


Ya ehel apu Dios



Kallahan, Keley-i: Ya ehel apu Dios Bible

**Ya ehel apu Dios**  
**Kallahan, Keley-i: Ya ehel apu Dios Bible**

copyright © 2009 Wycliffe Bible Translators, Inc.

Language: Antipolo Ifugao

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source files dated 29 Jan 2022  
3593303a-80c2-56e4-90b2-f4bfea2fd2a6

## Contents

Genesis . . . . .	1
Exodus . . . . .	49
Leviticus . . . . .	93
Numbers . . . . .	123
Deuteronomy . . . . .	160
Joshua . . . . .	195
Judges . . . . .	219
Ruth . . . . .	242
1 Samuel . . . . .	247
2 Samuel . . . . .	281
1 Kings . . . . .	309
2 Kings . . . . .	341
1 Chronicles . . . . .	372
2 Chronicles . . . . .	401
Ezra . . . . .	436
Nehemiah . . . . .	447
Esther . . . . .	462
Job . . . . .	471
Psalms . . . . .	497
Proverbs . . . . .	588
Ecclesiastes . . . . .	622
Song of Songs . . . . .	632
Isaiah . . . . .	638
Jeremiah . . . . .	701
Lamentations . . . . .	754
Ezekiel . . . . .	760
Daniel . . . . .	812
Hosea . . . . .	830
Joel . . . . .	840
Amos . . . . .	844
Obadiah . . . . .	851
Jonah . . . . .	853
Micah . . . . .	856
Nahum . . . . .	862
Habakkuk . . . . .	865
Sephaniah . . . . .	868
Haggai . . . . .	871
Sekariah . . . . .	873
Malachi . . . . .	883
Matthew . . . . .	887
Mark . . . . .	931
Luke . . . . .	958
John . . . . .	1003
Acts . . . . .	1034
Romans . . . . .	1072
1 Corinthians . . . . .	1093
2 Corinthians . . . . .	1113
Galatians . . . . .	1126
Ephesians . . . . .	1134
Philippians . . . . .	1141

Colossians . . . . .	1146
1 Thessalonians . . . . .	1151
2 Thessalonians . . . . .	1155
1 Timothy . . . . .	1158
2 Timothy . . . . .	1164
Titus . . . . .	1168
Pilimon . . . . .	1171
Hebrews . . . . .	1173
James . . . . .	1189
1 Peter . . . . .	1194
2 Peter . . . . .	1200
1 John . . . . .	1204
2 John . . . . .	1209
3 John . . . . .	1210
Jude . . . . .	1211
Revelation . . . . .	1213



## Genesis Ya Laputu

### *Ya meippanggep nunyan libluh e Genesis*

Huuyan libluh ni Genesis hu neitudekan idan impahding nan Apu Dios ni nanletun kabunyan niya puyek niyaddan emin hu mategun wadadman. Yadya mewan ni libluh hu neitudekan ni eleg pengu-unnudan ida eman ni nemangulun laki niya bii nan Apu Dios. Nanliwat ida et mebahbah hu kayyaggud ni nekidagyuman Apu Dios ni hi-gada.

Nem anin ni hanniman hu neipahding, et pinhed Apu Dios ni meibbanggad hu kayyaggud ni nekidagyuman tun hi-gadan tuu. Et mukun hinammad tun inhel e ittu-dak tu hu menellaknib ni tutu-u. (3:15) Et ya impahding tu ma-lat umamnu huuyan inhel tu, ey pinili tu hi Abraham e gayyum tu, et bendisyonan tu, ma-lat wadalli hakey ni helag tun edum ni aggew ni menellaknib ni tuu eyad puyek. (12:1-3)

Huuyan libluh hu neitudekan ni kapemaptekan niya impeminhed nan Apu Dios ni tutu-un lintu tu. Huuyan tuka pemaptekan ey neipeang-ang di impahding tuddan tutu-u, yadda pamilyah, yadda helag niyadda bebley. Neipeang-ang huuyan nengipaptekan tun Abraham, hi Isaac, hi Jacob niyadda helag da.

### *Yadda neitudek eyad libluh:*

1. Ya nanletuan nan Apu Dios ni kabunyan niya puyek. (chapters 1:1-2:25)
2. Ya nanggehayon ni nemangulun tuu et manliwat idan Apu Dios. (chapters 3:1-24)
3. Yadda nemangulun tutu-u niyadda helag da. (chapters 4:1-5:32)
4. Ya nengipaptekan nan Apu Dios nan Noah et ya nalbengan ni puyek. (chapters 6:1-9:26)
5. Yadda helag Noah et ya nengipatnaan idan tutu-un memehwat ni Tower e Babel. (chapters 10:1-11:26)
6. Yadda impahding nan Apu Dios nan Abraham. (chapters 11:27-25:11)
7. Yadda helag Ismael. (chapter 25:12-18)
8. Yadda impahding nan Apu Dios di biyag nan Isaac niyadda u-ungnga tu e di Jacob nan Esau. (chapters 25:19-36:43)
9. Yadda impahding nan Apu Dios di biyag nan Joseph. (chapters 37:1-50:26)

### *Ya nanletuan Apu Dios ni emin*

*(John 1:1-3, 10; Acts 4:24; Colossians 1:16; Hebrews 1:2; Revelation 4:11)*

<sup>1</sup> Yan laputu ey lintun Apu Dios hu kabunyan niya puyek. <sup>2</sup> Nem ya puyek ey eleg ni mapkel, ey endi nanha-ad diman. Edallem ni danum ni ebuh hu wadadman niya engeenget. Ey wada hu Ispirituh Apu Dios e heni dibdib di ta-pew ni danum.

### *Ya nemangulun aggew*

<sup>3</sup> Immehel hi Apu Dios et kantuy “Kaweda kan kawwalwal.” Ey tu-wangun newalwalan. <sup>4</sup> Ey inang-ang Apu Dios humman ni lintu tu ey kayyaggud. Impan-appil tu hu kawwalwal niya engeenget. <sup>5</sup> Et ngadanan tu hu kawwalwal ni aggew ey nginedanan tu hu engeenget ni hileng. Et mahileng nunman et mewa-wa ey humman hu nemangulun aggew.

### *Ya meikkadwan aggew*

<sup>6-7</sup> Kan mewan nan Apu Dios ey “Kaweda kan mengedwan danum et wadad ahpat edum ey wadad nandaul hu edum.” \* Ey humman neipahding. Ya etan wadad ahpat ey humman ida kulput ni kakelpuin udan, ey ya wadad nandaul ey humman danum eyad puyek. <sup>8</sup> Humman ni nengedwan danum di ahpat et yad nandaul ey nginedanan Apu Dios ni kabunyan. Et mahileng et mewa-wa ey humman hu neikadwan aggew.

### *Ya meikkatun aggew*

<sup>9</sup> Kan Apu Dios ey “Kesiplud kan danum et meappil kad pangil ma-lat meang-ang hu puyek.” Ey humman neipahding.† <sup>10</sup> Ya etan mamega ey nginedanan tun puyek, ey ya siniplud tun danum ey nginedanan tun baybay. Ey humman ni lintu tu ey kayyaggud. <sup>11-12</sup> Immehel mewan hi Apu Dios et kantuy “Patmel mu e puyek emin hu nambakbaklang ni kameitnem niyadda keyew ni kaumlameh ni nebukelan ma-lat mannananeng ni wada henin nunman ni meitnem.” Ey neipahding humman. Ey

\* 1:6-7 1:6-7 Psalm 148:4 † 1:9 1:9 Ang-ang yu hu 2 Peter 3:5

kayyaggud humman ni lintun Apu Dios. <sup>13</sup> Nehileng et mewa-wa ey humman hu neikatlun aggew.

*Ya meikka-pat ni aggew*

<sup>14</sup> Kan mewan Apu Dios ey "Kawedadda umbebnang di kabunyan ma-lat meappil hu kawwalwal di hileng et pengiimmatunan niya pengamtaan ni tsimpuh ni aggew niyadda tsimpuh ni toon. <sup>15</sup> Et humman idan umbebnang di kabunyan ey bebnangan da hu puyek." Ey neipahding ida huyya. <sup>16</sup> Lintun Apu Dios hu dewwan et-eteng ni kaumbebnang e humman hu aggew e kaumbebnang ni kawwalwal et ya bulan e kaumbebnang ni hileng. Ey lintu tudda pay hu dakel ni bittuwen. <sup>17</sup> Inha-ad tudda huyyan kaumbebnang di kabunyan ma-lat mabnangan hu puyek <sup>18</sup> ni kawwalwal ni yan hileng, ey ma-lat meappil hu kawwalwal niya hileng. Ey inang-ang Apu Dios humman ni lintu tu ey kayyaggud. <sup>19</sup> Nehileng et mewa-wa ey humman neika-pat ni aggew.

*Ya meikkelliman aggew*

<sup>20</sup> Kan Apu Dios ey "Kawedan emin hu nambakbaklang ni mategud danum niya kaweda dakel ni nambakbaklang ni mantayyatayab di kabunyan." <sup>21</sup> Et mawedan emin hu nambakbaklang ni mategud baybay e etta-teng ida edum. Ey lintu tu nambakbaklang ni sisit. Ey inang-ang Apu Dios ida humman ni lintu tu ey kayyaggud. <sup>22</sup> Binendisyonan tudda hu mategun wadad baybay ma-lat medakkel ida et mapnu hu baybay. Ey binendisyonan tudda dama hu sisit ma-lat medakkel ida. <sup>23</sup> Nehileng et mewa-wa ey humman neikeliman aggew.

*Ya meikka-nem ni aggew*

<sup>24-25</sup> Kan mewan Apu Dios ey "Kaweda eyad puyek hu nambakbaklang ni animal ni kaman-impah, yadda maeyum niyadda beken, yadda kamambinulluh, yadda kamangkinaddap niyadda kamandinallan." Ey tu-wangun newadadda. Ey inang-ang Apu Dios ida humman ni lintu tu ey kayyaggud.

<sup>26</sup> Entanni ey kan Apu Dios ey "Yan nunya ey leltuen tayu law hu tuun henin<sup>‡</sup> hi-gatsu ma-lat pan-ap-apun emin ni mategud puyek, yad kabunyan niyad baybay." <sup>27</sup> Henin nunman hu impahding Apu Dios e lintu tu hu tuun mei-inggeh hu elaw dad elaw tu. Ey lintu tudan laki niya bii.<sup>§</sup> <sup>28</sup> Et bendisyonan tudda e kantuy "Kahlag kayu et medakkel kayu et mebebleyan ni emin eya puyek et hi-gayu hu ngenamung eyan puyek, anin idan deleg di baybay, yadda sisit niyaddan emin hu animal."

<sup>29</sup> Ey kantuy "Indaddan kun emin hu nambakbaklang ni kameitnem niyadda keyew ni kamekkan lameh da ma-lat wada kennen yu. <sup>30</sup> Ey winedak hu helek niyadda edum ni kameitnem ma-lat wada kennen idan animal niyadda sisit." Emin ida huyya ey impahding tu ma-lat panyaggudan da. <sup>31</sup> Ey inang-ang nan Apu Dios ida humman ni lintu tu ey kayyaggud ni peteg. Nehileng et mewa-wa ey humman hu neika-nem ni aggew.

## 2

*Ya meikkeppitun aggew*

<sup>1</sup> Hanniman hu nanletuan nan Apu Dios ni puyek niya kabunyan niyaddan emin hu wadadman. <sup>2</sup> Ginibbuh tu law ni emin hu ngunu tu et man-iyatun meikkeppitun aggew.\* <sup>3</sup> Binendisyonan tu hu humman ni aggew et ibilang tun kamengillin tep humman ni aggew hu nengibbuhan tun ngunu tu et man-iyatu.

<sup>4</sup> Hanniman hu naltuan ni kabunyan et ya puyek niya emin hu hipan wadadman.

*Ya etan leguntad Eden.*

Lintun APU DIOS hu puyek niya kabunyan <sup>5</sup> Endi hu neitnem niya endi simmemel di puyek tep endi ni udan ni impaelin APU DIOS ey endi ni hu mantennem. <sup>6</sup> Entanni ey wadadda utbul ni menennum ni emin ni puyek.

<sup>7</sup> Entanni ey immala hi APU DIOS ni puyek, et kapyaan tun annel ni tuu et heb-ukan tu eleng tu, ey yimmayyah.<sup>†</sup> <sup>8</sup> Wada etan sineneman APU DIOS ni legunta e Eden di appit ni kasimmilin aggew et yadman nengiha-adan tun nunman ni tuun lintu tu. <sup>9</sup> Impatmel APU DIOS di legunta hu nambakbaklang ni keyew ey kakkayyaggud ang-ang da niya lameh da. Yadman di gawwan etan ni legunta ey wada etan keyew ni kaum-idwat ni biyag<sup>‡</sup> et ya etan keyew ni kaum-idwat ni laing ni pengamtaan ni kayyaggud niya lawah.

<sup>‡</sup> 1:26 1:26-27 Ang-ang yu hu 1 Corinthians 11:7 § 1:27 1:27 Matthew 19:4 Mark 10:6, James 3:9 \* 2:2 2:2 Hebrews 4:4, 10 † 2:7 2:7 Ang-ang yu hu 1 Corinthians 15:45-47 ‡ 2:9 2:9 Revelation 2:7, 22:2, 19

<sup>10</sup> Wada etan wangwang di Eden ni kamenennum ni nunman ni legunta. Yad a-allaw tu ey nan-epat huyyan wangwang. <sup>11</sup> Ya ngadan etan ni nemangulun wangwang ey Pishon e indalan tud Habilah. <sup>12</sup> Yadman hu kawad-an ni nemahmah ni balituk, yadda etan nenginan batu niyadda etan kunan tun letan keyew ni kayyaggud hamuy tu. <sup>13</sup> Ya ngadan etan ni meikkadwan wangwang ey Gihon e kamampellaw di bebley di Kush. <sup>14</sup> Ya etan meikkatlan wangwang ey Tigris e humman kamampellaw di Assyria di appit ni kasimmilin aggew. Ya etan meikka-pat ni wangwang ey Euphrates.

<sup>15</sup> Entanni et ilaw nan APU DIOS etan lintu tun tuud leguntad Eden, ma-lat hi-gatu mampaptek diman. <sup>16</sup> Kan APU DIOS ni hi-gatuy "Dammutun kennen mu hu lameh idan linggeman ni keyew eyad legunta, <sup>17</sup> nem entan tu ekan hu lameh etan ni keyew ni pengamtaan ni kayyaggud niya lawah. Tep hedin kennen mu lameh ni nunman ni keyew ey mettey ka."

<sup>18</sup> Entanni ey kan APU DIOS ey "Beken ni kayyaggud ni an manhahhakkey hu laki. Umletu-ak ni dayutun pangkadwa tun umbaddang ni hi-gatu."

<sup>19-20</sup> Hi APU DIOS ey lintu tu dedan la hu nambakbaklang ni animal niya sisit e puyek hu naltuan da. Humman idan lintu tu ey tu impeang-ang etan ni laki ma-lat ngadanan tudda. Et emin hu hipan impangngadan tun hanhakkey ni hi-gada ey humman ngadan da. Nem emin ida humman ey endi dayutun pangkadwa tun umbaddang ni hi-gatu. <sup>21</sup> Et ya impahding APU DIOS ey inuyeng tu etan laki et ekalen tu hu hakey ni tu-ngal di taglang tu et han tu pandummit etan laman. <sup>22</sup> Kinapya tun bii humman ni tu-ngal ni taglang et ilaw tud kad-an etan ni laki. <sup>23</sup> Ey kan etan ni laki ey "Kayyaggud et wada law eya pangkadwak ni keingngeh ku. Nalpu tu-ngal ku niyad laman ku. Bii hu ngadan tu tep nalpu laki." <sup>24</sup> Et humman hu, hedin mengahwa hu laki ey hi-yanen tud ametun inetu et makiaddum etan ni bii et henidda hakey.†

<sup>25</sup> Humman idan laki niya bii ey eleg ida mambalwasi, nem eleg ida umbaing.

### 3

#### *Ya nanliwatan ni tuu*

<sup>1</sup> Ya ketattallaman ni animal ni lintun APU DIOS eyad puyek, ey ya etan uleg.\* Kan etan ni uleg etan ni bii ey "Kaw makulug ni inhel Apu Dios ni hi-gayu e eleg kayu umkan ni lameh idan eyan linggeman ni keyew eyad legunta?" <sup>2</sup> Hinumang etan ni bii e kantuy "Dammutun umkan kamiddan emin eyan lameh ni keyew eyad legunta, <sup>3</sup> nem kan Apu Dios ey eleg kami umkan niya eleg mi kepaa hu lameh eyan keyew ni neigawwa eyad legunta. Tep mettey kami kunu hedin umkan kamin nunman winu keppaen mi."

<sup>4</sup> Kan etan ni uleg etan ni bii ey "Eleg kayu kaya mettey. <sup>5</sup> Hanniman impanghel nan Apu Dios tep amta tu e hedin kennen yu humman ey heni medyat hu mateyu et mei-ingngeh kayu law ni hi-gatu e amtaan yu hu kayyaggud niya lawah."

<sup>6</sup> Inang-ang etan ni bii etan lameh nunman ni keyew ey kayyaggud ni peteg hu ang-ang tu et kayyaggud ni kennen. Ey ninemnem tu e pinhed tun mambalin ni nekallaing. Et umla et kanen tu et idwatan tu ahwa tu et kanen tu dama. <sup>7</sup> Yan nunman ni nengannan da ey heni nadyat mateda et pepuhdanan da law e nambelad ida. Et umladdan bulung ni keyew ni fig et dauben da et paneni dan annel da.

<sup>8</sup> Kamangkehileng ni nunman ey dingngel da hi APU DIOS ni kamandalladallan di legunta et mantaludda etan di keyew. <sup>9</sup> Nem kan APU DIOS nan hi Adam ey "Attu kad-an yu?" <sup>10</sup> Himmumang hi Adam ey kantuy "Dingngel ku e kaka mengelli ey simmakuttak et eggak pinhed ni ang-angen muwak ni nambelad et mantalu-ak."

<sup>11</sup> Kan APU DIOS ey "Hipa nanghel ni hi-gam ni nambelad ka? Kaw kimman ka etan ni lameh ni keyew ni nakka ikka-leg?" <sup>12</sup> Kan Adam ey "Yan eya biin indawat mun pangkadwak hu nengidwat ni hi-gak et kanen ku." <sup>13</sup> Kan APU DIOS etan ni bii ey "Kele mu impahding humman?" Kan etan ni bii ey "Hineul tuwak etan ni uleg."†

<sup>14</sup> Et kan APU DIOS etan ni uleg ey "Mekastigu ka tep ya nengipahdingan mun nunman. Emin ida hu animal ni lintuk ey hi-gam ni ebuh hu menelhelatp eyan idut ku e meippalpun nunya ey mambulubuluh ka ey ya dep-ul hu kenekennen mun ingganah. <sup>15</sup> Hi-gam niyaddalli helag mu et ya etan bii niyaddalli helag tu ey mambubuhul kayullin ingganah. Kellaten mulli dapan etan ni helag ni bii, nem tegmilan tullu ulum."

<sup>16</sup> Ey kan APU DIOS etan ni bii ey "Panlelehhanam ali hu pan-unggaam. Nem anin ni hanniman et pinheden mu metlaing hu ahwam niya hi-gatu pan-ap-apum."

† 2:24 2:24 Matthew 19:5, Mark 10:7-8 et ya 1 Corinthians 6:16, Ephesians 5:31 \* 3:1 3:1 Revelation 12:9, 20:2

† 3:13 3:13 Ang-ang yu 2 Corinthians 11:3, Revelation 12:9

<sup>17</sup> Et kan APU DIOS daman Adam ey “Inu-unnud mu ahwam et kuman ka etan ni lameh ni keyew ni nakka ikka-leg. Et humman hu, iddutan ku hu puyek et meliligatan kallin ingganah ni mangngunnu ni han wada kennen mu. <sup>18</sup> Umtetmel idalli helek niya hebit<sup>‡</sup> ey pangkennen yuddalli kumpulmih ni neitnem. <sup>19</sup> Mahapul ni manliligat ka niya umlinget kan mangngunnu et han wada ennien mu. Hanniman alin ingganah hu pambiyagah ingganah ni mambanggad kayud puyek di nalpuam, tep puyek hu nekapyaan mu ey puyek metlaing hu pambangngadan mu.”

<sup>20</sup> Ya impangngadan Adam etan ni ahwatu ey Eva tep hi-gatu pan-innan emin ni tuu. <sup>21</sup> Entanni ey binalwasian APU DIOS di Adam nan Eva ni katat ni animal ni kinapya tun balwasi.

*Ya nenegyunan APU DIOS di Adam nan Eva etan di legunta e Eden*

<sup>22</sup> Et kan APU DIOS ey “Yan nunya ey neiinggeh law hu tuun hi-gatsu, e amta da hu kayyaggud niya lawah. Et humman hu, mahapul ni eleg ida umkan etan ni lameh ni keyew ni kaum-idwat ni biyag ma-lat eleg mannananeng hu biyag da.” <sup>23</sup> Et peallow APU DIOS ida etan di legunta e Eden et itu-dak tuddan an mangngunnud puyek ni nalpuan da. <sup>24</sup> Ya etan di legunta e Eden di appit ni kasimmilin aggew ey inhaad tudda anghel ni mangguwalya niya ispadah ni kamantetebbel e kumpulmih hu tuka pengihhanggai ma-lat endi an meihnpud di kad-an etan ni keyew ni kaum-idwat ni biyag.

## 4

*Di Kain nan Abel*

<sup>1</sup> Nan-ulig di Adam nan Eva ey newad-an hi Eva et man-ungnga ey laki. Et kan Eva ey “Bimmaddang hi APU DIOS et wada u-ungngak ni laki.” Et ngadanan tun Kain. <sup>2</sup> Entanni ey newada hu neikadwan u-ungnga tu e hi Abel hu ngadan tu. Ya ngunu tun neettengan tu ey mampattul ni kalneroh. Hi Kain ey mampyyew hu ngunu tu.

<sup>3</sup> Hakey ni aggew ey immiappit hi Kain nan APU DIOS ni ineni tu. <sup>4</sup> Hi Abel ey illa tudda hu kekakkayyaggudan ni parteh idan nemangulun impah ni kalneroh tu et iappit tu. Immamlang hi APU DIOS nunman ni impahding Abel et abuluten tu humman ni in-appit tu.\* <sup>5</sup> Nem eleg tu abuluten hu in-appit Kain. Et humman hu, nemahhig bunget Kain et tuka kekkeyunga. <sup>6</sup> Et kan APU DIOS ni hi-gatu ey “Kele kaka umbubunget ey muka kekkeyunga? <sup>7</sup> Gullat ni neiptek hu impahding mu et ebbuluten ku in-appit mu. Nem gapu tep neihla hu impahding mu ey hellipat-an Satanas hu pene-ulan tun hi-gam ma-lat hi-gatu hu ngenamung ni hi-gam, nem mahapul ni eleg mu i-abulut ni mehe-ul.”

*Ya nemateyan Kain nan Abel*

<sup>8</sup> Hakey ni aggew ey kan Kain nan agi tu e hi Abel ey “Umlaw itad payew.” Et lumaw ida, et wadaddadman ey pintey tu hi agitu.

<sup>9</sup> Entanni ey kan APU DIOS nan Kain ey “Attu hi agim ey?” Kan Kain ey “Tawwey ngu, kaw hi-gak hu kamengippaptek nan agik?”

<sup>10</sup> Kan APU DIOS ni hi-gatuy “Hipa impahding mu? Inang-ang ku hu kuheyaw nan agim di puyek et mahapul ni ibbaleh ku. <sup>11</sup> Et humman hu, meiddutan ka et endi law silbin ingngunum eyad puyek ni nengitmeg ni kuheyaw agim. <sup>12</sup> Endilli ennien mu anin ni ippenaptek mu intanem mu. Ey endilli law maptek ni panha-adam et ka law manhawahawang.”

<sup>13</sup> Hinumang Kain hi APU DIOS e kantuy “Nemahhig huttan ni kastiguk, eggak ali han-isipel. <sup>14</sup> Tep ay pea-allaw muwak di deya et meiddawwi-ak di kad-an mu niya pambalin muwak ni manhawahawang ni ebuh. Et nanna-ud ni linggeman hu menang-ang ni hi-gak ey petteyen da-ak.”

<sup>15</sup> Nem kan APU DIOS ni hi-gatuy “Eleg, tep hedin wada memettye ni hi-gam ey pitun tuu hu keiblehan ni pemettye dan hi-gam.” Et malkaan APU DIOS hi Kain ni pengimmatunan ni tuun hi-gatu ma-lat eleg da pateyen. <sup>16</sup> Et umidawwi law hi Kain nan APU DIOS et an mambebley di Nod di appit ni kakelinnugin aggew di Eden. (Ya keibbellinan ni Nod ey bebley ni panhawahawang.)

*Yadda helag Kain*

<sup>17</sup> Entanni ey nengahwa hi Kain et man-ungngadda ey laki et ngadanan tun Enok. Impambalin Kain etan nambebleyan dan et-eteng ni bebley, et ngadanan tun Enok e ngadan etan ni u-ungnga tu. <sup>18</sup> Hi Enok hu aman Irad, hi Irad hu aman Mehujael, hi Mehujael hu aman Metusael, hi Metusael hu aman Lamek.

<sup>19</sup> Dewwa ahwan Lamek e di Adah nan hi Sillah. <sup>20</sup> Nan-ungnga hi Adah et wada hi Jabal. Hi-gatu hu nahlagan idan kamampattul e nampambaley di tuldah. <sup>21</sup> Hi Jubal e agitu hu nahlagan idan nelaing ni man-ayyuding niya mantullaling. <sup>22</sup> Nan-ungnga hi Sillah et wada hi Tubal Kain et ya etan agitun bii e hi Naamah. Hi Tubal Kain ey nambalin ni kaman-e-dih.

<sup>23</sup> Hakey ni aggew ey kan Lamek idan etan ni ahwatu e di Adah nan Sillah ey “Dengel yu eya e-helen ku. Pimmateyyak ni kamenikken ni laki tep liniputan tuwak. <sup>24</sup> Hi apu hi Kain ey meibleh ni pitun tuu hedin wada memettey ni hi-gatu, nem hedin hi-gak hu petteyen da, man meibleh ni nepitut pitun tuu.”

<sup>25</sup> Entanni ey nan-ungnga mewan hi Eva et kantuy “Indawtan tuwak nan Apu Dios ni meihullul nan Abel e pintey nan Kain.” Et ngadanan tun Seth. <sup>26</sup> Nehiken hi Seth et wada u-ungnga tun hi Enos. Yan nunman ni tsimpuh hu nengilugian idan tutu-un meemmuemmung ni mandasal nan APU DIOS.

## 5

### *Yadda helag Adam*

<sup>1-2</sup> Yan eman ni nanletuan Apu Dios ni tuu ey lintu tuddan mei-ingnegh hu elaw dad elaw tu. \* Lintu tuddan laki niya bii ey binendisyonan tudda et ngadnan tuddan tuu. Huyyadda tenten ni helag Adam.

<sup>3</sup> Yan eman ni hanggatut et telumpulu toon Adam ey nan-ungngan hakey ni laki e nengalla-allan hi-gatu et ngadnan tun hi Seth. <sup>4</sup> Nambiyag pay ni walun gatut ni toon et mawedadda edum ni u-ungnga tu. <sup>5</sup> Yan eman ni neteyyan tu ey heyam ni gatut et telumpulu toon tu.

<sup>6</sup> Hi Seth ey hanggatut et lima toon tu et han maweda etan u-ungnga tun hi Enos. <sup>7</sup> Nambiyag pay ni walun gatut et pitun toon et mawedadda edum ni u-ungnga tu. <sup>8</sup> Et yan eman ni neteyyan tu ey heyam ni gatut et hampulut dewwa toon tu.

<sup>9</sup> Hi Enos ey nahyam hu toon tu et han maweda etan u-ungnga tun hi Kenan. <sup>10</sup> Nambiyag pay ni walun gatut et hampulut liman toon et mawedadda edum ni u-ungnga tu. <sup>11</sup> Et yan eman ni neteyyan tu ey heyam ni gatut et lima toon tu.

<sup>12</sup> Hi Kenan ey nepitu toon tu et han maweda etan u-ungnga tu e hi Mahalalel. <sup>13</sup> Nambiyag pay ni walun gatut et na-pat ni toon et mawedadda edum ni u-ungnga tu. <sup>14</sup> Yan eman ni neteyyan tu ey heyam ni gatut et hampulu toon tu.

<sup>15</sup> Hi Mahalalel ey na-nem et lima toon tu et han maweda etan u-ungnga tu e hi Jared. <sup>16</sup> Nambiyag pay ni walun gatut et telumpulun toon et mawedadda edum ni u-ungnga tu. <sup>17</sup> Yan neteyyan tu ey walun gatut et nahyam et lima toon tu.

<sup>18</sup> Hi Jared ey hanggatut et na-nem et dewwa toon tu et han maweda etan u-ungnga tu e hi Enok. <sup>19</sup> Nambiyag pay ni walun gatut ni toon et mawedadda edum ni u-ungnga tu. <sup>20</sup> Yan eman ni neteyyan tu ey heyam ni gatut et na-nem et dewwa toon tu.

<sup>21</sup> Hi Enok ey na-nem et lima toon tu et han maweda etan u-ungnga tun hi Methushelah. <sup>22</sup> Nambiyag pay ni telunggatut ni toon et mawedadda edum ni u-ungnga tu. Ey nekidagyum tun Apu Dios. <sup>23</sup> Ya nga-mut ni toon ni nambiyagan Enok ey telunggatut et na-nem et lima. <sup>24</sup> Yan nambiyagan tu ey nekidagyuman tun Apu Dios. Entanni ey endi maptek ey ettukaw hi Enok tep ingkuyug Apu Dios. †

<sup>25</sup> Hi Methushelah ey hanggatut et newalut pitu toon tu et han maweda etan u-ungnga tun hi Lamek. <sup>26</sup> Nambiyag pay ni pitun gatut et newalut dewwan toon et mawedadda edum ni u-ungnga tu. <sup>27</sup> Yan neteyyan tu ey heyam ni gatut et na-nem et heyam hu toon tu.

<sup>28</sup> Hi Lamek ey hanggatut et newalut dewwa toon tu et han maweda etan u-ungnga tun laki. <sup>29</sup> Kantuy “Huyyan u-ungnga hu mengippeamleng ni hi-gatsun emin eyad neligat ni ngunu tayu eyad puyek ni inidutan APU DIOS.” Et ngadnan tun hi Noah. <sup>30</sup> Nambiyag pay hi Lamek ni liman gatut et nahyam et liman toon et mawedadda edum ni u-ungnga tu. <sup>31</sup> Yan neteyyan tu ey pitun gatut et nepitut pitu toon tu.

<sup>32</sup> Hi Noah ey limanggatut toon tu et han maweda tellun u-ungnga tu e hi Shem, hi Ham et hi Japet.

## 6

### *Kamangkeimma-ma hu kalinawah idan tuu*

\* 5:1-2 5:1 Genesis 1:27 † 5:24 5:24 Hebrews 11:5

1-2 Dimmakkel law hu tuud puyek ey wadadda hu kakat-agun bibi-i. Et yan eman ni nenang-angan idan wadad kabunyan \* idan nunman ni bibi-id puyek ey naniahwadadda pinhed da. <sup>3</sup> Kan APU DIOS ey “Nemahhig law hu kalinawah idan tuu. Et humman hu, wada pappeg ni pengan-anusan ni Ispirituh kun hi-gada. Iddawtan kuddan ebuh ni hanggatut et dewampulun toon ni pantuttuyyuan dan liwat da.” †

<sup>4</sup> Humman newadaan ni etta-teng ni tuu eyad puyek ni nahlag ida etan ni bibi-in inahwaddan etan ni nalpud kabunyan. Yadda helag da ey et-eteng kabaelan da et mukun nandingngel ida.

<sup>5</sup> Yan nenang-angan APU DIOS ni kalinawah ni emin ni tuud puyek e lawah ni emin hu wadad nemnem dan ingganah, <sup>6</sup> ey nemahhig hu tuttuyyu tun nanletuan tun hi-gada. ‡ <sup>7</sup> Et mukun kan law APU DIOS ey “Bahbahen ku ew emin hu tuun lintuk et meendidda, anin idan animal ni kamandinallan ey kamambinullah, niyadda sisit, tep nakka mantuttuyyun nanletuan kun hi-gada.” <sup>8</sup> Nem kaum-amleng hi APU DIOS nan Noah tep kayyaggud hu elaw tu.

*Ya nanghelan Apu Dios nan Noah ni mengapyan bapor  
(Hebrews 11:7)*

<sup>9-10</sup> Huyya hu meippanggep nan Noah. Wada tellun u-ungnga tu e hi Shem, hi Ham, et hi Japet. Hi Noah ey kayyaggud ni tuu. Yan nunman ni ketaggu tu ey hi-gatun ebuh hu kayyaggud nekidaguyan tun Apu Dios.

<sup>11</sup> Nem yadda edum ni tuu ey nemahhig hu kalinewah da. Mabunget ida niya mapetey ida. <sup>12</sup> Kaang-ang-angan Apu Dios ey lawah eya puyek ni pambbleyan tep lawah idan emin hu tutu-u. <sup>13</sup> Et kantun Noah ey “Bahbahen ku ew hu puyek et mepappeg hu biyag idan tuu tep ay lawah idan peteg e ida kamampapatey. <sup>14</sup> Et humman hu, kanya kan bapor e ya kayyaggud ni keyew hu usselen mu et kuwakuwaltuhen mu. Pudlitim ni pukut ida nambattanan ni dinging ma-lat endi an umhegep ni danum. <sup>15</sup> Ya kadinukkey tu ey epat ni gatut et neliman piyeh. Ya kalinakkeb tu ey nepitu et liman piyeh. Ya kasina-gey tu ey na-pat et liman piyeh. <sup>16</sup> Atepin, nem entan tu pakaddingding hu hampulut walun pulgadah di nanlinikweh di ta-pew tu ma-lat kawwalwal di bawang. Ey kapyam ni tellun glaudh niya kanya kan habyen di pinigging tu. <sup>17</sup> Pengapya dakan bapor tep lelbengan ku puyek et mebahbah emin hu mategu. <sup>18</sup> Nem wada planuh kun hi-gam ni peamnuk. Et humman hu, ihhehwang dakeyu. Hegep kayun ahwam, yadda u-ungngam niyadda ahwa da etan di bapor. <sup>19-20</sup> Pekippahgep yudda nambulubulug ni emin ni nambakbaklang ni animal niyadda sisit ma-lat tumegudda. <sup>21</sup> Ipahgep yud bapor emin hu kennen yu niya kennen da.” <sup>22</sup> Et ipahding Noah emin hu inhel Apu Dios.

## 7

*Ya hinggepan di Noah etan di bapor*

<sup>1</sup> Entanni ey nedatngan etan tsimpuh ni inhel APU DIOS et kantun Noah ey “Hegep kayuddan pamilyah mud bapor tep hi-gam ni ebuh hu imbilang kun kayyaggud di emin ni tuu. <sup>2</sup> Ipahgep mudda hu hampipitun nambulubulug ni kameibbilang ni malinih ni animal niya hanhakkey ni nambulubulug idan kameibbilang ni beken ni malinih. <sup>3</sup> Ey ipahgep mudda hu hampipitun nambulubulug ni nambakbaklang ni sisit. Ipahding mudda huyya ma-lat emin hu nambakbaklang ni animal niyadda sisit ey mebunnat ida eyad puyek. <sup>4</sup> Tep hanlingguan hu melebbah meippalpun nunya ey peellik hu udan ni na-pat ni aggew niya na-pat ni hileng ma-lat meendin emin ida mategun lintuk.”

<sup>5</sup> Et ipahding nan Noah emin hu intugun nan APU DIOS ni pehding tu.

<sup>6-12</sup> Himegep hi Noah, ya ahwatu, yadda u-ungnga tu niyadda ahwada etan di bapor ma-lat eleg ida malsing. \* Yadda nambulubulug ni animal ni kameibbilang ni malinih niyadda beken ni malinih, anin idan kamangkinaddap niyadda kamanbinullah, yadda nambulubulug ni sisit, ey immalidda dama et mekihgep idan emin di bapor. Et malebah hu pitun aggew, e yan nunman hu meikkahampulut pitun aggew ni meikkadwan bulan ni nunman ni toon, ey inlaputu tu-wangun um-udan. Intaggan tu udan ni na-pat ni aggew niya na-pat ni hileng ey keut-utbul hu danum. Ey anin ni kabunyan et heni nantekang et kamangkaikuyag ali udan et malbengan hu puyek. Yan nunman ey enem ni gatut hu toon nan Noah.

\* **6:1-2** 6:1 Ya hakey ni keibbellinan tu ey huyyaddan lalakki ey kandy u-ungngan Apu Dios tep hi-gada hu helag Seth ey humman idan kakat-agun bibi-i ey helag Kain ida. † **6:3** 6:3 Ang-ang yu hu 1 Peter 3:20 ‡ **6:6** 6:6 Matthew 24:37-39 \* **7:6-12** 7:6 Matthew 24:38, Luke 17:27

<sup>13</sup> Yan nunman ni aggew ey himmegep hi Noah, ya ahwatu, yadda u-ungnga tu e hi Shem, hi Ham et hi Japet et niyadda ahwada etan di bapor. <sup>14-15</sup> Nekihep ni hi-gada hu nambulubulug ni nambakbaklang ni animal ni maeyum niya beken niyadda etan kaumtayab. <sup>16</sup> Impahding da humman e inu-unnud da hu inhel Apu Dios ni pehding da. Et yan hinggepan dan emin etan di bapor ey inlekbun APU DIOS hu habyen.

*Ya nalbengan ni puyek*  
(2 Peter 2:5)

<sup>17</sup> Sinaggan tu udan ni na-pat ni aggew et malbengan hu puyek. Lektattuy edallem law ni peteg hu danum ey simma-pew etan bapor. <sup>18</sup> Kamena-gey hu danum di puyek ey kamanta-ta-pew dama etan bapor di danum. <sup>19</sup> Anin ni yadda etan ettata-gey ni duntug eyad puyek et nangkeli-muh ida. <sup>20</sup> Taggan ni danum ta-gey et labhan tudda humman ni ettata-gey ni duntug ni enem ni mitroh. <sup>21-23</sup> Et meendin emin hu mategu eyad puyek, yadda tuu, yadda animal ni maeyum niya beken, yadda kamambinullah niya kamangkinaddap, niyadda sisit, tep nalsing idan emin. Yan ebuh hu neihwang ni eleg malsing ey hi Noah niyadda etan nekihep ni hi-gatud bapor. <sup>24</sup> Et malbengan hu puyek ni hanggatut et neliman aggew.

## 8

*Ya natdukan ni danum*

<sup>1</sup> Nem eleg liwwanen Apu Dios hi Noah niyadda animal ni wada etan di bapor. Et paeli tu dibdib et ilepu etan ni danum ni metduk. <sup>2</sup> Nesiked law hu danum ni nalpud nandaul niya nesiked hu udan <sup>3</sup> et mambabbabbal ni natduk hu danum ni liman bulan. <sup>4</sup> Yan eman ni meikkahampulut pitun aggew ni meikkeppitun bulan ey nanha-ad etan bapor di ta-pew ni duntug e Ararat. <sup>5</sup> Nanengtun kamangketeduk hu danum et yan lapun aggew ni meikkahampulun bulan ey kameang-ang ida law hu ta-pew ni duntug.

<sup>6</sup> Nelabah hu na-pat ni aggew et han ibeghul nan Noah hu hakey ni habhabyen etan ni bapor <sup>7</sup> et ibukyut tu hakey ni gawwang. Eleg mambangngad et mantayyatayab ingganah ni natduk hu danum. <sup>8</sup> Entanni et ibukyut tu mewan hu hakey ni paluma ma-lat pengamtaan tu hedin natduk law hu danum. <sup>9</sup> Nem endi e-paan tu tep nanengtun dakel hu danum et mambangngad etan di bapor et ipahgep Noah. <sup>10</sup> Nelabah hanlingguan et ibukyut tu mewan etan paluma. <sup>11</sup> Kamangkehilleng ni nunman ey nambangngad etan paluma e wada himbat tun bulung ni olibah et humman nengamtaan Noah e natduk law danum. <sup>12</sup> Nelabah hanlingguan et ibukyut tu mewan etan paluma ey eleg law mambangngad.

<sup>13</sup> Yan eman ni enem ni gatut et hakey hu toon nan Noah ni lapun aggew ni lapun bulan ey inbeghul tu bapor et man-ang-ang-ang ey kamangkema-gani law hu puyek. <sup>14</sup> Ey yan meikkadwampulut pitun aggew ni meikkadwan bulan ey nakamma-ganan law hu puyek.

<sup>15-16</sup> Et kan Apu Dios nan hi Noah ey "Dammutu law ni um-ehep kayun ahwam, yadda u-ungngam niyadda ahwa da. <sup>17</sup> Ibukyut mudda animal niyadda sisit et mahlag ida et medakkel ida et maihinap ida eyad puyek." <sup>18</sup> Et umhep hi Noah niyadda pamilyah tu. <sup>19</sup> Ey emin ida etan nambakbaklang ni animal, yadda kamandinallan niyadda kamangkinaddap, et yadda sisit ey immehep ida damad bapor e wada hakkeyey nan-unnud ida etan ni keingngeh da.

*Ya nan-appitan Noah nan hi Apu Dios*

<sup>20</sup> Entanni ey nengapya hi Noah ni altar ni pan-appitan tun APU DIOS et umlan hanhakkey idan animal niya sisit ni kameibbillang ni malinih et iappit tun hi-gatu e giniheb tudda. <sup>21</sup> Ey inebulut APU DIOS humman ni neiappit. Et kantud nemnem tuy "Eggak ali law iddusi hu puyek anin ni lawah hu nemnem niya kapehphehding idan tu. Tep inamtak e neipalpu dedan ni keu-ungnga da ey hanniman elaw da. Eleggak ali law ippidwan lelbengen hu puyek ma-lat eleg mebahbah emin hu mategu. <sup>22</sup> Hedin mannenneng eya puyek e eleg mebahbah man wadallin ingganah tsimpuh ni pantenneman, wada ahiani, wada manginudan, ya siaggew, ya kawwalwal niya hileng."

## 9

*Ya impeamtan Apu Dios nan hi Noah*

<sup>1</sup> Entanni et bendisyonan Apu Dios hi Noah niyadda u-ungnga tu et kantun hi-gaday "Kahlag kayu et medakkel kayu et bebleyan yun emin eya puyek. <sup>2</sup> Emin hu animal, yadda kamangkinaddap niya kamandinallan, yadda sisit niyadda mategud baybay ey tekkutan dakeyulli ey hi-gayulli kenamung ni pengippahdingan yun hi-gada. <sup>3</sup> Iddawat

kudda emin huyyan hi-gayu et mansilbin kennen yu, heniddan kameitnem e indawat kun hi-gayu. <sup>4</sup> Nem entan tu ekan hu detag ni nanengtun wada kuheyaw tu, tep ya kuheyaw hu kad-an ni biyag. <sup>5</sup> Et humman hu, ya tuun umpatey ni edum tun tuu ey mekastigu. Ey ya linggeman ni animal ni umpatey ni tuu ey mahapul ni mettey. <sup>6</sup> Tep lintuk hu tuun henin hi-gak, et humman hu hedin wada tuun petteyem tu edum tun tuu ey petteyem yu dama. <sup>7</sup> Panhelag kayu et medakkel kayu et bebleyan yun emin hu puyek.”

<sup>8</sup> Entanni ey kan Apu Dios nan Noah et yadda u-ungnga tuy <sup>9</sup> “Ihhammad kun mekitbal ni hi-gayu niyaddalli helag yu, <sup>10</sup> anin idan animal, yadda sisit niyaddan emin hu mategun edum yun himmegep etan di bapor. <sup>11</sup> Ey panna-ud kun e-helen ni hi-gayu e eleg law melbengi eya puyek ma-lat eleg mebahbah emin hu mategu. <sup>12</sup> Ya pengi-ang-angan yun um-amnu eya inhel kun hi-gayu niyaddan emin hu mategu ey <sup>13</sup> weddaen ku sibbunglun di kulput di kabunyan et pengiang-angan yu niyaddalli helag yu e pannananeng kun ingganah hu nekitbalan kun hi-gayu. <sup>14</sup> Et hedin impaelik hu kulput di kabunyan et mewedda sibbunglun <sup>15-16</sup> ey nemnemen kulli humman ni nekitbalan kun hi-gayu niyaddan emin hu mategun wadad puyek e eggak law ippidwan peelli lebeng eyad puyek ma-lat eleg mebahbah ni emin hu mategu. <sup>17</sup> Em, humman pengi-immatun yu etan ni nekitbalan kun emin ni mategu eyad puyek.”

### *Hi Noah niyadda u-ungnga tu*

<sup>18</sup> Yadda etan tellun u-ungngan Noah ni immehep di bapor ey hi Shem, hi Ham et hi Japet. Hi Ham hu aman Kanaan. <sup>19</sup> Huyyaddan tellun u-ungngan Noah hu nahlagan idan katuutuu eyad puyek.

<sup>20</sup> Hi amedan e hi Noah nemangulun nantanem ni grapes. <sup>21</sup> Hakey ni aggew ey nebuteng ni meinnun ni kinappa tun grapes. Et mambelad ni neugip di a-abbung tun tuldah. <sup>22</sup> Hi Ham e aman Kanaan ey inang-ang tu ametu e hi Noah ni nambelad et tu ehelen idan agitu e di Shem nan Japet. <sup>23</sup> Et umladdan wangel et iwa-ngal dad pahhannan da et dekugen da hi ameda ey daka panhinunnay ni limmaw di kad-an tu et egahan da etan wangel et mawengalan hi ameda e eleg da i-ang-ang ni hi-gatu. <sup>24-25</sup> Yan binangunan Noah ni na-kalan ni buteng tu ey neamtaan tu hu impahding Ham e udidyan ni u-ungnga tu. Et kantuy

“Ya idut idan helag Ham ey hi-gadalli bega-en idan helag di Shem nan Japet. <sup>26</sup> Nakka iddasal ni AP-APU e Dios ku e bendisyonan tu hi Shem. Ey pambalin tudda helag Ham ni bega-en idallin helag Shem. <sup>27</sup> Ey nakka iddasal e bendisyonan Apu Dios hi Japet et mambalin ni mahkang hu puyek tu ey mei-dum idallin helag Shem. Ey mambalin idalli helag Ham ni bega-en damaddan helag Japet.”

<sup>28</sup> Hi Noah ey nambiyag ni telunggatut et neliman toon ni negibbuan ni nalbangan ni puyek <sup>29</sup> et ya bilang emin ni toon tu et han matey ey heyam ni gatut et nelima.

## 10

### *Ya helag idan u-ungngan Noah*

<sup>1</sup> Huyyadda helag Shem, hi Ham et hi Japet e u-ungngaddan Noah. Dakel hu u-ungnga dan negibbuan ni lebeng. <sup>2</sup> Yadda helag Japet ey hi Gomer, hi Magog, hi Madai, hi Jaban, hi Tubal, hi Meshek, et hi Tiras. <sup>3</sup> Yadda helag Gomer ey hi Askenas, hi Ripat, et hi Togalmah. <sup>4</sup> Yadda helag Jaban ey nampambebley idad Elishah, yad Tarsis, \* yad Kittim † niyad Rhodes. <sup>5</sup> Yadda helag Japet hu ammed idan tutu-un nampambebley di nangkeihnup niya nangkeigawwad baybay. Huyyaddan helag Japet ey nan-appiappil hu nambebleyan da niya nambakbaklang hu ehel da.

<sup>6</sup> Yadda helag Ham ey hi Kush, hi Misraim‡, hi Put § et hi Kanaan. <sup>7</sup> Yadda helag Kush ey yadda nambebley di Seba, yad Habilah, yad Sabtah, yad Raamah niyad Sabtekah. Yadda helag Raamah ey yadda nambebley di Seba niyad Dedan. <sup>8</sup> Ya hakey ni helag Kush ey hi Nimrod e nambalin ni ap-apuddan kamekiggubbat. Hi-gatu hu nemangulun nengenapput ni nekigubagubatan tud kebebbebley <sup>9</sup> niya hi-gatu kelallangan ni mandedweng tep kabaddangin APU DIOS. Et humman hu, hin-addum ni kan idan tuud edum day “Henin kan Nimrod e nakallaing ni mandedweng.” <sup>10</sup> Yadda bebley ni nan-ap-apuan tu ey yad Babilon\*, yad Erech, yad Akkad niyad Kalneh, e huyyadda bebley di Babilonia‡. <sup>11</sup> Entanni ey limmaw hi Nimrod di Assyria et behwatan tu bebley

\* 10:4 10:4 Ya Tarsis ey bebley di Spain. † 10:4 10:4 Ya hakey ni ngadan tu ey Cyprus. ‡ 10:6 10:6 Ya hakey ni ngadan tu ey Egypt. § 10:6 10:6 Ya hakey ni ngadan tu ey Libya. \* 10:10 10:10 Ya hakey ni ngadan tu ey Babel. † 10:10 10:10 Ya hakey ni ngadan tu ey Shinar.



di Nineveh, ya Rehobot-Ir, ya Kalah <sup>12</sup> niya Resen e bebley ni nambattanan ni Nineveh niya Kalah e et-eteng ni bebley.

<sup>13</sup> Hi Misraim hu nahlagan idan nambbeley di Lidia, yad Anam, yad Lehab, yad Naptuh, <sup>14</sup> yad Patrus, yad Kasluh, niyad Crete e nahlagan idan Pilistin.

<sup>15</sup> Yadda helag Kanaan ey hi Sidon e pengulwan et han hi Het. <sup>16-18</sup> Newadadda edum ni u-ungngan Kanaan et humman idan u-ungnga tu nahlagan idan Jebusite, yadda Amorite, yadda Girgashite, yadda Hibite, yadda Arkite, yadda Sinite, yadda Arbadite, yadda Semarite niyadda Hamatite. Huyyaddan helag Kanaan ey neihinap ida. <sup>19</sup> Ya pappeg ni nambbeleyan da ey neipalpu Sidon ingganah di Gerar e neihnup di Gaza. Nei-dum pay hu Sodom, Gomorrah, Admah niya Seboim ni neihnup di Lasha.

<sup>20</sup> Huyyadda hu helag Ham ni neihinap di kebebbeley e nambakbaklang hu ehel da.

<sup>21</sup> Hi Shem e neihnedan nan Japet hu nahlagan idan helag Eber. <sup>22</sup> Yadda helag Shem ey hi Elam, hi Assur, hi Alpaksad, hi Lud et hi Aram. <sup>23</sup> Yadda helag Aram ey hi Us, hi Hul, hi Gether et hi Meshek. <sup>24</sup> Nahlag hi Alpaksad et wada hi Selah e aman Eber. <sup>25</sup> Hi Eber ey dewwa u-ungnga tu: hi Peleg hu ngadan ni hakey tep yan nunman ni ketaggu tu negenadwaan ni tutu-ud puyek. Hi Joktan hu ngadan agitu. <sup>26</sup> Hi Joktan hu nahlagan idan tutu-un nambbeley di Almodad, yad Selep, yad Hasarmabet, yad Jerah, <sup>27</sup> yad Hadoram, yad Usal, yad Diklah, <sup>28</sup> yad Obal, yad Abimael, yad Seba, <sup>29</sup> yad Ophir, yad Habilah niyad Jobab. Huyyaddan emin hu nahlag nan hi Joktan. <sup>30</sup> Ya nambbeleyan da ey neipalpu Meshah ingganah di Sephar e duntuduntug ni bebley di appit ni kasimmilin aggew. <sup>31</sup> Huyyaddan helag Shem ey neihinap idad dakel ni bebley ey nambakbaklang ehel da.

<sup>32</sup> Huyyaddan emin hu nahlagan idan u-ungngan Noah neipalpu negibbuan ni nalbengan ni puyek. Neihinap idad kebebbeley eyad puyek meippuun di nahlagan da.

## 11

### *Ya newadaan ni nambakbaklang ni ehel*

<sup>1</sup> Yan laputu ey hakey ni ebu hu ehel ni tuu. <sup>2</sup> Nem entanni et ida kamangedakkel ey limmaw idad appit ni kasimmilin aggew, ey dinteng da nedeklan ni puyek di Babilonia, et mambbeley idadman. <sup>3-4</sup> Et wada hakkeyey kanday “Mengapya itsun et-eteng ni bebley tayu. Ey behwatan tayu et-eteng niya eta-gey ni binattun baley et datengen tu kabunyan et mandingngel itsu niya eleg itsu mawehit eyad puyek.” Et ilepu dan mengapya.

<sup>5</sup> Entanni ey immali APU DIOS et tu ang-angen hu daka pangkapyaan bebley niya etan eta-gey ni baley. <sup>6</sup> Ey kantuy “Huyyaddan tuu ey hakey ida niya hakey hu ehel da. Huyya keilleppuan ni pengippahngan dan pinhed da. Et dammutun emin ali law hu pinpinhed dan pehding ey pehding da. <sup>7</sup> Itsuy, kelehbeng itsu et tayu pambakbaklang hu ehel da ma-lat eleg ida manhin-aawat!”

<sup>8</sup> Et iwehit APU DIOS idad puyek et isiked dan mengapya etan ni daka pangkapyaan bebley. <sup>9</sup> Ya impangngadan dan nunman ni bebley ey Babel tep yadman nenimengan APU DIOS ni hi-gada e impambakbaklang tu ehel da et iwehit tudda eyad ta-pew ni puyek.

<sup>10</sup> Huyyadda helag Shem. Yan eman ni nelabah hu dewwan toon neipalpu negibbuan ni nalbengan ni puyek, eman ni hanggatut hu toon Shem ey nahlag et wada hi Arpachshad. <sup>11</sup> Nambiyag pay ni liman gatut ni toon et wadadda edum ni u-ungnga tu.

<sup>12</sup> Nantoon hi Alpaksad ni telumpulut lima ey nahlag et wada hi Selah. <sup>13</sup> Nambiyag pay ni epat ni gatut et tellun toon et wadadda edum ni u-ungnga tu.

<sup>14</sup> Nantoon hi Selah ni telumpulu ey nahlag et wada hi Eber. <sup>15</sup> Nambiyag pay ni epat ni gatut et tellun toon et wadadda edum ni u-ungnga tu.

<sup>16</sup> Nantoon hi Eber ni telumpulut epat ey nahlag et wada hi Peleg. <sup>17</sup> Nambiyag pay ni epat ni gatut et telumpulun toon et wadadda edum ni u-ungnga tu.

<sup>18</sup> Nantoon hi Peleg ni telumpulu ey nahlag et wada hi Reu. <sup>19</sup> Nambiyag pay ni dewanggatut et heyam ni toon et wadadda edum ni u-ungnga tu.

<sup>20</sup> Nantoon hi Reu ni telumpulut dewwa ey nahlag et wada hi Serug. <sup>21</sup> Nambiyag pay ni dewanggatut et pitun toon et wadadda edum ni u-ungnga tu.

<sup>22</sup> Nantoon hi Serug ni telumpulu ey nahlag et wada hi Nahor. <sup>23</sup> Nambiyag pay ni dewanggatut ni toon et wadadda pay edum ni u-ungnga tu.

<sup>24</sup> Nantoon hi Nahor ni dewampulut heyam ey nahlag et wada hi Terah. <sup>25</sup> Nambiyag pay ni hanggatut et hampulut heyam ni toon et wadadda edum ni u-ungnga tu.

<sup>26</sup> Nantoon hi Terah ni nepitu ey nahlag et wadadda u-ungnga tu e hi Abram, hi Nahor et hi Haran.

*Yadda helag Terah*

<sup>27</sup> Huyyadda helag Terah e amad Abram, hi Nahor et hi Haran. Nahlag hi Haran et wada hi Lot. <sup>28</sup> Hi Haran ey netey di bebley dad Ur di Babilonia ey nanengtun mategu hi ametu e hi Terah. <sup>29</sup> Hi Abram ey inahwa tu hi Sarai. Hi Nahor ey inahwa tu hi Milkah e u-ungngan Haran. Wada agin Milkah ni bii e hi Iskah. <sup>30</sup> Hi Sarai ey nebasi et endi u-ungnga tu.

<sup>31</sup> Hi Terah ey ingkuyug tu hi Abram e u-ungnga tu, hi Lot e inap-apu tu e u-ungngan Haran, hi Sarai e ahwan Abram et hi-yanen da hu Ur di Babilonia et lumaw idad Kanaan. Nem nanda-guh idad Haran et mambebley idadman. <sup>32</sup> Et yadman neteyyan Terah eman ni dewanggatut et lima toon tu.

## 12

*Ya linawwan di Abram di Kanaan*

*(Acts 7:2-3; Hebrews 11:8)*

<sup>1</sup> Yan eman ni eleg da ni peni-yanan ni Babilonia ey kan APU DIOS nan Abram ey "Hi-yan mu bebley mu, yadda aaggim, niyadda pamilyah amam et lumaw ka etan di bebley ni ittuduk ni hi-gam. <sup>2</sup> Iddawtan dakan dakel ni helag mu et mandingngel kayu. Bendisyonan daka et man-amta ngadan mu, ey mebendisyonan edum ni tuu gapuh ni hi-gam. <sup>3</sup> Bendisyonan kudda etan memendisyon ni hi-gam, nem iddutan kudda mengiddut ni hi-gam ey bendisyonan kulli emin hu tuu eyad puyek gapuh ni hi-gam." \*

<sup>4</sup> Et hi-yanen Abram hu bebley tu et lumaw di nengitu-dakan APU DIOS e ingkuyug tu hi Lot. Nepitu et lima toon Abram ni neni-yanan tun Haran. <sup>5</sup> Ingkuyug tu hi Sarai e ahwatu, hi Lot e pengungngan tu, yaddan emin hu limmu tu niyadda bega-en tun illa tud Haran, et lumaw idad Kanaan.

Yan dintengan dad Kanaan, <sup>6</sup> ey nanglaw ida ingganah ni dinteng da hakey ni bebley e neihnup di Sekem et kumapyaddan kampu dad kad-an ni oak e keyew di Moreh. Huyyan bebley ey nambebleyan idan helag Kanaan ni nunman ni tsimpuh. <sup>7</sup> Ey nampeang-ang hi APU DIOS nan Abram et kantuy "Huyya hu iddawat kuddan helag mun pambebleyan da." Et mengapya hi Abram ni pan-appitan tun APU DIOS. †

<sup>8</sup> Entanni ey hini-yan da mewan humman ni bebley et manpalaw ida etan di duntuduntug ni bebley et mangkampudda nambattanan ni Bethel di appit ni kakelinnugin aggew niyad Ai di appit ni kasimmilin aggew. Et kumapya mewan hi Abram ni pan-appitan et dayawen tu hi APU DIOS. <sup>9</sup> Nem eleg mannaneng diman. Nan-etaetan idan nanha-adan da ey nampalaw idad Negeb.

*Ya nanha-adan di Abram di Egypt*

<sup>10</sup> Entanni ey wada nemahhig ni bisil di Kanaan et lumaw di Abram di Egypt et ida makibebley nidman. <sup>11</sup> Yan eman ni daka penettengid Egypt, ey kantun ahwatuy "Hi-gam e Sarai ey kat-agu ka. <sup>12</sup> Et hedini ang-angen dakaddan tuudya ey panna-ud da e han-ahwa ita et petteyen da-ak ma-lat al-en daka. <sup>13</sup> Et humman hu, ehel mu e agi daka ma-lat eleg da-ak pateyen, nem kayyaggud hu pehding dan hi-gak gapuh ni hi-gam."

<sup>14</sup> Et yan dintengan dad Egypt, ey tu-wangun katettebaladdan tuudman hu kakinat-angun Sarai. <sup>15</sup> Entanni ey inang-ang idan opisyal diman, et da ehelen ni patul da. Et ilaw da hi Sarai di baley tu. <sup>16</sup> Et gapuh nan Sarai ey indawtan etan ni patul hi Abram idan kalneroh, gelding, baka, kamel, kebayyu, et yadda laki niyadda biin bega-en da.

<sup>17</sup> Nem impandegheh nan APU DIOS etan patul niyadda wadad baley tu tep ya nengal-an tun Sarai. <sup>18</sup> Et paeyag etan ni patul hi Abram et kantuy "Kele mu impahding huyyan hi-gak? Kele eleg mu ehelen e ahwam hi Sarai? <sup>19</sup> Kele kammuy agim hi Sarai et innang ni ahwaan ku? Awit mu et manglaw kayu!" <sup>20</sup> Et mandalen etan ni patul ida tuu tu, et pea-allaw dad Abram, hi Sarai e ahwatu niyadda emin hu wadan hi-gada di diman e bebley da.

## 13

*Ya nan-appilan di Abram nan hi Lot*

<sup>1</sup> Hini-yan Abram hu Egypt et mambanggad di Negeb di Kanaan e ingkuyug tu ahwatu, hi Lot niyaddan emin hu wadan hi-gada. <sup>2</sup> Kedangyan ni peteg hi Abram. Dakel hu balituk tu, ya pihhuh tu niyadda animal tu, henin kalneroh, gelding niya

\* 12:3 12:3 Genesis 18:18, 22:18, 26:4, 28:14, Acts 3:25, Galatians 3:8 † 12:7 12:7 Acts 7:5, Galatians 3:16

baka. <sup>3-4</sup> Nangnanglaw ida et dumteng idad Bethel e nangkampuan da lan nunman di nambattanan ni Bethel niya Ai e yadman la hu nengapyaan tun pan-appitan. Yan nunman ni dintengan da ey dineyaw tu hi APU DIOS.

<sup>5</sup> Hi Lot ey kedangyan dama e dakel hu kalneroh tu, ya baketu, ya gelding tu niyadda bega-en tu. <sup>6</sup> Et humman hu, kulang law hu pampattulan da tep dakel ni peteg hu halun dan Abram. <sup>7</sup> Ey humman kaumhulun ni kapambabakaliddan daka pampattul. Yan nunman ey naneng tudda Kanaanite niyadda Perisite ni nambebley diman.

<sup>8</sup> Et kan Abram nan hi Lot ey "Beken ni kayyaggud hu ita mambekkal, anin idan taka pampattul, tep han-ama ita. <sup>9</sup> Ya kayyaggud ey man-appil ita haggud mahkang eya puyek. Pilim hu pinhed mun panha-adan et lumaw kayudman ma-lat man-appil ita. Ya etan eleg mu pillia, ey yadman hu panha-adak."

<sup>10</sup> Et man-ang-ang-ang hi Lot ey ya etan nedeklan ni puyek e Jordan ingganah di Soar hu pinili tu e kamedennumin emin. Huyyan pintek Lot ey heni etan ni leguntan APU DIOS e Eden niya wada dama neininghehan tud Egypt. Neipahding huyya et han bahbahan APU DIOS hu Sodom et ya Gomora. <sup>11</sup> Humman hu pinilin nan Lot et lumaw diman e appit ni kasimmilin aggew. Humman hu impahding dan nan-appil. <sup>12</sup> Et mambebley hi Abram di Kanaan. Nem hi Lot ey nekibebley di nedeklan ni neihnpud di Sodom. <sup>13</sup> Yadda tutu-udman ey lawah ida niya nemahhig hu liwat dan APU DIOS.

*Ya linawwan di Abram di Hebron*

<sup>14</sup> Yan eman ni nan-appilan di Abram nan Lot, ey kan APU DIOS nan Abram ey "Pan-ang-ang-ang kad nanlinikweh ingganah di pappeg ni han-ang-ang mu. <sup>15</sup> Tep emin eya muka ang-ang-anga ey iddawat kun hi-gam niyaddalli helag mu et hi-gayulli hu kan puyek ni inggana. <sup>16</sup> Ey iddawtan dakallin dakel ni helag mun eleg mebillang e henin kadinakkel ni dep-ul. <sup>17</sup> Lakkay et mu ang-angen ni emin hu pappeg eyan puyek ni iddawat kun hi-gam." <sup>18</sup> Et ialdan Abram hu kampu tud kad-an idan keyew ni oak di Mamre di Hebron. Ey nengapyan pan-appitan tun APU DIOS diman.

## 14

*Ya nengihwangan Abram nan hi Lot*

<sup>1</sup> Entanni ey wada gubat tep yadda etan epat ni patul e hi Amraphel di Babilon, hi Ariok di Ellasar, hi Kedorlaomer di Elam et hi Tidal di Goyim. <sup>2</sup> Ginubat dadda etan liman patul e hi Bera di Sodom, hi Birsu di Gomorrah, hi Sinab di Admah, hi Semeber di Seboim et ya etan patul di Bela e Soar hu hakey ni ngadan tu. <sup>3</sup> Humman idan liman patul ey impan-aaddum dadda sindalu dad etan di Nedeklandi Siddim e neihnpud di Netey ni Baybay.

<sup>4</sup> Yan hampulut dewwan toon ey hi Kedorlaomer hu ap-apu da, nem yan meikkeppulut tellun toon ey nginhay da law. <sup>5</sup> Nem yan meikkahampulut epat ni toon ey inemung nan Kedorlaomer hu sindalu tu niyadda sindalun edum tun patul, et gubaten dadda humman ni nangngehay ni nampambebley di Repaim di Asterot Karnaim, yadda Susim di Ham, yadda helag Emin di Saveh Kiriathaim <sup>6</sup> niyadda Horite di duntuduntug di Seir. Et pampedugen dadda ingganah di El Paran e neihnpud di eleg mebebley. <sup>7</sup> Et mambangngad idad En Mispas e ya ngadan tu law ey Kades, et gubaten dadda iAmalek niyadda Amorite ni nambebley di Hasason Tamal et apputen dadda.

<sup>8-9</sup> Entanni ey yadda etan liman patul di Sodom, yad Gomorrah, yad Admah, yad Seboim, niyad Bela, e Soar hu hakey ni ngadan tu, ey impan-aaddum da sindalu da et ida mambetak di Nedeklan e Siddim et gubaten dadman hi Kedorlaomer niyadda edum tun tellun patul. <sup>10</sup> Nem yadman ey dakel hu edallem ni bitu. Et umbebsik ida-et hu sindalun patul di Sodom niyad Gomorrah, ey nakna edum ni hi-gadadman. Nem yadda etan tellun edum dan patul ey bimmesik idad duntuduntug. <sup>11</sup> Yadda etan epat ni patul ni nengapput ey nan-ala dan emin hu wadad Sodom niyad Gomorrah, anin idan kennen et handa hi-yana humman idan bebley.

<sup>12</sup> Anin hi Lot e pengungngaan nan hi Abram et impeki-la da, yadda halun tu niyaddan emin hu wadan hi-gatu. <sup>13</sup> Nem wada etan hakey ni tuun bimmesik, et tu idaddatteng nan Abram e Hebrew ni nangkampud neihnpud idad keyew ni oak nan Mamre e Amorite. Hi Mamre niyadda agi tu e di Eskol nan hi Aner ey gayyum idan Abram. <sup>14</sup> Yan nangngelan nan Abram e impeki-laddan etan ni epat ni patul hi Lot, e pengungngaan tu, ey inemung tudda tuu tun dammutun mekiggubbat, e telunggatut et hampulut walu idan emin, et unuden dadda ingganah di Dan. <sup>15</sup> Dimmateng idadman et genedwaen Abram hu tuu tu. Et yan nunman ni hileng ey ginubat dadda humman ni patul e pindug dadda

\* 13:15 13:15 Acts 7:5, Galatians 3:16

ingganah di Hobah e indalan dad Damascus. <sup>16</sup> Et bangngaden tun emin hu imbesik da, anin hi Lot e pengunungan tu, yadda limmu tu, yadda edum ni tuu niyadda bibi-in imbesik da.

*Ya nemendisyonan Melkisedek nan hi Abram  
(Hebrews 7:1-10)*

<sup>17</sup> Yan nambangngaden nan Abram ni nengapputan tun Kedorlaomer, et yadda edum tun patul ey immali patul di Sodom et tu dammuen hi Abram di Nedeklandi Sabeh e Bebley ni Patul. <sup>18</sup> Anin ni hi Melkisedek e patul di Salem e padin Apu Dios e Keta-tageyyan ey inlaw tu sinapay niya meinnum. <sup>19</sup> Et bendisyonan tu hi Abram e kantuy "Abram, iddawat Apu Dios e Keta-tageyyan niya nanletun kabunyan niya puyek hu panyaggudan mu. \* <sup>20</sup> Medeyyaw hi Apu Dios e nemaddang ni hi-gam et mengapput ka."

Et idwat nan Abram nan hi Melkisedek hu kapulun emin ni inapput dad nekigubatan tu. <sup>21</sup> Entanni ey kan etan ni patul di Sodom nan hi Abram ey "Anin alam hu hipan binangngad mun imbesik da, nem pebangngad mun hi-gak ida tuuk." <sup>22</sup> Nem kan Abram ey "Eleg, tep insapatah kun AP-APU e Dios e Keta-tageyyan niya nanletun kabunyan niya puyek <sup>23</sup> e endi nak ellan ni hipan hi-gayu, anin ni bedbed ni patut yu winu sinulid ma-lat eleg mulli penghel ey kimmedangyan hi Abram tep ya indawat kun hi-gatu. <sup>24</sup> Yan ebuh hu kinan middan sindaluk ni an nekigubat hu eggak beyyadin hi-gayu. Nem idwat mu hu bingay eyaddan gayyum kun bimmaddang ni hi-gak e hi Aner, hi Eskol et hi Mamre."

## 15

*Ya inhelan APU DIOS nan hi Abram*

<sup>1</sup> Entanni ey nampeang-ang hi APU DIOS nan hi Abram di i-innep tu et kantuy "Abram, entan takut mu yaggud baddangan daka tep hi-gak hu heni panhappiyaw mu niya iddawtan dakan panyaggudan." <sup>2-3</sup> Nem hinumang nan Abram e kantuy "APU DIOS e Eta-gey ni peteg, anin ni ippahding mudda huttan et endi damengu silbitu tep endi u-ungngak ni pengippebeltan kuddan wadan hi-gak. Ebuhan etan bega-en ku e hi Elieser e iDamascus hu dammutun memeltan ni kinedangyan ku."

<sup>4</sup> Ey kan APU DIOS ni hi-gatuy "Beken hi Elieser e bega-en mu memeltan ni binaknang mu tep yalli u-ungngam." <sup>5</sup> Et ipengulun APU DIOS hi Abram di dallin et kantuy "Itengaw mud kabunyan et bilangen mudda bittuwen hedin hambilang mu. Tep henin nunman ali kadinakkel ni helag mu e eleg mebillang." \*

<sup>6</sup> Ey kinulug nan Abram hu inhel APU DIOS, et humman ni nengulugan tu hu gaputun nengibilangan APU DIOS ni hi-gatun kayyaggud. † <sup>7</sup> Kan mewan APU DIOS ni hi-gatuy "Hi-gak hi APU DIOS e nengipea-allaw ni hi-gam etan di bebley di Ur di Babilonia ma-lat idwat kun hi-gam huyyan puyek ni pampuyek mun ingganah."

<sup>8</sup> Ey kan Abram ey "APU DIOS e Eta-gey ni peteg, hipa pengamtaak e makulug ni pampuyek ku huyya?" <sup>9</sup> Kan APU DIOS ni hi-gatuy "Ka alen baka et ya labah ni gelding niya lakkitun kalneroh e hantetlu toon da. Ey ala kan hakey ni paluma niya hakey ni balug." <sup>10</sup> Et an alen Abram humman idan imbagan Apu Dios ni hi-gatu, e impandewa tun ginaged, et iyayyaggud tu mewan ni hinandedwan inha-ad e impantatakul tu. Nem yadda etan sisit ey eleg tu gedwaen. <sup>11</sup> Entanni ey netapngan ida etan sisit ni kamengngan ni netey ni animal, nem inebul tudda.

<sup>12</sup> Ey yan kamangkelinnug aggew ey naka-uyeng hi Abram, ey wada heni engeenget niya angetakkut ni inang-ang tu. <sup>13</sup> Ey immehel hi APU DIOS e kantun Abram ey "Yallin edum ni aggew ey mekibbebley idalli helag mud edum ni bebley. Mambalin idallin himbut diman ni epat ni gatut ni toon et panhelheltapen daddalli. ‡ <sup>14</sup> Nem kastiguen kuddalli mengihhimit ni hi-gada. Ey yallin peni-yanan dan nunman ni bebley ey ellan dalli kinedangyan idan tuodman. <sup>15</sup> Hi-gam ey meka-a-amma kalli et han ka matey, niya melinggep ali ketteyyan mu. <sup>16</sup> Yadalli meikka-pat ni helag mu hu mambangngad eyad bebley. Yan nunman ali ey ihhi-met idan Amorite hu kalinawah da et kastiguen kudda."

<sup>17</sup> Yan nelinugan ni aggew et ma-nget, ey inang-ang nan Abram hu kaman-aahuk ni banga niya apuy ni kamantetebbel ni nelabah di nambattan idan etan ni in-appit tun detag ni hinandedwa tun inha-ad. <sup>18-21</sup> Et yan nunman ey kan APU DIOS nan hi Abram ey "Iddawat kuddallin helag mu eya puyek meippalpu pappeg ni Egypt ingganah di Wangwang e Euphrates e nambebleyan idan Kenite, yadda Kenissite, yadda Kadmonite,

\* 14:19 14:19 Hebrews 7:1      \* 15:5 15:5 Romans 4:18, Hebrews 11:12      † 15:6 15:6 Romans 4:3, 9, 22-23, ya Galatians 3:6, niya James 2:23      ‡ 15:13 15:13 Acts 7:6-7

yadda Hittite, yadda Perissite, yadda Repaite, yadda Amorite, yadda Kanaanite, yadda Gergashite, niyadda Jebusite.”

## 16

### *Ya neiungngaan Ismael*

<sup>1</sup> Hi Sarai e ahwan Abram ey nebasi et endi u-ungnga tu. Nem wada hi Hagar e bega-en tun iEgypt. <sup>2-3</sup> Et kantun Abram ey “Anin ew ni iulig mu eya bega-en ku tep ay eleg i-abulut APU DIOS ni nak man-ungnga, et yalli u-ungnga yu hu pan-ungngak.” Ey inebulut Abram. Neipahding huuya eman ni nelabah hu hampulun toon ni nanha-adan dad Kanaan. <sup>4</sup> In-ulig Abram hi Hagar et mambutsug.

Yan nengamtaan Hagar e nambutsug ey nemahhig hu tuka pemippihul nan Sarai. <sup>5</sup> Et kan Sarai nan Abram ey “Bahul mu hu tuwak kapemippihulin bega-en ku. Ma-nu tep in-abulut ku e i-ulig mu, nem neipalpun nambutsugan tu ey tuwak kapippihula. Hamban anhan ang-angen APU DIOS hedin hipan hi-gatan dewwa hu neiptek, hi-gam winu hi-gak.” <sup>6</sup> Kan Abram ey “Hi-gam hu kan bega-en ni hi-gatu et ngenamung hu pehding mun hi-gatu.” Et nemahhig hu kapehding Sarai nan Hagar et tuka panlelehani et lektattuy bimmesik.

<sup>7</sup> Entanni ey dinteng etan ni anghel APU DIOS hi Hagar etan di hebwak etan di eleg mebebleyi di gilig ni dalan ni mampellaw di Sur. <sup>8</sup> Kan nunman ni anghel ey “Hagar e bega-en Sarai, kele wada kadya? Attu nalpuam niya attu lawwam?” Kan Hagar ey “Bimmesikkak e hini-yan ku hi Sarai e kan bega-en ni hi-gak.” <sup>9</sup> Ey kan etan ni anghel ni hi-gatuy “Pambangngad kan hi-gatu et hi-gam hu mannenneng ni bega-en tu. <sup>10</sup> Iddawtan dakan dakel ni helag mu e eleg mebillang. <sup>11</sup> Huttan ni imbutsug mu ey laki. Ya panggeddan mullin hi-gatu ey Ismael tep dingngel APU DIOS hu nampehemhemmekan mun hi-gatu. <sup>12</sup> Huttan alin u-ungngam ey heni ma-lem ni kebayyu. Anggebe-hel tullin emin tuu ey anggebe-hel dalli dama. Ey eleg tulli pinhed ni mekibbebley idan agitu.”

<sup>13</sup> Kan Hagar di nennem tuy “Kaw makulug ni inang-ang ku hi Apu Dios, ey nanengtun mategu-ak et e-ehhelen kulli meippanggep ni nunya?” Et kantuy “Hi-gam hu Dios ni kamenang-ang-ang ni hi-gak.” <sup>14</sup> Et humman hu ya kapanggeddan idan tuu etan ni hebwak ey “Hebwak etan ni wadan ingganah ni kamenang-ang-ang ni hi-gak.” Humman ni hebwak ey wadad nambattanan ni Kades niya Bered.

<sup>15</sup> Et iungngan Hagar etan u-ungnga dan Abram et ngadan Abram ni hi Ismael. <sup>16</sup> Ya toon Abram ni nunman ey newalut enem.

## 17

### *Ya pampekuggitan hu pengi-ang-angan ni nekitbalan APU DIOS idan Hebrew*

<sup>1</sup> Yan nahyam et heyam hu toon Abram ey nampeang-ang mewan hi APU DIOS ni hi-gatu et kantuy “Hi-gak etan Dios e Kabaellan tun emin. U-unnud muwak et ya kayyaggud hu ipahding mun ingganah. <sup>2</sup> Mekitballak ni hi-gam et pedakkel kulli helag mu.” <sup>3</sup> Et manyuung hi Abram ni nanlispituh tun hi-gatu. Kan Apu Dios ni hi-gatu ey <sup>4</sup> “E-helen kun hi-gam e pan-emma dakallin dakel ni tuud kebebbley. <sup>5</sup> Yan nunya ey hullulan ku ngadan mu et bekken law ni hi Abram nem hi Abraham, tep pambalin dakallin aman dakel ni tuud kebebbley. <sup>6</sup> Iddawtan dakallin dakel ni helag mu. Mampatul idalli edum ni hi-gada niya mampambebley idallid dakel ni bebley. <sup>7</sup> Pannananeng ku huuyan nekitbalan kun hi-gam niyadda helag mun edum ni aggew. † Niya mannananeng ni hi-gak hu Dios ni daydayawen mu niyadda helag mu. <sup>8</sup> Huuyan bebley e Kanaan ni nekibebleyan mu ey iddawat kun emin ni hi-gam niyaddalli helag mu ma-lat hi-gayu mengippuyyek ni ingganah, niya hi-gak ali hu Dios idan helag mu.

<sup>9-13</sup> Mahapul ni mampekuggit ka, anin idan helag mu, ma-lat kei-ang-angan tu e pannananeng yu eya nekitbalan kun hi-gayu. Et humman hu, meippalpun nunya ey emin hu lakin helag mu, ey mahapul ni mekuggit idan meikkewwalun aggew ni neiungngaan da, anin idan i-ungngan bega-en yud baley yu niyadda himbut yun melpud edum ni bebley. Humman ni kekuggitan yu hu kei-ang-angan tu e mengmenglaw alin ingganah hu nekitbalan kun hi-gayu. ‡ <sup>14</sup> Ya etan lakin eleg makugit ey eleg meibbillang ni tuuk tep eleg tu u-unnuden huuyan inhel ku.”

<sup>15</sup> Immehel mewan hi Apu Dios nan Abraham ey kantuy “Meippalpun nunya ey mehullulan law hu ngadan Sarai e ahwam, et hi Sarah law hu ngadan tu. <sup>16</sup> Bendisyonan

\* 17:5 17:5 Romans 4:17-18 † 17:7 17:7 Luke 1:55, Galatians 3:16 ‡ 17:9-13 17:9-13 Acts 7:8

ku et wadalli u-ungnga yu! Et hi Sarah hu pan-innallin dakel ni tuu et wadaddalli patul ni helag tu.”

<sup>17</sup> Et dayawen nan Abraham hi Apu Dios. Nem kamangngi-ngi-ngi tep kantud nemnem tu ey “Kaw dammutu makkaw ni mewedda u-ungngak ey hanggatut law hu toon ku? Niya kaw an man-ungnga law hi Sarah ey nei-inna dama law e nahyam hu toon tu?”  
<sup>18</sup> Et kan Abraham nan Apu Dios ey “Attu et hi Ismael kuma hu pengippeamnuan ni planuh mun hi-gakey?”

<sup>19</sup> Nem kan Apu Dios ey “Eleg. Beken ni hi-gatu hu kangku. Man-ungngalli hi Sarah ni laki et ingngadnan mullin hi Isaac. Hi-gatu niyaddalli helag tu hu pengippeamnuan kun nekitbalan kun mannananeng ni ingganah. <sup>20</sup> Dingngel ku hu inbagam ni panyaggudan Ismael. Et humman hu, bendisyonan ku daman dakel ni peteg ni helag tu. Hi-gatulli kehlagan ni hampulut dewwan aap-apu niya huyyaddan helag tu ey et-eteng ali hu pambebleyan da niya mandingngel idalli dama. <sup>21</sup> Nem hi Isaac e i-ungngallin Sarah ni balin tun hanneyan tsimpuh hu pengippeamnuan ku eyan nekitbalan ku.” <sup>22</sup> Negibbuh humman ni ung-ungbal da et hi-yanen Apu Dios hi Abraham.

<sup>23</sup> Yan nunman ni aggew ey inu-unnud nan Abraham hu inhel Apu Dios et kugiten tu hi Ismael e u-ungnga tu, yadda lalakkin kamanha-ad di baley tu niyadda lalakkin u-ungngaddan himbut tu. <sup>24</sup> Nekugit dama hi Abraham e yan nunman ey nahyam et heyam hu toon tu <sup>25</sup> ey hampulut tellu toon Ismael. <sup>26</sup> Nandihhan idan han-aman nekugit ni nunman ni aggew, <sup>27</sup> anin idan emin ni lalakkin bega-en tu.

## 18

### *Impeamtan APU DIOS e mehlag hi Abraham*

<sup>1</sup> Wadan pinhakkey ni nandattek aggew e kamanyuyuddung hi Abraham di habyen ni a-abbung tu ey nampeang-ang hi APU DIOS ni hi-gatu etan di wada keyew di Mamre. <sup>2</sup> In-ang-ang tu, ey wada tellun lakin kaman-eh-ehneng et lumaw et manyuung ni panlispituh tun hi-gada. \* <sup>3-4</sup> Et kantuy “Apuk ida, hedin kayyaggud yuka pannemnem ni hi-gak, panda-guh kayu ni anhan et man-iyayatu kayu eyad hengeg ni keyew et nak ali umlan danum ni pengullah yun heli yu. <sup>5</sup> Pandammuan tun pandaddanan kun kennen yu ma-lat wada ikkelmeg yu lad dalan.” Ey kanday “Ku anin tep.”

<sup>6</sup> Impapuut Abraham ni himmegep et kantun Sarah ey “Ganuim et umla ka etan ni kakkayyaggud ni alinah et menginkakapya kan sinapay.” <sup>7</sup> Et papuut tu mewan ni limmaw di halun tu et an gumuyud ni mateban kilaw ni baka et degdegen tu hakey ni bega-en tun memalsi. <sup>8</sup> Nelutun emin et umlan gatas niyadda edum ni kennen et tu imangdad ni kennen idan nunman ni tuudman. Ida kamammangngan ey kaman-eh-ehneng hi Abraham di hengeg idan keyew diman.

<sup>9</sup> Entanni ey kanday “Attu hi Sarah e ahwamey?” Kan Abraham ey “Immen di bawang.” <sup>10</sup> Kan APU DIOS ey “Um-ali-ak ali mewan ni balin tun hanneyan tsimpuh et yan nunman ey wadalli law u-ungngan Sarah e ahwam.” †

Wada hi Sarah di habyen ni kampu di dingkuggan Abraham et dingngel tu humman ni ung-ungbal da. <sup>11</sup> Ey gapu tep nea-amma law hi Abraham niya nei-inna dama hi Sarah et nepappeg law hu kamelpud annel tu, <sup>12</sup> ey kamangngi-ngi-ngi hi Sarah e kantud nemnem tuy “Inna-nu makkaw ni nak pan-ungngaan ey nei-inna-ak law niya nea-amma ahwak?”

<sup>13</sup> Et kan APU DIOS nan Abraham ey “Kele kamangngi-ngi-ngi hi Sarah? Kele kantuy ‘Kaw dammutun man-ungnga hu biin nei-inna, e henin hi-gak?’ <sup>14</sup> Kaw wada eleg kabaelin APU DIOS? ‡ Yallin pambangngadan kun kelebbahan ni heyam ni bulan ey man-ungnga hi Sarah ni laki.” <sup>15</sup> Simmakut hi Sarah et iheut tu e kantuy “Eleggak ngumi-ngi.” Nem kan APU DIOS ey “Tam em, ngimmi-ngi ka.”

<sup>16</sup> Negibbuh humman ni nan-ungbalan da et han ida lumaw di lawwan da. Nekilaw hi Abraham ni hi-gada ingganah etan di kameuhdungi hu Sodom. <sup>17</sup> Kan APU DIOS di nemnem tuy “Heballi peamtak nan Abraham hu ninemnem kun pehdung ku <sup>18</sup> tep yaddalli helag tu mambalin ni et-eteng ni bebley niya mandingngel idalli. Ey gapuh ni hi-gatu ey bendisyon kuddan tutu-u eyad puyek. § <sup>19</sup> Hi-gatu pinilik ni menuggun idan helag tun mengu-unnud ni hi-gak niya mengippahding ni kayyaggud niya limpiyuh ma-lat ipahding kullin emin hu insapatah kun hi-gada.”

<sup>20</sup> Et kan APU DIOS nan Abraham ey “Dingngel ku e yadda tuud Sodom niyad Gomora ey lawah ni peteg hu daka pehpahding. <sup>21</sup> Et humman hu, mahapul ni umlawwak et nak ang-angen hedin makulug.”

\* 18:2 18:2 Hebrews 13:2 † 18:10 18:10 Romans 9:9 ‡ 18:14 18:14 Matthew 19:26, Luke 1:37, 18:27, Mark 10:27 § 18:18 18:18 Galatians 3:8

<sup>22</sup> Yadda etan dewwan laki ey intuluy dan limmaw di Sodom. Nem ya etan katlu da e hi APU DIOS ey nanha-ad ni nekemtang et mekihummangan nan Abraham.

*Ya nekihummangan Abraham nan hi APU DIOS meippanggep idan tuud Sodom*

<sup>23</sup> Kan Abraham nan APU DIOS ey "Kaw endien mudda tu-wangun emin hu tutuud Sodom e illagat mudda hu kayyaggud?" <sup>24</sup> Inna-nu hedin wadadda neliman tuun kayyaggud hu daka pehpehding, kaw bahbaha mu humman ni bebley winu eleg, malat meihwang ida etan kayyaggud ni tuu?" <sup>25</sup> Hi-gam ni huwet emin ni tuud puyek ey limpiyuh ka. Et humman hu, amtak e eleg mu illagat ida kayyaggud ni tuun pemahbaha muddan lawah ni tuu." <sup>26</sup> Ey kan APU DIOS ey "Hedin wadadda hu neliman kayyaggud ni tuu, ey eleggak bahbaha humman ni bebley."

<sup>27</sup> Immehel mewan hi Abraham ey kantuy "Apu, pesinsahi muwak anhan tep ay endi egen kun mengibeggan hi-gam ni nunya tep endi-et lebbeng kun um-ehel tep tuu-ak ni ebuh." <sup>28</sup> Nem inna-nu hedin na-pat et liman ebuh hu kayyaggud ni tuudman, kaw bahbaha mu tep kulang ni lima?" Ey kan APU DIOS ey "Eleggak bahbaha humman ni bebley hedin wada na-pat et liman kayyaggud ni tuudman."

<sup>29</sup> Immehel mewan hi Abraham ey kantuy "Inna-nu hedin na-pat idan ebuh?" Hinumang nan APU DIOS e kantuy "Eleggak bahbaha anin ni na-pat idan ebuh." <sup>30</sup> Kan Abraham ey "Apu, entan anhan bunget mu tep wada pay ibbagak. Inna-nu hedin telumpulun ebuh hu kayyaggud ni tuudman?" Hinumang APU DIOS e kantuy "Eleggak bahbaha hedin wadadda telumpulu."

<sup>31</sup> Et kan Abraham ey "Apu, pesinsahim anhan hu tuled kun mengibeggadan nunyan hi-gam. Inna-nu hedin dewampuluddan ebuh?" Ey hinumang mewan Apu Dios e kantuy "Eleggak bahbaha humman ni bebley anin ni dewampulun ebuh hu kayyaggud ni tuudman." <sup>32</sup> Kan mewan Abraham ey "Apu, entan anhan bunget mu, huyya law hu manggillig ni ibbagak. Inna-nu hedin hampulun ebuh hu kayyaggud ni tuudman?" Kan Apu Dios ey "Eleggak bahbaha anin ni hampulun ebuh hu kayyaggud diman."

<sup>33</sup> Negibbuh humman ni ung-ungbal da et manglaw hi APU DIOS di lawwan tu. Et umenamut dama hi Abraham di baley tu.

## 19

*Ya kalinawah idan tuud Sodom*

<sup>1</sup> Kamangkehilleng ni nunman ey dimmateng ida humman ni dewwan anghel di Sodom. Hi Lot e kamanyuyyuddung etan di eheb nunman ni bebley ey inang-ang tudda et tu dammuen ida et nanyuung ni nanlispituh tun hi-gada. <sup>2</sup> Kantuy "Hi-gayuddan apuk, ikeyuy et lumaw itsud baley et ulahan yu heli yu. Ey mandeya itsu et han kayu humelaman ni kabbuhhan di lawwan yu." Nem kanday "Anin ni linggeman hu keuggipan midya." <sup>3</sup> Nem impapilit Lot et makilaw idad baley tu. Indaddanan tuudan kennen niya sinapay ni eleg mekamdugan ni kamengippalbag et mangan ida.

<sup>4</sup> Eleg ida pay maugip humman idan mangilin Lot ey hinelikub idan emin ni lalakkidman, yadda kamenikken niyadda nangeka-amma, hu baley Lot. <sup>5</sup> Et itku dan Lot e kanday "Attudda etan lakin mangilim ey? Pa-hep mudda et i-ulig midda."

<sup>6</sup> Immehep hi Lot et ilekbi tu et an makiungbal idan etan ni edum tun bimmebley. <sup>7</sup> Kantun hi-gada ey "Hi-gayuddan kaegiegi, entan anhan tu ipahding huttan ni lawah. <sup>8</sup> Anin ew katteg ni yadda etan dewwan u-ungngak ni biin eleg ni mengahwa hu pehep ku et hi-gada pengippahdingan yun pinhed yu. Et beken ni yadda etan mangilik tep wadadda eyad baley ku et mahapul ni ippaptek kudda." <sup>9</sup> Nem kanday "Hi-gam ni immalin nekibebley ni hi-gami, entan ngu dama keihihhimmel mu. Kele hi-gam hu menuttuddun hi-gami? A-allaw ka tep hi-gam ali anhan law hu pemellidpidan mi." Et itulud da hi Lot ey da-et bahbaha hu habyen, <sup>10</sup> nem ginuyud ida etan ni dewwan minengili tud bawang hi Lot et ilekbi da. <sup>11</sup> Et kulapen dadda etan tuun wadad dallin et eleg da hanhamak hu habyen.

<sup>12</sup> Kan ida etan ni dewwan lakin mangilin Lot ni hi-gatuy "Kaw wadadda edum ni u-ungngam, inepum winu agim eyad bebley? Hedin wada, ehel mun hi-gada et uma-allaw kayudyan nunya, <sup>13</sup> tep bahbaha mi huyyan bebley. Inamtan APU DIOS e nemahhig hu kalinawah idan tuodya et itu-dak dakemin memahbah eyan bebley."

<sup>14</sup> Et papuut nan Lot ni limmaw et tu ehelen ida etan ni lakin mengi-ahwan u-ungnga tu e kantuy "Papuut tayu et uma-allaw itsudya tep bahbaha APU DIOS huyyan bebley." Nem kan ida etan ni laki nem langlangkak tu.

*Hini-yan di Lot hu Sodom*

<sup>15</sup> Yan nunman ni kamangkewa-wa ey kan ida etan ni anghel nan hi Lot ey “Papuut mu! Awit mu eya ahwam niyadda etan dewwan u-ungngam ni bii et uma-allaw kayu ma-lat eleg kayu mailegat ni kebabbahan eyan bebley.” <sup>16</sup> Kamandewadewa hi Lot, nem himmek APU DIOS et tengeden ida etan ni anghel hu ngamay tu, ya ngamay ahwa tu niyadda etan u-ungnga tu et ipengulu dadda ingganah ni immehep ida etan di bebley. <sup>17</sup> Kan etan ni hakey ni anghel ey “Besik kayu ma-lat eleg kayu matey. Entan panwiwringngi yu. Ey entan panda-guh yu eman di nandeklan. Lakkayuy eman di duntug ma-lat eleg kayu mailegat ni kebabbahan idan nunyan bebley.”

<sup>18-20</sup> Kan Lot ey “Kayyagud anhan et himmek dakemi et deh e mategu kami, nem entan dakemi anhan palaw eman di duntug tep neidawwi ey meha-kupan kami et mettey kami. Attu anhan et yad eman di neihnup ni bebley hu bebsikan mi ma-lat meihwang kami? Tebulut yu anhan yaggud ek-ekut humman ni bebley.” <sup>21</sup> Kan etan ni anghel ey “Anin, ebbulutek hu kammu et eggak babhaha humman ni bebley. <sup>22</sup> Papuut yu! Pambesik kayun unlaw diman! Endi ni pehdng ku ingganah umdateng kayudman.” Ya ngadan nunman ni bebley ey Soar tep kan Lot ey ek-ekut ni bebley.

#### *Ya nemabbahan APU DIOS ni Sodom niya Gomorrah*

<sup>23</sup> Kamenimmil aggew ey umdateng di Lot di diman Soar. <sup>24</sup> Linggab nan APU DIOS hu Sodom niya Gomorrah e nan-egah tu hu apuy niya sulfur diman. \* <sup>25</sup> Et meabbah humman ni bebley, anin idan bebley ni nangkeitakdul, yadda neitnem, yadda edum ni mategu, yadda tutu-u niyadda animal. <sup>26</sup> Ya ngu etan ahwan Lot ey nanwingi et mambalin ni kimmelhin ahin. †

<sup>27</sup> Nawa-wa ey bimmangun hi Abraham ni dagah et lumaw di inehnengan da lan nan-ung-ungbalan dan APU DIOS. <sup>28</sup> Et man-uhdung di nandeklan di Sodom niyad Gomorrah ey mahdel ni ahuk hu kameang-ang diman. <sup>29</sup> Nem ninemnem APU DIOS hi Abraham et hemeken tu hi Lot et eleg mailegat ni nemabbahan tun nunman idan bebley.

#### *Hi Lot niyadda etan dewwan u-ungnga tun bii*

<sup>30</sup> Entanni ey hini-yan nan Lot niyadda etan dewwan u-ungnga tun bii hu Soar tep daka tekkusidda tuudman et lumaw idan an nambebley etan di leyang di duntug.

<sup>31</sup> Hakey ni aggew ey kan etan ni pengulwan nan hi agituy “Nea-amma law hi ama ey endin hekey hu lakin mengi-ahwan hi-gata ma-lat maweda u-ungnga ta. <sup>32</sup> Hedin ya ew pehdng ta, ey buttengen ta hi ameta ma-lat makiulig itan hi-gatu ma-lat mahlag ita et eleg mepappeg hu helag tayu.” <sup>33</sup> Et yan nunman ni hileng ey binuteng da hi ameda et makiulig etan pengulwan. Nem eleg amta ameda tep nakabbuteng.

<sup>34</sup> Nawa-wa et kan etan ni pengulwan ni agituy “Nekiuliggak nan aman hileng. Buttengen ta mewan ni hileng et hi-gam dama meki-ullig ni hi-gatu ma-lat mahlag ita.” <sup>35</sup> Et yan nunman ni hileng ey binuteng da mewan hi ameda et makiulig dama etan udidyan ey hanniman mewan e eleg amtan ameda tep nakabbuteng. <sup>36</sup> Huyya impahding idan nunman ni dewwan u-ungngan Lot et mambutsug ida.

<sup>37</sup> Nan-ungnga etan pengulwan ey laki et ngadnan tun hi Moab. Hi-gatu nahlagan idan iMoab. <sup>38</sup> Nan-ungnga dama etan udidyan ey laki mewan et ngadnan tun hi Ben-Ammi. Hi-gatu nahlagan idan iAmmon.

## 20

#### *Ya linawwan di Abraham di Gerar*

<sup>1</sup> Entanni ey hini-yan nan Abraham hu Mamre et lumaw di Negeb et manha-ad etan di nambattanan ni Kades niya Sur. Yan nanha-adan dad bebley di Gerar ey <sup>2</sup> kan tuddan tuudman ey agitu hi Sarah, et humman hu, hi Abimelek e patul ey tu impaeyag di baley tu hi Sarah ma-lat ahwaen tu. <sup>3</sup> Nem hakey ni hileng ey nan-i-innep hi Abimelek ey kan Apu Dios di i-innep tuy “Mettey ka, tep ya eya biin mu impaewit ey wada ahwa tu.”

<sup>4</sup> Nem eleg ni iulig nan Abimelek hi Sarah. Et kantuy “Apu, kaw petteyan dakemiddan emin ni tuuk anin ni endi impahding kun lawah ni hi-gatu? <sup>5</sup> Tam kangnung Abraham ey han-agidda ey anin daman eyan bii et humman dama kantu. Et humman hu, endi ngu amtak ni lawah ni nak impahding.” <sup>6</sup> Kan Apu Dios ey “Em, inamtak e endi bahul mu. Et mukun eggak iebulut ni mu i-ulig eya bii ma-lat eleg ka manliwat ni hi-gak. <sup>7</sup> Pebanggad mu eya bii etan ni ahwa tu. Humman ni ahwatu ey prophet. Iddasalan dakan hi-gatu et eleg ka matey. Nem hedin eleg mu pebanggad, man mettey ka, anin idan tuum.”

\* 19:24 19:24 Ang-ang yu hu 2 Peter 2:6 Jude 7 † 19:26 19:26 Luke 17:32



<sup>8</sup> Kamangkewa-wa ey impaeyag tudda opisyal tu et ehelen tun emin hu nekapkapyay ey simmakut ida. <sup>9-10</sup> Et paeyag tu hi Abraham et kantuy “Hipa huyyan mu impahding ni hi-gak? Hipa nak impahding et dakemi idwatan ni kebabbahan mi? Beken ni lebbeng ni an meippahding huyyan hi-gak. Kele mu impahding huyya?”

<sup>11</sup> Ey kan Abraham ey “Mukun impahding ku huyya ey tep kangku ngu nem endi kamengullug nan Apu Dios di deya, et nakka umkaguh ni pemetteyan da-ak ma-lat piliwen da ahwak. <sup>12</sup> Em, han-ahwa kami, nem ya kakulugan tu ey han-agi kami tep imbintan nan ama. <sup>13</sup> Et yan nengipea-allawan nan Apu Dios ni hi-gak di bebley mi, ey kangkun Sarah ey anin attu lawwan mi, et e-helen tuddan tuu e han-agi kami et humman pengippeang-ang tun neminhed tun hi-gak.”

<sup>14</sup> Et pebanggad Abimelek hi Sarah nan hi Abraham niya indawatan tun kakalneroh, yadda baka niyadda bega-en. <sup>15</sup> Ey kantun Abraham ey “Dammutun mampilli kan pinhed mun panha-adan eyad bebley ni nan-ap-apuan ku.” <sup>16</sup> Et kantu daman Sarah ey “Iddawtan kun hanlibun palatah hi agim ma-lat keang-angan tun endi bahul mu niya pengamtaan idan edum yu e endi impahding mun lawah.”

<sup>17</sup> Et idasal Abraham nan Apu Dios e bendisyonan tu etan patul niya ahwatu, niyadda emin biin wadad baley tu ma-lat mampan-ungngadda. <sup>18</sup> Tep impambalin APU DIOS ni nebasi emin biidman e humman kastigun Abimelek ni tu nengal-an Sarah e ahwan Abraham.

## 21

### *Ya neiunggaan nan Isaac*

<sup>1-2</sup> Entanni ey impeang-ang nan hi APU DIOS hu binabbal tun Sarah et peamnu tu inhel tu et man-unggan nunman ni tsimpuh ni gintud tu. Neipahding huyya eman ni neamma law hi Abraham. <sup>3</sup> Et ngadanan Abraham humman ni gelang ni Isaac. <sup>4</sup> Walun aggew etan ni gelang et kugiten nan Abraham tep humman hu inhel Apu Dios ni pehding tu. <sup>5</sup> Yan nunman ni neiunggaan Isaac ey hanggatut hu toon nan Abraham.

<sup>6</sup> Immamleng hi Sarah et kantuy “Indawtan tuwan nan Apu Dios ni pan-am-amlengan ku. Emin ali mengngel ni nan-unggaan ku ey mekiam-amleng idan hi-gak. <sup>7</sup> Hipa makkaw ngu an nannemni ni nak mambutsug? Nem deh e wada u-ungnga min Abraham ey ay nea-amma law.”

### *Ya nengitu-dakan Abraham di Hagar nan Ismael*

<sup>8</sup> Yan eman ni naphuan Isaac ey nampahemul hi Abraham. <sup>9</sup> Hakey ni aggew ey hi Ismael e u-ungngad Abraham nan hi Hagar e bega-en tun iEgypt ey tuka hehhegnuda hi Isaac e u-unggan Sarah. <sup>10</sup> Inang-ang Sarah et kantun Abraham ey “Itu-dak mu eya himbut ni bii niya u-ungnga tu tep eleg mabalni ni an mekibbinggay etan di beltanen eyan u-ungngak e hi Isaac.” † <sup>11</sup> El-eleg ni peteg hu kapannemnem nan hi Abraham ni nunman ni inhel Sarah tep u-ungnga tu dama hi Ismael. <sup>12</sup> Nem kan Apu Dios ni higatuy “Entan tu ikakaguh hu meippahding eyan biin himbut niya u-ungnga tu. U-unnud mu hu inhel Sarah ni pehding mu tep hi Isaac e u-ungnga hu pengippeamnuan kun insapatah kun hi-gam e dakel ali helag mu. ‡ <sup>13</sup> Iddawtan ku daman dakel ni helag eya u-unggan etan ni himbut tep u-ungngam dama.”

<sup>14</sup> Et bumengun ni dagah hi Abraham ni newa-waan tu, et pan-idaddan tu kenne niya danum ni pebellun tun Hagar et ya u-ungnga tu et itu-dak tudda.

Endi neputuk ni lawwan da et ida manhawahawang etan di eleg mebebley di Beersheba. <sup>15</sup> Entanni ey na-puhan idan danum et hi-yanen Hagar etan u-ungnga tud hengeg ni kekkeyyaw. <sup>16</sup> Et an yumudung di a-allaw tu. Kantuy “Eggak han-ispel ni menang-ang ni keteyyan ni u-ungngak.” Et kamanyuyyuddung ey kamannannangngih.

<sup>17</sup> Dingngel Apu Dios hu nangih etan ni u-ungnga et kan alin anghel Apu Dios di kabunyan nan Hagar ey “Hagar, hipa muka kakkaguh? Entan takut mu tep dingngel Apu Dios hu nangih ni u-ungngam. <sup>18</sup> Lakkay et mu awiten et a-alluken mu. Tep pambalin kuddalli helag tun et-eteng ni bebley.” <sup>19</sup> Entanni ey heni dinyat nan Apu Dios hu matan Hagar ey inang-ang tu etan hibuy et an umehul et painuman tu etan u-ungnga tu.

<sup>20-21</sup> Binendisyonan Apu Dios etan u-ungnga et meetteng di eleg mebebleyid Paran, nambalin ni nelaing ni mapena et pakiahwan inetun biin iEgypt.

### *Ya nanhumngangan di Abraham nan hi Abimelek*

\* 21:4 21:4 Acts 7:8 † 21:10 21:10 Galatians 4:30 ‡ 21:12 21:12 Romans 9:6-7, Hebrews 11:17-19

<sup>22</sup> Yan nunman ni tsimpuh ey limmaw hi Abimelek e patul et hi Pikol e ap-apun sindalu tud kad-an nan Abraham et kan Abimelek ni hi-gatuy "Inamtak e daka kabaddangin Apu Dios di emin ni muka ippahding. <sup>23</sup> Et mukun pinhed kun mansapatah kan Apu Dios e eleg ka mekibbuhul ni hi-gak, yadda u-ungngak niyadda inap-apuk, nem mekiggayyum kan hi-gami eyad nekibebleyam henin nakka pehding ni hi-gam." <sup>24</sup> Hinumang nan Abraham et kantuy "Dammutu, issapatah ku e eggak mekibbuhul ni hi-gam."

<sup>25</sup> Entanni ey nanlilih hi Abraham nan Abimelek meippanggep etan ni hibuy ni piniliw idan bega-en Abimelek. <sup>26</sup> Ey kan Abimelek ey "Eggak amta huttan ni neipahding niya eggak amta hu nengipahding tep ebu ni nunyan pengngelan kun nuntan. Kele eleg mu ehelen ni hi-gak ni nunman?" <sup>27</sup> Et idwatan Abraham hi Abimelek ni kalneroh niya baka ni kei-ang-angan ni kahinammad ni panggayyuman da. <sup>28-29</sup> Nem immal-an pay hi Abraham ni pitun kalneroh ni iddawat tun Abimelek ey kan Abimelek ey "Kele wada huttan?" <sup>30</sup> Hinumang nan Abraham e kantuy "Abulut mu huayan iddawat kun hi-gam et kei-ang-angan tu e muka ebbuluta e hi-gak hu nengu-ku eyan hibuy." <sup>31</sup> Et meippalpun nunman ey neingadnan humman ni bebley ni Beersheba tep yadman neipahdingan ni hummangan da. <sup>32</sup> Negibbuh humman ni hummangan da et mambangngad di Abimelek nan hi Pikol di Pilstia.

<sup>33</sup> Hi Abraham ey intanem tu keyew ni tamarisk di Beersheba et dayawen tu hi APU Dios e wadan ingganah. <sup>34</sup> Nambebley Abraham di Pilstia ni nebayag.

## 22

*Ya nematnaan Apu Dios ni kapengullug Abraham  
(Hebrews 11:17-19; James 2:21)*

<sup>1</sup> Hakey ni aggew ey pinatnaan Apu Dios hi Abraham. Immehel ni hi-gatu e kantuy "Abraham." Himmumang hi Abraham e kantuy "Em, Adyahhak, Apu." <sup>2</sup> Kan Apu Dios ey "Ikuyug mu etan binugtun ni u-ungngam ni nakappinhed mu e hi Isaac et lumaw kayud Moriah et iappit mun hi-gak ni kagihheba etan di duntun ni ittuduk ni hi-gam."

<sup>3</sup> Bimmangun ni dagah hi Abraham ni newa-waan tu et dumikhal ni ittungu dan da pan-appitan. Et idaddan tu kebayyu et ikuyug tu hi Isaac niyadda dewwan bega-en tu et lumaw ida etan di inhel Apu Dios ni lawwan da. <sup>4</sup> Yan meikkatlung aggew ey inang-ang Abraham etan lawwan da. <sup>5</sup> Kantudda etan ni bega-en ey "Di deya kayudya eyan kebayyu et madegah kamin han-amad dimmun et mi dayawen hi Apu Dios. Mambangngad kamilli." \*

<sup>6</sup> Impapehan nan Abraham etan ittungu nan Isaac et tengeden tu dama hu ewah niya etan pan-epuy da. Ida kamenglaw <sup>7</sup> ey kan Isaac ey "Ama, iyadya ittungu niya pan-epuy, nem attu etan kalneroh ni i-appit ey?" <sup>8</sup> Kan Abraham ey "Ngenamung hi Apu Dios." Et manglaw ida.

<sup>9</sup> Yan dintengan dad etan di inhel Apu Dios ni lawwan da ey kimmappa hi Abraham ni pan-appitan et iyayyaggud tun iha-ad etan ittungu. Binelud tu hi Isaac et ita-pew tun imebaktad etan di keyew di pan-appitan. <sup>10</sup> Inuknut tu hu ewah et petteyen tu-et etan u-ungnga tu, <sup>11</sup> nem immehel ali hu anghel APU Dios di kabunyan e kantuy "Abraham!" Kan Abraham ey "Hipa humman e Apu." <sup>12</sup> Kan ni anghel ey "Entan tu patey hu u-ungngam! Inamtak law e muka paka-u-unnuda hi Apu Dios tep eleg mu kawwanan eya hakey ni u-ungngam." †

<sup>13</sup> Ey inang-ang nan Abraham hu kalneroh ni nehibudan hu ha-duk tud pewen di a-allaw tu et tu alen et humman hu in-appit tun Apu Dios et beken etan u-ungnga tu. <sup>14</sup> Et humman ni duntun ey inggadnan nan Abraham ni "Hi APU Dios hu kaum-idwat ni mahapul." Et nanengtun humman hu ngadan tu ingganah ni nunya.

<sup>15</sup> Ey kan ali mewan etan ni anghel APU Dios di kabunyan nan Abraham ey <sup>16</sup> "Hi-gak e hi APU Dios ey issapatah kud ngadan ku e bendisyonan daka tep kinulug muwak et eleg mu kawwanan ni i-appit ni hi-gak etan binugtun ni u-ungngam. <sup>17</sup> Issapatah kun pedakkel hu helag mu et heniddalli bittuwen di kabunyan niya heniddalli palnah di gilig ni baybay e eleg mebillang. ‡ Huuyaddallin helag mu ey apputen da hu buhul da. <sup>18</sup> Bendisyonan kuddalli emin tuud puyek gapuh idan helag mu." §

<sup>19</sup> Et mambangngad idad kad-an idan etan ni bega-en tun ingkuyug tu et umenamut idad Beersheba.

<sup>20-23</sup> Entanni ey dingngel Abraham e walu ida lalakkin u-ungngan agi tu e hi Nahor nan ahwa tun hi Milkah. Hi Us hu pengulwan et han hi Bus, hi Kemuel e aman Aram,

\* 22:5 22:5 Hebrews 11:17-19 † 22:12 22:12 John 3:16, Romans 8:32 ‡ 22:17 22:17 Hebrews 6:14 § 22:18 22:18 Acts 3:25, James 2:21-24

hi Kesed, hi Haso, hi Pildas, hi Jidlap et han hi Bethuel e udidyan e aman Rebekah. <sup>24</sup> Wadadda dama hu edum ni u-ungngad Nahor nan Reumah e hakey ni ahwatu e hi Tebah, hi Gaham, hi Tahas et hi Maakah.

## 23

### *Ya neteyyan nan Sarah*

<sup>1-2</sup> Hi Sarah ey hanggatut et dewampulut pitu toon tu et han matey di Hebron di Kanaan et ibeluan Abraham.

<sup>3</sup> Limmaw hi Abraham di kad-an idan Hittite et kantuy <sup>4</sup> “Hi-gak ey binunallak eyad bebley yu et endi nak pengikkullungan ni ahwak. Igetang kayu anhan ni puyek malat nak pangikulungan ni hi-gatu.” <sup>5-6</sup> Kanday “Dammutu. Hedin hi-gami man daka kaibbilang ni eta-gey ni ap-apu. Et humman hu, ngenamung kan mampillin pinhed mun pengikkullungan ni ahwam.”

<sup>7</sup> Ey nanyuung hi Abraham di hinangga dan emin et kantuy <sup>8</sup> “Hedin i-abulut yun ikkulung ku ahwak di deya, ey ibega yu anhan nan Eplon e u-ungngan Sohar <sup>9</sup> et igetang tun hi-gak etan leyang di Makpelah di dagsin payew tu. Mahmahi yu hedin piga pengiggettang tu ma-lat bayadan kun wada kayun menang-ang et pambalin kun gungat ni pamilyah ku.”

<sup>10</sup> Wadadman hi Eplon e kamekiyuuyuddung ni hi-gada et umhel et denglen idan emin ni tuun neamung etan di heggeppan di bebley. <sup>11</sup> Kantun Abraham ey “Apu, iddawat kun hi-gam ni liblih humman ni leyang niya payew ni nunyan wadaddan emin eya tuun nangngel. Lakkay et mu ikulung diman etan ahwam.” <sup>12</sup> Nanyuung mewan hi Abraham di hinanggaddan Hittite. <sup>13</sup> Et kantun Eplon ey “Eleg, abulut mu kuma et gatangen ku humman ni puyek et nak pangikulungan ni ahwak. Iddawat ku ustuh ni bayad tu.” Humman ni inhel tu ey dingngel idan etan ni tuun neamung.

<sup>14-15</sup> Hinumang nan Eplon e kantuy “Apu, ya balol nunman ni puyek ey epat ni gatut ni palatah ni ebuh. Nem kaw piga anhan humman ni hi-gatan dewwa? Mu kuma ikulung hu ahwam diman.” <sup>16</sup> Inebulut Abraham et ipadngel tuddan Hittite ni binilang hu epat ni gatut ni palatah ni bayad etan ni puyek e in-ingngel tud kapengigtang idan kamampanggettang.

<sup>17</sup> Et humman ni puyek Eplon di Makpelah e neihnup di Mamre e wada leyang tu, ya payew tu niyadda keyew tu ey nambalin ni puyek nan Abraham tep ginatngan tu. <sup>18</sup> Emin ida Hittite ni neamung ey inamta da e puyek law Abraham humman ni puyek Eplon.

<sup>19</sup> Et an ikulung Abraham hi ahwa tu e hi Sarah etan di leyang di Makpelah ni neihnup di Mamre di Hebron di Kanaan. <sup>20</sup> Et humman ni payew niya leyang e puyek etan ni Hittite ey puyek law nan Abraham et pambalin tun gungat ni pamilyah tu.

## 24

### *Ya nengahwaan Isaac*

<sup>1</sup> Neka-a-amma law hi Abraham ey binendisyonan APU DIOS di emin ni impahding tu. <sup>2</sup> Hakey ni aggew ey kan Abraham etan ni bega-en tun nengidinelan tun emin ni wadan hi-gatuy “Ita-pew mu ngamay mu eyad ulpuk <sup>3</sup> et isapatah mun APU DIOS e Dios di kabunyan niyad puyek e beken alidya Kanaan hu pampillian mun peahwam eyan u-ungngak. <sup>4</sup> Lakkay alid bebley ni neiungngaan ku et ya u-ungngaddan agik hu mu pampillian ni ahwaen tu.”

<sup>5</sup> Nem kan etan ni bega-en tuy “Nem inna-nu hedin wada hu hemmakan ku, nem eleg tu pinhed ni meikkuyug ni hi-gak, kaw mambangngaddak et nak ikuyug eya u-ungngam et ilaw kudman?” <sup>6</sup> Kan Abraham ey “Eleg mabalin ni mu illaw eya u-ungngak diman. <sup>7</sup> Tep hi APU DIOS e Dios di kabunyan e nengi-lin hi-gak di deya et hi-yanen ku humman ni bebley ama niyadda agik, ey insapatah tun hi-gak e iddawat tuddan helag ku eya puyek di deya. Pemengngulu tu hu anghel tud lawwan mu ma-lat wada ewwiten mun ahwaen eyan u-ungngak. <sup>8</sup> Nem hedin eleg pinhed etan ni biin meki-lin hi-gam, ey meliblih ka eyad insapatah mu. Nem eleg mabalin ni mu ikkuyug eya u-ungngak di diman.”

<sup>9</sup> Et ita-pew etan ni bega-en hu ngamay tud ulpun Abraham et isapatah tu e u-unnuden tu humman ni inhel Abraham. <sup>10</sup> Impeki-la tu hampulun kamel ni nengitakkayan tuddan kakkayyaggud ni tu la iddawat et lumaw di bebley Nahor di Mesopotamia.

<sup>11</sup> Yan dintengan tudman ey impan-iyatu tudda etan kamel di kad-an etan ni hibuy etan di a-allaw ni bebley. Hambatanganan ni nunman e humman hu tsimpuh ni kapan-ehhuliddan bibi-i. <sup>12</sup> Et mandasal e kantuy “APU DIOS e Dios ni kadeyyawan apuk e hi Abraham, peang-ang mu anhan hu binabbal mun hi-gatu et baddangan muwak et

umamnu etan inhel tun pehding ku. <sup>13</sup> Adyahhak eyad hibuy ni kapan-ehhuliddan bibi-i eyad bebley. <sup>14</sup> E-helen kuddalli etan ni bibi-i e kangkuy 'Idwasi muwak anhan ni inehul mun danum.' Et ya etan biin peinumman tuwak niyadda kamel ku ey humman pengamtaan ku e hi-gatulli ittudum ni ahwaen nan Isaac. Niya humman pengamtaan ku e impeamnum hu inhel mu etan ni kan bega-en ni hi-gak."

<sup>15-16</sup> Eleg tu gibbuhen hu dasal tu ey dimmateng hi Rebekah ni an man-ehhul. Hi-gatu hu u-ungngan Bethuel e u-ungngan agin Abraham e hi Nahor e ahwan Milkah. Hi Rebekah ey kat-agun biin eleg ni mengahwa. Limmaw ni an nan-ahul et kamangkeibbanggad ey <sup>17</sup> an dinammu etan ni bega-en et kantun hi-gatuy "Idwasi muwak anhan ni inehul mun danum." <sup>18</sup> Kan etan ni bii ey "Em apu." Et ephaen tu etan inehul tu.

<sup>19</sup> Negibbuh ni imminum etan bega-en ey kan etan ni bii ey "Nak ali man-ehhul et painuman kudda dama eman kamel mu." <sup>20</sup> Et mambinbinanggad ni an nan-ahul ingganah impainuman tuddan emin etan kamel. <sup>21</sup> Kaum-eneeneng etan bega-en e tuka ang-ang-anga hedin hi-gatu tu-wangu pinilin APU DIOS.

<sup>22</sup> Negibbuh ni impainuman tudda etan kamel ey impaukat etan ni bega-en hu betling niya gelhing ni balituk et idwat tu etan ni bii. <sup>23</sup> Kan etan ni bega-en ni hi-gatuy "Hipa kan u-ungngan hi-gam? Kaw dammutun wada keuggippan mid baley yun hileng?" <sup>24</sup> Kan Rebekah ey "Hi Bethuel hi ama e u-ungngad Nahor nan Milkah. <sup>25</sup> Wada hu keuggippan yu niya dakek hu dagemin kennen ida eyan kamel."

<sup>26</sup> Nandukkun etan bega-en et dayawen tu hi APU DIOS. <sup>27</sup> Kantuy "Kaka medeeyaw e APU DIOS e Dios ni kadeyyawan Abraham e kan bega-en ni hi-gak tep impeang-ang mu binabbal mu niya baddang mun hi-gatu. Et deh e impangulu muwak di baley idan agitu."

<sup>28</sup> Nambesik hi Rebekah di baley inetu et tu idaddatteng ni emin hu neipahding. <sup>29-30</sup> Inang-ang nan Laban e agin Rebekah etan gelhing niya betling niya dinggel tu indaddatteng agitu ey nambesik di hibuy ey kaman-eh-ehng etan bega-en di kad-an idan kamel. <sup>31</sup> Et kantun hi-gatuy "Ikay et lumaw itad baley mi! Binendisyonan dakan APU DIOS! Wada hu indaddan kun panha-adan yud baley mi niya wada panha-adan idan kamel."

<sup>32</sup> Et makilaw humman ni bega-en. Impaptek idan bega-en Laban etan kalga et han da pangan ida kamel et iap-ap da dagemi etan di panha-adan da. Ey ida immalan danum ni pengullah etan idan bega-en Abraham ni dapan da. <sup>33</sup> Yan eman ni neidaddan hu kennen da, ey kan etan ni bega-en ey "Eleggak menggan ingganah e-helen ku hu gaputun nak illian di deya." Kan Laban ey "Ku anin. Ehel mu."

<sup>34</sup> Kan etan ni bega-en ey "Hi-gak hu bega-en nan Abraham. <sup>35</sup> Binendisyonan APU DIOS et kumedangan. Dakek hu kalneroh tu, ya baka tu, ya kamel tu niya kebayyu tu, dakek hu silber tu, ya balituk tu niya bega-en tu. <sup>36</sup> Hi Sarah e ahwa tu ey nei-inna et han maweda etan hakey ni u-ungnga dan laki e hi-gatu hu nengipebeltanan Abraham ni emin ni kinedangan tu. <sup>37</sup> Impansapatah tuwak Abraham e u-unnuden ku hu kantu e beken ida etan bibi-id Kanaan hu pampillian kun ahwaen Isaac e u-ungnga tu, <sup>38</sup> nem mampilli-ak kunun hi-gayuddan agitu.

<sup>39</sup> Et kangkuy 'Nem inna-nu hedin eleg pinhed ni biin meki-lin hi-gak?' <sup>40</sup> Ey kantuy 'Hi APU DIOS e nakka u-unnuda ey pekillaw tu anghel tun memaddang ni hi-gam ma-lat wada ewwiten mun biin ahwaen eyan u-ungngak ni melpud helag ama. <sup>41</sup> Nem hedin umlaw kad kad-an idan aaggik ey eleg da ebbulutan pekillaw ni hi-gam etan bii ey meliblich kad insapatah mu.'

<sup>42</sup> Et dumtengngak ni hambatenganan di hibuy ey indasal ku e kangkuy 'APU DIOS e Dios ni kadeyyawan Abraham e kan bega-en ni hi-gak, baddangi muwak eyad nakka nemnemaman pehding ku. <sup>43</sup> Hedin wada kamenikken ni biin um-alin an man-ehhul ey ibbagak ma-lat idwatan tuwak ni innumen ku. <sup>44</sup> Et hedin peinumman tuwak niyadda kamel ku, ey humman pengamtaan ku e hi-gatu pinhed mun ahwaen ni u-ungngan kan bega-en ni hi-gak.'

<sup>45</sup> Nakka pan-iddasal huyya ey iyyalli hi Rebekah ni an man-ehhul. Negibbuh ni nan-ahul et kangkuy 'Idwasi muwak anhan eyan inehul mu.' <sup>46</sup> Ey impah tu etan inehul tu et kantuy 'Imay, inum ka et hannak painumidda dama hu kamel mu.' Et uminummak et tu painuman ida kamel ku. <sup>47</sup> Kangkun hi-gatuy 'Hipa amam?' Ey kantuy 'Hi Bethuel hi ama e u-ungngad Nahor nan Milkah.' Et iha-ad ku etan singsing di eleng tu niyadda gelhing di ngamay tu. <sup>48</sup> Et mandukkunnak et dayawen ku hu AP-APU e Dios nan Abraham tep impangulu tuwak et hamaken ku hu biin u-ungngan agitu. <sup>49</sup> Et ya pinhed kun e-helen ey hedin kabbabbal kayun hi-gatu et pinhed yun meki-eppun hi-gatu, ehel yu ma-lat amtaen ku hedin hipa pehding ku."

<sup>50</sup> Ey hinumang di Bethuel nan Laban e kanday “Hi APU DIOS hu nengi-lin hi-gayudya. Et kaw hipa ni e-helen?” <sup>51</sup> Anin ni ikuyug mu hi Rebekah et iahwan u-ungngan kan bega-en ni hi-gam te ay humman hu pinhed APU DIOS.”

<sup>52</sup> Yan nangngelan etan ni bega-en ni nunman ey nandukkun et dayawen tu hi APU DIOS. <sup>53</sup> Et ukaten tudda etan intabin tun gamgan ni balituk niya silber niyadda kakkayyaggud ni balwasin iddawat tun Rebekah. Inukat tudda dama etan nangkinginan iddawat tun inetu et ya agitu. <sup>54</sup> Et han ida law mangan ni emin et mandeyadda etan bega-en et yadda edum tun hanlabbi.

Newa-wa et bumengun ida ey kan etan ni bega-en ey “Imay tu-wa et lumaw kami.” <sup>55</sup> Nem kan di Laban nan hi ineda ey “Entanni ew man et malebah hu hampulun aggew ni panha-adan Rebekah et han mu ikuyug.” <sup>56</sup> Nem kan etan ni bega-en ey “Entan anhan tu taktak hu pambangngadan ku haggud deh e kayyaggud et binaddangan tuwak nan APU DIOS et kayyaggud hu nambalinan ni illian kudya.”

<sup>57</sup> Kanday “Entanni ew tep et ayagan tayu hi Rebekah hedin hipa hu kantu.” <sup>58</sup> Et aygan da hi Rebekah et kanday “Kaw pinhed mun mekillaw eyan tuu?” Ey kantuy “Em, pinhed kun mekillaw.”

<sup>59</sup> Et iebulut da law ni mekillaw hi Rebekah ida etan ni bega-en Abraham. Niya impakilaw da daman Rebekah etan bega-en tun nengipappatek ni hi-gatu meippalpun kaglang tu. <sup>60</sup> Binendisyonan da hi Rebekah e kanday “Mambalin kalli kayan inan kalibulibun tuu. Niya apputen idallin helag mu hu buhul da.”

<sup>61</sup> Et mantakkay di Rebekah niyadda bega-en tud kamel et makilaw ida.

#### *Ya nandammuan di Isaac nan hi Rebekah*

<sup>62</sup> Hi Isaac ey nambelley di Beer Lahai Roi di Negeb. <sup>63</sup> Yan nunman ni mahmahdem ey an nandaddallan hi Isaac ey inang-ang tudda kamel ni iyyalli. <sup>64</sup> Ey inang-ang Rebekah hi Isaac et man-ayuhu etan di kamel. <sup>65</sup> Minahmahan tu etan ni bega-en e kantuy “Hipa eman tuun kamandaddallan ni iyyallin an menammun hi-gatsu?” Kan etan ni bega-en ey “Humman u-ungngan kan bega-en ni hi-gak.” Et manhukuyng hi Rebekah.

<sup>66</sup> Dimmateng hi Isaac et ehelen etan ni bega-en emin hu neipahding. <sup>67</sup> Inewit nan Isaac hi Rebekah etan di nambalyan inetun hi Sarah et man-addum ida. Nekappinhed nan Isaac hi Rebekah et hi-gatu nenga-alluk ni hi-gatun neteyyan inetu.

## 25

#### *Yadda edum ni helag Abraham*

<sup>1</sup> Hi Abraham ey nambintan ni hakey ni bii e hi Keturah hu ngadan tu. Yadda u-ungnga da ey <sup>2</sup> hi Simran, hi Joksan, hi Medan, hi Midian, hi Isbak et hi Suah. <sup>3</sup> Nahlag hi Joksan et di Seba nan Dedan. Nahlag hi Dedan et wadadda Assurim, yadda Letushim niyadda Leummim. <sup>4</sup> Nahlag hi Midian et hi Ephah, hi Epher, hi Hanok, hi Abida et hi Eldaah. Huyyaddan emin hu helag Keturah.

<sup>5</sup> Hi Isaac hu nengipebeltanan Abraham ni emin ni wadan hi-gatu. <sup>6</sup> Nem yan eman ni ketaggu tu ey indawtan tudda dama etan u-ungnga tud edum ni ahwa tu et itu-dak tuddad appit ni kasimmilin aggew e neidawwid kad-an Isaac.

#### *Ya neteyyan niya neikulungan Abraham*

<sup>7-8</sup> Neka-a-amma hi Abraham et matey eman ni hanggatut et nepitu et lima toon tu. <sup>9-10</sup> Et an ikulung idan u-ungnga tu e di Isaac nan Ismael etan di ginatngan Abraham ni leyang nan Eplon e u-ungngan Sohar e Hittite. Yadman dama neikulungan Sarah e ahwatu etan di takdul ni payew di Makpelah e neihnup di Mamre. <sup>11</sup> Entanni ey binendisyonan nan Apu Dios hi Isaac. Ya nambelleyan tu ey yad Beer Lahai Roi.

#### *Yadda helag Ismael*

<sup>12</sup> Huyyadda hu helag Ismael e u-ungngan Abraham nan Hagar e iEgypt e bega-en Sarah: <sup>13</sup> Ya pengulwan ey hi Nebayot et han hi Kedar, hi Adbeel, hi Mibsam, <sup>14</sup> hi Misma, hi Dumah, hi Massa, <sup>15</sup> hi Hadad, hi Tema, hi Jetur, hi Naphis et han hi Kedemah e udidyan. <sup>16</sup> Huyyaddan hampulut dewwan u-ungngan Ismael ey nei-peng idan nan-apud hampulud dewwan bebley ni neingedanan ni ngadan da. <sup>17</sup> Netey hi Ismael eman ni hanggatut et telumpulu et pitu toon tu. <sup>18</sup> Yadda helag tu ey nei-peng idad kebebbley neipalpuud Habilah ingganah di Sur e neihnup di pappeg ni Egypt di appit ni kasimmilin aggew ni mampellaw di Assyria e neappil idad edum ni helag Abraham.

#### *Ya neiungngaan di Esau nan Jacob*

<sup>19</sup> Huyyadda hu nekapkapyad biyag nan hi Isaac e u-ungngan Abraham. <sup>20</sup> Hi Isaac ey na-pat hu toon tun nan-ahwaan Rebekah e agin Laban niya u-ungngan Bethuel e

iAramea di Paddan Aram di Mesopotamia. <sup>21</sup> Dimmasadasal hi Isaac nan APU DIOS tep eleg pakeungnga hi Rebekah. Entanniy dingngel APU DIOS hu dasal tu et mambutsug hi Rebekah. <sup>22</sup> Ya etan imbutsug tu ey nandupi-il ey ida kaumbenultung di egeh tu. Et mandasal nan APU DIOS e kantuy “Kele henin nunya kameipahpahding ni hi-gak?” <sup>23</sup> Ey kan APU DIOS ni hi-gatuy “Huttan idan nandupi-il ni imbutsug mu ey mambalin idallin dewwan et-eteng ni bebley. E-etteng ali kabaelan ni hakey. Ya etan memengngulu ey mambalin ni bega-en ali etan ni meihned.” \*

<sup>24</sup> Nedatngan hu pan-ungnga tu ey makulug tu-wangun nandupi-il u-ungnga tu. <sup>25</sup> Ya nemangulun neukat ey makaddalang belat tu niya nekabwekan emin annel tu et ingadnan dan hi Esau. <sup>26</sup> Ya etan neihayned ni neukat ey inhammad tun intenged di dapan nan Esau et ingadnan dan hi Jacob. Na-nem hu toon nan Isaac ni neiungnga idan nunyan nandupi-il ni u-ungnga tu.

*Ya nengiwallengan nan Esau ni kelebengan tun pengulwan*  
(Hebrews 12:16)

<sup>27</sup> Yan nehiknan da ey nambalin hi Esau ni madweng e yad muyung hu tuka lallawwi. Hedin hi Jacob ey pinpinhed tun manha-ad di baley da. <sup>28</sup> Hi Isaac ey pinpinhed tu hi Esau tep ya tuka i-anemut ni tuka dedwengan tuka ihhida. Nem hi Rebekah ey hi Jacob hu pinpinhed tu.

<sup>29</sup> Hakey ni aggew e kamene-eng hi Jacob ni ihhida ey dimmateng hi Esau ni nalpud muyung ey neka-upa. <sup>30</sup> Kan Esau nan Jacob ey “Idwasi muwak eyan madlang ni kenen ni inhaeng mu et kuman nak tep neka-upa-ak.” (Et ingadnan da hi Esau ni Edom. Ya hu keibbellinan ni Edom ey madlang.) <sup>31</sup> Kan Jacob ey “Dammutu, nem pakaw ni iddawat mun hi-gak hu kelebengan mun pengulwan.” <sup>32</sup> Kan Esau ey “Ku anin! Kaw hipa silbin kelebengan hedin mettey yak ni upak?” <sup>33</sup> Kan Jacob ey “Pansapatah ka ni e iddawat mun hi-gak hu kelebengan mu et han daka idwasi.”

Et mansapatah hi Esau e idwat tu hu kelebengan tu. <sup>34</sup> Indawat nan Jacob etan kenen nan Esau et kanen tu et manglaw mewan. Humman ni impahding Esau ey impeang-ang tu e eleg tun hekey ibbilang etan kelebengan tun pengulwan.

## 26

*Ya nambebleyan di Isaac di Gerar*

<sup>1</sup> Entanni ey wada mewan hu bisil e heni la etan ni bisil ni ketaggun Abraham et lumaw hi Isaac di bebley di Gerar di bebley nan Abimelek e patul di Pilistia. <sup>2</sup> Nampeang-ang hi APU DIOS nan hi Isaac et kantuy “Entan elaw di Egypt, nem pannaneng kayu etan di ittuduk ni panha-adan yu. <sup>3</sup> U-unnud mu et manha-ad kayudya, et ipapte dakan hi-gak ni ingganah niya bendisyonan daka. Iddawat kun hi-gam niyadda helag mu eya puyek niya peamuk hu insapatah ku lan amam e hi Abraham. <sup>4</sup> Iddawtan dakan dakel ni helag mun henin kadinakkel ni bittuwen e eleg mebillang. Bendisyonan kuddalli emin tuud puyek gapuh idan helag mu. <sup>5</sup> Mukun henin nunman hu pehding kulli ey tep inu-unnud Abraham ni emin hu tugun ku.” <sup>6</sup> Et yadman law di Gerar hu nambebleyan di Isaac.

<sup>7</sup> Hedin minahmahan idan tuu meippanggep nan Rebekah, kan Isaac ey han-agidda. Kaumtakut ni menghel ni han-ahwadda tep entanniy petteyen da ma-lat piliwen da hi Rebekah tep kat-agun peteg.

<sup>8</sup> Nem entanni ey inuhungan Abimelek di habhabyen ni baley tu hi Isaac e tuka ak-akwala hi Rebekah. <sup>9</sup> Et paeyag Abimelek hi Isaac et kantuy “Tam ahwam gayam hi Rebekah. Kele kammuy hi agim?” Et kan Isaac ey “Tep kangkuy entanni ey wada memettey ni hi-gak ma-lat piliwen da hi Rebekah.” <sup>10</sup> Kan Abimelek ey “Hipu huyyan impahding mun hi-gami? Gullat ni wada hu lakidyan nengiuilig nan Rebekah, hi-gam et dedan hu umhulun ni pambehhulan mi.”

<sup>11</sup> Et peamta tuddan tuu tu e hedin wada mengippahding ni lawah di Isaac nan Rebekah, man pepettey tu.

*Ya kinedangyanan Isaac*

<sup>12</sup> Yan nunman ni toon ni nanleyakan hi Isaac ey dakel ni peteg hu ineni tu tep binendisyonan APU DIOS. <sup>13</sup> Et kumedangyan hi Isaac, ey tagan tu pay hu kedangyan. <sup>14</sup> Hantapug hu kalneroh tu, yadda baka niyadda bega-en tu. Et humman hu, kakeemmehiddan iPilistia. <sup>15</sup> Et da tababen ni emin hu hibuy ni impeku-ku lan ametu e hi Abraham.

\* 25:23 25:23 Romans 9:10-12

<sup>16</sup> Lektattuy kan Abimelek nan Isaac ey “A-allaw ka eyad bebley mi tep ay nambalin kumedek ni e-etteng ni peteg hu kabaelan mu nem hi-gami.” <sup>17</sup> Et ma-kal di Isaac diman et ida mambebley di Nedeklan e Gerar. <sup>18</sup> Et peku-ku mewan nan Isaac ni emin hu hibuy ni impeku-ku lan ametu. Humman idan hibuy ey sinebab idan iPilistia ni neteyyan ametu. Impannaneng tu hu impangngadan lan ametuddan nunman idan hibuy. <sup>19</sup> Et kumu-kudda mewan etan bega-en Isaac ni hibuy ey pintek da wada hu danum tu. <sup>20</sup> Nem immalidda kamampattul ni iGerar et ida kamekittuttut idan bega-en nan Isaac e kanday danum da kunu humman. Et ingadnan Isaac humman ni hibuy ni ‘Kapantututusi.’ <sup>21</sup> Nengu-kudda mewan etan bega-en Isaac di a-allaw tu ey hanniman mewan e nambabakalan da et ingadnan tun hibuy ni ‘Kapambabakali.’ <sup>22</sup> Hini-yan da humman et mampeku-ku mewan hi Isaac ni hakey ni hibuy ey eleg law pilliwaddan bimbebley. Et ingadnan tu humman ni hibuy ni Rehobot, e ya keibbellinan tu ey ‘Hibuy ni wada linggep.’ Tep kan Isaac ey “In-abulut APU DIOS ni manha-ad itsudya et yumaggud ali hu biyag tayu.”

<sup>23</sup> Entanni ey nan-aldan di Isaac di Beersheba. <sup>24</sup> Yan nunman ni hileng ni dinatngan da, ey nampeang-ang hi APU DIOS nan Isaac et kantuy “Hi-gak hu Dios amam e hi Abraham. Entan takut mu tep ippaptek daka et bendisyonan daka et idawtan dakan dake ni helag mu tep huyya insapatah ku lan bega-en ku e hi Abraham.” <sup>25</sup> Et mengapya hi Isaac ni pan-appitan et dayawen tu hi APU DIOS. Et mangkampu idadman et mengu-kudda etan bega-en tun hibuy.

<sup>26</sup> Hakey ni aggew ey dimmateng hi Abimelek e patul, hi Ahussat e konsihal tu et hi Picol e ap-apun sindalu tun nalpud Gerar. <sup>27</sup> Kan Isaac ni hi-gaday “Kele kayu immali ey yan nunman ey anggebe-hel yuwak et degyunen yuwak?” <sup>28</sup> Kanday “Immali kami tep inamta mi law e daka kapakabbaddangin APU DIOS. Et humman hu, pinhed min mekitbal ni hi-gam ma-lat mandadagyum itu. <sup>29</sup> Iuhummangan tayu e endi mu pehdng ni hi-gamin lawah, henin impahding min hi-gam ni neni-yanam ni hi-gami e endi mi impahding ni lawah. Et deh e binendisyonan dakan APU DIOS.”

<sup>30</sup> Et mampedaddan hi Isaac ni kenen da et mangan ida niya nengi-innum ida. <sup>31</sup> Yan newa-waan tun binangunan da, ey nansapatah ida e endi da ippahding ni lawah di hanhakkey ni hi-gada. Negibbuh humman et umenamut di Abimelek e melinggep ida tep nanggagayyum ida law.

<sup>32</sup> Yan nunman ni aggew, ey immanemut ida bega-en nan Isaac et ehlen da e wada danum etan di hibuy ni kinu-kuan da. <sup>33</sup> Et ingadnan Isaac humman ni hibuy ni Sibah e ya keibbellinan tu ey nansapatahan. Et humman hu, nengal-an dan nunman ni ngadan ni Beersheba.

<sup>34</sup> Yan na-pat hu toon nan Esau, ey inahwa tu dewwan biin Hittite e hi Judith e u-unggan Beeri et hi Basemat e u-unggan Elon. <sup>35</sup> Nem huyyaddan ahwan Esau ey daka pedgeh hu nemnem di Isaac nan Rebekah.

## 27

### *Binendisyonan Isaac hi Jacob*

<sup>1</sup> Yan nea-ammaan nan Isaac e eleg tu law han-ang-ang ey impaeyag tu hi Esau e pengulwan ni u-ungnga tu. Immali hi Esau et kantuy “Kela e ama?” <sup>2</sup> Kan Isaac ey “Deh e nea-amma-ak law et endilli maptek ey metteyyak. <sup>3</sup> Alam etan panam et ka mandeweng. <sup>4</sup> Pinhed ku etan muka pene-eng ni mepelhat. Iheeng mu et i-lim et hedn negibbuhhak ni nengan ey e-helen ku hu bendisyon kun hi-gam et hannak matey.”

<sup>5</sup> Nem dingngel Rebekah humman ni inhel nan Isaac nan hi Esau. Et yan linawwan Esau ni an mandedweng ey <sup>6-7</sup> kan Rebekah nan Jacob ey “Dingngel ku inhel amam nan agim e hi Esau e an mandedweng ni pehidda tun hi-gatu. Et hedn negibbuh ni nengan ey bendisyonan tud hinanggan APU DIOS et han matey. <sup>8</sup> Et humman hu, u-unnud mu eya e-helen kun hi-gam. <sup>9</sup> Pengin-eellaw kallid halun tayu et ka umlan dewwan mateban impah ni gelding et iheeng kun pinpinhed amam ni pene-eng. <sup>10</sup> Illaw mun hi-gatu et hedn nengan, ey hi-gam hu bendisyonan tu et han matey.”

<sup>11</sup> Nem kan Jacob nan inetuy “Nem tam nakabwekan hu annel Esau ey malinah ngu belat ku. <sup>12</sup> Inna-nu hedn keppean tuwak et amtaen tu e bekennak hi Esau? Penghel tuy nakka he-uhe-ula et hamban tuwak kabendisyon ey idduan da-ak kumedek.” <sup>13</sup> Kan inetuy “Hedn amtaen tu, anin ew ni hi-gak hu keillawan ni idut tu. Elaw ka kuma et kalli umlan gelding.”

<sup>14</sup> Et u-unnud nan Jacob hu inhel nan inetu et an ali umlan dewwan impah ni gelding et iheeng inetu etan ni pinpinhed nan ametun kapene-eng. <sup>15</sup> Inlan inetu hu kekakkayyaggudan ni intatalu tun balwasin Esau et pebalwasi tun Jacob. <sup>16</sup> Et ikapyaan

tun nedutdutan ni belat ni gelding ni ihhuklub tud ngamay tu, anin di tengda tu. <sup>17</sup> Et idwat tun Jacob etan meheng-ew ni ihhida niya sinapay ni kinapya tu.

<sup>18</sup> Inlaw Jacob nan ametu et kantuy "Ama." Kan ametuy "Uh, hipa ka? Kaw hi-gam hi Esau winu hi Jacob?" <sup>19</sup> Kan Jacob ey "Hi-gak hi Esau e pengulwan ni u-ungngam. Inu-unnud ku hu kammu. Bangun ka et mangan ka et bendisyonan muwak."

<sup>20</sup> Kan Isaac ey "Kele kuma anggagannuy wada dinweng mu e u-ungngak?" Kan Jacob ey "Tep binaddangan tuwak nan APU DIOS e muka deyyawa." <sup>21</sup> Ey kan Isaac ey "Ikay dih et kap-en daka hedini makulug ni hi-gam hi Esau."

<sup>22</sup> Et meihnup hi Jacob et kap-en nan ametu ey kantuy "Ehel nan Jacob eya ehel mu, nem ngamay nan Esau eya ngamay mu." <sup>23</sup> Eleg tu immatunan hi Jacob tep nakabwekan ngamay tu e henin ngamay Esau. Et bendisyonan tu, <sup>24</sup> nem impidwa tun imbaga e kantuy "Kaw makulug ni hi-gam hi Esau?" Kan Jacob ey "Em, hi-gak."

<sup>25</sup> Kan ametuy "I-lim etan dinweng mu et ihidak et han daka bendisyonani." Indawat Jacob etan kennen et mangan hi ametu. Et idwatan tun innumen tu.

<sup>26</sup> Kan ametu hi Isaac ni hi-gatuy "Keihnup ka et akwalen muwak e u-ungngak." <sup>27</sup> Inakwal Jacob hi ametu ey hinemuy nan ametu etan imbalwasi tu et bendisyonan tu. Kantuy

"Ya hamuy ni u-ungngak ey heni hamuy ni payew ni binendisyonan APU DIOS. <sup>28</sup> Peellin Apu Dios ali udan di payew mu niya peyaggud tu iggad mu ma-lat dakel ali enniem niya dakel ali innumem. <sup>29</sup> Pambega-en muddalli tuud kebebhebley niya hi-gam ali tengngawen dan ap-apu da. Anin idallin agim ni u-ungan inam et hi-gam hu pan-ap-apu da. Meiddutan idalli hu mengiddut ni hi-gam niya mebendisyonan ida memendisyon ni hi-gam."

<sup>30</sup> Negibbuh humman et umhep hi Jacob ey dimmateng hi Esau ni an nandeweng. <sup>31</sup> Indaddan tu dama hu pinpinhed nan ametu ihhida et ilaw tud kad-an tu et kantuy "Ama, bangun ka et mangan ka et ihidak eya inhaeng ku et han muwak bendisyonani."

<sup>32</sup> Kan Isaac ey "Kaw hipa ka?" Kan Esau ey "Tam hi-gak hi Esau e pengulwan ni u-ungngam."

<sup>33</sup> Dingngel Isaac humman ey kamanggegeygey. Kantuy "Hipattep la etan nengilin detag ni kinan kun nuntan et han ka umli? Hi-gatu kumedek hu binendisyonan ku. Humman man ahan ni bendisyon ey eleg mabalin ni an bangngaden." <sup>34</sup> Inhel nan ametu humman ey kamantete-ul hi Esau e kantuy "Ama, anin anhan nem bendisyonani muwak dama."

<sup>35</sup> Nem kan ametuy "Immali la hi agim et haulen tuwak et piliwen tu bendisyon mu."

<sup>36</sup> Kan Esau ey "Huyya pidwa tun nenaulan tuwak ni hi-gatu. Ambuley hi Jacob hu ngadan tu. Yan laputu, ey illa tu kelebengan kun pengulwan. Et ya man nunya ey piniliw tu bendisyon ku. Kaw endi law ni hekey hu ibendisyon mun hi-gak?"

<sup>37</sup> Kan ametuy "Endi law nak pehding tep ay impambalin kun hi-gatu hu pan-apu yu. Emin kayun han-aaggi ey impambalin kun pambega-en dakeyun hi-gatu. Binendisyonan kun dakel ni kennen niya meinum. Et humman hu, endi law hu iddawat kun hi-gam e u-ungngak." <sup>38</sup> Nem kamampehemhemmek hi Esau e kantuy "Kaw ebuh humman ni bendisyon mu? Bendisyonni muwak anhan dama." Ey nemahhig mewan hu nangih tu. \*

<sup>39</sup> Et kan ametuy "Nelihat ali pambiyagam tep ya puyek ni panha-adam ey beken ni kayyaggud ni pantennemam niya endilli udan di panha-adam. <sup>40</sup> Et humman hu, ya apputen mud pekiggubbatan mu hu pengellaam ni biyag mu. Mambalin kan bega-en nan agim, nem ngenghayen muli ma-lat eleg ka mannananeng ni bega-en tu."

<sup>41</sup> Et meippalpun nunman ey anggebe-hel law nan Esau hi Jacob tep piniliw tu hu bendisyon tu. Kantud nemnem tuy "Petteyek ali hi Jacob hedini mettey hi ama."

<sup>42</sup> Dingngel Rebekah humman ni planuh Esau et paeyag tu hi Jacob et kantun hi-gatuy "Deh e pinhed dakan petteyen nan agim hi Esau ma-lat ibleh tu impahding mu. <sup>43</sup> Et humman hu, dengel mu eya e-helen kun pehding mu. Besik kad Haran di kad-an nan pengemnaan mu e hi Laban. <sup>44</sup> Et yadman ni panha-adan mu ingganah me-kal hu bungen nan agim. <sup>45</sup> Et hannak ali umitu-dak ni mengeyyag ni hi-gam hedini liwwanan tu hu impahding mu. Tep eggak pinhed ni kayu mampettey et mandihhan kayun mettey ni hakey ni aggew."

<sup>46</sup> Hakey ni aggew ey kan Rebekah nan Isaac ey "Impeinglay ku eyadda Hittite ni ahwan Esau. Heballi ew metteyyak hedini mengahwa dama hi Jacob ni biin Hittite."

\* 27:38 27:38 Hebrews 12:17



## 28

*Ya nengitu-dakan Isaac nan Jacob di Mesopotamia*

<sup>1</sup> Et paeyag nan Isaac hi Jacob et bendisyonan tu et kantun hi-gatuy “Entan pengahwan biidy. <sup>2</sup> Lakkay di Paddan Aram di Mesopotamia di baley apum e hi Bethuel et ahwaen mu etan hakey ni u-ungngan pengemmaam e hi Laban. <sup>3</sup> Bendisyonan daka kaya nan Apu Dios e Kabaelan tun emin ey iddawtan dakallin dakel ni helag mu et hi-gam ali pan-ammed ni dakel ni tuu. <sup>4</sup> Bendisyonan dakan Apu Dios niyadda helag mun henin nemendisyonan tun apum e hi Abraham. Ey hi-gayulli kampuyek eyan indawat Apu Dios nan Abraham ni nekibebleyan tayu.” <sup>5</sup> Et itu-dak nan Isaac hi Jacob di Paddan Aram di Mesopotamia di baley nan hi pengemmaan tu e hi Laban e agin inetu e u-ungngan Bethuel e iAramea.

<sup>6-8</sup> Neamtaan nan Esau e binendisyonan ametu hi Jacob et han tu palaw di Mesopotamia ma-lat yadman hu pengahwaan tu et beken hu iKanaan ni i-ahwa tu. Niya inamta tu e inu-unnud Jacob di ametun inetu et lumaw di Mesopotamia. Et awatan tu law e eleg pinhed ametu hu bibi-in iKanaan. <sup>9</sup> Et lumaw hi Esau di bebley nan pengemmaan tu e hi Ismael et ahwaen tu hi Mahalat e agin Nebayot e u-ungngan Ismael e u-ungngan Abraham.

<sup>10</sup> Hi Jacob ey hini-yan tu hu Beersheba et lumaw di Haran. <sup>11</sup> Nehilngan di dalan et mangkampu. Et umlan batun pengi-ippingan tu et maugip. <sup>12</sup> Entannit neuyeng ey ini-innep tu e wada teyey ni dinteng tu kabunyan. Ey inang-ang tudda anghel nan Apu Dios e nanteyed ida ni nandayyudda etan di teyey. <sup>13</sup> Ey wada hi APU DIOS e immehngeng di ta-pew ni teyey e kantuy “Hi-gak hu AP-APU e Dios ni dinaydayaw nan apum e hi Abraham ni hi amam e hi Isaac. Iddawat kun hi-gam et yadda helag mu eya puyek ni muka pambakbaktadi. <sup>14</sup> Dakel ali helag mu e heniddalli dep-ul e eleg mebillang et meihhinnap idallid kebebbebley di puyek. Ey emin ali tuud kebebbebley di puyek ey bendisyonan kudda gapun hi-gam niyadda helag mu. <sup>15</sup> Ey emin di lawwan mu ey wada-ak ni mengippatek ni hi-gam niya hi-gak hu ngenamung ni mengibbanggad ni hi-gam eyad bebley. Eleg daka e-way, nem peamnuk emin eya impakulug kun hi-gam.”

<sup>16-17</sup> Bimmangun hi Jacob ey simmakut et kantuy “Tam wada gayam hi APU DIOS di deya ey eleg ku amta! Angetakkut di deya! Huyya na-mu hu baley Apu Dios e habyen ni umlaw di kabunyan.”

<sup>18</sup> Bimmangun ni dagah ni newa-waan tu et alen tu batun impungan tu et peehngeng tu et penginnemneman tun Apu Dios et duyagan tun lana. <sup>19</sup> Inngadnan tu humman ni Bethel, nem ya ngadan tu dedan ni nunman ey Lus.

<sup>20</sup> Et isapatah Jacob e kantuy “APU DIOS, hedin itutuluy mun mekikkillalw ni hi-gak di lawwan ku niya ippatek muwak et idwat mun emin hu kahapulan ku, henin kennen niya balwasik, <sup>21</sup> et kayyaggud hu pambangngadak di baley ama, man hi-gam e AP-APU hu deyyawen kun Dios ku. <sup>22</sup> Ey mambalin eya nengipeehngengan kun batun pandeyyawan ni hi-gam. Niya emin ali hu iddawt mun hi-gak ey pebangngad kun hi-gam hu kapulu tu.”

## 29

*Ya dintengan Jacob di baley Laban*

<sup>1</sup> Et dimangnglaw hi Jacob ey dimmateng di bebley di appit ni kasimmilin aggew <sup>2</sup> Entanni ey inang-ang tu hu hibuy di pattullan. Wadaddadman hu nantelu-an ni neamung ni kalneroh ni kamanluklukbub di nanlinikweh di hibuy tep yadman daka innumi. Nem immen hu et-eteng ni batun neihu-let etan di hibuy. <sup>3</sup> Hedin neamung idan emin kalneroh ey han ginlid idan kamampattul etan batu ma-lat uminum ida. Hedin negibbuh ni imminum ida, impebangngad da mewan etan batu.

<sup>4</sup> Hinnup nan Jacob ida etan kamampattul ni kalneroh et kantun hi-gaday “Hi-gayuddan agik, attu bebley yu?” Kanday “Yad Haran.”

<sup>5</sup> Kan Jacob ey “Kaw inamta yu hi Laban e u-ungngan Nahor?” Ey kanday “Tam em.”

<sup>6</sup> Kan Jacob ey “Inna-nun biyag tu?” Kanday “Kayyaggud. Mundeh ali hi Rachel e u-ungnga tu e impangulu tu hu kalneroh ametu.”

<sup>7</sup> Kan Jacob ey “Kele eleg yudda peinnumi eya kalneroh et yu pay ipattul ida haggud ba-ba ni kehillangan tu?” <sup>8</sup> Kanday “Eleg mi ni peinnumidda ingganah ni wadaddan emin hu kalneroh di deya et han mi gelida eya batun neihu-let di hibuy et painuman midan emin.”

\* 28:15 28:15 Hebrews 13:5

<sup>9</sup> Ida kaum-enungbal ey nandammuan tun dimmateng hi Rachel niyadda etan taka ippattul ni kalneroh ametu. <sup>10</sup> Inang-ang Jacob hi Rachel e u-ungngan pengemmaan tu niyadda etan kalneroh ametu ey limmaw et tu ekalen etan batun neihu-let di hibuy et painuman tudda etan kalneroh nan pengemmaan tu. <sup>11-12</sup> Et kan tun Rachel ey “Hi-gak hu u-ungngan Rebekah e agin amam.” Et akwalen tu hi Rachel ey kamannengngih ni amleng tu. Et mambesik hi Rachel di baley da et tu ehlen nan ametu.

<sup>13</sup> Dingngel Laban e wada etan pengungngaan tu ey impapuut tu et tu dammuen. Inakwal tu et ikuyug tud baley da. Et e-ehhelen nan Jacob emin hu neipahding. <sup>14</sup> Kan Laban ey “Makulug ni han-ama ita.”

*Ya neneklaan Jacob di Rachel nan hi Leah et ahwaen tudda*

Nekiha-ad hi Jacob ni hambulan diman <sup>15</sup> et hakey ni aggew ey kan Laban ni hi-gatuy “Ambeken ni gapu tep pengungngaan daka ey eleg daka tangdani. Piga pinhed mun penangndan kun hi-gam?”

<sup>16</sup> Hi Laban ey wada dewwan u-ungnga tun bii, hi Leah hu pengulwan ey hi Rachel hu neihned. <sup>17</sup> Kakkayyaggud hu matan Leah, nem hi Rachel ey kakkayyaggud hu impengannet tu niya kat-agun peteg.

<sup>18</sup> Hi Jacob ey pinpinhed tu hi Rachel. Et humman hu, kantun Laban ey “Ingngunwan dakan pitun toon hedin i-abulut mun ahwaen ku hi Rachel.” <sup>19</sup> Kan Laban ey “Dammutu. Heballi hi-gam hu mengi-ahwan hi-gatu nem ya edum ni beken ni nalpud pewen tayu. Et humman hu, kayyaggud hedin di deya itsu.”

<sup>20</sup> Et mangngunun pitun toon hi Jacob ma-lat iahwa tu hi Rachel. Nem heni pigan aggew ni ebuh ni hi-gatu tep nakappinhed tu hi Rachel.

<sup>21</sup> Negibbuh humman ni pitun toon et kan Jacob nan Laban ey “Ahwaen ku law hi Rachel haggud negibbuh law hu insapatah kun toon ni pangngunuan kun hi-gam.”

<sup>22</sup> Et mandaddan hi Laban et aygan tudda tutu-u et manhahamul idan pan-ahwaan di Jacob nan Rachel. <sup>23</sup> Nem yan nunman ni hileng ey hi Leah kumedek hu impeahwan Laban ni hi-gatu. <sup>24</sup> Wada indawat nan Laban nan hi Leah ni hakey ni biin pambega-en tu e hi Silpah hu ngadan tu.

<sup>25</sup> Yan newa-waan tu ey inimmatunan nan Jacob e hi Leah hu nekiulig tu et kantun Laban ey “Hipa huyyan mu impahding ni hi-gak! Ingngunwan dakan pitun toon ma-lat ahwaen ku hi Rachel, ey kele muwak hineul?” <sup>26</sup> Ey kan Laban ey “Tep ya elaw mi ey beken ni ya udidyan hu memengngulun mengahwa. <sup>27</sup> Nem anin, heged mu hanlingguan eyan nan-ahwaan yu et dammutun i-ahwam hi Rachel. Nem mahapul ni ingngunwan muwak pay ni pitun toon.”

<sup>28</sup> Inebulut Jacob et malebah humman ni hanlingguan et han peahwan Laban hi Rachel ni hi-gatu. <sup>29</sup> Et idwat daman Laban hu hakey ni pambega-en nan Rachel e hi Bilhah hu ngadan tu. <sup>30</sup> Et iulig nan Jacob hi Rachel ey pinpinhed tu nem hi Leah. Et ingunwan tu pay hi Laban ni pitun toon.

*Yadda etan u-ungngan Jacob*

<sup>31</sup> Yan nenang-angan APU DIOS e pinpinhed nan Jacob hi Rachel nem hi Leah ey in-abulut tun mambutsug hi Leah. Nem eleg tu iebulut ni mewedda u-ungngan Rachel. <sup>32</sup> Et man-ungnga hi Leah ey laki. Et kantuy “Inang-ang APU DIOS hu degeh ni nemnem ku, et yan nunya ey pinheden tuwak law ni ahwak.” Et ngadnan tu etan u-ungnga tun hi Reuben.

<sup>33</sup> Entanni ey nambutsug mewan et man-ungnga ey laki mewan. Et kantuy “Inamtan APU DIOS e eleg tuwak pinhed ni ahwak et idwatan tuwak ni hakey mewan ni u-ungngak.” Et ingadnan tun hi Simeon.

<sup>34</sup> Nambutsug mewan et man-ungnga ey laki mewan. Et kantuy “Wada-et ni pekappinheden tuwak law ni ahwak tep ay tellu law u-ungnga min laki.” Et ingadnan tun hi Levi.

<sup>35</sup> Nambutsug mewan et man-ungnga ey laki mewan. Kantuy “Deyyawen ku law hi APU DIOS.” Et ngadnan tun Judah. Ey eleg law man-ungnga.

## 30

<sup>1</sup> Nem hi Rachel ey endi ngu u-ungnga tu. Et humman hu, kaum-ameh nan hi agitu hi Leah. Kantun Jacob ey “Idwasi muwak daman u-ungngak tep hedin endi, man heballi ew mettey yak.” <sup>2</sup> Bimmunget hi Jacob et kantuy “Kaw hi-gak hi APU DIOS? Hi-gatun ebuh hu dammutun mengi-ebbulut ni mewedda u-ungngam, beken nak.”

<sup>3</sup> Et kan Rachel nan Jacob ey “Anin iulig mu ew ya bega-en kun hi Bilhah ma-lat hedin wada u-ungnga yu, ey meibillang ni u-ungnga ta.” <sup>4</sup> Inebulut Jacob et iulig tu hi Bilhah. <sup>5</sup> Nambutsug hi Bilhah et man-ungnga ey laki.

<sup>6</sup> Inngadnan Rachel ni hi Dan tep kantuy “Impeang-ang Apu Dios e hi-gak hu lebbeng tun kan ahwan nan hi Jacob. Et humman hu, dingngel tu hu dasal kun hi-gatu et idwat tu huyyan u-ungngak ni laki.”

<sup>7-8</sup> Entanni ey nambutsug mewan hi Bilhah et man-ungnga ey laki mewan. Et ngadanan Rachel ni Naptali, tep kantuy “Impenatnan agik ni pilliwen hu ahwak, nem inaput ku.”

<sup>9</sup> Inamtan Leah e eleg law man-ungnga et iebulut tu hi Silpah e bega-en tun i-ulig Jacob. <sup>10</sup> Nambutsug hi Silpah et man-ungnga ey laki. <sup>11</sup> Et ngadanan Leah ni Gad, tep kantuy “Negahat tak tep wada mewan hakey ni u-ungngak.”

<sup>12</sup> Nan-ungnga mewan hi Silpah ey laki mewan. <sup>13</sup> Et ngadanan Leah ni Asher tep kantuy “Nakka man-am-amleng ni peteg! E-helen idallin edum ni bii e nakka man-am-amleng.”

<sup>14</sup> Hakey ni aggew ni ahiani ey wada himmak nan Reuben di payew ni mandrake e kameitnem et ienamut tun inetu hi Leah. Kan Rachel nan Leah ey “Idwasi muwak anhan eyan in-anemut ni u-ungngam.” <sup>15</sup> Nem kan Leah ey “Deh dedangngu e piniliw mu ahwak, ey mu mewan pilliwen eya himmak ni u-ungngak?” Nem kan Rachel ey “Idwasi muwak et hi-gam hu meki-ullig nan ahwak ni hileng.”

<sup>16</sup> Yan mahmahdem ni nunman e iyalli hi Jacob ni nalpud payew ey an dinamman Leah et kantuy “Man-ullig itan hileng tep binaydan dakan mandrake ni himmak ni u-ungngak.” Et man-ulig idan nunman ni hileng.

<sup>17</sup> Ey dingngel nan Apu Dios hu dasal Leah et mambutsug et man-ungngan laki et humman hu meikkelliman u-ungnga tu. <sup>18</sup> Et ngadanan Leah ni Issakar tep kantuy “Huyyan u-ungnga hu gungunah kun indawat Apu Dios tep in-abulut ku bega-en kun i-ulig ni ahwak.”

<sup>19</sup> Entanni mewan ey nambutsug hi Leah et man-ungnga ey laki et humman hu meikka-nem. <sup>20</sup> Et ngadanan Leah ni Sebulun tep kantuy “Bendisyonan tuwak nan Apu Dios. Wadan pinhedan tuwak law ni ahwak, tep enem hu u-ungnga min laki.”

<sup>21</sup> Entanni ey nambutsug mewan et man-ungnga ey bii et ngadanan tun hi Dinah.

<sup>22</sup> Entanni ey ninemnem nan Apu Dios hi Rachel et iebulut tun meweddaan ni u-ungnga tu. <sup>23</sup> Nambutsug et man-ungnga ey laki. Kantuy “Kayyaggud anhan et indawtan tuwak Apu Dios ni u-ungngak et eleg da-ak law pipihulladan tuu.” <sup>24</sup> Et ngadanan tun Joseph tep kantuy “Hamban anhan iddawtan tuwak pay nan APU DIOS ni hakey ni u-ungngak ni laki ey.”

<sup>25</sup> Yan eman ni neiuungnaan nan Joseph ey kan Jacob nan Laban ey “Iebulut mu et mambangngad dak law di bebley mi. <sup>26</sup> Ey iebulut mu et ikuyug kudda eya ahwak niyadda eya u-ungngak haggud deh e nakatteklak ida. Ey inamtam et nemahhig hu impangngunuk ni impangunum ni hi-gak.” <sup>27</sup> Kan Laban ni hi-gaty “Entan tuwak hi-yan tep kan etan ni madiba ey indawtan tuwak nan APU DIOS ni panyaggudak gapun hi-gam. <sup>28</sup> Ehel mun hi-gak hedid piga pinhed mun tangdan mu et humman iddawtan ku.”

<sup>29</sup> Kan Jacob ey “Inamtam hu impahding kun nengingunungunun impangunum ni hi-gak ni pigan toon, et deh e dimmakkel hu halun mu tep impenaptek ku. <sup>30</sup> Tep makulug ni hahhakkey la hu halun mun inlian ku. Nem yan nunya ey dimmakkel law ni peteg. Binendisyonan dakan APU DIOS gapuh ni hi-gak. Et yan nunya ey mahapul ni ya familyah ku dama law hu hengnguden ku.”

<sup>31-32</sup> Kan Laban ey “Hipa nisi pinhed mun ittangdan kun hi-gam?” Hinumang nan Jacob e kantuy “Eggak pinhed ni tangdanan muwak. Ittuluy kun mengippaptek ni halun mu hedid ebbuluten mu eya e-helen ku. Iebulut mu et nak appilen ni emin etan nangkebatekan ni kalneroh niya gelding niyadda andeket ni impah ni kalneroh mu et anin humman hu tangdan ku. <sup>33</sup> Et edum alin aggew ey meang-ang e endi nak piniliw ni animal mu. Et hedid wadalli hu hemmakan mun kalneroh niya gelding ni beken ni nebalitan niya beken ni andeket ni impah ni kalneroh di halun ku, ey amtam e sinekew ku humman ni hi-gam.” <sup>34</sup> Kan Laban ey “Dammutu, ebbuluten ku huttan ni kammu.”

<sup>35</sup> Nem yan nunman ni aggew ey limmaw hi Laban et tu appilen ida etan nangkebatekan ni kalneroh niya gelding niyadda andeket ni impah ni kalneroh et pepaptek tuddan u-ungnga tu. <sup>36</sup> Et ilaw tuddad neidawwi e nandalan ni tellun aggew. Et yadda natdaan hu impapaptek Laban nan Jacob.

<sup>37</sup> Nem ya impahding Jacob ey immalan pangan nambakbaklang ni keyew et wihwihan tu hanna-kut ni ukih da ma-lat meang-ang hu mablah. <sup>38</sup> Et tu pan-iha-ad e inhangga tu etan di innumman idan gelding niya kalneroh ma-lat hedid um-aliddan um-inum e yan nunman hu daka pan-in-eenduli ey ang-angen da humman ni tu inha-ad. <sup>39</sup> Et hedid man-impah ida ey nangkebalitan niya nangkebatekan hu i-impah da.

<sup>40</sup> Beken ni ebuh humman ni impahding Jacob, nem inappil tudda labah ni halun nan Laban. Et peendul tuddad andeket ni lakkitud halun tu. Henin nunya nedakkelan ni halun Jacob, nem eleg ma-duman hu halun Laban.

<sup>41</sup> Hedin ida kaman-in-eendul etan ida animal ni endi degeh tu, ey kapehanggan Jacob etan winihwihan tuddan keyew di hinangngab etan di innumman da. <sup>42</sup> Nem eleg tu ippahding humman etan di nangkepigut. Et lektattuy kakkayyaggud ni emin hu halun tu e endi degeh da. Nem hedin yadda halun Laban ey nangkepigut ida. <sup>43</sup> Et ya nambalinalan tu ey kimmedangyan hi Jacob. Dakel hu halun tu, ya bega-en tu, ya kamel tu niya kebayyu tu.

## 31

*Ya binsikan Jacob et hi-yanen tu hi Laban*

<sup>1</sup> Dingngel Jacob e ida kamanlillih ida etan u-ungngan Laban e kanday "Illan Jacob ni emin hu kinedangyan ametayu et deh e kimmedangyan." <sup>2</sup> Anin ni hi Laban et wada kaiggibek nan Jacob ni el-eleg ni tuka pehding ni hi-gatu e beken ni heni lan nunman. <sup>3</sup> Entanni ey inhel APU DIOS nan hi Jacob e kantuy "Pambangngad kad bebley ni aammed mu niyadda aaggim haggud wada-ak ni mengippaptek ni hi-gam."

<sup>4</sup> Entanni ey impaeyag Jacob di Leah nan Rachel di pattullan tun kalneroh <sup>5</sup> et kantun hi-gaday "Nakka giggibbeka ey el-eleg law hu kapeang-ang-ang ameyun hi-gak, beken ni heni lan nunman hu tuka pengapngan hi-gak, nem nanngntun kaumbaddang ni hi-gak hi Apu Dios e kadeyyawan ama. <sup>6</sup> Inamta yu hu ligat kun nengingungngunuan kun ameyu. <sup>7</sup> Nem kapyatun linugilugih tuwak e nampinhampulu hu nenuullulan tun hummangan min tangdan ku. Nem kayyaggud et eleg iebulut nan Apu Dios ni wada tu pehding ni hi-gak ni lawah. <sup>8-9</sup> Heni hi Apu Dios hu nengi-tan ni halun ameyun hi-gak. Tep hedin kan ameyuy ya nangkebatekan ni gelding niya kalneroh hu iddawwat tun tangdan ku, man nangkebatekan hu impah da. Hedin mewan kantuy ya nangkegalitan hu iddawwat tun tangdan ku, man nangkegalitan hu impah ida.

<sup>10</sup> Yan eman ni kapengenduliddan etan ni gelding ey ini-innep ku e nangkegalitan niya nangkebatekan idan emin etan lakkitun gelding ni kamengendul. <sup>11</sup> Ini-innep ku e immehel etan anghel Apu Dios ni hi-gak e kantuy 'Jacob!' Et kangkuy 'Kela e Apu?' <sup>12</sup> Kan etan ni anghel ey 'Ang-ang mu kedi, emin ida eman lakkitun kamengendul ey nangkegalitan niya nangkebatekan edum. Hi-gak kamengippahding ni nunya tep inang-ang kun emin hu impahpahding nan Laban ni hi-gam. <sup>13</sup> Hi-gak hu Dios ni nampeang-ang ni hi-gam di Bethel etan di nengiha-adam ni batun dinuyagam mun lanan penginemnemneman mun hi-gak et mansapatah kan hi-gak. Pandaddan ka et mambangngad kad bebley ni neuingngan mu.' "

<sup>14</sup> Himmumang di Leah nan Rachel ey kanday "Anin haggud endi damengu beltanen min kinedangyan nan amemi <sup>15</sup> tep ya tuka pehding ni hi-gami ey heni kami hansinuwana. Inggatang dakemi et umahen tun emin hu nanggatngan tu. <sup>16</sup> Emin hu kinedangyan amemin heni inlan Apu Dios et idwat tun hi-gam ey hi-gatsuddan emin eyan u-ungnga hu lebbengtun keidwatan tu. Et humman hu, u-unnud mu etan inhel Apu Dios ni pehding mu."

<sup>17-21</sup> Et hakey ni aggew e limmaw hi Laban ni an memu-lit ni dutdut ni kalneroh tu, ey indaddan nan Jacob ni emin hu mahapul dan pambangngadan dad Kanaan e bebley ametu. Nan-itakkay tudda u-ungnga tu niyadda etan ahwatud kamel, et delunen dadda animal da et manglaw ida e impeki-la dan emin hu wadan hi-gadan limmu dan nanha-adan dad Paddan Aram di Mesopotamia. Et gapu tep endi hi ameda ey imbesik nan Rachel hu tuttu-un ametu. Yan nunman ni linawwan da ey eleg peamtan Jacob nan Laban. Impapuut dan limmaw et man-agwat idad Wangwang e Euphrates et mampalaw idad nangkedunduntut di Gilead.

*Ya namdugan Laban di Jacob*

<sup>22</sup> Nelabah tellun aggew ey wada nengipeamtan Laban e bimesesik di Jacob. <sup>23-25</sup> Et ikuyug Laban ida tutu-u tu et mangunud ida. Et yan meikkeppitun aggew ey hina-kup daddad nangkedunduntut di Gilead ni nangkampuan da. Yan nunman ni hileng ey ini-innep nan Laban e kan Apu Dios ni hi-gatuy "Ang-ang mu kuma ma-lat endi lawah ni e-helen mun Jacob."

<sup>26</sup> Et lumaw hi Laban di kad-an Jacob et kantuy "Kele heni balud di gubat ida eya u-ungngak e mudda imbesik? Hineul muwak. <sup>27</sup> Kele eleg mu e-ehhelen ey kayu nengali? Gullat et ni impeamtam, ey nandaddan nak ni pan-an-anlaan tayu et han kayu umgah di lawwan yu. <sup>28</sup> Eggak ew anhan akwalen ida eya inap-apuk niyadda eya u-ungngak ey kayu nengali. Beken ni kayyaggud huyyan impahding mu. <sup>29</sup> Gullat ni pinhed kun

pehding ni hi-gam hu lawah et dammutu. Nem nampeang-ang ni hi-gak etan Dios ni kadeyyawan amam et ehelen tu e hellipat-an ku ma-lat endi nak e-helen ni hi-gam ni lawah. <sup>30</sup> Inamtak e ya gaputun neala et hi-yanen yuwak ey tep kaka um-abtun mambanggad di bebley amam. Nem anin et, kele yu impeki-ladda etan dios ku?"

<sup>31</sup> Kan Jacob ey "Eggak e-ehelen ni hi-gam et mangeli kami tep kangku nem ikka-leg mudda u-unggam. <sup>32</sup> Nem helen ya meippanggep ida etan ni dios mu, ey mu panhamak et hedin wadan hi-gami hu nengala ey anin ni pepettey ku. Ey hedin wada ang-angen mun illamin hi-gam man issapatah kud hinanggadda eyan tutu-u ta e pebangngad ku." Inhel Jacob huyya tep eleg tu amta e sinekew Rachel etan ida dios ametu.

<sup>33</sup> Et lumaw hi Laban et tu epengen ni hinamahemak di kampun Jacob, yad kampun Leah, yad kampuddan etan ni dewwan bega-en et han lumaw di kampun Rachel, nem endi. <sup>34</sup> Hi Rachel e nengaladdan nunman ni dios ey intalu tud dallem ni yuddungngan ni kapantakkayi et yudungan tu. Intaggan nan Laban hamak, nem endi tu himmak.

<sup>35</sup> Kan Rachel nan ametuy "Entan tu balaw e ama hu eggak ehngeni tep wada kamelpud annel ku." Endi himmak nan Laban et <sup>36-37</sup> bumunget law hi Jacob et kantuy "Hipa bahul kun hi-gam? Kele muwak ali nampedug e heni kaka memdug ni nambahul et mu pambelukitkiten ni emin hu kalga mi. Paukat mu hedin wada himmak mun sinekew ku et ang-angen idan edum mu niyadda edum ku et iuh-uh da hedin hipan hi-gatan dewwa hu neiptek.

<sup>38</sup> Inamtam e dewwampulun toon hu nengingngunnuan daka et ipenaptek kun emin hu gelding mu niya kalneroh mu et deh e nedakkel ida. Ey yan nunman idan toon ey endi nengunuh ni kalneroh niya gelding mu niya endin hekey hu nak kinleng ni inhidak. <sup>39</sup> Hedin wada pintey idan animal di muyung di halun mu, man eggak peam-amta ni hinullulan ku. Anin idan kametellak ni hileng winu kawwalwal e muka pehullul ni hi-gak. <sup>40</sup> Ey insipesipel ku hu nemahhig ni petang ni kawwalwal niya nemahhig ni ketel ni hileng niya nakka metuttukal. <sup>41</sup> Henin nunya hu hinelheltap kun dewwampulun toon tep hampulut epat hu toon ni neneklaan kuddan eyan dewwan u-unggam, niya enem ni toon hu neneklaan kudda eyan halun ku. Nem anin ni hanniman et nampinhampulu hu nenullulan mun tangdan ku. <sup>42</sup> Gullat na-mun eleg tuwak baddangan ni Dios nan apu hi Abraham et hi amak e hi Isaac et intu-dak muwak ni endin hekey hu indawat mun hi-gak. Nem kayyaggud et inang-ang Apu Dios hu lawah ni impahpahding mun hi-gak niya ligat ni ngunuk, et mampeang-ang ni hi-gam ni nahdem et ibunget daka."

<sup>43</sup> Himmumang hi Laban ey kantuy "Yadda eya bii ey u-unggak ida niya inap-apuk ida eya u-ungga dadda. Ey animal ku eyadda kalneroh niyadda gelding. Ya kakulugan tu ey emin eya muka ang-ang-anga ey nalpun hi-gak. Nem endi inna-nuk ni mengikka-leg ni hi-gada. <sup>44</sup> Et humman hu, imay kuma et manhumngangan ita. Ey um-ala itan batun peginemnemneman tan ihhumngangan ta."

<sup>45</sup> Et umla hi Jacob ni batu et haaden tu ma-lat peginemnemneman dan nunman ni ihhumngangan da. <sup>46</sup> Inhel tuddan tuu tu e umpanuh idan batu et ipiggil da et mangan idan emin diman. <sup>47</sup> Et ngadanan Laban humman ni Jegar Sahadutah. Ya impangngadan daman Jacob ey Galeed.

<sup>48</sup> Kan Laban nan hi Jacob ey "Huyyan neipiggil ni batu hu mengippenemnem ni hi-gata." Et mukun Galeed hu ngadan nunman ni bebley. <sup>49</sup> Nem nginedanan da mewan ni Mispah tep kan Laban ey "Hi APU DIOS hu menang-ang ni hi-gatan dewwa ma-lat ya ihhumngangan ta hu meu-unnud, anin ni nandawwi ita. <sup>50</sup> Eggak ali amtaa hedin ibbungget muddalli eya u-unggak winu mengahwa kan edum ni bii, nem nemnem mu e wada hi Apu Dios ni kamenang-ang ni hi-gam. <sup>51</sup> Adyah eya neipiggil ni batu niya eya batun hinead mu. <sup>52</sup> Huyyaddan batu hu mengippenemnem ni hi-gatan dewwa etan ni inhumngangan ta. Eggak lebbahi eya pappeg et umli-ak ni an mengippahding ni hi-gam ni lawah et hanniman daman hi-gam. <sup>53</sup> Ya etan Dios idan ammed tayu e di Abraham nan hi Nahor hu ngenamung ni mengastigu etan ni eleg mengu-unnud eyan inhumngangan ta."

Et isapatah daman Jacob nan hi Apu Dios e kadeyyawan Isaac e u-unnuden tu huyyan inhumngangan da. <sup>54</sup> Et kumleng hi Jacob ni animal et iappit tun Apu Dios etan di duntug et aygan tudda etan tutu-u et mangan ida et manha-ad idadman ni hanlabbi.

<sup>55</sup> Nawa-wa et bumengun hi Laban ni dagah et akwalen tudda u-ungnga tu niyadda etan inap-apu tu et bendisyonan tudda et han ida umenamut di bebley da.

## 32

<sup>1-2</sup> Et mangmanglaw damad Jacob di lawwan da ey entanni ey wadadda anghel ni nenammun hi-gada. Inang-ang idan Jacob ey kantuy "Tam nangkampu gayam hi Apu Dios di deya." Et ingadnan tu humman ni bebley ni Mahanaim.

<sup>3</sup> Impamengulun Jacob ida edum ni tuu tu ma-lat ida makihummangan nan agitun hi Esau di Seir di Edom. <sup>4</sup> Kan Jacob ni hi-gaday "Kan yun Esau ey: Hi Jacob e bega-en mu ey nanhahha-ad di baley nan pengemmaan yu e hi Laban. Et yan nunya ey pinhed tun mambangngad. <sup>5</sup> Wadadda baketu, ya kebayyu tu, ya kalneroh tu, ya gelding tu et yadda bega-en tun lakaki niya bibi-i. Intu-dak dakemi ma-lat peamta mi hu ellian tu hedin ebbuluten mu."

<sup>6</sup> Nambangngad ida huyyan intu-dak Jacob et kandan hi-gatuy "Inhel min agim et iyyallin daitu dammuen e wada hu ingkuyug tun epat ni gatut ni tutu-u tu." <sup>7</sup> Dingngel nan Jacob humman ni inhel da ey nemahhig takut tu niya kaguh tu et pandewa tudda etan tutu-u tu niyadda halun tu. <sup>8</sup> Kantud nemnem tuy "Hedin umpatey hi Esau ey wada inna-nu eyan nanggillig ni umbebsik."

<sup>9</sup> Et mandasal hi Jacob e kantuy "APU e Dios ni kadeyyawa lan apuk hi Abraham ni hi ama e hi Isaac, hi-gam hu nengipanghel ni mambangngaddak di bebley idan aaggik niya ammed ku niya kammuy ippaptek muwak. <sup>10</sup> Beken ni lebbengtun muwak peangangan ni binabbal mun impeenang-ang mun hi-gak e bega-en mu. Makulug ni dakel ni peteg bendisyon mun hi-gak tep yan neni-yanan kun bebley mi et man-agwattak di Wangwang e Jordan ey ebuh hu hulkud kun intabin ku. Nem yan nunya ey nandewa-an ida tuuk ni ingkuyug ku. <sup>11</sup> APU DIOS, ihwang muwak anhan di hipan lawah ni pehdng agik e hi Esau tep ay nakka umtatakut. Tep entanniy petteyen dakemin emin ida eyan ahwak niyadda eya u-ungngak. <sup>12</sup> Nem inhel mun hi-gak nunman e ippaptek muwak niya kammuy pedakkel muddalli helag ku et heniddalli palnah di gilig ni baybay e eleg mebillang."

<sup>13</sup> Nanha-ad di Jacob ni hanlabbidman. Newa-wa et umappil ni animal ni iddawat tun agitu e hi Esau. <sup>14</sup> Inappil tu hu dewanggatut ni labah ni gelding niya dewampulun lakki tu, ya dewanggatut ni labah ni kalneroh niya dewampulun lakki tu, <sup>15</sup> ya telumpulun kamel ni wada impah tu, ya na-pat ni labah ni baka niya hampulun lakki tu, ya dewampulun labah ni kebayyu niya hampulun lakkitu. <sup>16</sup> Ginenadwa tudda et i-peng tudda etan idan bega-en tun mengipengulu et kantun hi-gaday "Pamengulu kayu ey ang-ang yu ma-lat wada pambabattanan yu."

<sup>17</sup> Inhel tu etan ni nemangulun bega-en e kantuy "Hedin dammuen yu hi Esau et ibbagetu e kantuy 'Attu lawwan yu? Hipa kan bega-en ni hi-gayu? Niya hipa kan halun idan nunya?' <sup>18</sup> Ey kanyun humang yuy 'Huyya hu halun nan bega-en mu e hi Jacob. Iddawat tun hi-gam e apu tu. Iyyalli e neitu-nud ni hi-gami.'" <sup>19</sup> Hanniman dama hu inhel tun e-helen ida etan ni bega-en tun nangkeitu-nud. <sup>20</sup> Ey kantun hi-gaday "Entan tu liwwan ni e-helen ni hi-gatu e kanyuy 'Hi Jacob e bega-en mu.'" Huyya impahding tu tep ya wadad nemnem tu ey meendi hu bunget Esau ni hi-gatu et ebbuluten tu hedin ang-angen tudda humman ni iddawat tun hi-gatu. <sup>21</sup> Impamengulu tun impalaw ida etan animal ni iddawat tun Esau et manha-ad di kampu da ni nunman ni hileng.

### *Ya nekibultungan Jacob di Peniel*

<sup>22</sup> Yan nunman ni hileng ey bimmangun hi Jacob et bangunen tudda etan dewwan ahwatu et yadda etan dewwan biin bega-en dan imbilang tun ahwatu niyadda etan hampulut hakey ni u-ungnga tu et agwatan da Wangwang e Jabbok. <sup>23-24</sup> Et iagwat tun emin hu wadan hi-gada et han mambangngad di kampu da et hahhakkey tun nandeyadman. Entanni ey wada immalin tuu et makibenultung ni hi-gatu ingganah kamangkewa-wa. <sup>25</sup> Nem eleg han-ilaw etan ni tuu hi Jacob et pangkubhil tu hu genit ni sipan Jacob.

<sup>26</sup> Et kan etan ni tuuy "Imay et lumawwak tep ay kamangkewa-wa." Nem kan Jacob ey "Eleg daka pellow ingganah bendisyonan muwak." <sup>27</sup> Kan etan ni tuu ey "Hipa ngadan mu?" Kan Jacob ey "Hi-gak hi Jacob."

<sup>28</sup> Ey kan etan ni tuu ey "Beken law ni Jacob hu ngadan mu. Hi-gam law hi Israel. Tep nekihangga kad tuu et hi Apu Dios ey nengapput ka." <sup>29</sup> Kan Jacob ey "Hipa ngadan mu?" Kan etan ni tuu ey "Eleg mahapul ni amtaen mu hu ngadan ku." Et bendisyonan tu hi Jacob.

<sup>30</sup> Kan Jacob ey "Inang-ang ku hi Apu Dios, nem kayyaggud et eleggak matey." Et ngadanan tu humman ni Peniel.

<sup>31</sup> Simmimil hu aggew ni neni-yanan Jacob ni Peniel e kamampi-pi-day tep nangkubhil hu genit di sipetu. <sup>32</sup> Et humman hu, ingganah ni nunya ey eleg ihhidaddan helag Israel hu ulat ni neipket di genit di sipan linggeman ni animal, tep humman hu neikubhil ni genit Jacob.

## 33

*Ya nandammuan di Jacob nan Esau*

<sup>1</sup> Inang-ang nan Jacob hi Esau e iyyallin nangkuyug ni epat ni gatut ni tuu et pan-ppiappil tudda pamilyah tu et mantu-tu-nud ida, e yadda u-ungngan Leah, yadda u-ungnga tun etan ni dewwan bega-en niyadda u-ungngan Rachel, et mantu-tu-nud ida. <sup>2</sup> Nemangulu etan dewwan biin bega-en niyadda u-ungnga da, et han maitu-nud hi Leah niyadda u-ungnga tu, et manggillig ida han-ina e di Rachel nan Joseph. <sup>3</sup> Nemappangngulu hi Jacob et kamangkeihnup nan agi tu hi Esau ey nanyuung ni nangkappitu. <sup>4</sup> Nambesik hi Esau ni an nenammun Jacob et akwalen tu ey ida kamannengngih ni dewwa.

<sup>5</sup> Inang-ang nan Esau ida etan bii niyadda etan u-ungnga da ey kantuy "Hipadda huayan ingkuyug mu?" Kan Jacob ey "U-ungngak ida huayan indawat Apu Dios tep kayyaggud ni peteg ni hi-gak."

<sup>6</sup> Immalidda etan dewwan bega-en niyadda u-ungnga da et manyuung idan Esau. <sup>7</sup> Neitu-nud hi Leah et yadda etan u-ungnga tu et manyuung ida dama. Nanggillig di Rachel nan hi Joseph et manyuung ida daman Esau.

<sup>8</sup> Minahmahan mewan nan Esau e kantuy "Ey hipadda kan animal etan ni nemangulun dinamuk?" Kan Jacob ey "Humman iddawat kun hi-gam ma-lat abuluten nu hu inlian mi."

<sup>9</sup> Nem kan Esau ey "Agik, eggak mahapul ida humman tep wada dama hu halun ku, et humman hu anin ni bangngad mu kuma." <sup>10</sup> Nem kan Jacob ey "Abulut mu kuma tep ay inebulut nu inlian mi. Et kayyaggud hu nandatngan ta et heni inang-ang ku hi Apu Dios ni nenang-angan kun hi-gam."

<sup>11</sup> Kapepillit Jacob e kantuy "Alam kuma eya nakka iddawat ni hi-gam tep dakel hu halun kun indawat Apu Dios gapu ni hemek tun hi-gak." Et abuluten nan Esau.

<sup>12</sup> Kan Esau ey "Et imay tep et lumaw itsu. Ippangulu midda eyan tuuk hu dalan." <sup>13</sup> Nem kan Jacob ey "Em, nem inna-nu e iyyaddadya hu gelang et ya halun ku niyadda impah da ey mahapul ni mambabbabbal kami tep entun mangkettey ida. <sup>14</sup> Et humman hu pamengulu kayu et anin ni meitu-tu-nud kamin eyaddan u-ungnga et yadda halun, et han dakeyu la datngid Edom."

<sup>15</sup> Kan Esau ey "Anin, nem ibbatih kudda edum ni tuuk ni pan-e-dum yu." Nem kan Jacob ey "Eleg, anin ebuh kami nemet peang-ang mu hu kayyaggud ni hi-gami." <sup>16</sup> Et umgah di Esau ni nambangngad di Edom.

<sup>17</sup> Nem nampalaw idad Jacob di Sukkot. Nengapyad man ni kampu da niya hiddumman idan halun tu. Et mukun nginadnan da humman ni Sukkot. <sup>18</sup> Intuluy dan nanglaw et lektattuy dimmateng idad Sekem di Kanaan. Et mangkampudda etan di neihnup ni bebley. Melinggep hu nandalnan da neipalpun immegahan dad Mesopotamia ingganah dimmateng idad Sekem. <sup>19</sup> Ginetang Jacob humman ni puyek ni hanggatut ni palatah idan helag Hamor e aman Sekem. <sup>20</sup> Et ngadnan tun El Elohe e ya keibbellinan tu, Apu Dios ni kadeyyawan Israel.

## 34

*Ya neipahding nan Dinah*

<sup>1</sup> Hakey ni aggew ey limmaw hi Dinah e u-ungngad Jacob nan Leah ni an nekia-ayyam idan edum ni biidman ni bebley. <sup>2</sup> Hi Sekem e u-ungngan Hamor e Hibite e ap-apudman ni bebley ey inang-ang tu hi Dinah et tu piliten ni in-ulig. <sup>3</sup> Nakappinshed tun peteg hi Dinah tep kat-agu et tuka ena-alluka ma-lat man-ahwadda. <sup>4</sup> Et tu ehelen nan ametu e hi Hamor e kantuy "Muwak i-hel idan a-ammed ni nunman ni bii tep pinhed kun ahwaen."

<sup>5</sup> Entanni ey dingngel nan Jacob e wada lawah ni neipahding ni u-ungnga tu e hi Dinah, nem impemegga tu ni i-ineng tep limmaw idan emin etan u-ungnga tun lalakkin an nampattul.

<sup>6</sup> Hi Hamor e aman nan hi Sekem ey limmaw ni an mekihummangan nan hi Jacob. <sup>7</sup> Ey neipaddih ni iyyaddalli etan u-ungngan Jacob ni nalpun an nampattul. Dingngel da humman ni neipahding nan agi da ey nemahhig bunget dan nemaingan Sekem ni hi-gadan Hebrew tep lawah humman ni peteg ni hi-gada.

<sup>8</sup> Kan Hamor nan Jacob ey "Inna-nu tu huuya e nakappinshed ni u-ungngak e hi Sekem etan u-ungngam e hi Dinah. Et humman hu, attu ew kuma et iebulut mu ma-lat man-ahwadda? <sup>9</sup> Manhuhummangan itsu et man-aapu itsu. <sup>10</sup> Ey damnutun mekibbebley kayudya ey ngenamung kayun ngunnuen yu henin umgatang winu manggettang niya hipan keddangyanan yu."

<sup>11</sup> Kan Sekem nan aman Dinah niyadda agituy “Iebulut yu anhan et iahwak hi Dinah. Iddawat kun emin hu hipan ibbageyu. <sup>12</sup> Anin piga ibbageyun iddawat ku et ebbuluten ku nemet iebulut yun ahwaen ku hi Dinah.”

<sup>13</sup> Nem gapu tep lawah hu impahding Sekem nan Dinah ey nanhina-ul da hu inhumang dan hi-gadan han-ama. <sup>14</sup> Kandan hi-gaday “Eleg mabalin ni mu ahwaen hu agi mi tep eleg ka makugit. Kebe-ingan mi hedin ebbuluten ni hu imbagam. <sup>15</sup> Nem hedin tetbalen yu et mampekuggit kayu ma-lat heni kayun hi-gami, man dammutun i-abulut min ahwaen Sekem hi agi mi. <sup>16</sup> Et man-aapu itsu niya mambebley kamidya et mandadagyum itsu. <sup>17</sup> Nem hedin eleg yu tetbala eya kammi ey ewwiten mi ew hi Dinah et manglaw kam.”

<sup>18</sup> Kayyaggud hu kapannemnem di Sekem nan Hamor ni nunman ni inhel da et abuluten da. <sup>19-20</sup> Hi Sekem ey hi-gatu kametbal di emin ni u-ungngan ametu. Gapu tep nakappinshed tu etan u-ungngan Jacob ey ganuganuddan han-aman limmaw di kakeem-mungiddan tuud eheb ni nunman ni bebley et ehelen dan hi-gada hu inhumangan da. <sup>21</sup> Kanday “Humman idan tuu ey kayyaggud hu daka pekiddagyumin hi-gatsu. Iebulut tayu mekibbebley idan hi-gatsu niya dammutun umgatang ida niya manggettang ida haggud mahkang eya bebley et lektattuy meki-eppu itsun hi-gada. <sup>22</sup> Nem kanday ebbuluten dan mekibbebley ni hi-gatsu hedin mampekuggit itsun emin ni lalakki ma-lat heni itsun hi-gada. <sup>23</sup> Hanniman hu pehding tayu ma-lat emin hu animal da niya emin hu wadan hi-gada ey ellan tayu. Abulut tayu kuma et makibebley idan hi-gatsu ma-lat meila-kam itsud kinedangyan da.” <sup>24</sup> Et abuluten idan tuu et mampakugit idan emin hu lalakkidman.

<sup>25</sup> Nelabah hu tellun aggew ni nekugitan da e maggeh ni hu kugit da ey limmaw di Simeon nan Levi e agiddan Dinah e nan-ispadah ida et da liguden ni pintey ida humman lalakkidman. <sup>26</sup> Impakipetey dadda han-ama e di Hamor nan Sekem. Et awiten da hi agida e hi Dinah et ienamut ida. <sup>27</sup> Limmaw ida dama etan edum ni u-ungngan nan Jacob et da pan-al-en hu hipan wadadman. Huyya nengiblehan dan neipahding nan agidan hi Dinah. <sup>28</sup> Impeki-la daddan emin hu inhalun da niya emin hu wada etan di bebley. <sup>29</sup> Nan-aledadda bibi-i, yadda u-ungnga niya emin kinedangyan da.

<sup>30</sup> Entanni ey kan Jacob nan Levi et hi Simeon ey “Impambalin yuwak ni angebehel ni emin ni tuudya. Inna-nu hedin mangkakahakey ida Kanaanite niyadda Perisite et umliddan mengubbat ni hi-gatsu, kaw eleg daitu petteyan emin tep ay hahhakkey itsu?” <sup>31</sup> Nem kanday “Bahul da tep heni biin tuka pebeyyad annel tu hu impahding Sekem ni agimi.”

## 35

### *Ya nanghelan Apu Dios nan Jacob ni mambanggad di Bethel*

<sup>1</sup> Entanni ey kan Apu Dios nan Jacob ey “Pan-alan kad Bethel et mambebley kayudman. Ey pengapya kadman ni pan-appitan yun hi-gak e Dios ni nampeang-angan hi-gam ni nunman ni binsikam ni neni-yanam nan agim e hi Esau.”

<sup>2</sup> Et kan Jacob idan pamilyah tu niyaddan emin hu kamekihha-ad di baley tuy “Pan-ibkah yudda dios yun kinapyan tuu niya pan-emeh kayu et manhullul kayun malinih ni balwasi yu. <sup>3</sup> Tep umlaw itsud Bethel et nak kumapyan pan-appitan nan Apu Dios e nemenaddang ni hi-gak di emin ni ligat ku niya nengipenaptek ni hi-gak di emin ni linawwan ku.” <sup>4</sup> Et idwat dan Jacob ni emin etan ida dios da niyadda betling da, et iku-ku tu etan di henge ni keyew ni oak ni neihnud di Sekem.

<sup>5</sup> Yan kapenglawwid Jacob ey impatekut Apu Dios ida etan tutu-ud nangkeihnup ni bebley et eleg da pedugen ida. <sup>6</sup> Entanni ey dimmateng idad Lus, e Bethel law ngadan tu, di Kanaan. <sup>7</sup> Et kumapya hi Jacob ni pan-appitan et ngadanan tun El Bethel, tep yadman hu nampeang-angan Apu Dios ni hi-gatun binsikan tun neni-yanan tun agitu.

<sup>8</sup> Entanni ey netey hi Deborah e nengipappatek nan Rebekah e inan Jacob et ikulung dad henge ni keyew ni oak e neihnud di Bethel. Et ngadanan da humman ni keyew ni “Keyew ni kapannannanggihi.”

<sup>9</sup> Yan nalpuan Jacob di Paddan Aram di Mesopotamia ey nampeang-angan mewan hi Apu Dios ni hi-gatu et bendisyonan tu. <sup>10</sup> Kan Apu Dios ni hi-gatuy “Yan nunya ey beken law ni Jacob hu ngadan mu tep hi-gam law hi Israel.” Et huyya law hu ngadan tu.

<sup>11</sup> Kan Apu Dios ni hi-gatuy “Hi-gak hu Dios e Kabaelan tun emin. Kahlag kan dakel et pambebleyan dalli hu dakel ni bebley. Ey mampatul idalli edum ni helag mu. <sup>12</sup> Hi-gam niyaddalli helag mu hu memeltan ni puyek ni indawat kun apum e hi Abraham ni hi amam e hi Isaac.”



<sup>13-14</sup> Negibbuh ni inhel nan Apu Dios humman et hi-yanen tu hi Jacob. Immala hi Jacob ni batun pengine-nem-neman tun nunman ni neipahding et haaden tudman etan di nenang-angan tun Apu Dios et du-yahan tun meinum niya lana. <sup>15</sup> Et ngadnan tu humman ni bebley ni Bethel.

*Ya neteyyan Rachel*

<sup>16</sup> Entanni ey hini-yan di Jacob hu Bethel et lumaw idad Eprat. Nem eleg ida dumteng di Eprat ey indegeh tu hu egeh nan Rachel et man-ungnga. <sup>17</sup> Nampaligat ni nan-ungnga et yan neukatan etan ni gelang ey kan etan ni nenaya ey "Kayyaggud kaya, laki mewan eya in-ungngam." <sup>18</sup> Nem kamangkeungnguh hu yayyah Rachel et ngadanan tu etan gelang ni Ben-oni et han matey, nem Benjamin hu impangngadan ametu.

<sup>19</sup> Netey hi Rachel et ikulung dad neihnpup di dalan ni umlaw di Eprat e Bethlehem hu ngadan tun nunya. <sup>20</sup> Et haaden Jacob hu batud nengikulungan dan Rachel ni pengine-nem-neman tu, et ingganah nunya ey wada humman ni sinyal ni kulung.

<sup>21</sup> Intuluy di Jacob ni nanglaw et mangkampuddad a-allaw ni Eta-gey ni baley di Eder. <sup>22</sup> Yan wadaddadman hu nenguligan nan Reuben nan Bilhah e bega-en da ey hakey ni ahwan ametu. Dingngel nan ametu hi Jacob humman ni impahding.

*Yadda u-ungngan Jacob*

Huyyadda ngadan ida etan ni hampulut dewwan lalakkin u-ungngan Jacob: <sup>23</sup> Hi Reuben e pengulwan, hi Simeon, hi Levi, hi Judah, hi Issakar, hi Sebulun. Huyyadda u-ungnga dan nan Leah. <sup>24</sup> Ya u-ungnga dan Rachel ey di Joseph nan hi Benjamin. <sup>25</sup> Ya u-ungnga dan Bilhah e bega-en Rachel ey hi Dan et hi Naptali. <sup>26</sup> Ya u-ungnga dan Silpah e bega-en nan Leah ey hi Gad nan hi Asher. Emin ida huyyan u-ungngan Jacob ey neiungngaddad Paddan Aram di Mesopotamia.

*Ya neteyyan Isaac*

<sup>27</sup> Immanemut di Jacob di kad-an nan ametu hi Isaac di Mamre e neihnpup di Hebron e nambebleyan dama lan aputu hi Abraham. <sup>28-29</sup> Yan nunman ey neka-a-amma law hi Isaac e hanggatut et newalu hu toon tu. Netey et ikulung idan u-ungnga tu e di Esau nan Jacob.

## 36

*Yadda nahlag nan Esau*

<sup>1</sup> Huyyadda nahlag nan Esau e hi Edom hu hakey ni ngadan tu. <sup>2</sup> Inahwa tudda tellun biin iKanaan. Hi Adah hu hakey e u-ungngan Elon e Hittite. Ya meikkadwa ey hi Oholibamah e u-ungngan Anah niya inap-apun Sibeon e Hibite. <sup>3</sup> Et ya meikkatlu ey hi Basemat e agin Nebayot e u-ungngaddan Ismael. <sup>4</sup> Ya u-ungngad Esau nan Adah ey hi Eliphaz. Ya u-ungnga dan Basemat ey hi Reuel. <sup>5</sup> Ya u-ungnga dan Oholibamah ey hi Jeus, hi Jalam ni hi Korah. Emin ida huyyan u-ungngan Esau ey neiungngaddad Kanaan.

<sup>6</sup> Entanni ey ninemnem Esau ni man-e-tan di edum ni bebley ma-lat meidawwin Jacob. Inewit tudda ahwatu, yadda u-ungnga tu, niyadda kamampanha-ad di baley tu. Impekila tudda halun tu niyaddan emin hu kinedangyan tun limmu tudman. <sup>7</sup> Mukun nan-etan ey tep kulang law hu puyek dad Kanaan ni pengippattulan dan han-agin halun da tep dimmakkal ni peteg. <sup>8</sup> Et an mambebley hi Esau di nangedunduntug di Edom.

<sup>9</sup> Huyyadda nahlag nan Esau e nahlagan idan iEdom. <sup>10-13</sup> Hi Eliphaz e u-ungngad Esau nan Adah ey nahlag et wada liman lalakki, e hi Teman, hi Omar, hi Sepho, hi Gatam et hi Kenas. Ya meikka-nem ey hi Amalek e u-ungnga dan Timna e hakey mewan ni ahwa tu. Hi Reuel e u-ungngad Esau nan hi Basemat ey nahlag et wadadda dama epat ni lalakki e hi Nahat, hi Serah, hi Sammah et hi Missah.

<sup>14</sup> Yadda u-ungngad Esau nan Oholibamah e u-ungngan Anah niya inap-apun Sibeon ey hi Jeus, hi Jalam et hi Korah.

<sup>15-16</sup> Yadda u-ungngad Esau nan Adah ey hi Eliphaz e pengulwan. Nahlag hi Eliphaz et hi Teman, hi Omar, hi Sepho, hi Kenas, hi Korah, hi Gatam et hi Amalek.

<sup>17</sup> Ya u-ungngad Esau nan Basemat ey hi Reuel. Nahlag hi Reuel et hi Nahat, hi Serah, hi Sammah et hi Missah e hi-gada hu ap-apuddan helag da.

<sup>18</sup> Yadda dama u-ungngad Esau nan Oholibamah e u-ungngan Anah ey hi Jeus, hi Jalam et hi Korah. <sup>19</sup> Emin ida huyyan netenten ey helag idan Esau e yad Edom hu nan-ap-apuan da.

*Yadda helag Seir*

<sup>20-21</sup> Yadda sigud ni nambebley di Edom ey nahlag idad helag Seir e Horite. Huyyadda ey hi Lotan, hi Sobal, hi Sibeon, hi Anah, hi Dishon, hi Eser et hi Dishan.

<sup>22</sup> Dewwa u-ungngan Lotan e di Hori nan Homam. Wada agin Lotan ni bii e hi Timna ngadan tu.

<sup>23</sup> Yadda u-ungngan Sobal ey hi Alban, hi Manahat, hi Ebal, hi Sepho et hi Onam.

<sup>24</sup> Hi Sibeon ey wadadda dewwan u-ungnga tu e di Aiah nan Anah. Huyyan hi Anah hu nenamak etan ni kaman-utbul ni maetung ni danum ni tu nengipattulan idan kebayyun ametud endi bebley. <sup>25-26</sup> Yadda u-ungngan Anah ey hi Dishon et hi Oholibamah e bii. Yadda u-ungngan Dishon ey hi Hemdan, hi Esban, hi Itran et hi Keran.

<sup>27</sup> Yadda u-ungngan Eser ey hi Bilhan, hi Saaban et hi Akan.

<sup>28</sup> Yadda u-ungngan Dishan ey di Us nan Aran.

<sup>29-30</sup> Huyyadda aap-apuddan Horite di Edom: Hi Lotan, hi Sobal, hi Sibeon, hi Anah, hi Dishon, hi Eser et hi Dishan. Huyyadda nisi Horite ni nan-ap-apid Edom.

#### *Yadda etan nanhuluhulul ni patul di Edom*

<sup>31</sup> Yan endi ni patul di Israel ey wadadda ngu dedan hu nanhuluhulul ni patul di Edom. <sup>32</sup> Ya nemangulu ey hi Bela e u-ungngan Beor e iDinhaba. <sup>33</sup> Netey hi Bela et maihullul hi Jobab e u-ungngan Serah e iBosrah. <sup>34</sup> Netey hi Jobab et maihullul hi Husham e iTeman. <sup>35</sup> Netey hi Husham et maihullul hi Hadad e u-ungngan Bedad e iAbit. Huyyan hi Hadad hu nengapput idan iMidian eman ni nanggugubatan dad Moab. <sup>36</sup> Netey hi Hadad et maihullul hi Samlah e iMasrekah. <sup>37</sup> Netey hi Samlah et maihullul hi Saul e iRehobot e bebley di kad-an ni Wangwang e Euphrates. <sup>38</sup> Netey hi Saul et maihullul hi Baal Hanan e u-ungngan Akbor. <sup>39</sup> Netey hi Baal Hanan et maihullul hi Hadad e iPau. Ya ahwan Hadad ey hi Mehetabel e u-ungngan Matred ey inap-apun Mesahab.

<sup>40-43</sup> Hi Esau hu nahlagan idan iEdom e yadda nengippangngulun hi-gada ey hi Timna, hi Albah, hi Jethet, hi Oholibamah, hi Elah, hi Pinon, hi Kenas, hi Teman, hi Mibsar, hi Magdiel et hi Iram. Nangkeingedan hu ngadan dad nampambebleyan da.

## 37

#### *Ya ini-innep Joseph*

<sup>1</sup> Hi Jacob ey nannaneng di Kanaan e bebley ametu. <sup>2</sup> Huyyadda nekapkapyan hi-gatu. Yan eman ni kapenikkenin u-ungnga tun hi Joseph e hampulut pitu toon tu ey nekikillaw idan edum ni agitun u-ungngan ametud edum ni ahwatu e di Bilhah nan Silpah ni an mampattul ni halun ameda. Ey hin-addum ni wada tuka idenaddatteng nan ametun beken ni kayyaggud ni kapehpehding idan nunman ni agitu.

<sup>3</sup> Hi Jacob ey hi Joseph hu pinpinhed tud emin ida etan ni u-ungnga tu, tep hi-gatu neiungnga eman ni tuka pangkea-ammai. Hakey ni aggew ey indawtan tun andukkey ni balwasin kakkayyaggud. <sup>4</sup> Yadda agin Joseph ey inletu da e hi-gatu pinpinhed amedan hi-gadan han-aaggi, et mukun angebe-hel da, et anin ni pekihummanganan dan hi-gatu et daka pambinungnet.

<sup>5</sup> Entanni ey nan-i-innep hi Joseph ni meippanggep idan agitu et ehlen tun hi-gada et nema-ma bunget dan hi-gatu. <sup>6</sup> Kantuy "Heninnuy hu ini-innep ku. <sup>7</sup> Limmaw itu kumangngun han-aaggid payew et tayu pambeteken ida etan neanin pagey. Entanni ey nebehwat etan bintek ku ey linikweh idan bintek yu et manyuung ida etan di bintek ku." <sup>8</sup> Ey kan idan agi tuy "Kaw kammu nem mampatul kalli et hi-gam u-unnuden mi?" Et nema-man angebe-hel da tep ya i-innep tu. Beken ni ya ini-innep tun ebu hu daka pengibubbungesin hi-gatu, nem anin ni elaw ni tuka penge-ehhel ni i-innep tu.

<sup>9</sup> Entanni ey wada mewan hu ini-innep tu et e-ehhelen tuddan agitu. Kantuy "Ini-innep kun nanyuung idan hi-gak hu aggew, ya bulan niyadda hampulut hakey ni bittuwen."

<sup>10</sup> Inhel tu daman ametu humman ni ini-innep tu ey imbunget ametu e kantuy "Kele hipa huttan ni i-innep? Kaw anin hi-gak, hi inam et yadda agim et manyuung kamillin hi-gam?" <sup>11</sup> Et mukun wada ameh idan agin Joseph ni hi-gatu. Nem hedini hi ametu, man tuka nemnemnema hu keibbellinan nunman ni i-innep.

#### *Ya nanhimbunan Joseph di Egypt*

<sup>12</sup> Hakey ni aggew ey limmaw ida agin Joseph di Sekem ni an mengippattul ni inhalun ameda. <sup>13-14</sup> Ey kan Jacob nan Joseph ey "Kaiunud ka et mu ang-angen ida agim di daka pampattuled Sekem. Mulli ang-ang hedini kayyaggud hu kameipahpahding ni hi-gada niyadda animal ni da impattul. Ey nambanggad ka et peamtam ni hi-gak." Kan Joseph ey "Em, umlawwak." Et umgah di bebley dad Hebron et lumaw di Sekem.

Dimmateng hi Joseph di Sekem <sup>15</sup> et tu hamhamken ida agitu. Ey wada hakey ni tuun nenang-ang nan Joseph et kantun hi-gatuy "Hipa muka hemmahemmaka?" <sup>16</sup> Kan Joseph ey "Yadda etan agik ni an nampattul, nem eggak ida hanhamak. Kaw amtam

kad-an da?"<sup>17</sup> Kan etan ni tuuy "Wadadda lan nuntan nem dingngel ku ung-ungbal da e umlaw idad Dothan." Et maiunud hi Joseph diman.

<sup>18</sup> Kamenetteng diman ey inang-ang idan agitu et ihuhummangan da petteyen dan hi-gatu. <sup>19</sup> Kanday "Iyalli etan kaum-eni-innep. <sup>20</sup> Petteyen tayu et egahen tayud bitu. Et hedin ibbagan ametayu, kantayuy kinan ni layon. Et ang-angen tayu pangngu numan hu pambalanan ni i-innep tu."

<sup>21</sup> Dingngel Reuben humman ey eleg tu pinhed ni petteyen da et kantuy "Eleg tayu petteya. <sup>22</sup> Nealay inggah tayud bitu." Mukun humman inhel tu ey tep tuka nemnemema e ewwiten tullu et ienamut tun ametu.

<sup>23</sup> Dimmateng tu-wangu Joseph ey dimpap da et ekalen da etan andukkey ni balwasi tun kakkayyaggud. <sup>24</sup> Et da egahen di bitun mamega.

<sup>25</sup> Ida kamengngan ey wadadda tuun inang-ang dan nalpud Gilead ni umlaw di Egypt. Humman idan tuu ey helag idan Ismael e ya ngunu da ey ida kamanggettang ni linggeman. Yadda kamel da ey dakel kinalga dan kameikkamdug di ihhida niyadda bangbanglu. <sup>26</sup> Kan Judah idan agituy "Endi gungunahen tayun memettey eyan agi tayu anin ni he-ulen tayu ametayu. <sup>27</sup> Kayyaggud na-mu hedin iggatang tayu eyaddan kamangkelebbah ni helag Ismael et eleg tayu pateyen. Tep kaw tu-wan beken tayun agi?" Ey inebulut idan agi tu. <sup>28</sup> Et da guyuden hi Joseph etan di bitu et igtang dan dewampungun palatah etan idan helag Ismael et ilaw dad Egypt. \*

<sup>29</sup> Nambangngad hi Reuben et tu ang-angen hi Joseph etan di bitu ey endidman. Et makaggeh ni peteg nemnem tu et pambi-kien tu balwasi tu. <sup>30</sup> Et lumaw di kad-an idan agitu et kantuy "Endi etan di bitu hi Joseph! Hipa law pehding ku?"

<sup>31</sup> Et ya law impahding da ey pintey da hakey ni gelding et ita-mel da balwasin Joseph etan di kuheyaw. <sup>32</sup> In-anemut da humman ni balwasin Joseph et peang-ang dan ameda et kanday "Himmak mi huyyan balwasid dalan. Ang-ang mu pangngu hedin huyya balwasi etan ni u-ungngam." <sup>33</sup> Inimmatunan tu e balwasin Joseph et kantuy "Tam em, balwasin etan ni u-ungngak! Endi! Binenuklin layon hu annel tu!" <sup>34</sup> Bini-kin Jacob hu balwasi tu et mambalwasin langgusih gapuh ni lemyung tu tep endi etan u-ungnga tu. Ey kaumlelemyung ni pigan aggew. <sup>35</sup> Immalidda u-ungnga tun menga-alluk ni hi-gatu, nem nanengtun kaumlelemyung. Kantuy "Inggahan ni metteyyak et hannak liwwana humman ni u-ungngak ni neendi."

<sup>36</sup> Yan nengidetengan dan Joseph di Egypt, ey inggatang dan Potiphar e ap-apuddan guwalyad baley ni patul.

## 38

### *Ya nengahwaan Judah*

<sup>1</sup> Yan nunman dama, ey hini-yan Judah ida agi tu et an makiha-ad di baley Hirah e iAdullam. <sup>2</sup> Yadman nenammuan tu etan ni ahwa tun iKanaan e u-ungngan Sua. <sup>3-5</sup> Et maweda tellun u-ungnga tun laki. Ya impangngadan tu etan ni pengulwan ey hi Er. Newada etan neihayned et ngadanan tun hi Onan. Newada etan neikatlu et ngadanan tun hi Selah. Hi Selah e udidyan ey neiungnga eman ni wadaddad Kesib.

<sup>6</sup> Kimmat-agu hi Er e pengulwan et peahwan ametun nan hi Tamar. <sup>7</sup> Nem hi Er ey nemahhig ni lawah hu tuka pehpending e kabellawan APU DIOS et pateyen tu.

<sup>8</sup> Entanni ey kan Judah etan ni meikkadwan u-ungnga tu e hi Onan ey "Iahwam hi Tamar tep humman elaw tayu. Et hedin wada u-ungnga yu ey meibbillang ni u-ungnga etan ni agim ni netey." Et iahwan Onan hi Tamar. <sup>9</sup> Nem inamtan Onan e beken tun meibbillang ni kan-u-ungngan i-ungnga da. Et humman hu, hedin nan-ulig idan Tamar, ey tuka pekwewa hu kamelpud annel tu et endi kamekapyang gelang. <sup>10</sup> Eleg pinhed APU DIOS humman ni impahding tu et pateyen tu hi Onan.

<sup>11</sup> Et kan law Judah nan Tamar ey "Pambangngad ka ew di baley amam et hedin mehikken hi Selah ey han tuka iahwa." Mukun hanniman impanghel tu ey tep kaumtakut tep entanni ey meippahding daman Selah etan neipahding idan agitu. Et mambangngad hi Tamar di baley di ametu.

<sup>12</sup> Entanni et malebah pigan toon ey netey etan ahwan Judah. Negibbuh hu nengibeluan tu et ayan tu etan gayyuu tu e hi Hirah e iAdullam et lumaw idad Timnah ni an memu-lit ni dutdut ni kalneroh tu. <sup>13</sup> Wada nangel nan Tamar e hi Judah e nengapun hi-gatu ey umlaw di Timnah ni an memu-lit ni dutdut ni kalneroh tu. <sup>14</sup> Et hullulan tun kakkayyaggud etan imbalwasi tun balwasin nebalu et manhukyung malat eleg meimmatunan anghah tu et an manyuyyuddung etan di eheb di Enaim e bebley

\* 37:28 37:28 Acts 7:9

ni kadellanan umlaw di Timnah. Mukun humman impahding tu ey tep inamta tu e nehiken law hi Selah, nem eleg peahwan ametun hi-gatu.

<sup>15</sup> Kamangkelebbah hi Judah ey inang-ang tu et kantu na-mu ngu nem hi-gatu hakey ida etan ni biin daka pebeyyad hu annel da tep hinukyungan tu angah tu. <sup>16</sup> Et lumaw di kad-an nunman ni bii et kantuy "Piga pinhed mun pemeyyad kun hi-gam ma-lat iulig daka?" Kan Tamar ey "Ngenamung ka hedin piga pinhed mun iddawat ni hi-gak." Hi Judah ey eleg tu amta e humman etan biin ineputu.

<sup>17</sup> Et kan Judah ey "Pei-lik alin hi-gam hu hakey ni gelding ku." Ey kan Tamar ey "Dammutu, nem pakkadek ni wada iddawat mun nunya et hedin peellim etan gelding mu, man han mu binanggad." <sup>18</sup> Kan Judah ey "Hipa pinhed mun iddawat kun nunya?" Kan Tamar ey "Dammutu eya imbanggel mu niya eya hulkud mu." Inebulut Judah et idwat tudda humman et man-ulig ida et mewad-an hi Tamar. <sup>19</sup> Immanemut hi Tamar et ekalen tu hukung tu niya balwasi tu et ibalwasi tu mewan etan balwasin nebalu.

<sup>20</sup> Yan eman ni nengitu-dakan Judah etan ni gayyum tu hi Hirah ni mengillaw etan ni gelding ni etan ni bii ma-lat bangngaden tudda etan indawat tu, nem endi humman ni bii. <sup>21</sup> Et tu pan-ibgaddan lalakkid Enaim e kantuy "Ettu etan biin tuka pebeyyad hu annel tun kamanyuyuddung la nid eheb ey?" Ey kanday "Endi ngu hu inamta min henin nunman ni biidya." <sup>22</sup> Et mambanggad et kantun Judah ey "Endidman etan bii. Anin ida etan ni lalakkidman et kanday endi hu henin nunman ni biidman." <sup>23</sup> Et kan Judah ey "Anin ew kattedg ni diman et alen tudda etan indawat kun hi-gatu. Tep ngi-ngi-ngian daita hedin mambanggad itan an menemmak ni hi-gatu."

<sup>24</sup> Entanni et nelabah tellun bulan ey wada nengiddatteng nan hi Judah e ya etan ineputu e hi Tamar ey nambalin ni tuka pebeyyad hu annel tu et aye nela-la-gahan. Bimmunget hi Judah et kantuy "Mahapul ni yu pa-hep et giheben yu." <sup>25</sup> Nem yan linawwan dan an mengellan hi-gatu ey kantuy "Yu peang-ang nan Judah eya banggel niya hulkud et ehelen yun hi-gatu e ya ama eyan imbutsug ku ey ya etan kanbanggel niya kanhulkud ni nunya."

<sup>26</sup> Da impeang-ang ey inimmatunan Judah e hi-gatuddan nunman et kantuy "Beken numan ni bahul Tamar hu impahding tu, tep eggak peahwan hi-gatu hi Selah." Eleg tu law iulig hi Tamar.

<sup>27</sup> Yan nedatngan ni pan-unggaan Tamar, ey neamta e nandupi-il hu u-ungnga tu. <sup>28</sup> Yan eman ni tuka ideggedeggeh ey indewdew etan ni hakey hu ngamay tu. Et ya etan biin meneyya ey, binedbedan tun madlang ni sinulid et kantuy "Huyya nemangulu." <sup>29</sup> Nem entanni ginuyud etan ni gelang hu ngamay tu et ya etan hakey hu nebukul ni neukat. Et kan etan ni biin nenaya "Hipa impahding mu et ka nebukul ni neukat?" Et ngadanan tun Peres. <sup>30</sup> Neukat ali dama etan gelang ni nebedbedan ni sinulid hu ngamay tu et ngadanan tun Serah.

## 39

### *Ya nengikelabutan dan Joseph di Egypt (Acts 7:9-10)*

<sup>1</sup> Yan dintengan idan helag Ismael di Egypt ey inggatang da Joseph nan Potipar e apun guwalyad baley patul.

<sup>2</sup> Hi Joseph ey wadan ingganah hi APU DIOS ni kaumbaddang ni hi-gatu et yan nunman ni nanha-adan tud baley Potipar ey kayyaggud hu nambalinan ni emin ni impahding tu. <sup>3</sup> Et humman ni ap-apu e hi Potipar ey inamta tu e kabaddangin APU DIOS hi Joseph di emin ni tuka pehding. <sup>4</sup> Pimpinshed Potipar hi Joseph et pambalin tun hi-gatu mengippaptek ni emin ni wadad baley tu niya emin ni limmu tu. <sup>5</sup> Et meippalpun nanha-adan Joseph diman ey binendisyonan APU DIOS ni emin hu impahding tud baley Potipar, anin niyadda daka ingngunud payew. <sup>6</sup> Hi Joseph law hu nengi-kudan Potipar ni emin ida etan ni wadad nanha-dan tu. Mukun hi Potipar ey endi law danag tu e ebuh law pinhed tun kenen ni kewa-wa-wan tuka nemnemnema.

Hi Joseph ey kat-agun peteg niya kayyaggud hu impenga-annel tu. <sup>7</sup> Et entanni ey wada neminshed etan ni ahwan Potipar ni hi-gatu et lektattuy kantun Joseph ey man-ullig ida. <sup>8</sup> Nem eleg ebbulutan Joseph ni pehding humman. Kantuy "Eleg mabalin ni nak pehding huttan. Ang-ang mu kedi e indinel ni apuk ni hi-gak ni emin eyan wadad baley yu. <sup>9</sup> Ma-nu tep nan-inggeh hu kelebengan min dewwa eyad baley, nem eleg daka idinel ni hi-gak tep ahwa dakan hi-gatu. Et humman hu, eleg mabalin ni nak pehding hu henin nuntan ni lawah ni peteg ni panliwwatan nan Apu Dios." <sup>10</sup> Eleg mengmenghep humman ni ahwan Potipar et kewa-wa-wa ey tuka eyyaeyyagi hi Joseph ma-lat man-ulig ida, nem eleg pinhed Joseph anin ni ya tu pekiyuyuddungan ni hi-gatu.

<sup>11</sup> Wada hakey ni aggew e himmegep hi Joseph e tu ippahding hu ngunu tu ey neipaddih ni endin hekey hu bega-en etan di baley. <sup>12</sup> Et itnged etan ni ahwan Potipar di balwasin Joseph et kantuy "Ikay et ita man-ulig." Nem bimmesik hi Joseph di dallin ey nela-nih balwasi tu et katetenggeda etan ni bii. <sup>13</sup> Yan nenang-angan etan ni bii e nanengtun tuka tetenggeda etan balwasin Joseph <sup>14</sup> ey nantetekkek et umlidda etan bega-en da ey kantuy "Ang yu kedi hu impahding etan ni Hebrew ni in-anemut ni ahwak e daitsu ni-ngangu be-ingen. Himmegep di kuwaltuh ku et tuwak et pilliten ni i-ulig, nem nantetekkek <sup>15</sup> et bumsik di dallin et adyadeh eya balwasi tu e eleg tu hanguden."

<sup>16</sup> Et itlu tu humman ni balwasin Joseph ingganah ni immanemut etan ahwatan nunman ni hileng. <sup>17</sup> Et idaddatteng tu e kantuy "Ang mu kedi etan in-anemut mun Hebrew e himmegep di kuwaltuh e tuwak et pilliten ni i-ulig. <sup>18</sup> Nem nantetekkek et bumsik di dallin e eleg tu hanguden eya balwasi tu."

<sup>19</sup> Dingngel Potipar humman ni inhel ahwatu ey nemahhig hu bunget tu. <sup>20</sup> Et tu pakelabut hi Joseph e an nei-dum idan edum ni impakelabut etan ni patul. <sup>21</sup> Nem nanengtun kabbabbal hi APU DIOS ni hi-gatu. Et humman hu, pinpinhed etan ni ap-apud kallabbutan. <sup>22</sup> Impambalin tu hi Joseph ni ap-apuddan emin ni balud niya hi-gatu ngenamung emin ni kameipahpahding di kallabbutan. <sup>23</sup> Ya etan ap-apud kallabbutan ey kamedinnel ni kapehpehding nan Joseph tep inamta tu e kabaddangin APU DIOS et kayyaggud hu kapambalinin tuka pehding.

## 40

### *Inhel Joseph hu keibbellinan ni ini-innep ida etan ni dewwan balud*

<sup>1-2</sup> Entanni et wadan pinhakkey hu bimmunget etan patul, tep wada nambahulan etan ni kamengapyan sinapay et ya etan kamampatek ni meinum ni innumen tu. <sup>3</sup> Et ikelabut tudda etan di neikelabutan Joseph di baley etan ni ap-apuddan guwalya. <sup>4</sup> Neayepaw idadman et ya etan ap-apun guwalya ey impambalin tu hi Joseph ni mampatek ni hi-gada.

<sup>5</sup> Hakey ni hileng ey wada ini-innep idan nunman ni dewwan balud ey nambaklang keibbellinan da. <sup>6</sup> Yan newa-waan tu et lumaw hi Joseph di kad-an da ey inang-ang tu e ida kaumlemyung. <sup>7</sup> Et kan Joseph ni hi-gaday "Kele kayu kaumlemyung ni nunya?" <sup>8</sup> Himmumang ida ey kandy "Tep wada ini-innep mi, nem endi mengippeamtan keibbellinan da." Kan Joseph ey "Hi Apu Dios hu kamengidwat ni kabaalan ni mengippeamtan keibbellinan ni i-innep. Ehel yun hi-gak hu ini-innep yu."

<sup>9</sup> Kan etan ni kamampatek ni meinum ey "Ya ini-innep ku ey wada kumanggu etan neitnem ni grapes ni <sup>10</sup> tellu panga tu. Entanni ey himmabung et anggagannu neluum. <sup>11</sup> Nakka tetenggeda etan basuh ni patul et pihpihen ku etan grapes di basuh et idwat kun patul."

<sup>12</sup> Kan Joseph ni hi-gatu ey "Ya keibbellinan nuntan ni ini-innep mu ey heninnuy: Ya etan tellun panga ey tellun aggew. <sup>13</sup> Melebbah hu tellun aggew, ey ibbukyat daka etan ni patul et pambanggad daka etan di ngunum dedan ni nunman. <sup>14</sup> Yan pambanggad alid ngunum ey etan tuwak anhan liwwan et pakie-ehhel muwak etan ni patul et ilah tu-et ey ibbukyat tuwak dama. <sup>15</sup> Tep hi-gak ey imbesik da-ak alid bebley min Hebrew et igtang da-ak di deya. Et yan nunya ey iyyadya-ak eyad kallabbutan anin ni endi nak impahding ni lawah."

<sup>16</sup> Dingngel etan ni kamengapyan sinapay e kayyaggud hu keibbellinan ni i-innep etan ni kadwa tu ey kantu daman Joseph ey "Ya ini-innep ku ey wada kumanggu in-agtuk ni tellun basket. <sup>17</sup> Yad etan di nanta-pew ni basket ey wadan emin hu nambakbaklang ni sinapay ni kennen etan ni patul. Nem immalidda sisit et kanen da." <sup>18</sup> Kan Joseph ey "Ya keibbellinan ni tellun basket ey tellun aggew. <sup>19</sup> Melebbah hu tellun aggew et peputul etan ni patul hu ulum. Ey itta-yun tu annel mud keyew et pan-in-e-kanan idan sisit."

<sup>20</sup> Entanni et malebah tellun aggew ey humman ni aggew hu neiunggaan etan ni patul et manhahumul ida etan idan opisyal tud baley tu. Et pa-hep tud kallabbutan etan kamampatek ni meinum niya etan kamengapyan sinapay et paeyag tuddad kad-an tu. <sup>21</sup> Ya etan kamampatek ni meinum ey impambanggad tud ngunu tun nunman ni aggew. <sup>22</sup> Nem ya etan kamengapyan sinapay ey impapety tu. Humman idan neipahding ey humman hu inebig nan Joseph ni keibbellinan ni i-innep da. <sup>23</sup> Nem ya etan kamampatek ni kainnuman patul ey liniwwan tu hi Joseph.

## 41

### *Inhel Joseph hu keibbellinan idan i-innep etan ni patul*

<sup>1</sup> Nelabah dewwan toon ey ini-innep etan ni patul e kaman-eh-ehngeng kumangngud gilig ni Wangwang e Nile. <sup>2</sup> Ey pinhakkeyey wada neukat etan di wangwang ni pitun mangkateban baka et ipa-yuh dan mengngan ni helek di gilig tu. <sup>3</sup> Entanni mewan ey neukat ida dama hu pitun nangkepigit ni baka. Limmaw idad kad-an etan idan mangkateban baka <sup>4</sup> et entanni ey kinan dadda humman ni mangkateban baka. Ey inggibek etan ni patul. <sup>5</sup> Nambangngad ni neugip ey nan-i-innep mewan. Ey inang-ang tu e wada simmemel ni hakey ni pagey e wada pitun udeng tun makabgah niya na-teng. <sup>6</sup> Entanni mewan ey neukat pitun udeng tun nekupeh tep ya maetung ni dibdib ni kamelpud kasimmilin aggew. <sup>7</sup> Entanni ey kinan idan nekupeh ida etan mabgah. Inggibek etan ni patul ey inamtu tu law e nan-i-innep.

<sup>8</sup> Yan newa-waan tu ey tuka pannenemnem humman idan ini-innep tu et tudda paeyag ni emin hu nengamtan magic niyadda nangkenemneman di Egypt. Inhel tun hi-gada hu ini-innep tu, nem endi hakey ni nengamtan keibbellinan tu. <sup>9</sup> Entanni ey kan etan ni kamampatek ni meinum etan ni patul ey "Yan eman ni nambahulan mi lan nunman <sup>10</sup> ey bimmunget kan hi-gami etan ni kamengapyan sinapay et pakelabut dakemi etan di baley ni ap-apuddan guwalya. <sup>11</sup> Hakey ni hileng ey wada ini-innep min dewwan nambaklang hu keibbellinan tu. <sup>12</sup> Ey wada etan kat-agun Hebrew ni edum min neikelabut e bega-en etan ni ap-apun guwalya. Inhel min hi-gatu ini-innep mi et ehlen tu hu keibbellinan tu. <sup>13</sup> Ey makulug numan ni neipahding hu inhel tun keibbellinan ni ini-innep mi. Hi-gak ey nambangngad dak di ngunuk, ey ya etan kamengapyan sinapay ey impapetey mu."

<sup>14</sup> Et paeyag etan ni patul hi Joseph et pa-hep dad kallabbuttan. Nampepu-lit et hullulan tu balwasi tu et lumaw di kad-an etan ni patul. <sup>15</sup> Et ehlen etan ni patul ni hi-gatu hu ini-innep tu. Kantuy "Wada ini-innep ku, nem endi nengamtan keibbellinan tu. Kanday inamtan kunu keibbellinan ni i-innep et mukun impaeyag daka." <sup>16</sup> Himmumang hi Joseph ey kantuy "Apu, endi kabaelan kun menghel ni keibbellinan ni ini-innep mu. Nem hi Apu Dios hu menghel ni kayyaggud ni keibbellinan tu."

<sup>17</sup> Kan etan ni patul ey "Ini-innep ku e nakka man-eh-ehngeng di gilig ni Wangwang e Nile <sup>18</sup> ey wadadda pitun mangkateban bakan neukat etan di wangwang et ipa-yuh dan mengngan ni helek etan di gilig tu. <sup>19</sup> Entanni mewan ey neukat ida hu pitun bakan nangkepigit. Humman idan baka hu kepippiggutan di emin ni bakan inang-ang kudya Egypt. <sup>20</sup> Entanni ey kinan dadda etan mateban baka. <sup>21</sup> Nem endi hu tu kei-ang-angan tep nanengtun nepippigit ida. Et entanni ey inggibek ku. <sup>22</sup> Entanni ey neuyengngak mewan ey ini-innep ku e wada simmemel ni hakey ni pagey e wada pitun udeng tun makabgah ey na-teng. <sup>23</sup> Entanni ey neukat mewan pitun udeng tun kinupeh ni dibdib ni kamelpud appit ni kasimmilin aggew. <sup>24</sup> Ey yadda etan nekupeh ni pagey, ey kinan dadda etan makabgah. Inhel kuddan nengamtan magic huuyaddan ini-innep ku, nem eleg da amta hu keibbellinan da."

<sup>25</sup> Kan Joseph etan ni patul ey "Huttan ni dewwan ini-innep mu ey nan-ingngah hu keibbellinan da. Hi Apu Dios ey impeamta tun hi-gam hu pehding tullin edum ni aggew. <sup>26</sup> Yadda etan pitun mateban baka niyadda etan pitun mabgah ni pagey ey nan-ingngah hu keibbellinan da e pitun toon. <sup>27</sup> Yadda etan pitun bakan nepigut niyadda etan pitun nekupeh ni pagey ey pitun toon ni bisil. <sup>28</sup> Humman etan kangkun nuntan ni impeamtan Apu Dios ni hi-gam hu ipahding tullin. <sup>29</sup> Yadya Egypt ey wadalli pitun toon ni dakel alin peteg hu ennien yu. <sup>30-31</sup> Nem meittu-nud ali hu pitun toon ni bisil. Nemahhig ali humman ni bisil et mebahbah ali eya bebley, et meliwwan ida la etan nelabah ni kayyaggud ni toon ni dakel kennen. <sup>32</sup> Ey nampidwa hu nengi-innepan mu tep makulug ni peamnun Apu Dios ey anggegannu keipahdingan tu. <sup>33</sup> Et humman hu, heninnu hu mahapul ni pehding mu. Pilim hu hakey ni nenemneman niya nelaing ni mengippatek eyan bebley. <sup>34-35</sup> Ey pili kan edum ni aap-apu ma-lat da amungen hu hakey di liman betek ni meennin nunman ni pitun toon ni dakel hu kennen. Emmungen dan emin humman di aallang et guwalyaan da. <sup>36</sup> Humman hu pehding mu ma-lat wadalli kennen ni nunman ni kedettangan ni pitun toon ni bisil et eleg matey ida tuun upa da."

#### *Hi Joseph hu governor di Egypt*

<sup>37</sup> Ya etan patul niyadda etan opisyal tu ey pininhd da humman ni planuh ni inhel Joseph. <sup>38</sup> Et kan etan ni patul idan opisyal tuy "Endi edum ni mei-ingngah nan Joseph tep wadan hi-gatu ispirituh Apu Dios." <sup>39</sup> Kan etan ni patul nan Joseph ey "Tep ay hi-gam hu nengipeamtaan Apu Dios ni nuntan ey humman kei-ang-angan tu e endi edum ni henin hi-gam e nenemneman niya nelaing. <sup>40</sup> Et humman hu, puttuken dakan meihhayned ni hi-gak ni man-ap-apu eyad bebley. Et emin hu tuu ey u-unnuden

da e-helen mu. <sup>41</sup> Yan nunya ey hi-gam hu governor emin eyad bebley di Egypt.” <sup>42</sup> Et ukhupen etan ni patul etan singsing tun nemalkaan ni sinyal tu et ihuklub tud galumeymey Joseph. Humman ni nengidwatan etan ni patul ni singsing tun Joseph hu kei-ang-angan tu e hi Joseph law hu governor. Impebalwasian tun kakkayyagud ni balwasi niya impebangelan tun balituk. <sup>43</sup> Ey indawat tun hi-gatu etan kapanlugganin neihayned ni ap-apud Egypt. Et panlugin tu hi Joseph et ida kamenglaw ey wadadda kamemengngulun kaumtenektekuk ma-lat kumiwang ida tuun pengippeang-angan dan lispituh dan hi-gatu. Et hi Joseph law hu governor di Egypt. <sup>44</sup> Kan etan ni patul ni hi-gatuy “Hi-gak hu patul di deya Egypt, nem hedin wada eleg mu i-abulut ey eleg mabalin ni meippahding.” <sup>45-46</sup> Inngadnan tu hi Joseph ni hi Saphenat Paneah e ngadan ni iEgypt niya impeahwa tun hi-gatu hi Asenat e u-ungngan Potipera e padid Heliopolis. Yan nunman ni nanggovernor hi Joseph di Egypt ey telumpulu toon tu. Et yan nunman ey tu inang-ang ni emin hu bebley diman.

<sup>47</sup> Yan nemangulun pitun toon ey makulug tu-wangun dakel ni peteg hu kennen di kebebbebley di Egypt. <sup>48</sup> Et paemung Joseph idad alang ni kinapyan gubilnu hu ineniddan tuud emin diman ni bebley. <sup>49</sup> Nemahhig e dakel kennen et isiked law Joseph ni manlelkud tep heni kadinakel ni palnah di gilig ni baybay.

<sup>50</sup> Ya nin nunman ni eleg pay medatngan hu bisil ey dewwa hu u-ungngad Joseph nan Asenat. <sup>51</sup> Ya impangngadan Joseph etan ni pengulwan ey hi Manasseh tep kantuy “Hi Apu Dios hu nenga-alluk ni hi-gak di nanhelheltapan ku niyad neidawwian kun ama.” <sup>52</sup> Ya etan neikadwa ey ngingadnan tun hi Epraim tep kantuy “Hi Apu Dios hu nengidwat ni u-ungngak eyad bebley ni nanhelheltapan ku.”

<sup>53</sup> Entanni ey nepappeg etan pitun toon ni dakel kennen di Egypt. <sup>54</sup> Neilepu law etan bisil ni immamnu etan inhel Joseph. Emin di kebebbebley ey na-puhan idan kennen, nem yad Egypt ey dakel hu kennen diman. <sup>55</sup> Entanni ey anin idan iEgypt et ida kamangke-puhin kennen et ida mambaga etan ni patul da. Nem kan etan ni patul ni hi-gaday “Kayu pambangan Joseph et ngenamung hu e-helen tu.”

<sup>56</sup> Nemahhig law hu bisil di kebebbebley di Egypt et pebeghul Joseph ni emin etan aallang et pan-igtang tuddan katuuuudman hu in-alang da. <sup>57</sup> Entanni ey kamampengellid Egypt hu tutu-ud edum ni bebley ni an umgatang nan Joseph ni kennen tep nemahhig hu bisil.

## 42

### *Ya an gintangan idan aaggin Joseph ni kennen di Egypt (Acts 7:11-12)*

<sup>1</sup> Dingngel Jacob e wada kennen di Egypt et kantuddan u-ungnga tuy “Kele kayu kamanahintekel ni ebuh e kayu kametemman pehding yu? <sup>2</sup> Deh e dingngel ku e wada kennen di Egypt. Lakkay et kayulli gumtang ni kennen tayu ma-lat eleg itsu matey ni upa.” <sup>3</sup> Et lumaw ida etan hampulun u-ungngan Jacob ni an umgatang ni kennen di Egypt. <sup>4</sup> Eleg pakilaw nan Jacob hi Benjamin tep kaumkaguh ni entanniy wada meippahding daman hi-gatu.

<sup>5</sup> Humman idan u-ungngan Jacob ey nekilaw idan edum ni tuun limmaw ni an umgatang ni kennen di Egypt tep anin ni yad Kanaan et bisil damadman.

<sup>6</sup> Hi Joseph e governor di Egypt hu kagettangiddan tutu-un kennen. Et mukun yad kad-an tu hu linawwan ida agitu e manyuung idad hinangga tun pengippeang-ang dan lispituh dan hi-gatu. <sup>7-8</sup> Yan nenang-angan nan Joseph idan agitu ey inimmatunan tudda. Nem eleg da immatunan hi Joseph e agi da. Et ya impahding Joseph ey impeang-ang tu e heni eleg tudda amta et tuka pambinungnet hu tuka pan-e-ehhel ni hi-gada e kantuy “Ettu bebley ni nalpuan yu?” Himmumang ida agitu e kandy “Nalpu kamid Kanaan. Immali kamin umgatang ni kennen.” <sup>9</sup> Ninemnem Joseph hu ini-innep tun nunman meippanggep ni hi-gada. Et kantun hi-gaday “Tam immali kayun an mansi-im ni hi-gami ma-lat amtaen yu elaw eyan bebley mi hedin dammutun apputen dakemid gubat.” <sup>10</sup> Kandy “Apu, endi kattedg hu henin nuntan ni nemnem mi, tep hi-gamin begaen mu ey immali kamin umgatang ni kennen mi. <sup>11</sup> Han-aaggi kami e u-ungnga dakemin hakey ni tuu. Kayyagud ngu nemnem mi, bekken ni ya an mansi-im hu in-ali midya.”

<sup>12</sup> Nem kaippilit nan Joseph e kantuy “Itek yu, immali kayu kumaddan ni mansi-im.” <sup>13</sup> Et kan da mewan ni humang day “Makulug e apu et endi huttan ni nemnem mi. Hampulut dewwa kamin han-aaggin u-ungngan hakey ni tuud Kanaan. Nanha-ad ali etan udidyan di kad-an amemi, ya etan hakey ni agi mi ey neendi.”

<sup>14</sup> Nem kaippilit nan Joseph e kantuy “Eleggak kulluga hu inhel yu. Inamtak et immali kayun an mansi-im. <sup>15</sup> Ya pematnak ni hi-gayu ma-lat pengamtaan ku hedin bekken ni

itek huttan ni inhel yu ey eleg kayu um-anemut ingganah ni um-alidya etan udidyan yu. Et huyyan inhel ku ey mandal metlaining etan ni patul. <sup>16</sup> Et humman hu, mahapul ni umlaw ali hakey ni hi-gayun an mengewwit etan ni udidyan yu. Hi-gayun edum ey meikkellabut kayu et maguwalyaan kayu ingganah ni amtaen ku e makulug hu inhel yu. Tep hedin itek hu inhel yu ey humman keang-angan tu e makulug ni immali kayun mansi-im.” <sup>17</sup> Et pakelabut Joseph idan tellun aggew.

<sup>18</sup> Yan meikkatlun aggew ey kan Joseph ni hi-gaday “Hi-gak ey hi Apu Dios hu nakka u-unnuda, et humman hu, eleg dakeyu pepettey hedin u-unnuden yu eya e-helen kun hi-gayu. <sup>19</sup> Anin ni ya hakey ni ebuh ni hi-gayu hu meikkellabut et anin ni umlaw kayun edum ma-lat ilaw yu etan gintang yun kennen et eleg ida matey ni upa etan ida hini-yan yud bebley yu. <sup>20</sup> Nem mahapul ni ikkuyug yulli etan udidyan yu et pengamtaan kun beken ni itek etan inhel yu et eleg dakeyu papetey.” Ey inebulut idan han-aaggi humman ni inhel Joseph.

<sup>21</sup> Wada hakey ni hi-gada ey kanday “Yan nunya ey tayu kahelheldapa law etan nambahulan tayu la etan ni agi tayun hi Joseph. Inang-ang tayun nunman hu hineltap tun nampehemhemmekan tun hi-gatsu, nem eleg tayu hemeken.” <sup>22</sup> Et kan Reuben ey “Kan ku dedan ey etan kuma dake hu yu pehding ni hi-gatu, nem eleg yuwak dengelen. Et yan nunya ey meibleh ni hi-gatsu hu neendian tu.”

<sup>23</sup> Hi Joseph ey inawtan tu humman ni inhel da, nem kan da na-mu nem eleg tu hanawat tep hedin mekihummangan idan hi-gatu, man wada kamengibbellin ni daka e-hela. <sup>24</sup> Hini-yan Joseph ida et an mannannangngih. Et han mambangngad et hi Simeon hu impabelud tu e kaang-angaddan agi tu.

<sup>25</sup> Inhel Joseph ida etan ni bega-en tu e ha-adan dadda langgusih da niya ibbangngad dadda pihhuh da e itta-pew daddad langgusih da. Ey iddaddanan daddan balun dan kennen dad dalan. <sup>26</sup> Negibbuh ni neidaddan hu kalga da et itakkay idan nunman ni agin Joseph di kebayyu da et manglaw ida.

#### *Ya inenamutan idan agin Joseph*

<sup>27</sup> Entanni ey nehilngan ida et mandeyaddad dalan. Ey inubad etan ni hakey hu bedbed ni langgusi tu ma-lat umlan pekkam tun kebayyu tu ey inang-ang tu etan pihhuh ni impameyad tun neita-pew di langgusih tu. <sup>28</sup> Et kantuddan agi tuy “Keyuy kedi et ang-angen yu, tam imbangngad da etan pihhuh ni imbayad ku. Adyah e inta-pew dad langgusih ku.” Ey simmakut ida e kanday “Nekele hanneya kapehding nan Apu Dios ni hi-gatsu?”

<sup>29</sup> Immanemut idad Kanaan et ehlen dan amedan emin hu neipahding ni hi-gada. <sup>30</sup> Kanday “Ya etan governor ey tuka pambinungnet ni meki-ungbal ni hi-gami. Kantuy limmaw kamin mansi-im di bebley da. <sup>31</sup> Kan min hi-gatuy ‘Bekken ni kami mansi-im tep kayyaggud ngu nemnem mi. <sup>32</sup> Hi-gami ey hampulut dewwa kamin han-aaggin u-ungngan hakey ni tuud Kanaan. Nanha-ad ali etan udidyan di kad-an amemi ey ya etan hakey ni agi mi ey neendi.’ <sup>33</sup> Ey kan etan ni governor ey ‘Ya pengamtaan ku hedin makulug hu inhel yu ey manha-ad ni hu hakey ni hi-gayu et umenamut kayun edum ma-lat ienamut yu hu gintang yun kennen et eleg ida matey ni upa etan ida hini-yan yud bebley yu. <sup>34</sup> Nem hedin um-ali kayu mewan ey mahapul ni ikuyug yulli etan udidyan yu ma-lat pengamtaan ku e beken ni itek hu inhel yun beken ni kayu mansi-im. Et han nak pa-hep di kallabbutan etan agiyu niya dammutun um-ali kayu mewan ni umgatang ni kennen yu.’ ”

<sup>35</sup> Entanni et ubaden dan emin hu bedbed di langgusih da ey nei-peng di langgusih da hu pihhuh ni imbayad da. Ey simmakut ida, anin ni hi ameda e hi Jacob. <sup>36</sup> Et kan amedan hi-gaday “Tam pinhed yun meendin emin hu u-ungngak. Neendi hi Joseph, ey neitu-nud mewan hi Simeon. Ey yan nunya mewan ey kanyuy ikkuyug yu hi Benjamin? Tam yuka ma-ma-maa hu nakka panhelheldapi.”

<sup>37</sup> Nem kan Reuben nan hi ametuy “Hi-gak hu ngenamung e ama. Hedin eggak i-anemut hi Benjamin, man anin ew katteg ni petteyan mudda etan dewwan u-ungngak.” <sup>38</sup> Nem kan Jacob ey “Eleg mabalin ni mekillaw eya u-ungngak e hi Benjamin di Egypt. Tep inamta yu e hi-gatun ebuh natdaan ni u-ungnga min Rachel tep neendi etan hakey. Entanni mewan ey wada hu meippahding ni hi-gatud dalan. Hi-gak ey nea-amma-ak law et metteyyak hedin meendi eya u-ungngak.”

## 43

<sup>1</sup> Nanengtun nemahhig hu bisil di Kanaan. <sup>2</sup> Et yan na-puhan ni kennen ni da gintang, ey kan Jacob idan u-ungnga tuy “Lakkayuy ew mewan di Egypt et kayulli gumtang ni kennen tayu.”



<sup>3</sup> Ey kan Judah ey "Em, nem kan mannuman etan ni gubernor ey eleg dakemi kunu i-abulut ni menang-ang ni hi-gatu hedini eleg mi ikkuyug etan udidyan mi." <sup>4</sup> Et humman hu, hedini i-abulut mun mekillaw hi Benjamin ey umlaw kamin an umgatang ni kenneh tayu. <sup>5</sup> Nem hedini eleg mu i-abulut ey eleg kami umlaw tep kan etan ni gubernor ey "Eleg dakeyu i-abulut ni menang-ang ni hi-gak hedini eleg yu ikkuyug etan agi yu."

<sup>6</sup> Kan Jacob ey "Kele dedan yu inhel e wada hu hakey ni agi yu? Tam yuka ma-ma-maa hu nakka panhelheltapi!" <sup>7</sup> Kanday "Tep kantuy 'Kaw mategu hi ameyu niya kaw wada pay hu edum ni agi yu?' Et mahapul ni hummangen midda humman ni imbagetu. Kaw hipa nengamtaan mi e tu e-helen e mahapul ni ikkuyug mi etan agi mi?"

<sup>8</sup> Et kan Judah nan ametuy "Iebulut mun mekillaw hi Benjamin et lumaw kami malat endin hi-gatsu hu mettey ni upa. <sup>9</sup> Anin ni hi-gak hu ngenamung. Hedini eleg ku i-anemut ey hi-gak ali hu kambahul ni ingganah. <sup>10</sup> Gullat et ni eleg kami metaktak wada-et ni nampidwa kamin limmaw."

<sup>11</sup> Et kan ameday "Hedini henin nuntan, ey ala kayun hipan kakkayyaggud ni wada eyad bebley et idwat yu la etan ni gubernor. Ala kayun danum ni putsukan, ya kaikkamdug di ihhida, ya bangbanglun insensoh niyadda edum ni lameh ni intanem. <sup>12</sup> Ey mahapul ni edumi yu ellan yun pihhuh, et ibangngad yu etan pihhuh ni ibangngad dad ta-pew ni langgusih yu eman ni linawwan yu lan laputu tep nehimeng ida na-mu. <sup>13</sup> Anin ew katteg ni ikuyug yu eya agiyu et lumaw kayu. <sup>14</sup> Hi Apu Dios e Kabaelan tun emin hu ngenamung ni memaddang ni hi-gayu ma-lat hemeken dakeyu etan ni gubernor et paenamut tulli hi Benjamin niya ma-lat pa-hep tud kallabbuttan hi agiyun hi Simeon et umenamut kayun emin. Nem hedini kantu et kapyatun wada meippahding ni hi-gada, ey ngenamung ew katteg diman!"

*Nekilaw hi Benjamin di Egypt*

<sup>15</sup> Inu-unnud da humman ni inhel ameda et umladdan iddawat da etan ni gubernor niya induman da hu intabin dan pihhuh et lumaw ida e ingkuyug da hi Benjamin di Egypt. Et lumaw idad kad-an etan ni gubernor e hi Joseph. <sup>16</sup> Inang-ang Joseph hi Benjamin ey kantu etan ni bega-en tun kamampatek di baley tuy "Ipengulum idad baley ku niya keleng kayun ihhidemi tep mekikkan idan hi-gak ni emaggew." <sup>17</sup> Inu-unnud etan ni bega-en et ipengulu tuddad baley Joseph.

<sup>18</sup> Yan daka pampengillawwin hi-gada ey ida kaumkenebkeb et kanday "Mukun mannuman illaw daitsudman ey ya etan pihhuh ni imbayad tayun laputun ibangngad dad langgusih tayu. Nungay ngun pambalinen daitsun bega-en et peki-la dadda eya kebayyu tayu?"

<sup>19</sup> Dimmateng idad heggeppan di baley Joseph ey kanda etan ni bega-en ni kamampatek di baley tuy <sup>20</sup> "Apu, hi-gamidda la etan immalin gimmatang ni kenneh. <sup>21-22</sup> Immali kami mewani ni umgatang ni i-anemut mi. Nem yan eman ni laputun gintangan mi et umenamut kami ey inang-ang mi e nei-peng di langgusih mi etan pihhuh ni imbayad mi. Ey eleg mi amta hedini hipa nengiha-ad diman. Et humman hu, adyah e impeki-la mi ma-lat ibangngad mi."

<sup>23</sup> Ey kan etan ni bega-en ey "Entan pandanag yu niya entan takut yu tep hi Apu Dios e kadeyyawan ameyu hu nengiha-ad ni nunman ni pihhuh. Tep inlak ida ngu etan pihhuh ni imbayad yu." Entanni ey impaukat tu hi Simeon <sup>24</sup> et han tu pahgep idan emin di baley Joseph. Ey nandaddan ni danum ni pengullah dan heli da e et pangan tudda hu kebayyu da. <sup>25</sup> Inukat ida etan ni han-aaggi etan iddawat dan Joseph ni ellian tun emaggew tep dingngel da e mekikkan idan hi-gatu.

<sup>26</sup> Immanemut hi Joseph et idwat da etan inla dallid bebley dan iddawat dan hi-gatu et manyuung idan panlipituh dan hi-gatu. <sup>27</sup> Imbagnetun hi-gada hedini inna-nudda. Ey kantuy "Inhel yu lan nunman e nea-amma law hi ameyu. Kaw nanengtun mategu?" <sup>28</sup> Himmumang ida ey kanday "Em apu, nanengtun mategu hi amemi." Et manyuung ida mewani ni hi-gatu.

<sup>29</sup> Intekel nan Joseph hi Benjamin e agitun mismuh ey kantuy "Kaw huyya etan kan yun udidyan yu? Bendisyonan dakan Apu Dios e u-ungnga." <sup>30</sup> Entanni ey eleg han-ispel nan Joseph hu nangih tun nenang-angan tun agi tu et papuut tun umhep et lumaw di kuwautuh tu et an mannannangngih diman. <sup>31</sup> Insiked tu nangih et manda-lup et han maukat et ehlen tuddan bega-en tun iddaddan da hu kenneh.

<sup>32</sup> Neappil hi Joseph ni nengan di hakey ni tebol et yadda dama agi tud hakey ni tebol. Neappil ida dama etan iEgypt ni mengngan tep eleg da pinhed ni mei-dum ni mekikkan idan Hebrew tep nebahah hu daka penang-ang ni hi-gada. <sup>33</sup> Natngadda etan agin Joseph tep impanhenehened daddan impayudung meippalpud pengulwan ingganah di udidyan e inhangga dan Joseph. <sup>34</sup> Ya etan kenneh da ey daka an ellad tebol Joseph. Daddakkel

indawat dan kengen nan Benjamin e mampillima kedakkel tu nem ya indawat dan kengen indan agitu. Et makangngan idan emin et manginum ida.

## 44

### *Ya etan basuh nan Joseph*

<sup>1</sup> Entanni ey kan Joseph etan ni bega-en ni kamampaptek di baley tuy "Panहुदुim hu sakuh da, ngenamung hu kabaelan dan tetngeden. Ey ibangngad mu pihhuh da e ita-pew mud Langgusih da. <sup>2</sup> Niya ita-pew mu etan silver ni basuh kud langgusih ni udidyan." Et u-unnuden etan ni bega-en.

<sup>3</sup> Yan newa-waan tu ey himmaleman idan limmaw e ingguyud dadda hu kebayyu da. <sup>4</sup> Nem eleg ida meidawwi ey kan Joseph etan ni bega-en tuy "Lakkay, unud mudda eman han-aaggi. Hedin ha-kupen mudda, kammun hi-gaday 'Kele kakkayyaggud hu impeang-ang ni apuk hi-gayu ey lawah yu impahding? <sup>5</sup> Kele yu impeki-la etan nekannginan basuh etan ni apuk? Humman ni basuh hu tuka innumi niya tuka ussalan man-ebbig. Et-eteng ni bahul huttan ni impahding yu.' "

<sup>6</sup> Et maiunud etan bega-en ey hina-kup tudda et ehelen tun hi-gada etan inhel Joseph. <sup>7</sup> Nem kandan hi-gatuy "Apu, hipa huttan ni muka pan-e-hela? Makulug ngu et endi mi impahding ni henin nuntan. <sup>8</sup> Tam inamtam mewan e imbangngad mi etan pihhuh ni neita-pew di langgusih min inenamutan mid Kanaan. Kele man kami menekkew ni silber winu balitik di baley ni apum? <sup>9</sup> Nem anin, ikay et panhamaken mud emin eyad langgusih mi et hedin wada hemmakan mu, ey anin papetey yu etan nengala niya pambalin dakemin edum ni bega-en tu."

<sup>10</sup> Kan etan ni bega-en ey "Dammutu huttan, nem ya pinhed ku ey ebuh etan nengalan mambalin ni bega-en. Hedin yadda edum ey dammutun um-anemut ida." <sup>11</sup> Et pan-epahen dadda langgusih da et wada hakkeyey inubad tu bedbed ni sakuh tu. <sup>12</sup> Et ilepu etan ni bega-en Joseph ni menemmak di langgusih etan ni pengulwan. Entanni et dinteng tu etan langgusih etan ni udidyan ey himmak tu etan basuh. <sup>13</sup> Yadda etan han-aaggi ey nambi-ki da balwasi dan degeh ni nemnem da. Et pan-itakkay da mewan etan langgusih dad kebayyu da et mambangngad idan emin di bebley.

<sup>14</sup> Dimmateng idad baley Joseph ey immen diman et manyuung idan hi-gatu. <sup>15</sup> Ey kan Joseph ey "Kele hipa huttan ni yu impahding? Kaw eleg yu amta e dammutun amtaen ku hu impahding yu tep maebiggak?"

<sup>16</sup> Kan Judah ey "Eleg mi amta ihhumang min hi-gam, apu governor. Ey anin ni e-helen mi hu makulug e kammiy eleg kami mambahul et endi damengu silbitu, tep huyyan neipahding ni hi-gami hu pengastigun Apu Dios ni hi-gamid nambahulan mi lan nunman. Et humman hu, anin ew katteg ni pambega-en dakemin emin ni hi-gam et beken ni ebuh etan nengalan basuh mu."

<sup>17</sup> Nem kan Joseph ey "Eleg mabalin ni nak pehding huttan! Ebuhan nengalan basuh kun pambega-en ku. Hedin hi-gayun edum ey dammutun um-anemut kayud bebley yu di kad-an ameyu."

<sup>18</sup> Nem nekihummangan hi Judah nan Joseph et kantuy "Apu governor, hi-gam ey neiinggeh hu kabaelan etan ni patul, nem dengel mu anhan eya e-helen ku, entan anhan bunget mu. <sup>19</sup> Apu, imbagam lan hi-gami eman ni laputan inlian mi hedin nanengtun wada amemi winu agimi. <sup>20</sup> Et kammi ey 'Wada amemin nea-amma niya wada hakey ni agi min udidyan ni newada eman ni kapangkea-ammain amemi. Ey inhel mi e wada agi etan ni agi min udidyan, nem neendi et ebuh tu law ni u-ungngan inetu. Et hi amemi ey nakappinhet tun peteg eya udidyan mi.' <sup>21</sup> Inhel mun hi-gamin ikkuyug mi et ang-angen mu. <sup>22</sup> Et ehelen min hi-gam e apu e eleg mabalin ni hi-yanen tu ametu tep entanniy humman ali kumedek hu ikkatay amemi. <sup>23</sup> Nem kammuy eleg mabalin ni kami mewan mampeang-ang ni hi-gam hedin eleg mi ikkuyug huyyan udidyan mi. <sup>24</sup> Et humman hu, yan inenamutan mid bebley mi, ey indaddatteng min amemi humman ni inhel mu.

<sup>25</sup> Et yan na-puhan ni gintang min kengen di deya ey kan amemi ey um-ali kami mewan ni umgatang. <sup>26</sup> Nem inhel min hi-gatu etan inhel mu e eleg mabalin ni kami mampidwan umgatang hedin eleg mi ikkuyug huyyan udidyan mi. <sup>27</sup> Ey kan amemin hi-gamiy 'Inamta yu e dewwan ebuh hu u-ungnga min Rachel. <sup>28</sup> Ya etan hakey ey neendi. Nanna-ud ni nebeni-ki hu annel tun impahding ni animal di muyung tep ingganah ni nunya ey endin nambangngad. <sup>29</sup> Et hedin ikkuyug yu eya agi yu et wada mewan meippahding ni hi-gatu ey e-duman yu degeh ni nemnem ku. Ey humman umhulun ni ketteyyan ku, nema-ma tep ay nea-amma-ak law.'

<sup>30-31</sup> Et yan nunya e apu, ey hedin um-anemut kami et eleg mekillaw eya udidyan mi et endi tun ang-angen amemi ey makulug ni mettey. Tep heni neitekap hu biyag tu eyad udidyan ni u-unggatu. Ey hedin iddawtan mi amemin dedgehan ni nemnem tu ey ay nea-amma man anhan ey mettey et hi-gami kambahul. <sup>32</sup> Ya hakey mewan ey inhel kun amemi e hi-gak hu ngenamung eyan udidyan mi et hi-gak hu kambahul ni ingganah hedin endin mambangngad. <sup>33</sup> Et humman hu, nakka ibbagan hi-gam e apu e hi-gak ew hu pambega-en mu et beken eya udidyan ni agimi ma-lat umenamut nan amemi. <sup>34</sup> Tep eleg damengu mabalin ni nak um-anemut hedin eleg mi ikkuyug eya udidyan mi, tep eggak han-ituled ni menang-ang ni lawah ni meippahding nan amemin eleg tu penang-angi eyan agimi."

## 45

### *Ya nampeamtaan Joseph idan agitu (Acts 7:13-15)*

<sup>1</sup> Entanni ey eleg law han-isipel nan Joseph et pinhed tun mampeamtan hi-gada. Et pa-hep tudda bega-en tu et ebuh idad agi tu et hantu ehela e hi-gatu etan agidan hi Joseph. <sup>2</sup> Nemahhig nangih tu et dengelen idan iEgypt et da peamta etan ni patul. <sup>3</sup> Kan tuddan agituy "Hi-gak hi Joseph. Kaw makulug ni nanengtun mategu hi ama?" Nem eleg umhumang ida etan agitu et ida kaum-eneeneng tep simmakut idan nangngelan dan inhel tu.

<sup>4</sup> Kan tun hi-gaday "Keihnup kayun hi-gak." Et meihnup idan hi-gatu. Et kantu mewan ey "Hi-gak hi Joseph e agi yun inggangang yu lan nunman ida eman ni tuun mampeellidya Egypt. <sup>5</sup> Nem entan tu pabehuli annel yu di yu impahding, tep hi Apu Dios hu kannemnem ni mengippeellidyan hi-gak ma-lat meihwang ida tuu eyad bisil. <sup>6</sup> Yan nunya hu meikkadwan ebuh ni toon ni bisil et wada pay hu liman toon et han mepappeg huyyan bisil. <sup>7</sup> Impabukul tuwak nan Apu Dios ni impaelidya ma-lat emin itsun han-aamma niya han-aaggi ey meteggu itsu e eleg itsu mettey ni upa tayu et mahlag itsu. <sup>8</sup> Makulug ni hi Apu Dios hu nengi-lin hi-gak di deya, beken ni hi-gayu. Et deh e impambalin tuwak ni meihhayned ni ap-apu et hi-gak hu ngenamung eyad bebley di Egypt.

<sup>9</sup> Et yan nunya, ey papuut yu et lumaw kayu et kanyun ametayuy 'Ya etan u-ungngam e hi Joseph ey impambalin Apu Dios ni gubernor di Egypt. Inhel tu e eleg itsu mantaktaktak et lumaw itsu kumadman. <sup>10</sup> Mambebley itsud Goshen di Egypt. Ikkuyug tayudda u-ungnga niyadda inap-apu tayu, anin idan inhalun tayu niya emin ni wadan hi-gatsu et manha-ad itsudman ma-lat meihnup itsun hi-gatu. <sup>11</sup> Manha-ad itsudman Goshen et hi-gatu ngenamung ni kennen tayu tep wada pay hu liman toon ni bisil et eleg tu pinhed ni mettey itsun upa."

<sup>12</sup> Immelhel mewan hi Joseph ni hi-gada ey kantuy "Inamta yu law e makulug ni hi-gak hi agiyu hi Joseph, anin ni hi-gam e Benjamin. <sup>13</sup> Et humman hu, elaw kayu ma-lat yu peamtan ametayu hu kasina-gey ni saad kudya e bebley niya ehel yun hi-gatun emin hu inang-ang yu. Imay, lakkayuy et yulli awiten."

<sup>14</sup> Negibbuh ni inhel tu humman et akwalen tu hi agitu hi Benjamin ey kaman-nengngih. Et akwalen daman Benjamin e kamannengngih dama. <sup>15</sup> Nanengtun kamannengngih hi Joseph ey tudda nan-akwal etan edum ni agitu. Et entanni ey ida law kamekihuhummangan ni hi-gatu.

<sup>16</sup> Dingngel etan ni patul niyadda opisyal tu e wadadda agin Joseph ey immamleng ida. <sup>17</sup> Kan etan ni patul nan Joseph ey "Ehel muddan agim et kalgaan dadda kebayyu dan kennen et han ida mambangngad di Kanaan. <sup>18</sup> Ey ehel mun hi-gada et dalli awiten hi ameyu niyadda pamilyah da et umliddadya. Ittudwan kuddan kekakkayyaggudan ni puyek ni panha-adan da et eleg ida mekulngan ni mahapul da. <sup>19</sup> Niya ehel mun hi-gada et numa-yun idan panlugganan idan aahwada niyadda u-ungnga da niya ikkuyug dalli ameyudya. <sup>20</sup> Ehel mun hi-gada e eleg ida umkakaguh ni peni-yanan dan Kanaan tep iddawat kun hi-gada hu kekakkayyaggudan ni puyek di deya Egypt ni pambebleyan da."

<sup>21</sup> Et abuluten idan han-aaggi humman ni inhel etan ni patul. Et mandaddan idan umlaw. Indawtan idan Joseph ni panlugganan dallin mambangngad niya kennen da lad dalan tep humman inhel etan ni patul ni hi-gatun pehding tu. <sup>22</sup> Ey indawtan tuddan hanhakkey ni balwasin panhullulan da. Nem hedin hi Benjamin, man indawtan tun liman balwasi niya telunggatut ni palatah. <sup>23</sup> Niya impalaw tun ametu hu hampulun kebayyun nangkalgan dakel ni kakkayyaggud ni wadad Egypt niya hampulun kebayyun nangkalgan pagey, ya sinapay niya edum ni mahapul dad dalan. <sup>24</sup> Immegah ida etan agitu ey kantuy "Entan la pambabakal yud dalan."

<sup>25</sup> Hini-yan da Egypt et mambanggad idad Kanaan. Dimmateng ida et kandan ameday  
<sup>26</sup> “Mategu hi Joseph! Hi-gatu ap-apud Egypt!” Nem natngan peteg e eleg tu kulluga  
humman ni inhel da. <sup>27</sup> Nem yan nanghelan dan emin ni impaad alin Joseph et yan  
nenang-angan tu etan idan panlugganan dan impaelin Joseph ni mengillaw ni hi-gadad  
Egypt ey immamleng ni peteg. <sup>28</sup> Kantuy “Kayyaggud anhan et mategu etan u-ungngak  
e hi Joseph! Mahapul ni umlawwak et nak ang-angen et hannak matey!”

## 46

### *Ya linawwan di Jacob di Egypt*

<sup>1</sup> Et mandaddan di Jacob e impeki-la dan emin hu wadan hi-gada et umgah ida.  
Dimmateng idad Beersheba et iappitan tu etan Dios eman lan ametu hi Isaac. <sup>2</sup> Yan  
nunman ni hileng ey nampeang-ang hi Apu Dios nan Jacob et kantuy “Jacob!”  
Himmumang hi Jacob e kantuy “Hipa humman e Apu?”

<sup>3-4</sup> Ey kantuy “Hi-gak etan Dios ni dinaydayaw lan amam. Entan takut mun umlaw  
di Egypt, tep pedakkel kulli hu helag mudman. Ippaptek dakeyun lawwan yudman ey  
ibbanggad kuddalli helag mudya. Ey wadalli hi Joseph di kad-an mun ketteyyan mud  
Egypt.”

<sup>5-7</sup> Newa-wa et ilugan mewan idan han-aaggi hi Jacob, yadda u-ungnga da niyadda  
aahwa da etan di impalaw ni patul ni panlugganan et hi-yanen da Beersheba. Impeki-la  
dan emin hu inhalan da niyadda emin hu limmudad Kanaan.

### *Yadda etan helag Jacob ni limmaw di Egypt*

*(Exodus 1:1-4)*

<sup>8</sup> Huyya ngadan idan u-ungngan Jacob ni limmaw di Egypt. Hi Reuben e pengulwan  
<sup>9</sup> niyadda etan u-ungnga tun hi Hanok, hi Pallu, hi Hesron, et hi Karmi. <sup>10</sup> Hi Simeon  
niyadda etan u-ungnga tun hi Jemuel, hi Jamin, hi Ohad, hi Jakin, hi Sohar, et hi Saul e  
u-ungnga tu etan di hakey ni biin iKanaan. <sup>11</sup> Hi Levi niyadda u-ungnga tun hi Gerson,  
hi Kohat et hi Merari. <sup>12</sup> Hi Judah niyadda etan u-ungnga tun hi Sela, hi Peres et hi Serah.  
(Netey ida dewwan u-ungngan Judah e hi Er et hi Onan eman ni wadaddad Kanaan.)  
Wadadda hu inap-apun Judah ni u-ungngan Peres e di Hesron nan hi Hamul. <sup>13</sup> Hi  
Issakar niyadda u-ungnga tun hi Tola, hi Puah, hi Jashub et hi Simron. <sup>14</sup> Hi Sebulun  
niyadda u-ungnga tun hi Sered, hi Elon et hi Jahleel. <sup>15</sup> Huyyadda u-ungngan Jacob nan  
Leah eman ni wadaddad Mesopotamya, nem eleg mei-dum etan u-ungnga dan biin hi  
Dinah. Telumpulut tellu hu bilang dan emin.

<sup>16</sup> Hi Gad niyadda u-ungnga tun hi Sephon, hi Haggi, hi Suni, hi Esbon, hi Eri, hi Arodi  
et hi Areli. <sup>17</sup> Hi Asher niyadda etan u-ungnga tun hi Imnah, hi Isbah, hi Isbi, hi Beriah  
et hi Serah e bii, niyadda etan inap-apun Asher e u-ungngan Beriah e di Heber nan  
Malkiel. <sup>18</sup> Huyyaddan hampulut enem hu nahlag di Jacob nan Silpah e bega-en nan  
Leah ni indawat ametun hi Laban.

<sup>19</sup> Yadda u-ungngad Jacob nan Rachel ey di Joseph nan Benjamin. <sup>20</sup> Yadda u-ungngan  
Joseph di Egypt ey di Manasseh nan Ephraim e ya ineda ey hi Asenat e u-ungngan Potipera  
e padid Heliopolis. <sup>21</sup> Yadda u-ungngan Benjamin ey hi Bela, hi Beker, hi Asbel, hi Gera,  
hi Naaman, hi Ehi, hi Ros, hi Muppim, hi Huppim et hi Ard. <sup>22</sup> Huyyaddan hampulut  
epat hu nahlag di Jacob nan Rachel.

<sup>23-25</sup> Yadda pitun helag di Jacob nan hi Bilhah e bega-en nan Rachel ni indawat ametu  
e hi Laban ey hi Dan, yadda etan u-ungnga tun hi Hushim, hi Naptali niyadda u-ungnga  
tun hi Jahseel, hi Guni, hi Jeshet, et hi Sillem.

<sup>26</sup> Et ya bilang emin ni helag Jacob ni limmaw di Egypt ey na-nem et enem e eleg  
makibilang ida ahwan u-ungnga tu. <sup>27</sup> Hedin mei-dum ida etan dewwan u-ungngan  
Joseph di Egypt man nepitudda.

<sup>28</sup> Yan eman ni kamenetteng di Jacob di Egypt ey impemappanggulun tu hi Judah ni  
an menghel nan Joseph ma-lat tudda dammuen di Goshen. <sup>29</sup> Et manlugan hi Joseph di  
kalesah tu et tu dammuen di ametud Goshen. Nandateng idan ametu et akwalen tu et  
tagan tu nangih. <sup>30</sup> Ey kan Jacob ni hi-gatuy “Anin ni metteyyak law haggud inang-ang  
daka ey nanengtun mategu ka.”

<sup>31</sup> Et kan Joseph nan hi ametu, yadda agitu, niyadda etan edum ni nekilaw ni hi-gada ey  
“Umlawwak di kad-an etan ni patul ma-lat nak peamtan hi-gatu e immali kayun nalpud  
Kanaan. <sup>32</sup> E-helen kun hi-gatu e kayu kamampattul e intabin yuddalli animal yu niya  
emin hu wadan hi-gayu. <sup>33</sup> Ey hedin peeyyag dakeyun hi-gatu et ibbagetu ngunu yu,  
<sup>34</sup> ehel yu e neipalpun keu-ungnga yu ey kayu kamampattul e henidda lan aammed tayu.  
Tep hedin huuya e-helen yun hi-gatu, man yadya Goshen hu ittudu tun pambebleyan yu  
ma-lat meappil kayuddan iEgypt tep daka pihhuladda hu kamampattul.”

## 47

<sup>1</sup> Ingkuyug Joseph hu limadda etan ni aaggi tu et lumaw idad kad-an etan ni patul et an makihummangan. Kantu etan ni patul ey “Dimmateng di ama et yadda aagik ni nalpud Kanaan e intabin dan emin hu inhalun da niya emin hu wadan hi-gada et immen idad Goshen.” <sup>2</sup> Et peam-amta tu etan ni patul etan ida liman agitun ingkuyug tu.

<sup>3</sup> Ey kan etan ni patul ni hi-gaday “Hipa ngunu yu?” Kanday “Kami kamampattul e apu, henidda lan aammed mi. <sup>4</sup> Immali kamin mekibbebley di deya tep nemahhig hu bisil di bebley mid Kanaan et anin ni kennen idan inhalun mi ey endi. Et humman hu, hedin i-abulut mu e apu ey yad Goshen panha-adan mi.”

<sup>5</sup> Ey kan etan ni patul nan Joseph ey “Kayyaggud et immali hi amam niyadda agim. <sup>6</sup> Anin ni ngenamung kan ittudum ni pambebleyan. Itudum ni hi-gada hu Goshen e kekakkayyaggudan ni puyek di deyad Egypt. Ey hedin wadan hi-gada hu kabaelan dan menggipattul ni halun ku ey i-kud mun hi-gada.”

<sup>7</sup> Entanni ey an inewit nan hi Joseph hi ametu hi Jacob et ilaw tud kad-an etan ni patul. Et bendisyonan Jacob etan patul. <sup>8</sup> Kan etan ni patul ni hi-gatuy “Piga toon mu?”

<sup>9</sup> Ey kan Jacob ey “Hanggatut et telumpulu toon kun nunya. Neligat niya ansikkey hu biyag ku nem ya biyag ida lan aammed ku.” <sup>10</sup> Impidwan Jacob ni binendisyonan etan patul et han ida umhiep ni han-aman Joseph.

<sup>11</sup> Inu-unnud Joseph hu inhel etan ni patul et itudu tun ametu niyadda agitu etan kekakkayyaggudan ni puyek ni neihnup di Rameses di Egypt et yadman pambebleyan da. <sup>12</sup> Indawtan Joseph ni kennen hi ametu niyaddan emin hu agitu niyadda pamilyah da meippuun di bilang da.

*Inhi-met tu bisil*

<sup>13</sup> Inhi-met tu hu bisil, anin di Egypt niyad Kanaan et endin hekey hu kennen idan tuu. <sup>14</sup> Et humman hu, mahapul ni umgatang ida tuu nan hi Joseph ni kennen da. Yadda nanggatngan tu ey tuka illaw di baley etan ni patul. <sup>15</sup> Entanni ey endi law hu pihuh idan tutu-ud Egypt niyad Kanaan, et yadda iEgypt ey limmaw idan mampehemhemmek nan Joseph e kanday “Endi law pihuh min pengettang min kennen mi, nem idwasi dakemi anhan ma-lat eleg kami matey ni upa mi.”

<sup>16</sup> Kan Joseph ey “Hedin endi law pihuh yu ey dammutun yadda inhalun yu hu i-li yun iwwa-hi yud kennen.” <sup>17</sup> Et pan-ilaw idan tuu hu kalnero, yadda gelding, yadda baka niyadda kebayyu dad kad-an nan Joseph, et humman inwa-hi dan kennen dan hantoon.

<sup>18</sup> Nelabah hantoon ey na-puh hu inhalun idan tutu-u et umllda mewan di kad-an Joseph et kanday “Apu, endi law hu iwwa-hi mid kennen tep na-puh hu pihuh mi. Ey illam ni emin hu inhalun mi et ebuh hu annel mi niya puyek min natdaan. <sup>19</sup> Hemek dakemi anhan ma-lat eleg kami matey! Anin ew katted ni pambega-en dakemi etan ni patul niya anin ni pampuyyek tu hu puyek mi. Nemet idwatan dakemin kennen mi niya ittanem ma-lat eleg mebel-ah hu puyek mi.”

<sup>20</sup> Et lektattuy gintang Joseph emin hu puyek di Egypt et pampuyek etan ni patul, tep nepilit ida tuun nengigtang ni puyek da tep nemahhig hu bisil. <sup>21</sup> Niya nambalin emin ida law hu tuudman ni bega-en etan ni patul. <sup>22</sup> Yan ebuh law hu puyek idan padi hu eleg meigtang tep kamelpun etan ni patul hu daka kenna, et eleg mahapul ni da iggatang hu puyek da. <sup>23</sup> Kan Joseph idan tuu ey “Deh e ginetang dakeyu, anin ni yadda puyek yu et bega-en dakeyu law etan ni patul. Adyah hu pagey. Lakkayuy et yu pan-itnem. <sup>24</sup> Et hedin man-enni kayu, ey iddawat yu etan ni patul hu hakey di liman betek ni enniyen yu. Ellan yu metdaan ma-lat wada kennen yu niya ma-lat wada ittanem yun balin tu.” <sup>25</sup> Kan idan tuuy “Kami kaum-amlang tep ay himmek dakemi et eleg kami matey. Et humman hu, anin ew ni pambega-en dakemi etan ni patul.”

<sup>26</sup> Et kapyaeen nan Joseph humman ni olden di emin ni bebley di Egypt et nanengtun nunya e kaiddawat idan tutu-u hu bingay etan ni patul di daka ennia. Ebuh ida etan padin eleg um-idwat ni daka ennia etan ni patul, tep beken tun puyek humman ni puyek da.

<sup>27</sup> Yadda etan helag Israel ey nannaneng idad Goshen et lektattuy kimmedangyan ida niya dimmakel ni peteg hu bilang da. <sup>28</sup> Hi Jacob ey nekibebley diman ni hampulut pitun toon et han matey eman ni hanggatut et na-pat et pitu hu toon tu.

<sup>29</sup> Yan nengamtaan tu e ngannganih law hu ketteyyan tu, ey impaeyag tu hi Joseph et kantuy “Ikepam hu ngamay mu daul ni ulpuk et isapatah mu e eleg muwak ali ikkulung di deya Egypt. <sup>30</sup> Nem ikulung muwak alid neikulungan idan aammed ku.” Kan Joseph ey “Em e ama, u-unnuden ku huttan ni inhel mu.” <sup>31</sup> Ey kan Jacob ey “Pansapatah

ka e u-unnudn mu hu inhel ku." Et mansapatah hi Joseph. Et manyuung hi Jacob et dayawen tu hi Apu Dios e inhudngul tud hulkud tud pangal tu. \*

## 48

*Ya nemendisyonan Jacob nan Epraim et hi Manasseh*

<sup>1</sup> Entanni ey dingngel Joseph e kamandedgeh hi ametu. Et ikuyug tu etan ida dewwan u-ungnga tu e di Manasseh nan Epraim et da ang-angen. <sup>2</sup> Dingngel nan Jacob e dimmateng hi Joseph ey inhanekul tun bimmangun et yumudung etan di unggipan tu. <sup>3</sup> Et kantun Joseph ey "Inamtam e yan eman ni wada kamid Lus di Kanaan ey nampeang-ang ni hi-gak hi Apu Dios e Kabaelan tun emin et bendisyonan tuwak. <sup>4</sup> Et kantun hi-gak ey "Iddawtan dakan dakel ni helag mu et hi-gada hu kehlagan idan nambakbaklang ni tutu-ud kebbebley eyad puyek niya iddawat kun hi-gam eya Kanaan et beltanen idallin helag mu et pampuyek dallin ingganah."

<sup>5</sup> Immehel mewan Jacob ey kantuy "Yadda eya dewwan u-ungngam, e di Epraim nan Manasseh ni neiungngadya et hannak umli ey eggamiden kuddan u-ungngak e henid Reuben nan Simeon e wada pebeltan kun hi-gada. <sup>6</sup> Nem hedin wadalli edum ni u-ungngam, ey yad beltanen di Epraim nan hi Manasseh hu kelpuan ni beltanen da. <sup>7</sup> Henin nunya pehdng ku gapuh nan inam la e hi Rachel e netey di Kanaan etan di neihnup di Eprat eman ni nalpuan tayud Mesopotamya. Et nemahhig hu lemyung ku gapuh neteyyan tu. Ingkulung ku hi inam etan di gilng ni dalan diman." (Ya ngadan law ni Eprat ni nunya ey Bethlehem.)

<sup>8</sup> Inang-ang nan Jacob ida etan dewwan u-ungngan Joseph ey kantuy "Kaw huyyadda etan u-ungngam?" <sup>9</sup> Kan Joseph ey "Em, huyyadda indawat Apu Dios ni u-ungngak di deya." Et kan Jacob ey "Ihnup muddallin hi-gak ma-lat bendisyonan kudda."

<sup>10</sup> Eleg um-aang-ang hi Jacob tep naka-a-amma law et ihnup nan Joseph ida etan u-ungnga tu et akwalen idan apu da. <sup>11</sup> Ey kan Jacob nan Joseph ey "Kangku nem endi law hu nak penang-angan ni hi-gam, nem kayyaggud et deh e in-abulut Apu Dios ni ang-angen daka, anin ida eyan u-ungngam."

<sup>12</sup> Impakiwang Joseph ida etan u-ungnga tu et manyuung nan ametu. <sup>13</sup> Et han tu mewan pebanggad ida etan u-ungngatud hinanggan apuda e hi Manasseh ey di wannan ametu et hi Epraim di willi tu. <sup>14</sup> Nem impampakhiw nan Jacob hu ngamay tu et ya wannan tu hu ingkapetud ulun nan Epraim e udidyan et ya willi tu ingkapetud ulun Manasseh e pengulwan. <sup>15</sup> Et bendisyonan tu dama hi Joseph e kantuy

"Ya etan Dios ni dinaydayaw ida lan aammed ku e di Abraham nan Isaac niya nengipenaptek ni hi-gak ingganah ni nunya, <sup>16</sup> e hi-gatu etan Anghel ni nengihwang ni hi-gak, hu memendisyon ida eyan u-ungnga. Hi-gadalli gaputun mandingngel hu ngadan ku niya ngadan idan aammed ku e di Abraham nan Isaac. Bendisyonim ida ma-lat dakel ni peteg ali hu helag da."

<sup>17</sup> Hi Joseph ey eleg tu pinhed humman ni impahding ametu e ingkapetu wannan tud ulun nan Epraim e udidyan. Et tengeden tu ngamay ametu et i-aldan tu-et di ulun Manasseh e pengulwan. <sup>18</sup> Kan tun ametuy "Beken ni hi-gatu pengikap-im ni wannan mu! Tep hi diyay hu pengulwan." <sup>19</sup> Nem kan ametuy "Em, inamtak. Et-eteng ali daman bebley hu pambbleyan ni helag Manasseh, nem nema-malli eya udidyan tep e-etteng ali kabaelan tu niya mandingngel idalli helag tu."

<sup>20</sup> Binendisyonan tudda mewan e kantuy "Hedin mambendisyon idalli helag Israel ey kandalli ey 'Bendisyonan dakeyun Apu Dios henid Epraim nan Manasseh.'" \* Yan nanghelan Jacob ni nunya ey impamengulu tun inhel hu ngadan Epraim e beken hi Manasseh. <sup>21</sup> Kan Jacob nan Joseph ey "Anggagannu law hu keteyyan ku, nem ippaptek dakeyullin Apu Dios et ibbanggad dakeyullid Kanaan e puyek ida lan aammed tayu. <sup>22</sup> Ey beken ni yadda agim, nem hi-gam hu pengidwatan ku etan ni bebley di Sekem e mateba kameitnem diman. Humman ni bebley ey inapput kuddan Amorite e inusal ku ispadah ku niya panak."

## 49

*Ya nemendisyonan Jacob idan u-ungnga tu et han matey*

<sup>1</sup> Entanni ey hi Jacob, e hi Israel hu hakey ni ngadan tu ey impaeyag tun emin ida u-ungnga tu et kantun hi-gaday "Ikeyuy ma-lat denglen yu hu e-helen kun meippahding alin hi-gayu."

\* 47:31 47:31 Hebrews 11:21

\* 48:20 48:20 Hebrews 11:21

- <sup>2</sup> Kantun hi-gaday “Hi-gayuddan u-ungngak, dengel yu eya e-helen ku e hi ameyun hi Israel. <sup>3</sup> Hi-gam e Reuben e pengulwan, ey hi-gam hu nakka ikkedhel, tep hi-gam hu newada eman ni pakehikken ku. Hi-gam hu kametettebal niya keka-ka-letan. <sup>4</sup> Nem hi-gam ey kaka mei-ellig etan di na-let ni elwang e tuka deplugan emin. Et humman hu, eleg mannananeng hu muka ketbali, tep bineing muwak e hi amam eman ni nenguiligan mun hakey ni ahwak.
- <sup>5</sup> Hi-gayu, Simeon nan Levi, ey nan-ingneh kayun ya matedem hu yuka tetngeda e ya mekipptey hu wadad nemnem yu. <sup>6</sup> Hi-gak e hi ameyu ey eggak pinhed huttan ni yuka pehpehding, tep gapuh ni bunget yu ey pimmatey kayu. Ey hedin wada hina-kupan yun animal ey neala ni pini-day yu. <sup>7</sup> Et humman hu, ya kastigu yu ey mehilit idalli helag yud emin ni pambebleyan idan helag ku.
- <sup>8</sup> Hi-gam e Judah ey tettebalen dakaddallin aaggim. Manyu-ung idallin hi-gam niya apputen muddalli buhul mu. <sup>9</sup> Heni kalli etan ni layon \* e hedin kinan tu etan pintey tu, man um-anemut et an man-u-uggip. Ey endi netuled ni memengngun ni hi-gatu. <sup>10</sup> Yaddalli helag mu hu man-ap-apu e manhuluhulul ida ingganah ni um-ali etan hakey ni pinilin Apu Dios ni man-ap-apu et hi-gatulli u-unnuden ni katuutuu. <sup>11</sup> Ey emin ali hu mahapul tu ey wada. Ya ittanem tun grapes ey mateba niya malemeh et yad hengeg tu hu pengi-ikketan tun kebayyu tu. Mademu alin peteg hu lamah tu et gullat na-mun dammutu et pengibbalbalan tun balwasi tu. <sup>12</sup> Et gapu tep dakel hu meinum ni grapes ey mambabatag hu matetu niya mablak hu ngipen tu gapuh ni tuka penginummin gatas.
- <sup>13</sup> Hi-gam e Sebulun ey manha-ad kallid gilig ni baybay e ya pappeg tu ey ingganah di Sidon. Yadman ali hu panda-guhan idan bapor.
- <sup>14</sup> Hi-gam e Issakar ey heni ka kebayyu, e ma-nut na-let, <sup>15</sup> nem hedin wada inang-ang tun kakkayyaggud ni pattulan ey umlaw diman et an man-u-uggip. Ey gapu tep yadman hu pinhed tun panha-adan ey lektattuy nambalin ni bega-en diman.
- <sup>16</sup> Hi-gam e Dan ey baddangam idalli edum mun helag ku ma-lat limpiyuh hu pehding idan buhul dan hi-gada. <sup>17</sup> Heni ka etan ni uleg di gilig ni dalan e tuka ikkalat di helin kebayyun kamelebbah ma-lat ma-gah etan nantakkay.”
- <sup>18</sup> Entanni ey kan Jacob ey “Nakka hehhegeda pengihwangan mun hi-gak, e APU DIOS.”
- <sup>19</sup> Entanni mewan ey kantuy “Hi-gam e Gad ey hedin wada matekew ni memdug ni hi-gam ey petekktu mu et hi-gam hu memdug ni hi-gada.
- <sup>20</sup> Hi-gam e Asher, kayyaggud ni kennen ida meitnem di puyek mu e henin kakennan patul.
- <sup>21</sup> Hi-gam e Naptali ey heni ka etan ni bimmukyut ni makwah ni kakkayyaggud hu impah tu.
- <sup>22</sup> Ey hi-gam e Joseph ey heni ka etan ni malemeh ni neitnem etan di wada hebwak ni umkalab di deplah. <sup>23</sup> Nemahhig hu hinelheltap mun impahpahding dan hi-gam e heni daka nan-himpapanaan. <sup>24-25</sup> Nem eleg ka meapput tep binaddangan dakan Dios ku e Kabaalan tun emin. Et hi-gatu e kamengippaptek ni hi-gatsu ey heni batun keihhikkugan tayun Hebrew. Hi-gatu hu mengidwat ni emin ni mahapul mu, henin udan niya petang ey anin ni danum ni kamelpud puyek. Ey medakkel ali hu halun mu niya helag mu. <sup>26</sup> Huttan idan pemendisyon kun hi amam ni hi-gam ni panyaggudan mu ey endi kei-ingnehan tu. Um-amnu emin ida huttan ni hi-gam, Joseph e kametbal di emin ni agim.
- <sup>27</sup> Ey hedin hi-gam dama e Benjamin, ey netuled ka e heni ka etan ni kandan wolf. Apputen muddalli buhul mu niya pan-i-anemut mu hu kumpulmih ni ellan mun hi-gada.”
- <sup>28</sup> Huyyadda hu inhel Jacob idan hampulut dewwan u-ungnga tu e neiunnud di nambakbaklang ni elaw da.

*Ya neteyyan Jacob*

<sup>29-30</sup> Entanni ey kan mewan Jacob ni hi-gaday “Nakka giggibbeka ey ngannganih hu ketteyyan ku et nak mei-dum idan aammed kun nangketey. Ey ya pinhed kun pengikkullungan yun hi-gak ey yad bebley tayud Kanaan etan di leyang di Makpelah e demang ni Mamle. Humman ey gintang eman lan hi apu e hi Abraham nan Eplon e Hittite e pambalin tun gungat yau. <sup>31</sup> Et yadman hu neikulungan di Abraham nan Sarah. Anin di apu yu e di Isaac nan Rebekah et yadman hu neikulungan da. Ey yadman hu nengikulungan ku daman ineyu e hi Leah. <sup>32</sup> Mukun anin hi-gak et pinhed kun yadman ni leyang etan di kad-an ni payew ni gintang lan apu hi Abraham etan ni Hittite hu pengikkullungan yulli daman hi-gak.”

\* 49:9 49:9 Numbers 24:9, Revelation 5:5

<sup>33</sup> Negibbuh ni inhel Jacob humman et bumaktad etan di uggippan tu ey impa-yuh tun netey.

## 50

<sup>1</sup> Inakwal nan Joseph hi ametu ey kamannengnih. <sup>2</sup> Et iolden tudda etan ni kamambalsamuh et balsamuhen da hi ametu. <sup>3</sup> Limmaw ni na-pat ni aggew et han da gibbuha tep in-u-unnud dan kapehding idan iEgypt. Et lemyungan dan dewwan bulan et hampulun aggew.

<sup>4</sup> Negibbuh hu lemyungan da et kan Joseph idan opisyal etan ni patul ey “Yu ehel anhan etan ni patul eya pinhed kun e-helen ni hi-gatu: <sup>5</sup> ‘Ya eman ni kamangkatatey hi ama ey impansapatah tuwak e nak ali ikkulung di Kanaan etan di indaddan tun keikkullungan tu. Et humman hu, iebulut mu anhan et nak ali ni ikulung hi ama et hannak ali mambangngad.’”

<sup>6</sup> Inebulut etan ni patul et kantuy “Dammutu, elaw ka et mu ipahding hu insapatah mun amam.” <sup>7</sup> Et an iklung di Joseph hi ameda. Nekilaw ida emin hu opisyal etan ni patul niyaddan emin hu aap-apud Egypt, anin idan kametbal ni tuud Egypt. <sup>8</sup> Nekilaw ida pamilyah Joseph niyadda edum dan helag Jacob. Yan ebuh hu nehi-yan di Goshen ey yadda u-ungnga niyadda etan inhalun dan kalneroh, yadda gelding niyadda baka. <sup>9</sup> Nekilaw ida dama etan nampangkebayyu niya nampangkalesa et dakel ida nekilaw ni hi-gada.

<sup>10</sup> Yan dintengan da etan di kapan-illikid Atad e neihnup etan di Wangwang e Jordan ey nanda-guh idadman et hammaden dan ilemyungan ni pitun aggew e impappangngulun Joseph.

<sup>11</sup> Ey yadda iKanaan ni nenang-ang ni nunman ni nekilemyungan idan iEgypt ey kanday “Anakkayang, tam nehammad numan hu daka pekillemyungin netey.” Et ngadanan da humman ni bebley ni Abel Misraim.

<sup>12</sup> Yadda etan u-ungngan Jacob ey inu-unnud da hu inhel ameda <sup>13</sup> e da ingkulung di Kanaan etan di leyang di Makpelah e neihnup di Mamre, e humman etan payew ni gintang Abraham etan ni Hittite e hi Eplon, et pambalin tun gungat idan pamilyah tu.

\* <sup>14</sup> Negibbuh ni ingkulung di Joseph hi ameda et mambangngad idad Egypt e hi-gadan emin idan agitu niyadda etan iEgypt ni nekilaw ni hi-gada.

*Yadda etan agin Joseph ey newada elem dan hi-gatu*

<sup>15</sup> Yadda etan agin Joseph ey newada hu elem dan hi-gatu eman ni neteyyan ameda. Kanday “Yan nunya e endi law hi ametayu, ey ibbaleh tu na-mu law hu impahding tayun hi-gatu.” <sup>16</sup> Et itu-dak da hakey ni mengippeamtan Joseph e kanday “Yan nunman ni mategu ni hi ametayu ey <sup>17</sup> inhel tun hi-gami e e-helen min hi-gam ma-lat liwwanen mu etan lawah ni impahding min hi-gam. Et humman hu, pesinsahi dakemi anhan e bega-en etan ni Dios ni dinaydayaw lan ametayu.” Dingngel Joseph humman ni inhel idan agitu ey kamannengnih.

<sup>18</sup> Entanni ey immalidda etan agitu et manyuung idan hi-gatu et kanday “Nandaddan kamin mambalin ni himbut mu.” <sup>19</sup> Nem kan Joseph ey “Entan takut yun hi-gak tep bekennak ni Dios ni menuwes niya mengastigun tuu. <sup>20</sup> Ma-nu tep lawah hu ninemnem yun pehding hi-gak, nem impambalin Apu Dios ni kayyaggud † ma-lat keihwangan ni dakel ni tuu eyad bisil. <sup>21</sup> Et humman hu, entan tattakut yu. Hi-gak hu ngenamung ni mengippaptek ni hi-gayu, anin idan u-ungnga yu.” Et luminggep law hu nemnem dan nangngelan dan nunman tep kabbabbal hu impanghel Joseph ni hi-gada.

*Ya neteyyan Joseph*

<sup>22</sup> Hi Joseph et yaddan emin ni helag ametu ey nannaneng idad Egypt. Netey hi Joseph eman ni hanggatut et hampulu toon tu. <sup>23</sup> Ey kayyaggud tep inang-ang tudda u-ungngan Epraim niyadda meikkadwan inap-apu tu, anin ni u-ungngan Makir e u-ungngan Manasseh.

<sup>24</sup> Yan eman ni eleg ni matey hi Joseph ey kan tuddan agituy “Anggagannu law ey metteyyak, nem ngenamung hi Apu Dios ni mengibbangngad ni hi-gayu etan di bebley ni inhel tun pebeltan tuddan helag Abraham, hi Isaac et hi ametayu hi Jacob. <sup>25</sup> Ey yallin pambangngadan yud Kanaan ey entan tu liwwan et ienamut yu tu-ngal ku.” Et isapatah da e u-unnuden da humman ni inhel tu. <sup>26</sup> Netey hi Joseph di Egypt eman ni hanggatut et hampulu hu toon tu et balsamuhen da et ilungun dadman.



## Exodus Ya neni-yanan idan helag Israel ni Egypt

*Ya meippanggep nunyan libluh e Exodus*

Huuyan libluh ni Exodus hu neitudekan ni neni-yanan idan helag Israel ni Egypt. Ya hakey ni ngadan Israel ey hi Jacob. Nekibebley idadman ni 430 ni toon, et pambalin idan iEgypt ni himbut. Peamtan nunyan libluh hu impahding Apu Dios ni neniked ni neihbutan da meippuun di et-eteng ni kabaelan tu. Ey neipeamta eyad libluh hu nengidwatan nan Apu Dios ni Tugun tun Moses di Duntug e Sinai. Huuyan Tugun ey neidwat idan helag Israel ni u-unnuden da ma-lat meidaydayaw hi Apu Dios et bendisyonan tudda. Yadda etan Hampulun Tugun ey parteh nunyan Tugun.

Impeamtan nunyan libluh ida intugun Apu Dios ni pemehwatan idan helag Israel ni et-eteng ni a-abbung e Tabernacle ngadan tu, yadda ussalen dan mengapyan nunman niyadda ngunut ni mahapul ni pan-appitan dan Apu Dios.

Ya hakey ni importanteh ni mahapul ni ewwatan eyad libluh ni Exodus, ey ya planuh Apu Dios ni mengihhammad ni kaweda tuddan tutu-u tu et mekiha-ad mewan ni hi-gada. Yadda nemangulun tutu-u eyad puyek ey binahbah da hu kayyaggud ni nekidayyuman Apu Dios ni hi-gada tep ya liwat da. Neipeang-ang eyad libluh ni Exodus hu impahding nan Apu Dios ni nengibanggad ni kayyaggud ni nekidayyuman tuddan helag Israel ni nengihwangan tun hi-gadad neihbutan da et ya nenelakniban tun hi-gadad liwat da. Huuyan impahding tu ey nambalin tuddan tutu-u tu. Ey impeang-ang tu kabaelan tud kamengippetngan impenahding tu niya impeamta tu kaweda tun hi-gadad Tabernacle.

*Yadda neitudek eyad libluh:*

1. Ya nengihwangan Apu Dios idan helag Israel di neihbutan da et ya nengipenguluhan tuddan neni-yanan dan Egypt. (chapters 1-18)
2. Ya nekitbalan Apu Dios idan helag Israel ni nengidwatan tun hi-gadan Tugun tu. (chapters 19-24)
3. Ya nengidwatan Apu Dios ni Tugun tu meippanggep ni pehding idan helag Israel ni memehwat ni Tabernacle, et ya pehding dan menaydayaw ni hi-gatudman. (chapters 25-40)

*Ya nanhelheltapan idan helag Israel di Egypt*

<sup>1</sup> Huuyadda ngadan idan u-ungngan Jacob \* ni nekilaw ni hi-gatud Egypt e ingkuyug dadda pamilyah da e <sup>2</sup> hi Reuben, hi Simeon, hi Levi, hi Judah, <sup>3</sup> hi Issakar, hi Sebulun, hi Benjamin, <sup>4</sup> hi Dan, hi Naptali, hi Gad et hi Asher. <sup>5</sup> Nepitun emin hu bilang ida eyan helag Jacob. Nekibilang hi Joseph e wada ngu dedan di Egypt.

<sup>6</sup> Entanni ey netey idan emin huuyan han-aaggi, anin hi Joseph. <sup>7</sup> Nem dakel hu helag dan neihullul ni hi-gada. Nahlag ida humman ni u-ungnga da et lektattuy dakel idan peteg et mailhinap idad emin ni bebley di Egypt.

<sup>8</sup> Nelabah hu dakel ni toon ey wada neihullul ni patul di Egypt ni eleg tu amta hu meippanggep lan Joseph niyadda etan kayyaggud ni impahpahding tun panyaggudan nunman ni bebley. † <sup>9</sup> Kantuddan tuu tuy "Dimmakkel idan peteg eya helag Israel, et eleg tayu amta ey wadalli lawah ni pehding dan hi-gatsu. <sup>10</sup> Mahapul ni mannemnem itsun pehding tayu ma-lat eleg ma-duman hu bilang da. Tep nungay wada gubat ey mei-dum idan buhul tayu, et hedini neapput itu ey hi-yanan da eya bebley tayu."

<sup>11</sup> Et ya impahding idan iEgypt ey impambalin daddan himbut etan helag Israel et panhelheltap dadda. Pinutuk da makabbunget ni mengippenggulu, et pangunu dan hi-gada hu nekalligat ni ngunu. Impekapyu dan hi-gada etan dewwan bebley, ya Pithom niya Rameses e humman pambodegahan ni patul. <sup>12</sup> Nem hedini kapan-imma-maddan iEgypt ni mengippehelheltap ni hi-gada, ey ida anhan law kamangkedakkel et ida kamangkeihhinnap. Mukun nema-man newada takut idan iEgypt ni hi-gada. <sup>13-14</sup> Et humman hu endi law hemek da et daka pan-imma-man mengippelilligat ni hi-gadad emin ni daka pengunnu, henin ngunud payew niya mengapyan meikkapyan baley.

<sup>15</sup> Entanni ey minandal etan ni patul etan dewwan Hebrew ‡ e di Shiprah nan Puah e hi-gada hu kaumbaddang idan edum dan helag Israel ni man-ungnga. Kantun hi-gaday <sup>16</sup> "Hedin laki hu i-ungngan biin Hebrew man patey nyu, nem hedini bii entan tu patey." <sup>17</sup> Nem eleg da u-unnuden humman ni inhel etan ni patul, tep ida kaumtakut nan Apu

\* **1:1** 1:1 Hi Israel hu hakey ni ngadan tu. † **1:8** 1:8 Acts 7:18 ‡ **1:15** 1:15 Yadda tuud Egypt ey dadda kangeddandida helag Israel ni Hebrew.

Dios, et eleg da pateyen ida lalakkan neiungnga. <sup>18</sup> Et humman hu impaeyag etan ni patul ida et kantuy “Kele eleg yuwak u-unnuden? Kele eleg yu pateyen ida lalakkan in-ungngaddan edum yun Hebrew?” <sup>19</sup> Kanday “Apu, endi pehding mi tep hin-appil idan peteg hu edum min biin Hebrew nem yadda iEgypt tep anggagannu hu daka pan-ungngai e eleg kami umdateng ni neukat hu u-ungnga da.”

<sup>20-21</sup> Et humman hu dimmakel idan peteg hu helag Israel niya immetteng law hu kabaelan da. Gapuh ni kapengu-unnudiddan nunyan bii nan hi Apu Dios, ey binendisyonan tudda et mengahwadda dama et mawedadda u-ungnga da.

<sup>22</sup> Entanni law ey in-olden etan ni patul idan tutu-u tu e kantuy “Yu pan-ibbeng ida hu pakeiungngan lalakkan Hebrew di Wangwang e Nile di diman Egypt, nem entan tudda ilegat hu biin pakeiungnga.”

## 2

### *Ya neiungngaan Moses*

<sup>1</sup> Yan nunyan tsimpuh ey wada etan han-ahwan helag Levi. <sup>2</sup> Nambutsug etan bii et man-ungnga ey laki. Inang-ang etan ni inetu e kakkayyaggud ni gelang et ittattallu tun tellun bulan. \* <sup>3</sup> Nem entanni ey eleg tu law han-itlu et lumaggan basket ni heni labba et pampudlitan tun pukut ma-lat eleg humgep danum. Inha-ad tudman etan gelang et tu itlud mekatlubbung di gilig ni Wangwang e Nile. <sup>4</sup> Ya etan biin agi etan ni gelang ey wadad man e kamantattallu etan di a-allaw tu e tuka ang-ang-anga hu meippahding ni hi-gatu.

<sup>5</sup> Entanni ey immali etan biin u-ungngan patul ni an man-e-meh etan di wangwang. Kaman-e-meh ey ida nandaddallan etan bega-en tud gilig nunman ni wangwang. Inang-ang etan ni u-ungngan patul etan basket ni kamangkalkalyap etan di mekatlubbung et itu-dak tu hakey ni bega-en tu et al-en. <sup>6</sup> Sinukwaban etan ni u-ungngan patul ey wada gelang ni lakin kamannengngih ey himmek tu. Kantuy “Huyya mannuman katteg hu hakey ni u-ungngaddan Hebrew.”

<sup>7</sup> Et henupen etan ni biin agin nunman ni gelang, et kantu etan ni u-ungngan patul ey “Kaw pinhed mu et nak umeyag ni biin Hebrew, ma-lat hi-gatu mengipaptek eyan gelang?” <sup>8</sup> Ey kantuy “Uh, elaw ka tep.” Et lumaw etan bii et hi inetu kumedek hu tu inaygan. <sup>9</sup> Kan etan ni u-ungngan patul etan ni inan gelang ey “Awit mu eya gelang ma-lat ipaptek mu et tangdanan daka.” Et awiten tu etan gelang et ipaptek tu. <sup>10</sup> Et yan neettengan nunman ni gelang, ey inlaw inetu etan ni u-ungngan patul et ibilang tun u-ungnga tu. Inngadnan tun hi Moses e ya keibbellinan tu ey ‘Iddakal’ tep indakal tud danum.

### *Ya binsikan Moses et lumaw di Midian*

<sup>11</sup> Nehiken law hi Moses et hakey ni aggew, ey limmaw ni an menang-ang idan edum tun Hebrew ey inang-ang tu hu kapenggipelligasiddan iEgypt ni hi-gadad daka pengnunggunnu. Entanni ey inang-ang tu hakey ni iEgypt e tuka pambe-iga etan hakey ni edum tun Hebrew. <sup>12</sup> Kamanwingiwingi hi Moses ey endi hu kamenang-ang-ang ni hi-gatu et pateyen tu humman ni iEgypt et iku-ku tud palnah.

<sup>13</sup> Nawa-wa mewan ey inang-ang tudda dewwan Hebrew e ida kamambekkal. Et kantu etan ni nambahul ey “Kele muka pangkewwaya eya edum mun Hebrew?” <sup>14</sup> Himmumang humman ni tuu ey kantuy “Hipa hu nemutuk ni hi-gam ni mambalin ni ap-apu mi niya huwet mi? Kaw petteyen muwak dama henin impahding mu etan ni iEgypt ni kaalman?” † Ey simmakut hi Moses ni nangngelan tun nunman e kantuy “Tam inamta law idan tutu-u humman ni impahding ku.”

<sup>15-16</sup> Entanni ey tu-wangun dingngel etan ni patul humman ni neipahding et tu-et pepettey hi Moses. Nem bimmesik di Midian et an makibebley diman.

Hi Jetro hu padid Midian ni nunman ey wada pitun bibi-in u-ungnga tu. Hakey ni aggew e kamanyuyyuddung hi Moses di kad-an ni hibuy, ey immalidda humman ni bibi-in u-ungngan Jetro ni an man-ehhul ni peinum daddan kalneroh niya gelding ameda. <sup>17</sup> Nem dinegyun idan edum ni kamampattul humman idan bibi-in u-ungngan Jetro. Inang-ang idan Moses et baddangan tudda et painuman tu hu animal da.

<sup>18</sup> Yan inenamutan da ey kan ameday “Kele anggagannuy immanemut kayu kuman nunya?” <sup>19</sup> Kanday “Tep wada etan iEgypt ni bimmaddang ni hi-gami et painuman tudda animal tayu.” <sup>20</sup> Kan ameday “Et attu humman ni tuu ey? Kele yu hini-yan diman? Yulli ayagi et makikan.”

\* 2:2 2:2 Hebrews 11:23 † 2:14 2:14 Acts 7:27-28, 35

<sup>21</sup> Nekilaw hi Moses et lektattuy pininshed tun mekihha-ad di baley Jetro. Entanni ey impeahwan Jetro etan hakey ni u-ungnga tu e hi Sippora nan Moses. <sup>22</sup> Nan-ungnga hi Sippora ey laki et ngadanan Moses ni Gersom tep kantud nemnem tuy “Hi-gak ey hansinu-wannak di deya.”

<sup>23</sup> Nelabah hu pigan toon ey netey etan patul di Egypt, nem nanengtun nemahhig metlaing hu kapanhelheltapiddan helag Israel, et humman hu, ida kamampehemhemhemme nan Apu Dios. <sup>24</sup> Dingngel Apu Dios hu daka pampehemhemhemmeki, ey ninemnem tu hu nekitbalan tud Abraham, hi Isaac et hi Jacob, <sup>25</sup> tep inamta tu dedan humman ni kapengippelilligasiddan iEgypt idan helag Israel et hemeken tudda.

### 3

#### *Ya nekihummanganan Apu Dios nan hi Moses*

<sup>1</sup> Hi Moses ey tuka ipappaptek ida animal ni nengapun hi-gatu e hi Jetro e padid Midian. Hakey ni aggew ey an impattul ida Moses hu kalneroh niya gelding etan di ba-hil ni eleg mebebleyi, et dumteng di Sinai e duntug ni kad-an Apu Dios. <sup>2</sup> Entanni ey nampeang-ang hu anghel APU DIOS ni hi-gatu etan di kamantettebbel ni ekkeket ni keyew. Inang-ang Moses e ma-nut kamantettebbel etan keyew, nem eleg megbu. \* <sup>3</sup> Natnga hi Moses e kantud nemnem tuy “Kele nemalad humman ni keyew e eleg megbu? Imay pangngu et nak henupen et paka-ang-angen ku.”

<sup>4</sup> Inang-ang APU DIOS e kamangkeihnup hi Moses ey inhelan tu e kantuy “Moses!” Kan Moses ey “Uh Apu, iyadya-aki!”

<sup>5</sup> Kan Apu Dios ey “Ehneng kadtan. Entan keihnup mudya. Ey ekal mu patut mu tep wada-ak eyad lugal ni inehngan mu. <sup>6</sup> Hi-gak hu Dios idan aammed mu e hi Abraham, hi Isaac et hi Jacob.” † Et hanian Moses hu angah tu tep kaumtakut ni menang-ang nan Apu Dios.

<sup>7</sup> Immelhel mewan APU DIOS ni hi-gatu ey kantuy “Inang-ang ku e nemahhig hu kapanhelheltapiddan tuuk di Egypt niya dingngel ku hu daka pampehemhemhemmekin daka pambebgain baddang ma-lat masiked hu daka panhelheltapi. Ey nakka hehmekadda, <sup>8</sup> et humman hu, immali-ak ma-lat ihwang kuddad kapengippelilligasiddan iEgypt ni hi-gada. Pe-kal kuddadman ni bebley et pellow kudda etan di mahkang ni kayyaggud ni puyek ni mateba hu kameitnem e humman hu nambebleyan idan Kanaanite, yadda Hittite, yadda Amorite, yadda Perisite, yadda Hibite niyadda Jebusite ni nunya. <sup>9</sup> Makulug ni dingngel ku hu palak idan helag Israel niya inang-ang ku hu nemahhig ni kapengippelilligasiddan iEgypt ni hi-gada. <sup>10</sup> Et humman hu, yan nunya ey ittu-dak daka et ka makihummangan etan ni patul di Egypt ma-lat ipengulum ida tuuk ni peni-yanan yun nunman ni bebley.” ‡

<sup>11</sup> Nem kan Moses ey “Apu, kaw hipa-ak kuman an mekihummangan etan ni patul ma-lat iebulut tun ippanguluk ida etan edum kun helag Israel et hi-yanan mi Egypt?”

<sup>12</sup> Ey kan Apu Dios ni hi-gatuy “Entan pandanag mu tep baddangan daka. Ya keangangan tun hi-gak hu nengitu-dak ni hi-gam ey heninnuy: Yallin pengippengngulan muddan tutu-uk ni peni-yanan yun Egypt, ey idaydayaw da-ak ni hi-gayu eyad duntug.”

<sup>13</sup> Nem kan Moses ey “Nem inna-nu hedin umlawwak diman et kangkuddan edum kun helag Israel, ey intu-dak tuwak ni Dios idan aammed tayu et kanday ‘Hipa humman ni Dios ni muka pan-e-hela? Hipa ngadan tu?’ ey hipa ihhumang kun hi-gada?” <sup>14</sup> Kan Apu Dios ey “HI-GAK ETAN WADAN INGGANAH. Ehel mun hi-gada e kammuy ‘Ya etan wadan ingganah hu nengitu-dak ni hi-gak.’ <sup>15</sup> Ehel mun hi-gada e hi-gak etan AP-APU e Dios idan aammed yu e hi Abraham, hi Isaac et hi Jacob hu nengitu-dak ni hi-gam. § Huyyan ngadan ku hu panggeddan ni tutu-un hi-gak ni ingganah.

<sup>16</sup> Elaw ka et amungen muddan emin hu aap-apun helag Israel et ehelen mun hi-gada e hi-gak hu AP-APU e Dios idan aammed yu e hi Abraham, hi Isaac et hi Jacob ey nampeang-anggak ni hi-gam. Ehel mun hi-gada e baddangan kudda tep inang-ang ku hu kapengippelilligasiddan iEgypt ni hi-gada. <sup>17</sup> Ninemnem kun pe-kal idad Egypt ma-lat mepappag hu daka panliligasi et palaw kudda etan di puyek ni mateba hu kameitnem e nambebleyan idan Kanaanite, yadda Hittite, yadda Amorite, yadda Perisite, yadda Hibite niyadda Jebusite.

<sup>18</sup> Elaw ka et nanna-ud ni kullugen idan aap-apun helag Israel hu e-helen mu. Elaw kayuddan emin ni aap-apun helag Israel et kayu makihummangan etan ni patul di Egypt. Et kanyun hi-gatuy ‘Ya etan AP-APU e Dios min Hebrew ey nampeang-ang ni hi-gami et

\* 3:2 3:2 Acts 7:30 † 3:6 3:6 Ang-ang yu hu Matthew 22:31-32, Mark 12:26, Luke 20:37, Acts 7:32. ‡ 3:10 3:10

[5-10] Acts 7:33-34 § 3:15 3:15 Matthew 22:32

mahapul ni i-appitan mi. Et humman hu, iebulut mu anhan ma-lat lumaw kami etan di eleg mebebleyi, e tellun aggew hu pandellanan mi, et kami mandayaw ni hi-gatu e AP-APU e Dios mi.’

<sup>19</sup> Nem inamtak e eleg tu i-abulut hedin eleg pillita. <sup>20</sup> Et humman hu dakel ali hu pehding kun kaketngain kebabbahan ni Egypt et lektat tu ey i-abulut tun umlaw kayu.

<sup>21</sup> Ey ang-angen ku et kayyaggud ali hu pannemnem idan iEgypt ni hi-gayu ma-lat yallin peni-yanan yun bebley da ey iddawtan dakeyullin mahapul yun ittabin yu. <sup>22</sup> Et emin idalli bibi-in helag Israel ey mangkekdey idalliddan sinakdul dan bibi-in iEgypt ni kan bega-en ni hi-gadan balwasi niya linggeman ni usal ni nekapyad silber niya balituk et pampehuklub da niya pampebalwasi daddan u-ungnga tu. Pehding dalli huyya et al-en da la hu kinedangyan ni Egypt e heni da imbesik di gubat.”

## 4

### *Indawtan APU DIOS hi Moses ni kabaelan tun mengippahding ni miracle*

<sup>1</sup> Hinumang Moses hi APU DIOS e kantuy “Nem inna-nu hedin eleg kullugaddan edum kun helag Israel hu e-helen kun hi-gada? Hipa pehding ku hedin kandy beken ni makulug ni nampeang-ang kan hi-gak?” <sup>2</sup> Ey kan APU DIOS ni hi-gatuy “Hipa eya singged mu?” Kan Moses ey “Tam hulkud.”

<sup>3</sup> Kan APU DIOS ey “Bekah mud puyek.” Imbekah nan Moses ey nambalin ni uleg. Ey simmakut hi Moses et bumsik. <sup>4</sup> Nem kan APU DIOS ey “Tenged mu ikul tu.” Et tengeden Moses ey nambangngad mewan ni hulkud.

<sup>5</sup> Immehel mewan hi APU DIOS ey kantuy “Heninnuy pay hu ippahding mu ma-lat kulugen idan edum mun helag Israel e hi-gak e AP-APU e Dios idan aammed yu e hi Abraham, hi Isaac et hi Jacob ey makulug ni nampeang-anggak ni hi-gam. <sup>6</sup> Ihweng mu ngamay mud balwasim.” Et ihweng Moses hu ngamay tu et guyuden tu ey bimmelah e neleprosih.

<sup>7</sup> Kantu mewan ey “Ipidwan ni ihhehweng.” Et ihweng tu mewan et guyuden tu ey na-kal humman ni leprosih di ngamay tu.

<sup>8</sup> Immehel mewan hi APU DIOS ey kantuy “Hedin eleg da kulugen etan nemangulun miracle man wada-et ni kullugen da huyyan meikkadwan peang-ang mu. <sup>9</sup> Ey hedin ippahding mudda huyyan dewwan miracle, nem kapyatun eleg ida mengullug, ala kan danum di Wangwang e Nile et iduyag mud puyek. Et humman ni danum ey mambalin ni kuheyaw.”

<sup>10</sup> Nem kan Moses ey “APU, beken ni hi-gak hu itu-dak mu tep inna-nu dan mengullug ni hi-gak e beken nak ngu dedan ni mahepit.” <sup>11</sup> Ey kan APU DIOS ni hi-gatuy “Kaw hipa nengapyan bungut ni tuu? Niya hipa kamenulleng niya kamangngengngan tuu? Ey hipa hu kabaelan tun mengullap winu memetyan matan tuu ma-lat han-ang-ang tu? Kaw hipa edum ni kabaelan tun mengippahding idan nunya hedin beken ni hi-gak e hi APU DIOS? <sup>12</sup> Et humman hu, elaw ka kuma et mu ipahding hu inhel ku. Baddangan dakan umhapit niya ittutudduk hu e-helen mu.”

<sup>13</sup> Nem kan Moses ey “Apu, eggak pinhed ni umlaw. Ya edum hu itu-dak mu.” <sup>14</sup> Ey bimmunget hi APU DIOS et kantuy “Ku anin tep. Hedin kammuy beken kan mahepit baddangan dakan agim e hi Aaron e helag Levi yaggud amtak e mahepit. Immen di dalan e kamengellin an menammun hi-gam. Inamtak et manggayallin penang-angan tun hi-gam. <sup>15</sup> Ehel mun hi-gatu hu pinhed mun e-helen ma-lat hi-gatu hu menghel. Hi-gak hu mengittutuddun hi-gayun e-helen yu niya pehding yu. <sup>16</sup> Hi-gatu menghel ni pinhed mun e-helen idan tuu. Ey hi-gam hu heni Dios ni menghel ni e-helen tu. <sup>17</sup> Ey itebin mu eya hulkud mu ma-lat huttan ussalen mun mengippahding ni dakel ni miracle.”

### *Ya nambangngadan Moses di Egypt*

<sup>18</sup> Immanemut hi Moses di baley da et kantu etan ni nengapun hi-gatu e hi Jetro ey “Tebulut mu anhan et lumaw wak ali nid Egypt et nak ida ang-angen aaggik diman et nak pepuhdanan hedin nanengtun mategudda.” Ey simbal nan Jetro. <sup>19</sup> Eleg ni hi-yanan nan Moses hu Midian ey immehel mewan hi APU DIOS ni hi-gatu ey kantuy “Pambangngad kad Egypt haggud netey ida law etan neminhed ni memettye ni hi-gam diman.” <sup>20</sup> Et itakay Moses di kebayyu etan ahwa tu niyadda u-ungnga tu et lumaw idad Egypt e impeki-la tu etan hulkud ni inhel APU DIOS ni ittabin tu.

<sup>21</sup> Kan APU DIOS nan Moses ey “Hedin umdateng kayud Egypt, ey entan tu liwwan et ipahding mud hinanggan etan ni patul ida etan miracle haggud indawat ku hu kabaelan mun mengippahding idan nunman. Nem pambalin kun manghay humman ni patul et eleg tu i-abulut ni pellow ida etan tuuk. <sup>22</sup> Et humman hu mahapul ni e-helen mun

hi-gatu huyya: Kan APu DIOS ey 'Nakka ibbilang ni pengulwan ni u-ungngak ida helag Israel. <sup>23</sup> Ey kangkuy iebulut mudda ma-lat lumaw idan menaydayaw ni hi-gak e Dios da, nem manghay ka, et humman hu, petteyen ku hu pengulwan ni u-ungngam ni laki.' "

<sup>24</sup> Yan kapenglawwid Moses di Egypt et mangkampuddad dalam ey nampeang-ang hi APu DIOS. Ey innang ni petteyen tu hi Moses. <sup>25-26</sup> Nem hi Sippora e ahwan Moses ey immalan ewah et kugiten tu etan u-ungnga dan laki, et idehidah tud helin Moses et kantuy "Ayyakaw huyyan elaw yu e mahapul ni mekuggit kayu!" Et gapuh ni nunman ni impahding Sippora ey eleg law pateyen APu DIOS hi Moses.

<sup>27</sup> Hi APu DIOS ey inhel tu lan Aaron e tu dammuen di Moses etan di eleg mebebleyi. Et lumaw hi Aaron et tu dammuen hi Moses et akwalen tu. <sup>28</sup> Et ehelen nan Moses nan Aaron ni emin hu inhel APu DIOS ni hi-gatu anin idan miracles ni pehding dan pambangngadan dad Egypt.

<sup>29</sup> Et mambangngad idad Egypt et amungen dadda etan aap-apuddan helag Israel. <sup>30</sup> Et ehelen nan Aaron emin ni hi-gada hu inhel APu DIOS nan Moses. Ey hedin hi Moses man impahding tudda miracle et ang-angen idan nunman ni tuun neamung.

<sup>31</sup> Ey kinulug dan makulug ni intu-dak idan APu DIOS. Ey yan nunman nengamtaan da e tuka hehhemekaddad daka panhelheltapi. Et manyuung ida et dayawen da hi Apu Dios.

## 5

*Ya linawwan di Moses nan Aaron di kad-an etan ni patul*

<sup>1</sup> Entanni ey limmaw di Moses nan Aaron di kad-an etan ni patul et kandan hi-gatuy "Ya etan AP-APu e Dios min helag Israel ey kantuy 'Iebulut mudda tuuk et lumaw idad eleg mebebleyi et ida mandayaw ni hi-gak.'" <sup>2</sup> Nem kan etan ni patul ey "Hipa ngu anhan humman ni kanyun AP-APu yu? Kele nak u-unnuden ey eggak amta humman ni AP-APu? Eleg mabalin ni kayu umlaw e helag Israel!"

<sup>3</sup> Hinumang di Aaron nan Moses e kanday "Nampeang-ang ni hi-gami etan Dios min Hebrew et kantuy umlaw kamid eleg mebebleyi e mandellan kamin tellun aggew malat mi i-appitan diman humman ni AP-APu e Dios mi. Tep hedin eleg mi u-unnuda ey pandedgeh dakemi ey mettey kami winu um-itu-dak ni menggubbat ni hi-gami et petteyen dakemi."

<sup>4</sup> Ey kan etan ni patul ni hi-gaday "Hipa kayun menaktak idan tuun nakka panggunnu! Lakkayuy kuma et yu ehelen idan edum yu ma-lat ida mampanggunu!"

<sup>5</sup> Yan nunya law ni-ngangun dimmakel kayun Hebrew nem hi-gami iEgypt ey pinhed yun issiked ni manggunnu?"

<sup>6</sup> Et yan nunman ni aggew ey in-olden etan ni patul ida etan ni kamengipappangnguludan himbut ni Hebrew <sup>7</sup> e kantuy "Entan tu law idwasidda kamampangngunnu dagemin meikkamdug di pulan mekapyan brick. Ngenamung idan an menemmak.

<sup>8</sup> Nem mahapul ni mannenneng hu sigud ni bilang ni daka kapyaa. Eleg mabalin ni an mekullangan, anin hakey. Mahigadda dedan, et humman hu, daka ibbagabagan hi-gak e pellaw kudda kunu et da iappitan etan Dios da. <sup>9</sup> Edumi yu ngunnuen da ma-lat wadan kenayun hu ngunnuen da et endi inna-nu dan an mandeddengngel ni itek."

<sup>10</sup> Et ehelen idan nunman ni kamengipappangnguludda etan ni himbut e kanday "In-olden etan ni patul e eleg dakeyu law iddawsin dagemi <sup>11</sup> et ngenamung kayun an menemmak, anin ni di attu. Nem mahapul ni mannenneng hu sigud ni bilang ni yuka kapyaa." <sup>12</sup> Et hinapen idan helag Israel hu Egypt ni hamak dan dagemi. <sup>13</sup> Kaippilit idan kamengipappangngulu e mahapul ni kapyaan da etan bilang ni daka kapyaan nunman lan ida kameidwasin dagemin kapyaan da. <sup>14</sup> Nem eleg da hangkapyu hu henin nunman ni bilang et yadda etan helag Israel ni nepilin mengipappangngulu hu nengipenyuan da et pambaigen dadda. Et kandan hi-gaday "Kele kulang law hu yuka kapyaan nunya e beken ni henin nunman?"

<sup>15</sup> Entanni et lumaw ida humman ni helag Israel ni kamengipappangngulu et kanda etan ni patul ey "Apu patul, kele hanniman hu yuka pehpehding ni hi-gami? <sup>16</sup> Insiked yun um-idwat ni dagemi ey kanyuy kapyaan mi hu henin kadinakel ni miika kapyaan nunman? Ey dakemi kapanbaiga ey beken ni hi-gami kambahul."

<sup>17</sup> Nem kan etan ni patul ey "Makahhiga kayu kumaddan e eleg yu pinhed ni manggunnu, et humman hu, yuka ibbagabagan hi-gak e i-abulut ku ma-lat lumaw kayun an man-appit ni AP-APu yu. <sup>18</sup> Pambangngad kayu kumad yuka panggunnu. Endi an meidwat ni hi-gayun dagemi. Mahapul ni kapyaan yu hu bilang ni brick ni yuka kapyaan nunman."

<sup>19</sup> Yan nunman hu nengamtaan idan nunman ni kamengipappangngulun helag Israel e endi mabalin ni da pehding nem u-unnuden da humman ni olden e mahapul ni kapyaan

dan kewa-wa-wa hu sigud ni bilang ni brick ni daka kapyaa, anin ni endi meidwat ni hi-gadan dagemi.

<sup>20</sup> Negibbuh ni nekihummangan idan etan ni patul et umhlep ida, ey wadad Moses nan Aaron ni kamanehhegged ni hi-gada. <sup>21</sup> Et kandan hi-gaday “Hi APU DIOS hu mengastigun hi-gayu tep ya impahding yu himmulun et deh e anggebe-hel dakemi law etan ni patul et yadda opisyal tu. Et humman kumedek pay hu umhulun ni pemetteyan dan hi-gami.”

*Ya nanghelan APU DIOS e baddangan tudda tuu tu*

<sup>22</sup> Et makihummangan mewan hi Moses nan APU DIOS e kantuy “Kele muka i-abulut ida tuum ni manhelheltap? Kaw ya nengitu-dakan mun hi-gak ey ma-lat manhelheltap ida?

<sup>23</sup> Tam meippalpu kumedek eman ni nak nekihummangan etan ni patul et peamtak etan inhel mun hi-gak ey nema-man tudda kapanhelheltap ni peteg. Ey endi kammun baddangan mudda ma-lat meihwang ida.”

## 6

<sup>1</sup> Hinumang APU DIOS hi Moses e kantuy “Yan nunya ey ang-angen mu law hu pehdng ku etan ni patul. Pilliten kun mengipellaw ni hi-gayun tuuk. Et hi-gatu ngu mengittu-dak ni hi-gayu et hi-yanen yu hu bebley dan penang-angan tun et-eteng ni kabaelan ku.

<sup>2</sup> Hi-gak hu AP-APU. <sup>3</sup> Nampeang-ang ngak lan Abraham, hi Isaac, et hi Jacob et ya amta da ey hi-gak hu Apu Dios e Kabaelan tun emin. Nem eggak peamtan hi-gada e ya ngadan kun impeamtak nunya e hi-gak hu AP-APU. <sup>4</sup> Nektiballak ni hi-gada niyaddalli helag da e iddawat kun hi-gada hu Kanaan e nekibeblyan da lan nunman. <sup>5</sup> Ey yan nunya ey peamnuk humman ni inhel kun hi-gada, tep dingngel ku kapampehemhemmekiddan tuuk ni impanhimit butan iEgypt. <sup>6-7</sup> Et humman hu, ehel muddan edum mun helag Israel e hi-gak hu AP-APU. Peang-ang ku hu et-eteng ni kabaelan edum nemahlig ni pengastiguk idan iEgypt, ma-lat pappegen ku hu nanhimitan yun hi-gada niya ma-lat meihwang kayud yuka panhelheltapi. Et yallin pengippahdingan kun nunya hu pengamtaan yu e tuu dakeyun hi-gak e AP-APU e Dios yu. <sup>8</sup> Ippangulu dakeyu etan di bebley ni insapatah kun iddawat kun Abraham, hi Isaac et hi Jacob et hi-gayu memeltan ni nunman ni puyek ma-lat pambebleyan yu. Et nemnemen yu e hi-gak hu AP-APU yu.”

<sup>9</sup> Et lumaw hi Moses et ni ehlen idan edum tun helag Israel hu inhel APU DIOS nem eleg da kulluga tep ya nemahhig ni daka panhelheltapi ey nedismayah ida.

<sup>10</sup> Entanni ey kan APU DIOS nan Moses ey <sup>11</sup> “Lakkay di kad-an etan ni patul et mu ehlen e mahapul ni pellow tudda tuuk ni helag Israel et hi-yanen da eya bebley.”

<sup>12</sup> Nem kan Moses ey “Nem ang-ang mu kedi, anin idan edum kun helag Israel et eleg da-ak kulluga, nekamma-ma ngun etan ni patul e eleg tuwak kulluga tep beken nak ni nelaing ni umhapit.”

<sup>13</sup> Et mandalen APU DIOS di Moses nan Aaron e kantun hi-gaday “Elaw kayu et yu ehelen etan ni patul niyadda edum yun helag Israel e in-olden kun ippangulu yudda helag Israel et hi-yanen yu Egypt.”

*Yadda nahlagan di Moses nan Aaron*

<sup>14</sup> Huyyadda tenten ni edum ni helag Israel e hi Jacob: yadda u-ungngan Reuben e pengulwan ey hi Hanok, hi Pallu, hi Hesron et hi Karmi. Huyyadda kamengipappangnguluddan pewen ni pamilyah Reuben. <sup>15</sup> Yadda u-ungngan Simeon e neihned ey hi Jemuel, hi Jamin, hi Ohad, hi Jakin, hi Sohar et hi Saul e ya inetu ey iKanaan. Huyyadda kamengipappangnguluddan pewen ni pamilyah Simeon. <sup>16</sup> Yadda u-ungngan Levi ey hi Gerson, hi Kohat et hi Merari. Hi Levi ey hanggatut et telumpulut pitu hu toon tu et han matey. <sup>17</sup> Yadda u-ungngan Gerson ey hi Libni et hi Simei. Nahlag ida dama et dumakkel ida. <sup>18</sup> Yadda u-ungngan Kohat ey hi Amram, hi Ishar, hi Hebron et hi Ussiel. Hi Kohat ey hanggatut et telumpulut et tellu toon tu et han matey. <sup>19</sup> Yadda u-ungngan Merari ey di Mahli nan Mushi. Emin ida eya negadan ey u-ungngan Levi niyadda helag dadda.

<sup>20</sup> Hi Amram ey inahwa tu hi Jokebed e agin ametu et man-ungngadda et di Moses nan Aaron. Hanggatut et telumpulut pitu toon Amram et han metey. <sup>21</sup> Yadda u-ungngan Ishar ey hi Korah, hi Nepheg, et hi Sikri. <sup>22</sup> Yadda u-ungngan Ussiel ey hi Mishael, hi Elsaphan et hi Sitri.

<sup>23</sup> Hi Aaron ey inahwatu hi Elisheba e agin Nashon e u-ungngan Amminadab. Yadda u-ungnga da ey hi Nadab, hi Abihu, hi Eleasar et hi Ithamar.

<sup>24</sup> Yadda u-ungngan Korah ey hi Assir, hi Elkanah, et hi Abiasap. Huyyadda helag Korah.

<sup>25</sup> Hi Eleasar e u-ungngan Aaron, ey inahwa tu hu u-ungngan Putiel et mahlag ida et hi Pinehas. Emin ida huyyan negadan ey hi-gada kamengipappangngulun helag Levi niyadda pamilyah da.

<sup>26</sup> Di Moses nan Aaron e netenten ni helag Levi hu minandal APU DIOS ni mengip-pengguluddan helag Israel ni meni-yan ni Egypt. <sup>27</sup> Hi-gada hu nekihummangan etan ni patul di Egypt et iebulut tu helag Israel ni meni-yan ni Egypt.

*Pinutuk APU DIOS hi Aaron ni mengi-ehneng nan Moses*

<sup>28-29</sup> Yan nekihummanganan APU DIOS nan Moses di Egypt ey kantuy “Hi-gak hu AP-APU. Elaw kad kad-an ni patul et mu ehelen emin eya e-helen kun hi-gam.” <sup>30</sup> Nem kan Moses ey “Inamtam e beken nak ngu katteg ni mahepit. Hipa hu inna-nu etan ni patul ni mengullug ni hi-gak?”

## 7

*Pinutuk APU DIOS hi Aaron ni menghel ni e-helen nan Moses*

<sup>1</sup> Ey kan APU DIOS nan Moses ey “Iddawtan dakan et-eteng ni kabaelan mu, ma-lat hi-gam hu mengi-ehneng ni hi-gak di hinanggan patul di Egypt. Ey hi agim e hi Aaron hu heni prophet mu. <sup>2</sup> Ehel mun Aaron emin hu e-helen kun hi-gam et ehlen tu etan ni patul, ma-lat iebulut dakeyun helag Israel ni meni-yan ni Egypt. <sup>3-5</sup> Nem pambalin ku etan patul ni manghay et kahingen tu e-helen yun hi-gatu, anin ni dakel hu angetakkut ni pehding kud Egypt. Nemahhig ali hu pengastiguk idan iEgypt et han dakeyu ipengulun hi-gak ni meni-yan ni nunman ni bebley. Yan nunman ali hu pengamtaan da e hi-gak hu AP-APU.”

<sup>6</sup> Et u-unnuden di Moses nan hi Aaron ni emin hu inhel APU DIOS ni hi-gada. <sup>7</sup> Yan nunman ni da nekihummanganan etan ni patul ey newalu et tellu toon nan hi Aaron ey newalu hu toon nan hi Moses.

*Ya neipahding etan ni hulkud Aaron*

<sup>8</sup> Kan APU DIOS di Moses nan hi Aaron ey <sup>9</sup> “Hedin ibbaga etan ni patul e mahapul ni peang-ang yu hu miracle ni pengullugan tu e intu-dak dakeyun hi-gak, ey ehel mun Aaron et bekahen tu etan hulkud di hinangga etan ni patul niyadda opisyal tu. Et humman ni hulkud ey mambalin ni uleg.”

<sup>10</sup> Et lumaw di Moses nan Aaron di kad-an etan ni patul e inu-unnud da hu inhel APU DIOS ni hi-gada. Bingkah nan Aaron hu hulkud tud hinangga etan ni patul niyadda opisyal tu ey nambalin tu-wangun uleg.

<sup>11-12</sup> Nem ineyagan dama etan ni patul hu nangkelaing niyadda etan kamenippahding ni magic ni iEgypt et bekahen da hulkud da ey nambalin ida daman uleg. Nem kinan ni uleg nan Aaron ida. <sup>13</sup> Nem manghay damengu etan patul e eleg tu kullugad Moses nan Aaron e humman dedan hu inhel nan APU DIOS ni meippahding.

*Emin hu danum di Egypt ey nambalin ni kuheyaw*

<sup>14</sup> Entanni ey kan APU DIOS nan Moses ey “Deh manghay ni peteg etan patul et eleg tu i-abulut ni hi-yanen yun tutu-uk hu Egypt. <sup>15</sup> Et humman hu, elaw kallin an menammu etan ni patul ni lawwan tun kakkabbuhhan di Wangwang e Nile et hegeden mu etan di gilig tu. Ey itebin mu etan hulkud ni impambalin mu lan uleg. <sup>16</sup> Et kammun hi-gatuy ‘Intu-dak tuwak ni AP-APU e Dios middan Hebrew ni menghel ni hi-gam ma-lat iebulut dakemin umlaw ni an menaydayaw ni hi-gatu etan di eleg mebebley. Nem ingganah ni nunya ey kahing ka. <sup>17</sup> Et humman hu, amtaen mu law ni nunya, e hi-gatu hu AP-APU etan di ippahding tu. Ihheplat ku eya hulkud eyad Wangwang et mambalin ni kuheyaw hu danum. <sup>18</sup> Mangketey idalli hu deleg et manhamuy hu danum et eleg mabalin ni yu innumen.’

<sup>19</sup> Ey ehel mu daman Aaron et tu idengdeng hulkud tuddad wangwang, yaddad kulukul niyaddad lebeng di ditan Egypt et mambalin ni emin hu danum diman ni kuheyaw, anin idan inehul da.”

<sup>20</sup> Impahding di Moses nan Aaron di hinangga etan ni patul niyadda opisyal tu hu inhel APU DIOS ni hi-gadan pehding da. Inheplat Aaron hu hulkud tud danum etan di wangwang et mambalin etan danum ni kuheyaw. <sup>21</sup> Ey nangketey ida hu deleg et mahemuy etan danum et eleg mabalin ni innumen idan iEgypt. Et humman hu neipahding e nambalin ni kuheyaw emin hu danum di Egypt. <sup>22</sup> Nem yadda dama magician di Egypt ey impambalin da danum ni kuheyaw. Et humman hu, nanengtun manghay etan patul, eleg tu u-unnuden hu inhel di Moses nan Aaron e humman dedan hu inhel APU DIOS. <sup>23</sup> Nealay nanligguh etan patul et manglaw di baley tu e eleg tun hekey hanguden etan impahding da. <sup>24</sup> Et wada hakkey idan iEgypt ey nengu-kuddad gilig ni Wangwang e Nile ni pan-ehhulan da tep nambalin emin hu danum ni kuheyaw.

<sup>25</sup> Nelabah hu pitun aggew neipalpu eman ni impambalin APU DIOS hu Wangwang e Nile ni kuheyaw.

*Dimmakkel ni peteg hu tukak di Egypt***8**

<sup>1</sup> Entanni ey immehel mewan hi APU DIOS nan Moses ey kantuy "Lakkay mewan et mu ehlen etan ni patul e kammuy 'Kan ni AP-APU mi ey iebulut mudda tuuk et lumaw idan menaydayaw ni hi-gak. <sup>2</sup> Tep hedin kahing ka ey peelli tu hantapug ni tukak et umapnal ida eyad bebley yu. <sup>3</sup> Mekapkapnullin tukak hu Wangwang e Nile et humman hu um-aliddalli edum eyad baley mu, yad baley idan opisyal mu, niyad baley idan tutu-um. Umhehgep idad kuwaltuh mu, ey umlaw idad ugkippan mu, yaddad yuka pene-engi, anin idad bangeyu. <sup>4</sup> Ey anin alin attu kad-an yuddan opisyal mu et ya tuum ey umalidda hu tukak ni hi-gayu."

<sup>5</sup> Ey ehel mun Aaron et idengdeng tu hulkud tuddad emin di wangwang, yad kulukul niyaddad lebeng di Egypt ma-lat maukat hu dakel ni tukak et umapnal idan emin di puyek di Egypt."

<sup>6</sup> Et idengdeng nan Aaron etan hulkud etan idad wada danum ey neukat idalli dakel ni tukak et mapnu hu bebley di Egypt. <sup>7</sup> Nem impahding ida damaddan magician hu hanniman e impaukat da dama hu dakel ni tukak.

<sup>8</sup> Et paeyag etan ni patul di Moses nan Aaron et kantuy "Pandasal kayun AP-APU yu ma-lat ekalen tudda tukak et iebulut kun umlaw kayu et yu iappitan etan AP-APU yu."

<sup>9</sup> Kan Moses ey "Getud mu hu aggew et idasalan dakeyun emin idan opisyal mu niyadda tuum, ma-lat meendidda eya tukak et ebuh di Wangwang e Nile ni panha-adan da."

<sup>10</sup> Kan etan ni patul ey "Yan kabbuhhan." Et kan Moses ey "Dammutu hedin humman hu pinhed mu ma-lat pengamtaam e endi hu edum ni dios ni henin AP-APU e Dios mi. <sup>11</sup> Endiddalli law eya tukak ni kamenuddukul ni hi-gayuddan opisyal mu niyadda tuum et ebuh alid Wangwang e Nile ni wada tukak."

<sup>12</sup> Et hi-yanen di Moses nan Aaron etan patul et mandasal hi Moses nan APU DIOS ma-lat ekalen tudda etan dakel ni tukak ni impaeli tu. <sup>13</sup> Dingngel APU DIOS hu dasal Moses et mangkatey ni emin hu tukak di baballey, yaddad aldattan niyad papayyew. <sup>14</sup> Et pan-amungen idan iEgypt e pinenuppu-ul dadda. Entanni et nabwel ida etan tukak ey nemahhig ni kamanhemmu etan bebley. <sup>15</sup> Nem yan nenang-angan etan ni patul e endidda law hu tukak ey kahing mewan et eleg tudda u-unnudad Moses nan Aaron e humman dedan la inhel APU DIOS ni pehding tu.

*Ya dimmakkelan imuk di Egypt*

<sup>16</sup> Kan mewan APU DIOS nan Moses ey "Ehel mun Aaron et iheplat tu etan hulkud tud puyek et mangkapyaddan emin hu dep-ul di Egypt ni imuk." <sup>17</sup> Et iheplat nan Aaron hu hulkud tu ey nangkapyu hu dep-ul ni imuk. Et nemahhig e daka keammuammungidda tuu niyadda animal. Dakel ni peteg hu imuk anin di attun bebley di Egypt. <sup>18</sup> Impatna-et damaddan magician ni pambalin hu dep-ul ni imuk, nem eleg da han-ipahding.

<sup>19</sup> Et kanda etan ni patul ey "Hi APU DIOS hu nengipahding ni nunya." Nem nanengtun kahing etan patul e humman dedan la inhel APU DIOS.

*Nehullul mewan hu allahhing ni dimmakkel*

<sup>20</sup> Kan mewan APU DIOS nan Moses ey "Haleman kallin kabbuhhan et mu hegeden etan patul di wangwang et kammun hi-gatuy 'Kan APU DIOS ey i-abulut mudda tuuk et lumaw idan menaydayaw ni hi-gak. <sup>21</sup> Nem hedin kahing ka, kastiguen dakeyu e peelli tu dakel ni allahhing et keam-amungan dakeyulli, anin idallin opisyal mu niyadda tuum. Ey nemahhig e mepnuddalli baballey yu. Ey anin attu lawwan yu et dakel alin peteg hu allahhing e endilli gessinen yu.

<sup>22</sup> Nem endilli ngu allahhing di Goshen e nambebleyan idan tuuk. Huyya pehding ku e APU DIOS ma-lat pengamtaan mu e hi-gak hu AP-APU, ey hi-gak hu kamengippenahding eyaddan kamekapkapyadya Egypt. <sup>23</sup> Hi-gak ey amtak hu tuuk niya amtak tuum. Et huyyan miracle ey ippahding kun kabbuhhan."

<sup>24</sup> Et mewa-wa ey nemahhig hu kapanligigasiddan tuud emin ni bebley di Egypt tep impaelin APU DIOS hu dakel ni allahhing. Et anin di baley etan ni patul et yad baley idan opisyal tu niyadda tuu tu ey napnun allahhing.

<sup>25</sup> Et paeyag mewan etan ni patul di Moses nan Aaron et kantuy "Lakkayuy et yu iappitan hu Dios yu, nem yadya e bebley mi hu pengippahdingan yu." <sup>26</sup> Nem hinumang nan Moses e kantuy "Eleg mabalin ni yadya hu pan-appitan mi tep anggebe-hel ni peteg idan tuum hu keklengen min i-appit min AP-APU e Dios mi. Et kaw eleg dakemilli tengbaa hedin yadya pan-appitan mi? <sup>27</sup> Mahapul ni u-unnuden mi hu kan ni AP-APU e Dios mi e umlaw kamin an man-appit ni hi-gatu etan di eleg mebebleyi e tellun aggew hu pandellanan."



<sup>28</sup> Kan nunman ni patul ey “Anin i-abulut dakeyun an man-appit ni AP-APU e Dios yu etan di eleg mebebleyi hedini eleg kayu um-eddawwin peteg. Ey idasali yuwak dama.”  
<sup>29</sup> Hinumang Moses et kantuy “Yan lawwan mi ey mandasallak nan APU DIOS ma-lat ma-kal ida allahhing di bebley yuddan opisyal mu niyadda tuum. Nem entan dakemi mewan haul e hedini neendidda etan allahhing ey eleg dakemi i-abulut ni umlaw ni an man-appit ni DIOS mi.”

<sup>30</sup> Et ebuhe hi-yanen di Moses etan patul et mandasal nan APU DIOS. <sup>31</sup> Dingngel APU DIOS hu dasal tu et meendiddan emin etan allahhing et anin hakey ey endi. <sup>32</sup> Nem ngimmehay mewan etan patul et eleg tudda mewan i-abulut ni umlaw.

## 9

### *Ya nemateyan APU DIOS ni animal idan iEgypt*

<sup>1</sup> Kan mewan APU DIOS nan Moses ey “Mu ehel etan ni patul e kammuy ‘Kan ni AP-APU e Dios min Hebrew ey iebulut mudda tuuk et lumaw idan menaydayaw ni hi-gatu. <sup>2</sup> Hedini kahing ka et eleg mu mewan i-abulut idan umlaw, <sup>3</sup> kastiguen daka e peellik hu pistin animal ma-lat mangkatey ida kebayyu yu, kamel yu, baka yu, kalneroh yu niya gelding yu. <sup>4</sup> Nem endillin hekey hu mettey ni animal idan helag Israel, tep immatunan ku hu animal yun iEgypt et humman ida pettey ku. <sup>5</sup> Et hi-gak e AP-APU ey ippahding ku huyyan kabuhhan.’ ”

<sup>6</sup> Ey tu-wangu e yan newa-waan tu ey impahding APU DIOS hu inhel tu et mangkatey ida animal idan iEgypt, nem endin hekey netey ni animal idan helag Israel. <sup>7</sup> Immitu-dak etan patul ni an mammahmah ni meippanggep ni animal idan helag Israel, ey kanday makulug numan ni endi netey ni animal da. Nem nanengtun kahing etan patul et eleg tudda palaw.

### *Kinastigun Apu Dios ida iEgypt e mangkepelhaan ida et yadda animal da*

<sup>8</sup> Kan APU DIOS di Moses nan Aaron ey “Kayu gamal ni dep-ul di appuyyan et petu-ug nan Moses ni ihhebweg di hinanggan etan ni patul. <sup>9</sup> Ya etan dep-ul ey um-ehbuk et meihhinnap alid emin di Egypt et mangkepelhaan idallin emin hu tuu niyadda animal.”

<sup>10</sup> Et ida umlan dep-ul et lumaw idad kad-an etan ni patul et petu-ug nan Moses ni inhebweg. Entanniy nangkepelhaan tu-wangu emin hu tuud Egypt anin idan animal da. <sup>11</sup> Et endi law hu mabalin ni ippahding etan ni magician, tep anin ni hi-gada et yadda edum dan iEgypt ey nangkepelhaan ida dama. <sup>12</sup> Nem mina-man nan APU DIOS hu ngehay etan ni patul et eleg tu u-unnuden di Aaron nan Moses e humman dedan la hu inhel APU DIOS nan Moses ni ippahding tu.

### *Impaelin Apu Dios hu etta-teng ni dallallud Egypt*

<sup>13</sup> Kan APU DIOS nan Moses ey “Haleman kan kabuhhan ma-lat mu mewan hegeden etan patul et kammun hi-gatuy ‘Kan AP-APU e Dios min Hebrew ey iebulut mudda tuuk ma-lat lumaw idan menaydayaw ni hi-gak. <sup>14</sup> Tep hedini kahing ka et eleg mudda pellow, ey beken ni ebuh ida opisyal mu et yadda tuum ni kastiguen ku, nem anin ni hi-gam ma-lat pengamtaan mu e endi edum ni dios ni henin hi-gak eyad puyek. <sup>15</sup> Tep gullat na-mun impaelik hu nemahhig ni degeh et nanna-ud ni netey kayun emin. <sup>16</sup> Nem ninemnem ku dedan e eleg dakey petteya ma-lat ang-angen yu et-eteng ni kabaelan ku, ey ma-lat mandingngel hu ngadan tud emin ni tuud kebebbley. \* <sup>17</sup> Nem ay ingganah ni nunya ey nanengtun manghay ka e eleg mu i-abulut ni umlaw ida tuuk. <sup>18</sup> Et humman hu yan kabuhhan ni henin nunyan olas, ey peellik hu nemahhig ni dallallu e endin hekey hu henin nunman neipalpu eman ni nambalin huyyan bebley. <sup>19</sup> Et humman hu iolden muddan tuum ma-lat ihidum dadda animal da niya hipaddan wadan hi-gayu. Tep hedini peellik hu dallalu ey mettey emin tuu niya animal ni eleg maihidum.’ ”

<sup>20</sup> Yadda edum ni opisyal etan ni patul ey simmakut ida etan ni inhel tu et dadda pan-ihidum hu bega-en da et yadda animal da. <sup>21</sup> Nem yadda edum ey kahing idan inhel APU DIOS et eleg dadda pan-ihidum hu bega-en da et yadda animal da.

<sup>22</sup> Kan APU DIOS nan Moses ey “Idengdeng mu hulkud mud kabunyan et ma-gah idalli dallallu et mangka-gahan ida tuu, yadda animal niyadda intanem di Egypt.”  
<sup>23</sup> Indengdeng nan Moses hulkud tud kabunyan ey impaeli tu-wangun APU DIOS di Egypt hu dallallu ey kamangkikidul niya kamangkekyam. <sup>24</sup> Nemahhig hu dallallu niya kedyam e anggetakkut ni peteg. Ey endi henin nunman di Egypt neipalpun nekapyaan nunman ni bebley. <sup>25</sup> Et mangkebahbah ida neitnem ey nangketey ida tuu niyadda animal ni nangka-gahan ni dallallu. <sup>26</sup> Ebuh di Goshen e nambebleyan idan helag Israel ni endi na-gah diman ni dallallu.

\* 9:16 9:16 Romans 9:17

<sup>27</sup> Impaeyag etan ni patul di Moses nan Aaron et kantun hi-gaday “Nakka ebbuluta e nambahullak. Neiptek hi APU DIOS ey neihla kamiddan tuuk. <sup>28</sup> Pandasal kan APU DIOS ma-lat pasiked tu eya kidul niya dallallu! Et iebulut kun umlaw kayu.” <sup>29-30</sup> Kan Moses ni hi-gatuy “Anin ni hannitan hu ehel mu ey amtak metlaing e hi-gam niyadda opisyal mu ey eleg kayu umtakut nan APU DIOS. Nem anin, hedin um-a-allawwak eyad bebley ey itta-gey ku ngamay ku et mekihummangan nak nan APU DIOS et pasiked tu eya kidul niya dallallu. Humman pengamtaan mu e bagin APU DIOS eya puyek ni nambebleyan tayun tuu.”

<sup>31-32</sup> Yadda neitnem ni kandan flax niya barley e ngannganin ni me-teng ey nangebahbah. Nem eleg mebahbah hu intanem dan wheat niya spelt tep eleg ida ni pay tummel.

<sup>33</sup> Limmaw hi Moses di a-allaw etan ni bebley et ita-gey tu ngamay tu et mandasal nan APU DIOS ey nesiked hu kidul, ya udan niya dallallu. <sup>34</sup> Nem nesiked ida humman ey nanliwat mewan etan patul niyadda opisyal tu tep kahing ida mewan. <sup>35</sup> Immannu hu inhel APU DIOS nan Moses e eleg i-abulut etan ni patul ni umlaw ida helag Israel.

## 10

### *Ya nengipealian APU DIOS ni dakel ni dudun di Egypt*

<sup>1</sup> Kan APU DIOS nan Moses ey “Lakkay di kad-an etan ni patul et ka mewan makihummangan ni hi-gatu. Nem impambalin kun manghay anin idan opisyal tu ma-lat wada inna-nuk ni mengippeang-ang idan nunyan miracle. <sup>2</sup> Et e-ehhelen yuddallin u-ungga yu niya inap-apu yun edum ni aggew hu meippanggep idan nunyan impahding kun miracle ni nengastiguk idan eyan iEgypt. Et amtaen yun emin e hi-gak hu AP-APU.”

<sup>3</sup> Et lumaw di Moses nan Aaron et kanda etan ni patul ey “Kan etan ni AP-APU e Dios min Hebrew ey ‘Pigantu pampekumbabahan mun hi-gak? Iebulut mudda tuuk et lumaw idan menaydayaw ni hi-gak. <sup>4-5</sup> Hedin nanengtun manghay ka et eleg mu i-abulut ida tuuk ni umlaw ey peellik ni kabuhhan eyad bebley yu hu dakel ni dudun. Nemahhig e napnapan dallin emin hu puyek et endin hekey hu meang-ang ni puyek. Et kennen dallin emin hu intanem ni natdaan ni eleg bahbahen ni dallallu, anin idan keyew. <sup>6</sup> Mepnu baley mu, ya baley idan opisyal mu niya baley idan tuum. Huyyan mekappa ey nemahhig e anin ida lan a-ammed yu ey endi da inang-ang ni henin nunya neipalpun laputun nambebleyan dadya.’” Inhel Moses huyya et hi-yanen tu etan patul.

<sup>7</sup> Yadda etan opisyal ey ida nanlilih etan ni patul da e kanday “Nekele, pigantu pengissikidan eyan tuun um-enidwat ni panligligatan tayu? Iebulut mudda eya helag Israel et lumaw idan an menadayaw ni AP-APU e Dios da. Kaw eleg mu ang-anga e nebahbah law eya bebley tayu?”

<sup>8</sup> Et paeyag etan ni patul di Moses nan Aaron et kantun hi-gaday “Dammutun i-abulut dakeyun umlaw et yu dayawen hu AP-APU e Dios yu. Nem kaw hipaddan hi-gayu umlaw?” <sup>9</sup> Kan Moses ey “Mahapul ni umlaw kamin emin, anin idan u-ungga mi, yadda nangkea-amma, yadda nangkei-inna niyadda animal mi ey peki-la min emin tep mahapul ni mampiyestah kami et manhahamul kamin menaydayaw ni AP-APU mi.”

<sup>10</sup> Kan etan ni patul ey “Isapatah kud ngadan APU DIOS e eggak i-abulut ni mekillaw ida ahwa yu niya u-ungga yu. Neaamta e wada lawah ni yuka nemnemunan pehding. <sup>11</sup> Ebu hu lalakkin i-abulut kun umlaw ni an menaydayaw etan ni AP-APU e Dios yu tep ay humman hu muka ibbagan pehding yu.” Inhel tu humman et pa-hep tud Moses nan Aaron etan di baley tu.

<sup>12</sup> Kan APU DIOS nan Moses ey “Ita-gey mu ngamay mu et umli dakel ni dudun di deya Egypt et kanen da emin hu sindaan ni dallallu.”

<sup>13</sup> Et ildeng nan Moses hu hulkud tud Egypt et paelin APU DIOS hu dibdib ni nalpud kasimminin aggew, et ia-aggew tu niya inlallabi tun dimmenibdib. Ey yan newa-waan tu ey dakel ni peteg hu dudun ni in-alin etan ni dibdib. <sup>14</sup> Nemahhig e nenapnapan emin hu bebley di Egypt ni dudun. Endi la hanneyan ni kedakkel ni dudun di Egypt ey endilli hanneyan ni meippahding diman. <sup>15</sup> Immepadda ey andeket hu kameang-ang. Kinan dan emin hu neitnem ni sindaan ni dallallu et endin hekey hu natdaan anin idan lameh ni keyew. Et emin di Egypt ey endin hekey hu kameang-ang ni bulung winu lameh ni neitnem.

<sup>16</sup> Et pagegannun etan ni patul ni impaeyag di Moses nan Aaron et kantun hi-gaday “Nakka ebbuluta e nanliwat tak nan AP-APU yu e Dios yu niya nambahullak ni hi-gayu. <sup>17</sup> Et humman hu pesinsahi yuwak anhan et mandasal kayu etan ni AP-APU e Dios yu et pasiked tu eya tuka pampalpaligat ni hi-gamin umhulun ni ketteyyan mi.”

<sup>18</sup> Et hi-yanen nan Moses etan patul et mandasal nan APU DIOS. <sup>19</sup> Ey dingngel APU DIOS hu dasal nan Moses et bangiwen tu pellowwan ni dibdib, et palaw tud appit ni kasimmlin aggew et ityab tuddan emin hu dudun. Et endin hekey hu dudun di Egypt tep inlaw ni dibdib emin di Madlang ni Baybay. <sup>20</sup> Nem impambalin APU DIOS etan patul ni manghay et eleg tu mewan palaw ida etan helag Israel.

*Impambalin APU DIOS ni engeenget di Egypt*

<sup>21</sup> Kan mewan APU DIOS nan Moses ey "Ita-gey mu hu ngamay mu e idengdeng mud kabunyan et ma-ngetan emin hu bebley di Egypt." <sup>22</sup> Inta-gey Moses hu ngamay tu ey na-ngetan emin hu bebley di Egypt ni tellun aggew. <sup>23</sup> Et yadda iEgypt ey eleg da han-ang-ang hu anin hipa et eleg ida man-u-ukkat di baley dan tellun aggew. Nem yadda helag Israel ey kawwalwal ngu dedan di nambebleyan da.

<sup>24</sup> Impaeyag mewan etan ni patul hi Moses et kantun hi-gatuy "Lakkayuy et yu dayawen hu AP-APU e Dios yu. Dammutun mekillaw ida ahwa yu niyadda u-ungnga yu, nem etan peki-ladda animal yu henin kalneroh yu, gelding yu niya baka yu." <sup>25</sup> Ey kan Moses ey "Eleg mabalin hu hanniman tep mahapul ni i-appitan mi hu AP-APU e Dios mi. <sup>26</sup> Et humman hu mahapul ni peki-la min emin hu animal mi. Eleg man ahan mabalin ni yadya hu pampillian min animal ni i-appit min hi-gatu tep mahapul ni umdateng kamidman et han mi amtaa hu pillien min i-appit min hi-gatu."

<sup>27</sup> Nem impambalin mewan APU DIOS ni manghay etan patul et eleg tu pellow ida etan Hebrew. <sup>28</sup> Kan etan ni patul nan Moses ey "A-allaw kadya! Entan ali law pampeang-ang ni hi-gak tep petteyen daka hedin!" <sup>29</sup> Kan Moses ey "Hi-gam apu patul hu meu-unnud. Eggak ali law mampeang-ang ni hi-gam."

## 11

*Ya neteyyan idan pengulwan ni lakin u-ungngaddan iEgypt*

<sup>1</sup> Kan dedan lan APU DIOS nan Moses ey "Hakey law huuyan ligat ni peellik etan ni patul et yadda tuu tu. Et hedin megibbuh huuya ey i-abulut dakeyun umlaw. Ey ya kakulugan tu ey hi-gatu mengittu-dak ni hi-gayu. <sup>2</sup> Et ya pehding mu ey ehel muddan tuum et mambagaddan sinakdul yun iEgypt ni gangam ni balituk niya silber." <sup>3</sup> Yan nunman ey impambalin APU DIOS ida iEgypt ni nekalispituh niya kabbabal daddan helag Israel. Ey anin idan opisyal ni patul niyadda tuu tu ey imbilang da hi Moses ni eta-gey hu saad tu.

<sup>4</sup> Et kan pay Moses etan ni patul ey "Kan etan ni AP-APU mi ey yallin gawan hileng ey un-ali et hinnapen tu emin hu bebley yud Egypt <sup>5</sup> et emin hu pengulwan ni u-ungnga yun laki ey mettey. Meippalpun u-ungngam, e hi-gatu-et hu meihhayned ni hi-gam ni man-ap-apu, et ingganah ni pengulwan ni u-ungngaddan kebakahan ni bega-en mu et yadda nemangulun impah ni animal yu ey mettey ida. <sup>6</sup> Medngel ali hu nangih ni endi tu neiingngehan tep endi neipahding ni henin nunyan nunman la ey endilli law henin nunyan meippahding. <sup>7</sup> Nem yadda helag Israel ey melinggep idalli tep endi meippahding ni hi-gada, anin idan animal da. Ey anin idan ahhu da et endi an umgungung. Yan nunman ali pengamtaan yu e nambaklang hu kapengibbillang APU DIOS idan helag Israel et hi-gayuddan iEgypt. <sup>8</sup> Ey emin idalli opisyal mu ey um-aliddan manyu-ung ni mampehemhemmek ni hi-gak ma-lat ipenguluk ida tuuk et hi-yanen ni eya Egypt. Ey makulug ni umlaw kami." Inhel Moses humman et umhep e nemahhig bunget tu.

<sup>9</sup> Kan dedan lan APU DIOS nan Moses ey "Nanengtun eleg dakalli u-unnud etan ni patul ma-lat peang-ang ku dakel ni miracle di deya Egypt."

<sup>10</sup> Et humman hu, anin impahding di Moses nan Aaron ida emin huuyan miracle di hinanggan etan ni patul, ey eleg tu i-ebulut ni umlaw ida etan helag Israel tep impambalin APU DIOS ni manghay.

## 12

*Ya Piyestah ni Passover e Nelabhan ni Anghel APU DIOS*

<sup>1</sup> Entanni ey kan mewan APU DIOS di Moses nan Aaron di Egypt ey <sup>2</sup> "Huuyan bulan hu memengngulun bulan ni hantoon. <sup>3</sup> Ehel yuddan edum yun helag Israel ma-lat yallin meikkeppulun aggew ni nunyan bulan ey wada hakkey ni pamilyah ey umpilin impah ni kalneroh ni ihhideda e hanhakkey di hakey ni pamilyah. <sup>4</sup> Hedin wada pamilyah ni eleg da han-epuh etan hakey ni kalneroh, mabalin ni mekiggedwa hu sinakdul da tep meippuun di kadinakkel etan ni pamilyah niya um-ustuh ni kennen. <sup>5</sup> Mahapul ni ya kayyaggud ni hantoon tun kalneroh winu gelding hu pillien yu. <sup>6</sup> Mahapul ni

paka-ippaptek yudda huyyan animal ingganah ni mahmahdem ni meikkeppulut epat ni aggew. Et emin kayun helag Israel ey keklengen yun kehillingan tun nunman ni aggew. <sup>7</sup> Da-nihi yun kuheyaw hu nambina-hil ni pamedingan niya etan ta-pew ni habyen ni emin ni baballey yun pengikkannan yu. <sup>8</sup> Itangtang yudda etan detag ey ihideyud sinapay ni eleg ma-duman ni kamampelbag, ey hidai yun mapeit ni kameitnem. <sup>9</sup> Entan tu ekan ni meatta winu entan tu panhina-eng, nem itangtang yu e anin ni ya ulu tu, ya heli tu, ya puhu tu, ya altey tu niya egeh tu. <sup>10</sup> Mahapul ni kenneh yun emin ni mahmahdem ey endi tetdaan yu. Nem hedini wada metdaan man, giheb yu. <sup>11</sup> Heninnuy pay hu pehding yu, pambalwasi kayun heni wada lawwan yu niya pampatut kayu ey ala yu hulkud yu. Ey papuut yu ekan tep melebbah nunyan hileng hu anghel kud baballey yu.

<sup>12</sup> Yan nunman alin hileng ey hinnapen kun emin hu bebley di Egypt et petteyen kuddan emin hu lakin pengulwan ni u-ungngaddan iEgypt niyadda nemangulun impah ni animal da. Ey bahbahen kun emin hu dios dan daka deyyawa, ma-lat pengamtaan da e hi-gak ni ebuh hu Dios. <sup>13</sup> Ya etan kuheyaw ni idda-ni yud pamedingan yu hu pengimmatunan kun baballey yu et labhan ku ma-lat endi mettey ni hi-gayun ellian kun pemetteyan kuddan pengulwan ni u-ungngaddan iEgypt. \* <sup>14</sup> Mahapul ni pehding yudda eya inhel kun ippahding yu e mampiyestah kayu ma-lat penginepman yun hi-gak e AP-APU yu. Ey ittutduddu yudda damaddan u-ungnga yu niya inap-apu yu huyya ma-lat eleg matelak huyyan elaw.

<sup>15</sup> Pitun aggew hu eleg yu pengngannin sinapay ni neha-adan ni kamampelbag. Ey yan memengngulun aggew ey mahapul ni e-kalen yudda emin hu kamampelbag ni sinapay di baballey yu. Tep hedini wadan hi-gayu hu mengngan ni sinapay ni neha-adan ni kamampelbag ni sinapay ni nunman ni pitun aggew ey eggak ibbilang ni tuuk. <sup>16</sup> Yan lapun aggew et yan meikkeppitun aggew ey meemmung kayu et mandayaw kayun hi-gak. Et endi an manggunnun nunman idan aggew. Yan ebuh hu mabalin ni ingngunu yu ey ya mengiddaddan ni kenneh yun pampiyestahan yu.

<sup>17</sup> Mahapul ni pehding yu huyyan elaw tep yan nunyan aggew hu nengipa-kalan kun hi-gayud Egypt. Ey pannananeng yun ippahding huyyan Piyestah ni Sinapay e eleg meha-adan ni kamampelbag. <sup>18</sup> Meippalpun mahmahdem ni meikkeppulut epat ni aggew ingganah ni mahmahdem ni meikkadwam pulut hakey ni nunman ni nemangulun bulan ey eleg kayu mengngan ni sinapay ni neha-adan ni kamampelbag. <sup>19-20</sup> Ey pitun aggew ni endi umkan ni sinapay ni neha-adan ni kamampelbag niya endi an meihha-ad ni kamampelbag di kabeley ni nunman idan aggew. Mahapul ni emin kayu, helag Israel winu beken, ey u-unnuden yu huyya tep ya etan mengehing et eleg tu u-unnuda ey eggak law ibbilang ni tuuk."

*Ya etan nemangulun Piyestah ni Passover*

<sup>21</sup> Et paeyag ida Moses emin aap-apun helag Israel et kantun hi-gaday "Kayu pilin impah ni kalneroh ni keklengen yun hemmulen ni pamilyah yun pampiyestahan yun Passover e humman la Nelabahan ni Anghel Apu Dios. <sup>22</sup> Niya betek kayun hissop ni itta-mel yu etan di kuheyaw ni kinleng yu et da-nihan yu nambina-hil ni pamedingan niya ta-pew ni habyen ni baley yu. Ey endin hi-gayu um-ehep ingganah ni mewa-wa. <sup>23</sup> Tep hedini um-alilli hi APU DIOS di emin ni bebley di Egypt ni memettey idan pengulwan ni lakin u-ungngaddan iEgypt et ang-angen tu e wada kuheyaw di nambina-hil ni pamedingan niyad ta-pew ni habyen ni baley yu, pelebbah tu etan anghel tu et eleg dakeyu illagat.

<sup>24</sup> Hi-gayu niyaddalli helag yu ey mahapul ni ippahding yudda huyyan katootoon ma-lat eleg matelak huyyan elaw. <sup>25</sup> Et hedini umdateng kayu etan di lawwan yun puyek ni impakulug APU DIOS ni hi-gayu, ippahding yu huyyan Piyestah ni Passover. <sup>26</sup> Hedini mahmahan idan u-ungnga yu e kele mahapul ni pehding yu huyya <sup>27</sup> ey kanyun ihhumang yuy 'Huyya piyestah ni penaydayaw min APU DIOS e i-appitan mi tep linabhan idan anghel tu baballey min helag Israel, et endi tu pinetey ni hi-gami, et ebuh ida ngu pengulwan ni lakin u-ungngaddan iEgypt ni pintey tu.' "

Dingngel idan helag Israel humman ey nandukun ida et dayawen da hi APU DIOS. <sup>28</sup> Et u-unnuden da hu inhel di Moses nan Aaron e humman intugun APU DIOS.

*Nangketey ida lalakkin pengulwan ni u-ungngaddan iEgypt*

<sup>29</sup> Yan nunman ni gawan hileng ey pintey APU DIOS emin hu pengulwan ni lakin u-ungngaddan iEgypt e neilepud u-ungngan etan ni patul e hi-gatu-et hu meihhayned ni mampatul ingganah di pengulwan ni u-ungngaddan nangkeikelabut, anin ni yadda

\* 12:13 12:13 Hebrews 11:28

nemangulun impah ni animal da. <sup>30</sup> Yan nunman ni hileng, ey bimmangun etan patul, yadda opisyal tu niyadda emin hu iEgypt ey kanengih ida tep emin di kabeley ey wada netey.

<sup>31</sup> Et yan nunman ni hileng ey impaeyag etan ni patul di Moses nan Aaron et kantun hi-gaday “Lakkayuy et yudda ipengulu edum yun helag Israel, et manglaw kayu. Hi-yan yu eya bebley mi ma-lat yu dayawen etan AP-APU e Dios yu e humman hu yuka ibbagabagan pehding yu! <sup>32</sup> Pampeki-la yudda kalneroh yu niyadda edum ni animal yu, nem idasali yuwak anhan ma-lat wada dama hu panyaggudak.”

<sup>33</sup> Kapandegdegaddan iEgypt etan ida helag Israel e kanday “Papuut yu et manglaw kayun emin. Endilli maptek ey mettey kamin emin hedin eleg kayu um-a-allaw di deyal!”

<sup>34</sup> Et panlibutan idan helag Israel hu pinelut dan alinah ni kapyae dan sinapay ni eleg meha-adan ni mampelbag et libutan dan luput et pampahnen da. <sup>35-36</sup> Et manglaw ida e impeki-la da kinedangyan idan iEgypt tep nambaga idan hi-gadan hubeng, yadda silber niyadda balwasi e inu-unnud da inhel lan Moses ni pehding da. Nan-idwat idan iEgypt huyyan imbageda tep impambalin APU DIOS ni mekallispituh idan hi-gada. Hanniman hu nengal-an idan helag Israel ni kinedangyan idan iEgypt et itebin da.

#### *Ya neni-yanan idan helag Israel ni Egypt*

<sup>37</sup> Immegah ida helag Israel di Rameses et mandaddallan idan limmaw di Sukkot. Ya bilang dan emin ni neni-yan ni Egypt ey enem ni gatut hu libu nem eleg ida maibilang hu u-ungnga niyadda bibi-i. <sup>38</sup> Ey dakek hu kalneroh da, gelding da niya baka dan impeki-la da. Dakek ida dama edum ni tuun beken ni helag Israel ni nekilaw ni hi-gada.

<sup>39</sup> Hedin nanha-ad ida, kinapya dan sinapay etan itabin dan alinah ni eleg meha-adan ni kamampelbag, tep hinaggadud hu immegahan da, et endi tsimpuh dan nengiddadan ni kennen da.

<sup>40-41</sup> Ya bilang ni toon ni nekibebleyan idan helag Israel di Egypt neipalpu eman ni linawwan dadman ingganah ni nunyan peni-yanan da ey epat ni gatut et telumpulun toon. <sup>42</sup> Yadda helag Israel ey mahapul ni katootoon ey i-ppit dan APU DIOS humman ni hileng ni nengihwangan tun hi-gada et hi-yanan da Egypt.

#### *Yadda etan meu-unnud ni Piyestah ni Passover*

<sup>43</sup> Entanni ey immehel mewan hi APU DIOS et kantud Moses nan Aaron ey “Yahhuy hu olden ni meu-unnud ni pengippahdingan yun Piyestah ni Passover. Endi hansinuan ni beken ni edum yun helag Israel ni mekikkan ni hi-gayu etan ni indaddan yun kalneroh ni hemmulen yun peginemnemman yun nelabahan ni anghel ku.

<sup>44</sup> Nem dammutun mekikkan ida himbut yun gintang yu, hedin nekugit ida. <sup>45</sup> Eleg mebellin ni mekikkan ida nekibebley ni hi-gayun nalpud edum ni bebley niyadda yuka pangngunwan kametangdani. <sup>46</sup> Ey mahapul ni kennen yun emin humman ni kalneroh etan di bawah ni baballey yu. Entan tu i-hep ey ang-ang yu et endi an megiplung ni genit nunman ni keklengen yu. † <sup>47</sup> Emin kayun helag Israel ey mahapul ni ipphading yu huyyan piyestah. <sup>48</sup> Nem eleg mabalin ni mekikkan hu tuun eleg makugit. Ey hedin wadadda nalpud edum ni bebley ni nekibebley ni hi-gayu et pinhed dan meki-dum ni pengippahdingan yun nuntan ni peginemnemman yun nelabahan ni anghel ku, dammutu. Nem mahapul ni mekuggit idan emin hu lalakkid pamilyah da anin idan lalakkin kamekihha-ad ni hi-gada ma-lat heniddan hi-gayun helag Israel et han mabalin ni meki-dum ida. <sup>49</sup> Emin kayun helag Israel et yadda etan tuun nekibebley ni hi-gayu ey mahapul ni u-unnuden yudda huyyan meu-unnud ni pengippahdingan ni Piyestah ni Passover.”

<sup>50</sup> Emin ida helag Israel ey inu-unnud da hu tugun APU DIOS ni inhel di Moses nan Aaron ni hi-gadan pehding dan peni-yanan dan Egypt. <sup>51</sup> Et ipengulun APU DIOS idan neni-yan ni Egypt ni nunman ni aggew.

## 13

#### *Ya pengi-eng-engan idan helag Israel ni pengulwan ni lakin u-ungnga da nan APU DIOS*

<sup>1</sup> Kan mewan APU DIOS nan Moses ey <sup>2</sup> “Emin hu pengulwan ni u-ungnga yun laki niya nemangulun impah ni animal yu ey ieng-eng yun hi-gak. Tep bagik emin hu pengulwan \* ni u-ungnga yun helag Israel, anin idan nemangulun impah ni animal yu.”

<sup>3</sup> Kan Moses idan edum tun helag Israel ey “Nemnemnem tayun ingganah huyyan aggew ni neni-yanan tayun Egypt et meliblih itsud neihbutan tayu gapuh ni et-eteng ni kabaelan APU DIOS. Ey ang-ang tayu et eleg tayu kanen hu sinapay ni neha-adan ni

kamampelbag. <sup>4-5</sup> Yan nunyan memengngulun bulan ni Abib ey hini-yan tayu Egypt et lumaw itsu etan di bebley ni impakulug APU DIOS ida lan ammed tayun iddawat tun hi-gatsu. Humman hu nambebleyan idan Kanaanite, Hittite, Amorite, Hibite niyadda Jebusite. Humman ni bebley ey dakel kennen ey mateba kameitnem. Hedin umdateng kayudman, ey entan tu liwwan ni ippahding hu pan-am-amlengan yu hedin nedatngan huyyan aggew ni katootoon. <sup>6-7</sup> Et yan dettengan yudman ni kakkayyaggud ni bebley ey ang-ang yu et eleg yu kanen hu sinapay ni neha-adan ni kamampelbag niya mahapul ni endi kamampelbag ni sinapay di baballey yu et yad bebley yu ni memengngulun pitun aggew ni memengngulun bulan. Et yan meikkeppitun aggew ey mampiyestah kayu e manhahamul kayun penaydayaw yun APU DIOS.

<sup>8</sup> Et hedin ippahding yulli huyyan piyestah ni katootoon ey ehel yuddallin u-ungnga yu e mukun wada huyyan piyestah ey tep huyya penginemnemneman tayun impahding APU DIOS et hi-yanen tayu Egypt. <sup>9</sup> Huyyan piyestah ey heni malkad ngamay winu tuktuk yun mengippenemnem ni hi-gatsun ingganah idan tugun APU DIOS. Huyya pehding tayu tep impa-kal daitun hi-gatud Egypt gapuh ni et-eteng ni kabaelan tu. <sup>10</sup> Et humman hu ippahding yulli huyyan piyestah di nagtud ni aggew ni katootoon.

<sup>11</sup> Yallin nunman alin dettengan yu etan di bebley ni impakulug APU DIOS ida lan ammed tayun iddawat tun hi-gatsu e humman hu nambebleyan idan iKanaan, <sup>12</sup> ey mahapul ni ieng-eng yun APU DIOS hu pengulwan ni u-ungnga yu tep emin hu lakin pengulwan ni u-ungnga yu anin idan nemangulun lakin impah ni animal yu ey hi-gatu. <sup>13</sup> Nem humman idan pengulwan ni lakin u-ungnga yun ieng-eng yun APU DIOS, ey dammutun hullulan yun lakkitun impah ni kalnero. Et ya nemangulun lakkitun impah ni kebayyu ey dammutun hullulan yun lakkitun impah ni kalnero. Nem hedin eleg yu pinhed ni hullulan, giplung yu buklew tu et matey. <sup>14</sup> Ey hedin ibbagaddallin u-ungnga yun edum ni aggew hu gaputun yuka pengippahdingin nunya, kan yulli ey 'Mukun mika ippahding huyya ey tep gapuh ni et-eteng ni kabaelan APU DIOS ey impa-kal dakemid Egypt e neihbutan mi <sup>15</sup> e kinastigu tu etan patul et pateyen tu pengulwan ni u-ungnga tu, yadda pengulwan ni u-ungngaddan tutu-u tu niyadda nemangulun impah ni animal da tep manghay et eleg dakemi i-abulut ni me-kal diman. Et humman hu, mahapul ni iddawat tayuddan APU DIOS hu nemangulun lalakkinn u-ungnga tayu et yadda nemangulun impah ni animal tayu. Nem ya meihhullul ni pengulwan ni lakin u-ungnga tayu ey ya impah ni kalnero. <sup>16</sup> Huyyan pehding tayu ey heni malkad ngamay winu tuktuk tayu et penginemnemneman tayun ingganah ni nangkalan APU DIOS ni hi-gatsud Egypt gapuh ni et-eteng ni kabaelan tu.' "

*Yan nengipenguluan APU DIOS idan helag Israel et hi-yanen da hu Egypt*

<sup>17-18</sup> Yan nengiebulutan etan ni patul ni hi-yanen idan helag Israel hu Egypt ey beken etan di keltad ni mampellaw di Pilistia hu impangulun Apu Dios ni dinlan da ey humman et hu neihnup. Et ya impangulu tu ey ya etan di eleg mebebleyi e mampellaw etan di Madlang ni Baybay nem nelikaw humman ni dinlan da. Tep kan APU DIOS ey "Nungay mantuttuyyu ida et mambanggad idad Egypt hedin mahapul ni mekiggubbat ida." Humman ninemnem tun pehding anin ni wada almas dan intabin dan neni-yanan dan Egypt.

<sup>19</sup> Yan neni-yanan di Moses ni Egypt ey neki-la tu genit Joseph tep inhel lan Joseph idan edum tun helag Israel e kantuy "Baddangan dakeyullin APU DIOS et hedin hi-yanen yulli Egypt, mahapul ni peki-la yulli genit ku."

<sup>20</sup> Hini-yan idan helag Israel hu Sukkot et dumteng idad Etham di gilig etan ni eleg mebebleyi et mangkampuddadman. <sup>21-22</sup> Ya impahding APU DIOS ni nengipengulun hi-gada ey hedin kawwalwal, kamambalin ni kulput et tuka ippangnguludda et hedin hileng, kamambalin humman ni kulput ni et-eteng ni apuy ni kamantettebbel et humman daka penillag ni dellanen da. †

## 14

*Impanggedwan APU DIOS etan danum di Madlang ni Baybay*

<sup>1</sup> Entanni ey kan mewan APU DIOS nan Moses ey <sup>2</sup> "Ehel muddan edum mun helag Israel et mambanggad kayu etan di neihnup di Pi Hahiroet e nambattanan ni Migdol et ya Madlang ni Baybay, et mangkampu kayu etan di demang ni Baal Sepon. <sup>3</sup> Et penghel etan ni patul ni Egypt ey nehama kayu niya nehukum kayu tep wada kayud nambattanan ni eleg mebebleyi et ya baybay, <sup>4</sup> et pedugen dakeyu tep pambalin ku mewan ni manghay. Implanuh ku huyya ma-lat usalen ku etan patul niyadda sindalu

† 13:21-22 13:21-22 Ang-ang yu Exodus 40:30.

tun pengippeang-angan kun et-eteng ni dayaw ku, et pengamtaan idan iEgypt e hi-gak hu AP-APU.” Et an ehlen Moses idan edum tun helag Israel ey inu-unnud da.

<sup>5</sup> Ya etan patul et yadda opisyal tu ey ida kamantuttuyyun limmawan idan helag Israel et eleg ida law mambangngad et kanday “Eyyakaw kumedek! Hipa ninemnem tayu, kele tayu in-abulut ni umbesik ida etan helag Israel? Tam endi law pambega-en tayu.”

<sup>6-8</sup> Impambalin mewan APU DIOS ni manghay etan patul et paidaddan tu hu kalesah ni panlugganan tu ma-lat ipengulu tudda sindalu tu niyadda ap-apudan memdug idan helag Israel. Inusal da enem ni gatut ni kekakkayyaggudan ni kalesa et yadda edum ni kalesa di Egypt ni kameussal di gubat. Ey netuled idan emin ni namdug idan helag Israel. <sup>9</sup> Yadda namdug idan helag Israel ey ya etan patul, yadda sindalun nandalan, yadda nampangkebayyu niyadda nampangkalesa et ha-kupen daddan nangkampud gilig ni Madlang ni Baybay e neihnup di Pi Hahirof niya demang ni Baal Sepon.

<sup>10</sup> Yan nenang-angan idan helag Israel e iyyaddalli etan patul niyadda sindalu tu ey simmakut ida et ida kamampehemhemmek nan APU DIOS ma-lat ihwang tudda.

<sup>11</sup> Kandan Moses ey “Eyyakaw kumedek, kaw in-ali dakemidyad eleg mebebleyi et matey kamidya? Kaw kulang hu keikkullungnan di Egypt? <sup>12</sup> Inhel mi dedan ni hi-gam e eleg dakemi pekidimdima-u et anin ew ngun diman kamid Egypt. Kekkeddukdul tu hu nannaneng kamin himbut di diman nem ya etan kami mettey di deyal!”

<sup>13</sup> Nem kan Moses ey “Entan takut yu! Petuled yu nemnem yu et ang-angen yu hu pehding APU DIOS ni mengihwang ni hi-gatsun nunya. Tep humman idan iEgypt ey meendidda et endilli law yu penang-angan ni hi-gada. <sup>14</sup> Ya kayyaggud ni pehding tayu ey pelinggep tayu nemnem tayu et ngenamung hi APU DIOS ni mekiggubbat ni hi-gada.”

<sup>15</sup> Kan APU DIOS nan Moses ey “Kele kayu kamampehemhemmek ni hi-gak? Ehel mu kumadda eyan tuu et ituluy yun menglaw. <sup>16</sup> Idengdeng mu eya hulkud mud baybay et megedwa eya danum et mandalan kayuddan edum mun helag Israel di mamega.

<sup>17</sup> Pambalin kudda mewan eya iEgypt ni manghay et anin kayu kamenglaw ey pan-unnuden dakeyu. Nem hi-gak hu mekiggubbat ni hi-gada et apputen ku etan patul, yadda sindalu tu, yadda sindalu tun nangkalesa et yadda nangkebayyu et meang-ang hu et-eteng ni kabaelan ku. <sup>18</sup> Et humman ni pengapputan kun hi-gada hu pengamtaan da e hi-gak hu makulug ni AP-APU.”

<sup>19</sup> Et ida kamenglaw hu helag Israel ey limmaw etan anghel ni kamengipappanggulun hi-gadad dingkuggan da ey limmaw dama etan kulput di nambattanan <sup>20</sup> idan helag Israel et yadda iEgypt et maiheni. Entanni et nehileng ey engeenget di kad-an idan iEgypt, nem kawwalwal di kad-an idan helag Israel tep nambalin ni apuy etan kulput. Et endi inna-nuddan iEgypt ni meihnup ni hi-gada.

<sup>21</sup> Dimmateng ida etan di baybay et idengdeng nan Moses etan hulkud tu ey impaelin APU DIOS hu na-let ni dibdib ni nalpud appit ni kasimmilin aggew et dumenibdbdb ingganah nawa-wa. Entanni ey nangedwa etan danum et mabudihan hu dalinat ni baybay. <sup>22</sup> Et man-agwat ida helag Israel di baybay e nandalan idad mamegan puyek tep ya etan danum di nambina-hil di winilli niyad winannan ey heni natneng.

<sup>23</sup> Ida kamangekeipdug hu iEgypt ni nampangkalesah ida niya nampangkebayyu. <sup>24</sup> Yan eleg pay ni mewa-wa ey nan-uhdung hi APU DIOS e wada etan di kulput et apuy. Et wadaen tu takut idan sindalun iEgypt. <sup>25</sup> Endi maptek ey kamangekeillunnek hu heli idan kalesah da et ida kamampaligat ni umlaw. Et kanday “A-allaw itsu kumadya! Tep ya DIOS idan helag Israel hu kamekihhanggan hi-gatsu.”

<sup>26</sup> Yan nan-agwatan emin ni helag Israel di ba-hil ni baybay ey kan APU DIOS nan Moses ey “Idengdeng mu mewan hu ngamay mud baybay ma-lat mandammu etan danum et mangkalsing ida eya iEgypt ni kamangekeipdug.”

<sup>27-28</sup> Et idengdeng Moses hu ngamay tud baybay ni kakkabbuhhan ey nambangngad etan danum. Et mangkaenud ida kalesa et yadda kebayyu ey nangkalsing ida sindalun iEgypt. Impatnaddan iEgypt et ni umdakal, nem nalsing idan emin gapun nunman ni impahding APU DIOS et endi natdaan.

<sup>29</sup> Nem yadda helag Israel ey nan-agwat ida e nandalan idad mamegan puyek di dalinat ni baybay e nambina-hil hu danum e heni nebatneng di winannan niyad winilli.

<sup>30-31</sup> Natgadda helag Israel ey et-eteng law hu dinel dan APU DIOS et hi Moses e bega-en tun nenang-angan dan kabaelan tun nengihwangan tun hi-gadan nunman ni aggew e inapput tudda iEgypt et nangkalsing idan impahding tu. Et mangkaiwehit hu annel dad gilig ni baybay.

<sup>1</sup> Et gapuh ni nunman ni nengihwangan Apu Dios ni hi-gada ey impappanggulun Moses ida edum tun helag Israel et man-a-appéh. Kandad a-appéh day “Ia-appéhan ku hi APU DIOS tep naka-apput tudda buhul tu e imbeng tud baybay etan ida kebakyuu et yadda nantakkay. <sup>2</sup> Hi APU DIOS hu na-let ni mengi-ehngeng ni hi-gak, ey hi-gatu mengihwang ni hi-gak. Hi-gatu hu Dios ku ey hi-gatu deyyawen ku. Ey hi-gatu Dios ni kadeyyawan ama, et humman hu ia-appéh ku meippanggep ni kasina-gey tu.

<sup>3</sup> Hi APU DIOS ey netuled ey nelaing ni mekiggubbat ey hi-gatu AP-APU. <sup>4</sup> Imbeng tuddad baybay hu sindalun iEgyt niyadda kalesa da. Et mangkalsing ida ketultuledan ni aap-apun sindalu da etan di Madlang ni Baybay. <sup>5</sup> Nalneng ida e henidada batun limmaw di nandallem.

<sup>6</sup> Hi-gam e APU DIOS ey et-eteng hu kabaalam e muka paka-apputa buhul mu. <sup>7</sup> Gapuh ni kasina-gey niya kakina-let mu ey inapput muddan emin hu kamenanggan hi-gam. Impeang-ang mu bunget mun nengendian mun hi-gada, henin kapanggih-ingin apuy ni ulut. <sup>8</sup> Inheb-uk mud baybay ey negedwa hu danum e heni natngeng et ay heni nedinding et mabudihan hu mamegan puyek di dalinat ni baybay.

<sup>9</sup> Kan etan ni buhul miy ‘Pepdugen kudda et hedin hina-kup kudda, nampatey kudda et al-en kun emin hu binangkang da et panggededwa middan tuuk.’ <sup>10</sup> Nem inheb-uk mu mewan e APU DIOS, et mandammu etan danum et mangkalsing ida. Et malneng idad baybay e henidada gumek ni nalneng di nandallem.

<sup>11</sup> APU DIOS, endi edum ni dios ni henin hi-gam. Kaw wadan hi-gada hu kamedeyyaw ey kakkayyaggud e henin hi-gam? Et hipan hi-gada hu kabaalam tun mengippahding idan kamengippetngan muka ippenahding?

<sup>12</sup> Indengdeng mu wannan ni ngamay mu ey nangkeunug ida buhul mi et lumaw idad nandallem di puyek.

<sup>13</sup> Nem hedin hi-gami, inhwang dakemi et ipengulu dakemi gapuh ni et-eteng ni impeminhed mun hi-gamin tuum. Ey gapuh ni et-eteng ni kabaalam ey ippaptek dakemi ingganah ni umdateng kami etan di bebley ni intudum ni panha-adan mi.

<sup>14</sup> Dakel idalli hu tutu-ud kebebbley ni mengngel alin nunman ni neipahding et umgeygey idan takut da. Nema-madda iPilistia, <sup>15</sup> anin idan aap-apun iEdom, niya iMoab. Ey nemahhig ali takut idan emin ni tuud Kanaan.

<sup>16</sup> Umtatakut idalli gapuh ni et-eteng ni kabaalam, APU DIOS, et humman hu umeneeng idalli e endi da pehding ni hi-gami ingganah ni melebbah kamin tuum ni libilih mud neihbutan mi.

<sup>17</sup> APU DIOS, illaw dakemilli etan di duntug et heni dakemi ittanem diman ni pinilim ni panha-adam e kad-an ni baley mun kinapyam. <sup>18</sup> Hi-gam e APU DIOS hu mannananeng ni man-ap-apun inggana.”

<sup>19</sup> Yan wadadda kakalesa niyadda kebakyuu et yadda sindalun iEgyt di gawwan baybay, ey impandammu mewan APU DIOS etan danum et malsing idan emin. Nem yadda helag Israel ey nema-ganan hu nandalnan da etan di baybay.

#### *Ya a-appéh Miriam*

<sup>20</sup> Entanni ey hi Miriam e agin Aaron e prophet ey illatu tambourine tu et ipappanggulu tudda dama edum tun bii et wada hakkeyey impatnul tu hu tambourine tu et menattayyaw ida. <sup>21</sup> Et man-a-appéh hi Miriam e kantuy “Ia-appéhi tayu hi APU DIOS tep inapput tu buhul tayu ma-lat kaideyyawan tu. Imbeng tudda kebakyuu et yadda nampantakkay etan di baybay et mangkalsing ida.”

#### *Ya etan mapeit ni danum di Marah*

<sup>22</sup> Entanni ey impanggulun Moses mewan ida helag Israel et hi-yanan da etan Madlang ni Baybay et mampalaw idad Sur e eleg mebebbley. Yan kaweda dadman ey tellun aggew ni endi da himmak ni danum ni innumen da. <sup>23</sup> Entanni ey dimmateng idad Marah ey wada danum diman, nem mapeit. Et humman hu neal-an ni nunman ni ngadan ni bebley ni Marah. Tep ya keibbellinan ni Marah di ehel dan Hebrew ey mapeit. <sup>24</sup> Ey ida kaumguguhu et kandan Moses ey “Mahapul ni wada danum ni innumen et eleg itsu matey ni ewew tayu.”

<sup>25</sup> Et mampehemmehemmek hi Moses nan APU DIOS. Intudun APU DIOS ni hi-gatu etan pangan keyew. Et alen tu et ibelangdu tu etan di danum ey na-kal pait tu et mabalin law ni meinum.

Ey yan nunman ni kaweda dad Marah ey impeamtan APU DIOS ni hi-gada etan ida tugun tun mahapul ni u-unnuden da, ma-lat ang-angen tu hedin u-unnuden da winu eleg. <sup>26</sup> Kantuy “Hedin paka-u-unnuden yuwak et ippahding yudda etan pinhed ku et ya kayyaggud pehding yu, eleg dakeyu kastigua, beken ni heniddan iEgyt e kinastiguk idan degeh. Hi-gak hu AP-APU yu et ya panyaggudan yu hu nakka nenemnema.”



<sup>27</sup> Entanni ey dimmateng idad Elim e wada hampulut dewwan hebwak diman niya nepitun palmah e heni neyug et mangkampuddadman.

## 16

### *Ya etan kennen ni impaelin Apu Dios*

<sup>1</sup> Emin ida helag Israel ey hini-yan da mewan hu Elim et lumaw idad Sin e hakey mewan ni eleg mebebleyi di nambattanan ni Elim niya Sinai et mangkampuddadman. Yan dintengan dadman ey hambulan et hampulut liman aggew hu nelabah neipalpun neni-yanan dan Egypt. <sup>2</sup> Yan wadaddadman ey kaigugguhu mewan idan tutu-u di Moses nan Aaron. <sup>3</sup> Kanday “Eyyakaw, kedukdul na-mu hedin pintey dakemin APU DIOS di Egypt. Kele dakemi ippangulun hi-gatu eyad eleg mebebleyi et kami mettey ni upa? Yad Egypt ey dakel kennen, hedin pinhed hu detag ey wada, heniddan edum ni klasih ni mekkan.”

<sup>4</sup> Et kan APU DIOS nan Moses ey “Peellik hu kennen ni melpud kabunyan. Nem mahapul ni kewa-wa-wa ey wada hakkeyey an mengemmung ni um-ustuh ni kennen tun nunman ni aggew. Et huuya pengamtaan ku hedin u-unnuden da e-helen ku. <sup>5</sup> Nem yan meikka-nem ni aggew ni kelinglinggu ey emmungen da hu mampidwa kadinakkel tun daka emmungan kewa-wa-wa ma-lat wada kennen dan meikkeppitun aggew.”

<sup>6</sup> Et amungen di Moses nan Aaron ida etan edum dan helag Israel et kandian hi-gaday “Yallin nunyan mahmahdem ey amtaen yu e hi APU DIOS hu nengipengulun hi-gatsu et hi-yanen tayu Egypt. <sup>7-8</sup> Ey yallin kakkabbuhhan ey ang-angen yulli hu et-eteng ni kabaelan tu. Dingngel tu hu lilih yun hi-gatu, tep ma-nut hi-gami yuka pengi-helin lilih yu, nem ya kakulugan tu ey hi-gatu hu nanlilihan yu, tep hi-gami ey bega-en dakemin ebuh ni hi-gatu. Hi-gatu hu mengidwat ni ihhideyun detag ni mahmahdem niya hi-gatu hu mengidwat ni mahapul yun sinapay ni kakkabbuhhan. Dingngel tu lilih yun hi-gatu, tep emin hu lilih yu ey hi-gatu nanlilihan yu.”

<sup>9</sup> Kan Moses nan Aaron ey “Ehel muddan emin ni edum tan helag Israel et maemung idad kad-an APU DIOS tep dingngel tu lilih da.” <sup>10</sup> Et kapan-e-helan Aaron humman ni hi-gada ey nampeang-ang hu kaumhilin dayaw APU DIOS etan di kulput.

<sup>11-12</sup> Immehel hi APU DIOS nan Moses e kantuy “Dingngel ku lilih ida eyan tuu. Ehel mun hi-gada e yan mahmahdem ey wada detag ni idawat kun ihhideda. Et yan kakkabbuhhan ey idawat ku emin hu sinapay ni mahapul da. Et humman pengamtaan da e hi-gak e Ap-APU hu Dios yu.”

<sup>13</sup> Yan nunman ni mahmahdem ey immali tu-wangu hu hantapug ni sisit ni quail etan di nangkampuan da. Ey yan kakkabbuhhan ey dimmelnu hu nanlinikweh di nangkampuan da. <sup>14</sup> Entannit endi law hu delnu ey nenapnapan etan puyek ni meingpih ni mangkablak e heni dallalu ang-ang tu. <sup>15</sup> Et yan nenang-angan idan tuu ey kanday “Hipa ngu huuya?” Kan Moses ni hi-gaday “Huuyadda indawat APU DIOS ni hi-gatsun kennen tayu. <sup>16</sup> Inhel tu e wada hakkeyey ya um-ustuh ni kennen tu hu emmungen yu e hantalub ni hanhakkey ni tuu.”

<sup>17</sup> Et wada hakey ey ida nengamung ni kennen da. Nem eleg man-iingnghe hu inemung da e wadadda daddakkel hu inemung tu nem yadda edum. <sup>18</sup> Nem yan nanlekudan dan inemung ni hanhakkey ni hi-gada ey endi nehawalan winu nekulangan. \* Wada hakkeyey immustuh hu inemung tun kennen tun han-aggew.

<sup>19</sup> Kan Moses ni hi-gaday “Mahapul ni kennen yun emin ni nunyan mahmahdem ma-lat endi tetdaan yun kennen yun kakkabbuhhan.”

<sup>20</sup> Nem wadadda eleg mengu-unnud ni nunman ni inhel nan Moses et tetdaan da edum etan ni kennen. Nem yan kakkabbuhhan ey nebangleh etan sindaan da e nebigihan ey kamampanhemmy. Neamtaan Moses humman ey nemahhig hu bunget tu.

<sup>21</sup> Et kekakkabbuhhan ey wada hakkeyey kaumlau ni an mengemmung ni um-ustuh ni kennen ni familiyah tu. Hedin na-let hu petang ey kameumah ida etan natdaan. <sup>22</sup> Hedin meikka-nem ni aggew, kamampidwa kadinakkel ni daka emmunga e handedwan talub ni hakey ni tuu. Entanniy limmaw ida etan nepilin kamengipappangngulu et da mahmahan nan Moses, kele hanniman. <sup>23</sup> Kan Moses ni hi-gaday “Ya gaputun mahapul ni mampidwa kadinakkel ni emmungen yun nunyan aggew ey tep intugun APU DIOS e yan kabbuhhan ey Sabadu e aggew ni nungew e endi manggunnu ma-lat mandayaw itsun hi-gatu. Mahapul ni ihhaeng yun nunya kennen yun kabbuhhan.”

<sup>24</sup> Inu-unnud da inhel nan Moses et mebiha-ad idan kennen dan kewa-waan tu. Ey man humman ni sindaan da tep eleg mebangleh niya eleg mabigihan. <sup>25</sup> Kan Moses ni hi-gaday “Huttan ni sindaan yu hu kennen yun nunyan Sabaduh, tep endi tayu hemmakan

\* 16:18 16:18 Ang-ang yu 2 Corinthians 8:15.

ni kennen. Yan nunyan aggew hu pandeeyawan tayun APU DIOS. <sup>26</sup> Et humman hu meippalpun nunya ey henin nunman hu pehding yu e kayu mengemung ni kennen yun enem ni aggew, nem yan kapitun aggew e Sabaduh ey endi hemmaken yun kennen.”

<sup>27</sup> Humman hu inhel nan Moses, nem yan nunman ni aggew ni Sabaduh ey wadadda metlaing etan limmaw ni an menemmak ni kennen, nem endi himmak da. <sup>28</sup> Kan APU DIOS nan Moses ey “Pigantu pengun-unnudan eyaddan tuun tugun ku? <sup>29</sup> Kaw eleg da nemnema e mampidwa kedakkel ni kennen ni nakka iddawat ni hi-gadan meika-nem ni aggew ma-lat um-ustuh ni kennen dan dewwan aggew? Tep hi-gak e AP-APU ey winedak hu meikkeppitun aggew ni pan-iyatuan yu e mannunggew kayu et eleg kayu umlaw ni an menemmak ni kennen yu.” <sup>30</sup> Et neipalpun nunman ey ida kaman-iyatun meikkeppitun aggew.

<sup>31</sup> Ya ngadan nunman ni kennen ey manna. † Ya ang-ang tu ey heni mablah ni bukel ni coriander et ya tamtam tu ey heni sinapay ni neha-adan ni danum ni putsukan. <sup>32</sup> Kan Moses idan edum tuy “Inhel APU DIOS e um-itlu itsu eyan manna ma-lat ang-angen idallin helag tayun edum ni aggew huuyan indawat tun hi-gatsu eyad eleg mebebleyin nengipa-kalan tun hi-gatsud Egypt.”

<sup>33</sup> Et ehlen Moses nan Aaron e um-alan pa-nay et taluan tun kagedwah ni talub ni manna et tu iha-ad etan di kapanha-adin APU DIOS ma-lat penguinemman idallin helag idan ing-ingganah.

<sup>34</sup> Inu-unnud Aaron humman ni inhel APU DIOS nan Moses, et tu iha-ad huuyan pa-nay di hinangngab ni Kaban di bawang etan ni Tabernacle. <sup>35</sup> Humman ni manna hu kikkinnan idan helag Israel ni na-pat ni toon etan di eleg mebebleyi ingganah ni dimmateng idad Kanaan. <sup>36</sup> (Ya inusal dan nunman ni nanlekud ni manna ey omer e hantalub tuka ella.)

## 17

### *Ya neukatan ni danum di batu*

<sup>1</sup> Hini-yan idan helag Israel hu Sin et tagan da elaw e daka u-unnuda kae-helan APU DIOS ni lawwan da. Entanni ey dimmateng idad Repidim et mangkampuddadman, nem endidman hu danum ni innumen da. <sup>2</sup> Et da mewan keigguguhu hi Moses ey ida kamangngungudu e kanday “Idwasi dakemin danum ni innumen mi.” Ey kan Moses ni hi-gaday “Entan tuwak igugguhu? Kele pinhed yun patnaan hu anus APU DIOS ni hi-gayu?”

<sup>3</sup> Nem naka-wew ida etan tuu et ida kamangngungudu e kanday “Kele dakemi impangulun meni-yan ni Egypt, et kami mettey ni inwew mi anin idan eyan u-ungnga mi niyadda animal mi?”

<sup>4</sup> Et mandasal hi Moses nan APU DIOS et kantuy “Apu, hipa pehding ku? Deh e ida kaumbunget eya tuun hi-gak e tengbaen da-ak.” <sup>5-6</sup> Et kan APU DIOS nan Moses ey “Pamengulu kayudda eyan nepilin mengipappangngulun helag Israel ni umlaw. Hehgeden dakeyulli etan di batud Duntug e Sinai. Itebin mu eya hulkud mun inheplat mu lad Wangwang e Nile, et iheplat mu etan di batu et maukat hu danum ni innumen yu.” Inu-unnud Moses huuyan inhel APU DIOS et iheplat tu hulkud tu etan di batu, ey neukat hu danum e kaang-ang-angaddan etan ni kamengipappangngulun helag Israel.

<sup>7</sup> Et ngadanan Moses humman ni bebley ni Massah, tep yadman hu nematnaan idan helag Israel ni anus APU DIOS ni hi-gada. Ey ingngadnan tun Meribah tep nanlilih ida etan tutu-un hi-gatu e kanday “Kaw makulug ni wada hi APU DIOS di deyan mengippaptek ni hi-gatsu winu endi?”

### *Ya nekigubatan idan helag Israel idan iAmalek*

<sup>8</sup> Yan wadadda helag Israel di Repidim ey limmaw ida iAmalek ni an mengubbat ni hi-gada. <sup>9</sup> Kan Moses nan Joshua ey “Pili kan lalakkin an menammuddan iAmalek ni iyyallin mengubbat ni hi-gatsu. Et yan kabubuhan ey nak um-ehnung etan di tuktuk ni duntug e tetgeden ku etan hulkud ni inhel Apu Dios ni ussalen ku.”

<sup>10</sup> Inu-unnud Joshua hu inhel Moses et ida makigubat idan iAmalek. Yan nunman ni daka panggugubasi ey limmaw hi Moses, hi Aaron niya hakey ni kadwa da e hi Hur etan di tuktuk ni duntug. <sup>11</sup> Hedin kaitta-ta-gey nan Moses etan hulkud, ida kamenga-apput hu helag Israel. Nem hedin nablay et imbah tu ngamay tu, ida kamenga-apput hu iAmalek. <sup>12</sup> Entanni ey nablay law hu ngamay Moses ni mengitta-ta-gey etan ni hulkud et pumulig di Aaron nan Hur ni batu et yudungan Moses. Nambina-hil idan hi-gatu

† 16:31 16:31 Ya keibbellinan ni manna ey “Hipa ngu humman?”

et ita-ta-gey da ngamay tu ingganah ni nelinug hu aggew. <sup>13</sup> Et apputen di Joshua ida iAmalek.

<sup>14</sup> Et kan APU DIOS nan Moses ey "Itudek yu eya meippanggep ni nengapputan yu, ma-lat eleg meliwwan ni ingganah. Ey ehel mun Joshua e petteyen kudda emin hu iAmalek."

<sup>15</sup> Et kumapyad Moses diman ni pan-appitan nan APU DIOS et ingadnan tun "Hi APU DIOS hu bandelah ku." <sup>16</sup> Kan tuddan edum tun helag Israel ey "Kayyaggud hedin hi APU DIOS hu nanengtun pengiddinnelan tayun mengittulluy ni mekiggubbat idan iAmalek ni ingganah."

## 18

### *Ya nambihitaan Jetro nan Moses*

<sup>1</sup> Entanni ey dingngel Jetro e padid Midian e aman ahwan Moses hu meippanggep idan kayyaggud ni impahding APU DIOS nan Moses niyadda edum tun helag Israel et ya ngempa-kalan tun hi-gadad Egypt. <sup>2-4</sup> Ninemnem tun ikkuyug etan u-ungnga tu e hi Sipporah e ahwan Moses et yadda u-ungnga da e di Gersom nan Elieser. Yan nunman la ey impaenamut nin Moses hi Sipporah et yadda u-ungnga da et ida makihad ad di kad-an Jetro. Yan neiungngaan idan nunman ni u-ungnga tu ey nginedanan tu etan pengulwan ni Gersom tep kantuy "Hi-gak ey immali-ak ni ebuh ni nekibebley di deya." Ey ya etan meikkadwa ey nginadnan tun Elieser tep binaddangan APU DIOS hi-gatu. Et kantuy "Hi APU DIOS e kadaydayawaddan ammed ku ey binaddangan tuwak et eleg tuwak pateyen etan ni patul di Egypt."

<sup>5</sup> Ingkuyug idan Jetro et lumaw idad nangkampuan di Moses etan di duntug ni eleg mebebley e yadman nampeang-angan APU DIOS lan nunman. <sup>6</sup> Hi Moses ey amta tu e um-alidda tep impamengulu lan Jetro e aman ahwatun impeamtan hi-gatu hu lawwan dadman.

<sup>7</sup> Ida kamenetteng ey an dinammun Moses et manyuung et akwalen tu. Et ikuyug Moses idad kampu tu. <sup>8</sup> Ine-ehhel nan Moses nan hi Jetro emin hu impahpahding APU DIOS etan ni patul di Egypt et yadda tuu tu niya impahding tun nemappeg ni daka pengippeligigasiddan edum tun helag Israel. Ine-ehhel tu pay hu nanhelheltapan da neipalpun neni-yanan dan Egypt ingganah ni dintengan da etan di nangkampuan da, et ya nemaddangan APU DIOS ni hi-gadan nunman ni nanligligatan da.

<sup>9</sup> Imamleng hi Jetro ni nangngelan tun nunman <sup>10</sup> et kantuy "Dayaw tayu hi APU DIOS tep inhewang dakeyud lawah ni impahpahding idan iEgypt et ya etan patul da. <sup>11</sup> Yan nunya ey inamtak law e hi APU DIOS hu keta-ta-geyyan nem yadda dios ni kadeyyawaddan edum ni tuu tep impaptek dakeyun tuu tu. Et ihwang dakeyud pehding idan iEgypt ni nekababbah hu daka penang-ang ni hi-gayun helag Israel e tuu tu."

<sup>12</sup> Entanni ey in-appit Jetro hu kagihheba et yadda edum ni iappit tun APU DIOS. Immalid Aaron et yadda etan aap-apun helag Israel ni menammun hi-gatu et manhamul idan emin ni pengidaydayaw dan APU DIOS.

### *Ya tugun Jetro*

<sup>13</sup> Nawa-wa et ituluy Moses hu ngunu tun mengipennuh ni kapandidiklamuhiddan tuu. Tep meippalpun kakkabbuhhan ingganah ni mahmahdem, ey kamanhulluhullul ida tuun kaum-alin mandiklamuh. <sup>14</sup> Inang-ang Jetro huayan neligat ni peteg ni ngunun Moses ey kantuy "Kele muka hahhakkeyi huttan ni ngunu e endi hu kaumbaddang ni hi-gam? Nakka ang-ang-anga ey neligat ni peteg hu ngunun, tep dakel ni neyun hu kaum-alin tuun kamapbeaddang ni hi-gam."

<sup>15-16</sup> Hinumang nan Moses et kantuy "Mahapul ni ippahding ku huayan ngunuk tep yan nakka pengippennuhin diklamuh idan tuu ey nak keituttuddun hi-gada tugun APU DIOS niyadda etan pinhed tun meunnud." <sup>17</sup> Kan Jetro ni hi-gatuy "Beken ni kayyaggud hu henin nuntan! <sup>18</sup> Tep neligat ni peteg huttan ni ngunun ey muka hahhakkeyi! Lektattulliy peinglay mu et anin idalli eyan tuum. <sup>19</sup> Et humman hu, kayyaggud hedin iddedngel mu eya tugun ku, yaggud daka kabaddangin APU DIOS. Ma-nu tep lebbeng tun i-ehneng mudda tuud hinangan APU DIOS. Ey mampebaddang kan hi-gatu meippanggep di daka panhahallai, <sup>20</sup> niya ittuttuddun ni hi-gada hu tugun tu, ya kayyaggud ni elaw et yadda etan lebbeng tun pehding da, <sup>21</sup> nem mahapul mu umbaddang ni hi-gam. Et humman hu pili kaddan kayyaggud elaw tu et hi-gada putuken mun mengi-ehneng idan tuu. Wadadda man-ap-apun hanlibu, hanggatut, nelima niya hampulu. Et humman idan man-ap-apu ey mahapul ni peka-u-unnuden da hi APU DIOS, ey ida kameiddinnel e eleg da ebbulutan metangdan ni pengippahdingan dan lawah. <sup>22</sup> Ey hi-gada ngenamung ni mengipennuh ni diklamuh idan tuun inehnengan da. Nem yadda etan neligat

ey humman i-ali dan hi-gam ni ippanuh mu. Nem yadda etan nelakah ni diklamuh ey ngenamung ida, ma-lat mee-ekalan hu ngunum. <sup>23</sup> Hedin u-unnuden mu huyya ey hedin kamei-unnud di pinhed Apu Dios ey eleg ka mekalliggatan di ngunum ey melinggep ida tuun um-anemut e neipenuh hu daka panhahallai.”

<sup>24</sup> Inu-unnud Moses humman ni tugun Jetro. <sup>25</sup> Et pilien tudda etan kabaelan dan man-ap-apu. Impan-ap-apu tuddan hanlibu, hanggat, nelima niya hampulu. <sup>26</sup> Et humman idan nepili hu ngenamung ni mengippennuh ni diklamuh idan tuu. Et yadda etan neligat ni meippennuh ey humman illaw dan Moses.

<sup>27</sup> Negibbuh ni nanhumangan idan Moses et han umenamut hi Jetro di bebley tu.

## 19

*Ya nangkampuan idan helag Israel di hengeg ni Duntug e Sinai*

<sup>1-2</sup> Hini-yan idan helag Israel hu Repidim et lumaw idad Sinai e eleg mebebleyi et mangkampu ida etan di hengeg nunman ni duntug. Ey yan nunman ni dintengan dadman ey dewwan bulan hu nelabah neipalpun neni-yanan dan Egypt.

<sup>3</sup> Entanni ey nanteyed hi Moses etan di duntug et an makihummangan nan Apu Dios. Ey kan APU DIOS ni hi-gatuy “Ehel muddan edum mun helag Israel e kammuy ‘Huyya hu kan APU DIOS: <sup>4</sup> Inang-ang yu impahding kuddan iEgypt et ya impahding kun nengilin hi-gayudya e heni dakeyu intayab ni tuldu. <sup>5-6</sup> Anin bagik emin eya wadad puyek ey hi-gayun ebuh ni helag Israel hu pillien kun pantu-uk \* hedin u-unnuden yuwak et ippahding yu hu e-helen kun pehding yu. Ey mambalin kayun padik ni mengippahding ni pinhed ku.” †

<sup>7</sup> Nandayyu hi Moses et amungen tudda etan kamengippangngulu et ehlen tun hi-gada hu inhel APU DIOS. <sup>8</sup> Ey kan idan emin ni tuuy “Ippahding min emin hu e-helen APU DIOS.”

Et manteyed mewan hi Moses et tu ehlen nan APU DIOS humman ni inhumang da. <sup>9</sup> Ey kan APU DIOS ni hi-gatuy “Um-ali-ak ni an menang-ang ni hi-gayu e ya ang-ang ku ey mahdel ni kulput et makihummangan nak ni hi-gam ma-lat meipalpun nunya ey kullugen dakaddan tuu. <sup>10</sup> Lakkay et mu ehlen ni hi-gada et mandaddan idan nunya et yan kabbuhhan ey mandeyyaw idan hi-gak. Ey ehel mun hi-gada e balbalan da balwasi da <sup>11</sup> ma-lat maidaddan idan bewahtun mandeyyaw ni hi-gak, tep um-ali-ak eyad tuktuk ni Duntug e Sinai et ang-angen da-ak ni hi-gadan emin. <sup>12</sup> Nem ha-adim ni kelteg hu nanlinikweh eyan duntug et ehlen mu e eleg ida meba-hil winu an umteyed tep hedin wada eleg mengu-unnud ey mettey. ‡ <sup>13</sup> Hedin wada mengippahding ni nunman, entan tu kaway nem pana yu winu tengba yun batu, et matey anin hedin tuu winu animal. Ey ehel mun hi-gada e hedin wada umtenul ni tangguyup ey umlaw idan emin etan di hengeg ni duntug.”

<sup>14-15</sup> Et mandayyu mewan hi Moses et ehelen tudda etan ni tuu e kantuy “Pandaddan kayun menaydayaw nan APU DIOS ni bewahtu. Hedin hi-gayuddan nampengahwa, entan tu ni julig hu ahwa yu.” Et ipahding idan tuu hu elaw ni panlinnih ni annel da ey imbalbal da babalwasi da.

<sup>16</sup> Yan nunman ni kakkabbuhhan ni meikkatlun aggew ey kamangkikidul ey kamangkekyam niya wada mahdel ni kulput etan di ta-pew ni duntug. Wada pay hu na-let ni tenul ni tangguyup. Ey emin ida helag Israel ey ida kamangegeygey ni takut da. <sup>17</sup> Impangulun Moses idan an menammun Apu Dios, et lumaw idad hengeg etan ni duntug et umehneng idadman. <sup>18</sup> Hi APU DIOS ey apuy hu nampeang-angan tu, et mukun nehhepahan etan duntug ni mahdel ni ahuk ni kamampellaw di ahat e heni kamelpud et-eteng ni apuy. Ey nakkayyang e kamanyeghy etan di duntug. <sup>19</sup> Entanni ey kamangke-let hu tenul ni tangguyup. Ey kamanhuhummangan di Moses nan Apu Dios e hedin immehel hi Moses, hinumang nan Apu Dios ni kidul.

<sup>20</sup> Entanni ey nelehbeng hi APU DIOS etan di tuktuk ni duntug et ayan tu Moses. <sup>21</sup> Kan APU DIOS nan Moses ey “Ehel muddan tuu e eleg ida meba-hil etan di kelteg ni um-alidyan menang-ang ni hi-gak tep hedin ippilit dan um-alidya, mettey ida. <sup>22</sup> Ey anin idan padin mei-ebbulut ni meihnu di kad-an ku ey mahapul ni ippahding da elaw ni panlinnih ni annel da. Tep hedin eleg da ipahding ey um-aliddadya, kastiguen kudda.”

<sup>23</sup> Kan Moses nan APU DIOS ey “Eleg ida mantetyed hu tuu eyad duntug tep kammuy ha-adak ni kelteg eya nanlinikweh et endi an meba-hil di deya tep wada kadya.” <sup>24</sup> Ey kan APU DIOS ey “Lakkay et mulli ikuyug hi Aaron et umli kayun dewwadya. Nem yadda

\* 19:5-6 19:5 Ang-ang yu Titus 2:14. † 19:5-6 19:5-6 Ang-ang yu 1 Peter 2:9 niya Revelation 1:6 et ya 5:10. ‡ 19:12 19:12-19 Hebrews 12:18-20

etan tuu niyadda padi ey eleg ida mabalin ni meba-hil di kelteg ni um-alidya tep hedin um-alidda, kastiguen kudda.”

<sup>25</sup> Et mandayyu mewan hi Moses et tu ehelen humman ni inhel APU DIOS.

## 20

*Yadda etan hampulun Tugun Apu Dios*

*(Exodus 20:12-16; Matthew 19:18-19; Mark 10:19; Luke 18:20; Romans 13:9)*

<sup>1</sup> Hi Apu Dios ey intugun tudda huyya e kantuy <sup>2</sup> “Hi-gak hi AP-APU e Dios yun nengihwang ni hi-gayun neihtutan yud Egypt.

<sup>3</sup> Hi-gak ni ebuh hu Dios ni deyyawen yu, endi edum.

<sup>4</sup> Entan pengapya yun heniddan wadad kabunyan, ya wadad puyek niya wadad danum ni deyyawen yun dios yu. <sup>5</sup> Eleg mabalin ni kayu manyu-ung ni hi-gada ey yudda deyyawen ni dios yu. Tep hi-gak e AP-APU e Dios yu ey nemahhig bunget ku hedin wada edum ni ibbilang yun dios yu e beken ni hi-gak ni ebuh. Kastiguen kudda etan eleg mengibbilang ni hi-gak anin idallin u-ungnga da, yadda inap-apu da niyadda pidwan inap-apu da <sup>6</sup> Nem eleg mepappeg hu impeminah kuddan etan ni tuun neminshed ni hi-gak niya kamengu-unnud ni tugun ku ingganah di meikkahanlibun helag da.

<sup>7</sup> Entan tu usal di legelegem hu ngadan ku e AP-APU e Dios yu, tep eggak hehmeka hu tuun mengippahding nunman et humman hu kastiguen ku.

<sup>8</sup> U-unnud yu elaw ni Sabaduh ni kamengillin ni aggew ma-lat ipahding yudda lebbeng tun meipahding. <sup>9</sup> Yan enem ni aggew di hanlingguan hu penguunnuan yuddan ingngunu yu. <sup>10</sup> Nem yan meikkeppitun aggew e Sabaduh ey endi an manggunnun hi-gayu, yadda u-ungnga yun lalakki niya bibi-i, yadda bega-en yun lalakki niya bibi-i, anin idan animal yun baka niya kebayyu, yadda edum ni animal yu, et yadda nekibebley ni hi-gayu. Mahapul ni man-iyatu kayun emin ni nunman ni aggew tep humman ni aggew ey neieng-eng ni hi-gak e AP-APU e Dios yu. <sup>11</sup> Tep enem ni aggew hu nanletuan kun kabunyan, ya puyek niya baybay, niya emin hu wadadman et man-iyatu-ak ni kapitun aggew. Et humman hu hi-gak e AP-APU yu ey nakka ngillina humman ni aggew.

<sup>12</sup> U-unnud yud ameyun ineyu ma-lat mebeyyag hu panha-adan yudman ni bebley ni iddawat kun hi-gayu. \*

<sup>13</sup> Entan tu patey hu edum yun tuu. †

<sup>14</sup> Entan tu iulig hu beken yu ahwa. ‡

<sup>15</sup> Entan panekew yu. §

<sup>16</sup> Entan tu ehel hu itek meippanggep ni edum yun tuu. \*

<sup>17</sup> Entan tu gamgami hu baley ni edum yu, ya ahwa da, ya bega-en da, ya bakeda, ya kebayyu da winu hipan wadan hi-gada.” †

<sup>18</sup> Yan nangngelan idan tuu etan ni kidul et ya etan na-let ni tenul ni tangguyup, niya nenang-angan dan nemahhig ni kedyam niya etan kaman-aahuk ni duntug ey ida kamangegegyey ni takut da et uma-allaw ida.

<sup>19</sup> Kandan Moses ey “Hi-gam ew hu pengi-hel ni hi-gamin pinhed Apu Dios ni e-helen et u-unnuden mi ma-lat beken tun mengi-hel ni hi-gami tep mettey kami.”

<sup>20</sup> Ey kan Moses ni hi-gaday “Entan takut yu. Henin nunya hu pematnan Apu Dios ni hi-gayu ma-lat mengu-unnud kayun hi-gatu et eleg kayu manliwat.”

<sup>21</sup> Nem yadda etan tuu ey nanengtun immen idad a-allaw tu, nem hi Moses ey an neihnup etan di andeket ni kulput di duntug ni kad-an Apu Dios.

*Inhel Apu Dios e mengapyadda helag Israel ni pan-appitan dan hi-gatu*

<sup>22</sup> Kan APU DIOS ni hi-gatuy “Ehel muddan edum mun helag Israel e kammuy ‘Huyya hu kan APU DIOS: Inang-ang yu hu impahding ku e Dios di kabunyan ni nekihummangan ni hi-gayu. <sup>23</sup> Et humman hu hi-gak ni ebuh hu deyyawen yu. Entan pengapyan kumpulmih ni deyyawen yun dios yu heniddan nekapyan gumek niya balitik.

<sup>24</sup> Ala kayun puyek et mengapya kayun pan-appitan yun hi-gak, et yadman pan-appitan yun baka niya kalneroh ni gihheben yun i-appit yun hi-gak et yadda edum ni i-appit yu. Emin hu ituduk ni pandeyyawan yun hi-gak ey wada-ak diman ni memendisyon ni hi-gayu. <sup>25</sup> Entan tu usal hu nepahek ni batu hedin batu hu kapyaeen yun pan-appitan yun hi-gak, tep eggak ebbuluta i-appit yu hedin humman ikkapyaya yu.

\* **20:12** 20:12 Ang-ang yu Matthew 15:4 et ya Mark 7:10 et ya 10:19 et ya Ephesians 6:2-3. † **20:13** 20:13 Matthew 5:21 et ya James 2:11. ‡ **20:14** 20:14 Matthew 5:27, James 2:11 § **20:15** 20:15 [13-15] Romans 13:9 \* **20:16** 20:16 [12-16] Matthew 19:18-19 † **20:17** 20:17 Romans 7:7

<sup>26</sup> Ey entan tu ikapya hu pan-appitan yud kametyed tep hedini umteyed etan tuun man-appit ey hedini wada tuud ehpen ey tengngawen tu sipa winu hipan parteh ni annel yun nunman ni man-appit.' "

## 21

### *Ya inhel Apu Dios meippanggep ni himbut*

<sup>1</sup> Kan Apu Dios nan Moses ey "Ehel muddan edum mun helag Israel <sup>2</sup> e kanmuy 'Huyya inhel Apu Dios: Hedini wada gintang yun himbut ni edum yun helag Israel, et ingunuwan dakeyun enem ni toon man ibukyat yun meikkepitun toon ey endi tu beyyadan ni hi-gayu. <sup>3</sup> Hedini eleg mengahwa eman ni neihbutan tu nem entanni ey nengahwa, melibilih hedini negibbuh humman ni enem ni toon, nem eleg melibilih etan bii. Nem hedini nengahwa ngu dedan eman ni neihbutan tun hi-gayu, melibilih idan dewwan kegibbuan ni enem ni toon. <sup>4</sup> Nem hedini hi-gayun kan himbut nengipeahwan hi-gatu, et wada u-ungnga tu, ebuh etan himbut yun melibilih ni kegibbuan ni pangngunuan tun hi-gayu. Eleg melibilih etan ahwa tu niyadda u-ungnga da tep nanengtun hi-gayu hu kanhambut ni hi-gada.

<sup>5</sup> Nem hedini eleg pinhed etan ni laki himbut yun melibilih tep nanengtun pinhed dakeyu ey eleg tu pinhed ni hi-yanen hu ahwa tu niya u-ungnga tu, <sup>6</sup> mahapul ni illaw yu humman ni himbut yud yuka pandeyyawin Apu Dios et pehneng yud habyen et teleken yu tangiletud dakel ni tuu, et keang-angan tu e mannengni ni himbut yu ingganah ni mettey.

<sup>7</sup> Nem hedini bii etan himbut yun inggang ametu, eleg melibilih. Beken ni henin laki himbut e melibilih ni kegibbuan ni enem ni toon. <sup>8</sup> Hedini wada gimmatang ni biin himbut et iahwatu nem entanniy eleg tu pinhed, dammutun iggang tu mewan etan di pamilyah ni nengatngan tu. Eleg mabalini tu iggang di edum ni tuun nalpud edum ni bebley, tep lawah humman ni pehding tun nunman ni bii. <sup>9</sup> Winu hedini wadan hi-gayu hu gimmatang ni bii et peahwa tu etan ni u-ungnga tu, ey mahapul ni ibbilang yu humman ni biin u-ungnga yu dama. <sup>10</sup> Winu hedini wadan hi-gayu gimmatang ni i-ahwa tu, nem entanni ey nengahwa mewan ni hakey ni bii et dewwa law ahwa tu, ey mahapul ni eleg tu iwalleng etan nemangulu, ey eleg tu kullangi etan sigud ni tuka idawat ni kenen tu, anin ya balwasi tu, ey eleg melumman hu pengibbilang tun hi-gatu. <sup>11</sup> Tep hedini eleg tu ipahding humman idan lebbeng tun pehding tu ey mahapul ni ibbukyat tun libilih humman ni bii ma-lat endi law utang tun hi-gatu.' "

### *Ya kastigun tuun liniputan tu edum tu*

<sup>12</sup> Kan Apu Dios nan Moses ey "Ehel muddan tuu e kanmuy 'Huyya inhel Apu Dios: Hedini wadan hi-gayu hu pina-tu tu edum tu et matey, mahapul ni mettey humman ni pimma-tu. <sup>13</sup> Nem hedini eleg tu igeb-at ey heballi umbesik etan di puttukan tun bebsikan tu, ma-lat endi lawah ni mekapyan hi-gatu. <sup>14</sup> Nem hedini pimmatey hu hakey ni tuu ey inggeb-at tu tep ya bunget tu, mahapul ni mettey humman ni tuu.

<sup>15</sup> Ya etan tuun kewwayen tu ammed tu ey mahapul ni mettey humman ni tuu.

<sup>16</sup> Ya etan tuun um-ibsik ni edum tun tuu et tu igtang winu pambega-en tu ey mahapul ni mettey.

<sup>17</sup> Ya etan tuun iddutan tu ammed tu ey mahapul ni mettey. \*

<sup>18</sup> Hedini nandepap hu dewwan tuu et duntuken etan ni hakey hu nekidpap tu winu sinuktukan tun batu et maliputan, nem eleg matey, eleg mekastigu humman ni kimmaway nem mahapul ni <sup>19</sup> baddangan tu humman ni kinway tu ingganah ni umyaggud. Ey beyyadan tu netaktakan tud ngunu tu.

<sup>20</sup> Ya etan tuun nambakdungan tu himbut tu, laki winu bii gapuh ni bunget tu et matey ey mahapul ni mekastigu. <sup>21</sup> Nem hedini melabbah hu dewwan aggew ey eleg matey etan himbut, eleg mekastigu etan kan himbut tep himbut tu etan tuu.

<sup>22</sup> Hedini wada dewwan tuun nandepap, ey inlagat da hu biin nambutsug et humman himmulun ni nengunahan tu, mahapul ni memulta etan nengilegat ni hi-gatu. Ya multa tu ey ngenamung hu ibbaga etan ni ahwan etan ni bii ey kaebbulutadda etan ni kamengippenuh nunman ni diklamuh <sup>23</sup> Nem hedini neliputan etan bii, mahapul ni mekastigu etan nengilegat ni hi-gatu. Ey hedini netey etan bii, mahapul ni mettey dama etan nengilegat ni hi-gatu.

<sup>24</sup> Hedini kinulap ni hakey ni tuu hu matan edum tu, mahapul daman kullapen yu mata etan ni nambahul. Hedini pinlag ni hakey ni tuu ngipen ni edum tu, mahapul ni peplagen yu dama ngipen etan ni nambahul. Hedini giniplung ni hakey ni tuu ngamay ni edum

\* 21:17 21:17 Matthew 15:4, Mark 7:10

tu, mahapul ni giplungen yu dama ngamay etan ni nambahul. Hedin heli negiplung, mahapul ni giplungen yu dama helin etan ni nambahul. † <sup>25</sup> Hedin inetungan ni hakey ni tuu edum tu, winu liniputan tu edum tu, mahapul ni ettungan yu winu lipputan yu dama etan nambahul.

<sup>26</sup> Ya etan tuun kinway tu bega-en tun bii winu laki et gapun nunman ey nekulap etan bega-en tu, mahapul ni ibbukyat tun liblih humman ni bega-en tu et humman bayad ni nekulapan tu. <sup>27</sup> Hedin naplag hu ngipen etan ni bega-en ey mahapul ni ibbukyat tun liblih humman ni bega-en et humman bayad ni naplagan ni ngipen tu. "

*Ya kastiguh etan ni tuun wada liniputan winu pintey ni animal tu*

<sup>28</sup> Kan Apu Dios nan Moses ey "Ehel muddan tuu huyya: 'Hedin wada neibukyat ni animal ey himma-duk ni tuu et matey, mahapul ni tegmilen humman ni animal et matey. Eleg mekastigu etan kan animal ni nunman niya entan tu ihida humman ni netegmilen ni animal. <sup>29</sup> Nem hedin inamtan etan ni kan animal e wada hina-duk tu lan nunman nem binay-an tu, ey hedin wada petteyen nunman ni animal ni tuu, mahapul ni tegmilen yu humman ni animal et matey niya mahapul ni mettey dama etan kan animal. <sup>30</sup> Nem mabalin ni eleg yu pepettey etan tuu hedin beyyadan tu ibbagaddan agin nunman ni netey ey kaebbulutaddan kamengippenuh nunman ni diklamuh.

<sup>31</sup> Anin ni laki winu bii pintey etan ni animal ey man-inggeh hu kastiguh etan ni kan animal. <sup>32</sup> Nem hedin himbut ni laki winu bii pintey ni animal, mahapul ni beyyadan etan ni kan animal ni telumpulun silber etan di kan himbut niya mahapul ni tegmilen etan animal et matey.

<sup>33</sup> Hedin wada nangku-kun bitu ey eleg tu hababen et wada na-gah diman ni animal ni edum ni tuu, <sup>34</sup> mahapul ni beyyadan etan ni nangku-ku etan animal. Hedin binaydan tu etan kan animal, mabalin ni i-anemut tu etan netey ni animal e heni tu gintang.

<sup>35</sup> Hedin wada nanlaban ni dewwan bulug ni baka ey netey hu hakey, mabalin ni manhumngangan ida etan kan animal et igtang da etan pimmatey ma-lat panggedwada bayad tu. Ey panggedwada detag etan ni netey. <sup>36</sup> Nem hedin neamta e mabunget etan bulug ni pimmatey ey eleg ippaptek etan ni kan bagi anin ni inhel dan hi-gatu nem kahing et deh e pimmatey ni edum ni animal, mahapul ni hullulan tu etan netey ni animal. Ey hedin i-abulut ni kan bagi etan netey ni animal, mabalin ni i-anemut tu humman ni netey ni animal. "

## 22

*Ya ibbayad idan helag Israel ni multa*

<sup>1</sup> Kan Apu Dios nan Moses ey "Ehel muddan edum mun helag Israel e kammuy 'Huyya hu inhel Apu Dios: Hedin wada nenakew ni animal et kelngen tu winu inggatang tu ey neha-kupan, mahapul ni hullulan tu humman ni sinekew tu. Hedin baka sinekew tu, hullulan tun liman baka. Hedin kalneroh sinekew tu, hullulan tun epat ni kalnero. <sup>2-4</sup> Hedin neha-kupan nem eleg tu kelngen winu eleg tu igtang etan sinekew tun animal, mahapul ni hullulan tun dewwa anin hipa humman ni animal. Nem hedin eleg kabaelan etan ni nenakew ni hullulan etan sinekew tu mahapul ni mabalin ni bega-en etan ni kan animal ni sinekew tu.

Hedin wada nenakew ni hileng ey pintey etan ni kan baley ni nenakewan tu, eleg mekastigu etan pimmatey tep beken tu bahul. Nem hedin kawwalwal hu nemateyan tu ey kantuy nenakew humman ni tuu ey nambahul et mahapul ni mekastigu.

<sup>5</sup> Hedin wada nengigeb-at ni nengibukyat ni animal tu et kanen tu intanem ni edum tu, mahapul ni hullulan etan ni kan animal. Ey ya ihullul tu ey mahapul ni kakkayyaggud ey nalpud intanem tu.

<sup>6</sup> Hedin nan-apuy hu hakey ni tuud puyek tu ey entanni ey immetteng etan apuy et mailegat ni nalgab hu intanem ni edum ni tuu, mahapul ni pekabbeyyadan tu etan ida nebahbah ni neitnem.

<sup>7</sup> Hedin wada dewwan tuun nanhumngangan et patelun etan ni hakey hu pihuh tu winu hipa humman ey sinekew da nem nehamak etan nenakew, mahapul ni mandubli hu ihullul etan ni nenakew etan ni sinekew tu. <sup>8</sup> Nem hedin neendi etan impatelun etan ni hakey ey kan etan ni nengitu ey netakew, nem eleg mahamak etan nenakew, mahapul ni mebigatal etan nengitu etan di daka pandeyyawwin Apu Dios ma-lat meamta hedin makulug naman hu inhel tu.

<sup>9</sup> Hedin wada diklamuh yu meippanggep ni animal yu, henin baka, kebayyu, kalneroh winu balwasi winu wada netalak ni ngunut yun mahapul ni illaw yud yuka pandeyyawwi.

† **21:24** 21:24 Ang-ang yu hu Leviticus 24:20 et ya Deut. 19:21 et ya Matthew 5:38.

Ey hedin wada netalakan ni kumpulmi, nem entanni ey himmak yud baley ni edum ni tuu, nem kaippilit etan ni kan baley e bagi tu humman, mahapul ni yu ippanuh etan di yuka pandeyyawin Apu Dios et ya etan e-helen tun nambahul ey mandubli hu ibbayad tu. <sup>10-11</sup> Hedin impapekan ni hakey ni tuu hu animal tud sinakdul tu nem entanni ey netey, winu neliputan winu netakew nem endi nenang-ang ni mengi-hel ni makulug ni neipahding, mahapul ni umlaw etan nengipaptek et an mansapatah nan Apu Dios e endi lawah ni impahding tu etan ni animal. <sup>12</sup> Hedin beken ni netakew etan animal, eleg beyyadi etan ni nengipaptek. Nem hedin wada nenakew etan ni animal, mahapul ni beyyadan etan ni nengipaptek. <sup>13</sup> Hedin pintey ni animal di muyung, eleg memulta etan nengipaptek nem mahapul ni peang-ang tu annel etan ni netey ni animal etan ni kan bagi, ma-lat pengamtaan tun neipahding, ey eleg mahapul ni mebeyyadan etan animal.

<sup>14</sup> Hedin wada bimmaneh ni animal, nem entanni ey wada lawah ni nekapy a etan ni animal ey eleg ang-ang-angen etan ni kan animal hedin hipa ustuh ni neipahding, mahapul ni hullulan etan ni bimmaneh winu beyyadan tu humman ni animal. <sup>15</sup> Nem hedin inang-ang etan ni kan animal ustuh ni neipahding, eleg tu beyyadi etan ni nemaneh. Hedin neabangan, eleg mahapul ni mebeyyadan tep ya etan abang hu heni neibeyad.' "

*Ya limpiyuh ni pehding*

<sup>16</sup> Kan Apu Dios nan Moses "Ehel muddan edum mun helag Israel e kammuy: 'Huyya inhel Apu Dios: Hedin in-ulig ni laki hu biin eleg meitgan hi-gatu mahapul ni i-ahwa tu ey beyyadan tu meippuun di kameu-unnud ni elaw da. <sup>17</sup> Nem hedin eleg pinhed etan ni aman etan ni biin mantulluy ida, eleg ida man-ahwa nem mahapul ni itetbalan tu humman ni bii.

<sup>18</sup> Mahapul ni pepettey ida maeyak.

<sup>19</sup> Ya tuun mengi-ullig ni animal et mekipeplet ni animal ey mahapul ni pepettey yu.

<sup>20</sup> Ya tuun tuka deyyawa ey tuka i-apisi edum ni dios e beken ni hi-gak ni ebuh ey mahapul pepettey yu.

<sup>21</sup> Entan tu ipahding lawah idan tuun nalpud edum ni bebley ni immalin nekibebley ni hi-gayu tep nemnem yu e limmaw kayu daman nekibebley di Egypt.

<sup>22</sup> Entan tu ipahding hu lawah idan nebalun bii niyadda nepu-hig. <sup>23</sup> Tep hedin humman pehding yun hi-gada et mambeggaddan baddang ku, makulug ni baddangan kudda. <sup>24</sup> Et gapuh ni nemahhig ni bunget ku ey peellik ida mengubbat ni hi-gayu et pateyen dakeyu et mabelludda ahwa yu ey mepu-hig ida u-ungnga yu.

<sup>25</sup> Hedin mampeuttang kayun pihhuh yuddan edum yun helag Israel ni mahapul tu baddang, entan iu-unnud idan edum ni kamampeuttang ni pihhu. Entan peporsentoh hu pihhuh yun peuttang yu. <sup>26</sup> Hedin balwasi hu inla yun pengitngedan yun inutang etan ni tuu, mahapul ni kahilehileng ey pebangngad yu etan balwasi tu. <sup>27</sup> Tep innanu hedin humman ni ebuh hu balwasi tu. Tep hedin eleg yu pebangngad ey mektel et eleg pakeugip ni kintel tu. Ey hedin mampehemhemmek ni hi-gak man makulug ni idawat ku ibbagey, tep hedin hi-gak man nakka pekahmekadda anggehmemek ni tuu.

<sup>28</sup> Entan tu pihul ey beken ni lawah hu yu e-helen idan neputuk ni mengipappangngulun hi-gayu. \*

<sup>29</sup> Hedin na-teng pagey yu, napget hu ingkail yu ey neluum ida lameh ni intanem yu, entan liwwan tun um-iappit nunman ni lebbeng tun kamei-appit ni hi-gak. Ey mahapul ni idawat yun hi-gak hu pengulwan ni u-ungnga yu, nem ya animal hu ihhullul yun i-appit.

<sup>30</sup> Anin idan nemangulun impah ni baka niya kalneroh ey pakiha-ad yun inetun pitun aggew et i-appit yun hi-gak ni kawelun aggew ni nengappilan yud inetu. <sup>31</sup> Hedin wada animal yun pintey ni animal di muyung, entan tu ihida. Diman et kanen ni ahhu tep tuu dakeyun hi-gak.' "

*Ya limpiyuh ni pehding di edum tayun tuu*

## 23

<sup>1</sup> Kan Apu Dios nan Moses ey "Ehel muddan edum mun helag Israel e kammuy 'Huyya inhel Apu Dios: Entan ihinap hu linggeman ni beken ni makulug. Ey hedin mantistigu kayu, entan tu ehel hu itek ma-lat baddangan yu etan nambahul. <sup>2</sup> Anin hedin kantu et dakel ida kamengippahding ni lawah e ida kamantistigun itek ma-lat eleg meipahding hu limpiyuh, entan tu iehneng ida humman ey entan tu u-unnud humman ni daka pehding. <sup>3</sup> Ey beken ni gapu tep newetwet etan nandiklamuh ey hi-gatu baddangan yu.

\* 22:28 22:28 Acts 23:5



<sup>4</sup> Hedin wada inang-ang yun animal ni bimmukyay, guyud yu et ilaw yu etan ni kan animal anin hedin kantu et buhul yu humman ni tuu. <sup>5</sup> Hedin kamampaligat hu kebayyun buhul mu e eleg pakeehneng tep mebel-at hu karga tu, baddangim etan tuu et peehneng mu etan kebayyu tu, beken nealay mu lebbahan.

<sup>6</sup> Entan tu kastigu hu hakey ni tuu gapu tep newetwet. <sup>7</sup> Ey entan tu legelegem deek ni edum yun tuu et kanyuy nambahul anin amta yun endi buhul tu et papetey yu, tep kastiguen ku mengippahding nunman ni lawah.

<sup>8</sup> Hedin kan ni hakey ni tuuy beyyadan dakeyu et iehnung yu etan di lawah ni tuka pehding, man entan tu abulut. Ya henin nunman ni bayad ey heni tu kullapen hu tuu et eleg meippahding hu limpiyuh etan idad endi hu bahul tu.

<sup>9</sup> Entan tu ipahding hu lawah etan idad edum ni tuun immalin nekibebley ni hi-gayu tep amta yu gibek tu tep anin ni hi-gayu et hiniktaman yu hanniman ni nekibebleyan yu lad Egypt."

*Ya inhel APU DIOS ni aggew niya toon ni pan-iyatuan idan helag Israel*

<sup>10-11</sup> Kan Apu Dios nan Moses "Ehel muddan helag Israel e kammuy 'Enem ni toon hu panleyakan yun payew yu ey enem ni toon hu pantenneman yun legutan yu ma-lat wada eppiten yun kennen yu. Nem yan meikkepitun toon ey eleg yudda tennemi. Ey hedin wada illameh idan etan ni sigud ni neitnem, ihulug yuddan newetwet et pengal-an dan kennen da. Hedin wada sindaan da, diman et pengannan idan animal di muyung.

<sup>12</sup> Yan hanlingguan ey enem ni aggew hu panggunnuan yu, nem yan meikkepitun aggew ey man-iyattu kayu et yadda bega-en yu, anin idan nalpud edum ni bebley ni yuka panggunnu ey anin idan animal yun yuka pan-elladu ey man-iyattu dama. <sup>13</sup> Ang-ang yu et u-unnuden yun emin huayan inhel APU DIOS. Entan tu dayaw hu edum ni dios ey entan tu ene-ehhel hu ngadan da."

*Yadda Piyestah idan helag Israel*

<sup>14</sup> Kan Apu Dios nan Moses ey "Ehel muddan edum mun helag Israel e kammuy 'Huuya inhel Apu Dios: Entan tu liwwan ni ipahding ida etan tellun piyestah ni katootoon.

<sup>15</sup> Ya memengngulu ey ya Piyestah ni Sinapay ni eleg meha-adan ni kamampelbag. Meu-unnud etan inhel kun pehding yu eman ni wada kayud Egypt. Eleg kayu mengngan ni sinapay ni neha-adan ni kamampelbag ni pitun aggew, ey mahapul ni wada i-appit yun pandeyyawan yun hi-gak ni nunyan piyestah.

<sup>16</sup> Ya meikkadwa ey ya Piyestah ni Ani. Pehding yu huayan piyestah ni pengilleppuan yun man-enni. Et ya meikkatun piyestah ey ya Piyestah ni Kampu e puggahen yu grapes niyadda edum ni kamekkan ni lameh ni keyew. <sup>17</sup> Ippahding yudda huayan piyestah ni katootoon. Mahapul ni um-alidda emin hu helag Israel ni lalakkin menaydayaw ni hi-gak e AP-APU e Dios yu.

<sup>18</sup> Entan pan-appit ni sinapay ni nekamdugan ni kamampelbag ni pan-appitan yun animal. Ey ang-ang yu et endi metdaan ni kewa-waan tun tabaddan animal ni i-appit yun hi-gak ni nunyan piyestah.

<sup>19</sup> Ey mahapul ni illaw yud baley ku e AP-APU e Dios yu hu kekakkayyaggudan idan memengngulun lameh ni intanem yu et iappit yun hi-gak.

Entan tu ihehng hu impah ni kalneroh winu gelding di gatas ni inetu."

*Ya inhel Apu Dios ni pehding tun panyaggudan idan helag Israel*

<sup>20</sup> Entanni ey immehel mewan hi Apu Dios et kantuan Moses ey "Ehel muddan edum mun helag Israel e kammuy 'Huuya inhel Apu Dios: Ittu-dak ku anghel kun mengippengngulun hi-gayu ingganah ni umdateng kayu etan di indaddan kun yu pambebleyan. <sup>21</sup> U-unnud yu e-helen nunyan anghel. Entan tu kahing tep hi-gak ngentu-dak ni hi-gatu. Hedin kehningen yu, eleg dakeyu pessinsahi. <sup>22</sup> Nem hedin u-unnuden yu, et ipahding yun emin hu e-helen ku ey hi-gak hu ngenamung ni mekihhanggaddan buhul yu. <sup>23</sup> Humman ni anghel ku mengippengngulun hi-gayu ingganah ni umdateng kayud bebley idan Amorite, Hittite, Perissite, Kanaanite, Hebite, niyadda Jebusite, et kayu mambebiley diman. Hi-gak e Dios hu mekihhanggan hi-gada et pateyen kudda. <sup>24</sup> Entan tu dayaw hu dios da ey entan tu iu-unnud di daka pehding ni menaydayaw ni dios da. Bahbah yu kumadda etan kinapya dan dios da niyadda hinead dan batun daka deyyawa.

<sup>25</sup> Hi-gak e AP-APU e Dios yu hu deyyawen yu, iddawtan dakeyun kennen yu niya danum ni innumen yu ey e-kalen ku degeh yu. <sup>26</sup> Ey endiddan aahwa yu hu mengunnuh niya endi an mebessi ey iddawtan dakeyun andukkey ni biyag.

<sup>27</sup> Petekktu ku ey himmengen kudda mengubbat ni hi-gayu ma-lat hedin kayu kamengelli ey memsik ida. <sup>28</sup> Pemengnguluk ni peelli inelit ma-lat pabsik dadda Hibite,

yadda Kanaanite niyadda Hittite ni wadadman. <sup>29</sup> Nem beken ni ida menga-mut ni me-kal emin ni hantoon et endi an metdaan. Tep hedin mambalin ni mamuyung etan bebley, umdakkel idalli anggetakkut ni animal et anggetakkut ali kumamman. <sup>30</sup> Heballi in-inut hu pehding kun mengkal ni hi-gada ingganah umdakkel kayu et penuen yu etan bebley.

<sup>31</sup> Ihhammad kulli pappeg ni bebley ni lawwan yu e meippalpud Madlang ni Baybay ingganah di gilig ni baybay di Pilstia et mampalaw la etan di eleg mebebleyi ingganah di Wangwang e Euphrates. Baddangan dakeyun lawwan yudman ma-lat apputen yudda tuudman et degyunen yudda. <sup>32</sup> Nem entan pekidayum ni hi-gada niya entan pekidum ni mandeyyaw ni dios da. <sup>33</sup> Ey entan iebuluttuddan mekibbebley ni hi-gayu tep meewwis kayulli kumedek ni mengippahding ni panliwwatan ni pandeyyaw dan dios da.' "

*Yadda Tugun Apu Dios ni u-unnuden idan helag Israel*

## 24

<sup>1</sup> Immehel hi APU DIOS nan Moses e kantuy "Ikuyug muddallid Aaron, hi Nadab, hi Abihu niyadda etan nepitun kamengipappanggulun helag Israel et manteyed kayu eyad kad-ak nem meidaddawwiddan menaydayaw ni hi-gak. <sup>2</sup> Nem hi-gam ni ebuh hu meihnup ni hi-gak. Yadda ikkuyug mu ey meidaddawwidda et yadda etan tuu ey eleg mabalin ni ida umtetyed eyad duntug."

<sup>3</sup> Nandayyu hi Moses et ehelen tuddan edum tun helag Israel hu intugun APU DIOS ni pehding da. Ey emin ida ey kanday "Ippahding min emin huttan ni inhel APU DIOS."

<sup>4</sup> Intudek Moses ida emin hu Tugun APU DIOS. Newa-wa et humelaman hi Moses ni an nengapyan pan-appitan nan APU DIOS di hengeg ni duntug. Et iha-ad tu hampulut dewwan batud nanlinikweh nunman ni pan-appitan ni mengi-ehnung idan hampulun dewwan helag eman ni ammed da e hi Israel. <sup>5</sup> Et ehelen tuddan nangehiken ni lalakkin man-appit nan APU DIOS ni kagihheba niyadda kilaw ni bakan i-appit dan pekiddagyuman. <sup>6</sup> Inha-ad Moses idad mahukung ni duyu hu kagedwah ni kuheyaw et ya gedwatu ey inwagkih tu etan di pan-appitan.

<sup>7</sup> Ey inla tu etan liblun ni nengitudekan tuddan tugun APU DIOS et eleten tun imbidbid idad edum tun helag Israel. Ey kanday "U-unnuden mi APU DIOS ey ippahding midda emin hu inhel tu."

<sup>8</sup> Inlan Moses etan kuheyaw et wakgihan tudda etan tuu e kantuy "Huyyan kuheyaw hu mengippeamta e mahapul ni u-unnuden tayu hu nekitbalan APU DIOS ni hi-gayu eman ni nanghelan tuddan emin eyan tugun." \*

<sup>9</sup> Negibbuh humman et ikuyug Moses di Aaron, hi Nadab, hi Abihu niyadda etan nepitun kamengipappanggulun et manteyed ida etan di duntug, <sup>10</sup> ey inang-ang da etan Dios da. Ya immehnengan tu ey heni neap-apan ni batu e sapphire e kamanlinnang e heni ang-ang ni kabunyan hedin endi kulput. <sup>11</sup> Anin inang-ang idan nunyan kamengipappanggulun helag Israel hi APU DIOS ey eleg tudda pateyen. Nengan ida ey imminum idadman di hinangga tu.

*Ya nanhahha-adan nan Moses ni na-pat ni aggew et na-pat ni hileng etan di Duntug e Sinai*

<sup>12</sup> Entanni ey kan mewan APU DIOS nan Moses ey "Panteyed kalli eyad duntug ni kad-an ku et idwat kun hi-gam etan dewwan batun neitudkan idan Tugun kun u-unnuden idan helag Israel." †

<sup>13</sup> Et umgah hi Moses e kadwa tu etan kaumbabbaddang ni hi-gatu e hi Joshua et manteyed ida etan di duntug. <sup>14</sup> Yan nunman ni immagahan da ey inhel Moses idan etan ni aap-apu e kantuy "Dideya kayu. Heged dakemi ingganah mambangngad kami. Hedin wada diklamu, lakkayuy di kad-an di Aaron nan Hur et hi-gada mengippennuh."

<sup>15</sup> Yan eman ni kamenyed di Moses nan Joshua ey hinephepan ni kulput etan duntug. <sup>16</sup> Humman ni kulput hu kei-ang-angan ni kawedan APU DIOS ey nanha-ad etan di duntug ni enem ni aggew. Ey yan meikkepitun aggew ey hi APU DIOS e wada etan di kulput ey immehel nan Moses. <sup>17</sup> Ya impenang-ang idan helag Israel ni wadan hengeg etan ni duntug ni nunman ni dayaw APU DIOS di ta-pew ni duntug ey heni kamantetebbel ni apuy. <sup>18</sup> Limmaw hi Moses etan di ta-pew ni duntug ni hinephepan ni kulput et manha-ad diman ni na-pat ni aggew niya na-pat ni hileng.

\* 24:8 24:8 Hebrews 9:20 † 24:12 24:12 Ang-ang yu 2 Corinthians 3:3.

## 25

*Ya inhel Apu Dios ni i-appit idan helag Israel*

<sup>1</sup> Kan APU DIOS nan Moses ey <sup>2</sup> "Ehel muddan edum mun helag Israel et iappitan dak ni hi-gada. Humman idan i-appit dan hi-gak ey meippuun di pinhed dan iddawat. <sup>3</sup> Huyyadda dammutun i-appit da: ya balituk, ya silber, ya giniling, <sup>4</sup> ya sinayyum ni blue, ya purple, ya makadlang, ya kayyagud ni luput, ya edum ni luput ni nekapyad dutdut ni gelding, <sup>5</sup> ya katak ni lakkitun kalneroh ni nambalin ni madlang, ya katak ni mategun wadad baybay, ya keyew ni akasyah, <sup>6</sup> ya lanan olibah e kameihha-ad di kengkeh, ya lanan kaihha-ad di ulu, ya bangbanglun insensoh, <sup>7</sup> ya onyx niyadda edum ni nangkenginan batun meittekkap di ephod e balwasin padi niya etan luput ni meittekkap di pagew tu.

<sup>8</sup> Ey mahapul ni ikkapyaan da-ak ni Tabernacle e a-abbung ni tuldah ma-lat makihha-addak ni hi-gayu. <sup>9</sup> Kapyu yu huyyan Tabernacle e iu-unnud yu etan di inhel kun pengapya yu."

*Ya inhel APU DIOS ni pehding dan mengapya etan ni Kaban ni keihha-adan ni neitudek ni tugun tu.*

<sup>10</sup> Kan mewan APU DIOS nan Moses ey "Pengapya kayun Kaban e usal yu keyew ni akasyah. Na-pat et liman pulgadah kadinukkey tu, dewampulut pitun pulgadah kalinakkeb tu, niya dewampulut pitun pulgadah kasina-gey tu. <sup>11</sup> Takapi yun nemahmah ni balituk humman ni Kaban, anin ya bawang tu niya nanlinikweh ni nunman ni Kaban. <sup>12</sup> Ey ikapya yu hu epat ni netullikeng ni balituk diman ni Kaban e handedwad nambina-hil. <sup>13</sup> Ey kapyu kayun keyew ni akasyah ni pan-attang e takapi yun balituk, <sup>14</sup> et idduduk yuddadman ni netullikeng di nambina-hil di Kaban. <sup>15</sup> Huyyaddan pan-attang ey menayan diman e eleg mabalin ni an me-kal. <sup>16</sup> Hedin negibuh, ihudum diman ni Kaban etan iddawat kun hi-gam ni dewwan batun neitudekan idan Tugun ku.

<sup>17</sup> Pengapya kayun nemahmah ni balituk ni hu-keb nunyan Kaban. \* Ya kadinukkey tu ey na-pat et liman pulgadah ey dewampulut pitun pulgadah hu kalinakkeb tu. <sup>18-19</sup> Pengapya kayun dewwan anghel di nambinengwah di hu-keb e meihakkey hu kapyu tu. <sup>20</sup> Manhinnanggadda e mebekyag payak da et hephepan da huyyan hu-keb. <sup>21</sup> Ihu-keb yu etan di kapyaan yun Kaban ni pengihha-adan yudda etan ni dewwan batun iddawat kun hi-gam. <sup>22</sup> Um-ali-ak alid ta-pew ni hu-keb di nambattanan idan etan ni dewwan anghel et idwat kun emin ni hi-gam ida tugun kun u-unnuden yun emin ni helag Israel."

*Ya intugun APU DIOS ni pengapya dan tebol ni keihha-adan ni sinapay ni kamei-appit ni hi-gatu*

<sup>23</sup> Kan mewan APU DIOS nan Moses ey "Pengapya kayun tebol e usal yu hu keyew ni akasyah. Ya kadinukkey tu ey tellun piyeh, ya kalinakkeb tu ey hakey et kagedwah ni piyeh niya nehuluk ni dewwan piyeh kasina-gey tu. <sup>24</sup> Takapi yun nemahmah ni balituk huyyan tebol niya nanlinikweh ni gilig tu. <sup>25</sup> Hu-upi yun tellun pulgadah di nanlinikweh ni gilig tu ey takapi yun balituk. <sup>26</sup> Ikapyai yun hanhakkey ni netullikeng ni balituk etan epat ni helin nunyan tebol di dugu tu. <sup>27</sup> Ikapya yudda huyyan netullikeng di daul ni gilig ni tebol. <sup>28</sup> Ey pengapya kayun keyew ni akasyah ni pan-attang yun nunyan tebol ey takapi yun balituk. <sup>29</sup> Ey pengapya kayun nemahmah ni balituk ni duyun pengihha-adan ni bangbanglun insensoh, ya basuh, ya pa-nay niya mahukung ni duyun pengidduyagan yun meinum ni kamei-appit. <sup>30</sup> Mahapul ni wadan kenayun hu sinapay ni ihha-ad yud hinangngab ku etan di tebol ni kapyaan yu."

*Ya inhel APU DIOS ni pengapya da etan ni pengippettukan ni kengkeh*

<sup>31</sup> Kan mewan APU DIOS ey "Pengapya kayun nemahmah ni balituk ni pengippettukan ni kengkeh. Ihakkey yun panday hu hengeg tu niya palat tu. Ey ihakkey yuddan kapyu hu heni basuh niyadda habung ni al-alkus tu. <sup>32</sup> Humman ni pengippettukan ni kengkeh ey enem panga tu e hantetlud nambina-hil. <sup>33</sup> Mei-peng idan nunman ni enem ni panga hu basuh ni heni habung ni almond. <sup>34</sup> Ya etan palat nunman ni pengippettukan ni kengkeh, ey neal-alkusan ni epat ni heni dama habung ni almond. <sup>35</sup> I-peng yun ikkapyu hu hanhakkey ni habung ni eleg mebekyag di daul ni handedwan pangan etan ni pengippettukan ni kengkeh. <sup>36</sup> Huyyaddan habung ni eleg mebekyag et yadda panga ey meihakkey hu kapkapyu tud pengippettukan ni kengkeh. Nemahmah ni balituk hu mekapyaan emin idan nunya. <sup>37</sup> Pengapya kayun pitun kengkeh et

\* 25:17 25:17 Meippuun di kapengullug idan helag Israel ey yimmudung hi Apu Dios di ta-pew ni hu-keb nunman ni Kaban ey yadman tuka pengippeang-angin hemek tuddan tuu tu.

ipetuk yuddad kapyaeun yun pengippettukan et madilagan hu hinangnga tu. <sup>38</sup> Ey mahapul ni ya nemahmah ni balituk hu kapyaeun yuddan ipit anin etan ni ha-addan. <sup>39</sup> Umlaw ni telumpulut epat ni kiloh ni nemahmah ni balituk hu kapyaeun yun nunyan pengippettukan ni kengkeh niyadda emin huyyan meussal.

<sup>40</sup> Mahapul ni kapyaeun yudda huyya e peka-i-u-unnud mu etan di impeang-ang kun hi-gam eyad duntug.” †

## 26

### *Yadda inhel APU DIOS ni pengapya da etan ni Tabernacle*

<sup>1</sup> Kan mewan APU DIOS ey “Heninnuy hu pengapya yun Tabernacle ni panha-adan ku: Pengapya kayun hampulun kultinah. Usal yu kakkayyagud ni luput et ya blue, ya purple niya makadlang ni sinayyum, ey bordai yuddan nepayakan ni anghel. <sup>2</sup> Emin ida huyyan kultinah ey man-iinggeh ida e umlaw di na-pat et dewwan piyeh hu kadinukkey da niya enem ni piyeh hu kalinakkeb da. <sup>3</sup> Pengapya kayun dewwan melakkeb ni kultinah e pandadagsi yun kugguten hu lima idan nunyan kultinah et meihakkey ida. Hanniman dama pehding yu etan ni liman kultinah. <sup>4</sup> Tullikeng yu hu sinayyum ni blue et ikugut yudda huyyad gilig idan nunman ni dewwan nanggillig ni kultinah. <sup>5</sup> Hannenelima hu ikkugut yun netullikeng di gilig idan nunman ni dewwan kultinah ey mahapul ni mampepettek ida. <sup>6</sup> Pengapya kayun neliman balituk ni pengippit yun gilig idan nunman ni dewwan kultinah ma-lat meikkahhakey hu dingding ni Tabernacle.

<sup>7</sup> Kapyay kayun hampulut hakey ni kultinah ni dutdut ni gelding et itta-kep yuddad luput ni kultinah ni Tabernacle. <sup>8</sup> Pan-iinggeh yudda humman ni kultinah e ya kadinukkey ni hakey ey na-pat et liman piyeh niya enem ni piyeh hu kalinakkeb ni hakey. <sup>9</sup> Pandadagsi yun kugguten hu liman nunyan kultinah et meihakkey ida. Hanniman dama pehding yu etan di enem ni kultinah e pandadagsi yun kugguten ida. Ya etan meikka-nem ni kultinah ey melugpi e meleyyag di heggepan di Tabernacle. <sup>10</sup> Ikapya yu hanneneliman netullikeng di gilig idan nunman ni lima niya enem ni kultinah ni nandadagsin nekugut. <sup>11</sup> Ey pengapya kayun neliman giniling ni pengippit yun gilig idan nunman ni kultinah et meihakkey ida. <sup>12</sup> Meleyyag dama hu utduk dad awwidan ni Tabernacle. <sup>13</sup> Ey meleyyag damad nambina-hil di Tabernacle hu umlaw di hampulut walun pulgadah. <sup>14</sup> Pengapya kayun dewwan tuldah ni katat ni lakkitun kalneroh niya kakkayyagud ni katat ni mei-dah. Huyya pengettep yun Tabernacle.

<sup>15</sup> Pengapya kayun kalkalimangngan Tabernacle ni akasyah ni keyew. <sup>16</sup> Ya kadinukkey idan nunman ni ikkapyay yu ey hampulut liman piyeh niya kalinakkeb da ey dewampulut pitun pulgadah. <sup>17</sup> Wada man-iinggeh ni handedwan dimmewdew di emin etan di frames ma-lat panhuhuup yudda. <sup>18-21</sup> Hinead dadda handedwampulu idan nunman di appit ni south niyad north ni Tabernacle. Ey ingkapyay da newalun silber ni pengittu-unan idan nunman e handedwa neikapyad hengeg ni hakey. <sup>22</sup> Yad awwidan ni Tabernacle di appit ni kakelinnugin aggew ey ituun yu hu enem idan nunman <sup>23</sup> niya ituun yu hanhakkey etan di dewwad dugu tu. <sup>24</sup> Humman idan meikkapyad dugu ey mandekep ida meippalpuad hengeg tu ingganah di utduk di ta-pew tu e meihhuklub hu netullikeng et mandekep ida. Henin nunman ipahding yud dewwan dugu tu. <sup>25</sup> Et walun emin ni henin nunman hu ikkapyay yudman ni awwidan ni Tabernacle ey iha-ad yu hu hampulut enem ni silber ni pengittu-unan idan nunman e handedwad hakey idan nunman.

<sup>26-27</sup> Pengapya kayun hampulut liman keyew ni akasyah ni meibballabag etan idad kalkalimangngan Tabernacle. Ikapya yu hanlilmad appit ni north, yad south et yad awwidan di appit ni kakelinnugin aggew. <sup>28</sup> Ya etan ida meiggawwan meibballabag di gawwaddan nunman ni kalkalimangnga ey meipalpuad hakey ni dugu ingganah lad hakey mewan ni dugu. <sup>29</sup> Pengapya kayu pay ni netullikeng ni balituk ni mengged idan meibballabag ni keyew. Ey takapi yun balituk huyyan kalkalimangnga, anin idan etan ni meibballabag.

<sup>30</sup> Hanneya pengapya yun Tabernacle e iu-unnud yu etan impeang-ang kun hi-gam eyad duntug.”

<sup>31</sup> Kan mewan APU DIOS nan Moses ey “Heldak yu bawang ni Tabernacle ni kultinah ni nekapyad kakkayyagud ni luput e nebordaan ni nepayakan ni anghel. Humman ni luput ey blue, ya purple niya makadlang. <sup>32</sup> Thabley yu huyyan kultinah di epat ni tukud ni akasyah e metekapan ni balituk ey meikkapyaan ni balituk ni hableyyan. Humman idan tukud ey meippeehngeng di silber ni pengippeehngengan. <sup>33</sup> Humman ni kultinah ni ihha-ad yud bawang ni Tabernacle ey humman manheldak ni Nesantuh ni Kuwalthu

et ya Nekassantuh ni Kuwaltuh APU DIOS. Ey meihha-ad etan Kaban Apu Dios di ba-hil nunman ni kultinah.

<sup>34</sup> Iha-ad yu etan hu-keb ni Kaban APU DIOS di Nekassantuh ni Kuwaltuh. <sup>35</sup> Ey iha-ad yu etan kapyaeun yun tebol etan di ba-hil ni Kuwaltuh APU DIOS, anin ya etan pengippettukan ni kengkeh. Meihha-ad di willi hu tebol ey yad wannan hu pengippettukan ni kengkeh.

<sup>36</sup> Pengapya kayu pay ni hakey ni meikkultinah di heggeppan di Tabernacle. Usal yu kakkayyaggud ni luput et ya blue, ya purple niya makadlang ni sinayyum ey iyayyaggud yun bordaan. <sup>37</sup> Ikapyai yu huyyan kultinah ni liman tukud ni akasyah e tekkapan yun balituk. Et ya kawit da ey balituk dama. Ya keittu-unan idan tukud ey giniling.”

## 27

### *Ya inhel APU DIOS ni pehding dan mengapyan pan-appitan*

<sup>1</sup> Kan mewan APU DIOS nan Moses ey “Kapyay yu hu altar e usal yu akasyah ni keyew. Humman ni altar ey kuwadladuh e pitu et kagedwah ni piyeh hu kadinukkey tu niya kalinakkeb tu, ey epat et kagedwah ni piyeh kasina-gey tu. <sup>2</sup> Ey ikapya yu hu heni ha-duk idad ta-pew ni epat ni dugu tu e neihakkey hu kapkapyay tud altar. Hedin megibbuh ni kinapya yu ey takapi yun giniling. <sup>3</sup> Pengapya kayuddan meussal di pan-appitan heni baldih ni pengihha-adan yun dep-ul, ya pala, ya besin, ya tewik ni detag niya penellukduk ni ngalab. Kapyaeun yun emin ida huyyad giniling. <sup>4-5</sup> Kapyay kayun nelagan giniling ni meihha-ket di dimmewdew di gawwan bawang ni altar. Kapyay yu epat ni netullikeng etan di epat ni dugun nunman ni altar ni keidduddukan idan pan-attang. <sup>6</sup> Ey pengapya kayun keyew ni akasyah ni pan-attang et takapan tun giniling. <sup>7</sup> Iduduk yudda humman ni pan-attang etan idad netullikeng ni ikkapyay yudda dugun altar ma-lat pengitngedan idan mengi-attang. <sup>8</sup> Ya tabla hu kapyay yun nunman ni altar nem entan tu det-ali henggeg tu. Iu-unnud yu pengapya yu etan di impeang-ang kun hi-gayu eyad duntug.”

### *Ya inhel APU DIOS ni pehding dan mengihha-ad ni kultinah di nanlinikweh ni Tabernacle.*

<sup>9</sup> Kan mewan APU DIOS nan Moses ey “Pengapya kayun dallin ni Tabernacle e mekkultinahan ni kakkayyaggud ni luput hu appit ni south e hanggatut et neliman piyeh kadinukkey tu. <sup>10</sup> Ya mengged nunman ni kultinah ey dewampulun tukud ni giniling ni meittu-un di dewampulun giniling ni pengittu-unan. Meihhabley ida etan idad silber ni kawit ey silber ni pengihhableyan ni neikapyadda tukud. <sup>11</sup> Hanniman damad appit ni north e hanggatut et neliman piyeh hu kadinukkey ni kultinah ni meihhabley di silber ni kawit ey silber ni pengihhableyan ni meikkapyad dewampulun giniling ni tukud ni meittu-un di dewampulun giniling ni pengittu-unan. <sup>12</sup> Yad awwidan di appit ni kakelinnugin aggew ey nepitu et lima hu kadinukkey ni meikkultinah e meihhabley di hampulun tukud ey meittu-un di hampulun pengittu-unan. <sup>13</sup> Hanniman damad heggeppan di dallin ni Tabernacle di appit ni kasimmilin aggew e mekkultinahan ni nepitu et liman piyeh kalinakkeb tu. <sup>14-15</sup> Yadman ni heggeppan ey meikkapyay hu dewwan kultinah e hakey ni kultinah di winannan ey hakey di winilli. Handedwampulut dewwa et kagedwah ni piyeh hu kalinakkeb ni hakey. Ey hantetlu hu tukud ni meittu-un di tellun nekapyan pengittu-unan hu pengihhableyan idan nunyan kultinah.

<sup>16</sup> Ya etan gawwan heggeppan di dallin ni Tabernacle e mekkultinahan ni telumpulun piyeh hu kalinakkeb tu. Meikkapyay hu kakkayyaggud ni luput et ya blue, ya purple niya makadlang ni sinayyum ey meiyayyaggud ni mebordaan. Meihhabley huyyan kultinah di epat ni tukud e meittu-un di epat ni pengittu-unan. <sup>17</sup> Emin ida tukud di dallin ni Tabernacle ey meikkapyaan ni silber ni kawit niya hableyyan, ey meittu-un idad giniling ni pengittu-unan. <sup>18</sup> Et ya lekud ni dallin ni Tabernacle ey hanggatut et neliman piyeh kadinukkey tu, ey nepitu et liman piyeh hu kalinakkeb tu, ey pitu et kagedwah ni piyeh hu kasina-gey tu. Ya etan meikkultinah, ey mahapul ni kayyaggud ni luput hu mekapya. Yadda pengittu-unan idan tukud ni keihhableyan idan kultinah ey giniling hu mekapya.

<sup>19</sup> Emin hu meussal di Tabernacle, anin idan paghek ey giniling hu mekapya.

### *Ya inhel APU DIOS ni pehding dan kengkeh*

<sup>20</sup> Imandal muddan edum mun helag Israel et umi-liddan kekakkayyaggudan ni lanan olibah ni meihha-ad idad kengkeh ni pandillag di Tabernacle et mantettebbel idan ingganah. <sup>21</sup> Meihha-ad etan pengippettukan ni kengkeh di ba-hil ni kultinah ni Kuwaltuh Apu Dios. Hi Aaron et yadda u-ungnga tun lalakki hu mampaptek idan nunman ni kengkeh ey mahapul ni mantettebbel idan neyun ni hileng ingganah

kakkabbuhhan di kad-an Apu Dios. Mannenneng huyyan olden ni pehding idan helag Israel et yadda u-ungnga da.”

## 28

*Ya inhel APU DIOS e di Aaron et yadda u-ungnga tu mampeddi*

<sup>1</sup> Kan mewan APU DIOS nan Moses ey “Hi Aaron e agim et yadda u-ungnga tun lalakki e hi Nadab, hi Abihu, hi Eleasar et hi Ithamar hu nepilin mampeddin mansilbin hi-gak. <sup>2</sup> Pakugut kan balwasin Aaron ma-lat melispituh ey kayyaggud ang-ang tun pengippahdingan tun ngunu tu ey keang-angan tu e hi-gatu ey neieng-eng ni hi-gak e Dios. <sup>3</sup> Ehel muddan nelaing ni muggut et kuguten da balwasin Aaron et meang-ang e hi-gatu ey neieng-eng ni mampeddin mansilbin hi-gak. <sup>4</sup> Huyyadda mekuggut ni ussalen ni padi: Ya luput ni meittekkap di pagew, ya ephod, ya mei-dah ni balwasi, ya nebordaan ni balwasi, ya meipngget di ulu et ya mei-ewwakeh. Pampakugut ka pay ni kayyaggud ni ibbalwasiddan lalakkin u-ungngan Aaron ni pengippahdingan dan ngunu dan padik. <sup>5</sup> Humman ida ey mekapyad kayyaggud ni luput niya balituk ni heni sinulid, ya blue, ya purple, niya makadlang ni sinayyum.

<sup>6</sup> Mahapul ni kayyaggud ni luput niya balituk ni heni sinulid hu kapyaan yun ephod, ey mebordaan ni blue, ya purple, niya makadlang ni sinayyum. <sup>7</sup> Huyyan ephod ey dewwan luput ni nan-appil e hakey di hinangga, ey hakey di beneg e keittekkapan ni dewwan luput ni meihhabley di pahhannan. <sup>8</sup> Mahapul daman ya kayyaggud ni luput hu mekapyaan meibalkesi di ephod, ey mahapul ni meiyayyaggud ni mebordaan ni balituk ni sinayyum, ya blue, ya purple niya makadlang. <sup>9</sup> Ala kayun dewwan batun onyx et iku-lit yudman hu ngadan idan helag Israel. <sup>10</sup> Enem ni ngadan hu meikku-lit di hakey ni batu, ey enem damad hakey, et meiku-lit emin hu ngadan idan helag Israel meippuun di nanhahaynedan dan neiungnga, meipalpud pengulwan ingganah di udiyan. <sup>11</sup> Iku-lit mudda huyyan ngadan idan helag Israel henin kapehding ni nelaing ni mengikku-lit ni sinyal di nenginan batu. Itekap mudda huyyan dewwan batu etan di balituk ni keihha-adan da, <sup>12</sup> et itakap dadda huyyan batu etan di neihabley di nambina-hil di pahhannan ni ephod. Huyyaddan batu hu peginemnemman APU DIOS idan helag Israel. Peang-ang Aaron di pahhannan tudda humman ni neiku-litan ni ngadan da, et nemnemnemen kun ingganah ida tutu-uk. <sup>13</sup> Itekap mudda huyyan dewwan batud balituk. <sup>14</sup> Ey pengapya kayun dewwan heni linubid ni nekapyad nemahmah ni balituk et iiket muddan nunman ni balituk.

<sup>15</sup> Pengapya kayun luput ni meittekkap di pagew ni ephod, et usalen ni padin mengaman pinhed Apu Dios ni meippahding. Nan-inggeh hu ussalen yun nunyad etan di kapyaan yun ephod ey iyayyaggud yu daman bordaan. <sup>16</sup> Kuwadladuh huyyan luput e meluggi, et heyam ni pulgaduh hu kadinukkey tu ey kalinakkeb tu. <sup>17</sup> Itekap yudya hu epat ni linyah ni nambakbaklang ni nebalol ni batu: yad etan di nemangulun linyah ey itekap yu hu ruby, ya topaz niya garnet, <sup>18</sup> yad meikkadwan linyah ey ya emerald, ya sapphire niya diamond, <sup>19</sup> yad meikkatlun linyah ey ya turquoise, ya agate niya amethyst, <sup>20</sup> niyad meikka-pat ni linyah ey ya beryl, ya onyx niya jasper. Meittekkap idan emin huyyan nebalol ni batud balituk. <sup>21</sup> Meitudek emin hu ngadan idan hampulut dewwan u-ungngan Jacob idadman ni nenginan batu et iehngeng dan emin hu helag Israel.

<sup>22</sup> Ikapyai yun nelubid ni bangga ni nemahmah ni balituk huyyan luput ni meittekkap di pagew ni ephod, <sup>23</sup> ey pengapya kayun dewwan netullikeng ni balituk et ikugut yud dewwan dugun nunman ni luput di ta-pew tu. <sup>24</sup> Iiket yu humman ni dewwan nelubid ni balituk di diman ni netullikeng. <sup>25</sup> Ey ya utduk idan nunman ni nelubid ni bangga ey iiket yu etan di dewwan balituk ni keipketan idan batun onyx ni meittekkap etan di meihhabley di pahhannan ni ephod. <sup>26</sup> Pengapya kayu mewan ni dewwan netullikeng ni balituk, ey ikugut yu etan di dewwan dugun etan ni utduk ni luput ni meittekkap di pagew ni ephod. Meikkuggut ida huyyad piggad etan ni luput et maitumuk di ephod. <sup>27</sup> Pengapya kayu pay ni dewwan netullikeng ni balituk ey ikugut yud hinanggan nunyan luput di ta-pew ni balkeh ni ephod. <sup>28</sup> Usal yu blue ni linubid ni mengi-ikket diman ni netullikeng ni meikkuggut di luput ni meittekkap di pagew ni ephod di ta-pew ni balkeh tu.

<sup>29</sup> Hedin umhegep hi Aaron di Nesantuh ni Kuwaltuh di Tabernacle, ey ihhuklub tu humman ni luput ni meittekkap di pagew e wada ngadan idan u-ungngan Israel di pettek ni puhu tu, et maipenemnem kayun tutu-uk ni ingganah. <sup>30</sup> Ihudu yu etan Urim et ya Thummim etan di bulsan nunman ni luput ni meittekkap di pagew et meita-pew di pettek ni puhun Aaron hedin ibbalwasi tun lawwan tud kuwaltuh ku, ma-lat wadan

ingganah nan Aaron ida humman ni pengamtaan yuddan tutu-uk ni pinhed kun pehding yu.

*Ya edum ni balwasiddan padi*

<sup>31</sup> Kugut kayu pay ni blue ni balwasin mei-dah di ephod. <sup>32</sup> Kapyai yun huklubban ni ulu ey kuguti yun luput hu gilig nunman ni huklubban henin edum ni balwasi ma-lat eleg mebi-ki. <sup>33</sup> Pengapya kayun henin lameh ni pomegranate e usal yu hu blue, ya purple et ya makadlang ni sinayyum ey inta-yun yuddad nanlinikweh di utduk nunyan balwasi e meibbenattan di balituk ni kingking. <sup>34</sup> Hedin inta-yun yu hakey ni kingking, intu-nud yu hakey etan ni heni pomegranate ingganah melikweh hu utduk nunman ni balwasi. <sup>35</sup> Ibbalwasin Aaron huyyan heggeppan tud Nesantuh ni Kuwaltuh di Tabernacle ni pansilbian tun hi-gak e AP-APU et mantetennul hu kingking ni heggeppan tu niyan e-hepen tu. Mahapul ni u-unnuden tun emin huyya ma-lat eleg matey. <sup>36</sup> Ey pengapya kayun medal ni nemahmah ni balituk et iku-lit yu hu 'Neieng-eng nan APU DIOS.' <sup>37</sup> Iiket yu blue ni linubid di medal, ey ittakap yud hinanggan etan ni kapyae yun penget Aaron. <sup>38</sup> Meittekkap huyyan medal di tuktuk nunman ni penget, et heni in-agtu tu hu bahul hedin wada keihhallaan idan helag Israel ni meippanggep ni i-appit da. Mahapul ni i-usal tun ingganah huyyan penget et hi-gak e AP-APU ey ebbuluten kun emin hu i-appit idan tuuk.

<sup>39</sup> Ya kayyaggud ni luput hu pakugut yun mei-dah ni balwasin Aaron. Hanniman dama etan ni penget tu e mahapul ni ya kayyaggud ni luput hu pakugut yu. Pakugut kayun neiyayaggud ni nebordaan ni meibalkeh di gitang tu. <sup>40</sup> Ey pakugut kayun mei-dah ni balwasi damaddan u-ungngan Aaron, ya mei-ewwakeh di gitang da, et ya penget da ma-lat kayyaggud ang-ang da ey melispituh idad ngunu da. <sup>41</sup> Pebalwasim nan hi agim e hi Aaron humman ni nekugut ni balwasi tu, ey pebalwasim ida daman u-ungnga tu hu nekugut ni balwasi da, ey duyangim hu ulu dan lanan olibah, et keang-angan tu e nepiliddan mampeddin mansilbin hi-gak. <sup>42</sup> Ey pakugut kayu mewan ni andukkey ni mandallem ni balwasi da e meipalpud gitang da ingganah di ulpu da. <sup>43</sup> Mahapul ni i-usal nan Aaron et yadda u-ungnga tudda huyyan heggeppan dad Tabernacle et yan lawwan dad altar di Nesantuh ni Kuwaltuh ni da pengippahdingan ni ngunu da. Hedin hanniman hu pehding da, man eleg ida mebehului et eleg ida mettey. Huyyan olden kun u-unnuden Aaron et yadda helag tun manhuluhulul ni mampeddi ey mannananeng ni ingganah."

## 29

*Ya neieng-engan idan padi*

<sup>1</sup> Kan APU DIOS nan Moses ey "Heninnuy hu pehding mun mengi-eng-eng nan Aaron et yadda u-ungnga tun mampeddi et mansilbiddan hi-gak. Ala kan kilaw ni lakkitun baka et ya dewwan lakkitun kalneroh ni endi dipeктоh da, <sup>2</sup> ey pengapya kan sinapay e usal mu kekakkayyaggudan ni alinah ey entan tu kamdugin kapampelbag. Pengapya kayu pay ni meingpih ni sinapay ey mekayya-meh edum e naha-dan ni mansikan olibah. <sup>3</sup> Iha-ad mudda huyyad agyag et iappit mun hi-gak di heggeppan di Tabernacle e me-unnud etan di kilaw ni lakkitun baka et ya dewwan lakkitun kalneroh.

<sup>4</sup> Ipahding mu huyyan elaw ni mengi-eng-eng nan Aaron et yadda u-ungnga tud heggeppan di Tabernacle ey ulahim ida e u-unnud mu elaw ni panlinnih. <sup>5</sup> Pebalwasim nan Aaron etan mei-dah ni balwasi tu, ya etan nebordaan ni mei-dah di ephod, ya ephod niya etan luput ni meittekkap di pagew ni ephod et ya etan meibalkeh. <sup>6</sup> Ey ipapnget mun hi-gatu etan penget ni netakapan ni balituk ni medal, <sup>7</sup> ey duyangim hu ulu tun lanan olibah et keang-angan tu e neputuk hi-gatun mampeddi. <sup>8</sup> Hedin negibuh ni in-eng-eng mu hi Aaron ey ieng-eng mudda dama u-ungnga tu e pebalwasim ida etan mei-dah ni balwasi da. <sup>9</sup> Ey pebalkeh mun hi-gada etan ida neabel ni balkeh ey papnget mun hi-gada hu penget da. Henin nunya ipahding mun mengi-eng-eng nan Aaron et yadda u-ungnga tun lalaki et hi-gada mampadin ingganah.

<sup>10</sup> I-lim hu lakkitun bakad hinanggan Tabernacle et ita-pew nan Aaron niyadda u-ungnga tu hu ngamay dad ulun nunman ni baka <sup>11</sup> ey keleng mud kad-an kud heggeppan di Tabernacle. <sup>12</sup> Ala kan kuheyaw tu et itdek mu ngamay mu et ha-adam ida etan heni ha-duk ni altar, ey iduyag mu hu edum ni kuheyaw di hengeg nunman ni altar. <sup>13</sup> Ekal mun emin hu taban neikuyeput di egeh niya etan ni altey, et ya etan dewwan basin niyadda neikuyeput ni taba et giheben muddad altar. <sup>14</sup> Ya natdaan ni parteh ni baka e humman ida hu belat, yadda laman, et yadda kinan tu ey gihheben mun emin di a-allaw ni kampu hu kamei-appit tep ya liwat.

<sup>15-16</sup> Ey alam hu hakey etan ni lakkitun kalneroh et itta-pew nan Aaron niyadda u-ungnga tu ngamay dad ulu tu. Keklengen mu et tayaen mu hu kuheyaw tu et iwakgih mud dingding ni altar. <sup>17</sup> Tegteg mu humman ni kalneroh ey ulahim hu egeh tu et ya heli tu et ita-pew mu etan di ulu tu et yadda edum ni parteh ni annel tu, <sup>18</sup> et giheben mud altar. Ya hamuy nunyan kagihheban kamei-appit ey peamleng tuwak.

<sup>19</sup> Alam mewan etan meikkadwan kalneroh et ita-pew nan Aaron niyadda u-ungnga tu hu ngamay dad ulu tu <sup>20</sup> et kelengen mu. Tayam hu kuheyaw tu et ha-adim hu wannan ni tangilan Aaron et yadda u-ungnga tu. Ha-adim daman kuheyaw hu wannan ni amama-an ni ngamay da et ya heli da, ey iwakgih mu hu metdaan ni kuheyaw di dingding ni altar. <sup>21</sup> Ala ka mewan ni kuheyaw et kamdugam ni lanan olibah, et wakgihan mu Aaron et yadda u-ungnga tu anin ni ya balwasi da, ma-lat mei-eng-eng ida niyadda balwasi dan hi-gak.

<sup>22</sup> Ey alam emin hu taban etan ni lakkitun kalneroh ni keklengem, anin taban neikuyeput di egeh niya etan ni altey, et ya etan dewwan basin niyadda neikuyeput ni taba, ya taban ikul tu et ya wannan ni ulpu tu. Huyyan lakkitun kalneroh ni keklengem ey mei-appit di pampeddian nan Aaron et yadda u-ungnga tu. <sup>23</sup> Ala kaddan sinapay ni eleg meha-adan ni kamampelbag ni neiappit ni hi-gak ni neiha-ad di kad-an ku. Ala kan hakey ni sinapay ni neha-adan ni mansikan olibah, ya hakey ni eleg, niya hakey ni meingpih ni sinapay. <sup>24</sup> Petnged muddan Aaron et yadda lalakin u-ungnga tu et ita-gey dan impeang-ang ni hi-gak. <sup>25</sup> Alam ida et giheben mud altar, anin etan ni kalneroh. Ya hamuy idan nunman ni kamei-appit ey kamengippeamleng ni hi-gak. <sup>26</sup> Ya etan pagew ni kinleng mun kalneroh ey ita-gey mu et ipeang-ang mun mei-appit ni hi-gak. Hedin negibbuh ni in-appit mu ey inlam tep humman hu patal mu.

<sup>27</sup> Appil mu hu pagew et ya ulpun etan ni kalneroh ni impeang-ang mun mei-appit ni pampeddian Aaron et yadda u-ungnga tu et idwat mun hi-gada. <sup>28</sup> Et yan edum ni aggew ey hedin man-appit ida helag Israel ni pekiddagyuman winu pampesalamatan dan hi-gak e AP-APU, ey meidwat ni ingganah humman ni hi-gada.

<sup>29</sup> Hedin mettey hi Aaron ey meippebeltan ida neieng-eng ni balwasi tud hakey idan u-ungnga tun puttukun yun meihullul ni hi-gatu. <sup>30</sup> Ey humman ni meihullul ni eta-gey ni padi ey ibbalwasi tudda huyyan pitun aggew ni kei-eng-engan tu et han tu ilepun mansilbid Tabernacle et yad Nesantuh ni Kuwaltuh ku.

<sup>31</sup> Ya etan pagew et ya ulpun kalneroh ey iheeng mud nengilinan ni lugal. <sup>32</sup> Kennen Aaron niyadda u-ungnga tudda humman anin ya etan sinapay ni neiha-ad di basket di heggepan di Tabernacle. <sup>33</sup> Hi-gadan ebuh ni padi hu dammutun mengngan idan nunman ni mei-appit ni ke-kalan ni liwat da. Eleg mabalin ni kennen ni kumpulmih ni tuu ida humman, tep neieng-eng ida humman ni detag. <sup>34</sup> Ey hedin wada sindaan dan nunman ni detag winu sinapay ni kewa-waan tu, ey mahapul ni giheben mu. Eleg mabalin ni kennen ida humman tep neieng-eng.

<sup>35</sup> Henin nunman hu pehding yun mengippahding nunman ni elaw ni pampeddian nan Aaron et yadda u-ungnga tu. Ipahding yudda huyyan pitun aggew. <sup>36</sup> Kewa-wa-wa ey keleng yu hu hakey ni kilaw ni lakkitun baka et meiappit ni ke-kalan ni liwat. Ey pan-appit kayun pengippahdingan yun elaw ni panlinnih ni altar, ey duyagi yun lanan olibah et maibilang ni malinih niya mei-eng-eng. <sup>37</sup> Pitun aggew hu pengippahdingan yuddan nunya. Hedin negibbuh ey neieng-eng law ni pan-appitan humman ni altar, et emin hu meittummuk diman ey mei-eng-eng nan Apu Dios."

<sup>38</sup> Kan APU DIOS nan Moses ey "Ya i-appit yun kewa-wa-wa ey ya dewwan hantoon ni kalneroh <sup>39</sup> e hakey ni kakkabbuhhan niya hakey ni mahmahdem. <sup>40</sup> Ya etan i-appit yun kakkabbuhhan ni hakey ni kalneroh ey unnudi yun umlaw di hakey ni kiloh ni alinah ni nekamdugan ni hambusih ni mansika. Ey iappit kayun hambusih ni meinnum. <sup>41</sup> Et ya etan i-appit yun mahmahdem ni hakey ni kalneroh ey unnudi ya daman nan-inggeh kedakkel tun alinah, ya mansikan olibah niya meinnum. Huyyaddan kamei-appit ey megihheb ida et hi-gak e DIOS ey um-amlengngak ni hamuy da.

<sup>42</sup> Meippalpun nunya ey man-appit kayun tutu-uk ni kewa-wa-wa, anin idallin helag yun edum ni aggew di heggepan di Tabernacle e kad-an ku, ma-lat makihummanganak ni hi-gayudman. <sup>43</sup> Mekiddammu-ak idan tutu-uk diman di Tabernacle, tep neieng-eng humman ni hi-gak tep wada-ak diman. <sup>44</sup> Em, mei-eng-eng ni hi-gak etan Tabernacle niya altar, anin hi Aaron niyadda u-ungnga tu et mansilbiddan hi-gak. <sup>45</sup> Mekihha-addak idan helag Israel e tutu-uk et hi-gak hu Dios da. <sup>46</sup> Ey amtaen da e hi-gak hu AP-APU e Dios dan nengipa-kal ni hi-gadad Egypt. Em, mekihha-addak ni hi-gada tep hi-gak dedan hu AP-APU e Dios da."



## 30

*Ya inhel APU DIOS ni pengiggihheban dan kamei-appit ni bangbanglu*

<sup>1</sup> Kan mewan APU DIOS nan Moses ey "Ala kayun keyew ni akasyah et mengapya kayun altar ni pengiggihheban ni bangbanglun insensoh ni i-appit yun hi-gak. <sup>2</sup> Kuwadladuh huyya e ya kadinukkey tu et ya kalinakkeb tu, ey hampulut walun pulgada ey tellun piyeh kasina-gey tu. Ikapya yu hu umdewdew ni heni ha-duk di ta-pew idan epat ni dugu tu e meihakkey hu kapkappa tu etan di altar. <sup>3</sup> Takapi yu huyyan altar ni balituk, ya tapew tu, yadda etan dimmewdew ni heni ha-duk, ya nanlinikweh ni gilig tu. <sup>4</sup> Ikapya yu hu dewwan netullikeng ni balituk di daul ni gilig tun pengidduddukan etan ni dewwan pan-attang. <sup>5</sup> Pengapya kayun dewwan akasyah ni pan-attang e netakapan ni balituk. <sup>6</sup> Iha-ad mudda huyyad ba-hil ni kuwaltuh ni keihha-adan etan ni Kaban ni neiha-adan idan neitudekan ni Tugun ku."

<sup>7</sup> Ey yan kekakkabbuhhan ni an pengippaptekan nan Aaron idan kengkeh, niya pengihheban tun bangbanglun insensoh di altar. <sup>8</sup> Hanniman ni hileng ni tu pengintegangan idan kengkeh e umgiheb ni bangbanglun insensoh. Mahapul ni pehding tun ingganah huyya anin idan helag yullin edum ni aggew. <sup>9</sup> Entan tu iappit di altar hu eleg meibbillang ni malinih ni bangbanglun insensoh winu kumpulmih ni kagihheban kamei-appit henin pagey niya meinnum.

<sup>10</sup> Ippahding Aaron hu elaw ni panlinnih nunyan altar ni pinhakkey ni hantoon e hadan tuddan kuheyaw ni animal ni kamei-appit tep ya liwat ni tutu-u etan epat ni dugu tun heni ha-duk. Mahapul ni pehding yun ingganah huyya tep mei-eng-eng huyyan altar ni hi-gak e AP-APU."

*Ya intugun APU DIOS ni ibbayad idan tutu-u*

<sup>11</sup> Kan mewan APU DIOS nan Moses ey <sup>12</sup> "Hedin billangen mudda edum mun helag Israel ey mahapul ni ya hanhakkey ni hi-gada ey wada ibbayad dan hi-gak ni pihhuh ni wa-hin annel dan nunman ni kebillangan da ma-lat endi um-alin ligat ni hi-gada. <sup>13</sup> Ya ibbayad ni hakey ni tuu ey meippuun di kameunnud ni olden meippanggep ni Tabernacle. Humman ni pihhuh ey i-appit dan hi-gak. <sup>14</sup> Mekibbilang ida dewampulu winu nehuluk hu toon tu. <sup>15</sup> Huyyan bayad ni annel yun idawat yun hi-gak ey man-iinggeh, kedangyan winu newetwet. <sup>16</sup> Dawat mudda huyyan ibbayad idan edum mun helag Israel, et ussalen mun mengippaptek ni Tabernacle. Huyyan ibbayad da ey heni wa-hin biyag da ey mengippenemnem ni hi-gak et ipaptek kudda."

*Inhel APU DIOS ni mengapyaddan besen ni pan-ullahan ni padi*

<sup>17</sup> Kan mewan APU DIOS nan Moses ey <sup>18</sup> "Pengapya kayun giniling ni besen niya giniling ni pengippettukan tu. Iha-ad yu huyyad nambattanan ni Tabernacle et ya altar. Ha-adim ni danum <sup>19-21</sup> et pan-ulahan nan Aaron niyadda u-ungnga tun ngamay da niya heli da, et han ida lumaw di Tabernacle di kad-an ku, niya hedin da gihheben hu kamei-appit di altar. Mahapul ni u-unnuden da huyya ma-lat eleg ida matey. Huyyan olden ey mahapul ni u-unnuden idan helag Israel ni ingganah."

*Ya inhel APU DIOS ni pehding dan mengapyan lana*

<sup>22</sup> Kan mewan APU DIOS nan Moses ey <sup>23</sup> "Ala kan kekakkayyaggud ni bangbanglu: Ya mir e umlaw di enem ni kiloh, ya tellun kiloh ni cinnamon, ya tellun kiloh ni unah, <sup>24</sup> ya enem et kagedwah ni kiloh ni cassia et ya hanggalon ni lanan olibah, <sup>25</sup> et pangkakamdug mudda et mengapya kan lanan neieng-eng ni ussalen ni padi. <sup>26</sup> Usal mu huyyan pengi-eng-engan mun Tabernacle, ya Kaban Apu Dios, <sup>27</sup> ya tebol, yadda ngunut diman, ya etan pengippettukan ni kengkeh, yadda ngunut ni meussal diman, niya etan altar ni pengiggihheban ni bangbanglu. <sup>28</sup> Hanniman daman altar ni pengiggihheban ni kamei-appit, yadda ngunut diman, ya etan besen et ya etan pengippettukan tu. <sup>29</sup> Duyagim ni lana ida huyya et mei-eng-eng idan hi-gak. Ey emin ida meittummuk idan nunya ey mei-eng-eng idan hi-gak. <sup>30</sup> Duyagim ni nunyan lana hu ulun Aaron niyadda ulun u-ungnga tun pampeddian da et mansilbiddan hi-gak. <sup>31</sup> Ehel muddan edum mun helag Israel e itultuluy dan mengapyan nunman ni lana et usalen yun ingganah ni pandeeyawan yun hi-gak. <sup>32</sup> Eleg mabalin ni mu idduyag di ulun kumpulmih ni tuu ey eleg mabalin ni mu iu-unnud et kumapya kan ussalen mud hipan pinhed mun pengi-ussalan. Tep huyya ey neieng-eng di pinhed kun kei-ussalan tu e beken di nalgem hu pengi-ussalan mu. <sup>33</sup> Ya etan tuun mengi-unnud ni mengapyan henin nunya winu mengidduyyag di kumpulmih ni tuu e beken ni padi ey eggak law ibbilang ni tuuk."

*Ya inhel APU DIOS ni pengapyan bangbanglun insensoh*

<sup>34</sup> Kan APU DIOS nan Moses ey “Ala kan bangbanglun henin resin, ya mollusk, ya galbanum niya nemahmah ni frankincense e man-iinggeh kedakkel da, <sup>35</sup> et mengapya kan bangbanglun insensoh. Edumim ni ahin ma-lat memahmah, ey beken ni nalgem pengi-ussalan yu. <sup>36</sup> Giling mu edum idan nunman et mapinu ey inha-ad mud Tabernacle di hinanggan Kaban kun neiha-adan ni nekitbalan ku. Yadman nakka pekiddammuin hi-gam. Huyyan bangbanglun insensoh ey neieng-eng ni hi-gak. <sup>37</sup> Beken ni neala ey ka nengapya et usalem di pinhed mun pengi-ussalan. <sup>38</sup> Ya etan tuun mengapyan henin nunya et usalen tud pinhed tun pengi-ussalan ey eggak law ibbilang ni tuuk.”

## 31

### *Yadda mengapyan Tabernacle*

<sup>1</sup> Kan mewan APU DIOS nan Moses ey <sup>2</sup> “Pinilik hu hakey ni helag Judah e hi Besalel e u-ungngan Uri e u-ungngan Hur. <sup>3</sup> Winedak ni hi-gatu hu Ispirituh ku et maweda laing tun mengapyan hipan neal-alkusan. <sup>4</sup> Nelaing ni mengapyan kakkayyagud ni ngunut e ya balituk, ya silber niya giniling hu tuka ussalan pan-alkus tu, <sup>5</sup> anin idan mealkusan ni nenginan batu. Nelaing pay ni man-e-dih ey mampaat ni hipan usal ni kayyagud ang-ang tu.

<sup>6</sup> Pinilik dama hi Oholiab e u-ungngan Ahishamak e helag Dan ni umbaddang ni hi-gatu. Wadadda pay edum ni pinilik et wadaen kun hi-gada hu et-eteng ni kabaelan dan mengippahding idan nunyan inhel kun pekapyam: <sup>7</sup> ya Tabernacle, ya etan Kaban kun neiha-adan ni nekitbalan ku, ya hu-keb tu, niya hipan ngunut ni mahapul di Tabernacle <sup>8</sup> henin tebol, yadda ngunut diman, ya etan balituk ni pengippettukan ni kengkeh et yadda meussal diman, <sup>9</sup> ya altar ni pan-appitan yun keklengen yu, yadda emin ni ngunut ni meussal diman, ya etan besen ni pan-ullahan niya pengippettukan tu. <sup>10</sup> Hi-gada pay hu menguggut idan balwasin padin ussalen nan Aaron niyadda u-ungnga tun pampeddian da. <sup>11</sup> Ey hi-gada hu mengapyan lana niya bangbanglun insensoh ni meussal di Nesantuh ni Kuwaltuh. Hedin kapyaan dadda huyya ey mahapul ni paka-unnuden da hu inhel kun hi-gam ni pengapya yu.”

### *Ya inhel APU DIOS ni pehding dan Sabaduh e kamengillin aggew*

<sup>12</sup> Kan mewan APU DIOS nan Moses ey <sup>13</sup> “Ehel muddan edum mun helag Israel et eleg ida mangngunnun Sabaduh tep humman peginemnemman yun ingganah ni nekitbalan kun hi-gayu, et hi-gak e AP-APU yu ey impambalin dakeyun tuuk.

<sup>14</sup> Em, endi mangngunnun nunman ni aggew tep kamengillin humman ni aggew. Hedin wada manghay et mangngunnun nunman ni aggew, mahapul ni mettey. <sup>15</sup> Tep wada enem ni aggew ni pingingunuan yun emin ni ngunu yu, nem yan meikkeppitun aggew e Sabaduh e pan-iyatuan yu ey nakka ngillina. Et humman hu, hedin wada kahing et mangngunnun nunman ni aggew, mahapul ni mettey. <sup>16</sup> Hi-gayuddan helag Israel ey mahapul ni ngillinen yu huyyan aggew ni ingganah et peginemnemman yun etan ni nekitbalan kun hi-gayun ingganah. <sup>17</sup> Huyya peginemnemman yun hi-gak ni ingganah tep hi-gak ni AP-APU yu ey enem ni aggew hu nanletuan kun kabunyan niya puyek et yan kapitun aggew ey nan-iyatu-ak.”

<sup>18</sup> Ginibbuh Apu Dios ni inhel ida huyyan nan Moses, et idwat tu etan dewwan batun neitudkan ni Tugun tu.

## 32

### *Nengapyadda etan tuun balituk ni baka et dayawen da*

<sup>1</sup> Nebayag hi Moses di duntug et maemung ida edum tun helag Israel di kad-an Aaron et kandan hi-gatuy “Pengapya ka ew ni dios tayun mengippenggulun hi-gatsu tep hi Moses e nengipengulun hi-gatsun neni-yan ni Egypt ey endin kaum-ali. Eleg tayu amta hu nekapan hi-gatu etan di linawwan tu.” \*

<sup>2</sup> Et kan Aaron ni hi-gaday “Hedin hannitan, pan-i-li yudda hu balituk ni betling idan ahwa yu niya u-ungnga yu.” <sup>3</sup> Et pan-ekalen da hu betling da et idwat dan Aaron. <sup>4</sup> Ineyug Aaron ida humman et mengapyan balituk ni baka. Inang-ang da humman ey kandy “Hi-gatsun helag Israel, huyya hu dios tayun nengipengulun hi-gatsun neni-yanan tayun Egypt.”

<sup>5</sup> Dingngel Aaron humman ey nengapyan pan-appitan di etan ni balituk ni baka et kantun hi-gada ey “Yan kabubuhan ey mampiyestah itsu et dayawen tayu eya AP-APU tayu.” <sup>6</sup> Yan kakkabbubuhan ni newa-waan tu ey himmalem an ida etan tuu e nan-ilaw da hu animal dan gihheben dan i-appit da niyadda animal ni i-appit dan pekiddagyuman

\* 32:1 32:1 Acts 7:40

dan APU DIOS. Et manhahamul ida etan tuu et manginum ida ey nenattayyaw idan penaydayaw da etan ni kinapya dan bukan dios da. †

<sup>7</sup> Entanni ey kan APU DIOS nan hi Moses ey “Papuut mu et mandayyu ka tep dingkug da-ak idan tuun impangulum ni neni-yan ni Egypt et deh e daka kapkapyaa lawah. <sup>8</sup> Kinehing dan emin hu tugun kun hi-gada et deh, nengapya idan balituk ni bukan daka daydayawa et i-appitan da. Kanday humman hu dios dan nengipengulun hi-gadan neni-yan ni Egypt. <sup>9</sup> Nemahhig hu ngehay da. <sup>10</sup> Entan tudda idleppep tep petteyen kudda gapuh ni bunget ku. Et hi-gam ni ebuh e Moses hu metdaan ni mehlag ni dakel.”

<sup>11</sup> Nem nampehemhemmek hi Moses nan AP-APU e Dios tu e kantuy “APU DIOS, entan ahan tu pamehig hu bunget idan eyan tuum e himmek mu, et pa-kal muddad Egypt ni nengipeang-angan mun et-eteng ni kabaelam. <sup>12</sup> Hedin pehdng mu etan kammu e endien mudda, penghel nguiddan iEgypt e ya gaputun nengipenguluhan mudda, ey mal-pateyen mudda et endi metdaan ni hi-gada. Entan ahan bunget. Anusim ida et eleg mudda pateyen. <sup>13</sup> Nemnem mu e inhel mudda lan bega-en mu e hi Abraham, hi Isaac et hi Jacob e kammun hi-gaday pedakkel mu helag da, et heniddan bittuwan di kabunyan e eleg mebillang. Ey nemnem mu e kammuy ya helag da hu pengidwatan mun etan ni bebley ni kammun panha-adan dan ingganah.” <sup>14</sup> Dingngel APU DIOS et eleg tudda pateyen.

<sup>15</sup> Nandayyud Moses di kad-an idan edum da e inla tu etan dewwan batun netudekan di nambina-hil ni Tugun Apu Dios. <sup>16</sup> Kinapyan Apu Dios ida humman ni batu et itudek tuddadman hu Tugun tu.

<sup>17</sup> Kamenetteng di Moses nan Joshua ey dingngel Joshua hu ngaladdan tuu et kantun Moses ey “Kele henidda kamanggugubat di nangkampuan tayu?”

<sup>18</sup> Ey kan Moses ey “Ya met hu nakka pengngel ey beken ni ngalan kamenga-apput winu palak ni kamangkeapput, nem henidda kaman-a-appeh.”

<sup>19</sup> Yan kamangkeihnup di Moses di kampu da etan di hengeg ni duntug, ey inang-ang tu etan balituk ni bukan kinapya da e daka itattayyaw, ey nemahhig hu bunget tu et itengba tu etan dewwan batun singnged tu et mepeni-ang ida. <sup>20</sup> Inla tu etan balituk ni bukan kinapya da et ayugen tu. Entanni et pambalin tun heni dep-ul et ikamdug tud danum et painum tun hi-gada.

<sup>21</sup> Kantun Aaron ey “Hipa impahding ida eyan tuun hi-gam et mu in-abulut ni da pehdng huyyan nemahhig ni liwat?”

<sup>22</sup> Ey kan Aaron ey “Entan bunget ni hi-gak tep inamtam e ya lawah hu pinhed dan peteg ni ippahding. <sup>23</sup> Kandan hi-gak ey ‘Pengapya ka kuman dios tayun mengippengulun hi-gatsu tep hi Moses e nengipengulun hi-gatsu et hi-yanen tayu Egypt ey endin kaum-ali. Eleg tayu amta hu neipahding ni hi-gatu etan di linawwan tu.’ ‡ <sup>24</sup> Et ehlen ku law ni hi-gadan pan-i-ali dan hi-gak hu balituk ni betling da et pan-ibkah kud apuy ey neukat ali eya balituk ni baka!”

<sup>25</sup> Nem inamtan Moses e in-abulut Aaron ida etan tuun mengippahding ni nunman ni pinhed da, et gapun nunman ey kangi-ngi-ngiiddan buhul da. <sup>26</sup> Et an umehngeng hi Moses di heggeppan di kampu et itkuk tu e kantuy “Hi-gayuddan neminhed ni menaydayaw nan APU DIOS ey keappil kayud dih.” Ey ebuh ida helag Levi ni limmaw di kad-an tu.

<sup>27</sup> Et kantun hi-gaday “Kan APU DIOS e kadaydayawan ammed tayu la e hi Israel ey, yu ala pingway yu et pampateyen yudda eya edum yu e ipalpu yud dih ingganah di ba-hil. Pampatey yu anin agi yu, gagayyum yu winu sinakdul yu.” <sup>28</sup> Inu-unnud da huyyan inhel Moses et pampateyen dadda ey tellun libu hu pintey dan nunman ni aggew.

<sup>29</sup> Entanni ey kan Moses idan nunman ni helag Levi ey “Yan nunyan aggew ey meappil kayu et eleg kayu meika-dum di edum yun helag Israel, tep nambalin kayun padin mansilbin APU DIOS, tep inu-unnud yu inhel tun pehdng yu et anin ni agi yu niya u-ungga yu ey impakipetey yu. Et gapun nunman ey bendisyonan dakeyun APU DIOS.”

<sup>30</sup> Nawa-wan nunman et kan Moses ida etan ni tuuy “Nemahhig ni liwat nunman ni impahding yu. Nem mantetyeddak mewan di duntug di kad-an APU DIOS, et nak makihummangan ni hi-gatu hedin mabalin anhan ni pesinsahan dakeyu.”

<sup>31</sup> Et maibanggad mewan hi Moses di kad-an APU DIOS et kantun hi-gatuy “Eteng hu nanliwatan idan nunman ni tuu tep nengapyaddan balituk ni baka, et kanday humman hu dios dan deyyawen da. <sup>32</sup> Nem anin anhan ni hanniman ey hemek mudda et pesinsahan mu humman ni impahding da. Tep hedin eleg mu pesinsahidda, ekal mu ew hu ngadan kud nengilistaam ni ngadan idan tuum.” §

† 32:6 32:6 Tibbon yuy 1 Corinthians 10:7. ‡ 32:23 32:23 Acts 7:40 § 32:32 32:32 Revelation 3:5

<sup>33</sup> Nem kan APU DIOS ey “Eleg mabalin. Ebuh ida etan nanliwat ni hi-gak ni e-kalen ku ngadan da. <sup>34</sup> Lakkay kuma et ipengulum ida et lumaw kayu etan di bebley ni inhel kun nunman ni lawwan yu, yaggud wada hu anghel kun mengippaptek ni hi-gayu. Nem kastiguen kuddalli huttan ni tuu gapuh ni nunman ni impahding da.”

<sup>35</sup> Entanni ey impaeli tu-wangun APU DIOS hu degeh idan nunman ni tuu gapuh ni nunman ni impahding da e impilit dan Aaron ni mengapyan balituk ni baka et dayawen da.

### 33

*Ya nanghelan APU DIOS nan Moses ni hi-yanen da Sinai*

<sup>1</sup> Kan mewan APU DIOS nan Moses ey “Hi-gam niyadda edum mun helag Israel ni impangulum ni nalpud Egypt, hi-yan yu Sinai et lumaw kayu etan di bebley ni insapatah kun Abraham, hi Isaac et hi Jacob ni pebeltan kun helag da. <sup>2</sup> Um-itu-dakkak ni anghel ni mengippangngulun hi-gayu et degyunen tudda Kanaanite, yadda Amoritte, yadda Hittite, yadda Perisite, yadda Hibite et yadda Jebusite ni nambebley diman et hi-gayu maihullul. <sup>3</sup> Wadan emin hu mahapul yudman ni bebley e kamehawwahawwal hu gatas niya danum ni putsukan. Nem eggak mekillaw ni hi-gayu tep manghay kayu. Entanni kumedek ey pebungnet yuwak et pampetteyen dakeyud dalan.”

<sup>4</sup> Dingngel da huyyan inhel APU DIOS ey ida kaumlelemyung e eleg da pinhed ni ussalen hu gangam da. <sup>5</sup> Tep kan APU DIOS nan Moses ey “Ehel mun hi-gada e kangkuy: Manghay kayu! Et humman hu, anin na-mun nekemtang hu pekillawwak ni hi-gayu et bahbahren dakey. Ekal yudda inusal yun gangam yu henin betling niya balituk ni banggel et nemnememek hedini hipa pehding kun hi-gayu.” <sup>6</sup> Et meippalpun eman ni neni-yanan dan nunman ni Duntug e Sinai, ey eleg ida law man-ussal idan gangam da.

*Ya meippanggep ni tabernacle*

<sup>7</sup> Kaikkapyan Moses hu tabernacle \* di a-allaw ni kampu da ma-lat hedini wada nemihedi ni mekihummangan nan APU DIOS ey kaumlaw diman.

<sup>8</sup> Hedini limmaw hi Moses diman tabernacle ey kaum-ehngeng ida tutu-ud habyen ni kampu da et ang-ang-angen da hi Moses ingganah umhegep. <sup>9</sup> Ey ya etan heni tukud ni kulput ey kamelehbeng di heggeppan di tabernacle hedini himmegep hi Moses ni mekihummangan nan APU DIOS e wada etan di kulput. <sup>10</sup> Hedini inang-ang idan helag Israel huyyan kulput ni nelehbeng di heggeppan ni tabernacle, ey um-ehngeng idad heggeppan ni kampu da et manyuung ida. <sup>11</sup> Kamekihinnangga hi APU DIOS nan hi Moses ni mekihummangan e henin kapanhummanganin dewwan tuun hanggayyum. Hedini negibbuh idan nanhummangan, nambangngad hi Moses di kampu da, nem hi Joshua e nehiken ni u-ungngan Nun ni kaumbabbaddang ni hi-gatud tabernacle ey wadan neyuni diman.

*Ya nenang-angan nan Moses ni dayaw APU DIOS*

<sup>12</sup> Kan Moses nan APU DIOS ey “Kammuy ippanguluk ida huyyan tutu-u et lumaw kamid bebley ni kammun lawwan mi, nem eleg mu ehelen hedini hipadda mekillaw ni hi-gak. Kammuy mewan ey neka-amta muwak ey kamengippeamleng ni hi-gam hu nakka pehpending. <sup>13</sup> Hedini makulug, peamtam tep anhan ni hi-gak ni emin hu planuh mu et amtaen ku niya ma-lat ipahding ku hu pinhed mu. Ey nemnem mu anhan e pinilim ida huyyan tuum.”

<sup>14</sup> Ey kan APU DIOS nan Moses ey “Hi-gak mismuh hu mekillaw ni hi-gam ma-lat luminggep ka, ey ma-lat kayyaggud ni emin hu meippahding ni hi-gam.” <sup>15</sup> Kan Moses ey “Mukun humman hu kangku ey tep hedini eleg ka mekillaw ni hi-gami ey heballi di deya kami, eleg kami meglid. <sup>16</sup> Ey inna-nun edum ni tutu-un mengamta e pinpinhed mudda eya tutu-um ey pinpinhed muwak, hedini eleg ka mekillaw ni hi-gami? Tep hedini mekillaw kan hi-gami ey humman keang-angan tu e hin-appil kamiddan edum ni tuu eyad puyek.”

<sup>17</sup> Ey kan APU DIOS nan Moses ey “Nakka ebbuluta huttan ni imbagam tep nakka man-am-amleng ni muka pehpending ey kayyaggud muka pekiddagyumin hi-gak.”

<sup>18</sup> Entanni ey wada mewan hakey ni imbagam Moses nan APU DIOS. Kantuy “Attu anhan et peang-ang mun hi-gak hu dayaw mu?”

<sup>19</sup> Hinumang APU DIOS e kantuy “Peang-ang kun hi-gam hu kakinayyaggud ku ey peamtak ni hi-gam e hi-gak hu AP-APU. Ey peang-ang ku pay hu binabbal niya hemek kuddan tuun pinhed ku. † <sup>20</sup> Nem eleg mabalin ni ang-angen mu angah ku, tep mettey

\* 33:7 33:7 Huyya nin tabernacle hu pekiddammuan ni helag Israel ni Dios da tep eleg ni mekapya etan ustuh ni Tabernacle. † 33:19 33:19 Romans 9:15

hu tuun menang-ang ni angah ku. <sup>21</sup> Ehneng ka eyad batun takdul ku. <sup>22</sup> Ihha-ad daka ni eyad dehak ni batu et hanian dakan ngamay ku ingganah melebbahhak, <sup>23</sup> et hannak ekala ngamay ku et ang-angen mun ebuh beneg ku, nem eleg mu ang-anga angah ku.”

## 34

*Ya etan dewwan batun neitudkan ni Tugun ni nei hullul etan di nemangulun binahbah Moses*

<sup>1</sup> Kan APU DIOS nan Moses ey “Pahek kan dewwan batun heni eman lan nemangulu, et ipidwak ni ittudek etan intudek ku la etan idad nemangulun batun binahbah mu. <sup>2</sup> Et yan kakkabbuhhan ni kabbuhhan ey panteyed kalli mewan eyad Duntug e Sinai et mandammu itad tuktuk tu. <sup>3</sup> Endi an meki-lin hi-gam ey endidda an mandaladalan di hengeg nunyan duntug anin idan kalneroh winu baka.” <sup>4</sup> Inu-unnud Moses et pumehek ni dewwan batu et humelaman ni limmaw etan di tuktuk ni Duntug e Sinai e intabin tudda humman ni dewwan batu.

*Nanhummangan mewan di APU DIOS nan Moses etan di tuktuk ni duntug*

<sup>5</sup> Limmehbeng etan kulput ni kad-an APU DIOS ey immen hi Moses e immehngeng. Et ehelen tun Moses e ya ngadan tu ey APU DIOS. <sup>6</sup> Nelabah hi APU DIOS di hinanggan Moses et kantun hi-gatuy “Hi-gak ni AP-APU e Dios ni kabbabbal ni peteg. Beken nak ni kabbubunget. Ey eleg melumman hu impeminhed kuddan tuu, ey nakka ippahding ni emin hu inhel ku. <sup>7</sup> Pannananeng ku impeminhed kuddan manhahayned ni helag yu, ey pessinsahan ku emin liwat da anin idan etan nangehay ni hi-gak. Nem eggak hehmeka, et kastiguen kuddalli u-ungnga da, yadda inap-apu da niyadda inap-apuddan inap-apu da.” <sup>8</sup> Ey nanlukbub hi Moses di puyek et dayawen tu Apu Dios.

<sup>9</sup> Et kantun APU DIOS ey “APU DIOS, hedin makulug ni muka pan-amlengi eya nakka pehpending, ibbagak anhan ni hi-gam e mekillaw kan hi-gami. Et anin ni nemahhig hu ngehay ida eyan tuu, pesinsahim anhan hu lawah ni impenahding mi ma-lat abuluten dakemin tuum.”

<sup>10</sup> Hinumang APU DIOS hi Moses et kantuy “Ku em tep. Mekittebbalannak ni nunyan hi-gayuddan helag Israel. Emin kayu ey ang-angen yuddalli kamengippetngan pehding kun panyaggudan yun endi henin nunman ni neipahding di edum ni bebley eyad puyek. Hi-gak e AP-APU yu ey pehding kuddalli humman et ang-angen alin emin ni tuu. <sup>11</sup> Mahapul ni u-unnuden yun helag Israel ida eya Tugun ni e-helen kun nunyan hi-gam. Ey e-helen kun hi-gam e yallin ngannganih dettengan yud bebley ni inhel kun lawwan yu, ey degyunen kudda nambebley diman ni Amorite, Kanaanite, Hittite, Perisite, Hibite et ya Jebusite. <sup>12</sup> Ang-ang yu et eleg kayu makidagyum idan nambebley di lawwan yu tep mambalin idan heni bitun keknaan yu. <sup>13</sup> Pambahbah yu kumadda etan daka pan-appisi, anin idan batun neieng-eng ni dios da, et yadda tukud ni daka penginelemnemin Asherah e biin dios da. <sup>14</sup> Entan tu dayaw hu edum ni dios tep hi-gak e AP-APU ey eggak pinhed ni wada edum ni yu deyyawen ni dios e beken ni hi-gak ni ebuh.

<sup>15</sup> Entan nisi pekidagyum yuddan tutu-un nambebley di lawwan yu heniddan etan ni daka pebeyyad annel da niyadda etan kaman-appit di beken ni makulug ni dios. Tep hedin mekidagyum kayun hi-gada ey ewwisen dakeyun menaydayaw idan dios da, et lektattuy meewwis kayu. <sup>16</sup> Ey lektattuy nan-iahwaddan u-ungnga yun lalakki hu bibi-i da et hi-gada umhulun ni pengiwallengan dan hi-gak e ya edum ni dios hu deyyawen da. <sup>17</sup> Entan pengapyan dios yun deyyawen yu.

<sup>18</sup> Mahapul ni itultuluy yun pehding ni pitun aggew hu Piyestah ni Sinapay ni eleg meha-adan ni kapampelbag ni memengngulun bulan ni katootoon, tep yan nunman ni bulan hu neni-yanan yun Egypt.

<sup>19</sup> Emin hu nemangulun lalakkin impah ni animal yu henin baka yu niya kalneroh ey bagik ida. <sup>20</sup> Dammutu mewan ni ihhullul yu hu impah ni kalneroh di nemangulun impah di kebayyu et humman mei-appit. Nem hedin eleg yu pinhed ni hullulan, ey hepung yu buklew nunman ni kebayyu. Ey ya pengulwan ni lakin u-ungnga yu ey mahapul ni beyyadan yu, et maibangngad idan hi-gayu. Mahapul ni emin kayu ey man-appit kayun hi-gak.

<sup>21</sup> Mahapul ni enem ni aggew ni ebuh pangngunuan yun hanlingguan. Entan pangngunu yun meikkeppitun aggew anin ni ahigaud winu ahiani ma-lat man-iyayatu kayu. <sup>22</sup> Ey mahapul ni pehding yu hu Piyestah ni Ani hedin negibbuh hu ahiani. Ey ipahding yu hu Piyestah ni Kampu hedin nedateng ida lameh ni intanem yu. <sup>23</sup> Niya mahapul ni yan hantoon ey mampitluddan un-alin emin hu lalakkin helag Israel ni mampresentah ni hi-gak e AP-APU e Dios dan helag Israel. <sup>24</sup> Hedin u-unnuden yu huyya e mampitlu kayun un-alid kad-an ku, ey endi mengubbat ni hi-gayu niya endi memilliw

ni bebley yu. Degyunen kudda hu nambebley di bebley ni lawwan yu ma-lat lumakkeh hu bebley yu.

<sup>25</sup> Entan tu iappit hu sinapay ni nekamdugan ni kapampelbag ni pan-appitan yun animal. Hedin man-appit kayun hi-gak ni impah ni kalneroh ni Piyestah ni Passover ey mahapul ni endi tetdaan yun detag ni nunman ni hileng. <sup>26</sup> Ey mahapul ni illaw yud baley ku e AP-APU e Dios hu kekakkayyagudan idan nemangulun lameh ni intanem yu et meiappit ni hi-gak.

Ey entan tu iheeng hu impah ni kalneroh winu gelding di gatas ni inetu.”

<sup>27</sup> Kan mewan APU DIOS nan Moses ey “Itudek mun emin ida huttan ni inhel ku tep huttan ida pengippuunan kun pekitbalak ni hi-gam niyadda edum mun helag Israel.”

<sup>28</sup> Nanha-ad hi Moses di Duntug e Sinai ni na-pat ni aggew ey na-pat ni hileng e impangkadwa tu hi APU DIOS. Yan nunman ni wadaddadman ey eleg mangamangan ey eleg uminuinum. Yan nunman ni tsimpuh hu nengitudekan tud dewwan nedampilag ni batun etan idan Hampulun Tugun nan APU DIOS e huyyadda neipuunan ni nekitbalan tu.

### *Kaumhili angh Moses*

<sup>29</sup> Entanni ey dimmayyu hi Moses di Duntug e Sinai e singnged tudda etan dewwan nedampillag ni batun neitudekan ni Hampulun Tugun APU DIOS. Ey kaumhili angh tu tep nekihuhummangan nan APU DIOS, nem eleg tu amta e kaumhili angh tu. <sup>30</sup> Inang-ang nan Aaron et yadda tutu-u humman ni kaumhilin angh Moses ey ida kaumtakut ni meihnup ni hi-gatu.

<sup>31</sup> Nem ineyagan idan Moses aap-apu ma-lat manhuhummangan ida. <sup>32</sup> Immalidda et ehelen Moses ni hi-gadan emin hu Tugun ni indawat APU DIOS ni hi-gatud Duntug e Sinai. <sup>33</sup> Negibbuh ni immehel hi Moses et manhukyung et mahenian angh tu. <sup>34</sup> Nem hedin himmegep di Tabernacle ni an mekihuhummangan nan APU DIOS, ey tuka e-kala hukyung tu. Hedin immehep et e-helen tuddan tutu-u hu intugun APU DIOS ni hi-gada, <sup>35</sup> ey kaang-angaddan tutu-u hu kaumhilin angh tu. Hedin mewan negibbuh ey kamanhukyung ingganah medetteng mewan hu pekihuhummangan tun APU DIOS.

## 35

### *Ya Tugun ni meippanggep ni Sabaduh*

<sup>1</sup> Inemung Moses idan emin hu edum tun helag Israel et kanton hi-gaday “Mahapul ni u-unnuden yudda huyyan intugun APU DIOS! <sup>2</sup> Yan hanlingguan ey enem ni aggew panggunnaan yu. Ey yan meikkeppitun aggew e Sabaduh ey man-iyatu kayu tep humman ni aggew ey neieng-eng nan APU DIOS. Yadda eleg mengu-unnud et manggunnuddan nunman ni aggew ey mettey ida. <sup>3</sup> Ey eleg mei-ebbulut ni kayu man-epuy di baballey yun nunman ni aggew.”

### *Ya sinenten nan Moses ni i-appit idan tutu-u*

<sup>4</sup> Kan Moses idan tutu-uy “Kan APU DIOS ey: Pan-appit kayun hi-gak. <sup>5</sup> Hedin man-appit kayu, huyyadda dammutun i-appit yu: ya balituk, ya silber niya giniling, <sup>6</sup> ya sinayyumu ni blue, ya purple niya makadlang, ya kayyagud ni luput, ya edum ni luput ni nekapyad dutdut ni gelding, <sup>7</sup> ya katat ni lakkitun kalneroh nambalin ni madlang, ya katat ni mategun wadad baybay, ya keyew ni akasyah, <sup>8</sup> ya lanan olibah ni kameihha-ad di kengkeh, yadda mekappan lanan kaihha-ad di ulu, ya bangbanglun insensoh, <sup>9</sup> ya onyx, yadda edum ni nangkenginan batun meittekkap di ephod ni padi niya luput ni meittekkap di pagew tu. <sup>10</sup> Hi-gayuddan nelaing ni mengippahding ni hipan ngunu, ali kayu et ingunu yudda huyyan pengunnu APU DIOS: <sup>11</sup> ya Tabernacle, ya tuldah ni meihhep, yadda meikkultinah, yadda kawit, yadda meibballabag, yadda tukud niyadda keittu-unan da, <sup>12</sup> ya Kaban APU DIOS, yadda pan-attang, ya etan hu-keb tu, ya etan kultinah di bawang di Kuwaltuh APU DIOS, <sup>13</sup> ya etan tebol, yadda pan-attang, yadda emin hu meussal etan di tebol, niya etan sinapay ni meihha-ad di Kuwaltuh APU DIOS, <sup>14</sup> ya pengippettukan idan kengkeh niyadda etan meussal diman, yadda kengkeh ni meippettuk diman, ya etan lanan meihha-ad di kengkeh, <sup>15</sup> ya altar ni pengiggihheban ni bangbanglun kamei-appit, yadda pan-attang, ya lanan kameihha-ad di ulu ya etan bangbanglun insensoh, ya etan kultinah di heggepan di Tabernacle, <sup>16</sup> ya etan altar ni pengiggihheban ni kamei-appit ni animal, ya etan nelaggan giniling ni pengittapewan ni kagihheban animal, yadda pan-attang, yadda ngunut ni kameussal di pan-appitan, ya etan et-eteng ni besen ni pan-ulahan niya etan pengippettukan nunman, <sup>17</sup> yadda meikkultinah di nanlinikweh di Tabernacle, yadda tukud niyadda pengittu-unan idan nunyan tukud, ya kultinah di heggepan di dallin ni Tabernacle, <sup>18</sup> yadda

paghek ni pengi-ikketan ni Tabernacle, ya dallin tu, yadda iket,<sup>19</sup> yadda balwasin padin ussalen dan pengippahdingan dan ngunu dad Kuwaltuh APU DIOS et yadda neieng-eng ni balwasin Aaron et yadda balwasin u-ungnga tu.”

<sup>20</sup> Entanni ey hini-yan idan emin ni tutu-u hi Moses diman ma-lat da pan-idaddan hu i-appit da. <sup>21</sup> Et emin ida neminshed ni man-appit ey in-ali da i-appit dan APU DIOS ni mahapul ni mekapyad Tabernacle, yadda ngunut diman niyadda ibbalwasiddan padi. <sup>22</sup> Yadda lalakki ey bibi-in neminshed ni um-idwat ni i-appit da ey nan-i-li da balituk ni betling, yadda singsing niyadda banggel. Emin hu klasih ni balituk ni tenged da ey in-appit dan APU DIOS. <sup>23</sup> In-alin edum hu blue, purple niya makadlang ni luput, ya kakkayyagud ni luput,\* ya dutdut ni gelding, ya katat ni lakkitun kalneroh ni nambalin di madlang niya kayyagud ni katat. <sup>24</sup> Yadda edum ey in-ali da giniling winu silber ey in-ali daman edum hu keyew ni akasyah ma-lat iappit da daman APU DIOS.

<sup>25</sup> Nan-i-li damaddan bibi-in nelaing ni memuddun ni kayyagud ni sinayyum ni blue, ya purple, ya makadlang niya kayyagud ni luput. <sup>26</sup> Yadda bibi-in nelaing ni man-ebbel ey immi-liddan inebel dan dutdut ni gelding. <sup>27</sup> In-alidda daman aap-apun helag Israel hu onyx niyadda edum ni nenginan batun meittekkap di ephod niya etan di luput ni meittekkap di pagew ni ephod. <sup>28</sup> In-ali da pay hu pampebanglun kennen, ya lanan olibah ni meihha-ad di kengkeh, ya lanan meihha-ad di ulu niya bangbanglun insensoh. <sup>29</sup> Emin ida helag Israel, yadda bibi-i niya lalakkin neminshed ni man-appit nan APU DIOS, ey in-ali dadda mahapul di pengngunnu tun hi-gadan in-olden tun Moses.

<sup>30</sup> Kan Moses idan tutu-uy “Hi APU DIOS ey pinili tun iddawtan hu hakey ni helag Judah e hi Besalel e u-ungangan Uri e u-ungangan Hur <sup>31</sup> ni kalinaing ni mengapyan hipan pekapy tu, <sup>32</sup> henin mamplennuh ni man-alkus niya mengapyan ngunut e ussalen tu balituk, silber winu giniling. <sup>33</sup> Nelaing pay ni man-e-dih niya mampaot ni batu niya keyew, ey nelaing ni mengapyan kumpulmih ni kayyagud ang-ang tu. <sup>34</sup> Ya pinilin APU DIOS ni pan-e-dum Besalel ey hi Oholiab e u-ungangan Ahishamak e helag Dan. Indawat APU DIOS hu kabaelan dan mengittuddun inamta dad edum da. <sup>35</sup> Ey indawat nan APU DIOS hu laing dan mengapyan kakkayyagud ni banggel, ya betling, ya singsing, ya nambakbaklang ni penguggut ni balwasi, ya pan-ebbel, ya pambordah ni blue, purple ey makadlang di kayyagud ni luput. Indawat tu pay hu laing dan mamplennuh ni pengapya daddan nunman et kayyagud ang-ang da.”

## 36

<sup>1</sup> Et humman hu, hi Besalel, hi Oholiab niyadda edum ni indawtan APU DIOS ni laing hu mengapyan Tabernacle meippuun di olden tu.

<sup>2</sup> Et paeyag nan Moses di Besalel nan Oholiab et ehelen tun illapu dan mangngunnu e hi-gadaddan edum tun indawtan APU DIOS ni laing ni mengingngunnu impangunu tu. <sup>3</sup> Indawat Moses ni hi-gada humman idan in-aliddan tutu-u ussalen dan mengapyan Tabernacle. Kekakkabbuhhan ey kapan-i-aliddan tutu-u hu edum ni iddawt da, <sup>4</sup> et lektattuy limmaw ida huuyan kamangngunnud <sup>5</sup> kad-an Moses et kandan hi-gatuy “Dakel kumamman ni peteg hu nei-lin meussal etan di pekapan APU DIOS.”

<sup>6</sup> Et mengapya hi Moses ni olden ni impalaw tuddan tutu-u. Kantuy “Isiked yu law ni um-i-lin i-appit yun meikkapyad Tabernacle tep nehawal kumamman indawat yu.” Et isiked ida law ni tutu-un um-i-lin meikkapya <sup>7</sup> tep nehawal kumamman in-ali dan meussal di pekapan APU DIOS.

### *Ya nekapyaan ni Tabernacle*

<sup>8</sup> Nengapyadda etan nelaing ni hampulun kultinah e inusal da kakkayyagud ni luput et ya blue, purple niya makadlang ni sinayyum. Ey imborda dadda hu u-ukkul ni anghel. <sup>9</sup> Emin ida huuyan kultinah ey nan-ingngeh ida e umlaw di na-pat et dewwan piyeh hu kadinukkey da niya enem ni piyeh hu kalinakkeb da. <sup>10</sup> Nengapya hi Besalel ni dewwan melakkeb ni kultinah e impandadagsi tun kinugut hu lima idan nunyan kultinah et meikahakey ida. Hanniman dama impahding tu etan ni liman kultinah. <sup>11</sup> Sinullikeng tu hu sinayyum ni blue et ikugut tudda huuyad gilig idan nunman ni dewwan nanggillig ni kultinah. <sup>12</sup> Hannenelima hu ingkugut tun netullikeng di gilig idan nunman ni dewwan kultinah ey nampepetek ida.

<sup>13</sup> Ey nengapyan neliman balituk ni pengippit tun gilig idan nunman ni dewwan kultinah ma-lat meihakkey hu dingding ni Tabernacle. <sup>14</sup> Nengapyan hampulut hakey ni kultinah ni dutdut ni gelding, et ita-kep tudda luput ni kultinah ni Tabernacle. <sup>15</sup> Impaniinggeh tudda humman ni kultinah e ya kadinukkey ni hakey, ey na-pat et liman piyeh niya enem ni piyeh hu kalinakkeb ni hakey. <sup>16</sup> Impandadagsi dan kinugut hu liman

\* 35:23 35:23 Ya luput ey nalpud neitnem ni flax.

nunyan kultinah et meihakkey ida. Hanniman dama impahding dan etan di enem ni kultinah e impandadagsi dan kinugut. Ya etan meikka-nem ni kultinah ey melugpi e meleyyag di heggeppan di Tabernacle. <sup>17</sup> Ingkapyda hanneneliman netullikeng di gilid idan nunman ni lima niya enem ni kultinah ni nandadagsin nekugut. <sup>18</sup> Ey nengapyan neliman giniling ni pengippit tun gilid idan kultinah et meihakkey ida. <sup>19</sup> Nengapyan dewwan tulda ni katat ni lakkitun kalneroh niya kakkayyagud ni katat ni mei-dah. Huyya pengetteped dan Tabernacle.

<sup>20</sup> Nengapyan kalkalimangngan Tabernacle ni akasyah ni keyew. <sup>21</sup> Ya kadinukkey idan nunman ni ingkapyda tu ey hampulut liman piyeh niya kalinakkeb da ey dewwampulut pitun pulgadad. <sup>22</sup> Wada nan-iinggeh ni handedwan dimmewdew di emin etan di frames ma-lat manhuhuup ida. <sup>23-26</sup> Hinead tudda handedwampulu idan nunman di appit ni south niyad north ni Tabernacle. Ey ingkapyda tu newalun silber ni pengittu-unan idan nunman e handedwa neikapyad hengeg ni hakey. <sup>27</sup> Yad awwidan ni Tabernacle di appit ni kakelinnugin aggew ey intuu tu enem idan nunman <sup>28</sup> niya intuu tu hanhakkey di dewwad dugu tu. <sup>29</sup> Humman idan neikkapyad dugu ey nandekep ida meippalpud hengeg tu ingganah di utduk di ta-pew tu e neihhuklub hu netullikeng et mandekep ida. Henin nunman hu impahding tud dewwan dugu tu. <sup>30</sup> Et walun emin ni henin nunman hu ingkapyda tudman ni awwidan ni Tabernacle ey inhaad tu hu hampulut enem ni silber ni pengittu-unan idan nunman et handedwad hakey idan nunman.

<sup>31-32</sup> Nengapyan hampulut liman keyew ni akasyah ni meibballabag etan idad kalkalimangngan Tabernacle. Ingkapyda tu hanlilmad appit ni north, yad south et yad awwidan di appit ni kakelinnugin aggew. <sup>33</sup> Ya etan ida neigawwan neiballabag di gawwaddan nunman ni kalkalimangnga ey neipalpud hakey ni dugu ingganah lad hakey mewan ni dugu. <sup>34</sup> Nengapya pay ni netullikeng ni balituk ni mengged idan meibballabag ni keyew. Ey sinekapan tun balituk huyyan kalkalimangnga, anin idan etan ni meibballabag.

<sup>35</sup> Ya etan kultinah di bawang ni Tabernacle ey kakkayyaggud ni luput et ya blue, purple niya makadlang ni sinayyum hu kinapya da. Ey ya hakey ni nelaing ni manggunnu hu nengibordan u-ukkul ni anghel. <sup>36</sup> Ingkapyaan tudda huyyan kultinah ni epat ni akasyah ni tukud ni netakapan ni balituk, ey epat ni silber ni pengittu-unan idan nunman ni tukud, ey epat mewan ni balituk ni kawit ni pengihhableyan ni kultinah.

<sup>37</sup> Nengapyan hakey pay ni meikkultinah di heggeppan di Tabernacle. Inusal tu kakkayyaggud ni luput et ya blue, ya purple niya makadlang ni sinayyum ey inyayyaggud dan binordaan. <sup>38</sup> Ingkapyaan tu huyyan kultinah ni liman tukud ni akasyah e sinekapan tun balituk. Et ya kawit da niya al-alkus da ey balituk dama. Ya keittu-unan idan tukud ey giniling.

## 37

### *Ya nekapyaan ni Kaban APU DIOS*

<sup>1</sup> Nengapya hi Besalel ni Kaban APU DIOS e inusal tu keyew ni akasyah. Na-pat et liman pulgadad kadinukkey tu, dewwampulut pitun pulgadad kalinakkeb tu, niya dewwampulut pitun pulgadad kasina-gey tu. <sup>2</sup> Sinekapan tun nemahmah ni balituk humman ni Kaban, anin ya bawang tu niya nanlinikweh ni gilid tu. <sup>3</sup> Ey ingkapyda tu epat ni netullikeng ni balituk diman ni Kaban e handedwad nambina-hil. <sup>4</sup> Ey nengapyan keyew ni akasyah ni pan-attang e sinekapan tun balituk, <sup>5</sup> et iduduk tuddadman ni netullikeng di nambina-hil di Kaban.

<sup>6</sup> Kinapya tu nemahmah ni balituk ni hu-keb ni Kaban. Ya kadinukkey tu ey na-pat et liman pulgadad ey dewwampulut pitun pulgadad hu kalinakkeb tu. <sup>7</sup> Nemahmah daman balituk hu kinapya tuddan dewwan u-ukkul ni nepayakan ni anghel. <sup>8</sup> Inhaad tuddad nambinengwah di utduk ni hu-keb ni Kaban e neihakkey hu nengikapyda tu etan di hu-keb. <sup>9</sup> Nanhinnanggadada e nebekyag payak da et hephepan da huyyan hu-keb.

### *Ya nekapyaan ni tebol*

<sup>10</sup> Ginibbuh tu humman et mengapyan tebol e inusal tu hu keyew ni akasyah. Ya kadinukkey tu ey tellun piyeh, ya kalinakkeb tu ey hakey et kagedwah ni piyeh niya nehuluk ni dewwan piyeh kasina-gey tu. <sup>11</sup> Sinekapan tun nemahmah ni balituk huyyan tebol niya nanlinikweh ni gilid tu. <sup>12</sup> Hinu-upan tun tellun pulgadad di nanlinikweh ni gilid tu ey sinekapan tun balituk. <sup>13</sup> Ingkapyaan tun hanhakkey ni netullikeng ni balituk etan epat ni helin nunyan tebol di dugu tu. <sup>14</sup> Ey ingkapyda tudda huyyan netullikeng di daul ni gilid ni tebol. <sup>15</sup> Ey nengapyan keyew ni akasyah ni pan-attang ni nunyan tebol ey sinekapan tun balituk. <sup>16</sup> Ey nengapyan nemahmah ni balituk ni duyun



pengihha-adan ni bangbanglun insensoh, ya basuh, ya pa-nay niya mahukung ni duyun pengidduyagan ni meinnum ni kamei-appit.

*Ya nekapyaan ni pengippettukan ni kengkeh*

<sup>17</sup> Nengapya hi Besalel ni nemahmah ni balituk ni pengippettukan ni kengkeh. Ingkahaakey tun pinanday hu hengeg tu niya palat tu. Ey ingkahaakey tuddan kinapya hu heni basuh niyadda habung ni al-alkus tu. <sup>18</sup> Humman ni pengippettukan ni kengkeh ey enem panga tu e hantetlud nambina-hil. <sup>19</sup> Nei-peng idan nunman ni enem ni panga hu basuh ni heni habung ni almond. <sup>20</sup> Ya etan palat nunman ni pengippettukan ni kengkeh, ey neal-alkusan ni epat ni heni dama habung ni almond, <sup>21</sup> In-epeng tun ingkanya hu hanhakkey ni habung ni eleg mebekyag di daul ni handedwan pangan etan ni pengippettukan ni kengkeh. <sup>22</sup> Huyyaddan habung ni eleg mebekyag et yadda panga ey neihakkey hu kapkappa tud pengippettukan ni kengkeh. Nemahmah ni balituk hu nekapyaan emin idan nunya. <sup>23</sup> Anin idan ipit niyadda melakkeb ni duyun penellukduk ni ngalab, et nemahmah daman balituk hu nekapya. <sup>24</sup> Ya ingkapyaan Besalel di pengippettukan ni kengkeh niyadda emin huyyan meussal ey umlaw ni telumpulut epat ni kiloh ni nemahmah ni balituk.

*Ya nekapyaan ni altar ni pengiggihheban ni bangbanglun insensoh*

<sup>25</sup> Ya etan altar ni pengiggihheban ni bangbanglun insensoh, ey keyew ni akasyah dama hu nekapya. Kuwadladuh e hampulut walun pulgadah hu kalinakkeb tu, ey hampulut walun pulgadah hu kadinukkey tu, ey tellun piyeh kasina-gey tu. Yadda epat ni dugu tu ey dimmewdew ni heni ha-duk ey neihakkey hu kapkappa tud altar. <sup>26</sup> Netakapan hu ta-pew nunman ni altar ni balituk, anin idan dingding tu niyadda etan dimmewdew ni heni ha-duk et yad nanlinikweh ni gilig tu. <sup>27</sup> Ingkappa tu hu handedwan netullikeng ni balituk di nambina-hil nunman ni altar di daul ni gilig tu, et kaidudukan idan pan-attang. <sup>28</sup> Akasyah hu nekapyaddan nunman ni pan-attang e netakapan ni balituk.

<sup>29</sup> Nengapyan lanan neieng-eng ni ussalen ni padi, ey nengapya pay ni nemahmah ni bangbanglun insensoh henin kapengapyan nelaing ni mengapyan bangbanglun insensoh.

## 38

*Ya nekapyaan ni altar ni pan-appitan ni megihheb*

<sup>1</sup> Nengapya pay di Besalel et yadda edum tun altar ni pengihheban ni kamei-appit e inusal da keyew ni akasyah. Huyyan altar ey kuwadladuh e pitu et kagedwah ni piyeh hu kadinukkey tu niya kalinakkeb tu, niya epat et kagedwah ni piyeh hu kasina-gey tu. <sup>2</sup> Ingkappa tu hu heni ha-duk idad ta-pew ni epat ni dugu tun neihakkey hu kapkappa tud altar. Negibbuu ni kinapya tu et takapan tun giniling. <sup>3</sup> Nengapya pay idan meussal di pan-appitan henin baldih ni pengi-ha-adan ni dep-ul, ya pala, ya besin, ya tewik ni detag niya penellukduk ni ngalab. Emin ida huuya ey nekapyad giniling. <sup>4-5</sup> Nengapyan nelaggaan giniling ni meihha-ket di dimmewdew di gawwan bawang ni altar. Ingkappa tu epat ni netullikeng etan di epat ni dugun nunman ni altar ni keiddudukan idan pan-attang. <sup>6</sup> Ey nengapyan keyew ni akasyah ni pan-attang e sinekatan tun giniling. <sup>7</sup> Induduk tudda humman ni pan-attang etan idad netullikeng ni ingkappa tuddad dugun altar ma-lat pengitgedan idan mengi-attang. Tabla hu kinapyan tun altar ey eleg tu det-alan. <sup>8</sup> Kinapya da etan giniling ni besen ni pan-ulahan niya etan giniling ni neipetukan tu e inusal dadda diggal ni indawat idan bibi-in kamangngunnud heggeppan di Tabernacle.

*Yadda kultinah ni Tabernacle*

<sup>9</sup> Ey kinapya da hu dallin ni Tabernacle e nekultinahan ni kakkayyaggud ni luput hu appit ni south e hanggatut et neliman piyeh kadinukkey tu. <sup>10</sup> Ya mengnged nunman ni kultinah, ey dewampulun tukud ni giniling ni meittu-un di dewampulun giniling ni pengittu-unan. Meihhabley ida etan idad silber ni kawit ey silber ni pengihhableyan ni neikapyaddad tukud. <sup>11</sup> Hanniman damad appit ni north e hanggatut et neliman piyeh hu kadinukkey ni kultinah ni meihhabley di silber ni kawit ey silber ni pengihhableyan ni meikkapyad dewampulun giniling ni tukud ni meittu-un di dewampulun giniling ni pengittu-unan. <sup>12</sup> Yad awwidan di appit ni kakelinnugin aggew ey nepitu et liman piyeh hu kadinukkey ni neikultinah e neihabley di hampulun tukud ni neituun di hampulun pengittu-unan. Silber hu nekapyaan kawit niya hableyyan. <sup>13</sup> Hanniman damad heggeppan di dallin ni Tabernacle di appit ni kasimmilin aggew e mekultinahan ni nepitu et liman piyeh kalinakkeb tu.

<sup>14-15</sup> Yadman ni heggeppan ey meikkapya hu dewwan kultinah e hakey ni kultinah di winannan ey hakey di winilli. Handedwampulut dewwa et kagedwah ni piyeh hu kalinakkeb ni hakey. Ey hantetlu hu tukud ni meittu-un di tellun nekapyan pengittu-unan hu pengihhableyan idan nunyan kultinah. <sup>16</sup> Emin ida humman ni kultinah ni neihabley di nanlinikweh di dallin ni Tabernacle, ey kayyaggud ni luput. <sup>17</sup> Ey emin ida neituunan ni tukud ey giniling nekapya, nem yadda kawit niya hableyyan ey silber. Et yadda utduk ni tukud ey netakapan ni silber. Emin ida tukud ey nekapyaan ni silber ni hableyyan.

<sup>18</sup> Yadda kultinah ni neihenid heggeppan ey telumpulun piyeh hu kadinukkey da, ey pitu kagedwah ni piyeh kasina-gey da heniddan etan ni kultinah ni neidingding ni nekapyad kayyaggud ni luput, ey nebordaan ni sinayyum ni blue, purple niya makadlang. <sup>19</sup> Epat hu tukud tu ey neituun idad giniling ni pengittu-unan. Neha-adan daman silber hu utduk da, anin idan neilibed et yadda pengihhableyan ni kultinah ey nekapyad silber. <sup>20</sup> Ey emin ida paghek ni Tabernacle, anin idad nanlinikweh di dallin tu ey giniling hu nekapya.

#### *Yadda neusal di Tabernacle*

<sup>21</sup> Ya bilang ni balituk ya silber niya giniling ni neusal di Tabernacle ey intudek idan helag Levi tep humman in-olden Moses. Hi Ithamar e u-ungngan Aaron e padi hu apu da. <sup>22</sup> Hi Besalel e u-ungngan Uri e u-ungngan Hur e helag Judah hu ingkalgaduh di emin idan nunyan meippahding ni in-olden APU DIOS nan Moses. <sup>23</sup> Bimmaddang ni hi-gatu hi Oholiab e u-ungngan Ahishamak e helag Dan. Nelaing ni man-al-alkus ey mengbordan blue, ya purple niya makadlang ni sinayyum di kayyaggud ni luput.

<sup>24</sup> Hanlibun kiloh ni balituk hu in-aliddan helag Israel ni neusal di Tabernacle. <sup>25-26</sup> Tellun libu et epat ni gatut et telumpulut dewwan kiloh ni silber hu neamung ni indawat idan tutu-u eman ni nebilang da e nekibilang ida lalakkid dewwampulu toon da winu nehuluk e umlaw di enem ni gatut et tellun libu et liman gatut et nelima hu bilang da. <sup>27</sup> Tellun libu et epat ni gatut ni kiloh ni silber hu neusal idad hanggatut ni neituun ni tukud ni Tabernacle, et yadda neituunan ni tukud ni pengihhableyan ni kultinah <sup>28</sup> ey dewwampulun kiloh ni silber hu nekapyan kawit, yadda neibaddeng ni hableyyan ni kultinah niyadda inha-ad dad ta-pew idan tukud, <sup>29</sup> niya dewwan libu et epat ni gatut ni kiloh ni neamung ni giniling ni indawat idan tutu-u. <sup>30</sup> Nekapyadda huuyad keittu-unan idan tukud di heggeppan di Tabernacle, ya altar, ya etan nelagga neiha-ad di bawang tu, et yadda ngunut ni meussal di altar. <sup>31</sup> Neiusal pay hu giniling di neituunan idan tukud ni keihhableyan idan kultinah di nanlinikweh di dallin ni Tabernacle, yad heggeppan, et yadda paghek pengi-ikketan idan kultinah.

## 39

#### *Ya balwasin padi*

<sup>1</sup> Yadda etan nelaing ni menggugut ey nengapyaddan kayyaggud ni luput ni blue, purple niya makadlang et kuguten dan ibbalwasin padin pengippahdingan dan pengunnun APU DIOS. Kinugut da huuyun luput ni ibbalwasin Aaron meippuun di in-olden APU DIOS nan Moses.

<sup>2</sup> Nengapyaddan ephod ni kayyaggud ni luput niya balituk ni heni sinulid ey nebordaan ni blue, ya purple niya makadlang ni sinayyum. <sup>3</sup> Nengapyaddan balituk ni sinulid e minenassilyu da hu balituk ma-lat umingpih et han da genungsing, et mambalin ni heni sinulid et iyayyaggud dan imborda anin etan idan blue, purple et ya makadlang ni sinayyum di diman ni kayyaggud ni luput.

<sup>4</sup> Ya nengapya dan ephod ey dewwan luput ni nan-appil e hakey di hinangga ey hakey di beneg e tetngeden ni dewwa mewan ni luput ni meihhabley di pahhannan. <sup>5</sup> Kayyaggud daman luput hu ingkapyu dan meibalkeh di ephod, ey binordaan dan balituk ni sinulid, ya blue, ya purple niya makadlang sinayyum. <sup>6</sup> Impek et dadda hu batun onyx di balituk et iyayyaggud dan iku-lit hu ngadan idan helag Israel diman henin kapehding ni mengikku-lit ni sinyal. <sup>7</sup> Intakap dadda huuyun batu etan di neihabley di nambina-hil di pahhannan ni ephod. Huuyaddan batu hu penginemnemneman APU DIOS idan helag Israel. Impahding dan emin huuya e inu-unnud da intugun APU DIOS nan Moses.

<sup>8</sup> Nengapyaddan luput ni meittekkap di pagew ni ephod. Nan-ingngeh hu inusal dan nunya etan di kinapya dan ephod ey inyayyaggud da daman binordaan. <sup>9</sup> Kuwadladuh huuyun luput e melugpi et heyam ni pulgaduh hu kadinukkey tu ey kalinakkeb tu. <sup>10</sup> Intakap dadya hu epat ni linyah ni nambakbaklang ni nebalol ni batu: yad etan di nemangulun linyah ey intakap da hu ruby, ya topaz niya garnet, <sup>11</sup> yad meikkadwan

linyah ey ya emerald, ya sapphire niya diamond, <sup>12</sup> yad meikkatlun linyah ey ya turquoise, ya agate niya amethyst, <sup>13</sup> niyad meikka-pat ni linyah ey ya beryl, ya onyx niya jasper. Neitekap idan emin huyyan nebalol ni batud balituk. <sup>14</sup> Neitudek emin hu ngadan idan hampulut dewwan u-unggan Jacob idadman ni nenginan batu et iehnged dan emin hu helag Israel.

<sup>15</sup> Ingkapyaan dan heni nelubid ni bangga ni nemahmah ni balituk huyyan luput ni meittekkap di pagew ni ephod, <sup>16</sup> ey nengapyaddan dewwan netullikeng ni balituk, et ikugut dad dewwan dugun nunman ni luput di ta-pew tu. <sup>17</sup> In-iket da humman ni dewwan nelubid ni balituk di diman ni netullikeng. <sup>18</sup> Ey ya utduk idan nunman ni nelubid ni bangga ey in-iket da etan di dewwan balituk ni neipketan idan batun onyx ni neitekap etan di neihabley di pahhannan ni ephod. <sup>19</sup> Nengapyadda mewar ni dewwan netullikeng ni balituk ey ingkugut da etan di dewwan dugun etan ni utduk ni luput ni meittekkap di pagew ni ephod. Neikugut ida huyyad piggad etan ni luput et maitumuk di ephod. <sup>20</sup> Nengapyadda pay ni dewwan netullikeng ni balituk ey ingkugut dad hinanggan nunyan luput di ta-pew ni balkeh ni ephod. <sup>21</sup> Inusal da hu blue ni linubid ni nengi-iket diman ni netullikeng ni neikugut di luput ni neitekap di pagew ni ephod di ta-pew ni balkeh tu. Impahding dan emin huyya e inu-unnud da intugun APU DIOS nan Moses.

<sup>22</sup> Nengugut idan blue ni balwasin mei-dah di ephod. <sup>23</sup> Kinapyaan dan huklubban ni ulu ey kinugutan dan luput hu gilig nunman ni huklubban henin edum ni balwasi malat eleg mebi-ki. <sup>24</sup> Nengapyaddan henin lameh ni pomegranate e inusal da hu blue, ya purple et ya makadlang ni sinayyum ey inta-yun yudda nanlinikweh di utduk nunyan balwasi. <sup>25</sup> Nengapyadda mewar ni nemahmah ni balituk ni kingking e imbenattan dad heni lameh ni pomegranate et ita-yun dad nanlinikweh ni utduk ni balwasi. <sup>26</sup> Inta-yun da hakey ni kingking ni intu-nud da hu hakey ni pomegranate ingganah nelikweh hu utduk ni balwasin padi. Impahding dan emin huyya e inu-unnud da intugun APU DIOS nan Moses.

<sup>27</sup> Ingkugutan da hi Aaron et yadda lalakkin u-ungnga tun mei-dah, <sup>28</sup> ya penget, ya taddung, ya ansikke ni pantalon <sup>29</sup> niya etan meibbalkeh e inusal da kayyaggud ni luput ni nebordaan ni blue, purple ni ya makadlang ni sinayyum. Impahding dan emin huyya e inu-unnud da intugun APU DIOS nan Moses. <sup>30</sup> Ey nengapyaddan medal ni nemahmah ni balituk et iku-lit da hu 'Neieng-eng nan APU DIOS.' <sup>31</sup> In-iket da blue ni linubid di medal et itekap dad hinanggan etan ni kinapya dan penget Aaron. Impahding dan emin huyya e inu-unnud da intugun APU DIOS nan Moses.

#### *Ya negibbuan etan ni Tabernacle niyadda etan ngunut diman*

<sup>32</sup> Huyya law hu negibbuan ni Tabernacle. Yadda helag Israel ey impahding dan emin hu in-older APU DIOS nan Moses. <sup>33</sup> Inlaw dan Moses hu kalkalimanggan Tabernacle, yadda kawit tu, yadda tukud tu, yadda keyew ni meibballabag, yadda keittu-unan da, <sup>34</sup> yadda katat ni lakkitun kalneroh ni impambalin dan madlang, ya kayyaggud ni katat, ya etan kultinah di bawang di Kuwaltuh APU DIOS, <sup>35</sup> ya Kaban APU DIOS, yadda keyew ni pan-attang niya hu-keb tu, <sup>36</sup> ya tebol niyadda meussal diman, ya sinapay ni meihha-ad di Kuwaltuh Apu Dios, <sup>37</sup> ya balituk ni pengippettukan ni kengkeh niyadda meussal diman, ya lanan meihha-ad di kengkeh, <sup>38</sup> ya balituk ni altar, ya lanan meihha-ad di ulun padi, ya bangbanglun insensoh, ya kultinah di heggeppan di Tabernacle, <sup>39</sup> ya giniling ni altar, ya giniling ni nelagang meihha-ad di bawang tu, yadda keyew ni pan-attang, niyadda emin ngunut ni meussal diman, ya besen niya pengippettukan nunyan besin, <sup>40</sup> yadda kultinah ni meiddingding, yadda tukud niyadda keittu-unan da, ya etan kultinah ni neiha-nin di heggeppan di dallin, yadda iket, yadda paghek niyadda edum ni meussal di Tabernacle, <sup>41</sup> yadda balwasin padin ussalen dan manggunnud Tabernacle, yadda balwasin Aaron niyadda balwasin u-ungnga tun lalaki.

<sup>42</sup> Impahding idan helag Israel humman e inu-unnud dan emin hu in-older nan APU DIOS nan Moses. <sup>43</sup> Inang-ang Moses emin ida huyyan kinapya da ey ustuh e neka-unnud da inhel APU DIOS ni pengapya da. Et bendisyonan Moses ida.

## 40

#### *Ya pemehwatan dan Tabernacle*

<sup>1</sup> Kan APU DIOS nan Moses ey <sup>2</sup> "Yan memengngulun aggew ni memengngulun bulan hu pemehwatan yun Tabernacle. <sup>3</sup> Ipahgep yu etan Kaban diman ey iahabley mudda kultinah et meha-ninan. <sup>4</sup> Ilaw mu etan tebol ey iha-ad mudda meihha-ad diman. Ey ipahgep mu etan pengippettukan ni kengkeh et ituun mudda kengkeh.

<sup>5</sup> Iha-ad mu etan altar ni pengiggihheban ni bangbanglun insensoh etan di demang ni Kaban ku. Ey ihabley mu hu kultinah di heggeppan ni Tabernacle. <sup>6</sup> Ey ya etan altar ni pengiggihheban ni kamei-appit ey iha-ad mud hinanggan heggeppan ni Tabernacle. <sup>7</sup> Penum ni danum etan besen ey inha-ad mud nambattanan nunyan altar et ya Tabernacle. <sup>8</sup> Kapyam hu dallin ni Tabernacle ey ihabley mu hu kultinah di heggeppan.

<sup>9</sup> Hedin negibbuh, wakgihim ni lana hu Tabernacle niyadda etan meussal diman et maieng-eng idan emin ni hi-gak. <sup>10</sup> Wakgihim dama etan altar ni pengiggihheban ni kamei-appit niyadda meussal diman et maieng-eng idan hi-gak <sup>11</sup> anin ya etan besen niya etan pengippettukan tu.

<sup>12</sup> Ipahding mu hu elaw ni panlinnih nan hi Aaron niyadda u-ungnga tud heggeppan di Tabernacle, <sup>13</sup> et pebalwasim nan Aaron hu balwasin padi ey duyagim hu ulu tun lana et keang-angan tu e hi-gatu neieng-eng ni padin mansilbin hi-gak. <sup>14</sup> Pebalwasim damaddan u-ungnga tu etan intugun kun ibbalwasi da, <sup>15</sup> ey duyagim dama hu ulu dan lana, henin pehding mun ameda et maieng-eng idan padin mansilbin hi-gak. Huyyan pena-adan mun lanan ulud Aaron niyadda u-ungnga tu hu keang-angan tu e ebuh hu helag dan manhulluhullul ni mampeddiddan helag Israel.”

<sup>16</sup> Inu-unnud Moses emin humman ni intugun APU DIOS ni pehding tu. <sup>17</sup> Yan nemangulun aggew ni nemangulun bulan ni meikkadwan toon neipalpun neni-yanan dan Egypt ey binehwat da etan Tabernacle ni panha-adan APU DIOS. <sup>18</sup> Ingkapyan Moses etan pengittu-unan daddan tukud niyadda etan kalkalimangnga tu. <sup>19</sup> Et han tu ietep etan tuldah et iha-ad tudda etan dingding e inu-unnud tu inhel APU DIOS ni pengapya tu.

<sup>20</sup> Inla tu etan dewwan batun neitudkan ni Tugun APU DIOS, et iha-ad tu etan di Kaban et hu-keban tu. Et iduduk tudda etan keyew ni pan-attang etan di netullikeng ni neikapyad Kaban. <sup>21</sup> Et ipahgep tu huyyan Kaban di Tabernacle et ita-yun tu etan kultinah ma-lat maiheni etan di Kaban. Impahding tudda e inu-unnud tu inhel APU DIOS.

<sup>22</sup> Impahgep tu hu tebol etan di bawang ni Tabernacle di hinanggan etan ni kultinah <sup>23</sup> et iha-ad tudman etan sinapay ni kamei-appit nan APU DIOS e inu-unnud tu hu inhel APU DIOS ni pehding tu.

<sup>24</sup> Impahgep tu pay etan pengippettukan idan kengkeh di Tabernacle, et iha-ad tud demang etan ni tebol di appit ni south. <sup>25</sup> Et integang tudda humman idan kengkeh di hinanggan APU DIOS e inu-unnud tu inhel tu.

<sup>26</sup> Et iha-ad tu etan balitik ni pan-appitan di hinanggan ni kultinah, <sup>27</sup> et giheben tu bangbanglun insensoh ni kamei-appit nan hi APU DIOS e inu-unnud tu inhel tun pehding tu. <sup>28</sup> Negibbuh humman et kultinahan tu etan heggeppan etan di Tabernacle.

<sup>29</sup> Inha-ad tud dallin ni Tabernacle etan pan-appitan daddan kagihheba. Yadman nan-appitan tu etan ni kinleng tu niya ineni dan in-appit da e inu-unnud tu inhel APU DIOS.

<sup>30</sup> Inha-ad tu etan besen di nambattanan etan ni Tabernacle niya pan-appitan et penuen tun danum. <sup>31</sup> Yadman hu pan-ullahan di Moses, hi Aaron niyadda u-ungnga tun heli da niya ngamay da <sup>32</sup> hedin umhehgep idad Tabernacle. Impahding tudda huyya meippuun di in-olden APU DIOS.

<sup>33</sup> Ya nanggillig ni impahding Moses, ey kinultinahan tu nanlinikweh ni dallin ni Tabernacle niya etan ni heggeppan tu, et megibbuh hu ngunu dad Tabernacle.

#### *Ya inlian ni kulput di Tabernacle*

<sup>34</sup> Entanni ey hinephepan ni kulput etan Tabernacle ey kaumhili tep wada APU DIOS diman. <sup>35</sup> Et eleg pakahgep hi Moses tep hinephepan nisin nunman ni kulput ey kaumhili dayaw APU DIOS.\*

<sup>36</sup> Hedin immahpat etan kulput et immela, han ida immegah hu helag Israel et unuden da et lumaw idad lawwan da. <sup>37</sup> Nem hedin eleg meglid man eleg ida dama. Nem hedin immela, immeladda dama. <sup>38</sup> Yan kawwalwal ey kameipettek di ahpat ni Tabernacle ey hedin hileng, kamambalin ni apuy ma-lat panilag idan helag Israel. Humman ni kulput ey wadan ingganah ni nunman ni da nandaldalan. †

\* 40:35 40:35 Revelation 15:8 † 40:38 40:38 Ang-ang yu Exodus 13:21-22

## Leviticus

### *Ya meippanggep eyan libluh ni Leviticus*

Huyyan libluh ni Leviticus hu neitudekan idan mahapul ni pehding idan helag Israel ni meittu-u ma-lat dammutun ebbuluten idan APU DIOS ni meibbillang ni kayyaggud niya malinih. Ya hakey ni pehding da ma-lat dammutun ebbuluten APU DIOS idan malinih di hinangngab tu ey i-appit da etan ida intugun tun i-appit dan hi-gatu. Pinutuk APU DIOS hi Aaron et yadda lalakkin u-ungnga tun mambalin ni padi ma-lat hi-gada mengingngun i-appit idan tutu-u et meiyayyaggud ni mei-appit nan APU DIOS.

Intugun APU DIOS ni hi-gada e mahapul ni kakkayyaggud ida et heniddan hi-gatu e kayyaggud ni peteg ma-lat peamleng da. (11:44-45 et ya 1 Peter 1:15-16) Ey intugun tun hi-gada e mahapul ni pinheden da edum da henin neminshed dan annel da. (19:18, Mark 12:31)

### *Yadda neitudek eyad libluh*

1. Ya etan ida liman nambakbaklang ni kamei-appit nan APU DIOS. (chapters 1:1-7:38)
2. Ya nampadian Aaron et yadda lalakkin u-ungnga tu. (chapters 8:1-10:20)
3. Yadda Tugun ni pengamtaan hedini meibbillang ni malinih winu eleg hu hakey ni tuu, yadda kennen et yadda meippanggep ni degeh. (chapters 11:1-16:34)
4. Yadda neitugun ni eleg ippahding ni tutu-u et yadda edum ni elaw ni mahapul ni pehding da. (chapters 17:21-25:55)
5. Yadda panyaggudan et yadda kastigu. (chapter 26:1-46)
6. Yadda meippanggep ni tutu-u, yadda animal niya puyek ni neieng-eng nan Apu Dios (chapter 27:1-34)

### *Yadda kamei-appit ni kagihheba*

<sup>1</sup> Hi APU DIOS e wada etan di Tabernacle ey ineyagan tu hi Moses et ehelen tun emin ni hi-gatu <sup>2</sup> hu u-unnuden idan helag Israel hedini man-appit idan animal da, henin baka, ya kalneroh winu gelding.

<sup>3</sup> Kan APU DIOS ni hi-gatuy "Yahhuy hu e-helen mun hi-gada: 'Hedini ya i-appit ni tuu ey ya kagihheban baka, ey mahapul ni ya lakkitu niya mahapul ni kayyaggud e endi dipektoh tu. I-ali tu humman et idwat tun padid heggeppan di Tabernacle ma-lat abuluten APU DIOS. <sup>4</sup> Itta-pew nunman ni tuu hu ngamay tud ulu etan ni baka ma-lat abuluten APU DIOS humman ni i-appit tu et ma-kal hu liwat tu. <sup>5</sup> Ey wa-teken tu humman ni baka, et alen idan padin helag Aaron hu kuheyaw tu et iwakgih dad altar di hinanggan ni Tabernacle. <sup>6</sup> Latlaten tu belat etan ni baka et hantu tenegtega, <sup>7</sup> ey pantungnguan idan padi hu altar et man-apuy ida. <sup>8</sup> Ey inta-pew da etan ida netenegteg ni detag ni baka, anin idan ulu et yadda taba etan di apuy. <sup>9</sup> Yadda wadad egeh tu e henin altey niya bala, et yadda heli, ey mahapul ni ullahan etan ni tuu et han i-dum idan padin gihheben di altar et iappit dan APU DIOS. Ya hamuy nunyan kamei-appit ey kamengippeamleng ni hi-gatu.

<sup>10</sup> Hedini ya i-appit etan ni tuu ey ya kalneroh winu ya gelding, ey mahapul ni ya lakkitu niya mahapul ni endi dipektoh tu. <sup>11</sup> Keklengen tud appit ni north etan ni altar di hinanggan APU DIOS. Ey iwwakgih idan padi hu kuheyaw di dingding nunman ni altar. <sup>12</sup> Tennegeteg nunman ni tuu hu detag nunman ni animal, et alen ni padi et ita-pew tu etan di kamantetebbel ni apuy di altar, anin ya ulu et ya taba. <sup>13</sup> Mahapul ni ullahan etan ni tuu hu wadaddad egeh etan ni animal, henin altey et ya bala, anin ida heli et i-dum ni padin gihheben di altar et iappit tun APU DIOS. Ya hamuy nunyan kamei-appit ey kamengippeamleng ni hi-gatu.

<sup>14</sup> Hedini ya kamei-appit ni kagihheba ey ya sisit, ey mahapul ni ya paluma winu ya balug. <sup>15-16</sup> Ilaw ni padid altar etan sisit et siluden tu buklew tu. Ey e-kalen tu bihugung tu niya kinan tu, et ibbeng tuddad kapengihha-adin dep-ul di a-allaw ni altar di appit ni kasimmilin aggew, niya iwwakgih tud dingding etan ni altar hu kuheyaw etan ni sisit. <sup>17</sup> Ey hantu hinukla humman ni sisit, nem ang-angen tu et eleg melahlah hu payak, et han tu gihebad apuy di altar. Ya hamuy nunyan kamei-appit ey kamengippeamleng nan APU DIOS.

## 2

### *Ya kamei-appit ni begah*

<sup>1</sup> Hedin begah \* hu i-appit ni tuun APU DIOS, ey mahapul ni megilling ma-lat mambalin ni alinah. Ey kamdugan tun mansikan olibah niya bangbanglun insensoh, <sup>2</sup> et ilaw tuddad kad-an ni padin helag Aaron. Umgamal etan padin nunman ni alinah ni nekamdugan ni mansikan olibah niya bangbanglun insensoh, et giheben tud altar ma-lat keiang-angan tu e neiappit humman ni alinah nan APU DIOS. Ya hamuy nunyan kamei-appit ey kamengippeamleng ni hi-gatu. <sup>3</sup> Ya edum nunyan kamei-appit ni alinah ey meidwat nan Aaron et yadda u-ungnga tu. Huyyan alinah ey mei-eng-eng nan APU DIOS tep kamei-appit ni hi-gatu.

<sup>4</sup> Hedin sinapay hu i-appit yu, ey mahapul ni ya kayyaggud ni alinah hu nekapyaan tu, niya mekamdugan ni mansikan olibah niya bangbanglun insensoh, nem entan tu kamdugin kamampelbag. <sup>5</sup> Hedin ya sinapay ni kameihhe-eng di nepayyad ni gumeke hu i-appit yu, ey mahapul ni kayyaggud ni alinah hu nekapyaan tu. Mekamdugan ni mansikan olibah, nem eleg mekamdugin kamampelbag. <sup>6</sup> Gudduen yu ey kamdugan yun mansika et humman i-appit yun alinah. <sup>7</sup> Hedin ya sinapay ni kameihhe-eng di palhu hu i-appit yu, ey mahapul ni ya kakkayyagud ni alinah ni nekamdugan ni mansikan olibah hu kapyaan yu.

<sup>8</sup> Hedin man-appit kayun APU DIOS ni begah, anin ni hipa pehding yun mengiddaddan, ey illaw yu etan ni padi et ilaw nunman ni padid altar. <sup>9</sup> Um-ala etan padin ekket ni nunman ni kamei-appit et giheben tud altar et keang-angan tu e neiappit nan APU DIOS humman, et ya hamuy tu ey kamengippeamleng ni hi-gatu. <sup>10</sup> Ya edum nunman ni kamei-appit ey meidwat di Aaron et yadda u-ungnga tu. Neieng-eng nan APU DIOS huyya, tep neiappit ni hi-gatu.

<sup>11</sup> Mahapul ni eleg mekamdugin kamampelbag, niya putsukan humman ni alinah ni kamei-appit nan APU DIOS, tep eleg mabalin ni gihheben hu kamampelbag ni sinapay, winu putsukan hedin ya kamei-appit ey kagihheba. <sup>12</sup> Hedin ya nebukul ni neani hu i-appit yu, ey dammutun mekamdugan ni kamampelbag winu putsukan, nem eleg mabalin ni gihheben humman ni i-appit yun APU DIOS. <sup>13</sup> Mekamdugan ni ahin hu begah ni kamei-appit nan APU DIOS ma-lat huyya mengippenemnem ni hi-gayu etan ni nehammad ni nekitbalan tun hi-gayu. Ippidwak ni e-helen e entan tu liwwan ni ha-adan ni ahin hu i-appit yu.

<sup>14</sup> Ihanglag yu humman ni mebukkul ni ennien yun i-appit yun APU DIOS. <sup>15</sup> Ey hadi yun mansikan olibah niya bangbanglun insensoh. <sup>16</sup> Um-ala etan padin ekket ni nunman ni neihanglag ni begah ni nekamdugan ni mansikan olibah niya insensoh et giheben tud altar e humman i-appit tun APU DIOS.

### 3

#### *Ya kamei-appit ni pekiddagyuman nan APU DIOS*

<sup>1</sup> Hedin man-appit kayun pekiddagyuman yun APU DIOS, ey mahapul ni ya bulug winu ya keba-yan ni bakan endin hekey dipektoh tu hu i-appit yu. <sup>2</sup> Itta-pew yu ngamay yud ulu etan ni bakan i-appit yu, et kelengen yud neihnap di heggeppan di Tabernacle, et iwakgih idan padin helag Aaron hu kuheyaw nunman ni bakad nanlinikweh ni dingding etan ni altar. <sup>3</sup> Emin ida taban wadad kad-an ni egeh ni nunman ni baka, <sup>4</sup> yadda etan dewwan basin, anin ya etan taban neilibutan da, et ya altey, ey mei-appit nan APU DIOS. <sup>5</sup> Ihha-ad idan padin helag Aaron ida huyyan emin di ta-pew ni detag ni kamei-appit nan APU DIOS et makigiheb di apuy. Ya hamuy idan nunyan kamei-appit ey kamengippeamleng ni hi-gatu.

<sup>6</sup> Hedin ya kalneroh winu gelding hu mei-appit ni pekiddagyuman nan APU DIOS, ey dammutu hu lakkitu winu ya labah ni endi dipektoh tu. <sup>7-8</sup> Hedin ya kalneroh hu i-appit yu, ey itta-pew yu ngamay yud ulu etan ni kalneroh ey kinleng yud neihnap di heggeppan di Tabernacle. Ey han iwakgih idan padi hu kuheyaw nunman ni kalneroh di nanlinikweh ni dingding etan ni altar. <sup>9-10</sup> Ya ikul, yadda taban wadad kad-an ni egeh, ya etan dewwan basin, et ya etan taban neilibutan da, niya altey tu ey kamei-appit nan APU DIOS. <sup>11</sup> Gihheben ni padi ida huyyan kennen ni kamei-appit ni hi-gatu.

<sup>12</sup> Hedin gelding hu i-appit ni tuun nan APU DIOS, <sup>13</sup> ey itta-pew tu ngamay tud ulun nunman ni gelding et kelengen yud neihnap di heggeppan di Tabernacle. Et han iwakgih idan padin helag Aaron hu kuheyaw nunman ni gelding di nanlinikweh ni dingding etan ni altar. <sup>14-15</sup> Ya ikul, ya egeh, ya etan dewwan basin, et ya etan taban neilibutan da,

\* 2:1 2:1 Ya kaittanem idan tutu-ud payew da ey ya wheat niya barley. Nem ya daka penghel ni daka i-appit ey grain. Ya nengibelin min grain ey begah winu pagey. Nem hin-addum ni kanday alinah daka i-appit winu wheat niya barley.

niya altey tu ey e-kalen <sup>16</sup> ni padi, et giheben tun emin di altar et meiappit nan APU DIOS, et ya hamuy tu ey kamengippeamlang ni hi-gatu.

Nemnem yu e emin hu taba ey neieng-eng ni kamei-appit nan APU DIOS. <sup>17</sup> Et mukun eleg mabalin ni yu kennen hu taba niya kuheyaw. Huyyan tugun ey mannananeng ni ingganah ey mahapul ni u-unnuden idan helag yu, anin di attun bebley hu pambebleyan da.’”

## 4

*Ya i-appit hedin wada liwat ni eleg igeb-at*

<sup>1</sup> Kan APU DIOS nan Moses ey <sup>2</sup> “Ehel mudda huyyan helag Israel, kammuy: ‘Hedin eleg u-unnuden ni hakey ni tuu hu tugun APU DIOS et manliwat, nem eleg tu igeb-at, ey heninnuy hu mahapul ni pehding tu.

<sup>3</sup> Ya etan eta-gey ni padi hu nanliwat, ey meilleggat ida etan tuu tud liwat tu. Et humman hu, mahapul ni i-appit tun APU DIOS hu lakkitun kilaw ni bakan endi dipektoh tu. <sup>4</sup> Illaw tud neihnpud di heggeppan di Tabernacle, et ita-pew tu ngamay tud ulun nunman ni baka, ey kinlang tudman di hinanggan APU DIOS. <sup>5</sup> Ya etan padin neputuk ni mansilbin nunman ni aggew ey um-alan kuheyaw etan ni baka et ihgep tud Tabernacle. <sup>6</sup> Ittetdek tu kimeng tud kuheyaw et iwakgih tun meminpittud hinanggan kultinah di hinanggan APU DIOS. <sup>7</sup> Niya ha-adan tun kuheyaw etan epat ni ha-duk di duguddan altar ni gihhebban ni insensoh. Ya etan natdaan ni kuheyaw ey idduyag tud hengeg ni altar ni neihnpud di heggeppan di Tabernacle. <sup>8</sup> Mahapul ni e-kalen ni padin emin hu taba etan ni baka, anin idan tabad egeh tu. <sup>9</sup> Peki-kal tu etan dewwan basin, anin ya etan taban neilibutan da, et ya altey tu <sup>10</sup> ni giniheb tud altar ni gihhebban ni kamei-appit. Henin nunman dama hu pehding tu etan ni taban lakkitun bakan wa-teken tun kamei-appit ni pekiddagyumin tun APU DIOS. <sup>11</sup> Nem ya etan edum ni detag etan ni baka, heniddan belat, ya laman, ya ulu, ya heli et ya egeh tu, ey ellan etan ni padi <sup>12</sup> et ilaw tud a-allaw ni bebley ni kameibbillang ni malinih et giheben tu etan di kad-an ni ibbengnan ni dep-ul.

<sup>13</sup> Ey hedin nanliwat idan emin hu bimbebley ni helag Israel tep eleg da u-unnuden hu tugun APU DIOS, anin eleg da amta e nanliwat ida, ey meibbillang idan emin ni nanliwat. <sup>14</sup> Nem hedin neamtaan da law e nanliwat ida, man mahapul ni um-aladda hu aap-apun bimbebley ni kilaw ni lakkitun bakan kamei-appit tep ya liwat, et peang-ang da etan di neihnpud di heggeppan di Tabernacle. <sup>15</sup> Et han da ita-pew ngamay dad ulun nunman ni lakkitun baka, et kelengen dad hinanggan APU DIOS. <sup>16</sup> Ey ellan etan ni padi hu edum ni kuheyaw etan ni baka et ihgep tud Tabernacle. <sup>17</sup> Ittetdek tu kimeng tu etan di kuheyaw, et iwakgih tun meminpittud hinanggan etan ni kultinah di hinanggan APU DIOS. <sup>18</sup> Niya ha-adan tun kuheyaw etan epat ni ha-duk di duguddan altar ni gihhebban ni insensoh. Ey idduyag tu etan natdaan ni kuheyaw di hengeg ni altar ni neihnpud di heggeppan di Tabernacle. <sup>19</sup> Mahapul ni e-kalen ni padin emin hu taba et giheben tud altar <sup>20</sup> ey ippahding tu hu henin tuka pehding ni kamei-appit tep ya liwat tu, ma-lat ma-kal hu liwat idan tuu. <sup>21</sup> Illaw tu edum ni parteh ni annel etan ni bakad a-allaw ni bebley et giheben tudman, henin tuka pehding ni kamei-appit tep ya liwat tu. Huyyan kamei-appit hu mengkal ni liwat idan bimbebley ni helag Israel.

<sup>22</sup> Hedin nanliwat hu ap-apu tep eleg tu u-unnuden hu tugun APU DIOS e Dios tu, anin ni eleg tu igeb-at, ey meibbillang ni nanliwat. <sup>23</sup> Nem hedin neamtaan tu e nanliwat, man mahapul ni i-ali tu hu lakkitun gelding ni endi dipektoh tu. <sup>24</sup> Itta-pew tu ngamay tud ulun nunman ni gelding, et kelengen tud altar di heggeppan di Tabernacle ni daka pengiklengin kagihheban kamei-appit nan APU DIOS ma-lat ma-kal liwat tu. <sup>25</sup> Ey ittetdek ni padi hu kimeng tud kuheyaw nunman ni gelding, et ida-nih tuddad ha-duk etan ni altar ni gihhebban ni kamei-appit. Ey idduyag tud hengeg nunman ni altar etan natdaan ni kuheyaw. <sup>26</sup> Niya gihheben tuddan emin hu tabad altar, henin tuka pehding ni taban kamei-appit ni kapekiddagyumin APU DIOS. Humman hu pehding ni padi ma-lat ma-kal hu liwat nunman ni ap-apu.

<sup>27</sup> Hedin wada helag Israel ni eleg mengu-unnud ni tugun APU DIOS, ey meibbillang ni nanliwat, anin ni eleg tu igeb-at. <sup>28</sup> Hedin neamtaan tu e nanliwat, mahapul ni i-ali tu hakey ni labah ni gelding ni endi dipektoh tu. <sup>29</sup> Itta-pew tu ngamay tud ulun nunman ni gelding, et kelengen tud appit ni north etan ni altar ni kapengiklengin kamei-appit ni kagihheba. <sup>30</sup> Ittetdek ni padi hu kimeng tud kuheyaw nunman ni gelding, et ida-nih tuddad ha-duk di dugun nunman ni altar et han tu iduyag hu natdaan ni kuheyaw di hengeg tu. <sup>31</sup> E-kalen tudda taban nunman ni gelding, henin tuka pehding ni kamei-appit ni kapekiddagyumin APU DIOS, et giheben tudda huyyad altar. Ya hamuy nunyan

kamei-appit ey kamengippeamleng ni hi-gatu. Huyyan pehding ni padi hu mengkal ni liwat etan ni tuun nan-appit.

<sup>32</sup> Hedin ya pakeetteng tun kalneroh hu in-ali etan ni tuun i-appit tu ma-lat ma-kal hu liwat tu, ey mahapul ni ya labah ni endi dipektoh tu. <sup>33</sup> Itta-pew tu ngamay tud ulun nunman ni kalneroh ey kinleng tud altar ni kapengiklengin kagihheban kamei-appit. <sup>34</sup> Ittetdek ni padi kimeng tud kuheyaw nunman ni gelding, et ida-nih tuddad ha-duk di dugun nunman ni altar ey idduyag tu hu natdaan ni kuheyaw etan di hengeg tu. <sup>35</sup> E-kalen tun emin taba henin impahding tu etan ni pakeetteng tun kalneroh ni kamei-appit ni kapekiddagyumin APU DIOS ni giniheb tu e ita-pew tud edum ni kagihheban kamei-appit. Henin nunya hu pehding ni padi ma-lat ma-kal hu liwat etan ni tuu.

## 5

### *Ya liwat ni eleg igeb-at*

<sup>1</sup> Hedin impaeyag da hakey ni tuu ma-lat mantistigun meippanggep ni inang-ang tu winu dingngel tu, nem eleg um-ehel e tuka pakdag i-ineng, ey mambehhul et mahapul ni mekastigu.

<sup>2</sup> Hedin eleg igeb-at etan ni tuu ey kinepa tu hu linggeman ni kameibbilang ni beken ni malinih henin netey ni animal di muyung winu maeyum, niyadda kamangkinaddap, ey meibbilang ni nanliwat humman ni tuu tep kameibbilang ida humman ni beken ni malinih.

<sup>3</sup> Ey anin ni eleg igeb-at ni hakey ni tuu nem wada kinepa tun linggeman ni lugit ni kamelpud annel ni edum ni tuu ey meibbilang ni nanliwat hedin neamtaan tu law hu impahding tu.

<sup>4</sup> Hedin mewan nansapatah hu hakey ni tuu, ey eleg tu pakannemnemen, anin ni lawah winu kayyaggud hu insapatah tun pehding tu, et meibbilang ni nanliwat hedin neamtaan tu law.

<sup>5</sup> Hedin impahding ni hakey ni tuu ida huyya et neamtaan tu, man mahapul ni ebbuluten tu e impahding tu humman. <sup>6</sup> Niya mahapul ni i-appit tun APU DIOS hu hakey ni labah ni kalneroh winu gelding ma-lat ma-kal hu liwat tu. Ya padi hu mengi-appit ni nunyan kamei-appit ni ke-kalan ni liwat nunman ni tuu.

<sup>7</sup> Hedin eleg hanggela etan ni tuu hu kalneroh winu gelding, ey dammutu hu dewwan paluma winu balug, et humman i-appit tu tep ya liwat tu. Ya hakey idan nunman ni sisit ey mei-appit tep ya liwat ey ya etan hakey ey kamei-appit ni kagihheba. <sup>8</sup> Illaw tudda humman ni sisit di kad-an ni padi et mamengulun i-appit ni padi etan kamei-appit tep ya liwat. Silluden tu bukdew nunman ni sisit, nem eleg tu puttula ulu tu. <sup>9</sup> Ey iwwakgih tu hu kuheyaw nunman ni sisit di dingding ni altar et han tu iduyag hu natdaan di hengeg nunman ni altar. Huyya hu kamei-appit tep ya liwat. <sup>10</sup> Ya etan meikkadwan sisit ey i-appit ni padi e meikkahakey ni megihheb meippuun di elaw ni pehding ni kamei-appit ni kagihheba. I-appit ni padi huyya ma-lat ma-kal hu liwat etan ni tuu.

<sup>11</sup> Hedin eleg hanggela etan ni tuu hu dewwan paluma winu balug, ey mahapul ni um-i-lin dewwan kiloh ni kakkayyaggud ni alinah, et humman i-appit tu tep ya liwat tu. Eleg tu ha-adin mansikan olibah winu hipan mengippebanglu, tep mei-appit huyya tep ya liwat. <sup>12</sup> Illaw tu etan ni padi humman ni alinah et gumemal, ma-lat keang-angan tun neiappit nan APU DIOS humman, et ita-pew tud edum ni kamei-appit ni kagihhebad altar. Mei-appit huyya tep ya liwat. <sup>13</sup> Ya padi mengi-appit ni nunman ma-lat meliwwan hu liwat idan nunman ni tuu. Ellan ni padi etan edum ni alinah tep neieng-eng humman ni hi-gatu henin tuka pehding ni alinah ni kamei-appit. "

### *Ya kamei-appit nan APU DIOS tep ya liwat*

<sup>14</sup> Huyyadda hu intugun APU DIOS nan Moses ni mahapul ni meunnud: <sup>15</sup> "Hedin wada hu hakey ni tuun nanliwat tep impahding tu hu beken ni lebbeng tun pehding di hipan neieng-eng nan APU DIOS, anin eleg tu igeb-at, ey mahapul ni i-appit tu hakey ni lakkitun kalneroh winu lakkitun gelding ni endi dipektoh tu. Humman hu kamei-appit tep ya nanliwatan tu. Ya pambalol dan nunman ey meippuun di inhel idan aap-apun kameunnud. <sup>16</sup> Mahapul ni mambeyyad etan tuu tep ya humman ni impahding tu niya e-duman tu ibbayad tun dewampulun porsentoh, et humman multa tu. Iddawat tun padi humman ni ibbayad tu et ya etan padi hu mengi-appit ni nunman ni animal, ma-lat ma-kal hu liwat nunman ni tuun nambahul.

<sup>17</sup> Ey hedin nanliwat hu hakey ni tuu tep eleg tu u-unnuden hu intugun APU DIOS, ey mahapul ni mambeyyad ni multa tu, anin ni eleg tu igeb-at humman ni nanliwatan tu. <sup>18</sup> Mahapul ni illaw tun padi hu hakey ni lakkitun kalneroh et iappit ni padi, tep ya liwat nunman ni tuu. Mahapul ni endi dipektoh ni nunman ni i-appit tu ey ustuh hu balol tu.



Mei-appit humman ni kalneroh ma-lat ma-kal hu liwat tu. <sup>19</sup> Humman ni mei-appit ey bayad ni nanliwatan nunman ni tuu nan APU DIOS.”

## 6

<sup>1</sup> Kan mewan APU DIOS nan Moses ey <sup>2</sup> “Hedin nanliwat hu hakey ni tuun hi-gak e APU DIOS, tep nan-itek e kantuy netalak winu netakew etan impatelun edum tun hi-gatu winu nan-itek winu sinekew tu humman ni impatelu dan hi-gatu, <sup>3</sup> winu hedin kantu et himmak tu hu sinlak ni edum tu, nem ay insapatah tu e kantuy endi himmak tu, winu wada edum ni hanniman ni impahding tun pambekhulan tu, ey mahapul ni heninnuy ida pehding tu: <sup>4</sup> Mahapul ni ibbangngad tu hu hipan inla tu tep ya itek tu, yadda pinilit tun inlad edum tun tuu, winu hipan sinekew tu, anin yadda impatelu dan hi-gatu winu indinel idan edum tun hi-gatu, winu netalak et hamaken tu, <sup>5</sup> winu inggebat tun inla, nem nan-itek. Mahapul ni ibbangngad tudda humman niya mambeyyad ni dewampulun porsentoh etan ni tuun nengipahdingan tun nunman ni bahul ni nunman ni aggew ni pan-appitan tu tep ya liwat tu. <sup>6-7</sup> Mahapul ni illaw etan ni nambahul etan ni padi hu kamei-appit tep ya liwat, e ya lakkitun kalneroh ni endi dipektoh tu et iappit tun hi-gak e APU DIOS. Hedin beken, ey ya pihhu hu i-ali tu, meippuun di kameunnud ni balol nunman ni animal ma-lat ma-kal hu liwat nunman ni tuu.”

### *Ya meunnud ni pan-appitan ni kagihheba*

<sup>8</sup> Entanni ey kan mewan APU DIOS nan Moses ey <sup>9</sup> “Itugun mun Aaron et yadda lalakkin u-ungnga tu eyadda meunnud ni pan-appitan ni kagihheba. Ya kamei-appit ni kagihheba ey mahapul ni meihha-ad di altar ni hanlabbi ingganah ni kakkabbuhhan, niya mahapul ni mannenneng hu apuy e eleg me-dep. <sup>10</sup> Hedin newa-wa ey ihhuklub ni padi etan kayyaggud ni balwasi tu, anin ya etan balwasi tun kamei-dah di nandallem, et linihan tu etan altar e e-kalen tu dep-ul ni neiappit ni kagihheba et iha-ad tud takdul nunman ni altar. <sup>11</sup> Hedin ginibbuh tu, ey e-kalen tu etan kakkayyaggud ni imbalwasi tu et ihullul tu etan tuka ibbalwasi dedan et ilaw tu etan dep-ul di a-allaw ni kampu, et tu ibbeng etan di puyek ni kameibbillang ni malinih. <sup>12</sup> Ya etan apuy di altar ey mahapul ni eleg me-dep. Mahapul ni ha-adan ni padin ittungu hu altar ni kewa-wa-wa ey iyayyaggud tun ihha-ad diman hu kamei-appit ni kagihheba, et giheben tu taban nunman ni kamei-appit ni pekiddagyuman nan APU DIOS. <sup>13</sup> Entan tu liwwan e mahapul nisin mannenneng hu apuy di altar e eleg me-dep.

### *Yadda etan meunnud ni pan-appitan ni kayyaggud ni alinah*

<sup>14</sup> Huyyadda meunnud ni pan-appitan ni kayyaggud ni alinah: Ellan ni hakey ni padin helag Aaron huyyan kamei-appit nan APU DIOS et ilaw tud hinanggan altar. <sup>15</sup> Ey um-ala etan padin hanggamal nunman ni alinah ni neha-adan ni mansikan olibah niya insensoh et giheben tud altar. Ya hamuy nunyan kamei-appit ey kamengippeamleng nan APU DIOS. <sup>16-17</sup> Ya etan natdaan ni alinah ni neiappit ey meidwat nan Aaron et yadda u-ungnga tu ma-lat kanen da. Kopyaen dan sinapay nem eleg da ha-adin kamampelbag et kanen dad dallin ni Tabernacle. Huyya hu iddawat APU DIOS ni patal idan padi di kamei-appit ni hi-gatun kagihheba. Neieng-eng humman ni kamei-appit henin kai-appit tep ya liwat niya bahul. <sup>18</sup> Meidwatan emin hu helag Aaron ni lalakki, anin idan helag tun edum ni aggew, tep humman patal da. Ey emin hu hipan tuun mengeppan nunman ni kennen ey mahapul ni neieng-eng nan APU DIOS.”

<sup>19</sup> Huyyadda edum ni inhel APU DIOS nan Moses ni meunnud: <sup>20</sup> “Yan aggew ni kei-engengan idan helag Aaron ni mampeddi ey mahapul ni man-appit idan APU DIOS ni hakey ni kiloh ni alinah, henin kamei-appit ni kewa-wa-wa. Mei-appit hu gadwa tu huyya ni kakkabbuhhan ey mei-appit hu gadwa tun mahmahdem. <sup>21</sup> Mahapul ni mekamdugan ni mansikan olibah niya meihhe-eng di nepayyad ni palhu niya megennedwa. Ya hamuy tu huyyan kamei-appit ey kamengippeamleng nan APU DIOS. <sup>22</sup> Emin hu manhinhinullul ni helag Aaron ey huyya i-appit dan ingganah nan APU DIOS etan ni aggew ni kei-engengan dan mampeddi. Megihheb huyyan kamei-appit. <sup>23</sup> Ey eleg mabalin ni an kennen huyyan i-appit idan padi, tep kagihheban emin.”

### *Ya kamei-appit tep ya liwat*

<sup>24</sup> Kan mewan APU DIOS nan Moses ey <sup>25</sup> “Itugun mun Aaron et yadda lalakkin u-ungnga tu eyadda tugun ni meunnud ni pan-appitan da tep ya liwat: Ya etan animal ni kamei-appit tep ya liwat ey neieng-eng nan APU DIOS, et humman hu, mahapul ni keklengen dad hinangga etan ni altar e kapengiklengin kagihheba ni kamei-appit. <sup>26</sup> Ya etan padin mengi-appit ni nunman ey dammutun kennen tu patal tud dallin ni Tabernacle e neieng-eng daman APU DIOS. <sup>27</sup> Ya etan mengeppa winu meittummuk eyan

kamei-appit ey mambalin ni mei-eng-eng nan APU DIOS. Ey ya balwasin mewakgihan ni kuheyaw ni kamei-appit ey mahapul ni ibbalbal etan di neputuk ni pengibbalbalan. <sup>28</sup> Hedin pulan banga hu neiheengan ni neiappit ni detag, ey mahapul ni mephik. Hedin giniling ni banga hu neiheengan tu, ey mahapul ni mead-adan et maka-olahan. <sup>29</sup> Ebu id a etan lalakkin u-ungngan padin dammutun mengngan ni nunman ni kamei-appit, tep huuya ey neieng-eng nan APU DIOS. <sup>30</sup> Nem hedin meippahgep hu kuheyaw etan ni kamei-appit tep ya liwat di Nesantuh ni Kuwaltuh di Tabernacle, ey mahapul ni gihheben hu annel etan ni animal tep eleg mabalin ni kennen.

## 7

### *Ya kamei-appit ni ke-kalan ni bahul*

<sup>1</sup> Huyyadda hu mahapul ni u-unnuden ni pan-appitan tep ya bahul: Huyyaddan kamei-appit ey mei-eng-eng nan APU DIOS. <sup>2</sup> Mahapul ni mekleng humman ni kamei-appit di kapengiklengin kamei-appit ni kagihheba. Ey meiwwakgih hu kuheyaw tu etan di epat ni dingding ni altar. <sup>3</sup> Ey e-kalen ni padi emin taba, ya tabad ikul, emin etan taban wadad kad-an ni egeh tu, <sup>4</sup> ya etan dewwan basin et ya taban neilibutan da, niya etan altey tu, ma-lat maiappit di altar. <sup>5</sup> Gihheben ni padin emin ida huuyad altar, tep huuya kamei-appit nan APU DIOS tep ya bahul ni tuu. <sup>6</sup> Ebu id a etan lalakkin u-ungngan padin mengngan ni nunman ni kamei-appit. Nem mahapul ni yad Tabernacle e kapanha-adin APU DIOS hu pengngannan da, tep humman ni mekkan ey neieng-eng ni hi-gatu.

<sup>7</sup> Nan-inggeh hu meunnud di kapan-appisi tep ya liwat niya bahul ni tuu e ellan ni padin mengi-appit hu detag ni animal ni kamei-appit. <sup>8</sup> Hedin ya dama etan belat ni animal ni kamei-appit ni kagihheba ey ellan ni padin mengi-appit ni nunman. <sup>9</sup> Ey emin hu kamei-appit ni begah ey ellan etan ni padin nengappit ni nunman anin ni hipa neiheengan tu. <sup>10</sup> Nem emin etan begah ni eleg maiheeng ni kamei-appit ni mekkan, e nekamdugan ni mansikan olibah winu eleg, ey meidwat idan padin helag Aaron.

### *Yadda meunnud ni pan-appitan ni pekiddagyuman nan APU DIOS*

<sup>11</sup> Huyyadda hu meunnud ni pan-appitan ni tuun pekiddagyuman tun APU DIOS: <sup>12</sup> Hedin man-appit hu hakey ni tuun pansalamatan tun APU DIOS, ey i-e-dum tun i-appit hu mahdel niya meingpih ni sinapay ni eleg mekamdugan ni kamampelbag, nem mekamdugan ni mansikan olibah. <sup>13</sup> Ey dammutun i-e-dum tun i-appit hu sinapay ni mekamdugan ni kamampelbag. <sup>14</sup> Hanhakkey idan nunyan sinapay hu kamei-appit nan APU DIOS. Ey meidwat ida huuyan kamei-appit etan ni padin mengiwwakgih ni kuheyaw di altar. <sup>15</sup> Niya mahapul ni kennen ni emin ni nunman ni aggew hu detag etan ni animal ni kamei-appit ma-lat endi an metdaan.

<sup>16</sup> Nem hedin man-appit hu hakey ni tuun pengippeang-angan tu e impahding tu insapatah tu, winu inggeb-at tun man-appit, ey eleg mahapul ni kennen ni emin etan detag ni nunman ni aggew. Anin ni kennen dan kewa-waan tu hu natdaan hedin wada. <sup>17</sup> Nem hedin wada eleg mekkan ni nunman ni meikkadwan aggew, ey mahapul law ni megihheb. <sup>18</sup> Tep hedin kennen da etan metdaan ni katlun aggew, ey eleg law ebbulutan APU DIOS humman ni in-appit etan ni tuu et endi law silbitu, tep meibbillang law ni beken ni malinih. Ey ya etan tuun mengngan ni nunman ey heltapen tu hu ligat ni meippahding ni hi-gatu.

<sup>19</sup> Hedin wada keittummukan etan ni detag ni kameibbillang ni beken ni malinih, ey eleg mabalin ni kennen humman ni detag, tep pi-yew, et mukun mahapul ni megihheb. Nem yadda etan edum ni detag ni neiappit ni nunman, ey dammutun kennen etan ni tuun kameibbillang ni malinih. <sup>20</sup> Ey ya etan tuun kameibbillang ni beken ni malinih, nem mengngan ni detag ni neiappit ni pekiddagyuman idan tuun APU DIOS, ey eleg law meibbillang ni tuun APU DIOS. <sup>21</sup> Ya etan tuun kinepa tu hu hipan eleg meibbillang ni malinih, anin ni ya tuu winu animal winu hipan kameibbillang ni beken ni malinih, nem kinan tu etan detag ni neiappit, ey eleg law meibbillang ni tuun APU DIOS."

<sup>22</sup> Kan mewan APU DIOS nan Moses ey <sup>23</sup> "Ehel muddan helag Israel e eleg da kenna taban baka, ya kalneroh et ya gelding. <sup>24</sup> Ey eleg da kenna hu taban animal ni netey winu pintey idan animal di muyung, nem dammutun meussal di edum ni kei-ussalan tu. <sup>25</sup> Ya etan tuun mengngan ni taban etan ni kagihheban kamei-appit nan APU DIOS ey eleg law meibbillang ni tuun APU DIOS. <sup>26</sup> Yadda helag Israel ey eleg mabalin ni da kennen hu kuheyaw ni animal winu sisit, anin ni di attu pambhebyan da. <sup>27</sup> Ya etan eleg mengu-unnud ni nunya ey eleg law meibbillang ni tuun APU DIOS."

<sup>28</sup> Kan mewan APU DIOS nan Moses ey <sup>29</sup> "Itugun muddan helag Israel e kammuy: Ya etan tuun man-appit ni pekiddagyuman ey i-ali tu edum ni kamei-appit nan APU DIOS. <sup>30</sup> Tetngeden etan ni tuu humman ni kagihheban kai-appit ni taba et ya pagew ni animal

et ita-gey tun peang-ang nan APU DIOS. <sup>31</sup> Ey gihheben ni padi humman ni tabad altar, nem ya etan pagew ey meidwat idan padi e hi Aaron et yadda u-ungnga tun lalakki. <sup>32</sup> Anin etan wannan ni ulpun animal, <sup>33-34</sup> et meidwat etan ni padin nengiwakgih ni kuheyaw niya nengihebe etan ni taban kamei-appit di altar. Tep ya etan pagew et ya wannan ni ulpu ey iddawat APU DIOS idan padi. Humman hu lebbeng tun meidwat ni ippatal idan helag Israel ni hi-gadan papaddid i-appit dan pekiddagyuman dan APU DIOS. Mahapul ni meunnud huyyan olden ni ingganah. <sup>35</sup> Huyya hu meidwat ni patal idan papaddin u-ungngan Aaron anin idan helag dan edum ni aggew. Netudun patal da huyya neipalpu eman ni neputukan dan mampeddi et mansilbiddan APU DIOS. <sup>36</sup> Yan nunman ni aggew ni neputukan dan mampeddi ey in-olden APU DIOS idan helag Israel e iddawat da huyyan patal idan padi, et yadda helag dallin edum ni aggew. Mahapul ni meunnud huyyan olden ni ingganah.

<sup>37</sup> Huyyadda meunnud ni pan-appitan ni kagihheba, ya pan-appitan ni begah, ya pan-appitan tep ya liwat, ya pan-appitan tep ya bahul, ya pan-appitan ni pampeddian niya pan-appitan ni pekiddagyuman nan APU DIOS.” <sup>38</sup> Intugun nan APU DIOS ida huyyan Moses di eleg mebebleyid Duntug e Sinai eman ni nengioldenan tuddan tutu-u tun helag Israel e man-appit idan hi-gatudman.

## 8

*Ya netuduan ida etan ni lalakkin u-ungnga idan Aaron ni mampeddi*

<sup>1</sup> Kan APU DIOS nan Moses ni nunman ey <sup>2</sup> “Ilaw mu hi Aaron et yadda lalakkin u-ungnga tud heggepan di Tabernacle. Itebin da hu balwasi dan balwasin padi, ya lanan kameussal ni neputuk ni mansilbin APU DIOS, ya kilaw ni lakkitun bakan kamei-appit tep ya liwat, ya dewwan lakkitun kalneroh et ya sinapay ni eleg meha-adan ni kapampelbag ni neiha-ad di agyag. <sup>3</sup> Ey ayagim idan emin hu bimmebley, et umliddadman di heggepan di Tabernacle.”

<sup>4</sup> Inu-unnud Moses humman ni inhel APU DIOS ni hi-gatu, et yan neamungan idan tuu <sup>5</sup> ey kantun hi-gaday “Adyah e ippahding ku hu inhel nan APU DIOS!” <sup>6</sup> Et ilaw tu hi Aaron et yadda lalakkin u-ungnga tud hinanggaddan tuu, et ipahding tun hi-gada hu elaw ni panlinnih. <sup>7</sup> Impebalwasi tun Aaron etan kaibalwasin padi et pambalkeh tu. Ey impehuklub tu etan ephod e humman hu kamanta-pew ni kamei-dah ni balwasin padi, et pebalkeh tu etan balkeh ni neabel et mangged nunman ni ephod. <sup>8</sup> Niya inhaad tu etan kameittekkap ni luput di pagew et ihudu tudman etan Urim et ya Thummim. <sup>9</sup> Impapnget tun Aaron etan penget et itekap tu etan balituk ni medal di hinanggan nunman ni penget. Humman ni tu impahding ey neiunnud etan di inhel APU DIOS ni pehding tu.

<sup>10</sup> Ey inla Moses etan lana et wakgihan tu etan Tabernacle niyadda emin hu wadadman ma-lat maieng-eng idan APU DIOS. <sup>11</sup> Inwakgih tu etan lana ni neminpittud altar anin idan hipan kameussal diman, henin besen niya etan neipetukan tu et mei-eng-eng ida. <sup>12</sup> Et duyagan tun lana hu ulun Aaron et maieng-eng daman APU DIOS. <sup>13</sup> Inlaw tudda dama hu lalakkin u-ungngan Aaron di hinanggan Tabernacle, et pebalwasi tu etan balwasi da ey impebalkeh tu balkeh da et papnget tu penget da, e inu-unnud tu hu intugun APU DIOS ni pehding tu.

<sup>14</sup> Negibbuh humman et iappit Moses hu lakkitun baka tep ya liwat. Inta-pew nan Aaron niyadda u-ungnga tu hu ngamay dad ulun nunman ni baka <sup>15</sup> et han kelengan Moses. Immalan kuheyaw nunman ni baka et itdek tu kimeng tu et ida-nih tu etan di epat ni ha-duk ni dimmewdew ni dugun altar ma-lat ipahding tu hu elaw ni panlinnih. Et iduyag tu etan edum ni kuheyaw di hengeng ni altar ma-lat maieng-eng nan APU DIOS. <sup>16</sup> Inlan Moses emin hu taban neikuyeput di egeh niya etan ni altey, et ya etan dewwan basin niyadda neikuyeput ni taba et giheben tuddan emin di altar. <sup>17</sup> Et alen tudda etan natdaan ni parteh ni baka e humman ida hu belat, yadda laman, et yadda kinan tu et tu giheben idan emin di a-allow ni kampu, tep humman hu inhel APU DIOS ni pehding tu.

<sup>18</sup> Impeang-ang mewan nan Moses hu lakkitun kalneroh ni i-appit tun kagihheba. Et ita-pew nan Aaron niyadda lalakkin u-ungnga tu hu ngamay dad ulun nunman ni kalneroh, <sup>19</sup> et kelengen Moses. Tinaya tu etan kuheyaw et iwakgih tuddan dingding ni altar. <sup>20</sup> Sinenegteg tu humman ni kalneroh et giheben tudda etan edum ni laman ni netegteg. Anin etan ulu et yadda taba et nekigihebe tu. <sup>21</sup> Inulahan tu egeh et yadda heli

\* **8:8** 8:8 Hedin ya Urim et ya Thummim ey heni dewwan ekka-kut ni batun neibulsad ephod e kameussal di bubunut ni pengamtan ni pinhed nan APU DIOS ni meippahding.

et pakigiheb tud altar. Ya kayyaggud ni hamuy ni nunman ni neiappit ni kagihheba ey kamengippeamleng nan APU DIOS.

<sup>22</sup> Entanni ey impeang-ang nan Moses nan hi APU DIOS etan meikkadwan lakkitun kalneroh ni mekleng ni pampeddian di Aaron et yadda lalakkin u-ungnga tu. Inta-pew da ngamay dad ulun kalneroh <sup>23</sup> et kelengen nan Moses. Immalan kuheyaw et ha-adi tud wannan ni tangilan Aaron, et yad wannan ni am-ama-an ni ngamay tu niyad helitu. <sup>24</sup> Et ha-adi tudda dama kuheyaw etan di wannan ni tangiladdan lalakkin u-ungngan Aaron, et yad wannan ni am-ama-an ni ngamay da niyad heli da. Et iwakgih tu etan edum ni kuheyaw di dingding ni altar.

<sup>25</sup> Inla tudda emin hu taba, anin taban neikuyeput di egeh niya etan ni altey, et ya etan dewwan basin niyadda neikuyeput ni taba, ya taban ikul tu et ya wannan ni ulpu tu. <sup>26</sup> Ey immalan tellun klasih ni sinapay ni neieng-eng nan APU DIOS, e hakey ni sinapay ni eleg meha-adan ni kamampelbag, ya hakey ni sinapay ni neha-adan ni mansikan olibah et ya meingpih ni sinapay, et ita-pew tuddad taba et yad wannan ni ulpun kalneroh. <sup>27</sup> Impatnged Moses emin ida huyyan Aaron niyadda lalakkin u-ungnga tu et ita-gey dan impeang-ang nan APU DIOS. <sup>28</sup> Inla mewan Moses ida humman et ita-pew tuddad kamei-appit ni kagihhebad altar et giheben tu. Humman hu kamei-appit ni pampeddian di Aaron et yadda u-ungnga tu. Ya hamuy idan nunman ni neiappit ey kamengippeamleng nan APU DIOS. <sup>29</sup> Entanni ey inlan Moses hu pagew et ita-gey ey impeang-ang nan APU DIOS. Humman hu patal Moses etan di lakkitun kalneroh ni neiappit ni pampeddian idan padi. Huyya impahding tu tep inu-unnud tu intugun APU DIOS ni pehding tu.

<sup>30</sup> Immala mewan hi Moses ni lana et ya kuheyaw di altar et iwakgih tud Aaron et yadda u-ungnga tu et yad balwasi da. Henin nunya impahding tu ma-lat maieng-eng idan APU DIOS, anin idan balwasi da.

<sup>31</sup> Kan Moses nan Aaron et yadda u-ungnga tuy "Ilaw yu etan detag di heggeppan di Tabernacle et iheeng yu et kanen yudman. Ey ekan yu etan ida sinapay di basket ni neiappit ni nampadian yu, tep humman intugun APU DIOS. <sup>32</sup> Giheb yun emin hu metdaan ni detag et ya metdaan ni sinapay. <sup>33</sup> Panha-ad kayu eyad heggeppan di Tabernacle ni pitun aggew ingganah megibbuh hu elaw ni kei-eng-engan yun pampeddian yu. <sup>34</sup> Huyyan impahding tayun nunya ey meippuun di intugun APU DIOS ma-lat ka-kalan ni liwat yu. <sup>35</sup> Mahapul nisin manha-ad kayud heggeppan di Tabernacle ni pitun aggew niya pitun hileng et ipahding yu hu intugun APU DIOS ni pehding yu ma-lat eleg kayu matey."

<sup>36</sup> Et u-unnuden nan Aaron et yadda u-ungnga tun emin hu inhel Moses ni intugun APU DIOS.

## 9

### *Ya nengilepuan Aaron ni man-appit*

<sup>1</sup> Yan newa-waan ni negibbuan ni neieng-engan di Aaron et yadda u-ungnga tun lalakkin mampeddi ey ineyagan idan Moses, anin ida etan ni kamengipappangngulun helag Israel. <sup>2</sup> Ey kantun Aaron ey "I-li kan hantoon tun lakkitun baka et ya lakkitun kalneroh ni endi dipektoh da et iappit muddan APU DIOS. I-appit mu etan baka tep ya liwat idan tuu ey hedini ya etan kalneroh, man iappit mun kagihheba. <sup>3</sup> Ey ehel muddan helag Israel et umi-liddan lakkitun gelding ni mei-appit tep ya liwat da, ya hantoon tun baka et ya kalneroh ni kamei-appit ni kagihheba. Emin ida huyyan mei-appit ey mahapul ni endi dipektoh da. <sup>4</sup> Ey man-appit idan bulug ni baka et ya lakkitun kalneroh ni pekiddagyuman dan APU DIOS. Unnudan dadda huyyan alinah ni neha-adan ni mansikan olibah. Mahapul ni pehding idan tuu huyya, tep mampeang-ang hi APU DIOS ni hi-gayun nunya."

<sup>5</sup> Inlaw idan tutu-ud hinanggan Tabernacle ida humman ni inhel nan Moses et maemung idan menaydayaw nan APU DIOS. <sup>6</sup> Kan Moses ey "Huyya inhel APU DIOS ni pehding yu ma-lat mampeang-ang ni hi-gayu hu kaumhilin dayaw tu."

<sup>7</sup> Et kan Moses nan Aaron ey "Lakkay di altar et man-appit ka tep ya liwat, ey man-appit kan kagihheba ma-lat ma-kal liwat mu et ya liwat idan tuu. Ipahding mu huyya meippuun di intugun APU DIOS."

<sup>8</sup> Et lumaw hi Aaron di altar et kelengen tu etan hantoon tun bakan kamei-appit tep ya liwat tu. <sup>9</sup> Indawat idan u-ungnga tun laki hu kuheyaw, et itdek tu kimeng tu et ida-nih tuddad heni ha-duk ni dimmewdew di dugun altar, et iduyag tu etan natdaan ni kuheyaw di hengge ni altar. <sup>10</sup> Giniheb tudman di altar hu taba, yadda basin et ya altey ni neiappit tep ya liwat e inu-unnud tu intugun APU DIOS ni inhel Moses. <sup>11</sup> Nem tu giniheb di a-allaw ni kampu etan ida detag et ya belat.

<sup>12</sup> Negibbuh humman et kelengen Aaron etan i-appit tun kagihheba, et idwat idan lalakkin u-ungnga tu hu kuheyaw nunman ni animal et iwakgih tuddad dingding ni altar. <sup>13</sup> Ey hinakkehakkey dan indawat ni hi-gatu etan ida negenedged ni detag, anin ya ulu et giheben tuddad altar. <sup>14</sup> Inulahan tudda wadad egeh et yadda heli et giheben tudda etan di altar.

<sup>15</sup> Negibbuh humman et peang-ang tu etan gelding ni kamei-appit tep ya liwat idan tuu et kelengen tu, henin impahding tu etan ni neiappit tep ya liwat tu. <sup>16</sup> In-appit tu humman ni kagihheba e inu-unnud tu hu kameunnud ni kapan-appisi. <sup>17</sup> Et hantu peang-ang etan kamei-appit ni begah e gimmal, et pakigiheb tud altar e in-edum tudda etan di edum ni kamei-appit ni kagihheba.

<sup>18</sup> Kinleng tu etan bulug ni baka niya etan lakkitun kalneroh ni kamei-appit ni pekiddagyuman idan tuun nan APU DIOS. Indawat idan lalakkin u-ungnga tu etan kuheyaw idan nunman ni animal et iwakgih tuddad dingding ni altar. <sup>19-21</sup> Inta-gey tudda etan pagew et ya ulpu et peang-ang tuddan APU DIOS meippuun di inhel Moses ni pehding tu. Inta-pew tuddadman etan ida taban lakkitun baka, ya taban lakkitun kalneroh, ya taban ikul da, ya tabad kad-an ni egeh da, yadda basin da niya altey da ma-lat giheben tuddad altar.

<sup>22</sup> Negibbuh humman et ita-gey tu hu ngamay tud hinanggaddan tuu et bendisyonan tudda et han melehbeng e nalpu etan di altar. <sup>23</sup> Et humgep di Moses nan Aaron di Tabernacle. Entanni ey immehep ida et bendisyonan dadda etan tutu-u, ey nampeang-ang hu kaumhilin dayaw APU DIOS ni hi-gadan emin. <sup>24</sup> Ey pinhakkeyey impaelin APU DIOS hu kamantebbel ni apuy, et giheben tun emin etan ida neiappit ni kagihheba et yadda tabad altar. Inang-ang idan tuu humman ey ida kamantekkkuk ni amleng da et lumukkbub idad puyek.

## 10

### *Ya nanliwatan di Nadab nan hi Abihu*

<sup>1</sup> Hedin di Nadab nan Abihu e u-ungngaddan Aaron ni laki ey inla da etan penggihheban ni bangbanglun insensoh, et ha-adan dan ngalab et wakgihan dan insensoh et peang-ang dan APU DIOS. Huyyan impahding da ey eleg da u-unnuden hu intugun APU DIOS ni pehding dan mengihheb ni insensoh. <sup>2</sup> Et humman hu, endi maptek ey impaelin APU DIOS hu apuy et matey idad hinangga tu.

<sup>3</sup> Kan Moses nan hi Aaron ey "Huyya hu pinhed APU DIOS ni e-helen etan di kantun 'Mahapul ni emin ida mansilbin hi-gak ey amtaen da e kayyagguddak ni peteg niya meiddeyyawwak idad tuuk.'" Nem kapakdag Aaron hu i-ineng.

<sup>4</sup> Ineyagan nan Moses di Mishael nan Elsaphan e u-ungngaddan Ussiel, e agin a-ammed Aaron, et kantun hi-gaday "Ekal yu annel ida eyan dewwan agi yu eyad yuka pandaydayawi et ilaw yuddad a-allaw ni kampu" <sup>5</sup> Immalidda et itnged dad balwasi etan idan netey et iguyud daddad a-allaw ni kampu e inu-unnud da hu inhel Moses ni pehding da.

<sup>6</sup> Entanni ey kan Moses nan Aaron et yadda u-ungnga tu e di Eleasar nan Ithamar ey "Hagu yu bewek yu niya entan tu bi-ki balwasi yu ma-lat eleg yu peang-ang e kayu kaumlelemyung. Tep hedin peang-ang yu lemyung yu, man mettey kayu ey illagat APU DIOS idan emin hu helag Israel tep ya bunget tu. Nem yadda edum tayun helag Israel ey dammutun peang-ang da lemyung da, tep ya neteyyan ida eyan dewwan pintey APU DIOS ni apuy. <sup>7</sup> Ey entan tu hi-yan eya heggeppan di Tabernacle, tep neieng-eng kayun panggunnun APU DIOS neipalpun neduygan ni ulu yun lana." Et u-unnuden da humman ni intugun Moses ni pehding da.

<sup>8</sup> Entanni ey kan APU DIOS nan Aaron ey <sup>9</sup> "Eleg mabalin ni kayu umhegep idan helag mu eyad Tabernacle e kad-an ku, hedin imminum kayun kaumbuteng, tep hedin hanniman pehding yu, man mettey kayu. Mahapul ni u-unnuden idan helag mun ingganah huyyan olden. <sup>10</sup> Ey mahapul ni amtaen yu hedin hipadda etan neieng-eng ni hi-gak niya hedin hipa kei-ussalan da. Niya mahapul ni amtaen yu hu kameibbillang ni malinih niyadda etan kameibbillang ni beken ni malinih. <sup>11</sup> Ey mahapul ni ittutuddum idan helag Israel ni emin hu intugun kun inhel kun Moses."

<sup>12</sup> Entanni ey kan Moses nan Aaron et yadda etan ni dewwan u-ungnga tun di Eleasar nan Ithamar ey "Aleyu etan natdaan ni alinah ni neiappit nan APU DIOS et kapyaen yun sinapay. Nem entan tu kamdugin kamampelbag. Ey ekan yud takdul ni altar tep neieng-eng nan APU DIOS. <sup>13</sup> Mahapul ni kennen yudda humman di kad-an ni neieng-eng ni lugal, tep humman ni mekkan ni kamei-appit ni hi-gatu hu patal yu ey patal ida daman helag yu. Huyya tugun tun e-helen kun hi-gayu. <sup>14</sup> Nem dammutun kennen

yudda pagew niya ulpun neipeang-ang nan APU DIOS di attun kameibbillang ni malinih. Tep patal yun emin idan helag yun lalaki et yadda bibi-i humman ni i-appit idan edum yun helag Israel ni pekiddagyuman dan APU DIOS. <sup>15</sup> Humman idan ulpu et ya pagew ey meillaw di altar e pengiggihheban ni taba et meita-gey ni meippeang-ang nan APU DIOS. Ey huyyadda patal yu et yadda helag yun ingganah meippuun di intugun tu.”

<sup>16</sup> Minahmahan Moses hedini hipa neipahding etan ni gelding ni neiappit ni ke-kalan ni liwat, et yan nengamtaan tun negihebe ey imbunget tud Eleasar nan Ithamar e natdaan ni u-ungngan Aaron. <sup>17</sup> Kantun hi-gaday “Kele eleg yu kanen di dallin ni Tabernacle humman ni neiappit ni ke-kalan ni liwat? Tep humman ni neiappit ey neieng-eng nan APU DIOS. Indawat tun hi-gayu ma-lat iappit yun ke-kalan ni liwat idan tuu. <sup>18</sup> Eleg yu ihgep hu kuheyaw nunman ni neiappit di bawang ni Tabernacle. Et humman hu, gullat et, kinan yud dallin. Kaw eggak itugun e hanniman pehding yu?”

<sup>19</sup> Hinumang Aaron ey kantuy “Tam nan-appit ida tuun nunya nan APU DIOS ni ke-kalan ni liwat da niya nan-appit idan kagihheba. Nem bimmunget damengu hi APU DIOS et pateyen tudda dewwan u-ungngak. Kaw kammu nem um-amleng hi APU DIOS hedini kinan kun nunya hu detag ni neiappit ni ke-kalan ni liwat?” <sup>20</sup> Dingngel Moses humman ni inhel Aaron ey inebulut tu.

## 11

*Yadda etan dammutun kennen et ya eleg mabalin ni kennen*

<sup>1</sup> Kan APU DIOS di Moses nan hi Aaron ey “Ehel yuddan <sup>2</sup> edum yun helag Israel e yadda hu animal ni dammutun kennen da <sup>3</sup> ey yadda etan negadwa kukub da niya daka pennidwaan galgala hu kinan da. <sup>4-6</sup> Nem eleg mabalin ni kennen yu kamel, ya badger niya rabbit, tep ma-nut daka pennidwaan galgala hu kinan da, nem eleg megadwa kukub da winu heli da. Et humman hu, eleg ida meibbillang ni malinih. <sup>7</sup> Entan tu ekan hu killum, tep ma-nut negadwa kukub da, nem eleg da pennidwaan galgala hu kinan da. Et humman hu, eleg ida meibbillang ni malinih. <sup>8</sup> Entan tudda ekan huyyan animal ey entan tu kapa annel da hedini netey ida tep eleg ida meibbillang ni malinih.

<sup>9</sup> Hedini yadda mategun wadad danum, ey ebuh ida hu wada lukhip tu niya ipay tun dammutun kennen yu. <sup>10-11</sup> Entan tu ekan ida endi lukhip tu niya ipay tu, tep eleg ida meibbillang ni malinih. Ey entan tudda kapa hedini netey ida. <sup>12</sup> Pidwaek ni e-helen, e eleg mabalin ni yu kennen hu hipan mategun wadad danum ni endi lukhip tu niya ipay tu.

<sup>13-19</sup> Yadda sisit ni eleg mabalin ni kennen yu ey ya tulduh, ya akup, ya gawwang, ya falcon, ya kukkuk, ya sisit ni kamengngan ni netey, ya butbut, ya ostrich, ya seagull, ya stork, ya heron, ya pelican, ya cormorant, ya hoopoe, ya panniki niya litlit.

<sup>20</sup> Emin hu nepayakan ni insect ni epat heli tun kaumkadap ey entan tu ekan, tep eleg ida meibbillang ni malinih. <sup>21</sup> Nem yadda edum ni nepayakan ni insect ni kaupaytuk ey ida kameibbillang ni malinih et dammutun kennen yudda. <sup>22</sup> Henin dudun, ya cricket niya taggunay. <sup>23</sup> Nem yadda edum ni nepayakan, nem ida kaumkadap ey entan tudda ekan, tep eleg ida meibbillang ni malinih.

<sup>24</sup> Ya tuun nengapan netey ni annel idan nunyan animal ey meibbillang ni beken ni malinih ingganah mehilling. <sup>25</sup> Hedini gegliden ni tuu annel idan nunyan animal, ey mahapul ni pepu-ut tun balbalan balwasi tu, nem mannenneng ni meibbillang ni beken ni malinih ingganah mehilling.

<sup>26</sup> Yadda netey ni animal ni eleg megadwa kukub da winu eleg da pennidwaan galgala hu kinan da ey eleg ida meibbillang ni malinih. Et ya etan tun mengeppan annel da ey meibbillang ni beken ni malinih ingganah mehilling. <sup>27</sup> Yadda netey ni animal ni epat heli dan wada kimeng da ey eleg ida meibbillang ni malinih, et ya etan tun mengeppan annel da ey meibbillang ni beken ni malinih ingganah mehilling. <sup>28</sup> Hedini pini-dit winu ginlid ni hakey ni tuu hu netey ni animal, ey mahapul ni pepu-ut tun balbalan hu balwasi tu, nem mannenneng ni meibbillang ni beken ni malinih ingganah mehilling.

<sup>29-30</sup> Emin hu moles, ya utut, ya kallulu, ya kutkutli niya silay ey eleg ida meibbillang ni malinih. <sup>31</sup> Et ya etan tuun mengeppaddan nunman anin ni mategudda winu netey ida ey meibbillang ni beken ni malinih ingganah mehilling. <sup>32</sup> Meibbillang daman beken ni malinih hu hipan ke-gahan da hedini netey ida, henin keyew, ya luput, ya lalat, ya langgusih, winu hipan kameussal. Et humman hu, mahapul ni meitta-mel idad danum, nem eleg ida damengu meibbillang ni malinih ingganah mehilling.

<sup>33</sup> Hedini na-gah hu netey ni annel dad pulan banga ey meibbillang ni beken ni malinih anin ya neihududman. Et humman hu, mahapul ni pephiken yu humman ni banga. <sup>34</sup> Yadda kennen ni neduyagan ni danum ni neiha-ad diman ni banga ey entan tu

ekan tep meibbillang law ni beken ni malinih. Ey eleg mabalin ni innumen hu hu danum ni neiha-ad diman tep meibbillang ni beken ni malinih. <sup>35</sup> Anin ni pugun ni kapengihhe-engin sinapay winu banga et hedin na-gahan ni netey ni annel idan nunman ey meibbillang ida law ni beken ni malinih. Et humman hu, mahapul ni bahbahaen yudda.

<sup>36</sup> Nem hedin hebwak winu tangkih ni danum hu na-gahan idan nunman ni netey ey nanengtun meibbillang ni malinih etan danum, nem ya etan tuun an mengkal hu meibbillang ni beken ni malinih. <sup>37</sup> Hedin na-gahan idan nunman ni netey hu bukel ni meitnem ey nanengtun meibbillang ni malinih. <sup>38</sup> Nem hedin neita-mel etan bukel ey na-gahan idan nunman ni netey ey meibbillang ni beken ni malinih.

<sup>39</sup> Ya etan animal ni dammutun kennen ey meibbillang ni beken ni malinih hedin netey. Et humman hu, ya etan tuun mengeppan netey ni annel tu ey eleg meibbillang ni malinih ingganah mehilling. <sup>40</sup> Ya etan tuun mengngan winu mengnged ni nunman ey mahapul ni ibbalbal tu balwasi tu, nem nanengtun meibbillang ni beken ni malinih ingganah mehilling.

<sup>41-42</sup> Eleg mabalin ni kennen yudda kamambinulluh winu kamangkinaddap di puyek ni epat winu dakel heli tu tep eleg ida meibbillang ni malinih. <sup>43</sup> Entan tudda ekan humman ma-lat eleg kayu maibilang ni beken ni malinih. <sup>44</sup> Entan tudda nisi kapa niya entan tudda ekan humman ni kamambinulluh winu kamangkinaddap di puyek ma-lat eleg kayu mabalin ni beken ni malinih. Tep hi-gak e AP-APU e Dios yu ey kayyaguddak ni peteg. Et humman hu, mahapul ni kayyagud kayu daman peteg. <sup>45</sup> Hi-gak e AP-APU hu nengipengulun hi-gayun neni-yanan yun Egypt, ma-lat hi-gak hu daydayawen yun Dios yu. Et humman hu, mahapul ni kayyagud kayu e endi yu pehding ni lawah, tep hi-gak ey kayyaguddak ni peteg. \*

<sup>46</sup> Huyyadda meunnud ni tugun meippanggep ni animal, yadda sisit, yadda mategun wadad danum, yadda kamangkinaddap, yadda kamambinulluh niyadda kamandinallan di puyek. <sup>47</sup> Mahapul ni paka-ang-angen yu hedin hipadda dammutun kennen yun kameibbillang ni malinih niyadda eleg mabalin ni kennen yun eleg meibbillang ni malinih."

## 12

### *Ya meunnud ni pan-unggaan ni bii*

<sup>1</sup> Immehel mewan hi APU DIOS nan Moses ey kantuy: Yaddahuy hu meunnud ni pan-unggaan idan biin helag Israel. <sup>2</sup> "Hedin newad-an hu hakey ni bii et man-ungngan laki, ey meibbillang ni beken ni malinih ni pitun aggew henin kaelliin kamelpud annel tun kabulabulan. <sup>3</sup> Ya etan gelang ey mahapul ni mekuggit ni meikkewwalun aggew tu. <sup>4</sup> Ey meibbillang ni beken ni malinih ni hambulan et tellun aggew tep ya kuheyaw ni impakewah tun nan-unggaan tu. Eleg ni mabalin ni tu keppaen ida kameussal di kapandeyyawi niya eleg mabalin ni an umhegep diman ingganah megibbuh pengippahdingan tun elaw ni panlinnih ni annel.

<sup>5</sup> Hedin bii in-ungnga tu, ey meibbillang ni beken ni malinih ni dewwan lingguan, henin kaelliin kamelpud annel tu. Ey hehgeden tu dewwan bulan et enem ni aggew et han dammutun ippahdingan tu elaw ni panlinnih ni kuheyaw tep ya nan-unggaan tu.

<sup>6</sup> Hedin negibbuh hu nengipahdingan tun elaw ni panlinnih etan ni in-ungnga tun laki winu bii, ey mahapul ni illaw tu etan ni padi hu hantoon tun kalneroh di heggeppan di Tabernacle et iappit tun kagihheba nan APU DIOS. Ey illaw tu hu hakey ni paluma winu balug et iappit tu tep ya liwat tu. <sup>7</sup> Ellan etan ni padi humman et iappit tu, et han dammutun meibbillang ni malinih etan bii. Huyyadda hu mahapul ni pehding ni bii hedin negibbuh ni nan-ungnga.

<sup>8</sup> Nem hedin newetwet etan bii et eleg tu hanggela hu kalneroh, ey dammutu hu dewwan paluma winu dewwan balug. Mei-appit hu hakey ni kagihheba ey mei-appit hu hakey tep ya liwat tu. Huyya pehding ni padin man-appit ma-lat dammutu mewan ni meibbillang ni malinih etan bii."

## 13

### *Ya meunnud meippanggep ni degeh ni belat*

<sup>1</sup> Kan APU DIOS di Moses nan hi Aaron ey <sup>2</sup> "Hedin wada hakey ni tuun wada simmemel di belat tun angetakkut ni gulid winu pelha winu wada limmebag di belat tu, winu

\* **11:45** 11:45 Ang-ang yu hu Leviticus 19:2 et ya 1 Peter 1:16.

mablah belat tu, ey ilaw yu padi e hi Aaron winu hakey ni helag tu. <sup>3</sup> Mahapul ni ang-angen ni padi humman ni gulid et hedini bimmelah hu bewek etan di belat ni negulid niya himmalem, ey anggetakkut humman ni degeh et mahapul ni e-helen ni padi e meibbillang humman ni tuun beken ni malinih.

<sup>4</sup> Nem hedini eleg humelem etan nebebla ey eleg bumlah hu bewek, ey appilen ni ebuh ni padi humman ni tuun pitun aggew. <sup>5</sup> Et hedini nedatngan hu meikkeppitun aggew, ey ang-angen mewan ni padi humman ni tuu et hedini eleg maihinap etan gulid di annel tu, ey appilen tun pitu pay ni aggew. <sup>6</sup> Ey ang-angen mewan ni padin kapitun aggew et hedini napwahan, ey e-helen ni padi e meibbillang ni malinih humman ni tuu, tep gulid ni ebuh humman. Nem mahapul ni ibbalbal etan ni tuu balwasi tu et han maibilang ni malinih. <sup>7</sup> Nem hedini meibbangngad humman ni gulid tu et meihhinnap, ey mahapul ni an mampeang-ang mewan etan ni padi. <sup>8</sup> Et hedini neihinap, ey e-helen tu e meibbillang ni beken ni malinih humman ni tuu niya e-helen tu e anggetakkut humman ni gulid tu, tep kamei-tan.

<sup>9</sup> Emin hu tuun wada gulid tun kamei-tan ey mahapul ni an mampeang-ang ni padi. <sup>10</sup> Et hedini ang-angen tu ey limmebak niya nebebla ey bimmelah bewek diman, <sup>11</sup> ey humman keang-angan tu e kamei-tan humman ni gulid. Et humman hu, e-helen ni padi e meibbillang ni beken ni malinih humman ni tuu. Et eleg law mahapul ni appilen tu ma-lat ang-ang-angen tu, tep nanna-ud ni meibbillang ni beken ni malinih humman ni tuu.

<sup>12-13</sup> Nem hedini napwahan etan gulid tu et ebuh law piklat ni wada, ey e-helen ni padi e kantuy 'Meibbillang ka law ni malinih.' <sup>14-15</sup> Nem hedini meibbangngad hu nebeblad annel tu, ey e-helen ni padi e kantuy 'Leprosih huyya, meibbillang kan beken ni malinih.'

<sup>16</sup> Nem hedini napwahan humman ni nebebla, et mambangngad hu ang-ang dedan etan ni belat etan ni tuu, ey mahapul ni umlaw di kad-an ni padi <sup>17</sup> ma-lat ang-angen tu mewan. Et hedini kayyaggud law etan belat ni tuu, ey e-helen ni padi e dammutu law ni meibbillang ni malinih etan tuu.

<sup>18</sup> Hedini wada hakey ni tuun napwahan hu pelha tu, <sup>19</sup> nem entanni ey wada kamanlelbag ni mablah ang-ang tu winu wada kamandalang niya mablah ni neihullul ni simmemel di kad-an lan pelha, ey mahapul ni umlaw etan tuud kad-an ni padi, et tu peang-ang hedini hipa humman. <sup>20</sup> Hedini ang-angen ni padi ey himmalem niya bimmelah hu bewek diman, ey e-helen tu e meibbillang humman ni tuun beken ni malinih, tep kamei-tan humman ni degeh ni belat. <sup>21</sup> Nem hedini eleg bumlah hu bewek etan di limmebak niya eleg humelem et lektattuy neumah, ey mahapul ni appilen ni padi humman ni tuun pitun aggew. <sup>22</sup> Et hedini yan nunman ni pitun aggew ey neihinap etan mablah di annel tu, ey mahapul ni e-helen ni padi e meibbillang ni beken ni malinih humman ni tuu, tep kamei-tan hu degeh tu. <sup>23</sup> Nem hedini eleg maihinap e nepiklatan ni ebuh, ey e-helen ni padi e meibbillang ni malinih humman ni tuu.

<sup>24</sup> Hedini neatungan etan belat ey bimmelah winu dimmalang hu petek ni neatungan, <sup>25</sup> ey mahapul ni tu peang-ang ni padi. Et hedini ang-angen tu ey bimmelah hu bewek diman niya himmalem humman ni neatungan, ey meibbillang ni beken ni malinih humman ni tuu, tep kamei-tan humman ni degeh ni belat tu. <sup>26</sup> Nem hedini eleg bumlah hu bewek etan di neatungan niya kamangkeibbangngad hu ang-ang dedan ni belat tu, ey appilen ni padin pitun aggew. <sup>27</sup> Ang-angen tu mewan ni meikkeppitun aggew, et hedini kamangkeihhinnap mewan etan nebeblad annel etan ni tuu, ey e-helen ni padi e eleg meibbillang ni malinih humman ni tuu, tep kamei-tan humman ni degeh ni belat tu. <sup>28</sup> Nem hedini napwahan etan nebebla, nem neatungan ni ebuh et mepiklatan, ey humman keang-angan tu e eleg mei-tan humman ni degeh. Et e-helen ni padi e meibbillang ni malinih etan ni tuu.

<sup>29</sup> Ya etan laki winu biin wada nebeblad ulu tu winu pangal tu, <sup>30</sup> ey mahapul ni ang-angen ni padi, et hedini himmalem niya himmin-appil hu ang-ang ni bewek diman, ey e-helen ni padi e meibbillang ni beken ni malinih humman ni tuu, tep kamei-tan humman ni degeh tu. <sup>31</sup> Nem hedini ang-angen ni padi ey beken ni hanniman, mahapul ni appilen tun pitun aggew. <sup>32</sup> Ey ang-angen mewan ni padin meikkeppitun aggew, et hedini eleg maihinap ey eleg humelem niya hedini eleg humin-appil hu ang-ang ni bewek diman, <sup>33</sup> ey mahapul ni memukmukan humman ni tuu, nem eleg tu kep-uhi hu bewek di pettek ni nebebla. Ey appilen tu mewan ni pitun aggew. <sup>34</sup> Hedini nedatngan hu meikkeppitun aggew, ey ang-angen mewan ni padi et hedini eleg maihinap niya eleg humelem, ey e-helen tu e meibbillang ni malinih humman ni tuu. Ey mahapul ni ibbalbal etan ni tuu balwasi tu ma-lat maibilang ni malinih humman ni tuu. <sup>35</sup> Nem hedini neibbangngad etan nebebla et neihinap, <sup>36</sup> ey mahapul ni pidwaen mewan ni padin ang-angen, et hedini tuwangun neihinap hu nebebla ey e-helen tu e beken ni malinih humman ni tuu, anin ni



eleg humin-appil hu ang-ang etan ni bewek. <sup>37</sup> Nem hedin ang-angen ni padi ey eleg maihinap etan nebebla, tep napwahan ey kamemmel hu bewek diman, ey e-helen ni padi e meibbillang ni malinih etan tuu.

<sup>38</sup> Hedin wadadda simmemel ni mangkablak di belat ni laki winu bii, <sup>39</sup> ey mahapul ni ang-angen ni padi, et hedin beken ni mablak ni peteg, ey e-helen ni padi e meibbillang ni malinih etan tuu tep eleg mei-tan humman ni degeh.

<sup>40-41</sup> Anin ni nemukmukan hu hakey ni tuu tep naplag bewek tu, et meibbillang ni malinih humman ni tuu. <sup>42</sup> Nem hedin wada simmemel ni mangkadlang ey mablak etan di naplagan ni bewek di ulu tu, ey kamei-tan humman ni degeh ni belat tu. <sup>43-44</sup> Et mahapul ni ang-angen ni padi humman ni tuu, et hedin tu-wangun wada mangkadlang niya mablak ni gulid di ulu tu, ey e-helen tu e meibbillang ni beken ni malinih humman ni tuu, tep kamei-tan humman ni degeh.

<sup>45</sup> Ya etan tuun wada degeh tun kamei-tan, ey mahapul ni mambalwasin nebi-ki ey eleg tu heggua bewek tu niya hennian tu bungut tu. Ey itekutekkuk tu hu 'Beken nak ni malinih! Beken nak ni malinih!' <sup>46</sup> Mannenneng ni meibbillang ni beken ni malinih humman ni tuu ingganah ni me-kal humman ni degeh ni belat tu. Ey mahapul ni meappil et an manha-ad di a-allaw ni kampu et meidawwid edum tun tuu.

*Ya olden ni meippanggep ni buut di luput*

<sup>47-49</sup> Hedin bimmuut hu balwasin nekapyad dutdut ni kalneroh winu kayyaggud ni luput, winu kumpulmih ni nekapyad katat niya hedin yadda humman ey meatta winu madmadlanggan, ey humman ida etan kameihhinnap. Et humman hu, mahapul ni ang-angen ni padi. <sup>50</sup> Binbini ni padi humman ni bimmuut ey ellan tu et itlu tun pitun aggew. <sup>51</sup> Hedin nedatngan etan meikkeppitun aggew ey binbini tu mewan, et hedin neihinap ida humman ni buut, ey meibbillang ni beken ni malinih. <sup>52</sup> Et emin ida etan luput winu katat ni wada hanniman ni buut ni kameihhinnap, ey mahapul ni gihheben etan ni padi.

<sup>53</sup> Nem hedin ang-angen ni padi ey eleg maihinap, <sup>54</sup> ey pebalbal tu etan luput et iwaklin tu mewan ni pitun aggew. <sup>55</sup> Hedin nedatngan etan nagtud ni aggew et ang-angen tu ey eleg humin-appil hu ang-ang tu, ey anin ni eleg maihinap etan buut et meibbillang ni beken ni malinih. Et humman hu, mahapul ni gihheben anin hedin kantu et wadad beneggan winu hangga-an ni balwasi etan buut. <sup>56</sup> Nem hedin ang-angen ni padi ey kamangke-kal etan buut ni nengibalbalan da, ey bi-kien tu humman ni nebuutan et ekalan tu. <sup>57</sup> Nem hedin mewedda mewan etan buut et meihhinnap, ey mahapul ni gihheben humman ni balwasi. <sup>58</sup> Nem hedin neibalbal etan luput ey neendi etan buut, ey mahapul ni ippidwan ibbalbal et han maibilang ni malinih.

<sup>59</sup> Huyyadda mahapul ni u-unnuden hedin bimmuut hu luput winu balwasin nekapyad dutdut ni kalneroh winu kayyaggud ni luput winu katat et han dammutun meibbillang ni malinih winu beken ni malinih."

## 14

*Ya pehdng etan ni tuun na-kal hu degeh ni belat tu*

<sup>1</sup> Kan mewan APU DIOS nan Moses ey <sup>2</sup> "Huyyadda meunnud ni pengippahdingan ni elaw ni panlinnih hedin na-kal hu degeh ni belat ni kamei-tan. Mahapul ni meillaw nan padi etan tuun na-kal hu henin nunman ni degeh tu, <sup>3</sup> ma-lat ilaw tu humman ni tuud a-allaw ni bebley et pakabbinbini tu. Et hedin makulug ni napwahan hu humman ni degeh ni belat tu, <sup>4</sup> ey e-helen ni padi etan ni tuu et i-li tu hu dewwan sisit ni kameibbillang ni malinih ni kamei-appit, ya keyew ni sedar, ya madlang ni sinulid et ya pingin hissop. <sup>5</sup> Ey immandal ni padi e keklengen da etan hakey ni sisit etan di neiteyan pulan mahukung ni duyu ni neha-adan ni pakeahul ni danum di hebwak. <sup>6</sup> Ey itta-mel ni padi etan di kuheyaw ni sisit ni nakleh hu hakey ni mategun sisit e pekitta-mel tu etan madlang ni sinulid et ya etan keyew ni sedar. <sup>7</sup> Niya iwwakgih tu etan kuheyaw ni meminpittu etan ni tuun na-kal degeh tu. Ey han tu inhel etan ni tuu e meibbillang law ni malinih. Hedin ginibuh ni padi ey peteyyab tu law etan hakey ni sisit di a-allaw ni bebley.

<sup>8</sup> Humman ni tuun na-kal degeh ni belat tu ey mahapul ni ibbalbal tu balwasi tu niya kep-uhan tu emin hu bewek di annel tu, anin ni iming tu, et han pan-emeh et han maibilang ni malinih. Et han dammutu law ni umhegep di kampu, nem eleg ni umhegep di baley dan pitun aggew. <sup>9</sup> Yan meikkeppitun aggew ey kep-uhan tu mewan ni emin hu bewek di annel tu, ya bewek di ulu tu, ya iming tu niya kidey tu. Ey mahapul ni ibbalbal tu balwasi tu niya man-e-meh et han law maibilang ni malinih.

<sup>10</sup> Yan meikkewwalun aggew ey um-i-li humman ni tuun dewwan hantoon dan lakkitun kalneroh et ya hakey ni labah ni kalneroh ni endi dipektoh da, ya nehuluk ni dewwan kiloh ni kayyaggud ni alinah ni nekamdugan ni mansikan olibah, et ya hambasuh ni mansikan olibah. <sup>11</sup> Ey illaw ni padi etan tuu et yadda i-appit tud heggepan di Tabernacle di kad-an APU DIOS. <sup>12</sup> Ellan ni padi hu hakey etan ni kalneroh, et ya hambasuh ni mansika et ita-gey tu et peang-ang tun APU DIOS et maiappit tep ya bahul. <sup>13</sup> Keklengen tu humman ni kalneroh etan di kapengiklengin kamei-appit tep ya liwat niya kamei-appit ni kagihheba. Humman ni kalneroh ni kamei-appit tep ya bahul ey meidwat idan padi, henin kamei-appit tep ya liwat. Humman ida ey neieng-eng nan APU DIOS. <sup>14</sup> Hedin negibbuh ni kinleng ni padi, ey um-alan kuheyaw nunman ni kalneroh, et ha-adan tu wannan ni tangilan nunman ni nan-appit, ya am-ama-an ni wannan ni ngamay tu et ya heli tu ma-lat maibilang law ni malinih humman ni tuu.

<sup>15</sup> Um-ala mewan etan padin lanan olibah et iduyag tud willin tepayya tu <sup>16</sup> et itdek tu wannan ni ledledengngan tu et iwakgih tun meminpittud hinanggan Tabernacle e kad-an APU DIOS. <sup>17</sup> Ey ihha-ad ni padi etan edum ni natdaan ni lanan olibah etan idad neha-adan ni kuheyaw e yad wannan ni tangilan nunman ni nan-appit, yad wannan ni am-ama-an ni ngamay tu niya heli tu et maibilang ni malinih humman ni tuu. <sup>18</sup> Ey ya etan natdaan ni lanan olibah, ey ihha-ad ni padid ulu etan ni tuu, ma-lat ma-kal liwat tun APU DIOS et maibilang ni malinih.

<sup>19</sup> Ey i-appit ni padi etan kamei-appit tep ya liwat, ey pehding tu etan elaw ni panlinnih etan di tuun na-kal degeh tu. Hedin negibbuh ey keklengen tu etan kamei-appit ni kagihheba <sup>20</sup> et iappit tud altar e i-e-dum tu etan alinah ni kamei-appit. Pehding ni padi humman ni elaw ni panlinih ma-lat maibilang ni malinih etan tuu.

<sup>21</sup> Hedin newetwet etan tuu et eleg tu hanggela hu dewwan pakeetteng tun lakkitun kalneroh ey anin ni hakey i-ali tun i-appit tu tep ya bahul, ya hangkiloh ni kayyaggud ni alinah ni nekamdugan ni mansikan olibah, et ya hambasuh ni mansikan olibah. Humman ni kamei-appit ni ke-kalan ni liwat etan ni tuu ey itta-gey ni padi et peang-ang tun APU DIOS. <sup>22</sup> Um-i-li mewan humman ni tuun dewwan paluma winu dewwan balug, et mei-appit hu hakey tep ya liwat ey ya etan hakey ey mei-appit ni kagihheba.

<sup>23</sup> Yan meikkewwalun aggew ey i-alin nunman ni tuu etan ni padi etan ida kamei-appit et ipahding da hu elaw ni panlinnih di kad-an APU DIOS di Tabernacle. <sup>24</sup> Ey ellan ni padi etan pakeetteng tun kalneroh ni kamei-appit tep ya bahul niya mansikan olibah, et ita-gey tun peang-ang tun APU DIOS. <sup>25</sup> Keklengen tu humman ni pakeetteng tun kalneroh ni kamei-appit tep ya bahul, et umlan kuheyaw tu et ha-adan tu wannan ni tangila etan ni tuu et ya am-ama-an ni wannan ni ngamay tu et ya heli tu.

<sup>26</sup> Ey um-iduyag etan padin lanan olibah di willin tepayya tu <sup>27</sup> et itdek tu wannan ni ledledengngan tu et iwakgih tun meminpittud kad-an APU DIOS. <sup>28</sup> Ey ha-adan tun lanan olibah humman idan neha-adan ni kuheyaw di wannan ni tangilan nunman ni nan-appit, ya wannan ni am-ama-an ni ngamay tu niya heli tu. <sup>29</sup> Ihha-ad tu etan natdaan ni lanad ulu etan ni tuu et ipahding tu elaw ni panlinnih nunman ni tuun na-kal degeh tu.

<sup>30-31</sup> Ey i-appit etan ni padi hu hakey etan ni dewwan paluma winu balug tep ya liwat nunman ni tuu hedin humman hanggela tu. Ey ya etan hakey ey mei-appit ni kagihheba e i-e-dum tu etan di kamei-appit ni alinah. Hanniman pehding ni padin pengippahdingan tun elaw ni panlinnih nunman ni tuu. <sup>32</sup> Hanniman meunnud ni pengippahdingan tun elaw ni panlinnih idan newetwet ni wada degeh ni belat dan kamei-tan."

*Ya elaw ni meunnud ni panlinnih ni baley*

<sup>33</sup> Entanni ey kan mewan APU DIOS di Moses nan hi Aaron ey <sup>34</sup> "Hedin umdateng kayud Kanaan ni iddawat kun pambebleyan yu, et weddaek di edum ni baballey hu lumuy ni kameihhinnap, <sup>35</sup> ey mahapul ni umlaw etan kan baley di kad-an ni padi et kantuy 'Wada lumuy di baley ku'.

<sup>36</sup> Immandal etan ni padi e mei-hep nin emin hu hipan wada etan di baley, et han lumaw diman ni an menang-ang, tep meibbillang ni beken ni malinih hu hipan hakupan tun eleg mei-hep. Hedin mei-hep ni emin hu ngunut ey han himmegep etan padid bawang ni baley, <sup>37</sup> et tu pekabbinbinen humman ni lumuy. Hedin wada ang-angen tun madmadlangngan winu meatta ang-ang tun kamenglaw di dallem idan dingding e beken ni yad ta-pew tun ebuh, <sup>38</sup> ey um-ehep etan padi et ilekbi tu etan baley ni pitun aggew.

<sup>39</sup> Umlaw ali mewan ni meikkeppitun aggew et tu ang-angen. Hedin kamangkeihhinnap humman ni lumuy, <sup>40</sup> ey i-olden tun pikwalen da etan batun neidingding ni wada lumuy tu et tu bekahen di a-allaw ni bebley di kameibbillang ni beken ni malinih.

<sup>41</sup> Immandal mewan etan ni padi e kep-uhan dadda dingding, ey emmungen da kinep-uh da et da ibbeng di a-allaw ni bebley ni kameibbillang ni beken ni malinih. <sup>42</sup> Ey hullulan da etan ida nepikwal ni batu anin idan na-kal ni kapemket ni dingding.

<sup>43</sup> Hedin megibbuh ni melinnihan niya mehullulan ida etan batu niya kapemket ey kapyatun mewedda mewan hu lumuy, <sup>44</sup> ey an ang-angen mewan ni padi, et hedin neihinap etan lumuy ey e-helen tu e meibbillang ni beken ni malinih humman ni baley. <sup>45</sup> Et mahapul ni bahbahaen da et ilaw da etan di a-allaw ni bebley ni kameibbillang ni beken ni malinih. <sup>46</sup> Ya etan tuun umhegep di baley ni neilekbi, tep kameibbillang ni beken ni malinih, ey meibbillang daman beken ni malinih ingganah mehilling. <sup>47</sup> Ey ya etan umbaktad winu mengangan diman ey mahapul ni ibbalbal tu balwasi tu.

<sup>48</sup> Nem hedin ang-angen etan ni padi ey endi law hu lumuy etan di baley, ey e-helen tu e malinih law humman ni baley tep na-kal hu lumuy tu. <sup>49</sup> Nem mahapul ni ippahding ni padi hu elaw ni panlinnih e um-alan dewwan sisit, ya sedar ni keyew, ya madlang ni sinulid et ya pingin hyssop. <sup>50</sup> Keklengen tu etan hakey ni sisit etan di neityan pulan mahukung ni duyun neha-adan ni danum ni pakeahul di hebwak. <sup>51-52</sup> Ey ellan tudda etan sedar ni keyew, ya pingin hyssop, ya etan makadlang ni sinulid niya etan hakey ni sisit, et ita-mel tuddad kuheyaw ni nakleh ni sisit ni nekamdugan ni danum et wakgihan tun meminpittu etan baley. Hedin negibbuh ni impahding tu huuyan elaw ni panlinnih etan ni baley, <sup>53</sup> ey peteyyab tu etan mategun sisit di a-allaw ni bebley. Pehding tu huuya ma-lat maibilang ni malinih mewan etan baley.

<sup>54-56</sup> Huttan ida meunnud ni meipahding hedin wada kameihhinap ni buut di balwasi winu lumuy di baley, winu kamei-tan ni degeh ni belat.

<sup>57</sup> Huttan hu pengamtaan ni tuu hedin meibbillang ni malinih winu eleg hu tuu niya hipan ngunut."

## 15

*Ya intugun APU DIOS idan tuun wada kamelpud annel dan kameibbillang ni beken ni malinih*

<sup>1</sup> Kan mewan APU DIOS di Moses nan Aaron ey <sup>2</sup> "Ehel yuddan edum yun helag Israel ida huuyan ittugun ku: Ya etan lakin wada kamelpud annel tu ey meibbillang ni beken ni malinih, <sup>3</sup> anin ni kantu et nanengtun wada kameukkat winu nesiked. <sup>4</sup> Meibbillang mewan ni beken ni malinih etan yinudungan tu winu neugipan tu.

<sup>5</sup> Ey ya etan tuun meittummuk di uggippan nunman ni laki, ey mahapul ni ibbalbal tu balwasi tu niya man-e-meh, nem nanengtun meibbillang ni beken ni malinih ingganah mehilling. <sup>6</sup> Ya etan tuun umyudung di yinudungan ni lakin wada kamelpud annel tu ey mahapul ni ibbalbal tu balwasi tu ey man-e-meh, nem nanengtun meibbillang ni beken ni malinih ingganah mehilling. <sup>7</sup> Hanniman dama etan tuun mengeppa etan ni lakin wada kamelpud annel tu e mahapul ni ibbalbal tu balwasi tu, nem meibbillang ni beken ni malinih ingganah mehilling. <sup>8</sup> Hedin linupdaan ni lakin wada kamelpud annel tu hu hakey ni tuu, ey mahapul ni ibbalbal etan ni nelupdaan hu balwasi tu, nem nanengtun meibbillang ni beken ni malinih ingganah mehilling. <sup>9</sup> Ya etan lakin wada kamelpud annel tu ey meibbillang ni beken ni malinih etan yuddungnan tun pantakkayan tud kebayyu. <sup>10</sup> Anin ni ya etan tuun mengeppan yinudungan nunman ni laki et mahapul ni ibbalbal tu balwasi tu, nem nanengtun meibbillang ni beken ni malinih ingganah mehilling. <sup>11</sup> Hedin eleg mambulu etan lakin wada kamelpud annel ey kinepa tu hakey ni tuu, ey mahapul ni ibbalbal nunman ni kinepa tu hu balwasi tu niya man-e-meh. Nem nanengtun meibbillang ni beken ni malinih ingganah mehilling. <sup>12</sup> Ya pulan bangan keppaen nunman ni lakin wada kamelpud annel tu ey mahapul ni mephik. Ey hedin keyew ni duyun mahukung hu kinepa tu, man mahapul ni meullahan.

<sup>13</sup> Hedin nesiked law hu kamelpud annel nunman ni laki ey melebbah hu pitun aggew et han tu ipahding hu elaw ni panlinnih e ibbalbal tu balwasi tu, ey an man-e-meh di hebwak et han dammutun meibbillang law ni malinih. <sup>14</sup> Yan meikkewwalun aggew ey mahapul ni um-alan dewwan paluma winu dewwan balug et lumaw di heggeppan di Tabernacle et idwat tun padi. <sup>15</sup> I-appit etan ni padi hu hakey tep ya liwat ey mei-appit ni kagihheba etan hakey. Pehding ni padi humman, ma-lat maibilang humman ni lakin malinih di hinangan APU DIOS.

<sup>16</sup> Hedin wada mewan kamelpud annel ni laki, ey mahapul ni man-e-meh, nem nanengtun meibbillang ni beken ni malinih ingganah mehilling. <sup>17</sup> Anin ni hipan luput winu katat hu neha-adan ni nunman ni kameukkat et mahapul ni mebalbalan, nem nanengtun meibbillang ni beken ni malinih ingganah mehilling. <sup>18</sup> Hedin nan-ulig hu

laki niya bii, ey mahapul ni man-e-meh ida, nem nanengtun meibbillang idan beken ni malinih ingganah mehilling.

<sup>19</sup> Hedin immali hu binnulan ni kamelpud annel ni bii, ey meibbillang ni beken ni malinih ni pitun aggew. Et ya etan tuun mengeppan hi-gatu ey meibbillang ni beken ni malinih ingganah mehilling. <sup>20</sup> Ey emin hu keuggipan winu yuddungan nunman ni bii ey meibbillang ni beken ni malinih. <sup>21-23</sup> Ya etan tuun mengeppan neugipan winu yinudungan nunman ni bii ey mahapul ni ibbalbal tu balwasi tu niya man-e-meh, nem nanengtun meibbillang ni beken ni malinih ingganah mehilling. <sup>24</sup> Ya etan lakin mengi-ullig nunman ni bii et maida-nih ni hi-gatu humman ni kamelpud annel tu, ey meibbillang ni beken ni malinih ni pitun aggew. Anin ni ya keuggipan nunman ni laki et meibbillang ni beken ni malinih.

<sup>25</sup> Ya etan biin wada kamelpud annel tun pigan aggew, nem beken humman etan kaum-alin binnulan, ey meibbillang ni beken ni malinih ingganah mesikked humman ni kamelpud annel tu. <sup>26</sup> Ey meibbillang ni beken ni malinih etan tuka keuggipi niya tuka yuddungin henin kaelliin binnulan ni kamelpud annel tu. <sup>27</sup> Ya etan tuun mengeppan kakeuggipin nunman ni bii, ey mahapul ni ibbalbal tu balwasi tu niya man-e-meh, nem nanengtun meibbillang ni beken ni malinih ingganah mehilling.

<sup>28</sup> Hedin nesiked hu kamelpud annel nunman ni bii, ey billangen tu pitun aggew et han dammutun meibbillang ni malinih. <sup>29</sup> Yan meikkewwalun aggew ey um-alan dewwan paluma winu dewwan pakeetteng tun balug et ilaw tun padid heggeppan di Tabernacle. <sup>30</sup> Mei-appit hu hakey tep ya liwat ey mei-appit ni kagihheba etan hakey. Pehding ni padi humman ma-lat maibilang ni malinih di hinanggan APU DIOS etan bii.”

<sup>31</sup> Kan APU DIOS nan Moses ey “Huyyadda ituttuddum ma-lat eleg pambalin idan helag Israel hu annel dan beken ni malinih, et eleg da hibiten hu Tabernacle ni wadad kadan da et eleg ida matey. <sup>32-33</sup> Huyyadda ituttuddum ni u-unnuden ni lakin meibbillang ni beken ni malinih tep wada neukat ni kamelpud annel tu, niya u-unnuden ni biin kaelliin binnulan ni kamelpud annel tu et ya u-unnuden ni lakin mengi-ullig ni biin wada binnulan ni kamelpud annel tu.”

## 16

*Ya etan neputuk ni aggew ni pan-appitan Aaron ma-lat ma-kal liwat idan helag Israel*

<sup>1</sup> Yan eman ni neteyyan idan dewwan u-ungngan Aaron tep eleg da u-unnuden hu intugun APU DIOS ni pehding dan man-appit <sup>2</sup> ey kan APU DIOS nan Moses ey “Ehel mun agim e hi Aaron et beken ni neala ni himmegep etan di Nekassantuh ni Kuwaltuh ni nehanian ni kulinah di hinanggan nehu-keban ni Kaban, tep mettey hedin henin nunman pehding tu, tep wada-ak di kulput di ta-pew nunman ni Kaban.

<sup>3</sup> Et humman hu, hedin umhegep hi Aaron diman ey pakkaw ni wada i-appit tun hantoon tun bakan kamei-appit tep ya liwat niya hakey ni lakkitun kalneroh ni kamei-appit ni kagihheba. <sup>4</sup> Huyya hu mahapul ni pehding tu et han humgep diman. Ey pakkaw mewan ni man-e-meh niya ihhuklub tu hu balwasin padi et ya etan kamei-dah, ey balkehan tu gitang tu niya mampepnet, tep humman ida neieng-eng ni balwasi tu. <sup>5</sup> Ey mahapul ni um-idwat idan hi-gatu hu edum tun helag Israel ni dewwan lakkitun gelding ni kamei-appit tep ya liwat et ya hakey ni lakkitun kalneroh ni kamei-appit ni kagihheba.

<sup>6</sup> I-appit nan Aaron humman ni bulug ni baka tep ya liwat tu niya liwat ni pamilyah tu. <sup>7</sup> Niya i-ali tu hu dewwan gelding et tu peang-ang nan APU DIOS di heggeppan di Tabernacle. <sup>8</sup> Et ibubunut tu hedin hipa etan di dewwan gelding hu i-appit tu winu ibbukyat tu. <sup>9</sup> I-appit nan Aaron nan APU DIOS etan mebunnut ni kamei-appit tep ya liwat. <sup>10</sup> Hedin ya etan gelding ni mebunnut ni meibbukyat ey peang-ang tun APU DIOS et hantu ibukyat di eleg mebebleyi, ma-lat keang-angan tu e heni inlaw nunman ni gelding hu liwat idan helag Israel di edawwi, ma-lat maibilang ida law ni malinih tep na-kal law liwat da.

<sup>11</sup> Ey hedin ya etan bulug ni baka, man i-appit Aaron tep ya liwat tu et ya liwat idan pamilyah tu. <sup>12</sup> Ellan tu etan pengiggihheban ni bangbanglun neha-adan ni ngalab ni nalpud altar di hinanggan APU DIOS. Ey um-alan dewwan gamal ni nakaggudun bangbanglu, et ihgep tud kuwaltuh ni nekultinahan <sup>13</sup> et iha-ad tu humman ni bangbanglud apuy. Et ya etan mampetyed ni ahuk tu ey hennian tu hu-keb ni Kaban. Hedin u-unnuden Aaron ida huyya hedin umhegep diman, ey eleg mettey. <sup>14</sup> Ya hakey mewan ni pehding tu ey ittetek tu kimeng tu etan di kuheyaw ni bulug ni baka et iwakgih tu etan di hu-keb ni Kaban et yad hinanggan nunman ni Kaban ni meminpittu.

<sup>15</sup> Hedin negibbuh, keklengen tu etan gelding ni kamei-appit tep ya liwat idan tuu. Ey ihhehgep tu humman ni kuheyaw di kuwaltuh ni nekultinahan, et waghian tu etan hu-keb ni Kaban et ya hinanggan nunman ni Kaban ni meminpittu, henin impahding tun kuheyaw ni baka. <sup>16</sup> Ippahding Aaron huyyad Nekassantuh ni Kuwaltuh et yad Tabernacle, ma-lat ipahding tu hu elaw ni panlinnih ma-lat abuluten APU DIOS ida huyya. Ippahding Aaron ida huyya tep ya liwat niya ngehay idan helag Israel ni hi-gatu e DIOS. <sup>17</sup> Hedin himmegep hi Aaron di Tabernacle ni man-appit di Nekassantuh ni Kuwaltuh ma-lat ma-kal hu liwat tu, ya liwat ni pamilyah tu niya liwat idan helag Israel, ey eleg mabalin ni wada edum ni umhegep diman.

<sup>18</sup> Ey han immehep hi Aaron et tu ipahding hu elaw ni panlinnih ni altar e umalan kuheyaw ni bulug ni baka niya gelding, et ha-adan tudda neidengdeng ni dugun nunman ni pan-appitan. <sup>19</sup> Ey ittedek tu kimeng tud kuheyaw idan nunman ni animal, et waghian tun meminpittu humman ni altar, et ipahding tu hu elaw ni panlinnih ma-lat maibilang ni malinih. Tep yan nunman ey neibilang ni beken ni malinih tep ya liwat idan helag Israel.

<sup>20</sup> Hedin negibbuh ni impahding tu humman di Nekassantuh ni Kuwaltuh, ya Tabernacle niya etan altar ey ellan tu etan mategun gelding et peang-ang tun APU DIOS. <sup>21-22</sup> Ey han tu inta-pew hu dewwan ngamay tud ulun nunman ni gelding, ey e-helen tun emin hu nanliwatan idan helag Israel niya nangngehayan da, et heni tudda in-etan ni nunman ni gelding. Et pebeltan tu etan ni neputuk ni tuun mengibbukyat, ma-lat ilaw nunman ni gelding emin hu liwat idan tuu di eleg mebebleyi.

<sup>23</sup> Yan heggepan mewan nan Aaron di Tabernacle ey e-kalen tu hu imbalwasi tun himmegep di Nekassantuh ni Kuwaltuh et iha-ad tudman. <sup>24</sup> Ey mahapul ni man-e-meh etan di nengilinan ni emmehhan ey hantu inhuklub etan balwasi tu ngu dedan et han umhep et man-appit ni kagihheban i-appit tu niya i-appit idan tuu. Huyya pehding tu ma-lat ma-kal liwat tu niya liwat idan tuu. <sup>25</sup> Ey hantu giniheb di altar ni emin hu tabaddan nunman ni animal ni kamei-appit tep ya liwat.

<sup>26</sup> Ya etan tuun an mengibbukyat ni gelding di eleg mebebleyi ey mahapul ni ibbalbal tu balwasi tu niya man-e-meh et han dammutun mambangngad di kampu da.

<sup>27</sup> Ya etan bulug ni baka niya etan gelding ni kamei-appit tep ya liwat ni kan kuheyaw ni ihhehgep Aaron di Nekassantuh ni Kuwaltuh ma-lat ma-kal hu liwat idan helag Israel, ey meillaw idad a-allaw ni kampu et magihep idadman. Mekigihhep hu belat da, ya laman da niya egeh da. <sup>28</sup> Ey ya etan tuun mengihheb idan nunman ey mahapul ni ibbalbal tu balwasi tu niya man-e-meh et han mambangngad di kampu da.

<sup>29</sup> Huyya hu tugun ni meunnud ni ingganah: Emin hu helag Israel, anin idan nekibebley ni hi-gada ey mannungngew ida e eleg ida an mangngunu niya mantetpel ida e eleg ida mengnan ni meikkeppulun aggew ni meikkeppitun bulan. <sup>30</sup> Yan nunman ni aggew hu pengippahdingan dan elaw ni ke-kalan ni liwat da, ma-lat malinih idad hinanggan APU DIOS. <sup>31</sup> Humman ey aggew ni Sabaduh ni Nungew e endin hekey hu mangngunu niya mantetpel ida, tep huyyan aggew ey kamengillin ni peteg. Mahapul ni meunnud ni ingganah ida huyyan tugun. <sup>32</sup> Ya mengippahding nunyan elaw ni ke-kalan ni liwat ey ya helag Aaron ni neputuk ni eta-gey ni padi. Ihuklub tu hu balwasin padi <sup>33</sup> et ipahding tu hu elaw ni panlinnih ni Nekassantuh ni Kuwaltuh, ya Tabernacle, et ya altar. Ey ipahding tu hu elaw ni ke-kalan ni liwat idan padi et yadda emin ni helag Israel.

<sup>34</sup> Meunnud ni ingganah ida huyyan emin ni tugun meippanggep ni elaw ni ke-kalan ni liwat yun helag Israel. Pinhakkey ni hantoon hu pengippahdingan yun nunya."

Et u-unnuden Moses ni emin ida huyyan tugun ni inhel APU DIOS ni hi-gatu.

## 17

### *Ya eleg pengngannin kuheyaw*

<sup>1</sup> Kan mewan APU DIOS nan Moses ey <sup>2</sup> "Ehel mun Aaron, yadda u-ungnga tu niyadda edum yun helag Israel ida huyyan ittugun kun hi-gada: <sup>3-4</sup> 'Hedin man-appit hu hakey ni helag Israel ni lakkitun baka, ya impah ni kalneroh winu ya gelding, ey mahapul ni i-ali tud heggepan di Tabernacle, ma-lat peang-ang tun i-appit tun APU DIOS. Tep hedin yad kampu winu yad a-allaw tu hu pengi-appitan tu, ey meibbillang ni nanliwat humman ni tuu, ey eleg law meibbillang ni tuun APU DIOS. <sup>5</sup> Mukun wada huyyan tugun ey ma-lat i-liddan helag Israel nan APU DIOS hu daka i-enappit di nalgem ni lugal. Tep mahapul nisin humman idan i-appit da ey i-ali daddan padid heggepan di Tabernacle et iappit dan pekiddagyuman dan APU DIOS. <sup>6</sup> Huyya pehding da ma-lat iwakgih ni padi hu kuheyaw etan ni animal di altar niya giheben tu hu taba et umamleng hi APU DIOS ni hamuy tu.

<sup>7</sup> Mahapul ni issiked idan helag Israel ni man-appit ni dimonyoh et ihakkey dan APU DIOS hu pandeyyaw da. Ey mahapul ni u-unnuden dan ingganah huyyan tugun.'

<sup>8</sup> Ey ehel mun hi-gada e kammuy 'Ya hakey ni helag Israel winu hansinu-wan ni nekibebley ni man-appit ni kagihheba winu hipan edum ni kamei-appit nan APU DIOS, <sup>9</sup> nem eleg tu i-alid heggeppan di Tabernacle, ey eleg law meibbillang ni tuun APU DIOS.

<sup>10</sup> Hedin kennen ni helag Israel winu hipan nekibebley hu animal ni eleg ma-kal kuheyaw tu, ey eleg law meibbillang ni tuun APU DIOS. <sup>11</sup> Tep ya kuheyaw hu kad-an ni biyag. Et mukun, in-olden APU DIOS e idduyag ni padid altar hu kuheyaw ni animal ni neiappit ma-lat ma-kal hu liwat yu, tep ya kuheyaw hu kamengkal ni liwat ni tuu. <sup>12</sup> Et humman hu, intugun APU DIOS e eleg mabalin ni ihhidaddan helag Israel niyadda nekibebley ni hi-gada hu detag ni animal ni eleg ma-kal kuheyaw tu.

<sup>13</sup> Hedin wada hakey ni helag Israel winu hipan nekibebley ni wada dinweng tun animal winu wada kinna tun sisit ni kameibbillang ni malinih, ey mahapul ni peih-ih tu kuheyaw da et ta-bunan tun puyek. <sup>14</sup> Tep ya biyag ni animal ey wadad kuheyaw tu. Et humman hu, hedin eleg u-unnuda etan ni tuu huyyan tugun, ey eleg law meibbillang ni tuun APU DIOS.

<sup>15</sup> Ya etan tuun helag Israel winu hipan nekibebley ni mengngan ni detag ni gandat ngun netey ni animal winu pintey ni animal di muyung, ey mahapul ni ibbalbal tu balwasi tu niya man-e-meh, nem nanengtun eleg meibbillang ni malinih ingganah mehilling. <sup>16</sup> Hedin eleg tu u-unnuda huuya, man mekastigu.' "

## 18

### *Ya eleg mabalin ni i-ulig*

<sup>1-2</sup> Kan mewan APU DIOS nan Moses ey "Ehel muddan edum mun helag Israel huyyan ittugun kun hi-gada: Hi-gak hu AP-APU e Dios yu. <sup>3</sup> Entan tu iu-unnud di elaw idan tuud Egypt e nambebleyan yu lan nunman. Ey entan tu iu-unnud di elaw idan iKanaan ni nambebley di bebley ni pengillawwak ni hi-gayu. <sup>4</sup> Ipahding yu pinhed ku ey u-unnud yu tugun ku. Hi-gak hu AP-APU e Dios yu. <sup>5</sup> Hedin u-unnuden yu tugun ku, kayyagud pambalanan ni biyag yu tep ya pengippahdingan yuddan nunman. Hi-gak hu AP-APU.

<sup>6</sup> U-unnud yudda eya tugun ku: Entan tudda iulig aaggi yu. Hi-gak hu AP-APU e Dios yu. <sup>7</sup> Entan tu iulig hi ineyu tep be-ingen yu hi ameyu. Nemnem yu e hi ineyu humman. <sup>8</sup> Ey entan tu iulig hu ahwan ameyu, tep kebe-ingan nan ameyu.

<sup>9</sup> Entan tu iulig hu agiyun bii, anin ni u-ungngan ameyud edum ni bii winu u-ungngan ineyud edum ni laki, anin ni eleg meetteng di baley yu.

<sup>10</sup> Entan tu iulig hu inap-apu yun bii, tep kebe-ingan yu. <sup>11</sup> Entan tu iulig hu imbintan ameyu, tep agiyu humman. <sup>12-13</sup> Entan tu iulig hu biin agin ameyu winu agin ineyu, tep agiddan ameyun ineyu. <sup>14</sup> Entan tu iulig hu ahwan agin ameyu ma-lat eleg yudda baingen, tep a-ammed yudda. <sup>15</sup> Entan tu iulig hu inepu yun bii, tep ahwan u-ungnga yu. <sup>16</sup> Entan tu iulig hu ahwan agiyu ma-lat eleg yu baingen hu agiyu.

<sup>17</sup> Entan tu iulig hu han-ina ey entan tu iulig hu inap-apu tu, tep lawah ni peteg humman.

<sup>18</sup> Entan tu ahwa hu agin ahwa yu hedin mategu ahwa yu.

<sup>19</sup> Entan tu iulig hu biin wada kamelpud annel tu, tep kameibbillang humman ni biin beken ni malinih.

<sup>20</sup> Entan tu iulig hu ahwan sinakdul yu, tep meibbillang kayun beken ni malinih.

<sup>21</sup> Entan tu iebulut ni mei-appit hu u-ungnga yun Molek, tep langlangkuyyaen yu hu ngadan ku e Dios yu. Hi-gak hu AP-APU.

<sup>22</sup> Eleg mabalin ni i-ulig ni laki hu edum tun laki, tep lawah ni peteg humman.

<sup>23</sup> Eleg mabalin ni an i-ulig ni tuu hu animal, tep meibbillang ni beken ni malinih hu tuun mengippahding nunman. Ey lawah ni peteg humman ni pehding ni hakey ni tuu.

<sup>24</sup> Entan tu ipahding ida huuya, tep meibbillang kayun beken ni malinih. Humman impenahding idan tuun nampambebley di pengillawwak ni hi-gayu, et maibilang idan beken ni malinih. Et mukun degyunen kudda et maihullul kayu. <sup>25</sup> Nambalin hu bebley dan beken ni malinih tep yadda humman ni impenahding da. Et humman hu, kastiguen kudda ma-lat ma-kal idadman.

<sup>26-27</sup> Nem hedin hi-gayu, anin idan nekibebley ni hi-gayu, ey mahapul ni paka-u-unnuden yun emin hu tugun ku, et eleg yu ipahding ida humman ni lawah ni peteg. Impenahding idan nambebley ditan ida humman ni kamengippebungnet et mambalin bebley dan beken ni malinih. Nem hedin nisin hi-gayu niyadda nekibebley ni hi-gayu, ey mahapul ni u-unnuden yu tugun ku. <sup>28</sup> Hedin ipahding yudda dama humman ey bellawen dakeyu etan ni bebley heni lan neipahding idan nambebley diman. <sup>29</sup> Hedin

wadan hi-gayun helag Israel hu mengippahding idan nunya, ey eleg law meibbillang ni tuun APU DIOS.

<sup>30</sup> U-unnud yu tugun ku ey entan tu iu-unnud di kapehding idan tuun nambebley di lawwan yun yu pambibleyan, ma-lat eleg kayu maibilang ni beken ni malinih. Hi-gak hu AP-APU e Dios yu.”

## 19

### *Yadda edum ni tugun*

<sup>1-2</sup> Kan mewan nan APU DIOS nan Moses ey “Ehel muddan edum mun helag Israel huyyan ittugun kun hi-gada: Mahapul ni kayyaggud kayun peteg e endi yu ippahding ni lawah, tep hi-gak e AP-APU e Dios yu ey kayyagguddak ni peteg. \*

<sup>3</sup> Mahapul ni lispituhen yu hi ameyun ineyu. Ey mahapul ni u-unnuden yu hu elaw ni Sabaduh. Hi-gak hu AP-APU e Dios yu.

<sup>4</sup> Entan tu dayaw hu dios ni kinapyan tuu niya entan pengapkapyu yun gumek ni dios ni deyyawen yu. Hi-gak hu AP-APU e Dios yu.

<sup>5</sup> Hedin man-appit kayun animal ni pekiddagyuman yun hi-gak ey mahapul ni u-unnuden yu intugun kun pehding yu ma-lat abulutek hu i-appit yu. <sup>6</sup> Ey mahapul ni kennen yu detag tun nunman ni aggew ni naklengan tu winu yan kewa-waan tu. Hedin wada metdaan ni meikkatlu aggew, ey giheb yu. <sup>7</sup> Hedin wada mengngan nunman ni detag ni meikkatlu aggew, ey eggak ebbuluta humman ni kamei-appit, tep meibbillang law ni beken ni malinih. <sup>8</sup> Ey ya etan tuun mengngan nunman ey nanliwat ni hi-gak, tep eleg tu lispituhen hu neieng-eng ni hi-gak. Et eleg law meibbillang ni tuuk.

<sup>9</sup> Hedin man-enni kayu ey entan tu pakieni etan ida nangkeigillig ey entan an pambanggad e yu paka-anien yu linabhan yu. <sup>10</sup> Hanniman mewan hu grapes e entan pambanggad yun mengehdim ni eleg yu bugbugen. Diman ida humman et wada ellan idan newetwet et yadda nekibebley ni hi-gayu. Hi-gak hu AP-APU e Dios yu.

<sup>11</sup> Entan panekey yu. Ey entan tu haul hu edum yun tuu. Niya entan tu ehel hu beken ni makulug.

<sup>12</sup> Entan tu isapatah di ngadan ku hedin yuka nemnemnema e eleg yu pehding humman ni issapatah yu, ma-lat eleg yu langlangkuyyaen hu ngadan ku e Dios yu. Hi-gak hu AP-APU.

<sup>13</sup> Entan tu helamhami hu edum yu niya entan tu pilih limmu tu. Ey entan tu igeb-at ni babbayyagen ni iddawat hu sinangdan ni impanggunu yu.

<sup>14</sup> Entan tu ehel hu lawah etan ni netuleng ni tuu niya entan tu iha-ad hu kehellapdungan ni nekulap ni tuu. Humman pengippeang-angan yun lispituh yun hi-gak e Dios yu. Hi-gak hu AP-APU.

<sup>15</sup> Mahapul ni limpiyuh pengippennuh yun kasuh et eleg yu ituppug hu bahul di newetwet winu kedangyan.

<sup>16</sup> Entan tu ihinap hu itek meippanggep ni hakey ni tuu. Ey entan tu ipahding hu umhulun ni ketteyyan ni edum yun tuu. Hi-gak hu AP-APU.

<sup>17</sup> Entan tu pannananeng ni angebe-helen hu hipan agiyu. Hedin wada nanhallaan yu, ey ihummangan yu et eleg kayu manliwat tep ya humman.

<sup>18</sup> Entan tu nemennem ni ibbaleh hedin wada lawah ni impahding ni hakey ni tuun hi-gayu. Ey entan tu pannananeng ni angebe-helen humman ni tuu, nem peang-ang yu impeminhed yun hi-gatu e henin impeminhed yun annel yu. † Hi-gak hu AP-APU.

<sup>19</sup> U-unnud yu tugun ku. Entan tu peendul hu hakey ni animal di hin-appil ni animal. Entan tu itnem di payew yu hu dewwan nambaklang ni kameitnem. Ey entan tu ibalwasi hu nekapyad dewwan nambaklang ni luput.

<sup>20</sup> Ya etan biin himbut ni ahwaen ni hakey ni laki, nem eleg ni meliblih di neihbutan tu, tep eleg mebaydan, ey hedin i-ulig ni hakey ni laki, man mekastiguddan dewwa. Nem beken ni katey hu kastigu da tep eleg meliblih di neihbutan tu etan bii. <sup>21</sup> Ya etan lakin mengi-ullig ni nunman ni bii ey mahapul ni um-ilaw ni lakkitun kalneroh di heggepan di Tabernacle et iappit tun hi-gak. <sup>22</sup> Ey humman hu pengippahdingan etan ni padin elaw ni ke-kalan ni liwat nunman ni tuu ma-lat liwwanen ku hu liwat tu.

<sup>23</sup> Hedin umlaw kayud Kanaan et mantennem kayun keyew ni kamekkan lameh tu, ey entan tu ekan hu illameh dan tellun toon, tep meibbillang ni beken ni malinih. <sup>24</sup> Ey iappit yun hi-gak ni emin hu illameh dan meikka-pat ni toon et pengipeang-angan yun yuka pandeyyaw ni hi-gak e AP-APU. <sup>25</sup> Dammutun kennen yu illameh dan meikkelliman

\* **19:1-2** 19:1-2 Ang-ang yu hu Leviticus 11:45 et ya 1 Peter 1:16. † **19:18** 19:18 Matthew 5:43

toon. Hedin u-unnuden yudda huyya ey dakel illameh ni ittanem yu. Hi-gak hu AP-APU e Dios yu.

<sup>26</sup> Entan tu ekan hu detag ni eleg ma-kal kuheyaw tu. Ey entan pan-anap yu niya entan pan-ayak yu.

<sup>27</sup> Entan tu pu-liti hu bewek di nambina-hil ni ulu yu ey entan tu pu-liti hu iming yu.

<sup>28</sup> Entan tu liputi annel yu niya entan tu bateki annel yun pengippeang-angan yun lemyung yu tep ya netey. Hi-gak hu AP-APU.

<sup>29</sup> Entan tu iebulut hu biin u-ungnga yun mampebeyad ni annel tun lalakki, tep mebeingan ida et lektattuy medakkel hu daka pebeyad annel da et mambalin hu bebley yun lawah ni pambebleyan.

<sup>30</sup> Ipahding yu elaw ni Sabaduh, ey lispituh yu hu baley kun pandeyyawan yun hi-gak. Hi-gak hu AP-APU.

<sup>31</sup> Entan pampebaddang yud tuun kamelpu kabaelan dad edum ni ispirituh, tep meibbillang kayun beken ni malinih hedin hanniman pehding yu. Hi-gak hu AP-APU.

<sup>32</sup> Lispituh yudda nangkea-amma niya nangkei-inna. Ey peka-u-unnud yuwak. Hi-gak hu AP-APU.

<sup>33</sup> Entan tu ipahding hu lawah idan tutu-un nekibebley ni hi-gayu. <sup>34</sup> Nem ipahding yun hi-gada hu henin yuka pehding idan edum yun helag Israel. Nemnem yu e nekibebley kayu damad Egypt ni nunman. Hi-gak hu AP-APU e Dios yu.

<sup>35</sup> Entan tu talam hu edum yun pengi-ussalan yun beken ni ustuh ni killohhan, ya kapanlelkud niya kapambillang. <sup>36</sup> Ya ustuh ni killohhan, ya ustuh ni lekud niya ustuh ni bilang hu usal yu. Hi-gak hu AP-APU e Dios yun nengipengulun hi-gayun neni-yanan yun Egypt. <sup>37</sup> U-unnud yun emin hu tugun ku niya olden ku. Hi-gak hu AP-APU e Dios yu.”

## 20

### *Ya kastigun tuu hedin eleg mengu-unnud*

<sup>1</sup> Kan mewan APU DIOS nan Moses ey <sup>2</sup> “Ehel muddan edum mun helag Israel huyyan ittugun kun hi-gada: Ya etan helag Israel winu hansinu-wan ni nekibebley ni hi-gayun gihheben tu u-ungnga tun iappit tu etan ni dios e hi Molek ey mahapul ni tengbaen idan bimmebley ni batu et matey. <sup>3</sup> Iwwalleng ku hu tuun mengipahding nunya ey eggak law ibbilang ni tuuk, tep pambalin tun beken ni malinih hu baley ku niya langlangkuyyaen tu ngadan kun pengidwatan tun u-ungnga tun Molek. <sup>4</sup> Ey hedin eleg hengnguddan bimmebley humman ni impahding tu et eleg da petteya humman ni tuu, <sup>5</sup> ey iwwalleng ku humman ni tuu, yadda pamilyah tu et yadda edum tun kamenaydayaw nan Molek, et eleg ida law maibilang ni tuuk.

<sup>6</sup> Hedin wada hakey ni tuun mampebaddang niya mengu-unnud ni e-helen idan tuun kamekihummangan ni linnawan netey, ey iwwalleng ku et eleg law meibbillang ni tuuk. <sup>7</sup> Tuu dakeyun hi-gak, et humman hu, ang-ang yu et ya kayyaggud hu ipahding yu. Hi-gak hu AP-APU e Dios yu. <sup>8</sup> U-unnud yu tugun ku, tep hi-gak e DIOS ey dakeyu kapambalin ni kayyaggud.

<sup>9</sup> Ya etan tuun tuka iduti a-ammed tu ey mekastigun katey, tep humman kastigun bahul tu.

<sup>10</sup> Hedin i-ulig ni hakey ni laki hu ahwan hakey ni tuu ey ya kastigun nunman ni laki, anin etan biin in-ulig tu, ey katey. <sup>11</sup> Ya etan lakin in-ulig tu ahwan ametu ey bineing tu hi ametu. Ya kastigu dan dewwa etan ni biin in-ulig tu ey katey. Hi-gada ngu kambahul ni ketteyyan da. <sup>12</sup> Ya dama kastigun hakey ni lakin nengiulig ni ahwan u-ungnga tu ey katey. Anin ni ya etan biin in-ulig tu et mettey dama. Lawah ni peteg impahding da, et humman hu, mahapul ni mettey ida.

<sup>13</sup> Ya kastigun lakin in-ulig tu hakey ni laki ey ya katey. Henin nunman dama kastigu etan ni in-ulig tu. Lawah ni peteg humman ni impahding da, et humman hu, hi-gada ngu kambahul ni ketteyyan da. <sup>14</sup> Hedin inahwan hakey ni laki hu han-ina, ey mekastiguddan tellu et magiheh idad apuy, tep ya humman ni anggeba-ing ni impahding da. Eleg mabalin ni wada mengipahding ni henin nunman ni hi-gayu.

<sup>15</sup> Ya lakin mengi-ulig ni animal ey mahapul ni mekastigu et matey. Ey anin ya etan animal et mahapul daman petteyan yu. <sup>16</sup> Hedin in-ulig ni hakey ni bii hu animal ey mahapul ni mettey idan dewwa. Tep hi-gada ngu kambahul ni ketteyyan da.

<sup>17</sup> Hedin inahwan hakey ni laki hu agi tun bii, winu biin u-ungngan ametu, winu u-ungngan inetu, ey baingi yuddad kedaklan ni tuu niya degyun yudda et eleg ida makibebley ni hi-gayu. Heltapen da kastigu da, tep in-ulig da agi da. <sup>18</sup> Ya etan lakin



mengi-ullig ni biin wada kamehpud annel tu ey medegyun idan dewwa et eleg ida makibebley ni hi-gayu, tep eleg da u-unnuden hu elaw ni panlinnih.

<sup>19</sup> Ya etan lakin mengi-ullig ni agin inetu winu agin ametu ey mekastigu, anin etan ni bii, tep eleg da u-unnuden etan tugun ni kameunnud ni elaw ni nan-aagian. <sup>20</sup> Ya etan lakin mengi-ullig ni ahwan agin ametu ey nambabul etan ni agin ametu. Et humman hu, mekastigu etan laki, anin etan bii et eleg ida man-ungnga, tep hi-gada ngu kambahul. <sup>21</sup> Ya etan lakin piniliw tu ahwan agitu ey meibbillang ni beken ni malinih humman ni impahding tu, tep eleg tu lispihuhen hi agi tu. Et humman hu, meiddutan ida et endi u-ungnga da.

<sup>22</sup> U-unnud yun emin hu tugun ku niyadda olden ku, tep hedin eleg yu u-unnuda ey medegyun kayud bebley ni pengillawwak ni hi-gayu. <sup>23</sup> Ey entan tu iu-unnud idan elaw ni bimbebley diman. Degyunen kudda tep lawah ni peteg hu daka pehpending, et mukun angebe-hel kuddan peteg. <sup>24</sup> Inhel ku dedan lan nunman e iddawat kun hi-gayu humman ni kayyagud ni puyek e mateba kameitnem ma-lat pambellean yu. Hi-gak hu AP-APU e Dios yu ey hi-gayu pinilik ni pantu-uk di emin ni tutu-u eyad puyek e heni kayu neieng-eng ni hi-gak.

<sup>25</sup> Et humman hu, mahapul ni pesi-ngai yu hedin hipaddan animal winu sisit hu kameibbillang ni malinih winu beken. Entan nisi ekan tu hu animal winu sisit ni kameibbillang ni beken ni malinih. Hi-gak nengiolden ni beken idan malinih humman. Et mukun hedin kennen yudda humman ey meibbillang kayu daman beken ni malinih.

<sup>26</sup> Mahapul ni kayyagud kayu tep hi-gak e AP-APU ey kayyaguddak ni peteg. \* Ey hi-gayu pinilik ni pantu-uk di emin ni tutu-u eyad puyek e heni kayu neieng-eng ni hi-gak.

<sup>27</sup> Ya etan tuun mekihummangan ni linnawan netey ey tengbaen ni batu et matey, tep hi-gatu ngu kambahul.”

## 21

*Ya pehding ni padi ma-lat maibilang ni kayyagud*

<sup>1</sup> Kan mewan APU DIOS nan Moses ey “Ehel muddan padin helag Aaron huyyan ittugun kun hi-gada: Eleg mabalin ni an keppaen ni padi hu netey ni aaggi tu ma-lat eleg maibilang ni beken ni malinih. \* <sup>2</sup> Nem dammutu hedin humman ni netey ey hi inetu, winu hi ametu, winu u-ungnga tun laki winu bii, winu agitun laki, <sup>3</sup> winu ya eleg malehin ni agi tun biin kamekihha-ad di baley tu. <sup>4</sup> Eleg mabalin ni an mekidimdima-u hedin nekieupe etan ni netey, tep meibbillang ni beken ni malini.

<sup>5</sup> Eleg mabalin ni mukmukan ni padi ulu tu, winu tu kep-uhan hu iming tu, winu tu lipputan hu annel tun pengippeang-angan tun lemyung tu. † <sup>6</sup> Mahapul ni kayyagud hu padi ma-lat eleg tu langlangkuyyaen hu ngadan ku e Dios, tep hi-gatu mengi-appit ni hi-gak ni kennen ni kagihheba. <sup>7</sup> Ey eleg mabalin ni an ahwaen ni padi hu biin tuka pebeyyad annel tun laki, winu biin in-ulig ni edum ni laki winu nekihi-yan ni ahwa tu. Tep mahapul ni kayyagud idan peteg hu padi. <sup>8</sup> Mahapul ni kayyagud hu kapengibbillang idan tuun padi tep hi-gada mengi-appit ni kennen ni hi-gak. Hi-gak e AP-APU ey kayyaguddak ni peteg ey pambalin kudda tuuk ni kayyagud. <sup>9</sup> Hedin pebeyyad ni biin u-ungngan padi hu annel tun laki, ey mahapul ni gihheben dan mategu, tep be-ingen tu hi ametu.

<sup>10</sup> Ya etan eta-gey ni padi e neduyagan hu ulu tun lanan nampadian tu et maieng-eng ni hi-gak et ibalwasi tu balwasin padi. Et humman hu, anin ni kaumlelemyung et hegguen tu bewek tu niya eleg tu bi-kia balwasi tu. <sup>11-12</sup> Humman ni eta-gey ni padi ey neieng-eng ni hi-gak. Et mukun eleg mabalin ni tu ippahding hu umhulun ni pambalanan tun beken ni malinih. Et humman hu, eleg mabalin ni tu hi-yanen hu Tabernacle et lumaw di kad-an ni netey ni tuu, anin ni hi ametu winu hi inetu hu netey, ma-lat eleg mambalin ni beken ni malinih hu Tabernacle.

<sup>13</sup> Ey mahapul nisin ya ahwaen ni padi ey ya etan biin endi nengiullig ni hi-gatu, <sup>14</sup> niya hakey ni pewen nahlagan da. Eleg mabalin ni tu ahwaen hu nebalu, winu ya nekihi-yan, winu ya biin tuka pebeyyad annel tun laki. <sup>15</sup> Tep mahapul ni meibbillang ni malinih ida u-ungnga tu. Hi-gak hu AP-APU e Dios ni nengieng-eng ni hi-gatun eta-gey ni padi.”

<sup>16</sup> Kan mewan APU DIOS nan Moses ey <sup>17</sup> “Ehel mun Aaron e kammuy: Endiddan u-ungngam ni wada dipektoh ni annel da hu an mampeddin mengi-appit ni kennen ni hi-gak. Huyyan tugun ey mahapul ni u-unnuden yullin ingganah. <sup>18</sup> Eleg mabalin ni meihnup ni hi-gak ida tuun wada dipektoh ni annel da, henin nekulap, ya nedahuy,

\* **20:26** 20:26 Ang-ang yu hu 1 Peter 1:16      † **21:5** 21:5 Leviticus 19:27-28 et ya Deut. 14:1

ya nepi-day, <sup>19</sup> ya neik-ik hu heli tu winu ngamay tu, <sup>20</sup> ya nebu-kung, ya ekkekut hu ingkatuu tu, ya wada degeh ni matetu, ya wada nebeblad belat tu niya napnahan. <sup>21</sup> Endi nisiddan helag Aaron hu wada dipektoh tu hu an man-appit ni hi-gak ni kennen. <sup>22</sup> Nem dammutun kennen tudda etan kennen ni neiappit ni hi-gak, yadda kennen ni kameibbillang ni kayyaggud niya kayyaggud ni peteg. <sup>23</sup> Nem ya henin nunman ni tuu ey eleg mabalin ni an meihnup etan di Nesantuh ni Kuwaltuh winu an meihnup di altar, tep pambalin tun beken ni malinih ida humman ni ngunut, tep hi-gak e AP-APU hu nengiang-eng idan nunman et mambalin idan kayyaggud.”

<sup>24</sup> Huyyadda intugun nan Moses nan Aaron, yadda u-ungnga tu niyaddan emin hu helag Israel.

## 22

<sup>1</sup> Kan mewan APU DIOS nan Moses ey <sup>2</sup> “Ehel mun Aaron et yadda lalakkin u-ungnga tu huyyan ittugun kun hi-gada: Lispituh yu hu i-appit idan helag Israel ni hi-gak ma-lat eleg yu langlangkuyyaen hu ngadan ku. Hi-gak hu AP-APU. <sup>3</sup> Hedin wadaddan helag yu hu kameibbillang ni beken ni malinih ey limmaw et an meihnup etan idad in-appit idan edum yun helag Israel ni hi-gak, ey eleg law mabalin ni an mansilbin hi-gak di altar, tep ya humman ni tu impahding. Huyyan tugun ey meunnud ni ingganah. Hi-gak hu AP-APU.

<sup>4</sup> Endi mewan idan helag Aaron ni wada degeh ni belat dan kamei-tan, winu wada kamelpud annel da, hu an mengngan idan kamei-appit ni hi-gak ingganah meibbillang idan malinih. Meibbillang ni beken ni malinih hu padi hedin kinapa tu hu netey ni tuu, hedin wada neukat ni kamelpud annel tu, <sup>5</sup> niya hedin wada kinapa tun animal winu tuun kameibbillang ni beken ni malinih. <sup>6</sup> Meibbillang humman ni padin beken ni malinih ingganah mehilling niya eleg mabalin ni umkan idan neiappit ni hi-gak ingganah man-e-meh. <sup>7</sup> Hedin nelinuh hu aggew ey meibbillang law ni malinih, et dammutu law ni mengngan idan neiappit ni hi-gak e humman ida dedan daka kenna. <sup>8</sup> Eleg mabalin ni kennen da hu detag ni netey ni animal winu pintey ni animal di muyung, tep kameibbillang ni beken ni malinih ida humman. Hi-gak hu AP-APU. <sup>9</sup> Mahapul ni u-unnuden idan emin ni padi hu tugun ku, tep mekastigudda et mettey ida hedin eleg ida mengu-unnud. Hi-gak hu AP-APU ni nemutuk ni hi-gada, ey nak ida kapambalin ni kayyaggud.

<sup>10</sup> Ebuh ida pamilyah ni padin mengngan ni neiappit ni hi-gak, endi edum. Anin idan kamekihha-ad ni hi-gada et eleg mabalin ni ida mekikkan. <sup>11</sup> Nem ya etan bega-en ni gintang ni padi, e pihuh tu nengatang tu, winu himbut tun neiungngad baley tu, ey dammutun mekikkan. <sup>12</sup> Ya etan biin u-ungngan padin inahwa tu hu beken ni padi ey eleg mabalin ni mekikkan idan nunman. <sup>13</sup> Nem hedin nebalu etan biin u-ungngan padi winu hini-yan ni ahwa tu niya endi u-ungnga tu, et mambangngad di baley ametu, ey dammutun mekikkan idan kennen ni meidwat nan ametu. Beken ni linggeman ni tuu hu mengngan idan nunman, ebuh nisi pamilyah ni padi.

<sup>14</sup> Ya etan tuun eleg maibilang di pamilyah ni padi ey nekikan, nem eleg tu igeb-at, ey mahapul ni beyyadan tun padi etan kinan tu niya e-duman tun dewampulun porsentoh. <sup>15</sup> Eleg mabalin ni an langlangkuyyaen ni padi hu kai-appit idan helag Israel. <sup>16</sup> Et mukun eleg mabalin ni tu i-abulut hu linggeman ni tuun an mengngan ida nunman. Tep manliwwat humman ni tuu et mahapul ni mekastigu. Hi-gak hu AP-APU, ey nakka pambalin idan neieng-eng humman idan kennen ni hi-gak.”

<sup>17</sup> Kan mewan APU DIOS nan Moses ey <sup>18</sup> “Ehel mun Aaron, yadda lalakkin u-ungnga tu niyaddan emin hu helag Israel huyyan ittugun kun hi-gada: Hedin man-appit ni kagihheba hu hakey ni helag Israel winu hakey ni nekibebley e beken ni helag Israel ni pengippahdingan tun insapatah tu winu iggeb-at tu ngu dedan ni man-appit, <sup>19</sup> ey mahapul ni ya endi dipektoh tun lakkitun baka, kalneroh winu gelding hu i-appit tu. Ebbuluten ku hu i-appit tu hedin lakkitu niya endi dipektoh tu. <sup>20</sup> Eggak ebbuluta hu i-appit ni hakey ni tuu hedin wada dipektoh etan ni animal.

<sup>21</sup> Hanniman dama etan ni kamei-appit ni pekiddagyuman tun hi-gak winu kamei-appit ni pengippeamnuan tun insapatah tu winu iggeb-at tun i-appit e mahapul ni endi dipektoh etan ni animal ma-lat abuluten ku. <sup>22</sup> Entan tu igeb-at ni i-appit ni hi-gak e AP-APU hu animal ni nekulap, winu nepi-day, winu neliputan, winu nekupu winu nebebla annel tu. Ey entan tu iebulut ni mei-appit ni kagihheba hu henin nunman ni hi-gak e AP-APU di altar. <sup>23</sup> Dammutun ebbulutek hu animal ni nebuni winu wada ekket ni dipektoh tu hedin meiggeb-at ni mei-appit. Nem eleg mabalin ni ida mei-appit di pengippeamnuan ni insapatah ni pehding. <sup>24</sup> Niya eleg mabalin ni yu i-appit ni hi-gak hu animal ni negapun, winu napidit, winu neliputan winu negedged et ma-kal hu

batbatu tu. Eleg mei-ebbulut hu henin nunman eyad bebley yu. <sup>25</sup> Ey entan tu iappit hu hanniman ni animal ni gintang yud hansinu-wan. Eggak ebbuluta henin nunman ni animal tep meibbillang ni wada dipektoh tu.

<sup>26-27</sup> Hedin neiimpah hu baka, ya kalneroh winu gelding, ey eleg ni mabalin ni appilen inetu ingganah melebbah pitun aggew. Hedin nelabah hu pitun aggew ey dammutun mei-appit ni kagihheba humman ni impah tu. <sup>28</sup> Eleg mabalin ni yu i-appit hu han-inan baka winu kalneroh ni hakey ni aggew. <sup>29</sup> Hedin man-appit kayun pansalamatan yun hi-gak, ey mahapul ni u-unnuden yudda etan intugun kun meunnud et hannak abuluta hu i-appit yu. <sup>30</sup> Ey mahapul ni kennen yun emin hu in-appit yun nunman ni aggew. Eleg mabalin ni wada yu tetdaan. Hi-gak hu AP-APU.

<sup>31</sup> U-unnud yun emin hu tugun ku, tep hi-gak hu AP-APU. <sup>32</sup> Entan tu langlangkuyyaen hu kayyaggud ni peteg ni ngadan ku. Mahapul ni emin hu tutu-ud Israel ey ebbuluten da e kayyagguddak ni peteg. Hi-gak hu AP-APU ni nemilin hi-gayu, ey dakeyu kapambalin ni kayyaggud. <sup>33</sup> Mukun impangulu dakeyun neni-yanan yun Egypt ey ma-lat hi-gak hu daydayawen yu. Hi-gak hu AP-APU."

## 23

### *Yadda meippanggep ni piyestah*

<sup>1-2</sup> Kan mewan APU DIOS nan Moses ey "Ehel muddan edum mun helag Israel huyyan itugun kun hi-gada: Huyyadda hu piyestah ni meippahding ma-lat maemung kayun helag Israel ni mandeyyaw. <sup>3</sup> Mei-ebbulut kayun manggunnun enem ni aggew. Nem yan meikkeppitun aggew e Sabaduh e kamengillin ni aggew ey mahapul ni man-iyiyatu kayu, tep neieng-eng huyyan aggew ni hi-gak ma-lat maemung kayun mandaydayaw ni hi-gak, anin ni attu pamebleyan yu. <sup>4</sup> Huyyadda hu piyestah ni pehding yud nagtud ni aggew.

*Ya Piyestah ni Passover e Nelabahan ni Anghel APU DIOS et ya Piyestah ni Sinapay ni eleg meha-adin kapampelbag*  
(Numbers 28:16-25)

<sup>5</sup> Mahapul ni pehding yu hu Piyestah ni Passover ma-lat keidaydayawak e AP-APU yu. Ya pengilleppuan yun pengippahdingan nunyan piyestah, ey yan mahmahdem ni meikkahampulun epat ni aggew ni memengngulun bulan. <sup>6</sup> Et yan meikkahampulun liman aggew ey illapu yun eleg mengngan ni sinapay ni neha-adan ni kamampelbag e huyya pehding yun pitun aggew. <sup>7</sup> Yan memengngulun aggew nunman ni pampiyestahan yu ey meemung kayu et mandayaw kayun hi-gak. Endi nisi manggunnun nunman ni aggew. <sup>8</sup> Man-appit kayun hi-gak ni kagihheba ni kewa-wa-wan pitun aggew. Ey kaemung kayu mewan ni meikkeppitun aggew, ma-lat mandayaw kayun hi-gak niya eleg kayu manggunnu.

### *Ya Piyestah ni Memengngulun Lamah*

<sup>9-10</sup> Hedin umlaw kayu etan di bebley ni iddawat kun hi-gayu et man-enni kayu, ey ilaw yun padi hu memengngulun hakey ni betek ni enni yu. <sup>11</sup> Itta-gey ni padi humman et peang-ang tun hi-gak e AP-APU ni nunman ni aggew ni meittu-nud di Sabaduh ma-lat abuluten dakeyun hi-gak. <sup>12</sup> Yan nunman ni aggew ey i-appit yun hi-gak hu hantoon tun lakkitun kalneroh e endi dipektoh tu et giheben yu. <sup>13</sup> Pakigiheb yu dewwan kiloh ni kamei-appit ni alinah ni neha-adan ni mansikan olibah. Kamengippeamleng ni hi-gak hu hamuy idan nunman ni i-appit yun kagihheba. I-dum yun i-appit hu hakey ni litroh ni meinum. <sup>14</sup> Entan tu ekan ida pakeani yu, anin ni ematta, winu neihanglag, winu nekapyan sinapay, hedin eleg yu ni iappit ida humman nan Apu Dios. Mahapul ni mannenneng ni u-unnuden ni helag yun ingganah huyyan tugun, anin ni attu kad-an da.

<sup>15</sup> Bilang yu pitun linggu meippalpun kewa-waan ni Sabaduh ni ngelawwan yu etan ni padin hambetek ni ineni yu et iappit tun hi-gak e AP-APU. <sup>16</sup> Ey man-appit kayu mewan ni pagey ni nunman ni aggew ni kewa-waan ni meikkeppitun Sabaduh. <sup>17</sup> Wada hakey ni pamilyah ey man-appit ni hi-gak e AP-APU ni dewwan sinapay ni nekapyad dewwan kiloh ni alinah ni nekamdugan ni kamampelbag. Humman ni kamei-appit ni memengngulun ineni yu ey iddawat yun hi-gak e AP-APU. <sup>18</sup> I-dum yun nunman ni i-appit yun hi-gak hu pitun lakkitun impah ni kalneroh e hantoon da ya hakey ni bulug ni baka, niya dewwan lakkitun kalneroh e endi dipektoh dan emin, et iappit dan kagihheba. Ey i-dum yun i-appit hu begah niya meinum. Ya hamuy idan nunya ey kamengippeamleng ni hi-gak e AP-APU. <sup>19</sup> Ey man-appit kayun hakey ni lakkitun gelding tep ya liwat niya dewwan hantoon ni lakkitun kalneroh ni pekiddagyuman yun hi-gak.

<sup>20</sup> Itta-gey ni padin peang-ang ni hi-gak e AP-APU ida humman ni dewwan lakkitun kalneroh et yadda sinapay ni nekapyad pakeanin pagey et iappit yun hi-gak. Huyyaddan kamei-appit niya mei-eng-eng ni hi-gak ey meidwat idan padi. <sup>21</sup> Entan nisi pangngunu yun nunyan aggew, nem kaemung kayu et mandaydayaw kayun hi-gak. Mannenneng huyyan tugun ni ingganah ey mahapul ni u-unnuden idan helag yu, anin ni attu pambbleyan da.

<sup>22</sup> Hedin man-enni kayu ey entan tu paka-ala hu pagey di nangkeigillig ey entan an kaibangngad et yu paka-al-en ida linabhan yu. Diman ida humman ma-lat wada ellan idan newetwet niyadda nekibebley ni hi-gayu. Hi-gak hu AP-APU e Dios yu.

*Ya Piyestah ni Tangguyup*

*(Numbers 29:1-6)*

<sup>23-24</sup> Yan memengngulun aggew ni meikkeppitun bulan ey mahapul ni man-iyiyatu kayu. Petnul yu tangguyup yu et maemung kayun emin ni mandaydayaw. <sup>25</sup> Entan nisi pangngunu yu, nem pan-appit kayun hi-gak e AP-APU ni kagihheba."

*Ya elaw ni ke-kalan ni liwat*

*(Numbers 29:7-11)*

<sup>26-27</sup> Kan mewan nan APU DIOS nan Moses ey "Ipahding yu hu elaw ni ke-kalan ni liwat idan tuu etan ni meikkeppulun aggew nunman ni meikkeppitun bulan ni katootoon. Mantetpel kayu e eleg kayu menggan nunman ni aggew. Meemung kayun mandaydayaw niya man-appit ni kagihheban hi-gak e AP-APU. <sup>28</sup> Entan nisi pangngunu yun nunman ni aggew tep yan nunman pengippahdingan yun elaw ni ke-kalan ni liwat. <sup>29</sup> Ya etan tuun menggan e eleg mantetpel nunman ni aggew ey eleg law meibbillang ni tuuk. <sup>30</sup> Ey petteyen ku etan tuun mangngunnu nunman ni aggew tep eleg mengu-unnud. <sup>31</sup> Tep endi nisi mangngunnu nunman ni aggew. Mannenneng huyyan tugun ey mahapul ni u-unnuden ni emin ni helag Israel, anin ni attu pambbleyan da. <sup>32</sup> Huyyan aggew ni pan-iyiyatuan ey meippalpun kelinnugan ni aggew ni meikkahyam ni aggew ingganah melinnug hu aggew ni kewa-waan tu, e humman meikkahampulun aggew nunman ni meikkeppitun bulan. Yan nunman ni aggew ey endi nisi hu menggan."

*Ya Piyestah ni Kampu*

*(Numbers 29:12-40)*

<sup>33-34</sup> Kan mewan APU DIOS nan Moses ey "Ehel muddan helag Israel huyya: Ya Piyestah ni Kampu ey ipahding yun pitun aggew, meippalpun meikkahampulut liman aggew ni nunman ni meikkeppitun bulan. <sup>35</sup> Yan memengngulun aggew ey meemung kayun mandaydayaw ni hi-gak niya eleg kayu mangngunu. <sup>36</sup> Man-appit kayun kagihheba ni kewa-wa-wan nunman ni pitun aggew. Ey yan meikkewwalun aggew ey meemung kayu mewan et mandaydayaw kayu niya man-appit kayun kagihheba. Endi nisin hi-gayu hu an mangngunu.

<sup>37</sup> Ipahding yudda huyyan piyestah et mandaydayaw kayun hi-gak e AP-APU e man-appit kayun kagihheba, ya begah, ya kakenna et ya kainnuma. Mahapul ni pehding yudda huyyad nagtud ni aggew ni keippahdingan tu. <sup>38</sup> Huyyaddan piyestah ni pehding yu ey mei-dum di pengu-unnudan yun elaw ni Sabaduh, yadda kenayun ni yuka iddawat, yadda yuka i-appit ni insapatah yu et yadda yuka iggeb-at ni iddawat ni hi-gak e AP-APU.

<sup>39</sup> Hanniman nisi pehding yu e hedin man-enni kayu ey mampiyestah kayun pitun aggew ni pandeyyawan yun hi-gak e AP-APU. Ilepun yun meikkahampulut liman aggew ni meikkeppitun bulan. Nemnem yu e yan memengngulu et yan meikkewwalun aggew ey man-iyiyatu kayu. <sup>40</sup> Yan nunman ni memengngulun aggew ey um-ala kayuddan kekakkayyaggudan ni lameh ni intanem yun keyew, ya bulung ni palmah et ya makabbulung ni pangan keyew et ilepu yu piyestah ni pandaydayaw yun hi-gak e AP-APU e Dios yun pitun aggew. <sup>41</sup> Hi-gayu et yadda helag yu ey mahapul ni pehding yu huyyan piyestah ni pitun aggew ni meikkeppitun bulan ni katootoon. <sup>42</sup> Ey mahapul ni manha-ad kayud kampun pitun aggew, <sup>43</sup> ma-lat pengamtaan idan helag yun edum ni aggew e hi-gak e AP-APU ey impangkampuk ida la aammed yu eman ni nengipenguluak ni hi-gadan neni-yanan dan Egypt. Hi-gak hu AP-APU e Dios yu."

<sup>44</sup> Huttan ida piyestah ni inhel Moses ni pehding idan helag Israel ni pandaydayaw dan APU DIOS.

## 24

*Yadda etan kengkeh*

*(Exodus 27:20-21)*

<sup>1</sup> Kan mewan APU DIOS nan Moses ey <sup>2</sup> “Ehel muddan helag Israel et umi-liddan nemahmah ni lanan olibah, et iha-ad yuddad kengkeh di Tabernacle ma-lat mannananeng ni eleg me-dep hu dilag diman. <sup>3</sup> Integan Aaron ida humman ni kahilehileng niya ang-angen tu et mandiddillag ingganah mewa-wa etan di ba-hil ni kultinah di kuwaltuh ni kad-an kun AP-APU. Huyyan olden ey mannananeng ni meunnud ni ingganah. <sup>4</sup> Mahapul ni wadan ingganah hu mengippatek idan nunman ni kengkeh ni neipetuk di balituk ni kapengippettukid kad-an kun AP-APU.

*Yadda etan sinapay ni kamei-appit nan APU DIOS*

<sup>5</sup> Usal yu hampulut dewwan kiloh ni alinah, et mengapya kayun hampulut dewwan sinapay. <sup>6</sup> Iha-ad yudda humman ni sinapay e mandedwan metu-tu-nud e han-e-nem etan di nemahmah ni balituk ni tebol di kuwaltuh ni kad-an kun AP-APU. <sup>\*</sup> <sup>7</sup> Wakgihi yun bangbanglun insensoh hu nambattanan idan netu-tu-nud ni sinapay, et humman hu i-appit yun kagihheban hi-gak e AP-APU, e beken ida etan sinapay. <sup>8</sup> Mahapul ni ihha-ad yu hu henin nunman ni sinapay di kad-an kun AP-APU hedin nedateng hu Sabaduh. I-appit yun ingganah ida humman ni sinapay ni hi-gak, ma-lat mannananeng hu nekitbalan kun hi-gayu. <sup>9</sup> Meidwat ida humman ni sinapay nan Aaron niyadda lalakkin helag tu et kanen dad kad-an ku tep humman patal da etan di kenneh ni kamei-appit ni kagihheban hi-gak e AP-APU.”

*Ya pengi-ang-angan ni meandeng ni kapengastigu*

<sup>10</sup> Wada hakey ni laki ni iEgypt hu ametu ey helag Israel hu inetu, e nekibekal ni hakey ni helag Israel. <sup>11</sup> Huyyan laki ey u-ungngan Selomit e u-ungngan Dibri e helag Dan. Yan nunman ni nekibekalan tu ey lawah ni peteg hu inhel tun APU DIOS et ilaw dad kad-an Moses, ma-lat ehelen tu hedin hipa meippahding nunman ni laki. <sup>12</sup> Ginuwalyaan da et hegeden da hedin hipa pinhed APU DIOS ni pehdng dan hi-gatu.

<sup>13</sup> Entanni ey kan APU DIOS nan Moses ey <sup>14</sup> “Ilaw yu huttan ni lakid a-allaw eyan kampu, ma-lat emin ida nangngel ni lawah ni peteg ni inhel tu, ey itta-pew da ngamay dad ulu tu et tistiguan da e nanliwat et pantengbaen yun emin ni bimbley et matey.”

<sup>15</sup> Heninnuy ehel muddan helag Israel: “Ya etan tuun lawah e-helen tun APU DIOS ey heltaopen tu kastigu tu, tep ya humman ni liwat tu. <sup>16</sup> Ey ya kastigun tuun manliwwat ni henin nunman, anin ni helag Israel winu nekibebly ni hi-gada, ey tengbaen idan bimbley ni helag Israel et matey.

<sup>17</sup> Hedin pimmetey hu hakey ni tuu ey mahapul ni mettey.

<sup>18</sup> Ya memettey ni animal ni edum ni tuu ey mahapul ni hullullan tu. Ey mahapul ni ya mategu hu ihhullul tud pintey tu.

<sup>19</sup> Ya etan tuun liniputan tu edum tu, ey mahapul ni meippahding daman hi-gatu humman ni impahding tu. <sup>20</sup> Hedin himpung ni tuu hu genit ni hakey ni tuu, ey mahapul ni hehpungen dama genit etan ni nambahul. Hedin kinulap ni tuu hu hakey ni matan edum tun tuu, ey mahapul ni mekullap dama hakey ni mata etan ni nambahul. Hedin pinlag ni hakey ni tuu hu hakey ni ngipen ni edum tun tuu, ey mahapul ni e-kalen dama hakey ni ngipen etan ni nambahul. † Mahapul ni meippahding dama etan ni tuu hu impahding tun edum tu.

<sup>21</sup> Hedin pintey ni hakey ni tuu hu animal ni edum tun tuu, ey mahapul ni hullullan tu. Nem hedin tuu pintey tu, ey mahapul ni mettey dama.

<sup>22</sup> Huyyaddan olden ey mahapul ni u-unnuden yun emin ni helag Israel, anin idan nalpud edum ni bebley ni nekibebly ni hi-gayu. Hi-gak hu AP-APU e Dios yu.”

<sup>23</sup> Negibbuh ni inhel Moses idan helag Israel ida huyyan tugun et ilaw da humman ni nanliwat di a-allaw ni bebley et tengbaen da et matey e inu-unnud da inhel APU DIOS nan Moses ni pehdng da.

## 25

*Ya meikkeppitun toon*

<sup>1</sup> Yan eman ni wada hi Moses di Duntug e Sinai ey kan APU DIOS ni hi-gatu ey <sup>2</sup> “Ehel mudda huyyan ittugun kuddan helag Israel: Hedin umlaw kayud bebley ni idawat kun pambebleyan yu, ey panlatang yu hu payew yun kapitun toon, et pengipeang-angan yun yuka pandeyyaw ni hi-gak. <sup>3</sup> Enem ni toon hu dammutun pemeyyewan yun payew yu, ya pengkalan yun pingin intanem yun grapes, ya pengennian yu niya pemugahan yun lameh idan intanem yun kamekkan. <sup>4</sup> Nem yan meikkeppitun toon ey mahapul ni panlatang yu hu puyek yu, tep humman ni toon ey neieng-eng nan APU DIOS. Entan tu

\* 24:6 24:6 [5-6] Exodus 25:30 † 24:20 24:20 Matthew 5:38

tanemi payew yu ey entan tu ekal hu pingin intanem yun grapes ni nunman ni toon.<sup>5</sup> Ey eleg mabalin ni kayu mantennem winu yu ellan hu lameh idan hipan impemegga tu temel e eleg yu itnem, anin idan lameh ni grapes ni eleg yu ekalen pingi da. Tep humman ni toon hu heni pan-iyyatuan ni puyek yu.<sup>6</sup> Anin ni eleg mepeyyew ni hantoon hu puyek yu, et eleg kayu me-puhin kennen yuddan pamilya yu, yadda bega-en yu, yadda kametangdanin yuka panggunnu, yadda hansinu-wan ni nekibeley ni hi-gayu,<sup>7</sup> yadda animal yu niyadda ma-lem ni animal ni wadad puyek yu. Dammutun kennen yu lameh idan simmemel di payew yu niyad legunta yun eleg yu ipaptek.

<sup>8</sup>Ya hakey mewan ni pehding yu ey bilang yu hu na-pat et heyam ni toon e meminpittu hu pitun toon,<sup>9</sup> et yan meikkeppulun aggew ni meikkeppitun bulan ni meikkeneliman toon e yan nunman hu Aggew ni Ke-kalan ni Liwat idan tuu\*, ey petnul yu tangguyup di kebebbley.<sup>10</sup> Huyyan meikkeneliman toon ey mei-eng-eng ni hi-gak. Man-amamleng kayun nunyan toon, tep anin idan neigtang ni himbut et meibbangngad idad pamilyah da dedan. Ey emin hu neigtang ni puyek ey meibbangngad di kampuyek.<sup>11</sup> Yan nunman ni meikkeneliman toon ey eleg kayu mantennem niya eleg yu ella lameh idan impemegga da temel, anin idan lameh ni grapes di legunta yun eleg yu ipaptek,<sup>12</sup> tep neieng-eng humman ni toon ni hi-gak. Ekan yu etan ineni yu ngu dedan di payew yu.<sup>13</sup> Yan nunyan toon ey meibbangngad ni emin hu neigtang ni puyek di kampuyek dedan.

<sup>14</sup>Et humman hu, hedin wada gettangen yu, winu iggatang yun puyek di edum yun helag Israel, ey entan tu talam.<sup>15</sup> Ya pambalol yu ey meippuun di piga kameenni ey hedin pigan toon et han madeteng hu pengippebangngadan yu.<sup>16</sup> Hedin dakel pay ni toon hu melebbah et han madeteng humman ni toon, ey nengingginna pambalol yu, nem hedin anggegannu kedettengan tu, ey nelallakkah, tep ya kamebeyyadi ey ya kedakkel ni pan-ennian etan di puyek.<sup>17</sup> Entan panhintatalam yu, tep humman pengippeang-angan yun kayu kamengu-unnud ni hi-gak. Hi-gak hu AP-APU e Dios yu.

#### *Ya meippahding ni meikkepitun toon*

<sup>18-19</sup>Hedin u-unnuden yun emin hu tugun ku niya olden ku ey melinggep hu panhadan yud bebley yu, ey dakel ennien yu e eleg kayu me-puhin kennen yu.

<sup>20</sup>Kanyu na-muy 'Hipa tep kennen min meikkepitun toon hedin eleg kami mantennem et endi ennien mi?'<sup>21</sup> Heninnuy humang nuntan: 'Panyaggud kulli ittanem yun meikkamen ni toon et dakel hu ennien yu ma-lat mandammun kennen yun tellun toon.<sup>22</sup> Hedin mantennem kayu law ni meikkewwalun toon ey nanengtun wada pay etan hu ineni yu lan meikka-nem ni toon, et humman kennen yu. Eleg kayu me-puhi ingganah medetteng hu intanem yun meikkahyam ni toon.'

<sup>23</sup>Ya puyek yun iggatang yu ey beken ni lebbengtun an mannananeng ni meigtang, tep hi-gak kampuyek nunman, beken yu puyek. Kayu kamekibebbley ni ebuh niya kayu kamekipappayyew ni ebuh eyad bebley ku.

#### *Ya pengibbangngadan ni hipan ginentang*

<sup>24</sup>Emin hu puyek ni neigtang ey wada kelebngan ni kampuyek ni memangngad.<sup>25</sup> Hedin nambalin ni newetwet hu hakey ni helag Israel et nepilitan ni nengigtang ni puyek tu, ey dammutun ya keih-ihnupan ni aaggi tu hu memangngad nunman ni puyek.<sup>26</sup> Hedin endiddan aaggi tu hu kabaelan tun memangngad, et entanniy wada dammutun pemangngad etan ni nengigtang, ey dammutun hi-gatu mismuh hu memangngad.<sup>27</sup> Mahapul ni ibbangngad tu pihhuh etan ni nengigtang meippuun di balol tu hedin mampiggan man-enni ingganah di nagtud ni toon ni pengibbangngadan ni gintang.<sup>28</sup> Nem hedin kulang hu pihhuh nunman ni tuun pemangngad tun puyek tu, ey mannenneng hu kelebngan etan ni nengigtang ingganah medettengan etan toon ni pengippebangngadan ni gintang. Yan nunman ni toon hu pengibbangngadan emin ni gintang ni puyek di kampuyek.

<sup>29</sup>Hedin ya baley ni neigtang ey wadad nehammad ni neluhud ni bebley, ey wada kelebngan ni kambaley ni memangngad hedin eleg malebbah hu hantoon meippalpu etan ni aggew ni neigtangan nunman ni baley.<sup>30</sup> Nem hedin eleg banggada etan ni nengigtang nunman ni toon, ey mambalin law ni baley etan ni nengigtang. Eleg law mabalin ni meibbangngad etan di nengigtang anin ni medettengan etan toon ni pengippebangngadan ni gintang.<sup>31</sup> Nem hedin ya etan baley di eleg maluhud ni bebley, ey meibbillang ni heni payew e wada kelebngan ni kambaley ni memangngad nunman ni baley tun kumpulmih ni aggew niya mahapul ni meibbangngad di nengigtang ni nagtud ni toon ni pengippebangngadan ni ginentang.

\* 25:9 25:9 Ang-ang yu Leviticus 23:27-28.

<sup>32</sup> Nem hedin yadda helag Levi ey wada kelebangan dan memangngad ni neigtang ni baley dan wadad bebley dan kumpulmih ni aggew, hedin wada humman ni baley dad bebley da. <sup>33</sup> Hedin wada baley ni inggang idan helag Levi ni wadad bebley dan eleg mebangngad, ey mahapul ni meibbangngad di nagtud ni toon ni pengippebangngadan ni gintang, tep hedin yadda baley idan helag Levi di nambebleyan da ey baley da ngu dedan ni ingganah. <sup>34</sup> Nem hedin yadda pattullan di nanlinikweh di bebley da, ey eleg mabalin ni inggang da, tep puyek idan helag Levi ni ingganah.

*Ya peuttang idad newetwet*

<sup>35</sup> Hedin wadadda dinagsi yun helag Israel hu nambalin ni newetwet, et eleg paketuging ni annel tu, ey mahapul ni iddawtan yun mahapul tu henin yuka pehding ni yuka tangtanganin yuka pangngunnu, ma-lat nanengtun mekibbebley humman ni edum yun helag Israel ni hi-gayu. <sup>36</sup> Entan tu peporsentoh hu peuttang yun hi-gatu. Nem u-unnud yu Dios yu et ibilang yun agi yu niya pekibebley yud nambebleyan yu. <sup>37</sup> Entan nisi tu peporsentoh hu peuttang yun hi-gatu ey entan tu panggenansahid kenneen ni inggang yun hi-gatu. <sup>38</sup> Hi-gak hu AP-APU e Dios yun nengipengulun hi-gayun neni-yanan yun Egypt, ma-lat i-li dakeyud bebley di Kanaan et hi-gak dayawen yun Dios yu.

*Ya kelibhian ni himbut*

<sup>39</sup> Hedin wada hu edum yun helag Israel ni nambalin ni nakawwetwet et mahapul ni ihhehbut tu annel tun hi-gayu, ey entan tu pangngunnu henin himbut. <sup>40</sup> Mekihha-ad ni hi-gayun heniddan yuka tangtanganin yuka pangngunnu ingganah medettengan etan nagtud ni Toon ni Jubilee ni kelibhian tu. <sup>41</sup> Yan nunman ni toon ey meibbangngad idad pamilyah dad bebley ni nahlagan da e kad-an idan aaggi da. <sup>42</sup> Hi-gayun helag Israel ey bega-en dakeyun hi-gak e AP-APU yun nengipengulun hi-gayun neni-yanan yun Egypt. Humman gaputun eleg mabalin ni kayu meihbut. <sup>43</sup> Entan tu ibubunget ida, nem u-unnud yuwak e Dios yu. <sup>44</sup> Hedin mahapul yu himbut, ey gatang kayud bebley di nanlinikweh ni bebley yu. <sup>45</sup> Dammutu mewan ni umगतang kayun u-ungngadan edum ni tuun nekibebley ni hi-gayu. Ey dammutun panhimit yudda u-ungnga dan neiungngad bebley yu. <sup>46</sup> Ey dammutun beltanen idan u-ungnga yu et panhimit dadda ingganah mettey ida. Nem hedin yadda edum yun helag Israel, ey eleg mabalin ni hanniman pehding yun hi-gada.

<sup>47</sup> Hedin wada edum ni tuun nekibebley ni hi-gayun kimmedangyan niya hedin wada edum yun helag Israel ni nambalin ni newetwet et tu inhebut annel tun nunman ni tuu, winu yadda u-ungngan nunman ni kedangyan, <sup>48</sup> ey wada kelebangan nunman ni himbut ni mebangngad. Dammutun ya lakin agi tu memangngad ni hi-gatu, <sup>49</sup> winu ya lakin agin ammed tu, ya naka-ihnap ni aaggi tu, winu hi-gatu mismuh hu memeyyad ni kelibhian tu, hedin wada inemung tun pihuh tu. <sup>50</sup> Mahapul ni e-helen tu etan ni nengatang ni hi-gatu, et bilangan da toon meippalpun neigtangan tu ingganah ni kedettengan ni nagtud ni toon ni keibbangngadan ni gintang, et ihummangan da meibbeyyad ni kelibhian tu meippuun di katangdanan kametanganin kapangngunnu. <sup>51</sup> Hedin ayepaw hu kedettengan ni toon ni pengibbangngadan ni gintang, ey mahapul ni e-etteng ni pihuh hu pebangngad tu etan ni nengatang ni hi-gatu. <sup>52</sup> Nem hedin anggegannu kedettengan nunman ni toon, ey ekkut ni euh hu beyyadan tun pemangngad tu, <sup>53</sup> ma-lat heni netangdanan ni katootoon. Mahapul ni ang-ang yu et eleg panligligat etan ni nengatang ni hi-gatu.

<sup>54</sup> Hedin wada helag Israel ni eleg melibhian ey nedateng hu meikkeneliman toon e humman hu toon ni pengippebangngadan emin ni gintang ey mahapul ni melibhian ida et yadda u-ungnga da. <sup>55</sup> Ya helag Israel ey eleg mabalin ni manhimit ni ingganah, tep himbut dakeyun hi-gak. Hi-gak hu nengipengulun hi-gayun neni-yanan yun Egypt. Hi-gak hu AP-APU e Dios yu."

## 26

*Ya panyaggudan ni iddawat APU DIOS idan kamengu-unnud ni tugun tu*

<sup>1</sup> Kan mewan APU DIOS ey "Entan pengapkapy yun i-ingnegh ni dios ni deyyawen yu henin tuttu-u, yadda pinaot ni keyew, winu batu, tep hi-gak hu AP-APU e Dios yu. <sup>2</sup> Pannananeng yun u-unnuden hu elaw ni Sabaduh niya lispituh yu hu baley kun yuka pandeyyawin hi-gak. Hi-gak hu AP-APU e Dios yu.

<sup>3</sup> Hedin u-unnuden yu tugun ku ma-lat maiunnud di pinhed ku hu pambiyag yu, <sup>4</sup> ey peellik hu udan ni aggew ni penepulan yu, ma-lat wada ennien yu niya ma-lat lumemeh ida intanem yun keyew ni kamekkan lameh da. <sup>5</sup> Ey umyaggud hu intanem yu et eleg mepappag hu pan-ennian yu ey medetteng mewan hu pemuggahan yun grapes. Eleg

mewan megibbuh pemuggahan yun grapes ey medettengan mewan hu pantenneman yu. Meweddān emīn hu mekkan ni pinhed yun kennen niya melinggep kayud bebley yu.

<sup>6</sup> Weddaek hu linggep di bebley yu et mekallinggep kayun meuggip e endi tekkutan yu. Ey iddawwi kudda ida angetakkut ni animal ni memettey ni hi-gayu niya eggak i-abulut ni wada mengubbat ni hi-gayu. <sup>7</sup> Ey hi-gayu pengapput ku hedin wada mengubbat ni hi-gayu, <sup>8</sup> ma-lat anin ni ebuh hu liman hi-gayu et apputen yu hanggatut, niya anin ni ebuh hu hanggatut ni hi-gayu et apputen yu hampulun libu.

<sup>9</sup> Ey bendisyonan dakeyu ma-lat dakel ali helag yu, niya ma-lat umamnu hu nekitbalan kun hi-gayu. <sup>10</sup> Bendisyonan ku mewan hu intanem yu ma-lat dumakkel ni peteg hu enniēn yu. Et pan-ibbeng yulli baak yu ma-lat wada pengihha-adan yun pakeani yu. <sup>11</sup> Mekibbebleyyak ni hi-gayu ey eleg dakeyu iwwalleng. <sup>12</sup> Em, mekibbebleyyak ni hi-gayun ingganah et hi-gak hu daydayawen yun Dios yu ey hi-gayu pantu-uk. <sup>13</sup> Hi-gak hu AP-APU e Dios yu. Impa-kal dakeyud Egypt, ma-lat eleg kayu mannananeng ni himbit idan tuodman. Ingkal ku kabaelan dan mengipheheltap ni hi-gayu, ma-lat meliblih kayu e eleg kayu law mebabba-ingi.”

*Ya kastigun eleg mengu-unnud ni tugun APU DIOS*

<sup>14</sup> Kan mewan APU DIOS ey “Hedin eleg yuwak u-unnuda niya hedin ngenghayen yudda huyyan tugun kun hi-gayu, <sup>15</sup> niya hedin iwwalleng yu tugun ku et eleg yu pehding hu in-olden kun pehding yu, ey hedin ippangil yu nekitbalan kun hi-gayu, <sup>16</sup> ey kastigun dakeyun hi-gak. Peellik ligat ni hi-gayu, henin degeh ni eleg meeggahi, ya nemahhig ni atung ni annel e kaumkulap niya degeh ni kamengpuh annel. Hedin mewan mantennem kayu, ey endi silbitu tep hehgepen dakeyun buhul yu et hi-gada mengngan ni intanem yu. <sup>17</sup> Iwwalleng dakeyun hi-gak et meapput kayud gubat ey yadda tuun angebe-hel dakeyu hu pan-ap-apu yu. Nemahhig ali takut yu et anin ni endi memdug ni hi-gayu et memsik kayu.

<sup>18</sup> Hedin meippahding ida huyyan hi-gayu ey kapyatun eleg yuwak u-unnuda, ey e-duman ku mewan ligat yun pambalin kun memimpittu hu kaligat tu. <sup>19</sup> Eggak peelli udan et kumelhi hu puyek ni pantenneman yun heni gumek, et pemappeg kun yuka pampahhiyyai. <sup>20</sup> Ey anin piga pehding yun man-aatun mangngunnu et endi silbitu, tep endi illameh ni ittanem yu.

<sup>21</sup> Hedin pannananeng yun mangngenghay ni hi-gak et eleg yuwak u-unnuda, ey kastigun dakeyu mewan et edumak hu ligat yun memimpittu. <sup>22</sup> Peellik hu angetakkut ni animal di muyung ma-lat pampateyen da u-ungnga yu, ey ma-lat bahbahen da animal yu. Hahhakkey ali tetdaan dan hi-gayu et mebel-ah dalan yu.

<sup>23</sup> Hedin eleg kayu mesilleg idan nunyan pengastiguk ni hi-gayu et nanengtun ngenghayen yuwak e eleg yuwak dedngela, <sup>24</sup> ey kastigun dakeyu mewan ni hi-gak et edumak ni meminpittu hu ligat yu. <sup>25</sup> Peellik hu mengubbat ni hi-gayu tep ya nengihallaan yun nekitbalan kun hi-gayu. Hedin mewan neamung kayun meihhikkug idad etta-teng ni bebley ey peellik hu eleg meeggahin degeh et mapilit kayun mansukkuh idan buhul yu. <sup>26</sup> Bahbahek hu pengellaan yun kennen yu et dammutu hu hakey ni ebuh ni pene-engan ni sinapay ni ussalen ni hampulun bibi-in pengihhe-engan dan metdaan ni alinah yu, et humman hanna-kuten yun ikaka-peng. Et anin ni mengngan kayu et eleg kayu mephel.

<sup>27</sup> Nem hedin eleg kayu pay masileg et nanengtun manghay kayu e eleg yuwak u-unnuda, <sup>28</sup> ey kastigun dakayu mewan tep ya bunget ku et meminpittu kaligat tu nem ya etan impalebah yun nengastiguk ni hi-gayu. <sup>29</sup> Nemahhig ali upa yu e eleg yulli han-isipel et kennen yulli u-ungnga yu. <sup>30</sup> Bahbahen kudda mewan yuka pandeyyawin wadad ta-pew ni duntug, anin idan yuka pengigihhebin insensoh, niya ibbeng ku netey ni annel yud kad-an idan kinapya yun i-inggeh ni dios yu. Anggebe-hel dakeyullin hi-gak, <sup>31</sup> ey bahbahek bebley yu et yadda yuka pandeyyawī niya eggak ebbuluta hu i-appit yun hi-gak. <sup>32</sup> Pakabbahbahek hu bebley yu et mahngang idalli buhul yun um-alin mambebley diman ni penang-angan dan nakabbahbahān tu. <sup>33</sup> Peellik ali mengubbat ni hi-gayu et iwēhit dakeyud kebebbebley et mebel-ah hu pupuyyek yu niya mannananeng ni mebahbah hu bebley yu. <sup>34-35</sup> Et mei-ellig ni man-am-amleng idallin man-iiyyatu hu pupuyyek yu, tep eleg yu u-unnuden hu intugun kun pan-iiyyatuan ni puyek yun nunman idan toon. Ey yan nunman idallin toon ni panha-adan yud bebley idan buhul yu ey mebel-ah puyek yu ma-lat man-iiyyatudda.

<sup>36</sup> Ey hedin yadda metdaan ni hi-gayu ey pambalin dakeyun makattakut idad bebley ni keillawwan yu, et anin ni tenul ni ebuh ni bulung ni keyew ni meiddibidib et umbesik kayu tep ya takut yu e heni dakeyu kapampedugan buhul yud gubat. Ey anin ni endi



meihnup ni buhul yu et metu-li kayu. <sup>37</sup> Mangketu-li kayulli anin ni endi kamampemdug ni hi-gayu. Ey endilli kabaelan yun mekihhanggan buhul yu. <sup>38</sup> Mangketey kayullid bebley ni keillawwan yu e heni dakeyu inekmun idan nunman ni bebley idan buhul yu. <sup>39</sup> Et yaddalli hahhakkey ni metdaan ni hi-gayu ey umlelemyung idad bebley ni buhul yu tep ya liwat da niya liwat idan ammed da.

<sup>40-41</sup> Nem hedin negibbuh ni hinelheltap idan tuuk hu nemahhig ni pengastiguk ni hi-gada, tep impalaw kuddad bebley idan buhul da ey lektattuy mampekumbabah ida et mantuttuyyudda et abuluten da liwat da et ya liwat idan ammed dan nanggehay ni hi-gak. <sup>42</sup> Ey yan nunman ali pannemneman kun nekitbalan kun Jacob, hi Isaac, et hi Abraham, et peamnuk ali etan inhel kun nunman ni hi-gada e iddawat kuddan tuuk etan bebley ni pambebleyan da. <sup>43</sup> Humman ni pengippellawwak ni hi-gadad edum ni bebley hu kastigu da tep ya liwat da, tep eleg da u-unnuden ida tugun ku, nem pinihul da. Et yan nunman ni peni-yanan dan bebley da ey heni man-iyatu hu puyek da.

<sup>44</sup> Nem anin ni hanniman et eggak ida iwwalleng ey eggak ida pakabbabhaha. Pannananeng ku nekitbalan kun hi-gada, tep hi-gak hu AP-APU e Dios da. <sup>45</sup> Nemnemen kulli mewan hu nekitbalan kun eman idan aammed dan nengipenguluak ni hi-gadan neni-yanan dan Egypt, et ang-angen emin ni tuud kebebbbley hu kabaelan ku. Hi-gak hu AP-APU e Dios.”

<sup>46</sup> Huyyaddan emin hu intugun APU DIOS nan Moses di Duntug e Sinai et han itugun Moses idan helag Israel.

## 27

### *Ya meunnud meippanggep ni mei-eng-eng nan APU DIOS*

<sup>1</sup> Kan mewan APU DIOS nan Moses ey <sup>2</sup> “Itugun muddan helag Israel huyya: ‘Hedin mansapatah hu hakey ni tuu et ieng-eng tun APU DIOS hu hakey ni tuu, ey beyyadan tu balol tu. <sup>3</sup> Huyyadda hu meunnud ni pambeyyad. Ya lakin dewampulu ingganah di na-nem hu toon tu, ey neliman palatah ni silber hu bayad tu. <sup>4</sup> Ya kat-agun biin hanniman toon tu e dewampulu ingganah di na-nem, ey telumpulun palatah ni silber bayad tu. <sup>5</sup> Ya lakin lima ingganah di dewampulu toon tu, ey dewampulun palatah ni silber bayad tu. Ya biin hanniman dama toon tu ey hampulun palatah ni silber bayad tu. <sup>6</sup> Ya lakin hambulan tu ingganah di lima toon tu, ey liman palatah ni silber bayad tu. Ya biin henin nunman toon tu, ey tellun palatah ni silber bayad tu. <sup>7</sup> Ya lakin nehuluk ni na-nem hu toon tu, ey hampulun liman palatah ni silber bayad tu. Ya biin hanniman dama toon tu, ey hampulun palatah ni silber bayad tu. <sup>8</sup> Hedin newetwet etan tuu et eleg tu hanggela hu meibbeyyad, ey illaw tu humman ni neieng-eng ni tuud kad-an ni padi, et ngenamung etan padin menghel ni beyyadan tu meippuun di kabaelan tu.

<sup>9</sup> Hedin insapatah ni tuu hu animal ni kameibbilang ni malinih e kaebbulutan APU DIOS ni kamei-appit ni hi-gatu, ey mambalin humman ni animal ni neieng-eng ni hi-gatu. <sup>10</sup> Ey eleg mabalin ni hullulan humman ni animal. Eleg mabalin ni hullulan hu kayyaggud ni lawah winu lawah ni kayyaggud. Hedin hullulan ni nunman ni tuu, ey meidwat nan APU DIOS etan animal ni neieng-eng et ya etan neihullul. <sup>11</sup> Nem hedin ya insapatah etan ni tuu ey animal ni kameibbilang ni beken ni malinih e eleg ebbulutan APU DIOS ni mei-appit ni hi-gatu, ey mahapul ni illaw etan ni tuu etan ni padi. <sup>12</sup> Et ya etan padi menghel hedini kayyaggud winu lawah, et ngenamung tun menghel hedini piga bayad tu, et humman ni inhel tun bayad tu ey eleg mabalin ni mehullulan. <sup>13</sup> Hedin pinhed etan ni tuun bangngaden, ey mahapul ni beyyadan tu niya e-duman tu pay ni dewampulun porsentoh.

<sup>14</sup> Hedin in-eng-eng ni hakey ni tuu hu baley tun hi-gak e AP-APU, ey ya padi menghel ni bayad tu meippuun di klasih nunman ni baley, ey humman ni na-hel ni bayad tu ey eleg mabalin ni mehullulan. <sup>15</sup> Nem hedini pinhed nunman ni tuun bangngaden humman ni baley, ey mahapul ni beyyadan tu niya e-duman tun dewampulun porsentoh.

<sup>16</sup> Hedin ya in-eng-eng ni hakey ni tuu nan APU DIOS ey ya puyek tu, ey ya bayad nunman ey meippuun di kedakkel ni kameitnem diman. Ya bayad ni hakey ni bushel ey hampulun palatah ni silber. <sup>17</sup> Hedin neieng-eng hu puyek ni meikkeneliman toon e keibbangngadan ni gintang, ey mannenneng hu balol tu. <sup>18</sup> Hedin babbayyag hu neieng-engan tu, ey balolan ni padi meippuun di bilang ni toon ingganah medettangan etan nagtud ni toon ni keibbangngadan ni emin ni gintang et hi-gatu manghel ni balol tu. <sup>19</sup> Hedin pinhed etan ni kampuyek ni bangngaden humman ni puyek, ey mahapul ni beyyadan tu niya e-duman tun dewampulun porsentoh. <sup>20</sup> Nem hedini inggang tu humman ni puyek di edum ni tuu ey eleg tu bayadan nan APU DIOS eman ni nengiang-engan tu, ey meendi law kelebngan tun memangngad ni nunman ni puyek. <sup>21</sup> Et

humman hu, hedin medettengan hu meikkeneliman toon ni pemangngadan ni neigtang, ey meibbanggad law idan padi, tep nambalin law ni neieng-eng nan APU DIOS humman ni puyek.

<sup>22</sup> Hedin in-eng-eng ni hakey ni tuu nan APU DIOS hu payew ni gintang tu, <sup>23</sup> ey balolan ni padi meippuun di bilang ni toon et han medatngan humman ni meikkeneliman toon ni pengippebangngadan ni gintang et bayadan nunman ni tuun nunman ni aggew. Ya etan pihuh ni ibbayad tu ey mei-eng-eng nan APU DIOS. <sup>24</sup> Yan nunman ni nagtud ni toon ey meibbanggad etan payew etan di kampuyek dedan winu yadda helag tu. <sup>25</sup> Emin hu hipan mebeyyadan ey meippuun di na-hel ni meunnud ni pemeyyad.

<sup>26</sup> Niya emin mewan hu memengngulun impah ni animal, henin impah ni baka, ya kalneroh niya gelding ey mei-eng-eng nan APU DIOS. Et mukun eleg mabalin ni an iggeb-at ni hakey ni tuun mengi-eng-eng idan nunman ni hi-gatu, tep neieng-eng ida ngu dedan. <sup>27</sup> Nem ya nemangulun impah idan kameibbilang ni beken ni malinih ni animal ni neieng-eng ey dammutun bangngaden etan ni tuu hedin beyyadan tu meippuun di kameunnud ni kapemeyyad niya e-duman tun dewampulun porsentoh. Hedin eleg tu bangngada humman ni animal, ey dammutun meigtang humman e mebalolan meippuun di kameunnud ni kapemeyyad.

<sup>28</sup> Nem emin ida neiappit ngu dedan nan APU DIOS, tep neieng-eng idan hi-gatu, henin animal, ya tuu niya puyek, ey eleg mabalin ni mebangngad winu meigtang, tep neieng-eng ida humman ni ingganah nan APU DIOS. <sup>29</sup> Ya etan tuun pinutuk APU DIOS ni mebahbah ey eleg mabalin ni mebeyyadan ma-lat bangngaden, tep mahapul ni mettey.

<sup>30</sup> Emin hu illameh ni meitnem ey mei-eng-eng nan APU DIOS hu meikkeppulu. <sup>31</sup> Hedin pinhed ni hakey ni tuun bangngaden ida humman ey mahapul ni beyyadan tu meippuun di kameunnud ni kapemeyyad niya e-duman tun dewampulun porsentoh. <sup>32</sup> Ey emin hu meikkeppulun animal ey mei-eng-eng nan APU DIOS. Hedin nambilang hu hakey ni tuun animal tu, ey mei-eng-eng nisin APU DIOS hu meikkeppulu. <sup>33</sup> Eleg mabalin ni an peppeteken ni tuu etan ida animal ni wada dipektoh tu et humman kantun meikkeppulu. Eleg mewan mabalin ni tu hullulan hu naptek ni meikkeppulu. Hedin hullulan tu etan naptek ni meikkeppulu, ey mei-eng-eng nan APU DIOS etan naptek et ya etan ihhullul tu. Ey eleg law mabalin ni an beyyadan ni tuu ida humman et tu bangngaden.' ”

<sup>34</sup> Huyyadda intugun APU DIOS nan Moses di Duntug e Sinai ni ittugun nan Moses idan helag Israel.

## Numbers

### *Ya meippanggep nunyan liblul ni Numbers*

Huyyan liblul ey nengadanan ni Numbers tep neitudek di deya hu dewwan nambaklang ni nebilangn idan sindalun helag Israel. Ya nemangulun nebilangn idan sindalu ey yan eman ni meikkadwan toon ni neni-yanan idan emin ni helag Israel ni Egypt. Ya meikkadwa ey neipahding eman ni nelabah hu telumpulut walun toon e netey ida law ni emin hu nemangulun sindalu niya anggegannu law ey umdateng ida tutu-ud bebley e Kanaan.

Insapatah nan APU DIOS ni nunman idan helag Israel e iddawat tun hi-gada hu bebley e Kanaan. (Exodus 3:17) Nem entannit dimmateng ida helag Israel di pappeg ni bebley, ey eleg da kulugen hu inhel APU DIOS ni iddawat tun hi-gada humman ni bebley. Endi dinel dan baddangan APU DIOS idan mengubbat ni tutu-ud Kanaan. Et humman hu, ya kastiguddan helag Israel ni dewampulu toon tu winu nehuluk ey eleg ida maiebulut ni umhegeg di bebley e Kanaan, et lumeniklikweh idad eleg mebebleyi ingganah neteyyan da. (14:26-35)

Nem anin ni eleg u-unnuden idan helag Israel hi APU DIOS et impaptek tudan na-pat ni toon ni nanliklikwehan dad endi bebley. (Deut. 29:5 et yad Neh. 9:21) Ey indawat tudan u-ungnga da hu bebley e Kanaan e humman dedan insapatah tun nunman.

### *Yadda neitudek eyad liblul:*

1. Ya nemangulun nemilangan Moses idan helag Israel. (chapters 1-4)
2. Yadda tugun ni u-unnuden idan tutu-u. (chapters 5-10)
3. Ya nekastiguan idan kamanlillih. (chapters 11-12)
4. Ya e-eggel ni nangngehayan idan tutu-u nan APU DIOS. (chapters 13-20)
5. Ya nanliklikwehan idan helag Israel di endi bebley. (chapters 21-25 et ya 33)
6. Ya meikkadwan nemilangan nan Moses idan helag Israel. (chapters 26-27)
7. Yadda nambakbaklang ni i-appit idan helag Israel nan APU DIOS. (chapters 28-30)
8. Ya negenedwaan ni Kanaan et ika-peng idan helag Israel. (chapters 31-36)

<sup>1</sup> Yan eman ni nemangulun aggew ni meikkadwan bulan neipalpun neni-yanan idan helag Israel ni Egypt e nanengtun wadaddad Sinai ey immehel hi APU DIOS nan Moses etan di daka pandeyyaw i et kantuy <sup>2-3</sup> “Ehel mun Aaron et yu bilangan ida edum yun helag Israel meippuun di pewen da niya pamilyah da. Ilista yudda ngadan emin idan lalakkin dewampulu toon da winu nehuluk e humman ida dammutun mekiggubbat. <sup>4</sup> Ehel mu et baddangan dakeyuddan ap-apun hanhakkey ni pewen ni mambillang.

<sup>5</sup> Huyyadda ngadan ni aap-apun neputuk ni umbaddang ni hi-gayu.

Yad helag Reuben ey hi Elisur e u-ungngan Sedeur. <sup>6</sup> Yad helag Simeon ey hi Selumiel e u-ungngan Surishaddai. <sup>7</sup> Yad helag Judah ey hi Nashon e u-ungngan Amminadab. <sup>8</sup> Yad helag Issakar ey Nethanel e u-ungngan Suar. <sup>9</sup> Yad helag Sebulun ey hi Eliab e u-ungngan Helon. <sup>10</sup> Yad helag Ephraim e u-ungngan Joseph ey hi Elishama e u-ungngan Ammihud. Yad helag Manasseh e hakey pay ni u-ungngan Joseph ey hi Gamaliel e u-ungngan Pedahsur. <sup>11</sup> Yad helag Benjamin ey hi Abidan e u-ungngan Gideoni. <sup>12</sup> Yad helag Dan ey hi Ahieser e u-ungngan Ammishaddai. <sup>13</sup> Yad helag Asher ey hi Pagiel e u-ungngan Okran. <sup>14</sup> Yad helag Gad ey hi Eliasap e u-ungngan Deuel. <sup>15</sup> Yad helag Naptali ey hi Ahira e u-ungngan Enan.” <sup>16</sup> Huyyadda neputuk ni mengi-ehngeng ni helag da e ap-apuddan pewen da.

<sup>17</sup> Di Moses nan Aaron niyadda humman ni hampulut dewwan aap-apu <sup>18</sup> ey impaeyag dan emin ida helag Israel ni nunman ni aggew, et ilistadadda lalakkin nantoon ni dewampulu et nehuluk meippuun di nahlagan da, <sup>19</sup> tep humman hu naka-ittugun APU DIOS nan Moses. Et bilangan di Moses idadman Sinai e eleg mebebleyi.

<sup>20-46</sup> Meippalpun Reuben e pengulwan ni u-ungngan Israel e hi Jacob hakey ni ngadan tu, ey inlista dadda helag dan dammutun mansindalun nantoon ni dewampulu et nehuluk meippuun di pewen da niya pamilyah da. Huyya listaan ni bilang da:

Ya nahlagan da	Ya bilang da
Hi Reuben	46,500
Hi Simeon	59,300
Hi Gad	45,650
Hi Judah	74,600
Hi Issakar	54,400
Hi Sebulun	57,400

Di Ephraim nan Manasseh e u-ungngan Joseph ey neibilang idan u-ungngan Israel

Hi Ephraim	40,500
Hi Manasseh	32,200

Huyyadda edum ni helag Israel

Hi Benjamin	35,400
Hi Dan	62,700
Hi Asher	41,500
Hi Naphtali	53,400
Ya bilang dan emin ey	603,550.

<sup>47</sup> Yadda helag Levi ey eleg ida mei-dum ni neilista <sup>48</sup> tep inhel APU DIOS nan Moses ni nunman e kantuy <sup>49</sup> "Entan tudda i-dum di listaan ni mansindalu. <sup>50</sup> Tep ya ngunu da ey ya mampaptek ni Tabernacle niyadda ngunut ni wadadman. Hi-gada pay memehhan ni Tabernacle niyadda ngunut diman hedin hi-yanen yu nangkampuan yu et man-e-tan kayu. Ey mahapul ni mangkampuddad nanlinikweh ni Tabernacle. <sup>51</sup> Hedin man-e-tan kayu, ey hi-gada hu memukkal ni Tabernacle niya hi-gada mengiyayyaggud ni kei-tanan yu. Eleg mabalin ni an meihnup ida edum yun helag Israel tep mettey ida. <sup>52</sup> Meennappil kayun helag Israel ni mangkampu meippuun di pewen yu e wada hakey idan mengipappangngulu ey i-ehngeng da pewen da niya wada bandelah da. <sup>53</sup> Yad nanlinikweh ni Tabernacle hu pangkampuan idan helag Levi, tep mang-guwuwalyadda ma-lat endi an meihnup idan edum ni helag Israel, et eleg kudda kastiguen gapuh ni bunget ku."

<sup>54</sup> Et ipahding idan helag Israel huyyan emin ni inhel Moses ni intugun APU DIOS.

## 2

<sup>1</sup> Kan APU DIOS mewan nan Moses et hi Aaron ey <sup>2</sup> "Hedin mangkampudda hu helag Israel ey wada hakey idan pewen ey metuddu pangkampuan da e wada bandelah ni helag da. Mangkampuddad nanlinikweh e gawwaen da hu Tabernacle, nem meidaddawwidada. <sup>3</sup> Yadda mangkampud appit ni kasimillin aggew ey yadda helag Judah, yadda helag Issakar et yadda helag Sebulun. Emin ida ey hakey hu bandelah da. Hi Nashon e u-ungngan Amminadab hu mengipappangngulun helag Judah <sup>4</sup> e ya bilang da ey 74,600. <sup>5</sup> Yadda helag Issakar ey hi Nethanel e u-ungngan Suar hu mengipappangngulun hi-gada <sup>6</sup> e ya bilang da ey 54,400. <sup>7</sup> Yadda helag Sebulun ey hi Eliab e u-ungngan Helon hu mengipappangngulun hi-gada <sup>8</sup> e ya bilang da ey 57,400. <sup>9</sup> Ya nga-mut ni bilang idan nunyan tellun helag ey 186,400.

Huyyadda hu memengngulud dalan hedin man-e-tan ida helag Israel ni pangkampuan da. <sup>10</sup> Yadda mangkampud appit ni south ey yadda helag Reuben, yadda helag Simeon et yadda helag Gad. Emin ida ey hakey hu bandelah da. Hi Elisur e u-ungngan Sedeur hu mengipappangnguluddan helag Reuben <sup>11</sup> e ya bilang da ey 46,500. <sup>12</sup> Yadda helag Simeon ey hi Selumiel e u-ungngan Surishaddai hu mengipappangngulun hi-gada <sup>13</sup> e ya bilang da ey 59,300. <sup>14</sup> Yadda helag Gad ey hi Eliasap e u-ungngan Deuel hu mengipappangngulun hi-gada <sup>15</sup> e ya bilang da ey 45,650. <sup>16</sup> Ya nga-mut ni bilang idan nunyan tellun helag ey 151,450. Hi-gada hu meittu-nud. <sup>17</sup> Meittu-nud ida helag Levi e pehhanen da hu Tabernacle. Emin ida helag Israel ey mantu-tu-nud idan umlaw e meunnud hu nantutu-nudan dan nangkampu. Wada hakey ey unnuden da bandelah ni helag da.

<sup>18</sup> Yadda mangkampud appit ni kakelinnugin aggew ey yadda helag Ephraim, yadda helag Manasseh niyadda helag Benjamin. Emin ida ey hakey hu bandelah da. Hi Elishama e u-ungngan Ammihud hu mengipappangngulun helag Ephraim <sup>19</sup> ey ya bilang da ey 40,500.

<sup>20</sup> Yadda helag Manasseh ey hi Gamaliel e u-ungngan Pedasur hu mengipappangngulun

hi-gada <sup>21</sup> e ya bilang da ey 32,200. <sup>22</sup> Yadda helag Benjamin ey hi Abidan e u-ungngan Gideoni hu mengipappangngulun hi-gada <sup>23</sup> e ya bilang da ey 35,400. <sup>24</sup> Ya nga-mut ni bilang idan nunyan tellun helag ey 108,100. Hi-gada neitu-nud idan helag Levi <sup>25</sup> Yadda mangkampud appit ni north ey yadda helag Dan, yadda helag Asher niyadda helag Naptali. Emin ida ey hakey hu bandelah da. Yadda helag Dan ey hi Ahieser e u-ungngan Ammishaddai hu mengipappangnguluddan hi-gada <sup>26</sup> e ya bilang da ey 62,700. <sup>27</sup> Yadda helag Asher ey hi Pagiel e u-ungngan Okran hu mengipappangngulun hi-gada <sup>28</sup> e ya bilang da ey 41,500. <sup>29</sup> Yadda helag Naptali ey hi Ahira e u-ungngan Enan hu mengipappangngulun hi-gada <sup>30</sup> e ya bilang da ey 53,400.

<sup>31</sup> Ya nga-mut ni bilang idan nunyan tellun helag Israel ey 157,600. Hi-gada manggillig ni meittu-nud hedin man-e-tan idad pangkampuan da.” <sup>32</sup> Ya bilang emin ni sindalun helag Israel ni neilista ey 603,550. <sup>33</sup> Eleg dadda i-e-dum hu helag Levi ni illista, tep humman intugun APU DIOS nan Moses. <sup>34</sup> Impahding idan helag Israel hu emin ni hipan intugun APU DIOS nan Moses ni pehding da. In-amag da kampudad pettek ni bandelah da. Hedini mewan man-e-tan ida, man man-uunnud ida e wada hakey ni grupuh ey wada bandelah da, tep humman inhel APU DIOS ni pehding da.

### 3

#### *Yadda helag Levi*

<sup>1</sup> Huyyadda hu familyah Aaron nan Moses ni neitudek eman ni immehel hi APU DIOS nan Moses di Duntug e Sinai. <sup>2</sup> Yadda lalakkin u-ungngan Aaron ey hi Nadab e pengulwan, hi Abihu, hi Eleasar et hi Ithamar. <sup>3</sup> Neputuk idan mei-eng-eng ni mampeddi, <sup>4</sup> nem netey di Nadab nan Abihu di hinanggan APU DIOS eman ni wadaddad Sinai e eleg mebebley, tep nan-appit idan hi-gatun apuy ni eleg mengippeameng ni hi-gatu. Endi lakin u-ungnga da, et ebuh law hi Eleasar nan Ithamar ni nampadi eman ni ketagun amedan hi Aaron. <sup>5</sup> Kan APU DIOS nan Moses ey <sup>6</sup> “Ayagim idadya hu helag Levi et putuken muddan umbaddang nan Aaron e padi. <sup>7</sup> Hi-gada mengippahding idan mahapul ni meingngun-nud Tabernacle e kad-an ku et mansilbiddan Aaron niyadda edum dan bimbebley. <sup>8</sup> Mahapul mewan ni ippaptek da ngunut di Tabernacle niya mansilbiddadman e i-ehngeng dadda edum dan helag Israel. <sup>9</sup> Putuk mudda nisin umbaddang di Aaron ni han-aamma. <sup>10</sup> Ebuh di Aaron niyadda lalakkin u-ungnga tun mengippahding ni ngunun padi. Ya kumpulmih ni tuun an meihnpud di Tabernacle et tu ipahding hu ngunun padi ey meippepettey.”

<sup>11</sup> Kan mewan APU DIOS nan Moses ey <sup>12-13</sup> “Yadda helag Levi hu pinilik idan helag Israel tep hi-gada hu mei-eng-eng ni hi-gak. Hi-gada meihhullul di emin ni pengulwan ni lalakkin u-ungngaddan helag Israel tep emin hu pengulwan ni lalakkin u-ungngaddan helag Israel ey mei-eng-eng idan hi-gak. Ya eman ni nemateyak idan pengulwan ni lalakkin u-ungngaddan iEgypt ey neieng-eng ni hi-gak idan emin hu pengulwan ni lalakkin u-ungngaddan helag Israel, anin idan nemangulun impah ni animal da. Hi-gak hu AP-APU e DIOS.”

<sup>14</sup> Kan mewan nan APU DIOS nan Moses di diman Sinai ey <sup>15</sup> “Bilang mudda lalakkin helag Levi ni hakey bulan tu niya nehuluk meippuun di pewen da niya familyah da.”

<sup>16</sup> Et bilangan Moses ida e inu-unnud tu intugun APU DIOS ni pehding tu.

<sup>17</sup> Huyyadda ngadan ni lalakkin u-ungngan Levi: hi Gerson, hi Kohat et hi Merari.

<sup>18</sup> Wada dewwan u-ungngan Gerson ni lalaki e hi Libni et hi Simeil. <sup>19</sup> Epat dama lakin u-ungngan Kohat: hi Amram, hi Ishar, hi Hebron et hi Ussiel. <sup>20</sup> Dewwa dama hu lalakkin u-ungngan Merari e di Mahli nan Mushi.

Huyyadda nahlag nan Levi ni neitudek meippuun di familyah da. <sup>21</sup> Yadda nahlag nan Gerson ey nalpud familyah di Libnih nan Simeil. <sup>22</sup> Ya bilang emin ni lalakkin helag dan neilistan hakey bulan tu niya nehuluk ey 7,500. <sup>23</sup> Hi-gada mangkampud awwidan ni Tabernacle di appit ni kakelinnugin aggew. <sup>24</sup> Hi Eliasap e u-ungngan Lael hu mengipappangngulun hi-gada. <sup>25-26</sup> Hi-gada ngenamung ni mengippaptek ni Tabernacle anin idan ngunut diman, yadda kultinah ni meihhennid heggeppan di bawang niyad dallin, yad nanlinikweh di Tabernacle niyad altar. Hi-gada pay ngenamung ni mengippaptek idan linubid niyadda edum ni kameussal diman.

<sup>27</sup> Yadda nahlag nan Kohat ey yadda familyah Amram, hi Ishar, hi Hebron et hi Ussiel. <sup>28</sup> Ya bilang emin ni lalakkin helag dan neilistan hakey bulan tu niya nehuluk ey 8,600. Hi-gada mengippaptek idan neieng-eng ni usal. <sup>29</sup> Hi-gada mangkampud appit ni south. <sup>30</sup> Hi Elisaphan e u-ungngan Ussiel hu mengipappangngulun hi-gada. <sup>31</sup> Yaddahuy hu ippaptek da: ya Kaban Apu Dios, ya tebol, ya pattukkan ni kengkeh, yadda altar, yadda edum ni ngunut ni kaussalan padid bawang ni Tabernacle et ya

kultinah ni neihehid heggepan di kad-an Apu Dios. <sup>32</sup> Hi Eleasar e padin u-ungngan Aaron hu mengipappanggulun emin idan helag Levi. Ey hi-gatu ingkalgaduh idan kamangngunnud Tabernacle.

<sup>33</sup> Yadda nahlag nan Merari ey humman ida pamilyah Mahli nan Mushi. <sup>34</sup> Ya bilang emin ni lalakkin helag dan neilistan hakey bulan tu niya nehuluk ey 6,200. <sup>35</sup> Hi-gada mangkampud north ni Tabernacle. Hi Suriel e u-ungngan Abihail hu mengipappanggulun hi-gada. <sup>36</sup> Hi-gada ngenamung ni mengippaptek idan kalkalimangngan Tabernacle, yadda meibballabag, yadda tukud, yadda pengippeehngan ni tukud niyaddan emin kameussal deya. <sup>37</sup> Hi-gada pay ngenamung ni mengippaptek ni wadad dallin ni Tabernacle heniddan tukud, yadda pengippeehngan ni tukud, yadda pa-pa niyadda linubid ni mahapul.

<sup>38</sup> Hi Moses nan Aaron niyadda u-ungnga tun lalakki hu mangkampud hinanggan Tabernacle di appit ni kasimminiln aggew. Hi-gada mengingngunnuddan hipan meippahding di Tabernacle, et mansilbiddan helag Israel. Ya kumpulmih ni tuun mengipattan mengippahding ni ngunu da ey meippepettey.

<sup>39</sup> Ya bilang emin idan lalakkin helag Levi ni hakey bulan tu niya nehuluk ni inlistad Moses nan Aaron meippuun di intugun APU DIOS ey 22,000.

*Ya nengiehnengan idan helag Levi idan pengulwan ni lalakkin u-ungngaddan helag Israel* <sup>40-41</sup> Kan APU DIOS nan Moses ey "Emin hu lalakkin pengulwan ni helag Israel ey mei-eng-eng ni hi-gak. Mahapul ni illista yu ngadan idan hambulan tu niya nehuluk. Nem hedid ya mengi-ehngeng ni hi-gadan mei-eng-eng ni hi-gak ey yadda helag Levi. Hi-gak hu AP-APU e Dios. Anin idan animal ni helag Levi et meiwwa-hiddan nemangulun impah ni animal idan helag Israel."

<sup>42</sup> Inu-unnud Moses et bilangan tuddan emin hu pengulwan ni lalakkin helag Israel meippuun di tugun APU DIOS. <sup>43</sup> Ya bilang emin ni pengulwan ni lalakkin helag Israel ey 22,273.

<sup>44</sup> Kan mewan APU DIOS nan Moses ey <sup>45</sup> "Teng-eng mun hi-gak ida helag Levi et meihullul idan emin ni pengulwan ni lalakkin helag Israel, anin idan animal da et meihullul idan nemangulun impah ni animal idan helag Israel. Mei-eng-eng ida helag Levi ni hi-gak. Hi-gak hu AP-APU e Dios. <sup>46</sup> Hedin yadda etan dewanggatut et nepitit tellun pengulwan ni lalakkin helag Israel ni nehuluk di bilang idan helag Levi ey mahapul ni wada wa-hi da. <sup>47</sup> Ya bayad ni hakey meippuun di kameunnud ni pambeyyad ey liman palatah ni silber. <sup>48</sup> Humman ni pihuh ni bayad da ey meidwat nan Aaron et yadda u-ungnga tu."

<sup>49</sup> Inu-unnud mewan Moses et amungen tu bayad idan nunman ni nehuluk di bilang ni neihullulan idan helag Levi <sup>50</sup> ey 1,365 ni palatah ni silber, <sup>51</sup> et idwat tun Aaron et yadda lalakkin u-ungnga tu meippuun di Tugun APU DIOS.

*Ya ngunuddan helag Kohat e u-ungngan Levi*

## 4

<sup>1</sup> Kan mewan APU DIOS nan Moses et hi Aaron ey <sup>2</sup> "Ilista yu emin hu helag Kohat meippuun di pewen da niyad pamilyah da. <sup>3</sup> Bilang yudda lalakkin dammutun mangngunnud Tabernacle ni telumpulu ingganah di nelima toon tu. <sup>4</sup> Ya ngunnuen dad Tabernacle ey ippaptek dadda neieng-eng ni ngunut.

<sup>5</sup> Nem hedid man-e-tan ida helag Israel di pangkampuan da man mahapul ni umhegep ni hi Aaron niyadda u-ungnga tu et da lugpien hu kultinah ni neihehid Kuwaltuh Apu Dios et ihephep dad kaban tu. <sup>6</sup> Ey ihhephep da mewan hu kayyaggud ni katat niya itta-kep da etan blue ni luput et handa iduduk etan ida pan-attang.

<sup>7</sup> Ya etan tebol ey aplagan dan blue ni luput et handa iha-ad diman ida duyu, yadda mahukung ni duyun pengihha-adan ni kamei-appit, yadda pengihha-adan ni meinnun niyadda sinapay ni meihha-ad diman ni kamei-appit nan APU DIOS. <sup>8</sup> Mahapul ni hephepan daddan makadlang ni luput niya itta-kep dan ihhephep hu kayyaggud ni katat ni gelding et handa iduduk hu pan-attang.

<sup>9</sup> Mahapul mewan ni hephepan dan luput ni blue hu pattukkan ni dilag, yadda kengkeh, yadda ipit, yadda et-eteng ni duyu niyadda ha-addan ni lanan olibah. <sup>10</sup> Illibut dadda huyyad kayyaggud ni katat niya ihha-ad dad pan-attangan.

<sup>11</sup> Hedin ya etan balituk ni altar ey mahapul ni hephepan dan blue ni luput et ita-kep da hu kayyaggud ni katat, et handa iduduk hu pan-attang. <sup>12</sup> Illibut da mewan di blue ni luput ida ngunut di Tabernacle niya hephepan dan kayyaggud ni katat et handa iha-ad di pan-attangan.

<sup>13</sup> Mahapul mewan ni e-kalen da dep-ul di altar niya hephepan dan madlang ni luput.

<sup>14</sup> Ihha-ad dadman ida ngunut ni meussal di altar henin penellukduk ni ngalab, yadda

tewik, yadda pala niyadda besin, et hephepan daddan kayyaggud ni katat et handa iduduk hu pan-attang.

<sup>15</sup> Et humman hu, hedin man-e-tan kayud pangkampuan yu ey mahapul ni gibbuhen Aaron niyadda u-ungnga tun hephepan emin ida humman ni neieng-eng ni ngunut, et han attangaddan helag Kohat. Mahapul ni henin nunya pehding yu tep eleg mabalin ni keppaen dadda humman tep mettey hu kumpulmih ni tuun mengeppa.

<sup>16</sup> Hi Eleasar e u-ungngan Aaron e padi hu ngenamung ni mengippaptek ni Tabernacle et yadda wadadman, henin lanan olibah ni kameihha-ad di kengkeh, yadda bangbanglu, yadda pagey niya lanan olibah ni kamei-appit."

<sup>17</sup> Kan mewan APU DIOS nan Moses et hi Aaron ey <sup>18</sup> "Heninnuy mewan hu mahapul ni meippahding et eleg ida matey hu helag Kohat anin ni meihnup idad kameussal di Tabernacle. <sup>19</sup> Mekihgep ni hi-gada hi Aaron niyadda lalakkin u-ungnga tud Tabernacle, et itudu dan hi-gada hedin hipa ingngunu da. <sup>20</sup> Tep hedin eleg da pehding huuya, man eleg mabalin ni umhehgep ida hu helag Kohat di Tabernacle, tep mettey ida hedin angangen da hu usal diman, anin ni nekemtang ni ebuh."

*Ya ngunuddan helag Gerson e u-ungngan Levi*

<sup>21</sup> Kan mewan APU DIOS nan Moses ey <sup>22</sup> "Itudek mudda emin hu helag Gerson e u-ungngan Levi meippuun di pewen da niyad pamilyah da. <sup>23</sup> Bilang mudda emin hu lalakkin dammutun mangngunnud Tabernacle ni telumpulu ingganah di nelima toon tu.

<sup>24</sup> Hi-gada mengnged idan nunya: <sup>25</sup> ya Tabernacle, ya meihhepkep ni luput et ya meittakep ni kakkayyaggud ni katat, ya kultinah di heggepan ni Tabernacle, <sup>26</sup> yadda kultinah et ya linubid di dallin ni Tabernacle niyad altar, ya kultinah di heggepan di dallin niyadda kameussal ni pengitta-yunan idan kultinah. Hi-gada mewan ngenamung ni mengippaptek idan nunya hedin man-e-tan ida helag Israel. <sup>27</sup> Hi Aaron niyadda lalakkin u-ungnga tu hu menang-ang idan helag Gerson hedin daka ippahding hu neitudun ngunu da, yadda mahapul ni ippahding da hedin man-e-tan ida niyadda edum ni ngunu da. Itudu da mewan ni hi-gada hedin hipa tetgeden da. <sup>28</sup> Huyyadda neitudun ngunuddan helag Gerson di Tabernacle. Hi Ithamar e u-ungngan Aaron hu ngenamung ni menang-ang ni ngunu da."

*Ya ngunuddan helag Merari e u-ungngan Levi*

<sup>29</sup> Imnehel mewan hi APU DIOS nan Moses ey kantuy "Ilistam ida emin hu helag Merari meippuun di pewen da niyad pamilyah da, <sup>30</sup> niya bilang mudda emin hu lalakkin dammutun mangngunnud Tabernacle ni telumpulu ingganah di nelima toon tu. <sup>31</sup> Hi-gada mengnged ni kalkalimangngan Tabernacle heniddan kameibballabag, <sup>32</sup> yadda tukud, yadda neituunan ni tukud, yadda pa-pa, yadda linubid di nanlinikweh ni Tabernacle niyaddan emin ida kameussal di pengikkapyaan idan nunya. Wada hakey ni hi-gada ey ngenamung tun mengippahding ni neitudun ngunu tu. <sup>33</sup> Huyyadda neitudun ngunnuen idan helag Merari di Tabernacle. Hi Ithamar e u-ungngan Aaron hu mengituttuddun pehding da."

*Ya listaan idan helag Levi*

<sup>34-48</sup> Inu-unnud di Moses nan Aaron niyadda kamengipappangngulun helag Israel hu olden APU DIOS et ilista dan emin hu lalakkin helag Kohat, hi Gerson et hi Merari e u-ungngaddan Levi, meippuun di pewen da niyad pamilyah da. Binilang dan emin hu dammutun mangngunnud Tabernacle ni telumpulu ingganah di nelima toon tu et heninnuy hu bilang ni helag da: hi Kohat ey 2,750, hi Gerson ey 2,630, et hi Merari ey 3,200. Ya nga-mut ni bilang dan emin ey 8,580.

<sup>49</sup> Meippuun di intugun APU DIOS nan Moses ey neilistaddan emin niya neitudun hanhakkey ni hi-gada ngunnuen da winu hipan pehding da.

*Yadda etan tuun kameibbillang ni beken ni malinih*

## 5

<sup>1</sup> Kan APU DIOS nan Moses ey <sup>2</sup> "Itugun muddan helag Israel e pe-kal dad nangkampuan da hu tutu-un wada angetakkut ni degeh dan kamei-aldan, et yadda tutu-un wada kamelpud annel da ni yadda etan eleg meibbillang ni malinih tep kinepa da winu sinikdun da hu annel ni netey. <sup>3</sup> Man-inggeh ni meippahding huuyad laki winu bii et ma-kal idad pangkampuan yu tep eggak pinhed ni meluggit eya bebley ni pekibbebleyan kun hi-gayun tutu-uk."

<sup>4</sup> Inu-unnud idan helag Israel hu intugun APU DIOS nan Moses, et pa-kal dad nangkampuan da etan ida tuun kameibbillang ni beken ni malinih.

<sup>5</sup> Kan mewan APU DIOS nan Moses ey <sup>6</sup> “Itugun muddan helag Israel huyya: ya etan laki winu biin eleg tu u-unnuda hi APU DIOS, et pehding tu lawah di edum tun tuu ey mambehul. <sup>7</sup> Humman ni tuu ey mahapul ni ebbuluten tun nambahul et bayadan tu multa tu etan di tuun nambahulan tu ey e-duman tun dewampulun porsentoh. <sup>8</sup> Nem hedini netey etan tuu et endi neihnpun ni aaggi tun pengidwatan etan ni nambahul ni bayad tu ey meidwat nan APU DIOS humman, et usalen idan padi. Hin-appil ngu dedan etan lakkitun kalneroh ni ukkaten ni nambahul et kelengen tun pengippahdingan tun elaw ni panlinnih. <sup>9</sup> Emin hu illaw idan helag Israel ni iddawat dan APU DIOS ey ellan idan padin menewwat. <sup>10</sup> Emin hu hipan meidwat etan ni padi ey ellan tu.”

*Ya meippanggep etan ni laki kaman-annil*

<sup>11</sup> Huyyadda intugun APU DIOS nan Moses <sup>12</sup> ni ittugun tuddan helag Israel: Hedin ngullaw an nenamak hu hakey ni biin edum ni laki beken tu ahwa <sup>13</sup> et man-ulig ida, nem endi tistigu et endi nena-kup ni hi-gada, <sup>14</sup> ey hedini man-annil etan laki ahwan nunman ni bii winu man-e-lem hu hakey ni laki e anin ni endi impahding ni ahwa tun lawah, <sup>15</sup> ey mahapul ni illaw ni laki hu ahwa tud kad-an ni padi. Niya mahapul ni um-ilaw ni hangkiloh ni alinah ni eleg meha-adan ni mansikan olibah winu bangbanglu tep mei-appit huyyan panmahmahan ni kaman-annil ni laki ma-lat meamta hedini makulug ni nambahul hu ahwa tu.

<sup>16</sup> Illaw etan ni padi etan bii et tu peehneng di hinanggan altar, <sup>17</sup> niya um-alan danum et iduyag tud bewed niya um-alan dep-ul di det-al ni Tabernacle et i-dum tud danum. <sup>18</sup> Hedin negibbuh ni imeang-ang etan ni padi etan bii di hinanggan APU DIOS, ey ukkahan tu betek ni bewek ni nunman ni bii et patnged tun hi-gatu etan neiappit ni alinah et pengamtaan hedini makulug etan kapan-annilin laki. Um-ehneng etan padid hinangga etan ni bii niya tetngeden tu etan bewed ni neha-adan ni mapeit ni danum ni um-idwat ni idut etan di nambahul. <sup>19</sup> Pansapatah ni padi etan bii ey kantun hi-gatuy “Hedini eleg ka makiulig di edum ni laki niya hedini endi impahding mun lawah ni umhulun ni keibbillangan mun beken ni malinih ey eleg um-amnu eya idut ni hi-gam. <sup>20</sup> Nem hedini nekiulig kad edum ni laki ey <sup>21</sup> hi APU DIOS hu mengiddut ni hi-gam ma-lat pippihulen dakan edum mun tuu. Pambalin dakan mebessi <sup>22</sup> eyan neidutan ni danum ni innumem.” Hummangen etan ni bii et kantuy “Ebbulutek huttan ni pehding APU DIOS.”

<sup>23</sup> Ittudek etan ni padi huyyan idut di katat, et hantu ulahi etan neitudek etan di mapeit ni danum di bewed. <sup>24</sup> Peinum ni padi etan ni bii humman ni danum ni neidutan et manhelheltap hedini tu-wangun nambahul. <sup>25</sup> Ellan mewan etan ni padi etan singnged ni biin alinah ni neiappit gapuh ni annil et ita-gey tu et ipeang-ang tun APU DIOS ey hantu ilaw di altar. <sup>26</sup> Umgamal etan padin nunman ni alinah et giheben tu, et painam tu mewan etan ni bii etan danum. <sup>27</sup> Hedini nekiulig etan biid edum ni laki, man nemahhig hu helheltapen tun iddawat ni danum ni neidutan et mebessi. Pippihulen idallin tutu-u. <sup>28</sup> Nem hedini eleg tu ipahding hu lawah, ey mehlag tep eleg um-amnu hu idut ni hi-gatu. <sup>29</sup> Huyya hu tugun ni meippanggep ni annil. Hedini nekiulig hu biid edum ni laki <sup>30</sup> winu kaman-annil hu laki e ya wadad nemnem tu ey wada edum ni laki ahwa tu, ey illaw tu ahwa tu et peehneng ni padid hinanggan APU DIOS et ipahding tu huyyan tugun. <sup>31</sup> Endi bahul ni laki, nem hedini nambahul hu bii, man heltapen tu kastigu tu.

*Ya u-unnuden idan Nasirite*

## 6

<sup>1</sup> Intugun mewan APU DIOS nan Moses <sup>2</sup> e ittugun tuddan helag Israel huyya: “Hedini wada laki winu biin mansapatah ma-lat mambalin ni Nasirite et i-eng-eng tu annel tun APU DIOS, <sup>3</sup> ey mahapul ni eleg um-inum ni kaumbuteng. Eleg um-inum ni hipan meinum ni nekapyad grapes niya eleg mengngan ni grapes niya raisins. <sup>4</sup> Anin ni hipan nekapyad grapes, ya bukel tu winu ukih tu ey eleg mabalin ni tu kennen.

<sup>5</sup> Eleg mabalin ni an mampepu-lit niya eleg mabalin ni tu e-kalen iming tu. Yan nunman ni tsimpuh ni pambalanan tun Nasirite ey mahapul ni pedukkey tu bewek tu niya iming tu. Mahapul mewan ni pannenneng tun pehding hu insapatah tu ma-lat maibilang ni malinih ingganah melebbah humman ni tsimpuh ni insapatah tun pansilbian tun APU DIOS. <sup>6</sup> Ey eleg mabalin ni an meihnpun di netey ni tuu. <sup>7</sup> Anin ni kantu et hi ametu, hi inetu winu yadda aaggi tu hu mettey, et eleg mabalin ni tu hibbiten annel tu gapun hi-gada, tep neieng-eng nan APU DIOS, e ya bewek tu hu keang-angan tu e hi-gatu ey Nasirite. <sup>8</sup> Hedini ya hakey ni tuu ey insapatah tun mambalin ni Nasirite et maieng-eng nan APU DIOS ey mahapul ni pehding tu hu neitugun ni hi-gatu.



<sup>9</sup> Hedin nehibit hu bewek ni hakey ni Nasirite tep neidagsid annel etan ni tuun neminpinhakkey ni netey, ey mahapul ni hehgeden tun pitun aggew et hantu mukmuki ulu tu niya e-kalen tu iming tu et han dammutun meibbillang ni malinih. <sup>10</sup> Yan meikkewwalun aggew ey illaw tu etan ni padi hu dewwan paluma winu dewwan balug di heggeppan ni Tabernacle. <sup>11</sup> I-appit ni padi hu hakey tep ya liwat niya gihheben tu hakey di altar ma-lat mambalin mewan ni malinih humman ni tuu tep ya neidagsian tud annel ni netey. Yan nunman ni aggew ey ippidwa tu mewan ni mansapatah nan APU DIOS niya dukkeyen tu mewan bewek tu. <sup>12</sup> Ippidwa tu mewan ni ieng-eng annel tun APU DIOS et mambalin mewan ni Nasirite. Eleg meibbillang etan tsimpuh ni nunman tep nehibit hu neieng-eng ni bewek tu. Mahapul mewan law ni man-appit ni hantoon tun lakkitun kalneroh gapuh ni bahul tu.

<sup>13</sup> Hedin negibbuh ni impahding ni Nasirite hu insapatah tun pansilbian tun APU DIOS, man umlaw di heggeppan ni Tabernacle <sup>14</sup> et peang-ang tun i-appit nan APU DIOS hu hakey ni hantoon tun lakkitun kalneroh ni kamei-appit ni kagihheba, ya hakey ni hantoon tun labah ni kalneroh ni kamei-appit tep ya liwat et ya hakey ni lakin kalneroh ni kamei-appit ni pekiddagyuman tun APU DIOS. Huyyaddan animal ey mahapul ni endi dipektoh da. <sup>15</sup> Um-iappit mewan ni hambasket ni sinapay ni eleg meha-adan ni pampelbag, yadda mahdel ni sinapay ni nekamdugan ni mansikan olibah, yadda mangkeingpih ni sinapay ni neha-adan ni mansikan olibah, yadda pagey niya meinum. <sup>16</sup> Peang-ang etan ni padi ida huyyan kamei-appit APU DIOS e pemengngulu tudda kamei-appit tep ya liwat niya kagihheba, <sup>17</sup> et hantu itu-nud hu kamei-appit gapuh ni pekiddagyuman nan APU DIOS niya hambasket ni sinapay ni eleg mekamdugan ni pampelbag, ya pagey niya meinum.

<sup>18</sup> Mukmukan etan ni Nasirite hu bewek tud heggeppan ni Tabernacle et giheben tud pengigihheban ni kamei-appit ni pekiddagyuman nan hi APU DIOS. <sup>19</sup> Hedin negibbuh ni nemukmukan hu bewek tu, ey iddawat ni padin hi-gatu hu hanhakkey ni nelutun lapan lakkitun kalneroh, et yadda mahdel niya meingpih ni sinapay ni eleg meha-adan ni pampelbag. <sup>20</sup> Itta-gey ni padin peang-ang nan APU DIOS humman idan meidwat ni bingay idan padi et memei-dum di pagew et ya lapan kalneroh. Hedin negibbuh ida huyya ey dammutu law ni um-inum etan Nasirite ni meinum.

<sup>21</sup> Huyyadda tugun ni meu-unnud di pan-appitan ni Nasirite. Hedin wada pay hu insapatah tun iddawat tun APU DIOS ni mei-dum di kamei-appit ngu dedan, ey dammutu. Nem mahapul ni pehding tu hu insapatah tu."

<sup>22</sup> Kan APU DIOS nan Moses ey <sup>23</sup> "Ehel mud Aaron niyadda u-ungnga tu e heninnuy hu pambendisyon daddan helag Israel:

<sup>24</sup> 'Hi APU DIOS hu mambendisyon niya mengippaptek ni hi-gayu. <sup>25</sup> Hi APU DIOS hu mengippeang-ang ni binabbal tu niya hemek tun hi-gayu. <sup>26</sup> Hi-gatu hu mengidwat ni linggep yu ey peang-ang tu amleng tun hi-gayu.' "

<sup>27</sup> Kan mewan APU DIOS ey "Hedin ngeddanen idan padi hu ngadan kun pemendisyonan dan helag Israel ey bendisyonak ida."

## 7

### *Ya i-appit idan kamengipappanggulun helag Israel*

<sup>1</sup> Ginibbuh nan Moses ni binehwa hu Tabernacle, et ipahding tu hu elaw ni pengi-eng-engan dan APU DIOS ni nunman, yadda kameussal diman, ya altar niyadda usal diman.

<sup>2</sup> Yadda etan aap-apun helag Israel ni kamanlistaddan tutu-u <sup>3</sup> ey in-ali da hu iddawat dan APU DIOS. Humman ida ey enem ni kaliton et ya hampulut dewwan bulug ni baka. Hakey ni kaliton hu indawat ni dewwan ap-apu, niya hakey ni bulug ni baka hu indawat ni hakey ni ap-apu. Impeang-ang dadda emin huyyad hinanggan Tabernacle.

<sup>4</sup> Entanni ey kan APU DIOS nan Moses ey <sup>5</sup> "Abulut mudda huyyan indawat da et mausal di hipan ngunu eyad Tabernacle. Idwat muddan helag Levi et usalen dad ngunu da."

<sup>6</sup> Et idwat Moses idan helag Levi hu ida humman ni kaliton niyadda bulug ni baka.

<sup>7</sup> Indawat tu dewwan kaliton et ya epat ni bulug ni baka idan helag Gerson et usalen dad ngunu da, <sup>8</sup> niya indawat tuddan helag Merari hu epat ni kaliton et ya walun bulug ni bakan usalen da damad ngunu da. Ya ap-apu dan mengituttuddun ngunu da ey hi Ithamar e u-unggan Aaron. <sup>9</sup> Endi an indawat nan Moses ni kaliton idan helag Kohat tep eleg da mahapul di ngunu da, tep hi-gada kamemehhan ni neieng-eng ni ngunut di Tabernacle.

<sup>10</sup> Yan etan ni neieng-engan ni altar hu nengi-lian idan aap-apun nunman idan indawat da et ipeang-ang dan inha-ad dad hinanggan altar. <sup>11</sup> Kan dedan lan APU DIOS nan Moses

ey "Ehel muddan helag Israel e kewa-wa-wan hampulut dewwan aggew ey i-alin hakey ni ap-apu hu iddawwat tun meussal ni pengi-eng-engan ni altar."

<sup>12-83</sup> Ey ya nengi-lin iddawwat tun nemangulun aggew ey hi Nahson e u-ungngan Amminadab e helag Judah. Yan meikkadwan aggew ey hi Nethanel e u-ungngan Suar. Yan meikkatun aggew ey hi Eliab e u-ungngan Helon e helag Sebulun. Yan meikka-pat ni aggew ey hi Elisur e u-ungngan Sedeur e helag Reuben. Yan meikkelliman aggew ey hi Selumiel e u-ungngan Surishaddai e helag Simeon. Yan meikka-nem ni aggew ey hi Eliasap e u-ungngan Deuel e helag Gad. Yan meikkeppitun aggew ey hi Elisham e u-ungngan Ammihud e helag Epraim. Yan meikkewwalun aggew ey hi Gamaliel e u-ungngan Pedahsur e helag Manasseh. Yan meikkaahyam ni aggew ey hi Abidan e u-ungngan Gideon e helag Benjamin. Yan meikkeppulun aggew ey hi Ahieser ey u-ungngan Ammishaddai e helag Dan. Yan meikkeppulu et hakey ni aggew ey hi Pagiel e u-ungngan Okran e helag Asher. Yan meikkeppulut dewwan aggew ey hi Ahira e u-ungngan Enan e helag Naptali.

Emin ida ey nan-iinggeh indawat da e hanhakkey ni duyun silber ni umlaw di hangkiloh et kagedwah bel-at tu, ya hanhakkey ni mahukung ni silber ni umlaw di hangkiloh bel-at tu meippuun di kameunnud ni lekud da. Napnudda humman ni kayyaggud ni alinah ni nekamdugan ni mansikan olibah, e huyya kamei-appit ni pagey. Indawat da mewan hu hanhakkey ni ek-ekut ni mahukung ni duyun balituk ni umlaw ni 1/8 ni kilo hu bel-at tu e neha-adan ni bangbanglun insensoh, ya hanhakkey ni kilaw ni lakkitun baka, ya hanhakkey ni lakkitun kalneroh, ya hanhakkey ni hantoon tun impah ni kalneroh ni kamei-appit ni kagihheba, ya hanhakkey ni gelding ni kamei-appit tep ya liwat.

Yadda indawat dan kamei-appit di pekiddagyuman ey: handedwan bulug ni baka, hanlilman lakkitun kalneroh, hanlilman gelding et ya hanlilman hantoon tun impah ni kalneroh.

<sup>84-88</sup> Et ya bilang emin ni indawat idan hampulut dewwan aap-apun helag Israel ni meussal di kei-eng-engan ni altar ey: Hampulut dewwan silber ni duyu et ya hampulut dewwan silber ni mahukung ni duyun umlaw di telumpulun kilo, hampulut dewwan balituk ni ekka-kut ni mahukung ni duyun umlaw ni hangkiloh et kagedwah bel-at tun nangkapanun insensoh, hampulut dewwan lakkitun baka, hampulut dewwan lakkitun kalneroh, hampulut dewwan hantoon tun impah ni kalneroh, ya alinah ni i-appit dan mei-unnud ida nunman ni kagihheba et ya hampulut dewwan gelding ni kamei-appit tep ya liwat. Ya in-ali da pay ni kamei-appit ni pekiddagyuman dan Apu Dios ey dewampulut epat ni lakkitun baka, na-nem ni lakkitun kalneroh, na-nem ni gelding et ya na-nem ni hantoon tun impah ni kalneroh.

<sup>89</sup> Yan hinggepan nan Moses di Tabernacle et makihummangan nan APU DIOS ey dingngel tu kaman-e-hel di nambattanan ni dewwan nepaot ni nepayakan ni anghel di ta-pew ni hu-keb ni Kaban APU DIOS.

## 8

*Ya pattukkan idan dilag*

<sup>1</sup> Kan APU DIOS nan Moses ey <sup>2</sup> "Ehel mun Aaron et hedin ippatuk tudda etan pitun dilag di pattukkan ey ang-angen tu et madilagan hu pettek ni hinanggan nunman ni pattukkan."

<sup>3</sup> Inu-unnud Aaron et iha-ad tudda dilag etan di dammutun medillagan hu hinanggan etan ni pattukkan. <sup>4</sup> Humman ni pattukkan ni dilag ey nekapyad balituk meippalpuud hengge tu ingganah di utduk tu e neu-unnud hu impeang-ang APU DIOS nan Moses ni pengiu-unnudan tu.

<sup>5</sup> Kan APU DIOS nan Moses ey <sup>6</sup> "Appil mudda helag Levi idad edum dan helag Israel, et ipahding mu hu elaw ni panlinnih ni hi-gada. <sup>7</sup> Wagkihim idan danum ni kapanlinnih et pelabahah mu bewek di ulu da niyad annel da, ey pebalbal mun hi-gada balwasi da et maibilang idan malinih. <sup>8</sup> Ehel mu mewan ni hi-gada et umi-liddan pakeetteng tun lakkitun baka, ya alinah ni nekamdugan ni mansikan olibah ni kamei-appit, niya kilaw ni lakkitun bakan kamei-appit tep ya liwat. <sup>9</sup> Ayagim idan emin hu helag Israel niya peehneng mudda helag Levi di heggepan ni Tabernacle. <sup>10</sup> Ey yadda helag Israel ey itta-pew da ngamay dad uluddan helag Levi. <sup>11</sup> Ipeang-ang Aaron idan hi-gak hu helag Levi et maieng-eng idan hi-gak tep hi-gak pansilbian da.

<sup>12</sup> Itta-pew idan helag Levi hu ngamay dad ulun etan ni dewwan lakkitun baka. Mei-appit hu hakey tep ya liwat niya gihheben da etan hakey. Huyya hu elaw ni panlinnih

idan helag Levi. <sup>13</sup> Peehneng muddad hinanggan Aaron niyadda u-ungnga tu et maieng-eng idan hi-gak. <sup>14</sup> Hanneya pehdng mun mengi-eng-eng idan helag Levi, tep hi-gada pinilik di edum dan helag Israel ni mengippahding ni pengunnuk.

<sup>15</sup> Hedin negibbuh ni impahding mu humman ni elaw ni panlinnih ni hi-gada ey ipeang-ang mudda et dammutu law ni umhehgep idad Tabernacle et ipahding da hu pengunnuk ni hi-gada. <sup>16</sup> Neiang-eng ida helag Levi ni hi-gak, tep hi-gada heihullul di emin ni pengulwan ni lakin u-ungngaddan helag Israel, <sup>17</sup> tep mei-eng-eng dedan ni hi-gak hu emin ni pengulwan ni lakin u-ungngaddan helag Israel, anin idan nemangulun impah ni animal da. Pinilika idad dedan ni mei-eng-eng ni hi-gak nunman ni hileng ni nemateyak emin ni pengulwan ni lakin u-ungngaddan iEgyt. <sup>18</sup> Et humman hu, yadda helag Levi hu ihullul kuddan pengulwan ni lakin u-ungngaddan helag Israel. <sup>19</sup> Hi-gada mewan hu pinilik ni emin di helag Israel ni mengippahding idan ittudun Aaron niyadda u-ungnga tun ingngunu dad Tabernacle ma-lat iehneng dadda edum dan helag Israel. Pehding da hu elaw ni panlinnih ni hi-gada et endi an meippahding ni lawah ni hi-gada hedin meihnup idad Tabernacle."

<sup>20</sup> Inu-unnud Moses, hi Aaron niyadda helag Israel hu intugun APU DIOS ni pehdng daddan helag Levi. <sup>21</sup> Impahding idan helag Levi hu elaw ni panlinnih niya imbalbal da balwasi da et peang-ang Aaron idan APU DIOS ey impahding tu hu elaw ni panlinnih ni hi-gada ma-lat maibilang idan malinih. <sup>22</sup> Neipalpun nunman ey ida law kaumhegep hu helag Levi ni manggunnud Tabernacle, et baddangan da hi Aaron niyadda u-ungnga tun laki. Inu-unnud dan emin hu intugun APU DIOS nan Moses ni pehdng da.

<sup>23</sup> Kan APU DIOS nan Moses ey <sup>24</sup> "Mahapul mewan ni u-unnuden idan helag Levi huyya: Hedin dewampulut liman toon ida laki ey illapu dan manggunnud Tabernacle. <sup>25</sup> Issiked dan manggunnud man hedin nelima law toon da. <sup>26</sup> Hedin dinteng da humman ni toon ey umbaddang idan ebuh di edum dan helag Levi ni mangguwalyad Tabernacle, nem beken law ni hi-gada mengippahding ida etan ni ngunudman. Humman ida ittudum ni ngunuddan helag Levi."

*Ya meippanggep etan ni Piyestah ni Passover e Nelabahan Anghel APU DIOS*

## 9

<sup>1</sup> Yan eman ni nemangulun bulan ni meikkadwan toon neipalpun neni-yanan idan helag Israel ni Egypt ey immehel hi APU DIOS nan Moses di Sinai <sup>2</sup> et kantuy "Ehel muddan helag Israel et ipahding da hu Piyestah ni Passover e Nelabahan ni Anghel etan di nagtud ni tsimpuh. <sup>3</sup> Pehding yu huyya meippalpun kamangkehilleng ni meikkahampulut epat ni aggew nunman ni bulan. Mahapul ni paka-u-unnuden yudda intugun kun pehdng yu meippanggep nunyan Piyestah."

<sup>4</sup> Inhel Moses idan tutu-u e ipahding da humman ni Piyestah <sup>5</sup> ni mahmahdem ni meikkahampulut epat ni aggew ni memengngulun bulan di diman Sinai, et ipahding idan tutu-u humman e inu-unnud da hu intugun APU DIOS nan Moses. <sup>6</sup> Nem wadadda eleg mangipahding ni nunman ni Piyestah tep kinipa da annel ni netey et maibilang idan beken ni malinih, et lumaw idan Moses nan Aaron nunman ni aggew <sup>7</sup> et kandan Moses ey "Eleg kami meibillang ni malinih tep kinipa mi netey ni tuu. Nem anin et anhan, kele dakemi ikka-leg ni man-appit nan APU DIOS ni nunyan nagtud ni tsimpuh ey ma-nudda edum min helag Israel tep nan-appit ida?"

<sup>8</sup> Kan Moses ni hi-gaday "Heged yu et amtaek hedin hipa e-helen APU DIOS ni meippanggep ni hi-gayu."

<sup>9</sup> Entanni ey kan APU DIOS nan Moses ey <sup>10</sup> "Ehel muddan helag Israel e hedin wadan higadan nunya winu yan edum ni aggew hu meibbillang ni beken ni malinih ni tsimpuh ni Piyestah ni Passover tep kinipa tu netey winu wada linawwan da et endiddan nunman ni nagtud ni tsimpuh ey dammutun pehdng da humman ni Piyestah <sup>11</sup> ni mahmahdem ni meikkahampulut epat ni aggew ni meihhayned ni bulan. Yan nunman ni tsimpuh pengngannan dan pakeetteng tun kalneroh et ya mapeit ni ihhidan natnateng et ya sinapay ni eleg mekamdugan ni kamampelbag. <sup>12</sup> Mahapul ni kenen dan emin et endi an metdaan ni kewa-waan tu. Mahapul mewan ni endi hehpungen dan genit ni animal ni neiappit. \* Mahapul ni u-unnuden dan emin hu meunnud hedin pehdng da humman ni Piyestah. <sup>13</sup> Nem ya tuun eleg mengippahding nunya anin kameibbillang ni malinih winu anin ni endi linawwan tu ey eleg law meibbillang ni tuuk tep eleg tuwak iappitan ni nunman ni nagtud tsimpuh. Et heltapen tu kastigu tu tep ya humman ni liwat tu.

<sup>14</sup> Ya edum ni tuun nekibebley ni hi-gayun nemihned ni mengippahding ni nunyan Piyestah ey dammutun pehdng tu nem mahapul ni paka-u-unnuden tu hu meunnud

\* 9:12 9:12 John 19:36

ni pehding. Anin ni hansinu-wan humman ni tuu winu helag dedan Israel et mahapul ni u-unnuden tu hu meunnud ni pehding.”

*Ya etan kulput ni nengipenguluddan helag Israel*

<sup>15</sup> Yan eman ni neiha-adan etan ni Tabernacle ey nelehbeng hu kulput et hephepan tun kawwalwal. Hedin hileng man kamambalin ni apuy humman ni kulput. <sup>16</sup> Hanniman kameippahding e hedin kawwalwal ey kamelehbeng humman ni kulput ey hedin hileng ey kamambalin ni apuy. <sup>17-18</sup> Hedin immahpat etan kulput, ey amtaddan helag Israel e pinhed APU DIOS ni man-e-tan ida. Et humman hu, bukkalen da kampu da ma-lat man-etan ida. Ey ihha-ad da mewan hedin nansiked niya melehbeng etan kulput. Nem hedin mannenneng etan kulput di Tabernacle, ey amta da e pinhed APU DIOS ni mannenneng idadman ni nangkampuan da. <sup>19</sup> Anin ni meeyapaw hu panha-adan ni kulput di Tabernacle et manhahha-ad idadman e eleg ida man-e-tan ni pangkampuwan da et u-unnuden da pinhed APU DIOS. <sup>20</sup> Hin-addum ni kamebillang ni ebuh hu aggew ni kapanhahha-adin kulput etan di Tabernacle. Et humman ni ebuh ni aggew hu panha-adan idan tuud nangkampuan da. Nem hedin in-olden APU DIOS ni man-e-tan ida ey daka u-unnuda. <sup>21</sup> Hin-addum mewan ni hakey ni hileng ni ebuh hu panha-adan ni kulput di Tabernacle et ida kaman-e-tan ni kewa-waan tu hedin immahpat etan kulput. Nem anin ni kawwalwal winu hileng et hanniman daka pehding e hedin immahpat etan kulput man mahapul ni man-e-tan ida. <sup>22</sup> Nem eleg ida man-e-tan anin ni dewwan aggew, hambulan, hantoon winu mea-ayyapaw pay hedin eleg um-ahpat etan kulput. Nem hedin nisin immahpat etan kulput man bukkalen da kampa ma-lat man-etan ida. <sup>23</sup> Ya daka pengu-unnudin APU DIOS hu daka pemukkalin kampu da niya daka pengikkapyai hedin humman inhel APU DIOS nan Moses ni pehding da.

## 10

*Yadda silber ni tangguyup*

<sup>1</sup> Kan APU DIOS nan Moses ey <sup>2</sup> “Kapy kan dewwan silber ni tangguyup et mausal ni pan-eyyag idan tuu ma-lat maemung ida ey humman pay pengippeamtaan hedin mahapul ni bukkalen da kampu da. <sup>3</sup> Hedin meipatnul ni dewwa etan ida tangguyup, humman pengamtaan idan tuu e mahapul ni meemung idad kad-am mud heggepan ni Tabernacle. <sup>4</sup> Nem hedin hakey ni ebuh hu meipatnul, ey ebuh ida etan kamengippangnguluddan tuu hu meemung di kad-am.

<sup>5</sup> Ey hedin kamamputuputul hu tenul etan ni tangguyup ey bukkalen idan nangkampud appit ni kasimmilin aggew hu kampu da et man-etan ida. <sup>6</sup> Yan pidwatun pengipatanulan dan tangguyup ni mamputuputul ey bukkalen damaddan nangkampud appit ni south hu kampu da et maitu-nud ida. <sup>7</sup> Nem hedin eyyagan yudda tuu ma-lat maemung ida, ey dukkedukkey yu hu tenul ni tangguyup.

<sup>8</sup> Yadda padin u-ungngan Aaron ni ebuh hu dammutun mengipatanul ni tangguyup. Ey mahapul ni u-unnuden idan meittu-nud ni helag dadda huyya. <sup>9</sup> Ey mahapul ni petnul yudda huyyan tangguyup et peamta yu e wada gubat hedin wada buhul yun menggep ni bebley yu et mekigubat kayun pengihwang yun annel yu. Baddangan dakeyun hi-gak e AP-APU e Dios yu ma-lat meihwang kayud buhul yu. <sup>10</sup> Patnul yu mewan tangguyup yun tsimpuh ni pan-an-anlaan yu henin Piyestah ni Kaketellakin Bulan winu yadda edum ni piyestah. Ey patnul yu mewan tangguyup yud pan-appitan yun kagihheba niya pekiddaguyan yun APU DIOS. Humman ni tenul ni tangguyup hu mengippenemnem ni hi-gayun nan Apu Dios. Hi-gak hu AP-APU e Dios yu.”

*Ya nan-etanan idan helag Israel ni nangkampuan da*

<sup>11</sup> Yan eman ni meikkadwampulun aggew ni meikkadwam bulan ni meikkadwan toon neipalpun neni-yanan idan helag Israel ni Egypt ey himma-pat hu kulput ni wadat Tabernacle, <sup>12</sup> et umgah ida helag Israel et hi-yanan da hu eleg mebebleyid Sinai et manglaw ida ingganah nansiked etan kulput di Paran e eleg mebebleyi. <sup>13</sup> Neditngan hu pan-e-tanan da mewan et iolden APU DIOS nan Moses e umlaw ida.

<sup>14</sup> Yan inggahan da ey nantutu-nud ida e nemanguludda helag Judah niyadda edum ni helag ni nekikampun hi-gada. Impanguluddan Nahson e u-ungngan Amminadab. <sup>15</sup> Neitu-nud ida helag Issakar e hi Nethanel e u-ungngan Suar hu nengipengulun hi-gada <sup>16</sup> et han maitu-nud hu helag Sebulun e impanguluddan Eliab e u-ungngan Helon. <sup>17</sup> Et han law maitu-nud ida helag Gerson niyadda helag Merari e nangnged etan ni binukal dan Tabernacle.

18 Neitu-nud ida helag Reuben et yadda edum da e impangulun Elisur e u-ungngan Sedeur. 19 Neitu-nud ida helag Simeon e impangulun Selumiel e u-ungngan Surishaddai. 20 Et maitu-nud ida helag Gad e impangulun Eliasap e u-ungngan Deuel. 21 Neitu-nud ida helag Kohat e helag Levi e hi-gada nangnged idan neieng-eng ni usal di Tabernacle. Yan dintangan da etan di pangkampuan da ey neiha-ad law etan Tabernacle. 22 Neitu-nud damadda helag Epraim e impanguluddan Elishamah e u-ungngan Ammihud. 23 Neitu-nud ni hi-gada hu helag Manasseh e impanguluddan Gamaliel e u-ungngan Pedahsur. 24 Neitu-nud ida dama helag Benjamin e impanguluddan Abidan e u-ungngan Gideoni. 25 Ya nanggillig ni tellun helag Israel ey yadda helag Dan, yadda helag Asher niyadda helag Naptali e humman ida ey guwalyad benneggan. Ya nengipengulun hi-gada ey yadda helag Dan e impanguluddan Ahieser e u-ungngan Ammishaddai. 26 Neitu-nud hu helag Asher e impanguluddan Pagiel e u-ungngan Okran, 27 et yadda law hu helag Naptali e impanguluddan Ahira e u-ungngan Enan. 28 Hanneya hu elaw ni negenedwaan idan helag Israel niya nantutu-nudan dad lawwan dan da pan-e-tanan. 29 Hakey ni aggew ey kan Moses nan hi aydu tu e hi Hobab e u-ungngan Jetro e iMidian ey "Umlaw kamid bebley ni inhel APU DIOS ni iddawat tun hi-gamin helag Israel. Pakilaw kan hi-gami et idwatan dakan panyaggudam tep inhel APU DIOS ni iddawat tu panyaggudan min tuu tu." 30 Nem kan Hobab ey "Eleggak mekillaw ni hi-gayu. Mahapul ni mambangngaddak di pamilyah kud bebley mi." 31 Kan mewan Moses ni hi-gatuy "Entan anhan dakemi hi-yan. Pakilaw ka kumaddan ni hi-gami, tep hi-gam hu nengamta hedini attu pangkampuan tayu eyad eleg mebebleyi. 32 Iddawtan dakaddan dakel ni panyaggudan ni iddawat APU DIOS ni hi-gatsu." 33 Yan neni-yanan idan helag Israel di Sinai ey nandalan idan tellun aggew. Nemangulu hu Kaban APU DIOS tep hedini attu nansikedan tu ey yadman pangkampuan da. 34 Hedin kawwalwal et ida kamenglaw ey kamei-unnunnuud ni hi-gada etan kulput. 35 Hedin mewan immegah ida et umlaw ida e in-attang da etan Kaban Apu Dios ey kan Moses ey "APU DIOS, inah ka et mudda pan-iwehit hu buhul mu. Pabsik mudda tuun angebe-hel daka!" 36 Hedin dimmateng idad pangkampuan da et inha-ad da Kaban Apu Dios, kan Moses ey "Kaibangngad ka e APU DIOS di kad-an min kalibulibun helag Israel."

## 11

### *Ya kamanpanlillah iddan*

1 Entanni ey inlapuddan helag Israel ni manlillah nan APU DIOS tep yadda ligat da. Dingngel APU DIOS hu ngudu da ey bimmunget et paeli tu apuy et malgab hu pangil ni nangkampuan da. 2 Nampehemmehemmek idan nampebaddang nan Moses et mandasal nan APU DIOS et ma-dep hu apuy. 3 Nginedanan dan Taberah humman ni nangkampuan da e ya keibbellinan tu ey 'Kamantetebbel ni bebley' tep immali apuy APU DIOS di kad-an da. 4 Entanni ey kaheppuladdan beken ni helag Israel ni nekilaw ni hi-gada hu kayyaggud ni kennen ni wadad Egypt, heni detag. Anin idan helag Israel et ida dama kamanlillah e kanday "Hamban wada detag ni ihhida tayu ey. 5 Yan kaweda tayud Egypt ey hedini pinhed tayu deleg man wada, liblih pay. Dakel pay diman bihhu-ut, yadda melon, niyadda dakel ni klasih ni danggu niya tapal! 6 Nem yan nunya ey nehingla itu law ni peteg ni manah tep ebuh humman tayu kakennakennan kewa-wa-wal!" 7 Ya manah ey heni ekka-ket ni bukel e beken ni makablah ang-ang tu. 8-9 Ida kame-gah ni hileng di kad-an ni nangkampuan idan helag Israel, et hedini newa-wa man inemung da. Daka beyyua et mamblin ni heni alinah ey handa kinapayan nedampillag ni sinapay. Hedin ya tamtam tu man heni sinapay ni nekamdugan ni mansikan olibah. 10 Kadeddengngelan Moses e ida kamanpanlillah etan tuun neamung di heggeppan ni kampu ey kameunnumunnu nemnem tu tep bimmubbunget hi APU DIOS. 11 Et kantun APU DIOS ey "Kele hanneya muka pehding ni hi-gak e bega-en mu e muwak kapanliligat? Hipa nak impahding ni muka bellawa et hi-gak mu nengidinelan ida eyan dakel ni tuun hanneya elaw da? 12 Beken ni hi-gak hu namyuh ni hi-gada niya beken ni hi-gak hu ammed da! Ey kele nak nambalin ni heni kaman-e-ban hi-gada et nak ida illaw di bebley ni inhel mun iddawat muddan aammed mi? 13 Attu nak pengellaan ni dakel ni detag ni pehiddak idan nunyan dakel ni tuu? Anin anhan et ida kaumlililililil e ida kaumbagabagan detag. 14 Eggak kabaelin hakkeyan ni mengippaptek ni hi-gada. Nakka meliggasin peteg! 15 Hedin hanneya pehding mun hi-gak man kedukdul hu patey muwak ew katteg et eggak helheltpen hu hanneya. Nem hedini daka kapeamleng man entan tuwak anhan panliligat."

<sup>16</sup> Entanni ey kan APU DIOS nan Moses ey “Ayagam ida nepitun kamengipappangngulun helag Israel et maemung idad Tabernacle di kad-an mu. <sup>17</sup> Um-ali-ak et umhellak ni hi-gam diman, ey weddaek alin hi-gada hu Ispirituh ni henin winedak ni hi-gam malat baddangan dakan hi-gadan mengippaptek idan etan ni tuu et eleg mu hakkeyan. <sup>18</sup> Ehel mun hi-gada e mahapul ni pehding da hu elaw ni panlinnih tep hi-gak e AP-APU ey dingngel ku lilih da e kanday ‘Hamban wada detag ni ihhida tayu ey’ niya kanday ‘Kedukdul hu biyag tayud Egypt’. Et humman hu, weddaek hu detag ni kabuhhan ey mahapul ni kennen da. <sup>19</sup> Beken ni han-aggew ni ebuh winu dewwan aggew, winu lima, winu hampulu, winu dewampulun aggew, tep mahapul ni <sup>20</sup> kennen dan kewa-wa-wan hambulan ingganah makahhinggadda et henidda um-uta. Hanneya meippahding tep inwalleng da-ak et kanday ‘Kele dedan tayu hini-yan hu Egypt?’ ”

<sup>21</sup> Nem kan Moses nan APU DIOS ey “Ya bilang ida eyan impanguluk ni tuun dammutun mansindalu ey enem ni gatut ni libu, ey kele kammuy iddawtan idan emin ni detag ni kennen dan hambulan? <sup>22</sup> Anin na-mun keklengen min emin animal ni et umkulang ni kennen da. Ey anin na-mun hellepen min emin hu deleg di baybay et umkulang ni pekkan ni hi-gada.” <sup>23</sup> Et kan APU DIOS nan Moses ey “Kaw wada pappeg ni kabaelan ku? Yan nunya penang-angam hedini um-amnu eya inhel ku!”

<sup>24</sup> Limmaw hi Moses et tu ehelen ni hi-gada hu inhel APU DIOS, et ayagan tudda nepitun kamengipappangngulun hi-gada, et peehngeng tuddad nanlinikweh ni Tabernacle.

<sup>25</sup> Entanni ey immali hi APU DIOS etan di kulput et umhel nan Moses. Wineda tudda etan ni nepitun tuun nepili hu Ispirituh ni henin wineda tun Moses. Yan newadaan ni Ispirituh ni hi-gada ey mambalin idan prophet ni nekemtang, nem yan nunman ni ebuh.

<sup>26</sup> Yadda etan dewwa e hi Eldad nan Medad e nekilistaddad nepitun tuu ey wadaddad kampu da tep eleg ida lumaw di Tabernacle ni nunman ni tsimpuh, nem anin ni hi-gada et nan-abig idan newadaan ni Ispirituh ni hi-gada. <sup>27</sup> Et wada hu kamenikken ni lakin nambesik et tu ehelen nan Moses e immen di Eldad nan Medad di kampu da e ida kaman-ebbig. <sup>28</sup> Immeheh hi Joshua e u-ungngan Nun e hi-gatu kamemabbaddang nan Moses neipalpun keu-ungnga tu ey kantun Moses ey “Mu pasiked ida, apu!”

<sup>29</sup> Nem kan Moses ey “Entan tuwak ikakkaguh. Kaw beken mewani ni kayyaggud hedini weddaen APU DIOS di emin ni tuu tu hu Ispirituh tu et mambalin idan emin ni prophet?” <sup>30</sup> Negibbuh huuya et mambanggad di Moses niyadda etan nepitun kamengipappangngulud kakampu da.

<sup>31</sup> Entanni ey impaelin APU DIOS hu dibdib ni nengilin dakeh ni peteg ni sisit ni nalpud baybay et umpaddad puyek ey neipu-ul ida et tellun piyeh keta-gey da ey nenap-apan hu mahkang etan di nangkampuan idan helag Israel e henin kedawwin kadellanan han-aggew. <sup>32</sup> Et itattaggan idan tutu-u hu ala e in-a-aggew da et ilallabbi da, et mewa-wa mewani et ia-aggew da ala. Ya inlan hakey ni hi-gada ey umlaw di neliman bushel et da pan-iha-pey di nangkampuan da. <sup>33</sup> Nem entannit daka pankennadda humman ni sisit, ey impaelin APU DIOS hu nemahhig ni degeh tep bimmubunget ni hi-gada. <sup>34</sup> Dakeh ni hi-gada netey et mukun nginedanan da humman ni nangkampuan dan ‘Kibrot Hataabah.’ Ya keibbellinan tu ey ‘Kulung idan nadmut ni detag’ tep ingkulung daddadman hu tutu-un kamanlillih meippanggep ni kennen ni kaiddawadawat APU DIOS.

<sup>35</sup> Entanni ey hini-yan idan helag Israel humman et lumaw idad Haserot et mangkam-puddadman.

## 12

### *Pinihul di Miriam nan Aaron hi Moses*

<sup>1</sup> Yan kaweda dad Haserot ey pinihul di Miriam nan hi Aaron hi Moses tep inahwa tu hu biin Kushite. <sup>2</sup> Kanda pay ey “Kaw hi Moses ni ebuh hu inhelan APU DIOS? Kaw eleg dama umhel ni hi-gata?” Humman ni inhel da ey dingngel APU DIOS.

<sup>3</sup> (Yad emin ni tuud puyek ey endi henin Moses e kamampekumbabah.)

<sup>4</sup> Pinhakkeyey ineyagan APU DIOS hi Moses, hi Aaron et hi Miriam et kantun hi-gaday ‘Lakkayuy ni tellud Tabernacle!’ Et lumaw idan tellu. <sup>5</sup> Entanni ey nelehbeng hi APU DIOS di kulput e heni tukud di heggeppan ni Tabernacle et ayagan tud Aaron nan Miriam. Inu-unnud da et lumaw idan dewwad kad-an tu.

<sup>6</sup> Kan APU DIOS ni hi-gaday “Dengel yu eya e-helek! Hedini wada pinhed kun e-helen idan prophet ey peamtak ni hi-gadad i-innep da. <sup>7</sup> Nem hedini hi Moses e bega-en ku ey beken ni hanniman, tep indinel kun emin ni hi-gatu hu helag Israel. <sup>8</sup> Humman gaputun nakka mekihinnanggan mekihummangan ni hi-gatu niya nakka panna-ud hu pinhed kun e-helen ni hi-gatu, et heni da-ak inang-ang. Kele eleg kayu umtakut ni memihhul ni hi-gatu?”

<sup>9</sup> Nemahhig bunget APU DIOS ni hi-gada et hi-yanen tudda. <sup>10</sup> Kamangkeitta-gey etan kulput di ta-pew ni Tabernacle ey endi maptek ey newada hu leprosih nan Miriam e nambalin ni pukaw hu belat tu. Inang-ang Aaron humman ni neipahding, <sup>11</sup> ey kantun Moses ey "Apu, entan dakemi anhan kastigu tep ya nambahulan min eleg mi pakannemnemen et ipahding mi. <sup>12</sup> Ang-ang mu anhan et eleg mambalin hi Miriam ni heni neiangngan gelang ni netey e kamangkebwel ngu dedan ni neukanan tu."

<sup>13</sup> Et mandasal hi Moses nan APU DIOS e kantuy "Peyaggud mu anhan e APU DIOS hi Miriam!"

<sup>14</sup> Hinumang APU DIOS ey kantun Moses ey "Gullat ni linupdaan ametu angah tu, et mahapul ni issipel tu baing tun pitun aggew. Et humman hu, idawwi yu nid kampu yun pitun aggew, et hedin negibbuh ey han dammutun mambanggad di kampu."

<sup>15</sup> Indawwi da hi Miriam di nangkampuan dan pitun aggew et eleg ida man-etan ingganah nambanggad hi Miriam di kampu da. <sup>16</sup> Hini-yan da hu Haserot et lumaw idad Paran e eleg mebebleyi et mangkampudda mewan diman.

## 13

*Ya nemutukan Moses ida etan ni an mansi-im di Kanaan*

<sup>1</sup> Kan APU DIOS nan Moses ey <sup>2</sup> "Pili kan hanhakkey di hampulut dewwan helag Israel et palaw muddan an mansi-im di Kanaan e bebley ni iddawwat kun hi-gayu."

<sup>3</sup> Et u-unnudun Moses humman inhel APU DIOS. Intu-dak tudda hampulut dewwan lalakkin kamengipappangnguluddan helag Israel et umgah idadman Paran e nangkampuan da. <sup>4</sup> Huyyadda ngadan da: hi Sammua e u-ungngan Sakkur di helag Reuben, <sup>5</sup> hi Saphat e u-ungngan Hori di helag Simeon, <sup>6</sup> hi Kaleb e u-ungngan Jephunneh di helag Judah, <sup>7</sup> hi Igal e u-ungngan Joseph di helag Issakar, <sup>8</sup> hi Hosea e u-ungngan Nun di helag Ephraim, <sup>9</sup> hi Palti e u-ungngan Raphu di helag Benjamin, <sup>10</sup> hi Gaddiel e u-ungngan Sodi di helag Sebulun, <sup>11</sup> hi Ammiel e u-ungngan Gemalli di helag Dan, <sup>12</sup> hi Gaddi e u-ungngan Susi di helag Manasseh e u-ungngan Joseph, <sup>13</sup> hi Sethur e u-ungngan Michael di helag Asher, <sup>14</sup> hi Nahbi e u-ungngan Bopsi di helag Naptali, <sup>15</sup> et hi Geuel e u-ungngan Maki di helag Gad.

<sup>16</sup> Huyyadda intu-dak Moses ni an mansi-im ni bebley ni lawwan da. Yan nunyan tsimpuh hu nenullulan nan Moses ni ngadan Hosea e u-ungngan Nun ni Joshua.

<sup>17</sup> Yan nengitu-dakan Moses ni hi-gada ey kantuy "Elaw kayud appit ni north e idlan yud Negeb ingganah di appit ni south ni Kanaan ey nedagah kayud etan di duntuduntug ni bebley. <sup>18</sup> Hedin dimmateng kayudman ey ang-ang yu hedin hipa elaw tu humman ni bebley niyadda bimbebley, hedin dakek ida winu hahhakkey ida winu hedin nangka-let ida winu eleg. <sup>19-20</sup> Ey ang-ang yu hedin kayyaggud humman ni bebley winu lawah. Ang-ang yu hedin neluhud winu eleg. Niya ang-ang yu hedin mateba neitnem winu eleg, niya hedin dakek keyew. Ey yallin pambangngadan yu, ey ienamut kayun lameh ni neitnem diman." (Yan nunman ni tsimpuh ey nelapuan ni melu-um hu grapes.)

<sup>21</sup> Limmaw ida humman ni lalakki et ilepu dan man-ang-ang di eleg mebebleyid Sin di Kanaan ingganah di Rehab e neihnup di Hamat. <sup>22</sup> Nampalaw ida nid appit ni north et mandalan idad Negeb et han-ida lumaw di Hebron e nambebleyan di Ahiman, hi Sheai et hi Talmai e helag idan etta-teng ni tutu-un kameingngadnin Anakim. (Ya Hebron hu nemangulun nekapyan bebley ni pitun toon et han hu Soan e bebley di Egypt.) <sup>23</sup> Yan linawwan dad Nedeklan e Eskol ey immaladdan hambu-ngul ni grapes. Makabel-at et pakkadek ni in-attang ni dewwan tuu. Immaladda pay ni lameh ni pomegranate niya lameh ni fig et ienamut da. <sup>24</sup> Nginedanan idan nunman ni helag Israel humman ni Nedeklan e Eskol e ya keibbellinan tu ey 'nebu-ngul' tep yadman nengal-an dan nebu-ngul ni grapes.

<sup>25</sup> Nelabah hu na-pat ni aggew ni nansiiman da et mambangngad <sup>26</sup> idad Kades di Paran e kad-an di Moses nan Aaron niyadda edum dan helag Israel. Ine-ehhel da hu inenang-ang da et peang-ang da etan lameh idan neitnem ni in-anemut da. <sup>27</sup> Kandan Moses ey "Limmaw kamid bebley ni nengitu-dakam ni hi-gami ey inang-ang mi e kayyaggud niya makatmel ey mateba nangkeitnem diman. Dakek putsukan, ey adyah hu in-anemut min lameh idan neitnem ni inla midman. <sup>28</sup> Nem yadda tutu-un nambebley diman ey nangka-let ida. Mahkang hu bebley da niya nehammad ni neluhud. Ey anggetakkut tep wada etta-teng ni tutu-udman e nahlag idan Anak. <sup>29</sup> Hedin yadda iAmalek ey nambebley idad Negeb. Yadda Hittite, yadda Jebusite niyadda Amorite ey nambebley idad duntuduntug diman. Yadda iKanaan ey nambebley idad gilig ni baybay niyaddad gilig ni Wangwang e Jordan."

<sup>30</sup> Kamanlillah ida helag Israel nan Moses nem impaineng Kaleb et kantuy "Itsuy kuma et tayudda gubaten et hi-gatsu mambebley diman tep nanna-ud ni apputen tayudda."

<sup>31</sup> Nem kan ida etan ni edum tun an nansiim ey "Eleg tayudda mannuman han-apput tep ka-ang-ang e et-eteng kabaelan da nem hi-gatsu." <sup>32</sup> Inhinap dad edum dan helag Israel hu beken ni makulug ni meippanggep etan ni bebley. Kanday "Lawah hu puyek diman tep kulang hu kaillameh idan neitnem ni kenneh ni emin ni nambebley diman niya ettateng idan tutu-u hu nambebley diman. <sup>33</sup> Immen ida pay diman hu helag Anak et hedini ya mika penang-ang ni annel mi ey heni kami taggunnay ey nanna-ud ni hanniman hu penang-ang dan hi-gami."

## 14

*Ya lilih mewan idan helag Israel*

<sup>1</sup> Yan nunman ni hileng ey nemahhig hu nangih idan helag Israel tep ya inamta da ey endi law namnamah da, <sup>2</sup> et manlilih idan Moses nan Aaron e kanday "Heballi netey kamid Egypt winu ya eyad desert!" <sup>3</sup> Kele daitsu in-alin APU DIOS eyad bebley et itsu matey di gubat ma-lat alen da ahwa tayu niyadda u-ungnga tayu et pambalin daddan himbut? Kedukdul ew katteg hu mambanggad itsud Egypt!" <sup>4</sup> Entanni tu-wangu ey wada hakkeyey kanday "Pili itsun mengippenggulun hi-gatsu et mambanggad itsud Egypt."

<sup>5</sup> Neamtaan di Moses nan Aaron et manyuung idad hinanggaddan nunman ni tutu-u.

<sup>6</sup> Hedin hi Joshua e u-ungngan Nun et hi Kaleb e u-ungngan Jephunneh e nekilaw ni an nansiim ey nemahhig lemyung da et bi-kien da balwasi da. <sup>7</sup> Kandaddan tutu-uy "Kakkayyaggud kaya etan bebley ni mi inang-ang. <sup>8</sup> Hedin peamleng tayu hi APU DIOS man illaw daitsu melinggep di bebley ni iddawat tun hi-gatsu e matmel niya mateba kameitnem ey dakel hu putsukan. <sup>9</sup> Entan kuma an panggehay nan APU DIOS. Entan takut yuddan tutu-udman tep nanna-ud ni apputen tayudda. Hedin hi-gada man endi mengihwang ni hi-gada, nem hedin hi-gatsu man wada hi APU DIOS ni memaddang, et humman hu entan takut yu."

<sup>10</sup> Entanni ey nanhuhummangan idan emin etan tuu e da tengbaen di Joshua nan Kaleb, nem endi maptek ey nampeang-ang hi APU DIOS ni hi-gadan emin e kaumhili heyaw tud Tabernacle ni daka pandeyyaw. <sup>11</sup> Ey immehel hi APU DIOS nan Moses e kantuy "Kele anhan ingganah nunyay da-ak kangengehayadda eyan tutu-u? Kaw eleg da-ak ni hekey kulluga, anin ni dakel impenahding kun miracle ni inenang-ang da? <sup>12</sup> Peellik hu degeh et meendidda huuyan tutu-u et hi-gam hu iddawtan kun dakel ni helag niya iddawtan dakan e-eteng ni kabaelan da nem yadda huuyan tutu-u!"

<sup>13</sup> Nem nampehemhemmek hi Moses nan APU DIOS et kantuy "APU DIOS, inamtaddan iEgypt e impa-kal mudda huuyan tuodman ni bebley da tep ya et-eteng ni kabaelan. Ey hedin ippahding mu humman et dedngelen da, ey hi-gada mengippeamtaddan

<sup>14</sup> nampambebley di deyan nuntan ni mu pehding. Dingngel da e hi-gam e APU DIOS ey nampeang-ang kan hi-gami niya wada ka etan di kulput ni kamei-unnuunnud ni hi-gamin kawwalwal et ipengulu dakemi, niya hedin hileng man kamambalin ni apuy ma-lat panilag mi. <sup>15</sup> Nem hedin henin nuntan pehding mu e endien mudda emin tutu-um ey penghel ngun tutu-ud edum ni bebley ni nangngel ni meippanggep ni hi-gam niya et-eteng ni kabaelan <sup>16</sup> e mukun pintey mudda tutu-um di desert ey tep eleg mu kabaelan ni iddateng idad bebley ni inhel mun pengillawwan ni hi-gada.

<sup>17</sup> Et humman hu, peang-ang mu anhan hu elaw mu e humman hu inhel mu lan kammuy:

<sup>18</sup> 'Hi-gak e DIOS ey bekennak ni nelakah ni umbunget. Et-eteng hu impeminhed kun hi-gayu. Ey nakka liwwana liwat yu niya ngehay yu. Nem eggak ebbulutan eleg mekastigu hu liwat yu, tep kastigwek ali hu u-ungnga yu tep ya liwat yun a-ammed da, anin idan inap-apu yu.' <sup>19</sup> Et humman hu, gapuh ni et-eteng ni impeminhed mu e APU DIOS, ey nakka iddasal e pesinsahim anhan hu liwat idan nunyan tutu-u henin impenading mun hi-gada meippalpun neni-yanan dan Egypt."

<sup>20</sup> Hinumang APU DIOS e kantuy "Em, anin pessinsahak ida, tep imbagam ni hi-gak.

<sup>21</sup> Nem hi-gak e wadan ingganah niya kamedeyyaw ni Dios ey issapatah ku <sup>22</sup> e endin hi-gadalli mategun an umdateng di diman ni bebley. Tep anin ni inang-ang dad Egypt niyad eleg mebebley hu dayaw ku niyadda impahding kun eleg kabaelan ni tuu ey kapyatun eleg da u-unnuda tugun ku et daka patnai anus kun hi-gada. <sup>23</sup> Et humman hu, eleg mabalin ni wadan hi-gada an umdateng etan di bebley ni inhel ku lan aammed dan iddawat kun hi-gada. Tep eleg mabalin ni mekidteng ida tutu-un eleg mengu-unnud ni hi-gak. <sup>24</sup> Nem hi Kaleb e bega-en ku ey nanengtun et-eteng hu dinel tun hi-gak. Et humman hu, hi-gatun ebuh hu dammutun mekidteng di diman ni bebley ni tu siniim



et mambebley ida helag tudman. <sup>25</sup> Entan pampalaw di nedeklan ni nambebleyan idan iAmalek niyadda iKanaan tep yan kabuhhan ey mambangngad kayu et mampalaw kayud eleg mebebleyid appit ni Madlang ni Baybay.”

<sup>26</sup> Kan mewan nan APU DIOS nan Moses et hi Aaron ey <sup>27</sup> “Endi pappeg ni lilih idan nunyan tutu-un hi-gak et deh e imminglayyak law. <sup>28</sup> Ehel yu huyyan hi-gada e kangkuy ‘Nanna-ud ni pehding kun hi-gayu hu inhel yun meippahding ni hi-gayu. <sup>29</sup> Nanlilihan kayun hi-gak, et humman hu mettey kayun emin eyad eleg mebebley! Endin hi-gayun meippalpud dewampulu toon tun nekilista etan ni nebilangn ni tuu <sup>30</sup> hu an umdateng di bebley ni insapatah kun iddawat kun hi-gayu. Ebu di Kaleb e u-ungngan Jephunneh nan hi Joshua e u-ungngan Nun ni umdateng diman.

<sup>31</sup> Yadda etan u-ungnga yun kanyuy ellan ni buhul yu ey hi-gada pedetteng kudman e bebley ni pinihul yu et hi-gada mambebley diman et man-am-amleng ida. <sup>32</sup> Nem hedin hi-gayun a-ammed da, ey mettey kayu eyad eleg mebebley. <sup>33</sup> Yadda u-ungnga yu hu manhelheltap eyad eleg mebebley ni na-pat ni toon et lumeniklikweh ida tep eleg yu u-unnuden hu tugun ku ingganah ni endi metdaan ni hi-gayu, anin ni hakey. <sup>34</sup> Ya etan na-pat ni aggew ni yu nansiiman di Kanaan ey pambalin kun na-pat ni toon ni panliggatan yu tep ya liwat yu et penang-angan yun bunget kun hi-gayu. <sup>35</sup> Et makulug ni hanniman pehding kuddan lawah ni tutu-un nanggehay ni hi-gak ma-lat matey idan emin eyad eleg mebebley. Hi-gak e AP-APU e Dios hu nanghel ni nunya.’ ”

<sup>36-37</sup> Yadda intu-dak Moses ni an nansiim et idaddatteng da beken ni makulug et humulun ni nanlilihan idan nunman ni helag Israel ey impandegeh idan APU DIOS et matey ida. <sup>38</sup> Ebu law di Joshua e u-ungngan Nun et hi Kaleb e u-ungngan Jephunneh ni nanengtun mategun hi-gadan hampulut dewwan nansiim.

<sup>39</sup> Inhel Moses idan edum tun helag Israel hu inhel APU DIOS ey nemahhig lemyung da.

<sup>40</sup> Kanday “Em, mika ebbuluta e nanliwat kami. Et humman hu, nandaddan kami law ni umlaw di bebley ni inhel APU DIOS ni lawwan mi.” Kamangkewa-wa ey immegah idan umlaw di duntuduntug ni bebley di Kanaan.

<sup>41</sup> Nem kan Moses ni hi-gaday “Kele nealay eleg yu u-unnuda olden APU DIOS ni mambangngad kayud eleg mebebley? Endi silbin nuntan ni pehding yu. <sup>42</sup> Entan kuma panglaw yu! Eleg dakeyu baddangin APU DIOS. Nanna-ud ni meapput kayu. <sup>43</sup> Mettey kayun an meiggubbat idan Amalekite niyadda Kanaanite. Inwalleng dakeyun APU DIOS tep nginhay yu.”

<sup>44</sup> Nem impilit idan helag Israel ni limmaw di duntuduntug ni bebley ey eleg da itebin hu Kaban APU DIOS niya eleg makilaw hi Moses. <sup>45</sup> Entanni ey immalidda Amalekite niyadda Kanaanite ni mambebley idan et apputen dadda et pampedugen dadda humman ni helag Israel ingganah di Hormah.

## 15

*Ya tugun APU DIOS meippanggep ni hi-gatu*

<sup>1</sup> Kan mewan APU DIOS nan Moses ey <sup>2</sup> “Ehel mu huyya idan edum mun helag Israel: Hedin umdateng kayud Kanaan e iddawat kun pambebleyan yu <sup>3</sup> et man-appit kayun hi-gak ni kagihheba, ey mahapul ni ya animal yun kalneroh winu gelding ey baka hu i-appit yu. Nem hedin man-appit kayun kagihheba gapuh ni insapatah yu winu iggebat yun man-appit winu ya etan yuka i-appit ni katootoon ni piyestah, <sup>4</sup> ey mahapul ni meunnudan ni hangkiloh ni kayyagud ni alinah ni neha-adan ni hakey ni litroh ni mansikan olibah. <sup>5</sup> Ya mei-unnud di hakey ni pakeetteng tun kalneroh ni kamei-appit ni kagihheba ey hakey ni litroh ni meinum ni kamei-appit.

<sup>6</sup> Hedin lakkitun kalneroh hu mei-appit ni kagihheba ey meunnudan ni dewwan kiloh ni alinah ni na-duman ni ngannganih ni hakey et kagedwah ni litroh ni mansikan olibah, <sup>7</sup> ey ngannganih ni hakey et kagedwah ni litroh ni meinum ni kamei-appit. Ma-lat hi-gak e AP-APU ey um-amlengngak tep ya nebanglun hamuy da.

<sup>8</sup> Hedin kilaw ni lakin baka hu mei-appit ni kagihheba gapuh ni insapatah winu gapuh ni pekiddagyuman nan APU DIOS, <sup>9</sup> ey mahapul ni meunnudan ni tellun kiloh ni alinah ni nekamdugan ni epat ni litroh ni mansikan olibah, <sup>10</sup> niya dewwan litroh ni meinum, ma-lat umamlengngak ni hamuy da. <sup>11</sup> Huyyadda hu mahapul ni meunnud di pan-appitan ni kilaw ni lakkitun baka winu lakkitun kalneroh niya pakeetteng tun kalneroh winu gelding. <sup>12</sup> Hanniman ipahding yun emin hedin man-appit kayuddan nunyan animal.

<sup>13</sup> Mahapul ni emin kayun helag Israel ey u-unnuden yudda huyyan emin ni pan-appitan yun hi-gak e AP-APU. <sup>14</sup> Anin idan nalpud edum ni bebley ni nekibebley ni hi-gayu et mahapul ni u-unnuden dadda huyyan kameunnud ni pan-appitan dan hi-gak ni

kagihheba. <sup>15</sup> Hi-gayuddan helag Israel niyadda nekibebley ni hi-gayun nalpud edum ni bebley, ey mahapul ni u-unnuden yudda huyyan tugun ni meunnud ni ingganah, tep nan-iingngeh nakka pengibbillang ni hi-gayu. <sup>16</sup> Man-iingngeh hu tugun ni u-unnuden yun helag Israel niyadda nekibebley ni hi-gayu.”

<sup>17</sup> Immehel mewan hi APU DIOS nan Moses ey kantuy <sup>18</sup> “Ehel mudda huyyan helag Israel: ‘Hedin wada kayulli law di bebley ni pengillawwak ni hi-gayu, <sup>19</sup> ey mahapul ni wada appilen yun i-appit yun hi-gak e DIOS yu etan idad kamekkan ni lameh ni neitnem diman. <sup>20</sup> Hedin mewan mengapya kayun sinapay ni nalpud pakeani yu, ey mahapul ni um-appil kayun mei-appit henin yuka pehding ni memengngulun meennin intanem yu. <sup>21</sup> Mahapul ni man-appit kayun hi-gak ni katootoon idan nunman ni sinapay ni kapyaan yud nemangulun ineni yu.

<sup>22</sup> Hedin wada eleg mengu-unnud idan Tugun kun indawat kun Moses, <sup>23</sup> niya hedin kantu et wadaddallid helag yun edum ni aggew hu eleg mengu-unnud idan nunyan Tugun, <sup>24</sup> nem eleg da igeb-at niya eleg amtan emin idan helag Israel humman ey mahapul ni i-appit dan kagihheba hu hakey ni kilaw ni lakkitun baka, niya unnudan dan alinah niya meinum et umamlengngak ni nebanglun hamuy tu. Mahapul mewan ni man-appit idan hakey ni lakkitun gelding tep ya liwat da. <sup>25</sup> I-appit ni padi ida humman ni pengippahdingan tun elaw ni panlinnih et pesinsahak hu nanliwatan dan emin ni bimbebley tep eleg da igeb-at niya tep nan-appit idan hi-gak ni kagihheba ey nan-appit ida tep ya liwat da. <sup>26</sup> Anin idan nekibebley ni hi-gada et neilegat idan emin di eleg da pengigeb-atan ni nanliwatan da, nem pessinsahak ida tep yadda humman ni kamei-appit.

<sup>27</sup> Hedin hakey hu nanliwat e eleg tu igeb-at, ey i-appit tu hakey ni hantoon tun labah ni gelding. <sup>28</sup> I-appit ni padin hi-gak e AP-APU humman ni i-appit etan ni tuu ma-lat pesinsahak hu liwat tu. <sup>29</sup> Huyyan tugun ey mahapul ni u-unnuden ni emin ni helag Israel niyadda nekibebley ni hi-gada tep neilegat idan emin nunman ni eleg meigeb-at ni liwat.

<sup>30-31</sup> Hedin inggeb-at ni helag Israel winu ya etan nekibebley ni hi-gadan nanliwat, tep imbilang tun endi silbitu hu tugun ku et eleg tu u-unnuden ey humman keang-angan tun tuwak kangghaya. Et humman hu, eleg law meibbillang ni tuuk. Hi-gatu ngu kan bahul ni kekastiguan tu.’”

<sup>32</sup> Yan kaweddadan helag Israel di eleg mebebleyi ey wada hu hina-kupan dan an nangyew ey Sabaduh nunman e pi-yew hu manggunnu. <sup>33</sup> Inewit da et ilaw dad kad-an di Moses nan Aaron niyadda edum da. <sup>34</sup> Impeguwalya da ni et hegeden da hu peamtan APU DIOS ni pehding dan hi-gatu. <sup>35</sup> Entanni ey kan APU DIOS nan Moses ey “Mahapul ni mettey humman ni nanliwat. Ilaw yud a-allaw ni nangkampuan yu et yu tengbaen diman et matey.” <sup>36</sup> Inu-unnud idan helag Israel humman ni intugun APU DIOS, et ilaw da humman ni tuud a-allaw ni nangkampuan da et tengbaen da et matey.

<sup>37</sup> Immehel mewan hi APU DIOS nan Moses ey kantuy <sup>38</sup> “Ehel mu mewan idan tuu et ha-adan da utduk ni balwasi dan buybuy e nebedbed ni blue ni sinulid. Mahapul ni mannananeng ni hanniman hu pehding idallin helag yun edum ni aggew. <sup>39</sup> Huyyaddan buybuy ni balwasi yu hu mengippenemnem ni hi-gayun tugun ku, ma-lat u-unnuden yu et beken ni yadda pinpinhed yu hu pehding yu, tep humman ida dedan daydayu tun pehding yu <sup>40</sup> ma-lat nemnemen yun u-unnuden ida huyyan tugun ku et eleg yu liwwanen e hi-gayu tuuk. <sup>41</sup> Hi-gak hu AP-APU e DIOS yu! Impa-kal dakeyud Egypt malat dayawen yuwak. Hi-gak hu AP-APU e DIOS yu.”

## 16

*Ya nanggehayan di Korah, hi Dathan et hi Abiram nan Apu Dios*

<sup>1</sup> Hakey ni aggew ey nantutuggun di Korah e u-ungngan Ishar e helag Kohat e u-ungngan Levi, et yadda helag Reuben e di Dathan nan Abiram e u-ungngaddan Eliab, et hi On e u-ungngan Peleth, <sup>2</sup> e ngenghayan da hi Moses. Entanni ey nei-dum ni hi-gada hu dewanggatut et neliman kamengipappangnguluddan helag Israel. <sup>3</sup> Limmaw idad kad-an di Moses nan Aaron et kandan hi-gada ey “Nehalman kumamman yuka pehding! Emin itsun helag Israel ey neieng-eng itsun APU DIOS ey wada hi-gatud emin ni hi-gatsu. Kele yuka pannemnem ni annel yu man eta-ta-gey kayu nem yadda eya edum ni tuun APU DIOS?”

<sup>4</sup> Dingngel Moses hu inhel da ey limmukbub di puyek et mandasal. <sup>5</sup> Entanni ey kantun Korah et yadda etan edum tuy “Peamtan APU DIOS ni kakkabbuhhan hedin hipan hi-gatsu hu pinili tun bega-en tu ey hedin hipan hi-gatsu hu kayyaggud di hinangga tu. Hedin hipa pillien tun hi-gatsu ey hi-gatu eyyagan tud altar e kad-an tu. <sup>6-7</sup> Et humman

hu, hi-gam e Korah et yadda edum mu ey mahapul ni heninnuy hu pehding yu. Yan kakkabbuhhan ey ala kayun emin ni pengiggihheban ni insensoh ni i-appit yun APU DIOS. Ha-adi yun insensoh ni gihheben yu et ilaw yud kapan-appisin nan APU DIOS, et ang-angen tayu hedin hipa pillien tun kakkayyaggud. Ya kakulugan tu ey hi-gayun helag Levi hu nehalmal kumamman!"

<sup>8</sup> Kan mewan nan Moses nan Korah ey "Dengel yu huyya, hi-gayuddan helag Levi!  
<sup>9</sup> Kaw yuka kullanga hu impahding nan APU DIOS e yaddad emin ni helag Israel ey hi-gayun helag Levi hu pinili tun meihnup ni hi-gatun pengippahdingan yuddan ngunu yud Tabernacle niya kayu kaum-ehngeng di hinanggaddan tutu-un pengippahdingan yun panyaggudan da? <sup>10</sup> Hi-gayun ebuh et yadda edum yun helag Levi hu nengidewatan tun nuntan ni ngunu. Yan nunyay pinhed yu pay ni hi-gayu mampeddi? <sup>11</sup> Hi APU DIOS hu kakulugan tun nginhay yu, tep kaw hipa hi Aaron ni yuka ingngudungudu?"

<sup>12</sup> Impaeyag Moses di Dathan nan Abiram e u-ungngaddan Eliab nem kanday "Eleg mi pinhed ni um-ali! <sup>13</sup> Kela, kaw kulang pay hu impahding mun impa-kal dakemid Egypt e makatmel ey mateba kameitnem ey dakel kennen niya putsukan et i-li dakemi eyad eleg mebebleyi, ma-lat matey kamidya? Pinhed mu mewan ni hi-gam ni ebuh hu tengngawen min ap-apu? <sup>14</sup> Hakey pay ey ingganah nunyay eleg dakemi ilaw di bebley ni matmel kameitnem ey dakel kennen niya putsukan. Niya attu mewan etan kammun iddawet mun puyek mi ey payew mi ey? Kaw dakemi kahe-uhe-ula? Eleg kami mannuman um-ali!"

<sup>15</sup> Entanni ey bimmunget hi Moses et mandasal nan APU DIOS e kantuy "APU DIOS, iddasal ku e entan tu abulut hu i-appit idan nunyan tuun hi-gam. Endi nak impahding ni lawah ni hi-gada e endi nak inlan animal da ey hanneya daka pehding ni hi-gak."

<sup>16</sup> Kantu mewan nan Korah ey "Mahapul ni um-ali kayun emin idan edum mun kabbuhhan di kapandeyyawin APU DIOS. Anin hi Aaron et um-ali. <sup>17</sup> Ang-ang mu et emin ida etan dewanggatut et neliman immunud ni hi-gam, ey um-i-liddan pengiggihheban ni insensoh et iappit yun APU DIOS di pan-appitan. Anin hi Aaron et um-i-li daman i-appit tu."

<sup>18</sup> Immalidda et umi-liddan pengiggihheban e hina-adan dan ngalab et ya insensoh et makiehneng idad Moses nan Aaron di heggeppan ni Tabernacle. <sup>19</sup> Hi Korah hu nenuttudduddan edum tun ngenghayen da hi Moses et hi Aaron. Humman hu neamung idan emin et umehngeng idad heggeppan ni Tabernacle, ey endi maptek ey nampeang-ang hu kaumhilin dayaw APU DIOS ni hi-gadan emin. <sup>20</sup> Immehel hi APU DIOS e kantud Moses nan Aaron ey <sup>21</sup> "Keibtaw kayud kad-an da et endiek idan nunya."

<sup>22</sup> Nem nanyuung di Moses nan Aaron et mandasal idan hi-gatu e kanday "APU DIOS e kakelpuin biyag, kaw hedin nambahul hu hakey ni tuu man illagat mun ibbunget idan emin eyadda edum da?"

<sup>23</sup> Kan APU DIOS nan Moses ey <sup>24</sup> "Ehel muddan eyan tuu et uma-allaw idad kampud Korah, hi Dathan et hi Abiram."

<sup>25</sup> Impapuut Moses ni limmaw di kampud Dathan nan Abiram ey neiunud idan hi-gatu hu aap-apun helag Israel. <sup>26</sup> Kantuddan etan ni tuu ey "A-allaw kayud kampuddan eyan lawah ni tuu ey ang-ang yu et endi keppaen yun usal da, et eleg kayu mailegat ni mekikketty ni hi-gada gapuh ni nanliwtan da." <sup>27</sup> Inu-unnud da et uma-allaw idad kampud Korah, hi Dathan et hi Abiram. Entanni ey immehep hi Dathan et hi Abiram, yadda ahwa da, ya u-ungngada et yadda gegellang ni u-ungnga da et umehngeng idad pettek ni habyen ni kampu da.

<sup>28</sup> Kan Moses ey "Huyya pengamtaan yun hi APU DIOS hu nemutuk hi-gak ni mengippahding idan nunya e beken ni emin nalpud nemnem ku. <sup>29</sup> Hedin mettey ida huyyan tuu e beken ni gapuh ni pengastigun APU DIOS ey humman keang-angan tun eleg da-ak putuken nan APU DIOS. <sup>30</sup> Nem hedin meippahding ni hi-gada hu kamengippetnga e nealay neunug ida lad puyek anin idan ngunut da et maikulung idan mategu ey humman pengamtaan yun inwalleng da hi APU DIOS."

<sup>31</sup> Negibbuh ni immehel hi Moses ey pinhakkeyey nadhak hu puyek ni inehngengan da, <sup>32</sup> et maunug ida, yadda pamilyah da, et yadda etan immunud nan Korah, anin idan ngunut da. <sup>33</sup> Mateguddan neunug di kad-an idan nangketey. Nekiunug ni hi-gadadda emin hu wadan hi-gada, et han mewan mambangngad hu puyek ni nangketem et meendidda. <sup>34</sup> Emin ida helag Israel ni wadadman ni nanggel ni pekaw da ey namsik ida ey ida kamantetekkek e kanday "Besik itu tep entanniy ekmunen daitu daman puyek!" <sup>35</sup> Entanni ey impaelin APU DIOS hu apuy et magihep ida etan dewanggatut et neliman nan-appit ni insensoh.

<sup>36</sup> Kan APU DIOS nan Moses ey <sup>37</sup> "Ehel mun Eleasar e u-ungngan Aaron e padi et tu amungen ida hu pengiggihheban ni insensoh ni inusal etan idan nunman ni nangketey

ni lalacki. Ehel mun hi-gatu et tudda iwehit hu ngalab di a-allaw tu, tep neieng-eng ida humman ni pengiggihheban ni insensoh<sup>38</sup> ni inusal idan nunman ni lalackin nambahul et mangketey ida. Ehel mu et humman idan pengiggihheban ni insensoh ey kapyaan tuddan meingpih ni meittekkap di altar et mambalin ni warning idan helag Israel. Humman idan pengiggihheban insensoh ey neieng-eng tep neipeang-ang idan hi-gak e DIOS.”

<sup>39</sup> Limmaw Eleasar e padi et tu pan-amungen ida humman ni dewanggatut et neliman pengiggihheban ni insensoh, et kapyaan tuddan meittekkap di altar e inu-unnud tu inhel APU DIOS ni inhel Moses ni pehding tu. <sup>40</sup> Humman hu mengippenemnem idan helag Israel e endi edum, ebuh ida helag Aaron ni dammutun mengihheh ni insensoh ni kamei-appit nan APU DIOS. Tep hedin linggeman ni tuu hu umlaw diman ni mengihheh ni insensoh, ey mettey et henid Korah et yadda etan edum tu.

<sup>41</sup> Nem entanni et mewa-wa ey ida mewan kamanlillah humman idan tuun nan Moses et hi Aaron e kandy “Pintey yudda edum ni tuun APU DIOS.”

<sup>42</sup> Yan nunman ni neamungan dan daka panlillahid Moses nan Aaron ey inang-ang da etan di Tabernacle hu kaumhilin heyaw APU DIOS di kulput ni neihephep diman. <sup>43</sup> An immehngeng di Moses nan Aaron di heggeppan ni Tabernacle <sup>44</sup> ey immehel hi APU DIOS nan Moses e kantuy <sup>45</sup> “Keibtaw kayudda eyan tuu et pateyen kudda!” Nem nanlukkub mewan di Moses nan Aaron di puyek.

<sup>46</sup> Entanni ey kan Moses nan Aaron ey “Papuut mu et mu alen hu pengiggihheban ni insensoh, et ha-adam ni ngalab melpud altar et ya insensoh et lumaw kad kad-an ida eyan tuu et iappit mun APU DIOS tep ya liwat da. Bimmunget tu-wa anhan law hi APU DIOS ni hi-gada et paeli tu degeh et deh e neilepun ida kamangkettey.” <sup>47</sup> Inu-unnud nan Aaron et tu alen hu kapanggihhebin insensoh et mambesik di gawwaddan nunman ni tuu. Inang-ang tu e nelapuan ni ida kamandedgeh nem nan-appit ni insensoh nan APU DIOS tep ya liwat da, <sup>48</sup> et masiked etan degeh et tu i-ang-ang ey immehngeng di nambattan idan mategu et yadda nangkete. <sup>49</sup> Ya bilang idan tuun netey ni nunman ey hampulut epat ni libu et pitu gatut. Nem eleg makibilang ida etan netey ni immunud nan Korah. <sup>50</sup> Nesiked etan degeh et han mambanggad hi Aaron di kad-an Moses di heggeppan ni Tabernacle.

## 17

### *Ya neipahding ni hulkud Aaron*

<sup>1</sup> Entanni ey immehel mewan hi APU DIOS nan Moses ey kantuy <sup>2</sup> “Ehel mudda etan ni hampulut dewwan kamengipappangngulun helag Israel et umidwat idan hanhakkey ni hulkud ni hi-gam. Ey intudek mu ngadan dad hulkud da. <sup>3</sup> Yad hulkud ni kamengipappangnguluddan helag Levi ey itudek mu ngadan Aaron. Mahapul ni wadan emin hu hulkud idan kamengipappangngulun helag Israel. <sup>4</sup> Ey ipahgep mudda humman ni hulkud di Tabernacle di kuwaltuh di kad-an kun taka pandammui et iha-ad mud hinangga etan ni Kaban ni neitluan ni neitudek ni Tugun ku. <sup>5</sup> Ka-immatur tep umpingi hu hulkud etan ni tuun pilliek, ma-lat masiked hu lilih idan edum mun helag Israel ni hi-gam tep ya humman ni pehding ku.”

<sup>6</sup> Inhel Moses huuyan meippahding idan helag Israel et wada hakey idan hampulun dewwan kamengipappangngulu, anin hi Aaron et umidwat idan hanhakkey ni hulkud dan Moses. <sup>7</sup> Inha-ad Moses emin humman idan hulkud di bawang ni Tabernacle di hinanggan Kaban APU DIOS e neitluan ni Tugun tu.

<sup>8</sup> Entanni et newa-wa et lumaw hi Moses di bawang ni Tabernacle ey inang-ang tu e pimmingi hu hulkud Aaron e nengiehneng idan helag Levi niya wada lameh tun almond ni neluum. <sup>9</sup> Inla tuddan emin etan hulkud et tu peang-ang idan edum tun helag Israel et ang-angen da neipahding, et ibangngad tudda humman ni hulkud etan idad kamengipappangngulu.

<sup>10</sup> Kan APU DIOS nan Moses ey “Ibangngad mu hulkud Aaron di hinanggan Kaban ma-lat mengipenemnem idan kamangngenghay ni tutu-u e hedin eleg da issiked ni manlillah man mettey ida.” <sup>11</sup> Et ipahding Moses hu inhel APU DIOS.

<sup>12</sup> Kan idan tutu-u nan Moses ey “Heni kami damengu netey tep nanna-ud ni mettey kami. <sup>13</sup> Anin anhan ni keihnupan di Tabernacle et mettey ita, et humman hu, heni kami damengu netey!”

## 18

### *Ya ngunun padi niyadda edum dan helag Levi*

<sup>1</sup> Kan APU DIOS nan Aaron ey “Hi-gam niyadda u-ungngam niyadda agim ni helag Levi hu mebehhulan hedim hipa meippahding eyan Tabernacle. Nem hedim ya meippanggep ni meihhallad pansilbian yun papaddi, ey hi-gayuddan u-ungngam ni ebuh hu mebehhulan. <sup>2</sup> Aygim ida agim ni helag Levi et baddangan dakeyuddan u-ungngam ni pengippahdingan yuddan meingngunnud hinanggan Tabernacle. <sup>3</sup> Nem ang-ang yu et yan pengippahdingan dan ngunu da ey eleg da keppaa hu ngunut ni neieng-eng, anin etan altar. Tep hedim wada keppaan da ey mettey kayun emin. <sup>4</sup> Mahapul mewan ni meidum idan hi-gayun pengippahdingan dan ngunu dan mengippaptek eyan Tabernacle, nem eleg mabalin ni wada hu beken ni helag Levi ni mekingngunnun hi-gayu.

<sup>5</sup> Hedim ya ngunu yuddan u-ungngam ey ippaptek yu hu Tabernacle niya altar. Hedim u-unnuden yudda huyyan tugun ku ey eggak law umbunget ni hi-gayun helag Israel. <sup>6</sup> Hi-gak hu nemiliddan agi yun helag Levi di emin idan helag Israel et bumaddang idan hi-gayu. Neieng-eng idan hi-gak e AP-APU ma-lat mangngunudda eyad Tabernacle. <sup>7</sup> Nem mahapul ni hi-gam niyadda anhan ni u-ungngam hu mengippahding idan ngunun padid altar niyad Kuwaltuh ni kad-ak. Tep hi-gayu hu pinilik ni mengippahding idan nunman ni ngunu. Et humman hu, hedim wada edum ni tuun mengippahding idan nunman et um-alin meihnup eyad kad-an ku man mettey.”

<sup>8</sup> Heninnuy ida hu itugun APU DIOS nan Aaron: “Hi-gayun papaddin pinilik ni mengiappit idan i-appit ni helag Israel ni hi-gak, ey iddawtan dakeyun ingganah ni patal yuddad i-appit da. <sup>9</sup> Meidwatan kayun kamei-appit ni eleg giheba henin kamei-appit ni pagey, yadda kamei-appit tep ya liwat niyadda kamei-appit tep ya bahul. <sup>10</sup> Hedim kennen yudda huttan, ey nemnemnem yu e neieng-eng idan hi-gak, niya ebuh ida lalakkin dammutun mengngan idan nuntan.

<sup>11</sup> Meidwatan kayu pay idan edum ni i-appit idan helag Israel ni itta-gey dan peang-ang ni hi-gak. Dammutun kennen idan u-ungngam ni lalakki niyadda bibi-i huyya, nem ebuh ida kameibbillang ni malinih ni dammutun mengngan idan nunman.

<sup>12</sup> Iddawat ku mewan ni hi-gayu hu kekakkayyaggudan ni mansikan olibah, yadda memengngulun enniem da niyadda memengngulun lameh ni intanem da. <sup>13</sup> Emin ida humman ni i-aliddan edum yun helag Israel ni hi-gak ey iddawat kun hi-gayu. Nem ebuh ida etan kameibbillang ni malinih ni mengngan idan nunman. <sup>14</sup> Iddawat ku pay ni hi-gayu emin ni iggeb-at dan i-appit ni hi-gak.

<sup>15</sup> Emin mewan hu pengulwan ni lalakkin u-ungngaddan edum yun helag Israel, anin idan memengngulun impah ni animal dan iddawat dan hi-gak ey iddawat kun hi-gayu. Meidwat pay ni hi-gayudda etan ibbayad idan tuun pemangngadan dan pengulwan ni lalakkin u-ungnga da niyadda ibbayad dan memengngulun lakkitun impah ni animal ni kameibbillang ni beken ni malinih. <sup>16</sup> Ya gelang ni hambulan tu ey liman palatah ni silber hu bayad ni pemangngad dan hi-gatu, meippuun di kameunnud ni kapemeyyad. <sup>17</sup> Nem eleg mabalin ni mebangngad hu nemangulun impah ni baka, ya kalneroh niya gelding, tep neieng-eng ida humman ni kamei-appit ni hi-gak. Iwakgih yu kuheyaw dad kapan-appisi niya giheb yu tabeda ma-lat umamlengngak ni hamuy da. <sup>18</sup> Ellan yudda humman ni detag, henin pagew niya wannan ni lapan meitta-gey ni meippeang-ang ni hi-gak. <sup>19</sup> Iddawat ku nisin hi-gam, yadda u-ungngam ni lalakki niyadda bibi-i ni emin hu neieng-eng ni i-appit idan edum yun helag Israel ni hi-gak. Huyyan inhel ku ey mannenneng e eleg mabalin ni mekyat winu mehullulan.”

<sup>20</sup> Immehel mewan hi APU DIOS nan Aaron ey kantuy “Eleg dakeyu iddawsin puyek ni beltanen yu tep hi-gak e AP-APU hu mahapul yun ebuh. Hi-gak hu mei-ellig ni beltanen yu. <sup>21</sup> Hedim yadda edum mun helag Levi ey iddawat kun hi-gada hu kapulun lelmuen idan emin ni helag Israel ni i-appit dan hi-gak, et humman tangdan dan pangngunuan da eyad Tabernacle. <sup>22</sup> Meippalpun nunya ey eleg mabalin ni maka-ihnu di Tabernacle hu edum yun helag Israel ni beken ni helag Levi ey beken ni padi tep mekastigudda et matey ida. <sup>23</sup> Yadda helag Levi ni ebuh hu mangngunnud Tabernacle et hedim wada ngu neihallan impahding da ey hi-gada ngu kan bahul. Huyyan olden ey mannannang ni ingganah e eleg mehulluli. Endi an meidwat ni hi-gadan beltanen dan puyek eyad Israel, <sup>24</sup> tep hedim ya iddawat kun hi-gada ey ya kapulun i-appit idan emin ni helag Israel. Et humman hu, gaputun endi da beltanen ni puyek da.”

<sup>25</sup> Kan APU DIOS daman Moses ey <sup>26</sup> “Itugun muddan helag Levi e hedim dewwatan da hu kapulun limmuddan edum dan helag Israel e humman hu iddawat kun beltanen da ey mahapul ni i-appit dan hi-gak hu kapulun nunman idan dewwatan da. <sup>27</sup> Et humman ni i-appit da daman hi-gak ey heni humman nemangulun pagey nalpud illikkan da winu meinum ni nalpud daka pengapyain meinum. <sup>28</sup> Humman ni i-appit da daman hi-gak ni kapulun dewwatan dad kapulun limmuddan edum dan helag Israel ey iddawat dan Aaron e padi. <sup>29</sup> Mahapul ni i-appit dan hi-gak hu kekakkayyaggudan ni dewwatan da.

<sup>30</sup> Humman idan i-appit dan hi-gak ey humman dama etan nemangulun pagey winu meinum ni i-appit idan edum dan helag Israel ni hi-gak.

<sup>31</sup> Yadda edum ni dewwaten da ey dammutun kenen dadda pamilyah da di kumpulmih ni lugal tep sinekla dadda humman di daka panggunnuid Tabernacle. <sup>32</sup> Eleg ida mebehhulin pengngannan daddan nunman hedin in-appit dan hi-gak hu kekakkayyaggudan. Nem mahapul ni eleg da hibbita humman idan i-appit ni edum dan helag Israel ni hi-gak. Tep hedin lalgemen da pehding da ey mettey ida.”

## 19

### *Ya etan danum ni panlinnih*

<sup>1</sup> Immehel mewan hi APU DIOS nan Moses et hi Aaron ey kantuy <sup>2</sup> “Ehel yuddan helag Israel huyyan Tugun kun hi-gada: Mahapul ni um-i-liddan madlang ni labah ni bakan endi dipektoh tu niya eleg tu ni patnaan ni manggunnu <sup>3</sup> et idwat dan Eleasar e padi. Meillaw humman ni bakad a-allaw ni nangkampuan da et kelngen dad hinanggan Eleasar. <sup>4</sup> Um-ala hi Eleasar ni kuheyaw nunman ni baka et itdek tu kimeng tu et iwakgih tun meminpittud appit ni hinanggan Tabernacle. <sup>5</sup> Mei-appit ni kagihheba humman ni bakad hinanggan Eleasar e eleg mede-ut et makigiheb hu belat tu, ya laman tu niya egeh tu. <sup>6</sup> Um-ala mewan hi Eleasar e padin keyew ni sedar, ya hissop niya madlang ni sinulid et pakigiheb tu etan ni baka.

<sup>7</sup> Hedin negibbuh humman ey pakkaw ibbalbal tu balwasi tu niya man-e-meh et han dammutun umhegep di nangkampuan da, nem meibbillang ni beken ni malinih ingganah mehilling. <sup>8</sup> Mahapul daman ibbalbal etan ni tuun nengiheb ni baka hu balwasi tu niya man-e-meh, nem meibbillang ni beken ni malinih ingganah mehilling. <sup>9</sup> Ya etan tuun meibbillang ni malinih ey ellan tu etan dep-ul ni bakan negiheh, et tu iha-ad di a-allaw ni kampu kameibbillang ni malinih, ma-lat ussalen idan helag Israel huyyan dep-ul ni pengippahdingan dan elaw ni panlinnih e ikkamdug dad danum. Humman ni pehding dan elaw ni panlinnih ey ke-kalan ni liwat. <sup>10</sup> Humman ni tuun mengellan dep-ul ey mahapul ni ibbalbal tu balwasi tu, nem meibbillang ni beken ni malinih ingganah mehilling. Mannenneng ni meunnud ni ingganah huyyan tugun idan helag Israel niyadda nekibebley ni hi-gada.

<sup>11</sup> Ya etan tuun mengeppan annel ni netey ni tuu ey meibbillang ni beken ni malinih ni pitun aggew. <sup>12</sup> Mahapul ni pehding tu hu elaw ni panlinnih ni katlun aggew et yan kapitun aggew et han dammutun meibbillang ni malinih. Nem hedin eleg tu pehding huyyan meikkatlu et yan meikkeppitun aggew, ey mannenneng ni meibbillang ni beken ni malinih anin ni melebbah pitun aggew. <sup>13</sup> Ya etan tuun kinepa tu annel ni netey nem eleg tu ipahding hu elaw ni panlinnih, ey hinibit tu hu Tabernacle. Et humman hu, eleg law mabalin ni meki-dum idan tuuk. Mannananeng ni beken ni malinih humman ni tuu tep eleg maduyagan ni danum ni kapanlinnih.

<sup>14</sup> Hedin wada netey di hakey ni a-abbung etan di kampu ey ya etan tuun wadadman, anin ni ya etan tuun himmegep diman ey meibbillang ni beken ni malinih ni pitun aggew. <sup>15</sup> Emin hu bewed winu bangan eleg mehu-keban ni wadadman ey meibbillang ni beken ni malinih. <sup>16</sup> Ya etan tuun mengeppan pintey dan tuu winu netey ni gandat di a-allaw ni bebley ey meibbillang ni beken ni malinih. Anin ya etan tuun mengeppan genit ni netey winu kulung et meibbillang daman beken ni malinih ni pitun aggew.

<sup>17</sup> Hedin wada hakey ni tuun kameibbillang ni beken ni malinih ni mengippahding ni elaw ni panlinnih, ey ellan ni hakey ni tuun kameibbillang ni malinih etan dep-ul ni negiheh ni baka, et iha-ad tud bewed et duyagan tun danum. <sup>18</sup> Et humman ni tuu ey um-alan hissop et ita-mel tudman et iwakgih tud kampu etan ni tuun beken ni malinih niyaddan emin di hipan wadadman, anin idan tutu-u. Ey wakgihan tu etan tuun nengapan genit ni netey, ya etan pintey dan winu gandat ni netey niya kulung. <sup>19</sup> Humman ni tuun meibbillang ni beken ni malinih ey mewakgihan ni meikkatlu et yan meikkeppitun aggew. Ey mahapul ni ibbalbal tu hu balwasi tu niya man-e-meh ni meikkeppitun aggew et han maibbillang ni malinih nunman ni hileng. <sup>20</sup> Nem ya etan tuun kameibbillang ni beken ni malinih ey eleg tu ipahding hu elaw ni linih ey eleg law mabalin ni meki-dum idan tuuk, tep hinibit tu hu Tabernacle ey mannenneng ni beken law malinih tep eleg maduyagan hu annel tun danum ni panlinnih. <sup>21</sup> Mahapul ni meippahding ni ingganah huyyan elaw ni panlinnih.

Ya etan tuun mengiwakgih ni danum ni kapanlinnih ey mahapul ni ibbalbal tu dama balwasi tu. Ey ya etan tuun mengeppan danum ni kapanlinnih ey meibbillang ni beken ni malinih ingganah ni hileng. <sup>22</sup> Emin hu keppaen ni tuun kameibbillang ni beken ni

malinih ey meibbillang law ni beken ni malinih, et yadda etan tuun mengeppaddan nunman ni kinepa tu, ey meibbillang idan beken ni malinih ingganah mehilling.”

## 20

*Ya neipahding eman ni wadadda helag Israel di Kades*

<sup>1</sup> Yan eman ni nemangulun bulan ey dimmateng ida helag Israel di Sin e eleg mebebleyi et mangkampuddad Kades. Yan kaweda dadman hu neteyyan Miriam et maikulung diman.

<sup>2</sup> Endi danum ni innumen idan tuud nangkampuan da et maemung idad kad-an di Moses nan Aaron <sup>3</sup> et manlillih idan Moses e kanday “Heballi ew nekiketey kamiddan edum min pintey APU DIOS! <sup>4</sup> Kaw dakemi ingkuyug di deya e eleg mebebleyi ma-lat matey kamin emin, anin idan animal mi? <sup>5</sup> Kele dakemi dedan impangulu et mi hini-yan hu Egypt et kami umli eyad bebley ni endi kaumtemel ni neitnem? Endidya begah, ya fig, ya grapes winu pomegranates. Ey endi pay anhan danum ni innumen!”

<sup>6</sup> Hini-yan di Moses nan Aaron ida et ida umehneng di heggeppan ni Tabernacle et manlukkub idad puyek. Entanniy nampeang-ang hu kaumhilin heyaw APU DIOS.

<sup>7</sup> Immehel hi APU DIOS nan Moses ey kantuy <sup>8</sup> “Alam etan hulkud di hinanggan Kaban et amungen yun Aaron emin ida tuu. Hedin neamung ida, ehel ka etan ni batu et maukat danum ma-lat wada innumen idan tuu niyadda animal da.”

<sup>9</sup> Inu-unnud Moses hu inhel APU DIOS et tu alen etan hulkud. <sup>10</sup> Inemung dan Aaron ida tuud kad-an ni batu et kan Moses ey “Dengel yu e mangkanghay ni tutu-u. Kaw pepillit yun peukkat ku danum eyad batu?” <sup>11</sup> Et iheplat tu hu hulkud ni nampidwa etan di batu ey neukat hu dakel ni danum et uminum ida etan tuu niyadda animal da.

<sup>12</sup> Nem bimmunget hi APU DIOS nan Moses et hi Aaron et kantun hi-gaday “Beken ni hi-gayu mengidting idan edum yun helag Israel di bebley ni inhel kun iddawat kun hi-gada tep eleg yuwak u-unnuden niya eleg yuwak dayawen ni nunman ni impahding yu.” <sup>13</sup> Yadman nanlilihan idan tuun nan APU DIOS et mangedanan ni Meribah. Yadman mewan nengipenang-angan APU DIOS e hi-gatu ey limpiyuh e meandeng tuka pehding.

*Ya eleg pangiabulutan ni patul ni Edom ni pandellanan di Moses di bebley da*

<sup>14</sup> Yan kawedad Moses di Kades ey nenu-dak ni an mekihummangan ni patul ni Edom et da ehelen e kanday “Heninnuy hu inhel idan agim ni helag Israel: Inamtam anhan et nemahhig hu nanhelheltapan mi. <sup>15</sup> Nekibebley idan nunman hu aammed mid Egypt ni nebayag ey impanhelheltap dadda, anin ni hi-gami. <sup>16</sup> Et mampehemhemmek kamin APU DIOS ey dingngel dakemi et itu-dak tu anghel ni nengipengulun hi-gamin meni-yan ni Egypt. Yan nunya ey wada kamid Kades e pappeg eyan bebley yu. <sup>17</sup> Mika ibbaga e iebulut mu anhan et mandalan kami niyadda animal mi eyad bebley yu. Unnuunnuden mi keltad et eleg kami mandalan idad payew yu niyad habal yu niya eleg kami um-inum ni danum di bubun yu. Ya keltad ni ebuh unnuden mi ingganah melebbah kami eyad bebley yu.”

<sup>18</sup> Nem kan etan ni patul di Edom ey “Entan pandalan yu eyad bebley mi tep gubbaten dakeyu hedid idalan yudya!”

<sup>19</sup> Kan ida mewan ni helag Israel ey “Ettu kuma et iebulut mu haggud ya keltad ni ebuh unnuden mi ey? Hedin hipa et um-inum kamiddan animal min danum yu ey ku anin katteg ni beyyadan mi, nemet mandalan kami anhan eyad bebley yu.”

<sup>20</sup> Nem kahing etan patul di Edom e kantuy “Eggak nisi i-abulut ni kayu mandellan eyad bebley mi!”

Et idaddan kumedek idan iEdom hu dakel ni sindalu dan mengubbat idan helag Israel.

<sup>21</sup> Et hin-appil law nengidlanan da tep kaikka-leg idan iEdom hu pandellanan dadman.

<sup>22</sup> Hini-yan idan helag Israel hu Kades et mampalaw idad duntuduntug di Hor e pappeg ni Edom. <sup>23</sup> Yan nunman ni wadaddadman ey immehel mewan hi APU DIOS nan Moses et hi Aaron. <sup>24</sup> Kantuy “Hedin hi-gam e Aaron ey eleg ka umdateng etan di bebley ni iddawat kun hi-gayun helag Israel tep mettey ka. Hanneya meippahding tep eleg yuwak u-unnuden di Meribah. <sup>25</sup> Hedin hi-gam e Moses ey ikuyug mu hi Aaron et hi Eleasar e u-ungga tu et manteyed kayud Duntug e Hor, <sup>26</sup> ey ekal mu hu balwasin padin inhuklub Aaron et pebalwasim nan Eleasar tep yadman ketteyyan Aaron.”

<sup>27</sup> Inu-unnud Moses humman ni inhel APU DIOS et manteyed idan tellu ey kaang-ang-gaddan tuu. <sup>28</sup> Dimmateng idad ta-pew ni duntug et ekalen Moses hu balwasin padin inhuklub Aaron et pebalwasi tun Eleasar. Yadman di ta-pew ni duntug hu neteyyan Aaron. Entanni et mandayyud Moses et hi Eleasar di kad-an idan tutu-u. <sup>29</sup> Dingngel idan tutu-u e netey hi Aaron et lumelemyung idan telumpulun aggew.

*Ya etan uleg ni nekapyan giniling*

## 21

<sup>1</sup> Ya etan patul di Kanaan e hi Arad e nambebley di Negeb ey dingngel tun iyaddalli helag Israel di keltad di Atharim ey tudda ginubat et ibsik tudda edum ni hi-gada et pambalin tuddan balud. <sup>2</sup> Entanni et mansapatah ida helag Israel nan APU DIOS e kanday "Hedin baddangan dakemi et apputen midda ey pekabbabhahen min emin hu bebley da." <sup>3</sup> Dingngel APU DIOS dasal da et baddangan tuddan mengapput ni iKanaan, et pekabbabhahen dadda bebley diman et ngadanan dan Hormah.

<sup>4</sup> Hini-yan idan helag Israel hu Duntug e Hor et idlan dad keltad ni mampellow di Madlang ni Baybay et ilikweh dad Edom. Nem wadaddad dalan ey imminglay ida, <sup>5</sup> et daka pan-inggudu hi Apu Dios et hi Moses. Kanday "Endi kenen di deya niya endi innumen. Impeinglay mi law eyan lawah ni mika kennakennan manna! Kele dakemi impangulun meni-yan ni Egypt et dakemi in-ali eyad eleg mebebleyi et kami matey di deya?"

<sup>6</sup> Entanni ey impaelin APU DIOS hu dakel ni anggetakkut ni uleg et pangkalaten dadda dakel ni hi-gada et mangkatey ida. <sup>7</sup> Limmaw ida hu tuud kad-an Moses et kanday "Mika ebbuluta e nanliwat kami tep ya lawah ni inhel min APU DIOS et hi-gam. Idasali dakemi anhan et ekalen APU DIOS ida eya uleg." Et idasalan idan Moses.

<sup>8</sup> Kan APU DIOS nan Moses ey "Kapy kan i-ingngel ni uleg ni giniling et ipelat mud utduk ni hulkud et hedin sinengaw idan tuun kinlat ni uleg man eleg ida mettey." <sup>9</sup> Inu-unnud Moses et kumapyan giniling ni uleg et ipelat tud hulkud et hedin kinlat ni uleg hu hakey ni tuu et in-ang-ang tudman ey eleg mettey.

<sup>10</sup> Entanni ey nampalaw ida mewan hu helag Israel di Obot et mangkampuddadman.

<sup>11</sup> Hini-yan da Obot et lumaw idad Iye Abarim e eleg mebebleyi e pappeg ni Moab di appit ni kasimmilin aggew. <sup>12</sup> Entanniy ida nangkampud Nedeklan e Sered. <sup>13</sup> Hini-yan da mewan humman et lumaw idad ba-hil ni Wangwang e Arnon di eleg mebebleyi e dagsin bebley idan Amorite. Ya Arnon hu nampappegan ni Moab et ya bebley idan Amorite. <sup>14</sup> Et mukun yad Liblul ni Meippanggep idan Gubat APU DIOS ey neitudek diman hu "Yad bebley e Waheb di Suphah et yadda deplah ya Wangwang e Arnon, <sup>15</sup> niyadda deplah di utduk etan ni nebebleyan di Ar di pappeg ni Moab."

<sup>16</sup> Immegah idadman et lumaw idad Beer e kad-an etan ni bubun et umhel hi APU DIOS nan Moses diman e kantuy "Amung mudda tuu et idwatak idan danum."

<sup>17</sup> Yan nunman ni tsimpuh nengia-appehan idan helag Israel ni nunyan a-appeh: "Kaukat kan danum eyad bubun et ia-appeh mi meippanggep ni hi-gam. <sup>18</sup> I-a-appeh mi huyyan bubun ni kinu-kuan idan u-ungangan patul, kinu-kuan idan aap-apu e inusal da hulkud da."

Hini-yan idan helag Israel humman ni eleg mebebleyi et manglaw ida et labhan da Mattanah, <sup>19</sup> ya Nahaliel et ya Bamot, <sup>20</sup> et lumaw idad nedeklan di Moab di ehpen ni Pisgah e duntug e kameuhdungu etan eleg mebebleyi.

<sup>21</sup> Entanni et menu-dak ida helag Israel ni an mekihummangan nan Sihon e patul idan Amorite. Heninnuy da e-helen ni hi-gatu: <sup>22</sup> "Ibulut mu anhan et idlan mi eyad bebley yu. Ya keltad ni ebuh unnuunnuden mi ingganah lebbahan mi eya bebley yu. Ey ang-angen mi ma-lat endin hi-gami, anin idan animal mi hu mengigisin ni intanem yud payey yu niyad legunta yu. Eleg kami um-inum di bubun yu."

<sup>23</sup> Nem eleg ibulut nan Sihon e patul diman ni mandellan ida hu helag Israel di bebley da. Inemung tu kumedek ida sindalu tu et dadda gubaten hu helag Israel di eleg mebebleyid Jahas. <sup>24</sup> Nem nampatey idan helag Israel humman idan buhul dan Amorite et hi-gada mambebley di bebley da meippalpu etan di Wangwang e Arnon ingganah di Wangwang e Jabok. Nem eleg da hanhegep hu Ammon tep nehammad ni peteg hu luhud ni bebley da. <sup>25</sup> Sinekup idan helag Israel emin hu bebley idan Amorite, ya Hesbon niyadda nanlinikweh ni bebley diman et mambebley idadman. <sup>26</sup> Yad Hesbon e et-eteng ni bebley hu nambebleyan nan patul e hi Sihon. Inapput nan Sihon ni nunman hu Moab et sakupen tu Hesbon niyaddan emin hu bebley ingganah di Wangwang e Arnon.

<sup>27</sup> Et mukun wada neitudek ni a-appeh e kantuy: "Ali kayud Hesbon e et-eteng ni bebley Sihon, et iyayyaggud yu huyyan bebley tu et heni la mewan nunman. <sup>28</sup> Yan nunman ey henilli nalpu apuy di Hesbon e bebley Sihon et malgab hu Ar e et-eteng ni bebley di Moab, niya nalgab ida duntug di ahpat ni Arnon. <sup>29</sup> Anggehennemek kayun iMoab, hi-gayun kamandaydayaw nan Kemos tep nebahbah kayu. Impambalin dakeyun dios yun hi Kemos ni balud nan Sihon e patul idan Amorite. <sup>30</sup> Nem yan nunya ey nebahbah ida Amorite, anin ni yadda bebley da meippalpud Hesbon ingganah di Dibon, ey meippalpud Nophah ingganah di Medeba."



<sup>31</sup> Nampambebley ida helag Israel di bebley idan Amorite.

<sup>32</sup> Entanni ey intu-dak Moses hu an mansi-im ni Jaser. Dadda ginubat et sakupen da, anin idan nanlinikweh ni bebley diman. Sinekup da humman ni bebley et degyunen daddan emin hu Amorite ni nambbbley diman. <sup>33</sup> Entanni et unuden da keltad et mampalaw idad Bashan. Hi Og e patul diman ni bebley ey impangulu tu sindalu tu et dadda gubaten ida helag Israel di Edrei. <sup>34</sup> Kan APU DIOS nan Moses ey "Entan takut mun hi-gatu, tep baddangan daka et apputem hi Og niyadda sindalu tu et sakupem bebley da. Ipahding mun hi-gatu hu henin impahding mu etan ni patul idan Amorite e hi Sihon e patul di Hesbon." <sup>35</sup> Nengapput ida tu-wangu hu helag Israel ni nanggugubatan da et pateyen da hi Og, yadda u-ungnga tu niyadda bimbebley. Endin hekey natdaan et sakupen da humman ni bebley da.

## 22

*Ya nengipeayagan etan ni patul di Moab nan hi Balaam*

<sup>1</sup> Nanglaw ida helag Israel et dumteng idad nandeklan di Moab e neihnop di Wangwang e Jordan e demang ni Jericho et mangkampuddadman. <sup>2</sup> Ya etan patul di Moab e hi Balak e u-ungngan Sippor ey dingngel tu hu impahding idan helag Israel idan Amorite.

<sup>3</sup> Inang-ang idan iMoab e dakel idan peteg hu helag Israel ey nemahhig takut ni patul da niyadda tutu-u. <sup>4</sup> Kan idan aap-apud Moab idan aap-apud Midian ey "Iyyaddalli dakel ni helag Israel. Nanna-ud ni bahbahren dan emin hu hipan wada eyad bebley tayu henin kapehding idan bakaddan helek e daka kenna emin!"

Et impahding nan Balak e patul ni Moab, <sup>5</sup> ey nenu-dak ni an mekihummangan nan Balaam e u-ungngan Beor di Pethor e bebley ni neihnop di Wangwang e Euphrates. Heninnuy hu inhel Balak ni e-helen dan Balaam: "Immalidda dakel ni tutu-un nalpud Egypt ey nemahhig ni ida kamangkeihhinnap di kebebbbley eyad puyek et iyyaddadyan nambebley idad dagsin bebley mi. Et humman hu, nakka umkakaguh tep entanniy pilliwen da eya bebley mi. <sup>6</sup> Endi kabaalak ni mekihhanggan hi-gada, et humman hu, ali ka anhan et idutam ida ma-lat apputen middad gubat et bumsik ida. Inamtak e kamebendisyoniida tuun muka bendisyoni, niya kameiddusidda muka iddusi."

<sup>7</sup> Et lumaw ida etan opisyal ni intu-dak nan Balak e opisyal di Moab niyad Midian ni mekihummangan nan Balaam. Ey nantabin idan pihhuh ni ibbayad dan hi-gatu ma-lat idutan tudda helag Israel. Dinteng da et ehelen da hu impaad nan Balak. <sup>8</sup> Ey kan Balaam ni hi-gada ey "Pandeya kayu et ngenamung hu peamtan APU DIOS ni ihhumang kun hi-gayu." Et mandeyadda humman ni aap-apun iMoab ni intu-dak Balak.

<sup>9</sup> Yan nunman ni hileng ey kan Apu Dios nan Balaam ey "Hipadda eya edum mu?"

<sup>10</sup> Kan Balaam ey "Huyyadda intu-dak nan Balak e patul di Moab ni mengipeamtan hi-gak <sup>11</sup> e neihinap kunu dakel ni tuun nalpud Egypt. Et humman hu, pinhed nunman ni patul ni iddutak ida kunu humman ni tutu-u, ma-lat hedind gubaten dadda ey apputen tudda et medegyun ida."

<sup>12</sup> Nem kan Apu Dios nan Balaam ey "Entan kaya pakilaw mun hi-gada niya entan tudda idusi hu helag Israel tep binendisyonan kudda."

<sup>13</sup> Newa-wa et kan Balaam idan nunman ni tuu ey "Lakkayuy kuma tep eleg i-abulut APU DIOS ni mekillawwak ni hi-gayu."

<sup>14</sup> Et mambanggad ida et ehelen dan Balak e eleg abuluten nan Balaam ni mekillaw ni hi-gada. <sup>15</sup> Nem eleg mengmenghep hi Balak et menu-dak mewan ni daddakkel niya eta-ta-gey saad da nem yadda etan nemangulun intu-dak tu.

<sup>16</sup> Limmaw ida et kandan Balaam ey "Heninnuy hu kan Balak e u-ungngan Sippor: 'Ali kan ali anhan ni memaddang ni hi-gami. <sup>17</sup> Dakel ibbayad kun hi-gam niya pehding ku hu hipan ibbagam nemet umli ka et idutam ida huyyan tutu-u.'"

<sup>18</sup> Nem kan Balaam ey "Anin na-mun iddawat Balak ni hi-gak hu baley tu e baley ni patul niya hipan wadadman, heniddan balituk niya pihhuh et eleg mabalin ni nak ngenghayen hu intugun APU DIOS e Dios kun hi-gak. <sup>19</sup> Nem anin ni hanniman et pandeya kayu, henin impahding idan nemangulun immalli et amtaek hedind wada edum ni pinhed APU DIOS ni peamtan hi-gak."

<sup>20</sup> Yan nunman ni hileng ey kan Apu Dios nan Balaam ey "Hedin ya inlian ida eyan tuu ma-lat daka ikuyug, ku anin, pandaddan ka et makilaw ka, nem ebuh e-helen kun hi-gam ipahding mu."

<sup>21</sup> Newa-wa et mantakkay hi Balaam di kebayyu tu et makilaw ida etan ni aap-apud Moab. <sup>22</sup> Nem bimmunget hi Apu Dios ni nekilawwan Balaam, et kamenglaw e ingkuyug tudda dewwan bega-en tu ey limmaw etan anghel APU DIOS et maihenid dalan. <sup>23</sup> Inang-ang etan ni kebayyun Balaam etan anghel ni immehngeng e inta-gey tu ispadah tu et

ihingngi tu nengidlanan tud payew, ey hineplit Balaam etan kebayyu et mambangngad di keltad.

<sup>24</sup> Entanni mewan ey an immehng etan anghel di keltad ni nahkit e nambattanan ni dewwan leguntan neluhud ni batu. <sup>25</sup> Inang-ang mewan etan ni kebayyu etan anghel ni immehng ey impilit tun immusip etan di tuping ni luhud et meigandut hu helin Balaam tep neipit et hepliten mewan Balaam etan kebayyu.

<sup>26</sup> Entanni ey nandayyu mewan etan anghel di nahkit ni dalan e endi dammutun ussipan etan ni kebayyu. <sup>27</sup> Inang-ang mewan etan ni kebayyu etan anghel ey limmukbub et pan-iheplit nan Balaam hu hulkud tun kebayyu tu tep ya bunget tu. <sup>28</sup> Entanni ey impa-hel APU DIOS etan kebayyu e kantuy “Hipa nak impahding ni hi-gam et muwak hineplit ni nampitlu?”

<sup>29</sup> Hinumang Balaam e intekuk tu e kantuy “Tep impeang-ang mu e heni endi nemnem ku. Gullat ni wada ispadah ku et nanna-ud ni petteyen daka.”

<sup>30</sup> Immehele mewan etan kebayyu ey kantuy “Nem kaw beken ni hi-gak hu kebayyum ni nunman ingganah ni nunya? Kaw wada nengipahdingak ni hanneyan nunman ni hi-gam?”

Kan Balaam ey “Endi!”

<sup>31</sup> Entanni ey heni dinyat nan APU DIOS hu matan Balaam et ang-angen tu etan anghel ni immehng di dalan e inta-gey tu ispadah tu ey limmukbub hi Balaam di puyek di hinanggan nunman ni anghel. <sup>32</sup> Et kan etan ni anghel ni hi-gatuy “Kele mu hineplit hu kebayyum ni nampitlu? Immali-ak et haniak hu dellanem tep muka ippilit ni umlaw tep muwak kangenghaya. <sup>33</sup> Nampitlun inang-ang tuwak eyan kebayyum et idlan tud pangil. Gullat ni eleg tu idlan di pangil et pintey dakan hi-gak, nem ya kebayyum ey eggak petteya.”

<sup>34</sup> Kan Balaam ey “Nakka ebbuluta e nanliwattak. Eggak amta e immehng kad dalan et hanian mu dellanek. Anin ni mambangngaddak hedineleg mu pinhed ni umlawwak.”

<sup>35</sup> Nem kan etan ni anghel APU DIOS ey “Dammun mekillaw kaddan eyan aap-apun intu-dak Balak nem mahapul ni ebuh hu e-helen kun hi-gam ni e-helen mu.” Et makilaw hi Balaam idan opisyal nan Balak.

<sup>36</sup> Dingngel Balak e iyyallid Balaam ey tudda dinammud Ar e bebley di gilig ni Wangwang e Arnon di pappeg ni Moab. <sup>37</sup> Kan Balak nan Balaam ni nandatengan day “Kele eleg ka umli etan ni laputun nengayagan daka? Kaw eleg mu kulugen hu kangkun et-eteng hu ibbayad kun hi-gam?”

<sup>38</sup> Kan Balaam ey “Immali-ak nem endi kabaelan kun menghel ni anin hipa. Ebuh hu e-helen APU DIOS ni dammutun e-helek.”

<sup>39</sup> Et makilaw hi Balaam nan Balak di Kiriat Husot. <sup>40</sup> Nan-appit hi Balak ni babakka ey kakalneroh et idwatan tu hi Balaam niyadda aap-apun nekilaw ni hi-gatu. <sup>41</sup> Newa-wa et ipengulun Balak hi Balaam di Bamot Baal e kameuhdungidda edum ni helag Israel.

## 23

### *Yadda inhel Balaam*

<sup>1</sup> Kan Balaam nan Balak e patul ey “Ikapyai muwak ni pitun pan-appitan di deya niya idaddan mu hu pitun kilaw ni lakkitun baka niya pitun lakkitun kalneroh ni kamei-appit.” <sup>2</sup> Inu-unnud Balak humman ni inhel Balaam et iappit tu hu hanhakkey ni kilaw ni lakkitun baka niya hanhakkey ni lakkitun kalneroh etan idad kinapya tun pan-appitan.

<sup>3</sup> Kan mewan nan Balaam nan Balak ey “Ehneng kad kad-an eyaddan in-appit mun kagihheba et uma-allawwak et ang-angek hedine hummangen tuwak nan APU DIOS. Hannak ali ehelan hi-gam hedine hipa peamta tun hi-gak.” Et hakey hi Balaam ni limmaw di ta-pew ni duntug <sup>4</sup> et dammuen APU DIOS diman. Kan Balaam ni hi-gatuy “Nengapya-ak ni pitun pan-appitan et man-appittak idadman ni hanhakkey ni lakkitun baka ey kalneroh.”

<sup>5</sup> Inhel APU DIOS nan Balaam hu pinhed tun e-helen nan Balak et kantun Balaam ey “Lakkay di kad-an Balak et ehelem hu inhel kun hi-gam.”

<sup>6</sup> Nambangngad hi Balaam ey immen pay hi Balak e kaman-eh-ehng di kad-an idan neiappit ni kagihheba e hi-gadaddan emin etan idan aap-apun iMoab. <sup>7</sup> Immehele hi Balaam et kantuy “Tuwak impaeyag nan Balak e patul di Moab di bebley kud duntug di appit ni kasimmilin aggew di Aram, et idutak ida kunu helag Israel e e-helek hu lawah ni meippahding ni hi-gada. <sup>8</sup> Nem hipa nak pengiddutan idan eleg idutan APU DIOS? Hipa nak penghelan ni lawah ni meippahding hedine endi inhel APU DIOS? <sup>9</sup> Immehengngak di ta-pew ni duntug et ang-angek ey dakel ida nem neappil ida e beken idan henin edum ni tutu-u. <sup>10</sup> Dakel idan peteg hu helag Israel e henidda dep-ul, e eleg ida

mebillang. Pinhed kun melinggep hu ketteyyak et heni-ak idan nunman ni tuun Apu Dios e neibilang idan kayyaggud.”

<sup>11</sup> Kan Balak nan Balaam ey “Kele kangkuy iddutam ida humman ni buhul ku ey binendisyonom ida kumedek?”

<sup>12</sup> Hinumang Balaam e kantuy “Em, tep ebuh hu kae-helan APU DIOS ni dammutun e-helek.”

<sup>13</sup> Entanni et kan Balak nan Balaam ey “Ikay et lumaw itad eman di a-allaw tu e kameang-ang hu edum idan helag Israel et mudda idutan tep humman pinhed kun pehding mu.” <sup>14</sup> Impangulu tu hi Balaam di Sophim e ta-pew ni Duntug e Pisgah. Kinapya tu mewan hu pitun pan-appitan diman et man-appit ni hanhakkey ni bulug ni baka niya hanhakkey ni lakkitun kalneroh. <sup>15</sup> Et kan mewan Balaam nan Balak ey “Ehneng ka eyad kad-an ni in-appit mun kagihheba et nak dammuen hi APU DIOS.”

<sup>16</sup> Et an dammuen nan APU DIOS hi Balaam et ehelen tu hu e-helen Balaam nan Balak. <sup>17</sup> Nambanggad hi Balaam di kad-an Balak et yadda edum tu hu ap-apud Moab ey ida kaman-eh-eheng di kad-an ni in-appit dan megihheb. Ithik hi Balak ni mengamta et kantuy “Hipa inhel APU DIOS?”

<sup>18</sup> Kan Balaam ey “Dengel mu e Balak e u-unggan Sippor huyyan e-helek. <sup>19</sup> Hi Apu Dios man beken ni henin tuu e kaman-ittek winu kamangkekyat. Tep hedin hi-gatu man tuka pehding ni emin hu tuka e-hela. Hedin inhel tu man kameippahding. <sup>20</sup> Neimandal ni hi-gak e bendisyonom ida hu nebendisyonom. Hedin binendisyonom Apu Dios ey eleg mabalin ni nak kekyatan. <sup>21</sup> Endi an meippahding ni lawah idan helag Israel niya endi hu hipan ligat ni um-alin hi-gada tep wada AP-APU e Dios dan memaddang ni hi-gada. Hi-gatu hu pinili dan patul da. <sup>22</sup> Hi Apu Dios hu an nengawit ni hi-gadad Egypt. Hi-gatu hu kamei-ellig ni ma-lem ni bulug ni bakan neka-let ni ihangga da. <sup>23</sup> Endi kabaellan ni idut winu ayak idan helag Israel. Et heninnuy hu e-helen idallin tutu-u meippanggep ni hi-gada: ‘Ang-ang yu hu impahding Apu Dios idan helag Israel!’ <sup>24</sup> Ida kamei-ellig hu helag Israel di layon e neka-let e eleg man-iyatu ingganah pamba-nuten tu dimpap tun kenen tu niya ingganah innumen tu kuheyaw ni pintey tu.”

<sup>25</sup> Entanni ey kan Balak nan Balaam ey “Hedin eleg mudda iddusi, ey entan tudda ew mewan bendisyoni.”

<sup>26</sup> Nem kan Balaam ey “Kaw eggak ehelen ni hi-gam e pehding kun ebuh hu e-helen APU DIOS ni hi-gak?”

<sup>27</sup> Kan Balak ey “Pakilaw kan hi-gak et ilaw daka etan di hakey ni bebley et ilah tu ey dammutun i-abulut Apu Dios ni iddutam idadman.”

<sup>28</sup> Et ilaw tu hi Balaam di tuktuk ni Duntug e Peor e kameuhdungi hu eleg mebebleyi.

<sup>29</sup> Kan Balaam ni hi-gatuy “Ikapyai muwak ni pitun pan-appitan di deya niya i-lim hu pitun bulug ni baka niya pitun lakkitun kalneroh ni mei-appit.” <sup>30</sup> Inu-unnud Balak et man-appit ni hanhakkey ni bulug ni baka niya hanhakkey ni lakkitun kalneroh etan idad pitun pan-appitan.

## 24

<sup>1</sup> Yan nunman ey inamta law Balaam e hedin ya pinhed APU DIOS ni pehding tu ey bendisyonom tudda helag Israel, et eleg tu law ipahding hu anap ma-lat pengamtaan tun pinhed Apu Dios ni pehding tu, e humman imminghan tuka ippenahding. Nanligguh et iang-ang tud eleg mebebleyi <sup>2</sup> ey inang-ang tudda helag Israel ni nangkampu e neena-appil ida meippuun di nahlagan da. Entanniy immali Ispirituh Apu Dios ni hi-gatu <sup>3</sup> et kantuy “Hi-gak e hi Balaam e u-unggan Beor e matneng nakka penang-ang, <sup>4</sup> ey nakka deddenggela ehel Apu Dios e Keta-ta-geyyan ey nakka ang-ang-anga hu peang-ang tun hi-gak:

<sup>5</sup> Kakkayyaggud ni peteg hu kampuddan helag Jacob, kakkayyaggud hu baballey da.

<sup>6</sup> Heniddan netu-tu-nud ni palmah, ey henidda garden di gilig ni wangwang, heniddan kapampebanglun kenen ni intanem APU DIOS, niya heniddan sedar di gilig ni lebeng.

<sup>7</sup> Dakel ali danum da et anin idan ittanem da et eleg mekullangin danum.

Ya patul da ey et-etteng ali kabaellan tu nem hi Agag. Sekkupun tulli dakel ni bebley.

<sup>8</sup> Ingkuyug idan Apu Dios ni neni-yanan dan Egypt ey neka-let ida e henidda ma-lem ni bulug ni baka. Daka paka-apputa kamekibuhhul ni hi-gada e daka panhepunga genit da niya dadda kapampanaa. <sup>9</sup> Henidda layon ni kamanhehhegged ni dedpapien tu. Henidda mewan etan ni labah ni layon e endi netuled ni an memenggun ni hi-gatu! Emin hu memendisyon ni Israel ey mebendisyonom. Nem meiddutan etan tuun mengiddut ni hi-gada.”

<sup>10</sup> Nemahhig hu bunget Balak nan Balaam e ginemgem tu ngamay tun bunget tu et itkuk tu e kantuy “Ineyagan daka ma-lat idutam ida buhul ku ey binendisyonom ida

kumedek ni nampitlu! <sup>11</sup> Pampenga-allow kadya! Anemut kad bebley yu! Inhel ku e et-eteng penangdan kun hi-gam nem eleg iebulut nan APU DIOS ni ellam humman.”

<sup>12</sup> Himmumang hi Balaam ey kantuy “Tam inhel ku dedan lan etan idan intu-dak mun mengeyyag ni hi-gak <sup>13</sup> e anin na-mun iddawat mun hi-gak ni emin hu silber niya balituk di baley mu et eleg mabalin ni nak ngenghayen hi APU DIOS et nak ipahding hu pinhed ku. Niya inhel ku dedan ni hi-gam e ebuh hu e-helen APU DIOS ni dammutun e-helek.

<sup>14</sup> Mambangnaddak law di bebley mi nem e-helek nin hi-gam hu ippahding idallin helag Israel idan tuum ni edum ni aggew.”

<sup>15</sup> Heninnuy inhel Balaam: “Hi-gak e hi Balaam e u-ungngan Beor e matneng nakka penang-ang <sup>16</sup> ey nakka deddengela hu ehel Apu Dios e Keta-ta-geyyan ey nakka ang-ang-anga hu impeang-ang tun hi-gak. <sup>17</sup> Nakka ang-ang-anga e yallin edum ni aggew ey meweddallid helag Israel hu hakey ni patul ni kamei-ellig di makaddilag ni bittuwen. Panggegmiken tullu uluddan iMoab niyadda bimbebley di Seth. <sup>18</sup> Apputen tullu buhul tud Edom niyad Seir et sakupen tu bebley da. Ey meweddalli et-eteng ni kabaelan idan helag Israel. <sup>19</sup> Humman alin ap-apun melpud helag Israel ey endien tuddalli hu metdaan ni mategu.”

<sup>20</sup> In-uhdung nan Balaam mewan idan iAmalek et heninnuy impeamta tun meippahding alin hi-gada: “Ma-nu tep ya Amalek hu kee-ettengan kabaelan tud emin ni bebley nem mebahbah ali et meendin ingganah.”

<sup>21</sup> In-uhdung tu damaddan iKenite et kantuy “Ma-nut melinggep kayud bebley yun heni buyad ta-pew ni mabetu, <sup>22</sup> nem mebahbah kayullin ellian idan iAssyria et alan dakeyu et mambalin kayun balud di bebley da.”

<sup>23</sup> Heninnuy mewan hu inhel Balaam: “Hipa mannenneng ni mategu hedin pehding Apu Dios hu hanneya? <sup>24</sup> Um-aliddalli bapor ni melpud gilig ni baybay di Cyprus. Panhelheltap dalli iAssyria niyadda iEber, nem anin ni hi-gada et mekabababah idalli.”

<sup>25</sup> Negibbuh ni inhel Balaam ida huyya et umenamut di bebley da ey immanemut dama hi Balak.

## 25

### *Ya impahding ni iMoab idan helag Israel*

<sup>1</sup> Yan nangkampuan idan helag Israel di Akasia ey in-ulig idan edum ni lalacki da hu bibi-in iMoab. <sup>2</sup> Et ayagan idan nunman ni bibi-in iMoab ida humman ni lalakkid daka pan-appisin dios dad Moab. Entanni ey nekihemul ida et lektattuy dinaydayaw da law ida dios di Moab. <sup>3</sup> Ey neki-dum idan nenaydayaw nan Baal di Peor. Et nemahhig bunget APU DIOS idan tuu tu tep ya huyyan neipahding. <sup>4</sup> Kantun Moses ey “Ayagim idan emin hu nengippangngulun nengipahding nunman et papetey muddad hinanggaddan helag Israel ma-lat ma-kal hu bunget kun hi-gada.”

<sup>5</sup> Et iolden Moses idan huwet ni Israel e kantuy “Ang-ang yun emin hu tuu yun kamandaydayaw nan Baal di Peor et papetey yudda.”

<sup>6</sup> Entanni ey wada hu hakey ni helag Israel ni nengihgep ni hakey ni biin iMidian di kampu tu e neka-ang-ang nan Moses niyadda etan neamung ni kamannengngih di heggeppan ni Tabernacle. <sup>7</sup> Hi Pinehas e padin u-ungngan Eleasar e inap-apun Aaron ey inang-ang tu dama et tu alen pahul tu <sup>8</sup> et unuden tu etan lakid kampu tu. Himmegep et iba-wek tu pahul tu etan ni laki et mailegat pay etan biin nesibik. Humman nesikedan ni degeh ni neihi nap idan helag Israel <sup>9</sup> nem neil-uh ni netey ida dewampulut epat ni libun hi-gada.

<sup>10</sup> Entanniy kan APU DIOS nan Moses ey <sup>11</sup> “Na-kal law bunget kuddan helag Israel tep ya humman ni impahding Pinehas. Ka-ang-ang e eleg tun hekey pinhed ni wada edum ni dios ni daydayawen da, et humman hu, eggak law ituluy hu planuh kun memabab ni hi-gadan emin tep ya bunget ku. <sup>12</sup> Et humman hu, ehel mun Pinehas e issapatah ku e wadallin ingganah hu linggep tu. <sup>13</sup> Hi-gatu niyadda helag tu hu mannenneng ni mampeddin ingganah, tep eleg tu iebulut ni wada edum ni dios daydayawen idan edum tun helag Israel, et humman hu, nepesinsahan hu liwat idan helag Israel tep ya impahding tu.”

<sup>14</sup> Ya ngadan etan ni lakin helag Israel ni netey e kadwa etan ni biin iMidian ey hi Simri e u-ungngan Salu e nahlag nan Simeon. <sup>15</sup> Ya ngadan etan ni bii ey hi Kosbi e u-ungngan Sur e hakey ni kamengippangnguluddan Midian.

<sup>16</sup> Entanni ey kan APU DIOS nan Moses ey <sup>17</sup> “Gubat yudda iMidian et bahbahen yudda <sup>18</sup> tep lawah impahding da e hineul dakeyu et dayawen yu hi Baal di Peor niya gapuh etan ni u-ungngan kamengippangnguluddan iMidian e hi Kosbi e pintey Pinehas ni nunman ni aggew ni neihi napan ni degeh di Peor.”

## 26

*Ya pidwa tun nambilangan Moses idan helag Israel*

<sup>1</sup> Ya eman ni nesiked hu degeh idan helag Israel e humman kastigu da ey kan APU DIOS nan Moses et hi Eleasar e u-ungngan Aaron ey <sup>2</sup> “Bilang yudda mewan hu lalakkin dewampulu toon tu winu nehuluk et meamta hedind pigad hakey ni pamilyah hu damnutun mansindalu.”

<sup>3</sup> Yan nunman ni tsimpuh ey nangkampudda helag Israel di nandeklan di Moab di gilig ni Wangwang e Jordan e demang ni Jericho. Inu-unnud nan Moses et hi Eleasar e padi humman et iolden daddan aap-apun helag Israel hu pehding dan memillang idan lalakki.

<sup>4</sup> Kanday “Bilang yuddan emin hu lalakkin helag Israel ni dewampulu toon tu winu nehuluk meippuun di in-olden APU DIOS ni meippahding.”

Huyyadda hu helag Israel ni neni-yan ni Egypt: <sup>5</sup> Huyyadda nahlag nan Reuben e pengulwan ni u-ungngan Jacob e Israel hu hakey ni ngadan tu: yadda helag Hanok, yadda helag Pallu, <sup>6</sup> yadda helag Hesron, niyadda helag Karmi. <sup>7</sup> Ya bilang emin ni lalakkin helag Reuben ey 43,730.

<sup>8</sup> Hi Pallu hu nahlagan nan Eliab <sup>9</sup> e aman Nemuel, hi Dathan et hi Abiram. Di Datham nan Abiram hu nengipappangulu lan nunman ni nekibaddang nan Korah ni nangehay di Moses nan Aaron et hi APU DIOS. <sup>10</sup> Nem nadhak puyek et mangkehung idad dallem tu anin hi Korah niyadda etan dewanggatut et neliman neki-dum ni hi-gadan pintey ni apuy. Humman ni neipahding ni hi-gada hu pengi-ang-angan ni edum ni tuu ma-lat tumekut idan mengippahding ni impahding da. <sup>11</sup> Nem eleg ida matey hu u-ungngan Korah ni nunman ni aggew.

<sup>12</sup> Huyyadda nahlag ni u-ungngan Simeon: yadda helag Nemuel, yadda helag Jamine, yadda helag Jakin, <sup>13</sup> yadda helag Serah niyadda helag Saul. <sup>14</sup> Ya bilang idan emin ni lalakkin helag Simeon ey 22,200.

<sup>15</sup> Huyyadda nahlag nan Gad: yadda helag Sephon, yadda helag Haggi, yadda helag Suni, <sup>16</sup> yadda helag Osni, yadda helag Eri, <sup>17</sup> yadda helag Arodi niyadda helag Areli.

<sup>18</sup> Ya bilang ni emin ni lalakkin helag Gad ey 40,500.

<sup>19</sup> Di Er nan Onan e u-ungngan Judah ey netey idad Kanaan. <sup>20</sup> Yadda nahlag nan Judah ey yadda helag Sela, yadda helag Peres, niyadda helag Serah. <sup>21</sup> Yadda nahlag nan Peres ey yadda helag Hesron, niyadda helag Hamul. <sup>22</sup> Ya bilang idan emin ni lalakkin helag Judah ey 76,500.

<sup>23</sup> Huyyadda nahlag nan Issakar: yadda helag Tola, yadda helag Puah, <sup>24</sup> yadda helag Jashub niyadda helag Simron. <sup>25</sup> Ya bilang emin idan lalakkin helag Issakar ey 64,300.

<sup>26</sup> Huyyadda nahlag nan Sebulun: yadda helag Sered, yadda helag Elon niyadda helag Jahleel, <sup>27</sup> ya bilang idan emin ni lalakkin helag Sebulun ey 60,500.

<sup>28</sup> Huyyadda nahlag nan Joseph: yadda helag di Manasseh nan Epraim. <sup>29</sup> Huyyadda nahlag nan Manasseh: yadda helag Makir, niyadda helag Gilead. (Hi Gilead hu u-ungngan Makir.) <sup>30</sup> Yadda nahlag nan Gilead: yadda helag Jesser, yadda helag Helek, <sup>31</sup> yadda helag Asreil, yadda helag Sekem, <sup>32</sup> yadda helag Semida niyadda helag Hephher. <sup>33</sup> (Hi Selophehad e u-ungngan Hephher ey endi lakin u-ungnga tu, bibi-in emin u-ungnga tu e hi Mahlah, hi Noah, hi Hoglah, hi Milkah et hi Tirsah.) <sup>34</sup> Ya bilang idan emin ni lalakkin helag Manasseh ey 52,700.

<sup>35</sup> Huyyadda nahlag nan Epraim: yadda helag Suthelah, yadda helag Beker niyadda helag Tahan. <sup>36</sup> Yadda nahlag nan hi Suthelah ey yadda helag Eran. <sup>37</sup> Ya bilang ni emin idan lalakkin helag Epraim ey 32,500.

<sup>38</sup> Huyyadda nahlag nan Benjamin: yadda helag Belah, yadda helag Asbel, yadda helag Ahiram, <sup>39</sup> yadda helag Supham niyadda helag Hupham. <sup>40</sup> Yadda nahlag nan Belah: yadda helag Ard niyadda helag Naaman. <sup>41</sup> Ya bilang idan emin ni lalakkin helag Benjamin ey 45,600.

<sup>42-43</sup> Yadda nahlag nan Dan: yadda helag Suham. Ya bilang ni emin idan lalakkin helag Dan ey 64,400.

<sup>44</sup> Huyyadda nahlag nan Asher: yadda helag Immah, yadda helag Isbi niyadda helag Beriah. <sup>45</sup> Yadda nahlag nan Beriah: yadda helag Heber niyadda helag Malkiel. <sup>46</sup> (Hi Asher ey wada u-ungnga tun biin hi Serah.) <sup>47</sup> Ya bilang emin idan lalakkin helag Asher ey 53,400.

<sup>48</sup> Huyyadda nahlag nan Naptali: yadda helag Jahseel, yadda helag Guni, <sup>49</sup> yadda helag Jeshar niyadda helag Sillem. <sup>50</sup> Ya bilang ni emin idan lalakkin helag Naptali ey 45,400.

<sup>51</sup> Et ya bilang ni emin ni lalakkin helag Israel ni neilista ey 601,730.

<sup>52</sup> Kan APU DIOS nan Moses ey <sup>53</sup> “Genedwam eya puyek meippuun ni kedakkel idan helag Israel et ika-peng mun hi-gada. <sup>54</sup> Idwat mu melallakkeb ni puyek idan daddakkel

helag da ey idwat mu nehehhekkid idad hahhakkey helag da. Meang-ang hu kedakkel ni hakey ni pewen di kelakkeb ni puyek ni meidwat ni hi-gada. <sup>55</sup> Ang-ang mu et binnunut hu pehding mun mengikka-peng ni puyek niya meippuun etan di neitudek ni bilang idan helag ni u-ungngan Israel. <sup>56</sup> Mahapul ni binnunut hu pehding mun mengikka-peng ni puyek et hedid daddakkel idad hakey ni pewen ey ya mahmahkang hu meidwat ni hi-gada, hedid hahhakkey idad pewen da ey ya nehehhekkid hu meidwat ni hi-gada.” <sup>57</sup> Huyyadda nahlag nan Levi: yadda helag Gerson, yadda helag Kohat niyadda helag Merari. <sup>58</sup> Huyyadda edum ni nahlag nan Levi: yadda helag Libni, yadda helag Hebron, yadda helag Mahli, yadda helag Mushi niyadda helag Korah. Hi Kohat hu aman Amram <sup>59</sup> e nengiahwan Jokebed. Hi Jokebed e neiungngad Egypt ey nahlag metlaing nan Levi. Nan-ungngad Amram nan Jokebed et di Aaron nan Moses, et hi Miriam e biin agi da. <sup>60</sup> Epat ni lalakki u-ungngan Aaron: hi Nadab, hi Abihu, hi Eleasar et hi Ithamar. <sup>61</sup> Nem netey di Nadab nan Abihu eman ni nan-appitan dan APU DIOS e eleg da u-unnuden hu inhel tun pehding ni mengihheb ni insensoh. <sup>62</sup> Ya bilang idan lalakkin nahlag nan Levi ni hambulan tu winu nehuluk ey 23,000. Neappil ngu listaan ni bilang da tep eleg ida meidwasin beltanen dan puyek di Israel. <sup>63</sup> Huyyadda binilang di Moses nan Eleasar eman ni nemilangan dan emin ni helag Israel etan di nandeklan di Moab di gilig ni Wangwang e Jordan e demang ni Jericho. <sup>64</sup> Endi anin hakey idan nunya hu nekibilang eman ni nemangulun nambilangan Moses idan helag Israel ni kaweda dad Sinai e eleg mebebleyi. Emin ida hu nebilang ni nunman ey endin hi-gada natdaan ni mategu, netey idan emin. <sup>65</sup> Inhel dedan APU DIOS ni nunman e mettey idan emin etan di eleg mebebleyi. Nem ebuh di Kaleb e u-ungngan Jepunneh et hi Joshua e u-ungngan Nun ni natdaan ni eleg matey.

## 27

### *Yadda etan bibi-in u-ungngan Selophehad*

<sup>1-4</sup> Hakey ni aggew ey limmaw ida hu bibi-in u-ungngan Selophehad e hi Mahlah, hi Noah, hi Hoghlah, hi Milkah, et hi Tirsah di heggeppan ni Tabernacle di kad-an di Moses, hi Eleasar e padi, yadda kamengipappangngulu niyadda edum dan bimbebley et kanday “Netey hi amemi di eleg mebebleyi ey endi helag tun laki. Netey tep ya liwat tu, e beken ni ya neki-duman tun Korah ni nangegehayan dan APU DIOS hu himmulun. Et humman hu, kele an metellak ngadan amemi tep ya keendin u-ungnga tun laki? Idwasi dakemi kuma anhan ni puyek ni indawat yuddan aaggin amemi.” Hedid hi Selophehad man u-ungngan Hephher e u-ungngan Gilead e u-ungngan Makir e u-ungngan Manasseh e u-ungngan Joseph.

<sup>5</sup> Nekihummangan hi Moses nan APU DIOS meippanggep ni nunman <sup>6</sup> ey kan APU DIOS ni hi-gatuy <sup>7</sup> “Neiptek ida numan hu u-ungngan Selophehad. Idwasim idan puyek ni henin neidwat idan aaggin ameda. Itudum ni hi-gada hu lebbeng tun beltanen ameda. <sup>8</sup> Ehel muddan helag Israel e hedid netey hu hakey ni laki ey endi u-ungnga tun laki ey mahapul ni meidwat hu beltanen tuddad bibi-in u-ungnga tu. <sup>9</sup> Hedid endin hekey u-ungnga tu ey meidwat hu beltanen tun lakin agitu. <sup>10</sup> Hedid endi lakin agi tu ey meidwat hu beltanen tun lakin agin ametu. <sup>11</sup> Hedid endi lalakkinn agin ametu ey meidwat hu beltanen tuddan kumpulmih ni neka-ihnup ni aaggi tu. Mahapul ni u-unnuden idan helag Israel huyyan Tugun ni indawat kun hi-gam e Moses.”

### *Ya neputukan nan Joshua ni meihhullul nan Moses*

<sup>12</sup> Hakey ni aggew ey kan APU DIOS nan Moses ey “Panteyed kad ta-pew ni Duntug e Abarim di appit ni kasimmilin aggew, et ang-angen mu hu bebley ni iddawat kuddan helag Israel. <sup>13</sup> Hedid negibbuh ni inang-ang mu ey mettey ka e henin nan agim hi Aaron. <sup>14</sup> Tep nginhay yu dama hu tugun ku eman ni nanlilihian idan tuun hi-gak di Meribah di eleg mebebleyid Sin, tep eleg mu peang-ang ni hi-gada hu et-eteng ni kabaelan ku.” (Hedid ya Meribah ey humman hu hebwak di Kades.)

<sup>15</sup> Nandasal hi Moses nan APU DIOS e kantuy <sup>16</sup> “APU DIOS e Dios ni kakelpuin biyag ni emin ni mategu, putuk ka anhan ni hakey ni kabaelan tun mengippengnguludda eyan tuum. <sup>17</sup> Em, putuk ka anhan ni mengippengngulun hi-gadan mekiggubbat et beken idan heni kalneroh ni endi mampattul ni hi-gada.”

<sup>18</sup> Kan APU DIOS nan Moses ey “Hi Joshua e u-ungngan Nun hu wada kabaelan tun mengipappangnguluddan tuu. Ayagim et ita-pew mu ngamay mud ulu tu. <sup>19</sup> Peehngeng mud hinanggan Eleasar e padi niyad emin idad edum yun helag Israel et ehelen mun hi-gada e hi-gatu meihhullul ni hi-gam ni mengippengngulun hi-gada. <sup>20</sup> Pebeltan mun hi-gatu kabaelan et mengu-unnud idan emin hu helag Israel ni hi-gatu. <sup>21</sup> Hedid wada pinhed dan ibbagan hi-gak ey um-ehngeng hi Joshua di hinanggan Eleasar e padi et

amtaen tu hedin hipa inhumang ku meippuun ni binnunut e ussalen da Urim niya Thummim. Henin nunya pengamtaan nan Eleasar ni e-helen tun Joshua niyadda etan tuu hedin hipa pinhed kun pehding da.”

<sup>22</sup> Inu-unnud Moses huuyan intugun APU DIOS et peehngeng tu hi Joshua di hinanggan Eleasar e padi niyaddad emin etan ni tuu, <sup>23</sup> Et ita-pew tu hu ngamay tud ulun Joshua et ehelen tu e hi-gatu meihhullul ni mengippengnguluddan helag Israel meippuun di tugun APU DIOS.

## 28

### *Ya kamei-appit ni kewa-wa-wa*

<sup>1</sup> Inhel mewan APU DIOS nan Moses <sup>2</sup> e ittugun tuddan helag Israel huuya e kantuy “Mahapul ni peang-ang yun hi-gak di nagtud ni tsimpuh etan ida kamengippeamleng ni kennen ni kagihheba. <sup>3</sup> Ya i-appit yun kagihheban kennen ni kewa-wa-wa ey dewwan hantoon tun lakkitun kalneroh ni endi dipektoh tu. <sup>4</sup> I-appit yu hu hakey ni kakkabbuhhan ey hakey mewan ni kamangkehilleng. <sup>5-7</sup> Unnudi yun kamei-appit ni begah e ngannganih ni hangkiloh ni alinah ni nekamdugan ni hakey ni litroh ni mansikan olibah. Unnudi yu pay ni kamei-appit ni meinum ni hakey ni litroh. Giheb yudda huuya et iappit yun hi-gak ni kewa-wa-wa ma-lat umamlengngak ni hamuy tu. Huuyan pehding yu ey neitugun dedan ni nunman di Duntug e Sinai. <sup>8</sup> Hanneya ipahding yun kakkabbuhhan niyan kamangkehilleng. Huuyan i-appit yun kennen ni kagihheba ey mengippeamleng ni hi-gak hamuy tu.

<sup>9</sup> Yan Sabaduh e kamengillin ni aggew ey iappit yu dewwan hantoon dan lakkitun kalneroh ni endi dipektoh da, ya ngannganih ni dewwan kiloh ni alinah ni nekamdugan ni mansikan olibah niya kamei-appit ni meinum. <sup>10</sup> Meikkahakey ni gihheban yudda huuyan i-appit yu e mei-dum di i-appit yun kewa-wa-wan meunnudan ni meinum.

<sup>11</sup> Peang-ang yu hu kagihheban i-appit yun hi-gak e Dios ni memengngulun aggew ni kabulaban e ya dewwan kilaw ni lakkitun baka, hakey ni lakkitun kalneroh niya pitun hantoon dan lakkitun kalneroh. Mahapul ni emin ida huuyan animal ey endi dipektoh da. <sup>12</sup> Unnudi yu etan hakey ni lakkitun bakan kamei-appit ni begah e umlaw di tellun kiloh ni alinah ni nekamdugan ni mansikan olibah, dewwan kiloh etan di lakkitun kalneroh <sup>13</sup> niya hanhakkey ni kiloh etan idad hantoon tun lakkitun impah ni kalneroh. Huuyan kamei-appit ni kagihheba niya kamei-appit ni kennen ey mengippeamleng ni hi-gak hu hamuy tu. <sup>14</sup> Mahapul mewan ni um-iappit kayun meinum ni dewwan litroh ni unnud ni hakey ni baka, hakey et kagedwah ni litroh ni unnud ni lakkitun kalneroh, niya hakey ni litroh ni unnud ni lakkitun impah ni kalneroh. Huuyadda kamei-appit ni memengngulun aggew ni kabulaban. <sup>15</sup> Ey iappit yu hakey ni gelding ni kamei-appit ni liwat e i-e-dum yu etan di i-appit yun kewa-wa-wa e unnudi yun kamei-appit ni meinum.

### *Ya i-appit yun penginnemneman yun Nelabahan ni Anghel Apu Dios*

<sup>16</sup> Yan meikkahampulut epat ni aggew ni memengngulun bulan hu pengippahdingan yun piyestah ni penginnemneman yun Nelabahan ni Anghel APU DIOS. <sup>17</sup> Yan meikkahampulut liman aggew hu keilleppuan ni pitun aggew ni piyestah yun eleg kayu mengan ni sinapay ni nekamdugan ni kamampelbag. <sup>18</sup> Yan memengngulun aggew nunman ni piyestah yu ey meemung kayu et mandaydayaw kayun eleg kayu mangngunnu. <sup>19</sup> Man-appit kayun kagihheba et humman kennen ni i-appit yun APU DIOS. I-appit yudda hu dewwan kilaw ni lakkitun baka, ya hakey ni lakkitun kalneroh, niya pitun hantoon dan lakkitun kalneroh. Mahapul ni endi dipektoh da. <sup>20</sup> Hanhakkey ida huuya niya meunnudan ni kamei-appit ni begah e humman hu alinah ni nekamdugan ni mansikan olibah. Ya hakey ni baka ey meunnudan ni dewwa et kagedwah ni kilo, ya hakey et kagedwah ni kiloh di hakey ni lakkitun kalneroh, <sup>21</sup> ey hangkiloh di hakey ni pakeetteng tun lakkitun kalneroh. <sup>22</sup> Ey man-appit kayun lakkitun gelding tep ya liwat ma-lat ma-kal liwat yu. <sup>23</sup> Peang-ang yun emin ida huuyan i-appit yun kagihheba e mei-dum di i-appit yun kewa-wa-wa. <sup>24</sup> Humman nisi pehding yun kewa-wa-wan pitun aggew ni piyestah ey man-appit kayun hi-gak ni kennen e giheb yu et umamlengngak ni hamuy tu. Hin-appil nisi ngu dedan etan ida i-appit yun kagihheba niya i-appit yun meinum. <sup>25</sup> Yan meikkeppitun aggew ey meemung kayu mewan et mandayaw kayun hi-gak e eleg kayu mangngunnu.

### *Ya kamei-appit ni Piyestah ni Ani*

<sup>26</sup> Yan memengngulu mewan ni aggew ni Piyestah ni Ani ey meemung kayu et mandayaw kayun hi-gak e eleg kayu mangngunnu. <sup>27</sup> Man-appit kayun kagihheba et

umamlengngak ni hamuy tu. Huyyadda i-appit yu: dewwan kilaw ni lakkitun baka, hakey ni lakkitun kalneroh niya pitun hantoon tun lakkitun kalneroh. Mahapul ni endi dipektoh da. <sup>28-29</sup> Man-appit kayu pay ni begah e iappit yu hu alinah ni nekamdugan ni mansikan olibah. Ya hakey ni baka ey meunnudan ni ngannganih ni tellun kiloh ni alinah, ya ngannganih ni dewwan kiloh ni alinah di hakey ni lakkitun kalneroh ey ya hangkiloh ni alinah di hakey ni hantoon tun lakkitun kalneroh. <sup>30</sup> Man-appit kayu pay ni hakey ni lakkitun gelding tep ya liwat ma-lat ma-kal liwat yu. Humman ni pan-appitan yu hu pengippahdingan yun elaw ni panlinnih yun tuu. <sup>31</sup> Humman idan i-appit yun kagihheba ey unnudi yun kamei-appit ni meinum e hin-appil ngu dedan etan i-appit yun kagihheba niya begah ni kewa-wa-wa. Mahapul ni emin ida i-appit yun animal ey endi hu dipektoh da.”

## 29

### *Ya Piyestah ni Tangguyup*

<sup>1</sup> “Meemmung kayu mewan emin et mandayaw kayun hi-gak ni memengngulun aggew ni meikkeppitun bulan. Entan panggunu yun nunman ni aggew, nem patnul yu tangguyub yu, <sup>2</sup> niya man-appit kayun hi-gak ni kagihheba, ma-lat umamlengngak ni hamuy tu. Huyyadda i-appit yu: hakey ni lakkitun baka, hakey ni lakkitun kalneroh niya pitun hantoon dan lakkitun kalneroh. Mahapul ni endi dipektoh da. <sup>3</sup> Wada hakey idan nunyan animal ey meunnudan idan kamei-appit ni begah e humman hu alinah ni nekamdugan ni mansikan olibah. Ya hakey ni baka ey meunnudan ni ngannganih ni tellun kiloh ni alinah, ngannganih ni dewwan kiloh hu mei-unnud di hakey ni lakkitun kalneroh <sup>4</sup> niya hangkiloh mei-unnud di hakey ni hantoon tun lakkitun kalneroh. <sup>5</sup> Man-appit kayu pay ni lakkitun gelding tep ya liwat ma-lat ma-kal liwat yu. <sup>6</sup> Hin-appil ngu dedan hu i-appit yun kagihheba e meunnudan ni kamei-appit ni begah niya meinum ni memengngulun aggew ni kabulabulan niyan kewa-wa-wa. Huyyaddan i-appit yun kagihheba ey mengippeamleng ni hi-gak hu hamuy tu.

### *Ya kamei-appit ni ke-kalan ni liwat idan tuu*

<sup>7</sup> Meemmung kayun mandayaw ni hi-gak ni meikkeppulun aggew ni meikkeppitun bulan. Mantepel kayu e eleg kayu mengngani niya eleg kayu manggunnu. <sup>8</sup> Man-appit kayu hi-gak ni kagihheba ma-lat umamlengngak ni hamuy tu. Yadda huyya i-appit yu: hakey ni kilaw ni lakkitun baka, ya hakey ni lakkitun kalneroh niya pitun hantoon dan lakkitun kalneroh. Ey mahapul ni endi dipektoh da. <sup>9</sup> Ya hanhakkey idan nunman ey meunnudan ni kamei-appit ni pagey e humman hu alinah ni nekamdugan ni mansikan olibah. Ya etan hakey ni baka ey meunnudan ni ngannganih ni tellun kiloh ni alinah, ngannganih ni dewwan kiloh di hakey ni lakkitun kalneroh <sup>10</sup> niya hangkiloh hu mei-unnud di hakey ni hantoon tun kalneroh. <sup>11</sup> Man-appit kayu mewan ni lakkitun gelding tep ya liwat e mei-dum di i-appit yu ma-lat ma-kal liwat yun pengippahdingan yun elaw ni panlinnih yun tuu. Hin-appil ngu dedan etan ida i-appit yun kagihheba e meunnudan ni alinah niya meinum ni memengngulun aggew ni kabulabulan niyan kewa-wa-wa. <sup>12</sup> Meemmung kayu mewan et mandayaw kayun hi-gak ni meikkahampulut liman aggew ni meikkeppitun bulan. Ey eleg kayu manggunnu nunman ni aggew.

<sup>13</sup> Yan memengngulun aggew ey man-appit kayun kagihheba e humman i-appit yun hi-gak ni kennen ma-lat umamlengngak ni hamuy tu. Huyyadda i-appit yu: ya hampulut tellun kilaw ni lakkitun baka, ya dewwan lakkitun kalneroh niya hampulut epat ni hantoon dan lakkitun kalneroh. Mahapul ni endi dipektoh da. <sup>14</sup> Hanhakkey idan nunyan animal ey unndan yun kamei-appit ni begah e humman hu alinah ni neha-adan ni mansikan olibah. Ya hakey ni baka ey meunnudan ni ngannganih ni tellun kiloh ni alinah, et ya hakey ni lakkitun kalneroh ey meunnudan ni ngannganih ni dewwan kiloh ni alinah <sup>15</sup> niya hakey ni hantoon tun lakkitun kalneroh ey meunnudan ni ngannganih ni hangkiloh ni alinah. <sup>16</sup> Man-appit kayu mewan ni lakkitun gelding ma-lat ma-kal liwat yu. Hin-appil ngu dedan hu i-appit yun kagihheba e meunnudan ni alinah niya meinum ni memengngulun aggew ni kabulabulan niyan kewa-wa-wa.

<sup>17</sup> Yan meikkadwan aggew ey iappit yu hu hampulut dewwan kilaw ni lakkitun baka ya dewwan lakkitun kalneroh niya hampulut epat ni hantoon dan lakkitun kalneroh. Mahapul ni endi dipektoh da. <sup>18</sup> Humman idan animal ey meunnudan idan kamei-appit ni alinah niya meinum. <sup>19</sup> Man-appit kayu mewan ni lakkitun gelding ma-lat ma-kal liwat yu. Hin-appil ngu dedan hu i-appit yun kagihheba e meunnudan ni begah niya meinum ni memengngulun aggew ni kabulabulan niyan kewa-wa-wa. <sup>20</sup> Yan meikkadwan aggew ey iappit yu hampulut hakey ni kilaw ni lakkitun baka, ya dewwan lakkitun kalneroh niya hampulut epat ni hantoon dan lakkitun kalneroh. Mahapul ni



endi dipektoh da. <sup>21</sup> Meunnudan ida humman ni animal ni i-appit yun begah niya meinnum. <sup>22</sup> Man-appit kayu ni lakkitun gelding tep ya liwat ma-lat ma-kal liwat yu. Mei-dum ida humman di i-appit yun kagihheba e meunnudan ni begah niya meinnum ni memengngulun aggew ni kabulabulan niyan kewa-wa-wa. <sup>23</sup> Yan meikka-pat ni aggew ey iappit yu hu hampulun kilaw ni lakkitun baka ya dewwan lakkitun kalneroh niya hampulut epat ni hantoon dan lakkitun kalneroh. Mahapul ni endi dipektoh da. <sup>24</sup> Huyyaddan animal ey meunnudan ni i-appit yun begah niya meinnum. <sup>25</sup> Man-appit kayu mewan ni lakkitun gelding tep ya liwat ma-lat ma-kal liwat yu. Hin-appil ngu dedan hu i-appit yun kagihheban meunnudan ni begah niya meinnum ni memengngulun aggew ni kabulabulan ey kewa-wa-wa.

<sup>26</sup> Yan meikkelliman aggew ey man-appit kayun heyam ni kilaw ni lakkitun baka, ya dewwan lakkitun kalneroh niya hampulut epat ni hantoon dan lakkitun kalneroh. Mahapul ni endi dipektoh da. <sup>27</sup> Humman idan animal ey meunnudan ni i-appit yun begah niya meinnum. <sup>28</sup> Man-appit kayu mewan ni lakkitun gelding tep ya liwat ma-lat ma-kal liwat yu. Hin-appil ngu dedan hu i-appit yun kagihheban meunnudan ni begah niya meinnum ni memengngulun aggew ni kabulabulan niyan kewa-wa-wa. Mahapul ni endi dipektoh da.

<sup>29</sup> Yan meikka-nem ni aggew ey man-appit kayun walun kilaw ni lakkitun baka, ya dewwan lakkitun kalneroh niya hampulut epat ni hantoon dan lakkitun kalneroh. Mahapul ni endi dipektoh da. <sup>30</sup> Humman idan animal ey meunnudan idan kamei-appit ni begah niya meinnum. <sup>31</sup> Man-appit kayu mewan ni lakkitun gelding tep ya liwat ma-lat ma-kal liwat yu. Hin-appil ngu dedan hu i-appit yun kagihheban meunnudan ni begah niya meinnum ni memengngulun aggew ni kabulabulan ey kewa-wa-wa.

<sup>32</sup> Yan meikkeppitun aggew ey man-appit kayun pitun kilaw ni lakkitun baka, dewwan lakkitun kalneroh ey hampulut epat ni hantoon dan lakkitun kalneroh. Mahapul ni endi dipektoh da. <sup>33</sup> Humman idan animal ey meunnudan idan kamei-appit ni begah niya meinnum. <sup>34</sup> Man-appit kayu mewan ni lakkitun gelding tep ya liwat ma-lat ma-kal liwat yu. Hin-appil ngu dedan hu i-appit yun kagihheban meunnudan ni kamei-appit ni begah niya meinnum ni memengngulun aggew ni kabulabulan niyan kewa-wa-wa.

<sup>35</sup> Yan meikkewwalun aggew ey kaemung idan emin tuu e endi manggunnun nunman ni aggew. <sup>36</sup> Huyyadda i-appit yun kagihheban mengipeamleng ni hi-gak: ya hakey ni kilaw ni lakkitun baka, ya hakey ni lakkitun kalneroh niya pitun hantoon dan lakkitun kalneroh. Mahapul ni endi dipektoh da. <sup>37</sup> Humman idan animal ey meunnudan idan kamei-appit ni begah niya meinnum.

<sup>38</sup> Man-appit kayu mewan ni lakkitun gelding tep ya liwat ma-lat ma-kal liwat yu. Mei-dum ida huyyad i-appit yun kagihheban meunnudan ni kamei-appit ni begah niya meinnum ni memengngulun aggew ni kabulabulan niyan kewa-wa-wa. <sup>39</sup> Emin ida huyyan ni mei-appit nunman ni piyestah ey hin-appil ngu dedan idad kamei-appit ni kagihheba, ya pagey, ya meinnum niya i-appit yun pekiddagyuman yun hi-gak e DIOS. Hin-appil mewan etan issapatah yu niya iggeb-at yun i-appit."

<sup>40</sup> Intugun Moses emin huyyan tugun APU DIOS idan helag Israel.

## 30

*Yadda meunnud meippanggep ni issapatah*

<sup>1</sup> Huyya intugun APU DIOS nan Moses ni e-helen tuddan kamengippangngulun helag Israel. <sup>2</sup> "Hedin insapatah ni hakey ni tuu e iddawat tu hu hipa nan APU DIOS ey mahapul ni pehding tu hu insapatah tu e eleg tu kekyata. \*

<sup>3</sup> Ya etan biin kamanha-ad di kad-an ametun mansapatah nan APU DIOS <sup>4</sup> ey anin ni dingngel ametu nem tuka pakdag i-ineng e eleg tu ikka-leg, ey mahapul ni pehding tu humman ni insapatah tu. <sup>5</sup> Nem hedin dingngel ametu ey eleg tu pinhed, ey dammutun anin ni eleg pehding etan ni bii humman ni insapatah tu. Pessinsahan APU DIOS humman ni bii tep ingka-leg ametun pehding tu hu insapatah tu.

<sup>6</sup> Hedin ya eleg mengahwan bii hu mansapatah anin ni kantu et nekannemnem tu winu eleg et mansapatah, ey entanni ey nengahwa <sup>7</sup> et neamtaan ni ahwa tu hu nansapatahan tu ey eleg tu ikka-leg, ey mannenneng hu insapatah tu. <sup>8</sup> Nem hedin eleg pinhed ni ahwa tu ey dammutun anin eleg tu ippahding humman ni insapatah tu, ey eleg ibbilang APU DIOS e bahul tu humman. <sup>9</sup> Hedin ya nebalu winu ya biin hini-yan ni ahwatu hu nansapatah ey mahapul ni pehding tu hu insapatah tun APU DIOS.

<sup>10</sup> Hedin nengahwa etan biin nansapatah ey nan-addum idan ahwatu, <sup>11</sup> ey neamtaan etan ni ahwa tu ey eleg tu ikka-leg, ey mahapul ni mannenneng hu insapatah tu.

\* 30:2 30:2 Matthew 5:33

<sup>12</sup> Nem hedin neamtaan ni ahwatu ey eleg tu pinhed, dammutun anin eleg tu ipphading humman ni insapatah tu ey eleg ibbilang APU DIOS ni bahul humman. <sup>13</sup> Wada kelebengan ni ahwatun mengikka-leg winu mengi-ebbulut ni pengippahdingan tun insapatah tu. <sup>14</sup> Nem hedin neamtaan ni ahwa tu ey kaum-i-ineng e eleg tu ikka-leg, ey mahapul ni pehding tu humman ni insapatah tu. Humman keang-angan tu e in-abulut tu hedin eleg tu ika-leg ni nunman ni aggew ni nanggelan tu. <sup>15</sup> Nem hedin nebaybayag et han tu ika-leg ey hi-gatu mekastigud eleg pengippahdingan etan ni biin insapatah tu.”

<sup>16</sup> Huyyadda hu inhel APU DIOS nan Moses meippanggep ni han-ahwan biin laki niya pehding ni hakey ni ama di biin u-ungnga tun eleg mengahwan kamekihha-ad di baley tu.

## 31

*Ya meippanggep ni nekigubatan ni helag Israel idan iMidian*

<sup>1</sup> Entanni ey kan APU DIOS nan Moses ey <sup>2</sup> “Kastigum ida tutu-ud Midian tep ya impahding daddan helag Israel. Hedin negibbuh ni impahding mu humman ey mettey ka law.”

<sup>3</sup> Et kan Moses ida etan ni tuu ey “Pandaddan kayun mekiggubbat e iehngeng yu hi APU DIOS et yudda gubaten hu iMidian et meibleh hu impahding da. <sup>4</sup> Mahapul ni hanlilibu hu melpud hanhakkey ni helag Israel.” <sup>5</sup> Et pumili idan hanlilibud emin idan helag ni u-ungngan Israel, et ya bilang dan emin ni an mekiggubbat ey hampulut dewwan libu.

<sup>6</sup> Intu-dak Moses ida humman ni sindalun impanguluddan Pinehas e u-ungngan Eleasar e padi e hi-gatu hu ngenamung ida etan ni neieng-eng ni usal, anin idan tangguyup ni ussalan dan mengippeamta hedin wada gubat.

<sup>7</sup> Et da ida iMidian meippuun di inhel APU DIOS nan Moses ni pehding da et patyen dan emin hu lalaksi, <sup>8</sup> anin etan idan liman patul diman e hi Ebi, hi Rekem, hi Sur, hi Hur et hi Reba. Ey nekipetey da hi Balaam e u-ungngan Beor. <sup>9</sup> Inla dadda bibi-idman ni bebley anin idan kaungaanga, yadda baka da, yadda kalneroh da niyaddan emin hu kinedangyan da, <sup>10</sup> et legaben da bebley da niyadda kampu da. <sup>11</sup> Inemung dan emin hu nan-ale dadman ni bebley, yadda tutu-u niyadda animal <sup>12</sup> et ienamut dan emin di kad-an Moses nan Eleasar e padi niyadda edum dan helag Israel etan di nangkampuan dad nandeklan di Moab e gilig ni Wangwang e Jordan e demang ni Jericho.

<sup>13</sup> An dinamud Moses, hi Eleasar e padi niyadda kamengipappangngulun helag Israel ida etan di a-allaw ni nangkampuan da. <sup>14</sup> Ey bimmunget hi Moses idan opisyal niyadda ap-apun sindalun nambanggad ni an nekigubat. <sup>15</sup> Kantun hi-gaday “Kele eleg yudda pateyen emin hu bibi-i?” <sup>16</sup> Hi-gada hu nengawis idan edum tayu et ngehayan da hi APU DIOS di Duntug e Peor tep inu-unnud da intugun Balaam ni hi-gada. Et humman himmulun et paelin APU DIOS hu degeh ni hi-gatsun tuu tu. <sup>17</sup> Pampatey yuddan emin hu lalakkin u-ungnga, anin idan bibi-in in-ulig ni laki. <sup>18</sup> Nem entan tudda patey hu bibi-in gegellang niya bibi-in eleg 1-ulig ni laki et alen yudda.

<sup>19</sup> Hi-gayun wada pinte yu winu kinepa tun annel ni netey ey panha-ad kayu nid a-allaw ni kampu tayun pitun aggew. Mahapul ni pehding yu hu elaw ni panlinnih anin idad balud yun meikkatlu niyan meikkeppitun aggew. <sup>20</sup> Mahapul mewan ni pehding yu hu elaw ni panlinnih idan balwasi yu winu kumpulmih ni nekapyad katat winu bewek ni gelding, anin idan nekapyad keyew.”

<sup>21</sup> Entanni ey kan Eleasar e padi etan idan lalakkin an nekigubat ey “Huyyadda hu inhel APU DIOS nan Moses ni u-unnuden tayu. <sup>22</sup> Emin ida eleg gihheba, henin balituk, silber, giniling, gumek, lata winu ihmay <sup>23</sup> ey mahapul ni pedellan yud apuy et han dammutun meibbillang ni malinih. Nem hedin yadda etan kagihheba ey mahapul ni ya danum ni euh hu ussalen yun panlinnih idan nunman. <sup>24</sup> Ya pehding yun meikkeppitun aggew ey ibalbal yu balwasi yu et maibilang kayun malinih et dammutun umhegep kayud kampu tayu.”

<sup>25</sup> Kan APU DIOS nan Moses ey <sup>26</sup> “Mahapul ni billangen yud Eleasar niyadda kamengipappangngulun tuu emin hu nealad gubat anin idan balud niyadda animal. <sup>27</sup> Ey gedwam et idwat muddan sindalu hu kagedwah niya idwat muddan tuu hu kagedwah. <sup>28</sup> Nem ya memengngulun pehding mu ey idwat mun hi-gak hu patal kuddan balud, yadda baka, kebayyu, kalneroh niyadda gelding e meellad patal idan sindalu. Appil mu hu hakey di hanlilimanggatut et humman mei-eng-eng ni hi-gak. <sup>29</sup> Idwat mudda huyyan patal kun Eleasar e padi et iappit tun hi-gak e DIOS. <sup>30</sup> Hedin yadda etan meidwat ni tutu-u ey iddawat dan hi-gak hu hakey di hannaneliman balud, yadda baka, kebayyu, kalneroh niyadda gelding. Ellan idan helag Levi e kamampaptek ni Tabernacle huyya.” <sup>31</sup> Inu-unnud di Moses nan Eleasar hu inhel APU DIOS et ipahding

da. <sup>32</sup> Heninnuy hu bilang ni inladdan sindalu: Yadda lakkitun kalneroh ey 675,000, <sup>33</sup> yadda bulug ni baka ey 72,000, <sup>34</sup> yadda lakkitun kebayyu ey 61,000.

<sup>35</sup> Yadda biin balud ni eleg iulig ni laki ey 32,000. <sup>36</sup> Ya kagedwah ni neidwat idan sindalun nekigubat ey 337,500 ni kalneroh, <sup>37</sup> ya neidwat nan APU DIOS ey 675 <sup>38</sup> yadda baka ey 36,000 ey neidwat nan APU DIOS hu 72, <sup>39</sup> yadda kebayyu ey 30,500 ey neidwat nan APU DIOS hu 61, <sup>40</sup> yadda balud ni biin eleg iulig ni laki ey 16,000 ey neidwat nan APU DIOS hu 32. <sup>41</sup> Indawat Moses nan Eleasar e padi hu bingay APU DIOS meippuun di intugun tu.

<sup>42</sup> Ya inappil Moses ni meidwat idan tutu-u ey <sup>43</sup> 337,500 ni kalneroh, <sup>44</sup> 36,000 ni baka, <sup>45</sup> 30,500 ni kebayyu <sup>46</sup> niya 16,000 ni biin eleg iulig ni laki. <sup>47</sup> Inlan Moses hu hanhakey di hannaneliman balud niyadda animal et idwat tuddan helag Levi e kamengippaptek ni Tabernacle APU DIOS. Neipahding emin huyya meippuun di intugun APU DIOS nan Moses ni pehding tu.

<sup>48</sup> Entanni ey limmaw ida opisyal niyadda aap-apun sindalud kad-an Moses <sup>49</sup> et kanday "Apu, binilang min emin ida sindalu mi ey wadaddan emin. Endi neendi anin hakey. <sup>50</sup> Et humman hu in-ali midda inla mid gubat ni balituk ni kameihhuklub di ngamay, yadda singsing, yadda betling niyadda banggel et iappit min APU DIOS ma-lat pengipeangang min mika pansalamati, tep endin hekey hu netey ni hi-gami."

<sup>51</sup> Et amungen di Moses nan Eleasar e padi humman ni in-aliddan sindalun balituk ni tenged. <sup>52</sup> Ya bel-at idan nunman ni balituk ni in-appit idan aap-apun sindalu nan APU DIOS ey umlaw ni dewanggatut ni kiloh. <sup>53</sup> Emin ida sindalu ey inla da patal da etan idad inla dad gubat. <sup>54</sup> Inlad Moses nan Eleasar etan ida balituk ni indawat idan ap-apun sindalu et ilaw dad Tabernacle et penginemnenneman APU DIOS e tuu tudda hu helag Israel.

## 32

### *Yadda helag Israel ni wadad Jordan di appit ni kasimmilin aggew*

<sup>1</sup> Yadda helag di Reuben nan Gad ey dakel ni peteg animal da. Et yan nenang-angan da e kayyaggud hu Jaser et ya Gilead ni pampattulan dan animal da <sup>2</sup> ey limmaw idan Moses nan Eleasar e padi niyadda edum ni kamengipappangngulun helag Israel et kandan hi-gaday <sup>3-4</sup> "Hi-gamin bega-en yu ey dakel animal mi. Ey kayyaggud ni pampattulan ida bebley di Atarot, ya Dibon, ya Jaser, ya Nimrah, ya Hesbon, ya Elealeh, ya Sibmah, ya Nebo niya Beon e sinekup tayu tep ya baddang APU DIOS ma-lat pambebleyan tayun helag Israel. <sup>5</sup> Idwat yudda anhan ida humman ni bebley ni hi-gami et anin ni eleg kami meagwat di Jordan."

<sup>6</sup> Kan Moses ey "Kaw hedin ya pinhed yu ey manha-ad kayudya et yadda edum yun helag Israel ni ebuh hu man-agwat di Jordan et hi-gada makigubat? <sup>7</sup> Hedin heni nuntan pehding yu ey dismayahen yudda edum yun man-agwat ni umlaw di bebley ni indawat APU DIOS ni hi-gada? <sup>8</sup> Henin nuntan tu-wangu impahding idan aammed yu eman ni nengitu-dakak idad Kades Barnea et da ang-angen humman ni bebley. <sup>9</sup> Limmaw ida et meipappeg idad Nedeklan e Eskol, nem entannit nambangngad ida ey dinismayah dadda edum dan helag Israel ni umlaw di bebley ni indawat APU DIOS ni hi-gada. <sup>10</sup> Et umhulun humman ni impahding da ey bimmunget hi APU DIOS et isapatah tu <sup>11</sup> e kantuy 'Issapatah ku e emin ida hu dewampulu toon tu winu nehuluk ni neni-yan ni Egypt, ey endi an umdateng ni hi-gadad bebley ni inhel kun Abraham, hi Isaac et hi Jacob ni iddawat kun hi-gada. <sup>12</sup> Ebuhi hi Kaleb e u-ungngan Jephunneh e Kenissite et hi Joshua e u-ungngan Nun ni umdateng diman tep naka-u-unnud da hi APU DIOS.' <sup>13</sup> Humman idan helag Israel ey limmeniklikweh idad eleg mebebleyin na-pat ni toon ingganah netey idan emin hu naniwat nan APU DIOS tep nemahhig bunget tun hi-gada.

<sup>14</sup> Ey itten kayu mewan ni nekalliwtan ni tuun pinhed yun ippahding hu henin impahding ida lan aammed yu! Yuka panma-maa bunget APU DIOS ni hi-gayun helag Israel. <sup>15</sup> Hedin eleg yu mewan u-unnuda hi APU DIOS, hi-gayuddan helag Reuben niyadda helag Gad et umbunget et iwwaleng daitu eyad eleg mebebleyi ey hi-gayu kambahul ni kebahbahan tayu."

<sup>16</sup> Nem kandan Moses ey "Hedin ya pinhed min pehding ey mengapya kamin pengikkubkuban min kalneroh mi ey hammaden min luhhuden eya bebley et panhadan idan ahwa mi niyadda u-ungnga mi. <sup>17</sup> Et hedin negibbuh, ey iddaddan mi almas mi et ipengulu midda edum min helag Israel ni an mekiggubbat ingganah melinggep idan mambebley di bebley ni meidwat ni hi-gada. Ey melinggep ida dama pamilyah mi eyad bebley ni hammaden min luhhuden tep endi pekahgep ni tuun an mengubbat ni hi-gada. <sup>18</sup> Eleg kami um-anemut ingganah ellan idan edum min helag Israel emin hu

beltanen dan puyek da. <sup>19</sup> Anin ni endi meidwat ni hi-gamin puyek di ba-hil ni Jordan. Pinhed min mambebley eyad appit ni kasimmilin aggew ni neitudun beltanen mi.”

<sup>20</sup> Kan Moses ey “Hedin makulug ni pehding yu hu inhel yu et mandaddan kayun mekiggubbat ma-lat iehnung yu hi APU DIOS, <sup>21</sup> niya hedin man-agwat ida sindalu yu et ipengulun APU DIOS idan mengubbat ni buhul tayu ingganah degyunen tudda, <sup>22</sup> ey dammutun mambanggad kayu tep impahding yu hu lebbeng tun pehding tun pengunnudan yun APU DIOS, ey impahding yu hu lebbeng tun pemaddang yuddan aaggi tayun helag Israel. Ey dammutu law ni mambebley kayu eyad bebley ni appit ni kasimmilin aggew di Jordan ni iddawat APU DIOS ni hi-gayu. <sup>23</sup> Nem hedin eleg yu ippahding huttan ni inhel yu ey manliwat kayun APU DIOS. Et humman hu ang-ang yu kuma tep makulug ni mekastigu kayu hedin manliwwat kayu. <sup>24</sup> Anin pengapya kayun baballey yu niya pengikkubkuban yuddan kalneroh yu nem mahapul ni pehding yu hu inhel yu.”

<sup>25</sup> Kan idan helag Reuben niyadda helag Gad ey “Hi-gamin bega-en mu ey u-unnuden ni inhel mu. <sup>26</sup> Manha-ad idadya Gilead hu ahwa mi, yadda u-ungnga mi niyadda animal mi, <sup>27</sup> nem hedin hi-gamin lalakki ey mandaddan kamin mekiggubbat e hi APU DIOS mengippengngulun hi-gami. U-unnuden mi inhel mun man-agwat kamid Jordan et kami makigubat.”

<sup>28</sup> Intugun Moses nan hi Eleasar, hi Joshua et yadda kamengipappangngulun tuu e kantuy <sup>29</sup> “Hedin man-agwat ida helag Gad niyadda helag Reuben di Jordan et mekillaw idan hi-gayun an mekiggubbat e ippangulu dakeyun APU DIOS, ey hedin sinekup yun emin hu bebley ey idwat yun hi-gada Gilead et pambebleyan da. <sup>30</sup> Nem hedin eleg da pinhed ni mekillaw ni hi-gayun an mekiggubbat ey yad bebley di Kanaan hu pekibbingngayan dan pambebleyan da.”

<sup>31</sup> Kan idan helag Gad niyadda helag Reuben ey “Apu, u-unnuden mi intugun APU DIOS. <sup>32</sup> Ihhammad min man-almas et man-agwat kamid Jordan et lumaw kamid Kanaan et kami makigubat et iehnung mi hi APU DIOS, nem huyyan ba-hil ni Jordan hu beltanen mi.”

<sup>33</sup> Et idwat Moses idan helag Reuben, yadda helag Gad niyadda kagedwah ni helag Manasseh e u-ungngan Joseph hu bebley Sihon e patul idan Amorite, ya bebley Og e patul di Basah niyaddan emin hu nanlinikweh ni bebley diman.

<sup>34</sup> Inyayyaggud idan helag Gad hu bebley di Dibon, ya Atarot, ya Aroer, <sup>35</sup> ya Atrot-Sophan, ya Jaser, ya Jogbehah, ya <sup>36</sup> Bet Nimrah et ya Bet Haran. Et nehammad law ni neluhud ni tuping ida humman ni bebley ey wadadda pengikkubkuban dan animal da.

<sup>37</sup> Inyayyaggud ida daman helag Reuben hu bebley di Hesbon, ya Elealeh, ya Kiriathaim, <sup>38</sup> ya Nebo, ya Baal Meon niya Sibmah. Hinullulan da ngadan idan edum ni bebley ni sinekup da et iyayyaggud da.

<sup>39</sup> Yadda helag Makir e u-ungngan Manasseh ey sinekup da Gilead et degyunen dadda Amorite ni nambebley diman. <sup>40</sup> Et idwat nan Moses hu Gilead idan helag Makir e u-ungngan Manasseh et mambebley idadman. <sup>41</sup> Yadda etan edum ni bebley di Gilead ey sinekup ni helag Jair e helag daman Manasseh et hullulan da ngadan da et ngadnan dan Bebley Jair. <sup>42</sup> Hi Nobah ey ginubat tu et sakupen tu Kenat niyadda nanlinikweh ni bebley diman et ngadnan tun Nobah.

### 33

*Yadda nangkampuan idan helag Israel eman ni inlian dad Moab ni nalpuan dad Egypt*

<sup>1</sup> Huyyadda neitudek ni ngadan idan nangkampuan idan helag Israel eman ni nalpuan dad Egypt e di Moses nan Aaron nengipengulun hi-gada. <sup>2</sup> Intudek Moses hu ngadan idan nunman ni nangkampuan da tep humman hu inhel APU DIOS ni pehding tu. Huyyadda dindinlan da e meamtrad nangkampuan da.

<sup>3</sup> Hini-yan idan helag Israel hu bebley di Rameses di Egypt eman ni meikkahampulut liman aggew ni nemangulun bulan ni newa-waan ni nelabhan ni Anghel APU DIOS. Yan neni-yanan idan helag Israel ni nunman ni bebley ey kaang-ang-angaddan tuudman ida. <sup>4</sup> Yan nunman daman aggew ey daka pan-ikkulung hu pengulwan ni u-ungnga dan pintey APU DIOS. Humman ni impahding APU DIOS hu nengipeang-angan tu e et-eteng kabaelan tu nem yadda dios di Egypt.

<sup>5</sup> Hini-yan idan helag Israel hu Rameses et lumaw idad Sukkot et mangkampuddadman.

<sup>6</sup> Entanni et lumaw idad Etham di gilig ni eleg mebebleyi et mangkampuddadman.

<sup>7</sup> Hini-yan da Etham et ibabbangngad da et ilikweh dad Pi Hahiroth e demang ni Baal-Sephon et mangkampuddad Migdol. <sup>8</sup> Hini-yan da Pi Hahiroth et man-agwat idad Madlang ni Baybay et lumaw ida etan di eleg mebebleyi. Nandalan idan tellun aggew et dumteng idad Marah et mangkampuddadman. <sup>9</sup> Hini-yan da humman et lumaw

idad Elim et mangkampudda mewan diman tep wada hampulut dewwan hebwak niya nepitun palmah diman. <sup>10</sup> Hini-yan da humman et ida mangkampuddad gilig ni Madlang ni Baybay. <sup>11</sup> Hini-yan da humman et lumaw idad Sin e eleg mebebleyi et mangkampuddadman.

<sup>12</sup> Entanni ey limmaw idad Dopkah et mangkampuddadman. <sup>13</sup> Hini-yan da Dopkah et ida mangkampud Alus. <sup>14</sup> Entanni ey nampalaw idad Rehidim et endi innumen ni danum et mangkampuddadman. <sup>15</sup> Hini-yan da humman et mampalaw idad Sinai e eleg mebebleyi et mangkampuddadman. <sup>16</sup> Hini-yan da humman et ida mangkampud Kibrot Hattaabah. <sup>17</sup> Entanni ey limmaw idad Haserot et mangkampuddadman. <sup>18</sup> Hini-yan da Haserot et ida mangkampud Ritmah. <sup>19</sup> Hini-yan da humman et mangkampuddad Rimmon Peres.

<sup>20</sup> Entanni ey limmaw idad Libnah et mangkampuddadman. <sup>21</sup> Limmaw idad Rissah et mangkampuddadman. <sup>22</sup> Entanni ey nampalaw idad Kehelathah et mangkampuddadman. <sup>23</sup> Hini-yan da humman et mampalaw idad Duntug e Sepher et mangkampuddadman. <sup>24</sup> Hini-yan da humman et ida mangkampud Haradah. <sup>25</sup> Limmaw idad Makhelot et mangkampuddadman. <sup>26</sup> Hini-yan da humman et ida mangkampud Tahat. <sup>27</sup> Hini-yan da Tahat et ida mangkampud Terah. <sup>28</sup> Hini-yan da Terah et ida mangkampud Mitkah.

<sup>29</sup> Entanni et lumaw idad Hasmonah et mangkampuddadman. <sup>30</sup> Hini-yan da humman et ida mangkampud Moserot. <sup>31</sup> Nampalaw idad Bene Jaakan et ida mangkampudman. <sup>32</sup> Entanni et lumaw idad Hor Haggidgad et mangkampuddadman. <sup>33</sup> Hini-yan da humman et ida mangkampud Jobathah. <sup>34</sup> Hini-yan da humman et ida mangkampud Abronah.

<sup>35</sup> Entanni et lumaw idad Esion Geber et ida mangkampudman. <sup>36</sup> Nampalaw idad Kades di kad-an ni Sin e eleg mebebleyi et mangkampuddadman.

<sup>37</sup> Entanni et mampalaw idad Duntug e Hor di pappeg ni Edom et ida mangkampudman.

<sup>38</sup> Yan nunman ni kaweda da etan di hengge ni duntug ey inhel APU DIOS nan Aaron e mantetyed di ta-pew nunman ni duntug et matey diman. Neipahding huuya eman ni nangginawwa hu siyaggew ni meikka-pat ni pulun toon neipalpun neni-yanan idan helag Israel ni Egypt. <sup>39</sup> Ey yan nunman ni neteyyan Aaron ey hanggatut et dewampulut tellu toon tu. <sup>40</sup> Ey yan nunman hu nanggelan Arad e patul di Kanaan e kamengelidda helag Israel e ida kamangkeihnap di bebley tu.

<sup>41</sup> Hini-yan da Duntug e Hor et ida mangkampud Salmonah. <sup>42</sup> Hini-yan da Salmonah et ida mangkampud Punon. <sup>43</sup> Hini-yan da Punon et ida mangkampud Obat.

<sup>44</sup> Entanni ey limmaw idad Iye Abarim di pappeg ni Moab et mangkampuddadman.

<sup>45</sup> Hini-yan da humman et ida mangkampud Dibon Gad. <sup>46</sup> Hini-yan da humman et ida mangkampud Almon Diblathaim.

<sup>47</sup> Entanni et lumaw idad duntug di Abarim e neihnap di Duntug e Nebo et mangkampuddadman. <sup>48</sup> Hini-yan da humman et ida mangkampud nandekan di Moab e gilig ni Wangwang e Jordan e demang ni Jericho. <sup>49</sup> Nedagdagsi hu kakampu dadman di gilig ni Wangwang e Jordan neipalpu Bet Jeshimot ingganah di Abel Sittim.

<sup>50</sup> Immehel hi APU DIOS nan Moses di diman e kantuy <sup>51</sup> "Ehel muddan helag Israel e hedin man-agwat ida eyad Wangwang e Jordan et umlaw idad Kanaan <sup>52</sup> ey mahapul ni degyunen daddan emin hu nambbley diman. Ey mahapul ni bahbaha dan emin hu kinapya dan dios da anin idan baley nunman idan dios da. <sup>53</sup> Pambebleyan dadda humman ni bebley tep indawat kudda humman ni hi-gada. <sup>54</sup> Ya pehding mun mengikka-peng nunman ni puyek ey ibubunut yu. Ya kelakkeb tu ey meippuun di kedakkel idan pengidwatam. Ya melallakkeb ni puyek hu meidwat idan daddakkel bilang da ey beken ni melakkeb hu meidwat idan ekket bilang da. Hedin hipa binunut da, man humman beltanen dan puyek, eleg mabalin ni mehullulan. Hanneya hu ipahding yun helag Israel ni mengikka-peng ni puyek. <sup>55</sup> Nem hedin eleg yudda degyuna hu nambbley diman ey mambalin idallin heni butad mateyu winu heniddalli hebit. Iddawtan dakeyullin panligligatan yudman ni pambebleyan yu. <sup>56</sup> Ey kastiguen dakeyu henin implanuh kun pehding kun hi-gada."

## 34

### *Ya pappeg ni Kanaan*

<sup>1</sup> Huyyadda inhel APU DIOS ni ittugun Moses idan helag Israel: <sup>2</sup> "Eleg mebaying ey umlaw kayud bebley di Kanaan e humman hu bebley ni iddawat kun hi-gayun beltanen yu ey huyyadda pappeg tu: <sup>3</sup> Ya pappeg tud appit ni south ey meipalpu Sin e eleg mebebleyi di pappeg ni Edom. Ya pappeg tud appit ni kasimmilin aggew ey meipalpu Netey ni Baybay. <sup>4</sup> Neliked di appit ni south e melebbahan hu Scorpion

Pass et mampalaw di Sin ingganah di Kades Barnea. Mampellaw mewan di Hasar Addai ingganah di Asmon. <sup>5</sup> Meippalpuw Asmon et maliked di wangwang di Egypt et meipappeg di Baybay e Mediterranean. <sup>6</sup> Ya pappeg tud appit ni kakelinnugin aggew ey yad gilig ni Baybay e Mediterranean. <sup>7</sup> Ya pappeg tud appit ni north ey meippalpuw Baybay e Mediterranean, et mampalaw di appit ni kasimmilin aggew di Duntug e Hor <sup>8</sup> ingganah di Lebo Hamat et mampalaw di Sedad, <sup>9</sup> niyad Sipron ingganah di Hasar Enan. Huyyadda pappeg ni bebley yud appit ni north. <sup>10</sup> Ya pappeg tud appit ni kasimmilin aggew ey meippalpuw Hasar Enan, et mampalaw di appit ni south di Sepham, <sup>11</sup> ey nampedayyud Riblah di appit ni kasimmilin aggew di Ain. Meippalpuwman et mampedayyud gilig ni Baybay e Galilee di appit ni kasimmilin aggew, <sup>12</sup> ey inunud tu hu Wangwang e Jordan ingganah di Netey ni Baybay. Huttan emin hu pappeg ni bebley yu."

<sup>13</sup> Kan Moses idan helag Israel ey "Humman idan bebley hu panggedwaan yun ibubunut yu. Yadda mangededwan nunman ni bebley ey yadda etan heyam et kagedwah ni helag Israel e humman dedan la hu intudun APU DIOS ni hi-gada. <sup>14</sup> Hedin yadda helag Reuben, yadda helag Gad niyadda kagedwah ni helag Manasseh, ey neidwatan ida dedan law ni puyek da et genedwaen da meippuun di pamilyah da. <sup>15</sup> Yadda bebley ni nangededwaan da, ey yaddad gilig ni Wangwang e Jordan di appit ni kasimmilin aggew e demang ni Jericho."

#### *Yadda etan aap-apun nengenedwa etan ni puyek*

<sup>16</sup> Entanni ey kan APU DIOS nan Moses ey <sup>17</sup> "Yadda mangedwa etan ni puyek ey di Eleasar e padi nan hi Joshua e u-ungngan Nun. <sup>18</sup> Ey ayagi yu hanhakkey idad helag Israel ni memaddang ni hi-gada. <sup>19</sup> Huyyadda ngadan da: hi Kaleb e u-ungngan Jephunneh di helag Judah, <sup>20</sup> hi Semuel e u-ungngan Ammihud di helag Simeon, <sup>21</sup> hi Elidad e u-ungngan Kison di helag Benjamin, <sup>22</sup> hi Bukki e u-ungngan Jogli di helag Dan, <sup>23</sup> hi Hanniel e u-ungngan Ephod di helag Manasseh e u-ungngan Joseph, <sup>24</sup> hi Kemuel e u-ungngan Siptan e helag Ephraim e u-ungngan Joseph, <sup>25</sup> hi Elisaphan e u-ungngan Parnak di helag Sebulun, <sup>26</sup> hi Paltiel e u-ungngan Ashan di helag Issakar, <sup>27</sup> hi Ahihud e u-ungngan Selomi di helag Asher <sup>28</sup> et hi Pedahel e u-ungngan Ammihud di helag Naphtali." <sup>29</sup> Huyyadda tuun pinilin APU DIOS ni menang-ang ni kegnedwaan ni Kanaan et ika-peng idan helag Israel.

## 35

#### *Ya bebley ni neidwat idan helag Levi*

<sup>1</sup> Yan eman ni wadadda pay nid nandeklan di Moab di gilig ni Jordan e demang ni Jericho ey kan APU DIOS nan Moses ey <sup>2</sup> "Ehel muddan helag Israel e iddawtan dadda helag Levi ni pambebleyan dan meunnudan ni kudal. <sup>3</sup> Meidwat ni hi-gada humman idan bebley ma-lat pambebleyan da niya pampattulan dan baka da, yadda kalneroh da niya edum ni animal da. <sup>4</sup> Ya kalinakkeb ni pampattulan da meippalpuw luhud di nanlinikweh di hanhakkey etan idad bebley ni meidwat ni hi-gada ey limanggatut ni metroh. <sup>5</sup> Ya kalinakkeb etan ni kuwadladuh di nambina-hil ey ngannganih ni hanlibun metroh, ey meiggawwadman hu et-eteng ni bebley. <sup>6</sup> Ya bilang ni bebley ni iddawwat yun hi-gadan helag Levi ey na-pat et dewwa, niya idwat yu hu enem ni bebley ni keihhikkugan ni tuun pimmatey nem eleg tu igeb-at. <sup>7</sup> Ya bilang emin ni bebley ni iddawwat yun hi-gada ey na-pat et walu e neunnudan idan kudal. <sup>8</sup> Ya bilang ni bebley ni iddawwat ni hanhakkey idan helag Israel idan aaggi dan helag Levi ey meippuun di kalinakkeb ni puyek ni meidwat ni hi-gada."

#### *Yadda etan bebley ni keihhikkugan*

<sup>9</sup> Huyya mewan hakey ni inhel APU DIOS nan Moses <sup>10</sup> ni ittugun tuddan helag Israel: "Hedin man-agwat kayud Wangwang e Jordan et umlaw kayud Kanaan, <sup>11</sup> ey pili kayun bebley ni keihhikkugan ma-lat yadman bebsikan ni tuun pimmatey nem eleg tu igeb-at. <sup>12</sup> Huyya pehdng yu ma-lat endi inna-nuddan aaggin pintey tun mengibleh. Ya tuun pimmatey ey eleg mabalin ni meippepettey hedin eleg ni meihuhummangan di hinangggadan bimbebley. <sup>13</sup> Putuk yu enem ni bebley ni keihhikkugan, <sup>14</sup> tellud appit ni kasimmilin aggew di Wangwang e Jordan ey tellud Kanaan di appit ni kakelinnugin aggew. <sup>15</sup> Humman idan bebley hu keihhikkugan idan helag Israel, yadda hansinu-wan ni nekibebley ni hi-gayu niya anin ni hipan tuun pimmatey ni eleg tu igeb-at. <sup>16-18</sup> Nem hedin wada inusal etan ni pimmatey ni tuun nematey tu, henin gumekek, batu winu keyew, ey meibbillang humman ni tuun pimmatey. Et humman hu mahapul ni mekastigu et

matey. <sup>19</sup> Ngenamung ida agi etan ni netey ni mengibleh ni memettey ni nunman ni pimmatey. Et hedin ha-kupan da, petteyen da.

<sup>20</sup> Hedini ya hakey ni tuu ey anggebe-hel tu hu edum tun tuu et ittuldun tu winu tegmilan tu <sup>21</sup> winu duntuken tu et matey ey meibbillang humman ni tuun pimmatey. Mahapul ni mekastigun katey. Ya etan neihnpun ni agin netey hu an memettey nunman ni pimmatey. <sup>22-23</sup> Nem hedini kantu et intuldun ni hakey ni tuu hu edum tun tuu winu imbekah tu batu winu inggah tu batu et metegmilan etan tuu et matey, nem eleg tu igeb-at niya beken tun anggebe-hel, ey eleg mebehhuli etan pimmatey. <sup>24</sup> Hedini wada hanniman, ey eleg ibbilang idan bimbley ni huwet ni nambahul etan tuun nengipahding nunman niya eleg da ibbilang lebbeng tun ibbaleh idan agi etan ni netey. <sup>25</sup> Mahapul ni angangen idan bimbley et eleg patyen idan agi etan ni netey humman ni pimmatey. Nem mahapul ni itu-dak da etan di bebley ni panha-adan tun keihhikkugan tu. Manhad law diman ingganah ketteyyan etan ni keta-ta-geyyan ni padi. <sup>26</sup> Nem hedini meukkat etan pimmatey diman <sup>27</sup> et angangen idan neihnpun ni agi etan ni netey et patyen da, ey eleg mekastigu humman ni nematey ni hi-gatu. <sup>28</sup> Ya etan tuun pimmatey nem eleg tu igeb-at ey mahapul dedan ni mannenneng ni mambbley di bebley ni keihhikkugan ingganah mettey etan keta-ta-geyyan ni padi, et han law dammutun mambanggad di bebley da. <sup>29</sup> Huyyaddan tugun ey mahapul ni u-unnuden yun ingganah anin idan helag yu niya anin ni attu pambebleyan yu.

<sup>30</sup> Ya etan tuun pimmatey tep pinhed tun umpatey winu umhulun hu bunget tu, ey mekastigun katey hedini wadadda tistigun mengi-uh-uh ni impahding tu. Eleg mabalin ni mekastigu hedini hakey ni ebuh hu mantistigu. <sup>31</sup> Ya etan tuun pimmatey tep pinhed tun umpatey winu umhulun hu bunget tu, ey mahapul nisin mekastigun katey. Eleg mabalin ni mambeyyad et melibilih di kastigu tu. <sup>32</sup> Eleg mewan mabalin ni mambeyyad et melibilih hu hakey ni pimmatey ni bimmesik di bebley ni keihhikkugan ma-lat dammutun mambanggad ey eleg ni matey etan keta-ta-geyyan ni padi. <sup>33</sup> Tep hedini i-abulut yun ippahding ni pimmatey humman ey mehibit hu bebley ni panha-adan yu. Et humman hu, mahapul ni pepettey yu etan pimmatey tep humman ni ebuh dammutun panlannah yun nehibit ni bebley. <sup>34</sup> Entan tu hibit hu bebley ni yu pambebleyan tep hi-gak e Dios yu ey mekibbebleyyak ni hi-gayun helag Israel."

## 36

### *Ya beltanen ni nengahwan bii*

<sup>1</sup> Limmaw ida hu kamengippangngulun pamilyah idan helag Gilead e u-ungngan Makir e u-ungngan Manasseh e u-ungngan Joseph di kad-an Moses niyadda edum ni aap-apu <sup>2</sup> et kanday "Intugun APU DIOS e ibinnunut hu pengennedwaam ni puyek et ika-peng min helag Israel. Intugun tu pay e iddawwat mu puyek agi mi e hi Selophehad idan biin u-ungnga tu. <sup>3</sup> Nem intugun tu e hedini ya edum ni pewen hu peki-ahwaan da man ulaw etan beltanen dan puyek di nengapun hi-gada. Et hedini hanniman meippahding ey me-kalan law hu puyek ni meidwat ni hi-gami. <sup>4</sup> Ey hedini nedatngan hu toon ni pengibbangngadan ni hipan ginatang di nengatngan, ey meibbangngad di sigud ni kampuyek, et ya etan puyek Selophehad ni bineltan idan biin u-ungnga tu, ey mei-dum ali law di puyek idan nekiahwaan da et pampuyek dallin ingganah et me-kalan law puyek ni helag mi."

<sup>5</sup> Et itugun Moses idan tuu hu inhel APU DIOS e kantuy "Neiptek hu inhel idan helag Manasseh. <sup>6</sup> Heninnuy hu intugun APU DIOS meippanggep idan bibi-in u-ungngan Selophehad: Anin ni mampilliddan pinhed dan ahwaan, nem mahapul ni ya edum dan helag Manasseh hu ahwaan da, <sup>7</sup> ma-lat mannananeng di pewen da hu puyek ni beltanen da. Mahapul ni wada hakkey ni hi-gayun helag Israel ey mannananeng hu puyek ni beltanen yu. <sup>8</sup> Et humman hu, emin hu bibi-in helag Israel ni wada beltanen tun puyek, ey mahapul ni mengahwad pewen da ma-lat eleg ma-kalan hu puyek ni bineltan idan hanhakkey ni helag Israel, ey ma-lat mannananeng di helag da hu bineltan da. <sup>9</sup> Hanniman ipahding yu ma-lat eleg lumaw di edum ni pewen hu bineltan da nem mannananeng ni hi-gada."

<sup>10</sup> Inu-unnud idan u-ungngan Selophehad hu intugun APU DIOS nan Moses ni pehding da, <sup>11</sup> et emin ida e hi Mahla, hi Tirsah, hi Hogleh, hi Milkah et hi Noah ey inahwa da hu lalakkin agi dan u-ungngan agin amedan <sup>12</sup> helag Manasseh e u-ungngan Joseph. Et mannananeng ni hi-gadan pewen hu puyek ni bineltan da.

<sup>13</sup> Huyyadda intugun APU DIOS nan Moses et itugun tudda daman edum tun helag Israel eman ni nangkampuan dad nandeklan di Moab di giligi ni Wangwang e Jordan ey demang ni Jericho.

## Deuteronomy

### *Ya meippanggep nunyan liblul ni Deuteronomy*

Huyyan liblul hu neitudekan ni nanggillig ni intugun Moses idan helag Israel. Impangulu tudda huyyan helag Israel eman ni limmeniklikwehan dad endi bebley ni na-pat ni toon. Yan nunyan tsimpuh ey dimmateng idad Nandeklan di Moab e demang ni gilig ni Kanaan e bebley ni insapatah APU DIOS ni iddawat tun hi-gada.

Inamtan Moses e ngannganih law ketteyyan tu et ihammad tun itugun idan edum tun Hebrew e mahapul ni pinheden da niya u-unnuden da hi APU DIOS ey impenemnem tun hi-gada hu et-eteng ni impeminhed APU DIOS ni hi-gada. (4:37, 6:4-5, 7:6-8, 10:12-13, 11:1 et yad 30:6)

Huyyan impeminhed tun hi-gada ey neipeamtaddad tugun et yad nekitbalan tun hi-gada. Hedin u-unnuden da nekitbalan tun hi-gada et yadda tugun tu ey bendisyonan tuddad Kanaan e iddawat tun pambebleyan da. Nem hedin ngenghayen da, man kastiguen tudda. (7:9-15 et yad 30:15-20)

### *Yadda neitudek eyad liblul:*

1. Impenemnem nan Moses hu nanliklikwehan idan helag Israel di endi bebley. (chapters 1-4)
2. Impidwan Moses ni inhel ida intugun APU DIOS idan helag Israel. (chapters 5-26)
3. Ya nekitbalan APU DIOS idan helag Israel. (chapters 27-30)
4. Ya nanggillig ni intugun Moses idan helag Israel et ya a-appeh tun penaydayaw tun APU DIOS. (chapters 31-32)
5. Ya nanghelan Moses ni bendisyon nan APU DIOS idan Hampulut Dewwan helag Israel. (chapter 33)
6. Ya neteyyan nan Moses. (chapter 34)

### *Ya neni-yanan idan helag di Sinai*

<sup>1</sup> Huyyan liblul hu neitudekan idan inhel Moses idan helag Israel eman ni wadaddad eleg mebebleyi di appit ni kasimmilin aggew di Wangwang e Jordan. Nangkampuddad man di Nedeklan e Jordan e neihnup di Sup e nambattanan ni Paran et yadda bebley ni Tophel, Laban, Haserot et ya Disahab. <sup>2</sup> (Ya ustuh dedan ni bilang ni aggew ni pandellanan meipalput Duntug e Sinai ingganah di Kades Barnea hedin iddalan di Duntug e Seir ey hampulun hakey ni aggew.)

<sup>3</sup> Yan eman ni nemangulun aggew ni meikkahhampulun hakey ni bulan ni meikkana-pat ni toon neipalpun nalpuan dad Egypt, ey inhel Moses emin hu intugun APU DIOS idan edum tun helag Israel. <sup>4</sup> Yan nunman ey negibbuh ni impeapput APU DIOS hi Sihon e patul idan Amorite ni nan-ap-apid Hesbon, et hi Og e patul di Bashan e nan-ap-apid Astarot et yad Edrei. <sup>5</sup> Intuttuddun Moses idan helag Israel hu meippanggep idan nunman ni tugun Apu Dios eman ni wadaddad Moab di appit ni kasimmilin aggew di Wangwang e Jordan.

<sup>6</sup> Kantun hi-gaday "Yan eman ni kaweda tayud Duntug e Sinai ey kan APU DIOS tayuy 'Nebayag kayu law ni nanha-ad di deya. <sup>7</sup> Bukal yu kampu yu et lumaw kayud duntuduntug ni bebley idan Amorite, yaddad nanlinikweh ni bebley diman, yad nandeklan di Jordan, yaddad bebley di duntug, yaddad nedeklan ni bebley di appit ni kakelinnugin aggew, di Negeb et yaddad bebley ni wadad gilig ni Baybay e Mediterranean. Ey elaw kayud Kanaan ey labhi yudda duntug di Lebanon ingganah di Wangwang e Euphrates. <sup>8</sup> Huyyadda hu bebley ni insapatah kun iddawat kuddan aammed yu e di Abraham, hi Isaac et hi Jacob et yadda helag da. Elaw kayu et yu pambebleyan.' "

### *Ya nampilyan Moses ni mengipappangguluddan helag Israel*

<sup>9</sup> Kan Moses idan etan ni tuu "Yan wada itu pay nid Duntug e Sinai ey inhel kun hi-gayu e eggak kabaelan ni mengippaptek ni hi-gayun emin. <sup>10</sup> Tep impedakkel dakeyun AP-APU e Dios yun henin kadinakkel idan bittuwen di kabunyan. <sup>11</sup> Hi APU DIOS e Dios idan aammed tayu hu mengippedakkel pay ni hi-gayun meminhanlibu niya hi-gatu memendisyon ni hi-gayu et kumedangyan kayu. <sup>12</sup> Nem inna-nuk ni mengippennuh idan yuka panhahallai niya inna-nuk ni umbaddang di ligat yu e hakey yak ni mengippahding? <sup>13</sup> Hannemnem yu etan inhel ku lan nunman e kangkyu pampili kayu hanhakkey ni helag Israel idan nelaing, wada kabaelan dan mengewwat, niya kayyaggud elaw da et hi-gada pambalin kun mengipappanggulun hi-gayu. <sup>14</sup> Ey inebulut yu e



'Kanyuy kayyaggud humman ni ninemnem kun pehding tayu.' " <sup>15</sup> Et humman idan pinili yu hu impambalin kun huwet niya opisyal yu. Et yadda edum ey impambalin kuddan man-ap-apun hanlibun tuu, yadda edum ey man-ap-apun hanggatut, yadda edum ey man-ap-apun nelima et yadda edum ey man-ap-apun hampulu.

<sup>16</sup> Intugun kuddan nunman ni huwet e kangkun hi-gaday "Mahapul ni meandeng ni ingganah hu pehding yu, beken ni ebuh ida helag Israel, nem anin idan nalpud edum ni bebley ni nekibebley ni hi-gayu. <sup>17</sup> Ihumangan yun ustuh hu kapandidiklamuhiddan edum yun helag Israel. Entan tu ipahhig idan kedangyan. Mahapul ni man-iingngeh ni meandeng hu pehding yun menuwwet idan kedangyan niya newetwet. Entan takut ni hipan pehding da, tep yuka i-ehneng hi Apu Dios ni pengipennuhan yuddan kasuh. I-li yun hi-gak ida kasuh ni kayu kamelligasin mengippennuh. <sup>18</sup> Ey yan nunman inhel kun hi-gayun emin hu hipan lebbeng tun pehding yu."

*Ya neitu-dakan idan an mansi-im*

<sup>19</sup> "Entanni ey hini-yan tayu hu Duntug e Sinai tep humman inhel APU DIOS e Dios tayun pehding tayu. Et mandalan itsud eleg mebebleyin mahkang, ey angetakkut e inang-ang tayun emin. Et han itu mampalaw di duntuduntug e bebley idan Amorite. Dimmateng itsud Kades Barnea et <sup>20</sup> kangkun hi-gayuy 'Dimmateng itu law di bebley ni indawat APU DIOS e Dios tayun hi-gatsu. <sup>21</sup> Ammandeh! Elaw kayu et pambebleyan yu. Entan pandawedawa, niya entan takut yu tep inhel APU DIOS e Dios ida lan aammed tayu, e iddawat tun hi-gayu humman ni bebley.'

<sup>22</sup> Nem kanyun hi-gak ey 'Um-itu-dak itsun an mansi-im et ehelen dan hi-gatsu hedini attu hu kayyaggud ni dellanen tayu, ey hedini hipan bebley hu tayu hehgepen.'

<sup>23</sup> Ey ya impannemnem kun nunman ni inhel yu ey kayyaggud, et pumili-ak ni hampulut dewwan lalakkin nalpud hanhakkey di helag Israel. <sup>24</sup> Limmaw ida e linabhan da etan duntuduntug et datngen da hu Nedeklan e Eskol et da hinapen ni inang-ang humman ni bebley. <sup>25</sup> Nengaladdan lameh ni keyew ni in-anemut dan neibangngadan da et kandan hi-gatsuy 'Kayyaggud ni pambebleyan humman ni indawat APU DIOS e Dios tayun hi-gatsu.'

<sup>26</sup> Nem nginhay yu hu inhel APU DIOS e Dios yu tep eleg yu pinhed ni umlaw diman. <sup>27</sup> Nangngungudu kayu niya nanlilih kayu e kanyuy 'Anggebe-hel daitsun APU DIOS, tep impangulu daitsu et hi-yanen tayu Egypt, et i-li daitsudya ma-lat pateyen daitsuddan Amorite. <sup>28</sup> Et humman hu, eleg itu kaya umlaw diman. Endi law tuled tayu, tep yadda intu-dak tayun an nansiim ey kanday etta-ta-gey ida tuudman, niya na-na-let ida nem hi-gatsu. Ey eta-ta-gey hu tuping ni luhud ni bebley da e dettengen tu kabunyan. Ey inang-ang da pay kunu hu etta-teng ni tutu-un helag Anak.'

<sup>29</sup> Nem inhel kun hi-gayu e kangkuy 'Entan takut idan nunman ni tuu, <sup>30</sup> tep ippangulu dakeyun APU DIOS e Dios yu. Hi-gatu mekiggubbat et iehneng dakeyu, henin inang-ang yun impahding tud Egypt, <sup>31</sup> niya impahding tud eleg mebebleyi. Anin ni hi-gayu, ey neka-ang-ang yu hu pengipenaptekan APU DIOS e Dios yun hi-gatsu eyad eleg mebebleyi, henin kapemapteki ni hakey ni aman u-ungnga tu. Et deh e in-ali daitsudya.' <sup>32-33</sup> Nem anin ni henin nunman impenahding APU DIOS e Dios tayu e kamambalin ni heni apuy ni hileng, niya kamambalin ni heni kulput ni kawwalwal ni nengipengupengulun hi-gatsuddad kayyaggud ni tayu nangkampuan. Ey eleg yu damengu idinel ni hi-gatu.

*Ya nengastiguan APU DIOS idan helag Israel*

<sup>34</sup> Et humman hu, nemahhig bunget APU DIOS ni nangngelan tun lilih yu et isapatah tu e kantuy <sup>35</sup> 'Endin hekey ni hi-gayun nekalliwtan ni tutu-un nunya hu mategun umlaw ni an menang-ang etan ni kayyaggud ni bebley ni insapatah kun iddawat kudda lan aammed yu. <sup>36</sup> Ebuh hi Kaleb e u-ungngan Jephunneh hu dammutun umlaw diman. Iddawat kun hi-gatu et yadda helag tu etan bebley ni tu dindinlan, tep impannanneng tu hu tuka pengu-unnud ni hi-gak.' <sup>37</sup> Gapun hi-gayu ey bimmunget dama hi APU DIOS ni hi-gak et kantuy 'Anin ni hi-gam Moses et eleg ka mabalin ni umlaw diman. <sup>38</sup> Nem petuled mu hi Joshua e u-ungngan Nun e kamemabbaddang ni hi-gam, et hi-gatu mengipenguluddan etan ni tutu-un mambebley diman.'

<sup>39</sup> Entanniy kan APU DIOS ni hi-gatsuy 'Yadda u-ungnga yun kamenangpa e eleg da pay ni amta hu lawah winu kayyaggud, e hi-gada etan yuka itattakkut ni belluden idan buhul yu, hu umlaw ni an mambebley diman. <sup>40</sup> Nem hedini hi-gayu, man meibbangngad kayu e iddalan yu mewani di eleg mebebleyi et mampalaw kayud appiti ni Madlang ni Baybay.'

<sup>41</sup> Entanni ey kanyun hi-gak ey 'Nanliwat kamin APU DIOS e Dios tayu, nem umlaw kamin nunya, et kami makigubat ma-lat mambebley kamidda etan di bebley tep humman dedan hu inhel tu.' Et pan-ihakbat yu almas yu, et lumaw kayun nekigubat tep kanyu nem nelakah hu penggepan yun nunman ni duntuduntug ni bebley.

<sup>42</sup> Nem kan APU DIOS ni hi-gak ey 'Ehel mun hi-gada e eleg ida umlaw ni mekiggubbat tep eggak baddangan ida. Hedin umlaw ida, ey nanna-ud ni apputen idaddan buhul yu.'

<sup>43</sup> Inhel kun hi-gayu humman ni inhel APU DIOS, nem kahing kayu. Et nealay nanglaw kayun nekigubat idan nambebley diman ni duntuduntug ni bebley e indinel yu annel yu tep nginhay yu hi APU DIOS. <sup>44</sup> Neukat idalli hu hantapug ni Amorite e henidda putsukan et gubaten dakeyu, et pampedugen dakeyu meippalpu Seir ingganah di Hormah, et apputen dakeyu etan di duntuduntug ni bebley di Edom. <sup>45</sup> Entanni ey nambangngad kayu et mampehemhemmek kayun mampebaddang nan APU DIOS, nem eleg tu hanguden hu dasal yu, <sup>46</sup> et manhahha-ad itsud Kades Barnea ni nebayag.

## 2

### *Ya nengipenemneman Moses ni nanhawawangan idan helag Israel*

<sup>1</sup> Nambangngad itsu et mampalaw itsud eleg mebebleyid appit ni Madlang ni Baybay, tep humman inhel APU DIOS ni hi-gak ni pehding tayu. Et lumeniklikweh itsud duntuduntug di Edom ni nebayag.

<sup>2-3</sup> Entanni ey kan APU DIOS ni hi-gak ey 'Nebayag kayu law ni limmeniklikweh eyad duntuduntug ni bebley, et yan nunya, ey palaw kayud north. <sup>4</sup> Ey tugun mudda tutu-u e kammuy: Li-bahi yu Seir e nambebleyan idan Edomite e aaggi yun helag Esau. Umtook idan hi-gayu, nem ang-ang yu pehding yu, <sup>5</sup> ey entan tudu gubat tep indawat kun hi-gada etan ida bebley di nanlinikweh di Duntug e Seir. Endin hekey hu bebley di diman ni nak iddawat ni hi-gayu anin ni ekket, tep humman bineltan Esau. <sup>6</sup> Nem dammutun umgatang kayun hi-gadan mekkan niya danum.'

<sup>7</sup> Nemnem yu e binendisyonan daitsun APU DIOS e Dios tayud emin ni impenahding tayu. Ey impenaptek daitsud nanhahha-adan tayu eyad mahkang ni eleg mebebleyi, ey wadan hi-gatsun ingganah eyan nelabah ni na-pat ni toon, niya indawat tun emin hu mahapul tayu.

<sup>8</sup> Intuluy tayun nangnanglaw et labhan tayu hu nambebleyan idan agi tayun helag Esau di Seir, ey eleg tayu idlan di keltad e Arabah e nampatyed ni nalpu Elat niyad Esion Geber. Et yan eman ni nampalaw itsud appit ni north e indalan tayud eleg mebebleyid Moab, <sup>9</sup> ey immehel hi APU DIOS e kantuy 'Ang-ang yu et endi yu pehding ni umhulun ni pekiggubatan idan iMoab e helag Lot ni hi-gayu, tep indawat ku hu Ar ni hi-gada ey endi nak iddawat ni hi-gayudman ni bebley.'

<sup>10</sup> (Ya nambebley dedan lan nunman di Ar ey yadda etan Emim e etta-teng niya ettagay ni tuu. Nan-iinggeh idan helag Anak e etta-teng ida. <sup>11</sup> Huyyaddan Emim et ya helag Anak hu kamengeddanin Repaim, nem ya kapangngedan idan iMoab ni hi-gada ey Emim. <sup>12</sup> Yan nunman la ey yadda Horite hu nambebley di Seir, nem dinegyun idan helag Esau. Binahbah da humman ni bebley et han ida maihullul ni nambebley diman henin impahding idan helag Israel, e dinegyun dadda nambebley di Kanaan tep indawat APU DIOS humman ni pambebleyan da.)

<sup>13</sup> "Et man-agwat itsud Kulukul e Sered, tep humman inhel APU DIOS ni pehding tayu. <sup>14</sup> Yan nunman ni nan-agwatan tayu ey nelabah hu telumpulul walun toon neipalpu eman ni dintingan tayud Kades Barnea. Yan nunman ni tsimpuh ey netey ida law ni emin etan lalakkin dammutun mekiggubbat, tep humman dedan hu insapatah lan APU DIOS. <sup>15</sup> Nemahhig hu impahding APU DIOS ni hi-gada ingganah netey idan emin.

### *Ya inhel APU DIOS ni pengidlanan dan umlaw di Kanaan*

<sup>16</sup> Netey ida law emin a-ammed yu <sup>17</sup> ey kan APU DIOS ni hi-gak ey <sup>18</sup> 'Hi-yan yu Moab nunyan aggew. Iklan yud Ar e pappeg tu, <sup>19</sup> et lumaw kayud nambebleyan idan Ammonite e helag Lot, nem entan tudu gubat, tep endi nak iddawat ni hi-gayun ni puyek diman tep indawat kun hi-gada humman ni bebley.'

<sup>20</sup> (Humman ni bebley ey Repaim la ngadan tu e humman hu ngadan idan lan nambebley diman. Ey ya kapangngedan ni Ammonite ni hi-gada ey Samsummim. <sup>21</sup> Etata-gey ida Rapaim e heniddan Anakim. Dakel ida ey nangka-let ida, nem binahbah idan APU DIOS, et maihullul ida Ammonite ni nambebley di bebley da. <sup>22</sup> Hanniman dama impahding APU DIOS idan Horite ni nambebley di Seir e binahbah tudu, et pambebleyan idan Edomite e helag Esau humman ni bebley da. Et hi-gada nambebley diman ingganah nunya. <sup>23</sup> Hanniman dama impahding idan nalpu Crete e ginubat dadda Abbite, et bahbahen dadda et maihullul idan nambebley di Gaza e bebley da.)

<sup>24</sup> "Yan linabhan tayu Moab ey kan APU DIOS ni hi-gatsuy 'Agwat yu eya Wangwang e Arnon et yu gubaten hi Sihon e Amorite e patul di Hesbon yaggud pengapput dakeyun hi-gak et hi-gayu nambebley di nambebleyan da.' <sup>25</sup> Kan tu pay ey 'Meippalpun nunya ey pambalin kun tekkutan dakeyudman emin ni tutu-un mengengel ni meippanggep ni

hi-gayun helag Israel, et anin ni ngeddanen dan ebuh ngadan yu, ey umgeyenggeng idan takut da.'

*Ya nengapputan idan helag Israel nan hi Sihon e patul di Hesbon*

<sup>26</sup> Ey yan wada itu etan di eleg mebebleyid Kedemot, ey nenu-dakkak ni an mekihummangan nan Sihon e patul di Hesbon, ma-lat kayyaggud hu pandadagyuman tayu. <sup>27</sup> Kangkuy 'tebulut mu anhan ni mandellan kami eyad bebley yu. Anin ni unnuunnuden mi hu keltad e eleg mi ihhingngid payew di wannan winu willi. <sup>28</sup> Beyyadan min hi-gayu emin hu mekkan niya meinum ni ellan mi. Ya mika ibbagan ebuh ey i-abulut mun mandellan kami eyad bebley yu <sup>29</sup> henin impahding idan helag Esau ni nambebley di Seir, et yadda Moabite ni nambebley di Ar e in-abulut da et mandalan kamid bebley da et malebah kami et man-agwat kamid Jordan et lumaw kamid bebley min indawat APU DIOS e Dios mi.' <sup>30</sup> Nem eleg iebulut Sihon e patul di Hesbon ni tayu iddalan di bebley da. Mukun hanniman ey tep hi APU DIOS e Dios tayu ey impambalin tun manghay, ma-lat wada umhulun ni panggugubatan tayu, et peapput tun hi-gatsu. Et deh, e humman tu-wangu impahding tu.

<sup>31</sup> Entanni ey kan APU DIOS ni hi-gak ey 'Peapput kun nunya hi Sihon e patul ey iddawat ku bebley dan hi-gayu. Et humman hu, lakkayuy et yu gubaten et pambebleyan yu bebley da.' <sup>32</sup> Et yan wada itsud Jahas, ey immali hi Sihon, niyadda sindalu tu et gubaten daitu. <sup>33</sup> Nem impeapput idan APU DIOS e Dios tayu et pateyan tayu hi Sihon e patul da, yadda u-ungga tun lalakki niyadda sindalu tu. <sup>34</sup> Ey binahbah tayu bebley da ey nampatey tayudda bimbebley, yadda lalakki, yadda bibi-i niyadda kaungaunga et endin hekey hu natdaan. <sup>35</sup> Inla tayudda animal da niya emin ni nebalol ni wadad bebley da. <sup>36</sup> Binaddangan daitu mewan nan APU DIOS e Dios tayu, et sakupen tayu hu Aroer di gilig ni Nedeklan e Arnon, et yadda bebley ni neigawwad Arnon ingganah lad Gilead. Emin ida humman ni bebley ni nehammad luhud tu ey kinabaelan tayun hinggep. <sup>37</sup> Nem eleg itu mampalaw di nambebleyan idan Ammonite, yaddad bebley di gilig ni Wangwang e Jabbok, yaddad bebley di duntuduntug et yad emin ni bebley ni inhel APU DIOS e Dios tayun eleg tayu lawwi.

### 3

*Ya nengapputan idan helag Israel nan hi Og e patul di Bashan*

<sup>1</sup> Entanni et mampalaw itsud Bashan ey dinammu daitun Og e patul diman e impangulu tu sindalu tu et gubaten daitud neihnup di Edrei. <sup>2</sup> Nem kan APU DIOS ni hi-gak ey 'Entan takut ni hi-gatu tep peapput kun hi-gayu tutu-u tu niya pebeltan kudda bebley tu. Ipahding yun hi-gatu hu henin impahding yun Sihon e patul idan Amorite di Hesbon.'

<sup>3</sup> Ey humman neipahding e impeapput APU DIOS e Dios tayu hi Og et yadda sindalu tu e pintey tayuddan emin. <sup>4</sup> Et hegepen tayudda etan na-nem ni bebley di Argob di Bashan e nampatulan tu, <sup>5</sup> Ey anin ni etta-gey niya nangkehammad ni neluhud hu nanlinikweh nunman ni etta-teng ni bebley niya nehammad eheb da ey hinggep tayu. Ey hinggep tayu pay ida etan bebley diman ni eleg maluhud. <sup>6</sup> Et bahbahen tayudda bebley diman niya pintey tayudda bimbebley ni lalakki, yadda bibi-i, niyadda kaunungan henin impahding tayud kebebbebley di nan-ap-apuan Sihon e patul di Hesbon. <sup>7</sup> Ey nan-ala tayu animal niya emin ni hipan wadadman e bebley.

<sup>8</sup> Et yan nunman ey sinekup tayu humman idan bebley ni dewwan patul idan Amorite di appit ni kasimmilin aggew di Wangwang e Jordan meipalpuw Wangwang e Arnon ingganah di Duntug e Hermon. <sup>9</sup> (Hedin ya kapanggeddan idan Sidonian ni Duntug e Hermon ey Sirion. Ey hedin yadda dama Amorite Senir hu daka panggeddan.) <sup>10</sup> Sinekup tayun emin hu bebley Og e patul di Bashan, humman ida ey bebley di tapew ni duntug, emin bebley di Gilead, emin bebley di Bashan ingganah di Salekah et yad Edrei. <sup>11</sup> (Hi Og e patul di Bashan ni ebuh hu natdaan etan idan etta-teng ni tuun helag Repaim. Ya lekud ni lungun tun nekapyad gumekek, ey enem ni piyeh hu kalinakkeb tu ey nehuluk ni hampulut tellun piyeh hu kadinukkey tu meippuun di kameunnud ni kapanlekud. Nanengtun nunyan immen di Rabbah di Ammon humman ni lungun tu.)

*Yadda etan nambebley di appit ni kasimmilin aggew di Jordan*

<sup>12</sup> Sinekup tayu humman ni bebley et idwat kuddan helag Reuben et ya helag Gad hu north ni Aroer e neihnup di Wangwang e Arnon, ya kagedwah ni Gilead et yadda ekka-ket ni bebley diman. <sup>13</sup> Indawat kuddan kagedwah ni helag Manasseh hu edum ni bebley di Gilead, emin hu bebley di Bashan e bebley la nin Og e bebley emin humman di Argob. (Yadda bebley di Argob di Bashan ey bebley ida lan Repaim. <sup>14</sup> Hi Jair e

kamengipappenggulun helag Manasseh hu neidwatan ni emin nunman ni bebley di Argob ingganah di pappeg ni Geshur et yad Maakah. Inggadan Jair hu ngadan tudman e bebley et ingganah nunya ey 'Bebley Jair' hu impangngadan tu.)

<sup>15</sup> Indawat ku Gilead idan helag Machir. <sup>16</sup> Hedin yadda helag di Reuben nan Gad ey indawat kun hi-gada hu bebley ni meippalpud pappeg ni Gilead ingganah di Wangwang e Arnon. Ya gawwan wangwang hu pappeg nunman ni bebley di appit ni south. Ya pappeg tud appit ni north ey yad Wangwang e Jabbok e humman hu pappeg ni Ammon. <sup>17</sup> Ya pappeg tud appit ni kakelinnugin aggew ey yad Wangwang e Jordan, meippalpud Baybay e Galilee di appit ni north ingganah di Netey ni Baybay di appit ni south ingganah di hengeg ni Duntug e Pisgah di appit ni kasimmilin aggew.

<sup>18</sup> Yan nunman mewan ey intugun kuddan helag Israel ni nambebley di appit ni kasimmilin aggew di Jordan e kangkuy 'Indawat APU DIOS e Dios tayun hi-gayu ida huyyan bebley et pambebleyan yu, nem mahapul ni mandaddan ida emin etan dammutun mekiggubbat, et man-almas ida et man-agwat idad wangwang, ma-lat baddangan dadda edum dan helag Israel ni an mansekkup ni neitudun pambebleyan da. <sup>19</sup> Nem yadda ahwa yu, u-ungga yu niyadda dakel ni animal yu ey anin ni manha-ad ida eyad bebley ni iddawat kun pambebleyan yu. <sup>20</sup> Tep mahapul ni baddangan yudda edum yun helag Israel ni mansekkup idan bebley di appit ni kakelinnugin aggew di Wangwang e Jordan ni iddawat APU DIOS e Dios tayun hi-gada. Et hedin impelinggep idan APU DIOS idadman henin impahding tun hi-gayu, ey mabalin law ni mambangngad kayu eyad bebley ni indawat kun hi-gayu.'

*Eleg iebulut APU DIOS hi Moses ni umlaw di Kanaan*

<sup>21</sup> Ey yan nunman ey intugun kun Joshua e kangkuy 'Inang-ang mu emin hu impahding APU DIOS e Dios mu etan idan dewwan patul e di Og nan Sihon. Hanniman ali dama hu pehding tuddan aap-apuddad bebley ni yu sekkupen.' <sup>22</sup> Entan takut ni hi-gada tep i-ehnged dakan APU DIOS e Dios mu et hi-gatu mekihhanggan hi-gada.

<sup>23</sup> Yan nunman ey inhammad kun nandasal e kangkuy <sup>24</sup> 'APU DIOS e Eta-gey ni peteg, inamtak e yadda dakel ni neipenahding ni impeang-ang mun hi-gak e bega-en mu hu lapun dakel ni pehding mulli e keang-angan ni et-eteng ni kabaalam. Endi hu edum ni dios di kabunyan et yad puyek ni kabaalam tun mengippahding idan henin impenahding mun kamengippetnga. <sup>25</sup> Attu anhan et iebulut mun um-agwattak di Wangwang e Jordan et ang-angek hu ba-hil tun mateba kameitnem, niya ang-angek ida kakkayyaggud ni bebley di nedunduntug niyaddad duduntug di Lebanon.'

<sup>26</sup> Nem gapun hi-gayu ey bimmunget hi APU DIOS ni hi-gak et eleg tu law denglen dasal ku et kantu kumedek ey 'Hiyya! Isiked mun mandasal ni hi-gak. <sup>27</sup> Eggak i-abulut ni ka man-agwat di Wangwang e Jordan. Lakkay di ta-pew ni duntug e Pisgah et man-uhdung ka et ang-angem idan emin hu bebley ni nanlinikweh di Kanaan. <sup>28</sup> Itugun mu kuma hu pehding Joshua ey petuled mu tep hi-gatu mengippenggulun edum yun helag Israel ni man-agwat di Wangwang e Jordan et da sakupen ida humman ni bebley ni inang-ang mu et mambebley idadman.'

<sup>29</sup> Et manha-ad itsud nedayyukung di demang ni Bet Peor." Huyyadda inhel Moses idan edum tun helag Israel.

## 4

*Inhelan Moses ida helag Israel ma-lat un-unuden da etan Tugun*

<sup>1</sup> Kan Moses idan tutu-uy "Pekadngel yudda eya ittugun kun hi-gayu, ey u-unnud yudda ma-lat eleg kayu matey et kayu mambebley di inhel APU DIOS e Dios ida lan aammed tayun iddawat tun hi-gada. <sup>2</sup> Eleg mabalin ni yu e-kalan winu e-duman ida eya inhel kun Tugun APU DIOS e Dios tayu. U-unnud yun emin ida huyyan Tugun. <sup>3</sup> Neka-ang-ang yu hu impahding APU DIOS di Baal Peor e pintey APU DIOS e Dios yu etan ida edum tayun helag Israel ni nandayaw nan Baal. <sup>4</sup> Nem hi-gayun impannaneng tun mengu-unnud APU DIOS e Dios yu, ey nanengtun mategu kayu ingganah nunya.

<sup>5</sup> Intuttudduk ni hi-gayudda hu Tugun APU DIOS e Dios kun u-unnuden yun ingaganah di bebley ni yu hehgepen et pambebleyan yu. <sup>6</sup> Hedin peka-u-unnuden yudda huyyan Tugun, ey humman pengi-ang-angan ni tutu-ud edum ni bebley e nelaing kayu niya nenemneman kayu. Ey hedin dedngelen da meippanggep idan nunyan tugun ey kanday 'Anakkayang numan, kaw wada heniddan nunyan hambebleyan ni nelaing ida niya nekannemneman ida?'

<sup>7</sup> Endi edum ni bebley ni anin ni nandingngel ey wada dios dan henin nan APU DIOS e Dios tayun wadan hi-gatsun ingganah e tuka hummanga dasal tayu hedin nambaga itsun baddang tu. <sup>8</sup> Ey kaw wada hakey ni nandingngel ni bebley ni wada tugun dan

kakkayyaggud e heniddan Tugun ni tayu kau-unnuda? <sup>9</sup> Nem ang-ang yu et eleg yu liwwanen ida etan inenang-ang yun impahpading Apu Dios ni panyaggudan yu. Ey mahapul mewan ni eleg yu liwwana eyan ketaggu yu, ma-lat ituttuddu yuddan u-ungnga yu niya inap-apu yudda humman. <sup>10</sup> Entan tu mewan liwwan e yan eman ni immehneng kayud hinanggan APU DIOS e Dios yu di Sinai ey kanton hi-gak ey 'Ayagim ida emin tutu-u, et maemung idad hinanggak e ehelen kun hi-gada hu pinhed kun pehding da, ma-lat amtaen dan umtakut ni hi-gak ey mengu-unnud ida ey mandeyyaw idan hi-gak, ma-lat ituttuddu da damadda humman idan u-ungnga dan edum ni aggew.'

<sup>11</sup> Yan nunman mewan ey kayu immehneng etan di neihnup di hengeg nunman ni duntug ni kamantetebbel e kamampellaw di ahpat ahuk tu, ey neihephep hu mahdel ni kulput niya andeket ni ahuk di diman ni duntug. <sup>12</sup> Immehel hi APU DIOS ni hi-gayun nalpud apuy. Ey ma-nut dingngel yu ehel tu, nem eleg yu ang-angen angah tu. <sup>13</sup> Nehammad hu nengi-hel tun nekiungbalan tun hi-gayu e mahapul ni u-unnuden yudda etan Hampulun Tugun tun intudek tud dewwan nedampillag ni batu. <sup>14</sup> Yan nunman hu nanghela APU DIOS ni hi-gak, e ituttudduk ni hi-gayun emin ida etan Tugun ni u-unnuden yud bebley ni yu sekkupen ni pambebleyan yu.

*Eleg mei-ebbulut hu helag Israel ni mandeyyaw ni dios ni kinapyan tuu*

<sup>15</sup> Eleg yu ang-angen ni hedin hipa ang-ang APU DIOS eman ni inhelan tun hi-gayud Duntug e Sinai e nalpud apuy ehel tu. Et humman hu, helipati yu <sup>16</sup> et eleg kayu mengapyan deyyawen yun i-ingngeh idan bii winu laki, <sup>17</sup> animal winu sisit, <sup>18</sup> yadda kaumkadap di puyek winu yadda deleg ni nambaley di danum. <sup>19</sup> Ey hedin intangaw yud kabunyan et inang-ang yu aggew, ya bulan, ya bittuwen niya emin hu wadadman, ey entan kaheul ni an mandeyyaw idan nunman ni inha-ad APU DIOS e Dios yu, anin ni kadeyyawaddan edum ni tutu-u. <sup>20</sup> Nem nemnem yu e impangulu dakeyun APU DIOS, et hi-yanen yu Egypt e bebley ni nanhelheltapan yu e heni kepengildangin gumek, et pambalin dakeyun tutu-u tun nebalol, et deh e ingganah nunya ey tutu-u dakeyun hi-gatu. <sup>21</sup> Gapuh ni hi-gayu, ey bimmunget hi APU DIOS ni hi-gak, et isapatah tu e eleg mabalin ni nak man-agwat di Wangwang e Jordan et lumawwak etan di kayyaggud ni bebley ni iddawat APU DIOS e Dios yun pambebleyan yu. <sup>22</sup> Ma-nut agwaten yu eya Jordan et lumaw kayu etan di yu pambebleyan, nem hedin hi-gak, man eggak meki-agwat et mateyyak eyad ba-hil ni wangwang. <sup>23</sup> Ang-ang yu et eleg kayu mengapyan i-ingngeh ni anin hipan deyyawen yu ma-lat eleg yu ipngil hu nehammad ni nekitbalan yun APU DIOS e Dios yu. Tep eleg pinhed APU DIOS e Dios yun pehding yu humman. <sup>24</sup> Hi APU DIOS e Dios yu ey heni apuy ni kaumgiheb. Ey kaum-ameh hedin deyyawen yu edum ni dios.

<sup>25</sup> Hedin edum alin aggew, et nebayag kayu law ni nambebley diman, et wadaddalli law u-ungnga niya ey inap-apu yu, entan pengapkapan i-ingngeh ni hipan yu deyyawen et panliwatan yu. Lawah humman ni yu pehding ey kamengippebungnet nan hi APU DIOS e Dios yu. <sup>26</sup> Ya kabunyan niya puyek hu tistiguk ni nunya et hedin eleg yu u-unnudadda intugun kun hi-gayu, ey anggegannu kayun meendid bebley ni yu pambebleyan ni pengagwatan yu eyan Wangwang e Jordan. Ey nekemtang panha-adan yudman ey kastiguen dakeyun APU DIOS. <sup>27</sup> Et iwwhit dakeyun hi-gatud kebebbebley, et lektattuy hahhakkey metdaan ni hi-gayu. <sup>28</sup> Ey yaddad bebley ni keillawwan yu ey deyyawen yudda kinapkapan tuun dios ni keyew niya batun eleg pakeang-ang ey eleg pekadngel, eleg mengngan ey eleg pakehamuy. <sup>29-30</sup> Hedin manhelheltap kayullin edum ni aggew, man heppulen yulli law hi APU DIOS e Dios yu. Ey hedin makulug ni heppulen yud puhu yu niyad nemnem yu hi APU DIOS e Dios yu, ey hemmakan yu malat mambangngad kayu law ni mandeyyaw niya mengu-unnud ni hi-gatu. <sup>31</sup> Tep hi APU DIOS e Dios yu ey mahmek, eleg dakeyu iwwalleng, eleg dakeyu bahbaha, niya eleg tu ippangil ni ippahding hu nehammad ni nekiungbalan tuddan aammed yun nunman.

<sup>32</sup> Yu mahmahid kebebbebley hedin wada nekapkapan henin nunya, meipalpu eman ni nanletuan Apu Dios ni tuu, ingganah ni nunya. Anin ni attu eyad puyek e daul ni kabunyan et endi henin nunyan kamengippetngan neipahding. <sup>33</sup> Kaw wada edum ni tuun nangngel nan Apu Dios ni immehel di apuy, et tumegu e henin neipahding ni hi-gayu? <sup>34</sup> Kaw wada edum ni dios ni nangkal ni dakel ni tutu-ud hakey ni bebley ni nahlag di hakey ni pewen, et pambalin tuddan tuu tu henin impahding APU DIOS e Dios yun hi-gayud Egypt? Naka-ang-ang yu e gapuh ni et-eteng ni kabaalan tu niya elet tu ey impaeli tu ligat niya gubat. Impahding tu kamengippetnga ey impahding tu mewan hu hipan angettakut. <sup>35</sup> Ya gaputun nengipeang-angan APU DIOS e Dios idan nunman ni hi-gayu, ey ma-lat amtaen yu e hi-gatun ebuh hu Dios, endi edum. <sup>36</sup> Ey mukun impadngel tun hi-gayu ehel tun nalpud kabunyan ey ma-lat ehelen tun hi-gayu hu pinhed tun pehding

yu. Ey impeang-ang tu apuy tu eyad puyek, ma-lat hi-gatu e wadad apuy ey wada innanu tun um-ehel ni hi-gayu. <sup>37</sup> Ey gapuh ni et-eteng ni neminshed tuddan aammed yu, ey binendisyonan dakeyun helag da, et ipengulu dakeyun hi-gatu et hi-yanen yu Egypt gapuh ni et-eteng ni kabaelan tu. <sup>38</sup> Ya mewan ni yuka pengellii, ey dinegyun tudda tutu-un e-etteng kabaelan da nem hi-gayu, et ilaw dakeyud bebley da et pambebleyan yu. <sup>39</sup> Et humman hu, iha-ad yud nemnem yu e hi APU DIOS, ey Dios di kabunyan niyad puyek ey hi-gatun ebuh hu Dios, endi edum. <sup>40</sup> Hedin u-unnuden yun emin hu tugun tun e-helen kun hi-gayun nunya, ey kayyaggud ni emin hu meippahding ni hi-gayu, et yadda helag yun meittu-nud ni hi-gayu. Ey mannenneng kayun mambebley eyad bebley ni iddawat APU DIOS e Dios yun hi-gayu.

*Yadda bebley ni keihhikkugan*

<sup>41</sup> Entanni et tuduen Moses hu tellun etta-teng ni bebley ni keihhikkugan, di appit ni kasimmilin aggew di Wangwang e Jordan. <sup>42</sup> Et hedin wada tuun pimmatey, nem eleg tu igeb-at ey beken ni gapuh ni bunget tu, ey dammutun umbesik diman et ihwang tu annel tu. <sup>43</sup> Yaddahuy hu bebley ni tinudun Moses: Ya Beser di ta-pew ni duntug di eleg mebebleyi hu neitududdan helag Reuben, ya Ramot di Gilead hu neitududdan helag Gad, et ya Golan di Bashan hu neitududdan helag Manasseh.

<sup>44</sup> Indawat Moses hu Tugun Apu Dios idan helag Israel. <sup>45</sup> Huyyadda hu inhel Moses ni mahapul ni u-unnuden da ey pehding da, eman ni neni-yanan dan Egypt, <sup>46</sup> et mangkampuddad nedeklan e neihnup di Bet Peor di appit ni kasimmilin aggew di Jordan. Yadman la hu nambebleyan nan Sihon e patul idan Amorite di Hesbon, e inapput Moses et yadda edum tun helag Israel ni nalpuan dad Egypt. <sup>47</sup> Sinekup da humman ni bebley tu et ya bebley nan Og e patul di Bashan. Hi-gadan dewwa hu patul idan nunman ni bebley di appit ni kasimmilin aggew di Jordan. <sup>48</sup> Yadda bebley ni sinekup da ey meippalpuad Aroer di gilig ni Wangwang e Arnon ingganah di duntug e Sirion e Hermon hu hakey ni ngadan tu. <sup>49</sup> Nei-dum emin hu Arabah di appit ni kasimmilin aggew di Wangwang e Jordan ingganah di south di Netey ni Baybay et yad hengeg ni Duntug e Pisgah."

## 5

*Yadda hampulun Tugun APU DIOS*

<sup>1</sup> Inemung Moses ida etan tuu et kantun hi-gaday "Pakadngel yun emin ida eya Tugun APU DIOS ni e-helen kun hi-gayun nunya, ma-lat amtaen yudda et u-unnuden yu. <sup>2</sup> Yan eman ni kaweda tayud Duntug e Sinai, ey nekitbal hi APU DIOS e Dios tayun hi-gatsu, <sup>3</sup> beken idan aammed tayun nunman hu nekiungbalan tu, nem hi-gatsun emin ni wadan nunyan mategu. <sup>4</sup> Yan nunman hu immehelan APU DIOS et mampeang-ang ni hi-gatsu etan di apuy. <sup>5</sup> Nem gapu tep kayu kauntakut etan ni apuy ey eleg kayu manteyed di duntug, et iehngeng dakeyun hi-gak ni mekihummangan nan APU DIOS. Et yadda intugun tu ey humman intugun kun hi-gayu.

<sup>6</sup> Kantuy 'Hi-gak hi AP-APU e Dios yun nengihwang ni hi-gayun neihbutan yud Egypt.

<sup>7</sup> Hi-gak ni ebuh hu Dios ni deyyawen yu, endi edum.

<sup>8</sup> Entan pengapya yun heniddan wadad kabunyan, ya wadad puyek niya wadad danun ni deyyawen yun dios yu. <sup>9</sup> Eleg mabalin ni kayu manyu-ung ni hi-gada ey yudda deyyawen ni dios yu. Tep hi-gak e AP-APU e Dios yu, ey nemahhng bunget ku hedin wada edum ni ibbilang yun dios yu e beken ni hi-gak ni ebuh. Kastiguen kudda etan eleg mengibbilang ni hi-gak, anin idallin u-ungnga da, yadda inap-apu da niyadda pidwan inap-apu da. <sup>10</sup> Nem eleg mepappeg hu impeminhed kuddan etan ni tuun neminshed ni hi-gak niya kamengu-unnud ni tugun ku ingganah di meikkahanlibun helag da.

<sup>11</sup> Entan tu usal di legelegem hu ngadan ku e AP-APU e Dios yu, tep eggak hehmeke hu tuun mengippahding nunman, et humman hu kastiguen ku.

<sup>12</sup> U-unnud yu elaw ni Sabaduh ni kamengillin ni aggew, e humman dedan la intugun ku e AP-APU e Dios yu ma-lat ipahding yudda lebbeng tun meippahding. <sup>13</sup> Yan enem ni aggew di hanlingguan hu pengingunuan yuddan inggunu yu. <sup>14</sup> Nem yan meikkeppitun aggew e Sabaduh, ey endi an mangngunnu hi-gayu, yadda u-ungnga yun lalacki niya bibi-i, yadda bega-en yun lalacki niya bibi-i, anin idan animal yun baka niya kebayyu, yadda edum ni animal yu, et yadda nekibebley ni hi-gayu. Mahapul ni man-iyatu kayun emin ni nunman ni aggew, tep humman ni aggew ey neieng-eng ni hi-gak e AP-APU e Dios yu. <sup>15</sup> Nemnem yu e neihbut kayu lan nunman di Egypt, et dakeyu awiten ni AP-APU e Dios yu, et hi-yanen yu humman ni bebley gapuh ni kamengippetngan kabaelan tu niya gapuh idan impahding tu. Humman gaputun intugun tu e pehding yu hu elaw ni Sabaduh.

<sup>16</sup> U-unnud yud ameyun ineyu meippuun di intugun tu ma-lat mebeyyag hu panha-adan yudman ni bebley ni iddawat tun hi-gayu.

<sup>17</sup> Entan tu patey hu edum yun tuu.

<sup>18</sup> Entan tu iulig hu beken yu ahwa.

<sup>19</sup> Entan panekew yu.

<sup>20</sup> Entan tu ehel hu itek meippanggep ni edum yun tuu.

<sup>21</sup> Entan tu gamgami hu baley ni edum yu, ya ahwa da, ya bega-en da, ya bakeda, ya kebayyu da winu hipan wadan hi-gada.'

<sup>22</sup> Huyyadda intugun APU DIOS ni hi-gatsun emin ni helag Israel eman ni inlet tun immehel di apuy e linikweh ni kulput niya engeenget. Huyyan ebuh inhel tun nunman et itudek tuddad dewwan nedampillag ni batu et idwat tun hi-gak.

<sup>23</sup> Nem yan nangngelan yuddan nunyan inhel tu etan di engeenget ey kamantetebbel etan apuy, ey immalidda aap-apu yun hi-gak. <sup>24</sup> Et kanday 'Impeang-ang APU DIOS e Dios tayu hu dayaw tu niya kasina-gey tu, ey dingngel tayu ehel tun nalpud apuy. Dingngel tayun immehel hi APU DIOS ey nanengtun mategu itsu. <sup>25</sup> Nem yan nunya ey kele itsu mettey? Tep nanna-ud e hedin um-ehel mewan hi APU DIOS e Dios tayun hi-gatsu, ey mettey itsu ey gihheben dait sun nemahhig ni apuy. <sup>26</sup> Kaw wada tuun nanengtun mategu anin ni dingngel tu hi APU DIOS ni immehel di apuy? <sup>27</sup> Lakkay e Moses et mu dengelen hu e-helen APU DIOS e Dios tayu. Et mambangngad ka et ehelen mun hi-gami inhel tun hi-gam et u-unnuden mi.'

<sup>28</sup> Dingngel APU DIOS humman ey kantun hi-gak ey 'Dingngel ku inhel idan nunyan tutu-u. Em, kayyagud numan hu inhel da. <sup>29</sup> Hedin hanniman et anhan hu pannemnem da ey deyyawen da-ak ali niya u-unnuden dan ingganah tugun ku, ey kayyagud alin ingganah hu meippahding ni hi-gada et yadda helag da. <sup>30</sup> Lakkay et mu ehelen ni hi-gada et mambangngad idad kampu da. <sup>31</sup> Nem hedin hi-gam e Moses ey panha-ad kadya et ehelek ni hi-gam emin hu tugun ku, et ituttuddum ni hi-gada, et u-unnuden daddad bebley ni iddawat kun hi-gadan pambebleyan da.'

<sup>32</sup> Et humman hu, hi-gayun helag Israel ey ang-ang yu et u-unnuden yun emin hu intugun APU DIOS e Dios yu. Entan tu ipengil, anin ni hakey ni tugun tu. <sup>33</sup> Paka-u-unnud yu tugun APU DIOS e Dios yu, et kayyagud ni emin hu meippahding ni hi-gayu, ey ma-lat mannaneng kayun mambebley di pambebleyan yu."

## 6

### *Ya nehammad ni impeminhed APU DIOS*

<sup>1</sup> Negibbuh ni inhel Moses emin hu Tugun APU DIOS, et kantudda etan ni tuu ey 'Huyyaddan emin hu tugun AP-APU e Dios yun inhel tun ituttudduk ni hi-gayun u-unnuden yud yu pambebleyan, <sup>2</sup> ma-lat hi-gayu, yadda helag yu, yadda u-ungnga da ey daydayawen yun neyun hi AP-APU e Dios yu. Et hedin u-unnuden yudda humman ni tugun tu ey andukkey pambiyagan yu. <sup>3</sup> Pakadngel yu e helag Israel emin huyyan e-helek ni hi-gayu! Ang-ang yu ma-lat mekangngu-unnud kayun hi-gatu, et kayyagud pambiyagan yu et dumakkel helag yu et hi-gayu mambalin ni et-eteng ni kabaelan tu, ey ma-lat nanengtun mambebley kayud kayyagud ni bebley e mateba kameitnem, tep humman impakulug AP-APU e Dios idan aammed tayu.

<sup>4</sup> Dengel yu e helag Israel. Ipidwak ni e-helen ni hi-gayu: Endi edum ni Dios nem hi APU DIOS e Dios tayu. <sup>5</sup> Pakappinheden yu hi AP-APU e Dios yud puhu yu, yad nemnem yu niyad emin ni yuka pehding. <sup>6</sup> Entan tu liwwan ida huyyan ittugun kun hi-gayun nunya. <sup>7</sup> Ituttuddu yu damaddan u-ungnga yu huyyan tugun. Ipenidwa yun e-helen ni hi-gada baballey yu anin di yu pandaldalnan, yan mahmahdem ey yan kakkabbuhhan. <sup>8</sup> Itudek yudda huyyan tugun et ilipet yud ngamay yu, ey imbedbed yud tuktuk yu, et meipenemnem ni hi-gayun ingganah. <sup>9</sup> Ey itudek yud pamedingan ni baballey yu niyad eheb yu.

<sup>10</sup> Anggegannu ey illaw dakeyun AP-APU e Dios yud bebley ni inhel tun iddawat tun aammed tayudda e di Abraham, hi Isaac et hi Jacob. Etta-teng niya kayyagud ida humman ni bebley ni iddawat tun pambebleyan yu, anin ni beken kayun nengapya. <sup>11</sup> Ey yadda mewan baballey ni yu panha-adan, ey napnun mahapul yun eleg yu panlingetan. Immen ida pay bubun ni pan-ehhulan yun beken ni hi-gayu nangku-ku, ey immen ida kennen yun kaumlameh e henin grapes niya olibah e beken ni hi-gayu nengitnem. Hedin wadan emin hu mahapul yud yu pambebleyan, <sup>12</sup> ey ang-ang yu et eleg yu liwwanen hi AP-APU e nengihwang ni hi-gayun neihbutan yud Egypt. <sup>13</sup> Hi AP-APU e Dios yun ebuh hu u-unnud yu niya daydayaw yu, ey yad ngadan tun ebuh pansapatahi yu. <sup>14</sup> Entan tu daydayaw ida dios ni kadeyyawaddan nambebley di nanlinikweh di bebley yu, <sup>15</sup> tep hi

AP-APU e Dios yun kamekihha-ad ni hi-gayu, ey eleg tu pinhed ni wada edum ni dios ni daydayawen yu. Tep hedin wada edum ni dios ni daydayawen yu ey nemahhig bunget tu, et bahbahen dakeyu et endien dakeyu eyad ta-pew ni puyek.

<sup>16</sup> Entan tu papatnai hi AP-APU e Dios yu e henin impahding yu eman ni nanlilihan yud Massah. <sup>17</sup> Paka-u-unnud yudda intugun AP-APU e Dios yun hi-gayu. <sup>18</sup> Ey ipahding yudda hu kan APU DIOS ni neiptek ey kayyaggud, ma-lat kayyaggud ni emin hu meipahding ni hi-gayu, et lumaw kayun an mambebley etan di kayyaggud ni bebley ni insapatah APU DIOS ni iddawat tuddan aammed yu. <sup>19</sup> Nanna-ud ni degyunen yudda buhul yun nambebley di yu pambebleyan, tep humman inhel APU DIOS ni pehding yu.

<sup>20</sup> Hedin mahman idallin u-ungnga yun edum ni aggew e kanday 'Hipadda huyyan Tugun APU DIOS e Dios tayun u-unnudden tayu?' <sup>21</sup> Kanyun hi-gaday 'Gapuh ni et-eteng ni kabaelan APU DIOS ey neihwang kamid neihbutan min patul di Egypt. <sup>22</sup> Inang-ang mi impahding APU DIOS ni kamengippetnga et ya angetakkut ni impahding tuddan iEgypt, ya patul da et yadda opisyal da. <sup>23</sup> Impangulu dakemin neni-yanan min Egypt, et idwat tun hi-gami eya bebley ni insapatah tun iddawat tuddan aammed tayu. <sup>24</sup> Et iolden APU DIOS e Dios tayun u-unnuden min emin ida huyyan Tugun tu, ey hi-gatu daydayawen mi et peyaggud dakemi ey ang-angen tu et mategu kami et humman numan neipahding ingganah nunya.

<sup>25</sup> Tep hi-gatu e Dios tayu ey ibbilang dakemin kayyaggud hedin peka-u-unnuden midan emin hu tugun tu.' "

## 7

### *Ya et-eteng ni impeminhed APU DIOS idan tuu tu*

<sup>1</sup> Yallin pengillawwan APU DIOS e Dios yun hi-gayud bebley ni yu pambebleyan, ey degyunen tuddalli dakel ni nampambebley diman. Humman ida ey Hittite, Girgashite, Amorite, Kanaanite, Perissite, Hibite, et yadda Jebusite. Na-na-let ida ey daddakel ida nem hi-gayu. <sup>2</sup> Hedin peapput idallin APU DIOS e Dios yu et mampambebley kayud bebley da, ey mahapul ni petteyen yuddan emin. Entan pekihumngangan ni hi-gada niya entan tu hemek ida tep mahapul ni endi yu tetdaan ni hi-gada. <sup>3</sup> Entan pakidagyum ey entan pakiepun hi-gada, <sup>4</sup> tep dinnien dadda u-ungnga yun mengiwwalleng nan APU DIOS, et ya edum ni dios hu daydayawen da. Et gapuh nunman ey bahbahen dakeyun APU DIOS gapuh ni nemahhig ni bunget tu. <sup>5</sup> Ya pehding yu ey pambahbah yun emin daka pan-appisi, yadda daka ngillinan batu ey yadda daka ussalan pandeyyawan dan Asherah. Giheb yudda kinapya dan dios da, <sup>6</sup> tep pinili dakeyun APU DIOS e Dios ni tutu-u tu. Hi-gayu pinilin APU DIOS e Dios yun pambalin tun nebalol di emin ni tutu-u eyad puyek.

<sup>7</sup> Pinili dakeyun APU DIOS ni nakappinshed tu, beken gapuh tep daddakel kayu winu na-na-let kayu nem yadda edum ni tuu, tep ya kakulugan tu ey hi-gayu keek-ekutan bilang tu. <sup>8</sup> Ya gaputan nakappinshed dakeyun APU DIOS, ey pinhed tun hi-gayu pengippeamnuan tun impakulug tuddalan aammed tayu. Humman gaputan nengihwangangan dakeyun APU DIOS gapuh ni et-eteng ni kabaelan tu, et pappegen tu neihbutan yu etan ni patul di Egypt. <sup>9</sup> Et humman hu, mahapul ni ewwatan yu e hi APU DIOS e Dios yu, ey makulug ni Dios. Hi-gatu hu Dios ni kapandinneli e eleg tu ihhalla hu inhel tun pehding tu, anin ni melebbah hu kalibulibun manhayhayned ni helag ni tutu-u. Eleg melumman hu impeminhed tuddan neminshed ni hi-gatu niyadda kamengunnud ni tugun tu. <sup>10</sup> Nem eleg mandewadewan mengastigu ey memahbah idan tuun angebe-hel da hi-gatu. <sup>11</sup> Et humman hu, mahapul ni u-unnuden yudda neituttuddun hi-gayu, et yadda Tugun tun inhel kun hi-gayun nunya.

<sup>12</sup> Hedin dedngelen yudda huyyan Tugun et peka-u-unnuden yudda, ey pannenneng APU DIOS e Dios yu hu nekitbalan tun hi-gayu, ey peang-ang tu hu eleg melumman ni impeminshed tu, tep humman inhel tuddan aammed tayu. <sup>13</sup> Pinheden dakeyu ey bendisyonan dakeyu et medakkel helag yu. Bendisyonan tu mewan intanem yu et eleg kayu ma-puhan ni kennen yu, innumen yu niya mansikan olibah ni ussalen yu. Pedakkel tu mewan hu bakeyu niya kalneroh yu. Iddawat tun emin ida huyyan bendisyon ni hi-gayu di bebley ni inhel tuddan aammed yun iddawat tun hi-gayu. <sup>14</sup> Endi edum ni tutu-u eyad puyek ni mekabendisyonan, nem hi-gayun ebu. Ey endillin hi-gayu niyadda animal yu hu eleg mehlag. <sup>15</sup> Ippapteke dakeyun APU DIOS ey endi angetakkut ni degeh ni tu peellin hi-gayu heniddan inang-ang yud Egypt, nem yadda buhul yun angebe-hel dakeyu hu pengippellawwan tuddan nunman ni degeh. <sup>16</sup> Mahapul ni bahbahen yudda bebley ni peapput APU DIOS e Dios yun hi-gayu. Entan tudda hemek hu nambebley diman, ey entan tu dayaw ida dios da, tep henidda bitun keknaan yu.



<sup>17</sup> Entanni ey kanyud nemnem yuy 'Hipa inna-nu tayun mengapput idan nambebley diman e et-eteng ni kabaelan da nem hi-gatsu?' <sup>18</sup> Entan takut yun hi-gada, nemnem yu impahding APU DIOS e Dios yun patul di Egypt et yadda tutu-u tu. <sup>19</sup> Ey nemnem yudda nemahhig ni ligat ni impaelin APU DIOS e Dios yun hi-gadan inang-ang yudman, yadda miracle ni impahding tu, ya nengihwangan tun hi-gayun neihbutan yu, gapuh ni et-eteng ni kabaelan tu niya elet tu. Ey bahbahaen APU DIOS e Dios yu ida buhul yun nunyan yuka tattakusi henin impahding tuddan iEgypt. <sup>20</sup> Weddaen APU DIOS e Dios yu hu takut ni hi-gada, ey bahbahaen tudda mengippatnan umbesik. <sup>21</sup> Humman hu, entan takut idan nunman ni tutu-u, tep baddangan dakeyun APU DIOS e Dios yu e et-eteng ni kabaelan tu ey kamengippetngan Dios. <sup>22</sup> Yan eman ni iyyalli kayu ey inekkuekkut APU DIOS e Dios yun degyunen ida nambebley diman. Eleg mabalin ni tu pinhakkeyen idan bahbahaen, tep mengindadakkal ida ma-lem ni animal. <sup>23</sup> Nem peapput idan APU DIOS e Dios yuddan hi-gayu. Weddaen tu takut da ingganah pemahbahaen yun hi-gada. <sup>24</sup> Peapput tu pay ni hi-gayu hu papatul da et meendidda eyad ta-pew ni puyek et meliwwan ida. Endi dammutun mekihhanggan hi-gayu, tep hi-gayu anhan law hu memahbah idan hipan buhul yu. <sup>25</sup> Mahapul ni gihheben yu hu kinapya dan dios da, ey entan tu gangami et yu alen ida silber niya balituk ni inusal dan nengapya, tep hedin ellan yudda humman ey mambalin idan keknahan yu, tep angebe-hel idan APU DIOS e Dios yudda humman. <sup>26</sup> Entan tu ienamut ida humman ni kinapkapyan tutu-un dios, tep meilleggat kayun mekibbahbah. Mahapul ni angebe-hel yudda humman ni kinapkapayaddan tuun dios, tep nanna-ud ni mebahbah ida.

## 8

### *Ya meippanggep ni kapemapteke APU DIOS idan tuu tu*

<sup>1</sup> Pannaneng yun u-unnuden emin ida tugun ni indawat kun hi-gayun nunya, et tumegu kayu ey dumakkal kayu, ma-lat kayu mambebley di insapatah APU DIOS ni iddawat tuddan aammed tayu. <sup>2</sup> Nemnem yu impahding APU DIOS e Dios yun nengipengulun hi-gayud eleg mebebleyin na-pat ni toon, ma-lat tuttuuddan dakeyun mampekumbabah ni nengidwatan tun hi-gayun dakel ni ligat ni pematna tun hi-gayu hedin u-unnuden yu tugun tu winu eleg. <sup>3</sup> Mukun in-abulut tun meuppa kayu et han tu paeli hu kennen yun manna, e ebuh nunman ni penamtaman yu. Anin ida aammed yu et eleg da tamtaman humman ni mekkan. Impahding tu huuya ma-lat ituttuddu tun hi-gayu e ya tuu ey eleg mandinnel di kennen ni ebuh ni keittu-uwan tu, nem mahapul ni mandinnel itu damad ehel APU DIOS. <sup>4</sup> Ang-ang yu, e eleg madunut hu imbalwasi yu, ey eleg lumbag hu heli yun nandaldalnan yun na-pat ni toon di desert. <sup>5</sup> Nemnem yu e mahapul ni tuggunen niya disiplinahan daitsun APU DIOS e Dios tayu, henin kapehding ni hakey ni aman u-ungga tu e tuka disiplinaha. <sup>6</sup> U-unnud yu Tugun APU DIOS e Dios yu, ey ipuun yu hu yuka pambiyag di pinhed tu, niya hi-gatu daydayaw yu. <sup>7</sup> Tep hi APU DIOS e Dios yu hu mengillaw ni hi-gayu etan di bebley ni mateba kameitnem e wadadda wangwang, yadda lebeng, niyadda hebwak et mampalaw idad nedeklan. <sup>8</sup> Mateba kameitnem diman ni wheat, barley, grapes, figs, pomegranates, niya olibah ey wada putsukan diman. <sup>9</sup> Eleg kayu meuppa ey eleg kayu mekullangan ni mahapul yudman. Ya kadinakkel ni gumek diman ey heni kadinakkel ni batu et ya gembang ey henin kadinakkel idan duntug. <sup>10</sup> Ey wadadman emin hu pinhed yun kennen. Humman gaputun pansalamat kayun APU DIOS e Dios yun nengidwatan tuddan hi-gayun nunman ni kayyaggud ni bebley e mateba kameitnem.

<sup>11</sup> Nem ang-ang yu kuma, et yallin nunman ni tsimpuh ni wadan emin mahapul yu, ey eleg yu liwwana hi APU DIOS e Dios yu, ey entan tu iwalleng ida huayan tugun tun inhel kun hi-gayun nunya. <sup>12</sup> Hedin edum alin aggew ey wadan emin mahapul yu, kakkayyaggud baballey yu, <sup>13</sup> nedakkal baka niya kalneroh yu, kimmedangyan kayu e dakel hu silber yu niya balituk yu, niyadda alikamen yu, <sup>14</sup> ey ang-ang yu et eleg kayu mampahhiyya, e yu law liwwanen hi APU DIOS e Dios yun nengihwang ni hi-gayun neihbutan yud Egypt. <sup>15</sup> Impapteke dakeyud mahkang ey anggetakkut ni eleg mebebleyi e kad-an idan umkalat ni uleg niya gayyaman. Endin hekey danum diman, nem impeutbul tu danum di mekelhin batu et wada ininum yu. <sup>16</sup> Indawtan dakeyu pay ni manna e mekkan ni eleg tamtaman idan aammed yu. Ey impaeli tu ligat ni pematna tun hi-gayu, nem yan udidih tu ey bendisonan dakeyu. <sup>17</sup> Impahding tu humman ma-lat eleg yu nemnemen e ya gaputun kimmedangyanan yu, ey gapun et-eteng ni kabaelan yu ey gapun elet yu. <sup>18</sup> Nem mahapul ni eleg yu liwwana e hi APU DIOS e Dios yu hu kamengidwat ni kabaelan yun umkedangyan. Mukun hanneya tuka pehding tep pinhed tun peamnu niya ippahding hu nehammad ni nekitbalan tudda lan aammed yu.

<sup>19</sup> Hedin iwalleng yu hi APU DIOS e Dios yu, et ya edum ni dios hu pansilbian yu ey deyyawen yu niya manyu-ung kayun hi-gada, man tistiguak e nanna-ud ni mebahbah kayu. <sup>20</sup> Bahbahen dakeyun APU DIOS henin nampemahbahan tuddan nampambebley di dillan yu hedin eleg yu u-unnuda hi APU DIOS e Dios yu.

## 9

### *Ya pengapputan gapuh ni binabbal APU DIOS*

<sup>1</sup> Immehel hi Moses idan edum tun helag Israel e kantuy “Dengel yu huyya, hi-gayun edum kun helag Israel! Nganganah ni agwaten yu hu Wangwang e Jordan et kayu mambebley di nambebleyan idan tutu-un e-etteng kabaelan da nem hi-gatsu. Etta-teng bebley da ey etata-gey tuping di nanlinikweh ni bebley da e dettengen tu kabunyan. <sup>2</sup> Eta-ta-gey ey nangka-let niya etta-teng ida tutu-un nampambebley diman, tep giant ida humman ni helag Anak e dingngel tayun endi pakeapput ni hi-gada. <sup>3</sup> Nem yan nunya pengamtaan yun ippangulu dakeyun APU DIOS e Dios yu e heni apuy pehding tun memahbah ni hi-gada. Et yan lawwan yudman di bebley da, ey degyunen yudda ey petteyen yudda tep humman dedan inhel APU DIOS ni meippahding.

<sup>4-5</sup> Ey hedin megibbuh ni degyunen APU DIOS e Dios yudda, entan tun nemnem e mukun inhullul dakeyun APU DIOS ni mambebley diman ey tep kayyaggud kayu niya kayyaggud hu yuka pehpehding, et hi-gayu lebbeng tun mambebley diman, tep lawah ida. Hakey pay ey pinhed APU DIOS e Dios yun ippahding hu inhel tudda lan aammed yu e hi Abraham, hi Isaac et hi Jacob. <sup>6</sup> Mahapul nisin nemnemen yu e mukun indawat APU DIOS e Dios yu humman ni pambebleyan yun mateba kameitnem, ey ma-lat peamnu tu hu inhel tun nunman. Beken ni gapu tep kelebbengan yu tep ya kakulugan tu ey mekanghay kayun tutu-u.

<sup>7</sup> Nemnem yu eman ni nengipebungetan yun APU DIOS e Dios yud eleg mebebleyi. Neipalpu dedan eman ni neni-yanan yun Egypt ingganah ni dintengan yudya, ey nginhay yu hi APU DIOS. <sup>8</sup> Anin yad Duntug e Sinai et impabunget yu hi APU DIOS, et humman gaputun nandaddan et ni memahbah ni hi-gayu. <sup>9</sup> Yan nunman nanteyedak ni an nenawat ni dewwan nedampillag ni batun neitudekan ni nekitbalan APU DIOS ni hi-gayu. Nanhahha-addak diman ni na-pat ni aggew et na-pat ni hileng e eggak maugiugip niya eggak uminum ni danum. <sup>10</sup> Indawat APU DIOS ni hi-gak ida humman ni dewwan nedampillag ni batun nengitudekan tuddan tugun tun inhel tun hi-gayun inhelan tud apuy eman ni neamungan yud duntug. <sup>11</sup> Yan nelabah hu na-pat ni aggew et ya na-pat ni hileng, ey indawat APU DIOS etan dewwan nedampillag ni batun nengitudekan tun nehammad ni nekitbalan tun hi-gayu.”

<sup>12</sup> Entannyi, kan APU DIOS ni hi-gak ey ‘Papuut mu et mandayyu ka tep nambengang ida hu tutu-un impangulum ni nalpud Egypt, et deh e lawah daka kapkapyaa. Anggegannuy inwalleng da hu intugun kun pehding da, et mengapyaddan bakan balituk ni dios dan daydayawen da.

<sup>13</sup> Inamtak hu ngehay idan nunyan tutu-u. <sup>14</sup> Entan tuwak ika-leg et bahbahen kudda et meliwwan idan ingganah, et yaddalli helag mun edum ni aggew hu pambalin kun et-eteng ni kabaelan da ey na-na-let ida nem hi-gada.’

<sup>15</sup> Nandayyu-ak e nalpu-ak etan di kamantetebbel ni duntug e singnged ku etan dewwan nedampillag ni batun neitudekan ni nekitbalan tu. <sup>16</sup> Yan nunman ni nandayuan ku ey inang-ang ku e nanliwat kayun APU DIOS e Dios yu. Nengapya kayun balituk ni i-inggeh ni impah ni baka, et kangkuy “Kele anhan anggegannuy inwalleng yu hu intugun APU DIOS ni pehding yu?” <sup>17</sup> Gapuh nunman ey imbekah kudda humman ni nedampillag ni batud hinangga yu et mebuklidda. <sup>18</sup> Nanlukkubbak et mampehemhemmekkak mewan ni na-pat ni aggew et na-pat ni hileng nan APU DIOS e eggak mangamangan niya eggak uminum ni danum. Mukun impahding ku humman ey tep nanliwat kayun APU DIOS et pabunget yu. <sup>19</sup> Simmakuttak tep gapun nemahhig ni bunget APU DIOS ey bahbahen dakeyun hi-gatu. Nem humman anhan ey dingngel tu dasal ku e eleg dakeyu bahbahen. <sup>20</sup> Bimmubbunget hi APU DIOS daman Aaron et petteyen tu-et, nem indasalak dama et eleg tu patyen. <sup>21</sup> Inlak humman ni kinapya yun i-inggeh ni baka, et giheben kud apuy et benuklien ku ingganah nambalin ni dep-ul et nak ibheng di kulukul ni nalpud duntug.

<sup>22</sup> Impabunget yu mewan hi APU DIOS eman ni wada itsud Taberah, yad Masah et yad Kibrot Hattaawah. <sup>23</sup> Ey yan eman ni wada itsud Kades Barnea ey kan APU DIOS ni hi-gayuy ‘Lakkayuy et yu sakupen etan iddawat kun hi-gayun bebley.’ Nem nginhay yu mewan tugun APU DIOS e Dios yu tep eleg yu u-unnuden niya eleg yu idinel. <sup>24</sup> Neipalpu dedan eman ni nengamtaak ni hi-gayu ey manghay kayun APU DIOS.

<sup>25</sup> Et humman hu, nanlukbubbak ni nandasal nan APU DIOS ni na-pat ni aggew et na-pat ni hileng tep kantuy bahbahen dakeyu. <sup>26</sup> Kangkud dasal kun hi-gatu ey "APU DIOS e Eta-gey ni peteg, etan tudda anhan bahbah eyadda pinilim ni tutu-um ni inhewang mud Egypt gapun et-eteng ni kabaalam niya elet mu. <sup>27</sup> Nemnem mudda la bega-en mu e di Abraham, hi Isaac ey hi Jacob, ma-lat liwwanem anhan hu ngehay niya liwat idan nunyan tuu. <sup>28</sup> Tep hedin bahbahem mudda ey penghel idallin iEgypt ey 'Mukun pintey APU DIOS ida tutu-u tud eleg mebebleyi ey gapu tep eleg tu kabaalan ni mengidting ni hi-gadad bebley ni kantuy pengippengnguluan tudda ey tep anggebe-hel tudda kaya.' <sup>29</sup> Nem ya kakulugan tu ey hi-gadan helag Israel hu pinilim ni tuum ni impangulum ni neni-yan ni Egypt gapun et-eteng ni kabaalam niya elet mu."

## 10

*Yadda etan pakekapyan neitudekan etan idan hampulun Tugun APU DIOS*

<sup>1</sup> Yan nunman ey kan APU DIOS ni hi-gak ey 'Kapyka ka mewan ni dewwan nedampillag ni batun henin etan ni dewwan nemangulu. Ey kapyka kan kaban ni keyew et pengihadam idan nunman et manteyed ka mewan eyad duntug ni kad-ak. <sup>2</sup> Ittudek ku mewan diman idan batu hu henin intudek ku etan di binahbah mu. Ey inha-ad mudda humman etan di nengilinan ni kaban.'

<sup>3</sup> Et kumapya-ak ni kaban e inusal ku hu akasyah ey kimmappya-ak mewan ni dewwan nedampillag ni batun heni lan etan ni dewwan batun nemangulu. Inteyed kudda humman ni batud kad-an tud duntug. <sup>4</sup> Et ittudek APU DIOS di diman etan hampulun intugun tun hi-gayun eman ni inhelan tud apuy eman ni neamungan yud duntug. Indawat tu mewan ni hi-gak ida humman ni batu, <sup>5</sup> et mandayyu-ak et nak iha-ad ida humman di kaban ni kinapyak. Et ingganah nunya ey immen idadman.

<sup>6</sup> Entanni ey immegah itsud hebwak idan Jaakanite, et mampalaw itsud Moserah e neteyyan Aaron et maikulung diman. Et hi Eleasar e u-ungnga tu hu nei hullul ni etagey ni padi. <sup>7</sup> Immegah itsu mewan et mampalaw itsud Gudgadah, et hi-yanen tayu et han itsu mampalaw di Jobbathah e kad-an idan kulukul. <sup>8</sup> Yadman nenuduan APU DIOS idan lalakkin helag Levi ni mampaptek ni Kaban tu, ey hi-gada mampeddi niya mengihel ni bendisyon tu. Et ingganah nunya ey huyyadda ngunu da. <sup>9</sup> Humman gaputun endi neidwat ni hi-gadan puyek ni beltanen da e beken ni heniddan hi-gayun aaggi da e neidwatan kayun pambebleyan yu. Ya tawid da ey hi APU DIOS e Dios yu tep humman inhel tun hi-gada.

<sup>10</sup> Inhel ku lan nunman e nanha-addak ni na-pat ni aggew et na-pat ni hileng di kad-an APU DIOS e heni lan laputu. Ey kayyaggud et dingngel mewan APU DIOS hu dasal ku et eleg dakeyu bahbahen. <sup>11</sup> Entanni ey inhel APU DIOS ni hi-gak e ippangulu dakeyu et kayu mambebley di inhel tudda lan aammed tayun iddawat tun pambebleyan yu.

<sup>12</sup> Et yan nunya, hipadda inhel APU DIOS e Dios yun pehding yu? Mahapul ni tekkutan yu hi APU DIOS e Dios yu, u-unnuden yun emin hu pinhed tu, daydayawen yu ey pinpinheden yud emin ni nemnem yu niya puhu yu. <sup>13</sup> U-unnud yudda tugun APU DIOS ni intugun kun hi-gayun nunya tep panyaggudan yu. <sup>14</sup> Hi APU DIOS e Dios tayu ey kukuwah tu kabunyan ya puyek niya emin hu wadadman. <sup>15</sup> Ey pinilin APU DIOS ida aammed tayun pengippahhigan tun impeminhed tu. Et humman hu, yad emin ni tutu-u eyad puyek, ey hi-gayun helag da hu pinili tun tutu-u tu ingganah nunya. <sup>16</sup> Et meippalpun nunya ey balbaliwi yu elaw yu, et isiked yun mangngenghay. <sup>17</sup> Hi APU DIOS e Dios yu hu keta-ta-geyyan ni Dios, ey hi-gatu Ap-apun emin ni ap-apu, ey et-eteng hu kabaalan tu. Meandeng hu tuka pehding, endi tuka pengippahhigi ey beken ni henin tuu e tuka tetbalan mebeyyadan ma-lat ipahding tu lawah. <sup>18</sup> Tuka i-ehneng ida nepuhig niyadda nebalu, ma-lat meidwat kelebngan da. Tudda kapinheda hansinu-wan ni nekibebley ni hi-gatsu e tudda kaiddawsin kenna da niya balwasi da. <sup>19</sup> Et humman hu, peang-ang yu dama impeminhed yuddan hansinu-wan ni nekibebley ni hi-gayu, tep anin ni hi-gayu et kayu dama nekibebley lan nunman di Egypt. <sup>20</sup> Takusi yu hi APU DIOS e Dios yu ey pansilbi kayun hi-gatu. Hi-gatu dayaw yu ey u-unnud yu niya isapatah yud ngadan tun ebuh. <sup>21</sup> Hi-gatu Dios yu e lebbeng tun deyyawen yu, tep hi-gatu Dios yun nengipenahding idan kamengippetnga, niya kayyaggud ni peteg ni inenang-ang yu. <sup>22</sup> Yan eman ni linawwan idan aammed tayud Egypt ey nepitud dan ebuh. Nem yan nunya ey ipedakkel daitsun APU DIOS e Dios tayu, heni kadinakkel idan bittuwen di kabunyan.

## 11

*Ya panyaggudan idan helag Israel ni pengunnudan dan APU DIOS*

<sup>1</sup> Mahapul ni pinheden yu hi APU DIOS e Dios yu, ey u-unnuden yun ingganah Tugun tu. <sup>2</sup> Dengel yu huyyan inhel ku, tep hi-gayu penghelan ku, beken idan u-ungnga yu. Tep hi-gayu nanhiktam ni kapandisiplinah nan APU DIOS e Dios yu, ey hi-gayu nenang-ang ni et-eteng ni kabaelan tu niya kasina-gey tu. <sup>3</sup> Em, hi-gayu nenang-ang ida etan ni miracle ni pengimmatunan niya kamengippetngan impahding tu etan ni patul di Egypt et yadda tutu-u tu. Nem yadda u-ungnga yu ey eleg da ang-angen ida humman. <sup>4</sup> Eleg da pay ang-angen hu impahding APU DIOS idan sindalun Egypt, et yadda kebayyu niya kakalesah dan daka ussalad gubat ni nan-anud tud Madlang ni Baybay eman ni namdugan dakeyu et nanengtun nebahbah ida ingganah nunya. <sup>5</sup> Eleg da pay ang-angen hu nengipaptek APU DIOS ni hi-gayud eleg mebebleyi ingganah ni dintengan yudya. <sup>6</sup> Ey eleg da ang-angen hu impahding tud Dathan nan Abiram e u-ungngan Eliab e helag Reuben eman ni nadhakan ni puyek et maunug idad dallem tu anin idan pamilya da, ya kampu da, yadda bega-en da niya animal da. <sup>7</sup> Nem hi-gayu nenang-ang idan nunyan kamengippetngan impahding APU DIOS.

<sup>8</sup> Et humman hu, peka-u-unnud yun emin hu intugun kun hi-gayun nunya, ma-lat nalet kayun umlaw etan yu pambebleyan, <sup>9</sup> niya ma-lat mannananeng kayun mambebley di inhel lan APU DIOS ni iddawat tuddan aammed yu et hi-gayun helag da. Humman ni bebley ey mateba kameitnem ey dakel danum ni putsukan. <sup>10</sup> Beken ni henid Egypt humman ni bebley ni yu pambebleyan, tep eleg mahapul ni ellaken yu danum et palaw yuddad garden yu. <sup>11</sup> Nem humman ni bebley ey wadadda duntug ey wada nedeklan ey kadennumin udan. <sup>12</sup> Ey kaipappaptek APU DIOS e Dios yun kewa-wa-wan hantoon.

<sup>13</sup> Et humman hu, hedini peka-u-unnuden yun emin hu tugun ni inhel kun hi-gayun nunya, ey hedini pinpinheden yu hi APU DIOS e Dios yud puhu yu niyad nemnem yu, ey hedini hi-gatu deyyawen yu, <sup>14</sup> ey peelli tu udan di tsimpuh ni penepullan yu et wada enniun yun pagey, mewedda grapes ni kapyaen yun meinnum niya mewedda lameh ni olibah ni kapyaen yun mansika, <sup>15</sup> ey mewedda helek ni kenneh ni animal yu niya meweddani emin hu mekkan ni mahapul yu. <sup>16</sup> Nem ang-ang yu et eleg kayu maheul ni mengiwwalleng nan APU DIOS et ya edum ni dios hu daydayawen yu. <sup>17</sup> Tep hedini iwwalleng yu hi APU DIOS, ey umbunget et eleg tu peelli udan, et mema-ganan hu puyek et eleg umtagu ittanem yu, et lektattuy mettey kayud kayyaggud ni bebley ni iddawat APU DIOS ni hi-gayu.

<sup>18</sup> Et humman hu, peka-ihha-ad yud nemnem yu huyyaddan inhel ku. Niya itudek yudda huyya et ilipet yud ngamay yu ey imbedbed yud tuktuk yu, ma-lat meipenemnem ni ingganah ni hi-gayu. <sup>19</sup> Ituttuddu yuddan u-ungnga yud baballey yu, anin ni attu kad-an yu, yan yuka pan-iyatui ey hedini kayu kamanggunnu. <sup>20</sup> Ey itudek yudda huyyan Tugun idad pamedingan ni baballey yu ey yaddad eheb yu, <sup>21</sup> ma-lat mebayag kayuddan u-ungnga yun mambebley di inhel APU DIOS ni iddawat tuddan aammed tayu. Em, mannenneng kayud man ingganah meendi hu kabunyan niya puyek.

<sup>22</sup> Pannaneng yun u-unnuden emin ida intugun kun hi-gayu. Peang-ang yu impeminhed yun APU DIOS e Dios yun pengippahdingan yuddan inhel tun pehding yu. Ey pannaneng yun mandeyyaw ni hi-gatu, <sup>23</sup> ma-lat degyunen tuddan emin hu mambebley di yu pambebleyan anin ni na-na-let ida ey et-eteng hu kabaelan da nem hi-gayu. <sup>24</sup> Pambebleyan yun emin hu gessinen yu, ey meippalpud eleg mebebleyi di south ingganah di Lebanon di north, ey meippalpud Wangwang e Euphrates di appit ni kasimilin aggew ingganah di Baybay e Mediterranean di appit ni kakelinnugin aggew. <sup>25</sup> Endi hu mabalin ni menanggan hi-gayu tep impambalin APU DIOS e Dios yun kaumtakut ida tutu-un hi-gayu anin ni attu lawwan yu.

<sup>26</sup> Yan nunya ey pampilli dakeyu hedini hipa pinhed yu, ya bendisyon winu ya idut. <sup>27</sup> Mebendisyonan kayu hedini pillien yun u-unnuden ida Tugun APU DIOS e Dios yun inhel kun hi-gayun nunya. <sup>28</sup> Nem meiddutan kayu hedini eleg yu u-unnuda huyyaddan Tugun ey hedini iwwalleng yu hi APU DIOS e Dios yu et ya edum ni dios ni eleg yu ni la amtan nunman hu deyyawen yu. <sup>29</sup> Hedini illaw dakeyun APU DIOS e Dios yud etan di bebley ni yu pambebleyan ey ehel yud Duntug e Gerisim hu bendisyon tu ey ehel yud Duntug e Ebal hu idut tu. <sup>30</sup> Huyyaddan duntug ey wadaddad appit ni kakelinnugin aggew di Wangwang e Jordan e neihnup etan di muyung di Moreh di bebley idan iKanaan di Arabah di Gilgal. <sup>31</sup> Man-agwat kayu law eyad Wangwang e Jordan et kayu mambebley etan di iddawat APU DIOS e Dios yun pambebleyan yu. Hedini hehgepen yu et nambebley kayu law diman, <sup>32</sup> ey mahapul ni peka-u-unnuden yudda Tugun ni intugun kun hi-gayu.

## 12

*Mahapul ni deyyawen hi APU DIOS etan di pillien tun pandeyyawan ni hi-gatu*

<sup>1</sup> Dengel yudda huuyan intugun kun nunya et u-unnuden yun ingganah di bebley ni yu pambebleyan ni indawat APU DIOS e Dios yun eman idan a-ammed yu. <sup>2</sup> Mahapul ni bahbahren yun emin ida kapandeyyawiddan tutu-un dios dad ta-pew ni duduntug ey hengeg idan keyew. <sup>3</sup> Ey pakabbabhah yudda daka pan-appisi ey bukli yudda impeehng dan batun daka ngillina. Giheb yudda daka penginelemnemin dios dan hi Asherah ey pambengwah yudda kinapkapyu dan dios da ma-lat eleg da law an daydayawen ida humman.

<sup>4</sup> Entan tu iu-unnud hu pandaydayaw yun APU DIOS e Dios yud henin kapandaydayaw idan edum ni tutu-un dios da. <sup>5</sup> Et humman hu, ya pehding yu ey deyyawen yu hi AP-APU e Dios yu etan di bebley ni pillien tun nambebleyan yun helag Israel. <sup>6</sup> Yadman mewan pan-appitan yuddan i-appit yun APU DIOS, heniddan yuka i-appit ni kagihheba, yadda yuka iddawat ni meikkeppulun limmu yu ey yadda hipan yuka i-appit, yadda insapatah yu ey yadda yuka iggeb-at ni i-appit, niyadda yuka i-appit ni nemangulun impah ni bakeyu niya kalneroh yu. <sup>7</sup> Ey yad kad-an AP-APU e Dios yu hu panhahamulan yu, ey pan-am-amleng pamilyah yud emin ni impahding yu, et bendisyonan dakeyun AP-APU e Dios yu.

<sup>8</sup> Yan nunya ey yuka ipahpahding pинpined yu, nem beken ali law ni hanniman <sup>9</sup> hedin umlaw kayud bebley ni iddawat AP-APU e Dios yun pan-iyyatuan yu. <sup>10</sup> Anggegannu law ey man-agwat kayud Wangwang e Jordan et kayu mambbley di iddawat AP-APU e Dios yun pambebleyan yu. Et hedin wada kayu law diman et melinggep kayu niya endi tekkutan yun buhul yu, tep ippaptek dakeyun hi-gatu, <sup>11</sup> ey mahapul ni i-ali yun emin ida etan inhel kun i-appit yun kagihheba, ya meikkeppulun limmu yu, yadda iggeb-at yun i-appit niyadda insapatah yun i-appit etan di pillien AP-APU e Dios yun pandeyyawan yun hi-gatu. <sup>12</sup> Ey mahapul mewan ni emin kayu, yadda u-ungnga yu et yadda bega-en yu, ey manhahamul kayudman di kad-an AP-APU e Dios yu. Ey pakieyag yudda aaggi yun helag Levi tep eleg ida meidwatan ni puyek ni beltanen da. <sup>13</sup> Ang-ang yu et eleg kayu man-appit ni kagihheba di kumpulmih ni pinhed yun pan-appitan. <sup>14</sup> Mahapul ni yad pillien APU DIOS ni bebley di hakey ni edum yun helag Israel hu pan-appitan yun kagihheba, ey yadman pengippahdingan yuddan edum ni inhel kun pehding yu.

<sup>15</sup> Nem yadda animal ni ihhide yu henin makwah niya gazelle ey anin ni palsi yu, ey anin ni attu nambebleyan yu et dammutun umpalsi kayu anin ni piga pinhed yu tep indawat AP-APU e Dios yudda humman ni kennen yu, anin hedin kayu kameibbilang ni malinih winu eleg. <sup>16</sup> Nem eleg mabalin ni kennen yu kuheyaw da, mahapul ni idduyag yud puyek henin danum. <sup>17</sup> Ey eleg mabalin ni yu kennen di nanha-adan yu hu in-appit yun meikkeppulun ennien yun pagey, ya memengngulun hi-iten yun meinum, ya mansikan olibah, yadda nemangulun impah ni bakeyu niya kalneroh yu, yadda pinhed yun iddawat ni insapatah yu, yadda yuka iggeb-at ni i-appit niya edum ni yuka i-appit. <sup>18</sup> Nem yadda humman ey mahapul ni kennen yuddan u-ungnga yu, yadda bega-en yu, ey yadda aaggi yun helag Levi ni mekibebley ni hi-gayud pillien AP-APU e Dios yun pandeyyawan yun hi-gatu. Ey pan-an-anla kayudman di kad-an AP-APU e Dios yun pan-amleng yudda impenahding yu. <sup>19</sup> Ang-ang yu et eleg yudda ewayen hu aaggi yun helag Levi eyan pambebleyan yud bebley yu.

<sup>20</sup> Hedin peamnullin AP-APU e Dios yu eman kantun pelakkeb tu hu pambebleyan yu, ey hedin pinhed yun manhiddan detag, ey anin panhida kayu. <sup>21</sup> Hedin neka-iddawwi hu ittudun AP-APU e Dios yun yu pan-appitan, man anin palsi kayun baka winu kalneroh ni idawat APU DIOS ni hi-gayu et ihideyud baballey yu. Huyya la inhel kun pehding yu. <sup>22</sup> Anin ni hipan tuun kameibbilang ni malinih winu eleg, ey dammutun ihhida dadda humman ni detag henin detag ni makwah niya gazelle. <sup>23</sup> Nem ya eleg yu kenna ey ya kuheyaw. Tep ya biyag ey wadad kuheyaw, et humman gaputun eleg mabalin ni yu pekikkan hu kuheyaw di detag. <sup>24</sup> Ya pehding yun kuheyaw ey iduyag yud puyek e heni danum. <sup>25</sup> Hedin u-unnuden yu huuyan tugun ey um-amleng hi APU DIOS, ey kayyaggud ni emin hu meippahding ni hi-gayu et yaddalli helag yun edum ni aggew. <sup>26</sup> Ilaw yud nepilin pandeyyawan emin hu i-appit yu et yadda iddawat yun isapatah yun APU DIOS. <sup>27</sup> I-appit yud altar APU DIOS e Dios yu hu detag ni i-appit yun kagihheba anin ya kuheyaw tu. Ey ya kuheyaw ni i-appit yun mehemmul ey ikuyag yud dagsin altar AP-APU e Dios yu. Nem dammutu nisin ihhide yu detag tu. <sup>28</sup> Peka-u-unnud yun emin ida intugun kun hi-gayu, et kayyaggud ni emin hu meippahding ni hi-gayu et yadda helag yun edum ni aggew, tep huttan idan pehding yu ey mengippeamleng nan APU DIOS e Dios yu.

<sup>29</sup> Yan pemabhan APU DIOS idan tuun yuka pandegyunad nambebleyan da et hi-gayu law hu nambebley diman, <sup>30</sup> ey ang-ang yu et eleg yu iu-unnud ni daka pandeyyaw ni dios da. Entan tu kaney 'Imay pangngu et tayu ang-angen hu daka pehding ni mandeyyaw ni dios da et iu-unnud tayu.' <sup>31</sup> Entan tu dayaw hi AP-APU e Dios yun henin kapandeyyaw ni edum ni tuun dios da. Tep anggebe-hel APU DIOS emin hu daka pehding ni mandeyyaw ni dios da. Daka i-appit hu u-ungnga da e dadda kagihhebad apuy di altar ni dios da.

<sup>32</sup> Nemnem yu nisidda eya intugun ku et u-unnuden yu, nem entan tu edumi ey entan tu ekali.

## 13

*Ya kapematnan APU DIOS hedini nehammad hu neminhed idan tuu tun hi-gatu*

<sup>1</sup> Hedin kantu et wadadda prophet winu tuun kamengi-innep ni meippahding alin edum ni aggew ey kanday ya miracle hu pengi-immatanan, <sup>2</sup> ey tu-wangu nunman ni meipahding et kanda law ey "Imay et dayawen tayu hu edum ni dios ni eleg yu daydayawen ni nunman." <sup>3</sup> Entan kayu kaya kaewis et yu ipahding hu kantu. Pematnan APU DIOS e Dios yun hi-gayu humman, et ang-angen tu hedini hi-gatu nakappinshed yud puhu yu ey nemnem yu. <sup>4</sup> Hi APU DIOS e Dios yu hu mahapul ni u-unnuden yu niya daydayawen yu. Ipahding yudda intugun tu, pansilbi kayu hi-gatu ey entan tu iwalleng. <sup>5</sup> Mahapul ni pepettey yudda hu prophet et yadda nengamtan keibbellinan ni i-innep, tep daka ituttuddu mangngenghay nan APU DIOS e Dios yun nengihwang ni hi-gayun neihbutan yud Egypt. Mahapul nisin pepettey yudda et ma-kal hu lawah ni hi-gayu, tep impatna dan mengewwis ni hi-gayun mengiwwalleng nan APU DIOS e Dios yu.

<sup>6</sup> Hedin he-ulen dakeyuddan agiyu, ya u-ungnga yu, ya ahwa yun nakappinshed yu, winu ya gayyun yu et ewwisen dakeyun mandeyyaw ni edum ni dios ni eleg yu am-amta niya eleg dama amtaddan a-ammed yu, <sup>7</sup> winu ewwisen dakeyu ngullaw ni mandeyyaw ni dios ni kadeyyawaddan tutu-ud neihnup winu neidawwin bebley, <sup>8</sup> ey entan kaewis ey entan tu deddenggel hu e-helen da. Entan tu hemek ida ey entan idlepidda. <sup>9</sup> Mahapul ni petteyen yudda. Hi-gayun pamilyah da hu pamengulun penengban hi-gada et han ida edum ni tutu-u. <sup>10</sup> Em, tengba yudda et matey ida, tep dakeyu et patnaan ni ewwisen ni mengiwwalleng nan AP-APU e Dios yun nengihwang ni hi-gayud Egypt ni neihbutan yu, <sup>11</sup> ma-lat hedini dedngelen idan emin ni helag Israel hu meippanggep nunman ey umtakut ida, et endin hi-gayu hu an mengippahding nunman ni lawah.

<sup>12</sup> Hedin mamebley kayu law di yu pamebleyan ni iddawap AP-APU e Dios yu, ey hedini ngullaw <sup>13</sup> wada dedngelen yun edum yun nambalin ni lawah nemnem tu, et awisen tudda edum yun bimbebley ni helag Israel ni mandeyyaw ni edum ni dios ni eleg yun hekey amtan nunman, <sup>14</sup> ey mahapul ni pekammamahahan yu. Ey hedini makulug ni neipahding et wadadda nantistigu ey <sup>15</sup> mahapul ni petteyen yudda humman ni tutu-u etan di bebley, anin idan animal da. <sup>16</sup> Et yadda alikamen da, niyadda limmu da ey ipu-ul yud gawan mulkaduh et giheben yu, ey legab yudda bebley da et iappit yun kagihheba nan APU DIOS e Dios yu. Et humman ni bebley ey mannananeng ni mebahbah ni ingganah.

<sup>17</sup> Ey humman idan lebbeng tun mebahbah ey entan tu itlu ma-lat pankukuwah yu et eleg bumunget hi APU DIOS ni hi-gayu, nem hehmeken dakeyu anhan law et pambalin dakeyun dakel ni peteg e humman dedan la inhel tuddan aammed yu. <sup>18</sup> Em, hehmeken dakeyun APU DIOS e Dios yu hedini u-unuden yudda tugun tun intugun kun hi-gayun nunya ey hedini pehding yudda pinhed tun pehding yu.

## 14

*Yadda etan kameibbilang ni malinih et ya beken ni malinih ni animal*

<sup>1</sup> Gapu tep tuu dakeyun APU DIOS e Dios yu, hedini illelmetan yu netey, man entan tu panggedged hu annel yu, ey entan tu mukmuki ta-pew ni tuktuk yun henin kapehding ni edum ni tutu-u, <sup>2</sup> tep tuu dakeyun APU DIOS e Dios yu. Hi-gayu pinili tun nebalol ni pantu-u tu di emin ni katuutuu eyad puyek.

<sup>3</sup> Entan tu ekan ida hipan kameibbilang ni beken ni malinih. <sup>4</sup> Huyyadda hu animal ni dammutun kennen yu: ya baka, ya kalneroh, ya gelding, <sup>5</sup> ya makwah, ya ma-lem ni kalneroh, ya gelding niya gazelle, <sup>6</sup> anin idan animal ni negedwa kukub da e daka pennidwaan galgala hu kinan da, <sup>7</sup> nem yadda animal ni ma-nut daka pennidwaan galgala hu kinan da nem eleg megedwa kukub da e henin kamel, ya rabbit, et ya coney, ey eleg meibbillang ni malinih. <sup>8</sup> Ya killum ey eleg meibbillang ni malinih tep ma-nut

negedwa kukub tu, nem eleg tu pennidwaan galgala kinan tu. Entan tu ekan winu kapa hu netey ni annel da.

<sup>9</sup> Yadda mategud danum ni wada hiphip da niya ipay da ey dammutun kennen yu, <sup>10</sup> nem entan tudda ekan endi hiphip da ey ipay da, tep eleg ida meibbillang ni malinih.

<sup>11</sup> Dammutun kennen yudda sisit ni kameibbillang ni malinih. <sup>12-18</sup> Yadda sisit ni eleg yu kenna ey ya tulduh, ya butbut, ya akup, yadda sisit ni kamengngan ni annel ni netey, ya gawwang, ya falcon, ya buzzard, ya ostrich, ya seagull, ya stork, ya heron, ya pelican, ya cormorant, ya hoopoe, et ya litlit niya panniki.

<sup>19</sup> Emin mewan insektoh ni nepayakan e dakel idan kamangkukuyyug ey eleg mabalin ni kennen yu, tep eleg ida meibbillang ni malinih, <sup>20</sup> nem dammutun kennen yudda insektoh ni kameibbillang ni malinih.

<sup>21</sup> Eleg mabalin ni yu kennen hu animal ni neala et matey, tep tuu dakeyun APU DIOS e Dios yu. Idwat yu winu igtang yuddan hansinu-wan ni nekibebley ni hi-gayu et kanen da.

Eleg mewan mabalin ni ihhaeng yu impah ni gelding e penennum yun gatas inetu.

<sup>22</sup> Appil kayun katootoon ni meikkeppulun emin ni inepit yud intanem yu anin ni ya pagey. <sup>23</sup> Ilaw yudda humman ni inappil yun pagey, kameinnum et ya mansikan olibah di pinilin APU DIOS ni Dios yun pandeyyawan yun hi-gatu et yu kanen diman. Anin idan nemangulun impah ni animal yun kalneroh niya baka ey ilaw yudman. Ipahding yudda huyya et amtaen yun mandeyyaw ey mengu-unnud ni ingganah nan APU DIOS e Dios yu. <sup>24</sup> Hedin neidawwi hu pinilin APU DIOS e Dios yun yu pandeyyawan ni hi-gatu et eleg kayu pakekalan emin ni meikkeppulun limmu yu tep nebinendisyonan kayu, <sup>25</sup> dammutun iggatang yudda et ya pihuh ni nanggatngan yu hu illaw yudman. <sup>26</sup> Hedin wada kayudman ey gatang kayun hipan pinhed yun i-appit: ya baka, kalneroh ya hipan meinnum et man-an-anla kayun manhamul idan pamilyah yud kad-an APU DIOS e Dios yu.

<sup>27</sup> Entan tu liwwan ida helag Levi ni nekibebley ni hi-gayu, tep endi neidwat ni hi-gadan tawid da. <sup>28</sup> Ilaw yu hu meikkeppulun emin ni inepit yud intanem yun meikkatun toon et amungen yud bebley yu. <sup>29</sup> Idwat yudda humman di helag Levi tep endi nisi neidwat ni hi-gadan tawid da. Idwasi yu damadda hu tutu-un nalpud edum ni bebley ni nekibebley ni hi-gayu, yadda nepu-hig et yadda nebalun edum yun bimbebley et wada kennen da et eleg ida maupa. U-unnud yudda huyya et bendisyonan APU DIOS e Dios yun emin hu pehding yu.

## 15

### *Ya pengilliblihan ni impautang*

<sup>1</sup> Hedin nelabah pitun toon, man entan tu singil hu impautang yun pihuh. <sup>2</sup> Heninnuy elaw tu: Emin ida nampautang ni pihuh ni edum dan helag Israel, ey eleg da law singngila impautang da. Eleg da law pepillit ni pebeyyad hu impautang dad edum da ey yad sinakdul da hedin nedatngan humman ni tsimpuh ni inhel APU DIOS. <sup>3</sup> Nem dammutun singngilen yu hu impautang yun edum ni tutu-un nekibebley ni hi-gayu. Nem ya impautang yun edum yun helag Israel hu entan tu singil.

<sup>4</sup> Bendisyonan dakeyun APU DIOS e Dios yu etan di bebley ni iddawat tun pambebleyan yu, et endi an mewetwet ni hi-gayun helag Israel, <sup>5</sup> hedin peka-u-unnuden yu hi APU DIOS e Dios yu, ey ippahding yun emin eyadda intugun kun hi-gayun nunya. <sup>6</sup> Peamnu tu hu inhel tun bendisyonan dakeyu, et beken ni hi-gayu um-utang, nem hi-gayu mampeuttang di dakel ni bebley, ey eleg yu pan-ap-apu hu edum ni tutu-u, nem hi-gayu man-ap-apud dakel ni bebley.

<sup>7</sup> Nem hedin mambebley kayud bebley ni indawat APU DIOS e Dios yun hi-gayu, et wada newetwet ni edum yun helag Israel et manheppul ni baddang, ey baddangi yu. Entan ukuh tu et baddangan yu. <sup>8</sup> Peang-ang yu kumaddan babbal yun hi-gada, et pautangan yuddan mahapul da. <sup>9</sup> Entan tu ukuh ni mampeuttang ni mahapul ni agi yu gapu tep anggegannu ey medettangan hu toon ni eleg pansingngilin impautang. Tep hedin eleg yu peuttangi, et mampehemhemmek nan APU DIOS tep ya impahding yu, ey hi-gayu kambahul. <sup>10</sup> Pan-an-anla kayun mengidwat ni mahapul tu, beken ni maggeh di nemnem yu hu hipaddan indawat yu, ma-lat bendisyonan APU DIOS e Dios yun emin hu pehding yu. <sup>11</sup> Eleg mekehding ni wadaddalli edum yun helag Israel ni newetwet. Et humman gaputun nakka pan-ittugun ni hi-gayun mahapul ni madawat kayun hi-gada.

### *Ya pengilliblihan ni himbu*

<sup>12</sup> Hedin wada edum yun helag Israel ni laki winu biin inhebut tu annel tun hi-gayu et ingunuan dakeyun enem ni toon ey pambalin yun liblih di neihbutan tun meikkepitun

toon. <sup>13</sup> Hedin ibbukyat yu hu himbut yun laki, man entan tu ibukyat e en-endi-an. <sup>14</sup> Idwasi yun bendisyon APU DIOS e Dios yun hi-gayu henin kalneroh, ya pagey niya meinum. <sup>15</sup> Entan tu liwwan e himbut kayu damad Egypt ni nunman, nem pinappeg APU DIOS e Dios yu hu neihbutan yu. Huyya gaputun nakka pan-ittugun ida huyyan hi-gayun nunya.

<sup>16</sup> Nem hedin eleg pinhed etan ni himbut ni meliblih, et pinhed tun mannenneng ni mansilbin hi-gayu tep pinhed dakeyu niya pamilyah yu ey kayyaggud biyag tud kad-an yu, <sup>17</sup> ey mahapul ni ilaw yud habyen yu et teleken yu tangila tudman et mambalin ni bega-en yu et ingganah ketteyyan tu. Hanniman dama pehding yun himbut yun bii. <sup>18</sup> Beken et maggeh ni nemnem yu pengilliblihan yun himbut yu haggud ingngunuan dakeyun hi-gatun enem ni toon e kagedwah ni ebuh tangdan tu etan di kaingngunun kametangdani. U-unnud yu huyyan intugun ku et bendisyonan APU DIOS e Dios yun emin hu pehding yu.

<sup>19</sup> Appil yudda hu memenggulun lakkitun impah idan baka yu ey kalneroh yu tep kamei-appit idan APU DIOS e Dios yu. Entan tudda panggunu humman idan baka, ey entan tudda pu-liti humman idan kalneroh. <sup>20</sup> Huyyaddan inappil yun animal hu hemmolen yuddan pamilyah yun katootoon di hinanggab APU DIOS e Dios yud intudu tun pandeyyawan ni hi-gatu. <sup>21</sup> Nem hedin wada dipekot etan ni animal tep nepi-day ngullaw winu nekulap, ey entan tu iappit ida humman nan APU DIOS e Dios yu. <sup>22</sup> Dammutun ihhide yud baballey yu hu henin makwah winu gazelle e kumpulmih mengihhidda anin hedin kayu kameibbillang ni malinih winu eleg. <sup>23</sup> Nem mahapul ni eleg yu pekikkan hu kuheyaw da, iduyag yud puyek e henin danum.

## 16

### *Ya etan Piyestah ni Passover e Nelabahan ni Anghel APU DIOS*

<sup>1</sup> Mahapul ni yan bulan ni Abib hu pengippahdingan yu etan ni Piyestah ni Nelabahan ni Anghel APU DIOS e Dios yu, tep yan nunman nengipengulangan APU DIOS e Dios yun hi-gayun neni-yanan yun Egypt ni hileng. <sup>2</sup> Yu palsi hu i-appit yun kalneroh winu baka et hamulen yud intudun APU DIOS e Dios yun pandeyyawan ni hi-gatu. <sup>3</sup> Entan tu ihidad sinapay ni nekamdugan ni kamampelbag. Ey pitun aggew hu pengngannan yun nunman ni sinapay ni eleg mekamdugan ni kamampelbag e nengadnan ni sinapay ni kapanhelheltapi henin kinan yu lan nanggannugannuan yun neni-yanan yun Egypt. Humman hu peginemneman yun ingganah etan ni aggew ni neni-yanan yun Egypt e bebley ni nanhelheltapan yu. <sup>4</sup> Ang-ang yu et endi an meihha-ad di baballey yun kamampelbag ni sinapay ni pitun aggew, ey mahapul ni endi an metdaan ni detag ni pinalsi yun kalneroh ni hileng, ekan yun emin nunman ni hileng.

<sup>5</sup> Eleg mabalin ni yu kenen humman ni i-appit yun kalneroh etan idad yu pambebleyan ni indawat APU DIOS e Dios yu. <sup>6</sup> Ey mahapul ni i-appit yu etan di pillien APU DIOS e Dios yun pandeyyawan yun hi-gatu ni mahmahdem hedin nelinug law hu aggew, tep yan nunman ni tsimpuh hu neni-yanan yun Egypt. <sup>7</sup> Itangtang yu humman ni impah ni kalnero, et kanen yud pillien APU DIOS e Dios yun pandeyyawan yu et han kayu mambanggad di kampu yun kakkabbuhhan. <sup>8</sup> Entan pangan ni enem ni aggew ni sinapay ni nekamdugan ni kamampelbag. Kaemung kayun meikkeppitun aggew et dayawan yu hi APU DIOS e Dios yu. Entan panggunu yun nunman ni aggew.

### *Ya etan Piyestah ni Ani*

<sup>9-10</sup> Hedin ya mewan pengippahdingan yun Piyestah ni Ani ey melebbah pitun linggu meippalpun pengilleppuan yun man-enni. Ey ilaw kayun iggeb-at yun i-appit ni hi-gatu meippuan ni imbendisyon tun hi-gayu. Humman ni pehding yu ey penaydayaw yun APU DIOS e Dios yu. <sup>11</sup> Et man-an-anla kayuddan pamilyah yu, yadda helag Levi ni wadal bebley yu, yadda hansinu-wan ni nekibebley ni hi-gayu, yadda nepu-hig et yadda nebalu, di pinilin APU DIOS e Dios yun pandeyyawan yun hi-gatu. <sup>12</sup> Mahapul ni peka-u-unnuden yudda huyyan tugun. Entan tu liwwan e nambalin kayun himbut di Egypt ni nunman.

### *Ya Piyestah ni Kampu*

<sup>13</sup> Ipahding yu hu Piyestah ni Kampun pitun aggew hedin negibbuh ni inilik yudda ineni yu ey kimpal yudda grapes yu. <sup>14</sup> Yan nunyan tsimpuh hu pan-an-anlaan yuddan pamilyah yu, yadda bega-en yu, yadda helag Levi, yadda hansinu-wan ni nekibebley ni hi-gayu, yadda nepu-hig niya nebalu. <sup>15</sup> Ipahding yu huyyan pitun aggew ni penaydayaw yun APU DIOS e Dios yu etan di pillien tun pandeyyawan ni hi-gatu, tep hi APU DIOS e Dios yu hu mengidwat ni hi-gayun dakel ni ennien yu, ey hi-gatu memendisyon ni emin ni ngunu yu, ma-lat endi pangkullangan ni an-anla yu. <sup>16</sup> Emin hu lalakkid Israel ey



mahapul ni pehding dadda huayan tellun piyestah ni katootoon etan di pillien APU DIOS yun pandeyyawan ni hi-gatu. Humman ida ey: Piyestah ni Passover, Piyestah ni Ani et ya Piyestah ni Kampu. Mahapul ni wada hakey ey um-ilaw ni iddawat tun APU DIOS, <sup>17</sup> nengamung hu kabaelan tu, meippuun di bendisyon ni indawat APU DIOS e Dios yun hi-gatu.

*Yadda etan mepillin manhuwet*

<sup>18</sup> Putuk yudda manhuwet et yadda oopisyal et mei-peng idan man-ap-apud helag yud kebbebley ni iddawat APU DIOS e Dios yun hi-gayu. Mahapul ni meandeng hu panhuwet daddan tutu-u. <sup>19</sup> Endi da pahhigan ni panhuwetan da, ey mahapul ni eleg ida mebeyyadi tep ya bayad hu kamei-ellig di kamengullap ni tuu, et humman hu anin ni nenemneman niya limpiyuh ey meihhalla law hu pehding tun mengippennuh ni kasuh. <sup>20</sup> Mahapul ni ya limpiyuh ni ingganah hu meippahding, et mannaneng kayun meteggu et mambebley kayud bebley ni indawat APU DIOS e Dios yun pambebleyan yu.

<sup>21</sup> Eleg mabalin ni kayu mengapyan penginnemneman yun Asherah, et yu idagsid altar APU DIOS e Dios yu. <sup>22</sup> Ey entan an iha-ad ni batun tukud ni deyyawan idan tutu-u, tep anggebe-hel APU DIOS e Dios yudda humman.

## 17

*Mahapul ni meu-unnud hu e-helen ni padi niya huwet ni mengipennu ni kasu*

<sup>1</sup> Entan tu iappit nan APU DIOS e Dios tayu hu baka winu kalneroh ni wada dipektoh tu, tep eleg tu pinhed henin nunman.

<sup>2</sup> Hedin wada laki winu biin nanliwat nan APU DIOS e Dios yu, tep impangil tu hu nekitbalan tun hi-gatu <sup>3</sup> et dayawen tu edum ni dios, ya aggew, ya bulan ey ya bittuwen ni eggak i-abulut ni yu deyyawen, <sup>4</sup> et meipeamtan hi-gayu humman, ey mahapul ni pakammahmahi yu hedin makulug. Et hedin makulug ni neipahding humman ni lawah ni peteg di deya Israel, <sup>5</sup> ey mahapul ni ellan yu humman ni tuu et ilaw yud eheb ni bebley et tengbaen yun batu et matey. <sup>6</sup> Nem hedin endi, winu hakey ni ebuh hu tistigu, ey eleg mabalin ni yu tengbaen et matey. Mahapul ni wada dewwa winu tellun mantistigu et han dammutun mettey etan tuun nanliwat. <sup>7</sup> Yadda tistigu hu memenggulun menengan nunman ni tuu, et han meitu-nud hu edum ni tutu-u. Hanniman ipahding yu et meendi henin nunman ni lawah ni hi-gayu.

<sup>8</sup> Hedin yadda neligat ni kasuh ni ippanuh idan huwet di bebley yu, henin pengamtaan hedin implanuh ni hakey ni tuun pimmatey winu eleg, ya gaputun neliputan hu hakey ni tuu niyadda edum ni kasuh ni neligat ni meipennuh, ey mahapul ni ilaw yud bebley ni pillien APU DIOS e Dios yun pandeyyawan yu. <sup>9</sup> Lakkayuy di kad-an idan padi e helag Levi, et yad kad-an ni huwet ni kaman-opisinah ni nunman ni tsimpuh, ma-lat hi-gada hu mengipennu ey kenamung ida hedin hipa lebbeng tun meippahding. <sup>10</sup> Mahapul ni u-unnuden yu hu e-helen ni padi niya huwet etan di nepilin pengippenuhan tep humman hu neiptek. Ang-ang yu et ipahding yun emin hu e-helen dan pehding yu. <sup>11</sup> U-unnud yu hu linteg ni ituttuddu da ey ya pengippennuh dan kasuh. Ang-ang yu et endin hekey an meihhallan pehding yu etan di intudu da. <sup>12</sup> Ya etan tuun manggenghay ni e-helen ni huwet winu ya padin kamansilbin APU DIOS e Dios yun nengipenuh ni nunman ni kasuh, ey mahapul ni petteyen yu. Mahapul ni me-kal hu lawah di Israel, <sup>13</sup> ma-lat dengelen idan emin ni tuu et tumekut ida et endi law an manggenghay.

*Yadda tugun ni mahapul ni u-unnuden ni mampatul*

<sup>14</sup> Yan pambebleyan yullid bebley ni iddawat APU DIOS e Dios yu, ey heppulen yulli law hu mampatul ni hi-gayu e heniddan bebley di nanlinikweh ni kebbebley. <sup>15</sup> Nem mahapul ni ya pillien yun mampatul ey ya pinilin APU DIOS e Dios yu niya mahapul ni edum yun helag Israel humman. Eleg mabalin ni ya hansinu-wan hu mampatul ni hi-gayu. <sup>16</sup> Ya etan mampatul ey eleg mabalin ni tu dakkedakkelen hu kebayyu tu. Ey eleg mabalin ni an um-itu-dak di Egypt ni tutu-u tun an umgatang ni kekebayyu tu, tep kan APU DIOS ey eleg mabalin ni ida mewar mambanggad diman. <sup>17</sup> Eleg mabalin ni an dakkelen ni patul hu ahwa tu, tep hi-gadalli umhulun ni pengiwwallangan tun APU DIOS. Ey eleg mewar mabalin ni tu tagan amung ni silber ey balituk et ikedangyan tu. <sup>18</sup> Hedin man-ap-apu hu hakey ni patul, man mahapul tu libluh ni meippangep ni tugun APU DIOS. Nem mahapul ni humman ni libluh ey nei-la etan di libluh ni singnged idan padin helag Levi. <sup>19</sup> Mahapul ni wadan ingganah huuyad kad-an tu, et benidbiden tu ingganah mepappeg biyag tu, ma-lat adalen tun mandeyyaw niya mengu-unnud idan tugun APU DIOS e Dios tu. <sup>20</sup> Et gapuh ni pemennidbidan tu ey eddalen tun eleg mampahhiyya et tu ibilang annel tun kekkeddukdul nem yadda edum tun helag Israel. Ey gapun

pemennidbidan tu ey eleg tu iwwalleng ida tugun APU DIOS ma-lat hi-gatu niyadda helag tu hu mannenneng ni mampatul di Israel.

## 18

### *Ya patal idan padi*

<sup>1</sup> Yadda padi et ya edum dan helag Levi, ey endi da beltanen ni puyek di deya Israel. Beken ni heniddan edum dan helag Israel e wada beltanen dan puyek. Yadda kamei-appit nan APU DIOS hu kelpuan ni pambiyagan da tep humman beltanen da. <sup>2</sup> Yaddad emin ni helag Israel ey hi-gada hu endi beltanen da, tep hi APU DIOS hu kamei-ellig di beltanen da, tep humman hu hinammad tun inhel ni hi-gada.

<sup>3</sup> Yaddahuy hu patal idan papaddi hedini nan-appit ida tutu-un baka winu kalneroh: ya lapa, ya pangal et ya egeh. <sup>4</sup> Meidwat mewani ni hi-gada hu memengngulun meenin pagey, memengngulun mehi-it ni meinnum, ya mansikan olibah et ya memengngulun mepu-lit ni dutdut ni kalneroh. <sup>5</sup> Tep yad emin ni hi-gayun helag Israel ey hi-gadan helag Levi et yadda helag da hu pinilin APU DIOS e Dios yun mampeddin ingganah.

<sup>6</sup> Hedin wada hakey ni helag Lebay ni neminhed ni mampeddi anin ni attu bebley tud Israel, ey dammutun umlaw di pillien APU DIOS ni pandeeyawan ni hi-gatu, <sup>7</sup> et an mansilbin APU DIOS e Dios tu heniddan edum tun helag Levi ni kamansilbin APU DIOS diman. <sup>8</sup> Dammutun mekibbingngay idan kenen ni edum tun padidman, anin hedini kantu et wada kaiddawat ni panilyah tun ussalen tu.

<sup>9</sup> Hedin kayu law mambebley di iddawati APU DIOS e Dios yun pambebleyan yu, ang-ang yu ma-lat eleg yu u-unnuden ida lallawah ni kapehpehding idan bimbebley diman. <sup>10</sup> Entan tu iappit hu u-ungnga yun yu gihheben idad apuy. Entan tu mewani iebulut ni wadan hi-gayu hu man-ennap, man-ebbig, winu man-eyyak, <sup>11</sup> kaman-ennap, manmagguway winu kamekihummangan ni linnawan nangketey. <sup>12</sup> Anggebe-hel ni peteg APU DIOS hu kamengippahding idan nunya. Ey anggetakkut hu meippahding ni hi-gada. Tep hanniman hu daka ippenahding idan nampambebley idad bebley ni lawwan yu, et humman hu, degyunen idan APU DIOS e Dios yu. <sup>13</sup> Mahapul ni endi yu ippahding ni panliwwatan yun APU DIOS e Dios yu.

<sup>14</sup> Yadda tutu-un nambebley di yu pambebleyan ey ida kamampebaddang di kaman-ennap, kaman-ebbig, nem hedini hi-gayu man eleg i-abulut APU DIOS e Dios yun yu ippahding ida hanniman.

### *Ya meipanggep ni makulug ya beken ni makulug ni prophet*

<sup>15</sup> Weddaen alin APU DIOS e Dios yu hu prophet yu e henin hi-gak. Nem mahapul ni u-unnuden yulli ittugun tu.

<sup>16</sup> Tep huyya imbageyun APU DIOS e Dios yun neamungan yud Duntug e Sinai e kanyuy "Eleg mi pinhed ni dedngelen hu ehel APU DIOS e Dios mi winu mi ang-angen hu kamantetebbel ni apuy tep etanni ey metey kami." <sup>17</sup> Et kan APU DIOS ni hi-gak ey "Kayyaggud tep, ippahding ku huttan ni inhel da. <sup>18</sup> Ey wadalli puttukun kud edum dan helag Israel ni hakey ni prophet e henin hi-gam. Et hi-gatulli mengippeamtaddan pinhed kun peamtan hi-gada. <sup>19</sup> Ya etan tuun mangngenghay ni e-helen nunman ni prophet ni peheppit ku ey kastiguen kulli. <sup>20</sup> Ey ya etan prophet ni kantuy nalpun hi-gak hu inhel tu, nem beken kayan makulug winu kantuy nalpun edum ni dios hu inhel tu ey mahapul ni mettey."

<sup>21</sup> Wadan kanyuy: 'Hipani pengamtaan hedini nalpun APU DIOS hu inhel ni prophet winu beken?' <sup>22</sup> Hedin kan etan ni prophet ey nalpun APU DIOS hu inhel tu ey eleg umamnu, humman pengamtaan yun eleg kaya malpun APU DIOS. Nalpu ngud nemnem etan ni prophet hu inhel tu, et entan tu kaya u-unnud humman ni prophet.

## 19

### *Yadda etan bebley ni meituudun keihhikkugan*

<sup>1</sup> Hedin negibbuh ni binahbah APU DIOS e Dios yudda tuun nampambebley di bebley ni iddawati tun hi-gayu, et sinekup yudda humman ni bebley et nampambaley kayud baballey da, <sup>2</sup> ey mahapul ni wada ittudu yun tellun etta-teng ni neigawwan bebley ni keihhikkugan idad bebley ni iddawati APU DIOS e Dios yun pambebleyan yu. <sup>3</sup> Pantelu yun gennedwaen hu bebley ni iddawati APU DIOS e Dios yun hi-gayu, et i-peng yudda humman ni etta-teng ni bebley ni neiggawwadman. Iyayyaggud yu keltad ni mampellaw diman et yadman bebsikan idan pimmatey et ida maihikug diman.

<sup>4</sup> Hedin wada hakey ni tuun pimmatey e eleg tu igeb-at, ey beken ni anggebe-hel tu etan tuun pintey tu, ey dammutun umbesik diman et an maihikug et meihwang.

<sup>5</sup> Heninnuy hu hakey di dammutun keussalan nunyan linteg: Limmaw hu dewwan tuun an nanlegh ni keyew di muyung ey neipassik hu tadem ni wahay ni hakey et meiptek etan di kadwa tu et matey. Hedin hanneya neipahhding, man dammutun umbesik humman ni pimmatey di bebley ni keihhikkugan et endi an mekapkapyan hi-gatu. <sup>6</sup> Hedin hakey ni ebuh hu meittuddun keihhikkugan, ey neidawwin bebsikan ni edum et entanniy ha-kupan idan agin netey ni netudun mengibleh et petthey da gapuh ni bunget da, ey beken ni bahul etan ni pimmatey tep eleg tu igeb-at. <sup>7</sup> Humman gaputun nakka i-olden e tellun bebley hu tudduen yun keihhikkugan.

<sup>8</sup> Hedin alin mahmahkangen APU DIOS e Dios yu hu pambebleyan yu, meippuun di inhel tudda lan aammed tayu et iddawwat tun hi-gayun emin ida humman ni bebley ni inhel tun hi-gada, <sup>9</sup> ey mahapul ni e-duman yu pay ni tellun bebley hu tudduen yun keihhikkugan. Nanna-ud ni iddawwat tun hi-gayu humman idan bebley yu, hedin u-unnuden yun emin hu tugun tun in-inhel kun hi-gayu ey hedin pinheden yun ingganah hi APU DIOS e Dios tayu niya iu-unnud yu elaw yud elaw tu. <sup>10</sup> Em, ipahding yudda huyyan inhel ku et eleg meil-uh ni mepettye hu eleg mabehulan ni tuud bebley ni iddawwat APU DIOS e Dios yun hi-gayu, et eleg kayu mambahul ni mengipepatey ni hakey ni tuu.

<sup>11</sup> Nem hedin wada hakey ni tuun anggebe-hel tu sinakdul tu, et igeb-at tun hingged et patyen tu et bumsik etan di bebley ni keihhikkugan, <sup>12</sup> ey mahapul ni an peelladdan aap-apud bebley tu, et pebeltan daddan mengibleh ni aaggin pintey tu, et patyen da humman ni pimmatey. <sup>13</sup> Entan tu hemek humman ni tuun mapetey, et ma-kal eyad Israel hu henin nunman ni lawah ni tuu, et kayyaggud ni emin hu meippahding ni hi-gayud pambebleyan yu."

<sup>14</sup> Intugun mewan Moses e kantuy "Hedin mambebley kayullid bebley yun nebalol ni peteg ni iddawwat APU DIOS e Dios yun hi-gayu, ey entan tu idedel hu puyek ni edum yu et yu geliden hu kiggad ni inha-ad idelan aammed yu.

<sup>15</sup> Entan tu ibilang e nambahul hu tuu hedin hakey ni ebuh tistigu. Mahapul ni dewwa winu tellu hu mantistigu. <sup>16</sup> Hedin ya etan hakey ni maitek ni tuu ey kantuy nambahul hu hakey ni tuu ey beken ni makulug, <sup>17</sup> mahapul ni umlaw idan dewwad kapandeyyawin APU DIOS, et yadda padi winu huwet ni kamansilbid man ni nunman ni tsimpuh hu menummalyan hi-gada, <sup>18</sup> et pakammahmahan da hedin hipa nambahul. Et hedin nebudihan e itek hu impabehul etan ni hakey ni tuud kadwa tu, <sup>19</sup> ey ya etan kaman-itek hu manheltap etan ni kastigun kantun nambahul. Hanniman ipahding yu et masiked hu hanniman ni lawah eyad Israel, <sup>20</sup> ma-lat hedin dedngelen ni emin ni tuu huyya, ey umtakut ida et endi an mengippahding ni henin nunman ni lawah.

<sup>21</sup> Ya etan tuun nambahul ey lebbeng tun mekastigu gapuh ni bahul tu. Et humman hu, ya etan tuun pimmatey ey mahapul ni mettey. Heninnuy hu lebbeng tun meunnud: Hedin kinulap ni hakey ni tuu hu hakey ni matan edum tun tuu, mahapul ni mekullap dama hakey ni matetu. Hedin pinlag ni hakey ni tuu hu hakey ni ngipen ni edum tun tuu, mahapul ni meplag dama hakey ni ngipen tu. Ey hedin liniputan ni hakey ni tuu hu ngamay winu helin edum tun tuu, mahapul ni melipputan dama ngamay winu heli tu."

## 20

### *Ya meu-unnud meipanggep ni pekigubatan*

<sup>1</sup> Hedin kayu mekiggubbat ni buhul yu, anin ni daddakkel sindalu da, kalesah da ey kebayyu da nem hi-gayu, ey entan takut yu, tep baddangan dakeyun APU DIOS e Dios yun nengihwang ni hi-gayud Egypt. <sup>2</sup> Ya pehding ni padi et han kayu an mekigubat ey umlaw di hinangaddan sindalu et umhel <sup>3</sup> e kantuy "Hi-gayun edum kun helag Israel, pandengel kayu! Umlaw kayun an mekiggubbat! Entan takut yu, entan ke dismayah yu ey entan tu talak nemnem yu gapuh ni takut yu. <sup>4</sup> Mekillaw ni hi-gayu hi APU DIOS e Dios yu et hi-gatu mekiggubbat idan buhul yu et pengapput dakeyu."

<sup>5</sup> Ey kan ida daman aap-apun sindalud sindalu day "Kaw wadan hi-gayu hu pakekapyu baley tun eleg tu ni pebendisyon nan APU DIOS? Hedin wada, man anemut tep entanniy mettey di gubat, ey hin-appil law mengippebendisyon ni baley tun APU DIOS. <sup>6</sup> Kaw wadan hi-gayu nantanem ni grapes ey eleg tu ni bugbugen lameh tu? Hedin wada, man anemut tep entanniy mettey di gubat, ey hin-appil ni tuu an mengngan ni lameh ni intanem tu. <sup>7</sup> Kaw wadan hi-gayu neilaw simbal tu? Hedin wada, anemut et mengahwa, tep entanniy mettey di gubat et hin-appil law ni laki hu mengi-ahwan biin ahwaen tu."

<sup>8</sup> E-duman ida daman opisyal et kanday "Kaw wadan hi-gayu kaumtakut ni an mekiggubbat? Hedin wada, man i-imman hu um-anemut, tep entanniy me-tanan ida

edum tun takut tu, et meendi tuled da.”<sup>9</sup> Hedin negibbuh ni immehel ida aap-apu idan sindalu ey tudduen dadda mengipappangguluddan sindalu.

<sup>10</sup> Ey hedin yu gubbaten hu hakey ni bebley, ey idwasi yu ni hu bimmebley ni wayah dan mansukkuh.<sup>11</sup> Hedin ibbeghul da eheb da et mansukkuh ida, mahapul ni mambalin idan himbut yu, et pangngunggunnu yuddan endi tangdan da.<sup>12</sup> Nem hedin eleg ida mansukkuh, man gubat yudda.<sup>13</sup> Ey hedin i-abulut APU DIOS e Dios yun hehgepen yu etan bebley, ey patey yun emin lalakkidman.<sup>14</sup> Yadda bibi-i, yadda u-ungnga, yadda animal ey emin hu hipan wada etan di bebley ey dammutun ellan yu et ienamut yu. Dammutu pay ni ussalen yun emin hu hipan inla yuddad buhul yu, tep indawat APU DIOS e Dios yudda humman ni hi-gayu.<sup>15</sup> Hanniman ipahding yuddan ebuh ni bebley ni neidawwi, nem entan tu ipahding huuyad bebley ni neihipud di nambebleyan yu.

<sup>16</sup> Nem hedin yaddad bebley ni iddawat APU DIOS e Dios yun hi-gayun pambebleyan yu, ey mahapul ni petteyen yuddan emin hu wadadman ni mategu.<sup>17</sup> Mahapul ni petteyen yuddan emin Hittite, ya Amorite, ya Kanaanite, ya Perissite, ya Hibite et yadda Jebusite tep humman intugun APU DIOS e Dios yun pehding yu.<sup>18</sup> Mukun kan APU DIOS ey petteyen yuddan emin ey ma-lat endi an mengituttuddun daka pehding ni mandeyyaw idan dios dan kinapyan tuun kamengippebungnet nan APU DIOS e Dios yu, tep humman umhulun ni panliwwatan yun hi-gatu.

<sup>19</sup> Hedin gubbaten yu hakey ni bebley ey mebabbayag hu penggepan yu, entan tu bahbah ida keyew. Tep kaw humman idan keyew hu buhul yu, beken tep mahapul yu lameh da.<sup>20</sup> Yadda etan keyew ni eleg mekkan lameh da, ey lelngehen yu et usalen yun menggep etan ni bebley.

## 21

*Ya pengippahdingan ni elaw ni panlinnih gapuh ni netey e pintey ni eleg meamtan pimmatey*

<sup>1</sup> Nungay wada nehamak ni annel ni pintey dan tuud bebley ni iddawat APU DIOS e Dios yu, ey eleg yu amta hedin hipa nematey.<sup>2</sup> Hedin wada hanniman ey mahapul ni ang-angen idan aap-apu niya huwet yu hu kehehhunnupan ni bebley etan di nehamak ni annel ni netey.<sup>3</sup> Et yadda aap-apudman ni bebley hu um-alan pakeetteng tun bakan eleg tu patnaan ni mangngunnu winu man-elladu.<sup>4</sup> Et ilaw da etan di nebel-ah ni nedeklan ni wada kulukul et hehpungen da buklew tudman.<sup>5</sup> Mahapul ni umlaw ida damadman hu padin helag Levi, tep hi-gada pinilin APU DIOS e Dios yun mansilbin hi-gatu, mambendisyon di ngadan tu, mengippennuh ni panhahallaan ni tutu-u niya menghel hedin lebbeng tun mekastigu hakey ni tuu winu eleg.<sup>6</sup> Yadda aap-apud bebley ni kehehhennupan di neteyyan etan ni tuu, ey ullahan da ngamay dad ta-pew nunman ni bakan nahpung buklew tu,<sup>7</sup> et kanday “Beken ni hi-gami nematey eyan tuu, ey eleg mi ang-angen hu neipahding.<sup>8</sup> APU DIOS, pesinsahim hu liwat idan tutu-u ni helag Israel ni inhewang mu. Entan tudda pabehulin neteyyan eyan tuum ni endi bahul tu.” Hanneya ippahding da ma-lat eleg ida mabehulan ni neteyyan etan ni tuu.<sup>9</sup> Hedin u-unnuden yudda huuyan intugun ku, ey pehding yudda hu pinhed APU DIOS, ey me-kal hu bahul ni nepateyan nunman ni tuud bebley yu.

*Ya meu-unnud ni pengiahwaan ni balud ni bii*

<sup>10</sup> Hedin impengapput dakeyun APU DIOS e Dios yud gubat et wadadda inla yun balud,<sup>11</sup> ey entanni ey wada inang-ang yuddan balud ni kat-agun biin pinhed yun ahwaen,<sup>12</sup> ey dammutun ewwiten yu humman ni biid baley yu, nem mahapul ni mukmukan tu ulu tu, e-kalen tu kuku tu,<sup>13</sup> niya hullulan tu balwasi tu. Manha-ad humman ni biid baley yu, et ilmetan tudda a-ammed tun hambulan et han law dammutun ahwaen yu.<sup>14</sup> Hedin neil-uh ni inahwa yu ey entanniy eleg yu mewan law pinhed humman ni bii, ey dammutun ibbukyat yun liblih e beken yu law ni himbut. Ey gapu tep pinilit yun in-ulig, ey eleg law mabalin ni henin himbut hu pehding yun hi-gatu, ey eleg mabalin ni yu iggatang.

*Ya kelebengan ni penguluwan ni laki*

<sup>15</sup> Hedin dewwa ahwan hakey ni laki ey pinpinhed tu etan hakey ni ahwa tu ey nan-ungngadda huuyan dewwan biin laki, nem ya pengulwan ni u-ungngatun laki ey ya etan eleg tu pinpinhed hu nengiungnga,<sup>16</sup> ey hedin gennedwaen tudda pebeltan tuudan u-ungnga tu, ey eleg mabalin ni tu iddawat hu e-etteng ni pebeltan tu etan di lakin u-ungnga tu etan di biin pinpinhed tu.<sup>17</sup> Mahapul ni iddawat tu etan e-etteng ni pebeltan tu etan ni pengulwan ni lakin u-ungnga tu, tep hi-gatu kei-ang-angan ni kelakkin ametu,

ey hi-gatu lebbeng tun mengellan kabeltanan pengulwan ni laki, anin ni u-ungnga tud eleg tu pinpinhed ni ahwa tu.

<sup>18</sup> Hedin wada u-ungngan manghay e eleg mengu-unnud nan ametu winu hi inetu anin ni tuggutuggunen da, <sup>19</sup> ey mahapul ni illaw di ametun inetu humman ni u-ungnga dad aap-apu etan di kapanhuwesidman ni bebley. <sup>20</sup> Et ehelen da e kanday "Huyyan u-ungnga mi ey manghay e eleg mengu-unnud. Mahiga ey ebuh mengngan niya mambutteng ni tuka pehpending." <sup>21</sup> Et emin hu lalakidman ni bebley ey tengbaen da humman ni tuu et matey. Hanniman ipahding yu et endi an meikamkamdug ni hi-gayun lawah tuka pehpending. Et hedin dedngelen ni emin ni helag Israel ey umtakut ida et eleg da ipahding hu henin nunman.

#### *Yadda etan edum ni tugun*

<sup>22</sup> Hedin wada nambahul ey lebbeng tun mettey tep ya kastigu tu ey katey. <sup>23</sup> Hedin meitta-yun di keyew, mahapul ni e-kalen yud neita-yunan tun nunman ni aggew et yu ikulung, et eleg mewa-waan diman tep iddutan Apu Dios etan bebley. Huyya pahding yu ma-lat eleg mahibit hu bebley ni iddawat APU DIOS e Dios yun hi-gayun beltanen yu.

## 22

<sup>1</sup> Hedin wada ang-angen yun bimmukyut ni baka winu kalneroh ni edum yun helag Israel ey entan tu kehinkullapi, aleyu et ilaw yu etan di kan animal. <sup>2</sup> Hedin neidawwi kambagi winu hedin eleg yu amta kan kukwah, ey ienamut yu et iiket yu et hedin umali etan kambagi et tu hemmaken, ey han yu indawat ni hi-gatu. <sup>3</sup> Hanniman mewan pehding yu hedin kantu et kebayyu, balwasi winu kumpulmih ni sinelak ni dinagsi yu. Entan tu kahintammai et kanyuy eleg yu ang-angen.

<sup>4</sup> Hedin netu-li baka winu kebayyun dinagsi yud dalam ey entan tu kehing-ang-angid pangil e heni eleg yu ang-angen. Baddangi yu kumaddan hu dinagsi yu, et behwatan yu animal tu.

<sup>5</sup> Hedin ya bii man eleg mabalin ni tu ibbalwasi balwasin laki, hanniman dama laki e eleg mabalin ni tu ibbalwasi balwasin bii. Hi APU DIOS e Dios yu ey eleg tu pinhed hu tunun mengipahding ni henin nunya.

<sup>6</sup> Hedin wada hina-kupan yun buyan sisit di keyew winu yad puyek ey wada etan inan sisit ni kamannekkeb winu na-pah itlug tu, ey eleg mabalin ni mu ellan etan inan sisit. <sup>7</sup> Dammutun ellan yudda impah tu, nem entan tu peki-la inetu. Hedin hanniman pehding yu ey umyaggud hu biyag yu niya andukkey pambiyagan yu.

<sup>8</sup> Hedin mewan mengapya kayun baley ey mahapul ni ha-adi yun padpad hu nanlinikweh ni atep yun nedeklan. Hanniman pahding yu ma-lat endi meaksidenteh ni me-gah et matey et eleg mabehulan hu pamilyah yu.

<sup>9</sup> Eleg mabalin ni yu ikkamdug hu edum ni kameitnem di intanem yun grapes. Tep hedin hanniman pehding yu, man eleg mabalin ni yu ellan hu lameh ni grapes anin niya lameh etan ni ingkamdug yun intanem yu.

<sup>10</sup> Entan mewan tu pan-unnud hu bulug ni baka niya kebayyun man-elladu.

<sup>11</sup> Entan tu ibalwasi hu balwasin nekapyad dutdut ni kalneroh niya luput ni neikahhakey ni neabel.

<sup>12</sup> Ha-adi yun beluybuy ni meitta-yun etan di epat ni dugun luput yun yuka iwwangal di annel yu.

<sup>13</sup> Hedin inahwan hakey ni laki hu hakey ni bii, nem entanni ey nantuttuyyun negibbuan ni nengiuligan tun hi-gatu et eleg tu law pinhed, <sup>14</sup> et mengapkapyan pebehul tu etan ni biin beken ni makulug e kantuy "Yan nengahwaak ni hi-gatu ey neamtaak e wada nemangulun nengiulig ni hi-gatun edum ni laki." <sup>15</sup> Ey mahapul ni um-ipeang-ang ida hu a-ammed ni biin kakulugan tun endi nemangulun nengiulig etan ni bii. Peang-ang daddan aap-apudman ni bebley. <sup>16</sup> E-helen etan ni aman bii e kantun hi-gaday "In-abulut ku eya u-ungngak ni biin ahwaen eyan laki, nem yan nunya ey heni buhul tu tuka pehding ni hi-gatu. <sup>17</sup> Anggeba-ing hu tuka pebehul ni hi-gatu, e kantuy yan nengiahwaan tun hi-gatu ey neamtaan tu e in-ulig ni edum ni laki. Nem adyah kakulugan tun endi edum ni lakin nengiulig eyan u-ungngak." Ey peang-ang tuddan huwet etan luput, <sup>18</sup> ma-lat kastiguen da etan laki. <sup>19</sup> Multaen dan hanggatut ni palatah ni silber gapuh ni nengipebahulan tun ahwa tun beken ni makulug. Humman ni multa tu ey meidwat etan ni aman bii. Hedin ya etan bii ey mannenneng ni ahwa etan ni laki, tep eleg mabalin ni tu hi-yanen.

<sup>20</sup> Nem hedin makulug etan impabehul ni laki ey endi pengi-ang-angan e eleg iulig ni edum ni laki etan bii, <sup>21</sup> ey mahapul ni illaw da etan biid hinanggan habyen ametu, et tengbaen idan lalakidman ni bebley et matey. Anggeba-ing humman ni bahul ni

tu impahding di Israel, e an nekiulig di lakin kaweda tud baley ametu. Eleg mabalin huyyan lawah ni meippahding di Israel.”

<sup>22</sup> Kan mewan Moses ey “Hedin i-ulig ni hakey ni tuu hu ahwan edum ey meippepettey ida humman ni dewwan nan-ulig, et meendi hu henin nunman ni lawah ni hi-gayu.

<sup>23</sup> Hedin dinammun hakey ni laki hu biin pinudungan ni edum ni laki et iulig tu, <sup>24</sup> ey meillaw idad a-allaw ni bebley et metengbadda et matey ida. Ma-nu kedit mahapul ni meippepettey etan bii, ey tep gullat et simmekuk et wada nemaddang ni hi-gatu. Hedin ya etan lakin nengiuilig ni hi-gatu ey mahapul ni meippepettey, tep in-ulig tu hu nepudungan ni bii. Ipahding yu huuya et meendi hu hanniman ni lawah ni hi-gayu.

<sup>25</sup> Nem hedini kantu et dinammun etan ni laki hu biin nepudungan di endi tu-utu-u et piliten tun iulig, ey ebuh etan lakin mettey. <sup>26</sup> Eleg mekastigu etan biin katey tep eleg mambahul. Humman ni bii ey mei-inggeh etan di tuun neala et pateyen da anin ni endi bahul tu. <sup>27</sup> Ey gapu tep pinilit etan ni lakin in-ulig etan biid endi tuu, ey nanna-ud ni simmekuk etan bii, nem endi nengihwang ni hi-gatu.

<sup>28</sup> Hedin neha-kupan hu lakin pinilit tun in-ulig hu biin eleg meitga, <sup>29</sup> mahapul ni mambeyyad ni neliman palatah etan ni aman bii. Ey mahapul ni i-ahwa tu humman ni bii, tep nambahul ni hi-gatu ey eleg mabalin ni hi-yanen tu. <sup>30</sup> Eleg mabalin ni an i-ulig ni laki hu ahwan ametu, tep et-eteng ni bahul tun ametu humman.”

## 23

### *Ya tugun meipanggep ni pandeyyaw Apu Dios*

<sup>1</sup> Ya hakey ni lakin negapun winu neputul singngedan tu, ey eleg mabalin ni meki-emmaung ni hi-gayun mandeyyaw nan APU DIOS.

<sup>2</sup> Yadda inla-la-gah, anin idan u-ungnga da ingganah di meikkewwalun inap-apu da, ey eleg ida mabalin ni meki-emmaung ni hi-gayun mandeyyaw nan APU DIOS.

<sup>3</sup> Yadda iAmmon winu iMoab, anin idan u-ungnga da ingganah di meikkewwalun inap-apu da, ey eleg ida mabalin ni meki-emmaung ni hi-gayun mandeyyaw nan APU DIOS, <sup>4</sup> Tep eleg dakeyu anhan idwatan ni kenen niya danum eman ni kayu kamengellin nalpuan yud Egypt. Nem sinangdanan da anhan law hi Balaam e u-unggan Beor e iPethor di Aram Naharaim, et idutan dakeyu. <sup>5</sup> Nem ay eleg denglen APU DIOS e Dios yu hu imbagan Balaam. Impambalin anhan law APU DIOS e Dios yun bendisyon humman ni idut, tep et-eteng hu nemihed tun hi-gayu. <sup>6</sup> Entan pakidagdagyum idan iAmmon ey iMoab ni nunyan ketaggu yu anin ni hipa meippahding.

<sup>7</sup> Nem hedini yadda iEdom ey entan tudda angebe-hel tep agi yudda, anin idan iEgypt tep nebayag kayun nekibebley ni hi-gada. <sup>8</sup> Dammutun meki-emmaung idan hi-gayu hu helag dan mandeyyaw nan APU DIOS meippalpu idan inap-apu da.

<sup>9</sup> Hedin kayu mekigubbat, ang-ang yu et eleg kayu meihnu idad kameibbilang ni beken ni malinih. <sup>10</sup> Hedin nambalin ni beken ni malinih hu hakey ni laki tep wada neukat di annel tun hileng ni neugipan tu, ey mahapul ni hi-yanen tu nangkampuan dan han-aggew. <sup>11</sup> Hedin kamangkelinnug aggew, man-e-meh et han menamut di kampun kelinnugan ni aggew.

<sup>12</sup> Malkai yud a-allaw ni kampu yu hu pangkahhilyatan yu. <sup>13</sup> Et mahapul ni emin kayu ey wada itabin yun pala tep hedini kayu mante-i, ey umku-ku kayud puyek et hedini negibbuh, man sina-bunan yu. <sup>14</sup> Hanneya ipahding yu tep mahapul ni malinih hu pangkampuan yu, tep wadadman hi APU DIOS e Dios yun mengeddug niya memaddang ni hi-gayu, et apputen yu buhul yu. Ey mahapul ni endi tu ang-angen diman ni hipan angeba-ing tep entanniy iwalleng dakeyu.

<sup>15</sup> Hedin wada himbut ni imbesikan tu kan himbut ni hi-gatu et maihikug ni hi-gayu, entan tu papilit ni pambanggad. <sup>16</sup> Abulut yun mekibebley ni hi-gayu etan di bebley ni pinili tun pambebleyan niya entan tu lehani.

<sup>17</sup> Endin hi-gayun helag Israel hu mambalin ni tu pebeyyad annel tud tempol idan beken ni makulug ni dios. <sup>18</sup> Entan mewan tu iappit di baley APU DIOS e Dios yu hu hipan sinangdan idan daka pebeyyad annel da, tep angebe-hel ni peteg idan APU DIOS e Dios yu.

<sup>19</sup> Entan tu peporsentoh hu pebenneh yun pihhuh winu kumpulmih ni kapebenneh ni kameporsentohi di edum yun helag Israel. <sup>20</sup> Nem dammutun peporsentoh yu pebenneh yuddan tutu-un nalpu edum ni bebley. Nem entan nisi tu singil ida edum yun helag Israel ni porsentoh, et bendisyonan APU DIOS e Dios yu emin hu pehding yud pambebleyan yu.

<sup>21</sup> Hedin wada insapatah yun APU DIOS e Dios yu, ey mahapul ni eleg yu ippangil. Mahapul ni ipahding yu tep humman hu kan APU DIOS e Dios yu, et manliwat kayu

hedin eleg yu pehding. <sup>22</sup> Beken ni liwat hu eleg mansapatah nan APU DIOS, <sup>23</sup> nem hedin inggeb-at yun mansapatah ey mahapul ni ipahding yu.

<sup>24</sup> Hedin limmaw kayud leguntan dinagsi yu, dammutun kennen yu hu pigan pinhed yun grapes ni intanem tu ingganah mehingla kayu, nem eleg mabalin ni kayu umihhambag. <sup>25</sup> Hedin mewan limmaw kayud payew ni dinagsi yu ey dammutun umpasing kayun kussimen, nem eleg mabalin ni geppasen yu hu intanem tu.

## 24

### *Ya meippanggep ni pengahwaan*

<sup>1</sup> Hedin nengahwa hakey ni laki, nem entanniy na-kal hu impeminhed tun ahwa tu tep wada neamtaan tun anggeba-ing ni elaw etan ni biin eleg tu pinhed, ey itudek tud papil hu meippanggep ni panhi-yanan da et idwat tu humman ni papil etan ni bii et han tu pa-hep di baley tu. <sup>2</sup> Hedin immehep etan bii et nambintan, <sup>3</sup> ey entanni mewan et hi-yanen etan ni meikkadwan ahwa tu winu netey, <sup>4</sup> ey eleg law mabalin ni an bangngaden etan ni nemangulun ahwa tu, tep kameibbillang law ni beken ni malinih humman ni bii. Eleg pinhed APU DIOS hu henin nunman. Humman hu, ang-ang yu et eleg yu ipahding hu henin nunman ni panliwwatan yun APU DIOS e Dios yu etan di bebley ni idawat tun pambebleyan yu.

<sup>5</sup> Ya pakelahin tun laki ey eleg mabalin ni an mansindalu winu an meidwatan ni ngunun gubilnun hantoon. Diman et eleg meidawwid baley da et peamleng tu ahwa tu.

<sup>6</sup> Hedin wada impautang yun hakey ni tuu, man entan tu ala hu gillingngan tun pengitngedan yun inutang tu, tep humman tuka ussalan mandaddan ni kennen tu et tumegu.

<sup>7</sup> Ya etan tuun tuka ibbebsik edum tun helag Israel et mambalin ni himbut tu winu ihhehbut tun edum ni tuu, ey mahapul ni meippepettey et meendi hu henin nunman ni lawah ni hi-gayu.

<sup>8</sup> Helipat-i yun emin ida degeh ni belat ni nelakah ni mei-tan, ey peka-u-unnud yu ittugun idan padin helag Levi meippanggep idan nunya, tep intugun kun hi-gadadda huyya. <sup>9</sup> Nemnem yu eman la impahding APU DIOS e Dios tayun nunman nan Miriam ni tayu kapengelliin nalpuan tayud Egypt.

<sup>10</sup> Hedin mewan wada impautang yun dinagsi yu, entan an hegeg di baley dan mengellan iddawat tun pengitngedan yun inutang tu. <sup>11</sup> Panha-ad kayud dallin et hegeden yu etan tuun impautangan yun mengi-ukkat ni iddawat tun hi-gayun pengitngedan yun utang tu. <sup>12-13</sup> Hedin newetwet ni peteg hu dinagsi yu, et ebuh hu edah ni balwasi tun iddawat tun pengitngedan yun impautang yun hi-gatu, ey aleyu etan balwasi tu, nem hedin nelinug hu aggew, man ibangngad mu, et wada ibbalwasi tun meuggip ma-lat bendisyonan dakeyun hi-gayu. Humman ni pehding yu ey ibbilang APU DIOS e Dios yun kayyaggud.

<sup>14</sup> Entan tu talam hu nakawwetwet ni kamekitekteklan nekibebley ni hi-gayu winu edum yun helag Israel. <sup>15</sup> Idwat yu sinekla dan hambatangan tep hedin hi-gada man newetwet ida, et humman na-mu daka iddidinel ni i-aledan mahapul da. Tep hedin eleg yu pehding huyya, entanni ey mampehemhemmek dan APU DIOS et gapun nunya ey manliwwat kayu.

<sup>16</sup> Hedin ya a-ammed man beken ni lebbeng tun ida mekastigun mettey gapuh ni bahul ni u-ungnga da. Hanniman ida mewan u-ungnga e beken ni lebbeng tun hi-gada mekastigun mettey gapuh ni bahul ni a-ammed da. Ya etan nambahul hu lebbeng tun meippepettey.

<sup>17</sup> Mahapul ni meidwat hu kelebngan idan nekibebley ni hi-gayu anin idan nepu-hig. Ey entan tu ala hu balwasin nebalu gapuh ni utang tu. <sup>18</sup> Entan tu liwwan e neihbut kayun nunman di Egypt et ihwang dakeyun APU DIOS e Dios tayu. Et humman hu, nakka ittugun e hannya ipahding yu.

<sup>19</sup> Hedin kayu kaman-ennid payew yu ey wada linabhan yun eleg yu anien, entan kaibangngad et yu peka-anien. Diman et wada ellan idan nekibebley ni hi-gayu, yadda nepu-hig et yadda nebalu, ma-lat bendisyonan dakeyun APU DIOS e Dios yud emin ni yuka pehding. <sup>20</sup> Hedin puggahen yu lameh ni intanem yun olibah, entan tu penidwan eggilahan et eleg yu paka-al-en lameh tu. Diman edum et wada ellan idan tutu-un nekibebley ni hi-gayu, yadda nepu-hig et yadda nebalu. <sup>21</sup> Hanniman mewan pehding yun pemugbugan yun intanem yun grapes di legunta yu e entan tu peka-agilah et wada ellan idan nekibebley ni hi-gayu, yadda nepu-hig et yadda nebalu. <sup>22</sup> Nemnem yu e nanhelheltap kayun nunman eman ni neihbutan yud Egypt. Humman hu, nakkaittugun ni hi-gayu e pehding yudda huya.

## 25

<sup>1</sup> Hedin wada dewwan tuun wada nanhallaan dan illaw dad korteh et ya huwet hu menghel hedin neiptek hu hakey ey neihalla hakey. <sup>2</sup> Hedin ya kastigu etan ni nambahul ey mahapul ni meheplat, ey panlukkub etan ni huwet et peheplat tud hinangga tu meipuu di nambahulan tu hedin piga bilang ni heplat hu mahapul. <sup>3</sup> Nem eleg mabalin ni nehuluk ni na-pat ni heplat, tep hedin nehuluk ni na-pat hu peneplatan dan hi-gatu ey mebe-ingan numangngu.

<sup>4</sup> Ya hakey mewan ni tugun ey entan tu ika-leg pengngannan ni newang hedin kaman-illik.

<sup>5</sup> Hedin wadadda han-aaggin lakin kamanha-ad di hakey ni baley, ey netey etan nengahwa, nem endi u-ungnga da, ey bintanen etan ni agi tu etan nebalun ahwan etan ni netey, ma-lat beken ni ya edum ni tuu pambintanan tu. <sup>6</sup> Ya etan memengngulun lakin u-ungnga da ey meibbillang ni u-ungangan etan ni netey ni agi tu, et eleg meliwwan hu ngadan tud Israel. <sup>7</sup> Nem hedin eleg pinhed etan ni meihayed ni agin etan ni netey ni ahwaan etan nebalun bii, mahapul ni umlaw humman ni biid kahehgepidman ni bebley et kantudda etan ni kamengipappangngulun bebley ey “Eleg pinhed etan ni agin netey ni ahwak ni pannenneng hu ngadan agi tu, tep eleg tuwak pinhed ni ahwaan.” <sup>8</sup> Peeyyag law idan kamengipappangngulun bebley etan laki et hummangen da et hedin eleg tu tu-wangu pinhed ni ahwaan etan bii, <sup>9</sup> ey umlaw humman ni biid kad-an nunman ni laki et ekalen tu patut tu, ey linupdaan tu angah nunman ni lakid hinggaddan kamengipappangngulu et kantuy “Hanneya kameippahding di lakin eleg tu pinhed ni mannenneng hu ngadan ni agi tu.” <sup>10</sup> Mandingngel ali law di Israel e huyyan pamilyah etan kandan ‘pamilyah ni na-kal hu patut tu.’

<sup>11</sup> Hedin kamambekkal hu dewwan lakin helag Israel, ey limmaw hu ahwan hakey et tu baddangan ahwa tu et kaweten tu hu singngedan etan ni kapekibbekkal ni ahwa tu, <sup>12</sup> ey entan tu hemek humman ni bii, et humman hu putul yu ngamay tu.

<sup>13</sup> Hedin mangkiloh kayu ey mahapul ni ya ustuh ni killohan usal yu <sup>14</sup> niya usal yu ustuh ni lekud. <sup>15</sup> Em, ya ustuh ni killohan et ya ustuh ni lekud hu usal yu et mabeyag pambebleyan yud bebley ni iddawat APU DIOS e Dios yun hi-gayu, <sup>16</sup> tep eleg pinhed APU DIOS e Dios yudda hu beken ni limpiyuh daka pehding.

<sup>17</sup> Entan tu liwwan hu impahding idan iAmalek ni hi-gatsu eman ni tayu kapengelliin nalpuan tayud Egypt, <sup>18</sup> e eleg ida tumekut nan APU DIOS et gubaten daitu eman ni itu kaumhihiga tep neka-atu itu, et pampatyen dadda edum tayun nanggillig. <sup>19</sup> Et hedin meihammad kayulli law ni mambebley idad indawat APU DIOS e Dios yun pambebleyan yu, ey mahapul ni bahbaha yudda humman ni iAmalek, et meendidda eyad ta-pew ni puyek et meliwwan ida. Entan tu liwwan huyyan ittugun kun hi-gayu.

## 26

*Ya meipanggep idan meidwat ni nemangulun lameh ni intanem niya meikkepulan limmu*

<sup>1</sup> Hedin umdateng kayud etan di bebley ni iddawat APU DIOS e Dios tayun pambebleyan yu et mambebley kayu law diman, <sup>2</sup> appil kayuddan memengngulun ennien yun lameh idan ittanem yu. Iha-ad yud basket et ilaw yud pillien APU DIOS e Dios yun pandeyyawan yun hi-gatu. <sup>3</sup> Elaw kayu etan di padin kamansilbin nunman ni tsimpuh, et kan yun hi-gatuy “Huyyan in-alik ni nak iddawat hu keang-angan tun ebbuluten ku e in-ali da-ak APU DIOS e Dios tayu eyad bebley ni inhel tun nunman ni iddawat tudda lan aammed tayu.”

<sup>4</sup> Ellan etan ni padi humman ni basket et tu iha-ad di hinanggan altar APU DIOS e Dios tayu. <sup>5</sup> Ey kanyud hinanggan APU DIOS e Dios yuy “Ya eman ammed mi e hi Jacob e Aramean e endi neduttuk ni bebley tu, ey an nambebley di Egypt ni nunman la. Hahhakkey idan nunman ni linawwan dadman, nem entanniy dimmakel idan peteg di Egypt ey nambalin ni et-eteng ni kabaelan da. <sup>6</sup> Ey hi-gamin helag da ey nambalin kamin himbut idan iEgypt et panhelheltap dakemi, <sup>7</sup> et mampehemhemmek kamin APU DIOS e Dios ida lan aammed mi, ey dingngel tu dasal mi. Inang-ang tu ligat mi, yadda nekalligat ni ngunu mi et ya daka pampehelheltap ni hi-gami. <sup>8</sup> Entanni ey impangulu dakemin APU DIOS e hi-yanen mi Egypt e impeang-ang tu kamengippetngan kabaelan tu. Ya anggetakkut ni tuka pehding et yadda miracle tu. <sup>9</sup> In-ali dakemin hi-gatud eyad indawat tun pambebleyan min dakek ni peteg gatas niya danum ni putsukan. <sup>10</sup> Et yan nunya e APU DIOS, ey in-alian dakan iddawat min nemangulun lameh ni intanem mid puyek ni indawat mun hi-gami.”



Iha-ad yu humman ni basket di hinanggan APU DIOS e Dios yu, ey nandayaw kayun hi-gatu. <sup>11</sup> Hedin negibbuh, nanhahumul kayu ey nan-an-anla kayu gapuh ni et-eteng ni bendisyon APU DIOS e Dios yun hi-gayu, et yadda pamilya yu. Ayagi yudda helag Levi et yadda tutu-un nekibebley ni hi-gayu, et makian-anladdan hi-gayu.

<sup>12</sup> Hedin nelabah tellun toon, amung yu hu meikkeppulun emin ni lameh ni intanem yu et idwat yuddan helag Levi, yadda nekibebley ni hi-gayu, yadda nepu-hig et yadda nebalu et wada kanen dat eleg ida maupa, <sup>13</sup> Ey kanyun APU DIOS e Dios yuy “Inlak di baley midda neappil ni neieng-eng ni iddawat kuddan helag Levi, yadda nekibebley yadda nepu-hig ey yadda nebalu, tep inu-unnud kudda intugun mun pehding ku e endi nak liniwwan. <sup>14</sup> Ey eggak kuman idan nunman ni tsimpuh ni nakka umlelemyung, ey eggak kakkappaen idan tsimpuh ni nakka meibbillang ni beken ni malinih, ey eggak i-appit idad netey. Inu-unnud daka e APU DIOS e Dios ku et ipahding kun emin hu intugun mun pehding ku. <sup>15</sup> Uhdungi dakemid kayyaggud ni kad-an mud kabunyan, et bendisyonan dakemin tutu-um e helag Israel, ey bendisyonim eya bebley min indawat mu meippuun di insapatah muddan aammed min nunman e iddawat mun hi-gada eya bebley ni dakel ni peteg gatas niya danum ni putsukan.”

<sup>16</sup> Yan nunya ey immandal APU DIOS e Dios yun u-unnuden yun emin hu Tugun tu. Ey mahapul ni ihhammad yun mengu-unnud ni hi-gatu. <sup>17</sup> Hinammad yun nunyan aggew ni inhel e hi APU DIOS hu Dios yu, ey u-unnuden yu emin hu Tugun tu niya ippahding yu e-helen tun pehding yu. <sup>18</sup> Ey yan nunya ey hinammad daman APU DIOS ni inhel, e tuu dakeyun hi-gatu e kamei-ellig ni nebalol ni tenged tu, tep humman dedan la insapatah tu ey inhel tu e mahapul ni u-unnuden yun emin hu Tugun tu. <sup>19</sup> Hedin u-unnuden yu nisin emin hu Tugun tu, ey pambalinen tun et-eteng ni kabaelan yu nem yadda edum ni bebley eyad puyek. Et gapuh ni nunman ey meiddeyyaw kayu niya mandingngel kayu. Ey mannenneng ni hi-gayu hu pinilin APU DIOS e Dios yun tutu-u tu meippuun di inhel tu dedan lan nunman.

## 27

### *Ya meipanggep ni pan-appitan etan di Duntug ni Ebal*

<sup>1</sup> Hi Moses et yadda aap-apu ey kan daddan edum dan helag Israel ey “Mahapul ni u-unnuden yun emin ida intugun min hi-gayun nunya. <sup>2</sup> Hedin man-agwat kayullid Wangwang e Jordan et umlaw kayud bebley ni iddawat APU DIOS e Dios yun hi-gayu, ey iha-ad yulli etta-teng ni batu ey pakpakan yun plaster. <sup>3</sup> Itudek yun emin ida Tugun ku et yadda intuttudduk. Humman pahding yu hedin man-agwat kayud Jordan, et lumaw kayud bebley ni iddawat APU DIOS e Dios yun hi-gayu e dakel ni peteg gatas niya danum ni putsukan, tep humman dedan la insapatah APU DIOS e Dios idan aammed yun hi-gayu. <sup>4</sup> Ippidwak ni e-helen e yallin pan-agwatan yu etan di Wangwang e Jordan, ey iha-ad kayulliddan batud Duntug ni Ebal et pakpakan yun plaster. <sup>5-6</sup> Kapyu kayun altar APU DIOS e Dios yu e usal yu hu eleg mapehek ni batu, et pan-appitan yu. Yadman pangiappisi yun kagihheban kamei-appit nan APU DIOS e Dios yu. <sup>7</sup> Ey i-appit yudman hu kamei-appit ni pekiddagyuman ey hinemul yudman etan in-appit yu, et man-an-anla kayud hinanggan APU DIOS e Dios yu. <sup>8</sup> Itudek yuddan emin hu Tugun etan idad inha-ad yun batun nepakpakan ni plaster.”

<sup>9</sup> Immehel mewan hi Moses et yadda padin helag Lebay idan helag Israel ey kantuy “Hi-gayun edum min helag Israel, eneeneng kayu ey pandengel kayu! Yan nunya ey nambalin kayun tutu-un APU DIOS e Dios yu. <sup>10</sup> Et humman hu, mahapul ni u-unnuden yudda tugun niyadda intuttuddun APU DIOS e Dios yun inhel kun hi-gayun nunya.”

<sup>11</sup> Kan Moses mewan idan tutu-uy: <sup>12</sup> “Hedin man-agwat kayud Wangwang e Jordan, man mahapul ni um-ehnung ida helag Simeon, helag Lebay, helag Judah, helag Issakar, helag Joseph et ya helag Benjamin di Duntug e Gerisim et ehelen da bendisyon dan hi-gayudman. <sup>13</sup> Ey um-ehnung ida damadda helag Reuben, helag Gad, helag Asher, helag Sebulun, helag Dan et ya helag Naptali di duntug e Ebal et ehelen da idut da. <sup>14</sup> Hedin negibbuh ey intekuk idan helag Lebay e kanday:

<sup>15</sup> “Meiddutan etan tuun mampaot winu mengapyan dios et ililliggud tun daydayawen. Hi APU DIOS ey angebe-hel tun peteg ida dios ni kinapyan tuu.”

Hummangen idan emin ni tuu e kanday ‘Amen.’”

<sup>16</sup> “Meiddutan etan tuun tuka pihhulad ametun inetu.”

Hummangen idan tuun kanday “Amen.”

<sup>17</sup> “Meiddutan etan tuun medeldel ni puyek ni dinagsi tu e tuka i-e-tan kegad.”

Hummangen idan tuun kanday “Amen.”

<sup>18</sup> “Meiddutan etan tuun tuka ippangulu nekulap ni tuud beken ni neiptek ni dalan.”

Hummangen idan tutu-un kanday "Amen."

<sup>19</sup> "Meiddutan etan tuun beken ni limpiyuh tuka pehding idan nekibebley, yadda nepuhig et yadda nebalu."

Hummangen idan tutu-un kanday "Amen."

<sup>20</sup> "Meiddutan etan lakin tuka i-ulig ahwan ametu, tep lawah humman ni impahding tun ametu."

Hummangen idan tutu-un kanday "Amen."

<sup>21</sup> "Meiddutan etan tuun tuka i-ulig animal."

Hummangen idan tutu-un kanday "Amen."

<sup>22</sup> "Meiddutan etan lakin tuka i-ulig hu agi tun biin anin ni u-ungngan ametud hinpappil ni bii winu u-ungngan inetud hin-appil ni laki."

Hummangen idan tutu-un kanday "Amen."

<sup>23</sup> "Meiddutan etan lakin tuka i-ulig biin nengapun hi-gatu."

Hummangen idan tutu-un kanday "Amen."

<sup>24</sup> "Meiddutan etan tuun illigud tun memettey ni edum tun tuu."

Hummangen idan tutu-un kanday "Amen."

<sup>25</sup> "Meiddutan etan tuun kapebeyyad et patyen tu tuun endi bahul tu."

Hummangen idan tutu-un kanday "Amen."

<sup>26</sup> "Meiddutan etan tuun eleg tu abuluten ida huyyan tugun tep eleg tu u-unnuda."

Hummangen idan tutu-un kanday "Amen."

## 28

### *Mebendisyonan ida kamengu-unnud nan Apu Dios*

<sup>1</sup> Hedin peka-u-unnuden yu hi APU DIOS e Dios yu et ippahding yuddan emin hu intugun kun hi-gayun nunya, ey peideyyaw dakeyun APU DIOS e Dios yud emin ni tuu eyad puyek. <sup>2</sup> Ey um-alin emin ida huyyan bendisyon ni hi-gayu hedin u-unnuden yu hi APU DIOS e Dios yu.

<sup>3</sup> Mebendisyonan kayuddad pambebleyan yu.

<sup>4</sup> Mebendisyonan kayun dakel ni u-ungnga, dakel ni ennien yu, niya dakel ni animal yu.

<sup>5</sup> Mebendisyonan ida intanem yun lameh tu ma-lat mepennupennu basket yu, ey mehaha-adan ni kenayun ni sinapay ida malukung ni duyu yu.

<sup>6</sup> Ey mebendisyonan emin ippahding yu anin ni attun bebley lawwan yu niya ennamutan yu.

<sup>7</sup> Hi APU DIOS hu mengapput idan buhul yu hedin gubbaten dakeyu. Et anin ni hakey dellanan dan um-alin mengubbat ni hi-gayu, ey um-ehyak ida et endi petekkan tu law hu dellanan da.

<sup>8</sup> Bendisyonan dakeyun APU DIOS et mepepennu aallang yun pagey, ey bendisyonan tun emin hu ippahding yu. Em, bendisyonan dakeyun APU DIOS e Dios yud bebley ni iddawat tun pambebleyan yu.

<sup>9</sup> Hedin u-unnuden yu tugun APU DIOS e Dios yu, et ippahding yudda pinhed tun pehding yu, ey hi-gayu pillien APU DIOS ni tutu-u tu meippuun di inhel tun nunman.

<sup>10</sup> Et hedin ang-angen ni emin ni tutu-ud kebebbebley e hi-gayu pinilin APU DIOS ni tutu-u tu ey umtakut idan hi-gayu. <sup>11</sup> Iddawat APU DIOS ni hi-gayu hu dakel ni kakkayyagud di bebley ni iddawat tun pambebleyan yu henin dakel ni u-ungnga, dakel ni animal ey dakel ni lameh ni kameitnem. Humman ni pambebleyan yu hu inhel tuddan aammed yun iddawat tun hi-gayu. <sup>12</sup> Peellin APU DIOS hu udan di tsimpuh ni panheppulan yun melpud nan-amungan tud kabunyan. Ey bendisyonan tun emin hu inggunu yu, et hi-gayu mampeuttang di dakel ni tutu-ud kebebbebley, nem eleg ngu mahapul ni kayu um-utang ni hi-gada. <sup>13</sup> Pambalin dakeyu mewan nan APU DIOS e Dios yun mengipappanggulun kebebbebley, et beken ni hi-gayu mengu-unnud ni hi-gada. Em, hanniman alin kenayun hu meippahding ni hi-gayu hedin peka-u-unnuden yun emin hu tugun APU DIOS ni nakka pan-iddawat ni hi-gayun nunya. <sup>14</sup> Entan tu iwalleng anin hakey idan tugun ni nakka pan-e-helan hi-gayun nunya, et beken ni ya edum ni dios yu u-unnuden winu daydayawen.

### *Meiddutan ida etan eleg mengu-unnud APU DIOS*

<sup>15</sup> Nem hedin eleg yu u-unnuda hi APU DIOS e Dios yu, et ngenghayen yudda huyyan nakka pan-ittugun ni hi-gayun nunya, ey meippahding ni hi-gayudda huyyan idut:

<sup>16</sup> Meiddutan kayun emin di pambebleyan yu, <sup>17</sup> et endi metdaan ni lameh idan kameitnem ni meihha-ad di basket yu, ey endi meihha-ad ni sinapay idad malukung

ni duyu yu, <sup>18</sup> ekket u-ungnga yu, metawwey papayyew yu, ey eleg man-impah animal yu henin baka niya kalneroh.

<sup>19</sup> Meiddutan kayu anin ni attun bebley lawwan yu winu panha-adan yu et endi silbin inggunu yu.

<sup>20</sup> Peellin APU DIOS hu idut ni hi-gayu, et matema kayun pehding yu, ey panhelheltap dakeyud emin idan pehding yu ingganah mekabbahbah kayu. Mukun meippahding ida huyyan idut ni hi-gayu, ey tep lawah hu yuka pehding ey gapun nengiwallengan yun hi-gatu. <sup>21</sup> Ey metu-tu-nud hu degeh ni peelli tun hi-gayu ingganah endi metdaan ni hi-gayud bebley ni iddawat tun pambibleyan yu. <sup>22</sup> Pandedgeh dakeyud APU DIOS idan degeh ni mambabbabbal kayun mettey, ey umlebag niya man-aatung annel yu. Eleg tu peelli udan et mema-ganan hu bebley yu, nem peelli tu maetung ni dibdib et mebahbah hu intanem yu. Um-aliddan emin huyyan ligat ni hi-gayu ingganah meendi kayu. <sup>23</sup> Endi nisin hekey me-gah ni udan et kumelhi puyek et heni gumek. <sup>24</sup> Kan man anhan et udan hu peellin APU DIOS ey beken, tep palnah niya dep-ul ni melpud kabunyan ingganah mebahbah kayu.

<sup>25</sup> Ey peapput dakeyud APU DIOS di buhul yu. Ma-nut iddalan yud hakey ni dalan ni an mengubbat ni buhul yu nem gapuh ni takut yu, ey um-ehyak kayu et endi petekkan tu lawwan yu. Ey nemahhig ali takut idan tutu-ud kebebbley ni penang-angan dan nunman ni meippahding ni hi-gayu. <sup>26</sup> Et hedin mettey kayu, man um-aliddalli sisit niya ma-lem ni animal ni mengngan ni annel yu, nem endi mengebbul ni hi-gada. <sup>27</sup> Peelli pay APU DIOS hu pelhan hi-gayu henin impahding tudan tutu-ud Egypt, et man-aayuh hu nenad annel yu. Niya nemahhig ali gatel ni annel yu, nem endi agah tu. <sup>28</sup> Niya pan-angngawen dakeyud APU DIOS, kullapen dakeyu ey pambalin dakeyud matekut, <sup>29</sup> ma-lat anin ni kawwalwal ey mandappadupad kayun heni kayu nekulap. Endi pambalanan ni emin ni ippahding yu, meippelligat kayun kenayun ey metekketekkekwan kayu niya endi mengihwang ni hi-gayu.

<sup>30</sup> Meitga hu hakey ni lakid bii, nem hin-appil kumedek mengi-ahwan hi-gatu. Ey ma-nut mengapya kayun baley, nem beken kayun manha-ad diman. Mantennem kayun grapes, nem beken kayun mengngan ni lameh tu. <sup>31</sup> Ang-ang-angen yu e wa-teken da bakeyu, nem eleg yu tamtami detag tu. Ey guyyuden dalli kebayyu yu, nem eleg da ibbangngad. Meidwat hu kalneroh yun buhul yu, nem endin memaddang ni hi-gayu. <sup>32</sup> Ey mambalin ida u-ungnga yun lalakki niya bibi-in himbut ni tutu-ud edum ni bebley, nem endi kabaelan yun umbaddang ni hi-gada. Et humman hu, kewa-wa-wa ey meaatu mateyun ebuhan ni mengi-aang-ang di dalan, et ilah tu ey ihhawang da, nem endiddan kaum-anemut. <sup>33</sup> Yalli mengngan ni lameh idan intanem yu, ey yadda tutu-ud edum ni bebley ni eleg yu dengenegen, et endin hekey hu iddawat dan hi-gayu. Ey pampalpaligat dakeyud ingganah. <sup>34</sup> Et gapuh ni nemahhig ni panhelheltapan yu ey um-angngaw kayu. <sup>35</sup> Peelli mewan APU DIOS hu pelhan emin di annel yu, e meippalpuud heliyu ingganah di uluyu ey eleg man ahan meeggahi.

<sup>36</sup> Pellaw dakeyullin APU DIOS di bebley ni eleg yu amta, e mekillaw ni hi-gayu patul yu, et dayawen yudman ida dios ni nekapyad keyew ey batu. <sup>37</sup> Anggebe-hel dakeyuddad bebley ni pengiwwehitan APU DIOS ni hi-gayu. Ngi-ngi-ngian dakeyu ey taltalangaan dakeyu.

<sup>38</sup> Anin ni dakel iggaud yu et ekket ennien yu tep kennen ni dudun, <sup>39</sup> ey anin ni pakap-ippatek yudda ittanem yun grapes, ey endi kennen yun lameh da ey endi kapyaan yun meinnun tep kennen ni bigih. <sup>40</sup> Ma-nut dakel hu ittanem yun oliabah, nem endi kapyaan yun lana tep medluh lameh da. <sup>41</sup> Ma-nut wadadda u-ungnga yun lalakki ey bibi-i, nem meendiddan hi-gayu tep ellan ni buhul yudda et mambalin idan balud di edum ni bebley. <sup>42</sup> Kennen ni dudun idalli keyew yu et yadda edum ni intanem yu.

<sup>43</sup> Yadda tutu-un nekibebley ni hi-gayu ey meetteng ali kabaelan da, nem hedin hi-gayu ey meendi kabaelan yu. <sup>44</sup> Hi-gadalli mampeuttang ni hi-gayu ey endi ngu peuttang yu. Et lektattuy hi-gada pan-ap-apu yu.

<sup>45</sup> Meippahding idan emin huyyan idut ni hi-gayu ingganah mebahbah kayu hedin eleg yu u-unnuda et ngenghayen yudda tugun APU DIOS e Dios yu. <sup>46</sup> Huuyaddan angetaktut ni idut hu mengipeang-ang niya mengippenemnem ni ingganah ni hi-gayu et yadda helag yun pengastigun Apu Dios. <sup>47</sup> Et humman hu, hedin eleg kayu man-an-anlan mandeyyaw nan APU DIOS e Dios yu gapuh ida etan ni dakel ni indawat tun panyaggudan yu, <sup>48</sup> ey ingunggunnuan yullidda peellin APU DIOS ni buhul yun mengubbat ni hi-gayu. Meu-upa kayulli, mee-ewew kayu, endilli balwasi yu ey mekullangan kayuddan mahapul yu. Panligligat dakeyu niya panhelheltapen dakeyu ingganah mebahbah kayu. <sup>49</sup> Humman idan peellin APU DIOS ey melpuddad neka-iddawwid gilig ni puyek. Nekekemtang ali ey dimmateng idan henidda tuldun ni immepa. Eleg yulli han-awat ehel

idan nunman <sup>50</sup> ni anggetakkut ni tutu-u e eleg da lispituha nangkea-amma ey nangkei-inna niya eleg da pay hehnekadda u-ungnga. <sup>51</sup> Kennen da animal ya niyadda intanem yu. Endi da tetdaan ni pagey yu, ya meinum, ya lanan olibah, impah ni bakeyu niya kalneroh yu ingganah mettey kayun upa yu et humman kebabbahan yu. <sup>52</sup> Bahbahen da emin hu etta-teng ni bebley yu et mangkatleb ida nangkehammad ni bebley yun yuka pandinnelin keihhikkugan yu, et hegepen dadda humman ni bebley yun iddawat APU DIOS e DIOS yun hi-gayu.

<sup>53</sup> Ey yan nunman ni pemabbahan ni buhul yun bebley yu, ey eleg kayu pakeisipel ni nemahhig ni upeyu et gapun nunman ey kennen yu law u-ungnga yun indawat APU DIOS e DIOS yun hi-gayu. <sup>54</sup> Anin law etan ni kabbabbal ni laki et eleg tu hehmeke agi tu, ya nakappinshed tun ahwa tu et yadda natdaan ni u-ungnga tu. <sup>55</sup> Et eleg tudda iddawsin tuka pangkennan u-ungnga tu, tep endi edum ni dammutun kennen ni nunman ni penggepan ni buhul yuddan bebley yu. <sup>56</sup> Hanniman mewan hu kabbabbal ni peteg ni biin nekadillikkadah e eleg tu patnaan ni inggasin hu puyek ey mambalin ni makuliput nan ahwa tu e nakappinshed tu et yadda u-ungnga tun laki niya bii. <sup>57</sup> Ittalu tullu in-ungnga tun gelang anin etan ballayyan tu et ipuhi tun kennen. Meippahding ali huyya tep endin hekey ali kennen nunman ni tsimpuh ni pengippeligigatan ni buhul yun hi-gayud bebley yu."

<sup>58</sup> Kan mewan Moses ey "Hedin eleg yu u-unnudan emin ida tugun ni neitudek eyad libluh, ey hedin eleg yu deyyawa hi APU DIOS e DIOS yun kamengippetnga tuka pehding. <sup>59</sup> Ey peellin APU DIOS ni hi-gayu et yadda helag yu hu nemahhig ni degeh ni heltapen yu, ya dakel ni ligat, ya degeh ni mebayag ni me-kal. <sup>60</sup> Ey peelli tun hi-gayu etan ida anggetakkut ni degeh ni inang-ang yun kaweda yud Egypt e eleg kayu umyaggud. <sup>61</sup> Anin idan edum ni degeh ni eleg maitudek eyad libluh ni neitudkan ni Tugun ey peelin APU DIOS ingganah mebahbah kayu. <sup>62</sup> Et mambalin kayun hahhakkey anin ni henin kadinakkel ni bittuwen di kabunyan hu kadinakkel yu, ey mambalin kayun ekket hedin eleg yu u-unnuda hu tugun APU DIOS e DIOS yu. <sup>63</sup> Hi APU DIOS e et-eteng ni neminshed tun hi-gayu et bendisyonan dakeyun dakel ni helag, ey mambalin ni hi-gatu memabbah ni hi-gayu et ma-kal kayudman ni bebley ni yu pambebleyan, <sup>64</sup> ey iwwahit dakeyun APU DIOS di kebebbebley anin ni attu eyad puyek. Et deyyawen yu law diman ida beken ni makulug ni dios e nekapyad keyew ey batu anin ni endiddan aammed yu an nandayaw ni henin nunman.

<sup>65</sup> Endilli linggep yuddad bebley ni keillawwan yu, ey endiddadman ni bebley hu mabalin ni yu pan-iyatuwan. Weddaen alin APU DIOS hu takut yu, ey meendilli namnamah yu et umlelemyung kayu. <sup>66</sup> Endilli maptek ni neitu-wan yu. Kewa-wa-wa niya kahilehileng ey umtatakut kayu tep entanniy lang nunman law pappeg ni biyag yu. <sup>67</sup> Ey hedin newa-wa, um-abtu kayun mehilling e kanyuy 'Hamban mehillingey,' ey hedin nehileng, kanyu mewan ey 'Hamban mewa-wa ey.' Ma-nu kredit hanniman kanyu ey gapun nemahhig ni takut yun menang-ang-ang idan anggetakkut ni kameippenahding. <sup>68</sup> Et lektattuy pambangngad dakeyun APU DIOS di Egypt e manluggan kayud bapor, anin ni kangkuy eleg kayu law mambangngad diman. Et yan lawwan yullidman ey ihhehbut yu annel yud buhul yu, nem endi neminshed ni mengettang ni hi-gayu."

## 29

### *Ya pengippidwaan idan helag Israel ni mekitbal nan APU DIOS*

<sup>1</sup> Huyyadda Tugun APU DIOS ni e-helen Moses idan helag Israel di duntug di Moab et meidum etan idad inhel tun pehding dan nekitbalan tun hi-gadad Duntug e Sinai.

<sup>2</sup> Ineyagan Moses idan emin helag Israel et kantun hi-gaday "Neka-ang-ang yun emin ida impahding APU DIOS etan ni patul di Egypt, yadda opisyal tu ey emin ni bebley da, <sup>3</sup> yadda nemahhig ni ligat ni pematna tu et yadda miracles niyadda kamengippetngan impahding tu. <sup>4</sup> Nem ingganah ni nunya ey eleg iebulut APU DIOS ni meewwatan yudda neipenahding ni hi-gayu. <sup>5</sup> Impangulu dakeyun hi-gak ni na-pat ni toon di eleg mebebleyi et manhahha-ad kayudman ey eleg madunut hu balwasi yu niya patut yu. <sup>6</sup> Nem anin endi sinapay ni kennen yu niya endi umbuteng ni inumen yu ey indawat APU DIOS emin hu mahapul yu ma-lat peamta tun hi-gayu e hi-gatu DIOS yu. <sup>7</sup> Et yan inlian tayud ya e nekigubat hi Sihon e patul di Hesbon et hi Og e patul di Bashan ni hi-gatsu, nem inapput tayudda. <sup>8</sup> Sinekup tayu bebley da et idwat tayun beltanen idan helag Reuben, yadda helag Gad et yadda kagedwah ni helag Manasseh. <sup>9</sup> Et humman hu, paka-u-unnud yun emin ida etan meunnud eyad nekitbalan yu ma-lat kayyaggud emin hu pambalinan idan pehding yu.

<sup>10</sup> Wada kayun emin deya, hi-gayuddan aap-apu, oopisyal, huwet, ey hi-gayun lalakkin helag Israel ni kaman-eh-nheng eyad kad-an APU DIOS e Dios yu. <sup>11</sup> Anin idan ahwa yu, yadda u-ungnga yu et yadda nekibebley ni hi-gayun kamengyew ni ittungu yu niya kaman-ehhul ni danum yu ey wadaddadya. <sup>12</sup> Wada kayudyan nunya et mekitbal kayun APU DIOS e Dios yu. Ey huyyan pekitbalan APU DIOS ni hi-gayu ey insapatah tun meippahding. <sup>13</sup> Pinhed tun meihhammad nunyan aggew hu pengbillangan dakeyun tutu-u tu, ey hi-gatu Dios yu e humman dedan inhel tun hi-gayu, ey humman mewan insapatah tudda lan a-ammed tayun hi Abraham, hi Isaac et hi Jacob. <sup>14-15</sup> Beken ni hi-gayun ebuh ni wadan nunyad hinangga tu hu pekitbalan tu, nem anin idallin helag Israel ni edum ni aggew.

<sup>16</sup> Inamtak et hannemnem yu hu elaw ni neitu-wan tayun eman ni kaweda tayud Egypt, ey yan eman ni nalpuan tayudman et mandalan itsuddad bebley ni buhul tayu. <sup>17</sup> Ey inamtak et hannemnem yudda inenang-ang yun lallawah ni dios dan nekapyad keyew, batu, silber ey balituk. <sup>18</sup> Mukun nekitbalan hi APU DIOS ni hi-gayu ey ma-lat endi anin hakey ni laki winu bii winu hakey ni helag, winu hakey ni pewen ni mengiwwalleng nan APU DIOS e Dios tayu, et an mandayaw ni dios idan tutu-un nambebley diman, ey ma-lat endin hi-gayu an mengibbunnat ni lawah ni tuun henin keyew ni kaumkekdet. <sup>19</sup> Angang yu et endin hi-gayun nanggel nunyan idut hu an mannemnem ni eleg meippahding ni hi-gatudda huyyan idut." Et kantuy "Eleg meippahding ni hi-gak ida humman anin ni ya pinpinhed ku ngu ippenahding ku." Ya henin nunyan kapannemnemnem hu umhulun ni kebabbahan yu. <sup>20</sup> Eleg mabalin ni pessinsahan APU DIOS hu henin nunman ni pehdang ni hakey ni tuu. Tep ya etan nemahhig ni bunget tu etan ni tuu, ey kamei-ellig ni kamantetebbel ni apuy. Et meippahding ni hi-gatun emin ida etan idut ni neitudek eyad libluh ey e-kalen APU DIOS hu ngadan tu eyad ta-pew ni puyek. <sup>21</sup> Appilen APU DIOS hu henin nunman ni tuud edum tun helag Israel, et pellow tun emin ni hi-gatu idut ni neitudek eyad libluh ni neitudekan idan Tugun tu.

<sup>22</sup> Et yan edum ni aggew ey amtaen idallin helag yu et yadda nekibebley ni hi-gayu hu ligat et yadda degeh ni peellin APU DIOS eyad bebley. <sup>23</sup> Mambalin alin sulfur ey ahin eya bebley et endi an umtemel ni anin hipan kameitnem, anin ni hakey ni helek et mambalin ni henin Sodom, ya Gomorrah ya Admah et ya Seboiim e binahbah APU DIOS gapuh ni bunget tu. <sup>24</sup> Et kan idallin tutu-ud nanlinikweh ey "Kele na-mu an impahding APU DIOS hu hanneyad bebley tu? Kele anhan nemahhig hu bunget tu?" <sup>25</sup> Et kan idallin tuu ey "Mukun hanniman ey tep impangil idan bimmebley hu nekitbalan dan APU DIOS e Dios ida lan aammed da, eman ni nengilpuan tun hi-gadad Egypt. <sup>26</sup> Et ya dios ni edum ni bebley hu dineyaw da, ey inhel APU DIOS ni hi-gada e eleg da ipahding humman. <sup>27</sup> Humman gaputun bimmubunget hi APU DIOS e Dios da, et paeli tun emin eyad bebley da etan ida idut ni neitudek eyad libluh. <sup>28</sup> Ey ingkal APU DIOS emin ida tutu-u tu eyad bebley da gapuh ni nemahhig ni bunget tu, et palaw tuddad edum ni bebley et immen idadman ingganah nunya."

<sup>29</sup> Yadda eleg maipeamta tuu ey kenamung hi APU DIOS e Dios tayuddan nunman, nem yadda etan neipeamta ey wadan ingganah ni hi-gatsu et yadda helag tayu, ma-lat u-unnuden tayun emin humman ni Tugun.

## 30

### *Hehmeken ali mewan APU DIOS ida helag Israel*

<sup>1-2</sup> Hedin hiniktaman yudda bendisyon niya idut ni inhel kun nunya et wada kayud kebebbebley eyad puyek di nengiwhehitan dakeyun APU DIOS e Dios yu, ey hedin hi-gayu et yadda helag yu ey mantuttuyyu kayu, et peka-u-unnuden yu law tugun APU DIOS e Dios yu, <sup>3</sup> ey hehmeken dakeyun APU DIOS e Dios yu, et dakeyulli ewwiten idad bebley ni nengiwhehitan tun hi-gayu, et ibangngad dakeyud bebley ni nalpuan yu, et peyaggud dakeyu mewan ni hi-gatu. <sup>4</sup> Anin ni illaw dakeyun APU DIOS di neka-idawwin bebley, ey dakeyu hemmaken et ienamut dakeyu, <sup>5</sup> et hi-gayu nanengtun mamebley etan di bebley ni indawat tudda lan aammed tayu. Pambalin dakeyullin kekkeddangyan ey daddakkel nem yadda la aammed yu.

<sup>6</sup> Hi APU DIOS e Dios yu ey pambalin dakeyu et yadda helag yun mekanggununnud ma-lat hi-gatu pekappinheden yu, ma-lat mannenneng kayun mamebley di diman ni bebley. <sup>7</sup> Pellow APU DIOS e Dios yun emin ida huyyan idut di buhul yun kamengippeligligat ni hi-gayu. <sup>8</sup> U-unnuden yu law hi APU DIOS ey ippahding yudda tugun tun nakka pan-e-helan hi-gayun nunya. <sup>9</sup> Baddangan dakeyun APU DIOS e Dios yu, et yumaggud hu pambalanan ni emin ni ngunnuen yu, ey pedakkel tu helag yu, yadda

animal yu, peyaggud tu iggaud yu, et pambalin tun dakel ni peteg ennien yu. Em, um-amleng mewan hi APU DIOS ni hi-gayu, et bendisyonan dakeyu henin nemendisyonan tudda lan aammed yu,<sup>10</sup> hedin hi-gatu pemengngulu yun u-unnuden yud nemnem yu niya puhu yu e eleg yu iwwaleng ida tugun tun neitudek di libluh.

*Ya pampilian idan helag Israel, ya ketegguan winu ya kebabbahan*

<sup>11</sup> Huyyadda tugun ni nakka pan-e-helan nunyan u-unnuden yu, ey beken ni neligat ni meewwatan winu ippahding.<sup>12</sup> Beken ni yad kabunyan kad-an idan nunyan tugun et eleg mahapul ni kanyuy ‘Hipalli umlaw di ahpat ni an mengella, ma-lat peehpen tudya et denglen tayu et u-unnuden tayu?’<sup>13</sup> Ey kaw immen di ba-hil ni baybay et kanyuy ‘Hipa man-agwat et i-li tudya et dengelen tayu et u-unnuden tayu?’<sup>14</sup> Nem wadan hi-gayud bungut yu niyad puhu yudda huuyan Tugun, et endi illason yun eleg yu pengu-unnudi.

<sup>15</sup> Et yan nunya ey e-helek ni hi-gayu pampillian yu, ya panyaggudan winu ya kebabbahan, ya ketagguan winu ya ketteyyan.<sup>16</sup> Hedin peka-u-unnuden yuddan emin eya indawat kun nunyan hi-gayun tugun APU DIOS e Dios yu, hedin hi-gatu pinheden yu niya u-unnuden yu elaw tu, ey umkedangan kayu niya medakkel kayu. Bendisyonan dakeyun APU DIOS e Dios yud bebley ni yu pambebleyan.<sup>17</sup> Nem hedin manggenghay kayu et eleg kayu mengu-unnud idan tugun tu, et meewis kayun mandeyyaw niya manyu-ung di edum ni dios,<sup>18</sup> ey e-helek ni hi-gayu e makulug ni mebahbah kayu. Eleg kayu mebeyyag ni mambebley di bebley ni lawwan yun pengagwatan yun Wangwang e Jordan.<sup>19</sup> Yaddahuy nisi hu pampillian yu, ya ketegguan yu winu ya ketteyyan yu, ya bendisyon winu ya idut. Nakka ibbagan kabunyan et ya puyek e mantistigudda hedin hipa pillien yun nunya. Pili yu ketegguan yu ma-lat tumegu kayuddan u-ungnga yu,<sup>20</sup> et pinheden yu hi APU DIOS e Dios yu, ey u-unnuden yu niya mandinnel kayun ebuh ni hi-gatu, tep hi APU DIOS nalpuan ni biyag yu, ma-lat mebayag kayun mambebley di insapatah tun iddawat tudda lan aammed yu e hi Abraham, hi Isaac et hi Jacob.”

## 31

*Ya nengipetuledan Moses nan Joshua*

<sup>1-2</sup> Entanni ey immehel mewan hi Moses idan emin ni helag Israel et kantuy “Neamma-ak law e hanggatut et dewampulu law toon ku, et eggak law kabaelan ni mengippengngulun hi-gayu. Hakey pay ey inhel dedan lan APU DIOS e eggak man-agwat di wangwang e Jordan.<sup>3</sup> Nem ippangulu dakeyun APU DIOS e Dios tayu et bahbahen yudda tutu-ud lawwan yun bebley, et hi-gayu maihullul ni mambebley diman. Hi Joshua law mengippengngulun hi-gayu tep humman inhel APU DIOS.<sup>4</sup> Bahbahen APU DIOS ida tutu-udman henin nemabbahan tun Sihon et hi Og e patul idan Amorite.<sup>5</sup> Peapput APU DIOS idan hi-gayu ey mahapul ni pehdng yun hi-gadan emin ida inhel kun ippahding yu.<sup>6</sup> Mahapul ni pekedhel yu nemnem yu et eleg kayu tumekut ni hi-gada, tep mekillaw hi APU DIOS e Dios yun hi-gayu niya eleg dakeyu iwwalleng ni hi-gatu.”

<sup>7</sup> Negibbuh ni inhel Moses ida humman et ayagan tu hi Joshua et kantun hi-gatud hinanggaddan tutu-uy “Mahapul ni pekedhel mu nemnem mu, tep hi-gam mengippengnguluddan eyan tutu-un an mambebley etan di puyek ni insapatah APU DIOS ni iddawat tudda lan aammed tayu. Genedwam et idwat mun hi-gada et beltanen da.<sup>8</sup> Ippangulu dakeyun APU DIOS ey eleg dakeyu iwwalleng. Et humman hu, entan kedismayah mu ey entan takut mu.”

<sup>9</sup> Intudek Moses huyyaddan Tugun et idwat tuddan padin helag Levi e nangged ni kaban APU DIOS et yadda aap-apun Israel.<sup>10</sup> Kantun hi-gaday “Yan kegibbuan ni meikkeppitun toon e humman hu kandan toon ni eleg pengippebeyyadin utang, ey ipahding yu hu Piyestah ni Kampu.<sup>11</sup> Mahapul ni bidbiden yudda huuyan Tugun di emin ni helag Israel di keemngunan yud hinanggan APU DIOS e Dios yud bebley ni pillien tun pandeyyawun yun hi-gatu.<sup>12</sup> Kaemung kayun emin ni lalakki niya bibi-i, yadda u-ungnga niyadda nekibebley ni hi-gayu, et denglen da et tumekut idan manggenghay nan APU DIOS e Dios yu, et peka-u-unnuden dadda etan Tugun.<sup>13</sup> Hanneya ipahding yu ma-lat yadda u-ungnga yun eleg mengamtaddan nunya, ey dedngelen da et tumekut idan manggenghay nan APU DIOS e Dios yu. Ipahding yun ingganah ida huyyad yu pambebleyan ni pengagwatan yun wangwang e Jordan.”

*Ya nengipeamtaan APU DIOS ni panliwwatan idan helag Israel ni hi-gatu*

<sup>14</sup> Kan APU DIOS nan Moses ey “Nedatngan law tsimpuh ni ketteyam. Ayagim hi Joshua et ikuyug mu etan di Tabernacle et ehelen kun hi-gatu pehdng tu.” Et lumaw di Moses nan Joshua di Tabernacle.<sup>15</sup> Entanni et mampeang-ang hi APU DIOS ni hi-gadad kulput e heni tukud etan di kahegepid Tabernacle.

<sup>16</sup> Et umhel nan Moses e kantuy “Anggegannu law ketteyam et ka mei-dum idan aammed mu. Nanna-ud ni hedin endi kalli law ey illapuddan eyan tutu-un mandeyyaw idan dios ni hipan bebley ni lawwan da. Iwwalleng da-ak et ihalla da hu nekitbalan kun hi-gada. <sup>17</sup> Et gapun nunman ey nemahhig ali bunget kun hi-gada et iwwalleng kudda ey eggak law baddangidda et mebahbah ida. Peellik ni hi-gada dakel ni nemahhig ni ligat et kandalli “Immali nemahhig ni ligat tayu tep inwalleng daitu law nan Apu Dios.” <sup>18</sup> Nanna-ud ni iwwalleng kuddalli tep ya liwat dan hi-gak ni pandeyyawan dan edum ni dios.

<sup>19</sup> Itudek mu huyyan a-appeh et ittutduddum idan helag Israel. Tuttuudum idan mengia-appeh ni nunya, ma-lat mengippenemnem ni hi-gadan lawah ni impahding da. <sup>20</sup> Tep illaw kuddad bebley ni insapatah ku lan aammed dan iddawat kun hi-gada e dakel ni peteg gatas niya danum ni putsukan. Kayyaggud alin peteg biyag dadman, tep umkedangyan ida et emin pinpinhed dan kennen ey dammutun kennen da. Nem deyyawan dalli edum ni dios et pihhulen da-ak ey impangil da hu nekitbalan kun hi-gada. <sup>21</sup> Um-alilli law hu dakel ni nemahhig ni ligat da et huyyan a-appeh hu mengippenemnem ni hi-gadan lawah ni impahding da, tep eleg ali liwwanan helag da huyyan a-appeh. Inamtak dedan neitu-wan da, anin ni eleg ida ni pay lumaw ni mambebley di pambebleyan dan insapatah kun iddawat kun hi-gada.”

<sup>22</sup> Et itudek Moses nunman ni aggew etan a-appeh et ittutduddu tuddan helag Israel.

<sup>23</sup> Immehel hi APU DIOS nan Joshua e u-ungngan Nun et kantuy “Pekedhel mu nemnem mu ey entan takut. Mahapul ni ippangulum ida edum mun helag Israel di bebley ni insapatah kun iddawat kun hi-gada. Wada-ak ni memaddang ni hi-gam.”

<sup>24</sup> Intudek Moses emin hu Tugun APU DIOS di liblul meipalpad lapu tu ingganah di pappeg tu. Endin hekey hu eleg tu itudek. <sup>25</sup> Yan nengibbuhuan tu ey intugun tuddan helag Levi e hi-gada mengippaptek etan ni Kaban ni neiha-adan ni neitudek ni Tugun APU DIOS. Kantun hi-gaday <sup>26</sup> “Yu idagsi eya liblul ni neitudekan ni tugun APU DIOS di Kaban, et kamei-ellig ni tistiguddan helag Israel et hedin wada impahding yun bahul ey endi illason yu. <sup>27</sup> Tep inamtak e manghay kayu ey neligat kayun metuttudduan. Anin dangngu eyan kawedak et nginhay yu hi APU DIOS, nema-ma-malli law ngehay yu hedin metteyyak. <sup>28</sup> Ayagi yuddan emin aap-apu ey opisyal ni helag Israel, et ehelen kun hi-gada huuya et tistiguan ni kabunyan ey puyek. <sup>29</sup> Tep inamtak e hedin endi-ak ali law man mambalin kayun lawah ni peteg e iwwalleng yudda intugun kun u-unnuden yu. Et humman hu um-ali nemahhig ni ligat ni hi-gayu, tep pebungngat yulli hi APU DIOS tep ya liwat ni pehding yu.”

*Ya a-appeh Moses*

<sup>30</sup> Et ia-appeh nan Moses di hinanggaddan emin ni helag Israel huyyan a-appeh:

## 32

<sup>1</sup> Dengel yu e kabunyan niya puyek eya e-helen kud a-appeh ku: Yaddalli et anhan hu ittutdudduk ey <sup>2</sup> heniddalli udan ni manke-gah, henin hamyuk ey henin delnud pekatmel ni intanem niya heniddan na-let ni udan di helek. <sup>3</sup> Iddaydayaw ku ngadan APU DIOS et ya kasina-gay tu. <sup>4</sup> Hi-gatu hu kamei-ellig di batun keihhikkugan. Kameiptek emin tuka pehding, limpiyuh ey meandeng hu elaw tu. Hi-gatu hu Dios tayu ey kayyaggud ni peteg niya tuka peamnun ippahding emin hu tuka e-hela.

<sup>5</sup> Nem yadda tuu tu ey lawah ida niya maheul ida, et humman hu beken ni lebbeng tun meibbillang idan tutu-u tudda.

<sup>6</sup> Hi-gayuddan tuun endi nemnem tu, kaw hannya pehding yun mampesalamat nan APU DIOS? Kaw beken ni hi-gatu ameyun nanletun hi-gayu, et ihhammad dakeyud nambebleyan yu?

<sup>7</sup> Nemnemnem yudda kedi hu nelabah ni tsimpuh. Mahmahi yuddan a-ammed yu et yadda nangkea-amma et ehelen dan hi-gayu hu neipenahding lan nunman.

<sup>8</sup> Yan nengidwatan Apu Dios e Keta-ta-geyyan ni pambebleyan ni tutu-u eyad puyek, ey inha-ad tuddad bebley ni pinhed tun panha-adan da, meippuun di bilang idan helag Israel.

<sup>9</sup> Tep yadda helag Israel hu pinilin APU DIOS ni tuu tu e kamei-ellig ni nebalol ni tenged tu.

<sup>10</sup> Impaptek tudda et adugan tudda humman nebalol ni tuu tu etan di eleg mebebleyin da nanhawawangan. <sup>11</sup> Kamei-ellig hi APU DIOS di tulduh e tuka tuttuddui impah tun umtayab ni hinikmat tuddad nebekyag ni payak tu. Hanniman impahding tuddan tutu-u tun helag Israel.

<sup>12</sup> Ebuh hi APU DIOS ni nengipenguluddan tutu-u tu, endi hu dios ni edum ni bebley ni an bimmaddang ni hi-gada.

<sup>13</sup> Inlaw tuddad nedundung ey indaddan tu kenen dan neanid payew. Indaddanan tuddan danum ni putsukan niya mansikan olibah ni nalpud batu, <sup>14</sup> yadda gatas ni baka niya kalneroh. Ey indawtan tuddan mangkateban impah ni kalneroh ey gelding ni nalpud Bashan ey indawtan tuddan kayyaggud ni alinah niya meinum ni nekapyad grapes.

<sup>15</sup> Hi-gadan helag Israel hu kamengeddanin Jeshurun ey kimmedangyan ida. Mangkatebadda niya ida kamepeppel, nem manghay ida. Inwalleng da hi Apu Dios e kamei-ellig di batun keihhikkugan da, ey hi-gatu nanletu niya nengihwang ni hi-gada. <sup>16</sup> Immameh hi APU DIOS gapuh ni nandayawan dan dios ni kinapkapan tuu, ey impabunget da gapuh idan lawah ni peteg ni impenahding da. <sup>17</sup> Nan-appit idan didimonyoh et yadda kinapyan tuun dios ni eleg da amta, ey eleg daydayawen idan aammed da.

<sup>18</sup> Hi-gayun tutu-u, liniwwan yu etan Dios yun kamei-ellig di batun keihhikkugan. Hi-gatu nengihwang niya nengidwat ni biyag yu. <sup>19</sup> Yan nenang-angan APU DIOS idan nunman ni lawah ni yuka pehpehding, ey bimmubunget et iwalleng dakeyun tuka ibbilang ni u-ungnga tu. <sup>20</sup> Kantuy "Eggak ida law hengnguda humman idan tutu-u, ey eggak baddangidda et ang-angek hedini hipa meippahding ni hi-gada, tep mekelhi ulu da e eleg ida mengu-unnud ni hi-gak." <sup>21</sup> Impabunget da-ak niya nakka um-ameh gapuh ni daka pandeyawin endi silbi tun dios ni kinapyan tuu. Ya kakulugan tu ey beken ni makulug ni dios ida humman. Yan nunya ey pebungnget kudda ey meemeh ida tep bendisyonak hu edum ni tutu-un eleg mengullug ni hi-gak e Dios. <sup>22</sup> Kamei-ellig hu bunget kud simmetebbel ni apuy e tuka gihheban emin hu hipa humman ingganah di dallem ni puyek anin ni ya yinudungan ni duntug.

<sup>23</sup> Mantutu-nud hu peellik ni ligat ni hi-gada e kamei-ellig ni nak ida kapanpenna. <sup>24</sup> Ey peellik hu nemahhig ni bisil et matey idan upeda, ey mettey ida gapuh ni nemahhig ni atung ni annel da niya gapuh ni degeh ni umpatey. Peellik pay hu angetakkut ni ma-lem ni animal ni kamengngan ni tuu. Ey peellik pay hu angetakkut ni uleg. <sup>25</sup> Ey itu-dak kudda mengubbat ni hi-gada et mangkatey idad keltad. Anin di baballoy da et nemahhig ali takut idan nangkea-amma, nangkei-inna, yadda kakat-agun lalacki ey bibi-i, yadda kaungaunga ey gegellang. <sup>26</sup> Ninemnem kun iwwahit ida ma-lat endi law manmemnem ni hi-gada. <sup>27</sup> Nem nakka um-angel e entanni ey mampahhiyadda buhul da et kandy 'Nengapput itu gapuh ni et-eteng ni kabaellan tayu. Beken hi APU DIOS hu nengipengapput ni hi-gatsu.'

<sup>28</sup> Hi-gadan helag Israel ey kulang nemnem da ey endi daka pan-ewwat. <sup>29</sup> Gullat ni nenememan ida et ewwatan da gaputan neipahding huuya, ey amtaen da mekapkapyallin hi-gada. <sup>30</sup> Kaw gullat et, kele an apputen ni hakey ni buhul da hu hanlibun hi-gada? Ey kele tu-wa anhan an pepsik ni dewwan buhul da hu hampulun libun hi-gada. Nem mukun hanniman ey hi APU DIOS e kamei-ellig ni keihhikkugan da ey inwalleng tudda tutu-u tu. <sup>31</sup> Inamtaddan buhul da e endi kabaellan ni dios dan beken ni henin Dios ni Israel. <sup>32</sup> Humman idan buhul da ey heniddan iSodom ey iGomorra e heniddan neitnem ni grapes e nambalin ida lameh tun kedet, <sup>33</sup> henidda mewan meinum ni nekapyad gitan uleg.

<sup>34</sup> Et humman hu, kan APU DIOS ey 'Eggak liwwanadda humman ni kapehpehding idan buhul idan tutu-uk. Et humman hu, kastiguen kuddallin gintud kun tsimpuh. <sup>35</sup> Hi-gak hu mengibleh niya mengastigu etan ni tuun wada lawah ni impahding tun hi-gayu et kamei-ellig ni meikkudlih ida. Neihnup law tsimpuh ni kebabahan da.'

<sup>36</sup> Nemnemen alin APU DIOS ida tutu-u tu et hemeken tudda hedini ang-angen tu e endi meihwang ni hi-gada anin hakey. <sup>37</sup> Ey hantulli eheladdan tutu-u tu e kantuy 'Attudda mewan hu yuka pandinnelin dios yun kinapkapan tuun et-eteng ni kabaellan da ey? <sup>38</sup> Attudda mewan ida dios yun in-enappitan yun taba niya meinum ey? Ayagi yudda et baddangan dakeyu et ihwang dakeyu. <sup>39</sup> Ya kakulugan tu ey hi-gak ni ebuh hu makulug ni Dios, endi edum! Hi-gak hu nalpuan ni biyag ni tuu ey hi-gak mewan hu memappag. Hanniman mewan e umlipputtak ey hi-gak hu kamengipeyaggud. Endi hu dammutun an mengippesikked ni hi-gak. <sup>40</sup> Hi-gak hu Dios ni wadan ingganah ey itta-gey ku ngamay ku et isapatah ku <sup>41</sup> e ta-liden ku hu ispadah ku, et pan-itwik ku et ibleh ku hu impahding idan buhul kun angebe-hel da-ak. <sup>42</sup> Man-ilh-ilh ali kuheyaw dad panak. Ussalen ku mewan ispadah kun pemettey kun buhul ku. Ey endin hi-gada mekihhanggan hi-gak hu an meihwang tep anin idan neliputan winu neikelabut ni aap-apu et mettey ida dama.'



<sup>43</sup> Hi-gayun tutu-ud kebebbley, pekiam-amleng kayuddan tutu-un APU DIOS, tep ibbaleh tu neteyyan idan bega-en tu. Pehding tu humman idan buhul tu ey liwwan tu liwat idan tutu-u tu."

<sup>44</sup> Huyya a-appeh ni intuttuddud Moses nan Joshua idan edum dan helag Israel.

<sup>45</sup> Ginibbuh Moses ni inhel idan tutu-u huyya, <sup>46</sup> et kantu mewan ni hi-gada ey "Ihad yud nemnem yu niya puhu yudda huuyan tugun ni inhel kun nunyan hi-gayu et han yulli dama itugun idan u-ungga yu et u-unnuden da. <sup>47</sup> Tep beken ni ehel ni ebuh ida huyya, nem keippuunan ni biyag yu. Hedin u-unnuden yu, ey mebeyyag hu pambebleyan yuddad bebley ni lawwan yud pan-agwatan yud wangwang e Jordan."

*Ya nengipeamtaan APU DIOS ni ketteyyan Moses di Duntug e Nebo*

<sup>48</sup> Yan nunman ni aggew ey kan APU DIOS nan Moses ey <sup>49</sup> "Lakkay di Moab idad Duntug e Abarim et manteyed kad Duntug e Nebo e demang ni Jericho, ma-lat man-ang-ang kad Kanaan e humman hu bebley ni iddawat kuddan helag Israel, <sup>50</sup> tep mettey kadman ni duntug ni tetyedem et lumaw kad linawwan idan aammed mun netey, e linawwan daman agim e hi Aaron e netey di Duntug e Hor. <sup>51</sup> Hi-gayun han-agin Aaron ey inhalla yu tugun kud hinangngab idan helag Israel di Meribah di Kades e kad-an ni danum di eleg mebebleyid Sin. Tep eleg yu peang-ang kakinayyagud kuddan tutu-u. <sup>52</sup> Et humman hu, uhdungam ni ebuh humman ni bebley. Nem eleg ka mabalin ni umlaw di diman ni pambebleyan idan helag Israel."

### 33

*Ya nemendisyonan Moses idan tuu*

<sup>1</sup> Huyya imbendisyon Moses e tuun Apu Dios idan helag Israel et han matey: <sup>2</sup> Nalpu hi APU DIOS di duntug e Sinai e heni aggew ni simmimil di Duntug e Seir. Himmeyaw ni nalpullid Duntug e Paran ey wada kamantetebbel ni apuy di wannan tu ey neikuyug ida hampulun libun anghel ni hi-gatu.

<sup>3</sup> Kan Moses nan APU DIOS ey "Nakappinshed mu tutu-um ey muka ippaptek ida. Ey yadda tuum ey daka u-unnuda muka e-helan pehding da, anin idan Tugun mun <sup>4</sup> nebalol ni tenged ni hi-gadan helag Israel <sup>5</sup> Hi APU DIOS hu nambalin ni patul idan helag Israel eman ni neamung ida aap-apu et yadda tutu-u tu."

<sup>6</sup> Heninnuy hu inhel Moses meippanggep idan helag Reuben: "Meteggu ida kaya helag Reuben anin ni ekket ida."

<sup>7</sup> Ya inhel Moses meippanggep ida daman helag Judah ey "Dengel mu anhan e APU DIOS hu kapamehemhemmekiddan helag Judah ni hi-gam. Ikahhakey muddad edum dan helag Israel, ey baddangim idan mekihhanggan buhul da."

<sup>8</sup> Heninnuy hu inhel tu meippanggep ida daman helag Levi: "APU DIOS, peamtam ni hi-gadan bega-en mu hu pinhed mu meippuun di Urin niya Thummim. Yan nematnaam ni hi-gadad Massah ey inang-ang mud Meribah e kad-an ni danum e kayyagud hu daka pehding. <sup>9</sup> Inu-unnud da tugun mu ey eleg da ihalla nekitbalan dan hi-gam. Ey impeang-ang da e et-eteng ni neminshed dan hi-gam nem yadda ammed da, ya u-ungga da, ey ya aaggi da. <sup>10</sup> Daka ittuttudduddan tuum hu tugun mu. Ey ida kaman-appit di altar mu. <sup>11</sup> APU DIOS, bendisyonim ida ey amleng kad ngunu dan daka pansilbiin hi-gam. Bahbah meekibuhul ni hi-gada et meendidda."

<sup>12</sup> Heninnuy hu inhel Moses meippanggep ida daman helag Benjamin: "Huyyan helag Benjamin hu nakappinshed niya kapeka-eddugin APU DIOS ni ingganah et endi lawah ni mekapkapyan hi-gada."

<sup>13</sup> Heninnuy hu inhel Moses meippanggep ida daman helag Joseph: "Bendisyonan et ahan APU DIOS hu puyek da et maudanan e maweda utbul ma-lat eleg ida makulangan ni danum. <sup>14</sup> Ey meptangan idalli et anhan kaumlameh ni ittanem da, ey dakel ali illameh dan kabulabulan. <sup>15</sup> Emin et hu duntug da ey metenneman idan kayyagud ni kaumlameh. <sup>16</sup> Mewedda et anhan di emin ni bebley da hu kakkayyagud. Ey bendisyonan ida et anhan APU DIOS e immehel di kamantetebbel ni ekket ni keyew. Ey um-alidda et anhan emin huuyan bendisyon ni helag Joseph, et hi-gatu hu heni uluddan aaggi tu. <sup>17</sup> Hi Joseph ey heni bulug ni bukan na-let. Kamei-ellig mewan hu elet tud haduk ni ma-lem ni baka. Mei-ellig ni ha-duken idallin hampulun libun helag Ephraim niya kalibulibun helag Manasseh hu tutu-ud kebebbley et itulud daddad gilig ni puyek."

<sup>18-19</sup> Heninnuy hu inhel Moses meippanggep idan helag Sebulun et yadda helag Issakar: "Umkedangyan idalli et anhan hu helag Sebulun di negosyoh dad baybay ey mee-edduman ali et anhan hu kakinedangyan idan helag Issakar di bebley da. Ikkedangyan dadda wadad baybay ey yadda wadad dallem ni palnah. Eyyagan dad

duntug da tutu-ud edum ni bebley, et iappit dadda lebbeng tun kamei-appit nan Apu Dios.”

<sup>20</sup> Heninnuy hu kan Moses ni meippanggep idan helag Gad: “Medeyyaw hi Apu Dios ni nengidwatan tun mahkang ni pambebleyan ni helag Gad. Ida kamei-ellig hu helag Gad ni layon e kamanhehhegged ni dedpapan tu et pateyen tu. <sup>21</sup> Kakkayyaggud hu pintek dan pambebleyan da. Hi-gada keidwatan etan ni mei-eng-eng di mengipappanggulu. Hedin neamung ida aap-apu ey hi-gada mengi-ehngeng ni limpiyuh ni pinhed APU DIOS ni meippahding.”

<sup>22</sup> Heninnuy hu kan Moses ni meippanggep idan helag Dan: “Kamei-ellig ida helag Dan di pakeetteng tun layon e neetteng di Bashan.”

<sup>23</sup> Heninnuy hu kan Moses ni meippanggep idan helag Naptali: “Nakappinhed APU DIOS hu helag Naptali ey et-eteng ni bendisyon tun hi-gada. Mambebley idallid appit ni kakelinnugin aggew et yad appit ni south.”

<sup>24</sup> Heninnuy dama hu kantun meippanggep ni helag Asher: “E-eteng hu bendisyon idan helag Asher nem ya bendisyon idan helag idan agi da. Hi-gadalli et anhan hu pekappinheden idan agi da. Malemeh ali et anhan hu olibah ni meitnem di puyek da <sup>25</sup> niya endilli et anhan hu menggep ni bebley da tep gumek niya giniling hu eheb da. Et melinggep idalli et anhan e endi da tekkutan.”

<sup>26</sup> “Hi-gayun helag Israel e kamengeddanin Jeshurun, endin hekey hu kamei-ingngeng di Dios yun kamedeyyaw di kabunyan e heni nanlugan di kulput ni um-alin memaddang ni hi-gayu. <sup>27</sup> Hi-gatu kaihkugi yu ey hi-gatu memaddang ni hi-gayun ingganah. Dinegyun tudda buhul yu et kantun hi-gayuy ‘Bahbah yuddan emin.’ <sup>28</sup> Et deh e melinggep kayu law ni helag Israel di bebley yun dakel ni peteg hu pagey niya meinum ey eleg mekullangin udan. <sup>29</sup> Hi-gayun helag Israel, amleng kayu! Endi hu edum ni tutu-un henin hi-gayun inhewang APU DIOS. Hi-gatu kamei-ellig ni happiyaw yu niya ispadah yu. Baddangan dakeyun hi-gatu et mengapat kayu. Um-aliddalli buhul yun mampehemhemmek ni hi-gayu, nem pambahbahun yuddalli daka pandeyyawin dios da.”

## 34

### *Ya netayyan Moses*

<sup>1</sup> Nalpu hi Moses di nandeklan di Moab, et manteyed di Duntug e Nebo et tagan tu teyed ingganah etan di ta-pew ni Duntug e Pisgah e demang ni Jericho. Et peang-ang APU DIOS ni hi-gatun emin ida bebley di Kanaan, meippalpu Gilead ingganah di Dan, <sup>2</sup> ey emin hu nambebleyan idan helag Naptali, yadda helag Epraim et hi Manasseh, anin ya nambebleyan idan helag Judah ey ingganah di baybay e Mediterranean di appit ni kasimmilin aggew, <sup>3</sup> ya bebley di Negeb et ya nandeklan ni meippalpu Jericho e dakel hu palmah ingganah di Soar. <sup>4</sup> Kan APU DIOS nan Moses ey “Humman ida bebley ni inhel kud Abraham, hi Isaac et hi Jacob, ni iddawat kun helag da. Peang-ang kun hi-gam, nem eleg daka pedetteng diman.”

<sup>5</sup> Negibbuh humman et matey di Moab hi Moses e bega-en APU DIOS. <sup>6</sup> Ingkulung APU DIOS hi Moses di nandeklan e neihnp di Bet Peor, nem ingganah nunya ey endi nengamtan ustuh ni pettek ni neikulungan tu. <sup>7</sup> Netey hi Moses eman ni hanggatut et dewampulu toon tu e nanengtu nin na-let. Anin ni tuka penang-ang ey eleg melumman. <sup>8</sup> Yan nunman ni neteyyan tu ey inlemetan idan edum tun helag Israel ni hambulan di diman di nandeklan di Moab, ingganah negibbuh etan aggew ni kapanlelmesi.

<sup>9</sup> Indawtan APU DIOS hi Joshua e u-unggan Nun ni laing eman ni nengikepaan Moses ni ngamay tun hi-gatu, tep hi-gatu pinili tun meihhullul nan Moses. Et humman hu, emin ida helag Israel ey inu-unnud da hi Joshua niya impahding dan emin hu inhel APU DIOS nan Moses.

<sup>10</sup> Endi hu hakey ni prophet APU DIOS di Israel ni neiingngeng nan Moses, tep hedin hi-gatu, man nekihinnanggan nekihummangan ni hi-gatu. <sup>11</sup> Endi mewan hu prophet ni henin Moses e intu-dak nan APU DIOS ni nengipahding idan miracles niyadda kamengippetngan impahding tud Egypt di hinanggan patul, yadda opisyal tu niyad emin diman ni bebley. <sup>12</sup> Ey endi edum ni prophet ni nengipahding ni henin impangunun APU DIOS ni hi-gatun inenang-ang idan helag Israel ni kamengippetnga niya angetakkut e eleg kabaelan ni tuu.

## Joshua

*Ya meippanggep nunyan libluh ni Joshua*

Huyyan libluh ni Joshua ey impeamta tu nengipeamnuan nan APU DIOS ni insapatah tun Abraham e iddawat tu hu bebley e Kanaan idan helag tu e humman ida hu helag Israel. (Gen. 15:18-21 et yad 17:18) Intugun APU DIOS ni nunman idan helag Israel e gubbaten dadda tutu-ud Kanaan et pateyen dan emin hu nambebley diman. (Deut. 7:1-5) Huyyaddan iKanaan ey nemahhig hu kalwah da, tep daka petteya u-ungnga da e dadda kagihheba et iappit daddan dios da. (Leviticus 18:21-30)

Indawat nan APU DIOS hu kabaelan nan Joshua et yadda edum tun helag Israel ni mengapput idan tutu-un nambebley di Kanaan. Huyya keang-angan tu e hi APU DIOS hu makulug ni Dios niya et-eteng hu kabaelan tu nem yadda dios idan iKanaan. Ya mahapul ni amtaen idan helag Israel di deya ey pannenneng dan mengu-unnud nan APU DIOS. Ey mahapul ni hi-gatun ebuh daydayawen da niya pansilbian da, tep pinili tuddan tuu tu. (Deut. 7:6-11)

*Ya neitudek eyad libluh:*

1. Ya hinggepan idan helag Israel di Kanaan e bebley ni insapatah nan APU DIOS ni iddawat tun hi-gada. (chapters 1-5)
2. Ya nekigubatan idan helag Israel idan iKanaan et apputen dadda. (chapters 6-12)
3. Ya nengegedwaan idan helag Israel ni Kanaan. (chapters 13-22)
4. Ya nanggillig ni intugun nan Joshua idan helag Israel et ya neteyyan tu. (chapters 23-24)

*Inhel APU DIOS nan Joshua e ippangulu tudda helag Israel et lumaw idad Kanaan*

<sup>1</sup> Yan eman ni endi law hi Moses e bega-en APU DIOS tep netey ey immehel hi APU DIOS nan Joshua e u-ungngan Nun, e kamemabbaddang lan nan Moses ni nunman. <sup>2</sup> Kantun hi-gatuy "Yan nunya tep endi law hi Moses e bega-en ku, ey pandaddan kayuddan emin eyan tutu-u et man-agwat kayud Wangwang e Jordan et lumaw kayud bebley ni iddawat kun hi-gayun helag Israel. <sup>3</sup> Inhel ku dedan lan Moses ni nunman e iddawat kun hi-gayun helag Israel emin hu bebley ni lawwan yu. <sup>4</sup> Ya pappeg ni iddawat kun pambebleyan yu, ey meippalpu desert di appit ni south ingganah di duntug di Lebanon di north, yad Wangwang e Euphrates di appit ni kasimmilin aggew et yad nampambebleyan idan Hittite, et mampalaw lad Baybay e Mediterranean di appit ni kelinnugin aggew. <sup>5</sup> E-helen kun hi-gam e Joshua e endi hu mabalin ni an mengapput ni hi-gam ni nunyan ketaggum, tep wada-ak ni ingganah ni memaddang ni hi-gam, henin nemenaddangan ku lan Moses. Eleg daka hi-yana niya eleg daka iwwalleng.

<sup>6</sup> Pekedhel mu nemnem mu ey entan takut tep hi-gam mengippengguluddan tuuk ni an mambebley etan di inhel kuddan aammed yun iddawat kun hi-gayu. <sup>7</sup> Nem mahapul ni pekedhel mu nemnem mu niya entan takut mu. Ey ang-ang mu et u-unnuden mu emin ida etan Tugun kundawat Moses ni hi-gayu. Entan tu iwalleng anin ni hakey eyaddan Tugun et kayyagud ni ingganah hu meippahding ni hi-gayu anin ni attu lawwan yu. <sup>8</sup> Mahapul ni ittuttuddum idan tuu hu neitudek di Tugun ku ey mahapul ni eddaeddalen mun kawwalwal niyan hileng. Ey mahapul ni u-unnuden mun emin hu neitudek diman ma-lat yumaggud ka ey kayyagud pambalanan ni emin ni pehding mu. <sup>9</sup> Ey nemnem mu e hi-gak e AP-APU e Dios yu, ey wada-ak ni ingganah ni umbaddang ni hi-gam, anin ni attu lawwam. Et humman hu, entan kedismayah mu ey entan takut mu. Pekedhel mu nemnem mu ey pandinel kan hi-gak."

*Ya in-olden Joshua idan tuu*

<sup>10</sup> Entanni ey in-olden Joshua idan aap-apun <sup>11</sup> umlaw idad kampun emin ni tutu-u et da ehelen ni hi-gada e kanday "Pandaddan kayun kennen yu tep melebbah tellun aggew ey man-agwat itsud Wangwang e Jordan et itsu mambebley etan di indawat APU DIOS tayun hi-gatsu."

<sup>12</sup> Kan Joshua idan helag Reuben nan Gad et yadda kagedwah ni helag Manasseh ey <sup>13</sup> "Entan tu liwwan eman inhel lan Moses ni hi-gayu e iddawat AP-APU e Dios tayu eya bebley di Jordan di appit ni kasimmilin aggew et pambebleyan yu. <sup>14</sup> Anin manha-ad idadya hu aahwa yu, yadda u-ungnga yu, et yadda animal yu. Nem hedin hi-gayuddan sindalu, ipengulu yudda edum tayun helag Israel et man-agwat itsud Wangwang e Jordan et baddangan yudda aaggi yu <sup>15</sup> ingganah ellan tayu humman ni indawat APU DIOS ni hi-gada dama bebley di Jordan di appit ni kelinnugin aggew, ma-lat melinggep law emin

helag Israel, et han dammutun mambangngad kayun mambbley kayu eyad appit ni kasimmilin aggew ni intudun Moses e bega-en APU DIOS ni hi-gayu.”

<sup>16</sup> Hinumang idan tuu hi Joshua e kanday “Pehding min emin hu in-olden mu. Ey anin ni attu pengittu-dakan mun hi-gami et umlaw kami. <sup>17</sup> U-unnuden min emin hu e-helen mu henin nengu-unnudan min Moses. Hi APU DIOS tayu hu memaddang ni hi-gam henin nenenaddangan tun Moses. <sup>18</sup> Hedin wada mangngenghay ni e-helen mu winu eleg mengu-unnud ni olden mu ey mahapul ni pepetty. Etan panhelindewa, nem pandinel ka ey ipahding mu emin hu kabaalam.”

## 2

### *Ya nengitu-dakan Joshua ni dewwan lakin an mansi-im di Jericho*

<sup>1</sup> Yan nangkampuan di Joshua di Akasia ey intu-dak tu dewwan tuun an mansi-im idan bebley di Kanaan, nema-ma-mad Jericho. Nandeyadda humman ni tuud baley Rahab e biin tuka pebeyyad annel tun lalakk. <sup>2</sup> Dingngel etan ni patul di Jericho e wadadda immalin helag Israel ni nunman hileng ni an mansi-im eyan bebley tayu. <sup>3</sup> Et menu-dak ni an menghel nan Rahab eyan kantu: “Pa-hep mudda etan dewwan lakin impahgep mud baley mu, tep immaliddan mansi-im eyan bebley tayu.”

<sup>4-6</sup> Kan Rahab ni hi-gaday “Em, wadadda immalidya, nem eggak amta nalpuan da. Limmaw idan nuntan ni kamangkehileng et han mailekbi hu eheb ni bebley. Eggak amta impelawwan da, nem pedug yudda et dammutun ha-kupen yudda.” Nem ya kakulugan tu ey intalun Rahab ida kayad atep ni baley tu et hephepan tuddan dagemi. <sup>7</sup> Immehep ida etan sindalun itu-dak ni patul, et mailekbi mewan hu eheb ni bebley. Limmaw ida la e indalan dad keltad ni mampellaw di pan-agwatan di Wangwang e Jordan.

<sup>8</sup> Eleg ida pay ni maugip etan immalin mansi-im ey limmaw hi Rahab di kad-an dad atep ni an mekihummangan ni hi-gada. <sup>9</sup> Kantun hi-gaday “Inamtak e indawat APU DIOS ni hi-gayu eya bebley. Nemahhig takut min hi-gayu. Emin tutu-u ey ida kaumtatakt. <sup>10</sup> Dingngel mi meippanggep ni nengedwaan APU DIOS ni danum di Madlang ni Baybay et man-agwat kayud nema-ganan ni gawwa tun nalpuan yud Egypt. Dingngel mi mewan meippanggep ni nemateyan yuddan dewwan patul e di Sihon nan Og e patul idan Amorite ni nambebley di Jordan di appit ni kasimmilin aggew et patyen yuddan emin bimmebley. <sup>11</sup> Humman gaputun yan nangngelan min nunman idan neipahding, ey nemahhig takut mi et meendin emin hu tuled mi tep makulug e hi APU DIOS yu hu Apu Dios di kabunyan et ya eyad puyek. <sup>12</sup> Ya ibbagak anhan nunyan hi-gayu ey isapatah yun hi-gak di ngadan APU DIOS e hehmeken dakemi anhan ni pamilyah ku, tep binaddangan dakeyu daman nunya. Peamta yun nunyan hi-gak ma-lat madinellak <sup>13</sup> e eleg yu pettey ama, hi ina, yadda agik et yadda pamilyah dan ellian yun pengubbatan yun Jericho.”

<sup>14</sup> Kan ida etan ni dewwan laki ey “Em, ipahding mi huttan. Eleg mi ihalla tep kastiguen dakemin APU DIOS. Nem mahapul ni eleg mu an e-ehhela hu impahding mi eyad bebley.”

<sup>15</sup> Ya baley Rahab ey neidummit di tuping ni luhud ni bebley et layagen tu linubid di habhabyen di ba-hil ni kadkak et pandalanan idan etan ni an nansium. <sup>16</sup> Kantun hi-gaday “Pampalaw kayud duntuduntug et mantalu kayudman ni tellun aggew et pandammuan tun keibbangngadan ida etan ni tutu-un an menemmak ni hi-gayu ey han kayu neukat et manglaw kayu.”

<sup>17</sup> Kan ida etan ni dewwan lakin nan Rahab ey “Pehding mi etan insapatah min hi-gam, <sup>18</sup> nem mahapul ni itta-yun mu eya madlang ni linubid ni inusal tayun nunyad habhabyen ni nengidlanan mi. Niya mahapul ni pehgep muddad bawang ni baley mu hu pamilyah mu: hi amam, hi inam, yadda agim ey anin idan edum ni pamilyah mu. <sup>19</sup> Hedin wada um-ehep ey meilleggat ni mettey di keltad, bekken mi ngu law ni bahul. Nem emin hu wadad bawang ni baley mu ey hi-gami nengamung ni hi-gada. Endi an mekapkapan lawah ni hi-gada, <sup>20</sup> nem hedin peamtam eya impahding mi, eleg mi dama pehding hu insapatah mi.”

<sup>21</sup> Kan Rahab ey “Em, ebbuluten ku eya nan-uungbalan tayu.” Intu-dak tudda et mena-yun etan madlang ni linubid di habhabyen e eleg tu ukahen.

<sup>22</sup> Nampalaw ida etan dewwan lakid duntuduntug et ida mantaludman ni tellun aggew. Yadda etan intu-dak ni patul ni an memdug ni hi-gada, ey dadda himhimmak nem eleg dadda hanhamak et mambangngad idad bebley. <sup>23</sup> Neukat idalli law etan an nansium et mandayyudda et man-agwat idad Wangwang e Jordan et mambangngad idad kad-an Joshua et idaddatteng dan emin hu nekenapkapy. <sup>24</sup> Kandan Joshua ey

“Makulug ni iddawat APU DIOS emin humman ni bebley ni hi-gatsu tep nemahhig takut idan tutu-udman ni hi-gatsu.”

### 3

*Ya nan-agwatan idan helag Israel di Wangwang e Jordan*

<sup>1</sup> Newa-wan nunman ni aggew ey himmaleman di Joshua niyadda edum tun helag Israel et umgah idad Akasia di nangkampuan da et lumaw idad Jordan et mangkampuddad gilig ni Wangwang, et panhehheggedan dan pan-agwatan da. <sup>2</sup> Nelabah tellun aggew ey im-impeng idan aap-apu hu kampu, <sup>3</sup> et ehelen dan emin idan tuu e kanday “Hedin inang-ang yu e immegah ida padin in-attang da etan Kaban ni AP-APU e Dios tayu, bukal yu kampu yu et maiunnud kayu. <sup>4</sup> Ippangulu da dellanen yu tep endi yu nandalnan di deya. Nem entan keihnp. Keibebbettaw kayun ngannganih ni kagedwah ni kilometroh.”

<sup>5</sup> Kan Joshua idan tutu-uy “Ipahding yu etan elaw tayun kapanlinnih ni annel tep wada pehding nan APU DIOS ni kabubuhan ni kamengippetngan hi-gatsu.”

<sup>6</sup> Kakkabubuhan et kan Joshua idan papaddiy “Iattang yu hu Kaban APU DIOS et mamengulu kayu et han maitu-nud ida tutu-u.” Et u-unnuden idan padi.

<sup>7</sup> Entanni ey immehel hi APU DIOS nan Joshua e kantuy “Meippalpun nunyan aggew ey peang-ang kuddan edum mun helag Israel e hi-gam hu mengipappangluddan hi-gada ma-lat amtaen da e daka kababbaddangi henin nemaddangak lan Moses. <sup>8</sup> Ehel muddan etan ni padin mengi-attang ni Kaban et hedin umdateng idad gilig ni wangwang ey umgawadda ey in-ehneng da.”

<sup>9</sup> Et ayagan Joshua ida tutu-u et kantun hi-gaday “Keyuy et denglen yu hu inhel ni AP-APU e Dios tayu. <sup>10</sup> Hi-gatu e Dios ni wadan ingganah ey peang-ang tu et-eteng ni kabaelan tun hi-gatsu tep degyunen tudda iKanaan, yadda Hittite, yadda Hibite, yadda Perisite, yadda Girgashite, yadda Amorite niyadda Jebusite ni nampambebley di bebley ni lawwan tayu. <sup>11</sup> Amtaen yu e Dios e Ap-apud emin di kebebbebley eyad puyek ey baddangan daitun kei-agwatan etan ni Kaban tud Wangwang e Jordan! <sup>12-13</sup> Messikked etan danum e heni nebengbeng ni gewwaan idallin padin mengi-attang ni nunman ni Kaban AP-APU e Dios di emin ni puyek.” Inhel tu pay e umpiliddan emin hu hampulut dewwan helag Israel ni mengi-ehneng ni hi-gada e hanhakkey di hakey ni helag.

*Ya nan-agwatan idan helag Israel di Wangwang e Jordan*

<sup>14-15</sup> Binukal idan helag Israel hu kampu da et mamenguluddan immegah hu padin nengiatang etan ni Kaban APU DIOS. Yan nunman ni tsimpuh ni nan-agwatan dad Wangwang e Jordan ey tsimpuh ni ahiani ey nemahhig ni dakel hu danum. Nem yan gimmawadda padi etan di wangwang <sup>16</sup> ey nebengbeng hu danum di nengin-ahpat di petek ni Adam e bebley ni neihnp di Sarethan. Et matduk etan danum et endi law hu danum ni mampellaw di Baybay e Neahinan et man-agwat idan emin di wangwang et lumaw idad demang ni Jericho. <sup>17</sup> Immeehneng ida papaddin nengiatang ni Kaban APU DIOS di nema-ganan ni dalinat ni wangwang di gawetu ingganah nan-agwat idan emin hu tuu.

### 4

<sup>1</sup> Yan nan-agwatan idan helag Israel di wangwang ey inhel APU DIOS nan Joshua e kantuy <sup>2</sup> “Pili kan hanhakkey idad hampulut dewwan helag Israel ni mengi-ehneng ni hi-gada. <sup>3</sup> Ey ehel mun hi-gada e um-aladdan hampulun dewwan batud inehnengan idan padid gawwan Wangwang e Jordan et ipiggil dad pangkampuan yun mahmahdem.”

<sup>4</sup> Ineyagan Joshua humman idan hampulut dewwan lalakkin pinili tu <sup>5</sup> et kantun hi-gaday “Lakkayuy di gawwan Jordan di immehnengan idan etan ni nengiatang ni Kaban APU DIOS e Dios tayu et pumhan kayun hanhakkey ni batun mengi-ehneng ni hampulut dewwan helag Israel ni nahlgan tayu. <sup>6</sup> Humman idan batu ey penginemnemman tayun neipahding. Et hedin edum alin aggew et kan idallin u-ungga tayuy ‘Hipa keibbellinan ida eyan batu?’ <sup>7</sup> e-helen tayullin hi-gada e kan tayuy ‘Huyya penginemnemman tayun nebengbengan ni danum di Wangwang e Jordan ni nengiaawatan dan Kaban APU DIOS. Huyyaddan batu hu penginemnemman idan helag Israel ni ingganah.’”

<sup>8</sup> Inu-unnud da inhel Joshua ni intugun APU DIOS et umladdan hampulut dewwan batud gawwan Wangwang e Jordan ni mengi-ehneng ni hampulun dewwan helag Israel et da ipiggil di nangkampuan da. <sup>9</sup> Ey impepiggil Joshua hu hampulut dewwan batu etan di inehnengan idan padin nengiatang ni Kaban diman ni Wangwang e Jordan. Et ingganah nunya ey nannaneng idadman humman idan batu.

<sup>10</sup> Yadda etan padin nengiattang etan ni Kaban ey immeehneng idad gawwan wangwang ingganah neipahding emin hu intugun APU DIOS ni indawat Moses nan Joshua. Ey yadda etan tuu ey impapuut dan nan-agwat. <sup>11</sup> Negibbuh ni neagwat idan emin et han dama law man-agwat etan papaddin nengiattang ni Kaban APU DIOS. <sup>12</sup> Ya nemangngulun nan-agwat ey yadda sindalun nalpud helag Reuben, yadda helag Gad et yadda gedwan helag Manasseh. Nan-almas ida ey nandaddan idan mekiggubbat e humman dedan la intugun Moses ni pehding da. <sup>13</sup> Na-pat ni libu hu bilang idan nunman ni sindalun naalmas ni mekiggubbat hu nan-agwat di hinanggan APU DIOS et lumaw idad nandeklan di Jericho.

<sup>14</sup> Yan nunman ni aggew ey dineyaw APU DIOS hi Joshua di hinanggan emin ni helag Israel et neippalpun nunman ni aggew ingganah neteyyan tu, ey dineyaw da hi-gatu henin nandayaw da lan Moses.

<sup>15</sup> Entanni ey kan APU DIOS nan Joshua ey <sup>16</sup> "Mandal mudda hu papaddin nengiattang ni Kaban et dumekal ida." <sup>17</sup> Inu-unnud Joshua et mandalen tudda et dumekal idad Wangwang e Jordan. <sup>18</sup> Yan dimmakalan ida etan ni padin nengiattang ni Kaban APU DIOS ey kamenglaw mewan law danum di wangwang et manla-la-pih di gilig tu e heni lan nunman.

<sup>19</sup> Yan nunman ni nan-agwatan idan helag Israel di Wangwang e Jordan ey meikkeppulun aggew ni nemangngulun bulan. Nangkampuddad Gilgal di Jericho di appit ni kasimmilin aggew. <sup>20</sup> Ingkappyan Joshua diman etan hampulut dewwan batun inla dad wangwang e mengi-ehneng idan hampulut dewwan helag Israel. <sup>21</sup> Kantuddan tutu-uy "Hedin ibbagaddan u-ungnga yun edum ni aggew hu keibbellinan ida eyan batu, <sup>22</sup> ehel yun hi-gada e nema-ganan hu Jordan ni nan-agwatan min a-ammed yun helag Israel." <sup>23</sup> Tep mina-ganan APU DIOS et han itu man-agwat emin. Henin nunman mewan impahding tud Madlang ni Baybay e mina-ganan tu nandalanan tayu ingganah neagwat itsun emin. <sup>24</sup> Impahding tu huuya ma-lat amtaen ni emin ni tutu-ud kebebbbley eyad puyek e et-eteng ni kabaelan APU DIOS niya ma-lat hi-gatu e APU DIOS yu hu daydayawen yun ingganah.

## 5

<sup>1</sup> Yadda patul ni Amorite etan idad bebley di Jordan di appit ni kakelinnugin aggew et yadda patul ni iKanaan ni nampambebley di gilig ni Mediterranean ey nemahhig ni peteg takut da et meendin hekey tuled dan nangngelan dan siniked APU DIOS hu danum di Wangwang e Jordan et mema-ganan hu nan-agwatan idan helag Israel.

<sup>2</sup> Inhel nan APU DIOS nan Joshua e kantuy "Pengapya kaddan ilap et kugitem ida lalakkin helag Israel." <sup>3</sup> Inu-unnud Joshua hu intugun APU DIOS et kugiten tuddad Gibeat Haaralot.

<sup>4-7</sup> Ma-nut nekugit ida emin hu lalakkin helag Israel eman ni neni-yanan dan Egypt nem eleg ida makugit hu neiungngad eleg mebebley ni nanha-adan dadman ni na-pat ni toon. Et humman idan lalakkin kakat-agun dammutun mekiggubbat ni nunman ni wadaddad Egypt ey netey idan emin tep eleg da u-unnuden hi APU DIOS. Insapatah dedan lan APU DIOS lan nunman e eleg tu in-abulut ni umlaw ida etan di kakkayyaggud ni bebley ni mateba kameitnem e humman inhel tun iddawat tuddan aammed da. Et yadda etan baluh ni helag Israel hu kinugit Joshua. <sup>8</sup> Negibbuh idan nekugit et manha-ad idad kumpada ingganah napwahan hu sugat da.

<sup>9</sup> Immehel mewan hi APU DIOS nan Joshua ey kantuy "Kamei-ellig ni inulin kun nunya hu nebabba-ingan yun neihbutan yud Egypt." Humman gaputun nengadnan humman ni bebley ni Gilgal \* et ingganah nunya ey humman ngadan tu.

<sup>10</sup> Yan nunman ni nangkampuan idan helag Israel di Gilgal di nedeklan e neihnud di Jericho ey nampiyestah idan nunman ni meikkahampulun epat ni aggew nunman ni bulan. Huyyan piyestah hu pannemneman dan nelabahan ni anghel APU DIOS di baballey dad Egypt. <sup>11</sup> Nawa-wa et yan nunman lapu tun pengannan dan lameh ni neitnem di Kanaan. Nengan idan neihanglag ni begah et ya sinapay ni eleg meha-adan ni kamampelbag. <sup>12</sup> Meippalpun nunman ey endi law kame-gah ni manna. Yan nunman dama neilepuan tun ya lameh ni neitnem di Kanaan daka kenna.

<sup>13</sup> Entanniy kamenglaw hi Joshua di Jericho ey tu i-ang-ang ey wada hu tuun immehngeng di hinangga tu e singnged tu ispadah et kan Joshua ni hi-gatuy "Kaw higam hu hakey ida etan ni sindaluk winu buhul daka?"

\* 5:9 5:9 Ya keibbellinan ni Gilgal ey ullinen.

<sup>14</sup> Himmumang etan tuu ey kantuy “Bekkennak ni sindalum winu sindalum buhul mu. Immali-ak tep hi-gak hu ap-apuddan sindalun APU DIOS.” Limmukhub hi Joshua di puyek ni pandeyyaw tu et kantuy “Bega-en muwak, hipa pinhed mun pehding ku?”

<sup>15</sup> Kan nunman ni tuun hi-gatuy “Ekal mu patut mu tep wada hi APU DIOS deya.” Inu-unnud Joshua et ekalen tu patut tu.

## 6

*Ya inhel APU DIOS ni pehding idan helag Israel*

<sup>1</sup> Kameileleki hu eheb ni heggepan di Jericho tep daka tekkusidda helag Israel ey neguwalyaan ma-lat endi mabalin ni um-ehep niya umhegep. Anin idan helag Israel ey eleg ida pakahgep.

<sup>2</sup> Kan APU DIOS nan Joshua ey “Iddawat kun hi-gam eya bebley Jericho et humman hu peapput ku etan patul di deya, anin idan sindalu tu.” <sup>3</sup> Ya pehding yuddan sindalum ey mampinhakkey kayun manlikweh eyad bebley da ni kewa-wa-wan enem ni aggew. <sup>4</sup> Ey yan meikkeppitun aggew ey mangkeppitu kayun manlikweh ey yadda etan pitun padin neitu-nudan idan nan-atang ni Kaban ku ey pampetnul da tangguyup da. <sup>5</sup> Et yan manggillig ni pengipatnulan da ey dukkeyen da ey eleg da sikkesikkeda. Hedin dingngel yu humman mandidihhan kayun umtekuk. Mangketu-lidalli hu binattun luhud ni bebley ma-lat humgep kayun emin.”

<sup>6</sup> Ineyagan Joshua ida papaddi et kantun hi-gaday “Iattang yu hu Kaban APU DIOS et mamengulu hu pitun hi-gayun nantenged ni tangguyup.” <sup>7</sup> Ey in-olden tuddan tutu-u e man-alsituddan manlikweh etan di bebley. Memengguludda edum ni sindalu ma-lat guwalyaan dadda padin nengiattang nunman ni Kaban APU DIOS.

<sup>8-9</sup> Inu-unnud da in-olden Joshua et mamenguludda edum ni sindalu et maitu-nud ida padin nangged ni tangguyup et han maitu-nud ida padin nengiattang ni Kaban APU DIOS, et han ida maitu-nud hu edum pay ni sindalu. Yadda etan padin nangged ni tangguyup ey daka pampetnul hu tangguyup da. <sup>10</sup> Nem hedin yadda etan tuu ey in-olden Joshua e eleg ida um-ehel ey eleg ida umtekuk ingganah i-olden tu. <sup>11</sup> Et ipengulu tudda tuun manlikweh ni pinhakkey diman ni bebley ni nunman ni aggew et han ida mambanggad di kampu dan an neugip ni hileng.

<sup>12-14</sup> Himmaleman mewan hi Joshua ni newa-waan tu et ipengulu tudda tuu tu et manlikweh ida etan di bebley. Nemanguludda mewan sindalum mangguwalya, et han ida maitu-nud etan pitun padin nangged ni tangguyup et han ida etan padin nengiattang ni Kaban APU DIOS, et han law maitu-nud ida edum ni sindalu. Ida kamenglaw ey kapampetnul idan padi hu tangguyup da. Nampinhakkey ida nanlikweh et maibanggad idad kampu da. Humman impahpahding dan enem ni aggew.

<sup>15</sup> Bimmangun ida mewan hu helag Israel ni kamangkewa-wan meikkeppitun aggew, et manlikweh ida mewan di Jericho. Nem yan nunman ni ebuh ni aggew hu neminpittuddan nanlikweh diman ni bebley. <sup>16</sup> Yan nunman ni meikkeppitun panlikwehan da, dinukkey idan padi hu tenul ni tangguyup da ey kan Joshua idan tuu ey “Tekuk kayu! Tep indawat APU DIOS eya bebley ni hi-gatsu!” <sup>17</sup> Mahapul ni mebahbah eya bebley anin idan emin ni wadadman, ma-lat mei-appit nan APU DIOS. Ebuh hi Rahab et yadda pamilyah tun eleg tayu petteya tep intalu tudda intu-dak kun an nansiim. <sup>18</sup> Nem endi yu elan idan hipan wadadya e bebley tep mahapul ni mebahbah ni emin. Hedin wada ellan yun eleg yu bahbaha ey humman umhulun ni kebahbahan tayun helag Israel. <sup>19</sup> Emin ida nekapyan silber, balituk, gembang winu gumek ey midulin ma-lat maussal ni pandeyyawan APU DIOS.”

<sup>20</sup> Impatnul idan padi tangguyup da ey nandidihhan ida helag Israel ni simmekuk ey nangketu-li hu binattun luhud ni nanlinikweh di bebley et wada hakey idan sindalu ey nepahgep ida. <sup>21</sup> Et pampateyen dan emin hu tutu-udman anin idan animal dan babakka, yadda kalneroh da niyadda kebayyu.

<sup>22</sup> Ebuh hi Rahab et yadda pamilyah tun eleg da pateyen. Imbaga dedan lan Joshua idan etan ni dewwan nansiim e kantuy, “Yu awit etan biin tuka pebeyyad annel tun lalakki anin idan pamilyah tu et i-hep yudda et pahding yu hu insapatah yun hi-gatu.”

<sup>23</sup> Et humgep ida et da awiten hi Rahab, hi ametun inetu, yadda agi tu et yadda bega-en da et ilaw dadda neihnpud di nangkampuan idan helag Israel.

<sup>24</sup> Et giheben idan helag Israel hu bebley et mekaggiheb emin hu wadadman. Ebuh ida hu nekapyan balituk, ya silber, ya gembang niya gumek ni eleg da giheben et da i-dum etan di kamei-appit nan APU DIOS. <sup>25</sup> Eleg pakipetey nan Joshua hi Rahab et yadda pamilyah tu tep intalu tudda etan dewwan intu-dak tun an nansiim. Et makibebley di Rahab idan helag Israel ingganah nunya.

<sup>26</sup> Negibbuh ni binahbah da Jericho ey immehel hi Joshua idan tutu-u e kantuy “Ya etan tuun mengipatnan mengiyayyagud eyan bebley e Jericho ey um-alin hi-gatu idut APU DIOS. Ey ya etan mengileppun mengikkapyan binattun luhud eyan bebley ey mettey pengulwan ni u-ungnga tun laki. Ya etan mengikkapyan eheb tu ey mettey hu udidyan ni u-ungnga tun laki.”

<sup>27</sup> Hi Joshua ey binenaddangan APU DIOS et mandingngel ngadan tud kebebbbley.

## 7

### *Ya neapputan idan helag Israel gapuh ni nanliwatan Akan*

<sup>1</sup> Nem eleg u-unnuden idan helag Israel hu mandal APU DIOS ni endi da ellan ni hipan wadad Jericho ni mahapul ni mebahbah. Wada hu hakey ni hi-gadan hi Akan ngadan tu e wadalli tu et itlu tu e humman gaputun nemahhig bunget APU DIOS idan helag Israel. Hi Akan ey u-ungnga Karmi e pamilyah Simri e pewen Serah di helag Judah.

<sup>2</sup> Entanni ey immitu-dak hi Joshua ni tutu-u tun an mansi-im ni Ai e hakey ni bebley ni neihnup di Bet Aben e appit di kasimmilin aggew hedin wada itad Bethel. <sup>3</sup> Nambanggad ida ey inhel dan Joshua e kandy “Ek-ekut humman ni bebley et humman hu anin ni ebuh hu dewwa winu tellun libun sindalu hu palaw mun an mengubbat ni nunman ni bebley.”

<sup>4</sup> Et tellun libun sindalun ebuh hu intu-dak Joshua nem inapput sindalun Ai ida. <sup>5</sup> Nampedug dadda helag Israel meippalpu eheb ni bebley ingganah di medayyun kapengellain batu et patyen da pay hu telumpulut enem ni hi-gada. Gapun nunyan neipahding ey endin hekey hu tuled idan helag Israel ey nemahhig takut da.

<sup>6</sup> Kaumlelemyung di Joshua et yadda edum tun aap-apun helag Israel. Hinebwangan da ulu dan dep-ul ey nambi-ki da balwasi da et manlukbub idag hinanggan Kaban ni neiha-adan ni neituede ni Tugun APU DIOS ingganah ni kamangkehiling. <sup>7</sup> Entanniy kan Joshua di dasal tu ey “APU DIOS e kata-ta-geyan, keke dakemi binaddangan ni nan-agwat di Wangwang e Jordan ma-lat papetey dakemiddan Amorite? Heballi nanha-ad kamid ba-hil ni wangwang. <sup>8</sup> Apu Dios, hipa law nak e-helen nunya e simmakut ida helag Israel ni buhul da? <sup>9</sup> Nungay dedngelen idan iKanaan et yadda edum ni nambebley di deya huyyan neipahding ey likwehen dakemi et patyen dakemi et meendi kami eyad ta-pew ni puyek. Inna-nu mewan ni keiddeyyawan ni eta-gey ni ngadan mu hedin henin nunya meippahding?”

<sup>10</sup> Nem kan APU DIOS nan Joshua ey “Ehneng ka! Kele kaka manluklukbub? <sup>11</sup> Peamtak ni hi-gam e nanliwat ida hu helag Israel! Eleg da u-unnuden hu intugun kun pehding da. Kangkun hi-gada e neieng-eng ni hi-gak ida etan wadad Jericho et mahapul ni mebahbah ni emin. Nem wadan hi-gada hu immala et i-dum daddan ngunut da nem daka ihhaut. <sup>12</sup> Humman gaputun endi kabaelan dan mekihhanggan buhul yu et bumsik ida. Yan nunya ey lebbeng tun mebahbah ida. Eleg dakeyu law baddangi ingganah bahbahen yudda inla yun inhel ku dedan lan mahapul bahbahen yu.

<sup>13</sup> Ehneng ka! Iolden muddan edum mun helag Israel et ipahding da etan elaw ni kapanlinnih ni annel da et meiddaddan idan meippahding ni kabbuhhan. Ehel mun hi-gada e kammuy, heninnuy hu kan APU DIOS e Dios yun helag Israel! ‘Wada intalu yuddan ngunut ni kangkun bahbahen yu et mei-eng-eng ni hi-gak. Endi kabaelan yun mengapput ni buhul yu ingganah e-kalen yudda humman ni ngunut.’ <sup>14</sup> Ehel mun hi-gada e yan kakkabbuhhan ey mahapul ni um-ehngeng ida ey meennappil ida meippuun di nahlagan da. Ya etan helag ni leldengen APU DIOS ey meennappil ida meippuun di nalpuan dan pewen. Ya etan pewen ni leldengen APU DIOS ey meennappil meippuun di pamilyah. Ya etan pamilyah ni leldengen APU DIOS ey mehakkhakkey ni um-ehngeng. <sup>15</sup> Et ya etan tuun meamtaan ni nenakew idan nunman ni ngunut ni mahapul ni mebahbah ey gihheben, anin idan emin ni wadan hi-gatu tep nginhay tu hu tugun APU DIOS e impahding tu hu anggeba-ing ni peteg di Israel.”

<sup>16</sup> Kakkabbuhhan nunman ni newa-waan tu ey inemung Joshua ida etan tuu e neenappil ida meippuun di helag da ey neputuk hu helag Judah. <sup>17</sup> Ineyagan dadda et meennappil ida meippuun di pewen da e ya pewen Serah hu neputuk. Neenappil ida mewan meippuun di pamilyah ey neputuk hu pamilyah Sabdi. <sup>18</sup> Hinakkehakkey dadda pamilyah Sabdi ey neputuk hi Akan e u-ungnga Karmi, e inap-apun Sabdi.

<sup>19</sup> Et kan Joshua nan Akan ey “U-ungngak, ehel mu hu makulug nan APU DIOS e Dios tayu kadeyyawan helag ni Israel. Imay ehel mu impahding mu, entan tu iheut.”

<sup>20</sup> Himmumang hi Akan ey kantuy “Makulug ni nanliwattak nan APU DIOS. Heninnuy impahding ku: <sup>21</sup> Inang-ang ku hu kayyagud ni andukkey ni balwasin nalpu Babilon ya dewangatut ni palatah ni silber, ya unlaw di kagedwah ni kiloh ni balituk ey



ginamgamak ida et al-en ku. Immen idad kampuk e ingku-kuk e wadad nandalleh hu silber.”

<sup>22</sup> Et umitu-dak hi Joshua ni an menemmak ni nunman ni intalun Akan. Nambesik idad kampu tu ey tu-wangun himmak da etan kantun nengiku-ku-an tu e nandalleh hu silber. <sup>23</sup> Inla da et ilaw dad kad-an Joshua et yadda emin ni helag Israel et i-aplag dad puyek di hinanggan APU DIOS.

<sup>24</sup> Singged Joshua et yadda tutu-u hi Akan ey inladadda etan silber, ya etan andukkey ni balwasi, et ya etan balituk, yadda u-ungnga tu, yadda baketu, yadda kebayyu tu, yadda kalneroh tu et ya kampu tu, yadda emin ni wadan hi-gatu et ilaw daddad nedayyukung di Akor. <sup>25</sup> Kan Joshua nan Akan ey “Kele ka immidwat ni panliggatan tayu? Yan nunya ey kastiguen dakan APU DIOS.”

Et ebuhe pantengbaen idan tuu hi Akan et yadda pamilyah tu et giheben da annel da. <sup>26</sup> Sina-bunan daddan dakel ni batu et maipu-ul et ingganah nunyay nanengtudman. Humman gaputun neingadnan humman ni Bebley ni Ligat, neipalpun nunman. Negibbuh ni neipahding huyya ey na-kal law bunget APU DIOS.

## 8

### *Ya nebahbahan ni Ai*

<sup>1</sup> Entanni ey kan APU DIOS nan Joshua ey “Entan takut ey entan kedismayah. Ikuyug muddan emin hu sindalun et gubaten yu Ai, tep baddangan dakeyu et apputen yu hu patul diman, yadda tutu-u tu et ya bebley tu. <sup>2</sup> Bahbahen yudda henin nemahbahan yun Jericho ey ipahding yun patul diman hu henin impahding yun patul di Jericho. Nem yan nunya ey anin pan-aleyu hu hipan wadadman, yadda ngunut et yadda animal. Pandaddan kayu et yu gubaten humman ni bebley. Elaw kayu etan di ba-hil ni bebley ma-lat idelunuh yun mengubbat ni hi-gada.”

<sup>3</sup> Et mandaddan di Joshua et yadda emin ni sindalun an mengubbat ni Ai. Pinilin Joshua hu telumpulun libun kelalla-ingan ni mekiggubbat et palaw tuddan hileng. Heninnuy <sup>4</sup> inolden tu: “Pantalu kayud ba-hil ni bebley nem entan kaidawwi, ey pandaddan kayun mekiggubbat. <sup>5</sup> Umlaw kamiddan edum ni sindalu et meihnup kamid bebley ey hedin neukat idalli sindalu dan mekiggubbat ni hi-gami e heni lan impahding dan nunman, umbesik kami. <sup>6</sup> Taggan mi besik et meipdug ida ingganah hi-yanen da bebley da. Tep kandad nemnem day ‘Simmakut ida helag Israel et ida kamemsik e heni mewan lan nunman.’ <sup>7</sup> Et ya pehding yu ey kaukat kayud nantaluwan yu et hegepen yu bebley da. Tep nanna-ud ni iddawat APU DIOS humman ni bebley ni hi-gatsu. <sup>8</sup> Hedin himmegep kayud bebley, legab yu hu baballey da tep huyya in-olden APU DIOS ni pehding tayu.”

<sup>9</sup> Et yan nunman ni hileng ey impalaw Joshua ida et ida manheged di nantaluan dad nambattanan ni Bethel, et yad appit ni kakelinnugin aggew di Ai. Nem hedin hi Joshua ey nekiugip idan edum ni sindalu tud kampu da.

<sup>10</sup> Kamangkewa-wan nunman ni newa-waan tu ey binengun tudda sindalu tu et mampalaw idad Ai e neikuyug ida hu aap-apuddan helag Israel. <sup>11</sup> Nangkampuddad appit ni north di Ai e wada nambattanan dan nandeklan di diman ni bebley. <sup>12</sup> Impalaw idan Joshua hu liman libun sindalun an mambektak di nambattanan ni Bethel et ya Ai di appit ni kakelinnugin aggew. <sup>13</sup> Kedaklan idan sindalu ey nanha-ad idad north et yadda etan nantalun mambektak di appit ni kakelinnugin aggew. Nunman ni hileng ey nanha-ad di Joshua di diman ni nandeklan.

<sup>14</sup> Inang-ang ni patul di Ai ida sindalun Joshua ey impapuut tun impangulu emin sindalu tu et mampalaw idad nandeklan di Jordan et da gubaten ida helag Israel. Yadman hu nanggubatan da mewan lan nunman. Nem eleg amtan nunman ni patul e wada mengubbat ni hi-gadad benneggan da. <sup>15</sup> Kahinbesikid Joshua et yadda sindalu tud appit ni endi bebley e henidda neapput. <sup>16</sup> Neamung idan emin hu lalakkid Ai et pampedugen dad Joshua et yadda sindalu tu ey ida kumedek kamangkeiddawwid bebley da. <sup>17</sup> Et endin hekey hu lakin nebatih diman e bebley da ey neibbeghul hu eheb ni bebley da.

<sup>18</sup> Entanni ey kan APU DIOS nan Joshua ey “Indengdeng mu pahul mud appit ni Ai tep iddawwat ku humman ni bebley ni hi-gayu.” Inu-unnud Joshua et idengdeng tu pahul tud appit ni Ai. <sup>19</sup> Inang-ang idan sindalu tu hu impahding tu ey pinhakkeyey neukat idad nampantaluwan da et humgep ida etan di bebley et legaben da.

<sup>20</sup> Nanwingidda hu lalakkid iAi ey inang-ang da ahuk ni kamampellaw di kabunyan ni nalpud bebley da, nem nehukum ida, et endi da bebsikan. Tep nanligguh ida helag Israel ni daka pampepduga et hanggaen dadda humman ni kamampedug ni hi-gada.

<sup>21</sup> Yan nenang-angan Joshua et yadda sindalu tun hinggep idan edum da etan bebley et legaben da ey nanligguh ida et pampateyen dadda hu sindalun Ai ni namdug ni hi-gada. <sup>22-24</sup> Neukat idalli sindalun helag Israel ni himmegep di bebley et bumaddang ida et pampateyen dadda buhul dan sindalun Ai. Dimpap da hu patul diman et ilaw dad kad-an Joshua. Yadda etan sinalun Ai ni nampalaw di eleg mebebley ey pingdu da et pateyen dadda et han ida mambangngad etan di bebley et pateyen dan emin tuodman.

<sup>25-26</sup> Nanengtun keiddedengdeng nan Joshua hu pahul tud Ai e eleg tu ibbahah ingganah ni pintey dan emin etan hampulut dewwan libun lalakki niya bibi-idman ni bebley. <sup>27</sup> Nem yadda animal et yadda nangkebalol ni ngunut idan bimbebley ni eleg mebahbah ey nan-aladdan helag Israel tep humman intugun APU DIOS nan Joshua ni pehding da.

<sup>28</sup> Linggab di Joshua hu Ai et bahbahen da et ingganah nunya ey nannaneng tun hanniman. <sup>29</sup> Ya etan patul ni Ai ey inta-yun Joshua annel tud keyew ingganah ni kamangkehilleng et han tu iolden idan sindalu tun da e-pahen et da ibbeng di heggeppan ni bebley et ta-bunan dan batu et nanengtun hanniman ingganah nunya.

<sup>30</sup> Entanni et mengapya hi Joshua ni pan-appitan dan APU DIOS ni Israel di Duntug e Ebal. <sup>31</sup> Et man-appit idan APU DIOS ni animal ni kagihheba niya kamehemmul. Ya ingkapyan Joshua ni pan-appitan ey batun eleg mapehek, tep humman inhel Moses etan di neitudek ni Tugun. <sup>32</sup> Entannit kaman-ang-ang-ang ida edum tun helag Israel ey panittudek Joshua etan di batu humman idan Tugun ni intudek Moses. <sup>33</sup> Emin ida helag Israel, yadda nei-dum ni hi-gada, yadda kamengipappanggulun hi-gada, yadda opisyal da, yadda huwet da ey negedwadda. Ya kagedwah ni hi-gada ey immehngeng di hengeg ni Duntug e Gerisim et ya kagedwah ni hi-gada ey immehngeng idad hengeg ni Duntug e Ebal. Nanhinnanggadda ey nambattanan dadda hu papaddin helag Levi ni nengiatang ni Kaban APU DIOS. Neipahding emin huuya tep huuya intugun Moses e bega-en APU DIOS ni pehding ma-lat dawaten da bendisyon.

<sup>34</sup> Binidbid Joshua ni hi-gada emin hu bendisyon niya idut ni intudek Moses di Tugun. <sup>35</sup> Emin hu neitudek di Tugun Moses ey imbidbid Joshua idad emin ni neamung anin idan bibi-i, gegellang et yadda tuud edum ni bebley ni nei-dum ni hi-gada.

## 9

### *Ya nenaulan idan iGibeon nan Joshua*

<sup>1</sup> Ya impahding idan helag Israel ey dingngel idan emin ni papatul di emin ni bebley di Jordan di appit ni kakelinnugin aggew e humman ida ey bebley di dutuduntug, yadda bebley di hengeg ni duntug niyad emin ni bebley di gilig ni Mediterranean ingganah di Lebanon ey yadda nampambebley diman ey Hittite, Amorite, Kannanite, Perisite, Hibite et yadda Jebusite. <sup>2</sup> Impan-aaddum da sindalu da ma-lat gubaten da hi Joshua et yadda edum tun helag Israel.

<sup>3</sup> Nem dingngel idan tutu-ud Gibeon hu impahding di Joshua di Jericho et yad Ai <sup>4</sup> et ya ninemnem dan pehding ey he-ulen dadda helag Israel. Et pumutuk ida itu-dak dad Gilgal ni an mekihummangan nan Joshua. Nambalun idan kennen da et iha-ad dad daan ni sakuh, et ya netenuptupan ni belat ni ha-addan ni meinnum. <sup>5</sup> Nambalwasi idan nebi-bi-ki et mampatut idan netenuptupan. Ey nekamma-ganan ey nebuutan hu sinapay ni binelun da. <sup>6</sup> Dimmateng idad nangkampuan idan helag Israel di Gilgal et kandan Joshua et yadda edum tu ey "Nalpu kamid neka-iddawwin bebley. Immali kamin meki-ungbal ni hi-gayu ma-lat eleg itsu mambubuhhulan."

<sup>7</sup> Nem kan idan helag Israel ey "Kele kami meki-ungbal ni hi-gayu? Nungay neihnup nambelleyan yu." <sup>8</sup> Kandan Joshua ey "Bega-en dakemin hi-gayu." Kan Joshua ni higaday "Hipa kayu ey attu nalpuan yu?"

<sup>9</sup> Kandan humang day "Nalpu kamid neka-iddawwin bebley. Immali kami tep dingngel mi hu kabaelan AP-APU e Dios et yadda impahding tud Egypt. <sup>10</sup> Dingngel mi mewah hu impahding tudan dewwan patul idan Amorite di appit ni kasimmilin aggew di Wangwang e Jordan e di Sihon e patul ni Hesbon e hi Og e patul ni Bashan e nambebley di Astarot. <sup>11</sup> Et kan idan aap-apu mi et yadda kebebleyan min hi-gamiy 'Pambalun kayun kennen ni menammun hi-gada. Anin ew ni pamballin dakemin bega-en ni hi-gada.' Ey ibbaga min hi-gayun makiungbal kayun hi-gami. <sup>12</sup> Ang-ang yu eya sinapay ni binelun mi, maetung la tep pakehaeng ni ininahan midman nem ang-ang yu kedi e nekamma-ganan law ey nebuutan. <sup>13</sup> Yadda eya belat ni neiha-adan ni meinnum ey pakekapyaddan nenaluan mi ey yan nunyay daan idelaw ey nangkalimat. Anin idan eyan balwasi mi niya patut mi ey nebi-bi-ki law tep neka-iddawwi nalpuan mi."

<sup>14</sup> Bininbin idan kamengipappanggulun helag Israel hu sinapay ni balun da ey simbal da nem eleg da ibegan APU DIOS hedini hipa pehding da. <sup>15</sup> Et makiungbal hi Joshua e kayyaggud hu pandadagyuman da et eleg tudda papetey. Ey insapatah idan aap-apun helag Israel e u-unnuden da humman ni nehammad ni ungbal da.

<sup>16</sup> Nelabah hu tellun aggew ey neamtaan idan helag Israel hu makulug e neihnpugayam hu nambebleyan idan nunman ni iGibeon. <sup>17</sup> Impapuut idan helag Israel ni immegah et lumaw ida et malebah hu tellun aggew ey dinteng da hu nambebleyan idan nunman ni tutu-un immali. Ya ngadan idan bebley da ey: Gibeon Kephira, Beerot et ya Kiriat Jearim. <sup>18</sup> Nem eleg mabalin ni petteyan idan helag Israel ida, tep insapatah idan aap-apu dad ngadan APU DIOS helag Israel e endi da pehding ni lawah ni hi-gada. Gapun nunman ey ida kamanlillah hu helag Israel di aap-apu da gapuh ni nunman ni impahding da, <sup>19</sup> nem hinumang da e kanday "Negibbuh ni insapatah mid ngadan e AP-APU ni Dios ni helag Israel et humman hu eleg mabalin ni wada tayu pehding ni lawah ni hi-gada. <sup>20</sup> Mahapul ni eleg tayudda petteya tep humman insapatah mi. Tep hedini petteyan tayudda, kastiguen dait sun Apu Dios. <sup>21</sup> Eleg tayudda petteya nem ikekeyewan dait su ey ia-ahhulan dait su." Huyya neipahding et maunud hu insapatah idan aap-apun helag Israel.

<sup>22</sup> In-olden Joshua et ilaw dadda hu iGibeon di kad-an tu et kantun hi-gaday "Kele dakemi hineul e kanyuy neka-iddawwi bebley yu ey ya gayam ni ebuh di deya hu nambebleyan yu? <sup>23</sup> Gapu nunyan impahding yu ey kastiguen dakeyu et mambalin kayun himbut ni ingganah anin idan u-ungnga yu. Hi-gayu mengyew niya man-ehhul ni meussal di baley ni Dios ku."

<sup>24</sup> Himmumang ida e kanday "Henin nunman impahding mi tep neamtaan mi e makulug ni in-olden ni AP-APU e Dios mun nan Moses e iddawwat tun emin eya bebley ni hi-gayu ey in-olden tu pay e hedini um-ali kayu man mahapul ni petteyan yun emin hu tutu-u eyaddad bebley. Et gapuh ni nemahhig ni takut min hi-gayu ey hanniman impahding mi ma-lat mategu kami anhan. <sup>25</sup> Yan nunya ey ngenamung katteg hu pinhed yun pehding ni hi-gami hedini hipa yuka pannemnem."

<sup>26</sup> Et ya impahding Joshua ey eleg tu iebulut ni an petteyan idan edum tun helag Israel ida. <sup>27</sup> Nem impambalin tuddan himbut e ikeyewan ey ia-ahhulan dadda helag Israel niya pan-appitan dan APU DIOS. Et ingganah nunya ey hanniman ngunu da.

## 10

### *Ya neapputan idan Amorite*

<sup>1</sup> Hi Adonisedek e patul ni Jerusalem ey dingngel tu e sinekup di Joshua hu Ai et pakabbabhahen da et pateyan tu patul diman e henin impahding tud Jericho e nekabbabhah tu ey pintey tu patul da. Ey dingngel tu e nekiungbal hu tutu-ud Gibeon idan helag Israel et kayyaggud law daka pandadagyumi niya nekibebley ida law ni hi-gada. <sup>2</sup> Gapuh ni nunman ey nemahhig takut idan tutu-ud Jerusalem tep inamta da e et-eteng ni bebley hu Gibeon e henin kainetteng idan bebley ni wada papatul da. E-etteng nem ya Ai ey nelaing idan mekiggubbat hu sindalun iGibeon. <sup>3</sup> Et ya impahding Adonisedek ey nantudek nan Hoham e patul ni Hebron, hi Piram e patul ni Jarmut, hi Japhia e patul ni Lakis, et hi Debir e patul ni Eglon. <sup>4</sup> Heninnuy hu intudek tu: "Ali kayu et baddangan yuwak ni mengubbat ni tutu-ud Gibeon tep nekihummangan idan Joshua et yadda edum tun helag Israel e mambinaddang ida."

<sup>5</sup> Impan-aaddum idan nunyan liman patul ni Amorite hu sindalu da et likwehen da Gibeon et gubaten da.

<sup>6</sup> Ya impahding idan iGibeon ey impalaw da tudek dan Joshua di nangkampuan dad Gilgal e kanday "Entan dakemi ipayyag ni bega-en mu. Papuut mu et umli ka et ihwang dakemi! Tep impan-aaddum idan papatul ni Amorite e nampambebley di duntug hu sindalu da et dakemi kapanggubata."

<sup>7</sup> Et umgah di Gilgal hi Joshua e ingkuyug tudda sindalu tu, anin idan kelalla-ingan ni sindalu tu. <sup>8</sup> Kan APU DIOS nan Joshua ey "Entan takut ni hi-gada tep nanna-ud ni pengapput daka. Endin hekey ni hi-gada hu dammutun mengapput ni hi-gam."

<sup>9</sup> Nanlallabbid Joshua et yadda sindalu tun nandalan ni limmaw di Gibeon et humman eleg am-amtaddan iAmorite ey ginubat dadda. <sup>10</sup> Impatekut APU DIOS ni peteg ida humman ni sindalun Amorite ni nenang-angan daddan sindalun Israel. Nampatey idan helag Israel hu dakel ni hi-gadad Gibeon. Ey nampedug da edum di keltad di Bet Horon ingganah di Aseka et yad Makkedah di appit ni south et pateyan dadda. <sup>11</sup> Ida kamamsik hu edum ni Amorite e ida kamandayyu ma-lat ibsikan dadda helag Israel, ey

nan-egah APU DIOS hu etta-teng ni dallallun hi-gada ingganah di Asekah. Et daddakkel hu netey ni hi-gadan na-gahan ni dallallu nem yadda pintey idan helag Israel.

<sup>12</sup> Yan nunman ni nemaddangan APU DIOS idan helag Israel et apputen dadda Amorite, ey nandasal hi Joshua nan APU DIOS di hinanggaddan edum tun helag Israel. Kantu ey "Paineng mu anhan hu aggew di petek ni Gibeon niya bulan di petek ni nandeklan di Aijalon."

<sup>13</sup> Et umineng hu aggew ey bulan ingganah ni inapput idan helag Israel hu buhul da. Neitudek huyyad Libluh nan Jashar. Immineng hu aggew di gawwan kabunyan et eleg malinug e beken ni henin kameippahding ni kewa-wa-wa. <sup>14</sup> Hi APU DIOS hu nekihangan buhul ni helag Israel ni nunman ni aggew. Endi henin nunman ni nenumang APU DIOS ni hakey ni tuun nandasal ni hi-gatu neipalpun nunman ingganah ni nunya.

<sup>15</sup> Entanni et mambangngad hi Joshua et yadda sindalu tud kampu dad Gilgal.

<sup>16</sup> Yan daka panggugubati, bimmesik ida etan liman patul et ida mantadul leyang di Makkedah. <sup>17</sup> Wada nenang-ang ni hi-gada et da peamtan Joshua. <sup>18</sup> Et iolden Joshua idan sindalu tu e kantuy "Hani yun etta-teng ni batu humman ni leyang ey pangguwalya kayun edum ni sindaludman. <sup>19</sup> Pakihangga kayuddan buhul yud dingkugga ey pedug yudda. Ey ang-ang yu et eleg ida mambangngad di bebley da tep nanna-ud ni pengapput daitun APU DIOS."

<sup>20</sup> Nampatey di Joshua et yadda sindalun helag Israel hu buhul da, nem wadadda ekkut ni natdaan tep neihikug idad bebley dan tuping hu luhud tu. <sup>21</sup> Melinggep idan nambangngad emin hu sindalun Joshua di kad-an tud kampu dad Makkedah. Neipahding huyya ey endin hekey law hu kaman-e-ehhling ni lawah ni meipanggep ni helag Israel.

<sup>22</sup> Entanni ey kan Joshua idan sindalu tuy "Ekal yudda hu batun neihenid leyang et i-li yud kad-ak etan ida liman patul." <sup>23</sup> Ingal dadda etan batu et paukat dadda humman ni patul ni Jerusalem, patul ni Hebron, patul ni Jarmut, patul ni Lakis niya patul ni Eglon. <sup>24</sup> Impaeyag Joshua emin ida sindalu tu et kan tuddan ap-apun sindalu tuy "Keyuy et igsin yu buklew idan eyan patul!" Et lumaw ida et u-unnuden da inhel Joshua.

<sup>25</sup> Kan mewan Joshua ni hi-gaday "Entan takut yu ey entan kedismayah yu. Pekedhel yu nemnem yu tep henin nunya hu pehdng APU DIOS idan emin ni buhul yun gubbaten yu." <sup>26</sup> Entanni et patyen Joshua ida humman ni liman patul et ita-yun tuddad liman keyew ingganah ni kamangkehilling.

<sup>27</sup> Kamangelinnug hu aggew ey in-olden Joshua et da alen hu annel da et dadda ibkah di leyang ni nantalan da et pan-erutan dan etta-teng ni batu et ingganah nunyay immen idadman humman ni etta-teng ni batu.

*Yan nansakupan di Joshua ni edum pay ni bebley di Amorite*

<sup>28</sup> Nunman ni aggew ey hinggep di Joshua hu Makkedah et pateyen da etan patul diman anin idan bimbebley henin impahding dad Jericho. <sup>29</sup> Impangulun Joshua ida sindalu tu et lumaw idad Libnah et liktuben da et gubaten da. <sup>30</sup> Et sakupen dan newawaan tu tep binaddangan APU DIOS. Pintey da emin hu tuodman et ya patul da e henin impahding dad Jericho.

<sup>31</sup> Impangulu mewan Joshua hu sindalu tu et lumaw idad Lakis. Linikweh da et gubaten da, <sup>32</sup> et sakupen da newawaan tu tep binaddangan idan APU DIOS. Et pateyen dan emin hu nambebley diman, henin impahding dad Libnah. <sup>33</sup> Immali hi Horam e patul ni Geser et yadda sindalu tun memaddang idan tutu-ud Lakis nem inapput di Joshua ida et pateyen daddan emin.

<sup>34</sup> Entanni et hi-yanan di Joshua hu Lakis et lumaw idad Eglon. Liniktub da et hegepen da. <sup>35</sup> Inapput dadda bimbebley ni nunman ni aggew et pateyen daddan emin hu tutu-udman henin impahding dad Lakis. <sup>36</sup> Hini-yan da mewan Eglon et lumaw idad Hebron, <sup>37</sup> et hegepen da et pateyen dan emin hu tutu-udman anin ni patul da. Nekipetey dadda tutu-un nampambebley di nanlinikweh diman. Ey impekabbabah da bebley diman henin impahding dad Eglon et endi natdaan ni mategu.

<sup>38</sup> Entanni et mambangngad di Joshua et yadda sindalu tu et mampalaw idad Debir et gubaten da. <sup>39</sup> Hinggep da humman ni bebley et gubaten dadda nambebley diman anin idan nambebley di nanlinikweh diman. Pintey da patul da et yadda tutu-u et pakabbabhahen dan emin hu wadadman henin impahding dad Libnah ey yad Hebron. <sup>40</sup> Sinekup di Joshua emin hu bebley di duntuduntug, yadda bebley di nansigging di appit ni kasimmilin aggew, yadda bebley di hengeg idan duntug di appit ni kakelinnugin aggew et yad Negeb di south. Inapput tudda papatul diman ni bebley ey pintey tun emin hu tutu-u et endi natdaan tep humman in-olden ni AP-APU e Dios idan helag Israel ni

pehding tu. <sup>41</sup> Sinekup di Joshua emin hu bebley di Kades Barnea ingganah di Gaza niya emin hu bebley di Goshen et ingganah di Gibeon. <sup>42</sup> Neminpinhakkey hu nengapputan di Joshua idan patul et ya bebley da tep binaddangan APU DIOS idan helag Israel et hi-gatu nekihanggan buhul da.

<sup>43</sup> Negibbuh ni sinekup dan emin humman idan bebley ni ginubat da et maibangngad idad Gilgal di nangkampuan da.

## 11

*Ya nengapputan Joshua ida etan ni bebley di appit ni North*

<sup>1</sup> Dingngel nan patul ni Hasor e hi Jabin hu meippanggep ni nengenapputan idan helag Israel ey impalaw tu tudek tun Jobab e patul ni Madron et yadda patul ni Simron et ya Aksap, <sup>2</sup> anin idan patul di bebley ni wadad duntuduntug di appit ni north, yadda bebley di Nedeklan e Jordan di appit ni south di Galilee, yadda bebley di hengeg ni duntug et yadda bebley ni wadad gilig ni baybay ni neihnpud di Dor. <sup>3</sup> Impalaw tu pay hu tudek tuddan iKanaan di nambina-hil di Jordan, yadda Amorite, yadda Hittite, yadda Perisite, yadda Jebusite ni nambebley di duntuduntug, ey yadda Hibite ni nambebley di hengeg ni Hermon di Mispah. <sup>4</sup> Immaliddan emin humman ni patul e ingkuyug dadda sindalu dan dakel e henin kadinakkel ni palnah di gilig ni baybay. Ey dakel ni peteg hu kebayyu da niya kalesah da. <sup>5</sup> Impan-aaddum da sindalu da et mangkampunguddad Wangwang e Merom ma-lat gubaten dadda helag Israel.

<sup>6</sup> Immehel hi APU DIOS nan Joshua e kantuy "Joshua, entan takut ni hi-gada, tep petteyan kuddan emin ni henin nunyan olas ni kabubuhan. Pi-day muddallin emin hu kebayyu da et giheben mu kalesah da."

<sup>7</sup> Limmaw di Joshua niyadda sindalu tu et egyaten daddan gubaten ida buhul dad Wangwang e Merom. <sup>8</sup> Et pengapputan nan APU DIOS ida. Nampedug da pay ida humman ni buhul da ingganah di Misrephot Maim di appit ni north et ingganah di Sidon et mampalaw ida pay di Mispah di appit ni kasimmilin aggew. Intagan da gubat ingganah ni endi natdaan idan buhul ni helag Israel. <sup>9</sup> Inu-unnud Joshua hu in-olden APU DIOS et pi-dayen tudda kebayyun buhul da et giheben tudda kalesah da.

<sup>10</sup> Neibangngad di Joshua et gubaten da hu bebley e Hasor et pateyan da patul diman. (Ya patul di Hasor hu ap-apun emin idan etan ni bebley ni nengubat idan helag Israel.) <sup>11</sup> Pintey dan emin hu nambebley diman et endin hekey natdaan ni mategudman. Et legaben da pay humman ni bebley.

<sup>12-15</sup> Sinekup di Joshua ni emin ni nambebleyan idan buhul da et legaben da Hasor. Nem eleg da legaben ida etan edum ni bebley di neduntug. Ey pintey dan emin hu tuudman idan bebley anin ni patul da et endi natdaan. Niya inla dan emin hu hipan wadadman anin ni animal ey hipaddan nebalol. Tep humman intugun APU DIOS nan Moses et itugun tu daman Joshua et u-unnuden tu. Impahding tu humman ni intugun APU DIOS nan Moses ni ipahding tu.

<sup>16</sup> Sinekup di Joshua ni emin humman ni bebley di duntuduntug yaddad hengeg ni duntug di north et yad south, emin hu bebley di Goshen et yadda bebley di mamega e appit ni south, anin idan bebley di nandeklan di Jordan. <sup>17-18</sup> Sinekup pay di Joshua ni emin ida bebley ni nampalaw di Duntug e Halak di appit di south ni neihnpud di Edom, ingganah di Baalgad di north, ingganah di nandeklan di Lebanon e appit di south ni Duntug e Hermon. Nebayag hu nekigubatan nan Joshua idan patul idan nunyan bebley nem dimpap tudda et pateyan tudda. <sup>19</sup> Ebuhan ida nambebley di Gibeon ni Hibite ni nekihummangan idan helag Israel ma-lat eleg dadda gubatan. Emin ida etan edum ni bebley ey ginubat idan helag Israel et apputen dadda. <sup>20</sup> Impambalin APU DIOS idan netuled ni mengubbat ni helag Israel ma-lat eleg hemeken ni helag Israel ida et pekabbabhahen dadda et matey idan emin et endi matdaan. Huyya intugun APU DIOS nan Moses ni pehding da.

<sup>21</sup> Yan nunyan tsimpuh hu nemateyan Joshua idan helag Anak e etta-teng ni tutu-un nambebley di duntuduntug di Hebron, yad Debir, yad Anab, et yaddad duntuduntug di Judah niyad Israel. Pintey idan Joshua emin et pakabbabhahen tu nambebleyan da.

<sup>22</sup> Endi an natdaan ni hi-gadan helag Anak di nambebleyan idan helag Israel. Ebuhan di Gaza, yad Gath ey yad Asdad ni wada natdaan.

<sup>23</sup> Henin nunman hu nansakupan Joshua ni emin idan nunman ni bebley tep humman dedan in-olden nan APU DIOS nan Moses. Ginenedwa tudda huyyan bebley et i-peng tuddan edum tun helag Israel et beltanen da. Ey wada law linggep di nambebleyan idan helag Israel.

## 12

### *Yadda etan patul ni inapput idan helag Israel*

<sup>1</sup> Sinekup ida dedan helag Israel etan ida bebley di appit ni kasimmilin aggew di Wangwang e Jordan meippalpu Nedeklan e Arnon ingganah di nandeklan di Jordan et mampalaw lad appit ni north di Duntug e Hermon et pambebleyan da. Inapput dadda etan dewwan patul e <sup>2</sup> ya hakey ey hi Sihon e patul ni Amorite e nanha-ad di Hesbon. Ya sakup ni tuka pan-ap-apui ey kegedwah ni Gilead e meippalpu Aroer e wadad gilig ni Nedeklan e Arnon. Ey meippalpu gawwan nunman ni Nedeklan e Arnon et mampalaw di Wangwang e Jabbok e humman hu nampappegan daddan Amorite, nekisekup di deya hu kagedwah ni Gilead e appit di North ni Wangwang e Jabbok. <sup>3</sup> Sinekup pay Sihon hu Nedeklan e Jordan et mampalaw lad appit ni south ni Baybay e Galilee ingganah di Bet Jeshimot e appit di kasimmilin aggew di Netey ni Baybay ingganah di hengeg ni Duntug e Pisgah.

<sup>4</sup> Ya meikkadwa ey hi Og e patul ni Bashan. Hi-gatu hakey ni natdaan ni helag Rephaim. Nampatul di Astarot et yad Edrei. <sup>5</sup> Ya sinekup ni nan-ap-apuan tu ey yadda bebley di Duntug e Hermon, yad Salekah niyadda emin ni bebley di Bashan ingganah di pappeg ni Geshur et ya Maakah. Sinekup tu hu kagedwah ni Gilead e hedina ya kagedwah tu ey sinekup ni nan-ap-apuan Sihon e patul ni Hesbon.

<sup>6</sup> Inapput Moses niyadda edum tun helag Israel ida humman ni dewwan patul et idwat Moses e bega-en APU DIOS hu nambebleyan dad helag Reuben, yadda helag Gad niyadda kagedwah ni helag Manasseh, et pambebleyan da.

<sup>7</sup> Inapput damaddan Joshua niyadda sindalu tun helag Israel emin ida patul di bebley ni appit di kakelinnugin aggew di Wangwang e Jordan, meippalpu Baalgad di nandeklan di Lebanon ingganah di Duntug e Halak di appit ni south e neihnpud di Edom. Et genedwaen Joshua ida huyyan bebley et ika-peng tuddan edum tun helag Israel et pambebleyan da. <sup>8</sup> Nei-dum di deya hu bebley di meduntug, yadda bebley di hengeg ni duntug di appit ni kakelinnugin aggew, yadda bebley di Nedeklan e Jordan et yadda bebley di hengeg ni duduntug diman, yadda bebley di nansigging di appit ni kasimmilin aggew et yadda bebley di mamegan puyek di appit ni south. Huyyaddan bebley ey nambebleyan idan nunman ni Amorite, yadda Kanaanite, yadda Perisite, yadda Hibite et yadda Jebusite.

<sup>9-24</sup> Ey huyyadda nambebleyan idan papatul ni inapput di Joshua. Ya Jericho, Ai e neihnpud di Bethel, Jerusalem, Hebron, Jarmut, Lakis, Eglon, Geser, Debir, Geder, Hormah, Arad, Libnah, Addullam, Makkedah, Bethel, Tappuah, Hopher, Aphek, Lasharon, Madon, Hasor, Simron-Meron, Aksap, Taanak, Megiddo, Kedes, Jokneam di Karmel, Dor di gilig ni baybay, Goyim di Gilgal et ya Tirsah. Telumpulut hakey hu bilang idan patul diman idan bebley.

## 13

### *Eleg sakupen idan helag Israel emin hu bebley ni pambebleyan*

<sup>1</sup> Nea-amma law hi Joshua ey immehel hi APU DIOS ni hi-gatu et kantuy "Nea-amma ka law ey dakel pay hu puyek ni mahapul ni sekkupen yu.

<sup>2-7</sup> Huyyadda pay hu bebley ni eleg yu sakupen: Emin hu bebley di Pilistia et yad Geshur, yadda bebley di Abim di appit ni south, meippalpu Wangwang e Sihor di pappeg ni Egypt ingganah di pappeg ni Ekron di appit ni north e neibilang ni bebley ni Kanaanite et ya bebley idan etan ni liman patul di Gaza, Asdod, Askelon, Gath niyad Ekron e bebley di Pilistia, emin hu bebley idan Kanaanite ni wadad appit ni north e ya pappeg tu ey meippalpu Mearah e bebley idan iSidon ingganah di Apek di pappeg ni bebley idan Amorite, yadda bebley idan Gebalite niya emin hu Lebanon di appit ni kasimmilin aggew meippalpu Baalgad di appit ni south di Duntug e Hermon ingganah di Hamat. Neibilang deya ida bebley ni iSidon di nambattanan ni Misreput Maim et yadda duntug di Lebanon. Baddangan dakeyun hi-gak et sakupen yudda huyyan bebley ma-lat ekalen yudda tutu-udman. Mahapul ni gennedwaen mudda huyyan bebley et i-peng mudda etan di heyam ni helag Israel et ya gedwan helag Manasseh tep huyya dedan la intugun kun pehdng mu."

<sup>8</sup> Ya etan puyek di appit ni kasimmilin aggew di Wangwang e Jordan ey indawat Moses, e bega-en APU DIOS, idan helag Reuben, yadda helag Gad et yadda kagedwah ni helag Manasseh.

<sup>9</sup> Ya pappeg ni bebley da ey meippalpu Aroer di gilig ni Nedeklan e Arnon, anin etan bebley di gawwan nunman e nandeklan et yadda bebley di duntug meippalpu Medeba ingganah di Dibon, <sup>10</sup> niya ingganah di pappeg ni bebley idan Ammonite ey nei-dum

emin hu bebley ni nampatulun Sihon e patul ni Amorite di Hesbon. <sup>11</sup> Nei-dum pay hu Gilead, yadda bebley di Geshur niya Maakah, emin ida bebley di Duntug e Hermon, yadda bebley di Bashan ingganah Salekah. <sup>12</sup> Sinekup da pay hu nan-ap-apuan etan ni patul e hi Og e natdaan idan helag Repaim e nan-ap-apud Astarot et yad Edrei. Dinegyun Moses ida humman di diman ni bebley tep inapput tuddad gubat. <sup>13</sup> Nem eleg degyunen idan helag Israel ida tutu-ud Geshur et yad Maakah et ingganah nunya ey nekibebley idan hi-gada.

<sup>14</sup> Endi an indawat Moses ni puyek idan helag Levi tep kan APU DIOS nan Moses ey hedini ya patal da ey ya meidwat ni hi-gada etan ida kamei-appit di altar APU DIOS e Dios idan helag Israel.

<sup>15</sup> Huyya indawat Moses ni pambebleyan idan helag Reuben. <sup>16</sup> Ya sakup ni bebley da ey nampalaw di Aroer di gilig ni Nedeklan e Arnon, anin etan neigawwan et-eteng ni bebley di diman nandeklan et yadda bebley di ta-pew idan duntug di Medeba. <sup>17</sup> Nei-dum pay hu Hesbon niya emin ida bebley di ta-pew idan Duntug e Dibon, Bamot Baal, Bet Baal Meon, <sup>18</sup> Jahas, Kedemot, Mephaat, <sup>19</sup> Kiriathaim, Sibmah, Seret Sahar di duntug di nandeklan, <sup>20</sup> Betpeor, yadda nansigging di Duntug e Pisgah et ya Bet Jeshimot. <sup>21</sup> Sinekup da pay ida bebley di ta-pew ni duntug niya emin ida bebley ni nan-ap-apuan nan Sihon e patul idan Amorite e hi Sihon di Hesbon. Inapput lan Moses humman ni patul anin idan patul di Midian e di Ebi, hi Rekem, hi Sur, hi Hur et hi Reba. Huyyaddan patul ey nansilbi idan Sihon e patul. <sup>22</sup> Ya hakey ni pintey idan helag Israel ey hi Balaam e maebig e u-ungngan Beor. <sup>23</sup> Ya pappeg ni bebley ni neidwat idan helag Reuben ey ya appit di kakelinnugin aggew di Wangwang e Jordan. Huyyan emin hu bebley ni bineltan idan helag Reuben.

<sup>24</sup> Indawtan lan Moses ida dama helag Gad ni pambebleyan da.

<sup>25</sup> Yadda bebley ni neidwat ni hi-gada ey Jaser, emin hu bebley di Gilead ya kagedwah ni bebley di Ammon ingganah di Aroer e neihnup di Rabbah. <sup>26</sup> Ya pappeg ni bebley da ey meippalpuh Hesbon et yad Ramat Mispah niya Betonim, meippalpuh Mahanaim et ingganah di pappeg ni Lodebar, <sup>27</sup> anin ni nandeklan di Jordan ey nei-dum hu Bet Haram, Betnimrah, Sukkot, ya Sapon et yadda edum ni bebley ni nan-ap-apuan ni patul e hi Sihon di Hesbon. Ya pappeg ni bebley dad appit ni kakelinnugin aggew ey ya Wangwang e Jordan ingganah di Baybay e Galilee. <sup>28</sup> Huyyadda bebley ni neidwat idan helag Gad.

#### *Yadda etan bebley ni neidwat*

<sup>29</sup> Indawtan daman Moses ida kagedwah ni helag Manasseh ni bebley ni pambebleyan da.

<sup>30</sup> Sinekup ni bebley da hu Mahanaim, emin hu bebley di Bashan et yadda na-nem ni bebley di Jair di diman. Humman idan emin ni bebley ey nan-ap-apuan lan eman ni patul e hi Og. <sup>31</sup> Nei-dum hu kagedwah ni Gilead et yadda bebley nan patul e hi Og e ya Astarot et ya Edrei. Emin ida huyya neidwat idan helag Makir e u-ungngan Manasseh.

<sup>32</sup> Hanneya impahding Moses ni nengika-peng ni mahkang ni nandeklan di Moab e appit ni kasimmilin aggew di Jericho di ba-hil ni Wangwang e Jordan. <sup>33</sup> Nem hedini yadda helag Levi e endi an indawat Moses ni hi-gada tep inhel tun hi-gada e hedini ya beltanen da ey ya kameidwat ni hi-gada etan idad kamei-appit nan APU DIOS ni Israel.

## 14

### *Ya negenedwaan ni bebley di appit ni kakelinnugin aggew di Jordan*

<sup>1</sup> Heninnuy hu negenedwaan ni bebley e Kanaan di appit ni kakelinnugin aggew di Jordan et i-peng idan helag Israel. Hi Eleasar e padi, hi Joshua e u-ungngan Nun et yadda kamengipappangngulun helag Israel hu nengika-peng idan edum dan helag Israel.

<sup>2</sup> Intugun lan APU DIOS ni nunman nan Moses e emin ida bebley di Jordan di appit ni kakelinnugin aggew, ey megennedwa et ibubunut idan heyam ni helag Israel, et ya kagedwah ni helag Manasseh et ika-peng da. <sup>3-5</sup> Nem ya puyek di appit ni kasimmilin aggew di Jordan, ey ingka-peng idan dewwa et kagedwah ni helag Israel. Nambalin ida hu helag Joseph e humman ida helag Manasseh et ya helag Ephraim. Nem yadda helag Levi ey ebuh hu pambebleyan da niya pampattulan dan animal da hu neidwat ni hi-gada. Beken henin neidwat idan edum dan helag Israel e melakkeb. Ya impahding idan helag Israel ni puyek da ey meippuun di intugun APU DIOS nan Moses.

### *Indawtan Joshua nan Kaleb hu Hebron*

<sup>6</sup> Yan nangkampuan di Joshua di Gilgal ey wadadda helag Judah ni limmaw di kad-an tu. Hakey ni hi-gada hi Kaleb e u-ungngan Jephunneh e Kenissite. Kantun Joshua ey

“Kaw hannemnem mu hu inhel lan APU DIOS ni nunman di Kades Barnea nan Moses e bega-en tu meippanggep ni hi-gatan dewwa? <sup>7</sup> Na-pat hu toon kun nunman ni nengitudakan Moses ni hi-gak ni an mansi-im di Kanaan. Yan nunman ey nalpu-ak di Kades Barnea. Nambangngaddak et ehelek ni hi-gatu hu kayyaggud meippanggep nunyan bebley. <sup>8</sup> Nem yadda edum kun an nansiim ey impatekut dadda edum tayu gapuh ni inhel da. Nem hedin ngun hi-gak man impeka-u-unnud ku hi APU DIOS e DIOS ku. <sup>9</sup> Et yan nunman ni aggew ey kan Moses ni hi-gak ey ‘Gapuh ni nuntan ni impahding mu ey pampuyyek mu et yadda u-ungngam ida bebley ni dinlan mun mu nansiiman.’

<sup>10</sup> Na-pat et liman toon law hu nelabah neipalpuh eman ni nanghelan APU DIOS ni nunman nan Moses. Yan nunman hu nandalnan tayun helag Israel di eleg mebebleyi e desert. Impakulug APU DIOS hu imbagetu et pannaneng tuwak ni mategu ingganah nunya. Ang-ang muwak kedi! Newalu et lima law toon ku, <sup>11</sup> ey nanengtun na-lettak heri lan nunman ni nengitu-dakan tuwak nan Moses ni an mansi-im. Na-lettak pay ni an mekiggubbat niya mengippahding ni anin hipan pehding ku. <sup>12</sup> Ey ya ibbagak nunyan iddawt mun hi-gak ey ya etan duntuduntug ni bebley ni inhel APU DIOS ni nunman ni meidwat ni hi-gak. Humman hu bebley ni nehamad ni neluhud ni batu e bebley idan etta-teng ni tutu-un helag Anak. Gapuh et anhan ni baddang APU DIOS, degyunen kudda tep humman inhel tun hi-gak.”

<sup>13</sup> Binendisyonan Joshua hi Kaleb e u-ungngan Jephunneh et idwat tun hi-gatu Hebron ni beltanen tu. <sup>14</sup> Et neippalpun nunman et ingganah nunya ey nanengtun nambebleyan idan helag Kaleb e u-ungngan Jephunneh e Kenissite hu Hebron. Mukun neidwat nan Kaleb e u-ungngan Jephunneh e Kenissite humman ni bebley, ey impeka-u-unnud tu APU DIOS e DIOS Israel. <sup>15</sup> Ya Hebron ey Arba la ni ngadan tu e humman ni bebley hu keettengan niya kaim-importantehan ni bebley idan helag Anak.

Yan nunya ey wada law linggep di diman ni bebley.

## 15

### *Yadda bebley ni neidwat idan helag Judah*

<sup>1</sup> Huyyadda pappeg ni bebley ni neidwat idan helag Judah.

Dinteng ni pappeg ni bebley da hu south ingganah di Sin e eleg mebebleyi e pappeg daman Edom. <sup>2</sup> Ya pappeg di south ey meippalpuh gilig ni Netey ni Baybay, <sup>3</sup> et mampalaw di kandan Scorpion Pass ingganah mewani di Sin e linabhan tu Kades Barnea, et ya Hesron et mampalaw di Addar, et han manlikweh ni nampalaw di Karka, <sup>4</sup> et madegah lad Asmon et unuden tu hu kulukul di gilig ni Egypt et ingganah lad Baybay e Mediterranean et mepappeg diman. Humman hu pappeg ni bebley idan helag Judah di appit tud south.

<sup>5</sup> Ya pappeg di appit ni kasimmilin aggew ey neiunnuunnud di kedukkey ni gilig ni Netey ni Baybay et manteyed lad ingganah di utduk ni Wangwang e Jordan. Yadman hu neilepuan ni pappeg di north, <sup>6</sup> et manteyed di Bet Hogleh ey nampalaw di appit ni north ni Bet Arabah ingganah di Batun Bohan. Hi Bohan e u-ungngan Reuben. <sup>7</sup> Neipalpu mewani di Nedeklan e Akor et mampalaw di Debir et manlikweh ni nampalaw di north di Gilgal e demang ni kandan Adummim Pass di appit ni south di nandeklan. Nampalaw lad hebwak di Ensemes ingganah di Enrogel, <sup>8</sup> et manteyed di Nedeklan e Hinnom di appit ni south di duntug ni kad-an ni bebley idan Jebusite e Jerusalem. Nampalaw la pappeg di tuktuk ni duntug di appit ni kakelinnugin aggew di Nedeklan e Hinnom di gilig ni Nedeklan e Rephaim di north. <sup>9</sup> Meippalpuhman ni tuktuk ni duntug ey nampalaw di Hebwak e Neptoah et ingganah di bebley ni nangkeihnup di Duntug e Epron. Dimmateng diman et mandayyud Baalah (e Kariat Jearim hakey ni ngadan tu). <sup>10</sup> Nanlikweh di appit ni kakelinnugin aggew di Duntug e Seir ey neiunnuunnud di north ni Duntug e Jearim, e Kesalon hu hakey ni ngadan tu, et mandayyud Bet Semes et labhan tu Timnah. <sup>11</sup> Nampalaw la hu pappeg ingganah di duntug di Ekron et manlikweh di Sikkeron et malebah di Duntug e Baalah et mampalaw di Jabneel et mepappeg di Baybay e Mediterranean.

<sup>12</sup> Humman hu pappeg tud appit ni kakelinnugin aggew. Huyyadda nambebleyan idan helag Judah.

<sup>13</sup> Inu-unnud Joshua hu in-olden APU DIOS ni hi-gatu e meidwat nan Kaleb e u-ungngan Jephunneh e helag Judah hu Hebron e bebley Arba e aman Anak et humman patal tu etan idad bebley ni meidwat idad helag Judah. <sup>14</sup> Dinegyun Kaleb di diman e bebley ida helag Anak e humman ida helag di Seshai, hi Ahiman et hi Talmi. <sup>15</sup> Entanni et lumaw mewani di Debir hi Kaleb ma-lat tu gubaten ida tutu-udman. (Yan ngadan ni Debir ni nunman ey Kariat Spher.) <sup>16</sup> Kan Kaleb ey “Peahwak hu u-ungngak ni bii e hi



Aksah etan ni lakin kabaelan tun menggep ni Kiriath Sepher.”<sup>17</sup> Entanni ey hi Otniel e u-unggan Kenas e agin Kaleb hu nangep ni nunman ni bebley et peahwan Kaleb ni hi-gatu hi Aksah e u-unggan tu.

<sup>18</sup> Yan nunman ni aggew ni nan-ahwaan da ey inhel Otniel nan Aksah et tu ibegan ametu hu kamedennumin puyek ni beltanen tu. Et lumaw hi Aksah di kad-an ametu. Immehep di kebayyu tu ey minahman ametu hedih hipa ibbagnetu.<sup>19</sup> Et kan Aksah nan ametuy “Kabbabbal kan hi-gak e ama tep indawtan muwak ni puyek di Negeb, nem ettu anhan et idwatan muwak pay ni puyek ni kamedennumi.” Et idwat Kaleb ni hi-gatu hu nengin-ahpat et ya nengi-ehpen ni hebwak.

<sup>20</sup> Huyyadda hu bebley ni neidwat idan helag Judah ni pambebleyan dad south: <sup>21</sup> yadda bebley dan neka-iddawwid appit ni south e neihnpud di pappeg ni Edom ey yadda Kabseel, Eder, Jagur <sup>22</sup> Kinah, Dimonah, Adadah, <sup>23</sup> Kedes, Hasor, Itnan, <sup>24</sup> Sip, Telem, Bealot, <sup>25</sup> Hasor Hadattah, Keriot Hesron (winu Hasor) <sup>26</sup> Amam, Sema, Moladah, <sup>27</sup> Hasar Gaddah, Hesmon, Betpelet, <sup>28</sup> Hasar Sual, Beersheba, Bisiythiah, <sup>29</sup> Baalah, Iim, Esem, <sup>30</sup> Eltolad, Kesil, Hormah, <sup>31</sup> Siklag, Madmannah, Sansannah, <sup>32</sup> Labaot, Silhim, Ain, et ya Rimmon. Dewampulut heyam hu bilang idan nunyan etta-teng ni bebley ey nei-dum pay ida ekka-ket ni bebley di nanlinikweh diman.

<sup>33</sup> Yadda bebley dad hengep idan duntug ey: Estaol, Sorah, Asnah, <sup>34</sup> Sanoah, Enggannim, Tappuah, Enam, <sup>35</sup> Jarmut, Addullam, Sokoh, Asekah, <sup>36</sup> Saaraim, Adithaim, Gederah et ya Gederothaim. Hampulut epat hu bilang idan nunyan etta-teng ni bebley ey nei-dum pay ida etan ekka-ket ni bebley di nanlinikweh diman.

<sup>37</sup> Yadda edum ni bebley da ey yadda Senan, Hadashah, Migdalga, <sup>38</sup> Dilean, Mispah, Jokteel, <sup>39</sup> Lakis, Boskat, Eglon, <sup>40</sup> Kabbon, Lahmam, Kitlis, <sup>41</sup> Gederot, Betdagon, Naamah, et ya Makkeda. Hampulut enem hu bilang idan nunyan etta-teng ni bebley e nei-dum pay ida etan ekka-ket ni bebley di nanlinikweh diman.

<sup>42</sup> Ya edum pay ni bebley da ey ya Libnah, Ether, Ashan, <sup>43</sup> Iptah, Asnah, Nesib, <sup>44</sup> Keilah, Aksib et ya Mareshah, heyam hu bilang idan nunyan etta-teng ni bebley ey nei-dum pay ida etan ekka-ket ni bebley di nanlinikweh diman.

<sup>45</sup> In-edum da pay hu Ekron et yadda ekka-ket ni bebley ni wadadman, <sup>46</sup> nei-dum pay ida etta-teng niya ekka-ket bebley ni neihnpud di Asdod, meippalpuud Ekron ingganah di Baybay e Mediterraneane. <sup>47</sup> Nei-dum pay hu Asdod et ya Gaza et yadda ekka-ket ni bebley diman, meippalpuud etan di kulukul ingganah di Egypt ey ingganah di gilig ni Baybay e Mediterraneane.

<sup>48</sup> Yadda bebley dad duntuduntug ey: Samir, Jattir, Sokoh, <sup>49</sup> Dannah, Kiriath Sannah e Debir hu hakey ni ngadan tu <sup>50</sup> Anab Estemoh, Anim, <sup>51</sup> Goshen, Holon et ya Giloh. Hampulut hakey emin ida huyyan etta-teng ni bebley ey nei-dum pay ida ekka-ket ni bebley di nanlinikweh diman.

<sup>52</sup> Nei-dum pay hu Arab, Dumah, Eshan, <sup>53</sup> Janim, Bet Tappuah, Aphekah, <sup>54</sup> Humtah, Hebron et ya Sior. Heyam ida huyya etta-teng ni bebley ey nei-dum pay hu ekka-ket ni bebley di nanlinikweh diman.

<sup>55</sup> Nei-dum dama hu Maon, Karmel, Sip, Juttah, <sup>56</sup> Jesreel, Jokdeam, Sanoah, <sup>57</sup> Kain, Gibeah et ya Timnah. Hampulut emin hu bilang idan nunyan etta-teng ni bebley ey nei-dum pay ida ekka-ket ni bebley di nanlinikweh diman.

<sup>58</sup> Ya edum pay ni bebley da ey: Halhul, Bet Sur, Gedor, <sup>59</sup> Maarat, Bet Anot et ya Eltekon. Enem ida huyyan etta-teng ni bebley ey nei-dum pay ida ekka-ket ni bebley di nanlinikweh diman.

<sup>60</sup> Yadda pay hu edum ni bebley da ey Kiriath Baal e Kiriath Jearim hu hakey ni ngadan tu et ya Rabbah. Dewwan etta-teng ni bebley ey nei-dum pay ida ekka-ket ni bebley di nanlinikweh diman.

<sup>61</sup> Huyyadda pay hu bebley da etan di desert: Bet Arabah, Middin, Sekakah, <sup>62</sup> Nibsan, Maehin ni Bebley et ya Engedi. Enem ida huyyan etta-teng ni bebley ey nei-dum pay ida ekka-ket ni bebley di nanlinikweh diman.

<sup>63</sup> Nem eleg kinabaelan idan helag Judah ni dinegyun ida Jebusite ni nambebley di Jerusalem et ingganah nunya ey nekibebebley idan hi-gadadman.

## 16

*Yadda etan bebley ni neidwat ni helag Ephraim et ya helag Manasseh*

<sup>1</sup> Ya pappeg ni bebley ni neidwat idan helag Joseph di appit ni south ey neipalpuud Jordan e neihnpud di Jericho ingganah etan di hebwak di Jericho di appit ni kasimmilin aggew et mampalaw di eleg mebebleyi et ingganah di duntuduntug ni bebley di Bethel.

<sup>2</sup> Et mampalaw di Lus et idlan tud Atarot Addar e nambebleyan idan Arkite. <sup>3</sup> Ey

nampalaw di nambebleyan idan helag Japlet di appit ni kakelinnugin aggew ingganah dimmateng di kad-an ni nengin-ehpen ni Bet Horon et mampalaw di Geser et meipappeg di Baybay e Mediterranean.

<sup>4</sup> Huyyaddan bebley hu neidwat ni nambebleyan idan helag Ephraim et ya kagedwah ni helag Manasseh e u-ungngaddan Joseph.

<sup>5</sup> Huyyaddan pappeg ni bebley da ey meipalpud Atarot Addar et mampalaw di appit ni kasimmilin aggew ingganah di nengin-ahpat ni Bet Horon, <sup>6-7</sup> et mampalaw lad Baybay e Mediterranean. Ya pappeg tud appit ni kasimmilin aggew ey linabhan tud Mikmethat et mampalaw di Taanat Siloh et manlikweh di Janoah. Mipalpudman et mampedayyud Atarot et yad Naarah ingganah di Jericho et meipappeg di Wangwang e Jordan. <sup>8</sup> Meipalpud Tappuah et mampalaw di appit ni kakelinnugin aggew di Kulukul e Kanah et meipappeg di Baybay e Mediterranean. Huyyadda bebley ni neidwat idan helag Ephraim ni pambebleyan da. <sup>9</sup> Nei-dum ni neidwat ni hi-gada ekka-ket ni bebley ni wadad pappeg ni puyek idan helag Manasseh.

<sup>10</sup> Nem eleg da degyunen ida iKanaan ni nambebley di Geser et makibebley idan helag Ephraim ingganah nunya, nem nambalin idan himbut idan helag Ephraim.

## 17

<sup>1</sup> Ya pangil ni puyek di Jordan di appit ni kakelinnugin aggew, ey neidwat idan edum ni helag Manasseh e pengulwan ni laki u-ungngan Joseph. Hi Makir e aman Gilead ey penguluwan ni laki u-ungngan Manasseh. Nelaing ey netuled ni mekiggubbat et humman gaputun neidwat ni hi-gatu hu Gilead et ya Bashan e appit di kasimmilin aggew di Jordan. <sup>2</sup> Ey yadda edum ni bebley di appit ni kakelinnugin aggew di Jordan ey neidwat idan edum ni helag Manasseh e hi Abieser, hi Helek, hi Asriel, hi Sekem, hi Hopher et hi Semida. Huyyadda ngadan idan lalakkin u-ungngan Manasseh e penguluwan ni u-ungngan Joseph.

<sup>3</sup> Hi Selopheada e u-ungngan Hopher e u-ungngan Gilead e u-ungngan Makir e u-ungngan Manasseh ey endi u-ungnga tun laki, ebuh bibi-i. Ya ngadan da ey hi Mahlah, hi Noah, hi Hogleh, hi Milkah et hi Tirsah. <sup>4</sup> Limmaw ida huyyad kad-an ni padi e hi Eleasar, hi Joshua e u-ungngan Nun et yadda kamengipappanggulun helag Israel et kanday "In-olden nan APU DIOS nan Moses e iddawtan dakemin puyek ni pambebleyan ni heniddan lalakkin agi mi." Et idwatan daddan pambebleyan da tep humman in-olden APU DIOS. <sup>5</sup> Hampulun pambebleyan hu neidwat nan Manasseh et mei-dum hu Gilead et ya Bashan di appit ni kasimmilin aggew di Jordan, <sup>6</sup> tep neidwatan ida dama bibi-in helag Manasseh. Neidwat hu Gilead di edum ni helag Manasseh.

<sup>7</sup> Yadda pappeg ni puyek ni neidwat idan helag Manasseh ey neipalpud Asher et mampalaw di Mikmethat di appit ni kasimmilin aggew di Sekem. Nampalaw di south et mei-dum ida tutu-un nambebley di Tappuah. <sup>8</sup> (Yadda bebley di nanlinikweh ni Tappuah ey neidwat idan helag Manasseh, nem ya bebley e Tappuah di pappeg ni bebley idan helag Manasseh ey neidwat idan helag Ephraim.) <sup>9</sup> Nampedayyu hu pappeg tud kulukul e Kanah. Neidwat hu appit ni south ni Kulukul idan helag Ephraim anin ni wadaddad nambebleyan idan helag Manasseh. Ya pappeg ni bebley ni neidwat idan helag Manasseh ey nampalaw di appit ni north e neiunnuunnud di Kulukul e Kanah et mepappeg di Baybay e Mediterranean. <sup>10</sup> Ya puyek ni neidwat idan helag Ephraim ey ya appit ni south. Ey ya puyek ni neidwat idan helag Manasseh ey appit ni north et ya Baybay e Mediterranean hu pappeg tud kakelinnugin aggew. Ya pappeg tud appit ni northwest ey ya nambebleyan idan helag Asher. Et ya pappeg tud appit ni northeast ey ya nambebleyan idan helag Issakar.

<sup>11</sup> Huyyadda bebley ni sakup ni puyek idan helag Manasseh e wadad sakup ni bebley idan helag Issakar et yadda helag Asher: ya Betsean, ya Ibleam et yadda ekka-ket ni bebley diman, ya Dor e wadad gilig ni baybay, ya Endor, ya Taanak, ya Megiddo et yadda bebley di nanlinikweh diman.

<sup>12</sup> Nem eleg kabaelan idan helag Manasseh ni dinegyun ida Kanaanite ni nambebley diman et nanengtun wadaddadman ingganah nunya. <sup>13</sup> Anin dedan law eman ni na-let idan menegyun ni hi-gada et eleg dadda degyunen tep impambalin daddan pangnunggunnu da.

<sup>14</sup> Hakey aggew ey limmaw ida hu helag Joseph di kad-an Joshua et kandan hi-gatuy "Kele ebuh humman ni puyek ni indawat mun pambebleyan mi ey dakel kami tep binendisyonan dakemin APU DIOS?"

<sup>15</sup> Hinumang Joshua e kantuy "Hedin kulang hu duntuduntug di Ephraim ni pambebleyan yu, tep dakel kayu, palaw kayuddad mamuyung di nambebleyan idan Perisite et yadda Rephaite et kayu man-umadman ni panha-adan yu."

<sup>16</sup> Kandy “Anin na-mun hanniman pehding ey umkulang metlaing humman idan duntuduntug ni pambebleyan mi. Ey eleg kami mabalin ni mandayyud Nedeklan e Jesreel tep yadda iKanaan ni nambebley di Bet Shan et yaddad edum ni bebley diman ey gumek hu kalesah dan daka ussalan mekiggubbat.”

<sup>17</sup> Kan Joshua ni hi-gaday “Makulug ni dakek kayu ey et-eteng ni kabaelan yu. Ebbuluten kun iddawtan dakeyu pay ni puyek yu. <sup>18</sup> Meidwat ni hi-gayu humman ni duntuduntug ni pambebleyan yu. Umai yu anin ni mamuyung ma-lat pambebleyan yun emin humman meippalpud hengeg tu ingganah di utduk tu. Handegyun yudda iKanaan anin ni na-let ida ey anin ni gumek kalesah dan ussalen dan mekiggubbat.”

## 18

*Ya negenedwaan idan etan ni edum ni puyek*

<sup>1</sup> Negibbuh ni sinekup idan helag Israel hu edum idan bebley ey neamung idad Siloh et ikapya da hu Tabernacle APU DIOS. <sup>2</sup> Nem wadadda pay hu pitun helag Israel ni eleg meidwatan ni puyek.

<sup>3</sup> Et kan Joshua idan edum tun helag Israel ey “Pigantu yu pambebleyan di bebley ni indawat APU DIOS idan aammed yun hi-gayu? <sup>4</sup> Putuk kayun hantetlun lalakkin mengi-ehngeng ni helag yu et itu-dak kudda et da ang-angen ida emin etan bebley ni eleg tayu ni sakupen et itudek da hu pinhed dan pehding ni mengenedwan nunman idan puyek ey han-ida nambanggad di kad-ak. <sup>5</sup> Mampittu kegenedwaan idan nunman ni puyek. Mannenneng ida helag Judah di neitudun pambebleyan dad appit ni south. Hanniman damaddan helag Joseph ey manha-ad idan neitudun pambebleyan dad appit ni north. <sup>6</sup> Itudek da hu meippanggep idan nunman ni bebley ni mampittu kegenedwaan tu, et i-li dan hi-gak et ibunut kud hinanggan APU DIOS tayu, et amtaan tayu hedin attu hu pinhed tun pambebleyan idan pitun helag Israel. <sup>7</sup> Nem hedin yadda helag Levi ey endi ida meiddawtan ni puyek da, tep mansilbid dan padin APU DIOS. Hedin yadda helag Gad, hi Reuben et yadda gedwan helag Manasseh ey negibbuh ni neidwat hu patal da e wadad appit ni kasimmilin aggew di Wangwang e Jordan e indawat lan Moses e bega-en APU DIOS ni hi-gada.”

<sup>8</sup> Immegah ida etan lalakkin an manmapah ni bebley ey kan Joshua ni hi-gaday “Elaw kayu et yu ang-angen etan bebley. Itudek yu hedin hipa ang-angen yu ey nambanggad kayud kad-ak et ika-peng kudda humman ni puyek idan helag yu hedin negibbuh ni imbunut kud hinanggan APU DIOS di deya Siloh.”

<sup>9</sup> Impahding idan nunman ni lalakki hu na-hel ni hi-gadan pehding da e ittudek da mapah etan ni bebley et pampittuen dan genedwaan. Itudek da ngadan emin etan idan bebley et nambanggad idad kad-an Joshua di Siloh. <sup>10</sup> Imbunut Joshua di Siloh di hinanggan APU DIOS ma-lat meamtaan hedin hipa meidwat ni hi-gadan helag Israel.

*Ya neidwat idan helag Benjamin*

<sup>11</sup> Entanni ey yadda helag Benjamin hu nemangulun nebunut ni meidwatan ni puyek. Ya neidwat ni hi-gadan puyek ey wadad nambattanan ni puyek idan helag Judah niya helag Joseph.

<sup>12</sup> Ya pappeg ni meidwat ni hi-gadad appit ni north ey meippalpud Wangwang e Jordan et manteyed di Jericho di appit ni north ey nampalaw di appit ni kakelinnugin aggew etan di duntuduntug ingganah di Bet Aben. <sup>13</sup> Niya nampalaw di Lus e Bethel hu hakey ni ngadan tud appit ni south et mandayyud Atarot Addar et mampalaw di duntug di ehpen ni Bet Horon di appit ni south.

<sup>14</sup> Nanlikweh di appit ni south e meippalpud etan di duntug di appit ni kakelinnugin aggew et mampalaw di Kiriath Baal e Kiriath Jearim hu hakey ni ngadan tu e hakey ni bebley idan helag Judah. Huyya pappeg tud appit ni kakelinnugin aggew.

<sup>15</sup> Ya pappeg tud appit ni south ey meippalpud gilig ni Kiriath Jearim ingganah di hebwak di Neptoah, <sup>16</sup> et mandayyud hengeg ni duntug e kameuhdungi hu Nedeklan e Hinnom e wadad appit ni north Nedeklan e Rephaim ey nampalaw di south etan di ta-pew ni duntug di Jebus et han mampalaw di Enrogl. <sup>17</sup> Nanlikweh mewan di appit ni north di Enseses et mampalaw di Gelilot e demang di dalan di Adummim et han mandayyud Batun Bahan. (Hi Bahan ey u-unggan Reuben.) <sup>18</sup> Nampalaw mewan di appit ni north e inunud tu ta-pew etan ni duntug e kameuhdungi hu nandeklan di Jordan, et mandayyud nandeklan <sup>19</sup> e indalan tud ahpat ni Bet Hoglah di appit ni north et meipappeg etan di Netey ni Baybay niyad utduk ni Wangwang e Jordan. Huyya pappeg tud appit ni south.

<sup>20</sup> Ya Jordan hu pappeg tud appit ni kasimmilin aggew. Huyyadda pappeg ni puyek ni neidwat idan helag Benjamin ni pambebleyan da.

<sup>21</sup> Yahhuy ida hu ngadan ni bebley ni neidwat ni hi-gada: Jericho, Bet Hogleh, Emek Kesis <sup>22</sup> Bet Arabah, Semaraim, Bethel, <sup>23</sup> Abbim, Parah, Oprah, <sup>24</sup> Kephrah Ammoni, Opni ey ya Geba. Hampulut dewwan bebley et yadda ekka-ket ni bebley di nanlinikweh diman.

<sup>25</sup> Huyyadda edum ni bebley diman: Gibeon, Ramah, Beerot, <sup>26</sup> Mispah, Kepirah, Mosah, <sup>27</sup> Rekem, Irpeel, Taralah, <sup>28</sup> Sela, Haelep, Jebus e Jerusalem hu hakey ni ngadan tu, Gibeah et ya Kiriath Jearim: Hampulut epat ni bebley et yadda ekka-ket ni bebley di nanlinikweh diman.

Huyya hu puyek ni neidwat idan helag Benjamin ni pambebleyan da.

## 19

### *Yadda bebley ni neidwat idan helag Simeon*

<sup>1</sup> Ya meikkadwan nebunut ni meidwatan ni puyek ey yadda helag Simeon. Yadda edum ni bebley ni neidwat ni hi-gada ey nealad puyek idan helag Judah.

<sup>2</sup> Huyyadda ngadan ni bebley ni neidwat idan helag Simeon ey Beersheba, Seba, Moladah, <sup>3</sup> Hasar Sual, Balah, Esem, <sup>4</sup> Eltolad, Bethul, Hormah, <sup>5</sup> Siklag, Bet Markabot, Hasar Susah, <sup>6</sup> Bet Lebaot et ya Saruhen. Hampulut tellun bebley et yadda ekka-ket ni bebley di nanlinikweh diman.

<sup>7</sup> Yadda edum ni bebley diman ey Ain, Rimmon, Ether et ya Ashan: epat ni bebley et yadda ekka-ket ni bebley di nanlinikweh diman. <sup>8</sup> Nei-dum ida hu ekka-ket ni bebley di nanlinikweh ingganah di Baalat Beer e Ramah hu hakey ni ngadan tu e wadad appit ni south.

Huyya hu neidwat idan helag Simeon ni nambebleyan da. <sup>9</sup> Gapu tep e-etteng hu puyek ni neidwat idan helag Judah ey neidwat etan edum ni bebley dan eleg da mahapul idan helag Simeon.

### *Ya puyek ni neidwat idan helag Sebulun*

<sup>10-12</sup> Ya meikkatlun nebunut ni meidwatan ni puyek ey yadda helag Sebulun. Ya puyek ni neidwat ni hi-gada ey dimmateng di Sarid. Meippalpuđman et mampalaw lad appit ni kakelinnugin aggew di Maralah et datngan tud Dabbeshet et yad gilig ni kulukul di appit ni kasimmilin aggew di Jokneam. Ey meippalpuđ Sarid ey nampalaw lad appit ni kasimmilin aggew di gilig ni Kislot Tabor ingganah di Daberat et manteyed di Japhia. <sup>13</sup> Nampalaw lad ingganah di appit ni kasimmilin aggew et meipalpuđman et mampalaw di Gath Hephher et yad Etkasin et manlikweh lad Neah ingganah di Rimmon. <sup>14</sup> Ya pappeg tud appit ni north ey nampalaw di Hannathon et maipappeg di Nedeklan e Iptahel. <sup>15</sup> Nei-dum hu Kattat, Nahalal, Simron, Idalah, et ya Bethlehem. Hampulut dewwan etta-teng ni bebley ey nei-dum idan ekka-ket ni bebley di nanlinikweh diman. <sup>16</sup> Huyyadda bebleyan ni neidwat idan helag Sebulun ni pambebleyan da.

### *Ya puyek ni neidwat idan helag Issakar*

<sup>17</sup> Ya meikka-pat ni nebunut ni meidwatan ni puyek ey yadda helag Issakar. <sup>18</sup> Huyyadda bebley ni neidwat ni hi-gada: Jesreel, Kesullot, Sunem, <sup>19</sup> Hapharaim, Sion, Anaharat, <sup>20</sup> Rabbit, Kishion, Ebes, <sup>21</sup> Remet, Engannim, Enhaddah et ya Betpasses. <sup>22</sup> Dimmateng hu pappeg tud Tabor, Sahasumah et yad Bet Semes et meipappeg di Jordan. Hampulut enem ni etta-teng ni bebley et mei-dum ida pay hu ekka-ket ni bebley di nanlinikweh. <sup>23</sup> Huyyadda hu bebley ni neidwat idan helag Issakar ni pambebleyan da.

### *Ya puyek ni neidwat ni helag Asher*

<sup>24</sup> Ya meikkelliman nebunut ni meidwatan ni puyek ey yadda helag Asher. <sup>25</sup> Huyyadda neidwat ni pambebleyan da: Helkat, Hali, Beten, Aksap, <sup>26</sup> Allam Melek, Amad et ya Mishal. Ya pappeg tud appit ni kakelinnugin aggew ey indalan tud gilig ni Karmel et ya Sihor Libnat. <sup>27</sup> Nanlikweh di appit ni kasimmilin aggew et mampalaw di gilig ni Betdagon et datngan tu Sebulun et ya Nedeklan e Ehtahel et mampalaw lad appit ni north di Bethemek et yad Neiel. Nampalaw mewar di north di Kabul, <sup>28</sup> Ebron, Rehob, Hammon et yad Kanah ingganah di Sidon. <sup>29</sup> Nanlikweh di Ramah et dumteng di Tyre e nehammad ni neluhud ni bebley. Ey nanlikweh mewar di Hosah et meipappeg di Baybay e Mediterranean. Nei-dum pay hu Mahalab, Aksib, <sup>30</sup> Ummah, Aphek et ya Rehah. Dewampulut dewwan emin huyyan etta-teng ni bebley et mei-dum ida ekka-ket ni bebley di nanlinikweh diman. <sup>31</sup> Huyyadda bebley ni neidwat idan helag Asher ni pambebleyan da.

<sup>32</sup> Ya neika-nem ni nebunut ni meidwatan ni puyek ey ya helag Naptali. <sup>33</sup> Ya pappeg tu ni puyek da ey nampalaw di Helep ingganah etan di keyew ni oak di Saannim

ingganah di Adami Nekeb et yad Jabneel et ingganah lad Lakkum et maipappeg di Wangwang e Jordan. <sup>34</sup> Dimmateng diman et melikked di appit ni kakelinnugin aggew di Asnot Tabor et mampalaw di Hukkok e dinteng tu hu pappeg ni puyek idan helag Sebulun di south. Et mampalaw di pappeg ni puyek idan helag Asher di appit ni kakelinnugin aggew et yad Wangwang e Jordan di appit ni kasimmilin aggew. <sup>35</sup> Yadda etta-teng ey nehammad luhud tun bebley diman ey ya Siddim, Ser, Hammat, Rakkat, Kinneret, <sup>36</sup> Adamah, Ramah, Hasor, <sup>37</sup> Kedes, Edrei, Enhazor, <sup>38</sup> Yiron, Migdalel, Horem, Bethanat et ya Bet Semes. Heyam ida huyyan etta-teng ni bebley ey nei-dum ida ekka-ket ni bebley di nanlinikweh diman. <sup>39</sup> Huyyadda hu bebley ni neidwat idan helag Naptali ni pambebleyan da.

<sup>40</sup> Ya meikkeppitun nebunut ni neidwatan ni puyek ey yadda helag Dan. <sup>41</sup> Huyyadda bebley ni neidwat ni hi-gada: Sorah, Estaol, Irsemes, <sup>42</sup> Saalbim, Aijalon, Itlah, <sup>43</sup> Elon, Timnah, Ekron, <sup>44</sup> Eltekeh, Gibbethon, Baalat, <sup>45</sup> Jehud, Beneberak, Gattrimmon, <sup>46</sup> Mejarkon, Rakkon et yadda bebley di hinanggan Joppa. <sup>47-48</sup> Huttan ida etta-teng ni bebley ni neidwat idan helag Dan ni pambebleyan da. Nem entanni ey eleg da kabaalan ni sekkupen humman idan bebley ni neidwat ni hi-gada et dadda law gubaten hu nambebley di Lais. Hinggep da humman ni bebley et patyen dadda tutu-udman et pambebleyan da law humman et hullulan da ngadan tun Dan e humman ngadan ni ammed dan nahlagan da.

<sup>49</sup> Yan negibbuhan ni nengenedwaan idan helag Israel ni puyek ni neidwat ni hi-gada ey indawtan da hi Joshua e u-ungngan Nun ni puyek tu. <sup>50</sup> Meippuun di olden APU DIOS ey indawat dan hi-gatu hu bebley ni pinhed tun pambebleyan e yad Timnat Serah di duntuduntug di Epraim. Inyayyaggud tu humman ni bebley et manha-ad diman. <sup>51</sup> Huyyadda hu bebley ni impeka-peng di Eleasar e padi, hi Joshua e u-ungngan Nun et yadda ap-apun helag Israel eman ni neamungan dad Siloh di hinanggan APU DIOS di heggeppan di Tabernacle e imbubunut da et mekaggibbuh hu nengenedwaan dan puyek da.

## 20

### *Yadda bebley ni keihhikkugan*

<sup>1</sup> Entanniy kan APU DIOS nan Joshua ey <sup>2</sup> “Ehel muddan edum mun helag Israel et pumili kayun bebley ni keihhikkugan e humman inhel ku dedan lan Moses. <sup>3</sup> Et yadman bebsikan ni hakey ni tuun pimimatey nem eleg tu igeb-at, ma-lat ibsikan tu etan tuun mengi-ewwit ni pintey tu.

<sup>4</sup> Dammutun umbesik di hakey idan nunyan bebley et lumaw di daka pengippen-nuhin kasuh di heggeppan nunman ni bebley et ehelen tuddan ap-apudman hedin hipa makulug ni neipahding. Pehgep da etan tuud bebley ey intuduan dan pambelleyan tu et manha-ad diman. <sup>5</sup> Hedin wada mei-unnud etan idan aaggin netey ni an mengi-ewwit ey eleg mabalin ni an i-abulut idan tuun pedpap humman ni pimimatey tep eleg tu igeb-at ey beken pay ni gapun bunget tu. <sup>6</sup> Yadda tutu-udman hu mengippen-nuh ni nunman ni kasuh et meamtaan hedin endi bahul tu. Hedin meamtaan e endi bahul tu, dammutun manha-ad diman et hegeden tu ketteyyan etan ni eta-gey ni padid man ni nunman neipahdingan tu. Ey han law nambanggad di bebley ni nalpuan tu.”

<sup>7</sup> Yadda bebley ni piniliddan helag Israel ni keihhikkugan ey yad appit ni kakelinnugin aggew di Wangwang e Jordan, Kedes di Galilee di duntuduntug ni bebley idan helag Naptali, Sekem di duntuduntug e bebley di helag Epraim et ya Hebron etan di duntuduntug ni bebley idan helag Judah. <sup>8</sup> Yadda appit ni kasimmilin aggew di Wangwang e Jordan ey pinili dadda hu Beser e bebley idan helag Reuben e wadad nedeklan ya Ramot di Gilead di bebley idan helag Gad et ya Golan di Bashan di bebley idan helag Manasseh. <sup>9</sup> Huyyadda bebley ni netudun bebsikan idan helag Israel winu yadda nekibebley ni hi-gadan pimimatey nem eleg tu igeb-at et yadman keihhikkugan tu ma-lat eleg pateyen idan mengi-ewwit ingganah ni keippen-nuhan ni kasuh da.

## 21

### *Yadda nambebleyan idan helag Levi*

<sup>1</sup> Limmaw ida hu helag Levi di kad-an Eleasar e padi et hi Joshua e u-ungngan Nun et yadda kamengipappangngulun helag Israel <sup>2</sup> di Siloh di Kanaan et kandan hi-gaday “Intugun lan APU DIOS nan Moses e meidwatan kamin pambebleyan mi niya pampattulan min animal mi.” <sup>3</sup> Ey inu-unnud da humman ni in-olden APU DIOS et idwatan idan edum dan helag Israel ida helag Levi ni pambebleyan da et ya pampattulan da. Yadda neidwat ni hi-gada ey nealad pupuyek ni neidwat idad edum dan helag Israel.

<sup>4</sup> Yadda pamilyah Kohat e helag Levi hu nemangulun nebulan ni meidwatan ni pambbleyan. Hi-gada ey helag Aaron e padi ey neidwatan idan hampulut tellun bebley ni panha-adan da. Humman idan bebley ey edum ni puyek idan helag Judah, helag Simeon et ya helag Benjamin. <sup>5</sup> Yadda edum ni helag Kohat ey neidwatan idan hampulun bebley e nalpud puyek idan helag Epraim, helag Dan et ya helag Manasseh di appit ni kakelinnugin aggew.

<sup>6</sup> Yadda helag Gerson ey neidwatan idan hampulut tellun bebley e nalpud puyek idan helag Issakar, helag Asher, helag Naptali et ya helag Manasseh di appit ni kasimmilin aggew.

<sup>7</sup> Yadda helag Merari ey neidwatan idan hampulut dewwan bebley e nalpud puyek idan helag Reuben, helag Gad et helag Sebulun.

<sup>8</sup> Inu-unnud idan helag Israel hu inhel APU DIOS ni intugun Moses et ibubunut da et itudu da pambbleyan idan helag Levi et ya kudal dan pampattulan da.

<sup>9</sup> Huyyadda ngadan ni bebley ni indawat idan helag Judah et ya helag Simeon <sup>10</sup> idan helag Aaron e helag Kohat e helag Levi. Hi-gada nemangulun nebulan.

<sup>11</sup> Neidwat ni hi-gada Arba e Hebron hu ngadan tun nunya e wadad duntuduntug di Judah et yadda kudal di nanlinikweh diman. Hi Arba ey aman Anak. <sup>12</sup> Nem yadda papayyew et yadda ekka-ket ni bebley ni neihnap diman ey neidwat dedan nunman nan Kaleb e u-ungngan Jephunneh.

<sup>13</sup> Huyyadda hu bebley ni neidwat idan helag Aaron e padi e neunnudan idan kudal: ya Hebron (e hakey ni nepilin bebley ni keihhikkugan), ya Libnah, <sup>14</sup> ya Jattir, ya Estemoa, <sup>15</sup> ya Holon, ya Debir, <sup>16</sup> ya Ain, ya Juttah, et ya Bet Semes. Heyam ni bebley e neunnudan idan kudal hu indawat idan helag Judah et hi Simeon.

<sup>17</sup> Epat ni bebley dama hu neidwat ni puyek idan helag Benjamin. Huyyadda ya Gibeon, ya Geba, <sup>18</sup> ya Anathot et ya Almon e neunnudan idan kudal. <sup>19</sup> Hampulut tellun emin hu bebley ni neidwat idan papaddin helag Aaron e neunnudan idan kudal.

<sup>20</sup> Yadda edum ni helag Kohat e helag Levi ey neidwat ida huyyan bebley e edum ni puyek ni neidwat idan helag Epraim. <sup>21</sup> Huyyaddan bebley ey Sekem (hakey ni bebley ni pinili dan keihhikkugan) etan di duntuduntug ni bebley di Epraim et ya Geser, <sup>22</sup> ya Kibsaim et ya Bet Horon. Epat ni bebley e neunnudan idan kudal.

<sup>23</sup> Epat ni bebley hu neidwat ni edum ni puyek idan helag Dan e yadda Eltekeh, ya Gibbethon, <sup>24</sup> ya Aijalon et ya Gath Rimmon e neunnudan idan kudal.

<sup>25</sup> Neidwat hu dewwan bebley di puyek idan kagedwah ni helag Manasseh. Huyyadda ey Taanak et ya Gath Rimmon e neunnudan idan kudal diman.

<sup>26</sup> Hampulun bebley emin hu neidwat idan helag Kohat e neunnudan idan kudal.

<sup>27</sup> Hedin yadda edum ni helag Levi e helag Gerson ey neidwat ni hi-gada hu edum ni bebley idan kagedwah ni helag Manasseh. Ya ngadan idan nunyan bebley ey Golan di Bashan (e hakey ni nepilin bebley ni keihhikkugan) et ya Beesterah et yadda kudal diman.

<sup>28</sup> Yadda epat ni bebley ni edum ni puyek idan helag Issakar ni neidwat idan helag Gerson ey ya Kishion, ya Dabarat, <sup>29</sup> ya Jarmut et ya Engannim e neunnudan idan kudal da.

<sup>30</sup> Epat daman bebley hu indawat idan helag Asher idan helag Gerson: ya Mishal, ya Abdon, <sup>31</sup> ya Helkat et ya Rehob e neunnudan idan kudal.

<sup>32</sup> Indawat ida daman helag Naptali ni hi-gada hu tellun bebley: ya Kedes di Galilee (huyya hakey ni nepilin bebley ni keihhikkugan), ya Hammot Dor et ya Kartan e neunnudan idan kudal.

<sup>33</sup> Ya bilang ni emin ni bebley ni neidwat idan helag Gerson ey hampulut tellu e neunnudan idan kudal.

<sup>34</sup> Yadda epat ni bebley ni edum ni puyek idan helag Sebulun ni neidwat idan edum ni helag Levi e helag Merari ey ya Jokneam, ya Kartah, <sup>35</sup> ya Dimnah et ya Nahalal e neunnudan idan kudal.

<sup>36</sup> Yadda dama epat ni bebley di puyek idan helag Reuben ni neidwat ey ya Beser, Jahas, <sup>37</sup> Kedemot et ya Mephaat e neunnudan idan kudal diman.

<sup>38-39</sup> Yadda helag Gad ey indawat da dama hu Ramot di Gilead (e hakey ida etan ni bebley ni nepilin keihhikkugan), ya Mahanaim, ya Heshon et ya Jaser e neunnudan idan kudal.

<sup>40</sup> Ya bilang ni emin ni bebley ni neidwat idan helag Merari ey hampulut dewwa.

<sup>41-42</sup> Ya bilang ni emin ni bebley ni indawat idan helag Israel ni edum dan helag Levi ey na-pat et walu e neunnudan idan kudal.

<sup>43</sup> Hi APU DIOS ey indawat tuddan helag Israel ni emin etan bebley ni insapatah tun iddawat tudda lan aammed da. Inapput dadda nampambbley diman et degyunen

dadda et pambebleyan da. <sup>44</sup> Winedan APU DIOS linggep dan emin di nambebleyan da. Ey endi hakey ni buhul da hu wada kabaelan tun mengubbat ni hi-gada, tep binaddangan idan APU DIOS et apputen dan emin buhul da. <sup>45</sup> Ey impeamnu tu emin hu impakulug tuddan helag Israel ni pehding tu.

## 22

<sup>1</sup> Hakey aggew ey impaeyag Joshua ida helag Reuben, yadda helag Gad et yadda kagedwah ni helag Manasseh et maemung ida. <sup>2</sup> Et kan Joshua ni hi-gada ey "Inu-unnud yun emin hu intugun Moses e bega-en APU DIOS ni pehding yu ey inu-unnud yu mewan emin hu inhel kun pehding yu. <sup>3</sup> Et eleg yudda hi-yanen hu edum yun helag Israel tep binenaddangan yudda ingganah nunya. Huttan impahding yun mengu-unnud ni Tugun AP-APU e Dios tayu. <sup>4</sup> Yan nunya ey winedan APU DIOS hu linggep idan edum yun helag Israel tep humman dedan inhel tun pehding tu. Humman gaputun anin um-anemut kayu law di pambebleyan yud Jordan di appit ni kasimmilin aggew ni indawat Moses e bega-en APU DIOS ni hi-gayu. <sup>5</sup> Nem peka-ang-ang yu et peka-u-unnuden yu hu intugun Moses e bega-en APU DIOS ni indawat tun hi-gayu: Pinhed yu hi APU DIOS yu ey impahding yu hu pinhed tun pehding yu. Pannaneng yu hu pandeyyaw yu ey pansilbi kayun hi-gatun ebuh."

<sup>6-9</sup> Et paenamut Joshua ida. Ey binendisyonan tudda e kantuy "Anemut kayu yaggud adyah e dakel hu inla yud buhul yun ikkedangyan yu, henin silber, hubeng, giniling niya gumek. Ey dakel balwasi yu. Ienamut yu et idawatan yudda edum yun helag Israel." Et lumaw ida helag Reuben, ya helag Gad et ya kagedwah ni helag Manasseh et hi-yanen dadda edum dan helag Israel di Siloh di Kanaan et mambanggad idad Gilead e bebley ni neidwat ni hi-gada tep humman tugun APU DIOS ni inhel tun Moses. Indawat dedan lan Moses hu Bashan di appit ni kasimmilin aggew di Jordan idan kagedwah ni helag Manasseh nem ya kagedwah ni helag Manasseh ey indawat Joshua hu appit ni kakelinnugin aggew di Jordan.

<sup>10</sup> Dimmateng ida helag Reuben, helag Gad et yadda kagedwah ni helag Manasseh di Gelilot e neihnpud di Jordan di Kanaan ey nengapyaddan et-eteng ni pan-appitan di gilig ni wangwang. <sup>11</sup> Dingngel idan edum dan helag Israel hu meippanggep nunman ni impahding da <sup>12</sup> et maemung idad Siloh ma-lat da gubaten ida humman ni edum dan helag Israel.

<sup>13</sup> Nem intu-dak da ni hi Pinehas e u-ungngan Eleasar e padin an mekihummangan ni hi-gada. <sup>14</sup> Nekilaw idan Pinehas hu hampulun aap-apu e wada hakey ey in-ehneng tu hu hakey idan hampulun helag Israel. Ey hi-gada man-ap-apud pewen da.

<sup>15</sup> Et lumaw di Pinehas et yadda edum tud Gilead et datngen dadda helag Reuben, helag Gad et ya kagedwah ni helag Manasseh et kandan hi-gaday <sup>16</sup> "Neamung idan emin hu edum tayun helag Israel e tutu-un APU DIOS et itu-dak dakemi et ibega min hi-gayu hedin hipa gaputu et eleg yu pannaneng hu yuka pandeyyaw ni Dios tayu. Ey kele kayu nemehwat ni pan-appitan yu? Huyya pengippeang-angan yun yuka iwwalleng hu ni Dios tayun helag Israel. Hipa gaputu et yu kangengahaya? <sup>17</sup> Kaw liniwwan yu hu nanliwatan tayud Peor et kastiguen daitsun APU DIOS et paeli tu hu nemahhig ni degeh et matey hu dakel ni hi-gatsu? Et ingganah nunyay itsu kamanhelheltap gapuh ni nunman ni liwat? <sup>18</sup> Ey yan nunya mewan ey iwwalleng yun mengu-unnud ni hi-gatu. Hedin ngenghayen yu hi APU DIOS, umbunget et kastiguen daitsun emin. <sup>19</sup> Hedin kanyuy beken ni kayyaggud hu bebley yun pandeyyawan yun APU DIOS, pan-agwat kayu katteg et mekibebley kayud nambebleyan mi e kad-an ni Tabernacle APU DIOS. Nem et eleg yu ngehayan hi APU DIOS et kami mailegat di ngehay yun yu nengapyaan ni hakey mewan ni altar. Hakey ni ebuh hu altar nan APU DIOS. <sup>20</sup> Kaw liniwwan yu hu nanggehayan Akan e u-ungngan Serah et al-en tudda etan ngunut ni bagin APU DIOS? Beken ni ebuh hi Akan ni netey gapuh nunman ni nanliwatan tu. Emin hu helag Israel ey nekastigu tep ya humman ni neipahding."

<sup>21</sup> Hinumang idan helag Reuben, helag Gad et ya magedwah ni helag Manasseh e kanday, <sup>22</sup> "Hi APU DIOS e et-eteng ni kabaelan tu hu makulug ni Dios! Hi-gatu tistigu mi! Tep inamta tu hedin ngehay mi winu beken hu gaputun nemehwatan mi eyan pan-appitan. Hedin eleg mi pannenneng hu mika pandeyyaw ni hi-gatu tep manghay kami, anin entan dakemi ihwang nunyan aggew. <sup>23</sup> Hedin eleg mi u-unnuden hi APU DIOS et mengapya kamin hin-appil ni pan-appitan min animal ni kagihheba winu pan-appitan min pagey niya kahemmula, anin katteg ni kastiguen dakemin hi-gatu.

<sup>24-25</sup> Ya gaputun nengapyaan mi eyan pan-appitan ey gapu tep kami kaumtakut e nungay edum alin aggew ey kan idallin helag yuddan helag miy 'Hipa ngu dama kelebbengan yun mandeyyaw nan APU DIOS ni Israel? Ambeken impambalin nan APU

Dios hu Wangwang e Jordan ni pampapappegan tayu ma-lat meappil kayu. Hi APU DIOS man Dios mi ngudedan ni helag Israel. Ey eleg kayu maibilang ni hi-gatu!' Et dammutun pesikked idallin helag yu hu helag min mandeyyaw nan APU DIOS.

<sup>26</sup> Humman gaputun nemehwatan min nunman ni pan-appitan e beken ni mi ussalen ni kagihheba winu yadda edum ni mei-appit ni kamengippeamleng nan Apu Dios. <sup>27</sup> Huyyalli mengippenemnem idan helag yu et yadda helag min edum ni aggew e anin ni hi-gami et wada kelebengan min mandeyyaw nan APU DIOS di Tabernacle tu ey dammutun man-appit kamin hi-gatudman kagihheba niya tayu kahemmula ma-lat eleg alin kan idan helag yun helag min edum ni aggew ey 'Endi lebbeng yun meibbillang nan APU DIOS.'

<sup>28</sup> Nem hedini ngullaw edum alin aggew ey henin nunman penghel idallin helag yun helag mi ey hummangen dalli e kanday 'Ang-ang yu eya kinapyaddalan a-ammed mi e nan-inggeh ni altar APU DIOS. Huyyan kinapya mi ey beken ni pan-appitan ni kagihheba winu kahemmula, nem huyya ey mengippenemnem idallin helag yu et ya helag mi e tuu daitsun emin APU DIOS.' <sup>29</sup> Eleg mabalin ni mi ngenghayen hi APU DIOS winu mi issiked ni mengu-unnud ni hi-gatu gapuh eyan binehwa min pan-appitan ey eleg mabalin ni kami man-appit ni kagihheba ya pagey winu kahemmula eyad binehwa mi. Eleg mewan mabalin ni kami mengapyan hakey ni pan-appitan et mi kadwaan hu pan-appitan nan APU DIOS di hinanggan Tabernacle." <sup>30</sup> Kayyaggud hu nangngel di Pinehas et yadda edum tun kamengippangngulun helag Israel ni inhel idan aaggi dan helag Reuben, helag Gad et yadda kagedwah ni helag Manasseh <sup>31</sup> et kan Pinehas e u-ungngan Eleasar e padiy "Yan nunya ey inamta tayu law e daitsu kababbaddangan APU DIOS tep eleg kayu manliwat ni hi-gatu. Inhewang yudda helag Israel di pengastiguan APU DIOS ni hi-gada."

<sup>32</sup> Hini-yan Pinehas et yadda edum tun ap-apu hu Gilead et mambangngad idad Kanaan et ehelen daddan edum da hu meippanggep ni nanhuhummangan daddan helag Reuben, helag Gad et yadda kagedwah ni helag Manasseh. <sup>33</sup> Immamleng ida helag Israel ni nangngel ni inhel di Pinehas et dayawen da hi Apu Dios. Et endi law daka e-ehelan manggugubat ida ma-lat mebahbah hu nambebleyan idan edum dan helag Israel e helag Reuben, helag Gad et ya kagedwah ni helag Manasseh.

<sup>34</sup> Nginedanan idan helag Reuben et ya helag Gad hu kinapya dan pan-appitan ni "Tistigu" tep kanday "Huyya tistigu tayun emin e hi APU DIOS e Dios tayu dama."

## 23

### *Ya tugun Joshua idan helag Israel*

<sup>1</sup> Nelabah dakel ni toon ni nanha-adan idan helag Israel di Kanaan ey impelinggep APU DIOS ida et endi law impahding ni buhul dan hi-gada. Neka-a-amma law hi Joshua ni nunman. <sup>2</sup> Impaeyag tun emin ida helag Israel, yadda kamengippangngulun hi-gada, yadda aap-apu da, yadda huwet da niyadda opisyal da et maemung ida et kantun hi-gaday "Neka-amma-ak law. <sup>3</sup> Inang-ang yun emin hu impahding APU DIOS e Dios tayu idan tutu-u eyad kebbebley gapuh ni hi-gatsu. Ey amta yu e hi-gatu nekihenanggaddan buhul tayu. <sup>4</sup> Inga-peng kun hi-gayun emin ida bebley ni sinekup tayu meippalpu Wangwang e Jordan ingganah di Baybay e Mediterranean di appit ni kakelinnugin aggew anin idan bebley ni eleg tayu pay ni sakupen ma-lat pambebleyan yu. <sup>5</sup> Et yan lawwan yullidman ey nanna-ud ni pandegyunen idallin APU DIOS hu nampambebley diman et hi-gayu maihullul ni hi-gada tep insapatah tu dedan lan nunman e idawat tun hi-gayudda humman ni bebley.

<sup>6</sup> Et humman hu, mahapul ni pekedhel yu nemnem yu! Ang-ang yu et peka-u-unnuden yun emin hu intudek Moses ni Tugun APU DIOS. Entan tu iwwalleng anin ni hakey idan nunman ni Tugun. <sup>7</sup> Entan pekidagdagyum idan tutu-un natdaan eyad nambebleyan tayu. Entan tu enehheehhel hu ngadan ni dios da. Ey entan tu isapatah di ngadan da winu yu deyyawen ida humman ni dios da. <sup>8</sup> Pannananeng yu hu yuka pengu-unud nan APU DIOS henin impenahding yun nunman ingganah nunya.

<sup>9</sup> Hi-gayu ey amta yu e inapput APU DIOS ida buhul tayu anin idan nambebley di et-eteng ni bebley e et-eteng ni kabaelan da. Ey ingganah nunya ey endin hi-gada hu nengapput ni hi-gatsu. <sup>10</sup> Anin ni hipan hi-gayu et kabaelan tun pebsik hu hanlibun buhul tayu gapuh ni baddang APU DIOS, tep humman dedan la insapatah tun pehding tu. <sup>11</sup> Et humman hu, peka-ang-ang yu et pannananeng yu impeminhed yun APU DIOS e Dios tayu.

<sup>12</sup> Nem hedini eleg yu pannenneng hu impeminhed yun hi-gatu et makiepu kayu ey makidagyum kayudda eyan tutu-un natdaan di nambebleyan yu <sup>13</sup> ey makulug ni eleg dakey baddangan AP-APU e Dios tayu et eleg tu pebsik ida tutu-udman idan bebley ni



pekgiggubbatan yun hi-gada. Et panhelheltap dakeyulli kumedek e heni dakeyu kinna ey heni dakeyu kahenneplita winu henidda hebit di mata yu ingganah ni me-puh kayu et meendi kayu eyad kayyaggud ni bebley ni indawat ni AP-APU e Dios tayun hi-gatsu.

<sup>14</sup> Hedin hi-gak man amtak e eleg mebayyag ey hi-yanen dakeyu. Nem heninnuy hu e-helen kun hi-gayu. Emin kayu ey inamta yud puhu yu ey nemnem yu e impahding AP-APU e Dios tayun emin hu panyaggudan tayun insapatah tu lan nunman. Anin hakey et endi eleg tu ipahding. <sup>15</sup> Nem nanna-ud daman kastiguen dakeyu hedin eleg yu u-unnuda tugun tu ingganah endi metdaan eyad kayyaggud ni bebley ni indawat tun hi-gayu. <sup>16</sup> Hedin eleg yu pannenneng ni mengu-unnud ni tugun tu. Ey hedin mansilbi kayu ey daydayawen yu hin-appil ni dios ey umbunget ni hi-gayu et endien dakeyu eyad kayyaggud ni bebley ni indawat tun hi-gayu."

## 24

<sup>1</sup> Impaeyag mewan Joshua idan emin hu helag Israel di Sekem, yadda kamengipap-pangngulun hi-gada, yadda aap-apu da, yadda huwet da niyadda opisyal da et maemung idad hinanggan APU Dios.

<sup>2</sup> Kan Joshua ni hi-gaday "Heninnuy hu inhel nan APU DIOS e Dios Israel: 'Yan nunman ey nambebley ida aammed yud ba-hil ni Wangwang e Euphrates ey dinaydayaw da hin-appil ni dios. Ya hakey idan nunman ida aammed yu ey hi Terah e amad Abraham nan Nahor. <sup>3</sup> Entanni et awiten ku hi Abraham e ammed yun nalpudman di ba-hil ni Wangwang e Euphrates et ipenguluk di Kanaan et pedakkel ku helag tu. Winedak hi Isaac e u-ungnga tu <sup>4</sup> et mahlag hi Isaac et di Jacob nan Esau. Indawat ku hu Edom ni beltaan Esau nem hi Jacob e ammed yu et yadda u-ungnga tu ey limmaw idad Egypt.

<sup>5</sup> Nebayag et wadaen kud Moses nan Aaron e bineal kun limmaw di Egypt et panheltap kudda tutu-udman ni nemahhig ni ligat. Et han ku ipenguludda a-ammed yu et hi-yanen da Egypt. <sup>6</sup> Nem yan wadaddad Madlang ni Baybay ey pindug idan iEgypt e nangkalesa ida ey nantakkay idad kebayyu. <sup>7</sup> Nampehemmehemmek idan hi-gak et paelik hu engeenget di nambattanan daddan iEgypt et anuden kudda humman ni iEgypt di baybay. Yadda a-ammed yu et yadda edum ni hi-gayun nunya ey neka-ang-ang yu hu impahding ku. Impalaw dakeyud eleg mebebleyi et manha-ad kayudman ni nebayag.

<sup>8</sup> Entanni et i-li dakeyud bebley idan Amorite di Jordan di appit ni kasimminil aggew. Nekigubat ida humman ni Amorite ni hi-gayu, nem impengapput dakeyun hi-gak et pilihan yu bebley da. Tep kayu kamengelli ey binahbah kudda dedan. <sup>9</sup> Entanni mewan ey nekigubat ni hi-gayu etan u-ungangan Sippor e hi Balak e patul di Moab et ehelen tun Balaam e u-ungangan Beor e iddutan dakeyu. <sup>10</sup> Nem eggak hanguden ni dingngel hi Balaam et binendisyonan dakeyu et ihwang dakeyud lawah ni pehding Balak ni hi-gayu.

<sup>11</sup> Nan-agwat kayud Jordan et umli kayud Jericho ey nekigubat ni hi-gayu hu iJericho e henin impahding idan Amorite, Perisite, Kanaanite, Hittite, Girgashite, Hibite et yadda Jebusite, nem impengapput dakeyun hi-gak. <sup>12</sup> Kayu dedan kamengilli ey impatekut kudda et bumsik ida etan dewwan patul ni Amorite. Beken ni ya ispadah yu ey pana yu hu gaputun nengapputan yu. <sup>13</sup> Indawat kun hi-gayu hu eleg yu pan-atuan ey beken ni hi-gayu hu nengapya. Yan nunya ey nambebley kayudtan ey yuka kenna hu eleg yu itnem henin grapes ey olibah.' "

### *Ya nanggillig ni tugun Joshua*

<sup>14</sup> Kan mewan Joshua idan edum tun helag Israel ey "Daydayaw yu ey peka-u-unnud yu hi APU DIOS, niya pansilbi kayun hi-gatun ebuh. Iwalleng yudda hu beken ni makulug ni dios ni dinaydayaw ida lan aammed yun nunman eman ni kawedda dad ba-hil ni Wangwang e Euphrates niyad Egypt. <sup>15</sup> Nem hedin kayu kamanhelindewan mengikkahhakey nan APU DIOS ni pandeyyaw yu, winu yuka pekeddudkul ni daydayawen ida dios ni dinaydayaw idan aammed yun nunman winu yadda dios ni kadaydayawaddan Amorite e kan bebley eyan nambebleyan tayun nunya ey pakannemnem yu ma-lat pilien yun nunyan aggew hedin hipa pinhed yun deyyawen. Tep hedin ngun hi-gak et ya pamilyah ku ey hi APU DIOS hu pansilbian mi."

<sup>16</sup> Hinumang idan tutu-u ey kanday "Anin ni hi-gami et hi APU DIOS ni ebuh hu deyyawen mi tep <sup>17</sup> hi-gatu e AP-APU hu Dios ni nangkal idan a-ammed tayud Egypt ni neihbutan dadman. Hakey pay ey inang-ang midda hu kamengippetngan impahding tu ey binenaddangan daitsud emin idad bebley ni linallawwan tayu ey linabhan tayu. <sup>18</sup> Ya mewan etan ni tayu kapengellii eyad bebley tayu ey impabsik tudda Amorite ni nambebley di deya. Et humman hu hi APU DIOS hu pansilbian mi dama tep hi-gatun ebuh hu Dios tayu."

<sup>19</sup> Entanni ey kan Joshua ni hi-gaday “Kaw kabaelan yu makkaw ni pannenneng hu yuka pengu-unnud nan APU DIOS? Hi-gatu ey kayyaggud ni peteg. Ey eleg tu ebbuluta hedin wada edum ni dios ni deyyawen yu ey eleg tu liwwana hu ngehay yu niya liwat yu. <sup>20</sup> Hedin iwwalleng yu et ya hin-appil ni dios hu deyyawen yu ey peelli tu kastigu yu ma-lat mebahbah kayu et meendi kayu anin ni dakeyu la kapekahnekan nunman.”

<sup>21</sup> Nem kan idan tutu-u ey “Eleg mi iwwalleng, tep hi-gatu hu DIOS ni deyyawen mi niya u-unnuden mi.”

<sup>22</sup> Et kan Joshua ni hi-gaday “Nemnemnem yu huttan ni inhel yu. Hi-gayu mismu hu nanghel ni hi APU DIOS hu u-unnuden yu.”

<sup>23</sup> Et kan Joshua ni hi-gaday “Hedin hannitan ey mahapul ni iwwalleng yudda beken ni makulug ni dios ni yuka daydayawa, et isapatah yu e AP-APU e Dios ni Israel ni ebuh hu daydayawen yu.”

<sup>24</sup> Kan mewan idan tutu-un humang dan Joshua ey “Em, ya AP-APU e Dios tayu hu deyyawen mi ey u-unnuden mi tugun tu.”

<sup>25</sup> Et yan nunman ni aggew di Sekem e kad-an da, ey intudek Joshua hu inhumangan da et idwat tun hi-gada hu edum ni tugun ni u-unnuden da. <sup>26</sup> Impakitudek Joshua ida huyyan tugun di libluh ni neitudekan ni Tugun. Ey immalan et-eteng ni batu et iha-ad tu etan di hengge ni keyew ni oak ni neihnup di pan-appitan nan APU DIOS.

<sup>27</sup> Kantuddan emin etan ni tutu-uy “Huyyan batu hu penginnemneman tayuddan emin ni inhel APU DIOS et yadda inhumangan tayu. Huyya tistigu tayu e eleg tayu iwwalleng hi Apu Dios.” <sup>28</sup> Negibbuh humman et paenamut Joshua ida tutu-ud nambebleyan da.

#### *Ya neteyyan Joshua*

<sup>29</sup> Entanni ey netey hi Joshua e bega-en APU DIOS e u-unggan Nun eman ni hanggatut et hampulu toon tu. <sup>30</sup> Ingkulung dad etan di puyek ni bineltan tud Timnat Serah di duntuduntug di Epraim di Duntug e Gaas di appit ni north. <sup>31</sup> Yan eman ni ketaggun Joshua ey hi APU DIOS hu dinaydayaw idan helag Israel et anin ni neteyyan tu ey nanengtun hi Apu Dios hu dinaydayaw da tep wadadda edum tun aap-apun nenang-ang idan panyaggudan dan impenahding APU DIOS.

<sup>32</sup> Ya etan genit Joseph ni inlapu dad Egypt ey ingkulung da damad Sekem di puyek ni gintang Jacob ni hanggatut ni palatah ni silver idan lalakkin u-unggan Hamor e hi aman Sekem. Humman ni puyek hu bineltan idan helag Joseph.

<sup>33</sup> Netey hi Eleasar e u-unggan Aaron et ikulung dad Gibeah e bebley di duntuduntug di Epraim. Humman ni puyek hu bineltan ni u-ungga tu e hi Pinehas.

## Judges

*Ya meippanggep nunyan libluh e Judges*

Huyyan libluh hu mengippeamta e eleg peka-u-unnuden idan helag Israel hu intugun nan APU DIOS ni hi-gadan mahapul ni petteyen dan emin hu nambebley di Kanaan niya hi-gatun ebuh hu daydayawen da niya pansilbian da. Nem nei-dum ida kumedek idan iKanaan et daydayawen da dios idan nunman ni nambebley diman. Hedin impahding idan helag Israel huyya ni in-abulut APU DIOS idan iKanaan ni mengubbat ni hi-gada ni inapput dadda.

Hedin neapput ida et ida kamanhelheltap, man ida kamantuttuyun eleg da pengu-unnudan nan APU DIOS ni nampehemhemmek idan hi-gatu ma-lat ihwang tuddad buhul da. Hedin hinumang APU DIOS hu dasal da, ni pinutuk tu hakey ni edum dan mengippangngulun hi-gada niya mambalin ni huwet da. Et humman ni huwet da hu kamengippangngulun hi-gadan mengubbat ni buhul dan kamengippehelheltap ni hi-gada. Et hedin nekigubat ida, man daka apputadda buhul da et ida kameihwang.

Nem hedin netey etan kamengippangngulun hi-gada, liniwwan ida mewan ni helag Israel hi APU DIOS ni nei-dum idaddan iKanaan ni mansilbin dios da. E-eggel ni neipahding hu henin nunya. Pinutuk nan APU DIOS hu hampulut epat ni nanhuluhulul ni nengippangngulun hi-gada niya nengihwang ni hi-gadad buhul da ni nunyan emin ni toon.

Endi hu patul ni nunyan tsimpuh ni nan-ap-apun hi-gadan helag Israel. Ey gapu tep eleg da pinhed ni u-unnuden hi APU DIOS ey wada hakkeyey impahding tu hu kantun kayyaggud di tuka pannemnem. (17:6)

*Ya neitudek eyad libluh:*

1. Nginhay idan helag Israel hi APU DIOS niya eleg da pinhed ni u-unnuden. (chapters 1:1-3:6)
2. Impangulun Otniel ida helag Israel di gubat et pappegen da nan-ap-apuan idan iAram ni hi-gada. (chapter 3:7-11)
3. Impangulun Ehud ida helag Israel di gubat et pappegen da nan-ap-apuan idan iMoab ni hi-gada. (chapter 3:12-30)
4. Impangulun Samgar ida helag Israel et ihwang tudda. (chapter 3:31)
5. Impangulud Deborah nan Barak ida helag Israel di gubat, et pappegen da nan-ap-apuan idan iKanaan ni hi-gada. (chapters 4-5)
6. Impangulun Gideon ida helag Israel di gubat et pappegen da nan-ap-apuan idan iMidian ni hi-gada. (chapters 6-8)
7. Ya nan-ap-apuan nan Abimelek, hi Tola, hi Jair, hi Jeptah, hi Ibsan, hi Elon et hi Abdon. (chapters 9-12)
8. Ya nengapputan nan Samson idan iPilistia. (chapters 13-16)
9. Ya nanggehayan idan edum ni helag Israel nan APU DIOS et dayawen da dios ni kinapyan tuu. (chapters 17-18)
10. Ya nengubatan idan edum ni helag Israel idan helag Benjamin. (chapters 20-21)

*Ya nengubatan idan helag Israel idan natdaan ni iKanaan*

<sup>1</sup> Yan neteyyan Joshua ey kan idan helag Israel nan APU DIOS ey "Hipan hi-gami hu memengngulun mengubbat idan iKanaan?"

<sup>2</sup> Hinumang APU DIOS e kantuy "Ya helag Judah hu memengngulu. Peapput kun hi-gada hu nambebley di Kanaan et mambabley idadman."

<sup>3</sup> Kan idan helag Judah idan aaggi dan helag Simeon ey "Pakilaw kayun hi-gami etan di neitudun hi-gamin bebley et mambabaddang itsun mengubbat idan iKanaan et han dakeyu dama baddangi etan di neitudun hi-gayun pambebleyan yu."

<sup>4</sup> Et makibaddang ida helag Simeon di helag Judah ni an nengubat idan iKanaan et yadda Perisite et peapput APU DIOS idan hi-gada. Pintey da hampulun libun sindaluddan nunman ni buhul dad Besek. <sup>5</sup> Yadman hu nenammuan dan Adoni Besek e patul diman et makigubat idan hi-gatu. <sup>6</sup> Bimmesik hi Adoni Besek nem pindug da et depapen da et putulen da am-ama-an ni ngamay tu et ya heli tu. <sup>7</sup> Kan Adoni Besek ey "Yan nunman la ey impaputul ku am-ama-an ni ngamay niya am-ama-an ni heli idan nepitun patul, et kamemi-pi-dit ni kennen ni kame-gah di nakka pengngani. Yan nunya ey imbale Apu Dios humman ni impahding kun hi-gada." Inlaw dad Jerusalem hi Adoni Besek et matey diman.

*Ya nanggepan idan helag Judah ni Jerusalem niya Hebron*

<sup>8</sup> Ginubat idan helag Judah hu Jerusalem et piliwen da. Pintey dadda hu nambbebley diman et legaben da etan bebley. <sup>9</sup> Et da pay gubaten ida iKanaan ni nampambebley di duntug, yad Negeb, yad hengeg ni duntug niyaddad mamegan bebley di appit ni south. <sup>10</sup> Hinggep da mewan ida iKanaan e nambbebley di Hebron e Kiriath Arbah ngadan tun nunman et apputen dadda helag Seshai, yadda helag Ahiman niyadda helag Talmi ni nambbebley diman.

*Hinggep Othniel hu Debir*

<sup>11</sup> Yan nalpuan dadman ey limmaw ida helag Judah di Debir e ya ngadan tun nunman la ey Kiriath Sefer. <sup>12</sup> Entanni ey kan Kaleb ey "Iddawat ku hi Aksah e u-ungngak ni bii et ahwaen etan ni tuun menggep ni Kiriath Sepher." <sup>13</sup> Et hi Othniel e u-ungngan udidyan Kaleb e hi Kenas hu nanggep nunman ni bebley et hi-gatu nengiahwan Aksah.

<sup>14</sup> Nunman ni aggew ni pan-ahwaan da ey inhel Othniel nan Aksah e mambeggan ametun mei-dum ni payew ni beltanen tu. Limmaw hi Aksah nan ametu et kamenghep di kebayu tu ey kan ametun hi-gatuy "Hipa ibbagam?" <sup>15</sup> Kan Aksah ey "Edumim anhan hu pebeltan mun hi-gak tep eleg medennumi etan puyek di Negeb ni indawat mu. Idwasi muwak anhan ni puyek ni wada hebwak tu." Et idwat nan Kaleb ni hi-gatu hu hebwak di ahpat niyad ehpen.

*Ya nengenapputan idan helag Judah et ya helag Benjamin*

<sup>16</sup> Yan neni-yanan idan helag Judah ni Jericho ey nekilaw ida Kenite e helag lan nan aman ahwan Moses, et ida mekibebley idan iAmalek etan di eleg mebebleyin neihnap di Arad di Negeb. <sup>17</sup> Entanni ey ida nei-dum hu helag Judah idan helag Simeon, et da gubaten ida iKanaan ni nambbebley di Sephat, et apputen dadda et bahbahen da humman ni bebley. Nginedanan da humman ni bebley ni Hormah. <sup>18</sup> Sinekup da pay hu Gaza, ya Askalon, ya Ekron et yadda etan ekka-kut ni bebley di nanlinikweh. <sup>19</sup> Sinekup da pay duntuduntug ni bebley tep binaddangan nan APU DIOS ida. Nem eleg da degyunen etan ida nampambebley di nedeklan tep gumekek hu kalesah da. <sup>20</sup> Neidwat hu Hebron nan Kaleb tep humman dedan la hu inhel Moses nunman. Hi Kaleb hu nenegyun idan tellun u-ungngan Anak. <sup>21</sup> Nem yadda helag Benjamin ey eleg dadda degyunen hu Jebusite ni nambbebley di Jerusalem et ingganah nunya ey nekibebley idadman.

<sup>22</sup> Binaddangan daman APU DIOS ida hu helag Ephraim nan Manasseh et da gubaten hu Bethel. <sup>23</sup> Ya ngadan tun nunman lan nengitu-dakan dan an mansi-im ni nunman ni bebley ey Lus. <sup>24</sup> Yan nunman ey hina-kupan idan nunman ni an nansiim hu hakey ni lakin nalpullid etan di bebley et kandan hi-gatuy "Itudu tu dellanen da et lumaw ida helag Ephraim nan Manasseh et patyen dan emin hu nampambebley diman nem eleg da ilegat hu pamilyah etan ni lakin nengitudun dellanen da. <sup>26</sup> Entanni ey limmaw huyyan lakin nekibebley di bebley idan Hittite et mengapyan et-eteng ni bebley et ngadanan tun Lus, et humman ngadan tu ingganah nunya.

<sup>27</sup> Eleg degyunen idan helag Manasseh hu tuun nampambebley di Bet Shan, yad Taanak, yad Dor, yad Ibleam, yad Megiddo niyadda etan bebley di nanlinikweh, tep inhammad idan iKanaan ni nambbebley diman et eleg ida medegyun.

*Yadda etan tutu-un eleg degyunen idan helag Israel*

<sup>28</sup> Yan eman ni wada law kabaelan idan iIsrael ey pinilit dadda humman ni iKanaan ni manggunnun neligat ni ngunu, nem eleg da pea-allaw idadman ni bebley.

<sup>29</sup> Hanniman ida daman helag nan Ephraim e eleg dadda degyunen hu iKanaan ni nambbebley di Geser et mekibebley idan hi-gada.

<sup>30</sup> Anin ida daman helag Sebulun et eleg da degyunen ida iKanaan ni nambbebley di Kitron niya Nahalol, et mekibebley idan hi-gada nem pinilit daddan panggunnun neligat ni ngunu.

<sup>31</sup> Eleg dama handegyun idan helag Asher ida iKanaan ni nambbebley di Akko, yad Ahlab, yad Aksib, yad Helbah, yad Apek, yad Sidon niyad Rehob, <sup>32</sup> et gapu tep eleg dadda degyunen ey hi-gada daddakkel nambbebleyan da nem yadda helag Asher.

<sup>33</sup> Eleg dama degyunen idan helag Naphtali hu iKanaan ni nambbebley di Bet Semes niyad Bet Anat. Nekibebley idan hi-gada et pambalin daddan panggunngunnu da.

<sup>34</sup> Yadda helag Dan man nambbebley ida etan di duntuduntug tep kaikka-leg idan Amorite ni dayyuan dad nedeklan. <sup>35</sup> Yadda Amorite ey eleg ida medegyun tep inhammad dan nambbebley di Aijalon, yad Saalbim et yad Duntug e Heres nem yan eman ni et-eteng law kabaelan idan helag Ephraim et ya Manasseh ey pinilit dadda Amorite ni

manggunnu henin himbut. <sup>36</sup> Ya pappeg ni bebley idan Amorite ey meippalpu etan di Keltad ni Akrabbim ingganah melebbahan hu Sela.

## 2

*Ya meippanggep etan ni anghel APU DIOS di Bokim*

<sup>1</sup> Limmaw hu anghel APU DIOS di Bokim e nalpud Gilgal et kantuddan helag Israel ey "Ingal dakeyud Egypt et ipengulu dakeyu eyad puyek ni insapatah kuddan aammed yu. Yan nunman ey inhel ku e kangkuy 'Eggak liwwana hu nekitbalan kun hi-gayu, <sup>2</sup> hanniman daman hi-gayu e etan tu liwwan et eleg kayu makitebbalan idan nambebley di deya. Ey mahapal ni bahbahaen yudda daka pan-appisi.' Nem kele eleg yu u-unnuden humman ni inhel kun pehding yu. Kele yu kinehing hu intugun ku? <sup>3</sup> Gapun nunyan impahding yu ey e-helek ni hi-gayu e eggak pe-kal ida eya tutu-un nampambebley di deya et maielig idallin hebit ni hi-gayu ey meewwis kayullin mandeyyaw ni dios da e kamei-ellig tu bitun kekenaan yu." <sup>4</sup> Ginubbuh etan ni anghel APU DIOS ni inhel huyya ey ida kamampantet-ul hu helag Israel, <sup>5</sup> et ngadanan da humman ni bebley ni Bokim e ya keibbellinan tu ey 'kamannengngih'. Et man-appit idan APU DIOS diman.

*Ya neteyyan Joshua*

<sup>6</sup> Impaenamut Joshua ida tuu et wada hakey ey ida nambebley di neitudun pambebleyan da. <sup>7-9</sup> Hi Joshua e bega-en APU DIOS e u-unggan Nun ey netey eman ni hanggatut et hampulu toon tu. Neikulung di Timnat Serah e tawid tu etan di duntuduntug di Epraim di appit ni north di Duntug e Gaas. Yan nunman ni etaggun Joshua et yadda nangkea-amman eleg pay ni matey ni nenang-ang emin idan kayyaggud ni impahding APU DIOS ey inu-unnud idan helag Israel hi APU DIOS.

*Ya nengisikedan idan helag Israel ni menaydayaw nan APU DIOS*

<sup>10</sup> Netey idan emin hu katoonan Joshua et maihullul ida hu kaungaungan eleg mengamtan APU DIOS niyadda panyaggudan dan impenahding tu. <sup>11</sup> Et manliwat ida helag Israel tep impahding da eleg pinhed APU DIOS ni nandayawan da dios e hi Baal. <sup>12</sup> Inwalleng da hi APU DIOS e Dios ni kadaydayawan aammed dan nunman e nengihwang ni hi-gadad Egypt. Et dayawen da edum ni dios ni kadeyyawaddan tuun nampambebley diman et pabunget da hi APU DIOS. <sup>13</sup> Tep insiked dan mandeyyaw nan APU DIOS et yadda dios dan hi Baal ni hi Astoret hu pansilbian da. <sup>14</sup> Et gapuh ni bunget APU DIOS idan helag Israel ey in-abulut tun pan-ellan idan buhul da et yadda mangkatekew hu wadan hi-gada. Et peapput tuddan buhul dad nanlinikweh et endi law kabaelan dan mekihhanggan hi-gada. <sup>15</sup> Ey emin hedin ida nekigubat man ida kameapput, tep eleg baddangin APU DIOS ida tep humman dedan inhel tun hi-gadan pehding tu et humman hu anggehemmek idelaw.

<sup>16</sup> Entanni ey winedan APU DIOS hu huwet ni memaddang ni hi-gada et apputen dadda buhul da. <sup>17</sup> Nem eleg da u-unnuda hu huwet da et yadda etan edum ni dios hu nansilbian da niya dineyawa da. Beken ni heniddan a-ammed da e inu-unnud da hi APU DIOS, tep hedin hi-gada, ey anggegannuy inwalleng da hi-gatu. <sup>18</sup> Hedin wada pinutuk APU DIOS ni manhuwet ey tuka baddangi ingganah ni mettey ma-lat ihwang tu hu tutu-ud buhul da, tep kahehmekaddan APU DIOS di daka panhelheltapin kapehding ni buhul dan hi-gada. <sup>19</sup> Nem hedin netey etan huwet ey imbangngad ida mewan ni tutu-un mengippahding ni lawah e nema-ma hu daka pehpehding nem yadda la a-ammed da. Daka deyyawa edum ni dios niya ida kamansilbin hi-gada. Eleg da pinhed ni dedkugen hu lawah niya daka pannananeng ngehay da. <sup>20</sup> Et humman hu nemahhig bunget APU DIOS ni hi-gadan helag Israel e kantuy "Gapu tep eleg u-unnuden idan nunyan tutu-u hu nekitbalan ku lan aammed da ey <sup>21</sup> eggak degyunadda eya tutu-u eyad bebley ni eleg degyunen Joshua ey netey. <sup>22</sup> Tep ussalaen kuddan pematnak ni helag Israel et angangen ku hedin u-unnuden da-ak e henidda lan aammed da winu eleg." <sup>23</sup> Et humman hu nengiebulutan APU DIOS ni mannenneng ida etan nambebley diman, et eleg tu iebulut ni apputen Joshua idan emin et medegyun ida.

## 3

*Yadda etan natdaan ni tutu-ud Kanaan*

<sup>1</sup> Impannaneng APU DIOS dedan hu edum ni nambebley ma-lat pematna tuddan helag Israel ni eleg meniktam ni nekigubat di Kanaan, <sup>2</sup> niya ma-lat tuttuddan tuddan pehding dan mekiggubbat tep eleg da ni patnaan ni mekiggubbat. <sup>3</sup> Yadda eleg medegyun ey yadda etan liman patul ni iPilistia et yadda tutu-u da, emin ida iKanaan, yadda iSidon, yadda Hibite ni nambebley di duduntug di Lebanon neipalpu Baal

ingganah di keltad di Hamat. <sup>4</sup> Mukun nisi nannaneng ida huuyan tutu-u, ey ma-lat pematnan APU DIOS idan helag Israel hedini u-nnuden da Tugun tun intugun Moses idan aammed da. <sup>5</sup> Et makibebley idan iKanaan, yadda Hittite, yadda Amorite, yadda Perisite, yadda Hibite et yadda Jebusite. <sup>6</sup> Ey nekiepuddan hi-gada et dayawen da hu dios idan nunman ni nekiepuan da.

*Yadda huwet ni helag Israel*

<sup>7</sup> Nanliwat ida helag Israel ey inwalleng da hi APU DIOS et daydayawen da hu beken ni makulug ni dios e di Baal nan Asherah. <sup>8</sup> Et bumunget hi APU DIOS ni hi-gada et peapput tuddan nan Kushan Rishathaim e patul ni Mesopotamia et man-ap-apun hi-gadan walun toon. <sup>9</sup> Entanniy nampehemhemmek idan APU DIOS et putuken tu hi Otniel e u-unggan Kenas e udidyan Kaleb ni mengihwang ni hi-gada. <sup>10</sup> Wada hu Ispirituh APU DIOS ni hi-gatu e mambalin ni huwet ni mengipappanggulun helag Israel. Nekigubat ni patul ni Mesopotamia ey binaddangan APU DIOS et mengapput. <sup>11</sup> Neipalpun nunman ey wada linggep di bebley idan helag Israel ni na-pat ni toon ingganah ni neteyyan Otniel.

<sup>12</sup> Entanniy nanliwat ida mewan hu helag Israel nan APU DIOS et pambalin tu hi Eglon e patul di Moab ni man-ap-apun hi-gada. <sup>13</sup> Inewis Eglon ida Amorite niyadda Amalekite et baddangan dan nengubat idan helag Israel et piliwen da Jericho. <sup>14</sup> Et man-ap-apu hi Eglon ni hi-gadan hampulut walun toon.

<sup>15</sup> Entanni ey nampehemhemmek ida mewan hu helag Israel nan APU DIOS, et putuken tu hi Ehud e neiggid ni mengihwang ni hi-gada. Hi-gatu hu u-unggan Gera e helag Benjamin. Entanni ey intu-dak idan helag Israel ni mengillaw ni buwis dan Eglon e patul di Moab. <sup>16</sup> Nengapya hi Ehud ni ispadah e hakey et kagedwah ni piyeh hu kudukkey tu. Intakap tu humman di wannan ni ulpu tu et hanian tun balwasi tu. <sup>17</sup> Et lumaw e intabin tu etan buwis ni tu idawat nan Eglon e patul di Moab e mateban peteg ni tuu. <sup>18</sup> Negibbuh ni indawat Ehud etan buwis et paenamut tudda edum tun nangged idan nunman. <sup>19</sup> Dimmateng hi Ehud etan di kad-an idan tuttu-un batun neihnup di Gilgal ey nambanggad et kantun Eglon e patul ey "Wada pinhed kun peamtan hi-gam e patul nem ebuh kan penghelan ku."

Et iolden Eglon idan bega-en tu e um-i-ineng ida niya um-a-allaw ida. <sup>20</sup> Neihnup hi Ehud etan ni patul e kamanyuyyuddung etan di metengtengnin ni kuwaltuh di ahpate et kantuy "Wada pinhed APU DIOS ni peamtan hi-gam." An um-ehng hi Eglon ey <sup>21</sup> inuknut ni willin ngamay Ehud etan ispadah ni neitekap di wannan ni ulpu tu, et tewiken tu egeh nan Eglon e patul. <sup>22</sup> Himmalem ni peteg hu neitwikikan etan ni ispadah ey neli-muh etan palek tu e mehephepan ni taba ey himmawang di beneg tu. Et eleg law guyuden nan Ehud. <sup>23</sup> Inlekbun Ehud etan habyen et ialladdu tu et umhep, <sup>24</sup> et manglaw. Immalidda etan bega-en ni patul nem neilekbi hu habyen et kanda na-mu nem wadad kakhilyad bawang, <sup>25</sup> et hehhegeden da. Nem ayepaw ey eleg meukkat etan patul da et umladdan alladdu et alladduen da ey inang-ang da e netey etan patul di det-al.

<sup>26</sup> Yan nunman ni kapenehhegediddan bega-en etan ni patul ni pengibbeghulan tun lekbi ey indalan Ehud etan di kad-an idan tuttu-un batun dios da et bumsik di Seirah. <sup>27</sup> Dimmateng di duntuduntug ni bebley di Epraim et patul tu tangguyup malat peamta tuddan edum tun helag Israel e mandaddan idan mekiggubbat et ipengulu tudda. <sup>28</sup> Kantun hi-gaday "Kaiunud kayun hi-gak tep peapput APU DIOS ni hi-gatsu ida eya buhul tayun iMoab." Limmaw ida et hegepen da etan bebley ni kapan-agwatiddan iMoab di Wangwang e Jordan et endi iebulut dan nan-agwat diman. <sup>29</sup> Yan nunman ni aggew ey pintey da hu hampulun libun keka-ka-letan niya ketultuledan ni sindalud Moab e endin hekey hu bimmesik. <sup>30</sup> Et man-ap-apun nunman ni aggew hu helag Israel di Moab et luminggep hu bebley dan newalun toon.

<sup>31</sup> Neitu-nud hi Samgar e u-unggan Anat nan Ehud ni nanhuwet. Hi-gatu dama mengihwang ni Israel e pintey tu hu enem ni gatut ni iPilistia e inusal tu hu hulkuud ni kapan-ebbul ni baka.

## 4

*Hi Deborah et hi Barak*

<sup>1</sup> Netey hi Ehud ey nanliwat ida mewan hu helag Israel nan APU DIOS. <sup>2</sup> Et peapput nan APU DIOS idan etan ni patul di Kanaan e hi Jabin e nanha-ad di Hagar e bebley diman. Hi Sisera e nambebley di Haroshet Haggoyim hu ap-apuddan sindalu tu. <sup>3</sup> Heyam ni gatut ni kalesah ni gumek hu kaussalan Jabin ni mekiggubbat. Impanhelheltap tuddan

peteg hu helag Israel ni dewampulu toon et mampehemhemmek ida mewan nan APU DIOS.

<sup>4</sup> Hi Deborah e biin prophet e ahwan Lappidot hu huwet idan helag Israel ni nunman. <sup>5</sup> Hi-gatu kapengillawiddan tuud Israel ni diklamuh da, et ipenuh tu etan di hengeg ni kandan Palmah nan Deborah e nambattanan ni Ramah niya Bethel di duntuduntug ni bebley di Epraim. <sup>6</sup> Hakey ni aggew ey impaeyag tu hi Barak e u-ungngan Abinoam e nambebley di Kedes di Naptali et kantun hi-gatuy "In-olden nan APU DIOS e Dios ni Israel e kantuy 'Ikuyug mu hu hampulun libun sindalun helag Naptali nan Sebulun et ipengulum idad duntug di Tabor. <sup>7</sup> Teppangak ali hi Sisera e ap-apun sindalun Jabin e patul et i-li tudda kalesah tu niyadda sindalu tu et gubaten dakeyu etan di Wangwang e Kishon, nem baddangan dakeyun hi-gak et apputen yudda.' "

<sup>8</sup> Himmumang hi Barak ey kantuy "U-unnuden ku et umlawwak hedini meki-li kan hi-gak. Nem eleggak umlaw hedini eleg ka mekillaw."

<sup>9</sup> Kan Deborah ey "Mekillawwak. Nem gapu tep henin nuntan hu pinhed mu ey beken ni hi-gam hu mengeddani ni meiddeyyaw ni pengapputan tayu tep peapput nan APU DIOS hi Sisera di hakey ni bii." Et makilaw hi Deborah nan Barak di Kedes. <sup>10</sup> Ingkuyug Barak hu hampulun libun helag nan Sebulun et hi Naptali et ipengulu tuddad Kedes e nekilaw hi Deborah ni hi-gada.

<sup>11</sup> Wada hakey ni Kenite e hi Heber e hini-yan tudda edum tun Kenite e helag Hobab e agin ahwan Moses et mengapyan kampud neihnup di Kedes etan di kad-an ni keyew ni oak di Saananim.

<sup>12</sup> Yan nengamtaan Sisera e nanteyed hi Barak e u-ungngan Abinoam di Duntug e Tabor, <sup>13</sup> ey impaeyag tun emin hu sindalu tu et ya etan heyam ni gatut ni sindalu tun nampangkalesah ni wadad Haroshet Haggoyim et ipengulu tuddad Wangwang e Kishon.

<sup>14</sup> Yan nunman dama ey kan Deborah nan Barak ey "Pandaddan kayu. Hi APU DIOS hu mengippengngulun hi-gatuy et apputen yu hi Sisera nunyan aggew." Et dumayyud Barak et hampulun libun sindalu tud Duntug e Tabor. <sup>15</sup> Ginubat idan sindalun Barak hu sindaluddan Sisera ey impatekut APU DIOS hi Sisera niyadda sindalu tu anin ida etan sindalun nampangkalesah. Entanniy dimmep-a hi Sisera di kalesah tu et bumsik. <sup>16</sup> Nampedug di Barak ida etan nampangkalesah et yadda sindalun Sisera ingganah di Haroshet Haggoyim et patyen daddan emin et endi hakey ni natdaan.

<sup>17</sup> Hedin hi Sisera man bimmesik di kampun Jael e ahwan Heber e Kenite tep kayyaggud hu kapekiddagyumin pamilyah Heber nan hi Jabin e patul ni Hasor. <sup>18</sup> An dinamun Jael e ahwan Heber hi Sisera et kantuy "Hegeg ka e Apu, eyad kampu mi. Entan takut." Himmegep hi Sisera et likbutan Jael ni wanggal. <sup>19</sup> Kan Sisera nan Jael ey "Ala kalli anhan ni danum tep na-wewwak." Inukat Jael etan katat ni neiha-adan ni gatas et painuman tu et hantu mewan likbuti. <sup>20</sup> Kantun Jael ey "Ehneng ka eyad habyen ni kampu et hedini wada um-alin mengibbegga hedini wada tuudya, kammuy endi."

<sup>21</sup> Nem neuyeng hi Sisera tep neka-atu ey an inlan Jael hu paghek niya massilyo, et mambabbabbal ni limmaw di kad-an tu et ipa-pa tu hu paghek di pinigging ni ulu tu, et manhawwang lad puyek et matey. <sup>22</sup> Entanni ey immali hi Barak ni menemmak nan Sisera. An dinamun Jael et kantuy "Ikay et nak itudu etan tuun muka panhemmaka." Himmegep hi Barak ey inang-ang tu hi Sisera e nepaghekan hu ulu tu e netey.

<sup>23</sup> Yan nunman ni aggew ey inang-ang idan helag Israel e impaapput APU DIOS hi Jabin e patul ni Kanaan ni hi-gada. <sup>24</sup> Neipalpun nunman ey kamangkewedda dama law hu kabalanan idan helag Israel et lektattuy daka apputad gubat hi Jabin e patul et entanniy binabhah da hu nempatulan tu.

## 5

### *Ya a-appeh di Deborah nan Barak*

<sup>1</sup> In-a-appeh di Deborah nan Barak e u-ungngan Abinoam huyyan a-appeh ni nunman ni aggew:

<sup>2</sup> "Hi APU DIOS hu medeyyaw! Tep timmuled ida helag Israel ni mekiggubbat. <sup>3</sup> Dengel yu e papatul ey hi-gayun aap-apu tep ia-appihak hu APU DIOS e Dios ni Israel ey mangganga-ak ni pandeyyaw kun hi-gatu. <sup>4</sup> APU DIOS, yan neni-yanam ni Seir et labham hu Edom ey nanyegyeg eyad puyek ey inggah ni kulput di kabunyan hu udan. <sup>5</sup> Ey nanyegyeg ida duntug eman ni immallian mu, APU DIOS. Anin etan ni Duntug e Sinai e kad-an APU DIOS e Dios ni Israel ey nanyegyeg!

<sup>6</sup> Yan ketaggud Samgar e u-ungngan Anat et hi Jael ey kaillikweh ni tuu e eleg da iddalan di keltad! <sup>7</sup> Hahhakkey hu tuun natdaan di Israel ingganah eman ni wada-ak e hi Deborah e kamei-ellig ni inan iIsrael. <sup>8</sup> Ya nenaydayawan idan helag Israel ni edum ni

dios ey ginubat dadda. Ey endi anin hakey ew ngun etan idan na-pat ni libun sindalu dan nengiehneng ni bebley da. <sup>9</sup> Et-eteng amleng ku eyaddan ap-apud Israel et yadda etan kamengu-unnud. Hi APU DIOS hu medeeyyaw. <sup>10</sup> Hi-gayun nantakkay di kakkayyaggud ni kebayyu, ey yimmudung di kayyagud ni depen tu, dengel yu! Ey hi-gayun mahapul ni mandellan di keltad, <sup>11</sup> ey dengel yudda eya kaman-a-appeh di kad-an ni ahhullan. Daka i-ena-appeh hu nengapputan APU DIOS niyadda sindalu tun helag Israel.

Entanniy limmaw ida tuun APU DIOS di heggeppan di bebley da. <sup>12</sup> 'Inah ka, Deborah! Ipengulum et man-a-apeh itsu. Ey hi-gam Barak e u-unggan Abinoam, ilaw mudda hu ingkalebut mu.' <sup>13</sup> Yadda natdaan ni tuun APU DIOS ey nandayyuddad Duntug e Tabor ni an mekiggubbat idan nangka-let ni sindalu. <sup>14</sup> Nalpuddad Epraim e bebley ida la nin Amalekite, neitu-nud ida dama helag Benjamin. Yadda helag Makir hu nengipengulun hi-gada ey yadda helag Sebulun hu ap-apu da. <sup>15</sup> Yadda dama helag Issakar ey nekilaw idan Deborah nan Barak ni an nekigubat e neiunnud idan hi-gatud nedayyukung. Nem yadda helag Reuben ey ida kamandewadewa. <sup>16</sup> Kele kayu nanha-ad di bebley yu di kad-an idan kalneroh yu? Kaw ma-lat deddengngelen yu pengeyyagan idan kamampattul ni kalneroh da? Em, ida kamandewadewa helag Reuben. <sup>17</sup> Yadda dama helag Gad ey nannaneng idad appit ni kasimmilin aggew di Jordan et yadda helag Dan ey nannaneng idad bebley dad neihnap di kadekkalin bapor. Yadda helag Asher ey nannaneng idad bebley dad gilig ni baybay. <sup>18</sup> Nem hedin yadda helag Sebulun nan Naptali ey inlamangan da biyag da et ida makigubat.

<sup>19</sup> Hedin yadda papatul ni Kanaan ey nekigubat idad Taanak e neihnap di hebwak ni Megiddo, nem endi inla dan silber niya hipan kakedanganun nunman ni bebley. <sup>20</sup> Ey yadda bittuwen di kabunyan ey ingeh tu nekigubat idan Sisera. <sup>21</sup> In-anud ni Wangwang e Kishon idan emin. Huyyan Wangwang e Kishon ey wada dedanggun nebayag. Kangkud annel kuy 'Entan takut, pekedhel mu nemnem mu!' <sup>22</sup> Heniddalli kidul hu dakel ni kebayyun Sisera ni kamemsik.

<sup>23</sup> Kan anghel APU DIOS ey 'Meiddutan ida tutu-ud Meros tep eleg ida lumaw ni nemaddang nan APU DIOS ni nekigubat idan neka-let ni sindalu.'

<sup>24</sup> Hi Jael e ahwan Heber e Kenite hu mebendisyonan ni et-eteng di emin ni biin kamanha-ad di kampu. <sup>25</sup> Nambagah Sisera ni danum nem ya gasat indawat tun inhad tud kayyaggud ni basuh e henin kaussaladdan patul. <sup>26</sup> Nem entanni ey inedang ni willi tu hu paghek ni kampu et alen ni wannan tu hu massilyu et ipa-pa tu etan paghek di ulun Sisera di pinigging ni ulu tu. <sup>27</sup> Et matey di kad-an ni heli tu.

<sup>28</sup> Ey immen hi inan Sisera e kaman-uh-uhdung di habhabyen. Tuka hehhegeda keibbangngadan tu. Kantuy 'Kele ayepaw ey endin kameibbangngad nan Sisera ni nanlugan di kalesah tu? Kele endi kamedngel ni kalesah?' <sup>29</sup> Himmumang etan nekannemnan ni biin bega-en tu ey tuka ippenidwa e kantuy <sup>30</sup> 'Immen ida namun daka panggedewa hu hipan kinedangan ni inla da etan di bebley ni ginubat da. Hanhakkey winu handedwan bii hu in-epeng idan sindalu, ey kakkayyaggud ni balwasin inlan Sisera niya kayyaggud alin babalwasin nebordaan hu iddawat tun hi-gak.'

<sup>31</sup> APU DIOS, emin et anhan hu buhul mu ey mettey idan henin neteyyan Sisera! Nem emin ida et hu kamenaydayaw ni hi-gam ey heniddan aggew e kaumhili hedin pimmetang."

Entanni ey wada law hu limminggep di bebley dan na-pat ni toon.

## 6

### *Hi Gideon*

<sup>1</sup> Entanni mewan ey nanliwat ida iIsrael nan APU DIOS et peapput tuddan iMidian et pan-ap-apu daddan pitun toon. <sup>2</sup> Ida kamanligligat hu iIsrael tep nemahhig hu kapehding idan iMidian ni hi-gada et bumsik idad duntug et ida mampantalud leyang. <sup>3</sup> Hedin negibbuh ni nampantanem ida helag Israel ey ngannganih idan man-enni, limmaw ida iMidian, yadda iAmalek et yadda etan nampambebley di appit ni kasimmilin aggew et dadda gubaten. <sup>4</sup> Ida kamangkampu etan di bebley ni nambahbah da hu edum ni intanem idan helag Israel ingganah lad Gaza di appit ni south. Daka pan-ala hu kalneroh da, baka da niya kebayyu da anin idan kennen. <sup>5</sup> Dakel idan peteg hu buhul dan nampantakkay di dakel ni kamel e eleg ida mebillang, henin kadinakkel ni dudun. Intabin da hu babakka da et manha-ad idad Israel ingganah endin hekey law hu kennen etan di bebley.

<sup>6</sup> Gapuh nunman ni impahding idan iMidian ey nebisil ida helag Israel, et mampehemhemmek idan APU DIOS ma-lat baddangan tudda. <sup>7</sup> Yan nunman ni nampehemhemmekan idan helag Israel nan APU DIOS <sup>8</sup> ey intu-dak tu hakey ni



prophet. Kantun hi-gada ey "Heninnuy hu inhel AP-APU e Dios ni Israel: 'Dakeyu inewit di Egypt di nanhimbutan yu. <sup>9</sup> Binaddangan dakeyu et ihwang dakeyu yuka panhelheltapid Egypt et yaddad edum ni buhul yu. Dinegyun kudda nampambebley eyad bebley yu et idwat kun hi-gayu huyyan bebley da. <sup>10</sup> Et kangkun hi-gayuy, Hi-gak hu AP-APU e Dios yu. Entan tu dayaw hu dios idan iAmorite e kan bebley eyan nambebleyan yun nunya. Nem eleg yuwak u-unnuden.' "

<sup>11</sup> Kaman-illik hi Gideon e u-ungngan Joas e kamantattallu etan di daka pangkekpalin grapes ma-lat eleg ang-angen idan iMidian ey immali hu angel APU DIOS diman Oprah et yumudung etan di keyew e kandan oak e intanem Joas e helag Abieser. <sup>12</sup> Nampeang-nan nan Gideon e kantuy "Hi-gam ni netuled ni mekiggubbat ey baddangan dakan APU DIOS!"

<sup>13</sup> Himmumang hi Gideon ey kantuy "Apu, hedin makulug ni dakemi kabaddangin APU DIOS, kele henin nunya kameippenahding ni hi-gami? Etnu mewan etan kan idan aammed min miracle ni impenahding APU DIOS ni nunman ey? Kanday 'Hi APU DIOS hu nengawit alin hi-gamid Egypt.' Ey kele yan nunya ey in-abulut tun panhelheltap dakemiddan iMidian?"

<sup>14</sup> Kan APU DIOS ni hi-gatuy "Iddawtan dakan elet mu ma-lat ihwang mudda edum mun Israel et meihwang idaddan iMidian. Hi-gak mengittu-dak ni hi-gam!"

<sup>15</sup> Kan Gideon ey "Apu Dios, inna-nuk ni mengihwang idan helag Israel ey ya pamilyah ku hu kekakkappuyan di helag Manasseh ey hi-gak hu endi bilang tud pamilyah mi."

<sup>16</sup> Nem hinumang APU DIOS e kantuy "Wada-ak ni ingganah ni memaddang ni hi-gam et apputen mudda iMidian e heni hakey ni tuu pekihhanggam."

<sup>17</sup> Kan Gideon mewan ey "Hedin makulug ni baddangan muwak, peang-ang mun hi-gak hu pengi-immatunak e makulug e hi APU DIOS immehel ni hi-gak. <sup>18</sup> Entan ni elaw anhan et nak ali alen hu i-appit kun hi-gam." Kan APU DIOS ey "Hehgeden daka."

<sup>19</sup> Impapuut Gideon ni limmaw di baley da et kelengen tu hu pakeetteng tun gelding et iheeng tu et mengapyan sinapay ni eleg mekamdugan ni mampelbag. Inha-ad tud basket etan detag et ya ihhibul di banga et ilaw tu etan ni anghel APU DIOS ni wadad hengge ni keyew e oak. <sup>20</sup> Kan etan ni anghel APU DIOS ey "Iha-ad mu eya detag et ya sinapay di batu et duyagan mun ihhibul." Inu-unnud Gideon et hanniman impahding tu. <sup>21</sup> Intedek etan ni anghel APU DIOS hu hulkud ni singnged tu etan di detag niyad sinapay, ey pinhakkeyey simmehel et giheben tu etan detag et ya sinapay. Endi maptek ey ettukaw etan anghel APU DIOS.

<sup>22</sup> Humman nengamtaan tu e anghel APU DIOS etan nekiungbal tu et tumekut e kantuy "Keta-ta-geyyan ni AP-APU, inang-ang ku angh ni angel mu!"

<sup>23</sup> Nem kan APU DIOS ni hi-gatuy ey "Umlinggep ka kaya. Entan takut. Eleg ka mettey."

<sup>24</sup> Nengappya hi Gideon ni pan-appitan nan APU DIOS et ngadanan tun 'Hi APU DIOS hu kakelpuin linggep.' Nanengtun nunyan wadad Oprah humman ni pan-appitan e puyek idan helag Abieser.

<sup>25</sup> Nunman ni hileng ey kan APU DIOS nan Gideon ey "Mu ala etan meikkadwan kekakkayyaggudan ni bulug ni bakan amam e pitu toon tu. Bahbah mu hu kapan-appisin amam nan Baal ey anin etan tukud ni daka penginnemnemni dios da e hi Asherah. <sup>26</sup> Et mengappya kan nehammad ey neiyayyaggud ni pan-appitan yun hi-gak e AP-APU e Dios yud ta-pew ni duntug. I-appit mun kagihheba humman ni baka. Usal mun penunggu humman ni tukud dan daka penginnemnemni Asherah." <sup>27</sup> Ineyagan Gideon hu hampulun bega-en tu et ipahding da hu inhel APU DIOS ni pehding tu. Impahding dan hileng tep kaumtakut hi Gideon ni pengamtaan idan edum ni tuun wadad baley ametu niyadda bimbebley.

<sup>28</sup> Nawa-wan nunman ey inang-ang idan tutu-u e nebahbah etan daka pan-appisin Baal niya etan neitu-bek ni tukud ni daka penginnemnemni Asherah niya inang-ang da e wada neiappit ni bulug ni baka etan di pakekappyan pan-appitan. <sup>29</sup> Kan idan tuuy "Hipa nengipahding nunya?" Da minenahmahan ey neamtaan da e hi Gideon e u-ungngan Joas hu nengipahding. <sup>30</sup> Et kandan Joas ey "Ayagim etan u-ungngam di deya tep mahapul ni mettey tep tu binahbah etan pan-appitan nan Baal et ya etan kapenginnemnemni Asherah."

<sup>31</sup> Nem intekuk Joas ni hi-gada e kantuy "Kele hi-gayu hu kamengi-ehneng nan Baal? Kele kayu mekihhangga gapuh ni hi-gatu? Emin ida kamekihhangga gapuh nan Baal ey mettey idan mangkewa-wa. Hedin makulug ni dios hi Baal, kenamung tu ngun mengi-ehneng ni annel tu, et hi-gatu ngu memahbah etan ni nemahbah ni altar tu."

<sup>32</sup> Neipalpun nunman ey nginadnan da hi Gideon ni "Jerub Baal". Hedin ya keibbellinan tu 'I-ehneng Baal hu annel tu.' Tep binahbah tu hu daka pan-appisin Baal.

<sup>33</sup> Entanni ey nan-edum hu sindalun Midian et ya Amalek et yadda etan nampam-bebley di appit ni kasimmilin aggew ni an mengubbat idan helag Israel. Inagwat da hu Wangwang e Jordan et mangkampuddad nandeklanan tud Jesreel. <sup>34</sup> Entanniy newada hu Ispirituh APU DIOS nan Gideon et patnul tu tangguyup e humman immatun ni pekiggubbatan idan tuu ey immalidda helag Abieser. <sup>35</sup> Nenu-dak mewan et paeyag tudda helag Manasseh, yadda helag Asher, yadda helag Sebulun et ya helag Naptali et mei-dum ida dama.

<sup>36</sup> Nekiungbal hi Gideon nan Apu Dios et kantuy "Hedin makulug etan inhel mun hi-gak e ussalen muwak ni mengihwang ni helag Israel, <sup>37</sup> yadhuy ali pengamtaak ni kakulugan tu. Ihha-ad ku eya mahdel ni luput ni nekapyad dudtud ni kalneroh eyad det-al ni mika pan-illikin hileng. Hedin mewa-wa ey ebuh eya luput ni na-bel ni delnu ey mamega hu puyek, humman pengamtaak e makulug ni hi-gak pinutuk mun ni mengi-ehneng eyaddan edum kun helag Israel." <sup>38</sup> Ey tu-wangun neipahding humman. Bimmangun hi Gideon ni newa-waan tu et peghetan tu etan luput ey napnu hu mahukung ni duyu.

<sup>39</sup> Nem kan mewan Gideon nan Apu Dios ey "Entan anhan bunget ni hi-gak et wada hu hakey law ni ebuh ni ibbagak. Pinhed kun yan nunya ey ya puyek hu me-bel nem manneng ni mamega eya luput." <sup>40</sup> Et yan nunman ni hileng ey impahding Apu Dios hu imbagan Gideon ni pehding tu. Nekamma-ganan etan luput ni newa-waan tu ey na-bel hu puyek ni delnu.

## 7

### *Ya nengapputan nan Gideon idan iMidian*

<sup>1</sup> Kamangkewa-wa ey nandaddan di Gideon et yadda sindalu tu et ida mangkampud hebwak di Harod. Nangkampudda dama hu iMidian di nandeklan e neihnup di duntug di Moreh di appit ni north.

<sup>2</sup> Kan APU DIOS nan Gideon ey "Dakel ni peteg hu sindalun ingkuyug mun nak ihhangaddan iMidian. Hedin umlaw idan emin ni mekiggubbat et mengapput ida, mampahhiya idalli e kanday hi-gada nengihwang ni annel da tep dakel ida. <sup>3</sup> Et humman hu, kammun hi-gada ey 'Hipan hi-gayu hu kaumtakut ni mekiggubbat? Heballi ew hi-yanan tu eya duntug e Gilead et umenamut.'" Inhel Gideon huuya ey immanemut ida dewampulu et dewwan libun sindalu tu et matdaan ida hu hampulun libu.

<sup>4</sup> Nem kan mewan APU DIOS nan Gideon ey "Dakel ida pay ni peteg. Ilaw muddad hebwak et hi-gak hu mampilli hedin hipan hi-gada hu mekillaw ey hipa eleg." <sup>5</sup> Inlaw Gideon idad hebwak ey kan APU DIOS ni hi-gatuy "Appil mudda hu tuum ni daka i-inum di tepayya da e henin kapenginnun ni ahhu. Ey appil mudda hu mandukkun ey intumuk da bungut dad danum et uminum ida." <sup>6</sup> Entanniy telunggatut ni ebuh hu imminum di tepayya da. Emin ida etan edum ey nandukkun ida et itumuk da bungut dan imminum ni danum. <sup>7</sup> Et kan APU DIOS nan Gideon ey "Yadda eya telunggatut ni ebuh ni sindalun hu nak ihhangan mengubbat idan iMidian et pengapput kudda et meihwang kayu. Ehel mudda etan ni edum et umenamut ida." <sup>8</sup> Et al-en Gideon ida usal ni neidwat ida etan di edum ni sindalu, anin idan tangguyup ni nekapyad ha-duk ni lakkitun kalneroh et paenamut tudda. Ebuh ida etan telunggatut ni nanha-ad. Yadda nangkampuddad iMidian ey nandeklan di ehpen ni nangkampuan di Gideon.

<sup>9</sup> Nunman ni hileng ey kan APU DIOS nan Gideon ey "Bangun ka et mandayyu kad kampuddan iMidian et mu gubaten ida tep peapput kudtan hi-gam. <sup>10</sup> Nem hedin umtakut kan mengubbat ni hi-gada, awit mu hi Purah e bega-en mu et kadwaan daka et dumayyu kayud kampuddan iMidian. <sup>11</sup> Dengel yu hu ung-ungbal da et umtuled kayun mengubbat ni hi-gada." Et lumaw di Gideon nan Purah di gilig ni kampuddan buhul da. <sup>12</sup> Yadda iMidian, yadda iAmalek et yadda nalpud eleg mebebleyi ey nangkampuddad nedeklan ey dakel ida e henidda dudun. Ey dakel pay kamel da henin kedakkel ni palnah di gilig ni baybay.

<sup>13</sup> Dimmateng hi Gideon etan di kampun buhul da ey dingngel tu hu hakey ni tuun tukapan-e-hela etan ni kadwa tu hu ini-innep tu. Kantuy "Ini-innep ku e wada kumanggu hu sinapay e neulin ali et meka-iptek eyad kampu tayun iMidian et tu-lien tu!"

<sup>14</sup> Kan etan ni kadwa tuy "Hakey ni ebuh hu keibbellinan nuntan. Baddangan APU DIOS hi Gideon e u-ungngan Joas et apputen daitsun iMidian et yadda etan umbaddang ni hi-gatsun mekiggubbat."

<sup>15</sup> Dingngel Gideon humman ni ini-innep nunman ni tuu et ya inhel etan ni kadwa tun keibbellinan tu ey nanyuung et mampesalamat nan APU DIOS. Nambanggad di

kampu da et kantuy “Bangun kayu tep baddangan daitson APU DIOS et apputen tayudda iMidian!”<sup>16</sup> Impantelu tudda etan telunggatut ni tuu tu et idwatan tuddan hanhakkey ni tangguyup et ya hanhakkey ni bewede e wada hinullat ni dilag.<sup>17</sup> Et kantun hi-gaday “Tang-ang yun hi-gak et hedin dimmatengngak di gilig ni kampu da ey u-unnud yu hu pehding ku.<sup>18</sup> Hedini impatnul idan edum ku hu tangguyup da, patnul yu daman wadad ba-hil ni kampu ey intekuk yu e kanyuy ‘Mekiggubbat itu et iehnung tayu hi APU DIOS et hi Gideon.’”

<sup>19</sup> Nelabah hu gawan hileng e yan nunman hu kapanhullulliddan guwalya ey dimmateng hi Gideon et yadda edum tud gilig ni kampuddan iMidian. Impatnul da hu tangguyup da et pehiken da etan ida bewede ni singnged da.<sup>20</sup> Inu-unnud ida etan ni dewwan grupuh hu impahding di Gideon. Singnged ni willin ngamay da hu dilag ey singnged ni wannan da hu tangguyup da. Ida kamantetekkkuk e kanday “Ussalen tayu ispadah tayun mekiggubbat et iehnung tayu hi APU DIOS et hi Gideon!”<sup>21</sup> Immehneng idan emin di pustuh dad nanlinikweh di kampuddan iMidian, et ang-ang-angen daddan simmakut e wada hakkeyey bimmesik ey ida kamantetekkkuk.<sup>22</sup> Yan nengipatnulan idan etan ni telunggatut ni sindalun Gideon ni tangguyup da ey sillak APU DIOS nemnem ida etan ni buhul da et mampapatey ida. Hedini yadda etan eleg matey man namsik idad Betsittah ingganah lad Sarethan et yad Abel Meholah e neihnup di Tabbat.

<sup>23</sup> Impaeyag Gideon ida helag Naptali, yadda helag Asher niyadda helag Manasseh et pedugen dadda bimmesik ni iMidian.<sup>24</sup> Nenu-dak ni an menghel idan iEpraim ni nambebley di duntug et kandan hi-gaday “Pandayyu kayu et tayudda gubaten hu iMidian. Panlehet kayud Wangwang e Jordan et yad kulukul di Betharah ma-lat eleg ida man-agwat.” Neamong ida helag Epraim et u-unnuden da humman ni inhel Gideon.<sup>25</sup> Dimpap da etan dewwan ap-apun sindaluddan iMidian e di Oreb nan Seeb. Pintey da hi Oreb etan di kandan Batun Oreb et patyen da dama hi Seeb etan di kandan Kapangkekpalin Seeb et ituluy dan nampamdug etan idan edum ni iMidian. Entanniy inlaw da hu ulun Oreb et hi Seeb nan Gideon di appit ni kasimmlin aggew di Jordan.

## 8

### *Ya pappeg tun neapputan idan iMidian*

<sup>1</sup> Entanniy kan idan iEpraim nan Gideon ey “Kele hanniman impahding mu e eleg dakemi ayagan ni yu nengubatan idan iMidian ni laputu?” Daka babballowa humman ni impahding Gideon et ida kamekittuttut ni hi-gatu.

<sup>2</sup> Nem kan Gideon ni hi-gaday “Kaw beken ni kedukdul ni peteg hu impahding yu nem ya impahding middan edum kun helag Abieser?”<sup>3</sup> Tep gapuh ni baddang APU DIOS ni hi-gayu ey pintey yudda hu ap-apun sindalun iMidian e di Oreb nan Seeb. Et humman hu kangkuy kedukdul hu impahding yu.” Dingngel da huayan impanghel Gideon ey na-kal hu bunget da.

<sup>4</sup> Entanni ey inagwat Gideon etan Wangwang e Jordan e ingkuyug tudda etan telunggatut ni sindalu tu et pampedugen dadda hu buhul da anin ni nemahhig law atu da.<sup>5</sup> Dimmateng idad Sukkot ey kan Gideon idan bimbebley diman ey “Idwasi yu anhan ida eya tuuk ni kenne da. Neka-atu ida ey mika pampepduga etan dewwan patul ni Midian e di Sebah nan Salmunna.”

<sup>6</sup> Nem kan idan ap-apun Sukkot ey “Kele mi iddawtan ida sindalum ni kenne da ey eleg da pay ni depapen di Sebah nan Salmunna?”

<sup>7</sup> Kan Gideon ni hi-gaday “Hedin dedpapen mid Sebah nan Salmunna gapuh ni baddang APU DIOS ey mambanggad kamilli et pambi-kien mi laman yu e ussalen mi hebit di eleg mebebley.”<sup>8</sup> Limmaw mewan hi Gideon di Penuel et mabagan kenne da ey heni daman inhumang idan tuud Sukkot hu inhumang da.<sup>9</sup> Et kan Gideon ni hi-gaday “Hedin megibbuh ni mengapputtak man mambanggaddak ali et bahbahen ku eya neita-gey ni yuka panguwalyai.”

<sup>10</sup> Wadan nunman di Sebah nan Salmunna et yadda sindalu dan hampulut liman libu di Karkor. Humman ida natdaan etan idan nan-aaddum ni sindaluddan nambebley di appit ni kasimmlin aggew tep netey ida hu hanggatut et dewampulun libun hi-gada.<sup>11</sup> Indalan di Gideon etan di dalan di appit ni kasimmlin aggew di Nobah et yad Jogbehah et eleg amtaddan sindalun iMidian ey dimmateng idan mengubbat ni hi-gada. Humman ni dalan hu kadellanaddan etan ni tuun endi ustuh ni bebley da.<sup>12</sup> Bimmesik ida etan dewwan patul ni iMidian e di Sebah nan Salmunna nem pingud di Gideon ida et depapen dadda et tumekut ida emin etan sindalu da et kabsik ida.

<sup>13</sup> Indalan di Gideon di dalan e Heres ni nambangngadan da. <sup>14</sup> Wada dinteng dadman ni kamenikken ni lakin iSukkot et depapen da et mahmahan da niya impaitudek dan hi-gatu hu ngadan idan nepitup pitun ap-apu niya opisyal di Sukkot. <sup>15</sup> Limmaw hi Gideon et kantun hi-gaday “Kaw hannemem yu la nakka pangkekdewin hi-gayun kennen idan tuuk ni neka-atu ey da-ak kaheghegnuda e kanyuy eleg yuwak idawsi ingganah ni dedpapen mid Sebah ni Salmunna? Adyadeh di Sebah nan Salmunna!” <sup>16</sup> Inla tudda hebit ni nalpud desert et panhelheltap tudda ap-apu niya opisyal idan iSukkot ma-lat pan-adlan da. <sup>17</sup> Limmaw mewan di Penuel et bahbahen tu etan eta-gey ni baley ni daka pangguwalyai et patyen tun emin hu lalakkin wadadman.

<sup>18</sup> Entanniy minahmahan nan Gideon di Sebah nan Salmunna e kantuy “Hipa ang-ang idan etan ni tuun pintey yud Tabor?”

Kandan hi-gatuy “Heniddan hi-gam e henidda u-ungngan patul.”

<sup>19</sup> Kan Gideon ey “Humman ida agik ni u-ungngan ina! Issapatuh ku e gullat ni eleg yudda patyen e eleg dakey dama petteya.” <sup>20</sup> Inhangga tu etan di pengulwan ni u-ungnga tun laki et kantuy “Patey mudda!” Nem eleg uknuten nan Jether hu ispadah tu tep u-ungnga pay ni ey kaumtakut.

<sup>21</sup> Kan di Sebah nan Salmunnah ey “Hi-gam pengipahding. Entan tu baal eya u-ungngan mengippahding ni lebbeng ni pehding ni nenemneman.” Et patyen idan Gideon et alen tudda neibanggal di kamel da.

<sup>22</sup> Entanni ey kan idan helag ni Israel ni hi-gatuy “Hi-gam law pan-ap-apu mi ey meihhullul idalli u-ungngam et yaddalli inap-apum tep hi-gam nengihwang ni hi-gamidnan iMidian.”

<sup>23</sup> Hinumang Gideon e kantuy “Eleg mabalin ni hi-gak winu ya u-ungngak hu man-ap-apun hi-gayu tep hi APU DIOS hu pan-ap-apu tayu. <sup>24</sup> Wadan ebuh hakey ni ibbagak. Idwasi yuwak ni hanhakkey ni betling ni inla yuddan buhul yu.” (Nampambetling idan balituk etan buhul dan helag Ismael.)

<sup>25</sup> Kan idan tuuy “Eteng amleng min mengidwat ni hi-gam.” Imbiklag da hakey ni andukkey ni balwasi et wada hakkeyey immidwat ni balituk ni betling ni inla daddan buhul da. <sup>26</sup> Limmaw di dewampulun kiloh hu bel-at idan indawat dan Gideon e eleg pay mei-dum etan ida edum ni gamgam henin banggal, yadda kakkayyaggud ni balwasiddan patul idan iMidian et yadda banggal ni kamel da. <sup>27</sup> Kinapyan Gideon ni ephod etan ida balituk et iha-ad tud Oprah e bebley tu. Nem entanni kumedek ey kadaydayawaddan helag Israel humman ni ephod et lektattuy anin hi Gideon et yadda pamilyah tu ey nambalin humman ni heni bitun naknaan da tep da law kadaydayawa dama.

<sup>28</sup> Hanneya neipahding ni nengapputan ni Israel ni Midian et eleg da law gubbatadda. Neipalpun nunman ey wada linggep di bebley idan helag Israel ni na-pat ni toon ingganah ni neteyyan Gideon.

#### *Ya neteyyan Gideon*

<sup>29</sup> Hi Gideon ey nambangngad di bebley tud Oprah et manha-ad diman. <sup>30</sup> Limmaw di nepitu hu u-ungnga tun laki tep dakel hu inahwa tu. <sup>31</sup> Wada pay hu hakey ni u-ungngatun laki etan di hakey ni imbilang tun ahwatun iSekem e nginedanan tun Abimelek. <sup>32</sup> Nea-amma hi Gideon e u-ungngan Joas et han matey et ikulung dad kulung ametud Oprah e bebley dan helag Abieser.

<sup>33</sup> Netey hi Gideon ey nanliwat ida mewan hu helag Israel et daydayawen da hi Baal. Nambalin dan dios hi Baal-berit, <sup>34</sup> et eleg da law deyyawa hi AP-APU e Dios dan nengihwang ni hi-gadad buhul da. <sup>35</sup> Eleg da pay peang-ang hu daka pampasalamat ni pamilyah nan Gideon ni nengipahdingan tun dakel ni panyaggudan dan helag Israel.

## 9

#### *Hi Abimelek e u-ungngan Gideon*

<sup>1</sup> Hakey aggew ey limmaw hi Abimelek e u-ungngan Gideon di Sekem ni an menang-ang idan agin inetu et kantun hi-gada et yadda edum ni agin inetu ey <sup>2</sup> “Ibega yuddan tutu-udya Sekem e kanyuy ‘Kaw pinhed da, man-ap-apun hi-gada etan ida nepitun lalakkin u-ungngan Gideon winu ya hakey ni ebuh? Niya nemnem yu e agi yuwak daman hi-gayu.’” <sup>3</sup> Ida nekihummangan humman ni agin inetu etan idad tutu-ud Sekem meipanggep nunman ni inhel Abimelek, ey nan-uunnud huhummangan da e hi-gatu pan-ap-apu da tep agi da. <sup>4</sup> Indawtan dan nepitun palatah ni silber e inla dad tempol nan Baal Berit, et penangdan tuddan endi silbi tun tuun nambalin ni sindalu tu et maiunud idan hi-gatu. <sup>5</sup> Impangulu tuddad bebley ametud Oprah, et awiten dadda etan nepitun lalakkin agi tu. Inlaw dadda etan di hakey ni batu et pateyen daddadman. Nem bimmesik hi Jotham e udidyen et an mantalu. <sup>6</sup> Entanniy neamung ida tutu-ud Sekem

di Betmillo etan di keyew e oak etan di takdul ni tukud ni batud Sekem et pambalin da hi Abimelek ni patul da.

<sup>7</sup> Dinggel Jotham humman ni impahding da et manteyed di ta-pew ni Duntug e Gerisim et itkuk tu e kantuy "Dengel yu, hi-gayun tutu-un nambebley di Sekem, hedim pinhed yun dedngelen dakeyun APU DIOS. <sup>8</sup> Hakey ni aggew ey ninemnem idan keyew ni mampillin patul da et kanda etan ni keyew ni olibah ey 'Hi-gam pampatul mi.' <sup>9</sup> Nem eleg tu tebalen tep kantuy 'Kaw nak issiked ni um-idwat ni lana e kameussal ni kapandeyyawiddan dios ey kaussaladdan tutu-u?'

<sup>10</sup> Minahmahan idan keyew dama etan ni fig e kanday 'Mampatul kan hi-gami?' <sup>11</sup> Nem eleg tu dama tebalen. Kantuy 'Endi inna-nuk ni mampatul ni hi-gayu tep eleg mabalin ni nak issiked ni umlameh ni kayyaggud niya malumi-ih ni mekkan.'

<sup>12</sup> Kan idan keyew etan ni wakal e grape ey 'Hi-gam pampatul mi.' <sup>13</sup> Nem kantuy 'Eleg mabalin ni hi-gak pampatul yu tep eggak pinhed ni issiked ni umlameh ni daka kapayaan meinnum ni kamampean-anlan dios et ya tuu.'

<sup>14</sup> Lektattuy kan law idan keyew etan ni hebit ey 'Hi-gam ew hu pampatul mi.' <sup>15</sup> Ey kan etan ni hebit ey 'Hedin makulug ni hi-gak hu pinhed yun pampatul yu, ikeyuy et manhidum kayun hi-gak. Hedin eleg yu, peukkat ku apuy etan di nahbitan ni pangak et malgab ida sedar di Lebanon.'

<sup>16-19</sup> Gullat ni kayyaggud hu nemnem yun nemutukan yun pampatul yu hi Abimelek e u-ungngan ama etan ni bega-en tu, um-amleng kayu et ni hi-gatu, henin hi-gatu e um-amleng et ni hi-gayu. Ey gullat ni kayyaggud impahding yu gapuh nan ama hi Gideon et hi-gamidann u-ungnga tu, linispituh yu et tep kalebbengan tu humman tep inlamngan tu biyag tun nekigubatan tuddan iMidian et ihwang dakeyu. Nem eleg tep nginhay yu et pateyen yudda nepitun lalakin u-ungnga tu etan di hakey ni batu. Et yan nunya ey hi-gatu e hi Abimelek law hu patul yud Sekem. <sup>20</sup> Et humman hu gapuh ni nunman ni lawah ni impahding yu ey kayyaggud et hedim man-imbababhah kayu e kamei-ellig ni meukkat hu apuy nan Abimelek, ma-lat magheb kayun tutu-ud Sekem et yad Betmillo. Ey meukkat et dama apuy ni hi-gayun tutu-ud Sekem et yad Betmillo et magiheh hi Abimelek." <sup>21</sup> Ginibbuh Jotham hu inhel tu et bumsik, et an mambebley di Beer tep kaumtakut nan agi tu hi Abimelek.

<sup>22</sup> Nan-ap-apu hi Abimelek di Israel ni tellun toon. <sup>23</sup> Entanniy kinapayan APU DIOS hu lawah ni kapannemnem idan tuun hi-gatu niya anin daman hi-gatu et nambalin ni anggebe-hel tudda tuu tu. Et huyya gaputun nginhay idan tuu hi Abimelek. <sup>24</sup> Mukun neipahding ida huyya ey ma-lat ibleh APU DIOS hu impahding Abimelek et yadda tutu-ud Sekem ni nemateyan dan nepitun lalakin u-ungngan Gideon. <sup>25</sup> Limmaw ida tutu-ud Sekem et da betaken hi Abimelek etan di duntuduntug ey daka piliwa da hu limmun hipan kamelebbah diman. Nem wada hu an nengidaddatteng ni nunyan nan Abimelek.

<sup>26</sup> Yan nunman ni tsimpuh ey wada hi Gaal e u-ungngan Ebed ni limmaw di Sekem, et an makibebley diman e ingkuyug tudda agi tu. Entanniy nekapya dinel idan tuun hi-gatu. <sup>27</sup> Nedatngan etan sinnoon ni Piyesah ni Ani ey neamung ida tuud kad-an ni tempol ni dios dad Sekem et manginum ida ey lawah hu ehel dan Abimelek. <sup>28</sup> Kapan-itkuk Gaal e kantuy "Kaw hipa hi Abimelek? Kele ni-man itu mansilbin hi-gatu? Kaw makulug ni helag Sekem humman ni tuu? Tam u-ungngan Gideon? Ey kaw beken hi Sebul hu opisyal tun kamengippaptek ni kameippenahding di tuka pan-ap-apui? Pansilbi itsun Hamor e hi-gatu ustuh ni nahlag nan Sekem. Kele itu mansilbin Abimelek? <sup>29</sup> Gullat ni hi-gak hu man-ap-apu man petteyeh hi Abimelek winu kangkuy hi-gatuy 'Amung mudda sindalum et manggubab itu!'"

<sup>30</sup> Dinggel nan Sebul e governor humman ni inhel Gaal ey nemahhig bunget tu. <sup>31</sup> Nenu-dak ni an mengidaddatteng nan Abimelek e wadad Arumah e kantuy "Immalid Gaal e u-ungngan Ebed niyadda agi tun an mekibebley di deya Sekem ey daka ipappangngulu tuun mangngenghay ni hi-gam. <sup>32</sup> Ali kayuddan sindalum ni hileng et kayu mantalud papayyew. <sup>33</sup> Hedin newa-wa et ka-ang-ang law dellanen man hinggep yu eya bebley. Et hedim meukkat hi Gaal et yadda tuu tun mekiggubbat ey mabalin ni pedhing yu hu pinhed yun ippahding ni hi-gada."

<sup>34</sup> Inu-unnud Abimelek et lumaw idadman ni hileng e impan-epat tun ginenedwa sindalu tu, et mataluddad nanlinikweh di Sekem. <sup>35</sup> Kaman-eh-ehngeng hi Gaal di ehed ni bebley ni neukatan idan sindalum Abimelek di nantaluwan da. <sup>36</sup> Inang-ang Gaal ida ey kantun Sebul ey "Ang-ang mu kedi, wadadda kamenayyun tuun nalpud duntug!"

Kan Sebul ey "Allinnew ni duntug ni heni tutu-u hu muka ang-ang-anga."

<sup>37</sup> Nem kan Gaal mewan ey "Eleg, tutu-udda humman ni kamenayyun nalpud duntug. Immen idalli pay iyallid keltad ni nalpud keyew e Oak ni Kaman-ennap."

<sup>38</sup> Et kan law nan Sebul ey “Ettu mewan etan hapit mun kammuy ‘Hipa ni-man hi Abimelek et daitu pambega-en ni hi-gatu?’ Hi-gada etan muka nengngehaya! Lakkay et mudda gubaten!” <sup>39</sup> Et ipengulun Gaal hu tutu-ud Sekem et da gubaten di Abimelek, <sup>40</sup> nem neapput ida et bumsik. Dakel hu nangketey ni sindalun iSekem e kepuppullay ida ingganah di eheb ni bebley. <sup>41</sup> Nanha-ad hi Abimelek di Arumah ey impa-kal nan Sebul hi Gaal et yadda aaggi tud Sekem.

<sup>42</sup> Nawa-wan nunman ey implanuh idan tutu-ud Sekem ni meukkat idan an mekiggubbat. Dingngel Abimelek humman ey <sup>43</sup> impantelu tun ginedwadda sindalu tu et ida manheged e nantaludda. Inang-ang di Abimelek niyadda sindalu tu e kamangkeukkat ida tuud Sekem di bebley ey neukat idad nantaluan da et gubaten dadda. <sup>44</sup> Et papuut di Abimelek et yadda sindalu tun limmaw ni mangguwalya etan di eheb ni Sekem. Yadda etan dewwan grupuh nunman ni sindalu ey dadda pintey etan ida tutu-ud a-allaw ni bebley. <sup>45</sup> Han-aggew hu nanggugubatan da et han hegepad Abimelek etan bebley et patyen dan emin ida bimbebley diman. Ey binabhah da etan bebley et panwahitan dan ahin.

<sup>46</sup> Dingngel idan tutu-un kamanha-ad etan di eta-gey ni baley ni kapangguwalyaid Sekem hu neipahding ey ida nantalud etan di nehammad ni tempol Baal Berit. <sup>47</sup> Wada nengipeamtan Abimelek ni nunman et ayagan tudda sindalu tu et ipengulu tuddadman ni Duntug e Salmon. <sup>48</sup> Inla tu wahay et bumengwah ni pangan keyew et pahnen tu. Et kantuddan sindalu tuy “Papuut yu et iu-unnud yud impahding ku.” <sup>49</sup> In-u-unnud idan sindalu tu et ipiggil da keyew etan di dingding ni tempol et legaben da. Et emin ida etan tuun wadadman e umlaw idan hanlibun lalaki niya bibi-i ey netey ida emin.

<sup>50</sup> Ginubat mewan di Abimelek hu Tebes et sakupen da. <sup>51</sup> Nem wada etan nehammad ni eta-gey ni baley ni daka pangguwalyaid gawwan nunman e bebley et ida mapnu tuudman ni nantalu. Inlebbi dan emin hu eheb et lumaw idad atep nunman ni eta-gey ni baley. <sup>52</sup> Inunud idan Abimelek nem tuka pan-iddaddan hu panlelgab tun nunman ni eta-gey ni baley. <sup>53</sup> ey wada etan biin nanggah alin batu et meka-iptek di ulun Abimelek et mekalliputan. <sup>54</sup> Kantu etan ni bega-en tuy “Uknut mu ispadah mu et patyen muwak et eleg ali panghel ni tuu ey ya hakey ni bii hu nematey ni hi-gak!” Inu-unnud etan ni bega-en tu et tewiken tu et matey. <sup>55</sup> Inang-ang idan sindalun Abimelek e netey ey nebukal ida et manganamut idad baballey da.

<sup>56</sup> Huyya impahding APU DIOS ni nengibleh ni lawah ni impahding Abimelek nan ametun nemateyan tun nepitun lalakkin agi tu. <sup>57</sup> Impanhelheltap idan APU DIOS hu tutu-ud Sekem gapun kalewah da, et humman inamnuan ni idut Jotham e u-ungngan Gideon ni hi-gada.

## 10

*Hi Tola, hi Jair et hi Jeptah ey nambalin idan huwet di Israel*

<sup>1</sup> Yan eman ni endi law hi Abimelek tep netey, ey hi Tola e u-ungngan Puah e u-ungngan Dodo hu wada kabaalan tun mengihwang ni helag Israel. Nahlag nan Issakar e nambebley di Samir di duntuduntug ni bebley Epraim. <sup>2</sup> Hi-gatu nan-ap-apud Israel ni dewampulu et tellun toon. Netey et ikulung dad Samir.

<sup>3</sup> Neihullul hi Jair e iGilead et man-ap-apud Israel ni dewampulut dewwan toon. <sup>4</sup> Telumpulu lalakkin u-ungnga tun na-peng idan kebayyu. Telumpulun bebley hu nan-ap-apuan dad Gilead e Bebley Jair hu ngadan da ingganah nunya. <sup>5</sup> Netey hi Jair et maikulung di Kamon.

<sup>6</sup> Nanliwat ida mewan hu helag Israel nan APU DIOS, tep daka daydayawa hi Baal et hi Astoret anin idan dios ni iSyria, iSidon, iMoab, iAmmon niya iPilistia. Inwalleng da hi APU DIOS et eleg da law deyyawa niya eleg ida mansilbin hi-gatu. <sup>7</sup> Gapun nunman ey bimmunget hi APU DIOS ni hi-gada et iebulut tudda iPilistia et yadda iAmmon ni man-ap-apun hi-gada. <sup>8</sup> Impanligligat dan hampulu et walun toon hu helag Israel ni nampambebley di appit ni kasimmilin aggew di Jordan. Humman ni bebley ey Gilead e bebley idan Amorite ni nunman la. <sup>9</sup> Nan-agwat ida dama iAmmon di Wangwang e Jordan et gubaten dadda helag Judah, yadda helag Benjamin niyadda helag Epraim, et nemahhig hu nengipeliligat daddan helag Israel.

<sup>10</sup> Et mampehemhemmek ida mewan law APU DIOS e kanday “Nanliwat kami tep inwalleng dakan Dios mi et daydayawen mi hi Baal.”

<sup>11</sup> Hinumang APU DIOS e kantuy “Yan nunman ey impanhelheltap dakeyuddan iEgyt, yadda Amorite, yadda iAmmon, yadda iPilistia, <sup>12</sup> yadda iSidon, yadda iAmalek niyadda iMaon et mampehemhemmek kayun hi-gak et ihwang dakeyu. <sup>13</sup> Nem yan nunya ey nanliwat kayu mewan tep inwalleng yuwak et dayawen yu edum ni dios. Et humman

hu, eleg dakeyu law baddangin nunya. <sup>14</sup> Lakkayuy et kayu mampebaddang ida etan ni pinili yun dios yu, et hi-gada mengihwang ni hi-gayud ligat yu."

<sup>15</sup> Nem kan idan helag Israel nan APU DIOS ey "Nanliwat kamin hi-gam. Ipahding mu hu hipan pinhed mun pengastigum ni hi-gami nem ihwang dakemi anhan ni nunya."

<sup>16</sup> Nan-iwalleng idan helag Israel hu tuttu-un dios da et hi APU DIOS law hu dayawen da. Et eleg law pakdag APU DIOS ni ang-ang-ang ni nemahhig ni ligat da.

<sup>17</sup> Yan nunman ni tsimpuh ey neamung idad Gilead hu sindalun Ammon ni an mekiggubbat idan helag Israel e nangkampud Mispah. <sup>18</sup> Nanhuhummangan ida aapapun iGilead e kanday "Hedin hipan hi-gatsu hu memenggulun mengubbat idan iAmmon ey hi-gatu man-ap-apud Gilead."

## 11

<sup>1</sup> Entanni ey wada hi Jeptah e netuled ni sindalun u-ungangan Gilead etan di hakey ni biin tuka pebeyyad annel tu. <sup>2</sup> Ey wadadda edum ni lalakkin u-ungangan Gilead di ahwa tu ngu dedan. Et yan eman ni ida kamangkeetteng ey dinegyun da hi Jeptah di baley da. Kandan hi-gatuy "Endi mu tewwiden nan ama tep u-ungnga dakan edum ni bii." <sup>3</sup> Et bumsik hi Jeptah et an mambebley di Tob. Wadadda etan endi silbi tun tuun nekigayyum ni hi-gatu et pambalinan dan ap-apuda.

<sup>4</sup> Yan nunman ni tsimpuh hu nengilepuan idan iAmmon ni mengubbat idan helag Israel, <sup>5</sup> ey limmaw ida kamengipappanggulun helag Israel di Gilead et da ang-angen hi Jeptah di Tob. <sup>6</sup> Kandan hi-gatuy "Hi-gam pan-ap-apu mi et ipengulu dakemi et tayu gubaten ida iAmmon."

<sup>7</sup> Nem kan Jeptah ni hi-gaday "Kele yan nunyan wada ligat yuy um-ali kayu law ni mengeyyag ni hi-gak ey angebe-hel yuwak lan nunman et pea-allaw yuwak di baley ama."

<sup>8</sup> Kandan hi-gatuy "Tep mahapul daka et ipengulu dakemin mengubbat idan iAmmon. Ey pambalin dakan ap-apu mid Gilead."

<sup>9</sup> Kan Jeptah mewan ey "Kaw hedin kantu et mekillawwak et ipengulu dakeyun mengubbat idan iAmmon et baddangan tuwak nan APU DIOS et mengapputtak, kaw makulug ni pambalin yuwak ni ap-apu yu?"

<sup>10</sup> Kandan hi-gatuy "Em. Ey u-unnuden min emin e-helen mu. Hi APU DIOS hu tistigu tayu."

<sup>11</sup> Et makilaw hi Jeptah ni hi-gada. Limmaw idad Mispah et pambalin dan hi-gatu ap-apuda. Et ehelen tu mewan humman idan inhumangan dad hinanggan APU DIOS di Mispah.

<sup>12</sup> Entanniy nenu-dak hi Jeptah ni an menghel ni patul ni Ammon ni pinhed tun e-helen: "Kele yu gubbaten bebley mi?"

<sup>13</sup> Hinumang nunman ni patul ni Ammon e kantuy "Tep yan nalpuan idan helag Israel di Egypt ey piniliw da hu puyek min meippalpu wangwang di Arnon ingganah di Wangwang e Jabbok et ingganah lad Wangwang e Jordan. Et yan nunya ey mahapul ni melinggep hu pengibbangnagan yun puyek mi."

<sup>14</sup> Nenu-dak mewan hi Jeptah et ni an menghel etan ni patul ni Ammon ni humang tu; <sup>15</sup> "Eleg piliwen ni helag Israel hu puyek idan iMoab winu iAmmon. <sup>16</sup> Heninnuy hu neipahding: Yan nalpuan idan helag Israel di Egypt ey indalan da etan di eleg mebebley et meagwat idad Madlang ni Baybay et han ida dumteng di Kades. <sup>17</sup> Nenu-dak idan an manmahmah etan ni patul ni Edom hedin mabalin ni iddalan dad bebley da nem eleg tu pinhed. Limmaw ida mewan et da ibega etan ni patul di Moab ey henin nunman dama humang tu. Et manha-ad ida ni helag Israel di Kades.

<sup>18</sup> Hedin ya law impahding da ey inlikweh dad eleg mebebleyid appit ni kasimmilin aggew di Moab etan di ba-hil ni Wangwang e Arnon, nem eleg ida meagwat tep humman papeg ni Moab.

<sup>19</sup> Nenu-dak ida mewan hu helag Israel ni an mengibgan Sihon e Amorite e patul ni Hesbon hedin mabalin ni iddalan dad bebley tu. <sup>20</sup> Nem eleg tu dama tep endi dinel tun hi-gada. Inemung tudda kumedek hu sindalu tu et mangkampuddad Jahas et gubaten dadda helag Israel.

<sup>21</sup> Nem binaddangan APU DIOS e Dios idan helag Israel et apputen dadda. Et mambalin law ni bebley idan helag Israel emin humman ni bebley idan Amorite, <sup>22</sup> meippalpu etan di Wangwang e Arnon di south ingganah di Wangwang e Jabbok di north, yad etan di eleg mebebley di appit ni kasimmilin aggew et yad Wangwang e Jordan di appit ni kakelinnugin aggew.

<sup>23</sup> Et humman hu, hi AP-APU e Dios ni Israel hu nenegyun idan iAmmon et idwat tudda humman ni bebley idan helag Israel e tuu tu. Humman hu gaputun eleg mabalin

ni mi iddawat ni hi-gayu. Kaw wada kelebengan yun mengellan nunman idan bebley? <sup>24</sup> Aleyun emin hu indawat ni dios yu e hi Kemos ey ellan mi dama hu indawat AP-APU e Dios min hi-gami. <sup>25</sup> Kaw kanyu nem kakkayyaggud kayu nem ya etan patul di Moab e hi Balak e u-unggan Sippor? Tam eleg tu gubaten ida helag Israel. <sup>26</sup> Nambbley ida helag Israel ni telunggatut ni toon di Hesbon, yad Aroer, et yaddad bebley di nanlinikweh et yad Arnon, ey eleg yu banggaden ida humman ni bebley ni nunman? Kele yan nunyan ebuh? <sup>27</sup> Endi nak impahding ni lawah ni hi-gam. Nem hi-gam hu lawah tep gubbaten dakemi. Nengamung hi APU DIOS ni mengipeang-ang ni nunya hedini ya helag Israel winu ya helag Ammon hu nambahul."

<sup>28</sup> Nem eleg ni hekey denglen ni patul ni Ammon humman ni inhel Jeptah ni indateng dan hi-gatu.

<sup>29</sup> Entanniy newada Ispirituh APU DIOS nan Jeptah et lumaw di bebley idan helag Gilead et hi Manasseh et mambangang di Mispah di Gilead et ipengulu tudu sindalu tud Ammon. <sup>30</sup> Nansapatah hi Jeptah nan APU DIOS e kantuy "Hedin baddangan muwak et apputek ida iAmmon, <sup>31</sup> ey i-epit kun hi-gam e gihebek hu memenggulun umwep di baley ku ni menammun hi-gak ni keibbangadadak."

<sup>32</sup> Impangulun Jeptah ida sindalu tun mengubbat idan iAmmon et pengapput idan APU DIOS. <sup>33</sup> Hinggepan da dewampulun bebley di Ammon meippalpu Aroer et yad bebley idan Minnit ingganah di Abel Keramim et peka-apputen dadda.

### *Ya etan biin u-unggan Jeptah*

<sup>34</sup> Immanemut hi Jeptah di Mispah et kamenetteng di baley da ey binsik etan ni hahhakkey ni u-ungga tun biin an nenammun hi-gatu e tuka petettennul hu tambourine ey menattayyaw tep et-eteng amleng tu. <sup>35</sup> Inang-ang Jeptah etan u-ungga tu ey bini-ki tu balwasi tun lemyung tu. Kantu etan ni u-ungga tuy "Nemahhig hu lemyung ku tep ay kumedek e hi-gam nemangulun nenammun hi-gak ey wada insapatah kun APU DIOS ey eleg mabalin ni nak kekyaten."

<sup>36</sup> Hinumang ni u-ungga tu e kantuy "Ama, ipahding mu hu insapatah mun APU DIOS ni meippanggep ni hi-gak tep binaddangan daka et apputen mudda buhul mun iAmmon. <sup>37</sup> Nem iebulut mu anhan et kami man-a-ayyam ni dewambulan idan gayyum kun bii et kami mannannangngih ni lemyung mid duntug tep eleg law mabalin ni nak melehhin." <sup>38</sup> In-abulut Jeptah et lumaw idad duntug etan u-ungga tu et yadda gayyum tun bii et ida mannannangngih ni dewambulan tep eleg katteg ngu melehin ey mettey. <sup>39</sup> Nelabah hu dewambulan et umenamut et ipahding Jeptah hu insapatah tun pehding tu et matey humman ni u-ungga tu e eleg malehin.

Huyya hu nalpuan ni elaw idan helag Israel <sup>40</sup> e yan epat ni aggew katootoon ey ida kaum-ehep hu kaungaungan bibi-i et ida mannannangngih et penginemnemman dan neipahding ni u-unggan Jeptah.

## 12

### *Hi Jeptah et yadda helag Epraim*

<sup>1</sup> Entanniy inemung idan helag Epraim hu sindalu da et man-agwat idad Jordan et lumaw idad Saphon. Kandan Jeptah ey "Kele eleg dakemi ayagan et bumaddang kamin mengubbat idan iAmmon? Um-ali kami mannuman et legaben ni baley mu et makigiheb ka gapuh ni nunman ni mu impahding."

<sup>2</sup> Hinumang Jeptah e kantuy "Tam impaeyag dakeyu eman ni laputun nanhahallaan midan iAmmon ey eleg kayu umlin nemaddang ni hi-gak. <sup>3</sup> Et neala law et man-agwat kami e kangkud nemnem kuy nengamung hedini hipa mekapkapan hi-gak et kami makigubat idan iAmmon et pengapput dakemin APU DIOS. Ey yan nunya mewan ey um-ali kayu et kanyuy hi-gak hu wada bahul tu ma-lat ipahding yu lawah ni hi-gak."

<sup>4</sup> Kan idan kamengipangngulun helag Epraim ey "Hi-gayu ngu damaddan sindalun iGilead hu nangehay et hi-yanen yudda helag Epraim niya helag Manasseh." Minandal law nan Jeptah hu sindalu tu et dadda gubaten iEpraim et apputen dadda. <sup>5</sup> Ey sinekup dadda hu bebley di kapan-agwatid Jordan ni kamampellaw di Epraim et hedini wada man-agwat ni iEpraim et kantuy "Kaw mabalin ni um-agwattak?" Ey mahmahan idan iGilead e kandy "Kaw nahlag kan Epraim?" Hedin kantuy "Beken," <sup>6</sup> kandan hi-gatuy, ehel mu dedan e kamnyu "Shibboleth." Tep hedini iEpraim man, kantuy "Shibboleth" tep eleg da pakai-hel ni ustuh hu 'Shibboleth.' Huyya daka pengimmatuni et petteyen da hedini helag Epraim humman ni man-agwat. Limmaw di na-pat et dewwan libu hu pintey dan helag Epraim ni nunman ni tsimpuh.

<sup>7</sup> Nan-ap-apu hi Jeptah di Israel ni enem ni toon. Netey et maikulung di Gilead.



*Hi Ibsan, hi Elon et hi Abdon*

<sup>8</sup> Hi Ibsan e iBethlehem hu neihullul nan Jeptah ni nan-ap-apud Israel. <sup>9</sup> Telumpulu hu u-ungnga tun laki ey telumpulu dama hu u-ungnga tun bii. Impampeahwa tudda u-ungnga tud hin-appil ni helag. Nan-ap-apu hi Ibsan di Israel ni pitun toon. <sup>10</sup> Netey et maikulung di Bethlehem.

<sup>11</sup> Neihullul ni hi-gatu hi Elon e helag Sebulun et manhuwet di Israel ni hampulun toon. <sup>12</sup> Netey hi Elon et maikulung di Aijalon etan di pappeg ni bebley Sebulun.

<sup>13</sup> Neihullul hi Abdon e u-ungngan Hillel e iPirathon et huwet di Israel. <sup>14</sup> Na-pat hu u-ungnga tun laki ey telumpulu inap-apu tun laki. Ey nepitun kebayyu hu daka ussalan pantakkayan. Hi-gatu huwet di Israel ni walun toon. <sup>15</sup> Netey et maikulung di Pirathon etan di pappeg ni bebley idan iEbraim etan di duntuduntug ni bebley idan iAmalek.

**13**

<sup>1</sup> Entanniy nanliwat ida mewan hu helag Israel nan APU DIOS et iebulut tudda iPilistia ni man-ap-apun hi-gadan na-pat ni toon.

<sup>2</sup> Yan nunman wada hi Manoah e helag Dan e nambebley di Sorah. Endi u-ungnga tu tep nebasi hu ahwa tu. <sup>3</sup> Entanniy nampeang-ang hu angel APU DIOS nan ahwan tu et kantuy "Nebasi ka et eleg ka pakeungnga, nem meweddaan kalli et man-ungnga kallin laki. <sup>4</sup> Nem mahapul ni eleg ka um-inum ni kaumbuteng ni meinum niya eleg ka umkan ni kameikka-leg ni mekkan. <sup>5</sup> Meweddaan kalli nisin lakin u-ungngam ey meilleppu etan ni aggew ni kei-ungnga tu ey entan tu pu-lisi bewek tu tep mambalin ni Nasirite e mei-kud nan Apu Dios. Hi-gatulli mengihwang ni helag Israel idan iPilistia."

<sup>6</sup> Limmaw hi ahwan Manoah di kad-an tu et kantun hi-gatuy "Wada immalin tuun heni anghel Apu Dios e angettakkut ang-ang tu. Eggak mahmahan nalpuan tu niya eleg tu ehelen ngadan tu. <sup>7</sup> Nem kantun hi-gak ey 'Meweddaan kalli et man-ungnga kan laki. Eleg mabalin ni um-inum kan hipan kaumbuteng ey eleg ka mengngan ni pi-yew ni kennen, tep mei-kud Apu Dios humman ni u-ungnga et mambalin ni Nasirite, meippalpun keukkatan tu ingganah ni ketteyyan tu.'" <sup>8</sup> Et mandasal hi Manoah nan APU DIOS e kantuy "APU, ipidwam anhan ni peelli etan intu-dak mun tuun Apu Dios et ittutuddu tu hu pehding min mengippaptek alin etan ni gelang ni mei-ungnga."

<sup>9</sup> Dingngel Apu Dios hu asal Manoah et mampeang-ang mewan etan anghel Apu Dios nan ahwa tun kamanyuyuddung di payew, nem endi hi Manoah ni nunman. <sup>10</sup> Impepuppuut nan ahwa tu et tu ayagan hi Manoah e kantuy "Immali mewan etan tuun nampeang-ang ni hi-gak lan hakey kaalman!"

<sup>11</sup> Nekilaw hi Manoah nan ahwa tu et kantu etan ni tuuy "Kaw hi-gam etan nekiungbal nan ahwak lan hakey kaalman?" Kan etan ni tuuy "Ern."

<sup>12</sup> Kan Manoah ey "Hedin um-amnu inhel mu, inna-nu pehding millin mengippaptek ni nunman ni gelang? Hipadda mahapul ni u-unnuden tu?"

<sup>13</sup> Kan etan ni anghel APU DIOS ey "Mahapul ni ang-angen mu et u-unnuden nan ahwam emin hu inhel kun hi-gatun pehding tu. <sup>14</sup> Eleg tu kennen hu lameh ni grapes niya eleg um-inum ni hipan kaumbuteng ey eleg umkan ni kumpulmih ni pi-yew ni kennen. Emin ida etan inhel min hi-gatu ey mahapul ni u-unnuden tu."

<sup>15</sup> Kan Manoah etan ni anghel APU DIOS ey "Pinhed min eleg ka ni umlaw et palsien mi hu pakeetteng tun gelding et ihida tayu."

<sup>16</sup> Himmumang etan anghel APU DIOS ey kantuy "Anin ni eggak umlaw et eggak kenna hu hipan immangdad yun kennen. Nem hedin mandaddan kayun i-appit yun kagihheba, iappit yun APU DIOS." (Eleg amtan Manoah e anghel APU DIOS humman.)

<sup>17</sup> Entanniy minahmahan Manoah etan ni anghel APU DIOS e kantuy "Hipa ngadan mu ma-lat dayawen dakalli hedin um-amnu eya inhel mu?"

<sup>18</sup> Kantuy "Kele yu mahmahan hu ngadan ku? Eleg yu dama han-awat hedin e-helek?"

<sup>19</sup> Et man-appit hi Manoah nan APU DIOS ni pakeetteng tun gelding et ya begah etan di batu. Entanniy impahding APU DIOS hu kamengippetnga ey kaang-ang-angad Manoah nan ahwa. <sup>20</sup> Kamantetebbel hu in-appit da ey inang-ang da etan anghel APU DIOS etan di apuy ey immelad kabunyan. Ey nanlukbub di Manoah nan ahwatud puyek ni nenang-angan dan nunman. <sup>21</sup> Entanniy eleg law mampeang-ang etan anghel APU DIOS et humman law nengamtaan nan Manoah e anghel APU DIOS gayam humman.

<sup>22</sup> Kantun ahwa tuy "Mettey ita mannuman tep inang-ang ta hi APU DIOS!"

<sup>23</sup> Nem kan ahwa tuy "Gullat ngun makulug ni petteyen deitan APU DIOS et eleg tu abuluten etan in-appit tan kagihheba niya etan begah ni in-appit ta ey gullat ngu et eleg mampeang-ang idan nunyan hi-gata ey eleg tu et ipahding hu kamengippetngan inang-ang ta."

<sup>24</sup> Nan-ungnga hi ahwan Manoah et ingadnan da etan gelang ni Samson. Neetteng ey bendisyonan APU DIOS. <sup>25</sup> Ey newada Ispirituh APU DIOS ni hi-gatu eman ni kaweda tud Mahaneh Dan e nambattanan ni Sorah et ya Estaol.

## 14

<sup>1</sup> Hakey ni aggew ni linawwan Samson di Timnah ey inang-ang tu hu hakey ni biin iPilistia. <sup>2</sup> Immanemut et kantud ametun inetuy “Wada inang-ang kun biin iPilistia di Timnah e pinhed kun i-ahwa.” <sup>3</sup> Nem eleg pinhed di ametun inetu et kanday “Nem kaw endi hu bii eyad bebley tayud Israel winu yadda agi tayun mabalin ni ahwaen mu? Kele ya iPilistia hu mu hemmaken ni i-ahwam e eleg da u-unnuda hi APU DIOS?”

Nem kan Samson nan ametu ey “Hi-gatu pinhed kun ahwaen. Yulli kurna awit.”

<sup>4</sup> Eleg amtd ametun inetu e implanuh APU DIOS huuya ma-lat wada umhulun ni pekihhanggaan tuddan iPilistia. Tep yan nunyan tsimpuh ey yadda iPilistia hu nan-ap-apid Israel.

<sup>5</sup> Limmaw hi Samson et yadda a-ammed tud Timnah et ida kamenetteng di leguntad man Timnah ey pinhakkeyey kamangekiddammu hu layon nan Samson. <sup>6</sup> Impa-let ni Ispirituh APU DIOS hi Samson et hepwerken tu hu hunghung ni nunman ni layon ey heni impah ni gelding hu impahding tu. Nem eleg tu e-ehelen huuyad ametun inetu.

<sup>7</sup> Dimmateng idad Timnah ey limmaw hi Samson di kad-an etan ni biin iPilistia et mekihummangan ey nakappinhed tu etan bii. <sup>8</sup> Nelabah hu pigan aggew ey nambanggad di Samson di Timnah ma-lat mangkasal ida law etan ni bii. Yan wada da pay di dalan ey indalan tud pangil et tu ang-angen etan annel ni layon ni pintey tu ey nambalyan ni putsukan ey wada danum tu. <sup>9</sup> Immala et tuka kakkanna ey mandaddallan. Dinteng tud ametun inetu et idwatan tudda et kuman ida dama, nem eleg ehlen Samson ni hi-gada e inla tud annel ni netey ni layon.

<sup>10</sup> Limmaw hi aman Samson ni an mekihummangan etan ni bii et mampahemul hi Samson di Timnah tep humman elaw dan nunman ni tsimpuh. <sup>11</sup> Neayagan hu telumpulun lalakkidman ni bebley ni pangkadwa tu. <sup>12</sup> Kan Samson ni hi-gaday “Wada ibbullikay kun hi-gayu et ehelen yu hedin hipa humman. Hedin meiptek hu penummang yu eyan pitun aggew ni panhahamulan tayu man iddawtan dakeyun telumpulun kayyaggud ni luput et ya telumpulun kayyaggud ni balwasi. <sup>13</sup> Nem hedin eleg yu amta keibbellinan tu man hi-gayu um-idwat ni hi-gak ni telumpulun kayyaggud ni luput et ya telumpulun kayyaggud ni balwasi.”

Kandan hi-gatuy “Ehel mu hu bullikay mu et dengelen mi.” <sup>14</sup> Et kan Samson ey “Nalpu etan mekkan di kaumkan ey malumi-ih hu neukat di na-let.”

Nelabah hu tellun aggew ey eleg da pay amta hu ihhumang da etan di bullikay.

<sup>15</sup> Yan meikka-pat ni aggew kandan ahwan Samson ey “A-alluk mu hi Samson e ahwam et ehelen tu hu keibbellinan ni bullikay tu. Hedin eleg mu ippahding man lelgaben mi baley amam et magiheb kayu. Kaw dakemi ineyagan ni mekihhemmul ma-lat mewetwet kami?”

<sup>16</sup> Limmaw hi ahwan Samson di kad-an tu et mannannangih et kantuy “Endi impeminhed mun hi-gak! Angebe-hel muwak. Wada inhel muddan edum kun iPilistia ni bullikay nem eleg mu ehlen ni hi-gak keibbellinan tu!”

Kan Samson ey “Kele nak e-helen hi-gam ey eggak ehlen di aman ina?” <sup>17</sup> Et mannannangih etan bii ingganah ni meikkeppitun aggew ni hamul. Imminglay law hi Samson et ehelen tun ahwa tu hu keibbellinan ni bullikay tun inhel tuddan lalakkid Timnah. Et lumaw etan ahwa tu et tu ehelen idan edum tun iPilistia hu imbagan Samson. <sup>18</sup> Et kamangehilleng nunman ni meikkeppitun aggew ey kan idan etan ni lalakkin nan Samson ey “Kaw hipa melullummi-i nem ya danum ni putsukan ey hipa na-na-let nem ya layon?”

Himmumang hi Samson et kantuy “Gullat ni eleg yu piliten hu ahwak ni menghel ni hi-gayu, eleg yu et amtaen keibbellinan tu!”

<sup>19</sup> Impa-let ni Ispirituh APU DIOS hi Samson et lumaw di Askelon et patyen tu telumpulun lalaki et alen tu balwasi da et tu idwat idan etan ni lalakkin nanghel ni keibbellinan ni bullikay tu. Nem nemahhig bunget tun nunman ni an neipahding et umenamut di baley di ametun inetu. <sup>20</sup> Ey ya etan ahwa tu man impeahwa da etan ni hakey ni gayyum tun nengiehneng ni hi-gatun nengahwaan tu.

## 15

<sup>1</sup> Entanniy nedateng hu ahiani et alen Samson hu pakeetteng tun gelding ni tu iddawtan nan ahwa tu. Pinhed tu et ni meki-uggip nan ahwatu nem kaikka-leg nan ametu. Kantun hi-gatuy <sup>2</sup> “Kangku nem angebe-hel mu et peahwak etan ni lakin nengadwan hi-gam

eman ni nan-ahwaan yu. Nem hedin pinhed mu, wada etan udidyan tun kakkayyaggud pay ang-ang tu nem hi-gatu. Hi-gatu ew kuma hu iahwam."

<sup>3</sup> Kan Samson ey "Yan nunya ey wada lebbeng kun mengibleh ni impahding idan iPilistia ni hi-gak." <sup>4</sup> An dimmepap Samson ni telunggatut ni fox bedbeden tu ikul ni handedwan fox et ibedbed tu hinulat ni dilag. <sup>5</sup> Binansingan tudda humman et hantudda ibukyad di papayew idan iPilistia et malgab ida etan neani niya eleg maeni. Anin idan keyew ni olibah et yadda grapes di legunta da ey nalgab. <sup>6</sup> Kan idan iPilistia ey "Hipa nengipahding nunya?" Kan idan tuuy "Hi Samson tep impeahwan nengapun hitagun iTimnah hu ahwa tu etan ni hakey ni nengiehneng ni hi-gatun nengahwaan tu." Limmaw ida iPilistia et giheben da etan ahwan Samson et hi ametu.

<sup>7</sup> Kan Samson idan iPilistia ey "Gapun nunyan impahding yu ey ibbaleh kun ingganah." <sup>8</sup> Et pateyen tu dake ni hi-gada tep ya bunget tu. Et an manha-ad di leyang di batud Etham.

<sup>9</sup> Entanniy limmaw ida dama iPilistia et ida mangkampud Judah di neihnup di Lehi. <sup>10</sup> Kan idan tuud Judah ey "Kele immali kayun mengubbat ni hi-gami?"

Kanday "Immali kamin mempap nan Samson et ibleh mi hu impahding tun hi-gami."

<sup>11</sup> Limmaw ida hu tellun libun lalakkin iJudah di leyang ni batun wadad Etham et kandan Samson ey "Kaw eleg mu nemnema e yadda iPilistia hu ap-apu tayu? Hipa huyyan impahding mun hi-gami?"

Kan Samson ey "Imbaleh ku hu impahding dan hi-gak."

<sup>12</sup> Kandan hi-gatuy "Immali kamin memellud ni hi-gam et idwat dakaddan iPilistia."

Kan Samson ey "Dammutu, nem isapatah yu e eleg yuwak petteya."

<sup>13</sup> Kanday "Em, belluden dakan ebuh et idwat dakaddan iPilistia. Eleg daka petteya." Binelud dan dewwan baluh ni linubid et ilaw da.

<sup>14</sup> Dimmateng hi Samson di Lehi ey ida kamangkeiddammu hu iPilistia e ida kamantetekuk gapuh ni amleng dan nadpap hi Samson. Nem ipa-let ni Ispirituh APU DIOS hi Samson et behaten tu etan nemalud dan ngamay tu e heni sinulid. <sup>15</sup> Wada himmak tun genit ni pangal ni pekattay tun kebayyu et usalen tun nampematey ni hanlibun lalakkin iPilistia.

<sup>16</sup> Entanniy kan Samson ey "Pangal ni kebayyu inusal kun nematey ni hanlibun lalakki. Ey pangal mewan ni kebayyu inusal ku et ipiggil kudda." <sup>17</sup> Inhel tu humman ey imbekah tu etan genit et ngadnan tu humman ni nengiihbengan tun genit ni 'Ramat Lehi' e hedin ya keibbellinan tu ey 'Duntug ni heni pangal.'

<sup>18</sup> Et entanniy nemahhig hu na-wewan tu et kantun APU DIOS ey "Impengapput muwak nem adyah e metteyyak ni ewew ku. Et entanni ey um-alidda tuun eleg mengullug ni hi-gam et baluden da-ak." <sup>19</sup> Et wadaen APU DIOS hu etbul etan di neku-kuan di Lehi et uminum hi Samson. Negibbuh ni imminum ey neibangngad hu elet tu. Et ngadanan Samson humman ni hebwak ni En Hakkore ey wada pay humman ni hebwak di Lehi.

<sup>20</sup> Nanhuwet hi Samson ni dewampulun toon di Israel ni nan-ap-apuan idan iPilistia di bebley da.

## 16

<sup>1</sup> Hakey ni aggew ey limmaw hi Samson di Gaza et wada ang-angen tun biin tuka pebeyyad annel tu. Nekilaw hi Samson nunman ni bii et an makiugip ni hi-gatun nunman ni hileng. <sup>2</sup> Wada nengibgaddan iGaza e wadadman hi Samson et guwalyaan da hu bebley e linikweh da et hehheggeden da keukkatan tud eheb. Endi hu impahding dan Samson nunman ni hileng tep kanday "Yan kamangkewa-wa hu pemetteyan tayun hi-gatu." <sup>3</sup> Nem neugip ni ebuh diman ingganah ni gawwan hileng. Bimmangun et lumaw di eheb ni bebley et lekhaen tu etan lekbi et pahnen tu e nekipahan tu etan dewwan tukud et ilaw tud duntug di demang ni Hebron.

<sup>4</sup> Nebabbayyag ey wada pininshed nan Samson ni bii e hi Delilah di Sorek e nedeklan ni bebley. <sup>5</sup> Limmaw ida hu ap-apun Pilistia di kad-an tu et kanday "Talam mu hi Samson et amtaem hedin hipa kamengippa-let ni hi-gatu niya hedin hipa pehding et dammutun dedpapey ey binelud. Et emin kami ey iddawtan dakan hanlibibu et hakey ni gatut ni palatah."

<sup>6</sup> Inebulut Delilah humman ni imbagedan hi-gatu et kantun Samson ey "Ehel mu ahan ni hi-gak hedin hipa kamengippa-let ni hi-gam niya hedin hipa pehding et mabalin ni pepenen daka et baluden daka."

<sup>7</sup> Himmumang hi Samson e kantuy "Hedin belluden da-ak ni pitun baluh ni iket ni panan eleg mema-ganan man mambalin law ni endi elet ku e henin edum ni tuu."

<sup>8</sup> Et idwatan idan ap-apun iPilistia hi Delilah ni pitun linubid ni panan eleg memaganan et baluden tu hi Samson. <sup>9</sup> Wadadda lalakkin nantalud hakey ni kuwaltuh.

Simmekuk hi Delilah e kantuy "Samson! Immalidda iPilistia ni mēpap ni hi-gam." Nem pinegtang Samson hu nemalud dan hi-gatu e henidda sinulid ni binhat ni apuy.

<sup>10</sup> Et kan Delilah nan Samson ey "Hineghegnud muwak ey linangkakan muwak! Ehel mu tu-wa dedan hedini hipa pehding et baluden daka."

<sup>11</sup> Kan mewān nan Samson ey "Hedin belluden da-ak ni tellun baluh ni linubid ni eleg pay ni mausal ey mabalun law ni endi elet ku et heni-ak ni edum ni tuu."

<sup>12</sup> Et baluden Delilah ni baluh ni linubid. Heni mewān ni laputu e wadadda intalu tun lalacki etan di hakey ni kuwaltuh. Entanni ey simmekuk mewān et kantuy "Samson, wadadda iPilistia ni mēpap ni hi-gam!" Ey binhat mewān Samson etan linubid e henin sinulid.

<sup>13</sup> Et kan mewān Delilah ni hi-gatuy "Muwak katu-tu-yaa niya muwak kaitteitteki ingganah nunya. Ehel mu law tu-wa hedini hipa pehding ni memellud ni hi-gam et eleg mu han-ekal."

Kan Samson ey "Hedin peki-ebbel mu eya pitun neappid ni bewek ku et ipiten mu eyan kapan-ebbeli ey mabalun law ni endi elet ku et heni-ak ni edum ni tuu." Et yan neugipan Samson ey nekiebel nan Delilah hu bewek tud tuka pan-i-abel <sup>14</sup> et ipiten tu et kantuy "Samson! Immalidda iPilistia ni mēpap ni hi-gam." Nem bimmangun hi Samson et iya-nit tu etan kapan-ebbeli anin etan ni neiiketān tu.

<sup>15</sup> Kan law nan Delilah nan Samson ey "Kele kammuy pinhed muwak ey eleg mu ehelan hi-gak hu makulug ni kakelpuin elet mu? Pitlu tu law huyyan nan-itekan mun hi-gak." <sup>16</sup> Humman kamennahmahin Delilah ni kewa-wa et lektattuy imminglay law hi Samson. <sup>17</sup> Et ehelen tu law emin ni hi-gatu. Kantuy "Eleg mepenu-litan hu bewek ku tep nei-eng-enggak nan APU DIOS neipalpun eman ni neiungnga-ak. Meendi elet ku et heni-ak idan edum ni laki hedini mepu-litannak."

<sup>18</sup> Inamta law Delilah e inhel tu hu makulug et menu-dak ni an mengeyyag idan aap-apun iPilistia. Kantuy "Ali kayu law ni nunya haggud inhel tu law ni hi-gak hu makulug." Et lumaw idan etan aap-apun iPilistia e intabin da etan pihhuh ni pemeyyad dan Delilah.

<sup>19</sup> Inugip Delilah hi Samson di ulpu tu et ayagan tu hakey ni lakin memu-lit etan ni pitun neappid ni bewek Samson et wada inna-nu dan mēpap ni hi-gatu. Nepu-litan ey neendi law elet tu. <sup>20</sup> Simmekuk hi Delilah e kantuy "Samson, immalidda iPilistia ni mēpap ni hi-gam!" Bimmangun hi Samson e kantud nemnem tuy "Eleg da-ak metlaing handepap tep ipelkih ku mewān ida henin impahding ku lan nunman." Nem eleg tu amtaen e hini-yan law APU DIOS. <sup>21</sup> Et baluden idan iPilistia hi Samson et ukiten da matetu. Binangkiling dan giniling et ilaw dad Gaza et pangiggillingen dan begah di kallabbutan. <sup>22</sup> Nem entanniy kamemmel mewān hu bewek Samson.

<sup>23</sup> Neamung ida hu aap-apun Pilistia et man-am-amleng ida et manhamamul ida ey nan-appit ida etan ni dios da e hi Dagon. Kanday "Impadpap nan dios tayu hi Samson e buhul tayu." <sup>24</sup> Inang-ang idan tuu hi Samson ey dineyaw da hu dios da e kanday "Impadpap nan dios tayu hu buhul tayu e nemahbah ni intanem tayu niya nematey ni dakel ni edum tayu." <sup>25</sup> Ida kamangkebuttey ey kanday "Paukat yu hi Samson et mampabuya." Dalli in-ehap hi Samson et pehneng dad gawwan etan ni tempol ni dios da etan di nambattanan ni dewwan etta-teng ni tukud ni nanhedel ni atep. <sup>26</sup> Kan Samson etan ni bega-en ni nangged ni ngamay tuy "Pehneng muwak etan di dammutun ihhehkak hu ngamay kud tukud et mandangkiggak." <sup>27</sup> Humman ni et-eteng ni baley ni daka panhamamuli ey nekappun tuu. Wadadman ida etan liman patul ni Pilistia niya umlaw ni tellun libun tuu hu wadad atep e daka ang-ang-anga hu kaippenahding Samson.

<sup>28</sup> Entanni ey nandasal hi Samson nan APU DIOS e kantuy "Keta-ta-geyyan ni Dios, nemnem muwak anhan. APU DIOS, pa-let muwak anhan, anin ni yan nunyan ehub et ibleh ku hu nengukitan idan iPilistia ni dewwan matak." <sup>29</sup> Et ihkan Samson hu dewwan ngamay tu etan di dewwan nanggawwan etta-teng ni tukud ni nunman ni tempol et umlet ni nengitulud et <sup>30</sup> tumkuk e kantuy "Anin mekikketteyak idan iPilistia!" Ey natleb etan tempol et mangkaipit ida etan patul ni iPilistia et yadda etan tuun wadadman. Daddakkel hu pintey Samson ni nunman neteyyan tu nem yan ketaggu tu.

<sup>31</sup> Immalidda hu lalackin agi tu et ya pamilyah tu et alen da annel tu et ikulung dad kulung ametun hi Manoah etan di nambattanan ni Sorah et ya Estaol. Dewampulun toon ni nan-ap-apan tud Israel.

## 17

<sup>1</sup> Wada hu hakey ni lakin hi Mikah ngadan tun nambebley di duntudungtu di Epraim. <sup>2</sup> Hakey ni aggew ey limmaw di kad-an inetu et kantun hi-gatuy "Dingngel ku e inidutam etan nengibsik ni hampulu et hakey ni gatut ni silber mu. Hi-gak hu nengalan nunman et adyah e in-alik."

Kan inetuy “Hi APU DIOS hu memendisyon ni hi-gam e u-ungngak ni nengibangngadan mu.”<sup>3</sup> Imbangngad tu etan pihuh et kan inetuy “Meiddewwat nan APU DIOS ida huyyan silber ma-lat eleg um-amnu hu idut kun hi-gam. Ey mampekapyak ni keyew ni dios e me-meh ni silber.”<sup>4</sup> Immala inetun dewanggatut nunman ni silber et lumaw di kad-an ni kaman-e-dih et mampekapyan dios ni keyew ni na-meh ni silber ma-lat tu iha-ad di baley nan Mikah.

<sup>5</sup> Hi Mikah ey nengapyan baley ni dios ni pandeyyawan tu. Nengapya mewan ni edum ni dios tu et iha-ad tudman et mengapyan ephod, et pambalin tun padi hu hakey ni u-ungngatun lakin mansilbi. <sup>6</sup> Yan nunman ni tsimpuh ey endi hu patul di Israel et ipahding idan tuu hu hipan kayyaggud di daka pannemnem.

<sup>7</sup> Wada hu hakey ni helag Levi ni nalpud Bethlehem di Judah <sup>8</sup> e hini-yan tu humman ni bebley tu et an menang-ang ni tu pekibbebleyan di edum ni bebley. Yan tu nandaldalan ey neipaddih ni yad baley Mikah di duntuduntug ni bebley Epraim hu nanda-guhan tu. <sup>9</sup> Kan Mikah ni hi-gatuy “Attu nalpuam?”

Kantuy “Nahlaggak nan Levi ey nalpu-ak di Bethlehem di Judah. Nakka menemmak ni pekibbebleyak.”

<sup>10</sup> Kan Mikah ni hi-gatuy “Panha-ad kadya et hi-gam pampeddik niya hi-gam konsihal ku et idwatan dakan hampulun silber ni katootoon ey iddawtan dakan ibbalwasim niya kennen mu.” <sup>11</sup> Inebulut nunman ni tuu et mekiha-ad nan Mikah. Et ibilang tun hakey ni u-ungnga tu. <sup>12</sup> Ey impambalin tun padi tu humman ni helag Levi et manha-ad di baley tu. <sup>13</sup> Kan Mikah ey “Amtak e bendisyonan da-ak APU DIOS tep wada hu helag Levi ni mansilbin padik.”

## 18

<sup>1</sup> Yan nunman ni tsimpuh ey endi patul ni Israel. Ey yan nunman ni tsimpuh ey kamenennang-ang ida helag Dan ni pambebleyan da tep eleg da handegyun ida etan tutu-un nambelley di puyek ni neitudun hi-gadan pambebleyan da. <sup>2</sup> Pinutuk idan helag Dan hu liman sindalu dan nalpud Sorah et yad Estaol ni an menang-ang niya mansi-im ni da pambebleyan. Dimmateng idad duntuduntug di Epraim ey ida nekiugip di baley Mikah. <sup>3</sup> Yan nunman ni wadaddadman ey inimmatunan da hu kapan-ehhel etan ni helag Levi et kandan hi-gatuy “Kela wada kadya? Hipa nengi-lin hi-gam deya ey hipa muka ippenahding?”

<sup>4</sup> Inhel tu hu nanhumnganganan dan Mikah e hi-gatu hu pampeddi tu et tangdanan tu.

<sup>5</sup> Et kanday “Mahmahim nan Apu Dios hedid kayyaggud hu pambalanan ni lawwan mi.”

<sup>6</sup> Kan etan ni padi ey “Melinggep kayud lawwan yu tep ippaptek dakeyuan APU DIOS.”

<sup>7</sup> Et lumaw ida humman ni liman tuud Lais, ey inang-ang da e melinggep niya kayyaggud hu neitu-wan idan tuudman e endi tekkutan da. Heniddan iSidon e kedangyan ida e endi daka pangkullangin mahapul da tep malemeh daka ittanem. Hakey pay ey neidawwiddad Sidon ey endi edum ni bebley ni nekidagyuman dan umbaddang ni hi-gada. <sup>8</sup> Nambangngad ida humman ni helag Dan di bebley dad Sora niyad Estaol ey minahmahan idan edum da hedid wada inang-ang dan bebley. <sup>9</sup> Hinumang da e kanday “Elaw itsud Lais et tayu sakupen humman ni bebley! Inang-ang mi ey kakkayyaggud hu puyek diman tep malemeh nangkeitnem. Eleg itu mandewadewan an mansekkup nunman ni bebley.” <sup>10</sup> Et-eteng humman ni bebley ni iddawat APU DIOS ni hi-gatsu, ey wadan emin hu mahapul diman. Yadda tuudman ey ida kamakaddinnel tep endi tekkutan da niya endi pandennagan da.

<sup>11</sup> Entanniy neamung ida hu enem ni gatut ni sindalun helag Dan ni an mekiggubbat e nalpuddan emin di Sorah et ya Estaol. <sup>12</sup> Ida nangkampud Kiriath Jearim di Judah di appit ni kakelinnugin aggew. Et humman hu ingngadnan dan Mahaneh Dan ingganah nunya e ya keibbellinan tu ey Kampun Dan. <sup>13</sup> Et han ida lumaw di baley Mikah di duntuduntug ni bebley di Epraim.

<sup>14</sup> Kan ida etan ni liman tuun an nansiim di Lais idan edum day “Wada hu baley deyan wada dios ni nekapyan keyew e na-meh ni silber. Ey wada edum pay ni nekapyan dios niya ephod. Hipa pehding tayu.” <sup>15</sup> Himegep idad baley Mikah et mekihummangan ida etan ni helag Levi ni kamekihha-ad diman. <sup>16</sup> Yadda etan enem ni gatut ni sindalun helag Dan ey ida kaman-eh-ehngeng etan di heggeppan di bebley. <sup>17</sup> Himegep ida etan liman an nansiim di bawang ni baley ni daka pandeyyawi et da alen ida etan dios ni na-meh ni silber et yadda pay edum ni nekapyan dios et ya etan ephod ni kausalan padi. Ey ya etan padi ey kamekieh-ehngeng ida etan ni enem ni gatut ni sindalud heggeppan.

<sup>18</sup> Inang-ang etan ni padin helag Levi e kapan-elladda etan ni liman tuu humman idan dios et kantun hi-gaday "Hipa yuka pan-ippahding?"

<sup>19</sup> Nem kandan hi-gatuy "I-ineng ka! Pakilaw ka kuman hi-gami et hi-gam pampeddi mi niya hi-gam pankonsihal mi et beken ni hakey ni pamilyah ni ebuh hu pansilbian mu nem yad hakey ni helag Israel." <sup>20</sup> Immamleng etan padi et makilaw ni hi-gada e inla tudda etan dios ni na-meh ni silber, yadda etan edum ni dios et ya etan ephod.

<sup>21</sup> Et pamenguluddan nunman ni helag Dan hu u-ungnga da, yadda animal da niyadda ngunut da. <sup>22</sup> Neidaddawwidada etan di baley Mikah ey inemung Mikah ida bimbebley et pedugen dadda. <sup>23</sup> Dadda kapanha-kupi helag Dan et tekukan dadda. Nanwingidada hu helag Dan et humangen da e kanday "Hipa pinhed mu? Kele mudda inemung eya tuu et dakemi pedugen?"

<sup>24</sup> Kan Mikah ey "Imbesik yudda dios ku et ya padik et endi natdaan ni hi-gak ey kanyu ni-nganguy, hipa pinhed ku?"

<sup>25</sup> Kan idan helag Dan ey "Heballi i-ineng ka tep entanniy wadan hi-gami hu kabbubunget et petteyeng kumedek et yadda pamilyah mu." <sup>26</sup> Et manglaw ida humman ni helag Dan. Inang-ang nan Mikah e dakel idan peteg e eleg tudda han-apput et mambanggad di baley da.

<sup>27</sup> Limmaw ida helag Dan di Lais e ingkuyug da etan padi ey inla dadda la etan tutu-u et hegpen da humman ni bebley e melinggep ida nambebley diman. Pintey dan emin hu tutu-udman et bahbahaen da etan bebley. <sup>28</sup> Endi memaddang idan bimbebley tep neidawwi hu Sidon ey endi edum ni bebley ni umbaddang ni hi-gada tep endi nekidagyuman da. Huyyan bebley ey wadam nedeklan ni neihnup di Bet Rehob. Inyayyagud idan helag Dan humman bebley et mambebley idadman. <sup>29</sup> Nginadnan dan Bebley Dan e ngadan ni apu da e u-ungngan Jacob nem Lais la ni ngadan tu. <sup>30</sup> Inha-ad idan helag Dan etan dios dan kinapyan tuu et daydayawen da et putuken da hi Jonathan e u-ungngan Gerson e inap-apun Moses ni padi da. Huyyan pamilyah hu padiddan helag Dan ingganah ni nedegyanan dad bebley da. <sup>31</sup> Humman idan dios Mikah hu dinaydayaw idan helag Dan ni dios da eman ni wada etan Tabernacle Apu Dios di Siloh.

## 19

<sup>1</sup> Yan nunman ni tsimpuh ey endi patul ni Israel. Wada etan helag Levi ni nambebley di edawwin bebley di duntuduntug di Epraim. Hakey ni aggew ey in-anemut tu hu hakey ni biin iBethlehen et i-dum tun ahwa tu. <sup>2</sup> Nem hini-yan etan ni bii et mambanggad di baley ametud Bethlehen. Nelabah hu epat ni bulan <sup>3</sup> ey ninemnem etan ni lakin unndun hu ahwatu. Ineyagan tu hakey ni bega-en tu ey immalan dewwan kebayyu et lumaw idad Bethlehen ni an mengewwit ni ahwatu. Dimmateng di baley ni aman ahwatu ey kayyagud hu impan-apnga tun hi-gatu. <sup>4</sup> Impapilit nunman ni aman biin manha-ad ida nidman et mandeyan tellun aggew et mekikkikkan ey nekiinnu-innum diman. <sup>5</sup> Yan meikka-pat ni aggew ey bimmangun ni dagah et umgah nem kan etan ni aman bii ey "Pangan kayu ni et wada i-e-let yu lad dalan."

<sup>6</sup> Et mangan ida et mengi-innum ida. Entanniy kan aman etan ni biiy, "Pandeya ka kuma et man-an-anla itu."

<sup>7</sup> Immehneng etan lakin umlaw nem kapeppilit ni aman etan ni bii e mandeya et mandeyan nunman ni hileng. <sup>8</sup> Kakkabbuhhan nunman ni meikkelliman aggew ey bimmangun mewan ni dagah et umgah ey kan mewan etan ni aman biiy "Pangan kayu ni et han kayu lumaw ni hambatenganan." Et makikan mewan law etan laki.

<sup>9</sup> Yan immegahan etan ni laki et ya etan imbilang tun ahwa tu et ya etan bega-en ey kan mewan nan ama etan ni bii ey "Heballi mandeya itu tep anggegannu law ey mehilling. Panha-ad kayun nunyan hileng et man-an-anla itu et han kayu humelaman ni kabbuhhan."

<sup>10</sup> Nem pinhed tu-wa anhan law etan ni lakin um-anemut et manglaw ida e ingkuyug tu etan biin imbilang tun ahwa tu ey impangkarga tudda etan dewwan kebayyu. Nampalaw idad appit ni Jebus e Jerusalem ngadan tun nunya. <sup>11</sup> Ida kameneteng diman ey kamangkehilling et kan etan ni bega-en tuy "Kamangkehilling law. Attu ew et mandeya itsud Jebus ni nunyan hileng?"

<sup>12</sup> Nem kan etan ni laki ey "Beken di deya pandeyaan tayu tep beken tayun kebebleyan ida tuodya. Endi hu helag Israel ni nambebley di deya. Medeggah itsud Gibeah. <sup>13</sup> Umlaw itsud Gibeah winu Ramah et yadman tayu pandeyaan." <sup>14</sup> Nanglaw ida et kamangkelinnug aggew ey dimmateng idad Gibeah di Benjamin. <sup>15</sup> Nanda-guh idadman et ida menang-ang ni keuggipan da. Limmaw ida etan di kakeemmungin tuudman nem endi, anin hakey ew ngun nengayag ni hi-gadan da pekidyaaan da.

<sup>16</sup> Nunman ni hileng ey wada hu hakey ni nea-amma nehilngan ni nalpud payew tu e iEpraim nem nekibebley diman Gibeah e bebley idan helag Benjamin. <sup>17</sup> Inang-ang tu etan helag Levi et yadda edum tu ey kantuy “Attu lawwan yu? Attu nalpuan yu?”

<sup>18</sup> Kan etan ni laki ey “Nalpu kamid Bethlehem di Judah ey um-anemut kami law di duntuduntug ni bebley mid Epraim. Nem umlaw kami nid baley APU Dros. Nem nehilngan kamidya ey endi kaum-ayag ni peki-uggipan mi. <sup>19</sup> Wada dagemin kennen ni kebayyu mi et ya kennen mi niya innumen mi. Wadan emin mahapul mi.”

<sup>20</sup> Kan nunman ni nea-amma ey “Itsuy di baley ku et yadman yu kaugipan. Iddawtan dakeyun mahapul yu. Entan kaugip deya.” <sup>21</sup> Et makilaw idan hi-gatu et idwatan tudda kebayyu tun kennen da et ulahan tu heli da et idaddan tu kennen da niya innumen da.

<sup>22</sup> Ida kaman-ap-apnga ey wadadda immalin nabngang ni tuun linikweh da etan baley et daka pampagpaga habyen ey kanda etan ni nea-ammay “Pa-hep mu etan mangilim ni laki et iulig mi!”

<sup>23</sup> Immehep etan nea-amma et kantun hi-gaday “Agik ida, etan anhan tu ipahding hu lawah. Anggeba-ing ni peteg huttan ni yu pehding eyan mangilik. <sup>24</sup> Anin ew katteg pe-hep ku eya u-unggak ni endi ahwa tu et ya eya ahwa eyan laki et ipahding yu hu pinhed yun hi-gada nemet eleg yu ipahding hu lawah eyan mangilik tep angeba-ing.”

<sup>25</sup> Nem kahing ida etan tutu-u. Et itulud law etan ni helag Levi etan ahwa tud dallin. Et piliten dan in-ulig e nanhinhinullul ida etan tuu ingganah ni kamangkewa-wa et han da ibukyut.

<sup>26</sup> Yan nunman ni kamangkewa-wa ey nambangngad etan bii etan di baley ni nandaguhan dan nandayaan ni ahwa tu et manlukbub etan di habyen et mena-yun diman ingganah ni kawwalwal. <sup>27</sup> Imbeghul etan ni laki hu habyen et an megewwid ey immen etan ahwa tun nanheku-bu e neihaklay ngamay tud habyen. <sup>28</sup> Kan etan ni laki ey “Bangun ka et lumaw itu law.” Nem eleg umhumang etan bii tep netey. Lina-kay law etan ni laki etan ahwa tu et itakkay tud kebayyu tu et ienamut da. <sup>29</sup> Dimmateng etan lakid baley tu et genededen tun hampulun dewwa hu annel nunman ni ahwa tu et palaw tu hanhakkey idan hampulut dewwan helag Israel. <sup>30</sup> Emin ida nenang-ang nunman ey kanday “Yan nunyan ebuh hu wada tayu inang-ang niya tayu dingngel ni henin nunyan neipahding neipalpu eman ni nalpuan idan helag Israel di Egypt. Nemnem tayu hedini hipa pehding tayu kaw pakdag tayu ang-ang?”

## 20

<sup>1</sup> Emin ida helag Israel meipalpud Dan di appit ni north ingganah di Beersheba di appit ni south ey neamung idad Mispah di hinanggan APU DIOS. <sup>2</sup> Nekiemung ida kamengipangngulun helag Israel anin idan etan ni epat ni gatut ni libun sindalun nandaddan diman. <sup>3</sup> Entanni ey dingngel idan helag Benjamin e neamung ida helag Israel di Mispah.

Minahmahan idan helag Israel hedini inna-nu tun an meipahding humman.

<sup>4</sup> Kan etan ni laki helag Levi ey “Limmaw kami etan ni biin imbilang kun ahwak di Gibeah e bebley ni helag Benjamin ni mandedyadman. <sup>5</sup> Nem yan nunman ni hileng ey immalidda lalakkid man e bebley et likwehen da etan baley ni nanda-guhan mi e pinhed da-ak ni petteyen. Nem ya ahwak hu inla da et piliten dan in-ulig e nanhuhullulan da ingganah netey. <sup>6</sup> In-anemut ku annel tu et tenegtegek e impanhampuluk ni dewa et i-peng kun impalaw idan hampulut dewwan pewen ni helag Israel gapuh nunyan lawah ni peteg ey angeba-ing ni neipahding. <sup>7</sup> Yan nunya ey panhuhummanganan tayun helag Israel hedini hipa pehding tayu.”

<sup>8</sup> Immehneng ida emin etan tutu-un neamung et kanday “Endin hi-gatsu hu um-anemut. <sup>9</sup> Heninnuy pehding tayu. Ibbubunut tayu hedini hipa mengubbat ni Gibeah. <sup>10</sup> Ya meikkeppulun tutu-un helag Israel hu nengamung ni mengippaptek ni kennen idan sindalu ey hi-gatsun edum hu an mengibleh ni impahding idan iGibeah ni angeba-ing ni peteg eyad bebley tayud Israel.” <sup>11</sup> Et meikahakey ida sindalun helag Israel ni an mengubbat ni Gibeah.

<sup>12</sup> Nenu-dak ida helag Israel et da ehelen ni helag Benjamin e kanday “Neihallan peteg hu impahding yu. <sup>13</sup> I-li yun hi-gami etan ida lawah ni tuun nengipahding nunya et pateyen midda, ma-lat mepappeg huuyan lawah ni neipahding eyad Israel.” Nem kahing ida helag Benjamin. <sup>14</sup> Neamung ida kumedek helag Benjamin di Gibeah e nalpuddad nampambebleyan da, et mandaddan idan mekiggubbat ni nunman idan edum dan helag Israel. <sup>15</sup> Immalidda hu dewampulut enem ni libun sindalun nan-almas ni ispada, et mei-dum ida etan di pitun gatut ni sindalud Gibeah. <sup>16</sup> Wadadda pitun gatut ni newillin sindalun Benjamin ey nelaini ni manlastik et anin ni puntaen da hakey ni bewek et

eleg meihhalla. <sup>17</sup> Inemung ni edum dan helag Israel hu epat ni gatut ni libun nelaini ni sindalun e eleg pay maibilang ida sindalun helag Benjamin.

<sup>18</sup> Eleg ida ni umgah ni an mekiggubbat ey minahmahan dan Apu Dios ni nandayawan dan hi-gatud Bethel e kanday "Hipan hi-gamin helag Israel hu memengngulun an menggubbat idan helag Benjamin?" Kan APU DIOS ey "Ya helag Judah hu memengngulu."

<sup>19</sup> Himmaleman ida helag Israel ni newa-waan tu et ida mangkampud neihnup di Gibeah. <sup>20-21</sup> Ida kamenetteng di Gibeah ey neukat idalli helag Benjamin et patyen da dewampulut dewwan libun helag Israel ni nunman ni aggew. <sup>22</sup> Nem impekedhel idan helag Israel hu nemnem da et ida mewan meipustuh etan di nanggugubatan da eman ni nemangulun aggew. <sup>23</sup> Limmaw ida nid Bethel ni an nampehemhemmek nan APU DIOS ingganah ni nehilngan tu et mahmahan dan hi-gatu e kanday "Kaw umlaw kami mewan et midda gubaten hu helag Benjamin e edum ni helag Israel?" Ey kan APU DIOS ey "Em, elaw kayu et yudda gubaten."

<sup>24</sup> Et lumaw ida mewan ni an menggubbat ni helag Benjamin. <sup>25</sup> Nem neukat idalli mewan hu helag Benjamin et patyen da hu hampulun walun libun edum dan helag Israel ni nampan-ispadah. <sup>26</sup> Limmaw ida mewan hu helag Israel di Bethel et ida mampehemhemmek nan APU DIOS et mantepel ida e eleg ida mangan ingganah nehilng. In-appitan da hi APU DIOS ni kagihheba niya nan-appit idan pekiddaguyan. <sup>27</sup> Minahmahan da mewan nan APU DIOS, hedini hipa pehding da. Yan nunman ni tsimpuh ey ya Bethel hu Kaban Apu Dios <sup>28</sup> e hi Pinehas e u-ungngan Eleasar e u-ungngan Aaron hu kamengippaptek e kanday "Kaw umlaw kami pay et midda gubaten hu edum min helag Benjamin winu issiked mi law?"

Himmumang hi APU DIOS et kantuy "Elaw kayu tep pengapput dakeyun kabubuhan."

<sup>29</sup> Et ida mambetak hu sindalun helag Israel di nanlinikweh di Gibeah. <sup>30</sup> Yan meikkatlun aggew ey ida neamung etan di nanggugubatan da heni lan impahding da. <sup>31</sup> Neukat idalli helag Benjamin e netapangan ida etan di a-allaw ni bebley et patyen da hu telumpulun helag Israel etan di keltad ni nanggubatan dad Bethel et yad Gibeah. <sup>32</sup> Ey ida kamantetekkek hu helag Benjamin e kanday "Tayudda mewan kapan-apputa heni lan nunman!"

Nem implanuh ida ngu dedan ni sindalun helag Israel e himbebbessikan da et meipdug ida helag Benjamin ma-lat meidaddawidda etan di bebley da. <sup>33</sup> Hini-yan idan edum ni helag Israel hu nampustuhan da et ida mampustuh di Baal Tamar. Entanniy neukat ida hu nantalun edum dan nambetak etan di appit ni kakelinnugin aggew di Gibeah, <sup>34</sup> et gubaten dadda helag Benjamin di beneggan da. Ey hampulun libun nekallaing ni sindalun helag Israel hu nengubat idan helag Benjamin di hinangga da. Nemahhig humman ni nanggugubatan da ey eleg amtaddan helag Benjamin e ida kamangekeapput. <sup>35</sup> Binaddangan idan APU DIOS hu helag Israel et apputen dadda helag Benjamin e edum dan helag Israel. Dewampulut liman libu et hanggatut hu pintey idan helag Israel etan idan helag Benjamin nunman ni aggew. <sup>36</sup> Ey yan nunman law hu nenang-angan ida law ni helag Benjamin e neapput ida.

Hedin yadda etan nemangulun grupuh ni sindalun Israel ey imbabbangngad da ni ma-lat wada inna-nuddan edum dan sindalun nambetak ni nantalud neihnup di Gibeah ni meukkat ni mekiggubbat. <sup>37</sup> Et maukat ida humman ni nantalun sindalu et humgep idad etan di bebley. Et pampatyen da emin hu tuudman. <sup>38</sup> Nan-uungbal ida dedan etan ida nambetak ni sindalu et yadda edum dan sindalu e lelgaben da etan bebley et mampeahpat hu mahdel ni ahuk <sup>39</sup> et pengi-immatunan idan edum dan mambangngad ida et dadda hanggaen hu helag Benjamin. Yan nunman nemateyan idan helag Benjamin ni telumpulun sindalun edum dan helag Israel et mantetekkek ida e kanday "Tayudda mewan kapan-apputadda heni lan nunman!" <sup>40</sup> Nem entanniy inang-ang da ey kaman-aahuk hu bebley da. <sup>41</sup> Nanligguh ida dama law helag Israel et gubaten dadda helag Benjamin. Ey nemahhig takut idan helag Benjamin tep inamta da law e meka-apput ida. <sup>42</sup> Namsik idad desert nem nampedug idan sindalun helag Israel et pampatyen dadda. <sup>43</sup> Hinelikub dadda helag Benjamin ey nampedug da edum ni bimmesik et ha-kupen dadda appit ni kasimmilin aggew di Gibeah. <sup>44</sup> Hampulut walun libu hu kelalla-ingan ni sindalun Benjamin ni netey nunman ni aggew ni nanggubatan da. <sup>45</sup> Yadda etan mategun natdaan man namsik ida et mampalaw idad eleg mebebleyid Batun Rimmon. Nem pintey idan helag Israel hu liman libun hi-gadad dalan. Intuluy dan pindug ida et patyen da hu dewwan libu etan di neihnup di Gidom. <sup>46</sup> Ya nga-mut tun emin hu netey nunman ni aggew ey dewampulut liman libun netuled ni sindalun helag Benjamin.

<sup>47</sup> Enem ni gatut ni lalakkan helag Benjamin ni ebuh hu natdaan. Bimmesik idad Batun Rimmon etan di eleg mebebleyi et manha-ad idadman ni epat ni bulan. <sup>48</sup> Nambangngad



ida helag Israel di kebebbley di Benjamin et pateyen dan emin hu mategu, lalakki, bibi-i, kaungaunga niyadda animal. Ey linggab dadda bebley.

## 21

<sup>1</sup> Insapatah idan helag Israel ni neamungan dad Mispah e eleg da peahwa hu bibi-in u-ungngaddan lalakkin helag Benjamin. <sup>2</sup> Limmaw idad Bethel di kad-an Apu Dios et manyuyyuddung idadman ingganah nehileng e mannannangngih ida ey pan-e-leten da dasal da e kanday <sup>3</sup> "APU DIOS e Dios ni Israel, ke le an neipahding huyya? Yan nunya ey neendi law hu hakey ni hi-gamin helag Israel?"

<sup>4</sup> Newa-wa et mengapyaddan pan-appitan dadman et man-appit ida et hamulen da ey nan-appit idan megihheb. <sup>5</sup> Kanday "Kaw wadan hi-gatsun helag Israel hu eleg umli eman ni neamungan tayud kad-an APU DIOS di Mispah?" Tep insapatah da dedan ni nunman ni neamungan da e hedini wada eleg meki-emmung man petteyen da. <sup>6</sup> Et-eteng hu lemyung idan helag Israel gapun neipahding idan helag Benjamin e kanday "Yan nunyay innang ni meendi hu hakey ni pewen ni agi tayun helag Israel. <sup>7</sup> Ettu namu law tayu pengellaan ni bibi-in i-ahwaddan natdaan ni lalakkin helag Benjamin tep ay insapatah tayun APU DIOS e eleg tayu peahwa hu u-ungnga tayun bibi-in hi-gada?"

<sup>8</sup> Minahmahan da hedini wada helag Israel ni eleg makiemung di Mispah ey neamtaan da e endi an nekiemung idan iJabes di Gilead. <sup>9</sup> Tep yan nambilangan daddan tutu-u ey endi hu nalpud Jabes di Gilead. <sup>10</sup> Et itu-dak da hampulut dewwan libun sindalu et da patyen emin hu tutu-udman anin idan bibi-i niya gegellang. <sup>11</sup> Kanday "Patey yun emin hu lalakki niya bibi-in in-ulig ni laki." <sup>12</sup> Entanniy wada himmak dadman ni epat ni gatut ni bibi-in endi ahwa da ey eleg ni iulig ni hipan laki et ilaw daddad Siloh di Kanaan.

<sup>13</sup> Nenu-dak idan an mengippeamtaddan helag Benjamin ni wadad Batun Rimmon e negibbuh law hu gubat. <sup>14</sup> Et mambangngad ida helag Benjamin di bebley da et idwat idan helag Israel ni hi-gada etan ida bibi-in iJabes ni eleg da patyen, nem kulang ida humman ni bibi-i. <sup>15</sup> Da kahehemekadda helag Benjamin tep in-abulut APU DIOS ni meippahding humman ni gubat et meendi kumedek hu hakey ni hi-gadan helag Israel. <sup>16</sup> Et humman hu kan idan kamengipappanggulun helag Israel ey "Attu tayu penemmakan ni peahwa tayuddan natdaan ni lalakkin helag Benjamin ey netey idan emin hu bibi-in edum dan helag Benjamin? <sup>17</sup> Mahapul ni mehlag ida et eleg meendi hu hakey ni helag Israel. <sup>18</sup> Nem eleg mabalin ni i-ahwa da hu u-ungnga tayun bibi-i tep insapatah tayu e meiddutan hu tuun mengi-ebbulut e peahwa tu u-ungngatun biid helag Benjamin."

<sup>19</sup> Entanniy ninemnem da e anggegannuy medettengan etan katootoon ni piyestah APU DIOS di Siloh. (Ya Siloh man wadad north ni Bethel, south ni Lebanon ey east ni keltad ni nambattanan ni Bethel et ya Sekem.) <sup>20</sup> Sinugun dadda helag Benjamin e kanday "Kayu pantalud legunta da <sup>21</sup> ey pan-ang-ang-ang kayu et hedini neukat ida etan iSiloh ni bibi-in an meneyyaw man impapuut yun an immiguyud ni i-anemut yu ma-lat iahwa. <sup>22</sup> Et hedini um-alidda a-ammed da ey agi dan lalakkin an manlillih, kammin hi-gaday 'Entan anhan tu bangngad ida u-ungnga yu et ahwaen idan helag Benjamin tep kulang hu himmak dan biid Jabes tep binahbah mi humman ni bebley. Awasi yu anhan. Eleg kayu mambekhul etan di insapatah yu tep eleg yu igeb-at ni indawat ida u-ungnga yun ahwaen idan helag Benjamin.'"

<sup>23</sup> Inu-unnud idan helag Benjamin et pahding da humman. Imbesik dadda etan bibi-in iSiloh et ienamut daddad bebley da. Inyayyaggud da hu bebley da et mambebley idadman. <sup>24</sup> Negibbuh humman et mampangenamut ida helag Israel e wada hakey ni familiyah niya pewen ey immanemut di baley tu.

<sup>25</sup> Yan nunman ni tsimpuh ey endi patul di Israel et wada hakey ey impahding tu hu hipan kayyaggud di tuka pannemnem.

## Ruth

### *Ya meippanggep nunyan libluh Ruth*

Neipeamta eyad libluh hu impahding nan Apu Dios ni nengipaptek idan tutu-u tu anin ni nanligligat ida niya nanhelheltap ida. (Romans 8:28) Ey peamta tu e ya impeminhed niya kapemaptek nan Apu Dios ey beken ni yaddan ebuh helag Israel pengippeangangan tu tep anin idan edum ni tutu-un kamengu-unnud niya kamengiddinnel ni hi-gatu. (Romans 1:5)

Hi Ruth ey kat-agun biin iMoab. Yadda iMoab ni nunman ey buhul idan helag Israel. Nem hi Apu Dios ey nekitbalan idan tutu-u tun helag Israel e ippaptek tudda. Huyyan hi Ruth ey anggehmemek niya endi mengippaptek ni hi-gatu. Entanni ey nambalin ni kamengullug ni Dios idan helag Israel. Neipeang-ang eyad libluh hu impahding nan Apu Dios ni nemendisyon nan Ruth gapuh ni nehammad ni tuka pengullug niya gapuh ni impeminhed tun Naomi e ina eman lan ahwa tu.

Huyyan neipahding di biyag di Ruth nan Boaz ey impeamta tu hu nan-ingnehan di Boaz nan Jesus Christo e mehlag alin Boaz et hi Ruth. Hi Boaz ey neihnup hu neiegian tun Ruth et mukun lebbeng tun hi-gatu mengippaptek nan Ruth. (3:9) Heni daman Jesus e neihnup ni agi tayu niya hi-gatu mengippaptek ni hi-gatsun tutu-u tun kamengullug. (Romans 1:3 et yad Hebrews 2:14)

Hi Boaz ey gintang tu payew Naomi, hanniman daman Jesus e sinekla tu liwat tayu ma-lat wada inna-nu tayun meibbangngad nan Apu Dios. (1 Pet. 1:18-19)

Eleg bumejing hi Boaz ni mengi-ahwan Ruth et ihwang tud kawinetwet, heni daman Jesus e eleg umbaing ni mengibbilang hi-gatsun agi tu ni nengihwangan tun hi-gatsud liwat tayu. (3:11, 4:9-10 et yad Hebrews 2:11)

### *Ya neitudekan eyad libluh:*

1. Ya nanlelehanan Naomi. Ya impeminhed nan Ruth nan Naomi et ya tuka pengullug nan Apu Dios. (chapter 1)
2. Ya nengipeang-angan nan Boaz ni hemek tu et ya tuka pemaptek nan Ruth. (chapter 2)
3. Ya nan-am-amtaan di Boaz nan Ruth. (chapter 3)
4. Ya nan-ahwaan di Boaz. (chapter 4)

### *Ya nekibebleyan di Elimelek et yadda pamilyah tud Moab*

<sup>1-2</sup> Yan eman ni tsimpuh ni yadda huwet hu kaman-ap-apud Israel ey wada etan hakey ni tuun nahlag nan Eprat e hi Elimelek ngadan tun iBethlehem di Judah. Hini-yan tu bebley da tep nemahhig bisil diman. Ingkuyug tu hi Naomi e ahwa tu et yadda etan dewwan u-ungnga dan laki e di Mahlon nan Kilion et ida mekibebley di Moab.

<sup>3</sup> Entanni ey netey hi Elimelek et ebuh ida law di Naomi et yadda dewwan u-ungnga dan nekibebley diman. <sup>4</sup> Yadda etan dewwan lakin u-ungnga da ey nekihawaddan iMoab e di Ruth nan Orpah. Nem entanni et nelabah hu ngannganih ni hampulun toon <sup>5</sup> ey netey daman Mahlon nan Kilion. Et ebuh law hi Naomi ni natdaan tep netey hu ahwatu et yadda u-ungnga tu.

### *Ya nambangngadan di Naomi nan Ruth di Bethlehem di Judah*

<sup>6</sup> Entanniy ninemnem nan Naomi ni mambangngad di bebley dad Judah tep dingngel tu e wada law kennen diman tep binendisyonan APu DIOS ida tuudman. Et mandaddan hi Naomi et yadda dewwan ineputun biin mambangngad. <sup>7</sup> Et umgah ida et hi-yanan da Moab ni nekibebleyan da nem entanni et wadaddad dalam ey nannemnemnem hi Naomi.

<sup>8</sup> Kantuddan etan ni dewwan ineputu ey "Heballi keibangngad kayud baley ni a-ammed yu. Iddasal ku e ya binabbal yuddan ahwa yu niya binabbal yun hi-gak ey henin nunman pehding APu DIOS ni hi-gayu. <sup>9</sup> Ey nakka iddasal e i-abulut tun mengahwa kayu ma-lat wada mewan hu neduttuk ni panha-adan yu."

Humman inhel Naomi ey tudda kapan-akwala, ey wada hakey ey kamannengngih.

<sup>10</sup> Himmumang idan ineputu ey kanday "Eleg, mekillaw kamin hi-gam di bebley yu et mekibebley kamidman."

<sup>11</sup> Nem kan Naomi ni hi-gaday "Hipu yu pekillawwan ni hi-gak? Pambangngad kayu kuma e u-ungngak ida. Kaw dammutu mewan ni man-ungnga-ak ni lakin ahwaen yu? <sup>12</sup> Eleg, e u-ungngak ida. Keibangngad kayu kumad baballey ni a-ammed yu, tep nei-inna-ak law ey eleg mabalin ni nak melehhin. Et anin dedan ni kantu et melehhinnak

mewan et man-ungnga-ak ni lalakki, <sup>13</sup> kaw makkaw eleg kayu mengahwa et hegeden yu kehikkenan da? Eleg mabalin humman! Et-eteng hemek kun hi-gayu nem inna-nu ey humman in-abulut APU DIOS ni meippahding ni hi-gak. Et humman hu heballi anemut kayu ew katteg.”

<sup>14</sup> Inhel tu humman ey nannanangih ida mewan. Et akwalen Orpah hi inetu et umenamut. Nem hedin hi Ruth, man tuka pepillit ni mekillaw nan Naomi.

<sup>15</sup> Kan Naomi nan Ruth ey “Ang-ang mu kedi ni-ngangu hi Orpah e nambangngad di bebley dad kad-an idan dios tu. Kaiunnud ka kuman hi-gatu et umenamut ka dama.”

<sup>16</sup> Nem hinumang Ruth e kantuy “Ebuh anhan tu ika-leg et makilawwak ni hi-gam. Anin ni attu lawwam ey mekillawwak niya anin ni attu mu panha-adan ey yadman nak pekihha-adan. Yadda agim ey ibbilang kuddan agik. Ya Dios mun muka deyyawa ey humman dama Dios ni deyyawen ku. <sup>17</sup> Ya bebley ni ketteyyam ey yadman dama ketteyyan ku et maikulungngak diman. Issapatah ku e anin nehalmu hu pengastigun APU DIOS ni hi-gak hedin hi-yanen daka. Ya katey ni ebuh hu mabalin ni mengappil ni hi-gatan dewwa.”

<sup>18</sup> Inamta law nan Naomi e eleg mehulluli nemnem nan Ruth et isiked tun mengittudak ni hi-gatu.

<sup>19</sup> Et lumaw idan dewwad Bethlehem. Dimmateng idadman ey immamleng ida bimbley ni nenang-ang ni hi-gada. Wada hakey idan bibi-i ey kanday “Kaw hi Naomi huyya?”

<sup>20</sup> Kan Naomi ey “Beken law ni Naomi \* hu pangngeddan yun hi-gak. Marah law hu pangngeddan yun hi-gak tep kamei-ellig e mapeit katteg ngu neitu-wan kun indawat APU DIOS e Kabaelan tun emin. <sup>21</sup> Yan eman ni neni-yanan kun eyan bebley tayu ey wada kamin emin ni hampamilyah, nem yan nunyan imbangngad tuwak APU DIOS ey hakeyyak et endi mengippeamleng ni hi-gak. Beken law ni ya Naomi hu pangngeddan yun hi-gak, tep nemahhig hu ligat kun impehakbat APU DIOS e Kabaelan tun emin?”

<sup>22</sup> Hanniman hu neipahding e nambangngad hi Naomi e kadwa tu etan iMoab ni ineputu e hi Ruth. Yan nunman ey pakelappun ahianin barley di Bethlehem.

## 2

### *Ya an nengamungan nan Ruth ni barley di payew nan Boaz*

<sup>1</sup> Yadman Bethlehem ey wada etan hakey ni lakin kedangyan ey kametbal e hi Boaz ngadan tu e neiegin Elimelek e ahwa lan Naomi.

<sup>2</sup> Hakey ni aggew ey kan Ruth nan inetu e hi Naomi ey “Ettu et lumawwak ni an mengemmung ni inggah idan kaman-enni barley hedin wada mengi-ebbulut?” Kan inetuy “Ku anin e u-ungngak. Lakkay panggu.”

<sup>3</sup> Et lumaw hi Ruth et an mangemmung ni inggah idan kaman-enni. Entanni e tu amtaen ey payew humman nan Boaz e neiegin Elimelek e aman eman lan ahwa tu.

<sup>4</sup> Entanni ey dimmateng hi Boaz ni nalpud Bethlehem et apngaen tudda hu kaman-enni e kantuy “Hi APU DIOS hu memendisyon ni hi-gayu!” Kan idan etan ni tuun hi-gatuy “Hi APU DIOS hu memendisyon daman hi-gam.”

<sup>5</sup> Inang-ang Boaz hi Ruth ey kantu etan ni kamengipappangngulun kaman-enni ey “Hipa eman bi?” <sup>6</sup> Kan etan ni kamengipappangnguluy “Humman etan iMoab ni ingkuyug alin Naomi. <sup>7</sup> Imbagetu hedin dammutun an mengemmung ni na-gah ni barley et iebulut ku. Impalpu tu lan kakkabbuhhan ingganah nunya. Ey nekemtang ni ebuh nanhiduman tu.”

<sup>8</sup> Limmaw hi Boaz di kad-an Ruth et kantun hi-gatuy “Dengel mu e-helek e u-ungngak. Anin entan elaw di edum ni payew ni an mengemmung ni inggah dan barley. Yan eyad payew ku hu pangemmungim. Tu-tu-nud mudda eya biin nakka panggunnu. <sup>9</sup> Ang-ang mu hedin attu da panggeppasan et yadman dama mu pengemmungan. E-helen kuddan etan ni lalakki et endi da ippahding ni lawah ni hi-gam. Hedin peteg inum mu, ka inum eman di inehul dan danum.”

<sup>10</sup> Nanyuung hi Ruth di hinanggan Boaz ni panlisputuh tu et kantuy “Eteng hu amleng ku tep kabbabbal kan hi-gak anin ni nalpu-ak di edum ni bebley.”

<sup>11</sup> Kan Boaz ey “Dingngel ku dedan hu impeminhed mu niya kabinabbal mun inan ahwam neipalpun neteyyan ni bineley mu. Dingngel ku pay e hini-yan mu ammed mu niya bebley yu et meki-li kadya, anin ni eleg mu amta hu elaw midya. <sup>12</sup> Hi APU DIOS e Dios ni Israel e neihikugam hu mengidwat ni wa-hin kayyaggud ni impenahding mu ma-lat endi pangkullangam.”

\* 1:20 1:20 Ya keibbellinan ni Naomi ey kaman-an-anla, ey ya keibbellinan ni Marah ey kaumlelemyung.

<sup>13</sup> Himmumang hi Ruth ey kantuy “Pannananeng mu anhan binabbal mun hi-gak, e apu. Kayyaggud law nakka panggibbek tep ya inhel mu anin ni eleggak mei-ingnegh ida eyan biin muka pangngunnu.”

<sup>14</sup> Entannit nedatngan hu pengngannan ni emaggew ey ineyagan Boaz hi Ruth e kantuy “Tkay et mangan itsu. Aleka eyan sinapay. Ita-mel mu hedin pinhed mu.” Et makikan hi Ruth ida etan ni kamanggunnu et idawtan pay Boaz ni neihanglag ni barley. Nakaphel ey wada pay eleg tu kanen tep dakel kumamman hu indawat dan hi-gatu.

<sup>15-16</sup> Nambangngad mewan hi Ruth ni an mengemmung ni barley ey kan Boaz etan idan tuka pangngunnu lakiy “Anin ni an mengemmung etan di kad-an idan nangkabtek ni barley, ey entan tu temyaw et eleg mabeingan. Ey anin ni humman ni, gimmuyud kayud bintek yu ni inggah yu ma-lat wada alen tu.”

<sup>17</sup> Intagan Ruth amung ingganah ni kamangkehilleng. Inilik tu etan inemung tun han-aggew ey nehuluk ni gadwan langgusih. <sup>18</sup> In-anemut tu et peang-ang tun inetu et idwat tu pay hu eleg tu kanen ni emaggew ni indawat dan kenen tu.

<sup>19</sup> Ey kan inetu e hi Naomi ey “Hipa kampanyew ni mu nengamungan nunyan dakel ni barley? Hi APU DIOS mambendisyon nunman ni tuun nammek ni hi-gam!”

Et ehlen Ruth hu kampanyew ni linawwan tu. Kantuy “Hi Boaz hu kampanyew ni nak nengamungan idan nunyan barley.”

<sup>20</sup> Kan Naomi ey “Hi APU DIOS hu mambendisyon ni hi-gatu! Makulug ni nanengtun binabbal APU DIOS idan mategu et ya nangketey. Humman ni hi Boaz ey neihnup hu neiegian tayun hi-gatu. Wada kelebengan tun mengippaptek ni pamilyah tayu.”

<sup>21</sup> Et kan Ruth ey “Inhel pay Boaz e kayyaggud hedin yad payew tu hu nak pengemmungan e mekikkillawwak idan kamanggeppas diman ingganah ni kegibbuan ni ahiani.”

<sup>22</sup> Kan Naomi ey “Em, kayyaggud numan hedin mekikkillaw kaddan biin kamanggunnud payew tu et endi an meipahding ni lawah ni hi-gam.”

<sup>23</sup> Et mekikkillaw hi Ruth idan bibi-in kamangngunna payew Boaz et mangemung ni barley ingganah ni negibbuh ahiani ni barley niya wheat. Ey nanengtun yad kad-an inetu e hi Naomi hu tuka ennamuti.

### 3

#### *Ya an nenang-angan Ruth nan Boaz*

<sup>1</sup> Hakey ni aggew ey kan Naomi nan Ruth ey “Kayyaggud et anhan hedin wada hemmaken kun mengi-ahwan hi-gam ma-lat wada mengippaptek ni hi-gam. <sup>2</sup> Nemnem mu e hi Boaz e nengiebulut ni meiunnu-unnud kaddan tuka pangngunnu ey agi tayu. Dingngel ku e man-illik nunyan hileng. <sup>3</sup> Heninnuy pahding mu, pan-emeh ka et apuapang annel mun bangbanglu ey nambalwasi kan kayyaggud ni balwasi et lumaw kad tuka pan-illiki. Nem ang-ang mu et eleg iltun Boaz e wada kadman ingganah ni megibbuh ni mengngan niya um-inum. <sup>4</sup> Ang-ang mu hu keuggipan tu et hedin neuyeng, linukyahan mu heli tu ey neugip kad andayyan tu. Ngenamung hu e-helen tun hi-gam.”

<sup>5-6</sup> Inebulut Ruth et lumaw di pan-illikan Boaz et ipahding tun emin inhel inetu.

<sup>7</sup> Inang-ang Ruth e negibbuh hi Boaz ni nengan et uminum ey kayyaggud hu gibek tu et an maugip etan di nengiha-adan dan inilik da. Yan neuyengan Boaz ey nambabbabbal hi Ruth et tu lukyahan hu heli tu et bumaktad di andayyan tu.

<sup>8</sup> Entanni et gawan hileng ey inggibek Boaz et an mampiggad ey wada biin neugip di andayyan tu.

<sup>9</sup> Et kantuy “Kaw hipa ka?” Ey kan Ruth ey “Hi-gak hi Ruth e bega-en mu, apu. Itapew mu hu dugun wangkal mun hi-gak tep neihnup kunu hu neiegian mun hi-gami et dammutun hi-gam mengippaptek ni hi-gak.”

<sup>10</sup> Ey kan Boaz ni hi-gatuy “Hi APU DIOS hu mambendisyon ni hi-gam e u-ungngak. E-etteng pay huyyan mengipeang-angam ni muka pengibbillang ni pamilyah inam nem ya impemaptek mun hi-gatu. Kayyaggud eya impahding mu, tep gullat ni edum ka et i-ang-ang mud kamenikken ni kedangyan winu newetwet hu peki-ahwaan mu.

<sup>11</sup> Entan pandanag mu e u-ungngak. Pehding kun emin hu imbagam. Anin haggud inamtaddan emin ni bimbley e kayyaggud kan tuu. <sup>12</sup> Ma-nu tep makulug ni neihnup hu neiegiaq eman lan ahwan nem wada pay neihehennup nem hi-gak. <sup>13</sup> Nem anin di deya ka et hannak mekihummangan ni hi-gatun kakkabbuhhan. Et hedin pinhed tun hi-gatu hu mengippaptek ni hi-gam ey kayyaggud. Nem hedin eleg tu pinhed ey issapatah kud ngadan APU DIOS e ippaptek dakan hi-gak.”

<sup>14</sup> Et mandeyadman hi Ruth di kad-an Boaz. Nem eleg mekawwa-wa ey bimmangun hi Ruth tep eleg pinhed Boaz ni wada menang-ang ni hi-gatun nandeyadman.

<sup>15</sup> Kan Boaz ey “Imay et ha-adan tan barley eya inwa-ngal mun luput.” Ingkal Ruth et ha-adan Boaz ni nehuluk ni dewampulun kiloh ni barley et patnged tun Ruth et umenamut.

<sup>16</sup> Dimmateng hi Ruth di baley da ey minahmahan inetun hi Naomi hedin inna-nu hu nanhumngangan dan Boaz et ehelen Ruth ni emin hu neipahding. <sup>17</sup> Inhel pay Ruth e kantuy “Indawat tu eya barley tep kantuy ‘Eleg mabalin ni endi mu i-anemut nan inam.’ ”

<sup>18</sup> Kan Naomi ni hi-gatuy “Entan pandanag mu e u-unggak. Nanna-ud ni pehding Boaz ni nunya hu lebbeng tun meippahding.”

## 4

### *Inahwan Boaz hi Ruth*

<sup>1</sup> Nawa-wan nunman et lumaw hi Boaz di eheb ni bebley e kapandadamuin tutu-u hedin wada meihhumngangan. Entanni ey immali etan lakin neka-ihnup hu neiegian tun Elimelek et aygan tu. Kantuy “Ikay e agik et yumudung ita.” Et yumudung humman ni tuu.

<sup>2</sup> Ineyagan Boaz hu hampulun aap-apudman ni bebley et makiyudung ida. <sup>3</sup> Et ehelen Boaz e kantuy “Nambanggad hi Naomi ni nalpud Moab et deh e kantuy iggatang tu hu puyek eman lan agi ta e hi Elimelek. <sup>4</sup> Ey nakka nemnemnema e lebbengtun peamtak ni hi-gam. Et gatangem hedin pinhed mu, tep neihnup neiegiam nem hi-gak. Et humman hu, hedin pinhed mun gettangen, ey ehel mun nunyad hinanggadda eyan aap-apu et denglen da. Nem hedin eleg mu pinhed, ehel mun hi-gak et gatangek. Tep hi-gam hu memengngulun wada lebbengtun mengettang ey hi-gak hu meihhayned.”

Ey kan etan ni lakiy “Anin gettangek.”

<sup>5</sup> Et kan Boaz ey “Kayyaggud hedin hannitan e gettangen humman ni puyek Naomi, nem mahapul ni ahwaem hi Ruth e balun iMoab. Ma-lat hedin wada u-ungnga yu ey humman hu meibbillang ni u-ungnga eman ni netey ni ahwatu et hi-gatu memeltan nunman ni puyek da.”

<sup>6</sup> Immehel humman ni laki ey kantuy “Hedin henin nuntan hu elaw tu ey eggak ew gettanga tep hedin gettangen ku, me-kalan kumedek hu pebeltan kuddan u-unggak. Et humman hu anin ew ni hi-gam pangetang.”

<sup>7</sup> Ya elaw idan helag Israel ni nunman ey hedin wada meiggettang ni puyek ey mahapul ni e-kalen etan ni tuun eleg meminhed ni mengettang hu patut tu et idwat tu etan di neminhed ni mengettang et humman pengi-ang-angan e negibbuh humngangan.

<sup>8</sup> Et humman impahding etan ni laki e ingkal tu hu patut tu et idengdeng tun Boaz et kantuy “Anin ni hi-gam pangetang etan ni puyek.”

<sup>9</sup> Et kan Boaz ida etan ni aap-apu et yadda etan edum ni tuun neamung ey “Hi-gayu hu tistigun nunya e ginetang kun Naomi etan puyek nan Elimelek e impebeltan tudan u-unggatu di Mahlon nan Kilion. <sup>10</sup> Gapu tep gintang ku eya puyek ey ahwaem ku hi Ruth e balun iMoab e ahwa lan Mahlon. Ma-lat hedin wada u-ungnga min laki ey meibbillang ni u-ungnga eman ni netey lan ahwa tu et hi-gatu memeltan ni nunman ni puyek. Ma-lat mannaneng ni eleg mepappeg hu helag da et eleg meendi hu ngadan dad listaan ni tutu-u eyad bebley tayu. Hi-gayun emin hu tistigun nunya.”

<sup>11</sup> Kan idan etan ni neamung ey “Em, hi-gami tistigu. Hi APU DIOS hu mambendisyon etan ni biin um-anemut di baley mu et henillid Rachel nan Leah e nahlagan idan daker ni helag Israel. Ey bendisyonan daka daman APU DIOS ma-lat hi-gam hu mambalin ni kamedeyyaw di helag Eprat ey mandinggel kad Bethlehem. <sup>12</sup> Ey iddawtan daka et anhan APU DIOS ni daker ni u-ungngam henin kadinakel ni helag Peres e u-ungngad Tamar nan Judah.”

<sup>13</sup> Negibbuh humman et awitwen nan Boaz hi Ruth et ienamut tud baley tu et man-ahwadda. Entanni ey binendisyonan APU DIOS hi Ruth et mewad-an et man-ungnga ey laki. <sup>14</sup> Ey kan idan bibi-in nan Naomi ey “Medeyyaw hi APU DIOS tep indawtan dakan inap-apum ni mengippaptek alin hi-gam. Hi APU DIOS hu mambendisyon ni hi-gatu ma-lat mandinggel ali ngadan tud emin di nambebleyan idan helag Israel. <sup>15</sup> Tep hi-gatu e u-ungngan inepum ey hi-gatulli pandinelam ni mengippaptek ni hi-gam hedin meina ka. Beken huttan ni ebuh tep ya etan inepum ey et-eteng neminhed tun hi-gam e kekkeddukdul pay nem ya neminhed ni pitun lakin u-ungnga!”

<sup>16</sup> Impenaptek Naomi humman ni inap-apu tu. <sup>17</sup> Yadda bibi-in bimmebley diman ey kanday “Nahlag law hi Naomi.” Et ngadanan da etan gelang ni hi Obed.

Nehiken hi Obed et mahlag et wada hi Jesse e aman David.

<sup>18-22</sup> Heninnuy hu tenten ni pewen da meippalpun Peres ingganah nan David. Nahlag hi Peres et hi Hesron. Nahlag hi Hesron et hi Ram e aman Aminadab. Nahlag hi Aminadab et hi Nashon. Nahlag hi Nashon et hi Salmon e aman Boaz. Nahlag hi Boaz et hi Obed. Nahlag hi Obed et hi Jesse e aman David.

## 1 Samuel

### *Ya meippanggep eyan libluh ni nemangulun Samuel*

Huyyan nemangulun libluh Samuel ey peamta tudda hu neipahpahding eman ni ketaggun Samuel. Hi Samuel hu nanggillig ni huwet ni nengipappangnguluddan helag Israel. Hi-gatu dama hu nengiehneng idan helag Israel nan Apu Dios.

Nem ay nginhay da hi Apu Dios et papilit dan mahapul da patul ni man-ap-apun hi-gada heniddan edum ni bebley. Nem anin ni hanniman ni nginhay da hi Apu Dios, et in-abulut tun meippahding etan daka ibbaga et putuken tu hi Saul ni pampatul da. Manun laputu tep kayyaggud hi Saul ni patul, nem entanni ey nambalin ni kamampahhiyya et eleg tu law u-unnuden hi Apu Dios.

Et humman hu, ninemnem Apu Dios e mahapul ni e-kalen tu hi Saul ni patul idan helag Israel, et ihullul tu hi David e tuka paka-u-unnudan emin hu pinhed Apu Dios. (13:14)

Ya nanggillig ni neitudek eyad libluh ey ya nengipelilligatan Saul nan hi David, tep kaum-ameh di kapengennappusin David idan buhul ni Israel. Ya hakey mewan ey kaum-ameh tep nandingngel hi David di emin di helag Israel.

### *Yahhuy hu neitudek eyad libluh:*

1. Ya neiungnaan Samuel ni ya nan-ap-apuan tuddan helag Israel. (chapters 1-7)
2. Ya nampatul Saul di Israel niya eleg tu pengu-unnudan nan hi Apu Dios. (chapters 8-15)
3. Ya neputukan David ni meihullul nan hi Saul ni pampatul idan helag Israel niya nengipelilligatan Saul nan David. (chapters 16-30)
4. Ya neteyyan Saul. (chapter 31)

<sup>1</sup> Wada etan hakey ni lakin helag Ephraim e hi Elkanah ngadan tu e nambebley di Ramah di duntug ni Ephraim. Hi Jeroham hu ametu e u-ungngan Elihu e u-ungngan Tohu e u-ungngan Sup e helag Ephraim. <sup>2</sup> Huyyan hi Elkanah ey dewwa ahwa tu e di Hannah nan Peninnah. Wadadda u-ungngan Peninnah, nem hedini hi Hannah man endi u-ungnga tu.

<sup>3</sup> Katootoon ni immegah hi Elkanah di Ramah ni limmaw di Siloh di baley APU DIOS et an mandayaw niya man-appit nan APU DIOS e Kabaelan tun emin. Yadda padidman ey di Hopni nan Pinehas e u-ungngaddan Eli. <sup>4</sup> Hedin nan-appit hi Elkanah nan APU DIOS, man tuka ippatalidda pamilyah tun detag. Hanhakkey hu patal ni tuka iddawat di Peninnah niyadda etan u-ungnga tu. <sup>5</sup> Nem hedini ya tuka iddawat ni patal Hannah man dewwa tep nakappinshed tu, anin ni endi u-ungnga tu tep impambalin APU DIOS ni nebasi. <sup>6</sup> Gapu tep nebasi hi Hannah ey kamekippilliw hi Peninnah ni impeminid Elkanah, ey tuka pippihula niya tuka ba-iba-inga. <sup>7</sup> Humman hu kapehpehding nan hi Peninnah ni katootoon hedini limmaw idad baley APU DIOS di Siloh, et humman gaputun kanengngihin Hannah niya humman eleg tu pengnganni.

<sup>8</sup> Et humman hu, kan Elkanah ni hi-gatuy "Hannah, entan nangih mu niya entan lelemung mu. Pangan ka kuma. Kaw beken ni kekkeddukdul hu et-eteng ni impeminhed kun hi-gam nem ya hampulun lakin u-ungngam?"

<sup>9-10</sup> Wadan pinhakkey hu negibbuh idan nengan di baley APU DIOS di Siloh ey immehngeng hi Hannah et uma-allaw di pangil et mandasal. Nemahhig lemyung tu ey tagan tu nangih. Hi Eli e padi ey kamanyuyyuddung etan di yuddungngan tud neihnup di heggepan ni baley APU DIOS. <sup>11</sup> Nansapatah hi Hannah di dasal tun APU DIOS e kantuy "APU DIOS e kabaelan tun emin, ang-ang mu anhan eya et-eteng ni nakka lelemunyi et baddangan muwak e bega-en mu! Dengel mu anhan eya dasal ku ma-lat idwatan muwak ni u-ungngak ni laki. Issapatah ku e ibbangngad ku metlaing ni hi-gam e APU et hi-gatulli bega-en mun ingganah. Ey anin ni eleg mampepu-lit tep humman kei-angangan tu e indinel kun hi-gam e Apu."

<sup>12</sup> Yan nunman ni kapandasalin Hannah ey kaitettekel nan Eli e padi hu bungut tu. <sup>13</sup> Kaittenuktubun Hannah hu dasal tu et kaman-etwiewitwib hu bibil tu nem endi kamedngel ni ehel tu. Et humman hu, kan Eli ey nebuteng. <sup>14</sup> Et kantun hi-gatuy "Kele kaka mambutteng ni um-alidya? Isiked mu hu mambuttebutteng."

<sup>15-16</sup> Kan Hannah ey "Eleggak mabuteng e apu ey eleggak manginuinum. Bekkennak ni lawah ni bii. Nakka mandasal tep anggehimmekkek katteg ngu gapuh etan ni kamekapkapyan hi-gak et humman nakka pan-iddasal nan APU DIOS."

<sup>17</sup> Kan Eli ey “Umlinggep ka kaya. Hi Apu Dios tayun helag Israel hu mengidwat ni muka ibbaga.”

<sup>18</sup> Kan Hannah ey “Salamat e apu. Ma-nu et anhan hedin kayyaggud hu pannemnem mun hi-gak ni ingganah.” Immanemut hi Hannah et mangan e eleg law umlelemyung.

*Ya neiungngaun Samuel et ya nei-kudan tun APU DIOS*

<sup>19-20</sup> Bimmangun idan dagah di Elkanah et ya pamilyah tun newa-waan tu, et mandayaw idan APU DIOS et han ida mambanggad di bebley dad Ramah.

Entanni ey nambutsug hi Hannah tep dingngel APU DIOS hu dasar tu. Nan-ungnga ey laki et ngadanan tun hi Samuel e ya keibbellinan tu ey ‘Nakdew nan Apu Dios’ tep kan Hannah ey “Kindew kun Apu Dios.”

<sup>21</sup> Entanni ey nedatngan mewan hu tsimpuh ni lawwan di Elkanah et ya pamilyah tud Siloh ni an man-appit nan APU DIOS tep humman dedan daka ippenahding ni katootoon ey wada pay hu insapatah nan Elkanah ni tu i-appit nan APU DIOS, ey yan nunyan tsimpuh hu tu pengippahdingan. <sup>22</sup> Nem eleg makilaw hi Hannah ni nunyan tsimpuh. Kantun ahwatuy “Eggak mekillaw ni nunya. Hehgedek kephuan eyan gelang et hannak ali ilaw di baley APU DIOS di Siloh et idinel kun hi-gatu et manha-ad alidman ni ingganah.”

<sup>23</sup> Kan Elkanah ey “Ngenamung ka, ipahding mu hu muka nemnemneman kayyaggud. Di deya ka tep et ngenamung alin kephuan eyan gelang. Hi APU DIOS hu umbaddang ni hi-gam ni mengippeamun inhel mun hi-gatun ippahding mu.” Et eleg makilaw hi Hannah et ipappaptek tu etan u-ungnga tu.

<sup>24</sup> Nelabah hu pigan toon ey naphu law etan gelang e hi Samuel et ilaw nan Hannah di Siloh di baley APU DIOS. Immalan hakey ni lakkitun bakan tellu toon tu, ya kagedwah ni saku ni alinah niya meinum. <sup>25</sup> Ginibbuh dan wina-tek hu bakan in-appit dan APU DIOS, et ilaw da etan u-ungnga e hi Samuel nan Eli. <sup>26</sup> Kan Hannah ni hi-gatuy “Apu, kaw han-immatun muwak?” Hi-gak la etan biin inang-ang mun immeehneng di deyan nandasal nan APU DIOS. <sup>27</sup> Indasal kun nunman nan APU DIOS e iddawtan tuwak ni u-unggak et adyah hu indawat tu. <sup>28</sup> Yan nunya ey ibbanggad ku eya u-unggak nan APU DIOS et hi-gatu ngenamung ni hi-gatu ingganah mepappeg biyag tu.” Negibbuh unghal da et dayawen da hi APU DIOS.

## 2

*Ya dasar Hannah*

<sup>1</sup> Nandasal hi Hannah e kantuy “APU DIOS, et-eteng hu amleng kun hi-gam tep binaddangan muwak, et ngi-ngian kudda law hu kamemippihul ni hi-gak. <sup>2</sup> Endi edum ni henin hi-gam, APU DIOS e kakkayyaggud. Ey endi edum ni kamei-ellig di batun kakeihikkugi tep hi-gam ni ebuh.

<sup>3</sup> APU DIOS, pasiked mudda etan kamampahhiyan kaum-eheehel ni legelegem, tep hi-gam ni ebuh hu Dios ni nengamta hedin lawah winu kayyaggud hu kapehpehding ni hakey ni tuu, et ngenamung kan pehding mun hi-gatu. <sup>4-5</sup> Yadda nangka-let ni tuu ey lektattuy nambalin idan nekakkapuy e heniddan nahpung la pana. Et yadda nekakkapuy hu mambalin ni neka-let. Yadda kekeddangyan lan nunman ey ida law kamekittعلان kennen da. Yadda kameuppan nunman ey eleg ida law me-puhin kennen da. Henin nunman etan biin eleg la ni pakeungnga ey pitu law u-ungnga tun nunya. Nem ya etan biin dakek u-ungnga tu ey kaumlelemyung law tep neendidda u-ungnga tu.

<sup>6</sup> Ey kabaalam ni memappeg ni biyag ni tuu ni impalaw mu linnawetud bebley idan nangketey di dungay, niya kabaalam mewan ni tegguen hu netey. <sup>7</sup> Muka pambalin ni newetwet hu edum ni tuu niya muka pekeddangyan hu edum. Henin saad e pambalin mun eta-gey hu edum niya nebahah hu edum. <sup>8</sup> Muka pekeddangyan hu newetwet niya mudda kaiha-ad di eta-gey ni saad dan man-ap-apu ma-lat matbal ida. Kabaalam ni ippahding ida huyya e APU DIOS, tep hi-gam hu nanletun puyek ey inhammad mun inha-ad etan di keihha-adan tu ey meippuun di elaw tu.

<sup>9</sup> Mudda kaippaptek e APU DIOS hu tuun kamengu-unnud ni hi-gam. Nem yadda lawah ni tuu ey pellow muddad engeenget e bebley ni nangketey. Et yadda tuun daka iddinell hu kakina-let dan ebuh ey eleg mabalin ni mengapput ida.

<sup>10</sup> Hi-gam e APU DIOS ey huwetam ali emin tuud puyek, et peang-ang mu nemahhig ni bunget muddan buhul mun pemahbaham ni hi-gada. Tep hi-gam ni wadad kabunyan ey peellim ali hu nemahhig ni pengastigum ni hi-gada. Nem wada etan pinutuk mun mampatul ni pengidwatan mun et-eteng ni kabaalam tu et endilli pakeapput ni hi-gatu.”

<sup>11</sup> Immanemut di Elkanah di bebley dad Ramah nem nanha-ad hi Samuel di Siloh, tep mansilbin APU DIOS di kad-an nan hi Eli e padidman.



*Lawah idan u-ungngan Eli*

<sup>12</sup>Yadda u-ungngan Eli ey lawah ida. Eleg da u-unnuda hi APU DIOS ey eleg da mewan ikkaguh hedini manliwwat idan hi-gatu winu eleg. <sup>13</sup>Eleg da lispituha etan olden ni kau-unnudan padi meippanggep ni daka ellad kai-appit idan tuu. Eleg da mewan hehgeda hu lebbengtun meidwat ni hi-gadan detag tep daka tuggunadda bega-en da et hedini wada immi-lin i-appit dan APU DIOS, <sup>14</sup>ey anin ni neiba-nget etan detag et daka an tetwika etan ni tewik ni tellu ngipen tu. Et ngenamung keitwikan tu ey humman kaelladdan padin patal da. Hanniman impenahding idan nunyan u-ungngan Eli di emin ni kai-appit idan helag Israel di Siloh. <sup>15</sup>Ya pay hakey ni impenahding da ey daka tugguna bega-en dan mengellan eleg malutun detag anin ni eleg ni ma-kal hu taban kagihheba di altar ni kamei-appit nan APU DIOS. Et kaumlaw hu bega-en da et kantu etan ni nengi-lin i-appit tuy "Idwat yu hu detag padin meatta tep pinhed tun pantinnangtang. Eleg tu pinhed hu nelutu."

<sup>16</sup>Hedin kan etan ni tuuy "Entannit ekalek tabetun kagihheba et han mu ala hu pinhed mu." Kan etan ni bega-en ey "Eleg. I-lim kuma tep hedini eleg mu iddawat man pampinilliw ku."

<sup>17</sup>Huyyan liwat idan u-ungngan Eli ey lawah ni peteg di hinanggan APU DIOS tep endini hekey lispituh dan kamei-appit ni hi-gatu.

*Yan wada hi Samuel di Siloh*

<sup>18</sup>Ya etan u-ungnga e hi Samuel ey tuka ingunggunni hi APU DIOS. Ey tu dama kaibbalwasi etan ephod e balwasin padi. <sup>19</sup>Katootoon ni kaumkapyu hi inetun ek-ekut ni balwasi tu. Tuka an iddawat ni hi-gatun daka lawwin da pan-appitan ni han-ahwan Elkanah ni pinhakkey ni hantoon. <sup>20</sup>Kabendisyoniddan Eli e kanton Elkanah ey "Hi APU DIOS hu mengidwat ni u-ungnga eyan ahwam ma-lat maihullul eyan u-ungnga yun indawat tun APU DIOS." Hedin negibbu hu bendisyon nan Eli man han ida negawid. <sup>21</sup>Entanni ey tu-wangun binendisyonan APU DIOS hi Hannah et maweda pay edum ni u-ungnga da e tellun laki et ya dewwan bii. Hi Samuel e u-ungnga da ey kamangkehikken law ey nanengtun kamansilbin APU DIOS.

<sup>22</sup>Ya etan padi e hi Eli ey nea-amma law ni peteg ey dingngedingngel tun emin hu meippanggep ni lawah ni kapehpehding idan u-ungnga tudan emin ni tuud Israel. Dingngel tu pay hu daka pengi-ulligiddan bibi-in kamampatek di heggeppan ni daka pandeyyawin APU DIOS. <sup>23</sup>Et kantun hi-gaday "Kele anhan henin nuntan hu yuka pehpehding? Kaiddenaddatteng idan tuun hi-gak hu meippanggep idan lawah ni yuka pehpehding. <sup>24</sup>Beken ni kayyagud ida humman ni nakka deddengngelan kaehheladdan tuun APU DIOS ni yuka pehpehding. <sup>25</sup>Hedin nambahul hu tuud edum tun tuu man dammutun i-ehngeng APU DIOS etan nambahul. Nem hedini hi APU DIOS hu nambahulan ni hakey ni tuu man endi law mengi-ehngeng ni hi-gatu."

Nem humman idan u-ungngatu ey kinehing da hu tugun ameda tep ninemnem law APU DIOS e petteyan tudda gapuh idan nunman ni lawah ni daka pehpehding.

<sup>26</sup>Hi Samuel ey kamangkeetteng law ey kametbal di hinangngab APU DIOS niyad hinangngab idan tuu.

*Ya neabig meippanggep ni pamilyah Eli*

<sup>27</sup>Entanniy wada immalin prophet APU DIOS di kad-an Eli et kantun hi-gatuy "Kan APU DIOS ni hi-gam ey 'Kaw eggak peamta hedini hipa-ak lan nan ammed mu e hi Aaron ni nambalinan dan himbut nan Pharaoh di Egypt? <sup>28</sup>Yan nunman ey pinutuk ku hi ammed mu e hi Aaron et yadda helag tun mambalin ni padik, et hi-gada hu man-appit ni hi-gak ni mengihheb niya hi-gada hu mengibbalwasin ephod e balwasin padi et makihummangan idan hi-gak. Et idwat ku kelebngan dan um-alan patal dad kai-appit idan helag Israel ni hi-gak. <sup>29</sup>Ey kele endi lispituh yuddan kamei-appit ni hi-gak et pinhed yu et pay ni ellan hu kai-appit idan tuun hi-gak? Kele in-abulut mudda u-ungngam ni mengellan kekakkayyaggudan ni detag idan kai-appit ni tutu-uk ni hi-gak et itattabba da? Humman keang-angan tu e e-etteng hu muka pengiddeyyaw idan u-ungngam nem hi-gak.

<sup>30</sup>Hi-gak ni AP-APU e Dios Israel ey insapatah kun nunman e yadda nahlagan yu niya helag yu hu mampeddi ey mansilbin hi-gak ni ingganah. Nem yan nunya ey pappegek humman ma-lat yadda kamandeyyaw ni ebuh ni hi-gak hu ibbilang ku. Eggak ibbilang ida etan eleg menaydayaw ni hi-gak. <sup>31</sup>Medettengan ali hu tsimpuh ni pemetteyak ni emin ni kat-agun lallakkid pamilyah mu niyaddad helag mu ma-lat endillin hi-gada mea-amma. <sup>32</sup>Umlemyung kalli ey maggeh nemnem mun menang-ang-ang idallin edum mun helag Israel tep bendisyonan tudda nem yad pamilyah mu ey endi meduddukkey biyag tu, tep eleg ida mea-amma ni netey ida. <sup>33</sup>Wadalli hakey ni helag mun mampeddin mansilbin hi-gak. Nem umlemyung alin peteg ey endilli namnamah tu. Makulug ni

endilli mea-amnan helag mu tep nehiken ni idan ni netey ida. <sup>34</sup> Ya pengamtaan mu e um-amnuddalli huyyan inhel ku ey mandihhan ni mettey hu dewwan u-ungngam e di Hopni nan Pinehas.

<sup>35</sup> Beken idalli law hu helag mun pambalin kun padi, tep pillien kulli hakey ni padin mengu-unnud niya mengippahding ni pinhed ku. Ippaptek kulli humman ni pillien ku, anin idan helag tu et ingunuan tun ingganah etan tudduen kun patul. <sup>36</sup> Yadda metdaan ni pamilyah mu ey manyu-ung idallin hi-gatu, niya mangkekkedw idallin hi-gatun pihhuh niya kennen. Et kan dallin hi-gatuy: Ala dakemi anhan ni umbaddang ni hi-gayun papaddi ma-lat wada pengellaan min kennen mi.' "

*Ya nampeang-angan Apu Dios nan Samuel*

### 3

<sup>1</sup> Ya etan u-ungnga e hi Samuel ey kamansilbin APU DIOS e tuka babbaddangi hi Eli e padi. Yan nunman ni tsimpuh ey kunan hu kapekihummanganin APU DIOS niya tuka pampeang-angin tuu.

<sup>2</sup> Hakey ni hileng ey an neugip hi Eli. Eleg um-aang-ang law hu matetu tep nea-amma. <sup>3</sup> Hi Samuel ey neugip diman ni baley APU DIOS di kad-an etan ni Kaban APU DIOS. Engeengenget pay ni e nanengtun eleg ma-dep hu dilag ey <sup>4</sup> immehel hi APU DIOS nan Samuel. Himmumang hi Samuel e kantuy "Em, Apu."

<sup>5</sup> Impapuut tun limmaw di kad-an Eli et kantun hi-gatuy "Immali-ak tep muwak kapan-eyyagi!" Nem kan Eli ni hi-gatuy "Kaibangngad kat ka maugip! Eleg daka ayagan." Et mambangngad hi Samuel ni an neugip.

<sup>6</sup> Entanni mewan ey immehel hi APU DIOS e kantuy "Samuel!" Bimmangun mewan hi Samuel et lumaw di kad-an Eli et kantuy "Immali-ak tep inaygan muwak."

Nem kan mewan Eli ey "Eleg daka ayagan e u-ungngak. Kaibangngad kat ka maugip."

<sup>7</sup> Hi Samuel ey eleg tu amta e hi APU DIOS hu immehel, tep endi an inhelan APU DIOS ni hi-gatun nunman. <sup>8</sup> Entanni ey impitlun APU DIOS ni immehel nan Samuel. Bimmangun mewan et lumaw di kad-an Eli et kantun hi-gatuy "Immali-ak tep inaygan muwak."

Ninemnem law Eli e hi APU DIOS hu immehel <sup>9</sup> et kantun Samuel ey "Kaibangngad kat ka maugip et hedini wada mewan um-ehel ey humang mu e kammuy 'Em, APU. Ehel mu pinhed mu, nandaddannak ni mengu-unnud ni e-helen mu.' " Et mambangngad mewan hi Samuel ni neugip.

<sup>10</sup> Entanni ey immali hi APU DIOS et umehneng di kad-an tu et kantun hi-gatuy "Samuel, Samuel!" Himmumang hi Samuel et kantuy "Em, APU. Ehel mu pinhed mu et u-unnuden ku."

<sup>11</sup> Kan APU DIOS ni hi-gatuy "Wadalli ippahding kuddan helag Israel ni edum ni aggew ni kamengippetngan hi-gada, <sup>12</sup> tep peamnuk ni pehding emin hu anggetakkut nan hi Eli et yadda pamilyah tu tep humman dedan la inhel kun hi-gatu. <sup>13</sup> Inhel ku dedan lan hi-gatu e helheltapan idallin pamilyah tu ni ingganah hu pengastiguk ni hi-gada tep nginhay da-ak idan u-ungnga tu. Inamtan Eli e henin nunman hu kapehpehding idan u-ungnga tu nem eleg tudda ehlan. Anin anhan et manghay ida. <sup>14</sup> Et humman hu issapatah kuddan pamilyah Eli e eleg ali me-me-kal huyyan liwat da anin ni hipa i-appit dan hi-gak."

<sup>15</sup> Nambangngad hi Samuel ni neugip ingganah newa-wa et hantu ibeghul hu heggeppan ni baley APU DIOS. Kaumtakut hi Samuel ni menghel nan Eli ni meipanggep ni ini-innep tu, <sup>16</sup> nem inaygan Eli et kantun hi-gatuy "Samuel e u-ungngak, ikay di deya." Kan Samuel ey "Em, apu."

<sup>17</sup> Minahmahan Eli e kantuy "Hipa inhel APU DIOS ni hi-gam? Entan tu iheut ni hi-gak. Ehel mun emin ni hi-gak hu inhel APU DIOS ni hi-gam tep hedini ihhaut mu ey nemahhig pengastigu tun hi-gam." <sup>18</sup> Et ehelen Samuel emin hu inhel APU DIOS e endi tu inhaut. Ey kan Eli ey "Hi-gatu APU DIOS! Kelebbengan tun mengippahding ni emin ni hipan amtatun kayyaggud."

<sup>19</sup> Kamangkehikhikken hi Samuel ey kapekabbaddangin APU DIOS di emin ni tuka pehding. Ey kapeamnun APU DIOS emin hu kaebbigan Samuel. <sup>20</sup> Et lektattuy nan-amtad emin di helag Israel e makulug ni prophet APU DIOS hi Samuel. <sup>21</sup> Intutuluy APU DIOS ni nampeang-ang di Siloh et yadman nengipeamtaan tun Samuel ni meippanggep ni elaw tu.

### 4

<sup>1</sup> Et emin ida helag Israel ey daka ebbuluta e makulug ni emin hu kae-helan Samuel.

*Piniliw idan iPilistia hu Kaban Apu Dios*

Entanni ey neamung ida mewan hu iPilistia ni mekiggubbat ni helag Israel. Ey yadda helag Israel ey nandaddan ida et mangkampuddad Ebeneser. Nangkampudda dama iPilistia di Aphek. <sup>2</sup> Yadda sindalun iPilistia ey dadda ginubat et apputen dadda sindalun Israel e pintey da epat ni libu. <sup>3</sup> Nambangngad ida natdaan ni helag Israel di kampuda ey kan idan aap-apu da ey "Kele an in-abulut APU DIOS et daitu apputen ni iPilistia ni nunya? Mahapul ni tayulli ellan hu Kaban APU DIOS di Siloh et itebin tayu ma-lat eleg daitu apputen idan buhul tayu."

<sup>4</sup> Et umitu-dak idan an mengellan Kaban APU DIOS e Kabaelan tun emin. Huyyan Kaban ey wada dewwan nepaot ni anghel di ta-pew tu e yadman hu kapanha-adin APU DIOS. Yadda etan dewwan u-ungngan Eli e di Hopni nan Pinehas ey nekilaw idad nengiatang ni Kaban APU DIOS. <sup>5</sup> Yan nengidatangan dan Kaban APU DIOS di kampuda da ey nemahhig hu tekuk idan emin ni helag Israel gapun amleng da et nakkayang e neeldeg hu puyek.

<sup>6</sup> Dingngel idan iPilistia hu tekuk idan helag Israel ey kanday "Kele ida kamantetekuk di kampuddan Hebrew?" Yan nengamtaan dan indateng idan Hebrew hu Kaban APU DIOS di kampuda, <sup>7</sup> ey simmakut ida e kanday "Immali hu dios di kampu da! Nanna-ud ni angetakkut hu meippahding ni hi-gatsu! Endi hu an nengipahding ni nunman ida lan edum ni buhul tayu! <sup>8</sup> Kaw hipa makkaw mabalin ni mengihwang ni hi-gatsun nunman idan dios ni Hebrew e et-eteng ni kabaelan da? Humman idan dios hu nematey idalan iEgypt di eleg mebebley. <sup>9</sup> Mahapul ni umtuled itsun iPilistia! Ihammad tayun mekiggubbat e humman pengippeang-angan tayun kaleki tayu. Tep hedin apputen daitu man mambalin itsun himbut idan nunman ni Hebrew henin impahding tayu lan hi-gada. Et humman hu mahapul ni ihhammad tayun mekiggubbat ni hi-gada."

<sup>10</sup> Et endi numan takut dan nekigubat ey inapput dadda helag Israel et mamsik idan nangeikbangngad di bebley da. Yan nunman ey dakel ni peteg hu pintey idan iPilistia ni sindaluddan helag Israel e umlaw di telumpulun libu. <sup>11</sup> Ey piniliw da Kaban APU DIOS et pateyen dadda etan dewwan u-ungngan Eli e di Hopni nan Pinehas.

#### *Ya neteyyan Eli*

<sup>12</sup> Yan nunman ey wada etan helag Benjamin ni bimmesik e nalpud nanggugubatan da et ipa-yuh tud Siloh. Nambi-ki tu balwasi tu et pandep-ulan tu ulutan pengippeangan tu e kaumlelemyung. <sup>13-15</sup> Dimmateng di Siloh ey wada hi Eli e kamanyuyyuddung di yuddungan tud gilig ni keltad e kamanhehhegged ni tuun melpud gubat anin ni eleg um-aang-ang matetu tep nea-amma e nahyam et walu toon tu. Nemahhig kaguh tun meippanggep etan ni Kaban APU DIOS.

Yan nunman ni dintengan etan ni helag Benjamin ey indaddateng tuddan tuu hu nemiliwan idan iPilistia ni Kaban APU DIOS. Et emin ida tuu ey ida kamantetekuk gapuh ni takut da.

Dingngel Eli tekuk da et mahmahan tu e kantuy "Kele ida kamangngangala?"

Impapuut etan ni tuun limmaw di kad-an Eli et ehelen tu gapu tu. <sup>16</sup> Kan nunman ni tuu nan Eli ey "Bimmesikkak alin nalpud gubat et aye akidatteng ku." Kan Eli ey "Et hipa nekapkapy e u-ungngak?"

<sup>17</sup> Kan nunman ni tuu ey "Bimmesik ida sindalu tayu tep neapput ida ey dakel hu netey ni hi-gada. Anin ida etan dewwan u-ungngam e di Hopni nan Pinehas et netey ida. Ey piniliw dan iPilistia hu Kaban APU DIOS."

<sup>18</sup> Dingngel Eli hu neipahding etan ni Kaban APU DIOS ey nanletwad et ma-gah di yinudungan tud gilig ni heggeppan etan di bebley. Et mahpung hu bukew tu et matey, tep nea-amma niya mebel-at tep mateba. Hi-gatu nan-ap-apuddan helag Israel ni na-pat ni toon.

<sup>19</sup> Ya etan inepu tun biin ahwan u-ungnga tu e hi Pinehas ey ngannganih ni man-ungnga. Dingngel tu nemiliwan idan iPilistia ni Kaban APU DIOS, ya nemateyan dan ahwatu ni ya neteyyan aman nan ahwatu ey pinhakkeyey indegeh ni egeh tu. Yan nunman ni nan-ungngan tu ey nampaligat. <sup>20</sup> Kamangkeungnguh hu yayyah tu ey kan idan bibi-in nemaddang ni hi-gatuy "Pekedhel mu nemnem mu, tep adyah e laki eya u-ungngam!" Nem eleg tu hanguden ni himmumang.

<sup>21</sup> Ya impangngadan etan ni ahwan Pinehas etan ni gelang ey "Ikabod" tep kantuy "Endi law dayaw APU DIOS ni hi-gatsun helag Israel." Humman hu kantu tep piniliw idan iPilistia hu Kaban APU DIOS niya netey hu ahwatu et hi aman ahwatu. <sup>22</sup> Impidwa tun inhel et han matey e kantuy "Endi law dayaw APU DIOS ni hi-gatsun helag Israel tep piniliw da Kaban tu."

## 5

*Ya neiha-adan ni Kaban APU DIOS di bebley idan iPilistia*

<sup>1</sup> Yan nemiliwan idan iPilistia ni Kaban APU DIOS, ey intabbitabbin da e inlapu dad Ebeneser et ilaw dad Asdod e et-eteng ni bebley da. <sup>2</sup> Da inha-ad di baley etan ni tuttu-un dios da e hi Dagon et intakdul da. <sup>3</sup> Nawa-wan nunman ey inang-ang idan tuud Asdod e na-gah etan tuttu-un dios da e hi Dagon. Nanlukbub di hinanggan etan ni Kaban APU DIOS, et ibangngad da etan di neiha-adan tu. <sup>4</sup> Nem nawa-wa mewan ey inang-ang da e na-gah mewan e nanlukbub di hinanggan etan ni Kaban APU DIOS, ey neputul hu ulu tu niya na-kal ida ngamay tu e neipassik di petek ni habyen. Ebuh etan annel tun nannaneng ni endi nebahbah. <sup>5</sup> Humman gaputun eleg idan hekey umgasin hu padin Dagon et yadda edum ni kaumhehgep di tempol Dagon etan di na-gahan tu.

<sup>6</sup> Nemahhig nengastigun APU DIOS idan tuud Asdod et yadda etan tuud nanlinikweh ni bebley da e wineda tu nangkemukkel ni laman di annel da. <sup>7</sup> Humman gaputun kan idan tuud Asdod ey "Mahapul ni me-kal di deya etan kaban ni dios idan helag Israel, tep nemahhig tuka pengastigun hi-gatsu et hi Dagon e dios tayu."

<sup>8</sup> Impaeyag dadda etan liman patul di Pilistia et kandan hi-gaday "Hipa pehding tayun kaban ni dios idan helag Israel?" Ey kan idan nunman ni liman patul ey "Ilaw yud Gath," et ilaw dad Gath e hakey mewan ni bebley di Pilistia.

<sup>9</sup> Yan nunman ni neiha-adan tud Gath ey kinastigu mewan APU DIOS ida nambebley diman et nemahhig takut da. Wineda tu hu nangkemukkel ni laman di annel dan emin, anin idan u-ungnga, nea-amma niya nei-inna.

<sup>10</sup> Inlaw idan tuud Gath humman ni Kaban APU DIOS di Ekron e hakey mewan ni bebley di Pilistia nem yan nengidtingan dadman ey kamantetekkkuk ida tuudman e kanday "In-ali da eyad bebley tayu hu kaban ni dios idan helag Israel et pateyen daitu."

<sup>11</sup> Impaeyag idan tuudman emin ida patul di Pilistia et kan idan nunman ni liman patul ey "Pebangngad yu ew etan kaban ni dios idan helag Israel ma-lat eleg itsu matey emin, anin idan pamilyah tayu." Mukun dakel ida netey ni tuu tep nemahhig hu nengastigun APU DIOS ni hi-gada. Et humman hu nemahhig hu takut da. <sup>12</sup> Yadda etan natdaan ni eleg matey ni hi-gada ey newada nangkemukkel ni laman di annel da, et ida kapehemhemmek idan dios da ma-lat baddangan dadda.

## 6

*Ya nengibangngadan idan iPilistia ni Kaban APU DIOS idan helag Israel*

<sup>1</sup> Ya etan Kaban APU DIOS e DIOS idan helag Israel ey neihaha-ad di Pilistia ni pitun bulan. <sup>2</sup> Impaeyag idan iPilistia hu papaddi da et yadda madiba et kandan hi-gaday "Hipa pehding tayun kaban ni dios idan helag Israel? Hedin kan tayuy pebangngad tayu, hipa pellow tayun i-unnud tayu etan di kaban?"

<sup>3</sup> Kanday "Hedin ibbangngad yu huttan ni kaban ni dios idan helag Israel ey mahapul ni wada mei-unnud ni i-appit yun nunman ni dios da ma-lat ma-kal hu liwat yu. Ey me-kal et anhan ida huttan ni degeh yu ey meamta hedin hipa gaputun dakeyu kakennastiguwa."

<sup>4</sup> Kan idan tuu ey "Hipa i-appit tayun hi-gatu?" Kanday "Ya liman nemukel ni balituk ni henin nemukkel ni laman niya liman balituk ni nekapyan henin utut e hanhahkey idan nunman ey i-ehnged da hanhahkey ida etan ni liman patul. Tep beken ni hi-gatsun ebuh nekastigu nem anin idan patul tayu. <sup>5</sup> Mahapul ni kapyaan yudda huyyan balituk ni henin nemukkel ni laman e henin tayu kadedgeha niya henin utut ni impaelin nunman ni dios idan helag Israel ni memahbah ni bebley tayu. Yad henin nunyan pehding yu ey deyyawan yu humman ni dios idan helag Israel. Ma-lat isiked tun mengastigun hi-gatsu et ya dios tayu niya eleg tu bahbahen eya bebley tayu. <sup>6</sup> Entan tu ngehay huyyan planuh tayun mengibbangngad eyan kaban. Entan tu iu-unnud idan iEgypt e manghay ida et kastiguen nunman ni dios da et handa iebulut ni umlaw ida helag Israel.

<sup>7</sup> Kapyu kayu kuman balbaluh ni kaliton et paguyud yun dewwan bakan pakeimpah dan eleg da ni patnaan ni man-elladu winu kaban mangguyud. Nem hedin yadda impah da ey yudda ipukung di kudal. <sup>8</sup> Ilugan yu etan Kaban APU DIOS di kaliton ey pakilugan yudda eta balituk ni iddawit yun multa yun nambahulan yu e iha-ad yu damad hakey ni kaban e itakdul yu humman ni kaban etan di kaban APU DIOS. Ey ihammad yuddan ikeput di kaliton et paguyud yu etan ni dewwan baka et kenamung hu pengillawwan da. <sup>9</sup> Pamga yu ang-ang-ang et hedin mampelaw idad Bet Semes e bebley idan helag Israel, humman pengamtaan tayu e ya APU DIOS hu nengipei-liddan nunyan et-eteng ni hinelheltap tayu. Nem hedin eleg ida mampellow diman ey beken tun nengipei-li nem kapyu tu ngu dedan ni nanligat itsu."

<sup>10</sup> Inu-unnud idan tuu humman ni inhel dan hi-gada et umladdan dewwan baka et paguyud dan etan kaliton. Yadda etan impah da ey da impukung dadda. <sup>11</sup> Inlugan dad kaliton etan Kaban APU DIOS et pakilugan da etan Kaban ni neiha-adan idan kinapya dan balituk ni henin nemukkel ni laman niya henin utut. <sup>12</sup> Entanni ey neni-di-weh ida etan bakan nampalaw di Bet Semes, menglaw ida ey tagan da elug. Neiunud ida etan liman patul ni iPilistia ingganah dimmateng idad pappeg ni Bet Semes.

<sup>13</sup> Neipaddih ni nunman ni tsimpuh e ida kamangeppas hu tuud Bet Semes ni wheat etan di nedeklan di bebley da. Pinhakkeyey inang-ang da e wada etan Kaban APU DIOS e neilugan di kaliton, et ida kamanggagayan peteg ni nenang-angan da. <sup>14</sup> Induttuk idan bakad payew Joshua e iBet Semes, et umehneng ida etan di kad-an ni et-eteng ni batu. Dinikhal idan nunman ni tuu etan kaliton et wa-teken dadda etan baka et giheben dan in-appit nan APU DIOS. <sup>15</sup> Yadda helag Levi ey ingkal da ngu dedan etan Kaban APU DIOS, niya etan kaban ni neiha-adan idan balituk et ipetuk da etan di et-eteng ni batu. Yan nunman ni aggew ey in-appitan idan iBet Semes hi APU DIOS e giniheb da edum ni in-appit da. <sup>16</sup> Inang-ang-ang ida etan ni liman patul ni iPilistia emin humman ni neipahding et han ida mambanggad di bebley dan nunman ni aggew.

<sup>17</sup> Humman idan impalaw ni iPilistia ni kamei-appit APU DIOS, tep ya nanliwatan da ey liman balituk ni henin nemukkel ni laman. In-ehneng idan nunman ni liman balituk etan ida liman patul et ya bebley di Pilistia ni daka pan-ap-apui. Humman idan bebley ey: Asdod, Gaza, Askelon, Gath niya Ekron. <sup>18</sup> Hanniman mewan ida etan balituk ni henin utut e in-ehneng da hu bebley ni kapan-ap-apuidda etan ni liman patul di Pilistia, neluhud di nanlinikweh et yadda eleg maluhud. Et ya daka penginnemin nunyan neipahding ey ya etan et-eteng ni batun wadad payew Joshua e nengipetukan dan Kaban APU DIOS. Humman ni batu ey nanengtun wadadman ingganah ni nunya.

<sup>19</sup> Hi APU DIOS ey pinetey tu nepitun lalakkin bimbebley di Bet Semes, tep inuhdungan da etan bawan ni Kaban tu. Et ida kaumlemyung hu iBet Semes gapuh idan nunman ni pintey APU DIOS ni edum da. <sup>20</sup> Kanday "Hipa makkaw kuma eleg umtakut eyan DIOS e kayyaggud ni peteg? Ettu pengillawwan tayun Kaban tu et eleg manhahha-ad di deya?" <sup>21</sup> Immitu-dak idan mengippeamtaddan iKiriari Jerim et da ehelen ni hi-gada e kanday "Ali kayun mengella eyan Kaban APU DIOS et ilaw yud bebley yu tep imbanggad idan iPilistia."

## 7

### *Ya nan-ap-apuwan Samuel di Israel*

<sup>1</sup> Et lumaw ida iKiriari Jearim et alen da etan Kaban APU DIOS, et ilaw dad baley Abinadab e namebley di duntug et iha-ad dadman. Et hi Eleasar e u-unggan Abinadab hu pinutuk dan mengippatek ni nunman ni Kaban APU DIOS. <sup>2</sup> Nebayag hu neiha-adan nunman ni Kaban APU DIOS di Kiriari Jearim e umlaw ni dewampulun toon. Yan nunman ey nampehemhemmek ida hu helag Israel nan APU DIOS ma-lat baddangan tudda.

<sup>3</sup> Kan Samuel ni hi-gada ey "Hedin makulug ni hi APU DIOS hu pengikkahhakeyan yu law ni yuka pandeyyaw, ey mahapul ni paka-u-unnud yu niya iwalleng yudda etan wadan hi-gayun dios ni edum ni bebley, anin etan kinapya yun dios yun bii e hi Astoret. Idinel yu biyag yun APU DIOS, ma-lat ihwang dakeyuddad iPilistia." <sup>4</sup> Inu-unnud idan helag Israel et iwalleng dadda etan tuttu-u e hi Baal et hi Astoret et hi APU DIOS law ni ebuh hu daka deyyawa.

<sup>5</sup> Entanni ey impalaw Samuel di kebebbley di Israel hu mengippeamtan emin idan edum tun helag Israel, ma-lat maemung idad Mispah e kantuy "Kaemmung kayun emin di Mispah et idasalan dakeyun hi-gak diman." <sup>6</sup> Neamung idan emin di Mispah et tumasuk idan danum et iduyag dad puyek ni in-appit dan APU DIOS. Ey nantepel idan nunman ni aggew e eleg ida mangan tep humman pengippeang-angan da e ida kamantuttuyun nanliwatan da. Kandan dasal day "Mika ebbuluta e nanliwat kamin hi-gam e APU DIOS." Yan nunman di Mispah ey nambalin hi Samuel ni ap-apu da.

<sup>7</sup> Yan nanggelan idan iPilistia e neamung ida helag Israel di Mispah, ey immegah ida etan liman patul niyadda sindaluddan an mengubbat ni hi-gada. Dingngel idan helag Israel e iyaddalli iPilistia ni mengubbat ni hi-gada ey simmakut ida. <sup>8</sup> Kandan Samuel ey "Thammad mun mandasal nan APU DIOS e Dios tayu, ma-lat ihwang daitud pehding idan iPilistia ni hi-gatsu." <sup>9</sup> An immala hi Samuel ni hakey ni impah ni kalneroh et iappit tun APU DIOS e giniheb tun emin. Et mandasal nan APU DIOS ma-lat baddangan tudda. Ey dingngel APU DIOS hu dasal da et baddangan tudda.

<sup>10</sup> Heninnuy hu impahding APU DIOS ni nemaddangan tun hi-gada: Yan nunman ni kapan-i-appit Samuel etan giheben tun i-appit tun APU DIOS, ey neihipud ida law hu

iPilistia ni mengubbat ni hi-gada. Nem endi maptek ey impakidul APU DIOS ni na-let et mabukal ida iPilistia gapuh ni takut da et legemen da besik. <sup>11</sup> Yadda helag Israel ey impapuut dan immegah di Mispah et pan-unuden dadda iPilistia. Et pedalladallan da hu patey ni hi-gada ingganah dimmateng idad Bet Kar.

<sup>12</sup> Immala hi Samuel ni batu et ituun tud nambattan ni Mispah ey Sen ma-lat penginemneman idan tuu. Kantuy "Binaddangan daitun APU DIOS." Et ngadanan tun Ebeneser e ya keibbellinan tu ey "Batun etan ni kaumbaddang." <sup>13</sup> Neapput ida iPilistia et eleg da law gubbaten hu helag Israel ni nunman ni ketaggun Samuel tep eleg iebulut APU DIOS. <sup>14</sup> Binangngad dadda bebley dan pinilih ni iPilistia meippalpud Ekron ingganah di Gath, anin idan edum ni bebley dan sinekup idan iPilistia. Lektattuy insiked ida daman Amorite ni mengubbat idan helag Israel.

<sup>15</sup> Hi Samuel hu impan-ap-apuddan helag Israel ingganah neteyyan tu. <sup>16</sup> Yan nunman ni ketaggun Samuel ey katootoon ni tuka e-pengan umlaw di emin ni bebley idan helag Israel e tuka ippalpud Bethel, yad Gilgal ingganah lad Mispah. Ey kamansilbin huwet di edum tun helag Bethel. <sup>17</sup> Et hedin ginibbuh tun manhuwet idadman ni bebley, ey mambangngad di Ramah e bebley tu, tep hi-gatu kamengippennuh ni kapanhahallaiddan tuudman. Hakey pay ey yad Ramah hu nengapyaan tun pan-appitan dan APU DIOS.

## 8

### *Pinhed idan helag Israel ni wada patul da*

<sup>1</sup> Yan nea-ammaan nan Samuel ey impambalin tudda u-ungnga tun huwet di Israel ni umbaddang ni hi-gatu. <sup>2</sup> Hi Joel hu pengulwan ni u-ungnga tu et hi Abijah hu neihayned. Hi-gada nansilbin huwet di Beersheba. <sup>3</sup> Nem eleg da iu-unnud ni kapehding ameda, tep nemahhig e ya pihhuh hu daka gamgami, et beken law ni limpiyuh hu daka pehding ni manhuwet ni kapandidiklamuhiddan tuu. Ya pihhuh hu daka pengippuunin pengapputan ni tuud kasuh anin ni hi-gada nambahul.

<sup>4</sup> Entanni ey neamung idan emin hu kamengippappangngulun helag Israel et lumaw idad kad-an Samuel di Ramah. <sup>5</sup> Kandan hi-gatuy "Apu Samuel, inna-nukkaw e neamma ka law ey eleg iu-unnud idan u-ungngam di kayyaggud ni muka pehding ni manhuwet? Pinhed min puttuken mu hakey ni mampatul ni hi-gami et heniddan edum ni bebley e wada patul da."

<sup>6</sup> Dingngel Samuel e pinhed dan wada patul da ey eleg tu pinhed humman ni imbagedan mahapul da patul da, et mandasal nan APU DIOS. <sup>7-8</sup> Nem kan APU DIOS ey "Anin u-unnud mu hu pinhed idan tuu et umitudu kan pampatul da. Kammu nem hi-gam dingkug da nem ambeken tep hi-gak inwalleng da tep dingkug da-ak dedan lan nunman. Neipalpun nengipnguluan kun hi-gada et hi-yanan da Egypt ey dingkug da-ak et ya edum ni dios hu dinaydayaw da. Et humman hu ya kakulugan tu ey beken hi-gam hu dingkug da, nem hi-gak. <sup>9</sup> Anin ni u-unnud mu pinhed da. Nem peamtam ni hi-gada e nemahhig ali pehding ni mampatul ni hi-gada."

<sup>10</sup> Et ehlen Samuel emin hu inhel APU DIOS idan nunman ni tuun kamanbeggan patul da. <sup>11</sup> Kantuy "Heninnuy ali pehding ni mampatul ni hi-gayu. Pansindalu tulli edum ni lalakkin u-ungnga yu, et ya edum ey manmanehoh ni kalesah ni meussal di gubat. Memengnguludda edum e mandellan ida ey meitu-tu-nud ida kalesah tun meussal di gubat. <sup>12</sup> Yadda pay edum ey pambalin tun ap-apun hanlibun sindalu et ya edum ey pan-ap-apun neliman sindalu. Et ya edum ni u-ungnga yu ey mangngunnuddad payew tu ey mengapyadda edum ni almas niya kalesah. <sup>13</sup> Yadda dama bibi-in u-ungnga yu ey pambalin tuddan mene-eng ni kennen tu niyadda opisyal tu, mengapyan bangbanglu edum ey mengapyadda edum ni sinapay ni kennen tu."

<sup>14</sup> Ey humman alin mampatul ey ellan tu kekakkayyagudan ni payew yu yadda yuka pantennemin grapes niya olibah et idwat tuddan opisyal tu. <sup>15</sup> Ey ellan tu kapulun emin ni ennien yu niya lameh ni grapes yu et idwat tuddan opisyal tu et yadda bega-en tu. <sup>16</sup> Ey ellan tudda bega-en yun lalakki niya bibi-i. Anin idan kekakkayyagudan ni baka yu niya kebayyu yu et ellan tu ma-lat usalen tun pangngunnu tu. <sup>17</sup> Ellan tu pay hu kappuluddan animal yu. Ey pambalin dakeyun himbut tu. <sup>18</sup> Um-amnun meippahding idalli huuya et nemahhig ali lilih yu gapuh ni pehding ali etan ni patul ni pillien yu nem eleg dakeyulli baddangin APU DIOS."

<sup>19</sup> Nem kahing ida helag Israel e eleg da hengnguda inhel Samuel tep kanda kumedek ey "Beken ali kumamman henin nunman! Pinhed min wada patul ni man-ap-apun hi-gami, <sup>20</sup> henin edum ni bebley, ma-lat wada dama patul min mengippengngulun hi-gami hedid wada gubat."

<sup>21</sup> Dingngel Samuel humman ni inhel idan tuu et ehlen tun emin nan APU DIOS. <sup>22</sup> Kan APU DIOS ni hi-gatuy "Anin! U-unnud mu pangngu numan hu pinhed da." Et kan Samuel idan tuu ey "Anemut kayu nid nampambebleyan yu."

## 9

### *Ya nekapkapa et han mailepu pampatulan di Israel*

<sup>1</sup> Wada etan hakey ni tuun kedangyan niya et-eteng ni lispituh ni tuun hi-gatu e hi Kish hu ngadan tu e helag Benjamin. Huyyan hi Kish ey u-ungngan Abiel e u-ungngan Seror e u-ungngan Bekolat e u-ungngan Apiyah e helag Benjamin. <sup>2</sup> Wada pakehikken ni kat-agun lakin u-ungngan Kish e hi Saul ngadan tu. Endi nekiingneh idan helag Israel di kakinat-agu tu niya hi-gatu keta-ta-geyyan e linabhan tuddan emin hu edum tun helag Israel ni hakey ni piyeh.

<sup>3</sup> Hakey ni aggew ey wadadda netalak ni kebayyun ametu e hi Kish, et kantun u-ungnga tu e hi Saul ey "Awit kan hakey ni bega-en tayu et pangkadwam ni an menemmak idan kebayyu tayun netalak." <sup>4</sup> Inu-unnud Saul humman ni inhel nan ametun pehding tu. Et mangmanglaw idad neduntug di Ephraim et yaddad nanliklikweh di Salisha, nem agda pakehamak hu kebayyu dan netalak. Et mampalaw idad Saalim, nem endiddadman. Et mampalaw ida mewan di nambelleyan idan helag Benjamin nem endidda. <sup>5</sup> Yan dintengan dad bebley di Sup ey kan law Saul ni bega-en tuy "Um-anemut ita ew kuma. Tep entanniy hi-gata kumedek hu ikakkaguh law nan ama e beken ida etan kebayyu."

<sup>6</sup> Nem kan ni bega-en tuy "Eleg, apu. Wadadyan bebley etan prophet Apu Dios ni kalispituhaddan tuu, tep kaum-amnu emin tuka e-hela. Umlaw itan an menang-ang et ibga tan hi-gatu. Nungay et anhan ni ittudu tu kad-an idan kebayyu."

<sup>7</sup> Kan Saul ey "Hedin umlaw itan an menang-ang ni hi-gatu, hipa iddawat ta e na-puh law hu balun ta? Endin hekey hu mabalin ni iddawat tan numman ni prophet Apu Dios."

<sup>8</sup> Kan etan ni bega-en ey "Wada hakey ni gumek ni pihhuh kun iddawat tan hi-gatu ma-lat itudu tu kad-an idan kebayyu."

<sup>9-11</sup> Kan Saul ey "Kayyaggud huttan ni ninemnem mun pehding ta." Et lumaw idad nambelleyan etan ni prophet Apu Dios. Ida kamenyed etan di bebley ey wadadda hinipngat dan bibi-in nalpud bebley ni an man-ehhul et kandan hi-gaday "Kaw wadadman etan tuun maebig?" (Ya daka pangngeddan ni prophet Apu Dios ni numman ey maebig. Et hedin wada pinhed idan tuun ibbagan Apu Dios ey kaday "Tayu angangen etan maebig et hi-gatu pengibegaan tayu.")

<sup>12-13</sup> Kan ida etan ni bibi-iy "Em wadadman. Pakealli tu tep yan nunya pan-appitan idan tuu nan Apu Dios di duntug. Papuut yu hedin pinhed yun ha-kupan tep immegah ni umlaw di duntug ni an mekikkan idan tuu. Ida kamanhehhegged tutu-ud duntug tep eleg mabalin ni mengngan ida tuun neaygan ingganah ni umdateng tep mahapul ni iddasal tun Apu Dios etan neiappit et han ida mangan. Et humman hu papuut yun umlaw ma-lat datngen yu."

<sup>14</sup> Et lumaw di bebley hi Saul e kadwa tu etan bega-en tu. Ida kamenetteng ey dinammu da hi Samuel e kamenglaw di duntug ni an mandeyyaw. <sup>15</sup> Inhel dedan APU DIOS nan Samuel lan kaalman e <sup>16</sup> kantuy "Yan kabbuhhan ni henin nunyan olas ey itu-dak ku hakey ni helag Benjamin et duyagam ni lana ulutu et humman keang-angan tu e hi-gatu pinutuk kun pan-ap-apuddan tuuk ni helag Israel. Hi-gatu mengihwang hi-gayud buhul yun iPilistia. Inang-ang ku kapanhelheltapiddan tuuk ey dingngel ku daka pampehemhememeki."

<sup>17</sup> Inang-ang nan Samuel hi Saul ey kan APU DIOS ni hi-gatuy "Huttan etan tuun inhel kun hi-gam. Hi-gatu hu pan-ap-apuddan tuuk." <sup>18</sup> An neihnup hi Saul nan Samuel et kantun hi-gatuy "Kaw amtam hu kapanha-adi etan ni maebig?"

<sup>19</sup> Ey kan Samuel ey "Hi-gak humman ni maebig. Imay, pamengulu kayudman di duntug ni kapan-appisi et meitu-nuddak tep mekikkan kayun bega-en mun hi-gak ni nunya. Hannak ali ehelan emin ni kakkabbuhan hedin hipa humman ni muka nemneman ibbagan hi-gak et han dakeyu paenamut. <sup>20</sup> Entan pandanag meippanggep etan idan kebayyun amam ni netalak ni tellun aggew tep nehamak ida. Nem ya etan importanteh ni kanamnahaddan emin ni helag Israel ni pan-ap-apu da ey hi-gam et yadda pamilyah mu."

<sup>21</sup> Kan Saul ey "Kele kuma ni-ngangu huttan ni muka pan-e-helan hi-gak? Hi-gak ey nahlaggak nan Benjamin e keek-eketan ni helag Israel. Ey ya pay pamilyah aman neibilangan ku ey hi-gada kebabahan idan helag Benjamin."

<sup>22</sup> Nanteyed idad duntug di kapan-appisi et ipengulun Samuel hi Saul et ya etan bega-en tu etan di mahkang ni kuwaltuh ni daka pengnganni. Et payudung tuddad

kayuddungin kametbal ni tuu. Wadadda edum ni mangilin umlaw di telumpulu bilang da. <sup>23</sup> Kan Samuel etan ni kamampaptek ni kennen ey “Mulli ala etan inhel kun appilen mun detag?”

<sup>24</sup> In-ali etan ni kamene-eng etan nelutun detag ni ulpu et iha-ad tud hinanggan Saul. Kan Samuel ey “Ihidam huttan! Impeappil ku tep in-eng-eng kun hi-gam ni nunyan panhahamulan tayu. Huyya dedan ninemnem kun pehding ni nengayagak idan eyan edum tayu.” Et makikan hi Saul et ya etan bega-en tun nan Samuel ni nunman ni aggew. <sup>25</sup> Negibbuh idan nandayaw et mandayyuddad bebley. Ingkuyug Samuel hi Saul di baley tu et tu idaddan hu keuggipan tud atep. Negibbuh idan nanhumngangan et maugip hi Saul.

<sup>26</sup> Kamangkewa-wa ey binengun Samuel hi Saul et kantuy “Pandaddan ka et hedini, nangnanglaw kayu kuma.” Nandaddan hi Saul et umhiep idan Samuel et unuden da etan keltad. <sup>27</sup> Wadaddad giligi ni bebley ey kan Samuel nan Saul ey “Ehel mun bega-en mu et anin ni ipappangngulu tun umlaw,” et mamengulu etan bega-en ni limmaw. Et kan Samuel nan Saul ey “Entanni et ehlen kun hi-gam etan inhel Apu Dios.”

## 10

### *Ya nemutukan nan Samuel nan Saul ni mampatul*

<sup>1</sup> Inukat Samuel hu neibuti ni lanan olibah et iduyag tud ulun Saul. Inakwal Samuel hi Saul et kantuy “Pinutuk dakan Apu Dios ni pan-ap-appedan helag Israel ma-lat ihwang muddad buhul da. Heninnuy hu pengamtaam e hi APU DIOS hu nemutuk ni hi-gam ni man-ap-apu. <sup>2</sup> Yan lawwam ni entanni ey wada la dewwan tuun dammuen mu etan di neihnip di kulung Rachel di Selsa e nambebleyan idan helag Benjamin. E-helen dan hi-gam e kaday ‘Nehamak ida etan kebayyu, et eleg law medennagi amam meippanggep idan nunman, nem hi-gam law tuka pandennagi, tep tuka mennahmiddan tuu e kantuy: Hipa na-mu hu neipahding ni u-ungngak?’

<sup>3</sup> Et hedini tagan yu elaw et dettengen yu etan et-eteng ni keyew di Tabor, ey dammuen yu mewan hu tellun tuun an man-appit nan Apu Dios di Bethel. Ya hakey ni hi-gada ey tuka gugguyyuda tellun pakeetteng tun gelding. Ya etan hakey ey singnged tu tellun sinapay, ey ya etan hakey ey singnged tu meinnum. <sup>4</sup> Apngaen dakan hi-gada ey iddawtan dakan dewwan sinapay. Ey ellam humman ni sinapay ni iddawtan dan hi-gam.

<sup>5</sup> Ittuluy yun manteyed di duntug Apu Dios di Gibeah e neihnip di nangkampuan idan iPilistia. Hedin muka pandettenga bebley ey wadadda dammuen yun prophet ni kamandayyun nalpudda etan di kapan-appisid duntug. Ida kaman-ayyuding, ida kamampan-a-abek, ida kamanggitalah, niya ida kamantullaling ey pedalladallan dan mandeyyaw nan Apu Dios. <sup>6</sup> Endi maptek ey newada hu Ispirituh APU DIOS ni hi-gam et anin ni hi-gam et ippahding mu dama kapehpehding idan prophets niya melumman hu muka pannemnem. <sup>7</sup> Hedin negibbuh ni neipahding ida huyyan inhel ku ey u-unnud mu hu hipan penemnem Apu Dios ni hi-gam tep baddangan dakan hi-gatu. <sup>8</sup> Pamengulu kan umlaw di Gilgal. Um-ali-ak alidman et mandammu ita et man-appittak nan Apu Dios ni kagihheba niya mehemmul. Heged muwak ni hanlingguan diman ingganah ni elliak et ehelen ku hu ippahding mu.”

<sup>9</sup> Yan nunman ni neni-yanan Samuel nan Saul ey linumman Apu Dios hu kapannemnem Saul et maipahding ni emin nunman ni aggew hu inhel nan Samuel ni meipahding ni hi-gatu. <sup>10</sup> Yan dintangan nan Saul di Gibeah e kadwatu etan bega-en tu, ey dinammu dadda prophets. Entanni newada hu Ispirituh Apu Dios ni hi-gatu et anin law ni hi-gatu ey tuka pan-ippahding hu kapehpehding idan prophet. <sup>11</sup> Inang-ang idan tuun nengamtan hi-gatu ey kaday “Akaw! Kele hipa neipahding nan hi Saul e u-ungngan Kish? Kaw nambalin daman prophet?”

<sup>12</sup> Wada etan hakey ni tuudman ni kantuy “Entan katnga yu hedini nambalin hi Saul ni prophet, anin beken ni prophet hi ametu. Tep hi Apu Dios hu kamemuttuk ni tuun mambalin ni prophet, tep beken ni kamebeltan ni ammed hu kinaprophet.” Neipalpun nunman ey hedini wada impahding ni hakey ni tuun kamengippetnga, man kan idan tuu ey “Kaw anin etan u-ungngan Kish e hi Saul et nambalin ni prophet?”

<sup>13</sup> Insiked Saul etan tuka pan-ippahding et manteyed etan di duntug ni daka pan-appisi. <sup>14</sup> Entanni ey dinammun agin ametu hi Saul et ya etan bega-en tu et kantun hi-gaday “Ettu linallawwan yu?” Kan Saul ni nenumang tu ey “Mi himhimmak hu netalak ni kebayyu mi. Nem eleg midda hanhamak et lumaw kamid kad-an Samuel ni mampebaddang.”



<sup>15</sup> Kan agin ametuy “Et hipa inhel Samuel ni hi-gayu?” <sup>16</sup> Kan Saul ey “Inhel tu e eleg kami mandennag tep nehamak ida kebayyu.” Humman ni ebuh inhel tu. Eleg tu ehelen ni hi-gatu hu inhel Samuel meippanggep ni pambalanan tullin patul ni Israel.

*Ya nepilian nan hi Saul ni mampatul*

<sup>17</sup> Nelabah hu pigan aggew et amungen Samuel hu edum tun helag Israel et mandammuddad Mispah et ehelen tu hu pinhed Apu Dios ni e-helen ni hi-gada. <sup>18</sup> Kantun hi-gaday “Heninnuy hu inhel nan APU DIOS e Dios tayun helag Israel, kantuy ‘Inamta yu e impanguluk a-ammed yun neni-yanan dan Egypt niya inhewang dakeyud emin ni buhul yun nampehelheltap ni hi-gayu. <sup>19</sup> Hi-gak hu Dios yun nengihwang ni hi-gayud emin ni ligat yu. Nem yan nunya ey dingkug yuwak et deh e kayu kamambeggan pampatul yu. Anin tep, kaemung kayud hinanggak meippuun di helag yu et ya pamilyah yu.’”

<sup>20</sup> Inaygan Samuel ida meippalpud helag da et ya pamilyah da. Entanni ey pinutuk APU DIOS hu helag Benjamin. <sup>21</sup> Inaygan Samuel hu pamilyah idan helag Benjamin e hinakkehakkey tudda ey pinutuk Apu Dios hu pamilyah Matri. Lektattuy pinutuk tu hi Saul e u-unggan Kish. Nem da hemmaken ey ettukaw. <sup>22</sup> Et kan idan tuun nan APU DIOS ey “Kaw immali etan pinutuk mu?” Kan APU DIOS ey “Immen e nantalud kad-an ni nampengiha-adan yuddan ngunut yu.” <sup>23</sup> Impapuut dan an impaukat hi Saul et angangen idan tuu ey anakayang e hi-gatu keta-ta-geyyan. Neipappeg di buklew tu hu keta-ta-geyyan idan tuu.

<sup>24</sup> Kan Samuel idan tuuy “Hi-gatu hu pinutuk APU DIOS ni pampatul tayu. Endi hakey ni hi-gatsu hu henin hi-gatu.” Ey kamantetekkek ida tuu e kanday “Hi-gam hu mannenneng ni pampatul mi.”

<sup>25</sup> In-espikar Samuel idan tuu hu meippanggep ni elaw niya kapehding ni patul. Intudek tudda humman et iha-ad tud kapandeyyawin Apu Dios et hantu paenamut ida etan tuu.

<sup>26</sup> Ey immanemut dama hi Saul di Gibeah. Kinadwaan idan eta-gey saad tun winedan Apu Dios hu impeminhed dan hi-gatu. <sup>27</sup> Nem wadadda etan endi silbi tun tuun kanday “Hipa ngu anhan hu kabaelan nunyan tuun ippahding ni panyaggudan tayu?” Daka pihhula hi Saul et endi da indawat ni hi-gatun pengippeang-ang dan lisipituh dan hi-gatun nambalanan tun patul. Dingngel Saul humman ni pihul dan hi-gatu nem impakdag tu i-ineng.\*

## 11

*Ya nengapputan Saul idan iAmmon*

<sup>1</sup> Nelabah hu hambulan ey impangulun Nahas e patul di Ammon ida sindalu tu, et lumaw idan mengubbat idan nambebley di Jabes Gilead et halikuben da humman ni bebley. Et kan idan iJabes nan Nahas ey “Man-uungbal itsu et anin katteg ni hi-gam ingunggunnuan mi nem et eleg dakemi anhan pateyen.” <sup>2</sup> Nem kan Nahas ey “Ebbulutek hu inhel yu, nem mahapul ni pan-ukkitek ni emin hu wannan ni mateyu et kebabba-ingan yun emin ni helag Israel.”

<sup>3</sup> Dingngel idan aap-apud Jabes huyya ey kanday “Anin. Nem idwati dakemin pitun aggew ni wayah mi et umitu-dak kamin an mengipeamtaddan emin ni edum min helag Israel et hedin katteg endi hu memaddang ni hi-gami, anin mansukkuk kamin hi-gayu.” Et abuluten Nahas humman.

<sup>4</sup> Dimmateng ida intu-dak ni iJabes di Gibeah e nambebleyan Saul et peamta da hu inhel etan ni patul di Ammon, ey simmakut idan emin tuudman et nemahhig lemyung da ey ida kamannengngih. <sup>5</sup> Neipaddih ni iyyalli hi Saul ni nalpud payew e ginuyud tu dewwan baketu. Kantuy “Kele kayu kamannengngih? Hipa neipahding?” Et ehelen dan hi-gatu hu inhel idan nalpud Jabes.

<sup>6</sup> Ey nemahhig bungat Saul ni nangngelan tun nunman. Impetuled Apu Dios <sup>7</sup> et kelngen tu etan dewwan baka et tenegtegen tu et pampailaw tuddad kebebbley di Israel e kantuy “Henin nunya hu meippahding ni bakan hipan tuun eleg mekillaw idan tuud Saul nan Samuel ni an mekiggubbat idan Ammonite.” Winedan APU DIOS hu takut idan helag Israel ni nenang-angan dan wada et-eteng ni kabaelan Saul et abuluten dan

\* **10:27** 10:27 Yan nunman ni tsimpuh ey hi Nahas hu patul di Ammon. Nemahhig hu impahpahding tun nanlelehanan idan nambebley di ba-hil ni Jordan ni helag Gad niya helag Ruben, tep intu-dak tudda sindalu tu et da pan-ukiten hu wannan ni mamatta da. Pitun libun ebuh hu eleg maukit hu mateda, tep intalwan dadda etan sindalu et bumsik idad Jabes Gilead.

emin. <sup>8</sup> Inemung Saul idad Besek ey telunggatut ni libu hu bilang idan iIsrael niya telumpulun libu hu sindalun iJudah ni nei-dum ni hi-gada.

<sup>9</sup> Kan daddan etan ni intu-dak idan iJabes ey "Yu peamta bebley yu e eleg mandattek hu aggew ni kabuhhan ey meihwang kayu." Dingngel idan iJabes humman ni inhel idan intu-dak da ey immamleng idan peteg.

<sup>10</sup> An hineul idan tuud Jabes ida Ammonite e kanday "Yan kabuhhan ey mansukkuh kamin hi-gayu et ngenamung katteg hu pinhed yun pehding ni hi-gami." <sup>11</sup> Nem kamangkewa-wan newa-waan tu ey impantelun Saul ida hu sindalu tu, et papuut dan lumaw di nangkampuan idan sindalun Ammonite et pateyen da dakel ni hi-gada ingganah ni emaggew. Yadda eleg da patyen ey neiwehit ida e wada hakkeyey linggem tu besik.

<sup>12</sup> Negibbuh hu gubat ey kan idan tuun nan Samuel ey "Et tudda man etan kanday beken hi Saul ni pampatul da ey? Ayagi yudda et pampateyen midda kedii!" <sup>13</sup> Nem kan Saul ey "Endi hu meippepetey ni nunya tep yan nunyan aggew hu nengihwangan APU DIOS ni hi-gatsun helag Israel di buhul tayu." <sup>14</sup> Kan Samuel ni hi-gaday "Umlaw itsun emin di Gilgal ma-lat tayu ipidwan peamta e hi Saul hu patul tayu." <sup>15</sup> Limmaw idan emin di Gilgal et man-appit idan APU DIOS et man-am-amleng ida ey nanhahamul ida.

## 12

### *Ya inhel Samuel di edum tun helag Israel*

<sup>1</sup> Immehel hi Samuel idan edum tun helag Israel e kantuy "Inu-unnud ku inhel yun pehding ku et putuken ku pampatul yu. <sup>2</sup> Hi-gatu law hu mengipappanggulun hi-gayu. Tep hedin hi-gak, nea-amma-ak law. Ey yadda u-unggak ey wadaddadya. Neipalpun eman ni kimmat-agu-ak ey hi-gak hu nan-ap-apu yu ingganah nunya. <sup>3</sup> Pandengel kayu. Hedin wada impahding kun lawah, ehel yun nunyad hinanggan APU DIOS et yad hinanggan eyan patul ni pinutuk tu. Nemnem yu mewan hedin wadan hi-gayu hu inlak baketu winu kebayyu tu. Kaw wadan hi-gayu hu tinelam ku winu impanhelheltap ku? Kaw wada nengipahdingak ni beken limpiyuh gapu tep nebayadannak. Pekannemnem yu et hedin wada impahding kuddan nunyan hi-gayu ey ehel yu ma-lat baydan ku winu wa-hiak."

<sup>4</sup> Kan idan tuu ey "Endi. Eleg dakemi talamen ey eleg dakemi panligligat. Endi mu inlan hipan wadan hi-gami." <sup>5</sup> Et kan Samuel ey "Hedin henin nuntan ey hi APU DIOS et yan eya patul ni pinutuk tu hu tistigu e endi nambahulan kun hi-gayu." Kan idan tuu ey "Em, hi APU DIOS hu tistigu tayu."

<sup>6</sup> Intu-man Samuel ni immehel e kantuy "Hi APU DIOS hu nemutuk nan Moses et hi Aaron et ipengulu dadda aammed tayun helag Israel ni neni-yan ni Egypt. <sup>7</sup> Imay, i-ineng kayu et peamtak ni hi-gayu hu nambahulan yun APU DIOS, tep implilit yun mahapul ni wada patul yu e humman kei-ang-angan tun endi dinel yun hi-gatu anin ni dakel impeenang-ang tun hi-gayun kayyaggud e inhewang dakeyu et yadda la aammed yu.

<sup>8</sup> Impanhelheltap ida iEgypt ida la aammed tayun helag Israel eman ni linawwan dad Egypt. Et mampehemhemmek idan APU DIOS e baddangan tudda. Himmek tudda et itu-dak tud Moses nan Aaron ni nengipengulun hi-gada et ma-kal idadman Egypt et mambangngad idan nambebley eyad bebley tayu. <sup>9</sup> Nem inwalleng idan aammed tayu hi AP-APU e Dios tayu et iebulut tu law ni gubbaten idan buhul da e humman ida iPilistia, ya patul di Moab et hi Siser e ap-apuddan sindalud Hasor et meapput ida.

<sup>10</sup> Et mampehemhemmek idan APU DIOS e kanday 'Nanliwat kamin hi-gam e APU DIOS tep dingkung daka et di Baal nan Astoret hu dinaydayaw mi. Nem pesinsahi dakemi anhan et ihwang dakemid buhul mi et hi-gam ni ebuh law hu deyyawen mi.' <sup>11</sup> Entanni ey winedan APU DIOS hu mengihwang ni hi-gada. Humman ida ey hi Gideon, hi Barak, hi Jeptah et hannak law meihullul. Emin kami ey inhewang dakeyud buhul tayu ay deh e melinggep itsun emin.

<sup>12</sup> Entanni ey inamta yu e nandaddan hi Nahas e patul di Ammon ni mengubbat ni hi-gayu et iwalleng yu hi APU DIOS e Dios yu e patul yu et kanyun hi-gak ey 'Mahapul tayu hu patul ni pan-ap-apu tayu.' <sup>13</sup> Et adyah eya patul ni pinhed yun man-ap-apun hi-gayu. Hi-gatu hu pinilin APU DIOS. <sup>14</sup> E-helek ni hi-gayun nunya e kayyaggud emin hu meipahding ni hi-gayu, hedin emin kayu anin eya patul yu ey mansilbi kayun APU DIOS e Dios yu, ey daydayawen yu niya u-unnuden yun emin hu pinhed tun pehding yu. <sup>15</sup> Nem hedin nenghayan yu et eleg yu unnuda man kastiguen dakeyu anin eya patul yu.

<sup>16</sup> Ineng itsu et ang-angen yu hu kamengippetngan pehding APU DIOS. <sup>17</sup> Emin itsu ey amta tayu e yan nunya tsimpuh ni tayu kapan-enniin wheat. Ey inamta tayu e eleg

um-udan nunyan tsimpuh. Nem mandasallak et paelin APU DIOS hu kidul niya udan. Hedin meippahding huyya ey pengamtaan yun et-eteng ni nambahulan yun hi-gatun nambagaan yun patul ni pan-ap-apu yu.”

<sup>18</sup> Et mandasal hi Samuel ey impaelin APU DIOS hu kidul niya udan ni nunman ni aggew. Ey simmakut idan peteg tuun nan hi Apu Dios et hi Samuel. <sup>19</sup> Et kandan Samuel ey “Apu, pandasal ka anhan nan APU DIOS e Dios tayu et eleg kami matey. Mika ebbuluta e nambahul kami ey induman mi mewan et mambahul kamin nambagaan min patul ni pan-ap-apu mi.”

<sup>20</sup> Nem kan Samuel ey “Entan takut yu, eleg kayu mettey! Em, nambahul kayun nambagaan yun patul yu. Nem ya importanteh ey isiked yun mandeeyaw niya mansilbid edum ni dios, ma-lat ikahakey yun APU DIOS hu pandeeyaw yu. <sup>21</sup> Entan tudda dayaw hu beken ni makulug ni dios tep endi silbi da. Endi da ibbaddang ni hi-gayu ey eleg dakeyu ihhehwang di buhul yu. Endi silbi da tep beken idan makulug ni dios. <sup>22</sup> Impakulug APU DIOS ni eleg dakeyu iwwalleng tep hi-gayu pinutuk tun pantu-u tu ey eleg mengapkapnyan kebabbahan ni dayaw ni ngadan tu.

<sup>23</sup> Hedin hi-gak ey eleggak mambahul nan APU DIOS ni nak pengissikedan ni mandasal ni panyaggudan yu. Ittuluy kun mengituttuddun kayyaggud niya neiptek ni pehding yu. <sup>24</sup> Peka-u-unnud yu hi APU DIOS ey hi-gatun ebuh hu deyyawen yu. Ey entan tu liwwan etan ida kayyaggud ni impenahding tun panyaggudan yu. <sup>25</sup> Nem hedin tattaggan yun manliwwat ey e-helek ni hi-gayu e apputen dakeyun buhul yu, et emin kayu, anin ni patul yu ey meillaw kayud bebley da.”

## 13

### *Ya eleg pengu-unnudan Saul nan Apu Dios*

<sup>1</sup> Hi Saul ey telumpulu toon tun nampatanul tu et man-ap-apud Israel ni na-pat et dewwan toon. <sup>2</sup> Hakey ni aggew ey pinilin Saul hu tellun libun sindalun edum tun helag Israel ni pan-e-dum tun mekiggubbat idan iPilistia. Et makiha-ad idan hi-gatud Mikmas di duntug di Bethel hu dewwan libu et ikuyug Jonathan e u-ungnga tu hu hanlibu et mampalaw idad Gibeah di nambebleyan idan helag Benjamin. Yadda etan edum ni eleg tu pilien ey impaenamut tuddad baballey da.

<sup>3</sup> Hakey ni aggew ey an ginubat di Jonathan ida sindalun iPilistia di Geba et apputen dadda. Ey nandengel di emin idan iPilistia hu meippanggep ni nunman. Dingngel daman Saul et umitu-dak di emin ni bebley idan helag Israel e impatnul da tangguyup dan mengeyyag idan edum da ma-lat ida makigubat. <sup>4</sup> Dingngel ni emin idan helag Israel e ginubat Saul ida nangkampun iPilistia, et humman hu, nema-man angebebe-hel law ni iPilistia ida. Et lumaw ida etan edum ni sindalu et ida mei-dum di Saul di Gilgal.

<sup>5</sup> Neamung ida dama iPilistia et mandaddan idan an mekiggubbat ni hi-gada. Tellun libu hu kalesah dan kamei-usal di gubat niya enem ni libun sindalu hu kamanluggan. Et yadda etan edum ey dakey ida e henidda palnah di gilig ni baybay e eleg mebillang. Nangkampuddad Mikmas di nengappit di kasimmilin aggew hedin wada itad Bet Aben.

<sup>6</sup> Yan nengubatam daddan helag Israel ey nemahhig hu impahding dan hi-gada. Et humman hu ida nampantalud leyang, yad bitu et yaddad etta-teng ni batu. <sup>7</sup> Nampan-agwat ida edum di Wangwang e Jordan et mampalaw idad Gad et yad Gilead. Ey hedin hi Saul et yadda sindalu tu ey wadaddad Gilgal e simmatakut ida.

<sup>8</sup> Hingged tu hi Samuel di Gilgal ni hanlingguan tep humman inhel Samuel ni hi-gatun pehding tu. Nem endi tun kaum-ali et kapanhi-yanadda law ni sindalu hi Saul. <sup>9</sup> Ey gapu tep eleg pekahged hi Saul ey kantuddan tuu tu ey “Kayu alan i-appit tayun kagihheba niya i-appit tayun hemmullen tayu.”

Et hi-gatu mangiappit etan ni megihheb. <sup>10</sup> Pakegibbuh tun nan-appit ey dimmateng hi Samuel et tu dammuen et apngaen tu. <sup>11</sup> Nem kan Samuel ey “Kele mu impahding huyya?”

Kan Saul ey “Mahapul ni ippahding ku tep da-ak kapanhi-yanaddan sindaluk ey endi kan kaum-ali ey wadadda law hu sindalun iPilistia di Mikmas. <sup>12</sup> Mukun nehagaggak et ipahding ku huyya tep kangkud nemnem kuy ‘Um-alidda et gubaten dakemid Gilgal ey eleg ku ibagan APU DIOS et baddangan tuwak.’ ”

<sup>13</sup> Kan Samuel ey “Eleg mu pakannememen et ipahding mu! Kele eleg mu u-unnuden hu intugun APU DIOS ni hi-gam ni pehding mu? Gullat ni inu-unnud mu, hi-gam et yadda helag mu pampatul idan helag Israel ni ingganah. <sup>14</sup> Nem yan nunya ey eleg mannenneng hu pampatanul di pamilyah mu tep eleg mu u-unnuden hu tugun APU DIOS ni hi-gam. Et humman hu hullulan dakallin APU DIOS et ihullul tu pinhed tu et

humman alin tuu ey peka-u-unnuden tu pinhed Apu Dios, et hi-gatulli pan-ap-apuddan tuu tu.”

<sup>15</sup> Hini-yan Samuel hu Gilgal et lumaw di lawwan tu. Ey hi Saul ey binilang tudda sindalu tu ey enem ni gatut ni ebuh. Et ikuyug tudda et lumaw idad Gibeah di bebley idan helag Benjamin.

<sup>16</sup> Nangkampudman di Saul nan Jonathan e u-ungnga tu et yadda sindalu da. Ey yadda sindalun iPilistia ey nangkampudda damad Mikmas. <sup>17</sup> Humman idan sindalun iPilistia ey nanteluddan negenedwa. Wada hakey ni grupu ey daka an gubbata hipan bebley ni imbesik dadna ngunut diman. Ya hakey ni grupuh ey nampalaw idad Opra di Sual. <sup>18</sup> Ya meikadwan grupu ey nampalaw idad Bet Horon. Et ya meikkatlu ey nampalaw idad pappeg ni bebley di meuhdungan hu Seboim e nandeklan di appit ni eleg mebebleyi.

<sup>19-22</sup> Yan nunman ni daka panggugubati ey endi almas idan helag Israel. Ebuhi Saul et hi Jonathan e u-ungngatun wada ispadah da niya pahul da. Tep yad bebley dad Israel ey endin hi-gadan Hebrew hu nengamtan man-e-dih tep eleg pinhed idan iPilistia ni amtaen dan mengapyan ispadah niya pahul. Et humman hu yad Pilistia hu kapengellaiddan Hebrew ni aledu, gabyon, wahay et ya gapas. Ya bayad ni pena-lidan dan wahay et ya pahul ey hakey ni ek-ekut ni gumek ni pihhu. Et ya bayad ni pena-lidan dan aledu et ya gabyon ey dewwan gumek ni pihhu.

<sup>23</sup> Yadda iPilistia ey intu-dak da edum ni sindalu da et ida mampustuh etan di keltad di Mikmas ni nambabattanan daddan iIsrael.

## 14

### *Ya nengapputan di Saul nan Jonathan idan iPilistia*

<sup>1</sup> Hakey ni aggew ey kan Jonathan etan ni sindalu tun kamenettengged ni happiyaw tu niya almas tu ey “Itay pangngu et ta ang-angen hu kampuddan iPilistia di demang tu.” Et lumaw ida, nem humman ni ninemnem Jonathan ni pehding tu ey eleg tu peamtan ametu e hi Saul. <sup>2</sup> Nangkampu hi Saul di kad-an etan ni keyew e pomegranate di Migron e neihnop di Gibeah. Ya sindalun ametu ey enem ni gatut. <sup>3</sup> Ya hakey idan nunman ni tuun Saul ey ya etan padin nambalwasin ephod e hi Ahijah e u-ungngan Ahitub e agin lkabod e u-ungngan Pinehas e u-ungngan Eli e nampadi lan nunman di Siloh. Eleg amtan Saul et yadda tuu tu e wada linawwan nan Jonathan.

<sup>4</sup> Hi Jonathan et ya etan kat-agun sindalu tu ey mahapul ni iddalan dad Mikmas mat wada inna-nu dan umlaw di kampuddan iPilistia. Wada dewwan et-eteng ni batun nandemang etan di keltad ni dellanen da. Ya ngadan etan ni hakey ey Boses et ya etan hakey ey Senit. <sup>5</sup> Ya hakey ey wadad appit ni north e inhangga tud Mikmas. Et ya etan hakey ey wadad appit ni south e inhangga tud Geba. <sup>6</sup> Kan Jonathan etan ni ingkuyug tun sindalu ey “Itay di nangkampuan idan eman ni iPilistia e eleg mengamtan APU DIOS. Wada et anhan ni baddangan daitan APU DIOS et apputen tadda. Hedin baddangan deita, nanna-ud ni mengapput itsu anin ni hahhakkey itsu.”

<sup>7</sup> Kan etan ni kadwa tun sindalu ey “Anin ni hipan pinhed mun pehding ey pinhed ku dama et baddangan daka.”

<sup>8</sup> Kan Jonathan ey “Et imay tep et lumaw ita. Heninnuy hu pehding ta. Mampeang-ang itan hi-gadan lawwan tad kad-an da. <sup>9</sup> Et hedin kanday hehgeden tadda et hi-gada um-alidya kad-an ta, mannenneng itadyad inehngangan ta. <sup>10</sup> Nem hedin kanday umlaw itadman, umkalab ita et lumaw itad kad-an da tep humman hu pengi-immatunan e pengapput daitun APU DIOS.”

<sup>11</sup> Et mampeang-ang idan sindaluddan iPilistia ey daka heghegnudadda e kanday “Deh, ida kamangkeukkat hu Hebrews di leyang ni nantalwan da.” <sup>12</sup> Simmekuk ida etan iPilistia nan Jonathan et ya etan sindalu tu e kanday “Teyed kayulli et tuttuuduan dakeyu!” Kan Jonathan etan ni sindalu tuy “Kaitu-nud kan hi-gak. Pengapput daitun APU DIOS.”

<sup>13</sup> Et manteyed di Jonathan et ya etan sindalu tu. Nekileban hi Jonathan e inusal tu heli tu niya ngamay tu et mangketukkad ida iPilistia. Et ya etan sindalu tun kameitutu-nud hu nematey ni hi-gada. <sup>14</sup> Dewwampulu pintey Jonathan et ya etan sindalu tun nunman idan iPilistia ni nunman ni dimmatengan da. <sup>15</sup> Yadda sindalun iPilistia ey ida kamangegeygey ni takut da, anin idan wadad kampu da niyadda edum dan nekilaw ni mekiggubbat. Anin ni puyek ey heni kamangegeygey dama tep nemahig hu nengipetakut Apu Dios ni hi-gada.

<sup>16</sup> Yadda sindalun impustuh Saul ni nanguwalyad kampu dad Gibeah e nambebleyan idan helag Benjamin ey inang-ang da e kabsik ida humman ni sindalun iPilistia. <sup>17</sup> Et kan Saul idan ap-apun sindalu tuy “Amung yudda sindalu tayu ma-lat meamta hedin

hipa endidya." Inemung dadda ey endi hi Jonathan et ya sindalu tun kamengnged ni almas tu. <sup>18</sup> Kan Saul etan ni padi e hi Ahijah ey "I-lim alidya etan ephod." Humman ni ephod e bulwasin padi ey keittabittabin Ahijah anin ni attu lawwan daddan helag Israel. <sup>19</sup> Yan nunman ni kaman-e-ehhel hi Saul nan hi Ahijah ey ida kamangngangala iPilistia e endi petek tu kamekapkapyad nangkampuan da. Et kan Saul ey "Hiyya-ew endi law tsimpuh tayun mammamah nan APU DIOS nunya."

<sup>20</sup> Et lumaw di Saul et yadda sindalu tun an nekiggubbat idan iPilistia. Nem dimmateng ida ey inang-ang dadda sindalun iPilistia ni kaman-impapatey tep heni netalak nemnem da. <sup>21</sup> Yadda etan edum ni Hebrew ni neki-dum lan nunman idan iPilistia ey bimmesik ida et ida law meki-dum di edum dan helag Israel ni impangulud Saul nan Jonathan. <sup>22-23</sup> Yan nangngelan idan edum ni sindalun Israel ni nantalud duntug di Epraim e kamemsik ida iPilistia ey neukat ida et ida meki-dum ni nengubat ni hi-gada ingganah ni linabhan da Bet Aben. Yan nunman ni aggew ey inihwang APU DIOS ida helag Israel.

<sup>24</sup> Kimmapuy ida law hu helag Israel tep neu-upadda tep impansapatah Saul ida e eleg ida menggan. Kantuy "Lawah hu meippahding etan ni tuun menggan ni nunyan aggew. Tep mahapul ni endin hi-gatsu menggan ingganah ibbaleh kun apputen ida buhul tayu." Et humman hu endin hi-gada hu nengan ni nunman ni aggew. <sup>25-26</sup> Entannit wadaddad muyeng ey wadadda dinteng dan putsukan. Nem eleg ida kuman tep ida kaumtakut nan Saul.

<sup>27</sup> Nem hi Jonathan ey eleg tu denglen humman ni inhel ametun impenattakut tuddan tuu tu. Et yan wada himmak tun putsukan ey dinuduk tun hulkud tu et kuman ey nekemkemtang ey kedukdul e wada law elet tu. <sup>28</sup> Entanni ey kan etan ni hakey ni sindaluy "Anin anhan et kimmakapuy kami tep neuupa kami nem kami kaumtakut tep kan amam ey 'Lawah hu meippahding ni tuun umkan ni hipan mekkan ni nunyan aggew.'" "

<sup>29</sup> Kan Jonathan ey "Nemahhig kummamman huttan ni impahding ama. Ang-ang yu kedi e kedukdul law e wada elet ku tep kimmannak ni putsukan. <sup>30</sup> Heballi kumaddan hu kimman kayun hipan piniliw yun kennen di yu nekigubatan. Gullat et daddakkel na-mu pintey yun buhul tayu."

<sup>31</sup> Yan nunman ni aggew ey negibbuh ni inapput idan helag Israel ida iPilistia e impalpu da gubat di Mikmas ingganah di Aijalon. Nem yan nunman ey neka-upadda helag Israel. <sup>32</sup> Et humman hu impapuut dan kinleng ida etan animal ni inla dan buhul da henin kalneroh et ya baka et pangkanen da ey eleg ni mehithitan hu kuheyaw da.

<sup>33</sup> Wadadda nengidaddatteng nan Saul e kanday "Akkunu e kapan-ippahding idan sindalu hu pambehullan nan APU DIOS. Daka pangkana hu detag ni wada kuheyaw tu." Et tumkul hi Saul e kantuy "Nambahul kayu! Papuut yu et pumulig kayun et-eteng ni batudya kad-ak. <sup>34</sup> Ey ehel yuddan emin ni edum tayun helag Israel et i-li da baka niya kalneroh da et kelengen dadya et hamulen da. Eleg mabalin ni kennen da hu detag ni wada kuheyaw tu tep mambahul idan APU DIOS."

Et pan-ilaw da bakeda niya kalneroh dan nunman ni hileng et kelengen da et hamulen da. <sup>35</sup> Ya kinapyan Saul ni pan-appitan nan APU DIOS ey humman nemangulun kinapya tu.

<sup>36</sup> Negibbuh humman et kan Saul idan tuuy "Umlaw itsun nunyan hileng ni an mengubbat idan iPilistia et pateyen tayudda et alen tayu hu hipan wadan hi-gada." Kandan hi-gatuy "Em, u-unnuden mi huttan ni kayyaggud ni nemnemen mu." Nem kan etan ni padiy "Entanni et ibega tayu nin Apu Dios hedin huyya pinhed tun pehding tayu."

<sup>37</sup> Et ibegan nan Saul nan Apu Dios e kantuy "Kaw hedin gubbaten midda iPilistia man pengapput dakemi?" Nem eleg humumang hi Apu Dios ni nunman ni aggew. <sup>38</sup> Et ayagan nan Saul emin ida aap-apun helag Israel et kantun hi-gaday "Ikeyuy ni emin et amtaen tayu hedin hipa mewan liwat tayun neipahding nunya. <sup>39</sup> Issapatah kun APU DIOS e wadan ingganah ni kamengihwang ni hi-gatsun helag Israel e ya etan nanliwat ey mahapul ni pepetty, anin ni ya u-unggak e hi Jonathan hu nanliwat!" Nem ida kaum-i-ineng emin. <sup>40</sup> Kan Saul ni hi-gaday "Ehneng kayun emin di pangil et umehngeng kamin han-amad pangil." Kan idan tuuy "U-unnuden mi hu pinhed mun pehding mi."

<sup>41</sup> Entanni et mandasal hi Saul nan APU DIOS e Dios idan helag Israel e kantuy "APU DIOS, kele eleg muwak hummangen nunyan aggew? Humang muwak anhan eyan Urim et ya Thummim, et hedin hi-gak winu yan eya u-unggak e hi Jonathan hu nambahul ey mebunnut hu Urim. Ey hedin yadda tuu hu wada bahul tu ey mebunnut hu Thummim." Entanni ey neamta e di Jonathan nan ametu nambahul e beken ida tuu tep ya Urim nebutut.

<sup>42</sup> Et kan Saul ey "Tbubunut yu hedin hipan hi-gamin u-ungngak hu nambahul?" Ey hi Jonathan hu neamtaan ni nambahul. <sup>43</sup> Minahmahan nan Saul nan Jonathan e kantuy "Hipa impahding mu e u-ungngak?"

Kan Jonathan ey "Kimmannak ni ekket ni putsukan, kaw ebuh humman ey pepettey da-ak?"

<sup>44</sup> Hinumang Saul ey kantuy "Mahapul ni mettey ka e Jonathan. Anin petteyen tuwak nan Apu Dios hedin eggak pehding insapatah ku." <sup>45</sup> Nem kan idan tuun nan hi Saul ey "Kaw pepettey mu hi Jonathan e nengihwang ni hi-gatsun helag Israel ni nunya aggew? Eleg mabalin! Issapatah min APU DIOS e wadan ingganah e endi an me-gah ni bewek tu anin hakey. Hi Apu Dios hu nemaddang ni hi-gatu et ihwang daitun nunyan aggew."

Et eleg da papetey hi Jonathan ni nunman hi aggew tep inihwang idan tuu. <sup>46</sup> Insiked law nan Saul et yadda sindalu tun memdug idan iPilistia et umenamut idad bebley da.

*Ya kapan-ap-apuin Saul et yadda pamilyah tu*

<sup>47</sup> Yan nampatulana Saul di Israel ey impangulu tudda sindalu tun nekigubat emin idan buhul dan nampambebley di nanlinikweh di bebley da et apputen dadda. Emin hu nekigubatan nan Saul ey nengenapput. Ginubat tudda iMoab, iAmmon, iEdom, yadda patul di Sodom et ya iPilistia. <sup>48</sup> Anin yadda iAmalek et netuled ni nekigubat hi-gada et apputen tudda. Inihwang Saul ida helag Israel di emin ni nengubat ni hi-gada.

<sup>49</sup> Huyyadda lakin u-ungngan Saul: Hi Jonathan, hi Isbi et hi Malkishua. Wada dewwan u-ungnga tun bii: Ya pengulwan ey hi Merab, ey hi Mikal hu udidyan. <sup>50</sup> Ya ngadan ni ahwan Saul ey hi Ahinoam e u-ungngan Ahimaas. Ya ngadan ni ap-apun sindalu tu ey hi Abner e u-ungngan Ner e agin ametu. <sup>51</sup> Ya aman Saul e hi Kish ey han-agiddan Ner e aman Abner. Et ya amad Kish nan Ner ey hi Abiel.

<sup>52</sup> Yan nunman ni ketaggan Saul ey e-eggel ni nekigubat idan iPilistia. Et humman hu hedin wada inang-ang tun lakin na-let niya netuled ey tuka ewwita et tuka pambalin ni sindalu tu.

## 15

*Nanggugubat ida iIsrael et yadda iAmalek*

<sup>1</sup> Hakey ni aggew ey kan Samuel nan hi Saul ey "Intu-dak tuwak lan APU DIOS et putuken dakan pampatul idan helag Israel e tuu tu, et yan nunya ey dengel mu eya pinhed Apu Dios e Kabaelan tun emin ni e-helen ni hi-gam. <sup>2</sup> Kantuy 'Mahapul ni kastiguen kudda tuud Amalek tep bintak dadda lan nunman hu tutu-uk ni helag Israel ni nalpuan dad Egypt, et gubaten dadda. <sup>3</sup> Humman hu elaw ka et ipengulum et yu pekabbabhahen ni emin hu wadad bebley di Amalek. Pampatey yuddan emin tuudman, anin idan lalaki niya bibi-i, yadda kaungaunga anin idan gegellang. Endin hekey yu ibbatih, pakipetey yudda baka, yadda kalnero, yadda kamel niyadda kebayyu.' "

<sup>4</sup> Et an amungen idan Saul hu sindalu tud Telaim e dewanggatut ni libu et i-dum tu pay hu hampulun libun sindalun nalpud Judah. <sup>5</sup> Ida nangkampud Saul etan di nedayyukung di bebley idan iAmalek et yadman pambetakan da. <sup>6</sup> Ey nenu-dak ni an menghel idan Kenite e uma-allaw ida ma-lat eleg ida meileggat ni pemetteyan tuddan iAmalek. Tep humman idan Kenite ey kayyaggud la impeang-ang daddan helag Israel ni nalpuan dad Egypt. Et hi-yanen idan Kenite hu iAmalek.

<sup>7</sup> Inapput Saul et yadda sindalu tu hu iAmalek e nampatey dadda meippalpuud Habilah ingganah di Sur e petek ni kasimmilin aggew di Egypt. <sup>8</sup> Dimpap tu hi Agag e patul idan iAmalek. Et yadda tuud Amalek ey impapetey tuddan emin ni sindalu tu. <sup>9</sup> Nem eleg tu papetey hi Agag et yadda kekakkayyaggudan ni kalnero, baka niyadda etan mangkateban impah ni kalneroh et ya baka. Ebu idan etan kamantu-ul niya lawah e endi silbi tun pintey da. Ey eleg da bahbaha idan kayyaggud ni ngunut e wada keiussalan da.

*Na-kal hi Saul ni patul*

<sup>10</sup> Entanni ey kan APU DIOS nan hi Samuel ey <sup>11</sup> "Nakka mantuttuyyun peteg ni nak nemutukan nan hi Saul ni nampatul, tep dingkug tuwak et eleg tu u-unnudun hu inhel kun pehding tu." Kamemunnumunnu hu nemnem Samuel ni nangngelan tun nunman ni inhel APU DIOS et ianteng tu dasal ni nunman ni hileng.

<sup>12</sup> Himmaleman hi Samuel ni newa-waan tu et tu ang-angen hi Saul. Wada nanghel ni kanday "Limlaw hi Saul di Karmel et an mampekapyan batun pengine-nem-neman ni tuun hi-gatu et madegah di Gilgal."

<sup>13</sup> Dinteng nan Samuel ey kan Saul ni hi-gatuy "Kayyaggud et dimmateng ka! Hi APU DIOS hu mambendisyon ni hi-gam! Inu-unnud kun emin hu intugun APU DIOS ni pehding ku."

<sup>14</sup> Nem kan Samuel ey “Tamey nakka deddenggela eluelug ni baka niya kalnero.”

<sup>15</sup> Kan Saul ey “Yadda sindaluk nengipahding. Eleg da pateyen etan ida kekakkayyagudan ni kalneroh niya baka tep kamei-appit ida humman nan hi APU DIOS e Dios mu. Nem pintey dan emin etan edum ni eleg da alen.”

<sup>16</sup> Kan Samuel nan hi Saul ey “Eneeng ka! Dengel mu eya e-helek ni inhel APU DIOS ni nahdem ni hi-gak.” Kan Saul ey “Hipa inhel tu?”

<sup>17</sup> Et ehlen nan Samuel e kantuy “Hi-gam ey inamtam e nebahah hu saad mun nunman nem impambalin dakan APU DIOS ni patul idan helag Israel. <sup>18</sup> In-olden tun hi-gam e kantuy ‘Lakay et yudda gubaten hu tuud Amalek tep nekalliwatan ida. Pakabbahbah yuddan emin et endi metdaan.’ <sup>19</sup> Kele eleg mu u-unnuden hu inhel APU DIOS ni pehding mu? Kele yadda ellan yu etan di bebley hu impapatek mu et deh law e eleg pinhed APU DIOS humman ni impahding mu.”

<sup>20</sup> Kan Saul ey “Nem tam inu-unnud ku hu tugun APU DIOS e impahding kun emin hu inhel tun hi-gak ni pehding ku. Et depapen ku hi Agag ey impapetey kun sindaluk emin hu tuu tu. <sup>21</sup> Nem yadda sindaluk ey eleg da pateyen ida kekakkayyagudan ni kalneroh niya baka ma-lat maiappit idan APU DIOS e Dios mud Gilgal.”

<sup>22</sup> Nem kan Samuel ey “Kaw e-etteng amleng nan APU DIOS di kamei-appit ni hi-gatu nem ya kapengu-unnudin tugun tu? Eleg, tep kapehebbalin APU DIOS hu pengu-unnudan yun hi-gatu nem ya etan i-appit yun kekakkayyagudan ni kalnero. <sup>23</sup> Tep ya kapangngenghayin tuun nan Apu Dios ey neiinggeh di liwat idan maeyak. Hanniman mewan e liwat hu pampahhiyyaan et ngehayen hu tugun tu, heni damengu kadaydayawa hu beken ni makulug ni dios. Et humman hu, eleg daka law ibbilang ni hi-gatun patul, tep eleg mu u-unnuden hu tugun tu.”

<sup>24</sup> Kan Saul ey “Em, nakka ebbuluta e nanliwattak ni hi-gatu, tep eggak u-unnuden huttan ni inhel mu, tep nakka umtakut idan sindaluk et u-unnuden ku hu pinhed da.

<sup>25</sup> Nem pesisahim anhan humman ni impahding ku et makilaw kan hi-gak et nak dayawen hi APU DIOS.”

<sup>26</sup> Nem kan Samuel ni hi-gatuy “Eggak mekillaw ni hi-gam tep eleg mu u-unnuden hu tugun APU DIOS et humman hu beken law ni hi-gam hu tuka ibbilang ni patul di Israel.”

<sup>27</sup> Nanligguh hi Samuel e umlaw et, nem intenged nan Saul di utduk ni balwasi tu et mebi-ki. <sup>28</sup> Kan Samuel ni hi-gatuy “Yan nunya ey beken law ni hi-gam hu patul di Israel, tep ihhullul tu hu hakey ni kakkayyaggud nem hi-gam e heni tu linapdit ni hi-gam hu pan-ap-apuwam henin nebi-kian eyan balwasik tep inya-nit mu. <sup>29</sup> Hi Apu Dios e kamedeyyaw ni Dios idan helag Israel ey eleg man-itek ey eleg tu hulluli nemnem tu tep beken ni tuu.”

<sup>30</sup> Kan Saul ey “Nakka ebbulutan nanliwattak, nem pakilaw ka anhan ni hi-gak et nak mandayaw nan APU DIOS e Dios mu, ma-lat pengipeang-angan mun lispituh mun hi-gak di hinanggaddan edum tayun helag Israel.” <sup>31</sup> Inebulut Samuel humman et makilaw ni hi-gatu et an dayawen nan Saul hi APU DIOS.

<sup>32</sup> Entanni ey kan Samuel ey “Mulli awit deya hi Agag e patul ni iAmalek.” Dimmateng hi Agag ey kamakaddinnel tep kantud nemnem tuy “Eleg da-ak petteyen tep gullat et pintey da-ak la.” <sup>33</sup> Nem kan Samuel ey “Pintey mu hu dakel ni tuu et mambalin ni endi u-unggan dakel ni ina et yan nunya ey petteyen daka dama et endi u-unggan inam.” Inhel tu humman et pateyen tu hi Agag et tenegetegen tud hinangan APU DIOS di Gilgal.

<sup>34</sup> Limmaw hi Samuel di Ramah, ey hedin hi Saul man immanemut di baley tud Gibeah. <sup>35</sup> Neipalpun nunman ingganah ni neteyyan Saul ey limmelemyung hi Samuel gapuh ni hi-gatu nem eleg tu law enang-angen. Et-eteng dama tuttuuyun APU DIOS ni nemutukan tun Saul ni nampatul di Israel.

## 16

### *Hi David hu neputuk ni mampatul*

<sup>1</sup> Entanni ey kan APU DIOS nan hi Samuel ey “Kele ingganah nunyay kakaumlelemyung gapuh nan Saul? Eggak law pinhed ni hi-gatu mampatul di Israel. Ala ka kuman lanan olibah et lumaw kad Bethlehem et mu ang-angen hi Jesse tep pinutuk ku etan hakey ni u-ungnga tun mambalin ni patul.” <sup>2</sup> Nem kan Samuel ey “Nem inna-nun nak pengippahdingan nuntan? Kaw eleg tuwak petteyan Saul hedin dedngelen tu?”

Kan APU DIOS ey “Ala kan kilaw ni bakan lawwam diman et hedin wada mengibbegga hedin hipa mu pehding diman, kammuy ‘Immali-ak tep nak i-appitan hi APU DIOS.’ <sup>3</sup> Ayagim hi Jesse di mu pan-appitan et han ku la ehela pehding mu. Puttukem ali etan ittuduk ni hi-gam ni mampatul.”

<sup>4</sup> Inu-unnud Samuel humman ni inhel APU DIOS et lumaw di Bethlehem. Dimmateng diman ey ida kamangegeygey etan aap-apun an menammun hi-gatu gapuh ni takut da. Kanday “Kaw kayyaggud hu in-alim?” <sup>5</sup> Hinumang Samuel et kantuy “Em, panyaggudan hu in-alik. Immali-ak tep nak i-appitan hi APU DIOS. Pandaddan kayun menaydayaw nan APU DIOS, ey immali kayu et tayu iappitan ni hi-gatu.” Inhel tu daman Jesse niyadda u-ungnga tu humman ey inaygan tudan mekikkan ni hi-gatud i-appit tu.

<sup>6</sup> Dimmateng di Jesse et ang-angen Samuel hi Eliab e u-ungngan Jesse ey kantud nemnem tuy “Nanna-ud ni hi-gatu pinutuk APU DIOS ni mampatul.” <sup>7</sup> Nem kan APU DIOS ni hi-gatu ey “Beken ni hi-gatu pinutuk, tep hedin hi-gak ey nakka i-ang-ang di ugali, bekennak ni henin tuu e ya ang-ang ni tuu hu tuka ibbilang. Penghel mu na-mu nem hi-gatu hu pinutuk kun mampatul, tep in-ang-ang mud kayyaggud ni ang-ang tu niyad kasina-gey tu.”

<sup>8</sup> Entanni et ayagan Jesse hi Aminadab e hakey ni u-ungnga tud hinanggan Samuel, nem kantuy “Beken ni hi-gatu pinutuk APU DIOS.” <sup>9</sup> Intu-dak nan Jesse hi Sammah damad hinanggan Samuel, nem kan Samuel mewar ey “Beken ni hi-gatu pinutuk APU DIOS.” <sup>10</sup> Inaygan Jesse ida etan pitun u-ungnga tu et lumaw idad hinanggan Samuel, nem kan Samuel ey “Endi pinilin APU DIOS ni hi-gada.”

<sup>11</sup> Et kan Samuel nan Jesse ey “Kaw ebuh ida huayan u-ungngam?” Kan Jesse ey “Wada etan udidyan, nem immen di halun e kamampattul ni kalnero.”

Kan Samuel ey “Itu-dak kan an mengeyyag ni hi-gatu tep eleg itu mengngan ingganah umdateng.”

<sup>12</sup> Et an paeyag nan Jesse etan udidyan ni u-ungnga tu e hi David. Immali ey kat-agu ey kayyaggud ang-ang tu nema-ma matetu ey kayyaggud annel tu. Entanni ey kan APU DIOS nan Samuel ey “Hi-gatu pinutuk ku. Inah ka et duyagan ulu tun lana.”

<sup>13</sup> Inu-unnud nan Samuel et alen tu lana et duyagan tud ulun David di hinanggaddan agitu. Neipalpun nunman ey newada Ispirituh APU DIOS nan David ey eleg tu hi-yana. Negibbuh humman et mambanggad hi Samuel di Ramah.

#### *Kaigiggitalahin David hi Saul*

<sup>14</sup> Hedin hi Saul man inwalleng law ni Ispirituh APU DIOS et maihullul etan lawah ni ispirituh ni intu-dak APU DIOS et tuka petattakut niya tuka panligligat hi Saul. <sup>15-16</sup> Kan ida etan ni bega-en nan Saul ni hi-gatuy “Ya etan lawah ni ispirituh ni intu-dak Apu Dios hu kamengippeligligat ni hi-gam. Hedin pinhed mu e Apu, kami umhamak ni nelaing ni manggitalah et hedin himpaw daka etan ni lawah ni ispirituh man petnul tu gitalah tu et yumaggud ka mewar.”

<sup>17</sup> Et kan Saul ni hi-gaday “Em, kayu tep hamak ni nelaing ni manggitalah et i-li yudya.”

<sup>18</sup> Immehel etan hakey ni bega-en tu ey kantuy “Wada etan inamtak ni lakid Bethlehem ni u-ungngan Jesse e beken ni nelaing ni ebuh ni manggitalah, nem kayyaggud pay ni laki ey netuled niya nelaing ni meippanggep ni gubat niya kayyaggud tuka pan-e-ehhel. Ey kabaddangin APU DIOS di emin ni tuka pehding.”

<sup>19</sup> Et menu-dak hi Saul di kad-an Jesse et kantuy “Itu-dak mudya etan u-ungngam ni kamampattul ni kalneroh e hi David.” <sup>20</sup> Inebulut Jesse et idaddan tu dakel ni sinapay niya meinum et ya gelding, et ilugan tud kebayyu et paela tun David ni tu iddawat nan Saul. <sup>21</sup> Naha-ad hi David di baley Saul et mansilbin hi-gatu. Nakappinshed nan hi Saul hi David et hi-gatu hakey ni kamengnged ni almas tu.

<sup>22</sup> Entanni ey nenu-dak hi Saul di kad-an nan Jesse et tu ibega e kantuy “Tebulut mu et mambalin hu u-ungngam e hi David ni hakey ni mansilbin hi-gak tep nakappinshed ku.” Et iebulut nan Jesse.

<sup>23</sup> Neipalpun nunman ey hedin immali etan lawah ni ispirituh ni kapeellin Apu Dios ni kamengipeligligat nan Saul, ey kamanggitalah hi David et ma-kal etan lawah ni ispirituh nan hi Saul et kaumyaggud hu tuka panggibbek.

## 17

#### *Inapput David hi Goliath*

<sup>1</sup> Hakey ni aggew ey neamung ida hu sindalun Pilistia di Sokoh e bebley di Judah ma-lat makigubat ida. Nangkampuddad Ephes Dammim e nambattanan ni Sokoh et ya Asekah. <sup>2</sup> Inemung daman Saul ida sindalu tud Nedeklan e Elah di demang ni nangkampuan idan iPilistia et mandaddan idan mekiggubbat ni hi-gada. <sup>3</sup> Nandimmang ida e sindalun Pilistia di hakey ni duntug, et yadda sindalun Israel di hakey ni duntug. Ya etan nedayyukung hu nambabattanan da.



<sup>4</sup> Entanniy neukat alid kampuddan iPilistia hu et-eteng ni tuu e tudda kehingngihingn-gita. Hi-gatu hi Goliath di Gath e ketultuledan ni hi-gadan emin ni sindalud Pilistia. Eta-gey ni tuu e nehuluk ni heyam ni piyeh hu kasina-gey tu. <sup>5</sup> Ya helmet tu niyadda edum ni tuka ihuklub di annel tun nekapyan giniling, ey umlaw ni nelimat pitun kiloh hu bel-at tu. <sup>6</sup> Wada pay hu neiuhklub di heli tun giniling ey wada ansikkey ni giniling ni pahul tun hinakbatan tu. <sup>7</sup> Ey wada pay hu hakey ni et-eteng ni peteg ni pahul tu ey mahdel e pitun kilo hu bel-at tu ey et-eteng hu palat tu. Kamemappangngulu etan hakey ni sindalun nangged ni happiyaw tu hedini wada lawwan tu. <sup>8</sup> Singkukan tudda sindalun iIsrael e kantuy "Hi-gayuddan helag Israel e bega-en Saul! Kaw nandaddan kayun mekiggubbat? Imay pili kayun mekihangan hi-gak et manhanga kamin mampetty. Hi-gak etan netuled ni sindalun iPilistia. <sup>9</sup> Hedin petteyen tuwak, anin ni pambalin dakemin bega-en yu. Nem hedini apputen ku et petteyen ku ey mambalin kayun bega-en mi. <sup>10</sup> Kaw wada hakey ni sindalun emin ni Israel hu kabaelan tun mekihangan hi-gak? Itu-dak yulli et mampatey kami."

<sup>11</sup> Dingngel nan Saul et yadda sindalud Israel hu inhel tu ey nedismayah ida niya simmakut idan peteg.

<sup>12</sup> Wada hi David ni nunman di kad-an ametu e hi Jesse di Bethlehem di Judah. Hi Jesse e helag Eprat ey walu hu laki u-ungnga tu. Nea-amma law eman ni nambalin Saul ni patul. <sup>13-15</sup> Yadda etan tellun u-ungnga tun nanhayhayned meippalpu penggulwan ey hi Eliab, hi Abinadab et hi Samah, ey ida nei-dum di sindalun Saul ni an nekigubat idan iPilistia. Hi David e udidian ey kamekihha-ad di baley Saul nem kaman-inlaw di kad-an ametud Bethlehem ni an memaddang ni hi-gatun mengippatek ni kalneroh da.

<sup>16</sup> Kewa-wa-wan na-pat ni aggew, ey kameukkat hi Goliath ni kakkabbuhhan niyan mahmahdem ni meneghegnit idan sindalun Israel ni mekipetty ni hi-gatu.

<sup>17</sup> Hakey ni aggew ey kan Jesse nan hi David e u-ungnga tu ey "Alam eya kagedwah ni sakuh ni neihanglag ni begah niya hampulun sinapay et papuut mun umlaw di kampuddan agim et mu idwat ni hi-gada. <sup>18</sup> Peki-lam eya hampulun mebanglun cheese ni mekkan et idwat mu la etan ni ap-apu da. Ey ang-ang mu hedini hipa inna-nudda etan ni agim niya ehel mun hi-gada et mantudek idali. <sup>19</sup> Immen ida agim niyadda edum dan sindalun Israel etan di Nedeklan e Elah, tep ida kamekiggubbat idan iPilistia."

<sup>20</sup> Himmaleman hi David ni newa-waan tu e inhi-yan tun etan ni hakey ni kamampattul etan ida kalneroh da, et manglaw e inla tu etan balun idan agitu e inu-unnud tu inhel ametu. Umdateng hi David di nangkampuan idan sindalun helag Israel ey katkuk ida e immeladdan an mekiggubbat. <sup>21</sup> Entanni ey nanhenup ida sindalun helag Israel et ya sindalun iPilistia. <sup>22</sup> Inhi-yan David hu kalga tu etan ni kamanguwalyan mahapul da et tudda hamaken agi tu. <sup>23</sup> Kamekiung-ungbal hi David ida etan ni agitu ey neukat ali mewan etan sindalun Pilistin e hi Goliath e tuka pantetkukidda hu sindalun Israel e henin impenahding tun kewa-wa-wa e tudda kahennegnit mekipetty ni hi-gatu. Et hi David ey dingngel tu humman ni intekuk tu. <sup>24</sup> Inang-ang idan sindalun Israel hi Goliath ey kabsik idan takut da.

<sup>25</sup> Ida kaman-inmamamah e kanday "Kaw inang-ang yu humman ni et-eteng ni tuu? Daitu kahennegnit. Ey kaw dingngel yu inhel ni patul tayu e peahwa tu kunu etan u-ungnga tun bii etan ni memetty nan hi Goliath ey eleg pay mambeyyad hu pamilyah tun buwis?"

<sup>26</sup> Minamahahan David ida etan ni sindalu e kantuy "Hipa gun-uden etan ni memetty eman ni et-eteng ni tuun iPilistia ma-lat mepappeg hu tu peningngihingngit idan sindalu tayu? Hipa ngu anhan humman ni tuun eleg mengullug nan Apu Dios e tuka ngengngehayadda hu sindalun Apu Dios e wadan ingganah?" <sup>27</sup> Et ehelen dan hi-gatu hu gun-uden etan ni tuun memetty ni hi-gatu.

<sup>28</sup> Dingngel nan Eliab e pengulwan David humman ni inhel tu ey imbunget tu e kantuy "Hi-gam kedi ngudama ey lawah wadad nemnem mu ey ka kamampahhiya. Kele wada kadya? Hipa mengippatek idan kalneroh tayun muka ipappattul? Immali kan ebuh ni an man-ang-ang-ang eyan gubat."

<sup>29</sup> Nem kan David ey "Kaw hipa edum ni nak inhel? Tam nakka mammahmahmah ni ebuh." <sup>30</sup> Et uma-allaw hi David et tu ibabbaggaddan edum ey nan-ingngeh hu inhumang da.

<sup>31</sup> Entanni ey neawatan ida etan ni sindalu hu pinhed David et da peamtan Saul e patul da et paeyag tu.

<sup>32</sup> Limmaw hi David et kantun Saul ey "Entan pandanag mu, ngenamungngak ni menangan eman ni iPilistia." <sup>33</sup> Himmumang hi Saul e kantuy "Beken mannuman ni langlangkak huyya! Hipa kuma inna-num ni mekihangan hi-gatu, ey u-ungnga ka. Hedin hi-gatu man impaglangan tun nekigubagubag."

<sup>34-35</sup> Nem hi David ey eleg medismayah. Kantuy “Hi-gak ni bega-en mu ey impenaptek hu hu kalneroh ama. Hedin wada immalin layon winu bear et imbesik tu hu impah ni kalneroh mi, ey nakka pampedugan nantengeddak ni bakdung ni piniliw ku inhakmal tu. Hedin kellaten tu man nealay intenged kud pangal tu ey binakdungak et matey. <sup>36</sup> Hi-gak ni bega-en mu ey pinetepetey ku layon niya bear. Hanniman dama pehding ku eman ni et-eteng ni tuun iPilistia ni tuka ngengneghayadda sindalun APU DIOS e wadan inggana. <sup>37</sup> Hi APU DIOS e nemaddang ni hi-gak et pateyen ku layon niya bear hu memaddang metlaing ni hi-gak et apputen ku eya iPilistia.” Inda-yun law nan Saul et kantuy “Anin lakay tep. Ngenamung hi APU DIOS ni memaddang ni hi-gam.”

<sup>38-39</sup> Indawat Saul nan David etan ida gumeck ni tuka ussalan mekiggubbat. Indawat tu hu helmet ni giniling et ya etan gumeck ni tuka ihhuklub di annel tu. Impatnan David ni inhuklub ma-lat giknaen tu hedin inna-nu tu tep endi tu nan-usalan ni hanniman. Impatna tun umdalan ey eleg tu han-iddan tep kameibbel-asi et pan-ekalen tu e kantuy “Eleg mabalin nak ussalan ida huyyan usal mu tep eleg umingha.” <sup>40</sup> Inla tu kumedek etan hulkud tu et ya balebay tu et manglaw. Nanda-guh etan di kulukul et pumi-dit ni liman nemullimul ni batu et iha-ad tud hambag tu et lumaw e tu dammuen hi Goliath.

### *Pinetey David hi Goliath*

<sup>41</sup> Kamangkeiddamulli dama hi Goliath e impamengulu tu etan nangnged ni happiyaw tu. <sup>42</sup> Inang-ang tu hi David e kayyaggud ang-ang tu ey u-ungnga et humman hu tuka a-amiha. <sup>43</sup> Kapan-itkuk Goliath nan David e kantuy “Kele nantenged kan hulkud, kaw ahhu-ak et mu ihanggan hi-gak huttan?” Ey tu pay kapan-itkuk hu idut tun David e tuka pan-immadmad idan dios tu ma-lat meipahding hu lawah nan David. <sup>44</sup> Kan pay nan Goliath ey “Ikay dih et pakan ku annel mun sisit niyadda animal di muyung.”

<sup>45</sup> Hinumang nan David et kantuy “Ihhanggan ni hi-gak hu pahul niya ispadah et ya ansikke ni pahul, nem umbaddang hi APU DIOS, e kabaelan tun emin, ni hi-gak ni mekihanggan hi-gam. Hi-gatu hu Ap-apuddan sindalun Israel e muka ngengneghaya. <sup>46</sup> Yan nunyan aggew ey peapput dakan APU DIOS ni hi-gak ma-lat pateyen dakan hi-gak et putulen ku ulum. Ey pekkan kuddan sisit niyadda animal hu annel idan sindalum, ma-lat amtaen ni emin ni tuud kebbebley e makulug ni wada hu Dios ni mengippaptek idan helag Israel. <sup>47</sup> Ey ma-lat pengamtaan ida daman edum kun helag Israel e eleg mahapul APU DIOS hu almas ni mengihwang ni hi-gamin tuu tu. Hi-gatu ngenamung hedin hipa pinhed tun mengapput di gubat. Et humman hu baddangan dakemin hi-gatu et apputen dakeyu.”

<sup>48-49</sup> Iyyalli hi Goliath ey immela dama hi David e tu dammuen ey himmeweng ni batu et balebayen tu hi Goliath ey neipunet di tuktuk tu etan batu et manhekubbu hi Goliath.

<sup>50-51</sup> Et mambesik hi David et tu uknuten hu ispadah nan Goliath et pamutul tun ulu tu. Hanneya nengapputan David etan ni keet-etengan ni tuud Pilistia e eleg tu usalen hu ispadah nem ebuh hu balebay tu.

Inang-ang idan iPilistia e netey etan daka igaggayan sindalu da e hi Goliath, ey newahit ida e kabsik ida gapuh ni takut da. <sup>52</sup> Pinhakkeyey katkuk ida sindalun helag Israel ey daka pampedugadda iPilistia etan di keltad ni mampellow di Saarim ingganah di bebley di Gath et yad Ekron. Nampatey dadda et mangkeiwehit di keltad hu annel idan nangketey ni iPilistia. <sup>53</sup> Nambanggad ida humman ni sindalun helag Israel et da pan-alen emin hu wadad kampuddan iPilistia. <sup>54</sup> Hi David ey inlaw tu ulun Goliath e iPilistia di bebley dad Bethlehem e neihnup di Jerusalem. Impeki-la tu almas nan Goliath et tu itlud kampu tu.

<sup>55</sup> Yan eman ni kapenang-ang-angin Saul nan hi David ni tuka pekillebbanin Goliath ey kantun Abner e ap-apuddan sindalu tuy “Hipa kan u-ungngan hi-gatu?” Kan Abner ey “Tawwey, apu patul, tam anin hi-gak et aggak dama amta.” <sup>56</sup> Kan Saul nan Abner ey “Mulli ibega hedin hipa kan u-ungngan hi-gatu.”

<sup>57</sup> Ey entanniy immali hi David di kampu da et ipengulun Abner di kad-an Saul e nanengtun sinettenged tu ulun Goliath. <sup>58</sup> Ey kan Saul ni hi-gatu ey “Hipa amam?” Kan David ey “Hi Jesse e bega-en mud Bethlehem.”

## 18

<sup>1-2</sup> Negibbuh ni nan-ungbal di Saul nan David ey impanha-ad law nan hi Saul hi David di baley tu et eleg tu law paenamut di baley da. Ey hedin hi Jonathan man newada hu et-eteng ni impeminhed tun David e henin neminhed tun annel tu. <sup>3</sup> Insapatah Jonathan nan David e pannennengen tun ingganah ali hu panggayyuman da, tep henin impeminhed tun annel tu hu impeminhed tun hi-gatu. <sup>4</sup> Ya nengipeang-angan Jonathan

ni kahinammad ni nanggayyuman da, ey indawat tun David hu balwasi tu, ya ispadah tu, panetu et ya ballikid tu.

<sup>5</sup> Hi David ey kabaelan tu numan ni mengippahding idan kapengunnun Saul e patul ni hi-gatu. Et humman hu impambalin Saul hi-gatun ap-apuddan sindalu tu. Ey et-eteng ni amleng idan opisyal Saul niyadda sindalu tun hi-gatu.

*Kakeemmehin Saul hi David*

<sup>6</sup> Heninnuy hu nekapkapyo eman ni negibbuh ni pintey David hi Goliath. Yan eman ni kapengennamusin David niyadda edum tun sindalu ey nangkeukat ida kabiibi-id baballey dan menammun nan hi Saul e patul. Ida kamenattayyaw ey ida kaman-am-amleng ni man-a-appéh ey pampetnul da hu tambourine da niya gitalah da tep ya nengapputan dad gubat. <sup>7</sup> Nem ya in-a-appéh da ey kanday “Kalibulibu hu pintey nan Saul, nem kapulupulun libu pintey nan hi David.”

<sup>8</sup> Dingngel nan Saul huyyan a-appéh da ey bimmubunget ey wada law ameh tun David. Kantud nemnem tuy “Kele hanniman daka penge-ehhel. Kele kanday kalibulibu hu pintey ku nem hi David ey kapulupulun libu pintey tu. Tam lektattuy hi-gatulli pan-ap-apu da.” <sup>9</sup> Neipalpun nunman ey kahellipat-in Saul hi David. <sup>10</sup> Nema-ma pay tep yan newa-waan tu ey in-abulut Apu Dios ni panhelheltap etan lawah ni ispirituh hi Saul et heni kaman-angngaw. Et hedin nanhaniman hi Saul man igiggitalahan nan David. <sup>11</sup> Nem endi maptek ey dineltak Saul hi David ni pahul ma-lat maipetak et di dingding, nem ingkiwangan tu kuma. Pidwa tu huyyan pengippahdingan Saul ni nunman nan David nem ingkiwangan tu kuman nampidwa.

<sup>12</sup> Inamtan Saul e wada hi APU DIOS nan hi David tep kameang-ang e hi-gatu law hu tuka baddangi. Nem hedin hi Saul man inwalleng law APU DIOS et humman gaputun kaumtatakut law nan David. <sup>13</sup> Lektattuy eleg law pinhed Saul ni ang-angen hi David et palaw tud edum ni bebley ey impambalin tun ap-apun hanlibun sindalu. Et ipangulun David humman ni sindalu tun an mekiggubbat. <sup>14</sup> Et kayyagud kapambalinin emin ni tuka ippahding tep kabaddangin APU DIOS. <sup>15-16</sup> Kaang-angan Saul humman ni kameipahpahding ey nema-ma-man kamemunnununu nemnem tu. Nem emin ida helag Israel ey nakappinshed da hi David, tep hi-gatu kamengippangnguluddan sindalu dan mekiggubbat et apputen dadda buhul da.

*Inahwan David hu u-ungngan Saul*

<sup>17</sup> Hakey ni aggew ey kan Saul nan hi David ey “Ninemnem kun peahwak ni hi-gam hu pengulwan ni u-ungngak ni bii e hi Merab. Nem mahapul ni peang-ang mu e netuled kan sindalu. Ey ka mewan mekiggubbat ni pengi-ehngeng mun APU DIOS.” Kan Saul di nemnem tuy “Huyya pehding ku ma-lat yaddalli ngu iPilistia hu memettye ni hi-gatu et bekennak.”

<sup>18</sup> Nem kan David nan Saul ey “Kaw mabalin hu hannitan? Kaw hipa-ak kuma ey hipa kuma bilang ni pamilyah kud Israel et da-ak apuen ni patul? Newetwet katteg ngu hi ama.” <sup>19</sup> Nem an medettengan etan nagtud ni aggew ni pan-ahwaan et di David nan Merab ey impeahwan Saul hi Merab nan hi Adriel e iMeholah. <sup>20</sup> Nem ya etan hakey ni biin u-ungngan Saul e hi Mikal ey nakappinshed tu hi David. Neamtaan nan Saul humman ey kaman-am-amleng <sup>21</sup> tep kantud nemnem tuy “Hedin pinhed David ni ahwaen hi Mikal, ey mahapul ni an mekiggubbat idan iPilistia ma-lat pateyen da et.” Kakkayyagud hu inhel tun David e kantuy “Tam ey eppuen daka metlaing tep peahwak ni hi-gam etan hakey ni biin u-ungngak.”

<sup>22</sup> Tinuttudduan nan Saul ida tuu tu et da ehelen nan David e kanday “Heninnuy hu e-helen yun David: ‘Daka katettebalan apu patul, anin ni hi-gamin emin ni opisyal tu. Et humman hu kantuy ettu kuma et ahwaem etan hakey ni u-ungnga tuy?’ ”

<sup>23</sup> Nem kan David ey “Eteng ni dayaw hu mengahwan u-ungngan patul, nem hipa ina-nuk e newetwetak ni tuu, ettu pengellaan kun hehngeten ku.”

<sup>24</sup> Indaddatteng da huyyan inhel David nan Saul ey <sup>25</sup> kantun hi-gaday “Ehel yun David e mahapul ku ey ya belat ni hanggatut ni kinugit tun pintey tuddan buhul kun iPilistia ma-lat ibleh tu impenahding da. Humman hu bayad ni pengahwaan tun u-ungngak.” Huyya inhel Saul ni ippahding David tep ya wadad nemnem tu ey pinhed tun petteyen da hi David di tu pengippahdingan nunyan tuka ibbaga.

<sup>26</sup> Kamangggaya hi David ni mengebbulut nunman ni kaibbagan patul tu. Eleg ni medatngan hu getud dan pengippahdingan tun nunman ey <sup>27</sup> ingkuyug David hu sindalu tu et da pateyen hu dewanggatut ni iPilistia, et gedgeden da hu utduk ni belat ni singngedan da et da peang-ang nan hi Saul. Et peahwan Saul hi Mikal nan David.

<sup>28</sup> Neka-amta law nan Saul e kapakabbaddangin APU DIOS hi David niya nakappinshed nan Mikal e u-ungnga tu, <sup>29</sup> ey nema-ma-ma law hu takut tun David et mambalin ni buhul tu David ni ingganah.

<sup>30</sup> Yadda iPilistia ey daka gubbagubbatad David nem kaennapputad David ida. Nem yadda etan edum tun ap-apun sindalun Saul ey beken ni hanniman. Et humman hu nandingngel hi David di kebebbbley.

## 19

### *Impatnan Saul ni petteyen hi David*

<sup>1</sup> Hakey ni aggew ey inhel nan Saul nan hi Jonathan e u-ungnga tu et yadda opisyal tu e mahapul ni petteyen da hi David. Nem gapu tep gayyum nan Jonathan hi David ni peteg, <sup>2</sup> ey limmaw di kad-an David et kantuy “Hedin kabbuhhan man ang-ang mu et kamanemak ni mu pantelluan et manha-ad kadman tep pinhed aman petteyen daka. <sup>3</sup> E-helen kullin ama et umli kamid neihnup di mu pantelluan di patullan. Et ung-ungbalen mi hu meippanggep ni hi-gam et pengamtaan kulli hedin hipa dedan hu wadad nemnem tu, et hannak ehelan emin ni hi-gam hedin hipa penghel tu.”

<sup>4</sup> Yan newa-waan tu ey nanhumangan di Jonathan nan ametu et ehelen tu kakinyaggud nan David. Ey nampehemhemmek hi Jonathan nan ametu et eleg tu ibubbunget hi David. Kantuy “Entan tu ipahding hu lawah nan hi David e bega-en mu. Endin hekey numangu hu bahul tu winu lawah ni tu kinapkapyan hi-gam. Binenaddangan daka numan ni hi-gatu. <sup>5</sup> Kaw eleg mu nemnema hu nengilamngan tun biyag tu et makihanggan Goliath et pengapput dait sun APU DIOS? Tam ka kaman-am-leng ni nunman. Kele yan nunya ey mu petteyen? Endin hekey gaputun mu pemetteyan ni hi-gatu tep endi bahul tu.” <sup>6</sup> Entanni ey inebulut nan Saul humman ni inhel Jonathan et masapatah nan APU DIOS e wadan ingganah et ya insapatah tu ey eleg tu pepettye hi David.

<sup>7</sup> Negibbuh nanhumangan dan han-ama et an ayagan nan Jonathan hi David et idaddatteng tun emin hu inungbal dan ametu. Ingkuyug Jonathan hi David et lumaw idad kad-an nan Saul et ingunggunnan David hi Saul e heni lan nunman.

<sup>8</sup> Entanni ey immalidda mewan sindalud Pilistia ni umgubat et makigubat di David et yadda sindalun Israel ni hi-gada. Nemahhig impahding di David ni nekigubat ni hi-gada et bumsik idan emin hu sindalun iPilistia.

<sup>9-10</sup> Nambangngad hi David ni an nengubat idan iPilistia et manha-ad mewan di baley nan Saul. Nem hakey ni aggew e kamanyuyyuddung hi Saul e tuka deddengela gitalah David ey immali mewan etan lawah ni ispirituh ni intu-dak APU DIOS ni mengippehelheltap ni hi-gatu et ginyangan tun pahul hi David nem ingkiwangan kuman David et madegah etan pahul et maipetak di dingding. Et bumsik mewan hi David.

<sup>11</sup> Yan nunman ni hileng ey impalaw Saul di baley di David hu sindalu tu ma-lat guwalyaan da et pateyen da hedin um-ehep. Nem yan nunman ni hileng ey kan Mikal nan hi David e ahwa tu ey “Besik kan nunyan hileng et ka mantalu tep petteyen dakan kakkabbuhhan.” <sup>12</sup> Et baddangan tu hi David et idan tud habhabyen et bumsik nunman ni hileng. <sup>13</sup> Illan Mikal hu tuttu-u et pebaktad tud unggippan David et libutan tun dutdut ni gelding et wangan tu. <sup>14</sup> Immalidda etan sindalun Saul ni an mengellan hi-gatu, nem kan Mikal ey “Kamandedgeh et kameu-ugip.”

<sup>15</sup> Nambangngad ida sindalun Saul et ehlen da humman ni hi-gatu. Nem kan Saul ni hi-gada ey “Pakiattang yullid neugipan tu et i-li yudya et pateyen ku.” <sup>16</sup> Inu-unnud da et humgep idad baley di David et da-et attangen di unggippan tu nem inang-ang da ey tuttu-un nelibutan ni dutdut ni gelding. Et mambangngad ida mewan nan Saul et ehelen dan hi-gatu humman.

<sup>17</sup> Impaeyag nan Saul hi Mikal et kantuy “Kele muwak hineul et mu impabsik hu buhul ku?” Nem kan Mikal ey “Binaddangan ku et bumsik tep kantuy petteyen tuwak hedin eggak baddangin umbesik.”

<sup>18</sup> Bimmesik hi David et lumaw di Ramah di kad-an Samuel et idaddatteng tun emin hu impahpahding Saul ni hi-gatu. Et ikuyug Samuel hi David et lumaw idad Nayot et manha-ad idadman. <sup>19</sup> Wada nengidaddatteng nan Saul e wada hi David di Nayot di Ramah, <sup>20</sup> et menu-dak ni sindalun an mempap ni hi-gatu. Nem dimmateng ida et ang-angen da hi Samuel et yadda edum tun prophet e ida kamandeyyay ey pinhakkeyey immali Ispirituh nan Apu Dios daman idan nunman ni sindalu et mambalin idan prophet et mandayaw ida dama. <sup>21</sup> Dingngel Saul hu meippanggep nunman et menu-dak mewan ni edum ni sindalu tu nem hanniman hu neipahding ni hi-gada. Hanniman metlaing hu neipahding ni pitlu tun nenu-dakan nan Saul ni sindalu tu.

<sup>22</sup> Entanni ey nandudug law hi Saul ni limmaw di Ramah et dumteng di ahullan di Seku. Kan tuddan tuu ey "Attud David nan Samuel ey?" Kanday "Wadadda Nayot."  
<sup>23</sup> Et mangunud diman hi Saul, nem wadad dalan ey newada Ispirituh nan Apu Dios ni hi-gatu et mambalin ni prophet et kamandaydayaw dama e heni prophet ingganah ni dimmateng di Nayot. <sup>24</sup> Ingal tu etan balwasi tu et ipahding tud hinanggan Samuel hu kapandeyaw ni prophet e nambakbaktad diman ni nunman ni aggew et yan hanlabbi. Huyya hu gaputun kan idan tuuy "Kaw prophet dama law hi Saul?"

## 20

### *Ya nengipeang-angan Jonathan ni neminhed tun David*

<sup>1</sup> Entanni ey hini-yan David hu bebley di Nayot di Ramah et lumaw di kad-an Jonathan. Nan-ang-ang ida et kan David ni hi-gatuy "Hipa nambahullak? Hipa lawah ni nak kinapkapyan amam et nealay pinhed tuwak ni petteyen?" <sup>2</sup> Hinumang Jonathan ey kantuy "Beken ni makulug ni daka petteyen nan ama. Gullat ngut inamtak huttan ni tu pehding ni hi-gam tep tu kae-helan emin hu wadad nemnem tun hi-gak."

<sup>3</sup> Nem kan David ey "Eyyakaw eleg mu amta! Inamtan amam e hanggayyum itan peteg, et humman hu, eleg tu peamtan hi-gam, tep eleg tu pinhed ni maggeh nemnem mu gapuh ni nunman ni pehding tu. Nakka issapatah ni hi-gam di ngadan APU DIOS e makulug ni innang ni petteyen tuwak!" <sup>4</sup> Et kan Jonathan ey "Ehel mu hedini hipa humman ni pinhed mun pehding kun memaddang ni hi-gam, et ipahding ku."

<sup>5</sup> Kan David ey "Yan kabubuhan ey Piyestah ni Kaketellakin Bulan et mahapul ni wada-ak et mangan itsun emin di amam ni patul. Nem iebulut mu anhan et bumsikkak et nak mantalud pattullan ingganah ni mahmahdem ni bewahtu. <sup>6</sup> Hedin ibbagallin amam hedini attu linawwan ku, ehel mu e inhel kun hi-gam e umlawwak nid Bethlehem tep nedatngan etan sinnoon ni mika keemmungin han-aaman man-appoint nan Apu Dios. <sup>7</sup> Hedin kantuy 'Anin' humman kei-ang-angan tun endi lawah ni planuh tun pehding ni hi-gak. Nem kai-immatur hedini makulug ni pinhed tuwak ni petteyen tep umbunget. <sup>8</sup> Et humman hu ipahding mu anhan huyya et peamnum hu insapatah mun hi-gak e humman nengipeang-ang mun hi-gak ni binabbal mu. Nem hedini yad muka pannemnem ey nambahullak nan amam man heballi patey muwak et beken ni mahapul ni hi amam hu memettye ni hi-gak."

<sup>9</sup> Kan Jonathan ey "Eleg mabalin ni nak ipahding huttan! Gullat ni wada inletuk ni planuh nan amam kantuy petteyen daka et inhel ku ngun hi-gam." <sup>10</sup> Et kan David ey "Nem inna-nun pengamtaak hedini bimmunget hi amam?"

<sup>11</sup> Kan Jonathan nan David ey "Itay di kapanpattuli." Et lumaw idan dewwa. <sup>12</sup> Et ehelen Jonathan nan David hu pehding da. Kantuy "Hi APU DIOS e Dios tayun helag Israel hu tistiguh ta. Yan hambatanganan ni kabubuhan ni hanneyan olas ey meki-ungballak alin ama. Hedin kayyaggud ehel tu meippanggep ni hi-gam, menu-dakkak ni mengippeamtan hi-gam. <sup>13</sup> Nem hedini pinhed dakan petteyen, ey eggak peamtan hi-gam ma-lat meihwang ka, anin ew ni petteyen tuwak nan APU DIOS. Nem nanengtu et anhan kayan baddangan dakan APU DIOS heni lan ama e binenaddangan tun nunman. <sup>14</sup> Ey ya e-helen kun hi-gam e David ey pannananeng mu anhan dama hu binabbal mun hi-gak henin etan ni eleg melumman ni binabbal nan Apu Dios. Hedin metteyyak, man <sup>15</sup> pannananeng mulli anhan hu binabbal mu daman pamilyah ku. Ey hedini petteyen mudda mekibbuhul ni hi-gam di kebebbebley tep ya baddang APU DIOS, ey ang-ang mu anhan et eleg mu ilegat ida pamilyah ku. <sup>16</sup> Ang-ang ta ma-lat huyyan insapatah tan pehding ta ey makulug ni ipahding ta. Nem hedini eleg mu ipahding eya insapatah ta, man kastiguen dakan APU DIOS."

<sup>17</sup> Nakappinhed nan Jonathan hi David e henin impeminhed tun annel tu, et humman hu, impansapatah tu mewan hi David ma-lat ehelen tu impeminhed tun hi-gatu. <sup>18</sup> Kan mewan Jonathan nan David ey "Kabubuhan law etan Piyestah ni Kaketellakin Bulan. Nanna-ud ni illellu daka tep endi kallid yuddungngan mu. <sup>19</sup> Mahapul ni hedini bewahtu man kapatalu etan di nantaluan mu lan nunman di kad-an ni neipu-ul ni batu. <sup>20</sup> Um-ali-ak ali et ipenak hu tellun panad kad-an mu e heni wada nakka punpuntaadman. <sup>21</sup> Itu-dak ku bega-en kun an mengelladdan nunman ni ipanak. Hedin dedngelen mu e kangkun hi-gatuy 'Itten ida panad kad-an mu, alam!' Ya keibbellinan tu humman ey endi lawah ni meippahding ni hi-gam et mabalin ni meukkat ka. Ey issapatah kun APU DIOS e wadan ingganah e makulug ni endi meipahding ni hi-gam. <sup>22</sup> Nem hedini kangkun hi-gatuy 'Linabhan dakaddan pana, mu hamak di a-allaw tu' ey mahapul ni umbesik ka tep humman pinhed APU DIOS ni ipahding mu. <sup>23</sup> Hedin ya etan inhumngan ta, ey mahapul ni nemnemem e wada hi APU DIOS ni tistigu ta."

<sup>24-25</sup> Et an mantalu hi David. Yan nunman ni Piyestah ni Kaketellakin Bulan, ey yimmudung hi Saul e patul ni mengan. Ya tuka yuddungi ey yad appit ni dingding. Nandemang idan nan hi u-ungna tu e hi Jonathan ey yimmudung hi Abner di pingging tu. Ebuhi di kayuddungin David ni endi yimmudung. <sup>26</sup> Inang-ang Saul e endi hi David, nem kaum-eneeneng tep kantud nemnem tuy “Wada na-mu impahding tun himmulun ni kameibbillang ni beken ni malini et humman hu pi-yew ni mekihimmul et eleg umli.” <sup>27</sup> Newa-wan nunman ey endi mewan hi David et kan Saul nan hi Jonathan ey “Kele endi etan u-ungngan Jesse ni kaalman et yan nunya?”

<sup>28</sup> Kan Jonathan ey “Kantu dedan ni hi-gak ey mahapul ni um-anemut nid bebley dad Bethlehem. <sup>29</sup> Impaeyag kunuddan agi tu tep mahapul ni wadaddan emin ni han-aamma, ma-lat ipahding da hu daka pehding ni man-appit. Kantuy ‘Hedin anhan mabalin ey iebulut mu et umenamuttak et nak ang-angen ida aaggik?’ Et iebulut ku. Et humman hu endi hi-gatun nunya.”

<sup>30</sup> Bimmunget hi Saul et kantun Jonathan ey “Ka-ila u-ungnga daka tu-wangun endi silbi tun bii! Endi nemnem mu! Kaw kammu nem eleg ku amta e muka peka-iddedlepi humman ni u-ungngan Jesse ey kebe-ingan yun inam. <sup>31</sup> Hedin eleg mettey humman ni tuu ey nanna-ud ni beken kallih mampatul. Lakay kuma et mulli awiten tep mahapul ni mettey.” <sup>32</sup> Nem kan Jonathan ey “Nem kaw hipa impahding tu? Kele mu pepettey?”

<sup>33</sup> Ey gapuh ni bunget Saul ey gininyang tu hi Jonathan ni pahul tu, nem neihla kuma. Humman law nengamtaan nan Jonathan e makulug ni pinhed ametun petteyan hi David. <sup>34</sup> Nemahhig hu bunget nan Jonathan et umehngeng et hi-yanen tu etan daka pengnganni et eleg mangan ni han aggew ni nunman e meikkadwan aggew ni Piyestah ni Kaketellakin Bulan, tep maggeh nemnem tu etan ni anggeba-ing ni kapehpehding ametun nan hi David.

<sup>35</sup> Newa-wan nunman et lumaw hi Jonathan di nantaluan David ma-lat man-innang-ang ida, e humman hu inhumngan da. Wada ingkuyug tun u-ungngan laki. <sup>36</sup> Kan Jonathan nunman ni u-ungnga ey “Pambesik kan an mengella eyan ippanak.” Kamemsik etan u-ungnga ey impana tu ey nelabah. <sup>37</sup> Kapandettenga etan ni u-ungnga etan pana ey kan Jonathan ey “Immen di a-allaw tu hu pana. <sup>38</sup> Papuut mu et mu al-en!” An inla etan ni u-ungnga etan pana et idwat tun Jonathan. <sup>39</sup> Humman ni u-ungnga ey eleg tu amta meippanggep ni hummangan di David nan Jonathan. <sup>40</sup> Indawat Jonathan ida etan pana etan ni u-ungnga et paenamut tu.

<sup>41</sup> Limmaw la etan u-ungnga ey neukat hi David di nantaluan tud kad-an ni batu et mandukkun et manyuung ni nampitlun nan Jonathan. Nan-akwal ida et mannanangih idan dewwa, nema-man David. <sup>42</sup> Entanni ey kan Jonathan nan David ey “Hi Apu Dios hu nanengtun mengippaptek ni hi-gam. Ang-angen tu et yadda helag mu niyadda helag ku ey pan-in-inayyun dallin ingganah ni pehding hu insapatah ta.” Negibbuh idan nanhumngangan et lumaw hi David di lawwan tu et mambangngad dama hi Jonathan di baley da.

## 21

### *Bimmesik hi David et hi-yanen tu hi Saul*

<sup>1</sup> Impa-yuh David ni limmaw di Nob di kad-an Ahimelek e padi. Inang-ang Ahimelek hi David ey kamangegeygey ni takut tu. Kantuy “Kele hakey ka e endi edum mun ingkuyug mu?” <sup>2</sup> Hinumang David e kantuy “Intu-dak tuwak nan Saul e patul di deya nem kantuy aggak e-ehhela gaputun nengitu-dakan tuwak. Hedin yadda tuuk inhel kun hi-gada pandadamman milli. <sup>3</sup> Kaw wada gayam hu mabalin ni kenne? Idwasi muwak ni liman sinapay winu linggeman ni kamekkan ni wadadatan tep neka-uppa-ak.”

<sup>4</sup> Kan Ahimelek e padi ey “Endi sinapay. Ebuhan etan neiappit nan Apu Dios. Mabalin ni um-ala ka nem eleg mabalin ni kenne idan sindalum hedin nekiulig idan ahwada winu hipan bii.” <sup>5</sup> Kan David ey “Ma-nu humman tep makulug ni eleg ida ngu dedan mekiullig hu sindaluk ni bii hedin wada lawwan mi. Nema-ma-man nunya tep importanteh ni peteg hu mi ippahding.”

<sup>6</sup> Et humman hu gapu tep endi edum ni kenne ey immidwat hi Ahimelek etan ni neiappit nan Apu Dios ni sinapay ni pakeekkal da etan di lamesaan ni neiha-adan tu et hullulan dan pakekapa.

<sup>7</sup> Yan nunman ey neiapaddih ni wada etan hi Doeg e iEdom e ap-apuddan kapampattul Saul e tuka pan-ippahding diman hu mahapul ni pehding tu meippuun di Tugun, ma-lat maibilang ni malinihi di hinangngab nan Apu Dios.

<sup>8</sup> Kan David nan Ahimelek ey “Kaw wada pahul winu ispadah yu et banhek ni? Endi inlak ni almas ku, anin ispadah tep hinaggadud hu inggahan mi, tep importanteh ni

peteg hu nengitu-dakan patul ni hi-gak.”<sup>9</sup> Kan etan ni padi ey “Wada etan ispadah Goliath e sindalun iPilistia ni pintey mud nandeklan di Elah. Nelibutan ni luput et immen di ba-hil etan ni ephod. Dammutun ellan mu hedini mahapul mu, ebuh humman ni ispadah ni wada.” Kan David ey “I-lim ali tep, et alen ku. Huttan anhan law hu ispadah ni endi tu kei-ingnehan.”

<sup>10</sup> Imbesikan David ni nunman ni aggew hi Saul et manglaw di Pilistia di kad-an Akhis e patul di Gath. <sup>11</sup> Nem kan idan opisyal Akhis ey “Kaw beken huyya hi David e patul di bebley dad Israel? Tam hi-gatu etan intenattayawan idan bibi-i ey in-ena-appahan da. Kandai ‘Hi Saul ey kalibulibu pintey tu, nem hi David ey kapulupulun libu pintey tu.’ ”

<sup>12</sup> Dingngel David humman ey newada takut tun Akhis e patul di Gath. <sup>13</sup> Et kahin-a-angngawan tu, et hedini wada kamenang-ang-ang ni hi-gatu ey tuka lellelgema ku-liku-lit di lekbini heggeppan etan di bebley, niya tuka peayyu-ayyuh hu angiw tud iming tu hedini da belluden. <sup>14</sup> Inang-ang Akhis ey kantuddan bega-en tuy “Ang-manglaw yu kedini eya tuu, tam kaman-angngaw! Kele yu nan-i-lidya? Pan-itu-dak yu et manglaw. <sup>15</sup> Eggak mahapul hu hakey mewani kaman-angngaw di baley ku! Kaw yuka tuyyuiddan eya kamampangan-angngaw di deya?”

## 22

### *Impapetey Saul nan Doeg ida padid Nob*

<sup>1</sup> Hini-yan David humman ni bebley di Gath et lumaw etan di leyang ni neihnup di Adullam. Dingngel idan agitu niyadda a-ammed tu e nantaludman et lumaw idad kad-an tu. <sup>2</sup> Entanni ey immalidda katuutuun kameligligasi niyadda nangkeutangan niyadda etan tuun dakei diklamuh da et mei-dum idan David. Ey ya bilang dan emini ey limmaw di epati ni gatut.

<sup>3</sup> Entanniy limmaw hi David di Mispah di Moab et tu ibegan etan ni patul e kantuy “Kaw dammutu anhan ni mekihha-ad di aman ina eyad bebley yu ingganah ni amtaek hedini hipa pehding Apu Dios ni memaddang ni hi-gak?” <sup>4</sup> Inebulut etan ni patul et manha-ad ida ammed tudman ni nunman ni tsimpuh ni nantattalluan di David di leyang di Addullam.

<sup>5</sup> Hakey ni aggew ey immali hi Gad e prophet nan hi David e kantuy “David, hi-yan yu huyyan bebley et lumaw kayud Judah.” Inu-unnud di David et lumaw idad Judah di muyang e Heret ngadan tu.

### *Impapetey Saul ida papaddid Nob*

<sup>6</sup> Hakey ni aggew ey wada hi Saul di duntug di Gibeah e kamanyuyyuddung di hengeg ni keyew e tamarisk, ey tuka tettenggeda pahul tu. Yadda opisyal tu ey ida kaman-eh-ehngeng di kad-an tu. Ey wada nanghel ni hi-gatu e himmak da hu kapantattalluin David. <sup>7</sup> Kantun hi-gaday “Dengel yu, hi-gayuddan edum kun helag Benjamin. Kaw kan yu nem hedini mampatul hi David man iddawtan dakeyullin emini ni pampuyyek yun peyyewen yu niya tenneman yun grapes? Kaw pambalin dakeyullin ap-apun sindalu tu?” <sup>8</sup> Kaw humman hu gaputun eleg yuwak pinhed ni pan-ap-apu et mekihhangga kayu law ni hi-gak? Eleg yu pay anhan ehelen ni hi-gak e kababbaddangin u-unggak hi David. Ey endini hi-gayu kamengippeamtan hi-gak e tuwak kahemmahemmakan David e hakey idan tuuk ma-lat pateyen da-ak.”

<sup>9</sup> Hi Doeg e iEdom ey wadadman e kamekieh-ehngeng idan sindalun Saul. Inhel tu e inang-ang tu hi David e u-ungngan Jesse e limmaw di kad-an Ahimelek e padi e u-ungngan Ahitub di Nob. <sup>10</sup> Et mahmahan Ahimelek nan Apu Dios hedini hipa kayyaggud ni pehding David. Ey indawtan tun kennei tu et idwat tu pay etan ispadah nan Goliath ni hi-gatu.

<sup>11</sup> Dingngel Saul huyyan inhel Doeg ey immitu-dak ni mengeyyag nan Ahimelek e padi et yadda agi tun padid Nob et umliddan emini. <sup>12</sup> Dimmateng ida ey kan Saul nan hi Ahimelek ey “Dengel mu eya e-helek ni hi-gam e u-ungngan Ahitub.” Kan Ahimelek ey “Em, apu.”

<sup>13</sup> Et kan Saul ni hi-gatuy “Kele mu binaddangan hi David e buhul ku et idwatam ni kennei tu niya ispadah? Ey kele ka nekiungbal nan Apu Dios et ibegam hedini hipa kayyagud ni pehding tu? Yan nunya ey dingkung tuwak et tuwak kaanbebbetaka ma-lat pateyen tuwak.” <sup>14</sup> Hinumang nan Ahimelek e kantuy “Nem tam hi David hu nehammad tuka pengi-ehngeng ni hi-gam di emini ni bega-en mu ey inepum hi-gatu. Hi-gatu hu kamengipappangnguluddan kamangguwalyan hi-gam. Ey hi-gatu hu kamelisipituh ni peteg di emini ida eyan opisyal mu ey bega-an mu. <sup>15</sup> Kaw ebuh nunman ni nekiungbalan kun Apu Dios ni meippanggep ni kayyaggud ni pehding tu? Apu patul, entan tu anhan ihannitan hu eheli ni hi-gak et yadda agik tep endi ngu amtak ni meippanggep ni nuntan

ni muka pan-e-hela.”<sup>16</sup> Nem kan Saul ey “Ahimelek, mettey kayun emin, anin idan ammed mu et yadda agim.”

<sup>17</sup> Et baalen Saul ida guwalya tu et kantuy “Pampatey yudda eya papaddin APU DIOS, tep anin hi-gada et hi David daka baddangi. Inamta da e bimmesik hi David, nem eleg da ehelen ni hi-gak.” Nem endin hi-gada neminshed ni memettey idan nunman ni papaddin APU DIOS.

<sup>18</sup> Et kan Saul nan Doeg ey “Patey muddan emin eyadda padi.” Inu-unnud Doeg e iEdom et pampatyen tudda. Newalu et lima hu bilang idan pintey tun padin nunman ni aggew e nanengtun inhuklub da ephod e balwasin padi. <sup>19</sup> Inlagat pay Saul ni impapetey ida nambebley di Nob e nambebleyan idan nunman ni padi. Impapetey tudda lalakki niya bibi-i, yadda kaungaunga niyadda gegellang. Impampapetey tudda pay hu babakka da, kekebayyu da niyadda kalneroh da et endin hekey natdaan.

<sup>20</sup> Ebuah hi Abiathar e u-ungngan Ahimelek ni bimmesik et lumaw di kad-an David. <sup>21</sup> Et idaddatteng tun David hu nemateyan nan Saul idan padin APU DIOS. <sup>22</sup> Kan David ey “Yan nunman ni aggew ni nenang-angan kun Doeg diman, ey inamtak e an mandaddatteng nan hi Saul. Hi-gak kumedeke hu kambahul ni neteeyan idan ammed mu niya aaggim. <sup>23</sup> Panha-ad kadya et ipaptek daka. Pinhed nan Saul ni petteyen daitan dewwa, nem entan takut. Endi an memettey ni hi-gam di deyard kad-an ku.”

## 23

### *Binaddangan David ida tuud Keilah*

<sup>1</sup> Hakey ni aggew ey dingngel David e kapanggubbatattan iPilistia ida iKeilah e daka pan-ibsik hu akeani dan pagey da. <sup>2</sup> Et kan David nan APU DIOS ey “Kaw umlawwak et nak ida gubaten hu iPilistia?” Kan APU DIOS ey “Em, elaw ka et mudda baddangan hu tuud Keilah.” <sup>3</sup> Nem kan idan tuun David ey “Kaw kabaelan tayu? Itsu dedangngu kaumtataku di deya e bebley tayud Judah ey nema-ma ngun angetakkut ni itsu mekiggubbat idan sindalun iPilistia.”

<sup>4</sup> Impidwa mewan nan David ni inhel nan APU DIOS e kantuy “Lakkayuy kuma. Baddangan dakey et apputen yudda sindalun iPilistia.” <sup>5</sup> Limmaw hi David niyadda sindalu tud Keilah et dadda gubaten hu iPilistia et pampateyen da dakek ni hi-gada et pan-al-en da kalneroh da niyadda baka da, et meihwang ida tuud Keilah.

<sup>6</sup> Yan eman ni binsikan Abiathar e u-ungngan Ahimelek et lumaw di kad-an David di Keilah, ey intabin tu ephod. <sup>7</sup> Entanni ey dingngel nan Saul e wada hi David di Keilah et kantud nemnem tuy “In-abulut Apu Dios ni dedpapey ku David ni nunya tep neluhud humman ni bebley ni kad-an tu ey nehammad hu eheb tu et nehukum diman.”

<sup>8</sup> Minandal nan Saul ida emin sindalu tun mandaddan et lumaw idad Keilah ma-lat da gubaten hi David et yadda tuu tu.

<sup>9</sup> Nem dingngel nan David humman ni planuh Saul et kantun Abiathar ey “I-lim etan ephod di deya et usalen tan mengamta hedini hipa pinhed Apu Dios ni pedhing tayu.”

<sup>10</sup> Inlaw Abiathar etan ephod et mandasal hi David nan APU DIOS e kantuy “APU DIOS e Dios min helag Israel, dingngel ku e bega-en mu e implanuh Saul ni um-alin tu bahbahren eya bebley di Keilah tep iyyadya-ak di deya. <sup>11</sup> Kaw um-ali tu-wangu hi Saul di deya? Et hedini um-ali, kaw pedpap da-ak ida eyan bimbebley? APU DIOS e Dios min helag Israel humang mu anhan eya dasal ku et peamtam hedini hipa mekapya.”

Hinumang APU DIOS e kantuy “Em, um-ali hi Saul.” <sup>12</sup> Impidwan mewan David ni minahmahan e kantuy “Kaw ihhehdul dakemi eyaddan bimbebley nan hi Saul?” Ey kan APU DIOS ey “Em.”

<sup>13</sup> Et ipengulun David ida sindalun umlaw di enem ni gatut et hi-yanen da Keilah et man-etaetan ida e eleg ida mambayag di hakey ni bebley. Dingngel nan Saul e bimmesik hi David et eleg law lumaw di Keilah.

### *Nantalu hi David di duntug ni eleg mebebleyi*

<sup>14</sup> Nantalutalu hi David et yadda sindalu tu etan idad duntug di eleg mebebleyid Sip. Ey hedini hi Saul man tuka an hemmahemmaka hi David, nem eleg iebulut Apu Dios ni hemmakan tu.

<sup>15</sup> Yan eman ni wada hi David di Hores diman Sip ey neamtaan tu e immali hi Saul ni an menemmak ni hi-gatu ma-lat patyen tu. <sup>16</sup> Yan nunman ey limmaw hi Jonathan di kad-an David et tu ehelan ma-lat eleg medismayah. <sup>17</sup> Kantun nan David ey “Entan tattakut mu. Eleg i-abulut Apu Dios ni petteyen dakan ama. Hi-gam ali mampatul di Israel et hi-gak ali meihhayned ni hi-gam. Anin hi ama et inamta tu.” <sup>18</sup> Et isapatah da mewan di hinanggan APU DIOS hu nanggayuman da. Nambanggad hi Jonathan di bebley da, nem hi David ey nannaneng di Hores.



<sup>19</sup> Entanni ey wadadda tuud Sip ni limmaw di kad-an Saul di Gibeah et da ihdul hi David. Kanday “Wada hi David di bebley mi e kamantattallu etan di duntug di Hakilah di Hores e neihnpud di Jeshimon. <sup>20</sup> Et humman hu, pandayyu kadya e apu patul, anin ni hipan aggew pinhed mu et ngenamung kamin mempap ni hi-gatu.”

<sup>21</sup> Kan Saul ey “Kayyaggud anhan et hannitan! Bendisyonan dakeyun APU DIOS tep kababbal kayun hi-gak. <sup>22</sup> Lakkayuy et yulli peka-ang-angen hedin ettu ustuh ni kad-an tu, hedin ettu tuka lallawwi, niya hedin hipa nenang-ang ni hi-gatu, tep kanday netalam kunun peteg humman ni tuu. <sup>23</sup> Yu ang-ang hedin ettu petek tu tuka pantattallui, et hedin himmak yu, itu-dak kayullin menghel ni hi-gak et hannak makilaw ni hi-gayu. Hedin nanengtud man nanna-ud ni hemmaken ku anin ni hinnapen ku emin hu bebley di Judah ni an menemmak ni hi-gatu.”

<sup>24</sup> Inebulut da hu inhel Saul ni pehding da et mambangngad idad Sip et han maitu-nud di Saul. Hedin di David ey wadaddad eleg mebebleyid Paran \* e neihnpud di Jeshimon. <sup>25</sup> Limmaw di Saul et yadda tuu tun an menemmak nan David, nem wada nengipeamtan David et an mantalu etan di mabetun duntug diman Paran. Neamtaan daman Saul e immen di David et unuden dadman.

<sup>26</sup> Et wadadda etan di ba-hil ni duntug ey wadad David dama etan ba-hil tu. Impapuut di David ni hini-yan humman tep kamangkeihnpud di Saul e ngannganih ni mehakupan ida. <sup>27</sup> Entanni ey wada immalin menggeyyag nan Saul. Kantuy “Papuut yu et mambangngad kayu tep immalidda iPilistia ni mengubbat ni bebley tayu!” <sup>28</sup> Et isiked nan Saul ni memdug nan David et lumaw idan an mekiggubbat idan etan ni iPilistia. Et humman hu ingngadan da humman ni bebley ni Selah Hamahleket. Ya keibbellinan tu ey “Duntug ni peni-yanan.” <sup>29</sup> Hini-yan di David humman ni bebley di Maon et lumaw idad Enggedi et yadman mewan hu da nantaluan.

## 24

### *Eleg pinhed David ni petteyen hi Saul*

<sup>1</sup> Yan nambangngadan di Saul ni da nekigubatan idan iPilistia ey wada nanghel mewan ni hi-gatu e wada hi David di eleg mebebleyin neihnpud di En Gedi. <sup>2</sup> Inemung Saul hu tellun libun kelalla-ingan ni sindalun helag Israel, et lumaw idan an menemmak nan hi David di Batun Immeyew ni Gelding.

<sup>3</sup> Entanni ey dinteng da hu leyang e neihnpud ni kubkub idan kalneroh di gilig ni keltad ey himmegeg hi Saul ni an mangkakhilya. Ey yadman ni leyang hu nantalwan nan David niyadda etan sindalu tu, nem neka-ihhudek ida. <sup>4</sup> Inang-ang idan sindalun David hi Saul ey kandan hi-gatu ey “Yan nunya law hu pengapputam ni buhul mu. Inhel APU DIOS e peapput tun hi-gam hu buhul mu et ngenamung kan pehding mu.” Nambabbabal hi David ni limmaw et gumedged ni ekkut ni balwasin Saul nem eleg tun hekey igibek.

<sup>5</sup> Nem entanni ey el-eleg hu kapannenemnem nan David ni tu nengedgedan ni utduk ni balwasin Saul. <sup>6</sup> Kan tuddan sindalu tuy “Eleg mabalin nak ippahding humman. Hi APU DIOS hu nemilin hi-gatun mampatul et humman hu eleg tu i-abulut ni wada nak ippahding ni hi-gatun lawah.” <sup>7</sup> Huyya inhel David idan sindalu tu et agda pateyen hi Saul.

Entanni ey neukat hi Saul etan di leyang et manglaw. <sup>8</sup> Neukat dama law hi David etan di leyang et kantun nan hi Saul ey “Apu patul.” Nanligguh hi Saul ey nanyuung hi David ma-lat lispituhen tu. <sup>9</sup> Kan David ni hi-gatuy “Kele muka kukkuluga hu kae-e-heladdan tuun kanday pinhed dakan petteyen ni hi-gak? <sup>10</sup> Yan nunya penang-angan mun beken ni makulug, tep gullat ni makulug ey pintey daka, tep in-abulut et nan APU DIOS ni petteyen daka eyad leyang. Anin idan sindaluk ey kandy lebbeng tun petteyen daka, nem kangkuy eggak ippahding hu lawah ni hi-gam, tep hi-gam hu pinutuk APU DIOS ni mampatul. <sup>11</sup> Ang-ang mu kedi e ama eya singnged kun pinutut kun utduk ni balwasim. Gullat et pintey daka. Nem eleg! Mahapul ni ewwatam e endi bahul ku niya eleg daka ngehayen, nem muwak kaandeddedwenga ma-lat pateyen muwak. <sup>12</sup> Nem anin, ngenamung hi APU DIOS ni menang-ang hedin hipa neihlan hi-gatan dewwa. Ey hi-gatu ngenamung ni mengibleh eyan muka pehpending ni hi-gak, tep endi ngu nak pehding ni lawah ni hi-gam. <sup>13</sup> Inamtam met etan kandan ‘Yadda lawah ni tuu hu kamengapkapyan lawah.’ Et humman hu endi ngu lawah ni nak ippahding ni hi-gam. <sup>14</sup> Ang-ang mu kedi APU DIOS patul, kele muwak kadeddedwenga ma-lat pateyen muwak ey beken nak ni importanteh ni tuu. Heni muka deddedwenga netey ni ahhu, winu simel! <sup>15</sup> Ang-angen et anhan kedin APU DIOS hedin hipa nambahul ni hi-gatan dewwa,

\* 23:24 23:24 Ya hakey ni ngadan ni Paran ey Maon.

et hi-gatu ngenamung ni menang-ang eyan kamekapkapy a et ihwang tuwak di lawah ni ippahding mun hi-gak.”

<sup>16</sup> Kan Saul ey “Kaw hi-gam hi David e u-ungngak hu kaman-e-ehhel?” Ey kamannengngih. <sup>17</sup> Et kantun David ey “Nakka ebbuluta e hi-gam hu neiptek ey hi-gak hu neiha. Kayyaggud kan hi-gak ey lawah hu nakka pehpehding ni hi-gam. <sup>18</sup> Impeang-ang mun nunya hu makulug ni binabbal mun peteg ni hi-gak, et eleg muwak pateyen anin ni in-abulut APU DIOS ni pehding mu humman ni hi-gak. <sup>19</sup> Hipa makkaw tuun anin um-ali buhul tud kad-an tu et eleg tu petteya? Et humman hu bendisyonan dakan APU DIOS gapun nuntan ni binabbal mun hi-gak. <sup>20</sup> Inamtak law e hi-gam ali mampatul di deya bebley tayu e Israel. Ey meihhammad ali hu pampatul di Israel gapuh ni hi-gam. <sup>21</sup> Nem mahapul ni issapatah mun APU DIOS e eleg mulli petteyadda helag ku, ma-lat eleg ali anhan meliwwan hu ngadan ku niya ngadan ni nahlagan ku.”

<sup>22</sup> Inebulut David et mansapatah e pehding tulli humman ni tuka ibbaga. Et umenamut hi Saul ey nambanggad hi David et yadda sindalu tu etan di daka pantattallui.

## 25

### *Ya neteyyan Samuel*

<sup>1</sup> Entanni ey netey hi Samuel et umlidda emin hu helag Israel, et ilmetan da et da ikulung di bebley tud Ramah. Negibbuh ni ingkulung dad Ramah e bebley tu, et mampalaw di David di Paran e eleg mebebleyi.

### *Ya meippanggep nan David, hi Nabal et hi Abigail*

<sup>2-3</sup> Wada etan kedangyan ni iMaon e hi Nabal e helag Kaleb. Wada tellun libun kalneroh tu niya hanlibun gelding tu. Wada kudal tud neihipud di Karmel. Makabbunget hi-gatu ey endi hemek tu. Ey lawah tuka pehding ni edum tun tuu. Nem hi Abigail hu ahwa tu ey nelaiing ey kat-agu.

<sup>4</sup> Yan nunman ni wadad David di eleg mebebleyi ey dingngel tu e kapampu-litiddan Nabal niyadda bega-en tu hu kalneroh tu. <sup>5-6</sup> Et itu-dak tudda hampulun nangehiken ni sindalu tud Karmel e kantun hi-gaday “Lakkayuy di kad-an Nabal di Karmel et kanyun hi-gatuy ‘Intu-dak dakemin apu mi e hi David ma-lat ehelen min hi-gam huuya: Andukkey ey kayyaggud et anhan hu pambiyagan mu eyad puyek, anin idan wadad baley mu. <sup>7-8</sup> Dingngel ku e yuka pampu-litidda dutdut ni kalneroh mu. Ey neipaddih nunyan inlian middan tuuk hu panhahammulan yu. Ettu anhan et umidwat kan mabalin ni iddawt mun hi-gak e bega-en mu ey gayyum mu e hi David, tep hi-gak et yadda tuuk ey kayyaggud impeang-ang middan bega-en mu. Endi impahding min lawah niya endi sinekew min animal mu. Anin mahmahim idan muka pampattul.”

<sup>9</sup> Inhel da humman ni inhel David et hehhegeden da hu ihhumang Nabal. <sup>10</sup> Entanni ey kan Nabal ey “Kaw hipa ngu anhan humman ni hi David? Niya hipa anhan hi ametu? Hi-gatu kedi ngu hakey ida etan ni bega-en ni bimmesik tep dakel idan nunya hu bega-en ni kaumbesik. <sup>11</sup> Hedin hi-gak man beken ni nakkapakdag hu idwat ni kennen niya danum etan ni tuun eggak amta, ey beken ni neala ni nak impalsian hu tuu. Yadda nakka panggunnun kamemu-lit ni kalneroh ku iddawtan kun kennen da ey hi-gada ippalsian ku.”

<sup>12</sup> Immanemut ida etan intu-dak David et idaddatteng dan hi-gatun emin hu inhel Nabal ni hi-gada. <sup>13</sup> Bimmunget hi David et kan tuddan sindalu tuy “Pandaddan kayu ey pan-asip kayu.” Nan-asip dama hi David et ipengulu tudda epat ni gatut ni sindalu tu. Eleg ida makilaw hu dewanggatut ni sindalu tu tep mangguwalyaddan ngunut da.

<sup>14</sup> Ya etan hakey ni bega-en Nabal ey kantun Abigail ey “Kaw eleg mu denglen hu meip-panggep ni inliyan idan intu-dak David ni nalpud eleg mebebleyin mekihummangan ni apu mi e hi Nabal, nem lawah kumedek hu nan-ehel tun hi-gada et mebabba-ingan ida. <sup>15-16</sup> Ey kayyaggud idan peteg numan ni hi-gami. Endi da impahding ni lawah ni hi-gami, ey neipalpu eman ni wadaddad kad-an mid pattullan ey endi an netakew ni mika ippattul. Kea-aggew ey kahilehileng ey endi lawah ni nekapan hi-gami ey binaddangan dakemi. <sup>17</sup> Pannemnem ka kuman pehding mu tep makulug mannuman ni angetakkut hu mekapan apu Nabal et hi-gayun pamilyah tu. Anin anhan et lawah ni peteg elaw tu e endi lispih tu.”

<sup>18</sup> Impapuut Abigail et umlan dewanggatut ni sinapay, ya meinum ni neiha-ad di dewwan belat ni animal ya liman kalnero, et ya dewwan latan neihanglag ni ballu, ya hanggatut ni napkel ni raisins niya dewanggatut ni napkel ni figs et ehelen tuddan bega-en tu et itakkay dad kebanyu. <sup>19</sup> Kan tuddan bega-en tuy “Kabukul kayu la. Et hannak kaiunud.” Eleg amtan Nabal humman ni ippahding tu tep eleg tu peamtan hi-gatu.

<sup>20</sup> Nantakkay hi Abigail di kebayyu tu et ida kamenyed di duntug ey iyyaddallid David et yadda sindalu tu e ida kamandayyu et mandadamuudda. <sup>21</sup> Kaumbubunget hi David e kantud nemnem tuy “Kele ni-man nak binenaddangan humman ni tuu et endi an netalak di pattulan tu eyad eleg mebebleyi niya endi an netakew ey lawah hu tu impahding ni hi-gak? <sup>22</sup> Anin petteyen tuwak Apu Dios hedini eggak petteya hi Nabal niyadda tutu-u tu et han mewa-wa.”

<sup>23</sup> Inang-ang Abigail hi David et papuut tun umhiep di kebayyu et manyuung ni hi-gatu. <sup>24</sup> Nandukkun et kantuy “Apu, dengel mu anhan eya e-helen kun hi-gam. Hi-gak hu nambahul. <sup>25</sup> Liwwan mu anhan humman ni impahding Nabal tep endi nemnem tu ey lawah ngu dedan elaw tu e humman keibbellinan ni ngadan tu. Ey neipaddih ngudama anhan ni endi-ak ni inlian idan intu-dak mu, et humman hu liwwan mu anhan apu, humman.

<sup>26</sup> Inamtak e hi APU DIOS hu eleg mangiebulut ni hi-gam mismuh hu mengibleh ni impahding idan buhul mu ma-lat eleg ka pumetey. Ey issapatah kun APU DIOS e wadan ingganah e ermin ida buhul mun ihik ni memetey ni hi-gam ey kastiguen tudda henin Nabal. <sup>27</sup> Abulut mu anhan eya in-alik ni iddawak kun hi-gam et yadda sindalum. <sup>28</sup> Liwwan mu anhan humman ni neipahding. Hi-gam ali pambalin APU DIOS ni patul anin idallin helag mun edum ni aggew, tep hi-gam hu kamekihhanggaddan buhul tu. Hamban anhan endi lawah ni mu ippahding ni nunyan ketaggum ey. <sup>29</sup> Anin ni wada kamenemmahemmak ni hi-gam ma-lat daka pateyen et eleg daka kaya petteya tep ippaptek dakan APU DIOS e heni ingkaput tu hu biyag mu. Nem hedini yaddalli etan buhul mu man pampela-yud tuddalli e heniddalli batun neibalebay et matelak. <sup>30</sup> Et hedini peamnullin APU DIOS ida etan inhel tun hi-gam ni pehding tu, et pampatul dakallid Israel, <sup>31</sup> ey endilli mu pantuttuyuan ni impahding mun lawah henin umpatey ni endi puut tu winu ma-lat ibleh mu impahding ni buhul mu. Yallin pambendisyonan APU DIOS ni hi-gam, ey nemnemnem muwak ali anhan.”

<sup>32</sup> Hinumang David humman ni inhel Abigail et kantuy “Medeyyaw hi APU DIOS ni Dios di Israel e nengitu-dak ni hi-gam ni nunyan an menammun hi-gak. <sup>33</sup> Ey nakka mampasalamat nan Apu Dios gapuh ni kayyaggud ni mu kapannemnem et aggak meiluh ni pumetey gapuh ni pengibleh kun impahding ni buhul kun hi-gak. <sup>34</sup> Ma-nu tep hi APU DIOS hu eleg mangiabulut ni umpateyak, nem gullat ni eleg mu papuut ni immali, nanna-ud ni petteyek hi Nabal, anin idan tuu tu, et endilli an metdaan ni hi-gadan kewa-waan tun kabbuhhan.”

<sup>35</sup> Illan David humman idan indawat Abigail et kantun hi-gatuy “Anemut kad baley ey entan pandanag. Ippahding kudda etan imbagam.”

<sup>36</sup> Dimmateng hi Abigail di baley da ey nangling hi Nabal et ida kamanhahamul hu tuu tu e heni patul. Et gapuh tep ida kaman-am-amleng ey dakel ininum Nabal, et makabbuteng et endi an ine-ehhel Abigail ni hi-gatu ingganah newa-waan tu. <sup>37</sup> Na-kal law buteng tu et ehelen Abigail ni hi-gatu hu neipahding ey pinhakkeyey eleg umkihal hu annel Nabal. <sup>38</sup> Nelabah hu nekapulun aggew ey pinappeg APU DIOS hu biyag tu.

<sup>39</sup> Dingngel David e netey hi Nabal ey kantuy “Medeyyaw hi APU DIOS tep binaddangan da-ak, et ibleh tu impahding Nabal et kastiguen tu gapuh nunman ni impahding tu. Ey medeyyaw hi APU DIOS tep eleg tu iebulut ni nak ippahding hu lawah.”

Entanni ey nenu-dak hi David ni an mengikkellun ni hi-gatun nan hi Abigail. <sup>40</sup> Dimmateng idad Karmel etan an nangkalun et kandan Abigail ey “Intu-dak dakemin David et puhdanan mi hedini ebbuluten mun i-ahwa dakan hi-gatu.”

Inebulut tu et <sup>41</sup> manyuung et kantuy “Bega-en tuwak ni hi-gatu ey nandaddan nak ni mansilbin hi-gayu e bega-en tu niya mengullah ni heli yu.” <sup>42</sup> Et ebuhe mantakkay di kebayyu tu et ikuyug tudda liman biin bega-en tu et maikuyug et iahwan David.

<sup>43</sup> Neikadwan nan Ahinoam di Jesreel e nemangulun inahwan David. <sup>44</sup> Hedini hi Mikal e ahwatun u-unggan Saul ey impeahwan ametun nan hi Paltiel e u-unggan Lais e iGalim.

## 26

### *Ya eleg mewan pameteyan nan David nan hi Saul*

<sup>1</sup> Wadadda tuun nalpud Sip ni limmaw di Gibeah et ehelen dan Saul e wada hi David e kamantattallud duntug di Hakilah e demang ni Jeshimon. <sup>2</sup> Impapuut Saul et ikuyug tudda nangkelaing ni sindalu tun tellun libu, et lumaw idad eleg mebebleyid Sip ni an menemmak nan hi David. <sup>3</sup> Nangkampud dad giligi ni keltad ni mampellaw di Hakilah. Ey hedini di David ey nannaneng idad eleg mebebleyi. Dingngel David e immalid Saul ni

an menemmak ni hi-gatu, <sup>4</sup> et menu-dak ni an mansi-im ni hi-gada ey tu-wangun immen di Saul diman.

<sup>5</sup> Entanni ey an himmak David hu kampud Saul et putuken tu neugipan di Saul nan Abner e u-ungngan Ner. Hi Saul ey neugip di bawang ni kampu tu e kadwatu hi Abner e ap-apidan sindalu tu. Yadda sindalu tu ey wadaddan nanlinikweh ni hi-gada. <sup>6</sup> Kan David nan Ahimelek e Hittite et hi Abishai e agin Joab e u-ungngaddan Seruiah ey “Hipan hi-gayu neminshed ni mekillaw ni hi-gak di kampun Saul?” Kan Abishai ey “Hi-gak.”

<sup>7</sup> Et lumaw idan nunman ni hileng ey immen hi Saul e neka-uyeng e neka-ugip ey neitu-bek hu pahul tud puyek di neihnup di ulu tu. Neugip damad Abner et yadda sindalu tu e nanggawwa-an da. <sup>8</sup> Kan Abishai nan David ey “Angmuy, indaddan Apu Dios ni hi-gam hu buhul mu et ngenamung kan pehding mun hi-gatu. Iebulut mu et nak ba-weken ni pahul tu et maipetak di puyek? Peminhakkey kun ebuh ni ba-weken et mettey.”

<sup>9</sup> Nem kan David nan Abishai ey “Entan tu patey. Kaw eleg mu amta e kastiguen nan APU DIOS hu mengippahding ni lawah ni pinutuk tun mampatul? <sup>10</sup> Ngenamung hi APU DIOS e wadan ingganah ni mengastigun hi-gatu. Amtak e hi-gatulli memettey ni hi-gatu e pandedgehen tu winu pepettey tud tu pekiggubbatan. <sup>11</sup> Et eleg et anhan i-abulut APU DIOS ni hi-gak hu memettey ni hi-gatu e pinutuk tun mampatul. Ya eman pahul tu niya eman ha-addan tun danum ellan ta et lumaw ita.” <sup>12</sup> Et alen di David etan pahul Saul niya ha-addan tun danum et manglaw ida ey endin hekey ni hi-gada nengigibek tep inuyeng idan APU DIOS.

<sup>13</sup> Entanni ey dimmateng di David nan Abishai etan di demang tud ta-pew ni duntug. Neidaddawwi da <sup>14</sup> et tekukan David hi Abner e u-ungngan Ner et yadda sindalu tu e kantuy “Abner! Kaw handengel muwak?” Kan Abner ey “Hipa kan kamantetkuk e bengngunem hu patul?”

<sup>15</sup> Kan David ey “Abner, kaw beken ni hi-gam hu ap-apun emin ni sindalud Israel? Kele eleg mu pekagguwalyaan hu apun ni patul, et wada immali lan nuntan ni memettey et ni hi-gatu. <sup>16</sup> Eleg mu ipahding hu ngunum, Abner! Issapatah kun APU DIOS e wadan ingganah e lebbeng tun mettey kayuddan sindalum tep eleg yu guwalyaan hu pinutuk APU DIOS ni patul. Ang-ang yu kedi, attu la hu pahul tu niya ha-addan tun danum? Adyah e inla mi!”

<sup>17</sup> Inimmatunan Saul hu ehel David et kantuy “Kaw hi-gam e u-ungngak e David hu kaman-e-hel?” Kan David ey “Em, apu patul, hi-gak! <sup>18</sup> Kele ingganah nunya ey muwak kadeddedwenga e bega-en mu? Hipa impahding kun nambahullak ni hi-gam? <sup>19</sup> Apu patul, dengel mu anhan eya e-helek e bega-en mu. Hedin hi APU DIOS hu kamengituttuddun hi-gam ni mengibbubunget ni hi-gak, i-appitan ku ma-lat ekalen tu bunget mun hi-gak. Nem hedini tuu kannemnem ni nunyan kamekapkapy ey hamban idutan APU DIOS. Tep gapuh ni nuntan ni tuu ey nedegyunnak di bebley ni kad-an APU DIOS et nak law kamanhahha-ad eyad bebley ni hin-appil ni dios hu kadaydayawaddan bimbebley. <sup>20</sup> Entan tuwak anhan patey di bebley idan hin-appil ni tuu e beken bebley APU DIOS. Kele hi-gam ni patul di Israel hu an memettey ni hi-gak ey endi kabaelan kun mekihhanggan hi-gam tep nakka mei-ellig di simel! Kele muwak kadeddedwenga e heni-ak animal?”

<sup>21</sup> Himmumang hi Saul ey kantuy “Nakka ebbuluta e hi-gak hu nambahul. Endi nemnem ku et ipahding ku hu lawah ni peteg nem liwwan mudda hu impahding kut mambangngad kad baley tayu, David e u-ungngak! Endi law nak pehding ni hi-gam ni lawah tep binabbalan muwak et eleg muwak pateyen ni nunyan hileng.”

<sup>22</sup> Kan David ey “Adyah eya pahul mu, apu patul. Itu-dak kallin sindalum ni mengella. <sup>23</sup> Bendisyonan APU DIOS ida tuun kameiddinnel ey limpiyuh daka pehding. Yan nunya ey indaddan dakan APU DIOS ma-lat ngenamung pehding kun hi-gam e pinutuk tun mampatul nem eleg daka pateyen. <sup>24</sup> Et gapu tep binabbalan daka et eleg daka pateyen nunya ey hanniman et dama pehding APU DIOS ni hi-gak et ihwang tuwak di ligat ku.”

<sup>25</sup> Kan Saul nan David ey “Bendisyonan dakan Apu Dios e u-ungngak David, ma-lat emin pehding mu ey kayyaggud hu pambalanan tu!” Et manglaw lad David di lawwan da ey nambangngad dama hi Saul di bebley da.

## 27

### *Nekibebley hi David di Pilistia*

<sup>1</sup> Kan David di nemnem tuy “Hakey alin aggew et hehlengan tuwak alin Saul et petteyen tuwak. Heballi kattedg umbesikkak di Pilistia ma-lat isiked tulli et anhan ni mandeddedweng ni hi-gak et luminggeppak.”

<sup>2-3</sup> Et ikuyug David ida pamilyah tu et yadda enem ni gatut ni sindalu tu et yadda pamilyah da et ida makibebley di Gath e et-eteng ni bebley di Pilistia. Hi Akhis e u-ungngan Maok hu patul diman. Ingkuyug tudda etan dewwan ahwa tu e hi Ahinoam di Jesreel et hi Abigail di Karmel e ahwa la nin Nabal. <sup>4</sup> Dingngel nan Saul e limmaw di David di Gath et isiked tun mengunnuunnud ni hi-gatu.

<sup>5</sup> Hakey ni aggew ey kan David nan hi Akhis ey "Apu patul, hedin kayyaggud hu nanggayyuman ta, man itudu ka anhan ni mi pambebleyan anin ni beken di Gath e bebley mu." <sup>6</sup> Et itudun Akhis ni hi-gatu hu Siklag. Neipalpun nunman ey neibilang law ni sakup ni Judah humman ni bebley. <sup>7</sup> Nambebley di David diman ni hantoon et epat ni bulan.

<sup>8</sup> Yan nanha-adan dadman ey kaipappanggulun David ida sindalu tun an mekiggubbat. Ginubat tudda bimbebley di Geshur, yadda tuud Girsi niyadda tuud Amalek e nebayag ni nambebley diman. Ey inlapu da pay ni mengubbat idan tuud Sur ingganah di Egypt. <sup>9</sup> Hedin ginubat di David hu hakey ni bebley ey daka petteyan emin lakki niya bibi-i e endi daka tetdai. Nem hedin yadda animal da henin kalneroh, yadda baka, yadda kebayyu, niyadda kamel ey daka ellan emin anin idan ngunut henin balwasi ni han ida nambangngad di kad-an Akhis. <sup>10</sup> Et hedin kan Akhis nan David ey "Attu yu nekigubatan nunya?" Kan David ni humang tuy "Yadda etan wadad gilig ni Judah" winu "Yadda helag Jerahmeel" winu "Yadda Kenite."

<sup>11</sup> Hedin inapput di David ida, da kapetteyan emin lakki niya bibi-i. Endi daka i-anemut ni pambalin dan himbut tep kantud nemnem tuy "Entanniy umlaw idad Gath et da idaddatteng hu makulug ni impahding ku." Huyya impenahding di David di Pilistia eman ni nekibebleyan dadman. <sup>12</sup> Kakukkulugan Akhis hi David et humman hu kantud nemnem tuy "Kayyaggud et henin nunman ngu hu kapehpehding David idan edum tun helag Israel ma-lat angebe-hel da gapun nunman ey mambalin hi-gatun bega-en kun ingganah."

## 28

<sup>1</sup> Entanniy nandaddan ida mewan hu sindalud Pilistia ni an mengubbat idan helag Israel. Kan Akhis nan hi David ey "Lebbeng tun mei-dum kayuddan hi-gamin an mekiggubbat idan helag Israel." <sup>2</sup> Kan David ey "Ku em. Pinhed ku et ang-angem ali hu pehding kun mekiggubbat." Et kan Akhis ey "Kayyaggud, pambalin daka tep ni guwalyak."

### *Nampebaddang hi Saul madiba*

<sup>3</sup> Netey dedanggu la hi Samuel et ikulung dad Ramah e bebley tu. Ey nemahhig hu nengilmetan idan helag Israel ni neteyyan tu. Yan nunman lan ketaggun Samuel ey impapa-kal Saul di Israel hu mangkadiba, et yadda kamammagguway et yadda wada kabaelan dan mekihummangan ni linnawan netey.

<sup>4</sup> Yadda sindalun iPilistia ey ida nangkampu etan di neihnup di Sunem. Ey hedin di Saul ida dama nangkampu di Gilboa. <sup>5</sup> Inang-ang Saul ida etan hantapug ni sindalun iPilistia ey simmakut ni peteg <sup>6</sup> et ibega tun APU DIOS hedin hipa hu pehding tu, nem eleg hummangan APU DIOS di i-innep winu yad binnunut. Anin idan prophets tu ey endi tuka peamtan hi-gada. <sup>7</sup> Et ya law impahding Saul ey in-olden tuddan opisyal tu e kantuy "Kayu hamak ni biin kamammagguway et hi-gatu pangibag-an ku hedin hipa pinhed Apu Dios ni pehding tayu." Kanday "Wada hakey di En Dor."

<sup>8</sup> Inhelam nan Saul hu ang-ang tu e nambalwasin beken ni balwasin patul. Et nunman ni hileng ey immawit ni pangkadwa tu et lumaw idad baley nunman ni bii. Dimmateng ida ey kan Saul ni hi-gatuy "Aygim ali hu linnawan etan ni netey ni e-helen kun hi-gam ma-lat amtaen ku hu mekapkapyallin hi-gak." <sup>9</sup> Kan etan ni bii ey "Inamtak e amta yu impahding Saul e patul tayu e impa-kal tud Israel ida tuun kabaelan dan mekihummangan ni linnawa. Ey kayu immalid yan mene-ul ni hi-gak et kanyu et maipeteyyak?"

<sup>10</sup> Et isapatah nan Saul e kantuy "Issapatah kud ngadan APU DIOS e wadan ingganah e eleg ka mekastigun pengipahdingam ni nunya." <sup>11</sup> Kan etan ni bii ey "Hipa kan linnawan pinhed mun eyyagak?" Kan Saul ey "Hi Samuel."

<sup>12</sup> Entanniy inimmatunan etan ni bii hi Samuel ey pinhakkeyey kamampepekkaw etan bii et kantun Saul ey "Kele yuwak hineul? Tam hi-gam hi Saul e patul!" <sup>13</sup> Kan Saul ni hi-gatuy "Entan takut mu. Ehel mu kuma hedin hipa inang-ang mu." Kan etan ni bii ey "Wada linnawan kamangeukkat alid puyek."

<sup>14</sup> Kan Saul ey "Hipa ang-ang tu?" Kan etan ni bii ey "Tam nea-amman nambalwasin andukkey." Inamtan nan Saul e hi Samuel humman et iyuung tun panlispituh tu.

<sup>15</sup> Entanni ey immehel hi Samuel e kantun Saul ey “Kele muwak impaeyag di deya et muwak taktaken.” Kan Saul ey “Em tep et-eteng ni ligat ku. Immalidda iPilistia ni an mengubbat ni hi-gak, nem dingkug tuwak nan Apu Dios. Eleg tuwak law hummangad i-innep ku niya endi tuka e-ehheladdan prophets ni pehding mi et mukun inaygan daka, ma-lat ehlen mu hedin hipa pehding ku.”

<sup>16</sup> Nem kan Samuel ey “Endi law silbi tun muwak pengeyyagan tep inwalleng daka law APu DIOS et buhul daka law nunya?” <sup>17</sup> Huttan inamnuan ni inhel tu lan hi-gak ni nunman et ehelen kun hi-gam. Ingkal dakan man-ap-apu et ihullul tu hi David. <sup>18</sup> Huyya nambalanan ni eleg mu pengu-unnudan ni inhel tun hi-gam ni petteyem idan emin hu iAmalek. <sup>19</sup> Et humman hu yan kabbuhhan peapput dakan APu DIOS idan iPilistia anin idan sindalum et pateyen daka niyadda u-ungngam, ma-lat maitu-nud kayun hi-gak ni um-alidya.”

<sup>20</sup> Dingngel Saul humman ni inhel Samuel ey pinhakkeyey neilukuy di puyek tep ya takut tu, hakey pay ey tep eleg mambangngan ni nunman ni aggew. <sup>21</sup> Inang-ang etan ni bii e simmakut ni peteg hi Saul et kantun hi-gatuy “Kele inna-num, Apu patul, inlamangan ku biyag ku et u-unnuden ku hu inhel mun pehding ku. <sup>22</sup> Nem kulug muwak anhan e bega-en mu et mangan ka ma-lat wada ikkelmeg mun mambangngad.” <sup>23</sup> Nem eleg pinhed Saul. Anin idan opisyal tu ey impilit dan mengngan. Inu-unnud tu et uminah et an yumudung di unggipan tu.

<sup>24</sup> Wada etan kilaw ni bakan kaipappattul etan ni bii et tu al-en et pewa-tek tu ey nengapyan sinapay ni eleg ma-duman ni kamampelbag. <sup>25</sup> Et ilaw tun kennen di Saul et yadda tuu tu et mangan idan emin. Negibbuh idan nengan et manglaw idan numman e hileng.

## 29

### *Eleg pinhed idan iPilistia ni baddangan David idad gubat*

<sup>1</sup> Yadda iPilistia ey inemung da sindaluddad Aphek. Ey yadda sindalun helag Israel ey nangkampudda damad hebwak di Jesreel. <sup>2</sup> Yadda papatul ni iPilistia ey immegah ida et ipengulu da sindalu da e negenedwaddan hanggagatut ey hanlibu. Yadda sindalud David nan Akhis ni nei-dum ni hi-gada ey nanggillig ida. <sup>3</sup> Inang-ang idaddan apapun sindalun iPilistia ey kanday “Kele wadadda eya Hebrew di deya?” Kan Akhis ey “Huyya hi David e hakey ni ap-apun sindalun Saul di Israel ni nunman. Nem nebayag ni nekiahaha-ad ni hi-gak ey endi inamtak ni bahul tu neipalpun immalyan tu ingganah ni nunya.”

<sup>4</sup> Nem bimmunget ida etan ap-apun sindalun iPilistia et kanday “Pambangngad yuddad indawat yun bebley da. Eleg mabalin ni daitsu baddangan ni an mekiggubbat, tep inna-nu hedin itsu kamanggugubat ey hi-gatsu kumedek ginubat da. Tep hipa pehding David ma-lat mambangngad hu neminhed ni apu tu hedin beken ni gubbaten daitsu kaya et patyen tu dakek ni hi-gatsu? <sup>5</sup> Kaw bekken huayan hi David hu intenattayyawan idan bibi-id Israel niya in-ena-appahan dan kanday ‘Kalibulibu hu pintey nan Saul, nem kapulupulun libu hu pintey David.’”

<sup>6</sup> Et ayagan Akhis di David et kantun hi-gatuy “Nakka issapatah di ngadan Apu Dios e makulug ni kayyaggud ka et pinhed kun mekillaw kan hi-gamin mekiggubbat, nem eleg pinhed idan edum kun ap-apun sindalu. <sup>7</sup> Nem entan pandanag! Anin ew ni pambangngad ka ey ang-ang mut endi mu ippahding ni bellawen da.”

<sup>8</sup> Kan David ey “Nem kaw hipa nak impahding ni lawah, apu patul? Tamey kanmuy endi nak ipahding ni lawah neipalpu eman ni inlian min nekibebley ni hi-gayu ingganah nunya. Ey hipa gaputun eleg kami umbaddang ni mekiggubbat ni buhul yu?”

<sup>9</sup> Nem kan Akhis ey “Hedin hi-gak ngu man endi nakka e-helan hi-gam tep nakka ebbuluta e kayyaggud kan hi-gak heniddan anghel e daka ihhakkey Apu Dios hu neminhed da. Nem yadda edum ni patul hu eleg neminhed ni mei-dum kayun hi-gamid gubat. <sup>10</sup> Et humman hu hi-gam e David niyadda sindalum ni neni-yan nan Saul et umli kayun nekibebley ni hi-gak, ey mahapul ni umhaleman kayun mambangngad di nambebleyan yun intuduk ni hi-gayu.”

<sup>11</sup> Et kamangkewa-wa ey immegah di David et mambangngad ida. Ey yadda etan sindalun iPilistia ey limmaw idad Jesreel.

## 30

### *Ginubat idan iIsrael hu iAmalek*

<sup>1-3</sup> Nelabah dewwan aggew et dumteng di David di bebley dad Siklag ey inang-ang da e nalgab hu bebley da et magiheb emin hu wadadman. Ey yadda bibi-i niyadda u-ungnga da ey imbesik idan iAmalek ni immalin nengubat ni bebley da.

<sup>4</sup> Nemahhig nangih David e kamantet-ul anin idan sindalu tu ey ida kaumlelemyung. <sup>5</sup> Nekibsik dadda etan dewwan ahwan David e di Ahinoam e ijesreel nan hi Abigail e ahwa lan Nabal di Karmel. <sup>6</sup> Kamemunnunnu nemnem David tep maggeh ni pteg nemnem idan sindalu tu tep ya nengibsikan idan iAmalek ni u-ungnga. Et humman hu ihik dan tengbaen hi-gatu nem impetuled APU DIOS e Dios tu.

<sup>7</sup> Impaeyag tu hi Abiathar e padi e u-ungnga lan Ahimelek et kantun hi-gatuy "I-lim etan ephod et amtaen tayu hu pinhed APU DIOS ni pehding tayu." Et ilaw nan Abiathar. <sup>8</sup> Nekihummangan hi David nan APU DIOS e kantuy "Kaw pedugden midda iAmalek ey kaw ha-kupen midda ey apputen midda?" Kan Apu Dios ey "Em! Pedug yudda et bangngaden yudda emin hu imbesik da."

<sup>9-10</sup> Et mangunud di David et yadda etan enem ni gatut ni sindalu tu. Dimmateng idad kulukul di Besor ey nanha-ad ida dewanggatut ni sindalu tep neka-atudda. Nem intuluy di David et yadda etan epat ni gatut ni sindalu tun limmaw.

<sup>11-12</sup> Ida kamenglaw ey wada dinteng dad pattullan ni lakin iEgypt et awiten da et ilaw dad kad-an David. Eleg mangamangan ni tellun labbi et tellun aggew humman ni tuu et idwatan dan kennen tun figs niya dewwan napkel ni raisins et han maibangngad elet tu.

<sup>13</sup> Kan David ni hi-gatuy "Hipa kan bega-en ni hi-gam ey attu bebley mu?" Himmumang ey kantuy "Nalpu-ak di Egypt. Bega-en tuwak etan ni hakey ni tuun iAmalek, nem ay hini-yan tuwak eman ni nelabah tellun aggew tep nandeggehak. <sup>14</sup> Mi ginubat ida Kelethite di Judah et yadda helag Kaleb, anin ya bebley di Siklag et legaben mi."

<sup>15</sup> Kan David ey "Ettu et ipengulu dakemid kad-an idan iAmalek ni nengubat ni bebley mi?" Kan etan ni laki ey "Hedin issapatah mun Apu Dios e eleg muwak petteya ey eleg muwak ibbangngad di kad-an ni apuk man dammutun ippanguluk hu kad-an da."

<sup>16</sup> Et ipengulun nunman ni tuu hu nangkampuan idan iAmalek. Limmaw di David ey immen ida humman ni iAmalek e ida kamengi-innum ey ida kamanhahamul niya ida kamenattayaw tep dakel imbesik dad Pilistia et yad Judah. <sup>17</sup> Hi David et yadda sindalu tu ey nampatey dadda meipalpun kakkabbuhan ingganah ni mahmahdem, nem wadadda epat ni gatut ni lalakkin bimmesik di Karmel e nampantakkay idad kamel. <sup>18</sup> Binangngad di David kuma emin hu imbesik da, anin ida etan dewwan ahwa tu, <sup>19</sup> yadda ahwan sindalu tu, yadda u-ungngada et ya emin ni ngunut da. Endi eleg mebangngad ni imbesik idan nunman ni iAmalek, anin ni hakey. <sup>20</sup> Anin idan animal da et binangngad da et degyunen idan sindalu tu et ienamut da. Kanday "Huyyadda ey kukuwah law David."

<sup>21</sup> Et mambangngad di David di kulukul di Besor di kad-an idan etan dewanggatut ni sindalun eleg makilaw gapuh ni atu da. Immaliddan nenammud David et apngaen David ida. <sup>22</sup> Nem wadadda etan lawah nemnem tun sindalu tu e kanday "Eleg tayudda iddawsy eyaddan illa tayud buhul tayu. Yan ebuh hu mabalin ey bangngaden da aahwa da niya u-ungnga da et han ida anemut."

<sup>23</sup> Nem kan David ey "Eleg e hi-gayuddan agi, beken ni hanniman hu pehding tayun eyan indawat APU DIOS ni hi-gatsu. Kaw eleg yu ang-anga e endi lawah ni nekapyan hi-gatsu, tep impaptek daitsu et pengapput daitsun APU DIOS. <sup>24</sup> Endi an mengebbulut nuntan ni kanyu. Mahapul ni man-yingnegh hu panggegedwaan tayu eyaddan illa tayud gubat. Ya etan an nekigubat et ya etan nanha-ad ni nanggualyad kampu ey mahapul ni man-yingnegh ellan da." <sup>25</sup> Huyya hu olden David ni meu-unnud et neipalpun nunman ey humman neu-unnud di Israel.

<sup>26</sup> Immanemut di David di Siklag et umipelaw idad gagayyum tun aap-apud Judah etan ni illadad gubat. In-unnud tu tudek e kantuy "Peellik eya iddawat kun hi-gayun inla mid nekigubatan min buhul APU DIOS." <sup>27-31</sup> Indawtan tudda dama etan gagayyum tun aap-apu etan idad bebley e Bethel, Ramot di Negeb, yadda etan edum ni gagayyum tud Jattir, yad Aroer, yad Sipmet, yad Estemoa, yad Rakal, yadda bebley idan Jerahmeelite, niyadda iKenite, yad Hormah, yad Borashan, yad Athak et yad Hebron e humman ida bebley ni linallawwan di David e kabbabbal ida tuodman ni hi-gada.

## 31

*Netey hi Saul et yadda u-ungnga tun lakid gubat*

<sup>1</sup> Ginubat idan iPilistia hu sindalun helag Israel di Duntug e Gilboa et dakel hu pintey daddan helag Israel diman. Bimmesik ida edum ni hi-gada, anin hi Saul e patul niyadda u-ungnga tu, <sup>2</sup> nem hina-kup idan iPilistia ida et pateyen da tellun u-ungngan Saul e hi Jonathan, hi Abinadab, et hi Malkishua. <sup>3</sup> Nekalliputan dama hi Saul tep pinenaddan buhul da tep nemahhig gubat di kad-an tu. <sup>4</sup> Et kantu etan ni kamenettengged ni almas tu ey "Uknut mu ispadah mu et pateyen muwak tep eleg ku pinhed ni yaddalli Pilistin e eleg mengullug nan Apu Dios hu um-alin mampehelheltap ni hi-gak."

Nem kaumtakut humman ni kamenettengged ni almas tun memetty ni hi-gatu, et uknuten law nan Saul hu ispadah tu et lukbuban tu et matwik annel tu. <sup>5</sup> Inang-ang etan ni kamenettengged ni almas Saul e netey et uknuten tu dama ispadah tu et lukbuban tu et matey idan dewwa. <sup>6</sup> Yan nunman ni aggew ey netey hi Saul, yadda tellun u-ungnga tun laki, ya kamenettengged ni almas tu et yadda opisyal tu.

<sup>7</sup> Dingngel idan edum ni helag Israel ni nambebley di Nedeklan e Jesreel et yad ba-hil ni Wangwang e Jordan e bimmesik ida sindalu da niya netey hi Saul niyadda tellun u-ungnga tu, ey bimmesik ida et hi-yanen da bebley da. Et umlidda iPilistia et maihullul idan nambebley diman.

<sup>8</sup> Newa-wan nunman ey limmaw ida iPilistia et da pan-alen hu hipan ellan daddan nangketey ni helag Israel. Entanni ey himmak da hu annel Saul niyadda etan tellun u-ungnga tud Duntug e Gilboa. <sup>9</sup> Pinutul da ulun Saul et alen dan emin almas tu. Ey intu-dak da an menghel di emin ni bebley dad Pilistia niyad tempol ni kinapya dan dios da meippanggep ni neapputan idan helag Israel. <sup>10</sup> Inla da almas Saul et da iha-ad di tempol ni dios da e hi Astarot et ipetak da annel tud luhud di Bet Shan.

<sup>11</sup> Dingngel idan iJabes Gilead humman ni impahding idan iPilistia nan Saul, <sup>12</sup> ey nanlallabiddan limmaw hu netuled ni sindalu dad Bet Shan. Et da alen hu annel Saul et ya annel idan tellun u-ungnga tu et ilaw dad Jabes et giheben dadman. <sup>13</sup> Inemung dadda tu-ngal ni eleg magiheb et ikulung dad hengeg ni tamarisk di diman Jabes. Negibbuh ni impahding dadda humman, ey eleg ida mangan ni pitun aggew.



## 2 Samuel

### *Ya meippanggep ni meikkadwan libluh Samuel*

Huyyan meikkadwan libluh Samuel ey peamta tudda neipahding eman ni ketaggun David e patul di Israel. Ya eman ni nampatulun tu ey dakel hu ligat tu. Tep ginubagubat idan buhul ni Israel di David niyadda tuu tu. Ey ya etan u-ungnga tu e hi Absalom ey nginhay tu hi ametun hi David et ipatna tun pilliwen hu nan-ap-apuan tu. Nem binaddangan Apu Dios hi David niyadda etan sindalu tu et mengapput idad nekihenanggaan dad gubat.

Nem entanni ey impahding David hu himmallan liwat e in-ulig tu hi Bathsbeba e ahwan Uriah. Niya impapetey tu hi Uriah ma-lat eleg meamta humman ni nanliwtan tu. Entanni mewan ey nanliwat nan hi Apu Dios ni nemilangan tudan helag Israel. Nem anin ni hanniman et impannananeng David ni inu-unnud hi Apu Dios eman ni ketaggu tu.

Impeamtan Apu Dios hu binabbal tu niya impeminhed tun David ni nekitbalan tun hi-gatu e pakulug tu e ya helag tu mampatul ni ing-ingganah. (7:1-29) Huyyan nekitbalan tun hi-gatu ey um-amnullin pampatulun ni helag David e hi Jesus Christo di kebebbley eyad puyek. (Luke 1:32-33)

### *Ya neitudek eyad libluh:*

1. Ya nambalinan David ni patul niya neihammadan ni nan-ap-apuan tu. (chapters 1-10)
2. Ya nanliwtan David niyadda etan ligat tu eman ni nampatulun tud Israel. (chapters 11-24)

### *Ya nengamtaan David ni neteyyan idan han-ama e di Saul nan Jonathan*

<sup>1-2</sup> Hi Saul ey pintey idan iPilistia. Ey hi David ey nambangngad di Siklag eman ni nelabah pigan aggew ni nekigubatan daddan iAmalek et apputen dadda. Yan meikkatun aggew neipalpun dintengan da ey wada immalin tuun nalpud nangkampuan di Saul. Bini-ki tu balwasi tu niya dinep-ulan tu ulu tu.\* Limmaw di kad-an David et manyuung ni panlispituh tun hi-gatu.

<sup>3</sup> Kan David ni hi-gatuy "Attulli nalpuam?" Hinumang nunman ni tuu e kantuy "Bimmesikkak e nalpuwak di kampuddan sindalun helag Israel."

<sup>4</sup> Kan David ey "Et hipa neipahding?" Et ehelen nunman ni tuu e kantuy "Bimmesik ida hu sindalun Saul. Dakel hu netey ni hi-gada, anin di Saul nan hi Jonathan et netey ida."

<sup>5</sup> Kan David ey "Inna-nun mu nengamtaan e netey di Saul nan Jonathan?"

<sup>6</sup> Kan nunman ni tuu ey "Wada-ak di duntug di Gilboa nunman ey inang-ang ku hi Saul e immehngeng ey singged tu pahul tu ey kamangekihup ida nampangkebayyu niya nampangkalesah ni sindalun iPilistia ni manliktub ni hi-gatu. <sup>7</sup> Inang-ang tuwak et ayan tuwak. Et kangkuy 'Kela?' <sup>8</sup> Minahmahan tu hedin hipa-ak, et ehelen ku e iAmalekkak. <sup>9</sup> Ey kantun hi-gak ey 'Ikay et pateyen muwak tep himmalem liput ku et metteyyak damengu.' <sup>10</sup> Et lumawwak et ma-maen ku et matey tep kamangkatatey. Inlak hu penget tun penget ni patul niya gelhing tu et adyah e in-alik ma-lat iddawat kun hi-gam, e apu."

<sup>11</sup> Dingngel di David niyadda sindalu tu ey nambi-ki da hu balwasi dan pengipeangan dan lemyung da. <sup>12</sup> Et mannannangngih ida niya nantepel idan nunman ni aggew tep ya neteyyan Saul, hi Jonathan et yadda edum dan helag Israel ni tuun APU DIOS. <sup>13</sup> Minahmahan David etan ni tuu hedin attu hu bebley tu ey kantuy "iAmalekkak nem nekibebleyyak ni hi-gayu."

<sup>14-16</sup> Et kan David ni hi-gatuy "Kele endi takut mun nematey ni pinutuk APU DIOS ni patul? Yan nunya ey mettey ka tep hi-gam ngu kan bahul! Indudug mu ngun inhel hu bahul mu e pintey mu pinutuk APU DIOS ni patul." Inaygan David hu hakey ni sindalu tu et kantun hi-gatuy "Patey mu eya tuu!" Et pateyen nunman ni sindalu tu humman ni iAmalek.

### *Ya a-appeh nan David ni nengilmetan tuu neteyyan di Saul nan Jonathan*

\* 1:1-2 1:1-2 Huyya daka pehding nunman ma-lat peang-ang da e ida kaumlelemyung

<sup>17</sup> Nengapya hi David ni a-appéh ni meippanggep ni nengilmétan tun neteyyan di Saul nan Jonathan. <sup>18</sup> Et iolden tu e mahapul ni meituttudduđđan emin ni helag Judah. Huyyan a-appéh ey neitudek etan di libluh nan Jashar.

<sup>19</sup> Yahhuy hu a-appéh David: “Hi-gayuddan edum kun helag Israel, netey idad duntug ni bebley tayu etan kamedeyyaw ni ap-apu tayu. Anin idan ketultuledan niyadda kelallangan ni sindalu tayu. <sup>20</sup> Entan tu peamtad Gath niyad Askelon di Pilistia, e bebley idan eleg mengullug nan Apu Dios, ma-lat eleg ida man-am-amleng hu bibi-i da.

<sup>21</sup> Hamban eleg ali um-udan di kedunduntug di Gilboa, ey memagmagan hu puyek diman ma-lat endilli meennidman tep yadman hu neteyyan Saul e ketultuledan ni sindalu et eleg law melemmuh hu happiyaw tun lana. <sup>22</sup> Ya panan Jonathan et ya ispadah nan Saul ey inusal dan nematey idan neka-let ni buhuł da.

<sup>23</sup> Nemnem tayud Saul nan Jonathan e han-ama e kakkayyaggud idan hi-gatsu. Yan ketaggu da ey ida kameka-unnud. Ey nan-unnud ida mewan ni neteyyan da. E-ellistudda nem ya tuldu niya na-na-let ida nem ya lion.

<sup>24</sup> Humman hu hi-gayun kabiihin helag Israel, ilmesi yu neteyyan Saul! Tep binalwasian dakeyun kayyaggud ey indawtan dakeyun balituk ni gangam.

<sup>25</sup> Netey ida etan netuled ni sindalu tayu, anin hi Jonathan, et immen idad duduntug hu annel da. <sup>26</sup> Agik Jonathan, nakka umlelemyung niya maggeh ni peteg hu nemnem kun neteyyam. Et-eteng ni peteg hu impeminhed mun hi-gak e endi kei-ingngehan tu, anin niya impeminhed ni bii.

<sup>27</sup> Maggeh ni peteg di nemnem ku neteyyan yun emin ni nangketuled ni sindalu et endi law silbiddan almas yu.”

## 2

### *Ya nampatulán David di Judah*

<sup>1</sup> Entanni ey minahmahan David nan APU DIOS e kantuy “Kaw dammutun nak mambebley di Judah?” Kan APU DIOS ey “Dammutu.” Kan David ey “Attudman?” Kan APU DIOS ey “Yad Hebron.” <sup>2-3</sup> Et ipengulun David ida sindalu tu, anin yadda ahwa da niyadda ahwa tu e hi Ahinoam e iJesreel et hi Abigail e iKarmel, e ahwa lan eman nan hi Nabal. Et mambebley idad Hebron et yadda etan di nanlinikweh ni bebley diman.

<sup>4</sup> Entanni ey immaliddad Hebron hu aap-apud kebebbebley di Judah et putuken da hi David ni mampatul di diman Judah et duyagan da hu ulu tun lana.

Dingngel David e yadda iJabes Gilead hu an nengikulung nan Saul <sup>5</sup> et umitu-dak ni tuu tun mengillaw ni tudek tun hi-gada. Kantud tudek tuy “Panyaggud dakeyun APU DIOS ni nengikulungan yun Saul e humman nengipeang-ang yun nanengtun eleg yu iwalleng hu patul yu. <sup>6</sup> Ey babbalan dakeyu et anhan APU DIOS ey nanengtu et anhan ni ippaptek dakeyu. Hedin hi-gak dama man kayyaggud pehding kun hi-gayu tep gapuh nunman ni yu impahding. <sup>7</sup> Anin ni netey hu patul yu ey entan kedismayah. Pa-let yu nemnem yu ey idinel yuwak. Abulut yuwak ni mampatul ni hi-gayu heniddan tuud Judah e pinutuk da-ak ni mampatul ni hi-gada.”

### *Ya nanggugubatan idan tuun David et yadda tuun Saul*

<sup>8</sup> Hakey ni aggew ey hi Abner e u-unggan Ner e ap-apun sindalun Saul ey himmesik idan Isboset e u-unggan Saul. Inagwat da etan Wangwang e Jordan et lumaw idad Mahanaim. <sup>9</sup> Impambalin Abner hi Isboset ni patul di Gilead, Asher, Jesreel, Ephraim et yad Benjamin niyaddad edum ni bebley ni helag Israel. <sup>10</sup> Na-pat hu toon Isboset eman ni impambalin nan Abner ni patul et man-ap-apun dewwan toon ni ebuh. Nem yadda helag Judah ey hi David hu imbilang dan patul da. <sup>11</sup> Nan-ap-apud Judah ni pitun toon et enem ni bulan e yad Hebron hu nambebleyan tu.

<sup>12</sup> Hakey ni aggew ey ingkuyug Abner hu sindalu tu niyadda opisyal Isboset et hi-yanen da Mahanaim et lumaw idad Gibeon. <sup>13</sup> Hi Joab e hi Seruah hu inetu ey ingkuyug tu sindalun David et lumaw idan an menammun hi-gadad lebeng di diman Gibeon. Nandimmang di Abner nan Joab niyadda sindalu da etan di lebeng. <sup>14</sup> Kan Abner nan hi Joab ey “Imay et panlaban tadda eya kakat-agun sindalu ta.”

Inebulut Joab et kantuy “Hedin huttan hu pinhed mu, man anin, ebbuluten ku.”

<sup>15</sup> Pinutuk Abner hu hampulut dewwan mengi-ehneng nan Isboset et yadda helag Benjamin et putuken daman Joab hu hampulut dewwan mengi-ehneng nan David. <sup>16</sup> Nanlalaban ida e hedin hinebungul da bewek ni kalaban da, intewik da ispadah di taglang. Et matey idan emin humman ni dewwampulut epat ni sindalun nunman ni aggew. Humman hu gaputun ingngadnan da humman ni ‘Puyek ni Nanhintetwikan.’

<sup>17</sup> Negibbuh humman ey nanggugubat ida sindalun Isboset e hi Abner hu ap-apu da niyadda sindalun David. Nemahhig hu impahding dan nanggugubat et lektattuy inapput idan sindalun David hu sindalun Abner.

<sup>18</sup> Yadda etan tellun lakin u-ungngan Seruiah e hi Joab e ap-apuddan sindalun David, hi Abishai et hi Asahel ey sindalu daman David ida. Hi Asahel e kandan heni makwah tep na-let ni umbesik ey <sup>19</sup> nampedug tu hi Abner. <sup>20</sup> Inwingin Abner et kantuy “Kaw hi-gam hi Asahel?” Kan Asahel ey “Em.”

<sup>21</sup> Kan Abner ey “Beken ni hi-gak hu pedug mu. Ya hakey ni sindalu hu pedug mu et hedin pintey mu, alam hu almas tu.” Nem kahing hi Asahel et tagan tu pedug nan Abner.

<sup>22</sup> Impidwan Abner ni inhelan hi Asahel e kantuy “Isiked mun memmemdug ni hi-gak tep hipalli penghel nan agim e hi Joab hedin peteyen dakan hi-gak.” <sup>23</sup> Nem eleg me-heli hi Asahel. Et hegeden law Abner hi Asahel et itwik tu pahul tud egeh Asahel et humewang di beneg tu et matey. Neipalpun nunman ey emin hu tuun kamandellan di diman neteyyan Asahel ey ida kaum-ehneng ni nekemtang ni penginemnemunan dan hi-gatu.

<sup>24</sup> Intuluy di Abishai nan Joab ni inunud hi Abner et kamangkelinnug law hu aggew ey dimmateng idad duntug di Ammah e neihnup di Giah. Humman ni bebley di Giah di keltad mampellaw di Gibeon. <sup>25</sup> Neamong ida mewan hu helag Benjamin di kad-an Abner et mampustuh ida etan di tuktuk ni duntug. <sup>26</sup> Singkukan Abner di Joab et kantuy “Kaw huyya pinhed tayu e hi-gatsu ngu ey nampapatey itsu? Kaw eleg mu nemnema e ya pambalanan tu ey degeh ni nemnem? Tam helag daitan dewwa nan Israel, ehelim anhan kumadda sindalum ma-lat isiked dan memdug ni hi-gami.”

<sup>27</sup> Himmumang hi Joab ey kantuy “Kayyaggud et immehel ka. Issapatah kun Apu Dios e gullat ni eleg ka umhel et pan-unnuden dakeyu ingganah ni kewa-waan tu.” <sup>28</sup> Et mantangguyup hi Joab ni pengamtaan idan sindalu tu e issiked dan memdug ni hi-gada. Et isiked da law ni manggugubat.

<sup>29</sup> Hi Abner niyadda sindalu tu ey nandalan idan hileng di nandeklanan tud Jordan et agwatan da etan Wangwang et dumteng idad Mahanaim ni ngannganih ni emaggew ni newa-waan tu.

<sup>30</sup> Insiked di Joab ni memdug nan Abner et amungen tudda sindalu tu ey hampulut heyam hu netey, eleg makibilang hi Asahel. <sup>31</sup> Nem ya pintey idan sindalun Joab ni sindalun Abner ey telunggatut et na-nem e humman ida ey helag Benjamin. <sup>32</sup> Inanemut di Joab hu anel agi tu e hi Asahel, et da ikulung di kullungngan ni aammed dad Bethlehem. Nihileng law ni nunman nem nanglaw di Joab niyadda etan sindalu tu et dumteng idad Hebron ni newa-waan tu.

### 3

<sup>1</sup> Nebayag ni kamanggubbagubbat hu tuudda lan eman nan hi Saul niyadda tuun David. Et lektattuy kamangkedakkel ida tuun meiddagyum nan David nem yad pamilyah Saul ey kamangkeekket hu tuu da.

<sup>2</sup> Hi David ey enem ida lakin u-ungnga tun nanhenehened ni neiungngad Hebron. Ya pengulwan ey hi Amnon, e u-ungnga dan Ahinoam di Jesreel. <sup>3</sup> Ya hened ey hi Kileab, e u-ungnga dan Abigail, e ahwa lan eman nan hi Nabal di Karmel. Ya meikkatlu ey hi Absalom, e u-ungnga dan Maakah, e u-ungngan Talmai, e patul di Geshur. <sup>4</sup> Ya meikkapat ey hi Adonijah, e u-ungnga dan Haggit. Ya meikkellima ey hi Sephatiah, e u-ungnga dan Abital. <sup>5</sup> Et ya meikka-nem ey hi Itream, e u-ungnga dan Eglah. Huyyaddan lakin u-ungngan David ey neiungngaddan emin di Hebron.

#### *Hi David law hu neimumdan Abner*

<sup>6</sup> Yan nunman ni kapanggubbagubbatiddan sindalun David niyadda sindalun eman lan nan hi Saul ey inhammad Abner hu saad tu et mambalin ni ap-apuddan tuun Saul. <sup>7</sup> Hakey ni aggew ey kan Isboset e u-ungngan Saul nan Abner ey “Kele mu in-ulig hi Lispah e u-ungngan Aiah e hakey idan ahwan ama?” <sup>8</sup> Bimmunget hi Abner tep ya humman ni an inhel Isboset ni hi-gatu et kantuy “Kele hannitan muka pannemnem ni hi-gak? Kaw mabalin ni nak pehding humman ey nemahhig hu nakka pengi-ehneng lan amam? Tam heni tep kammu ey nakka baddangidda iJudah. Kaw eleg mu amta e neipalpun nunman ey in-ehneng ku amam, hi-gayun pamilyah tu, niyadda gagayyum tu et eggak iebulut ni daka dedpapien ni sindaluddan David? Ey kele ka mengapkapyan pambehulan ku umhulun ni ebuh hu bii? <sup>9-10</sup> E-helen kun hi-gam e impakulug APU DIOS e hi David hu ihullul tun Saul ni mampatul ma-lat mepappeg hu kapampatul in amam niyadda helag tu. Et hi David hu mampatul di Judah niyad emin di nambebleyan idan

helag Israel. Ey issapatah kun Apu Dios e anin ni petteyen da-ak hedim eggak baddangi hi David ma-lat umammu emin hu impakulug Apu Dios ni hi-gatu.”<sup>11</sup> Nem kapakdag Isboset eneeneng tep kaumtakut nan Abner.

<sup>12</sup> Entanni ey nenu-dak hi Abner ni an mekihummangan nan David e wadad Hebron. Huyya inhel tun e-helen dan David: “Hi-gam e David hu lebbeng tun mampatul. Manhummangan ita et hedim man-unnud nemnem ta, ey baddangan daka ma-lat hi-gam hu man-ap-apud emin di bebley tayun helag Israel.”

<sup>13</sup> Inebulut David et kantudda etan ni binegan Abner ey “Kayyaggud huttan ni inhel tu. Ebbulutun kun mekihummangan ni hi-gatu nem mahapul dedan ni ikkuyug tullu ahwak e hi Mikal, e u-ungnga lan eman nan hi Saul.”<sup>14</sup> Impaad mewan David nan Isboset e kantuy “Ehel yu lan Isboset e mahapul ni peki-li tullin Abner hi Mikal, e ahwak, tep intebalan kun hanggatut ni iPilistia ni pintey ku tep humman hu inhel ameyun bayad tu.”<sup>15</sup> Inu-unnud Isboset humman ni inhel David et tullu paewit hi Mikal. Et hi-yanen Mikal hi Paltiel, e u-ungngan Lais.<sup>16</sup> Nannannangngih etan ahwan Mikal ey neiunnuunnud ni hi-gatu ingganah di Bahurim. Inhelan Abner e kantun hi-gatuy “Pambangngad ka kuma.” Et u-unnuden Paltiel et mambangngad la.

<sup>17</sup> An inungbal idan Abner hu aap-apuddad Israel et kantun hi-gaday “Amtak e nebayag dedan lan ey pinhed tayun emin hi David ni mampatul tayu.<sup>18</sup> Ettu e yan nunya kuma? Nemnem yu eman inhel lan APU DIOS e kantuy ‘Hi David e bega-en ku hu pambalin kun mengihwang idan tuuk di buhul dan iPilistia et yaddad emin ni buhul da.’”<sup>19</sup> Limmaw hi Abner di nambebleyan idan helag Benjamin et makihummangan ni hi-gada ey inebulut da. Et han lumaw di kad-an David di Hebron et peamta tu e simbal emin ni tuud Israel, anin idan helag Benjamin, e hi-gatu mampatul da.

<sup>20</sup> Impalsian David di Abner niyadda etan dewampulun ingkuyug tun nunman ni linawwan dad Hebron et hamulen da.<sup>21</sup> Negibbuh humman ni nanhahamulan da et kan Abner nan David ey “Apu patul, mambabangngad kami et nak awisen ida emin hu tuud Israel et abuluten da e hi-gam hu mampatul da tep humman dedan la pinhed mu.” Et paenamut David hi Abner e kantun hi-gatuy “Ang-angen ku ma-lat endi lawah ni meipahding ni hi-gam.” Et umgah di Abner et manglaw ida.

*Ya nemateyan Joab nan hi Abner*

<sup>22</sup> Entanni ey dimmateng di Joab e nalpuddallid da nekigubatan idan buhul da ey dakel in-anemut dan inladadda nekigubatan. Endid Abner di diman tep immeladda ey nandinel ni endi lawah ni meipahding ni hi-gatu tep humman inhel David.<sup>23</sup> Nem yan dintengan di Joab ey dingngel tu illian Abner di kad-an David ey dingngel tu e melinggep hu nengipeanamutan David ni hi-gada.<sup>24</sup> Limmaw hi Joab di kad-an David et kantuy “Kele hanniman hu mu impahding e immali hi Abner et paenamut mu.<sup>25</sup> Immali mannuman et haulen daka ma-lat wada inna-nu tun mengamtan emin ni hipan muka pehpahding niya muka lawwi! Amtak e anin ni hi-gam et amtam e makulug eya inhel ku.”

<sup>26</sup> Hini-yan Joab hi David et lumaw ni an nenu-dak ni mengunnud nan hi Abner ma-lat ehelen dan hi-gatu et mambangngad. Hina-kupan da etan di ahullan di Silah et awiten da, nem eleg amtan David huyyan impahding da.<sup>27</sup> Dimmateng hi Abner di Hebron ey inaygan nan Joab di a-allaw etan ni heggepan di bebley, e heni wada e-helen tun hi-gatun ebu. Wadaddadman ey pinhakkeyey sinwik Joab hi Abner di egeh tu et matey di diman. Pintey Joab hi Abner tep imbaleh tu nemateyan tun agi tu e hi Asahel.

<sup>28</sup> Dingngel David humman ni neipahding nan Abner ey kantuy “Inamtan APU DIOS, e endi bahul ku niya endi bahul idan tuuk ni neteyyan Abner.<sup>29</sup> Hi Joab niyadda pamilyah tu hu mekastigu. Et humman hu yaddalli mantutu-nud ni helag tu ey wadan hi-gada mandedgeh ni anggetakktu ni degeh ni neitu-wan, ya degeh ni kamengpuh annel ey wadadda mepi-day et mahapul da hulkud, wadadda mettey di gubat, niya wadadda mettey tep ya upa.”

<sup>30</sup> Huyya hu inhel David ni kastigu da tep nanda-daan di Joab nan hi agi tu e hi Abishai ni pintey hi Abner tep imbaleh da hu nemateyan Abner nan Asahel e agi da eman ni nanggugubatan dad Gibeon.

<sup>31</sup> In-olden David nan Joab niyadda tuu tu e bi-kien da balwasi da et mambalwasiddan langgusih et peang-ang da e ida kaumlelemyung ni neteyyan Abner. Daka pan-illaw hi Abner ni an ikkulung ey kameitu-tu-nud hi David di lungun Abner e humman pengippeang-ang tun lispituh tun hi-gatu.<sup>32</sup> Et da ikulung hi Abner di diman Hebron ey nemahhig hu nangih idan tuudman kullungngan, anin hi David.

<sup>33</sup> Huyya kinapyan David ni a-appah ni meippanggep ni nengilmetan tun neteyyan Abner e kantuy “Kele anhan ya neteyyan Abner ey heni neteyyan ni lawah ni tuu.<sup>34</sup> Eleg

mebangkiling hu ngamay tu niya heli tun nemateyan dan hi-gatu tep eleg mambahul. Endi hu bahul tu nem pintey ni lawah ni tuu.”

Dingnel da humman ni a-appéh ey nimmangih ida emin tuu. <sup>35</sup> Yan nunman ni aggew ey eleg mangan hi David. Kaeyyaeyyagiddan tuu ma-lat mangan nem eleg tun peteg pinhed e kantuy “Anin ew ni petteyan tuwak nan Apu Dios hedín eleg meimmuh huyyan aggew ey nak mengngan.” <sup>36</sup> Katetebbaladdan tuu huyyan impahding David, anin idan etan ni edum ni impahding tu. <sup>37</sup> Ya humman ni impahding tu hu nengamtaan idan emin ni tuud Israel e makulug ni endi hu bahul David e patul dan neteyyan nan Abner.

<sup>38</sup> Kan David idan opisyal tu ey “Kaw eleg yu nemnema e huyyan pintey da ey eta-gey saad tun ap-apu di deya Israel? <sup>39</sup> Hedin hi-gak man nekapuyyak law anin ni pinutuk tuwak nan APU DIOS ni pampatul yu. Eggak law han-anus eyadda u-ungngan Seruiah tep nemahhig ni lawah daka pehpéhding. Ya pinhed ku kastiguen Apu Dios ida tep ya lawah ni daka pehpéhding tep humman lebbeng tun meippahding ni hi-gada.”

## 4

### *Ya nemateyan dan u-ungngan Saul e hi Isboset*

<sup>1</sup> Dingnel Isboset, e u-ungngan Saul, ni pintey dad Hebron hi Abner ey simmakut, anin idan tuu tu. <sup>2</sup> Ya law ap-apuddan sindalun Isboset ey yadda etan han-agi e di Baanah nan hi Rekab. Huyyaddan han-agi ey u-ungngaddan Rimmon di Beerot, e helag Benjamin. Ya Beerot ey neibilang ni bebley idan helag Benjamin. <sup>3</sup> Wadadda la nambebley diman nem bimmesik idad Gittam e mambebley idadman ingganah nunya.

<sup>4</sup> Ya hakey ni helag Saul ey hi Mepiboset e u-ungngan Jonathan. Lima toon tu eman ni neteyyan di ametu e hi Jonathan nan hi apu tu e hi Saul. Yan eman ni neipeamtad baley dad Jesreel hu meippanggep ni neteyyan da ey nenginlala-kay etan kamenge-ebban hi-gatu ma-lat humsik ida nem na-gah hi Mepiboset et mepi-day.

<sup>5</sup> Hakey ni aggew ey limmaw ida etan han-agi e di Baanah nan hi Rekab di baley nan Isboset. Dimmateng idan emaggew ey neugip hi Isboset ma-lat man-iyatu. <sup>6</sup> Ya etan biin bega-en Isboset ni kamanya-yan alinah di habyen ey kaumtenu-tu-mel et mauyeng dama. Et humman hu eleg tu igibek hu hinggepan di Baanah nan Rekab. <sup>7</sup> Himmegep idad kuwaltuh Isboset et pateyen da et putulen da ulu tu et alen da. Nanlallabiddan nandalan e indalan da etan di Nedeklan e Jordan. <sup>8</sup> Limmaw idad Hebron et da peang-ang nan David etan ulun Isboset. Kandan hi-gatuy “Adyah hu ulun Isboset, e u-ungngan eman nan hi Saul e buhul mun nandewedeweng ni hi-gam ma-lat pateyen daka. In-abulut APU DIOS ni nunyan meibleh idan u-ungngan Saul hu impahpahding tun hi-gam, e apu patul.”

<sup>9</sup> Nem himmumang hi David et kantun hi-gada ey “Issapatah kun APU DIOS e wadan ingganah ni nengihwang ni hi-gak di emin ni lawah, e meippepetey kayu tep ya huttan ni impahding yu. <sup>10</sup> Heni lan eman ni tuun immalid kad-an kud Siklag et ehelen tun hi-gak hu neteyyan Saul tep kantu ngu nem um-amlenggak. Impapetey ku humman ni tuu et humman hu ginunggunah tun nunman ni indaddatteng tun hi-gak. <sup>11</sup> Humman hu impahding kun hi-gatu tep ya humman ni indaddatteng tu et nema-ma ngu pehding kun hi-gayun lawah ni tuu. Tep pintey yu etan tuun endi bahul tun neugip di bawang ni baley tu. Nambahul kayu, et humman hu, pepetey dakeyu ma-lat meendi kayu eyad ta-pew ni puyek.” <sup>12</sup> Et ehelen David idan sindalu tu et pateyen dad Baanah nan Rekab. Pinutul da hu heli da niya ngamay da et da ita-yun hu annel da etan di neihnap di lebeg di Hebron. Ey hedín ya ulun Isboset, ey da ingkulung di neikulungan nan Abner di Hebron.

## 5

### *Ya nampatulán law David di emin ni bebley di Israel*

<sup>1</sup> Entanni ey limmaw idan emin hu helag Israel di kad-an David di Hebron. Et kandan hi-gatuy “Han-aaggi itsun emin tep hakey nahlagan tayu. <sup>2</sup> Anin dedan eman ni hi Saul hu patul et hi-gam hu nengipengupenguluddan sindalu tayud gubat. Ey inhel dedan APU DIOS e kantuy ‘Hi-gam hu pampatul idallin tuuk ni helag Israel niya hi-gam mengippaptek ni hi-gada.’” <sup>3</sup> Et mekihummangan hi David idan aap-apu dad hinanggan APU DIOS ma-lat pan-addum tudda law emin hu helag Israel. Inebulut da e hi David law hu pampatul da et duyagan da ulu tun lana.

<sup>4</sup> Telumpulu toon David eman ni nampatulán tu et mampatul ni na-pat ni toon. <sup>5</sup> Pitu et kagedwah ni toon hu nampatulán tud Hebron di Judah niya telumpulu et tellun toon hu nampatulán tudan emin ni helag Israel e yad Jerusalem hu nanha-adan tu.

<sup>6</sup> Ya lappun nan-ap-apuan David di Jerusalem ey heninnuy: Impangulu tudda sindalu tu et da gubaten ida Jebusite ni nambebley di Jerusalem. Kan ida na-nun Jebusite nem eleg kabaelin David ni apputen ida. Kandan hi-gatuy “Eleg yu anhan kabaelin ni meihnup di deya tep anin ni yadda nekulap niyadda nepi-day hu ihangga min hi-gayu et umtakut kayu.” <sup>7</sup> Nem entanni ey hinggep di David humman ni bebley e Zion et apputen dadda et ngadanan dan ‘Bebley David’.

<sup>8</sup> Yan nunman la ey kan David idan sindalu tu ey “Kaw wadan hi-gayu henin hi-gak e angebe-hel tuddan peteg hu Jebusite et ihik tun petteyen ida? Hedin wada, lakkayuy! Iunud yud kinapya dan dalan ni danum et yu pampateyen ida humman ni kandan nekulap ey nepi-day.” Et mukun kanday “Eleg pakahgep di Baley APU DIOS hu nekulap niya nepi-day.” <sup>9</sup> Entanni et an mambebley hi David diman et ngadanan tun ‘Bebley David.’ Impambalin David ni kakkayyaggud ni bebley hu Jerusalem e impeyayyaggud tu nanlinikweh nunman ni bebley. <sup>10</sup> Lektattuy kamangkeihhammad hu kapan-ap-apuini David tep kapakabbaddangin APU DIOS e Kabaelan tun emin.

#### *Ya baley David et ya pamilya tu*

<sup>11</sup> Hi Hiram e patul di Tyre ey immitu-dak ni tuu tud kad-an David. Immipelaw ni keyew, yadda carpenter niyadda mapehek ni batu ma-lat mengapyaddan baley David. <sup>12</sup> Et yan nunman ni nengamtaan David e hi-gatu pinutuk APU DIOS ni mampatul di Israel ey inhammad tu nan-ap-apuan tu ma-lat panyaggudan idan edum tun helag Israel e tuun APU DIOS.

<sup>13</sup> Yan nan-aldanan David di Jerusalem ey induman tu ahwa tu niyadda tuka ibbilang ni ahwa tu et dumakkal hu u-ungga tun lalakki niya bibi-i. <sup>14</sup> Huyyadda u-ungga tun lalakkin neuunggad Jerusalem: hi Sammua, hi Sobab, hi Nathan, hi Solomon, <sup>15</sup> hi Ibhaz, hi Elishua, hi Nephag, hi Japhia, <sup>16</sup> hi Elishama, hi Eliada, et hi Eliphelet.

<sup>17</sup> Entanni ey dingngel idan iPilistia e hi David law hu patul idan emin ni helag Israel et amungen daddan emin sindalu dan an mappap ni hi-gatu. Nem dingngel David humman ni pehding da et lumaw ni an nantalu etan di neligat ni kedpapan tu. <sup>18</sup> Immalidda humman ni iPilistia et maiwehit idad Nedeklan e Rephaim. <sup>19</sup> Nandasal hi David nan APU DIOS e kantuy “Kaw i-abulut mun midda gubbaten eman ida iPilistia? Kaw pengapput dakemi?” Hinumang APU DIOS e kantuy “Em, lakkayuy, pengapput dakeyun hi-gak!”

<sup>20</sup> Et lumaw hi David niyadda sindalu tud Baal Perasim et apputen dadda sindalun iPilistia. Et kan David ey “Nelakah hu nengipeapputan APU DIOS idan buhul ku e henin kapehding ni danum hedin dimmakkal e um-ienud.” Et mukun ya ngadan nunman ni bebley ey Baal Perasim. <sup>21</sup> Yan ida kamemsik hu sindalun iPilistia ey nanhi-yan dadda hu tuttu-un daka daydayawan dios da et pan-al-en idan sindalun David.

<sup>22</sup> Entanni ey immalidda mewan hu sindalun iPilistia et maiwehit ida mewan di Rephaim. <sup>23</sup> Et makihummangan mewan hi David nan APU DIOS hedin hipa pehding tu. Himmumang hi APU DIOS ey kantuy “Beken di appit ni deya pengubbatan yun hi-gada. Ya pehding yu ey kaliked kayu et meba-hil kayu et yudda gubaten di kad-an idan keyew e balsam. <sup>24</sup> Hedin wada dedngelen yun kaman-alsituh di ta-pew idan nunman ni keyew ey ilepu yun mekiggubbat tep memengngulu-ak ni mengubbat idan nunman ni iPilistia et apputen kudda.” <sup>25</sup> Idu-unnud David humman ni inhel APU DIOS ni pehding tu et ipalpuad Geba ingganah lad Geser ni nengubat idan iPilistia et degyunen dadda.

## 6

#### *Ya nei-lian ni Kaban Apu Dios di Jerusalem*

<sup>1</sup> Entanni mewan ey impaeyag David emin ida sindalu tun nelaing ni mekiggubbat e umlaw ni telumpulun libu. <sup>2</sup> Impangulu tuddad Baalah di Judah ni an mengella etan ni Kaban Apu Dios. Wada hi APU DIOS di ta-pew ni Kaban e yimmudung di nambattanan ida etan ni pinaot ni heni anghel. Et humman hu, nengadnan humman ni Kaban APU DIOS e Kabaelan tun emin. <sup>3-4</sup> Humman ni Kaban APU DIOS ey wadad baley Abinadab di dutug et lumaw alid David et da ilugan di pakekapan kaliton ni ingguyud idan baka. Ey di Ussah nan Ahio e u-unggan Abinadab hu nengipenguluddan nunman ni baka e nemangulu hi Ahio. <sup>5</sup> Neitu-nud di David niyadda etan edum tu. Nehaldet hu a-appah da ey nenattayyaw idan daka pandaydayaw nan APU DIOS. Ida kamanggiggitalah ey man-ayyuding ida edum ey pampetnui ni edum hu tambourine, ya castanets niyadda cymbals.

<sup>6</sup> Entanni ey dinteng da illikkan Nakon ey neikudlih ida etan bakan nengiguyud ni kaliton et tepapan nan Ussah etan Kaban ma-lat eleg metu-li. <sup>7</sup> Ey bimmunget hi APU DIOS et pinhakkeyey pintey tu hi Ussah tep kinepa tu etan Kaban. Et humman hu,

neipahding e netey hi Ussah di takdul nunman ni Kaban. <sup>8</sup> Ey bimmunget hi David ni nemateyan APU DIOS nan hi Ussah et ingadnan tu humman ni bebley ni Peles Ussah. Et neipalpun nunman ingganah ni nunya ey nanengtun Peles Ussah hu ngadan tu.

<sup>9</sup> Kaumtakut law hi David nan APU DIOS et kantuy "Hipattep law pehding kun mengi-ennamut ni Kaban APU DIOS?" <sup>10</sup> Et eleg tu law ienamut humman ni Kaban di Jerusalem et ilaw tud baley nan Obed Edom di Gath. <sup>11</sup> Neiha-ad etan Kaban diman ni tellun bulan ey et-eteng ni bendisyon APU DIOS nan Obed Edom, ya pamilyah tu niya emin hu wadan hi-gatu.

<sup>12</sup> Entanni ey dingngel David e hanniman neipahding e et-eteng ni bendisyon APU DIOS nan Obed Edom tep ya neiha-adan nunman ni Kaban di baley tu. Et tu al-en humman ni Kaban Apu Dios di baley Obed Edom et man-am-amleng idan nengilaw di Jerusalem. <sup>13</sup> Yan nunman ni da nengal-an ey hedin imma-allaw idan ekket, peehneng David ida et iappitan tu hi APU DIOS ni hakey ni lakkitun baka et ya hakey ni kilaw ni baka. <sup>14</sup> Inhuklub David etan ephod e balwasin padi, et pedallan tu hu neayayayaw ni nandaydayaw tun APU DIOS, <sup>15</sup> ey immeladda e hi-gadan emin idan helag Israel ni an nengala etan ni Kaban APU DIOS. Indateng dad Jerusalem ey ida kamantetekkek tep ya amleng da ey daka pampatnul hu tangguyup da.

<sup>16</sup> Yan nunman ni daka pan-iddateng di bebley etan Kaban APU DIOS ey dimmu-ngaw hi Mikal e u-unggan Saul di habhabyen ey inang-ang tu hi David ni kamenattayaw ey kamanpaypaytuk ni tuka pandaydayaw nan APU DIOS ey pinihil tud nemnem tu.

<sup>17</sup> Inhegep da etan Kaban et da iha-ad etan di neatepan ni tulдах ni impekapan David. In-appitan tu hi APU DIOS ni kagihheba niya mehemmul. <sup>18</sup> Negibbuh humman et bendisyonan David ida tuud ngadan APU DIOS e Kabaelan tun emin. <sup>19</sup> Et ika-pengan tuddan emin tuun neamung ni sinapay, raisin niya neitangtang ni detag, et han ida umenamut.

<sup>20</sup> Immanemut dama hi David et bendisyonan tudda pamilyah tu. Nem neukat hi Mikal ey kantuy "Tam hiyya numan eya patul ni Israel e an nampahhiyan nenattayaw ey impeang-ang tu annel tuddan bibi-in bega-en idan opisyal tu."

<sup>21</sup> Hinumang David hi Mikal ey kantuy "Humman ngun nak impahding ni nak nenattayawan ey impenaydayaw kun APU DIOS, e nemutuk ni hi-gak ni meihhullul nan amam niyadda u-ungnga tu ma-lat hi-gak hu mampatul di emin ni helag Israel. Ey nemnem mu huuya: Eggak issiked ni meneyyaw ni pandeyyaw kun APU DIOS. <sup>22</sup> Anin ni kammuy anggeba-ing humman ni nak nenattayawan et pan-inma-mak anhan law ni menattayaw ma-lat penaydayaw kun APU DIOS. Ya muka pannemnem ey anggeba-ing hu nakka pehpehding nem da-ak katettebaladdan etan idan bibi-in bega-en."

<sup>23</sup> Neipalpun nunman ey eleg law man-ungnga hi Mikal e u-unggan Saul.

## 7

### *Ya impakulug APU DIOS nan hi David*

<sup>1</sup> Hi APU DIOS ey inhammad tu kapan-ap-apuin David et endi law lawah impahding idan buhul tun hi-gatu tep tuka ippatek. Et humman hu kamakallinggep law di palasyoh tu. <sup>2</sup> Entanni ey hakey ni aggew ni kapan-ung-ungbalid David nan hi Nathan e prophet ey kan David ey "Ma-nun hi-gak tep nakka manha-ad di nehammad ni baley ni nekapan keyew ni sedar ey immen hu Kaban Apu Dios di neatepan ni tulдах."

<sup>3</sup> Ey kan Nathan ni hi-gatuy "Ipahding mu hu hipan pinhed mu et baddangan dakan APU DIOS."

<sup>4</sup> Nem yan nunman ni hileng ey kan Apu Dios nan Nathan ey <sup>5</sup> "Mu ehel nan David e bega-en ku huuya: 'Beken ni hi-gam hu memehwat ni tempol ni panha-adan ku.

<sup>6</sup> Neipalpu eman ni nengihwangan kuddan aammed yun helag Israel di Egypt ingganah nunya ey eleggak manha-ad di tempol. Nanha-addak di neatepan ni tulдах ni nei-i-tan di attun bebley ni linallawwan idan tuuk. <sup>7</sup> Ey yan nunman ni nekikkilawan kun hi-gada ey eggak ehelan idan pinutuk kun kamengippangngulun hi-gada e ikkapyaan da-ak ni baley ni nekapan sedar ni keyew.'

<sup>8</sup> Et humman hu, ehel mun David e kangkuy 'Hi-gak e AP-APU e Dios e Kabaelan tun emin ey ingkal daka etan di nebahah ni ngunum e kamampattul ni kalneroh et pambalin dakan patul idan tuuk e helag Israel. <sup>9</sup> Nekikkilawwak ni hi-gam anin di attu linawwam. Ey hedin ka mekiggubbat idan buhul mu ey memengngulu-ak ni an mengapput ni hi-gada. Pambalin dakan mekatbal niya mandingngel kad kebebbebley eyad puyek. <sup>10-11</sup> Ittudian dakeyun tuuk ni helag Israel ni pambebleyan yu ma-lat yadman hu pambebleyan yun ingganah et eleg dakeyu law panhelhelat idan lawah ni tuu. Meipalpu eman ni wada pinutuk kun man-ap-apun hi-gayu ey ginubagubat

dakeyun lawah ni tutu-u, nem meippalpun nunya ey eggak law i-abulut ni meippahding humman ni hi-gayu.

Hi-gak e hi Apu Dios, ey pekullug kun hi-gam David e yadda helag mulli mampatul. <sup>12</sup> Hedin mepappeg ali hu biyag mu et meikkulung kad kullungngan idan aammed mu ey pampatul kulli hakey ni u-ungngam niya ihhammad ku pan-ap-apuan tu. <sup>13</sup> Hi-gatulli hu memehwat ni tempol ku. Ey ippaptek ku ma-lat mannananeng ni ingganah hu pan-ap-apuan tu. <sup>14</sup> Hi-gak ali hi ametu ey hi-gatulli u-ungngak. Hedin wada lawah ni ippahding tu ey kastiguen ku, henin kapengastigun a-ammed ni u-ungnga tu. <sup>15</sup> Nem anin ni kastiguen ku et nanengtu impeminhed ku niya pemaddang kun hi-gatu. Beken ni henin impahding kun Saul e ingkal kud nan-ap-apuan tu et ihullul daka. <sup>16</sup> Mehlag ka niya mehlag ida dama helag mu et manhuhullul idan mampatul ma-lat mannananeng pan-ap-apuan.' "

<sup>17</sup> Et lumaw hi Nathan di kad-an David et ehelen tun emin ni hi-gatu hu inhel Apu Dios.

### *Ya dasal David*

<sup>18</sup> Entanni ey limmaw hi David e patul di kad-an APU DIOS et mandasal. Yimmudung et mandasal e kantuy "APU DIOS e Eta-gey ni peteg, hi-gak niyadda pamilyah ku ey endi katteg ngu kelebengan mid impahding mun panyaggudan mi. <sup>19</sup> Ey aye muka pan-edumi bendisyon mun hi-gak, APU DIOS e Eta-gey ni peteg niya impakulug mu panyaggudan idan helag kun edum ni aggew. Et meippuun idan nunya ey nakka meewwasi law e APU DIOS, e Eta-gey ni peteg e kabbabbal kan peteg ni hi-gak niyadda pamilyah ku. Em, kayyaggud kan peteg ni hi-gami. <sup>20</sup> Anin ni naka-amtam hu katutuuk e bega-en mu et kapyatun kakkayyaggud kan hi-gak. Et humman hu, endi law edum ni mahapul kun nak ibbagan hi-gam. <sup>21</sup> Impeamtam ni hi-gak hu pinhed mun meipahding ni panyaggudan ku. Ey amtak e meippahding tep impakulug mun hi-gak ey huuya dedan hu pinhed mun meippahding.

<sup>22</sup> APU DIOS e Eta-gey ni peteg, makulug ni kaka metbal. Endi edum ni amta min Dios mi, hi-gam ni ebuh. <sup>23</sup> Ey endi edum ni henin hi-gamin helag Israel ni inhewang mud neihbutan mid Egypt et pambalin dakemin tuum et wada inna-nu tun mandingngel hu ngadan mud kebebbley eyad puyek. Ey impahding mu hu kamengippetnga e impampa-kal mudda nampambebly, anin idan dios da et maihullul kamin tuum. <sup>24</sup> Em, APU DIOS, impambalin dakemin helag Israel ni tuum ni ingganah ey hi-gam hu Dios mi.

<sup>25</sup> Et yan nunya e APU DIOS, ey iddasal ku e peamnum et maipahding ni ingganah etan hinammad mun inhel ni pehding mun panyaggudan ku niya panyaggudan idan helag ku. <sup>26</sup> Ey peamnum anhan humman ni inhel mu et mandingngel hu ngadan mun ingganah di kebebbley ma-lat kan idallin tuu ey 'Hi APU DIOS e Kabaelan tun emin hu Dios idan helag Israel.' Et humman hu, pannananeng mu anhan hu pan-ap-apuan ku.

<sup>27</sup> APU DIOS e Kabaelan tun emin ni Dios min helag Israel, netuleddak ni mengiddasal idan nunyan hi-gam tep impeamtam niya inhel mun hi-gak e bega-en mu e pampatul muddalli helag ku. <sup>28</sup> APU DIOS e Eta-gey ni peteg, hi-gam e Dios ku ey hinammad mun inhel ni hi-gak ida kayyaggud ni pehding mullin panyaggudan ku. <sup>29</sup> Et humman hu, peamnum humman ni inhel mu et bendisyonam ni ingganah ida helag ku. Hi-gam, APU DIOS e Eta-gey ni peteg, ey nanna-ud ni peamnum ni ingganah hu inhel mu e bendisyonan muwak niyaddalli helag ku."

## 8

### *Ya nengenapputan di David niyadda opisyal tu*

<sup>1</sup> Entanni ey nekigubat mewan hi David idan iPilistia et apputen tudda et piliwen tu Gath e bebley da.

<sup>2</sup> Entanni ey inapput tudda pay hu iMoab. Impanlukbub tud puyek ida humman ni iMoab e hantehanteludda et papetey tu dewwa ey eleg tu papetey hakey. Yadda law iMoab ey ingngunan da hi David niya ida kamambeyyad ni buwis ni hi-gatu.

<sup>3</sup> Entanni ey an nekigubat hi David etan ni u-ungngan Rehob e hi Hadadeser e patul di Sobah. Neipahding huayan gubat eman ni kamenglaw hi Hadadeser niyadda sindalu tu etan idad bebley di gilig ni Wangwang e Euphrates ma-lat sakupen dadda. <sup>4</sup> Inapput di David ida piliwen da hanlibu et pitun gatut ni sindalun nangkebayyu niya dewampulun libun edum ni sindalu. Entanni et imandal David e pi-dayen dadda kebayyun nengiguyud ni nunman idan kalesah. Ebuh hanggatut idan nunman ni kebayyun eleg tu pepi-day ma-lat usalen idan sindalu tu.

<sup>5</sup> Immaliddan sindalun iSyria di Damascus ni memaddang nan Hadadeser e patul di Sobah nem ginubat di David ida et pateyen da dewampulut dewwan libun hi-gada.



<sup>6</sup> Et mengapya hi David ni kampuddan sindalu tudman idan bebley ni sinekup tu et mambayad ida tuudman ni buwis ni hi-gatu. Impengenapput nan APU DIOS hi David di emin ni tu nekigubatan. <sup>7</sup> Entanni ey inlaw David ida etan happiyaw ni balituk ni inla tuddan aap-apun Hadadeser di Jerusalem. <sup>8</sup> Inla tu pay hu dakel ni giniling di Betah nyad Berothai e bebley ni nan-ap-apuan Hadadeser.

<sup>9</sup> Dingngel nan Toi e patul di Hamat e inapput David idan emin sindalun Hadadeser <sup>10</sup> ey intu-dak tu u-ungnga tu e hi Joram ni an mengapngan David niya an mengippeang-ang ni amleng tun nengapputan tun Hadadeser. (Di Toi nan Hadadeser ey nebayag ni nambubuhhulan ida.) Immitebin hi Joram ni balituk, ya silber niya giniling ni tu iddawat nan David. <sup>11</sup> In-appit nan David emin ida humman nan APU DIOS e henin impahding tudda lan silber niya balituk ni inla tuddad edum ni bebley ni inapput tu. <sup>12</sup> Humman idan bebley ey Edom, Moab, Ammon, Pilistia, niya Amalek. Anin idan illa tun Hadadeser e patul di Sobah e u-ungngan Rehob et in-appit tun APU DIOS.

<sup>13</sup> Hi David ey nema-man nandingngel eman ni nemateyan tun hampulut walun libun sindalun iEdom etan di Nedeklan e Ahin. <sup>14</sup> Yan nunman ni nengapputan tuddan iEdom ey nengipekapyad emin ni bebley diman ni kampuddan sindalu tu et mei-dum ida humman ni bebley ni sakup ni nan-ap-apuan David. Huyya mewan hakey ni keangngan tu e impengenapput nan APU DIOS hi David di emin ni tu nekigubatan.

<sup>15</sup> Nan-ap-apu hi David di emin ni helag Israel ey kayyagud niya limpiyuh hu impahding tuddan tuu tu. <sup>16</sup> Hi Joab e u-ungngan Seruiah hu ap-apun sindalu tu. Hi Jehoshaphat e u-ungngan Ahilud hu kamampatek idan dokumintuh ni bebley da. <sup>17</sup> Di Sadok e u-ungngan Ahitub nan hi Ahimelek e u-ungngan Abiathar hu padi da. Hi Seraiah hu sekretarih. <sup>18</sup> Hi Benaiah e u-ungngan Jehoiada hu ap-apun guwalyan David e patul. Ey yadda u-ungngan David hu opisyal tun kaumbaddang ni hi-gatu.

## 9

### *Di David nan hi Mepiboset*

<sup>1</sup> Hakey ni aggew ey imbagan David e kantuy “Kaw wadadda mategun helag Saul? Hedin wada, pinhed kun ippatek et peang-ang ku binabbal kun hi-gatu tep humman hu impakulug kun Jonathan.” <sup>2</sup> Entanni ey dingngel tu e wada hi Siba e bega-en lan eman nan hi Saul. Impaeyag tu et kantuy “Kaw hi-gam hi Siba?” Hinumang Siba ey kantuy “Em, apu patul, hi-gak hi Siba.”

<sup>3</sup> Kan David mewan ni hi-gatuy “Kaw nanengtun wada mategud pamilyah lan eman nan hi Saul ma-lat peang-ang kun hi-gatu hu binabbal Apu Dios?”

Hinumang Siba e kantuy “Wada hakey ni u-ungngan Jonathan e hi Mepiboset e nepi-day.”

<sup>4</sup> Kan David ey “Attu hu kad-an tu?” Kan Siba ey “Immen di baley di Makir, e u-ungngan Ammiel di Lo Debar.”

<sup>5</sup> Et an ali paewit nan David humman ni u-ungngan Jonathan. <sup>6</sup> Immali hi Mepiboset, e u-ungngan Jonathan niya inap-apu lan Saul, et manyuung di hinanggan David ni pengippeang-ang tun lispih tun hi-gatu. Kan David ni hi-gatuy “Kaw hi-gam hi Mepiboset?” Himmumang hi Mepiboset ey kantuy “Em, apu patul, hi-gak hi Mepiboset.”

<sup>7</sup> Et kan David mewan ni hi-gatuy “Entan tattakut mun hi-gak, Mepiboset. Ippatek daka niya peang-ang ku binabbal kun hi-gam tep humman insapatah ku lan amam e hi Jonathan. Ibbangngad kun hi-gam ni emin hu puyek lan apum, e hi Saul, niya di deya baley ku pengannam.”

<sup>8</sup> Nanyuung hi Mepiboset nan David et kantuy “Apu patul, kele kabbabbal kan hi-gak ey nak katted ngu kamei-ellig etan ni netey di ahhu tep endi silbik?”

<sup>9</sup> Impaeyag David hi Siba, e bega-en lan eman nan hi Saul, et kantun hi-gatuy “Ibbangngad kun Mepiboset ni emin hu limmun eman lan hi apu tu e hi Saul. <sup>10</sup> Hi-gam, yadda u-ungngan niyadda bega-en mu ey ngunnuen yudda humman ni puyek tu ma-lat ya bingay tud eppiten yu ey iddawat yuddan pamilyah tu. Hedin hi Mepiboset ey mekihha-ad ni hi-gak di baley ku.” (Hi Siba ey hampulut limadda u-ungnga tun laki niya dewampulu bega-en tu.)

<sup>11-13</sup> Hinumang Siba e kantuy “Ippahding kun emin hu immandal mun hi-gak, apu patul.” Hi Mepiboset e nepi-day hu dewwan heli tu ey limmaw di Jerusalem et an makiha-ad di baley David e patul niya nekikkikkan ni hi-gatu e heni u-ungnga tu. Wada lakin u-ungngan Mepiboset e hi Mikah ngadan tu. Ey hi Siba et yadda pamilyah tu ey bega-en Mepiboset ida.

## 10

*Ya nengapputan di David ni sindaluddan Hanun di Ammon*

<sup>1</sup> Entanni ey netey hi Nahas, e patul di Ammon et maihullul etan u-ungnga tu e hi Hanun ni nampatul. <sup>2</sup> Dingngel David humman et kantuy "Mahapul ni peang-ang ku kayyaggud ni nakka pekiggayyum nan Hanun henin impeang-ang nan ametu lan hi-gak eman ni ketaggu tu." Et umitu-dak ni tuu tun mengiddu-ngaw Hanun ma-lat peamta dan hi-gatu e kaumlelemyung dama hi David ni neteyyan ametu e hi Nahas. Nem yan dintengan dad Ammon et lumaw idad kad-an nan patul e hi Hanun <sup>3</sup> ey kan idan aapud Ammon ey "Apu patul, kaw kammu nem ya nengitu-dakan David idan nunyan tuu tu ey ma-lat peamta da e kaumlelemyung hi David tep netey hi amam? Beken mannaman, tep immaliddan mansi-im eyan bebley tayu ma-lat nelakah daitsun apputen di gubat."

<sup>4</sup> Kinulug Hanun humman ni inhel da et padpap tudda etan intu-dak David et kepuhan da hu pangil ni iming da niya pinututan da balwasi da e impappag dad sipeda et han dadda palaw. <sup>5</sup> Et ida law kaumbaing ni um-anemut di bebley da tep ya humman ni impahding dan hi-gada. Dingngel David humman ni neipahding et umitu-dak ni an menghel ni hi-gadan anin ni manha-ad ida nid Jericho ingganah umtemel hu iming da.

<sup>6</sup> Entanni ey ninemnem idan iAmmon e impambalin da kumedek hi David ni buhul da. Et tumangdan idan dewampulun libun sindalun iSyria di Bet Rehob niyad Sobah, yadda hampulud dewwan libun sindalud Tob niya etan patul di Maakah niyadda hanlibun sindalu tu. <sup>7</sup> Dingngel David mewan hu humman et itu-dak tu hi Joab niyadda emin hu sindalu tu et ida makigubat ni hi-gada. <sup>8</sup> Yadda sindalud Ammon ey ida nampustuh di eheb di bebley da. Ey yadda sindalun iSyria, yadda sindalun nalpud Tob niya sindalun Maakah ey ida dama nampustuh di a-allaw ni bebley.

<sup>9</sup> Inang-ang Joab e gubbaten daddad hinangga da niyad dingkuggan da et pilien tudda kelalla-ingnan ni sindalu tu et hi-gada inhangga tuddan sindalun iSyria. <sup>10</sup> Pinili tu hi agitu hi Abishai ni mengippengguluddan edum ni sindalu da et hi-gada mekihhanggaddan iAmmon. <sup>11</sup> Kan Joab ni hi-gatuy "Hedin ang-angen mu e dakemi kapan-apputaddan iSyria, ali kayun memaddang ni hi-gami. Hanniman daman hi-gak e hedin ang-angen ku e dakeyu kapan-apputaddan iAmmon ey um-ali kamin memaddang ni hi-gayu. <sup>12</sup> Mahapul ni umtuled itu e eleg itu umtakut! Ihhammad tayun mekiggubbat ma-lat iehneng tayu tutu-u tayu niyadda bebley tayun indawat Apu Dios ni hi-gatsu. Idasal tayu e ya pinhed APU DIOS hu meippahding."

<sup>13</sup> Immelad Joab niyadda sindalu tun dadda gubbaten hu sindalun iSyria ey ida kamemsik. <sup>14</sup> Inang-ang idan sindalun iAmmon e ida kamemsik hu sindalun iSyria ey bihmesik ida dama tep simmakut idan Abishai niyadda sindalu tu et humgep idad bebley da. Et mambangngad law di Joab di Jerusalem.

<sup>15</sup> Inang-ang idan iSyria e inapput idan sindalun helag Israel ey neaming ida mewan. <sup>16</sup> Immayag hi Hadadeser e patul idan edum ni sindalu tun wadad ba-hil ni Wangwang e Euphrates et lumaw idad Helam e impanguluddan Sobak e ap-apun sindalu tu. <sup>17</sup> Dingngel David e immen idad Helam hu sindalun iSyria et amungen tudda sindalu tun helag Israel et man-agwat idad Wangwang e Jordan et lumaw idad Helam di nampustuhan idan sindalun iSyria et ilepu dan manggugubat. <sup>18</sup> Neapput ida iSyria et bumsik ida. Pintey di David hu pitun gatut ni nangkalesah ni sindalu da niyadda na-pat ni libun edum dan sindalu niya liniputan da hi Sobak, e ap-apun sindalu, et matey diman di nanggugubatan da. <sup>19</sup> Yan nenang-angan idan patul idad bebley ni sinekup Hadadeser e neapput ida ey nekidagyum idan David et mambalin idan tutu-u tu. Nipaipun nunman ey ida law kaumtakut hu iSyria ni memaddang idan iAmmon.

## 11

*Di David nan Bathsheba*

<sup>1</sup> Nedayeng etan tsimpuh ni kapanggugubbasiddan papatul e yan nunman hu negibbuan ni tsimpuh ni ketel ey intu-dak David hi Joab, yadda edum ni aap-apu niyadda sindalu dan an mengubbat mewan idan iAmmon. Ey inapput dadda et sakupen da etan et-eteng ni bebley e Rabbah. Yan nunman ni da nekigubatan ey eleg makilaw hi David e nanha-ad di Jerusalem.

<sup>2</sup> Hakey ni hambatangan ey limmaw hi David di ta-pew ni baley tu et man-ang-ang ey wada inuhdungan tun biin kaman-e-meh. Humman ni bii ey kat-agun peteg. <sup>3</sup> Nenu-dak hi David ni an manmahmah hedin hipa humman ni biin kat-agun peteg. Ey neamtaan da e hi Bathsheba e u-ungngan Elam ey ahwan Uriah e Hittite. <sup>4</sup> An impaewit David hi Bathsheba et i-li dad baley tu et iulig tu. Yan nunman ey pakegibbuh

ni nengipahdingan tu etan ni elaw ni panlinnih tep pakesiked ni kamelpud annel tu. Negibbuh ni nan-ulig ida et umenamut hi Bathsheba di baley da. <sup>5</sup> Entanni ey ginibek Bathsheba e newad-an et itu-dak tu an mengippeantan David.

<sup>6</sup> Et mantudek hi David nan hi Joab, e ap-apuddan sindalu tu et kantuy "Itu-dak mulli hi Uriah e Hittite." Et itu-dak Joab hi Uriah di kad-an David. <sup>7</sup> Dimmatgep hi Uriah et mahmahan David hedini inna-nun gubat niya hedini melinggep hi Joab niyadda sindalu tu. <sup>8</sup> Et hantu ehelan Uriah e kantuy "Anemut ka ni- Uriah et ka man-iyayatu." Immehep hi Uriah di baley di David ey ninemnem David ni um-ipeilaw di baley Uriah ni iddawat tun hi-gatu et ilaw ni bega-en tu. <sup>9</sup> Nem eleg umenamut hi Uriah di baley da et makiugip idan guwalya etan di heggepan di baley nan David.

<sup>10</sup> Dingngel David e eleg umenamut hi Uriah di baley da et paeyag tu et kantun hi-gatuy "Kele eleg ka umenamut ey nebayyag ni neidawwian mud pamilyah mu?"

<sup>11</sup> Hinumang Uriah ey kantuy "Yadda edum kun sindalum ni nalpud Judah niyad Israel ey immen idan kamekiggubbat ey wadan hi-gada etan Kaban Apu Dios, et humman hu, immen hi Joab e ap-apu ni niyadda opisyal tu e nangkampudda. Ey ma-nu ni ngangun hi-gak tep nak um-anemut et mammangngannak niya mengi-innummak ey i-ulig ku ahwak. Issapatah ku e eleg mabalin ni nak ippahding humman!"

<sup>12</sup> Et kan law David ey "Anin tep, di deya itu et han ka mambanggad ni kabubuhan." Et manha-ad hi Uriah di Jerusalem ni nunman ni aggew. <sup>13</sup> Yan newa-waan tu ey inyagan David ni mekikkan ni hi-gatu et butengen tu. Nem eleg damengu umenamut di baley da et maugip di kuwaltuh idan guwalyan David.

<sup>14</sup> Newa-wan nunman et mantudek hi David nan Joab et paela tun Uriah. <sup>15</sup> Kan David di tudek tun Joab ey "Pamengulum hi Uriah etan di kad-an ni nemahhig hu laban ey hi-yan yudman ma-lat pateyen idan buhul tayu." <sup>16</sup> Et yan an penggepan di Joab etan ni et-eteng ni bebley ey impalaw tu hi Uriah etan di keippahhigan idan kalaban da. <sup>17</sup> Et entanni tu-wangu ey pintey da hi Uriah e Hittite niyadda edum ni sindalun Joab.

<sup>18</sup> Nenu-dak hi Joab di kad-an David ni an mengippeantan David ni neipahding di daka panggugubasi. <sup>19</sup> Sinuttuddun Joab etan intu-dak tu e kantuy "Hedin e-helen mu emin etan ni patul hu neipahding ni gubat <sup>20</sup> et umbunget e kantuy 'Kele kayu dedan an neka-ihnap ni nekigubat ni hi-gada? Kaw eleg yu amta e anin ni wadadda etan di luhud et pampennaen dakeyu? <sup>21</sup> Kaw eleg yu hannemnem hu neteyyan Abimelek e u-ungngan Gideon? Tam bii nematey ni hi-gatud Tebes e wada etan di luhud ey intengba tu batun hi-gatu et matey. Kele eleg yu nemnemen humman et kayu dedan neka-ihnap di luhud?' Hedin e-helen tudda ida huayan hi-gam, ey kammun hi-gatu ey 'Anin hi Uriah e sindalum ey netey.'"

<sup>22</sup> Limmaw etan binengan Joab et ehelen tuddan David humman ni intugun Joab ni e-helen tu. <sup>23</sup> Kantun David ey "Neukat ida kalaban mi ey na-na-let ida numan nem impahding mi kabaelan mi et pebanggad midda etan di heggepan di diman ni bebley ey yadman kumedek hu nampemanaan daddan edum mi et mangkatey ida. <sup>24</sup> Anin ni hi Uriah et pinena da et matey."

<sup>25</sup> Kan David etan ni intu-dak Joab ey "Ehel mun Joab et eleg medismayah tep ya kakulugan tu ey eleg tayu amta hedini hipadda mettey di gubat. Ehel mun hi-gatu et ipahding yun emin hu kabaelan yun mekiggubbat ma-lat apputen yudda buhul tayu."

<sup>26</sup> Dingngel Bathsheba e netey hi Uriah e ahwatu et ibeluan tu. <sup>27</sup> Negibbuh humman ni pitun aggew ni nengibeluan tun ahwa tu et paeyag David di baley da et man-ahwadda et iungnga tu etan u-ungnga da. Nem hi APU DIOS ey eleg tu pinhed humman ni impahding David.

## 12

### *Ya nantutuyuan David*

<sup>1</sup> Entanni ey intu-dak APU DIOS hi Nathan, e prophet, ma-lat tu ehelen nan David eya a-abbig. Kantuy "Wadadda etan dewwan tuun nambbley di hakey ni bebley. Kedangyan hu hakey ey nekawwetwet hu hakey. <sup>2</sup> Ya etan kedangyan ey dakel hu baketu niya kalneroh tu. <sup>3</sup> Nem ya etan newetwet ey hakey ni ebuh etan gintang tun kalneroh tun animal tu. Impenaptek tud baley tu humman ni kalneroh et makietteng idan u-ungnga tud baley da. Tuka pekikkan humman ni kalneroh ey tuka pekiinum ni innumen tu. Ey hin-addum ni tuka ihakhaki e heni u-ungnga tu. <sup>4</sup> Hakey ni aggew ey wada mangili etan ni kedangyan nem eleg tu pinhed ni keklengen hu animal tun pehidida tun mangili tu et tu alen etan kalneroh etan ni newetwet ni tuu."

<sup>5</sup> Bimmunget hi David ni nunman ni impahding etan ni kedangyan ni tuu et kantuy "Issapatah kud ngadan APU DIOS e wadan ingganah e mahapul ni mettey humman ni

tuu. <sup>6</sup> Ey mahapul ni beyyadan tun epat ni kalneroh humman ni inla tu tep lawah ni peteg humman ni tu impahding.”

<sup>7</sup> Kan Nathan nan David ey “Hi-gam hu neieligan nunman ni kedangyan ni tuu eyad ab-abig ku. Dengel mu eya kan APU DIOS e Dios tayun helag Israel ni meippanggep ni hi-gam: ‘Hi-gam e David hu pinutuk kun mampatul di Israel. Ey inhewang daka eman ni pemetteyan daka-et nan Saul. <sup>8</sup> Impebeltan kun hi-gam hu pan-ap-apuan tu niyadda ahwa tu. Et hi-gam hu pinutuk kun mampatul di Israel niyad Judah. Gullat ni kulang ida huuya et indumak. <sup>9</sup> Kele eleg mu u-unnuden hu tugun ku et mu impahding hu lawah. Impapetey mu hi Uriah e Hittite et beltanem hu ahwa tu! <sup>10</sup> Et humman hu, heninnuy hu meppahding di pamilyah mu. Emin idallid manhuluhulul ni helag mu ey wadaddalli mepetey ni hi-gada. <sup>11</sup> Ey issapatah ku e pambalin kulli hakey ni u-ungngam ni um-idwat ni kemunnumunnuan ni nemnem mu. Yalli penang-angam ni nunyan meppahding ey i-abulut kun i-ulig alin hakey ni lakin u-ungngam ida ahwam etan di panhin-aang-angan idan tuu. <sup>12</sup> Inligid mu nengiuilgam ni ahwan edum ni laki nem yan pengi-ulligan alin u-ungngam etan idan ahwam ey panhin-aang-angan idallin katuutuud Israel.’ ”

<sup>13</sup> Entanni ey kan David nan Nathan ey “Nathan, nakka ebbuluta e nanliwattak nan APU DIOS.”

Hinumang Nathan et kantuy “Em, nem pinesinsahan Apu Dios hu liwat mu, eleg ka mettey. <sup>14</sup> Nem ya huuyan impahding mu hu umhulun ni pemihhulan idan buhul APU DIOS ni hi-gatu. Et humman hu mettey etan u-ungngam ni laki.”

<sup>15</sup> Et umenamut hi Nathan. Entanni ey impandegheg APU DIOS etan lakin u-ungngad David nan Bathsheba. <sup>16</sup> Nampehemhememek hi David di asal tun Apu Dios ma-lat ekalen tu et anhan hu degeh nunman ni u-ungnga. Ey eleg mamangngan hi David niya kahilehileng ey kaumlaw di kuwaltuh tun mambakbaktad di det-al. <sup>17</sup> Limmaw ida opisyal tu et da a-alluken ma-lat uminah et mangan nem eleg tu. <sup>18</sup> Yan meikkeppitun aggew ey netey etan u-ungnga. Ida kaumtakut hu opisyal tun menghel ni hi-gatun netey etan u-ungnga tep kanday “Nemahhig hu lemyung David ni kapandedgehin u-ungnga tu et nema-ma ngu tep aye netey law. Wada kedi ngu hu lawah ni pehding tun annel tu hedin e-helen tayu e netey etan u-ungnga tu?”

<sup>19</sup> Inang-ang David e ida kamantutubudda opisyal tu ey immalid nemnem tu e netey etan u-ungnga tu. Et kantun hi-gaday “Kaw netey etan u-ungngak?” Ey kanday “Em, apu patul.”

<sup>20</sup> Ey pinhakkeyey imminah hi David et an man-emeh niya nanhagu. Et manhullul ni balwasi tu et lumaw di baley APU DIOS et daydayawen tu. Nambanggad di baley da ey kamambeggan kennen tu et idaddanan da et mangan. <sup>21</sup> Kan idan opisyal tun hi-gatu ey “Kele yan mategu etan gelang ey kaka umlelemyung niya eleg ka mengngan? Nem entanni et netey ey imminah ka et ka mekangngan?”

<sup>22</sup> Hinumang David ida e kantuy “Em, nantepellak niya nimmangiangihhak eman ni mategu etan u-ungngak tep kangku ngu nem hehmeken tuwak nan APU DIOS et eleg mettey. <sup>23</sup> Nem ay netey, et kele nak pay mantetpel? Kaw dammutun pebangngad ku biyag tu? Umlawwak alin edum ni aggew di kad-an tu, nem eleg mabalin ni mambangngad ni hi-gak.”

<sup>24</sup> Ina-alluk David hi Bathsheba, e ahwa tu. Entanni ey in-ulig tu mewan hi Bathsheba et mambutsug et man-ungnga ey laki et ingadnan dan hi Solomon. Ey nakappinshed APU DIOS humman ni u-ungnga. <sup>25</sup> Et humman hu intu-dak tu hi Nathan e prophet et tu ehelen nan David e ngeddanan tu humman ni gelang ni Jedidiah e ya keibbellinan tu ey “Nakappinshed APU DIOS humman ni gelang.”

<sup>26</sup> Hedin hi Joab niyadda sindalun David, man nanengtun ida kamekiggubbat di Rabbah e et-eteng ni bebley di Ammon, et sakupen da pangil. <sup>27</sup> Nenu-dak hi Joab ni mengippeamtan David meippanggep etan ni gubat. Huuya inhel tun da e-helen nan David: “Ginubat ku Rabbah niya kinahwa min binahbah hu daka pan-ehhulin danum. <sup>28</sup> Et ya law pehding mu ey amung mudda etan edum ni sindalun et umli kayun menggep ni nunyan bebley ma-lat hi-gam hu me-hel ni mengapput, beken ni hi-gak.”

<sup>29</sup> Et amungen David ida edum ni sindalu tu et da gubaten ida tuud Rabbah et hegepen da et sakupen da. <sup>30</sup> Wadadman etan dios ni kadeyyawaddan iAmmon e hi Molek ngadan tun napngetan ni balituk ni umlaw di telumpulut epat ni kiloh hu bel-at tu. Ingal David ida nenginan batun neial-alkus diman ni penget et iha-ad tud penget tu. Ey dakel pay hu illad David ni nangebalol diman. <sup>31</sup> Sinekup di David humman ni bebley et piliten tudda bimbebley ni manggunnu e ussalen da gelgel, ya gabyon niya wahay. Ey pinilit tuddan mengapayan henin bricks. Hanniman dama impahding tuddan edum ni nambebley di

Amnon. Negibbuh ni neipahding ida huyya et mambangngad hi David niyadda sindalutud Jerusalem.

## 13

*Ya lawah ni impahding Amnon nan agi tun bii, e hi Tamar*

<sup>1</sup> Wada etan udidityan Absalom ni biin u-ungngan David e hi Tamar e kat-agun peteg. Et hi Amnon e agi tun u-ungngan David di hakey ni bii, ey pinhed tun i-ulig. <sup>2</sup> Nemahhig hu neminhd Amnon nan Tamar et kaumlelemyung ey lektattuy nandegeh. Endi inna-nu tun mekihummangan ni hi-gatun deddewwadda tep wadan ingganah hu kadwatu.

<sup>3</sup> Nem wada etan netalam ni gayyum Amnon e hi Jonadab e agin Amnon tep u-ungngan Simeah e agin ametu e hi David. <sup>4</sup> Hakey ni aggew ey kan Jonadab nan Amnon ey "Kele hipa kakemunnunnuin nemnem mu? Kele u-ungnga dakan patul ey hannitan ka e heni mu inlu-lu neitu-wan mu?"

Himmumang hi Amnon ey kantuy "Nemahhig hu impeminhd kun Tamar e agin Absalom."

<sup>5</sup> Kan Jonadab nan Amnon ey "Heninnuy pehdng mu: Hindeddegehim. Et hedin um-ali hi amam ni menang-ang ni hi-gam, ey ehel mun hi-gatu e pinhed mun ittu-dak tu hi Tamar e agim \* ni mengiddaddan ni kennen mudya. Niya ehel mu e umyaggud ka hedin hi-gatu mengippengngan ni hi-gam."

<sup>6</sup> Inu-unnud Amnon humman et umli tu-wangu hi ametu hi David, e patul, ni menang-ang ni hi-gatu et ibega tu e pinhed tun ittu-dak tu anhan hi Tamar ma-lat umidaddan etan ni pinhed tun kennen niya hi-gatu mengippengngan ni hi-gatu. <sup>7</sup> Simbal David et menu-dak ni an menghel nan Tamar et lumaw di baley nan Amnon et tu idaddanan ni kennen tu.

<sup>8</sup> Et lumaw hi Tamar di baley agi tu hi Amnon ey immen e kamambakbaktad. Immalan alinah e kopyaen tun sinapay. <sup>9</sup> Nelutu etan kennen et iha-ad tud duyu, nem eleg mengngan hi Amnon. Kan Amnon idan bega-en tu ey "Mahapul ni um-ehep kayun emin." <sup>10</sup> Immehep idan emin etan bega-en et kantun Tamar ey "I-lim di deya kennen ku et pangan muwak." Et ilaw Tamar hu kennen Amnon. <sup>11</sup> Ey pinden Amnon et kantun hi-gatuy "Man-ullig ita."

<sup>12</sup> Nem kan Tamar ey "Entan tuwak anhan pilit ni mengippahding ni lawah! Beken ni lebbeng tun an ippahding hu hanneya eyad bebley tayud Israel. <sup>13</sup> Hedin ippahding mu huttan ni hi-gak, ettu lawwak ma-lat eggak meibabbaing! Niya kaw eleg ka meibabbaing damadya e bebley tayud Israel? Heballi pakihummangan kan ameta. Amtak et i-abulut tun i-ahwa muwak!"

<sup>14</sup> Nem eleg ni hekey hengngudan Amnon humman ni kapan-e-helan Tamar et piliten tu kumedek ni in-ulig tep na-na-let. <sup>15</sup> Nem entanni impahding tu pinhed tu ey anggebehel Amnon hi Tamar ni peteg nem ya impeminhd tun hi-gatu. Et kantun hi-gatuy "Ehep ka, a-allaw ka eyad baley ku!"

<sup>16</sup> Nem kan Tamar ey "Eggu! Hedin pe-hep muwak, man e-etteng anhan law ni pambehulam nem yan eya lawah ni mu impahding ni hi-gak!" Nem eleg mewan hengngudan Amnon humman ni kapan-e-helan Tamar.

<sup>17</sup> Immayag hi Amnon ni bega-en tu et kantuy "Pa-hep mu eya bii et ilekbim hu habyen." <sup>18</sup> Et pa-hep etan ni bega-en hi Tamar et ilekbi tu habyen. Ya balwasin Tamar ni nunman ey andukkey niya andukkey ngamay tu tep humman hu balwasiddan u-ungngan patul ni biin eleg ni mengahwa.

<sup>19</sup> Nambi-kin Tamar hu balwasi tu niya dinep-ulan hu ulu tun pengippeang-ang tun baing tun neipahding ni hi-gatu et tuka u-upupa hu angah tu niya kamantete-ul ey immelad baley da. <sup>20</sup> Inang-ang agi tu e hi Absalom et kantuy "Kaw wada lawah ni impahding Amnon ni hi-gam? Pekedhel mu nemnem mu! Inna-nu, agim metlaing hi Amnon. Entan e-ehhel tun edum ni tuu huttan ni neipahding." Neipalpun nunman ey kaumlelemyung ni ingganah hi Tamar ey nanhahha-ad di baley agitu hi Absalom.

<sup>21</sup> Dingngel David humman ni lawah ni impahding Amnon nan agi tu hi Tamar ey nemahhig hu bunget tu. <sup>22</sup> Ey anggebehel law Absalom ni peteg hi Amnon tep ya humman ni impahding tun Tamar e agi tu et eleg tun hekey law ung-ungbala.

*Ya nengipepatayan Absalom nan hi Amnon*

<sup>23</sup> Nelabah hu dewwan toon ey nedatngan hu pemu-litan Absalom ni dutdut idan kalneroh tud Baal Hasor e neihnpud di Epraim. Inaygan tudda agi tun u-ungngan ametun mekillaw diman. <sup>24</sup> Limmaw daman an mengayyag nan ametu e hi David e kantuy "Yan

\* 13:5 13:5 Hin-appil inedan Amnon tep hi Tamar ey u-ungngan David di hakey ni bii.

nunya pemu-litan kun dutdut idan kalneroh ku, eyyagan daka niyadda opisyal mu et umli kayun mekihhemmul.”

<sup>25</sup> Nem kan ametu ey “Anin ni ebuh kayu. Beken ni lebbeng tun kami um-alin emin tep meliggatan ka kumedek tep hi-gami.” Kaepillit Absalom nem eleg abuluten ametu.

<sup>26</sup> Et kan law Absalom ey “Anin ew, hedini eleg kayu um-ali, nem iebulut mu ew ngu hi Amnon et makilaw ni hi-gami.”

Kan ametu hi David ey “Kele pakkaw ni mu ikkuyug hi Amnon?” <sup>27</sup> Nem kaepippilit Absalom et lektattuy inebulut ametun pekillaw hi Amnon anin idan edum ni u-ungnga tu.

<sup>28</sup> Impamengulu dedan Absalom ni inhel idan tuu tu e kantuy “Heninnuy hu pehding tayu. Hedini nebuteng hi Amnon et insinyas ku e petteyen yu ey u-unnud yu. Entan takut yu, hi-gak hu ngenamung. Et humman hu tuled kayu, entan pandinwa yu.” <sup>29</sup> Inu-unnud idan tuun Absalom et pateyen da hi Amnon. Hedini yadda etan edum ni u-ungngan David ey nampantakkay idad kebayyu da et mamsik idan takut da.

<sup>30</sup> Wadaddad dalam e eleg ida ni dumteng ey wada nengipeamtan David e kanday “Pintey Absalom idan emin hu u-ungngam et endin hekey hu natdaan.” <sup>31</sup> Dingngel David humman ey nambi-ki tu balwasi tu et manlukbub di puyek tep ya degeh ni nemnem tu. Anin idan opisyal tu et bini-ki da dama balwasi da. <sup>32</sup> Nem kan Jonadab, e u-ungngan Simeah e agin David ey “Apu patul, eleg ida kaya matey emin u-ungngam, ebuh hi Amnon ni netey. Implanuh dedan nan Absalom humman neipalpun nemilitan Amnon ni in-ulig hi Tamar e agi tu. <sup>33</sup> Et humman hu entan tu kulug etan indaddateng dan hi-gam e kanday netey idan emin u-ungngam tep ebuh kaya hi Amnon ni netey.”

<sup>34</sup> Hedini hi Absalom, man bimmesik et attukaw.

Ya etan guwalyad eheb di Jerusalem ey inang-ang tudu dake ni tuun kamandayyu etan di keltad di appit ni Horonaim et tu ehelen nan David e patul humman ni inang-ang tu. <sup>35</sup> Kan Jonadab nan David ey “U-ungngam ida humman ni iyyalli. Makulug etan inhel kun nuntan ni hi-gam.” <sup>36</sup> Dimmateng ida ey ida kamannengngih, ey anin hi David niyadda opisyal tu et ida dama kamannengngih.

<sup>37-38</sup> Hedini hi Absalom, man bimmesik di kad-an Talmai e patul di Geshur ey u-ungngan Amihhud. Nekihahha-ad di diman ni tellun toon. Ey hi ametu e hi David ey imnen di Jerusalem e kaumlemyung ni kewa-wa tep ya neteyyan ni u-ungnga tu hi Amnon. <sup>39</sup> Entanni ey eleg law umlemyung hi David nem tuka nenemnema hi Absalom.

## 14

### *Ya nambangngadan Absalom di Jerusalem*

<sup>1</sup> Hi Joab e u-ungngan Seruah ey amta tu e kanenemnan David hi Absalom. <sup>2</sup> Et paeyag tu etan nenemnan ni biid Tekoa. Dimmateng humman ni bii et tuttudduan Joab e kantuy “Pambalwasi kan balwasin nebalu ey peang-ang mu e kaka umlemyung ma-lat heni makulug ni nebalu ka. Ey entan tu hagu bewek mu ma-lat peang-ang mu e heni ka nebayag ni nebalu. <sup>3</sup> Et lumaw kad kad-an David et mu ehelen eya ittutdukk ni e-helen mun hi-gatu.” Et ehelen Joab hu an e-helen nunman ni bii nan David.

<sup>4</sup> Limmaw humman biid kad-an David et manyuung ni pengippeang-ang tun lisipitun tun hi-gatu. Et kantuy “Apu patul, immali-ak ni mampebaddang anhan ni hi-gam.”

<sup>5</sup> Kan David ey “Kele hipa kakemunnunnuin nemnem mu?”

Kan etan ni bii ey “Netey hu ahwak, apu patul. <sup>6</sup> Ey wada dewwan u-ungngak. Nem hakey ni aggew ey nambakal idad payew nem endi memelkan hi-gada e matey hakey. <sup>7</sup> Et yan nunya, apu patul, ey emin ida agi mi ey daka pepillit ni i-abulut ku etan hakey ni u-ungngak et pateyen da tep ya nemateyan tun agi tu. Nem eggak pinhed, tep hedini humman pehding da, endilli law hu u-ungngak. Endien da namnamah ku niya endi memelkan ni ngadan ni ahwak.”

<sup>8</sup> Kan David e patul ey “Anemut ka et hi-gak hu ngenamung. Ang-angen ku et endi meippahding ni hi-gam ni lawah.”

<sup>9</sup> Kan etan ni bii ey “Apu patul, anin ew katted ni hi-gak niya u-ungngak hu mebehulan ni hipan meippahding et beken ni hi-gam niya pamilyah mu.”

<sup>10</sup> Hinumang David e kantuy “Hedini wada menattakkut ni hi-gam, peamtam ni hi-gak. Panna-ud kun hi-gam e eleg ali law ippidwan nunman ni tuun ippahding humman ni hi-gam.”

<sup>11</sup> Kan pay etan ni bii ey “Ettu anhan et idasal mun APU DIOS e Dios mu ma-lat eleg tu iebulut ni pehding idan agik hu e-etteng ni bahul ni pemetteyan dan u-ungngak.”

Immehel hi David et kantuy "Issapatah kud ngadan APU DIOS, e wadan ingganah e endi kaya hu lawah ni an meippahding ni u-ungngam."

<sup>12</sup> Ey kan pay etan ni bii ey "Apu patul, anusi muwak anhan tep wada pay hakey ni e-helen ku."

Kan David ey "Em, hipa pay hu e-helem?"

<sup>13</sup> Ey kan etan ni bii ey "Apu patul, gapuh ni et-eteng ni hemek mun hi-gak ey kammuy baddangan muwak. Ettu et hanniman dama pehding muddan edum mun tuun APU DIOS ey? Nengapya kan bahul mu tep kele hedini ya u-ungngam mismu man eleg mu hehmeka et paenamut mu? <sup>14</sup> Ya kapanbubuhuliddan tuu ey eleg mannananeng, beken ni henin katey. Ey beken ni henin danum e hedini neikuyag man eleg law mabalin ni ekkupen. Nem yadda tuun nambubuhulan ey mabalin mewani mandadagyum ida. Anin hi Apu Dios et beken ni neala ni pinappeg tu biyag ni nambahul ni tuu. Nem wada pehding tu et humman ni tuun neappil ey mabalin ni mambangngad ni hi-gatu. Et humman hu, ettu anhan apu patul, et paenamut mu etan u-ungngam ni neipelaw di edawwin bebley ey? <sup>15</sup> Mukun immali-ak e apu patul ni mekihummangan ni hi-gam ey da-ak katennattakkutaddan tutu-u ey nakka namnamahan ippahding mu ibbagak. <sup>16</sup> Ninemnem ku e dedngelen mu anhan eya ibbagak et ihwang mu anhan etan u-ungngak et eleg da pateyen ma-lat eleg ma-kal hu ngadan mi eyad bebley ni indawat Apu Dios ni hi-gatsun tuu tu. <sup>17</sup> Et-eteng ni dinel kun ihhehwang dakemi tep impakulug mu e apu patul ey heni ka anghel Apu Dios e amtam hu kayyaggud niya lawah. Baddangan daka anhan kayan AP-APU e Dios mun ingganah."

<sup>18</sup> Kan David etan ni bii ey "Wada ibbagak ni hi-gam nem mahapul ni ya makulug hu e-helem." Kan etan ni bii ey "Em, apu patul."

<sup>19</sup> Kan David ey "Kaw hi Joab nengitu-dak ni hi-gam?"

Ey kan etan ni bii ey "Apu patul, em tu-wa. Eleg mabalin ni nak ihhaut. Hi-gatu nengitu-dak ni hi-gak niya hi-gatu nanghel eyaddan inhel kun hi-gam. <sup>20</sup> Nem mukun huyya ninemnem tun pehding ey ma-lat wada inna-nu tun meiyayyaggud hu hipaddan lawah ni neipahding. Hi-gam mismu ey inamtam emin hu kamekapkapy e heni ka nisi anghel Apu Dios."

<sup>21</sup> Et paeyag David hi Joab et kanton hi-gatuy "Ebbuluten ku hu inhel mun ippahding ku. Lakkay et mulli awiten hi Absalom."

<sup>22</sup> Nanyuung hi Joab ni panlisipituh tun David et kanton hi-gatuy "Bendisyonan dakan Apu Dios, apu patul. Amtak law e kaka um-amleng ni hi-gak tep inebulut mu hu inhel kun ippahding mu."

<sup>23</sup> Et lumaw hi Joab di Geshur et tulli awiten hi Absalom et umenamut idad Jerusalem. <sup>24</sup> Nem in-olden David e patul e eleg mabalin ni manha-ad hi Absalom di baley tu. Kantuy "Eggak pinhed ni ang-angen hi Absalom." Et meappil hi Absalom niya eleg mampeang-ang nan ametu.

<sup>25</sup> Hi Absalom ey hi-gatu hu kekakkayyaggudan ni kaleki tud emin ni lakid Israel. Ey kakkayyaggud hu impenga-annel tu meippalpud dapan tu ingganah di ulu tu. <sup>26</sup> Ya bewek tu ey mahdel niya sinnoon hu tuka pampepu-lisi, ey hangkilo et gedwa hu bel-at tu. <sup>27</sup> Tellun laki u-ungngan Absalom et ya hakey ni biin kat-agun peteg e hi Tamar hu ngadan tu.

<sup>28</sup> Dewwan toon law hu nelabah ni nanha-adan Absalom di Jerusalem nem eleg tun hekey ang-angen hi ametu. <sup>29</sup> Entanni ey impaeyag Absalom hi Joab ma-lat itu-dak tun an mekihummangan nan ametu nem eleg lumaw hi Joab. <sup>30</sup> Lektattuy kan Absalom idan bega-en tuy "Lakkayyuy et yu legaben ida intanem tu etan di puyek tud neitakdul di puyek ku." Et lumaw ida et legaben da intanem Joab.

<sup>31</sup> Entanni ey immali hi Joab di baley Absalom et kantuy "Kele mu impalgab hu intanem ku?"

<sup>32</sup> Hinumang Absalom e kantuy "Em, tep nenu-dakkak ni nampidwan an mengeyyag ni hi-gam nem eleg ka umli. Pinhed ku-et ni umlaw kad kad-an ama et mu ibegan hi-gatu hedini hipa gaputun yuwak ali inewit di Geshur et i-li yuwak di deya ey ay eleg damengu pinhed aman ang-angen tuwak. Heballi ew ngu eleg da-ak i-lidya et nanha-addak diman. Pinhed kun ang-angen, et hedini nambahullak, anin ni pepetey tuwak ni hi-gatu."

<sup>33</sup> Limmaw hi Joab di kad-an David e patul et tu ehlen hu inhel Absalom ey impaeyag law nan David hi Absalom. Limmaw hi Absalom et manyuung et akwalen nan ametu.

## 15

*Ya nemiliwan nan Absalom ni kapan-ap-apuin ametu*

<sup>1</sup> Entanni nangnanglaw hu tsimpuh ey immala hi Absalom ni kebayyu tu niya kalesah tu, niya wada neliman tuun tuka ikukkuyyug. <sup>2</sup> Kaumhaleman hi Absalom etan di heggeppan ni bebley e Jerusalem et kaman-eh-ehngeng di gilig ni keltad. Et hedini wada immalin tuun wada tu iddiklamuh nan David e patul ey kaeyyagin Absalom ni imbagetu hedini attu nambebleyan etan ni tuu, ni inhel etan ni tuu nambebleyan tu. <sup>3</sup> Ey hedini kan Absalom etan ni tuu ey "Wada kelebengam eyad kasuh mu, nem ay endi pinutuk ni patul ni mengippennuh ni kasuh. <sup>4</sup> Ma-nu-et hedini wada kelebengam kun mengippennuh ni kasuh ma-lat hedini wada immalin mandiklamuh ey hi-gak hu mengippennuh et idwat ku kelebengam tu." <sup>5</sup> Ey hedini manyu-ung ida tuun hi-gatu man tudda kumedek ka an akwala numan. <sup>6</sup> Humman hu tuka pehpehding hedini wadadda edum tun helag Israel ni kaum-alin menang-ang ni patul ma-lat ipenuh tu kasuh tu. Et gapun nunman ey kamangkewedda impeminhed idan tuu nan Absalom.

<sup>7</sup> Nelabah hu epat ni toon ey kan Absalom nan ametu e hi David ey "Ibulut mu anhan et lumawwak di Hebron ma-lat nak ipahding hu insapatah kun APU DIOS ni pehding kudman. <sup>8</sup> Yan eman ni wada-ak di Geshur di Syria ey insapatah kun hi-gatu e hedini ibbangngad tuwak di deya Jerusalem ey nak deyyawen di Hebron."

<sup>9</sup> Inebulut ametu e kantuy "Anin lakkay." Et lumaw hi Absalom di Hebron.

<sup>10</sup> Nem ya kumedek impahding Absalom ey nenu-dak ni an menghel idan emin ni helag Israel e kanday: "Hedini wada dedngelen yun tangguyup ey itkuk yu hu: 'Hi Absalom hu patul di Hebron.'" <sup>11</sup> Ineyagan tu dewangngatut ni edum tun helag Israel di Jerusalem ni meikkuyyug nem eleg da amta planuh tu. <sup>12</sup> Yan nunman ni kapan-ippahding Absalom hu pan-appointan tun Apu Dios ey impaeyag tu hi Ahithopel e iGiloh e hi-gatu hakey idan opisyal ametu e hi David. Ey yan nunman ey ida kamangkewedaddakel hu tuun meikkuyyug ni hi-gatu.

<sup>13</sup> Entanni wada hu an nandaddatteng nan David e kantuy "Emin ida tuud kebebbley di Israel ey hi Absalom law hu patul da."

<sup>14</sup> Kan David idan emin ni opisyal tu ey "Mahapul ni pepu-ut tayu et bumsik itsu ma-lat eleg daitsu ha-kupan nan Absalom et meihwang itsu, anin idan eyan tutu-ud Jerusalem."

<sup>15</sup> Ey kan idan opisyal David ey "U-unnuden mi hu hipan pinhed mu." <sup>16</sup> Et bumsik di David, yadda pamilyah tu niyadda opisyal tu. Nem yadda etan hampulun imbilang tun ahwa tu ey eleg ida makilaw ma-lat ipaptek da baley tu. <sup>17</sup> Ida kamennetteng di David di gilig etan ni bebley ey in-ehngeng da <sup>18</sup> et pamengulu tudda guwalya tu niyadda etan enem ni gatut ni sindalun neikuyug ni hi-gatun nalpuwan dad Gath.

<sup>19</sup> Entanni ey kan David nan Ittay, e ap-apuddan sindalu tun nalpud Gath ey "Kele ka mekikkillaw ni hi-gami? Hedini hi-gam man nekibebley kan ebuh ni hi-gami, et humman hu, heballi ew hu pambangngad ka ma-lat mansilbi kan Absalom e nei hullul ni patul. <sup>20</sup> Beken ni maeyapaw hu nekibebleyan mun hi-gami, ey eggak pinhed ni mekikkillaw kan hi-gak et ka makilligat ni hi-gak, nema-ma tep eggak ni pay amta hedini attu lawwak. Ipengulum ida tuum et mambangngad kayu ew. Hi APU DIOS hu nanengtun mengippaptek kayan hi-gayu."

<sup>21</sup> Nem hinumang Ittay e kantuy "Apu patul, issapatah kud ngadan APU DIOS, e wadan ingganah e anin ni attu lawwam et mekikkillawwak, anin ni humman umhulun ni ketteyyan ku."

<sup>22</sup> Et kan law David ey "Kayyaggud hedini hannitan, itsuy tep." Et makilaw hi Ittay niyadda etan sindalu tu, anin idan pamilyah da. <sup>23</sup> Yan nunman ni kamenglaw di David ey kanengih ida tuu. Inagwat David niyadda tuu tu etan kulukul ni Kidron et mampalaw idad eleg mebebleyi.

<sup>24</sup> Di Sadok nan Abiathar niyadda etan edum dan padi hu nengiatang etan ni Kaban Apu Dios. Inha-ad da nid gilig ni keltad ingganah ni imma-allaw ida emin hu tuun David etan di bebley. <sup>25</sup> Kan David nan Sadok ey "Heballi ibbangngad yu eya Kaban di bebley. Hedini nanengtun kaum-amleng hi APU DIOS ni hi-gak ey ibbangngad tuwak ali et angangen ku eya Kaban niya etan Tabernacle e baley tu. <sup>26</sup> Nem hedini eleg um-amleng ni hi-gak, ngenamung tun pinhed tun pehding ni hi-gak."

<sup>27</sup> Entanni ey kan David nan Sadok ey "Heninnuy hu planuh ku, pambangngad kayan Abiathar di bebley, nem ang-ang mu et endi mu ippahding ni hipan umhulun ni guluh. Ikuyug mu hi Ahimaas e u-unggam ni hi Jonathan e u-unggan Abiathar. <sup>28</sup> Manheged kami etan di kapan-agwasid wangwang di eleg mebebleyi ma-lat hegeden ku hipan pinhed mun peamtan hi-gak." <sup>29</sup> Et mambangngad di Sadok nan Abiathar di Jerusalem et manha-ad idadman e intabin da etan Kaban Apu Dios.

<sup>30</sup> Intuluy di David niyadda edum tun nanglaw e nampatyed idad Duntug e Olibah e ida kamenglaw ey kamannengngih. Nanhukuyug niya eleg mampatut ni pengippeang-ang tu e kaumlemyung. Anin ida edum tun neikuyug ni hi-gatu e nanhukuyug ida niya



ida dama kamannengnih. <sup>31</sup> Dingngel David e nei-dum hi Ahithopel nan hi Absalom ey kantud dasal tuw "APU DIOS, pambalin mu anhan ni endi silbin ittugun Ahithopel."

<sup>32</sup> Dimmateng di David etan di tuktuk ni duntug ni wada kapan-appisi ey dinamun Hushai e Arkite e nebi-ki balwasi tu ey nedep-ulan hu ulu tu. <sup>33</sup> Kan David ni hi-gatuy "Hedin mekillaw kan hi-gak man endi damengu hu ibbaddang mun hi-gak. <sup>34</sup> Nem wada ibbaddang mun hi-gak hedin mambangngad kad Jerusalem et kamun Absalom ey 'Mansilbi-ak ni hi-gam, apu patul, heni lan nansilbiak nan amam.' Et ya pehding mu ey entan tu iunnud di hipan ittugun Ahithopel. <sup>35</sup> Yaggud immen idadman di Sadok nan Abiathar ni memaddang ni hi-gam. Ey ya pehding mu ey ehel mun hi-gadan emin hu dedngelen mud baley ni patul. <sup>36</sup> Ey wadadda damadman di Ahimaas e u-ungngan Sadok nan Jonathan e u-ungngan Abiathar. Hi-gada hu itu-dak mun mengippeamtan hi-gak ni hipan mu idaddateng." <sup>37</sup> Inu-unnud Hushai humman ni inhel David et mambangngad di Jerusalem ey yan nunman dama kapennettengid Absalom niyadda tuu tu.

## 16

### *Ya nemaddangan Siba nan David*

<sup>1</sup> Yan ima-allaw di David e linabhan da etan tuktuk ni duntug ey dinamun da etan bega-en Mepiboset e hi Siba. Wadadda kebayyun impangkalga tun dewanggatut ni sinapay, ya hanggatut ni napkel ni raisin, ya hanggatut ni napkel ni figs niya meinum. <sup>2</sup> Kan David ni hi-gatuy "Nem kele mudda in-ali huttan, hipa pengippahdingan muddan nuntan?"

Hinumang Siba ey kantuy "In-alik eyadda kebayyun pantakkayan ni familyah mu. Ey yadda eya kennen niya meinum, ey kennen yu niya innumen yuddan tuum hedin meettu kayu eyad eleg mebebleyi."

<sup>3</sup> Kan pay David nan Siba ey "Attu hi Mepiboset, e inap-apun Saul e kan bega-en lan hi-gam ey?" Kan Siba ey "Immen di Jerusalem tep ya wadad nemnem tu ey mambangngad ni hi-gatu hu nan-ap-apuan lan eman nan hi Saul e apu tu."

<sup>4</sup> Kan David ey "Hedin makulug huttan, iddawat ku tep ni hi-gam emin hu puyek nan Mepiboset."

Kan Siba ey "Apu patul, et-eteng hu salamet kun hi-gam. Mansilbi-ak ni hi-gam et ipahding ku hu mengippeamleng ni hi-gam."

### *Ya nengahingan Simei nan David*

<sup>5</sup> Tagan di David elaw et dumteng idad Bahurim ey wada etan hi Simei e u-ungngan Gera e wada neiegian tu lan eman nan hi Saul. Dinammu tud David et tagan tu ehel ni lawah ni hi-gatu. <sup>6</sup> Nangkepil tun batu hi David niyadda opisyal tu, anin ni wadadda guwalyan David. <sup>7</sup> Kan Simei ey "Pampenga-allaw ka e David tep mapetey ka niya lawah kan tuu! <sup>8</sup> Imbaleh law APU DIOS ni hi-gam hu nemiliwan mun nan-ap-apuan Saul niya nemateyan mun hi-gatu niyadda familyah tu. Et deh law e impebeltan tun u-ungngam e hi Absalom hu muka pan-ap-apui. Huttan hu lebbeng tun kastigum."

<sup>9</sup> Immel hi Abishai e u-ungngan Seruiat et kantuy "Apu patul, kele hanniman hu kapan-e-ehel eman ni tuun heni ahun endi silbitu. Imay et nak kedi putulen hu ulu tu et ang-angen ku numan hedin man-e-ehel pay!"

<sup>10</sup> Nem immehel hi David et kantun Abishai et hi agi tu hi Joab ey "Bekken ni henin nuntan hu pehding. Tep hedin humman hu in-abulut APU DIOS e ihhapitan dak ni lawah, kaw hipa-ak ni mengibeggan hi-gatu hedin hipa gaputon tu penghelan nunman." <sup>11</sup> Ey kantu damad Abishai et yadda emin ni opisyal tu ey "Ya etan u-ungngak mismuh ey ihik da-ak ni petteyen, et kaw kayu kametnga e huayan tuu e helag Benjamin ey hanniman ehel tun hi-gak? Diman, tep hi APU DIOS na-mu nengiabulut ni hanniman pehding tun hi-gak. <sup>12</sup> Ilah tu et anhan ey pambalin APU DIOS ni bendisyon tun hi-gak eyadda lawah ni ehel tun hi-gak." <sup>13</sup> Kamenglaw lad David ey kameiunnuunnud hi Simei ey tagan tu ehel ni lawah nan David ey tuka pankepilan batu niya kumpulmih ni lugit. <sup>14</sup> Dimmateng di David di Jordan ey nea-atudda et man-iyatuddadman.

<sup>15</sup> Hedin hi Absalom niyadda tuu tu ey dimmateng idad Jerusalem e neikuyug ni hi-gatu hi Ahithopel. <sup>16</sup> An dinamun Hushai e Arkite e nehammad ni gayyum David et kantun hi-gatuy "Mannenneng kan mampatul!"

<sup>17</sup> Kan Absalom ni hi-gatuy "Kaw hannitan hu pengippeang-ang mun impeminhed mun gayyum mu e hi David? Gullat nekilaw kan hi-gatu!"

<sup>18</sup> Hinumang Hushai et kantuy "Eggak makilaw ni hi-gatu tep ya pansilbian ku ey ya etan pinutuk APU DIOS niya pinutuk idan helag Israel ni mampatul. <sup>19</sup> Hakey pay ey nansilbi-ak lan eman ni nampatulan tu, et humman hu mansilbi-ak dama law ni hi-gam."

<sup>20</sup> Entanni ey kan Absalom nan Ahithopel ey “Deh e wada itsu law di deya, hipa hu muka nemnemem kayyaggud ni pehding ku?”

<sup>21</sup> Kan Ahithopel ni hi-gatu ey “Mudda iulig etan ida biin imbilang amam ni ahwatan hini-yan tu eyad baley tu et pangi-angan idan emin ni helag Israel e imbilang dakan buhul tu ma-lat madinel idan mei-dum ni hi-gam.” <sup>22</sup> Inebulut Absalom humman ni intugun Ahithopel et mampekapyan hukyawwid ta-pew ni atep etan ni baley ametu et peang-ang-ang tuddan katuutuud Israel hu nengi-uligan tuddan nunman ni bibi-i.

<sup>23</sup> Kapekatalan Absalom hu kaittugun Ahithopel e heni makulug ni nalpun Apu Dios. Hanniman la daman ametu hi David e tu dama katetebbala kaittugun Ahithopel.

## 17

### *Ya nenaulan Hushai nan hi Absalom*

<sup>1</sup> Entanni ey kan mewan Ahithopel nan Absalom ey “Ettu et pumili-ak ni hampulut dewwan libun sindalu et unuden middan nunyan hileng di amam ey? <sup>2</sup> Mi gubbaten idan nunyan neka-atudda niya nekaddismayah et nanna-ud ni um-ehyak ida tuu tu tep ya takut da. Hi-gatun ebuh hu petteyen ku, <sup>3</sup> nem yadda tuu tu ey ibbangngad kuddan hi-gam.” <sup>4</sup> Huyyan ninemnem Ahithopel ni pehding tu ey kaebbulutad Absalom niyadda etan kamengippangngulul helag Israel.

<sup>5</sup> Nem entanni ey kan Absalom ey “Yu ayagi hi Hushai ma-lat dengelen tayu hedin hipa dama ittugun tu.” <sup>6</sup> Immali hi Hushai et kan Absalom ni hi-gatuy “Heninnuy hu kan Ahithopel ni pehding, nem hipa dedan dama muka pannemnem? U-unnden tayu winu eleg? Hedin eleg, ehel mu hedin hipa pehding tayu?”

<sup>7</sup> Immel hi Hushai ey kantuy “Huttan ni intugun Ahithopel ey beken ni kayyaggud ni tayu u-unnden ni nunya. <sup>8</sup> Inamtam e hi amam niyadda sindalu tu ey nelaing idan mekiggubbat, niya anggetakkut ida e henidda etan ni bear ni imbesik da impah tu. Hakey pay ey in-a-ammaan tun mekiggubbat niya eleg meie-eddum idan sindalu tu hedin hileng. <sup>9</sup> Ey amtak et immen e inhammad tun nantalu law di leyang winu yad edum ni tuka pantellui. Hedin kantu et gubbaten amam ida sindalum ey anin hipa humman ni menggel et panna-ud dan meapput ida sindalum. <sup>10</sup> Et humman hu anin idan etan ni ketultuledan ni sindalum et umtakut ide law tep emin tuud Israel ey amta da e nelaing hi amam ni mekiggubbat niya netuled ni peteg ida tuu tu. <sup>11</sup> Et humman hu ya ittugun ku ey hebali amung mudda emin tuudya Israel meippalpad Dan ingganah di Beersheba, ma-lat daddakkel ida tuum ni mekiggubbat e heniin kadinakkel ni pantal di gilig ni baybay e eleg mebillang. Ey kayyaggud hedin hi-gam kumaddan hu mengippengngulul hi-gadan mengunnud nan amam. <sup>12</sup> Tayu gubbaten hi amam anin ni attu kad-an tu, et pateyen tayuddan emin et endi metdaan. <sup>13</sup> Anin ni kantu et an meihikkug hi amam hi David di hakey ni bebley, ey emin itsun tuudya Israel ey tayu bahbaha hu luhud nunman ni bebley.”

<sup>14</sup> Kan Absalom niyadda tuud Israel “Kayyaggud humman ni intugun Hushai nem ya intugun Ahithopel.” Humman hu ninemnem da tep eleg pinhed Apu Dios ni meu-unnud etan neiptek ni intugun Ahithopel ma-lat kebahaan nan Absalom, ey humman e hu kayyaggud ni planuh.

<sup>15</sup> Limmaw hi Hushai et tu ehelen ida etan ni dewwan padi e di Sadok nan Abiathar hu intugun tun Absalom niyadda tuud Israel et ya intugun daman Ahithopel. <sup>16</sup> Inhel tu pay ni hi-gada e pepu-ut dan umlaw ma-lat da ehelen nan David hu meippanggep ni nunman et eleg ida mandeyan nunman ni hileng di diman di kapan-agwasid Wangwang e Jordan. Mahapul ni man-agwat ida et mampalaw ida etan di eleg mebebleyi tep hedin eleg ida umlaw man mettey idan emin, anin idan tuu tu.

<sup>17</sup> Hi Jonathan et hi Ahimaas ey nanhahha-ad idad En Rogel di a-allaw ni Jerusalem tep eleg da pinhed ni wada menang-ang ni hi-gadad Jerusalem. Ya impahding da ey daka beggaa etan biin bega-en ni menghel ni hi-gadan kamekapkapy ey han da dama anin helan nan David. <sup>18</sup> Nem entanni ey wada etan kamenikken ni lakin nenang-ang ni hi-gada e tu idaddatteng nan Absalom. Neala law et bumsik di Ahimaas nan Jonathan di Bahurim et lumaw idad etan di baley ni hakey ni tuudman ni wada bubun di dallin etan ni baley tu et yadman pantaluan da. <sup>19</sup> Immala etan biin ahwa etan ni kan baley ni nanhukung tun nunman ni hibuy et panha-peyan tun pagey ma-lat endi mengamta e wada nantaludman.

<sup>20</sup> Entanni ey wadadda immalin tuun Absalom etan di baley et mahmahan da hedin wada inang-ang tud Jonathan nan Ahimaas. Ey inhel etan kan baley e limmaw idan inagwat da etan wangwang. Et an panhamaken idan nunman ni tuun Absalom nem endidda et mambangngad idad Jerusalem.

<sup>21</sup> Neukat idelaw di Jonathan nan Ahimaas etan di nantaluan da et manglaw ida e nampalaw idad kad-an David. Et kandan hi-gatuy "Pandaddan kayu kuma et man-agwat itu eyad Wangwang e Jordan ni nunyan hileng." Inhel da pay ni hi-gatu e mengunnud alid Absalom et petteyen dadda tep humman hu intugun Ahithopel ni hi-gatu. <sup>22</sup> Inu-unnud David humman ni inhel da et man-agwat emin tuu tud wangwang ni nunman ni hileng et kamangkewa-wan newa-waan tu ey wadaddad ba-hil ni wangwang.

<sup>23</sup> Hedin hi Ahithopel, man nebaingan ni peteg tep eleg u-unnuden Absalom hu intugun tu et mantakkay di kebayyu tu et mambanggad di bebley tud Gilo. Inyayyaggud tun emin hu hipan wadad baley tu et itugun tun emin hu hipan pinhed tun meippahding et han lumaw ni nanta-yun et matey. Et ikulung dad neikulungan idan aammed tu.

<sup>24</sup> Yan dintengan di David di Mahanaim ey yan nunman dama nan-agwatan di Absalom etan Wangwang e Jordan ni daka pampengunnudid ametu. <sup>25</sup> Hi Absalom ey inhullul tun Joab ni man-ap-apun sindalu tu hi Amasa, e u-ungngan Jetsel e helag Ismael. Hi Abigail, e u-ungngan Nahas hi inetu. Hi Nahas ey han-agiddan Seruia, e inan Joab. <sup>26</sup> Impanguluddan Absalom hu sindalu tud Gilead et yadman hu nangkampuan da.

<sup>27</sup> Yan dintengan di David di Mahanaim ey an dinammud Sobi, e u-ungngan Nahas di Rabbah di Ammon, hi Makir, e u-ungngan Ammiel di Lo Debar, et hi Barsillay di Rogelim di Gilead. <sup>28-29</sup> In-alyan dad David niyadda tuu tun abek, wanal, banga, duyun mahukung, begah, alinah, pukdu, keldih, ya hinanglag ni begah, putsukan, gatas, cheese niya kalnero, tep inamta da e neka-atudda, neupadda niya na-wew ida.

## 18

### *Ya neteyyan nan Absalom*

<sup>1</sup> Inemung David idan emin hu sindalu tu et genedwaen tuddan hanlilibu niya hanggagatut ey ya hanlibu niya hanggagatut man wada ap-apu da. <sup>2</sup> Impantelu tuddan ginenedwa et ya ap-apun hakey ni grupuh ey hi Joab, hi Abishai di hakey ni grupu et hi Ittay e tuud Gath hu ap-apud hakey ni grupuh. Kan David ni hi-gada ey "Itsu mekiggubbat ni emin."

<sup>3</sup> Nem kandan hi-gatuy "Eleg, anin ni entan pakilaw mun hi-gami, tep hi-gam mannuman hu ilillingitan idan buhul tayun petteyen tep nebalol ka. Ya balol mu ey hampulun libun sindalu. Et humman hu, anin ni umbebsik kami winu petteyen da kagedwah ni hi-gami et endi bilang tuddan buhul tayu. Kayyaggud anhan law hedini manha-ad ka et ya baddang hu peellim ni hi-gami."

<sup>4</sup> Inebulut David et eleg makilaw idan sindalu tu. Et immen di heggeppan ni bebley e kaman-eh-ehngeng ey immeladda sindalu tun negenedwan hanlilibu niya hanggagatut. <sup>5</sup> Hi David ey in-olden tud Joab, hi Abishai et hi Ittay e kantuy "Ang-ang yu anhan et eleg yu pateyen etan u-ungngak e hi Absalom." Emin ida etan sindalu ey dingngel da humman ni in-olden David idan ap-apun sindalu tu.

<sup>6</sup> Limmaw ida humman ni sindalun David et manggugubat idaddan edum dan helag Israel ni sindalun Absalom di muyung di Epraim. <sup>7</sup> Entanni ey inaput idan sindalun David hu sindalun Absalom e pintey da dewampulun libu. <sup>8</sup> Neihinap humman ni gubat etan idad bebley di Israel ey daddakkel ida anhan law hu sindalun nangketey di muyung nem ya nangketey di mismuh ni nanggugubatan da.

<sup>9</sup> Yan nunman ni daka panggugubasi ey dinteng Absalom hu edum ni sindalun ametu et kamemsik e nantakkay di kebayyu tu, nem neiha-but hu ulu tud pangan keyew et kamanta-ta-yun ey bimmesik la hu kebayyu tu. <sup>10</sup> Wada hakey ni sindalun David ni nenang-ang et tu ehelen nan Joab. Kantuy "Immen hi Absalom e nanta-yun etan di keyew."

<sup>11</sup> Et kan Joab etan ni sindalu ey "Nem tamey eleg mu pateyen? Gullat et, iddawtan dakan hampulun palatah niya peta-gey ku saad mu niya iddawtan dakan ballikid ni opisyal."

<sup>12</sup> Nem kan nunman ni sindalu ey "Anin na-mun piga libun pihuh hu iddawtan mun hi-gak, et eleg mabalin ni nak petteyen hu u-ungngan patul. Dingngel ku inhel nan David ni hi-gam, hi Abishai et hi Ittay e kantuy 'Ang-ang yu anhan et eleg yu pateyen etan u-ungngak e hi Absalom.'" <sup>13</sup> Gullat ni eggak u-unnuden hu inhel tu et pintey ku etan u-ungnga tu, et nanna-ud ni amtaen tu, tep hedini hi-gatu man tuka amtaan emin hu hipan kamekapkapy, niya amtak et eleg muwak i-ehngeng."

<sup>14</sup> Ey kan Joab ey "Hipa huttan ni muka pan-e-hela?" Ey inla tu tellun pahul tu et tu ginyangen hi Absalom e nanengtun kamanta-ta-yun etan di keyew ey neiptek di pagew tu. <sup>15</sup> Entanni ey immalidda hampulun sindalun Joab et pan-in-giginyangan da dama hi Absalom et matey.

<sup>16</sup> Et mantangguyup hi Joab ma-lat masiked hu gubat. Et isiked ida law ni sindalu tun memdug idan sindalun Absalom, e edum dan helag Israel. <sup>17</sup> Lina-huh da annel Absalom et da ibbeng etan di edallem ni neku-kuan diman muyung et ta-bunan dan dakel ni batu. Et mamsik ida sindalun Absalom di nampambebleyan da.

<sup>18</sup> Yan ketaggun Absalom ey wada impekapyu tu etan di nedeklan ni Puyek ni Patul ni batun tukud e netudekan ni ngadan tu ma-lat penginemnemnan dan hi-gatu tep endi lakin u-ungnga tun memeltan ni ngadan tu. Nginedanan tun Batun Absalom humman et ingganah nunya ey nanengtu humman ni penginemnemnan dan hi-gatu.

<sup>19</sup> Kan Ahimaas e u-unggan Sadok ey "Imay et nak peamtan patul huyyan kayyaggud ni neipahding e inhewang APU DIOS di buhul tu."

<sup>20</sup> Nem kan Joab ni hi-gatuy "Entan elaw! Endi mu e-helen ni kayyaggud ni hi-gatun nunya tep netey hu u-ungnga tu. Han dakalli baalan edum ni aggew nem beken ni nunya."

<sup>21</sup> Inayan kumedek Joab etan bega-en tun Kushite et kantun hi-gatuy "Elaw kad kad-an David e patul et mu ehelen ni hi-gatu hu inang-ang mun neipahding deya." Nanyuung nan Joab humman ni bega-en et besiken tun limmaw di kad-an David.

<sup>22</sup> Hi Ahimaas ey tuka ippilit ni i-abulut Joab ni umlaw. Kantuy "Anin ni hipa humman ni meipahding ni hi-gak et umlawwak et nak dama peamta hu neipahding."

Kan Joab ni hi-gatuy "Nem kele anhan pinhed mun peteg ni umlaw? Endi metlaing silbitu tep endi mu gun-uden."

<sup>23</sup> Ey kan Ahimaas ey "Anin, pinhed kun umlaw."

Lektattuy in-abulut Joab. Limmaw hi Ahimaas e nalhet hu nengidlanan tu et mamengulun dimmateng nem ya etan Kushite.

<sup>24</sup> Hi David ey kamanyuyyuddung di nambattanan etan ni dewwan eheb ni heggeppan etan di bebley. Ya etan hakey ni guwalya ey limmaw di atep etan ni eheb et kaman-ang-ang ey inang-ang tu etan tuu e kamemsik ni iyyalli etan di bebley. <sup>25</sup> Intekuk tun David humman ni inang-ang tu ey kan David ey "Hedin hakey tu man nanna-ud ni kayyaggud hu i-ali tun an peamta." Ey kamenetteng humman ni tuun iyyalli.

<sup>26</sup> Entanni ey inang-ang mewan etan ni guwalya hu hakey pay ni tuun kamemsik daman iyyalli. Intekuk etan ni guwalya etan ni kamampaptek di heggeppan e kantuy "Ang-ang mu ked, iyyalli mewan hu hakey."

Hinumang nan David e patul e kantuy "Kayyaggud dama hu i-ali tun peamta."

<sup>27</sup> Kan etan ni guwalya ey "Tam heni hi Ahimaas eman nemangulu tep ya tuka pemsik." Kan David e patul ey "Kayyaggud ni tuu hi Ahimaas et amtak e kayyaggud hu i-ali tun peamta."

<sup>28</sup> Dimmateng hi Ahimaas ey inapnga tu hi David ey nanyuung ni panlispituh tun hi-gatu. Et kantuy "Kayyaggud hu neipahding. Tep binaddangan dakan AP-APU e Dios mu et apputen mudda buhul mun kamangngenghay ni hi-gam e apu patul."

<sup>29</sup> Kan David e patul nan Ahimaas ey "Hipa inna-nun u-ungngak e hi Absalom, kaw kayyaggud, endi neipahding ni hi-gatun lawah?"

Hinumang hi Ahimaas et kantuy "Eggak amta hedin hipa hu neipahding nan Absalom. Nem yan eman ni inggahan kullin nengitu-dakan tuwak Joab ni ellian kudya ey wada kakeamuammungiddan tuu nem eggak amta hedin hipa humman."

<sup>30</sup> Kan David ni hi-gatu ey "Ehneng ka nidya." Et umehngeng ni hi Ahimaas.

<sup>31</sup> Dimmateng etan Kushite ey kantuy "Apu patul, kayyaggud hu in-alik ni peamtan hi-gam, tep binaddangan dakan APU DIOS et apputen muddan emin buhul mun kamangngenghay ni hi-gam."

<sup>32</sup> Kan mewan David ni hi-gatuy "Inna-nu etan ni u-ungngak e hi Absalom, kaw kayyaggud, endi lawah ni neipahding ni hi-gatu?"

Hinumang ni nunman ni bega-en e kantuy "Kayyaggud et hedin ya etan neipahding ni u-ungngam ey meipahding daman emin idan buhul mun kamangngenghay ni hi-gam!"

<sup>33</sup> Dingngel tu humman ey nemahhig lemyung tu ey kamantet-ul ni immelad kuwaltuh di ahpat ni eheb e kantuy "Ayyuh ka e u-ungngak Absalom! Heballi hi-gak hu netey et beken ni hi-gam e u-ungngak Absalom hu netey!"

## 19

*Ya nekapkapyan negibbuan ni gubat*

<sup>1</sup> Entanni ey dingngel Joab e kaumlemyung niya kaumnanginangih hi David tep ya neteyyan ni u-ungnga tu e hi Absalom. <sup>2</sup> Dingngel ida daman sindalun David e kaumlemyung ey na-kal hu amleng dan nengapputan dan nunman ni aggew. <sup>3</sup> Et humman hu, ida kaum-eneeneng e henidda nebaingan ni sindalun bimmesik di gubat.

<sup>4</sup> Kau-upupan David e patul hu angah tu ey tagan tu nangih ey tuka penidpidwaan ittetkuk hu: “Ayyuh ka e u-ungngak Absalom! Absalom e u-ungngak!”

<sup>5</sup> Limmaw hi Joab di baley David e patul et kantuy “Yan nunya ey bineing dakemin emin ni sindalum. Kele inhewang daka, yadda u-ungngam et yadda ahwam anin idan biin imbilang mun ahwam ey henin nunya muka peang-ang-ang e heni wada lawah ni impahding mi? <sup>6</sup> Tam e-etteng na-mu tep hu impeminhed mudda etan ni tuun angebehel daka niya angebehel mudda etan et-eteng impeminhed dan hi-gam. Muka peang-ang e endi silbi middan opisyal mu niya sindalum. Gullat tep ni mategu Absalom ey netey kamin emin, et man-am-amleng ka. <sup>7</sup> Ettu et lumaw ka kuma et mu hudhuden idan tuum ma-lat maweda dinel dan hi-gam. Tep issapatah kud ngadan APU DIOS e hedini eleg mu ippahding huyyan inhel ku ey mampenglaw idan emin et endin hekey hu metdaan ni sindalum ni kabbuhan tep pan-inhihi-yanan daka. Et humman ali hu nema-man peteg ni meippahding ni hi-gam di biyag mu.”

<sup>8</sup> Inu-unnud David hu intugun Joab et lumaw et an yumudung etan di heggeppan etan ni bebley. Dingngel idan sindalu tu et umlidda et maemung idad kad-an tu. Hedini yadda etan neapput ni sindalun Absalom, man namsik idad nampambebleyan dad Israel. <sup>9</sup> Emin di Israel ey ida kamanhuhubeg hu tuu e kanday “Hi David numan e patul tayu hu nengihwang ni hi-gatsud emin di buhul tayu. Ey hi-gatu hu nengihwang ni hi-gatsud buhul tayun iPilistia, nem ay umhulun hu u-ungnga tun hi Absalom ey bimmesik et hi-yanen tu bebley tayu. <sup>10</sup> Nem endi law patul tayu tep pintey dad gubat hi Absalom e pinutuk tayun mampatul. Et humman hu, ettu et nemnemen tayu hu mabalin ni pehding tayu ma-lat ibanggad tayu hi David ni mampatul ni hi-gatsu ey?”

<sup>11</sup> Dingngel David humman ni kae-e-heladdan edum tun helag Israel et itu-dak tud Judah di Sadok nan Abiathar ma-lat ida makihummangan idan aap-apudman et ehelen dan hi-gada e kanday “Huyya hu kan David: ‘Nandaddan ida aap-apud edum yun helag Israel ni mengibbanggad ni hi-gak ni mampatul ni hi-gayu. Inna-nu daman hi-gayu, kele hi-gayu manggillig ni mengibbanggad ni hi-gak ni mampatul?’ <sup>12</sup> Kele han-aaggi itsu ey henin nuntan kayu e hi-gayu manggillig ni mengibbanggad ni hi-gak ni mampatul.’” <sup>13</sup> Huyya dama e-helen kun Amasa: “Hi-gam Amasa ey agi daka et humman hu hi-gam hu puttukan kun pan-ap-appedan sindaluk et beken hi Joab. Nem hedini eggak ippahding huyyan inhel kun hi-gam anin ni petteyen tuwak APU DIOS.” <sup>14</sup> Ey emin ida tuud Judah ey pinhed dan hi David hu mampatul da, et menu-dak idan an mengippeamtan hi-gatu niyadda opisyal tu ma-lat umenamut idad Jerusalem.

<sup>15</sup> Iyyallid David e wadaddad Jordan ey immalidda tuud Judah ni an menammun hi-gatu ma-lat kadwaan daddan man-agwat etan di wangwang. <sup>16</sup> Immali dama hi Simei e iBahurim e u-ungngan Gerah e helag Benjamin et papuut tun nekilaw idan iJudah ni an menammun David. <sup>17</sup> Limmaw ni hanlibuh hu edum tun helag Benjamin. Anin hi Siba e bega-en lan eman nan hi Saul, niyadda hampulut liman u-ungnga tun lalaki niya dewampulun bega-en tu ey limmaw ida daman nekiapngan David. <sup>18</sup> Limmaw idan memaddang nan David niyadda pamilyah tu niyadda tuu tun man-agwat etan di wangwang ey impahding da hipan pinhed tun pengunnun hi-gada.

*Ya nengipeang-angan David ni binabbal tun Simei*

Yan nan-agwatan da ey immali hi Simei e manyuung di hinanggan David. <sup>19</sup> Kantun David ey “Apu patul, liwwan mudda anhan etan lawah ni impahding ku eman ni neni-yanan mun Jerusalem. <sup>20</sup> Nakka ebbulutan nambahullak ni hi-gam, et humman hu, nebukullak nem yadda edum ni menammun hi-gam et apngaen daka.”

<sup>21</sup> Immehel hi Abishai e u-ungngan Seruah ey kantuy “Lebbeng tun mettey hi Simei, lallahw hu in-inhel tu eyan pinutuk APU DIOS ni mampatul.”

<sup>22</sup> Nem hinumang David et kantuddad Abishai nan Joab ey “Nehalman kayu anhan tu-wangu! Eggak pinhed hu hannitan. Endi tayu pepettey tep man-am-amleng itsun nunya tep hi-gak hu patul mewand e emin di deya Israel.” <sup>23</sup> Insapatah David nan Simei e kantuy “Entan kakaguh mu e Simei tep eleg daka petteya.”

*Ya nengipeang-angan David ni binabbal tun Mepiboset*

<sup>24</sup> Entanni ey immali hi Mepiboset, e inap-apun eman lan nan hi Saul, et tu dammuen dama hi David. Eleg tu ipaptek hu annel tu neipalpu eman ni neni-yanan David ni Jerusalem. Eleg tu ulahan heli tu, ey eleg tun hekey ibalbalbal hu balwasi tu niya eleg tu kep-uhan iming tu. <sup>25</sup> Kan David ni hi-gatu ey “Kele eleg ka makilaw ni hi-gak?”

<sup>26</sup> Hinumang Mepiboset e kantuy “Heninnuy neipahding, apu patul: Inamtam e nepi-dayyak katteg ngu, et humman hu, kangku anhan nan Siba e bega-en ku ey iddaddan tu kebayyun pantakkayan ku nem eleg tu u-unnuden. <sup>27</sup> Ey itek kaya inhel tun hi-gam e kantuy eggak pinhed ni mekillaw. Nem inamtak e inamtam hu kakulugan tu tep heni ka

anghel APU DIOS. Et humman hu, ipahding mu inamtam ni neiptek. <sup>28</sup> Emin kamiddan aaggik niyadda pamilyah ku ey lebbeng tun pepettey dakemin hi-gam, apu patul. Nem ya anhan law impahding mu ey ineyagan muwak et ehelen mu e mekikkannak di baley mun kewa-wa-wa. Ey ya kakulugan tu ey beken ni lebbeng kun mambegga pay ni hi-gam ni panyaggudan ku."

<sup>29</sup> Kan David ni hi-gatuy "Anin. Ya ninemnem kun pehding ey pan-inggeh yun Siba ni panggedwaan etan puyek ni indawat kun hi-gatu."

<sup>30</sup> Nem kan Mepiboset ey "Anin ni idwat mun emin nan Siba. Tep ya ngu nakka pan-amlengin ebuh ey kayyaggud et nambangngad ka, e apu patul, ey endi lawah ni neipahding ni hi-gam."

*Ya nengipeang-angan David ni binabbal tun Barsillai*

<sup>31</sup> Entanni ey immali dama hi Barsillai e iGilead e nalpud Rogelim ni mengapnga niya memaddang nan David ni man-agwat etan di Wangwang e Jordan. <sup>32</sup> Nea-amma law hi Barsillai e newalu toon tu. Kedangyan hi Barsillai et hi-gatu nengipaptek ni mahapul di David niyadda tuu tu, henin kennen eman ni nanha-adan dad Mahanaim <sup>33</sup> Kan David ni hi-gatu ey "Pakilaw kan hi-gak di Jerusalem et hi-gak hu ngenamung ni mengippaptek ni hi-gam."

<sup>34</sup> Nem kan Barsillai ey "Anin ew ni enggak mekillaw e apu patul tep nea-amma-ak damengu law. <sup>35</sup> Newalu toon ku ey nak ida law kahigga hu hipan pan-am-amlengan, beken heni law eman ni kekat-aguk. Anin ni ya kennen niya meinum et heni kulang law hu heng-ew tu hu nakka penamtam. Ey anin idan hipan a-appet et enggak law hengnguda. Ey mangkeie-edummak kumedek ni panliggatan mu. <sup>36</sup> Eleg mahapul ni mu ipahding humman ni hi-gak. Ya pinhed kun ebuh ey meki-agwattak ni hi-gam di wangwang. <sup>37</sup> Ey nambangngaddak ngud bebley mi et yadman hu keteyyan ku et maikulungngak di kulung idan aammed ku. Ya ew eya u-ungngak e hi Kimham hu ikuyug mu et mansilbin hi-gam et ngenamung kan iddawat mun hi-gatu."

<sup>38</sup> Ey kan David ey "Kayyaggud tep! Mekillaw hi Kimham ni hi-gak ma-lat ipahding ku niya ma-lat idwat kun emin hu pinhed mun panyaggudan tu niya panyaggudam."

<sup>39</sup> Nan-agwat di David niyadda tutu-u, anin hi Barsillai et akwalen tu hi Barsillai ey binendisyonan tu et han umenamut hi Barsillai.

<sup>40</sup> Entanni ey limmaw di David di Gilgal e ingkuyug tu hi Kimham, yadda sindalun helag Judah niyadda kagedwah ni edum dan helag Israel ni neki-agwat ni hi-gadad Wangwang e Jordan. <sup>41</sup> Entanni ey ida kamanlillah hu edum ni helag Israel e kandan David ey "Kele ebuh ida iJudah ni wada kelebbeng tun immalin bimmaddang ni hi-gam, yadda pamilyah mu niyadda tuum ni nan-agwat di wangwang?"

<sup>42</sup> Hinumang idan iJudah e kanday "Lebbeng dedan tep hi Judah tu-wa anhan hu nahlagan daman nan David e patul. Et humman hu entan bunget yu gapun nuntan. Eleg kami mambagan tangdan mi ey eleg kami mambagan kennen winu hipan iddawat ni patul ni hi-gami."

<sup>43</sup> Hinumang idan nunman ni edum dan helag Israel et kanday "Em, nem daddakkel kami nem hi-gayun helag Judah tep hampulu kamin pewen ni nahlag nan Israel. Et humman hu, hi-gami kumaddan hu wada lebbeng tun an mengikkuyug nan David e patul! Ey kele eleg dakemi ayagan? Hakey pay, ey hi-gami nemangulun nannemnem ni pambangngad tayun mampatul mewan hi David ni hi-gatsu." Tagan dan ida kamanhuhubeg ey kapambinunngat ida law ni helag Judah ni um-ehel.

## 20

*Ya eleg pangebulitan Seba nan hi David*

<sup>1</sup> Wada etan kabbubunget e hi Seba e u-ungngam Bikri e helag Benjamin. Nantang-guyup ey simmekuk e kantuy "Hi-gayuddan helag Israel, anemut itsu kuma! Hipa pengapyaan tayun David, beken ni hi-gatu hu patul tayu!" <sup>2</sup> Inu-unnud idan helag Israel hi Seba et hi-yanen da hi David et ebuh ida law etan helag Judah ni neikuyug nan David meippalpu Jordan ingganah di Jerusalem.

<sup>3</sup> Yan eman ni nambangngad law di David di Jersalem ey in-olden tun appilen dadda etan hampulun imbilang tun ahwa tun nanha-ad ni mengippaptek ni baley tu et peguwalya tudan sindalu tu. Impaptek David ni emin hu mahapul da nem eleg tudla law iulig et henidda nebalu, ey neipukung ida ingganah ni mettey ida.

<sup>4</sup> In-olden David nan Amasa e kantuy "Lakkay et mudda amungen hu tuud Judah et umli kayullin emin di deyan katlun aggew." <sup>5</sup> Limmaw hi Amasa ni an mengeyyag ni hi-gada nem neabbayyag ni nambangngad e eleg tu u-unnuden etan tellun aggew ni in-olden David.

<sup>6</sup> Kan David nan Abishai ey “E-eteng ni guluh hu kaiddawat nan Seba nem hi Absalom. Et humman hu pandaddan ka et ikuyug mudda edum ni sindaluk et unuden yu tep entanni ey umbesik di etata-gey tuping tun bebley et neligat ni dedpapen.”  
<sup>7</sup> Et ipengulun Abishai ida sindalun Joab, yadda guwalyan patul niyadda etan edum ni sindalu e immegah idad Jerusalem ma-lat unuden da hi Seba.

<sup>8</sup> Yan wadadda etan di et-eteng ni batud Gibeon ey nandammuddan Amasa. Nambalwasi hi Joab ni balwasin sindalu ey wada in-asip tun hinallung e inuknut ni willi tun tu penammuan nan Amasa. <sup>9</sup> Kan Joab nan Amasa ey “Kayyaggud et iyyadya ka e agik, Amasa” ey indapan wannan tud iming nan Amasa ni pengapnga tu. <sup>10</sup> Eleg ang-angen Amasa etan hinallung ni singnged Joab di willi tu. Intewik Joab di egeh Amasa et maibu-bu egeh tu niya kinan tu. Neminhakkey ni netey hi Amasa et eleg mahapul ni pidwaen tun tetwiken. Hini-yan dan han-agin Abishai hi Amasa e intuplak tu kuheyaw tu et ituluy dan mengunnud nan Seba.

<sup>11</sup> Ya etan hakey ni sindalun Joab ey singkukan tudda tuun Amasa e kantuy “Hedin hi David hu pinhed yun pampatul yu ey hi Joab hu pan-apu yu, man ikeyuy et mei-dum kayun Joab.” <sup>12</sup> Ya etan annel Amasa ey neigawwad keltad ey kaang-ang-angan nunman ni sindalun Joab e kakeammu-amungiddan tuun kamelebbah. Et iguyud tud a-allaw tu et hephepan tun luput. <sup>13</sup> Na-kal law etan annel Amasa etan di keltad ey neiunud idan emin nan Joab etan sindalun an mempap nan Seba.

<sup>14</sup> Linabhan di Seba hu nampambebleyan idan helag Israel et dumteng idad Abel Bet Maakah et manha-ad idadman. Yadda etan edum tun helag Bikli ey neamung ida et maiunnud idan hi-gatudman. <sup>15</sup> Entanni ey dingngel idan sindalun Joab e wadad Seba etan di bebley et liktuben da humman ni bebley. Nanta-bunan dan puyek etan hengeg idan luhud ma-lat matebeb et wada dellanen da ey kapangku-kuddan edum hu hengeg ni pangil idan nunman ni luhud ma-lat metu-li. <sup>16</sup> Wadadman hu nelaing niya nekannemnan ni biin tuka pantetkukidda tuun Joab. <sup>17</sup> Limmaw hi Joab ey kan etan ni bii ey “Kaw hi-gam hi Joab?” Hinumang Joab et kantuy “Em, hi-gak hi Joab!”

<sup>18</sup> Kan etan ni bii ey “Dengel mu eya e-helen ku.” Kan Joab ey “Em!” Kan nunman ni bii ey “Wada etan kanda lan nunman e hedin wada yuka panhahallai, lakkayuy di Abel et yu dengelen hu ittugun da. Ey makulug ni humman daka pehding da. <sup>19</sup> Hi-gamin tuudya ey kayyaggud kami ngu niya melinggep kami et eleg mi pinhed ni mekiggubbat. Ey kayyaggud hu mi kapekiddagyumiddan edum tayun helag Israel. Ey kele hipa hu gaputun yu pemahbahan eyan bebley mi? Kaw pinhed yun bahbahen hu bebley APU DIOS?”

<sup>20</sup> Himmumang hi Joab ey kantuy “Bekken huttan ni wadad nemnem min gaputun mi inlian di deya. Eleg kami umliyan memahbah ni bebley yu niya memetty ni hi-gayu. <sup>21</sup> Immali kamidya et mi ang-angen hi Seba e helag Epraim e u-ungngan Bikli. Hi-gatu nengipappangnguluddan tuun mangngenghay ni patul mi e hi David. Pinhed kun dedpapen yu et i-li yun hi-gami et manglaw kami et hi-yanen mi eya bebley yu.”

Kan etan ni bii ey “Bebkahan milli ulu tud binna-hil eyan tuping ni luhud.”

<sup>22</sup> Limmaw etan bii et tu ehelen idan tuu et putulen da ulun Seba et da bekahen di kad-an Joab. Et patnul Joab hu tangguyup tun pengamtaan idan sindalu tu e hi-yanen da humman ni bebley. Et mampambanggad ida sindalun Joab di bebley da. Et mambanggad hi Joab di Jerusalem di kad-an nan David e patul.

<sup>23</sup> Hi Joab law hu ap-apun emin idan sindalud Israel. Hi Benaiah e u-ungngan Jehoiadah hu ap-apuddan guwalyan David. <sup>24</sup> Hi Adoniram e ap-apun ingkalgadah idan kapangnunggunn patul. Hi Jehoshapat e u-ungngan Alihud hu kamengittuddek idan hipan kamekapkappa etan di bebley, <sup>25</sup> hi Seba hu sekretarih, di Sadok nan Abiathar hu padi <sup>26</sup> ey hi Ira e helag Jair hu hakey pay ni padin nan David e patul.

## 21

### *Ya neipepateyan idan helag Saul*

<sup>1</sup> Yan nunman ni nampatul David ey wada bisil ni tellun toon. Nandasadasal hi David ey hinumang APU DIOS e kantuy “Nebisil kayu tep yaddan emin hu bahul Saul niyadda pamilyah tu e nampatey dadda tuud Gibeon.”

<sup>2</sup> Humman idan tuud Gibeon ey beken idan helag Israel. Humman ida natdaan ni Amorite ni insapatah idan helag Israel lan nunman ni ippaptek et eleg dadda pateyan. Nem ya impahding lan Saul ey ngannganih ni impapety tuddan emin tep ya tuka pengi-ehngeng idan edum tun helag Israel. <sup>3</sup> Impaeyag David ida tuud Gibeon et kantun hidagay “Hipa pinhed yun pehding kun panyaggudan yu ma-lat liwwanen yudda lawah

lan impahding Saul ni hi-gayu? Ey ma-lat bendisyonan dakemin pinilin APU DIOS ni tuu tu.”

<sup>4</sup> Kanday “Ya nambubuhhulan middan pamilyah Saul ey beken ni pihhuh winu balituk hu pan-iddawat niya eleg mabalin ni mi i-awit et mi pateyen hu linggeman ni helag Israel.”

Kan David ey “Hipa tep hu pinhed yun pehding ku?”

<sup>5-6</sup> Kanday “Pebeltan yuddan hi-gami pitun lakin helag Saul et mi ita-yun idad hinanggan APU DIOS di Gibeah e bebley Saul e pinutuk tun mampatul. Tep yan nunman ey pinhed Saul ni petteyen dakemin emin ma-lat meendi kami eyad bebley tayud Israel.”

Kan David ey “Anin, ebbuluten ku huttan ni kanyu.” <sup>7</sup> Nem eleg iebulut David hi Mepiboset, e inap-apun Saul ni u-ungngan Jonathan, tep ya etan ni nantebbalan dan Jonathan.

<sup>8</sup> Yadda in-abulut tu ey yadda etan dewwan lakin u-ungngad Saul nan Rispah e u-ungngan Aiah. Humman ida ey hi Armoni et hi Mepiboset niya in-edum tu liman lakin u-ungngan Merab e u-ungngan Saul. Ya ahwan Merab ey hi Adriel, e u-ungngan Barsillai di Meholah. <sup>9</sup> Humman ida pitun lakin helag Saul ni in-abulut David ni illaddan iGibeon et ilaw daddad duntug et pateyen dadda et ita-yun daddadman di hinanggan APU DIOS. Yan nunman ey pakelallappun ahiani da.

<sup>10</sup> Hi Rispah e inad Armoni nan Mepiboset ey nengapyan a-abbung tu etan di batu et atepan tun langgusih et manhahha-ad diman neipalpu eman ni pakelappun ahiani ingganah eman ni inlapu tu manginudan. Ina-addugan tudda annel idan nunman ni u-ungnga tu tep kaum-alidda sisit ni mengan ey kaum-aliddan hileng hu animal di muyung ni mengngan ni annel da. <sup>11</sup> Dingngel David humman ni impahding Rispah <sup>12</sup> et tu paeladdan iJabes di Gilead hu tu-ngal di Saul nan Jonathan. Da imbesik ida humman ni tu-ngal di Bet Shan e nengita-yunan idan iPilistia ni annel di Saul nan Jonathan eman ni nemateyan daddad duntug di Gilboa. <sup>13</sup> Impaela tu pay hu tu-ngal idan pitun helag Saul ni inta-yun idan tuud Gibeon. <sup>14</sup> Et iolden tun mekikkullung idad tu-ngal di Saul nan Jonathan di kulung eman lan nan hi Kish e aman Saul di Selah e bebley idan helag Benjamin. Entanni ey impasiked law Apu Dios etan bisil.

*Ya nekigubatan idan helag Israel etan idad etta-teng ni tuud Pilistia*

<sup>15</sup> Entanni mewan ey nanggugubat ida iPilistia niyadda helag Israel. Et ipengulun David hu sindalu tun an nekigubat idan iPilistia. Wadan pinhakkey ni nunman ni nemahhig hu gubat da e naka-atu hi David. <sup>16</sup> Ya etan et-eteng ni tuun iPilistia e hi Isbi Benob ey giniling hu pahul tu, e tellu et kagedwah ni kilo hu bel-at tu, niya pakekappa hu ispadah tu. Hinnup tu hi David et petteyen tu et <sup>17</sup> nem immali kuma hi Abishai e u-ungngan Seruah et pateyen tu humman ni iPilistia. Et gapun nunman ni neipahding ey kan ida law ni sindalun David ni hi-gatuy “Meippalpun nunya ey eleg ka law mekillaw ni an mekkiggubbat. Eleg mi pinhed ni meendi kan patul min helag Israel tep hedini mettey ka, heni na-dep hu dilag min helag Israel.”

<sup>18</sup> Entanni mewan ey nanggugubat ida hu iPilistia niyadda helag Israel di Gob et pateyen nan Sibekkai e iHushah hi Sap e helag idan etta-teng ni tuu.

<sup>19</sup> Entanni ey nanggugubat ida mewan hu iPilistia et yadda helag Israel di Gob et pateyen daman Elhanan e u-ungngan Jair e iBethlehem hi Lahmi e agin Goliath la e tuud Gath. Et-eteng hu pahul Lahmi e heni kainetteng ni tukud ni kapengitta-yunin kaman-ebbel ni pan-ablan tu.

<sup>20</sup> Entanni ey nanggugubat ida mewan hu iPilistia niyadda helag Israel di Gath. Wada mewan hu hakey ni et-eteng ni tuun han-e-nem hu galumeymey ni ngamay tu niya dapan tu. Hi-gatu hu hakey ni helag idan etta-teng ni tuun nunman la. <sup>21</sup> Nemahhig e tudda kaheneghegnita sindalun helag Israel nem pintey Jonathan, e u-ungngan Simeah, e agin David.

<sup>22</sup> Humman idan epat ni etta-teng ni tuun iPilistia ni pintey di David niyadda sindalu tu ey nahlag ida etan ni etta-teng lan tutu-ud Gath.

## 22

*Ya a-appeh David ni tuka penaydayaw APU DIOS*

<sup>1</sup> Yahhuy hu a-appeh David ni tuka penaydayaw APU DIOS tep binaddangan tu hi David et meihwang di emin ni hipan impahpahding idan buhul tu niyad impahpahding nan Saul.

<sup>2-3</sup> Kantuy “Hi APU DIOS e Dios ku hu heni batun nakka keihhikkugin mengippaptek ni hi-gak niya hi-gatu kamengihwang ni hi-gak. Ey hi-gatu dama hu kamei-ellig ni happiyaw ku. Em, hi-gatu kamengihwang ni hi-gak di kapehpehding idan



mangkabunget ni buhul ku. <sup>4</sup> Hi APU DIOS hu nakka pandasali, tep tuwak kabaddangi et nakka meihwang di lawah ni kapehding idan buhul ku. Et humman hu, lebbeng tun meidaydayaw.

<sup>5-6</sup> Lawah hu neipenahding ni hi-gak, et humman hu, kenayun ni nakka hanghangгаа hu ketteyyan ku et heni kamanhehhegged hu kulung ni hi-gak. <sup>7</sup> Et mandasallak nan hi APU DIOS e DIOS ku tep nemahhig ni nakka meligligasid kameippenahding ni hi-gak ey dingngel tud Tempol tud kabunyan hu dasal ku et baddangan tuwak.

<sup>8</sup> Impeang-ang Apu Dios hu bunget tuddan buhul ku et paeli tu hu nemahhig ni yeyeg ey kamandeldelyun hu puyek et anin ni ya neiktuan ni kabunyan et kamanggiwwed. <sup>9</sup> Heni kaman-a-ahhuk hu eleng tu niya heni kamangkeukkak di bungut tu hu kamantettebbel ni ngimmalab ni apuy tep ya bunget tuddan buhul ku. <sup>10</sup> Imbeghul tu kabunyan et kamangkelehbeng ali ey kameang-ang hu andeket ni kulput di daul ni heli tu. <sup>11</sup> Entanni ey nantakkay di anghel. Ey intayab ni dibdib. <sup>12</sup> Impan-enget tud nanlinikweh di kad-an tu ey liniktuban daman andeket ni kulput ni kamengi-lin udan. <sup>13</sup> Heni kedyam hu benang ni nalpullin Apu Dios ni tuka pangkelehbengillid kabunyan. <sup>14</sup> Entanni ey immehel alid kabunyan hi APU DIOS e Eta-gey ni peteg ey heni kidul hu ehel tu. <sup>15</sup> Ey nampana tudda buhul tu et mangkawehit ida niya impaeli tu kedyam et mamsik ida. <sup>16</sup> Ey gapuh ni nemahhig ni bunget tuddan buhul tu ey nebudihan hu dalinat ni baybay niya sinuunan eyan puyek.

<sup>17</sup> Heni nanyuung alid kabunyan et guyuden tuwak nan APU DIOS di edallem ni danum. <sup>18</sup> Inhewang tuwak idad buhul kun et-eteng ni peteg kabaelan da nem hi-gak. <sup>19</sup> Yan eman ni wada ligat ku ey immalidda buhul kun mengubbat ni hi-gak, nem binaddangan tuwak nan APU DIOS. <sup>20</sup> Em, binaddangan tuwak et ihwang tuwak tep kaum-amleng ni nakka pehpehding.

<sup>21</sup> Tuwak kaiddawsin panyaggudan ku, tep neiptek hu nakka pehding niya endi bahul ku. <sup>22</sup> Eggak ngehayen hu AP-APU e DIOS ku tep inu-unnud kudda tugun tu. <sup>23</sup> Nakka nemnemman emin hu tugun tu et endi nak kinehing. <sup>24</sup> Inamta tun endi bahul ku tep endi nak impahding ni neihla. <sup>25</sup> Et humman hu, kaiddawat APU DIOS hu panyaggudan ku tep neiptek hu nakka pehding niya inamta tun endi hu bahul ku.

<sup>26</sup> APU DIOS, makulug ni kamannananeng hu muka pemapték idan tuun eleg mengiwwalleng ni daka pengullug ni hi-gam niya kayyaggud muka pehding idan endi bahul tu. <sup>27</sup> Ey kayyaggud hu muka pehding idan tuun ebuh kayyaggud ni daka pehpehding, nem mudda kakastigua hu tutu-un lawah hu daka pehpehding. <sup>28</sup> Mudda kabaddangi hu tuun daka pebabah annel da nem muka pebabah ida tuun kamampahhiyya.

<sup>29</sup> APU e DIOS ku, kaka mei-ellig ni dilag ku tep muka ittudu hu pehding kud nakka ketemmai. <sup>30</sup> Hi-gam hu kamengidwat ni tuled kun mengubbat idan buhul ku niya hi-gam hu kakelpuin kabaelan ku et nakka panhegepa hu bebley dan nehammad hu luhud tu.

<sup>31</sup> Em, APU DIOS, makulug ni kayyaggud ni emin hu muka pehding! Kameiddinnel ni emin hu muka e-hela. Heni ka happiyaw idan kamengiddinnel ni hi-gam, tep mudda kahenniid hipan lawah ni meippahding ni hi-gada. <sup>32</sup> Hi-gam ni ebuh e APU hu makulug ni DIOS. Hi-gam ni ebuh hu kamei-ellig di batun kameihhennid buhul ni. <sup>33</sup> Hi-gam hu nehammad ni nakka keihhikkugi niya hi-gam kaumbaddang ni hi-gak ni pengippahdingan kun kayyaggud. <sup>34</sup> Muwak kabaddangi ma-lat eggak man-egah di duntug ey ma-lat heni-ak ni makwah e na-let ni umbesik. <sup>35</sup> Sinuttudduan muwak et nelaingngak ni mekiggubbat niya na-lettak ni meminnat ni pana.

<sup>36</sup> APU DIOS, gapuh ni et-eteng ni kabaelan mu ey inhewang muwak tep heni hi-gam hu happiyaw ku. Ey gapuh ni baddang mu niya binabbal mun hi-gak ey eta-gey law saad ku. <sup>37</sup> Muka penemnem ni hi-gak hu kayyaggud ni pehding ku ma-lat u-unnuden ku pinhed mun pehding ku. \*

<sup>38</sup> Hi-gak anhan law hu nampamdug ni hi-gada et ha-kupen kudda. Ey eggak isiked ni nekigubat ni hi-gada ingganah inapput kuddan emin. <sup>39</sup> Nampanak ida et mangketu-liddad hinanggak et eleg ida pakeehng.

<sup>40</sup> Hi-gam kamengidwat ni kabaelan kun mekiggubbat et nakka pan-apputadda buhul ku. <sup>41</sup> Muka petekkut ida buhul ku et ida kaumbesik ey muwak kabaddangi et nakka apputadda humman ni buhul kun angebe-hel da-ak. <sup>42</sup> Entanni ey ida kaman-eyyag ni umbaddang ni hi-gada, nem endi kaum-ali. Nampehemhemmek idan APU DIOS, nem

\* 22:37 22:37 Ya ehel di Hebrew ey endi maptek hu pinhed nunyan verse ni e-helen, et mukun yadda edum ni versions ey kandy "Eleg mu iebulut ni da-ak dedpapan idan buhul ku et adyah e eleg da-ak pateyen."

eleg tudda baddangi. <sup>43</sup> Impeka-apput kudda buhul ku et henidda dep-ul ni kapan-ityah ni dibidib. Ey nak ida kapan-ideyapdap e henidda pitek di keltad.

<sup>44</sup> Inhwang muwak idad mangkanghay ni tutu-u et idwat mu kelebengan kun man-ap-apud edum ni bebley. <sup>45</sup> Emin hu nakka e-helan pehding idan tuu ey daka u-unnuda. Anin idan tuun kamelpud edum ni bebley et ida kamanyu-ung di hinanggal ni lispituh dan hi-gak. <sup>46</sup> Neendi tuled idan buhul ku et ida kamanggegeyey ni takut da ey mangkeukkat idad nampantalan da.

<sup>47</sup> Kamedaydayaw hi APU DIOS e wadan ingganah. Hi-gatu hu heni batun nakka keihhikkugi. Em, kamedeyyaw hi APU DIOS e kamengihwang ni hi-gak. <sup>48</sup> Hi-gam hu Dios ni kamengibleh ni lawah ni kapehding idan buhul kun hi-gak niya hi-gam hu kamengidwat ni kabaelan kun mengapput idan buhul ku ma-lat hi-gak pan-ap-apu da. <sup>49</sup> Em, hi-gam hu kamengihwang ni hi-gak idad buhul ku. Tep eleg mu i-abulut ni da-ak apputen ni hi-gada, niya muwak kaippaptek ma-lat endi lawah ni pehding idan mangkabunget ni tuun hi-gak.

<sup>50</sup> Et humman hu, meki-dummak idan katuutuud kebebbley ni menaydayaw ni hi-gam. Ey i-ena-appah ku hu penaydayaw kun hi-gam. † <sup>51</sup> Impengenapput muwak e pinutuk mun patul niya impannananeng mu hu impeminhed mun hi-gak e hi David niyadda helag ku.”

## 23

### *Ya nanggillig ni inhel David*

<sup>1</sup> Hi David, e u-ungngan Jesse, ey pinutuk Apu Dios ni mampatul di Israel. Humman ni Ap-apu e Dios Jacob hu nengidwat ni neta-gey ni saad tu.

Hi-gatu kan a-appah ida etan ni kakkayyaggud ni a-appah di Israel.

Et yahhuy ida hu nanggillig ni inhel tu: <sup>2</sup> “Ya etan Ispirituh APU DIOS ey hi-gak hu pe-hel tun menghel idan e-helen tu. <sup>3</sup> Hi-gatu e Dios tayun helag Israel ey kamei-ellig di et-eteng ni batun keihhikkugan tayu. Kantuy ‘Ya etan patul ni limpiyuh hu tuka pan-ap-apu tep tuka deyyawa hi Apu Dios <sup>4</sup> ey kamei-ellig di aggew ni pimmetang ni kakkabbuhan ni endi kulput ey kamei-ellig di aggew e ya tuka pehding ni ang-ang ni helek ey kayyaggud hedin pakesiked ni udan.’

<sup>5</sup> Yadda helag ku bendisyonan Apu Dios tep hi-gak hu nengipekulugan tun etan ni eleg melumman ni nekitbalan tu. Ey peamnu tun hellakniban tuwak e humman hu pinhed ku. <sup>6</sup> Nem yadda etan lawah ni tuu ey iwwalleng tudda, heniddalli etan ni hebit e eleg mabalin ni ekkupen di ngamay. <sup>7</sup> Et humman hu, ya law gumekek hu ussalen dan mengemmung. Humman idan hebit ey eppuyan et magheb.”

### *Yadda etan netuled ni sindalun David*

<sup>8</sup> Huyyadda ngadan idan Tellun Ketultuledan ni sindalun David: hi Josheb Bassebet di Takemon hu kamengipappangulluddan Tellun Ketultuledan. Wadan pinhakkey ni tu nekigubatan e pintey tu telunggatut ni buhul dan inusal tu pahul tu.

<sup>9</sup> Ya meikkadwa etan idan Tellun Ketultuledan ey hi Eleasar, e u-ungngan Dodai e helag Ahoh. Wada lan nunman ni hi-gadad David e hinegnit dadda iPilistia ni neamung ni mekiggubbat ni hi-gada. Ey endi maptek ey bimmesik ida edum tun helag Israel <sup>10</sup> nem hedin hi-gatu man impahding tun emin kabaelan tun nekileban ingganah ni kimmedhel hu ngamay tu et eleg tu han-iwelak hu singnged tun ispadah tu. Binaddangan APU DIOS idan nunman et mengapput ida. Entanni ey immalidda law hu edum tun helag Israel et pan-alen da almas idan sindalun iPilistia ni nangketey.

<sup>11</sup> Ya meikkatlu etan idan Tellun Ketultuledan ni sindalun David ey hi Sammah, e u-ungngan Agee di Harar. Hakey ni aggew ey neamung mewan ida sindalun iPilistia di Lehi etan di netaneman ni dakel ni keldih ey bimmesik ida sindalun Israel tep simmakut idan iPilistia. <sup>12</sup> Nem hi Sammah ey impahding tun emin hu kabaelan tun nekileban idan sindalun iPilistia e humman hu nengipaptek tun nunman ni nangkeitnem ni keldi et pampeteyen tudda iPilistia. Ey nengapput ida tep ya baddang APU DIOS.

<sup>13</sup> Wadan pinhakkey eman ni ngannganih ni meleppuan hu ahiani e limmaw ida etan Tellun Ketultuledan etan di Telumpulun Netuled ni sindalun David di kad-an tu e neihnpud di leyang di Addulam. Yan nunman ey wadadda hu sindalun iPilistia e nangkampudda etan di Nedeklan e Rephaim. <sup>14</sup> Wadaddad David ni nunman di duntug e neligat ni hehgepen ni buhul da. Yadda edum ni sindalun iPilistia ey sinekup da Bethlehem. <sup>15</sup> Entanni ey ninemnem David hu bebley dan Bethlehem et kantuy “Pinhed kun peteg ni um-inum ni danum etan di bubun di neihnpud di eheb di Bethlehem.”

<sup>16</sup> Et humman idan Tellun Ketultuledan ni sindalu ey da hinggep hu nangkampuan idan iPilistia et ida umehul ni danum etan di kad-an ni eheb di Bethlehem et ilaw dan David. Nem eleg tu inumen et iduyag tu kumedek di puyek ma-lat iappit tun APU DIOS. <sup>17</sup> Kantud dasal tu ey "APU DIOS, eleg mabalin ni nak inumen huyyan danum tep kamei-ellig huyyad kuheyaw idan nunyan sindalun inlamngan da biyag dan an nan-ahul." Et eleg tu inumen humman ni danum. Huyya impahding ida etan ni Tellun Ketultuledan ni sindalun David ni pengippeang-ang dan kasinuled da.

<sup>18</sup> Hi Abishai e agin Joab e hi Seruah hi ineda hu ap-apuddan nunman ni Telumpulun Netuled ni sindalu. Nekibilang hi Abishai idan nunman ni Telumpulu tep pintey tu telunggatut ni buhul dad hakey ni gubat e inusal tu pahul tu. <sup>19</sup> Et gapuh tep hi-gatu ketultuledan idan nunman ni Telumpulu ey hi-gatu nambalin ni ap-apu da. Nem eleg maiinggeh etan idad Tellun Ketultuledan ni nandingngel ni sindalun David.

<sup>20</sup> Hi Benaiah, e u-ungngan Jehoiada e iKabseel, hu hakey daman netuled ni sindalun David tep dakeh hu impahding tun neang-angan ni tuled tu. Ya hakey ni impahding tu ey pintey tu dewwan iMoab ni nekallaing ni mekiggubbat. Ey hakey ni aggew ni ahi ketelan ey pintey tu layon di bitu. <sup>21</sup> Pintey tu mewan hu hakey ni et-eteng ni iEgypt ni nantenged ni pahul. Ebuh hu bakdung ni almas tu nem piniliw tu pahul tu et humman hu impamety tun hi-gatu. <sup>22</sup> Huyyadda hu impahding Benaiah e netuled dama e ngannganih ni mei-inggeh hu nandingngelan tu etan idad Tellun Ketultuledan ni sindalun David. <sup>23</sup> Hi-gatu hu kametbal etan di Telumpulun Netuled, nem eleg maiinggeh etan idad Tellun Ketultuledan. Ey hi-gatu pinutuk David ni ap-apuddan guwalya tu.

<sup>24</sup> Ya ngadan ida etan ni Telumpulun Netuled ni sindalun David ey hi Asahel e agin Joab, hi Elhanan e u-ungngan Dodo di Bethlehem, <sup>25</sup> di Sammah nan Elika di Harod, <sup>26</sup> hi Heles di Bet Peleth, hi Ira e u-ungngan Ikes di Tekoa, <sup>27</sup> hi Abieser di Anathot, hi Mebunnai di Hushah, <sup>28</sup> hi Salmon di Ahoh, hi Maharai di Netophah, <sup>29</sup> hi Heled e u-ungngan Baanah damad Netophah, hi Ittay e u-ungngan Ribai di Gibeah e helag Benjamin, <sup>30</sup> hi Benaiah di Pirathon, hi Hiddai di nedeklan di Gaas, <sup>31</sup> hi Abi Albon di Arabah, hi Asmabet di Bahurim, <sup>32</sup> hi Eliahba di Saalbon, yadda u-ungngan Jashen, hi Jonathan, <sup>33</sup> e u-ungngan Sammah di Harar, hi Ahiam e u-ungngan Sarar di Harar, <sup>34</sup> hi Eliphelet e u-ungngan Ahasbai di Maakah, hi Eliam e u-ungngan Ahithopel di Gilo, <sup>35</sup> hi Hesro di Karmel, hi Paarai di Arab, <sup>36</sup> hi Igal e u-ungngan Nathan di Sobah, hi Bani e helag Gad, <sup>37</sup> hi Seleki di Ammon, hi Naharai iBeerot e kamengnged ni happiyaw Joab, <sup>38</sup> di Ira nan hi Gareb di Jattil <sup>39</sup> e hi Uriah e Hittite.

Ya nga-mut tun bilang idan nunyan netuled ni sindalu ey telumpulut pitu.

## 24

*In-olden David ni mebillang ida etan lalakkinn dammutun mansindalu*

<sup>1</sup> Entanni mewan ey nemahhig hu bunget APU DIOS idan helag Israel et usalen tu hi David ni mengippeligat ni hi-gada. Kantun David ey "Bilang mudda emin hu tutu-ud Israel niyad Judah."

Et iolden David nan Joab niyadda edum ni ap-apun sindalu tu, e kantuy <sup>2</sup> "Lakkayuy di emin ni bebley di Israel, meipalpud Dan ingganah di Beersheba et bilangen yuddan emin hu helag Israel, tep pinkeh kun amtaen hedinn pigaddan emin."

<sup>3</sup> Nem kan Joab ni hi-gatuy "Hi APU DIOS hu mengippedakkel ni meminhagatut hu tutu-u eyad Israel! Ey ang-angen mulli et anhan kaya hu amnuan tu. Nem kele mahapul ni an ipahding huyya?"

<sup>4</sup> Nem kapepillit David ni pehding di Joab niyadda ap-apun sindalu tu humman ni in-olden tu. Et lumaw idan an nemillang idan tuu. <sup>5</sup> Inagwat da etan Wangwang e Jordan et mangkampudda etan di neigawwad nandeklanan tud tu-tu-lun Aroer e bebley di Gad, et han ida lumaw di Jaser. <sup>6</sup> Limmaw ida pay di Gilead niyad Kades e bebley idan Hittite. Ey limmaw idad Dan et han ida lumaw di Sidon di appit ni kakelinnugin aggew. <sup>7</sup> Nampalaw ida pay di Tyre e neluhud ni tuping, yaddad bebley idan Hibite niyaddad bebley di Kanaan et han ida lumaw di Beersheba di Judah. <sup>8</sup> Limmaw di heyam ni bulan et dewampulun aggew et han megibbuh hu nanlistaan dan emin ni helag Israel di emin ni bebley di Israel. <sup>9</sup> Et an peamtan Joab nan David e ya bilang idan lalakkinn kabaellan tun mekiggubbat ey walunggatut ni libud Israel niya limanggatut ni libud Judah.

<sup>10</sup> Negibbuh humman ni nampelistaan David ey lawah tuka pannenemnem nunman ni tu impahding et kantun APU DIOS ey "Nakka ebbuluta e nanliwattak ni hi-gam ni nak nengipahdingan nunya. Liwwan mu anhan huyyan nanliwattak. Eggak ni hekey nemnemen et ipahding ku huyya."

<sup>11</sup> Yan newa-waan tun eleg pay ni bumengun hi David ey kan APU DIOS nan Gad e prophet David ey <sup>12</sup> “Mu ehel nan David e kammuy ‘Huyya inhel APU DIOS: Iddawtan dakan tellun pampillian mun pengastiguk ni hi-gam, et ya etan pillien mu hu ippahding ku.’ ” <sup>13</sup> Et lumaw hi Gad di kad-an David et kantun hi-gatuy “Huyya inhel APU DIOS: ‘Hipa hu pinhed mun pengastiguk ni hi-gam: ya tellun toon ni bisil, ya tellun bulan ni pempemdugan dakeyun buhul yu, winu ya tellun aggew ni nemahhig degeh ni meihhinnap emin di bebley yu?’ Hipa pillien mu et humman hu ihhumang kun APU DIOS?”

<sup>14</sup> Hinumang David ey kantuy “Nekalligat huttan ni nemnemen. Nem nakka pekeddudul ni hi APU DIOS mismuh mengastigun hi-gak tep et-eteng hemek tu, et beken ni ya tuu ussalen tun mengastigun hi-gak.” <sup>15</sup> Et paelin APU DIOS hu nemahhig ni degeh e inlapu tun kakkabbuhhan ni nunman ni aggew ingganah ni nelabah humman ni inhel tun pengippesikkedan tu. Ya bilang emin ni tuun netey meippalpu Dan ingganah di Beersheba ey nepitun libu. <sup>16</sup> Yan nunman ni dintengan etan ni anghel di Jerusalem ni memettye idan tuu ey nantuttuyyu hi APU DIOS e eleg tu law pinhed ni petteyen ida et kantu etan ni anghel ey “Hiyya ew law, entan tudda patey.” Yan nunman ey wada etan angel di illikkan Araunah e Jebusite.

<sup>17</sup> Yan nenang-angan David e kamangkettey ida tuud degeh ni in-ali etan ni anghel ey kantun APU DIOS ey “Hi-gak hu nanliwat, beken ida eya tuu, anggehmmek ida kumedek. Hi-gak et yadda pamilyah ku hu lebbeng tun kastiguen mu.”

<sup>18</sup> Yan nunman ni aggew ey limmaw hi Gad e prophet di kad-an David et kantuy “Lakkay etan di illikkan Araunah et ka kumapyadman ni pan-appitan nan APU DIOS.” <sup>19</sup> Et u-unnuden David humman ni in-olden APU DIOS ni inhel Gad ni hi-gatu. <sup>20</sup> Kamenetteng di David niyadda etan edum tu ey inang-ang idan Araunah et tudda dammuen et manyuung di hinanggan David e neitumuk angah tud puyek. <sup>21</sup> Kantuy “Apu patul, kayyaggud et immali kayu ni-man.”

Hinumang nan David e kantuy “Em, immali-ak et ibegak hedin dammutun gettangen ku eya illikkan mu et mengapya-ak ni pan-appitan APU DIOS ma-lat pasiked tu hu degeh ni neihipap di bebley tayu et kamangkettey ida tuu.”

<sup>22</sup> Kan Araunah ey “Apu patul, iddawat kun hi-gam huyyan illikkan niya hipan mahapul mu ey iappit mu hipan hu pinhed mun i-appit ni hi-gatu. Wadadda bakan i-appit mu, ey anin ni penungngum eyadda delaydayan niyadda det-al eyan illikkan. <sup>23</sup> Eleg mahapul ni mu beyyadan ida huyya. Edihey ebbuluten APU DIOS ida huyyan i-appit mun hi-gatu.”

<sup>24</sup> Nem himmumang hi David et kantuy “Eleg! Mahapul ni beyyadan kudda. Tep eggak i-appit nan APU DIOS hu eggak beyyadi.” Et gatngen David humman ni illikkan niyadda etan baka ni neliman palatah. <sup>25</sup> Nengapyan pan-appitan et man-appit nan APU DIOS ni kagihheba niya pekiddagyuman. Ey inebulut APU DIOS humman ni in-appit David et pasiked tu etan anghel ni memettye idan helag Israel.

## 1 Kings

### *Ya meippanggep nunyan libluh e 1 Kings*

Netey hi David e patul et hi Solomon e u-ungnga tu hu neihullul ni hi-gatun nampatul di Israel. Hedin hi Solomon, man kayyaggud niya nelaing ni patul. Impekapyu tu hu Tempol di Jerusalem niya dakel hu edum ni impahding tun panyaggudan idan tutu-u tu. Ey nandingngel anin di edum ni bebley.

Netey hi Solomon et meihullul ni nampatul hi Rehoboam e u-ungnga tu. Nem nginhay nan Jeroboam hu kelebengan nan Rehoboam ni nampatul. Yadda hampulun helag Israel ey pinili da hi Jeroboam ni nampatul da. Et huyya negedwaan ni Israel et mambalin ni dewwan bebley. Nengadanan huyyan appit ni north ni Israel ey Judah hu neingedan di appit ni south. Wada hakey idan nunyan dewwan bebley ey wada patul da ey wada sindalu da.

Hedin netey hu patul da, ey kameihullul hu lakin u-ungngan nunman ni patul. Emin ida nampatul di Israel di appit ni north ey lawah ida, tep eleg da u-unnuden hi Apu Dios. Nem yad Judah di south ey wadadda edum ni kayyaggud ni nampatul diman, tep inu-unnud da hi Apu Dios.

### *Ya neitudek eyad libluh:*

1. Yadda neipenahding eman ni eleg ni megedwa hu bebley di Israel. (chapters 1-11)
2. Yadda neipenahding eman ni negedwaan ni Israel et mambalin ni dewwan bebley. (chapters 12-22)

### *Yan nea-ammaan David*

<sup>1</sup> Nea-amma law hi David e patul et anin ni ta-ta-kepen da pewengngal dan hi-gatu ey kapyatun kamektel. <sup>2</sup> Et humman hu kan idan bega-en tun hi-gatuy "Apu, heballi ew kami menemmak ni kamenikken ni bii et ipaptek daka. Meki-uggip ni hi-gam et man-a-attung kayu et angka maktel."

<sup>3</sup> Et da epeepengen hu kebebbbley di Israel ni hamak dan kat-agun bii ey wada himmak dad Sunem e hi Abishag hu ngadan tu et ilaw dad kad-an David e patul. <sup>4</sup> Kayyaggud ni peteg hu ang-ang nunman ni bii. Ey tuka peka-ippaptek humman ni patul. Kameki-uggip humman ni bii nan hi David, nem endi impahding tun hi-gatu.

### *Implanuh Adonijah ni hi-gatu mampatul*

<sup>5-6</sup> Netey hi Absalom et hi law Adonijah e u-ungngad David nan Haggit hu pengulwan ida etan ni lakin u-ungngan David. Hi Adonijah ey kakkayyaggud hu kalinaki tu. Eleg ene-ehhelan ametu hi David di hipan impenahding tu. Entanni ey immalid nemnem tu e hi-gatu law mampatul et umladdan kalesah, yadda kebayyu et ayagan tu neliman tuun pangkadwatu.

<sup>7</sup> An nekihummangan nan Joab e u-ungngan Seruiah et hi Abiathar e padi ey kanday dammutun hi-gatu mampatul. <sup>8</sup> Nem hedin di Sadok e padi, hi Benaiah e u-ungngan Jehoiada, hi Nathan e prophet, hi Simei, hi Rei, et yadda guwalyan David man eleg da iebulut ni an mampatul hi Adonijah.

<sup>9</sup> Hakey ni aggew ey an nan-appit hi Adonijah etan di kandan Uleg ni Batu e neihnup di hebwak di Enrogl. Immaladdan kalneroh, ya bulug ni baka et ya mangkateban pakeetteng tun baka. Inaygan tudu da hu aaggi tun lakin u-ungngan David, yadda opisyal di Judah et ida makihemul, <sup>10</sup> nem eleg tu ayagan hi Solomon e hakey ni agitu, anin hi Nathan e prophet, hi Benaiah et yadda etan guwalyan patul.

### *Hi Solomon hu nampatul*

<sup>11</sup> Entanniy limmaw hi Nathan nan Bathsheba e inan Solomon et kantun hi-gatuy "Kaw eleg mu dengelen e impambalin Adonijah e u-ungngan Haggit hu annel tun patul? Ey eleg amtan nan David e patul hu meippanggep nunman. <sup>12</sup> Hedin pinhed mun meihwang hu biyag yun han-inan Solomon, u-unnud yu eya itugun ku. <sup>13</sup> Lakkay di kad-an nan David e patul et kammuy 'Apu patul, kaw eleg mu isapatah ni hi-gak e ya u-ungngak e hi Solomon hu meihullul ni hi-gam ni nampatul? Kele yan nunyay hi Adonijah hu nambalin ni patul?' " <sup>14</sup> Kan pay Nathan ey "Hedin dedngelek e kayu kamanhuhummangan, umhegeppak ali ma-lat iuh-uh ku e makulug hu muka pan-e-hela."

<sup>15</sup> Et lumaw hi Bathsheba di kuwaltuh nan patul. Neka-a-amma law et kaipappaptek etan ni kat-agun bii e hi Abishag e iSunem. <sup>16</sup> Nanyuung hi Bathsheba ni panlispituh tu ey kan David ni hi-gatuy "Hipa ibbagam?"

<sup>17</sup> Kan Bathsheba ey "Apu patul, insapatah mu lad ngadan APU DIOS e Dios mu e hi Solomon e u-ungnga ta hu meihhullul ni hi-gam ni mampatul, <sup>18</sup> nem yan nunya ey nambalin ni patul hi Adonijah ey eleg mun hekey amta. <sup>19</sup> An nan-appit ni dakel ni lakkitun baka, yadda kalneroh et yadda mangkateban pakeetteng tun baka. Inaygan tudda hu u-ungngam ni laki, hi Abiathar e padi et hi Joab e ap-apun sindalum et ida makihemul, nem eleg tu ayagan hi Solomon e u-ungnga ta. <sup>20</sup> Apu patul, kehehheggedan emin ni tuudyad Israel hedin hipa puttuken mun meihhullul ni hi-gam ni mampatul. <sup>21</sup> Hedini mettey ka ey eleg mu putuken hu mampatul, mambalin kamin u-ungnga ta e hi Solomon ni buhul nunman alin mampatul."

<sup>22</sup> Nanengtun ida kamanhuhummangan ey dimmateng hi Nathan di baley etan ni patul. <sup>23</sup> Waddadda nangel etan ni patul e wada hi Nathan et paeyag tu. Himmegep hi Nathan et manyuung di hinanggan David e patul <sup>24</sup> et kantuy "Apu patul, kaw inhel mu e hi Adonijah hu meihhullul ni hi-gam ni mampatul? <sup>25</sup> Tep yan nunyan aggew ey limmaw ni an nan-appit ni dakel ni lakkitun baka, yadda kalneroh et yadda mangkateban pakeetteng tun baka. Inaygan tuddan emin hu lalakin u-ungngam, hi Joab e ap-apun sindalum, et hi Abiathar e padi. Et immen idan nunya e ida kamanhahamul ey daka pan-itkuk e kanday 'Hi Adonijah hu mannenneng ni mampatul!' <sup>26</sup> Nem eleg dakemi ayagan e hi-gamid Sadok e padi, hi Benaiah et hi Solomon. <sup>27</sup> Kele anhan eleg mu peamtaddan opisyal mu e hi-gatu ihhullul mun mampatul hedini kantu et hi-gam nengiolden eyan neipahding?"

<sup>28</sup> Entanni ey immehel law hi David e kantuy "Yu ehel nan Bathsheba et umlidya." Immali et umehng di hinanggan David. <sup>29</sup> Kan David ni hi-gatuy "Issapatah kun hi-gam di ngadan nan APU DIOS e wadan ingganah ni nengihwang ni hi-gak di emin ni buhul ku <sup>30</sup> e ippahding kun nunya humman ni insapatah ku. Et tistiguk hu Dios ni Israel e hi Solomon e u-ungnga ta hu meihhullul ni hi-gak ni mampatul."

<sup>31</sup> Nanyuung hi Bathsheba di hinanggan David ni panlispituh tu et kantuy "Apu patul, manbi-biyag ka et anhan kuman ingganah."

<sup>32</sup> Entanni ey impaeyag David hi Sadok e padi, hi Nathan e prophet et hi Benaiah e u-ungngan Jehoiada. Immalidda <sup>33</sup> et kantun hi-gaday "Awit yudda hu opisyal ku et pantakkay yud kebayyuk hi Solomon e u-ungngak et lumaw kayud ahhullan di Gihon. <sup>34</sup> Hedini dimmateng kayudman, duyagan di Sadok nan Nathan ni lana hu ulun Solomon, ma-lat keang-angan tu e hi-gatu mampatul di Israel. Hedini negibbuh, patnul yu hu tangguyup et itkuk yu hu 'Mannenneng hi Solomon ni mampatul!' <sup>35</sup> Kadwai yulli mewani ni pambangngadan tun yuddungan tu eyad yuddungngak. Hi-gatu hu pinutuk kun meihhullul ni hi-gak ni mampatul eyad bebley tayud Israel et yad Judah."

<sup>36</sup> Immehel hi Benaiah ey kantuy "Meippahding emin huttan ni inhel mu ey tetbalen et anhan APU DIOS e Dios mu, <sup>37</sup> ey baddangan tu et anhan hi Solomon henin nemaddangan tun hi-gam, ey nehahhammad ali et anhan hu pan-ap-apuan tu nem ya nan-ap-apuan."

<sup>38</sup> Di Sadok e padi, hi Nathan e prophet, hi Benaiah e u-ungngan Jehoiada et yadda guwalyan David ey inlaw da hi Solomon di Ahhullan di Gihon. Ey hi Solomon ey nantakkay di kebayyuan ametu e hi David. <sup>39</sup> Inukat Sadok etan neiha-adan ni lanan olibah ni intabin tun inla tud Tabernacle et duyagan tu ulun Solomon. Impatnul da hu tangguyup et itkuk idan emin ni tuu hu "Mannenneng ni mampatul hi Solomon!" <sup>40</sup> Kinadwaan da mewani ni nambangngad e tagan da tekuk ey pampetnul da hu ayyuding ni gayeda et heni wada yegyeg.

<sup>41</sup> Kamangkegibbuh di Adonijah et yadda etan ineyagan tun kamanhahamul ey dingngel da hu kamangngangala. Dingngel Joab hu tangguyup ey kantuy "Kele wada nakka deddengngelan kamangngangalad bebley?"

<sup>42</sup> Eleg tu imuhen hu tuka pan-e-hela ey dimmateng hi Jonathan e u-ungngan Abiathar. Kan Adonijah ey "Ikay dih. Kayyaggud kan tuu et inamtak et kayyaggud dama hu in-alim ni e-helem."

<sup>43</sup> Himmumang hi Jonathan ey kantuy "Beken ni kayyaggud. Hi Solomon hu pinilin David ni meihullul ni hi-gatun mampatul. <sup>44</sup> Intu-dak tud Sadok, hi Nathan, hi Benaiah, et yadda guwalya tu et kadwaan da Solomon. Ey impantakkay dad kebayyuan patul. <sup>45</sup> Et duyagan di Sadok nan Nathan ni lana hu ulu tud Ahhullan di Gihon et hi-gatu law mampatul. Nambangngad idad bebley ey katkuk ida tuun anla da et humman hu dingngel yun kamangngangala. <sup>46</sup> Hi Solomon law hu patul. <sup>47</sup> Limmaw idan emin hu opisyal di kad-an David e patul et kanday 'Hi Apu Dios e muka daydayawa hu ngenamung ni memaddang nan Solomon et mema-man mandingngel nem hi-gam ey

nehahhammad pay hu pan-ap-apuan tu nem hi-gam.' Ey nanyuung hi David e patul di kametun pandeyyaw tun APU DIOS <sup>48</sup> et mandasal e kantuy 'Daydayawen daka e AP-APU e Dios ni Israel tep pinutuk mu u-ungngak ni meihullul ni hi-gak ni mampatul! Ey tep impannaneng muwak ni mategu ma-lat ang-angen ku.' "

<sup>49</sup> Dingngel idan nekiemung nan Adonijah ey pinhakkeyey nebukal ida e wada hakkeyey nanglaw di lawwan tu. <sup>50</sup> Hedin hi Adonijah simmakut nan Solomon et lumaw etan di Tabernacle et tu itnged di dugun etan ni altar. <sup>51</sup> Wada nengipeamtan Solomon e simmakut hi Adonijah ni hi-gatu et immen e tuka itetnged di dugun etan ni altar e kantuy "Ettu anhan et isapatah nan patul e hi Solomon e eleg da-ak petteya?"

<sup>52</sup> Kan Solomon ey "Hedin kayyaggud peang-ang-ang tu et mabalin ni medinnellak ni hi-gatu, anin ni hakey ni bewek tu et endi an me-gah, nem hedin lawah hu nemnem tu, mahapul ni mettey." <sup>53</sup> Immitu-dak hi Solomon ni an mengewwit ni hi-gatu et da awiten di altar. Dimmateng di kad-an Solomon et manyuung. Kan Solomon ni hi-gatuy "Anemut kad baley yu."

## 2

### *Ya nanggillig ni intugun David nan Solomon*

<sup>1</sup> Ngannganih mettey hi David ey impaeyag tu hi Solomon et tugunen tu. <sup>2</sup> Kantuy "Anggegannuy mepappag law hu biyag ku. Pandinel ka ey pa-let mu nemnem mu, <sup>3</sup> niya ipahding mun emin hu pinhed APU DIOS ni pehding mu. Peka-u-unnud mu hu tugun tu niya olden tun wada etan di Tugun Moses, et anin ni attu lawwam niya hipa pehding mu ey kayyaggud emin hu mekapkapy. <sup>4</sup> Hedin u-unnudem hi APU DIOS um-amnu etan inhel tu lan hi-gak e kantuy 'Hedin peka-u-unnuden idallin helag mun emin hu tugun ku, hi-gadalli man-ap-apun ingganah.'

<sup>5</sup> Wada pay hu pinhed kun ittugun ni hi-gam. Nemnem mu impahding nan Joab e u-ungngan Seruiyah ni hi-gak e pintey tu dewwan ap-apun sindaluk e di Abner e u-ungngan Ner et hi Amasa e u-ungngan Jether. Pintey tuddan tsimpuh ni linggep tep imbaleh tu neipahding ni tsimpuh ni gubat. Beken ni lebbengtun tu pehding humman tep angegabaing. Hi-gak kumedek hu nebahulan tep hi-gak hu ap-apu tu. <sup>6</sup> Ngenamung kan pehding mu, nem nemnem mu e mahapul ni meippepettey.

<sup>7</sup> Yadda etan u-ungngan Barsillai e iGilead, ang-ang mu et kabbabbal kan hi-gada ey ipaptek mudda tep impaptek da-ak ni nampamdugan tuwak nan hi Absalom e agim.

<sup>8</sup> Nemnem mu dama hi Simei e u-ungngan Gerah di Bahurim e helag Benjamin. Lawah ni peteg hu nan-ehel tun hi-gak ni nakka pampenglawid Mahanaim. Nem yan nambangngadak, immali et tuwak dammuen di Wangwang e Jordan et isapatah kud ngadan APU DIOS e eggak pepettey. <sup>9</sup> Nem anin ni hanniman insapatah ku, ey mahapul ni mekastigu, et humman hu papetey mu tep nanengtun nambahul. Inamntam hu pehding mu tep nelaing ka."

### *Ya neteyyan David*

<sup>10</sup> Netey hi David et ikulung dad Bebley David. <sup>11</sup> Nampatul di Israel ni na-pat ni toon. Nambebley di Hebron ni pitun toon et yad Jerusalem ni telumpulut tellun toon. <sup>12</sup> Hi Solomon law hu nampatul, e neihullul nan ametu e hi David, ey nehammad hu nan-ap-apuan tu.

### *Ya neteyyan Adonijah*

<sup>13</sup> Entanni ey limmaw hi Adonijah e u-ungngan Haggit di kad-an Bathsheba et kan Bathsheba ni hi-gatuy "Kaw kayyaggud hu inliam di deya?" Kan Adonijah ey "Em! <sup>14</sup> Wada-et anhan hu ibbagak ni hi-gam." Kan Bathsheba ey "Hipa humman?"

<sup>15</sup> Hinumang tu e kantuy "Inamntak e hi-gak e kuma hu lebbeng tun mampatul ey emin hu edum tayun helag Israel ey humman amta da. Nem hin-appil hu neipahding tep hi agik hu nampatul tep humman hu pinhed APU DIOS ni meippahding. <sup>16</sup> Nem wada-et anhan hu ibbagak hedin tetbalem." Kan Bathsheba ey "Hipa humman?"

<sup>17</sup> Kan Adonijah ey "Inamntak et ebbuluten nan patul hu hipan mu ibbagan hi-gatu et humman hu, attu et iehngeng muwak et ibegam et iebulut tun i-ahwak hi Abishag e iSunem."

<sup>18</sup> Kan Bathsheba ey "Em, ngenamung ngak ni meki-ungbal nan patul."

<sup>19</sup> Limmaw hi Bathsheba di kad-an ni patul e hi Solomon et tu e-helen hu imbagan Adonijah. Immehngeng hi Solomon et manyuung ni panlispih tun inetu. Yimmudung et mampaelan hakey ni yuddungngan ni meihha-ad di winannan tu et payudung tu inetu.

<sup>20</sup> Kan Bathsheba ey "Wada ibbagak ni hi-gam ey pinhed kun tetbalem anhan."

Kan Solomon ey "Hipa humman e ina? Ehel mu et inamntam e tetbalek."

<sup>21</sup> Kan inetuy “Iebulut mu hi Abishag e iSunem ni i-ahwan agim e hi Adonijah.”

<sup>22</sup> Kan Solomon ey “Kele mu ibbagan hi-gak e iebulut ku hi Abishag ni i-ahwa tu? Inamtam e pengulwan nem hi-gak niya hi-gatu hu pinhed nan Abiathar e padi et hi Joab ni mampatul?”

<sup>23</sup> Entanniy insapatah Solomon di ngadan APU DIOS e kantuy “Hi Apu Dios hu memettey ni hi-gak hedim eggak petteya hi Adonijah gapuh eyan tuka ibbagan hi-gak. <sup>24</sup> Hi APU DIOS hu nengiha-ad ni hi-gak eyad yuddungngan ama e hi David ni mampatul. Impeammu tu hu insapatah tun yaddalli helag ku hu mampatul. Issapatah kud ngadan APU DIOS e pepettey ku hi Adonijah nunyan aggew.”

<sup>25</sup> Entanni et itu-dak tu hi Benaiah et tu pateyen hi Adonijah.

*Ya nengitu-dakan Solomon nan Abiathar di edawwi et ya neteyyan Joab*

<sup>26</sup> Entanniy kan Solomon nan hi Abiathar ey “Kaibangngad kad bebley mud Anathot. Lebbeng tun pepettey daka, nem eleg daka pepettey nunya tep hi-gam hu nangnged ni Kaban APU DIOS e Eta-gey ni peteg ni nekilawwam nan ama e hi David ey hineltap mu dama hu hineltap tu.” <sup>27</sup> Nem ingkal Solomon et eleg law mansilbin padin APU DIOS. Et huyya inamnuan etan ni inhel lan APU DIOS di Siloh meippanggep idan helag Eli e padi.

<sup>28</sup> Yan nangngelan Joab ni meippanggep ni nunman ey hinggah idan helag tun ingganah. Impeammu tu hu insapatah tun yaddalli helag ku hu mampatul. Issapatah kud ngadan APU DIOS e pepettey ku hi Adonijah nunyan aggew. <sup>29</sup> Impeamta dan Solomon huyya et itu-dak tu hi Benaiah e u-ungngan Jehoiada ni memettey ni hi-gatu.

<sup>30</sup> Limmaw hi Benaiah di baley APU DIOS et kantun Joab ey “In-olden apu patul e um-ehep ka.”

Kan Joab ey “Eleg, yadya pinhed kun ketteyak.”

Nambangngad hi Benaiah et tu ehelen hu inhel Joab.

<sup>31</sup> Kan Solomon ey “Anin u-unnud mu hu inhel tu. Patey mu et ikulung mu ma-lat hi-gak niyadda helag David ey eleg kami mailegat di nambahulan tun nemateyan tuddan tutu-un endi bahul da. <sup>32</sup> Kastiguen APU DIOS hi Joab tep ya nemateyan tun dewwan tuun endi bahul da ey eleg amtan ama e hi David. Pintey Joab di Abner e ap-apun sindalud Israel et hi Amasa e ap-apun sindalud Judah e kakkayyaggud hu elaw da nem hi-gatu. <sup>33</sup> Et humman hu, mekastigu hi Joab anin idan helag tun ingganah. Nem hedim hi David niyadda helag tu, man pelinggep niya pan-ap-apuddan APU DIOS ni ingganah.”

<sup>34</sup> Limmaw hi Benaiah di baley APU DIOS et patyen tu hi Joab et tu ikulung di neihpud di eleg mebebleyi. <sup>35</sup> Impambalin Solomon hi Benaiah ni ap-apun sindalu tu, et maihullul nan Joab niya impambalin tun padi hi Sadok, et maihullul nan Abiathar ni nampadi.

*Ya neteyyan Simei*

<sup>36</sup> Impaeyag Solomon hi Simei et kantun hi-gatuy “Pengapya kan baley mudya Jerusalem et manha-ad kadya et agka lumaw di edum ni bebley, <sup>37</sup> tep hedim um-a-allaw ka et agwatan mu hu Kulukul e Kidron, man mettey ka, et bahul mu ngu.”

<sup>38</sup> Hinumang Simei ey kantuy “Em, apu patul, u-unnudek hu inhel mu.” Et manha-ad di Jerusalem.

<sup>39</sup> Nem entanni et malebah hu tellun toon ey bimmesik hu dewwan bega-en Simei et lumaw idad baley Akhis e u-ungngan Maakah e patul di Gath. Dingngel tu e wadaddadman <sup>40</sup> ey nangkebayyu et lumaw di kad-an Akhis e patul di Gath et tudda hamaken. Himmak tudda et mambangngad ida emin di baley tu.

<sup>41</sup> Neamtaan Solomon humman ni impahding Simei <sup>42</sup> et paeyag tu et kantun hi-gatuy “Kaw eleg daka pansapatah di ngadan APU DIOS e eleg mu hi-yana Jerusalem? Et ehelen ku pay ni hi-gam e hedim hi-yanem man nanna-ud ni mettey ka? Kaw eleg mu tebalen et kammun hi-gak ey u-unnudem hu inhel ku? <sup>43</sup> Kele mu ngin hay hu olden ku et ya insapatah mu? <sup>44</sup> Neka-amtam ni emin hu impahpahding mun lawah nan hi ama e hi David et hi APU DIOS hu mengastigun hi-gam. <sup>45</sup> Nem hedim hi-gak man bendisyonan tuwak et anhan ni hi-gatu ey ihhammad tun ingganah hu pan-ap-apuan David.”

<sup>46</sup> In-olden nan Solomon nan Benaiah et pateyen tu hi Simei. Nehammad law hu pan-ap-apuan Solomon tep endi law hu mangngenghay ni hi-gatu.

### 3

*Ya laing nan Solomon*

<sup>1</sup> Nekigayyum hi Solomon etan ni patul di Egypt et ahwaen tu hu hakey ni u-ungngan nunman ni patul. Nanha-ad idad Bebley David ingganah ni negibbuhuan ni palasyoh tu, ya Tempol nan APU DIOS et ya etan eta-gey ni tuping di nanlinikweh di Jerusalem.



<sup>2</sup> Yan endi ni nekapyan Tempol APU DIOS, ey ida kaumlaw hu helag Israel ni an man-appit di etata-gey ni duntug. <sup>3</sup> Nakappinshed Solomon hi APU DIOS niya tuka pekau-unnudadda tugun nan ametu e hi David, nem kaman-appit ni animal idad dakel ni daka pan-appisiddan edum ni dios.

<sup>4</sup> Wadan pinhakkey ni limmaw hi Solomon ni an man-appit di Gibeon tep humman hu nandingngel ni daka pan-appisi, et kelngen tu hu hanlibun kagihheban kamei-appit. <sup>5</sup> Yan nunman ni hileng ey nampeang-ang hi APU DIOS ni hi-gatud i-innep tu e kantuy “Hipa pinhed mun iddawat kun hi-gam?”

<sup>6</sup> Himmumang hi Solomon et kantuy “Impeenang-ang mun ama e hi David e bega-en mu hu et-eteng ni impeminhed mun hi-gatu, tep kayyaggud ey limpiyuh niya kamengun-unnud ni hi-gam. Ey eleg mu isiked ni nengipeang-ang ni et-eteng ni impeminhed mun hi-gatun nengidwatam ni u-ungnga tu et maihullul ni hi-gatun mampatul.

<sup>7</sup> AP-APU e Dios ku, hi-gak hu inhullul mun aman mampatul anin ni u-ungnga-ak pay ni et eggak amtan man-ap-apu <sup>8</sup> nem adyahhak ni man-ap-apuddan dakel ni tuun eleg mebillang. <sup>9</sup> Et humman hu, ya ibbagak anhan ni hi-gam ey idwasi muwak ni laing ma-lat kayyaggud hu pehding kun man-ap-apuddan eyan tuum, ey ma-lat maweda hu kabaelan kun mengamta hedin hipa kayyaggud winu lawah, tep hipa kuma tuun kabaelan tun man-ap-apu eyaddan dakel ni tuum?”

<sup>10</sup> Immamlang hi Apu Dios ni nengibegaan Solomon <sup>11</sup> et kantun hi-gatuy “Gapu tep ya laing ni man-ap-apu hu imbagam ma-lat meandeng hu pehding mun man-ap-apu, e beken ni ya andukkey ni biyag, niya kinedangyan winu ketteyyan ni buhul mu, ey <sup>12</sup> iddawat ku hu muka ibbaga. Pambalin dakan nekallaing niya iddawtan dakan kabaelan mun man-ewwat e endi tu kei-ingnengan ni laing idan nemangulu winu meittu-nud ni hi-gam ni mampatul. <sup>13</sup> Iddawat ku pay ni hi-gam ida etan eleg mu ibega, henin kinedangyan niya dayaw ni nunyan ketaggum, et hi-gam hu kekakkaddangyanan niya hi-gam hu kee-ettengan dayaw tud emin ni patul. <sup>14</sup> Hedin u-unnuden mun emin hu tugun ku niya olden ku, henin nengu-unnudan amam e hi David ni hi-gak, ey iddawtan dakan andukkey ni biyag.”

<sup>15</sup> Inggibek Solomon ey inamta tu e i-innep humman ni immehelan Apu Dios ni hi-gatu. Et lumaw di Jerusalem et umehngeng di hinangga etan ni Kaban APU DIOS et man-appit ni kagihheba niya pekiddagyuman nan APU DIOS. Negibbuh humman et mampahemul idan opisyal tu.

*Ya nanhuwetan Solomon ni hakey ni neligat ni kasuh*

<sup>16</sup> Hakey ni aggew ey immaliddad kad-an Solomon hu dewwan biin daka pebeyyad hu annel dan laki. <sup>17</sup> Kan etan ni hakey ni hi-gaday “Apu patul, kami kamanha-ad eyan kadwak ni biid hakey ni baley. Entanniy nan-ungnga-ak ni laki e wada eya kadwak ni nunman. <sup>18</sup> Nelabah hu dewwan aggew ey nan-ungnga daman laki eya bii. Dewwa kamin ebuh ni kamanha-ad diman.

<sup>19</sup> Hakey ni hileng ey inipit tu u-ungnga tun nampiggadan tu, nem eleg tu igeb-at, et matey etan u-ungnga tu. <sup>20</sup> Bimmangun nunman ni hileng et alen tu u-unggak et ihullul tu u-ungnga tun netey, et paulig tun hi-gak nem eggak igibek tep neka-uyengngak. <sup>21</sup> Nawa-wa law et bumengunnak et nak pan-innum hu u-unggak ey netey. Nem entanni et pekabbinbinek ey beken humman ni u-unggak.”

<sup>22</sup> Nem immehel etan bii e kantuy “Eleg, u-unggak etan mategun gelang! Ya etan netey hu u-unggam!”

Hinumang etan ni nemangulun bii ey kantuy “Eleg mabalin! Ya ngu etan netey hu u-unggam tep ya etan mategu hu u-unggak!” Lektattuy ida kamantuttut di hinanggan Solomon e patul.

<sup>23</sup> Entanni et kan Solomon ey “Hipa inna-nun nuntan e wada hakey ni hi-gayu ey kanyuy u-ungnga yu eya mategun gelang.”

<sup>24</sup> Tulli impaela hu ispadah et i-li da et <sup>25</sup> kantuy “Gedwa yu eya gelang et pangedwadada eyan dewwan bii.”

<sup>26</sup> Ya etan makulug ni kan u-ungnga etan ni mategun gelang ey et-eteng hu impeminhed tun u-ungnga tu et kantuy “Apu patul, entan tu ahan patey eya gelang! Anin ew katted ni idwat mu eyan kadwak!”

Nem kan etan ni hakey ni bii ey “Endi an mengellan hi-gatan dewwa eyan gelang. Gedwa yu kuma!”

<sup>27</sup> Immehel law hi Solomon et kantuy “Entan tu patey eya gelang, idwat yu eyan nemangulun bii. Hi-gatu hu makulug ni inetu.”

<sup>28</sup> Yan nangngelan idan iIsrael ni nunman ni impahding Solomon ni nanhuwet nunman ni kasuh, ey et-eteng hu lispituh dan hi-gatu tep inamta da law e hi Apu Dios hu nengidwat ni laing tu, et meandeng nenuwet tun kasuh.

## 4

### *Yadda opisyal Solomon*

<sup>1</sup> Hi Solomon hu patul di emin ni kebebbbley di Israel, <sup>2</sup> et huyyadda hu eta-gey ni opisyal tu:

Hi Asariah e u-ungngan Sadok hu padi. <sup>3</sup> Di Elihorep nan Ahijah e u-ungngan Sisha hu kamengittuddek idan meippanggep ni kamekapkapy etan di bebley.

Hi Jehoshaphat e u-ungngan Ahilud hu kamengippaptek etan idan kameittuddek.

<sup>4</sup> Hi Benaiah e u-ungngan Jehoiadah hu ap-apuddan emin ni sindalu.

Di Sadok nan Abiathar hu padi.

<sup>5</sup> Hi Asariah e u-ungngan Nathan hu ap-apuddan governor.

Hi Sabud e u-ungngan Nathan hu padin konsihal nan hi Solomon e patul.

<sup>6</sup> Hi Ahishar hu kamenang-ang idan bega-en di baley ni patul.

Hi Adoniram e u-ungngan Abdah hu kamenang-ang-ang idan nepillit ni mangngunnu.

<sup>7</sup> Wada pay hu hampulut dewwan pinutuk Solomon ni manggovernor di Israel. Hi-gada hu ngenamung ni kennen di baley ni patul. Hakey ni bulan ni ya hakey ni hi-gada hu ngenamung ni mengidwat ni emin ni kennen di baley ni patul. <sup>8</sup> Huyyadda ngadan idan nunman ni hampulut dewwan governor niya ngadan idan bebley ni pan-ap-apuan da: hi Ben Hur hu governor di Epraim.

<sup>9</sup> Hi Ben Deker hu governor idad bebley e Makas, Saalbim, Bet Semes, Elon et ya Bet Haman.

<sup>10</sup> Hi Ben Heseb hu governor etan di dewwan bebley e Arubbot et yad Sokoh, et yad emin ni bebley di Heper.

<sup>11</sup> Hi Ben Abinadab e ahwatu hi Taphat e hakey ni u-ungngan Solomon ey governor di emin ni bebley di Dor.

<sup>12</sup> Hi Baanah e u-ungngan Ahilud hu governor di bebley di Taanak, et yad Megiddo et yad emin ni bebley di Bet Shan e neihnup di Sarethan e wadad south di Jesreel. Ya sakup ni pan-ap-apuan tu ey meippalpu di Bet Shan ingganah di Abel Meholah et yad Jokmeam.

<sup>13</sup> Hi Ben Geber hu governor di Ramot di Gilead et yaddad etan di ekka-kut ni bebley di Gilead e bebley ni helag Jair e helag Manasseh, et yaddad bebley di Argob di Bashan. Na-nem ni emin ida huyyan bebley ni linikweh diman ni sinuping dan eta-gey niya giniling hu eheb tu.

<sup>14</sup> Hi Ahinadab e u-ungngan Iddo hu governor idad bebley di Mahanaim.

<sup>15</sup> Hi Ahimaas e ahwan Basemat e u-ungngan Solomon hu governor di emin ni bebley di Naptali.

<sup>16</sup> Hi Baana e u-ungngan Hushai hu governor idan bebley di Asher anin ni Bealot.

<sup>17</sup> Hi Jehoshaphat e u-ungngan Paruah hu governor idan bebley di Issakar.

<sup>18</sup> Hi Simei e u-ungngan Ela hu governor idan bebley di Benjamin.

<sup>19</sup> Hi Geber e u-ungngan Uri hu governor idan bebley di Gilead e nan-ap-apuan lan Sihon e patul ni iAmor et hi Og e patul ni iBashan.

Ey wada pay hu pinutuk Solomon e patul ni hakey ni man-ap-apuddan emin ni bebley di Judah niyad Israel.

### *Ya kayyaggud ni nan-ap-apuan Solomon*

<sup>20</sup> Ya kedakkel ni tutu-ud Judah et yad Israel ey henin kedakkel ni palnah di gilig ni baybay. Dakel hu kennen da niya innumen da ey ida kamaman-an-anla. <sup>21</sup> Ya sinekup ni nan-ap-apuan Solomon ey emin hu bebley ni meippalpu di Wangwang e Euphrates ingganah di Pilistia et lumaw lad pappeg ni Egypt. Ida kamambeyyad emin ni hi-gatun buwis ey hi-gatu ap-apuda ingganah ni neteyyan tu.

<sup>22</sup> Ya mahapul Solomon ni kennen ni han-aggew di baley da ey hanggatut et neliman sakuh ni pinun alinah, telunggatut ni sakuh ni kennen e henin begah, <sup>23</sup> hampulun bakan daka ia-allain kennen da, hampulut dewwan bakan kameippatut, hanggatut ni kalneroh niya gelding, yadda makwah, yadda manuk, yadda gawgawa niyadda sisit.

<sup>24</sup> Nan-ap-apu hi Solomon di emin ni bebley di appit di kakelinnugin aggew, hedin wada itad Euphrates e Wangwang meippalpu di Tipsah ingganah di Gaza. Emin ida hu patul diman ni bebley ey hi-gatu daka u-unnuda. Ey kayyaggud pay hu kapekiddagyumiddan papatut di nangkeihnup ni bebley dadman. <sup>25</sup> Yan nan-ap-apuan Solomon ey melinggep ida tuud Israel et yad Judah et wada hakkeyey kamakaddinel di

nanha-adan tu. Meippalpuḍ Dan ingganah di Beersheba ey wada hakey ni familia ey wada baley tu niya pantenneman tu.

<sup>26</sup> Hi Solomon e patul ey wada hu na-pat ni libun pukkungnan ni kebayyun kamanguyud ni kalesah niya hampulut dewwan libun kebayyu tun kamei-ussal di gubat.

<sup>27</sup> Yadda etan hampulut dewwan governor ey nei-peng idad bulan ni mengillaw ni kennen ni mahapul di baley Solomon. Mahapul ni ang-angen da et eleg ida mangkulang di hipan kennen. <sup>28</sup> Da pay kaillaw hu daka pekkan ni kebayyun daka ussalad gubat et yadda etan edum ni kebayyun daka panggunnu.

#### *Ya kalinaing Solomon*

<sup>29</sup> Indawtan Apu Dios hi Solomon ni kamengippetngan laing, ya et-eteng ni kabaelan ni kapan-ewwat niya dakel ni inamta tu. <sup>30</sup> Nelalla-ing nem yadda kelaingan ni tutu-ud appit ni kasimmilin aggew niyad Egypt. <sup>31</sup> Hi-gatu kelalla-ingan ni emin ni tuu. Nelalla-ing nem di Ethan e helag Ezra, hi Heman et di Kalkol nan Darda e u-ungngaddan Mahol. Nandingngel hu ngadan Solomon di emin ni nanlinikweh ni bebley. <sup>32</sup> Intudek tu tellun libun kandan proverbs et ya hanlibu et liman a-appeh. <sup>33</sup> Inamta tu niya intuttuddu tu meippanggep ni kameitnem, henin keyew e sedar di Lebanon niya kandan hyssop ni kaumtemel di tuping, yadda meippanggep ni animal, sisit, et yadda mategud danum. <sup>34</sup> Nandingngel hu laing tud kebebbley, et humman hu, emin ida patul di kebebbley ey immitu-dak idan tuu dan an mandedngel ni hi-gatu.

## 5

#### *Ya nandaddanan Solomon ni nengapyaan tun Tempol*

<sup>1</sup> Hi Hiram e patul di Tyre ey nehammad hu nanggayuman da lan David. Dingngel tu e hi Solomon e u-ungngan David hu neihullul ni patul ey immitu-dak ni tutu-u tun an mekihummangan.

<sup>2</sup> Huyya hu intudek Solomon ni impalaw tun Hiram e kantuy <sup>3</sup> “Nanna-ud ni inamtam e gapuh ni nekigubagubatan ama e hi David di buhul tuddad bebley di nanlinikweh, ey endi inna-nu tun nengapyan Tempol ni pandeyyan tun AP-APU e Dios tu ingganah ni peapput APU Dios emin hu buhul tu. <sup>4</sup> Nem yan nunya ey impelinggep tuwak nan AP-APU e Dios ku, et endi law hu buhul ku eyad bebley ni nangkeihnup ni hi-gami. Endi hu kamannemnem ni mengubbat ni bebley mi. <sup>5</sup> Insapatah APU DIOS nan hi ama e hi David e kantuy ‘Yalli u-ungngam ni meihullul ni hi-gam ni mampatul hu memehwat ni tempol ni pandeyyan yan hi-gak.’ Et mukun yan nunya ey ninemnem kun behwatan humman ni Tempol.

<sup>6</sup> Et humman hu nakka ibbaga anhan hu baddang mu. Itu-dak mudda anhan hu tuum et ida manleneh ni mahapul kun keyew e sedar di Lebanon, tep inamtam e endi ngu hu nelaing ni tuuk ni manleleneh ni keyew ni henin kalinaing idan tuum. Peellik ida tuuk ni umbaddang ni hi-gada, niya beyyadak ida hu tuum hedin piga pinhed mu winu hipa pinhed mun ibbayad ku.”

<sup>7</sup> Et-eteng hu amleng Hiram ni nangngelan tun impaad Solomon idan intu-dak tu et kantuy “Medeyyaw hi AP-APU ni nunyan aggew tep indawtan tu hi David ni nekallaing ni u-ungnga tun nambalin ni patul ni bebley dan nandingngel.”

<sup>8</sup> Impalaw daman Hiram hu humang tun Solomon e kantuy “Inhel dan hi-gak hu muka ibbaga. Dammutun iddawtan dakan sedar et ya belbel ni mahapul mu. <sup>9</sup> Iddaddan idan tuuk humman idan keyew et idayyu dan melpud Lebanon ingganah etan di baybay, et handa ikeput di bangka et padelan dad baybay ey handa impadekal di bebley ni pinhed mu. Hedin inubad idan tuuk hu kaput, ngenamung ida law dama tuum ni mengiennamut. Ya ibbagak ni ebuḥ ni hi-gam e iddawt mu kennen ni mahapul idan tuuk.”

<sup>10</sup> Et idwat Hiram emin hu sedar et ya belbel ni mahapul Solomon. <sup>11</sup> Ya dama indawat Solomon ni bayad tun Hiram ey hanggatut ni libun sakuh ni wheat et ya hanggatut et hampulun libun galon ni nemahmah ni mansikan olibah ni katootoon ni kennen idan tuu tud baley da.

<sup>12</sup> Impeamnun APU DIOS hu insapatah tun iddawt tu laing nan Solomon. Kayyaggud ni peteg hu nanggayuman di Solomon nan Hiram ey nanhumangan ida e kayyaggud idallin ingganah.

<sup>13</sup> Entanni ey pinilit Solomon hu telumpulun libun tuud Israel ni manggunnu, <sup>14</sup> et putuken tu hi Adoniram ni menang-ang ni hi-gada. Impantelu tuddan ginenedwa et hambulan ni hampulun libu hu umlaw di Lebanon ni an manggunnu, niya dewwan bulan hu panggunnuan dad baballey da. Hedin negibbuḥ hu hambulan, neihullul mewan hu hakey ni grupuh. Nanhinhinullul ida humman ni tellun grupuh. <sup>15</sup> Wada

mewan hu newalun libun tuun impanggunnun Solomon ni mampehhek ni batud duntug niya nepitun libun tuun memehhan ni pinehek da. <sup>16</sup> Wadadda dama hu neputuk ni tellun libu et telunggatut ni menang-ang niya mengituttuddun pehding idan kamampanggunnu. <sup>17</sup> Inu-unnud idan kamampehhek ni batu hu inhel Solomon et pumehek idan mei-ussal di pengibbehwatan ni Tempol. <sup>18</sup> Yadda tuun Solomon, yadda tuun Hiram, niyadda tuun nalpud Gebal hu nengidaddan idan batu niyadda keyew ni mei-usal di pengapyaan dan Tempol.

## 6

### *Binehwat Solomon hu Tempol*

<sup>1</sup> Yan meikkadwan bulan ni meikka-pat ni toon e kandan Sib e yan nunman ey epat ni gatut et newalun toon law nelabah neipalpu eman ni neni-yanan idan helag Israel ni Egypt ey inlapun Solomon ni behwatan etan Tempol APU DIOS.

<sup>2</sup> Ya etan Tempol ey nahyam ni piyeh hu kadinukkey tu, telumpulun piyeh hu kalinakkeb tu, ey na-pat et liman piyeh hu kasina-gey tu. <sup>3</sup> Ya etan balkon ey hampulut liman piyeh hu kadinukkey tu, niya telumpulun piyeh hu kalinakkeb tu. <sup>4</sup> Ya dingding ni Tempol ey wada habhabyen tun mehehhekkang di appit ni bawang tu niya nahnahkit di appit ni dallin. <sup>5</sup> Hedin yadda etan nambina-hil ni keb-al niyad awwidan ni Tempol ey neidagsi hu tellun gladuh ni baley e hedin ya kasina-gey ni hakey ni gladuh man pitu et kagedwah ni piyeh. <sup>6</sup> Yadda etan kuwaltuh di nengin-ehpen ey pitut kagedwah ni piyeh hu kalinakkeb tu, ey yadda etan kuwaltuh di neigawwan gladuh, ey heyam ni piyeh hu kalina-keb tu, ey ya etan meikkatun gladuh ey hampulut kagedwah ni piyeh hu kalina-keb tu. Ma-nu kedit hanniman, ey tep meing-ingpih hu dingding ni nengin-ahpat ni gladuh nem ya dingding ni nengin-ehpen, et dammutun meitta-pew hu dinengal di dingding ni nengin-ehpen ni kuwaltuh ni nengiha-adan dan kandan girder.

<sup>7</sup> Hedin yadda etan batun neusal di Tempol man inyayyaggud da dedan ni pinehek et endi hu hipan kamedngel ni tenul ni massilyu, ya wahay winu edum ni alumintan gumeke ni nengikapyaan da Tempol.

<sup>8</sup> Ya heggeppan etan di nemangulun gladuh ni neihuup di Tempol ey yad appit di south e wada hu agdan ni mampellaw di meikkadwa niyad meikkatun gladuh. <sup>9</sup> Ingkapyan Solomon hu bubidah ni Tempol e inusal tu sedar ni tabla et megibbuh etan Tempol. <sup>10</sup> Inusal tu pay hu sedar ni nengihuup etan ni tellun gladuh di Tempol e pitut kagedwah ni piyeh hu kasina-gey ni hakey ni gladuh.

<sup>11</sup> Immehel hi APU DIOS et kantun Solomon ey <sup>12</sup> "Hedin u-unnudem ni emin hu tugun niya olden ku man peamnuh ni hi-gam hu insapatah ku lan amam e hi David. <sup>13</sup> Mekihha-addak idan tutu-uk e helag Israel eyad Tempol ni muka pangkapyaa, niya eggak ida iwwalleng."

<sup>14</sup> Hi Solomon ey ginibbuh tu law ni kinapya etan Tempol.

### *Ya mipanggep ni bawang ni Tempol*

<sup>15</sup> Ya neikapyan dingding ni bawang ni Tempol neipalpu det-al ingganah di bubidah ey sedar ni tabla niya belbel hu neikapyad det-al. <sup>16</sup> Ey ya sedar ni tabla hu neikapyad dingding ni Nekassantuh ni Kuwaltuh APU DIOS meipalpu det-al ingganah di bubidah. Humman ni Kuwaltuh ey wadad hudek ni Tempol niya telumpulun piyeh hu kadinukkey tu. <sup>17</sup> Wada melakkeb ni kuwaltuh di hinanggan nunman ni Kuwaltuh e na-nem ni piyeh hu kadinukkey tu. <sup>18</sup> Emin hu bawang ni Tempol ey nei-dah ni neidingding hu sedar ni keyew e nepaotan ni heni kalibahha niya habung. Et endin hekey hu kameang-ang ni batun neidingding.

<sup>19</sup> Ya etan Kaban APU DIOS ey neiha-ad etan di Nekassantuh ni Kuwaltuh di hudek ni Tempol. <sup>20</sup> Ya kadinukkey nunman ni Nekassantuh ni Kuwaltuh ey telumpulun piyeh, ey telumpulun piyeh dama hu kalina-keb tu niya kasina-gey tu. Netakapan emin dingding tun nemahmah ni balituk anin ya det-al tu niya bubidah tu. Ey anin etan ni kapan-appisi et nedinding ni sedar e netakapan ni balituk. <sup>21</sup> Emin hu bawang ni Tempol ey netakapan ni balituk. Ey neiballabag hu kadenah ni balituk etan di kahehgepid neihudek ni kuwaltu. Humman ni kuwaltuh ey netakapan daman nemahmah ni balituk. <sup>22</sup> Et emin hu bawang ni Tempol, anin etan kapan-appisi etan di Nekassantuh ni Kuwaltuh APU DIOS, ey netakapan ni nemahmah ni balituk.

<sup>23</sup> Wada dewwan anghel ni pinaot dan keyew ni olibah ni inha-ad da etan di Nekassantuh ni Kuwaltuh APU DIOS e ya kasin-gey da ey hampulun liman piyeh. <sup>24-26</sup> Neka-inggeh hu kainetteng da niya impengapya dan nunman ni dewwan pinaot. Handedwa hu payak da e pitut kagedwah ni piyeh hu kadinukkey da. Ya kadinukkey ni payak da meipalpu utduk ni hakey ni payak ingganah di utduk mewan ni hakey ni

payak ey hampulut liman piyeh. <sup>27</sup> Nandagsi dadda etan di Nekassantuh ni Kuwaltuh APU DIOS. Ya etan dewwan payak dan nebekyag ey nantumuk idad gawwan etan ni kuwaltuh. Ya etan dewwa mewan ni payak da ey dimmateng idad nambina-hil di dingding. <sup>28</sup> Humman idan anghel ni pinaot ey netakapan ni balituk. <sup>29</sup> Ey neipaot di dingding ni nunman ni dewwan kuwaltuh hu heniddan nunman ni anghel, ya palmah niya habung.

<sup>30</sup> Hedin yadda det-al man netakapan ni balituk.

<sup>31</sup> Yad heggeppan di Nekassantuh ni Kuwaltuh APU DIOS ey ingkapyan Solomon hu dewwan lekbin nekapyan keyew ni olibah. Ya etan nangged idan nunman ni lekbi ey beken ni kuwadladuh. <sup>32</sup> Neal-alkusan ida humman ni pinaot ni anghel, palmah et ya habung. Humman idan pinaot ey netakapan ni balituk. <sup>33</sup> Henin etan ni pamedingan ni habyen ni Tempol e keyew ni olibah hu ingkapy tu. <sup>34</sup> Ya etan dewwan lekbin nunman ni habyen ey belbel ey kamesiklup <sup>35</sup> e neal-alkusan idan neipaot ni anghel, ya palmah niya habung ey netakapan ni balituk.

<sup>36</sup> Yad hinanggan Tempol ey wada kinapya tun dallin ey nedingding humman ni tellun nanggaga-tun ni nepahek ni batu ni han neta-pewan ni keyew ni sedar.

<sup>37</sup> Nekapya etan pengibbehwatan dan Tempol eman ni meikkadwan bulan ni kandan Sib e yan nunman hu meikka-pat ni toon ni nampatulan Solomon. <sup>38</sup> Ey yan eman ni meikkewwalun bulan e humman hu kandan Bul, e yan nunman hu meikkahampulu et hakey ni toon ni nampatulan Solomon ey nekaggibbuh etan Tempol e neka-u-unnud tu hu planuh. Hi Solomon ey ginibbuh tun binehwat huayan Tempol ni pitun toon.

## 7

### *Ya etan palasyoh Solomon*

<sup>1</sup> Nengapya dama hi Solomon ni palasyoh ni panha-adan tu e limmaw hu hampulu et tellun toon et han megibbuh. <sup>2-3</sup> Nginedanan tu humman ni baley tun Muyung e Lebanon. Hanggatut et neliman piyeh hu kadinukkey tu, nepitut liman piyeh hu kalinakkeb tu, niya na-pat et liman piyeh hu kasina-gey tu. Tellun linyah hu neta-gey ni tukud tu ey hampulut liman tukud di hakey ni linyah. Huyya idan nelinyah ni tukud hu neita-pewan idan wanan ni sedar. Nebubidahan ni sedar ingganah etan di netukudan ni kuwaltuh ni da kapengittelluin ngunut. <sup>4</sup> Ya etan di nambina-hil ni dingding ey wada hu hantetelun nantutu-nud ni habhabyen. <sup>5</sup> Ey humman idan nantutu-nud ni habhabyen di nambina-hil ey nanhinnanggadda. Nandinnukkey ida humman ni habhabyen anin etan ni habyen.

<sup>6</sup> Ya etan Kuwaltuh ni Dakel Tukud ey nepitut liman piyeh hu kadinukkey tu niya napat et liman piyeh hu kalinakkeb tu. Wada balkon tun neatapan niya netukutukudan.

<sup>7</sup> Ya etan Kuwaltuh ni Yuddunggan ni Patul, e ya hakey ni ngadan tu ey Kuwaltuh ni Panhumalyaan ey humman hu kapengippenuhin kasuh. Nedingding humman ni sedar meippalpu det-al ingganah di atep tu.

<sup>8</sup> Hanniman dama etan kapanha-adin Solomon e wada etan di dingkuggan ni Kuwaltuh ni Panhuwatan. Ey hanniman dama nengapya dan kapanha-adin etan ni ahwatun u-unggan patul di Egypt.

<sup>9</sup> Emin ida huuya ey nekapyad kayyaggud niya nenginan batu neipalpu etan di nengituunan dan baley ingganah idad hableyan da. Inna-ud dan yinayyaggud etan ida batud ngal-an da e inusal da gelgel ma-lat man-iingngeh. <sup>10</sup> Yadda etan etta-teng ni batun ingku-ku dan nengituunan daddan nunman ni kinapya dan baley ey hampulut dewwan piyeh hu kadinukkey ni edum niya hampulut liman piyeh hu edum. <sup>11</sup> Anin idan edum ni batun intena-pew da, niyadda wanan ni sedar ey nina-ud dan lingkud. <sup>12</sup> Ya nengapyatun dallin ni palasyo ey nedingding ni tellun nanggaga-tun ni nepahek ni batu ni han neta-pewan ni keyew ni sedar. Hanniman dama hu nengapya dan dallin ni Tempol APU DIOS.

### *Ya ngunun Huram*

<sup>13</sup> Entanni ey impaeyag Solomon e patul hi Huram <sup>13</sup> di Tyre e nelaing ni meippanggep ni ngunun giniling. <sup>14</sup> Ey simbal tu e hi-gatu mengingngunun emin ni giniling. Hi ametu la ey nelaing daman ngunun meipanggep ni giniling ey hi inetu e balu ey helag Naptali.

### *Ya etan dewwan giniling ni tukud*

<sup>15</sup> Kinapyan Huram hu dewwan giniling ni tukud ni neikapyad hinanggan habyen ni Tempol. Dewampulut pitun piyeh hu kasina-gey da niya hampulut walun piyeh hu kainetteng da. <sup>16</sup> Ey nengapyan dewwan giniling ni neihuup di ta-pew idan nunman

ni tukud e hampipitu et gedwan piyeh hu kasina-gey da. <sup>17</sup> Huyyaddan neihuup di ta-pew idan nunman ni tukud ey inal-alkusan tuddan kadenah ni giniling <sup>18</sup> niya dewwan kadenah ni netu-tu-nud ni, henin lameh ni pomegranate.

<sup>19</sup> Humman ni kinapya tun giniling ni neiha-ad di ta-pew idan tukud ey heni habung e lily niya enem ni piyeh kasina-gey tu. <sup>20</sup> Humman idan netullikeng ey neal-alkusan ni kadenah niya dewwampulan gatut ni giniling ni henin pomegranate e netu-tu-nud di nanlinikweh nunman idan tukud. <sup>21</sup> Impeehngeng tudda humman ni dewwan tukud di hinanggan habyen ni Tempol. Ya etan neikapyad appit ni south ey nengadanan ni Jakhin, ey ya etan neikapyad appit ni north ey nengadanan ni Boaz. <sup>22</sup> Humman idan giniling ni nekapyan henin lilih ey neiha-ad di ta-pew nunman idan tukud. Negibbuh law ngunun Huram meippanggep idan tukud.

*Ya etan giniling ni tangkih*

<sup>23</sup> Nengapya mewan hi Huram ni netullikeng ni et-eteng ni giniling ni tangkih e pitu et kagedwah ni piyeh hu kasina-gey tu, hampulut liman piyeh hu kalinakkeb tu, niya na-pat et liman piyeh hu nanlinikweh ni bibil tu. <sup>24</sup> Neal-alkusan hu nanlinikweh di daul ni bibil nunman ni tangkih ni dewwan linyah ni nantutu-nud ni giniling e heni kalibahha e neina-ud ni neikapyad tangkih.

<sup>25</sup> Neituun huyyan et-eteng ni tangkih di beneg idan hampulut dewwan giniling ni bulug ni baka e hantetlu ey hin-appil nengihangaan da e indekug dan emin di gawetu. <sup>26</sup> Humman ni tangkih ey tellun pulgadah hu hedel tu. Ya bibil tu ey henin basuh e nelugsi e heni etan habung ni lily. Nehuluk ni hampulun libun galon hu tuka ellan danum.

*Yadda giniling ni kaliton*

<sup>27</sup> Nengapya hi Huram ni hampulun giniling ni kaliton e han-e-nem ni piyeh kadinukkey, kainetteng tu niya epat et gedwan piyeh hu kasina-gey tu. <sup>28-29</sup> Yad dingding idan nunman ni kaliton ey neipaot hu heni layon, ya lakkitun baka niyadda heni anghel. Ey yad ta-pew niyad daul idan nunman ni neipaot ni layon, niya bulug ni baka ey neipaot hu neappid ni al-alkus tu. <sup>30</sup> Emin ida humman ni kaliton ey han-e-pat hu heli da e nekapyan daman giniling ey nekapyan giniling etan nangnged ni kapansilleniddan etan ni heli. Ya etan di epat ni dugun nunman idan kaliton ey wada nekapyan giniling ni pengippettukan ni besen. Humman ni pengippettukan ni besen ey neipaot hu neappid ni al-alkus tu. <sup>31</sup> Ey neigawwadman hu netullikeng ni pengippettukan, e humman hu mengnged ni besen. Hampulut walun pulgadah hu kasina-gey tu meippalpuh sigil ni kaliton, niya pitun pulgadah hu dallem tu. Ey nepaotan ni al-alkus tu hu nanlinikweh. <sup>32</sup> Yadda heli tu ey dewwampulut liman pulgadah hu kasina-gey da e neihuup idad daul ni dingding niyadda etan nangnged ni pansillenan ni heli, ey neikahakey kapyatu etan di kaliton. <sup>33</sup> Humman idan heli ey henin helin kalesah ni kameussal di gubat. Ey emin hu nekapyan nunman ni idan helin kaliton ey giniling.

<sup>34</sup> Anin ida etan ni epat ni dugun neiha-ad ey neina-ud hu kapyatu etan di kaliton. <sup>35</sup> Ya hedel etan idan neilibed idad kaliton ey neina-ud hu kapyatu ey heyam ni pulgadah. <sup>36</sup> Neipaot idadman hu heni anghel, yadda layon, niyadda palmah. Ey neipaot hu neappid ni al-alkus di nanlinikweh. <sup>37</sup> Hanneya hu nengapya daddan kaliton e naniinggeh hu keetteng da niya kapkapy da.

<sup>38</sup> Nengapya hi Huram ni hampulun besen ni nei-peng di kaliton. Ya hakey ni besen ey enem ni piyeh hu kainetteng tu ey ya kadinakkel ni meihha-ad ni danum ey nehuluk ni dewwan gatut ni galon. <sup>39</sup> Inha-ad tu hu liman kaliton di appit ni south ni Tempol, et ya limad appit ni north. Inha-ad tu etan et-eteng ni tangkih di appit ni southeast ni Tempol.

*Ya nengiha-adan daddan meussal di Tempol*

<sup>40-45</sup> Nengapya pay hi Huram idan banga, yadda pala et yadda besen et gibbuhen tu law emin hu impekapan Solomon ni hi-gatun meussal di Tempol APU DIOS. Yaddahuy hu kinapya tu: dewwan tukud, dewwan heni mahukung ni duyun neikapya etan di ta-pew idan tukud, yadda al-alkus ni kadenah ni neiha-ad di ta-pew idan tukud, epat ni gatut ni heni lameh ni pomegranate ni nekapyan giniling ni neihabley idadman ni kadenah di ta-pew ni dewwan tukud, dewwan netu-tu-nud ni pomegranates hu neihabley di hakey ni kadena di hakey ni tukud, yadda hampulun kaliton ni pengippettukan idan hampulun besen ya etan et-eteng ni tangkih niyadda etan hampulut dewwan heni bulug ni bakan neipetukan tu. Emin ida humman anin idan banga, yadda pala, niyadda besen ey nekapyad giniling.

Humman idan mahapul di Tempol ey impekapyan Solomon nan Huram. <sup>46</sup> Et ya nengapyaan tuddan nunman ey yad kapampandayin wadad nambattanan ni Sukkot et ya Sarethan di Nedeklan e Jordan. <sup>47</sup> Eleg pakiloh nan Solomon ida huyyan neusal ni giniling tep daket ni peteg et endi nengamtan bel-at tu.

<sup>48</sup> Yadda etan meussal di Tempol ni nekapyad balituk ni impekapyan Solomon ey: ya etan altar, ya etan tebol ni pengihha-adan ni sinapay ni kamei-appit nan Apu Dios, <sup>49</sup> yadda etan hampulun pengippettukan ni kengkeh ni neiha-ad di hinanggan Nekassantuh ni Kuwaltuh e limad appit ni south ey lima damad appit ni north, yadda habung ni al-alkus, yadda kengkeh, yadda ipit ni ngalab, <sup>50</sup> yadda basuh, yadda pan-e-dep ni kengkeh, yadda besen, yadda pengiggihheban ni insensoh, yadda penellukduk ni ngalab, yadda bitaglah ni lekbin Nekassantuh ni Kuwaltuh niyadda etan bitaglah ni lekbin Tempol. Emin ida humman ey nekapyad balituk.

<sup>51</sup> Negibbu ni emin hu impangunun Solomon di Tempol et iha-ad tun emin ida balituk, yadda silber et yadda edum ni in-appit ametu e hi David nan APU DIOS di bodegah ni Tempol.

## 8

*Ya nengilawwan dan Kaban APU DIOS di Tempol*  
(2 Chronicles 5:2-6:2)

<sup>1</sup> Ineyagan Solomon e patul emin ida etan kamengipappangngulun helag Israel niyadda familyah da et maemung idad Jerusalem, et da alen hu Kaban APU DIOS di Zion e Bebley David et ilaw dad Tempol. <sup>2</sup> Yan nunman ni meikkeppitun bulan e kandan bulan ni Ethanim e yan nunman hu Piyestah ni Kampu hu neamungan da. <sup>3</sup> Dimmateng idan emin hu kamengipappangngulun helag Israel et iattang idan padi etan Kaban APU DIOS <sup>4</sup> et ilaw dad Tempol. Anin etan Tabernacle et yadda ngunut ni meussal diman ey inlaw idan padi niyadda helag Levi diman. <sup>5</sup> Neamung di Solomon niyadda helag Israel di hinangga etan ni Kaban APU DIOS, et man-appit idan daket ni kalneroh niyadda bakan eleg mebillang.

<sup>6</sup> Entanni ey inhegep idan padi humman ni Kaban di Tempol, et ilaw da etan di Nekassantuh ni Kuwaltuh APU DIOS et iha-ad dad daul idan nepaot ni nepayakan ni anghel. <sup>7</sup> Yadda etan nebekyag ni payak idan nunman ni anghel, ey hinephepan da etan Kaban et yadda keyew ni nengattang da. <sup>8</sup> Kameang-ang ni ebuh utduk idan nunman ni keyew hedin wada itad hinanggan Nekassantuh ni Kuwaltuh APU DIOS. Ingganah nunya ey immen ida etan keyew ni impan-attang da. <sup>9</sup> Ya neiha-ad etan di Kaban APU DIOS ey ebuh etan dewwan nedampillag ni batun inha-ad Moses eman ni wadaddad Duntug e Sinai. Yadman hu nekitbalan APU DIOS idan helag Israel eman ni nalpuan dad Egypt.

<sup>10</sup> Entanniy immehep ida etan padin nalpu etan di Nekassantuh ni Kuwaltuh Apu Dios, ey pinhakkeyey napnu hu Tempol ni kulput <sup>11</sup> ni kaumhili tep wadadman hi APU DIOS, et endi law inna-nuddan padin mengittulluy ni ngunu da.

<sup>12</sup> Et mandasal hi Solomon e kantuy "APU DIOS, kammuy manha-ad kad kulput, <sup>13</sup> nem yan nunya ey nengapya-ak ni kayyaggud ni peteg ni panha-adam ni ingganah."

*Ya inhel Solomon idan tuu*  
(2 Chronicles 6:3-11)

<sup>14</sup> Nanligguh hi Solomon et ihangga tuddan nunman ni neamung ni tuu et bendisyonan tudda. <sup>15</sup> Kantuy "Kamedeyyah hi AP-APU e Dios tayun helag Israel. Tep impeamnu tu hu insapatah tu lan ama e hi David, <sup>16</sup> e kantuy 'Neipalpu eman ni impa-kal kudda tuuk di Egypt ingganah nunya ey endi nak pinilin bebley eyad Israel ni pemehwatan ni Tempol ni pandeyyawan dan hi-gak. Pinili daka e David ni man-ap-apuddan tuuk e helag Israel.'"

<sup>17</sup> Intuluy Solomon et kantuy "Implanuh nan ama e hi David ni memehwat ni Tempol ni pandeyyawan nan AP-APU e Dios tayun helag Israel, <sup>18</sup> nem kan APU DIOS ni hi-gatuy 'Kayyaggud huttan ni ninemnem mun pinhed mun memehwat ni Tempol ni pandeyyawan yun hi-gak, <sup>19</sup> nem beken ni hi-gam hu memehwat. Ya hakey aliddan u-unggam hu memehwat ni Tempol ku.'

<sup>20</sup> Yan nunya ey impeamnun APU DIOS humman ni insapatah tu, tep adyah e neihullullak nan aman mampatul eyad Israel, et ay deh e binehwat ku eya Tempol ni pandeyyawan ni hi-gatu e Dios tayun helag Israel. <sup>21</sup> Ey wada ingkapyak eyad Tempol ni pengihha-adan ni Kaban APU DIOS e neiha-adan etan ni batun nedampillag ni neitudekan ni nekitbalan di APU DIOS ida lan ammed tayun nalpuan dad Egypt."

*Ya dasal Solomon*

<sup>22</sup> Entanni ey an immehneng hi Solomon di hinangga etan ni altar et ita-gey tu ngamay tu e han-ang-ang emin ni tuu <sup>23</sup> et mandasal e kantuy "AP-APU e Dios min helag Israel, endi edum ni Dios di kabunyan ey puyek ni henin hi-gam. Impannaneng mu hu eleg melumman ni impemihed muddan tuum ni kamekangngu-unnud ni hi-gam niya kamengippehebballin mengippahding ni pinhed mu, niya muka peamnu hu nekitbalam ni hi-gada. <sup>24</sup> Impahding mu tu-wangu ni inhel mu lan ama e hi David e bega-en mu et deh e impeamnum nunyan emin. <sup>25</sup> AP-APU e Dios min helag Israel, pannananeng mu anhan etan hakey mewan ni insapatah mun ama e kammuy wadan ingganah hu hakey ni helag tun mampatul di deya Israel, hedin paka-u-unnuden da hu tugun mu henin impahding tu. <sup>26</sup> Ey yan nunya AP-APU e Dios min helag Israel, peamnum anhan emin hu insapatah mun ama e hi David e bega-en mu.

<sup>27</sup> Nem kaw makulug, e Apu Dios ni manha-ad ka eyad puyek? Mahkang ni peteg hu kabunyan, nem eleg um-ustuh ni panha-adam, et nema-ma ngun ek-eket ni peteg eya Tempol ni binehwt ku. <sup>28</sup> AP-APU e Dios ku, dengel mu anhan eya dasal kun bega-en mun kamampehemhemmek ni hi-gam. Em, dengel mu ahan eya dasal kun nunya. <sup>29</sup> Ipaptek mu anhan ni kawwalwal niyan hileng eya Tempol mun pinilim ni pandeyyawan ni hi-gam. Ey dengel mu anhan hu dasal ku hedin inhanggak di appit eyan Tempol. <sup>30</sup> Em, dengel mu anhan hu dasal midan eyan tuum ditan kabunyan ni kad-am hedin kami kamandal e inhangga mid appit eyan Tempol et liwwanem hu liwat mi.

<sup>31</sup> Hedin wada hakey ni tuun kandan nengipahding ni lawah di edum tu, et nei-li eyad altar eyad Tempol et issapatah tu e eleg mambahul, <sup>32</sup> ey dengel mu anhan e APU DIOS di kad-am mud kabunyan hu dasal tu, et ngenamung kan menuwet idan bega-en mu. Kastigum hu mambahul, tep humman hu lebbeng tu niya itudum etan tuun endi bahul tu.

<sup>33</sup> Hedin ya liwat ida eyan tuum ni helag Israel hu umhulun et apputen idan buhul dad gubat, nem entanni ey mantuttuyyudda et heppulen hu baddang mu, et um-alidda eyad Tempol mun mampehemhemmek di dasal da ma-lat liwwanem hu liwat da, ey <sup>34</sup> dengel mu anhan hu dasal dad kad-am mud kabunyan. Liwwan mu anhan hu liwat idan nunyan tuum et ibangngad muddad bebley ni indawat mun aammed da lan nunman.

<sup>35</sup> Hedin nanliwat ida mewan ni hi-gam et kastiguen mudda e eleg mu paeli udan, nem entanni ey mantuttuyyu ida et issiked dan manliwwat, et mandasal idan hi-gam e ihhangga dad appit eyad Tempol mu, <sup>36</sup> dengel mu anhan dasal dadan kad-am mud kabunyan, et liwwanem anhan hu liwat eyaddan bega-en mun helag Israel, et ittuttudduan muddan mengippahding ni neiptek ni keittu-uan, niya paelim hu udan eyad bebley ni indawat mun pambebleyan dan ingganah.

<sup>37</sup> Hedin wada bisil eyad bebley winu pistin tuu winu degeh ni intanem winu dudun, winu hedin ginubat ni buhul da eyadda tuum, winu wada immalin hipan degeh ni hi-gada niya hipa humman ni umbabhah, <sup>38</sup> ey dengel mu anhan hu dasal da. Hedin mewan wadadda eyad tuum ni helag Israel hu nemahhig lehan da, et mandasal ida e iddengdeng da ngamay dad appit eyan Tempol, <sup>39</sup> ey dengel mu anhan dasal dad kad-am di kabunyan, liwwan mu liwat da niya baddangim ida. Hi-gam ni ebuh nengamtan nemnem ni tuu, et humman hu, hi-gam hu ngenamung ni mengippahding ni hipan pehding mun hanhakkey eyaddan tuum, <sup>40</sup> ma-lat mengu-unnud idan ingganah ni hi-gam ni panha-adan da eyad bebley ni pambebleyan dan indawat mudda lan aammed mi.

<sup>41</sup> Hedin wada edum ni tuun nalpud edawwin bebley ni um-alin menaydayaw ni hi-gam, <sup>42</sup> tep nanna-ud ni dedngelen da hu meippanggep ni nandingngel ni ngadan mu niyadda dake ni miracle ni kamengippetngan impahding muddan tuum, ey hedin mandasal idan ihhangga da eyad Tempol mu, <sup>43</sup> ey dengel mu dasal dad kad-am mud kabunyan et ipahding mu hu daka ibbagan hi-gam, ma-lat amtaen dakan emin ni tuu eyad puyek, ey u-unnuden dakan henidda eyan tuum e helag Israel, ey ma-lat amtaen da e huyyan Tempol ni binehwt ku ey yadya penaydayawan ni hi-gam.

<sup>44</sup> Hedin minandal mudda tuum ni an mekiggubbat idan buhul da et mandasal idan hi-gam, anin ni attu kad-an da, e ihhangga dad appit eyan bebley ni pinilim niyad Tempol ni kinapyak, <sup>45</sup> ey dengel mu anhan di ditan kad-am mud kabunyan hu dasal da et pengapput mudda.

<sup>46</sup> Hedin manliwwat ida eya tuum ni hi-gam, tep emin hu tuu ey kamanliwwat, et gapuh ni burget mu ey peapput muddan buhul da et alen daddan balud et ilaw daddad edum ni bebley di neidawwi winu neihnup, <sup>47</sup> nem hedin et anhan mantuttuyyudda niya mampehemhemmek idan hi-gam di bebley ni neilawwan da, et mandasal



idan hi-gam ey ebbuluten da e nanliwat ida et ippahding da lawah, ey dengel mu anhan hu dasal da, e APU DIOS. <sup>48</sup> Ey hedini yan kaweda dad bebley ni buhul da ey ibbangngad dan mekangngu-unnud ni hi-gam, et mandasal idan ihhangga dad appit eyan bebley ni indawat mudda lan aammed mi, niya eyad Jerusalem ni pinilim niya eyad Tempol mun kinapyak, <sup>49</sup> ey dengel mu anhan hu dasal dad kad-am mud kabunyan et baddangan mudda. <sup>50</sup> Liwwan mu anhan emin hu liwat idan tuum niya liwwan mu hu nangngehayan dan hi-gam, niya ang-ang mu ma-lat hemeken idan buhul da, <sup>51</sup> tep tuum ida ngu dedan, tep inewit muddad Egypt e bebley ni heni apuy ni kapan-e-dihin gumek.

<sup>52</sup> APU DIOS e Eta-gey ni peteg peang-ang mu anhan hu binabbal mu eyaddan tuum e helag Israel, anin ni hi-gak e patul da, niya dengel mu anhan hu dasal mi ni pambeggaan min baddang ni hi-gam. <sup>53</sup> Hi-gami pinilim ni tuum di emin ni katutuud kebebbley. APU DIOS e Eta-gey ni peteg, huttan ida impakulug mu dedan lan bega-en mu e hi Moses ni nangkalam idan aammed mid Egypt.”

#### *Ya bendisyon Solomon*

<sup>54</sup> Ginibbuh nan Solomon ni nandasal nan APU DIOS di nandukkunan tud hinanggan pan-appitan ey immehneng et ita-gey tu ngamay tu, <sup>55</sup> et eleten tu hu pambendisyon tuddan tutu-u e kantuy <sup>56-57</sup> “Ya AP-APU e Dios tayu hu medeyyaw e nengidwat ni linggep idan tuu tu e humman dedan la inhel tun nunman. Impahding tun emin hu inhenammad tulani inhel nan hi Moses e bega-en tu. Eleg daitu-et anhan kuma iwwalleng ni hi-gatu nem baddangan daitu henin nemaddangan tudda lan aammed tayu. <sup>58</sup> Ey pambalin daitu et anhan kuman mekangngu-unnud ni hi-gatu, ma-lat ipahding tayun emin hu olden tu niya tugun tun indawat tudda lan aammed tayu. <sup>59</sup> Niya nenememen kuma et anhan nan APU DIOS e Dios tayun ingganah huyyaddan dasal tayu et yadda etan imbagak ni hi-gatu. Kabbabbal et anhan kuman ingganah ni hi-gayun tutu-un helag Israel, et anin ni hi-gak e patul yu et idwat tun kewa-wa-wa hu mahapul tayu. <sup>60</sup> Ma-lat wada inna-nu tun pengamtaan ni emin ni katutuud kebebbley eyad puyek e hi-gatu e APU DIOS e Dios tayu ey hi-gatun ebuh hu Dios, endi edum. <sup>61</sup> Ey ya kayyaggud ey hi-gatsun tutu-u tu ey mannananeng hu pengullug tayu, niya mandinnel itsun APU DIOS e Dios tayu ey u-unnuden tayun emin hu olden tu, niya tugun tu heni eyan tayu kapehpehding nunya.”

#### *Ya neieng-engan etan ni Tempol nan Apu Dios*

<sup>62</sup> Negibbuh et man-appit hi Solomon niyaddan emin hu tuu nan APU DIOS. <sup>63</sup> Ya in-appit Solomon ni pekiddagyuman nan APU DIOS, ey dewampulut dewwan libun baka, ya hanggatut et dewampulun libun kalneroh niya gelding. Huyya impahding Solomon et yadda edum tun helag Israel ni nengiang-eng etan ni Tempol APU DIOS.

<sup>64</sup> Yan nunman pay ni aggew ey in-eng-eng Solomon etan gawwan dallin ni hinanggan Tempol, et man-appit diman ni kagihheba, ya pagey, et yadda tabaddan animal ni kamei-appit ni pekiddagyuman. Mukun yadman nan-appitan tu ey tep dakel mei-appit et eleg un-ustuh etan di giniling ni altar di kad-an APU DIOS.

<sup>65</sup> Et man-am-amleng di Solomon niyaddan emin hu helag Israel ni nunman ni tsimpuh, tep impahding da hu Piyestah ni Kampu di hinanggan APU DIOS. Dakel ida hu tuun nangkulpud edawwin bebley meippalpud Lebo Hamat di north ingganah di kulukul di Egypt di appit ni south. Humman ni hamul da ey limmaw di hampulut epat ni aggew, tep pitu aggew ni nanhahamulan dan nengiang-eng dan Tempol, ey pitun aggew mewan hu nanhahamulan dan Piyestah ni Kampu. <sup>66</sup> Negibbuh humman ni piyestah et paenamut Solomon idan emin tuu. Binendisyonan da hi Solomon ey ida kaman-am-amleng ni immanemut, tep kayyaggud hu impahding APU DIOS nan David e bega-en tu, anin ni hi-gadan tuu tun helag Israel.

## 9

#### *Ya nampeang-angan mewan APU DIOS*

<sup>1</sup> Yan nengibbuh Solomon ni nengapyaan tun Tempol niya palasyoh tu niyaddan emin etan pinhed tun kapyae, <sup>2</sup> ey nampeang-ang mewan hi APU DIOS ni hi-gatu, e heni lan nampeang-angan tud Gibeon. <sup>3</sup> Kan APU DIOS ni hi-gatuy “Dingngel ku dasal mu. In-eng-eng ku eya Tempol ni kinapyam et yadya pandeyyawan yun ingganah ni hi-gak. Eddugak niya ippaptek kun ingganah.

<sup>4-5</sup> Ey hedini hi-gam, man ihhammad ku nan-ap-apuam hedini kayyaggud niya limpiyuh hu pengu-unnud mun hi-gak, henin impahding lan amam e hi David, ey hedini u-unnuden mun emin hu inhel kun pehding mu, anin idan tugun ku niya olden ku, ey

peamnuk hu insapatah kun nunman nan amam e kangkuy wadallin ingganah hu helag tun man-ap-apudya Israel.

<sup>6</sup> Nem hedin hi-gam winu helag mu ey ngenghayen yudda tugun ku niya olden kun indawat kun hi-gayu et deyyawen yu edum ni dios <sup>7</sup> ey e-kalen dakeyun tuuk e helag Israel eyad bebley ni indawat kun hi-gayu. Ey iwalleng ku eya Tempol ni in-eng-eng kun pandeyyawun yun hi-gak, ey emin hu tutu-ud kebebbley ey angebe-hel dakeyulli niya pippihulen dakeyu. <sup>8</sup> Ey anin ni kayyaggud ni peteg hu ang-ang eyan Tempol ni nunya et makabbabhah ali ma-lat emin idalli melebbah ey metngadda. Kandalliyy 'Kele na-mu hanneya hu impahding APU DIOS eyan bebley niya eya Tempol?' <sup>9</sup> Yalli ihhumang idan tuu ey kanday 'Neipahding huyya tep dineyaw da hu edum ni dios, niya inwalleng da hi APU DIOS e Dios dan nengihwang ida lan aammed dad Egypt. Et humman hu, impaelin APU DIOS ni hi-gada eya nemahhig ni ligat da.' "

*Ya nehammad ni nanhumngangan di Solomon nan Hiram*

<sup>10</sup> Dewampulun toon hu nelabah et han gibbuan Solomon hu palasyoh tu niya Tempol APU DIOS. <sup>11</sup> Ya etan patul di Tyre e hi Hiram hu nengidwat ni emin ni sedar, yadda belbel, yadda balituk ni mahapul Solomon. Ya indawat daman Solomon ni hi-gatu ey hampulut dewwan bebley di Galilee. <sup>12</sup> An inang-ang Hiram humman idan bebley ey eleg tu pinhed <sup>13</sup> et kantun Solomon ey "Hipadda huyyan bebley ni indawat mun hi-gak e agik? Tam endi silbida." Humman gaputun nginedanan Hiram humman ni bebley ni Kabul e ya keibbellinan tu ey 'Endi silbitu' et humman ngadan tu ingganah nunya. <sup>14</sup> Umlaw di liman libun kiloh ni balituk hu indawat Hiram nan Solomon.

*Ya edum ni impahding Solomon*

<sup>15</sup> Huyyadda impekapyan Solomon idan nepilit ni mangngunnu: Ya etan Tempol APU DIOS, ya palasyoh tu, ya Millo, ya etan batun tuping ni lulud ni Jerusalem et yadda bebley di Hasor, Megiddo et ya Geser. <sup>16</sup> Humman ni bebley e Geser ey sinekup lan patul di Egypt ni nengubatan tuddan bimbebley diman et apputen tudda. Pintey tudda hu nambebley diman et legaben tu humman ni bebley. Indawat tun regaloh humman ni bebley etan ni u-ungnga tun bii eman ni nan-ahwaan dan Solomon. <sup>17</sup> Inyayyaggud Solomon humman ni bebley et ya etan nengin-ehpen e Bet Horon ngadan tu, <sup>18</sup> ya Baalat, et ya Tamar etan di mamegan puyek. <sup>19</sup> Binehwa tudda bebley ni pambodegahan tuddan mahapul tu, yadda bebley ni pengihha-adan tuddan kebayyu tu niyadda kalesah tun meussal di gubat. Ey kinapya tu hu hipan pinhed tun kapyen di Jerusalem, yad Lebanon et yad emin di bebley ni nan-ap-apan tu.

<sup>20</sup> Wadadda tutu-un nannaneng di nambebleyan idan helag Israel e humman ida hu Amorite, Hittite, Perissite, Hibite niyadda Jebusite. <sup>21</sup> Huyyadda helag ni tuudman ni eleg pateyen idan helag Israel eman ni nalpuan dad Egypt. Pinilit idan Solomon ni impangngunu et ingganah nunya ey himbut ida. <sup>22</sup> Yadda helag Israel ey endi pinilit Solomon ni impangngunu tep impambalin tuddan sindalu, opisyal ni gubilmu, ap-apun sindalu, ap-apuddan sindalun mampangkalesah niya mangkebayyun sindalun mekiggubbat. <sup>23</sup> Pinilin Solomon hu liman gatut et neliman opisyal ni menang-ang idan nepilit ni mangngunnu.

<sup>24</sup> Yan nengialdanan Solomon etan ni ahwatun u-ungngan patul di Egypt di palasyoh ni kinapya tun panha-adan tu, e tu inewit di Bebley David, ey impekapy tu etan Millo.

<sup>25</sup> Impahding Solomon etan ida mekapyad Tempol e mampitlun hantoon hu panappitan ni kagihheba, man-appit ni pekiddagyuman nan APU DIOS, niya man-appit ni kagihheban bangbanglun insensoh etan di pan-appitan ni kinapya tu.

<sup>26</sup> Nengapya pay hi Solomon ni dakel ni bapor di Esion Geber e neihnpud di Elat di Edom etan di gilig ni Madlang ni Baybay. <sup>27</sup> Immitu-dak hi Hiram idan tuu tun impeingha da mangngunnud bapor, ma-lat baddangan da hu tuun Solomon. <sup>28</sup> Nambapor ida et lumaw idad Ophir, et yan nambangngadan da ey in-anemut da hu hampulut enem ni libun kiloh ni balituk, et idwat dan Solomon e patul.

## 10

*Ya inlian ni biin patul di Seba*

*(2 Chronicles 9:1-12)*

<sup>1</sup> Dingngel etan ni biin ap-apud Seba hu meippanggep nan Solomon e nandingngel ni patul niya meippanggep ni tuka pengu-unnudin APU DIOS, et umlin mematan hi-gatu hedin inna-nu penummang tuddan neligat ni pinhed tun mahmahan. <sup>2</sup> Dimmateng humman ni patul di Seba ey dakel hu ingkuyug tun bega-en tu, yadda kamel tun nangkalgan kameikkamdug di kennen, yadda nebalol ni batu niya dakel ni balituk.

Yan nanhumngangan dan Solomon ey minahmahan tun emin hu hipan immalid nemnem tu, <sup>3</sup> ey hinumang Solomon ni emin. Endi neligat ni hi-gatu. <sup>4</sup> Natngan peteg humman ni biin ap-apud Seba ni laing Solomon, niyan nenang-angan tun palasyoh ni kinapya tu. <sup>5-6</sup> Ey natnga mewan ni nenang-ang tuddan dakel ni peteg ni kennen ni kameiddaddan di baley tu, yadda kapanha-adiddan opisyal tu, ya kayyaggud ni kapehdng idan kamanggunnud palasyoh tu, yadda kamengippatek ni hamul, anin idan kayyaggud ni balwasi da, niyadda kagihheban tuka i-appit di Tempol APU DIOS, et kantud nemnem tuy 'Nakkayyang, endi numan kei-ingngehan idan nunyan inang-ang ku!' Ey kantun Solomon ey "Makulug hu dingngel ku meippanggep ni laing mu et yadda impahding mu! <sup>7</sup> Nem eggak ni kulugen ida humman ni dingngel ku ingganah immali-ak et ang-angen kun emin. Ya kakulugan tu ey kagedwah ni ebuh hu dingngel ku tep nelalla-ing ka ey kekkeddangyan ka nem ya inhel da. <sup>8</sup> Negahat ida tuum! Anin idan opisyal mun wadan ingganah di kad-an mu, tep daka deddedngela hu ehel ni nelaing ni tuu. <sup>9</sup> Medeyyaw hi APU DIOS e DIOS mu! Impeang-ang tu amleng tun hi-gam eman ni nemutukan tun hi-gam ni pampatul idan tutu-u tun helag Israel. Ey gapuh ni kamannananeng ni impeminhed tuddan helag Israel ey impambalin dakan patul ma-lat kayyaggud niya limpiyuh hu pan-ap-apum ni hi-gada."

<sup>10</sup> Indawat tun Solomon hu nehuluk ni epat ni libun kiloh ni balituk, ya dakel ni kameikkamdug di kennen niyadda nangkebalol ni batu. Endi edum ni an immidwat nan Solomon ni henin nunman ni kadinakkel ni kameikkamdug di kennen, ebuh humman ni biin ap-apud Seba.

<sup>11</sup> (Yan eman ni neng-lian idan bapor Hiram ni balituk ni nalpud Ophir, ey impeki-li tu dakel ni keyew e almug niyadda nangkebalol ni batu. <sup>12</sup> Ingkapyan Solomon humman idan keyew ni almug ni balundilya di Tempol niyad Palasyoh ey kinapya tu edum ni ayyuding niya gitalah ni ussalan dan man-a-appeh. Endi henin nunman ni kadinakkel ni keyew ni almug ni an neidwat winu negatang neipalpun nunman.)

<sup>13</sup> Indawat daman Solomon hu hipan kindew nunman ni biin ap-apud Seba, et meidum etan idad eleg mebillang ni tu ngu dedan kaiddawat ni bisita tu. Et mambangngad humman ni ap-apu et yadda bega-en tud bebley da.

*Ya kinedangyan Solomon e patul*  
(2 Chronicles 9:13-29)

<sup>14</sup> Katootoon ni kadewwatan Solomon hu umlaw di dewampulut liman libun kiloh ni balituk. <sup>15</sup> Hin-appil ngu dedan hu buwis ni kabeyyadiddan kamampanggettang niya hin-appil hu kamelpuddan patul di Arabia niyadda governor idan bebley di Israel.

<sup>16</sup> Nengapya hi Solomon ni dewanggatut ni etta-teng ni happiyaw e umlaw di pitun kiloh ni balituk hu neusal di hakey. <sup>17</sup> Ey nengapyan telunggatut ni ekka-kut ni happiyaw ni umlaw di dewwan kiloh ni balituk hu neusal di hakey. Intalu tudda humman ni happiyaw di palasyoh tud Muyung e Lebanon ngadan tu.

<sup>18</sup> Nampekapya pay ni et-eteng ni yuddungngan ni patul e neal-alkusan ni bakgit ni elephant ey netakapan ni nemamah ni balituk. <sup>19</sup> Humman ni yuddungngan ni patul ey wada enem ni palekad ni mampeahpat diman. Ya keiddangkigan ni beneg nunman ni yuddungngan ey nanyeku. Wada pengihhaklayan ni ngamay di nambina-hil nunman ni yuddungngan, ey wada dewwan heni layon ni immehneng di nambina-hil. <sup>20</sup> Wada mewan hu hampulut dewwan heni layon ni immehneng di utduk idan enem ni palekad di nambina-hil. Ebuhan humman ni yuddungngan ni patul ni henin nunman e endi tu kei-ingngehan.

<sup>21</sup> Emin ida basuh Solomon et yadda hipan kameussal diman ni Muyung e Lebanon ey nemamah ni balituk hu kinapya da. Yan nunman ni tsimpuh Solomon ey endi balol ni silber et humman hu, endi nekapyan silber ni kameussal di baley tu. <sup>22</sup> Wadadda bapor nan Solomon ni kamekikkilaw idan bapor Hiram. Hedin nelabah tellun toon, neibbanggad ida huyyan bapor ni wada in-anemut dan balituk, ya silber, yadda bakgit ni elephant, niyadda tadaw.

<sup>23</sup> Hi Solomon hu kekekkekdangyanan ey kelalla-ingan di emin idan nampatul eyad puyek. <sup>24</sup> Et emin hu katuutuud kebebbebley ey limmaw idan an mandedngel ni laing tun indawat Apu Dios ni hi-gatu. <sup>25</sup> Emin ida ey wada daka iddawat ni hi-gatun nekapyad silber, ya balituk, yadda balwasi, yadda almas, yadda meikkamdug di kennen, yadda kebayyu niyadda mule. Henin nunya kameippenahding ni katootoon.

<sup>26</sup> Inemung nan Solomon hu hampulut epat ni gatut ni kalesah ni kameussal di gubat niya hampulut dewwan libun kebayyu. Inha-ad etan dakel ni kalesah niyadda kebayyud idan bebley ni kinapya tun keihha-adan da ey inha-ad tudda edum di Jerusalem. <sup>27</sup> Yan nunman ni nampatuluan tu ey dakel ni peteg hu silber di Jerusalem henin kadinakkel

ni batu, ey dakel ni peteg hu keyew ni sedar henin kadinakkel ni keyew ni sycamore di hengeg idan duntug di Judah. <sup>28</sup> Yadda kebayyun Solomon ey gintang idan ahenteh tud Egypt niyad Silisia e nebayadan meippuun di kameunnud ni kapemeyyad. <sup>29</sup> Yan nunman ni tsiimpuh ey enem ni gatut ni silber hu bayad ni hakey ni kalesah ni meussal di gubat e neidteing di Jerusalem ni nalpud Egypt. Et ya hakey ni kebayyu ey hanggatut et neliman silber hu bayad tu. Kagettangaddan ahenteh Solomon ida humman di Egypt et handa igtang damaddan patul idan Hittite et yadda patul di Syria.

## 11

### *Inwalleng Solomon hi Apu Dios*

<sup>1</sup> Hi Solomon e patul ey pinpinhed tudda bibi-id edum ni bebley. Beken ni ebuh etan u-ungangan patul di Egypt inahwa tu tep inahwa tudda pay hu bibi-in Hittite, iMoab, iAmmon, iEdom ey iSidon. <sup>2</sup> Inahwa tudda anin ni in-olden APU DIOS ni hi-gadan tuu tu e eleg mabalin ni da meki-ahwan biid edum ni bebley, tep lektattuy neawis idan mandeyyaw ni dios da. Nem kinehing nan Solomon et pan-iahwa tudda. <sup>3</sup> Inahwa tu hu pitu gatut ni u-ungngaddan patul ey hin-appil mewan hu telunggatut ni biin imbilang tun ahwa tu. Lektattu tu-wangu ey impambalin idan nunyan bibi-in eleg mengu-unnud hi Solomon nan Apu Dios, <sup>4</sup> et yan nea-ammaan tu ey inewis dan mandeyyaw ni dios da. Eleg tu pannanengen ni mengu-unnud nan APU DIOS, beken ni heni lan ametu hi David e ingkahhakey tun nandayaw nan APU DIOS. <sup>5</sup> Dineyaw tu hi Astoret e biin dios ni Sidon, et hi Molek e kamengippebungnet ni dios di Ammon. <sup>6</sup> Nanliwat nan APU DIOS ey eleg tu law idinel hi-gatu, beken ni henin nan ametu hi David.

<sup>7</sup> Nengapya pay hi Solomon ni pandeyyawan etan ni kamengippebungnet ni dios ni Moab e hi Kemos di duntug di appit ni kasimminil aggew di Jerusalem. Nengapya pay ni pandeyyawan nan Molek e kamengipebungnet ni dios ni Ammon. <sup>8</sup> Entanniy nengapyan pandeyyawan idan ahwa tun nalpud edum ni bebley, ma-lat wada pangihheban dan insensoh niya wada pan-appitan daddan dios da.

<sup>9-10</sup> Anin ni nampidwa nampeangangan nan APU DIOS e Dios idan helag Israel nan Solomon et iolden tun hi-gatu e eleg tu deyyawa edum ni dios, nem eleg tu u-unnuden ey inwalleng tu anhan law. Et humman hu bimmunget hi APU DIOS ni hi-gatu <sup>11</sup> et kantuy "Gapu tep inggeb-at mu et eleg mu u-unnuden hu nehammad ni nanhummanganan ta et eleg mu u-unnuden humman ni olden ku, ey issapatah kun iddawt ku hu pan-ap-apuan ni hakey ni opisyal mu. <sup>12</sup> Nem gapun nan hi amam e hi David ey eleg ku ni ipahding ni nunyan ketaggun. Hannak ali ipahding ni pampatulan ni u-unggam. <sup>13</sup> Eleg ku endia hu pan-ap-apuan tu nem i-abulut kun mampatul di hakey ni helag Israel gapuh nan David e bega-en ku ey gapun Jerusalem e bebley ku."

### *Yadda buhul Solomon*

<sup>14</sup> Entanni ey impambalin nan APU DIOS hi Hadad e helag ni patul di Edom ni buhul Solomon. <sup>15-16</sup> Ya dedan lan nunman ni nelabah law pigan toon ey limmaw di David nan Joab e ap-apun sindalu et yadda sindalu tud Edom, et da ikulung hu edum dan helag Israel ni netey di gubat. Yan nunman ni enem ni bulan ni nangugubatan da, ey nampatey dadda lalakkid man Edom. <sup>17</sup> Nem hi Hadad niyadda edum ni opisyal ametu ey bimmesik idad Egypt, et eleg ida mailegat ni netey. Yan nunman ey u-ungnga ni hi Hadad. <sup>18</sup> Hini-yan da Midian et lumaw idad Paran. Immikuyug idan mengippengulun hi-gada, et lumaw idad Egypt di kad-an ni patul et idwatan tu hi Hadad ni puyek, ya baley et ya kennen.

<sup>19</sup> Nekigayyum hi Hadad etan ni patul et peahwan nunman ni patul ni hi-gatu hu aydu tun agin Tahpenes e ahwa tu. <sup>20</sup> Wada u-ungngadan hi Genubat e nekie-etteng di palasyoh idan u-unggan patul.

<sup>21</sup> Dingngel Hadad di Egypt e netey hi David et hi Joab e ap-apun sindalu tu ey kantu etan ni patul ey "Ettu et iebulut mu et mambangngaddak di bebley mi?"

<sup>22</sup> Kan etan ni patul ey "Tep kela, kaw wada eggak idwat ni hi-gam? Kaw wada nangkulangkak et humman gaputun pinhed mun un-anemut?" Kan Hadad ey "Endi, nem abulut mu anhan et umenamuttak di bebley mi" et maibangngad hi Hadad di bebley tu.

<sup>23</sup> Entanniy impambalin Apu Dios dama hi Reson e u-unggan Eliadah ni buhul Solomon. Hi Reson ey bimmesik et hi-yanen tu hu ap-apu tun hi Hadadeser e patul di Sobah, <sup>24</sup> et mambalin ni ap-apun buhul di bebley da. Yan nengubatan David nan Hadadeser et apputen tu et pateyen tun emin hu bimmaddang ni hi-gatu, ey limmaw hi Reson et yadda tuu tud Damascus et hi-gatu pambalin dan patul da. <sup>25</sup> Hi-gatu hu nemahhig ni buhul ni Israel ni ketaggu pay nan Solomon. Nei-dum nan Hadad ni

immidwat ni kakemunnunnuin nemnem idan helag Israel. Anggebe-hel tun peteg ida helag Israel.

*Ya insapatah Apu Dios nan Jeroboam*

<sup>26</sup> Ya hakey ni nambalin ni buhul Solomon ey hi Jeroboam e hakey ni opisyal tu e u-ungngan Nebat e iSeredah di Epraim. Hi Seruah inetu e balu.

<sup>27</sup> Henin nunya neipahding et han mambalin hi Jeroboam ni buhul ni bebley tu. Yan kapampengippekapayain Solomon etan ni Millo, indihhan tun impekapaya etan tuping di bebley ametu e hi David. <sup>28</sup> Yan nunman ey kimmata-agu law hi Jeroboam e na-let ni mangngunnu. Inang-ang Solomon hu helu tun mangngunnu et hi-gatu hu putuken tun man-ap-apuddan etan ni nepilit ni mangngunnu helag Manasseh et hi Epraim.

<sup>29</sup> Hakey ni aggew ni nalpu hi Jeroboam di Jerusalem, ey dinammmun nan Ahijah e prophet ni iSiloh di keltad ey dewaddan ebuh etan di a-allow ni bebley. Hi Ahijah ey baluh etan edah ni balwasi tu. <sup>30</sup> Inukhup tu humman ni balwasi tu, et pambi-kien tun impanhampulu tu et dewa, <sup>31</sup> et kantun Jeroboam ey "Alam hu hampulun eyan binenikik ni balwasi tep kan APU DIOS e Dios idan helag Israel ey 'Hedin ya kei-elligan tu huyya ey bi-kien kulli pan-ap-apuan Solomon et iddawat kulli hampulun helag Israel ni hi-gam. <sup>32</sup> Nem pannennengek hu hakey ni helag nan Solomon gapun nan David e bega-en ku ey gapuh ni Jerusalem e pinilik di emin ni bebley di Israel ni pambebleyak. <sup>33</sup> Hanneya pehding ku tep inwalleng da-ak nan Solomon et dayawen tu hi Astoret e biin dios ni Sidon, hi Kemos e dios ni Moab et hi Molek e dios ni Ammon. Eleg tuwak u-unnuden, anin idan tugun ku et ipahding tudda hu lawah ni eggak pinhed, beken ni henin ametu e hi David.

<sup>34</sup> Nem eggak endia hu pan-ap-apuan Solomon, et pannenneng kun hi-gatu mampatul ni nunyan ketaggu tu gapun nan hi ametu hi David e pinilik ni bega-en kun nungun nud ni olden ku niya tugun ku. <sup>35</sup> Pebeltan kun hi-gam hu pan-ap-apuan ni u-ungngan Solomon ma-lat hi-gam mampatul ni hampulun helag Israel. <sup>36</sup> Pannenneng ku hu pan-ap-apuan ni u-ungngan Solomon ni hakey ni helag ma-lat nanengtun mampatul hu helag David di Jerusalem, e pinilik ni bebley ni pandeyyawan ni ngadan ku. <sup>37</sup> Hi-gam e Jeroboam hu pambalin kun patul di Israel ey man-ap-apu kad emin ni bebley ni pinhed mu. <sup>38</sup> Hedin peka-u-unnuden muwak et ipahding mu hu neiptek di hinanggak, ey u-unnudem hu olden ku et peamleng muwak et heni ka lan bega-en ku e hi David, ey wada-ak ni ingganah ni memaddang ni hi-gam. Pambalin dakan patul ni Israel ey pannenneng ku helag mun mampatul ni ingganah, henin nan David. <sup>39</sup> Nem kastiguen ku hu helag nan David tep ya liwat Solomon nem beken ni hanniman ni ingganah.'"<sup>40</sup> Impatnan Solomon ni peteyen hi Jeroboam nem bimmesik di Egypt di kad-an Sishak e patul diman et manha-ad diman ingganah ni neteyyan Solomon.

*Ya neteyyan Solomon*

*(2 Chronicles 9:29-31)*

<sup>41</sup> Yadda edum ni neipahding ni nampatulan Solomon, yadda impahding tu niya laing tu ey neitudek etan di liblul ni neitudekan idan impahpahding Solomon. <sup>42</sup> Nampatul hi Solomon di Jerusalem et yad emin ni bebley di Israel ni na-pat ni toon. <sup>43</sup> Netey et maikulung di Bebley David e ametu, et maihullul ni nampatul hi Rehoboam e u-ungnga tu.

## 12

*Ya nanggehayyan ni edum ni helag Israel nan Rehoboam*

<sup>1</sup> Limmaw hi Rehoboam di Sekem tep neamung idan emin ni helag Israel ni nambebley di appit ni north ma-lat tuduen dan patul. <sup>2</sup> Yan nunman ey wada hi Jeroboam e u-ungngan Nebat di Egypt tep bimmesik diman eman ni nampatulan Solomon. Dingngel tu e hi Rehoboam law nampatul, et mambangngad di Israel.

<sup>3</sup> Entanni ey impaeyag idan helag Israel ni nambebley di appit ni north hi Jeroboam et lumaw idad kad-an Rehoboam et kandan hi-gatuy <sup>4</sup> "Mabunget la hi amam e hi Solomon ni hi-gami ey impanligligat dakemi. Hedin eleg dakemi panligligat ni peteg ey hedin ekkalan mu hu beyyadan min buwis, nanengtun mansilbi kamin hi-gam."

<sup>5</sup> Hinumang Rehoboam e patul et kantuy "Idwasi yuwak ni tellun aggew et pakannemnem ku ihhumang ku et han kayulli maibangngad." Et lumaw ida.

<sup>6</sup> Nekihummangan hi Rehoboam idan nea-amman konsihal ni nansilbin ametu e hi Solomon hu meippanggep nunya e kantuy "Hipa ittugun yun hi-gak ni ihhumang kuddan nunman ni tuu?"

<sup>7</sup> Kanday "Ipahding mu kayyaggud ey peang-ang mu binabbal mun hi-gada et tebalem humman ni daka-ibbaga ma-lat mansilbi idan hi-gam ni ingganah."

<sup>8</sup> Nem eleg tu u-unnuden humman ni intugun idan nunman ni nea-amma et mahimmangan etan idan katoonan tun konsihal et ibega tun hi-gada hedini hipa ittugun da. <sup>9</sup> Kantun hi-gaday "Hipa ittugun yun penummang kuddan tuun kanday e-ekkalak ligat da?"

<sup>10</sup> Kandan hi-gatuy "Heninnuy penummang mun hi-gada: 'Ya eya ik-ikingnan ku man e-etteng nem ya gitang ama! <sup>11</sup> Hedini impanligat dakeyu lan peteg nan ama, nema-hu pehding kun mengipeligat ni hi-gayu. Hedini hineplit dakeyu lan ama, heplaten dakeyun nahbitan ni heplit ni nunya.' "

<sup>12</sup> Nelabah tellun aggew ey nambanggad hi Jeroboam et yadda emin etan tuud kadan Rehoboam tep humman inhel tun hi-gada. <sup>13</sup> Nem impambinungget Rehoboam ni nenumang ni hi-gada tep eleg tu u-unnuden hu intugun idan nea-amma konsihal tu. <sup>14</sup> Et ya kumedek hu intugun idan u-unggan konsihal hu inu-unnud tu et kantuy "Impanligat dakeyu lan ama nem nema-man panligat dakeyun hi-gak nunya. Hineplit dakeyu lan nunman nem heplaten dakeyun nunyan nahbitan!" <sup>15</sup> Et humman hu neipahding e eleg u-unnuden Rehoboam hu pinhed idan tuu, tep humman dedan la inhel APU DIOS ni meippahding ey huyya inamnuan nunman ni inhel tun Ahijah e prophet di Siloh e humman dama inhel tun Jeroboam e u-unggan Nebat.

<sup>16</sup> Yan nengamtaan idan nunman ni tuu e eleg hengnudan Rehoboam hu daka ibbaga ey ida kamantetekkek e kanday "Mepappag hu pampatulan ni helag David! Endi bilang tayud nan-ap-apuan ni u-unggan Jesse! Hipa ni-man impahding dan panyaggudan tayu? Hi-gatsun helag Israel, anemut itsu kuma! Ngenamung numan hi Rehoboam e helag David!"

Et umenamut ida e eleg da ibbilang hi Rehoboam ni patul da. <sup>17</sup> Nem yadda helag Israel ni nambebley di Judah ey hi Rehoboam hu nanengtun patul da.

<sup>18</sup> Entanni ey intu-dak Rehoboam hi Adoniram e ap-apuddan nepilit ni manggunnu et tu ang-angen ida edum dan helag Israel ni nambebley di north, nem nangenga da et matey. Neamtaan Rehoboam huyyan neipahding et pepuppuut tun an nantakkay di kalesah et bumsik di Jerusalem. <sup>19</sup> Neipalpun nunman ingganah nunya ey kangghayaddan nunman idan helag Israel ni nambebley di north hu pampatulan ni helag David ni hi-gada.

<sup>20</sup> Nandinggel law di Israel e nambanggad hi Jeroboam ni nalpud Egypt et maemung ida et putuken dan patul da. Ebu hu helag Judah ni nanengtun ya helag David hu patul da.

*Ya inebig Semaiah  
(2 Chronicles 11:1-4)*

<sup>21</sup> Dimmateng hi Rehoboam di Jerusalem, et amungen tu hanggatut et newalun libun kelalla-ingan ni sindalu tun helag Judah niya helag Benjamin, tep pinhed tun gubbatan hu helag Israel ni nambebley di north ma-lat banggaden tu hu pan-ap-apuan tudman.

<sup>22</sup> Nem immel hi APU DIOS nan Semaiah e prophet e kantuy <sup>23</sup> "Mu ehel nan Rehoboam e u-unggan Solomon e patul di Judah et yad emin ni tuud Judah et yad Benjamin e kammuy <sup>24</sup> Huyya inhel APU DIOS: 'Entan tu gubat ida aaggi yun helag Israel. Anemut kayu kumad baballey yu tep hi-gak hu nengipanghel eyan neipahding!' "

Inu-unnud da humman ni intugun APU DIOS et umenamut ida.

*Inwalleng Jeroboam hi APU DIOS*

<sup>25</sup> Inhammad nan Jeroboam e patul di Israel ni linuhud hu Sekem e duntuduntug ni bebley di Ephraim et manha-ad nidman. Entanniy hini-yan tu humman ni bebley, et tu iyayyaggud hu Penuel et man-e-tan diman. <sup>26-27</sup> Nannemnemnem ey kantuy "Ida kaumlaw eyadda tuuk ni an man-appit nan APU DIOS di Tempol di Jerusalem et entanniy pintey da-ak ali, et maibbanggad nan Rehoboam eya nakka pan-ap-apui."

<sup>28</sup> Gapuh ni intugun idan konsihal tu ey ninemnem tu et mengapyan dewwan balituk ni heni lakkitun baka et kantuddan tuuy "Kayu kameliggasin yuka lallawwid Jerusalem ni an mandeyyaw. Hi-gayuddan tuuk ni Israel, adyah hu dios yun nengihwang ida lan aammed yud Egypt!" <sup>29</sup> Inha-ad tu hu hakey idan nunman ni bakan balituk di Bethel et ya hakey damad Dan, <sup>30</sup> et manliwat ida etan tuu tep da dinaydayaw ida huyyan dios ni baka di Bethel et yad Dan.

<sup>31</sup> Nengapya pay hi Jeroboam ni pandeyyawan idad ta-pew ni duntug et putuken tudu padin beken ni helag Levi.

*Liwat ni peteg hu mandeyyaw di Bethel*

<sup>32</sup> Inlappun Jeroboam ni ipahding hu Piyestah ni Kampu ni pandeyyawan da eman ni meikkewwalun bulan e henin daka pehding di Judah

nem hin-appil ni bulan. Nan-appit ida damad pan-appitan ni kinapya dad Bethel, nem ya in-appitan da ey yadda etan balituk ni bakan kinapya da. <sup>33</sup> Et yan nedatngan etan gintud Jeroboam ni meikkahampulun liman aggew ni meikkewwalun bulan, et an man-appit di Bethel et pan-an-anlaan idan Iisrael tep huuya in-olden tun piyestah da.

## 13

<sup>1</sup> Intu-dak APU DIOS hu hakey ni prophet di Bethel e nalpud Judah. Dimmateng diman ey hina-kupan tu hi Jeroboam e immehneng di pan-appitan tep man-appit. <sup>2</sup> Inu-unnud nunman ni prophet hu intugun APU DIOS ni hi-gatu et eleten tun immehel e kantuy "Higam ni pan-appitan, yahhuy hu kan APU DIOS 'Wadalli hu mei-ungngad pamilyah nan David ni lakin gelang e hi Josiah ali ngadan tu. I-appit tuddallidya etan ida padin kaum-alidyan man-appit. Gihheben tullidya hu tu-ngal da.'" <sup>3</sup> Kan pay nunman ni prophet ey "Mepi-ang ali eya pan-appitan et maiwehit ida dep-ul tu. Humman ali immatun e hi APU DIOS hu nalpuan eyan inhel ku."

<sup>4</sup> Dingngel Jeroboam hu intekuk nunman ni prophet et ledngen tu e kantuy "Depap yu humman ni tuu!" Nem pinhakkeyey kimmedhel hu indengdeng nan Jeroboam ni ngamay tu ey eleg meyku. <sup>5</sup> Pinhakkey mewan ey nepi-ang etan pan-appitan et maiwehit yu dep-ul di puyek e humman inamnuan ni inhel nunman ni prophet ni pengimmatunan e hi APU DIOS hu nalpuan ni inhel tu.

<sup>6</sup> Kan Jeroboam nunman ni prophet ey "Idasal mu anhan nan AP-APU e Dios mu ma-lat peyaggud tu eya ngamay ku." Nandal humman prophet nan APU DIOS et yumaggud etan ngamay ni patul, <sup>7</sup> et kantun nunman ni prophet ey "Ikay di baley et ita mangan et wada iddawat kun hi-gam."

<sup>8</sup> Hinumang nunman ni prophet e kantuy "Anin ni iddawat mun hi-gak hu kagedwah ni kinedangyan mu et eggak mekillaw ni hi-gam. Eggak mengngan winu um-inum ni hipan mekkan winu meinum eyad bebley di deya, <sup>9</sup> tep in-olden APU DIOS e aggak mengngan winu um-inum ni hipadya, ey eggak iddalan ni keibbangngadak di dinlan kun inlian kudya." <sup>10</sup> Et umenamut nem hin-appil hu nengidlanan tu.

### *Ya etan nea-amman prophet di Bethel*

<sup>11</sup> Wada etan nea-amman prophet ni nambbley di Bethel. Immanemut ida etan lalakkin u-ungnga tu, et ehlen dan hi-gatu meippanggep ni impahding nunman ni prophet nunman ni aggew. Inhel da pay ni hi-gatu hu inhel nunman ni prophet nan Jeroboam e patul. <sup>12</sup> Kan amedan hi-gaday "Attu la nampelawwan tu?" Lindeng idan u-ungnga tu hu dinlan nunman ni prophet ni nalpud Judah, <sup>13</sup> et kantun hi-gaday "Idaddan yu hu pantakkayak ni kebayyu." Indaddan da et mantakkay <sup>14</sup> et mandayyu et unuden tu humman ni prophet ni nalpud Judah. Hina-kup tun kamanyuyuddung di hengeg ni keyew ni oak et kantun hi-gatuy "Kaw hi-gam etan prophet ni nalpud Judah?"

Hinumang etan ni tuu e kantuy "Em, hi-gak."

<sup>15</sup> Kan etan ni nea-amman prophet ey "Ikay di baley et ita mangan."

<sup>16</sup> Nem hinumang nunman ni prophet e kantuy "Eleg mabalin ni nak mekillaw ni hi-gam di baley yu winu nak ebbuluten hu kayyaggud ni pengapngam ni hi-gak tep eggak mabalin ni mengngan winu um-inum ni danum di deya. <sup>17</sup> Tep in-olden APU DIOS ni hi-gak ey eggak mengngan winu um-inum di deya, niya hedin um-anemuttak ey eggak iddalan di dinlan kun inlian ku."

<sup>18</sup> Kan etan ni nea-amman prophet ni iBethel ey "Anin ni hi-gak et prophettak dama e henin hi-gam. Ey in-olden APU DIOS etan ni hakey ni anghel et ehlen tun hi-gak e daka ewwiten di baley et pangan daka ey peinumman dakan danum." Nem itek tu kaya.

<sup>19</sup> Et makilaw humman ni prophet APU DIOS ni nalpud Judah et mangan et uminum diman.

<sup>20</sup> Nanengtun ida kamanyuyuddung ey immehel hi APU DIOS etan ni nea-amman prophet. <sup>21</sup> Et itkuk tu etan ni prophet ni nalpud Judah e kantuy "Kan APU DIOS ey nginhay mu tep eleg mu u-unnuden hu inhel tun pehding mu. <sup>22</sup> Tep neki-li ka et mangan ka et uminum ka eyad bebley ni in-olden tun eleg mu pengngannan niya eleg mu innuman. Gapuh nunyan impahding mu ey mettey ka ey eleg meikkullung hu annel mud gungat idan ammed mu."

<sup>23</sup> Negibbuh idan nengan et idaddan etan ni nea-amman prophet etan kebayyu tu et pantakkayan nunman ni prophet ni iJudah <sup>24</sup> et manglaw. Wadad dalan ey dinamun layon et pateyen tu. Neipullay hu annel nunman ni prophet di keltad ey immehneng ida etan layon et ya kebayyud dagsi tu. <sup>25</sup> Inang-ang idan nelabah ni tuu hu annel nunman ni prophet ni neipullay di keltad ey kaman-eh-ehngeng hu layon di dagsi tu et lumaw idad

Bethel e nambbleyan etan ni nea-amman prophet et ehlen da humman ni inang-ang da.

<sup>26</sup> Dingngel etan ni nea-amman prophet humman ey kantuy “Humman etan prophet ni eleg mengu-unnud ni in-olden APU DIOS! Impeamnun APU DIOS hu kantun pehding tu et itu-dak tu hu layon ni memettye ni hi-gatu.”

<sup>27</sup> Entanniy kan etan ni nea-amman prophet idan u-ungnga tuy “Idaddan yu etan kebayyu.” Et idaddan idan u-ungnga tu, <sup>28</sup> et mantakkay et lumaw ey himmak tu etan annel ni prophet di keltad ey nanengtu etan layon et ya etan kebayyun immehngeng di dagsi tu. Eleg kanen etan ni layon hu annel ni prophet niya eleg tu pateyen etan kebayyu. <sup>29</sup> Hinakyuyyu etan ni nea-amman prophet etan netey et itakkay tud kebayyu tu et mambanggad di Bethel et nannangngihan tu et ikulung tu. <sup>30</sup> Ingkulung tud kulung ni pamilyah da et nannangngihan tu e kantuy “Anggehemmek ka e agik!”

<sup>31</sup> Entanniy kan etan ni nea-amman prophet idan u-ungnga tuy “Hedin metteyyak ali, idagsi yulli hu annel ku eyad annel tu eyad gungat tayu, <sup>32</sup> tep huyyan tuu ey makulug ni prophet et emin hu inebig tun inhel APU DIOS ni meippahding ni pan-apapuan tu niya neteyyan ni helag tu tep impahding tu hu lawah ni peteg di hinanggan Apu Dios.

#### *Ya lawah ni peteg ni impahding Jeroboam*

<sup>33</sup> Nanengtun manghay hi Jeroboam e patul di Israel e eleg tu issiked hu lawah ni tuka pehpehding. Intuluy tu anhan law ni memilliddan papaddin nalpud linggeman ni helag et hi-gada hu mansilbi etan di kapandeyyawin kinapya tu. Linggeman law ni tuun neminhed ey tuka puttukan mampeddi. <sup>34</sup> Huyya gaputun nekabbabahan ni pan-apapuan tu niya neteyyan ni helag tu tep impahding tu hu lawah ni peteg di hinanggan Apu Dios.

## 14

#### *Ya neteyyan ni u-ungngan Jeroboam ni laki*

<sup>1</sup> Entanniy nandegheh etan laki u-ungngan Jeroboam e hi Abijah. <sup>2</sup> Sinugun Jeroboam hu ahwa tu et kantuy “Hullulim hu ang-ang mu et eleg meimmatunan e hi-gam ahwak et lumaw kad Siloh di kad-an Ahijah. <sup>3</sup> Alekan hampulun sinapay et yadda malumi-i ni sinapay, ya hambusi ni putsukan et lumaw kad kad-an tu et ibgam hedin hipa meippahding eyad u-ungnga ta.” <sup>4</sup> Inu-unnud etan ni ahwa tu et lumaw di Siloh. Hi Ahijah ey nekulap tep neka-a-amma law.

<sup>5</sup> Eleg ni dumteng etan ahwan Jeroboam ey inhel nan APU DIOS ni hi-gatu e kantuy “Tyyalli ahwan Jeroboam ma-lat mahmahan tun hi-gam hu meippanggep ni u-ungnga tu tep kamandedgeh. Eleg tu pinhed ni peamtan hi-gam e hi-gatu ahwan Jeroboam. Ehel mun hi-gatu hu e-helek ni hi-gam.”

<sup>6</sup> Et humman hu, dingngel nan Ahijah hu kudun heli tud habyen ey kantuy “Hegeg ka. Inamtak e ahwa dakan Jeroboam! Kele eleg mu pinhed ni peamta e hi-gam hu ahwa tu? Lewah hu e-helen kun hi-gam. <sup>7</sup> Mu ehel nan Jeroboam e heninnuy hu inhel APU DIOS e Dios idan helag Israel ni hi-gatu. Kantuy ‘Hi-gam hu pinilik di emin idan tuu et pambalin dakan patul eyaddan tuuk e helag Israel. <sup>8</sup> Impebeltan kun hi-gam hu pan-apapuan idan helag David, nem beken kan henin hi-gatu e bega-en ku, hi-gak ni ebuh hu tuka pandinneli ey inu-unnud tu hu tugun ku et ipahding tu hu pinhed ku. <sup>9</sup> Hi-gam hu kelellewwahan hu impahding tun emin idan nemangulun nan-ap-apu. Inwalleng muwak et mengapya ka pay ni dios ni daydayawen mu. Impabunget muwak gapuh idan nunman ni kinapyam ni gumeke ni dios.

<sup>10</sup> Huyya gaputun peellik ali hu kababahan ni pan-apapuan. Petteyek ali emin hu laki helag mu et endi meldaan. Ey bababahan ku hu pan-apapuan henin daka pengihhebin lugit ingganah me-puh hu helag mu. <sup>11</sup> Pangkennen alin ahhu hu mettey ni pamilyah mu eyad bebley, et yadda mettey di a-allaw ni bebley ey pangkennen alin sisit.’ Huyya inhel APU DIOS.”

<sup>12</sup> Kan Ahijah nan ahwan Jeroboam ey “Anemut ka kuma. Mettey etan u-ungngam ni dettengam di baley yu. <sup>13</sup> Emin hu tuud Israel ey nangngihan da ey handa ingkulung. Hakey tun ebuh di pamilyah Jeroboam ni kayyaggud hu keikkullungan tu tep hi-gatun ebuh hu nengipeamleng nan APU DIOS e Dios idan helag Israel. <sup>14</sup> Wadalli ihha-ad APU DIOS ni hakey ni mampatul di deya Israel, et hi-gatulli memappeg ni pan-apapuan Jeroboam et yadda helag tu. <sup>15</sup> Kastiguen alin APU DIOS tuudya Israel et henilli elkat di gilig ni wangwang ni kaihheneplat ni danum. E-kalen tuddalli eyad kayyaggud ni bebley ni indawat tun aammed da, et iwehit tuddad bebley di ba-hil ni Wangwang e Euphrates, tep impabunget da hi APU DIOS ni nandayawan dan Asherah. <sup>16</sup> Iwwalleng



APU DIOS ida tuudya Israel tep nanliwat hi Jeroboam ey impappangngulu tudda tuon manliwwat."

<sup>17</sup> Nambangngad hi ahwan Jeroboam di Tirsah et dumteng di baley da ey netey etan u-ungnga da. <sup>18</sup> Ninannangngihan idan iIsrael et ikulung da e humman inamnuan ni inhel APU DIOS nan Ahijah e prophet.

*Ya neteyyan Jeroboam*

<sup>19-20</sup> Dewampulun toon hu nampatulana Jeroboam. Netey et ikulung da et maihullul hu u-ungngatu e hi Nadab ni nampatul. Emin hu impahding Jeroboam, ya nekigubagubatan tu et ya nan-ap-apuan tu ey neitudek emin di libluh ni meippanggep ni patul di Israel.

*Ya meippanggep nan hi Rehoboam e patul di Judah*

*(2 Chronicles 11:5-12, 15)*

<sup>21</sup> Hi Rehoboam e u-ungngan Solomon ey na-pat et hakey hu toon tun nampatulana tud Judah ey nan-ap-apun hampulut pitun toon di Jerusalem e bebley ni pinilin APU DIOS di emin ni bebley di Israel ni pandeyyawan ni hi-gatu. Hi Naamah hu ngadan inetu e iAmmon.

<sup>22</sup> Nanliwat ida hu tuud Judah nan APU DIOS, et pabunget da tep nehalhalman hu nanliwatan da nem yadda la aammed da. <sup>23</sup> Nengapyaddan pandeyyawan dan beken ni makulug ni dios, et behwatan da batun tukud ni pandeyyawan dan Asherah di duntug et yaddad hengeg ni keyew. <sup>24</sup> Wadadda pay hu laki niya biin kamansilbid daka pandeyyawin beken ni makulug ni dios e daka pebeyyad annel da. Kaippenahding ni tuud Judah hu angeba-ing ni peteg ni kapehpehding idela etan ni dinegyun APU DIOS ni nambebley ni sigud diman e humman ida iKanaan.

<sup>25</sup> Yan meikkeliman toon ni nan-ap-apuan Rehoboam, ey ginubat ni patul ni Egypt e hi Sishak hu Jerusalem. <sup>26</sup> Inla tun emin hu nangkebalol ni wadad Tempol et yad palasyoh, anin idan balituk ni happiyaw ni kinapya lan Solomon. <sup>27</sup> Entanni et hullulan nan Rehoboam ida humman ni balituk ni happiyaw ni giniling et idinel tuddan apapun guwalyad eheb ni palasyoh tu. <sup>28</sup> Hedin umlaw hu patul di Tempol ey huyyaddan happiyaw hu kaussaladdan guwalya, ni han da mewan imbangngad di kuwaltuh ni guwalya.

<sup>29</sup> Emin hu impenahding Rehoboam et ya nampatulana tu ey neitudek di libluh ni meippanggep ni patul di Judah. <sup>30</sup> Nantultuluy hu nanggugubatan di Rehoboam nan Jeroboam. <sup>31</sup> Entanni ey netey hi Rehoboam et maikulung di gungat idan patul di Bebley nan David et maihullul hi Abijah e u-ungngatun nampatul. Hi Naamah e iAmmon hu inan Rehoboam.

## 15

*Ya nampatulana Abijah di Judah*

*(2 Chronicles 13:1-14:1)*

<sup>1</sup> Hi Abijah ey nampatul di Judah eman ni meikkehampulut walun toon ni nan-ap-apuan Jeroboam di Israel. <sup>2</sup> Tellun toon ni ebuh hu nampatulana tu e nanha-ad di Jerusalem. Hi Maakah hu inetu e u-ungngan Absalom. <sup>3</sup> Impahding tun damadda hu panliwwatan ni impenahding ametu. Eleg tu ihakkey nan APU DIOS hu dinaydayaw tu, tep dinaydayaw tu pay hu edum ni dios e beken ni heni lan apu tu hi David. <sup>4</sup> Nem gapun nan David, ey indawtan nan APU DIOS hi Abijah ni u-ungnga tun meihullul ni hi-gatun mampatul et manha-ad di Jerusalem. <sup>5</sup> Yan ketaggun David ey inu-unnud tu hu tugun APU DIOS. Ey impahding tudda hu kayyagud di hinanggan APU DIOS. Ebuh etan nengipepateyan tun Uriah e Hittite hu lawah ni impahding tu.

<sup>6-7</sup> Yan nampatulana Abijah ey nanggubagubat idan Jeroboam. Neitudek ida impenahding Abijah di Libluh idan Patul di Judah. <sup>8</sup> Netey hi Abijah et maikulung di Bebley David et maihullul hi Asa e u-ungngatun nampatul.

*Ya nampatulana Asa di Judah*

*(2 Chronicles 15:16-16:6)*

<sup>9</sup> Nampatul hi Asa di Judah ni meikkadewampulun toon ni nan-ap-apuan Jeroboam di Israel. <sup>10</sup> Na-pat ni toon et hakey hu nan-ap-apuan tu e nanha-ad di Jerusalem. Hi Maakah hu apu tu e u-ungngan Absalom. <sup>11</sup> Impahding Asa hu kayyagud e kamengippeamleng APU DIOS e heni lan apu tu hi David. <sup>12</sup> Dinegyun tudda hu lalakki niya bibi-in daka pebeyyad annel dan kamansilbid daka pandeyyawiddan beken ni makulug ni dios, ey ingkal tun emin ida etan tuttu-un kinenapyadda lan etan ni ammed tun nampampatul ni neitu-nudan tu. <sup>13</sup> Ingkal tu pay hi apu tu e Maakah di saad tun inan patul tep nampebehwat ni tukud ni pandeyyawan dan Asherah. Nandikhal Asa ida

humman ni tukud et tu itungud nandeklanan tud Kidron. <sup>14</sup>Eleg bahbahen Asa emin ida etan daka pandeyyawin beken ni makulug ni dios ni wadad duntug nem impannang tu hu dinel tun APU DIOS ni ketaggu tu. <sup>15</sup>Inha-ad tun emin di Tempol ida hu balituk, et ya silber et yadda etan edum ni usal ni in-eng-eng dan han-aman APU DIOS.

<sup>16</sup>Hi Asa e patul di Judah et hi Baasha e patul di Israel ey nanggubagubat ida eman ni nampatul da. <sup>17</sup>Ginubat nan Baasha hu Judah et ilepu tun hammaden hu luhud ni Ramah ma-lat endi umhegep niya endi meukkat di Judah.

<sup>18</sup>Et ya law impahding Asa ey illatu emin hu natdaan ni silber niya balituk di Tempol niyad palasyoh, et pailaw tuddan opisyal tu et da idwat nan Benhadad e patul di Damascus di Syria e u-ungngan Tabrimmon e u-ungngan Hesion et ipped tu e kantuy <sup>19</sup>“Attu anhan et ibangngad tan nunya hu kayyaggud ni kapandagyumiddan a-ammed ta et mambaddang ita. Huyyan silber niya balituk ey iddawat kun hi-gam et isiked mun memaddang nan Baasha e patul di Israel et mapilit ni mengkal idan sindalu tu eyad bebley ku.”

<sup>20</sup>Inebulut Benhadad humman ni inhel Asa et itu-dak tudda ap-apun sindalu tu niyadda sindalu da et da gubaten ida bebley di Israel. Hinggep da et sakupen dadda bebley di Ijon, ya Dan, ya Abel Bet Maakah, emin hu bebley di Kinneret niya emin ni bebley di Naptali. <sup>21</sup>Dingngel Baasha humman ni neipahding et isiked tun manluhud ni Ramah et manglaw di Tirsah.

<sup>22</sup>Entanni ey in-olden Asa di kebebbley di Judah e emin ida katuutuu ey mahapul ni umlaw idan mampemehhan ni batu niya keyew ni inusal Baasha ni nanluhud ni Ramah. Inusal Asa ida humman ni batu niya keyew ni nanluhud ni Mispah niya Gebah di bebley ni helag Benjamin.

<sup>23</sup>Emin ida impahding Asa ni meippanggep ni kabaelan tun man-ap-apu niyadda bebley ni binehwal tu, ey neitudek emin di Libluh idan Patul di Judah. Yan nea-ammaan tu ey eleg pakedalan tep wada degeh ni heli tu. <sup>24</sup>Netey hi Asa et ikulung dadungan idan patul di Bebley David, et maihullul hi Jehoshaphat e u-ungngatun nampatul.

#### *Ya nampatulanan Nadab di Israel*

<sup>25</sup>Nampatul hi Nadab e u-ungngan Jeroboam di Israel ni meikkadwan toon ni nampatulanan Asa di Judah, et man-ap-apun dewwan toon. <sup>26</sup>Lawah impahpahding tu et manliwat nan APU DIOS e inu-unnud tu hi ametu et ituluy tun nandaydayaw ni dios ni kinapyan tuu. Hi ametu e hi Jeroboam hu nengipappanggulun mengippahding idan nunman ni panliwwatan et iu-unnud ida daman tuu.

<sup>27</sup>Hi Baasha e u-ungngan Ahijah e helag Issakar ey namplanuh ni lawah ni pehding tun patul da e hi Nadab, et pateyen tu eman ni nengubatan di Nadab et yadda sindalu tun Gibbethon di Pilistia. <sup>28</sup>Neipahding huyya eman ni meikkatlun toon ni nampatulanan Asa di Judah et hi Baasha hu neihullul nan Nadab ni nampatul di Israel. <sup>29</sup>Pakeyudung tun nampatul ey pintey tudda emin hu helag Jeroboam et endin hekey natdaan ni higa-gada anin hakey. Huyya inamnuan ni inhel APU DIOS nan Ahijah di Siloh e prophet. <sup>30</sup>Neipahding huyya tep impabunget Jeroboam hi APU DIOS e Dios idan helag Israel, tep ya liwat tu niya gapun nengipappangguluan tuddan tuud Israel ni manliwwat.

<sup>31</sup>Emin hu impahpahding Nadab ey neitudek di libluh ni Patul di Israel. <sup>32</sup>Di Asa e patul ni Judah et hi Baasha e patul ni Israel ey nanggubagubat ida eman ni nampatulanan da.

#### *Hi Baasha e patul ni Israel*

<sup>33</sup>Nampatul hi Baasha e u-ungngan Ahijah di Israel ni meikkatlun toon ni nampatulanan Asa di Judah, et nampatul ni dewampulut epat ni toon. Yad Tirsah hu nanha-adan tu. <sup>34</sup>Hi Baasha ey heni daman Jeroboam e nanliwat di hinanggan APU DIOS ey ipappangngulu tudda tuud Israel ni manliwat.

## 16

<sup>1</sup>Immehel hi APU DIOS nan hi Jehu e prophet e u-ungngan Hanani, et tu ehelen nan Baasha e kantuy <sup>2</sup>“Yan nunman ey heni daka pini-dit di dep-ul et pambalin dakan patul idan tuuk ni ilrael, nem inu-unnud mu hu impahpahding Jeroboam ni nanliwat, et ipengulum ida tuuk ni manliwwat et humman nakka umbunget. <sup>3</sup>Huyya gaputun bahbahen daka et yadda pamilyah mu henin nemahbahak ni helag Jeroboam e u-ungngan Nebat. <sup>4</sup>Pangkennen alin ahhu ida agim ni mettey eyad bebley, niya kennen alin sisit hu mettey di a-allaw tu.”

<sup>5</sup>Emin ida neipenahding ni nampatulanan Baasha ey neitudek di Libluh idan Patul di Israel. <sup>6</sup>Netey hi Baasha et maikulung di Tirsah et maihullul hu u-ungngatu hi Elah ni nampatul.

<sup>7</sup> Yan nunman la ey binegan APU DIOS hi Jehu e prophet ni u-ungngan Hanani et ehelan tu hi Baasha et yadda pamilyah tu, tep impabunget tu hi APU DIOS gapuh idan lawah ni impahpahding tu, henin impenahding nan Jeroboam e nemangulun nampatul ey gapuh pay ni nemateyan tun emin ni pamilyah Jeroboam.

*Ya nampatulanan Elah di Israel*

<sup>8</sup> Yan meikkadwampulut enem ni toon ni nampatulanan Asa di Judah ey nampatul hi Elah e u-ungngan Baasha di Israel et man-ap-apud Tirsah ni dewwan toon.

<sup>9</sup> Hi Simrih e hakey ni opisyal tu, e ap-apuddan kagedwah ni bilang idan sindalun kamangkalesah ey nannemnem ni lawah ni pehding tu etan ni patul. Wadan nunman etan patul e hi Elah di Tirsah e ida kamenginnun di baley Arsah e kamengippaptek ni baley patul, ey kamangkebuttege. <sup>10</sup> Himmegep hi Simrih di baley Arsah et pateyan tu hi Elah et hi-gatu maihullul ni patul. Neipahding huyya eman ni meikkadwampulut pitun toon ni nan-ap-apuan nan Asa e patul di Judah. <sup>11</sup> Nampatul hi Simrih ey impapetey tun emin hu pamilyah nan Baasha, yadda agitu et yadda gagayyum tu et endi ana natdaan ni lakin hi-gada anin hakey. <sup>12</sup> Humman ni impahding Simrih e pintey tudda emin hu pamilyah Baasha hu inannuan ni inhel APU DIOS ni nunman nan hi Jehu e prophet meippanggep nan Baasha. <sup>13</sup> Neipahding humman tep ya liwat ni impenahding di Baasha nan Elah e han-ama, niya nengipappangnguluhan daddan tutu-un manliwwat, e dinaydayaw da hu dios ni kinapayan tuu et pabunget da hi APU DIOS e Dios idan helag Israel. <sup>14</sup> Emin hu impahding Elah ey neitudek di Libluh idan Patul di Israel.

*Ya nampatulanan Simrih di Israel*

<sup>15</sup> Nampatul hi Simrih di Tirsah di Israel eman ni meikkadwampulun pitun toon ni nampatulanan Asa di Judah, nem pitun aggew ni ebuh nampatulanan tu. Yan nunman ey ginubat ni sindalun Israel hu Gibeton e bebley di Pilistia. <sup>16</sup> Yan nangngelan idan nunman ni sindalu e pintey Simrih hu patul da ey pinutuk da hi Omrih e ap-apu dan meihullul ni mampatul di Israel. <sup>17</sup> Hini-yan di Omrih et yadda sindalu tu hu Gibeton et da gubaten hu Tirsah. <sup>18</sup> Inang-ang Simrih e hinggep da etan bebley et lumaw etan di nehammad ni kuwaltuh di bawang ni palasyoh et legaben tu hu palasyoh et matey diman. <sup>19</sup> Neipahding humman tep ya liwat ni impahding tun APU DIOS e inu-unnud tu hu impenahding lan Jeroboam e patul et humman gaputun nanliwat ida dama tuud Israel.

<sup>20</sup> Emin hu impahding Simrih, anin ya nannemneman tun lawah ni impahding tu etan ni patul, ey neitudek di Libluh idan Patul di Israel.

*Ya nampatulanan Omrih di Israel*

<sup>21</sup> Yadda tuud Israel ey negedwadda tep ya edum ey pinhed dan hi Tibnih e u-ungngan Ginat hu mampatul. Yadda dama edum ey hi Omrih hu pinhed da. <sup>22</sup> Nem entanni ey yadda hu tuun neminhed nan Omrih hu nengapput. Netey hi Tibnih et hi Omrih hu nambalin ni patul. <sup>23</sup> Nampatul hi Omrih di Israel ni meikkatelumpulut hakey ni toon ni nampatulanan Asa di Judah, et man-ap-apun hampulut dewwan toon. Enem ni toon hu nanha-adan tud Tirsah.

<sup>24</sup> Entanni ey gintang tu etan duntug di Samaria ni enem ni libun Silber nan Semer. Hinammad tun linuhud humman ni duntug et kapyaan tun bebley et ngadnan tun Samaria tep Semer hu ngadan ni kan puyek. <sup>25</sup> Nem hi Omrih hu nemahhig ni peteg hu nanliwatan tun APU DIOS, tep nema-ma-ma hu impahding tun lawah nem yadda neitunudan tun nampatul. <sup>26</sup> Heni lan Jeroboam e nemangulun nampatul e impabunget tu hi AP-APU e Dios idan helag Israel tep ya liwat tu niya nengipappangnguluhan tuddan tuun manliwwat e dinaydayaw da hu tuttu-un dios ni kinapkapan tuu.

<sup>27</sup> Emin hu impahding Omrih ni nampatulanan tu ey neitudek di Libluh idan Patul di Israel. <sup>28</sup> Netey hi Omrih et maikulung di gungat idan aammed tud Samaria, et maihullul ni mampatul hi Ahab e u-ungnga tu.

*Ya nampatulanan Ahab di Israel*

<sup>29</sup> Nampatul hi Ahab e u-ungngan Omrih di Israel eman ni meikkatelumpulut walun toon ni nampatulanan Asa di Judah, et manha-ad di Samaria ni dewwampulut dewwan toon. <sup>30</sup> Nemahhig mewan nanliwatan tun APU DIOS nem yadda neitunudan tun patul. <sup>31</sup> Beken ni ebuh hu nanliwatan tun henin nanliwatan Jeroboam hu binungetan APU DIOS ni hi-gatu, nem gapu tep inahwa tu pay hi Jesebel e u-ungngan Ethaal e patul di Sidon et dayawen tu hi Baal. <sup>32</sup> Binehwat tu hu tempol di Samaria ni pandeyyawan dan Baal et mengapayan pan-appitan diman. <sup>33</sup> Nengapya mewan ni kei-inggeh ni biin dios e hi Asherah. Huyya gaputun daddakkel hu impahding tun nengipebunget ni AP-APU e Dios idan helag Israel, nem yadda etan patul ni neitunudan tu.

<sup>34</sup> Nunman ni nampatulan Ahab hu nengiyayyaggudan nan Hiel e iBethel ni Jericho. Kapangkapyaan Hiel hu pengibbehwatan ni nunman ni bebley, ey netey hu pengulwan ni lakin u-ungnga tu e hi Abiram. Ginibbuh tun inha-ad ida hu eheb nunman ni bebley, ey netey mewan hu udidyan ni lakin u-ungnga tu e hi Segub. Huyyaddan neipahding hu inamnuan ni inhel APU DIOS ni nunman nan Joshua e u-ungngan Nun meippanggep ni Jericho.

## 17

<sup>1</sup> Entanniy wada hu prophet e hi Elijah ngadan tu e iTisbi di Gilead e kanton Ahab ey "Yad ngadan nan APU DIOS e Dios idan helag Israel e wadan ingganah, e kan bega-en ni hi-gak, ey e-helen kun hi-gam e endilli delnu winu udan ni dewwa winu tellun toon ingganah ni penghelak e um-udan mewan."

<sup>2</sup> Entanni ey kan APU DIOS nan Elijah ey <sup>3</sup> "Hi-yan mu huyyan bebley et mampalaw kad appit ni kasimmilin aggew, et mantalu ka etan di neihnup di Wangwang e Kerit di appit ni kasimmilin aggew di Wangwang e Jordan. <sup>4</sup> Ala kan innumen mud wangwang ey be-alen ku hu gawwang ni mengi-lin kennen mu."

<sup>5</sup> Inu-unnud Elijah humman ni inhel APU DIOS et lumaw, et manha-ad di gilig ni Wangwang e Kerit. <sup>6</sup> Kai-aliddan gawwang hu kennen tun sinapay niya detag ni kakkabbuhhan niyan mahmahdem, ey yad wangwang tuka innumi.

<sup>7</sup> Entannit hakey ni aggew ey natduk humman ni wangwang tep endi udan.

*Hi Elijah et ya etan nebalun biid Sarephat*

<sup>8</sup> Kan APU DIOS nan Elijah ey <sup>9</sup> "Lakkay di Sarephat e bebley ni neihnup di Sidon et manha-ad kadman. Wada hu nebalun biidman ni mengidwat ni kennen mu tep inhel kun hi-gatu."

<sup>10</sup> Limmaw hi Elijah et dumteng di eheb nunman ni bebley, ey inang-ang tu hu hakey ni nebalun biin kamemessing. Kanton hi-gatuy "Idwasi muwak anhan ni danum ni innumen ku." <sup>11</sup> Kamenglaw humman ni nebalun biin an um-alan danum, ey impetunud Elijah e kantuy "Idwasi muwak anhan pay ni ekket ni sinapay."

<sup>12</sup> Immehel humman ni nebalun bii ey kantuy "Yad ngadan nan AP-APU e Dios mu e wadan ingganah ey issapatah ku e makulug ni endin hekey sinapay mi. Wadan ebuh hu hanggamal ni alinah di galapon et ya ekket ni mansika. Immali-ak deyan memessing et ienamut ku et panunguk ni alinah ni kennen mi etan ni u-ungngak ni laki. Humman ni ebuh law hu pinnangan mi et mettey kami law ni han-ina tep endi law kennen mi."

<sup>13</sup> Nem kan Elijah ni hi-gatuy "Entan pandanag! Lakkay et mu iheeng hu kennen yu, nem iheeng ka nin eket ni sinapay ni kennen ku et i-lim ey han ka law nenaeng ni kennen yun u-ungngam. <sup>14</sup> Tep inhel APU DIOS e Dios idan helag Israel e kantuy 'Hi-gak e AP-APU ey peellik hu udan et eleg kayu me-puhan ni alinah niya mansikan olibah ingganah ni medettengan humman ni tsimpuh.'"

<sup>15</sup> Inu-unnud nunman ni nebalun bii humman ni inhel Elijah ni pehding tu, ey neipalpun nunman ey wada kennen dan kewa-wa-wa. <sup>16</sup> Tep anin ni piga ussalen dan mansika niya alinah et eleg ida ma-puhan, tep humman hu inhel APU DIOS.

<sup>17</sup> Hakey ni aggew ey nandeggeh etan u-ungngan nunman ni nebalun bii. Entanniy nema-ma degeh tu et matey. <sup>18</sup> Kan nunman ni biin nan Elijah ey "Hi-gam ni bega-en nan Apu Dios, kele hannya hu impahding mun hi-gak? Kaw immali kan mengastigun hi-gak tep ya liwat ku ma-lat pateyem eya u-ungngak?"

<sup>19</sup> Kan Elijah ey "I-lim etan u-ungnga!" Et ilaw tu humman ni u-ungnga etan di meikkadwan gladuh nunman ni baley et ihgep tud kuwaltuh ni tuka panha-adi et bebaktud tud kama. <sup>20</sup> Inlet tun nandasal e kantuy "APU DIOS e Dios ku, kele hannya mu impahding eyan u-ungngan nebalu? Impenaptek tuwak numan ey kele mu pintey hu u-ungnga tu?" <sup>21</sup> Neita-pew hi Elijah di annel etan ni u-ungngan nampitlu et mandasal e kantuy "APU DIOS e Dios ku, pebanggad mu anhan hu yahyah eyan u-ungnga!"

<sup>22</sup> Dingngel APU DIOS hu dasar nan Elijah et tumegu etan u-ungnga. <sup>23</sup> Inlaw Elijah nan inetu et kanton hi-gatuy "Ang-ang mu kedi, mategu eya u-ungngam!"

<sup>24</sup> Kan etan ni biin nan Elijah ey "Inamtak law e makulug ni bega-en daka ey prophet dakan APU DIOS."

## 18

*Hi Elijah et yadda etan prophet Baal*

<sup>1</sup> Hakey ni aggew ni meikkatun toon ni eleg tu udanan ey kan APU DIOS nan Elijah ey "Lakkay di kad-an Ahab e patul et ehlen mun hi-gatu e peellik law hu udan" <sup>2</sup> et lumaw hi Elijah di kad-an Ahab.

Yan nunman ey nemahhig law hu bisil di Samaria. <sup>3</sup> Entanni ey ineyagan Ahab hi Obadiah e kamampatek ni palasyoh tu. (Hi Obadiah ey nanengtun kamengunnud nan APU DIOS. <sup>4</sup> Yan nampemateyan Jesebel idan prophet APU DIOS ey intalun Obadiah hu hanggatut ni prophet di dewwan leyang ey hannenelimad hakey ni leyang. Imbabballunan tuddan kenne da et ya innumen da.) <sup>5</sup> Kan Ahab nan Obadiah ey "Umlaw ita et ta ang-angen emin hu ida hebwak niyadda kulukul eyad nambebleyan tayu hedini wada um-ustuh ni helek ni kenne ida eyan kebayyu et tumegudda et anhan hu edum. Eleg na-mu-et anhan mahapul ni tayu petteyen hu edum ni animal tayu." <sup>6</sup> Nanhummangan ida e mampellaw di pangil hakey ey ya damad pangil hu hakey et manhi-yan ida.

<sup>7</sup> Kamenglaw hi Obadiah ey dinammu tu hi Elijah. Inimmatunan tu et manyuung e kantun hi-gatuy "Kaw hi-gam hi Elijah, e apu?"

<sup>8</sup> Kan Elijah ey "Em, hi-gak hi Elijah. Lakkay et mu ehelen etan ni patul ni kan bega-en ni hi-gam e wada-ak."

<sup>9</sup> Hinumang Obadiah et kantuy "Kaw hipa impahding kun lawah et pinhed mun petteyen da-ak nan Ahab e patul? <sup>10</sup> Issapatah kud ngadan nan APU DIOS e Dios mun wadan ingganah e daka impahemahemak di kebebbley nan Ahab. Hedin mewan kan ni hakey ni patul ey endi kad bebley tu, kapepillit Ahab ni mansapatah etan patul diman e makulug ni endi kadman ni bebley tu. <sup>11</sup> Ey kammun hi-gak nunyay umlawwak et nak ehelen etan ni patul e wada ka? <sup>12</sup> Inna-nu hedini nakka menglaw ni an menghel ni hi-gatu e wada ka ey immali mewan kumedek hu Ispirituh APU DIOS et ibsik daka lad edum ni bebley. Kaw eleg tuwak petteyan hi-gatu hedini um-ali ey endi ka? Ey hedini ngun hi-gak e bega-en mu man dinaydayaw ku hi APU DIOS neipalpu eman ni kaglang ku. <sup>13</sup> Kaw eleg mu dengelen hu nengiteluan kun hanggatut ni prophet di dewwan leyang, e hannenelimad hakey ni leyang, et i-illawwak idan kenne da, tep yan nunman hu tsimpuh ni nampemateyan Jesebel idan prophet APU DIOS? <sup>14</sup> Et humman hu etan tu kan ey nak e-helen etan ni patul e wada ka? Tep makulug anhan et petteyen tuwak!"

<sup>15</sup> Hinumang Elijah e kantuy "Issapatah kud ngadan APU DIOS e wadan ingganah niya Kabaalan tun emin ey hi-gatu AP-APU ni kan bega-en ni hi-gak e mampeang-angngak etan ni patul ni nunyan aggew." <sup>16</sup> Limmaw hi Obadiah et tu ehelen nan Ahab e patul et umlin an menammun Elijah. <sup>17</sup> Inang-ang Ahab hi Elijah ey kantuy "Itten ka law ditan ni kaumhuhulun ni kapanligigasiddan Israel?"

<sup>18</sup> Kan Elijah ey "Beken ni hi-gak hu gaputun kayu kamanligligat tep nalpun hi-gayun amam. Nginhay yu hu tugun APU DIOS ey yuka daydayawa hi Baal e dios ni kinapyan tuu. <sup>19</sup> Lakkay et mu oldenan idan emin hu tuud Israel et mandadammu itud Duntug e Karmel. Peki-lim ida emin hu prophet ni kapappangngan nan hi Jesebel e bineley mu. Humman ida ey epat ni gatut et neliman prophet Baal et yadda etan epat ni gatut ni prophet Asherah e biin dios."

<sup>20</sup> Ineyagan Ahab ida emin hu tuud Israel, anin idan prophet et maemung idad Duntug e Karmel. <sup>21</sup> Limmaw hi Elijah di hinanggaddan tuu et kantun hi-gaday "Pigan tullu pannemneman yun ustuh? Hedin kanyud nemnem yu ey hi APU DIOS hu makulug ni Dios, hi-gatu unud yu! Nem hedini kanyuy hi Baal hu ustuh ni dios, hi-gatu daydayaw yu!"

Nem kaum-eneeneng ida etan tuu.

<sup>22</sup> Kan mewan Elijah ni hi-gaday "Hi-gak ni ebuh hu natdaan ni prophet APU DIOS, nem yadda prophet Baal ey epat ni gatut et nelima. <sup>23</sup> I-li yu hu dewwan lakkitun baka. Idwat yu hakey idan eyan prophet Baal et wa-teken dat genedgeden da et ita-pew da eyad ittungun keyew nem eleg da apuyi. Henin nunman dama pehding ku etan ni hakey ni baka. <sup>24</sup> Ey mandasal ida etan ni dios da e hi Baal. Mandasallak daman APU DIOS. Ya etan mengippeellin apuy ey humman hu makulug ni Dios."

Ida kamantetekkuk hu tuu e kanda "Em, kayyagud huttan ni inhel mu!"

<sup>25</sup> Kan Elijah etan idan prophet Baal ey "Hi-gayu pamengulu tep dakek kayu. Aleyu hakey ni lakkitun baka et idaddan yu. Pandasal kayun dios yu nem etan tu apuyi."

<sup>26</sup> Inla da etan hakey ni lakkitun bakan iddaddan da, et mandasal idan Baal meippalpun nunman ni kakkabbuhan et ingganah ni emaggew. Kandan dasal day "Humang mu dasal mi e Baal!" Nem endi kaumhumang.

Intatagga da tayaw e ida kaumeniklikweh di pan-appitan ni kinapya da.

<sup>27</sup> Ngannganih ni emaggew ey kaheghegnitaddan Elijah e kantuy "Kele eleg umhumang hi Baal? Kaw beken ni dios? E-ellet yu pay hu tekuk, nungay wada tuka nemnemnema winu wada tuka pan-inggunu? Nungay wada linawwan tu winu neugip et mahapul ni bengnunen?"

<sup>28</sup> Et nema-man daka pan-itkuk hu dasal dan Baal ey daka panlipusi annel dan pahul niya hinallung, tep humman dedan hu daka pehding ingganah ni kaman-pangkukuheyaw hu liput da. <sup>29</sup> Nahwing law aggew ey tagan da pay hu dasal ey tagan da hu ngalan endi tunung tu ingganah ni kamangkelinnug hu aggew ey nedatngan law hu tsimpuh ni kapan-appisin mahmahdem ey endi hu humang Baal.

<sup>30</sup> Immehel law hi Elijah idad tuu et kantuy "Keihenhennup kayudya." Neamung ida hu tuud kad-an Elijah et iyayyaggud tu hu nebahbah ni kapan-appisin APU DIOS. <sup>31</sup> Immalan hampulut dewwan batun mengi-ehneng idan hampulut dewwan helag Jacob e nginedanan APU DIOS ni Israel. <sup>32</sup> Inusal tudda humman ni batun nengapyan altar et mengapyan kanal di nanlinikweh ni mabalin ni han-aletu hu epat ni galon ni danum. <sup>33</sup> Hina-adan tun keyew hu altar APU DIOS et genedgeden tu etan lakkitun baka, et itapew tud keyew ni ittungu. Negibbuh humman et kantuy "Penu yu hu epat ni pa-nay ni danum et iduyag yu eman di mei-appit et yad keyew ni ittungu." Et u-unnuden da.

<sup>34</sup> Kantu mewan ey "Ipidwa yu!" et idalli mewan man-ahul et iduyag da. Impitlu tu mewan e kantuy "Duyagi yu pay!" Et u-unnuden da inhel tu. <sup>35</sup> Kaman-aayuh hu danum di altar et mapnu etan kinu-kuan dan kanal.

<sup>36</sup> Nedatngan law hu tsimpuh ni kapan-appisi et mandasal hi Elijah et kantuy "Hi-gam e AP-APU e Dios di Abraham, hi Isaac et hi Jacob, peamtam nunya e hi-gam hu Dios di deydad Israel niya peang-ang mu e hi-gak hu bega-en mu ey emin eya impahding ku ey in-olden mu. <sup>37</sup> Humang mu anhan eya dasal ku e APU DIOS et pengamtaan idan nunyan tuu e hi-gam hu makulug ni Dios niya amtaen da e pinhed mun meibbanggad idan hi-gam."

<sup>38</sup> Entanniy impaelin APU DIOS hu apuy et giheben tu etan neiappit, ya etan keyew ni ittungu, yadda etan batu niya puyek, et anin etan danum di kanal ey natduk. <sup>39</sup> Inang-ang idan tuu humman ni neipahding ey limmukbub idad puyek et daka pan-itkuk e kanday "Hi APU DIOS hu makulug ni Dios, endi edum ni Dios!"

<sup>40</sup> Kan Elijah ey "Depap yudda hu prophet Baal! Ang-ang yu eya endi bumsik ni higa-da, anin hakey!" Dimpap idan tuu emin prophet Baal et ilaw daddad Wangwang e Kishon et pateyen tuddan emin diman.

#### *Ya immudanan tu*

<sup>41</sup> Negibbuh emin humman ni neipahding et kan Elijah nan Ahab ey "Lakkay law et ka mekanggan, tep nakka deddengngela hu bungug ni udan e immen ali."

<sup>42</sup> Limmaw hi Ahab et an mangang ey nanteyed dama hi Elijah di Duntug e Karmel et yumudung e inlukluk tu hu ulu tud nambattanan ni pukel tu.

<sup>43</sup> Kantu etan ni bega-en tuy "Lakkay et kaman-uhdung di baybay." Limmaw etan bega-en ey nambangngad et kantuy "Endin hekey inang-ang ku." Neminpittu nengitudakan Elijah ni hi-gatan an man-uhdung di baybay.

<sup>44</sup> Yan meikkeppitun an pan-uhdungan nunman ni bega-en ey kantuy "Wada hu kulput ni heni ngamay ni tuun kamena-pew di baybay."

Kan Elijah etan ni bega-en tuy "Lakkay et mu ehelen nan Ahab e manluggan di kalesah tu, et umenamut ma-lat eleg meha-kupan ni na-let ni udan."

<sup>45</sup> Entanniy nan-enget tep dimmekket hu kulput. Kamandidibidib ey tuka pan-egaha udan. Impapuut Ahab et umenamut di Jesreel. <sup>46</sup> Hedin hi Elijah, ey binallikidan tu hu andukkey ni balwasi tu et pa-let APU DIOS et besiken tud Jesreel ey nemangulu pay ni dimmateng nem hi Ahab e patul.

## 19

#### *Bimmesik hi Elijah di Sinai*

<sup>1</sup> Dimmateng hi Ahab et idaddatteng tun ahwatu e hi Jesebel emin hu impahding Elijah nunman ni aggew et ehelen tu pay hu nemateyan tun emin ni prophet Baal. <sup>2</sup> Dingngel Jesebel et itu-dak tu hu an menghel nan Elijah ni nunya e kantuy "Anin ni petteyan da-ak idan dios hedin enggak ipahding ni hi-gam hu impahding muddan prophet Baal ni henin nunyan olas ni kabpuhan."

<sup>3</sup> Simmakut hi Elijah et bumsik. Ingkuyug tu etan bega-en tu et lumaw idad Beersheba di Judah. Dimmateng idadman et hi-yanen tudman hu bega-en tu, <sup>4</sup> nem hedin hi-gatu man nandalan ni han-aggew et lumaw di eleg mebebleyi. Nan-iyatu et yumudung e nanhidum di hengeg ni keyew e kamekapyan hagad tep neka-atu ey nedismayah et pinhed tun mettey. Nandasal e kantuy "Hiyya law e APU DIOS, eya nemahhig ni kamekapkapan hi-gak. Pappag mu ew katted hu biyag ku tep heni-ak metlaing ida lan aammed ku."

<sup>5</sup> An bimmaktad etan di hengeg ni keyew et maugip. Endi maptek ey wada hu anghel ni nengapan hi-gatu e kantuy “Bangun ka et mangan ka.” <sup>6</sup> Bimmangun hi Elijah ey inang-ang tu hu et-eteng ni sinapay et ya hakey ni pa-nay ni danum ni neiha-ad di ulu-an tu. Nengan et uminum et bumaktad mewan.

<sup>7</sup> Nambangngad mewan etan anghel APU DIOS et bangunen tu et kantuy “Bangun kat mangan ka pay tep neidawwi hu lawwan mu.” <sup>8</sup> Bimmangun hi Elijah et mangan et uminum ey neibangngad elet tu et mandalan ni na-pat ni aggew et dumteng di Sinai e Duntug Apu Dios. <sup>9</sup> Wada hu leyang diman et yadman kaugipan tun nunman ni hileng.

Nem entanniy immehel hi APU DIOS ni hi-gatu e kantuy “Elijah, hipa muka ihahha-ad deya?”

<sup>10</sup> Hinumang Elijah et kantuy “AP-APU e Kabaelan tun emin, nanbega-en muwak ni ingganah et hi-gam ni ebuh hu nansilbian ku. Adyahaak tep ihik ida helag Israel ni memettye ni hi-gak, ey deh dedangngu e hakeyyak ni natdaan tep pintey dan emin hu prophet mu. Inwalleng da nekitbalan dan hi-gam niya binahbah da pan-appitan ni hi-gam.”

<sup>11</sup> Kan APU DIOS ey “Kaukat ka et lumaw kad duntug et umehngeng kad hinanggak.” Kaman-eh-ehngeng hi Elijah ey dimmibdib ni na-let ey nepi-ang etan duntug et mangkepi-ang ida batu, nem endi hi APU DIOS di dibdib. Nesiked etan na-let ni dibdib ey nanyegyeg, nem endi hi APU DIOS di yegyeg. <sup>12</sup> Nesiked hu yegyeg ey newada apuy, nem endi hi APU DIOS etan di apuy. Entanni law et endi etan apuy ey wada hu neituttubun ehel.

<sup>13</sup> Dingngel Elijah etan ehel ey hinephepan tu angah tun etan ni andukkey ni balwasi tu, et umehngeng etan di habyen ni leyang ey kan etan ni immehhel ey “Hipa muka ippenahding deya e Elijah?”

<sup>14</sup> Kan Elijah ey “APU DIOS e Kabaelan tun emin, nansilbi-ak ni hi-gam ni ingganah. Nem inwalleng idan iIsrael hu tugun mu. Nambahbah da hu pan-appitan ni hi-gam ey pintey da emin hu prophet mu. Hakeyyak law ni natdaan ey pinhed da-ak mewan ni petteyen.”

<sup>15</sup> Kan APU DIOS ey “Pambangngad kad nalpuam e idlan mud dinlan mu etan di eleg mebebleyin neihnup di Damascus, et lumaw kad Damascus et mu putuken hi Hasael e duyagim ni lana ulutu ma-lat hi-gatun mampatul di Syria. <sup>16</sup> Hanniman dama ipahding mun Jehu e u-ungngan Nimsi e duyagim ni lana ulu tu ma-lat hi-gatu mampatul di Israel niya pambalin mu hi Elisha e u-ungngan Saphat di Abel Meholah ni meihhullul ni hi-gam ni prophet. <sup>17</sup> Emin hu umbebsik ni eleg petteyan Hasael ey petteyen Jehu, emin hu umbebsik ni eleg petteyan Jehu ey petteyen Elisha. <sup>18</sup> Nem anin hannitan, ey wada inappli kun pitun libun tutu-ud Israel ni impannaneng da dinel dan hi-gak e eleg ida manyuung nan Baal.”

#### *Ya nambalinalin Elisha ni prophet*

<sup>19</sup> Limmaw hi Elijah et tu hamaken hi Elisha ey dinteng tun kaman-elladu e hampulut dewwan paris ni bulug ni baka hu tuka pan-elladu. Hampulut hakey ni paris hu nemangulu ey hakey ni paris hu nanggillig ni tuka manmandala. Ingkal Elijah etan andukkey ni balwasi tu et pebalwasi tun Elisha. <sup>20</sup> Hini-yan Elisha etan ida baka et meipdug nan Elijah et kantuy “Ettu anhan et nak ni ibgan ama et hi ina et hannak makilaw ni hi-gam ey?”

Kan Elijah ey “Dammutu. Eggak ikka-leg.” <sup>21</sup> Nambangngad hi Elisha et wa-teken tu hu hakey ni paris ni baketu et iheeng tu, e inusal tudda hu pakun nenungu tu, et ieyag tudan tuu et hamulen da. Negibbuh et makilaw nan Elijah et baddangan tud ngunu tu.

## 20

#### *Ya gubat ni Israel et ya Syria*

<sup>1</sup> Hi Benhadad e patul di Syria ey inemung tudan emin hu sindalu tu. Ey nei-dum ni hi-gada hu telumpulut dewwan patul niyadda sindalu da. Immegah ida e nantakkay idad kebayyu niya nanlugan idad kalesah ni kaussalad gubat et da gubaten hu Samaria.

<sup>2</sup> Immitu-dak hi Benhadad idan tuu tu etan di bebley et da ehelen nan Ahab e patul ni Israel huuya: “Kan patul e hi Benhadad ey <sup>3</sup> ‘Ellan kudda silber mu niya balituk mu anin idan kekatkat-agan ni ahwam niyadda u-ungngam.’”

<sup>4</sup> Hinumang Ahab et kantuy “Apu, nakka ebbuluta muka ibbaga. Anin ala muwak et yadda emin ni wadan hi-gak.”

<sup>5</sup> Nambangngad ida mewan hu bineal Benhadad et kanday “Kan Benhadad ey ‘Imbagak e iddawat mun hi-gak hu silber ya balituk, yadda ahwam et yadda u-ungngam,

<sup>6</sup> nem yan kabubuhan ni hanneyan olas ey ittu-dak kudda opisyal ku ma-lat da hinapen hu baballey yuddan opisyal mu et alen dan emin hu hipan nebalol.’ ”

<sup>7</sup> Inaygan Ahab ida emin hu kamengipappanggulun bebley tu et kantuy “Ang-ang yu kedi, pinhed nunman ni tuun mekigguluh ni hi-gatsu. Nenu-dak la e kantuy iddawat kun hi-gatu ida ahwak, yadda u-unggak, et yadda silber niya balituk ku et tebalek.”

<sup>8</sup> Kan idan nunman ni kamengipappanggulu et yadda tuu ey “Entan tu kaya dengel niya entan abulut tu hu tuka ibbaga.”

<sup>9</sup> Et kan Ahab idan intu-dak Benhadad ey “Ehel yun patul yu e inebulut ku etan nemangulun imbagetu nem eleg mabalin ni nak ebbuluten eya tuka ibbagan nunya.” Immanemut ida et da ehelen nan Benhadad humman ni inhumang nan Ahab.

<sup>10</sup> Entanniy nenu-dak mewan hi Benhadad e kantuy “I-alik hu dakel ni sindalu et bahbahren mi eya et-eteng ni bebley mu et ya dep-ul law hu i-anemut da. Anin ni petteyan da-ak idan dios hedin eggak pehdng humman!”

<sup>11</sup> Hinumang daman Ahab e kantuy “Ehel yun patul yu e ya hakey ni sindalu ey eleg ni mampahhiya hedin kamandaddan ni an mekiggubbat. Et hedin negibbuh hu gubat et mengapput ey han law nampahhiya.”

<sup>12</sup> Dinggel Benhadad huyyan inhumang Ahab ni daka pengi-innumiddan edum tun patul di nangkampuan da, et kantuddan tuu tuy “Pandaddan kayun mekiggubbat!” Et mandaddan idan mengubbat etan ni et-eteng ni bebley Ahab.

<sup>13</sup> Entanniy wada prophet ni limmaw di kad-an Ahab e patul ni Israel et kantuy “Kan APU DIOS ey ‘Entan takut muddan eman ni muka ang-ang-angan dakel ni sindalun mengubbat ni hi-gayu, tep peapput kudtan hi-gam ni nunyan aggew et pengamtaan e hi-gak hu AP-APU.’ ”

<sup>14</sup> Kan Ahab ey “Hipa mengippengguluddan mekiggubbat?” Kan etan ni prophet ey “Kan APU DIOS ey yadda kakat-agun aap-apun sindaluddad probinsiya.”

Kan Ahab mewan ey “Hipa mengidwat ni olden idan nunman ni sindalu?” Kan etan ni prophet ey “Hi-gam.”

<sup>15</sup> Et paeyag Ahab hu ap-apuddan sindalud probinsiya e ya bilang da ey dewanggatut et telumpulut dewwa. Et hantudda amunga hu sindalun Israel e pitu libu bilang da. <sup>16</sup> Nandattek aggew nunman ey limmaw idan an mengubbat idan iSyria. Ey yan nunman ni tsimpuh ey ida kamangkebutteng di Benhadad niyadda etan telumpulut dewwan patul ni memaddang ni hi-gatu. <sup>17</sup> Nemanguludda hu sindalud probinsiya ni limmaw. Et ida kamenetteng ey inang-ang idan sindalun Benhadad ni kaman-ang-ang-ang et kandan hi-gatuy “Wadadda sindalun kamengellin nalpud Samaria.”

<sup>18</sup> Kan Benhadad ey “Entan tudda patey, nem depap yudda, anin hedin kantu et kayyaggud hu in-ali da winu mekiggubbat ida.”

<sup>19</sup> Nem ay kapan-ipenguluddan ap-apun sindalud probinsiya hu edum dan sindalun Israel ni an mengubbat ni hi-gada. <sup>20</sup> Et wada hakey idan sindalud Israel ey pintey tu hu kehangga tun sindalun Syria. Endi maptek law ey namsik ida hu sindalun Syria et pampedugen idan sindalun Israel, nem impepuppuut Benhadad et mangkebayyuddan edum ni sindalu tu et bumsik ida. <sup>21</sup> Naka-apput Ahab ida iSyria anin idan etan ni nampangkebayyu ey nampangkalesah ni sindalu da.

<sup>22</sup> Entanniy limmaw hu hakey ni prophet et kanton Ahab ey “Hedin mambanggad kayu, ey ang-ang mu et paka-iddaddan mudda sindalum, niya pakannemnemen yu hu kayyaggud ni pehdng yu, tep gubbaten dakeyulli mewan ni patul di Syria ni hanneyan tsimpuh ni balintu.”

<sup>23</sup> Kan idan opisyal nan Benhadad ni hi-gatuy “Ya gaputun neapput itu ey dios di neduntug hu dios ni Israel. Nem kedi nem yad nedeklan hu panggugubatan tayu, mengapput itu. <sup>24</sup> Heninnuy pahding mu: Ekal mudda etan patul ni mengippenggulun gubat et ihullul mudda hu ap-apun sindalu. <sup>25</sup> Ey idaddan mu hu henin kedakkel lan sindalu tayun nangketey ey hululim ida kekebayyun nangketey niya kakalesah ni nangkebahbah. Et gubaten tayudda iIsrael di nedeklan et apputen tayudda.”

Inebulut Benhadad humman et ipahding tu emin inhel da.

<sup>26</sup> Entanni ey nelabah hu tsimpuh ni ketel et amungen Benhadad hu sindalu tu et lumaw idad Aphek ni an mengubbat ni Israel. <sup>27</sup> Nandaddan ida dama iIsrael et lumaw idan menammun hi-gada. Henidda dewwan ek-ekut ni halun ni kalneroh ey hedin yadda iSyria man ninapnapan da hu pangil ni duntug. Nandimmang hu nangkampuan da.

<sup>28</sup> Limmaw etan prophet di kad-an Ahab et kantuy “Heninnuy hu inhel nan APU DIOS ‘Gapu tep kan idan iSyria ey hi-gak hu dios ni ebuh di duntug nem beken di nedeklan ey peapput kun hi-gayu eman ida dakel ni sindalu da et pengamtaan yu e hi-gak hu APU DIOS.’ ”



<sup>29</sup> Pitun aggew hu nanhahha-adan idan iSyria niyadda iIsrael di kampuddan nandemang. Inlapu dan manggubat ni meikkeppitun aggew ey pintey ni iIsrael hu hanggatut ni libun sindalun Syria. <sup>30</sup> Bimmesik idad Aphek etan eleg matey nem nealay natleb mewan etan binattun luhud nunman ni bebley et mangkede-hilan ida et matey hu dewampulut pitun libun hi-gada.

Bimmesik dama hi Behdad et an mantalu etan di neitlun kuwaltuh ni hakey ni baley. <sup>31</sup> Limmaw ida hu opisyal tud kad-an tu et kandan hi-gatuy "Dingngel mi e mahmek hu patul idan iIsrael. Abulut mu et lumaw kamid kad-an ni patul idan Israel et iewake mi langgusih ey imbanggel mi hu linubid et hemeken daka et eleg daka pateyen."

<sup>32</sup> Hanniman impahding da e imbalwasi da langgusih et ibanggal da linubid et lumaw idad kad-an Ahab et kandan hi-gatuy "Kan Behdad ey ebuh anhan tu patey."

Kan Ahab ey "Kaw mategu pay? Kayyaggud tep heni kami han-agi!" <sup>33</sup> Hedin ya impan-awat idan opisyal Behdad nunman ni inhel Ahab ey kayyaggud hu meippahding et humangen da e kaday "Makulug ni han-agi kayan Behdad!"

In-olden Ahab e kantuy "Paeli yudya!" Dimmateng hi Behdad ey ineyagan Ahab et yumuddung idan dewwad etan di kalesah ni tuka ussalad gubat.

<sup>34</sup> Kan Behdad ni hi-gatuy "Ibbangngad kun hi-gam ida etan bebley ni inlan aman nan amam ey dammutun memehwat kan et-eteng ni panggettangan yud Damascus e henin impahding amadtan Samaria."

Kan Ahab ni hi-gatuy "Gapun nunyan panhummanganan ta ey ibbukyat daka." Et makahummanganan ida e eleg ida law manggugubat et ibukykat tu.

#### *Inhel ni hakey ni prophet e lawah hi Ahab*

<sup>35</sup> Entanni ey kan APU DIOS etan ni hakey ni prophet ey "Ehel mun kadwam ni prophet e kammy 'Kaway muwak.'" Nem eleg kawayen etan ni hakey ni prophet.

<sup>36</sup> Et kan etan ni prophet ni hi-gatuy "Gapu tep muka ngenghaya olden APU DIOS ey petteyen daka lan layon ni peni-yanam ni hi-gak." Immela etan prophet ey dinammu tu layon et pateyen nunman ni layon.

<sup>37</sup> Limmaw mewan huyyan prophet di hakey ni tuu et kantun hi-gatuy "Kaway muwak." Inlet etan ni tuu nengaway ni hi-gatu et masugat kumamman.

<sup>38</sup> Linibutan etan ni prophet hu angah tun luput, et eleg meimmatunan et umehneng di gilig ni keltad et hehheggeden tu kelebbaan etan ni patul. <sup>39</sup> Nelabah etan patul et umhel etan prophet e kantuy "Apu patul, nak nekigubat ey wada hakey ni sindalun nengi-lin hi-gak ni dimpap tun buhul tayu. Kantuy 'Guwalyaim huyyan tuu. Hedin pepsik mu man petteyen daka winu multaen dakan tellun libun silber.'" <sup>40</sup> Nem endi maptek ni hanggaek et eggak kumedek pepuhdanan ey bimmesik etan tuu."

Hinumang nan patul et kantuy "Intakang mu kastigum et humman meippahding ni hi-gam."

<sup>41</sup> Ingkal etan ni prophet hu inhani tud angah tu ey inimmatunan etan ni patul e hi-gatu hakey ni prophet. <sup>42</sup> Et kan law etan ni prophet ni hi-gatuy "Heninnuy hu inhel APU DIOS ni hi-gam 'Gapu tep in-abulut mun eleg mettey etan tuun in-olden kun mettey ey ihullul mu biyag mu. Ey mettey ida sindalum tep eleg da pateyen sindalu tu.'" "

<sup>43</sup> Kaumlemyung ey kaumbubunget hi Ahab e patul di Samaria ni immanemut.

## 21

### *Ya leguntan Nabot*

<sup>1</sup> Wada etan puyek Nabot e kapantennemin grapes ni neihnpud di palasyoh nan Ahab e patul di Jesreel. <sup>2</sup> Hakey ni aggew ey kan Ahab nan Nabot ey "Ettu et idwat mun hi-gak etan puyek mun sinneman mun grapes? Neihnpud di palasyoh ku et pinhed kun tenneman ni natnateng. Mekiwwa-hi-ak ni kakkayyaggud pay ni pantenneman ni grapes hedin pinhed mu. Hedin bekken, beyyadak ni ustuh."

<sup>3</sup> Hinumang Nabot ey kantuy "Bineltan ku huyyan leguntan pantenneman ni grapes et humman hu eleg et kuma ahan i-abulut APU DIOS ni nak iddawat ni hi-gam!"

<sup>4</sup> Immanemut hi Ahab ey kaumbubunget ey kaumlemyung ni nenumang Nabot ni hi-gatu. Bimmaktad di uggiptan tu e inangga tud dingding ey eleg tu pinhed ni mengngan.

<sup>5</sup> Limmaw hi Jesebel et kantuy "Kele kakaumlemyung? Ey kele eleg ka mengngan?"

<sup>6</sup> Hinumang Ahab et kantuy "Tep imbagak nan Nabot e gettangek etan leguntan tuka tennemin grapes winu hullulak ni hakey ni legunta ey kantuy 'Eleg mabalin ni nak iddawat hu leguntak ni hi-gam.'" "

<sup>7</sup> Kan Jesebel ey "Kaw bekken kan patul ni Israel? Bangun ka ey nan-an-anla ka ey nengan ka. Ellak humman ni leguntan Nabot."

<sup>8</sup> Nengapya hi Jesebel ni dakek ni tudek et ipilma tu ngadan Ahab et malkaan tu etan ni kapammalkan patul et iwatwat tuddan opisyal tu niyadda ap-apud Jesreel. <sup>9</sup> Heninnuy hu neitudek: "Tolden yuddan tutu-u tayun mantetpel idan nunya. Amung yudda ey impayudung yu hi Nabot di yuddungngan ni kametbal ni tuu. <sup>10</sup> Nem ayag kayun dewwan mabunget e endi silbi tun tuu et e-helen da e inidutan Nabot di Apu Dios nan Ahab. Hedin negibbuh, inlaw yu hi Nabot di a-allaw eyan bebley et yu tengbaen et matey."

<sup>11</sup> Inu-unnud idan opisyal et yadda ap-apu humman ni in-olden Jesebel, <sup>12</sup> et getuden da hakey ni aggew ni pantetpelaan da. Inemung dadda tutu-u et payudung da hi Nabot di yuddungngan ni kametbal ni tuu. <sup>13</sup> Impayudung da dama etan dewwan mabunget ni endi silbi tun tuud hinanggan Nabot, et ehelen da e inidutan tud Apu Dios nan Ahab et ilaw dad a-allaw ni bebley et tengbaen da et matey. <sup>14</sup> Intu-dak da an nanghel nan Jesebel e kanday "Netey law hi Nabot."

<sup>15</sup> Dingngel Jesebel hu inhel da et kantun Ahab ey "Netey law hi Nabot. Hi-gam law kan leguntan etan ni eleg tu iggatang ni hi-gam ni puyek tu." <sup>16</sup> Imminah hi Ahab et ganunganun limmaw di leguntan Nabot et pambalin tun legunta tu.

<sup>17</sup> Nem kan APU DIOS nan Elijah e prophet di Tisbi ey <sup>18</sup> "Lakkay di kad-an Ahab e patul di Samaria. Immen di sinneman Nabot ni grapes tep kantuy legunta tu humman. <sup>19</sup> Ehel mun hi-gatu e kammuy 'Pintey mu hi Nabot et piliwem pay hu puyek tu. Gapun nunyan impahding mu ey panhimmutan alin ahhu hu kuheyaw mud a-allaw eyan bebley henin nampenimutan dan kuheyaw Nabot!"

<sup>20</sup> Inang-ang Ahab hi Elijah et kantuy "Himmak muwak mewan e buhul ku?"

Hinumang Elijah et kantuy "Em, himmak daka. Immali-ak tep ebuh tu-wangu lawah ni muka pehpending di hinanggan APU DIOS. <sup>21</sup> Et humman hu, kan APU DIOS ey 'Peellik hu memabbah ni hi-gam. Petteyen daka et ya emin lakid pamilyah mu, u-ungnga winu neamma. <sup>22</sup> Mambalin hu pamilyah mun henin pamilyah lan Jeroboam e u-ungngan Nebat niya heni lan pamilyah nan hi Baasha e u-ungngan Ahijah, tep impabunget muwak ni nengipappangnguluam idan helag Israel ni manliwwat. <sup>23</sup> Hedin hi Jesebel, kenne alin ahhu hu annel tud kad-an ni tuping di Jesreel. <sup>24</sup> Et yaddalli pamilyah mun mettey di bebley ey kenne alin ahhu annel da ey hedin yadda mettey di a-allaw ni bebley ey kenne idan sisit annel da."

<sup>25</sup> (Endi an kei-inggehan idan lawah ni impenahding Ahab di hinanggan APU DIOS, tep tinuttudduan nan ahwa tu e hi Jesebel. <sup>26</sup> Impenahding tu hu anggeba-ing ni peteg, tep dinyadayaw tu hu dios ni kinapyan tuu e humman kadaydayawaddalan iAmmon. Huyyaddan iAmmon hu dinegyun APU DIOS ni nalpuan idan helag Israel di Egypt.)

<sup>27</sup> Dingngel Ahab humman ni inhel Elijah ey bini-ki tu balwasi tu et mambalwasin langgusi ey eleg mamngangan. Tuka i-ugip etan langgusin balwasi tu ey kamandal-adalan e kaumlelemyung.

<sup>28</sup> Kan APU DIOS nan Elijah ey <sup>29</sup> "Inang-ang mu hu nantuttuyuyan kumamman law Ahab di hinanggak? Gapun nengipahdingan tun nunman ey eggak peelli hu memabbah ni hi-gatun nunyan ketaggu tu. Hannak ali kastigua hu helag tu hedin mettey."

## 22

### *Inhelan nan prophet e hi Mikaiiah hi Ahab (2 Chronicles 18:2-27)*

<sup>1</sup> Ya Israel et ya Syria ey eleg ida manggubat ni dewwan toon. <sup>2</sup> Yan meikkatluon toon ey limmaw hi Jehoshaphat e patul di Judah ni an nenang-ang nan Ahab e patul ni Israel. <sup>3</sup> Yan eleg ni lawwan nan Jehoshaphat diman Israel ey kan Ahab idan opisyal tuy "Hi-gatsu hu kambebley ni Ramot Gilead, nem kele ingganah nunya ey eleg tayu bangngaden hu Syria?" <sup>4</sup> Et yan nunman ni linawwan Jehoshaphat diman ey kan Ahab ni hi-gatuy "Attu et baddangan muwak et ta gubaten hu Ramot Gilead?"

Himmumang hi Jehoshaphat ey kantuy "Dammutu, kele tep eleg daka da-dai ey han-agi ita. Anin idan sindaluk niyadda kebayyuk et neidaddan, et ngenamung kan mammandal ni hi-gada. <sup>5</sup> Nem ya memengngulun pehding tayu ey mahmahan tayu nin APU DIOS hedin hipa e-helen tu."

<sup>6</sup> Et ayagan idan Ahab emin hu prophet tu e umlaw di epat ni gatut hu bilang da, et mahmahan tun hi-gada e kantuy "Hipa kanyu, kaw tayu gubbaten hu Ramot Gilead winu eleg?"

Himmumang ida ey kanday "Em, tayudda gubbaten et nanna-ud ni pengapput daitsun Apu Dios."

7 Nem kan Jehoshaphat ey “Kaw endi prophet nan APU DIOS di deyan panmahmahan tayu?” 8 Kan Ahab ey “Wada hakey e hi Mikaiah e u-ungngan Imlah, nem angebe-hel ku tep endi kayyaggud ni tuka e-helan hi-gak, lawah ni ingganah!”

Kan Jehoshaphat ey “Entan tu ihannitan hu ehel mu! Kayyaggud tu dedngelen tayu dama hedini hipa e-helen tu.”

9 Et itu-dak nan Ahab hu hakey ni opisyal tun mengeyyag nan Mikaiah ma-lat mengin-aali.

10 Nambalwasid Ahab nan Jehoshaphat ni balwasin patul et yumudung idad yud-dungngan dad kapan-illikin neihnu di eheb di Samaria, et man-abig ida hu prophet nan Ahab di hinangga da. 11 Wadadman hi Sedekiah e u-ungngan Kenaanah e nengapyan ha-duk ni gumek et peang-ang tu et kantun Ahab ey “Kan APU DIOS ey ‘Heni kayulli newang ni mampena-duk idan iSyria ingganah paka-apputen yudda.’”

12 Emin ida etan edum ni prophet ey nan-iingngel inhel da. Kanday “Mu gubat hu Ramot Gilead et nanna-ud ni mengapput ka tep pengapput dakan APU DIOS.”

13 Ya etan opisyal ni an nengawit nan Mikaiah ey kantun hi-gatuy “Ang-ang mu kuma, tep emin ida edum ni prophet ey kanday mengapput hu patul tayu e hi Ahab, et humman hu, mahapul ni i-unnud mud inhel da!”

14 Nem kan Mikaiah ey “Hedin hi-gak man, issapatah kud ngadan APU DIOS e wadan ingganah e ya e-helen tun ebuh hu e-helek.”

15 Dimmateng hi Mikaiah ey kan Ahab ni hi-gatuy “Mikaiah, kaw umlaw kamin Jehoshaphat ni an mengubbat ni Ramot Gilead winu eleg?”

Himmumang hi Mikaiah et kantuy “Lakkayuy et nanna-ud ni mengapput kayu tep pengapput dakeyun APU DIOS.”

16 Nem kan Ahab ey “Kaw eggak eheehelen ni hi-gam e ya makulug ni ebuh ni kae-helan APU DIOS hu e-helen mu?”

17 Et kan Mikaiah ey “Inang-ang kudda sindalun helag Israel e newahit idan emin di duduntug, e henidda kalneroh ni endi mampattul ni hi-gada. Ey immebel hi APU DIOS e kantuy ‘Endi mengippengguluddan nunyan sindalu. Paenamut yudda et luminggep ida.’”

18 Et kan Ahab nan Jehoshaphat ey “Dingngel mu? Ambeken makulug etan inhel kun hi-gam e endi kayyaggud ni tuka e-helan hi-gak tep lawah emin?”

19 Intuluy Mikaiah ni immebel e kantuy “Dengel yu! Inang-ang ku APU DIOS e yimmudung di yuddungngan tud kabunyan, ey immebneng idan emin hu anghel tud kad-an tu. 20 Entanni ey kan APU DIOS ni hi-gaday ‘Hipa umlaw ni an mene-ul nan Ahab et tu gubaten hu Ramot Gilead ma-lat matey diman?’ Ey wada hakey ni hi-gada ey hin-appil hu tuka pan-e-hela et endi maptek. 21 Lektattuy limmaw di hinanggan APU DIOS hu hakey ni ispirituh et kantuy ‘Hi-gak hu umlaw ni an mene-ul ni hi-gatu.’

22 Kan APU DIOS ey ‘Hipa pedhing mu?’ Kan etan ni ispirituh ey ‘Umlawwak et nak pan-itek idan emin prophet Ahab.’

Kan APU DIOS ey ‘Lakkay, et nanna-ud ni mehe-ul.’ 23 Et mukun hannya neipahding e impan-itek nan APU DIOS ida eya prophet mu, ey hi-gatu metlaing nengiolden e mettey ka!”

24 Entanni ey limmaw hi Sedekiah e u-ungngan Kenaanah di kad-an Mikaiah et ampingen tu et kantuy “Kaw pigantu ni-ngangu neni-yanan ni Ispirituh APU DIOS ni hi-gak et hi-gam inhelan tu?”

25 Kan Mikaiah ey “Amtaem alin mu pantelluan di neihudek ni kuwaltuh.”

26 Entanni ey in-older Ahab e kantuy “Depap yu hi Mikaiah et ilaw yun Amon e gubernor et yad kad-an Joas e u-ungngak. 27 Ehel yun hi-gada e ikkalebut da, ey ebuh danum niya sinapay ni idawat dan kennen tu ingganah pambanggaddan ku e endi neipahding ni lawah ni hi-gak.”

28 Kan Mikaiah ey “Hedin mategu kan meibbangngad, humman keang-angan tu e beken hi APU DIOS ni immebel ni hi-gak!” Kantu pay ey “Emin kayun neamung, nemnemnem yudda huayan inhel ku.”

#### *Ya neteyyan Ahab*

29 Et lumaw di Ahab e patul di Israel nan Jehoshaphat e patul di Judah ni an nengubat ni Ramot Gilead. 30 Yan immegahan da ey kan Ahab nan Jehoshaphat ey “Ya hin-appil ibbalwasik et endi mengimmatun ni hi-gak, nem hedini hi-gam, pambalwasi kan balwasi dedan ni patul.” Et humman hu impahding nan Ahab e patul di Israel e hinullulan tu ang-ang tun an nekigubat.

31 Ya etan patul di Syria ey in-older tuddan etan ni telumpulut tellun aap-apun sindalun nampangkalesah e kantuy “Ebih hu patul di Israel ni petek yun petteyen.”

<sup>32</sup> Et mukun yan nenang-angan idan sindalun Syria nan Jehoshaphat ey nampedig da tep kanda nem hi-gatu etan patul di Israel, nem kamantetekuk <sup>33</sup> et immatunan da e beken hi-gatu etan patul di Israel ey insiked dan memdug ni hi-gatu.

<sup>34</sup> Nem hedini hi Ahab e patul di Israel, wada hu sindalun iSyria ni neipaddih ni nekapitek hu impanetp nambattanani ni nanhuupan ni gumek ni inhuclub tu. Et itkuk tu etan ni kamampellinun kalesah e kantuy, "Nepana-ak! Pambangngad ita kuma et hi-yanen ta eya kapanggugubati."

<sup>35</sup> Ida kamanggugubat nunmani ni aggew ey immen hi Ahab e nandangdangkig di kalesah tun inhangga tudan iSyria. Nangkeukat hu kuheyaw tu et nemahhig hu kuheyaw emini di det-al ni kalesah tu. Kamangkelinnug hu aggew ey netey hi Ahab. <sup>36</sup> Kamangkehilleng nunmani ey wada nengitkuk etan idan sindalu e kantuy "Anemut itsun emini ni sindalud bebley tayu."

<sup>37</sup> Hanniman hu neteyyan nan Ahab. Inlaw da annel tud Samaria et ikulung dadman. <sup>38</sup> Da inulahan etan kalesah ni inusal tun nekigubat di lebeng di Samaria e kapan-emehiddan biin daka pebeyyad annel da. Nanhimutan ni ahhu hu kuheyaw Ahab, et humman hu inamnuan ni inhel lan APU DIOS.

<sup>39</sup> Emin hu impahding Ahab e patul, anin ni ya baley tun neal-alkusan ni bakgit ni elephant niyadda etta-teng ni bebley ni kinapya tu ey neitudek di Libluh idan Patul di Israel. <sup>40</sup> Netey et maihullul hi Ahasiah e u-ungngatun nampatul.

*Hi Jehoshaphat hu patul di Judah*

<sup>41</sup> Nampatul hi Jehoshaphat e u-ungngan Asa di Judah eman ni meikka-pat ni toon ni nampatulani Ahab di Israel. <sup>42</sup> Telumpulut lima toon tun nunmani, et man-apud Jerusalem ni dewampulut liman toon. Hi Asubah e u-ungngan Silhi hu inetu. <sup>43</sup> Kayyaggud impahding Jehoshaphat ni nampatul. Inu-unnud tu hu elaw ametun hi Asa e impahding tu pinhed APU DIOS. Nem eleg tu bahbahen ida pandeyyawan ni beken ni makulug ni dios et eleg issiked idan tuun man-appiti niya mengihheb ni insensoh diman. <sup>44</sup> Hi Jehoshaphat ey kayyaggud hu nekidagyuman tu etan ni patul ni Israel.

<sup>45</sup> Emin hu impahding Jehoshaphat, ya kabaelan tu et yadda gubat ni nekihangaan tu, ey neitudek di Libluh idan Patul di Judah. <sup>46</sup> Ingkal tuddad bebley da emini hu tuun daka pebeyyad annel dan daka pandeyyawiddan beken ni makulug ni dios. Humman ida etan eleg ekalen nan ametu e hi Asa eman ni nampatulani tu.

<sup>47</sup> Endi la nin nunmani hu patul di Edom tep hedini ya ap-apu da ey kamelpud Judah.

<sup>48</sup> Wadadda bapor nan Jehoshaphat ni kaumlaw di Ophir ni um-alan balituk, nem nebahbah idad Esion Geber et eleg idelaw meussal. <sup>49</sup> Entanniy kan Ahasiah e patul ni Israel ey pinhed tun mekillaw hu tuu tuddad tuun Jehoshaphat ni an mambapor nem eleg abuluten Jehoshaphat.

<sup>50</sup> Netey hi Jehoshaphat et ikulung dad Bebley David etan di gungat idan aammed da et maihullul hi Jehoram e u-ungngatun nampatul.

*Hi Ahasiah hu patul di Israel*

<sup>51</sup> Yan meikkahampulut pitun toon ni nampatulani Jehoshaphat di Judah, ey nampatul hi Ahasiah di Israel et man-ap-apud Samaria ni dewwan toon. <sup>52</sup> Nanliwat daman APU DIOS e henin ametu e hi Ahab et hi inetu e hi Jesebel. Nanliwat ni henin nanliwatan lan patul e hi Jeroboam e impappangngulu tudda tutu-ud Israel ni nanliwat. <sup>53</sup> Dinaydayaw tu niya nansilbi daman Baal e henin ametu et pabunget tu hi APU DIOS e Dios ni Israel.

## 2 Kings

### *Ya meippanggep nunyan libluh e 2 Kings*

Emin ida nampatul di Israel ey lawah ida. Anin yad Judah et dakel ida dama lawah ni nampatul diman. Eleg da u-unuden hi Apu Dios tep yadda beken ni makulug ni dios ni kadaydayawaddan nekibebley ni hi-gada hu inu-unnud da. Et ipenahding idan tutu-u hu lawah e in-u-unnud daddan eleg mengullug nan Apu Dios.

Eleg umamleng hi Apu Dios ni nunyan impahding da, nem anin ni henin nunya et eleg tu pinhed ni iwwalleng ida hu pinili tun tutu-u tu. Et mukun intu-dak tudda prophet tu et ehelan dadda humman ni patul et yadda tutu-u ma-lat isiked da lawah ni daka pehpahding ma-lat hi-gatun ebuh daydayawen da. Nelabah hu pigan toon ni eleg da pengu-unnudan niya eleg da panggelan ni tugun Apu Dios et iebulut tudda huyyan tutu-ud Israel et yad Judah ni apputen ni buhul dadda et alen daddan balud di edum ni bebley.

### *Ya neitudek eyad libluh:*

1. Ginibbuh nan Elijah hu pansilbian tun Apu Dios et lumaw di kabunyan. (chapters 1:1-2:11)
2. Hi Elisha e prophet et ya nansilbian tun Apu Dios. (chapters 18:1-25:30)
3. Yadda neipenahding ingganah binahbah ni Assyria hu bebley di Israel. (chapters 8:16-17:41)
4. Yadda neipenahding di Judah ingganah neapput ida tutu-udman et mailaw idan balud di Babilon. (chapters 18:1-25:30)

### *Ya inhel Apu Dios ni kastigun Ahasiah*

<sup>1</sup> Yan eman ni netey hi Ahab ey ginubat ni iMoab hu Israel.

<sup>2</sup> Hi Ahasiah e neihullul ni patul ey na-gah di balkon di meikkadwan gladuh di palasyo tud Samaria et eleg law pakedalan. Immitu-dak idan tuu tun an mekihhummanan nan Baal Sebul e dios di Ekron e et-eteng ni bebley di Pilistia, et amtaen tu hedini umyaggud winu eleg.

<sup>3</sup> Nem kan ni anghel APU DIOS nan Elijah e prophet ni iTisbe ey "Mudda dammu etan bineal nan Ahasiah e patul et kammun hi-gaday 'Kele yu ang-angen hi Baal Sebul e dios di Ekron? Kaw gapu tep kanyu nem endi hu Dios ni Israel?' <sup>4</sup> Ehel yun etan ni patul huyyan kan APU DIOS ni hi-gatu: Eleg ka umyaggud tep mettey ka!" Inu-unnud Elijah hu inhel APU DIOS, <sup>5</sup> et yan nambangngadan ida etan ni intu-dak ni patul ey kantun hi-gaday, "Kele kayu nambangngad?"

<sup>6</sup> Kandan hi-gatuy "Dinammu dakemin etan ni hakey ni tuu ey kantuy mambangngad kami kunu et ehelen min hi-gam hu inhel APU DIOS e kantuy 'Kaw endi hu Dios di deya Israel et humman gaputun intu-dak mudda tuun an manmahmah nan Baal Sebul e dios ni Ekron? Gapu tep impahding mu huyya ey eleg ka umyaggud et mettey ka!'"

<sup>7</sup> Kan etan ni patul ey "Hipa ang-ang etan ni tuun nenammun hi-gayu et ehelen tu huttan?" <sup>8</sup> Kanday "Nambalwasin andukkey ni nekapyad belat ni animal et mamballikid ni katat."

Kan etan ni patul ey "Hi Elijah humman!" <sup>9</sup> Entanniy intu-dak Ahasiah hu ap-apun sindalu et ya neliman tuu tu ni an mempap nan Elijah. Himmak dan kamanyuyyudding di duntug et kan etan ni ap-apun hi-gatuy "Bega-en nan Apu Dios, kan apu patul ey meki-li ka kunun hi-gami."

<sup>10</sup> Nem kan Elijah ey, "Hedin bega-en da-ak nan Apu Dios e humman hu kammu, ali apuy di kabunyan et magiheba ka et yadda tuum!" Pinhakkey ey immali tu-wangu apuy et pateyen tudda emin humman ni sindalu.

<sup>11</sup> Nenu-dak mewan etan ni patul ni hakey ni ap-apun sindalu et ya neliman tuu tu et lumaw idad kad-an Elijah et kantu mewan ni hi-gatuy "Bega-en nan Apu Dios, kan ni patul ey mahapul ni meki-li kan hi-gamin nunya!"

<sup>12</sup> Hinumang mewan Elijah e kantuy "Hedin bega-en da-ak nan Apu Dios e humman hu kammu, ali apuy ni melpad kabunyan et pateyen daka et yadda tuum!" Et umli tu-wangu mewan hu apuy Apu Dios et pateyen tuddan emin.

<sup>13</sup> Nenu-dak mewan etan patul ni hakey ni ap-apun sindalu et ikuyug tu hu neliman tuu tu. Nanteyed ida mewan di duntug et mandukun etan ap-apun sindalud hinanggan Elijah et mampehemhemmek e kantuy "Bega-en Apu Dios, hemek dakemi eyaddan

sindaluk, entan dakemi patey! <sup>14</sup> Netey ida etan dewwan ap-apun sindalu et yadda tuu da tep pintey idan apuy ni nalpud kabunyan nem hemek muwak anhan.”

<sup>15</sup> Kan etan ni angel APU DIOS nan Elijah ey “Pakilaw kan hi-gatu, entan takut.” Et makilaw hi Elijah et lumaw di kad-an ni patul.

<sup>16</sup> Kantu etan ni patul ey “Heninnuy hu inhel APU DIOS: ‘Gapu tep nenu-dak kan an mekihummangan nan Baal Sebul e dios ni Ekron e heni endi Dios di deya Israel ey eleg ka umyaggud tep mettey ka!’ ”

<sup>17</sup> Netey tu-wangu hi Ahasiah e immamnu hu inhel APU DIOS ni impeamtan Elijah. Et gapu tep endi hu lakin u-ungngan Ahasiah ey hi Joram e agi tu hu neihullul ni hi-gatun nampatul ni meikkadwan toon ni nan-ap-apuan Jehoram e u-ungngan Jehoshaphat di Judah.

<sup>18</sup> Emin hu impahding Ahasiah e patul ey neitudek di Liblud idan Patul di Israel.

## 2

### *Ya neilawwan Elijah di kabunyan*

<sup>1</sup> Entanniy nedatngan law hu tsimpuh ni pengellaan APU DIOS nan Elijah di kad-an tu e ussalen tu hu alipuhapuh. Wadad Elijah nan Elisha di dalan e nalpuddad Gilgal, <sup>2</sup> ey kan Elijah nan Elisha ey “Panha-ad kadya tep kan APU DIOS ey umlawwak di Bethel.” Nem kan Elisha ey “Issapatah kun APU DIOS e wadan ingganah ni nakka pandinneli niya issapatah ku daman hi-gam e eleg daka hi-yana.” Et lumaw idan dewwad Bethel.

<sup>3</sup> Entanni ey neamung ida prophet diman ni bebley et lumaw idan dewwad Bethel. Et kandan hi-gatuy “Kaw inamtam e ellan APU DIOS hu mittuduh mun nunyan aggew?” Kantuy “Em, inamtak, nem beken humman ni tayu pan-uungbalan ni nunya.”

<sup>4</sup> Entanniy kan Elijah nan Elisha mewan ey “Panha-ad kadya tep inhel Apu Dios e umlawwak di Jericho.” Nem kan mewan Elisha ey, “Issapatah kun APU DIOS e wadan ingganah e nakka panddinieli niya issapatah ku daman hi-gam e eleg daka hi-yana.” Et lumaw idan dewwad Jericho.

<sup>5</sup> Wadadda neamung ni prophet ni ijericho ni lumaw di kad-an Elisha et kandan hi-gatuy “Kaw inamtam e ellan nan APU DIOS nunyan aggew hu mittuduh mu?”

Hinumang mewan Elisha e kantuy “Em, inamtak nem bekken humman ni tayu pan-uungbal nunya.”

<sup>6</sup> Entanni ey kan Elijah nan Elisha ey “Panha-ad kadya tep kan APU DIOS ey umlawwak di Wangwang e Jordan.”

Nem hinumang Elisha e kantuy “Issapatah kun APU DIOS ni wadan ingganah e nakka pandinnelin Dios niya issapatah ku daman hi-gam e eleg daka hi-yana.” Et mangkuyug idan limmaw. <sup>7</sup> Neiunnud ida neliman prophet ni hi-gada et umehngeng idad a-allaw tu. Inang-ang da e immehneng di Elisha nan Elijah di gilig ni Wangwang e Jordan. <sup>8</sup> Entanni ey ingkal nan Elijah etan andukkey ni balwasi tu et ludunen tu et iheplat tud danum, ey negedwa etan danum di wangwang et man-agwat idan Elisha e indalan dad mamega.

<sup>9</sup> Dimmateng idad gilig ni wangwang di ba-hil ey kan Elijah nan Elisha ey “Hipa pinhed mun pehdng kun panyaggudam et han da-ak ala?”

Hinumang Elisha e kantuy “Ettu et pebeltan mun hi-gak hu kabaalam et maihullullak ni hi-gam di ngunum?” <sup>10</sup> Kan Elijah ey “Nelugat huttan ni muka ibbaga, nem hedin ang-angen muwak ni pengellaan da-ak ey dammutun beltanem. Nem hedin eleg muwak ang-anga, man eleg meippahding eya muka ibbaga.” <sup>11</sup> Ida kamaandaddallan ey nanung-ungbal ida ey pinhakkeyey immali hu kamantetebbel ni kalesah niya kebayyu et mandalan di nambattanang da, et al-en ni alipuhhapuh hi Elijah et ilaw tud kabunyan. <sup>12</sup> Naka-ang-ang Elisha et mantetekkuk e kantuy “Ama! Ama! Hi-gam hu na-let ni nengienheng ni Israel! Limmaw ka law!” Entanni ey neendid tuka penang-ang ey bini-ki tu andukkey ni balwasi tu gapuh ni lemyung tu. <sup>13</sup> Pini-dit tu hu andukkey ni balwasin Elijah ni na-gah et mambanggad di Wangwang e Jordan et umehngeng di gilig tu. <sup>14</sup> Inheplat tu etan balwasin Elijah di danum et kantuy “Attu ka e AP-APU e Dios nan Elijah?” Entanni ey negedwa etan wangwang et man-agwat hi Elisha.

<sup>15</sup> Yan nenang-angan idan neliman prophet ni nalpud Jericho ni nunman ni neipahding ey kanday “Wada law nan Elisha hu et-eteng ni kabaalam nan Elijah!” Da dinammu et manyuung idan hi-gatu. <sup>16</sup> Kanday “Wada neliman nangka-let ni bega-en mu. Hedin pinhed mu da hinnapen hu eleg mebebley et da hamaken hu mittuduh mu tep nungay inlaw ni Ispirituh APU DIOS di duntug winu nedeklan et iha-ad tudman.” Kan Elisha ey “Eleg, entan tu an hamak.” <sup>17</sup> Nem impepipilit da et palaw tudda. Et lumaw ida humman ni neliman tuu et da hamahamaken ni tellun aggew nem eleg da hamaken hi Elijah.

<sup>18</sup> Nambangngad idad Jericho di kad-an Elisha ey wadadnan ni kamanhehhegged ni hi-gada. Et kantuy "Kaw eggak dedan ehelen ni hi-gayu e eleg yu an hemmaka?"

*Yadda miracle ni impahding Elisha*

<sup>19</sup> Entanni ey wadadda ap-apud bebley di Jericho ni limmaw di kad-an Elisha et kandan hi-gatuy "Apu, anin hi-gam et inamtam e ma-nut kayyaggud eya kad-an ni bebley nem lawah hu danum deya niya eleg umlameh hu kameitnem."

<sup>20</sup> Kan Elisha ey "I-li yu hu mahukung ni duyun neha-adan ni ahin," et ilaw dan hi-gatu. <sup>21</sup> Limmaw di ahullan et ibkah tu humman ni danum et kantuy "Kan APU DIOS ey 'Pambalin kun malinih eya danum et eleg law umhulun ni ketteyyan ni tuu ey umlameh law hu kameitnem.' " <sup>22</sup> Ey nambalin humman ni danum ni malinih neipalpun nunman et ingganah nunya tep immamnu hu inhel nan Elisha. <sup>23</sup> Hini-yan Elisha hu Jericho et lumaw di Bethel. Kamenglaw ey wadadda dinammutun kaungaungan lalakki nalpudman ni bebley e daka langlangkaki. Kanday "Nemukmukan ni tuu, hi-yanen mu eya bebley mi!"

<sup>24</sup> Nanwingi hi Elisha et iang-ang tun hi-gada et idutan tuddad ngadan APU DIOS. Entanniy wada dewwan bear ni nalpud muyeng et pambi-kien hu na-pat et dewwan hi-gada. <sup>25</sup> Nampalaw hi Elisha di Duntug e Karmel et han mandayyud Samaria.

### 3

*Ya nanggubatan ni Israel et ya Moab*

<sup>1</sup> Yan meikkahampulut walun toon ni nampatulan nan Jehoshaphat di Judah ey nampatul hi Joram e u-ungngan Ahab di Israel ni hampulut dewwan toon ey yad Samaria hu nambebleyan tu. <sup>2</sup> Nanliwat hi Joram nan APU DIOS nem beken ni henin ametu et hi inetu e hi Jesebel hu kalinewah tu, tep impa-kal tu hu batun ingkapyan ametun daka pandeyyawin Baal. <sup>3</sup> Nem nanengtun impenahding tu hu liwat ni henin nanliwatan lan nemangulun patul e hi Jeroboam e impappangngulu tudu hu helag Israel ni nanliwwat. <sup>4</sup> Yan nampatulan Ahab ey hi Mesha hu patul di Moab et yadda tutu-u tu ey kamampattul ey ida kaum-idwat nan patul ni Israel ni hanggatut ni libun impah ni kalneroh ni katootoon niya dutdut ni hanggatut ni libun lakin kalneroh.

<sup>5</sup> Nem yan neteyyan Ahab ey ginubat Mesha e patul ni Moab hu Israel. <sup>6</sup> Indaddan daman Joram e patul hu sindalun Israel et umgah idad Samaria. <sup>7</sup> Nenu-dak ni an menghel ni patul di Judah e hi Jehoshaphat e kantuy "Gubbaten da-ak ni patul di Moab. Kaw dammutun baddangan muwak ni mekihhanggan hi-gatu?"

Hinumang nan Jehoshaphat e kantuy "Em, nandaddanna anin idan sindaluk et yadda kebayyu mi. <sup>8</sup> Attu dellanen tayun mengubbat ni hi-gada?"

Kan Joram ey, "Iddalan tayu etan di nelikaw ni dalan di eleg mebebleyid Edom."

<sup>9</sup> Et lumaw di Joram e patul ni Israel, ya etan patul ni Judah, ya etan patul ni Edom niyadda sindalu da. Nelabah hu pitun aggew ni nandalnan dad nelikaw ni dalan ey na-puhan idan danum et endi innumen da anin idan sindalu da et yadda animal da. <sup>10</sup> Et kan Joram e patul ni Israel ey "Hipa pehding tayu! In-ali daitsun APU DIOS di deya ma-lat apputen daitsun patul ni Moab."

<sup>11</sup> Nem kan Jehoshaphat e patul di Judah ey "Kaw wada hu prophet ni mabalin ni panmahmahan tayu hedini hipa hu kan APU DIOS ni pehding tayu?"

Immehel hu hakey ni ap-apun sindalun Joram ey kantuy "Wada hi Elisha e u-ungngan Saphat. Hi-gatu neihullul nan Elijah."

<sup>12</sup> Kan Jehoshaphat ey, "Makulug ni prophet APU DIOS hi Elisha." Et lumaw idan tellun patul di kad-an Elisha.

<sup>13</sup> Kan Elisha nan Joram e patul di Israel ey "Kele daka baddangan ni hi-gak? Lakkay et ka makiungbal idan prophet di amam nan inam."

Kan Joram ey, "Eggu! Tep hi APU DIOS hu mengipahding nunya ma-lat apputen daitsun patul ni Moab."

<sup>14</sup> Hinumang Elisha e kantuy "Issapatah kud ngadan APU DIOS e Kabaelan tun emin e kan bega-en ni hi-gak e gullat et eleggak mekibibbiyang ni hi-gam nem nakka lispituha hi Jehoshaphat e patul ni Judah. <sup>15</sup> Kayulli awit ni nengamtan manggitalah."

Yan ida kamanggitalah etan da inewit ey newada kabaelan APU DIOS nan Elisha <sup>16</sup> et kantuy "Heninnuy hu inhel APU DIOS: 'Pengu-ku kayun dakel ni kanal eyad nedeklan. <sup>17</sup> Endi yu ang-angen ni udan winu dibdib nem medakkel ali danum eyad nedeklan et wada innumen yu, yadda bakeyu niyadda edum ni animal yu.' <sup>18</sup> Nem nelakah ni ippahding APU DIOS huyya. Ey pengapput dakeyu pay ni pekiggubbatan yuddan iMoab. <sup>19</sup> Hehgepen yu pay ida kakkayyaggud ni nangketuping ni bebley da. Panlelnehen

yudda hu kaumlameh ni keyew da, hullatan yudda daka pan-ehhuli ey pepnuen yun batu hu kayyaggud ni payew dan mateba kameitnem.”

<sup>20</sup> Tu-wangun nedatngan etan kapan-appisin kakkabbuhhan ey kamengelli danum ni nalpud appit ni Edom.

<sup>21</sup> Entanniy dingngel idan iMoab e iyaddalli hu sindaluddan tellun patul ni an mengubbat ni hi-gada et paeyag dadda hu emin hu lalakki, nangkea-amma niya kaungaungan dammutun pakatnged ni almas et da guwalyaan hu pappeg ni bebley da. <sup>22</sup> Bimmangun idan kakkabbuhhan ey madlang hu ang-ang ni danum e heni kuheyaw tep ya hi-law ni petang tep kamenu-lu hu aggew. <sup>23</sup> Entanniy ida kamantetekkek e kanday “Kuheyaw humman! Nampapatey ida hu sindaluddan tellun patul. Itsuy et tayu alen emin hu wadad kampu da!”

<sup>24</sup> Nem dimmateng idad nangkampuan idan iIsrael ey nangkeukat ida sindalun Israel et gubaten dadda humman iMoab et mamsik ida. Nem nampedig dadda et hegepen da bebley da et pampatyen dadda. <sup>25</sup> Nambahbah dadda bebley di Moab ey nan-ibbeng dadda batud papayyew da et menapnapan. Nanhulatan da hu kakelpuin danum da ey nanlenged da hu kaumlameh ni keyew da. Ebu hu Kir Heres ni eleg da hegepen et eleg mebahbah hu tuping ni bebley da nem entanniy linikweh idan kamampambayyabey et hegepen da.

<sup>26</sup> Inang-ang ni patul di Moab e ida kamangkeapput ey inemung tu hu pitu gatut ni nampan-ispadah ni sindalu tu et ipilit dan hubbukan hu sindalun patul ni Edom e buhul da ma-lat bumsik ida nem eleg da kinabaelan. <sup>27</sup> Entanni ey inla tu etan pengulwan ni u-ungnga tun lakin meihhullul et alin hi-gatun mampatul et iappit tun dios dan iMoab etan di tuping ni luhud etan ni et-eteng ni bebley. Ey natngadda helag Israel ni nunman ni impahding tu et mambanggad idad bebley da.

## 4

### *Binaddangan Elisha hu nebalun bii*

<sup>1</sup> Hakey ni aggew ey limmaw hu hakey ni biin nebalun ahwa lan hakey ni prophet di kad-an Elisha et kantun hi-gatuy, “Apu, netey hu bega-en mun ahwak, ey inamtam e kamengullug lan Apu Dios. Yan nunya ey immali etan tuun nan-utangan tu lan nunman ni pihhu ni mengellan etan idan dewwan u-ungngak ni laki et mambalin idan himbut tu.” <sup>2</sup> Kan Elisha ey “Hipa pehding kun memaddang ni hi-gam? Hipa wadad baley yu?”

Kan etan ni biiy “Endin hekey, ebu hu ekkut ni lanan olibah ni wadad pa-nay.”

<sup>3</sup> Kan Elisha ni hi-gatuy “Lakkay et mu banehen ida pa-nay ni bimbley anin ni piga bilang tu, <sup>4</sup> ey himmegep kayuddan u-ungngam ni lakid baley yu ey nanlekbi kayu. Alam etan pa-nay mu et iduyag mu lana etan idad pa-nay ni binneh mu. Hedin napnu hu hakey, iwaklin yud pangil.”

<sup>5</sup> Limmaw etan biid baley da et manlekbidida. Inla tu etan pa-nay dan neiha-adan ni mansikan olibah et duyanan tudu hu dakek ni pa-nay ni binneh idan u-ungnga tu.

<sup>6</sup> Napnu ida law emin etan pa-nay et kantun etan ni hakey ni u-ungnga tuy “I-lim pay hakey ni pa-nay,” nem kantun inetuy, “Endi law.” Ey endi law kaum-ayuh ni lana.

<sup>7</sup> Limmaw etan bii et tu idaddateng nan Elisha hu neipahding ey kantuy, “Mu igtang ida humman ni mansika et pameyad mun utang mu. Wada pay metdaan ni ussalen yuddan u-ungngam.”

### *Ya nenaguan Elisha ni u-ungngan kedangyan ni biin iSunem*

<sup>8</sup> Hakey ni aggew ey limmaw hi Elisha di Sunem e nambebleyan ni hakey ni biin kedangyan. Ineyagan tu hi Elisha ni mekikkan di baley da et meippalpun nunman ey hedini mandellan hi Elisha diman ey kamanda-guh di baley nunman ni bii ma-lat mangan.

<sup>9</sup> Kan etan ni biin nan ahwatuy “Inamtak et huayan tuun kaumdena-guh deya ey bega-en Apu Dios. <sup>10</sup> Ikkapyaan tan ek-ekut ni kuwaltuh di atep ey ha-adan tan kama, ya tebol, ya hakey ni yuddungngan et ya kengkeh, et hedini immali wada panha-adan tu.”

<sup>11</sup> Hakey ni aggew ey immali hi Elisha di diman Sunem et umahpat di kuwaltuh tun man-iyatu. <sup>12</sup> Entanniy kantu etan ni bega-en tu e hi Gehasihey “Mu ayagi etan bii.” Immali etan bii et umehnged di kad-an tu. <sup>13</sup> Kan Elisha nan Gehasihey mewan ey, “Kammun hi-gatuy, ‘Hipa pehding min panyaggudam tep dakemi kaipapatek ey muka iddawat hu mahapul mi? Kaw pinhed mu et nak makihummangan nan patul winu ap-apun sindalun meippanggep ni panyaggudam?’”

Hinumang etan ni bii e kantuy, “Eleg mahapul tep wada pamilyah kun mengippaptek ni hi-gak.”



<sup>14</sup> Entanni ey kan mewan nan Gehasihey “Hipa tep law pehdng tan panyaggudan tu?”

Kan Gehasihey “Endi u-ungnga tu ey nea-amma pay hu ahwa tu.”

<sup>15</sup> Kan Elisha ey “Mu ayagi et umlidya.” Immali et umehneng di habyen. <sup>16</sup> Kan Elisha ni hi-gatuy “Hedin medettengan ali hanneyan tsimpuh ni balintu man wadalli ihhaklim ni u-ungngam ni laki.” Kan etan ni biiy, “Apu e bega-en Apu Dios, bekken anhan ni ya huttan hu ilanglangkak mun hi-gak!”

<sup>17</sup> Nem immammnu hu inhel Elisha tep newad-an etan bii et medatngan humman ni tsimpuh ni neitu-nud ni toon ey tu-wangun nan-ungan laki. <sup>18</sup> Nelabah hu pigan toon ey nee-teng law etan gelang et hakey ni aggew ey limmaw di payew da et tu ang-angen hi ametun kamekibbaddang idan kaman-enni. <sup>19</sup> Nem endi maptek ey kantun ametuy “Maggeh uluk! Maggeh uluk!”

Kan ametu etan ni hakey ni bega-en ey “Awit mu et ilaw mun inetud baley.”

<sup>20</sup> Inewit etan ni bega-en et ilaw tu et ihakhaklin inetu ingganah ni meaggew ey netey etan u-ungnga. <sup>21</sup> Inlaw inetud kuwaltuh nan Elisha et pebaktad tud kama et hi-yanen tu e inlekbi tu habyen. <sup>22</sup> Inaygan tu hi ahwatu et kantun hi-gatuy “Itu-dak mu hu hakey ni bega-en et i-li tu hakey ni kebayyu et gumegannu-ak alin an menang-ang nan Elisha e prophet.” <sup>23</sup> Kan ahwa tuy “Kele kaumlaw nunya ey bekken ni tekwal ni bulan winu Sabaduh?” Kan etan ni biiy “Anin.” <sup>24</sup> Impeha-ad tu hu yuddungngan tud beneg ni kebayyu et mantakkay et kan tu etan ni bega-en tuy “Imay, pabsik mu eya kebayyu ey anin entan tu pambabbabbal hedin eleg ku e-hela.” <sup>25</sup> Et mampalaw idad Duntug e Karmel di kad-an Elisha. Ida kamenetteng ey inang-ang Elisha et kantun Gehasih e bega-en tuy “Ang-ang mu kedi, iyyalli eman biin iSunem!” <sup>26</sup> Papuut mu et mu dammuen et amtaem hedin kayyaggud idan emin, hi-gatu, ya ahwa tu et ya u-ungngatu.”

Kan etan ni biin iSunem nan Gehasih ey “Em, kayyaggud kami.” <sup>27</sup> Nem limmaw di kad-an Elisha ey nanyuung di hinangga tu et itnged tud heli tu. An-et la pea-allow nan Gehasih nem kan Elisha ey “Entan tu pea-allow! Wada hu et-eteng ni ligat tu nem eleg peamtan APU DIOS ni hi-gak hedin hipa humman.”

<sup>28</sup> Immehel etan bii e kantuy “Kaw nak nambagan hi-gam ni u-ungngak ni laki? Higam ngu e apu et ehelem. Kaw eggak e-helen ni hi-gam ni nunman e entan tuwak idwasin namnamahan ku?”

<sup>29</sup> Kan Elisha nan Gehasihey “Papuut mu et mandaddan ka. Alam hu hulkud ku et pepuppuut mun umlaw, entan ketaktak di dalan ni mekihuhummangan. Hedin wada dammuen mun meki-ungbal, anin entan tu humang. Lakkay et mu ita-pew eya hulkud kud angah etan ni u-ungnga.” <sup>30</sup> Kan etan ni biin nan Elisha ey “Issapatah kud ngadan APU DIOS e wadan ingganah niya issapatah kun hi-gam e eggak um-anemut hedin eleg ka meki-li!” Et makilaw hi Elisha. <sup>31</sup> Impapuut Gehasih et mamengulun dumteng et tu ita-pew hu hulkud di angah etan ni u-ungnga nem endi silbitu. Tu dinammu hi Elisha et kantuy “Eleg tumegu etan u-ungnga.” <sup>32</sup> Dimmateng hi Elisha et hakey tu humgep etan di kuwaltuh ey inang-ang tu etan u-ungngan bimmaktad di kama e netey. <sup>33</sup> Inlekbi tu etan habyen et mandasal nan APU DIOS. <sup>34</sup> Inta-pew tu annel tu etan di annel ni u-ungnga et iptek tu hu bungut tud bungut tu, ya matetu etan di matan u-ungnga et ita-pew tudda ngamay tud ngamay tu. Entanniy iyyalin kamengettung hu annel nunman ni u-ungnga! <sup>35</sup> Immehneng hi Elisha et mandalladallan etan di kuwaltuh et hantu mewan ipidwan neita-pew di annel nunman ni u-ungnga ey bimmakih ni neminpitu ey entanniy dinyat tu matetu! <sup>36</sup> Ineyagan Elisha hi Gehasih et ehlen tu e eyyagan tu ina etan ni u-ungnga. Himmegep etan bii et kan Elisha ni hi-gatuy “Awit mu eya u-ungngam.” <sup>37</sup> Nandukkun etan biid hinanggan Elisha et manyuung et awiten tu etan u-ungnga tu et umhep ida.

*Yadda etan dewwa pay ni miracle*

<sup>38</sup> Nambangngad hi Elisha di Gilgal ey wada bisil diman. Hakey ni aggew ey neamung ida edum tun prophet ey kantun bega-en tuy “Paneeng kan kennen idan nunyan tuu.”

<sup>39</sup> Limmaw hu hakey ni hi-gadan an nengalan na-teng di payew ey wada inang-ang tun wikal ni heni bihhu-ut et pan-alen tu lameh tu. In-anemut tu et panggippen tu et iheeng tu ey eleg tu amta hedin hipa humman. <sup>40</sup> Nelutu et idaddan tu et mangan ida, nem da tamtaman ey kandan Elisha ey “Umpatey eya kennen tep wada kedet tu!” Et eleg da law ituluy ni mengngan. <sup>41</sup> Kan Elisha ey “I-li kayun alinah.” Hina-adan tu humman ni inhaeng da et kantuy “Ibnew yu law et kanen yu.” Sinamtaman da ey kayyaggud law hu tamtam tu.

<sup>42</sup> Hakey ni aggew ey wada immalin tuun nalpud Baal Salisha e in-ali tu dewampulun sinapay ni kinapya tud nemangulun ineni dan barley ni nunman ni toon. Wada pay pakeanin barley ni in-ali tu.

Kan Elisha etan ni bega-en tuy "Idwat mu huyya et kanen idan eyan prophet."<sup>43</sup> Himmumang etan bega-en e kantuy "Kaw an umgela kuma huyyan kennen ni hanggatut ni tuu?" Nem kan Elisha ey "Idwat mu et kanen da, tep kan APU DIOS ey mengangan ida et wada pay metdaan."<sup>44</sup> Et idaddan etan ni bega-en etan kennen et mangan ida ey wada pay hu natdaan e immamnu hu inhel APU DIOS.

## 5

### *Ya na-kalan ni degeh Naaman*

<sup>1</sup> Kapekatbalan patul di Syria hi Naaman e ap-apun sindalu tu tep gapun hi-gatu ey impengenapput APU DIOS idad gubat. Netuled ni sindalu nem wada hu degeh ni belat tun kandan leprosy. <sup>2</sup> Wada lan nunman hu nengubatan dan Israel et ibsik da hakey ni u-ungngan bii et pambega-en etan ni ahwan Naaman. <sup>3</sup> Hakey ni aggew ey kan etan ni u-ungngan bega-en nan hi ahwan Naaman ey, "Hamban umlaw hu apuk di Samaria et tu ang-angen etan prophet diman ma-lat agahan tu hu degeh tun leprosy."<sup>4</sup> Dingngel Naaman humman ni inhel etan ni u-ungngan bii et lumaw etan ni patul et ehlen tun hi-gatu humman. <sup>5</sup> Kan etan ni patul ey "Em, mahapul ni umlaw ka! Mantuddekkak etan ni patul di Israel et alen mu et idwat mun hi-gatu."

Et lumaw hi Naaman e nambalun ni telumpulun libun palatah ni silber, enem ni libun balituk et ya hampulun balwasi.

<sup>6</sup> Heninnuy hu wada etan di tudek ni inlaw Naaman etan ni patul ni Israel: "Nantudekkak ni hi-gam et peamtak hi Naaman e opisyal ku. Pinhed kun e-kalen mu hu leprosy ni degeh tu."<sup>7</sup> Binidbid etan ni patul ni Israel humman ni tudek ey bini-ki tu balwasi tu et kantuy "Kaw hi-gak hi Apu Dios? Kaw mabalin ni umpateyyak ey sineguk mewar? Kele an um-itu-dak ni kamandedgeh ni leprosy ma-lat ekalen ku? Tam kamenemmahemmak ni umgapuh ma-lat gubaten daitu mewar!"<sup>8</sup> Nem dingngel nan Elisha e prophet huyya et itu-dak tu hu an menghel ni nunyan nunman ni patul: "Kele kaka memunnununu? Itu-dak mudya hi Naaman et amtaen tu e wada hu makulug ni prophet di Israel."

<sup>9</sup> Et lumaw hi Naaman e impakilaw tudda hu kebayyun nangguyud ni kalesah tu et umehngeng di pettek ni habyen di baley Elisha. <sup>10</sup> Immitu-dak hi Naaman ni bega-en tun an menghel e kantuy "Lakkay et kamambulun meminpittud Wangwang e Jordan et yumaggud hu belat mu niya ma-lat ma-kal hu degeh tun leprosy."<sup>11</sup> Nem bimmunget hi Naaman tep kantuy "Kangkung ngu nem um-ehep et ang-angen tuwak et mandasal nan hi APU DIOS e Dios tu et idengdeng tu hu ngamay tu eyad annel ku et ma-kal eya leprosy ku. <sup>12</sup> Nem kaw bekken ni kekkeddukul ni peteg hu Wangwang e Abana niya Parpar di Damascus nem yaddan emin hu wangwang eyad Israel? Kele bekken diman ni nak pambulluan?" Nemahhig bunget Naaman et mandaddan ni meibbangngad di bebley tu. <sup>13</sup> Nem immehel ida hu bega-en tun ingkuyug tu et kanday "Apu, kaw gullat ni neligat hu e-helen etan ni prophet ni pehding mu et kaw ambeken ni han-ipahding mu? Et humman hu, attu kuma et u-unnudem eya kantun umlaw kan ebuh ni an mambullu et ma-kal degeh mu?"<sup>14</sup> Inu-unnud Naaman et lumaw di Jordan et mantamel ni neminpittu e humman hu inhel Elisha ni pehding tu et meka-kal hu degeh tu et yumaggud belat tu e nambalin ni heni belat ni u-ungnga. <sup>15</sup> Nambangngad hi Naaman et yadda etan ingkuyug tud kad-an Elisha et kantuy "Inamtak law nunya e endi edum ni makulug ni Dios di kebebhebley, ebuh di deya Israel. Abulut mu ahan eya iddawat kun hi-gam."<sup>16</sup> Nem kan Elisha ey "Issapatah kud ngadan APU DIOS e wadan ingganah niya kan bega-en ni hi-gak e eggak dewwata hu hipan iddawat mun hi-gak." Kapepillit Naaman nem eleg tu.

<sup>17</sup> Kan Naaman ey "Hedin tep hannitan, abulut mu anhan et umienamuttak ni puyek ni ellak di deya et pekalgak eyad dewwan kebayyuk tep meippalpun nunya ey eleggak man-appit di kumpulmih ni dios nem hi APU DIOS ni ebuh. <sup>18</sup> Nem pessinsahan da-ak et anhan nan APU DIOS hedin mekihgeppak etan ni patul kud tempol ni tu pandeyyawan nan Rimmon e dios ni Syria et ittetnged tun hi-gak et manyu-ung et makiyu-ungngak dama."<sup>19</sup> Kan Elisha ey "Melinggep la pandellanam." Ida kamenglaw di Naaman e neidaddawwidada law<sup>20</sup> ey kan Gehasih e bega-en nan Elisha di nemnem tuy "Impaenamut nan apuk hi Naaman ey endi tu imbayad! Gullat et kuma, inla tu etan kapan-iddawat nunman ni iSyria. Issapatah kud ngadan nan APU DIOS e wadan ingganah e mahapul ni pepdugek et alek hu kumpulmih ni iddawat tu."<sup>21</sup> Et meipdug hi Gehasih. Inang-ang nan Naaman e kamangkeipdug et melehbeng di kalesah tu et dammuen tu, et kantuy, "Kaw wada hipan neipahding?"<sup>22</sup> Hinumang nan Gehasi e kantuy "Endi, nem intu-dak da-ak nan apuk et e-helen kun hi-gam e wadadda dewwan

prophet ni dimmateng e edum ida etan ni grupuh ni prophet di duntug di Epraim. Pinhed tun iddawtam idan tellun libun palatah ni silber et ya dewwan panhullulan dan balwasi."

<sup>23</sup> Kan Naaman ey "Alam kuma eya enem ni libun palatah ni silber." Impapilit tu et umidwat ni dewwan panhullulan ni balwasi et patnged tuddan dewwan bega-en tu et ilaw da e neitu-nud hi Gehasih. <sup>24</sup> Dimmateng ida etan di duntug di kad-an ni baley Elisha ey bineltan nan Gehasih etan singnged idan bega-en Naaman et ihgep tud bawang et pambangngad tudda. <sup>25</sup> Entanni ey nambangngad mewan ni himmegep di bawang di kad-an Elisha ey kan Elisha ni hi-gatuy, "Attu nalpuam?"

Kan Gehasihey, "Kaw wada linawwak?" <sup>26</sup> Nem kan Elisha ey "Kaw kammu nem endi hu linnawak diman ni nenang-ang ni nelehbengan Naaman di kalesah tu et daka dammuen? Beken nunya tsimpuh hu penewwatan ni iddawat dan pihhuh, balwasi, winu puyek ni tenneman ni grapes niya olibah, kalneroh, niya baka winu bega-en?" <sup>27</sup> Gapu tep impahding mu huttan, heltapen yuddallin helag mun ingganah hu degeh Naaman." Immehep hi Gehasih di kuwaltuh Elisha ey nambalin ni mablah hu belat tu e heni dallallu tep newada leprosy tu.

## 6

### *Ya nehamakan etan ni wahay*

<sup>1</sup> Hakey ni aggew ey kan idan prophet ni kaippappangngulun Elisha ni hi-gatuy "Ek-ekut eya tayu kapanha-adi. <sup>2</sup> Iebulut mu et kami manlengeh ni keyew di gilig ni Jordan et mengapya kamidman ni panha-adan tayu." Kan Elisha ey "Lakkayuy tep." <sup>3</sup> Kan etan ni hakey ni prophet ey "Pakilaw ka anhan ni hi-gami."

Kan Elisha ey "Em, mekillawwak." <sup>4</sup> Dimmateng idad Jordan et ilugi dan manlelnegh ni keyew. <sup>5</sup> Kamanlelnegh etan hakey ni hi-gada ey neipassik hu ulun wahay tu et ma-gah di danum et kantun Elisha ey "Apu, hipa pehding ku? Binneh ku man anhan humman ni wahay!" <sup>6</sup> Kan Elisha ey "Attu na-gahan tu?"

Intudu tu et bumengwah hi Elisha ni paul et ibkah tud danum ey simma-pew etan wahay. <sup>7</sup> Kan Elisha ey "Papuut mu et mu alen!" Et gegannuen etan ni tuun inla.

### *Ya neapputan idan iSyria*

<sup>8</sup> Hedin mekiggubbat hu patul ni Syria di patul ni Israel ey hummanganen tudda ap-apun sindalu tu ma-lat ehelen tun hi-gada hedin attu da pangkampuan. <sup>9</sup> Nem kaamtaan Elisha e prophet et kaum-itu-dak ni an menghel ni patul ni Israel et eleg ida lumaw diman tep wadadda iSyria ni nambetak. <sup>10</sup> Et kaum-itu-dak dama etan patul ni an menghel idan tuun nampambebley diman et mandaddan ida. Hanneya hu neipenahding. <sup>11</sup> Humman hu gaputun bimmubbunget hu patul ni Syria et amungen tudda ap-apun sindalu tu et kantun hi-gaday "Hipan hi-gayu hu kamemabbaddang ni patul ni Israel?" <sup>12</sup> Kan etan ni hakey ni ap-apun sindalu ey "Endin hi-gami e apu patul, nem hi Elisha e prophet di Israel hu kamenghel etan ni patul ni Israel idan muka e-helad kuwaltuh mu." <sup>13</sup> In-olden nan patul di Syria e kantuy "Yu hamak hedin attu kad-an tu et depapen yu."

Yan nanghelan dan hi-gatu e wadad Dothan hi Elisha ey <sup>14</sup> intu-dak tu dakel ni sindalun nampangkebayyu niya nampangkalesah. Dimmateng idadman ni hileng et halikuben da. <sup>15</sup> Bimmangun etan bega-en Elisha ni kamangkewa-wa et umhep di dallin ey inang-ang tudda sindalun iSyria, yadda kebayyu da et ya kalesah dan hinelikub da bebley. Tu imbagan Elisha e kantuy "Apu, hipa pehding ta?"

<sup>16</sup> Hinumang Elisha e kantuy "Entan takut, tep daddakkel ida sindalu tayu nem ya sindalu da." <sup>17</sup> Et mandasal e kantuy "APU DIOS, betyam hu mata eyan bega-en ku et ang-angen tu." Dingnel APU DIOS hu dasal tu et betyaen tu mata etan ni bega-en et i-ang-ang tu ey inang-ang tu hu dakel ni kebayyud duntug niya dakel ni kalesah ni apuy e nehelikub idan Elisha.

<sup>18</sup> Ida kamampandayyu buhul dan iSyria ey nandasal hi Elisha. Kantun dasal tuy "APU DIOS, kulap mudda eman sindalu!" Dingnel APU DIOS dasal Elisha et kulapen tudda buhul dan sindalu. <sup>19</sup> Limmaw hi Elisha di kad-an da et kantun hi-gaday "Neihalla dillan yu, bekken huyyan bebley ni lawwan yu. Unud yuwak et ipengulu dakeyu etan di tuun yu hemmaken." Et ipengulu tuddad Samaria. <sup>20</sup> Dimmateng idadman et mandasal mewan hi Elisha e kantuy "APU DIOS, betyam mateda ma-lat han-ang-ang ida." Dingnel APU DIOS hu dasal tu et betyaen idan nunman ni sindalu mateda ey in-ang-ang da e wadaddad Samaria.

<sup>21</sup> Inang-ang idan patul ni Israel ey kantun Elisha ey "Apu, kaw petteyen kudda?" <sup>22</sup> Kan Elisha ey "Entan tudda patey. Anin idan sindalun yuka dedpapad gubat ey

eleg yudda petteya. Idaddan yu kuma kennen da niya innumen da et mangan ida ey imminin ida et han ida umenamut di kad-an ni patul da.”<sup>23</sup> Inu-unnud etan ni patul et idaddan tu hu dakel ni kennen ni hemmulen da et han tudda paenamut. Neipalpun nunman ey insiked law ni Syria ni mengubbagubbat ni Israel.

<sup>24</sup> Nem nelabah mewan hu pigan toon ey impangulun Ben Hadad e patul ni Syria hu sindalu tu et gubatan da Israel et halikuben da Samaria.

<sup>25</sup> Gapun nunman ey na-puhan ida bimbley ni kennen. Entanni daka iggatang hu ulun kebayyun newalun palatah ni silber niya hambasuh ni keldih ni liman palatah ni silber.

<sup>26</sup> Wada hakey ni aggew ni kamandaddallan hu patul ni Israel di appit ni tuping ni luhud ni bebley ey immehel hu hakey ni biin kantuy “Baddangi muwak anhan e apu patul!”

<sup>27</sup> Hinumang nan patul e kantuy “Hedin eleg daka baddangin APU DIOS ey nema-maman hi-gak e endi mabalin ni ibbaddang kun hi-gam tep endi kennen winu innumem ni nak iddawat ni hi-gam.”<sup>28</sup> Nem hipa ibbagam ni hi-gak?”

Kan etan ni bii ey “Wada etan biin kantun hi-gak ey kennen mi u-ungngak ni laki et hedin newa-wa ey kennen mi dama hu u-ungnga tun laki.”<sup>29</sup> Et iheeng mi etan u-ungngak et kanen mi. Newa-wa ey kangkun hi-gatuy kennen mi dama etan u-ungnga tu ey eleg tu tep intalu tu!”

<sup>30</sup> Dingngel etan ni patul huyya ey bini-ki tu balwasi tun lemyung tu ey inang-ang idan tuu e langgusih hu nandallem ni imbalwasi tu.”<sup>31</sup> Insapatah nunman ni patul e kantuy, “Anin petteyen da-ak Apu Dios hedin eggak peputtul hu ulun Elisha e u-ungngan Saphat ni nunyan aggew!”<sup>32</sup> Et menu-dak ni an mengewwit nan Elisha.

Kamanyuyyuddung hi Elisha di baley tun nunman e inemung tudda ap-apun Israel et ida kamanhuhummangan. Eleg pay ni dumteng hu intu-dak nunman ni patul ni an mengewwit ni hi-gatu ey kantuddan edum tuy “Immen ali hu memettye ni hi-gak e intu-dak ni mapetey. Hedin umdateng, ilekbi yu habyen. Mei-unnud ali apu tu.”<sup>33</sup> Eleg tu gibbuhen tuka pan-e-hela ey dimmateng etan intu-dak nunman ni patul ey neitunud etan patul e kantuy “Hi APU DIOS hu nengidwat eyan tayu kapanligligasi! Kele nak hehheggeden hu hipan pehding tu?”

## 7

<sup>1</sup> Hinumang Elisha et kantuy “Dengel mu hu inhel APU DIOS! Yan kabbhuhan ni hanneyan tsiumpah ey umlakah hu megettang di Samaria. Ya liman kiloh ni kekakkayyaggudan ni alinah winu hampulun kiloh ni barley ey hanhakkey ni palatah ni silber ni ebuh hu bayad tu.”<sup>2</sup> Kan etan ni bega-en ni neki-lin patul ey “Eleg mabalin ni an meippahding huttan, anin ni kantu et ibbeghul nan APU DIOS hu kabunyan et paeli tu udan.”

Kan Elisha ni hi-gatuy “Ang-angem alin meippahding nem endilli mu tamtaman.”

*Ya neni-yan idan sindalun iSyria etan ni bebley*

<sup>3</sup> Wadadda epat ni lakin kamanleprosy ni kamanhahha-ad di eheb nunman ni bebley. Ida kamanhuhummangan e kanday “Kele itsu manhahha-ad deya et hehheggeden tayu ketteyyan tayu?”<sup>4</sup> Hedin umhegep itsud bebley, mettey itsun upa tayu. Hedin mewan manhahha-ad itsudya, mettey itsu metlaing ni upa tayu. Heballi umlaw itsud kampuddan iSyria et hedin eleg daitu petteya, kayyaggud. Nem hedin hipa humman et petteyen daitu, kaw hipa an pehding, mettey itsu metlaing anin ni eleg itsu umlaw diman.”

<sup>5</sup> Et yan nunman ni kamangkehilleng ey limmaw ida etan di kampuddan sindalun iSyria. Dimmateng ida ey endi tuu.”<sup>6</sup> Tep ya impahding Apu Dios ey impadngel tuddan iSyria hu heni iyyallin dakel ni sindalun nampangkebayyu ey nampangkalesah. Et yadda sindalun iSyria ey penghel da na-mu nem bineyadan ni patul ni Israel ida patul ni Hittite et ya patul ni Egypt et yadda sindalu da et iyyaddallin mengubbat ni hi-gada.”<sup>7</sup> Et humman hu linggem da besik ni nunman ni hileng et pakdag da hi-yan ni kampu da niya kebayyu da.

<sup>8</sup> Yan dintengan idan etan ni epat ni lakin kamanleprosy ey himmegep idad hakey ni kampu et pangkanen da hu kennen niya ininum da meinnum ni wadadman. Nanaleda hu balituk niya silber et yadda babalwasi et da pan-itu. Nambanggad ida et humgep ida mewan di hakey ni kampu et hanniman mewan impahding da.”<sup>9</sup> Nem entanni ey kanday “Beken ni kayyaggud hu impahding tayu! Kayyaggud ni peteg huyyan neipahding nunyan aggew ey tayu kaipuppuhi. Hedin eleg tayu peamta huyya ingganah ni kabbhuhan ey makulug ni wada lawah ni meippahding ni hi-gatsu.

Umlaw itsu et tayu peamtaddan ap-apun sindalun patul!" <sup>10</sup> Hini-yan da humman ni kampun iSyria et mambangngad idad bebley et da ehelen idan guwalyad eheb e kanday "Limmaw kamid nangkampuan idan iSyria ey endin hekey tuu. Nangkeiiket hu kebayyu ey nannaneng emin hu wadad kampu da nem endin hekey tuu!" <sup>11</sup> Nan-itkuk idan guwalya humman ni dingngel da et man-amtad baley ni patul.

<sup>12</sup> Bimmangung etan patul nunman ni gawan hileng et kantuddan opisyal tuy "Inamtak hu neipahding. Inamtaddan iSyria e endi law kennen tayu et hi-yanen da kampu da et ida mantalud a-allaw tu. Daka hehhegeda peni-yanan tayu eyan bebley ma-lat depapen daitu et hegpen da eya bebley tayu." <sup>13</sup> Immehel etan hakey ni opisyal tu ey kantuy "Heballi hu um-itu-dak itsun an menang-ang hedin hipa makulug ni neipahding. Anin ussalen da hu liman kebayyu tayun natdaan. Hedini hipa et wada lawah ni meippahding ni hi-gada ey nan-inggeh dama hedini nanha-ad idadya et eleg ida lumaw tep mettey itsun emin daman upa tayu."

<sup>14</sup> Et idaddan da dewwan kalesah et ya kebayyu et umitu-dak etan patul ni sindalun an menang-ang hedini hipa neipahding idan sindalun iSyria. <sup>15</sup> Limmaw ida et madegah ida lad Jordan ey inang-ang da hu neiwahhiwahhit ni babalwasi niya edum ni usal idan iSyria e nan-egah dan nanggannugannuan dan bimmesik. Nambangngad ida humman ni intu-dak etan ni patul et ehelen dan emin ni hi-gatu hu inang-ang da.

<sup>16</sup> Et lumaw ida hu tuud Samaria et da pan-alen emin hu wadad nangkampuan idan iSyria, et umamnu etan inhel APU DIOS e hedini ya bayad ni liman kiloh ni kekakkayyaggudan ni alinah niya hampulun kiloh ni barley ey hanhakkey ni palatah ni silber ni ebuh.

<sup>17</sup> Yan nunman ey inha-ad etan ni patul etan bega-en tun menang-ang ni um-ehep niya umhegep di eheb ni bebley nem nan-igsin kumedek idan tuun kamampippilliwi ni um-ehep et matey diman. Humman inamnuan ni inhel Elisha meippanggep ni hi-gatsun nengadwaan tun patul et da ang-angen di baley tu. <sup>18</sup> Inhel dedan nan Elisha etan ni patul e yan nunman ni olas ni kewa-waan tu ey hanhakkey ni palatah ni silber hu bayad ni liman kiloh ni kekakkayyaggudan ni alinah niya hampulun kiloh ni barley. <sup>19</sup> Ey himmumang ni nunman humman ni bega-en ni nengadwa etan patul e kantuy "Eleg mabalin ni meippahding huttan, anin ni kantu et ibbeghul nan APU DIOS hu kabunyan et paeli tu udan!" Hinumang daman Elisha e kantuy "Ang-angem ali meippahding, nem eleg mulli tamtamidda humman ni mekkan." <sup>20</sup> Ey immamnu tep nan-igsin idan tuud eheb etan ni bebley et matey.

## 8

### *Ya nambangngadan etan ni biin iSunem di baley tu*

<sup>1</sup> Yan nunman la ey inhel Elisha etan ni biin iSunem e kan u-unggan sinegu tu e kantuy "Awit mu pamilyah mu et lumaw kayud edum ni bebley tep inhel APU DIOS e peelli tu hu bisil ni pitun toon di deya Israel." <sup>2</sup> Inu-unnud etan ni bii humman ni inhel tu et ikuyug tu pamilyah tud Pilstia et manha-ad idadman ni pitu toon. <sup>3</sup> Nelabah humman ni pitun toon e endi law bisil et mambangngad idad Israel. Limmaw humman ni bii et ya etan u-ungga tud kad-an etan ni patul et ibegan nunman ni bii hu pemangngadan tun baley tu niya puyek tu. <sup>4</sup> Yan nunman ey kamekihuhummangan etan patul nan hi Gehasih e bega-en nan Elisha. Kan etan ni patul ni hi-gatuy "Pinhed kun dedngelen ida hu miracle ni impenahding Elisha." <sup>5</sup> Kapan-e-helan Gehasih hu nenagan nan Elisha ni hakey ni u-unggan netey ey himmegep idalli humman ni han-ina et ibegan nunman ni bii hu meippanggep ni baley tu niya puyek tu. Kan Gehasih ey "Apu patul, hidiyyay hu biin kan u-unggan sinegun Elisha ey adyah etan u-ungga tu!" <sup>6</sup> Kan etan ni patul etan ni bii ey "Kaw makulug numan?" Kan etan ni bii ey "Em, makulug numan." Et paeyag etan ni patul hu hakey ni opisyal tu et iolden tu e ang-angen tu ma-lat meibangngad ni emin hu hipan limmun etan ni bii anin idan nangatngan dan neanid payew tu ni nunman lan keendi tu.

### *Hi Elisha et ya etan patul di Syria e hi Ben Hadad*

<sup>7</sup> Limmaw hi Elisha di Damascus e bebley di Syria ey neipaddih ni kamandedgeh hi Ben Hadad e patul diman. Dingngel nunman ni patul e wada hi Elisha <sup>8</sup> ey kantun Hasael e hakey ni opisyal tuy "Ala kan mu iddawet etan ni prophet et ehelen mun hi-gatu et mekihummangan nan APU DIOS et amtaen tu hedini umyagguddak winu eleg." <sup>9</sup> Impangkalgan Hasael hu na-pat ni kamel ni emin ni klasih ni kekakkayyaggudan ni daka kapyaad Damascus et lumaw di kad-an Elisha. Nandateng ida et kan Hasael ey "Intu-dak tuwak nan Ben Hadad e bega-en mu tep pinhed tun amtaen ni hi-gam hedini

me-kal degeh tu et yumaggud winu eleg.”<sup>10</sup> Kan Elisha ey “Mu ehel ni hi-gatu e mekal degeh tu. Nem impeamtan APU DIOS ni hi-gak e mettey!”<sup>11</sup> Entanniy kaitettekel nan Elisha hi Hasael ey bimmaing hi Hasael. Entanni mewan ey kamannengngih hi Elisha.<sup>12</sup> Kan Hasael ey “Kele ka kamannengngih e apu?” Himmumang hi Elisha et kantuy “Tep inamtak e lawah alin peteg hu ippahding muddan tutu-ud Israel. Lelgabern ali nangehammad ni luhud eyan bebley, pampetteyem ali kaungangan lalakki, paniggasin muddalli ekka-kut ni u-ungnga et matey ida niya pambeghien muli egeh ni nampambutug ni bibi-i eyad bebley.”<sup>13</sup> Kan Hasael ey “Inna-nun nak pengippahdingan idan nuntan ey endi bilang kun tuu?”

Hinumang Elisha e kantuy “Impeamtan APU DIOS e mambalin kallin patul ni Syria.”<sup>14</sup> Nambangngad hi Hasael di kad-an ni patul et kantun Hasael ey “Hipa inhel Elisha ni hi-gam?” Kan Hasael ey “Kantuy me-kal kunu degeh mu.”<sup>15</sup> Nem newa-wa ey immala hi Hasael ni wangal et ita-mel tud danum et umumen tu etan patul et matey. Et maihullul hi Hasael ni nampatul di Syria.

<sup>16</sup> Nambalin ni patul hi Jehoram e u-ungangan Jehoshaphat di Judah ni meikkelliman toon ni nampatulanan Joram e u-ungangan Ahab di Israel.<sup>17</sup> Telumpulun dewwa toon tun nampatulanan tu e nanha-ad di Jerusalem et man-ap-apun walun toon.

<sup>18</sup> Inu-unnud tu lawah ni impahding idan patul di Israel henin Ahab, tep inahwa tu hu u-ungangan Ahab. Humman idan lawah ni impahding tu ey kapakabbellawan APU DIOS.<sup>19</sup> Nem eleg pinhed APU DIOS ni mebahbah hu Judah tep impakulug tu lan David e yadda helag tu man-ap-apun ingganah.<sup>20</sup> Yan nampatulanan Jehoram ey ngimmehay ida iEdom et mampatul ngun hi-gada.

<sup>21</sup> Et idaddan Jehoram emin ida kalesah tun meussal di gubat et lumaw di Sair. Hinelikub idan sindalun iEdom di Jehoram nem bimmesik ni nunman ni hileng e hi-gada etan idan ap-apun sindalu tun nampangkalesa. Newahit ida etan edum ni sindalu tu et mamsik idad baballey da.<sup>22</sup> Et neipalpun nunman ingganah nunya ey beken law sakup ni Judah hu bebley da. Yan nunman ni tsimpuh dama hu nengubatan ni Libnah ni Judah tep pinhed dan meappil.<sup>23</sup> Emin hu impenahding Jehoram ey neitudek di Liblun idan Patul di Judah.<sup>24</sup> Netey hi Jehoram et maikulung di gungat idan patul di Bebley David et maihullul etan u-ungnga tun hi Ahasiah ni nampatul.<sup>25</sup> Hi Ahasiah e u-ungangan Jehoram hu nambalin ni patul di Judah eman ni meikkahampulut dewwan toon ni nampatulanan Joram e u-ungangan Ahab di Israel.

<sup>26</sup> Dewampulut dewwa hu toon tun nampatulanan tu et man-ap-apun hantoon di Jerusalem. Hi Athaliah e hi inetu e inap-apun Omri e patul di Israel.

<sup>27</sup> Lawah dama impenahding Ahasiah henin impenahding idan patul di Israel. Impenahding tudda lawah ni angebe-hel APU DIOS henin impenahding ni pamilyah Ahab tep inepe da hi-gatu.

<sup>28</sup> Yan nunman la ey nekilaw etan patul e hi Ahasiah nan Joram e u-ungangan Ahab et da gubaten hi Hasael e patul ni Syria di Ramot Gilead ey neliputan hi Joram.<sup>29</sup> Nambangngad hi Joram di Jesreel ma-lat mapwahan liput tu. Ey hi Ahasiah e patul di Judah ey limmaw ni an menang-ang ni hi-gatu.

## 9

### *Ya nampatulanan Jehu di Israel*

<sup>1</sup> Ineyagan Elisha e prophet hu hakey ni kamekikkillaw ida etan ni prophet et kantun hi-gatuy “Pandaddan ka et lumaw kad Ramot Gilead. Alam eya neibusih ni lanan olibah<sup>2</sup> et hedin dimmateng kadman, mu himmak hi Jehu e u-ungangan Jehoshaphat ey inap-apun Nimsi. Aygim et lumaw kayud neappil ni kuwaltuh ma-lat meidawwid edum tu<sup>3</sup> ey duyagim ni lanan olibah ulu tu ey kammuy ‘Kan APU DIOS ey: Pinutuk dakan mampatul ni Israel.’ Ey hedin negibbuh ey imbeghul mu hu habyen et mamsik ka.”

<sup>4</sup> Et lumaw humman ni kamenikken ni prophet di Ramot Gilead.<sup>5</sup> Dimmateng diman ey dinteng tu hi Jehu e kamekiyuyudung idan ap-apun sindalu. Kantuy “Apu, wada ibbagak ni hi-gam.” Immehel hi Jehu et kantuy “Hipan hi-gami hu inhelam?” Kan etan ni prophet ey, “Hi-gam, apu.”<sup>6</sup> Immehneng hi Jehu et humgep idan dewwad bawang et duyagan tun lanan olibah hu ulun Jehu et kantuy “Kan APU DIOS e Dios Israel ey ‘Putuken dakan mampatul idan tuuk di Israel.’<sup>7</sup> Mahapul ni bahbahren mu hu helag Ahab et ibleh ku hu nemateyan nan ahwa tu e hi Jesebel idan prophet ku ey yadda edum ni bega-en ku.<sup>8</sup> Mahapul ni mettey emin hu helag Ahab. Pepettey ku emin hu lalakin helag tu, yadda u-ungnga niyadda nangkea-amma anin idan himbut.<sup>9</sup> Pehding kun helag Ahab hu henin impahding kuddan helag ida lan nampatul di Israel e di Jeroboam e u-ungangan Nebat nan hi Baasha e u-ungangan Ahijah.<sup>10</sup> Hedin hi Jesebel ey eleg meikkullung, nem kennen

alin ahhu hu annel tud Jesreel.' " Negibbuh ni inhel tu humman ey nengimbebeghul ni habyen et umhep et mamsik.

<sup>11</sup> Nambangngad hi Jehu di kad-an idan edum tun opisyal ey kandan hi-gatuy "Hipa neipahding? Hipa inhel etan ni kaman-angngaw ni tuun hi-gam?" Kan Jehu ey "Inamta yu hu inhel tu." <sup>12</sup> Kanday "Eleg mi amta inhel tu!" Kan Jehu ey "Heninnuy inhel tu: 'Kan APU DIOS ey pinutuk da-ak mampatul di Israel.'" <sup>13</sup> Dingngel da ey pinhakkeyey nan-iaplag da hu balwasi dan andukkey di pengigsinan Jehu et patnul da tangguyey ey daka pan-itkuk e kanday "Hi Jehu hu patul!"

<sup>14</sup> Entanni ey namplanuh hi Jehu e u-ungngan Jehoshaphat e u-ungngan Nimsi ni lawah ni pehdng tun Joram. (Hi Joram et ya emin tuud Israel ey daka dippendali Ramot Gilead et eleg hegepen Hasael e patul di Syria. <sup>15</sup> Nem yan nunya ey nambangngad hi Joram di Jesreel ma-lat mapwahan hu liput tun nekigubatan tuddan iSyria eman ni nanggubatan dan Hasael e patul.) Kan Jehu idan edum tun ap-apun sindalu ey "Hedin makulug ni henin nuntan yuka pannemnem e i-ehneng yuwak, ang-ang yu ma-lat endi umlaw ni mengipeamtad Jesreel meippanggep nunyan nekapya."

<sup>16</sup> Nanlugan hi Jehu di kalesah tun kameussal di gubat et lumaw di Jesreel di kad-an Joram e kaman-u-uggip tep neliputan. Wada damadman hi Ahasiah e patul di Judah tep tu inang-ang hi Joram. <sup>17</sup> Inang-ang etan ni guwalyan kaman-uh-uhdung di guwalyaan ni neita-gey hi Jehu et yadda tuu tun iyalli ey intekuk tun Joram e kantuy "Wadadda sindalun iyalli!"

Kan Joram ey "Itu-dak kan mangkebayyu et tu ang-angen ma-lat amtaen tayu hedini kayyagud in-ali da winu beken." <sup>18</sup> Limmaw etan nangebayyun bineal da et tu dammuwen hi Jehu et kantuy "Pinhed nan patul ni amtaen hedini linggep hu in-alim winu beken." Kan Jehu ni hi-gatuy "Hipa ngu dama huttan ni muka pan-e-hela? Kaiunnud ka kuman hi-gak!" Kan nunman ni guwalya nan hi Joram ey "Inang-ang ku e limmaw etan intu-dak kun an menammun hi-gada nem eleg mambangngad." <sup>19</sup> Intu-dak mewan Joram e patul hu hakey ni tuun an menammun Jehu et dumteng et kantuy "Pinhed nan patul ni amtaen hedini linggep in-alim winu beken." Kan mewan Jehu ey "Hipa ngu dama huttan ni muka pan-e-hela? Kaiunnud ka kuman hi-gak!"

<sup>20</sup> Intekuk man ni guwalya nan hi Joram e kantuy "Limmaw etan intu-dak mu nem eleg mewan mambangngad! Hi Jehu e u-ungngan Nimsi na-mu hu iyalli tep nemahhig e tuka pampebsik hu kebayyu tu e heni kaman-angngaw!"

<sup>21</sup> In-olden nan Joram e kantuy "Idaddan yu hu kalesah ku! Papuut yu!" Et lumaw di Joram e patul ni Israel et hi Ahasiah e patul ni Judah e nampanlugan idad kalesah da et da dammuwen hi Jehu di puyek lan Nabot di Jesreel.

<sup>22</sup> Nandadammudda et kan Joram e patul nan Jehu ey "Kaw linggep hu in-alim?"

Hinumang Jehu e kantuy "Inna-nun keweddaan ni linggep ey nemahhig hu kapandeyyaw idan tuun beken ni makulug ni dios niya didimonyoh ni impappangngulun Jesebel e hi inam?" <sup>23</sup> Binengiw Joram hu kalesah tu et manligguh et pabsik tu kebayyu tu et itkuk tun Ahasiah e kantuy "Kaumpilliw huyyan tuun kapan-ap-apui!"

<sup>24</sup> Nem pinenan Jehu et meiptek di beneg tu et maela puhu tu. Neilukuy di kalesah tu et matey. <sup>25</sup> Kan Jehu nan Bidkar e opisyal tun kamampaktek ni kalesah tuy "Alam eya annel tu et ibbeng mu eman di puyek lan Nabot e iJesreel. Kaw hannemnem mu la eman nantakkayan tan ta ketu-tu-nuda hi Ahab e patul e aman eyan hi Joram ey impaebig APU DIOS huyyan mekapya meippanggep ni hi-gatu? Heninnuy hu kantu: <sup>26</sup> 'Inang-ang kun kaalman hu nemateyan dan Nabot et yadda u-ungnga tun laki. Issapatah ku e meibleh ni hi-gam humman ni impahding mun eyad puyek Nabot.' Et humman hu alam kuma eya annel Joram et ibbeng mu eman di puyek lan Nabot ma-lat umamnu hu inhel APU DIOS ni meippahding."

#### *Ya neteyyan Ahasiah e patul di Judah*

<sup>27</sup> Inang-ang Ahasiah e patul ni Judah humman ni neipahding nan Joram ey bimmesik et mampalaw di dalan ni umlaw di Bet Haggan. Kapampepdugin Jehu ey tuka pan-itkuk idan sindalu tu e kantuy "Patey yu!" Pinena da et maliputan di kalesah tud kametyed di Gur e neihnup di Ibleam nem nanglaw et dumteng di Megiddo et matey diman.

<sup>28</sup> Intakkay idan opisyal tu hu annel tu et ilaw dad Jerusalem et ikulung dad gungat idan patul di bebley David. <sup>29</sup> Nampatul hi Ahasiah di Judah eman ni meikkahampulut hakey ni toon ni nampatulan Joram e u-ungngan Ahab di Israel. <sup>30</sup> Dimmateng hi Jehu di Jesreel et denglen Jesebel ey pinintolan tu matetu et iyayyagud tu bewek tu et umehneng di kad-an ni habhabyen et man-uh-uhdung di keltad. <sup>31</sup> Kamenggep hi Jehu di eheb ni bebley ey kan Jesebel ni hi-gatuy "Kaw linggep in-alim e Simrih? Kele wada kadya e mapetey?" <sup>32</sup> Intangaw Jehu ey simmekuk et kantuy "Hipa memaddang ni hi-gak?"

Ey dimmu-ngaw hu dewwa winu tellu nekapun ni opisyal etan di baley ni patul ni nengidu-ngaw di habhabyen ni hi-gatu. <sup>33</sup> Et kantun hi-gaday "Pedep-ah yu hi Jesebel di habhabyen!" Impedep-ah da tu-wangu et maipaghit edum ni kuheyaw tud dingding et yadda kebayyu. Et padelan Jehu hu kebayyu tu et ya kalesah tud annel nan Jesebel et mangkeigsin.

<sup>34</sup> Himmegep hi Jehu di baley ni patul et mangan et uminum. Negibbuh ni nengan et kantuy "Neidutan huttan ni bii, nem anin yu ikulung annel tu tep u-ungnga tu-wan patul." <sup>35</sup> Nem an ang-angen idan tuun an mengellan annel tu ey ebuh hu genit ni ulu tu, ya heli tu niya ngamay tun wada. <sup>36</sup> Nambanggad ida et da ehelen nan Jehu ey kantuy "Heninnuy dedan la hu inhel APU DIOS nan Elijah e prophet e iTisbi e kantuy 'Kennen alin ahhu hu annel Jesebel etan di bebley di Jesreel. <sup>37</sup> Meiwwehhit ali annel tud puyek di Jesreel e heni tain animal et endilli pakeimmatun e hi-gatu hi Jesebel.' "

## 10

### *Ya neipepateyan idan helag Ahab*

<sup>1</sup> Wada hu nepitun helag Ahab e patul lad Israel ni nambebley di Samaria. Nantudek hi Jehu idan kamengippangngulun tuun kamampaktek idan helag Ahab. Heninnuy hu kantu etan di tudek: <sup>2</sup> "Hedin dewwaten yu eya tudek tep ay hi-gayu kamampaktek idan helag ni patul ey hi-gayu hu ngenamung idan kalesah ni kameussal di gubat, yadda kebayyu, yadda almas et yadda bebley ni nehammad ni neluhud. <sup>3</sup> Pili kayun kelaingan ni helag Ahab e patul et pambalin yun patul yu ey nandaddan kayun mekiggubbat ni pengi-ehnengan yun helag tu." <sup>4</sup> Simmakut ida hu ap-apud Samaria tep kanday "Kaw kabaelan tayu kuman menangan Jehu, anin idan dewwan patul e di Joram nan Ahasiah et inapput tudda?" <sup>5</sup> Et mantudek ida hu ap-apun kamampaktek ni baley nan patul niyadda ap-apun bimbebley et yadda kamengippaktek idan helag Ahab et palaw dan Jehu. Kandat tudek day "Bega-en dakemin hi-gam ey nandaddan kamin mengippahding ni pinhed mun pehding mi. Eleg kami umpilin patul mi, et humman hu, ipahding mu hu hipan kayyagud ni muka nemnemnema." <sup>6</sup> Nengapya mewan hi Jehu ni hakey ni tudek ni hi-gada et kantuy "Hedin hi-gak i-ehneng yu ey hedin u-unnuden yu olden ku, i-li yun hi-gak di Jesreel hu uluddan helag Ahab ni hanneyan olas ni kabbuhhan."

Yadda etan nepitun helag Ahab ey impappaktek idan ap-apud Samaria et hi-gada nenge-etteng ni hi-gada. <sup>7</sup> Dinwat da etan meikkadwan tudek Jehu et pateyen dan emin humman ni nepitun helag Ahab et iha-ad da ulu dad dakel ni basket et palaw dan Jehu di Jesreel. <sup>8</sup> Dingngel nan Jehu e in-ali dadda humman ni ulu idan helag Ahab ey in-olden tu e pandedwan dan tetbunen di eheb ni bebley et diman idadman ingganah ni newa-waan tu. <sup>9</sup> Newa-wa et lumaw hi Jehu etan di eheb ni bebley et kantudda etan ni neamung ni tuu ey "Endi bahul yu. Hi-gak hu kan nemnem et pateyen ku hi Joram e patul. Nem hipa nematey ni hi-gada? <sup>10</sup> Huyya keang-angan ni inamnuan ni inhel APU DIOS nan Elijah ni meippahding ni helag Ahab tep kameippahding hu tuka e-hela." <sup>11</sup> Impapetey Jehu emin hu agin Ahab ni nambebley di Jesreel, yadda opisyal tu, yadda gayyum tu et yadda padi tu et endin hekey hu natdaan ni hi-gada.

### *Ya neteyyan idan agin etan ni patul e hi Ahasiah*

<sup>12</sup> Hini-yan Jehu hu Jesreel et lumaw di Samaria. Ey yan wadadda etan di dalan ni kandan Kampun Kamampattul ni Kalneroh <sup>13</sup> ey dinammu dadda edum ni helag Ahasiah e patul di Judah et kantun hi-gada ey "Hipa kayu?" Kanday "Agi dakemin Ahasiah. Umlaw kamid Jesreel et mi ang-angen hi Jesebel e ina etan ni patul et ya pamilyah tu." <sup>14</sup> Pinhakkeyey intekuk Jehu hu olden tudan sindalu tu e kantuy "Depap yudda nem entan tudda patey." Dimpap dadda emin e na-pat et dewwa bilang da et papetey tudadda bubun di Bet Ehed et endi natdaan ni hi-gada anin hakey.

### *Netey emin hu natdaan ni agin Ahab*

<sup>15</sup> Kamenglaw mewan hi Jehu ey dinammu tud dalan hi Jehonadab e u-ungngan Rekab. Kan Jehu ni hi-gatuy "Kaw nan-ingngah hu ta kapannemnem et makiunnud kan hi-gak? Kaw baddangam muwak?"

Kan Jehonadab ey "Em."

Kan Jehu ni hi-gatuy "Hedin tep hannitan, indengdeng mu ngamay mu." Indengdeng tu et baddangan Jehu ni nanlugan idad kalesah tu. <sup>16</sup> Kan Jehu ey "Peki-li kan hi-gak et ang-angem hedin inna-nu nakka pengu-unnud nan APU DIOS." Et mangkuyug idan limmaw di Samaria. <sup>17</sup> Dimmateng idadman et pateyen Jehu emin hu natdaan ni pamilyah Ahab. Huyya inamnuan ni inhel lan APU DIOS nan Elijah ni meippahding.



<sup>18</sup> Inemung Jehu ida tutu-ud Samaria et kantun hi-gaday “Yan nampatulanan Ahab ey kulang hu impahding tun nenaydayaw nan Baal, nem hedin hi-gak nunya man nehammad ni peteg pandeyyaw ku. <sup>19</sup> Ayagi yun emin ida prophet Baal, emin ida kamandeyyaw ni hi-gatu niya emin ida padi tu. Ang-ang yu et umliddan emin. Tep yan nunya ey man-appittak nan Baal ni nehammad ni peteg. Yadda etan kamenaydayaw nan Baal ni eleg meki-emmung ey mettey ida.”

Nem hanneya impanghel Jehu ma-lat wada inna-nu tun memettey idan emin ni kamandeyyaw nan Baal. <sup>20</sup> In-olden mewan Jehu e kantuy “Getud yu hu hakey ni aggew ni pandeyyawan nan Baal!” Et u-unnuden da. <sup>21</sup> Nenu-dak ni an mengippeamtad emin ni kebbebley di Israel ma-lat umliddan mandeyyaw nan Baal. Immaliddan emin e endi eleg umli. Himmegep idan emin di tempol Baal ey nakapnu.

<sup>22</sup> In-olden mewan Jehu etan ni padin kamampaptek ni balwasi e kantuy “Ang-ang mu et usalen dadda eya balwasi.” Et emin ida etan kamandeyyaw nan Baal ey inusal da hu nan-ingeing ni balwasi. <sup>23</sup> Et humegep dama hi Jehu e kadwa tu hi Jehonadab e u-ungangan Rekab. Kantudda etan ni neamong ey “Ang-ang yu et ebuh ida kamandeyyaw nan Baal ni wadadya. Endi an mei-dum idan etan ni kamandeyyaw nan APU DIOS.” <sup>24</sup> Nem yan nunman ni wadadda etan tuud bawang ni tempol ma-lat man-appit idan Baal ey impustuh Jehu hu newalun sindalud dallin. Intugun tun hi-gada e kantuy “Patey yudda emin eya tuu. Hedin wada pepsik ni hakey ni hi-gayu, ya biyag tu iwwa-hi tu.”

<sup>25</sup> Negibbuh ida etan tuun nan-appit ni kagihheba ey kan Jehu idan guwalya et yadda ap-apu day “Hegeg kayu et pateyen yuddan emin. Ang-ang yu et endi yu pepsik!” Et pampateyen daddan emin e inusal da ispadah da. Nan-iguyud da annel idan nunman ni nangketey et pan-ibbeng dad dallin. Ey himmegep idad kapanha-adin Baal et <sup>26</sup> i-hep dadda etan keyew ni tukud ni daka pandeyyawin Baal et giheben da. <sup>27</sup> Ey nampi-ang dadda etan ingilinan ni batun Baal et pambahbaha da etan tempol et pambalin dan kahlilya ingganah nunya. <sup>28</sup> Hanneya impahding Jehu ni nangkai idan kamandeyyaw nan Baal di Israel.

<sup>29</sup> Nem eleg tu bahbaha ida hu balituk ni heni bakan wadad Bethel niyad Dan ni daka daydayawa. Huyya hu et-eteng ni liwat ni impappangngulun Jeroboam e u-ungangan Nebat et u-unnuden idan tuud Israel. <sup>30</sup> Kan APU DIOS nan Jehu ey “Impahding mu emin hu pinhed kun pehding muddan helag Ahab. Humman hu gaputun issapatah ku e mampatul ali helag mu di deya Israel ingganah di pidwan inap-apum.” <sup>31</sup> Nem eleg peka-u-unnuden nan Jehu emin hu tugun nan APU DIOS e Dios ni Israel tep impappangngulu tudda hu tuud Israel ni manliwwat e henin impahding Jeroboam.

<sup>32</sup> Yan nunman ni tsimpuh ey inlapun APU DIOS ni kapanpeek-ekut hu bebley idan helag Israel. Inapput Hasael e patul di Syria ida dakel ni bebley di Israel di gubat et idum tud bebley da. <sup>33</sup> Ya bebley ni Israel ni wadad appit ni kasimmilin aggew di Jordan, ya Gilead, ya bebley ni helag Gad, ya bebley ni helag Reuben et ya bebley ni helag Manasseh, anin ya gilig ni Aroer ingganah di Gilead et ya Bashan di North. <sup>34</sup> Emin ida impenahding Jehu et ya nekapkapyan nampatulanan tu ey neitudek etan di Liblul idan Patul di Israel. <sup>35</sup> Netey et maikulung di Samaria et maihullul etan u-ungnga tun hi Jehoahas ni nampatul. <sup>36</sup> Dewampulut walun toon hu nampatulanan Jehu di Israel e yad Samaria nanha-adan tu.

## 11

### *Ya nampatulanan Athaliah di Judah*

<sup>1</sup> Yan nengamtaan nan Athaliah e netey etan u-ungnga tun patul e hi Ahasiah ey in-olden tun petteyen dan emin hu aaggi niya pamilyah Ahasiah. <sup>2</sup> Nem hi Jehosheba e agin Ahasiah e u-ungangan Jehoram e patul ey indalunuh tun inewit hi Joas e gelang ni lakin u-ungangan Ahasiah anin etan kamengippaptek ni hi-gatu et tudda itlud hakey ni kuwaltuh di Tempol ma-lat eleg mailegat ni pemetteyan Athalia idan aaggi tu. <sup>3</sup> Impaptek Jehosheba hi Joas e ittattalu tud Tempol Apu Dios ni enem ni toon ni nan-ap-apan Athaliah. <sup>4</sup> Nem yan meikkeppitun toon ni nan-ap-apan Athaliah ey impaeyag etan ni padi e hi Jehoiada ida ap-apun guwalyan patul et ya ap-apun guwalyad baley tu et mekitebbalan idan hi-gatud Tempol APU DIOS. Impansapatah tuddan mansilbiddan ustuh ni patul et han tu peang-ang ni hi-gada hi Joas e u-ungnga lan eman ni patul e hi Ahasiah.

<sup>5</sup> Kan Jehoiada ni hi-gaday “Mahapul ni heninnuy hu pehding yu. Mangguwalya edum ni hi-gayud baley ni patul ni Sabaduh e kamengillin ni aggew. <sup>6</sup> Ey ya edum ey mangguwalyadda etan di Ehebe e Sur. Ey yadda edum ey manha-ad idad appit ni beneg idan guwalyad baley ni patul. <sup>7</sup> Et yadda etan dewwan grupuh ni eleg manggunnun

Sabaduh hu manggualyad Tempol APU DIOS et guwalyaan yu hi Joas. <sup>8</sup> Mahapul ni nakaddaddan kayun manggualyatan etan ni patul e liktuben yu niya neuknut hu ispadah yu. Keiunnuunnud kayun hi-gatud lawwan tu. Ey patey yu kumpulmih ni meihnup ni hi-gatu.”

<sup>9</sup> Inu-unnud idan ap-apun guwalya hu inhel Jehoiada ni pehding da. Inemung idan kamengipappangnulun nunman ni tellun grupuh hu tuu da, yadda manggunnun nunman ni Sabaduh et yadda negibbuh ni nanggunu. <sup>10</sup> Ey ingka-peng Jehoiada e padi idan nunman ni kamengipappangnulu idan pahul niyadda happiyaw lan David e patul ni neitlud Tempol. <sup>11</sup> Humman idan guwalyan nangkeuknut hu ispadah da ey meipustuh idad hinanggan Tempol ey liktuben da etan patul et ya etan altar ma-lat guwalyaan da humman ni patul.

<sup>12</sup> Entanni ey impabudal nan Jehoiada hi Joas e u-ungnga lan eman ni patul e hi Ahasiah et ipanget tun hi-gatu hu penget ni patul et idwat tun hi-gatu hu liblun ni neitudkan ni tugun ni pehding ni man-ap-apu et pemta da e hi-gatu law hu patul. Dinuyagan da ulu tun lana et itkuk da e kanday “Manneng kan mampatul!”

<sup>13</sup> Dingngel nan Athalia hu ngaladdan tutu-u et yadda guwalya ey impapuut tun limmaw di Tempol APU DIOS et tu ang-angen hedin hipa kameipahpahding. <sup>14</sup> Ey inang-ang tu etan patul e immehng di dagsin tukud ni heggeppan di Tempol e yadman hu kaehngin patul. Ey yadda etan opisyal niyadda kamantangguyup ey immehng idad dagsin etan ni patul. Ida kamampantetekuk hu tuun amleng da ey pampetnul da tangguyup da. Yan nenang-angan Athaliah idan nunya ey bini-ki tu balwasi tu et mantetekuk e kantuy “Sinela yuwak! Sinela yuwak!” <sup>15</sup> Ey hi Jehoiada e padi, in-olden tuddan kamengipappangnulu e kantuy “I-hep yud Tempol hi Athaliah ey patey yu hu hipan tuun mengipattan mengihwang ni hi-gatu. Entan tu patey eyad bawang ni Tempol APU DIOS.” <sup>16</sup> Pinden da et ilaw da etan di eheb ni kahehgepin kebayun umlaw di baley ni patul et pateyan dadman. <sup>17</sup> Hi Jehoiada e padi ey impekitbal tuddan APU DIOS etan patul niyadda tuu ma-lat hi APU DIOS ni ebuh u-unnuden da. Ey impekitbal tu dama etan patul et yadda tuu ma-lat kayyaggud hu pandadagyuman da.

<sup>18</sup> Entanniy limmaw ida tutu-ud tempol nan Baal et bahbahen da niya nambukli dadda pan-appitan anin idan tutu-u, et pateyan da hi Mattan e padin Baal di hinanggan nunman ni pan-appitan.

Impeguwalan Jehoiada idan sindalu hu Tempol, <sup>19</sup> et hi-gatu niyadda ap-apun sindalu, yadda guwalyan patul et yadda guwalyad baley ni patul ey kinadwaan da hi Joas e patul ni nalpud Tempol et lumaw ida etan di baley ni patul e indalan da etan di Eheb ni Guwalya et an yumudung hi Joas di yuddungngan ni patul. <sup>20</sup> Et man-am-amleng ida tuu ey melinggep law hu bebley da tep pintey da hi Athaliah di baley ni patul. <sup>21</sup> Hi Joas ey pitu toon tun nampatulun tud Judah.

## 12

### *Ya nampatulun Joas di Judah*

<sup>1</sup> Nampatul hi Joas di Judah eman ni meikkeppitun toon ni nampatulun Jehu di Israel. Nanha-ad di Jerusalem et mampatul ni na-pat ni toon. Hi Sibiah hu ngadan inetu e iBeersheba. <sup>2</sup> Impahding tu hu kamengippeamleng di hinanggan APU DIOS eman ni ketaggun Jehoiada e padi tep tinenuttuuduan tu. <sup>3</sup> Nem eleg tudda bahbahen etan kapandeyyawin bekken ni makulug ni dios, et eleg isiked idan tuun man-appit niya mengihheb ni insensoh diman.

<sup>4</sup> Impaeyag Joas ida padi et kantun hi-gaday “Amung yudda pihhuh ni in-aliddan tuun in-appit dad Tempol APU DIOS: humman ida etan daka ibbayad ni pan-appitan da, yadda etan pihhu ni daka iddawat ngu dedan et yadda etan daka ibbayad hedin wada insapatah da. <sup>5</sup> Elan idan padi humman ni pihhuh ma-lat mausal ni pengiyayyaggudan ni kumpulmih ni nebahbah eyad Tempol.”

<sup>6</sup> Nem nedatngan hu meikkadwampulut tellun toon ni nampatulun Joas ey endi pay hu neiyayyaggud di Tempol <sup>7</sup> et paeyag Joas hi Jehoiada et yadda edum ni padi et kantun hi-gaday “Kele eleg yu iyayyaggud hu nangkebahbah eyad Tempol? Entan ew law tu ala hu pihhuh ni kameemung. Tep meippalpun nunya ey bekken law ni hi-gayu hu mengngeng ni pihhu. Mahapul ni iddawat yu et mausal ni pengiyayyaggudan ni Tempol.”

<sup>8</sup> Inebulut idan padi et abuluten da pay e bekken law ni hi-gada hu mengiyayyagud ni Tempol. <sup>9</sup> Immala hi Jehoiada ni et-eteng ni kaban et teleken tu gawwan hu-keb tu et tu iha-ad di dagsin kapan-appisid winannan ni heggeppan di Tempol. Et yadman hu pengihha-ad idan padin kamanguwalyad heggeppan di Tempol idan pihhuh ni kaiddawat idan tuun kaum-alin mandeyyaw. <sup>10</sup> Hedin napnu etan kaban ni pihhuh,

immalidda etan kapantuddek ni patul niya etan keta-ta-geyyan saad tun padid Tempol et bilangan da ey inha-ad dad hambag et ikiloh da. <sup>11</sup> Hedin negibbuh ni intudek da ustuh ni kiloh tu, indawat daddan kamengippaptek ni ngunud Tempol et ibeyad dad karpenter, <sup>12</sup> yadda kamengingngunnun batun meussal et yadda kamampehhek ni batu. Hi-gada pay hu memeyyad idan keyew, niyadda nepahek ni batun mahapul et yadda edum ni beyyadan ni pengiyayyaggudan dan Tempol APU DIOS. <sup>13</sup> Nem endidman ni pihhuh hu meibbeyyad ni pengapyaan dan silber ni basuh, mahukung ni duyu, tangguyup, ya kameussal di kengkeh winu kumpulmih ni kameussal hu silber winu balituk ni mahapul di Tempol APU DIOS.

<sup>14</sup> Tep humman ni pihhuh ey meussal ni penangdan idan kamampangngunnun pengiyayyaggudan dan Tempol. <sup>15</sup> Humman idan tuun kamappaptek ni ngunud Tempol ey ida kameiddinnel ni peteg et humman hu eleg mahapul ni an menahmahan hu neilawwan ni pihhuh. <sup>16</sup> Nem yadda etan pihhuh ni neiappit gapuh ni eleg pengu-unnudan ni Tugun APU DIOS niya gapuh ni nanliwatan ey eleg da ihha-ad di Tempol, nem meidwat idan padi.

*Indawat Joas ida nengilinan ni ngunut nan hi Hasael*

<sup>17</sup> Yan nunyan tsimpuh ey ginubat nan Hasael e patul ni Syria hu Gath et i-dum tud bebley tu. Ey tu pay kanemneman gubbaten hu Jerusalem. <sup>18</sup> Nem inlan Joas emin ida etan nengilinan ni in-appit ida lan neitu-nuddan tun patul e di Jehoshaphat, hi Jehoram, et hi Ahasiah et i-dum tuddad in-appit tun APU DIOS anin idan balituk ni neidulin di Tempol et yad baley ni patul et pailaw tun emin di Hasael e patul ni Syria et uma-allaw ida humman ni sindalu tud Jerusalem.

<sup>19</sup> Emin hu impenahding Joas ey neituede di Liblul idan Patul di Judah.

<sup>20-21</sup> Yadda opisyal tu e hi Josakar e u-ungngan Simeat et hi Jehosabad e u-ungngan Somer, ey nannemnem idan lawah ni pehding dan hi-gatu et pateyen dad Bet Millo di keltad ni mampedayyud Silla. Humman ida kameidinnel ni konsihal tu. Ingkulung dad gungat idan patul di Bebley David et maihullul etan u-ungnga tu e hi Amasiah ni nampatul.

## 13

*Ya nampatulan Jehoahas di Israel*

<sup>1</sup> Yan meikkadwampulut tellun toon ni nampatulan Joas e u-ungngan Ahasiah di Judah ey nampatul hi Jehoahas e u-ungngan Jehu di Israel et manha-ad di Samaria et man-apapun hampulut pitu toon.

<sup>2</sup> Nanliwat daman henin nan Jeroboam e u-ungngan Nebat e nemangulun nampatul et ipappangngulu tudda tuud Israel ni nanliwat. Ey eleg tu isiked ni mengippahding ni lawah di hinangngan APU DIOS. <sup>3</sup> Humman hu gaputun bimmubbunget hi APU DIOS idan tuud Israel et i-abulut tun ennapputen idan Hasael e patul ni Syria et hi Ben Hadad e u-ungngatu. <sup>4</sup> Entanni ey nandasal hi Jehoahas ma-lat baddangan APU DIOS ey dingngel tu dasal tu tep inang-ang tu e nemahhig kapehpehding ni patul ni Syria idan tutu-ud Israel. <sup>5</sup> Et wadaen APU DIOS hu hakey ni man-ap-apid Israel et ihwang tudda tuud Israel idan iSyria. Et luminggep ida mewan heni lan nunman. <sup>6</sup> Nem nanengtun eleg da iwalleng hu mengippahding ni lawah ni impappangngulu lan Jeroboam et manliwat ida. Ey nanengtun immen di Samaria etan hu tukud ni daka deyyawan biin dios e hi Asherah.

<sup>7</sup> Entanni ey ekkut law natdaan ni ussalen Jehoahas ni ihhangga tud gubat. Ebu hu neliman sindalu nampangkebayyu, hampulun kalesah, et ya hampulun libun sindalu, tep nampatey idan patul ni Syria e henidda dep-ul ni nan-igsn tu. <sup>8</sup> Emin hu impahding Jehoahas ey neituede etan di Liblul idan Patul di Israel. <sup>9</sup> Netey et ikulung dad Samaria et maihullul hu u-ungnga tu e hi Jehoas ni nampatul di Israel.

*Ya nampulan Jehoas di Israel*

<sup>10</sup> Yan meikkatelumpulut pitun toon ni nampatulan Joas di Judah ey nampatul hi Jehoas e u-ungngan Jehoahas di Israel. Nanha-ad di Samaria et man-ap-apun hampulut enem ni toon.

<sup>11</sup> Nanliwat daman APU DIOS e heni lan eman ni patul e hi Jeroboam e ipappangngulu tudda tuud Israel ni nanliwat. <sup>12</sup> Emin hu impenahding Jehoas, anin etan ni nekigubatan tun Amasiah e patul di Judah e kei-ang-angan ni kinatuled ey neituede di Liblul idan Patul di Israel. <sup>13</sup> Netey hi Jehoas et maikulung di Samaria di gungat idan patul ni Israel et maihullul etan u-ungnga tu e hi Jeroboam ni nampatul.

*Ya neteyyan Elisha*

<sup>14</sup> Hi Elisha e prophet ey nandegeh ey eleg meeggahi et patey tu law ey limmaw hi Jehoas e patul ni Israel et tu ang-angen. Kamannannangnih e kantuy "Ama! Ama! Hi-gam hu kamei-ellig etan di kalesa ey kebayyun inhanggan Israel di gubat!" <sup>15</sup> Kan Elisha ni hi-gatuy "Ale kan pana." Inu-unnud Jehoas et an umla. <sup>16</sup> Kan mewan Elisha ni hi-gatuy "Tenged mu eya pana." Singnged Jehoas etan pana ey intenged Elisha hu ngamay tud ngamay Jehoas. <sup>17</sup> Kan Elisha ey "Ibeghul mu eya habhabyen ni neihanggad Syria di appit ni kasimmilin aggew et ipenam diman." Et ipenan Jehoas etan pana ey simmekuk hi Elisha e kantuy "Huttan hu panan APU DIOS ni mengapput idan iSyria! Peka-apputem ali iSyria di Aphek." <sup>18</sup> Entanniy kan Elisha nan Jehoas ey "Iba-wek mud puyek eya pana." Et iba-wek tun nampitlu. <sup>19</sup> Bimmunget hi Elisha etan ni patul et kantuy "Gullat et imba-wek mun neminlimma winu nemin-enem ma-lat peka-apputem ida iSyria. Mampitlu law ni ehub pengapputam ni hi-gada."

<sup>20</sup> Netey hi Elisha et maikulung.

Katootoon ni wadadda iMoab ni kaumlaw ni mengubbat idan iIsrael hedid negibbuh hu tsimpuh ni ketel.

<sup>21</sup> Wada pinhakkey ni kapan-ikkulung idan iIsrael hu hakey ni tuun netey ey inang-ang dan iyyalidda iMoab et mengin-iibheng idan etan ni annel ni netey di kulung Elisha et mamsik ida. Ey neitumuk etan annel ni netey di genit Elisha ey netaguan etan tuu et umehngeng.

*Ya gubat ni iIsrael niya iSyria*

<sup>22</sup> Nanhelhetap ida iIsrael ni nampatulan Jehoahas tep pinalpaligat idan Hasael e patul di Syria. <sup>23</sup> Nem et-eteng hu hemek APU DIOS ni hi-gada et eleg ida mekabbabhah gapu tep ya nehammad lan nekitbalan tun Abraham, hi Isaac et hi Jacob. Humman hu gaputun eleg tu iebulut ida mekabbabhah ingganah nunya. <sup>24</sup> Netey hi Hasael e patul di Syria et meihullul hi Ben Hadad e u-ungngatun nampatul. <sup>25</sup> Inapput Jehoas e patul ni Israel hi Ben Hadad ni nampitlu et bangngaden tudda bebley ni piniliw Ben Hadad eman ni nampatulan ametun hi Jehoahas.

## 14

*Ya nampatulan Amasiah di Judah*

*(2 Chronicles 25:1-24)*

<sup>1</sup> Nampatul hi Amasiah e u-ungngan Joas di Judah eman ni meikkadwan toon ni nampatulan Jehoas e u-ungngan Jehoahas e patul di Israel. <sup>2</sup> Dewampulut lima toon tun nampatulan tud Judah e nanha-ad di Jerusalem et nampatul ni dewampulut heyam ni toon. Ya ngadan inetu ey hi Jehoaddin e iJerusalem. <sup>3</sup> Impahding tu hu kayyagud di hinanggan APU DIOS, nem beken ni henin impahding lan apu tu e hi David. Hi ametun hi Joas hu impeka-u-unnud tu. <sup>4</sup> Eleg tu bahbahen ida etan kapandeyyawin beken ni makulug ni dios, et eleg isiked idan tuun man-appit niya mengihheb ni insensoh diman.

<sup>5</sup> Entanni ey nehammad law hu nampatulan Amasiah ey impapetey tudda hu nematey nan ametu e hi Joas e patul. <sup>6</sup> Nem eleg tudda papetey hu u-ungnga da tep inu-unnud tu hu inhel APU DIOS etan di Tugun Moses e kantuy "Beken ni lebbeng tun meippepetey hu a-ammed gapuh ni nambahulan ni u-ungnga da ey beken ni lebbeng tun meippepetey ida u-ungnga gapuh ni nambahulan idan a-ammed da. Ya hakey ni tuun nambahul ey mahapul ni meippepetey gapuh ni bahul tu."

<sup>7</sup> Entanniy pintey Amasiah hu hampulun libun sindalun iEdom etan di kandan Valley of Salt. Sinekup tu pay hu Sela et hullulan tu ngadan tun Jokteel et humman ngadan tu ingganah nunya.

<sup>8</sup> Entanni mewan ey nenu-dak hi Amasiah idan opisyal tud kad-an ni patul di Israel e hi Jehoas e u-ungngan Jehoahas e u-ungngan Jehu et ehelen da e kanday "Huyya inhel Amasiah e patul: 'Ikay et manggubat ita.'" <sup>9</sup> Nem in-alig Jehoas hu nenumang tu e kantuy "Wada hu hebit di Lebanon e kantu etan ni keyew ni Sedar ey, 'Tebulut mu et ahwaen ni u-ungngak hu hakey ni u-ungngam ni bii.' Nem entanniy immali hu animal di muyung et pan-igsin tu humman ni hebit. <sup>10</sup> Inamtak e Amasiah e inapput mudda iEdom, et humman hu muka ippahhiyya. Ey kaka man-am-amleng gapuh ni nunman ni nengapputam et mandengel ka. Nem ya ittugun kun hi-gam ey entan kaukat mun an mekiggubbat. Kele ka menemmak ni ligat ni umhulun ni kebabbahan niya kebabbahan idan tuud Judah?"

<sup>11</sup> Nem kahing hi Amasiah. Et amungen Jehoas e patul di Israel ida sindalu tu, et manggubat idan Amasiah e patul di Judah di Bet Semes di Judah. <sup>12</sup> Neapput hu sindalun Amasiah et mamsik idad baballey da. <sup>13</sup> Nambalin ni balud nan hi Jehoas hu patul di Judah e hi Amasiah e u-ungngan Joas e u-ungngan Ahasiah di Bet Semes. Nampalaw di

Jehoas di Jerusalem et bahbahren da etan tuping ni luhud e inlapu dad Eheb e Epraim ingganah di Dugun Eheb. Limmaw ni dewanggatut ni mitroh hu kedukkekey ni nebahbah ni luhud. <sup>14</sup> Inla dan emin hu balituk niya silber niya nangkebalol ni usal di Tempol APU DIOS et yad baley ni patul.

Ey wadadda pay hu imbesik dan iJudah et mambangngad di Samaria.

<sup>15</sup> Emin ida impahding Jehoas, anin ya nanggubatan dan Amasiah e patul di Judah ey neitudek etan di Liblul idan Patul di Israel. <sup>16</sup> Netey hi Jehoas et ikulung dad Samaria di gungat idan patul di Israel, et maihullul hi Jeroboam e u-ungnga tun nampatul.

<sup>17</sup> Hi Amasiah e u-ungngan Joas e patul di Judah ey nambiyag pay ni hampulut liman toon meippalpun neteyyan nan Jehoas e patul ni Israel. <sup>18</sup> Emin ida etan edum ni impahding Amasiah ey neitudek etan di Liblul idan Patul di Judah.

*Ya neteyyan Amasiah e patul di Judah*  
(2 Chronicles 25:25-28)

<sup>19</sup> Wadadda hu namplanuh ni memettye ni hi-gatud Jerusalem, et bumsik di Lakis nem inunud da et pateyen dadman. <sup>20</sup> Imbangngad da annel tud Jerusalem et itakkey dad kebayyu et ikulung dad Bebley David di gungat idan patul di Judah. <sup>21</sup> Inhullul idan tutu-ud Judah hi Ussiah e u-ungngan Amasiah ni nampatul e hampulut enem hu toon tu. <sup>22</sup> Et yan nunman ni nampatuluan tu ey binangngad tud gubat hu Elat et iyayyaggud tu.

*Ya nampatuluan Jeroboam di Israel*

<sup>23</sup> Yan meikkahampulut liman toon ni nampatuluan Amasiah e u-ungngan Joas e patul di Judah, ey nampatul hi Jeroboam e u-ungngan Jehoas di Israel. Nampatul ni na-pat et hakey ni toon ey nanha-ad di Samaria. <sup>24</sup> Nanliwat dama Jeroboam nan APU DIOS tep inu-unnud tu hu lawah ni impenahding lan Jeroboam e patul e u-ungngan Nebat e ipappangngulu tudda tutu-ud Israel ni manliwwat.

<sup>25</sup> Binangngad tud gubat ida bebley di nambattanan ni Lebo Hamat niya Netey ni Baybay. Humman hu insapatah APU DIOS e Dios ni Israel nan hi Jonah e prophet e u-ungngan Amittai di Gath Hepher. <sup>26</sup> Tep inang-ang APU DIOS hu nemahhig ni ligat idan tuud Israel, ey endi kamemaddang ni hi-gada. <sup>27</sup> Ey gapu tep eleg pinhed APU DIOS ni pakabbabhahren tu hu Israel, wineda tu hi Jeroboam e patul ma-lat ihwang tu Israel. <sup>28</sup> Emin hu impenahding Jeroboam e patul, yadda impahding tu, yadda nekigubatan tu, ya nemandngadan tun Damascus niya Hamat e bebley di Judah nunman et mambangngad ida huyyan bebley di Israel ey neitudek idad Liblul idan Patul di Israel. <sup>29</sup> Netey hi Jeroboam et maikulung di Samaria di gungat idan patul di Israel, et maihullul etan u-ungngatun hi Sekariah ni nampatul di Israel.

## 15

*Ya nampatuluan Ussiah di Judah*  
(2 Chronicles 26:1-23)

<sup>1</sup> Yan meikkadwampulut pitun toon ni nampatuluan Jeroboam di Israel, ey nampatul hi Ussiah e u-ungngan Amasiah di Judah. <sup>2</sup> Hampulut enem hu toon tu eman ni nampatuluan tu et man-ap-apun nelimat dewwan toon e yad Jerusalem nanha-adan tu. Ya ngadan inetu ey hi Jekoliah e iJerusalem. <sup>3</sup> Kayyaggud hu impahding tu e kamengeipeamleng nan APU DIOS henin ametu e hi Amasiah. <sup>4</sup> Nem eleg tu bahbahren ida etan kapandeyyawin beken ni makulug ni dios, et eleg isiked ni man tuun man-appit niya mengihheh ni insensoh diman.

<sup>5</sup> Impandegeh nan APU DIOS hi Ussiah ni leprosy et eleg ma-kal humman ni degeh tu ingganah ni neteyyan tu. Neappil di hakey ni baley et ya etan u-ungnga tu e hi Jotham hu nengipahding idan ngunu tun patul. <sup>6</sup> Emin hu impahding Ussiah ey neitudek di Liblul idan Patul di Judah. <sup>7</sup> Netey hi Ussiah et maikulung di Bebley David di gungat idan patul di Judah et maihullul hi Jotham e u-ungnga tun nampatul.

*Ya nampatuluan Sekariah di Israel*

<sup>8</sup> Yan eman ni meikkatelumpulut walun toon ni nampatuluan Ussiah di Judah, ey nampatul hi Sekariah e u-ungngan Jeroboam di Israel. Nanha-adan di Samaria et man-ap-apun enem ni bulan. <sup>9</sup> Nanliwat nan APU DIOS henin impahding idan ammed tu. Inu-unnud tu hu impahding lan Jeroboam e patul e u-ungngan Nebat e impappangngulu tudda tuud Israel ni nanliwat.

<sup>10</sup> Entanniy nannemnem ni lawah hi Sallum e u-ungngan Jabes et pateyen tu hi Sekariah e patul di hinanggaddan tuu et maihullul ni nampatul. <sup>11</sup> Emin hu impahding Sekariah ey neitudek etan di Liblul idan Patul di Israel. <sup>12</sup> Huyya inamnuan etan lan

inhel APU DIOS nan Jehu e kantuy “Mampatul ali helag mud Israel, nem meippappeg ni meika-pat ni inap-apum ni ebuh.”

*Ya nampatulan Sallum di Israel*

<sup>13</sup> Yan eman ni meikkatelumpulut heyam ni toon ni nampatulan Ussiah di Judah, ey nampatul hi Sallum e u-ungngan Jabes di Israel. Nanha-ad di Samaria et man-ap-apun hambulan. <sup>14</sup> Entanniy limmaw hi Menahem e u-ungngan Gadi di Samaria e nalpud Tirsas, et pateyen tu hi Sallum et maihullul ni nampatul di Israel. <sup>15</sup> Yadda impahding Sallum anin etan nemateyan tun patul da ey neitudek etan di Liblul idan Patul di Israel.

<sup>16</sup> Nunman ni nalpuan Menahem di Tirsas ey binabhah tu bebley e Tappuah anin idan bebley ni neihnup diman ingganah di Tirsas et pampateyen tudda hu tutu-un nampambebley diman tep eleg ida mansukkuh ni hi-gatu. Ey nambeghi tu egeh idan nampambutsug ni bii. <sup>17</sup> Nampatul hi Menahem e u-ungngan Gadi di Israel eman ni meikkatelumpulut heyam ni toon ni nampatulan Ussiah di Judah. Nanha-ad di Samaria et man-ap-apun hampulun toon. <sup>18</sup> Nem nanliwat nan APU DIOS tep inu-unnud tu hu impahding lan patul e hi Jeroboam e u-ungngan Nebat e impappangngulu tudda tuud Israel ni nanliwat.

<sup>19</sup> Entanniy ginubat Tiglat Pileser e patul di Assyria hu Israel, et idwat Menahem ni hi-gatu hu umlaw ni telumpulut walun libun kiloh ni silber, ma-lat bumaddang humman ni patul ni Assyria ni hi-gatu et meihahhammad hu pan-ap-apuan tu. <sup>20</sup> Inlan Menahem ida kekeddangyan ni tuud Israel humman ni pihhu ni indawat tu. Pinilit tu hu hanhakke ni hi-gada et umidwat idan han neliman palatah ni silber. Inlan Tiglat Pileser ida humman et eleg tu law gubaten Israel et maibangngad di Assyria. <sup>21</sup> Emin ida impenahding Menahem ni nampatulan tu e neitudek etan di Liblul idan Patul di Israel. <sup>22</sup> Netey et maikulung et maihullul hi Pekahiah e u-ungngatun nampatul.

*Ya nampatulan Pekahiah di Israel*

<sup>23</sup> Yan eman ni meikkellimampulun toon ni nampatulan nan Ussiah di Judah, ey nampatul hi Pekahiah e u-ungngan Menahem di Israel. Nanha-adan di Samaria et man-ap-apun dewwan toon. <sup>24</sup> Nanliwat nan APU DIOS tep inu-unnud tu hu impahding lan patul e hi Jeroboam e u-ungngan Nebat e impappangngulu tudda tutu-ud Israel ni nanliwat. <sup>25</sup> Entanniy namplanuh ni lawah hi Pekah e u-ungngan Remaliah e ap-apun sindalun etan ni patul e hi Pekahiah ni pehding tu e edum tudda neliman sindalun nalpud Gilead, et pateyen da etan di gawwan kapangguwalyaid baley ni patul di Samaria et hi-gatu maihullul ni nampatul. <sup>26</sup> Emin hu impahding nan Pekahiah ey neitudek etan di Liblul idan Patul di Israel.

*Ya nampatulan Pekah di Israel*

<sup>27</sup> Yan eman ni meikkellimampulu et dewwan toon ni nampatulan Ussiah di Judah, ey nampatul hi Pekah e u-ungngan Remaliah di Israel. Nanha-ad di Samaria et man-ap-apun dewwampulun toon. <sup>28</sup> Nanliwat nan APU DIOS tep inu-unnud tu hu impahding lan patul e hi Jeroboam e u-ungngan Nebat e ipappangngulu tudda tutu-ud Israel ni nanliwat. <sup>29</sup> Yan nunman ni nampatulan Pekah ey ginubat mewana nan Tiglat Pileser e patul di Assyria hu Israel et sakupen tudda hu Ijon, ya Abel Bet Maakah, ya Janoah, ya Kedes, ya Hasor, yadda bebley di Gilead, Galilee niya Naptali et ilaw tudda hu nampambebley diman di Assyria et pambalin tuddan balud. <sup>30</sup> Entanni ey namplanuh ni lawah hi Hoshea e u-ungngan Elah et pateyen tu hi Pekah e patul et maihullul ni nampatul. Inlapu tun nampatul di Israel eman ni meikkadwampulun toon ni nampatulan Jotham e u-ungngan Ussiah di Judah. <sup>31</sup> Emin hu impenahding Pekah ey neitudek di Liblul idan Patul di Israel.

*Ya nampatulan Jotham di Judah*

<sup>32</sup> Yan eman ni meikkadwan toon ni nampatulan Pekah e u-ungngan Remaliah di Israel ey nampatul hi Jotham e u-ungngan Ussiah di Judah. <sup>33</sup> Dewwampulut liman toon tun nunman ni nampatulan tu et man-ap-apud Jerusalem ni hampulut enem ni toon. Ya ngadan inetu ey hi Jerusha e u-ungngan Sadok. <sup>34</sup> Kayyaggud ida impahding tu e kamengipeamleng nan APU DIOS henin ametu e hi Ussiah. <sup>35</sup> Nem eleg tu bahbahen ida etan kapandeyyawin dios ni beken ni makulug, et eleg isiked idan tuun man-appit niya mengihheh ni insensoh diman. <sup>36</sup> Emin ida impahding Jotham ey neitudek di Liblul idan Patul di Judah. <sup>37</sup> Yan nunman ni nampatulan tu hu nengilepuan APU DIOS ni nengipelaw nan Resin e patul ni Syria et hi Pekah e patul ni Israel ni mengubbat ni Judah. <sup>38</sup> Netey hi Jotham et maikulung di Bebley David di gungat idan patul di Judah et maihullul hi Ahas e u-ungnga tun nampatul.

## 16

*Ya nampatulana Ahas di Judah*  
(2 Chronicles 28:1-27)

<sup>1</sup> Yan eman ni meikkahampulut pitun toon ni nampatulana Pekah e u-ungngan Remaliah di Israel ey nampatul hi Ahas e u-ungngan Jotham di Judah. <sup>2</sup> Dewampulu toon tun nampatulana tu ey nanha-ad di Jerusalem et man-ap-apun hampulut enem ni toon. Eleg tu u-unnuden hu kayyaggud ni impahpahding nan apu tu la e hi David e patul, tep lawah impahpahding tu e beken ni pan-amlengan APU DIOS e Dios tu. <sup>3</sup> Inu-unnud tu lawah ni impenahding idan patul ni Israel, ey ginheb tu u-ungnga tun laki et iappit tud beken ni makulug ni dios. Ey inu-unnud tudda hu lawah ni peteg ni impenahding idan tutu-un dinegyun APU DIOS di diman ni bebley eman ni nalpuan idan helag Israel di Egypt.

<sup>4</sup> Nan-appit ey ginheb tu insensoh etan idad kapandeyyawin beken ni makulug ni dios, yaddad duntug, niyad hengeg ni meyebyeb ni keyew.

<sup>5</sup> Entanniy ginubat di Resin e patul ni Syria et hi Pekah e patul ni Israel hu Jerusalem et liktuban da, nem eleg da apputen hi Ahas. <sup>6</sup> Yan nunman dama hu nemangngadan ni patul di Edom ni Elat et degyunen tudda iJudah ni nambebley diman, et mambebley ida iEdom diman ingganah nunya. <sup>7</sup> Hi Ahas e patul ni Judah ey nenu-dak ni an mekihummangan etan ni patul ni Assyria e hi Tiglat Pileser et heninnuy inhel tu: "Hi-gak hu makulug ni bega-en mu. Ali ka et ihwang muwak ni patul ni Syria et ya patul ni Israel ni mengubbat ni hi-gak." <sup>8</sup> Inlan Ahas ida silber, et ya balituk, di tempol et yadda ha-addan ni nangkebalol di baley ni patul et pailaw tu etan ni patul ni Assyria. <sup>9</sup> Et ipengulun Tiglat Pileser ida sindalu tu et da gubaten hu Damascus e bebley di Syria. Impambalin dadda tuudman ni balud et pambebleyan dadda Kir et pateyen da hu patul da e hi Resin. <sup>10</sup> Limmaw hi Ahas e patul ni Judah di Damascus et tu ang-angen hi Tiglat Pileser. Wadadman ey inang-ang tu hu hin-appil ni pan-appitan et palaw tun Uriah e padi hu pengiu-unnudan tu ma-lat mengapyan henin nunman. <sup>11</sup> Et mengapya hi Uriah ni pan-appitan ni neka-inggeh nunman et gibbuhen tu ey eleg pay mambanggad hi Ahas. <sup>12</sup> Dimmateng hi Ahas ni nalpud Damascus ey inang-ang tun negibbuh etan pan-appitan. <sup>13</sup> Et man-appit ni kagihheban animal, ya pagey niya meinnum ey inwakgih tud pan-appitan etan kuheyaw ni in-appit tun pekiddagyuman nan Apu Dios.

<sup>14</sup> Ingal Ahas etan sigud ni giniling di altar di hinanggab ni Tempol APU DIOS ni wada etan di nambattanan ni pakekapyana dan pan-appitan et ya etan di heggeppan Tempol et geliden da etan di piniggung nunman ni baluh ni pan-appitan.

<sup>15</sup> In-olden Ahas nan Uriah e kantuy "Yan eyad et-eteng ni pan-appitan ni impekapyak hu pengiappisim ni kagihheban mei-appit ni kakkabbuhhan, yadda kagihheban pagey ni kamei-appit ni kamangkehileng, yadda i-appit ni patul ni pagey ni kagihheba, yadda kamei-appit ni pagey niyadda i-appit ni tuun meinnum niyadda kuheyaw ni animal ni kamei-appit ey iduyag mu eyad pakekapan pan-appitan. Nem ya etan giniling ni altar ey pan-appitan ku hedina wada pinhed kun amtaen." <sup>16</sup> Et u-unnuden Uriah e padi emin hu intugun nan Ahas e patul.

<sup>17</sup> Binukal nan Ahas e patul ida etan giniling ni kaliton ni meussal di Tempol ey nan-ekal tudda etan besen ni neipetek diman. Ingal tu pay etan et-eteng ni palyuk ni nekapyad giniling ni pengihha-adan ni danum etan di beneg ni hampulut dewwan giniling ni lakkitun baka et ipetek tu etan di batu. <sup>18</sup> Ey gapu tep pinhed Ahas ni peamlengen etan patul ni Assyria ey ingkal tu etan tuka yuddunggid Tempol ni Sabaduh ey inlekti tu etan kahegepin patul di Tempol. <sup>19</sup> Emin ida impahding nan Ahas e patul ey neitudek etan di Liblud idan Patul di Judah. <sup>20</sup> Netey hi Ahas et ikulung dad Bebley David di gungat idan patul ni Judah et maihullul hi Hesechia e u-ungnga tun nampatul.

## 17

*Ya nampatulana Hosea di Israel*

<sup>1</sup> Yan eman ni meikkahampulut dewwan toon ni nampatulana Ahas di Judah ey nampatul di Israel hi Hosea e u-ungngan Elah. Nanha-ad di Samaria et man-ap-apun heyam ni toon. <sup>2</sup> Nanliwat nan APU DIOS nem beken ni henin nanliwatan idan neitudan tun patul di Israel.

<sup>3</sup> Entanniy ginubat Salmaneser e patul ni Assyria hi Hoshea et apputen tu et katootoon ey mahapul ni mambeyyad hi Hoshea ni buwis ni hi-gatu. <sup>4</sup> Entanniy nannemnem hi Hoshea ni pehding tu et menu-dak ni opisyal tun an menghel nan So e patul di Egypt et bumaddang ni hi-gatu ma-lat masiked hu pambeyyadan tun buwis etan ni patul ni Assyria. Nem neamtaan nan Salmaneser huyya et padpap tu hi Hoshea et ikelabut tu.

<sup>5</sup> Entanniy ginubat Salmaneser emin hu bebley di Israel et liktuben ni sindalu tu hu Samaria ni tellun toon. Yan nunman ni meikkatlun toon, <sup>6</sup> e nunman hu meikkahyam ni toon ni nampatulana Hoshea ey hinggep Salmaneser e patul ni Assyria hu Samaria. Inlaw tudda ilsrail di Assyria et pambalin tuddan balud diman. Impambebley tudda edum di Halah, ya edum di neihnuip di Wangwang e Habor di Gosan et yaddad bebley idan Medes. <sup>7</sup> Mukun neipahding huuyad Samaria ey tep nanliwat ida tutu-ud Israel nan APU DIOS e nengihwang ni hi-gadan neihbutan dad Egypt tep dinaydayaw da edum ni dios. <sup>8</sup> Inu-unnud da hu kapehding idan tutu-un dinegyun APU DIOS di diman ni bebley eman ni daka mengellin nalpuan dad Egypt ey daka ippenahding hu liwat ni impappangguluddan nemangulun patul ni Israel. <sup>9</sup> Intattallu dan impenahding hu eleg pinhed APU DIOS e Dios da. Nengapya idan pandeeyawan etan idan beken ni makulug ni dios e nei-peng di bebley da. <sup>10</sup> Emin di kedunduntug et yaddad nehiduman ni henggep ni keyew ey wada inha-ad dan tukud ni pandeeyawan dan etan ni biin dios e hi Asherah. <sup>11</sup> Emin ida mewana nangkeita-gey ni lugal ey daka pan-appisin kagihheban insensoh ni pandeeyaw daddan beken ni makulug ni dios heni lan impenahding idan nampambebley diman ni dinegyun APU DIOS. Lawah impahpahding da et pabunget da hi APU DIOS. <sup>12</sup> Dineyaw da hu beken ni makulug ni dios e humman intugun APU DIOS ni eleg da ippahding.

<sup>13</sup> Intenu-dak tudda prophet ni menghel idan tuud Israel et yad Judah ni kantuy "Iwalleng yudda lawah ni yuka kapkapyaa. U-unnud yu Tugun kun indawat ku lan aammed yu niya indawat kun hi-gayu daman inhel ida eyan bega-en kuddan prophet."

<sup>14</sup> Nem eleg mengu-unnud ida helag Israel e manghay ida. Henidda lan a-ammed da e eleg da iddinel hi APU DIOS e Dios da. <sup>15</sup> Inwalleng dadda Tugun APU DIOS ni ya nekitbalan tudda lan aammed da. Eleg da hengnguda hu tuka e-helan pehding da. Daka daydayawa hu endi silbi tun dios e kinapyan tuu et mambalin ida daman endi silbitu. Ey inu-unnud da hu kapehpehding idan edum ni tuun nambebley di nanlinikweh ni bebley da anin ni inhel APU DIOS ni hi-gada e eleg da ipahding humman. <sup>16</sup> Nginhay da emin hu Tugun APU DIOS e Dios da. Nengapyaddan dewwan i-inggeh ni bakan gumek et dayawen da. Nengapyadda pay ni i-inggeh ni biin dios e hi Asherah ey dineyaw da hi Baal et yadda bittuwen di kabunyan. <sup>17</sup> In-appit daddan kagihheba hu u-ungnga dan lalakki niya bibi-i etan idan beken ni makulug ni dios. Ida kamandinnel di kaheppitan kaman-ennap et ya maeyak ey ya pengippahdingan dan panliwwatan da hu wadan ingganah di nemnem da et pabunget da hi APU DIOS.

<sup>18</sup> Humman binungetan APU DIOS ni hi-gada et pa-kal tuddad kad-an tu et ebuh hu helag Judah ni nanha-ad di bebley da. <sup>19</sup> Nem anin ida tuud Judah et eleg da u-unnuden hu tugun APU DIOS. Impahding da dama hu liwat ni impenahding idan tuud Israel. <sup>20</sup> Et iwalleng law APU DIOS idan emin hu helag Israel. Impeapput tuddad buhul dan nengubat ni hi-gada ingganah ni nebahbah ida. Humman nengastigu tun hi-gada.

<sup>21</sup> Yan nengappilan APU DIOS ni Israel di nan-ap-apuan David \* ey piniliddan tutu-ud Israel hi Jeroboam e u-ungngan Nebat ni patul da. Et ipappanggulun Jeroboam idan mengiwalleng nan APU DIOS niya mengipahding ni lawah ni peteg ni liwat nan APU DIOS. <sup>22</sup> Et itutuluy idan tuun mengippahding ni emin ni lawah ni impahpahding Jeroboam <sup>23</sup> ingganah eman ni impa-kal idan APU DIOS di bebley da et humman inannuan ni inhel idelan bega-en tun prophet. Et humman hu neipahding e inlaw idaddan iAssyria et mannaneng idadman ingganah nunya.

*Ya nambebleyan idan iAssyria di Israel*

<sup>24</sup> Nan-i-lin etan ni patul di Assyria ida tuun nalpud Babilon, yad Kuhat, yad Abba, yad Hamat niyad Sepharbaim et maihullul idan nambebley di Samaria. Tep hinggep da hu Samaria et yadda edum ni bebley di Israel et hi-gada mambebley diman.

<sup>25</sup> Huuyaddan tuun nalpud edum ni bebley ni nambebley di Samaria ey eleg da dayawen hi APU DIOS, et itu-dak nan APU DIOS hu layon et pampateyen tu edum ni hi-gada. <sup>26</sup> Wada an nengipeamta etan ni patul ni Assyria e kantun hi-gatuy "Eleg amtaddan tuun ni impambebley mud Samaria hu mandeeyaw ni Dios diman, et itu-dak nunman ni Dios ida layon et pateyen tudda." <sup>27</sup> Gapuh nunman ey in-olden nunman ni patul e kantuy "Pambanggad yud Samaria hu hakey ni padin in-ali tayudya et ittutuddan tuddan pehding dan mandeeyaw ni Dios diman." <sup>28</sup> Et pambanggad da hu hakey ni padin helag Israel di Samaria et an mambebley di Bethel et ittutuddu tudda etan ni tuu hu pehding dan mandeeyaw nan APU DIOS.

\* **17:21** Hi David et ya u-ungnga tu e hi Solomon ey nan-ap-apudda lad emin di bebley idan helag Israel ingganah eman ni nengappilan Apu Dios idan tutu-un daka pan-ap-apui. Yadda bebley di north ey kandy Israel ey yadda bebley di south ey kandy Judah.



<sup>29</sup> NEM humman idan immalin tuun nambebley di Samaria, ey nanengtun daka deyyawadda etan ida dios dad nalpuan dan bebley. Ey nengapyaddan tuttu-un da inhad etan idad kapandeyyawin kinapyaddan helag Israel. <sup>30</sup> Yadda etan nalpud Babilon ey daka deyyawa etan kinapyadan dios e Sukkot Benat ngadan tu. Hedin yadda nalpud Buthah ey hi Nergal hu daka deyyawan dios da. Yadda dama nalpud Hamat ey hi Ashimah hu daka deyyawan dios da. <sup>31</sup> Yadda nalpud Ibbah ey di Nibhas nan hi Tartak hu daka deyyawan dios da. Yadda iSepharbaim ey daka i-appit hu u-ungnga dad dios da e di Adrammelek nan hi Anammelek.

<sup>32</sup> Daka deyyawa dama hi APU DIOS nem linggeman hu daka pillian mampeddin hidagan man-appit etan di kapandeyyawin beken ni makulug ni dios. <sup>33</sup> Ma-nut daka deyyawa hi APU DIOS nem daka deyyawa damadda hu beken ni makulug ni dios da e daka iu-unnud di daka pehding di nalpuan dan bebley. <sup>34</sup> Ingganah nunyay humman daka pehpehding e eleg da deyyawan ustuh hi APU DIOS niya eleg da u-unnuda Tugun tun indawat tuddan helag Jacob e nginedanan tun Israel.

<sup>35</sup> Yan eman ni nekitbalan APU DIOS idan helag Jacob ey kantun hi-gaday "Entan tu dayaw hu edum ni dios, entan panyuung yun hi-gada winu pansilbin hi-gada. <sup>36</sup> Hi-gak ni ebuh hu DIOS ni nengipengulun hi-gayun meni-yan ni Egypt gapuh ni et-eteng ni kabaalak et hi-gak hu u-unnud yu. Panyuung kayun hi-gak niya pan-appit kayun hi-gak. <sup>37</sup> Mahapul ni u-unnuden yudda tugun kun impatudek ku. Eleg mabalin ni deyyawen yu edum ni dios. <sup>38</sup> Ey mahapul ni eleg yu liwwana etan nehammad ni nekitbalan kun hi-gayu niya entan tu dayaw hu edum ni dios. <sup>39</sup> Mahapul ni u-unnuden yuwak AP-APU e DIOS yu. Hi-gak hu mengihwang ni hi-gayud buhul yu."

<sup>40</sup> NEM kahing ida e eleg da dengelen hu ehel tu et itultuluy dan ipahding hu lawah ni daka ippenahding ngu dedan. <sup>41</sup> Et humman hu ma-nut daka deyyawa hi APU DIOS nem da dama kadeyyawa hu beken ni makulug ni dios da. Ey kaitultuluy idan helag dan mengippahding idan nunman ingganah nunya.

## 18

### *Ya nampatulana Heseekiah di Judah*

<sup>1</sup> Yan eman ni meikkatlun toon ni nampatulana Hoshea e u-ungngan Elah di Israel, ey nampatul hi Heseekiah e u-ungngan Ahas di Judah. <sup>2</sup> Dewampulut lima toon tun nunman ni nampatulana tud Judah. Nanha-ad di Jerusalem et man-ap-apudman ni dewampulut heyam ni toon. Ya ngadan inetu ey hi Abijah e u-ungngan Sekariah. <sup>3</sup> Kayyaggud hu impahding tu e kamengippeamleng nan APU DIOS heni lan impahding ni ammed tu e hi David e patul. <sup>4</sup> Ingkal tudda etan kapandeyyawin tutu-un beken ni makulug ni dios. Nambukli tudda etan ngilinan ni batu. Binahbah tudda etan tukud ni daka penginnemnemni etan ni biin dios e hi Asherah. Binahbah tu pay etan uleg ni gembang ni kinapya lan Moses ni nginedanan dan Nehustan tep kadaydayawaddan helag Israel ni in-appitan dan daka gihheban insensoh.

<sup>5</sup> Hi Heseekiah ey nehammad hu dinel tun APU DIOS e DIOS ni Israel. Endi kei-ingngehan tud edum ni nemangulun nampatul di Judah, anin idan etan ni neitu-nud ni hi-gatu. <sup>6</sup> Impannananeng tu tuka pengu-unnud APU DIOS e endi eleg tu u-unnuden idan Tugun ni indawat APU DIOS nan Moses. <sup>7</sup> Ey gapu tep binaddangan APU DIOS ey kayyaggud emin hu nambalanan idan impahding tu. Nginhay tu etan patul di Assyria et isiked tun mambeyyad ni buwis ni hi-gatu. <sup>8</sup> Nekigubat pay idan iPilistia et apputen tudda et sakupen tu bebley da ingganah di Gaza et yadda edum ni bebley diman ni neguwalyaan anin idan et-eteng ni bebley.

<sup>9</sup> Yan eman ni meikka-pat ni toon ni nampatulana Heseekiah, et yan meikkeppitun toon ni nampatulana Hoshea e u-ungngan Elah di Israel, ey yan nunman hu nengubatan Salmaneser e patul ni Assyria ni Israel et liktuben idan sindalu tu hu Samaria. <sup>10</sup> Hinggep idan iAssyria hu Samaria eman ni meikkatlun toon e humman hu meikkahyam ni toon ni nampatulana Hoshea di Israel ey meikka-nem ni toon ni nampatulana Heseekiah di Judah. <sup>11</sup> Nan-ilaw nisi etan ni patul ni Assyria ida helag Israel di bebley tu e inlaw tu edum di Halah, yadda edum di neihnu di Wangwang e Habor di Gosan et ya edum ey inlaw tudda bebley idan Medes. <sup>12</sup> Mukun neapput hu Samaria ey tep eleg da u-unnudadda Tugun ni indawat Moses e bega-en tu. Eleg ida umdedngel ey eleg da pinhed ni mengu-unnud.

### *Ya nengubatan ni iAssyria ni Judah*

<sup>13</sup> Yan eman ni meikkahampulut epat ni toon ni nampatulana Heseekiah di Judah ey ginubat nan Sennakerib e patul di Assyria ida iJudah et sakupen tudda etta-teng ni bebley diman ni nehammad ni netuping luhud da.

<sup>14</sup> Nenu-dak hi Hesechia e patul ni Judah ni menghel nan Sennakerib di Lakis e kantuy “Ebbulutek e nambahullak! Ettu anhan et isiked mun mengubbat ni hi-gami. Iddawat ku hu hipan muka ibbaga.”

Hinumang nan Sennakerib e patul di Assyria et kantuy “Mahapul ni um-idwat ka, Hesechia, ni hampulun libun kiloh ni silber et ya hanlibun kiloh ni balituk.” <sup>15</sup> Et idwat Hesechia emin hu silber ni wadad Tempol et yad baley ni patul. <sup>16</sup> Ey nan-ekal tu balituk di lekbi et yad pamedingan ni Tempol et idwat tun Sennakerib.

<sup>17</sup> Nem impalaw damengun nan Sennakerib e patul di Assyria hu dakel ni sindalu tun nalpud Lakis ni mengubbat ni Jerusalem e impanguluddan eta-gey ni opisyal tu. Dimmateng idad Jerusalem et manha-ad ida etan di dalan ni kapangngunnuiddan kamengapayan balwasid gilig ni alak ni kadellanan danum ni kamepang etan di lebeg di ahpat. <sup>18</sup> Impaeyag da hi Hesechia e patul nem intu-dak tu hu tellun opisyal tu et hi-gada an mekidammun hi-gatu. Humman idan tellun opisyal ni an mekihummangan ey hi Eliakim e u-ungngan Hilkiyah e hi-gatu hu kamengippaptek ni emin ni hipan wadad baley nan patul, hi Sebna e sekretarih nan patul et hi Joah e u-ungngan Asap e hi-gatu hu kamengittuddek ni kamekapkapyad bebley.

<sup>19</sup> Kan nunman ni ap-apun sindalun Assyria ni hi-gaday “Pinhed ni patul mid Assyria e et-eteng kabaelan tun amtaen hedini kela nealay kamakaddinnel hi patul e hi Hesechia. <sup>20</sup> Kantuy ‘Kaw kanyu nem wada kabaelan idan sindalu yun mekihangan hi-gami? Kanyuy nelaing kayun mamplennuh niya kabaelan yun mekigubbat, nem ehel ni ebuh ida huttan. Kaw hipa ni-man yuka ididdinel ni umbaddang ni hi-gayu et yuka nemnemneman mengubbat ni hi-gamin iAssyria? <sup>21</sup> Kele yu pandinnelan hu Egypt ni umbaddang ni hi-gayu? Hedini yu Egypt ey kamei-ellig di katlubung e hedini humman ihhulkud mu ey lektattuy nahpung et masibik kumedek ngamay mu. \* Henin nunman elaw ni patul di Egypt idan kamampebaddang ni hi-gatu.

<sup>22</sup> Nem hedini kanyuy mandinnel kayun APU DIOS e Dios yu, ey kaw beken ni hi-gatu kan altar idan nambahbah nan Hesechia et ehelen tudan tutu-ud Judah e hakey ni ebuh hu altar di Jerusalem ni pan-appitan da? † <sup>23</sup> Imay kedi kumaddan et man-ungbal itu. Ya patul ni Assyria ey kantuy ‘Hedini wada dewwan libun sindalu yu, man iddawtan dakeyun dewwan libun kebayyun pantakkayan da. <sup>24</sup> Nem kaw umgeladda makkaw ni ihhanga yun hi-gami? Anin na-mun yadda nekakkapuy ni sindalun Assyria pekihhanga yu et eleg kayu umgegla. Anin ni kantu et wada ibbaddang ni Egypt ni hi-gayun kalesah et ya sindalun mantakkay di kebayyu et eleg kayu umgelan menanggan hi-gami. <sup>25</sup> Hakey mewani ey kaw kanyu nem um-ali-ak ni an memabhah nunyan bebley hedini eleg ieblut nan APU DIOS? Ya kakulugan tu ey inhel tun hi-gak e um-ali kami malat bahbahen mi eya bebley yu.’”

<sup>26</sup> Entanni ey kan di Eliakim, hi Sebna ni hi Joah nunman ni opisyal ey “Ettu anhan et i-hel mun hi-gamin bega-en mud Aramaic, haggud han-awat mi. Entan tu i-hel ni hi-gamin Hebrew tep dedngelen ida eman ni tutu-un wadad kad-an ni tuping ni luhud.”

<sup>27</sup> Nem kan kumedek nunman ni ap-apuy “Eleg, tep eleg tuwak itu-dak ni ap-apuk ma-lat ya patul yu niya hi-gayun ebuh pengippeamtaan kun nunyan nakka pan-e-hela. Pinhed kun dedngelen ida daman tutu-un kamanyuyyudung di tuping, et amtaen da e hedini eleg kayu mansukkuk, man kennen dalli dama tai da ey innumen dalli mimi da henin hi-gayu!”

<sup>28</sup> Et umehneng humman ni opisyal et itkuk tun in-ehel tud Hebrew e kantuy “Dengel yu hu pinhed ni kamedeyyaw ni patul di Assyria ni amtaen yu! <sup>29</sup> ‘Ang-ang yu et eleg dakeyu haulen nan Hesechia tep eleg dakeyu han-ihwang di pehding kullin hi-gayu gapuh ni et-eteng ni kabaekal. <sup>30</sup> Ey entan tu ieblut ni dakeyu ihaphapitan ni mengiddinnel nan APU DIOS. Anin ni kantuy nanna-ud ni ihhewwang dakeyun APU DIOS, et entan tu kukkullug. Entan tu nemnemnem e ihhewwang dakeyun hi-gatun ellian idan sindaluk ni iAssyria ni mengubbat ni hi-gayu et sakupen mi eya bebley yu.

<sup>31</sup> Entan kaya tu deddengngel hi Hesechia! Hi-gak e patul ni Assyria ey mandalen dakeyun meukkat eyad bebley yu et mansukkuk kayu. I-abulut kun anin ni kennen yudda lameh ni intanem yun grapes niya figs ey anin ni man-ehhul kayud hibuy yu, <sup>32</sup> ingganah kedetangan ni pengillawwan dakeyud edum ni bebley ni yu pekibbebleyan. Humman ni bebley ni pengillawwan dakeyu ey heni dama eyan bebley yun wada emin mahapul yu henin grapes ni kapyaan yun meinnum, ya wheat ni kapyaan yun sinapay, ya lameh ni olibah ni kennen yu niya kapyaan yun lana. Ey dakel hu danum ni putsukan. Hanneya meippahding hedini u-unnuden yu hu olden kun mansukkuk kayu ma-lat eleg

\* 18:21 18:21 Ezekiel 29:6-7 † 18:22 18:22 Ang-ang yu Isaiah 36:7 et ya 2 Chronicles 31:1.

kayu matey nem meteggu kayu. Entan nisi tu kulug hu e-helen Heseekiah anin ni kantuy ihhehwang dakeyun APU DIOS.

<sup>33</sup> Tep ya kakulugan tu ey endi hakey ni bebley ni inhewang idan dios dan hi-gak e patul di Assyria. <sup>34</sup> Kaw hannemnem yu neipahding idan tutu-ud Hamat, yad Arpad, yad Sepharbim, yad Hena niyad Ibbah e indinel dadda dios dan mengihwang ni hi-gada, nem eleg ida baddangan nunman idan dios da? Hanniman mewan hu Samaria e eleg meihwang di et-eteng ni kabaelan mi.

<sup>35</sup> Kaw wada ew ngu hakey ni dios idan nunyan bebley ni nengihwang ni hi-gadad et-eteng ni kabaelan ku? Et humman hu, kele yu nemnemnem e kabaelan APU DIOS ni ihhehwang hu Jerusalem? " ‡

<sup>36</sup> Nem ida kaum-eneheng hu tuu e endi himmumang, tep humman hu intugun Heseekiah ni hi-gada. <sup>37</sup> Yadda etan tellun opisyal e di Eliakim e u-ungngan Hilkiah e kamampatek ni baley ni patul, hi Sebna e daka pantuddek, et hi Joah e u-ungngan Asaph e kamengippatek ni importanteh ni papel, ey nambangngad idad kad-an Heseekiah e patul. Bini-ki da balwasi dan lemyung da et idaddatteng dan hi-gatun emin hu inhel etan ni opisyal ni patul ni Assyria.

## 19

### *Ya neihwangan ni Jerusalem*

<sup>1</sup> Dingngel Heseekiah hu indaddatteng idan nunman ni tellun opisyal tu, ey bini-ki tu balwasi tun lemyung tu, et mambalwasin langgusih et lumaw di Tempol APU DIOS. <sup>2</sup> Intu-dak tud kad-an ni prophet e hi Isaiiah e u-ungngan Amos di Eliakim e opisyal tun kamengippatek ni baley ni patul, hi Sebna e sekretarih et yadda kamengippangngulun papaddi e nampambalwasiddan emin ni langgusih. <sup>3</sup> Limmaw ida et kandan Isaiiah ey "Heninnuy hu inhel Heseekiah: 'Yan nunyan aggew ey mekastigu itu, manhelheltap itu, niya mebabba-ingan itu. Mei-ellig itsun nunyad man-ungngan biin iyyallin meukkat hu gelang, nem na-puhan ni elet tu. <sup>4</sup> Intu-dak ni patul ni Assyria hu ap-apun sindalu tu, et taltalangaen tu hu Dios tayun wadan ingganah. Nem hamban anhan dingngel APU DIOS e Dios mu humman idan in-inhel tu et kastiguen tudda ey. Et humman hu, pandasal ka anhan nan Apu Dios, ma-lat baddangan daitsun tutu-un natdaan.' "

<sup>5</sup> Dingngel Isaiiah hu impaad nan patul e hi Heseekiah, <sup>6</sup> ey impalaw tu humang tun hi-gatu e kantuy "Kan APU DIOS ey 'Entan takut idan inhel ni ap-apun sindalun patul ni Assyria e kantuy eleg daka ihhehwang ni hi-gak. <sup>7</sup> Tep pedngel kullin nunman ni patul hu kae-eheladdan tutu-ud bebley tu, et humman alin dedngelen tu umhulun ni pambangngadan tud bebley da et hannak ali papetey diman.' "

### *Ya hakey mewan ni impenattakkut idan iAssyria idan iJudah (Isaiiah 37:8-20)*

<sup>8</sup> Entanni ey dingngel nunman ni opisyal ni Assyria e hini-yan ni patul da hu Lakis, et immen e kamekiggubbat di Libnah e neihnup ni bebley et unuden tudman et wada tu ibegan hi-gatu.

<sup>9</sup> Yan nunman ey dingngel ni patul ni Assyria e kamengelli hi Tirhakah e iKus e patul ni Egypt ni mengubbat ni hi-gatu. Impalaw tu ni hu tudek tun Heseekiah di Judah et han lumaw ni mekiggubbat ni patul ni Egypt. <sup>10</sup> Kantud tudek tuy "Hi-gam e Heseekiah ey entan kaheul mun inhel ni dios mu, anin ni kantuy eleg mi hansakup ni iAssyria hu bebley yun Jerusalem. Entan tu kukkullug, anin ni hinammad nunman ni dios mun inhel huttan. <sup>11</sup> Kaw eleg mu dengelen hu impahpahding ni papatul ni Assyria ni linggeman ni bebley ni pinhed dan bahbahen? Tam neala ni binahbah dadda. Kaw kammu nem hedin hi-gayu, man meihwang kayu? <sup>12</sup> Binahbah idan aammed kun nunman hu bebley ni Gosan, ya Haran niya Reshep. Ey nampatey dadda iBetheden e nambebley di Telassar. Attu et inhewang idan dios da ey? \* <sup>13</sup> Niya attu et neihwang ida patul di Hamat, yad Arpad, yad Sepharbaim, yad Hena ni yad Ibbah ey? † Tam nangkeendiddan emin!"

<sup>14</sup> Inlan Heseekiah humman ni tudek et bidbiden tu et lumaw di Tempol. Binekyag tud hinanggan APU DIOS <sup>15</sup> et mandasal e kantuy "APU DIOS e Kabaelan tun emin e Dios ni Israel ni yimmudung ni man-ap-apud ahpap ni kad-an idan anghel, hi-gam ni ebuh hu Dios. Hi-gam ni ebuh Ap-apun emin idan nan-ap-apuan di kebebbebley eyad puyek. Hi-gam ni ebuh nanletun kabunyan et ya puyek. <sup>16</sup> APU DIOS, dengel mu anhan eya nakka

‡ 18:35 18:35 [32-35] Ang-ang yu hu Isaiiah 36:18-20. \* 19:12 19:12 Yadda bebley ni nengadan deya e wadaddad Mesopotamia e Iraq hu ngadan tun nunya. † 19:13 19:13 Yadda bebley ni nengadan deya ey wadaddad Syria nunya.

pampehemhemmeki, ey ang-ang mu anhan eya kameippenahding ni hi-gami. Dengel mu mewan hu kapenaltalangan Sennakerib ni hi-gam e Dios ni wadan ingganah.

<sup>17</sup> APU DIOS, inamta mi e makulug numan ni neipahding eya intudek tu e binahbah ida lan eman ni papatul ni Assyria hu dakel ni bebley, et pambalin dadda humman ni bebley ni eleg mebebley et endi law silbi da. <sup>18</sup> Nanggiheb dadda beken ni makulug ni dios di diman idan bebley, tep humman ida ey i-ingneh ni ebuh e nekapyad keyew niya batun pinaot ni tuu. <sup>19</sup> Nem yan nunya, APU DIOS e Dios mi, ey ihwang dakemi anhan idan iAssyria, ma-lat pengamtaan idan tutu-ud kebebbebley eyad puyek e hi-gam ni ebuh hu Dios."

*Ya impaad Isaiah nan Heseekiah  
(Isaiah 37:21-38)*

<sup>20-21</sup> Entanni et palaw Isaiah e u-unggan Amos hu tudek tun Heseekiah et ehelen tun hi-gatu hu humang APU DIOS di dasal tu. Kantuy "Huyya inhumang APU DIOS e Dios ni Israel. Kantuy 'Dingngel ku dasal mu meippanggep nan Sennakerib e patul ni Assyria. Et huyya hu e-helek ni hi-gatu: Yadda tutu-uk di Zion e Jerusalem ey dakeyu kapippihulan Sennakerib ey dakeyu katalalanggai. Ida kamanwigiwigiwig ey ida kamanggalagalagak hu bibi-in menang-ang ni hi-gayun kamemsik.

<sup>22</sup> Kaw hipa pinihil yu et taltalangan yu hedin beken ni hi-gak e Dios ni Israel e kayyaggud ni peteg? <sup>23</sup> Bineal mudda opisyal mu et ipahhiya dan hi-gak e gapuh idan kalesah yun yuka ussalad gubat niya sinekup yudda keta-ta-geyyan ni duntug di Lebanon, et panlengen yudda ettata-gey ni keyew e sedar niya kekakkayyaggudan ni cypress. Impahhiyam mewan e dinteng mu hu gawwan mahdel ni muyung. <sup>24</sup> Muka ippahhiya e nangku-ku kayun hibuy idad bebley ni sinekup yu et pan-inumen yu danum diman. Ey muka ippahhiya e inupup mu hu Wangwang e Nile di Egypt, et mema-ganan ma-lat man-agwat ida sindalum.

<sup>25</sup> Nem kaw eleg yu amta e implanuh ku dedan ni nebayag e henin nunman meippahding? Et deh e neipahding tu-wangu! Hi-gak hu nengidwat ni kabaelan yu, et pambahhan yudda bebley ni nangehammad ni tuping hu luhud da. <sup>26</sup> Et humman hu, yadda tutu-udman ni bebley ey endi kabaelan da. Simmakut ida et nelakah nengapputam ni hi-gada. Heniddan pakatmel ni helek e nelakah ni iddeyapdap. Ey heniddan helek ni simmemel di atep ni baley e kamekling hedin nemahhig petang.

<sup>27</sup> Nem inamtak ni emin hu elaw mu, ya muka pehpending niya muka lallawwi. Ey inamtak e nemahhig bunget mun hi-gak. <sup>28</sup> Et gapuh tep dingngel ku nemahhig ni bunget mun hi-gak niya nemahhig ni muka pampahhiya, ey tetbengek hu eleng mu niya hadak bungut mun gumek, et pebangngad dakad nalpuam e iddalan mud keltad ni dinlan mun immali."

<sup>29</sup> Kan Isaiah nan Heseekiah ey "Huyyalli pengi-ang-angan mun pengihwangan APU DIOS eyan bebley. Meippalpun nunya ingganah alin balin tu, ey mengngan kayun kaillameh idan nealay simmemel. Nem yan meikkatun toon ey mantennem kayun pagey niya grapes, et hi-gayu mengenni niya mengngan ni illameh idan nunman ni ittanem yu. <sup>30</sup> Kayyaggud ali biyag idan tutu-ud Judah ni natdaan di gubat. Meihhammad idad bebley da niya medakkel hu helag da ey umkedangan ida. Heniddalli neitnem ni limmehed lamut tud puyek e mekallameh ida. <sup>31</sup> Wadaddalli metdaan di Jerusalem et yad Duntug e Zion tep hi APU DIOS, ey hinammad tun ninemnem e pekullug tudda huyya."

<sup>32</sup> Kan mewan Isaiah ey "Heninnuy hu inhel APU DIOS meippanggep ni patul di Assyria: 'Eleg mabalin ni an umhegep niya tu pellow panetu, anin ni hakey, di deya Jerusalem. Endi sindalu tun nanhappyaw ni um-alin an meihnup eyad bebley. Ey endi da pan-ippigil ni batu niya eleg da pan-ippu-ul hu puyek ma-lat pengidlanan dan umhegep eyad bebley. <sup>33</sup> Humman ni patul ni immali ey eleg umhegep eyad bebley, nem mambangngad e iddalan tud dinlan tun immali. Hi-gak e hi APU DIOS hu nanghel idan nunya. <sup>34</sup> Guwalyaak huyyan bebley ey ippaptek ku ma-lat kaideyawayak. Peamnuh hu hinammad kun inhel ni nunman nan hi David e bega-en ku."

<sup>35</sup> Yan nunman ni hileng ey limmaw hu hakey ni anghel nan APU DIOS di nangkampuan idan iAssyria et pateyen tu hanggatut et newalu e liman libun sindalu da. Et yan newawaan tu ey kepuppullay hu annel idan nangketey ni sindalud kampu da.

<sup>36</sup> Humman binsikan nan Sennakerib e patul ni Assyria et mambangngad di Nineveh.

<sup>37</sup> Entanni et hakey ni aggew ey immen hi Sennakerib ni kamandeyyaw di tempol ni dios tun hi Nisrok ey limmaw ida dewwan u-ungnga tun laki e di Adrammelek nan

Sareser et patyen da hi ameda e inusal da ispadah da et bumsik idad Ararat. Et meihullul ni nampatul hi Esarhaddon e hakey ni u-ungnga tun laki.

## 20

*Ya nandegehan patul e hi Heseekiah et ya yinaggudan tu  
(Isaiah 38:1-8, 21-22; 2 Chronicles 32:24-26)*

<sup>1</sup> Entanni ey nandegeh hi Heseekiah et innang ni mettey. Limmaw hi Isaiah e prophet e u-unggan Amos et tu ang-angen et kantun hi-gatuy "Kan APU DIOS ey eleg ka umyaggud. Et humman hu, iyayyaggud mun emin hu hipan mahapul ni iyayyaggud mu et mandaddan ka, tep mettey ka."

<sup>2</sup> Dingngel Heseekiah humman ey nanligguh et ihangga tud dingding et mandasal e kantuy <sup>3</sup> "APU DIOS, nemnem mu anhan e impannananeng kun nansilbin hi-gam. Endi edum ni nak inenu-unnud nem hi-gam ni ebuh, niya impahding kun emin hu kamengippeamleng ni hi-gam." Ginibbuh tun nandasal ey kamannannangngih e nemahhig lemyung tu.

<sup>4</sup> Hini-yan Isaiah hi Heseekiah e patul, nem yan wada hi Isaiah etan di gawwan etan ni mahkang ni dallin nunman ni baley patul, ey kan APU DIOS ni hi-gatuy.

<sup>5</sup> "Pambangngad kad kad-an Heseekiah e ap-apuddan tuuk et ehelen mu e kammuy 'Hi-gak ni AP-APU e Dios eman ni ammed mu e hi David ey dingngel ku dasal mu ey inang-ang ku lewam. Peyaggud daka et melebbah hu tellun aggew ey dammutun umlaw kad Tempol ku. <sup>6</sup> Pambiyag daka pay ni hampulut liman toon. Ihhehwang daka, anin eyan bebley e Jerusalem, di hipan ippahding ni patul ni Assyria. Ippaptek ku huyyan bebley tep huyya impakulug kun bega-en ku e hi David niya ma-lat kaideyawan ku.'" <sup>7</sup> Et ehelen Isaiah etan idan kamampaptek etan ni patul e um-aladdan bulung ni fig et teptepen da et iepuap da etan di pelha tu et mapwahan.

<sup>8</sup> Kan Heseekiah ey "Hipa pengi-immatunan ku e makulug ni peyaggud tuwak nan APU DIOS, et melebbah hu tellun aggew et dammutun nak mandeyyaw di Tempol tu?" <sup>9</sup> Kan Isaiah ey "Wada peang-ang APU DIOS ni hi-gam ni pengi-immatunam e um-amnu inhel tu. Hipa pinhed mun pengi-immatunan, umtu-lu hu allinnew ni agdan ni hampulun akad ni mampeahpat winu mampeehpen ni hampulun akad." <sup>10</sup> Kan Heseekiah ey "Nelakah ni mampeahpat hu allinnew ni agdan ni hampulun akad nem ya mampeehpen. Pinhed kun um-ehpen ni hampulun akad."

<sup>11</sup> Nandasal hi Isaiah nan APU DIOS et peehpen APU DIOS ni hampulun akad hu allinnew etan ni agdan ni kinapya lan patul e hi Ahas.

*Yadda nalpud Babilon*

<sup>12</sup> Yan nunman ni tsimpuh ey dingngel ni patul di Babilon e hi Merodak Baladan e u-unggan Baladan, e nandegeh hi Heseekiah e patul, nem yimmaggud. Et mantudek ni hi-gatu et pailaw tu e wada pay in-unnud tun indawat tun hi-gatu. <sup>13</sup> Inapngan Heseekiah ida humman ni immalin iBabilon et peang-ang tun hi-gadan emin hu kinedangyan tun wadad bodegah tu, yaddan silber, yadda balitik, yadda kapampebanglun kennen, yadda lana, yadda usal tud gubat niya emin hu hipan nebalol ni tenged tu. Impeang-ang tun emin hu wadad bodegah tu niyad nan-ap-apuan tu, endi eleg tu peang-ang ni hi-gada.

<sup>14</sup> Entanni ey limmaw etan prophet e hi Isaiah di kad-an Heseekiah et kantuy "Attu nalpuan idan nunman ni tutu-u niya hipa inhel dan hi-gam?" Kan Heseekiah ey "Nalpuddad Babilon e naka-iddawwin bebley."

<sup>15</sup> Kan mewan nan Isaiah ey "Hipa inang-ang dad baley mu?" Hinumang nan patul e kantuy "Inang-ang dan emin hu kinedangyan ku. Endi hu enggak peang-ang ni hi-gada."

<sup>16</sup> Et kan Isaiah ni hi-gatuy "Dengel mu eya inhel APU DIOS: <sup>17</sup> Medettengan ali aggew ni pengibsikan idan iBabilon ni emin ni wada eyad baley mu, anin idan ineming idelan aamed mu ingganah nunya, et endi an metdaan. \* Huttan inhel APU DIOS. <sup>18</sup> Meillaw idalli edum ni helag mud Babilon et mapnahan ida et ingunwan da hu patul diman."

<sup>19</sup> Ya nan-awat nan patul e hi Heseekiah ey mewedda linggep nunman ni ketaggu tu. Et kantuy "Kayyaggud huttan ni inhel mun hi-gak ni impeamtan APU DIOS."

*Ya nepappegan ni kapan-ap-apuin Heseekiah*

<sup>20</sup> Emin ida impahding Heseekiah, yadda kinapya tu, ya binehwat tun et-eteng ni panemmungan ni danum, ya kina-utan tud dallem ni puyek ni nengipedalnan tun danum et umli etan di et-eteng ni bebley ey neitudek etan di Libluh idan Patul di Judah. <sup>21</sup> Netey hi Heseekiah et maihullul etan u-ungngatun e hi Manasseh ni nampatul.

\* 20:17 20:17 Ang-ang yu hu Daniel 1:2 et ya 5:3.

## 21

### *Ya nampatulana Manasseh di Judah*

<sup>1</sup> Hampulut dewwan toon Manasseh ni nampatulana tud Judah, et mampatul ni nelimat lima toon e yad Jerusalem nanha-adan tu. Ya ngadan inetu ey hi Hepsibah. <sup>2</sup> Nanliwat nan APU DIOS hi Manasseh tep impahding tudla lawah ni henin impenahding idelan nampambeleley diman ni dinegyun APU DIOS eman ni kapengelliiddan aammed tun helag Israel ni nalpuan dad Egypt. <sup>3</sup> Impeyayyaggud tudla kapandeyyawin beken ni makulug ni dios ni binahbah nan ametu e hi Heseekiah. Ey impekapyu tu pan-appitan nan Baal niya nengapyaddan i-inggeh etan ni biin dios e hi Asherah e henin impahding Ahab e patul ni Israel. Niya dineyaw tudla bittuwen. <sup>4</sup> Nengapya pay ni pan-appitan idan beken ni makulug ni dios etan di Tempol ni kan APU DIOS ni pandeyyawan ni hi-gatu. <sup>5</sup> Ey nengapyan pan-appitan idan bittuwen etan di dewwan dallin ni Tempol. <sup>6</sup> In-appit tu pay ni kagihheba hu u-ungnga tun laki, impahding tu hu ayak, ya man-ennap, ya magic, ey nandinelan tudla mapelad niya kamammagguway. Et gapuh idan nunman ni nemahhig ni lawah ni impenahding tun panliwwatan ey impabunget tu hi APU DIOS.

<sup>7</sup> Inha-ad tu pay hu penginnemneman da etan ni biin dios e hi Asherah di Tempol APU DIOS. Ey humman ni impahding tu ey lawah ni peteg tep inhel lan APU DIOS nan David et hi Solomon e u-ungnga tu e kantuy "Emin di nambebleyan idan hampulut dewwan helag Israel ey yadya Jerusalem eyad Tempol ku hu pinilik ni pandeyyawan yun ngadan kun ingganah. <sup>8</sup> Hedin pannananeng idan helag Israel ni u-unnuden ni emin Tugun kun indawat ku lan bega-en ku e hi Moses, ey eggak i-abulut ni ida medegyun eyad bebley ni indawat kudla lan aammed da."

<sup>9</sup> Nem eleg u-unnuden idan iJudah tep impappangngulun Manasseh ida tuun mengippahding ni panliwwatan, e nehahhalman nem ya impahding idelan nambebley diman ni dinegyun APU DIOS eman ni nalpuan idan aammed dan helag Israel di Egypt. <sup>10</sup> Huyya inhel APU DIOS idan prophet tu: <sup>11</sup> "Impahding Manasseh ida huyyan lawah ni peteg e nehahhalman pay ni liwat nem ya impahding idelan iAmorite. Ey impappangngulu tudla tutu-ud Judah ni mandeyyaw ni dios ni kinapyan tuu. <sup>12</sup> Et humman hu, hi-gak e AP-APU e Dios Israel ey peellik hu memahbah ni Jerusalem et ya Judah et emin idalli menggel ni neipahding ey metngadda. <sup>13</sup> Kastiguen ku hu Jerusalem henin impahding kun Samaria ey henin impahding kun patul ni Israel e hi Ahab et yadda helag tu. Endiek hu tutu-ud Jerusalem e kamei-ellig ni pakadda-nihak et henin duyun nakadda-nihan et meihakkub. <sup>14</sup> Anin idallin etan ni metdaan ni tuuk ey iwalleng kudla et alen idaddan buhul da anin ni limmu da. <sup>15</sup> Hanneya pehding kun tutu-uk tep nanliwat idan hi-gak, niya impabunget da-ak neipalpu dedan eman ni neni-yanan ni aammed dad Egypt ingganah nunya."

<sup>16</sup> Dakel ni peteg hu impapetey nan Manasseh ni tuun endi bahul da, et kamei-ellig ni nalbeng hu keltad di Jerusalem ni kuheyaw da meippalpud hengge tu ingganah di utduk tu. Nei-dum idad impahding tun panliwwatan e impappangngulu tudla tuud Judah ni mandeyyaw ni beken ni makulug ni dios. <sup>17</sup> Emin ida impahding Manasseh, anin idan lawah ni kinapkapya tu ey neitudek etan di Liblul idan Patul di Judah. <sup>18</sup> Netey hi Manasseh et maikulung etan di garden di baley tu e garden Ussa et maihullul hu u-ungnga tu e hi Amon ni nampatul.

### *Ya nampatulana Amon di Judah*

<sup>19</sup> Dewampulut dewwa hu toon Amon eman ni nampatulana tud Judah, et mampatul ni dewwan toon e yad Jerusalem ni nanha-adan tu. Ya ngadan inetu ey hi Meshullemet e u-unggan Harus e ijotbad. <sup>20</sup> Lawah ida impahpahding tu e kapekabballawan APU DIOS, heniddan impahding lan ametu e hi Manasseh. <sup>21</sup> Inu-unnud tu hu impenahding ametu ey dineyaw tudla beken ni makulug ni dios ni dinaydayaw ametu. <sup>22</sup> Inwalleng tu hi APU DIOS e Dios idan aammed tu ey nginhay tu tugun tu. <sup>23</sup> Entanniy ey namplanuh ida opisyal Amon et pateyen dad baley tu.

<sup>24</sup> Nem pintey damaddan iJudah hu nematey ni hi-gatu, et ihullul da hi Josiah e u-unggatun nampatul. <sup>25</sup> Emin ida impahding Amon ey neitudek etan di Liblul idan Patul di Judah. <sup>26</sup> Ingkulung da hi Amon di garden Ussa, et maihullul hi Josiah e u-unggatun nampatul.

## 22

### *Ya nampatulana Josiah di Judah*

<sup>1</sup> Walun toon hi Josiah eman ni nampatul tud Judah, et mampatul ni telumpulut hakey ni toon e nanha-ad di Jerusalem. Ya ngadan inetu ey hi Jedidah e u-ungngan Adaiiah e iBoskat.

<sup>2</sup> Impahding Josiah hu kamengippeamleng nan APU DIOS e inu-unnud tu hu impahding lan ammed tu e hi David e patul. Ey impannananeng tun mengippahding ni kayyaggud.

*Ya nehamakan etan ni neitudekan ni Tugun*

<sup>3</sup> Ya eman ni meikkahumpulut walun toon ni nampatul Josiah, ey intu-dak tu etan sekretarih tu e hi Sapan e u-ungngan Asaliah ey inap-apun Meshullam di Tempol et iolden tu e kantuy <sup>4</sup> “Elaw ka etan ni eta-gey ni padi e hi Hilkiyah et amtaem hedin piga inemung idan guwalyad habyen ni pihhuh ni in-aliddan tutu-ud Tempol. <sup>5</sup> Ehel mun hi-gatu et idwat tu humman ni pihhuh idan kamampaptek ni meiyayyaggud di Tempol et ibeyad dad tangdan idan kamenginggunnun nunman. <sup>6</sup> Mahapul ni umtangan idan karpenter, et yadda mapehek ni batu, ey umgang idan keyew niya batun mahapul ni pengiyayyaggudan ni Tempol. <sup>7</sup> Yadda porman ey mahapul ni limpiyuh ida e eleg mahapul ni ittudek idan porman hu pihhuh ni daka ella tep limpiyuh nemnem idan kamanggunnu.”

<sup>8</sup> Entanni ey kan Hilkiyah nan Saphan e sekretarih ey “Himmak kud Tempol Apu Dios eya libluh ni neitudekan ni Tugun.” Et idwat tun Saphan et bidbiden tu.

<sup>9</sup> Et lumaw hi Saphan etan ni patul et kantuy “Inladdan opisyal mu hu pihhuh ni Tempol et idinel dadda etan ni kamanggunnu niya kamampaptek idan meiyayyaggud di Tempol, <sup>10</sup> ey iyyadya hu libluh ni indawat Hilkiyah ni hi-gak.” Et ibidbid tun nan patul.

<sup>11</sup> Dingngel nan Josiah etan imbidbid tun neitudek di diman ni libluh ey bini-ki tu balwasi tu ey kaumlelemyung. <sup>12</sup> Et ehelen tun Hilkiyah e padi, et hi Ahikam e u-ungngan Sapan, et hi Akbor e u-ungngan Mikaiah, et hi Sapan e sekretarih, et hi Asaiah e konsihal tu e kantuy <sup>13</sup> “Elaw kayud Tempol et makihummangan kayun APU DIOS e iehngeng yuwak et yadda tutu-u eyad Judah et mahmahan yu meippanggep eyan libluh ni nehamak. Nanna-ud ni nemahhig bunget APU DIOS ni hi-gatsu tep eleg u-unnuden idelan aammed tayu eya neitudek di libluh ey anin ni hi-gatsu ey eleg tayu ipahding hu neitudek ni pehdng tayu.”

<sup>14</sup> Limmaw di Hilkiyah, hi Ahikam, hi Akbor, hi Sapan e sekretarih et hi Asaiah e konsihal ni patul, et ida makihummangan etan ni biin prophet e hi Huldah e ahwan Sallum e u-ungngan Tikbah e inap-apun Harhas. Hi Sallum hu kamampaptek idan balwasid Tempol. <sup>15</sup> Inhel Huldah ni hi-gada e mambangngad idan patul et ehelen dan hi-gatu huuya: “Yu ehel etan ni nengitu-dak ni hi-gayu eya inhel ni AP-APU e Dios tayun helag Israel. Kantuy <sup>16</sup> ‘Bahbahen ku eya bebley, anin idan bimmebley. Humman hu inhel kun neitudek etan di libluh ni binidbid yu. <sup>17</sup> Tep inwalleng da-ak ni hi-gada et ienappitan dadda edum ni dios. Et mukun nemahhig hu bunget kun hi-gada tep yadda humman ni daka pehpending. Makulug et eleg meellubyag eya nemahhig ni bunget kuddan tutu-ud Jerusalem. <sup>18</sup> Nem heninnuy hu e-helek ni patul yu: Hi-gak e AP-APU e Dios ni helag Israel ey peamtak ni hi-gam hu meippanggep ni neitudek di libluh: <sup>19</sup> Gapu tep nantuttuyuy ka et mampekumbabah kan hi-gak e Dios e bini-kim hu balwasim, et numngih ka eman ni nangngelam ni inhel kun neitudek di libluh ni pehdng kun Jerusalem niyadda bimmebley, e iddutak ida tu meendi silbida, ey dingngel ku muka pampehemhemmekin hi-gak. <sup>20</sup> Et humman hu, eggak pay ni peelli pemahbah kun Jerusalem ingganah mettey ka. Melinggep ali kettayyam niya meiyayyaggud kan meikkullong, ey hannak impaeli huayan meippahding. Tep eleg mulli ang-anga hu pemahbahak ni bebley yu.’”

Nambangngad ida humman ni intu-dak Josiah et ehelen dan hi-gatu hu inhel etan ni prophet ni bii.

## 23

<sup>1</sup> Entanni ey impaeyag Josiah emin ida aap-ud Judah niyad Jerusalem, <sup>2</sup> et ikuyug tuddad Tempol. Inayan tudda dama padi, yadda prophets et yadda tutu-u, kedangyan niya newetwet. Et eleten tun bidbiden ni hi-gada etan libluh ni nehamak di Tempol ni neitudekan ni nekitbalan APU DIOS ni hi-gada. <sup>3</sup> An immehng hi Josiah di dagsin tukud ni Tempol, et isapatah tu e peka-u-unnuden tu law hi APU DIOS niya ipahding tun emin ida tugun ni neitudek di libluh. Ey emin ida etan tuu ey insapatah da dama e u-unnuden da humman ni nekitbalan APU DIOS ni hi-gada.

<sup>4</sup> Et iolden Josiah etan ni eta-gey ni padi e hi Hilkiyah, yadda padin kaumbaddang ni hi-gatu, yadda guwalya etan di kahehgepid Tempol e e-kalen dan emin ida kameussal

ni kapandeyyawin Baal, ya etan biin dios e hi Asherah et yadda wadad kabunyan. Et giheben etan ni patul ida humman ni emin etan di a-allaw ni bebley e neihnup di Nedeklan e Kidron et palaw tu hu dep-ul di Bethel. <sup>5</sup> Ingkal tudda padin pinutuk idan neitu-nudan tun patul ni Judah, tep nan-enappit idan kagihheban bangbanglu etan di kapan-appisin beken ni makulug ni dios idad bebley di Judah anin ni Jerusalem. Nan-appit ida pay ni kagihheban bangbanglun Baal, ya aggew niya bulan, yadda bittuwen niyadda emin ni wadad kabunyan. <sup>6</sup> Ingkal tu pay di Tempol hu tukud ni kapenginnememin etan ni biin dios e hi Asherah, et ilaw tud a-allaw ni Jerusalem etan di Nedeklan e Kidron. Et giheben tu et guduen tu ingganah ni nambalin ni dep-ul et pan-iwehit tud kulung. <sup>7</sup> Binahbah tu baley ni kakeihha-adiddan lakin daka pebeyyad annel dad Tempol. Yadman daman baley hu kapan-ebbelliddan biin luput ni kameussal ni daka pandeyyawin Asherah. <sup>8</sup> Binahbah tun emin hu daka pan-appisin beken ni makulug ni dios e daka pangihhebin bangbanglu meippalpu Geba ingganah di Beersheba. Binahbah tu dama hu daka pandeyyawin beken ni makulug ni dios di eheb Joshua e governor ni Jerusalem. Humman ni kapandeyyawi ey wadad winillin eheb ni Jerusalem. Ey in-ali tud Jerusalem etan ida padin APU DIOS ni nambabley di edum ni bebley di Judah.

<sup>9</sup> Yadda etan padin nan-appit di kapandeyyawin beken ni makulug ni dios, ey eleg dan hekey iebulut ni man-appit di altar APU DIOS di Tempol, nem nekikan idan sinapay ni eleg meha-adan ni pampelbag ni neidwat idan edum dan padi.

<sup>10</sup> Binahbah mewan Josiah hu pan-appitan e nengadanan ni Topet di Nedeklan e Ben Hinnom et endi an pengi-appitan idan tutu-un, u-ungnga dan laki winu bii, etan ni dios da e hi Molek. <sup>11</sup> Ingkal tu mewan ida i-ingngeh ni kebayyu etan di kahehepid Tempol APU DIOS e in-eng-eng idelan patul di Judah ni aggew. Giniheb tudda pay hu kalesah ni inusal dan nandayaw ni aggew. Neiha-ad ida humman di neihnup di kapanha-adin Nathan Melek e opisyal ni kamampatek di dallin ni Tempol. <sup>12</sup> Binahbah tu mewan etan kapandeyyawin inha-ad idelan patul ni Judah di atep ni baley ni patul di petek ni kuwaltuh lan Ahas e patul. Binahbah tu mewan ida kapan-appisin kinapya lan Manasseh e patul etan di dewwan dallin ni Tempol APU DIOS. Binukli tudda humman ni pan-appitan et tu ibheng etan di Nedeklan e Kidron. <sup>13</sup> Binahbah tu mewan ida impekappa lan Solomon e patul etan di appit ni kasimmilin aggew di Jerusalem et yad pinigging ni Duntug e Olibah e daka pan-appisin kamengippeguhun dios e hi Astoret e biin dios ni Sidon, hi Keman e dios ni Moab et hi Molek e dios ni Ammon. <sup>14</sup> Binahbah tu mewan ida tukud ni daka penginnememin biin dios e hi Asherah. Ey nan-iwehit tu genit idan netey ni tuudman. <sup>15</sup> Binahbah tu mewan etan daka pan-appisi niya daka pandeyyawid Bethel e kinapya lan Jeroboam e patul e u-unggan Nebat e nengipappangguluddan tuud Israel ni manliwwat. Ginudu tudda humman ingganah ni nambalin idan dep-ul ey giniheb tudda hu tukud Asherah. <sup>16</sup> Entanni ey inang-ang Josiah ida kulung etan di duntug diman, et peku-ku tudda genit et giheben tu etan di pan-appitan diman Bethel, et mepappeg usal nunman ni pan-appitan. Huyya inamnuan ni inhel APU DIOS ni inebig lan prophet tu.

Entanniy inang-ang mewan Josiah hu hakey ni kulung, <sup>17</sup> et mahmahan tu e kantuy “Hipa kan kulung ni dimmun?” Kan idan tuud Bethel ey “Humman hu kulung eman lan prophet ni nalpud Judah ni nengabig eyan impahding mun nunya meippanggep eyan pan-appitan di deya e Bethel.” <sup>18</sup> Kan Josiah ey, “Diman humman ni kulung. Entan tu ebkal hu genit diman.”

Et eleg da kihalen hu genit diman anin idan genit idan prophet ni nalpud Samaria.

<sup>19</sup> Impahding Josiah hu henin impahding tud Bethel e binahbah tudda kapandeyyawin beken ni makulug ni dios ni kinapyaadda lan patul di Israel di Samaria e himmulun ni nemahhig ni bunget APU DIOS.

<sup>20</sup> Pintey tudda hu papadiddan beken ni makulug ni dios etan di pan-appitan ni nan-enappitan da. Nanggiheb tu genit ni tuudman, ma-lat mepappeg hu usal idan nunman ni pan-appitan et mambanggad di Jerusalem.

*Ya nampiyestahan di Josiah ni penginnemneman dan Nelabahan ni Anghel APU DIOS*

<sup>21</sup> In-older Josiah e mampiyestah ida tutu-un penginnemneman dan Nelabahan ni Anghel APU DIOS e Passover tep neitudek etan di liblun ni Tugun ni himmak da.

<sup>22</sup> Humman ni Piyestah ni Nelabahan ni Anghel APU DIOS ey eleg maipahding neipalpu eman ni nan-ap-apuan idan huwet niya patul di Israel et yad Judah. <sup>23</sup> Neipahding huyyan Piyestah di Jerusalem eman ni meikkahampulut walun toon ni nampatulanan Josiah.

*Yadda etan edum ni kayyaggud ni impahding Josiah*



<sup>24</sup> Ey gapu tep pinhed Josiah ni meu-unnud etan ida neitudek ni tugun etan di libluh ni himmak nan Hilkiyah e eta-gey ni padid Tempol, ey ingkal tud Jerusalem et yaddad bebley di Judah emin ida hu kaman-ennap niya kamammagguway. Nan-ekal tudda hu dios di baballey idan tutu-u, yadda i-ingingeh idan dios niya emin etan daka ussalan mandeyywan ni beken ni makulug ni dios.

<sup>25</sup> Endi hakey idan nemangulun hi-gatu winu neitu-nud ni hi-gatun nampatul hu henin hi-gatu e ingkahhakey tun nandayaw tun APU DIOS, ey neka-u-unnud tu hu Tugun Moses. <sup>26</sup> Nem anin ni hanniman ey eleg ma-kal hu nemahhig ni bunget APU DIOS idan tutu-ud Judah ingganah nunya tep ya et-eteng ni liwat ni impahding lan Manasseh e patul. <sup>27</sup> Et kan APU DIOS ey "Pehding kun Judah hu henin impahding kun Israel. Degyunen kudda tutu-ud Judah eyad bebley da, et palaw kuddad edawwin bebley, ey iwwalleng ku Jerusalem e pinilik ni bebley ku, ey iwwalleng ku Tempol ni kangkun pandeyyawan dan hi-gak."

*Ya nepappegan ni nampatulanan Josiah*

*(2 Chronicles 35:20-36:1)*

<sup>28</sup> Emin hu impahding Josiah e patul ey neitudek etan di Libluh idan Patul di Judah.

<sup>29</sup> Nunman ni nampatulanan Josiah ey impangulun Neko e patul di Egypt hu dakel ni sindalu tu et mampalaw ida etan di Wangwang e Euphrates, et da baddangan hu patul di Assyria. Nandaddan dama hi Josiah et ipengulu tu sindalu tun an makiggubbat ni iEgypt, nem pintey Neko hi Josiah di Megiddo. <sup>30</sup> Inlugan idan opisyal tu hu annel tud kalesah tu, et ibanggad dad Jerusalem et ikulung dad gungat idan patul. Et ihullul idan tuu hi Jehoahas e u-ungnga tun nampatul.

*Ya nampatulanan Jehoahas di Judah*

*(2 Chronicles 36:2-4)*

<sup>31</sup> Dewampulut tellu hu toon Jehoahas eman ni nampatulanan tud Judah, et man-apapun tellun bulan di Jerusalem. Ya ngadan inetu e hi Hamutal e u-ungngan Jeremia e iLibnah. <sup>32</sup> Nanliwat nan APU DIOS henin nan liwatan idelan aammed tu. <sup>33</sup> Nepappeg hu nampatulanan tu eman ni nampapan Neko e patul di Egypt ni hi-gatud Riblah di Hamat et ikelabut tudman ma-lat eleg man-ap-apud Jerusalem. Impambayad pay nunman ni patul ni Egypt hu Judah ni buwis ni tellun libu et epat ni gatut ni kiloh ni balituk. <sup>34</sup> Entanni ey impambalin nan Neko hi Eliakim e u-ungngan Josiah ni nampatul di Judah. Et hullulan tu ngadan tun hi Jehoiakim. Inlaw nan Neko hi Jehoahas di Egypt et yadman neteyyan tu.

*Ya nampatulanan Jehoiakim di Judah*

*(2 Chronicles 36:5-8)*

<sup>35</sup> Hi Jehoiakim e patul di Judah ey binuwisan tudda dama tutu-u, ngenamung etan di kabaelan dan beyyadan ma-lat wada pambeyyadda etan ni buwis ni kaibbagan patul ni Egypt. <sup>36</sup> Dewampulut lima hu toon Jehoiakim nunman ni nampatulanan tu. Nanha-ad di Jerusalem et man-ap-apun hampulut hakey ni toon. Ya ngadan inetu e hi Sebidah e u-ungngan Pedaiah di Rumah. <sup>37</sup> Nanliwat hi Jehoiakim nan APU DIOS tep impahding tu hu liwat ni impenahding idan aammed tu.

## 24

<sup>1</sup> Nunman ni nampatulanan Jehoiakim ey ginubat Nebukadnessar e patul di Babilon hu Judah. Nansukuh hi Jehoiakim et mambayad mewan ni buwis ni tellun toon et hantu ngehaya. <sup>2</sup> Entanniy impaelin APU DIOS hu iBabilon, yadda iSyria, yadda iMoab niya iAmmon et bahbahen da Judah. Humman inamnuan ni inhel tu lan prophet tu meippanggep ni Judah. <sup>3</sup> Neipahding huyyaddan Judah tep in-olden APU DIOS e medegyun idad bebley da gapuh ni dakel ni liwat ni impenahding lan nan patul e hi Manasseh. <sup>4</sup> Nema-man nemateyan tun dakel ni tutu-un endi bahul da. Humman ni lawah ni peteg ni impahding lan Manasseh ey eleg liwwanan APU DIOS. <sup>5-6</sup> Netey hi Jehoiakim et maihullul hi Jehoiachin e u-ungngatun nampatul. Emin ida impenahding Jehoiakim ey neitudek di Libluh idan Patul di Judah.

<sup>7</sup> Eleg law mambanggad ni mekiggubbat hu patul ni Egypt et yadda sindalu tu, tep sinekup law ni patul di Babilon ida bebley ni sinekup la nin Egypt, meippalpu etan di kulukul di Egypt ingganah di Wangwang e Euphrates.

*Ya nampatulanan Jehoiachin di Judah*

*(2 Chronicles 36:9-10)*

<sup>8</sup> Hampulut walun toon nan Jehoiachin eman ni nampatulun tud Judah, et man-apun tellun bulan ey nanha-ad di Jerusalem. Ya ngadan inetu ey hi Nehusta e u-ungngan Elnathan e iJerusalem. <sup>9</sup> Hi Jehoiachin ey henin ametu e nanliwat nan APU DIOS. <sup>10</sup> Nunman ni nampatulun tu ey ginubat idan ap-apun sindalun Babilon hu Jerusalem et liktuben da humman ni bebley. <sup>11</sup> Entanni ey immali hi Nebukadnessar di Jerusalem, <sup>12</sup> et mansukuh hi Jehoiachin e patul ni Israel, anin hi inetu, yadda u-ungnga tu, yadda ap-apun ni sindalu tu et yadda opisyal tuddad baley tun iBabilon.

Yan meikkewwalun toon ni nan-ap-apuan Nebukadnessar ey inlaw tud Babilon hi Jehoiachin et ikelabut tudman.

<sup>13</sup> Ey inla tu emin ida nebalol ni wadad Tempol niyad baley ni patul et ilaw tud Babilon. Impeki-la tu emin ida balituk ni meussal etan di Tempol ni impekapyal lan Solomon e patul tep humman dedan inhel APU DIOS ni meippahding. <sup>14</sup> Ey inlaw tud Babilon hu hampulun libun tutu-ud Jerusalem. Humman ida ey lalakkin u-ungngan patul, yadda aap-apu, yadda nangketuled ni sindalu, yadda nelaing ni mangngunnu ey yadda kamampan-e-dih. Eleg tu peki-ladda hu nekawwetwet ni tutu-u et hi-gada natdaan etan di bebley. <sup>15</sup> Inlaw Nebukadnessar di Babilon hi Jehoiachin e patul, hi inetu, yadda ahwatu, yadda opisyal tu niyadda eta-gey saad tu ey kekeddngan ni iJudah. <sup>16</sup> Impakilaw tud Babilon hu pitun libun kelalla-ingan ni sindalun na-let ni mekiggubbat ya hanlibun nelaing ni mangngunnu niya man-e-dih. <sup>17</sup> Entanni ey pinutuk Nebukadnessar ni mampatul di Judah hi Mataniah e agin ammed Jehoiachin et hullulan tu ngadan tun Sedekiah.

*Ya nampatulun Sedekiah di Judah*

*(2 Chronicles 36:11-12; Jeremiah 52:1-3a)*

<sup>18</sup> Dewampulut hakey hu toon nan Sedekiah ni nampatulun tud Judah. Nanha-ad di Jerusalem et man-ap-apun hampulut hakey ni toon. Ya ngadan inetu ey Hamutal e u-ungngan Jeremiah e iLibnah. <sup>19</sup> Nanliwat hi Sedekiah nan APU DIOS henin eman lan patul e hi Jehoiakim. <sup>20</sup> Et nemahhig hu bunget APU DIOS idan tutu-ud Jerusalem niyad Judah et palaw tuddad edum ni bebley.

*Ya nebahbahan ni Jerusalem*

*(2 Chronicles 36:13-21; Jeremiah 52:3b-11)*

Entanni ey nginhay Sedekiah hi Nebukadnessar e patul di Babilon.

## 25

<sup>1</sup> Yan eman ni meikkahampulun aggew ni meikkahampulun bulan ni meikkahyam ni toon ni nampatulun tu ey impangulun Nebukadnessar e patul di Babilon hu sindalu tu et da gubaten hu Jerusalem. Nangkampudda etan di a-allaw ni Jerusalem. Liniktub da Jerusalem et mengapyaddan dellanen da etan di tuping ni luhud ni bebley ma-lat wada inna-nuddan umhegep. <sup>2</sup> Et nemahhig hu bunget APU DIOS idan tutu-ud Jerusalem niyad Judah et palaw tuddad edum ni bebley.

<sup>3</sup> Ya eman ni meikkahyam ni aggew ni meikka-pat ni bulan nunman ni toon e endin hekey law kennen idan tutu-ud bebley, <sup>4</sup> ey binahbah law idan iBabilon etan luhud et hegepen da bebley. Liniktub da bebley, nem bimmesik idan emin hu sindalun Sedekiah ni hileng e indalan da etan di garden ni patul et idlan da etan di eheb ni nandammuan ni dewwan luhud et mamsik idan nampalaw idad appit ni Nedeklan e Jordan.

<sup>5</sup> Nem pindug idan sindalun iBabilon hi Sedekiah et depapan da etan di Nandeklan e Jericho et hi-yanen idan sindalu tu. <sup>6</sup> Inlaw da hi Sedekiah nan Nebukadnessar e wadad Riblah, et bistigalen tudman et ehelen tu kastigu tu. <sup>7</sup> Yadman Riblah hu nemateyan daddan u-ungngan Sedekiah di hinangga tu ey tuka ang-ang-anga. Inukit da matetu et bangkilingen da et ilaw dad Babilon.

<sup>8</sup> Yan eman ni meikkeppitun aggew ni meikkelliman bulan ni meikkepulut heyam ni toon ni nampatulun Nebukadnessar di Babilon, ey limmaw di Jerusalem hi Nebusaradan e ap-apun guwalyan patul, <sup>9</sup> et legaben tu hu Tempol, ya baley ni patul, yadda edum ni baley diman, niyadda baley idan eta-gey saad tud Jerusalem. <sup>10</sup> Ey binahbah idan sindalu tu etan tuping ni luhud nunman ni bebley. <sup>11</sup> Inlaw Nebusaradan di Babilon ida edum ni tutu-un natdaan diman, anin idan sindalun neminhd ni mei-dum di sindalun iBabilon. <sup>12</sup> Nem eleg tudda ikuyug hu edum ni nekawwetwet ma-lat hi-gada mengippaptek idan papayyew niyadda leguntan netaneman ni grapes.

<sup>13</sup> Ey nambahbah idan iBabilon hu etta-teng ni giniling ni tukud ni Tempol, yadda kaliton ni wadadman, anin etan et-eteng ni giniling ni tangkih, et ilaw dan emin hu giniling di Babilon. <sup>14</sup> Impeki-la dadda banga, yadda pala, yadda kapandellukduk ni dep-ul, yadda kameussal di kengkeh et yadda giniling ni usal di Tempol. <sup>15</sup> Inladdan

emin etan ida nekapyan balituk niya silber et yadda ekka-kut ni mahukung ni duyu et ya etan pengiggihheban ni insensoh.

<sup>16</sup> Yadda etan giniling ni impekapyan lan Solomon e patul ni meussal di Tempol e humman ida etan dewwan etta-teng ni tukud, yadda kaliton et ya etan et-eteng ni tangkih, ey mekkabbel-at ida et eleg dadda ikiloh. <sup>17</sup> Nan-ingngeh ida etan dewwan etta-teng ni tukud e handedwampulut pitun piyeh hu kasina-gey da e wada pay hu giniling ni neihuup e han-e-pat et kagedwan piyeh hu kasina-gey tu. Ya nanlinikweh idan nunya ey neal-alkusan ni pomegranate e nekapyan giniling.

<sup>18</sup> Yadda edum ni balud ni ingkuyug Nebusaradan di Babilon ey hi Seraiah e eta-gey ni padi, hi Sephaniah e neihayned ni hi-gatu, et yadda tellun opisyal tud Tempol. <sup>19</sup> Yadda ingkuyug tun nalpud Jerusalem ey hakey ni ap-apun sindalu, ya liman etan idan konsihal ni patul, ya etan opisyal ni neihayned idan ap-apun sindalu, ya sekretarih tu niyadda na-nem ni tuu. <sup>20</sup> Inlaw Nebusaradan idad kad-an Nebukadnessar e patul di Babilon di Riblah, <sup>21</sup> et papetey idan patul diman.

Humman hu neipahding e neilaw ida iJudah di edum ni bebley.

<sup>22</sup> Nambalin nan Nebukadnessar ni governor di Judah hi Gedaliah e u-ungngan Ahikam e inap-apun Sapan et hi-gatu mengipaptek idan tuun nehi-yan di Judah ni eleg mailaw di Babilon. <sup>23</sup> Dingngel idan eleg mansukuh ni ap-apun sindalu et yadda tuu, humman ni neipahding et mei-dum idan Gedaliah di Mispah. Hi Ismael e u-ungngan Nethaniah, hi Johanan e u-ungngan Kareah, hi Seraiah e u-ungngan Tanhumet e iNetopah et hi Jaasaniah e iMaakah et yadda sindalu da. <sup>24</sup> Kan Gedaliah ni hi-gaday "E-helek ni hi-gayu e entan takut idan opisyal ni Babilon et kayyaggud kaya meippahding ni hi-gayu."

<sup>25</sup> Nem yan meikkeppitun bulan nunman ni toon, limmaw di Mispah hi Ismael e u-ungngan Nethaniah e inap-apun Elishama e helag ni patul e kadwa tudu hu hampulun tuu tu et pateyen da hi Gedaliah anin idan iJudah et ya iBabilon ni wadadman ni edum tu. <sup>26</sup> Et bumsik idan emin hu natdaan ni iJudah ni kekeddangyan et ya nangkewetwet et yadda ap-apun sindalu et lumaw idad Egypt tep simmakut idan iBabilon.

*Imbukyat da hi Jehoiachin e neikelabut  
(Jeremiah 52:31-34)*

<sup>27</sup> Ya eman ni meikkadwampulut pitun aggew ni meikkahampulut pitun toon ni neikelabutan Jehoiachin ey nunman ni toon hu nampatulanan Ebil Merodak di Babilon.

Kabbabbal nan hi Jehoiachin e patul di Judah ni neikelabut et ibukyat tu. <sup>28</sup> Ey gapu tep kabbabbal hi Ebil Merodak nan Jehoiachin, ey indawtan tun eta-gey ni saad e kamedeyyaw ey eta-ta-gey nem yadda etan edum ni patul ni neilaw damadman Babilon. <sup>29-30</sup> In-abulut tun mehullulan etan imbalwasin Jehoiachin ni balwasin balud niya in-abulut tun mekikkikkan ni hi-gatun kewa-wa-wa ingganah ni neteyyan tu. Ey tu pay kaidawsin iggatang tud mahapul tun kewa-wa-wa.

## 1 Chronicles

*Ya meippanggep eyan libluh ni 1 Chronicles*

Huyyan libluh ni 1 Chronicles ey peamta tu e eleg iwalleng Apu Dios ida tuu tun helag Israel. Anin ni inapput idan iAssyria niyadda iBabilon ida et alen daddan balud di bebley da et eleg liwwanen Apu Dios ida. Wadadda hu edum ni hi-gadan immanemut di Israel ni nalpuan dad Babilon, nem nedismayah ida tep nebahbah hu Tempol da ey nekapuy hu gubilnu da.

Et maitudek eya libluh ma-lat mambangngad hu dinel idan nunman ni helag Israel nan Apu Dios. Penemnem eyan libluh ni hi-gada hu nengipeyaggudan Apu Dios idan aammed da lan nunman ni ya nengipaptekan tun hi-gada et baddangan tudda et tumuled ida. Hanniman et dama kuma hu pehding idan nunman ni helag Israel ni pengiddinnel dan Apu Dios e kamengipappaptek ni hi-gadan nunya ni yallin edum ni aggew. Tep hi Apu Dios ey eleg melumman, nem kamannananeng hu impeminhed tu niya tuka pemaptek ni tuu tu. (Psalms 100:5)

*Yadda neitudek eyad libluh:*

1. Ya nengipeyaggudan Apu Dios idan aammed idan helag Israel et dumakkedakkel ida. (chapters 1–9)
2. Ya nengipeyaggudan Apu Dios idan helag Israel ni nemutukan tun David ni mampatul ni hi-gada. (chapters 10–21)
3. Ya nengipeyaggudan Apu Dios idan helag Israel ni nengidaddanan tun emin ni mahapul di pemehwatan dan Tempol niyadda edum ni mahapul da. (chapters 22–29)

*Ya tenten meippalpun Adam ingganah nan Abraham \**

<sup>1</sup> Nantanud hi Adam et wada hi Seth. Nantanud hi Seth et wada hi Enos, nantanud hi Enos et wada hi Kenan, <sup>2</sup> nantanud hi Kenan et wada hi Mahalalel, nantanud hi Mahalalel et wada hi Jared, <sup>3</sup> nantanud hi Jared et wada hi Enok, nantanud hi Enok et wada hi Methushelah, nantanud hi Methushelah et wada hi Lamek, <sup>4</sup> nantanud hi Lamek et wada hi Noah. Tellu u-ungngan Noah ni laki: hi Shem, hi Ham et hi Japhet. <sup>5</sup> Nantanud hi Japhet et wada hi Gomer, hi Magog, hi Madai, hi Jaban, hi Tubal, hi Meshek et hi Tiras. <sup>6</sup> Nantanud hi Gomer et wada hi Askenas, hi Riphath, et hi Togarmah <sup>7</sup> Nantanud hi Jaban et wada hi Elishah, hi Tarsis, hi Kittim et hi Rodanim. <sup>8</sup> Nantanud hi Ham et wada hi Kush, hi Misraim†, hi Put ‡ et hi Kanaan. <sup>9</sup> Nantanud hi Kush et wada hi Seba, hi Habilah, hi Sabta, hi Raamah et hi Sabteka. Nantanud hi Raamah et wadad Seba nan Dedan. <sup>10</sup> Hi Kush hu nahlagan nan Nimrod e nan-amtda kebebbley ni nelaing ni mekiggubbat. <sup>11</sup> Hi Misraim hu nahlagan idan nampambebley di Lydia, Anam, Leah, Napthuh, <sup>12</sup> Patrus, Kasluh niyad Crete e nahlagan idan iPilstia.

<sup>13</sup> Nantanud hi Kanaan et wada hi Sidon e nahlagan idan Sidonian. Nantanud mewan hi Kanaan et wadadda Hittite, <sup>14</sup> Jebusite, Amorite, Girgashite, <sup>15</sup> Hibite, Arkite, Sinite, <sup>16</sup> Arbadite, Semarite niyadda Hamatite. <sup>17</sup> Yadda u-ungngan Shem ey hi Elam, hi Assur, hi Arpaksad, hi Lud, et hi Aram. Yadda u-ungngan Aram ey hi Us, hi Hul, hi Gether et hi Meshek. <sup>18</sup> Hi Arpaksad hu aman Selah e aman Eber. <sup>19</sup> Dewwa u-ungngan Eber. Hi Peleg hu ngadan etan ni hakey tep yan ketaggu tu ey negenedwa tutu-ud kebebbley eyad puyek meippuun di nambakbaklang ni ehel da. Ya ngadan ni meikkadwa ey hi Joktan. <sup>20</sup> Hi Joktan hu nahlagan Almodad, hi Seleph, hi Hasarmabet, hi Jerah, <sup>21</sup> hi Hadoram, hi Usal, hi Diklah, <sup>22</sup> hi Obal, hi Abimael, hi Seba, <sup>23</sup> hi Ophir, hi Habilah et hi Jobab. <sup>24</sup> Huyyadda hu nehayhayned ni helag meippalpun Shem ingganah nan Abram. Newada hi Shem et han hi Arpaksad et han hi Selah <sup>25</sup> et han hi Eber, et han hi Peleg, et han hi Reu, <sup>26</sup> et han hi Serug, et han hi Nahor et han hi Terah <sup>27</sup> et han hi Abram e nehullulan ni Abraham ngadan tu.

<sup>28</sup> Dewwa u-ungngan Abraham e di Isaac nan Ismael. <sup>29</sup> Hampulut dewwa u-ungngan Ismael e hi Nebayot hu pengulwan et han hi Kedar, hi Adbeel, hi Mibsam, <sup>30</sup> hi Misma, hi Dumah, hi Massa, hi Hadad, hi Tema, <sup>31</sup> hi Jetur, hi Naphis, et hi Kedemah. <sup>32</sup> Wadadda enem ni lakin u-ungngan Abraham nan hi Keturah e imbilang tun hakey ni ahwa tu e hi Simran, hi Joksan, hi Medan, hi Midian, hi Isbak et hi Suah. Di Seba nan Dedan hu

\* 1: 1:0 Emin hu u-ungngan ngadan di tenten ey laki, nem hedin bii etan u-ungnga ey daka e-hela e bii. † 1:8 1:8 Ya hakey ni ngadan tu ey Egypt. ‡ 1:8 1:8 Ya hakey ni ngadan tu ey Libya,

u-ungngan Joksan. <sup>33</sup> Yadda u-ungngan Midian: hi Ephah, hi Epher, hi Hanok, hi Abida et hi Eldaah. Huyyaddan emin hu helag di Keturah nan Abraham.

<sup>34</sup> Hi Isaac e u-ungngan Abraham ey dewwa u-ungnga tu e di Esau nan Jacob. <sup>35</sup> Yadda u-ungngan Esau ey hi Eliphaz, hi Reuel, hi Jeus, hi Jalam et hi Korah. <sup>36</sup> Yadda u-ungngan Eliphaz ey hi Teman, hi Omar, hi Sephi, hi Gatam, hi Kenas, hi Timna et hi Amalek. <sup>37</sup> Yadda u-ungngan Reuel ey hi Nahat, hi Serah, hi Sammah et hi Missah.

*Yadda sigud ni nambebley di Edom*

<sup>38</sup> Yadda sigud ni nambebley di Edom ey nahlag idad helag Seir e hi Lotan, hi Sobal, hi Sibeon, hi Anah, hi Dishon, hi Eser et hi Dishan. <sup>39</sup> Dewwa u-ungngan Lotan e di Hori nan Homam. Wada agin Lotan ni bii e hi Timna ngadan tu. <sup>40</sup> Yadda u-ungngan Sobal ey hi Alban, hi Manahat, hi Ebal, hi Sephi et hi Onam. Wada dewwan u-ungngan Sibeon e di Aiah nan Anah <sup>41</sup> e aman Dishon. Yadda u-ungngan Dishon ey hi Hamran, hi Esban, hi Itran et hi Keran. <sup>42</sup> Yadda u-ungngan Eser ey hi Bilhan, hi Saaban, et hi Jaakan. Yadda u-ungngan Dishan ey di Us nan Aran.

*Yadda nampatul di Edom*

<sup>43</sup> Yan endi ni patul di Israel ey wadadda ngu dedan hu nanhuluhulul ni patul di Edom. Ya nemangulu ey hi Bela e u-ungngan Beor e iDinhaba. <sup>44</sup> Netey hi Bela et maihullul hi Jobab e u-ungngan Serah e iBosrah. <sup>45</sup> Netey hi Jobab et maihullul hi Husham e iTeman. <sup>46</sup> Netey hi Husham et maihullul hi Hadad e u-ungngan Bedad e iAbit. Huyyan hi Hadad hu nengapput idan iMidian eman ni nanggugubatan dad Moab. <sup>47</sup> Netey hi Hadad et maihullul hi Samlah e iMasrekah. <sup>48</sup> Netey hi Samlah et maihullul hi Saul e iRehobot e bebley di kad-an ni Wangwang e Euphrates. <sup>49</sup> Netey hi Saul et maihullul hi Baal Hanan e u-ungngan Akbor. <sup>50</sup> Netey hi Baal Hanan et maihullul hi Hadad e iPau. Ya ahwan Hadad ey hi Mehetabel e u-ungngan Matred ey inap-apun Mesahab. <sup>51</sup> Entanni ey netey dama hi Hadad.

Yadda nengipappangngulun iEdom meippuun di nahlagan da ey hi Timna, hi Albah, hi Jethet, <sup>52</sup> hi Oholibamah, hi Elah, hi Pinon, <sup>53</sup> hi Kenas, hi Teman, hi Mihsar, <sup>54</sup> hi Magdiel et hi Iram.

## 2

*Yadda helag Judah*

<sup>1</sup> Huyyadda hampulut dewwan u-ungngan Jacob: hi Reuben, hi Simeon, hi Levi, hi Judah, hi Issakar, hi Sebulun, <sup>2</sup> hi Dan, hi Joseph, hi Benjamin, hi Naptali, hi Gad et hi Asher. <sup>3</sup> Lima u-ungngan Judah. Tellu u-ungnga dan Batsua e ahwa tun iKanaan: hi Er, hi Onan et hi Selah. Lawah ni peteg hi Er e pengulwan ni u-ungnga tu et patyen APU DIOS. <sup>4</sup> Ya u-ungnga dan Tamar e inepe tun nebalu ey dewwa e di Peres nan Serah e nandupi-il ida. <sup>5</sup> Dewwa u-ungngan Peres e di Hesron nan Hamul. <sup>6</sup> Lima u-ungngan Serah e hi Simri, hi Ethan, hi Heman, hi Kalkol et hi Darda. <sup>7</sup> Hi Akan e u-ungngan Karmi e helag Serah hu himmulun ni nekastiguan idan helag Israel tep wada intalu tun inla dad gubat ni neieng-eng nan APU DIOS. <sup>8</sup> Hakey hu u-ungngan Ethan e hi Asariah.

*Ya tenten ni aammed nan David e patul*

<sup>9</sup> Tellu u-ungngan Hesron e hi Jerahmeel, hi Ram et hi Kaleb. <sup>10</sup> Hi Ram hu aman Amminadab. Nantanud hi Amminadab et wada hi Nashon e nan-ap-apuddan helag Judah. <sup>11</sup> Nantanud hi Nahson et wada hi Salmon. Nantanud hi Salmon et wada hi Boaz. <sup>12</sup> Hi Boaz hu aman Obed. Hi Obed hu aman Jesse. <sup>13</sup> Pitu hu u-ungngan Jesse e hi Eliab hu pengulwan et han hi Abinadab et hi Sammah\*, <sup>14</sup> hi Nethanel, hi Raddai, <sup>15</sup> hi Osem et han hi David. <sup>16</sup> Ey wada dewwan biin u-ungnga tu e di Seruah nan Abigail. Tellu u-ungngan Seruah: hi Abishai, hi Joab, et hi Asahel. <sup>17</sup> Inahwan Abigail hu hakey ni helag Ismael et wada hu hakey ni u-ungnga da e hi Amasa.

*Yadda helag Hesron*

<sup>18</sup> Hi Kaleb e u-ungngan Hesron ey inahwa tud Asubah nan Jeriot. Yadda u-ungngad Kaleb nan Asubah ey hi Jesher, hi Sobab et hi Ardon. <sup>19</sup> Netey hi Asubah et bintanen Kaleb hi Eprat et wada hakey ni u-ungnga da e hi Hur. <sup>20</sup> Nantanud hi Hur et wada hi Uri. Nantanud hi Uri et wada hi Besalel. <sup>21</sup> Yan eman ni na-nem hu toon nan Hesron ey inahwa tu etan biin u-ungngan Makir niya agin Gilead et wada hakey ni u-ungnga da e hi Segub. <sup>22</sup> Hi Segub hu aman Jair e nan-ap-apun dewampulut tellun bebley di Gilead. <sup>23</sup> Nem entanniy ginubat idan ap-apud Geshur niyad Aram et sakupan da na-nem ni bebley diman, anin ni ya Jair niya Kenat niyadda edum ni bebley ni neihipun diman.

\* **2:13** 2:13 Ya hakey ni ngadan tu ey Simea.

Emin ida nambebley diman ey helag idan Makir e aman Gilead. <sup>24</sup> Hi Hesron ey netey di Kaleb Eprathah. Wada u-ungnga dan Abijah e hi Ashur e nengapyan bebley e Tekoa.

*Yadda helag Jerahmeel*

<sup>25</sup> Hi Jerahmeel e pengulwan ni u-ungngan Hesron ey wada liman u-ungnga tu: hi Ram, hi Bunah, hi Oren, hi Osem et hi Ahijah. <sup>26</sup> Nengahwa pay hi Jerahmeel et wada hakey ni u-ungnga da e hi Onam. <sup>27</sup> Tellu hu u-ungngan Ram e pengulwan ni u-ungngan Jerahmeel: hi Maas, hi Jamin et hi Eker. <sup>28</sup> Wada dewwan u-ungngan Onam e di Sammai nan Jada. Wada dama dewwan u-ungngan Sammai e di Nadab nan Abishur. <sup>29</sup> Inahwi Abishur hi Abihail et wada dewwan u-ungnga da e di Ahban nan Molid. <sup>30</sup> Hi Nadab e agin Abishur ey wada dewwan u-ungnga tu e di Seled nan Appaim. Nem netey hi Seled ey endi u-ungnga tu. <sup>31</sup> Hi Appaim hu aman Ishi. Nantanud hi Ishi et wada hi Seshan. Nantanud hi Seshan et wada hi Ahlai. <sup>32</sup> Hi Jada e agin Sammai ey wada dewwan lakin u-ungnga tu e di Jether nan Jonathan. Nem netey hi Jether ey endi u-ungnga tu. <sup>33</sup> Wada dewwan u-ungngan Jonathan e di Peleth nan Sasa. Huyyaddan emin hu helag Jerahmeel. <sup>34-35</sup> Endi lakin u-ungngan Seshan et peahwa tu etan hakey idan biin u-ungnga tu etan ni bega-en tu e hi Jarha e iEgypt et wada hakey ni lakin u-ungnga da e hi Attai. <sup>36</sup> Hi Attai hu aman Nathan, hi Nathan hu aman Sabad, <sup>37</sup> hi Sabad hu aman Eplal, hi Eplal hu aman Obed <sup>38</sup> hi Obed hu aman Jehu, hi Jehu hu aman Asariah, <sup>39</sup> hi Asariah hu aman Heles, hi Heles hu aman Eleasah, <sup>40</sup> hi Eleasah hu aman Sismai, hi Sismai hu aman Sallum, <sup>41</sup> hi Sallum hu aman Jekamiah, hi Jekamiah hu aman Elishama.

*Yadda edum ni helag Kaleb*

<sup>42</sup> Yadda u-ungngan Kaleb e agin Jerahmeel ey hi Meshah e pengulwan e aman Sip. Ya neihayned ey hi Maresha e aman Hebron. <sup>43-44</sup> Wadadda epat ni u-ungngan Hebron e hi Korah, hi Tappuah, hi Rekem et hi Sema. Hi Sema hu aman Raham ey hi Raham hu aman Jorkeam. Nantanud hi Rekem e agin Sema et wada hi Sammai <sup>45</sup> e aman Maon. Nantanud hi Maon et wada hi Bet Sur. <sup>46</sup> Imbilang Kaleb hi Ephah ni ahwa tu et wada tellun u-ungnga da e hi Haran, hi Mosa et hi Gases. Wada hakey ni u-ungngan Haran et ngadanan tun Gases. <sup>47</sup> Wada hi Jahdai e enem u-ungnga tu: e hi Regem, hi Jotham, hi Geshan, hi Peleth, hi Ephah et hi Saap. <sup>48</sup> Wada mewwan hakey ni imbilang Kaleb ni ahwa tu e hi Maakah et wada dewwan u-ungnga da e di Seber nan hi Tirhanah. <sup>49</sup> Entanni ey wada pay dewwan u-ungnga da e hi Saap, e nahlagan idan nambebley di Madmannah, et hi Seba e nahlagan idan nambebley di Makbenah niyad Gibea. Wada hakey ni biin u-ungngan Kaleb e hi Aksah. <sup>50</sup> Huyyadda pay edum ni nahlag nan Kaleb.

Yadda lakin u-ungngan Hur e pengulwan ni lakin u-ungngad Kaleb nan Eprathah ey hi Sobal e nahlagan idan nambebley di Kiriath Jearim, <sup>51</sup> hi Salma e nahlagan idan nambebley di Bethlehem, et hi Harep e nahlagan idan nambebley di Bet Gader, <sup>52</sup> hi Sobal e nahlagan idan iKiriath Jearim hu nahlagan idan nampambebley di Haroeh, yadda kagedwah ni nambebley di Manuhot <sup>53</sup> niyadda iKiriath Jearim e humman ida iIrite, Puthite, Sumathite niyadda Misraite e edum dadda Sorathites niyadda Estaolites. <sup>54</sup> Hi Salma e nengapyan bebley e Bethlehem hu nahlagan idan iNetophat, iAtrot Bet Joab, yadda kagedwah ni iManahat, yadda iSorah <sup>55</sup> niyadda iJabes e nelaign idan mantuddek ni importanteh ni dokumintuh e humman ida hu Tirathites, Simeathites niyadda Sukathites. Kenite idan emin huyya e nahlag idan Hammat e nahlagan idan pamilyah Rekah.

### 3

*Yadda u-ungngan David e patul*

<sup>1-3</sup> Yadda enem ni u-ungngan David eman ni kaweda tud Hebron meipalpad pengulwan ingganah di udiyan: hi Amnon e inetu hi Ahinoam e iJesreel, hi Daniel e inetu hi Abigail e iKarmel, hi Absalom e inetu hi Maakah e u-ungngan Talmi e patul di Geshur, hi Adonijah e inetu hi Haggit, hi Sephatiah e inetu hi Abital et hi Iream e inetu hi Eglah. <sup>4</sup> Emin ida ey neiungngadda Hebron eman ni nampatul David et manha-ad diman ni pitun toon et kagedwah.

Entanni et man-aldan di Jerusalem et mampatul ni telumpulud tellun toon <sup>5</sup> et maiungngadda edum ni u-ungnga tudman. Epat hu u-ungnga dan Bathsheba e u-ungngan Ammiel: hi Simea, hi Sobab, hi Nathan et hi Solomon. <sup>6</sup> Wadadda pay hu heyam ni u-ungnga tu e hi Ibhaz, hi Elishua, hi Eliphelet, <sup>7</sup> hi Nogah, hi Nepheg, hi Japhia, <sup>8</sup> hi Elishama, hi Eliada et hi Eliphelet. <sup>9</sup> Huyyadda edum ni u-ungnga tu, nem eleg ida mei-dum hu u-ungnga tuddad imbilang tun ahwa tu. Wada u-ungnga tun bii e hi Tamar.

*Yadda helag Solomon*

<sup>10</sup> Huyyadda nanhuluhulul ni nampatul ni helag Solomon: hi Rehoboam, hi Abijah, hi Asa, hi Jehoshapat, <sup>11</sup> hi Jehoram, hi Ahasiah, hi Joas, <sup>12</sup> hi Amasiah, hi Ussiah\*, hi Jotham, <sup>13</sup> hi Ahas, hi Heseekiah, hi Manasseh, <sup>14</sup> hi Amon, et hi Josiah. <sup>15</sup> Wada epat ni u-ungngan Josiah: Hi Johanan, hi Jehoiakim, hi Sedekiah et hi Sallum. † <sup>16</sup> Hi Jehoiachin hu neihullul nan ametu e hi Jehoiakim ni nampatul. Et hi Sedekiah hu neihullul nan Jehoiachin.

*Yadda helag nan Jehoiachin*

<sup>17</sup> Yadda u-ungngan nan Jehoiachin ni nambalin ni balud di Babilonia: hi Sealtiel, <sup>18</sup> hi Malkiram, hi Pedaiah, hi Senassar, hi Jekamiah, hi Hoshama et hi Nedabiah. <sup>19</sup> Dewwa u-ungngan Pedaiah e di Serubbabel nan Simeel. Dewwa dama u-ungngan Serubbabel e di Meshullam nan Hananiah. Wada hakey ni biin u-ungnga tu e hi Selomit. <sup>20</sup> Wadadda pay hu liman u-ungngan Serubbabel e hi Hashubah, hi Ohel, hi Berekiah, hi Hasadiah, et hi Jushab Heseed. <sup>21</sup> Dewwa u-ungngan Hananiah e di Pelatiah nan Jeshaiiah. Hi Jeshaiiah hu aman Rephaiah e aman Arnan e aman Obadiah e aman Sekaniah. <sup>22</sup> Wada hakey ni u-ungngan Sekaniah e hi Semaiah. Lima inap-apu tu e hi Hattus, hi Igal, hi Bariah, hi Neariah, et hi Saphat. <sup>23</sup> Tellu u-ungngan Neariah e hi Elioenai, hi Hiskiah et hi Asrikam. <sup>24</sup> Pitu u-ungngan Elioenai e hi Hodabiah, hi Eliashib, hi Pelaiah, hi Akkub, hi Johanan, hi Delaiah, et hi Anani.

**4***Yadda helag Judah*

<sup>1</sup> Yadda helag Judah: hi Peres, hi Hesron, hi Karmi, hi Hur et hi Sobal. <sup>2</sup> Hi Reaiah e u-ungngan Sobal hu aman Johat. Hi Johat hu amad Ahumai nan Lahad e nahlagan idan iSorah. <sup>3-4</sup> Nahlag di Kaleb nan Eprat et wada hi Hur e pengulwan. Nahlag hi Hur et humman ida nambebley di Bethlehem. Tellu u-ungngan Hur: hi Etham, hi Penuel et hi Eser. Nahlag hi Etham et wadadda tellun u-ungnga tu e hi Jesreel, hi Isma et hi Idbas et ya hakey ni biin hi Haselelponi. Yadda helag Penuel hu nambebley di Gedor, ey yadda helag Eser hu nambebley di Hushah. <sup>5</sup> Hi Ashur e nahlagan idan nambebley di Tekoa ey dewwa ahwa tu e di Helah nan Naarah. <sup>6</sup> Epat hu lakin u-ungngad Ashur nan Naarah e hi Ahussam, hi Hepher, hi Temeni et hi Haahastari. <sup>7</sup> Wada epat ni lakin u-ungngad Ashur nan Helah e hi Seret, hi Ishar, hi Etnan, <sup>8</sup> et hi Kos e nahlagan di Anub nan Sobebah niyaddan emin hu helag Aharhel e u-ungngan Harum.

<sup>9</sup> Wada hakey ni lakin hi Jabes e kametettebal ni hi-gadan emin ni han-aaggi. Nanlehhanaan inetu eman ni nengiuungnga tun hi-gatu et mukun Jabes impangngadan tun hi-gatu. <sup>10</sup> Nandasal hi Jabes ni Dios idan helag Israel e kantud dasal tuy "Bendisyonni muwak anhan e Apu Dios et idwatan muwak ni melakkeb ni puyek. Ey baddangi muwak et eggak ipahding hu lawah ni umhulun ni panhelheltapak." Dingngel Apu Dios huyyan dasal tu et idwat tu hu imbagetud dasal tu.

*Yadda edum ni netenten*

<sup>11</sup> Hi Kelub e agin Suhah ey nahlag et wada u-ungnga tu e hi Mehira e aman Eston <sup>12</sup> e amad Bet Rapha, hi Paseah et hi Tehinnah e aman Ir Nahas. Nambebley idad Rekah hu helag da. <sup>13</sup> Dewwa lakin u-ungngan Kenas e di Otniel nan Seraiah. Dewwadda dama u-ungngan Otniel e di Hathat nan Meonothai. <sup>14</sup> Nahlag hi Meonothai et wada hi Oprah. Nahlag hi Seraiah et wada hi Joab e nahlagan idan nambebley di Ge Harashim. Neingedan humman di bebley da tep emin ida nambebley diman ey nelaing ida et daka kapyaan emin. <sup>15</sup> Yadda u-ungngan Kaleb e u-ungngan Jephunneh ey hi Iru, hi Elah et hi Naam. Hi Kenas hu u-ungngan Elah. <sup>16</sup> Hi Jehallelel ey epat hu u-ungnga tu: hi Sip, hi Siphah, hi Tiria et hi Asarel. <sup>17-18</sup> Yadda u-ungngan Esrah ey hi Jether, hi Mered, hi Ephraim et hi Jalon. Inahwan Mered hi Bithiah e u-ungngan patul di Egypt et maweda hu hakey ni biin u-ungnga da e hi Miriam niyadda etan dewwan laki e di Sammar nan Isbah e nahlagan idan nambebley di Estemoa. Inahwa mewana Mered hu hakey ni biin helag Judah et maweda tellun u-ungnga da e hi Jered hu hakey e nahlagan idan nambebley di Gedor. Hi Heber hu meikkadwa e nahlagan idan nambebley di Soko. Et hi Jekuthiel hu meikkatlu e nahlagan idan nambebley di Sanoah. <sup>19</sup> Hi Hodiah ey inahwa tu agin Naham. Yadda u-ungngan ahwan Hodiah ey hi aman Keilah e Garmite et hi Estemoa e Maakathite. <sup>20</sup> Hi Simon ey epat hu u-ungnga tu e hi Amnon, hi Rinnah, hi Benhanan et hi Tilon. Dewwa u-ungngan Ishi e di Sohet nan Bensohet. <sup>21</sup> Yadda helag Selah e

\* **3:12** 3:12 Ya hakey ni ngadan tu ey hi Asariah. † **3:15** 3:15 Ya hakey ni ngadan tu ey Jehoaahas.

u-ungngan Judah ey hi Er e nahlagan idan nambebley di Lekah, hi Laadah e nahlagan idan nambebley di Mareshah, yadda etan nangkelaing ni man-ebbel e nambebley idad Bet Asbea, <sup>22</sup> hi Jakim niyadda tuun nambebley di Koseba, hi Joas, et hi Sarap e nan-ap-apud Moab niyad Jashubi Lehem. Emin ida huyyan ngadan ey nalpud nebayag ni neitudek ni dokumintuh. <sup>23</sup> Yadda edum ni helag Selah ey ida kamengennapyan pulan banga e ingngunan da etan patul. Nambebley idad Nethim niyad Gederah.

#### *Yadda helag Simeon*

<sup>24</sup> Hi Simeon ey lima u-ungnga tu e hi Nemuel, hi Jamin, hi Jarib, hi Serah et hi Saul. <sup>25</sup> Ya u-ungngan Saul ey hi Sallum e aman Mibsan e aman Misma. <sup>26</sup> Hi Misma hu aman Hammuel e aman Sakkur e aman Simei. <sup>27</sup> Hampulut enem hu u-ungngan Simei ey enem ida biin u-ungnga tu. Nem natpeng ida hu u-ungngaddan agi tu. Humman gaputun daddakkel idan peteg helag Judah nem hi Simeon. <sup>28</sup> Ingganah eman ni nampatulan David ey nampambebley ida helag Simeon di Beersheba, yad Moladah, yad Hasarshual, <sup>29</sup> yad Bilhah, yad Esem, yad Tolad, <sup>30</sup> yad Bethuel, yad Hormah, yad Siklag, <sup>31</sup> yad Bet Markabot, yad Hasarsusim, yad Betbiri niyad Saaraim. <sup>32</sup> Nambebley ida pay di Etham, yad Ain, yad Rimmon, yad Token, yad Ashan, <sup>33</sup> niyaddad nanlinikweh ni bebley ingganah di Baalat. Huyyadda hu neilistan bebley idan aammed da. <sup>34-38</sup> Huyyadda kamengipappangngulun helag Simeon: hi Meshobab, hi Jamlek, hi Joshah e u-ungngan Amasiah, hi Joel, hi Jehu e u-ungngan Joshibiah e u-ungngan Seraiah e u-ungngan Asiel, hi Elioenai, hi Jaakobah, hi Jeshohaiiah, hi Asaiah, hi Adiel, hi Jesimiel, hi Benaiah, hi Sisa e u-ungngan Siphie e u-ungngan Allon e u-ungngan Jedaiah e u-ungngan Simri e u-ungngan Semaiah. <sup>39</sup> Entanni ey kamangkedakkel helag da et mampalaw idad appit ni kakelinnugin aggew di Gerar\* et ipattul da animal dad nandeklan di diman kad-an ni bebley. <sup>40</sup> Dinteng da humman ni bebley ni kayyaggud ni pampattulan e melakkeb niya eleg likwehen ni duntug ey melinggep ni peteg diman. Yadda helag Ham hu sigud ni nambebley diman. <sup>41</sup> Yan nampatulan nan Hesechia di Judah ey limmaw ida huyyan netenten ni tutu-ud Gerar et gubaten dadda humman ni helag Ham niyadda Meunite ni nambebley diman. Et degyunan dadda et hi-gada maihullul ni nambebley diman, tep kayyaggud humman ni bebley ni pampattulan tep dakel hu kennen ni kalneroh da.

<sup>42</sup> Wada mewan limanggatut ni helag Simeon ni nampalaw di Edom † di appit ni kasimmilin aggew. Yadda nengipengulun hi-gada ey yadda u-ungngan Ishi e hi Pelatiah, hi Neariah, hi Rephaiah et hi Ussiel. <sup>43</sup> Pintey dadda natdaan ni Amalekite di diman Edom et hi-gada mambebley diman neipalpun nunman.

## 5

<sup>1</sup> Hi Reuben hu pengulwan ni u-ungngan Jacob\*. Nem gapu tep in-ulig tu hakey ni imbilang ametun ahwatu ey neendi law kelebngan tun pengulwan. Et humman ni kelebngan tu ey neidwat idan u-ungngan Joseph. Et humman hu, beken hi Reuben ni neilistan pengulwan di tenten. <sup>2</sup> Yadda helag Judah hu nambalin ni kee-ettengan kabaellan tu et malpun hi-gada hu nan-ap-apun emin ni helag Jacob, nem nannanng hu kelebngan Joseph ni pengulwan. <sup>3</sup> Epat ida u-ungngan Reuben: hi Hanok, hi Pallu, hi Hesron et hi Karmi. <sup>4-6</sup> Yadda helag Joel ni nehayhayned ey hi Semaiah, hi Gog, hi Simei, hi Mikah, hi Reaiah, hi Baal et hi Beerah. Hi Beerah e nengipappangnguluddan helag Reuben ey dimpap nan Tiglat Pileser e patul di Assyria et ilaw tud bebley tu. <sup>7</sup> Huyyadda neilistan aap-apun helag Reuben: hi Jeiel, hi Sekariah, <sup>8</sup> et hi Bela e u-ungngan Asas e u-ungngan Sema e u-ungngan Joel. Nambebley idad nambattanan ni Aroer, ya Nebo niya Baal Meon. <sup>9</sup> Dakel animal dad Gilead et sakupen da hu eleg mebebleyid appit ni kasimmilin aggew ingganah di Wangwang e Euphrates. <sup>10</sup> Yan eman ni nampatulan Saul ey ginubat idan nunyan helag Reuben ida Hagrite. Nampatey dadda et hi-gada maihullul ni nambebley etan di bebley di Gilead di appit ni kasimmilin aggew.

#### *Yadda helag Gad*

<sup>11</sup> Yadda helag Gad ey nambebley idad neihup di nambebleyan idan helag Reuben di Bashan ingganah di appit ni kasimmilin aggew di Salekah. <sup>12</sup> Hi Joel hu ap-apu dad Bashan. Hi Sapham, hi Janai et hi Saphat hu neihayned ni hi-gatu. <sup>13</sup> Yadda edum ni nahlag nan Gad, e huyyadda ap-apun pewen da ey hi Michael, hi Meshullam, hi Seba, hi Jorai, hi Jakan, hi Sia et hi Eber. <sup>14</sup> Emin ida ey nahlag idan nan Abihail e u-ungngan Huri e u-ungngan Jaroah e u-ungngan Gilead e u-ungngan Michael e u-ungngan Jeshishai e u-ungngan Jahdo e u-ungngan Bus. <sup>15</sup> Hi Ahi e u-ungngan Abdiel e u-ungngan Guni hu

\* 4:39 4:39 Ya hakey ni ngadan tu ey Gedor. † 4:42 4:42 Ya hakey ni ngadan tu ey Seir. \* 5:1 5:1 Ya hakey ni ngadan tu ey Israel.



ap-apun pewen da. <sup>16</sup> Nambebley ida huyyan helag Gad di Gilead, yad Bashan niyaddad nanlinikweh diman niyad emin di kudal di Saron. <sup>17</sup> Emin ida ey neilistad libluh ni tenten eman ni tsimpuh di Jotham e patul di Judah nan Jeroboam e patul di Israel.

*Yadda sindalun nambebley di appit ni kasimmilin aggew*

<sup>18</sup> Wadadda 44,760 ni nangkelaing ni sindaluddan helag Reuben, helag Gad niyadda kagedwah ni helag Manasseh ni nambebley di appit ni kasimmilin aggew. Nelaing idan mengussal ni happiyaw niya ispadah, niya nelaing idan umpana. <sup>19</sup> Dadda ginubat ida Hagrite niyadda tutu-ud Jetur, yad Naphis niyad Nodab. <sup>20</sup> Wada dinel dan Apu Dios et mandasal idan hi-gatu et baddangan tudda et mengapput ida. <sup>21</sup> Nan-ala da animal idan buhul da e neliman libun camel, dewanggatut et neliman libun kalneroh ni ya dewwan libun kebayyu. Impeki-la da hu hanggatut ni libun tutu-un impambalin dan balud. <sup>22</sup> Mukun kedi pintye da daker ni buhul da et apputen dadda ey tep humman pinhed Apu Dios ni meippahding. Neipalpun nunman ey nambebley idadman ingganah neilaw idad edum ni bebley.

*Ya nambebleyan idan edum ni helag Israel*

<sup>23</sup> Dimmakel idan peteg hu kagedwah ni helag Manasseh ni nambebley di appit ni kasimmilin aggew et ida mampambebley etan di bebley ni meippalpu Bashan ingganah di Baal Hermon, yad Senir niyad Duntug di Hermon. <sup>24</sup> Huyyadda hu aap-apun nengipappanggulun helag da: hi Ephraim, hi Ishi, hi Eliel, hi Asriel, hi Jeremiah, hi Hodabiah et hi Jahdiel. Nandingngel idan emin ni nelaing niya netuled ni sindalu, ey ida kametbal ni ap-apun helag da. <sup>25</sup> Nem huyyaddan edum ni helag Manasseh ey inwalleng da hu Dios ida lan aammed da et dayawan dadda dios idan tutu-un binahbah nan Apu Dios ni nunman. <sup>26</sup> Et humman hu, impaeli tu hi Pul e patul di Assyria, e Tiglat Pileser hu hakey ni ngadan tu, et gubaten tudda. Ingkal tudda huyyan helag Reuben, helag Gad niya kagedwah ni helag Manasseh. Impambebley tuddad Halah, yad Habor, yad Hara niyad giligi ni Wangwang e Gosan, et ingganah nunya ey yadman nambebleyan da.

## 6

*Yadda helag Levi*

<sup>1</sup> Yadda u-unggan Levi ey hi Gerson, hi Kohat et hi Merari. <sup>2</sup> Nantanud hi Kohat et wada epat ni lakin u-ungnga tu e hi Amram, hi Ishar, hi Hebron et hi Ussiel. <sup>3</sup> Dewwa lakin u-unggan Amram e di Aaron nan Moses. Hi Miriam hu biin u-ungnga tu. Wada epat ni lakin u-unggan Aaron e hi Nadab, hi Abihu, hi Eleasar et hi Ithamar. <sup>4</sup> Nantanud hi Eleasar et wada hi Pinehas. Nantanud hi Pinehas et wada hi Abishua <sup>5</sup> e aman Bukki. Nantanud hi Bukki et wada hi Ussi, <sup>6</sup> e aman Serahiah e aman Meraiot, <sup>7</sup> e aman Amariah e aman Ahitub. <sup>8</sup> Nantanud hi Ahitub et hi Sadok e aman Ahimaas <sup>9</sup> Nantanud hi Ahimaas et wada hi Asariah e aman Johanan. <sup>10</sup> Nantanud hi Johanan et wada hi Asariah, e hi-gatu la eta-gey ni padid Tempol ni kinapyan Solomon di Jerusalem. <sup>11</sup> Hi Asariah hu aman Amariah e aman Ahitub <sup>12</sup> e aman Sadok e aman Sallum <sup>13</sup> e aman Hilkiah e aman Asariah <sup>14</sup> e aman Seraiah e aman Jehosadak. <sup>15</sup> Hi Jehosadak hu hakey etan idan iJudah niya iJerusalem ni in-abulut APU DIOS ni inlaw Nebukadnessar e patul di bebley tu.

*Yadda edum ni helag Levi*

<sup>16</sup> Yadda lakin u-unggan Levi ey hi Gerson, hi Kohat et hi Merari. <sup>17</sup> Nantanud hi Gerson et wada hi Libni et hi Simeil. <sup>18</sup> Nantanud hi Kohat et wada hi Amram, hi Ishar, hi Hebron et hi Ussiel. <sup>19</sup> Nantanud hi Merari et wadad Mahli nan Mushi. Huyyadda helag Levi. <sup>20</sup> Huyyadda nehayhayned ni helag Gerson: Nantanud hi Gerson et wada hi Libni e aman Jehat e aman Simmah. <sup>21</sup> Nantanud hi Simmah et wada hi Joah e aman Iddo e aman Serah e aman Jeatherai. <sup>22</sup> Yadda dama nehayhayned ni helag Kohat. Nantanud hi Kohat et wada hi Amminadab e aman Korah e aman Assir <sup>23</sup> e aman Elkanah e aman Ebiasap e aman Assir <sup>24</sup> e aman Tahat e aman Uriel e aman Ussiah e aman Saul. <sup>25</sup> Dewwa u-unggan Elkanah ni laki e di Amasai nan Ahimot. <sup>26</sup> Huyyadda nehayhayned ni helag Ahimot: Nantanud hi Ahimot et wada hi Elkanah e aman Sophai e aman Nahat <sup>27</sup> e aman Eliab e aman Jeroham e aman Elkanah e aman Samuel. <sup>28</sup> Hi Samuel ey wada dewwan lakin u-ungnga tu e hi Joel hu pengulwan et han hi Abijah. <sup>29</sup> Huyyadda dama nehayhayned ni helag Merari: Nantanud hi Merari et wada hi Mahli e aman Libni e aman Simeil e aman Ussah e aman <sup>30</sup> Simea e aman Haggiah e aman Asaiah.

*Yadda kamampaptek ni a-appah niyadda kameussal di kapandeyyaw*

<sup>31</sup> Huyyadda hu lalakkin pinutuk David ni mampaptek ni a-appeh niyadda usal di kapandeyyawid Jerusalem neipalpu eman ni nengilawwan dan Kaban Apu Dios diman. <sup>32</sup> Neipalpun nunman ingganah ni nengapyaan Solomon ni Tempol ey hi-gada nanhuluhulul ni nangngunud kapandeyyawin APU DIOS. <sup>33</sup> Huyyadda nahlagan idan nangngunud kapandeyyawid: hi Heman e u-ungngan Joel e helag Kohat hu kamengipappangngulun nemangulun grupuh ni kamampaptek ni a-appeh di kapandeyyawid. Hi Heman hu u-ungngan Joel e u-ungngan Samuel <sup>34</sup> e u-ungngan Elkanah e u-ungngan Jeroham e u-ungngan Eliel e u-ungngan Toah <sup>35</sup> e u-ungngan Sup e u-ungngan Elkanah e u-ungngan Mahat e u-ungngan Amasai e u-ungngan <sup>36</sup> Elkanah e u-ungngan Joel e u-ungngan Asariah e u-ungngan Sephaniah <sup>37</sup> e u-ungngan Tahat e u-ungngan Assir e u-ungngan Ebiasap e u-ungngan Korah <sup>38</sup> e u-ungngan Ishar e u-ungngan Kohat e u-ungngan Levi e u-ungngan Jacob. <sup>39</sup> Ya kamengipappangngulun meikkadwan grupuh ni kamemaddang nan Heman ni mampaptek ni a-appeh ey hi Asap e u-ungngan Berekiah e u-ungngan Simea <sup>40</sup> e u-ungngan Michael e u-ungngan Baaseiah e u-ungngan Malkijah <sup>41</sup> e u-ungngan Etni e u-ungngan Serah e u-ungngan Adaiah, <sup>42</sup> e u-ungngan Ethan e u-ungngan Simmah e u-ungngan Simei, <sup>43</sup> e u-ungngan Jahat e u-ungngan Gerson e u-ungngan Levi. <sup>44</sup> Ya kamengipappangngulun meikkatlung grupuh ey hi Ethan e helag Merari. Hi Ethan ey u-ungngan Kishi e u-ungngan Abdi e u-ungngan Malluk e u-ungngan <sup>45</sup> Hashabiah e u-ungngan Amasiah e u-ungngan Hilkiah e u-ungngan <sup>46</sup> Amsi e u-ungngan Bani e u-ungngan Semer <sup>47</sup> e u-ungngan Mahli e u-ungngan Mushi, e u-ungngan Merari e u-ungngan Levi. <sup>48</sup> Emin ida etan edum dan helag Levi ey hi-gada kamengingngun edum ni ngunud Tabernacle e baley Apu Dios.

#### *Yadda helag Aaron*

<sup>49</sup> Ejuh ida helag Aaron ni nepilin mampeddin mengi-appit idan bangbanglu niyadda kagihheban kamei-appit nan Apu Dios di altar. Ey hi-gadan ebuh hu dammutun umlaw di kuwalthu ni kad-an Apu Dios ni an mengi-appit ni kake-kalin liwat idan helag Israel. Pehding dan emin huuya meippuun di tugun Moses e bega-en Apu Dios. <sup>50</sup> Huyyadda nehayhayned ni helag Aaron: Hi Aaron hu aman Eleasar e aman Pinehas e aman Abishua e aman <sup>51</sup> Bukki e aman Ussi e aman Serahiah <sup>52</sup> e aman Meraiot e aman Amariah e aman Ahitub e aman <sup>53</sup> Sadok e aman Ahimaas.

#### *Ya nambebleyan idan helag Aaron*

<sup>54</sup> Yadda helag Aaron ni nahlag nan Kohat hu nemangulun neidwatan ni pambebleyan da. <sup>55</sup> Neidwat ni hi-gada hu Hebron di Judah niyadda nanlinikweh ni kudal diman. <sup>56</sup> Nem yadda papayyew niyadda ekka-ket ni bebley ni neihnup diman ey neidwat dedan nunman nan Kaleb e u-ungngan Jephunneh. <sup>57</sup> Huyyadda bebley ni neidwat idan helag Aaron: ya Hebron e bebley ni keihhikkugan, ya Libnah, ya Jattir, ya Estemoa, <sup>58</sup> ya Hilen, ya Debir <sup>59</sup> ya Ashan, ya Juttah niya Bet Semes e neunnudan idan kudal. <sup>60</sup> Yadda bebley idan helag Benjamin ni indawat dan hi-gada ey ya Gibeon, ya Geba, ya Alemet niya Anathot e neunnudan idan kudal. Ya nga-mut emin ni bebley ni indawat dan hi-gadan pambebleyan ni pamilyah da ey hampulut tellu. <sup>61</sup> Yadda bebley ni indawat ni kagedwah ni helag Manasseh idan edum ni helag Kohat ey hampulun bebley. <sup>62</sup> Ya indawat idan helag Issakar, helag Asher, helag Naptali niyadda kagedwah ni helag Manasseh ni nambebley di Bashan idan helag Gerson ey hampulut tellun bebley. <sup>63</sup> Ya dama indawat idan helag Reuben, helag Gad niyadda helag Sebulun idan helag Merari ey hampulut dewwan bebley. <sup>64</sup> Humman idan bebley ni neunnudan ni kudal hu indawat idan edum ni helag Israel idan agi dan helag Levi. <sup>65</sup> Neidwat ni hi-gada ida humman ni bebley idan helag Judah, helag Simeon niyadda helag Benjamin meippuun di binnunut. <sup>66</sup> Yadda bebley ni indawat idan helag Ephraim idan edum ni helag Kohat <sup>67</sup> ey ya Sekem e duntuduntug ni bebley di Ephraim ni keihhikkugan, ya Geser, <sup>68</sup> ya Jokneam, ya Bet Horon, <sup>69</sup> ya Aijalon niya Gath Rimmon e neunnudan idan kudal. <sup>70</sup> Yadda bebley ni indawat idan kagedwah ni helag Manasseh ey ya Aner ni ya Bileam e neunnudan idan kudal. Indawat dadda huuyad edum ni helag Kohat. <sup>71</sup> Yadda bebley ni indawat idan kagedwah ni helag Manasseh idan helag Gerson ey ya Golan di Bashan ni ya Astarot e neunnudan idan kudal. <sup>72</sup> Yadda bebley ni indawat idan helag Issakar ey ya Kedes, ya Dabrat, <sup>73</sup> ya Ramot et ya Anem e neunnudan idan kudal. <sup>74</sup> Yadda bebley ni indawat idan helag Asher ey ya Mashal, ya Abdon, <sup>75</sup> ya Hukok niya Rehob e neunnudan idan kudal.

<sup>76</sup> Yadda bebley ni indawat idan helag Naptali ey ya Kedes di Galilee, ya Hammon niya Kiriathaim e neunnudan idan kudal. <sup>77</sup> Yadda bebley ni indawat idan helag Sebulun idan helag Merari e helag Levi ey ya Jokneam, ya Kartah, ya Rimmono niya Tabor e neunnudan idan kudal. <sup>78-79</sup> Yadda bebley ni indawat idan helag Reuben ey ya Beser

e wadad gilig ni eleg mebebleyi, ya Jahsah, ya Kedemot niya Mephaat e neunnudan idan kudal. Ya nambebleyan idan helag Reuben ey yad appit ni kasimmilin aggew di Wangwang e Jordan e demang ni Jericho. <sup>80</sup> Yadda bebley ni indawat idan helag Gad ey ya Ramot di Gilead, ya Mahanaim, <sup>81</sup> ya Hesbon niya Jaser e neunnudan idan kudal.

## 7

### *Yadda helag Issakar*

<sup>1</sup> Hi Issakar ey epat hu u-ungnga tu: hi Tola, hi Puah, hi Jashub et hi Simron. <sup>2</sup> Hi Tola ey enem hu u-ungnga tu: hi Ussi, hi Rephaiah, hi Jeriel, hi Jahmai, hi Ibsam et hi Semuel. Hi-gada kamengipappangngulun pewen da ey nandingngel idan nelaing ni sindalu. Ya bilang emin ni helag Tola ni sindalu eman ni nampatulana David ey 22,600. <sup>3</sup> Hi Ussi ey hakey hu u-ungnga tu e hi Israhiah. Hi Israhiah ey epat hu u-ungnga tu: hi Michael, hi Obadiah, hi Joel et hi Ishiah. Hi-gada nengipappangngulun pewen da. <sup>4</sup> Dakel hu aahwa da niya u-ungnga da, et ya bilang emin ni sindalu da ey 36,000. <sup>5</sup> Ya bilang emin ni helag Issakar ni sindalun neilistad dokumintuh ni bebley da ey 87,000.

### *Yadda helag di Benjamin nan Dan*

<sup>6</sup> Hi Benjamin ey tellu u-ungnga tu: hi Bela, hi Beker et hi Jediael. <sup>7</sup> Hi Bela ey lima hu u-ungnga tu. Sindaludda ey hi-gada kamengipappangngulun pewen da: hi Esbon, hi Ussi, hi Ussiel, hi Jerimot et hi Iri. Ya bilang emin ni helag dan sindalu ey 22,034. <sup>8</sup> Hi Beker ey heyam hu u-ungnga tu: hi Semirah, hi Joas, hi Elieser, hi Elioenai, hi Omri, hi Jeremot, hi Abijah, hi Anathot et hi Alemet. <sup>9</sup> Ya bilang emin ni helag dan sindalun neilistad dokumintuh ni bebley da ey 20,200. <sup>10</sup> Hi Jediael ey hakey hu u-ungnga tu e hi Bilhan. Pitu u-ungangan Bilhan: hi Jeus, hi Benjamin, hi Ehud, hi Kenaanah, hi Sethan, hi Tarsis et hi Ahisarah. <sup>11</sup> Hi-gada kamengipappangngulun pewen da. Ya bilang ni helag dan sindalu ey 17,200. <sup>12</sup> Yadda u-ungangan Ir ey di Suppim nan Huppim. Hi Hushim hu u-ungangan Aher.

### *Yadda helag Naptali*

<sup>13</sup> Hi Naptali ey epat hu u-ungnga tu: Hi Jahsiel, hi Guni, hi Jesher, et hi Sallum. (Hi Bilhah hu inan ameda.)

### *Yadda helag Manasseh*

<sup>14</sup> Hi Manasseh ey dewwa u-ungnga tu etan ni imbilang tun ahwatun iAramea e hi Asriel et hi Makir. Hi Makir hu aman Gilead. <sup>15</sup> Hi Makir hu nenamak ni inahwad Huppim nan Suppim. Wada agitun biin hi Maakah. Ya hakey pay ni lakin u-ungngan Makir ey hi Selophehad e biin emin u-ungnga tu. <sup>16</sup> Ya ahwana Makir ey Maakah dama ngadan tu. Dewwa u-ungnga da e di Peres nan Seres. Dewwa dama u-ungngan Peres e di Ulam nan Rakem. <sup>17</sup> Hi Ulam ey hakey hu u-ungnga tu e hi Bedan. Emin ida ey nahlag idan Gilead e u-ungngan Makir e u-ungngan Manasseh. <sup>18</sup> Hi Hammoleket e biin agin Gilead ey tellu u-ungnga tu: hi Ishod, hi Abieser et hi Mahlah. <sup>19</sup> Hi Semida ey epat hu u-ungnga tu e hi Ahian, hi Sekem, hi Likhi et hi Aniam.

### *Yadda helag Epraim*

<sup>20</sup> Huyyadda nanhayhayned ni helag Epraim: Nantanud hi Suthelah et wada hi Bered, e u-ungnga tu hi Tahat e u-ungnga tu hi Eleadah, <sup>21</sup> e u-ungnga tu hi Tahat e u-ungnga tu hi Sabad e u-ungnga tu hi Suthelah. Wada dewwan agin Suthelah ni u-ungngan Epraim e di Eser nan hi Elead, nem pintey idan tutu-ud Gath ni da-et penekkewan ni baka da. <sup>22</sup> Nebayag hu nengilmetan amedan hi Epraim ni neteyyan idan u-ungnga tu et umlidda aaggi tun menga-alluk ni hi-gatu. <sup>23</sup> Entanniy newad-nan mewan hu ahwa tu et man-ungnga ey laki et ngadnan tun hi Beriah, e ya keibbellinan tu ey 'ligat' tep ya neipahding di pamilyah da. <sup>24</sup> Wada hu biin u-ungngan Epraim e hi Seerah ngadan tu. Hi-gatu nengipekapyan bebley di nengin-ahpat niyad nengin-ehpen ni Bet Horon ni ya Ussen Seerah. <sup>25</sup> Huyyadda edum ni nehayhayned ni helag Epraim: hi Rephah e u-ungnga tu hi Reshep e u-ungnga tu hi Telah e u-ungnga tu hi Tahan e u-ungnga tu <sup>26</sup> hi Ladan e u-ungnga tu hi Ammihud e u-ungnga tu hi Elishamah e u-ungnga tu <sup>27</sup> hi Nun e u-ungnga tu hi Joshua. <sup>28</sup> Ya neitudun hi-gadan nambebleyan da ey ya Bethel niyadda bebley ni nanlinikweh diman, ingganah di Naaran di appit ni kasimmilin aggew niyad appit ni kakelinnugin aggew di Geser e nei-dum ida nangkeihnup ni bebley diman. Nambebleyan da pay hu Sekem niyadda neihnup ni bebley diman ingganah di Ayyah niyadda bebley ni neihnup diman. <sup>29</sup> Nei-dum ni nambebleyan dadada hu bebley di pappeg ni puyek idan helag Manasseh. Humman idan bebley ey Bet Shan, Taanak,

Megiddo, Dor, niyadda etan ekka-ket ni bebley diman. Yadda helag Joseph e u-ungngan Israel hu nambebley diman.

*Yadda helag Asher*

<sup>30</sup> Huyyadda helag Asher: wadadda epat ni lakin u-ungngan Asher: hi Imnah, hi Isbah, hi Isbi et hi Beriah. Wada hakey ni biin agida e hi Serah. <sup>31</sup> Dewwa u-ungngan Beriah e di Heber nan Malkiel. (Hi Malkiel hu nengipekapyan bebley di Birsait.) <sup>32</sup> Hi Heber ey tellu u-ungnga tu: hi Japlet, hi Somer et hi Hotham. Wada biin agida e hi Sua. <sup>33</sup> Hi Japlet ey tellu u-ungnga tu: hi Pasak, hi Bimhal et hi Asbat. <sup>34</sup> Hi Somer ey epat hu u-ungnga tu: hi Ahi, hi Rohgah, hi Hubbah et hi Aram. <sup>35</sup> Hi agi da e hi Helem ey epat hu u-ungnga tu: Hi Sophah, hi Imna, hi Seles et hi Amal. <sup>36</sup> Yadda u-ungngan Sophah ey hi Suah, hi Harnepher, hi Sual, hi Beri, hi Imrah, <sup>37</sup> hi Beser, hi Hod, hi Samma, hi Silsah, hi Itran, et hi Beera. <sup>38</sup> Yadda u-ungngan Jether: hi Jephunneh, hi Pispah et hi Ara. <sup>39</sup> Yadda u-ungngan Ulla: hi Arah, hi Hanniel et hi Risia. <sup>40</sup> Huyyaddan helag Asher hu neputuk ni mengipappangngulun pewen da. Nandingngel idan nelaing ni sindalu niya kayyaggud idan ap-apu. Ya bilang emin ni helag Asher ni dammutun mansindalu ey 26,000.

## 8

*Ya tenten idan aammed Saul e helag Benjamin*

<sup>1</sup> Hi Benjamin ey wada liman u-ungnga tu: hi Bela, hi Asbel, hi Aharah <sup>2</sup> hi Nohah et hi Rapha. <sup>3</sup> Yadda u-ungngan Bela ey hi Addar, hi Gera, hi Abihud, <sup>4</sup> hi Abishua, hi Naaman, hi Ahoah, <sup>5</sup> hi Gera, hi Sephuphan et hi Huram. <sup>6-7</sup> Yadda u-ungngan Ehud e kamengipappangngulun pewen dan nambebley di Geba ey hi Naaman, hi Ahijah, et hi Gera. Nem neapput idad gubat et pa-kal daddadman et ida nambebley di Manahat. Hi Gera e amad Ussa nan Ahihud hu nengipengulun linawwan dadman. <sup>8-9</sup> Hini-yan Saharaim ida dewwan ahwa tu e di Hushim nan Baara et an mambebley di Moab et ahwaen tu hi Hodes et wada pitun u-ungnga da e hi Jobab, hi Sibia, hi Meshah, hi Malkam, <sup>10</sup> hi Jeus, hi Sakia, et hi Mirmah. Emin ida huyyan u-ungngan Saharaim ey nambalin idan mengipappangngulun helag da. <sup>11</sup> Wada pay hu dewwan u-ungngad Saharaim nan hi Hushim e di Abitub nan Elpaal. <sup>12</sup> Wada tellun u-ungngan Elpaal: hi Eber, hi Misham et hi Semed e nengipekapyan bebley e Ono, ya Lod, niyadda nanlinikweh ni bebley diman.

*Yadda helag Benjamin ni nambebley di Gath niyad Aijalon*

<sup>13</sup> Di Beriah nan Sema hu kamengipappangngulun pewen dan helag Benjamin ni nambebley di Aijalon niya hi-gada nenegyun idan tutu-ud Gath. <sup>14</sup> Yadda u-ungngan Beriah ey hi Ahio, hi Sashak, hi Jeremot, <sup>15</sup> hi Sebadiah, hi Arad, hi Eder, <sup>16</sup> hi Michael, hi Ispah et hi Joha.

*Yadda helag Benjamin ni nambebley di Jerusalem*

<sup>17</sup> Huyyadda helag Elpaal: hi Sebadiah, hi Meshullam, hi Hiski, hi Heber, <sup>18</sup> hi Ismerai, hi Isliah, et hi Jobab. <sup>19</sup> Huyyadda helag Simei: hi Jakim, hi Sikri, hi Sabdi, <sup>20</sup> hi Elienai, hi Silletai, hi Eliel, <sup>21</sup> hi Adaiyah, hi Beraiah, et hi Simrat. <sup>22</sup> Huyyadda helag Sashak: hi Ispan: hi Eber, hi Eliel, <sup>23</sup> hi Abdon, hi Sikri, hi Hanan, <sup>24</sup> hi Hananiah, hi Elam, hi Antothijah, <sup>25</sup> hi Ipdeiah et hi Penuel. <sup>26</sup> Huyyadda helag Jeroham: hi Samserai, hi Sehariah, hi Athaliah, <sup>27</sup> hi Jareshiah, hi Elijah et hi Sikri. <sup>28</sup> Huyyadda pewen ni helag Benjamin ni nambebley di Jerusalem.

*Yadda edum ni helag Benjamin ni nambebley di Gibeon niyad Jerusalem*

<sup>29</sup> Hi Jeiel hu nahlagan idan nambebley di Gibeon. Hi Maacah hu ngadan ni ahwatu. <sup>30</sup> Yadda u-ungnga tu ey hi Abdon e pengulwan, hi Sur, hi Kish, hi Baal, hi Ner, hi Nadab, <sup>31</sup> hi Gedor, hi Ahio, hi Seker, <sup>32</sup> et hi Miklot e aman Simeah. Nambebley ida helag dad Jerusalem e neihup idad nambebleyan ni edum ni aaggi da.

*Ya pamilyah nan hi Saul e patul*

<sup>33</sup> Hi Ner hu aman Kish e aman Saul e patul. Hi Saul ey epat hu u-ungnga tu: hi Jonathan, hi Malkishua, hi Abinadab et hi Esbaal. <sup>34</sup> Hi Jonathan hu aman Meribbaal e aman Mikah. <sup>35</sup> Wadadda epat ni u-ungngan Mikah: hi Pithon, hi Melek, hi Tarea et hi Ahas. <sup>36</sup> Hi Ahas hu aman Jehoaddah e wada tellun u-ungnga tu e hi Alemet, hi Asmabet et hi Simri. Hi Simri hu aman Mosa <sup>37</sup> e aman Binea e aman Raphah e aman Eleasah e aman Asel. <sup>38</sup> Wada enem ni u-ungngan Asel e hi Asrikam, hi Bokeru, hi Ismael, hi Seariah, hi Obadiah et hi Hanan. <sup>39</sup> Hi Eshek e agin Asel ey wada tellun u-ungnga tu: hi Ulam, hi Jeus et hi Eliphelet. <sup>40</sup> Yadda u-ungngan Ulam ey nelaing idan umpana niya

netuled idan sindalu. Hanggatut et nelima hu u-ungnga da niya inap-apu da. Huyyaddan emin hu helag Benjamin.

## 9

<sup>1</sup> Emin ida helag Israel ey neilistadda meippuun di pamilyah dan neitudek di Libluh idan Patul di Israel.

### *Yadda nambangngad ni neilaw di neidawwin bebley*

Yadda tutu-ud Judah ey neilaw idan balud di Babilon tep humman kastigu dan liwat da. <sup>2</sup> Yadda nemangulun nambangngad di nambebleyan da ey yadda edum ni helag Israel. Wadadda neikuyug ni hi-gadan padi, yadda helag Levi niyadda aaggi dan kamansilbid Tempol. <sup>3</sup> Immalidda helag Judah, yadda helag Benjamin, yadda helag Epraim niyadda helag Manasseh et manha-ad idad Jerusalem. <sup>4</sup> Ya hakey ni pamilyah ni nambangngad ey ya pamilyah Uthai e u-ungngan Ammihud e u-ungngan Omri e u-ungngan Imri e u-ungngan Bani e helag Peres e u-ungngan Judah. <sup>5</sup> Ya damad helag Selah ey nambangngad hi Asaiah niyadda u-ungnga tu. <sup>6</sup> Yaddad helag Serah ey nambangngad hi Jeuel niyadda aaggi tu. Ya bilang dan emin ni helag Judah ni nambangngad ey 690. <sup>7</sup> Yadda helag Benjamin ni nambangngad di Jerusalem ey hi Sallu e u-ungngan Meshullam e u-ungngan Hodabiah e u-ungngan Hassenuah, <sup>8</sup> hi Ibneiah e u-ungngan Jeroham, hi Elah e u-ungngan Ussi ey inap-apun Mikri, et hi Sepahtiah e u-ungngan Reuel e u-ungngan Ibnijah. <sup>9</sup> Emin ida ey hi-gada nengippangngulun helag da niya neilistaddad listaan ni tenten ni aammed da. Ya bilang emin ni nambangngad ni helag Benjamin ey 956 ni pamilyah. <sup>10</sup> Yadda padin nambangngad di Jerusalem ey: hi Jedaiah, hi Jehoarib, hi Jakin <sup>11</sup> hi Asariah e u-ungngan Hilkiah e u-ungngan Meshullam e u-ungngan Sadok e u-ungngan Meraiot e u-ungngan Ahitub. Hi Asariah hu keta-ta-geyyan saad tud Tempol. <sup>12</sup> Nambangngad dama hi Adaiyah e u-ungngan Jeroham e u-ungngan Pashur e u-ungngan Malkijah, et hi Maasai e u-ungngan Adiel e u-ungngan Jahserah e u-ungngan Meshullam e u-ungngan Meshillemit e u-ungngan Immer. <sup>13</sup> Ya bilang emin idan padin nambangngad ey 1,760. Hi-gada nengippangngulun helag da. Neka-amta da inggunu dad Tempol.

### *Yadda helag Levi ni nambangngad di Jerusalem.*

<sup>14</sup> Yadda helag Levi ni nambangngad di Jerusalem ey hi Semaiah e u-ungngan Hassub e u-ungngan Asrikam e u-ungngan Hashabiah e helag Merari, <sup>15</sup> hi Bakbakkar, hi Heres, hi Galal, hi Mattaniah e u-ungngan Mika e u-ungngan Sikri e u-ungngan Asap, <sup>16</sup> hi Obadiah e u-ungngan Semaiah e u-ungngan Galal e u-ungngan Jeduthun, et hi Berekiah e u-ungngan Asa e u-ungngan Elkanah e nekibebley idan iNetophah.

### *Yadda guwalyad Tempol ni nambangngad di Jerusalem*

<sup>17</sup> Huyyaddan guwalyad Tempol ni nambangngad di Jerusalem ey hi Sallum, hi Akkub, hi Talmon, hi Ahiman et yadda agi da. Hi Sallum hu ap-apu da. <sup>18</sup> Huyyadda hu kamanguwalyad heggeppan ni patul di appit ni kasimmilin aggew. Hi-gada guwalyan nunman di heggeppan di kampuddan helag Levi. <sup>19</sup> Hi Sallum e u-ungngan Kore niya inap-apun Ebiasap niyadda aaggi tun helag Korah hu kamanguwalyad heggeppan di Tabernacle APU DIOS henin ngunun aammed dan nunman e hi-gada ngenamung ni mampaptek di Tabernacle. <sup>20</sup> Hi Pinehas e u-ungngan Eleasar hu ap-apu da la ey binenaddangan APU DIOS. <sup>21</sup> Hi Sekariah e u-ungngan Meshelemiah ey guwalya damadman. <sup>22</sup> Ya bilang emin idan guwalyad heggeppan ey dewanggatut et hampulut dewwa. Huyyadda hu neputuk di helag da meippuun di tenten ni aammed da. Ey hi David e patul et hi Samuel e prophet hu nemutuk lan aammed da tep ida kameiddinel. <sup>23</sup> Hi-gada niyadda helag da hu nannaneng ni mangguwalyadman. <sup>24</sup> Ida kamanguwalyad etan di epat ni heggeppan: yad appit ni kasimmilin aggew niyad tuka kelinnugi, yad north niyad south. <sup>25</sup> Yadda aaggidan wadad edum ni bebley ey ida kaum-alin umbaddang ni hi-gadan mangguwalyan hampipitun aggew. <sup>26</sup> Yadda etan epat ni ap-apuddan guwalyan helag Levi idan emin ey hi-gada nei-kudan idan kuwaltuh niyadda bodegah di Tempol. <sup>27</sup> Ida kamanha-ad di neihnup diman Tempol tep ya ngunu da ey ida kamanguwalyan hileng niyan kawwalwal niya hi-gada kamengibbeghul idan eheb ni kakkabbuhhan.

### *Yadda edum ni helag Levi*

<sup>28</sup> Yadda edum ni helag Levi hu kamengippaptek idan kameussal di kapandeyyawi. Daka ang-angadda usal ni kamei-hep ma-lat meipahgep ni emin hedin negibbuh neusalan da, et endi an metellak. <sup>29</sup> Yadda dama edum ni hi-gada ey daka ippaptek etan ida edum ni kameussal henin alinah, ya meinum, ya lana, ya insensoh niyadda

kameikkamduḡ ni mengippebanglu. <sup>30</sup> Nem yadda padi kamengiddaddan ni bangbanglu niya kaikkamduḡ ni mengippebanglu. <sup>31</sup> Hi Mattithiah e pengulwan ni u-unggan Sallum e helag Korah hu neidinelan ni ngunun mengapyan sinapay ni kamei-appit nan Apu Dios. <sup>32</sup> Ey yadda helag Kohat hu kan ngunun mengapyan sinapay di Tempol ni Sabaduh. <sup>33</sup> Yadda edum ni helag Levi hu kamampaptek ni a-appeh niyadda kapetnul di Tempol. Hi-gada niyadda kamengippangngulun pamilyah dan helag Levi ey ida kamanha-ad di Tempol et eleg ida mekingngunnun edum ni ngunu tep wada neduttuk ni nei-kud ni ngunu dan kawwalwal niyan hileng. <sup>34</sup> Emin ida huyyan nengadan ey hi-gada kamengippangngulun pamilyah dan helag Levi meippuun di netenten ni aammed da e nambebley idad Jerusalem.

*Ya tenten ni aammed Saul e patul niyadda helag tu*

<sup>35</sup> Hi Jeiel hu nahlagan idan nambebley di Gibeon. Hi Maakah hu ngadan ni ahwatu. <sup>36</sup> Ya ngadan idan u-ungga tu ey hi Abdon e pengulwan, hi Sur, hi Kish, hi Baal, hi Ner, hi Nadab, <sup>37</sup> hi Gedor, hi Ahio, hi Sekariah et hi Miklot. <sup>38</sup> Hi Miklot hu aman Simeam. Nambebley ida helag dad Jerusalem e neihnap idad edum ni aaggi da. <sup>39</sup> Hi Ner hu aman Kish e aman Saul. Hi Saul ey epat hu u-ungga tu: hi Jonathan, hi Malkishua, hi Abinadab et hi Esbaal. <sup>40</sup> Hi Jonathan hu aman Meribbaal e aman Mikah. <sup>41</sup> Wadadda epat ni u-unggan Mikah: hi Pithon, hi Melek, hi Tarea et hi Ahas. <sup>42</sup> Hi Ahas hu aman Jarah e wadadda tellun u-ungga tu e hi Alemet, hi Asmabet et hi Simri e aman Mosa. <sup>43</sup> Hi Mosa hu aman Binea. Hi Binea hu aman Rephaiah. Hi Repahiah hu aman Eleasah. Hi Eleasah hu aman Asel. <sup>44</sup> Wada enem ni u-unggan Asel: hi Asrikam, hi Bokeru, hi Ismael, hi Seariah, hi Obadiah et hi Hanan.

## 10

*Ya neteyyan Saul e patul*

<sup>1</sup> Entanni ey ginubat idan iPilistia hu helag Israel di Duntug e Gilboa et dakel hu pintey daddan helag Israel diman. Bimmesik ida edum ni hi-gada, anin hi Saul e patul niyadda u-ungga tu. <sup>2</sup> Nem hina-kup idan iPilistia et pateyen da tellun u-unggan Saul e hi Jonathan, hi Abinadab et hi Malkishua. <sup>3</sup> Nekalliputan dama hi Saul tep pinenaddan buhul da tep nemahhig gubat di kad-an tu. <sup>4</sup> Et kantu etan ni kamenettengged ni almas tuy "Uknut mu ispadah mu et pateyen muwak tep eggak pinhed ni yaddalli iPilistia e eleg mengullug nan Apu Dios hu um-alin mampehelheltap ni hi-gak."

Nem kauntakut humman ni kamenettengged ni almas tun memetty ni hi-gatu et uknuten law nan Saul hu ispadah tu et lukbuban tu et matwik annel tu. <sup>5</sup> Inang-ang etan ni kamenettengged ni almas Saul e netey et uknuten tu dama ispadah tu et lukbuban tu et matey idan dewwa. <sup>6</sup> Yan nunman neteyyan Saul e patul niyadda etan tellun u-ungga tun laki et mepappeḡ nan-ap-apan ni pamilyah tu.

<sup>7</sup> Dingngel idan edum ni helag Israel ni nambebley di Nandeklan e Jesreel e bimmesik ida sindalu da niya netey hi Saul niyadda etan tellun u-ungga tu, ey bimmesik ida et hi-yanen da bebley da. Et umlidda iPilistia et maihullul idan mambebley diman.

<sup>8</sup> Nawa-wan nunman ey limmaw ida iPilistia et da pan-alen hu hipan ellan daddan nangketey ni helag Israel. Entanni ey himmak da hu annel Saul niyadda u-ungga tud Duntug e Gilboa. <sup>9</sup> Pinutul da ulun Saul et alen dan emin almas tu. Ey intu-dak da an menghel di emin ni bebley dad Pilistia niyad tempol ni kinapya dan dios da meippanggeḡ ni neapputan idan helag Israel. <sup>10</sup> Inha-ad dadda almas Saul di hakey ni daka pandeyyaw i et ita-yun da ulu tud tempol ni dios da e hi Dagon.

<sup>11</sup> Entanni ey dingngel idan iJabes Gilead humman ni impahding idan iPilistia nan Saul <sup>12</sup> et lumaw ida netuled ni sindalu et da alen hu annel tu niyadda annel ni tellun u-ungga tu et ilaw dad Jabes. Et dadda ikulung di hengeḡ ni keyew ni oak diman et mantepel idan pitun aggew.

<sup>13</sup> Hanniman neipahding nan Saul e netey tep eleg tu u-unnuden hu tugun APu Dios. Nginhay tu hi APu Dios et mekihummangan ni linnawan netey ma-lat ibega tu hedini hipa kayyagḡud ni pehding tu, <sup>14</sup> e beken hi APu Dios ni nampebaddangan tu. Et humman hu, impapety APu Dios et ihullul tu hi David e u-unggan Jesse ni nampatul.

## 11

*Ya nampatulan nan David idan helag Israel*

<sup>1</sup> Entanni ey limmaw idan emin hu helag Israel di kad-an David di Hebron et kandan hi-gatuy "Han-aaggi itsun emin tep hakey nahlagan tayu. <sup>2</sup> Anin dedan eman ni hi Saul hu patul tayu et hi-gam hu nengipengupengulun sindalu tayud gubat. Ey inhel dedan

lan AP-APU e Dios mun kantuy 'Hi-gam hu pampatul idallin tuuk ni helag Israel niya mengippaptek ni hi-gada.' " <sup>3</sup> Et mekihummangan hi David idan aap-apu dad hinanggan APU DIOS e pan-addum tudda law emin hu helag Israel. Inebulut da e hi David law hu pampatul da et duyagan da ulu tun lana. Humman inamnuan ni inhel lan APU DIOS nunman nan Samuel e prophet.

<sup>4</sup> Entanni ey limmaw hi David niyadda helag Israel et da gubaten hu Jerusalem, e Jebus hu hakey ni ngadan tu. Yadman nambelleyan idan Jebusite. <sup>5</sup> Kan idan nunman ni Jebusite nan David ey "Eleg mu hanhegep eya bebley mi tep nehammad luhud tun tuping." Nem hinggep di David humman ni bebley e Zion et apputen dadda et ngadanan dan Bebley David. <sup>6</sup> Yan nunman ey kan David idan sindalu tuy "Ya memengngulun umpatey ni Jebusite hu pambalin kun ap-apun sindaluk!" Entanni ey hi Joab e inetu hi Seruiah hu nemangulun pimmatey et hi-gatu impan-ap-apun David idan sindalu tu. <sup>7</sup> An nambelley hi David diman et mukun 'Bebley David' ngadan tu. <sup>8</sup> Impeyayyaggud David humman ni bebley e impeetteng tu niya sinebab tu hu appit ni kasimmilin aggew. Anin idan nanlinikweh di gilig ni bebley et inyayyaggud tu. Inyayyaggud daman Joab hu panggil nunman ni bebley. <sup>9</sup> Lektattuy kamangkeihhammad hu kapan-ap-apuin David tep kapakabbaddangin APU DIOS e Kabaalan tun emin.

#### *Yadda nelaing ni sindalun David*

<sup>10</sup> Pininhed idan helag Israel ni mambalin hi David ni patul da e humman dedan inhel APU DIOS ni nunman ni meippahding. Binaddangan da hi David et mannaneng ni et-eteng kabaalan ni nan-ap-apuan tu. Huyyadda neilistan nangkelaing ni sindalu tu. <sup>11</sup> Ya nemangulu ey hi Jashobeam e Hakmonite e hi-gatu ap-apudda etan ni Tellun Ketultuledan. Wadan pinhakkey ni tu nekigubatan e pintey tu telunggatut ni buhul dan inusal tu pahul tu. <sup>12</sup> Ya neihayned etan idad Tellun Ketultuledan ey hi Eleasar e u-unggan Doda e helag Ahoh. <sup>13</sup> Hi-gatu kadwan David eman ni da nekigubatan idan iPilistia di Pas Dammim. Wadadda etan di payew ni netaneman ni barley ey endi maptek ey namsik ida edum tun helag Israel <sup>14</sup> nem nemahhig e inleput dan David ni nekileban idan iPilistia di gawwan nunman ni payew. Binaddangan APU DIOS ida et mekanggapput ida. <sup>15</sup> Hakey ni aggew ey limmaw ida etan Tellun Ketultuledan e edum idan etan ni Telumpulun Netuled ni sindalun David di kad-an tu e neihnup di leyang di Addulam. Yan nunman ey nangkampudda sindalun iPilistia di Nedeklan di Rephaim. <sup>16</sup> Wadadda David ni nunman di duntug e neligat ni hehgepen ni buhul da. Yadda edum ni sindalun iPilistia ey sinekup da Bethlehem. <sup>17</sup> Entanni ey ninemnem David hu bebley dan Bethlehem et kantuy "Pinhed kun peteg ni um-inum ni danum etan di bubun ni neihnup di eheb di Bethlehem." <sup>18</sup> Et humman idan Tellun Ketultuledan ni sindalu ey da hinggep hu nangkampuan idan iPilistia et ida umehul ni danum di kad-an ni eheb di Bethlehem et ilaw dan David. Nem eleg tu inumen et iduyag tu kumedek di puyek ma-lat iappit tun APU DIOS. <sup>19</sup> Tep kantuy "Eleg mabalin ni nak innumen huyyan danum tep kamei-ellig huyyad kuheyaw idan nunyan sindalun inlamngan da biyag dan an nan-ahul." Et mukun eleg tu inumen humman ni danum.

Huyya impahding idan nunyan Tellun Ketultuledan ni sindalun nengipeang-ang dan kasinuled da. <sup>20</sup> Hi Abishai e agin Joab hu ap-apuddan nunman ni Telumpulun Netuled ni sindalu. Nekibilang hi Abishai idan nunman ni Telumpulu tep pintey tu telunggatut ni buhul dad hakey ni gubat e inusal tu pahul tu. <sup>21</sup> Et hi-gatu nambalin ni ap-apu da tep hi-gatu ketultuledan idan nunman ni Telumpulu. Nem eleg maiingngeh etan idad Tellun Ketultuledan ni nandingngel ni sindalun David. <sup>22</sup> Hi Benaiah e u-unggan Jehoiada e iKabseel hu hakey daman netuled ni sindalun David tep dakek hu impahding tun neang-angan ni katinuled tu. Ya hakey ni impahding tu ey pintey tu dewwan iMoab ni nekallaing ni mekiggubbat. Ey hakey ni aggew ni ahiketel ey pintey tu layon di bitu. <sup>23</sup> Pintey tu pay hu hakey ni sindalun iEgypt ni et-eteng ni tuu e pitut kagedwah ni piyeh kasina-gey tu niya mahdel ni peteg hu pahul tu e henin tukud ni kapengitta-yunin kaman-ebbel ni pan-ablan tu. Ebuhi hu bakdung ni inusal Benaiah et piliwen tu pahul nunman ni iEgypt et humman pametey tun hi-gatu. <sup>24</sup> Huyyadda hu impahding Benaiah e netuled dama e nganngannih ni mei-ingngeh hu nandingngelan tu etan idad Tellun Ketultuledan ni sindalun David. <sup>25</sup> Kamekatbal etan idad Telumpulun Netuled, nem eleg maiingngeh etan idad Tellun Ketultuledan. Hi-gatu pinilin David ni ap-apuddan guwalya tu. <sup>26</sup> Huyyadda ngadan idan edum ni nangkelaing ni sindalun David: Hi Asahel e agin Joab, hi Elhanan e u-unggan Dodo di Bethlehem, <sup>27</sup> hi Sammot e iHarod, hi Heles e iPelon, <sup>28</sup> hi Ira e u-unggan Ikkes e iTekoa, hi Abiesar e iAnathot, <sup>29</sup> hi Sibbekai e iHushah, hi Ilai e iAhoh, <sup>30</sup> hi Maharai e iNetophah, hi Heled e u-unggan Baanah e iNetophah dama, <sup>31</sup> hi Ithai e u-unggan Ribai e iGibea di Benjamin, hi Benaiah e

iPirathon, <sup>32</sup> hi Hurai e nalpu etan idad nandeklan di neihnpud di Gaas, hi Abiel e iArbah, <sup>33</sup> hi Asmabet e iBahurim, hi Eliahba e iSaalbon, <sup>34</sup> yadda u-ungngan Hashem e iGison, hi Jonathan e u-ungngan Sagee e iHarar, <sup>35</sup> hi Ahiam e u-ungngan Sakar e iHarar, hi Eliphah e u-ungngan Ur, <sup>36</sup> hi Hephher e iMekerah, hi Ahijah e iPelon, <sup>37</sup> hi Hesro e iKarmel, hi Naarai e u-ungngan Esbai, <sup>38</sup> hi Joel e agin Nathan, hi Mibhar e u-ungngan Hagri, <sup>39</sup> hi Seleke e iAmmon, hi Naharai e iBeerot e kamenettengnged ni almas Joab, <sup>40</sup> di Ira nan Gareb e iJattir <sup>41</sup> hi Uriah e Hittite, hi Sabad e u-ungngan Ahlai, <sup>42</sup> hi Adina e u-ungngan Sisa e helag Reuben e kamengipappangnguluddan helag da ey ap-apuddan telumpulun sindalu, <sup>43</sup> hi Hanan e u-ungngan Maakah, hi Joshaphat e iMitna, <sup>44</sup> hi Ussi e iAstarot, di Sama nan Jeiel e u-ungngaddan Hotham e iAroer, <sup>45</sup> hi Jediel nan Joha e u-ungngaddan Simri e iTis, <sup>46</sup> hi Eliel e iMahabah, di Jeribai nan Joshabiah e u-ungngaddan Elnaam, hi Itmah e iMoab, <sup>47</sup> hi Eliel, hi Obed, et hi Jaasiel e iSobah.

## 12

### *Yadda sindalun David ni helag Benjamin*

<sup>1</sup> Wadadda nei-dum nan David ni lalacki et manha-ad idad Siklag eman ni binsikan tu tep pinhed nan Saul e u-ungngan Kish ni petteyen. Huyyadda edum tun netuled ni sindalun nekigubagubat. <sup>2</sup> Nelaing idan emin ni mengussal ni pana niya balebay e daka ussala wannan niya willin ngamay da. Agi idan Saul tep hi Benjamin emin nahlagan da. <sup>3</sup> Hi Ahieser hu ap-apu da e u-ungngan Semaah e iGibeah. Hi agi tu hi Joas hu neihayned ni ap-apu. Huyyadda sindalu da: di Jesiel nan Peleth e u-ungngaddan Asmabet, di Berakah nan Jehu di Anathot, <sup>4</sup> hi Ismaiah e iGibeon e nelaing ni sindalu niya hakey ni ap-apuddan 'Telumpulu', hi Jeremiah, hi Jahasiel, hi Johanan, hi Josabad e iGederah, <sup>5</sup> hi Elusai, hi Jerimot, hi Bealiah, hi Semariah, hi Sephatiah e iHarup, <sup>6</sup> yadda helag Korah e hi Elkanah, hi Ishiah, hi Asarel, hi Joeser, hi Jashobeam, <sup>7</sup> et di Joelah nan hi Sebadiah e u-ungngaddan Jeroham e iGedor.

### *Yadda sindalun David ni helag Gad*

<sup>8</sup> Wadadda netuled niya nelaing ni sindalun helag Gad ni nei-dum nan David eman ni nantalan tud eleg mebebleyi. Nelaing idan mengussal ni pahul niya anggetakkut ida e henidda layon niya henidda makwah e elistuddan umbesik. <sup>9</sup> Heninnuy hu saad da meippuun di kabaelan da: hi Eser hu ap-apu da, hi Obadiah hu neihayned, <sup>10</sup> hi Eliab hu neikatlu, hi Mishmannah hu neika-pat, hi Jeremiah hu neikelima, <sup>11</sup> hi Attai hu neika-nem, hi Eliel hu neikepitu, <sup>12</sup> hi Johanan hu neikewalu, hi Elsabad hu neikahyam <sup>13</sup> hi Jeremiah hu neikepulu, et hi Makbannai hu neikepulun hakey. <sup>14</sup> Humman idan helag Gad ey hi-gada ap-apuddan sindalu. Ya edum ni hi-gada ey ap-apun hanlibu ey ya edum ey ap-apun hanggatut. <sup>15</sup> Yan nemangulun bulan ni toon e yan nunman kala-pihin danum di Wangwang e Jordan ey ida kaum-agwat et dadda pabsik ida etan nambbleyi di ba-hil ni wangwang di appit ni kasimmilin aggew niyad kakelinnugin aggew.

### *Yadda helag Judah niyadda edum ni helag Benjamin ni neki-dum nan David.*

<sup>16</sup> Entanni ey wadadda dama immalin helag Benjamin niyadda helag Judah ni meki-dum nan David. <sup>17</sup> An dinamun David ida et kantun hi-gaday "Hedin kayyaggud in-ali yu e umbaddang kayun hi-gak, ey ebbuluten dakeyun meki-dum ni hi-gak niyadda sindaluk. Nem hedin wadad nemnem yu e ihhehdul yuwak idan buhul ku, anin ni endi impahding kun lawah, ey hi Apu Dios e kaddeyyawaddan aammed tayu hu mengastigun hi-gayu." <sup>18</sup> Entanni ey immali iSpiritu Apu Dios nan Amasai e hakey idan ap-apuddan Telumpulu ey kantuy "Sindalu dakemin hi-gam e David e u-ungngan Jesse. Kayyaggud hu pambalinan ni emin ni ippahding mu niya ippahding idan memaddang ni hi-gam tep baddangan dakeyun Apu Dios." Et abuluten David ni mei-dum ida et pan-apu tuddan sindalu tu.

### *Yadda helag Manasseh ni nei-dum nan David.*

<sup>19</sup> Wadadda edum ni sindalun helag Manasseh ni limmaw et mei-dum idan David eman ni nekilawwan tuddan iPilistia ni da-et la pengubbatan nan Saul. Nem yan nunman ey eleg iebulut idan iPilistia ni mei-dum di David ni hi-gadan an mekiggubbat et pambanggad dadda tep ida kaumtakut e entanniy ihhehdul David idan nan Saul e patul tun nunman. <sup>20</sup> Huyyadda sindalun helag Manasseh ni nei-dum di David eman ni daka pangkeibbanggadid Siklag: Hi Adnah, hi Josabad, hi Jediel, hi Michael, hi Josabad, hi Elihu et hi Sillethai. Emin ida huyya ey ap-apun hanlibun sindalu. <sup>21</sup> Yan nunman ni nei-duman dan David ey nambalin idan ap-apun sindalu tu tep nelaing ida. Entanni et



mambalin idan aap-apuddan sindalun helag Israel. \* <sup>22</sup> Kewa-wa-wa ey kamangke-dumi sindalun David et lektattuy dimmakkedakkel ida.

*Ya listaan ni sindalun David*

<sup>23</sup> Yan kawedan David di Hebron ey dakel ida nandaddan ni sindalun mei-dum ni hi-gatu et baddangan dan mampatul et maihullul nan Saul tep humman dedan inhel APU DIOS ni meippahding. <sup>24</sup> Heninnuy bilang dan emin: yad helag Judah ey 6,800 e nan-almas idan pahul niya happiyaw, <sup>25</sup> yad helag Simeon ey 7,100, <sup>26</sup> yad helag Levi ey 4,600. <sup>27</sup> Nei-dum hi Jehoiada e ap-apun pamilyah Aaron e impangulu tu 3,700 ni sindalu. <sup>28</sup> Nei-dum dama hi Sadok e kat-agun lakin ap-apu dan netuled. Hi-gatu niyadda dewampulut dewwan aaggi tu ey ap-apudda emin ni sindalu. <sup>29</sup> Yad helag Benjamin e nahlagan Saul e patul ey 3,000. Nem ingganah nunyan tsiimpuh ey dakel ni hi-gada hu nannaneng ni hi Saul hu pinhed da. <sup>30</sup> Yad helag Epraim ey 20,800 e nelaing ida daman emin ni sindalu. <sup>31</sup> Yad kagedwah ni helag Manasseh ey 18,000 hu intu-dak dan memaddang nan David ni mampatul. <sup>32</sup> Yad helag Issakar ey 200 ni aap-apu e ingkuyug dadda sindalu da. Inamtaddan nunyan sindalu hedin hipa kekakkayyaggudan ni tsiimpuh ni da pekiggubbatan. <sup>33</sup> Yad helag Sebulun ey 50,000 sindalu ida. Ida kameiddinnel niya nehammad hu daka pengi-ehngeng nan David niya kayyaggud idan sindalun nandaddan ni mekiggubbat, niya nelaing idan mengussal ni emin ni hipan almas. <sup>34</sup> Yad helag Naptali ey hanlibun aap-apu hu nei-dum e ingkuyug dadda 37,000 ni sindalu dan nangelaing ni mengussal ni pahul niya happiyaw. <sup>35</sup> Yad helag Dan ey 28,600 ni sindalun nelaing ni mekiggubbat. <sup>36</sup> Yad helag Asher ey 40,000 ni sindalun nandaddan ni mekiggubbat. <sup>37</sup> Ey yaddad helag Reuben, yad helag Gad niyad kagedwah ni helag Manasseh ni nambebley di gilig ni Wangwang e Jordan di appit ni kasimminil aggew ey 120,000 ni sindalun nelaing ni mengussal ni emin ni hipan almas. <sup>38</sup> Emin ida huyyan sindalun nandaddan ni mekiggubbat ey limmaw idad Hebron di kad-an David ma-lat hi-gatu pambalin dan patul. Ey emin idan helag Israel ey pinhed da hi-gatun mampatul ni hi-gada. <sup>39</sup> Nanha-ad idad kad-an David ni tellun aggew e kikkinnan da hu kennen ni indawat idan kebebleyan da niya ini-innum da hu meinnun ni indaddan dan innunen da. <sup>40</sup> Meippalpu helag idan Issakar, yadda helag Sebulun niyadda helag Naptali ey nan-i-li da kennen e nan-itakkay dad kebayyu, yad camel, yad lakkitun baka niyad mule hu alinah, ya lameh ni fig, ya raisin, ya meinnun niya mansikan olibah. Nan-i-lida pay hu baka niya kalneroh ni ihhideda. Emin huyyan impahding da ey pengippeang-ang dan emin ni amleng da.

## 13

*Ya neienamutan ni Kaban Apu Dios*

<sup>1</sup> Hinummangan David emin ida aap-apun sindalu tun aap-apun hanlibu niya aap-apun hanggatut <sup>2</sup> et hantu peamtan emin idan edum dan helag Israel e kantuy "Hedin ebbuluten yu niya hedin pinhed APU DIOS e Dios tayu, man um-itu-dak itsun an mengippeamtan emin idan edum tayun helag Israel, anin idan papaddi niyadda edum dan helag Levi ma-lat maemung itsun emin deya. <sup>3</sup> Tep yan nunya law hu tsiimpuh ni tayu pemangngadan ni Kaban Apu Dios e neiwalleng eman ni nampatulan Saul." <sup>4</sup> Pinhed idan helag Israel humman ni inhel David et tebalen da. <sup>5</sup> Et amungen David idan emin hu edum tun helag Israel meippalpu nambebleyan dad pappeg ni Egypt ingganah di Lebo Hammat ma-lat da al-en etan Kaban Apu Dios di Kiriati Jearim et ilaw dad Jerusalem. <sup>6</sup> Entanni et lumaw hi David niyadda edum tun helag Israel di Baalah di Judah, e Kiriati Jearim hu hakey ni ngadan tu. Yadman da pengellaan nunman ni Kaban. Wada hi APU DIOS di ta-pew ni Kaban e yimmudung di nambattanan ida etan ni pinaot ni heni anghel. Et humman hu, nengadnan humman ni Kaban Apu Dios. <sup>7</sup> Da inla humman ni Kaban e wadad baley Abinadab et ilugan dad pakekapyan kaliton ni ingguyud idan baka. Ey di Ussah nan Ahio e u-ungngan Abinadab hu nengipenguluddan nunman ni baka. <sup>8</sup> Neitu-nud hi David niyadda etan edum tu. Nehaldet hu a-appeh da niya nenattayyaw idan daka pandaydayaw nan Apu Dios. Manggiggittalah ida edum ey man-ayyuding ida edum ey kapampetnul ni edum hu tambourine, yadda cymbal niyadda tangguyup. <sup>9</sup> Nem entannit dinteng da illikkan Kidon ey neikudlih ida etan bakan nengiguyud ni kaliton et tepapen nan Ussah etan Kaban Apu Dios ma-lat eleg metu-li. <sup>10</sup> Ey bimmunget hi APU DIOS et pinhakkeyey pintey tu hi Ussah tep kinepa tu etan Kaban. Et humman hu neipahding e netey hi Ussah di hinanggan APU DIOS.

\* **12:21** 12:21 Ya hakey ni keibbellinan nunya ey daka baddangi hi David ni mekillebban idan tutu-un kaum-alin umlaban et ibsik da hipan pinhed dan ibbebsik.

<sup>11</sup> Bimmunget hi David ni nemateyan APU DIOS nan hi Ussah et ingadnan tu humman ni bebley ni Peles Ussah. Et neipalpun nunman ingganah ni nunya ey nanengtun Peles Ussah hu ngadan tu. <sup>12</sup> Kaumtakut law hi David nan Apu Dios et kantuy “Hipattep law pehding kun mengi-ennamut ni Kaban Apu Dios?” <sup>13</sup> Et eleg tu law ienamut humman ni Kaban di Jerusalem et ilaw tud baley nan Obed Edom di Gath. <sup>14</sup> Neiha-ad etan Kaban diman ni tellun bulan ey et-eteng bendisyon APU DIOS nan Obed Edom, ya pamilyah tu niya emin hu wadan hi-gatu.

## 14

### *Ya baley David niya pamilyah tu*

<sup>1</sup> Hi Hiram e patul di Tyre ey immitu-dak ni tuu tud kad-an David. Immipelaw ni keyew, yadda karpenter niyadda mapehek ni batu ma-lat mengapyaddan baley David. <sup>2</sup> Ey yan nengamtaan David e hi-gatu pinutuk APU DIOS ni mampatul di Israel ey inhammad tu nan-ap-apuan tu ma-lat panyaggudan idan edum tun helag Israel e tuun Apu Dios. <sup>3</sup> Entanni ey induman David ahwa tud Jerusalem et dummakkel hu u-ungnga tun lalakki niyadda bibi-i. <sup>4</sup> Huyyadda u-ungnga tun lalakkin neiungngal Jerusalem: hi Sammua, hi Sobab, hi Nathan, hi Solomon, <sup>5</sup> hi Ibhah, hi Elishua, hi Elpelet, <sup>6</sup> hi Nogah, hi Nepheg, hi Japhia, <sup>7</sup> hi Elishama, hi Beeliada et hi Eliphelet.

<sup>8</sup> Dingngel idan iPilistia e hi David law hu patul idan emin ni helag Israel et amungen daddan emin sindalu dan an mēpap ni hi-gatu. Nem dingngel David humman ni pehding da et ikuyug tudda sindalu tun an mekihhanggan hi-gada. <sup>9</sup> Dimmateng ida iPilistia di Rephaim e Nandeklan et gubaten dadda tuudman. <sup>10</sup> Et mandasal hi David nan Apu Dios e kantuy “Kaw i-abulut mun midda gubbaten eman ida iPilistia? Kaw pengapput dakemi?” Hinumang APU DIOS ey kantuy “Em, lakkayuy, pengapput dakeyun hi-gak!”

<sup>11</sup> Et lumaw hi David niyadda sindalu tud Baal Perasim et apputen dadda sindalun iPilistia. Et kan David ey “Nelakah hu nengipeapputan Apu Dios idan buhul ku e henin kapehding ni danum hedini nedakkel e um-ienud.” Et mukun ya ngadan nunman ni bebley ey Baal Perasim. <sup>12</sup> Yan kapemsikiddan iPilistia ey nanhi-yan da kinapya dan dios da et iolden David idan tuu tu et giheben daddan emin humman.

<sup>13</sup> Entanni ey immalidda mewah hu sindalun iPilistia et gubaten da humman ni bebley. <sup>14</sup> Et makihummangan mewah hi David nan Apu Dios hedini hipa pehding tu. Himmumang hi Apu Dios ey kantuy “Beken di appit tudya pengubbatan yun hi-gada. Ya pehding yu ey kaliked kayu et meba-hil kayu et yudda gubaten di kad-an idan keyew e balsam. <sup>15</sup> Hedini wada dedngelen yun man-alsituh di ta-pew idan nunman ni keyew ey ilepu yun mekiggubbat tep memengngulu-ak ni mengubbat idan nunman ni iPilistia et apputen kudda.” <sup>16</sup> Inu-unnud David humman ni inhel Apu Dios ni pehding tu et ilepudat Gibeon ingganah lad Geser ni nengubat idan iPilistia et degyunen dadda. <sup>17</sup> Et mandingngel hi David di kebbebley tep yadda huyyan neipahding niya impambalin APU DIOS hu tutu-ud kebbebley ni kaumtakut ni hi-gatu.

## 15

### *Ya pengihha-adan David ni Kaban Apu Dios*

<sup>1</sup> Negibbuh law ni impebehwat nan David hu baballey ni pambelleyan tu etan di bebley ni neingedanan ni ngadan tu \* et kapyaan tu pengihha-adan ni Kaban Apu Dios et paetep tun tulda. <sup>2</sup> Et kantuy “Hedini tayulli ellan etan Kaban ey ebuh ida helag Levi ni mengeng tep hi-gadan ebuh pinutuk APU DIOS ni mansilbin hi-gatun ingganah.”

<sup>3</sup> Impaeyag David idan emin hu edum tun helag Israel ma-lat maemung idad Jerusalem et dalli alen hu Kaban APU DIOS et iha-ad dad indaddan tun pengihha-adan da. <sup>4</sup> Huyyadda helag Aaron ni padi niyadda helag Levi ni impaeyag tu: <sup>5</sup> Yad helag Kohat ey immali hu hanggatut et dewampulu e hi Uriel hu kamengipappangngulu. <sup>6</sup> Yad helag Merari ey immali hu dewanggatut et dewampulu e hi Asaiah hu kamengipappangngulu. <sup>7</sup> Yad helag Gerson ey immali hu hanggatut et telumpulu e hi Joel hu kamengipappangngulu. <sup>8</sup> Yad helag Elisaphan ey immali hu dewanggatut e hi Semaiah hu kamengipappangngulu. <sup>9</sup> Yad helag Hebron ey immali hu newalu e hi Eliel hu kamengipappangngulu. <sup>10</sup> Yad helag Ussiel ey immali hu hanggatut et hampulut dewwa e hi Aminadab hu kamengipappangngulu.

<sup>11</sup> Inaygan idan David etan padi e di Sadok nan Abiathar niyadda etan enem ni kamengipappangngulun helag Levi e hi Uriel, hi Asaiah, hi Joel, hi Semaiah, hi Eliel et hi

\* 15:1 15:1 Jerusalem hu ngadan tun hin-addum.

Amminadab <sup>12</sup> et kantun hi-gaday “Hi-gayu kamengipappangguluddan edum yun helag Levi, et humman hu, mahapul ni pehding yun emin hu elaw ni panlinnih ni annel yu et yulli alen hu Kaban AP-APU e Dios tayu helag Israel et iha-ad yud indaddan kun keihhadan tu. <sup>13</sup> Bimmunget hi AP-APU e Dios tayu et kastiguen daitso eman ni laputun tayu-et pengellaan tep beken kayun helag Levi ni nangnged nunman ni Kaban tu. Humman ni impahding tayu ey eleg tayu peamleng hi APU DIOS.”

<sup>14</sup> Et ipahding idan padi niyadda helag Levi hu elaw ni panlinnih dan annel da et han ida lumaw ni an mengellan Kaban AP-APU e Dios ni helag Israel ma-lat ilaw dad Jerusalem. <sup>15</sup> In-attang idan helag Levi hu Kaban APU DIOS tep humman dedan intugun tun Moses ni pehding da. <sup>16</sup> In-olden David idan kamengipappanggulun helag Levi e umpiliddan edum dan man-a-appéh niya mengippatnul idan cymbal, yadda ayyuding, niyadda gitalah ma-lat man-a-appéh idan kamengippeamleng ni pandeyyawan da. <sup>17</sup> Et huyyadda nepili: hi Heman e u-ungngan Joel, hi agitu hi Asap e u-ungngan Berehiah et hi Ethan e u-ungngan Kushaiah e nahlag nan Merari. <sup>18</sup> Yadda edum ni nepili: hi Sekariah, hi Jaasiel, hi Semiramot, hi Jehiel, hi Unni, hi Eliab, hi Benaiah, hi Maaseiah, hi Mattithiah, hi Eliphelehu, hi Mikneiah, et yadda kamangguwalyad eheb e di Obed Edom nan Jeiel. <sup>19</sup> Hi Heman, hi Asap et hi Ethan hu nepilin mengippatnul ni giniling ni cymbal. <sup>20</sup> Hi Sekariah, hi Asiel, hi Semiramot, hi Jehiel, hi Unni, hi Eliab, hi Maaseiah et hi Benaiah hu mengippatnul ni ayyuding. <sup>21</sup> Ey hi Mattithiah, hi Eliphelehu, hi Mikneiah, hi Obed Edom, hi Jeiel, et hi Asasiah hu nepilin mengippatnul ni gitalah. <sup>22</sup> Hi Kenaniah hu ap-apuddan emin ni helag Levi ni kan ngunun man-a-appéh niya mengippatnul idan kameussal di kapandeyyawi tep nelaing ni meippangger ni a-appéh. <sup>23-24</sup> Di Berehiah nan Elkanah et di Obed Edom nan Jehiah hu nepilin mangguwalyan Kaban Apu Dios. Ey hi Sebaniah, hi Joshaphat, hi Nethanel, hi Amasai, hi Sekariah, hi Benaiah, et hi Elieser hu papaddin mampetnul ni tangguyup di hinanggan Kaban Apu Dios.

<sup>25</sup> Limmaw di David niyadda kamengipappanggulun helag Israel niyadda aap-apun hanlibun sindalu tud baley Obed Edom ni an mengellan Kaban APU DIOS, e neiha-adan ni nekitbalan tu. Ey nemahhig hu nan-am-amlengan da. <sup>26</sup> In-appit dan Apu Dios hu pitun bulug ni baka et ya pitun kalneroh tep kameang-ang e binaddangan idan Apu Dios hu helag Levi ni nengiatang ni Kaban tu. <sup>27</sup> Kayyaggud ni peteg imbalwasin David niya imbalwasi tu pay hu ephod. Ey kayyaggud dama imbalwasiddan kaman-a-appéh, yadda kamengippatnul ni ayyuding niya gitalah, hi Kenaniah e ap-apu da niyadda nengiatang ni Kaban Apu Dios. <sup>28</sup> Emin ida helag Israel ey nekilaw idan an ngellan Kaban APU DIOS e neiha-adan ni nekitbalan tu. Indateng dad Jerusalem ey ida kamantetekuk ni amleng da niya daka pan-ipatnul ida tangguyup, yadda cymbal, yadda ayyuding niyadda gitalah. <sup>29</sup> Yan nunman ni daka pan-iddateng di bebley etan Kaban APU DIOS ey dimmu-ngaw di habhabyen hi Mikal e u-ungngan Saul ey inang-ang tu hi David e patul ni kamenattayyaw niya kamanpaypaytuk ni amleng tu, ey nemahhig nemihul tud nemnem tu.

## 16

<sup>1</sup> Indateng da etan Kaban et da iha-ad di neatepan ni tulda ni impedaddan David et iappitan da hi Apu Dios ni kagihheba niya kahemmula. <sup>2</sup> Negibbuh hi David ni nan-appit et bendisyonan tudda tuud ngadan APU DIOS, <sup>3</sup> et ika-pengan tuddan emin hu tuun neamung ni sinapay, ya neitangtang ni detag \* niya raisin.

<sup>4</sup> Pinutuk David ida helag Levi ni mengipappangguluddan tutu-un mandeyyaw ni AP-APU e Dios idan helag Israel di hinanggan Kaban ni pambeggaan dan bendisyon niya pansalamatan dan hi-gatu. <sup>5</sup> Pinutuk tu hi Asap ni mengipappanggulu, meihhayned hi Sekariah et han hi Jeiel, hi Semiramot, hi Jehiel, hi Mattithiah, hi Eliab, hi Benaiah, hi Obed Edom et hi Jeiel. Hi-gada manggitalah niya man-ayyuding. Hi Asap hu mengippatnul ni cymbal ey <sup>6</sup> yadda etan dewwan padin di Benaiah nan Jahasiel hu mantangguyup di hinanggan Kaban Apu Dios.

### *Ya a-appéh David*

<sup>7</sup> Yan nunman ni aggew hu nengidwatan David nan Asap niyadda edum tun helag Levi eyan a-appéh ni pampesalamatan dan APU DIOS: <sup>8</sup> Pansalamat itsun APU DIOS niya pandasal itsun hi-gatu. Tayu peenamtað kebebhebley ida impahpahding tu. <sup>9</sup> Iena-appéh tayu hu dayaw tu niyadda etan kaketngain tuun impahpahding tu. <sup>10</sup> Emin itsun kamengu-unnud nan APU DIOS ey igaggaya tayu hu kayyaggud ni peteg ni ngadan tu. <sup>11</sup> Hi-gatu pambagai tayun baddang niya hayukup itsud kad-an tun ingganah. <sup>12-13</sup> Hi-gayuddan helag Abraham e bega-en Apu Dios e helag ida daman Jacob ni pinili tun

\* 16:3 16:3 Ya hin-appil ni keibbellinan nunyad Hebrew ey han-akup ni dates.

pantu-u tu, nemnem yudda kaketngain tuun impahpahding Apu Dios ni panyaggudan yu niya nemnem yudda dama hi kalinimpiyuh ni nenuwet tu.

<sup>14</sup> Hi-gatu hu AP-APU e Dios tayu, et humman hu, mahapul ni u-unnuden tayun emin ni tuu eyad puyek ida tugun tu. <sup>15</sup> Eleg tu liwwana hu nekitbalan tu, anin ni pigan toon hu melebbah. <sup>16-17</sup> Et humman hu, pannananeng tu hu nekitbalan tun Abraham e humman dama insapatah tun Isaac. Impidwa tun inhel humman ni nekitbalan tun ingganah nan hi Jacob e hi Israel niyadda helag tu <sup>18</sup> e kantuy "Iddawat kun hi-gayu hu bebley di Kanaan ni beltanen idan helag yu."

<sup>19</sup> Yan nunman ey hahhakkey ida hu tuun Apu Dios ni nekibebley di diman Kanaan. <sup>20</sup> Immanal-aldan idan nekibenebbley di edum ni bebley ni nan-ap-apan idan nambakaklang ni patul. <sup>21</sup> Nem endi kuma hakey ni patul ni an nengipelilligat ni hi-gada, tep eleg iebulut nan Apu Dios ni pehding da humman ni hi-gada <sup>22</sup> e kantuy "Entan tudda panliligat hu pinilik ni tuuk niyadda prophets e bega-en ku."

<sup>23</sup> Hi-gatsun emin ni tutu-ud kebebbebley eyad puyek, ia-apphehi tayu hi APU DIOS! Peamta tayun kewa-wa-wa hu nenelakniban tun hi-gatsu. <sup>24</sup> Ey tayu paenamtan katuutuud kebebbebley hu dayaw tu niya peamta tayudda etan tuka pehpending ni kaketngain tuu. <sup>25</sup> Hi APU DIOS ey eta-gey ni peteg. Hi-gatu hu lebbeng tun daydayawen tayu e beken ni yadda etan linggeman ni dios. <sup>26</sup> Tep humman idan dios ey beken idan makulug ni dios, tep kinapyaddan tuu. Nem hi APU DIOS ey hi-gatu hu nanletun kabunyan. <sup>27</sup> Kameang-ang dayaw tu, ya kasina-gey tu niya et-eteng ni kabaelan tud Tempol tun tuka panha-adi, niya wada amleng diman. <sup>28</sup> Et humman hu, emin itsun tuu ey daydayaw tayu tep ya kasina-gey tu niya kabaelan tu. <sup>29</sup> Dayaw tayu hu ngadan APU DIOS et tayu iappitan di Tempol tu, tep humman dedan lebbeng tun pehding tayu. Ey panyuung itsun menaydayaw nan APU DIOS tep ya kasina-gey tu niya kakinyayaggud tu. <sup>30</sup> Emin itsun katuutuud kebebbebley ey panggegeygey itsud hinangga tu tep ya takut tayun hi-gatu e nengihammad eyan puyek et eleg meglied.

<sup>31</sup> Pan-am-amleng kayun emin e wada eyad puyek niya hi-gayun wadad kabunyan. Ehel tayuddan tutu-ud kebebbebley e hi APU DIOS hu patul. <sup>32</sup> Anin ni hi-gam e baybay niyaddan emin hu wadatan et itkuk yu hu penaydayaw yun hi-gatu. Ey pan-am-amleng kayu daman papayew anin idan hipan neitnem. <sup>33</sup> Ittekuk idalli daman keyew di muyung hu amleng dan ellian APU DIOS ni man-ap-apu eyad puyek.

<sup>34</sup> Pansalamat itsun APU DIOS tep ya kakinyayaggud tu. Ya impeminhed tu ey kamannananeng ni ingganah. <sup>35</sup> Kanyun hi-gatuy "Apu Dios e kamengihwang ni hi-gami. Ihwang dakemi anhan niya paenamut dakemin emin ni tutu-um ni neiwahhiwahhit di kebebbebley ma-lat maemung kamin mansalamat niya menaydayaw ni ngadan mun kayyaggud ni peteg." <sup>36</sup> Daydayaw tayu hu AP-APU e Dios tayun helag Israel. Em, daydayaw tayun ingganah.

Emin itu ey kantayuy "Amen! Daydayaw tayu hi APU DIOS!"

<sup>37</sup> Pinutuk David hi Asap niyadda edum tun helag Levi ni mampaptek ni ingganah di pandeyyawan di neiha-adan ni Kaban Apu Dios. Mahapul ni ippahding da ngunu dadman ni kewa-wa-wa. <sup>38</sup> Hi Obed Edom e u-ungngan Jeduthun niyadda etan na-nem et walun edum tu hu memaddang ni hi-gada. Ya ngunun Obed Edom nan Hosah ey mangguwalyaddad eheb. <sup>39</sup> Hi Sadok niyadda edum tun padi ey nannaneng idad Gibeon ni mampaptek di Tabernacle e pandeyyawan nan APU DIOS. <sup>40</sup> Yan kakkabbuhhan niyan kamangkehilleng ey mahapul ni wadaddan mengihheb ni kamei-appit di altar meippuun di neitudek ni Tugun APU DIOS ni indawat tuddan helag Israel. <sup>41</sup> Nei-dum ni hi-gadad Heman nan Jeduthun niyadda edum dan neputuk ni man-a-appheh ni pandeyyaw dan APU DIOS tep ya kamannananeng ni impeminhed tu. <sup>42</sup> Hi-gada mewar kan ngunun mantangguyup niya mampetnul idan cymbal niyadda edum ni kapetnul di kapan-a-apphehin pandeyyaw nan APU DIOS. Ya pamilyah Jeduthun hu kan ngunun mampaptek ni eheb.

<sup>43</sup> Negibbuh ida huyyan impahding da et umenamut idan emin hu tutu-ud baballey da. Anin hi David et immanemut damad baley tu.

## 17

### *Ya inhel nan APU DIOS nan David*

<sup>1</sup> Yan eman ni nanha-ad law hi David di baley tun impekapya tu ey kantun Nathan e prophet ey "Ma-nun hi-gak tep nakka manha-ad di nehammad ni baley ni nekappyan keyew ni sedar ey ya Kaban APU DIOS ey neiha-ad di neatepan ni tuldah." <sup>2</sup> Ey kan Nathan ni hi-gatuy "Ipahding mu hu hipan pinhed mu et baddangan dakan Apu Dios."

<sup>3</sup> Nem yan nunman ni hileng ey kan Apu Dios nan Nathan ey <sup>4</sup> “Mu ehel nan David e bega-en ku e kammuy ‘Huyya hu inhel APU DIOS: Beken ni hi-gam hu memehwat ni Tempol ni panha-adan ku. <sup>5</sup> Neipalpu eman ni nengihwangan kuddan aammed yun helag Israel di Egypt ingganah nunya ey eleggak manha-ad di tempol tep nanhaha-addak di neatepan ni tulдах ey nan-etaetannak. <sup>6</sup> Ey yan nunman ni nekikkillawwan kun hi-gada ey endi nak nengibgaan idan eman ni pinutuk kun nengipappangngulun hi-gadan memehwat idan baley kun mekapyad keyew ni sedar.

<sup>7</sup> Hi-gak e hi APU DIOS e Kabaelan tun emin ey ingkal dakad nebahah ni ngunum ni mampattul ni kalneroh et putuken dakan mampatul eyaddan tuuk ni helag Israel. <sup>8</sup> Nekikkillawwak ni hi-gam anin ni attu linawwam. Hedin immela kan an mekiggubbat idan buhul mu ey nakka memengngulu et apputen kudda. Ey pambalin dakallin kamekathal ni ap-apun mandingngel di kebebbley eyad puyek. <sup>9-10</sup> Intuduan dakeyun tuuk e helag Israel ni pambebleyan yun ingganah. Endi law mengippehelheltap ni hi-gayu eyad bebley yu. Yan inlian yudya ey ginubagubad dakeyuddan lawah ni tutu-u, nem meippalpun nunya ey endi law hanniman ni an meippahding. Hammaden kun e-helen e peapput kullin emin hu buhul yu niya iddawtan dakeyun helag yu.

<sup>11</sup> Hedin mepappeg ali biyag mu et meikkullung kad gungat idan aammed mu ey pambalin kulli hakey ni u-ungngam ni patul et ihammad ku pan-ap-apuan tu. <sup>12</sup> Hi-gatulli mengapyan tempol ku. Ey ang-angek et mannananeng hu pan-ap-apuan tu. <sup>13</sup> Hi-gatulli u-ungngak ey hi-gak ali ametu. Pannananeng kulli impeminhed ku niya pemaddang kun hi-gatu. Beken ni henin impahding kun Saul e ingkal kud pan-ap-apuan tu et ihullul daka. <sup>14</sup> Hi-gatulli puttunen kun mampatek idan edum tun helag Israel e tutu-uk niya pannananeng kullin ingganah hu pan-ap-apuan tu.’ ”

<sup>15</sup> Et lumaw hi Nathan di kad-an David et ehelen tun emin ni hi-gatu hu inhel Apu Dios.

#### *Ya dasal David*

<sup>16</sup> Entanni ey limmaw hi David e patul di kad-an APU DIOS et mandasal. Yimmudung e kantud dasal tuy “AP-APU e Dios, hi-gak niyadda pamilyah ku ey endi katteg ngu kelebengan mid impahding mun panyaggudan mi, <sup>17</sup> nem deh e mu kumedek kapan-e-dumi bendisyon ku tep ya binabbal mun hi-gak. Hinammad mun inhel hu pehding mun panyaggudan idan helag kun edum ni aggew, niya heni eta-gey saad kun muka pehding ni hi-gak. <sup>18</sup> Et humman hu, endi law hu edum ni nak e-helen ni hi-gam. Neka-amtam hu neitu-wan ku niya muwak kalispituhan bega-en mu. <sup>19</sup> Hi-gam kannemnem ni mengippahding ni hanneyan panyaggudan ku e bega-en mu niya hi-gam nengipeamtan hi-gak ni eta-gey ni saad kun edum ni aggew. <sup>20</sup> APU DIOS, endi edum ni inamta min henin hi-gam ni Dios mi. <sup>21</sup> Ey endi edum ni henin hi-gamin helag Israel ni inhwang mud neihbutan mid Egypt et pambalin dakemin tuum et wada inna-nu tun mandingngel hu ngadan mud kebebbley eyad puyek. Impahding mu hu kamengippetnga et pampakal mudda nampambebley ma-lat maihullul kamin tuum. <sup>22</sup> Em, APU DIOS, impambalin dakemin helag Israel ni tuum ni ingganah niya hi-gam hu Dios mi.

<sup>23</sup> Et yan nunya e APU DIOS ey iddasal ku e peamnum ma-lat maipahding ni ingganah etan hinammad mun inhel ni pehding mun panyaggudan ku niya panyaggudan idan helag ku. <sup>24</sup> Ey peamnum humman ni inhel mu et mandingngel hu ngadan mun ingganah di kebebbley ma-lat kan idallin tuu ey ‘Hi APU DIOS e Kabaelan tun emin hu Dios idan helag Israel.’ Et humman hu, pannananeng mu anhan hu pan-ap-apuan ku.

<sup>25</sup> Apu Dios, netuleddak ni mengiddasal idan nunyan hi-gam tep impeamtan ni hi-gak e bega-en mu e pampatul muddalli helag ku. <sup>26</sup> APU DIOS, hi-gam hu Dios, hinammad mun inhel ni hi-gak ida kayyaggud ni pehding mullin panyaggudan ku. <sup>27</sup> Et humman hu, peamnum humman ni inhel mu et bendisyonam ni ingganah ida helag ku. Hi-gam, APU DIOS, hu nambendisyon ni hi-gada, et nanna-ud ni mannananeng humman ni bendisyon mun hi-gada.”

## 18

#### *Ya nengapputan David di gubat*

<sup>1</sup> Entanni ey nekigubat mewan hi David idan iPilstia et apputen tudda. Piniliw tu Gath e bebley da, niyadda nanlinikweh ni bebley diman. <sup>2</sup> Inapput tudda pay iMoab et mambalin idan bega-en tu niya ida kamambeyyad ni buwis ni hi-gatu.

<sup>3</sup> Intu-nud tun ginubat hi Hadadeser e patul di Sobah ni neihnup di Hamat tep pinhed Hadadeser ni hi-gatu man-ap-apuddad bebley ni wadad ahpat ni Wangwang e Euphrates. <sup>4</sup> Et mengapput hi David niyadda sindalu tu et piliwen da hanlibun kalesah niya dimpap da pitun libun sindalun nengimanehoh idan nunman ni kalesah niyadda dewampulun

libun edum ni sindalu. Entanni et imandal David e pi-dayen dadda etan kebayyu. Ebu hanggatut idan nunman ni kebayyun eleg tu pepi-day ma-lat usalen idan sindalu tu.<sup>5</sup> Immalidda sindalun iSyria di Damascus ni memaddang nan Hadadeser e patul di Sobah nem ginubat di David ida et pateyen da dewampulut dewwan libun hi-gada.<sup>6</sup> Et mengapya hi David ni kampuddan sindalu tudman idan bebley ni sinekup tu et mambayad ida tudman ni buwis ni hi-gatu. Impengenapput nan APU DIOS hi David di emin ni tu nekigubatan.

<sup>7</sup> Entanni ey inlaw David ida etan happiyaw ni balituk ni inla tuddan ap-apun Hadadeser di Jerusalem.<sup>8</sup> Inla tu pay hu dakel ni giniling di Tibhat niyad Kun e bebley ni nan-ap-apuan Hadadeser. (Humman ida inusal Solomon ni nengapyan tangkih, yadda tukud niyadda edum ni usal di Tempol.)

<sup>9</sup> Dingngel nan Toi e patul di Hamat e inapput David idan emin sindalun Hadadeser e patul di Sobah<sup>10</sup> ey intu-dak tu u-ungnga tu e hi Joram ni an mengapngan David niya mengippeang-ang ni amleng tun nengapputan tun Hadadeser. (Di Toi nan Hadadeser ey nebayag ni nambubuhhulan ida.) Immitebin hi Joram ni balituk, ya silber niya giniling ni tu iddawat nan David.<sup>11</sup> In-appit nan David emin ida humman nan APU DIOS, e henin impahding tudda lan silber niya balituk ni inla tuddad edum ni bebley ni inapput tu. Ya ngadan idan nunman ni bebley ey Edom, Moab, Ammon, Pilistia niya Amalek.

<sup>12</sup> Hi Abishai e u-ungngan Seruiah ey inapput tudda iEdom di Nedeklan e Ahin et pateyen tu hampulut walun libun sindalu da.<sup>13</sup> Nampekapyan kampuddan sindalud kebebbley di Edom et mei-dum ida humman ni bebley ni sakup ni nan-ap-apuan David. Huyya mewan hakey ni keang-angan tu e impengenapput nan APU DIOS hi David di emin ni nekigubatan.

<sup>14</sup> Nan-ap-apu hi David idan emin ni helag Israel ey kayyaggud niya limpiyuh impahding tuddan tuu tu.<sup>15</sup> Hi Joab e u-ungngan Seruiah hu ap-apuddan sindalu tu. Hi Jehoshaphat e u-ungngan Ahilud hu kamampatek ni dokumintuh ni bebley da.<sup>16</sup> Hi Sadok e u-ungngan Ahitub nan hi Ahimelek e u-ungngan Abiathar hu padi da.<sup>17</sup> Hi Benaiah e u-ungngan Jehoiada hu ap-apun guwalyan David e patul. Ey yadda u-ungngan David hu opisyal tun kaumbaddang ni hi-gatu.

## 19

### *Inapput David ida iAmmon niyadda iSyria* (2 Samuel 10:1-19)

<sup>1</sup> Entanni ey netey hi Nahas e patul di Ammon et maihullul etan u-ungnga tu e hi Hanun ni nampatul.<sup>2</sup> Dingngel David huyya et kantuy "Mahapul ni peang-ang ku hu kayyaggud ni nakka pekiggayyum nan Hanun henin kayyaggud ni impeang-ang nan ametu lan hi-gak eman ni ketaggu tu." Et umitu-dak ni tuu tun an mengiddu-ngaw nan Hanun ma-lat peamta dan hi-gatu e kaumlemyung dama hi David ni neteyyan ametu e hi Nahas. Nem yan dintengan dad Ammon et lumaw idad kad-an nan patul e hi Hanun<sup>3</sup> ey kan idan aap-apud Ammon ey "Apu patul, kaw kammu nem ya nengitu-dakan David idan nunyan tuu tu ey ma-lat peamta da e kaumlemyung hi David tep netey hi amam? Beken mannuman tep immaliddan mansi-im eyan bebley tayu ma-lat nelakah daitsun apputen di gubat!"

<sup>4</sup> Kinulug Hanun humman ni inhel da et padpap tudda etan intu-dak David et kepuhan dan emin hu iming da niya pinututan da balwasi da e impappeg dad sipeda et han dadda palaw.<sup>5</sup> Et humman hu, ida law kaumbaing ni um-anemut di bebley da tep ya humman ni impahding dan hi-gada. Dingngel David humman et umitu-dak ni an menghel ni hi-gadan anin ni manha-ad ida nid Jericho ingganah umtemel iming da.

<sup>6</sup> Immalid nemnem nan Hanun niyadda iAmmon e impambalin da hi David ni buhul da et mambayad idan umlaw di na-pat ni libun kiloh ni silber ni abang ni kalesah ni usalen dad gubat niya abang idan mantakkay ni nalpud nengin-ahpat di Mesopotamia niyaddad bebley di Syria e Maakah niya Sobah.<sup>7</sup> Immalidda humman ni telumpulut dewwan libun kalesah ni inebangan da niyadda dakel ni sindalu etan ni patul di Maakah et ida mangkampud Medeba. Immalidda dama iAmmon et mei-dum idan hi-gada.

<sup>8</sup> Dingngel David mewan hu meippanggep nunman et itu-dak tu hi Joab niyaddan emin hu sindalu tu et ida makigubat ni hi-gada.<sup>9</sup> Yadda sindalud Ammon ey ida nampustuh di eheb di bebley da. Yadda etan patul ni immalin memaddang ni hi-gada ey ida dama nampustuh di a-allaw ni bebley.

<sup>10</sup> Inang-ang Joab e gubbaten daddad hinangga da niyad dingkuggan da et pilien tudda kelalla-ingan ni sindalu tu et hi-gada inhangga tuddan sindalun iSyria.<sup>11</sup> Pinili tu hi agitu hi Abishai ni mengippengnguluddan edum ni sindalu da ma-lat hi-gada

mekihhanggaddan iAmmon. <sup>12</sup> Kan Joab ni hi-gatuy “Hedin ang-angen mu e dakemi kapan-apputaddan iSyria, ali kayun memaddang ni hi-gami. Hanniman daman hi-gak e hedin ang-angen ku e dakeyu kapan-apputaddan iAmmon ey um-ali kamin memaddang ni hi-gayu. <sup>13</sup> Mahapul ni umtuled itsu e eleg itsu untakut! Ihhammad tayun mekiggubbat et iehnung tayu tutu-u tayu niyadda bebley tayun indawat Apu Dios ni hi-gatsu. Idasal tayu e ya pinhed APU DIOS hu meippahding.”

<sup>14</sup> Immelad Joab niyadda sindalu tun dadda gubbaten hu sindalun iSyria ey ida kamemsik. <sup>15</sup> Inang-ang idan iAmmon e ida kamemsik hu sindalun iSyria ey bimmesik ida dama tep simmakut idan Abishai niyadda sindalu tu, et humgep idad bebley da. Et mambanggad law di Joab di Jerusalem.

<sup>16</sup> Inang-ang idan iSyria e inapput idan helag Israel et umeyag idan edum ni sindalu dan wadad ba-hil ni Wangwang e Euphrates. Et ipenguluddan Sobak e ap-apuddan sindalun Hadadeser e patul di Sobah. <sup>17</sup> Dingngel David e immen idad Helam hu sindalun iSyria et amungen tudda sindalu tun helag Israel et man-agwat idad Wangwang e Jordan et ipustuh tudda e hinangga dadda sindalun iSyria. Inlapu dan manggugubat <sup>18</sup> ey neapput ida iSyria et bumsik ida. Pintey di David hu pitun libun iSyria ni nangkalesah niyadda na-pat ni libun edum dan sindalu. Pintey da pay hu ap-apun sindalun Syria e hi Sobak. <sup>19</sup> Yan nenang-angan idan patul idad bebley ni sinekup Hadadeser e neapput ida ey nekidagyum idan David et mambalin idan tutu-u tu. Neipalpun nunman ey eleg law pinhed idan iSyria ni baddangan ida iAmmon.

## 20

### *Sinekup David hu Rabbah*

*(2 Samuel 12:26-31)*

<sup>1</sup> Nemateng etan tsimpuh ni kapanggugubasiddan papatul e yan nunman hu negibuhan ni ahiketel ey impangulun Joab ida sindalu tu et da gubaten emin hu bebley di Ammon ey liniktub da hu Rabbah et hegepen da et bahbahaen da. Nem eleg makilaw hi David ni nunman tep nanha-ad di Jerusalem. <sup>2</sup> Wadadman etan dios ni kadeyyawaddan iAmmon e hi Molek ngadan tun napngetan ni balituk ni umlaw di telumpulut epat ni kiloh hu bel-at tu. Humman ni penget ey neal-alkusan ni nangkinginan batu.

Entanni ey neiunud hi David di Rabbah et dumteng diman. Ingkal tudda humman ni nenginan batu et iha-ad tud penget tu. Ey dakep pay hu illad David ni nangkebalol diman. <sup>3</sup> Sinekup di David humman ni bebley et piliten tudda bimmebley ni manggunnu e ussalen da gelgel, gabyon niya wahay. Hanniman dama impahding tuddan edum ni nambebley di Ammon. Negibbuh ni neipahding ida huuya et mambanggad hi David niyadda sindalu tud Jerusalem.

### *Ya nekigubatan dan etta-teng ni tutu-ud Pilistia*

*(2 Samuel 21:15-22)*

<sup>4</sup> Entanni mewan ey nanggugubat ida hu iPilistia niyadda helag Israel di Geser et meapput ida iPilistia. Pintey nan Sibbekkai e iHushah hi Sippai e helag idan etta-teng ni tuu.

<sup>5</sup> Entanni ey nanggugubat ida mewan hu iIsrael niyadda iPilistia et pateyen daman Elhanan e u-ungngan Jair hi Lahmi e agin Goliath la e tuud Gath. Et-eteng hu pahul Lahmi e heni kainetteng ni tukud ni kapengitta-yunin kaman-ebbel ni pan-ablan tu.

<sup>6</sup> Entanni ey nanggugubat ida mewan hu iPilistia niyadda helag Israel di Gath. Wada mewan hu hakey ni et-eteng ni tuun han-e-nem hu galumeyem ni ngamay tu niya dapan tu. Hi-gatu hu hakey ni helag idan etta-teng ni tuun nebayag. <sup>7</sup> Nemahhig e tudda kaheneghegnita sindalun helag Israel nem pintey Jonathan e u-ungngan Sammah e agin David.

<sup>8</sup> Humman idan etta-teng ni tuun iPilistia ni pintey di David niyadda sindalu tu ey nahlag ida etan ni etta-teng lan tutu-ud Gath.

## 21

### *Impabilang nan David emin hu tutu-ud Israel*

*(2 Samuel 24:1-25)*

<sup>1</sup> Entanniy pinhed Satanas ni iddawtan ida helag Israel ni panliggatan da et penemnem tun David ni pebilang ida tutu-u tu. <sup>2</sup> Et iolden David nan Joab niyadda edum ni ap-apun sindalu tu et kantuy “Lakkayuy di emin ni bebley di Israel meipalpuud Beersheba di south ingganah di Dan di north et bilangen yuddan emin hu helag Israel, tep pinhed kun amtaen hedin pigaddan emin.”

<sup>3</sup> Nem kan Joab ey “Hi APU DIOS hu mengippedakkel ni meminhanggatut hu tutu-u eyad Israel! Apu patul, bega-en muddan emin. Kele mu pehding huyya? Kaw beken ni pambekhulan emin ni helag Israel?” <sup>4</sup> Nem kapepillit nan David ni pehding Joab huyyan in-olden tu et lumaw hi Joab et tu hinapen emin ida bebley di Israel et han mambanggad di Jerusalem. <sup>5</sup> Et peamtan Joab nan David e ya bilang idan lalakkin kabaelan tun mekiggubbat ey hakey ni milyon et hanggatut ni libud Israel niya epat ni gatut et nepitun libud Judah. <sup>6</sup> Eleg pinhed Joab humman ni in-olden nan David et eleg tu pakibilang ida helag Levi nan Benjamin.

<sup>7</sup> Nem eleg ni hekey pinhed Apu Dios hu da nambilangan et kastiguen tudda helag Israel. <sup>8</sup> Et entannyi kan David nan Apu Dios ey “Nakka ebbuluta e nanliwattak ni hi-gam ni nak nengpahdingan nunya. Liwwan mu anhan huyyan nanliwatak. Eggak ni hekey nemnemen et ipahding ku huyya.”

<sup>9</sup> Et kan APU DIOS nan Gad e prophet David ey <sup>10</sup> “Mu ehel nan David e kammuy ‘Huyya inhel APU DIOS: Iddawtan dakan tellun pampillian mun pengastiguk ni hi-gam, et ya etan pillien mu hu ipahding ku.’”

<sup>11</sup> Et lumaw hi Gad di kad-an David et kantun hi-gatuy “Huyya inhel APU DIOS: ‘Hipa hu pinhed mun pengastiguk ni hi-gam: <sup>12</sup> ya tellun toon ni bisil, winu tellun bulan ni pemabhahan dakeyun buhul yu, winu tellun aggew ni nemahhig ni degeh ni i-alin anghel APU DIOS e hinnapen tun emin eya Israel.’ Hipa pillien mu et humman hu ihhumang kun APU DIOS?”

<sup>13</sup> Hinumang David ey kantuy “Nekalligat huttan ni nemnemen. Nem nakka pekeddukul ni hi APU DIOS mismuh mengastigun hi-gak tep et-eteng ni hemek tu, et beken ni ya tuu ussalen tun mengastigun hi-gak.”

<sup>14</sup> Et paelin APU DIOS hu nemahhig ni degeh idan helag Israel ey nepitun libu hu netey ni hi-gada. <sup>15</sup> Intu-dak tu etan anghel ni an memettey idan iJerusalem nem nantuttuyyu et kantu etan ni anghel ey “Hiyya ew law, entan tudda patey tudman.” Yan nunman ey kaman-eh-ehngeng etan anghel di kad-an ni illikan Araunah e Jebusite.

<sup>16</sup> Intangaw David di kabunyan ey inang-ang tu humman ni anghel ni kaman-eh-ehngeng e singded tu ispadah e nandaddan ni memettey idan iJerusalem. Et mambalwasiddan langgusih hi David niyadda etan kamengipappangngulu et lumukbub idad puyek. <sup>17</sup> Ey nandasal hi David e kantuy “Apu Dios, hi-gak hu nanliwat. Hi-gak hu nengipebilang idan tutu-u. APU DIOS e Dios ku, hi-gak niyadda pamilyah ku kastigum. Entan tu ilegat ida eya tutu-u tep beken ni hi-gada nanliwat.”

<sup>18</sup> Et an ehelen etan ni anghel APU DIOS nan Gad e tu e-helen nan David et lumaw di illikkan Araunah et mengapyan pan-appitan nan APU DIOS diman. <sup>19</sup> Inu-unnud David humman ni in-olden APU DIOS ni inhel Gad ni hi-gatu et lumaw. <sup>20</sup> Wada hi Araunah diman niyadda etan epat ni lakin u-ungnga tu e ida kaman-illik ni wheat. Yan nenangan dan etan ni anghel ey bimmesik ida etan epat ni u-ungngan Araunah et ida mantalu. <sup>21</sup> Inang-ang Araunah e iyalli hi David e patul ey hini-yan tu etan illikkan et tu dammuen et manyuung e neitumuk angah tud puyek.

<sup>22</sup> Kan David ni hi-gatuy “Igtang mun hi-gak eya puyek ni muka pan-illiki et mengapyaak ni pan-appitan APU DIOS ma-lat pasiked tu hu degeh ni neihipap di bebley tayu et kamangkettey ida tuu. Iddawat ku ustuh ni bayad tu.”

<sup>23</sup> Kan Araunah ey “Apu patul, iddawat kun hi-gam et usalen mud pinhed mun pengussalan. Adyah ida eya bakan i-appit mun kagihheba ey adyah ida eya keyew ni pan-illikan ni ittungun niya adyah ida wheat ni mei-dum ni mei-appit. Iddawat kun hi-gam idan emin huyya.”

<sup>24</sup> Nem himmumang hi David ey kantuy “Eleg, beyyadak etan ustuh ngu dedan ni bayad tu. Tep eggak i-appit nan APU DIOS hu hipan melpun hi-gam ni eggak beyyadi.”

<sup>25</sup> Et idwat tun Araunah etan bayad ni puyek ni pan-illikan e enem ni gatut ni balituk. <sup>26</sup> Nengapyan pan-appitan et man-appit nan APU DIOS ni kagihheba niya nan-appit ni pekiddagyuman ni hi-gatu. Nandasal ey hinumang APU DIOS et paeli ni apuy ni nalpud kabunyan et magihep ida etan neiappit di pan-appitan. <sup>27</sup> Entanni ey immehel hi APU DIOS etan ni anghel et ibangngad nunman ni anghel hu ispadah tud asip tu.

<sup>28</sup> Yan nenangan David e hinumang APU DIOS hu dasal tu ey nan-appit etan di illikkan Araunah. <sup>29</sup> Ya Tabernacle ni kinapyan Moses di eleg mebebleyi niya etan kapan-appisin kagihheba ey wadaddad Gibeon ni nunman ni tsimpuh. <sup>30</sup> Nem eleg peka-law hi David diman ni an mandeyyaw nan Apu Dios tep kaumtakut ni ispadah etan ni anghel APU DIOS.



## 22

<sup>1</sup> Et humman hu kan David ey “Yallidya hu kebehwatan ni Tempol nan AP-APU e Dios tayun helag Israel ey yallidya hu pengikkapyaan ni altar ni pan-appitan ni kagihheba.”

*Ya nandaddanan dan mengapyan Tempol*

<sup>2</sup> Inemung David e patul ni emin ida tutu-un nalpud edum ni bebley ni nekibebley di Israel et iolden tun mengapyaddan kuwaddadah ni batun meikkapyad Tempol. <sup>3</sup> Indawat tu dakel ni gumeke ni kapaen dan patak niya panhippit daddan eheb ni nekapan keyew niya dakel ni giniling e eleg melkud kiloh tu. <sup>4</sup> Impedaddan tu pay hu dakel e eleg mebillang ni talutuh ni sedar ni indawat idan iTyre niyadda iSidon. <sup>5</sup> Kan David di nemnem tuy “Ya etan Tempol ni behwatan alin u-ungngak e hi Solomon ey mahapul ni kayyagud niya mandinggel di kebebbebley. Nem u-ungnga ni et kulang ni inamta tu, et humman hu, idaddanak idan mahapul tu.” Et idaddanan David ni dakel ni meussal ni mekapan Tempol ni nunman ni ketaggu tu.

<sup>6</sup> Impaeyag tu hi Solomon e u-ungnga tu et ehelen tun hi-gatu hu pehding tun mengapyan Tempol nan APU DIOS e Dios idan helag Israel. <sup>7</sup> Kan David ni hi-gatuy “U-ungngak, nebayag ni pinhed kun behwatan hu Tempol ni pandeyyawan nan APU DIOS e Dios ku. <sup>8</sup> Nem kan APU DIOS ni hi-gak ey ‘Dakel hu pintey mun tutu-ud mu nekigubagubatan et dakel impaeyuh mun kuheyaw. Et humman hu, beken ni hi-gam hu memehwat ni Tempol ni keiddeyyawak.’ <sup>9</sup> Nem insapatah tun hi-gak e kantuy ‘Wadalli u-ungngan ni mampatul ni tsimpuh ni linggep. Tep eggak ali i-abulut ni an gubbaten idan buhul tud nanlinikweh. Iddawtak alin linggep hu Israel ni pampatulan tu. Yalli ngadan tu ey hi Solomon. <sup>10</sup> Hi-gatulli memehwat ni Tempol ni keiddeyyawak. Ibbilang kullin u-ungngak niya hi-gak ali pan-emma tu. Ey pannananeng kulli pan-ap-apan idan helag tud Israel.’

<sup>11</sup> Et yan nunya e Solomon e u-ungngak, ey iddasal ku ma-lat hi APU DIOS e Dios mu hu memaddang ni hi-gam niya hi-gatu mengippeamnun impakulug tu e baddangan dakan memehwat ni Tempol tu. <sup>12</sup> Ey nakka iddasal e iddawtan dakan APU DIOS e Dios mu, ni laing mu niya kabaalan mun man-ap-apudya Israel meippuun di Tugun tu. <sup>13</sup> Hedin u-unnudem ni emin ida tugun ni indawat APU DIOS nan Moses niyadda helag Israel ey meippahding emin hu pinhed mu. Mahapul ni pekedhel mu nemnem mu niya eleg ka mandewadewa. Entan takut mu niya entan kedismayah. <sup>14</sup> Deh e impahding kun emin kabaalan kun mengidaddan idan mahapul ni pemehwatan ni Tempol. Epat ni milyon ni kiloh ni balituk niya na-pat ni milyon ni kiloh hu silber ni indaddan ku. Dakel mewan giniling niya gumeke e eleg mebillang kiloh da. Ey indaddan kudda keyew niya batu, nem mahapul ni e-dumam ida huyya. <sup>15</sup> Dakel ida tutu-un dammutun panggunnum. Wadadda tutu-un panggunnum ni mengellan nepahek ni batu, yadda memehhek ni batu, yadda karpenter niya dakel ida nelaing ni menginggunnum <sup>16</sup> balituk, ya silber niya gumeke. Ilepum law ni pengunnum nunya. Et hi APU DIOS hu memaddang ni hi-gam.”

<sup>17</sup> Et iolden David ni emin idan kamengipappanggulun helag Israel e mahapul ni baddangan da hi Solomon nunman ni mengunnum. <sup>18</sup> Kantun hi-gaday “Hi AP-APU e Dios yu hu bimmenaddang ni hi-gayu niya impellingep dakeyu. In-abulut tun apputen kuddan emin tutu-ud nanlinikweh ni bebley, et yan nunya ey nambalin ida law ni tuu yu niya daka u-unnuda hi APU DIOS. <sup>19</sup> Et yan nunya ey ikahhakey yun mansilbin APU DIOS e Dios yu. Ilepum yun behwatan hu Tempol et iha-ad yudman hu Kaban ni nekitbalan tun hi-gatsu niyaddan emin etan kameussal ni penaydayawan ni hi-gatu.”

## 23

<sup>1</sup> Yan eman ni neka-a-amma law hi David e patul ey impambalin tu hi Solomon e u-ungnga tun patul di Israel.

*Ya ngunuddan helag Levi*

<sup>2</sup> Entanni ey inemung David idan emin hu kamengipappanggulun helag Israel, yadda padi niyadda edum dan helag Levi. <sup>3</sup> Binilang tun emin hu lalakkan helag Levi ni telumpulu toon tu winu nehuluk ey telumpulu et walun libu bilang da. <sup>4</sup> In-olden tu e yadda dewampulut epat ni libu hu mengippaptek ni ngunud Tempol APU DIOS, enem ni libu mengippaptek idan meittuddek niya mengippennuh ni diklamuh idan tuu, <sup>5</sup> yadda epat ni libu manguwalyad eheb ey yadda epat ni libu mandeyyaw nan APU DIOS e ussalen dadda et indawat ni patul ni meippatul. <sup>6</sup> Ginenedwan David ida helag Levi ni tellun grupuh meippuun di nahlagan da e hi Gerson, hi Kohat et hi Merari.

*Yadda helag Gerson e u-ungngan Levi*

<sup>7</sup> Hi Gerson ey wada dewwan u-ungnga tun laki e di Ladan nan Simei. <sup>8</sup> Hi Ladan ey wada tellun u-ungnga tun laki e hi Jehiel, hi Setham et hi Joel. <sup>9</sup> Hi-gada hu kamengipappangnguluddan edum dan nahlag nan Ladan. Hi Simei ey wada tellun lakin u-ungnga tu e hi Selomot, hi Hasiel et hi Haran. <sup>10-11</sup> Wada pay hu epat ni lakin u-ungnga Simei: hi Jahat, hi Sisa, hi Jeus et hi Beriah. Di Jeus nan Beriah ey ekket helag da, et humman hu neibilang idan hakey ni pewen.

*Yadda helag Kohat e u-ungngan Levi*

<sup>12</sup> Hi Kohat ey wada epat ni u-ungnga tun laki e hi Amram, hi Ishar, hi Hebron et hi Ussiel. <sup>13</sup> Ya etan pengulwan e hi Amram ey hi-gatu amad Aaron nan Moses. Hi Aaron niyadda helag tu hu neputuk ni mampeddin mengippaptek ni ingganah idan nengilinan ni kameussal. Hi-gada man-appit ni penaydayawan dan APU DIOS ey mansilbiddan hi-gatu niya mambendison idan tutu-ud ngadan Apu Dios. <sup>14</sup> Nem hi Moses e bega-en Apu Dios ey nei-dum hu helag tuddad helag Levi. <sup>15</sup> Dewwan laki u-ungngan Moses e di Gersom nan hi Elieser. <sup>16</sup> Ya kamengipappangnguluddan helag Gersom ey hi Sebucl. <sup>17</sup> Hi Elieser ey hakey ni ebuh u-ungnga tun laki e hi Rehabiah, nem dakel helag Rehabiah. <sup>18</sup> Ya meikkadwan u-ungngan Kohat e hi Ishar ey wada hakey ni u-ungnga tu e hi Selomit e hi-gatu ap-apun helag da. <sup>19</sup> Ya meikkatun u-ungngan Kohat e hi Hebron ey wada epat ni u-ungnga tu e hi Jeriah, hi Amariah, hi Jahasiel et hi Jekameam. <sup>20</sup> Ya meikka-pat ni u-ungngan Kohat e hi Ussiel ey wada dewwan u-ungnga tu e di Mikah nan hi Issiah.

*Yadda helag Merari e u-ungngan Levi*

<sup>21</sup> Hi Merari ey wada dewwan u-ungnga tu e di Mahli nan Mushi. Hi Mahli ey wada dama dewwan u-ungnga tun laki e di Eleasar nan Kish. <sup>22</sup> Nem netey hi Eleasar e endi u-ungnga tun laki, biiddan ebuh. Humman idan biin u-ungnga tu ey inahwa dadda agin dan lakin u-ungngan Kish. <sup>23</sup> Ya meikkadwan u-ungngan Merari ey hi Mushi. Tellu u-ungnga tu e hi Mahli, hi Eder et hi Jeremot. <sup>24</sup> Huyyadda helag Levi meippuun di nahlagan da niya pamilyah da e wada hakkeyey neitudek hu ngadan tu. Emin ida helag tun dewampulu toon tu winu nehuluk ey wada ngunu tud Tempol APU DIOS.

<sup>25</sup> Inhel dedan lan David ni nunman e kantuy "Ya etan AP-APU e Dios tayun helag Israel ey impellingep tudda tuu tu ey mambbley di deya Jerusalem ni ingganah. <sup>26</sup> Et humman hu, eleg law mahapul ni pehhapehhanen idan helag Levi etan Tabernacle niyaddan emin hu mahapul ni pandeyyawan." <sup>27</sup> Meippuun etan di nanggillig ni intugun David ey emin ida helag Levi ni dewampulu toon tu winu nehuluk ey meittudek hu ngadan da et mansilbiddan Tempol APU DIOS. <sup>28</sup> Huyyadda neidwat ni hi-gadan ngunnuen da: Baddangan dadda padin helag Aaron etan di kapandeyyawid Tempol, ippaptek dadda hu dallin niyadda kuwaltuh, ang-angen da ma-lat eleg mahibit etan ida neieng-eng ni kameussal di Tempol, niyadda pay edum ni ngunu dad Tempol. <sup>29</sup> Ey hi-gada mengippaptek ni sinapay ni kamei-appit nan Apu Dios, ya alinah ni kamei-appit, yadda meingpih ni sinapay ni eleg meha-adan ni kamampelbag, yadda neiheeng ni neiappit niyadda alinah ni nekamdugan ni lanan olibah. Hi-gada mewan mengikkilloh niya manlelkud idan kamei-appit di Tempol. <sup>30</sup> Ey man-a-appel idan penaydayaw dan APU DIOS ni kakkabbuhan niyan mahmahdem ni kewa-wa-wa. <sup>31</sup> Ey hi-gada umbaddang hedini wada mei-appit ni kagihheban Sabaduh etan ni Piyestah ni Kaketellakin Bulan niyaddan edum ni piyestah. Mansilbiddan Apu Dios ni kewa-wa-wa meippuun etan di neitudun ngunu da niya pedhing da. <sup>32</sup> Hi-gada mengippaptek ni Tabernacle niya Tempol niya umbaddang idaddan agi dan padin helag Aaron ni pandaydayawan di Tempol.

## 24

*Yadda ngunun padi*

<sup>1</sup> Huyyadda grupuh ni negenedwaan idan helag Aaron. Hi Aaron ey epat ida u-ungnga tun laki: hi Nadab, hi Abihu, hi Eleasar et hi Ithamar. <sup>2</sup> Nem netey di Nadab nan Abihu dedangngu, et han matey hi ameda, ey endi u-ungnga da. Et humman hu di Eleasar nan Ithamar ni ebuh hu nampadi. <sup>3</sup> Binaddangan di Sadok e helag Eleasar nan hi Ahimelek e helag Ithamar hi David e patul ni negenedwaddan helag Aaron ni dakel ni grupuh meippuun di neitudun ngunu da. <sup>4</sup> Yadda helag Eleasar ey negenedwaddan hampulut enem ni grupuh, ey yadda helag Ithamar ey negenedwaddan walun grupuh. Huyya impahding da tep daddakkel ida lakin helag Eleasar. <sup>5</sup> Wadadda opisyal niya kamengipappangngulun pandeyyawan di helag Eleasar niyad helag Ithamar et impambinnunut da hu meputtuk ni meidwat ni hi-gadan ngunnuen da ma-lat endi

keittuppagan tu. <sup>6</sup> Ida kamanhuhullul hu helag di Eleasar nan Ithamar ni umbunut ey ilislistan etan ni sekretarih e hi Semaiah e u-ungngan Nethanel e helag Levi hu neitudun ngunu dad hinanggan patul, yadda opisyal tu e hi Sadok e padi, hi Ahimelek e u-ungngan Abiathar, yadda etan kamengipappangngulun pamilyah ni padi, niyadda pamilyah idan edum dan helag Levi. <sup>7-18</sup> Huyyadda nanhenehened ni dewampulut epat ni pamilyah ni nengidwatan dan ngunu meippuun di nambubunutan da. Ya nangulu ey ya pamilyah Jehoiarib et maitu-nud ida hu pamilyah Jedaiah, hi Harim, hi Seorim, hi Malkijah, hi Mijamin, hi Hakkos, hi Abijah, hi Jeshua, hi Sekaniah, hi Eliashib, hi Jakim, hi Huppah, hi Jeshebeab, hi Bilgah, hi Immer, hi Hesir, hi Happises, hi Pethahiah, hi Jeheskel, hi Jakin, hi Gamul, hi Delaiah, niya pamilyah Maasiah. <sup>19</sup> Neilistadda huyyan pamilyah meippuun di ngunu dad Tempol niya meippuun di daka pehding ni ngunu dan inlapu eman ni ammed da e hi Aaron ni nengu-unnudan tun tugun AP-APU e Dios ni helag Israel.

*Ya listaan idan edum nihelag Levi*

<sup>20</sup> Huyyadda edum ni kamengipappangnguluddan pamilyah ni helag Levi.

Hi Sebucl hu kamengipappangngulun helag Amram. Hi Jehdeiah hu kamengipappangngulun helag Sebucl. <sup>21</sup> Hi Issiah hu kamengipappangngulun helag Rehabiah. <sup>22</sup> Hi Selomot hu kamengipappangngulun helag Ishar. Hi Jahat hu kamengipappangngulun helag Selomot. <sup>23</sup> Hi Jeriah hu kamengipappangngulun helag Hebron, hi Amariah hu meikkadwan hi-gatu, meikkatlu hi Jahasiel ey meikka-pat hi Jekameam. <sup>24-25</sup> Hi Mikah hu kamengipappangngulun helag Ussiel ey di Samir e helag Mikah nan hi Issiah e agin Mikah hu kamengipappangngulun helag Mikah. Hi Sekariah hu kamengipappangngulun helag Issiah. <sup>26</sup> Di Mahli nan Mushi hu kamengipappangngulun helag Merari. Hi Beno hu kamengipappangngulun helag Jaasiah. <sup>27</sup> Yadda u-ungngan Jaasiah e hi Beno, hi Soham, hi Sakur et hi Ibri hu kamengipappangngulun helag Merari. <sup>28</sup> Hi Eleasar hu kamengipappangngulun helag Mahli, nem endi u-ungnga tun laki. <sup>29</sup> Hi Kish ey wada hakey ni u-ungnga tu e hi Jerahmeel, et hi-gatu kamengipappangnguluddan edum tun helag Kish. <sup>30</sup> Hi Mahli, hi Eder ni hi Jerimot hu kamengipappangngulun helag Mushi. Huyyadda pamilyah ni helag Levi. <sup>31</sup> Imbubunut da dama ngunnuen da, henin impahding idan agi dan helag Aaron, di hinanggan David e patul, hi Sadok, hi Ahimelek niyadda kamengipappangnguluddan pamilyah idan padi niyadda pamilyah idan agi dan helag Levi, e beken ni yad toon da hu nengipunaan dan ngunnuen da.

## 25

*Yadda man-ap-appah di Tempol*

<sup>1</sup> Hi David e patul niyadda opisyal ni sindalu tu hu nemutuk idan edum ni pamilyah Asap, hi Heman et hi Jeduthun hu mengippeamtan inhel APU Dios niya mengipatnul ni ayyuding, ya gitalah niya cymbal. Huyyadda listaan idan neputuk ni mengipappangngulu niya mengituttuddun pehding dan mandeyyaw.

<sup>2</sup> Hi Asap ey epat ida u-ungnga tu e hi Sakur, hi Joseph, hi Nethaniah et hi Asharelah. Hi ameda e hi Asap hu kamengipappangngulun hi-gada, niya hi-gatu mengippeamtan inhel APU Dios hedini-olde ni patul.

<sup>3</sup> Hi Jeduthun ey enem ida u-ungnga tu e hi Gedaliah, hi Seri, hi Jeshaiyah, hi Simei, hi Hashabiah et hi Mattithiah. Hi ameda e hi Jeduthun hu kamengipappangngulun hi-gada, niya hi-gatu mengippeamtan inhel Apu Dios ey meunnudan ni ayyuding ya a-appah ni pandeyyaw niya pansalamat dan APU Dios.

<sup>4</sup> Hi Heman ey hampulut epat hu u-ungnga tu e hi Bukkiah, hi Mattaniah, hi Ussiel, hi Sebucl, hi Jerimot, hi Hananiah, hi Hanani, hi Eliathah, hi Giddalti, hi Romamti Eser, hi Josbekashah, hi Mallothi, hi Hothir et hi Mahasiot. <sup>5</sup> Hi Heman e prophet etan ni patul ey indawtan Apu Dios ni hampulut epat ni u-ungngatun laki niya tellun bii e humman dedan hu inhel tun hi-gatu ma-lat katbalan tu. <sup>6</sup> Hi-gatu kamengipappangnguluddan nunyan u-ungnga tun manggitalah, man-ayyuding niya mengipatnul ni cymbal ni daka pandeyyawid Tempol meippuun di olden ni patul. Nem di Asap, hi Jeduthun et hi Heman ey ya patul kamengi-olden ni ngunnuen da. <sup>7</sup> Huyyaddan tellun laki niyadda pamilyah da ey nelaing ida niya nan-adal idan meippanggep ni a-appah niya hipan kapetnul ni penaydayaw dan Apu Dios. Ya bilang dan emin ey dewanggat et newalut walu. <sup>8</sup> Neitudun hi-gada ngunu da meippuun di binnunut. Tep emin ida, anin ni u-ungnga winu nea-amma, kamantuttuddu winu kaman-eddal ey nambubunut ida et maitudu nisi ngunu da. <sup>9-31</sup> Huyyaddan dewanggat et newalut walun tuu ey negenedwaddan dewampulut epat ni grupuh meippuun di pamilyah da e wada hakey ni

mengippangngulun hanhakkey ni grupuh. Ya bilang ni hakey ni grupuh ey hampulut dewwa. Huyyadda nebinunut ni manhenened ni mengippahding ni ngunu da: hi Joseph e helag Asap, hi Gedaliah, hi Sakur, hi Seri, hi Nethaniah, hi Bukkiah, hi Asharelah, hi Jeshaiiah, hi Mattaniah, hi Simei, hi Ussiel, hi Hashabiah, hi Sebucl, hi Mattithiah, hi Jeremot, hi Hananiah, hi Josbekashah, hi Hanani, hi Mallothi, hi Eliathah, hi Hothir, hi Gidalti, hi Mahasiot, et hi Romamti Eser.

## 26

### *Yadda mangguwalyad Tempol*

<sup>1</sup> Huyyadda grupuh ni helag Levi ni mangguwalyad Tempol. Ya grupuh nan Meshelemiah e u-ungngan Kore di pamilyah Asap e helag Korah. <sup>2</sup> Huyyadda pitun u-ungnga tu meipalpuud pengulwan ingganah di udidyan: hi Sekariah, hi Jediael, hi Sebadiah, hi Jatniel, <sup>3</sup> hi Elam, hi Jehohanan et hi Eliehoenai.

<sup>4</sup> Hi Obed Edom ey binendisyonan daman Apu Dios ni walun u-ungnga tu. Huyyadda ngadan da meipalpuud pengulwan ingganah di udidyan: hi Semaiah, hi Jehosabad, hi Joah, hi Sakar, hi Nethanel, <sup>5</sup> hi Ammiel, hi Issakar et hi Peulleta.

<sup>6-7</sup> Hi Semaiah e pengulwan ni u-ungngan Obed Edom ey enem hu u-ungnga tu e hi Otni, hi Rephael, hi Obed, hi Elsadad, hi Elihu et hi Semakiah. Eta-gey saad dad pewen da tep et-eteng kabaelan da, nema-madda etan dewwan nanggillig tep wada hinappil ni laing da. <sup>8</sup> Na-nem et dewwa bilang emin ni nalpuud pamilyah Obed Edom ni kamangguwalya. Hi-gada ey nelaing idan mengippahding ni nunyan ngunu da.

<sup>9</sup> Yad pamilyah daman Meshelemiah ey hampulut walun laki hu nelaing daman mengippahding ni ngunu dan mangguwalya.

<sup>10-11</sup> Hi Hosah e helag Merari ey pinutuk tu hi Simri ni mengippangngulu, anin ni beken ni hi-gatu pengulwan ni u-ungnga tu. Yadda edum ni agin Simri ey hi Hilkiyah, hi Tebaliah et hi Sekariah. Ya bilang emin idan nalpuud pamilyah Hosah ni mangguwalyad Tempol ey hampulut tellu.

<sup>12</sup> Huyyaddan mangguwalyad Tempol ey negenedwadda meippuun di pamilyah ni nalpuud da ey neidwatan idan neduttuk ni ngunnuen da heniddan edum dan helag Levi. <sup>13</sup> Ya hakey ni pamilyah ey ida kamambubunut, anin ni kamenikken winu neamma, niya anin hipa adal da, ma-lat meamta hedin hipan eheb hu guwalyaan da. <sup>14</sup> Hi Selemiah ey binunut tu etan eheb di appit ni kasimmilin aggew ey ya etan u-ungngatu e hi Sekariah e kayyaggud tuka ittugun ey binunut tu eheb di appit ni north. <sup>15</sup> Hi Obed Edom ey binunut tu Eheb di South ni panguwalyaan tu, ey yadda lalakkin u-ungnga tu ey binunut da etan bodegah ni guwalyaan da. <sup>16</sup> Di Suppin nan Hosah ey binunut da etan Eheb di appit ni kakelinnugin aggew niya etan Eheb e Salleket di keltad di ahpat. Et manhulluhullul idan mangguwalya. <sup>17</sup> Kewa-wa-wa ey enem hu mangguwalyad appit ni kasimmilin aggew, niya epat di north, niya epat damad south. Niya epat dama mangguwalyad bodegah e handedwad hakey ni bodegah. <sup>18</sup> Yad dallin di appit ni kakelinnugin aggew ey epat hu mangguwalyad keltad ey dewwa etan di dallin mismuh. <sup>19</sup> Huyyadda netudun guwalyaan idan helag di Korah nan Merari.

### *Yadda edum ni meinggunnud Tempol*

<sup>20</sup> Yadda edum ni helag Levi ey hi-gada mengippaptek idan pengitluan ni hipan nebalol ni ngunut di Tempol niyadda bodegah ni pengihha-adan idan neieng-eng nan Apu Dios. <sup>21</sup> Hi Jeiel hu mengippangngulun pamilyah Ladan e helag Gerson. <sup>22</sup> Yadda pay etan dewwan u-ungngan Jehiel e di Setham nan Joel ey nei-dum idan mengippaptek ni pengitluan ni nangkebalol ni ngunut di Tempol niyaddad bodegah.

<sup>23</sup> Huyyadda kamengippangngulun helag Amram, hi Ishar, hi Hebron et hi Ussiel.

<sup>24</sup> Hi Sebucl e helag Gerson e u-ungngan Moses hu ap-apuddan mengippaptek ni nebalol ni ngunut di Tempol. <sup>25</sup> Ya agin Gerson ey hi Elieser e aman Rehabiah e aman Jeshaiiah e aman Joram e aman Sikri e aman Selomit. <sup>26</sup> Hi Selomit niyadda pamilyah tu hu mengippaptek idan neieng-eng nan Apu Dios ni indawat David, yadda kamengippangngulun pamilyah, yadda nahlagan da, yadda ap-apun sindalu tu <sup>27</sup> niyadda inla dad gubat ma-lat maiappit ma-lat mausal di Tempol. <sup>28</sup> Ey hi-gada hu ngenamung ni mengippaptek idan neiappit ni kameussal di Tempol, anin ida lan indawat nan Samuel e prophet, hi Saul e patul, hi Abner e u-ungngan Ner et hi Joab e u-ungngan Seruiah.

### *Ya ngunuddan edum ni helag Levi*

<sup>29</sup> Yad helag Ishar ey hi Kenaniah niyadda u-ungnga tu hu opisyal niya huwet e mengipennuh ni diklamuh idan helag Israel.

<sup>30</sup> Yad helag Hebron ey hi Hashabiah niyadda hanlibut pitun gatut ni agitun nangkelaing hu ngenamung ni meippanggep ni daka pansilbiin nan Apu Dios niya pansilbian dan patul ni Israel. Ey hi-gada mengipappangnguluddan nambebley di appit ni kakelinnugin aggew di Wangwang e Jordan. <sup>31</sup> Hi Jeriah hu mengipappangnguluddan helag Hebron. Yan meikka-pat ni pulun toon ni nampatuan David ey nehamak hu dokumintuh et meamtaan e yadda nangkelaing ni helag Hebron ey nambebley idad Jaser di Gilead. <sup>32</sup> Yad appit ni kasimmilin aggew di Wangwang e Jordan ey pinutuk David e patul hu dewwan libut pitun gatut ni mengipappangngulun pamilyah ni agiddan Jeriah. Et hi-gada ngenamung ni meippanggep ni panhibian nan Apu Dios niya pansilbian dan patul ni Israel. Yadman hu nambebleyan idan helag Reuben, helag Gad niyadda kagedwah ni helag Manasseh.

## 27

### *Yadda aap-apun sindalu*

<sup>1</sup> Huyyadda listaan ni aap-apun sindalun helag Israel ni mansilbi etan ni patul e hi-gada man-ap-apuiddan grupuh ni sindalun neputuk ni manggunnun kabulabulan ni hantoon. Hakey ni grupuh hu mansilbin hambulan, ey ya hakey ni grupuh ey dewwampulut epat ni libun tuu.

<sup>2-15</sup> Huyyadda aap-apid hanhakkey ni bulan: Ya ap-apun nemangulun grupuh ni mansilbi etan ni patul ni memengngulun bulan ey hi Jashobeam e u-unggan Sabdiel. Hi-gatu ey wadad grupuh ni helag Peres. Yan meikkadwan bulan ey hi Dodai e helag Ahoah. Hi Miklot hu neihayned ni hi-gatun kamengipappangngulu. Yan meikkatun bulan ey hi Benaiah e u-unggan Jehoiaadah e padi. Hi-gatu hu ap-apuiddan ngadanan ni 'Telumpulu'. Hi Ammisabad e u-ungga tu hu neihayned ni hi-gatun ap-apuiddan nunyan grupuh. Yan meikka-pat ni bulan ey hi Asahel e agin Joab, ey hi Sebadiah e u-ungga tu hu neihayned ni hi-gatun ap-apuiddan nunyan grupuh. Yan meikkelliman bulan ey hi Samhut e helag Israh. Yan meikka-nem ni bulan ey hi Ira e u-unggan Ikes e iTekoa. Yan meikkeppitun bulan ey hi Heles e helag Ephraim e iPelon. Yan meikkewwalun bulan ey hi Sibbekai e helag Serah e iHushah. Yan meikkahyam ni bulan ey hi Abieser e iAnathot e sakup ni bebley idan helag Benjamin. Yan meikkeppulun bulan ey hi Maharai e helag Serah e iNetopah. Yan meikkeppulut hakey ni bulan ey hi Benaiah e iPirathon e sakup ni bebley idan helag Ephraim. Yan meikkeppulut dewwan bulan ey hi Heldai e helag Otniel e iNetopah.

### *Yadda mengipappangngulun helag Israel*

<sup>16-22</sup> Huyya listaan idan mengipappangngulun helag Israel:

<b>Yadda helag Israel:</b>	<b>Yadda mengipappangngulun hi-gada:</b>
Reuben:	Hi Elieser e u-unggan Sikri
Simeon:	Hi Sephatiah e u-unggan Maakah
Levi:	Hi Hashabiah e u-unggan Kemuel
Aaron:	Hi Sadok
Judah:	Hi Elihu e hakey ni agin David e patul
Issakar:	Hi Omri e u-unggan Michael
Sebulun:	Hi Ismaiah e u-unggan Obadiah
Naptali:	Hi Jeremot e u-unggan Asriel
Ephraim:	Hi Hoshea e u-unggan Asasiah
Manasseh di appit ni kakelinnugin aggew:	Hi Joel e u-unggan Pedaiah
Manasseh di appit ni kasimmilin aggew:	Hi Iddo e u-unggan Sekariah
Benjamin:	Hi Jaasiel e u-unggan Abner
Dan:	Hi Asarel e u-unggan Jeroham.

<sup>23</sup> Insapatah APU DIOS e pedakkel tudda helag Israel henin kadinakkel ni bittuwen di kabunyan, et yan ngenipebilangan David ni hi-gada ey eleg tu pabilang ida kulang ni dewampulu toon tu. <sup>24</sup> Hi Joab e inetu hi Seruah ey inlapu tun nambalang idan tuu, nem eleg tu gibbuhen. Et eleg maitudek hu ustuh ni bilang dad libluh David e patul tep kinastigun Apu Dios ida helag Israel tep ya nemilangan daddan tuu.

### *Yadda mengippaptek ni limmun patul*

<sup>25-31</sup> Huyya listaan idan mengippaptek ni kinedangyan ni patul: Hi Asmabet e u-unggan Adiel hu mengippaptek idan alang niyadda bodegah ni patul di baley tu. Hi

Jonathan e u-ungngan Ussiah hu mengippaptek ni bodegah ni patul di probinsiya, yad munisipyu niyad baranggay, anin idan kapangguwalyai. Hi Esri e u-ungngan Kelub hu mengippaptek idan kamangngunnud payew. Hi Simei e iRamah hu mengippaptek idan kamangngunnud kapantennemin grapes. Hi Sabdi e iSephah hu mengippaptek ni bodegah ni meinum. Hi Baal Hanan e iGeder hu mengippaptek idan keyew e olibah niya sycamore idad duntug di appit ni kakelinnugin aggew. Hi Joas hu mengippaptek ni bodegah ni lanan olibah. Hi Sitrai e iSaron hu mengippaptek idan bakad Saron. Hi Saphat e u-ungngan Adlai hu mengippaptek idan bakad nedeklan. Hi Obil e helag Ismael hu mengippaptek idan kamel. Hi Jehdeiah e iMeremot hu mengippaptek idan donkey. Hi Jasis e helag Haggi hu mengippaptek idan gelding niyadda kalnero.

### *Yadda konsihal David*

<sup>32</sup> Hi Jonathan e kaemmaan David hu nelaing ni konsihal tu. Nekannemneman ey hi-gatu hakey ni kapantuddek etan ni patul ni pinhed tun petuddek. Hi Jehiel e u-ungngan Hakmoni hu mengippaptek idan u-ungngan David e patul. <sup>33</sup> Hi Ahithopel hu hakey mewan ni konsihal tu. Hi Hushai e Arkite e gayyum nan David hu hakey pay ni konsihal tu. <sup>34</sup> Netey hi Ahithopel et maihullul ni hi-gatu di Abiathar nan hi Jehoiada e u-ungngan Benaiah. Hi Joab hu ap-apuddan sindalun David e patul.

## 28

### *Ya intugun David meippanggep ni Tempol*

<sup>1</sup> Entanni ey impaeyag David emin hu opisyal di Israel ma-lat maemung idad Jerusalem. Et umliddan emin hu aap-apu, yadda aap-apun sindalu, yadda kamampaptek idan animal ni patul niyadda u-ungnga tu. Immalidda dama emin hu opisyal di palasyoh, yadda sindalun iJerusalem ni netuled niya nelaing ni mekiggubbat.

<sup>2</sup> Immehngeng hi David et kantun hi-gaday "Hi-gayuddan agik ey tutu-uk, dengel yu eya e-helek. Pinhed ku-et ni memehwat ni nehammad ni pengihha-dan ni Kaban ni neiha-dan ni nekitbalan APU DIOS ni hi-gatsu e kamei-ellig ni pengiddahyayan ni AP-APU e Dios tayu, ni helitu. Et idaddan kudda mahapul ni pemehwatan ni nunman ni Tempol ni keiddeyyawan tu, <sup>3</sup> nem kantun hi-gak ey 'Beken ni hi-gam hu memehwat ni Tempol ni keiddeyyawan ni ngadan ku, tep sindalu ka e dakel pintey mun tuu.'

<sup>4</sup> Hi APU DIOS e Dios tayun helag Israel ey pinutuk tuwak niyadda helag kun mampatul ni ingganah di deya Israel. Pinili tu helag Judah et yad helag Judah ey pinili tu pamilyah aman mampatul. Et yad pamilyah ama ey hi-gak hu pinili tun mampatul di deya Israel. <sup>5</sup> Winedan APU DIOS hu dakel ni u-ungngak ni laki et yan nunya ey hi Solomon hu pinutuk tun mampatul di deya Israel e bebley tu.

<sup>6</sup> Kan APU DIOS ni hi-gak ni nunman ey 'Ya etan u-ungngam e hi Solomon hu memehwat ni Tempol ku. Hi-gatu pinutuk kun pan-u-ungngak, ey hi-gak hi ametu. <sup>7</sup> Pannananeng ku hu pan-ap-apan tu hedini eleg tu issiked ni mengu-unnud ni tugun ku, henin tuka pehding nunya.'

<sup>8</sup> Et humman hu, yan nunya ey heninnuy hu ittugun kun hi-gayun tutu-uk di hinanggan APU DIOS niya hi-gayun emin ni neamung ni helag Israel e tuu tu: Mahapul ni peka-u-unnuden yun emin hu Tugun APU DIOS e Dios tayu ma-lat mannananeng itsun mambbley di deya e kayyagud ni bebley. Et yan edum alin aggew ey pebeltan tayuddan meittu-nud ni helag tayu et beltanen dan ingganah."

<sup>9</sup> Ey kantun Solomon ey "Hi-gam ni u-ungngak, ittugun kun hi-gam e hi Apu Dios e inu-unnud ku hu daydayaw mu niya ikahhakey mu nemnem mun mansilbin hi-gatu. Amta tun emin hu wadad nemnem tayu niyadda etan pinhed tayun ippahding. Hedin hi-gatu pandinnelan mu, man baddangan daka, nem hedin iwwalleng mu, man iwwalleng dakan ingganah. <sup>10</sup> Nemnem mu e hi-gam hu pinutuk APU DIOS ni memehwat ni Tempol tu. Et humman hu pekedhel mu nemnem mu et ipahding mu humman."

<sup>11</sup> Et idwat David nan Solomon hu planuh ni Tempol, e humman ida planuh ni bodega, yadda kuwaltuh niya etan Nekassantuh ni Kuwaltuh APU DIOS. <sup>12</sup> Indawat tu pay hu planuh ni dallin, yadda kuwaltuh di nanlinikweh, yadda bodegah ni pengihha-dan ni kameussal di Tempol niyadda kuwaltuh ni keihha-dan ni mei-eng-eng ni AP-APU e Dios tayu. <sup>13</sup> Ey intugun tu pay nan Solomon hu ngunuddan padi niyadda edum dan helag Levi di Tempol APU DIOS, niya intugun tu pehding dan mengippaptek idan ngunut ni kameussal diman. <sup>14</sup> Intugun tu piga silber niya balituk ni meussal ni pengapayaan daddan nunman ni kameussal di Tempol, <sup>15</sup> henin balituk niya silber ni pengippettukan ni kengkeh, yadda kengkeh <sup>16</sup> yadda silber ni tebol, yadda balituk ni tebol ni keihha-dan idan neieng-eng ni sinapay ni kamei-appit nan Apu Dios, <sup>17</sup> yadda tebeng, yadda mahukung ni duyu, yadda bewed, yadda duyu, <sup>18</sup> pigan nemahmah ni balituk ni meussal

ni pengapyaan dan pan-appitan ni panggiheban ni insensoh, niyadda etan anghel ni nebekyag payak dad ta-pew ni Kaban ni neiha-adan ni nekitbalan APU DIOS. <sup>19</sup> Ey kan David e patul nan hi Solomon e u-ungnga tu ey “Emin ida huyya ey wada etan di planuh ni neitudek ni indawat APU DIOS ni hi-gak.”

<sup>20</sup> Entanni mewan ey kan David nan Solomon ey “Pekedhel mu nemnem mu, entan takut mu niya entan kedismayah mu. Ilepum ni memehwat ni Tempol ey ang-ang mu et endi mengippesikked ni hi-gam, anin ni hipa. Tep baddangan daka etan ni AP-APU e Dios ni nakka daydayawa. Eleg daka iwwalleng ni hi-gatu, nem baddangan daka ingganah ni megibbuh humman ni Tempol. <sup>21</sup> Yadda padi niyadda edum dan helag Levi hu mengingunnuddan ngunud Tempol. Ey umbaddang ni hi-gada etan ida nelaing di hipan ngunu. Ey emin ida tuu, anin idan kamengippangngulu ey nandaddan idan mengu-unnud ni i-olden mun hi-gada.”

## 29

### *Yadda neidwat ni mei-ussal ni pemehwatan dan Tempol*

<sup>1</sup> Entanni ey kan David ida etan ni tuu ey “Ya eya u-ungngak e hi Solomon ni pinutuk Apu Dios ey u-ungnga pay ni, et endi pinatnaan tun hipan ngunu. Ey et-eteng ni peteg humman ni ngunun meipahding tep beken ni palasyoh ni tuu, nem Tempol ni AP-APU e Dios. <sup>2</sup> Impahding kun emin hu kabaalak ni mengemmung idan emin ni mahapul ni pemehwatan ni Tempol, heniddan balituk, yadda silber, yadda giniling, yadda gumek, yadda keyew, yadda nenginan batu niyadda gamgam, yadda etan edum ni batun mei-alkus niya dakel ni marbol. <sup>3</sup> Yan nunya ey iddawat ku dakel ni silber ku niya balituk ku et mei-dum etan idad indaddan ku tep et-eteng hu neminshed kun Tempol Apu Dios. <sup>4</sup> Iddawat ku hanggatut et hampulut liman libun kiloh ni nemahmah ni balituk niya dewanggatut et na-nem et liman kiloh ni nemahmah ni silber ni pan-alkus idan dingding ni Tempol <sup>5</sup> niyaddan emin ni kapyaan idan nelaing ni mengapyan kumpulmih ni meussal di Tempol. Hipadda dama neminshed ni um-idwat nan APU DIOS?”

<sup>6-7</sup> Et idwat damaddan aap-apun helag Israel, yadda opisyal, yadda ap-apun sindalu, yadda kamengipaptek ni puyek niya animal ni patul niyadda u-ungnga tu hu nehuluk ni hanggatut et nepitut dewwan libun kiloh ni balituk, nehuluk ni enem ni gatut et hampulut tellun libun kiloh ni giniling, niya nehuluk ni tellun million ni kiloh ni gumek ma-lat mausal ni pemehwatan dan Tempol. <sup>8</sup> Yadda etan wada nenginan batu da ey indawat da et maiha-ad di bodegah ni Tempol et hi Jehiel e helag Gerson e helag Levi hu mengipaptek idan nunman. <sup>9</sup> Eleg mapilit ida tuun immidwat nan APU DIOS ey ida kaman-am-amleng tep dakel ni peteg hu neidwat. Ey kaman-am-amleng dama hi David e patul.

### *Dineyaw David hi APU DIOS*

<sup>10</sup> Hi David ey dineyaw tu hi APU DIOS di hinanggaddan neamung ni tuu e kantuy “AP-APU e Dios idan eman ni ammed mi e hi Jacob, medaydayaw kan ingganah! <sup>11</sup> Kaka medeyyaw niya et-eteng ni kabaalam, tep emin ida wadad kabunyan niyad puyek ey nalpun hi-gam. Hi-gam hu patul ni kamekangngapput niya kamedaydayaw. Kaka methal ni peteg. <sup>12</sup> Hi-gam hu kakelpuin kinedangyan niya dayaw, niya hi-gam ni ebuh AP-APU. Muka pambalin hu hakey ni tuun kametbal niya et-eteng ni kabaalan tu tep hi-gam hu kakelpuiddan nunya. <sup>13</sup> Et yan nunya ey mampesalamat kamin hi-gam e Dios mi niya daydayawen mi hu kamedaydayaw ni ngadan mu.

<sup>14</sup> Hi-gak niyadda eya tutu-uk ey beken ni kammi ey hi-gami um-idwat ni hi-gam, tep emin hu wadan hi-gami ey nalpu ngu dedan ni hi-gam. Pebanggad min ebuh hu indawat mun hi-gami. <sup>15</sup> APU DIOS, nekibebley kamin ebuh eyad puyek henidda lan aammed mi. Ya panha-adan mi eyad puyek ey kamei-ellig di allinnew ni ebuh ni nelabah. <sup>16</sup> AP-APU e Dios mi, in-ali min emin ida huyyan kinedangyan ma-lat memehwat kamin Tempol ni penaydayawan min hi-gam, nem nalpun hi-gam ida huyya, tep hi-gam hu nalpuan ni emin. <sup>17</sup> Inamtak, e APU DIOS e muka patnai wadad nemnem idan tutu- niya kaka um-amleng hedin kayyaggud hu daka pehpending. Ya kakulugan tu ey nakka man-am-amleng ni mengidwat ni hi-gam ni emin idan nunya, ey inang-ang ku e ida dama kaman-am-amleng eyadda tutu-un nengi-lin iddawat dan hi-gam. <sup>18</sup> AP-APU e Dios idan eman ni aammed mi e hi Abraham, hi Isaac, et hi Jacob, pannananeng mun ingganah anhan hu kapengu-unnud niya impeminshed idan eyan tutu-un hi-gam. <sup>19</sup> Tha-ad mud puhu eyan u-ungngak e hi Solomon hu et-eteng ni impeminshed tun mengu-unnud ni tugun mu niya et-eteng ni impeminshed tun memehwat ni Tempol ni indaddanan kun mahapul.”

<sup>20</sup> Ginibbuh David ni nandasal et hantu iolden idan tutu-u e kantuy “Dayaw yu hu AP-APU e Dios tayu!” Et emin ida etan tuun neamung ey dineyaw da hu AP-APU e Dios idan aammed da e nanyuung ida ey nandukkun idad hinanggan AP-APU e Dios niyad hinanggan David e patul.

<sup>21</sup> Yan newa-waan tu ey nan-appit idan APU DIOS hu tutu-u. In-appit da hu hanlibun lakkitun baka, hanlibun lakkitun kalneroh niya hanlibun impah ni kalneroh e giniheb da etan di pan-appitan. Ey in-ali da kamei-appit ni meinnum niyadda dakel ni in-appit idan helag Israel.

<sup>22</sup> Et yan nunman ni aggew ey ida nan-am-amleng idan emin ey nengan ida niya nenginum idad hinanggan APU DIOS. Yan nunya pidwatun pengebbulutan da e hi Solomon e u-ungngan David hu meihhullul ni patul da. Et duyagan da ulu tun lana ma-lat keang-angan tu e hi-gatu pampatul da, ey dinuyagan da dama ulun Sadok et hi-gatu mambalin ni padi da. <sup>23</sup> Et maihullul hi Solomon nan ametun yimmudung di yuddunggan ni patul APU DIOS. Kayyaggud emin hu nekapkapyan nampatuluan tu niya inu-unnud idan emin ni tutu-ud Israel. <sup>24</sup> Emin ida opisyal niyadda sindalu ey insapatah da e hi-gatun ebuh hu pansilbian da. Anin idan edum ni u-ungngan David et insapatah da e hi-gatun ebuh hu patul da. <sup>25</sup> Impambalin APU DIOS hi Solomon ni kamekatbal ni peteg di nampatuluan tu niya impekedangyan tu e kamedeyyaw ni peteg nem yadda edum ni nampatul di Israel.

#### *Ya neteyyan nan David*

<sup>26</sup> Hi David e u-ungngan Jesse ey nampatul di Israel <sup>27</sup> ni na-pat ni toon. Nambebley di Hebron ni pitun toon niyad Jerusalem ni telumpulut tellun toon ni nunman ni nampatuluan tu. <sup>28</sup> Kayyaggud hu biyag tu, kedangyan ey kapakatbaladdan tutu-u. Netey eman ni nekaa-ammaan tu et maihullul ni nampatul hi Solomon e u-ungnga tu. <sup>29</sup> Neitudek di liblu idan prophet e hi Samuel, hi Nathan, et hi Gad ni emin hu neipenahding ni nampatuluan David neipalpun laputu ingganah ni pappeg tu, <sup>30</sup> e humman ida impahding tun kei-ang-angan ni et-eteng ni kabaelan tu, yadda neipenahding ni hi-gatu ni ya bebley e Israel niyadda bebley di nanlinikweh.



## 2 Chronicles

*Ya meippanggep eyan libluh ni 2 Chronicles*

Huyyan libluh ni meikkadwan Chronicles ey peamta tu e hi Apu Dios ey eleg tu iwalleng ida tuu tun helag Israel. Humman ida etan hahhakkey ni hi-gadan nambangngad di Israel ni nalpud Babilon e neihbutan da. Yan nunman ni nambebleyan da mewan di Israel ey nedismayah ida tep dakel hu buhul da. Anin ida etan eleg mengullug nan Apu Dios ni nekibebley ni hi-gada et ida kamekibbuhul ni hi-gada.

Nem impenemnem etan ni nengitudek eyan libluh ni hi-gada e peyaggud ida mewan Apu Dios heni lan nunman. Et yan ebuh hu kayyaggud ni pehding da ey medinnel idan hi-gatun memaddang niya mengippaptek ni hi-gadan nunya et yallin edum ni aggew.

*Ya neitudek eyad libluh:*

1. Impeyaggud Apu Dios hu ammed idan helag Israel ni nengidwatan tun hi-gada etan ni Tempol ni daka penaydayawin hi-gatu niya ya nemutukan tun Solomon ni patul da et idwat tu hu laing tun man-ap-apun hi-gada. (chapters 1-9)
2. Iddawat Apu Dios idan hu gun-uden etan nanengtun kamengu-unnud ni hi-gatu, nem kastiguen tudda etan eleg mengu-unnud ni hi-gatu. Ya pengi-ang-angan e makulug huyya ey ya etan di impahding tuddan patul di Judah niyadda tutu-udda lan nunman. (chapters 10-36)

*Ya laing hu imbagan Solomon e patul di dasal tu  
(1 Kings 3:1-15)*

<sup>1</sup> Hi Solomon e u-ungngan David e patul ey neihammad law hu nan-ap-apuan tud Israel tep binendisyonan APu DIOS e Dios tu niya indawtan tun et-eteng ni kabaelan tu.

<sup>2</sup> Ineyagan tun emin hu tutu-ud Israel, yadda eta-gey ni ap-apun sindalu, yadda huwet, yaddan emin hu opisyal ni gubilnu, niyaddan emin hu ap-apun pamilyah da <sup>3</sup> et ipengulu tuddad kapenaydayawid Gibeon, tep yadman kad-an ni Tabernacle APu DIOS ni kinapyan eman lan bega-en tu e hi Moses di eleg mebebleyi. <sup>4</sup> Ya etan Kaban APu DIOS ey inha-ad David e patul di neatepan ni tuldah ni ingkapyu tud Jerusalem eman ni tu nengal-an nunman di Kiriat Jearim. <sup>5</sup> Nem ya etan di giniling ni altar ni kinapyan Besalel e u-ungngan Uri ey inap-apun Hur ey nanengtudman Gibeon di hinanggan etan ni Tabernacle nan APu DIOS. Et mukun limmaw diman di Solomon niyaddan emin hu tutu-u ma-lat ida mandayaw nan APu DIOS. <sup>6</sup> Et man-appit idan hanlibun animal ni kagihheba etan di giniling ni altar diman di hinanggan Tabernacle ni penaydayaw dan APu DIOS.

<sup>7</sup> Yan nunman ni hileng ey nampeang-ang hi Apu Dios nan Solomon et kantuy "Hipa pinhed mun iddawat kun hi-gam?"

<sup>8</sup> Himmumang hi Solomon ey kantuy "Impeenang-ang mu et-eteng ni neminhed mun ama e hi David, ey yan nunya ey impambalin muwak ni neihullul ni hi-gatun mampatul.

<sup>9</sup> Hi-gam e AP-APu e Dios, peamnum anhan ni ippahding hu insapatah mun ama. Impambalin muwak ni patul eyaddan dakel ni peteg ni tutu-un eleg mebillang, <sup>10</sup> et humman hu, idwasi muwak anhan ni laing ma-lat amtak pehding kun man-ap-apun hi-gada. Tep kaw hipa tuun kabaelan tun man-ap-apu eyan dakel ni peteg ni tutu-um?"

<sup>11</sup> Hinumang Apu Dios hi Solomon ey kantuy "Beken ni ya kinedangyan winu ya keiddeyyawan winu ya ketteyyan idan buhul mu winu ya andukkey ni biyag hu kindew mun hi-gak, nem ya laing mun man-ap-apu eyaddan tutu-uk, <sup>12</sup> et humman hu, iddawat kun hi-gam huttan ni muka kekdewa. Niya iddawtan daka pay ni kinedangyan niya dayaw ni eggak idwat idan edum ni patul lan nunman, niyaddalli meihhayned ni hi-gam."

*Ya et-eteng ni kabaelan niya kinedangyan nan patul e hi Solomon  
(1 Kings 10:26-29)*

<sup>13</sup> Entanni et hi-yanen Solomon hu Gibeon e kad-an ni Tabernacle et mambangngad di Jerusalem. Et yadman nanha-adan tun nampatulan tud Israel. <sup>14</sup> Inemung Solomon hu hanlibu et epat ni gatut ni kalesah ni kameussal di gubat niya hampulut dewwan libun kebayyu et ilaw tuddad kinapya tun bebley ni keihha-adan da, ey inha-ad tu edum di Jerusalem. <sup>15</sup> Yan nunman ni nampatulan tu ey dakel ni peteg hu silber niya balituk di Jerusalem henin kadinakkel ni batu, niya dakel ni peteg hu keyew ni sedar henin kadinakkel ni keyew ni sycamore di hengeg idan duntug di Judah. <sup>16</sup> Yadda kebayyun Solomon ey gintang idan ahenteh tud Egypt niyad Silisia e nebayadan meippuun di

kemeunnud ni kapemeyyad. <sup>17</sup> Yan nunman ni tsimpuh ey enem ni gatut ni silber hu bayad ni hakey ni kalesah ni meussal di gubat e neidteng di Jerusalem ni nalpud Egypt. Ey ya hakey ni kebayyu ey hanggatut et neliman silber hu bayad tu. Kagettangaddan ahenteh Solomon ida humman di Egypt ni han da inggatang damaddan patul idan Hittite niyadda patul di Syria.

## 2

### *Ya nandaddanan dan nebehwatan ni Tempol (1 Kings 5:1-18)*

<sup>1</sup> In-olden Solomon e patul e behwatan da hu Tempol ni penaydayawan nan APU DIOS niya palasyoh ni panha-adan tu. <sup>2</sup> Impangngunu tudda nepitun libun tutu-un manbunnag idaddan mahapul ni meikkapya, yadda newalun libun tutu-un mampehhek ni batu niya tellun libu et enem ni gatut ni porman ni menang-ang idan nunyan mampangngunu.

<sup>3</sup> Entanni ey nantudek hi Solomon nan Hiram e patul di Tyre e kantuy “Pei-lii muwak anhan idan talutuh ni sedar henin impahding mun nengapyaan ama hi David ni palasyoh tu. <sup>4</sup> Nakka pambehwata Tempol ni penaydayawan nan AP-APU e Dios kun meing-eng ni hi-gatun pengihheban ni insensoh niya pengiha-adan idan sinapay ni kamei-appit ni hi-gatu, ya pengi-appitan ni kagihheba niya kamei-appit ni kakkabbuhhan niyan kamangkehillehng, yan Sabaduh, yan Piyestah ni Kaketellakin Bulan niyaddan edum ni aggew ni mika penaydayawin AP-APU e Dios mi. In-olden ni Dios min hi-gamin helag Israel e pehding midan emin huayan ingganah.

<sup>5</sup> Implanuh kun memehwat ni kayyagguud niya et-eteng ni Tempol tep ya Dios mi ey e-etteng ni peteg kabaelan tu nem yadda edum ni dios. <sup>6</sup> Nem ya kakulugan tu ey endi hakey ni tuun kabaelan tun memehwat ni baley ni panha-adan Apu Dios, tep anin ni ya etan mahkang ni peteg ni kabunyan et kulang ni panha-adan tu. Et humman hu, hipa-ak kuman tu kabaelan ni memehwat ni Tempol ni panha-adan tu? Ya dammutun kapyaen kun ebuh ey ya pengiggihheban idan kamei-appit ni hi-gatu.

<sup>7</sup> Itu-dak kallin hakey ni tuun nelaing ni ngunu meippanggep ni balituk, ya silber, ya giniling niya gumeke, niya nelaing ni mangku-lit idan nunman. Ey nelaing pay ni mengapyan blue, purple, niya madlang ni luput. Mei-dum ni mekingngunnuddan nelaing ni mangngunun tutu-ud Judah niyad Jerusalem ni pinilin ama hi David. <sup>8</sup> Ey pei-lii muwak idan talutuh ni sedar, yadda cypress niyadda juniper ni melpud Lebanon tep inamtak e nelaing ida tuum ni manlelneh ni keyew. Um-itu-dakkak idan tuuk ni memaddang idan tuum <sup>9</sup> ni mengiddaddan ni dakel ni talutuh, tep huayan Tempol ni planuh kun behwatan ey et-eteng ni peteg niya kayyagguud. <sup>10</sup> Peellik hu kenen idan tuum ni manlelneh. Iddawat ku hu hanggatut ni libun langgusih ni wheat, hanggatut ni libun langgusih ni barley, hanggatut et hampulun libun galon ni meinum niya hanggatut et hampulun libun galon ni mansikan olibah.”

<sup>11</sup> Intudek nan Hiram hu humang tun nan Solomon et palaw tu. Kantud tudek tuy “Nakappinshed APU DIOS ida tuu tu, et humman hu, impambalin dakan patul da. <sup>12</sup> Medaydayaw hi AP-APU e Dios idan helag Israel ni nengapyan kabunyan niya puyek e nengidwat nan David ni nekallaing ni u-ungga tun dakel amta tu. Et yan nunya ey pinhed tun memehwat ni Tempol ni AP-APU niya palasyo ni pambelleyan tu. <sup>13</sup> Ittu-dak kud kad-an mu hi Hiram e nekallaing niya kayyagguud ni peteg tuka pangngunu. <sup>14</sup> Helag nan Dan hi inetu niya iTyre hi ametu. Inamta tun mengingngunun balituk, ya silber, ya giniling, ya gumeke, ya batu niya keyew. Nelaing mewani ni mengingngunun luput e ussalen tu blue, purple niya madlang niya naka-amta tun mengingngunun kayyagguud ni luput. Kabaelan tun pehding hu kumpulmih ni pangku-lit niya hanu-unnud tu hu kumpulmih ni pan-al-alkus ni hipan pengunun hi-gatu. Dammutun baddangan tudda tuum niyadda kapangngunun amam e hi David. <sup>15</sup> Pei-lim ida wheat, ya barley, ya meinum niya mansikan olibah ni kammun iddawat mu. <sup>16</sup> Et lengehen min emin hu sedar ni mahapul mud duntug di Lebanon et lakehen midat anuden mid baybay ingganah di Joppa et yu alen diman et ienamut yud Jerusalem.”

### *Ya neilepuan ni nekapyaan ni Tempol (1 Kings 6:1-38)*

<sup>17</sup> Impabilang Solomon emin ida nalpud edum ni bebley ni nekibebley di Israel, henin impahding ametu hi David ey hanggatut et nelimat tellun libut enem ni gatut hu bilang da. <sup>18</sup> Impangngunu tu nepitun libun hi-gadan mambunnag ni meussal di Tempol niya newalun libun mampehhek ni batud duntug. Ey pinili tu tellun libu et enem ni gatut ni porman ni menang-ang ni hi-gada niya mengittuddun ngunnen da.

### 3

<sup>1</sup> Indaddan dedan lan David e patul e aman Solomon hu pengibbehwatan dan Tempol di Jerusalem di Duntug e Moriah e nampeang-angan lan etan ni AP-APU nan hi David. Yadman la ni kad-an ni kapan-illikin Araunah e Jebusite. <sup>2</sup> Inlapun Solomon ni memehwat ni Tempol APU DIOS eman ni meikkadwan bulan ni meikka-pat ni toon ni nampatulan tu.

<sup>3</sup> Humman ni Tempol ni behwatan tu ey nahyam ni piyeh hu kadinukkey tu niya telumpulun piyeh hu kalinakkeb tu. <sup>4</sup> Wada balkon ni meihhu-up di Tempol. Ya kalinakkeb tu ey telumpulun piyeh e neiinggeh di Tempol. Ya kasina-gey tu ey telumpulun piyeh. Ey metekkapan ni nemahmah ni balituk hu bawang tu huuyan balkon. <sup>5</sup> Ya etan keet-eteng an ni kuwaltuh ey nedingding ni sedar niya netakapan ni nemahmah ni balituk e wada al-alkus tun kei-inggeh ni keyew ni palmah niya kei-inggeh ni kadenah. <sup>6</sup> Inal-alkusan etan ni patul etan Tempol ni kayyaggud ni peteg ni nenginan batu niya balituk ni nalpud Parbaim. <sup>7</sup> Sinekapan tun balituk ida dingding ni Tempol, yadda nangged ni atep, yadda heggeppan niyadda lekbi. Ey yadda dingding ey neipaot ida hu heni anghel ni nangkepayakan. <sup>8</sup> Ya etan neihudek ni kuwaltuh e humman hu Nekassantuh ni Kuwaltuh APU DIOS ey telumpulun piyeh kadinukkey tu, ya kalinakkeb tu niya kasina-gey tu, e humman dama kalinakkeb ni Tempol. Dewampulut liman libu hu kiloh ni balituk ni neusal ni neitekap idad dingding nunman ni Nekassantuh ni Kuwaltuh APU DIOS. <sup>9</sup> Nengapyaddan patak ni balituk e ya bel-at ni hakey ey nehuluk ni kagedwah ni kiloh. Yadda dingding idan nengin-ahpat ni kuwaltuh ey netakapan daman balituk.

<sup>10</sup> Nampekapyawan hi Solomon e patul ni dewwan u-ukkul ni anghel ni nepayakan e na-meh idan balituk et iha-ad tudda etan di Nekassantuh ni Kuwaltuh APU DIOS. <sup>11-13</sup> Nandagsiddan immehneng e inhangga dad heggeppan. Handedwa payak da e pitu et kagedwah ni piyeh kadinukkey ni hakey e nebekyag ida et mantumuk hu utduk dad gawetu niya dimmateng di nanbina-hil ni dingding hu utduk ni hakey ni payak da. Ya kalinakkeb ni epat ni payak dan nebekyag ey telumpulun piyeh. <sup>14</sup> Ya kultinah di Nekassantuh ni Kuwaltuh ni kad-an APU DIOS ey nekapan kayyaggud ni luput niya edum ni luput e mabetakan ni blue, purple niya madlang, ey neal-alkusan ni henin anghel ni nepayakan.

*Yadda etan dewwan giniling ni tukud*

*(1 Kings 7:15-22)*

<sup>15</sup> Nampekapyawan pay hi Solomon e patul ni dewwan tukud ni meikkapyad hinanggan habyen ni Tempol. Ya kasina-gey ni hakey ey dewampulut pitun piyeh. Ey nampekapan dewwan meihhu-up di ta-pew idan nunman ni tukud ni hampipitu et kagedwah kasina-gey da. <sup>16</sup> Yad ta-pew idan nunyan tukud ey wada al-alkus ni kadenah ni nelagga niya hanggatut ni giniling ni henin lameh ni pomegranate. <sup>17</sup> Impeehneng tudda humman ni dewwan tukud di hinanggan habyen ni Tempol. Ya etan neikapyad appit ni south ey nengadanan ni Jakhin ey ya etan neikapyad appit ni north ey nengadanan ni Boaz.

### 4

*Yadda meussal di Tempol*

*(1 Kings 7:23-51)*

<sup>1</sup> Nampekapyawan hi Solomon e patul ni giniling ni altar e telumpulun piyeh ni kuwadladuh niya hampulu et liman piyeh kasina-gey tu. <sup>2</sup> Nampekapyawan pay ni netullikeng ni et-eteng ni tangkih ni giniling. Pitu et kagedwah ni piyeh hu kasina-gey tu, hampulut liman piyeh hu kalinakkeb tu niya na-pat et liman piyeh hu nanlinikweh ni bibil tu. <sup>3</sup> Neal-alkusan hu nanlinikweh di daul ni bibil nunman ni tangkih ni dewwan linyah ni nantutu-nud ni giniling ni heni kalibahha \* e neina-ud ni neikapyad tangkih. <sup>4</sup> Neituun huuyan et-eteng ni tangkih di beneg idan hampulut dewwan giniling ni bulug ni baka e hantetlu ey hin-appil nengihanggaan da e indekug dan emin di gawetu. <sup>5</sup> Ya hedel ni tangkih ey tellun pulgadah. Ya bibil tu ey henin bibil ni basuh e nanyeku e henin habung ni lily. Ya kameihhuddun danum diman ni tangkih ey nehuluk ni hampulut liman libun galon.

<sup>6</sup> Nengapyadda pay ni hampulun besen e lima kameihha-ad di appit ni south ey limad appit ni north ni Tempol. Ya kei-ussalan idan nunya ey pengi-ullahan idan parteh ni animal ni kamei-appit ni kagihheba. Ya etan danum di et-eteng ni tangkih ey pan-ullahan idan padi.

\* 4:3 4:3 Ya hakey ni keibbellinan nunyad Hebrew ey bulug ni baka.

<sup>7-8</sup> Nengapyaddan hampulun balituk ni pengippettukan ni kengkeh e neiunnud di daka pengapya niya hampulun tebol et iha-ad dad Tempol e hanlilman pengippettukan ey hanlilman tebol di nambina-hil. Ey nengapyaddan hanggatut ni balituk ni mahukung ni duyuu.

<sup>9</sup> Nengapyaddan dallin ni padi niya hakey ni mahkang ni dallin. Yadda lekbin habyen idan eheb e nambattanan idan nunyan dallin ey na-meh idan giniling. <sup>10</sup> Ya etan tangkih ey neiha-ad di neihipup di dugun Tempol di appit ni southeast.

<sup>11</sup> Nengapyaddan banga, yadda pala niyadda besen. Et humman negibbuan idan emin nunyan meussal di Tempol APU DIOS ni impekapan Solomon e patul ni hi-gada. Yaddahuy hu kinapya da:

<sup>12</sup> Ya dewwan tukud, ya dewwan heni mahukung ni duyuu neikapyad ta-pew idan nunman ni tukud, <sup>13</sup> yadda etan al-alkus e epat ni gatut ni heni ni lameh ni pomegranate e nekapyad giniling ni neihtabley idadman ni kadenah di ta-pew ni dewwan tukud e handedwan netu-tu-nud ni pomegranates di hakey ni kadenah, <sup>14</sup> yadda kaliton ni pengippettukan idan besen, <sup>15</sup> ya etan et-eteng ni tangkih niyadda etan hampulun dewwan heni bulug ni bakan neipetukan tu, <sup>16</sup> yadda banga, yadda pala, yadda tebung ni detag niyaddan emin hu edum ni meussal diman.

Emin ida huyyan meussal di Tempol APU DIOS ni impekapan Solomon nan Huram ey nekapyad giniling.

<sup>17</sup> Impekapy tu emin ida huyya etan di kapan-e-dihid nambattanan ni Sukkot niya Sarethan di Nedeklan e Jordan. <sup>18</sup> Dakel ni peteg hu giniling ni neusal et endi nengamtan bel-at tu.

<sup>19</sup> Yadda etan kameussal di Tempol ni nekapyad balituk ni impekapan Solomon ey: ya altar, yadda tebol ni pengihha-adan ni sinapay ni kamei-appit nan Apu Dios, <sup>20</sup> yadda pengippettukan ni kengkeh niyadda nemahmah ni balituk ni kengkeh e mantettebbel di hinanggan Nekassantuh ni Kuwaltuh Apu Dios e neunud hu planuh, <sup>21</sup> yadda habung ni al-alkus, yadda kengkeh niyadda ipit ni ngalab, <sup>22</sup> yadda pan-e-dep ni kengkeh, yadda besen, yadda pengiggihheban ni insensoh, niyadda penellukduk ni ngalab. Emin ida huyya ey nekapyad balituk. Ey yadda lekbi † di Nekassantuh ni Kuwaltuh APU DIOS niyadda lekbin Tempol ey netakapan idan balituk.

## 5

<sup>1</sup> Negibbuh ni emin hu impangunun Solomon di Tempol et iha-ad tun emin ida balituk, yadda silber niyadda edum ni in-appit ametu e hi David nan APU DIOS di bodegah ni Tempol.

*Ya nei-lian ni Kaban APU DIOS di Tempol  
(1 Kings 8:1-9)*

<sup>2</sup> Entanni et ayagan Solomon emin ida kamengipappanggulun helag Israel niyadda pamilyah da et maemung idad Jerusalem et da alen di Zion \* e Bebley David etan Kaban ni neiha-adan ni nekitbalan APU DIOS et ilaw dad Tempol. <sup>3</sup> Yan nunman ni neamungan idan emin ni helag Israel di hinanggan Solomon ey nedatngan hu Piyestah ni Kampu.

<sup>4</sup> Dimmateng ida emin kamengipappanggulun helag Israel et iattang idan helag Levi etan Kaban APU DIOS <sup>5</sup> et ilaw dad Tempol. Anin etan Tabernacle niyadda ngunut ni meussal diman et inlaw idan padi niyadda helag Levi diman. <sup>6</sup> Neamung di Solomon niyadda helag Israel di hinangga etan ni Kaban et man-appit idan dakel ni kalneroh niyadda bakan eleg mebillang.

<sup>7</sup> Entanni ey inhegep idan padi humman ni Kaban di Tempol et ilaw da etan di Nekassantuh ni Kuwaltuh APU DIOS et iha-ad dad daul idan nepaot ni nepayakan ni anghel. <sup>8</sup> Yadda etan nebekyag ni payak idan nunman ni anghel ey hinephepan da etan Kaban niyadda keyew ni pengattang da. <sup>9</sup> Kameang-ang ni ebuh utduk idan nunman ni keyew hedin wada itad hinanggan Nekassantuh ni Kuwaltuh APU DIOS. Ingganah nunya ey immen ida etan keyew ni impan-attang da. <sup>10</sup> Ya neiha-ad etan di Kaban APU DIOS ey ebuh etan dewwan nedampillag ni batun inha-ad Moses eman ni wadaddad Duntug e Sinai. Yadman nekitbalan APU DIOS idan helag Israel eman ni nalpuan dad Egypt.

*Ya dayaw ni AP-APU*

<sup>11-14</sup> Negibbuh ni inha-ad da humman ni Kaban APU DIOS diman et maukat ida. Emin hu padi ey impahding da hu elaw ni panlinnih ni annel da, anin ida etan ni

† 4:22 4:22 Yad 1 Kings 7:50, ya keibbellinan nunya ey bitaglah, beken ni lekbi. \* 5:2 5:2 Hin-addum ey Zion hu daka panggeddan ni Jerusalem ey hin-addum ni kanday Bebley David. Ey hin-addum ey Zion hu daka panggeddan ni pangil ni Jerusalem.

eleg mangngunnun nunman ni aggew. Yadda helag Levi e hi Asap, hi Heman et hi Jeduthun niyadda pamilyah dan kaman-a-appéh niya kamengippatnul ni kameussal di kapenaydayawi ey nambalwasiddan nekapyan kayyaggud ni luput. Immehneng idad appit ni kasimmilin aggew ni altar e singnged da cymbal, ya gitalah niya ayyuding e hi-gadaddan hanggatut et dewampulun padin kamengippatnul ni tangguyp. Yadda kaman-a-appéh niyadda kamantanguyp ey kayyaggud hu daka pan-uunnudi e ida kaman-a-appéh edum ey pampetnul daman edum hu tangguyp, ya cymbal niyadda etan edum ni daka petnul ni penaydayaw dan APU DIOS. Daka pan-ia-appéh hu: “Kamedeyyaw hi Apu Dios e AP-APU tep kayyaggud niya kamannanang impeminhed tu.”

Ey endi maptek ey napnun kaumhilin kulput etan Tempol tep wada hi APU DIOS diman et endi inna-nu dan mengittulluy ni mandaydayaw.

## 6

*Ya inhel Solomon idan tutu-u*  
(1 Kings 8:12-21)

<sup>1</sup> Entanni et mandasal hi Solomon e patul. Kantun dasal tuy: “APU DIOS, kammuy manha-ad kad mahdel ni kulput, <sup>2</sup> nem yan nunya ey nengapya-ak ni kayyaggud ni Tempol ni panha-adan mun ingganah.”

<sup>3</sup> Nanligguh hi Solomon et ihangga tuddan nunman ni neamung ni tuu et bendisyonan tudda. <sup>4</sup> Kantuy “Kamedeyyaw hi AP-APU e Dios tayun helag Israel. Tep impeamnu tu hu insapatah tu lan ama e hi David e kantuy <sup>5</sup> ‘Neipalpu eman ni impa-kal kudda tuuk di Egypt ingganah nunya ey endi nak pinilin bebley eyad Israel ni pemehwatan ni Tempol ni penaydayawan dan hi-gak. Niya endi nak pinutuk ni man-ap-apu eyaddan tuuk e helag Israel. <sup>6</sup> Nem yan nunya ey pinilik hu Jerusalem ni penaydayawan dan hi-gak ey hi-gam e David hu pinutuk kun man-ap-apu eyaddan tuuk.’ ”

<sup>7</sup> Intuluy Solomon et kantuy “Implanuh nan ama e hi David ni memehwat ni Tempol ni penaydayawan nan AP-APU e Dios tayun helag Israel, <sup>8</sup> nem kan Apu Dios ni hi-gatuy ‘Kayyaggud huttan ni ninemnem mun pinhed mun memehwat ni Tempol ni penaydayawan yun hi-gak, <sup>9</sup> nem beken ni hi-gam hu memehwat. Ya hakey idallin u-ungngam hu memehwat ni Tempol ku.’

<sup>10</sup> Et yan nunya ey impeamnun APU DIOS humman ni insapatah tu tep adyah e neihullullak nan aman mampatul eyad Israel et ay binehwal kun eya Tempol ni penaydayawan ni hi-gatu e Dios tayun helag Israel. <sup>11</sup> Inha-ad kud Tempol etan Kaban ni neiha-adan etan ni dewwan batun nedampillag ni neitudekan ni nekitbalan APU DIOS ni hi-gatsun helag Israel.”

*Ya dasal Solomon*  
(1 Kings 8:22-53)

<sup>12-13</sup> Entanni ey an immehneng hi Solomon di hinangga etan ni altar et ita-gey tu ngamay tu et mandasal. Wada impekapyan Solomon ni giniling ni pampettukan ni neiha-ad di gawwan etan ni dallin. Kuwadladuh e walun piyeh dinukkey tu niya linakkeb tu niya liman piyeh kasina-gey tu. Immehneng diman et han mandukkun e han-ang-ang emin ni tuu.

<sup>14</sup> Kantud dasal tuy “AP-APU e Dios min helag Israel, endi edum ni Dios di kabunyan niyad puyek ni henin hi-gam. Impannanang mu hu eleg melumman ni impeminhed muddan tuum ni kamekanggu-unnud ni hi-gam niya kamengippehballin mengipahding ni pinhed mu, niya muka peamnu hu nekitbalam ni hi-gada. <sup>15</sup> Impahding mu tu-wangu hu inhel mu lan ama e hi David e bega-en mu, et deh e impeamnum nunyan emin. <sup>16</sup> AP-APU e Dios min helag Israel, pannananang mu anhan etan hakey mewar ni insapatah mun ama e kammuy wadallin ingganah hu hakey ni helag tun mampatul di deya Israel, hedini paka-u-unnuden da tugun mun henin impahding tu. <sup>17</sup> Em, APU DIOS e Dios min helag Israel, peamnum anhan ni emin hu insapatah mun ama e hi David e bega-en mu.

<sup>18</sup> Nem kaw makulug, Apu Dios, e manha-ad ka eyad puyek et mekibebley kan tutu-um? Mahkang ni peteg hu kabunyan, nem nahkit ni panha-adam, et nema-ma ngun ek-eket ni peteg eya Tempol ni binehwal ku. <sup>19</sup> AP-APU e Dios ku, dengel mu anhan eya dasal kun bega-en mun kamampehemhemmek ni hi-gam. Em, dengel mu anhan eya dasal kun nunya. <sup>20</sup> Ipaptek mu anhan ni kawwalwal niyan hileng eyad Tempol mun pinilim ni penaydayawan ni hi-gam. Ey dengel mu anhan hu dasal ku hedini inhanggak di appit tudya. <sup>21</sup> Em, dengel mu anhan hu dasal midden eyan tuum di kad-an mud

kabunyan hedini kami kamandal e inhangga mid appit tudy e Tempol et liwwanem hu liwat mi.

<sup>22</sup> Hedini wada hakey ni tuun nambahul di edum tu et nei-li eyad hinanggan altar eyad Tempol et mansapatah e eleg mambahul, <sup>23</sup> ey dengel mu anhan e APU DIOS di kad-an mud kabunyan et ngenamung kan manhuwet, niya kastigum hu nambahul tep humman lebbeng tu, ey peamtam hedini hipa endi bahul tu.

<sup>24</sup> Hedini inappit idan buhul da hu tutu-um ni helag Israel tep ya liwat da, nem entanni ey nantuttuyyudda et umlidda eyad Tempol ni mandasal et mambeggaddan baddang mu, <sup>25</sup> ey dengel mu anhan dasal dad kad-an mud kabunyan et pesinsahan mu hu liwat da et ibangngad muddad bebley dan indawat mudda lan aammed da. <sup>26</sup> Hedini mewan nanliwat idan hi-gam et kinastigum ida et eleg mu paeli udan, nem entanni ey nantuttuyyudda et isiked dan manliwwat et mandasal idan hi-gam e ihhangga dad appit eyan Tempol, <sup>27</sup> ey dengel mu anhan dasal dad kad-an mud kabunyan. Ey liwwan mu anhan hu liwat idan bega-en mun helag Israel et tuttuuddan muddan neiptek ni pehding ni keittu-uan da ey paelim hu udan eyad bebley ni indawat mun pambebleyan dan ingganah.

<sup>28</sup> Hedini wada bisil eyad bebley, winu pistin tuu, winu degeh ni intanem, winu dudun, winu buhul idan tuum ni mengubbat ni hi-gada, winu hipa humman ni degeh ni um-alin hi-gada, winu hipan umbahbah, <sup>29</sup> ey dengel mu anhan dasal da. Hedini mewan wadaddan eyan tuum ni helag Israel hu nemahhig ni kamanhelheltap niya kaumlelemyung et mandasal e itta-gey tu ngamay tu et idengdeng tud appit nunyan Tempol, <sup>30</sup> ey dengel mu anhan dasal tud kad-an mud kabunyan et pesinsahan mu liwat tu et baddangam. Hi-gam ni ebuh nengamtan nemnem ni tuu. Et humman hu, hi-gam hu ngenamung ni lebbeng tun pehding mun hanhakkey idan tutu-um, <sup>31</sup> ma-lat hi-gam daydayawen da ey mengu-unnud idan ingganah ni hi-gam eyad bebley ni pambebleyan dan indawat mudda lan aammed da.

<sup>32</sup> Hedini wadadda hin-appil ni tuun nalpud edum ni bebley ni um-alin menaydayaw ni hi-gam, tep nanna-ud ni dedngelen da meippanggep ni nandingngel ni ngadan mu niyadda dakel ni kamengippetngan impahding mu et mandasal idan ihhangga da eyad Tempol, <sup>33</sup> ey dengel mu anhan dasal dad kad-an mud kabunyan et idwat mu ibbagedan hi-gam ma-lat amtaen daka et u-unnuden dakaddan tutu-ud kebebbebley eyad puyek, henin kapehding idan tuum ni helag Israel, ey ma-lat amtaen da e huyyan Tempol ni binehwat ku hu penaydayawan dan hi-gam.

<sup>34</sup> Hedini minandal mudda tuum ni an mekiggubbat ni buhul da, et mandasal idan hi-gam, anin di attu, et ihhangga dad appit eyan bebley ni pinilim niya eyad Tempol ni binehwat ku, <sup>35</sup> ey dengel mu anhan di kad-an mud kabunyan hu dasal da et pengapput mudda.

<sup>36</sup> Hedini nanliwat ida tuum ni hi-gam, tep emin hu tuu ey ida kamanliwwat, et peapput muddan buhul da tep ya bunget mu, et alen daddan balud et ilaw daddad edum ni bebley ni neidawwi winu neihnup, <sup>37</sup> nem entanni ey mantuttuyyudda et mampehemhemmek idan hi-gam di bebley ni neilawwan da, et mandasal idan hi-gam et ehlen da niya ebbuluten da e impahding da lawah ey dengel mu anhan dasal da, e APU DIOS. <sup>38</sup> Ey hedini yan nunman ni wadaddad bebley ni buhul da ey ida mewan law kamengu-unnud ni hi-gam et mandasal ida e ihhangga dad appit eyan bebley ni indawat mu eman ida lan aammed da, ni ya eyad et-eteng ni bebley e Jerusalem ni pinilim ni ya eyad Tempol ni binehwat ku, <sup>39</sup> ey dengel mu anhan di kad-an mud kabunyan hu dasal da et baddangam ida. Ey pesinsahim anhan hu liwat idan tuum ni hi-gam.

<sup>40</sup> Apu e Dios ku, ang-ang dakemi niya dengel mu anhan emin hu iddasal midya. <sup>41</sup> APU DIOS, ali ka et humgep ka eyad balel mun pan-iyatuam ni neiha-adan ni Kaban mun kei-ang-angan ni et-eteng ni kabaelan mu. Hegep ka eyad Tempol et manha-ad kadyan ingganah. Bendisyonim ida padim di paelim da. Ey nakka iddasal e man-am-leng idan emin tuum tep ya kakinayyaggud mun hi-gada. <sup>42</sup> Apu Dios e AP-APU, entan tu anhan iwalleng hu patul ni pinilim. Pannananeng mu hu eleg melumman ni impeminhed mun bega-en mu e hi David."

## 7

### *Ya neieng-engan ni Tempol (1 Kings 8:62-66)*

<sup>1</sup> Ginibbuh Solomon ni nandasal ey wada immalin apuy ni nalpud kabunyan et giheben tudda neiappit. Ey napnu etan Tempol ni kaumhilin dayaw APU DIOS tep immalidman, <sup>2</sup> et eleg pakahgep ida padi tep ya humman ni kaumhilin dayaw tu.

<sup>3</sup> Inang-ang idan helag Israel humman ni apuy ni nalpud kabunyany niya etan kaumhilin dayaw tud Tempol ey nandukkun ida et iyuung da et dayawen da hi APU DIOS. Kandang "Kayyaggud hi APU DIOS niya kamannananeng impeminhed tu!" <sup>4</sup> Et man-appit hi Solomon e patul niyaddan emin hu tuu nan APU DIOS. <sup>5</sup> Nan-appit hi Solomon ni dewampulut dewwan libun baka niya hanggatut et dewampulun libun kalneroh niya gelding. Huyya impahding Solomon niyadda edum tun helag Israel ni nengiang-eng ni Tempol Apu Dios. <sup>6</sup> Immehneng ida padid neitudun keihha-adan da e nanhihinnanggaddaddan edum dan helag Levi. Daka daydayawa hi APU DIOS e daka pan-ia-appeh hu "Mannananeng impeminhed tu." Ey daka pampetnul ida etan daka petnul ni impekapy lan David e patul. Yadda dama padi ey daka pampetnul tangguyp da ey ida kaman-eh-ehneng ni emin hu helag Israel.

<sup>7</sup> In-eng-eng Solomon nan Apu Dios etan gawwan dallin ni hinanggan Tempol et man-appit diman ni kagihheban tabaddan animal ni kamei-appit ni pekiddagyuman. Yadman nan-appitan tu tep dakel mei-appit et eleg um-ustuh etan di giniling ni altar ni kinapya tu.

<sup>8</sup> Nan-am-amleng hi Solomon niyaddan emin hu helag Israel ni nunman ni tsimpuh tep impahding da Piyestah ni Kampun pitun aggew. Dakel idan peteg hu tuun nangkalpud edawwin bebley meippalpad Lebo Hamat di north ingganah di kulukul di Egypt di appit ni south. <sup>9</sup> Intu-nud dan in-eng-eng etan altar et mampiyestah ida mewan ni pitun aggew. Ey pitun aggew dama nampiyestahan dan nengipahdingan dan Piyestah ni Kampu. <sup>10</sup> Et paenamut Solomon emin ida tuun newa-waan ni meikkadwampulut tellun aggew ni nunman ni meikkeppulun bulan. Ida kaman-am-amleng tep kayyaggud hu impahding APU DIOS nan David, hi Solomon niyadda tuu tun helag Israel.

*Ya nampeang-angan mewan Apu Dios nan Solomon  
(1 Kings 9:1-9)*

<sup>11</sup> Ginibbuh Solomon hu Tempol niya palasyoh tu niya impahding tun emin ida planuh tuddan nunya <sup>12</sup> ey nampeang-ang hi APU DIOS ni hi-gatun hileng et kantuy "Dingngel ku dasal mu ey nakka ebbuluta e huuyan Tempol hu pengi-appitan yuddan kamei-appit ni hi-gak. <sup>13</sup> Hedin wada tsimpuh ni eggak peelli udan, winu mandalek ida dudun ni mengngan idan neitnem, winu peellik idan tuuk hu degeh, <sup>14</sup> nem mandasal idan hi-gak ey mantuttuyudda et iwwalleng da lawah ni daka pehpending, ey dedngelek di kabunyany hu dasal da et pesinsahan ku hu liwat da et peyaggud ku mewan hu puyek da ma-lat dakel ennien da. <sup>15</sup> Eddugak huuyan Tempol ey nandaddannak ni mengngel ni dasal da, <sup>16</sup> tep pinilik niya binendisyonak huuyan penaydayawan dan hi-gak ni ingganah. Et humman hu, eddugak niya ippaptek kun ingganah.

<sup>17-18</sup> Ey hedin hi-gam, man ihhammad ku nan-ap-apuam hedin kayyaggud niya limpiyuh hu pengu-unnud mun hi-gak henin impahding lan amam e hi David, niya hedin u-unnuden mun emin hu inhel kun pehding mu, anin idan tugun ku niya olden ku, ey peamnuk hu insapatak kun nunman nan amam e kangkuy wadallin ingganah hu helag tun man-ap-apudya Israel. <sup>19</sup> Nem hedin ngenghayen yudda tugun ku niya olden kun indawat kun hi-gayu et daydayawen yu edum ni dios, <sup>20</sup> ey pea-allaw dakeyun tuuk e helag Israel eyad bebley ni indawat kun hi-gayu. Ey iwwalleng ku eya Tempol ni in-eng-eng kun penaydayawan yun hi-gak, et emin ali tutu-ud kebebbebley ey pippihulen da tep mekababbah alin peteg.

<sup>21</sup> Ma-nut kayyaggud ni peteg hu ang-ang eyan Tempol ni nunya, nem emin idalli melebbah ey metngadda et kandalli' "Kele na-mu hanneya impahding APU DIOS eyan bebley et ya eya Tempol?" <sup>22</sup> Yalli ihhumang idan tuu ey kandang "Neipahding huuya tep dineyaw da hu edum ni dios et iwwalleng da hi APU DIOS e Dios dan nengihwang ida lan aammed dad Egypt. Et humman hu, impaelin APU DIOS ni hi-gada himmallan ligat da." "

## 8

*Yadda panyaggudan ni impahding Solomon  
(1 Kings 9:10-28)*

<sup>1</sup> Dewampulun toon hu nelabah et han gibbuan Solomon hu palasyoh tu niya Tempol APU DIOS. <sup>2</sup> Inyayyaggud tu mewan ida bebley ni indawat Hiram e patul ni hi-gatu et palaw tudda edum ni helag Israel ni mambbebley diman. <sup>3</sup> Ey yan nunman ey tu ginubat hu Hamat Sobah et sakupen tu. <sup>4</sup> Inyayyaggud tu Tadmor di desert niyadda emin hu bebley di Hamat et pambalin tuddan bodegah. <sup>5</sup> Inyayyaggud tu pay hu ahpat niya ehpen ni Bet Horon anin idan luhud da et ha-adan tun lekbi hu eheb tu. <sup>6</sup> Ey inyayyaggud tu Baalat niyaddan emin hu bebley ni pambodegahan. Ey binehwat tudda bebley ni pengihha-adan tuddan kebayyu tu niyadda kalesah ni meussal di gubat. Kinapya tun

emin hu hipan pinhed tun kapyaan di Jerusalem, yad Lebanon niyad emin di bebley ni nan-ap-apuan tu.

<sup>7</sup> Wadadda tutu-un nannaneng di nambebleyan idan helag Israel e humman ida hu Amorite, Hittite, Perissite, Hibite niyadda Jebusite. <sup>8</sup> Huyyadda helag ni tuodman ni eleg pateyan idan helag Israel eman ni nalpuan dad Egypt. Pinilit idan Solomon ni impangunu et ingganah nunya ey himbut ida. <sup>9</sup> Yadda helag Israel ey endi pinilit Solomon ni impangunu tu tep impambalin tuddan sindalun, opisyal ni gubilnu, ap-apuddan sindalun mampangalesah niya mangkebayyun sindalun mekiggubbat. <sup>10</sup> Pinilin Solomon hu dewanggatut et neliman opisyal ni menang-ang idan nepilit ni manggunnu.

<sup>11</sup> Inlaw Solomon etan ahwa tun u-ungngan patul di Egypt di kinapya tun baley tu e tu inewit di Bebley David tep kantuy “Mahapul ni eleg manha-ad di palasyoh nan ama hi David humman ni ahwak tep pi-yew, tep neiha-ad ladman etan Kaban APU DIOS et maibilang ni neieng-eng.”

<sup>12</sup> Nan-appit hi Solomon ni kagihheba etan di altar APU DIOS e ingkapyat tud hinanggan Tempol. <sup>13</sup> Ya bilang ni tuka i-appit ni kewa-wa-wa ey meippuun di inhel ni Tugun Moses. Hin-appil ngu dedan ida kamei-appit ni Sabaduh, yan Piyestah ni Kaketellakin Bulan niyadda etan tellun piyestah ni kameippahding ni katootoon e Piyestah ni Nelabahan ni Anghel, Piyestah ni Ahiani, niya Piyestah ni Kampu. <sup>14</sup> Inu-unnud tu olden nan ametu hi David e pinili tudda padin mansilbin kewa-wa-wa, anin idan edum ni helag Levi ni memaddang idan padin man-a-appah ni daka penaydayawi. Pinili tu pay ida mangguwalyan Tempol e inenappil tudda meippuun di ngunun pehding dan kewa-wa-wa etan di eheb, tep humman in-olden nan ametu hi David ni intugun Apu Dios. <sup>15</sup> Neunud ni emin hu intugun David ni pehding idan padi niyadda edum dan helag Levi meippanggep idan bodegah niyadda edum ni meippahding.

<sup>16</sup> Yan nunyan tsimpuh ey negibbuh ni emin hu impangunun Solomon meippalpu eman ni nengikapyaan dan keibbehwatan ni Tempol APU DIOS ingganah nekagibbuhuan tu.

<sup>17</sup> Entanni et lumaw hi Solomon di ESION Geber niyad Elat di gilig ni baybay di Edom.

<sup>18</sup> Impelawwan Hiram e patul di Tyre ni bapor hi Solomon e yadda tuu tu hu kapitan idan nunman ey impan-edum dadda imminghan manggunnud bapor. Nekilaw ida opisyal Solomon di Ophir et yan nambangngadan da ey in-anemud dan Solomon hu balituk ni umlaw di hampulut enem ni libun kilo.

## 9

### *Ya inlian ni biin ap-apud Seba (1 Kings 10:1-13)*

<sup>1</sup> Dingngel etan ni biin ap-apud Seba hu meippanggep nan Solomon e nandingngel ni patul ey immalid Jerusalem ni mematan hi-gatu hedin inna-nu penummang tuddan neligat ni pinhed tun mahmahan. Dakel hu ingkuyug tun bega-en tu, yadda kamel tun nangkalgan kaikkamdu di kennen, yadda nebalol ni batu niya dakel ni balituk.

Yan nanhumnganan dan Solomon ey minahmahan tun emin hu hipan immalid nemnem tu, <sup>2</sup> ey hinumang Solomon ni emin. Endi neligat ni hi-gatu. <sup>3</sup> Natngan peteg humman ni biin ap-apud Seba ni laing Solomon niyan nenang-angan tun palasyoh ni kinapya tu. <sup>4-5</sup> Ey natnga mewan ni nenang-ang tuddan dakel ni peteg ni kennen ni kameiddaddan di baley tu, yadda kapanha-adiddan opisyal tu, ya kayyaggud ni kapehding idan kamanggunnud palasyoh tu, yadda kamengippaptek ni hamul, anin idan kayyaggud ni balwasi da, niyadda kagihheban tuka i-appit di Tempol APU DIOS, et kantud nemnem tuy ‘Nakkayyang, endi numan kei-ingngehan idan nunyan inang-ang ku!’ Ey kantun Solomon ey “Makulug hu dingngel ku meippanggep ni laing mu niyadda impahding mu! <sup>6</sup> Nem eggak ni kulugen ida humman ni dingngel ku ingganah immali-ak et ang-angen kun emin. Ya kakulugan tu ey kagedwah ni ebu hu dingngel ku, tep nelalla-ing ka niya kekkeddangyan ka nem ya inhel da. <sup>7</sup> Negahat ida tuum, anin idan opisyal mun wadan ingganah di kad-an mu, tep daka deddenggela hu ehel ni nelaing ni tuu! <sup>8</sup> Medaydayaw hu AP-APU e Dios mu! Impeang-ang tu amleng tun hi-gam eman ni nemutukan tun hi-gam ni pampatul idan tuu tun helag Israel. Kamannanang hu impeminhed tuddan helag Israel, et mukun impambalin dakan patul da ma-lat kayyaggud niya limpiyuh hu pan-ap-apum ni hi-gada.”

<sup>9</sup> Indawat tun Solomon hu nehuluk ni epat ni libun kiloh ni balituk, ya dakel ni kaikkamdu di kennen niyadda nangkebalol ni batu. Endi edum ni an immidwat nan



Solomon ni henin nunman ni kakinyayggud ni kaikkamdug di kennen, ebuh humman ni ap-apud Seba.

<sup>10</sup> (Yan eman ni nengi-lian idan tuun Solomon niyadda tuun Hiram ni balituk ni nalpud Ophir ey neki-la da dakel ni keyew ni algum \* niyadda nangkebalol ni batu. <sup>11</sup> Ingkapyan Solomon ida humman ni keyew ni palekad di Tempol niyad Palasyoh tu niya kinapya tu edum ni ayyuding niya gitalah ni ussalen dan man-a-appéh. Endi edum ni hanniman ni kakinyayggud ang-ang tun nekapyad Judah.)

<sup>12</sup> Indawat daman Solomon hu hipan kindew nunman ni biin ap-apud Seba. Ey daddakel hu indawat tun hi-gatu nem yadda in-ali tun indawat tu. Et han mambangngad humman ni ap-apu niyadda bega-en tud bebley da.

*Ya kinedangyan Solomon e patul*  
(1 Kings 10:14-25)

<sup>13</sup> Katootoon ey kadewwatan Solomon hu umlaw di dewampulut liman libun kiloh ni balituk <sup>14</sup> Hin-appil ngu dedan hu buwis ni kabeyyadiddan kamampanggettang niya hin-appil hu kamelpuddan patul di Arabia niyadda gubernor idan bebley di Israel. <sup>15</sup> Nengapya hi Solomon ni dewanggatut ni etta-teng ni happiyaw e umlaw di pitun kiloh ni balituk hu neusal di hakey. <sup>16</sup> Ey nengapyan telunggatut ni ekka-ket ni happiyaw ni umlaw ni tellu et kagedwah ni kiloh ni balituk hu neusal di hakey. Intalu tudda humman ni happiyaw di palasyoh tun Muyung e Lebanon ngadan tu.

<sup>17</sup> Nampekapyay pay ni et-eteng ni yuddungngan ni patul e neal-alkusan ni bakgit ni elephant e netakapan ni nemahmah ni balituk. <sup>18</sup> Humman ni yuddungngan ni patul ey wada enem ni palekad ni mampeahpat diman ey wada neihuup ni balituk ni pengiddahyayan ni heli niya wada pengihhaklayan ni ngamay di nambina-hil. Ey wada dewwan heni layon ni immehneng di dagsin pengihhaklayan ni ngamay di nambina-hil. <sup>19</sup> Wada mewan hu hampulut dewwan heni layon ni immehneng di utduk idan enem ni palekad di nambina-hil. Ebu humman ni yuddungngan ni patul ni henin nunman e endi tu kei-ingnghan.

<sup>20</sup> Emin ida basuh Solomon niyadda hipan kameussal diman ni Muyung e Lebanon ey nemahmah ni balituk hu kinapya da. Ya silber ni nunman ni tsimpuh Solomon ey endi balol tu. <sup>21</sup> Wadadda bapor tun kamekikkilaw idan bapor Hiram. Hedin nelabah tellun toon, ey ida kamambangngad huyyan bapor ni wada in-anemut dan balituk, ya silber, yadda bakgit ni elephat, niyadda tadaw.

<sup>22</sup> Hi Solomon e patul hu kekekkekdangyanan niya kelalla-ingan di emin idan nampatul di kebebbebley eyad puyek. <sup>23</sup> Et ida kaumlaw hu patul di kebebbebley ni mandeanggel ni laing tun indawat Apu Dios ni hi-gatu. <sup>24</sup> Emin ida ey wada daka iddawt ni hi-gatun nekapyad silber niya balituk, yadda balwasi, yadda almas, yadda kaikkamdug di kennen, yadda kebayyu niyadda mule. Henin nunya kameippenahding ni katootoon.

<sup>25</sup> Impekapyan Solomon hu epat ni libun kubkub ni pengihha-adan tuddan kebayyu niyadda kalesah. Ya bilang idan kebayyu tun kameussal di gubat ey hampulut dewwan libu. Inha-ad tudda etan edum ni kalesah niyadda kebayyud bebley ni kinapya tun keihha-adan da ey inha-ad tudda edum di Jerusalem. <sup>26</sup> Hi-gatu ap-apuddan edum ni patul idan bebley meippalpu Wangwang e Euphrates ingganah di Pilstia niyad pappeg ni Egypt. <sup>27</sup> Yan nampatulan tu ey henin kedakkel idan batud Jerusalem hu kedakkel ni silber. Dakel mewan hu keyew ni sedar e henin kedakkel ni keyew ni sycamore idad duntug di Judah. <sup>28</sup> Yadda kebayyun Solomon ey kagettangaddan ahenteh tud Egypt niyadda edum ni bebley.

*Ya neteyyan Solomon*  
(1 Kings 11:41-43)

<sup>29</sup> Yadda edum ni impahding Solomon meippalpu laputu ingganah ni neteyyan tu ey neitudek di Liblun ni Prophet e hi Nathan, yad Liblun ni Ab-abig Ahijah di Siloh, niyad Liblun ni I-innep Iddo e Prophet e nei-dum daman neitudek diman hu meippanggep ni nan-ap-apuan nan Jeroboam e patul di Israel. <sup>30</sup> Nampatul hi Solomon di Jerusalem niyad emin di bebley di Israel ni na-pat ni toon. <sup>31</sup> Netey et maikulung di Bebley David e ametu et maihullul ni nampatul hi Rehoboam e u-ungnga tu.

## 10

*Ya nangngehayan ni edum ni helag Israel nan Rehoboam*  
(1 Kings 12:1-20)

\* 9:10 9:10 Ya hakey ni ngadan nunyan keyew ey almug.

<sup>1</sup> Limmaw hi Rehoboam di Sekem tep neamung idan emin diman hu helag Israel ni nambebley di appit ni north ma-lat tuduen dan patul. <sup>2</sup> Yan nunman ey wada hi Jeroboam e u-ungngan Nebat di Egypt tep bimmesik diman eman ni nampatul Soloman. Dingngel tu e hi Rehoboam law nampatul et mambanggad di Israel.

<sup>3</sup> Entanni ey impeayag idan helag Israel ni nambebley di appit ni north hi Jeroboam et lumaw idad kad-an Rehoboam et kandan hi-gatuy <sup>4</sup> "Mabungget la hi amam e hi Soloman ni hi-gami ey impanligligat dakemi. Hedin eleg dakemi panligligat ni peteg ey hedin ekkalan mu hu beyyadan min buwis, ey nanengtun mansilbi kamin hi-gam."

<sup>5</sup> Hinumang Rehoboam e patul et kantuy "Idwasi yuwak ni tellun aggew et pakannememen ku ihhumang ku et han kayulli mambanggad." Et lumaw ida.

<sup>6</sup> Nekihummangan hi Rehoboam idan nea-amman konsihal ni nansilbin ametu e hi Soloman meippanggep nunya e kantuy "Hipa ittugun yun hi-gak ni ihhumang kuddan nunman ni tuu?"

<sup>7</sup> Kanday "Ipahding mu kayyaggud ey peang-ang mu binabbal mun hi-gada et tebalem humman ni daka ibbaga ma-lat mansilbiddan hi-gam ni ingganah."

<sup>8</sup> Nem eleg tu u-unnuden humman ni intugun idan nunman ni nea-amma et makihummangan etan idan katoonan tun konsihal tu et ibega tun hi-gada hedin hipa ittugun da. <sup>9</sup> Kantun hi-gaday "Hipa ittugun yun penummang kuddan tuun kanday ekkalak ligat da?"

<sup>10</sup> Kandan hi-gatuy "Heninnuy penummang mun hi-gada: 'Ya eya ik-ikingngan ku ey e-etteng nem ya gitang ama! <sup>11</sup> Hedin impanligligat dakeyu lan peteg nan ama, nema-ma hu pehdng kun mengipeligligat ni hi-gayu. Hedin hineplit dakeyu lan ama, ebligen dakeyun nahbitan ni eblig ni nunya.'"

<sup>12</sup> Nelabah tellun aggew ey nambangngad hi Jeroboam niyaddan emin etan tuud kad-an Rehoboam tep humman inhel tun hi-gada. <sup>13</sup> Nem impambinungngat Rehoboam ni nenuman ni hi-gada tep eleg tu u-unnuden hu intugun idan nea-amman konsihal tu. <sup>14</sup> Et ya kumedek hu intugun idan u-ungngan konsihal hu inu-unnud tu et kantuy "Impanligligat dakeyu lan ama nem nema-man panligligat dakeyun hi-gak nunya. Hineplit dakeyu lan nunman nem ebligen dakeyun nunyan nahbitan!" <sup>15</sup> Eleg tu u-unnuden hu pinhed idan tuu tep humman dedan pinhed APU DIOS ni meippahding e humman inamnuan ni inhel lan Ahijah e prophet di Siloh ni impeamtan APU DIOS meippanggep nan Jeroboam e u-ungngan Nebat.

<sup>16</sup> Yan nengamatan idan nunman ni tuu e eleg hengngudan Rehoboam hu daka ibbaga ey ida kamantetekuk e kanday "Mepappeg hu pampatul ni helag David! Endi bilang tayud nan-ap-apanan u-ungngan Jesse! Hipa ni-man impahding dan panyaggudan tayu? Hi-gatsun helag Israel, anemut itsu kuma! Ngenamung numan hi Rehoboam e helag David!"

Et umenamut ida e eleg da ibbilang hi Rehoboam ni patul da. <sup>17</sup> Nem yadda helag Israel ni nambebley di Judah ey hi Rehoboam hu nanengtun patul da.

<sup>18</sup> Entanni ey intu-dak Rehoboam hi Adoniram e ap-apuddan nepilit ni mangngunnu et tu ang-angen ida edum dan helag Israel ni nambebley di north, nem nantengka da et matey. Neamtaan Rehoboam huyyan neipahding et pepuppuut tun an nantakkay di kalesah et bumsik di Jerusalem. <sup>19</sup> Neipalpun nunman ingganah nunya ey kangenghayaddan nunman ni helag Israel ni nambebley di north hu pampatul helag David ni hi-gada.

## 11

*Ya impeamtan Semaiah e prophet  
(1 Kings 12:21-24)*

<sup>1</sup> Dimmateng hi Rehoboam di Jerusalem et amungen tu hanggatut et newalun libun kelalla-ingan ni sindalu tun helag Judah niya helag Benjamin, tep pinhed tun gubbaten hu helag Israel ni nambebley di north ma-lat bangngaden tu hu pan-ap-apan tudman. <sup>2</sup> Nem immehel hi APU DIOS nan Semaiah e prophet et kantuy <sup>3</sup> "Mu ehel nan Rehoboam e u-ungngan Soloman e patul di Judah, yadda helag Benjamin niyadda edum dan helag Israel ni nekibebley ni hi-gada e kammuy <sup>4</sup> Huyya inhel APU DIOS: 'Entan tu gubat ida aaggi yun helag Israel. Anemut kayu kumad baballey yu tep hi-gak hu nengipanghel eyan neipahding!'"

Inu-unnud da humman ni in-olden APU DIOS et eleg ida lumaw ni mengubbat nan Jeroboam.

<sup>5</sup> Nannaneng hi Rehoboam di Jerusalem et ihammad tun ingkapyaan ida huyyan ettateng ni bebley di Judah niyad Benjamin ni pandipensah dan buhul da: <sup>6</sup> ya Bethlehem,

ya Etham, ya Tekoa, <sup>7</sup> ya Bet Sur, ya Soko, ya Adullam, <sup>8</sup> ya Gath, ya Mareshah, ya Sip, <sup>9</sup> ya Adoraim, ya Lakis, ya Asekah, <sup>10</sup> ya Sorah, ya Aijalon, ni ya Hebron.

<sup>11</sup> Naka-ihhammad tuddan inalmasan ey in-epeng tuddadman hu ap-apun sindalu niya immidwat ni mahapul da henin kennen, mansikan olibah, ya meinum, <sup>12</sup> yadda happiyaw niyadda pahul. Huyya impahding tun nengihhammad ni nan-ap-apuan tud Judah niyad Benjamin.

*Ya inlian idan padi niyadda edum dan helag Levi di Judah*

<sup>13</sup> Entanni ey nampengalidda hu padi niyadda edum dan helag Levi di Judah e nalpuddad kebebbbley di Israel. <sup>14</sup> Inwalleng da hu pattullan da et lumaw idad Judah niyad Jerusalem tep kaikka-leg di Jeroboam e patul niyadda u-ungnga tu hu pansilbian dan APU DIOS. <sup>15</sup> Pinilin Jeroboam hu papaddi tun mansilbid daka penaydayawiddan beken ni makulug ni dios niyadda dimonyoh, yadda dios ni impekapa tun heni gelding niya heni baka. <sup>16</sup> Et humman hu, emin ida helag Israel ni neminshed ni menaydayaw nan APU DIOS e Dios da ey neiunnud idaddan helag Levi di Jerusalem ma-lat wada innanu dan man-appit nan AP-APU e Dios ida lan aammed da. <sup>17</sup> Hi-gada nengipehammad ni kabaelan ni Judah et yan tellun toon ey binaddangan da hi Rehoboam e u-ungngan Solomon niya inu-unnud da hi APU DIOS henin impahding da eman ni nan-ap-apuan di David nan Solomon.

*Ya familyah Rehoboam*

<sup>18</sup> Inahwan Rehoboam hi Mahalat e u-ungngan Jerimot e u-ungngad David nan Abihail e u-ungngan Eliab e u-ungngan Jesse. <sup>19</sup> Wada tellun u-ungnga dan laki e hi Jeus, hi Semariah et hi Saham. <sup>20</sup> Entanni et ahwaen tu hi Maakah e u-ungngan Absalom et wada epat ni u-ungnga dan laki e hi Abijah, hi Attay, hi Sisa et hi Selomit. <sup>21</sup> Hampul walu ahwan Rehoboam niya na-nem ida imbilang tun ahwa tu. Ya bilang ni lalakin u-ungnga tu ey dewampul walu niya na-nem hu bibi-in u-ungnga tu. Hi Maakah hu nakappinshed tuddad emin ni ahwa tu <sup>22</sup> et pambalin tu hi Abijah e u-ungnga dan meihhayned ni hitagun mampatul. <sup>23</sup> Nelaing hi Rehoboam tep in-epeng tudda u-ungnga tun lalakkid bebley di Judah niyad Benjamin e nehammad idan neluhud. Ey indawtan tuddan dakel ni kennen da niya hipan mahapul da, ey impeahwa tun hi-gada dakel ni bii.

## 12

*GINUBAT NI EGYPT HU JUDAH*

<sup>1</sup> Nem yan neihammadan ni nan-ap-apuan Rehoboam ey inwalleng tu hu Tugun APU DIOS et iu-unnud idan emin ni tutu-un hi-gatu. <sup>2</sup> Et yan meikkelliman toon ni nan-ap-apuan tu ey kinastigon APU DIOS ida tep ya nengiwallengan dan hi-gatu et gubaten ni patul di Egypt e hi Sishak hu Jerusalem <sup>3</sup> e inusal tu hanlibu et dewanggatut ni kalesah, na-nem ni libun sindalun nampangkebayyu ey nei-dum ida pay hu iLibya, yadda iSukkot niyadda iSudan et dakel idan peteg e eleg ida mebillang. <sup>4</sup> Sinekup Sishak ida bebley ni nehammad luhud tud Judah et mampalaw di Jerusalem.

<sup>5</sup> Entanni et lumaw hi Semaiah e prophet di kad-an di Rehoboam e patul niyadda kamengipappangngulun iJudah ni neamung di Jerusalem tep imbesikan da hi Sishak. Et kantun hi-gaday "Kan APU DIOS ey 'Inwalleng yuwak, et humman hu, iwwalleng dakeyu daman hi-gak et ngenamung hu pehding Sishak ni hi-gayu.' "

<sup>6</sup> Inebulut nan Rehoboam niyadda etan kamengipappangngulu e nanliwat ida et kandy "Neiptek numan hi APU DIOS ni hipan pehding tun hi-gatsu."

<sup>7</sup> Inang-ang APU DIOS e inebulut dan nanliwat ida ey immehel mewan nan Semaiah et kantun hi-gatuy "Kaebbulutaddan nuntan ni tuu e nanliwat ida, et humman hu, eggak ida ew pakabbabhahan pengubabatan Sishak ni hi-gada. Nem meka-apput ida et ngannganih idan mettey emin. Anin ni hanniman meippahding e eleg mekabbabhah hu Jerusalem gapuh ni bunget ku. <sup>8</sup> Sekkupun Sishak hu bebley da et mambalin idan bega-en tu, et yan nunman ali pengamtaan da e keduksul hu mansilbin hi-gak nem ya mansilbin tuun ap-apu."

<sup>9</sup> Et umli hi Sishak di Jerusalem et alen tun emin hu nangkebalol ni wadad Tempol niyad palasyoh, anin idan balituk ni happiyaw ni kinapya lan Solomon. <sup>10</sup> Entanni et hullulan nan Rehoboam ida humman ni balituk ni happiyaw ni giniling et idinel tuddan ap-apun guwalyad eheb ni palasyoh tu. <sup>11</sup> Hedin umlaw di Tempol hi Rehoboam e patul ey ussalen idan guwalya huyyaddan happiyaw ey han da mewan imbangngad di kuwaltuh ni guwalya. <sup>12</sup> Na-kal hu bunget APU DIOS et eleg tu patyen hi Rehoboam, tep nantuttuyyun nanliwatan tu et mampekumbabah. Ey kayyaggud law hu neipahpahding di Judah.

*Ya meippanggep ni nan-ap-apuan Rehoboam*

<sup>13</sup> Neihammad hu nan-ap-apuan Rehoboam di Jerusalem ey intultuluy tun nan-ap-apu. Na-pat et hakey hu toon tun nampatulan tu et man-ap-apun hampulut pitun toon di Jerusalem e bebley ni pinilin APU DIOS di emin ni nambebleyan idan helag Israel ni penaydayawan dan hi-gatu. Hi Naamah hu inetu e iAmmon. <sup>14</sup> Lawah impahding tu tep eleg tu hengngudan amtaen hu pinhed APU DIOS ni meippahding.

<sup>15</sup> Yadda impahding Rehoboam ni laputu ingganah ni neteyyan tu ey neitudek di Liblulh Semaiah e prophet niyad Liblulh Iddo, e hakey mewan ni prophet, e neitudekan ni tenten ni aammed idan helag Israel.

Di Rehoboam nan Jeroboam ey nanggubagubat ida. <sup>16</sup> Entanni ey netey hi Rehoboam et maiklung di gungat idan patul di Bebley David et maihullul hi Abijah e u-ungngatun nampatul.

## 13

*Ya nanggubatan di Abijah nan Jeroboam*

*(1 Kings 15:1-8)*

<sup>1</sup> Yan meikkahampulut walun toon ni nampatulan Jeroboam di Israel ey nampatul hi Abijah di Judah. <sup>2</sup> Et mampatul ni tellun toon e nanha-ad di Jerusalem. Hi Maakah hu inetu e u-ungngan Uriel di Gibeah.

Entanni ey nanggubat di Abijah nan Jeroboam. <sup>3</sup> Epat ni gatut ni libu hu sindalun Abijah ey walun gatut ni libu hu sindalun Jeroboam.

<sup>4</sup> Et mandadamudda sindalu dad duntuduntug ni bebley di Epraim. Immehneng hi Abijah di Duntug di Semaraim et itkuk tun Jeroboam niyadda iIsrael e kantuy "Hi-gam e Jeroboam e patul niya hi-gayuddan iIsrael, dengel yu eya e-helen ku: <sup>5</sup> Kaw eleg yu amta e hi APU DIOS e Dios tayun emin ni helag Israel ey nehammad hu nekitbalan tun David e hi-gatu niyadda helag tu hu pinili tun mampatul ni ingganah di Soma Israel? <sup>6</sup> Nem hi Jeroboam e u-ungngan Nebat ey porman eman ni nampatulan Solomon e u-ungngan David ey nginhay tu ngu ap-apu tu. <sup>7</sup> Inemung tudda lawah ni tutu-un endi silbitu et piliten da hi Rehoboam e u-ungngan Solomon ni mengu-unnud ni pinhed da gapu tep u-ungnga ni e endi dakel ni pinatnaan tu et eleg tudda kabaelan ni kehgingen.

<sup>8</sup> Et yan nunya ey planuh yun gubbaten hu nan-ap-apuan APU DIOS ni kaipappangnguluddan helag David. Ma-nu tep dakel sindalu yu nem ya dios yu ey balituk ni impah ni bakan kinapyan Jeroboam. <sup>9</sup> Dinegyun yudda helag Aaron e padin APU DIOS niyadda helag Levi et putuken yudda padi yu, henin kapehding idan tutu-ud edum ni bebley ni eleg mengamtan APU DIOS. Yuka i-eng-eng ni mampeddi hu kumpulmih ni tuun wada intabin tun lakkitun baka winu pitun kalneroh ma-lat mansilbin padin dios yu."

<sup>10</sup> "Nem hedin ngun hi-gami ey ya AP-APU e Dios hu nanengtun pansilbian mi, tep eleg mi iwalleng. Yadda helag Aaron hu mansilbin padi mi, ey yadda edum dan helag Levi hu memaddang ni hi-gada. <sup>11</sup> Man-appit idan insensoh niyadda animal ni kagihheba, ey ihha-ad dadda sinapay di nengilinan ni tebol ni kewa-wa-wan kakkabbuhhan niyan kamangkehilleng ey integan dadda kengkeh di balituk ni pengipettukan. Mika u-unnudda huyyan in-olden AP-APU e Dios mi. Nem hedin ngun hi-gayu, man inwalleng yu. <sup>12</sup> Hi Apu Dios mismuh hu mengippenggulun hi-gami, ey yadda padi tu mengipetnul ni tanggyup et ikuyug dakemin mekiggubbat ni hi-gayu. Hi-gayun iIsrael, entan kuma pakigubat yun AP-APU e Dios ida lan aammed tayu tep meapput kayu mannuman!"

<sup>13</sup> Ya impahding Jeroboam ey indalunuh tun impalaw ida edum ni sindalu tun menggubbat idan sindalun Judah di dingkuggan da ey kinadwaan tudda edum ni sindalu tun menggubbat ni hi-gadaad hinangga. <sup>14</sup> Nem entannit neamtaan idan iJudah e hinekum idan buhul da ey nampehemhemmek idan APU DIOS ma-lat baddangan tudda. Entanniy impatnul idan padi hu tanggyup da <sup>15</sup> ey ida kamantetekkek hu sindalun iJudah et da gubaten hi Jeroboam niyadda sindalu tun iIsrael et apputen dadda tep binaddangan idan Apu Dios. <sup>16</sup> Et bumsik ida humman ni iIsrael tep impeapput Apu Dios idaddan iJudah. <sup>17</sup> Pintey di Abijah niyadda sindalu tu hu limanggatut ni libun kelalla-ingan idan sindalun iIsrael. <sup>18</sup> Nengapput ida iJudah tep nandinel idan AP-APU e Dios ida lan aammed da.

<sup>19</sup> Pindug di Abijah ida humman ni sindalun Jeroboam et sakupen da edum ni bebley dad Bethel, ya Jeshanah, ya Epron, niyadda bebley di nanlinikweh diman. <sup>20</sup> Et eleg law kabaelan Jeroboam ni bangngaden ida humman ni bebley ni nan-ap-apuan Abijah, niya beken law ni nehammad hu nan-ap-apuan tu. Entanni et pappegen APU DIOS hu biyag tu.

<sup>21</sup> Nem hi Abijah ey kamangkeihhammad hu tuka pan-ap-apui. Hampulut epat ni bii ahwa tu niya dewampulut dewwa hu u-ungnga tun laki, niya hampulut enem hu bii. <sup>22</sup> Yadda edum ni neipahding ni nampatulana Abijah, yadda inhel tu niyadda impahding tu ey neitudek di Liblun nan Iddo e Prophet.

## 14

*Ya nengapputan ni patul e hi Asa idan buhul da*

<sup>1</sup> Netey hi Abijah et maikulung di Bebley David et maihullul hi Asa e u-ungngatun nampatul. Yan nunman ni nampatulana tu ey melinggep hu bebley dad Judah ni hampulun toon.

<sup>2</sup> Impahding Asa hu kayyaggud e kamengippeamleng ni AP-APU e Dios tu. <sup>3</sup> Ingkal tudda pan-appitan niya kapenaydayawin beken ni makulug ni dios niya binahbah tudda daka deyyawan batun dios niya etan tukud ni biin dios e hi Asherah. <sup>4</sup> Ey inolden tuddan iJudah e hi APU DIOS e Dios ida lan aammed da hu daydayawen da, niya u-unnuden da tuttuudu tu niya tugun tu. <sup>5</sup> Ingkal tudda kapenaydayawin beken ni makulug ni dios niyadda kapan-appisin insensoh di emin ni bebley di Judah, et humman hu, melinggep hu bebley dan nunman ni nampatulana tu. <sup>6</sup> Endi nengubat ni hi-gatu tep indawtan APU DIOS ni linggep niya inhammad tu luhud idan etta-teng ni bebley di Judah.

<sup>7</sup> Kantuddan tutu-ud Judah ey "Mengapya itsun etta-teng ni bebley et luhuden tayuddan nehammad ni batu niya ikkapyaan tayuddan etata-gey ni baballey ni pangguwalyaan niya eheb ni melekbian niya meiphiw. Nannaneng ni hi-gatsu huayan bebley tayu tep inu-unnud tayu pinhed ni AP-APU e Dios tayu et pelinggep daitsu." Et ipahding dadda humman ni implanuh da et megibbuh. <sup>8</sup> Ya bilang ni sindalun Asa e patul ey telunggatut ni libun iJudah e nanhappiyaw ida niya nampahul ida, ey neidum hu dewanggatut et newalun libun sindalun helag Benjamin ni nanhappiyaw niya nampana. Netuled idan emin niya nelaing idan mekiggubbat.

<sup>9</sup> Wada hu hakey ni tuun iEthiopia e hi Serah ngadan tu e ginubat tu Judah. Ingkuyug tudda hakey ni milyon ni sindalu tu niya telunggatut ni nangkalesah et dumteng idad Mareshah. <sup>10</sup> Limmaw hi Asa niyadda sindalu tun nekigubat ni hi-gada e nampustuh idad Nedeklan e Sephathah e neihnu di Mareshah.

<sup>11</sup> Nandasal hi Asa ni AP-APU e Dios tu e kantuy "AP-APU e Dios mi, hi-gam ni ebuh hu dammutun umbaddang idan sindaluk ni mekiggubbat idaddan et-eteng ni kabaelan dan sindalu. Baddangi dakemi anhan tep hi-gam hu mika pandinneli ey gapun ngadan mu ey immali kamin mekiggubbat ida eyan dakel ni peteg ni sindalu. AP-APU, hi-gam hu Dios mi, entan anhan tu iebulut ni daka apputen ni tuu."

<sup>12</sup> Et manggubbat ida ey binaddangan APU DIOS hi Asa niyadda sindalu tu et apputen dadda humman ni sindalun iEthiopia et mamsik ida. <sup>13</sup> Nampedug di Asa ida ingganah di Gerar ey dakel hu netey idan nunman ni iEthiopia et endi law kabaelan idan sindalu dan natdaan ni mekiggubbat mewar tep inapput APU DIOS ida. Et dakel inladdan sindalun iJudah ni limmu da. <sup>14</sup> Binahbah dadda ekka-ket ni bebley di nanlinikweh di Gerar tep eleg ida lumeban tep nemahhig hu takut idan bimbebley diman nan APU DIOS. Ey dakel ni peteg hu nan-aladdan sindalun iJudah ni hipan wadadman idan bebley. <sup>15</sup> Hinggep da mewar hu kampuddan kamampatek ni animal et alen da dakel ni kalneroh niya kamel et han ida mambanggad di Jerusalem.

## 15

*Yadda kayyaggud ni impahding Asa*

<sup>1</sup> Entanni ey newada Ispirituh Apu Dios nan Asariah e u-ungngan Oded, <sup>2</sup> et lumaw ni an menamun Asa e patul di Judah et kantun hi-gatuy "Dengel mu huuya e apu patul niya hi-gayuddan emin ni bimbebley di Judah niyad Benjamin! Makulug ni ippatek dakeyun APU DIOS hedin hi-gatu pandinnelan yu. Hedin hi-gatu kahwaen yun pampebaddangan yu, ey baddangan dakeyun hi-gatu, nem hedin iwwalleng yu ey iwwaleng dakeyng dama. <sup>3</sup> Nebayag ni eleg hanguden idan helag Israel hu makulug ni Dios. Endi padin kamantuttuddun hi-gada niya endi olden ni daka u-unnuda. <sup>4</sup> Nem hedin immali ligat da ey ida kamambanggad ni mengu-unnud ni AP-APU e Dios dan helag Israel. Tudda kabaddangi hedin nampehemhemmek idan hi-gatu. <sup>5</sup> Yaddan nunman ni tsimpuh ey endi kaumlaw di edum ni bebley tep endi linggep e ebuh guluh niya ligat ni wadad kebebbebley. <sup>6</sup> Ida kamampanggubbat hu kebebbebley tep impaelin Apu Dios hu dakel ni ligat da. <sup>7</sup> Nem hedin hi-gayu, man mahapul ni pekedhel yu nemnem yu et eleg kayu medismayah, tep wadalli kayyaggud ni gun-uden yud ngunu yu."

<sup>8</sup> Dingngel nan Asa hu impeamtan Asariah e u-ungngan Oded, ey timmuled et tudda pan-ekalen emin hu kinapyaddan tuon dios di kebebbley di Judah niyad Benjamin, anin idad bebley ni sinekup dad duntuduntug ni bebley di Epraim. Et iyayyaggud tu etan pan-appitan nan APU DIOS di mahkang ni dallin ni Tempol.

<sup>9</sup> Entanni et ayagan Asa ida helag Judah niyadda helag Benjamin anin idan helag Epraim, yadda helag di Manasseh nan Simeon, tep dakel ni hi-gada immalin nekibebley eman ni nenang-angan da e kepekabbaddangin APU DIOS hi Asa, <sup>10</sup> et maemung idad Jerusalem eman ni meikkatlun bulan ni meikkahampulut liman toon ni nampatulana Asa. <sup>11</sup> Yan nunman ni aggew ey in-appit dan APU DIOS hu edum ni imbesik dad gubat e pitun gatut ni baka, pitun libun kalneroh niya gelding. <sup>12</sup> Inhammad dan inhuummangan e ya hu AP-APU e Dios ida lan aammed dan ebuh hu daydayawen da. <sup>13</sup> Simbal dan emin e meippepetey hu hakey ni tuu, u-ungnga winu nea-amma, laki winu biin eleg menaydayaw ni hi-gatu. <sup>14</sup> Intekuk dan nansapatah di ngadan APU DIOS niya nan-ipatnol da tangguyup. <sup>15</sup> Nan-am-amleng idan emin tep nalpud puhu da huyyan insapatah da e eleg ida mandewadewa. Nemahhig amleng dan nampebaddang nan APU DIOS tep dingngel tu dasal da et pelinggep tudda e eleg tu iebulut ni gubbaten idan buhul daddad nanlinikweh ni bebley da.

<sup>16</sup> Entanni ey ingkal Asa hi apu tu hi Maakah di ngunu tun inan patul tep nengapyan biin dios tu e hi Asherah. Linggeh Asa humman ni kinapyan apu tu et dikhalen tu et giheben tud Nedeklan e Kidron. <sup>17</sup> Anin ni eleg bahbahen Asa idan emin hu penaydayawan ni beken ni makulug ni dios di bebley da et ingkahakey tun APU DIOS hu tuka penaydayaw ni ketaggu tu. <sup>18</sup> Inlaw tud Tempol emin ida balitik niya silber niyadda ngunut ni in-eng-eng da lan dewwan ametu e hi Abijah nan Apu Dios. <sup>19</sup> Endi an nengubat ni bebley da ingganah eman ni telumpulut liman toon ni nan-ap-apuan tu.

## 16

### *Yadda guluh di Israel (1 Kings 15:17-22)*

<sup>1</sup> Yan eman ni meikkatelumpulu et enem ni toon ni nan-ap-apuan Asa di Judah ey ginubat Baasha e patul di Israel et ilepu tun hammaden hu luhud ni Ramah malat endi umhegep niya endi meukkat di Judah. <sup>2</sup> Et ya impahding Asa ey immalan silber niya balitik di daka pengittelluin nangebalol di Tempol niyad palasyoh et palaw tud Damascus di Syria nan hi Benhadad e patul et ipead tu e kantuy <sup>3</sup> "Attu anhan et ibangngad tan nunya hu kayyaggud ni kapandagyumidda lan a-ammed ta et mambaddang ita? Huyyan silber niya balitik ey iddawat kun hi-gam ma-lat isiked mun memaddang nan Baasha e patul di Israel et mapilit ni mengkal idan sindalu tu eyad bebley ku."

<sup>4</sup> Inebulut Benhadad humman ni inhel Asa et itu-dak tudda ap-apun sindalu tu niyadda sindalu da et da gubaten ida bebley di Israel. Hinggep da et sakupen dadda bebley di Ijon, ya Dan, ya Abel Bet Maakah niyaddan hu emin hu etta-teng ni bebley di Naptali ni daka pambodegahi. <sup>5</sup> Dingngel Baasha humman ni neipahding et isiked tun manluhhud ni Ramah. <sup>6</sup> Entanni ey in-olden nan Asa idan ijudah et da pahanen ida batu niyadda keyew ni nanluhud Baasha ni Ramah et usalen dan panluhhud ni Geba niya Mispah.

### *Hi Hanani e prophet*

<sup>7</sup> Yan nunman ni tsimpuh ey limmaw hi Hanani e prophet di kad-an patul e hi Asa et kantuy "Ya patul di Syria nandinelan mu e beken ni ya AP-APU e Dios mu, et humman hu, endi law kabaelan mun mengapput idan sindalud Syria. <sup>8</sup> Yan nunman ey nandinel kan APU DIOS, et mukun impengapput daka, anin ni dakel ni peteg sindalun Ethiopia niya Libya, niya anin ni dakel hu kalesah dan inusal da niya dakel sindalu dan nampantakkay ni kebayyu. <sup>9</sup> Tep hi APU DIOS ey tuka peka-ang-angan emin hu kameipahpahding di kebebbley eyad puyek niya tuka petuled hu nemnem idan tuu ma-lat hi-gatun ebuh hu pandinnelan da. Eleg mu nemnemen et ipahding mu hu impahding mu, et humman hu, meippalpun nunya ey mekiggubgubbat kan ingganah." <sup>10</sup> Bimmubbunget hi Asa nunyan inhel Hanani et pakelabut tu. Ey yan nunya daman tsimpuh hu nengilepuan Asa ni makabbunget idan edum ni tuu.

### *Ya nepappegan ni nan-ap-apuan Asa (1 Kings 15:23-24)*

<sup>11</sup> Emin ida neipahding ni nan-ap-apuan Asa meippalpun laputu ingganah ni neteyyan tu ey neitudek di Liblud idan Patul di Judah niyad Israel. <sup>12</sup> Yan eman ni meikkatelumpulut heyam ni toon ni nampatulana Asa ey nepi-day tep ya nemahhig ni

degeh tud heli tu. Nem anin ni nemahhig degeh tu et eleg mampebaddang nan APU DIOS tep yadda doktor hu nandinelan tun nampaegahan tu. <sup>13</sup> Nelabah dewwan toon ey netey <sup>14</sup> et ikulung dad kulung ni kinapya tud Bebley David. Inha-ad da annel tud ugrippan ni neha-adan ni mebanglun lana et handa ikulung. Ey nan-apuy idan matbel ni apuy ni pengippeang-ang dan lispituh dan hi-gatu.

## 17

### *Ya nampatulan Jehoshaphat*

<sup>1</sup> Neihullul hi Jehoshaphat nan ametu e hi Asa ni nampatul et ihammad tu nan-ap-upuan tud Judah ma-lat beken ni nelakah ni gubbaten idan iisrael. <sup>2</sup> Impustuh tudda sindalud kebbebley di Judah e nehammad ni neluhud ni batu, yadda bebley di nedunduntug niyadda bebley ni sinekup ametu e hi Asa di Epraim. <sup>3</sup> Binendisyonan APU DIOS hi Jehoshaphat tep inu-unnud tu hu impahding ametu e eleg tu dayawen hi Baal. <sup>4</sup> Inu-unnud tu tugun Apu Dios e Dios ametu niya nansilbin hi-gatu et eleg tu iu-unnud ni impahding idan patul di Israel. <sup>5</sup> Et humman hu, inhammad APU DIOS hu nan-ap-upuan Jehoshaphat di Judah. Emin ida tuu tu ey in-alian dan iddawat dan hi-gatu et kumedangyan, ey et-eteng ni lispituh dan hi-gatu. <sup>6</sup> Ingkahaakey tu nemnem tun nansilbin APU DIOS ey binahbah tudan emin hu kapenaydayawin beken ni makulug ni dios niyadda tukud ni biin dios e hi Asherah di Judah.

<sup>7</sup> Yan meikkatulun toon ni nan-ap-upuan tu ey intu-dak tudda huyyan opisyal tun mantuttuddud kebbebley di Judah: hi Benhail, hi Obadiah, hi Sekariah, hi Nethanel et hi Mikaiah. <sup>8</sup> Neikuyug ida heyam ni helag Levi niya dewwan padi. Ya ngadan idan nunyan helag Levi ey hi Semaiah, hi Nethaniah, hi Sebadaiah, hi Asahel, hi Semiramot, hi Jehonathan, hi Adonijah, hi Tobijah et hi Tobadonijah. Ey yadda padin nekilaw ey di Elishama nan Jehoram. <sup>9</sup> Intabin da hu liblul ni Tugun APU DIOS et lumaw idad kebbebley di Judah ni mantuttuddu.

<sup>10</sup> Impambalin APU DIOS ni kaumtakut ida hu nampambebley di nanlinikweh di Judah et eleg da gubaten hi Jehoshaphat. <sup>11</sup> Yadda edum ni iPilistia ey immidwat idan nan Jehoshaphat ni dakel ni silver niya edum ni indawat da. Ey immidwat ida dama Arab ni pitun libu et pitun gatut ni lakkitun kalneroh niya pitun libu et pitun gatut ni gelding. <sup>12</sup> Kamangke-dumi kabaelan Jehoshaphat et memehwat di emin ni bebley di Judah ni nehammad ni luhud ni batu niya memehwat ni etta-teng ni bebley <sup>13</sup> ni nengiha-adan tudan mahapul da.

Inha-ad tud Jerusalem ida nangkelaing ni sindalu <sup>14</sup> meippuun di nahlagan da. Hi Adnah hu ap-apuddan sindalun helag nan Judah e telunggatut ni libu hu bilang da. <sup>15</sup> Ya meihhayned ey hi Jehohanana e dewanggatut et newalun libu sindalu tu. <sup>16</sup> Ya meikkatul ey hi Amasiah e u-unggan Sikri e dewanggatut ni libu sindalu tu. (Hi Amasiah ey kaman-am-amleng ni nengabulut ni mansilbin APU DIOS.) <sup>17</sup> Ya ap-apuddan sindalun nahlag nan Benjamin ey hi Eliada e hakey ni nelaing ni sindalun dewanggatut hu sindalu tun nan-almas idan happiyaw niya pana. <sup>18</sup> Ya meihhayned ni hi-gatu ey hi Jehosabad e hanggatut et newalun libu sindalu tun neka-almasan idan mekiggubbat. <sup>19</sup> Huyyadda sindalun kamansilbin patul di Jerusalem ey hin-appil ida dama neipustuh di edum ni bebley di Judah e neluhud ni batu.

## 18

### *Ya beken ni kayyaggud ni impeamtan Mikaiah e prophet nan Ahab (1 Kings 22:1-28)*

<sup>1</sup> Kimmedangyan ni peteg hi Jehoshaphat niya kameiddeyyaw. Nekiepun Ahab e patul ni Israel tep inahwan u-ungga tun laki hu u-unggan Ahab ni bii. <sup>2</sup> Nelabah pigan toon ey limmaw hi Jehoshaphat ni an mengiddu-ngaw nan Ahab di Samaria. Et mampahemul hi Ahab e kinleng tu dakel ni kalneroh niya baka et pengapnga tun hi-gatu niyadda opisyal ni ingkuyug tu. Entanni ey imbagetun Jehoshaphat hedini dammutun mandadaddan mengubbat ni Ramot Gilead. <sup>3</sup> Kantuy "Kaw dammutu anhan ni da-daan muwak ni mengubbat ni Ramot Gilead?"

Himmumang hi Jehoshaphat ey kantuy "Dammutu, kele tep eleg daka da-dai ey hangagi ita. Ikuyug mudda sindalud et mandalem ida. <sup>4</sup> Nem ya memengngulun pedhing tayu ey mahmahan tayu nin APU DIOS hedini hipa e-helen tu." <sup>5</sup> Et ayagan idan Ahab emin hu prophet tu e umlaw di epat ni gatut hu bilang da, et mahmahan tun hi-gada e kantuy "Hipa kanyu, kaw tayu gubbaten hu Ramot Gilead winu eleg?"

Himmumang ida ey kanday "Em, tayudda gubbaten, et nanna-ud ni pengapput dait sun Apu Dios."

<sup>6</sup> NEM kan Jehoshaphat ey "Kaw endi prophet nan APU DIOS di deyan panmahmahan tayu?"

<sup>7</sup> Kan Ahab ey "Wada hu hakey e hi Mikaiah e u-ungngan Imlah nem anggebe-hel ku tep endi kayyaggud ni tuka e-helan hi-gak, lawah ni ingganah."

Kan Jehoshaphat ey "Entan tu ihannitan hu ehel mu! Ya kayyaggud ni pehding ta ey dedngelen ta dama hedin hipa e-helen tu." <sup>8</sup> Et itu-dak nan Ahab hu hakey ni opisyal tun mengeyyag nan Mikaiah ma-lat mengin-aali. <sup>9</sup> Nambalwasid Ahab nan Jehoshaphat ni balwasin patul et yumudung idad yuddungngan dad kapan-illikin neihnup di eheb di Samaria et man-abig ida prophet Ahab di hinangga da. <sup>10</sup> Wadadman hi Sedekiah e u-ungngan Kenaanah e nengapyan ha-duk ni gumeK et peang-ang tu et kantun Ahab ey "Kan APU DIOS ey 'Heni kayulli newang ni mampena-duk idan iSyria ingganah paka-apputen yudda.'" <sup>11</sup> Emin ida etan edum ni prophet ey nan-iingngeh inhel da. Kanday "Mu gubat hu Ramot Gilead et nanna-ud ni mengapput ka tep pengapput dakan APU DIOS." <sup>12</sup> Ya etan opisyal ni an nengawit nan Mikaiah ey kantun hi-gatuy "Ang-ang mu kuma tep emin ida edum ni prophet ey kanday mengapput hu patul tayu e hi Ahab, et humman hu, mahapul ni i-unnud mud inhel da!" <sup>13</sup> NEM kan Mikaiah ey "Hedin hi-gak, man issapatah kud ngadan ni AP-APU e Dios ku e wadan ingganah e ya e-helen tun ebuh hu e-helek."

<sup>14</sup> Dimmateng hi Mikaiah ey kan Ahab ni hi-gatuy "Mikaiah, kaw umlaw kamin Jehoshaphat ni mengubbat ni Ramot Gilead winu eleg?" Himmumang hi Mikaiah ey kantuy "Lakkayuy et nanna-ud ni mengapput kayu tep pengapput dakeyun APU DIOS."

<sup>15</sup> NEM kan Ahab ey "Kaw eggak eheehelen ni hi-gam e ya makulug ni ebuh ni kae-helan APU DIOS hu e-helen mu?" <sup>16</sup> Et kan Mikaiah ey "Inang-ang kudda sindalun helag Israel e newahit idan emin di duduntug, e henidda kalneroh ni endi mampattul ni hi-gada. Ey immehel hi APU DIOS e kantuy 'Endi mengippengnguluddan nunyan sindalu. Paenamut yudda ma-lat luminggep ida.'" "

<sup>17</sup> Et kan Ahab nan Jehoshaphat ey "Inang-ang mu? Kangku nisi dedan ni hi-gam ey endi kayyaggud ni kapeamtan Mikaiah! Lawah ni ingganah." <sup>18</sup> Intuluy Mikaiah ni immehel e kantuy "Dengel yu! Inang-ang ku hi APU DIOS e yimmudung di yuddungngan tu ey immehng idan emin hu anghel tud kad-an tu. <sup>19</sup> Entanni ey kan APU DIOS ni hi-gaday 'Hipa umlaw ni an mene-ul nan Ahab e patul di Israel et tu gubaten hu Ramot Gilead et matey diman?'"

Ey wada hakkey ni hi-gada ey hin-appil tuka pan-e-hela et endi petekkan tu. <sup>20</sup> Lektattuy limmaw di hinanggan APU DIOS hu hakey ni ispirituh et kantuy 'Hi-gak hu umlaw ni an mene-ul ni hi-gatu.'

Kan APU DIOS ey 'Hipa pehding mu?'

<sup>21</sup> Kan etan ni ispirituh ey 'Umlawwak et nak pan-itek idan emin hu prophet Ahab.'

Kan APU DIOS ey 'Lakkay, et nanna-ud ni mehe-ul.' <sup>22</sup> Et mukun hannya neipahding e impan-itek nan APU DIOS ida eya prophet mu, niya hi-gatu nengiolden e mettey ka!"

<sup>23</sup> Entanni ey limmaw hi Sedekiah e u-ungngan Kenaanah di kad-an Makaanah et ampingen tu et kantuy "Kaw pigantu ni-ngangu neni-yanan ni ispirituh APU DIOS ni hi-gak et umhel ni hi-gam?"

<sup>24</sup> Kan Mikaiah ey "Amtaem alin mu pantelluan di neihudek ni kuwaltuh."

<sup>25</sup> Entanni ey in-older Ahab e kantuy "Depap yu hi Mikaiah et ilaw yun Amon e governor niyad kad-an Joas e u-ungngak. <sup>26</sup> Ehel yun hi-gada e ikkalebut da et ebuh hu danum niya sinapay ni iddawat dan hi-gatun kennen tu ingganah mambangngaddak e endi neipahding ni lawah ni hi-gak."

<sup>27</sup> Kan Mikaiah ey "Hedin mategu kan mambangngad, humman keang-angan tu e beken hi APU DIOS ni immehel ni hi-gak!" Kantu pay ey "Emin kayun neamung, nemnemnem yudda huyyan inhel ku!"

<sup>28</sup> Et lumaw di Ahab e patul di Israel nan Jehoshaphat e patul di Judah ni an nengubat ni Ramot Gilead. <sup>29</sup> Yan ingganah da ey kan Ahab nan Jehoshaphat ey "Ya hin-appil ibbalwasik et endi mengimmatun ni hi-gak, nem hedin hi-gam man pambalwasi kan balwasi dedan ni patul." Et humman hu impahding nan Ahab e patul di Israel e hinullulan tu ang-ang tu et ida makigubat.

<sup>30</sup> Ya etan patul di Syria ey in-older tuddan aap-apun sindalun nampangkalesah e kantuy "Ebih hu patul di Israel ni petek yun petteyen." <sup>31</sup> Et mukun yan nenang-angan idan sindalun Syria nan Jehoshaphat ey nampedug da tep kanda nem hi-gatu etan patul di Israel, nem kamantetekkuk ni mampebaddang et baddangan APU DIOS et pasiked tudda kamampemdug ni hi-gatu. <sup>32</sup> Tep yan nengamtaan idan nunman ni sindalu e beken ni hi-gatu patul di Israel ey insiked dan memdug ni hi-gatu.



<sup>33</sup> Nem hedini hi Ahab e patul di Israel, man wada hu sindalun iSyria ni neipaddih ni neka-iptek hu impanetud nambattanan ni nanhuupan ni gumeke ni inhuklub tu. Et itkuk tu etan ni kamampellinun kalesah tu e kantuy “Nepana-ak! Pambangngad ita kuma et hi-yanen ta eya kapanggugubati.” <sup>34</sup> Ida kamanggugubat nunman ni aggew ey immen hi Ahab e kamandangdangkig di kalesah tun inhangga tuddan iSyria ingganah ni hambatangnan. Entanni et kamangkelinnug hu aggew ey netey.

## 19

<sup>1</sup> Hi Jehoshaphat e patul di Judah ey melinggep ni immanemut di Jerusalem. <sup>2</sup> Dimmateng ey an dinamun Jehu e prophet ni u-ungngan Hanani et kantun hi-gatuy “Kele mu binaddangan ida lawah ni tuu? Ey kele nakappinhed mudda hu angebebehel da hi APU DIOS? Nemahhig hu bunget APU DIOS ni hi-gam tep ya huttan ni impahding mu. <sup>3</sup> Nem wada kuma kayyagud ni hi-gam, tep impa-kal mudda emin tukud ni dios e hi Asherah niya impahding mu pinhed Apu Dios ni meippahding.”

<sup>4</sup> Nambebley hi Jehoshaphat di Jerusalem nem kaum-umlaw di kebebbebley meipalpud Beersheba ingganah idad duntuduntug ni bebley di Epraim e tuka an e-e-heladdan tutu-un mengu-unnud ida mewan ni AP-APU e Dios ida lan aammed da. <sup>5</sup> Pinutuk tudda manhuwet di emin ni etta-teng ni bebley ni neluhud di Judah. <sup>6</sup> Kantun hi-gaday “Mahapul ni pekannememen yu ey han yu inhel hu pengippennuh yun panhahallaan idan tuu, tep beken ni ya tuu, nem hi APU DIOS hu peamleng yun pengippahdingan yun ngunu yu. Baddangan dakeyun hi-gatu ma-lat limpiyuh pengippennuh yun emin ni panhahallaan ni tutu-u. <sup>7</sup> Takusi yu hi APU DIOS et eleg yu legemen ni pengippahding ni ngunu yu tep hi-gatu e AP-APU e Dios tayu ey eleg tu i-abulut hu beken ni limpiyuh ni pehding, niya eleg tu i-abulut ni mampebeyyad ma-lat ipahding hu beken ni limpiyuh.”

<sup>8</sup> Pinutuk Jehoshaphat ida edum ni helag Levi ni beken ni padi, yadda edum ni padi niyadda aap-apun edum ni helag Israel ni manhuwet di Jerusalem et ipenuh dadda kasuh ni meippanggep ni nambahulan ni hakey ni tuun Tugun APU DIOS niyadda kapanhahallain tutu-u. <sup>9</sup> Huyyadda edum ni intugun tun pehding da: “Mahapul ni tekkutan yu hi APU DIOS ni pengippahdingan yun ngunu yu, ey mahapul ni endi hu mee-ehhel ni lawah ni pehding yu, ey mahapul ni ikkahhakey yu nemnem yu niya puhu yun pengippahdingan yun ngunu yu. <sup>10</sup> Hedin wada nengi-lin hi-gayun diklamuh meippanggep ni pimmatey, niya eleg da pengu-unnudan ni Tugun APU DIOS winu hipan intugun tu, ey mahapul ni e-helan yudda ma-lat isiked dan manliwwat nan APU DIOS et eleg bumunget ni hi-gayu. Ipahding yudda huyya e eleg kayu manliwat.

<sup>11</sup> Hi Amariah e eta-gey ni padi hu mengippanghel hedini nanliwat nan APU DIOS hu hakey ni tuu et lebbeng tun mekastigu. Ey hi Sebadiah e u-ungngan Ismael e kamengipappanggulun helag Judah hu menghel hedini nambahul hu hakey ni tuud edum tun tuu. Yadda helag Levi hu umbaddang ni hi-gayun menang-ang ma-lat limpiyuh hu meippahding ni pengippennuhan yun kasuh. Pekedhel yu nemnem yun pengippahdingan yun ngunu yu. Hi APU DIOS hu memaddang ni hi-gayun mengippahding ni kayyagud.”

## 20

*Ya nengubatan idan helag Israel idan iMoab, iAmmon niyadda iEdom*

<sup>1</sup> Entanni ey nekigubat ida sindalud Moab, yadda iAmmon niyadda edum ni Meunites nan Jehoshaphat. <sup>2</sup> Wada immalin nanghel nan Jehoshaphat e kantuy “Immen idalli dakel ni sindalun iEdom ni menggubat ni hi-gam. Nalpudda etan di kamelebbahi hu Netey ni Baybay. Wadadda law di Hasason Tamar.” (En Gedi hakey ni ngadan tu.) <sup>3</sup> Simmakut hi Jehoshaphat tep ya huyyan dingngel tun angettakkut ni meippahding et mandasal nan APU DIOS et ibega tu hedini hipa pehding tu. Ey in-olden tun emin idan tutu-ud Judah niyad Jerusalem e mantetpel ida e eleg ida mengngan. <sup>4</sup> Et umlidda tutu-ud Jerusalem ni nalpudd kebebbebley di Judah ma-lat mampebaddang idan APU DIOS di dasal da.

<sup>5</sup> Immehng hi Jehoshaphat di hinanggaddan nunman ni neamung ni iJudah yadda iJerusalem di pakekapan dallin ni Tempol Apu Dios, <sup>6</sup> et mandasal e kantuy “APU DIOS e Dios ida lan aammed mi, hi-gam ni ebuh hu Dios ni wadad kabunyan. Ey hi-gam hu ap-apun emin di kapan-ap-apui eyad puyek. Eta-gey ka niya et-eteng ni kabaelan mu, et humman hu, endi tuun kabaelan tun mekihhanggan hi-gam. <sup>7</sup> Dinegyun mudda hu sigud ni nambebley di deya eman ni dintengan ida lan aammed min imbilang mun tutu-um, et idwat mun hi-gadan helag Abraham e gayyum mu eyadda bebley ni beltanen

dan ingganah. <sup>8</sup> Nambbley ida law di deya et behwatan da eya Tempol mu. <sup>9</sup> Et kanday 'Hedin wada ligat ni immalin hi-gami, henin gubat, ya degeh niya bisil, umali kami et umehneng kamid hinangga eyan Tempol mun mika penaydayawin hi-gam, et mampehemhemmek kamin hi-gam et dengelem dasal mi et ihwang dakemid ligat mi.'

<sup>10</sup> Ang-ang mu huyyan pehding eyaddan sindalud Ammon, yadda iMoab niyadda sindalun nambbley di Duntug e Seir di Edom. Eleg mu iebulut ida la aammed min mengubbat ni hi-gada eman ni nalpuan dad Egypt, et panlikweh mudda et eleg dadda bahbahen. <sup>11</sup> Ey hipa huyyan daka pehpehding kumedek ni hi-gamin nunya e pinhed dan degyunen dakemi eyad bebley ni imepeltan mun hi-gami. <sup>12</sup> Apu e Dios mi, pasiked mudda anhan. Eleg mi amta pehding mi, nem kami kamedinnel e baddangan dakemin hi-gam, tep endi kabelaan min mekihhanggan dakel ni peteg ni sindalun mengubbat ni hi-gami."

<sup>13</sup> Emin ida lalakkin iJudah, anin idan ahwa da, yadda u-ungnga da ey immen ida e immehneng idad hinanggan APU DIOS. <sup>14</sup> Entanni ey newada Ispirituh APU DIOS nan Jahasiel e u-unggan Sekariah e u-unggan Benaiah e u-unggan Jeiel e u-unggan Mattaniah e helag Asap e helag Levi, <sup>15</sup> et kantun Jehoshaphat ey "Dengel mu e apu patul huuya, anin ni hi-gayun iJudah niyadda iJerusalem! Kan APU DIOS ey 'Entan takut yu niya entan kakkaguh yuddan nunman ni naka-let niya dakel ni peteg ni sindalu, tep hi APU DIOS hu mekiggubbat ni hi-gada e beken kayu. <sup>16</sup> Egah kayu kuman mekiggubbat ni kabuhhan. Ang-angen yuddallin umteyed di matyed di Sis di utduk ni nandeklan di eleg mebebleyid Jewel. <sup>17</sup> Nem eleg pay mahapul ni kayu mekiggubbat. Nealay neipustuh kayu ey immi-ineng kayu et ang-angen yu pengapputan APU DIOS ni hi-gada. Baddangan dakeyun hi-gatu, hi-gayuddan iJudah niyadda iJerusalem. Entan nisi takut yu niya entan kakkaguh yu. Elaw kayun kabuhhan tep baddangan dakeyun APU DIOS.'"

<sup>18</sup> Dingngel da huuya ey nanyuung hi Jehoshaphat e patul niya nanyuung damadda emin hu helag Israel et dayawen da hi APU DIOS. <sup>19</sup> Entanni ey immehneng ida helag Levi ni helag Kohat nan Korah et dayawen da hi APU DIOS e Dios dan helag Israel et daka pan-ituk hu daka pandaydayaw.

<sup>20</sup> Nawa-wa et humelaman ida sindalun iJudah di eleg mebebleyid Tekoa. Yan wadaddad dalan ey immehneng hi Jehoshaphat et kantuddan tuu tuy "Dengel yuwak, hi-gayuddan iJudah niyadda iJerusalem! Kulug yu hu AP-APU e Dios yu et mannananeng kayun na-let, niya kulug yudda prophet ma-lat kayyagud ni emin pambalinalan ni pehding yu." <sup>21</sup> Negibbuh humman ni inhel tu et ehelen tuddan kaman-a-appeh e memappangnguludda et ia-appehan da hi APU DIOS niya daydayawen da kasina-gey tu. Heninnuy in-a-appeh da: "Mampesalamat itsun APU DIOS, tep tuka pannananeng hu et-eteng ni impemihed tun hi-gatsu."

<sup>22</sup> Yan nunman ni inlapu dan man-a-appeh ni mandaydayaw ey impanggugubat APU DIOS ida sindalun iAmmon, yadda iMoab niyadda iEdom et meapput ida. <sup>23</sup> Nambaddang ida iAmmon niyadda iMoab et pateyen dan emin ida sindalun iEdom. Entannit pintey daddan emin ey hi-gada mewan nampapatey. <sup>24</sup> Et mukun dimmateng ida sindalun iJudah di kapan-uhdungid eleg mebebleyi ey inang-ang da hu dakel ni peteg ni nangkeiwehit ni annel idan nangketey ni tuu e endi hakey ni hi-gadan an bimmesik. <sup>25</sup> Limmaw hi Jehoshaphat e patul ni yadda tuu tu et da pan-amungen hu ngunut idan nunman ni nangketey ni sindalun buhul da. Nemahhig e dakel ni peteg inla dan babakka, yadda kennen, yadda balwasi niyadda nebalal ni usal da, et eleg ida kumamman pakatnged. Limmaw di tellun aggew hu nengamungan daddan emin nunman. <sup>26</sup> Neamung idan meikka-pat ni aggew et dayawen da hi APU DIOS di Nedeklan e Berakah e ya keibbellinan tu ey 'Bendisyon' et ingganah nunya ey humman ngadan tu.

<sup>27</sup> Impangulun Jehoshaphat ida sindalun iJudah niyadda iJerusalem et ida kaman-amamleng ni nambanggad di Jerusalem tep inapput APU DIOS hu buhul da. <sup>28</sup> Dimmateng idad Jerusalem et lumaw idad Tempol APU DIOS et manggitalah ida, ey nan-ayyuding ida niya nantangguyup ida ey menglaw ida.

<sup>29</sup> Dingngel dad kebebbley hu impahding APU DIOS ni nekigubat idan buhul ni helag Israel ey nemahhig takut dan hi-gatu. <sup>30</sup> Et melinggep kaya mewan law hu nan-ap-apun Jehoshaphat tep endiddad nambbley di nanlinikweh hu immidwat ni ligat da. <sup>31</sup> Nampatul hi Jehoshaphat di Judah eman ni telumpulul lima toon tu et man-ap-apun dewampulut lima toon di Jerusalem. Hi Asubah e u-unggan Silhi hu inetu. <sup>32</sup> Kayyagud impahding Jehoshaphat ni nampatul. Inu-unnud tu hu elaw ametu hi Asa e impahding tu pinhed APU DIOS. <sup>33</sup> Nem eleg tu bahbahen ida penaydayawan ni beken ni makulug ni dios niya eleg ikahhakey idan tuu tun nandayaw nan Apu Dios.

<sup>34</sup> Ya edum ni impahding Jehoshaphat ni nampatul tu e neitudek di Libluh Jehu e u-ungngan Hanani e nei-dum di Libluh idan Patul di Israel.

<sup>35</sup> Yan kamangkepapppeg hu nan-ap-apuan tu ey nekibaddang nan Ahasiah e patul di Israel. Hi Ahasiah ey lawah ni tuu. <sup>36</sup> Nambaddang idan nampengapyan bapor di Esion Geber. <sup>37</sup> Entanni ey impeamtan Elieser e u-ungngan Dodabahu e iMareslah hu beken ni kayyagud ni meipahding nan Jehoshaphat. Kantuy "Nekibaddang kan Ahasiah, et humman hu, bahbahen APU DIOS hu nginunu yu." Immamnu humman e nebahbah ida etan bapor et eleg ida maibiyahed di baybay.

## 21

### *Ya nampatulanan Jehoram di Judah*

<sup>1</sup> Netey hi Jehoshaphat et ikulung dad kulung dad Bebley David etan di gungat idan aammed, et maihullul hi Jehoram e u-ungnga tun nampatul. <sup>2</sup> Yadda agin Jehoram ni laki ey hi Asariah, hi Jehiel, hi Sekariah, hi Asariahu, hi Michael et hi Sephatiah. <sup>3</sup> Indawtan amedaddan silber, ya balitik niyadda edum ni nebalol ni tenged. Inpeng tu mewan ni hi-gada hu edum ni etta-teng ni bebley di Judah e nehammad ni neluhud. Nem hi Jehoram hu nambalin ni patul tep hi-gatu pengulwan. <sup>4</sup> Entannit inhammad tu nan-ap-apuan tu ey pintey tuddan emin hu aaggi tun laki, anin idan edum ni kamengipappangngulun bebley. <sup>5</sup> Telumpulut dewwa toon Jehoram eman ni nampatulanan tud Judah et man-ap-apun walun toon, e yad Jerusalem nanha-adan tu. <sup>6</sup> Inu-unnud tu lawah ni impahding idan patul di Israel henin Ahab, tep inahwa tu hu u-ungngan Ahab. Humman idan lawah ni impahding tu ey kapakabballawan APU DIOS. <sup>7</sup> Nem gapun nekitbalan APU DIOS nan David ni nunman ey eleg tu iebulut ni mebahbah hu nan-ap-apuan tu tep impakulug tu lan David e yadda helag tu man-ap-apun ingganah. <sup>8</sup> Yan nampatulanan Jehoram ey ngimmehay ida iEdom et pilien da hakey ni mampatul ngun hi-gada. <sup>9</sup> Et an gubaten Jehoram hu Edom e inlaw tun emin sindalu tun nanlugan idad kalesah. Wadad Jehoram diman ey hinekum idan iEdom, nem bimesik ni hileng. <sup>10</sup> Et neipalpun nunman ingganah nunya ey beken law ni sakup ni Judah hu bebley da. Ey yadda dama iLibnah ey ngimmehay ida eman ni neiwallengan Jehoram ni AP-APU e Dios ida lan aammed da. <sup>11</sup> Nambewhat tu penaydayawan ni beken ni makulug ni dios idad duntug di Judah niya impappangngulu tudda tutu-ud Judah niyad Jerusalem ni menaydayaw idan nunman ni dios.

<sup>12</sup> Entanni ey nantudek hi Elijah e prophet nan Jehoram e kantud tudek tuy "Heninnuy hu kan ni AP-APU e Dios ida lan ammed mu e hi David, kantuy 'Eleg mu u-unnuden ida kayyagud ni impahding nan amam e hi Jehoshaphat niya hi apum hi Asa. <sup>13</sup> Tep heni ka kumedek idan patul di Israel e lawah impenahding da. Impappangulum ida tutu-ud Jerusalem niyad Judah ni menaydayaw ni dios ni kinapayan tu, henin impenahding Ahab di Israel. Ey pintey mudda hu lalakkin aaggim ni kekkeddukdul nem hi-gam. <sup>14</sup> Et humman hu, yan nunya ey kamangkeddettengi law hu pengippahdingan APU DIOS ni nemahhig ni pengastigu tun hi-gam, yadda tutu-um, yadda u-ungngam, yadda ahwam ey emin ni wadan hi-gam. <sup>15</sup> Ya kastigum ey iddawtan dakan degeh ni egeh ni nemahhig degeh tu et meukkat utduk ni egeh mu.' " <sup>16</sup> Entanni ey impenemnem APU DIOS idan iPilistia niyadda Arab ni nambebley di neihnup di Ethiopia e da gubbaten hi Jehoram. <sup>17</sup> Et lumaw idad Judah et bahbahen dadda nehammad ni luhud nunman ni bebley et alen dan emin hu hipan nebalol di baley ni patul, anin idan u-ungnga tu niyadda ahwatu. Ebuhan etan udidyan ni u-ungnga tu e lakin hi Ahasiah ni eleg da ibsik. <sup>18</sup> Negibbuh ni neipahding huyya et pandegeh nan APU DIOS ni degeh ni egeh ni eleg meeggahi. <sup>19</sup> Nangnanglaw hu tsimpuh et yan ngannganih ni dewwan toon hu nandegehan tu ey neukat hu utduk ni egeh tu et nemahhig nanhelheltapan tu et lektattuy netey. Eleg ida man-apuy hu tuu tun pengiddeyyawan dan hi-gatun neteyyan tu, beken ni henin neipahding ida lan aammed tu. <sup>20</sup> Telumpulut dewwan toon tun nampatulanan tud Judah et man-ap-apun walun toon di Jerusalem. Ey yan neteyyan tu ey eleg ida lumemyung hu tuu tu. Ingkulung dad bebley David, nem eleg da ikulung di kulung idan patul.

## 22

### *Ya nampatulanan Ahasiah di Judah*

<sup>1</sup> Entanni ey piniliddan tutu-ud Jerusalem hi Ahasiah e udidyan ni lakin u-ungngan Jehoram ni meihullul ni patul. Yadda peppengulwan ni aaggi tun laki ey pintey idan Arab ni nengubatan dan hi-gada, et hi-gatu law nampatul di Judah. <sup>2</sup> Dewampulut

dewwa toon Ahasiah ni nampatulan tud Judah et man-ap-apun hantoon. \* Hi Athaliah hu inetu e inap-apun Omri e patul di Israel. <sup>3</sup> Lawah ida dama impenahding Ahasiah henin impenahding idan patul di Israel tep sinuttudduan inetu. <sup>4</sup> Impenahding tudda lawah ni angebe-hel APU DIOS henin impenahding ni familyah Ahab. Yan neteyyan ametu ey nambalin ida familyah Ahab ni konsihal tu et hi-gada himmulun ni nebahbahan tu. <sup>5</sup> Inu-unnud Ahasiah hu intugun da et makibaddang nan Joram e patul ni Israel e u-ungngan Ahab. Da ginubat hi Hasael e patul ni Syria di Ramot Gilead ey neliputan hi Joram. <sup>6</sup> Et mambangngad di Jesreel ma-lat mapwahan liput tu.

Ey hi Ahasiah e patul di Judah ey limmaw ni an nenang-ang ni hi-gatu. <sup>7</sup> Nem beken ni kayyaggud kumedek nambalanan nunman ni impahding tu. Tep ninemnem dedan law Apu Dios e yan nunman ni lawwan Ahasiah diman hu pengastiguan tun hi-gatu. Yan nunman ni wadadman hi Ahasiah ey immali hi Jehu e u-ungngan Nimsi e pinilin APU DIOS ni memappeg ni nan-ap-apuan ni familyah Ahab. <sup>8</sup> Yan kapampemetteyin Jehu idan familyah Ahab ey neipaddih ni inang-ang tudda edum ni opisyal ni Judah niyadda aaggin Ahasiah ni neikuyug ni hi-gatu et patyen Jehu idan emin. <sup>9</sup> Entanniy limmaw ida tutu-un Jehu ni an menemmak nan Ahasiah ey hina-kupan dad Samaria e nantaludman. Bineld da et ilaw dan Jehu et patyen tu. Inyayyaggud idan tutu-un ingkulung hi Ahasiah tep kanday "Hi-gatu ey inap-apun Jehoshaphat e kamekanggu-unnud lan APU DIOS." Entanni ey endid familyah Ahasiah hu kabaelan tun mampatul.

#### *Ya nampatulan Athaliah di Judah*

<sup>10</sup> Yan nengamtaan nan Athaliah e netey etan u-ungnga tun patul e hi Ahasiah ey in-olden tun petteyan dan emin hu aaggi niya familyah Ahasiah di Judah. <sup>11</sup> Nem indalunuh Jehosheba ni inewit hi Joas e gelang ni lakin u-ungngan Ahasiah niya etan biin kamengippatek ni hi-gatu e tudda itlud hakey ni kuwaltuh ni Tempol ma-lat eleg mailegat ni pemetteyan Athalia idan aaggi tu. Hi Jehosheba e ahwan Jehoiada e padi ey agin Ahasiah e u-ungngan Jehoram e patul nunman. <sup>12</sup> Impaptek tu hi Joas e intattalu tud Tempol Apu Dios ni enem ni toon ni nan-ap-apuan Athaliah.

## 23

<sup>1</sup> Yan meikkeppitun toon ni nan-ap-apuan Athaliah ey timmuled hi Jehoiada e padi et mekitbal idan liman aap-apun sindalu e hi Asariah e u-ungngan Jeroham, hi Ismael e u-ungngan Jehohanan, hi Asariah e u-ungngan Obed, hi Maaseiah e u-ungngan Adaiyah et hi Elishaphat e u-ungngan Sikri. <sup>2</sup> Nandalunuh idan limmaw di Judah et ayagan dadda aap-apun helag Levi et umlidda Jerusalem. <sup>3</sup> Neamung idan emin di Tempol Apu Dios et mekitebbalan ida etan ni patul ni u-ungnga. Kan Jehoiada ni hi-gaday "Nedateng law tsimpuh ni pan-ap-apuan eyan u-ungngan patul tep humman inhel APU DIOS e ya helag David hu mampatul ni hi-gatsu. <sup>4</sup> Mahapul ni heninnuy pehdng yu: Yadda padi niyadda edum dan helag Levi ni um-alin mangngunnun Sabaduh ey mantetludda e megennedwadda et mangguwalyadda edum etan idad eheb. <sup>5</sup> Umlaw ida edum di baley ni patul niya mangguwalya edum di Eheb e Yinudungan. Yadda edum ey manhad idad dallin ni Tempol. <sup>6</sup> Entan tu liwwan e ebuh ida nisi padi niyadda edum dan helag Levi ni mangngunnun nunman ni tsimpuh ni dammutun umhegeg di Tempol tep neieng-eng idan Apu Dios. Yadda etan edum ni tutu-u ey mahapul ni u-unnuden da huyyan intugun APU DIOS et manhad idad dallin. <sup>7</sup> Hi-gayun helag Levi ey mahapul ni nakaddaddan kayun mangguwalya etan ni patul e liktuben yu niya neuknut hu ispadah yu. Keiunnuunnud kayun hi-gatud lawwan tu, ey hedin wada mengippatnan umhegeg di Tempol, ey patey yu."

<sup>8</sup> Inu-unnud idan helag Levi niyadda tutu-u humman ni inhel Jehoiada ni pehdng da. Inemung idan kamengippangngulun nunman ni tellun grupuh hu tuu da, yadda mangngunnun nunman ni Sabaduh niyadda negibbuh ni nangngunu. Eleg dedan iebulut Jehoiada ni um-anemut ida etan negibbuh ngunu dan nunman ni Sabaduh. <sup>9</sup> Ey ingka-peng Jehoiada e padi idan nunman ni kamengippangngulu ida pahul niyadda happiyaw lan David e patul ni neitlud Tempol. <sup>10</sup> Humman idan guwalyan nangeuknut hu ispadah da ey meippustuh idad hinanggan Tempol niya liktuben da etan patul niya etan altar ma-lat guwalyaan da humman ni patul. <sup>11</sup> Entanni ey impabudal nan Jehoiada hi Joas e u-ungnga lan eman ni patul e hi Ahasiah et papngat tun hi-gatu hu pengat ni patul et idwat tun hi-gatu hu liblun ni neitudekan ni tugun ni pehdng ni man-ap-apu et peamta da e hi-gatu law hu patul. Dinuyagan da ulu tun lana et itkuk da e kanday "Mannenneng kan mampatul!"

\* 22:2 22:2 Emin ida patul di Judah ey yad Jerusalem hu nambebleyan dan nampatulan da.

<sup>12</sup> Dingngel nan Athaliah ida tutu-un kamemsik niya dingngel tu tekuk ni tutu-u tep ya amleng da etan ni patul ey impapuut tun limmaw di Tempol APU DIOS et tu ang-angen hedin hipa kameipahpading. <sup>13</sup> Ey inang-ang tu etan patul e immehneng di dagsin tukud ni heggeppan di Tempol e yadman hu kaehnengin patul. Ey yadda etan opisyal niyadda kamantanguyup ey immehneng idad dagsi etan ni patul. Ida kamampantetekkuk hu tuun amleng da ey pampetnul da tangguypup da. Yadda kaman-a-appeh ni nangnged ni daka petnul hu kamengipappangngulun daka pan-am-amlengi. Yan nenang-angan Athaliah idan nunya ey bini-ki tu balwasi tu et mantetekkuk e kantuy "Sinela yuwak! Sinela yuwak!" <sup>14</sup> Ey hi Jehoiada e padi, ey in-olden tuddan kamengipappangngulu e kantuy "I-hep yud Tempol hi Athaliah ey patey yu hu hipan tuun mengippatnan mengihwang ni hi-gatu. Entan tu patey eyad bawang ni Tempol APU DIOS." <sup>15</sup> Pinden da et ilaw dad baley ni patul et pateyen dad Eheb e Kebayyu. <sup>16</sup> Hi Jehoiada e padi ey impekital tu nan APU DIOS etan patul niyadda tuu ma-lat hi APU DIOS ni ebuh hu u-unnuden da. <sup>17</sup> Limmaw ida tuud tempol Baal e babbahen da. Binukki da etan kapan-appisin kinapya dan dios e hi Baal ey pintey da hi Mattan e padin Baal di hinanggan nunman ni pan-appitan. <sup>18</sup> Pinilin Jehoiada ida padin helag Levi e hi-gada ngenamung ni mampaptek di Tempol meippuun di kameunnud ni intugun lan David. Ey in-olden tun hi-gada mengi-appit nan APU DIOS idan kagihheba meippuun di tugun Moses. Ey hi-gada man-a-appeh ni pan-am-amlengan meippuun di tugun lan David e patul. <sup>19</sup> Impustuh tudda kamanguwalyaddad eheb di Tempol et eleg da pahgep ida kameibbillang ni beken ni malinih. <sup>20</sup> Entanni ey limmaw hi Jehoiada niyadda ap-apun sindalu, yadda eta-gey saad tu, yadda aap-apu niyaddan emin hu tutu-u, et da ikuyag hi Joas e patul e nalpuddad Tempol Apu Dios. Indalan dad nengin-ahpat ni eheb et lumaw idad baley ni patul et payudung dad yuddungngan ni patul. <sup>21</sup> Ey ida kaman-am-amleng emin tuu niya melinggep law bebley da tep netey hi Athaliah.

## 24

### *Ya nengiyayaggudan Joas ni Tempol*

<sup>1</sup> Pitu toon Joas eman ni nampatulun tud Judah et man-ap-apun na-pat ni toon e yad Jerusalem hu nanha-adan tu. Hi inetu ey hi Sibiah e iBeersheba. <sup>2</sup> Yan ketaggun Jehoiada e padi ey kamengippeamleng nan APU DIOS hu impahpading Joas. <sup>3</sup> Pinilin Jehoiada hu dewwan biin inahwan Joas et maweda u-ungnga dan lakaki niya bibi-i. <sup>4</sup> Nelabah pigan toon ey ninemnem Joas ni iyayaggud hu Tempol APU DIOS. <sup>5</sup> Et ayagan tudda padi niyadda edum dan helag Levi et kanton hi-gaday "Elaw kayuddad kebebbley di Judah ni nunya et yudda amungen hu buwis ni kaiddawat idan helag Israel ni katootoon ma-lat usalen tayun mengiyayaggud ni Tempol." Nem eleg da u-unnuden ni nunman ni nanghelan tu. <sup>6</sup> Et paeyag ni patul hi Jehoiada e eta-gey ni padi et kanton hi-gatuy "Kele eleg mu iga-gadda helag Levi ni an mengemmung di Judah niyad Jerusalem ni buwis ni meussal di Tempol? Huttan ni buwis ey in-olden lan Moses, e bega-en nan APU DIOS, idan helag Israel ma-lat mausal ni pengiyayaggudan ni Tabernacle."

<sup>7</sup> Yan nan-ap-apuan Athaliah ey hinggep idan tutu-u tu etan Tempol et usalen dadda neieng-eng ni ngunut ni nandaydayawan dan Baal. <sup>8</sup> Nampekapy hi Joas ni kaban ni nekapyad keyew et iha-ad dad heggeppan di Tempol. <sup>9</sup> Neipeamtaddan emin ni tuud Judah niyad Jerusalem e mahapul ni i-ali da iddawat dan APU DIOS meippuun di in-olden lan Moses e bega-en Apu Dios. Humman la in-olden tuddan edum tun helag Israel eman ni kaweda dad eleg mebebleyi. <sup>10</sup> Inebulut idan tutu-u humman et man-am-amleng idan nengi-lin pihuh da et mapnu etan kaban. <sup>11</sup> Hedin napnu etan kaban, man kaelladdan helag Levi et ilaw daddan opisyal ni patul ni inladdan sekretarih niyadda opisyal ni eta-gey ni padi humman ni pihuh et bilangen da. Hedin negibbuh, ey daka ibbanggad mewan humman ni kaban di Tempol. Hanniman ni kewa-wa-wa et lektattuy dakel neamung ni pihuh. <sup>12</sup> Indawat di Joas e patul nan Jehoiada humman idan pihuh etan idan ap-apun kamampaptek ni kamanggunnu et tumangdan idan karpenter niyadda kamampahhek ni batu et iyayaggud da Tempol APU DIOS. Simmangdan ida pay ni man-e-dih ni gumek niya giniling ni meussal diman.

<sup>13</sup> Impahding idan kamanggunnu emin hu kabaelan dan nengiyayaggud ni Tempol ey kayyaggud hu nambalinan ni ngunu da. Et ihammad da niya imbanggad da hu ang-ang dedan lan Tempol ni nunman. <sup>14</sup> Negibbuh ni inyayaggud da et ibanggad dan Joas e patul et hi Jehoiada e padi hu nehawal ni pihuh et usalen dan mengapyaddan meussal di penaydayawan, ya pan-appitan, anin idan indu niyadda basuh ni baliutuk niya silber. Yan ketaggun Jehoiada e padi ey eleg da battani hu daka pan-appisid Tempol. <sup>15</sup> Neka-a-amma hi Jehoiada et han matey eman ni hanggatut et telumpulu

toon tu. <sup>16</sup> Neikulung di kulung idan patul di Bebley David, tep neidaydayaw hi APU DIOS idan kayyaggun di impahding tun panyaggudan idan tutu-ud Israel et ya etan Tempol. <sup>17</sup> Nem ya law ni neteyyan Jehoiada ey immalidda aap-apud Judah et manyuung ida etan ni patul e hi Joas et ihaphapitan da et u-unnuden tu intugun da. <sup>18</sup> Insiked dan mandaydayaw di Tempol APU DIOS e Dios ida lan aammed da et ya etan tukud ni kinapya dan dios da e hi Asherah niyadda edum ni dios ni kinapyan tuu hu dinaydayaw da. Et bumunget hi APU DIOS idan nunyan panliwwatan ni kapehpehding idan iJudah niyadda iJerusalem. <sup>19</sup> Entanni ey bineal APU DIOS ida prophet et ehelan daddan etan ni tuu malat mambangngad idan mengu-unnud ni hi-gatu, nem eleg da hengngudan dedngelen hu daka e-hela. <sup>20</sup> Entanni newada hu Ispirituh Apu Dios nan Sekariah e u-unggan Jehoiada e padi et umehneng di hinanggaddan tutu-u et kantun hi-gaday "Kan Apu Dios ey 'Eleg yu u-unnuda tugun ku, et humman hu, eleg umyaggun biyag yu. Ey inwalleng yuwak, et mukun inwalleng dakeyu daman hi-gak.'" <sup>21</sup> Nem eleg pinhed nan Joas e patul niyadda opisyal tu humman ni inhel Sekariah et iuungbal da pemetteyan dan hi-gatu. In-olden nan Joas ni petteyan idan tutu-ud dallin ni Tempol et tengbaen da et matey. <sup>22</sup> Liniwwan nan Joas hu et-eteng ni impeminhed niya nehammad ni nengiehneng nan Jehoiada ni hi-gatu et papetey tu hi Sekariah e u-unggan Jehoiada. Kamangkattekattey hi Sekariah ey kantuy "Hi-gam e APU DIOS hu penang-ang eyan pehding dan hi-gak et ipahding mu lebbeng tun meippahding ni hi-gada." <sup>23</sup> Yan lapun nunman ni toon ey limmaw ida sindalun iSyria et da gubaten hi Joas. Hinggep dadda bebley di Judah, anin yad Jerusalem et patyen dan emin hu aap-apudman. Ey inla dan emin hu hipan wadad bebley et palaw dan patul dad Damascus. <sup>24</sup> Ekket hu bilang idan sindalun iSyria, nem binaddangan idan APU DIOS et apputen dadda sindalun Judah, anin ni daddakkel ida. Hanneya impahding APU DIOS ni nengastigu tun Joas tep inwalleng idan iJudah hu Dios ida lan aammed da. <sup>25</sup> Immanemut ida iSyria e hini-yan da hi Joas ni nekalliputan. Nem pintey idan opisyal tu tep ya nemateyan tun u-unggan Jehoiada e padi. Pintey da hi Joas e kaman-u-uggip di unggipan tu et da ikulung di Bebley David, nem eleg maikulung di kulung idan patul. <sup>26</sup> Yadda nematey ni hi-gatu ey hi Sabad e u-ungga etan ni biin iAmmon e hi Simeat et hi Jehosabad e u-ungga etan ni biin iMoab e hi Simrit.

<sup>27</sup> Neitudek di Liblul idan Patul hu meippanggep idan lalakin u-unggan Joas, ya impeamtaddan prophet ni meippanggep ni hi-gatu niya meippanggep ni nengiyayaggudan tun Tempol Apu Dios. Netey hi Joas et maihullul hi Amasiah e u-ungga tun nampatul.

## 25

### *Ya nampatulan Amasiah*

<sup>1</sup> Dewampulut lima toon Amasiah eman ni nampatulan tu et man-ap-apud Judah ni dewampulut heyam ni toon. \* Hi inetu ey hi Jehoaddin e iJerusalem. <sup>2</sup> Ma-nut inu-unnud Amasiah hu tugun APU DIOS, nem eleg malpud puhu tu. <sup>3</sup> Yan neihammadan law ni nan-ap-apuan tu ey impapetey tudu hu nematey nan ametu e hi Joas e patul. <sup>4</sup> Nem eleg tu papetey ida u-ungga da tep inu-unnud tu hu olden APU DIOS ni neitudek di Tugun Moses e kantuy "Beken ni lebbeng tun mettey hu a-ammed tep ya nambahulan ni u-ungga tu niya beken ni lebbeng tun mettey hu u-ungga tep ya nambahulan ni a-ammed tu. Tep ya hakey ni tuun nambahul ey hi-gatu mettey tep ya nambahulan tu."

<sup>5</sup> Ya hakey mewan ni impahding nan Amasiah ey inemung tudu sindalun helag Judah niyadda helag Benjamin et putuken tu aap-apu da meippuun di helag da. Impabilang tudu nantoon ni dewampulu niyadda nehuluk ni dewampulu toon da ey limmaw idan telunggatut ni libu. Nelaing idan man-ussal ni happiyaw niya pahul. <sup>6</sup> Ey sinangdanan tu hu hanggatut ni libu nelaing ni sindalun iIsrael ni umlaw di epat ni libu kiloh ni silber.

<sup>7</sup> Nem wada hu immalin bega-en Apu Dios et kantun hi-gatuy "Apu patul, entan kuma tangdan mun sindalun iIsrael tep inwalleng APU DIOS ida humman ni helag Ephraim et eleg tudu baddangi. <sup>8</sup> Hedin pekillaw muddan sindalum ni an mekiggubbat ey nannad ni meapput kayu, anin ni piga laing yun mekiggubbat. Peapput dakeyun Apu Dios tep hedin hi-gatu man kabaalan tun peapput winu pengapput hu pinhed tu."

<sup>9</sup> Kan Amasiah etan ni bega-en Apu Dios ey "Nem hipa tep law silbin etan ni imbayad kun hi-gada?" Kan etan ni bega-en Apu Dios ey "Kabaalan APU DIOS ni um-idwat ni hi-gam ni daddakkel ni pihhu nem ya etan imbayad mu."

\* 25:1 25:1 Emin ida patul di Judah ey nambebley idad Jerusalem ni nampatulan da.

<sup>10</sup> Et paenamut ida law Amasiah etan ida sinangdanan tun sindalun helag Epraim. Nambanggad ida humman ni sindalu e nemahhig bunget daddan iJudah. <sup>11</sup> Impetuled Amasiah hu nemnem tu et ipengulu tudda sindalu tud Nedeklan e Maehin et pateyen dadda hampulun libun sindalun iEdom ni nalpud Seir. <sup>12</sup> Ey dimpap da hampulun libun sindalu et ilaw daddad ahpap ni deplah et ibheng dadda et mangkebukli annel dad babattud ehpen. <sup>13</sup> Nem entanni kumedek ey hinggep idan sindalun impaenamut Amasiah hu pigan bebley di Judah di nambattanan ni Samaria niya Bet Horon et pateyen da tellun libun tutu-u niya dakel inla dan limmuddan tutu-u.

<sup>14</sup> Yan inenamutan Amasiah ni nalpuan tun tu nengubatan idan iEdom ey wadadda in-anemut tun inla tuddan dios idan tuud Seir. Dinaydayaw tudda humman ni dios, ey nanyuung ni hi-gada niya in-appitan tudda. <sup>15</sup> Bimmunget hi APU DIOS tep ya humman ni impahding tu et itu-dak tu hu hakey ni prophet et kantuy "Kele nealay muka daydayawadda dios ni eleg da kabaelin mengihwang idan tuu dad hipan impahding mun hi-gada?" <sup>16</sup> Nem eleg gibbuhen nunman ni prophet hu tuka pan-e-hela ey immehel hi Amasiah e kantuy "Egga mahapul hu tugun mu. I-ineng ka kumadnan tep lektattuy impapetey daka!" Et isiked nunman ni prophet ni um-ehel nem kantuy "Nanna-ud ni ninemnem Apu Dios ni bahbahen daka tep hannitan muka pehpahding ey muka kehinga tugun ku."

<sup>17</sup> Entanni ey hinummangan Amasiah ida konsihal tu et umitu-dak ni an memabbagan patul ni Israel e hi Jehoas e u-unggan Jehoahas niya inap-apun Jehu. Kantuy "Ali ka e patul ni Israel et manggubap ita." <sup>18</sup> Nem a-abbig hu impanumang nunman ni patul di Israel nan Amasiah e patul di Judah. Kantuy "Wada hu hebit di moyung di Lebanon e kantu etan ni keyew ni sedar ey 'Tebulut mu et ahwaen ni u-unggang etan u-unggam ni bii.' Nem entanni ey immali kumedek hu anggetakkut ni animal et pangisn tu humman ni hebit. <sup>19</sup> Ka na-mu kamampahhiya tep sinekup me Edom, nem ya ittugun kun hi-gam ey ditan ka kumad baley mu. Entan kauk mun mekigubbat. Kele ka menemmahemmak ni panliggatan yun umhulun ni kebabbahan yuddan tutu-um di Judah?"

<sup>20</sup> Nem kahing hi Amasiah tep indaddan Apu Dios hu kebabbahan tu tep ya tuka penaydayawin dios idan iEdom. <sup>21</sup> Et amungen Jehoas e patul di Israel ida sindalu tu et ida makigubat nan Amasiah e patul di Judah et manggubap idad Bet Semes. <sup>22</sup> Nanggugubat ida ey inaput idan iIsrael hu sindalun iJudah et mamsik ida et mampanganamut idad baballey da. <sup>23</sup> Binelud nan Jehoas hi Amasiah e patul di Judah di Bet Semes et ilaw tud Jerusalem. Binabbah idan sindalu tu hu enem ni gatut ni piyeh ni batun luhud meippalpuud Eheb e Epraim ingganah di Dugun Eheb. <sup>24</sup> Inla tuddan emin hu balituk, ya silber niyaddan emin hu ngunut ni kameussal di Tempol ni impaptek Obed Edom, anin idan hipan nebalol ni wadad baley ni patul. Ey inlaw tudda tutu-udman di Samaria.

<sup>25</sup> Hi Amasiah e patul di Judah ey nambiyag pay ni hampulut liman toon neipalpuun neteyyan Jehoas e patul ni Israel. <sup>26</sup> Ya edum ni neipahding ni nampatulnan Amasiah neipalpuun laputu ingganah ni neteyyan tu ey neitudek di Liblud idan Patul di Judah niyad Israel. <sup>27</sup> Yan nengiwallengnan Amasiah nan APU DIOS ey wadadda namplanuh ni memettye ni hi-gatud Jerusalem, et bumsik di Lakis. Nem intu-dak idan buhul tu hu mengunnud ni hi-gatu et da pateyen diman. <sup>28</sup> Imbanggad da annel tud Jerusalem e intakkay dad kebanyu et ikulung dad kulung idan aammed tud Bebley David.

## 26

### *Ya nampatulnan Ussiah di Judah*

<sup>1</sup> Yan neteyyan Amasiah ey impambalin idan tutu-ud Judah hi Ussiah e u-ungga tun neihullul ni nampatul e hampulu et enem hu toon tu. <sup>2</sup> Hi-gatu nengiyayyagud ni Elat et ibanggad tun sakup ni Judah eman ni netey law hi ametu. <sup>3</sup> Hampulu et enem hu toon Ussiah eman ni nampatulnan tu et mampatul di Judah ni nelimat dewwan toon. Hi inetu ey hi Jekoliah e iJerusalem. <sup>4</sup> Inu-unnud tu hu tugun APU DIOS, henin ametu hi Amasiah. <sup>5</sup> Hi Sekariah hu nenuttuddun Ussiah ni mekanggu-unnud nan APU DIOS et pannananeng tun nansilbin APU DIOS eman ni ketaggun Sekariah et bendisyonan Apu Dios emin hu impahding tu.

<sup>6</sup> Nekigubat hi Ussiah idan iPilistia et bahbahen da luhud ni Gath, ya Jabneh niya Asdod. Et mengapyan baluh ni bebley di Asdod niyaddad edum ni parteh ni Pilistia. <sup>7</sup> Binaddangan Apu Dios ni nengapputan tudnan iPilistia, yadda Arab di Gur niyadda Meunites. <sup>8</sup> Et mambayad ida Meunites \* ni hi-gatun buwis ni katootoon. Et-eteng law

\* 26:8 26:8 Ya hakey ni ngadan idan nunyan tuu ey Ammonite.

hu kabaelan tu et nema-man nandingngel di kebebbley, anin di Egypt. <sup>9</sup> Nengapya mewan ni nehammad ni eta-gey ni pangguwalyaan di Jerusalem di Dugun Eheh, yad Eheh e Nandeklan niyad appit ni nanlinikweh ni luhud. <sup>10</sup> Ey nengapyan nehammad ni pangguwalyaan dan bebley idad desert niya nengu-kuddan dakel ni bubun tep dakel ni peteg halun tud hengeg idan duntug di Judah niyaddad nandeklan. Nakappinshed tu mewan hu hipan meitnem, et mukun dakel tuka panggunnun mampaptek ni legunta tu niya payew tuddad duntug di Judah niyaddad nandeklan.

<sup>11</sup> Dakel ni peteg hu sindalun Ussiah, ey nekallaing ida niya nandaddan idan emin ni mekiggubbat. Hi Jeiel e sekretarih ni sindalu hu nengilistan emin ni ngadan idan nunman ni sindalu niya nengidaddan ni hi-gada. Hi Maaseiah hu bimmaddang ni hi-gatu. Ey hi Hananiah e hakey ni konsihal ni patul hu ap-apuddan mengidwat ni hipan olden ni u-unnuden da. <sup>12</sup> Dewwan libu et enem ni gatut ida aap-apun kamanmandal idan nunman ni nangkelaing ni sindalu. <sup>13</sup> Ey telunggatut et pitun libu et limanggatut hu bilang idan sindalu. Nakadaddan idan emin ni mekihhanggad hipan buhul ni patul da. <sup>14</sup> Indawtan Ussiah idan emin ni happyaw, ya pahul, ya helmet, ya gumek ni balwasi, ya pana niya balebay. <sup>15</sup> Nampekapyan makina ni neipetuk idad luhud di Jerusalem ni ussalen dan mengippellaw ni pana niya mengitteng-il ni batud neita-gey ni pangguwalyaan winu yaddad dugun luhud. Humman ni makina ey kinapyaddan nangkelaing ni tuu tu. Nandingngel hi Ussiah di kebebbley tep binaddangan Apu Dios et ay et-eteng law hu kabaelan tu.

*Ya nanliwatan Ussiah niya nekastiguan tu*

<sup>16</sup> Nem nambalin ni kamampahhiya law hi Ussiah tep et-eteng ni kabaelan tu et humman nebahbahan tu. Nanliwat nan APU DIOS tep hakey ni aggew ey himmegep di Tempol et tu bansingan hu kagihheban bangbanglun insensoh. <sup>17</sup> Et ya impahding Asariah e eta-gey ni padi ey ingkuyug tudda newalun neteled ni padin APU DIOS et unuden da hi Ussiah e patul ni hinggepan tud Tempol <sup>18</sup> et ehelan da e kaday “Beken ni lebbengtun hi-gam e Ussiah hu mengihheh ni insensoh ni kamei-appit nan APU DIOS. Yadda padin helag Aaron hu pinutuk APU DIOS ni mengippahding nuntan. Ehep ka tep nanliwat ka! Eleg daka tetbalan APU DIOS ni nuntan ni impahding mu.”

<sup>19</sup> Bimmunget hi Ussiah ey eleg tu ihha-ad etan pangkihheban ni insensoh ni singnged tu. Ey yan nunman ni inehnengan tud hinanggan kapanggihhebin insensoh di Tempol APU DIOS ey newada leprosih di tuktuk tu. <sup>20</sup> Inang-ang di Asariah niyadda edum ni padi humman ni leprosih tu ey impapuut dan impa-hep. Anin ni hi-gatu et impapuut tu daman immehep tep kinastigun APU DIOS. <sup>21</sup> Et humman dinggeh nan Ussiah neipalpun nunman ingganah neteyyan tu. Neappil hu nanha-adan tu ey kameikka-leg law hu hehgepan tud Tempol. Hi Jotham e u-ungnga tu hu nampaptek ni baley ni patul niya hi-gatu nan-ap-apuddan tutu-u. <sup>22</sup> Yadda edum ni neipahding neipalpun nan-ap-apuan Ussiah ingganah ni neteyyan tu ey intudek ni prophet e hi Isaiah e u-unggan Amos. <sup>23</sup> Netey hi Ussiah et maikulung di a-allaw ni kullungan idan patul. Eleg maikulung di kulung idan patul tep wada leprosih tu. Hi Jotham e u-ungnga tu hu nei hullul ni nampatul.

## 27

*Ya nampatulanan Jotham di Judah*

<sup>1</sup> Dewampulut lima toon nan Jotham eman ni nampatulanan tud Judah et man-ap-apun hampulut enem ni toon. Hi inetu ey hi Jerusah e u-unggan Sadok. <sup>2</sup> Kayyaggud ida impahding tu e kamengippeamleng nan APU DIOS, henin ametu hi Ussiah, nem eleg ngu humgep di Tempol ni mengihheh ni insensoh. Nem yadda ngu tutu-u ey intultuluy dan impahding hu lawah. <sup>3</sup> Impeyayyaggud Jotham hu nengin-ahpat ni Eheh ni Tempol ey inhammad tudda luhud di duntug di Ophel. <sup>4</sup> Ey nengapyan bebley di nedunduntug di Judah ey nengapyan nangehammad ni pangguwalyaan idad muyung.

<sup>5</sup> Entanni ey ginubat tudda iAmmon et apputen tudda. Et mambayad idan buwis ni hi-gatun tellun toon. Et ya daka iddawat ni hi-gatun katootoon ey umlaw di epat ni libun kiloh ni silber, neliman libun langgusih ni wheat niya neliman libun langgusih ni barley. <sup>6</sup> Nambalin ni et-eteng hu kabaelan Jotham tep kamekanggu-unnud ni AP-APU e Dios tu. <sup>7</sup> Yadda impahding tun nan-ap-apuan tu, yadda nekigubagubatan tu niyadda edum ni impahding tu ey neituede di Liblud idan Patul di Israel niyad Judah. <sup>8</sup> Dewampulut lima toon tu eman ni nampatulanan tud Judah et man-ap-apun hampulut enem ni toon. <sup>9</sup> Netey et maikulung di Bebley David et mai hullul hi Ahas e u-ungnga tun nampatul.



## 28

*Ya nampatulán Ahas di Judah*

<sup>1</sup> Dewampulu toon Ahas eman ni nampatulán tud Judah et man-ap-apun hampulu et enem ni toon. Eleg tu u-unnuden hu kayyaggud ni impahding lan ammed tu e hi David e patul tep impahding tu hu eleg pan-amlengin APU DIOS. <sup>2</sup> Inu-unnud tu kumedek hu lawah ni impahpahding idan patul di Israel e nengapyaddan dios da e hi Baal et dayawen da. <sup>3</sup> Nan-appit ni kagihheba di Nedeklan e Ben Hinnom niya inu-unnud tudda lawah ni peteg ni impahpahding ida lan tutu-un dinegyun APU DIOS di nambebleyan da eman ni kapengelliiddan aammed tun helag Israel ni nalpuan dad Egypt. In-appit tu pay ni nunman ni dios tudda u-ungnga tun lalakki e giniheb tudda. <sup>4</sup> Ey nan-appit niya giniheb tu insensoh idad kapenaydayawin beken ni makulug ni dios di ta-pew idan duntug niyaddad hengeg ni mabulung ni keyew.

<sup>5</sup> Et ya humman idan liwat Ahas hu nengiebulutan APU DIOS ni apputen ni patul di Syria et piliten tun inlaw hu dakel ni iJudah di Damascus. Anin idan iIsrael et inapput da hi Ahas et pateyen da dakel ni sindalu tu. <sup>6</sup> Pintey Pekah e u-ungngan Remaliah e patul ni Israel hu hanggatut et dewampulun libun ketultuledan ni sindalun iJudah ni han-agew tep inwalleng da hu AP-APU e Dios ida lan aammed da. <sup>7</sup> Ey pintey daman Sikri e helag Epraim hi Maaseiah e u-ungngan patul, hi Asrikam e ap-apun guwalyad baley ni patul et hi Elkanah e neihayned di saad ni patul.

<sup>8</sup> Inladdan iIsrael hu dewanggatut ni libun bibi-i niyadda kaungaungad Judah, anin idan dakel ni limmu da et ilaw daddad bebley dad Samaria, anin ni humman ida ey agi dan helag Israel. <sup>9</sup> Nem hi Oded e prophet APU DIOS e wadad Samaria ey tudda dinammu hu sindalun Israel ni inenamutan da et kantun hi-gaday "In-abulut ni AP-APU e Dios ida lan aammed yun apputen yudda hu iJudah tep ya bunget tun hi-gada. Nem hedin hi-gayu ey nehalman kumaman hu impahding yu e endi hemek yu e pampateyen yudda. <sup>10</sup> Et yan nunya ey yuka nemnemneman panhambut ida humman ni iJudah niya iJerusalem. Kaw eleg yu amta e nanliwat kayu daman AP-APU e Dios yu? <sup>11</sup> Dengel yu eya e-helek! Ibangngad yudda humman ni balud ni inla yu tep agi yudda. Tep hedin eleg yudda ibbukyat, man kastiguen dakeyun APU DIOS tep ya nemahhig ni bunget tu."

<sup>12</sup> Yadda edum ni ap-apud Israel ni wadadman e hi Asariah e u-ungngan Jehohanan, hi Berekiah e u-ungngan Meshillemot, hi Jehiskiah e u-ungngan Sallum et hi Amasa e u-ungngan Hadlai ey daka ebbuluta humman ni intugun ni prophet et da ehelan humman idan sindalun nalpud gubat. <sup>13</sup> Kandan hi-gaday "Eleg mabalin ni yu i-alidda humman ni balud di deya! Entan tu pan-edumi nambahulan tayu. Et-eteng dedangngu nambahulan tayu et deh e peellin APU DIOS hu nemahhig ni bunget tun hi-gatsun iIsrael." <sup>14</sup> Et ibukyat dadda iJudah ni impambalin dan balud da niya imbangngad dadda limmu dan imbesik da ey kaang-ang-angaddan aap-apu da. <sup>15</sup> Yadda dama etan epat ni nengadan ni lalakki ey imbangngad dadda balwasiddan balud ni binlidan da. Ey indawtan daddan balwasi niya patul ni ussalaen da, et idwatan dadda pay ni kennen da niya danum ni innunen da niya hina-adan dan lanan olibah hu liput da. Intakkay daddad kebayyu hu eleg pakedalan et ibangngad daddan emin di Jericho e Bebley ni Neyug et han ida umenamut di bebley dad Samaria.

<sup>16-17</sup> Entanni ey ginubat mewan idan sindalun Edom hu Judah et alen da dakel ni hi-gada et pambalin daddan balud. Yan nunyan tsimpuh hu an nekihummanganan nan Ahas e patul di Judah nan Tiglat Pileser e patul ni Assyria ma-lat bumaddang ni hi-gatun mengubbat ni buhul tu. <sup>18</sup> Yan nunya daman tsimpuh hu nengubatan idan iPilistia idan bebley di hengeg ni duntug di Judah niyadda bebley di Negeb. Sinekup da dedan et pambebleyan da hu Bet Semes, ya Aijalon, ya Gederot, ya Soko, ya Timnah niya Gimso, anin idan ekka-ket ni bebley diman. <sup>19</sup> Hanneya impahding APU DIOS ma-lat mampekumbabah hi Ahas e patul di Judah tep impappangngulu tudda tutu-u tun nengiwalleng nan APU DIOS et manliwat ida.

<sup>20</sup> Yan inlian Tiglat Pileser e patul di Assyria ey eleg tu baddangan hi Ahas, nem impanligat tu kumedek. <sup>21</sup> Et alen law Ahas ida nebalol ni ngunut di Tempol, yad baley ni patul, yad baley idan opisyal tu et idwat tun Tiglat Pileser e patul di Assyria, nem eleg tu damengu baddangan. <sup>22</sup> Ey kapan-imma-man Ahas ni mangngenghay nan APU DIOS hedin wada ligat ni immalin hi-gatu. <sup>23</sup> Nan-appit mewan idan dios ni iSyria e nengapput ni hi-gatu tep kantuy "Hedin binaddangan idan nunman ni dios hu patul di Syria ey nanna-ud daman baddangan da-ak hedin i-appitan kudda." Nem humman ni impahding tu hu himmulun kumedek ni nebahbahan tu, anin idan edum tun helag Israel. <sup>24</sup> Ey inla tudda ngunut di Tempol et pambahbahen tu. Et ilekbi tu hu Tempol ma-lat endi an mandaydayaw diman. Beken ni ebuh ida huyyan impahding tu tep

nampengapya ni-ngangu mewan ni pan-appitan idan beken ni makulug ni dios di emin diman Jerusalem. <sup>25</sup> Ey ngapyan penaydayawan idan nunman ni beken ni makulug ni dios di kebebbley di Judah et pan-appitan daddan nunman ni beken ni makulug ni dios. Humman idan impahding tu hu himmulun et pabunget tu etan AP-APU e Dios ida lan aammed da.

<sup>26</sup> Yadda edum ni impahding Ahas ni nampatulun tu ey neitudek di Libluh idan Patul di Judah niyad Israel. <sup>27</sup> Netey hi Ahas et maikulung di Jerusalem, nem eleg maikulung di kulung idan patul. Et maihullul hi Heseekiah e u-ungnga tun nampatul.

## 29

### *Ya nampatulun Heseekiah di Judah*

<sup>1</sup> Dewampulut lima toon Heseekiah eman ni nampatulun tud Judah et man-ap-apudman ni dewampulu et heyam ni toon. <sup>2</sup> Kamengippeamleng nan APU DIOS ida impahding tu, henin impahding eman lan ammed tu e hi David e patul.

<sup>3</sup> Yan nemangulun bulan ni nan-ap-apuan tu ey imbeghul tu hu Tempol APU DIOS et iyayyagud tudda lekbi. <sup>4</sup> Impaeyag tudda padi niyadda edum dan helag Levi et mandadamuddad dallin ni Tempol di appit ni kasimmilin aggew. <sup>5</sup> Et kantun higaday “Hi-gayun helag Levi, dengel yu eya e-helek: Ipahding yu hu elaw ni kapanlinnih ni annel yu, anin eyan Tempol ni AP-APU e Dios ida lan aammed tayu. Ey ekal yun emin ida nanhibit ni Tempol. <sup>6</sup> Eleg pannaneng ida lan aammed tayun nandinnel nan AP-APU e Dios tayu et manliwat idan hi-gatu. Inwalleng da, anin eyan Tempol tu et dayawen da edum ni dios. <sup>7</sup> Inlekbi da Tempol, indep dadda dilag diman, niya insiked dan man-appit ni kagihheban insensoh niyadda kagihheban animal di Tempol ni Dios tayun helag Israel. <sup>8</sup> Et humman hu, nemahhig bunget APU DIOS ni hi-gatsun ijudah niyadda ijerusalem. Et humman nengiebulutan tun meippahding ni hi-gatsu hu lawah ni peteg niya angetakkut, et deh law e daitu kang-ngi-ngiidan tutu-u. <sup>9</sup> Nangketey ida aamma tayud gubat niya nambalin idan balud hu u-ungnga tayun bibi-i niya lalakki, anin idan ahwa tayu. <sup>10</sup> Nem yan nunya ey pinhed kun mekitbal nan AP-APU e Dios tayun helag Israel et eleg law bumubbunget ni hi-gatsu. <sup>11</sup> Hi-gayun helag Levi, entan tu law iwalleng hu ngunu yu. Hi APU DIOS hu nemilin hi-gayun mansilbin hi-gatu niya mengippengguluddan tutu-un menaydayaw niya man-appit ni hi-gatu.”

<sup>12</sup> Inu-unnud da hu intugun ni patul da et ilepu dan mangngunnu. Huyyadda helag Levi ni wadadman: Yadda nahlag nan Kohat: hi Mahat e u-ungngan Amasai, hi Joel e u-ungngan Asariah. Yadda nahlag nan Merari: hi Kish e u-ungngan Abdi et hi Asariah e u-ungngan Jahallelel. Yadda nahlag nan Gerson: hi Joah e u-ungngan Simmah et hi Eden e u-ungngan Joah. <sup>13</sup> Yadda nahlag nan Elisaphan: hi Simri et hi Jeiel. Yadda nahlag nan Asap: hi Sekariah et hi Mattaniah. <sup>14</sup> Yadda nahlag nan Heman: hi Jehiel et hi Simeil. Yadda nahlag nan Jeduthun: hi Semaiah et hi Ussiel.

<sup>15</sup> Inaygan idan nunya hu edum dan helag Levi et ipahding da hu elaw ni panlinnih ni annel da et handa ilepun pehding hu elaw ni panlinnih ni Tempol e inu-unnud da inhel ni patul da meippuun di olden APU DIOS ni pehding da. <sup>16</sup> Himmegep ida padid Tempol APU DIOS et i-hep dad dallin ni Tempol hu ngunut ni kameibbillang ni beken ni malin的角度 et ilaw idan helag Levi di Nedeklan e Kidron. <sup>17</sup> Inlapu dan mengippahding ni elaw ni panlinnih ni Tempol eman ni nemangulun aggew ni nemangulun bulan, et yan meikkewwalun aggew ey wadadda law di balkon. Intuluy dan nangngunun walu pay ni aggew et mekaggebuh, et ya bilang ni aggew ni nengipahdingan dan elaw ni panlinnih ey hampulu et enem ni aggew.

<sup>18</sup> Entanni et lumaw ida helag Levi nan Heseekiah e patul et peamta da impahding da. Kandan hi-gatuy “Impahding ni elaw ni panlinnih ni Tempol APU DIOS, ya altar, yadda ngunut ni kameussal diman, ya tebol ni kapengihha-adin neieng-eng ni sinapay niyadda ngunut diman. <sup>19</sup> Ey ni binanggad ida edum ni ngunut ni inlan patul la e hi Ahas eman ni nengiwallengtan tun APU DIOS et ilekbi tu hu Tempol. Immen ida law di hinanggan altar APU DIOS e ida kameibbillang ni malin的角度 et neidaddan ida law ni meussal.”

<sup>20</sup> Yan kakkabbuhhan ni newa-waan tu ey inemung nan Heseekiah ida opisyal tud bebley et lumaw idad Tempol APU DIOS. <sup>21</sup> Immilaw idan pitun bulug ni baka, pitun lakkitun kalneroh, pitun pakeetteng tun lakkitun kalneroh, niya pitun lakkitun gelding et iappit da tep ya liwat idan pamilyah nan patul niyadda bimmebley di Judah niya ma-lat ipahding da hu elaw ni panlinnih dan Tempol. In-appit idan padin helag Aaron humman idan animal di altar Apu Dios tep humman in-olden ni patul. <sup>22</sup> Kinleng dadda bulug ni baka, yadda lakkitun kalneroh niyadda pakeetteng tun kalneroh et iwakgih da kuh yaw di altar. <sup>23</sup> Yadda gelding ni kamei-appit tep ya liwat ey inlaw dan patul niyadda

tutu-u et ita-pew da ngamay dadman. <sup>24</sup> Kinleng idan padi humman idan gelding et iwakgih da kuheyaw dad altar ma-lat ma-kal hu liwat idan helag Israel tep in-olden ni patul e huyyan kamei-appit ni kagihheba ey ke-kalan ni liwat emin idan helag Israel.

<sup>25</sup> Impustuh nan Hesechia e patul ida helag Levi di Tempol et ipatnul da cymbal, ya gitalah niya ayyunding. Inu-unnud tun emin ida tugun APU DIOS ni inhel ida lan prophet e hi Gad e hi Nathan nan David e patul. <sup>26</sup> Limmaw ida helag Levi di nanlinikweh di Tempol e intabin da daka petnul ni kinapyan David niya limmaw ida dama hu padid pustuh da e intabin da tangguyup.

<sup>27</sup> In-olden Hesechia e i-appit dadda kagihheba di altar. Ey yan nunman ni daka pan-i-appit ida humman ni kagihheba ey daka pan-ia-appeh hu penaydayaw dan APU DIOS ey pamptnul da tangguyup niyadda kameiappetnul ni kinapya lan David e patul.

<sup>28</sup> Dinaydayaw idan emin ni helag Israel hi APU DIOS niya nan-a-appeh ida nelaing ni man-a-appeh ey pamptnul da tangguyup ingganah ni negiheb emin hu in-appit dan megihheb.

<sup>29</sup> Et manyuung etan patul niyadda tutu-un penaydayaw dan APU DIOS.

<sup>30</sup> In-olden ni patul niyadda opisyal tu e ia-appeh idan helag Levi hu a-appeh di David nan Asap ni penaydayaw dan APU DIOS. Et man-a-appeh idan kamengippeamleng niya nanyuung idan penaydayaw dan APU DIOS.

<sup>31</sup> Entanni ey immehel hi Hesechia e patul e kantuy "Negibbuh law hu pengiddewatan tayun annel tayun APU DIOS. I-li yu law ida i-appit yu, anin idan i-appit yun pansalamatan yu." Et pan-i-liddan tutu-u i-appit da. Yadda neminshed ey in-ali da i-appit dan kagihheba.

<sup>32</sup> Et huyyadda in-ali dan kamei-appit nan hi APU DIOS ni kagihheba: nepitun bulug ni baka, ya hanggatut ni lakkitun kalneroh niya dewanggatut ni pakeeteng tun lakkitun kalneroh.

<sup>33</sup> In-ali da pay hu enem ni gatut ni bulug ni baka niya tellun libun kalneroh ni mei-appit ni hemmullen idan tutu-u.

<sup>34</sup> Nem hahhakkey ida padin mengiddaddan idan kamei-appit ni kagihheba et baddangan ida law ni edum dan helag Levi ingganah ni negibbuh ngunu da niya ingganah ni na-duman ida padin nengipahding ni elaw ni panlinnih.

Tep yadda helag Levi ey daka paka-ippaptek hu mengippahding ni elaw ni panlinnih ni annel da, beken idan henin padi.

<sup>35</sup> Dakel ni peteg mei-appit ni kagihheba, yadda mei-appit ni meinum, niyadda taban ingkal dad mei-appit ni mehemmul.

Et yan nunman hu neibangngadan mewan law ni daka penaydayawi dedan di Tempol APU DIOS. <sup>36</sup> Kaman-am-aleng hi Hesechia e patul niyadda tutu-u tep ya impahding Apu DIOS ni panyaggudan da, tep angegannu ey negibbuh emin hu pinhed dan meipahding.

## 30

### *Ya nandaddanan dan Piyestah ni Passover e Nelabahan ni Anghel APU DIOS*

<sup>1</sup> Impalaw nan patul e hi Hesechia hu tudek tuddad emin ni tutu-ud Israel niyad Judah, anin idan helag Manasseh niyadda helag Epraim et umliddan emin di Tempol APU DIOS di Jerusalem et ipahding da hu Piyestah ni Passover e Nelabahan ni Anghel APU DIOS e Dios dan helag Israel.

<sup>2</sup> Nanhuhummangan di Hesechia, yadda opisyal tu niyadda tuud Jerusalem e pehding da humman ni Piyestah ni meikkadwan bulan.

<sup>3</sup> Tep yan nunman ni tsimpuh ey hahhakkey ida padin nengipahding ni elaw ni panlinnih. Hakey pay ey eleg ni maemung ida tutu-ud Jerusalem.

Nem sigud ngu dedan ni daka pehding humman ni piyestah ni nemangulun bulan.

<sup>4-5</sup> Inebulun nan Hesechia e patul niyadda tutu-u hu pengippahdingan dan nunman ni Piyestah ni Nelabahan ni Anghel ni AP-APU e Dios dan helag Israel.

Et mukun in-uungbal da e pellow da mengippeamtaddan emin ni tutu-ud Israel meipalpad Beersheba ingganah di Dan ma-lat umliddan emin di Jerusalem et ipahding da humman ni piyestah.

Tep yadda lan nelabah ni toon ey eleg da u-unnuden hu Tugun meippanggep nuanyan Piyestah tep eleg ida meki-emmaung hu edum.

<sup>6</sup> In-olden ni patul e wadadda mengillaw ni tudek di Israel niyad Judah, e heninnuy neitudek: "Hi-gayuddan helag Israel, ibangngad yun menaydayaw ni AP-APU e Dios hi Abraham, hi Isaac et hi Jacob, et baddangan daitun hahhakkey ni natdaan ni nengubatan daitusiddan iAssyria.

<sup>7</sup> Entan tu iu-unnud ida lan aammed yu niyadda la aaggi yu e inwalleng da hu AP-APU e Dios ida lan aammed tayu et nemahhig nengastigu tun hi-gada et deh e hi-gayu mismuh ey yuka ang-ang-anga kameipahpahding.

<sup>8</sup> Entan pangngehay yu, henin impahding da, u-unnud yu kumaddan hi APU DIOS. Ali kayu eyad Tempol tud Jerusalem e neieng-eng ni ingganah, et dayawen yu hi APU DIOS ma-lat ma-kal hu nemahhig ni bunget tun hi-gayu.

<sup>9</sup> Tep hedindaydayawen yu mewan hi APU DIOS ey hehmeken idan buhul yu hu ahwa yu niyadda u-ungnga yun balud da et ibangngad dadda eyad bebley tayu.

Tep hi APU DIOS e Dios yu ey mahmek. Et humman hu, hedind hi-gatu mewan hu daydayawen yu ey baddangan dakeyu."

*Ya Piyestah ni Passover*

<sup>10</sup> Im-impeng idan ngilaw ni tudek hu kebebbbley ni nambebleyan idan helag Epraim niyadda helag Manasseh, anin di bebley idan helag Sebulun. Nem dadda kangngi-ngii niya dadda kaheghegnuda. <sup>11</sup> Nem wadadda edum ni helag Asher, yadda helag Manasseh, yadda helag Sebulun ni nampekumbabah et lumaw idad Jerusalem. <sup>12</sup> Yan nunman ey winedan Apu Dios hu et-eteng ni impeminhed idan tutu-ud Judah ni meihhakkey ni mengu-unnud ni olden ni patul niyadda opisyal tu ma-lat u-unnuden da ehel Apu Dios.

<sup>13</sup> Et dakel idan peteg hu neamung di Jerusalem ni mengippahding ni Piyestah ni Sinapay ni eleg meha-adan ni kamampelbag niya Piyestah ni Passover ni nunman ni meikkadwan bulan. <sup>14</sup> Nambabaddang ida mewan et ekalen dadda pan-appitan idan eleg mengullug nan Apu Dios di Jerusalem, anin idan daka pan-appisin insensoh ni kagihheba, et dadda ibbeng di Nedeklan e Kidron.

<sup>15</sup> Nedatangan hu meikkahampulud epat ni aggew nunman ni bulan ey kinleng idan tutu-u ida pakeetteng tun kalneroh ni mei-appit. Ey bimmaing ida edum ni padi niyadda edum dan helag Levi et ipahding da hu elaw ni daka panlinnih ni annel da et ilaw dadda i-appit dan kagihheba di Tempol. <sup>16</sup> Et lumaw idad da keippustuhan di Tempol meippuun di Tugun Moses e bega-en Apu Dios. Ey yadda edum dan helag Levi ey inlaw da kuheyaw et iwakgih idan padid altar. <sup>17</sup> Ey dakel ida tutu-un eleg mengipahding ni elaw ni panlinnih ni annel et yadda edum ni helag Levi hu nangleng idan kalneroh da et iappit dan APU DIOS <sup>18-19</sup> Ya kedaddakkelan idan eleg mengipahding ni elaw ni panlinnih ni annel ey yadda helag Epraim, yadda helag Manasseh, yadda helag Issakar niyadda helag Sebulun. Nem nekihemul idan nunman ni Piyestah ni Passover, anin ni eleg da u-unnuden hu tugun meipanggep nunyan piyestah. Et idasalan Heseekiah ida e kantud dasal tuy "Kayyaggud ni AP-APU e Dios ida lan aammed mi, abulut mu anhan ida eya kamandaydayaw ni hi-gam e neminhd ni mengu-unnud law ni hi-gam e Dios da, anin ni eleg da ipahding etan kameunnud ni elaw ni panlinnih."

<sup>20</sup> Dingngel nan APU DIOS humman ni dasal nan Heseekiah et abuluten tu nandaydayaw idan tutu-u et eleg tudda kastiguen. <sup>21</sup> Pitun aggew hu mengipahdingan idan tutu-un neamung di Jerusalem ni Piyestah ni Sinapay ni eleg meha-adan ni kamampelbag et man-am-amleng ida. Immenah-appih ida padi niyadda edum dan helag Levi ni kewa-wa-wan pitun aggew ni nenaydayaw dan APU DIOS e inunnudan dan daka petnul. <sup>22</sup> Katettebalan Heseekiah ida padi niyadda edum dan helag Levi tep nelaide idan mengipahding ni ngunu dan meipanggep ni daka pansilbin Apu Dios.

Yan nunman ni pitun aggew ey nan-am-amleng ida tutu-un nekihemul niya nan-appit idan penaydayaw dan AP-APU e Dios ida lan aammed da. <sup>23</sup> Ey inebulut dan mampiyestah idan pitu pay ni aggew et itu-man dan man-am-amleng. <sup>24</sup> Indawat Heseekiah idan tutu-u hu hanlibun bulug ni baka niya pitun libun kalneroh ni hemmullen da. Indawat ida daman opisyal hu hanlibun bulug ni baka niya hampulun libun kalneroh. Yan nunman ey dakel ida law hu padin mengipahding ni elaw ni panlinnih ni annel da. <sup>25</sup> Nan-am-amleng idan emin hu tutu-un neamung di Judah, yadda padi niyadda edum dan helag Levi, yadda nalpud Israel, yadda immalin mekippiyestah ni tutu-ud edum ni bebley ni nekibebley di Israel niyad Judah.

<sup>26</sup> Ey nemahhig hu am-amleng idan tutu-ud Jerusalem nunman ni piyestah. Endi henin nunman ni neipahding neipalpu eman ni tsimpuh Solomon e u-unggan David e patul ingganah nunya. <sup>27</sup> Immehngeng ida padi et bendisyonan dadda tutu-u. Ey dingngel Apu Dios humman ni dasal dad kad-an tud kabunyan.

**31**

<sup>1</sup> Yan negibbuan ni piyestah ey limmaw ida helag Israel di kebebbbley di Judah, yad Benjamin, yad Epraim, niyad Manasseh et pambabhahen dadda daka ngillinan tukud. Ey binengwah da etan tukud ni dios dan bii e Ashera niya nan-ekal dadda daka penaydayawin beken ni makulug ni dios niyadda daka pan-appisin hi-gada. Et han ida mampanganamut di bebley da.

<sup>2</sup> Hi Heseekiah ey ginenedwa tudda padi niyadda edum dan helag Levi et itudu tudda ngunnen da e wadadda man-appit ni kagihheba, wadadda man-appit ni mehemmul, niya wadadda man-a-appih ni penaydayaw niya pampesalamat nan APU DIOS di eheb ni Tempol. <sup>3</sup> Ey kaum-idwat ni animal ni kamei-appit ni kekakkabbuhhan niyan mahmahdem, yan kesabasabaduh, yan Piyestah ni Kaketellakin Bulan, niyadda edum ni Piyestah ni meipahding ni katootoon meippuun di Tugun APU DIOS. <sup>4</sup> Ey inhel tudan tutu-ud Jerusalem e pan-i-ali dadda lebbengtun idawat dan limmu da et idwat daddan padi niyadda edum dan helag Levi ma-lat wada inna-nuddan nunyan mengikkahakey

ni mansilbin APU DIOS. <sup>5</sup> Inu-unnud da et umilaw idan lameh ni emin ni intanem da: ya wheat, ya pakekapyan meinum, ya mansikan olibah niya danum ni putsukan. Ey inlaw da meikkeppulun emin ni limmu da. <sup>6</sup> Yadda tutu-ud kebebbley di Judah ey inlaw da dama meikkeppulun limmuda, yadda baka, yadda kalneroh niya hipan neiang-eng nan AP-APU e Dios da. Ey dakel ni peteg hu neamung ni indawat idan tuu. <sup>7</sup> Inlapu dan mengidwat ni meikkeppulun limmu da eman ni meikkatlun bulan ingganah ni meikkeppitun bulan. <sup>8</sup> Inang-ang nan Heseekiah e patul niyadda opisyal tu e dakel ni peteg hu in-aliddan edum dan helag Israel ey dineyaw da hi AP-APU et bendisyonan dadda.

<sup>9</sup> Kan Heseekiah idan padi niyadda edum dan helag Levi ey "Ettu nalpuan idan emin nunya?" <sup>10</sup> Kan Asariah e eta-gey ni padi e helag Sadok ey "Neipalpu eman ni nampengilian idan tuun indawat dad Tempol ey eleg kami law mekullangin kenen mi niya dakel pay hu kamehewwal, tep binendisyonan APU DIOS ida tuu tu. Huyyan emin hu nehawal."

<sup>11</sup> In-olden nan Heseekiah e mahapul ni mengayaddan bodegah di Tempol et u-unnuden da in-olden tu. <sup>12</sup> Kaman-am-amleng ida tuun mengi-lid Tempol ni meikkeppulun limmu da niyadda hipan iddawat da. Hi Konaniah e helag Levi hu neputuk ni mampaptek idan nunya. Hi agi tu hi Simeh hu neputuk ni memaddang ni hi-gatu. <sup>13</sup> Yadda edum ni helag Levi ni neputuk ni memaddang ni hi-gada ey hi Jehiel, hi Asariah, hi Nahat, hi Asahel, hi Jerimot, hi Josabad, hi Eliel, hi Ismakiah, hi Mahat et hi Benaiah. Huyyadda pinutuk ni patul ni mengippaptek ni i-aliddan tuu. Hi Asariah e eta-gey ni padi hu menang-ang ni emin ni kameippahding di Tempol Apu Dios.

#### *Yadda meikka-pengan ni kaidawat idan tuu nan Apu Dios*

<sup>14</sup> Hi Kore e u-unggan Imnah e helag Levi e kamampaptek ni Eheh di appit ni kasimmilin aggew hu neputuk ni menewwat ni iddawat ida etan ni tuu nan AP-APU niya hi-gatu ngenamung ni mengikka-peng idan nunman.

<sup>15</sup> Yadda memaddang ni hi-gatu ey hi Eden, hi Miniamin, hi Jeshua, hi Semaiah, hi Amariah et hi Sekaniah. Ikka-pengan daddan emin hu familiyah idan padid bebley da meippuun di grupuh ni helag da. Nan-iinggeh hu meikka-peng ni hi-gada, neamma winu u-ungnga. <sup>16</sup> Kameikka-pengi damadda etan lalakki meippalpuud tellu toon \* tu winu nehuluk ni neitudek hu ngadan tud libluh ni tenten ni aammed dan waddad Tempol ni nunman ni tsimpuh ni pengippahdingan dan ngunu da meippuun di grupuh ni neibilangan da. <sup>17</sup> Yadda kameikka-pengin papaddi ey yadda neitudek hu familiyah da niya ngadan dad libluh ni neitudekan ni tenten ni aammed da. Meikka-pengan ida dama hu edum dan helag Levi ni dewampulu winu nehuluk toon da meippuun di ngunu da niya grupuh da. <sup>18</sup> Pekikka-peng dadda ahwa da, anin idan ekka-ket ni lalakki niya bibi-in u-ungnga dan neitudek hu ngadan dad neitudekan ni tenten ni aammed da, tep impahding da hu elaw ni panlinnih ni annel da. <sup>19</sup> Yadda padin nahlag nan Aaron ni nambebley di etta-teng ni bebley niyaddad pattullan di nanlinikweh diman ni bebley ey neputuk idan mengikka-peng idad padi niyaddan emin hu edum dan helag Levi ni neitudek hu ngadan dad neitudekan ni tenten ni aammed da.

<sup>20</sup> Kayyaggud humman ni impahding Heseekiah e patul ni nengika-peng idan nunman idad padi niyaddad edum dan helag Levi di kebebbley di Judah. Impannanang tun kayyaggud niya limpiyuh impahding tu et peamleng tu hu AP-APU e Dios tu. <sup>21</sup> Kayyaggud ni emin hu nambalinan ni impahding Heseekiah e patul tep ingkahhakey tu nemnem tun nansilbin Apu Dios ni nengipaptek tun Tempol niya ya nengu-unnudan tuddan Tugun.

## 32

### *Ya nengubatan ni Assyria ni Judah*

<sup>1</sup> Yan nengibbuhan Heseekiah ni emin nunman ni kayyaggud ni impahding tu ey ginubat Sennakerib e patul ni Assyria hu Judah. Hinelikub idan sindalu tudda nehammad ni neluhud ni bebley diman et pan-ikapya daddad binna-hil ni luhud hu dellanan dan menggep nunman ni bebley ma-lat sakupen da. <sup>2</sup> Nem ya dedan ni nengamtaan Heseekiah e um-aliddad Sennakerib ni mengubbat ni Jerusalem <sup>3</sup> ey hinummangan tudda opisyal tu niyadda ap-apun sindalu tu e sikkeden da danum ni mampellaw di a-allaw ni bebley. <sup>4</sup> Inemung da dakel ni tutu-un an memengbeng niya memengngiw idan kulukul niyadda hebwak ma-lat eleg meang-ang hu kapampelawwin danum tep kanday "Kele kumay an um-alidda patul ni Assyria et da datngen dakel ni danum?"

\* **31:16** 31:16 Ya edum ni neitudek ey kantuy telumpulu tep yan nunman kapengilleppuin hakey ni lakin mansilbid Tempol.

<sup>5</sup> Nan-ihammad Heseekiah ida pandipensah tun bebley da et pan-iyayyaggud tudda nebahbah ni luhud. Ey nan-edahan tudda luhud et pan-ihammad tudda tuping di Bebley David. Nampekapyya pay ni dakel ni peteg ni almas niya happiyaw. <sup>6</sup> Pinutuk tudda apun sindalu et amungen tuddad mulkaduh di heggeppan ni bebley. Et kantun hi-gaday <sup>7</sup> "Pekedhel yu nemnem yu niya tuled kayu! Entan takut yun Sennakerib winu yadda sindalu tu tep e-eteng hu kabaelan etan ni memaddang ni hi-gatsu. <sup>8</sup> Anin ni dakel ni peteg hu sindalun Sennakerib niya na-let ida, et tuuddan ebu. Nem hedin hi-gatsu, man hi APU DIOS e Dios tayu hu umbaddang ni hi-gatsu et hi-gatu mekiggubbat ma-lat iehngeng daitsu!" Ey timmuled ida tep ya humman ni inhel Heseekiah.

<sup>9</sup> Yan nunman ni kapan-iddaddan nan Sennakerib hu pehdng tun menggep ni Lakis ey intu-dak tu hu hakey ni opisyal tu et heninnuy hu impaad tun e-helen tun Heseekiah niyadda tuu tu: <sup>10</sup> "Hi-gak e hi Sennakerib e patul ey kangkuy: Kaw hipa ni-man yuka pandinneli et yu nemnemen e meihwang kayun penggepan kun Jerusalem e bebley yu?" <sup>11</sup> Kan Heseekiah ni hi-gayun tuu tuy 'Baddangan daitsun APU DIOS e Dios tayun pengubbatan daitsun patul ni Assyria.' Nem dakeyu mannuman kahahha-ula. Ya kakulugan tu ey mettey kayun upa yu niya ewew yu hedin ngenghayen dakemi. <sup>12</sup> Kaw beken ni hi Heseekiah hu nangkai idan penaydayawan nan APU DIOS, anin ni yadda altar tu? Ey in-olden tun hi-gayun iJudah niyadda iJerusalem e mahapul ni mandaydayaw kayu niya man-appit kayu etan di hakey ni altar di Tempol. Ey in-olden tu mewan e yadman ni ebu pan-appitan yu. <sup>13</sup> Inamta mi e inamta yu hu impahpahding midan aammed kun patul di Assyria idan tutu-ud kebebbebley eyad puyek. Kaw wada hu hakey ni dios idan nunman ni bebley ni nengihwang idan tutu-ud impahding mi? <sup>14</sup> Binahbah mi kebebbebley ey eleg ihwang ni hipan dios ida tutu-udman di impahding min hi-gada. Et humman hu, nakka penghelin eleg dakeyu dama han-ihwang ni dios yud pehdng min hi-gayu tep et-eteng ni kabaelan mi. <sup>15</sup> Entan tu iebulut ni dakeyu he-ulen nan Heseekiah. E-helek mewan e endi hu dios idan kebebbebley ni tu kinabaelan ni inehwang ida tuud hipan impahding ku niyad impahding idan aammed ku. Et nema-ma ngu etan dios yu e endi kabaelan tun nengihwang ni hi-gayun pehdng ku."

<sup>16</sup> Beken humman ni ebu hu kapeneghegnud Sennakerib di APU DIOS nan Heseekiah, e bega-en tu, nem dakel pay hu inhel idan opisyal tun lawah. <sup>17</sup> Entanni ey nantudek mewan hi Sennakerib ni peneghegnud tun AP-APU e Dios idan helag Israel. Kantud tudek tuy "Ya dios nan Heseekiah ey heniddan dios ni edum ni bebley e endi kabaelan tun nengihwang idan tutu-u tud pehdng ku." <sup>18</sup> Yadda opisyal ni iAssyria ni nengilaw etan ni tudek ey intekud dad ehel ni Hebrew etan idad tuun neamong di luhud hu daka penattakut ni hi-gada, ma-lat awatan da et tumekut ida et nelakah dan hehgepen humman ni bebley da. <sup>19</sup> Ya kapan-e-ehhel idan nunman ni opisyal meippanggep ni Dios di Jerusalem ey heni kinapayan tuu e heniddan dios idan edum ni tuu.

<sup>20</sup> Nandasal di Heseekiah, e patul e hi Isaiah e prophet e u-ungngan Amos, nan Apu Dios et mampebaddang idan hi-gatu. <sup>21</sup> Dingngel APU DIOS hu dasal da e bagaen tudda anghel ni memettey idan sindalun Assyria, anin idan opisyal da niyadda ap-apun sindalu da. Et mambangngad hi Sennakerib di bebley dan nekabbaingan. Entanni ey pintey idan edum ni u-ungnga tu eman ni linawwan tud Tempol ni dios tu.

<sup>22</sup> Hanniman hu impahding APU DIOS ni nengihwang nan Heseekiah niyadda iJerusalem nan Sennakerib e patul di Assyria niyadda edum ni buhul da. <sup>23</sup> Meippalpun nunman ey kapakallispituhaddan tutu-u hi Heseekiah, anin idan nambebley di nanlinikweh. Dakel hu tutu-un nengi-lid Jerusalem ni indawat dan APU DIOS niya dakel dama indawat dan Heseekiah.

<sup>24</sup> Entanni ey nandegeh hi Heseekiah et heni mettey et mandasal nan APU DIOS ma-lat ekalen tu humman ni degeh tu. Ey indawtan nan APU DIOS ni kamengippetngan pengi-ang-angan tu e um-amnun me-kal degeh tu. <sup>25</sup> Nem hi Heseekiah ey nampahhiya kumedek e eleg tu peang-ang hu amleng tun nunman ni binabbal APU DIOS ni hi-gatu. Et bumunget hi APU DIOS ni hi-gatu niyadda tutu-ud Judah niyad Jerusalem et manhelheltap ida. <sup>26</sup> Nantuttuyyu hi Heseekiah ni nunman ni nampahhiyyaan tu niya nampekumbabah ida dama tutu-u et isiked APU DIOS ni mengastigun hi-gadan nunman ni ketaggun Heseekiah.

<sup>27</sup> Hi Heseekiah ey kedangyan ni peteg niya kapakallispituhan tutu-u. Nampekapydan nangehammad ni baley ni pengihha-adan tuddan balituk tu, ya silber tu, ya nangkinginan batu, yadda kaikkamdug di kenen, yadda happiyaw tu niyadda edum ni nebalol ni tenged tu, <sup>28</sup> anin idan pengihha-adan tun wheat, ya meinum niya mansikan olibah. Ey nampekapydan dakel ni kubkubban idan baka, yadda kalneroh niya gelding. <sup>29</sup> Dakel ni bebley kinapya tu niya dakel ni peteg animal tu henin baka, kalneroh niya gelding, tep indawtan Apu Dios ni dakel ni limmu tu et kumedangyan ni peteg. <sup>30</sup> Ey

hi-gatu nemengbeng ni Hebwak e Gihon di ahpat tu et padelan tu danum di kinapya tun alak di dallem ni puyek et palaw tud Bebley David di appit ni kakelinnugin aggew. Kayyaggud hu nambalanan emnin ni impahding tu.

<sup>31</sup> Nem yan inlian idan opisyal ni iBabilon et mahmahan da meippanggep idan kayyaggud ni neipahpading di bebley ey in-abulut Apu Dios ni ngenamung hi Heseekiah ni ihhumang tu et ang-angen tu hedini hipa dedan wadad nemnem tu niyad puhu tu. <sup>32</sup> Yadda impahding Heseekiah eman ni nampatulanan tu, niyadda impahding tun nengunnudan tun APU DIOS ey netudek di Libluh Isaiiah e u-unggan Amos e nei-dum di Libluh idan Patul di Judah niyad Israel. <sup>33</sup> Netey hi Heseekiah et maikulung di nenginahpat ni kullungngan idan patul. Ey emnin ida tutu-ud Judah niyad Jerusalem ey daka lispituha, anin eman ni neteyyan tu. Neihullul hi Manasseh e u-ungnga tun nampatul.

*Ya nampatulanan Manasseh di Judah*

### 33

<sup>1</sup> Hampulut dewwan toon Manasseh ni nampatulanan tud Judah et mampatul ni nelimat lima toon e yad Jerusalem nanha-adan tu. <sup>2</sup> Nanliwatan nan APU DIOS hi Manasseh tep impahding tud lawah ni henin impenahding idelan nampambebley diman ni dinegyun APU DIOS eman ni kapengelliiddan aammed tun helag Israel ni nalpuan dad Egypt. <sup>3</sup> Impeyayyaggud tudda kapenaydayawin beken ni makulug ni dios ni binabhah nan ametu e hi Heseekiah. Ey imekanya tu pan-appitan nan Baal niya nengapyaddan i-ninggeh etan ni biin dios e hi Asherah, niya dineyaw tudda bittuwen. <sup>4</sup> Nengapya pay ni pan-appitan idan beken ni makulug ni dios di Tempol ni kan APU DIOS ni penaydayawan ni hi-gatun ingganah. <sup>5</sup> Ey nengapyan pan-appitan idan bittuwen etan di dewwan dallin ni Tempol. <sup>6</sup> In-appit tudda lalakkin u-ungnga tu e giniheb tuddad Nedeklan e Hinnom, ey impahding tu ayak, ya man-ennap niya nandinelan tudda mapelad niya kamammagguway. Et pabunget tu hi APU DIOS tep yadda humman ni nemahhig ni lawah ni impenahding tun panliwwatan.

<sup>7</sup> Ey tu inha-ad hu nepaot ni tuttu-un dios di Tempol. Ey humman ni impahding tu ey lawah ni peteg tep inhel lan APU DIOS nan David et hi Solomon e u-ungnga tu e kantuy "Emin di nambebleyan idan hampulut dewwan helag Israel ey yadya Jerusalem eyad Tempol ku hu pinilik ni penaydayawan yun ngadan kun ingganah. <sup>8</sup> Hedin pannananeng idan helag Israel ni u-unnuden ni emnin Tugun kun indawat ku lan nan hi bega-en ku e hi Moses ey eggak i-abulut ni ida medegyun eyad bebley ni indawat kudda lan aammed da." <sup>9</sup> Nem impappanggulun Manasseh ida tuun mengippahding ni panliwwatan e nehalhalman nem ya impahding ida lan nambebley diman ni dinegyun APU DIOS eman ni nalpuan idan aammed dan helag Israel di Egypt.

<sup>10</sup> Inhelan APU DIOS hi Manasseh niyadda tutu-ud Judah, nem eleg da hanguden ni dingngel. <sup>11</sup> Et itu-dak APU DIOS ida sindalun Assyria et da gubaten hu Judah et depapen da hi Manasseh. Simbeng da eleng tu et ha-adan dan heni benwit niya binangkilingan dan giniling et ilaw dad Babilon. <sup>12</sup> Et nemahhig ni nanhelheltap hi Manasseh et mampekumbabah law nan APU DIOS et mandasal ni hi-gatu e Dios ida lan aammed da. <sup>13</sup> Inebulut APU DIOS hu dasal tu et baddangan tu tep himmek tu et ibangngad tud Jerusalem di nan-ap-apuan tu. Yan nunman law hu nengamtaan Manasseh e hi-gatun ebuh hu Dios.

<sup>14</sup> Entanni ey impeyayyaggud law nan Manasseh etan nei-dah ni luhud ni Bebley David meippalpuad Hebwak e Gihon di appit ni kakelinnugin aggew di Nedeklan e Kidron ingganah di Eheb e Deleg et pelikweh tud duntug di Ophel et ta-geyud tu humman ni luhud. Et ipustuh tu hu aap-apun sindalud nangekhammad ni neluhud ni bebley. <sup>15</sup> Ingkal tudda etan beken ni makulug ni dios idad duntug niyadda inha-ad tud Tempol APU DIOS. Ingkal tudda pay pan-appitan ni ingkanya tud duntug di kad-an ni Tempol, anin idan edum ni pan-appitan ni ingkanya tud Jerusalem, et tu ibbeng di ba-hil ni bebley. <sup>16</sup> Ey inyayyaggud tu pan-appitan nan APU DIOS et man-appit ni pekiddagyuman niya pansalamatan ni hi-gatu. Et ehelen tuddad tutu-ud Judah e daydayawan da hu AP-APU e Dios dan helag Israel. <sup>17</sup> Ma-nu tep intutuluy dan nan-appit di edum ni pan-appitan ni beken ni makulug ni dios, nem hi AP-APU e Dios dan ebuh hu nengiapitan daddan nunman ni in-appit da.

<sup>18</sup> Yadda impahding Manasseh, ya dasal tun Apu Dios niyadda inhel idan prophet ni hi-gatun nalpuan AP-APU e Dios dan helag Israel, ey neitudek di Libluh idan Patul di Israel. <sup>19</sup> Ya dasal tu, ya inhumang Apu Dios di dasal tu, yadda nanliwatan tu niya nangngehayan tun Apu Dios, ey neitudek emnin di Libluh idan Prophet. Impakitudek da nengapyaan tudadan baley ni beken ni makulug ni dios niyadda pengine-nem-neman

ni biin dios e hi Asherah, et han mantuttuyyun liwat tu. <sup>20</sup> Netey hi Manasseh et maikukung di kullunggan di baley tu et maihullul hi Amon e u-ungnga tun nampatul. <sup>21</sup> Dewampulut dewwa hu toon Amon eman ni nampatulan tud Judah et mampatul ni dewwan toon e yad Jerusalem nanha-adan tu. <sup>22</sup> Lawah ida impahpahding tu e kapakabballowan APU DIOS, heniddan impahding lan ametu e hi Manasseh. Ey dinaydayaw tu et ienappitan tuddan emin hu beken ni makulug ni dios ni kinapyan ametu. <sup>23</sup> Nem eleg ngu mampekumbabah nan APU DIOS, beken ni henin ametu, nem intultuluy tun nanliwat. <sup>24</sup> Entanni law ey namplanuh ida opisyal tu et pateyen dad baley tu. <sup>25</sup> Nem pintey damaddan iJudah hu nematey ni hi-gatu et ihullul da hi Josiah e u-ungngatun nampatul.

## 34

### *Ya nampatulan Josiah di Jerusalem*

<sup>1</sup> Walun toon hi Josiah eman ni nampatulan tud Judah et mampatul ni telumpulut hakey ni toon e nanha-ad di Jerusalem. <sup>2</sup> Impahding Josiah hu kamengippeamleng nan APU DIOS e inu-unnud tu hu impahding lan ammed tu e hi David e patul. Ey impannananeng tun nengipahding ni kayyaggud. <sup>3</sup> Yan meikkewwalun toon ni nampatulan tu e u-ungnga pay nin nunman ey inlapu tun mandaydayaw nan APU DIOS e Dios lan ammed tu hi David. Ey yan meikkahampulut dewwan toon ni nampatulan tu ey inlapu tun e-kalen ida penaydayawan ni beken ni makulug ni dios, ya etan tukud nan Asherah niyadda edum ni kinapya dan dios. <sup>4</sup> In-olden tu e bahbahen dan emin hu pan-appitan nan Baal, yadda daka pan-appisin kagihheban insensoh, yadda tukud ni daka pengineknemnememin Asherah niyadda edum ni pinaot ni hipan daka deyyawa. Sineneptep dadda humman et iwehit dad ta-pew ni kulung ida lan nan-appit ni nunman idan dios. <sup>5</sup> Giniheb Josiah hu genit idan padin nansilbin beken ni makulug ni dios idad daka pan-appisi ma-lat linihan da Judah niya Jerusalem. <sup>6</sup> Hanniman mewan impahding tud nambebleyan idan helag Manasseh, yadda helag Epraim, yadda helag Simeon niyadda helag Naptali, <sup>7</sup> e binahbah tudda pan-appitan ni beken ni makulug ni dios niyadda tukud ni daka pengineknemnememin Asherah. Ey sineneptep tudda kinapya dan dios da et mambalin idan dep-ul. Binahbah tu pay ida daka pan-appisin kagihheban insensoh di Israel et han mambanggad di Jerusalem.

<sup>8</sup> Yan meikkahampulut walun toon ni nampatulan tu e ginibbuh tun lininihan hu bebley da niya Tempol e putuken tu hi Saphan e u-ungngan Asaliah, hi Maasiah e governor ni Jerusalem et hi Joah, e u-ungngan Joahas e kapantuddek ni patul di emin ni kameippahding di bebley, ni mengiyayyaggud ni Tempol ni AP-APU e Dios tu. <sup>9</sup> Hi Hilkiyah e eta-gey ni padi hu neidwatan etan ni pihhuh ni inemung idan helag Levi ni guwalyad eheb ni Tempol. Humman idan pihhuh ey indawat idan helag Manasseh, yadda helag Epraim niyadda edum dan helag Israel ni nambebley di north, yadda iJudah, yadda helag Benjamin, niyadda himmebley di Jerusalem. <sup>10</sup> Indinel Hilkiyah humman pihhuh idan tellun neputuk ni mampaktek ni mengiyayyaggud ni Tempol APU DIOS. Et penangan daddan karpenter ni mengiyayyaggud nunman ni Tempol. <sup>11</sup> Gimmatang idan nepahek ni batu niyadda negelgel ni keyew ni meussal ni pengiyayyaggudan dan Tempol Apu Dios e eleg hanguden idan nemangulun patul ni inyayyaggud et mebahbah. <sup>12</sup> Yadda helag Levi ey ida kameiddinnel ni manggunu. Yadda porman da ey di Jahat nan hi Obadiah e nahlag idan Merari, et di Sekariah nan Meshullam e nahlag idan Kohat. Yadda edum ni helag Levi ni nelaide ni man-a-appel <sup>13</sup> ey hi-gada kamampaktek idan manggunnu niya daka ippaktek ida edum ni meinggunnu. Ya edum ni hi-gada ey sekretarih, oopisyal edum niya guwalyad eheb edum.

### *Nehamak hu Liblul ni neitudekan ni Tugun Apu Dios*

<sup>14</sup> Yan eman ni kapampengi-ukkasin Hilkiyah e eta-gey ni padi etan ni pihhuh ni neilaw di Tempol ey himmak tu hu liblul ni neitudekan ni Tugun APU DIOS ni indawat tu lan Moses. <sup>15</sup> Et kan Hilkiyah nan Saphan e sekretarih ey "Himmak kud Tempol Apu Dios eya liblul ni neitudekan ni Tugun." Et idwat tun hi-gatu. <sup>16</sup> Inlan Saphan et tu peang-ang nan Josiah e patul. Kantun hi-gatuy "Ida numan kamanhehellu hu opisyal mun mengipahding ni ngunu da. <sup>17</sup> Inladdan opisyal mu hu pihhuh ni Tempol et idinel dadda etan ni kamanggunnu niya kamampaktek idan meiyayyaggud ni Tempol." <sup>18</sup> Kan pay Saphan nan hi Josiah e patul ey "Adyah eya liblul ni indawat Hilkiyah e eta-gey ni padin hi-gak." Et ibidbid tu humman ni liblul ni hi-gatu.

<sup>19</sup> Dingngel Josiah e patul humman ni nebidbid ey bini-ki tu balwasi tu niya kaumlelemyung. <sup>20</sup> In-olden tun Hilkiyah, hi Ahikam e u-ungngan Saphan, hi Abdon e u-ungngan Mikah, hi Saphan e sekretarih et hi Asaiah e konsihal tu, <sup>21</sup> e kantuy "Elaw



kayud Tempol et iehneng yuwak niyaddan emin eya natdaan ni iIsrael niya iJudah et mahmahan yun APU DIOS hu meippanggep ni neitudek eyad libluh ni nehamak. Nanna-ud ni nemahhig bunget tun hi-gatsu tep eleg u-unnuden ida lan aammed tayu ida huyyan neitudek.”

<sup>22</sup> Et lumaw hi Hilkiah niyadda edum tu etan di baluh ni parteh ni Jerusalem et ida mekihummangan etan ni biin prophet e hi Huldah e ahwan kamampaptek idan balwasid Tempol e hi Sallum e u-ungngan Tokhat e u-ungngan Hasrah. Inhel dan hi-gatu hu meippanggep nunman ni libluh <sup>23</sup> ey kantun hi-gaday “Yu ehel etan ni nengitu-dak ni hi-gayu eya inhel ni AP-APU e Dios tayun helag Israel. Kantuy <sup>24</sup> ‘Nanna-ud ni bahbahek hu Jerusalem, anin idan bimbley et umamnu emin ida idut ni neitudek di libluh ni nebidbid ni hi-gatu. <sup>25</sup> Tep inwalleng da-ak ni hi-gada et ienappitan dadda edum ni dios. Et mukun nemahhig hu bunget kun hi-gada tep yadda humman ni daka pehpending. Makulug et eleg meellubyag eya nemahhig ni bunget kuddan tutu-ud Jerusalem. <sup>26</sup> Nem heninnyu hu e-helek ni patul yu: Hi-gak e AP-APU e Dios idan helag Israel ey peamtak ni hi-gam hu meippanggep ni neitudek di libluh: <sup>27</sup> Nantuttuyyu ka et mampekumbabah kan hi-gak e DIOS e bini-kim hu balwasim et numngih ka eman ni nangngelam ni inhel kun neitudek di libluh ni pehding kun Jerusalem niyadda bimbley, ey dingngel ku muka pampehemhemmekin hi-gak. <sup>28</sup> Et humman hu, eggak pay ni peelli pemahbah kun Jerusalem ingganah mettey ka. Melinggep ali ketteyyam niya meiyayyaggud kan meikkullung, ey hannak impaeli huyyan meippahding. Tep eleg muli ang-anga hu pemahbahak ni bebley yu niyadda bimbley.’”

Et umenamut ida humman ni intu-dak Josiah e patul et ehelen dan hi-gatu humman ni inhel etan ni biin prophet.

<sup>29</sup> Entanni ey impaeyag Josiah emin ida aap-apud Judah niyad Jerusalem, <sup>30</sup> et ikuyug tuddad Tempol. Inayang tudda dama padi, yadda edum dan helag Levi niyadda tutu-u, kedangyan niya newetwet. Et eleten tun bidbiden ni hi-gada etan libluh ni nehamak di Tempol ni neitudekan ni nekitbalan nan APU DIOS ni hi-gada. <sup>31</sup> An immehng hi Josiah di dagsin tukud ni Tempol et isapatah tu e peka-u-unnuden tu law hi APU DIOS niya ipahding tun emin ida tugun ni neitudek di libluh.

<sup>32</sup> Ey in-olden tun emin idan nunman ni tutu-un neamung di Jerusalem niyaddad bebley idan helag Benjamin e issapatah dan u-unnuden da hu nekitbalan da. Inu-unnud idan tutu-ud Jerusalem niya impidwa dan nekitbal ni AP-APU e Dios ida lan aammed da. <sup>33</sup> Binahbah Josiah emin hu kinapyaddan tutu-un dios dad kebebbebley di Israel e kamengippehbungnet nan APU DIOS. In-olden tu pay e mahapul ni daydayawen idan tutu-u hu AP-APU e Dios ida daman aammed da. Et yan nunman ni tagggu tu ey eleg da iwalleng hu AP-APU e Dios dan helag Israel.

## 35

*Ya nengipahdingan di Josiah ni Piyestah ni Passover e Nelabahan ni Anghel APU DIOS*

<sup>1</sup> Entanni ey impahding di Josiah hu Piyestah ni Passover ma-lat maidaydayaw hi APU DIOS. Yan eman ni meikkahampulup et ni aggew ni nemangulun bulan ey nakleng ida impah ni kalneroh. <sup>2</sup> Intudu tu ngunuddan padi ey kayyaggud hu inhel tun hi-gada e pehding da ngunu dan mansilbid Tempol APU DIOS.

<sup>3</sup> Kantuddan helag Levi ni neputuk ni mansilbin Apu Dios niya mantuttuddun helag Israel ey “Iha-ad yu law hu Kaban APU DIOS di Tempol ni binehwt nan Solomon e u-ungnga lan David e patul ni Israel et eleg mahapul ni yu i-abaabat. Et ya law pehding yu ey pansilbi kayun APU DIOS niyadda tutu-u tun helag Israel. <sup>4</sup> Um-ali kayun mangngunu meippuun di grupuh ni nahlagan yu. Ey u-unnud yu intugun lan David e patul ni Israel et hi Solomon e u-ungnga tu. <sup>5</sup> Elaw kayud neitudun pangngunuan yu ma-lat baddangan yudda etan neitudun hi-gayud pamilyah ni mengi-appit ni in-ali dad Tempol. <sup>6</sup> Keleng yudda impah ni kalneroh ni kamei-appit di Piyestah ni Passover ey ipahding yu hu elaw ni panlinih ni annel yu et mandaddan kayun umbaddang idan edum yun helag Israel ni um-ali e humman intugun APU DIOS nan Moses.”

<sup>7</sup> Indawat Josiah hu telumpulun libun impah ni kalneroh niya gelding ni nalpud halun tu niya tellun libun bulug ni baka et mei-appit ni nunman ni piyestah. <sup>8</sup> Yadda dama opisyal ni patul ey hi-gada ngu kan nemnem et umidwat idan hipan pinhed dan iddawat idan tutu-u, yadda padi niyadda helag Levi. Indawat nan Hilkiah, hi Sekariah et hi Jehiel e opisyal ni kamampaptek ni Tempol Apu Dios hu dewwan libu et enem ni gatut ni impah ni kalneroh niya gelding et ya telunggatut ni bulug ni bakan mei-appit nunman ni piyestah. <sup>9</sup> Yadda kamengipappangngulun helag Levi e hi Konaniah niyadda aaggi tu e di Semaiah nan Nethanel, hi Hashabiah, hi Jeiel et hi Josabad, ey indawat daddan

helag Levi hu liman libun impah ni kalneroh niya gelding, et ya limanggatut ni bulug ni baka, et iappit dad Piyestah ni Passover.

<sup>10</sup> Et yan negibbuhan ni neidaddanan ni emin ni mahapul ni nunman ni piyestah ey limmaw ida padi niyadda edum dan helag Levi di kad-an ni neitudun pangngunnaan da meippuun di grupuh dan in-olden ni patul. <sup>11</sup> Kinleng idan helag Levi etan ida impah ni kalneroh ni mei-appit nunman ni piyestah et idwat da etan ni padi hu kuheyaw et iwakgih tud altar ey kapanlinnihiddan edum dan helag Levi etan ida animal ni nakleng. <sup>12</sup> Binewelwa dadda humman ni animal ni neiappit ni kagihheba et ika-peng daddad grupuh ni pamilyah da et iappit dan APU DIOS meippuun di Tugun ni neitudek di Libluh Moses. Hanniman mewan hu impahding daddan bulug ni baka. <sup>13</sup> Intangtang dadda etan impah ni kalneroh ni neiappit nunman ni piyestah tep humman hu mahapul ni meippahding, ey inhaeng dadda etan edum ni neiappit et malutu et ihidaddan tutu-u. <sup>14</sup> Et han da idaddan hu kenen daddan padin helag Aaron et mangan idan emin. Tep yadda padi hu mengi-appit idan kagihheba, anin idan taba, et iappit dadda meippalpun kakkabbuhhan ingganah ni hileng.

<sup>15</sup> Yadda helag Asap e hi-gada hu kamampaktek ni a-appeh niyadda meippatnul ey limmaw idad neitudun hi-gada meippuun di olden David, hi Asap, hi Heman et hi Jeduthun e prophet ni patul. Yadda kamanguwalyaddan eheb ey eleg da hi-yanen hu pustuh da tep indaddan idan helag Levi ni emin hu mahapul di piyestah.

<sup>16</sup> Negibbuh hu pandaddanan dan emin idan mahapul ni Piyestah ni Passover et iappit dadda mei-appit ni kagihheba di kapan-appisi meippuun di olden nan Josiah e patul. <sup>17</sup> Impahding idan helag Israel di Jerusalem humman ni piyestah et ipahding dan pitun aggew hu Piyestah ni Sinapay e eleg meha-adan ni kamampelbag. <sup>18</sup> Eleg la maipenahding huayan Piyestah ni Passover neipalpu eman ni tsimpuh Samuel ingganah nunyan tsimpuh tep endi patul ni helag Israel ni nengipahding nunyan impahding Josiah e nekiemung ida padi, yadda helag Levi, niyaddan emin hu tutu-ud Jerusalem, yad Judah niyad Israel.

<sup>19</sup> Neipahding humman ni Piyestah ni Passover eman ni meikkahampulut walun toon ni nampatulanan Josiah. <sup>20</sup> Negibbuh ni impeyayyaggud nan Josiah etan Tempol ey impangulun Neko e patul di Egypt ida sindalu tu et da gubaten hu Karkemis di Wangwang e Euphrates. Et ipengulu daman Josiah ida sindalu tu et ida makigubat ni hi-gada. <sup>21</sup> Nem immitu-dak hi Neko e patul ni Egypt ni an menghel nan Josiah e kantuy "Hipa pinhed mu e Josiah e patul ni Judah? Endi inamtak ni nanhallaan ta, niya eggak pinhed ni mekiggubbat ni hi-gam! Ya pinhed kun gubbaten ey yadda buhul kun ebuh. Kan man anhan Apu Dios ey pepu-ut ku kunu. Et humman hu, entan tuwak gubat tep baddangan tuwak mannuman nan Apu Dios ey entanniy petteyen dakan hi-gatu."

<sup>22</sup> Nem kinehing nan Josiah humman ni impeamtan Apu Dios nan Neko. Ya kumedek impahding tu ey ingkal tu imbalwasi tun balwasin patul ma-lat eleg immatunan idan buhul da. Et ipengulu tudda sindalu tun an mekiggubbat nan Neko di Nedeklan e Megiddo. <sup>23</sup> Entanni ey pinenaddan buhul tu, et kantun etan ni opisyal tuy "I-a-allaw muwak tep himmalem liput ku." <sup>24</sup> Ingkal da etan di kalesah tun nanlугanan tu et ilugan dad hakey ni kalesah et ilaw dad Jerusalem et matey diman et ikulung dad kullunggan idan patul. Limmelemyung idan emin hu iJudah niyadda iJerusalem ni neteyyan tu.

<sup>25</sup> Entanni ey wada hu kaum-ipelemyung ni peteg ni a-appeh Jeremiah meippanggep ni neteyyan Josiah. Et ingganah nunya ey kai-ena-appeh idan lalakki niyadda bibi-in helag Israel hedin ninemnem da hi Josiah. Nambalin huayan hakey ni elaw idan helag Israel niya neitudek huuyad Libluh ni A-appeh idan kaumlelemyung.

<sup>26</sup> Yadda edum ni neipahding eman ni nampatulanan Josiah niya edum ni impahding tu meippuun di Tugun APU DIOS, <sup>27</sup> meippalpun laputu ingganah di pappeg tu ey neitudek di Libluh idan Patul di Judah niyad Israel.

## 36

### *Ya nampatulanan Jehoahas di Judah*

<sup>1-2</sup> Entanni ey impambalin idan tutu-ud Judah hi Jehoahas e u-ungngan Josiah ni meihullul ni nampatul diman. Dewampulut tellu toon Jehoahas eman ni nampatulanan tud Judah. Nanha-ad di Jerusalem et man-ap-apan tellun bulan. <sup>3-4</sup> Anggegannu et mepappeg hu nan-ap-apan tu tep dimpap nan Neko e patul di Egypt et ihullul tu hi Eliakim e agin Jehoahas. Ey impambayad tudda iJudah ni tellun libu et epat ni gatut ni kiloh ni silber niya telumpulu et epat ni kiloh ni balituk ni buwis da.

Entanni ey hinullulan nan Neko hu ngadan Eliakim ni Jehoiakim. Hedin hi Jehoahas ey inlaw tud Egypt et pambalin tun balud diman. <sup>5</sup> Dewampulut lima hu toon Jehoiakim

eman ni nampatulan tud Judah et man-ap-apun hampulut hakey ni toon. Nem lawah ida impenahding tu et manliwat nan AP-APU e Dios tu. <sup>6</sup> Entanni ey immali hi Nebukadnessar e patul di Babilon et hegepen tu Jerusalem. Binangkiling tu hi Jehoiakim et ilaw tud Babilon. <sup>7</sup> Inlan Nebukadnessar hu edum ni nebalol ni ngunut di Tempol Apu Dios et tu iha-ad di baley tud Babilon.

<sup>8</sup> Yadda edum ni neipahding eman ni nampatulan Jehoiakim niyadda lawah ni impahding tu ey neitudek di Liblul idan Patul di Israel niyad Judah. Hi Jehoiachin e u-ungnga tu hu neihullul ni nampatul.

<sup>9</sup> Hampulut walu toon Jehoiachin eman ni nampatulan tud Judah nem nan-ap-apun ebuh ni tellun bulan et hampulun aggew. Lawah dama impahding tu et manliwat nan APU DIOS. <sup>10</sup> Yan negibbuan ni ahi ketelan nunman ni neitu-nud ni toon ey impaeyag nan Nebukadnessar e patul di Babilon hi Jehoiachin di Babilon et mambalin ni balud diman. Dakel hu nebalol ni ngunut di Tempol APU DIOS ni neilaw di Babilon ni nunman ni tsimpuh.

Entanni ey impambalin nan Nebukadnessar hi Sedekiah e agin a-ammed nan Jehoiachin ni meihullul ni nampatul di Judah niyad Jerusalem. <sup>11</sup> Dewampulut hakey hu toon Sedekiah eman ni nampatulan tud Judah et man-ap-apun hampulut hakey ni toon e yad Jerusalem hu nanha-adan tu. <sup>12</sup> Lawah dama impahpahding tu et manliwat nan APU DIOS niya eleg mampekumbabah nan Jeremia e prophet ni intu-dak nan APU DIOS ni mengippeamtan e-helen tu. <sup>13</sup> Nginhay tu mewan hi Nebukadnessar e patul, anin ni insapatah tun Apu Dios e mengu-unnud ni hi-gatu. Manghay ni peteg hi Sedekiah e eleg mampekumbabah nan AP-APU e Dios idan helag Israel. <sup>14</sup> Ey yadda aap-apuddan padi, anin idan tutu-u ey nema-ma dama ngehay dan APU DIOS. In-u-unnud dad kapehpehding idan nambebley di nanlinikweh e daka daydayawadda beken ni makulug ni dios et hi-gada ngu ey hinibit da Tempol ni AP-APU e Dios di Jerusalem.

<sup>15</sup> Ya AP-APU e Dios ida lan aammed da ey humman ni intu-dak tu hu prophet tun um-ehel idan tutu-u tu, tep tudda kahehmeka niya tuka ayyuhi hu Tempol tu, <sup>16</sup> nem kataltalanggaidan tutu-u humman idan prophet niya daka pihhula daka e-hela. Ey anggengi-ngi dadda et lektattuy nemahhig tu-wa law bunget APU DIOS ni hi-gada e endi dammutun an mengippesikked winu mengellubyag nunman ni bunget tu. <sup>17</sup> Et paelin APU DIOS hi Nebukadnessar di Babilon niyadda sindalu tu et pedugen dadda sindalun Sedekiah di Tempol et peteyen dadda niyadda edum ni tuudman, anin idan nangkeamma niya nangkei-inna niyadda kamandedgeh, e endi hemek da, tep in-abulut APU DIOS e pehding da humman. <sup>18</sup> Imbesik di Nebukadnessar ida ngunut di Tempol Apu Dios niyad bodegah ni Tempol, yadda kinedangyan ni patul niyadda opisyal tu et ilaw dan emin di Babilon. <sup>19</sup> Et han legabaddan nunman ni sindalu hu Tempol Apu Dios, yadda baley ni patul niyaddan emin hu hipan nebalol diman. Ey binahbah tudda luhud ni bebley.

<sup>20</sup> Yadda natdaan ni helag Israel ey neilaw idad Babilon et mambalin idan bega-en ni patul niyadda lalakkin u-ungnga tu ingganah eman ni inapput ni patul ni Persia hi Nebukadnessar. <sup>21</sup> Et manlatang hu puyek di Judah ni nepitun toon, e humman inamnuan ni inhel nan APU DIOS nan Jeremia e prophet e kantuy "Metawwey ali hu bebley ni nepitun toon et maihullul di dakel ni Sabbath ni eleg meu-unnud."

<sup>22</sup> Yan nemangulun toon ni nampatulan nan Cyrus e patul ni Persia ey winedan APU DIOS hu impeminhed tun mengapyan olden e meittudek et palaw tuddad kebebbebley ni sinekup tu ma-lat maipahding hu inebig Jeremia e prophet. <sup>23</sup> Heninnuy hu in-olden nan Cyrus e patul ni Persia: "Ya AP-APU e Dios di kabunyan ey indawat tun hi-gak emin hu pan-ap-apuan eyad puyek niya hi-gak hu nanghelan tun memehwat ni Tempol tud Jerusalem di Judah. Ey emin kayun tutu-un Apu Dios ey mambangngad kayud Israel et yu ingunu humman. Hi Apu Dios hu memaddang ni hi-gayu."

## Ezra

### *Ya huyyan libluh nan Ezra*

Yan eleg ni meipahding ida neitudek eyad libluh ey in-abulut nan Apu Dios hu Jerusalem et ya Tempol diman ni bahbahaen idan iBabilon. Yan nunman hu nengilepuan idan iBabilon ni mengillaw idan helag Israel di bebley da et pambalin daddan balud da. Ya toon ni nunman ey 606 B.C. Nem anin ni henin nunman hu neipahding et insapatah nan Apu Dios e hedin melebbah hu nepitun toon man i-abulut tun um-anemut mewan ida helag Israel di bebley da. (Jeremiah 25:12-14 et yad 29:10-14)

Et yan eman ni 536 B.C. ey in-abulut nan Cyrus e patul di Persia hu 50,000 ni helag Israel ni mambangngad di bebley dad Israel. Nem ingganah ni nunman ey nebahbah etan Tempol dad Jerusalem, anin idan luhud di nanlinikweh ni bebley.

Impeamta dama eyan libluh hu impahding idan helag Israel ni nengiyayyaggud ni Tempol et ieng-eng da mewan nan Apu Dios. Ey neipeamta hu meippanggep nan Ezra e nengipappangguluddan tuu tu.

### *Ya neitudek eyad libluh:*

1. Ya nambangngadan idan nemangulun grupuh ni helag nan Israel di bebley dad Jerusalem. (chapters 1-2)
2. Ya nengilepuan idan helag Israel ni nengiyayyaggud ni Tempol. (chapter 3)
3. Ya kapengippillitiddan buhul idan helag Israel ni pengippesikkedan ni hi-gadan nengiyayyaggud ni Tempol. (chapter 4)
4. Ya nengibbuhuan idan helag Israel ni nengiyayyaggud ni Tempol et ieng-eng dan Apu Dios. (chapters 5-6)
5. Ya nansilbian Ezra nan Apu Dios et ya nengipappangnguluan tuddan helag Israel. (chapters 7-10)

### *Ya nengiebulutan nan Cyrus ni pambangngadan idan helag Israel di bebley da*

<sup>1</sup> Yan eman ni nemangulun toon ni nampatulun Cyrus di Persia ey impeamnun APU Dios hu inhel tu lan Jeremiah ni nunman. Impenemnem tun Cyrus e patul di Persia et mengapyan olden e impatudek tu et palaw tuddad bebley ni nan-apapuan tu.

<sup>2</sup> Huyya olden nan Cyrus e patul di Persia: "Hi AP-APU e Dios di kabunyan ey nambalin da-ak ni patul di emin ni bebley eyad puyek, et hi-gak hu pangidinelan tun memehwat ni Tempol tud Jerusalem di Judah. <sup>3</sup> Et humman hu, emin kayun tuu tu ey dammutun mambangngad kayud Jerusalem di Judah et yu behwatan huyyan Tempol AP-APU e Dios ni Israel e kamedayyaw di Jerusalem. Hi Apu Dios yu hu meweddand hi-gayun tuu tu. <sup>4</sup> Hi-gayuddan bimmebley di kad-an idan natdaan ni helag Israel, ey mahapul ni man-allus kayun ussalen dan mambangngad et idwatan yuddan silber, ya balituk, yadda animal et ya hipan pinhed yun iddawat di Tempol Apu Dios di Jerusalem."

<sup>5</sup> Entanni ey nandaddan idan umlaw hu aap-apuddan helag Judah et yadda helag Benjamin, yadda papaddi, yadda helag Levi e huyyadda emin hu indawtan Apu Dios ni amleng ni mekillaw di Jerusalem ni memehwat ni Tempol APU DIOS. <sup>6</sup> Emin ida dinagsi da ey binaddangan dadda et pan-idwatan daddan silber, yadda balituk, yadda edum ni mahapul dad pandellanan da, yadda animal, yadda nenginan tenged, et yadda pinhed dan iddawat di Tempol.

<sup>7</sup> Inukat daman Cyrus e patul ida mahukung ni duyu et yadda basuh ni inlan nan Nebukadnessar e patul ni nunman di Tempol di Jerusalem et iha-ad tud tempol ni dios tu. <sup>8</sup> Ey impabilang tun Mitredat, e kamampaptek idan tenged niya pihhuh ni Persia, et hi-gatu mengidwat nan Sesbassar e governor ni Judah.

<sup>9-10</sup> Yahhuy bilang idan nunman ni indawat Cyrus:

balituk ni duyu	30
silber ni duyu	1,000
silber ni melakkeb ni duyu	29
balituk ni mahukung ni duyu	30
silber ni mahukung ni duyu	410
ya edum ni kameussal	1,000

<sup>11</sup> Ya nga-mut ni emin idan balituk et ya silber ni usal ey 5,400. Ina-allan Sesbassar emin ida huyyan nambangngadan idan helag Israel di Jerusalem ni nalpuan dad Babilon.

## 2

*Yadda ngadan ni helag Israel ni nambangngad di Jerusalem*

<sup>1</sup> Yauhuy ida hu helag Israel ni nalpud Babilon et mambangngad idad Jerusalem et yad edum ni bebley di Judah. Pinilit idan Nebukadnessar e patul ni meni-yan ni bebley dan nunman et ilaw tuddad Babilon. <sup>2-20</sup> Ya nengipengulun hi-gada ey hi Serubbabel, hi Jeshua, hi Nehemiah, hi Seraiaah, hi Reelaiaah, hi Mordekai, hi Bilsan, hi Mispar, hi Bigbai, hi Rehum, et hi Baanah. Yauhuy hu bilang idan lalakkin helag Israel ni nambangngad ni nalpud Babilon:

<b>Ya ngadan ni nahlagan da</b>	<b>Ya bilang da</b>
Yadda helag Paros	2,172
Yadda helag Sephatiah	372
Yadda helag Arah	775
Yadda helag Pahat-Moab (e helag di Jeshua nan Joab)	2,812
Yadda helag Elam	1,254
Yadda helag Sattu	945
Yadda helag Sakkai	760
Yadda helag Bani	642
Yadda helag Bebai	623
Yadda helag Asgad	1,222
Yadda helag Adonikam	666
Yadda helag Bigbai	2,056
Yadda helag Adin	454
Yadda helag Ater (e helag Hesechia)	98
Yadda helag Besai	323
Yadda helag Jorah	112
Yadda helag Hashum	223
Yadda helag Gibbar	95

<sup>21-35</sup> Heninnuy dama bilang idan tutu-un nambangngad di nampambebleyan idan a-ammed da:

<b>Yadda ngadan ni bebley ni nambangngadan da</b>	<b>Ya bilang da</b>
yad Bethlehem	123
yad Netophah	56
yad Anathot	128
yad Asmabet	42
yad Kiriath Jearim, yad Kephirah niyad Beerot	743
yad Ramah et yad Geba	621
yad Mikmas	122
yad Bethel niyad Ai	223
yad Nebo	52
yad Magbis	156
yad hakey ni Elam	1,254
yad Harim	320
yad Lod, yad Hadid niyad Ono	725
yad Jericho	345
yad Senaah	3,630

<sup>36</sup> Yauhuy damadda papaddin nambangngad: yadda helag Jedaiah e pamilyah nan Jeshua <sup>973</sup> <sup>37</sup> yadda helag Immer 1,052 <sup>38</sup> yadda helag Pashur 1,247 <sup>39</sup> yadda helag Harim 1,017.

<sup>40</sup> Yauhuy ida helag Levi ni nambangngad: yadda helag Jeshua nan Kadmiel e helag Hodabiah, <sup>74</sup> <sup>41</sup> yadda kaman-a-appah ni helag Asap 128, <sup>42</sup> yadda kamangguwalyaddan eheb ni Tempol: yadda helag di Sallum, hi Ater, hi Talmon, hi Akkub, hi Hatita et hi Sobai 139.

<sup>43</sup> Yadda kamampangnunnud Tempol: yadda helag di Siha, hi Hasupha, hi Tabbaot, <sup>44</sup> hi Keros, hi Siaha, hi Padon, <sup>45</sup> hi Lebanah, hi Hagabah, hi Akkub, <sup>46</sup> hi Hagab, hi Salmi, hi Hanan, <sup>47</sup> hi Giddel, hi Gahar, hi Reaiah, <sup>48</sup> hi Resin, hi Nekoda, hi Gassam, <sup>49</sup> hi Ussa, hi Paseah, hi Besai, <sup>50</sup> hi Asnah, hi Meunim, hi Nephussim, <sup>51</sup> hi Bakbuk, hi Hakupha, hi Harhur, <sup>52</sup> hi Baslut, hi Mehida, hi Harsa, <sup>53</sup> hi Barkos, hi Sisera, hi Temah, <sup>54</sup> hi Nesiah et hi Hatipha.

<sup>55</sup> Yadda helag ni bega-en nan Solomon: yadda helag di Sotai, hi Hassopheret, hi Peruda, <sup>56</sup> hi Jaala, hi Darkon, hi Giddel, <sup>57</sup> hi Sephatiah, hi Hattil, hi Pokeret-Hassebaim et hi Ami.

<sup>58</sup> Yadda helag ni kamampangnunnud Tempol et yadda helag idan bega-en nan Solomon ey 392.

<sup>59-60</sup> Wadadda dama hu 652 ni nalpud Tel Melah, yad Tel Harsa, yad Kerub, yad Addan et yad Immer e helag di Delaiah, hi Tobiah et hi Nekoda, nem endi daka peang-ang ni kakulugan tu e helag idan Israel.

<sup>61</sup> Wadadda dama hu padi e helag nan Hobaiah, yadda helag Hakkos et yadda helag Barsillai. (Huyyan hi Barsillai ey inahwa tu hu u-ungngan Barsillai e iGilead et ingedan tu ngadan nan aman ahwa tu.) <sup>62</sup> Nem hihhimmak idan nunya hu neitudekan ni tenten ni a-ammed da ey endi daka hemmaka et eleg dadda iebulut ni mei-dum idan papaddi. <sup>63</sup> Inhel nan governor da e eleg ida mabalin ni mekikkan ni neiappit nan Apu Dios ingganah ni wada hu padin mengi-ussal ni Urim et ya Thummim et pengamtaan da hedin dammutun mekikkan ida winu eleg.

<sup>64-67</sup> Ya bilang idan emin ni nambangngad ey 42,360, hin-appil ida pay hu 7,337 ni lalakki niya bibi-in bega-en da. Wada pay ingkuyug dan 200 ni lalakki et ya bibi-in kaman-a-appeh. Neki-la da hu 736 ni kebayyu da, ya 245 ni mule da\*, ya 435 ni kamel da et ya 6,720 ni donkey da†.

<sup>68</sup> Dimmateng idad Tempol nan APU DIOS di Jerusalem et umidwat ida edum ni aap-apun pinhed dan iddawat et mausal di pemehwatan ni Tempol di neibehwatan tun nunman.

<sup>69</sup> Indawat da hu hipan dammutun iddawat da. Ya bilang ni emin ni neidwat ey 500 ni kiloh ni balituk, 2,600 ni kiloh ni silber et ya hanggatut ni andukkey ni balwasin padi.

<sup>70</sup> Nampambebley idad neihnup di Jerusalem hu papaddi, yadda helag Levi, yadda kaman-a-appeh, yadda kamanguwalyad eheb, yadda kamangnunnud Tempol et yadda edum ni tutu-u. Hedin yadda edum ni helag Israel ey ida nampambebley di nanha-adan ida lan a-ammed dan nunman.

### 3

#### *Ya neiyayyaggudan ni altar*

<sup>1</sup> Yan eman ni meikkeppitun bulan, e wadadda law helag Israel di nampanha-adan dad nambibleyan da, ey neamung idan emin di Jerusalem. <sup>2</sup> Et kapyaan mewan di Jeshua e u-ungngan Jehosadak, yadda edum tun papaddi, et hi Serubbabel e u-ungngan Sealtiel et yadda aaggi tu, hu pan-appitan dan Dios dan helag Israel et wada ussalen dan man-appit ni kagihheba e humman intugun Moses e bega-en Apu Dios. <sup>3</sup> Anin ni ida kaumtakut hu helag Israel idan tutu-un nampambebley diman ey kinapya da hu pan-appitan da etan di neikapyaan tun nunman et ilepu da mewan ni man-appit idan kagihheba nan APU DIOS ni kakkabbuhhan et yan kamangkehilleng.

<sup>4</sup> Impahding da hu Piyestah ni Kampu tep humman hu neitudek di Tugun Moses et iappit da hu mahapul ni mei-appit ni kewa-wa-wan nunman ni Piyestah. <sup>5</sup> In-appit da mewan hu daka i-appit ni kagihheba, ya daka i-appit ni Piyestah ni Kaketellakin Bulan, ya daka i-appit di daka keammuumungin daka pandeyyawin APU DIOS niya daka iggeb-at ni iddawat nan APU DIOS. <sup>6</sup> Anin ni eleg ni ilepuddan helag Israel ni memehwat ni Tempol ey inlapu dan man-appit nan APU DIOS ni kagihheban animal eman ni nemangulun aggew ni meikkeppitun bulan.

<sup>7</sup> Entanni et umidwat ida helag Israel ni pihhuh ni penangdan daddan memehhek ni batu et yadda karpenter. Immidwat ida mewan ni kennen, ya meinum et ya lanan olibah ni illaw dad Tyre et yad Sidon et iwa-hi dan keyew ni sedar ni melpud Lebanon ni pedellan dad baybay et han da padekal di Joppa. Emin ida huyyan meipahding ey in-abulut nan patul e hi Cyrus di Persia.

<sup>8</sup> Ya eman ni meikkadwan bulan ni meikkadwan toon ni nambangngadan dad Jerusalem ey inlapu dan memehwat ni Tempol. Immalid Serubbabel e u-ungngan Sealtiel, hi Jeshua\* e u-ungngan Jehosadak, yadda papaddi, yadda helag Levi niya emin hu edum dan

\* 2:64-67 2:64-67 impah ni kebayyu et ya donkey † 2:64-67 2:64-67 animal ni heni kebayyu \* 3:8 3:8 Ya hakey ni ngadan tu ey Joshua.

helag Israel ni nambanggad di Jerusalem et mangngunud da. Yadda helag Levi ni dewampulu toon tu et nehuluk hu nengipappanggulun ngunun kebehwatan ni Tempol. <sup>9</sup> Yadda helag Levi ni nambabaddang ni nampaptek idan nangngunud Tempol ey di Jeshua et yadda u-ungnga tu et yadda agi tu, hi Kadmiel et yadda u-ungnga tu (e helag idan Hodabiah) et yadda u-unggan Henadad, yadda u-ungnga da niya aaggi da.

<sup>10</sup> Yan nengibbuhan dan pegnad ni pengibbehwatan dan Tempol, ey immalidda papaddin nanengtun nambalwasiddan balwasin padi, et pampatnul da tangguyup da. Ey immalidda dama helag Levi e helag Asap et pampatnul da hu cymbal et daydayawen dan emin hi APU DIOS tep humman dedan daka pehding neipalpu eman ni ketaggun nan David e patul ni Israel. <sup>11</sup> Nan-a-appéh idan penaydayaw dan APU DIOS niya pampesalamat dan hi-gatu e kandan a-appéh day:

“Kayyaggud hi APU DIOS! Endi pappég ni impemihed tun hi-gatsun helag Israel e eleg melumman.”

Et emin ida tutu-uy nemahhig e daka pan-itkuk hu daka penaydayaw nan APU DIOS tep negibbuh hu pegnad ni pengibbehwatan ni Tempol tu.

<sup>12</sup> Dakel ida hu kamangkea-amman papaddi, yadda edum dan helag Levi et yadda edum ni aap-apun nannemnem etan ni nemangulun Tempol et pan-eleten da nangih dan nenang-angan dan negibbuhan ni pegnad ni pengibbehwatan ni daka pangkapyaan Tempol. Nem hedin yadda etan edum ni tuu ey ida kamantetekkek tep ya anla da.

<sup>13</sup> Nan-eeddum hu tekuk dan an-anla da et ya nangih da e endi petekkan tu kamedngel ey neka-ka-let et kamedngel di neidawwi.

## 4

*Yadda wadadda kamengi-leg ni keiyayyaggudan ni Tempol*

<sup>1</sup> Yadda buhul idan helag Judah et yadda helag Benjamin ey dingngel da e kapambe-hwataddan tutu-un nambanggad di Jerusalem hu Tempol ni AP-APU e Dios idan helag Israel, <sup>2</sup> et da ang-angen hi Serubbabel et yadda edum ni aap-apun helag Israel et kandan hi-gaday “Baddangan dakeyun mengapya eyan Tempol tep mi dama kadeyyawa hu Dios yun yuka deyyawa. Nan-enappit kamin hi-gatu neipalpu eman ni nengi-lian dakemin Esarhaddon e patul di Assyria ni mambebley deya.”

<sup>3</sup> Nem kan di Serubbabel, hi Jeshua et yadda etan edum ni aap-apu ey “Eleg mi mahapul baddang yun pengapyaan min Tempol ni AP-APU e Dios mi. Anin ni hi-gamin ebuh ey kinapya mi, tep humman olden nan patul e hi Cyrus di Persia ni hi-gami.”

<sup>4</sup> Entanni ey inlapuddan tutu-un nampambebley di nanlinikweh diman ni menismayah niya menattakkut idan iJudah ma-lat isiked dan mangngunnu. <sup>5</sup> Bineyadan dadda opisyal di gubilnud Persia ma-lat pasiked da ngunu. Nangnanglaw hanneyan impenahding dan nampatulán Cyrus di Persia ingganah ni neihullulan nan Darius ni nampatul diman.

<sup>6</sup> Nelabah hu pigan toon et mampatul hi Serses ey nantudek ida buhul ni tutu-ud Judah et yad Jerusalem et idiklamuh dadda.

<sup>7</sup> Entanni mewan et mampatul hi Artaserses di Persia et mantudek ida humman ni buhul idan iJudah ni hi-gatu, e impappanggulud Bislam, hi Mitredat, hi Tabeel niyadda edum da. Inusal da Aramaic di tudek da et ibelin ni nemidbid nan patul.

<sup>8</sup> Hi Rehum e governor nan hi Simsai e sekretarih tu hu nantudek nan patul e hi Artaserses et ehelen da hu meippanggep ni kamekapkapyad Jerusalem. <sup>9</sup> Kandad tudek day

“Nalpu huyyan tudek nan Rehum e governor et hi Simsai e sekretarih tu, yadda huwet et yadda edum ni opisyal ni tutu-ud Tripolis, yad Persia, yad Ereke et yad Babilon, yadda iElam di Susa, <sup>10</sup> et yadda edum ni tutu-un yapaelin Ashurbanipal e kamedeyyaw ey et-eteng ni kabaelan tu, ni mambebley di Samaria et yaddad edum ni bebley di appit ni kakelinnugin aggew di Wangwang e Euphrates.

<sup>11</sup> Huyya tudek min hi-gam e Apu Artaserses e patul. Nalpu huyyan tudek ni hi-gamin tutu-um di appit ni kakelinnugin aggew di Wangwang e Euphrates. <sup>12</sup> Pinhed min amtaem e ap-apu mi e yadda helag Israel ni nalpuudan ni immalin mambebley di deya Jerusalem ey da mewan ni mengiyayyaggud eyan bebley idan manghay ey lawah ni tutu-u. Anin ya tuping ni luhud ni bebley da et daka pan-iyayyaggud et anggegannuy gibbuhen da. <sup>13</sup> Hedín gibbuhen da huyyan bebley da e apu patul, anin idan luhud tu ey nanna-ud ni issiked dan mambeyyad ni buwis da. Et humman ali kekullangan ni pihhuh di bebley ni nan-ap-apuam.

<sup>14</sup> Et humman hu, gapu tep hi-gam hu apu mi, ey eleg mi pinhed ni pehding da humman et mukun nantudek kami et pengamtaam. <sup>15</sup> Pinhed min hemmakem

hu dokumintuh ni nunman ni intaluddan nemangulun patul ni meippanggep nunyan bebley et amtaem e huyyan bebley ey sigud ni eleg ida mengu-unnud hu nambebley deya. Ya kakulugan tu ey ya gaputun nebahbahan ni bebley da ey emin hu kaman-ap-apu ey daka ngenghaya. <sup>16</sup> Et humman hu, e-helen min hi-gam e hedin megibbuh ni meiyayaggud huyyan bebley et mahead hu nanlinikweh ni tuping ni luhud tu ey makulug ni eleg mulli law kabaelan man-ap-apu idad bebley di appit ni kakelinnugin aggew di Wangwang e Euphrates.”

<sup>17</sup> Hinumang Artaserses et kantud tudek tuy

“Huyya humang kun hi-gam e Rehum e gobernador, hi-gam e Simsai e sekretarih et hi-gayuddan opisyal ni nambebley di Samaria et yaddad bebley di appit ni kakelinnugin aggew di Wangwang e Euphrates.

<sup>18</sup> Imbidbid dan hi-gak etan tudek yu et ehelen da keibbellinan tu. <sup>19</sup> Inmandal ku et hamaken da hu dokumintuh meippanggep ni Jerusalem ey makulug ni neipalpu eman ni nebayag ey ngingin hay da aap-apu da tep kedaklan idan nambebley diman ey manghay ida. <sup>20</sup> Nanhuluhulul hu et-eteng ni kabaelan dan nampatul di ditan Jerusalem niyaddad bebley di appit ni kakelinnugin aggew di Wangwang e Euphrates et mukun et-eteng hu daka emmungan buwis da. <sup>21</sup> Et humman hu, yan nunya ey imandal yu ni issiked idan nuntan ni tutu-un manggunnu ingganah pengi-mandalak ni dammutun ittuluy da. <sup>22</sup> Entan tu a-ayyapaw ni mengi-olden tep eleg tayu i-abulut ni wada an umbahbah di panyaggudan ni nan-ap-apan ku.”

<sup>23</sup> Dimmateng hu tudek nan patul e hi Artaserses et meibidbid nan Rehum, hi Simsai et yadda edum dan opisyal ey impapuut dan limmaw di Jerusalem et piliten dan pasiked ida helag Israel ni manggunnud Tempol.

<sup>24</sup> Neisiked hu ngunud Tempol Apu Dios di Jerusalem ingganah ni meikkadwan toon ni nampatulanan Darius di Persia.

## 5

<sup>1</sup> Yan nunman ey hi Haggai e prophet et hi Sekariah e hakey mewan ni prophet e u-ungngan Iddo ey impeamta da hu inhel nan Apu Dios idan helag Israel idan edum dan nambebley di Judah et yad Jerusalem. <sup>2</sup> Yan nangngelan di Serubbabel e u-ungngan Sealtiel nan Jeshua e u-ungngan Jehosadak ni impeamtaddan nunman ni prophet ey inlapu da mewan ni mengittu-man ni manggunnud Tempol Apu Dios di Jerusalem et baddangan idan nunman ni dewwan prophet.

<sup>3</sup> Nem anggegannu ey limmaw hi Tattenai e gobernador ni probinsiya di appit ni kakelinnugin aggew di Wangwang e Euphrates, et hi Sethar Bosenai et yadda edum da di Jerusalem et mahmahan da e kanday “Hipa nengiebulut ni hi-gayun memehwat eyan Tempol et mekapya mewan huyyan baley?” <sup>4</sup> Kanda mewan ey “Hipadda ngadan ni tutu-un kamampanggunnudyda?” <sup>5</sup> Nem ay kaipappaptek nan Apu Dios humman idan aap-apan helag Israel et mukun endi nengipesiked ni hi-gadan manggunnu ingganah mantuddek idan Darius et humangen tudda damad tudek tu.

<sup>6</sup> Huyya tudek nan Tattenai e gobernador, hi Sethar Bosenai et yadda edum ni opisyal tud appit ni kakelinnugin aggew di Wangwang e Euphrates ni impalaw dan Darius e patul.

<sup>7</sup> Kanday “Huyya tudek min hi-gam e apu Darius e patul. Ya pinhed ni ey melinggep hu pan-ap-apuam. <sup>8</sup> Pinhed min peamta e apu patul e limmaw kamid Judah ey inang-ang mi e daka pangkapyaa hu Tempol ni eta-gey ni Dios. Etta-teng ni batu daka pan-ikkapya ey daka panha-adin keyew ida dingding. Inang-ang mi mewan e mangkahludda kamanggunnu ey daka pepuppuut ni manggunnu. <sup>9</sup> Imbaga midan aap-apu da hedin hipa nengiolden ni hi-gadan memehwat ni nunman ni Tempol. <sup>10</sup> Ey minahmahan mi mewan ngadan da ma-lat amtaem hedin hipa nengipappanggulun nunyan ngunu.

<sup>11</sup> Ey hinumang da ey kanday ‘Bega-en dakemin Apu Dios di kabunyan et yad puyek. Mika pan-ikkapya huyyan Tempol ni kinapya dedan nunman ni hakey ni eta-gey ni patul ni Israel. <sup>12</sup> Nem gapuh ni nengipebungetan idan aammed min nan Apu Dios di kabunyan ey in-abulut tu hu patul di Babilon e hi Nebukadnessar et gubaten tudda. Binahbah tu huyyan Tempol et ibsik tudda tutu-ud Babilon. <sup>13</sup> Nem yan eman ni nemangulun toon ni nampatulanan patul e hi Cyrus, ey in-olden tun mekapya mewan huyyan Tempol. <sup>14</sup> Anin idan silber ey balituk ni kaussalad Tempol ni inlan nan patul nunman e hi Nebukadnessar ey imbangngad Cyrus nan Sesbassar e sinudu tun gobernador ni Judah. <sup>15</sup> Kan Cyrus e patul nan Sesbassar ey “Ilaw mudda huyyan usal et iha-ad mud Tempol di Jerusalem ey binehwat yu hu baley Apu Dios di nebehwatan tu lan nunman.” <sup>16</sup> Et ikapyan



Sesbassar hu pegnad ni pengibbehwatan ni Tempol Apu Dios di Jerusalem. Neilepun nunman hu ngunud Tempol et ingganah nunya, nem eleg pay ni megibbuh. Huyya inhumang dan hi-gami.’

- 17 Et humman hu, hedin dammutu e apu patul man pahemak mu humman ni dokumintuh di opisinah ni patul di Babilon et meamta hedin makulug nunman ni in-olden nan Cyrus e patul e behwatan da huyyan Tempol di Jerusalem, et peamtam ni hi-gami hedin hipa muka pannemnem ni nunyan imbagemi.”

## 6

*In-abulut nan Darius e patul hu keiyayyaggudan ni Tempol*

<sup>1</sup> Gapun nunyan tudek ey in-olden nan patul e hi Darius e hemmeken daddad dokumintuh ni gubilnud Babilon. <sup>2</sup> Et entanni ey yad Ekbatana di Media hu nenamakan dan neludun ni papel ni neitudekan nunman ni olden.

<sup>3</sup> Kantuy “Yan eman ni nemangulun toon ni nampatulana Cyrus ey in-olden tun mekapywa mewan hu Tempol di Jerusalem etan di neikapyaan tu lan nunman ma-lat panappitan idan helag Israel ni daka gihheba. Nahyam ni piyeh kasina-gey tu ey nahyam mewan ni piyeh kalinakkeb tu. <sup>4</sup> Ya dingding tu ey hantehantetun neiyayyaggud ni nepahek ni batun manggaga-tun ni han neibattan hu keyew. Et ya pihuh ni meibbeyad di hipan mahapul ey melpud gubilnu. <sup>5</sup> Ya hakey pay ey mahapul ni meibbanggad di diman e Tempol Apu Dios ida balituk niyadda silber ni asal diman ni inlan Nebukadnessar ni nunman la et i-li tudya Babilon.”

<sup>6</sup> Et palaw nan Darius e patul hu tudek ni penummang tu. Kantuy

“Huyya tudek kun hi-gam e Tattenai e governor idad bebley di Euphrates di appit ni kakelinnugin aggew, ey hi-gam e Sethar Bosenai et hi-gayuddan edum dan opisyal ditan ni probinsiya. Entan elaelaw yudman.

<sup>7</sup> Entan pekidindima-u yun ngunud Tempol nan Apu Dios. Ditan et behwatan ni governor idan helag Israel et yadda aap-apu da hu baley Apu Dios di neikapyaan tun nunman. <sup>8</sup> I-olden ku hu pehding yun memaddang idan aap-apuddan helag Israel di daka pampemehwatin baley Apu Dios: Emin hu mahapul da ey beyyadan ni gubilnu e melpud kameemmung ni buwis ni bimbley di ditan Euphrates di appit ni kakelinnugin aggew, et eleg maisiked hu ngunu. <sup>9</sup> Kewa-wa-wa ey entan tu langganin iddawat idan padid Jerusalem hu hipan mahapul da, henin pakeeteng ni lakkitun ni patul niya hi-gatu mengastigun tuun manggenghay ni nunyan olden niya memabhah ni Tempol di Jerusalem. Hi-gak e hi Darius hu nengiolden nunya et mahapul ni meunnud huyyan olden ku.”

<sup>11</sup> Ey i-olden ku e hedin wada eleg mengu-unnud nunyan olden, ey me-kal hu hakey ni dinengal ni baley tu et musingan et itwik di annel tu. Anin ni baley tu et meabhah. <sup>12</sup> Hi Apu Dios e nemilin Jerusalem ni pandeyyawan ni ngadan tu hu mengappit ni patul niya hi-gatu mengastigun tuun manggenghay ni nunyan olden niya memabhah ni Tempol di Jerusalem. Hi-gak e hi Darius hu nengiolden nunya et mahapul ni meunnud huyyan olden ku.”

<sup>13</sup> Inu-unnud nan Tattenai e governor, hi Sethar-Bosenai et yadda edum da huyyan olden nan patul e hi Darius. <sup>14</sup> Et itultuluy idan ap-apun helag Israel ni kinapya etan Tempol ey inu-unnud da intuttuddudan prophet e di Haggai nan Sekariah e helag Iddo. Ginibbuh dan binehwat hu Tempol tep humman in-olden nan Apu Dios dan helag Israel ey humman dama in-olden idan nampatul di Persia e hi Cyrus, hi Darius et hi Artaserses.

<sup>15</sup> Ginibbuh dan kinapya hu Tempol eman ni meikkatun aggew ni bulan ni Adar eman ni meikka-nem ni toon ni nampatulana Darius.

<sup>16</sup> Et man-am-amleng idan nengieng-eng nan Apu Dios nunman ni Tempol hu papaddi, yadda edum dan helag Levi niyadda edum dan helag Israel ni nambanggad ni nalpud edum ni bebley ni neilawwan da. <sup>17</sup> Nampalsiddan hanggatut ni lakkitun baka, ya dewanggatut ni lakkitun kalneroh, ya epat ni gatut ni impah ni kalneroh ni mei-appit et ya hampulut dewwan lakkitun gelding ni mei-appit tep ya liwat idan hampulut dewwan helag Israel. <sup>18</sup> Hedin yadda papaddi et yadda edum dan helag Levi ey nambanggad idad ngunu da dedan di Tempol e humman la intudek Moses di liblun tun pehding da.

<sup>19</sup> Yan eman ni meikkahampulut epat ni aggew ni nemangulun bulan nunman ni neihayned ni toon ey impahding da hu Piyestah ni Passover e penginemnemneman dan nelabahan ni anghel Apu Dios. <sup>20</sup> Impahding idan papaddi et yadda edum dan helag Levi hu elaw ni palinnih ni annel ma-lat malinih idan pengippahdingan dan nunman

ni Piyestah. Pinalsida dadda mei-appit ni animal ni hemmulen dan emin ni helag Israel ni nambanggad di bebley dad Jerusalem. <sup>21</sup> Hinemul idan helag Israel humman idan in-appit da et makihemul ida edum dan nengiwalleng ni lawah ni elaw ni sinakdul da et dayawen da hu AP-APU e Dios dan helag Israel. <sup>22</sup> Pitun aggew hu nampiyestahan da tep impahding da mewan hu Piyestah ni Sinapay ni eleg meha-adan ni kamampelbag. Nan-an-anladda tep nambalin nan APU DIOS ni kayyaggud hu kapannemnem ni patul di Assyria et kabbabbal ni hi-gada, ey bimmaddang ni ngapyaan dan Tempol Apu Dios e Dios dan helag Israel.

## 7

### *Ya dintengan Ezra di Jerusalem*

<sup>1-5</sup> Nelabah dakel ni toon et mampatul hi Artaserses di Persia ey wada hu tuun hi Ezra ngadan tu. Sinenten tu aammed tu ey nahlag nan Aaron e eta-gey ni padi: hi Ezra ey u-ungngan Seraiah e u-ungngan Asariah e u-ungngan Hilkiah, e u-ungngan Sallum, e u-ungngan Sadok, e u-ungngan Ahitub, e u-ungngan Amariah, e u-ungngan Asariah, e u-ungngan Meraiot, e u-ungngan Serahiah, e u-ungngan Ussi, e u-ungngan Bukki, e u-ungngan Abishua, e u-ungngan Pinehas, e u-ungngan Eleasar, e u-ungngan Aaron e eta-gey ni padi.

<sup>6</sup> Huyyan hi Ezra ey mittuduh ni nekanngamtan Tugun ni indawat ni AP-APU e Dios idan helag Israel nan Moses. Immalid Jerusalem e nalpud Babilon et idwat nan patul ni hi-gatu emin ni hipan imbagetu. Et-eteng ni bendisyon AP-APU e Dios nan Ezra et mukun kabbabbal etan patul ni hi-gatu. <sup>7</sup> Yan eman ni meikkeppitun toon ni nampatuln Artaserses hu inlian tu e ingkuyug idan edum dan helag Israel, yadda edum ni padi, yadda helag Levi, yadda kaman-a-appeh, yadda kamanguwalyan eheb, niyadda kamanggunnud Tempol.

<sup>8</sup> Dimmateng di Ezra di Jerusalem ni meikkelliman bulan ni meikkeppitun toon ni nampatuln nan Artaserses. <sup>9-10</sup> Immegah idad Babilon eman ni nemangulun aggew ni nemangulun bulan, et dumteng idad Jerusalem ni nemangulun aggew ni meikkelliman bulan, tep binendisyonan Apu Dios hu nandalnan da tep ya kayyaggud ni elaw Ezra e ya ingngunungunu tu, ey inedaedal tu niya inu-unnud tu hu Tugun APU DIOS et itenuttuddu tuddan edum tun helag Israel.

<sup>11</sup> Huyya neitudek di tudek ni indawat nan Artaserses e patul nan Ezra e padi ey mittuduh, e nekanngamtan intugun APU DIOS ni hi-gadan helag Israel:

<sup>12</sup> "Huyya tudek kun hi-gam e Ezra e padi ey kamantuttuddun Tugun ni Dios di kabunyan. <sup>13</sup> I-olden ku e emin ida helag Israel eyad kebebbley ni nan-apauak, anin idan papaddi et ya helag Levi ey dammutun mekillaw idad Jerusalem ni hi-gam hedin pinhed da. <sup>14</sup> Hi-gak et yadda pitun edum kun konsihal ku ey ittu-dak dakad Jerusalem et yad Judah et mu ang-angen hedin inna-nu daka pengu-unnud ni Tugun Apu Dios tep huyya neidinel ni ngunum. <sup>15</sup> Peki-lam idela balituk et ya silber ni i-appit midan edum kun Dios yun helag Israel e wada Tempol tud Jerusalem, <sup>16</sup> anin idan balituk et ya silber ni emmungem idad bebley di Babilon et yadda i-appit ni tutu-u ey papaddin melpud puhu dan iddawad dad Tempol Apu Dios dad Jerusalem. <sup>17</sup> Huyyaddan meemmung ey meussal ni pengettang yuddan bulug ni baka, yadda lakkitun kalneroh, yadda impah ni kalneroh, yadda kamei-appit ni wheat niya meinnum. Emin ida huyya ey mei-appit di Tempol Apu Dios yud Jerusalem. <sup>18</sup> Hedin ya mehewwal ni balituk niya silber ey dammutun ussalan yu nem mahapul ni meippuun di pinhed ni Dios yun pengi-ussalan yu. <sup>19</sup> Idwat yun Dios di Jerusalem emin ida usal ni Tempol tun indinel min hi-gayu. <sup>20</sup> Hedin wada edum ni mahapul yud Tempol ey dammutun um-ala kayud pihhuu ni gubilnu.

<sup>21</sup> Hi-gak e hi Artaserses ey i-olden ku e emin ida kamengnged ni pihhuu ni gubilnu winu treasurer di kebebbley di appit ni kakelinnugin aggew di Wangwang e Euphrates ey iddawad da mahapul nan Ezra tep hi-gatu ey padi niya kamantut-tuddun Tugun nan Dios di kabunyan. <sup>22</sup> Ya dammutun kedakkel ni iddawad yun hi-gatu ey tellun libu et epat ni gatut ni kiloh ni silber, limanggatut ni langgusih ni pagey, limanggatut et neliman galon ni meinnum et ya limanggatut et neliman galon ni lanan olibah, et ya ahin ni ngenamung hu kedakkel tu. <sup>23</sup> Mahapul ni peka-ang-angen yu et idwat yun emin hu inhel ni Dios di kabunyan ni mahapul ni meihha-ad di Tempol tu et endi umhulun ni tu bungngetan ni hi-gak et yadda meittu-nud ni hi-gak ni mampatul. <sup>24</sup> Eleg mewan mabalin ni kayu mansingnil

ni buwis idan padi, yadda edum dan helag Levi, yadda kaman-a-appreh, yadda guwalya niyadda edum ni wada ngunu tud Tempol Apu Dios.

<sup>25</sup> Ey hi-gam Ezra ey usal mu laing ni indawat Apu Dios ni hi-gam et piliem ida aap-apu ey huwet ni mengipappangnguluddan tutu-un nampambebley di appit ni kakelinnugin aggew di Wangwang e Euphrates ni nengamtan Tugun nan Dios yu. Hedin eleg amtaddan tutu-u hu Tugun ey mahapul ni tutudduan mudda. <sup>26</sup> Hedin ya eleg mengu-unnud ni Tugun nan Apu Dios niya olden eyad bebley ni nan-ap-apuak ey mekastigu. Hedin ya kastigu tu ey mettey winu meillaw di edum ni bebley winu meellan emin hu hipan wadan hi-gatu winu meikkellabur."

<sup>27</sup> Kaman-an-anla hi Ezra e kantuy "Medeyyaw hi AP-APU e Dios idan a-ammed mi! Tep hi-gatu nengidwat ni impeminhed nan patul ni mengiyayyaggud ni Tempol APU Dios di Jerusalem. <sup>28</sup> Ey hi-gatu medeyyaw tep impeang-ang tu hu eleg mepappeg ni impeminhed tun hi-gak tep impambalin tun kabbabbal ni hi-gak hi patul et yadda konsihal tu et yadda emin opisyal tun et-eteng ni kabaelan da. Timmuleddak tep binendisyonan tuwak nan AP-APU e Dios ku et amungen kudda edum ni aap-apun Israel et ikuyug kuddad Jerusalem."

## 8

*Yadda neikuyug nan Ezra ni nambangngadan tu*

<sup>1</sup> Yahhuy ida hu neitudek ni aap-appedan helag et ya bilang idan neki-lin hi-gak ni nalpud Babilon eman ni nan-ap-apuan nan patul e hi Artaserses: <sup>2</sup> Yad helag Pinehas ey hi Gersom. Yad helag Ithamar ey hi Daniel. <sup>3</sup> Yad helag David ey hi Hattus e u-ungngan Sekaniah. Yad helag Paros ey hi Sekariah et yadda hanggatut et neliman lalakkin edum tu. <sup>4</sup> Yad helag Pahat Moab ey hi Eliehoenai e u-ungngan Serahiah et yadda dewanggatut ni lalakkin edum tu. <sup>5</sup> Yad helag Sattu ey hi Sekaniah e u-ungngan Jahasiel et yadda telunggatut ni lalakkin edum tu. <sup>6</sup> Yad helag Adin ey hi Ebed e u-ungngan Jonathan et ya neliman lalakkin edum tu. <sup>7</sup> Yad helag Elam ey hi Jeshaiiah e u-ungngan Athaliah et yadda nepitun lalakkin edum tu. <sup>8</sup> Yad helag Sephatiah ey hi Sebadiah e u-ungngan Michael et yadda newalun lalakkin edum tu. <sup>9</sup> Yad helag Joab ey hi Obadiah e u-ungngan Jehiel et yadda dewanggatut et hampulut walun lalakkin edum tu. <sup>10</sup> Yad helag Bani ey hi Selomit e u-ungngan Josiphiah et yadda hanggatut et na-nem ni lalakkin edum tu. <sup>11</sup> Yad helag Bebai ey hi Sekariah e u-ungngan Bebai et yadda dewampulut walun lalakkin edum tu. <sup>12</sup> Yad helag Asgad ey hi Johanan e u-ungngan Hakkatan et yadda hanggatut et hampulun lalakkin edum tu. <sup>13</sup> Yad helag Adonikam ey hi Eliphelet, hi Jeuel, hi Semaiah et yadda na-nem ni edum dan lalakki (nem eleg ida makidihhan tep neiunud ida.) <sup>14</sup> Yad helag Bigbai ey hi Uthai, hi Sakkur, et yadda nepitun lalakkin edum da.

<sup>15</sup> Inemung kuddad kad-an ni Ahaba Canal et mangkampu kamidman ni tellun aggew. Entanni et ang-angek hu listaan idan tutu-u ey ma-nut waddada padi nem endin hekey hu edum ni helag Levi ni neki-li. <sup>16</sup> Et paeyag ku hi Elieser, hi Ariel, hi Semaiah, hi Elnathan, hi Jarib, hi Elnathan, hi Nathan, hi Sekariah et hi Meshullam e kamengipappangngulluddan tutu-u. Impaeyag kudda damad Joiarib et hi Elnathan e nangkelaiing ni tutu-u. <sup>17</sup> Intu-dak kuddad kad-an Iddo, e ap-appedan helag Levi di Kasiphia, yadda aaggi tu niyadda kamampangngunnud Tempol, ma-lat ibega dan hi-gada et umitu-dak idan tutu-un mansilbid Tempol Apu Dios di Jerusalem. <sup>18</sup> Gapuh ni bendisyon Apu Dios ni hi-gami ey impaeli da hi Serebiah e naka-amta tu ngunu tu, et ya hampulun walun u-ungnga tu et yadda lalakkin agi tu. Hi Serebiah ey helag Mahli e helag Levi e u-ungngan Israel. <sup>19</sup> Impaeli da dama hi Hashabiah, hi-gadan Jeshaiiah e helag idan Merari et ya dewampulun aaggi tu niyadda u-ungnga tun lalakki. <sup>20</sup> Nei-dum idan hi-gada hu dewanggatut et dewampulu e ya ngunu da ey mansilbid Tempol. Ya a-ammed dan nunman ey hi-gada dedan hu netudun memaddang idan helag Levi eman ni ketaggun nan David e patul et yadda opisyal tu. Wada neitudekan ni emin ni ngadan da.

<sup>21</sup> Yan wada kamid Ahaba Canal ey in-olden ku et mantepel kami e eleg kami mangan ey nandasal kamin Apu Dios et kedewen min hi-gatu e ippangulu dakemid lawwan mi niya ang-angen tu et meihwang kami, et yadda u-ungnga mi niya anin idan emin ni wadan hi-gami. <sup>22</sup> Bimmaingngak et eleggak law an mambagan nan patul ni sindalun mekillaw ni mangguwalyan hi-gamid dalan, ma-lat endi hu lawah ni pehding ni buhul min hi-gami, tep inhel min hi-gatu e kammiy "Hi Dios mi ey makabbaddang idan tutu-un kamandeyyaw ni hi-gatu, nem nemahhig bunget tuddan tutu-un kamengiwwalleng ni

hi-gatu.”<sup>23</sup> Et humman hu, nantepel kami et mandasal kami, ma-lat ipaptek dakemin Apu Dios, ey hinumang tu dasal mi.

<sup>24</sup> Pinilik hu hampulun dewwad kamengipappangnguluddan papaddi e di Serebiah nan Hashabiah et yadda hampulun aaggi da. <sup>25</sup> Et ikiloh kudda hu balituk, yadda silber et yadda edum ni usal ni Tempol ni indawat nan patul, yadda konsihal tu, yadda opisyal tu, niyadda edum ni helag Israel, et pebeltan kun hi-gada. <sup>26</sup> Huyya neitudek ni indawat kun hi-gada: ya dewwampulut liman libun kiloh ni silber, ya tellun libu et walunggatut et neliman kiloh ni silber ni usal di Tempol, ya tellun libu et walunggatut et neliman kiloh ni balituk, <sup>27</sup> ya dewwampulun balituk ni mahukung ni duyu e nehuluk ni walun kiloh bel-at da, ya dewwan giniling ni mahukung ni duyu e nan-inggeh ni balituk balol tu.

<sup>28</sup> Kangkun hi-gaday “Neidewat kayun APU Dios. Heni damaddan eyan silber et ya balituk e neiappit idan AP-APU e Dios idan a-ammed tayu. <sup>29</sup> Et humman hu, paka-ang-ang yu et idteng yun emin huuyag Tempol e eleg ni hekey ma-kalan. Hedin indateng yu, pidwa yun ikiloh et han yu impebeltan ni ap-apuddan padi, yadda edum dan helag Levi et yadda aap-apuddan helag Israel di Jerusalem.” <sup>30</sup> Yadda papaddi et yadda edum dan helag Levi hu nengipaptek niya nengilaw ni nunman idan silber, yadda balituk, et yadda edum ni kausalad Tempol di Jerusalem.

<sup>31</sup> Immegah kamid Ahaba Canal eman ni meikkahampulut dewwan aggew ni nembangulun bulan et lumaw kamid Jerusalem. Naka-ippaptek dakemin Apu Dios mi et endi nengubat niya nambetak ni hi-gamin buhul mid nandalnan mi. <sup>32</sup> Dimmateng kamid Jerusalem et man-iyuatu kamin tellun aggew.

<sup>33</sup> Limmaw kamid Tempol eman ni meikka-pat ni aggew et ikiloh midda inlaw min silber, yadda balituk et yadda etan edum ni kameusal di Tempol, et pebeltan min Meremot e padi e u-ungngan Uriah. Yadda edum tu ey di Eleasar e u-ungngan Pinehas et yadda dewwan helag Levi e di Josabad e u-ungngan Jeshua et hi Noadiah e u-ungngan Binnui.

<sup>34</sup> Binilang mi et ikiloh min emin et itudek mi.

<sup>35</sup> Yadda edum kun helag Israel ni nembangngad eyad bebley mi ey nan-i-li da hu gihheben dan i-appit dan Dios idan helag Israel. In-ali da pay hu hampulut dewwan bulug ni baka, ya nahyam et enem ni lakkitun kalneroh, ya nepitun pitun impah ni kalneroh et ya hampulut dewwan gelding ni i-appit dan mengi-ehneng ni hi-gamin emin ni helag Israel ma-lat ma-kal hu liwat mi. Emin ida huuya ey giniheben dan in-appit nan APU Dios. <sup>36</sup> Impeki-la da etan neitudekan ni olden ni indawat nan patul ni hi-gada, et idwat daddan gubernor niya opisyal idan bebley di appit ni kakelinnugin aggew di Wangwang e Euphrates. Et bumaddang ida humman ni aap-apu ey oopisyal idan tutu-u et yaddad mahapul di Tempol Apu Dios.

## 9

<sup>1</sup> Negibbuh ni emin huuya ey immalidda edum ni aap-apun helag Israel et kandan higak ey “Dakel ida helag Israel, yadda edum ni papaddi niyadda edum dan helag Levi ni eleg mengappil ni annel dad tutu-un nampambibley di nanlinikweh. Daka iu-unnud di lawah ni peteg ni kapehpehding idan iAmmon, iMoab, iKanaan, iEgypt, yadda Hittite, yadda Perisite, yadda Jebusite et yadda Amorite. <sup>2</sup> Tep kapan-iahwaddan lalakkin helag Israel hu bibi-in nangkaldpudman idan bebley ey nan-iebulut dadda u-ungnga dan meki-ahwaddan nunnan ni bibi-i et beken idelaw ni malinid di hinanggan Apu Dios. Ey yadda aap-apu niyadda oopisyal hu nengipappangngulun nunyan nemahhig ni liwat.”

<sup>3</sup> Dingngel ku huuya ey nambi-kik hu balwasik ey nan-iwa-nit ku bewek ku, ey nan-hepdu ku iming ku et yumudunggak e nemahhig lemyung ku. <sup>4</sup> Yimmuyudunggak diman ingganah nedatngan hu pan-appitan ni kamangkehilleng. Emin ida etan tutu-un simmattakut ni pehding nan Dios min helag Israel tep ya liwat idan edum dan nampambangngad di Jerusalem ey immaliddad kad-ak et mekiyuyuddung idan hi-gak.

<sup>5</sup> Imminahhak law tep nedatngan hu pan-appitan mi, e nanengtun nebi-bi-ki balwasik, et mandukkunnak et mandasallak nan AP-APU e Dios ku e inta-gey ku ngamay ku.

<sup>6</sup> Kangkud dasal kuy “Apu Dios ku, et-eteng ni baing kun mengitta-gey ni angah kud hinanggam tep nemahhig liwat mi e gullat ni panggaga-tun et melebbahan ulu mi e dettengen tu kabunyan. <sup>7</sup> Nemahhig liwat min tutu-u neipalpu eman ni ketagguddan aammed min nebayag. Gapuh ni liwat mi ey impeenapput dakemiddan buhul mi, anin idan patul mi et yadda papaddi mi. Nampatey da edum mi, nan-ale da limmu mi et pan-ilaw dakemid bebley da et mambalin kamin balud da. Anggeba-ing ni peteg biyag mi ingganah nunya.

<sup>8</sup> Nem yan nunya ey indawtan dakemin nekemtang ni pengippeang-angam ni hemek mu e AP-APU e Dios mi, tep in-abulut mun meteggu kamin edum et idwatan dakemin melinggep ni pambibleyan mi eyad bebley mu. Imbukyat dakemid neihbutan mi, et

wada law an-anla mid biyag mi. <sup>9</sup> Em, nambalin kamin himbut, nem eleg dakemi pannaneng di neihbutan mi tep ya impeminhed mun eleg melumman. Impambalin mudda patul di Persia ni kabbabbal ni hi-gami et iebulut dan meibbanggad kamid bebley mi et behwatan mi Tempol mu tep nekabbabhah. Ey impelingep mudda bebley mid Judah niyad Jerusalem.

<sup>10</sup> Apu Dios mi, hipa na-mu law e-helen mi? Tep ay ngin hay mi mewan intugun muddan <sup>11</sup> bega-en mun prophet e kammuy 'Ya eya bebley ni ellian yun pambebleyan ey beken ni malinih di hinanggak, tep hedin yadda eya tutu-un nampambebley deya ey pinnu da eya bebley dan lawah ni peteg ni daka pehpending. <sup>12</sup> Humman gaputun, entan tu iebulut hu bibi-in u-ungnga yun meki-ahwaddan u-ungnga dan lalakki ey entan tu abulut hu lalakkin u-ungnga yun ahwaen dadda hu bibi-in u-ungnga da. Ey entan peki-ungbal ni hi-gada meippanggep ni panhinbabaddangan yu, ma-lat kayyaggud kayun ingganah. Emin ittanem yu eyad puyek ey malemeh niya pebeltan yuddallin helag yu et pampuyek dan ingganah.'

<sup>13</sup> Anin ni hanniman neipahding ni hi-gami e kinastigu dakemi tep ya liwat mi ey inamta mi e kulang humman ni nengastigum ni hi-gami, tep eleg mu iebulut e Apu Dios mi e kami mettey ni emin. <sup>14</sup> Nem yan nunya mewan ey inwalleng mi tugun mu et makiepu kamiddan tutu-un lawah ni peteg daka pehpending. Et humman hu, nanna-ud ni kastiguen dakemi, tep ya bunget mu et endien dakemin emin ni natdaan. <sup>15</sup> Hi-gam e AP-APU e Dios min helag Israel ey kayyaggud ka. Himmek dakemi et deh e nanengtun mategu kami. Mika ebbuluta liwat min hi-gam ey endin hekey lebbeng min um-ehngeng di hinanggak."

## 10

### *Ya nengabulutan idan tutu-un liwat da*

<sup>1</sup> Yan nunman ni nanyuungan nan hi Ezra et mandasal di hinanggan Tempol e kamannanangih ey pan-e-helen tu nanliwatan da, ey immalidda daker ni edum tun helag Israel ni nangkea-amma ey nangkei-inna, kaungaungan lalakki ey bibi-i, et maemngeng idad kad-an tu e nemahhig hu nangih da. <sup>2</sup> Entanniy kan Sekaniah e u-ungngan Jehiel e helag Elam nan Ezra ey "Eleg mi u-unnuden hi Apu Dios et makiepu kamiddan tutu-udya. Nem anin ni hanniman neipahding et wada namnamah tayun helag Israel. <sup>3</sup> Tep ya pehding tayu ey mansapatah itsun Apu Dios e itu-dak midda eya bibi-in inahwa mi ey ikkuyug dadda u-ungnga min hi-gada. U-unnuden mi e-helem niya e-helen idan edum ni kamengu-unnud ni Tugun Apu Dios tayu. Ey pehding min emin wadad Tugun Apu Dios. <sup>4</sup> Ngenamung kan pinhed mun pehding mu. U-unnuden mi hedin hipa kammu."

<sup>5</sup> Et uminah hi Ezra et pansapatah tudda aap-apun papaddi, yadda edum dan helag Levi et yadda edum ni helag Israel e pehding da hu inhel nan Sekaniah, et mansapatah idan emin. <sup>6</sup> Entanni ey hini-yan Ezra hu hinanggan Tempol Apu Dios, et lumaw di kampun Jehohanan e u-ungngan Eliashib. Nandeyadman nem eleg mangan ey eleg uminum tep nanengtun kaumlelemyung, tep ya eleg pengu-unnudan idan edum tun helag Israel ni nambanggad.

<sup>7</sup> Entanni et palaw idan aap-apu da tudek daddan tutu-u et peamta dan hi-gada e emin idan nampambanggad di diman bebley dad Judah niyad Jerusalem ey meemmung idad Jerusalem. <sup>8</sup> Wada tellun aggew ni panhehgedan dan hi-gada, et ya etan eleg um-ali ey meella hu hipan wadan hi-gatu ey eleg law meibbillang ni edum da.

<sup>9</sup> Et yan nedatngan ni meikkatun aggew e yan nunman hu meikkadwampulun aggew ni meikkahyan ni bulan ey neamung idan emin hu lalakkin helag Judah et yadda helag Benjamin di Jerusalem, et yumudung idad dallin ni Tempol Apu Dios. Nemahhig takut da tep importanteh ni peteg hu inlian da ey ida kamangegeygey tep nemahhig hu udan.

<sup>10</sup> Immehngeng hi Ezra et kantuddan tutu-uy "Nanliwat kayu tep nan-iahwa yu hu bibi-in beken ni edum tayun helag Israel, et humman himmulun ni na-duman hu liwat tayu. <sup>11</sup> Hedin ya law pehding yu ey abulut yu hu liwat yun AP-APU e Dios idan a-ammed tayu ey ipahding yu hu kamengippeamleng ni hi-gatu. Entan pekiieddueddum yuddan beken ni helag Israel. Ey hi-yan yudda bibi-in inaddum yun beken ni helag Israel."

<sup>12</sup> Intekuk idan neamung hu humang da e kanday "Neiptek inhel mu. Mahapul ni u-unnuden midda huttan ni inhel mu. <sup>13</sup> Nem hantapug eya tutu-un neamung ey nemahhig udan et eleg mabalin ni um-ehngeng kamid dallin. Hakey pay ey eleg mabalin ni megibbuh huyyan tayu pehding ni hakey winu dewwan aggew, tep daker kamin peteg ni nengipahding nunyan liwat. <sup>14</sup> Attu et anin yadda ap-apu mi hu manha-ad deya Jerusalem ma-lat hi-gada mengi-ehngeng ni hi-gami, et emin kamin nekihawad beken ni helag Israel ey megtud hu aggew ni ellian mi, ey mahapul ni meki-lidda aap-apu niya

huwet ni bebley mi. Hanneya pehding tayu ma-lat masiked hu bunget Apu Dios ni hi-gami tep ya huyyan liwat ni mi impahding.”<sup>15</sup> Inebulut idan emin ni tutu-u humman ni na-hel. Ebuh di Jonathan e u-ungngan Asahel et hi Jahseiah e u-ungngan Tikbah et yadda dewwan helag Levi e di Meshullam nan Sabbethai ni eleg meminhed ni mengippahding nunya.

<sup>16</sup> Et humman impahding idan tutu-un nambanggad. Piniliddan Ezra e padi hu pan-ap-apuddan helag Israel et itudek tu ngadan da. Et yan nunman ni nemangulun aggew ni meikkahampulun bulan ey inlapu dan manmahmah idan kasuh. <sup>17</sup> Nedateng hu nemangulun aggew ni nemangulun bulan ni neitu-nud ni toon, ey negibbuh ni nebigistgal emin hu lalakkín nengiahwan beken ni edum dan helag Israel.

*Yadda lalakkín nengiahwan bibi-in beken ni edum dan helag Israel*

<sup>18</sup> Yadda papaddi: Yaddad helag Jeshua e u-ungngan Josadak et yadda aaggi tun lalakki ey hi Maaseiah, hi Elieser, hi Jarib et hi Gedaliah. <sup>19</sup> Emin ida ey insapatah da e hi-yanen da ahwa da et iappit da hanhakkey ni lakkitun kalneroh tep ya liwat da. <sup>20</sup> Yaddad helag Immer ey di Hanani nan Sebadiah. <sup>21</sup> Yaddad helag Harim ey hi Maaseiah, hi Elijah, hi Semaiah, hi Jehiel et hi Ussiah. <sup>22</sup> Yaddad helag Pashur ey hi Elioenai, hi Maaseiah, hi Ismael, hi Nethanel, hi Josabad et hi Elasa.

<sup>23</sup> Yaddad helag Levi: Hi Josabad, hi Sime, hi Kelaiah (e Kelita hu hakey ni ngadan tu), hi Pethahiah, hi Judah et hi Elieser.

<sup>24</sup> Yaddad kaman-a-appéh ey hi Eliashib. Yaddad kamanguwalyad eheb ey hi Sallum, hi Telem et hi Uri.

<sup>25</sup> Yaddad edum dan helag Israel: Yaddad helag Paros ey hi Ramiah, hi Issiah, hi Malkijah, hi Mijamin, hi Eleasar, hi Malkijah et hi Benaiah.

<sup>26</sup> Yaddad helag Elam ey hi Mattaniah, hi Sekariah, hi Jehiel, hi Abdi, hi Jeremot et hi Elijah.

<sup>27</sup> Yaddad helag Sattu ey hi Elioenai, hi Eliashib, hi Mattaniah, hi Jeremot, hi Sabad, et hi Asisa.

<sup>28</sup> Yaddad helag Bebai ey hi Jehohanan, hi Hananiah, hi Sabbai et hi Atlai.

<sup>29</sup> Yaddad helag Bani ey hi Meshullam, hi Malluk, hi Adaiah, hi Jashub, hi Seal et hi Jeremot.

<sup>30</sup> Yaddad helag Pahat-Moab ey hi Adna, hi Kelal, hi Benaiah, hi Maaseiah, hi Mattaniah, hi Besalel, hi Binnui et hi Manasseh.

<sup>31-32</sup> Yaddad helag Harim ey hi Elieser, hi Ishijah, hi Malkijah, hi Semaiah, hi Simeon, hi Benjamin, hi Malluk et hi Semariah.

<sup>33</sup> Yaddad helag Hashum ey hi Mattenai, hi Mattattah, hi Sabad, hi Eliphelet, hi Jeremai, hi Manasseh et hi Sime.

<sup>34-37</sup> Yaddad helag Bani ey hi Maadai, hi Amram, hi Uel, hi Benaiah, hi Bedeiah, hi Keluhi, hi Baniah, hi Meremot, hi Eliashib, hi Mattaniah, hi Mattenai et hi Jaasu.

<sup>38-42</sup> Yaddad helag Binnui ey hi Sime, hi Selemiah, hi Nathan, hi Adaiah, hi Maknadebai, hi Sashai, hi Sarai, hi Asarel, hi Selemiah, hi Semariah, hi Sallum, hi Amariah et hi Joseph.

<sup>43</sup> Yaddad helag Nebo ey hi Jeiel, hi Mattithiah, hi Sabad, hi Sebina, hi Jaddai, hi Joel et hi Benaiah.

<sup>44</sup> Emin ida huyyan lalakki ey inahwa da bibi-in beken da edum ni helag Israel et maweda u-ungngan edum ni hi-gada. Hini-yan dadda et awiten idan bibi-i hu u-ungnga da.

## Nehemiah

### *Yan eya libluh nan Nehemiah*

Hi Nehemiah ey bega-en nan patul e hi Artaserses di Susa. Nem entanni ey wada nalpud Jerusalem ni nengipeamta e lawah kameippenahding diman. Yadda helag Israel ni nambangngad diman ey endi linggep da, tep ma-nut neiyayyaggud hu Tempol, nem nebahbah hu luhud di nanlinikweh ni bebley. Et humman hu, endi panheniddan helag Israel idan buhul dan nambebley di nanlinikweh di bebley da.

Et an mekihummangan hi Nehemiah nan patul ma-lat iebulut tun umlaw di Jerusalem et tu iyayyaggud hu bebley et ya luhud tu, ey in-abulut nan patul. Huyyan libluh hu neitudekan ni impahding nan Apu Dios ni nemaddang nan Nehemiah e nengippangngulun mengiyayyaggud ni luhud ni Jerusalem, anin ni wadadda buhul dan kamengikka-leg ni pengiyayyaggudan dan nunman.

### *Ya neitudek eyad libluh:*

1. Impappangngulun Nehemiah hu pengiyayyaggudan dan luhud di nanlinikweh di Jerusalem. (chapters 1-7)
2. Imbidbid nan Ezra hu Tugun nan Apu Dios idan helag Israel et mantuttuyyuddan liwat dan Apu Dios. (chapters 8-10)
3. Wadadda edum ni helag Israel ni nambebley di probinsiya di Judah et yad Benjamin ni nei-tan di Jerusalem et mambebley idadman. (chapter 11)
4. Neieng-eng nan Apu Dios hu luhud di Jerusalem. (chapter 12)
5. Kinastigun Nehemiah ida hu eleg mengu-unnud ni Tugun nan Apu Dios. (chapter 13)

### *Ya neitudek meipanggep ni impahding Nehemiah e u-ungngan Hekaliah*

<sup>1</sup> Huyyadda hu impahding ku e hi Nehemiah e u-ungngan Hekaliah ni intudek ku.

Yan eman ni bulan ni Kisleb ni meikkadwampulun toon ni nampatulanan Artaserses, ey wada-ak di Susah e nambebleyan idan ap-apudman ni bebley. <sup>2</sup> Entanniy immali hi agik e hi Hanani ni an menang-ang ni hi-gak e wadadda edum tun lalakkin nalpuddad Judah, et ibegak ni hi-gada hedini hipa inna-nu tud Jerusalem niyadda etan edum min Jew ni nambangngad ni nalpud Babilon e neilawwan dan nunman. <sup>3</sup> Hinumang da ey kandan hi-gak ey "Et-eteng kapanligligatiddan nambangngad ni tutu-ud Judah, niya nemahhig baing da. Nebahbah hu tuping ni nanlinikweh ni Jerusalem ey negiheh hu ida eheb ni bebley."

<sup>4</sup> Dingngel ku impanumang dan imbagak ey yimmudungngak et numngihhak. Nemahhig lemyung ku et eleggak mangan ni pigan aggew ey nandasallak nan Apu Dios di kabunyan. <sup>5</sup> Kangkud dasal kuy "APU DIOS e Dios di kabunyan, eta-gey kan peteg, et mukun daka kapekaddeyawa. Muka peamnu hu muka e-helan pehding mun panyaggudan idan neminhed niya kamengu-unnud ni hi-gam. <sup>6</sup> APU DIOS, dengel mu anhan hu dasal kun kawwalwal niyan hileng. Nakka pan-iddasali hu tutu-um ni helag Israel. Nakka ebbuluta e nanliwat kamin hi-gam. Em, anin ni hi-gak et yadda pamilyah ku et nanliwat kamin hi-gam. <sup>7</sup> Nemahhig nanliwatan min hi-gam. Eleg mi u-unnuden ida intugun mu, yadda linteg mu niyadda edum ni mahapul ni u-unnuden min tugun mun indawat mu lan Moses e bega-en mu.

<sup>8</sup> Nemnem mu anhan ni nunya hu inhel mun nunman nan Moses e kammuy 'Hedin eleg yuwak u-unnuda, man iwwahit dakeyun emin di kebebbebley eyad puyek. <sup>9</sup> Nem hedini mantuttuyyu kayu et mengu-unnud kayu mewan ni hi-gak, man dakeyulli bangngaden et i-li dakeyud bebley ni pinilik ni pandeyyawan yun hi-gak, anin ni attu eyad puyek kad-an yu.'

<sup>10</sup> Bega-en dakemi e APU DIOS. Hi-gami hu tutu-um ni inhwang mu tep et-eteng hu kabaelam. <sup>11</sup> Dengel mu anhan e Apu eya dasal ku, niya dengel mu dama dasal idan edum ni bega-en mun pinpinhed dan menaydayaw ni hi-gam. Baddangi muwak anhan et mambalin ni kababbal hi patul ni hi-gak ni nak pambeggaan ni baddang tu."

Yan nunyan tsimpuh ey hi-gak hu kamampaptek ni kainnuman patul.

## 2

<sup>1</sup> Nelabah hu epat ni bulan et hakey ni aggew e kamengngan hi Artaserses e patul ey inlaw ku meinnun ni innumen tu. Endi tu nenang-ngan ni hi-gak ni kaumlelemyung, ebuh ni nunya. <sup>2</sup> Et kantong hi-gak ey "Kele kakaumlelemyung? Eleg ka met mandedgeh?"

Wada na-mu et-eteng ni ligat mu tep kele henin nuntan ang-ang mu?" Ey simmakuttak, <sup>3</sup> nem hinumang ku et kangkuy "Ya pinhed ku ey manneneng kan mampatul! Nakka umlelemyung tep ya bebley min neikulungan idan aammed mi ey nekabbabhah niya nangkegiheb ida eheb tu."

<sup>4</sup> Kan patul ey "Et hipa dammutun ibbaddang ku?"

Nandasallak nan Apu Dios di kabunyan et <sup>5</sup> hannak humumang et kangkuy "Hedin kabbabbal kan hi-gak e apu patul, man iebulut mu anhan et umenamuttak nid Judah et nak iyayyaggud hu bebley ni neikulungan idan a-ammed ku."

<sup>6</sup> Wadan nunman hi ahwan patul e yimmudung di dagsi tu. Kan patul ni hi-gak ey "Piga aggew ni mahapul mu niya pigan keibbangadam?" Inhel ku hu piga aggew ni mahapul ku ey inebulut nan patul et getudek aggew ni lawwak.

<sup>7</sup> Kangku mewan ey "Hedin anhan dammutu e apu patul, pengapya kan tudek ni nak iddawat idan governor idad probinsiya di appit ni kakelinnugin aggew di Wangwang e Euphrates ma-lat kayyaggud hu pandellanak lad bebley dan lawwak di Judah. <sup>8</sup> Ey pantudek ka anhan nan Asap e kamampaptek idan muyung mu et idwatan tuwak ni keyew ni ikkapyak di eheb idan Tempol niya eheb idan tuping ni luhud ni bebley et ya ussalek di baley ku." Gapuh ni kawedan Apu Dios ni hi-gak ey inebulut nan patul ida humman ni kindew kun hi-gatu.

<sup>9</sup> Wadadda impakilaw nan patul ni nengadwan hi-gak ni aap-apun sindalu tu niyadda sindalun nampangkebayyu ma-lat guwalyaan da-ak. Et lumawwak di appit ni kakelinnugin aggew di Wangwang e Euphrates et idwat ku tudek nan patul idan governor dadmar. <sup>10</sup> Nem entannit dingngel di Sanballat, e Horonite, nan hi Tobiah e hakey ni opisyal di Ammon hu dintengak ey peteg bunget da tep eleg da pinhed ni wada umbaddang idan helag Israel.

<sup>11</sup> Limmawwak di Jerusalem et manha-addak diman ni tellun aggew, <sup>12</sup> nem eggak e-ehelen hu impemnem Apu Dios ni hi-gak ni pehdng kun panyaggudan ni Jerusalem. Et yan nunman ni hileng ni meikkatlun aggew ey immayaggak ni pangkadwak et umhep kami. Eleg ida mantakkay di kebayyu tep ebuh etan kebayyuk ni ina-alla mi. <sup>13</sup> Indalan kud Eheb e Nandeklan et labhak hu Ahhullan ni Dragon ngadan tu, et mampalawwak di Eheb e Ibbengnan et peka-ang-angek hu nangkebahbah ni batun luhud et yadda eheb ni nangkegiheb. <sup>14</sup> Nampalawwak mewan di Eheb e Kapan-ehhuli et yad Lebeng ni Patul nem endi pengippedlanak ni kebayyuk. <sup>15</sup> Et manteyeddak law di Nedeklan e Kidron et peka-ang-angek hu luhud et hannak mambangngad et idlan ku mewan di Eheb e Nandeklan tu et humgeppak di bebley.

<sup>16</sup> Endi nengamtadda etan ni opisyal ni linawwak diman winu hipa nak impahding tep endi ni nak nanghelan ni hi-gada hedini hipa planuh ku, anin idan padi, yadda aap-apu niyadda mekibaddang alid ngunu. <sup>17</sup> Nem entanni et peamtak law ni hi-gada e kangkuy "Inamta tayu emin hu et-eteng ni ligat eyan bebley tayu. Nangkebahbah batun luhud tu ey nangkegiheb ida eheb tu. Et humman hu, pakkadek ni pan-iyayyaggud tayu et eleg itu mebabba-ingan." <sup>18</sup> Entanni et e-ehhelek ni hi-gada hu impahding Apu Dios ni nemaddang ni hi-gak niya inhel nan patul.

Hinumang da ey kandy "Em, iyayyaggud tayu hu luhud ni bebley tayu." Et lapuan dan mangngunu.

<sup>19</sup> Nem entanni et dingngel di Sanballat, hi Tobiah et hi Geshem e Arab hu planuh mi ey dakemi kangi-ngi-ngii, tep kandy "Hipa ni-man huttan ni yuka pan-ippahding? Kaw ngenghayan yu hu patul?"

<sup>20</sup> Nem hinumang ku et kangkuy "Baddangan dakemin Apu Dios di kabunyan et meippahding eya ngunuen mi. Hi-gamin bega-en tu ey leppuan min mengiyayyaggud eyan luhud. Nem hedini hi-gayu man endi bibbiyang yudya Jerusalem tep endi dedan kelebbengan yun mekibbebley deya."

### 3

<sup>1</sup> Ya neipahding et mekapya hu tuping ni luhud ni Jerusalem ey heninnuy: Inlapun Eliashib e eta-gey ni padi niyadda edum tun papaddi et kapyae da etan Eheb e Kalneroh et ieng-eng dan Apu Dios. Intuluy da et kapyae da luhud ingganah etan di Eta-gey ni Baley ni Hanggatut et yad Eta-gey ni Baley Hananel et ieng-eng da daman Apu Dios. <sup>2</sup> Kinapyadda daman ijericho hu tu-lu tu et gibbuhen da. Intu-man daman Sakkur e u-unggan Imri etan neitudun ngunuen tu et gibbuhen tu.

<sup>3</sup> Yadda helag Hassenaah hu nengapyan Eheb e Deleg, anin ya lekbi niya alladdu tu.

<sup>4</sup> Hi Meremot dama e u-unggan Uriah e u-unggan Hakkos hu nengiyayyaggud ni tu-lu tu. Neitu-nud ni hi-gatu hi Meshullam e u-unggan Berekiyah e u-unggan Meshesabel. Ey hi Sadok dama e u-unggan Baana hu nengiyayyaggud ni tu-lu tu. <sup>5</sup> Yadda lalakin



iTekoa hu nengingunun tu-lu tu, nem eleg pinhed idan ap-apu dan mekinggunnun neitudun ngunnuen da.

<sup>6</sup>Ya dama pettek ni ngunnuen Joiada e u-ungngan Paseah et hi Meshullam e u-ungngan Besodeiah ey ya Eheb e Jeshanah. Ginibbuh da et ikapya da hu lekbi niya alladdu tu. <sup>7</sup>Ya neitu-nud ni hi-gadan nengingunun tu-lu tu e dimmateng di baley ni gubernor di bebley di appit ni kakelinnugin aggew di Wangwang e Euphrates ey hi Melatiah di Gibeon, hi Jadon di Meronot, yadda lalakkin iGibeon niyadda iMispah. <sup>8</sup>Inggunu daman Ussiel e u-ungngan Harhaiah, e kamengapyan balituk ni tenged, hu tu-lu tu et gibbuhen tu. Neitu-nud dama hi Hananiah e kamengapyan bangbanglu, et ngunuen tu pettek tu ingganah lad Mahkang ni Batun Luhud.

<sup>9</sup>Hi Rephaiah e u-ungngan Hur e ap-apun gedwan Jerusalem hu nengingunu daman pettek tu. <sup>10</sup>Hi Jedaiah e u-ungngan Harumap nengingunun pettek tun neihnpud di baley da. Hi Hattus e u-ungngan Hashabneiah hu nengingunun pettek tu. <sup>11</sup>Hi Malkijah e u-ungngan Harim et hi Hassub e u-ungngan Pahat Moab hu nengingunun tu-lu tu, et kapyaen da etan Eta-gey ni Baley ni Kapene-engi. <sup>12</sup>Hi Sallum e u-ungngan Hallohes e ap-apun kagedwah ni bebley di Jerusalem hu nengiyayyaggud ni neitudun pettek tu et gibbuhen tu. Binaddangan idan bibi-in u-ungnga tu.

<sup>13</sup>Binaddangan idan iSanoah hi Hanum et kapyaen da hu Eheb e Nandeklan. Ginibbuh da et ikapya da lekbi niya alladdu tu. Inyayyaggud da pay hu hanlibu et liman gatut ni piyeh ni tu-lun nunman ni tuping ni luhud ingganah di Eheb e Ibbengngan.

<sup>14</sup>Hi Malkijah e u-ungngan Rekeb e ap-apud Bet Hakkerem hu nengiyayyaggud nunman ni Eheb di appit ni kakelinnugin aggew. Ginibbuh tu et ikapya tu lekbi niya alladdu tu.

<sup>15</sup>Hi Sallum e u-ungngan Kolhoseh e ap-apud Mispah hu nengingunun Eheb e Ahhullan. Inetepan tu et ikapya tu lekbi niya alladdu tu. Inggunu tu pay hu batun luhud etan di Lebeng e Siloam e neidagsid Garden ni Patul ingganah di mampedayyun dalam ni kamelpud Bebley nan David. <sup>16</sup>Hi Nehemiah e u-ungngan Asbuk e ap-apun kagedwah ni Bet Sur hu nengingunun tu-lu tu ingganah di kad-an ni kulung David, niyad etan di lebeng niyad Kampun sindalu.

<sup>17</sup>Yadda helag Levi hu nengiyayyaggud ni tu-lu tu e impappangngulun Rehum e u-ungngan Bani. Hi Hashabiah e ap-apun kagedwah ni bebley di Keilah hu nengiehneng ni bebley da et iyayyaggud tu hu neitudun ngunnuen da. <sup>18</sup>Neitu-nud ida dama hu kebebleyan tun impangulun nan u-ungngan Henadad e hi Binnui e ap-apun kagedwah ni bebley dad Keilah.

<sup>19</sup>Hi Eser e ap-apud Mispah e u-ungngan Jeshua hu nengingunun hinanggan kapengitluin almas ingganah di nepikuan ni tuping. <sup>20</sup>Hi Baruk e u-ungngan Sabbai hu nengingunun tu-lu tu ingganah di heggepan di baley ni eta-gey ni padi e hi Eliashib. <sup>21</sup>Inggunu daman Meremot e u-ungngan Uriah e u-ungngan Hakkos hu tu-lu tu meippalpu heggepan ingganah di pappeg ni baley nan Eleashib.

<sup>22</sup>Neitu-nud damadda papaddid nampambebley di neihnpud di Jerusalem ni nengingunun tu-lu tu. <sup>23</sup>Di Benjamin nan Hassub hu nengingunun tu-lu tu di neihnpud di baballey da. Hanniman daman Asariah e u-ungngan Maaseiah e u-ungngan Ananiah e inggunu tu etan luhud ni dagsin baley tu. <sup>24</sup>Neitu-nud dama hi Binnui e u-ungngan Henadad ni nangngunu e inlapu tud petek ni baley Asariah ingganah di dugun tuping. <sup>25</sup>Hi Palal e u-ungngan Usai hu nengitu-man di demang ni nepikuan ni tuping, et ngunuen tu pay etan luhud di kad-an ni baley nan patul e eta-gey ni neihnpud di dallin ni kapangguwalyai.

Neitu-nud ni hi-gatu hi Pedaiah e u-ungngan Paros <sup>26</sup>et yadda kamampangngunud Tempol ni nambelleby di duntug ni Ophel et ingunu da hu huup tu ingganah di appit ni kasimmilin aggew e neihnpud di Eheb e Danum et yad etan di eta-gey ni kapangguwalyai. <sup>27</sup>Yadda dama iTekoa hu neitu-nud et ingunu da hu meippalpu demang ni eta-gey ni kapangguwalyai ingganah di luhud di Ophel.

<sup>28</sup>Meippalpu Eheb e Kebayyu ey wada hakey idan papaddin nambaley di neihnpud di luhud ey inggunu tu hu pettek ni baley tu. <sup>29</sup>Hi Sadok e u-ungngan Immer hu nengingunun pettek ni baley tu. Hi Semaiah e u-ungngan Sekaniah e guwalya etan di Eheb ni appit ni kasimmilin aggew hu nengingunun tu-lu tu. <sup>30</sup>Hi Hananiah e u-ungngan Selemiah et hi Hanan e meikka-nem ni u-ungngan Salap hu nengingunun tu-lu tu e humman meikkadwan nginunu da. Hi Meshullam e u-ungngan Berekiah hu neitu-nud ni nangngunu etan di petek ni baley tu. <sup>31</sup>Hi Malkijah e nelaing ni meippanggep ni balituk hu neitu-nud ni nangngunu ingganah di nambaleyan idan kamangngunud Tempol et yadda kamampanggettang e neihnpud di Eheb e Mipkad ni mampellow di Tempol, ingganah di nengin-ahpat ni kuwaltuh di nanlikwehan ni tuping ni luhud. <sup>32</sup>Inggunuddan nelaing ni meippanggep balituk ni tenged et yadda kamampanggettang

hu nanggillig ni tuping ni luhud, meippalpu etan di kuwaltuh ingganah etan di Eheb e Kalneroh.

## 4

*Intuluy di Nehemiah ni nangngunu anin ni wadadda buhul dan kamenattakkut ni hi-gada*

<sup>1</sup> Dingngel Sanballat e mika pan-ikkapya hu tuping ni luhud ni bebley mi ey nemahhig bunget tu et dakemi kapampihulan Jews. <sup>2</sup> Kantud hinanggaddan edum tu et yadda sindalun iSamaria ey "Hipa na-mu ninemnem idan nunyan nekawwetwet niya kameligligatin Jews? Ey kaw kanda nem han-iyayyaggud da hu luhud ni bebley da? Ey kaw kanda nem hedin dakel hu i-appit da man gibbuhen dan han-aggew hu ngunu da? Niya kaw dammutun ussalen dadda negiheh ni babattun mengiyayyaggud ni luhud?"

<sup>3</sup> Kaman-eh-ehngeng hi Tobiah e iAmmon di kad-an Sanballat et kantu damay "Anin ni ahhun ebuh hu mandellan di ta-pew tu et metu-li humman ni kapyae dan luhud."

<sup>4</sup> Nandasallak nan Apu Dios et kangkuy "Dengel mu anhan e Apu Dios hu daka pemippihul ni hi-gami! Pebangngad mun hi-gada hu daka peneghegud ni hi-gami, et piliwen ni edum ni tuun emin hu limmu da ey belluden dadda et ilaw dadda bebley da. <sup>5</sup> Entan tu liwwan hu liwat da tep deh e nemahhig hu daka pemippihul ni hi-gami eyad ngunu mi."

<sup>6</sup> Tagan mi kuma ngunu tep makahludda impan-edum ku et lektattuy nekagedwah law hu kasina-gey ni tuping. <sup>7</sup> Nem entanni et dingngel di Sanballat, hi Tobiah, yadda iArabia, yadda iAmmon et yadda iAsdod e kamangkekapya hu luhud ni Jerusalem niya kamangkeiyayyaggud emin ida nebahbah ey nemahhig bunget da. <sup>8</sup> Lektattuy implanuh dan emin e gubbaten dakemi ma-lat metaktak hu ngunu mi. <sup>9</sup> Nem nandasal kamin Apu Dios, ey inha-ad midda mangguwalyan kamampanggunnun kawwalwal niyan hileng.

<sup>10</sup> Entanni ey kan idan helag Judah ey "Neatu kamin kamanggunnu ey dakel ni peteg hu nangebuklin batun mahapul ni linnihan mi, et humman hu, kami kameliggasin mengapay eyan batun luhud. <sup>11</sup> Kan ida daman buhul miy 'Umkukumna ida ey dimmateng itsud kad-an da et pampatyen tayudda ma-lat masiked ngunu da.' "

<sup>12</sup> Nem ida kaum-ali-ali hu edum min Jew nekibebley idan buhul min mengippeamtan hi-gamin implanuh idan buhul min pehding dan hi-gami. <sup>13</sup> Ya law impahding ku ey impantenged kudda tutu-uk ni ispadah, ya pahul niya pana et ipustuh kuddan mangguwalya. Hakey ni pamilyah ni wada neduttuk ni guwalyaan da etan di eleg maluhud.

<sup>14</sup> Nakka ang-ang-anga ey ida kaumtatakut et kangkun hi-gadan emin, anin idan apu da et yadda opisyal da "Entan takut yuddan buhul tayu. Entan tu liwwan e hi Apu Dios ey et-eteng ni kabaelan tu niya angetakkut. Et humman hu, mekihhangga itsu et iehngeng tayu kebebleyan tayu, yadda u-ungnga tayu, yadda ahwa tayu et ya eya nanha-adan tayu."

<sup>15</sup> Dingngel idan buhul mi e neamtaan mi hu planuh da ey impanna-ud da e hi Apu Dios hu nemahbah nunman ni planuh da. Nambangngad kami daman an manggunnu e wada hakkeyey limmaw di neitudun ngunnuen tu. <sup>16</sup> Neipalpun nunman ey ginedwak ida tutu-uk et manggunnudda edum ey mangguwalyadda edum e nantenged idan pahul, ya happyaw niya pana, ey nambalwasiddan gumeke. Anin idan opisyal mi et daka i-ehngeng emin tuu dan kamampanggunnu. <sup>17</sup> Hedin yadda kamambunng ni kameussal, man intenged da hakey ni ngamay dad pinhan da ey singnged ni hakey ni ngamay da almas da. <sup>18</sup> Emin ida kamampanggunnu ey in-asip da hu ispadah da. Hedin ya etan kamantanguyup man kamanha-ad di kad-ak et patnul tu tangguyp tu hedin wada meippahding.

<sup>19</sup> Kangkudnan tutu-u, yadda ap-apu da niya opisyal da ey "Nandidinnawwi eya tayu kapanggunnu e eleg meihakkey, tep wada hakkeyey wada neitudun petek tu eyad nanlinikweh ni luhud. <sup>20</sup> Nem anin ni attu kad-an yu, ey hedin dingngel yu tenul ni tangguyp man kaemng kayud kad-an ku. Hi Apu Dios tayu hu mekiggubbat tep i-ehngeng daitu."

<sup>21</sup> Et humman hu, kewa-wa-wa, meippalpun kamangkewa-wa ingganah ni kakeukkasin bittuwen ni hileng ey manggunnudda edum ey mangguwalyadda edum e nampahul ida. <sup>22</sup> Yan nunman hu nanghelak idan tutu-u e mahapul ni emin ida, anin idan daka panha-ad di baballey da, ey manha-ad idad Jerusalem et dammutun mangguwalyaddan hileng ey manggunnuddan kawwalwal. <sup>23</sup> Eggak ukhupa balwasik anin ni hileng. Hanniman dama kapehding idan edum ku et yadda bega-en ku. Mahapul mewan ni neidaddan ni ingganah almas mi anin ni kami man-ehhul.

## 5

<sup>1</sup> Entanni ey wadadda nandiklamuh tep ya kapehpehding ni edum dan Jew.

<sup>2</sup> Kanday "Etta-teng pamilyah mi, et humman hu, mahapul mi daddakkel ni pihhuh ni iggatang mid kennen mi et eleg kami mahkaw." <sup>3</sup> Kan daman edum ey "Nan-ibelal mi papayyew mi, anin idan mika pantennemin grapes et yadda baballey mi et igtang mid kennen mi ma-lat tumegu kami." <sup>4</sup> Hedin yadda mewan edum, kanday "Dakel law inutang min nemayabayad min buwis ni papayyew mi et ya mika pantennemin grapes. <sup>5</sup> Hakey nahlagan mi, ey nan-iingeh hu kakinyayyagud ni u-ungnga mi niya u-ungnga da, nem mahapul katted ngun iggatang mi u-ungnga mi et mambalin idan himbut, ma-lat wada iggatang mid kennen mi et eleg kami matey ni upa. Neihbut ida law edum ni bibi-in u-ungnga mi, nem endi katted dammutun pehding mi tep neibelal ni emin hu puyek mi."

<sup>6</sup> Dingngel ku huyyan diklamuh da ey peteg bunget ku. <sup>7</sup> Nannemnemnemmak ni pehding ku ey immalid nemnem ku e e-helak ida aap-apu et yadda opisyal. Kangkun hi-gaday "Nem kele anhan pakkadek ni yu peporsentoh hu yuka pebenneh ni pihhuh idan aaggi yu et yudda kapanligligat?" Impaeyag kuddan emin hu tutu-u et panhuhummanganan mi hu elaw nunya.

<sup>8</sup> Neaumng ida et kangkun hi-gaday "Nanligligatan tayu mewan ni nemangngad eyaddan aaggi tayun nengihbut ni annel dad tutu-ud edum ni bebley ni eleg mandeyyaw nan Apu Dios ey kele yan nunya mewan ey pinilit yuddan mambalin ni himbut yu ey edum yuddan Jew?" Ey ida kaum-i-ineng hu aap-apu e endi humang da.

<sup>9</sup> Kangku mewan ey "Lawah huttan ni yuka pehpehding! Gullat et kuma ey umtakut kayun Apu Dios et ya kayyagud pehding yu et endi umhulun ni pemihhulan idan buhul tayun hi-gatsu! <sup>10</sup> Tam anin hi-gak et yadda eya edum ku et nampautang kamin pihhuh niya begah. Hedin ya kumaddan hu kayyagud ni pehding tayu ey eleg tayu pebeyad ida impautang tayu. <sup>11</sup> Mahapul ni pebangngad yu papayyew da, yadda daka pantennemin grapes niya olibah et ya baballey da. Mahapul mewan ni pebangngad yudda porsentoh ni illa yun inutang dan pihhuh, ya begah, ya meinum niya mansikan olibah."

<sup>12</sup> Kan idan aap-apu ey "Em, u-unnuden mi inhel mu. Ibbangngad min emin ida illa min hi-gada ey eleg mi law uh-uha inutang da." Inaygak ida papaddi et pansapatah kudda humman ni ap-apun hi-gada.

<sup>13</sup> Inubad ku hu inawekeh kud gitang ku et yagyagak hu balwasik et kangkuy "Hanneya pehding Apu Dios ni tuun eleg mengippahding ni inhel tun pehding tu. Ellan Apu Dios hu baley tu ey emin limmu tu et endin hekey hu metdaan ni hi-gatu."

Kan idan emin ni tuun humang day "Amen!" Et dayawen da hi APU DIOS. Ey impahding ida numan ni aap-apu hu inhel dan pehding da.

<sup>14</sup> Yan hi-gak hu governor di Judah ni hampulud dewwan toon e meippalpun meikkadwampulun toon ni nan-ap-apuan Artaserses ingganah ni meikkatelumpulut dewwan toon ni nan-ap-apuan tu, ey endi kinan middan edum kun kennen ni lebbeng tun meidwat ni hi-gak e governor. <sup>15</sup> Ey hedin yadda la nanggobornor ni nunman et hannak maihullul ey et-eteng hu in-inla daddan tutu-u. Nambagaddan kewa-wa-wan na-pat ni silber, ya kennen niya meinum. Anin idan bega-en da et impanligligat dadda dama tutu-u. Nem hedin ngun hi-gak, man eggak ipahding ida humman tep nakka umtakut nan Apu Dios. <sup>16</sup> Ingkakhakey ku nemnem kun nanggununud tuping ni bebley. Eggak abuluten ni wada nak gettangen ni puyek ma-lat pampuyek ku. Anin idan opisyal ku et minandal kuddan manggunnud tuping. <sup>17</sup> Eggak ni hekey mangkedew ni mahapul ku anin ni nakka pappangngan hu hanggatut et neliman edum tayun Jew, hin-appil mewan hu mangili ni kamelpud edum ni bebley di nanlinikweh. <sup>18</sup> Hedin ya nakka pehiddan kewa-wa-wa man hakey ni baka, enem ni mangkateban kalneroh niya dakel ni manuk. Hedin mewan nelabah hu hampulun aggew man wada nakka idaddan ni nambakbaklang ni meinum. Nem anin ni hanniman et eggak mambagan lebbeng tun meidwat ni governor ni kamelpuddan tutu-u, tep amtak e ida kameligligasi.

<sup>19</sup> Et mandasallak nan Apu Dios e kangkuy "Nemnem mu anhan hu impenahding kun panyaggudan ida eyan tutu-u et bendisyonan muwak."

## 6

<sup>1</sup> Entanni ey dingngel di Sanballat, hi Tobiah, hi Geshem, e iArabia et yadda edum ni buhul mi e ginibbuh mi etan tuping ni luhud, nem eleg mi ni ikapyadda eheb, <sup>2</sup> et paelid Sanballat nan Geshem hu tudek dan hi-gak e kami kunu mandadammud Onoh e hakey ni bebley. Nem neamtaak kaya e wada pehding dan hi-gak ni lawah. <sup>3</sup> Et palaw ku dama tudek kun hi-gada e kangkuy eggak umlaw diman tep importanteh ni peteg hu

ingngunuk niya eleg mabalin ni pesikked ku hu ngunu mi tep ya nak penang-angan ni hi-gada.

<sup>4</sup> Nampi-pat hu nengayagan dan hi-gak nem nan-ingngeh inhumahumang kun hi-gada.

<sup>5</sup> Entanni mewan et itu-dak Sanballat hu bega-en tun nengi-lin tudek tun hi-gak e eleg tu ipket etan tudek tu.

<sup>6</sup> Kantud tudek tuy "Kannan Geshem ni hi-gak ey kae-ehheladdan tutu-u eyad nanlinikweh e hi-gayuddan edum mun helag Israel ey wada planuh yun mangngenghay ni gubilnu et humman yuka pampengiyayyaggudin luhud yu. Kammu pay kunu ey implanuh mun mambalin alin patul. <sup>7</sup> Nekihummangan ka kunu mewan idan prophet ni sinudum ni mengippeamtan hi-gam ali mampatul di Judah. Nanna-ud e dedngelen nan patul tayu huyya, et mukun kangku-et ey mandammu ita et panhummanganan ta huyya."

<sup>8</sup> Impalaw ku mewan humang ku e kangkuy "Itek emin eya inhel mu. Kinapkapyam ida huyyan intudek mu." <sup>9</sup> Dakemin ebuh katenattakkuta ma-lat isiked ni ngunu mi. Et humman hu, nandasallak nan Apu Dios et kedewek e pekedhel tu nemnem ku niya pe-let tuwak.

<sup>10</sup> Yan nunman hu nak nenang-angan nan Semaiah, e u-ungngan Delaiah e u-ungngan Mehetabel, e eleg tu hanhi-yan baley da. Ey kantun hi-gak ey "Ita mandammud Tempol Apu Dios et ilekbi ta, tep wadadda um-alin memettey ni hi-gam ni hileng."

<sup>11</sup> Nem kangkun hi-gatuy "Beken ni hi-gak etan tuun an umbesik et mantalu. Ey kaw kammu nem nak ittalu annel kud Tempol ma-lat eleg da-ak patyen? Eleg mabalin ni nak pehding huttan." <sup>12</sup> Entanni ey immalid nemnem ku e eleg malpun Apu Dios humman ni inhel Semaiah, nem sinangdanan di Sanballat nan Tobiah ma-lat ipahding tu humman ni hi-gak. <sup>13</sup> Kanda et tattakkuten da-ak ni hi-gatu et manliwattak ni pengippahdingak nunman ma-lat kebabahak.

<sup>14</sup> Et mandasallak mewan e kangkuy "Apu Dios, entan tu liwwan huyyan impahding di Sanballat nan Tobiah et kastiguem ida. Kastigum dama etan biin hi Noadiah niya emin ida etan prophet ni nenattakkut ni hi-gak."

<sup>15</sup> Nangngunu kamin nelimat dewwan aggew ey negibbuh etan tuping ni luhud e nunman hu meikkadwampulut liman aggew ni bulan ni Elul. <sup>16</sup> Yan nangngelan idan buhul mi niyadda edum ni tuud nanlinikweh ni negibbuhuan tu ey simmakut ida niya nebabba-ingan ida tep inamta da e neipahding huyyan ngunu tep ya baddang Apu Dios.

<sup>17</sup> Yan nunman ni nelimat dewwan aggew ey dakel hu tudek ni nan-a-awwahid Tobiah et yadda opisyal ni Judah. <sup>18</sup> Dakel idad Judah ni kamemaddang nan Tobiah tep hi Sekaniah e edum min helag Israel ey u-ungngan Arah hu aman ahwa tu. Hakey pay ey hi Jehohanan e u-ungnga tu ey inahwa tu hu u-ungngan Meshullam e u-ungngan Berekiah e edum min helag Israel. <sup>19</sup> Daka ene-ehhelan hi-gak e kayyaggud hi Tobiah ni da indenaddatteng emin hu inhel ku. Ey dakel hu impeeni-lin Tobiah ni tudek ni nenatakkut tun hi-gak.

## 7

<sup>1</sup> Negibbuh hu tuping ni luhud et pan-ikapyak hu lekbin eheb et tuduek ida guwalya, yadda man-a-appeh di pandeyyawan niyadda edum ni helag Levi et ittuttudduk ngunnuen da. <sup>2</sup> Sinuduk hu dewwan mampaptek di bebley di Jerusalem e ya hakey ni hi-gada ey hi agik hi Hanani. Hi Hananiah hu kadwa tu e ap-apuddan guwalya tep kayyaggud ni tuu ey endi henin hi-gatu e tuka peka-u-unnuda hi Apu Dios. <sup>3</sup> Intugun kun hi-gada e pakkaw ni neta-nang aggew ey handa imbeghul ida lekbin eheb ey peka-illekbi da hu lekbi hedin nelinug aggew ey han ida immanemut ida guwalya. Inhel ku mewan ni hi-gada e um-aladdan nambebley di Jerusalem ni mangguwalya e wada nedutuk ni pangguwalyaan da ey yadda edum ey mangguwalyaddad pettek ni baballey da.

<sup>4</sup> Ya Jerusalem ey mahkang nem hahakkey hu nambebley, ey anin ni baballey et hahhakkey ni hu nebehwat. <sup>5</sup> Hi Apu Dios hu nengipenemnem ni hi-gak et amungek ida tutu-u et yadda ap-apu da niya oopisyal da et ang-angek hu papil ni neitudekan ni ngadan idan ammed da. Entanni ey himmak ku neitudekan idan nemangulun nambangngad ni nalpud edum ni bebley ni neilawwan da. Huyyadda neitudek diman:

<sup>6</sup> Huyyadda etan nambangngad ni edum min helag Israel ni inlaw nan patul e hi Nebukadnessar di Babilon. Nambangngad idad Jerusalem et yad Judah e wada hakkeyey nambangngad di nambebleyan tu. <sup>7-25</sup> Yadda nengipengulun hi-gada ey hi Serubbabel, hi Joshua, hi Nehemiah, hi Asariah, hi Raamiah, hi Nahamani, hi Mordekai, hi Bilsan, hi Misperet, hi Bigbai, hi Nehum et hi Baanah. Huyyadda neitudek ni lalakkin helag Israel ni nambangngad ni nalpud edum ni bebley ni neilawwan da.

<b>Ya ngadan nahlagan da</b>	<b>Ya bilang da</b>
Ya helag Paros	2,172
Ya helag Sepahtiah	372
Ya helag Arah	652
Ya helag Pahat-Moab (helag di Jeshua nan Joab)	2,818
Ya helag Elam	1,254
Ya helag Sattu	845
Ya helag Sakkai	760
Ya helag Binnui	648
Ya helag Bebai	628
Ya helag Asgad	2,322
Ya helag Adonikam	667
Ya helag Bigbai	2,067
Ya helag Adin	655
Ya helag Ater (helag idan Heseekiah)	98
Ya helag Hashum	328
Ya helag Besai	324
Ya helag Harip	112
Ya helag Gibeon	95

26-38 Yadda bebley ni edum tuun nambangngadan da:

<b>Yadda ngadan ni bebley ni nambangngadan da</b>	<b>Ya bilang da</b>
Yadda iBethlehem niyadda iNetophah	188
Yadda iAnathot	128
Yadda iBet Asmabet	42
Yadda iKiriath Jearim, iKephirah, et yadda iBeerot	743
Yadda iRamah niyadda iGeba	621
Yadda iMikmas	122
Yadda iBethel niyadda iAi	123
Yadda iNebo	52
Yadda iElam	1,254
Yadda iHarim	320
Yadda iJericho	345
Yadda iLod, iHadid, niyadda iOno	721
Yadda iSenaah	3,930

39-42 Yadda padin nambangngad:

yadda helag Jedaiah e helag idan Jeshua	973
yadda helag Immer	1,052
yadda helag Pashur	1,247
yadda helag Harim	1,017

43-45 Yadda helag Levi ni nambangngad: yadda helag di Jeshua nan Kadmiel e helag Hodabiah 74 yadda kaman-a-appah ni helag Asaph 148 yadda kamanggungwalyan eheb ni helag Sallum, hi Ater, hi Talmon, hi Akkub, hi Hatita, et hi Sobai 138.

46-56 Yadda helag idan kamampangngunnud Tempol ni nambangngad: hi Siha, hi Hasupha, hi Tabbaot, hi Keros, hi Sia, hi Padon, hi Lebana, hi Hagaba, hi Salmai, hi Hanan, hi Giddel, hi Gahar, hi Reaiah, hi Resin, hi Nekoda, hi Gassam, hi Ussah, hi Paseah, hi Besai, hi Meunim, hi Nephussim, hi Bakbuk, hi Hakupha, hi Harhur, hi Baslut, hi Mehida, hi Harsa, hi Barkos, hi Sisera, hi Temah, hi Nesiah et hi Hatipha.

57-59 Yadda nambangngad ni helag idan bega-en nan patul e hi Solomon: Hi Sotai, hi Sopheret, hi Perida, hi Jaalah, hi Darkon, hi Giddel, hi Sephatiah, hi Hattil, hi Pokeret Hassebaim et hi Amon.

60 Ya bilang ni emin ni helag idan kamampangngunnud Tempol et yadda bega-en Solomon ni nambangngad ey 392.

61-62 Wadadda 642 ni nambangngad ni helag di Delaiah, hi Tobiah et hi Nekodah e nambebley di Tel Mela, yad Tel Harsa, yad Kerub, yad Addon et yad Immer, nem endi daka peang-ang ni kakulugan tun helag idan Israel.

<sup>63</sup> Wadadda mewan hu kanday helag idan padin nambangngad di Jerusalem e hi Hobaiah, hi Hakkos et hi Barsillai. (Huyyan hi Barsillai ey inahwa tu hu hakey ni unngangan Barsillai e iGilead et ingedan tu ngadan nan aman ahwa tu.) <sup>64</sup> Nem hihhimmak idan nunya hu neitudekan ni tenten ni aammed da ey endi daka hemmaka, e eleg dadda iebulut ni mei-dum idan papaddi. <sup>65</sup> Eleg pay i-abulut ni governor ni kenneh da hu patal ni padin daka kenneh kamei-appit ingganah ni wada hakey ni padin mengussal ni Urim et ya Thummim et mahmahan dan APU DIOS hedini dammutun mekikkan ida.

<sup>66-69</sup> Ya bilang idan emin ni nambangngad di bebley dad Judah ey 42,360, hin-appil ida pay hu 7,337 ni lalaki niya bibi-in bega-en da. Wada pay ingkuyug dan 245 ni lalaki et ya bibi-in kaman-a-appeh. Neki-la da hu 736 ni kebayyu da ya 245 ni mule da, ya 435 ni kamel da, et ya 6,720 ni donkey da.

<sup>70</sup> Wadadda hu aap-apun helag Israel ni nan-aammung et ibaddang dad meussal ni meikkappay Tempol. Indawat ni governor hu umlaw di 8.5 ni kiloh ni balituk, ya neliman mahukung ni duyu et ya 530 ni balwasin padi. <sup>71</sup> Hedini ya nga-mut ni indawat ida etan ni edum ni ap-apu man 170 ni kiloh ni balituk et ya 1,600 ni kiloh ni silber. <sup>72</sup> Ya in-ammung idan edum ey umlaw di 170 ni kiloh ni balituk, ya 1,300 ni kiloh ni silber et ya 67 ni balwasin papaddi.

<sup>73</sup> Et emin ida helag Israel: yadda papaddi, yadda helag Levi, yadda kamangguwalyad eheb ni bebley, yadda kaman-a-appeh, yadda kamanggunnud Tempol ey nambebley idad bebley da.

## 8

<sup>1</sup> Yan eman ni meikkeppitun bulan ey nampanha-ad ida law hu helag Israel di bebley da. Yan nemangulun aggew nunman ni bulan ey neamung idan emin hu tutu-ud mulkaduh di Jerusalem etan di Eheb e Danum et ehelen dan Ezra e padin nekangngamtan Tugun ni indawat APU DIOS nan Moses, e tu ellan etan libluh ni neitudekan idan nunman ni Tugun.

<sup>2</sup> Et an alen nan Ezra et ilaw tud kad-an ni neamungan idan tutu-un lalaki niya bibi-i et yadda kaungangan dammutun han-awat da meibbidbid. <sup>3</sup> Binidbid Ezra etan Tugun di hinangngab idan tutu-u e inlapu tun kakkabbuhhan ingganah ni nandattekk aggew ey sinuttungul idan tutu-u. <sup>4</sup> Immehneng hi Ezra di kinapya dan keyew ni pattukkan ni indaddan dan meussal nunman ni neamungan da. Huyyaddan tutu-u hu immehneng di wannan tu: hi Mattithiah, hi Sema, hi Anaiah, hi Uriah, hi Hilkiah et hi Maaseiah. Yad winilli tu inehnengan di Pedaiiah, hi Mishael, hi Malkijah, hi Hashum, hi Hasbaddanah, hi Sekariah et hi Meshullam. <sup>5</sup> Nepattuk hu inehnengan Ezra et kapaka-ang-angaddan tutu-u. Inang-ang dan inukuyad tu hu libluh ey immehneng idan emin.

<sup>6</sup> Kan Ezra ey "Medaydayaw hi APU DIOS e eta-gey ni Dios!" Ey inta-gey idan emin ni tutu-u ngamay da et kanday "Amen! Amen!" Nandukkun ida et manyuung ida et dayawan da hi APU DIOS.

<sup>7</sup> Yadda helag Levi e di Jeshua, hi Bani, hi Serebiah, hi Jamin, hi Akkub, hi Sabbethai, hi Hodiah, hi Maaseiah, hi Kelita, hi Asariah, hi Josabad, hi Hanan, et hi Pelaiah, hu nengituttuddun Tugun ey man-eh-ehneung ida tutu-u. <sup>8</sup> Binidbid da hu Tugun ni impaewat da hu keibbellinan tu ma-lat awatan idan tutu-u. <sup>9</sup> Dingngel idan tutu-u hu neitudek di Tugun ni mahapul ni pehding da ey kanengih ida. Et kan di governor e hi Nehemiah, hi Ezra e padin nekangngamta Tugun et yadda edum tun helag nan Levi ni kamampengituttuddun Tugun ey "Entan nangih yu tep yan nunyan aggew ey daydayawan tayu hi AP-APU e Dios tayu."

<sup>10</sup> Kan mewan Nehemiah ey "Anemut kayu et kayu manhahamul. Idwasi yuddan kenneh niya meinum etan ida endi indaddan da, tep huyyan aggew ey pan-an-anlaan tayu niya penaydayawan tayun Apu Dios. Entan lelemung yu, tep ya an-anlan kamelpun APU DIOS hu mengippa-let ni hi-gayu!"

<sup>11</sup> Ina-alluk ida daman helag Levi ida tutu-u e kanday "Isiked yu law nangih tep aggew ni penaydayawan nan Apu Dios nunya." <sup>12</sup> Entanni et umenamut ida tutu-ud baballey da et mekangan idan ey nengi-innum ida et man-an-anladda. Et idwatan dadda edum dan kenneh, tep dingngel da ey inewatan da hu Tugun Apu Dios.

<sup>13</sup> Nawa-wan nunman ey limmaw ida ap-apun helag Israel, yadda papaddi et yadda edum dan helag Levi di kad-an Ezra et da peka-amtaen etan neituttuddun Tugun. <sup>14</sup> Ey neamtaan dan daka pampengeddalin Tugun e inhel APU DIOS nan Moses e mahapul ni mamballey ida hu helag Israel di kampu ni kedettengan ni piyestah dan meipphading ni nunman ni bulan e Piyestah ni Kampu ngadan tu. <sup>15</sup> Neitudek mewan e peamta dan emin ni tutu-ud kebbebley et yad Jerusalem e kanday "Lakkayuy di muyung et kayu umladdan pangan belbel, ya olibah, ya mirtel, ya palmah et yadda edum ni keyew et mengapya kayun kampu."

<sup>16</sup> Inu-unnud idan tutu-u et mengapyaddan kampud nedeklan ni atep di baley da, yad dallin da, yad dallin ni Tempol, yad kad-an ni Eheh e Danum et yad neihnup di Eheh e Epraim. <sup>17</sup> Emin ida helag Israel ni nambangngad ey nampengapyaddan kampu et mambaley ida nidman. Endi hanneyan neipahding neipalpu eman ni ketaggun Joshua e u-unggan Nun ingganah nunya. Ey nemahhig an-anla da. <sup>18</sup> Kewa-wa-wan pitun aggew, meipalpun nemangulun aggew ni piyestah ingganah ni negibbuan tu, ey imbenidbid Ezra idan tutu-u hu hanna-kut etan ni Tugun. Yan nunman ni aggew ni negibbuan ni piyestah, ey neamung idan emin tutu-u tep humman neitudek di Tugun Moses.

## 9

*Ya nengabulutan idan tutu-un liwat dan Apu Dios*

<sup>1-2</sup> Nedatngan hu meikkadwampulut epat ni aggew nunman ni bulan, ey neamung ida mewan helag Israel et mantepel ida e eleg ida mangan, tep nantuttuyyuddan liwat da. Nambalwasiddan langgusih et panha-adan da ulu dan dep-ul et keangangan tun ida kaumlelemyung, et pan-ehelen da liwat da et ya liwat ida lan a-ammed da. Ey neipalpun nunman ey inappil da dedan law anel dad edum ni tutu-un beken ni helag Israel. <sup>3</sup> Neibidbid ni hi-gadan tellun olas hu Tugun APU DIOS e Dios da. Negibbuh ni dingngel da Tugun ey nan-i-hel da liwat da, et daydayawen dan tellun olas mewan hi APU DIOS e Dios da. <sup>4</sup> Immehng di Jeshua, hi Bani, hi Kadmiel, hi Sebaniah, hi Bunni, hi Serebiah, hi Bani et hi Kenani etan di nekapyan ehngan da, et mandasal idan APU DIOS e Dios da e inlet da dasal da.

<sup>5</sup> Yadda helag Levi e di Jeshua, hi Kadmiel, hi Bani, hi Hashabneiah, hi Serebiah, hi Hodiah, hi Sebaniah et hi Pethahiah ey inlapu dan mandeyyaw nan Apu Dios. Kan daddan tutu-uy "Ehneng itsun emin et dayawen tayu hi APU DIOS e Dios tayun wadan ingganah!" Et mandasal ida helag Israel e kanday "Daydayawen daka. Emin et kuma tuu ey daydayawen daka anin ni inamta mi e eleg umgela penaydayaw min hi-gam.

<sup>6</sup> APU DIOS, hi-gam ni ebuh AP-APU. Hi-gam nanletun kabunyan ey emin hu wadadman. Hi-gam mewan nanletun puyek, ya baybay et ya emin hu hipan wadadman. Indawat mu biyag emin ni mategu ey emin ida anghel di kabunyan ey daka kadaydayawa.

<sup>7</sup> Hi-gam e AP-APU e Dios hu nemilin Abram et ipengulum et hi-yanen tu Ur di Kaldea et hullulam hu ngadan tun Abraham. <sup>8</sup> Inang-ang mu e kamekangngu-unnud ni hi-gam et ehelen mun hi-gatu planuh mu e pebeltan muddan helag tu hu bebley idan Kanaanite, yadda Hittite, yadda Amorite, yadda Perisite, yadda Jebusite niyadda Girgashite. Impeamnum humman ni planuh ni inhel mun hi-gatu, tep muka peamnun emin hu muka e-hela.

<sup>9</sup> Inang-ang mu mewan nengipeligligatan idan iEgypt ni aammed mi, et mampahpahmek idan hi-gam et ihwang muddad Madlang ni Baybay. <sup>10</sup> Impenahding mu mewan hu milagroh ni nengastiguam ni patul dad Egypt, yadda opisyal tu niyadda tutu-u tu, tep nang-ang mu nengipeligligatan daddan tutu-um. Et humman ni impahding mu hu nandangngelan ni ngadan mu ingganah nunya. <sup>11</sup> Ginedwam mewan etan baybay et mandalan ida tutu-um di mamegan puyek, nem yadda nampamdug ni hi-gada, ey nalsing ida e henidda batun nangkalneng di danum. <sup>12</sup> Yan nunman mewan ni nandaldalnan da, ey nambalin kan kulput ni nengipengulum ni hi-gadan kawwalwal, ey nambalin kan heni tukud ni apuy ni hileng, et pambenang dan dellanen da.

<sup>13</sup> Ya mewan di Duntug e Sinai ey limmehbeng kan nalpud kabunyan et umhel kaddan tutu-u, et idwat mun hi-gada hu neiptek niya kayyaggud ni tugun mu. <sup>14</sup> Intuttuddum ni hi-gada hu tugun mun meu-unnud ni aggew ni Sabbath. Huyyaddan tugun ey indawat mun bega-en mu e hi Moses et pebeltan tu damaddan aammed mi.

<sup>15</sup> Entanni et neupadda tutu-um ey indawtan muddan sinapay ni nalpud kabunyan, et na-wew ida mewan ey impaukat mu danum di batu et inumen da. Inhel mu mewan ni hi-gada e ngenamung idan an manha-ad etan ni puyek ni insapatah mun iddawat mun hi-gada. <sup>16</sup> Nem nampahhiyadda humman ni aammed mi ey nangngehay ida e eleg da u-unnuden intugun mu.

<sup>17</sup> Eleg daka u-unnuden ey eleg da nemnemen etan ida la kamengippetngan impenahding mu. Ey ida kamampahhiya ey manghay ida ey kanday mampilliddan pan-ap-apu da, tep pinhed dan mambangngad di Egypt et mambalin ida mewan ni himbut diman. Nem hi-gam e Apu Dios ey muka liwwana liwat. Kabbabbal kan peteg ey endi pappeg ni neminhed mu. Bekken kan kabbubunget ey et-eteng ni hemek mu, et humman hu, eleg mudda iwalleng. <sup>18</sup> Nengapyadda mewan ni i-inggeh ni baka et dayawen dan dios da e kanday humman nengipengulum hi-gada et hi-yanen da Egypt. Humman ni impahding da ey nemahhig ni liwat e penaltalanga dan hi-gam e AP-APU. <sup>19</sup> Nem ay, et-eteng hu

hemek mu et eleg mudda ipayyag etan di desert, tep eleg mu ekalen etan kulput niya apuy ni kamengippenggulun hi-gada. <sup>20</sup> Intuttuddum hu kayyaggud ni pehding da tep ya kakinyayyaggud mu. Indawtam idan manna et humman kanen da niya indawat mu danun ni innumen da. <sup>21</sup> Yan nunman ni na-pat ni toon ni nanhahha-adan dad desert ey indawat mun emin hu mahapul da. Eleg madunut balwasi da niya eleg lumbag heli da!

<sup>22</sup> Binaddangam ida mewan et sakupen dadda bebley di nanlinikweh ni nambebleyan da, tep inapput dad gubat hu nampambebley diman. Sinekup dan emin hu bebley di Hesbon e nampatulun Sihon niya Bashan e nampatulun Og. <sup>23</sup> Indawtam idan dakel ni peteg ni helag da, e henin kedakkel ni bittuwen di kabunyan niya inlaw muddad bebley ni inhel muddan a-ammed min beltanen da. <sup>24</sup> Binaddangam ida mewan u-ungnga dan nemiliw ni Kanaan, tep impeapput mun hi-gada hu tutu-un nampambebley diman anin idan patul da. Et idwatan mudda tutu-um ni kabaelan dan mengippahding ni hipan pinhed dan pehding ni tutu-udman. <sup>25</sup> Nampiliw da nangeluhud ni bebley niya kayyaggud ni pupuyyek e mateba kameitnem, anin idan baballey ni immen emin mahapul. Ey wadadda bubun, yadda kamekkan lameh tun keyew niyadda edum ni nangkeitnem. Wada emin hu pinhed dan kennen et mukun simmabadda, ey ida kaman-an-arla tep ya humman idan kakkayyaggud ni indawat mun hi-gada.

<sup>26</sup> Nem anin ni hanniman kakinyayyaggud mun hi-gada et eleg daka u-unnuden ey nginhay daka. Inwalleng da Tugun mu et pampatyen dadda prophet mun kamenghel ni hi-gadan ibbanggad dan mengu-unnud ni hi-gam ey lawah ni peteg daka pengpenghel ni hi-gam. <sup>27</sup> Neala law et iebulut mun apputen idan buhul da, et humman idan buhul da impan-ap-apu da. Nem entannit ida kamanligligat ey nampehemhemmek idan hi-gam, et dengelen mud kad-an mud kabunyan, et peehngeng mudda ap-apu dan mengihwang ni hi-gadad buhul da tep ya et-eteng ni hemek mu.

<sup>28</sup> Nem entanni mewan et melinggep ida ey nanliwat ida mewan. Et iebulut mu mewan ni apputen idan buhul da. Nantuttuyyuddad liwat da ey dingngel mu mewan di kad-an mud kabunyan hu nampehemhemmekan dan hi-gam, et ihwang mudda tep ya et-eteng ni hemek mu. Nepenidpidwa hanneyan neipahding. <sup>29</sup> Inheinhelam ida ma-lat u-unnuden da Tugun mu, nem umhulun hu daka pampahhiyai ey nginhay daka, anin ni panyaggudan da- et anhan hu pengu-unnudan dan Tugun mu. Makneg ida e eleg dan hekey dedngela ehel mu. <sup>30</sup> Inenuenusam idan dakel ni toon tep ya nehammad ni impeminhed mun hi-gada. Intu-dak mu Ispirituh mu e inusal mudda prophet ni um-ehel ni hi-gada nem eleg dadda denglen! Et ya impahding mu ey impeapput muddan lawah ni tutu-un eleg mengamtan hi-gam ni nampambebley di nanlinikweh. <sup>31</sup> Nem et-eteng ni hemek mu et eleg mudda iwalleng ey eleg mudda bahbahen, tep hi-gam e Apu Dios ey mahmek ka ey kabbabbal kan peteg.

<sup>32</sup> Et humman hu, yan nunya e Apu Dios e eta-gey ni peteg ni Dios, ey kabaelan tun emin, niya kamengippetnga, daka kadaydayawa tep muka peamnun emin hu muka e-helan pehding mu, tep ya nehammad ni impeminhed mu. Nemnam mu anhan ida impalebalebah min ligat. Nemahhig nanligligatan mi anin idan patul mi, yadda prophet mi et yadda la ammed mi neipalpu eman ni nengapputan dakemiddan patul ni Assyria ingganah nunya. <sup>33</sup> Nem hedin kinastigu dakemi, man limpiyuh ka tep et-eteng hu nambahulan mi et hedin hipa kastigun ni hi-gami, man humman lebbeng tun pehding mun hi-gami. <sup>34</sup> Eleg hanguden idan papatul mi, yadda ap-apu mi, yadda papaddi niyadda aammed mi hu tugun mu. Eleg dakan hekey u-unnuden ey eleg da dengelen hu mandal mu, niyadda warning mu. <sup>35</sup> Anin yan kaweda da law di bebley da et eleg daka daydayawen anin ni nan-idwat mu panyaggudan da. Indawat mun hi-gada hu melakkeb ni pambebleyan da ey mateba kameitnem, nem eleg da pinhed ni iwalleng hu lawah ni daka pehpehding.

<sup>36</sup> Et yan nunya mewan ey himbut kami eyad bebley ni indawat mudda lan aammed mi e wadan emin hu mahapul mi. <sup>37</sup> Emin hu limmu mi eyad bebley ey kaelladdan patul ni in-abulut mun man-ap-apun hi-gami tep ya liwat mi. Emin hu pinhed dan pehding ni hi-gami et yadda animal mi ey daka ippahding. Midda mewan kaingunggunnuidda et humman hu nemahhig ligat mi.

<sup>38</sup> Et gapuh idan nunyan kameippenahding ey hi-gamin helag Israel ey mika pan-ittudek eya inhummmangan min issapatah min pehding. Huyyan neitudek ey pinilmaan idan aap-apu mi, yadda papaddi et yadda edum dan helag Levi."

## 10

<sup>1</sup> Hi-gak e hi Nehemiah e governor e u-ngnan Hakaliah hu hakey ni nampilma.



2-8 Huyyadda ngadan idan papaddin nampilma: Hi Sedekiah, hi Seraiah, hi Asariah, hi Jeremiah, hi Pashur, hi Amariah, hi Malkijah, hi Hattus, hi Sebaniah, hi Malluk, hi Harim, hi Meremot, hi Obadiah, hi Daniel, hi Ginnethon, hi Baruk, hi Meshullam, hi Abijah, hi Mijamin, hi Maasiah, hi Bilgai et hi Semaiah.

9-13 Yadda edum dan helag Levi ni nampilma: Hi Jeshua e u-ungngan Asaniah, hi Binnui e u-ungngan Henadad, hi Kadmiel, hi Sebaniah, hi Hodiah, hi Kelita, hi Pelaiah, hi Hanan, hi Mika, hi Rehob, hi Hashabiah, hi Sakkur, hi Serebiah, hi Sebaniah, hi Hodiah, hi Bani et hi Beninu.

14-27 Yadda aap-apun nampilma: Hi Paros, hi Pahat Moab, hi Elam, hi Sattu, hi Bani, hi Bunni, hi Asgad, hi Bebai, hi Adonijah, hi Bigbai, hi Adin, hi Ater, hi Heseekiah, hi Assur, hi Hodiah, hi Hashum, hi Besai, hi Harip, hi Anathot, hi Nebai, hi Magpias, hi Meshullam, hi Hesir, hi Meshesabel, hi Sadok, hi Jaddua, hi Pelatiah, hi Hanan, hi Anaiah, hi Hoshea, hi Hananiah, hi Hashub, hi Hallohes, hi Pilha, hi Sobek, hi Rehum, hi Hashabnah, hi Maaseiah, hi Ahiah, hi Hanan, hi Anan, hi Harim et hi Baanah.

28 Huyyaddan nampilma et yadda edum dan helag Israel, yadda edum ni papaddi, yadda edum ni helag Levi, yadda kaman-a-appeh, yadda kamanguwalya, yadda kamanggunnud Tempol, yadda kamengu-unnud ni Tugun Apu Dios ni neappil di edum ni tutu-un nambebley di bebley da, yadda aahwa da, yadda u-ungnga dan dammutun han-awat da, et yadda aap-apu da, <sup>29</sup> ey insapatah da e peka-u-unnuden da Tugun Apu Dios. Insapatah da mewan e hedin ippangil da Tugun ni indawat Apu Dios nan Moses e bega-en tu ey anin meiddutan ida.

<sup>30</sup> Yahhuy insapatah da: "Eleg kami meki-eppuddan edum ni tutu-un nekibebley eyad bebley mi. <sup>31</sup> Ey eleg kami umgatang hedin wada in-aliddan edum ni tutu-un iggatang dan hi-gamin Sabaduh niya edum ni aggew ni kamei-eng-eng nan Apu Dios. Hedin nedatngan hu kapitun toon, ey eleg mi ngunnua papayyew mi niya eleg mi singngila impatung min nunman ni toon.

<sup>32</sup> Katootoon ey iddawat midda bayad ni buwis min silber e humman hu mahapul ni iddawat mid Tempol. <sup>33</sup> Hi-gami ngenamung idan mahapul di kapandeyyawid Tempol henin sinapay, begah, yadda animal ni daka gihheban kewa-wa-wa, yadda kamei-appit ni Piyestah ni Kaketellakin Bulan et yan edum ni Piyestah, yadda edum ni pan-appitan, yadda kamei-appit ni ke-kalan ni liwat emin idan helag Israel et yadda edum ni hipan mahapul di Tempol.

<sup>34</sup> Hi-gamin tutu-um e yadda papaddi, et yadda edum dan helag Levi, ey mambubunut kamin katootoon et maptek hedin hipan familyah hu mengiddaddan ni keyew ni ussalen ni mengihheb ni kamei-appit ni hi-gam e AP-APU e Dios mi tep humman kantung Tugun.

<sup>35</sup> Illaw mid Tempol ida memengngulun ennien mid hantoon anin idan memengngulun medetteng ni lameh idan intanem mi. <sup>36</sup> Hanniman mewan hu pengulwan ni lakin u-ungnga mi e illaw mid Tempol et idewat nan padin hi-gam e Apu Dios tep humman neitudek di Tugun. I-appit midda mewan hu nemangulun impah ni baka mi ey kalneroh mi niya gelding mi. <sup>37</sup> Illaw middan padid Tempol hu memengngulun alinah ni kapyaeen min etan di memengngulun ennien min katootoon niyadda edum ni kamei-appit e henin meinum, yadda lanan olibah ey emin ida mambakbaklang ni kamekkan ni kaillameh ni intanem mi, anin ni ya meikkeppulun mi enniad inggaud mi. Iddawat middan helag Levi hu meikkeppulun in-appit min lameh ni intanem mi. <sup>38</sup> Wada hanhakkey ni padin helag Aaron ni mekillaw idan helag Levi di hanhakkey ni bebley ni an mengemmung idan meikkeppulun lameh ni intanem mi. Ya meikkeppulun nunman idan inemung ni helag Levi ey meillaw di Tempol. <sup>39</sup> Yadda helag Israel et yadda edum dan helag Levi ey um-i-liddan i-ammung dan begah, ya meinum niya lanan olibah ni illaw dad bodegah idan kameussal di Tempol, yad kapanha-adiddan padi, yadda kaman-a-appeh et yadda kamanguwalyad Tempol.

Issapatah min emin e eleg mi iwalleng hu Tempol Apu Dios."

## 11

*Yadda tutu-un immalin nambebley di Jerusalem*

<sup>1</sup> Yan nunya ey nambebley ida aap-apud Jerusalem. Ya impahding da ma-lat madaman hu tutu-un mambebley diman ey pimiliddan kapulu etan idad nambebley di Judah et yad Benjamin, e imbubunut da, et ida dama mambebley diman Jerusalem e pinilin Apu Dios ni bebley tu. Nannaneng ida edum dad nambebleyan da ngu dedan.

<sup>2</sup> Katettebaladdan edum da etan ida neputuk ni pamilyah ni an mambebley di Jerusalem.

<sup>3</sup> Hedin yadda edum ni helag Israel, yadda papaddi et yadda edum dan helag Levi, yadda kamampanggunnud Tempol, et yadda helag ni bega-en Solomon, ey nannaneng idad

nampambebleyan dad Judah. <sup>4</sup> Nem ida nambebley di Jerusalem hu edum ni helag Judah et yadda helag Benjamin.

Yadda helag Judah ni an nambebley di Jerusalem ey: Hi Athaiah e u-ungngan Ussiah e u-ungngan Sekariah e u-ungngan Amariah e u-ungngan Sephatiah e u-ungngan Mahalalel e helag Peres, <sup>5</sup> hi Maaseiah e u-ungngan Baruk e u-ungngan Kolhoseh e u-ungngan Hasaiah e u-ungngan Aadaiah e u-ungngan Joiarib e u-ungngan Sekariah e helag Selah. <sup>6</sup> Ya bilang emin ni helag Peres ni nambebley di Jerusalem ey epat ni gatut et na-nem et walu.

<sup>7</sup> Yadda helag Benjamin ni nambebley di Jerusalem ey: Hi Sallu e u-ungngan Meshullam e u-ungngan Joed e u-ungngan Pedaiah e u-ungngan Kolaiah e u-ungngan Maaseiah e u-ungngan Ithiel e u-ungngan Jeshaiiah. <sup>8</sup> Wadadda dewwan edum tu e di Gabbai nan Sallai. Ya bilang emin ni helag Benjamin ni nambebley di Jerusalem ey heyam ni gatut et dewampulut walu. <sup>9</sup> Hi Joel e u-ungngan Sikri hu ap-apu da ey hi Judah e u-ungngan Hassenuah hu neihayned ni hi-gatun ap-apu.

<sup>10</sup> Yauhuy dama ngadan idan padin nambebley diman: Hi Jedaiah e u-ungngan Joiarib, hi Jakin, <sup>11</sup> hi Seraiah e u-ungngan Hilkiyah e u-ungngan Meshullam e u-ungngan Sadok e u-ungngan Meraiot e u-ungngan Ahitub e ap-apud Tempol Apu Dios, <sup>12</sup> yadda edum dan walun gatut et dewampulut dewwan kamanggunnud Tempol. Wada mewan hi Aadaiah e u-ungngan Jeroham e u-ungngan Pelaliah e u-ungngan Amsi e u-ungngan Sekariah e u-ungngan Pashur e u-ungngan Malkijah, <sup>13</sup> et ya dewanggatut et na-pat et dewwan edum tun ap-apuddan helag da. Wada mewan hi Amassai e u-ungngan Asarel, e u-ungngan Ahsai, e u-ungngan Meshillemot, e u-ungngan Immer, <sup>14</sup> et yadda hanggatut et dewampulut walun nelaing ni edum tu. Hi Sabdiel e u-ungngan Haggadolim hu ap-apu da.

<sup>15</sup> Yadda helag Levi ni nambebley diman: Hi Semaiah e u-ungngan Hashub e u-ungngan Asrikam e u-ungngan Hashabiah e u-ungngan Bunni, <sup>16</sup> di Sabbethai nan Josabad e ap-apuddan helag Levi ni kamanggunnud dallin ni Tempol Apu Dios, <sup>17</sup> hi Mattaniah e u-ungngan Mika e u-ungngan Sabdi e u-ungngan Asap e kamengippengulun dasal ni kapansalamatin Apu Dios, hi Bakbukia e kapambaddang nan Mattaniahet, hi Abda e u-ungngan Sammu e u-ungngan Galal e u-ungngan Jeduthun. <sup>18</sup> Ya bilang emin idan helag Levi ni nambebley di Jerusalem ey dewanggatut et newalu et epat.

<sup>19</sup> Yadda kamangguwalyaddan eheb: hi Akkub, hi Talmon et yadda edum dan kamangguwalya e hanggatut et nepitu et dewwa hu bilang dan emin.

<sup>20</sup> Yadda edum ni papaddi, yadda edum dan helag Levi niyadda edum dan helag Israel ey ida nampanha-ad di bebley di Judah e nampambebleyan ida lan aammed da. <sup>21</sup> Nem hedin yadda bega-en di Tempol e di Siha nan Gispa hu ap-apu da, ey nambebley idad Ophel.

<sup>22</sup> Ya ap-apuddan helag Levi ni wadad Jerusalem ey hi Ussi e u-ungngan Bani e u-ungngan Hashabiah e u-ungngan Mattaniah e u-ungngan Mika e helag Asap e hi-gada hu kaman-a-appeh di Tempol Apu Dios. <sup>23</sup> Wada intugun nan patul ni neduttuk ni ngunnuen dan kewa-wa-wa.

<sup>24</sup> Hi Pethahiah e u-ungngan Meshesabel e helag Serah e u-ungngan Judah hu sinudun patul ni umbaddang ni hi-gatun menang-ang ni hipan meippanggep idan helag Israel.

<sup>25</sup> Ya nampambebleyan idan edum ni tutu-ud Judah ey yad kad-an ni papayyew da, ey yad Kiriath Arba, yad Dibon et yaddad bebley ni neihnup diman, yad Jakabseel et yaddad bebley ni neihnup diman, <sup>26</sup> yad Jeshua, yad Moladah et yad Betpelet, <sup>27</sup> yad Hasarshual, yad Beersheba et yaddad bebley diman, <sup>28</sup> yad Siklag, yad Mekonah et yaddad bebley diman, <sup>29</sup> yad Enrimmon, yad Sorah, yad Jarmut, <sup>30</sup> yad Sanoah, yad Adullam et yaddad bebley diman, yad Lakis et yaddad papayyew diman et yad Asekah et yaddad bebley diman. Meippalpad Beersheba ingganah di Nedeklan e Hinnom hu nambebleyan idan helag Judah.

<sup>31</sup> Hedin yadda dama helag Benjamin ey nampambebley idad Geba, yad Mikmas, yad Aija, yad Bethel et yaddad nanlinikweh ni bebley diman, <sup>32</sup> yad Anathot, yad Nob, yad Ananiah, <sup>33</sup> yad Hasor, yad Ramah, yad Gittaim, <sup>34</sup> yad Hadid, yad Seboim, yad Neballat, <sup>35</sup> yad Lod, yad Ono et yad nandeklan ni nambebleyan idan nekallaing ni mengapyan hipan usal. <sup>36</sup> Yadda edum idan helag Levi ni nambebley di Judah ey nei-dum idan helag Benjamin.

## 12

<sup>1-7</sup> Huyyadda neitudek ni ngadan idan papaddi et yadda edum dan helag Levi ni nambangngad ni neki-lid Serubbabel e u-ungngan Sealtiel et hi Joshua e eta-gey ni padi: Hi Seraiah, hi Jeremiah, hi Ezra, hi Amariah, hi Malluk, hi Hattus, hi Sekaniah, hi

Rehum, hi Meremot, hi Iddo, hi Ginnethoi, hi Abijah, hi Mijamin, hi Maadiah, hi Bilgah, hi Semaiah, hi Joiarib, hi Jedaiah, hi Sallu, hi Amok, hi Hilkiah, et hi Jedaiah. Huyyadda kamengipappanggulun papaddi eman ni ketaggun Joshua.

<sup>8</sup> Yadda dama helag Levi ey: Hi Jeshua, hi Binnui, hi Kadmiel, hi Serebiah, hi Judah, et hi Mattaniah e hi-gada kamengipappanggulun man-a-appeh ni pampesalamatan dan Apu Dios. <sup>9</sup> Di Bakbukiah nan Unni e edum dan kaman-a-appeh hu kaum-ehngeng di hinangga da.

<sup>10</sup> Huyya tenten ni helag Joshua e eta-gey ni padi. Nahlag hi Joshua et hi Joiakim. Nahlag hi Joiakim et wada hi Eliashib. Nahlag hi Eliashib et wada hi Joiada. <sup>11</sup> Nahlag hi Joiada et wada hi Jonathan. Nahlag hi Jonathan et wada hi Jaddua.

<sup>12-21</sup> Yan ketaggun Joiakim ey huyyadda hu padin kamengipappangguluddan helag da: hi Seraiah ey hi Meraiah, Jeremiah ey hi Hananiah, hi Ezra ey hi Meshullam, Amariah ey hi Jehohanan, hi Malluki ey hi Jonathan, Sebaniah ey hi Joseph, hi Harim ey hi Adna, Meraiot ey hi Helkai, hi Iddo ey hi Sekariah, Ginnethon ey hi Meshullam, hi Abijah ey hi Sikri, Miniamin ey hi Moadiah ey hi Pilta, hi Bilgah ey hi Sammua, Semaiah ey hi Jehonathan, hi Joiarib ey hi Mattenai, Jedaiah ya hi Ussi, hi Sallai ey hi Kallai, Amok ey hi Eber, hi Hilkiah ey hi Hashabiah, Jedaiah ey hi Nethanel.

<sup>22</sup> Yan eman ni napatulan nan Darius ey neitudek ida ngadan ni nahlagan idan pamilyah ni papaddi et yadda helag Levi eman ni tsimpuh idan eta-gey ni padi e hi Eliashib, hi Joiada, hi Johanan et hi Jaddua. <sup>23</sup> Nem neipappeg ni ebuh listaan ni gubilnu eman ni ketaggun Jonathan e inap-apun Eliashib.

<sup>24</sup> Huyyadda ap-apun dewwan grupuh ni helag Levi ni neitudek: Hi Hashabiah, hi Serebiah, hi Jeshua, hi Binnui et hi Kadmiel. Huyyaddan dewwan grupuh ey ida kamanhuluhulul ni mandeyyaw ey mampesalamat nan Apu Dios. Impahding da huyya e neiunnud di tugun lan patul e hi David e kamekanggu-unnud nan Apu Dios.

<sup>25</sup> Huyyadda dama ngadan ni kamanguwalyad bodegah di kad-an idan eheb ni Tempol tep humman nedutuk ni ngunu da: Hi Mattaniah, hi Bakbukiah, hi Obadiah, hi Meshullam, hi Talmon et hi Akkub. <sup>26</sup> Nanguwalyaddad bodegah ni Tempol eman ni ketaggun Joiakim e u-ungngan Joshua e u-ungngan Jehosadak, hi Nehemiah e gubernor et hi Ezra e padin nekanggamta etan ni Tugun.

<sup>27</sup> Ya eman ni neieng-eng ni pakekappyan batun luhud ni Jerusalem ey impaeyag dan emin ida helag Levi anin ni attu kad-an da et mei-dum idan nekiemung et makia-appeh ida ey nampesalamat idan Apu Dios e daka petnul hu gangha, ya gitalah niya ayyuding da. <sup>28</sup> Humman idan helag Levi ni kaman-a-appeh ey nalpuddad nampambebeyan dan neihnpud di Jerusalem et yaddad bebley di Netophah, <sup>29</sup> yad Bet Gilgal, yad Geba et yad Asmabet, tep nampambebeyan ida kaman-a-appeh di nanlinikweh di Jerusalem. <sup>30</sup> Impahding idan papaddi et yadda edum dan helag Levi hu elaw ni linih di hinangngab Apu Dios et han da dama pahding humman di tutu-u, yadda eheb et ya etan di tuping ni luhud.

<sup>31</sup> Impanguluk ida aap-apud Judah di ta-pew ni tuping ni luhud, tep hi-gada mengip-pengnguluddan dakek ni tutu-un nandewa linyah dan man-alsituh idan manlikweh di bebley ey man-a-appeh idan pampesalamat dan Apu Dios. Mampellaw ida etan hakey ni grupuh di south e iddalan dad ta-pew ni tuping ingganah di Eheb e Ibbengngan.

<sup>32</sup> Neitu-nud ni hi-gada hi Hoshaiyah et yadda etan kagedwah ni ap-apuddad Judah, <sup>33</sup> et yadda padi e hi Asariah, hi Ezra, hi Meshullam, <sup>34</sup> hi Judah, hi Benjamin, hi Semaiah, hi Jeremiah, <sup>35</sup> et yadda edum ni padin kamantanguyup. Neitu-nud dama hi Sekariah e u-ungngan Jonathan e u-ungngan Semaiah e u-ungngan Mattaniah e u-ungngan Mikaiyah e u-ungngan Sakkur e u-ungngan Asap. <sup>36</sup> Nanggillig ida edum Sekariah e hi Semaiah, hi Asarel, hi Milalai, hi Gilalai, hi Maai, hi Nethanel, hi Judah et hi Hanani. Inusal dadda hu kapetnul ni henin usal lan David e patul e kamekanggu-unnud nan Apu Dios. Hi Ezra e nekangngamtan Tugun hu nengipengulun hi-gadan emin. <sup>37</sup> Inlapu dad Eheb ni Ahhullan et mampatyed idad nambebeyan lan David e patul. Linabhan da etan baley David et manlikweh idad batun luhud di Eheb e Danum di appit ni kasimminlin aggew.

<sup>38</sup> Nampalaw etan meikkadwan grupuh di appit ni north e dadda dammuen etan nemangulun grupuh. Neitu-nuddak ni hi-gada e ingkuyug kudda hu kagedwah etan idan tutu-u. Linabhan mi etan Eta-gey ni Baley ni Kapene-engi et mampalaw kamid Mahkang ni Luhud. <sup>39</sup> Ey linabhan mi etan Eheb e Epraim, ya Eheb e Jeshanah, ya Eheb e Deleg, ya Eta-gey ni Baley Hananel, ya Eta-gey ni Baley idan Hanggatut ingganah etan di Eheb e Kalneroh et meipappeg kami etan di neihnpud di Eheb e Guwalya.

<sup>40</sup> Huyyaddan dewwan grupuh ni kamenaydayaw nan Apu Dios, ey nandammuddad Tempol, anin ni hi-gami e edum kudda etan kagedwah ni aap-apu, <sup>41</sup> yadda papaddin kamantanguyup e hi Eliakim, hi Maaseiah, hi Miniamin, hi Mikaiyah, hi Elioenai, hi

Sekariah, et hi Hananiah. <sup>42</sup> Neitu-nud ida kaman-a-appeh e di Maaseiah, hi Semaiah, hi Eleasar, hi Ussi, hi Jehohanan, hi Malkijah, hi Elam et hi Eser. Inleinlet dan nan-a-appeh e impappangnuguluddan Jesrahiah.

<sup>43</sup> Dakel in-appit dan nunman ni aggew, tep indawat Apu Dios hu et-eteng ni pan-amamlengan da. Anin idan bibi-iy ey kaungaunga et nekiam-amleng ida et nemahhig e kamedngel di edawwi hu ngala da tep ya amleng da.

<sup>44</sup> Yan nunman ni aggew ey netududda hu mampaptek ni bodegah ni kapengihhadiddan kai-ammung ni tutu-u henin meikkeppulun emin ni kamemengngulun lameh ni intanem da niya hipan enniem da. Hi-gada an mengellad papayyew et ilaw dad bodegah et kanen idan padi et yadda edum dan helag Levi tep humman hu neitudek di Tugun. Katettebaladdan tutu-u hu kapehding idan papaddi et yadda helag Levi ni ngunu da.

<sup>45</sup> Ida kamansilbin Apu Dios ey hi-gada pay hu mengingngunnuddan elaw ni panlinnih di hinanggab Apu Dios tep humman kantud Tugun. Anin idan kaman-a-appeh et yadda kamanguwalyaddan eheb, et da dama kau-unnuda hu tugun ni impebeltan David e patul et ya u-ungnga tu e hi Solomon. <sup>46</sup> Neipalpu dedan eman ni ketaggun David et hi Asap, ey wadadda netudun mengipappangngulun man-a-appeh ni pandeyyaw niya pampesalamat nan Apu Dios. <sup>47</sup> Et yan nunyan tsimpuh di Serubbabel nan Nehemiah ey ida kaum-idwat hu tutu-un kennen idan kaman-a-appeh et yadda kamanguwalyad Tempol. Ida dama kaum-idwat ni mahapul idan helag Levi, et hedin yadda dama helag Levi, ey daka iddawat idan papaddin helag Aaron hu lebbengtun meidwat ni hi-gada.

## 13

<sup>1</sup> Yan nunman ni aggew ni nemidbidan dan Tugun Moses idan tutu-u ey nebidbid hu neitudek diman ni kantuy eleg mabalin ni mei-dum ida iAmmon et yadda iMoab di kakeemmungiddan tutu-un Apu Dios, <sup>2</sup> tep eleg dadda idwatan ida helag Israel ni danum niya kennen eman ni nalpuan dad Egypt. Ya kumedek impahding da ey sinangndan da hi Balaam et idutan tudda helag Israel, nem impambalin damengun Apu Dios humman ni idut ni panyaggudan da. <sup>3</sup> Yan nunman ni neibidbidan nunyan tugun ey inlapu da law ni eleg mengi-ebbulut ni edum ni tutu-un beken ni helag Israel ni meki-dum ni hi-gadad daka keemmungi.

<sup>4</sup> Yan eleg ni meipahding huyya ey hi Eliashib e padin netudun mampaptek idan bodegah di Tempol ey kayyaggud hu nekigayyuman tun Tobiah. <sup>5</sup> Et iebulut tun ussalen Tobiah etan melakkeb ni kuwaltuh ni nekapyan pengi-emmungan idan kamei-appit ni begah, yadda bangblu, yadda edum ni usal di Tempol, yadda meinnum et yadda lanan olibah. Intugun Moses ni nunman e huyyaddan kamei-appit ey ussalen idan helag Levi, yadda kaman-a-appeh et yadda kamanguwalyan eheb.

<sup>6</sup> Endi-ak di Jerusalem ni nunman, tep nambangngaddak di Babilon eman ni meikkatelumpulu et dewwan toon ni nampatulan Artaserses diman. Nem entanni kuma ey inebulut tun mambangngaddak di deya Jerusalem. <sup>7</sup> Et dimmatengngak ey natnga-ak ni nengamtaak ni nunyan lawah ni peteg ni impahding Eliashib e tu ni-ngangu indawtan hi Tobiah ni panha-adan tud Tempol nan Apu Dios. <sup>8</sup> Bimmungettak nunman et pan-ibbeng kuddan emin hu ngunut Tobiah ni neiha-ad di kuwaltuh. <sup>9</sup> Et imandal kun pehding da hu elaw ni kapanlinnih diman ni kuwaltuh, et hannak ibangngad etan ida hipan meihha-ad diman e humman ida hu usal ni Tempol, yadda kamei-appit ni begah et yadda bangbanglun kagihheba.

<sup>10</sup> Neamtaak mewan e hini-yan idan kaman-a-appeh hu Tempol, anin idan edum ni helag Levi et mambangngad idan mangngunnud payew, tep kulang hu kaiddawat idan edum dan helag Israel ni kennen da. <sup>11</sup> Et ibunget kudda aap-apun nengiebulutan dan meiwwalleng hu Tempol, et pambangngad kudda helag Levi et yadda kaman-a-appeh et ipahding da hu ngunu da dedan ni mampaptek ni Tempol. <sup>12</sup> Entanni et pan-i-lidda law ni helag Israel di bodegah ni Tempol hu meikkeppulun begah da, yadda meinnum et ya lanan olibah. <sup>13</sup> Et tuduek hi Selemiah e padi, hi Sadok e nekangngamtan tugun et hi Pedaiah e helag Levi ni mampaptek idan bodegah. In-edum ku hi Hanan e u-unggan Sakkur e u-unggan Mattaniah ni pambaddang da. Kameiddinneh ida huyyan mampaptek ni mahapul idan edum dan helag Levi, tep inamtak e kayyaggud elaw da.

<sup>14</sup> Nandasallak nan Apu Dios e kangkuy "Apu Dios, entan anhan tu liwwan eya kayyaggud ni impahding ku eyan Tempol mu e Dios ku."

<sup>15</sup> Yan nunman ni tsimpuh ey nakka ang-ang-angadda tutu-ud Judah e anin ni Sabaduh, et daka pan-iyayyaggud hu daka pangkekpali, niya kapan-ienamut ni edum hu ineni da e daka pan-itakkay di kebayyu da. Yan nunman mewan ni aggew ey daka pan-i-lid Jerusalem hu meinnum, yadda figs, et yadda edum ni kalga e daka pan-ittakkay di kebayyu da et ilaw dad Jerusalem. Inhelak idan nunman e kangkuy eleg mabalin ni ida

manggetang ni Sabaduh. <sup>16</sup> Wadadda mewan hu nalpud Tyre ni nekibebley di diman Jerusalem e humman ni ida immalan deleg et yadda edum ni kameigtang ni in-ali dan da iggatang idan tutu-un Sabaduh.

<sup>17</sup> Imbunget kudda aap-apud Judah e kangkun hi-gaday "Ang-ang yu kedi eya lawah ni yuka pehpehding e eleg yu tu-wangu ngillina hu aggew ni Sabaduh. <sup>18</sup> Inamta yu dedangnu e humman binungetan Apu Dios et kastiguen daitu et yan eya bebley tayu, ey yu mewan kapan-e-dumi bunget tun hi-gatsun helag Israel tep ya eleg yu pangngillinin aggew ni Sabaduh." <sup>19</sup> Et ya impahding ku ey immandal kun illeki dadda eh eb ni bebley hedin kamangkehille ng ni Kalima et handa ibeghul hedin negibbuh hu aggew ni Sabaduh. Bineal kudda edum ni tuuk ni mangguwalya et endi da pehgep ni daka iggatang di bebley nunman ni aggew. <sup>20</sup> Nem wada pinhakkey ey nampidwa na-mun wadadda kamanggettang ni emin ni hipan kameiggettang ni nandeyad binna-hil ni tuping ni luhud ni hileng ni Kalima. <sup>21</sup> Et iheng-ak kudda e kangkuy "Kele kayu kamandedyadatan? Endi silbitu yu penehhegedan ni kewa-waan tu! Entan tu ipidpidwan um-ali tep pekellabut dakeyu mannuman!" Neipalpun nunman ey eleg ida law um-alin Sabaduh. <sup>22</sup> Immandal ku mewan e pehding idan helag Levi hu elaw ni linih ni annel et ida mangguwalya et mannungew idan emin hu tutu-un Sabaduh. Et mandasallak mewan nan Apu Dios e kangkud dasal kuy "Entan anhan tu liwwan e Apu Dios eya kayyaggud ni impahding ku et hemeken da-ak tep et-eteng ey nehammad hu impeminhed mu."

<sup>23</sup> Neamtaak mewan ni nunman e dakel ida edum kun helag Israel ni nengiahwan bibi-in iAsdod, yadda iAmmon et yadda iMoab. <sup>24</sup> In-epet tu mewan et hedin yadda u-ungnga da ey ya ehel ni iAsdod et ya edum ni ehel hu inamta da e eleg da amta hu ehel min helag Israel. <sup>25</sup> Bimmungettak mewan ni hi-gada et pan-idutak ida. Nanheplit kudda edum et pan-iya-nit ku bewek da, et pansapatath kuddad hinangngab Apu Dios e eleg da i-abulut ni meki-ahwa u-ungnga dad beken mi edum ni helag Israel e eleg mengamtan Apu Dios.

<sup>26</sup> Inhel kun hi-gada e ya nengiahwaan nan patul e hi Solomon ni biin beken min edum ni helag Israel hu himmulun nanliwatan tun Apu Dios. Hi-gatu lan nunman hu keta-ta-geyyan ni emin ni patul ey endi edum ni patul ni henin hi-gatu ey et-eteng hu impeminhed Apu Dios ni hi-gatu et hi-gatu tuduen tun mampatul emin di bebley di Israel. Nem anin ni hi-gatu et impanliwat idan ahwatun beken ni helag Israel. <sup>27</sup> Kangku mewan ni hi-gaday "Kele tu-wangu anhan yu ninemnem ni mengippahding ni lawah et yu iahwa bibi-in nalpud edum ni bebley et manliwat kayun Apu Dios?"

<sup>28</sup> Ya mewan hakey ni u-ungngan Jehoiadah e u-ungngan Eliashib e eta-gey ni padi ey inepun Sanballat e iBet Horon. Et humman himmulun ni impa-kal ku humman ni u-ungngan Jehoiadah di diman Jerusalem.

<sup>29</sup> Nandasallak mewan nan Apu Dios e kangkuy "Entan anhan tu liwwan humman ni impahding da e Apu Dios ku tep bineing da hu kapedi da ey inhalla da hu insapatath dan hi-gadan papaddi ey helag Levi."

<sup>30</sup> Impasiked kuddan mengu-unnud ni elaw niya tuttuuddan tutu-un nalpud edum ni bebley. Et pan-ituduk hu ngunuddan padi et yadda edum dan helag Levi, ma-lat wada hakkeyey inamta tu niya pehding tu ngunu tu. <sup>31</sup> Inhel kun hi-gada e ippaptek dadda ittungun mahapul ni pan-appitan hedin nedatngan hu panheppulan daddan nunman, niya ippaptek dan emmungen ida iddawat ni tutu-un memengngulun ennien da niyadda memengngulun lameh ni intanem dan iddawat daddan papaddi.

Et mandasallak mewan et kangkuy "Nemnem mu anhan e Dios ku ida huyyan impahding ku et idwat mu panyaggudak."

## Esther

### *Ya huyyan liblul nan Esther*

Huyyan liblul ey impeamta tu hu impahding nan Esther ni nengihwang idan Jews ma-lat eleg ida matey. Hi Esther nan Mordekai niyadda dakel ni edum dan Jews e helag Israel ni neilaw ni balud di Babilon ey nambebley idad Persia. (Ya eman ni 539 B.C. ey inapput ni Persia hu Babilon et sakupen da.)

Hi Serses hu patul di Persia ni nunman. Hini-yan tu hi Basti e ahwatu et ahwaen tu hi Esther e Jew. (Nem eleg ni meamtaan e Jew hi Esther.)

Yadman e nambebleyan nan Serses ey wada hu lakin hi Haman hu ngadan tu. Neipetagey hu nguun tu et mambalin ni meihhayned nan Serses e patul. Hi Haman ey hakey ni Amalekite. Anggebe-hel tudda hu Jews et nemnemen tun pepettey idan emin. Et mekihummangan nan patul e hi Serses et ehelen tun hi-gatu e mengapyan olden ma-lat dammutun petteyan idan tutu-u hu Jews di megtud ni aggew. Ey inebulut nan patul.

Nem entanni ey dinggel nan Mordekai e pengemmaen Esther humman ni olden et lumaw nan Esther et peamta tun hi-gatu humman. Et ilemangan nan Esther hu biyag tu et an mekihummangan nan patul meippanggep nunya. Et ya impahding nan patul ey nengapyan hin-appil ni olden e mei-ebbulut ida Jews ni mekihhanggaddan buhul da malat ihwang da annel da. Henin nunman hu impahding da et meihwang idad ketteyyan da et hi Haman hu neipepatey.

Nan-am-amleng ida hu Jews ni nengapputan daddan buhul da et ilepu da etan piyestah dan katootoon e nginedanan dan Purim.

### *Ya neitudek eyad liblul:*

1. Nambalin hi Esther ni ahwan nan patul e hi Serses. (chapters 1-2)
2. Nannemnem hi Haman ni pehding tun mengippepettey idan Jews. (chapter 3)
3. Nannemnem hi Esther ni pehding tun mengihwang idan edum tun Jews. (chapters 4-7)
4. Inhwang nan Apu Dios ida Jews di ketteyyan da. Neilepu hu Piyestah e Purim. (chapters 8-10)

### *Ya nampahemulan etan ni patul e hi Serses*

<sup>1-2</sup> Yan nunman ey wada hu patul e hi Serses ngadan tu e nan-ap-apud hanggatut et dewampulut pitun probinsiya e neipalud India ingganah di Ethiopia \* Yad Susa hu nanha-adan tu. <sup>3</sup> Yan meikkatun toon ni nampatulun tu ey nampahemul et ayagan tudda emin opisyal tu, yadda ap-apun sindalu tud Persia niyad Media, yadda gubernor idan probinsiya niyadda edum ni ap-apudman. <sup>4</sup> Humman ni hamul ey limmaw ni enem ni bulan et han megibbuh et pengipeang-angan tun kinedangyan ni bebley tu niya dayaw ni nampatulun tu.

<sup>5</sup> Negibbuh humman et nampahemul mewan ni hanlingguan di dallin ni baley tud Susa et ayagan tuddan emin hu tutu-udman, kedangyan niya newetwet. <sup>6</sup> Hina-adan da dallin ni kayyagud ni kultinah ni mablah niya blue ey madlang ni luput hu impemedbed da. Netullikeng ni silber hu neihukluban ni nemedbed da e neihabley di tukud ni marbol. Ya neikapyan det-al ni dallin ey marbol niya pearl niyadda edum ni nenginan batu. Yadda yuddunggan diman ey nekapyad balituk niya silber. <sup>7</sup> Yadda balituk ni basuh ni eleg man-iinggeh, e endi dewwan nan-inggeh kapkapa tu hu nenginumman da etan ni dakel ni meinnum ni indaddan nan patul. <sup>8</sup> Immandan nan patul idan bega-en tu e eleg da tetteppenga hu itaug dan innumen idan tuu et ngenamung kehinglaan da.

<sup>9</sup> Hi Basti e ahwan patul ey nampahemul damaddan bibi-id bawang. <sup>10</sup> Yan eman ni meikkeppitun aggew ey kamengi-innum hi patul ey kaman-an-la. Entanni ey impaeyag tudda etan pitun napnahan ni lalakkin bega-en tu e hi Mehuman, hi Bista, hi Harbona, hi Bigta, hi Abagta, hi Sethar et hi Karkas. <sup>11</sup> Et ehelen tun hi-gada e da ewwiten hi Basti e ahwatu niya e-helen dan hi-gatu e ippepnget tu etan kaippepnget ni ahwan patul et han umlid kad-an tu. Kat-agun peteg humman ni ahwan patul et pinhed tun peang-ang idan opisyal tu niyadda mangili tu hu kakinat-agu tu. <sup>12</sup> Nem an ineyagan idan bega-en patul hi Basti ey eleg tu pinhed ni umlaw et nemahhig hu bunget nan patul.

<sup>13</sup> Et pinhakkeyy impaeyag tudda opisyal tun nengamtan emin ni hipan kameunnud ni linteg niya elaw dad Persia, tep humman ni ingganah tuka pehding e tuka mahmahin

\* 1:1-2 1:1-2 Heb. Cush; Sudan niya Ethiopia ni nunya.

hi-gada hedini hipa pehding tu. <sup>14</sup> Ya ngadan idan nunyan opisyal ni kaeyyagin patul hedini wada pinhed tun mahmahan ey hi Karsena, hi Sethar, hi Admatha, hi Tarsis, hi Meres, hi Marsena et hi Memukan. Hi-gada hu pitun opisyal ni tuka kedinneli niya hi-gada keta-ta-geyyan saad dad Persia niyad Media. <sup>15</sup> Immalidda et kantun hi-gaday “Hi-gak e patul yun hi Serses ey intu-dak kudda bega-en ku et da ehelen nan ahwak e hi Basti e immandal kun um-ali ey eleg tuwak u-unnuden! Impaeyag dakeyu ma-lat ehlen yun hi-gak hedini hipa wadad linteg tayun lebbeng tun pehding kun hi-gatu.”

<sup>16</sup> Immehel hi Memukan et kantun hi-gatu niyadda opisyal tuy “Nambahul hi Basti e ahwam, apu patul. Ey beken ni hi-gam ni ebuh e ahwatu ni nambahulan tu, nem anin idan ap-apud bebley tayu niyadda edum tayun lalakki. <sup>17</sup> Lektattuy emin idalli law bibi-i ey eleg da law lispituha hu aahwa da hedini dedngelen da e nginhay nan Basti hu mandal nan patul e ahwa tu. Tep kandallin ahwa day “Immandal nan patul ni umlaw di kad-an tu hi Basti e ahwa tu ey eleg tu u-unnuden hu inhel ni ahwa tun patul.” <sup>18</sup> Inamtak et eleg mehilling nunyan aggew ey dedngelen idan ahwa min opisyal mudya Persia niyad Media hu impahding Basti et iu-unnud dan hi-gatu e eleg da lispituha hu ahwa da, et umhulun ni pengibbungnetan ni ahwa dan hi-gada. <sup>19</sup> Et humman hu, hedini pinhed mu, ey imandal mu et eleg law mabalin ni an mampeang-ang ni hi-gam e patul hi Basti e ahwam. Paitudek mu huyya etan di neitudekan idan linteg di deya Persia niyad Media e eleg ali mabalin ni mehullulan. Ey penang-ang kan edum ni kakkayyaggud ni biin meihullul ni hi-gatun ahwam. <sup>20</sup> Nakka medinnel e hedini amtaen idan emin ni tuu huyyan mandal mu, ey emin law bibi-i ey lispituhun da ahwa da, kedangyan winu newetwet.”

<sup>21</sup> Emin ida etan opisyal, anin etan patul ey daka ebbuluta e kayyaggud humman ni inhel Memukan et u-unnuden nan patul humman ni inhel tu. <sup>22</sup> Et palaw tun emin di probinsiya ni nampatulan tu hu tudek e neibelin emin di nambakbaklang ni ehel idan tutu-u et imandal tu e emin hu lalakki ey hi-gada meunnud di baballey da.

## 2

### *Nambalin hi Esther ni ahwan patul*

<sup>1</sup> Entanni et nedagem law bunget nan patul ey tuka nemnemnema hi Basti e ahwa tu, ya impahding tu et ya immandal tun meippahding ni hi-gatu. <sup>2</sup> Et kan idan kamenuggun nan patul ey “Attu et manemak itsu eyad bebley tayun kat-agun biin eleg malehin et hi-gatu ahwaem. <sup>3</sup> Itugun muddan opisyal mud emin ni probinsiya et pan-i-li dan emin hu kakat-agun bibi-i eyad baley mud Susa. Et pepaptek muddan Hegai e napnahan ni bega-en mun kamengippaptek idan bibi-im ma-lat idwatan tuddan mengippeyayyaggud ni ang-ang da. <sup>4</sup> Hedini nedatngan hu nagtud ni aggew ey pinilim hu nakappinhed mun hi-gada et meihullul nan Basti e ahwam.” Kayyaggud hu nangngel nan patul ni nunman ni inhel da et u-unnuden tu.

<sup>5</sup> Wadan nunman di Susa etan Jew e hi Mordekai ngadan tu e u-ungngan Jair e u-ungngan Simei e u-ungngan Kish e helag Benjamin. <sup>6</sup> Wadadman tep yan eman ni nengapputan nan hi patul e hi Nebukadnessar ni patul ni Judah e hi Jehoiachin ey inla tudda iJudah di Jerusalem et ilaw tuddad Babilon e bebley tu. Impambalin tuddan balud diman et hi Mordekai hu hakey ni hi-gadan nambalin ni balud. <sup>7</sup> Wada hu agitu e hi Esther e ya ngadan tud Hebrew ey Hadassa. Kat-agun peteg niya kayyaggud impengannel tu. Inewit Mordekai eman ni neteyyan idan a-ammed tu et e-ettengen tun imbilang tun u-ungnga tu et hikenen tu.

<sup>8</sup> Ya nengioldenan nan patul hu himmulun et dakel ida kakat-agun bibi-in inlaw dad kad-an tud Susa e hi Esther dama hakey ni hi-gada. Nanha-ad idad baley nan patul et ipaptek idan Hegai. <sup>9</sup> Katettebalan Hegai hu kakinayyaggud ni ang-ang Esther et eleg mebaying ey linepuan tun mengiyayyaggud ni ang-ang tu et pehena-ad tun lana niya bangbanglu hu annel tu ey nepili hu tuka pekkan ni hi-gatu. Inappil Hegai hi Esther et iha-ad tud kekakkayyaggudan ni panha-adan, et idwatan tun pitun nepilin bega-en di baley patul ni mengippaptek ni hi-gatu.

<sup>10</sup> Eleg e-ehhelen nan Esther hu bebley ni nalpuan tu tep sinugun Mordekai e eleg tu peamta e hi-gatu ey Jew. <sup>11</sup> Kewa-wa-wa ni kamanlinnabah hi Mordekai di dallin ni kapanha-adid Esther, ma-lat ang-angen tu niya amtaen tu hu kameippenahding ni hi-gatu.

<sup>12</sup> Kaumlaw di hantoon hu daka pengiyenayyaggudin ang-ang idan bii ni han da inlaw di kad-an ni patul. Enem ni bulan hu pengi-ussalan dan lanan mir di annel da niya enem ni bulan mewar hu daka pengi-eppuapin bangbanglu. <sup>13</sup> Hedini nedatngan etan lawwan ni hakey ni biid kad-an ni patul ey dammutun mampillin ibbalwasi tu

niya hipan ussalen tu ma-lat ma-duman kakinayyaggud ni ang-ang tu. <sup>14</sup> Kaumlaw ni hileng di kad-an ni patul et hedin newa-wa, ey kaumlaw etan di hakey mewan ni kapanha-adiddan bibi-in nei-dum ni ahwan patul e ya kamampaptek ni hi-gadadman ey hi Saasgas e hakey mewan ni napnahan ni lakin bega-en nan patul. Eleg mambangngad hu hakey ni biid kad-an ni patul ingganah ni pengeyyagan tun hi-gatu.

<sup>15</sup> Entanni ey nedatngan law hu lawwan Esther di kad-an ni patul. (Ya aman Esther e hi Abihail ey agin a-ammed Mordekai. Nem imbilang Mordekai hi Esther ni u-ungnga tu tep hi-gatu nenge-etteng ni hi-gatu.) Yan nunman ni lawwan tud kad-an ni patul ey inusal tu hu balwasin pinilin Hegai e nengipenaptek ni hi-gada. Eleg mambagan edum ni hipan ussalen tu tep inu-unnud tun emin hu intugun Hegai. Ey emin ida kamenang-ang nan Esther ey daka tettebala kakinat-agu tu.

<sup>16</sup> Inlaw da hi Esther di baley nan patul e hi Serses eman ni meikkeppitun toon ni nampatulanan tu e meikkeppulun bulan ni Tebet. <sup>17</sup> Inang-ang nan patul hi Esther ey hi-gatu pininhed tud emin ida etan ni edum ni bibi-i. Et iha-ad tud ulun Esther etan penget ni ahwan patul et hi-gatu law mambalin ni ahwatu et beken law hi Basti. <sup>18</sup> Et mampahemul hi patul ni keiddeyyawan Esther et aygan tuddan emin hu aap-apu niyadda opisyal tu. Ey immandal tu e emin hu tutu-ud bebley ni sinekup tu ey endi manggunnun nunman ni aggew. Nanwatwat ni nangkenginan indawat tuddan tu.

<sup>19</sup> Hi Mordekai hu hakey ni pinilin patul ni opisyal tu. <sup>20</sup> Hi Esther ey eleg tu peam-anta e hi-gatu ey Jew tep humman intugun nan Mordekai ni hi-gatu. Tep ingganah ni nunya ey tuka peka-u-unnuda hu tuka ittugun henin nengu-unnudan tun kaglang tun nengipenaptekan tun hi-gatu.

<sup>21</sup> Yan nunman ni kapangngunnuin Mordekai di baley ni patul ey wada dewwan napnahan ni guwalyad habyen ni kuwaltuh patul e di Bigtanah nan Teres. Huyyaddan guwalya ey wada binelaw dan patul et ida kamanhuhummangan e kanday petteyen da. <sup>22</sup> Nem dingngel Mordekai humman ni ung-ungbal da et idaddatteng tun Esther et ehelen daman Esther nan patul, ey inhel tu e hi Mordekai hu nanghel nunman ni indaddatteng tu. <sup>23</sup> Impebistigal nan patul ey makulug humman ni indaddatteng dan hi-gatu et papetey tudda humman ni dewwan guwalya e inta-yun dadda. Humman ni neipahding ey impatudek nan patul e hi Serses di libluh ni meippanggep ni nampatulanan tu.

### 3

#### *Ninemnem Haman ni ippahding hu kebabahan idan emin ni Jew*

<sup>1</sup> Entanni ey impeta-gey etan ni patul hu saad Haman, e u-ungngan Hammedatha e helag Agag, et hi-gatu law keta-ta-geyyan saad tuddan emin ni opisyal tu. <sup>2</sup> Et imandal nan patul e emin ida opisyal tu ey mandukkun ida niya manyu-ung idan pengippeang-angan dan lispituh dan Haman. Et emin ida opisyal ey inu-unnud da et ida kamandukkun niya ida kamanyu-ung ni hi-gatu. Nem hi Mordekai ey eleg tu u-unnuda humman ni mandal. <sup>3</sup> Et kamennamahiddan edum ni opisyal ni hi-gatu hedin hipa eleg tu pengu-unnudin nunman ni mandal nan patul. <sup>4</sup> Kewa-wa-wa ni daka e-e-heli ma-lat u-unnuden tu humman ni mandal patul nem eleg tudda dedngela. Lektattuy inhel Mordekai ni edum tun opisyal e kantuy "Hi-gak ey Jew hak et humman hu, eleg mabalin ni nak manyu-ung di hinanggan nan Haman." Et idaddatteng dan Haman humman ni inhel tu ma-lat ang-angen da hedin hipa pehding tun Mordekai.

<sup>5</sup> Nemahhig bunget Haman ni nenang-angan tun eleg mandukkun niya eleg manyu-ung hi Mordekai ni hi-gatu. <sup>6</sup> Et yan nengamtaan tun Jew gayam hi Mordekai ey ninemnem tun beken ni ebuh hi Mordekai ni kastiguen tu. Nannemnem ni pehding tun memettye ni emin ni Jews idad bebley ni sinekup ni nan-ap-apuan Serses.

<sup>7</sup> Yan eman ni meikkahampulut dewwan toon ni nampatulanan Serses, ni nemangulun bulan ni Nisan ey immandal Haman e mambubunut ida et pengamtaan dan getud ni aggew niya bulan ni pengippahdingan dan nunman ni implanuh tu. Entanniy gintud da e yan meikkahampulut tellun aggew ni Adar e meikkahampulut dewwan bulan.

<sup>8</sup> Et lumaw hi Haman di kad-an ni patul et kantun hi-gatuy "Wadadda hansinu-wan ni neikamdug ni hi-gatsu ey neiwehit idan emin eyad bebley ni nan-ap-apuan mu. Hin-appil hu elaw da e endi hu neiingngehan tud elaw ni edum ni tutu-u. Hakey pay ey eleg da u-unnuda linteg eyad bebley tayu. Et humman hu, beken ni panyaggudam hedin mannenneng idadya. <sup>9</sup> Hedin hipa kammu e apu patul, imandal mu et papetey tayuddan emin. Et hedin ebbuluten mu huyyan inhel kun pehding mu ey iddawat ku hu telunggatut et na-pat ni libu et dewanggatut ni kiloh ni silber ma-lat mei-dum di kapengi-emmungin pihhuh eyan bebley tayu."



<sup>10</sup> Inebulut nan patul humman ni inhel Haman et ukhupen tu singsing di ngamay tu e humman hu tuka pandippel ni olden tu et idwat tun Haman e u-unggan Hammedatha e helag Agag e buhul emin ni Jew. <sup>11</sup> Kan patul nan Haman ey “Ngenamung kan pehding mu etan idan tuu nem anin ditan hu pihhuh mu.”

<sup>12</sup> Yan eman ni meikkahampulut tellun aggew ni nemangulun bulan ey ineyagan Haman ida sekretarih nan patul et pan-e-helen tu etan olden ey pan-ittudek da et ibelin dad emin ni nambakbaklang ni ehel idan tutu-u et palaw daddan gubernor niya opisyal idan bebley. Neiolden humman di ngadan patul et medippelan ni singsing tu. <sup>13</sup> Et menu-dak idan mengikka-peng idan nunman ni tudek di kebebbebley. Neitudek diman e petteyan dan emin hu Jew, yadda nea-amma niyadda nei-inna, anin idan kaungaunga, ey meellan emin hu hipan wadan hi-gadan limmu da. Ey mahapul ni pehding da huuya etan ni nagtud ni aggew e yan meikkahampulut tellun aggew ni bulan ni Adar. <sup>14</sup> Meippeamtad emin di kebebbebley huayan olden ma-lat mandaddan idan emin hu tutu-u hedin medetteng humman ni aggew. <sup>15</sup> Et humman ni olden nan patul ey neipeamtan emin ni katuutuud Susa niya neiawatwat di kebebbebley humman ni neitudek. Kamakallinggep di Haman nan Serses e patul ni kamakayuyuyuddung niya mengi-innum ey immen ida katteg hu tutu-ud Susa ni kaman-al-alingangnga e eleg da amta hedin hipa pehding da.

## 4

### *Ya nampebaddangan Mordekai nan Esther*

<sup>1</sup> Dingngel Mordekai ni emin hu neipahding ey nambi-ki tu balwasi tu e nemahhig lemyung tu. Nambalwasin langgusih et ha-adan tu ulu tun dep-ul, et an mandaladalan di bebley e kamantete-ul ni degeh ni nemnem tu. <sup>2</sup> Neipappeg di kahehgepid baley nan patul tep eleg da pehgep hu nambalwasin langgusih. <sup>3</sup> Yan neipeamtaan nunyan olden di emin di kebebbebley ni wada Jew ni nekibebley ey kamedngel hu teul da. Nampantepel ida ey intagan da nangih. Dakel ni hi-gada hu nampambalwasin langgusih niya ida kamambakbaktad di dep-ul.

<sup>4</sup> Impeamtadda etan ni napnahan ni lalaki niyadda bega-en Esther hu kapehpehding Mordekai ey nemahhig hu lemyung tu. Impailaw tu hu balwasin ibbalwasi tu ma-lat hullulan tu langgusih ni inhuclub tu, nem eleg tu pinhed. <sup>5</sup> Intu-dak tu mewan hi Hatak, e napnahan ni lakin indawat nan patul ni hi-gatun pambega-en tu, et lumaw di kad-an Mordekai et tu mahmahan hedin hipa himmulun et tu impahding humman.

<sup>6</sup> Limmaw hi Hatak di kad-an Mordekai etan di heggepan di baley patul, <sup>7</sup> et idaddatteng Mordekai ni emin ni hi-gatu hu neipahding et ehelen tu pay hu bilang ni pihhuh ni inhel Haman ni ibbayad tun mei-dum di pihhuh ni bebley hedin meippepettey idan emin hu Jews. <sup>8</sup> Indawan tu hi Hatak ni hakey ni neitudekan etan ni mandal nan patul di Susa ni pemetteyan dan emin ni Jews. Inhel Mordekai ni hi-gatu e iddawat tu humman nan Esther et kantuy “Paka-hel mun Esther eya kameipahpahding niya ehel mun hi-gatu e mampehemhemmek nan patul ma-lat hemeken tudda tuu tun Jews.”

<sup>9</sup> Inu-unnud nan Hatak et lumaw di kad-an Esther et ehelen tun emin hu inhel Mordekai. <sup>10</sup> Et itu-dak mewan nan Esther hi Hatak et mambanggad di kad-an Mordekai et tu ehelen hu inhel tu. <sup>11</sup> Kan Esther ey “Inamtan emin ni katuutu u e hedin wada hakey ni tuun neala ni nampeang-ang nan patul di bawang ni baley tu, ey eleg tu paeyag, ey mahapul ni mettey. Tep mahapul ni eyyagan ni patul hu tuu ni han himmegep di kad-an tu. Ya dammutun keihwangan tun ebu et eleg da pateyan ey hedin iddengdeng nan patul ni hi-gatu etan balituk ni hulduk tu. Hakey pay ey nelabah law hambulan ni eleg tuwak pangeyagan nan patul.” <sup>12</sup> Limmaw hi Hatak di kad-an Mordekai et tu ehelen huayan inhel Esther.

<sup>13</sup> Heninnuy hu inhumang Mordekai, kantuy “Entan tu pandidinel hu kawedam di baley nan patul et penghel mu nem eleg daka illagat ni petteyan hedin medettengnan hu pemetteyan dan emin ni Jew. <sup>14</sup> Hedini pemeggam i-ineng eyan hannayan tsimpuh, ey wada edum ni kelpuan ni baddang ma-lat meihwang eya edum tayun Jew. Nem hi-gam niyadda aaggim ey mettey itsun emin. Ey hipa inamtan hedini nambalin kan ahwan patul ma-lat hi-gam bumaddang nunya?”

<sup>15</sup> Et humangen Esther hi Mordekai et kantuy <sup>16</sup> “Lakkay tep et mu amungen ida edum tayun Jews di deya Susa et mantepel kayu eyan nak pehding. Ehel mun hi-gada et eleg kayu mangan niya eleg kayu uminum ni tellun aggew. Hanniman dama pehding midan bega-en ku. Et hedini negibbuh ni impahding tayu huuya, ey umlawwak et nak ang-angen hi patul. Ey ebbuluten kun anin ni metteyyak hedini humman umhulun ni

ketteyyak.”<sup>17</sup> Dingngel Mordekai huyyan inhel Esther et ebuhe uminah et manglaw ni an mengippahding ni intugun Esther.

## 5

*Ya imbagan Esther etan ni patul*

<sup>1</sup> Yan nunman ni meikkatlun aggew ni nantepelan da ey inhuklub Esther hu kaibbalwasin ahwan patul et humgep di kad-an patul. Yimmudung etan patul di yuddungnan tu e inhangga tud heggeppan. <sup>2</sup> Inang-ang tu hi Esther ni kaman-eh-neng di kad-an ni heggeppan ey kaman-am-amleng ni nenang-ang ni hi-gatu, et indengdeng tu hu balituk ni hulkud tun hi-gatu. Et meihnpup hi Esther et tu kapaen hu utduk etan ni hulkud nan patul.

<sup>3</sup> Kan etan ni patul ni hi-gatuy “Kele ka immali? Hipa ibbagam e Esther? Ehel mu hedin hipa humman tep dammutun iddawat kun hi-gam hu kagedwah eyan bebley ni nan-ap-apuan ku hedin humman pinhed mu!”

<sup>4</sup> Himmumang hi Esther et kantuy “Apu patul, kekdewek anhan hedin ebbulutem et umli kayun Haman ni mahmahdem tep indaddanan dakeyun mangkeheng-ew ni kennen.”

<sup>5</sup> Et paeyag nan patul hi Haman ma-lat lumaw idad kad-an Esther ni mengngan. Immali hi Haman et lumaw ida. <sup>6</sup> Ida kamengi-innum ey kan mewan nan patul nan Esther ey “Ehel mu law nunya hedin hipa pinhed mun ibbaga. Anin ni kammuy iddawat ku hu kagedwah ni nan-ap-apuak et ebbuluten ku!”

<sup>7</sup> Kan Esther ey “Ya pinhed kun peteg ni kekdewen ey heninnuy; <sup>8</sup> Hedin kabbabbal kan hi-gak e apu patul et ebbulutem hu ibbagak ey pinhed kun um-ali kayun Haman ni kabbuhhan et idaddanan dakeyu mewan ni kennen et hannak ehela hu pinhed kun e-helen ni hi-gam.”

<sup>9</sup> Kaman-am-amleng ni peteg hi Haman ni immanemut, nem kamangkelebbah di eheb ni baley patul, ey inang-ang tu hi Mordekai e kamanyuyyuddung e eleg um-inah ni manyu-ung niya eleg umgeyenggeng ni takut tun hi-gatu, ey nemahhig bunget tu. <sup>10</sup> Nem insipel tu bunget tu et umenamut et amungen tudga gagayyum tud baley tu. Nekieyag tu hi Seres e ahwatu, <sup>11</sup> et ipahhiya tun hi-gada hu kinedangyan tu, ya dakek ni u-ungnga tun lalakki niya nengipeta-geyan patul ni saad tu. Ey impahhiya tu e hi-gatu hu keta-tageyyan ni opisyal nan patul.

<sup>12</sup> Ey kantuy “Beken ni ebuh ida huyya tep ebuhhak ni kadwan patul ni ineyagan nan Esther et idaddanan dakemin kennen di baley tu. Ey umlaw kami mewan nan patul ni an mengngan di baley nan Esther ni kabbuhhan! <sup>13</sup> Nem emin ida huyya ey endi silbitu hedin newa-wa ni inang-ang ku hi Mordekai e Jew ni kamanyuyyuddung di eheb ni baley patul.”

<sup>14</sup> Et kan Seres e ahwa tu et da-yunan idan gagayyum tuy “Ettu et mampekapyu kan dewampulu et liman metroh hu kasina-gey tun pengitta-yunan mun hi-gatuy? Et hedin kabbuhhan man imbagam nan patul et tu peta-yun hi Mordekai ma-lat man-am-amleng kan an mekikkan di baley nan ahwan patul.” Kayyaggud ni peteg hu nangngel nan Haman nunman ni inhel da et imandal tun kapaen da hu pengitta-yunan tun Mordekai.

## 6

*Ya nengipedayawan etan ni patul nan Mordekai*

<sup>1</sup> Yan nunman ni hileng ey eleg um-ali ugip nan patul et itu-dak tu hu hakey ni bega-en tun an mengella etan ni neitudekan emin ni kamekennapkapypad nan-ap-apuan tu, et ibidbid dan hi-gatu. <sup>2</sup> Entanni ey nedatngan etan neitudek ni nengipeamtaan nan Mordekai ni nengiplenuhan di Bigtana nan Teres ni pemetteyan da et lan patul. Huyyaddan dewwan di Bigtana nan Teres e napnahan ni lalakki hu guwalyaddan nunman di kuwaltuh patul. <sup>3</sup> Dingngel nan patul humman ni binidbid da ey kantuy “Hipa impahding tayu niya hipa indawat tayun Mordekai ni nengipahdingan tun nunya?”

Kan idan bega-en tuy “Endi an neipahding niya endi an neidwat ni hi-gatu.”

<sup>4</sup> Entanni ey kan patul ey “Hipa hu opisyal kun wada eyad baley ku?” Ey neipapaddih ni himmegep ali hi Haman ni an et mekihummangan nan patul ma-lat peta-yun tu hi Mordekai etan di imekapya tu.

<sup>5</sup> Et kan idan bega-en patul ey “Immen hi Haman di dallin.”

Et kantuy “Yu ayagi et humgep.”

<sup>6</sup> Himmegep hi Haman et kan patul ni hi-gatuy “Wada hakey ni tuun pinhed kun peteg ni pehding hu kayyaggud ni hi-gatu et kaidaydayawan tu. Hipa dedan muka pannemnem ni kayyaggud ni pehding ku?”

Kan Haman di nemnem tuy “Hipa edum ni pinhed eyan patul ni iddawtan ni dayaw hedin beken ni hi-gak?” <sup>7</sup> Et kantun patul ey “Hedin pinhed mu e apu patul ni meidaydayaw hu hakey ni tuu ey heninnuy hu ipahding mu. <sup>8</sup> Pei-lim hu hakey ni balwasim niya hakey ni kebayyum ni napngetan ni penget mu, <sup>9</sup> et ayagam hu hakey ni eta-gey ni opisyal mu et pebalwasi tu humman ni balwasim ni nunman ni tuu ey impantakkay tud kebayyum et ipengulu tun an idalladallan di gawwan bebley. Ey ehel mu etan ni opisyal et itektekkek tu e kantuy ‘Ang-ang yu hu kapehding nan patul ni tuun pinhed tun meidaydayaw!’”

<sup>10</sup> Entanni ey kan patul nan Haman ey “Kakkayyaggud huttan ni inhel mu. Papuut mu et umla kan balwasin nakka ussala niya kebayyuk et ipahding mun Mordekai e Jew eya inhel mu. Immen di heggeppan ni baley ku e kamanyuyyuddung. Ang-ang mu et ipahding mun emin ni hi-gatu etan inhel mun pehding.”

<sup>11</sup> Et alen Haman hu balwasin patul et tu pebalwasin Mordekai et pantakkay tud kebayyun patul et tu idalladallan di gawwan bebley et itektekkek tu e kantuy “Ang-ang yu kapehding ni patul ni tuun pinhed tun meidaydayaw!” <sup>12</sup> Negibbuh humman et mambangngad hi Mordekai di heggeppan ni baley patul nem hedin hi Haman ey impapuut tun immanemur di baley tu e nemahhig lemyung tu niya baing tu.

<sup>13</sup> Indaddatteng tun ahwa tu niyadda gagayyum tun emin hu neipahding. Ey kandan hi-gatuy “Hi Mordekai e buhul mu ey Jew. Et humman hu, makulug ni eleg meippahding hu lawah ni planuh mun hi-gatu. Nanna-ud ni meapput ka.” <sup>14</sup> Nanengtun ida kamanhuhummangan ey dimmateng ida etan napnahan ni lalakkin bega-en patul ni an mengewwit nan Haman ma-lat an makikan ni indaddan nan Esther e ahwan nan patul ni kennen da.

## 7

### *Ya nengipepateyan etan ni patul nan hi Haman*

<sup>1</sup> Et lumaw di patul nan Haman ni an mekikkan di baley nan Esther. <sup>2</sup> Ida kamenginnun nunman ni aggew ey pinuhndan mewan nan patul nan ahwatu e kantuy “Imay, ehel mu law nunya hu pinhed mun ibbaga e Esther et idwat ku. Anin ni kammuy iddawat kun hi-gam hu kagedwah eyan bebley ni nan-ap-apuan ku et iddawat ku, hedin humman pinhed mu.”

<sup>3</sup> Et humumang hi Esther et kantuy “Hedin kayyaggud muka pannemnem ni hi-gak e apu patul ey heninnuy kekdewek ni hi-gam: Entan anhan tu iebulut e metteyyak ey entan anhan tu iebulut ni mettey ida edum kun Jews. <sup>4</sup> Tep hi-gak niyadda edum kun Jews ey nebayadan biyag mi et meippepettey kamin emin e endi metdaan. Gullat ni neigtang kamin mambalin ni himbut et pemeggak i-ineng, tep beken ni lebbeng tun daka taktaken hedin henin nunman ni ebuh meippahding. Nem yan nunya ey kamangeddengi law pemetteyan dakemin emin.”

<sup>5</sup> Kan Serses e patul nan hi Esther ey “Hipa humman ni tuun an mengippahding ni henin nuntan? Attu kad-an tu?”

<sup>6</sup> Kan Esther ey “Ya buhul min kamengippehelheltap ni hi-gami ey hi Haman eya, e lawah ni peteg nemnem tun tuu!” Dingngel Haman hu inhel Esther ey kimmuphat ni takut tu. <sup>7</sup> Nemahhig hu bunget patul et umhep et lumaw di garden di dallin ni baley tu.

Inamtan Haman e kastiguen nan patul et mampehemhemmek nan Esther. <sup>8</sup> Et mandukkun hi Haman et manyuung di yuddungnan ni binaktadan Esther. Neipapaddih ni mambangngad ali hi patul et humgep ey inang-ang tu hi Haman e tuka pan-iyuung di binaktadan Esther et kantuy “Kaw pehding mu pay anhan di hinanggak hu lawah nan ahwak eyad baley ku?” Inlet tu ehel et dengelen idan bega-en tu ey pinhakkeyey da hinukbungan angh Haman.

<sup>9</sup> Immehel hi Harbona e hakey ni bega-en ni wadadman ey kantuy “Immen mannuman pay hu impekapa tud dagsin baley tun dewampulut liman metroh hu ta-gey tun pengitta-yunan tun Mordekai e nengihwang ni hi-gam e apu patul.”

Et kan patul ey “Ilaw yu hi Haman et hi-gatu ita-yun yudman.” <sup>10</sup> Inu-unnud da et ilaw da hi Haman et da ita-yun di impekapa tun pengitta-yunan tun Mordekai, et han madegem hu bunget nan patul.

## 8

*Ya kelebengan idan Jew ni mekihhanggan buhul da*

<sup>1</sup> Yan nunman ni aggew ey indawat nan patul e hi Serses nan Esther hu emin ni hipan kinedangyan Haman e buhul idan Jew. Entanni ey impaeyag nan patul hi Mordekai tep inhel Esther hu neiegian tun hi-gatu. <sup>2</sup> Inukhup nan patul hu singsing di ngamay tu et idwat tun Mordekai e humman daka ussalan pandippel ni tudek ni nalpun patul. Humman etan singsing ni indawat nan patul nan Haman nem binangngad tu. Impambalin nan Esther hi Mordekai ni mampaptek ni puyek Haman niyadda edum ni kukuwah tu.

<sup>3</sup> Entanni ey limmaw mewan hi Esther et mandukun di kad-an ni helin nan patul et mannanangih niya nampehemhemmek ni hi-gatu ma-lat pasiked tu anhan etan lawah ni implanuh Haman ni meipahding idan Jew. <sup>4</sup> Ey indengdeng mewan nan patul etan balituk ni hulkud tu et uminah hi Esther. <sup>5</sup> Kan Esther ey "Hedin anhan dammutun kayyaggud hu muka pannemnem eyan ibbagak niya hedin kaka um-amleng ni hi-gak ey iolden mu anhan et eleg maunud etan olden Haman e u-ungngan Hammedatha e helag Agag, ma-lat eleg ida matey emin hu Jews eyad bebley ni nan-ap-apuam. <sup>6</sup> Tep eggak ali han-isipel ni menang-ang-ang ni pemetteyan daddan aaggik niyadda edum kun Jews."

<sup>7</sup> Kan patul e hi Serses ni humang tud Esther nan Mordekai ey "Namplanuh hi Haman ni lawah e pinhed tun petteyen ni emin hu Jews et mukun in-olden ku et da ita-yun. Ey emin hu hipan kinedangyan tu ey indawat kun hi-gam e Esther. <sup>8</sup> Nem hedini ya etan neitudek et medippelan ni singsing ku ey eleg mabalin ni an mehullulan. Nem dammutun mantuddek kayuddan edum yun Jew et yu ehelen hu hipan panyaggudan da et anin iha-ad yu ngadan ku ni dinipelan yun singsing ku."

<sup>9</sup> Et ayagan nan Mordekai ida sekretarih di baley patul et papuut dan kapyaan humman ni olden. Neipahding huyya eman ni meikkadwampulu et tellun aggew ni meikkatun bulan ni Siban. Intudek da humman idan olden Mordekai idan Jews, yadda gubernor niyadda opisyal di hanggatut et dewampulut pitun probinsiya meipalpuud India ingganah di Ethiopia. Intudek dad nambakbaklang ni ehel niya kapenudded idan probinsiya niyad kapenudded niya ehel idan Jew. <sup>10</sup> Humman idan tudek ni impalaw Mordekai ey neipilma hu ngadan patul niya nedippelan ni singsing tu. Limmaw ida hu an nengika-peng idan nunman ni tudek e nantakkay idad kebayyun patul ni nangka-let ni umbesik.

<sup>11</sup> Neipeamta etan idad tudek e kai-abulut nan patul e dammutun meemung ida Jews di kebebbley ma-lat mekihhanggadan memettey ni hi-gada, niya dammutun petteyen dadda buhul da ey inla da hu limmu da. <sup>12</sup> Huyyan olden ey meunnud di kebebbley ni nan-ap-apuan Serses etan ni nagtud ni aggew ni pampemetteyan daddan Jews e yan meikkahampulu et tellun aggew ni Adar e meikkahampulu et dewwan bulan. <sup>13</sup> Nekapya huyyan olden niya neipeamtad emin ni probinsiya ma-lat mandaddan ida Jews ni mekihhangga hedin medettengan humman ni nagtud ni aggew. <sup>14</sup> Impapuut dan an ngiwatwat ni nunman idan tudek et mampantakkay idad nangka-let ni umbesik ni kebayyun patul. Anin yad Susa e bebley nan patul et neipeamtan hi-gada humman ni olden.

<sup>15</sup> Entanni ey immehep hi Mordekai di baley nan patul e inhlukub tu hu henin balwasin patul e mablah niya blue ey netakapan ni madlang ni andukkey ni balwasi et mampenget ni kayyaggud ni balituk ni penget.

Yan eman ni neipeamta etan ni olden di Susa ey kaman-am-amleng ida tutu-udman. <sup>16</sup> Nemahhig amleng idan emin ni Jew ni nunman ni aggew niya katettebaladdan emin ni tutu-u. <sup>17</sup> Emin di kebebbley ni neibidbidan ni olden patul ey ida kaman-am-amleng hu Jews et manhahamul ida. Ey wadadda edum ni tutu-un nambalin ni Jew et mei-dum idan hi-gada, tep ya takut da.

## 9

*Ya nengapputan idan Jews ni buhul da*

<sup>1</sup> Nedateng etan meikkahampulu et tellun aggew ni bulan ni Adar e meikkahampulu et dewwan bulan e humman ni aggew hu kahehhegedaddan buhul idan Jews ni nengapputan dan hi-gada, ey nahwi kumedek hu neipahding. <sup>2</sup> Tep emin ida hu Jews di kebebbley di nan-ap-apuan Serses ey neamung ida et meikahhakey idan nekihanggan tutu-un nemihed ni memettey ni hi-gada. Et humman sinekutan idan emin ni tutu-un hi-gada et endi hakey ni an nekihanggan hi-gada. <sup>3</sup> Anin idan gubernor niyadda opisyal et binaddangan dadda Jews tep ida kaumtakut nan Mordekai. <sup>4</sup> Tep nandingngel di emin ni probinsiya hi Mordekai eman ni nengipeta-geyan nan patul ni saad tu et mambalin

ni et-eteng law kabaelan tu. Ey kamengmenglaw hu aggew ey kamangke-dumi pay hu kabaelan tu.

<sup>5</sup> Et humman hu, yadda Jews ey dammutun pehding da hu pinhed dan ippahding ni buhul da. Nampatey daddan nunman ni aggew hu buhul da e inusal da ispadah da.

<sup>6</sup> Yad Susa e nambeblesyan nan patul ey pintey idan Jews hu limanggatut ni buhul da. <sup>7-10</sup> Nekipetey dadda etan hampulun u-ungngan Haman e u-ungngan Hammedatha e buhul idan Jew. Ya ngadan idan nunman ni u-ungngan Haman ey: Hi Parsandatha, hi Dalpon, hi Aspatha, hi Poratha, hi Adalia, hi Aridatha, hi Parmasta, hi Arisai, hi Aridai et hi Baisatha. Pintey dadda nem eleg da alen hu hipan wadad baballey da niyadda limmu da.

<sup>11</sup> Yan nunman ni aggew ey neipeamta etan ni patul hu bilang idan pintey ni Jews di Susa. <sup>12</sup> Et kan patul nan Esther ey "Pintey idan Jews hu limanggatut ni tutu-u eyad bebley di Susa. Pintey dadda pay hu hampulun u-ungngan Haman ni lalakki. Inamtak et nema-ma impahding dad edum ni probinsiya. Nem ehel mu hu edum ni pinhed mun meippahding et iebulut ku, niya ehel mu hedin hipa kekdehem et idwat ku."

<sup>13</sup> Kan Esther nan patul ey "Apu patul, hedin dammutu, ey kekdehek et iebulut mu e pehding idan Jews di deya Susa ni kabuhhan hu henin impahding dan nunya. Ey ehel mu et da ita-yun ida annel ni u-ungngan Haman."

<sup>14</sup> Inebulut patul et imandal tu e meippahding huyya niya meippeamta Susa huyyan mandal. Ey tu impeta-yun ida annel ni u-ungngan Haman. <sup>15</sup> Newa-wan nunman e humman hu meikkahampulu et epat ni aggew nunman e bulan ni Adar ey neamung ida mewan hu Jew ni nambeblesy di Susa et patyen da mewan hu telunggatut ni buhul dadman. Nem eleg ida umlan hipan wadan hi-gada.

<sup>16</sup> Yadda dama hu Jews di edum ni probinsiya ey neamung ida et mambabaddang idan menanggan buhul da et patyen da hu nepitit liman libun hi-gada. Nem eleg ida umlan hipan wadan hi-gada. <sup>17</sup> Impahding idan wadad probinsiya huyyan meikkahampulu et tellun aggew ni Adar. Et mewa-wan nunman ey nan-iyatudda et man-an-anladda niya nanhamul ida. <sup>18</sup> Nem hedin yadda Jews di Susa man intu-man dan menanggan buhul dan nunman ni meikkahampulu et epat ni aggew et han ida man-iyatun meikkahampulu et liman aggew, et yan nunman nan-an-anlaan da. <sup>19</sup> Et humman hu, hedin yadda Jew ni nambeblesy di probinsiya ey yan meikkahampulu et epat ni aggew ni Adar hu daka pan-am-amlengin katootoon e ida kamanhamul niya ida kamanhindawat ni hipan pinhed dan iddawat di edum da.

<sup>20</sup> Hi Mordekai ey intudek tun emin huyyan neipahding. Ey nantudek idan emin ni Jews ni nambeblesy di Persia <sup>21</sup> e pambalin da hu meikkahampulu et epat niya meikkahampulu et liman aggew ni Adar ni pan-am-amlengan dan katootoon. <sup>22</sup> Huyyadan dewwan aggew hu nengapputan idan Jews ni buhul da niya nambalin ni lemyung dan am-amleng. Ya pehding dan man-am-amleng ni nunman ni dewwan aggew ey manhamul ida niya manhindawat idan hipan pinhed dan iddawat niya kennen, ey iddawtan dadda nangkewetwet. <sup>23</sup> Inu-unnud idan Jews hu olden Mordekai et pambalin dan piyestah ni katootoon humman idan aggew.

<sup>24</sup> Hi Haman, e u-ungngan Hammedatha e helag Agag, e buhul idan Jews hu kan nemnem ni memetty idan Jew et ibubunut tu, e humman keibbellinan ni Purim, et maptek hu aggew niya bulan ni pengippahdingan tun nunman ni ninemnem tu. <sup>25</sup> Nem an nekihummangan hi Esther nan patul et mengapyan olden et manhewi hu lawah ni planuh Haman et hi-gatu niyadda u-ungnga tun laki hu neita-yun.

<sup>26</sup> (Ngedanan dan Purim humman idan aggew ni daka pan-am-amlengi tep humman daka penghel ni bubunut ni nunman.) Et umhulun hu nantudekan Mordekai niya neipenahding ni hi-gada, <sup>27</sup> ey nanhummangan ida Jews di kebebablesy e man-am-amleng idan nunyan dewwan aggew hedin nedatngan huyyan pan-am-amlengan da. Huyyan olden ey mahapul ni u-unnuden alin emin ni helag idan Jews ni katootoon anin idan edum ni tuun nambalin ni Jews. <sup>28</sup> In-olden da e huyyan dewwan aggew ey eleg liwanaddan Jews ni katootoon et man-am-amleng idan emin familyah dad kebebablesy. Nanhummangan ida e eleg da iwwalleng huyyan piyestah dan Purim et ipenahding idallin helag dan ingganah niya eleg da liwwana hu neipahding ni nunman idan aggew.

<sup>29</sup> Entanni et mantudek mewan hi Esther e u-ungngan Abihail, et hi Mordekai e Jew et ipilma da ngadan dan dewwa et iolden da hu pengu-unnudan dan Piyestah ni Purim.

<sup>30</sup> Ey nantudek hi Mordekai idan emin ni Jews etan idad hanggatut et dewampulut pitun probinsiya ni nan-ap-apuan Serses et peamta tun hi-gada e endi law da tattakutan tep melinggep ida law. <sup>31</sup> Ey inhel tu e mahapul ni pehding da hu elaw ni Piyestah ni Purim ni katootoon hedin nedateng humman ni aggew e henin daka pehding ni mengu-unnud ni daka pantetpeli niya daka lemyungi. Hi Mordekai nan Esther e ahwan patul hu

nengiolden nunya. <sup>32</sup> Huyyan olden Esther ni elaw ni Purim ey neitudek di libluh ni kakeittuddekin emin ni kamekapkapyad bebley da.

## 10

*Ya meippanggep ni nandingngelan di Serses nan Mordekai*

<sup>1</sup> Hi Serses e patul ey immandal tu e mahapul ni mambeyyad ni buwis ida katuutuud kebebbebley, anin idan nampambebley di edawwi e gilig ni baybay. <sup>2</sup> Emin hu kakkayyaggud ni impahpahding nan patul, anin ni ya nengipeta-geyan tun saad Mordekai, ey neitudek etan di libluh ni patul di Persia niyad Media. <sup>3</sup> Hi Mordekai hu meihhayned di saad nan patul e hi Serses. Kapakallispituha niya nakappinhed idan edum tun Jews tep impenaptek tu panyaggudan da niya linggepan da niyaddalli helag dan edum ni aggew.

## Job

*Ya meippanggep nunyan libluh e Job*

Hi Job ey kamekangngu-unnud ni ingganah nan Apu Dios. Nem hakey ni aggew ey limmaw hi Satanas di kad-an Apu Dios di kabunyan et ehelen tun hi-gatu e mukun kamekangngu-unnud hi Job ni hi-gatu ey tep tuka benbendisyonin ingganah. Niya kan Satanas nan Apu Dios ey gullat ni i-abulut tun panhelheltap tu hi Job et nanna-ud ni iwwalleng Job hu tuka pengullug niya iddutan tu hi Apu Dios. Pinhed Apu Dios ni peang-ang e beken ni makulug huyya et iebulut tu hi Satanas ni mengippehelheltap nan Job. Niya in-abulut tun endien Satanas hu hipan wadan Job.

Yan nengamtaan idan tellun gagayyum Job e hi Eliphas, hi Bildad et hi Sophar humman idan ligat ni neipahding ni hi-gatu ey limmaw idan an menga-alluk ni hi-gatu. Nem entanni kumedek ey kanday wada impahding Job ni lawah et mukun kamanhelheltap. Tep kanday gullat ni endi lawah ni impahding tu, et eleg et iebulut Apu Dios ni an manhelheltap. Nem kan Job ey endi tu impahding ni an umhulun ni pengippehelheltapan Apu Dios ni hi-gatu. Sinaggan nan Job niyadda gagayyum tun himmenummangan meippanggep nunya. Entanni ey nakaddismayah hi Job et endi law petek tu hu tuka pannemnem ni nunyan ligat ni tuka helheltapa.

Lektattuy immehel hi Apu Dios nan Job et kantun hi-gatuy eleg kabaelin tuun ewwatan ni emin hu meippanggep ni pinhed tun pehding di tutu-u tu. Ya importanteh ni pehding ni tutu-u ey mandinnel idan Apu Dios ma-lat amtaen da e anin ni hipa meippahding ni hi-gada et nakappinhed tudda niya ippaptek tudda. (Hebrews 10:38 et yad Habakkuk 2:4) Inhel Apu Dios e hi-gatu keta-ta-geyyan niya hi-gatu hu wada kelebngangan tun mengippahding ni hipan pinhed tu niya limpiyuh ni emin tuka pehding.

Ya inedal Job di nanhelheltapan tu ey emin hu kai-abulut Apu Dios ni kameippahding idan nemihed ni hi-gatu ey mambalin ni panyaggudan da. (Romans 8:28 et yad James 5:11)

*Ya neitudek eyad libluh:*

1. Ya nengipehelheltapan Satanas nan Job et ya nengendian tun emin ni wadan hi-gatu. (chapters 1-2)
2. Ya nemangulun nanhuhummanganan di Job et yadda gagayyum tu. (chapters 3-14)
3. Ya meikkadwan nanhuhummanganan di Job et yadda gagayyum tu. (chapters 15-21)
4. Ya meikkatun nanhuhummanganan di Job et yadda gagayyum tu. (chapters 22-31)
5. Ya inhel nan Elihu. (chapters 32-37)
6. Ya humang Apu Dios nan Job et ya bendisyon tun hi-gatu. (chapters 38-42)

<sup>1</sup> Wada hakey ni tuun hi Job hu ngadan tun nambbley di Us. Hi Apu Dios hu tuka daydayawa niya tuka pannananeng hu tuka pengullug ni hi-gatu. Kayyaggud ni peteg hu elaw tu niya tuka hellipat-i ma-lat endi lawah ni tu pehding. <sup>2</sup> Hampulu u-ungnga tu e pitudda laki niya telludda bii. <sup>3</sup> Wada pitun libun kalneroh tu, tellun libun kamel tu, hanlibun baketu niya limanggatut ni kebayyu tu. Ey dakek bega-en tu. Hi-gatu kekekkekdangyanan idan nambbley di appit ni kasimmilin aggew.

<sup>4</sup> Yadda etan pitun lalakkin u-ungngan Job ey ida kamanhulluhullul ni mampehemmul. Daka eyyagidda etan tellun agi dan biin mekian-anlan hi-gada. <sup>5</sup> Hedin negibbuh ida u-ungnga tun nampahemul, man kaumbangun hi Job ni kamangkewa-wa ma-lat man-appit ni kagihheba, e humman elaw ni panlinnih tuddan emin ni u-ungnga tu. Huyya kapehding Job tep kantud nemnem tuy 'Entanni ey nanliwat ida u-ungngak e eleg da lispihuhen hi Apu Dios.'

<sup>6</sup> Hakey ni aggew ey limmaw ida anghel di kad-an APU DIOS ey nekilaw dama hi Satanas. <sup>7</sup> Et kan APU DIOS nan Satanas ey "Attu linallawwan mu?"

Ey kan Satanas ey "Nak ali nandaladalan di puyek." <sup>8</sup> Kan mewan APU DIOS nan Satanas ey "Kaw inang-ang mu etan bega-en kun hi Job? Endi hu henin hi-gatud puyek. Kayyaggud ni peteg elaw tu niya tuka pannananeng hu tuka pengullug ni hi-gak. Tuwak kadaydayawa niya tuka hellipat-i ma-lat endi ipahding tun lawah."

<sup>9</sup> Hinumang Satanas ey kantuy "Kaw makulug makkaw ni tuka daydayawen hedin endi tu gungunahen? <sup>10</sup> Annagam nem muka paka-ippaptek idan hampamilyah, anin idan hipan wadan hi-gatu. Niya muka bendisyonin emin hu tuka pehding. Ang-ang

mu kedi e kedangyan ni peteg! <sup>11</sup> Kedi nem endiem emin hu kinedangyan tu, ambeken lawah e-helen tun hi-gam!"

<sup>12</sup> Kan APU DIOS ey "Ku anin, emin hu wadan hi-gatu ey ngenamung kan pinhed mun pehding. Nem entan tu lipusi." Et hi-yanen nan Satanas hi APU DIOS et manglaw.

<sup>13</sup> Hakey ni aggew ni kapanhahamuliddan u-ungangan Job di baley ni pengulwan ni lakin u-ungga tu, <sup>14</sup> ey nambebossik ali hakey ni tuu et lumaw di kad-an Job et kantun hi-gatuy "Kami kaman-elladu e impangngunu midda etan lakkitun baka niya ida kamenge-ekkan etan di neihnup ni pattullan etan ida kebayyu, <sup>15</sup> ey entanniy wadadda immalin iSabeya et ibsik dan emin etan ida baka niyadda kebayyu. Niya pintey daddan emin hu bega-en mu et ebuhhak ni bimmesik, et deh e immali-ak ni mengippeamtan hi-gam."

<sup>16</sup> Eleg gibbuhen nunman ni bega-en hu tuka pan-e-hela ey dimmateng mewan hakey ni bega-en et kantuy "Linsitan ni kedyam ida kalneroh niyadda kamampattul et mangkatey ida. Ebuhhak ni natdaan, et deh e immali-ak ni an mengippeamtan hi-gam."

<sup>17</sup> Eleg gibbuhen nunman ni meikkadwan bega-en hu tuka pan-e-hela ey immali mewan hu hakey ni bega-en et kantuy "Immalidda tellun grupuh ni iKaldea et ibsik dadda kamel et pateyen dan emin hu bega-en mu. Ebuhhak ni natdaan et deh e immali-ak ni mengippeamtan hi-gam."

<sup>18</sup> Eleg tu gibbuhen hu tuka pan-e-hela ey immali mewan hu hakey ni bega-en tu et kantuy "Ida kamanhahamul hu u-ungngam di baley ni pengulwan mu, <sup>19</sup> ey immali nallet ni pewek ni nalpud eleg mebebleyi et tukkadenu tu etan baley et matey idan emin. Hi-gak ni ebuh hu eleg matey, et deh e immali-ak ni mengippeamtan hi-gam."

<sup>20</sup> Imminah hi Job et bi-kien tu balwasi tu, tep nemahhig lemyung tu. Minukmukan tu ulu tu et lumukbub di puyek et dayawen tu hi Apu Dios. <sup>21</sup> Kantuy "Yan neitungngaak ey endin hekey intabin ku, ey henin nunman alin ketteyyan ku e endi nak ittabin. Hi APU DIOS hu nengidwat ni emin ni kinedangyan ku niya emin hu wadan hi-gak, ey hi-gatu mewan hu nemangngad. Medeyyaw hu ngadan APU DIOS!"

<sup>22</sup> Anin ni neipahding ida huyyan ligat nan Job et eleg manliwat, tep eleg tu pabehul nan Apu Dios humman idan neipahding ni hi-gatu.

## 2

### *Ya nematnaan mewan Satanas nan Job*

<sup>1</sup> Entanni mewan ey limmaw ida etan anghel di kad-an APU DIOS et makilaw mewan hi Satanas. <sup>2</sup> Kan APU DIOS nan Satanas ey "Attu linallawwan mu?"

Kan Satanas ey "Nak ali nandaladalan di puyek."

<sup>3</sup> Kan APU DIOS ni hi-gatuy "Kaw inang-ang mu etan bega-en kun hi Job? Endi edum ni tuun henin hi-gatu. Kayyaggud ni peteg elaw tu niya tuka pannananeng hu tuka pengullug ni hi-gak? Tuwak kadaydayawa niya tuka hellipat-i ma-lat endi tu ipahding ni lawah. Imbagam ni hi-gak ma-lat iebulut kun pehding mu hu pinhed mun pehding ni hi-gatun lawah, anin ni endi himmulun. Nem anin ni hanniman et impannaneng tu hu tuka pengullug ni hi-gak."

<sup>4</sup> Hinumang mewan Satanas ey kantuy "Ya tuu ey dammutun illamngan tun emin nemet maituu. <sup>5</sup> Nem pandegeh mu kedi, lawah mannuman e-helen tun hi-gam."

<sup>6</sup> Kan APU DIOS ey "Anin, i-abulut kun ngenamung kan pehding mun hi-gatu, nem entan tu patey."

<sup>7</sup> Et hi-yanen Satanas hi APU DIOS et lumaw di kad-an Job et patmel tu hu dakel ni pelhad annel tu. <sup>8</sup> Limmaw hi Job di gilig ni kapengi-ibbengin lugit et pumi-dit ni teping ni naphik ni banga et pengel-id tun kimmelhin nenan pelha tu.

<sup>9</sup> Et kan ahwa tun hi-gatuy "Kele ingganah nunyay muka pannananeng hu muka pengullug nan Apu Dios? Ehel mu kuma lawah ni hi-gatu ma-lat matey ka ew katteg!"

<sup>10</sup> Himmumang hi Job ey kantuy "Hipa huttan ni muka pan-e-hela? Hedin tayu kaebbuluta hu kayyaggud ni kaiddawat nan Apu Dios ni hi-gatsu, ey mahapul ni ebbuluten tayu dama hu ligat ni tuka peelli."

Endi an inhel Job ni lawah nan Apu Dios, anin ni neipahding ida emin huyyan ligat ni hi-gatu.

### *Immalidda gayyum nan Job*

<sup>11</sup> Entanniy immalidda hu tellun gayyum Job e hi Eliphas e iTeman, hi Bildad e iSuaus ni hi Sophar e iNaamah. Dingngel da e nemahhig hu ligat Job et lumaw idan an mengaalluk ni hi-gatu. <sup>12</sup> Neidawwi ida pay ey inang-ang da hi Job nem eleg da immatunan. Nem entannit inimmatunan da law ey ida kamantete-ul et bi-kien da balwasi da niya inhebwag dad ulu da dep-ul, tep nemahhig lemyung da. <sup>13</sup> Et makiyuyuddung idan Job



di puyek ni pitun aggew niya pitun hileng, nem endi nan-e-ehhel ni hi-gada, tep daka ang-ang-anga e nemahhig hu tuka panhelheltapi.

### 3

*Ya lilih Job nan Apu Dios*

<sup>1</sup> Entanni ey immehel hi Job et lawah hu inhel tu meippanggep ni neiungnga-an tu. <sup>2-3</sup> Kantuy "Apu Dios, endim ew katteg hu aggew ni neiungnga-ak niya hileng ni nengapyaan idan a-ammed kun hi-gak. <sup>4</sup> Pambalin mu humman ni aggew ni engenget et liwwanan mu. <sup>5</sup> Ey pambalin mun beken ni pan-am-amlengan humman ni aggew. Hukbungim ni kulput ma-lat eleg mabnangan. <sup>6</sup> Ekal mu humman ni hileng et eleg maibilang di toon. <sup>7</sup> Pambalin mu humman ni hileng ni endi silbitu niya ang-ang mu et endi man-am-amleng. <sup>8</sup> Ehel mudda etan ni maeyak ni wada kabaelan dan mengippebuddal etan ni Lebayatan e angetakkut ni mategud baybay, ma-lat idutan da humman ni aggew ni neiungnga-an ku. <sup>9</sup> Entan tu pahyaw etan bittuwen ni kakkabbuhhan niya entan tu pabudal hu aggew ma-lat eleg mewa-wa et mannananeng ni engenget. <sup>10</sup> Em, idusim humman ni hileng, tep eleg tu upupen hu talun ina et deh e neiungnga-ak, ey nakka manligligat niya nakka umlelemyung.

<sup>11</sup> Kele eleggak ni-ngangu matey ni neiungnga-an ku? <sup>12</sup> Kele tuwak impenaptek e tuwak impainuinan nan ina di huhu tu et nak netagu? <sup>13</sup> Gullat et ngu, ey neteyyak et immen nak ni kamakallingep ni kaman-i-yyatu. <sup>14</sup> Ey nak et ngu kaman-u-uggip di kulung ku e heni-ak ida etan ni papatul niyadda opisyal ni nandingngel tep yadda etta-teng ni bebley ni impebehwat da. <sup>15</sup> Em, heballi ngu neteyyak et man-u-uggippak et heni-ak ida etan ni netey ni u-ungngan patul e napnu baley dan balituk niya silber, <sup>16</sup> winu heni-ak ni gelang ni netey ni neiungnga-an tu e eleg tu ang-angen hu kawwalwal. <sup>17</sup> Hedin netey hu tuu, man kamepappeg hu lawah ni tuka pehpehding niya kaman-yyatu hu neaton tuu. <sup>18</sup> Anin idan balud et melinggep ida hedin netey ida, tep endi law guwalyan mengibbungnet winu memabba-al ni hi-gada. <sup>19</sup> Yadda kekeddangyan niyadda nangkewetwet ey immen ida damad kulung. Yadda himbut ey liblih idelaw di kan himbut ni hi-gada. <sup>20</sup> Kele kai-abulut Apu Dios ni an mambi-biyag hu tuun kamanhelheltap e henin hi-gak? Ey kele eleg tu pappega hu biyag ni tuun nemahhig lemyung tu? <sup>21</sup> Daka abtui ketteyyan da, nem ayepaw ey eleg ida mettey. Daka peheballi hu kulung nem ya hipan nebalol ni tenged. <sup>22</sup> Tep endi damengu amleng dad biyag da ingganah ni ketteyyan da. <sup>23</sup> Kele kapannannaneng nan Apu Dios ni tegguen hu tuu ey endi damengu silbitu, tep endi namnamah tu? <sup>24</sup> Hi-gak katteg ngu ey kan mewan anhan ey mengngannak ey eleg, tep nemahhig lemyung ku niya nakka umpalapak. <sup>25</sup> Emin hu nakka tattakusi ey neipahding tu-wangun hi-gak. <sup>26</sup> Endi katteg linggep ku niya endi iyyatuk. Nemahhig ligat ku e endi pappeg tu."

### 4

*Ya nemangulun humang Eliphaz nan Job*

<sup>1</sup> Immehel hi Eliphaz ey kantuy <sup>2</sup> "Job, entan tu balaw hedin um-ehellak. Eleg mabalin ni nak pemegga i-ineng.

<sup>3</sup> Yan nunman ey hi-gam simmugutugun idan neliganan, ma-lat hi Apu Dios pandin-nelan da niya binaddangam ida hu kamanheppul ni baddang. <sup>4</sup> Indawtam ni kayyaggud ni tugun ida etan endi namnamah da et petuled mudda. <sup>5</sup> Nem yan nunyan hi-gam hu wada ligat tu ey kaka metemman pehding mu. <sup>6</sup> Dinaydayaw mu hi Apu Dios niya endi nambahulam. Et humman hu, gullat et, ey e-etteng dinel mu niya namnamah mu.

<sup>7</sup> Nemnem mu kedi, kaw wada hakey ni kayyaggud ni tuun nekalliganan? <sup>8</sup> Hedin ya ngu inamtak, man hedin lawah kapehpehding ni hakey ni tuu, ey lawah dama hu kameippahding ni hi-gatu. <sup>9</sup> Ey kababhahan Apu Dios ni bunget tu hu hanniman ni tuu. <sup>10-11</sup> Ya hanniman ni tuu ey heni mabunget ni layon ni kaman-elmam ni an menemmak ni animal ni petteyen tu ma-lat kanen tu. Nem hedin naplag hu ngipen tu ey eleg tu han-ipahding huyya et mettey ida impah tun upeda.

<sup>12</sup> Wada neipeamtan hi-gak ni endi hu edum ni nengamta, tep intuttubbu etan ni nanghel ni hi-gak. <sup>13</sup> Heni lemah humman e impabsik tu ugip ku. <sup>14</sup> Ey gimmeneygeyyak ni takut ku. <sup>15</sup> Entanni ey nelabah dibdib di angah ku ey nebugittak. <sup>16</sup> Nesiked etan dibdib ey wada inang-ang kun kaman-eh-ehngeng, nem eleg meimmatuni. Entanni ey dingngel ku intuttubbu tun hi-gak e kantuy <sup>17</sup> 'Kaw wada hakey ni tuun endi liwat tu e kakkayyaggud di hinanggan Apu Dios?'

<sup>18</sup> Tam anin idan anghel di kabunyan et eleg medinnel ni hi-gada. <sup>19</sup> Et humman hu, kaw kammu nem kamakaddinnel hi Apu Dios di tuun nekapyad puyek e nelakah

ni pepditen e henin pappayya? <sup>20</sup> Ya tuu ey anin ni mategun kakkabbuhhan et endi maptek ey netey ni mahmahdem. <sup>21</sup> Et humman hu, mettey hu tuu et hi-yanen tu emin limmu tu, et al-en ni edum ni tuu ey eleg tu awatan hu elaw ni neitu-wan tu.

## 5

<sup>1</sup> Kaw hedini um-ayag ka e Job ni umbaddang ey wada menengngud ni hi-gam? Anin na-mun mampebaddang kaddan anghel et endi um-alin umbaddang ni hi-gam. <sup>2</sup> Ikkatey mulli mannuman danag mu niya degeh ni nemnem mu. Hedin hanniman pehding mu ey heni endi nemnem mu. <sup>3</sup> Inenang-ang kudda tutu-un kulang nemnem dan melinggep ida, nem kekemtang ey immali ligat da. <sup>4</sup> Et endi linggep ni u-ungnga da niya endi mengi-ehngeng ni hi-gadad korteh. <sup>5</sup> Et ya law edum ni tuu mengellan enni da, anin idan kinedangyan da. <sup>6</sup> Kaw hipa nalpuan ni ligat hedini beken ni hi-gam metlaing? Amta tayu e eleg umtetmel di puyek, <sup>7</sup> tep ya tuu ey neungnga ngu dedan et manligligat e henin emsin apuy e kametu-ug.

<sup>8</sup> Heninnuy hu ittugun kun hi-gam: Attu kuma et ehelen mun emin nan Apu Dios eya kameipahpahding ni hi-gamey? <sup>9</sup> Tep dakel hu tuka pehding ni eleg tayu han-awat niya endi pappeg ni tuka ipahding ni miracle. <sup>10</sup> Tuka peelli udan ma-lat madenuman hu papayyew. <sup>11</sup> Hi-gatu mewan hu kamengippeta-gey idan tuun endi bilang tu niya hi-gatu kamengippeamleng idan tuun kaumlelemyung. <sup>12</sup> Tuka bahbaha planuh idan netalam ni tuu ma-lat mambalin ni endi silbitu. <sup>13</sup> Et yadda lawah ni implanuh dan pehding dan edum ni tuu ey kameipahpahding ngun hi-gada. <sup>14</sup> Henidda nekulap ni kamandapdapudap ni kawwalwal. Heni hileng ni ingganah ni hi-gada. <sup>15</sup> Nem yadda newetwet ey hi Apu Dios hu kamengihwang ni hi-gada et eleg ida matey. Ey tudda kabaddangi ma-lat ihwang tuddad kamengiddeliligat ni hi-gada. <sup>16</sup> Hi-gatu kamengidwat ni namnamah idan newetwet niya tuka pappega hu kaippenahding idan lawah ni tuu.

<sup>17</sup> Mebendisyonan etan tuun katuggunan Apu Dios. <sup>†</sup> Et humman hu, entan almet mun kapehding Apu Dios ni menuggun ni hi-gam, <sup>18</sup> anin hedini kantu et lipputan daka et peyaggud daka mewan. Ey hedini kantu et pedgehan daka ey a-alluken daka kaya. <sup>19</sup> Baddangan dakan ingganah ma-lat endi lawah ni meippahding ni hi-gam. <sup>20</sup> Ippaptek daka et tumegu ka hedini immali bisil, niya ippaptek daka hedini wada gubat ma-lat eleg ka matey. <sup>21</sup> Ippaptek daka ma-lat anin ni mengapkapya tuun bahu mu ey endi kaya an meippahding ni hi-gam ni lawah. Ey anin ni wada memahbah ni hi-gam et baddangan daka et meihwang ka. <sup>22</sup> Eleg ka umtakut ni angetakkut ni kameipahpahding, anin ni um-ali bisil. Ey eleg ka umtakut idan angetakkut ni animal di muyung. <sup>23</sup> Tep endi da pehding ni lawah ni hi-gam. Anin ni payew mu et meendiddalli hu babattu. <sup>24</sup> Melinggep kallid baley mu niya anin idan animal mu et endi hu el-eleg ni meippahding ni hi-gada. <sup>25</sup> Dakel idalli u-unggam niya henillin kedakkel ni helek di pattullan hu helag mu. <sup>26</sup> Andukkey ali biyag mu et meka-a-amma kalli ey han ka netey, henin pagey e hehgeden ni meka-teng ni han ineni.

<sup>27</sup> Makulug ida huyya e Job, tep inenang-ang tayun neipahding. Et humman hu, dengel mu huyyan itugun ku, et ipahding mu.<sup>7</sup>

## 6

### *Ya inhel Job*

<sup>1</sup> Himmumang hi Job et kantuy <sup>2</sup> "Gullat ni ikkiloh hu ligat ku niyadda eya nakka helheltapa, <sup>3</sup> et mebelbel-at na-mu nem yadda palnah di gilig ni baybay. Et humman hu, entan katnga yu eyan nakka pan-e-ehhel. <sup>4</sup> Heni tuwak pinenan Apu Dios et mangkaiwehit hu kedet ni panetud annel ku. Nantutu-nud tu hu angetakkut ni meippahding ni hi-gak. <sup>5</sup> Kaw endi kelebengan kun manlillih? Anin ni kebayyu niya baka et ida kaum-eluelug hedini endi kennen dan helek. <sup>6</sup> Ey anin ni hi-gatsun tuu et itu kamanlillih hedini endi ahin et endi tamtam ni kennen. Hipa makkaw neminhed ni kennen ni endi tamtam tu tep eleg maehinan? Niya kaw wada tamtam etan ni mablal ni parteh ni itlug, hipa tamtam tu? <sup>7</sup> Hedin hi-gak, man eggak kennadda humman ni kennen, tep heni eleg meekmun.

<sup>8</sup> Kele na-muy eleg iddawat Apu Dios hu nakka ibbagan hi-gatu? Kele eleg tu hummanga dasal ku? <sup>9</sup> Hebballi-ew katteg petteyen tuwak. <sup>10</sup> Hedin hanniman hu meippahding ni hi-gak, ey anin ni nemahhig hu nakka panhelheltapi et melinggeppak niya man-am-amlengngak tep inamtak e eggak ngehayen hu tugun nan Apu Dios e kayyaggud ni peteg. <sup>11</sup> Nem hipa inna-nuk ni meittu-u, ey ay endi elet ku niya endi

\* 5:12 5:12-13 Ang-ang yu hu 1 Corinthians 3:19. † 5:17 5:17 Deut. 8:5 Hebrews 12:5-6

namnamah ku? <sup>12</sup> Hi-gak ey nekapuyyak. Beken nak ni batu niya beken ni nekapyad giniling hu annel ku. <sup>13</sup> Endi law elet ku niya namnamah ku ey endi umbaddang ni hi-gak.

<sup>14</sup> Hedin makulug ni gayyum yuwak, man lebbengtun baddangan yuwak, anin ni kantu et inwalleng ku hi Apu Dios e Kabaelan tun emin. <sup>15</sup> Nem hi-gayun mismuh ni gagayyum ku hu kamengippeang-ang e eleg kayu meiddinnel. Heni kayun kulukul e ma-nu tep kamanla-la-pih hedin manginudan, <sup>16</sup> niya hedin neumah dallallu et mambalin ni danum, <sup>17</sup> nem hedin ugew ey kametduk et kamema-gani. <sup>18</sup> Et yadda etan kamanggettang ni kamengihhingngin daka dellana ma-lat ida uminum diman ey ida kame-ngangi. Et humman hu, dakek hu kamettey, tep ida kametellak di mamegan eleg mebebleyin hamak dan danum. <sup>19</sup> Hanniman ida dama kamanggettang ni iSeba niyadda iTema e dakek ni hi-gada et-eteng namnamah dan wada hemmakan dan danum ni innumen da, <sup>20</sup> nem kamepappeg namnamah dad gilig ni nema-ganan ni kulukul. <sup>21</sup> Heni kayuddan nunman ni kulukul e endi damengu hu ibbaddang yun hi-gak. Inang-ang yu ligat ku ey simmakut kayu, tep kanyu na-muy meippahding daman hi-gayu henin nunman ni ligat. <sup>22</sup> Nem kaw nambaga-ak ni hi-gayun iddawat yun hi-gak? Kaw nangkedewwak ni kinedangyan yu ma-lat usalen ku? <sup>23</sup> Kaw imbagak ni hi-gayu ma-lat ihwang yuwak di buhul ku et yaddad lawah ni tuu?

<sup>24</sup> Ehel yu et dengelen ku hedin hipa nambahulan ku et pamegak i-ineng. <sup>25</sup> Maggeh hu makulug ni ehel, nem eggak mekagehi, tep hipa silbin in-inhel yu e beken ni makulug? <sup>26</sup> Adyahhak e angehemmekkak ey kanyuy nalgenalgem hu nakka e-e-hela. Kaw kanyu nem nelaing kayun umtugun? Endi silbitu tugun yu eyad nakka panhelheltapi. <sup>27</sup> Dammutu pay ni pambalin yudda nepu-hig ni himbut niya dammutun iggatang yu gagayyum yu. <sup>28</sup> Iang-ang yun hi-gak. Kaw itek hu inhel ku? <sup>29</sup> Nemahhig kumamman huttan ni yuka pehpehding. Isiked yu huttan ni yuka e-e-hela e kanyuy nambahullak. Tep endi inamtak ni bahul ku. Entan tu pakdag ehehel. Hedin hi-gak ngu, man kayyagguddak. <sup>30</sup> Eggak man-itek. Kaw kanyu nem eggak amta hedin hipa hu kayyaggudd niya lawah?

## 7

<sup>1</sup> Kaw beken dedan ni neligat hu biyag ni tuu eyad puyek e henin kamekittangdan e kamanhelheltap? <sup>2</sup> Ya tuu ey henin himbut e kaum-abtun kehillengan tu ma-lat man-iyatu. Ey henin kamekittangdan e tuka hehhegeda tangdan tu. <sup>3</sup> Hedin hi-gak ngu man nakka umlelemyung ni kewa-wa-wa niyan kahilehileng tep endi law namnamah kud neitu-wan ku. Huyya katteg ngu indawat Apu Dios ni neitu-wan ku. <sup>4</sup> Hedin nehileng et bimmaktaddak man nakka abtui hu kewa-waan tu. E-eggel ni nampiggaddak, tep ayepaw ey eleg mewa-wa. <sup>5</sup> Nebighan hu annel ku niya kaman-aayuh hu nenan pelhak.

<sup>6</sup> Anggegannuy kamenglaw hu aggew ku e heni hangkedem ni ebuh. Ey endi namnamah kun meteggu. <sup>7</sup> 'Apu Dios, entan tu anhan liwwan e heni hakey ni yayyah ni ebuh hu biyag ku et endi law nak pan-an-anlaan, tep anggegannuy mepappeg law hu biyag ku. <sup>8</sup> Muwak kaang-ang-angan nunya, nem eleg muwak ali law ang-anga. Muwak ali hemmakan, nem endi-ak ali law, tep metteyyak. <sup>9-10</sup> Ya tuu ey henin kulput e hedin neendi man eleg law mambanggad. Henin nunman hu tuu e hedin netey man eleg law mambanggad et liwwanen law idan emin ni nengamtan hi-gatu. <sup>11</sup> Maggeh hu nemnem ku niya nakka umlelemyung. Et humman hu, mahapul ni umehellak ma-lat ehelen ku gibek ku. <sup>12</sup> Kele muwak kaguguwalyai, kaw heni-ak etan ni angetakkut ni mategud baybay? <sup>13</sup> Hedin bimmaktaddak ma-lat patnaak ni man-iyatu et kangku et melilliwwan hu ligat ku, <sup>14</sup> man muwak katenattakkuta kumedek di muka pei-innep ni hi-gak. Dakek muka peang-ang ni angetakkut niya muwak kalelmama. <sup>15</sup> Et humman hu, nakka pekeddukdul hu hehkelen muwak et mateyyak nem ya nak meteggu manhelheltap. <sup>16</sup> Hiyya ew katteg hu mambiyag. Imminglayyak law eyan neitu-wan ku. Et humman hu, entan tuwak ikakkaguh et ngenamungngak ew ngu. Endi damengu silbin biyag ku. <sup>17</sup> Kaw hipa ngu anhan hu tuu, et mu ikakkaguh? \* <sup>18</sup> Muka hellipat-in emin hu tuka pehpehding ni kewa-wa-wa, et muka iddawsin panliggatan tu ma-lat pematnam ni hi-gatu. <sup>19</sup> Kaw dammutu anhan ni iwingim di pangil ni nekemtang? <sup>20</sup> Hipa nambahulan kun hi-gam, e kamengu-uhdung ni tuu? Kele hi-gak mu pinilin panhelheltap? Kaw hi-gak kaum-idwat ni ligat mu? <sup>21</sup> Kaw eleg mu liwwana liwat ku? Anggegannu law ey meikkullungngak et muwak ali hemmakan ey endi-ak.' "

\* 7:17 7:17 Psalms 8:4 et ya 144:3

## 8

*Ya inhel Bildad*

<sup>1</sup> Entanniy himmumang hi Bildad e iSuah ey kantuy <sup>2</sup> “Kaw tattaggan mu ehehel eyan legelegem ni muka e-e-hela? <sup>3</sup> Kaw beken ni meandeng ni emin hu kapehding nan Apu Dios? Kaw tuka ihhalla hu neiptek? <sup>4</sup> Ku nanliwat ida na-mu u-ungngam nan Apu Dios et humman hu nengastiguan tudda tep humman dedan lebbeng tun meippahding ni hi-gada. <sup>5</sup> Nem anin ni hanniman et pandasal kan Apu Dios e Kabaelan tun emin ma-lat mampehemhemmek kan hi-gatu. <sup>6</sup> Tep hedin makulug ni kayyaggud kan tuu man baddangan daka et pebangngad tun emin hu neendin hi-gam. <sup>7</sup> Et yalli kinedangan mun iddawat Apu Dios ni hi-gam ey daddakkel ali anhan law ni peteg nem ya la kinedangan mun nunman.

<sup>8</sup> Nemnem mu kedi kalinaing idan tuun nunman niya nemnem mudda hipan inedal ida eman lan aammed tayu. <sup>9</sup> Ya tuu ey kulang hu inamta tu niya ansikkey hu biyag tu e heni alinnew ni nelabah. <sup>10</sup> Nem anin dengel mu niya adal mu hu intuttudduda lan nelaini na aammed tayun nunman.

<sup>11</sup> Ya katlubbung ey yad wada danum daka tetmeli tep eleg ida meteggud mamega. <sup>12</sup> Hedini mema-ganan hu puyek ey hi-gada memengngulun mekling, anin ni eleg ida ni ma-tengan. <sup>13</sup> Heniddan nunman ni katlubbung hu tutu-un mengiwalleng nan Apu Dios e meendi namnamah da. <sup>14</sup> Ida kamandinnel di hipan kabbabahbah e henin tawang ni kakkawwa. <sup>15</sup> Me-gah ita kumedek hedini ittetnged diman tep beken ni nehammad ni pengitngedan. Henin nunman dama hu sinulid e entan tu itnged diman tep eleg daka hanhedel. <sup>16</sup> Yadda tuun eleg mengu-unnud nan Apu Dios ey henidda mateban neitnem e mahkang hu inakyaman da. <sup>17</sup> Nangkeilipet hu lamut dad batu et eleg law me-kal. <sup>18-19</sup> Nem hedini nelekhadda man mettey ida et meendidda. Meihhullul ali mewan edum ni umtemel et meliwwan ida la etan nemangulu e heni eleg ida tummel diman.

<sup>20</sup> Yadda tuun daka pannananeng hu daka pengullug nan Apu Dios ey eleg tudda iwalleng, nem hedini yadda lawah ni tuu ey eleg tudda baddangi. <sup>21</sup> Et humman hu, hedini mengu-unnud kan Apu Dios e Job, ey pebangngad tulli kaya amleng mu et umngingi kalli mewan. <sup>22</sup> Nem yadda buhul mu ey be-ingen tuddalli niya bahbahaen tulli nanha-adan da.”

## 9

<sup>1</sup> Immehel mewan hi Job ey kantuy <sup>2</sup> “Em, inamtak e makulug ida huttan ni inhel mu. Nem kaw dammutun wada tuun endi liwat tud hinangngab Apu Dios? <sup>3</sup> Anin ni kantu et iddiklamuh ni hakey ni tuu hi Apu Dios, kaw kabaelan tun hummangan hu hakey ew ngud hanlibun pinhed Apu Dios ni mahmahan ni hi-gatu? <sup>4</sup> Eleg, tep nekallaing niya et-eteng hu kabaelan Apu Dios. Endi hakey ni tuun dammutun mekihhanggan hi-gatu.

<sup>5</sup> Endi maptek ni ginlid tu duntug niya bahbahaen tun bunget tu. <sup>6</sup> Tuka peelli yeyeg niya tuka iggiwwed ida batun yinudangan ni puyek. <sup>7</sup> Kabaelan tun eleg peukkat hu aggew niya bittuwen. <sup>8</sup> Endi nemaddang ni hi-gatun nengibiklag ni kabunyan niya endi nemaddang ni hi-gatun nengigsin etan ni angetakkut ni mategud baybay. <sup>9</sup> Lintu tun emin hu bittuwen e ya Dipper, ya Orion, niya Pleades, anin ida etan ni bittuwen ni wadad appit ni south ni kabunyan. <sup>10</sup> Humman idan emin ni impahding tu ey ita kametnga, niya eleg mebillang hu miracle ni tuka pehding.

<sup>11</sup> Eggak han-ang-ang hi Apu Dios, anin ni meihnup winu melebbah. <sup>12</sup> Hedini impalaw tu katey ni mengellan hakey ni tuu, ey endi dammutun an menikked ni hi-gatu. Endi mewan hu hakey ni tuun kantung hi-gatuy ‘Hipa muka pan-ippahding?’ <sup>13</sup> Nemahhig hu bunget Apu Dios. Tudda kapetteya buhul tu e henin Rahab, \* niyadda etan keka-ka-letan ni nekihhanggan hi-gatu.

<sup>14</sup> Et humman hu, hipa-ak kuman an mekihhanggan hi-gatu? <sup>15</sup> Ya dammutun ebuhi ni pehding ku ey mampehemhemmekkak nan Apu Dios e huwet ku, anin ni kantu et endi nambahulan kun hi-gatu. <sup>16</sup> Anin ni kantu et i-abulut tun um-ehellak ey amtak damengu e eleg tu dedngela e-helen ku. <sup>17</sup> Tep indawtan tuwak ni dakei ni ligat ku ey endi bahul ku. <sup>18</sup> Nantutu-nud hu impaeli tun ligat ku e endin hekey battan tu. <sup>19</sup> Et-eteng hu kabaelan tu. Endi mei-inggeh ni hi-gatu. Ey endi me-hel ni bahul tu tep meandeng hu tuka pehding. <sup>20</sup> Hedini kangkuy endi bahul ku niya kangkuy nakka paka-u-unnuda hi Apu Dios ey nanna-ud ni kantuy neihla-ak.

<sup>21-22</sup> Makulug ni endi bahul ku nem eggak law ikkaguh hu biyag ku tep impeinglay ku. Endi damengu silbitu biyag tep anin ni kantu et nambahul etan tuu winu eleg ey

\* 9:13 9:13 Yadda dewwan kameingnadin Rahab ey ya etan angetakkut ni mategud baybay niya Egypt.

petteyey ida damengun Apu Dios. <sup>23</sup> Kamekangngi-ngi hi Apu Dios hedin endi maptek ey netey hu tuun endi bahul tu. <sup>24</sup> Ya kangku ey indawat Apu Dios hu kebbebbley eyad puyek idan lawah ni tuu. Tuka kullapadda huwet et beken ni meandeng hu daka pehding. Kaw hipa edum ni kamengippahding nunya hedin beken ni hi-gatu?

<sup>25</sup> Ya aggew ni pambiyagan ku ey napnun ligat niya anggagannun kamenglaw nem ya etan tuun na-let ni umbesik. <sup>26</sup> Em, ya aggew ku eyad puyek ey henin bapor ni anggagannuy kamenglaw niya henin kapenggagannuun tulduh ni mengkeb ni kenneh tu. <sup>27</sup> Hin-addum ni nakka patnain issiked ni manlillih ey nakka ippilit ni peamleng hu annel ku, <sup>28</sup> anin ni nanengtun nakka manhelheltap. Nem inamtak metlaing e nanengtun ya kapannemnem nan Apu Dios ey wada bahul ku. <sup>29</sup> Et humman hu, anin ni hipa pehding ku ma-lat peang-ang ku e endi bahul ku et endi damengu silbitu. <sup>30</sup> Anin dedan ni kangku et ullahak hu bahul ku e tebbunek ma-lat maka-olahan, <sup>31</sup> ey i-ibbeng da-ak damengun Apu Dios di tuplak et malugittak et anin na-mun balwasik et ibbaing tuwak.

<sup>32</sup> Nem hi Apu Dios ey beken ni tuu et nak idiklamuh di korteh ma-lat ipenuh midman hu nanhallaan mi. <sup>33</sup> Anin dedan, et hipa kuma dammutun mengpennuh ni kasuh mi? <sup>34</sup> Hipa dammutun mengkal ni kabaelan Apu Dios ma-lat eggak law tumekut ni hi-gatu <sup>35</sup> niya ma-lat tumuledak ni um-ehel ni hi-gatu? Nem anin ni kantu et eleggak mabalin ni um-ehel ni hi-gatu, tep endi damengu tuled ku.

## 10

<sup>1</sup> Imminglayyak law di neitu-wan ku niya maggeh ni peteg nemnem ku. Imay, et umhellak et ehelen ku meippanggep ni degeh ni nemnem ku. <sup>2</sup> Heninnuy hu e-helek nan Apu Dios: 'Beken ni neala ey kammuy wada bahul ku. Ehel mu hedin hipa nambahulak. <sup>3</sup> Hipa gun-uden mun mengpelilligat ni hi-gak? Ey kele muwak iwwalleng e lintum? Manudda hu lawah ni tutu-u tep mudda kapeamleng niya mudda kapekeddangyan. <sup>4</sup> Kaw neingngeh hu muka penang-ang di kapenang-ang ni tuu? <sup>5</sup> Ey kaw ansikkekey hu biyag mu e henin biyag ni tuu, <sup>6</sup> et humman hu muka abtuin puhdanan hedin nambahullak? <sup>7</sup> Ey anin na-mun inamtam dedan e endi bahul ku et kastiguen muwak damengu ey endi mengihwang ni hi-gak di kabaalam.

<sup>8</sup> Hi-gam hu nanletun hi-gak, nem yan nunyay hi-gam damengu memahbah ni hi-gak. <sup>9</sup> Apu Dios, nemnem mu e puyek hu kinapyam ni hi-gak. Kaw anggagannu mewan ey pebanggad muwak di puyek e nalpuan ku? <sup>10</sup> Wineda muwak et peatteng muwak di egeh ina. <sup>11</sup> Kinapyam hu nangketuketuan ni annel ku e genit niya ulat et libutan mun laman niya belat, <sup>12</sup> et idwat mu yayyah ku. Ey impaptek muwak et mategu-ak niya impeang-ang mu hu eleg melumman ni impeminhed mun hi-gak.

<sup>13</sup> Nem ay hedin ya wadad nemnem mu <sup>14</sup> ey hellipat-am hu pambehhulan ku ma-lat kastiguen muwak. <sup>15</sup> Hedin nanliwattak ey muwak kaiddawsin ligat ni helheltapen ku. Nem hedin neiptek hu impahding ku ey endi silbitun hi-gam. Anggehemmekkak katteg ngu niya angeba-ang hu neitu-wan ku. <sup>16</sup> Hedin kayyaggud hu kameipahpahding di biyag ku, ey dedwengen muwak e heni ka layon ma-lat liputan muwak, et humman pengipeang-angam ni et-eteng ni kabaalam. <sup>17</sup> Eleg mekehing hu muka puttukan mengiheddak e nebahulannak et kamangkema-ma bunget mun hi-gak. Ey tagan mu planuh ni pehding mun hi-gak ma-lat panhelheltap muwak.

<sup>18</sup> Apu Dios, kele dedan mu in-abulut et nak maiungnga? Kele eleg muwak pateyen ni neiungngan ku ma-lat endi nenang-ang ni hi-gak? <sup>19</sup> Heballi ew dedan hu eleg muwak wadaen winu neiungnga-ak nem neteyyak et meni-wehhaak di kulung. <sup>20</sup> Nebilang law aggew ku, et humman hu, kangkuy ettu-et anhan et dekugen muwak ni nekemtang et luminggeppak ni ekket. <sup>21</sup> Umlawwak dedangngu etan di bebley ni engeenget e kaumlemyung hu tuu et eggak ali law mambanggad. <sup>22</sup> Endi petekkan tudman niya engeenget ni peteg e heni gawan hileng ni neyun.' "

## 11

### *Ya inhel Sophar*

<sup>1</sup> Himmumang hi Sophar e iNamaah ey kantuy <sup>2</sup> "Hipa menummang idan nunyan legelegem ni inhel mu? Kaw ya kadinakkel ni ehel ni tuu hu pengi-ang-angan e endi bahul tu? <sup>3</sup> Kaw kammu nem eleg mi hanhumang eya muka e-e-hela? Ey kaw kammu nem pemegga mi i-ineng eyan muka penaltalanggain Apu Dios? <sup>4</sup> Kammuy makulug eya muka e-e-hela niya kakkayyaggud kad hinangngab Apu Dios. <sup>5</sup> Hamban um-ehel hi Apu Dios ma-lat ehelen tun hi-gam hu wadad nemnem tu ey <sup>6</sup> niya ma-lat peamta tun hi-gam hu ustuh ni laing. Dakel mannuman hu eleg tayu amta niya eleg tayu han-awat.

Ya kakulugan tu ey kinulngan Apu Dios hu kastiguh mu nem ya etan lebbeng tu et dedan ni pengastigu tun hi-gam.

<sup>7</sup> Kaw dammutu kuman amtaem hu eleg peamtan Apu Dios e Kabaelan tun emin? Ey kaw dammutu kuman amtaem emin hu meippanggep ni hi-gatu? <sup>8</sup> Eleg, tep endi hakey ni tuun wada kabaelan tun man-ewwat nan Apu Dios. Hedin hi-gatu man eleg melkud hu amta tu e henin kadinawwin puyek di kabunyan niya henin kadinalem ni puyek e endi lekud tu. Kaw hipa ka kuma et meingingeh hu inamtam di inamta tu? <sup>9</sup> Ya inamtan Apu Dios ey eleg melkud, kamei-ellig e mahmahkang nem ya puyek, niya melallakkeb nem ya baybay. <sup>10</sup> Gullat ni kantu et pedpap dakan Apu Dios et ilaw dakad korteh, ey hipa wada kabaelan tun mengippesikked nunman ni pehding tu? <sup>11</sup> Tep inamtan Apu Dios hedin hipa tuun endi silbitu niya tuka hellipat-i hu panliwwatan nunman ni tuu. <sup>12</sup> Kaw dammutun man-impah hu kebayyun tuu? Ey kaw dammutun menemneman niya umlaing hu tuun endi nemnem tu?

<sup>13</sup> Ku gullat ni kayyaggud hu wadad nemnem mu niyad puhum et mandasal kan Apu Dios. <sup>14</sup> Niya mantuttuyyu kan liwat mu ey issiked mun mengippahding ni lawah, <sup>15</sup> malat yumaggud ka kaya et keang-angan tun endi bahul mu. Lektat tu kaya ey umtuled kan eleg ka umtatakut. <sup>16</sup> Melebbah kaya ligat mu et liwwanem et henin kakelebbahin danum di daul ni langtay. <sup>17</sup> Et ya neitu-wan mun kamei-ellig ni engeenget ey kawwalwal ali nem ya emaggew henin tuka kewa-wain kakkabbuhhan. <sup>18</sup> Ippaptek dakan Apu Dios et tumuled ka tep mewedda namnamah mu ey man-iyatu ka niya umlinggep ka. <sup>19</sup> Eleg ka law umtatakut ni buhul mu niya dakel hu mampebaddang ni hi-gam. <sup>20</sup> Nem yadda lawah ni tutu-u ey endi namnamah dan meihwang. Ebu hu katey ni daka hehhegeda."

## 12

<sup>1</sup> Himmumang hi Job et kantuy <sup>2</sup> "Tam nakallaing ka ni-ngangu e amtam ni emin. Nanna-ud ni mettey ka kedi, et endi law hu edum ni nelaing. <sup>3</sup> Tam anin daman hi-gak et wada nemnem ku. Inamtak ida dama huttan ni in-inhel mu. Kaw kammu nem kulang inamtak nem hi-gam? <sup>4</sup> Hi-gak ey endi bahul ku niya meandeng nakka pehding. Yan nunman ey hedin nandasallak nan Apu Dios man tuka hummanga dasal ku. Nem yan nunya ey da-ak kang-ngi-ngiiddan gagayyum ku. <sup>5</sup> Anin ni hi-gayu et yuwak kang-ngi-ngiin nunya tep endi ligat yu. Heni yuka ittuldun hu tuun ngannganih ni me-gah. <sup>6</sup> Nem ya kakulugan tu ey anin idan mangkatekew niyadda kamengippebungnet nan Apu Dios et daka iddinel hu elet da e heni humman hu dios da niya melinggep ida.

<sup>7</sup> Hedin pinhed yu ewwatan hu elaw ni biyag, man nemnem yudda sisit, <sup>8</sup> anin idan mategun wadad puyek niyad baybay, <sup>9</sup> tep hedin hi-gada man inamta da e hi APU Dios hu nanletun hi-gada. <sup>10</sup> Hi-gatu hu kamengittunduk ni elaw ni biyag idan lintu tu niya hi-gatu nangged ni biyag ni tuu. <sup>11</sup> Hi-gatu nengapyan bungut ma-lat kayyaggud hu penamtam ni mepelhat ni kennen. Ey hi-gatu nengapyan tangila e pinpinhed tun dedngelen hu kayyaggud ni ehel.

<sup>12</sup> Ya nea-amman tuu ey nenemneman niya nelaing tep andukkey hu nambiyagan tu. <sup>13</sup> Nem nelalla-ing hi Apu Dios niya kabaelan tun ippahding emin hu pinhed tu. <sup>14</sup> Yadda tuka bahbaha ey eleg law mabalin ni meiyayyaggud niya hedin ingkalebut tu tuu man eleg mabalin ni umbebsik. <sup>15</sup> Hedin mewan pinhed Apu Dios ni meuggew ey eleg tu peelli udan. Ey hedin mewan pinhed tun melbengan hu puyek ey tuka peelli na-let ni udan.

<sup>16</sup> Naka-let hi Apu Dios ey hi-gatu kamengapput ni ingganah. Hi-gatu ngenamung ni pehding tuddan maheul niyadda kamehe-ul ni tutu-u. <sup>17</sup> Tuka pambalin hu nekallaing niya nekannemneman ni ap-apun endi inamta tu. <sup>18</sup> Tuka pe-kal ida patul di daka pan-ap-apui ni impakelabut tudda. <sup>19</sup> Ey tuka pebabah hu saad idan papaddi niyadda aap-apu. <sup>20</sup> Tudda kapeinneng ida matugun ni kapandinneiddan tutu-u niya tuka endia laing ni nangkea-amma. <sup>21</sup> Tudda kabe-inga hu nangketa-gey saad da ey tuka pappega nan-ap-apuan idan aap-apu.

<sup>22</sup> Ey tuka walwali nemahhig ni engeenget, anin di attu. <sup>23</sup> Ey tuka pambalin ni naka-let hu tutu-ud hakey ni bebley, nem entanni ey impeapput tudda metlaing niya impedakkel tudda ni inwahit tudda mewan. <sup>24</sup> Tuka pambalin hu aap-apun henin endi nemnem da. Ey inwalleng tudda et eleg da law amta pehding da e heniddan netalak ni tuud eleg mebebleyi. <sup>25</sup> Et henidda wadad engeenget e ida kamangkapakapa niya henidda nebuteng e ida kamandiwadiwag.

## 13

<sup>1-2</sup> Inang-ang kudda niya dingngel kudda lan nunman emin eya in-inhel yu. Ey nakka ewwasin emin e henin-ak ni hi-gayu, niya dakel dama inamtak. Kaw kannyu nem kulang

inamtak nem hi-gayu? <sup>3</sup> Ya pinhed kun pekihummangan ey hi Apu Dios e kabaelan tun emin, beken ni hi-gayu. Pinhed kun hi-gatu mismuh hu pengibgaak ni pinhed kun ibbaga. <sup>4</sup> Hedin hi-gayu man itek hu yuka e-e-helan meippanggep ni hi-gak. Heni kayuddan kaman-eggah nem endi daka eggahi, anin ew ngun hakey. <sup>5</sup> Heballi um-i-ineng kayu et eleg meamta e endi inamta yu. <sup>6</sup> Pandengel kayu et ehelek hu pinhed kun e-helen.

<sup>7</sup> Kele maitek kayu? Kaw kanyu nem dammutun i-ehneng yu hi Apu Dios ni penghelan yun itek? <sup>8</sup> Ey kaw hi-gayu hu mengi-ehneng ni hi-gatud kasuh tu? <sup>9</sup> Kaw makulug makkaw ni endi hu ang-angen Apu Dios ni lawah ni hi-gayu? Ey kaw kanyu nem dammutun i-ittekan yu hi Apu Dios henin yuka pehding ni tutu-u? <sup>10</sup> Anin ni ittalu yud nemnem yu hu lawah ni elaw yu et ibbunget dakeyu damengu. <sup>11</sup> Kaw eleg kayu umtakut ni kasina-gey nan Apu Dios? <sup>12</sup> Endi silbin yuka e-e-hela. Heni dep-ul e endi silbitu niya heni bangan pula e kabbabahbah.

<sup>13</sup> I-ineng kayu et hi-gak dama umhel. Ngenamunggak, anin ni hipa meippahding ni hi-gak. <sup>14</sup> Nandaddannak di hipan meippahding ni hi-gak. <sup>15</sup> Anin ni petteyen tuwak Apu Dios ni nanlilihan kun hi-gatu. Ey anin ni endi namnamah kun mebaddangannak \* nemet ehelen ku lilih kun hi-gatu. <sup>16</sup> Nem nakka medinnel e meihwanggak tep inamtak e endi bahul ku, tep gullat ni wada bahul ku et eleg mabalin ni nak mekihhanggan hi-gatu.

<sup>17</sup> Pakadngel yu eya e-helek. <sup>18</sup> Naka-iddaddan ku e-helen kun hi-gatu ey inamtak e neiptekak. <sup>19</sup> Kaw wada kahing eyan inhel ku? Hedin wada hemmakan yun kei-angan-an tu e neihalla-ak ey anin ni pemeggak i-ineng ingganah metteyyak."

<sup>20</sup> Immehel mewah hi Job ey kantuy "Apu Dios, dewwan ebuh ibbagak ni hi-gam ey hedin tetbalem, ey e-helen kun emin et endi nak ittalun hi-gam. <sup>21</sup> Isiked mu anhan ni mengastigon hi-gak niya entan tuwak petattakut. <sup>22</sup> Hi-gam pamengulun um-ehel ni hi-gak et humangek, winu iebulut mun um-ehellak et humangeng. <sup>23</sup> Kaw hipa nanliwatak niya hipa lawah ni impahding ku? <sup>24</sup> Kele muwak inwalleng, ey kele heni buhul muwak ni muka pehding ni hi-gak? <sup>25</sup> Ey kele muwak katennattakkuta ey endi damengu silbik tep heni-ak bulung ni keyew ni kameihhuyahuyay? Niya kele heni muwak kapeppepduga ey heni-ak nema-ganan ni dagemi ebuh.

<sup>26</sup> Dakel hu lawah ni muka pebehul ni hi-gak, anin idan impahding kun keu-unggak. <sup>27</sup> Heni mu binangkiling hu helik niya muka hellipat-i keglidan ku, anin ya gassin ku. <sup>28</sup> Mambabbabballak ni mettey e heni-ak keyew ni kamangkedunnut niya heni-ak luput ni kinelakelat ni ballaeng.

## 14

<sup>1</sup> Emin hu tuu ey nekapuy ida niya endi kabaelan da. Ansikkey hu biyag da ey napnun ligat. <sup>2</sup> Henidda etan ni habung e ma-nut nebekyag nem nekemtang ey nakling. Henin allinnew ni kulput e nekemtang ni attukaw la. <sup>3</sup> Apu Dios, kaw hellipat-an muwak et idiklamuh muwak ma-lat ehelen mu kastiguk? <sup>4</sup> Kaw dammutun wada hu tuun endi tu pambehulan? <sup>5</sup> Implanuh mu ngu dedan hedin piga toon niya bulan ni ketegguan ni tuu. Ey eleg mabalin ni me-duman hu binilang mu. <sup>6</sup> Et humman hu diman et ngenamung tun man-iyayaton nekemtang. Heni dedangngu katted bega-en, et humman hu, entan tu helipat-i et gibbuhen tu ngunu tun indawat mun hi-gatu.

<sup>7</sup> Ya keyew ey anin ni nalngeh et wada namnamah ni umpingi et pumenga hedin neetteng. <sup>8-9</sup> Ey anin ni nedunut hu tunged tu et umpingi lamut tu hedin immudan.

<sup>10</sup> Nem hedin ya tuu et netey, ey humman pappeg ni neitu-wan tu et endi law mannemnem ni hi-gatu. <sup>11</sup> Henin wangwang niya lebeng e kametduk ni nema-ganan. <sup>12</sup> Hedin netey hu tuu ey eleg law umbangun ingganah ni keendian ni kabunyan.

<sup>13</sup> Nem hedin ngun hi-gak man nakka pekeddukdul ni mettey et muwak itlud dallem ni puyek et hedin na-kal law bunget mu ey hehmeken muwak. Ey ettu ew et getuden mu hu pengihwangan mun hi-gak ey. <sup>14</sup> Nem kaw hedin netey hu tuu man metegguan ali mewah ni edum ni aggew? Ey hedin makulug ni hanniman hu meippahding, man anin ni nemahhig eya nakka helheltapa et nakka namnamahan mepappeg hu ligat ku. <sup>15</sup> Ey eyyagan muwak et humumanggak ey um-amleng kan hi-gak e lintum. <sup>16</sup> Et yalli law pehding mu ey hellipat-an muwak nem beken ni ya nanliwatak. <sup>17</sup> Ey liwwanem alin emin hu nambahullak ma-lat ibilang muwak ni kayyaggud.

<sup>18-19</sup> Nem ya kakulugan tu ey muka endia namnamah ni tuu e henin kakegdayin duntug et mangkaulin hu etta-teng ni batu, ey henin kakebullubulin puyek tep ya na-let ni udan. <sup>20</sup> Muka apputadda tuu, ni inendim ida, ey muka bahbaha ang-ang da hedin

\* **13:15** 13:15 Ya hakey ni keibbellinan tu ey nanengtun kanamnamahan Job e baddangan Apu Dios.

netey ida et mudda kapellaw etan di da panha-adan ni ingganah. <sup>21</sup> Eleg da amta hedin meiddeyyaw winu mebe-ingan hu u-ungnga da. <sup>22</sup> Ebuh law daka panhelheltapin daka giggibeka ey ida kaumlelemyung.”

## 15

<sup>1-3</sup> Entanni ey kan Eliphaz nan Job ey “Kaw henin nuntan hu kapenappihappit ni nenemneman ni tuu? Hiyya law, entan tu tagan ehel. Endi damengu silbi tun emin eya muka e-e-hela. <sup>4</sup> Kaw endi lispituh mu ey kaw eleg ka umtakut nan Apu Dios? <sup>5</sup> Kamakamta hu kalinewah mud muka pan-e-ehhel, nema-ma tep muka henniin hapit mu hu muka pehpending. <sup>6</sup> Anin ni eggak e-hela e nambahul ka, et hi-gam ngu nengipeamta eyad muka pan-e-ehhel.

<sup>7</sup> Kaw kammu nem hi-gam nemangulun tuun neiungnga? Ey kaw newada ka eman ni nanletuan Apu Dios idan duntug? <sup>8</sup> Kaw wada kan nekideddengel ni planuh Apu Dios? Kaw hinakkeyam hu laing? <sup>9</sup> Niya kaw hipa ni-man hu inamtam ni eleg mi amta? <sup>10</sup> Ya nan-adalan min laing mi ey yadda nangkea-amman nangkeubanan e na-na-tengan ida nem hi amam.

<sup>11</sup> Kaw beken ni kabbabbal hu kapan-e-ehhel nan Apu Dios? Hipa pay muka heppula? <sup>12</sup> Kele eleg mu pakannemnema ni bimmunget ka? <sup>13</sup> Inwalleng mu hi Apu Dios et deh e lawah eya muka pan-e-helan hi-gatu tep bimmunget ka. <sup>14</sup> Kaw mabalin ni wada hakey ni tuun kayyaggud di hinanggan Apu Dios? <sup>15</sup> Anin idan anghel et eleg makaddinnel hi Apu Dios ni hi-gada tep beken idan kayyaggud ni peteg. <sup>16</sup> Et nema-ma ngu hu tuu e nakalliwatan, e ihik ni mengippahding ni lawah.

<sup>17</sup> Dengel mu kedi e Job eya e-helek ni inamtak. <sup>18</sup> Makulug ida huyyan intuttuddun nangkelang niya nangkenemneman ni hi-gak. Dingnel dadda dama huyyan aammed da <sup>19</sup> e hi-gada hu neidwatan ni bebley eman ni endi ni hu edum ni tutu-un nambebley diman.

<sup>20</sup> Yadda lawah ni tuun daka panliligat hu edum dan tuu ey manhelheltap idalli ingganah ni kepappegan ni neitu-wan da. <sup>21</sup> Nemahhig hu takutakut dallin ingganah. Anin ni wada ni linggep et ida kaumtakut ni um-alin menggep ni hi-gada. <sup>22</sup> Ida kaumtakut ni um-ehep hedin engeenget tep entanniy pintey dadda. <sup>23</sup> Ida kamandaladalan ni an menemmak ni kennen da, nem endi daka hemmaka. Ey ida kaumtatakut tep inamta da e anggagannu law ey mettey ida. <sup>24</sup> Nemahhig takut dan nunman ni meippahding ni hi-gada e henin takut da etan ni patul ni um-alin mengubbat ni hi-gada. <sup>25</sup> Henin nunman hu kameippahding di tuun daka taltalangga niya daka ngenggehaya hi Apu Dios e Kabaelan tun emin. <sup>26</sup> Ihik idan mekihhanggan hi-gatu e henidda sindalun mekiggubbat e nehammad hu happyaw da.

<sup>27</sup> Huyyaddan lawah ni tuu ey kekeddangyan ida niya mangkatebadda. <sup>28</sup> Nem mangkebahbah ali bebley da et mampambebley idallid nehi-yan ni bebley niya manhad idad kamangkebahbah ni baballey. <sup>29</sup> Meendilli kinedangyan da. Eleg meihhinnap hu kinedangyan dad dakel ni bebley.

<sup>30</sup> Eleg mabalin ni da ibbebsikan hu engeenget ni panha-adan da. Heniddalli etan ni keyew ni megihheb tep heng-aban idallin Apu Dios et mebahbah ida. <sup>31</sup> Eleg dalli law iddinel hu kinedangyan dan endi silbi tun edum ni aggew, tep endi gun-uden da. <sup>32</sup> Anggegannulli ey mepappeg biyag da et meendin emin hu nandinelan da. <sup>33</sup> Heniddalli hu lameh ni grapes ni nepugah ey eleg maluum, niya heniddalli habung ni olibah ni nangkaplak. <sup>34</sup> Yadda tuun lawah nemnem da ey eleg ida mehlag. Ey mangkegihheb ali baballey dan napnun sinekew da niya piniliw da. <sup>35</sup> Hi-gada hu kamaplennuh niya kamengippahding ni lawah niya maheul ida.”

## 16

### *Ya humang Job*

<sup>1</sup> Himmumang mewan hi Job et kantuy <sup>2</sup> “Eleggak mea-alluk ni nuntan idan in-inhel yu. Yu anhan law kumedek kapedgeh nemnem ku. Hakey pay ey dingnel ku dedangngu ida la huttan. <sup>3</sup> Et humman hu, i-ineng kayu law. Kele kayu kaum-ehehel? <sup>4</sup> Gullat namun hi-gayu hu kamanhelheltap ni heni eyan ligat ku, ey mabalin ni hannitan na-mu dama hu pan-e-ehhel kun hi-gayu. Tagan ku dama pihul ni hi-gayu ey nanwigiwiggak di hinangga yu, hedin heni-ak ni hi-gayu. <sup>5</sup> Nem bekennak ni henin hi-gayu. Tep gullat ngun hi-gak et ya penga-alluk kun hi-gayu hu e-helen ku. <sup>6</sup> Anin ni kangkuy endi bahul ku, et eleg yu damengu ebbuluta. Et humman hu, anin ni hipa e-helen ku et endi ibbaddang tu. Ey hedin eggak um-ehel ey eleg mee-ekkali hu nakka helheltapa.



<sup>7</sup> Apu Dios, nemahhig ni ligat hu indawat mun hi-gak. In-abulut mun mettey ida familyah ku. <sup>8</sup> Ey ang-ang mu kedi impahding mun annel ku. Impambalin mun genit et mablitan et huyya law hu daka penghelin nakalliwatannak.

<sup>9</sup> Kaumbubunget hi Apu Dios ni hi-gak niya angebe-hel tuwak ni peteg et heni tuwak bineni-ki. <sup>10</sup> Angebe-hel da-ak idan tutu-u ey da-ak kangi-ngi-ngii niya da-ak kakeammumungi ni inamping da-ak. <sup>11</sup> In-abulut Apu Dios ni pehding idan lawah ni tuu huyyan hi-gak.

<sup>12</sup> Yan nunman ey melinggep hu biyag ku. Nem yan nunya ey heni intenged Apu Dios di buklew ku et pan-iwedwed tuwak et punpuntaen tuwak. <sup>13</sup> Endin hekey hemek Apu Dios ni hi-gak. Heni tu bineal ida memennan hi-gak et halikuban da-ak et pampanaen da-ak et man-iih-ih hu kuheyaw kud puyek. <sup>14</sup> Hi Apu Dios ey heni etan ni sindalun nemahhig bunget tu e e-eggel ni liniputan tuwak. <sup>15</sup> Adyahhak ni kamanyuyyudding di dep-ul e langgusih balwasik. <sup>16</sup> Intagan ku nangih et lumtuk hu matak. <sup>17</sup> Ey endi inamtak ni bahul ku niya endi lawah ni indasal ku.

<sup>18</sup> Hi-gam e puyek hu tistiguk! Entan tu ta-buni eya kuheyaw ku. Humman mengippeamtadda eyan neipahding ni hi-gak. <sup>19</sup> Wada mengi-ehngeng ni hi-gak di kabunyan. Ey hi-gatu tistiguk. <sup>20</sup> Anin ni inwalleng da-ak ni gagayyum ku et wada hi Apu Dios ni pandasalan ku. <sup>21</sup> Hamban anhan wada mengi-ehngeng ni hi-gak di hinanggan Apu Dios ni henin kapengi-ehngeng ni dewwan hanggayyum ey. <sup>22</sup> Tep anggegannu law kepappegan ni aggew ku et umlawwak etan di keltad ni mampellaw etan di eleg mabalin ni nak ali law mambanggad.

## 17

<sup>1</sup> Endi law namnamah ku. Kamangkepappeg hu neitu-wan ku et kamangkedettengi law keikkullungak. <sup>2</sup> Adyah e hinelikuban da-ak ida eyan tutu-un kameneghegnud ni hi-gak.

<sup>3</sup> Apu Dios, iehngeng muwak anhan et iuh-uh mu e endi bahul ku tep endi edum ni mengi-ehngeng ni hi-gak, anin ni hakey. <sup>4</sup> Eleg da kulluga hu nakka e-hela tep inendim hu daka pan-ewwat, nem mahapul ni peang-ang mun hi-gada e neihalladda. <sup>5</sup> Ya hakey ni tuu ey tuka ihhedul gayyum tu tep ya gun-uden tu, nem manhelheltap ali u-ungnga tu tep ya humman ni impahding tu.

<sup>6</sup> In-abulut mun ngi-ngi-ngian da-ak idan tutu-u niya panlupdaan da angah ku. <sup>7</sup> Eleg law um-aang-ang matak tep ya nanginangih ku. Nekappiguttak et heni-ak law allinnew. <sup>8</sup> Yadda kayyaggud ni tuu ey ida kametnga hedini inang-ang da hu neipahding ni hi-gak. Ey ida kaumbubunget idaddan gagayyum kun endi silbi da. <sup>9</sup> Mukun hanniman ey tep yadda kayyaggud ni tutu-u ey kamangkeihhammad hu daka pengu-unnudin Apu Dios.

<sup>10</sup> Nem hedini hi-gayu man makulug ni endi hakey ni nelaing niya endi nenemneman. <sup>11</sup> Kamangkepappeg hu biyag ku ey endi hu nambalanan ni planuh ku niya endi law namnamah ku. <sup>12</sup> Nem hi-gayuddan gagayyum ku ey kanyuy kawwalwal hu hileng niya kanyuy anggegannu ni newa-wa. Nem hedini katted ngun hi-gak ey inamtak e nanengtun wada-ak di engeenget. <sup>13</sup> Endi law nakka namnamahan lawwak hedini beken di bebley ni netey et yadman di engeenget hu nak pan-u-uggipan. <sup>14</sup> Et heni amak hu kulung ku ey heni inak niya aaggik ida etan bigih ni menggan ni annel ku. <sup>15</sup> Hipa tep law namnamah ku? Ey hipa mengidwat ni namnamah ni hi-gak? <sup>16</sup> Kaw hipa namnamahan kun gun-udek hedini mambalin eya annel kun dep-ul di bebley ni netey?"

## 18

### *Ya inhel Bildad e iSuah*

<sup>1</sup> Hinumang Bildad hi Job e kantuy, <sup>2</sup> "Ettu et umi-ineng ka e Job et dengelem hu e-helen min hi-gam ey? <sup>3</sup> Kele kammuy endi amta mi e heni kami baka? <sup>4</sup> Mu kumedek kapanligat annel mu tep ya bunget mu. Kaw hipa dama ibbaddang ni bunget? Kaw dammutun mehullulan hu puyek niya mangkepikwal hu babattud deplah tep ya bunget mu? <sup>5</sup> Makulug ni anggegannu neendi lawah ni tuu e heni dilag ni me-dep <sup>6</sup> et ma-nget di kad-an tu. <sup>7</sup> Ma-nu tep meandeng hu tuka pandellan, nem meihhungbub tep hi-gatu ngu hu keippahdingan ni lawah ni planuh tu. <sup>8-10</sup> Eleg tu amta e wada keknaan tun neidaddan di dellanen tu, henin bitu, et nanna-ud ni meknalli.

<sup>11</sup> Et humman hu, kaumtatakut law ni ingganah. <sup>12</sup> Kedangyan ni nunman nem yan nunya ey kameuppa niya heni kamanhehhegged hu ligat di habyen tu. <sup>13</sup> Anggetakkut hu degeh tun neiwehit di annel tu ey kamangkebwel hu heli tu niya ngamay tu. <sup>14</sup> Heni nepilit ni neipa-hep di baley tun kakkayyaggud et hanggaen tu hu patul ni katey. <sup>15</sup> Ey megihheb hu baley tu, anin idan hipan wadadman. <sup>16</sup> Henin keyew ni nema-ganan

annel tu niya lamut tu et matey. <sup>17</sup> Et endi law mee-ehhel ni hi-gatud bebley tu, anin di edum ni bebley, ey endin ingganah law hu mannemnem ni hi-gatu. <sup>18</sup> Ey me-kal law di bebley idan mategu et lumaw di engeenget, <sup>19</sup> niya endi metdaan ni helag tun mategu. <sup>20</sup> Et emin hu tuu meippalpud appit ni kasimmilin aggew ingganah di tuka kelinnugi ey umgeygey idan takut dan pengngelen dan nunman ni meippahding ni hi-gatu. <sup>21</sup> Henin nunman hu meippahding idan lawah nemnem tun tuun daka iwwalleng hi Apu Dios.”

## 19

### *Ya inhumang Job*

<sup>1</sup> Himmumang mewan hi Job et kantuy <sup>2</sup> “Pigan pengissikkedan yun um-ehehel tep-ay yuka panma-maa hu nakka panhelheltapi? <sup>3</sup> E-eggel ni pinel-itan yuwak. Eleg kayu pay anhan umbaing ni nuntan ni yuka pehpending. <sup>4</sup> Anin dedan ni kantu et makulug ni wada lawah ni impahding ku, ey ngenamungngak ngu, entan pekidimdima-u. <sup>5</sup> Kaw kanyu nem kekeddukdul kayu nem hi-gak? Ey kaw kanyu nem ya eya ligat kun nakka helheltapa hu keang-angan tun makulug ni nekalliwtannak? <sup>6</sup> Kaw eleg yu ang-anga e hi Apu Dios hu nengipahding nunya? Heni-ak naknad kineman inheged tun hi-gak.

<sup>7</sup> Nakka manlillih, nem endi kamenengngud ni mengngel ni hi-gak. Ey nakka manheppul ni umbaddang ni hi-gak, nem endi kamemaddang ni hi-gak. <sup>8</sup> Heni hinenian Apu Dios hu dellanen ku ey engeenget et eggak han-ang-ang. <sup>9</sup> Binangngad tun emin kinedangyan ku et ekalen tu dayaw ku. <sup>10</sup> Heni tuwak bineni-ki niya inendi tu namnamah ku. <sup>11</sup> Kamei-ellig di apuy ni kamantettebbel bunget tun hi-gak, et humman hu, nemahhig tuka pehding ni hi-gak e heni tuwak buhul. <sup>12</sup> Ey heni tu impaelidda sindalu tun mengubbat ni hi-gak et halikuban da-ak ma-lat depapen da-ak.

<sup>13</sup> Impambalin tudda aaggik niya gagayyum kun eleg umhidit ni hi-gak tep anggebel da-ak. <sup>14</sup> Anin idan nengam-aman hi-gak et eleg da-ak law amta. <sup>15</sup> Yadda etan mangilik ni kaum-alialid baley ni nunman ey eleg idelaw umdu-ngaw. Anin idan bega-en kun bibi-i et heni-ak nalpud edum ni bebley e eleg da-ak law amta. <sup>16</sup> Hedin nakka man-e-ehhel idan bega-en ku man eleg da-ak law hengnguda. <sup>17</sup> Hedin ya dama ahwak ey eleg meihnup ni hi-gak tep nakka manhemmu. Anin idan aaggik et eleg ida meihnup ni hi-gak. <sup>18</sup> Da-ak kaheghegnudaddan u-ungnga niya da-ak kangngi-ngi-ngi hedin inang-ang da-ak. <sup>19</sup> Inwalleng da-ak idan nehammad ni gagayyum ku anin idan nakappinhd ku. <sup>20</sup> Nekappiguttak e heni-ak genit et mablatan ey innang ni metteyyak.

<sup>21</sup> Hemek yuwak kedi anhan e gagayyum ku tep hannya impahding Apu Dios ni hi-gak. <sup>22</sup> Kele yuka pan-edumi hu ligat ni impehakbat tun hi-gak? Kaw yuka e-nguhi eya nakka helheltapa?

<sup>23</sup> Ma-nu-et anhan nem wada mannemnem ni mengittuddek eyan nakka e-e-hela et kapyaen dan libluh, <sup>24</sup> winu ikku-lit dad batu ma-lat mannananeng diman ni ingganah. <sup>25</sup> Nem inamtak e wadalli um-alin melpud kabunyan ni mengi-ehngeng ni hi-gak. <sup>26</sup> Ey inamtak e anin ni metteyyak et mabwel hu annel ku et ang-angen kulli hi Apu Dios. <sup>27</sup> Em, makulug ni ang-angen kulli hi Apu Dios! Ey nakka um-aabtun menang-ang ni hi-gatu!

<sup>28</sup> Nem ay hi-gayuddan gagayyum ku ey kayu kaumhamahamak ni ippakpak yun hi-gak ni bahul niya yuka pedgeh hu nemnem ku tep kanyuy bahul ku eya nakka panhelheltapi. <sup>29</sup> Nem pinhd kun amtaen yu e anin ni hi-gayu et mekastigu kayu tep ya henin nuntan ni yuka pannemnemnem. Et yan nunnan ali pengamtaan yu e wada kameuwes emin ni tuu.”

## 20

### *Ya inhumang Sophar e iNaamah*

<sup>1</sup> Hinumang Sophar e iNaamath e kantuy <sup>2</sup> “Nakka umguguu eyan in-inhel mu, et humman hu, mahapul ni um-ehellak. <sup>3</sup> Insisipel ku hu pel-it mun hi-gami nem mahapul law ni hummangen daka.

<sup>4</sup> Kaw eleg mu amta e neipalpu eman ni laputun nanha-adan ni tuud puyek, <sup>5</sup> ey nekemtang ni ebu hu kapan-an-anlain tuun nekalliwtan? <sup>6</sup> Anin ni meetteng kabaellan tu et nemahhig hu tuka pampahhiya e dettengen tu kabunyan <sup>7</sup> et meitteyyab alin heni dep-ul. Et an ali hemmahemmakken idan nengamtan hi-gatu et kanday ‘Attu na-mu linawwan tu?’ <sup>8</sup> Attukaw ali e eleg meang-ang, henin i-innep ni hileng e kameendi. <sup>9</sup> Anin idan gagayyum tu niyadda pamilyah tu et endilli law hu da penang-angan ni hi-gatu. <sup>10</sup> Et mahapul alin pebangngad idan helag tu hu hipan illa tudan nangkewetwet. <sup>11</sup> Kat-agu niya na-let humman ni tuu, nem anggegannuy mettey et mambalin ni puyek.

<sup>12-13</sup> Tuka pan-am-amlengin mengippahding ni lawah, henin amleng ni kapengngan-nin meheng-ew ni kennen. <sup>14</sup> Nem mambalin ni mapeit di egeh tu e henin pait ni kedet. <sup>15</sup> Mei-ellig ni i-uta tullu sinekew tun kinedangyan, tep ukkatan Apu Dios di egeh tu et banggaden tu. <sup>16</sup> Ey mei-ellig ni ekmunen tullu gitan uleg et iketey tu <sup>17</sup> et eleg tu law pan-am-amlengi kamehawwahawwal ni mansikan olibah, ya gatas niya putsukan. <sup>18-19</sup> Endi silbin nan-aatuan tu ey endi gun-uden tu, tep sinelatlam tu hu nangketwet et peki-la tu baballey da. <sup>20</sup> Ya neagum ni tuu ey pinhed tun ellan emin hu hipan pinhed tu e endi hu kantun hiyya law. <sup>21</sup> Nem ya hanniman ni tuu ey meendilli kinedangyan tu, anin ni ya kennen tu.

<sup>22</sup> Yallin keddangyanan tu ey umdateng ali hu nemahhig ni ligat ni memahbah ni hi-gatu et maumah hu kinedangyan tu. <sup>23</sup> Heballi peellin Apu Dios hu nemahhig ni ligat tu tep ya bunget tun hi-gatu. <sup>24</sup> Anin ni ipatna tun ibbebsikan hu peellin Apu Dios ni panliggatan tu et petteyen damengun Apu Dios. <sup>25</sup> Heni mangkeippa-net di annel tu hu pana et man-ih-ih kuheyaw tu et lektattuy nemahhig hu takut tu.

<sup>26</sup> Mebahbah emin hu nebalol ni limmu tu tep peellin Apu Dios hu apuy et giheben tun emin. <sup>27</sup> I-uh-uh idan wadad kabunyan niyad puyek e nekalliwtan humman ni tuu. <sup>28</sup> Ey mebahbah emin kinedangyan tu tep ya bunget Apu Dios ni hi-gatu, henin kababhahan ni baley hedini nalbengan hu puyek. <sup>29</sup> Henin nunya meippahding etan ni lawah ni tuu tep humman inhel Apu Dios."

## 21

### *Ya inhel Job*

<sup>1</sup> Immehel mewan hi Job ey kantuy <sup>2</sup> "Dengel yu anhan eya e-helek ma-lat humman penga-alluk yun hi-gak. <sup>3</sup> Entan inglay yu et umhellak. Hedin negibbuhhak, ey anin ni hehgnud yuwak.

<sup>4</sup> Hi APU DIOS hu panlillihan ku, beken ni ya tuu, tep kele kabaelan tun emin ey eleg tuwak baddangi? <sup>5</sup> Gullat et dedan et metnga kayun menang-ang ni hi-gak. <sup>6</sup> Hi-gak mismuh ey nakka metnga niya nakka umgeygey hedini ninemnem ku eya neipenahding ni hi-gak.

<sup>7</sup> Kele kai-abulut Apu Dios ni meteggu hu lawah ni tuu ingganah maka-a-ammadda niya tudda kapekeddangyan? <sup>8</sup> Ida kamehlag niya andukkekey hu biyag da et daka ang-anga keettengan idan u-ungnga da niyadda inap-apuda. <sup>9</sup> Ey endi kapeellin Apu Dios ni memahbah ni pamilyah da niya endi daka tekkusi. <sup>10</sup> Anin ni halun da et kayyaggud hu daka pan-impah. <sup>11</sup> Ida kamaman-an-anla u-ungnga dan kaum-ena-ayyam, heniddan impah ni kalneroh ni kaumpenaypaytuk. <sup>12</sup> Ida kamenattayyaw, ida kaumgeniggittalah niya ida kaum-ena-ayyuding. <sup>13</sup> Mekallinggep hu biyag da niya endi ligat ni daka helheltapa ingganah mettey ida. <sup>14</sup> Anin ni hanniman et kanda kumedek nan Apu Dios ey 'Eleg daka mahapul ni hi-gami niya eleg mi pinhed ni amtaen hu pinhed mun meippahding di biyag mi.' <sup>15</sup> Ya kanda ey eleg mahapul ni u-unnuden hi Apu Dios, niya endi gun-uden dan mandasal ni hi-gatu. <sup>16</sup> Ey kanday kayyaggud hu biyag da tep ya kabaelan da. Nem hedini hi-gak ngu man enggak ebbuluta humman ni kapannemnemnem.

<sup>17</sup> Nem kaw kastiguen idan Apu Dios? Eleg! Pinpinhakkey kaelliin ligat ni hi-gada. Ey hedini mewan wada impaeli tun ligat tep ya bunget tu ey eleg ida meilleggat. <sup>18</sup> Kaw kastiguen tudda henin kapehding ni na-let ni dibdib ni dagemi e tuka pan-ityab, winu hedini dep-ul ni kaittayab ni pewek? Eleg!

<sup>19</sup> Kanyuy 'Kastiguen Apu Dios ida u-ungnga tep ya liwat ni ammed da.' Nem eleg, tep yadda ngu etan nanliwat hu kastiguen Apu Dios ma-lat peang-ang tu e tuka ippahding humman tep ya liwat da. <sup>20</sup> Mahapul ni yadda nambahul hu meneltap ni nambahulan da ma-lat gibeken da hu bunget Apu Dios e Kabaelan tun emin. <sup>21</sup> Kaw hedini netey hu tuu man tu mewan law nenemnem hedini melinggep hu pamilyah tu winu eleg? <sup>22</sup> Hipa ni-ngangu dammutun an mengituttuddun Apu Dios ni pehding tu? Kaw ambeken hi-gatu huwet ni emin ni tuu?

<sup>23-24</sup> Ya edum ni tuu ey kayyaggud ni ingganah hu annel da e endi degeh da. Endi ligat da niya ida kaman-an-anla ingganah ketteyyan da. <sup>25</sup> Yadda dama edum ey nekawwetwet ida et angehemmek ida ingganah ketteyyan da. <sup>26</sup> Nem nan-iingngeh idan emin e mebiggihan idad kulung da.

<sup>27</sup> Inamtak et el-eleg hu yuka pannemnem ni hi-gak. <sup>28</sup> Kan yud nemnem yuy 'Attu mewan hu baley etan ni kedangyan ni peteg ni tuun lawah hu tuka ippenahding ey?' <sup>29-30</sup> Emin hu tuu, anin di attu ey daka ebbuluta et pinpinhhakkey anhan law hu

kapengippeellin Apu Dios ni ligat idan kamengippahding ni lawah. <sup>31</sup> Endi kamenge-ehhel ni nambahulan da niya endi kamengastigun hi-gada. <sup>32</sup> Ey hedini netey ida man nemahhig kapandeyyaw ni tuun hi-gada. <sup>33</sup> Dakel hu tuun kamekillaw di da pengikkullungan ni hi-gada niya dakel hu kaumlelemyung ni neteyyan da. Beken ni ehub humman tep melinggep idan kamambakbaktad.

<sup>34</sup> Hedin hi-gayu ngu dama ey endi silbitu yuka e-e-hela. Et inna-nu makkaw ni penga-allukan yun hi-gak ni henin nunman ni yuka e-e-hela?"

## 22

### *Ya inhumang Eliphaz e iTeman*

<sup>1</sup> Himmumang hi Eliphaz e iTeman et kantuy <sup>2</sup> "Hipa silbi tayun tuu nan Apu Dios? Endi. Ya kakulugan tu ey anin idan kelalla-ingan et endi silbi dan hi-gatu. <sup>3</sup> Anin ni kantu et endi liwat ni hakey ni tuu, et hipa humman nan Apu Dios e Kabaelan tun emin? <sup>4</sup> Kaw ya muka penaydayawin hi-gatu hu himmulun ni nengipahdingan tuddan nuntan ni hi-gam ma-lat tugunen daka? <sup>5</sup> Beken mannuman, tep ya himmulun ey ya dakel ni liwat mu et keang-angan ni kalinewah mu.

<sup>6</sup> Inlam hu balwasin tuun eleg tu hambayad hu utang tu et endi law ibbalwasi tu. <sup>7</sup> Eleg mu idwatan ni kennen niya danum ida neupa niya na-wew ni tutu-un immalin an nambagan hi-gam, <sup>8</sup> anin ni kedangyan kan peteg, ey kaka medeyyaw niya et-eteng kabaalam. <sup>9</sup> Eleg mudda baddangan hu nangkebalu, ey pinili mu limmuddan nepu-hig, niya impanligligat mudda. <sup>10</sup> Et humman hu kameipahpahding ida huttan ni anggetakkut ni hi-gam, <sup>11</sup> e heni ka wadad engeenget niya heni ka nalsing di lebeng.

<sup>12</sup> Hi Apu Dios e wadad kabunyan ey tuka uh-uhdungin emin hu bittuwen. <sup>13</sup> Kaw kammu nem eleg han-ang-ang Apu Dios hu kad-an mud engeenget? <sup>14</sup> Ey kaw kammu nem hennian ni kulput hu matetun tuka pandalladallanid kabunyan di ta-pew ni puyek, et eleg tu ang-anga hu muka pehpending? <sup>15</sup> Kaw eleg mu issiked ni pehding hu henin kaippenahding idan lawah ni tutu-u?

<sup>16</sup> Yadda lawah ni tuu ey endi maptek ey neendidda, anin ni eleg ni medatngan hu nagtud ni aggew ni ketteyyan da e henidda in-anud ni nedakkel ni danum. <sup>17</sup> Mukun hanniman meippahding ni hi-gada ey tep inwalleng da hi Apu Dios e kandan hi-gatuy 'Ngenamung kami ngu. Kaw hipa dammutun pehding mun hi-gami?' <sup>18</sup> Ey hi-gatu nengidwat ni emin ni kayyaggud ni hi-gada. Tawwey, eggak han-awat hu kapannemnem idan nunman ni tutu-u.

<sup>19</sup> Ida kamangggaya ey ida kamakangngi-ngi hu kayyaggud ni tutu-u hedini inang-ang da e nekastigu hu lawah ni tuu. <sup>20</sup> Kanday 'Nanna-ud ni mebahbah ni emin hu kinedangyan idan lawah ni tuu. Hedin wada mewah hu metdaan ni eleg mebahbah ey megihheb di apuy.'

<sup>21</sup> Pampekumbabah ka kumaddan nan Apu Dios e Job ma-lat bendisyonan daka mewah ni hi-gatu. <sup>22</sup> Abulut mu hu tuka ituttuddu niya nenemnem mu et eleg mu liwwanen. <sup>23</sup> Hedin mambanggad kan mengu-unnud ni hi-gatu et issiked mun manliwwat ey kayyaggud law kaya hu meippahding di biyag mu. <sup>24</sup> Entan law tu gagamgami hu pihuh niya pan-ibbeng mudda balituk mu. <sup>25</sup> Hi Apu Dios e Kabaelan tun emin hu kamei-ellig ni pihuh mu niya balituk mu.

<sup>26</sup> Et um-amleng ka kayan mandinnel ni hi-gatu e Kabaelan tun emin. <sup>27</sup> Ey hedini mandasal kan hi-gatu man hummangen tu dasal mu, ey pehding mu hu insapatah mun hi-gatu. <sup>28</sup> Kayyaggud ali pambalinal ni emin ni pehding mu et yumaggud kaya neituan mu. <sup>29</sup> Ey hedini wada tuun neipebah niya nedismayah ey indasalam, ey nanna-ud ni baddangan Apu Dios humman ni tuu. <sup>30</sup> Hedin makulug ni muka paka-u-unnuda hi Apu Dios ey baddangan mudda nanliwat ma-lat meihwang ida."

## 23

### *Ya inhel Job*

<sup>1</sup> Immehel mewah hi Job ey kantuy <sup>2</sup> "Mahapul ni manlillihhak nan Apu Dios tep tuwak kapanhelheltap e eleg tuwak hehmeka. <sup>3-4</sup> Gullat et anhan ni inamtak hu nak penemmakan ni hi-gatu et umlawwak di kad-an tu et nak makihummangan ni hi-gatudman, <sup>5</sup> ma-lat dengelek hedini hipa kantu ey ma-lat awatan ku e-helen tu. <sup>6</sup> Kaw apputen tuwak tep eta-gey ni peteg saad tu? Eleg! Inamtak et dedngelen tu e-helen ku. <sup>7</sup> Tep kayyagguddak ni tuu et dammutun mekihummangannak ni hi-gatu. Nakka panna-ud e e-helen tu e endi bahu ku.

<sup>8-9</sup> Eggak amta kad-an Apu Dios. Anin ni attu nak penemmakan ni hi-gatu et endidman. Ey ma-nu tep inamtak e wada hi Apu Dios, nem eggak han-ang-ang. <sup>10</sup> Nem inamta tun

emin hu nakka pehpehding. Et humman hu, hedin patnaan tuwak, ey ang-angen tu e heni-ak etan ni nemamah ni baliutuk.

<sup>11</sup> Naka-u-unnud ku hu pinhed tun pehding ku. Endi nak impangil. <sup>12</sup> Inu-unnud kun emin hu intuttuddu tun pehding ku. Ey nakka pekeddukdul hu ehel tu nem ya kennen. <sup>13</sup> Nem hedin hi-gatu man tuka pehding hu pinhed tu tep hi-gatu ebuh hu Dios. Hipa kuma hu dammutun menullul ni ninemnem tun pehding tu? <sup>14</sup> Endi, tep tuka ippahding hu hipan implanuh tun pehding ni hi-gak. Hi-gatu ngenamung ni pambalanan ni biyag ku. <sup>15</sup> Et humman hu, nakka umtatakut ni hi-gatu. Ey hedin nakka nemnemnema hu meippanggep ni hi-gatu man nakka umgeygey ni takut ku. <sup>16-17</sup> Impambalin tuwak ni makattakut. Hi Apu Dios e Kabaelan tun emin hu nakka tekkusi, beken ida eya lawah ni kameipahpahding ni hi-gak e kamei-ellig di engeenget.

## 24

<sup>1</sup> Kele na-mu eleg gegtudan Apu Dios hu penuwetan tun tutu-u? Kele eleg mepappeg hu kapanhehhegediddan kamengu-unnud ni hi-gatu? <sup>2</sup> Yadda lawah ni tuu ey daka panideldel hu puyek ni edum dan tuu niya daka pantakewa kalneroh ni edum et i-dum dad kalneroh da. <sup>3</sup> Daka ella hu kebayyuddan nepu-hig niya daka ella hu bakaddan nebalun bii ingganah beyyadan da utang da. <sup>4</sup> Eleg da ibbilang hu kelebengan idan newetwet, niya dadda kapetattakut et humman hu mahapul law ni ida mantellu. <sup>5</sup> Et henidda law immeyew ni kebayyud kad-an ni eleg mebebleyi e ida kaan menemmahemmak ni kennen da niya ippakan dan u-ungnga da. <sup>6</sup> Et humman hu ida law kaan mekiennid beken da payew ey ida mengehchim ni grapes ni intanem idan lawah ni tuu. <sup>7-8</sup> Endi baley dan ennamutan da et daka pemega ugip ni hileng e endi wanggal da niya balwasi da et ida kamekekkel. Hedin immudan man ida katteg kamegeggepet niya ida kameihhukkip di leyang.

<sup>9</sup> Yadda lawah ni tuu ey daka panhimit hu u-ungngaddan nebalun bii. Ey daka ella u-ungngaddan nangkewetwet ma-lat maibeyad idad utang ni a-ammed da. <sup>10</sup> Dadda kapillitan panggunnud payew anin ni nambelad ida, tep endi katteg balwasi da. Ey ida kameu-upan manggunnu tep endi kennen da. <sup>11</sup> Ma-nu tep ida kamengapyan mansikan olibah nem eleg da tamtami niya ida kamengapyan meinum ni grapes, nem ida kamewew. <sup>12</sup> Kapelapelak ida nangkeliptan ni kamangkettey, nem eleg hengngudan Apu Dios ni dedngelen hu dasal da.

<sup>13</sup> Yadda lawah ni tuu ey daka ngengngehaya hi Apu Dios. Eleg da ebbuluta hu tuttuddu tun kamemnang ni nemnem niya eleg da ippahding hu pinhed tu. <sup>14</sup> Ida kaumhaleman ni umbangun ma-lat da pampateyen ida nangkewetwet. Ey hedin nehileng man ida mewan menekew. <sup>15</sup> Yadda edum ni lalacki ey daka hehhegeda kehillengan tu ma-lat eleg ida meang-ang ni da pengi-ulligan ni beken da ahwa. <sup>16-17</sup> Yadda edum ey ida kaman-u-uggip ni kawwalwal ni ida nenakew ni hileng. Ya engeenget hu pinpinhed da, beken ni ya kawwalwal, tep impeingha da hu lawah ni kameipahpahding di engeenget.

<sup>18-19</sup> Nem meendidda hu lawah ni tutu-u eyad puyek ni mategu e henin kakeummahin upag di danum niya henin kakeendiin dallallud mamegan puyek hedin pimmetang. Ey inidutan Apu Dios hu puyek da et endi law kaumlaw diman ni an manggunnu. <sup>20</sup> Et endi law hu an mannemnem ni hi-gada, anin idan ineda et liwwanen dadda. Kennen alin bigih hu annel da. Ey heniddalli etan ni nalngel ni keyew. <sup>21</sup> Hanniman hu meippahding ni hi-gada tep eleg dadda hehmeka hu nebalu niya nebasi, nem impanhelheltap dadda kumedek.

<sup>22</sup> Ey yadda dama etan tutu-un et-eteng kabaelan da ey bahbahen Apu Dios ida tep ya et-eteng ni kabaelan tu. Anin ni neihammad hu neitu-wan da et mettey ida damengu. <sup>23</sup> Dammutu na-mun kai-abulut Apu Dios ni manlam-ay ida nem tuka hellipat-i hu daka pehpehding. <sup>24</sup> Ey ma-nu tep umkedangan ida, nem nekemtang ni ebuh tep mettey ida. Heniddan neitnem ni meenni niya heniddan helek e anggegannu ni nakling. <sup>25</sup> Hipa menghel ni beken ni makulug ida huyyan inhel ku winu endi silbitu?"

## 25

### *Ya meikkatun humang Bildad e iSuah nan hi Job*

<sup>1</sup> Himmumang hi Bildad e iSuah ey kantuy <sup>2</sup> "Et-eteng kabaelan Apu Dios ey hi-gatu tekkutan tep hi-gatu nangnged ni emin ni wadad kabunyan. <sup>3</sup> Ey hi-gatu kakelpuin benang ni kamemnang ni emin. Endi hakey ni hambalang tudda anghel ni bega-en tu. <sup>4</sup> Kaw wada hakey ni tuun kayyaggud di hinanggan Apu Dios? Endi hakey ni an neiungngan neibilang ni kayyaggud. <sup>5</sup> Endi pakeingngel ni heyaw ni dayaw Apu Dios,

anin ni bulan niyadda bittuwen. <sup>6</sup> Et nema-ma ngu hu tuu e heni bigih di hinangngab tu?"

## 26

### *Ya inhumang Job nan Bildad*

<sup>1</sup> Immel mewan hi Job ey kantuy <sup>2</sup> "Em, kakkayyaggud ka tep et-eteng hu imbaddang mun hi-gak e nekakkapuy katteg ngun tuu! <sup>3</sup> Kayyaggud et kaka umtugun niya muka ituttuddu inedal mud tuun endi nemnem tu e henin hi-gak. <sup>4</sup> Hipa ni-ngangu nangngelan muddan nuntan ni kakkayyaggud ni tugun? Hipa kan linnawan immel ni hi-gam?"

<sup>5</sup> Nanna-ud ni ida kamanggegeygey hu linnawan nangketey di bebley ni netey di dallem ni baybay. <sup>6</sup> Humman ni bebley idan netey ey eleg meha-ninan niya eleg meitlun nan Apu Dios, <sup>7</sup> e nengibiklag ni north ni kabunyan niya nengiha-ad ni puyek e endi neituunan tu. <sup>8</sup> Winedan Apu Dios hu danum idad kulput ey eleg meikkuyyag anin ni mel-at. <sup>9</sup> Ey heni linibutan tun kulput hu bulan et eleg meang-ang. <sup>10</sup> Ey heni yad pappeg ni baybay hu nengiptekan tun pan-appilan ni kawwalwal niya hileng. <sup>11</sup> Hedin bimmunget hi Apu Dios ey heni kamanggiwwed ida tukud ni kabunyan. <sup>12</sup> Impaineng tu baybay tep ya kabaelan tu, ey gapuh mewan ni elet tu ey pindit tu etan anggetakkut ni mategud baybay. <sup>13</sup> Ey gapuh ni et-eteng ni kabaelan tu ey kinapya tun kakkayyaggud hu ang-ang ni kabunyan. Ey pintey tu etan et-eteng ni anggetakkut ni uleg.

<sup>14</sup> Yadda huyyan impahding tun tayu kaketngai ey ekket ni ebuh ni kei-ang-angan ni kabaelan tu. Hipa makkaw hu dammutun mengewwat ni et-eteng ni kabaelan tu?"

## 27

### *Intu-man Job ni immehel*

<sup>1</sup> Intu-man Job ni immehel ey kantuy <sup>2-4</sup> "Issapatah kud ngadan Apu Dios e Kabaelan tun emin e anin ni beken ni kayyaggud impahding tun hi-gak et deh e tuwak kapanhelheltap, ey eleggak man-itek niya eggak e-hela lawah ni hi-gatu ingganah kepappegan ni biyag ku. <sup>5-6</sup> Eleg mabalni ni nak ebbuluten e neiptek kayu. Pepillit ku dama e endi bahu ku ingganah mepappeg hu biyag ku. Tep yad nemnem ku ey endi ngu namtak ni nambahulak.

<sup>7</sup> Nakka iddasal e mekastigudda buhul ku e henin kakekastiguiddan lawah ni tuu. <sup>8</sup> Hipa namnamah idan eleg mengullug nan Apu Dios hedin medettengan hu pemappegan tun biyag da? <sup>9</sup> Kaw hedin wada ligat da man dedngelen tu pampehemhemmekan da? <sup>10</sup> Kaw dammutun mekiddagyum idan Apu Dios e Kabaelan tun emin? Ey kaw ida kamandasal ni hi-gatu?

<sup>11</sup> Imay kedi, et paka-ittuttudduk ni hi-gayu hu kapehding Apu Dios e Kabaelan tun emin. <sup>12</sup> Nem ku hiyya tu-wa, haggud hedin hi-gayu man inang-ang yun emin. Nem ay kele endi silbitu yuka e-e-hela?

<sup>13</sup> Heninnyu hu kapengastigun Apu Dios e Kabaelan tun emin etan idan mapetey niyadda lawah ni tuu. <sup>14</sup> Anin ni dakel ni u-ungnga da et mangketey idallid gubat winu mettey idan upa da. <sup>15</sup> Yadda metdaan ey mettey idan degeh, nem endi an umnangih ni ketteyyan da, anin idan aahwa da.

<sup>16</sup> Ma-nu et kedangan ida lawah ni tuu, e dakel ni peteg hu pihhuh da niya babalwasi da, <sup>17</sup> nem pan-ibbalwasillin kayyaggud ni tutu-u niya pan-ellan alin limpiyuh ni tuu hu pihhuh da. <sup>18</sup> Ya baley idan lawah ni tuu ey beken ni nehammad, heni baley ni kakkawwa winu heni hukyawwin kapanhiddumid payew.

<sup>19</sup> Ma-nu na-mu tep kedangan idan nunya, nem entannit ida umbangun ey attukaw hu kinedangan da et mabalni ida law ni nekawwetwet. <sup>20</sup> Um-alin hi-gada hu anggetakkut ni helheltapen da henin kaelliin pewek ni hileng niya henin kakelbengin puyek. <sup>21</sup> Ittayab idan dibdib ni melpud kasimmilin aggew et meendidda. <sup>22</sup> Anin ni hipa pehding dan umbesik niya anin ni hipa pehding da ma-lat meihwang ida, et endi damengu hemek ni pewek ni hi-gada. <sup>23</sup> Kamabungngug hu pewek et nemahhig takut dan kamemsik.

## 28

### *Ya inhel Job meippanggep ni kalinaing niya kapannemnem*

<sup>1</sup> Inamtan tutu-un manminnas ni silber niya inamta dan man-eyyug ni balituk ma-lat memahmah. <sup>2</sup> Ey inamta dan manminnas ni gumek di puyek niya inamta dan mengappil ni gembang di batu. <sup>3</sup> Daka illaw hu dilag di dallem ni puyek e engeenget ma-lat ku-kuan dadda hu nebalol ni batu. <sup>4</sup> Tagan da elaw di dallem ni puyek di eleg handateng ni tuu. Daka ussala linubid ni panta-yunan da. <sup>5</sup> Yad ta-pew ni puyek hu katetmeliddan intanem

e kakelpuin kennen, nem yad dallem ni puyek ey heni wada apuy ni kamengeyyug ni batun <sup>6</sup> neiha-adan ni balituk niyadda edum ni hipan nambakbaklang ni nebalol ni batu. <sup>7</sup> Endi pakeang-ang ni dellanen diman, anin idan gawwang niyadda sisit nelaing ni menang-ang ni kennen da et eleg da ang-angen humman. <sup>8</sup> Ey endi layon niya hipan anggetakkut ni animal ni kamandellan diman.

<sup>9</sup> Ya tuu ey kabaelan tun pi-angen hu et-eteng ni batu ey tuka ku-kui hengeg ni duntug. <sup>10</sup> Ey dakel hu nebalol ni batun tuka hemmakadman. <sup>11</sup> Tuka an uh-uha hu nalpuan ni wangwang et hamaken tu, ma-lat ukaten tu hu hipan nebalol ni wadadman.

<sup>12</sup> Kabaelan ni tuun hemmeken ida humman, nem endi kabaelan dan menemmak ni kalinaing niya kapengewwat, ey eleg da amta nalpuan tu. <sup>13</sup> Endi nengamta e nebalol ni peteg hu kalinaing niya eleg mehemmak di bebley idan mategu. <sup>14</sup> Ey eleg mehemmak anin di dallem ni baybay. <sup>15</sup> Eleg megettang anin ni balituk winu silber hu pemeyyad. <sup>16</sup> Eleg mabalin ni an mei-ingnehu hu balol ni kalinaing etan di nekammahmah ni balituk ni nalpud Ophir winu batun onyx winu sapphire. <sup>17</sup> Nebalbalol hu kalinaing nem ya balituk, anin etan ni kengingnginnaan ni tenged ni nekapyad balituk winu crystal. <sup>18</sup> E-etteng hu balol ni kalinaing nem ya bayad idan nebalol ni batu e henin coral winu jasper winu ruby. <sup>19</sup> Ya kalinaing ey eleg mabalin ni meiwwa-hid topaz ni nalpud Kush, niya eleg megettang ni nekammahmah ni balituk.

<sup>20</sup> Hipa nalpuan ni kalinaing niya kapengewwat? <sup>21</sup> Eleg maipeang-ang ni hi-gatsun tuu hu kalinaing ey eleg maipeang-ang idan sisit ni matedem hu mateda. <sup>22</sup> Nem ya katey, et yadda hipan kaumbabhah ey kanday dingngel da kunu hu penemmak numan ni kalinaing.

<sup>23</sup> Hi Apu Dios ni ebuh hu nengamtan kad-an ni kalinaing, <sup>24</sup> tep hi-gatu e Dios ey han-ang-ang tu pappeg ni puyek niya tuka ang-ang-angan emin hu wadad daul ni kabunyan. <sup>25</sup> Indawat Apu Dios hu elet ni dibdib niya lingkud tu hu pappeg ni baybay. <sup>26</sup> Hi-gatu ngenamung hedini attu pengippelawwan tun udan niya kidul. <sup>27</sup> Yan negibbuh ni nengipahdingan tuddan numan ey inang-ang tu kalinaing et lekuden tu balol tu. Ey tuka tetbalan hiyya numan e importanteh ni peteg hu kalinaing. <sup>28</sup> Et kan Apu Dios idan tuuy ‘Ya kapengu-unnudin hi-gak hu ustuh ni kalinaing. Ey ya kapengissikedin mengippahding ni lawah hu keweddaan ni ustuh ni kapan-ewwat.’ ”

## 29

<sup>1</sup> Intu-man nan Job ni immehel et kantuy <sup>2</sup> “Pinhed ku-et anhan ni ya biyag ku ey heni la eman ni nengippapptekan tuwak nan Apu Dios. <sup>3</sup> Binenaddangan tuwak lan numan ey kamei-ellig ni tuka bebnangi engeenget ni dellanek. <sup>4</sup> Yan numan ey kayyaggud kapekiddagayumin nan Apu Dios ni hi-gak niya binendisyonan tu familyah ku. <sup>5</sup> Ey yan numan ni tuwak kapemabbaddangin hi-gatu e Kabaelan tun emin ey wadadda u-unggak di kad-an ku. <sup>6</sup> Dakel hu gatas idan animal ku niya dakel lanan nakka ellad intanem kun olibah ni mangkateba, anin ni mabetu neitneman da.

<sup>7</sup> Ey hedini neamung ida nangkenemneman ni kamengipappangngulun bebley ey nakka meki-emmung ni hi-gada. <sup>8</sup> Ida kaumkiwang kamampenikken niya ida kaum-ehnung nangka-amman pengippeang-angan dan lisiputh dan hi-gak. <sup>9-10</sup> Ey kaissiked idan kamengipappangngulun tutu-un um-ehel, anin idan eta-gey saad tu, niya ida kaum-i-ineng ni pengippeang-angan dan lisiputh dan hi-gak.

<sup>11</sup> Emin ida hu nengamta niya nanggel ni meippanggep ni hi-gak ey da-ak katettebala niya kayyaggud emin hu daka e-ehhelaan meippanggep ni hi-gak. <sup>12</sup> Tep binaddang idan nangkewetwet niyadda nepu-hig ni kamanheppul ni baddang tep endi edum ni da pampebaddangan. <sup>13</sup> Binaddangan kudda dama hu endi law namnamah da et bendisyonan da-ak ni hi-gada. Anin idan nangebalu et binaddang idan et man-anladda. <sup>14</sup> Limpiyuh niya kayyaggud ni ingganah impahpading ku. Kamei-ellig ni imbalwasik hu kalinimpiyuh niya kamei-ellig ni intaddung ku hu kayyaggud ni kapehding. <sup>15</sup> Heni hi-gak mataddan nekulap niya heliddan nedahuy. <sup>16</sup> Nambalinnak ni amaddan newetwet ey nakka i-ehnung di korteh ida tuun nalpud edum ni bebley. <sup>17</sup> Inedik hu kabaelan idan lawah niya mangkabunget ni tutu-u, et ihwang kudda tutu-un daka pampengippahdingin lawah.

<sup>18</sup> Kangku nem andukkey biyag ku. Ey kangku nem melinggeppak ni mettey e wadadda familyah ku. <sup>19</sup> Ma-nu lan numan tep heni-ak etan ni keyew ni eleg mekulangin danum. <sup>20</sup> Da-ak katettebalan tutu-u ey nannananeng elet ku.

<sup>21</sup> Hedini umtugunnak man ida kaum-i-ineng etan nakka pantugguna e daka pakadngela tugun ku. <sup>22</sup> Ey hedini negibbuhhak ni umtugun man endi daka i-e-dum, tep emin hu intugun ku ey endi kulang tu. <sup>23</sup> Da-ak mewan kahehgedan um-ehel ni hi-gada, e henin daka penehhegedin ellian ni udan tep ya panyaggudan da hu nakka e-hela.

<sup>24</sup>Hedin mewan nedismayah idad biyag da, ey ida kaumtuled hedin inang-ang da amleng di angah ku. <sup>25</sup>Hi-gak hu kamengi-andeng ni emin ni hipan meippennuh. Heni-ak patul dan kamengippangngulun sindalu tu. Ey nakka a-alluka hu tutu-un kaumlelemyung.

### 30

<sup>1</sup>Nem yan nunya ey da-ak kaheghegnudaddan kamampenikken ni lalakkan endi silbin a-ammed da e eggak ida iddinel ni umbaddang idan ahhuk ni mengeddug ni kalneroh ku. <sup>2</sup>Endi silbi da tep endi damengu hu dammutun ibbaddang dan hi-gak. <sup>3</sup>Nakawwetwet ida niya ida kameu-upa et ida kamandaladalan ni an menemmak ni kennen da, anin di endi nambebley. <sup>4</sup>Linggeman daka ellan kennen da, anin ni lamut ni keyew e mekallamhit. <sup>5</sup>Nedeg-al idad nambebleyan da ey kapantekukiddan tutu-u e henidda mangkatekew. <sup>6</sup>Et yan nunya ey ida kamanha-ad di natduk ni kulukul, yad leyang di deplah niyaddad mabetu. <sup>7</sup>Henidda katteg ni animal di muyung hedin ida kamantetekkuk di meelkat ey hedin neammuammung idad makyew. <sup>8</sup>Endi silbi da niya endi nengamtan hi-gada, ey nedegyun idad nambebleyan da.

<sup>9</sup>Ey yan nunya ni-ngangu ey da-ak kaheghegnuda idan u-ungnga dad pi-yew ni a-appeh da. Ey da-ak kailanglangkak di ung-ungbal da. <sup>10</sup>Da-ak kapippihula niya ida kameihnup ni ebuh ni hi-gak ma-lat lupdaan da angah ku. <sup>11</sup>Henin nunya law daka pehpending ni hi-gak tep impambalin tuwak nan Apu Dios ni endi elet ku niya endi kabaellan ku. <sup>12</sup>Da-ak kalebbana ey endi dedangngu mabalin ni nak pehding. Heni da indaddan hu bitun keknaak. <sup>13</sup>Heni da hinenian hu dellanak ey daka pehding emin hu mabalin ni pehding dan hi-gak ma-lat mema-ma ligat ku ey ay inamta da e endi memaddang ni hi-gak. <sup>14</sup>Kaelielidda hu memabhah ni hi-gak ni nunyan wada ligat ku. <sup>15</sup>Ebuh hu takut ni wadan hi-gak. Endi law kinedangyan ku niya angeba-ing hu nambalanan ni neitu-wan ku.

<sup>16</sup>Yan nunya ey neihnup law ketteyyak. Endi menga-alluk ni hi-gak eyad nemahhig ni nakka helheltapa. <sup>17</sup>Hedin hileng man nemahhig degeh ni annel ku e eleg anhan mesikked ni nekemtang. <sup>18</sup>Heni lina-nih Apu Dios hu balwasik et heni tuwak kapanhehkela. <sup>19</sup>Heni da-ak imbing di pitek et adyah e heni-ak lugit.

<sup>20</sup>'Nakka mampehemhemmek anhan ni hi-gam e Apu Dios, nem eleg muwak baddangi. <sup>21</sup>Mabunget kan peteg ni hi-gak. Muka ussala et-eteng ni kabaellan mun mengippehelheltap ni hi-gak. <sup>22</sup>Heni impaelim hu anggetakkut ni pewek et iteyab tuwak. <sup>23</sup>Apu Dios, inamta e yan nunya hu pappeg ni biyag ku. Nem inna-nu e humman dedan hu meippahding di emin ni tuu.

<sup>24</sup>Kele anhan hannya muka pehding e Apu Dios ni hi-gak? Ey adyah dedangngu e nebahbahhak et nakka mampehemhemmek ni hi-gam? <sup>25</sup>Kaw eggak mekinannangih idan tutu-un kamanligligat? Ey kaw eggak lumelemyung tep ya kapanhelheltapiddan angehemmek ni tuu? <sup>26</sup>Nakka namnamaha e ya an-anla niya linggep hu meippahding di biyag ku, nem beken, tep ya ligat niyadda lawah hu neipahding.

Kangku nem kawwalwal peellin Apu Dios ey beken tep engeenget hu impaeli tu. <sup>27</sup>Ebuh katteg ngu danag niya helheltap ni nakka hanghangaan kewa-wa-wa. <sup>28</sup>Kamei-ellig ni eleggak meptangi, tep endin hekey hu an-anlad biyag ku. Et humman hu, hedin limmawwak di kakeam-unnuden pinhed tu, winu wada inamyawak ni inang-ang ni matak, niya mampebaddang hu nakka ippahding. <sup>29</sup>Ya tenul ni ehel ku ey heni tenul ni ostrich winu jakal. <sup>30</sup>Dimmekket belat ku niya kaman-aatung annel ku. <sup>31</sup>Ey ya law nakka deddengngelan nunya ey yadda kamantete-ul niya kamannanangih e beken law ida etan ni kamengippeamleng.

### 31

#### *Ya nanggillig ni inhel Job*

<sup>1</sup>Insapatah kud annel ku e eggak amyawi hu bii.

<sup>2</sup>Ya iddawat Apu Dios e Kabaellan tun emin ni gun-uden ni tuu ey meippuun di ippahding tu. <sup>3</sup>Et humman hu, tuka peelli ligat niya hipan umbabhah etan idan lawah ni tuu.

<sup>4</sup>Tuka hellipat-in emin hu nakka pehding niya attu nakka lawwi. <sup>5</sup>Nem kaw wada nak hineul winu nak sinelam? <sup>6</sup>Ngenamung hi Apu Dios ni mengi-uh-uh e endi bahul ku. <sup>7</sup>Hedin eggak u-unnuden pinhed tu, winu wada inamyawak ni inang-ang ni matak, winu wada edum ni nambahulan ku, <sup>8</sup>ey anin katteg ni mebahbah inggaud ku winu anin ew ni kennen ni edum ni tuu hu hipan intanem ku.

<sup>9</sup>Ey hedin ngullaw inamyawak hu ahwan dinagsik, et nakka menemmahemmak ni tsimpuh ni pengi-ulligan kun hi-gatu, <sup>10</sup>ey anin ew ni meki-ahwan edum ni laki etan



ahwak niya anin ew ni meki-ullig hu edum ni lakin hi-gatu. <sup>11</sup> Tep nemahhig ni bahul hu pengamyawan et iulig hu beken ni ahwa. Et humman hu, mahapul ni mekastigu-ak hedini humman hu nambahulan ku. <sup>12</sup> Hedin kantu et impahding ku humman ni bahul, ey anin ew katteg ni mebahbah ni emin hu hipan wadan hi-gak, tep humman ni bahul ey heni apuy di impiernoh e tuka gihheban emin.

<sup>13</sup> Hedin wada mewan neihlan impahding kun bega-en ku winu eggak hanguden hu lilih da, <sup>14</sup> ey hipa inna-nuk ni mekihinnanggan nan Apu Dios? Hipa ihhumang kun hi-gatu hedini hummanganen tuwak? <sup>15</sup> Hi Apu Dios hu nanletun hi-gak niya hi-gatu dama hu nanletuddan bega-en ku.

<sup>16</sup> Kaw eggak baddangan ida newetwet niya kaw eggak hemeken ida nebalu. <sup>17</sup> Kaw nekuliputtak et eggak idwatan ida nepu-hig ni kennen da? <sup>18</sup> Neipalpu dedan eman ni u-ungga-ak ey mebaddanggak ni hi-gada. <sup>19-20</sup> Hedin wadadda newetwet ni eleg pakegatang ni balwasi ey nak ida kaiddawsin ibbalwasi dan nekapyad dudut ni animal ku ma-lat eleg ida maktel. Et humman hu, da-ak kapakatbaladdan emin ni tuu. <sup>21</sup> Hedin wada sinelam kun nepu-hig tep et-eteng hu kabaelan ku, <sup>22</sup> ey anin ni mehpung ngamay ku niya anin ew ni melahlah pahhannan ku. <sup>23</sup> Kedukdul ew humman nemet eleg tuwak kastiguen nan Apu Dios, nem ya kakulugan tu ey endi impahding kun hanniman tep nakka umtakut ni hi-gatu e eta-gey ni Dios.

<sup>24-25</sup> Eggak pandidinel hu balituk ku. Ey eggak ippahhiya hu kinedangyan ku. <sup>26-27</sup> Ey eggak dayawen hu bulan niya aggew, anin ni inang-ang ku hu kakinayyaggud da. Ey eggak nemnemen ni illigud ni deyyawen ida. <sup>28</sup> Gullat ni impahding ku humman ey lebbeng tun mekastigu-ak, tep ya tuun kamengippahding nunman ey inwalleng tu hi Apu Dios, e Kabaelan tun emin.

<sup>29</sup> Eggak mewan ngi-ngi-ngian hu buhul ku hedini wada immalin ligat da. <sup>30</sup> Ey endi nak nandasalan nan Apu Dios ma-lat matey ida. Tep gullat ni impahding ku humman, ey em, e makulug ni nanliwattak. <sup>31</sup> Emin ida bega-en ku ey i-uh-uh da e nakka pengngan emin hu kamanda-guh di baley. <sup>32</sup> Ey endi hakey ni eggak pehgep anin ni hansinuan ni nalpud edum ni bebley. <sup>33</sup> Hedin hi-gak man bekennak ni henin edum e daka ittattallu lawah ni daka pehpehding. <sup>34</sup> Ey anin ni hipa e-helen ni tuun meippanggep ni impahding ku ey eggak pakdag i-ineng niya eleggak mantalu.

<sup>35</sup> Gullat et anhan ni wada hakey ni huwet ni mengngel ni hi-gak, ey amtaen tu e makulug ida huyyan impahding ku. I-ehngeng ku hu annel ku. Ngenamung hi Apu Dios e Kabaelan tun emin ni menghel e nambahullak niya hi-gatu mengittuddek ni bahul ku. <sup>36</sup> Eleggak umtakut anin ni kanyuy nambahullak tep nakka medinnel e endi hemmeken tun bahul kun yuka pebehul ni hi-gak. Imay, ehel yu hu kanyun bahul ku, hedini wada. <sup>37</sup> Nakka medinnel ni an menghel nan Apu Dios ni emin ni impahding ku, ey eggak umbang.

<sup>38</sup> Hedin sinelam ku winu piniliw ku etan puyek ni nakka tattannemi, <sup>39</sup> ey hedini ma-nun hi-gak tep nakka makangngan ey eleg ida mengngan hu nakka pangngunnun nengigeud ni kennen ku, et ida kamanhelheltap, <sup>40</sup> ey anin ew katteg ni ya helek niya hebit hu patmel mudman et beken ni ya wheat niya barley.”

Huyya pappag ni inhel Job.

## 32

<sup>1</sup> Kapepillit Job e endi nambahulan tu et isiked ida law etan ni tellun gagayyum tun um-ehehel ni hi-gatu.

<sup>2</sup> Nem wada etan hi Elihu ngadan tu e eleg tu han-isipel bunget tu tep eleg pinhed Job ni ebbuluten e nambahul et hi Apu Dios kumedek tuka pebehulin neipahding ni hi-gatu. Hi aman Elihu ey hi Barakel e helag Bus e helag Ram. <sup>3</sup> Ey kaumbubunget ida etan ni tellun gayyum Job tep eleg da hanhumang hi Job et heni kumedek law hi Apu Dios hu neihalla. <sup>4</sup> Hi-gatu hu keu-ungga-an ni hi-gadan emin, et humman hu, hingged tu et megibbuh idan immehel.

<sup>5</sup> Inang-ang tu e eleg da hanhumang hi Job ey bimmunget, <sup>6</sup> et kantuy “U-ungga-ak nem hi-gayu, et humman hu, nakka um-e-gey ni menghel ni hi-gayun wadad nemnem ku. <sup>7</sup> Kangkud nemnem kuy ‘Yadda peppengulwan hu lebbengtun um-ehel tep nenemnemnan ida.’ <sup>8</sup> Nem inamtak law e ya dedan hu Ispirituh Apu Dios hu kamengidwat ni nemnem niya kalinaing ni tuu. <sup>9</sup> Beken ni yadda nea-amman ebuh hu nenemnan niya beken ni hi-gadan ebuh hu kamengewwat ni neiptek. <sup>10</sup> Et humman hu, dengel yu anhan et ehelen ku dama hu wadad nemnem ku.

<sup>11</sup> Inan-anusan kun nandeddengngel ni in-inhel yun wadad nemnem yu. <sup>12</sup> Nakadngel kun emin inhel yu ey endin hi-gayu nanghel hedini hipa neihallaan Job niya endin hi-gayu pakehumang ni hi-gatu. <sup>13</sup> Entan tu kaney ‘Anin ni eleg ebbuluten Job hu tugun

tayu et ngenamung hi Apu Dios ni mengittuddun hi-gatun neihlaan tu.' <sup>14</sup> Gullat ni hi-gak hu nekihummangan nan Job, et beken ni hannitan penummang kun hi-gatu. <sup>15</sup> Kayu kaum-i-ineng tep eleg yu amta ihhumang yu. <sup>16</sup> Hipa tep law, kaw hehegeden ku e-helan yu? Kaw pakdag ku dama i-ineng? <sup>17</sup> Eleg, tep mahapul ni um-ehellak dama. <sup>18</sup> Eggak han-isipel ni nak pakdag i-ineng tep dakel pinhed kun e-helen. <sup>19</sup> Iyyadyan heni-ak etan ni pakekapyan ha-addan ni meinum ni endi eghawan tu et ngannganihkah ni mebughi. <sup>20</sup> Et humman hu, mahapul ni um-ehellak ma-lat ehlen ku dama hu wadad nemnem ku. <sup>21</sup> Endi nak pengippahhigan niya eggak e-hela e kayyaggud hu hakey ni tuu hedin eleg malpud puhuk, <sup>22</sup> tep endi ngud nemnem ku humman. Hakey pay ey nanna-ud ni kastiguen tuwak nan Apu Dios hedin hanniman pehding ku.

### 33

<sup>1</sup> Nem yan nunya ey dengel mu e Job hu pinhed ku daman e-helen ni hi-gam. <sup>2</sup> Nandaddannak ni menghel ni wadad nemnem ku. <sup>3</sup> Hi-gak ey makulug ni emin hu nakka e-hela. <sup>4</sup> Ya Ispirituh Apu Dios e Kabaelan tun emin hu namyuh ni hi-gak niya hi-gatu nengidwat ni biyag ku. <sup>5</sup> Idaddan mu e Job hu ihhumang mu et manhumngangan ita.

<sup>6</sup> Nan-ingnegh itad hinangngab Apu Dios. Ey pitek hu nekapyaan tan dewwa. <sup>7</sup> Et humman hu, entan takut mun hi-gak. Beken ni hi-gak etan eta-gey saad tu ma-lat daka pekebbeb.

<sup>8</sup> Heninnuy dingngel kun inhel mu e Job. <sup>9</sup> Kammuy 'Endi bahul ku. Endi nak impahding ni lawah, <sup>10</sup> nem nealay kan Apu Dios ey nambahullak e heni-ak buhul tu. <sup>11</sup> Heni hina-adan tun bangkiling hu helik niya heni tuka hellipat-i keglidak.'

<sup>12</sup> Nem e-helek ni hi-gam e Job e neihalla ka. Tep eta-ta-gey hi Apu Dios nem ya tuu. <sup>13</sup> Kele nealay kammuy eleg hummangan Apu Dios hu lilih ni hakey ni tuu? <sup>14</sup> Anin ni um-eehel hi Apu Dios ni tuu et eleg da han-awat hu tuka e-e-hela. <sup>15</sup> Yan hileng ni kakeuggipin tuu ey kaum-ehel hi Apu Dios di i-innep da. <sup>16</sup> Humman hu tuka pengippeamtain angetakkut ni meippahding ni hi-gada. <sup>17</sup> Tuka ihhanniman ma-lat isiked ni tuun manliwwat niya ma-lat isiked dan mampahhiya <sup>18</sup> ma-lat eleg ida lumaw di bebley ni netey. <sup>19</sup> Ya kapenuggun Apu Dios ni tuu ey tuka iddawsin nemahhig ni degeh. <sup>20</sup> Hedin kamandedgeh hu tuu man kameendi neminhad tun mengangan. Anin ida etan ni pinpinhed tun kennen et kamengippeuttan hi-gatu. <sup>21</sup> Et lektattuy nekappigut et mambalin ni genit et mablattan. <sup>22</sup> Ya henin nunman ni tuu ey ngannganih ni umlaw di bebley idan netey.

<sup>23</sup> Nem hedin um-ali anghel ni mengi-ehngeng ni hi-gatu, et penemnem tun Apu Dios e kayyaggud humman ni tuu, <sup>24</sup> et wadan kan et anhan Apu Dios ey 'Ibukyat mu etan tuu. Eleg umlaw di bebley idan netey tep adyah bayad tu et meihwang di bahul tu.' <sup>25</sup> Et mambangngad mewana elet tu et umu-ungga. <sup>26</sup> Ey hedin mandasal humman ni tuu, ey hummangan Apu Dios hu dasal tu. Ey man-am-amleng hi Apu Dios ni mengebbulut ni hi-gatu ma-lat mambangngad hu kayyaggud ni daka pandagyumi. <sup>27</sup> Kantullin tutu-uy 'Nanliwattak tep beken ni kayyaggud impahding ku, nem liniwwan Apu Dios hu liwat ku. <sup>28</sup> Eleg da-ak palaw di bebley ni nangketey et adyahhak e nakka man-am-amleng e nanengtun mategu-ak.'

<sup>29</sup> E-eggel ni hannya hu kapehding Apu Dios ni tuu <sup>30</sup> ma-lat meihwang et eleg matey e humman et lebbeng tun kastigu tu tep ya liwat tu, ma-lat man-am-amleng pay nid biyag tu. <sup>31</sup> Yan nunya e Job ey mahapul ni mandedngel kan hi-gak. <sup>32</sup> Nem hedin wada pinhed mun e-helen, imay ehel mu et dengelek. Nandaddannak ni mengebbulut hedin neiptek e-helem. <sup>33</sup> Nem hedin endi e-helem, ey dengel muwak. I-ineng ka tep, et ittutudduk ni hi-gam hu pehding ni menemnem."

### 34

#### *Intu-man Elihu ni immehel*

<sup>1</sup> Kan mewana Elihu ey <sup>2</sup> "Hi-gayun nekallaing niya nekannemnem, dengel yu eya e-helek. <sup>3</sup> Ya bungut kamenamtam hedin mepelhat hu kennen. Heni daman tangila e tuka dedngela hedin kayyaggud winu lawah etan ehel. <sup>4</sup> Wadan hi-gatsun mannemnem hedin hipa neiptek niya hi-gatsu mengamta hedin hipa kayyaggud. <sup>5</sup> Hi Job ey kantuy 'Endi bahul ku ey beken ni meandeng hu kapenuwet Apu Dios.' <sup>6</sup> Ey kantuy 'Endi bahul ku nem kanday maitekkak. Eleg me-kal eya degeh ku anin ni eleggak manliwat.'

<sup>7</sup> Kaw wada inang-ang yun tuun henin Job e endi lispituh tun Apu Dios? <sup>8</sup> Pinpinhed tun mekillaw ni tuun lawah nemnem tu. <sup>9</sup> Ey kantuy 'Endi silbitun pengu-unnudan nan Apu Dios.'

<sup>10</sup> Dengel yu e-helek, hi-gayun amta tu mengewwat. Emin tuu ey amta da e eleg manliwwat hi Apu Dios e Kabaelan tun emin. <sup>11</sup> Hedin ya tuka pehding ey tuka iddawat hu lebbeng tun meidwat dedan di hakey ni tuu, meippuun di hipan impahding nunman ni tuu. <sup>12</sup> Ya kakulugan tu ey eleg mabalin ni an pehding Apu Dios e Kabaelan tun emin hu lawah. Eleg mewan mabalin ni beken ni meandeng hu tuka panhuwet ni tuu. <sup>13</sup> Endi an nemelanan Apu Dios ni kabaelan tu tep wada ngu dedan ni hi-gatu humman. Ey endi an nemutuk ni hi-gatun mengippaptek ni emin ni bebley eyad puyek. <sup>14</sup> Gullat ni banggaden Apu Dios hu biyag ni indawat tun hi-gatsun tutu-u et <sup>15</sup> nanna-ud ni mettey itsun emin et mambalin itsun dep-ul.

<sup>16</sup> Imay, pandengel kan hi-gak hedn nelaing ka niya nenemneman ka. <sup>17</sup> Hi Apu Dios ey wada kelebengan tun man-ap-apu tep meandeng tuka pehding. Kele ni-nganguy kammuy wada bahul tu? <sup>18</sup> Tuka ibbunget ida papatul niyadda aap-apu e kantuy 'Lawah nemnem yu ey beken ni meandeng yuka pehding.' <sup>19</sup> Eleg tu ippahhig idan aap-apu niya kekeddangan hu impeminhed tu, tep lintu tudda dama nangketwet. <sup>20</sup> Yadda edum ni tuu ey ida kamangkinnemtang ni mettey ni gawan hileng. Anin idan aap-apu et ida kame-kal di daka pan-ap-apui ni netey ida nem beken ni ya kapehding ni tuu hu kaumhulun ni daka ketteyi.

<sup>21</sup> Hi Apu Dios ey tuka ang-ang-anga hu kapambiyag idan tuu niya emin hu daka pehpehding. <sup>22</sup> Endi hakey ni lawah nemnem tun tuun dammutun tu ittalan hi Apu Dios di engeenget. <sup>23</sup> Et humman hu, eleg mahapul ni gegtuden Apu Dios hu penuwetan tun tuu. <sup>24</sup> Eleg mahapul ni mahmahan tu ni han tu ingkal hu hakey ni ap-apu ma-lat ihullul tu edum. <sup>25</sup> Tep inamta tu ngu dedan hu elaw da, et humman hu, tudda kaapputa niya tudda kabahbahan hileng. <sup>26</sup> Tuka peang-ang e tuka kastiguadda lawah ni tuun <sup>27</sup> nengisiked ni mengu-unnud ni hi-gatu niya nengiwalleng ni tugun tu. <sup>28</sup> Daka panhelheltap hu nangketwet, et humman hu, ida kamampehemhemmek nan Apu Dios ma-lat baddangan tudda. <sup>29</sup> Nem hedn kan Apu Dios ey pakdag tu i-ineng, kaw hipa an memihhul ni hi-gatu? Hipa makkaw dammutun pehding ni tuu hedn eleg hengngudan Apu Dios? <sup>30</sup> Nem eleg tu i-abulut ni man-ap-apudda hu eleg mengu-unnud ni hi-gatu ma-lat eleg da panhelheltap hu tutu-u.

<sup>31</sup> Job, attu et ehelen mun Apu Dios e muka ebbuluta e nanliwat ka niya isiked mu law ni manliwwat. <sup>32</sup> Nem ku kammu na-mu mewan ey 'Hipa nambahulan ku? Ehel mu et eggak law ipahding.'

<sup>33</sup> Kaw hullulan Apu Dios hu ninemnem tun pehding ma-lat u-unnuden tu pinhed mu? Nem tam dingkug mu ngu dedan hi Apu Dios. Ngenamung kan mannemnem. Bekkennak ni mampilli. Imay, ehel mun hi-gami hedn hipa muka pannemnem. <sup>34</sup> Emin hu mengngel ni hi-gak, anin idan nenemneman ey daka tetbala e kanday <sup>35</sup> 'Mukun henin nunman kapan-e-ehhel Job ey tep endi amta tu niya endi kametunnung ni tuka e-e-hela.' <sup>36</sup> Hedin pakannemnem yudda in-inhel Job ey amtaen yu e heni kapan-e-ehhel ni lawah ni tuu hu tuka pan-e-ehhel. <sup>37</sup> Dakel dedangu liwat tu ey induman tu pay et ngehayan tu hi Apu Dios."

## 35

### *Intu-man Elihu ni imnehel*

<sup>1</sup> Imnehel mewan hi Elihu nan Job ey kantuy <sup>2</sup> "Beken ni kayyaggud e Job hu kammuy 'Endi liwat kun Apu Dios.' <sup>3</sup> winu kammuy 'Endi silbi tun nakka pengu-unnudin hi-gatu.' winu kammuy 'Hipa ginunggunah kun eleg manhilliwwat?'

<sup>4</sup> Hummangen ku hu inhel mu niyadda inhel ni gagayyum tu. <sup>5</sup> Itengaw mud kabunyan et ang-angem ida kulput ni naka-itta-gey. <sup>6</sup> Hedin kantu et neliwtan ka niya dakek nanliwatan mu, kaw wada mabalin ni ippahding ni liwat mun Apu Dios? <sup>7</sup> Ey hedn kantu et kakkayyaggud impahding mu, kaw wada ibbaddang tun hi-gatu winu hipa mahapul tun dammutun iddawat mun hi-gatu? <sup>8</sup> Yadda edum mun tuu hu mebaddangan di kayyaggud ni impahding mu niya hi-gada manhelheltap di lawah ni impahding mu.

<sup>9</sup> Hedin neligtan hu tuu ey ida kamampehemhemmek di tuun dammutun umbaddang ni hi-gada ma-lat meihwang di diman ni ligat. <sup>10</sup> Nem beken ni hi Apu Dios e nanletun hi-gada hu daka pampebaddangi, anin ni hi-gatu kamenga-alluk ni tuu ma-lat dammutun man-a-appahida, anin ni wada ligat da. <sup>11</sup> Em, eleg ida mampebaddang ni hi-gatu e nengidwat ni kalinaing da et eta-ta-gey ida nem yadda sisit niyadda animal.

<sup>12</sup> Ey hedn mandasal ida man eleg hummangan Apu Dios hu dasal da, tep ida kamampahhiya niya lawah ida. <sup>13</sup> Et humman hu, endi silbitun ida mandasal nan Apu Dios e Kabaelan tun emin, tep eleg tu dedngela dasal da. <sup>14</sup> Ey naka-ihhalla kumamman

hedin kan tayuy eleg tu ang-anga kameipahpading. Tep limpiyuh tuka pehding nem pakkadek ni ennusan tayun hehgeden. <sup>15</sup> Kaw kammu nem eleg kastiguan Apu Dios hu kamanliwwat? <sup>16</sup> Endi silbin in-inhel mu tep eleg mu amta muka e-e-hela.”

### 36

<sup>1</sup> Intu-man Elihu ni immehel e kantuy <sup>2</sup> “Anusi yun dedngelen eya edum ni e-helen kun nakka pengi-ehnengin Apu Dios. <sup>3</sup> Huyyan neipeamtan hi-gak ey nalpu metlaing nan Apu Dios e nanletun hi-gak. Peang-ang kun hi-gayu e hedini hi-gatu man kayyaggud ni ingganah hu tuka pehding. <sup>4</sup> Endi itek ni nak e-helen ni hi-gayu tep hedini hi-gak man naka-amtak ni emin.

<sup>5</sup> Hi Apu Dios ey et-eteng kabaelan tu, nem endi tuka pihhula. Ey tuka pehding emin hu pinhed tun pehding. <sup>6</sup> Eleg tu i-abulut ni mannananeng ni mategu hu lawah ni tuu, nem tuka iddawt hu kelebangan idan angehemmek ni tuu. <sup>7</sup> Tuka paka-ippaptek ida hu kayyaggud ni tuu et tuka pambalin idan meiddeyyaw ni ingganah henin patul. <sup>8</sup> Nem hedini nebangkilingan hu tuu et ida kamanhelheltap tep ya impahding da, <sup>9</sup> ey kapeamtan Apu Dios hu liwat da niya tuka peamta daka pampahhiyyai. <sup>10</sup> Ey tudda katugguna ma-lat isiked dan mengippahding ni lawah.

<sup>11</sup> Hedini u-unnuden da hi Apu Dios ey ipahding da hu pinhed tu ey umlinggep ida niya umyaggud hu neitu-wan da. <sup>12</sup> Nem hedini eleg ida mengu-unnud man mettey ida et lumaw idad bebley ni netey, tep kulang hu inamta da. <sup>13</sup> Yadda eleg mengu-unnud nan Apu Dios ey ida kaumbubunget ni pengastiguan tun hi-gada. Ey anin ni mekastigudda et eleg ida mampemhemhemmek ni hi-gatu. <sup>14</sup> Eleg ida mea-amma ey mettey idan anggeba-ing hu impenahding da. <sup>15</sup> Nem hedini yadda etan kamanligligat ey ihehwang Apu Dios ida. Tukai-abulut ni manliggat ida tuu tep humman tuka penuggun ni hi-gada.

<sup>16</sup> Nem hedini hi-gam e Job ey indawwi dakan Apu Dios lan nunman di ligat ma-lat nelam-ay kad biyag mu. Impakedangan daka niya impelinggep daka. <sup>17</sup> Nem yun nunya ey kaka umgugu hu tep muka nenemneman neyun e eleg mekastigudda lawah ni tuu. Nem entan kadenagim tep meandeng ali meippahding. <sup>18</sup> Ey ang-ang mu kuma, tep mehe-ul kalli kumedek ni dakel ni pihhuh et ipahding mu lawah. Tep ya tuun mengippahding ni hanniman ey nelakah tun dedkugen hi Apu Dios. <sup>19</sup> Entan tu nemnem e ya kinedangan mu niya et-eteng ni kabaelan hu mengikka-leg ni ligat ni um-alin hi-gam. <sup>20</sup> Ey entan abtui kehillengan tu ma-lat panhanim ni annel mu, tep yad engeenget hu kakebahbahin tuu. <sup>21</sup> Ang-ang mu kuma et beken ni ya lawah ipenahding mu, tep impaelin Apu Dios hu ligat mu ma-lat eleg mu ipahding hu lawah.

<sup>22</sup> Entan tu liwwan e hi Apu Dios ey kabaelan tun emin. Eleg tu heppula menuttuddun hi-gatu tep hi-gatu kelalla-ingan ni mittuduh. <sup>23</sup> Endi tuun dammutun menghel ni hitagatun pehding tu. Ey endi tuun an menghel ni neihalla impahding tu. <sup>24</sup> Dayaw mu kumaddan hi Apu Dios tep ya impahding tu ey pan-a-appel kan pandeyyaw mun hitagatu. <sup>25</sup> Inang-ang ni emin ni tuu hu impahding Apu Dios, nem eleg da awatan.

<sup>26</sup> Eleg han-awat ni tuu hu kasina-gey Apu Dios niya eleg da hambalang hu toon tu. <sup>27</sup> Kapeahpat Apu Dios hu danum eyad puyek ni impambalin tun udan. <sup>28</sup> Ey tuka peelli udan e kamelpud kulput ma-lat usalen emin ni tuu. <sup>29</sup> Endi hakey ni tuun han-awat tu hedini inna-nun kulput ni meiwwehhit niya inna-nu et kaumkidul di kabunyan. <sup>30</sup> Kapellow mewan Apu Dios hu kedyam di kabunyan et anin di dallem ni baybay et kameang-ang heyaw tu. <sup>31</sup> Emin ida humman ni tuka pehding ni kaketngai ey pengippeang-ang tu e hi-gatu hu Ap-apun emin ni tutu-u. Ey tuka iddawt ni hi-gada hu dakel ni kennen. <sup>32</sup> Tuka peelli kedyam niya ngenamung tun pinhed tun pengippelawwan. <sup>33</sup> Ya kidul ey heni kamantetkuk et peamta tu e wada hi Apu Dios. Ey ya pewek ni tuka peelli ey mengippeamtan nemahhig ni bunget tu. \*

### 37

<sup>1</sup> Nakka umkebbeb ni mannemnem ni nunman! <sup>2</sup> Dengel yu ehel Apu Dios ni heni kidul. <sup>3</sup> Tuka peukkat hu kedyam di kabunyan ni impalaw tud emin eyad puyek. <sup>4</sup> Ey kameittu-nud hu ehel tun heni kidul e kamengipetnga. <sup>5</sup> Em, kamengipetnga ehel tu niya eleg han-awat ni tuu hu kainetteng ni kabaelan tu. <sup>6</sup> Tuka mandala hu dallallu niya udan ma-lat ma-gah idad puyek.

<sup>7</sup> Yadda tuu ey daka issiked ngunu da tep yan nunman pengippeamtaan tun hi-gadan kabaelan tu. <sup>8</sup> Yadda dama animal di muyung ey ida kamantellud mabetu niyaddad edum ni daka pantellui. <sup>9</sup> Hi Apu Dios hu kamengippeellin pewek niya nemahhig ni ketel. <sup>10</sup> Ey hedini yimmayyah man kamambalin ni dallallu hu danum idad wangwang

\* 36:33 36:33 Ya hakey ni keibbellinan tu ey ‘Yadda baka ey amta da ngu dedan e iyyalli pewek.’

niyadda kulukul. <sup>11</sup> Tuka ha-adin danum ida kulput niya tuka unnudin kedyam. <sup>12</sup> Ey tuka mandaladda kulput ni mambinbinanggad et ida kaumlaw di tuka pengippellawin hi-gada eyad puyek. <sup>13</sup> Hin-addum ni peelli tu udan et panenum tun puyek e humman tuka pengippeang-angin neminshed tu, nem hin-addum ni tuka peelli et pengastigu tun tutu-u.

<sup>14</sup> Et humman hu, i-ineng ka kedi e Job niya pandengel ka. Nemnemnem mudda hu kaketngain impenahding Apu Dios. <sup>15</sup> Kaw inamtam hedin hipa inna-nun Apu Dios ni mammandal ni kedyam ma-lat maukat di kulput? <sup>16</sup> Ey kaw han-awat mu hedin hipa inna-nun kulput ni kamanhahha-ad di kabunyan? Humman keang-angan tun hi Apu Dios ey nakallaing niya nakannemnem. <sup>17</sup> Kamanhelheltap ida tuu tep nemahhig atung ni kai-alin dibdib ni kamelpud south. <sup>18</sup> Kaw dammutun baddangam hi Apu Dios ni mengibbiklag ni kabunyan ma-lat ya ang-ang tu ey heni gembang?

<sup>19</sup> Ya muka pannemnem ni annel mu ey nekangngamta ka. Hedin makulug ni nekangngamta ka, tuttuddui dakemin ihhumang min Apu Dios tep ay eleg mi inamta ihhumang mi. <sup>20</sup> Kaw wada tuun dammutun menuttudun Apu Dios? Ey kaw eleg tu ngu ikkaguh hu biyag tu et tu ipahding humman. <sup>21-22</sup> Kamedeyyaw ni peteg hi Apu Dios. Kaumhili dayaw tu e endi pengi-ingnghan. Henin aggew e eleg mabalin ni itettekkel ni tuu hedin inelay ni dibdib hu kulput et mepukyahan, tep kaumhili. Nem neman-kaumhili hu dayaw Apu Dios. <sup>23</sup> Ey eleg tayu han-awat hu kabaelan Apu Dios ni mengippahding ni emin. Nem anin ni hanniman et kayyaggud niya meandeng hu tuka pehding e eleg daitu panligligat. <sup>24</sup> Et humman hu, kadeyyawa niya katekkusin emin ni tuu niya kadeyyawaddan makulug ni nenemnem ni tuu.” \*

## 38

### *Ya inhumang APU DIOS nan Job*

<sup>1</sup> Entanniy hinumang APU DIOS hi Job di pewek. <sup>2</sup> Kantun hi-gatuy “Kele muka kehinga kalinaing ku e legelegem hu muka e-hela? <sup>3</sup> Imay, inah ka et humangem hu mahmahak ni hi-gam.

<sup>4</sup> Kaw wada ka eman ni nanletuan kun kebebbley eyad puyek? Ehel ka hedin nekangngamta ka. <sup>5</sup> Hipa kan nemnem et hanneya kaminahkang ni puyek? Ku nanna-ud na-mun inamtam? <sup>6</sup> Hipa nangged ni yinudungan ni puyek? Ey hipa nengiha-ad idan tukud tu <sup>7</sup> e yan nunman ey ida kaman-a-appel hu bittuwen niya ida kaman-am-amleng hu aanghel?

<sup>8</sup> Hipa hu nengiha-ad ni kelteg ni danum idad baybay eman ni nekapyaan tu? Hidak, endi edum. <sup>9</sup> Hinephepan kun makahdel ni kulput hu baybay et man-enget diman. <sup>10</sup> Inha-ad ku hu pappeg ni baybay et ihammad ku lekbi tu et ialladduk. <sup>11</sup> Et ehelek ni dalluyun e eleg tu li-bahi humman ni kelteg ni inha-ad ku.

<sup>12</sup> Job, kaw wada-ew ngu pinhakkey ni nanmandalan mun hileng et mewa-wa niya kaw wada nanmandalan mun aggew et tumimil? <sup>13</sup> Kaw minandal mu kawwalwal et maihinap di kebebbley et mepappeg ida lawah ni kameippahding di engeenget? <sup>14</sup> Hedin kamenimmil aggew ni kakkabbuhhan ey kameka-ang-ang hu kapkapyaddan kedundutug niyadda nangkedeklan. <sup>15</sup> Ey hedin nekawwa-wa, ey eleg law mabalin ni pehding ni tutu-u hu lawah ni implanuh da.

<sup>16</sup> Kaw kinabaelan mun limmaw di dallem ni baybay et mu inang-ang hu kapan-utbulin danum? <sup>17</sup> Ey kaw inang-ang mu hu eheb ni inha-ad kud kahehgepid bebley ni netey? <sup>18</sup> Kaw inamtam hedin hipa kalinakkeb ni puyek? Humang muwak hedin inamtam.

<sup>19</sup> Kaw inamtam hedin attu kakelpuin kawwalwal niya engeenget? <sup>20</sup> Kaw inamtam hu kadellanan umlaw diman? Ey kaw amtam hedin inna-nun umlaw diman? <sup>21</sup> Nem kabaelan na-mu, tep lintu daka et han maweda emin eya wada niya hineniktamam emin hu hipan neipenahding.

<sup>22</sup> Kaw limmaw kad nengiemungan kun dallallun <sup>23</sup> indaddan ku ma-lat mausal hedin wada gubat niya hedin wada guluh? <sup>24</sup> Attu kakelpuin aggew niya attu kakeiwwehhisin dibdib ni nalpud kasimmilin aggew?

<sup>25</sup> Hipa kamengippeellin na-let ni udan niya hipa nengiha-ad ni dalan ni kedyam? <sup>26-27</sup> Hipa kamengippeellin udan idad eleg mebebley e mamegan puyek ma-lat tummel helek? <sup>28</sup> Kaw wada a-ammed ni udan niya delnu? <sup>29</sup> Hipa a-ammed ni dallallun <sup>30</sup> kamengippekelhin danum idad wangwang niyaddad lebeng e heni kelhin batu?

\* **37:24** 37:24 Ya hakey ni keibbellinan tu ey ‘Nem yadda kamenghel ni nenemnem ida ey eleg tudda ibbilang.’

<sup>31</sup> Kaw hi-gam hu kamengekkenneng ni kakeglididdan bittuwen e Pleiades niya Orion?  
<sup>32</sup> Kaw wada kabaelan mun ippahding ma-lat meang-ang ida bittuwen di hipaddan tsimpuh, niya kaw dammutun ippangulu mudda etan bittuwen e nengadanan ni bear niyadda impah tu? <sup>33</sup> Kaw muka ewwasi impahding ku et kau-unnuddan bittuwen hu pinhed kun lawwan dad kabunyan? Ey kaw heni kan hi-gak et hi-gam hu ngenamung ni tuu? <sup>37-38</sup> Hipa hu kabaelan tun memillang ni kulput niya mengissigging ni hi-gada ma-lat maiduyag hu danum etan idad mamegan puyek?

<sup>34</sup> Kaw kabaelan mun tetkukan ida kulput ma-lat umudan et ma-bel ka? <sup>35</sup> Ey kaw dammutun mandalem hu kedyam ma-lat maukat niya kaw kaum-alin hi-gam et kantuy 'Impahding ku hu inhel mun pehding ku?' <sup>36</sup> Hipa nengidwat ni kalinaing niya nemnem ni tuu? <sup>37-38</sup> Hipa hu kabaelan tun memillang ni kulput niya mengissigging ni hi-gada ma-lat maiduyag hu danum etan idad mamegan puyek?

<sup>39</sup> Kaw kabaelan ni ihhamakan ida layon niyadda impah dan kennen da <sup>40</sup> hedin nantaluddad leyang winu hedin ida kamanhehhegged ni kennen da? <sup>41</sup> Hipa kamemekkan idan impah ni gawwang hedin neupadda et ida kamambeggan hi-gak ni kennen da?

## 39

### *Intu-man Apu Dios ni immehel nan Job*

<sup>1</sup> Kaw inamtam hu getud ni pan-ungnaan idan gelding di duntug? Ey kaw inang-ang mu hu ina-nun kapanpa-lekin makwah? <sup>2-3</sup> Ey kaw inamtam hedin piga bulan da ni han ida limmukbub ni mampa-lek? <sup>4</sup> Hedin neetteng hu impah da et na-let ida law ey ngenamung idan lawwan da.

<sup>5</sup> Hipa nengiebulut ni mambalin idan immeyew hu edum ni kebayyu? <sup>6</sup> Hi-gak ni ebuh nengituttuddun hi-gadan meteggu etan di neahinan ni palnah di eleg mebebleyi. <sup>7</sup> Ida kameiddawwid umpaliteng ni bebley et eleg ida mabalin ni meeyyum ma-lat mengu-unnud ida. <sup>8</sup> Yaddad duntug ni daka panha-adi hu daka penemmakin kennen da.

<sup>9</sup> Kaw dammutun meeyyum hu immeyew ni baka ma-lat dammutun panggunnu winu an manha-ad etan di nekapan panha-adan tu? <sup>10</sup> Ey kaw dammutun i-iket mu hakey et pan-aledum? <sup>11</sup> Kaw dammutun iddinel mud elet tu et maingunu hu ingngunum? <sup>12</sup> Kaw dammutun hi-gatu iddinel mun mengi-ennamut ni pagey mu?

<sup>13</sup> Ya ostrich ey elistun mengippeyagpag ni payak tu. Nem eleg tu han-apput hu stork ni umtayab. <sup>14</sup> Ey tuka hi-yanadda itlug tud palnah et ngenamung idan man-a-attung diman et manekeban. <sup>15</sup> Eleg tu ikkaguh hedin wada mengigsin winu iddeyapdap ni animal di muyung hu itlug tu et magmik. <sup>16</sup> Ey anin ni me-pah ida et henidda beken tun impah e eleg tu ikkaguh hedin mettey ida. <sup>17</sup> Hanniman nengapayak ni hi-gatu e endi nemnem ni tep eggak idwatan ni laing tu. <sup>18</sup> Nem hedin umbesik, man hi-gatu keka-ka-letan e tuka li-bahi tuun nantakkay di na-let ni peteg ni umbesik ni kebayyu.

<sup>19</sup> Job, kaw hi-gam nengidwat ni elet idan kebayyu? Ey kaw hi-gam nengipatmel ni andukkey ni bewek di tengda da? <sup>20</sup> Kaw hi-gam nengidwat ni elet dan umpaytuk e henin dudun? Ey kaw hi-gam nengidwat ni kaumtenul di eleng da et penattakkut dan tuu? <sup>21</sup> Hedin ida mekiggubbat man daka pan-iku-met heli dad puyek. Ey nemahhig e na-let idan umbesik. <sup>22</sup> Eleg da amtan umtakut ey eleg da tekkusi ispadah. <sup>23</sup> Kamangkillang almas idan sindalun nantakkay ni hi-gada niya kaumhili hedin naptangan. <sup>24-25</sup> Hedin simmenul tangguyup e humman pengippeamtaan da e wada gubat man ihik idan umbesik. Eleg ida um-ineng. Ida kaumkenu-ngeh hedin dingngel da tenul ni tangguyup. Da mewan kagibbeka e wada gubat anin ni neidaddawwi kad-an da. Hedin dingngel da mandal idan ap-apun sindalu man ihik idan mekiggubbat.

<sup>26</sup> Kaw hi-gam nenuttuddun gawwang ni umtayab ma-lat mampalaw di south ni ahi kettekettelan? <sup>27-28</sup> Kaw pakkadek mandalem hu tulduh et han tumyab di eta-gey ni an mengapyan buya tud ta-pew ni babattu etan idad naka-itta-gey ni duntug? <sup>29</sup> Kaman-uh-uhdung diman et ang-angen tu animal ni dedpapan tun kennen tu, <sup>30</sup> ni neamung ida impah tu et pangkanen da."

## 40

<sup>1</sup> Intu-man APU DIOS ni immehel nan Job <sup>2</sup> ey kantuy "Kaw wada pay edum ni ihhumang mun hi-gak, e Dios e Kabaelan tun emin? Kammuy hi-gak neihla. Imay, et manhumngan ita."

<sup>3</sup> Kan Job nan APU DIOS ey <sup>4</sup> "Endin hekey hu bilang ku, et humman hu, endi ihhumang kun hi-gam. <sup>5</sup> Dakel law inhel ku et humman hu, endi law edum ni nak e-helen."

<sup>6</sup> Entanniy immehel mewan hi APU DIOS e wada etan di pewek et kantuy <sup>7</sup> "Imay, manhinngangan ita ma-lat wada mahmahak ni hi-gam niya mahapul ni hummangem."

<sup>8</sup> Kaw ya pinhed mun e-helen ey hi-gam hu limpiyuh niya neiptek, beken ni hi-gak? <sup>9</sup> Kaw neiningneh hu elet mud elet ku? Kaw heni kidul hu ehel mu henin ehel ku? <sup>10</sup> Hedin kammuy 'Em' peang-ang mu kakulugan ni dayaw mu niya muka pampahhiyai henin kapengippeang-angin patul ni dayaw tu niya kasina-gey ni saad tud tuka pambalwasi. <sup>11</sup> Ey peang-ang mu bunget muddad tutu-un kamampahhiya malat mampekumbabah ida. <sup>12</sup> Itkel mun hi-gada niya ibabah mudda, anin idan lawah ni tutu-u et pakabbahbah mudda. <sup>13</sup> Iku-kum idad puyek niya heni mudda ikelabut di bebley idan netey. <sup>14</sup> Et hedin kinabaelan mun impahding ida humman, ey hi-gak memengngulun menettebal ni hi-gam niya ebbuluten ku e nengapput ka. <sup>15</sup> Nemnem mu e ya hippopotamus e anggetakkut ni animal ey winedak dama henin hi-gam. Ya helek tuka kenna e henin baka. <sup>16</sup> Nem naka-let humman ni animal. <sup>17</sup> Maka-andeng hu ikul tu e henin keyew e sedar niya mekelhidda laman ni heli tu. <sup>18</sup> Ey mekelhi genit tu henin gembang, niya mekedhel hu heli tu e heni gumek. <sup>19</sup> Humman keka-ka-letan di emin ni animal ni lintuk niya hi-gak ni ebuh pakeapput ni hi-gatu. <sup>20</sup> Wadadda hu kakkayyaggud ni kennen tud duntuduntug e kapan-a-ayyamin edum ni animal. <sup>21-22</sup> Kamanhiddum di gilig ni wangwang di hengeg idan katlubbung e hinenian ni helek e lotus et yadda keyew e willow. <sup>23</sup> Eleg umtakut ni naka-let ni danum di Wangwang e Jordan ey eleg tu hengnguda anin ni mangkepaghitan angah tun danum. <sup>24</sup> Hipa wada kabaelan tun mengullap nunman ni animal ma-lat depapen tu? Ey hipa wada kabaelan tun mengikket ni eleng tu?

## 41

<sup>1</sup> Heni mewan etan ni animal e Lebayatan. Kaw handepap mu humman ni anggetakkut ni animal di baybay ma-lat benwitem winu ma-lat bedbedam hu hunghung tu? <sup>2</sup> Ey kaw kabaelan mun mantetbeng ni eleng tu et guyudem winu tetwikem hu pangal tun pahul <sup>3</sup> et mampehemhememek law ni hi-gam? <sup>4</sup> Kaw dammutun tetbalen tun mambalin ni bega-em ni ingganah? <sup>5</sup> Kaw dammutun eyyumen mu henin sisit et idwat mun u-ungngam et a-ayyamen tu? <sup>6</sup> Kaw dammutun iggatang muddan kaumgatang et gedgeden da et igtang da? <sup>7</sup> Kaw meippa-net di ulu tu winu belat tu pahul hedin dehnagen. <sup>8</sup> Patnaim ni lipputan et eleg mulli law ipidpidwa. Ey eleg mullin hekey liwwana humman ni neipahding.

<sup>9</sup> Eleg mabalin ni medpap tep anin ni ebuh penang-angan ni tuu et metu-lin takut tu. <sup>10</sup> Et hedin hanniman e endi tuun dammutun an meniksikdun nunman ni Lebayatan, hipa makkaw dammutun mekihhanggan hi-gak? <sup>11</sup> Hipa kuma humman ni mengipatnan mangngenghay ni hi-gak ey eleg mekastigu? Hi-gak nanletun emin.

<sup>12</sup> Pinhed kun peamta e ya etan Lebayatan ey naka-let niya et-eteng ni peteg. <sup>13</sup> Ey endi tuun dammutun an memi-ki winu menwik ni belat tu. <sup>14</sup> Ey endi mewan tuun dammutun an menekkan ni bungut tu tep anggetakkut ni peteg hu ngipen tu. <sup>15</sup> Yadda nan-edaedah ni lukhip tu hu happyaw tu. <sup>16-17</sup> Mandummit idan peteg et anin ni dibdib et eleg tu hanlehep.

<sup>18</sup> Hedin bimma-kih man heni apuy hu matetu e kamandadalang e heni ang-ang ni aggew ni kamangkewa-wa. <sup>19</sup> Kameukkat hu heni apuy niya ngalab di bungut tu <sup>20</sup> niya kameukkat hu ahuk di eleng tun heni ahuk ni kamangkegihheb ni emattan helek. <sup>21</sup> Kapetbel ni yayyah tu ngalab niya kameukkat hu tebal ni apuy di bungut tu.

<sup>22</sup> Et-eteng hu buklew tu niya anggetakkut hu ang-ang tu. <sup>23</sup> Ey mekelhin emin hu annel tu e heni gumek. <sup>24</sup> Kamei-ellig di makakkelhin batu hu puhu tu e eleg ni hekey umtakut. <sup>25</sup> Hedin imminah ey anin idan na-let ni peteg et ida kaumtabay ey endi mabalin ni pehding da hedin bimma-dung. <sup>26</sup> Eleg mabalin ni melipputan humman ni anggetakkut ni animal tep anin ni ispadah winu pahul et eleg tu hanliput belat tu. <sup>27</sup> Anin ni gumek niya gembang hu igginyang ni hi-gatu et endi silbitu, tep henidda dagami winu nedunut ni keyew ni hi-gatu. <sup>28</sup> Eleg tu pay pekinna pana ey hedin binelabay da man heni dagemin ebuh etan neiteng-il ni hi-gatu. <sup>29</sup> Eleg tu mewan pekinna pa-tu tep heni dagemin hi-gatu niya anggengi-ngi tu pahul ni meigginyang ni hi-gatu. <sup>30</sup> Hedin ya lukhip ni egeh tu ey makakkelhi niya matedem et heni nealedu hu puyek di tuka keddapi.

<sup>31</sup> Hedin mewan mangkaykay di dallem ni baybay ey tuka kiwaa danum et heni kamanlellewwag <sup>32</sup> e heni mablak ni upag. <sup>33</sup> Endi takut tu niya endi edum ni animal eyad puyek ni henin hi-gatu. <sup>34</sup> Hi-gatu ap-apun emin ni animal di muyung. Endi bilang ni edum ni animal di tuka penang-ang tep nemahhig tuka pampahhiya."

## 42

<sup>1</sup> Himmumang hi Job ey kantuy <sup>2</sup> “APU DIOS, inamtak e han-ipahding mun emin tep dammutun pehding mu hu hipan pinhed mu niya endi tuun mabalin ni mengippesiked ni hi-gam. <sup>3</sup> Kammuy ‘Hipa huyyan tu ni-ngangu kakehginga nakka pannemnem ey endin hekey inamta tu?’ Hi-gak humman! Mukun hanniman ey tep nakka e-ehheladda hu kamengippetngan hi-gak e eggak han-awat.

<sup>4</sup> Kammuy ‘Mandedngellak ma-lat humangen ku hu mahmahan mun hi-gak.’

<sup>5</sup> Yan nunman ey dingngel ku inhel ni edum ni tuun hi-gak ni meippanggep ni hi-gam. Nem yan nunya ey inang-ang dakan hi-gak. <sup>6</sup> Et humman hu, nakka umbaing niya nakka mantuttuyyu et deh e nakka manyuyyuddung di dep-ul ma-lat peang-ang ku e nakka mantuttuyyu.”

<sup>7</sup> Negibbuh ni immehel hi APU DIOS nan Job et kantun Eliphaz e iTeman ey “Nakka umbubunget ni hi-gam niyadda etan dewwan gayyum mu, tep beken ni makulug hu inhel yun meippanggep ni hi-gak. Beken kayun henin Job e bega-en ku e makulug numan inhel tu. <sup>8</sup> Et humman hu, ilaw kayun Job ni pitun baka niya pitun lakkitun kalneroh et iappit yun hi-gak tep ya impahding yu. Iddasalan dakeyun Job ma-lat eggak ipahding ni hi-gayu hu lebbeng tun kastigu yu tep ya impahding yu. Beken kayun henin Job e bega-en ku e makulug numan hu inhel tun meippanggep ni hi-gak.”

<sup>9</sup> Inu-unnud di Eliphaz, hi Bildad et hi Sophar humman ni inhel APU DIOS et denglen APU DIOS hu dasal Job.

<sup>10</sup> Negibbuh ni indasalan Job ida gayyum tu ey imbanggad APU DIOS emin hu kinedangyan tu ey induman tu pay et mandubli. <sup>11</sup> Entanni ey immalidda law aaggin Job niyadda gagayyum tu et manhamul idad baley tu. Impeang-ang da law hemek dan hi-gatu ey ina-alluk da ma-lat liwwanan tudda nemahhig ni hinelheltap tun impaelin APU DIOS ni hi-gatu. Emin ida ey indawtan da hi Job ni pihuh niya singsing ni balituk.

<sup>12</sup> Binendisyonan APU DIOS hi Job ni daddakkel nem yan nunman, et yan nunya law ey wada hampulut epat ni libun kalneroh tu, enem ni libun kamel tu, dewwan libun baketu niya hanlibun kebayyu tu. <sup>13</sup> Ey newada pitun lalakkin u-ungnga tu niya tellun bibi-i. <sup>14</sup> Ya pengulwan ni bii ey hi Jemimah, hi Kesiah hu neihayned ey hi Keren Hapuk hu udiyan. <sup>15</sup> Kakat-aguddan peteg ida huyyan bibi-in u-ungngan Job. Ey endi edum ni bibi-i eyad puyek ni mei-inggeh di kinat-agu da. Indawtan idan Job ni puyek ni tawid da, anin idan lalakkin u-ungnga tun aaggi da.

<sup>16</sup> Neipalpun nunman ey nambiyag pay hi Job ni hanggatut et na-pat ni toon et mepidwaan ni neap-apuan ey inang-ang tu pay ida humman ni inap-apu tu. <sup>17</sup> Neka-amma hi Job ey melinggep neitu-wan tu et han matey.



## Psalms

*Ya meippanggep nunyan liblul e Psalms*

Huyyan liblul ni Psalms hu neamuamung ni a-appeh ni intudek idan Hebrew ni kamengullug nan Apu Dios. Huyyaddan a-appeh ey meussal ni penaydayaw nan Apu Dios niya umbaddang idan kamengullug ni menaydayaw niya mengu-unnud ni hi-gatun kewa-wa-wa.

Huyyadda kaia-appeh idan Hebrew ni daka keemmungin menaydayaw nan Apu Dios. Ya edum idan nunyan a-appeh ey daka iddasal ni daka pambeggain Apu Dios ni baddang ma-lat baddangan tuddad ligat da (Psalms 55) winu ma-lat peyaggud tudda hedin ida kamandedgeh. (Psalms 6 et ya 41) Yadda etan edum ey a-appeh ni tuun Apu Dios ni pantuttuyyuan tun liwat tu. (Psalms 32, 38, 51 et ya 130) Ya edum ey a-appeh ni penaydayaw nan Apu Dios. (Psalms 113, 117 et ya 145-150.) Ya edum ey tugun idan kamengullug nan Apu Dios et ya elaw ni pambi-biyag da. Ya edum ey peamta tu impahding Apu Dios ni nengihwang idan tutu-ud buhul da. (Psalms 18, 81 et ya 107)

Wadadda mewan edum eyad liblul ni Psalms e tuka ene-ehhela hu elaw Jesus Christo et yadda pehding tullin ellian tud puyek, ma-lat peang-ang tu e hi-gatu hu pinilin Apu Dios ni Patul niya mengippaptek ni tutu-u, niya metegguan alid katey. (Iinggeh yu Psalms 22 et ya Acts 4:25-27, 13:33-34) Hi Jesus Christo hu pinutuk Apu Dios ni mei-appit tep ya liwat tayu. (Psalms 40:6-8 et yad Hebrews 10:1-10) Inhel mewan Apu Dios e hi Jesus ey mambalin ni Eta-gey ni padi. (Psalms 110 et yad Hebrews 7:17-21) Hi Jesus hu kei-elligan ni 'batu' ni pinilin Apu Dios. (Psalms 118:22-23 et yad Matthew 21:42)

### Ya Nemangulun Nunyan Liblul e Psalms

#### 1

*(Psalms 1-41)*

<sup>1</sup> Man-am-amleng ni peteg ida tuun eleg da u-unnuda hu kaittugun idan lawah ni tuu. Eleg ida mekikillaw idan nunman ni eleg mengu-unnud nan APU DIOS ey eleg da iu-unnud di daka pehding.

<sup>2</sup> Tep ya ngu daka pan-amlengi ey ya daka pengu-unnudin tugun APU DIOS et kewa-wa-wa niya kahilehileng ey humman hu daka ilillingisin eddaeddalen.

<sup>3</sup> Ya pambalanan ni daka pehpehding ey panyaggudan ni biyag da et henin etan ni keyew ni simmemel di gilig ni kulukul e eleg mekling niya makallameh.

<sup>4</sup> Nem beken ni hanniman hu meippahding idan tuun lawah daka pehding, tep heniddalli ngu degin metel-ap et ihuyaw ni dibdib.

<sup>5</sup> Et humman hu, yalilin kedettengan ni panhuwetan APU DIOS ey eleg tu hehmekadda humman ni tuun lawah daka pehding niya eleg ida mabalin ni mei-dum di tutu-un kaebbultan APU DIOS.

<sup>6</sup> Em, mebahbah idalli lawah ni tutu-u, nem hedin yadda etan tutu-un kamengu-unnud ni tugun APU DIOS ey ippaptek tudda.

#### 2

<sup>1</sup> Kele emin di kebebbbley ey wadadda kamengehding nan APU DIOS? Ey kele na-mu ya daka nenemneman pehding ey yadda endi silbitu?

<sup>2</sup> Anin idan papatul da niyadda aap-apu da et ida kamandadagyum ni mengehding nan APU DIOS et ya etan pinutuk tun mampatul. \*

<sup>3</sup> Kanday "Eleg tayu u-unnuda hi APU DIOS et ya etan pinutuk tun patul ma-lat beken law ni hi-gada hu pan-ap-apu tayu et pappegen tayu nanhimitan tayun hi-gada."

<sup>4</sup> Nem hi Apu Dios e Ap-apud kabunyan ey tuka ngi-ngi-ngii hu planuh dan endi silbitu.

<sup>5</sup> Entanni ey bimmunget ni hi-gada ey simmakut idan nemahhig ni bunget tu.

<sup>6</sup> Kantuy "Impayudung kud Zion, e bebley ni nakka panha-adi hu pinutuk kun mampatul di kebebbbley." †

<sup>7</sup> Humman ni patul ey kantuy "Peamtak etan inhel APU DIOS ni hi-gak ni kantuy 'U-ungnga dakan hi-gak. Peamtak ni nunya e hi-gak hi Amam. ‡

<sup>8</sup> Ibegam ni hi-gak et idwat ku kelebengan mun man-ap-apud kebebbbley eyad puyek.

<sup>9</sup> Et-eteng ali kabaelan mun man-ap-apun hi-gada niya nelakah pemahbahan mun hi-gada henin kapemhikin bangan nekapyad pula.' "

\* 2:2 2:2 [1-2] Acts 4:25-26 † 2:6 2:6 Ya Zion ey humman etan bebley David e kandan Jerusalem winu Duntug ni kad-an ni Tempol. ‡ 2:7 2:7 Acts 13:33, ya Hebrews 1:5 et ya 5:5

<sup>10</sup> Et humman hu, hi-gayuddan papatul niya aap-apud kebebbebley, dengel yu ma-lat pan-adlan yu eya e-helen kun hi-gayu.

<sup>11</sup> Pan-am-amleng kayun mansilbin APU DIOS ey helipat-i yu et eleg yu ipahding ida eleg tu pinhed.

<sup>12</sup> Ey pengu-unnud kayu etan ni U-ungnga tu, tep hedin eleg yu u-unnuda, man pinhakkeyey umbunget hi APU DIOS et pappegen tu biyag yu.

Yadda etan tuun kamengiddinnel nan APU DIOS ni mengippaptek ni hi-gada ey um-amleng ida.

### 3

*Ya a-appeh David ni meippanggep ni binsikan tun pemetteyan et ni u-ungnga tu e hi Absalom ni hi-gatu*

<sup>1</sup> APU DIOS, dakel ida buhul kun neminshed ni memettey ni hi-gak.

<sup>2</sup> Ya meippanggep ni hi-gak hu daka e-ehhela e kanday "Nanna-ud ni eleg ihhehwang APU DIOS humman ni tuu."

<sup>3</sup> Nem anin ni hanniman hu kanda e APU DIOS, et inamtak e baddangan muwak et meihwangngak kayad lawah ni hipan mekapkapy. Hi-gam hu kamengippetuled ni hi-gak ey peidaydayaw muwak.

<sup>4</sup> Hedin nakka mampehemhememek ni mandasal ni hi-gam ma-lat baddangan muwak, man muka dedngela dasal ku etan di duntug ni kad-an mu.

<sup>5</sup> Anin ni yan nakka keuggipin kahilehileng et muwak kai-adug, et melinggeppak ni umbangun ni kakkabbuhhan.

<sup>6</sup> Et humman hu, enggak umtakut idan kalibulibun buhul kud nanlinikweh.

<sup>7</sup> APU DIOS, inah ka anhan et baddangan muwak ma-lat meihwangngak eyad kapehpehding idan buhul kun hi-gak. Bahbah mudda ma-lat endi inna-nu dan mengippahding ni lawah ni hi-gak.

<sup>8</sup> Hi-gam e APU DIOS hu kamengippanghel hedin hipa mengapput. Ey idwat mu et anhan hu panyaggudan min emin ni tuum.

### 4

*Ya a-appeh David ni kameunnudin gitalah ni meidwat etan ni kamengipappangnguluddan kaman-a-appeh*

<sup>1</sup> Dengel mu anhan hu dasal ku e APU DIOS kun kamengi-ehngeng ni hi-gak. Binenaddangan muwak di hipan ligat ku, et nakka medinnel ni baddangan muwak mewan ni nunya.

<sup>2</sup> Hi-gayun katuutuu, kele anhan pinhed yun peteg ni pedngelan yuwak? Ey kaw eleg yu issiked ni mengippebehul ni itek ni hi-gak?

<sup>3</sup> Nemnem yu huyya: hi APU DIOS ey inappil tudda etan kamengu-unnud ni hi-gatu ma-lat hi-gada hu pantu-u tu. Ey tuka dedngela dasal ku.

<sup>4</sup> Helipat-i yu ma-lat anin ni wada bungngetan yu, ey beken humman ni umhulun ni panliwwatan yu. \* Ey entan tu liwwan huyya ma-lat anin ni yan keuggipan yu ey nemnemnemen yu.

<sup>5</sup> Pandinel kayun APU DIOS ey iappit yu hu lebbeng tun kamei-appit ni hi-gatu.

<sup>6</sup> Wadadda hu edum ni tuun kanday "Hipalli na-mu memaddang ni hi-gatsu?"

Et humman hu, peang-ang mu anhan hu binabbal mun hi-gami e APU DIOS.

<sup>7</sup> Nem ya kakulugan tu ey et-eteng hu amleng kud panyaggudan kun indawat mu nem ya amleng idan tuun dakel inggaud da niya dakel hu meinum ni kinapya da.

<sup>8</sup> Nakka mekallinggep, et humman hu nakka maka-uggip ni hileng, tep inamtak e wada ka e APU DIOS ni kamengippaptek ni hi-gak.

### 5

*Ya a-appeh David ni kameunnudin tullaling ni meidwat etan ni kamengipappangnguluddan kaman-a-appeh*

<sup>1-2</sup> APU DIOS, dengel mu anhan hu dasal ku et ipaptek muwak di nakka panligligasi, tep hi-gam ni ebuh e Patul ku niya Dios ku hu nakka pambeggain baddang.

<sup>3</sup> Kekakkabbuhhan ey muka dedngelan nakka umdasadasal ni hi-gam ni hinehhegged ku hu hipan ihhumang mud nakka ibbagad dasal ku.

<sup>4</sup> APU DIOS, eleg mun hekey pinhed hu lawah, et humman hu, anin ni ekket ni kapanliwwasin tuu et eleg mu ebbuluta.

\* 4:4 4:4 Ang-ang yud Ephesians 4:26

<sup>5</sup> Eleg mabalin ni um-alidda kamampahhiyyan tuud kad-an mu ey anggebe-hel mudda etan kamengapkapyan lawah.

<sup>6</sup> Bahbahan muddalli hu maitek ni tuu ey anggebe-hel muddan peteg hu mapetey niya maheul ni tuu.

<sup>7</sup> Nem himmek muwak ngu tep ya impeminhed mu et mukun dammutun daka daydayawen ni hi-gak di Tempol ni muka panhahha-adi.

<sup>8</sup> APU DIOS, dakel ni peteg hu buhul ku, et humman hu, baddangi muwak anhan et itudum hu pinhed mun pehding ku.

<sup>9</sup> Eleg idan hekey meiddinnel hu buhul ku, tep endi hu makulug ni daka e-hela niya ebuh hu pemahbahan dan edum dan tuun daka nenemneman pehding. Ya bungut da ey kamei-ellig etan di eleg matengeb ni kulung e kamanhemmu, tep lawah hu daka heppita. Daka he-ula edum dan tuu. \*

<sup>10</sup> APU DIOS, kastigum ida humman ni tuu ey pambalin mun kebabbahan da hu hipan lawah ni daka nemnemman ippahding. Deyun mudda et lumaw idad lawwan da, tep nemahhig hu ngehay dan hi-gam, et ebuh hu panliwwatan ni daka pehpehding.

<sup>11</sup> Nem yadda etan tuun neminhed ni hi-gam et ebuh kan daka iddinel ni da keihhikkugan ey daka ia-appeh hu daka penaydayaw ni hi-gam. Et humman hu, ipaptek mudda ma-lat man-an-ladda.

<sup>12</sup> APU DIOS, panyaggud mudda etan tuun daka paka-u-unnuda hu pinhed mu, ma-lat penang-angan dan impeminhed mun kamei-ellig di happiyyaw ni kaihhanid buhul.

## 6

*Ya a-appeh David ni kameunnudin gitalah ni meidwat etan ni kamengipappangnu-luddan kaman-a-appeh*

<sup>1</sup> APU DIOS, entan tuwak anhan ibubbunget niya entan tuwak anhan kastigu tep ya ni bunget mun hi-gak.

<sup>2</sup> Nem hemek muwak niya pa-let muwak kumaddan, tep iyyadyan nemahhig ni kimmappuyyak, et endin hekey law hu elet ku.

<sup>3</sup> Ey nemahhig ni kamemunnumunnu hu nemnem ku, et nakka pekdag law hehhegged ni pemaddangan mun hi-gak, nem ay pigantu na-mu e APU?

<sup>4</sup> APU DIOS, hemek muwak anhan et umli kan memaddang ni hi-gak ma-lat meihwangngak eyad ketteyyan ku!

<sup>5</sup> Eggak pinhed ni umlaw di dungay, tep endi hu kamannemnem ni hi-gam niya endi hu kamengidaydayaw ni hi-gam diman.

<sup>6</sup> Kimmappuy hu annel ku tep ya palapalak kun kahilehileng ey nemahhig ni kame-bel hu abek kun lewak.

<sup>7</sup> Eggak law um-aang-ang, tep limmetuk hu matak ni nanginangih kud kapehpehding idan buhul kun hi-gak.

<sup>8-9</sup> Hi-gayuddan tutu-un lawah hu tuka pehpehding, pampenga-allaw kayu, tep dingngel APU DIOS hu nangih ku niya nakka pampehemhemmekid dasal kun nakka pambeggain baddang tu ey inamtak e baddangan tuwak.

<sup>10</sup> Et humman hu, emin idalli buhul ku ey mebe-ingan idad keapputan da, et medegyun idalli.

## 7

*Ya a-appeh David ni in-a-appeh tun APU DIOS meippanggep nan Kush e helag Benjamin*

<sup>1</sup> Hi-gam e APU, e Dios kun nakka keihhikkugi, baddangi muwak anhan, et meihwangngak ida eyad buhul kun kamemmemdug ni hi-gak.

<sup>2</sup> Tep hedin eleg muwak baddangi et dedpapien da-ak ni hi-gada, man illaw da-ak di neitlun endi umbaddang ni hi-gak, et da-ak bena-nuten diman, henin kapehding ni layon.

<sup>3-4</sup> AP-APU e Dios ku, hedin wada impahding kun lawah di edum kun tuu, winu wada hineul kun gayyum ku, winu wada piniliw kun limmun buhul ku,

<sup>5</sup> man anin ni padpap muwak idan buhul ku, et anin ni petteyen da-ak. Ey anin ni diman nak et mena-yun nak ni meippullay di puyek, hedin wada impahding kun heniddan nunya.

<sup>6</sup> APU DIOS, entan tu pakdag i-ineng, nem kahegag ka et baddangan muwak ma-lat penang-angan idan buhul kun bunget mun hi-gada. Ipahding mu hu kelebngan mun neipuan di kinalimpiyuh mu.

\* 5:9 5:9 Romans 3:13

<sup>7</sup> Amung muddan emin hu katuuuuud kebebbbley, et hi-gam hu pan-ap-apu dan emin, anin ni itten kad kabunyan.

<sup>8</sup> APU DIOS, hi-gam ni ebuh hu huwewet ni emin ni tuud kebebbbley. Et humman hu, pinhed kun peamtam e endi bahul kun hi-gam e Keta-ta-geyyan ni APU, tep endi impahding kun lawah ni nak pambehhulan.

<sup>9</sup> APU DIOS, hi-gam hu kekakkayyaggudan ey hi-gam ni ebuh nengamta hedin kayyaggud winu lawah hu wadad nemnem ni tuu. Et humman hu, pasiked mu anhan hu lawah ni kapehpehding idan tuun eleg mengu-unnud ni hi-gam, nem idwat mu panyaggudan idan kamengu-unnud ni hi-gam.

<sup>10</sup> Hi-gam, e APU DIOS hu nakka iddinel ni mengippaptek ni hi-gak, tep muka ihehwang ida kamengu-unnud ni hi-gam.

<sup>11</sup> Limpiyuh hu muka penuwet, et inamtak e nanna-ud ni kastiguen mudda tuun lawah daka pehpehding.

<sup>12-13</sup> Hedin eleg mantuttuyyu hu tuun lawah ni tuka pehpehding, man nandaddan hi APU DIOS ni mengastigun hi-gatu. Et ta-liden tu ispadah tu ey iddaddan tu almas tu niya kamantetebbel ni panetu.

<sup>14</sup> Ya tuun lawah hu tuka pehpehding ey lawah dama hu wadad nemnem tu. Ya hauhaul niya pemahbahan tun edum tun tuu hu tuka nenemneman pehding.

<sup>15</sup> Nem humman ni tuun ya lawah hu tuka nenemnema ey humman ngu hu memahbah ni hi-gatu, et heni nakna ngud kinapya tun bitu.

<sup>16</sup> Emin hu lawah ni impahpahding tu niya tuka nemnemneman ippahding di edum ni tuu, ey mambangngad ni meipahding idan hi-gatu.

<sup>17</sup> Hedin ngun hi-gak, man nakka mansalamat nan APU DIOS tep ya kakinayyaggud ni peteg ni tuka pehding. Ey ia-appeh ku hu nakka penaydayaw ni ngadan tu e Keta-ta-geyyan ni APU.

## 8

*Ya a-appeh David ni kameunnudin gitalah ni meidwat etan ni kamengipappangnu-luddan kaman-a-appeh*

<sup>1</sup> APU DIOS e Ap-apu mi, kameang-ang hu kasina-gey mud emin di hipan wadad puyek. Ya muka keidaydayawi ey endi kei-ingnegan tu, tep anin di kabunyan et hi-gam hu kameiddeyyaw.

<sup>2</sup> Anin idan u-ungnga niyadda geggellang et netuttudduan idan kayyaggud ni pandaydayaw ni hi-gam. \* Ey gapu tep ya et-eteng ni kabaelan mu ey nelakah mun pesikked hu ngehay idan buhul mu et meapput ida.

<sup>3</sup> Hedin intangaw kud kabunyan, et inang-ang ku hu lintum ni bulan niyadda bittuwen ni inha-ad mud neiha-dan da,

<sup>4</sup> ey kangkud nemnem kuy kaw hipa ngu anhan ida tuu et mudda kanemnemnema niya mudda kaipapaptek?

<sup>5</sup> Lintum idan nebababah ni ekket nem yadda anghel, nem nekemtang ni ebuh. Ey impedaydayaw mudda,

<sup>6</sup> niya pinutuk muddan pan-ap-apun emin ni lintum, †

<sup>7</sup> heniddan kalneroh, yadda baka, yadda edum ni kaman-ayyam di puyek,

<sup>8</sup> yadda sisit, yadda deleg niyadda edum ni kaman-ayyam di baybay.

<sup>9</sup> APU DIOS e Apu mi, makulug ni kameang-ang di emin ni hipan wada eyad puyek hu kasina-gey mu.

## 9

*Ya a-appeh David ni meidwat di kamengipappangngulun a-appeh. Huyyan a-appeh ey kei-ingnegan tu etan a-appeh ni kantuy "Ya neteyyan ni lakin u-ungnga."*

<sup>1</sup> APU DIOS, daydayawen dakan hi-gak di puhuk niyad nemnem ku. Ey peennamtak di emin hu kakinayyaggud ni impahding mu.

<sup>2</sup> Nakka man-am-amलग gapuh ni hi-gam, et nakka ia-appeh hu nakka penaydayaw ni hi-gam e Apun Keta-ta-geyyan.

<sup>3</sup> Hedin hi-gam hu nekihnggad buhul ku, man neala ni netukkad ida ni netey ida.

<sup>4</sup> Hi-gam ey limpiyuh ka niya neiptek ni emin hu muka panhuwet, et humman hu, impeang-ang mu e endi bahul ku.

\* 8:2 8:2 Ang-ang yu hu Matthew 21:16 † 8:6 8:6 [4-6] Hebrews 2:6-8

<sup>5</sup> Nem hedin yadda etan tutu-ud kebebbley ni lawah daka pehpehding ni eleg mengu-unnud ni hi-gam ey kammuy nambahul ida, et kastiguen mudda et meliwwan idallin ingganah.

<sup>6</sup> Impeka-apput mudda buhul mi ey nambahbah mu bebley da, et meliwwan idallin ingganah.

<sup>7</sup> Nem hi-gam, e APU DIOS, ey patul kan ingganah et itten kad yinudungan mun manhuwet di emin.

<sup>8</sup> Meandeng muka panhuwet ey limpiyuh muka pehding ni man-ap-apu.

<sup>9</sup> APU DIOS, hi-gam hu kakeihhikkugiddan kamanhelheltap ey hi-gam hu kaumbaddang hedini wada ligat.

<sup>10</sup> Emin ida kamengu-unnud ni hi-gam, e APU DIOS, ey hi-gam hu daka iddinel, tep eleg mu iwwaklin hu tuun kamambeggan hi-gam ni mahapul tu, nem muka pekahhengnguda.

<sup>11</sup> Emin itu, ia-appah tayu hu penaydayaw tayun APU DIOS e Ap-apud Zion ey peamta tayuddan katuutu hu kayyaggud ni impahpahding tu.

<sup>12</sup> Tep eleg tudda liwwana hu tutu-un kamanligligat ey tudda kabaddangi hu kamambeggan baddang ni hi-gatu, nem kastiguen tudda hu mapetey.

<sup>13</sup> Hemek muwak anhan e APU DIOS et baddangan muwak eyad kapehpehding idan buhul kun hi-gak. Ipaptek muwak ma-lat eggak matey

<sup>14</sup> ey ma-lat wada inna-nu tun nak penaydayawan ni hi-gam di hinanggaddan dakel ni tuud Jerusalem niya ma-lat wada inna-nu tun pengippeang-angan kun am-amleng kud nengihwangan mun hi-gak di lawah.

<sup>15</sup> Yadda tuun eleg mengu-unnud nan APU DIOS ey humman ni eleg da pengu-unnudi hu umhulun ni kebabahan da, et henidda etan ni tuun nakna ngud kinapya tun bitu.

<sup>16</sup> Impeang-ang APU DIOS hu kinaDios tud kinalimpiyuh ni tuka pehding ni manhuwet. Et mukun, humman idan tutu-u ey meknadda ngud bitun kinapya da.

<sup>17</sup> Emin ida tuun lawah daka pehpehding ey nanna-ud ni mena-yun idad dungay, tep yadman dedan hu lawwan idan tuun kahing nan APU DIOS.

<sup>18</sup> Nem yadda newetwet ni tutu-u ey eleg ida mannananeng ni meliwwan, tep dewwatan dalli daka namnamaha.

<sup>19</sup> APU DIOS, ipahding mu hu pinhed mu ey entan tu iebulut ni wada tuun an manla-pah ni hi-gam. Huwesim ida tuun kahing ni mengu-unnud ni hi-gam et ehelen mu kastigu da.

<sup>20</sup> Peang-angim idan tekkutan da ma-lat pengamtaan da e tuuddan ebuh.

## 10

*Ya a-appah David meippanggep ni kalinimpiyuh*

<sup>1</sup> APU DIOS, kele anhan kaka meiddawwin hi-gami ey kaka mantellu hedini wada ligat mi?

<sup>2</sup> Ida kamampahhiya hu tutu-un lawah daka pehpehding ey daka panligligat hu nangkewetwet. Ang-ang mu et emin hu lawah ni daka nenemneman ippahding di edum ni tuu ey hi-gada ngu hu keippahdingan tu.

<sup>3</sup> Daka ippahhiya hu lawah ni daka amyawi ey daka tettebaladda hu neagum ni tuu niya lawah hu daka e-helan meippanggep ni hi-gam e APU DIOS.

<sup>4</sup> Humman idan tuu ey eta-gey hu daka pannemnem ni annel da et kahing idan mengu-unnud ni hi-gam. Kaday endin hekey hu bilang mu.

<sup>5</sup> Nem ay kayyaggud ni-ngangu hu kapambalinin emin ni daka pehding. Nem eleg da han-awat hu elaw ni pengastigum ni hi-gadan edum alin aggew. Ey daka lalamhiha hu buhul da.

<sup>6</sup> Kandad nemnem day "Kakkayyaggud ni emin hu pambalinan ni mika kapkapyaa ey nanna-ud ni endi mi panliggatan."

<sup>7</sup> Ebu hu idut, \* ya itek niya tenattakkut ni wadad bungut da. Neidadaddan dedan emin di bungut da hu hipan lawah ni daka e-hela.

<sup>8</sup> Ida kamantattallud engeenget di gilig ni bebley ni daka pambebbettakin tuun pinhed dan petteyen, anin ni endi bahul nunman ni tuu. Ida kamansissi-im et yadda etan tuun endin hekey kabalanan dan mengibleh hu daka pupputukan petteyen.

<sup>9</sup> Henidda etan ni layon ni kamantattallun kamanhehgedgep ni linggeman ni animal ni dedpapan tu. Henidda dama etan ni kamandedweng e hedini dimpap tu hu dinweng tu, man tuka pan-ibsik lad pengi-ennamutan tu.

\* 10:7 10:7 Romans 3:14

<sup>10</sup> Naka-let ida, et humman hu, endi mabalin ni ippahding etan ni daka dedpapa, tep endi kabaelan da. <sup>11</sup> Humman idan tuun lawah daka pehpehding ey kanday “Eleg hengngudan Apu Dios hu tayu kapehpehding, tep beken ni hi-gatsu hu tuka hellipati.” Huyya hu daka penghel, tep kanda na-mu ngu nem eleg han-ang-ang idan APU DIOS.

<sup>12</sup> APU DIOS, nemnem mudda anhan etan tuun daka panlelehmani ligat da ey kastigum ida etan tuun lawah daka pehpehding. <sup>13</sup> Kele na-muy dammutun pihhulen dakaddan tutu-un lawah daka kapkapyaa? Ey kanda ni-nganguy “Eleg tuwak kastiguan Apu Dios.”

<sup>14</sup> Nem inamtam e APU DIOS ey muka ang-ang-anga hu daka pehpehding ni mengippeheltap ni edum dan tuu, et humman hu, kastigum ida. Hi-gam hu kapandinneliddan anggehmemek ni tuu ey hi-gam hu kamengi-ehnung idan nangkepuhig, tep hi-gam hu kaumbaddang ni hi-gada.

<sup>15</sup> APU DIOS, ekal mu hu hipan kabaelan idan tuun lawah daka pehpehding et kastiguen mudda ma-lat mepappeg humman ni daka pehpehding.

<sup>16</sup> APU DIOS, mannananeng ni hi-gam hu patul. Pea-allaw mudda eyad bebley mu emin hu tuun hin-appil hu dios ni daka daydayawa.

<sup>17</sup> APU DIOS, muka dedgela hu dasal idan anggehmemek ni tuu, et mukun inamtak e ellubyagen muddad daka panhelheltapi.

<sup>18</sup> Muka hehmekadda hu tuun kamanligligat ey muka i-ehnung ida nangkepuhig, et mukun inamtak e ippaptek mudda et eleg petattakut idan tuun lawah daka pehpehding.

## 11

*Ya a-appeh David ni meidwat etan ni kamengipappangngulun a-appeh*

<sup>1</sup> Hi APU DIOS hu nakka keihhikkugi. Et humman hu, hi-gayuddan tuu, entan tuwak itu-dak di duntug ni an mantelludman e henin sisit.

<sup>2</sup> Ey anin ni kanyuy “Wadadda mannuman hu lawah ni tuun nambetak ni memetty idan kayyaggud ni tuu,” et eggak umtakut.

<sup>3</sup> Em, eggak umtakut anin pay ni kanyuy “Endi damengu hu kabaelan idan kayyaggud ni tuun umbaddang eyad puyek, tep endi hu ustuh ni linteg ni meunnud.”

<sup>4</sup> Eggak nisi umtakut, tep ya kakulugan tu, immen hi APU DIOS di yinudungan tud kabunyan e daitsu kauh-uhdungin emin ni tuu, anin ni attu hu kad-an tayu. Ey inamta tu hu hipan kapehpehding ni tuu.

<sup>5</sup> Et tuka hellipati kapehding idan kayyaggud niya lawah ni tuu. Anggebe-hel tudda emin hu mangkabunget ni tuu.

<sup>6</sup> Et humman hu, peelli tullu hu kamantetebbel ni apuy niya maka-atung ni dibdib etan idad lawah ni tutu-u et kastiguen tudda.

<sup>7</sup> Hi APU DIOS ey limpiyuh ey nakappinshed tudda hu tuun kayyaggud hu daka pehpehding. Et humman hu, mekihha-ad idallin hi-gatun edum ni aggew.

## 12

*Ya a-appeh David ni kameunnudin gitalah ni meidwat etan ni kamengipappangngulun a-appeh*

<sup>1</sup> APU DIOS, baddangi dakemi anhan, tep iyyadyan hahhakkey ida law hu makulug ni kamengu-unnud ni hi-gam. Endi hakey ni dammutun pandinnelan, tep wada hakkeyey maitek ida.

<sup>2</sup> Anin ida etan ni nantatakdul baley da et ida kamanhinlalangkak. Ma-nud hinangga da, tep kakkayyaggud hu daka e-hela, nem ya kakulugan tu ey lawah hu wadad nemnem da.

<sup>3</sup> Paineng mudda humman ni tuu et isiked dan mampahhiya

<sup>4</sup> tep kanday “Han-ipahding tayu hu hipan pinhed tayu, tep mahepiti itu. Endin hekey hu tuun an mengippeinneng ni hi-gatsu.”

<sup>5</sup> Nem kan APU DIOS ey “Inang-ang ku hu kapanligligasiddan anggehmemek niya newetwet ni tutu-u ey dingngel ku palak da tep ya kapehding ni edum dan tuun hi-gada. Et humman hu, un-ali-ak et ihwang kudda, tep humman hu nebayag ni daka hehhegedan pehding ku.”

<sup>6</sup> Emin hu muka e-helan pehding mu e APU DIOS ey kaum-amnu, et mukun endi dewadewad hipan muka e-hela. Kamei-ellig etan di silver e hediniyug ni nangkappitu, man nemamah law hu kametdai.

<sup>7-8</sup> Nem anin ni attun bebley et dakel ida hu tuun ebuh hu lawah ni pinpinhed dan pehpehding ey katettebaladdan edum dan tuu. Et humman hu, ipaptek dakemi anhan ni tuum ni kamengu-unnud ni hi-gam e APU DIOS ma-lat meihwang kamin ingganah di hipan lawah ni daka pehpehding.

**13**

*Ya a-appeh David ni meidwat etan ni kamengipappanggulun a-appeh*

- <sup>1</sup> APU DIOS, kaw e-wayen muwak ni ingganah? Pigan tu penengngudan mun hi-gak?  
<sup>2</sup> Pigan tu hu kepappegan eyan kakemunnunnuin nemnem ku? Ey kaw kewa-wa-wan umlelemyungngak katted ngu? Entan tu anhan iebulut ni apputen da-ak ni ingganah idan buhul ku.  
<sup>3</sup> APU DIOS, uhdungi muwak anhan et dengelen mu dasar ku. Ey pambangngad mu elet ku e Dios ku ma-lat eggak ni matey.  
<sup>4</sup> Ippatek muwak anhan ma-lat eleg mabalin ni da-ak apputen idan buhul ku et eleg idalli man-am-amleng ni nengapput ni hi-gak.  
<sup>5</sup> APU DIOS, nakka medinnel e nehammad hu impeminhed mun hi-gak niya nakka man-am-amleng, tep inamtak e baddangan muwak et meihwangngak di pehding idan buhul ku.  
<sup>6</sup> Impeang-ang mu hu kakinyayggud mun hi-gak, et humman hu, nakka i-ena-appeh hu nakka penaydayaw ni hi-gam.

**14**

*Ya a-appeh David ni meidwat etan ni kamengipappanggulun a-appeh*

- <sup>1</sup> Yadda tuun endi nemnem da ey kanday "Endi hu Dios." Lawah ni peteg hu wadad nemnem da niya lawah daka pehpehding. Endin hekey ni hi-gada hu kayyaggud tuka pehding.  
<sup>2</sup> Kauh-uhdunggiddan APU DIOS di kabunyan hu tuud puyek ma-lat ang-angen tu hedid wadan hi-gada hu nenemneman ni ihik ni mengeddal niya mengamtan hi-gatu.  
<sup>3</sup> Nem endi, tep emin tuu ey inwalleng da hi APU DIOS et mambalin idan lawah. Et mukun endin hekey hu tuun kamengippahding ni kayyaggud. \*  
<sup>4</sup> Kan APU DIOS ey "Endi nemnem idan tuun kamangngenghay ni hi-gak niya endin hekey ni hi-gada hu kamandasal ni hi-gak. Ya daka pehpehding ey daka pilliwa limmuddan tuuk."  
<sup>5</sup> Nem nemahhig ali takut dan hakey ni aggew ni penang-angan dan kapekabbaddan-gin Apu Dios ida kamengu-unnud ni hi-gatu.  
<sup>6</sup> Kaiggeb-at idan lawah ni tuun memahbah ni planuh idan angehemmek ni tuu, nem ippatek idan APU DIOS.  
<sup>7</sup> Nakka iddasadasal e hakey alin aggew ey wada melpud Zion ni mengihwang ni higtatsun helag Israel di buhul tayu. Yan nunman alin aggew ey man-am-amleng itsun peteg, tep peyaggud dait sun APU DIOS.

**15**

*Ya a-appeh David*

- <sup>1</sup> APU DIOS, inamtak et yadda etan dammutun mekihha-ad niya mengidaydayaw ni hi-gam di duntug mud Zion  
<sup>2</sup> ey ebuh ida etan tuun kamekanggu-unnud ni pinhed mu niya limpiyuh hu tuka pehding niya tuka heppita.  
<sup>3</sup> Humman idan tuu ey eleg da e-hela hu lawah meippanggep ni edum dan tuu ey endi lawah ni daka pehding ni edum da niya eleg da tumtumbuka hu sinakdul da.  
<sup>4</sup> Daka tettebala hu tutu-un kamakanggu-unnud nan APU DIOS, nem angebe-hel dadda hu kahing ni hi-gatu. Ey daka peamnun ippahding emin hu daka e-helan pehding da, anin ni panligligatan da.  
<sup>5</sup> Eleg da peteppat hu daka peuttang ni pihuh da niya eleg da ebbulutan mebeyyadan ni mantistigon itek ma-lat mabehulan hu endi bahul tun tuu.  
 Yadda henin nunya tuu ey mekihha-ad idallid kad-an APU DIOS ni ingganah.

**16**

*Ya dasar David*

- <sup>1</sup> Apu Dios, ang-ang mu anhan ma-lat endi lawah ni an meippahding ni hi-gak, tep hi-gam hu nakka iddinel ni mengippatek ni hi-gak.  
<sup>2</sup> Kangkun APU DIOS ey "Hi-gam hu Apuk, inamtak e emin hu hipan kayyaggud ni wadan hi-gak ey nalpun hi-gam."

\* 14:3 14:3 [1-3] Romans 3:10-12

<sup>3</sup> Nakka tettebala ida etan kamekangngu-unnud nan APU DIOS ey nakka um-amleng ni mekikkillaw ni hi-gada.

<sup>4</sup> Yadda tuun kamenaydayaw ni edum ni dios ey me-duman hu ligat da. Eggak ngu meki-dum ni hi-gadan man-appit ey eggak daydayawa dios da.

<sup>5</sup> Hi-gam ngun ebuh, e APU DIOS hu kakelpuin emin ni mahapul ku. Et humman hu, melinggeppak tep muwak kaippaptek.

<sup>6</sup> Kamei-ellig di impatewidan muwak ni kakkayyaggud ni puyek tep impeyaggud mun peteg hu neitu-wan ku.

<sup>7</sup> Nakka daydayawa hi APU DIOS, tep tuka ituttuddun hi-gak hu kayyaggud ni pehding ku. Anin ni nakka pambakbaktadin hileng et tuka penemnem ni hi-gak ida tugun tu.

<sup>8</sup> Ey inamtak e wadan hi-gak hi APU DIOS ni kenayun, et humman hu nakka makaddinnel ni tuka pemaptek ni hi-gak.

<sup>9</sup> Et humman hu, nakka man-am-amleng et nakka itekkutekkuk hu nakka penaydayaw ni hi-gam e APU DIOS, tep nakka makaddinnel e tegguan muwak alin ketteyyan ku.

<sup>10</sup> Tep inamtak e Apu et eleg muwak na-yunad kulung, tep eleg mu pinhed ni nak mebwel di diman, tep pinutuk muwak ni bega-en mu. \*

<sup>11</sup> Impeamtam ni hi-gak e tegguen muwak ni ketteyyan ku. Et nakka man-am-amleng tep wada kan kenayun ni hi-gak niya tep wada-ak alid kad-an mun ingganah. †

## 17

### *Ya dasal David*

<sup>1</sup> APU DIOS, dengel mu anhan eya dasal ku, tep beken ni itek, ma-lat ya limpiyuh hu maipahding ni hi-gak. Em, baddangi muwak anhan.

<sup>2</sup> Peamtam anhan e endi hu bahul ku, tep inamtam hu limpiyuh.

<sup>3</sup> Inamtam hu wadad puhuk niyad nemnem ku. Anin yan hileng et pinenatnaan mu hu elaw ku ey endi mu himmak ni nak nambahulan niya endi hu lawah di nemnem ku. Em, tep nakka hellipat-i ma-lat endi nak panliwwatan di nakka e-hela.

<sup>4</sup> Inu-unnud ku tugun mu et eggak ipahding hu kapehding idan tuun mabunget.

<sup>5</sup> Ey impannananeng kun nengu-unnud ni hi-gam et endi nak impangil ni tugun mu.

<sup>6</sup> Apu Dios, inamtak e muka dedngela hu dasal ku, et humman hu, dengel muwak, et ipahding mu anhan hu nakka ibbagan hi-gam.

<sup>7</sup> Peang-ang mu hu eleg melumman ni impeminhed mu et ihwang muwak. Hi-gam ni ebuh hu kabaelan tun memaddang idan kamambeggan baddang ma-lat endi lawah ni ippahding idan buhul dan hi-gada.

<sup>8</sup> Adugi muwak anhan e nakappinhed mu e kamei-ellig ni hephepan muwak ni payak mu,

<sup>9</sup> ma-lat endi lawah ni ippahding idan mapetey ni buhul kun nenalikub ni hi-gak.

<sup>10</sup> Humman idan buhul ku ey endin hekey hemek da niya nemahhig hu daka pampahhiya.

<sup>11</sup> Anin ni attu lawwan ku et ida kamei-unnunud ni hi-gak, tep da-ak kahellipat-i ma-lat depapen da-ak.

<sup>12</sup> Henidda neu-upan layon ni kamantattallun kamenehhegged ni hi-gak, ma-lat pambikien da-ak.

<sup>13</sup> APU DIOS, kahegag ka, et hi-gam hu mekihhangga eyaddan buhul ku et apputen mudda. Usal mu ispadah mu et ihwang muwak di pehding ida eyan lawah ni tuu.

<sup>14</sup> Em, baddangi muwak anhan ma-lat meihwangngak di kapehpehding ida eyan tuun ebuh eya wadad puyek ni daka gagamgami. Kayyaggud hedini kastiguen mudda, et heltapen da etan in-eng-eng mun panlelehanan da. Ey kayyaggud hedini anin idan u-ungnga dadda niyadda inap-apu da et manhelheltap ida dama.

<sup>15</sup> Nem hedini ngun hi-gak, man nakka makaddinnel e ang-angen dakalli, tep hi-gam hu inu-unnud ku. Em, um-amlengngak alin menang-ang ni hi-gam ni bengngunan ku.

## 18

*Ya a-appeh David e bega-en APU DIOS ni meidwat etan ni kamengipappangngulun a-appeh. Huyya hu in-a-appeh tu eman ni nengihwangan APU DIOS ni hi-gatud buhul tu e hi Saul niyadda etan edum ni buhul tu.*

<sup>1</sup> APU DIOS, nakappinhed daka. Hi-gam hu kakelpuin elet ku.

\* 16:10 16:10 Acts 13:35 † 16:11 16:11 [8-11] Acts 2:25-28



<sup>2</sup> Hi-gam e hi APU DIOS e Dios ku hu kamengippaptek ni hi-gak. Hi-gam hu kamei-ellig di batun nakka keihhikkugin kamengihwang ni hi-gak. Ey hi-gam hu kamei-ellig ni happiyaw ku.

<sup>3</sup> Hi-gam e APU DIOS hu nakka pandasali, tep muwak kabaddangi et nakka meihwang di lawah ni kapehding idan buhul ku. Et humman hu, lebbeng tun meidaydayaw ka.

<sup>4-5</sup> Lawah hu neipenahding ni hi-gak, et humman hu, kenayun ni nakka hanghangгаа hu ketteyyan ku et heni kamanhehhegged hu kulung ni hi-gak.

<sup>6</sup> Et mandasallak nan APU DIOS e Dios ku tep nemahhig ni nakka meligligasid kameippenahding ni hi-gak ey dingngel tud Tempol tud kabunyan hu dasal ku et baddangan tuwak.

<sup>7</sup> Impeang-ang APU DIOS hu bunget tuddan buhul ku et paeli tu hu nemahhig ni yegyeg ey kamandeldelyun hu puyek et anin idan duntug et neigiwwed hu sinuunan da.

<sup>8</sup> Heni kaman-a-ahhuk hu eleng tu niya heni kamangkeukkat di bungut tu hu kamantettebbel ni ngimmalab ni apuy tep ya bunget tuddan buhul ku.

<sup>9</sup> Imbeghul tu kabunyan et kamangkelehbeng ali ey kameang-ang hu andeket ni kulput di daul ni heli tu.

<sup>10</sup> Entanni ey nantakkay di anghel et ityab ida lan dibdib.

<sup>11</sup> Impan-enget tud nanlinikweh di kad-an tu ey liniktuban daman andeket ni kulput ni kamengi-lin udan.

<sup>12</sup> Nandaggah hu heyaw tud andeket ni kulput et pinhakkeyey kamangkekedyam ey kamangka-gah ali dallallu.

<sup>13</sup> Entanni ey immehel alid kabunyan hi APU DIOS e Keta-ta-geyyan ey heni kidul hu ehel tu.

<sup>14</sup> Nampana tudda buhul tu et mangkawehit ida niya impaeli tudda hu kedyam et mamsik ida.

<sup>15</sup> Ey gapuh ni nemahhig ni bunget tuddan buhul tu ey nebudihan hu dalinat ni baybay et ya sinuunan eyan puyek.

<sup>16</sup> Heni nanyuung alid kabunyan et guyuden tuwak di edallem ni danum.

<sup>17</sup> Inhewang tuwak idad buhul kun et-eteng ni peteg kabaelan da nem hi-gak. <sup>18</sup> Yan eman ni wada ligat ku ey immalidda buhul kun mengubbat ni hi-gak, nem binaddangan tuwak nan APU DIOS. <sup>19</sup> Em, binaddangan tuwak et ihwang tuwak tep kaum-amleng ni nakka pehpehding.

<sup>20</sup> Tuwak kaiddawsin panyaggudan ku tep neiptek hu nakka pehding ey endi bahul ku.

<sup>21</sup> Eggak ngehayen hu AP-APU e Dios ku, tep inu-unnud kudda tugun tu.

<sup>22</sup> Tep nakka nemnemneman emin hu tugun tu et endi nak kinehing.

<sup>23</sup> Inamta tun endi bahul ku tep endi nak impahding ni neihla.

<sup>24</sup> Et humman hu, kaiddawat APU DIOS hu panyaggudan ku tep neiptek hu nakka pehding ey inamta tun endi hu bahul ku.

<sup>25</sup> APU DIOS, makulug ni kamannananeng hu muka pemaptek idan tuun eleg mengiwwalleng ni daka pengullug ni hi-gam ey kayyaggud muka pehding idan endi bahul tu.

<sup>26</sup> Ey kayyaggud hu muka pehding idan tuun ebuh kayyaggud ni daka pehpehding. Nem mudda kakastigua hu tutu-un lawah hu daka kapkapyaa.

<sup>27</sup> Mudda kabaddangi hu tuun daka pebabah annel da, nem muka pebabah ida tuun kamampahhiyya.

<sup>28</sup> APU e Dios ku, kaka mei-ellig ni dilag ku, tep muka ittudu hu pehding kud nakka ketemmai.

<sup>29</sup> Hi-gam hu kamengidwat ni tuled kun mengubbat idan buhul ku ey hi-gam hu kakelpuin kabaelan ku et nakka panhegepa hu bebley dan nehammad hu luhud tu.

<sup>30</sup> Em, APU DIOS, makulug ni kayyaggud ni emin hu muka pehding! Ey kameiddinnel ni emin hu muka e-hela. Heni ka happiyaw idan kamengiddinnel ni hi-gam, tep mudda kahenniid hipan lawah ni meippahding ni hi-gada.

<sup>31</sup> Hi-gam ni ebuh e APU hu makulug ni Dios. Hi-gam ni ebuh hu kamei-ellig di batun kameihhennid buhul mi.

<sup>32</sup> Hi-gam hu kakelpuin elet ku ey hi-gam kaumbaddang ni hi-gak ni pengippahdingan kun kayyaggud.

<sup>33</sup> Muwak kabaddangi ma-lat eggak man-egah di duntug ey ma-lat heni-ak ni makwah e na-let ni umbesik.

<sup>34</sup> Sinuttudduan muwak et nelaingngak ni mekiggubbat ey na-lettak ni meminnat ni pana.

<sup>35</sup> APU DIOS, hi-gam hu kamengippaptek ni hi-gak. Inhewang muwak tep ya et-eteng ni kabaelan mu niya heni hi-gam hu happiyaw ku. Ey gapuh ni baddang mu niya binabbal mun hi-gak ey eta-gey law saad ku.

<sup>36</sup> Intuntun mu nemnem kud kayyaggud ni pehding ku et u-unnuden ku pinhed mun pehding ku. \*

<sup>37</sup> Hi-gak anhan law hu nampamdug ni hi-gada et ha-kupen kudda. Ey eggak isiked ni nekigubat ni hi-gada ingganah inapput kudhan emin.

<sup>38</sup> Nampanak ida et mangketu-liddad hinanggak et eleg ida pakeehngeng.

<sup>39</sup> Hi-gam kamengidwat ni kabaelan kun mekiggubbat et nakka pan-apputadda buhul ku.

<sup>40</sup> Muka petekkut ida buhul ku et ida kaumbesik ey muwak kabaddangi et nakka apputadda humman ni buhul kun anggebe-hel da-ak.

<sup>41</sup> Entanni ey ida kaman-eyyag ni umbaddang ni hi-gada, nem endi kaum-ali. Nampehemhemmek idan APU DIOS, nem eleg tudda baddangi.

<sup>42</sup> Impeka-apput kudha buhul ku et henidda dep-ul ni kapan-ityab ni dibdib. Ey nak ida kapan-ideyapdap e henidda pitek di keltad.

<sup>43</sup> Inhewang muwak idad mangkanghay ni tutu-u et idwat mu kelebengan kun man-ap-apud edum ni bebley.

<sup>44</sup> Emin hu nakka e-helan pehding idan tuu ey daka u-unnuda. Anin idan tuun kamelpud edum ni bebley et ida kamanyu-ung di hinanggak ni lispituh dan hi-gak.

<sup>45</sup> Neendi tuled idan buhul ku, et ida kamangegeygey ni takut da ey mangkeukkat idad nampantalan da.

<sup>46</sup> Kamedaydayaw hi APU DIOS e wadan ingganah. Hi-gatu hu heni batun nakka keihhikkugi. Em, kamedeyyaw hi APU DIOS e kamengihwang ni hi-gak.

<sup>47</sup> Hi-gam hu Dios ni kamengibleh ni lawah ni kapehding idan buhul kun hi-gak ey hi-gam hu kamengidwat ni kabaelan kun mengapput idan buhul ku et hi-gak pan-ap-apu da.

<sup>48</sup> Em, hi-gam e APU, hu kamengihwang ni hi-gak idad buhul ku. Tep eleg mu i-abulut ni da-ak apputen ni hi-gada ey muwak kaippaptek ma-lat endi lawah ni pehding idan mangkabunget ni tuun hi-gak.

<sup>49</sup> Et humman hu, meki-dummak idan katuutuud kebebbebley ni menaydayaw ni hi-gam. Ey i-ena-appah ku hu penaydayaw kun hi-gam. †

<sup>50</sup> Impengenapput muwak e pinutuk mun patul ey impannananeng mu hu impemihned mun hi-gak e hi David et yadda helag ku.

## 19

*Ya a-appah David ni meidwat etan ni kamengipappanggulun a-appah*

<sup>1</sup> Emin hu tayu kaang-ang-angad kabunyan ey lintun Apu Dios ey humman ida kakeang-angin dayaw tu.

<sup>2</sup> Kewa-wa-wa ey kahilehileng ey immen idadman ni mengippeamtan kasina-gey tu.

<sup>3</sup> Endi kamedngel ni bungug da niya eleg ida umhapit,

<sup>4</sup> nem humman ni kaweda da hu kamengippeang-ang idan katuutuud puyek ni kawedan Apu Dios.

Wineda tu hu kabunyan ni panha-adan ni aggew <sup>5</sup> e hedin newa-wa, man kameukkat, heni etan ni lakin melehhin e kaman-am-amleng ni kelehhinan tu ey heni etan ni kameki-apput ni bebbesik e ihik ni an meki-apput.

<sup>6</sup> Kewa-wa-wa ey kaumsimil ni nelinug. Ey hedin pimmetang, man emin tuu ey daka gibbeka hu atung tu.

<sup>7</sup> Kakkayyaggud ni emin hu tugun APU DIOS. Tuka pehammad hu kapengullug ni tuu ey tuka pambalin ni nenemnem hu tuun kulang ni hu nemnem tu.

<sup>8</sup> Emin hu tugun APU DIOS ey neiptek. Ida kaum-amleng hu kamengu-unnud idan nunman ni tugun tu. Limpiyuh ida humman ni tugun tu ey tuka e-dumi hu kapan-ewwat.

<sup>9</sup> Kayyaggud ni daydayawen tayu hi APU DIOS. Et mengmenglaw alin ingganah hu penaydayawan tayun hi-gatu. Neiptek niya limpiyuh hu tugun tu.

<sup>10</sup> Humman idan tugun tu ey nebalbalol nem ya nemahmah ni balituk. Et humman hu gullat ni i-inggeh di putsukan et melullummi-ih.

\* 18:36 18:36 Yad ehel ni Hebrew ey endi maptek hu pinhed nunyan verse ni e-helen, et mukun yadda edum ni versions ey kanday "Eleg mu iebulut ni da-ak dedpapan idan buhul ku et adyah e eleg da-ak pateyen." † 18:49 18:49 Romans 15:9

<sup>11</sup> Ya tugun mu e APU DIOS hu kamengittuddun hi-gak, e bega-en mun kayyaggud ni pehdng ku, et emin hu tuka pambalini ey nakka panyaggudi.

<sup>12</sup> Hedin ya tuu, man eleg tu amta hedin kameihla hu tuka pehdng. Et humman hu, liwwan mu anhan e APU DIOS hedin wada ngullaw hu neihlan impahding kun eggak amta.

<sup>13</sup> Ey baddangan muwak ma-lat endi hu lawah ni nak iggeb-at ni ippahding. Entan tu iebulut ni heni humman hu mengnged ni hi-gak ma-lat eggak ippahding hu lawah, nem ebuh hu kayyaggud ni ippahding ku.

<sup>14</sup> APU DIOS e kaumhelaknib ey kakei-elligin batun kakeihhikkugi, pinhed kun meingneh di pinhed mu hu hipan nemnemen ku niya e-helen ku.

## 20

*Ya dasal David ni meidwat etan ni kamengipappanggulun a-appeh*

<sup>1</sup> Hi-gam e gayyum ku ey hummangen et anhan APU DIOS e Dios nan hi Jacob hu dasal mu ey baddangan daka. Ey ippaptek daka ma-lat endi maipahding ni lawah ni hi-gam.

<sup>2</sup> Em, hi APU DIOS e wadad Tempol tud Zion hu memaddang niya mengippa-let ni hi-gam.

<sup>3</sup> Ey ebbuluten tu et anhan ey pan-am-amlengan tudda hu muka i-appit ni hi-gatu.

<sup>4</sup> Ey iddawat tu et anhan emin hu ibbagam ni hi-gatu niya peamnu tu emin hu hipan muka nemnemen pehdng.

<sup>5</sup> Em, iddawat tu et anhan emin hu hipan ibbagam ni hi-gatu. Et hedin peamnun AP-APU e Dios tayudda huuya ey ittekuk milli hu an-anla mi niya man-am-amleng kamillin menaydayaw ni hi-gatu tep ya pengapputan mu.

<sup>6</sup> Inamtak law e hi APU DIOS ey tuka pengapput hu pinutuk tun mampatul tep ya et-eteng ni kabaelan tu. Huuya keang-angan tu e tuka dedngelad kad-an tud kabunyan hu dasal nunman ni patul.

<sup>7</sup> Dakel ida etan tuun ya almas da niya kebayyu da hu daka ididdinel ni pengapputan dad gubat. Nem hedin ngun hi-gatsu, man ya kabaelan APU DIOS e Dios tayu, hu tayu kaidinel di pengapputan tayu.

<sup>8</sup> Humman idan tuun eleg mengiddinel ni hi-gatu ey hedin neapput ida, man humman hu pappeg tun hi-gada. Nem hedin hi-gatsu, man mengapput itu tep ya baddang tu.

<sup>9</sup> AP-APU mi, pengapput mu etan patul mi niya dengel mu anhan hu hipan mika ibbagam hi-gam di dasal mi.

## 21

*Ya a-appeh David ni meidwat ni kamengipappanggulun a-appeh*

<sup>1</sup> APU DIOS, kaman-an-anla etan patul, tep indawat mu kabaelan tu et mengapput.

<sup>2</sup> Indawat mun emin hu pinhed tu, endi eleg mu idwat ni hi-gatu.

<sup>3</sup> Ey indawtam ni dakel ni panyaggudan tu niya impapngtam ni balituk, tep hi-gatu pinutuk mun mampatul.

<sup>4</sup> Nandalas ni hi-gam ma-lat ihwang mud ketteyyan tu ey inebulut mu et mannananeng ni ingganah hu biyag tu.

<sup>5</sup> Kamenga-apput humman ni patul tep muka baddangi et mukun kameidaydayaw ey nandingngel.

<sup>6</sup> Humman idan indawat mun panyaggudan tud biyag tu ey mannananeng ni hi-gatan ingganah. Ey nemahhig an-anla tu, tep wada kan kenayun di kad-an tu.

<sup>7</sup> Kamekaddinel humman ni patul ni hi-gam e APU DIOS e Keta-ta-geyyan. Ey inamta tu e eleg melumman hu impemihed mun hi-gatu. Et humman hu, kamekallinggep di biyag tu.

<sup>8</sup> Emin idalli buhul mu ey pambalin muddallin balud, tep et-eteng kabaelan mu et nelakah hu pengapputan mun hi-gada.

<sup>9</sup> AP-APU, yan pampeang-angan mulli ey nemahhig hu bunget mu. Et ya meippahding alin hi-gada ey heniddalli megihheb ni pengastiguan mun hi-gada. \*

<sup>10</sup> Endillin hekey hu helag dan metdaan, tep petteyen muddan emin.

<sup>11</sup> Emin hu lawah ni daka nemnemen pehdng ni hi-gam ey eleg um-amnu et endi an meippahding.

<sup>12</sup> Tep umbesik idalli hedin ang-angen da hu neidengdeng ni panam ni hi-gada.

<sup>13</sup> Daka kadaydayawa e APU DIOS, tep ya kabaelan mu, niya mika ia-appeh hu amleng mid kayyaggud ni impahding mu.

\* 21:9 21:9 Ang-ang yu 2 Thess. 1:7-8.

## 22

*Ya a-appeh David ni meidwat etan ni kamengipappanggulun a-appeh. Huyyan a-appeh ey nan-ingneh hu pengia-appeh etan di a-appeh meippanggep ni "Makwah ni Kakkabuhhan."*

<sup>1</sup> APU DIOS, hipa himmulun et nealay muwak katteg ngu impayyag? \* Nakka mampehemhemmek ni mampebaddang ni hi-gam, nem eleg muwak hengnguda.

<sup>2</sup> Nakka umdasadasal ni kewa-wa-wa niyan kahilehileng ma-lat baddangan muwak, nem eleg mun hekey dedngela. Endi katteg ngu linggep ku.

<sup>3</sup> Nem hi-gam, APU DIOS, ey kayyaggud kan peteg, et mukun hi-gam hu patul ni kadaydayawaddan helag Israel.

<sup>4</sup> Hi-gam hu indinel idan aammed mi, et ihwang mudda.

<sup>5</sup> Em, ihwang muddan nampehemhemmekan da. Hi-gam nandinelan da ey eleg ida medismayah tep binaddangan mudda.

<sup>6</sup> Nem hedin katteg ngun hi-gak, man heni-ak bigih ni daka pehding ni hi-gak.

<sup>7</sup> Emin ida tuun kamenang-ang ni hi-gak ey da-ak kang-i-angi-nii niya da-ak kapennadngeli ni nanwigiwigiwida †

<sup>8</sup> e kanday "Tam kammu mewan ey hi APU DIOS hu muka iddinel. Nem tamey eleg um-ali et ihwang daka? Ey kele eleg daka baddangi hedin makulug ni nakappinhed daka?" ‡

<sup>9</sup> APU DIOS, hi-gam nengipenaptek ni hi-gak neipalpun neiungngaak.

<sup>10</sup> Ey hi-gam hu indinel kun nunman ingganah nunya e Dios ku.

<sup>11</sup> Entan anhan tuwak ipayyag, tep dakel immalin ligat ku ey hi-gam ni ebuh hu wada kabaelan tun umbaddang ni hi-gak.

<sup>12</sup> Hinelikuban da-ak idan buhul kun henidda mangkabunget ni bubulug ni bakad halun di Bashan

<sup>13</sup> ey henidda kamampangngegeyyed ni layon ni nandadaddan ni mengikkem-ut ni hi-gak.

<sup>14</sup> Endi law ni hekey elet ku, heni danum ni neikuyag di puyek. Ey nemahhig hu nakka panggibbek e heni nangkahpung hu tu-ngal ku.

<sup>15</sup> Nea-atu-ak ni peteg ey nema-ganan kulkulung ku et neipket hu dilak di alingangngak. Heni muwak impullay di puyek ma-lat mateyyak.

<sup>16</sup> Hinelikuban da-ak idan lawah ni tutu-un henidda ahhu ey sinwik da ngamay ku niya helik.

<sup>17</sup> Makaggeh hu annel ku ey ka-ang-ang ni emin hu genit ku. Ey ida kaman-am-amlang ni menang-ang-ang ni hi-gak ni kamanhelheltap.

<sup>18</sup> In-epeng da balwasik ey imbubunut da etan inebel ni balwasik. §

<sup>19</sup> APU DIOS, entan anhan tuwak ipayyag, nem papuut mu anhan et baddangan muwak.

<sup>20</sup> Ihwang muwak et eleg da-ak pateyen idan tutu-un heni mabunget ni ahhu.

<sup>21</sup> Ey ihwang muwak anhan di pehding ida eyan tuun henidda layon, niya henidda malem ni bulug, tep endin hekey hu kabaelan kun mekihhanggan hi-gada.

<sup>22</sup> Peamtak idan aaggik hu meippanggep ni hi-gam e Apu Dios. Ey daydayawen dakad kakeemmungiddan tutu-um. \*

<sup>23</sup> Hi-gayun kamengu-unnud nan APU DIOS, hi-gatu daydayaw yu! Em, hi-gayun helag Jacob e tutu-ud Israel, hi-gatu daydayaw yu!

<sup>24</sup> Hi Apu Dios ey eleg tudda iwwalleng hu newetwet. Baddangan tuddad tsimpuh ni panliggatan da niya nandadaddan ni umbaddang ni hi-gadan penepgulan dan baddang tu.

<sup>25</sup> APU DIOS, daydayawen dakan hi-gak ey peamnuk hu inhel ku e i-appitan dakad kakeemmungiddan kamengu-unnud ni kamenaydayaw ni hi-gam.

<sup>26</sup> Yadda nangkewetwet ni kamengiddinnel ni hi-gam ey mekangngan ida et daydayawen daka. Em, emin ida kamengiddinnel ni hi-gam e APU ey nanna-ud ni daydayawen daka. Umyaggud ali hu biyag da ey man-an-anladdan ingganah.

<sup>27</sup> Emin idalli katuutuud kebebbbley ey nemnemen da hi APU DIOS et hi-gatulli law hu daydayawen da,

<sup>28</sup> tep hi-gatu hu keta-ta-geyyan ni Patul ni AP-APU ni emin ni tutu-ud puyek.

<sup>29</sup> Emin tuu, anin idan kedangyan niyadda etan kamangkatatey ey manyu-ung idallin menaydayaw nan APU DIOS.

\* 22:1 22:1 Ang-ang yu Matthew 27:46 et ya Mark 15:34. † 22:7 22:7 Matthew 27:39 Mark 15:29 et ya Luke 23:35

‡ 22:8 22:8 Matthew 27:43 § 22:18 22:18 Ang-ang yu John 19:24. \* 22:22 22:22 Hebrews 2:12

<sup>30</sup> Emin idalli helag tayun meittu-nud ey mansilbiddan APU DIOS. Ey dedngelen idallin u-ungnga tayu hu kamengippetngan impahding tu.

<sup>31</sup> Ey yaddalli etan eleg ni maiungnga ey meippeamtan hi-gada hu nenelakniban APU DIOS idan tuu tu.

## 23

*Ya a-appeh David*

<sup>1</sup> Hi APU DIOS hu kamei-ellig ni kamengipattul ni hi-gak, mukun endi nakka pangkullangid mahapul ku.

<sup>2</sup> Tuwak kaippangulud kad-an ni kayyaggud ni pattulan niyad kad-an ni meli-neng ni danum.

<sup>3</sup> Tuwak kape-let ey tuka ittudu hu kayyaggud ni u-unnuden ku ma-lat keidaydayawan ni ngadan tu.

<sup>4</sup> Anin ni nemahhig hu ligat ku e heni-ak wadad engeenget et eleggak umtakut, tep wada kan hi-gak. Muwak kaipapaptek e heni muwak kaa-allukudan hulkud mu et nakka meihwang di hipan angetakut ni mekapy.

<sup>5</sup> Muka peang-ang idan buhul ku hu muka pemaptek ni hi-gak, tep muka immangdad hu dakel ni kennen ku niya innumen ku. Ey muka duyyagin lana hu uluk ni muka pengapngan hi-gak. Muwak kabendisyonin kewa-wa-wa.

<sup>6</sup> Inamtak e pannananeng mu hu kakinyaggud mu niya impeminhed mun hi-gak nunyan ketagguk. Et humman hu, daydayawen dakan ingganah di baley mu.

## 24

<sup>1</sup> Yan eya puyek niya emin hu wadadya, yadda tuu et yadda kaman-ayyam, niyadda neitnem ey kukuwah emin APU DIOS. \*

<sup>2</sup> Hi-gatu hu nengituun eyan lintu tun puyek di dalinat ni baybay.

<sup>3</sup> Kaw amta yu hedin hipadda etan tuun kaebbulutan APU DIOS ni dammutun umteyed di duntug tu ma-lat humgep di Tempol tu?

<sup>4</sup> Yadda tuka ebbuluta ey yadda etan tuun makulug niya kayyaggud ni ebuh hu wadad nemnem da, kayyaggud hu daka pehding, eleg ida man-itek, niya eleg da daydayawa hu beken ni makulug ni dios.

<sup>5</sup> Hi APU DIOS e kaumhelaknib ey tudda kaibbilang ni kayyaggud ey tuka iddawat hu panyaggudan da.

<sup>6</sup> Ey hi-gadan ebuh hu dammutun umlaw di Tempol tun menaydayaw ni hi-gatu e DIOS ni dinaydayaw eman lan hi Jacob.

<sup>7</sup> Ibeghul yudda eheb niyadda habyen ni wada dedangngu lan nunman ma-lat humgep etan nakatta-gey ni Patul.

<sup>8</sup> Nem hipa humman ni kameiddeyyaw ni patul? Endi edum nem hi APU tayu e kamedeyyaw ey et-eteng hu kabaelan tu et endi pakeapput ni hi-gatu.

<sup>9</sup> Em, ibeghul yudda eheb niyadda habyen ni wada dedangngu lan nunman ma-lat humgep etan nakatta-gey ni Patul.

<sup>10</sup> Hipa huyyan nakatta-gey ni Patul? Hi-gatu hu AP-APU e Kabaelan tun emin niya hi-gatu hu Patul ni kameiddeyyaw.

## 25

*Ya a-appeh David*

<sup>1-2</sup> Hi-gam e APU hu nakka pandasali, tep hi-gam hu DIOS kun nakka iddinel. Ihwang muwak et eleg da-ak apputen idan buhul ku ma-lat endilli da pan-an-anlaan niya ma-lat eggak ali mebabba-ingan.

<sup>3</sup> Ang-ang mu anhan ma-lat eleg ida meapput hu tuun kamengiddinnet ni hi-gam. Nem baddangim ida ma-lat apputen dadda tuun nemahhig hu ngehay dan hi-gam.

<sup>4</sup> APU DIOS, peamtan ni hi-gak hu elaw mu ey ittutuddum ni hi-gak hu pinhed mun pehding ku ma-lat humman hu u-unnuden ku.

<sup>5</sup> Em, tuttuddui muwak ma-lat emin hu pehding ku ey mei-unnud di kameiddinnet ni tuttuddum, tep hi-gam hu DIOS kun kamenellaknib ni hi-gak niya hi-gam ni ebuh hu nakka iddinel di biyag kun kewa-wa-wa.

<sup>6</sup> Hi-gam e APU DIOS, ey eleg melumman hu impeminhed mu niya binabbal mun impeang-ang mun hi-gamin nunman.

\* 24:1 24:1 Ang-ang yu 1 Corinthians 10:26.

<sup>7</sup> Em, kayyaggud kan peteg, APU DIOS ey eleg melumman hu impeminhed mu. Et humman hu, nakka ibbagan hi-gam e pesinsahim anhan ida liwat ku winu hipan lawah ni impahpahding ku eman ni nakka penikkeni.

<sup>8</sup> Hi-gam e APU DIOS ey kakkayyaggud kan peteg, et mukun muka ittutduddan tuun nangkeliwtan hu kayyaggud ni elaw ma-lat humman hu u-unnuden da.

<sup>9</sup> Hi-gam hu mengituntun ida etan ni kamampekungbabah ni tutu-u ni kayyaggud ni u-unnuden da. Ey muka peamtan hi-gada hu pinhed mun pehding da.

<sup>10</sup> APU DIOS, eleg melumman hu impeminhed mu niya nemahhig hu binabbal muddan tuun kamengu-unnud ni nekitbalam ni hi-gada ey daka u-unnuda tugun mu.

<sup>11</sup> APU DIOS, peamnum hu inhel mun nunman e pessinsahan mudda dakel ni liwat ku ma-lat kaideyawan mu.

<sup>12</sup> Emin ida etan tuun hi APU DIOS hu daka paka-u-unnuda ey ittudu tun hi-gada hu neiptek ni pehding da.

<sup>13</sup> Umyaggud ali biyag da niya tewwiden idallin u-ungnga da eya puyek ni nambebleyan da.

<sup>14</sup> Humman idan tuun daka paka-u-unnuda hu pinhed APU DIOS ey nehammad hu nekigayyuman dan hi-gatu. Hi-gada hu kapengippeamtain APU DIOS ni meippanggep ni nekitbalam tuddan tuu tu.

<sup>15</sup> Hi APU DIOS hu kenayun ni nakka pampebaddangi, tep hi-gatun ebuh hu dammutun mengihwang ni hi-gak di hipan lawah ni mekapkapyu.

<sup>16</sup> APU DIOS, hemek muwak anhan, tep iyyadyan nemahhig law ni nakka manhelheltap ey endi edum ni memaddang ni hi-gak.

<sup>17</sup> Kamangkema-ma hu ligat ku et nakka meduddukul ni peteg. Baddangi muwak anhan.

<sup>18</sup> Em, ang-ang mu anhan ida eya nakka panlelehmani ey pesinsahim ida hu hipan nanliwtan ku.

<sup>19</sup> APU DIOS, ang-ang mu kedi, dakel ida buhul ku ey anggebe-hel da-ak ni peteg ni hi-gada.

<sup>20</sup> Et humman hu, ipaptek muwak anhan e APU DIOS, ma-lat meihwangngak di daka pehpehding ey entan tuwak peapput ni hi-gada, tep hi-gam ni ebuh hu nakka iddinel.

<sup>21</sup> Limpiyuhhak et ya pinhed mu hu nakka pehpehding, et humman hu, ipaptek muwak anhan, tep hi-gam ni ebuh hu nakka iddinel.

<sup>22</sup> Em APU DIOS, ihwang dakemin tuum ni helag Israel eyaddad mika panligligasi.

## 26

### *Ya a-appéh David*

<sup>1</sup> APU DIOS, peamtam idan tuu e endi ngu hu liwat ku, tep kayyaggud hu impahding ku. Hi-gam ni ebuh hu nakka iddinel, et emin hu nakka pehpehding ku ey kamei-unnud di pinhed mu.

<sup>2</sup> Patnai muwak ma-lat penang-angan mun elaw ku et ya hipan wadad puhuk niyad nemnem ku.

<sup>3</sup> Tep inamtak e eleg melumman hu impeminhed mun hi-gak ey impannaneng mu hu muka pemaptek ni hi-gak.

<sup>4</sup> Eleggak mekikillaw idan tuun maitek niya eggak iu-unnud di kapehding idan tuun kayyaggud daka peang-ang, nem ya kakulugan tu ey lawah wadad nemnem da.

<sup>5</sup> Eleggak meie-eddum idad tuun kamengapkapyan lawah niya eggak u-unnuda hu hipan pinhed da.

<sup>6</sup> Nakka manbullu ma-lat peang-ang ku e na-kal law hu liwat ku et hannak umlid altar mun menaydayaw ni hi-gam e AP-APU.

<sup>7</sup> Nakka ia-appéh hu nakka pansalamat ni hi-gam niya nakka penamtadda hu kakkayyaggud ni impahding mu.

<sup>8</sup> Nakappinhed kun umlaw di baley mu e APU DIOS, tep kameang-ang diman hu dayaw mu.

<sup>9</sup> Ang-ang mu anhan et eggak ali mailegat ni pampemahbahan muddan tuun lawah daka pehpehding niya ma-lat eleg ali maipahding ni hi-gak hu meippahding idan mapetey.

<sup>10</sup> Humman idan tuu ey ihik idan mengippahding idan inamta dan lawah ey daka pebeyyad hu pengippahdingan daddan nunman.

<sup>11</sup> Nem hedin hi-gak ngu, man ebuh ida etan pinhed mun inu-unnud kun impahding. Et humman hu, hemek muwak anhan, et ihwang muwak.

<sup>12</sup> Nak law kamekallinggep, et daka kadaydayawa e APU di hinangaddan tuum di Tempol mu.

## 27

*Ya a-appéh David*

<sup>1</sup> Hi APU DIOS hu kamei-ellig ni dilag ku. Hi-gatu hu kamenellaknib niya kamengippaptek ni hi-gak, et humman hu, endi nak tekkutan.

<sup>2</sup> Hedin pinhed da-ak ni bahbahren idan tuun lawah daka pehpehding, man hi-gada kumedek hu mebahbah.

<sup>3</sup> Ey anin ni liktuben da-ak idan hantapug ni buhul ku, et eleggak umtakut, tep nakka iddinel hi APU DIOS.

<sup>4</sup> Ya nakka ibbagan ebuh nan APU DIOS ey pinhed kun yad baley tu nak penaydayawan ni hi-gatun kewa-wa-wa, ma-lat nenemnemen kun ingganah hu kakinayyaggud tu niya ma-lat tuttudduan tuwak ni kayyaggud ni pehding.

<sup>5</sup> Et ipaptek tuwak di emin ni panliggatan ku ey heni tuwak ittalud Tempol tu niya heni tuwak ippatuk di et-eteng ni batu

<sup>6</sup> et endi hu an ippahding idan buhul kun hi-gak. I-appitan kudman hi APU DIOS ey man-an-anla-ak ni mengit-itkuk ni a-appéh kun penaydayaw kun hi-gatu.

<sup>7</sup> Hemek muwak e APU et humangen mu anhan hu dasal ku.

<sup>8</sup> Ineyagan muwak e kammuy "Ikay et dayawen muwak." Et kangkuy "Em, um-ali-ak e APU."

<sup>9</sup> Hi-gam hu bimmenaddang ni hi-gak, et humman hu, entan anhan tuwak ipayyag ni bega-en mu. Ey entan anhan tuwak ibubbunget, tep hi-gam ni ebuh hu wada kabaellan tun menellaknib ni hi-gak.

<sup>10</sup> Anin ni ippayyag da-ak idan a-ammed ku, et wada ka e APU DIOS ni nakka iddinel ni mengippaptek ni hi-gak.

<sup>11</sup> APU DIOS, ituttuddum ni hi-gak hu pinhed mun pehding ku niya ipengulu muwak di dalan ni endi hu lawah ni an ippahding idan buhul kun hi-gak.

<sup>12</sup> Em, entan tuwak ipayyag, ma-lat endi lawah ni an ippahding idan buhul kun maitek, tep dakek daka pebehul ni hi-gak ey da-ak katattakkuta.

<sup>13</sup> Nakka medinnel e ang-angen ku hu kakinayyaggud APU DIOS eyan ketagguk.

<sup>14</sup> Pandinel itsun APU DIOS. Eleg tayu iwalleng hu tayu kapengullug ni hi-gatu, tep hi-gatun ebuh hu pandinnelan tayu.

## 28

*Ya a-appéh David*

<sup>1</sup> APU DIOS e nakka pandinnelin kamei-ellig di batun kakeihhikkugi, dengel mu anhan eya dasal ku et eleg muwak ipayyag, ma-lat eleggak ali lumaw di dungay e kalawwin kamettey ni tuu.

<sup>2</sup> Em, dengel mu anhan hu dasal kun nakka pampehemhemmeki e nakka itta-gey hu ngamay kun indengdeng kud appit ni Tempol mu.

<sup>3</sup> Entan tuwak anhan ilegat ni pengastiguan muddan tuun kamengippenahding ni lawah. Tep humman idan tuu ey kayyaggud hu daka peang-ang di hinanggan sinakdul da, nem ya wadad nemnem da niyad puhu da ey lawah ni peteg.

<sup>4</sup> Lebbengtun kastiguen mudda humman ni tuu, et ipahding mun hi-gada hu hipan lawah ni impahpahding dad edum dan tuu.

<sup>5</sup> Humman idan tuu ey eleg daka daydayawa, tep eleg dan hekey nemnema e hi-gam hu nanletun emin niya eleg dan hekey nemnema hu impahpahding mu. Et humman hu, anin ni kastigum ida ma-lat mannananeng idan mebahbah.

<sup>6</sup> Daydayaw tayu hi APU DIOS, tep tuka dedngela dasal kun nakka pambeggain baddang tu.

<sup>7</sup> Hi APU DIOS hu kamengippaptek niya kamengi-ehngeng ni hi-gak. Hi-gatun ebuh hu nakka iddinel. Tuwak kabaddangi niya tuwak kapeamleng, et humman hu, nakka ia-appéh hu nakka penaydayaw ni hi-gatu.

<sup>8</sup> Em, hi APU DIOS hu kamengippaptek idan tuu tu. Ey tuka i-ehngeng ey ippaptek tu etan pinutuk tun patul.

<sup>9</sup> APU DIOS, ihwang mudda tuum ey bendisyonim ida. Em ipaptek muddan ingganah e heni ka etan ni kamampattul e tuka ipapaptek ida tuka ippattul.

## 29

*Ya a-appéh David*

<sup>1</sup> Hi-gayun wadad kabunyan, daydayaw tayun emin hi APU DIOS tep et-eteng hu kabaellan tu niya tep hi-gatu hu medeyyaw.

<sup>2</sup> Em, daydayaw tayu hi APU DIOS, tep lebbengtun meidaydayaw hu ngadan tu. Panyuung itsun menaydayaw ni hi-gatu gapu tep ya kinaDios tu.

<sup>3</sup> Hi APU DIOS ey kamedeyyaw. Ya ehel tu ey kamedngel di baybay e heni kidul.

<sup>4</sup> Et-eteng hu kabaelan ni ehel tu niya kameamta hu kasina-gey tun peteg hedin himmapit.

<sup>5</sup> Tep hedin himmapit hi APU DIOS, man ida kamangkehepwak hu sedar e makaggangan keyew, anin idan sedar di Lebanon.

<sup>6</sup> Ey yadda kedunduntug di Lebanon ey ida kaumpaytuk hedin himmapit hi APU DIOS, heniddan impah ni bakan kaumpenaypaytuk. Et ya duntug di Hermon, ey kaumpaytuk hedin himmapit hi APU DIOS, heni etan ni lakkitun bakan kamampaypaytuk.

<sup>7</sup> Hedin immehel hi APU DIOS, man kaumkedyam

<sup>8</sup> niya kamewedda hu yegyeg di desert, anin di desert di Kades.

<sup>9</sup> Anin idan keyew di kedunduntug et ida kamampanggiwwed et kamangkaplag hu bulung da hedin himmapit hi APU DIOS. Nem yadda tuu tu ey immen ida ngud Tempol e daka itektekkekku hu daka penaydayaw ni hi-gatu e kanday "Dayaw tayu hi APU DIOS."

<sup>10</sup> Hi APU DIOS hu Patul ni ingganah. Hi-gatu hu ngenamung di emin, anin ni yan eman ni nalbengan ni puyek. \*

<sup>11</sup> Hi APU DIOS hu kamengipe-let idan tuu tu niya hi-gatu kamengippelinggep ni hi-gada.

## 30

*Ya a-appeh David ni neia-appeh ni neieng-engan ni Tempol*

<sup>1</sup> Daydayawen daka e APU DIOS, tep inhwang muwak di buhul ku et eleg da-ak pateyen ni hi-gada et endi pan-am-amlengan da.

<sup>2</sup> Nampehemmehemmekkak ni hi-gam ey binaddangan muwak e APU e Dios ku et yumagguddak.

<sup>3</sup> Nakka mangkattekattay e ngannganih ni umlawwak di dungay, nem sinegu muwak et adyah e mategu-ak e APU DIOS. \*

<sup>4</sup> Hi-gatsun kamengu-unnud nan APU DIOS, ia-appeh tayu penaydayaw tayun hi-gatu ey daydayaw tayu hu kayyaggud ni peteg ni ngadan tu.

<sup>5</sup> Ma-nu tep kaumbunget hi APU DIOS, nem nekemtang ni ebuh. Nem mannananeng ni ingganah hu binabbal tu. Heni daman kalemyungi e anin ni kaka umlelemyung ni hileng, nem mewa-wa kaya et mewedda mewan hu amleng.

<sup>6</sup> Yan makallinggeppak, ey kangkuy "Endi meippahding ni hi-gak ni lawah."

<sup>7</sup> APU DIOS, yan nengipeang-angan mun binabbal mun hi-gak ey melinggeppak tep kaka mei-ellig di duntug ni kakeihhikkugi. Nem ay entanni ey impayyag muwak et nemahhig takut ku.

<sup>8</sup> Et mandasallak ni hi-gam, e APU, ma-lat baddangan muwak.

<sup>9</sup> Kangkud dasal kuy "Endi silbitu hedin yad dungay hu pengippelawwan mun hi-gak. Tep kaw dammutun mandaydayaw ni hi-gam hu netey ni tuu? Ey kaw dammutun ene-ehhelen idan nangketey hu kamannanang ni muka pemapte? "

<sup>10</sup> APU DIOS, dengel mu anhan huyyan dasal ku. Peang-ang mu hemek mun hi-gak et baddangan muwak."

<sup>11</sup> Nemahhig hu lemyung kun nunman, nem entanni ey ingkal mudda etan nakka lelemyungi niya nakka tattakusi, et deh e nak law kamenattayyaw ni amleng ku.

<sup>12</sup> Et humman hu, eggak issiked ni mengi-ena-appeh ni penaydayaw kun hi-gam e APU e Dios ku, niya nakka mansalamat ni hi-gam ni ingganah.

## 31

*Ya dasal David ni meidwat etan ni kamengipappanggulun a-appeh*

<sup>1-2</sup> APU DIOS, hi-gam hu nakka keihhikkugi. Entan tu anhan iebulut ni nak mebe-ingan. Kayyaggud kan peteg, et humman hu, dengel mu anhan huyyan dasal ku et ihwang muwak. Abulut mu anhan ni meihhikkuggak ni hi-gam et heni ka etan ni batun kakeihhikkugi.

<sup>3</sup> Em, hi-gam ni ebuh hu heni batun nakka keihhikkugin kamengihwang ni hi-gak. Et humman hu, peamtam niya itudum ni hi-gak hu kayyaggud ni pehding ku ma-lat kaideyawan ni ngadan mu.

<sup>4</sup> Entan tuwak iebulut ni mekna etan di bitun inheged dan keknaan ku tep hi-gam ni ebuh hu menellaknib ni hi-gak.

\* 29:10 29:10 Genesis 6:17-18 \* 30:3 30:3 Ang-ang yu Psalm 71:20.



<sup>5</sup> APU DIOS, hi-gam hu ngenamung ni ispirituh ku. \* Baddangi muwak et meihwangngak, tep inamtak e kamannananeng hu muka pemaptek idan tuum.

<sup>6</sup> Anggebe-hel kudda hu tuun kamengu-unnud ni beken ni makulug ni dios. Ey hi-gak ngu, ey hi-gam hu nakka iddinel.

<sup>7</sup> Nakka um-amleng ni peteg tep ya eleg melumman ni impeminhed mun hi-gak. Inang-ang mu hu nemahhig ni hinelheltap ku et baddangan muwak.

<sup>8</sup> Eleg mu iebulut ni da-ak dimpap idan buhul ku, tep impaptek muwak di emin ni linallawwan ku et endi neipahding ni hi-gak ni lawah.

<sup>9</sup> Hemek muwak anhan e APU DIOS, tep nemahhig hu ligat ku. Limmetuk hu matak ni nanginangih ku ey kamangekeendi law hu amleng kun meittu-u.

<sup>10</sup> Iyyadyan heni ikkatey ku eya nemahhig ni lemyung ku tep nemahhig hu ligat ku. † Kimmappuy ni peteg hu annel ku ey anin ni genit ku et henidda kahheheppung.

<sup>11</sup> Emin ida buhul ku ey da-ak kapanhimpipihuli, nema-madda hu tuun sinakdul ku. Anin idan gayyum ku et ida law kaumtakut ni hi-gak, et da-ak kapanhi-yana hedin inang-ang da-ak.

<sup>12</sup> Eleg da-ak law hengngudan hi-gada e heni-ak netey niya heni-ak neibbeng ni naphik ni pa-nay.

<sup>13</sup> Dakel hu nakka deddedngelan kae-ehheladdan buhul kun hi-gak. Ey daka ihhenum-mangan hu pehdng dan memettye ni hi-gak, et nemahhig hu takutakut ku.

<sup>14</sup> Nem anin ni hanniman, et nanengtun nehammad hu dinel kun hi-gam, tep hi-gam e APU hu Dios ku.

<sup>15</sup> Hi-gam hu nakka iddinel di biyag ku. Et humman hu, ihwang muwak anhan di hipan pehdng idan buhul kun kamengippehelheltap ni hi-gak.

<sup>16</sup> Em, ihwang muwak anhan ey peang-ang mu kawedan binabbal mu niya kamannananeng ni impeminhed mun hi-gak, e bega-en mu.

<sup>17</sup> APU DIOS, entan tu anhan iebulut ni nak mebabba-ingan, nem ang-ang mu et yadda kumaddan etan tuun lawah daka pehpehdng hu mebe-ing. Ey palaw mudda kumad dungay di kalawwin netey.

<sup>18</sup> Pasiked mudda humman ni kaumlenangkak, tep manghay ida niya beken ni makulug hu daka pebehul idan kayyaggud ni tuu.

<sup>19</sup> Hi-gam e APU DIOS ey nan-amta hu kakinayyaggud mu, tep dakel hu indaddan mun panyaggudan idan tuun kamengidaydayaw ni hi-gam niya muka paka-ippaptek ida tuun kamengiddinell ni hi-gam.

<sup>20</sup> Em, hi-gam hu kamengippaptek ni hi-gada ey mudda kahenniid hipan lawah ni pinhed ni buhul dan pehdng ni hi-gada, anin idad itek ni daka pebehul ni hi-gada.

<sup>21</sup> Meidaydayaw hi APU DIOS, tep impeang-ang tu hu eleg melumman ni impeminhed tun hi-gak eman ni nengubatan da-ak idan buhul ku e innang ni petteyen da-ak.

<sup>22</sup> Wadan pinhakkey ni nemahhig hu takut ku, tep kangku ngu nem inway tuwak law nan APU DIOS. Nem kayyaggud anhan et dinggel tu hu dasal ku et baddangan tuwak eman ni nampehemmehemmekan kun hi-gatu.

<sup>23</sup> Emin itsun kamengu-unnud nan APU DIOS ey hi-gatu pinheden tayu, tep tudda kaippaptek hu kamengu-unnud ni hi-gatu. Nem yadda etan manghay ey kastiguen tudda, tep humman hu lebbengtun meippahding ni hi-gada.

<sup>24</sup> Emin itsun kamengiddinell nan APU DIOS ey pekedhel tayu hu nemnem tayu niya ihammad tayu hu dinel tayun hi-gatu.

## 32

### *Ya a-appeh David*

<sup>1</sup> Man-am-amleng idan peteg hu tuun pinesinsahan APU DIOS hu liwat da niyadda hipan lawah ni impahding da tep ya ngehay dan hi-gatu.

<sup>2</sup> Em, man-am-amleng ida, tep eleg law ibbilang APU DIOS idan neliwtan. Humman idan tutu-u ey eleg da ihhaut hu liwat da, nem daka ibbehwang nan hi APU DIOS hu hipan lawah ni impahding da. \*

<sup>3</sup> Yan eman ni eggak pantuttuyuan ni liwat ku, e APU DIOS ey endin hekey hu linggep kun kewa-wa-wa.

<sup>4</sup> Nakka panlelehanin hileng niyan kawwalwal hu muka pengastigun hi-gak, et neendi elet ku henin danum ni natduk tep ya na-let ni petang.

\* **31:5** 31:5 Luke 23:46 † **31:10** 31:10 Yadda edum ni nengamtan Hebrew ey kanday ya keibbellinan tu ey beken ni "nemahhig hu ligat ku" nem "nemahhig hu bahul ku." \* **32:2** 32:2 [1-2] Romans 4:7-8

<sup>5</sup> Entanni law et abuluten ku e nanliwattak ey nginhay daka, et ehelen kun hi-gam e nakka mantuttuyyu ey pinesinsahan mun emin hu liwat ku.

<sup>6</sup> Et humman hu, emin hu tuun kamengu-unnud ni hi-gam e APU DIOS ey mandasadasal idan kenayun et ni hi-gam, ma-lat eleg ida meapput hedin wada nemahhig ni panliggatan da.

<sup>7</sup> Hi-gam e APU DIOS hu makulug ni nakka keihhikkugi, tep hi-gam hu nakka iddinel ni mengihwang ni hi-gak di hipan lawah ni kamekapkapy. Et mukun nakka i-ena-appéh hu nengihwangam ni hi-gak.

<sup>8</sup> Kan APU DIOS ey "Ituttudduk hu kayyaggud ni pehding yu. Tuggunen dakeyu ey ippaptek dakeyun hi-gak.

<sup>9</sup> Et humman hu, pengu-unnud kayu et beken kayun henin kebayyu e pakkaw ni pekemmalan ni gume et han mengu-unnud."

<sup>10</sup> Yadda tuun kamengippahding ni lawah ey dakel hu panliggatan da, nem yadda kamengu-unnud nan APU DIOS ey ippaptek tudda, tep eleg melumman hu impeminhed tun hi-gada.

<sup>11</sup> Hi-gayuddan tuun kayaggud elaw dan daka paka-u-unnuda hi APU DIOS, pan-am-amleng kayu ey pantetekuk kayu gapuh ni an-anla yu, tep ya impahpahding tun hi-gayu.

### 33

<sup>1</sup> Emin itsun makulug ni kamengu-unnud nan APU DIOS ey ihaldet tayun man-a-appéh ni penaydayaw tayun hi-gatu gapuh ni am-amleng tayu, tep humman dedan lebbengtun pehding tayu.

<sup>2</sup> Pelding tayudda ayyuding niya gitalah ni pengia-appéhan tayun pansalamatan tayun APU DIOS.

<sup>3</sup> Itkuk tayu an-anla tayu et ia-appéhan tayu hi APU DIOS ni baluh ni a-appéh ni tayu kapenaydayaw ni hi-gatu. Ey panggitalah itsun mei-unnud di a-appéh tayu.

<sup>4</sup> Makulug ni emin hu kae-helan APU DIOS niya emin hu tuka pehding ey kameiddinnel.

<sup>5</sup> Nakappinshed tu hu hipan limpiyuh niya kayyaggud ey kameang-ang di emin eyad puyek hu eleg melumman ni impeminhed tun hi-gatsun tuu.

<sup>6</sup> Immehel ni ebuh ey lintu tun emin hu wadad kabunyan, henin aggew, ya bulan, niyadda bittuwen.

<sup>7</sup> Impangkakahakey tu hu danum di edallem ni baybay et iha-ad tu pappeg tu.

<sup>8</sup> Emin itsun katuuuud puyek ey daydayaw tayu hi APU DIOS ey paka-u-unnud tayu hu tugun tu.

<sup>9</sup> Tep immehel ni ebuh ey wineda tu eya puyek niya emin hu hipan wadadya.

<sup>10</sup> Emin hu kaiplanuh idan tuun pehding ey kababhahan APU DIOS ma-lat eleg umamnu.

<sup>11</sup> Nem yadda implanuh tun meippahding ey um-amnu et mannananeng ni ingganah.

<sup>12</sup> Et humman hu, ya hanbebleyan ni kamenaydayaw nan APU DIOS ey man-am-amleng ida. Em, makulug ni man-am-amleng ida hu tuun pinili tu.

<sup>13-14</sup> Hi APU DIOS ey immen di kabunyan di nan-ap-apuan tu ey tuka uh-uhdungin emin hu tuu eyad puyek.

<sup>15</sup> Ey inamta tun emin hu daka pehpehding tep hi-gatu hu nengapyan nemnem da.

<sup>16</sup> Beken ni ya kabaelan idan sindalu hu kameiddinnel ni pengapputan winu keihwangan ni patul et yadda sindalu tud gubat.

<sup>17</sup> Ey eleg meiddinnel hu kebayyud pengapputan di gubat, tep anin ni neka-ka-let ida et endi kabaelan dan mengihwang idan sindalud buhul da.

<sup>18</sup> Nem hedin hi APU DIOS, man tuka paka-ippaptek ida hu kamekangngu-unnud ni hi-gatu niya kamengiddinnel ni eleg melumman ni impeminhed tu.

<sup>19</sup> Tudda kabaddangi ma-lat meihwang idad ketteyyan da, ey anin ni nemahhig hu bisil et ida kameteggu, tep tuka weddaa kennen da.

<sup>20</sup> Hi APU DIOS ni ebuh hu dammutun pandinnelan tayun mengihwang ni hi-gatsu, tep kamei-ellig ni happiyaw tayu. Daitsu kabaddangi ey daitsu keippaptek.

<sup>21</sup> Et mukun itsu kaman-am-amleng ey tep tayu kaiddinel hu kayyaggud ni peteg ni ngadan tu.

<sup>22</sup> APU DIOS, pannananeng mu anhan hu nehammad ni impeminhed mun hi-gami, tep hi-gam ni ebuh hu mika pandinneli.

## 34

*Ya a-appeh David ni meippanggep eman ni tuka hin-a-angngawid hinanggan Abimelek e ngeipea-allaw ni hi-gatu*

<sup>1</sup> Mansalamattak nan APU DIOS ni kenayun ey ene-ehhelen kun ingganah hu keidaydayawan tu.

<sup>2</sup> Hi-gatu daydayawen kun kenayun tep ya impahding tu, ma-lat wada et anhan ni um-amleng ida etan tuun kameligligasi hedin dedngelen da.

<sup>3</sup> Emin itsu, daydayaw tayu hu kasina-gey APU DIOS. Hi-gatun ebuh hu daydayawen tayu.

<sup>4</sup> Nandasallak nan APU DIOS ey dingngel tu et ihwang tuwak di emin ni nakka tattakusi.

<sup>5</sup> Emin ida kamengiddinnel ni hi-gatu ey ida kaman-am-amleng tep nanna-ud ni baddangan tudda et eleg ida mebabba-ingan.

<sup>6</sup> Henin hi-gak e nampehemhememekkak nunman nan APU DIOS ey binaddangan tuwak di emin ni ligat ku.

<sup>7</sup> Tep kaguwalyaiddan anghel APU DIOS emin hu kamengu-unnud ni hi-gatu, et ida kameihwang di hipan anggetakkut.

<sup>8</sup> Kulug yu dama hi APU DIOS et amtaen yu hu kakinnayaggud tu. Tep makulug ni um-amleng ida tuun kamengiddinnel ni hi-gatu.

<sup>9</sup> Hi-gayun tutu-un APU DIOS, ey hi-gatu paka-u-unnud yu, tep tuka iddawat hu mahapul idan kamengu-unnud ni hi-gatu.

<sup>10</sup> Anin idan layon et hin-addum ni endi kennen da, nem yadda etan tuun makulug ni kamengu-unnud nan APU DIOS ey endi da pangkullangan di mahapul da.

<sup>11</sup> Hi-gayuddan kamampenihhikken, dengel yu et tuttuiddan dakeyun mengu-unnud nan APU DIOS.

<sup>12</sup> Hedin pinhed yun man-am-amleng kayu niya meduddukkey hu biyag yu,

<sup>13</sup> man helipati yu et beken ni ya lawah niya itek hu yu e-e-helen.

<sup>14</sup> Issikid yun mengippahding ni lawah et ya kayyaggud hu pehding yu. Ey mahapul ni kakkayyaggud hu pekiddagyum yud edum yun tuu. \*

<sup>15</sup> Tep kapaka-ippaptek APU DIOS ida tuun kayyaggud hu daka kapkapyaa et tuka dedngela dasal da.

<sup>16</sup> Nem nemahhig hu bunget tu ida etan ni lawah ni tutu-u. Hedin netey ida, man anggagannun meliwwan ida. †

<sup>17</sup> Beken ni ligat ni henin nunman hu meippahding idan makulug ni kamengu-unnud nan APU DIOS, tep nandadaddan ni mengngel ni dasal da et tudda kabaddangid hipan daka panliggasi.

<sup>18</sup> Ey tuka hehmekadda tuun endi namnamah dad biyag da.

<sup>19</sup> Dakel hu ligat ni kahelheltapaddan tuun kamengu-unnud nan APU DIOS, nem tudda kabaddangi et ida kameihwang kayad emin di ligat da.

<sup>20</sup> Tep emin ida kamengu-unnud ni hi-gatu ey tudda kapaka-ippaptek et anin ni hakey ni tu-ngal da et endi an mehping.

<sup>21</sup> Nem yadda tuun lawah hu daka pehpehding ey mettey ida tep yadda lawah ni daka pehpehding. Ey yadda tuun angebe-hel dadda hu kamengu-unnud nan APU DIOS ey kastiguen tudda.

<sup>22</sup> Nem emin ida tuun makulug ni kamengu-unnud niya kamengiddinnel nan APU DIOS ey tudda kaihhehwang. Tep emin hu kameihhikkug ni hi-gatu ey tudda kaippaptek. ‡

## 35

*Ya a-appeh David*

<sup>1</sup> APU DIOS, baddangi muwak anhan et hi-gam hu mekihhanggaddan kamekihhangga niyadda kamengubbat ni hi-gak.

<sup>2</sup> Em, baddangi muwak anhan, tep heni hi-gam hu almas ku niya happiyyaw ku.

<sup>3</sup> Ey heni hi-gam hu pahul ku niya dehnag kun ihhanggak idan tuun kamemmemdug ni hi-gak. Pakulug mu anhan ni hi-gak e APU DIOS e ihhewang muwak eyad ketteyyan ku.

<sup>4</sup> Panhewim et yadda etan tuun memettey ni hi-gak hu meappat niya mebabba-ingan. Ey pambalin mun metemma ida et eleg da ipahding hu implanuh da.

<sup>5</sup> Pambalin muddan heni degin ittayab ni dibdib ni penegyunan ni anghel mun hi-gada.

<sup>6</sup> Ey pambalin mun engeengt ey medanglel hu dellanen da, ma-lat man-egah idan pemdugan etan ni anghel mun hi-gada.

<sup>7</sup> Endi nak impahding ni lawah ni hi-gada, nem indaddan da hu bitun keknaan ku.

\* 34:14 34:14 Romans 14:19 et ya Hebrews 12:14 † 34:16 34:16 [12-16] Ang-ang yu 1 Peter 3:10-12 ‡ 34:22 34:22 Ang-ang yu Psalms 37:40.

<sup>8</sup> Nem hewim ma-lat umkukumnadda ey hi-gada ngu hu mebahbah, tep meknadda ngud ingkapya dan bitu.

<sup>9</sup> Et man-am-amlengngak ali, tep binaddangan muwak e APU DIOS et meihwangngak.

<sup>10</sup> Et humman hu, kangkullin hi-gatuy "Eteng selamat kun hi-gam e APU, tep endi edum ni henin hi-gam e muka ihhewang ida hu tuun endi kabaelan da kapehding idan tuun et-eting kabaelan da. Em, muka ihhewang ida nangkewetwet di kapehding idan nunman ni kamemilliw ni limmu da."

<sup>11</sup> Yadda lawah ni tuu ey kaddad tistigu day nambahullak, nem endi kaya lawah ni nak impahding.

<sup>12</sup> Emin hu kayyaggud ni nakka pehding ey daka pambalin ni lawah. Et humman hu, nakka umlelemyung ni peteg.

<sup>13-14</sup> Hedin wada nandegeh ni hi-gada, man nakka mekilelemyung ey nakka mantetpel ni dasal ku gapuh ni hi-gada, tep nak ida kaibbilang ni agik winu ammed ku.

<sup>15</sup> Nem ay yan nunyan hi-gak hu neligtan, ey nemahhig ni ida kaum-amleng niya da-ak kang-ni-ngii hedin neamuamung ida. Anin ida etan ni eggak amtan tuu et ida kameie-edum ni mengippehelheltap ni hi-gak.

<sup>16</sup> Da-ak kapanhimpipihuli ey daka peang-ang-ang e anggebe-hel da-ak ni peteg.

<sup>17</sup> Apu Dios, entan tu pakdag ang-ang-ang ni hi-gak, nem baddangi muwak anhan, et meihwangngak eyad kapehpehding ida eyan anggetakkut ni tuun henidda layon,

<sup>18</sup> ma-lat wada inna-nu tun pansalamatan ku niya penaydayawan kun hi-gam di hinanggaddan tuun kamengu-unnud ni hi-gam.

<sup>19</sup> Entan tu iebulut ni nak meapput ma-lat endi hu pan-am-amlengan idan buhul kun maitek. Ey entan tu iebulut e yadda tuun anggebe-hel da-ak ni endi gaputu \* ey da pan-am-amlengan eya nakka lelemyungi.

<sup>20</sup> Beken ni ya panlinggepan hu daka ennung-ungbala, nem ya pemahbahan daddan tuun neminhed ni melinggep ida ngu.

<sup>21</sup> Daka ittettetkuk hu daka pebehul ni hi-gak e kanday "Inang-ang mi hu nengipahdingan tun nunman!"

<sup>22</sup> Nem hi-gam e APU DIOS ey inamtam hu kamekapkapyaa, et humman hu, entan anhan tu pakdag i-ineng ey entan tuwak anhan iwalleng.

<sup>23</sup> APU e Dios ku, inah ka anhan et iehneng muwak! Baddangi muwak eyad ligat ku.

<sup>24</sup> Limpiyuh ka e APU e Dios ku, et humman hu, peamtam anhan di katuutuu e endi bahul ku. Entan tu iebulut ni da-ak ngi-ngi-ngian idan buhul ku gapuh eyan ligat ku.

<sup>25</sup> Ey entan tu iebulut ni an meippahding hu wadad nemnem dan kanday nedatngan kunu law hu aggew ni daka hehhegedan pemetteyan dan hi-gak.

<sup>26</sup> Panhewim e APU DIOS ma-lat yadda etan tuun kaman-am-amleng di nakka panligligasi hu meliggatan ey metemmaddan pehding da. Ey mebe-ing ida et, niya meibbahah ida humman ni tuun kanday nela-la-ing ida nem hi-gak.

<sup>27</sup> Nem peamleng mudda etan kamengi-ehneng ni hi-gak di hipan kapebehul idan buhul kun hi-gak ma-lat itekutekkuk da e kanday "Meiddaydayaw hi APU DIOS, tep kaum-amleng ni mengippeyaggud idan bega-en tu."

<sup>28</sup> Em, ipahding mu anhan ida huuya e APU, ma-lat ene-ehhelen ku hu kinalimpiyuh mu niya kakinayyaggud mu ey daydayawen dakan kewa-wa-wa.

## 36

*Ya a-appeh David e bega-en APU DIOS ni meidwat etan ni kamengipappanggulun a-appeh*

<sup>1</sup> Ya tuun lawah hu tuka kapkapyaa ey eleg umtakut ni mengippahding ni panliwwatan, tep kahing nan APU DIOS\* niya ebuh hu panliwwatan ni tuka nenemnema.

<sup>2</sup> Eleg tu han-ang-ang hu kalinawah tu, tep eta-gey ni peteg hu tuka pannemnem ni annel tu, et kantu na-muy eleg kastiguan APU DIOS.

<sup>3</sup> Ya lawah niya itek hu tuka heppita, tep beken ni kayyaggud niya beken ni neiptek hu pinhed tun pehding.

<sup>4</sup> Anin ni yan tuka pambakbaktadin hileng et ya lawah ni pehding tu hu tuka nenemnema. Endi tuka pehding ni kayyaggud, tep endin hekey hu tuka pelebbaah ni lawah.

<sup>5</sup> Nem ya impeminhed mu niya muka pemaptek ni hi-gami e APU DIOS, ey mannananeng e henin kabunyan e eleg mabalin ni melkud.

\* 35:19 35:19 John 15:25 \* 36:1 36:1 Romans 3:18

<sup>6</sup> Ey nehammad hu kakinayyaggud mu henin duntug e neihammad di sinuunan tu. Hanniman daman kinalimpiyuh mu e kamei-ellig di kadinalllem ni baybay. APU DIOS, muka ippaptek hu tuu niya animal.

<sup>7</sup> Ya eleg melumman ni impeminhed mu ey nebalol ni peteg, tep endi tu kei-ingngehan. Et humman hu, hi-gam ni ebuh hu mika iddinel ni mengippaptek ni hi-gami, heni kami nanhidum di payak mu.

<sup>8</sup> Kami kaman-am-amleng ni mengngan idan hantapug ni kennen ni winedam, ey dakemi kapeinnumin danum ni kamelpu etan di kayyaggud ni wangwang. †

<sup>9</sup> Hi-gam hu kakelpuin biyag ni emin ni mategu niya hi-gam hu heni dilag di biyag mi.

<sup>10</sup> APU DIOS, pannananeng mu hu eleg melumman ni impeminhed muddan tuun neminhed ni hi-gam niya pannananeng mun iddawtan ida humman ni kamengu-unnud ni hi-gam ni panyaggudan da.

<sup>11</sup> Entan anhan tu iebulaw ni da-ak apputen idan tuun kamampahiyya, winu da-ak degyunen idan tuun lawah daka pehpending.

<sup>12</sup> Neapput ida humman ni lawah ni tuu. Netu-lidda et eleg ida pakebangun.

## 37

### *Ya a-appeh David*

<sup>1</sup> Entan pandanag anin kayu kameligligasi ey yadda lawah ni tuu ey nelam-ay hu biyag da. Ey entan kaemeh et yu dama ipahding hu daka pehpending.

<sup>2</sup> Tep humman idan tuu ey anggagannuy mettey idalli, heniddan helek niya intanem e mekling ida, ni netey ida.

<sup>3</sup> Hi APU DIOS hu idinel yud biyag yu et ya pinhed tu u-unnuden yu, et luminggep kayud nambebleyan yu.

<sup>4</sup> Pan-am-amleng kayu tep kabbabbal hi APU DIOS, et iddawat tu hu yuka nenemneman mahapul yu.

<sup>5</sup> I-kud yun APU DIOS hu biyag yu ey hi-gatu hu idinel yu, et makulug ni baddangan dakeyun hi-gatu.

<sup>6</sup> Ey tettebale dakeyud emin ni tuu gapuh ni kakinayyaggud yu niya kalinimpiyuh yu e henin petang ni emaggew e tuka peptangin emin.

<sup>7</sup> Entan pandanag yu, nem anusi yun menehhegged ni baddang APU DIOS. Ey entan kaemeh yuddan lawah ni tuun kamengeddangyan et yu dama ipahding hu lawah ni daka pehpending.

<sup>8</sup> Ey entan bunget niya entan kadenagid linggeman, tep beken ni kayyaggud hu kapambaliniddan nunman.

<sup>9</sup> Tep yadda tuun kamengiddinel nan APU DIOS ey mannenneng idan manha-ad di puyek ni indawat tun hi-gada. Nem hedin yadda tuun lawah daka kapkapyaa ey endien tudda.

<sup>10</sup> Yadda tuun lawah daka pehpending ey anggegannuy meendiddalli et anin ni piga hamak ni hi-gada et eleg ida mehemmak.

<sup>11</sup> Nem yadda tuun daka pebabah hu annel da ey umyaggud hu biyag da niya umlinggep idad bebley ni indawat APU DIOS ni pambebleyan da.

<sup>12</sup> Yadda tuun lawah daka pehpending ey nemahhig bunget daddan tuun kakkayaggud hu elaw da et ihik daddan bahbahen.

<sup>13</sup> Nem kangi-ngi-ngiiddan APU DIOS, tep amta tu e eleg mebeyyag ey meendiddalli humman ni tuu.

<sup>14</sup> Yadda tuun lawah daka pehpending ey indaddan da ispadah da niya panedan pemettey daddan kayyaggud ni tuu, niyadda nangketwet.

<sup>15</sup> Nem eleg um-amnun meippahding humman, tep mehwilli et humman ni ispadah da niya paneda hu memettey ngun hi-gada.

<sup>16</sup> Ya etan ekkut ni limmun hakey ni kayyaggud ni tuu ey nebalbalol nem ya kinedangyan idan emin ni tuun kamengippahding ni lawah.

<sup>17</sup> Tep bahbahen alin APU DIOS hu kabaelan idan nunman ni tuu. Nem ippaptek tudda kakkayaggud ni tuu.

<sup>18</sup> Kaippaptek idan APU DIOS ni kewa-wa-wa hu tuun kamengu-unnud ni hi-gatu niya tuka pannenneng ni iddawat hu panyaggudan da.

<sup>19</sup> Em, ippaptek tudda, et eleg da panlelehmani ligat da. Ey eleg ida me-puhan ni kennen da, anin ni wada nemahhig ni bisil.

<sup>20</sup> Nem yadda etan tuun lawah daka pehpending ey mettey ida. Tep emin ida hu buhul APU DIOS ey heniddalli habung winu ahuk e neala ni attukaw ida la.

† 36:8 36:8 Ya pinhed nunyan e-helen ey beken ni ebuh hu kennen niya danum, nem emin ida kayyaggud ni indawat APU DIOS ma-lat umamleng itu.

<sup>21</sup> Yadda tuun lawah daka pehpehding ey eleg da beyyadi hu daka uttanga. Nem yadda tuun kayyaggud elaw da ey beken ni hanniman hu daka pehding, tep madewat ida.

<sup>22</sup> Yadda binendisyonan APU DIOS ni ebuh hu mambebley di puyek ni indawat tun pambebleyan da. Nem yadda etan tuun inidutan tu ey meendiddalli.

<sup>23</sup> Hi APU DIOS ey tuka ittudu hu kayyaggud niya neiptek ni elaw ni u-unnuden idan tuun kamengippeamleng ni hi-gatu ey tudda kaippaptek.

<sup>24</sup> Et anin ni kamei-ellig ni man-e-gah ida et eleg ida mena-yun di nan-egahan da, tep peehneng idan APU DIOS mewan.

<sup>25</sup> Ingganah nunyan nea-ammaan ku e andukkekey biyag ku ey endin hekey hu nak inang-ang ni kayyaggud ni tuun an impayyag APU DIOS. Ey endi nak inang-ang ni u-ungnga tun kamangkedekedew ni kenen tu.

<sup>26</sup> Yadda tuun daka paka-u-unnda hi APU DIOS ey madewat ida niya nelakah idan mampeuttang. Ey yadda u-ungnga da ey mebendisyonan ida.

<sup>27</sup> Ipahding yudda kayyaggud, beken ya panlawahan, ma-lat mannananeng alin yadda u-ungnga yu niyadda inap-apu hu mambebley eyad bebley tayu.

<sup>28</sup> Tep nakappinhed APU DIOS ida hu tuun limpiyuh daka pehding ey eleg tudda ippayyag hu kamekangngu-unnud ni hi-gatu, nem tudda kaippaptek ni ingganah. Nem yadda helag idan tuun lawah daka pehpehding ey endien tudda.

<sup>29</sup> Yadda tuun kamekangngu-unnud nan APU DIOS, ey hi-gada mambebley ni ingganah di indawat tun pambebleyan da.

<sup>30</sup> Yadda kayyaggud ni tuu, ey kayyaggud dama hu daka ittugun. Emin hu daka heppita ey limpiyuh ni kenayun.

<sup>31</sup> Eleg da ippangil hu tugun APU DIOS, tep wadad puhu da niyad nemnem da.

<sup>32</sup> Yadda tuun lawah daka pehpehding ey daka hellipat-idda hu kayyaggud ni tuu, tep pinhed dan petteyen ida.

<sup>33</sup> Nem hi APU DIOS ey eleg tudda ippayyag hu kayyaggud ni tuu di hipan lawah ni pehding idan lawah ni tuu. Tep eleg tu i-abulut ni wada hu lawah ni an meippahding ni hi-gada hedid wada mengiddiklamuh ni hi-gada.

<sup>34</sup> Hi APU DIOS hu idinel yud biyag yu et paka-u-unnuden yu tugun tu ma-lat hi-gayu memelitan eyan bebley tayu. Han yulli ang-anga hu pengendian APU DIOS idan tuun kamengippahding ni lawah.

<sup>35</sup> Wada eman hakey ni tuun lawah ni peteg e nemahhig ni mabunget et katattakusidan tuu, tep daka panlelehmani hu tuka pehpehding ni hi-gada. Humman ni tuu ey daka i-alig etan di sedar e kegagganggaan ni keyew di Lebanon.

<sup>36</sup> Nem endi maptek ey netalak et nak hamahamaken, nem eggak hanhamak.

<sup>37</sup> Nem beken ni henin nunman hu tuun limpiyuh elaw tu, tep humman ni tuun kayyaggud hu tuka pekikkillawid edum tun tuu ey kaddiwah hu biyag tun hakey alin aggew.

<sup>38</sup> Nem yadda etan tuun lawah daka pehpehding, ey anin idan helag da et meendiddalli.

<sup>39</sup> Hi APU DIOS ey tudda kaihhehwang hu kayyaggud ni tuu ey tudda kaippaptek di hipan daka panliggasi.

<sup>40</sup> Em, tudda kabaddangi et ida kameihwang di lawah ni kapehpehding idan lawah ni tuu, tep hi-gatu hu daka idinel di biyag dan mengippaptek ni hi-gada.

## 38

*Ya a-appeh David ni meippanggep ni pandasalan nan hi APU DIOS*

<sup>1</sup> APU DIOS, peang-ang mu hu hemek mu et eleg muwak anhan kastiguen di bunget mu.

<sup>2</sup> Heni muwak pinena ey heni muwak kineway et maliputannak.

<sup>3</sup> Makaggeh ni peteg hu annel ku gapuh ni impahding mun hi-gak tep ya bunget mun liwat ku.

<sup>4</sup> Em, nemahhig hu liwat ku e heni mebel-at ni peteg et eggak han-agtu hedid nakka nemnemema.

<sup>5</sup> Eggak nemnemen kumedek ni ipahding kudda lawah et deh e kamei-ellig ni nemahhig hu liput ku e kamanhemmy.

<sup>6</sup> Eggak pakebangun tep makaggeh hu annel ku ey nakka umlelemyung ni kewa-wa-wa gapuh idan liwat ku.

<sup>7</sup> Nemahhig hu atung ni annel ku et heni-ak mettey.

<sup>8</sup> Endin hekey hu elet ku, tep kimmapuyyak law ni peteg ey nakka umpalalapak niya maggeh ni peteg nemnem ku. \*

<sup>9</sup> APU DIOS, inamtam ni emin hu hipan pinhed ku-et anhan di biyag ku niya handengel mu eya nakka pellapellaki.

<sup>10</sup> Nemahhig ni endi law hu elet ku ey nakka umkenebkeb ni peteg ey anin ni ya matak et eleg law um-aang-ang.

<sup>11</sup> Emin ida hu sinakdul ku niyadda gagayyum ku, anin idan pamilyah ku et eleg da-ak law hehnupa tep da-ak kangihhewa.

<sup>12</sup> Yadda dama tuun ihik ni memettey ni hi-gak ey indaddan dan keknaan ku. Ey tagan da nemnem ni pehding dan memahbah ni hi-gak.

<sup>13</sup> Nem nakka pekdag eneeneng et heni-ak netuleng niya heni-ak nenganga.

<sup>14</sup> Nakka pekeddukdul hu eggak ida deddenggela niya eggak ida huhummanga.

<sup>15</sup> Tep hi-gam e APU e Dios ku hu nakka iddinel, et hi-gam hu ngenamung ni umbaddang ni hi-gak.

<sup>16</sup> Nakka iddasal e APU DIOS e entan tu iebulut ni da-ak heneghegnuden idan buhul ku winu da pan-am-amlengan hu hipan lawah ni kameippahding ni hi-gak.

<sup>17</sup> Iyyadyan nemahhig ni maggeh ni emin hu annel ku et ay heni-ak meplat.

<sup>18</sup> Nakka ebbulutan emin hu liwat ku et nakka e-helan hi-gam e nakka mantuttuyyun nengipenahdingan kuddan nunman.

<sup>19</sup> Angebe-hel da-ak idan buhul ku, anin ni endi impahding kun hi-gadan lawah. Hantapug ida, man anhan niya nangka-let ida.

<sup>20</sup> Emin hu kayyaggud ni nakka pehding ni hi-gada ey daka bellehin lawah tep angebebe-hel da-ak tep nakka i-ehngeng hu neiptek niya kayyaggud.

<sup>21</sup> APU e Dios ku, entan tuwak anhan eway ey entan kaidawwim ni hi-gak, <sup>22</sup> nem baddangi muwak kumaddan, tep hi-gam ni ebuh hu kamenellaknib ni hi-gak.

## 39

*Ya a-appeh David ni meidwat nan Jeduthun e kamengipappanggulun a-appeh*

<sup>1</sup> Kangkud annel kuy "Hellipat-an ku et eggak maihelaut ni mengippahding ni lawah niya ma-lat endi nak e-helen ni pambenhulan ku. Ey hellipat-an ku ma-lat anin ni pekdag ku eneeneng hedin wadadda lawah ni tuu."

<sup>2</sup> Nem ay hedin nakka pakdag eneeneng, anin ni wada et, hu kayyaggud ni pinhed kun e-helen ey nema-man nakka umguguhun annel ku.

<sup>3</sup> Et lektattuy eggak han-isipel hu guhuk et umhellak.

<sup>4</sup> Kangkuy "APU DIOS, penemnem mun hi-gak e ansikkey hu biyag ku et nebilang ni ebuh hu aggew ku eyad puyek.

<sup>5</sup> Em, ansikkey hu indawat mun biyag ku e heni handangan ni ebuh. Tep ya lingkud mun biyag ni tuu ey nekemtang ni peteg e henin pinhakkey ni yahyahan.

<sup>6</sup> Ey henin allinnew e anin ni kaang-ang-anga et nekekemtang ni attukaw. Et humman hu, endi silbitu hedin ya keddangyanan di puyek ni ebuh hu an peppepdugen, tep eleg meamta hedin hipalli mengellan nunman ni kinedangyan ni kepapegan ni biyag.

<sup>7</sup> Et mukun hedin hi-gak ngu e Apu, man endi edum ni nakka iddinel di biyag ku nem hi-gam ni ebuh.

<sup>8</sup> Helaknibi muwak anhan di liwat ku ma-lat endi gapun da-ak pemippihulan idan tuun endi nemnem tu.

<sup>9</sup> Endi mabalin ni nak pehding, tep hi-gam hu nalpuan eyan nakka panhelheltapi.

<sup>10</sup> Nem attu anhan et isiked mun mengippehelheltap ni hi-gak, tep heni-ak ni mettey gapuh eyan nakka panhelheltapi.

<sup>11</sup> Muka kastigua hu tutu-u tep ya liwat da ma-lat matugun ida. Ya muka pehding ey muka bahbaha hu hipan nebalol ni wadan hi-gada, henin kapehding ni aney. Em, nekemtang ni ebuh hu biyag ni tuu eyad puyek e henin pinhakkey ni yahyahan.

<sup>12</sup> Dengel mu anhan e APU hu dasal ku ma-lat baddangan muwak ma-lat ya ustuh hu pambiyag ku, anin ni nanda-guhhak ni nekemtang ni ebuh eyad puyek, henidda lan ammed ku.

<sup>13</sup> Et humman hu, isiked mu anhan ni mengippehelheltap ni hi-gak ma-lat man-am-amlengngak ni nekemtang et hannak hi-yana eya puyek."

\* **38:8** 38:8 [5-8] Endi maptek hedin makulug ni kamandedgeh hi David ni nanghelan tun nunya winu eleg, nem kakulugan tu na-mu ey kaumbabaing tep ya liwat tu.

## 40

*Ya a-appéh David ni meidwat etan ni kamengipappangngulun a-appéh*

<sup>1</sup> Inan-anusan kun nenehhegged ni pemaddangan tuwak nan APU DIOS ey dingngel tu hu dasal kun nampehemmehemmekan kun hi-gatu.

<sup>2</sup> Et ihwang tuwak di nemahhig ni ligat ku e kamei-ellig ni ginuyud tuwak di luyluy et peehngng tuwak di ta-pew ni batu.

<sup>3</sup> Sinuttudduan tuwak ni baluh ni a-appéh ni penaydayaw ni hi-gatu e Dios tayu. Dakel idalli menang-ang nunyan nengihwangan tu hi-gak et metngaddalli ey mandinnel idallin hi-gatu e APU tayu.

<sup>4</sup> Yadda kamengiddinnel nan APU DIOS ey um-amleng ida. Eleg da iddinel ida kamampahhiya niyadda etan kamenaydayaw ni dios ni kinapyan tuu.

<sup>5</sup> Hi-gam e APU e Dios ku, ey endi mei-ingngel ni hi-gam, tep dakel hu impahding mun panyaggudan min eggak hambalang ey eggak han-ehel ni emin. Em, dakel pay hu implanuh mun panyaggudan mi.

<sup>6</sup> Impaewat mun hi-gak e beken ni yadda hu hipan kamei-appit heniddan animal ni kagihheba niyadda kamei-appit ni ke-kalan liwat hu kamengippeamleng ni hi-gam, nem ya nehammad ni kapengu-unnudin tugun mu.

<sup>7</sup> Et mukun kangkuy "Adyahhak e Apu ni mengippahding etan ni neitudek ni meippanggep ni hi-gak e kantuy

<sup>8</sup> 'APU e Dios ku, nakka um-amleng ni mengippahding ni pinhed mu, tep ya tugun mu hu nakka nenemneman ingganah.' " \*

<sup>9</sup> Inamtam e APU DIOS e emin di kakeemmungiddan tuum ni daka penaydayawin hi-gam ey impaenamtak hu meippanggep ni muka penellaknibin tuu. Ey huuya hu ene-ehelen kun ingganah.

<sup>10</sup> Eggak ibeing ni menghel ni kabaelan mun umhelaknib niya kamannananeng ni muka pemaptekt ni hi-gami, nem impaenamtak ni nakka peki-emmaemmungiddan tuum. Ey ingganah nunya ey nanengtun nakka peennamtaddan tuum hu eleg melumman ni impeminhed mu.

<sup>11</sup> APU DIOS, hemek muwak anhan ni ingganah. Nakka medinnel e endi hu el-eleg ni an meippahding ni hi-gak, tep eleg mepappeg hu muka pemaptekt ni hi-gak ey eleg melumman ni impeminhed mun hi-gak.

<sup>12</sup> Nem yan nunya ey nemahhig hu ligat ku niya liwat ku e eggak hambalang, tep daddakkel ida nem yadda bewek ku. Mukun medismayahhak ni peteg. Et eggak amta pehding kun meihwang.

<sup>13</sup> APU e Dios ku, kahegag ka anhan et baddangan muwak ma-lat meihwangngak.

<sup>14</sup> Ey himeng mudda anhan ida tutu-un ihik ni memettey ni hi-gak ma-lat maka-apput ida niya ma-lat mebabba-ingan ida humman ni tutu-un daka pan-am-amlengi hu nakka panligligasi.

<sup>15</sup> Hamban meapput ida humman ni tuun kamenaltalanggan hi-gak ma-lat mebabba-ingan ida ey.

<sup>16</sup> Nem peamleng mudda ngu etan tuun kemenepupeppul ni hi-gam ma-lat man-an-ladda. Em, ya kayyaggud ey humman idan emin ni hinelaknibam ey man-am-amleng ida et itkuk da e kandy "Eta-gey ni peteg hi APU DIOS!"

<sup>17</sup> Apu Dios, hedinnel kattedeg ngun hi-gak, man anggehemmekak ni peteg niya neendi elet ku. Et humman hu, entan tuwak anhan liwwan, nem ipaptekt muwak. Apu e Dios ku, hi-gam hu kamengihwang ni hi-gak, et humman hu, kahegag ka anhan et baddangan muwak.

## 41

*Ya a-appéh David ni meidwat etan ni kamengipappangngulun a-appéh*

<sup>1</sup> Man-am-amleng idan peteg hu tuun wada hemek daddan nangkewetwet, tep baddangan idan APU DIOS hedinnel wada ligat da.

<sup>2</sup> Kaippaptekt idan APU DIOS et andukkey hu pekibi-biyagan dad bebley da. Tudda kabendisyoni ey eleg tu i-abulut ni wada lawah ni ippahding idan buhul dan hi-gada.

<sup>3</sup> Ey hedinnel idan kamandedgeh ey tudda kaellubyaga ey tudda kapeyaggud.

<sup>4</sup> Nandasallak e kangkuy "APU DIOS, nanliwattak ni hi-gam, et humman hu hemek muwak anhan et peyaggud muwak."

<sup>5</sup> Yadda buhul ku ey lawah hu daka e-ehhela meippanggep ni hi-gak niya pinhed dan metteyyak ma-lat meliwannak.



<sup>6</sup> Hedin immaliddan mengiddu-ngaw ni hi-gak ey kayyaggud hu daka peang-ang. Nem ya kakulugan tu ey ida kaum-alin an mandeddenggel ni hipan el-eleg ni meippanggep ni hi-gak ni da-ak sinumtumbuk di edum ni tuu.

<sup>7</sup> Humman idan buhul kun angebe-hel da-ak ey daka ittenuttubud edum da e wada lawah ni mekappan hi-gak.

<sup>8</sup> Kanday "Nanna-ud mannuman ni mettey di binaktadan tu, tep nemahhig hu degeh tu."

<sup>9</sup> Anin etan ni nehammad ni gayyum kun nakka iddinel niya nekikakikan ni hi-gak, et nambalin ni buhul ku. \*

<sup>10</sup> Nem nakka mandasal ni hi-gam e APU DIOS ma-lat hemeken muwak anhan et yumagduddak et ibleh ku kapehpehding idan buhul kun hi-gak.

<sup>11</sup> Inamtak e kaka um-amleng di nakka pehpehding et mukun eleg mu i-abulut ni da-ak apputen idan buhul ku.

<sup>12</sup> Ey inamtak e muwak kabaddangi et mekihha-addak alin hi-gam ni ingganah, tep emin hu nakka pehpehding ey kamei-unnud di pinhed mu.

<sup>13</sup> Kamedeyyaw hu AP-APU e Dios idan helag Israel! Em, medaydayaw ni ingganah.

Amen. Em, amen! †

## Ya Meikkadwan Libluh ni Psalms

(Psalms 42-72)

### 42

*Ya a-appeh idan helag Korah ni meidwat etan ni kamengipappanggulun a-appeh*

<sup>1</sup> Apu Dios, makahhapul dakan peteg ni hi-gak henin kapeneppulin naka-wew ni makwah ni metengnin ni danum.

<sup>2</sup> Hi-gam e Dios ni kamannananeng ni ingganah, ey makahhapul dakan hi-gak, et nakka um-abtun um-alin menaydayaw ni hi-gam.

<sup>3</sup> Eggak mangamangan, tep kewa-wa-wa niya kelallabbi ey nakka umlewalewan lemyung ku. Nemahhig hu kapenge-ehhel idan buhul kun hi-gak e kanday "Kele attu mewan hu Dios mu et baddangan daka ey?"

<sup>4</sup> Nakka nemnemnema e yan nunman la ey nakka ippanguludda edum kun an mandeyyaw ni hi-gam di Tempol mu. Kami kaman-am-amleng et mika pan-itkuk hu a-appeh min penaydayaw mi niya pansalamat min hi-gam.

<sup>5</sup> Nem yan nunya ey nemahhig ni nakka umlemyung niya kamemunnumunnu hu nemnem ku. Nem nanengtun hi-gam hu nakka iddinel ey hi-gam e Dios kun kamenellaknib ni hi-gak hu daydayawen ku.

<sup>6-7</sup> Apu Dios, iyyadyan nemahhig hu nakka lelemyungid kamantu-tu-nud ni ligat kun kamei-ellig di kamabungngug ni elwang di duntug di Hermon niyad Misar niya kamabungngug ni danum di Wangwang e Jordan. Nem anin ni hanniman et eggak liwwana hu binabbal mun hi-gak.

<sup>8</sup> APU DIOS, muka peang-ang ni kewa-wa-wa hu eleg melumman ni impeminhed mun hi-gak, et kahilehileng ey humman nakka i-ena-appeh. Ey nakka mandasal ni hi-gam e Dios kun nengidwat ni biyag ku.

<sup>9</sup> Hi-gam hu Dios ni kamei-ellig ni batun nakka keihhikkugi, tep hi-gam kamengipaptek ni hi-gak. Nem kele muwak kae-wayaya et eleg muwak baddangi eyad nakka helheltapan kapehpehding idan buhul ku?

<sup>10</sup> Makaggeh ni peteg hu daka pemennadngel ni hi-gak e kanday "Attu mewan etan Dios mun kamemaddang ni hi-gam ey?"

<sup>11</sup> Nem yan nunya ey nemahhig ni nakka umlemyung niya kamemunnumunnu hu nemnem ku. Nem nanengtun hi-gam hu nakka iddinel ey hi-gam e Dios kun kamenellaknib ni hi-gak hu daydayawen ku.

### 43

<sup>1</sup> Apu Dios, iehneng muwak anhan, et peamtam idan eleg mengu-unnud ni hi-gam e endi bahul ku. Ey ihwang muwak di hipan lawah ni pehding idan lawah niya maheul ni tuu.

<sup>2</sup> Hi-gam e Apu Dios, hu nakka keihhikkugi, tep hi-gam hu kamengipaptek ni hi-gak. Nem ay nakka umlelemyung, tep muwak kae-wayaya et da-ak kapanhelheltapaddan buhul ku.

\* **41:9** 41:9 Ang-ang yu Matthew 26:23, ya Mark 14:18, ya Luke 22:21 et ya John 13:18 † **41:13** 41:13 Psalm 106:48

<sup>3</sup> Baddangi muwak ni mengewwat ni elaw mu e heni muwak dillagan et ituttuddum ni hi-gak ida hu makulug ni tugun mu ma-lat umli-ak mewan ni mandeyyaw ni hi-gam di Tempol mud duntug mu e Zion.

<sup>4</sup> Em, ipengulu muwak di altar mu e Apu Dios et daka iappitan diman, tep hi-gam hu kakelpuin amleng ku. Et ia-appehan daka ey petnul ku ayyuding kun penaydayaw kun hi-gam e Dios ku.

<sup>5</sup> Nem yan nunya ey nemahhig ni nakka umlelemyung niya kamemunnumunnu hu nemnem ku. Nem nanengtun hi-gam hu nakka iddinel ey hi-gam e Dios kun kamenellaknib ni hi-gak hu daydayawen ku.

## 44

*Ya a-appeh idan helag Korah ni meidwat etan ni kamengipappanggulun a-appeh*

<sup>1</sup> Apu Dios, dingngel mi in-inhel idan eman ni ammed min meippanggep ni kakinyayyagdu ni impahpading mun eman ni ketaggu da.

<sup>2</sup> Impanhelheltap mudda kunun emin hu buhul mi niya dinegyun mudda humman ni tutu-ud nambebleyan da et ihullul mudda aammed min nambebley diman ey impeyaggu mu neitu-wan idan nunman ni tuum.

<sup>3</sup> Impangenapput mudda et sakupen dadda nambebleyan idan buhul da. Nem beken ni gapuh ni almas da winu ya kabaelan da hu nengenaputan da, nem gapuh ni et-eteng ni kabaelan mu. Et humman nengipeang-angan mun binabbal mu niya impeminhed mun hi-gada.

<sup>4</sup> Hi-gam hu patul ku niya Dios ku. Impangenapput dakemin tutu-um.

<sup>5</sup> Mika ennapputadda buhul mi tep ya kabaelan mun ebuh.

<sup>6</sup> Beken ni ya pana winu ispadah hu nakka iddinel di keihwangan ku.

<sup>7</sup> Tep hi-gam kamengippengapput ni hi-gami et ida kamebe-ingi hu buhul mi.

<sup>8</sup> Et humman hu, kami kamansalamat ni hi-gam niya daydayawen dakan ingganah.

<sup>9</sup> Nem yan nunya ey in-eway dakemi. Eleg mu law pinhed ni ippanguludda sindalu mid gubat et kami kamebabbaing.

<sup>10</sup> Tep in-abulut mun pebsik dakemiddan buhul mid nambebleyan mi et pan-alen dan emin hu hipan limmu mi.

<sup>11</sup> Ey in-abulut mudda hu edum ni hi-gamin heni kalneroh ni nampatey da ey yadda edum mi ey neiwehit idad bebley ni neilawwan da.

<sup>12</sup> Heni endin hekey hu balol mid hinanggam e nealay heni dakemi inggang ni nelakah ni peteg.

<sup>13</sup> Impambalin dakemin kangi-ngi-ngiiddan katuutuu ey dakemi kapanhimpipihuli, tep inang-ang-ang da hu impahding mun hi-gami.

<sup>14</sup> Ey kami kamababbaing ni kapenge-ehhel idan katuutuud kabebbley. Et hedini inang-ang dakemi, ida kamanwigiwig.

<sup>15</sup> Nakka mebabba-ingin ingganah

<sup>16</sup> gapuh ni kapehphehding idan buhul kun ihik ni memetty ni hi-gak e da-ak kapennadngeli niya da-ak kapippihula.

<sup>17</sup> Neipenahding ida huayan emin ni hi-gami, anin ni eleg daka iwalleng niya anin ni eleg mi ipngil hu nekitbalam ni panyaggudan mi.

<sup>18</sup> Em, eleg daka iwalleng ey eleg mi ipngil hu tugun mu,

<sup>19</sup> nem inway dakemi e heni dakemi impayyag di kad-an idan angetakkut ni animal di muung niyad engeenget.

<sup>20</sup> Gullat ni inwalleng daka e Dios mi et ya edum ni dios hu dinaydayaw mi e inta-gey mi ngamay mi et mandasal kamin hi-gada,

<sup>21</sup> et nanna-ud ni inamtam, tep Dios ka et amtam emin hu hipan wadad nemnem ni tuu.

<sup>22</sup> Nem mika hanghanggaan kenayan hu ketteyyan mi tep ya mika pengu-unnudin hi-gam e Apu Dios. Makulug huuya, tep ya kapannemnem ni tuun hi-gami ey heni kami kalneroh ni kamenehhegged ni kepalsian tu. \*

<sup>23</sup> Et humman hu, inah ka anhan e Apu Dios et helakniban dakemi. Kele heni ka kaman-u-uggip? Entan dakemi anhan eway ni ingganah.

<sup>24</sup> Kele heni dakemi kaitattallui? Ey kele eleg dakemi hengnguhengnguda eyad ligat min mika panlelehmani?

<sup>25</sup> Kamei-ellig ni netukkad kami et mena-yun kamin limmukbub di puyek, tep neka-apput kami.

<sup>26</sup> Apu Dios, baddangi dakemi anhan. Ihwang dakemi tep eleg melumman hu impeminhed mun hi-gami.

\* 44:22 44:22 Romans 8:36

## 45

*Ya a-appeh idan helag Korah ni meidwat etan ni kamengipappanggulun a-appeh. Huyya kaia-appeh di kasal. Nan-ingnegh hu kapenga-appeh etan ni a-appeh e "Lilies."*

<sup>1</sup> Wada ninemnem kun kayyaggud ni peteg ni a-appeh ni pinhed kun ittudek meippanggep nan apu patul. Heni-ak nelaing ni kamantuddek ni a-appeh e ussalen ku laing tun mengapyan nunyan a-appeh. Huyya a-appeh ni ittudek ku.

<sup>2</sup> Apu patul, hi-gam hu kekakkayyaggudan di emin ni lalakki. Nelaing kan umhapit, tep binendisyonan dakan Apu Dios ni ingganah.

<sup>3</sup> Iesip mu ispadah mu e ketultuedan ni patul. Et-eteng hu kabaalam ey hi-gam hu kamedeyyaw.

<sup>4</sup> Pantakkay kad kebayyum et itultuluy mun menga-apput tep muka i-ehngeng hu limpiyuh niya kayyaggud ni elaw. Ey gapuh ni kabaalam ey mudda kapehding hu kaketngain tuu.

<sup>5</sup> Pan-ipenam ida mangkatedem ni panam di puhuddan buhul mu. Et maka-apput idan emin hu buhul mud kebebbbley.

<sup>6</sup> Apu Dios, mannananeng ni ingganah hu nan-ap-apuam ey limpiyuh hu pehding mun man-ap-apu.

<sup>7</sup> Ya kayyaggud ni elaw hu nakappinshed mu, nem anggebe-hel mu hu lawah ni elaw. Et humman hu, hi Apu Dios e Dios ni muka u-unnuda ey pinutuk dakan medaydayaw nem yadda edum mu ma-lat man-am-amleng kan peteg.\*

<sup>8</sup> Daka kai-ena-appehiddan tuun nangkelaing ni man-ayyuding di baley mun neenal-alkusan ni ivory. Ey neha-adan ida balwasim ni bangbanglun myrrh, ya aloe, niya cassia.

<sup>9</sup> Yadda edum ni imbilang mun ahwam, ey u-ungngaddan papatul di edum ni bebley. Et ya etan ahwam ni immehngeng di winannan ni yuddungam ey nanggngam ni nemahmah ni balituk di Ophir.

<sup>10</sup> Hi-gam ni biin ahwaen ni patul, dengel mu et ehelen kun hi-gam e mahapul ni beken law ni yadda ammed mu niyadda agim hu mu nenemnemen.

<sup>11</sup> Tep ya etan patul ey nemahhig ni tuka am-amyawi hu kakinat-agum. Hi-gatu law hu ap-apum, et humman hu, ipahding mun emin hu pinhed tu.

<sup>12</sup> Yadda tutu-ud Tyre, ey pan-i-ali dan hi-gam hu hipan pinhed dan iddawat ni hi-gam. Ey hi-gam ali hu pangkekdedwan idan kekeddangyan ni tuun hipan panyaggudan da.

<sup>13</sup> Immen etan kat-agun biin ahwaen ni patul di kuwaltu tu e imbalwasi tu etan nebalbalittukan ni balwasid kasal. Yadman hu panhehhegedan tu ingganah ni pengillawan dan hi-gatud kad-an ni patul.

<sup>14</sup> Entanni et ilaw da humman ni biin nambalwasin kakkayyaggud di kad-an ni patul ey neiunud ida etan bibi-in gayyum tu,

<sup>15</sup> et ida kaman-am-amleng ni immelad baley ni patul.

<sup>16</sup> Apu patul, dake idalli lakin u-ungngam ni meihhullul ni mampatul ni henin hi-gam niyadda aammed mu. Hi-gadalli hu puttukan mun mampan-ap-apud kebebbbley.

<sup>17</sup> Meippalpun nunya ey hi-gam hu meidaydayaw eyad a-appeh ku ey mengmenglaw alin hi-gam hu meidaydayaw di kebebbbley ni ingganah.

## 46

*Ya a-appeh idan helag Korah ni meidwat etan ni kamengipappanggulun a-appeh ni kaia-appeh idan bii*

<sup>1</sup> Hi Apu Dios hu tayu kakeihhikkugi niya hi-gatu kakelpuin elet tayu. Hi-gatu hu nandadaddan ni kenayun ni umbaddang ni hi-gatsud hipan tayu kapanliggasi.

<sup>2</sup> Et humman hu, eleg itsu umtakut, anin ni manyegyeg ni na-let et mangkagday ida duntug et mangka-gah idad baybay

<sup>3</sup> ey anin na-mun umla-pih hu danum di baybay ey manyegyeg di sinuunan idan duntug.

<sup>4-5</sup> Nem ya bebley Apu Dios ey wadadman hu wangwang ni kamengippeamleng idan tuudman. Ey anin ni hellikuben idan buhul humman ni bebley et ihhehwang Apu Dios e Keta-ta-geyyan ida tun tun kamangkewa-wa. Et eleg ali mebahbah humman ni bebley.

<sup>6</sup> Nem yaddalli katuutuud kebebbbley ey umtatakut ida tep mepappeg ali hu nampan-ap-apuan ni aap-apu da. Nanna-ud ni meippahding huyya, tep henilli kidul hu tekuk Apu Dios ni tu pengapputan idan emin hu sindalud puyek.

\* 45:7 45:7 [6-7] Huyyaddan dewwan verse ey Apu Dios hu impangngadan etan ni nengituede nunya nan Christo. Ang-ang yu Hebrews 1:8-9

<sup>7</sup> Hi APu DIOS e Kabaelan tun emin niya DIOS la daman eman nan hi Jacob ey wadan hi-gatsu niya hi-gatu hu tayu kakeihhikkugi.

<sup>8</sup> Ikeyuy et ang-angen tayudda kamengippetngan impahding APu DIOS et ya nemahbahan tuddan kebebbley.

<sup>9</sup> Kabaelan tun pesikked hu gubat di anin ni attun bebley. Anin ni hipa humman ni ussalaen dad gubat, henin pahul niya pana, et panhehpungen tudda ey panggihheben tudda happiyyaw da.

<sup>10</sup> E-helan idallin Apu Dios e kantuy "Isiked yun mekihhanggan hi-gak. Nemnem yu e hi-gak ni ebuh hu Dios e Keta-ta-geyyan ni Ap-apud emin eyad puyek."

<sup>11</sup> Hi APu DIOS e Kabaelan tun emin niya DIOS la daman eman nan hi Jacob ey wadan hi-gatsu niya hi-gatu hu tayu kakeihhikkugi.

## 47

*Ya a-appeh idan helag Korah ni meidwat etan ni kamengipappanggulun a-appeh*

<sup>1</sup> Hi-gayun katuutuu, pelakpak kayun anla yu niya elet yun mengia-appeh ni pandaydayaw yun Apu Dios.

<sup>2</sup> Hi APu DIOS e Keta-ta-geyyan hu Ap-apud emin eyad puyek, et humman hu, hi-gatu lebbengtun tekkutan.

<sup>3</sup> Indawat tun hi-gatsu hu kabaelan tayun mengapput idan emin ni buhul tayud kebebbley, et hi-gatsu law hu man-ap-apud bebley da.

<sup>4</sup> Ey hi-gatu nemilin bebley tayun tayu kaigaggayan helag Israel e nakappinshed tun tuu tu.

<sup>5</sup> Yan kapenglawwin Apu Dios di kabunyan e tuka pan-ap-apui ey katkatnulan tu hu tangguyup niya katkuk ida tuun amleng dan hi-gatu.

<sup>6</sup> Imay, pan-a-appeh itsun pandaydayaw tayun hi-gatu. Pan-a-appeh itsun pandaydayaw tayun hi-gatu e Patul tayu.

<sup>7</sup> Humman ni Dios hu Patul ni emin eyad puyek. Pan-a-appeh itsun pandaydayaw tayun hi-gatu.

<sup>8</sup> Hi Apu Dios ey wadad yuddungngan tun kaman-ap-apud emin ni bebley.

<sup>9</sup> Neamung idan emin hu aap-apud kebebbley et mei-dum idan mengidaydayaw ni Dios nan Abraham. Tep hi-gatu hu Ap-apuddan emin ni patul di puyek ni daydayawen ni tutu-u, tep hi-gatu Keta-ta-geyyan.

## 48

*Ya a-appeh idan helag Korah ni meidwat etan ni kamengipappanggulun a-appeh*

<sup>1</sup> Hi APu DIOS ni ebuh hu keta-ta-geyyan. Et humman hu, hi-gatun ebuh hu kameidaydayaw di bebley tud duntug tun tuka panha-adi.

<sup>2</sup> Humman ni Duntug e Zion ey eta-gey ey kakkayyaggud ni peteg hu ang-ang tu, et humman hu, ida kaum-amleng hu katuutuud kebebbley hedin inang-ang da. Yadman hu nambebleyan etan ni Keta-ta-geyyan ni Patul. \*

<sup>3</sup> Impeang-ang Apu Dios e hi-gatu hu kamengi-eddug nunman ni bebley tud Jerusalem e turing hu luhud tu.

<sup>4</sup> Nem entanni ey impan-aaddum idan papatul eyad puyek hu sindalu da et lumaw idan an mengubbat nunman ni bebley di Zion e Jerusalem.

<sup>5</sup> Nem ida kamenetteng di diman et daka ang-ang-anga humman ni bebley, ey pinhakkeyey simmattakut ida et mamsik ida.

<sup>6</sup> Nemahhig hu takut da et ida kamampanggegeygey e henidda etan ni biin man-ungnga.

<sup>7</sup> Binahbah Apu Dios ida et heniddan bapor di Tarsis ni binahbah ni na-let ni pewek ni nalpud appit ni kasimmilin aggew.

<sup>8</sup> Diddingngel tayu hu panyaggudan nunman ni bebley ni impahpahding APu DIOS e Kabaelan tun emin, nem yan nunya ey inang-ang tayu law hu kakinyayyaggud nunman ni bebley tu. Ey hi-gatu e hi Apu Dios ey tuka eddugi huayan bebley et melinggep ni ingganah.

<sup>9</sup> Apu Dios, kami kaumlaw di Tempol mun mannemnemnem ni eleg melumman ni impeminhed mu.

<sup>10</sup> Daka kadaydayawaddan katuutuud kebebbley ey nandingngel ka. Limpiyuh ka niya kayyaggud kan peteg. Ey mudda kapaka-apputa buhul mu, tep et-eteng kabaelan mu.

\* 48:2 48:2 Matthew 5:35.

<sup>11</sup> Ida kaum-amleng hu tuud bebley e Zion niyad kebebbbley di Judah tep limpiyuh hu muka penuwet.

<sup>12</sup> Elaw itsun tuun Apu Dios et tayu ang-angen hu bebley tayud Zion ma-lat tayu bilangen hedini pigadda etan nangehammad ni baballey ni kapan-eddugiddan guwalyan nunman ni bebley tayu.

<sup>13</sup> Ey ma-lat tayu paka-ang-angen ida humman ni pan-eddugan anin idan tuping ni luhud tu, et wadalli a-abbigen tayuddan u-ungnga tayun meihhuullul ni hi-gatsu.

<sup>14</sup> Huyyan Dios hu Dios tayun ingganah. Ey hi-gatu hu mannananeng ni Dios tayun mengippenggulun hi-gatsun ingganah.

## 49

*Ya a-appeh idan helag Korah ni meidwat etan ni kamengipappanggulun a-appeh*

<sup>1-2</sup> Dengel yun katuutuud kebebbbley eya pinhed kun e-helen, hi-gayuddan kekedangyan niyadda nangkewetwet, yadda eta-gey niyadda nebabah hu saad da.

<sup>3</sup> Huyyaddan e-helen kun hi-gayu ey kenemneman yu ma-lat awatan yu hu elaw ni biyag.

<sup>4</sup> Ey ituttudduk hu keibbellinan idan nunya ey penelpedingen ku hu ayyuding ku.

<sup>5</sup> Hi-gak ey anin ni liktuben da-ak idan buhul \* et ya hipan anggetakkut et eggak umtakut.

<sup>6</sup> Eggak tekkusidda hu tuun lawah daka pehpending e ya kinedangyan da hu daka iegah niya daka ididdinel.

<sup>7</sup> Tep kamettye emin hu tuu ey endi hakey ni hanggela tun beyyadan hu biyag tu ma-lat eleg matey. Anin ni piga kinedangyan ni tuu et eleg tu hanggela beyyadan hu biyag tun Apu Dios.

<sup>8-9</sup> Eleg mabalin ni tayu beyyadan hu keihwangan tayu ma-lat eleg itu matey, nem mannananeng itsun mambi-biyag ni ingganah. Tep nebalol ni peteg hu biyag ni tuu.

<sup>10</sup> Anin idan nangkelaing ni tuu et ida kamettye, henin kameippahding idan tuun endi nemnem tu. Et emin hu limmu da ey ihhi-yan daddad edum ni tuu.

<sup>11</sup> Ma-nu tep mangkeinggeddan hu ngadan dad puyek da, nem hi-yanen da et hin-appil ni tuu hu mengi-ussal idan nunman. Tep ya law di kulung da hu panha-adan dan ingganah.

<sup>12</sup> Anin ni piga hu kinedangyan ni tuu, et beken humman ni an mengihwang ni hi-gatud ketteyyan tu, tep mettey ali dama e heniddan animal.

<sup>13</sup> Hanniman hu kameippahding idan tuun daka iddinnel di annel da. Hanniman dama hu meippahding idan kamengu-unnud ni hi-gadan daka tetbala hu daka e-hela.

<sup>14</sup> Henidda kalneroh e nanna-ud ni mettey et heni ya katey hu mengippattul ni hi-gada. Hi-yanen dalli kakkayyaggud ni baballey da et yaddallid kulung da panha-adan dan ingganah. Ey mebwel annel dadman. Huyyalli pengapputan idan kemengu-unnud nan Apu Dios ni hakey ni aggew.

<sup>15</sup> Em, hanniman ali kepappegan da, nem hedini ngun hi-gak, man hi Apu Dios hu nakka iddinel ni mengihwang ni hi-gak di katey.

<sup>16</sup> Entan kaemeh yuddan tuun tagan da kedangyan ey kamangkeetteng baley da.

<sup>17</sup> Tep hedini mettey ida, man endi ittabin dan hipan kinedangyan dad kulung da.

<sup>18</sup> Ma-nu tep kakkayyaggud hu biyag da eyad ta-pew ni puyek niya katetteballadan tutu-u ida,

<sup>19</sup> nem mettey idalli damengu et ida mei-dum di aammed da e engeenget ni ingganah kad-an da.

<sup>20</sup> Et humman hu, ya tuun eleg tu ewwasin beken ni ya kinedangyan tu hu mengihwang ni hi-gatud lawwan tud dungay ey henilli etan ni animal e mettey.

## 50

*Ya a-appeh Asap*

<sup>1</sup> Hi Apu Dios e Kabaelan tun emin ey tudda kapan-eyyagin emin hu tutu-ud puyek di kad-an tu, meippalpu appit ni kasimmilin aggew ingganah di appit ni tuka kelinnugi.

<sup>2</sup> Hi-gatu e Dios ey kamelpu benang tud Zion e kekakkayyaggudan ni bebley.

<sup>3</sup> Ey yallin ellian tu e Dios tayu ey henilli bungug ni kidul hu dedngelen tayu niya emin hu wadad pandellanan tu ey megihheb ida, tep pebukkul tu hu apuy ni kamantettebbel et maitu-nud e liniktub ni na-let ni pewek.

<sup>4</sup> Emin ida etan hipan wadad kabunyan niyad puyek ey ang-angen dalli hu pehding Apu Dios ni penuwetan tun tuu tud puyek.

\* 49:5 49:5 Ya edum ni neitudek ey beken ni "buhul," nem "maheul."

<sup>5</sup> Kantuy “Amung yudda tutu-uk ni nanengtun kamengu-unnud ni hi-gak. Hi-gada hu nekitbalan kun nan-appitan dan hi-gak.”

<sup>6</sup> Emin ida wadad kabunyan ey daka peamta hu kalinimpiyuh ni kapenuwet Apu Dios. Hi-gatun ebuh hu menuwet ni emin ni tuu.

<sup>7</sup> Kan Apu Dios idan tuu ey “Hi-gayun tutu-uk ni helag Israel, dengel yu eya e-helen kun hi-gayu, tep hi-gak hu Dios yu et hi-gak hu menghel ni lawah ni impahpading yu.

<sup>8</sup> Eggak bellawadda yuka i-appit ni hi-gak heniddan yuka gihhebad altar ku.

<sup>9</sup> Nem eggak mahapul ida babakka yud kudal yu niyadda gelding yu.

<sup>10</sup> Tep ya kakulugan tu ey emin hu hipan kaman-a-ayyam ni wadad muyung, yadda babakkad kaheluhelun di kedunduntug, <sup>11</sup> anin idan sisit, niyadda edum ni mategu ey hi-gak hu nanletun emin.

<sup>12</sup> Hedin kantu et meuppa-ak ey eggak mambeggan hi-gayun kennen ku, tep hi-gak nanletun emin ni wadad puyek.

<sup>13</sup> Eggak mahapul hu detag idan baka yu niya kuheyaw idan gelding yun yuka i-appit ni hi-gak.

<sup>14</sup> Tep ya pinhed kun pehding yu ey mansalamat kayu kumaddan ni hi-gak e Dios e Kabaelan tun emin, niya peamnu yu hu insapatah yun hi-gak.

<sup>15</sup> Ey emin di hipan panliggatan yu ey hi-gak pampebaddangi yu et ihwang dakeyu ma-lat daydayawen yuwak.”

<sup>16</sup> Nem yadda tuun kamengippenahding ni lawah, ey kan Apu Dios ni hi-gaday “Isiked yun mengmenghel idan tugun ku, tep endi kelebengan yun menge-ehhel ni nekitebbalan kuddan tuuk.

<sup>17</sup> Yuka kehinga tugun kun hi-gayu. Ey eleg yu hengnguda hu nakka e-hela.

<sup>18</sup> Anin ni wada hu ha-kupan yun kamenekkew et hamban yuka eheli ey eleg, tep yuka baddangi anhan law niya kayu dama kamekikillaw idan tuun daka i-abek hu ahwa da.

<sup>19</sup> Pinpinhed yun menghel ni lawah ey itek hu yuka e-helan kenayun.

<sup>20</sup> Ey lawah niya itek hu yuka ene-ehhelan meippanggep ni anhan ni agiyu ma-lat pemahbah yun hi-gatu.

<sup>21</sup> Inamtak ida huyyan yuka pehpehding, nem nakka pakdag i-ineng, et kanyu na-mu ngu nem eleg dakeyu ibbunget. Nem neihla kayun peteg, tep makulug ni ibbunget dakeyulli.

<sup>22</sup> Mahapul ni dedngelen yuwak et mantuttuyyu kayu, tep hedin pengpenglaw yun kakkahingen yuwak, man mettey kayu et endi hu mengihwang ni hi-gayu.

<sup>23</sup> Hedin makulug ni pinhed yuwak ni daydayawen, ey pansalamat kayun hi-gak. Tep nanna-ud ni ihhehwang kuddan emin hu tuun mengu-unnud ni hi-gak.”

## 51

*Ya a-appeh David ni meippanggep ni nengibungetan Nathan e prophet, ni hi-gatu tep ya nenguiligan tun Bathsheba*

<sup>1</sup> Apu Dios hemek muwak anhan et pesinsahan mu hu liwat ku, tep eleg melumman hu impeminhed mu niya kamannananeng hu binabbal mu.

<sup>2</sup> Ekal mun emin hu lawah di neitu-wan ku et heni muwak inulahan.

<sup>3</sup> Nakka ebbulutan nanliwattak, et kewa-wa-wa ey humman hu nakka pannemnem.

<sup>4</sup> Nem ya kakulugan tu ey hi-gam ni ebuh hu nanliwatan ku. Tep hi-gam hu kan tugun etan ni eggak u-unnuden ni nengipahdingan kun lawah di edum kun tuu. Et humman hu, nakka ebbulutan neiptek hu impanhumalyam ni hi-gak et lebbengtun kastiguen muwak.

<sup>5</sup> Neipalpu eman ni neiungnaan ku, anin ni yan eman ni newad-an kud egeh nan ina ey lawahhak.

<sup>6</sup> Nem ya pinhed mu e Apu Dios, ey kayyaggud hu neitu-wan ni tuu, et humman hu, tuttuddui muwak anhan ma-lat menemnemannak.

<sup>7</sup> Ekal mudda anhan hu hipan liwat ku, ma-lat yumaggud hu neitu-wan ku et heni neulahan hu lugit ku.

<sup>8</sup> Apu, nemahhig nengastigum ni hi-gak, nem nak anhan kamempehemhemmek ni hi-gam e pebanggad mu hu am-amleng kud biyag ku.

<sup>9</sup> Entan tu anhan nenemnem hu nak nanliwatan ni hi-gam, nem pesinsahi muwak et ekalen mu hu hipan lawah di neitu-wan ku.

<sup>10</sup> Peyaggud mu hu nakka pannemnem ma-lat hi-gam ni ebuh hu u-unnuden ku.

<sup>11</sup> Entan tuwak anhan iwalleng ey entan tu anhan idawwi hu Ispirituh mun hi-gak.

<sup>12</sup> Pambanggad mu mewan hu am-amleng ku heni eman ni nelakniban mun hi-gak. Ey baddangi muwak ma-lat hi-gam ni ebuh hu u-unnuden ku,

<sup>13</sup> et nak itenuttuddu hu elaw muddan tuun nampanliwat et mambangngad idan mengu-unnud mewan ni hi-gam.

<sup>14</sup> Apu Dios, entan tuwak anhan kastigun nemateyak nunman ni tuu, \* nem ihwang muwak di ketteyyan ku ma-lat man-am-amlengngak ni an mengippeennamtan kakinayyaggud mu.

<sup>15</sup> Nakka pehemhemmek ni hi-gam et daydayawen daka.

<sup>16</sup> Beken ni yadda kamei-appit hu kamengippeamleng ni hi-gam. Et mukun gullat ni i-appitan dakan kagihheba ey nanna-ud ni eleg mu ebbuluta.

<sup>17</sup> Tep ya muka pehebballin i-appit e Apu Dios, ey ya pengebbulutun kun nanliwattak et mantuttuyyuaq. Humman ni mei-appit hu eleg mu bellawa.

<sup>18</sup> Apu Dios, peang-ang mu anhan hu binabbal mun hi-gamin nambebley di Zion ey baddangi dakemin mengiyayyaggud idan nangebahbah ni tuping ni luhud eyad bebley mid Jerusalem.

<sup>19</sup> Et hedin megibbuh ni emin, ey dammutu law ni um-amleng kan pengi-lian midan kagihheban kamei-appit ni hi-gam niya dammutu mewan law ni i-appitan dakan bubulug ni bakad altar mu.

## 52

*Ya a-appeh David meippanggep eman ni nengidaddattengan Doeg e iEdom nan hi Saul ni nemaddangan Ahimelek nan hi David.*

<sup>1</sup> Hi-gam ni tuun nandinggel, kele muka ippahhiya hu lawah ni muka pehpephding idan tuun Apu Dios? Kaw eleg mu amta e hi-gatu hu kameiddinnel ni ingganah ni kamengippaptek ni hi-gada?

<sup>2</sup> Kele nemahhig kan ya pemahbahan mun edum mun tuu hu muka nenemneman kewa-wa-wa? Emin hu muka e-hela ey nehalmun ni maggeh ni peteg di nemnem nem ya degeh ni kalippusin matedem. Ey maitek kan peteg.

<sup>3</sup> Muka pehebballin ippahding ida lawah, tep eleg mu pinhed hu kayyaggud. Ey beken ni makulug hu muka heppita, tep pinpinhed mun man-ittek.

<sup>4</sup> Maitek kan peteg, ey pinpinhed mun pededdegehan hu edum mun tuud muka e-helan itek.

<sup>5</sup> Nem nanna-ud ni mampinhakkey dakallin endien nan Apu Dios, tep heni daka la-nihen di nambalyan mu et palaw tukad dungay.

<sup>6</sup> Metngaddalli hu kamengu-unnud nan Apu Dios ni penang-angan dan nunman ni meippahding ni hi-gam niya mangngi-ngi-ngiddalli et kanday

<sup>7</sup> "Humman hu neipahding ni hi-gatu tep ya kinedangyan tu niya kalinewah tu hu indinel tu e beken hi Apu Dios."

<sup>8</sup> Hedini hi-gak ngu, man heni-ak etan ni keyew ni olibah ni tagan tu etteetteng di Tempol mu e Apu Dios. Tep nakka iddinel hu nehammad niya eleg melumman ni impeminhed mun hi-gak.

<sup>9</sup> Apu Dios, daydayawen dakan ingganah tep kakkayyaggud ka. Ey ene-ehhelen kuddan tutu-um hu kayyaggud ni impahding mu.

## 53

*Ya a-appeh David meippanggep ni nannemneman tun Apu Dios. Meidwat huyya etan ni kamengipappanggulun a-appeh*

<sup>1</sup> Yadda tuun endi nemnem da ey kanday "Endi hu Dios." Lawah ni peteg hu wadad nemnem da niya lawah daka pehpehding. Endin hekey ni hi-gada hu kayyaggud tuka pehding.

<sup>2</sup> Kauh-uhdungiddan Apu Dios di kabunyan hu tuud puyek ma-lat ang-angen tu hedini wadan hi-gada hu nenemneman ni ihik ni mengeddal niya mengamtan hi-gatu.

<sup>3</sup> Nem endi, tep emin tuu ey inwalleng da hi Apu Dios et mambalin idan lawah. Et mukun endin hekey hu tuun kamengippahding ni kayyaggud. \*

<sup>4</sup> Kan Apu Dios ey "Kele nanengtun manghay ida humman ni lawah ni tutu-u? Lawah daka pehpehding, tep daka pilliwa limmuddan tuuk niya eleg idan hekey mandasal ni hi-gak ingganah nunya."

<sup>5</sup> Nem hakey alin aggew et wadalli hu meippahding ni hi-gada et nemahhig ni umtatakut idalli e nema-ma-ma nem ya takut dan hiniktaman da lan nunman. Tep meiwahhiwahhit ali hu genit dan ketteyyan da gapuh ni pehding Apu Dios ni hi-gada.

\* 51:14 51:14 Ang-ang yu 2 Samuel 12:9 et ya Psalm 26:9. \* 53:3 53:3 [1-3] Romans 3:10-12

Mukun meippahding humman ey tep paka-apputen idallin tuu tudda tep inwalleng tudda dedan.

<sup>6</sup> Nakka iddasadasal e hakey alin aggew ey wada melpud Zion ni mengihwang ni hi-gatsun helag Israel di buhul tayu. Yan nunman alin aggew ey man-am-amleng itsun peteg, tep peyaggud daitsun Apu Dios.

## 54

*Ya a-appeh David ni meippanggep ni nengidaddattengan idan tuud Sip nan hi Saul ni tuka pantattallui. Huyyan a-appeh ey meidwat etan ni kamengipappangnguluddan kaman-a-appeh ey kameunnudin gitalah.*

<sup>1</sup> Apu Dios, ihwang muwak ey iehneng muwak anhan tep et-eteng hu kabaelan mu. \*

<sup>2</sup> Dengel mu anhan hu dasal ku tep mahapul ku baddang mu.

<sup>3</sup> Immen idalli etan kamampahhiya niya mangkabunget ni tutu-un memetty ni hi-gak. Humman ida etan tutu-un eleg daka ibbilang.

<sup>4</sup> Hi-gam e Apu Dios, hu kaumbaddang ni hi-gak niya hi-gam hu Apuk ni kamengi-ehneng ni hi-gak.

<sup>5</sup> Panhewim, et ya pinhed idan buhul kun pehding dan hi-gak hu pengastigum ni hi-gada, et pappegen mu hu biyag da, tep humman dedan hu inhel mun pehding mu.

<sup>6</sup> Nakka um-amleng ni mengi-lin pinhed kun i-appit ni hi-gam e APU niya nakka mansalamat ni hi-gam tep kakkayyaggud ka.

<sup>7</sup> Binenaddangan muwak di hipan ligat ku ey inenapput mudda buhul ku.

## 55

*Ya a-appeh David ni kameunnudin gitalah ni meidwat etan ni kamengipappangngulun a-appeh*

<sup>1</sup> Dengel mu anhan e Apu Dios, hu dasal ku. Entan tu anhan pakdag eneeneng.

<sup>2</sup> Em, dengel mu dasal ku et baddangan muwak, tep ay nemahhig ni kamemunnumunnu hu nemnem ku.

<sup>3</sup> Iyyadyan nemahhig takut kud kapehpehding idan buhul ku, tep da-ak kapelilligasi ey anggebe-hel da-ak.

<sup>4</sup> Anin anhan et nakka umkenebkeb, tep nakka umtakut ni mettey.

<sup>5</sup> Et nakka umgeneygey ni takut ku.

<sup>6</sup> Hamban nepayakkannak e henin paluma et tumyabbak di edawwi, et nak man-iyyatudman.

<sup>7</sup> Et yadman ngu hu nak panha-adan et mekallinggepak ngudman ni desert.

<sup>8</sup> Gullat na-mun dammutun pehding ku huuya et pepu-ut kun meiddawwi eyad bebley ni napnuan ni hingit e heni nemahhig ni pewek ni kaumbahbah.

<sup>9</sup> Apu Dios, himeng mudda buhul ku ma-lat eleg da amta heppiten da. Nemahhig katted ngun ebuh hu pappatey ni kameipahpahding eyad bebley.

<sup>10</sup> Kewa-wa-wa niya kahilehileng ey kamampapatey ey kamandedeppap ida tuu.

<sup>11</sup> Anin ni attu lawwan eyad bebley et immen ida mangkabunget niya mangkaheul ni tuu.

<sup>12</sup> Gullat ni ya buhul ku hu kamemippihul winu kamengippadngel ni hi-gak, et dammutun issipel ku winu nak ittalan.

<sup>13</sup> Nem beken, tep hi-gam e anhan ni gayyum ku hu kamengippahding idan nunyan hi-gak.

<sup>14</sup> Kakkayyaggud ni peteg hu ung-ungbal tan nangkukkuyyugan tan nekidaydayawan tad Tempol, nem hi-gam kumedek hu nengipahding ni hi-gak ni lawah.

<sup>15</sup> Hamban mangkinnemtang idan mettey hu buhul ku e henidda mategun neikulung anin ni eleg ida ni mea-amma, tep kapya tu ngu dedan ni hi-gadan mengippahding ni lawah.

<sup>16</sup> Nem hedin hi-gak ngu, man ya AP-APU e Dios hu nakka pampebaddangi et nanna-ud ni ihhehwang tuwak.

<sup>17</sup> Nakka mampemhemhemmek di dasal kun kakkabbuhhan, yan emaggew niyan mahmahdem ey inamtak ni iddawat Apu Dios hu nakka ibbagan hi-gatud dasal ku.

<sup>18</sup> Ippaptek tuwak di nak pekihhanggaan idan buhul ku, et meihwangngak di hipan pehding dan hi-gak ma-lat melinggeppak alin mambangngad.

\* 54:1 54:1 Ya ehel di Hebrew ey eleg tu kaney "eteng ni kabaelan mu," nem kantuy "tep ya ngadan mu."



<sup>19</sup> Hi Apu Dios e nan-ap-apu lan nunman et ingganah ey dedngelen tu dasal ku et apputen tudda buhul ku, tep eleg da pinhed ni issiked hu lawah ni daka pehdng ey eleg ida umtakut ni hi-gatu.

<sup>20</sup> Ya etan nakka ibbilang ni anhan ni gayyum ku ey nambalin ni buhul ku, tep eleg tu ipahding hu impakulug tun hi-gak.

<sup>21</sup> Malumi-ih ni peteg hu tuka penge-ehhel, nem ya kakulugan tu ey napnun hingit hu nemnem tu. Ey ma-nut kayyaggud dengel ni ehel tu, nem heni makattaddem ni hinallung e kaumliput.

<sup>22</sup> Emin hu yuka kakkaguhi ey i-hel yun APU DIOS, et baddangan dakeyun hi-gatu. Makulug ni ippaptek dakeyu, tep eleg tu i-abulut ni an meapput hu kayyaggud ni tuu.

<sup>23</sup> Em, makulug e nanna-ud ni pellow mudda lawah ni tutu-un mapetey niya maitek di kulung da, anin ni eleg ida ni mea-amma. Nem hedind ngun hi-gak, man hi-gam nakka iddinel ni mengihwang ni hi-gak.

## 56

*Ya a-appeh David ni meippanggep ni nampapan idan iPilistia ni hi-gatud Gath. Huyyan a-appeh ey kei-ingnegh tu etan a-appeh e "Ya etan palumad neidawwin keyew ni oak." Meidwat huuya etan ni kamengippangnguluddan kaman-a-appeh.*

<sup>1</sup> Apu Dios, hemek muwak anhan, tep ay nemahhig ni nakka panlelehhanu hu kapehpehdng idan buhul kun heni da-ak kadeddedwenga.

<sup>2</sup> Da-ak kahellipat-in kewa-wa-wa, tep pinhed da-ak ni panligligat.

<sup>3</sup> Nem anin ni hipan tsimpuh ni nakka umtakut et hi-gam e Apu Dios hu nakka iddinel.

<sup>4</sup> Em, makulug ni hi-gam e Apu Dios, hu nakka iddinel niya hi-gam hu nakka daydayawan APU, tep eleg mu keyyata hu muka e-helan pehdng mu. Et mukun eggak law umtakut, tep hipa ni-man hu dammutun da pehdng ni hi-gak ey tuu idan ebuh?

<sup>5</sup> Kai-anteng idan buhul ku hu mamplennuh ni lawah ni pehdng dan hi-gak ey daka hehhehwian emin hu nakka e-hela.

<sup>6</sup> Nanhuhummangan ida et ida kamantattallun mansissi-im ni nakka pehpehdng, tep ihik idan memettey ni hi-gak.

<sup>7</sup> Apu Dios, gapuh ni bunget muddan nunman idan tutu-u ey kastiguh mudda, tep nemahhig ni lawah hu daka pehpehdng.

<sup>8</sup> Inamtam ni emin hu ligat ni impalebalebah ku. Inemung mu lewak di busih mu ey intudek muddan emin di libluh mu.

<sup>9</sup> Apu Dios, nakka medinnel e yan pampebaddangan kun hi-gam ey baddangan muwak et umhunay ida buhul ku, et humman pengi-immatanun kun muwak kabaddangi.

<sup>10</sup> Et mukun nakka daydayawa hu impakulug mu e APU, tep eleg mu keyyata hu impakulug mu.

<sup>11</sup> Em, nakka medinnel ni hi-gam e Apu Dios, et mukun eggak umtakut. Tep hipa ni-man hu dammutun da pehdng ni hi-gak ey tuu idan ebuh?

<sup>12</sup> Apu Dios, ipahding ku hu impakulug ku ni hi-gam e man-appittak ni pansalamatan kun hi-gam,

<sup>13</sup> tep inhewang muwak di katey ey eleg mu iebulut ni nak mambehhu. Et yan nunya ey dammutu law ni mekiddagyum ni hi-gam ma-lat kamei-ellig ni nakka mandaddallan di kawwalwal ni kaum-idwat ni biyag. \*

## 57

*Ya a-appeh David ni meippanggep ni tu nantattalluan di leyang eman ni binsikan tu et hi-yanen tu hi Saul. Huyyan a-appeh ey kei-ingnegh tu etan a-appeh e "Entan tu bahbah."*

<sup>1</sup> Apu Dios, hemek muwak anhan, hi-gam hu nakka iddinel ni mengippaptek ni hi-gak e kamei-ellig ni meihhikkuggak ni hi-gam ingganah melebbah eya anggetakkut ni kamekapkapan kamei-ellig di na-let ni pewek.

<sup>2</sup> Hi-gam hu nakka pandasali e Apu Dios ni Keta-ta-geyyan, tep hi-gam ni ebuh hu kamengippeamnun hipan pinhed mun meippahding ni hi-gak.

<sup>3</sup> Et nakka medinnel ni dedngelen mud kabunyan e kad-an mu hu dasal ku, et ihwang muwak idad buhul ku et meibbabaing ida. Tep hi-gam e Dios ku, ey muka pannananeng hu eleg melumman ni impeminhed mu niya muka pemaptek ni hi-gak.

<sup>4</sup> Liniktub da-ak ida eyan buhul kun henidda layon e makan ni tuu. Yadda lawah ni daka pehpehdng ey kamei-ellig di pana niya pahul ni kamanlipput ni annel. Ey kamei-ellig di matedem ni ispadah hu ehel da.

\* 56:13 56:13 Job 33:30

<sup>5</sup> Apu Dios, peang-ang mud kabunyan e ta-pew ni puyek hu kasina-gey mu, niya peang-ang mud puyek hu dayaw mu.

<sup>6</sup> Nemahhig law ni nakka umlelemyung, tep indaddan idan buhul ku hu keknaan ku. Kimmu-kuddan bitud dellanen ku, nem hi-gada et kuma hu mekna.

<sup>7</sup> Nakka makaddinnel ni hi-gam e Apu Dios, et humman hu, nakka man-a-appéh ni penaydayaw kun hi-gam.

<sup>8</sup> Yan nunya ey ihikkak law ni memelpelding ni ayyuding niya gitalah ni kamangkewa-wa, et heni bengngunen ku hu aggew, tep umbangunnak ni dagah ni menaydayaw ni hi-gam.

<sup>9</sup> Mansalamattak ni hi-gam e Apu Dios niya ia-appéh ku hu penaydayaw kun hi-gam di hinanggaddan katuutuud kebebbley.

<sup>10</sup> Tep eleg melumman hu impemihed mu niya kamannananeng hu muka pemapték ni hi-gami, niya eleg ida metpeng e henin kasina-gey ni kabunyan.

<sup>11</sup> Apu Dios, peang-ang mud kabunyan e ta-pew ni puyek hu kasina-gey mu, niya peang-ang mud puyek hu dayaw mu. \*

## 58

*Ya a-appéh David ni meidwat etan ni kamengipappangngulun a-appéh. Huyyan a-appéh ey kei-inggeh tu etan a-appéh e "Entan tu bahbah."*

<sup>1</sup> Hi-gayuddan aap-apu, beken ni limpiyuh hu yuka pehding ni menuwet idan tutu-u.  
<sup>2</sup> Ebu hu lawah ni yuka nenemneman pehding, et hi-gayu anhan law hu kaumpatepatey.

<sup>3</sup> Yadda lawah ni tutu-u ey neiungngaddan lawah dedan et humman hu lawah hu elaw da niya maitek ida.

<sup>4</sup> Ya ehel da ey kamei-ellig di gitan uleg e kaumpatey. Ey henidda hakuku e daka kahintuttullengi.

<sup>5</sup> Et anin ni um-ali etan nelaing ni mengeyyum ni uleg, et iyenayyaggud tun petnul hu tuka pengeyyum, ey eleg hengngudan nunman ni hakuku.

<sup>6</sup> AP-APU e Dios, pasiked mudda anhan hu anggetakkut ni kapehpehding idan nunman ni tuu e kamei-ellig ni penepngitan mun ngipen idan mabunget ni layon.

<sup>7</sup> Ey ipahding mun hi-gada hu henin kameippahding ni danum e kamelinnug di pe-hang niya ipahding mun hi-gada hu henin kameippahding di helek di dalam e kapan-igsin idan tuu.

<sup>8</sup> Ey heniddallin gunggunyayu e eleg tu dettenga lawwan tu ey neumah winu heniddallin kameni-weh ni gelang ni kamettey di egeh inetu, et eleg tu ang-angen hu kawwalwal.

<sup>9</sup> Apu Dios, peang-ang mu hu bunget mu ma-lat peminhakkeyen muddan endien, anin idan u-ungnga winu nea-amma et henidda helek ni kep-ahem.

<sup>10</sup> Nem yaddalli kamengu-unnud ni hi-gam ey man-am-amleng idan pengastiguan muddan nunman ni lawah ni tutu-u et kamei-ellig ni pengullah dan heli da hu kuheyaw idan nunman ni lawah ni tutu-u.

<sup>11</sup> Et kan idallin tutu-uy "Makulug ni kayyaggud hu kapambalinin kapengu-unnudin Apu Dios niya makulug ni hi-gatu hu kamanhuwet ni katuutuu eyad puyek."

## 59

*Ya a-appéh David meippanggep ni nengitu-dakan nan Saul idan sindalu tun memtak ni hi-gatud baley tu ma-lat pateyen da. Huyyan a-appéh ey kei-inggeh tu etan a-appéh e "Entan tu bahbah." Meidwat huyyan a-appéh etan ni kamengipappangngulun a-appéh.*

<sup>1</sup> Apu Dios, ihwang muwak anhan di eyad immalin buhul kun memettey ni hi-gak.  
<sup>2</sup> Em, ihwang muwak anhan di hipan pehding idan eyan lawah ni tuun mapetey.

<sup>3-5</sup> Neamuamung ida et immen e nemahhig ni ihik idan memettey ni hi-gak ey endi nak impahding ni nambahulan kun hi-gada, niya endi nanliwatan kun hi-gam, APU DIOS, nem kapyatun pinhed da-ak ni petteyen. Et humman hu, kahegag ka anhan e APU DIOS e Kabaelan tun emin ni Dios mid Israel, et baddangan muwak et kastiguen mudda humman ni tuun eleg mengullug ni hi-gam, anin idan tutu-ud kebebbley ni kei-inggeh da. Ey entan tudda dama hemek hu lawah ni tuun kamengihdul ni edum da.

<sup>6</sup> Ida kameukkat ni hileng et henidda ahun kamangngengeyyed ni kamanhawa-hawang di bebley.

\* 57:11 57:11 Ya Psalm 57:7-11 ey nan-inggeh ni Psalm 108:1-5.

7 Daka tenattakkuta edum da niya ida kamemadpadngel. Emin hu daka e-hela ey makakkageh nem ya hu kalippusin matedem ni ispadah. Ey kanda ni-nganguy “Kaw dedngelen daitsum Apu Dios?” \*

8 Nem hi-gam e APU DIOS ey muka heghegnuda niya muka ngi-ngi-ngiidda hu hanniman ni tutu-un eleg mengu-unnud ni hi-gam di kebebbley.

9 Hi-gam e Apu Dios, hu nakka iddinel, tep hi-gam hu kakelpuin elet ku niya hi-gam hu nakka keihhikkugi.

10 Apu e Dios ku, eleg melumman hu impeminhed mun hi-gak et nakka makaddinnel ni baddangan muwak et manggagaya-ak ni penang-angan kun keapputan idan emin ni buhul ku.

11 Apu e Dios min kamengippaptek ni hi-gami, entan tudda peminpinhakkey ni endien ida humman ni buhul ku, nem pannananeng muddan manhelheltap ma-lat eleg liwwanan idan tuuk e makulug ni mudda kakastigua hu lawah ni tutu-u. Ey anin ni iwehit muddan ebuh niya peapput mudda gapuh ni kabaelan mu.

12 Gapuh ni lawah ni kameukkat di bungut da, e idut niya itek ey mambalin et ni kebingan da hu daka pampahhiyyai.

13 Endim ida tep ya nemahhig ni bunget mun hi-gada ma-lat pengamtaan ni katuuuud kebebbley e hi-gam e Apu Dios, hu Ap-apud Israel.

14 Ida kameukkat hu buhul kun hileng et henidda ahun kamangngeyyed ni kamanhawahawang di bebley.

15 Ey henidda ahun kamandaladalan ni meneyyud ni kennen da, et ida kaumgenung-gung hedin eleg ida maphel.

16 Nem hedin hi-gak ngu, man nakka ia-appeh hu meippanggep ni kabaelan mu ey nakka ia-appeh ni kakabbuhhan hu meippanggep ni impeminhed mu.

17 Apu Dios e kakelpuin elet ku, man-a-appehhak ni penaydayaw kun hi-gam, tep eleg melumman hu impeminhed mun hi-gak. Ey hi-gam hu nakka keihhikkugi.

## 60

*Ya a-appeh David ni meippanggep ni nekigubatan tun Aram-Naharaim et hi Aram-Sobah niya meippanggep ni nambangngadan di Joab et pampateyen dadda hu hampulut dewwan libun tuud Edom di Nandeklanan tud Ahin. Huyyan a-appeh ey kei-ingngeh tu etan a-appeh e “Ya habung ni lily ni pekitbalan.” Meidwat huyyan a-appeh etan ni kamengipappangngulun a-appeh.*

1 Apu Dios, inwalleng dakemi niya impeapput dakemi, tep nemahhig hu bunget mun hi-gami. Nem yan nunya ey mika iddasal ni hi-gam e entan dakemi law anhan ibubbunget ma-lat u-unnuden daka mewan ni hi-gami.

2 Heni impaelim hu yegyeg di bebley mi et mangkadhak. Nem, attu anhan et panhaddak mu.

3 Nemahhig hu nampehelheltap mun hi-gamin tutu-um e heni dakemi impainuman ni kaumbuteng, et kami law kamandangidangi.

4 Nem hedin yadda kamekanggu-unnud ni hi-gam, man muka itta-gey hu bandelah ma-lat peamtam idan tutu-um e meihwang idad lawah ni pehding ni buhul dan hi-gada.

5 Et humman hu, dengel mu anhan hu dasal min tutu-um ni nakappinhed mu et ihwang dakemi tep et-eteng kabaelan mu.

6 Immehel ali hi Apu Dios etan di tuka panhahha-adi et kantuy “Apputen kudda buhul ku et man-am-amlengngak ni mengennadwan Sekem niya nedeklan di Sukkot e bebley da ma-lat i-peng idan tutu-uk.

7 Ya Gilead niya Manasseh ey bebley kudda. Ey yadda iEpraim hu heni sindaluk. Hedin ya Judah ey yadman ali kelpuan idan patul ku.

8 Pambega-en kudda iMoab ey panhimit kudda iEdom, ey ittekuk kulli hu pengapputak idan iPilistia.”

9 Apu Dios, hipa edum ni mengippengngulun hi-gak di Edom e nehammad ni neluhud ni batu, hedin beken ni hi-gam ni ebuh?

10 Kaw inwalleng dakemi tu-wangu anhan e Apu Dios? Kaw eleg ka law mekillaw idan sindalu min an mekigubbat?

11 Baddangi dakemi anhan ni mengubbat idan buhul mi, tep endi silbin baddang ni tuu.

12 Nanna-ud ni mengapput kami hedin baddangan dakemi e Apu Dios, tep ya kakulugan tu ey hi-gam dedan hu kamengapput idan buhul mi. \*

\* 59:7 59:7 Ang-ang yu Job 22:13, ya Psalm 10:11, ya 73:11 et ya 94:7.

\* 60:12 60:12 Ya Psalm 60:5-12 ey

nan-inggeh ni Psalm 108:6-13.

## 61

*Ya a-appéh David ni kameununudin gitalah ni meidwat etan ni kamengippangnguluddan kaman-a-appéh*

<sup>1</sup> Apu Dios, dengél mu anhan eya nakka pampehemmehemmekin hi-gam di dasal ku, <sup>2</sup> tep iyyadyan kamangkeendi namnamah ku niya edawwi-ak ni peteg di bebley mi. Ilaw muwak anhan di kad-an ni melinggep ni panha-adak e heni batun kakeihhikkugi ma-lat endi an meipahding ni hi-gak ni lawah.

<sup>3</sup> Hi-gam hu heni etan ni batun kakeihhikkugi, tep hi-gam hu kamengippaptek ni hi-gak. Niya hi-gam hu kamenennin hi-gak ida etan di buhul ku.

<sup>4</sup> Abulut mu anhan et makiha-addak ni ingganah di muka panha-adi ma-lat luminggeppak tep ippaptek muwak e heni-ak manhiddum di payak mu.

<sup>5</sup> Dinggel mudda e Apu Dios hu impakulug kun hi-gam ni pehding ku, niya indawat mun hi-gak ida etan lebbengtun muka iddawat idan kamengu-unnud ni hi-gam.

<sup>6</sup> Idwasim anhan hu patul min andukkey ni biyag ma-lat mambi-biyag ni dakel ni toon.

<sup>7</sup> Ey kayyaggud et anhan hedín ippaptek mu ma-lat hi-gatu mampatul ni ingganah. Pannananeng mu hu muka pemaptek ni hi-gatu niya eleg melumman ni impeminhed mu.

<sup>8</sup> Et iena-appéh ku hu penaydayaw kun hi-gam niya i-enappitan dakan kewa-wa-wa etan ni impakulug kun i-appit kun hi-gam.

## 62

*Ya a-appéh David ni meidwat nan Jeduthun e kamengippangngulun a-appéh*

<sup>1</sup> Hi Apu Dios hu nakka hehhegedan mengihwang ni hi-gak, tep ebuh tun nakka iddinél.

<sup>2</sup> Hi-gatu hu heni batun nakka keihhikkugi niya hi-gatu kamengihwang ni hi-gak. Ey hi-gatu hu kamekihhanggan buhul ku ma-lat endi an mengapput ni hi-gak.

<sup>3</sup> Pigantu pengissikkedan yun mengippelligat ni hi-gak, ey deh e heni-ak dedangngu nedunut ni luhud ni kamangketu-li?

<sup>4</sup> Pinhed yuwak ni e-kalen di eta-gey ni saad kun nakka ketbali. Niya am-amleng yun man-ittek meippanggep ni hi-gak, tep ma-nut kakkayyaggud hu yuka e-helad hinanggak, nem ya kakulugan tu ey angebe-hel yuwak.

<sup>5</sup> Hi Apu Dios hu nakka hehhegedan umbaddang ni hi-gak tep hi-gatun ebuh hu nakka iddinél.

<sup>6</sup> Hi-gatu hu heni batun nakka keihhikkugi niya hi-gatu kamengihwang ni hi-gak. Ey hi-gatu dama hu kamekihhanggan buhul ku ma-lat endi an mengapput ni hi-gak.

<sup>7</sup> Makulug ni hi-gatu hu kamengihwang ni hi-gak niya hi-gatu kakelpuin nakka ketbali, tep hi-gatu hu heni batun nakka keihhikkugi.

<sup>8</sup> Kaegiegi, hi Apu Dios hu idinél tayun ingganah di hipan ligat tayu niya hi-gatu pengiheli tayun hipan tayu kakakkaguhi, tep hi-gatu hu makulug ni tayu kakeihhikkugi.

<sup>9</sup> Hi-gatsun tutu-u eyad puyek, newetwet niyadda kedangyan, ey endin hekey hu bilbilang tayud kapenang-ang nan Apu Dios. Tep gullat na-mun meikkiloh itsu et angkepaw itsu nem ya yahyah.

<sup>10</sup> Entan tu taketakew hu nan-aatuan ni edum yun tuu niya bekken ni an tenattakkuten hu edum ni tuu ma-lat piliwen yu limmu tu. Ey hedín kantu et umkedangyan kayu, man beken mewan dedan ni ya kinedangyan hu an iddinél.

<sup>11</sup> Tep beken ni pinhakkey ni ebuh hu nangngelan kun inhel Apu Dios ni kantuy ebuh tun wada hu kabaelan tu <sup>12</sup> niya eleg ni hekey melullumman hu impeminhed tu.

Apu, nanna-ud ni muka iddawat hu kagun-udan hakey ni tuu meippuun di impahding tu.

## 63

*Ya a-appéh David eman ni wadad desert di Judah*

<sup>1</sup> Apu Dios, hi-gam hu Dios ku. Ey hi-gam hu makahhapul kud biyag ku henin kapeneppulin naka-wew ni tuun danum di desert. Ihikkak ni peteg ni umhayukup di kad-an mu.

<sup>2</sup> Inang-ang kud baley mu hu elaw ni kinaDios mu, ya kabaelan mu niya elaw ni muka keiddeyyawi.

<sup>3</sup> Daydayawen dakan hi-gak tep ya impeminhed mun eleg ni hekey melullumman e nebalbalol nem ya biyag min tuu.

<sup>4</sup> Itta-gey ku hu ngamay kun mandasal ni hi-gam niya mansalamattak ni hi-gam ni ingganah eyan ketaggak.

<sup>5</sup> Niya man-am-amlenggak ni mengi-ena-appéh ni penaydayaw kun hi-gam e heni-ak nekangnan ni meheng-ew ni kennen et makaphellak.

<sup>6</sup> Anin ni nakka mambakbaktad di unggippak ni hileng et daka kanenemnema

<sup>7</sup> tep muwak kabennaddangin ingganah. Et humman hu, nakka man-am-amleng ni mengi-ena-appéh ni muka pemaptek ni hi-gak.

<sup>8</sup> Hi-gam ni ebuh hu nakka iddinél, tep hi-gam hu makulug ni kamengihwang ni hi-gak di lawah.

<sup>9</sup> Et emin idalli etan tuun neminshed ni memetty ni hi-gak ey hi-gada anhan law hu pellow mud nandaul di dungay.

<sup>10</sup> Tep mangketty idallid da pekiggubbatan et pangkanen idan animal di muyung hu annel da.

<sup>11</sup> Nem hedin hi-gak ey man-am-amlenggak ali tep pengapput muwak e Apu Dios. Emin ida hu kamansapatah ni hi-gam, tep hi-gam hu daka iddinél ey daydayawen daka, nem meimmid ali bungut idan mangkaitek.

## 64

*Ya a-appéh David ni meidwat etan ni kamengipappangngulun a-appéh*

<sup>1</sup> Apu Dios, dengél mu anhan hu dasal ku, et ihwang muwak di hipan lawah ni pehding idan buhul ku.

<sup>2</sup> Baddangi muwak anhan ma-lat meihwangngak di hipan wadad nemnem idan lawah ni tuun pinhed dan pehding ni hi-gak.

<sup>3</sup> Heni matedem ni ispadah niya pana ni kamenaggah di puhu hu kalwah ni daka penge-ehhel ni hi-gak.

<sup>4</sup> Endin hekey kenekeneng da, et nekekemtang ni binahbah dadada hu tuun endi bahul da, tep endi takut dan mengiwaggawag ni hipan daka pebehul di edum dan tuu, anin ni inamta dan itek humman.

<sup>5</sup> Daka dinnia edum dan mengippahding ni hipan lawah ni wadad nemnem da niya daka ihhenummangan hedid attu pengituan dan pengna dan buhul da. Kanday "Endi an menang-ang ni tayu kaippenahding."

<sup>6</sup> Hedid implanuh da hu lawah ni pehding da, kanday "Nanna-ud ni meippahding huyyan implanuh tayu."

Makulug ni netalam hu nemnem ni tuu. <sup>7</sup> Nem endilli maptek ey pennaen idan Apu Dios, et makallipputan ida.

<sup>8</sup> Em, endien tuddalli tep yadda humman ni lawah ni inhél da. Et emin idalli hu tuun menang-ang ni keippahdingan tu humman ey manwigwigiwig idan pihul dan hi-gada.

<sup>9</sup> Emin ali hu tuu ey metngadda, et nemnemen dalli hu impenahding Apu Dios niya humman ali da peennamta katuuuu.

<sup>10</sup> Yadda kamekangngu-unud nan Apu Dios ey meihhikkug idan hi-gatu, hi-gatu daydayawen da niya man-am-amleng ida tep ya impahding tu.

## 65

*Ya a-appéh David ni meidwat etan ni kamengipappangngulun a-appéh*

<sup>1</sup> Apu Dios, lebbengtun daydayawen dakan hi-gamid kad-an mud Zion, niya ippahding mi hu impakulug min hi-gam ni pehding mi

<sup>2</sup> tep muka dedngela dasal mi. Ey emin alid kebebbbley ey dakel idalli tuun mampandalan ni hi-gam ni pambeagaan dan baddang mi.

<sup>3</sup> Nekalliwtan kami, nem dakemi kapessinsahid hipan impahding mi.

<sup>4</sup> Et humman hu, man-am-amleng kamin pinilim ni tutu-um ni mekiha-ad ni hi-gam di kad-an mu, tep endilli mi pangkullangan di hipan panyaggudan mid Tempol mu.

<sup>5</sup> Apu Dios, e kamenellaknib ni hi-gami, muka dedngela dasal mi, tep dakemi kabad-dangi et kami kamengapput di hipan mika pekihhanggai. Ey dakel hu kamengippetngan impahpahding mun mika keihwangid lawah. Et yan nunya ey hi-gam hu kapandinélin dakel ni katuuuu kebebbbley, anin idan wadad nangekidawwin bebley di ba-hil ni baybay.

<sup>6</sup> Winedam hu kedunduntug ni keippeang-angan ni et-eteng ni kabaélan mu.

<sup>7</sup> Muka peinneng hu dalluyun niya bungug ni danum di baybay. \* Ey muka pesikked hu kamangguguluh ni tutu-ud kebebbbley.

\* 65:7 65:7 Matthew 8:26-27 Mark 4:38-39 Luke 8:23-25

<sup>8</sup> Et humman hu emin hu tuu, anin di attu, et ida kametngan muka pehding et daka itekkkutekkuk hu an-anla dan hi-gam.

<sup>9</sup> Muka ippaptek hu puyek et muka peelli hu udan ma-lat madenuman et kayyaggud ni pantenneman niya ma-lat maweda hu danum idad wangwang mu. Ey muka weddaa hu dakel ni kaillameh ni kaittanem idan tuu meippuun di pinhed mun meippahding.

<sup>10</sup> Tep muka uppela puyek ni pantenneman mi ma-lat tumegu ittanem mi.

<sup>11</sup> Et dakel ni peteg hu muka iddawat ni ennien mi, tep anin di attu et muka peang-ang hu kakinyayyaggud mu.

<sup>12-13</sup> Em, tep emin di kedunduntug ey nenapnapan ida pattullan ni kalneroh. Ey nangketaneman ni pagey hu nedeklan. Emin ida humman ni winedam ey heni daka pan-itkuk hu a-appeh da tep ya amleng da.

## 66

*Ya a-appeh ni meidwat etan ni kamengipappangngulun a-appeh*

<sup>1</sup> Emin kayun katuutuuy eyad puyek ey itekkkutekkuk yu hu penaydayaw yun Apu Dios.

<sup>2</sup> Iena-appeh yu hu kamedeyyaw ni ngadan tu niya hi-gatu hu daydayaw yu.

<sup>3</sup> Ehel yun Apu Dios e kanyuy "Kami kemetngadda etan di muka pehpending. Et-eteng hu kabaelan mu, et humman hu, emin hu buhul mu ey ida kamandukkun di hinanggam tep ya takut dan hi-gam.

<sup>4</sup> Emin hu katuutuud kebebbley ey manyu-ung idan menaydayaw ni hi-gam niya i-ena-appeh da hu penaydayaw dan ngadan mu."

<sup>5</sup> Nemnem tayudda etan impahpahding Apu Dios ni kaketngain tuun humman hu panyaggudan idan emin ni tuu tu.

<sup>6</sup> Ya hakey ni impahding tu ey ginedwa tu hu danum di gawwan baybay et pandalnan ida eman ni aammed tayun nan-agwatan dadman. Et humman hu, pan-an-anla itu tep ya humman ni tu impahding.

<sup>7</sup> Hi-gatu hu mannananeng ni man-ap-apu tep ya et-eteng ni kabaelan tu. Tuka hellipati hu kapehpehding ni emin ni tuud kebebbley. Et humman hu, entan tu ipatpatnan mangngenghay ni hi-gatu.

<sup>8</sup> Emin itsun katuutuud kebebbley ey daydayaw tayu hi Apu Dios e Dios tayu niya pandingngel tayu hu tayu kapenaydayaw ni hi-gatu.

<sup>9</sup> Hi-gatu hu nangged ni biyag tayu ey daitsu kaippaptek di hipan lawah ni meippahding ni hi-gatsu.

<sup>10</sup> Apu Dios, pinenatnaan dakemi e heni kami silber ni neayug di apuy ma-lat memahmah, tep indenawtan dakemin ligat min penang-angan mu hedin nehammad hu mika pengullug ni hi-gam.

<sup>11</sup> Ey heni dakemi kinna et pehakbat mu hu mebel-at ni ligat ni hi-gami, tep in-abulut mu et panlelehanan mi.

<sup>12</sup> Niya in-abulut mu et apputen dakemiddan buhul mi et nemahhig hu nampehelhelatp dan hi-gami e heni dakemi nan-igsin, ey heni kami nandalan di apuy niyad danum ni um-ienud. Nem yan nunya ey adyah ni in-ali dakemin hi-gam eyad melinggep ni bebley e wadan emin hu mahapul mi.

<sup>13-14</sup> Et yan nunya ey um-ali-ak di Tempol mun man-appit ni kagihheba ma-lat peamnuk hu impakulug kun hi-gam eman ni wada hu nemahhig ni nakka panligligasi.

<sup>15</sup> Em, i-alian dakan simmaban kalneroh ni kagihheban kamei-appit ni hi-gam niya um-li-ak ni baka niya gelding ni mei-dum ni i-appit kun hi-gam.

<sup>16</sup> Emin kayun kamekangngu-unnud nan Apu Dios ey dengel yu et e-ehhelen kun hi-gayu hu kakkayyaggud ni impahding tun hi-gak.

<sup>17</sup> Tep nampehemhemhemkakk ni hi-gatud dasal ku niya in-ena-appeh ku hu nakka penaydayaw ni hi-gatu

<sup>18-19</sup> ey dingngel tu hu dasal ku et baddangan tuwak, tep inamta tu e endi hu nak intalud puhuk ni liwat ku. Tep gullat ni wada inhaut ku et nanna-ud ni eleg tuwak hanguden.

<sup>20</sup> Hi Apu Dios hu nakka daydayawa, tep hinumang tu hu dasal ku niya impannaneng tu hu eleg melumman ni impeminhed tun hi-gak.

## 67

*Ya a-appeh ni meidwat etan ni kamengipappangngulun a-appeh. Kamegittalahi huyyan a-appeh.*

<sup>1</sup> Apu Dios, hemek dakemi anhan niya bendisyoni dakemi niya gaggayui dakemi

<sup>2</sup> ma-lat wada inna-nu tun pengamtaan idan tutu-ud puyek ni elaw mu niya ma-lat amtaen da e hi-gam hu kemenellaknib ni hi-gada.

<sup>3</sup> Ey kayyaggud hedini hi-gam e Apu Dios hu daydayawen ni katuutuud kebbebley!  
<sup>4</sup> Niya kayyaggud hedini man-am-amleng idan mengi-ena-appeh ni penaydayaw dan hi-gam, tep limpiyuh hu muka panhuwet niya muka ittudun emin hu neiptek ni pehding.  
<sup>5</sup> Em, kayyaggud hedini hi-gam e Apu Dios, hu daydayawen ni katuutuud kebbebley!  
<sup>6</sup> Impanyaggud mu hu inggaud mi et mehawwahawwal hu bendisyon mun hi-gami e Apu Dios e Dios mi.  
<sup>7</sup> Em, makulug ni bendisyonan daitsun Apu Dios, et hi-gatulli daydayawen ni emin ni tutu-ud kebbebley.

## 68

*Ya a-appeh David ni meidwat etan ni kamengipappangngulun a-appeh*

<sup>1-2</sup> Inah ka e Apu Dios et iwehit mudda buhul mun kamengihhingit ni hi-gam ma-lat mangkeapput ida et mamsik idan takut da e henidda ahuk ni kaitayyatayyab ni dibdib. Niya ma-lat humman idan lawah ni tuu ey meendiddad kad-an mu, e henidda kendel ni melennat di apuy.

<sup>3</sup> Nem hedini yadda etan tuun kakkayyaggud elaw da ey pan-am-amleng ida et itektekkekuk da hu an-anla dad kad-an mu.

<sup>4</sup> Emin itu ey ia-appeh tayu hu penaydayaw tayun Apu Dios e kamantakkay di kulput. Hi-gatu hu AP-APU. Pan-an-anla itsud hinangga tu.

<sup>5</sup> Hi Apu Dios e wadad Tempol ey tuka ippaptek ida hu nangkepu-hig niyadda nangkebalu.

<sup>6</sup> Emin ida hu anggehemmek ey iddawtan tuddan panha-adan da. Niya tudda kaibbukyat hu nangkeikelabat et man-an-anladda. Nem yadda tuun kahing ni hi-gatu ey pambalin tu bebley dan mamega et panlelhanan dadman tep ya bisil.

<sup>7</sup> Apu Dios, yan nengipenguluam idan tuum ni nalpuan dad Egypt et idlan yud desert  
<sup>8</sup> ey nanyegyeg niya immudan ni na-let tep hi-gam e Dios idan helag Israel ey immali kad Sinai.

<sup>9-10</sup> Ey yan kaweddadan tuum di nambibleyan dan indawat mu ey impaelim mewan hu udan ni makahhapul da, et yumaggud hu bebley da. Anggehemmek ida, nem impanyaggud mu hu intanem da tep ya binabbal mun hi-gada.

<sup>11</sup> Yan eman ni nengipeamtaan Apu Dios ni nengapputan idan tuu tu ey nangkeukat ida kabibiid baballey da et ida kamampan-an-anla e daka itektekkekuk e kanday  
<sup>12</sup> "Emin ida etan aap-apu niyadda sindaluddan buhul ni patul tayu ey ida kamemsik. Et panggeddwaan idan bibi-in helag Israel hu limmuddan nunman ni buhul da.

<sup>13</sup> Anin idan eleg makigubat, tep hi-gada nengipaptek ni kalneroh et neidwatan idan inladdan sindalud gubat. Et henidda neta-bunan ni silber niya balituk et heniddan paluman hinenian ni payak tu."

<sup>14</sup> Hi Apu Dios e Kabaelan tun emin ey inwahit tudda humman ni patul henin kakeiwwehhisin kame-gah ni dallallud Duntug e Salmon.

<sup>15-16</sup> Hi-gayun etata-gey niya etta-teng ni Kedunduntug di Bashan, kele kayu kaumaameh ni Duntug e Zion ni pinilin APU Dios ni panha-adan tun ingganah?

<sup>17</sup> Yan eman ni linawwan Apu Dios di tuka panha-adi ey liniktub idan kalibulibun nampangkalesa ni sindalu tun nalpuad Duntug e Sinai.

<sup>18</sup> Ey yan sinelakdangan tud kabunyan ey ingkuyug tu hu dakel ni dimpap tu \* niya dakel dama hu indawadawat idan katuutuun hi-gatu. Anin idan tutu-un kahing ni hi-gatu, et wada dama hu indawat da. Humman ni Dios ni AP-APU ey makulug ni yadman hu tuka panha-adi.

<sup>19</sup> Daydayaw tayu hi Apu Dios e kaumhelaknib niya kaumbaddang ni hi-gatsun kewa-wa-wad hipan ligat tayu.

<sup>20</sup> Humman ni Dios niya Eta-gey ni peteg ni APU tayun kaumhelaknib ey hi-gatu kamengihwang ni hi-gatsud ketteyyan tayu.

<sup>21</sup> Nem hedini yadda buhul tun nanengtun ya lawah daka ippenahding ey endi kawwan tun hi-gada, tep panggemiken tuli hu ulu da.

<sup>22</sup> Makulug huuya, tep wada hu inhel Apu Dios ni kantuy "Anin ni ida mantellud duntug di Bashan niyad dalinat ni baybay hu buhul yu et pambanggad kuddad kad-an yu,

<sup>23</sup> et panggassigassinan yu hu kuheyaw da niya anin idan ahhu yu et panhimmutan da hu kuheyaw idan nunman ni buhul yu."

<sup>24</sup> Apu Dios, e Patul ku niya Dios ku, nanhin-aang-angan ni katuutuu hu nebenenbentegan yuddan tuum ni nengipenguluam idad muka panha-adi.

\* 68:18 68:18 Ephesians 4:8

<sup>25</sup> Nebukul idan nebeteg hu kaman-a-appéh et han ida maitu-nud hu kamengipatnū idan kamei-unnud di a-appéh. Et meigawwadda hu kabiibiin kamantambourine.

<sup>26</sup> Emin itsun helag Israel ey daydayaw tayu hu AP-APU e Dios di tayu kakeemuem-mungi.

<sup>27</sup> Nebukul ida hu nebibbilang ni helag Benjamin, et maitu-nud ida hantapug ni aap-apun helag Judah, et han ida maitu-nud law hu aap-apun helag Sebulun niyadda helag Naptali.

<sup>28</sup> Apu Dios, peang-ang mu hu kabaelan mun henin impahding mun nemenaddangan mun hi-gamin nunman.

<sup>29</sup> Kapan-i-liddan papatul di kebebbley hu hipan iddawat dan hi-gam di Tempol mud Jerusalem.

<sup>30</sup> Apu Dios, ibunget mudda humman ni iEgypt ni buhul min henidda animal di muyung ni kamantattallud mekatlubung niya henidda bulug ni kameikkenamkamdug di impah idan baka, ingganah mampekumbabah ida et man-appit idan hi-gam ni silber. Ey pan-iwehit mudda humman ni tuun ya gubat hu pinpinhed da.

<sup>31</sup> Et hakey alin aggew ey pan-i-aliddan iEgypt hu nebalol ni gumek ni iddawat dan hi-gam niya hi-gam hu daydayawen dad bebley di Ethiopia et iappitan daka damadman.

<sup>32</sup> Emin kayun katutuud puyek ey i-a-appéh yu hu penaydayaw yun Apu Dios,

<sup>33</sup> e heni nantakkay di kulput di kabunyan ni lintu tu dedanggu niya heni kidul hu ehel tu.

<sup>34</sup> Hi-gatu hu ap-apud kabunyan niya kameang-ang di Israel hu et-eteng ni kabaelan tu. Emin kayu ey yu paenamta humman ni kabaelan tu.

<sup>35</sup> Apu Dios, e Dios idan helag Israel, kaka mengippetngad muka panha-adi. Ey hi-gam hu kakelpuin elet niya kabaelan idan tutu-um.

Daydayaw tayu hi Apu Dios!

## 69

*Ya a-appéh David ni meidwat etan ni kamengipappangngulun a-appéh. Huyyan a-appéh ey kei-inggeh tu etan a-appéh ni kantuy "Habung ni Lilies."*

<sup>1</sup> Apu Dios, ihwang muwak anhan, tep iyyadyan heni-ak melsing di nemahhig ni ligat ku.

<sup>2</sup> Ey heni-ak kamangkeillunnek di luyluy niya heni-ak kamangkelneng di danum ni ligat kun nemahhig ni nakka panlelehmani.

<sup>3</sup> Neatu-ak law ni bagabagan baddang mu, et nemahhig ni makaggeh hu kulkulung kun dasadasal ku niya bimmatag hu matak ni lewalewak ni heged kun baddang mu e Apu Dios.

<sup>4</sup> Hantapug ida buhul ku e daddakkel ida nem ya bilang ni bewek di uluk. Endi lawah ni nak impahding ni hi-gada, nem kapyatun anggebe-hel da-ak, \* et nemahhig ni ihik idan memettey ni hi-gak, ey nangka-let ida man anhan. Nemahhig ni ida kaman-ittek, tep anin ni eleggak manekew et da-ak kapenekew, et daka pepippilit ni ibbangngad ku kunu hu sinekew kun hi-gada.

<sup>5</sup> Apu Dios, amtam hu hipan lawah ni nak impahding, tep eleg mabalin ni ka meittalwan. Makulug ni wada impenahding kun henin kapehding idan tuun endi nemnem da, nem anin idan nunman et inamtam.

<sup>6</sup> APU DIOS, e Eta-gey ni peteg niya Kabaelan tun emin, e Dios idan helag Israel, entan tu iebulut ni hi-gak hu umhulun ni kebe-ingan idan kamengiddinnel niya kamenaydayaw ni hi-gam.

<sup>7</sup> Tep ya kakulugan tu ey da-ak kapennadngeli niya da-ak kaba-iba-ingaddan edum ni tuu tep ya nakka pengu-unnudin hi-gam.

<sup>8</sup> Et anin idan anhan ni agik niyadda pamilyah ku et heni law hansinu-wan hu daka pengibbilang ni hi-gak.

<sup>9</sup> Apu Dios, nemahhig kaguh ku eyan baley mu, et maggeh nemnem ku hedin nalgem hu keussalan tu, † mukun emin hu lawah ni kae-helan tuun meippanggep ni hi-gam ey hi-gak hu tuka keillawwi. ‡

<sup>10</sup> Da-ak kapippihuladdan tuu hedin nakka mannannangngih niya hedin nantepellak di hinanggam e APU DIOS.

<sup>11</sup> Ey da-ak kangi-ngi-ngii hedin nambalwasi-ak ni langgusih ma-lat peang-ang ku e nakka umlelemyung,

\* 69:4 69:4 John 15:25 † 69:9 69:9 John 2:17 ‡ 69:9 69:9 Romans 15:3



12 niya hi-gak hu katumtumbukan katuutuu. Anin ida etan ni kamambuttebutteng et ya meippanggep ni hi-gak hu daka i-ena-appeh.

13 Nem anin ni hanniman hu kameippenahding ni hi-gak et nanengtun hi-gam e APU, hu nakka pandasadasali et wada-et anhan ni dedngelen mu hu dasal ku. Nem ngenamung ka hedini pigantu pinhed mun penummangan nunyan dasal ku. Et humman hu, humang muwak anhan tep nehammad hu impeminhed mu niya muka peamnu hu impakulug mun pengihwangan muwak.

14 Apu Dios, baddangi muwak anhan ma-lat meihwangngak eyad kapehpehding idan buhul ku. Et heni muwak guyyuden di kelnengan kud luyluy winu danum ma-lat eleggak malsing.

15 Em, entan anhan tu iebulut ni heni nak melneng di nandallem ma-lat eleggak matey.

16 APU DIOS, dengel mu anhan huyyan dasal ku, tep nakappinhed muwak niya muwak kapakahmeka.

17 Entan anhan tu pakdag eneeneng, nem humang mu hu dasal ku, tep iyyadyan nemahhig ni anggetakkut hu kameippenahding ni hi-gak.

18 Apu Dios, baddangi muwak et meihwangngak eyad kapehpehding idan buhul ku.

19 Inamtam ida humman ni buhul ku. Ey inamtam e nakka isissipel hu daka pehpehding ni hi-gak, tep inang-ang mu hu daka pemennadngeli niya daka pema-iba-ingin hi-gak.

20 Iyyadyan nemahhig hu degeh ni nemnem ku, tep da-ak kapennadngeli. Ey endi, anin ew ngun hakey ni kamengippeang-ang ni hemek dan hi-gak.

21 Hamban da-ak kapangan tep neupa-ak, ey endi, tep ya kedet kumedek hu indawat dan hi-gak. Niya hamban peinnuman da-ak ni danum tep na-wewwak, ey beken, tep ya etan mapeit ni meinum hu indawat dan innumen ku. §

22 Et humman hu, heballi mambalin hu daka iddenaddan ni daka hemmuhemmulan memahbah ni hi-gada e henidda meknad bitu.

23 Apu Dios, kulap mudda ma-lat eleg da han-ang-ang, niya pakepuy mu hu annel da. \*

24 Peang-ang mu hu nemahhig ni bunged mun hi-gada et endiem ida.

25 Et anin ni endi an metdaan ni hi-gada niya anin ni mangkebe-ew hu baballey da, et meiwalleng hu nambebleyan da. †

26 Daka ma-maan panligligat ida kinastigum niya dadda katalalanggai hu impanhel-heltap mu.

27 Entan tu liwwan ida nanliwtan da et kastiguem ida niya entan tu iebulut ni ida meihwang.

28 Ekal mu hu ngadan dad libluh ni neitudekan ni ngadan idan mategu niya entan tudda i-dum di listaan idan muka ibbilang ni tuum.

29 Apu Dios, baddangi muwak ma-lat meihwangngak eyad nemahhig ni nakka panlehhani.

30 Man-a-appehhak niya mampesalamattak ni penaydayaw kun Apu Dios, tep ya kasina-gey tu.

31 Tep huyya kapeheballin APU DIOS ni pehding ku nem ya nak i-appitan ni neha-dukan ni baka.

32 Ey um-amleng ida hu kemepeligligat hedini ang-angen da huyya. Et humman hu, emin kayun kamekangngu-unnud nan Apu Dios ey pan-am-amleng kayu!

33 Tep hi APU DIOS ey eleg tu iwwalleng ida hu angehemmek ni tutu-u niya eleg tu e-wayadda hu tuu tun neikelabut.

34 Hi-gayuddan wadad kabunyan, yad puyek, niyad baybay, ey daydayaw yu hi Apu Dios.

35 Tep hi-gatulli mengihwang ni Jerusalem niya iyayyaggud tuddalli edum ni bebley di Judah et pambebleyan idallin tutu-u tu.

36 Tep humman idan bebley ey beltanen idallin helag ni tutu-u tun kamengu-unnud niya neminhed ni hi-gatu, et melinggep idallin mambebley diman.

## 70

*Ya a-appeh David eman ni nambagaan tun baddang. Meidwat huyyad kamengipap-pangngulun a-appeh.*

1 APU e Dios ku, kahegag ka anhan et baddangan muwak ma-lat meihwangngak.

§ 69:21 69:21 Matthew 27:48, Mark 15:36, Luke 23:36, John 19:28-29 \* 69:23 69:23 [22-23] Romans 11:9-10

† 69:25 69:25 Acts 1:20

<sup>2</sup> Ey himeng mudda anhan ida tutu-un ihik ni memettey ni hi-gak ma-lat maka-apput ida niya ma-lat mebabba-ingan ida humman ni tutu-un daka pan-am-amlengi hu nakka panligligasi.

<sup>3</sup> Hamban meapput ida humman ni tuun kamenaltalanggan hi-gak ma-lat mebabba-ingan ida ey.

<sup>4</sup> Nem peamleng mudda ngu etan tuun kemenepupeppul ni hi-gam ma-lat man-an-anladda. Em, ya kayyaggud ey humman idan emin ni hinelaknibam ey man-am-amleng ida et itkuk da e kanday "Eta-gey ni peteg hi APU DIOS!"

<sup>5</sup> Apu Dios, hedin katted ngun hi-gak, man anggehemmekkek ni peteg niya neendi elet ku. Hi-gam hu Dios ku ey hi-gam hu kamengihwang ni hi-gak. Et humman hu, kahegag ka anhan et baddangan muwak.

## 71

<sup>1</sup> APU DIOS, hi-gam hu nakka keihhikkugi. Entan tu anhan iebulut ni nak mebe-ingan.

<sup>2</sup> Kayyaggud kan peteg, et humman hu, dengel mu anhan huyyan dasal ku et ihwang muwak.

<sup>3</sup> Abulut mu anhan ni meihhikkuggak ni hi-gam et heni ka etan ni batun kakeihhikkugi. Em, hi-gam ni ebuh hu heni batun nakka keihhikkugin kamengihwang ni hi-gak.

<sup>4</sup> Apu Dios, helaknibi muwak ma-lat meihwangngak anhan di kapehpehding ida eyan mabunget ni tuun lawah hu daka pehpehding.

<sup>5</sup> Tep neipalpu eman ni keu-ungngak ey hi-gam e Eta-gey ni peteg ni AP-APU hu namnamah kud biyag ku, tep hi-gam ni ebuh hu nakka iddinel.

<sup>6</sup> Em, neipalpu eman ni neiungngaak ey hi-gam hu indinel ku. Ey hi-gam hu nengipenaptek ni hi-gak, et mukun hi-gam daydayawen kun ingganah.

<sup>7</sup> Ya biyag ku hu kapengi-ang-angin tutu-u, tep hi-gam hu nehammad ni nakka keihhikkugi.

<sup>8</sup> Et humman hu eggak pengissikkedin mengidaydayaw ni hi-gam niya mengippeennamtad katuutuun meippanggep ni muka keiddeyyawi.

<sup>9</sup> Entan anhan tuwak iwalleng eyan nea-ammaan ku law tep iyyadyan endi law ni hekey elet ku.

<sup>10</sup> Tep immen ida buhul kun ihik ni memettey ni hi-gak, et humman daka ihhenumman-gan.

<sup>11</sup> Kanday "Tayu kuma pepdugen humman ni tuu et depapen tayu, haggud nanna-ud ni endi an mengihwang ni hi-gatu, tep inway Apu Dios."

<sup>12</sup> Apu Dios, entan anhan keidawwim ni hi-gak, nem papuut mu anhan e Dios ku et umli ka et baddangan muwak.

<sup>13</sup> Panhewim ma-lat humman idan buhul kun ihik ni memettey ni hi-gak hu meapput et meendidda. Niya pinhed kun hi-gada mebe-ingan niya hi-gada mepihhul.

<sup>14</sup> Nem hedin hi-gak ngu, man hi-gam ni ebuh hu nakka iddinel ni ingganah ni umbaddang ni hi-gak, et kewa-wa-wa ey eggak issiked ni menaydayaw ni hi-gam.

<sup>15</sup> Ia-aggew kun mengippeennamtad katuutuun kakinayyaggud mun peteg niya kabaelan mun mengihwang, anin ni eleggak paka-ewwasi hu elaw tudda humman.

<sup>16</sup> Em, APU DIOS e Eta-gey ni peteg, nak peennamta hu impenahding mun kamengippeang-ang ni et-eteng ni kabaelan mu. Niya nak ene-ehhelen di emin ni tuu e hi-gam ni ebuh hu kayyaggud ni peteg.

<sup>17</sup> Neipalpu keu-ungngak ey sinenuttudduan muwak, et humman hu, ingganah nunya ey eleggak issiked ni mengippeennamtadda etan ni muka pehpehding ni kaketngain tuu.

<sup>18</sup> Entan anhan tuwak iwalleng eyan nea-ammaan ku law e iyyadyan naka-ubanannak. Nem baddangi muwak kumaddan e Apu Dios ni an mengippeennamtaddan kameitu-tunud ni helag mi hu meippanggep ni kabaelan niyadda kaketngain impenahding mu.

<sup>19</sup> Anin di kabunyan et nan-amta hu kakinayyaggud mu niyadda etan muka pehpehding ni kaketngain tuu. Apu Dios, endi edum ni henin hi-gam.

<sup>20</sup> In-abulut mun panlelehanan ku hu nemahhig ni ligat, nem nakka medinnel e peyaggud muwak ali mewan, tep eleg mu iebulut ni nak mettey. \*

<sup>21</sup> Ey inamtak et iddawtan muwak alin et-eteng ni keiddeyyawan ku niya ellubyagem ali gibek ku.

<sup>22</sup> Et daydayawen dakalli e Apu, e Kayyaggud ni peteg ni Dios idan helag Israel. Em, ussatak ali ayyuding niya gitalah et man-a-appehhak ni penaydayaw kun hi-gam, tep kamannananeng hu muka pemaptek ni hi-gak.

<sup>23</sup> Makulug ni ittetikuk kulli am-amleng ku niya a-appeh kun penaydayaw kun hi-gam, tep hinelakniban muwak.

<sup>24</sup> Ey ia-aggew kun menge-ehhel ni kakinyayyaggud mu, tep neapput ida humman ni tuun ihik ni memettye ni hi-gak et mabeingan ida.

## 72

*Ya a-appeh nan Solomon*

<sup>1</sup> Apu Dios, tuduim hu patul e u-ungngan patul ni elaw ni kalinimpiyuh niya kakinyayyaggud ni henin elaw mu,

<sup>2</sup> ma-lat ya limpiyuh niya kayyaggud hu pehding tun man-ap-apuddan tuum, nema-madda etan ni nangketwetwet,

<sup>3</sup> et wada inna-nu tun yaggudan ni bebley niya ma-lat kayyaggud hu pehding idan bimmebley.

<sup>4</sup> Baddangim ma-lat ipaptek tudda humman ni anggehmmek ni tutu-un kameliligasi niya ma-lat pan-apputen tudda hu kamengippeliligat ni hi-gada.

<sup>5</sup> Apu Dios, kayyaggud hedini pannananeng mu hu kapengu-unnud idan tutu-um ni hi-gam henin kapannananengin bulan niya aggew.

<sup>6</sup> Em, baddangim huyyan patul ma-lat ya panyaggudan emin ni bebley hu pehpehding tu, henin udan e ya panyaggudan ni neitnem hu tuka iddawet.

<sup>7</sup> Ey baddangim ma-lat yan tsimpuh ni pan-ap-apuan tu ey umkedangyan ida hu kamekangngu-unnud ni hi-gam niya mannananeng kinedangyan da, henin kapannananengin bulan.

<sup>8</sup> Ey kayyaggud hedini man-ap-apud kebebbebley, meippalpu hakey ni baybay ingganah mewan etan di hakey ni baybay. Niya meippalpu etan di Wangwang e Euphrates ingganah etan di pappeg ni bebley eyad puyek. \*

<sup>9</sup> Et emin ida tuun nampambebley di desert niyadda buhul tu ey manyu-ung idallid hinangga tun panlispituh dan hi-gatu.

<sup>10</sup> Niya emin ida hu patul di kebebbebley di nanlinikweh di baybay niyadda patul di Tarsis, yad Seba niyad Seba ey pan-i-ali dali hu hipan iddawet dan hi-gatu.

<sup>11</sup> Manyu-ung idallin emin ni hi-gatu hu papatul niyaddan emin hu katuuuud kebebbebley ey hi-gatu hu pansilbian da.

<sup>12</sup> Humman ni patul ey ippaptek tudda hu kameliligasin nangketwetwet ni kamambeggan baddang tu niya ippaptek tudda neiwalleng ni tuun endi kaumbaddang ni hi-gada.

<sup>13</sup> Hehmeken tuddalli hu tuun en-endi-an ni peteg niyadda endin hekey hu kabaelan da ma-lat ihwang tudda.

<sup>14</sup> Em, baddangan tudda ma-lat eleg ida meliligasi niya ma-lat eleg pateyen idan buhul da, tep nebalol hu biyag dan hi-gatu.

<sup>15</sup> Kayyaggud et hedini andukkey hu biyag etan ni patul niya kayyaggud hedini emin hu tuu ey iddasalan da ma-lat bendisyonan Apu Dios niya i-alian idan iSeba ni balituk.

<sup>16</sup> Ey kayyaggud hedini umyaggud hu lameh ni kaissanem idan tuu tu niya mekallameh hu nangkeitnem ida etan di kedunduntug e henid Lebanon. Niya kayyaggud hedini mepnudda tutu-ud kebebbebley et heniddan pattullan e nenapnapan ni helek.

<sup>17</sup> Niya kayyaggud hedini mannananeng hu ngadan tu, henin kapannananengin petang ni aggew. Ey kayyaggud hedini mebendisyonan hu kebebbebley tep hi-gatu niya hi-gatu hu deyyawen da.

<sup>18</sup> Daydayaw tayu hi Apu Dios e Dios idan helag Israel. Ebu hu kamengippahding ni kaketngain tuu.

<sup>19</sup> Ey daydayaw tayu hu kamedeyyaw ni ngadan tun ingganah. Ya pinhed ku ey meihhinnap hu dayaw tud kebebbebley eyad puyek.

Amen! Em, amen!

<sup>20</sup> Huyya hu pappeg idan asal David, e u-ungngan Jesse.

## Ya Meikkatun Liblun ni Psalms

(Psalms 73-89)

## 73

*Ya a-appeh nan Asap*

<sup>1</sup> Hi Apu Dios ey makulug ni kakkayyaggud hu tuka pehding idan helag Israel hedini wadadda kayyaggud hu elaw da.

<sup>2</sup> Nem hedini hi-gak, man innang ni me-kal hu dinel ku niya nakka pengullug ni hi-gatu.

\* 72:8 72:8 Sekariah 9:10

<sup>3</sup> Tep nakka ang-ang-anga ey emin ida hu tuun kamampahhiyya niya lawah hu daka kapkapyaa ey ida kamampengeddangyan et nakka um-ameh.

<sup>4</sup> Endi hu nemahhig ni ligat da, endi degeh da niya nangka-let ida.

<sup>5</sup> Ey endi ni-ngangu hu daka keliggasin henin kakeliggasin emin ni tuu.

<sup>6</sup> Et mukun nemahhig hu daka pampahhiyya niya nemahhig ni mabunget ida.

<sup>7</sup> Makatabadda tep nemahhig kinedangyan da \* Ebuh hu lawah ni pehding dad edum dan tuun daka nenemnema.

<sup>8</sup> Daka pippihuladda hu edum dan tuu niya lawah hu daka e-e-helan hi-gada. Daka ippahhiyyadda etan daka nemnemneman da pehding ni panlelehhanaan ni edum dan tuu.

<sup>9</sup> Lawah hu daka e-helan Apu Dios di kabunyan. Ey daka ippilit di katuuuu hu pinhed dan meippahding eyad puyek.

<sup>10</sup> Et humman hu, anin idan tuun kamengullug nan Apu Dios et wadadda etan edum ni daka i-unud di kae-heladdan nunman ni tutu-u.

<sup>11</sup> Kanda ni-nganguy "Anin ippahding tayu hu hipan pinhed tayu, haggud kaw amtan Apu Dios e Keta-ta-geyyan hu tayu kapehpehding?"

<sup>12</sup> Humman hu elaw idan nunman e lawah ni tuu, nem ay ida ni-ngangu kamengeddangyan.

<sup>13</sup> Et ya law immalid nemnem ku ey endi silbitu nak nengipenahdingan ni kayyaggud e eleggak manliwat.

<sup>14</sup> Tep kewa-wa-wa ey nakka helheltapa ligat kun indawat mun hi-gak e Apu Dios.

<sup>15</sup> Nem gullat ni imbehwang ku hu wadad nemnem ku et nanna-ud ni nedismayah ida kamekangngu-unnud ni hi-gam, tep beken ni hanniman hu elaw ni tutu-un Apu Dios.

<sup>16</sup> Impatnak ni mengewwat ni elaw tu huyyan kameippahding, nem neligat ni meewwatan.

<sup>17</sup> Nem yan eman ni nak nandayawan ni hi-gam di Tempol mu ey inewatan ku law hu meippahding idan nunman e tuun lawah daka pehpehding.

<sup>18</sup> Em, Apu Dios, inewatan ku law e humman idan tutu-u ey kastiguen muddan ingganah e heni pedellan muddad medanglel ni dalan et man-egah ida.

<sup>19</sup> Humman ni meippahding ni hi-gada ey anggetakkut, tep pinhakkey ali ey nangekendidda.

<sup>20</sup> Humman ni elaw ni biyag dan nunyad puyek ey nekekemtang ni ebuh e heni i-innep e kametsiked hedini inggibek.

<sup>21</sup> Makulug ni yan eman ni makaggeh hu nemnem ku, tep nakka meemeh ida etan ni tuun lawah daka pehpehding

<sup>22</sup> ey heni-ak etan ni animal ni endin hekey nemnem tu. Tep eggak awatan hu elaw mun nunman e Apu Dios.

<sup>23</sup> Nem ay kayyaggud anhan et nakka mekiddagyum ni hi-gam e Apu Dios et nanengtun heni muka tettenggeda hu ngamay ku.

<sup>24</sup> Niya muka ittududda hu kayyaggud ni pehpehding ku, et lektattuy nedatngan hu keiddeyyawan kun ellian kud kad-an mu.

<sup>25</sup> Yad kabunyan ey endi hu edum ni henin hi-gam ni nemihed niya kamengippaptek ni hi-gak. Ey anin eyad puyek et endi edum ni pinhed kun panggayyum, nem hi-gam ni ebuh.

<sup>26</sup> Kaumkapuy hu annel ku niya nemnem ku, nem wada ka e Apu Dios ni kamengippa-let ni hi-gak. Hi-gam ni ebuh hu mahapul kun ingganah di biyag ku. †

<sup>27</sup> Emin ida etan lawah ni tuun eleg daka u-unnuda e APU DIOS ey makulug ni endiem idan ingganah.

<sup>28</sup> Nem hedini hi-gak, man endi edum ni pinhed ku nem ya nak mekiddagyum ni hi-gam, e APU DIOS e Eta-gey ni peteg, ni kamengippaptek ni hi-gak. Et humman hu, emin ida etan panyaggudan ni muka pehpehding ey nak peennamtaddan katuuuu.

## 74

### *Ya a-appeh Asap*

<sup>1</sup> Apu Dios, kele dakemi tu-wangu anhan inway et mena-yun? Ey kele nemahhig bunget muddan anhan ni tutu-um?

<sup>2</sup> Nemnem mu e hi-gami hu tutu-um ni pinilim dedan ni nunman. Tep hi-gami hu inhewang mud neihbutan mi et pambalin dakemin tutu-um. Niya entan anhan tu liwwan hu Jerusalem ni pinilim ni pambleyan mu.

\* 73:7 73:7 Yad edum ni neitudek ey kanday "Emin hu lawah ni wadad nemnem da ey kameukkat di daka heppita."

† 73:26 73:26 Psalm 16:5

<sup>3</sup> Kele eleg ka meheggag ni impahpahding idan buhul mun Tempol mu niya eya bebley mi? Endi meyatu, tep nemahhig ni endin hekey hu eleg da bahbahen.

<sup>4</sup> Ida kaumtenekkutekkuk hu buhul mud Tempol ni daka pampengihha-adin bandelah dan immatun ni nengapputan da.

<sup>5</sup> Nampalang da hu kahehgepid Tempol e henidda kamanlelnegh ni keyew di muyung.

<sup>6</sup> Emin ida etan neenal-alkusan ni dingding ey nanwa-tek daddan wahay niya minesuh da.

<sup>7</sup> Nambahbah da etan Tempol mu et legaben da. Endin hekey hu takut da e impambalin dan kameibbillang ni beken ni malinih di hinanggam humman ni Tempol ni mika penaydayawin hi-gam.

<sup>8</sup> Kandad nemnem day "Imay kuma et bahbahen tayun emin hu hipan wadadya." Et legaben da tu-wangun emin hu kapenaydayawin hi-gam e Apu Dios eyad bebley.

<sup>9</sup> Endidda law etan mika pengi-immatunin kawedam di kad-an mi niya endidda law hu prophets ni mengippeamtan hi-gamin kepapegan tudda huyyan daka pehpending.

<sup>10</sup> Apu Dios, pigan tu pengippesikedan mun ngehay ida eyan buhul mu? Kaw diman et ngi-ngi-ngian dan ingganah hu ngadan mu?

<sup>11</sup> Entan tu pakdag i-ineng, nem kahegag ka et peang-ang mu hu et-eteng ni kabaelan mudda etan ni buhul mu et anin ni mangketey idan emin.

<sup>12</sup> Apu Dios, hi-gam hu APU mi niya patul mi meippalpu dedan ni laputu, niya hi-gam hu nengihwang ni hi-gamid emin di nanligligatan mi eyad puyek.

<sup>13</sup> Impeang-ang mu hu et-eteng ni kabaelan mu eman ni nengedwaan mun danum di baybay et mandalan ida tuum diman. \* Niya binahbah mudda etan kametekkusin kaman-ayyam di baybay e Lebayatan hu ngadan tu.

<sup>14</sup> Em, nanggemik mudda hu ulu tu et pakan muddan animal di desert hu annel tu.

<sup>15</sup> Winedam ida hebwak niyadda kulukul. Ey sinduk mudda etta-teng ni wangwang.

<sup>16</sup> Ey winedam dama hu kawwalwal niya engeenget ey lintum hu aggew niya bulan et iha-ad muddad neiha-adan da.

<sup>17</sup> Winedam hu ahikettekettelan niya siyaggew. Ey ingkapyam hu kelteg ni puyek.

<sup>18</sup> APU Dios, entan tu liwwan ida etan buhul mun nemahhig hu ngehay dan hi-gam et daka kapippihula niya daka kang-i-ngii.

<sup>19</sup> Entan anhan dakemi eway, nem ihwang dakemidda eyad mangkabunget ni buhul mi, tep endi kabaelan mi. Em, entan anhan dakemi liwwan ni tutu-um, tep kami kamanligligat.

<sup>20</sup> Ey entan tu liwwan hu nekitbalam ni hi-gami, tep iyyadyan heni na-ngetan ni emin hu bebley mi, tep ebuh patepatey ni kameippenahding di deya.

<sup>21</sup> Entan tu iebulut ni ida mebabba-ingan ni ingganah hu nangkewetwet ni kameligligasi. Nem baddangim ida kuma dedan ma-lat hi-gam hu daydayawen da.

<sup>22</sup> Apu Dios, kahegag ka et ipahding mu hu pinhed mun meippahding ma-lat pasiked mudda buhul mun kamekihhanggan hi-gam. Entan tu liwwan e kewa-wa-wa ey daka kang-i-ngi-ngiiddan nunman ni tutu-un kamangngengeh hay ni hi-gam.

<sup>23</sup> Entan tu pakdag i-ineng, nem pasiked mudda humman ni buhul mun kamemennadngel ni hi-gam, tep daka pan-imma-ma ngehay dan hi-gam.

## 75

*Ya a-appeh Asap ni meidwat etan ni kamengipappanggulun a-appeh. Huyyan a-appeh ey kei-ingnegh tu etan a-appeh ni kantuy "Entan tu Bahbah."*

<sup>1</sup> Kami kamansalamat ni kawedam di kad-an mi e Apu Dios. Mika peennamtaddan katuuuu hu kasina-gey mu niyadda etan impahpahding mun kaketngain tuu.

<sup>2</sup> Kan Apu Dios ey "Gintud ku hu aggew ni panhuwetan kuddan tutu-u. Ey limpiyuh hu nakka panhuwet.

<sup>3</sup> Hi-gak hu kamengihhammad ni neituunan eyan puyek, et humman hu, anin ni manyegyeg et nemahhig takut idan tutu-u ey hi-gak hu ngenamung ni mengnged.

<sup>4</sup> Nak ida kae-heli hu manghay ni tutu-u e kangkuy 'Isiked yun mampahhiya!' Ey kangkuddan tutu-un lawah daka pehpending ey 'Entan tu ipahhiya hu kabaelan yu, <sup>5</sup> niya entan tu panghel e eta-ta-gey kayu nem hi-gak. Isiked yun um-ehehel ni linggeman.'"

<sup>6</sup> Tep ya manhuwet ni tuu ey beken ni yad kasimmilin aggew, winu yad tuka kelinnuggi niya beken ni yad desert hu kelpuan tu,

<sup>7</sup> nem hi Apu Dios hu manhuwet. Hi-gatu hu mengippanghel hedid nambahul hu tuu winu eleg.

\* 74:13 74:13 Exodus 14:21-22

<sup>8</sup> Ya bunget APU DIOS ey heni neibesuh ni kedet ni tuka idduyag et paka-inumen idan tuun lawah daka pehpending.

<sup>9</sup> Nem hedin hi-gak ngu, man ya kakinayyaggud Apu Dios hu nak peennamta niya i-ena-appéh ku hu penaydayaw kun hi-gatu e Dios idan helag Jacob.

<sup>10</sup> Tep hi Apu Dios ey inhel tun kantuy endien tu kabaelan idan lawah daka pehpending, nem ihhammad tu kabaelan idan kamengu-unnud ni hi-gatu.

## 76

*Ya a-appéh Asap ni meidwat etan ni kamengipappangnguluddan kaman-a-appéh. Kamegittalahi huyyan a-appéh.*

<sup>1</sup> Hi Apu Dios ey naka-amtaddan iJudah niya kaidaydayaw idan iIsrael.

<sup>2</sup> Yad Duntug di Zion di Jerusalem hu tuka panha-adi.

<sup>3</sup> Yadman hu nampemahbahan tuddan emin ni almas idan buhul tu, yadda pana da, yadda happiyyaw da niyadda ispadah da.

<sup>4</sup> Apu Dios, kaka medeyyaw niya kakkayyaggud kan peteg nem yadda etan etata-gey ni duntug ni dakel hu medweng ni animal.

<sup>5</sup> Emin ida etan nangka-let ni buhul mi ey nangeapput ida et pan-al-en mi hu hipan limmu da. Kepuppullay hu annel dad nangketeyyan da, et endi law silbin elet da niya laing da.

<sup>6</sup> Emin ida etan kebayyu niyadda nampantakkay ey nealay nangketukkad ida et matey idan nengibungetam ni hi-gada e Dios idan helag Jacob.

<sup>7</sup> Endi edum ni kametekuksi nem ebuh ka e APU DIOS, niya endi hakey ni kabaelan tun an mekihhanggan hi-gam hedin bimmunget ka.

<sup>8</sup> Impeamtam alid kabunyan hu kastiguddan tuu eyad puyek ey simmakut ida et umi-ineng ida.

<sup>9</sup> Tep hi-gam hu kamengastiguddan nampanliwat niya hi-gam hu kamengihwang idan kameliligasin tuu.

<sup>10</sup> Ya muka pengastiguin tutu-u tep ya nemahhig ni bunget mu ey keiddeyyawam. Ey yadda kameniktam ni bunget mu ey mesilleg ida.

<sup>11</sup> Emin itsun katuutuu ey peamnu tayu hu hipan impakulug tayun APU DIOS e Dios tayu, niya idwat tayun hi-gatu hu lebbeng tun meidwat ni hi-gatu e Dios ni kamedeyyaw niya kametekuksi.

<sup>12</sup> Tep tuka endia tuled idan aap-apu niya tudda kapetekkut hu papatul eyad puyek.

## 77

*Ya a-appéh Asap ni meidwat nan Jeduthun e kamengipappangnguluddan kaman-a-appéh*

<sup>1</sup> Nakka mampehemmehemmek nan Apu Dios ma-lat dengelen tu anhan hu dasal ku.

<sup>2</sup> Hi-gatu hu nakka kahwaan pampebaddangan ni emin di ligat ku. Nakka umdasadasal ni kahilehileng nan hi Apu Dios niya eleggak meettun mengitata-gey ni ngamay kun mandasal, nem kapyatun endi amleng ku.

<sup>3</sup> Hedin ninemnem ku hi Apu Dios, man nakka medismayah, tep kameendi hu namnamah ku.

<sup>4</sup> Eleg um-ali ugip ku tep nemahhig ni kamemunnumunnu hu nemnem ku et eleg meibbehwang hu pinhed kun iddasal nan Apu Dios.

<sup>5</sup> Hedin ninemnem ku eman nelabalabah ni kakkayyaggud ni tsimpuh

<sup>6</sup> e nakka um-ena-appéh ni hileng tep ya amleng ku, man kangkud nemnem kuy

<sup>7</sup> "Kaw inwalleng da-ak law nan Apu Dios ni ingganah et eleg da-ak law hehmeka?"

<sup>8</sup> Kaw endi law hu impeminhed tun hi-gami niya kaw eleg tu peamnu etan impakulug tun panyaggudan min tuu tu?"

<sup>9</sup> Kaw hinullulan tun bunget hu binabbal tu niya hemek tun hi-gami?"

<sup>10</sup> Ya nemahhig ni makageh di nemnem ku ey heni etan ni endi law hu kabaelan Apu Dios e Keta-ta-geyyan, et eleg tuwak law baddangi. Huyyadda hu kaum-alid nemnem ku,

<sup>11</sup> nem nanengtun eleggak lilliwwanadda etan kaketngain tuun impahpahding mun nunman e APU DIOS.

<sup>12</sup> Eleg ni hekey me-me-kal di nemnem kudda humman, tep humman ida hu nakka pannenemnem ni kenayun.

<sup>13</sup> Emin hu impahpahding mu ey kayyaggud ni peteg niya endi edum ni Dios ni henin hi-gam.

14 Ebuhan kan kamengippahding idan kaketngain tuu niya impaenang-ang mud kebebbe-bley hu et-eteng ni kabaelan mu.

15 Ey inhewang mudda tutu-um ni helag di Jacob nan Joseph, tep ya et-eteng ni kabaelan mu.

16 Apu Dios, yan eman ni nampeang-angan mud Madlang ni Baybay ey nemahhig hu dalluyun diman et anin ni yad dalinat tu et heni kamanggegyey ni takut tu.

17 Nemahhig hu udan niya kamangkikidul. Niya kamangkekedyam e henidda panam ni kamantayyatayab.

18 Hedin kimmidul\* et kamangkekedyam, man kamebnangi hu puyek niya kabunyan niya kamanyegyeg di puyek.

19 Nandalan kad ta-pew ni dalluyun et agwatem etan edallem ni baybay, nem endi an neang-ang ni gassin mu.

20 Impangulum ida tutu-um e henidda kalneroh ni kaipappattul di Moses nan hi Aaron.

## 78

### *Ya a-appeh Asap*

1 Hi-gayun kaegiegi, dengel yu et awatan yu eya ittutdudduk ni hi-gayu.

2 Dengel yu ma-lat awatan yudda etan neligat ni ewwatan ni impahpahding Apu Dios idan aammed tayun nunman

3 e humman ida dingngel tayu niya inedal tayun hi-gada.

4 Et mahapul daman pebeltan tayuddan u-ungnga tayu ma-lat mambeltabeltan alin ingganah, et wada inna-nu tun keippeamtaan ni impahpahding APU DIOS ni kaketngain tuu niya et-eteng ni kabaelan tu.

5 Indawat APU DIOS hu tugun tuddan aammed tayun helag Jacob et itugun tun hi-gadan ittutduddaddan u-ungnga da humman idan tugun tu,

6 et amtaen idan meihhayned ni helag da ma-lat mambeltabeltan alin edum ni meittunud ni hi-gada.

7 Hanneya impanugun tu ma-lat hi-gatu hu pandinnelan da niya ma-lat eleg da liwwanen ida kamengippetngan impenahding tu et u-unnuden dan ingganah ida tugun tu.

8 Et wadan eleg da-et anhan u-ukkuladda aammed tayun nunman e nemahhig hu ngehay dan Apu Dios, et eleg ida mengu-unnud ni tuka ittugun niya eleg ida mandinel ni hi-gatu.

9 Heni lan impahding idan sindalun helag Epraim e nakaddaddan idan an mekiggubbat et lunaw ida, nem entanni et neilepu hu gubat ey nealay namsik ida, anin ni naka-almas ida.

10 Tep emin ida aammed tayun helag Israel ey eleg da pannaneng ni u-unnuden hu nekitbalan Apu Dios ni hi-gada niya kinehing da hu tugun tu.

11 Liniwwan dadda hu miracles ni impaenang-ang tun hi-gada.

12 Em, eleg da nemnemen ida humman ni impenahding Apu Dios idan aammed da eman ni wadaddad Soan di Egypt.

13 Niya entanni ey ginedwa tu hu danum di baybay et heni dingding di nambina-hil ni nan-agwatan da.

14 Ey hedin kawwalwal, man tuka weddaa hu kulput ni mengippengngulun hi-gada. Niya hedin hileng, man tuka pambalin ni apuy humman ni kulput ma-lat mabnangan hu dellanen da.

15 Ya hakey mewan ni impahding tu ey pini-ang tudda batud desert et umebwal hu danum ni impainum tun hi-gada.

16 Et heni kulukul hu danum ni neukat et mampeyeyuk e heni wangwang.

17 Nem anin ni inang-ang dan emin ida huayan impenahding Apu Dios et kapyatun nanliwaliwat idad desert tep ya ngehay dan Apu Dios e Keta-ta-geyyan.

18 Inggeb-at dan pinatnaan hi Apu Dios, et papilit dan iddawat tun hi-gada etan pinhed dan kennen.

19 Ey nemahhig ni lawah hu daka penghel nan Apu Dios e kanday "Kaw makkaw et kabaelan Apu Dios ni weddaen hu kennen tayu eyad desert?"

20 Ku ma-nu tep makulug numan ni hineplat tu hu batu et man-ebwal hu danum, nem kaw makkaw et kabaelan tun weddaen hu sinapay niya detag ni kennen tayun tutu-um tu?"

21 Dingngel APU DIOS humman ni kapenge-ehhel idan helag Jacob, e Israel hu hakey ni ngadan tu, ey nemahhig hu bunget tun hi-gada e heni simmebel ni apuy,

\* 77:18 77:18 Ya bungug ni nunman ni kidul ey henin bungug idan helin kalesah ni kamenglaw ni mekiggubbat.

22 tep endi hu daka pengullug ni hi-gatu niya beken ni hi-gatu hu daka iddinel ni mengippaptek ni hi-gada.

<sup>23-25</sup> Nem anin ni hanniman ida, et impaelin Apu Dios etan kamelpud kabunyan ni kennen e mannah \* e humman hu kakennaddan anghel. Et humman kinakinan da. Eleg ida mekulngan, tep dakel ni ingganah kameidwat ni kennen da.

<sup>26</sup> Entanni mewan ey impaeli tu hu na-let ni dibdib ni nalpud appit ni kasimmilin aggew niyad south tep ya et-eteng ni kabaelan tu.

<sup>27</sup> Et paeli tu hu hantapug ni sisit ey nemahhig ni ida kaman-ellihbuk e henidda dep-ul winu henidda palnah di gilig ni baybay ni eleg mebillang.

<sup>28</sup> Et peapnal tuddad nampangkampuan da

<sup>29</sup> et pangkanen idan tuu, tep humman hu pinhed dan iddawat Apu Dios ni hi-gada.

<sup>30-31</sup> Nem entanni et tagan da ekan nunman ni detag ey neheglab hu bunget Apu Dios ni hi-gada, et pampeteyen tudda hu kakat-agun nangka-let ni lalakkin helag nan Israel.

<sup>32</sup> Nem anin ni hanniman hu neipenahding, et kapyatun impannaneng idan tuun nanliwaliwat. Eleg ida mandinel ni hi-gatu, anin ni impenahding tu hu dakel ni miracles.

<sup>33</sup> Et mukun impetattakut tuddan katootoon et lektattuy pinappeg tu hu biyag dan endi silbitu.

<sup>34</sup> Hedin pinetey tudda edum ni hi-gada ey han ida nantuttuyyu hu edum da niya ihik ida law ni mandasal ni hi-gatu.

<sup>35</sup> Kaum-ali law di nemnem da e hi Apu Dios hu heni batun daka keihhikkugi niya hi-gatu e Keta-ta-geyyan ni Apu hu kamengihwang ni hi-gada.

<sup>36</sup> Nem anin ni kanday ida kamengu-unnud ni hi-gatu, et itek da kaya, tep humman hu daka penge-ehhel ni ebuh.

<sup>37</sup> Tep ya kakulugan tu ey eleg da ikahhakey hu impeminhed dan hi-gatu niya eleg da pannananeng ni u-unnuden hu nekitbalan tun hi-gada.

<sup>38</sup> Nem anin ni hanniman et kapyatun kapakahmekan Apu Dios ida humman ni tutu-u tu. Et pesinsahan tu hu liwat da et eleg tudda endien. Anin ni e-eggel ni impabunget da et insisipel tu et eleg tudda kastiguen.

<sup>39</sup> Tep inamta tun tuuddan ebuh et nekemtang ni ebuh hu daka pambiyagi e henin kakelebbahin dibdib e pinhakkey ni attukaw la.

<sup>40-41</sup> E-eggel ni nginhay da hi Apu Dios, e kayyaggud ni peteg ni Dios idan helag Israel, eman ni wadaddad desert ni pematna<sup>†</sup> dan binabbal tun hi-gada. Et humman hu, nemahhig lemyung tun impahpahding da.

<sup>42</sup> Liniwwan da et-eteng ni kabaelan tu niya nengihwangan tuddad buhul da.

<sup>43</sup> Ey liniwwan dadda miracles ni impeang-ang tun hi-gadad Soan di Egypt.

<sup>44</sup> Impambalin tun kuheyaw ida danum di wangwang niyad kulukul di Egypt, et endi hu innumen idan tutu-udman.

<sup>45</sup> Ey impalaw tu hu hantapug ni aggiyyet niya tukak et melilligatan hu tuud Egypt et mebahbah hu bebley da.

<sup>46</sup> Impalaw tu mewan hu dakel ni dudun et pangkanen dadda hu intanem dadman Egypt.

‡

<sup>47</sup> Ey impalaw tu hu etta-teng ni dallallu et mangkebahbah hu intanem dan grapes niyadda figs.

<sup>48</sup> Nangketey ida babakka da niya pintey ni kedyam ida edum ni animal da.

<sup>49-50</sup> Eleg tu isipel hu nemahhig ni bunget tu, et panligligat tuddan peteg e eleg tu kawwanan hu biyag da, et paeli tu pistin tuu et matey ida. Ey impaeli tudda anghel ni memettye ni hi-gada.

<sup>51</sup> Pintey tuddan emin hu lakin pengulwan ni u-ungngaddan iEgypt e helag nan Ham.

<sup>52</sup> Et han tu law ipenguludda hu tutu-u tu et hi-yanan da humman ni bebley di Egypt e henidda kalneroh ni impangngupangngulu tud desert.

<sup>53</sup> Impapaptek tudda et eleg ida tumekut niya endi an neipahding ni hi-gadan lawah. Nem hedin yadda etan buhul daddan namdug ni hi-gada ey inenud tuddad baybay. §

<sup>54</sup> Inlaw tudda etan tutu-u tud duntuduntug ni bebley ni inapput tud gubat tep ya et-eteng ni kabaelan tu. \*

<sup>55</sup> Dinegyun tudda hu tuun nampambeyley diman et ihullul tudda tutu-u tu. Ginenadwa tu humman ni duntuduntug ni bebley et i-peng tuddan helag Israel. Anin ida etan ni baballey et ingka-peng tun hi-gada et pambaleyan da. †

\* 78:23-25 78:23-25 Ang-ang yu John 6:31. † 78:40-41 78:40-41 Ang-ang yu Psalm 95:9 et ya Hebrews 3:9 ‡ 78:46

78:46 Exodus 10:12-15 § 78:53 78:53 Exodus 14:26-28 \* 78:54 78:54 Exodus 15:17 et ya Joshua 3:14-17 † 78:55 78:55 Joshua 11:16-23



<sup>56</sup> Nem anin ni hanniman hu impahding Apu Dios, e Keta-ta-geyyan, idan tuu tu, et kapyatun nginhay da tugun tun pematnaan dan binabbal tu.

<sup>57</sup> Henidda eman lan aammed da e eleg da ikahhakey hu impeminhed dan hi-gatu niya eleg ida meiddinnel e henidda etan ni nepikun pana.

<sup>58</sup> Impabunget da hi Apu Dios tep dinaydayaw dadda hu kinapya dan dios da niya nengapyaddan penaydayawan dan nunman idan dios da.

<sup>59</sup> Et humman hu nengiwallengen tuddan nunman ni tutu-u tun helag Israel.

<sup>60</sup> Et ewayen tu hu Tabernacle di Siloh e yadman hu nekibleyean tuddan tutu-u tu.

<sup>61</sup> Ey in-abulut tun ibbebsik idan edum ni tuu etan Kaban ni kapengi-ang-angiddan tutu-u tun kabaelan tu niya dayaw tu.

<sup>62</sup> Ey in-abulut tu tutu-u tun petteyen idan buhul da tep ya bunget tun hi-gada.

<sup>63</sup> Et mangkatey idad gubat hu nehiken ni lalakkin u-ungnga da et endi law hu i-ahwaddan bibi-in kimmat-agu.

<sup>64</sup> Anin idan papaddi da et pintey dadda, nem endi inna-nukkaw idan aahwa dan mengibbellun hi-gada, tep nemahhig hu gubat.

<sup>65</sup> Nem entanni kuma ey heni nebelingkawweh ni bimmangun hi Apu Dios niya heni nelaing ni sindalun na-kal buteng tu,

<sup>66</sup> et apputen tudda humman ni buhul tu et mebabba-ingan idan ingganah.

<sup>67</sup> Nem eleg tu pinhed ni mekihha-ad di kad-an idan helag Epraim e helag Joseph.

<sup>68</sup> Tep pinili tu hu Duntug di Zion ni nakappinhed tu, di nambebleyan idan helag Judah,

<sup>69</sup> et yadman hu nengipebehwatan tun Tempol tun eta-gey niya nehammad ni mannananeng alin ingganah, henin eyan puyek.

<sup>70</sup> Pinili tu hi David ni heni pambega-en tu, et tulli paewit di tuka pampappattuliddan kalneroh,

<sup>71</sup> et hi-gatu hu pambalin tun patul idan tutu-u tun helag nan Israel.

<sup>72</sup> Kayyaggud hu impahpahding David idan tutu-u tu, tep impapaptek tudda niya limpiyuh hu elaw ni impahpahding tun nampatulun tu.

## 79

### *Ya a-appéh Asap*

<sup>1</sup> Apu Dios, hinggep idan tutu-un eleg mengullug ni hi-gam hu bebley idan tuum di Jerusalem, et immen ni nambahbah da humman ni bebley. Anin etan Tempol ni muka panha-adi et hinggep da et pambalin dan beken ni malinih di hinanggam.

<sup>2</sup> Nampatey dadda hu tutu-um ni kamengu-unnud ni hi-gam, et pangkanen idan sisit niya animal di muyung hu annel dan kepuppullay di puyek.

<sup>3</sup> Henin kaeyyuhin danum hu kapan-ayyuayyuhin kuheyaw idan tutu-um di Jerusalem niya endi hu natdaan ni an mengikkullug ni hi-gada.

<sup>4</sup> Emin ida hu tutu-ud kebbebley di nanlinikweh ey dakemi kapennadngeli, dakemi kangi-ngi-ngii niya dakemi kapippihula.

<sup>5</sup> APU DIOS, kaw pengpenglaw mu huttan ni nemahhig ni bunget mun hi-gamin heni kaumhinyab ni apuy ni eleg me-me-dep?

<sup>6</sup> Yadda ngu etan tuun eleg mengibbilang ni hi-gam niya eleg mandasal ni hi-gam hu pangihanggaim ni bunget mu.

<sup>7</sup> Tep hi-gada nampematey idan tutu-um e helag Jacob niya hi-gada nampemahbah ni bebley da.

<sup>8</sup> Apu Dios, entan dakemi kastigu tep ya liwat idan aammed mi, nem hemek dakemi kumaddan, tep makahhapul min peteg hu baddang mu.

<sup>9</sup> Apu Dios e kamengihwang ni hi-gami, baddangi dakemi niya pesinsahim hu liwat ni ma-lat wada inna-nu tun penang-angan idan tuun kakinayyaggud mu et meidaydayaw ka.

<sup>10</sup> Entan tu iebulut ni dakemi taltalangkaan idan tuun eleg mengu-unnud ni hi-gam. Tep kanda ni-nganguy "Attu mewan hu kapan-ellan Apu Dios yu ey?" Et humman hu, Apu Dios, ibleh mu anhan et kastiguen mudda, tep pintey dadda hu bega-en mu.

<sup>11</sup> Ey dengel mu anhan hu palak idan nangkeikelabut, et baddangan mudda ma-lat meihwang ida etan nekastigun katey, et wada inna-nu tun keippeang-angan ni et-eteng ni kabaelan mu.

<sup>12</sup> Apu Dios, pamehig mun kastiguen ida hu tutu-ud nanlinikweh ni bebley ma-lat paka-ibleh mu hu nenaltalangkaan dan hi-gam.

<sup>13</sup> Et mansalamat kamin tutu-um ni kamei-ellig ni kalneroh mu niya daydayawen dakan ingganah.

## 80

*Ya a-appéh Asap ni meidwat etan ni kamengipappangngulun a-appéh. Huyyan a-appéh ey kei-ingneh tu etan a-appéh ni kantuy "Ya habung ni lily ni pekitbalan."*

<sup>1</sup> Dengel mu dasal mi e Apu Dios e heni kamengippattul niya kamengipappangnguluddan helag Joseph niya yimmudung di ta-pew ni Kaban di nambattanan idan anghel diman.\*

<sup>2</sup> Peang-ang muddan tuud Epraim, yad Benjamin niyad Manasseh hu et-eteng ni kabaelan mun mengihwang ni hi-gamid lawah.

<sup>3</sup> Apu Dios, baddangi dakemi ma-lat mengu-unnud kami mewan ni hi-gam, niya peang-ang mu anhan hu hemek mun hi-gami ma-lat meihwang kamid lawah.

<sup>4</sup> APU DIOS e Kabaelan tun emin, kaw nanengtun nemahhig hu bunget mun hi-gami, et humman hu eleg mu penengngudin dasal min tutu-um?

<sup>5</sup> Heni ya ligat hu intuging mun hi-gami ey heni ya lewa hu impainuinum mun hi-gami, tep nemahhig ni mika panlelehani.

<sup>6</sup> In-abulut mun pippihulen dakemiddan buhul min nambbley di nanlinikweh niya dakemi kapennadngelin hi-gada.

<sup>7</sup> Baddangi dakemi e Apu Dios e Kabaelan tun emin ma-lat mengu-unnud kami mewan ni hi-gam, niya peang-ang mu anhan hu hemek mun hi-gami ma-lat meihwang kamid lawah.

<sup>8</sup> Inlapu dakemillid Egypt et i-li dakemidya et degyunen mudda hu tuun nampambley eyad bebley et ihullul dakemi. Heni kami temel ni grapes ni mulli illad Egypt et itnem mudy e bebley.

<sup>9</sup> Heni ginebutam huyyan puyek, et kayyaggud temel ni intanem mun grapes. Hi-gami neieligan nunman ni grapes. Limmehed hu lamut tu niya pimmappanga et heyebheban tun emin eya bebley.

<sup>10</sup> Anin yadda duntug et hiniduman tu et hilungen tudda hu etata-gey ni sedar.

<sup>11</sup> Ey dimmateng ida hu utduk ni pangetud Baybay e Mediterranean di appit ni kakelinnugin aggew niyad Wangwang e Euphrates di appit ni kasimmilin aggew.

<sup>12</sup> Nem yan nunya ey in-abulut mun bahbahen da hu luhud di nanlinikweh e inway mu humman ni grapes, et kapanhin-e-kaniddan emin ni katuutuun kamelebbah hu lameh tu,

<sup>13</sup> niya kapambahhaddan ulha niyadda etan edum ni animal di muyng.

<sup>14-15</sup> Apu Dios e Kabaelan tun emin, etan dakemi eway, nem ihanggam law anhan daman hi-gami, et uhdungan dakemin tuum, ma-lat ihwang dakemin kamei-ellig etan di grapes ni heni mu intanem eyad bebley. Huyyan intanem mu ey heni u-ungngam ni pinutuk mu. †

<sup>16</sup> Nemahhig ni mika panlelehani hu kapehpehding idan buhul min hi-gamin heni kami etan ni grapes ni daka pangkep-aha ni nanlegab da. Pampapetey mudda ma-lat penang-angan dan bunget mu.

<sup>17</sup> Ipattek mu anhan etan tuun pinhed mu niya pinilim ni um-ehngeng di winannan mu, ‡

<sup>18</sup> et wada inna-nu tun eleg daka law pengiwwallengi. Ihammad mu hu mika pengullug, et hi-gam mewan law hu daydayawen mi.

<sup>19</sup> Baddangi dakemi e APU DIOS e Kabaelan tun emin ma-lat mengu-unnud kami mewan ni hi-gam, niya peang-ang mu anhan hu hemek mun hi-gami ma-lat meihwang kamid lawah.

## 81

*Ya a-appéh Asap ni kameunnudin gitalah ni meidwat etan ni kamengipappangngulun a-appéh*

<sup>1</sup> Pan-am-amleng itsun mengia-appéh ni tayu kapenaydayaw nan Apu Dios tayud Israel ni kamengippa-let ni hi-gatsu.

<sup>2</sup> Unnudi tayuddan tambourine, yadda ayyuding niyadda gitalah hu a-appéh tayu.

<sup>3</sup> Pampatnul tayudda dama hu tangguyup hedini nedatngan hu Piyestah ni Kaketellakin Bulan niyan Kaketullikengin Bulan.

\* **80:1** 80:1 Exodus 25:22 † **80:14-15** 80:14-15 Ya pinhed nunyan e-helen e "u-ungngam pinutuk Apu Dios" ey yadda helag Israel winu hi Christo ni kamengippatek ni tutu-un Apu Dios. ‡ **80:17** 80:17 Ya pinhed nunyan e-helen e "etan tuun pinhed mu niya pinilim ni um-ehngeng di winannan mu" ey yadda na-mu helag Israel winu hi Christo ni kamengippatek ni tutu-un Apu Dios.

4 Mahapul ni u-unnuden tayu, tep huyya hu hakey ni intugun Apu Dios tayun helag Israel.

5 Huyya hu intugun tuddan aammed tayun helag Israel eman ni nengastiguan tuddan iEgypt.\*

Yan nunman ey wada dingngel kun immehel ni eggak amta keibbellinan tun kantuy  
6 "E-kalek hu heni mebel-at ni yuka hakhakbasi niya hipan heni yuka li-li-bitu, tep pappegen ku hu nekalligat ni ngunu yud neihbutan yu.

7 Nampehemmehemmek kayu et ihwang dakeyud ligat yu. Hinumang ku hu dasal yu eman ni immennak di mahdel ni kulput niya pinatnaan ku hu kahinammad ni yuka pengullug di Meribah eman ni nanlilihan yudman, tep endi innumen yun danum.

8 Dengel yuwak kedi kuma anhan e tutu-uk ni helag Israel, et tugunen dakeyu.

9 Entan tu daydayaw hu dios ni edum ni tutu-u, nem hi-gak ni ebuh hu daydayaw yu. †

10 Tep hi-gak hu AP-APU e Dios yun nengihwang ni hi-gayud neihbutan yud Egypt. Ibeга yun hi-gak hu hipan mahapul yu et idwat ku.

11 Nem eleg yu dedngela hu tugun ku niya kanyu ni-nganguy eleg yuwak mahapul,

12 et iebulut kun ippahding yu hu hipan pinpinhed yun pehding, tep makneg kayu.

13 Gullat et anhan ni yuwak kadedngela, et u-unnuden yu hu tugun kun tutu-uk ni helag Israel,

14 ey nanna-ud ni meminpinhakkey hu pengapputan kuddan buhul yu.

15 Et emin ida hu kamengihhingit ni hi-gak e AP-APU ey manyu-ung idad hinanggak ni takut da niya kastiguen kuddan ingganah.

16 Nem hedin hi-gayu, man paka-ippaptek dakeyu, et idwat kun ingganah hu kakkayyag-gud ni kennen yu niya iddawtan dakeyun putsukan." ‡

## 82

### *Ya A-appeh nan Asap*

1 Hi Apu Dios hu kamenuwet idan kameingngadnin "dios." \*

2 Et humman hu, hi-gayuddan huwet ey mahapul ni ya limpiyuh hu elaw ni panhuwet yu et isiked yun mengi-ehneng idan nambahul.

3 Tep mahapul ni i-ehneng yu hu kelebengan idan nangkewetwet, yadda anggeheme-mek, yadda nangkepu-hig, niyadda endi kabaelan dan mengi-ehneng ni annel da.

4 Mahapul ni baddangan yudda ma-lat meihwang idad kapehpehding idan lawah ni tutu-un endin hekey hu hemek dan edum dan tuu.

5 Heni kayu wadad engeenget, tep eleg yun hekey han-awat hu makulug ni kalinimpiyuh ni elaw. Et humman hu, lawah law ni peteg hu kameippenahding di kebebbley.

6 Kangkun nunman ey "Emin kayu ey dios kayu. † Ey u-ungnga dakeyun hi-gak e Keta-ta-geyyan.

7 Nem anin ni hanniman hu kangku et nanna-ud ni mepappeg ali damengu hu biyag yu, tep endi nambaklangan yuddan edum ni tuu, anin idan edum ni ap-apu."

8 Inah ka anhan e Apu Dios et huwetan mudda hu katuuuud kebebbley, tep hi-gam dedan ni ebuh hu lebbengtun man-ap-apu eyad puyek ni lintum.

## 83

### *Ya a-appeh Asap*

1 Apu Dios, kele muka pemegga i-ineng ey muka pakdag ang-ang-ang ni hi-gami?

2 Kaw eleg mu ang-anga hu ngehay idan buhul mun hi-gam?

3 Ang-ang mu kedi e tagan da planuh ni hipan lawah ni pinhed dan pehding idan tutu-um ni nakappinhed mu.

4 Kanday "Ikeyuy kuma et tayu bahbaha hu kebebbley di Israel et endien tayudda katuuuudman ma-lat meliwwan idallin ingganah."

5 Nanhuhummangan ida et mandadagyum idan mekihhanggan hi-gam.

6 Huyyadda hu iEdom, iIsmael, iMoab, iHagrit

7 iGebal, iAmmon, iAmalek, iPilistia niyadda iTyre.

\* 81:5 81:5 Ya hakey mewan ni keibbellinan tu ey "eman ni nengipenguluhan tuddan neni-yanan dan Egypt." † 81:9 81:9 Exodus 20:2 niya Deut. 5:7 ‡ 81:16 81:16 Deut. 32:13-14 \* 82:1 82:1 Huyyaddan 'dios' ey dammutun ya keibbellinan tu ey humman ida dios ni kadadayawaddan iKanaan. Ya hakey mewan ni dammutun keibbellinan tu ey humman ida hu aap-apu winu huwet eyad puyek. † 82:6 82:6 John 10:34.

<sup>8</sup> Anin idan iAssyria et nei-dum idaddan iAmmon niyadda iMoab e helag idan Lot et mambabaddang idan mengubbat ni hi-gam niyadda hu tutu-um.

<sup>9</sup> Et humman hu, ipahding mun emin ni hi-gada hu henin impahding muddan iMidian niya impahding mun nan hi Sisera et hi Jabin di Wangwang e Kishon.

<sup>10</sup> Nangkete y idadman di Endor ni impahding mu et mangkabwel hu annel dad ta-pew ni puyek.

<sup>11</sup> Ipahding muddan aap-apu da hu henin eman ni impahding mun Oreb, hi Seeb, hi Sebah et hi Salmunna.

<sup>12</sup> Huyyadda eman tuun kanday pampilliwen da hu puyek ni kameingngadnin "Pattullan Apu Dios."

<sup>13</sup> Apu Dios, pan-iwehit mudda et henidda dep-ul winu degin kaitayyatayyab ni dibdib.

<sup>14-15</sup> Patekut mudda niya pandegyun mudda et henidda nedeg-al ni takut dan naka-let ni pewek winu kamangkelgab ni duntug.

<sup>16</sup> APU DIOS, ipahding mun hi-gada hu nemahhig ni kebe-ingan da ingganah pampekum-babahan dan hi-gam, et u-unnuden daka.

<sup>17</sup> Ey pinhed kun pehding mun hi-gada hu kebabba-ingan da, ya tattakutan da niya kekastiguan da.

<sup>18</sup> Em, ipahding mudda huyyan hi-gada ingganah ebbuluten dan hi-gam ni ebuh hu APU, e Keta-ta-geyyan ni Dios niya Ap-apun emin eyad puyek.

## 84

*Ya a-appeh idan helag Korah ni meidwat etan ni kamengipappanggulun a-appeh. Kamegittalahi huyyan a-appeh.*

<sup>1</sup> APU DIOS e Kabaelan tun emin, kayyaggud ni peteg hu Tempol mu.

<sup>2</sup> Pinpinhed kun peteg ni umlaw diman ni an mengi-ena-appeh ni amleng kun hi-gam e Dios ni wadan ingganah. Em, kamengippeamleng ni peteg ni hi-gak hu umhayukup di kad-an mu.

<sup>3</sup> Anin idan beding niyadda pippiwweng et ida kamambuyya niya daka ippaptek hu binuya dad kad-an ni altar mu e APU DIOS e Kabaelan tun emin. Hi-gam hu Patul ku niya Dios ku.

<sup>4</sup> Um-amleng ida dama etan tutu-un kamanha-ad di Tempol mu, tep daka i-ena-appeh ni ingganah hu daka penaydayaw ni hi-gam.

<sup>5</sup> Ey um-amleng ida tutu-un hi-gam hu daka iddinnel ni kakelpuin elet da. Niya ihik idan umlaw di Tempol mud Jerusalem ma-lat daka daydayawen diman.

<sup>6</sup> Hedin ida kamangkelebbah di Nehayyukung di Baca e mamega ey keut-utbul hu hebwak, tep nedatngan hu mainudan et kameammuumung hu danum diman.

<sup>7</sup> Na-let daka panggibek di daka penettengid Jerusalem, tep daka nenemnema hu penammuan dan hi-gam e Apu Dios diman.

<sup>8</sup> APU e Dios ni Kabaelan tun emin, e Dios nan Jacob, dengel mu anhan eya dasal ku <sup>9</sup> et bendisyonam etan pinutuk mun patul mi.

<sup>10</sup> Apu e Dios ku, nakka peheballin peteg hu hakey ni aggew ni penaydayawan kun hi-gam di Tempol mu nem ya nak manha-ad ni hanlibun aggew di linggeman ni bebley. Ey nakka peheballi hu ennusan kun menehhegged ni pengippahgepan dan hi-gak di Tempol mu nem ya etan da-ak ap-apngaen di baley ni tuun lawah hu tuka pehpending.

<sup>11</sup> Tep hi APU DIOS hu kamengippaptek ni hi-gami, ey hi-gatu kakelpuin mika panyaggudi niya mika ketbali, tep nandadaddan ni mengidwat ni panyaggudan idan tutu-un kamengu-unnud ni hi-gatu.

<sup>12</sup> APU DIOS e Kabaelan tun emin, pan-am-amleng muddan emin hu tutu-un kamengiddinnel ni hi-gam.

## 85

*Ya a-appeh idan helag Korah ni meidwat etan ni kamengipappanggulun a-appeh*

<sup>1</sup> APU DIOS, binendisyonam hu bebley mud Israel et kumedangyan ida mewan hu tutu-um ni helag Israel.

<sup>2</sup> Pinesinsahan mu hu hipan nambahulan idan tutu-um niyadda hipan lawah ni impahding da.

<sup>3</sup> Ingkal mu hu nemahhig ni bunget mun hi-gada et eleg mudda law ibubbunget.

<sup>4</sup> Apu Dios e kamenellaknib ni hi-gami, pambanggad dakemi anhan ni mengu-unnud mewan ni hi-gam, niya entan anhan dakemi law ibubbunget.

<sup>5</sup> Tep kaw pengpenglaw mu hu bunget mun hi-gami?

<sup>6</sup> Pambangngad mu kumaddan hu nehammad ni mika pengullug ma-lat wada inna-nu tun penaydayawan daka mewan ni hi-gamin tutu-um.

<sup>7</sup> APU DIOS, peang-ang mu hu eleg melumman ni impeminhed mun hi-gami niya helaknibi dakemi.

<sup>8</sup> Unud tayu hu hipan e-helen Apu Dios e APU tayu tep kantuy pelinggep tudda tutu-u tun kamengu-unnud ni hi-gatu. Nem mahapul ni eleg tayu ibbangngad ni pehding hu lawah ni tayu kapehpehding nunman.

<sup>9</sup> Makulug ni hellakniban tudda hu tutu-un kamenaydayaw ni hi-gatu ma-lat meang-ang di kebebbley hu dayaw tu.

<sup>10</sup> Yallin pengippeang-angan Apu Dios ni nehammad ni impeminhed tu niya kamanananang ni tuka pemapteku ni hi-gatsu, ey meihwang itsu niya umlinggep itsu. \*

<sup>11</sup> Yan nunman ni aggew ey hi Apu Dios ni ebuh hu u-unnuden ni tutu-u. Niya gapu tep ya kakinyaggud tu ey uh-uhdungan tudda et bendisyonan tudda.

<sup>12</sup> Em, makulug ni daitu kabendisyonin APU DIOS et kaumyaggud hu tayu kaittanem niya kayyaggud hu biyag tayu.

<sup>13</sup> Humman ni kakinyaggud APU DIOS hu mengiddaddan ni dellanen tun ellian tun mampatul.

## 86

### *Ya dasal nan David*

<sup>1</sup> APU DIOS, dengel mu anhan hu dasal ku et humangen mu, tep endi law ni hekey elet ku niya endi katted ngu hu kabaelan ku.

<sup>2</sup> Ipaptek muwak ma-lat meihwangngak di lawah ni kamekapkapy e Dios ku. Tep hi-gak ni bega-en mu ey ebuh kan nakka iddinel.

<sup>3</sup> Et humman hu, hemek muwak anhan e Apu, tep kewa-wa-wa ey nakka umdasadasal.

<sup>4</sup> Nakka kekdewan hi-gam e peamleng muwak anhan, tep hi-gam hu nakka pengiddin-nelin biyag ku.

<sup>5</sup> Apu Dios, kayyaggud ka niya muka pessinsahi hu liwat mi, tep eleg melumman hu impeminhed muddan kamampehemhemmek ni hi-gam.

<sup>6</sup> APU DIOS, dengel mu anhan hu nakka pampehemhemmekin hi-gam di dasal ku et baddangan muwak.

<sup>7</sup> Hedin wada ligat ku, man nakka mandasal ni hi-gam, tep amtak ni muka dedngela hu dasal ku.

<sup>8</sup> Endi edum ni Dios ni henin hi-gam niya endi edum ni kabaelan tun pehding hu muka pehding.

<sup>9</sup> Emin hu katuutuun lintum di kebebbley ey um-aliddad kad-an mu et manyuung idan menaydayaw ni hi-gam tep ya kasina-gey mu.

<sup>10</sup> Makulug ni et-eteng hu kabaelan mu niya muka ippahding hu kaketngain tuu. Hi-gam ni ebuh hu Dios.

<sup>11</sup> APU DIOS, tutuddui muwak ni mengu-unnud ni hipan pinhed mun pehding ku ma-lat peamleng dakan ingganah. Ey baddangi muwak et ikahhakey ku hu impeminhed kun hi-gam niya hi-gam ni ebuh hu pansilbiak.

<sup>12</sup> Apu e Dios ku, hi-gam hu nakka daydayawad puhuk niyad nemnem ku. Em, daydayawen dakan ingganah,

<sup>13</sup> tep et-eteng hu impeminhed mun hi-gak niya hinelakniban muwak di ketteyyan ku.

<sup>14</sup> Apu Dios, emin ida etan kamampahhiya niya mangkapetey ni tutu-u ey ihik idan memettye ni hi-gak niya eleg dakan hekey ibbilang ni hi-gada.

<sup>15</sup> Nem hi-gam e Apu Dios ey mahmek ka, kabbabal ka, tep beken kan kabbubunget, niya eleg ni hekey melumman hu impeminhed mu niya muka pemapteku ni hi-gami.

<sup>16</sup> Hemek muwak, ey pa-let muwak niya helaknibi muwak, tep bega-en muwak e heni lan inak.

<sup>17</sup> APU DIOS, peang-ang mu hu muka penettebalin hi-gak ma-lat mabeingan ida etan tuun kamengihhingit ni hi-gak, hedin ang-angen dan hi-gam hu kaumbaddang ni hi-gak niya muka iddawtu hu panyaggudan ku.

## 87

### *Ya a-appeh idan helag Korah*

<sup>1</sup> Pinilin APU DIOS ni pambebleyan tu hu Jerusalem e wadad duntug tu.

\* **85:10** 85:10 Yad Hebrew ey kantuy "Mandammu hu nehammad ni impeminhed tu niya etan tuka pemapteku ni tutu-u tu. Niya man-akwal hu linggep niya limpiyuh."

<sup>2</sup> Nakappinghed tu humman ni bebley nem yadda etan edum ni bebley di Israel.

<sup>3</sup> Hi-gayuddan bimbley di Jerusalem e bebley nan Apu Dios ey dengel yu eya kayyaggud ni tuka e-hela meippanggep ni nunyan bebley tu.

<sup>4</sup> Kantuy "I-e-dum kun ittudek ida iEgypt, niyadda iBabilon di listaan ni kamengunnud ni hi-gak. Anin idan iPilistia, yadda iTyre, niyadda iEthiopia, ma-lat ibilang kuddan bimbley di Jerusalem."

<sup>5</sup> Panyaggud alin Apu Dios e Keta-ta-geyyan hu Jerusalem, et humman hu, kan idallin tutu-ud kebbebley ey "Nambbleyyak damad Jerusalem."

<sup>6</sup> Hi APU DIOS hu mengillistaddan tutu-un nalpud kebbebley et ibilang tuddan bimbley di Jerusalem.

<sup>7</sup> Umtenayyayyaw idalli niya um-ena-appeh ida et kanday "Yad Zion hu kakelpuin kapanyaggudin neitu-wan mi."

## 88

*Ya a-appeh idan helag Korah ni meidwat etan ni kamengipappangngulun a-appeh. Huyyan a-appeh ey meia-appeh ni meiu-unnud etan di kapenga-appeh ni "Panligligatan." Hi Heman e iEzrah hu nengitudek nunyan a-appeh.*

<sup>1</sup> AP-APU e DIOS kun kamenellaknib ni hi-gak, kewa-wa-wa niya kahilehileng ey nakka umdasadasal ni pemmekan mun hi-gak.

<sup>2</sup> Dengel mu anhan hu dasal ku et baddangan muwak,

<sup>3</sup> tep iyyadyan kamemunnumunnu hu nemnem ku niya ngannganih law hu ketteyyan ku.

<sup>4</sup> Endi elet ku e heni-ak idan kamangkatey.

<sup>5</sup> Ey heni-ak nei-dum di nangketey et heni-ak nekikulung ni hi-gada, tep inway muwak et eleg muwak law baddangi.

<sup>6</sup> Heni muwak linhey di engeenget niya edallem ni neku-kuan.

<sup>7</sup> Nakka henelhelatapa hu nemahhig ni bunget mun hi-gak e heni anggetakkut ni dalluyun di baybay ni um-ienud. Et humman hu, endi law namnamah ku.

<sup>8</sup> Hi-gam hu himmulun et pan-inhihi-yanan da-ak idan gagayyum ku et eleg dan hekey pinhed ni meihnup \* ni hi-gak. Ey heni-ak nakna et eleggak pakabsik.

<sup>9</sup> APU DIOS, limmetuk hu matak ni lewalewak et eleggak law um-aang-ang. Ey kewa-wa-wa ni nakka mandasal niya nakka itata-gey hu ngamay kun bagak ni hemek mu.

<sup>10</sup> Kaw yadda nangketey hu pengippahdingan idan miracles mu? Kaw ida kaum-inah humman ni nangketey ma-lat daydayawen daka?

<sup>11</sup> Ey kaw dammutun an ene-ehhelen idan nangkeikulung hu eleg melumman ni impeminhed mu niya eleg mepappep ni muka pemapteke ni tuu?

<sup>12</sup> Niya kaw han-ang-ang idan wadad engeenget e bebley idan nangketey ida hu miracle mu? Winu kaw hannemnem dadada hu kayyaggud ni muka pehphehding?

<sup>13</sup> Nakka umdasadasal ni kewa-wa-wan pemaddangan mun hi-gak e APU,

<sup>14</sup> nem ay kele muwak inwalleng et eleg mu hengnguda hu nakka ibbagad dasal ku?

<sup>15</sup> Neipalpu eman ni keu-unggak ingganah ni nunya ey e-eggel ni ekket hu ketteyyan ku. Nemahhig ni impeinglay ku law hu nakka panlelehanin muka pengastigun hi-gak.

<sup>16</sup> Eggak law han-isipel hu nemahhig ni bunget mu et iyyadyan ikkatey ku hu muka pehphehding ni hi-gak.

<sup>17</sup> Heni-ak kamangkelneng di danum niya heni-ak nehukum, tep nemahhig hu bunget mun hi-gak.

<sup>18</sup> Nan-inhihi-yanan da-ak idan edum ku niyadda gagayyum kun peteg tep ya muka pehphehding ni hi-gak, et heni-ak wadad engeenget.

## 89

*Ya a-appeh nan Ethan e iEzrah*

<sup>1</sup> APU DIOS, i-ena-appeh ku hu impeminhed mun eleg melullumman ni ingganah, et anin idan helag min edum ni aggew ey amtaen da hu meippanggep ni eleg mepappep ni muka pemapteke ni hi-gami.

<sup>2</sup> Nakka an peennamta humman ni eleg melullumman ni impeminhed mu niya muka pemapteke ni hi-gamin mannananeng ni ingganah ni henin kapannananengin kabunyan.

<sup>3</sup> Impakulug mun David e kammuy "Nekitballak nan David e pinutuk kun bega-en ku. Et kangkun hi-gatuy

\* 88:8 88:8 James 4:8

4 'Yadda helag mu hu mampatul ni ingganah niya ippaptek ku et mannananeng alin hi-gada hu man-ap-apu.' "

5 Anin idan wadad kabunyan, heniddan anghel et daka i-ena-appeh hu daka penaydayaw ni hi-gam e APU, tep yadda etan kaketngain tuun muka pehpehding ni ya kamannananeng ni muka pemaptek.

6 APU DIOS, hipa hu wadad kabunyan ni henin hi-gam? Endi, tep anin idan anghel et eleg ida meingingeh ni hi-gam.

7 Em, hi-gam ni ebuh hu katekkusiddan emin ni wadad kabunyan. Tep emin ida wadadman ey ida kametngan hi-gam.

8 APU e Dios ni Kabaelan tun emin, endi edum ni henin hi-gam. Ey kamannananeng hu muka pemaptek.

9 Anin idan baybay et hi-gam hu daka u-unnuda niya muka pesikked hu nemahhig ni angetakkut ni dalluyun.

10 Hi-gam ni ebuh hu wada kabaelan tun nematey etan ni angetakkut ni animal e hi Rahab ni nambaley di baybay, niya inapput mudda hu buhul mu tep ya et-eteng ni kabaelan mu.

11 Hi-gam kankabunyan ni kabunyan niya hi-gam kampuyek eyan puyek niyadda hu hipan wadadman, tep hi-gam hu nanletu niya nengiktun emiemin.

12 Em, hi-gam nanletun emin, anin idan wadad north niyad south. Anin idan Duntug e Tabor niyad Hermon, et heni daka i-ena-appeh hu daka penaydayaw ni hi-gam.

13 Et-eteng ni peteg hu kabaelan mu. Endin hekey hu eleg mu han-ipahding.

14 Emin hu muka pehding di nan-ap-apuan mu ey neipun di kalinimpiyuh niyad kakinyaggud. Ey emin di muka pehpehding ey kameang-ang hu eleg melumman ni impeminhed mu niya kamannananeng ni muka pemaptek.

15 Emin ida etan tuun kamengidaydayaw ni hi-gam ey man-am-amleng idan peteg. Ida kamambi-biyag meippuun di binabbal mu e APU.

16 Ida kaman-am-amleng niya daka kadaydayawan kewa-wa-wa tep ya kakinyaggud mu.

17 Impengenapput dakemid mika pekihhanggaid buhul mi tep ya binabbal mun hi-gami.

18 Hi-gam e APU DIOS e kayyaggud ni peteg ni Dios idan helag Israel hu nemutuk ni patul min kamengippaptek ni hi-gami.

19 Impeamtam lan nunman idan tutu-um e kammuy "Binaddangan ku etan sindaluk ni pinilik idad emin di tuuk ni pambalin kun patul.

20 Hi David e bega-en ku, hu impambalin kun patul et duyagan kun lana hu ulu tun immatun ni nenuduan kun hi-gatun mampatul.

21 Hi-gak hu memaddang ni hi-gatu, ey ya et-eteng ni kabaelan ku hu mengippa-let ni hi-gatu,

22 et eleg mabalin ni an apputen idan buhul tu niyadda lawah ni tutu-u.

23 Hi-gatu hu pengapput ku et apputen tuddan emin hu buhul tu niya hipan kamengihhingit ni hi-gatu.

24 Mengmenglaw ni ingganah hu impeminhed ku niya pemaptek kun hi-gatu et hi-gatu hu pengennapput kun ingganah.

25 Pambalin kun mahkang hu bebley ni nan-ap-apuan tu et hi-gatu hu man-ap-apu meippalpad Baybay e Mediterranean ingganah di Wangwang e Euphrates.

26 Et kantullin hi-gak ey 'Hi-gam hu amak niya Dios kun kamengippaptek niya kamenellaknib ni hi-gak.'

27 Ibbilang kun hi-gatu hu pengulwan idan emin ni u-ungngak niya hi-gatulli hu keta-ta-geyyan idan emin ni patul.

28 Endi tu kelummanan hu impeminhed kun hi-gatu niya eggak ippangil hu nekitbalan kun hi-gatu.

29 Henin kapannananengin kabunyan di neiha-adan tu hu pannananengan ni nan-ap-apuan David, tep yadda helag tu hu manhuluhulul ni mampatul.

30-31 Nem hedin eleg u-unnudaddan helag tu hu tugun ku et beken ni nei-lad tugun ku hu elaw ni pambi-biyag da,

32 ey kastigek ida tep ya liwat da et panlelahanan da.

33 Nem ya impeminhed kun David ey mannananeng ngu dedan. Ey eggak keyyata hu impakulug kun hi-gatu.

34 Em, eggak ippangil hu hipan nekitbalan kun hi-gatu niya anin hakey et endi nak ippangil ni hipan panyaggudan tun impakulug kun hi-gatu.

35 Emin hu impakulug kun David ey neipun di kakinyaggud ku, et humman hu, eggak manlangkak ni hi-gatu.

<sup>36</sup> Ang-angen ku ma-lat emin ida hu manhuluhulul ni mampatul, ey yad helag David hu kelpuan da ma-lat mangmanglaw ni mannananeng hu nan-ap-apuan tu e henin aggew ni kamannananeng ni ingganah di neiha-adan tu.

<sup>37</sup> Niya heni daman bulan e kamannananeng ni ingganah di nengiha-adan kud kabunyan ni mengippeang-ang ni kinaDios ku."

<sup>38</sup> Nem entanni ey imbunget mu humman ni mu pinilin patul et iwalleng mu.

<sup>39</sup> Eleg mu pannananeng hu nekitbalan mun hi-gatu e bega-en mu et pappegem hu nan-ap-apuan tu.

<sup>40</sup> Et iebulut mun mebahbah idan emin hu tuping ni luhud ni bebley tu, anin idan daka pangguwalyai.

<sup>41</sup> Nan-ibsik idan katuuuun kamelebbah di baley tu hu hipan limmu tu, niya kangi-ngi-ngiiddan kebebleyan tu.

<sup>42</sup> Ida kamampam-am-amleng hu buhul tu, tep impengapput mudda.

<sup>43</sup> Impambalin mun endi silbi tudda hu almas tu niya eleg mun hekey baddangan di gubat.

<sup>44</sup> Ingkal mu hu kelebbengan tun mampatul, tep pinappeg mu hu tuka keiddeyyawi.

<sup>45</sup> Inebaban mu hu kea-ammaan tu niya kamebabbaingi tep ya impahding mun hi-gatu.

<sup>46</sup> APU, pigantu kepappegan tu huyyan muka pehpending? Kaw pengpenglaw mu hu bunget mun heni kaumhinyab ni apuy?

<sup>47</sup> Nemnem mu anhan e ansikkey dedanggu hu biyag min tuu e endi silbitu.

<sup>48</sup> Tep emin hu tuu ey nanna-ud ni mettey et maikulung.

<sup>49</sup> Apu, attu mewan etan eleg melullumman ni impemihed mun hi-gamin impakulug mun nan hi David meippuun di kamannananeng ni muka pemaptek ey?

<sup>50</sup> Entan anhan tu liwwan e bineibeing dakemin bega-em niya intemeg ku hu penadpadngel idan nunman ni manghay ni tutu-un eleg mengullug ni hi-gam.

<sup>51</sup> APU, kataltalanggaidan buhul mu hu pinilim ni patul, anin ni attu lawwan tu.

<sup>52</sup> Daydayaw tayu hi APU DIOS ni ingganah.

Amen. Em, amen!

## Ya Meikka-pat ni Libluh ni Psalms

(Psalms 90-106)

### 90

*Ya dasal nan Moses e bega-en Apu Dios*

<sup>1</sup> Neipalpu eman ni laputu ey hi-gam e Apu Dios hu mika keihhikkugi.

<sup>2</sup> Anin ni yan eman ni eleg mu ni letuen eyadda wadan nunya heniddan duduntug, et hi-gam ngu dedan hu Dios ni endi laputu niya endi pappeg tu.

<sup>3</sup> Hedin kammun hi-gamin tutu-uy "Pambanggad kayun puyek mewan e nekapyaan yu," man kaum-amnu. \* Makulug ni ansikkey biyag min tutu-u.

<sup>4</sup> Nem hedin hi-gam, man ya hanlibun toon ey heni han-aggew ni ebuh, winu heni pigan olas ni ebuh ni hileng.

<sup>5</sup> Ya muka pengendiin tuu ey heni i-innep e nekekemtang ni ebuh, niya henin kakeennudin tuud na-let ni danum e endi maptek ni attukaw la. Ey henidda helek ni kaumtemel ni kakkabbuhhan,

<sup>6</sup> ey neetteng ni himmabung, nem entannit kamangkehilleng ey nakpit.

<sup>7</sup> Heniddan nunman hu kei-elligan tu hu ketteyyan mi tep ya bunget mun hi-gamid liwat mi, et humman hu mika tattakusi.

<sup>8</sup> Amtam ni emin hu hipan liwat mi. Anin idan liwat min endi nengamta et inamtam.

<sup>9</sup> Em, kamesikkey hu biyag mi e endi maptek ni nepappeg tep ya bunget mu.

<sup>10</sup> Ya kadinukkey ni biyag ni tuud puyek ey nepitun toon, nem hin-addum et kaumlav di newalu hedin endi gannad annel. Nem anin ni hanniman hu kapambiyagi et dakel hu kapanleleghanin ligat, ey nekekemtang ni nepappeg hu biyag.

<sup>11</sup> Apu, eleg mi han-awat hu kameippahding hedin bimmunget ka. Ey gapuh tep ya nemahhig ni bunget mu ey daka katekkusiddan tutu-u.

<sup>12</sup> Et humman hu, tudui dakemi ma-lat eleg mi liwwan e nekekemtang ni ebuh hu biyag mi eyad puyek niya ma-lat memenneman kami et ipahding mi hu pinhed mu.

<sup>13</sup> APU DIOS, entan anhan tu pannananeng hu bunget mun hi-gamin bega-en mu, nem hemek dakemi kumaddan.

\* 90:3 90:3 Genesis 3:19, Job 34:14-15, Psalm 104:29



<sup>14</sup> Pagibek mun hi-gamin kewa-wa-wa etan eleg melullumman ni impeminhed mu ma-lat wada inna-nu tun pan-am-amlengan mi eyad ansikkei ni biyag mi eyad puyek.

<sup>15</sup> Pan-am-amleng dakemi ma-lat maihullul ida etan di impalebalebah min hineneltap min ligat ni impaelim ni hi-gami.

<sup>16</sup> Ey peang-ang mun hi-gamin bega-en mu hu et-eteng ni kabaelan mu niya peang-ang muddan helag mi hu dayaw mu.

<sup>17</sup> Apu e Dios mi, ya kayyaggud kumaddan ey pannananeng mu hu kakinayyaggud mun hi-gami ma-lat emin hu pehding mi ey kayyaggud hu pambalanan tu.

## 91

<sup>1</sup> Ya tuun tuka iddinel hi APU DIOS e Kabaelan tun emin ni keihhikkugan tun mengippaptek ni hi-gatu

<sup>2</sup> ey dammutun kantuy "APU e Dios ku, ngenamung kan mengippaptek niya mengihwang ni hi-gak di lawah, tep hi-gam ni ebuh hu nakka iddinel."

<sup>3</sup> Em, tep makulug ni hi Apu Dios hu kamengippaptek niya hi-gatu kamengihwang ni hi-gam di hipan anggetakkut niyad linggeman ni degeh ni kaikkatay.

<sup>4</sup> Tep heni daka hennian ni payak tu. Ey ya tuka pemaptek hu heni happiyaw mu.

<sup>5</sup> Et humman hu, endi mu tekkutan ni meippahding ni hi-gam ni hileng niyan kawwalwal.

<sup>6</sup> Niya endi mu tekkutan ni hipan degeh ni um-alin hi-gam winu hipan memettey ni hi-gam hedini hi Apu Dios hu iddinel mud biyag mu.

<sup>7</sup> Anin ni linibu hu mangkettey ni sinakdul mu, et endi hu lawah ni an meippahding ni hi-gam.

<sup>8</sup> Tep ang-ang-angen mullin ebuh hu pengastiguan Apu Dios idan tuun nambahul.

<sup>9</sup> Et humman hu, gapu tep hi APU DIOS e Keta-ta-geyyan hu muka keihhikkugi niya hi-gatu muka iddinel ni mengippaptek ni hi-gam

<sup>10</sup> ey makulug ni meihwang ka niyadda pamilyah mud hipan lawah ni kamekapkapyah.

<sup>11</sup> Tep beggaen tudda anghel tun mengippaptek ni hi-gam di attun lawwan mu

<sup>12</sup> et a-allukuden daka ma-lat eleg liputan ni batu hu helim. \*

<sup>13</sup> Ey anin ni wada ha-kupam ni layon winu anggetakkut ni uleg di pandellanan mu, et dammutun petteyen mudda.

<sup>14</sup> Tep inhel APU DIOS e kantuy "Hi-gak hu mengihwang idan tuun neminshed ni hi-gak niya hi-gak hu mengippaptek idan kamengiddinnel ni hi-gak.

<sup>15</sup> Ey hedini wada ligat da, et mambeggaddan hi-gak ni baddang ku ey gagannuen kun memaddang ni hi-gada. Baddangan kudda et meihwang idad ligat da et meidaydayaw hu ngadan da.

<sup>16</sup> Em, ihhehwang kudda niya iddawtan kuddan andukkey ni biyag da."

## 92

*Ya a-appeh ni penaydayaw nan APU DIOS ni aggew ni pan-iyatuan*

<sup>1</sup> Kayyaggud ni mansalamat niya man-a-appeh ni penaydayaw ni hi-gam, APU e Keta-ta-geyyan.

<sup>2</sup> Ey kayyaggud hedini an peennamtan kewa-wa-wa niyan kahilehileng hu eleg melullumman ni impeminhed mu niya muka pemaptek.

<sup>3</sup> Niya kayyaggud hedini unnudan ni gitalah niya ayyuding hu a-appeh ni penaydayaw ni hi-gam.

<sup>4</sup> APU DIOS, nakka man-am-amleng niya nakka man-a-appeh tep yadda impahding mu.

<sup>5</sup> APU DIOS, kamengippetnga hu muka pehpehding niya nekalligat ni meewwatan hu wadad nemnem mu.

<sup>6-7</sup> Ya tuun endi nemnem tu ey eleg tu han-awat e ma-nu tep kayyaggud ni emin hu kameippahding idan lawah ni tuu ey ida kaumkedangyan, nem heniddan mateban helek e meendiddallin ingganah.

<sup>8</sup> Nem hi-gam e APU DIOS, ey mannananeng kan man-ap-apu.

<sup>9</sup> Yadda etan kamekibbuhul ni hi-gam, e lawah daka pehpehding, ey mangkewehhit idalli niya mangkettey ida.

<sup>10</sup> Nem hedini hi-gak, man impambalin muwak ni na-let e henin bakad muyung, niya indawtan muwak ni panyaggudan ku et man-am-amlenggak.

<sup>11</sup> Inang-ang ku hu neapputan idan buhul ku niya dingngel ku hu tekuk da, tep ya takut da.

\* 91:12 91:12 [11-12] Matthew 4:6.

<sup>12</sup> Nem hedin yadda kamengu-unnud ni hi-gam e APU DIOS ey umyaggud hu biyag da e heniddan eta-gey ni neyug winu sedar di Lebanon.  
<sup>13</sup> Em, umyaggud ida, tep henidda neitnem di Tempol APU DIOS e Dios tayu  
<sup>14</sup> e nanengtun matebadda niya nanengtun mangkalemeb ida, anin ni nea-ammadda.  
<sup>15</sup> Et kandalliy "Limpiyuh numan hi APU DIOS! Hi-gatu hu heni batun tayu kakeihhikkugi. Ey neiptek ni emin hu tuka pehding."

## 93

<sup>1</sup> Hi APU DIOS hu patul. Kamedeyyaw ni peteg niya et-eteng hu kabaelan tu. Inhammad tun ingkapyu hu puyek di nengiktuan tu.  
<sup>2</sup> Ya muka pampatuli e APU DIOS ey neihammad dedanggu eman ni laputu. Ey anin ni hi-gam et wada ka dedan ni ingganah.  
<sup>3</sup> Naka-let hu dalluyun di baybay e heni bungug ni kidul,  
<sup>4</sup> nem endin hekey hu tu kei-inggehan di et-eteng ni kabaelan mu e APU DIOS di kabunyan.  
<sup>5</sup> APU DIOS, yadda tugun mu ey eleg ida melullumman. Ey anin ya kakinayyaggud ni Tempol mu et mannananeng alin ingganah.

## 94

<sup>1</sup> APU DIOS e kamengastigu, peang-ang mu hu bunget muddan tuun lawah daka pehpehding.  
<sup>2</sup> Hi-gam hu kamenuwet ni katuutuu. Et humman hu, inah ka et idwat mu hu lebbeng tun kastiguddan kamampahhiya.  
<sup>3-4</sup> APU DIOS, pigan tu penikkedam ni kapan-am-amlengiddan lawah ni tutu-u ma-lat masiked hu daka ippahhiyyan lawah ni daka pehpehding.  
<sup>5</sup> Nemahhig ni daka panligligat ida tutu-um ni kamengu-unnud ni hi-gam e APU DIOS.  
<sup>6</sup> Daka pampateyadda nangkebalu, yadda nangkepu-hig, niyadda nalpud edum ni bebley ni nekibebley ni hi-gami.  
<sup>7</sup> Kanday "Eleg damengu han-ang-ang niya eleg hengngudan APU DIOS, e kadeyyawaddan helag Jacob, hu tayu kapehpehding."  
<sup>8</sup> Kaegieigi, kele endin hekey hu nemnem yu? Pigan tu kenemneman yu?  
<sup>9</sup> Kaw dammutun hi APU DIOS e nengapyan mata niya tangila ey eleg tu han-ang-ang niya eleg tu handengel?  
<sup>10</sup> Hi-gatu hu kamengastigun katuutuu niya inamta tun emin, ey kele kanyuy eleg dakeyu kastigua, niya kele kanyu ni-nganguy eleg tu amta hu yuka pehpehding?  
<sup>11</sup> Tep ya kakulugan tu ey inamta tu hu wadad nemnem ni tuu niya inamta tu e endi silbin wadad nemnem da.\*  
<sup>12</sup> APU, um-amleng ida muka pengittutduuin tugun mu. <sup>13</sup> Mudda kaellubyagad nemahhig ni ligat da ingganah alin kedettengan ni kekastiguan idan tutu-un lawah daka pehpehding.  
<sup>14</sup> Hi APU DIOS ey eleg tudda ippayyag hu tutu-u tu.  
<sup>15</sup> Et humman hu, peang-ang tullu hu limpiyuh ni panhuwet, et humman ali u-unnuden idan tuun kakkayyaggud hu elaw da.  
<sup>16</sup> Hipa hu neminshed ni mengi-ehngeng ni hi-gak di nak pekihhanggaan idan tutu-un lawah daka pehpehding?  
<sup>17</sup> Tep gullat ni eleg tuwak baddangan nan APU DIOS et nanna-ud ni neteyyak.  
<sup>18</sup> Yan eman ni nampehemhemmekak ni hi-gam e APU DIOS, tep nganganah ni meapputtak, ey binaddangan muwak tep ya eleg melullumman ni impeminshed mu.  
<sup>19</sup> Niya hedin kamemunnumunnu nemnem ku ey muwak kapelinggep niya muwak kapeamleng.  
<sup>20</sup> Eleg mudda ebbuluta hu aap-apun daka panligligat hu edum dan tuu e daka pepillit ni u-unnuden hu beken ni limpiyuh ni olden da.  
<sup>21</sup> Ida kamambabaddang ni mannemnem ni pehding dan pampemetteyan daddan tutu-un endi bahul da.  
<sup>22</sup> Nem hedin ngun hi-gak, man hi APU DIOS hu nakka iddinel ni mengippaptek ni hi-gak. Hi-gatu e Dios ku hu heni batun nakka keihhikkugi.  
<sup>23</sup> Nanna-ud ni kastiguen idallin APU e Dios tayun emin hu tutu-un lawah daka pehpehding et endien tudda.

\* 94:11 94:11 Ang-ang yu 1 Corinthians 3:20.

## 95

<sup>1</sup> Daydayaw tayu hi APU DIOS e tayu kakeihhikkugi. Ia-appéh tayu amleng tayun hi-gatu e kamengihwang ni hi-gatsu.

<sup>2</sup> Pansalamat itsun hi-gatud hinangga tu niya ia-appéh tayu hu tayu kapenaydayaw ni hi-gatu.

<sup>3</sup> Tep hi-gatu hu APU DIOS ni kabaelan tun mengippahding ni emin niya hi-gatu hu keta-ta-geyyan ni Patul idan emin ni dios.

<sup>4</sup> Hi-gatu hu Ap-apun emin ni hipan wadad puyek anin di nandaul niyaddad etata-gey ni duntug.

<sup>5</sup> Hi-gatu nanletun baybay niya puyek, et humman hu, hi-gatun emin idan nunman.

<sup>6</sup> Emin itsu ey panyuung itsu niya pandukun itsun menaydayaw nan APU DIOS e namyuh ni hi-gatsu.

<sup>7</sup> Tep hi-gatu hu Dios tayun kamengippatek ni hi-gatsun heni kalneroh tun tuka ippattul.

Hamban anhan dedngelen yu hu e-helen APU DIOS ni hi-gayun nunya e kantuy

<sup>8</sup> "Entan tuwak ngehay, nem dengel yu et u-unnuden yuwak. Entan tu u-ukkul hu impahding ida la eman ni aammed tayu eman ni wadaddad desert di Meribah niyad Massah e eleg da u-unnuden hu pinhed kun pehding da.

<sup>9</sup> Inenang-ang da hu impenahding kun panyaggudan da, nem kapyatun pinatnaan da hu binabbal kun hi-gada. \*

<sup>10</sup> Et mukun bimmungettak ni hi-gadan na-pat ni toon et kangkuy 'Anakkayang ida huyyan tuu! Manghay idan peteg e eleg dan hekey pinhed ni mengu-unnud ni tugun ku.'

<sup>11</sup> Bimmungettak et isapatah ku e kangkuy 'Hedin yadda humman ni tuu, ey eleg mabalin ni ida meilla-kam di nakka pan-iyayui.' " †

## 96

(1 Chronicles 16:23-33)

<sup>1</sup> Emin itsun katuutuud kebebbley ey iena-appéh tayu hu baluh ni a-appéh ni penaydayaw tayun APU DIOS.

<sup>2</sup> Em, iena-appéh tayu hu penaydayaw tayun ngadan tu niya peamta tayun kewa-wa-wa hu nenelakniban tun hi-gatsu.

<sup>3</sup> Ey peamta tayun katuutuud kebebbley hu dayaw tu niyadda etan tuka pehpehding ni kaketngain tuu.

<sup>4</sup> Hi APU DIOS ey eta-gey ni peteg. Hi-gatu hu lebbeng tun daydayawen tayu e beken ni yadda etan linggeman ni dios.

<sup>5</sup> Tep humman idan dios ey beken idan makulug ni dios, tep kinapyaddan tuu. Nem hi APU DIOS ey hi-gatu hu nanletun kabunyan.

<sup>6</sup> Kameang-ang hu dayaw tu, ya kasina-gey tu, ya et-eteng ni kabaelan tu niya kakinayyaggud ni ang-ang tud Tempol tu.

<sup>7</sup> Et humman hu, emin itsun tuu ey daydayaw tayu hi APU DIOS tep ya kasina-gey tu niya kabaelan tu.

<sup>8</sup> Dayaw tayu hu ngadan APU DIOS et tayu iappitan di Tempol tu, tep humman dedan lebbeng tun pehding tayu.

<sup>9</sup> Ey panyuung itsun menaydayaw nan APU DIOS tep ya kakinayyaggud tun peteg. Niya emin itsun katuutuud kebebbley ey panggegeygey itsud hinangga tu tep ya takut tayun hi-gatu.

<sup>10</sup> Peamta tayuddan katuutuud kebebbley e hi APU DIOS hu makulug ni Patul. Hi-gatu nanletu eyan puyek ni eleg meglid niya limpiyuh hu tuka panhuwet idan tutu-u.

<sup>11</sup> Pan-am-amleng kayun emin e wada eyad puyek niya hi-gayun wadad kabunyan. Anin ni hi-gam e baybay niyadda emin hu wadatan et itkuk yu penaydayaw yun hi-gatu.

<sup>12</sup> Ey pan-am-amleng kayu daman papayyew anin idan hipan neitnem. Ittetkuk idalli daman keyew di muyung hu amleng dan

<sup>13</sup> ellian APU DIOS ni man-ap-apu eyad puyek. Meandeng ali niya limpiyuh hu pehding tun man-ap-apu.

## 97

<sup>1</sup> Hi APU DIOS hu patul! Pan-am-amleng kayun emin ni wadad puyek, anin idan hi-gayun nampambebley di gilig ni baybay.

\* 95:9 95:9 [8-9] Ang-ang yu Psalm 78:41, et ya Hebrews 3:8-9, et ya 3:15, et ya 4:7. Ey ang-ang yu dama Exodus 17:1-7 et ya Numbers 20:2-13 † 95:11 95:11 [10-11] Hebrews 3:10-11 et ya 4:5

<sup>2</sup> Kayyaggud niya limpiyuh hu tuka pehding ni man-ap-apu. Hinelikuban ni mahdel niya andeket ni kulput.

<sup>3</sup> Tuka pebukkul hu apuy di attun lawwan tu ma-lat magiheh ida buhul tud nanlinikweh.

<sup>4</sup> Hedin ya mewan tuka peellin kedyam tu ey tuka bebnangi kebebbley niya ida kaumgeygey hu tutu-u hedin inang-ang da.

<sup>5</sup> Ey ida kameummah hu kedunduntug e henin kakeummahin lilin ni kapehding nan APU DIOS e Ap-apun emin ni wadad puyek.

<sup>6</sup> Emin ida hu wadad kabunyan ey daka iwwaggawag hu kakinayyaggud tu niya kaang-ang-angan katuuuud puyek hu dayaw tu.

<sup>7</sup> Mebabba-ingan idallin emin hu kamenaydayaw idan dios ni kinapyan tuu niyadda kamengippahhiyaddan nunman idan beken ni makulug ni dios. Et humman hu, emin kayun dios ey hi-gatu daydayaw yu.

<sup>8</sup> APU DIOS, ida kaman-am-amleng hu tutu-ud Jerusalem niyad edum ni bebley di Judah, tep limpiyuh hu muka panhuwet.

<sup>9</sup> Tep hi-gam e APU hu keta-ta-geyyan ni emin eyad puyek. Ey eta-gey kan peteg nem yaddan emin hu dios.

<sup>10</sup> Hi-gayuddan neminhed nan APU DIOS ey iwaklin yu hu hipan lawah. Tep hi-gatu hu kamengippaptek niya kamengihwang idan kamengu-unnud ni hi-gatud hipan kapehding idan tutu-un lawah daka pehpehding.

<sup>11</sup> Emin ida hu kamengu-unnud nan APU DIOS ey henidda mebnangan niya man-am-amleng ida.

<sup>12</sup> Et humman hu, pan-am-amleng kayun kayyaggud elaw tu niya daydayaw yu hi APU DIOS e kayyaggud ni peteg.

## 98

### *Ya a-appeh*

<sup>1</sup> Ia-appehi tayu hi APU DIOS ni baluh ni a-appeh, tep kayyaggud hu impenahding tun hi-gatsu. Ey naka-apput tudda buhul tu tep ya kabaelan tu niya kakinayyaggud tu.

<sup>2</sup> Impeamtan APU DIOS hu nengapputan tu et peang-ang tud kebebbley hu kabaelan tun mengihwang.

<sup>3</sup> Impeamnu tu hu inhel tu e pannananeng tu hu impeminhed tu niya pemaptek tuddan helag Israel. Ey inang-ang idan katuuuud eyad puyek hu nengapputan tu e Dios tayu.

<sup>4</sup> Pan-a-appeh itsun emin ni tutu-u eyad puyek tep ya an-anla tayu. Niya itkuk tayu hu tayu kapenaydayaw nan APU DIOS.

<sup>5</sup> Em, pan-a-appeh itu niya pan-ayyuding itsun menaydayaw ni hi-gatu.

<sup>6</sup> Unnudi tayun tangguyup hu a-appeh tayu niya itkuk tayu an-anla tayud hinanggan APU DIOS e Patul.

<sup>7</sup> Anin ni hi-gam e puyek niyaddan emin hu wadadatan ey itkuk yu hu yuka penaydayaw ni hi-gatu. Ey hi-gam daman baybay niyaddan emin hu mategun wadadatan ey hanniman dama hu ipahding yu!

<sup>8</sup> Hi-gayudda daman wangwang ey pangkelapkap kayu. Pan-a-appeh kayu daman kedunduntug tep ya an-anla yun menaydayaw ni hi-gatu.

<sup>9</sup> Tep um-alilli hi APU DIOS ni man-ap-apu eyad puyek. Meandeng ali niya limpiyuh hu pehding tun man-ap-apu.

## 99

<sup>1</sup> Hi APU DIOS hu patul! Yimmudung di ta-pew ida etan ni dewwan anghel di yinudungan tu. Emin hu tuu ey ida kaumgeygey. Anin ni ya puyek et kamanyegyeg.

<sup>2</sup> Hi APU DIOS ey kameiddeyyaw di Zion niya hi-gatu hu ap-apun emin di kebebbley di puyek.

<sup>3</sup> Ya keta-ta-geyyan niya kamengippetngan ngadan tu hu lebbeng tun medaydayaw. Kayyaggud ni peteg hi APU DIOS.

<sup>4</sup> Hi-gam ni Patul e et-eteng kabaelan tu niya limpiyuh ni emin hu tuka pehding, ey tuka hellipat-i ma-lat ya limpiyuh niya neiptek hu meippahding di Israel.

<sup>5</sup> Daydayaw tayu hu AP-APU e Dios tayu. Pandukkun itsud hinangga tu, tep hi-gatu hu kayyaggud ni peteg.

<sup>6</sup> Yan nunman ey di Moses nan hi Aaron hu padi tu. Ey hi Samuel hu hakey ni nandasal daman hi-gatu. Nandasal idan APU DIOS et baddangan tudda.

<sup>7</sup> Nekihummungan idan tutu-u tu eman ni kaweda tud kulput niya inu-unnud da hu tugun tu.

<sup>8</sup> Em, APU e Dios mi, hinumang mu hu dasal da. Impeang-ang mun hi-gada e muka pessinsahi niya muka liwwana hu liwat da. Nem kinastigum ida hedini nambahul ida.  
<sup>9</sup> Daydayaw tayu hi APU DIOS. Ey itu pandaydayaw di duntug tud Jerusalem tep hi-gatu e Dios tayu ey kayyaggud ni peteg.

## 100

*Ya a-appéh ni pansalamat nan hi APU DIOS*

<sup>1-2</sup> Emin itsun tutu-ud puyek ey pan-am-amleng itsun menaydayaw nan APU DIOS. Itkuk tayu hu a-appéh tayud hinangga tu.

<sup>3</sup> Abulut tayu e hi-gatu e AP-APU hu Dios. Hi-gatu hu namyuh ni hi-gatsu niya hi-gatu hu kantuun hi-gatsu. Heni itu kalneroh ni tuka ipappattul.

<sup>4</sup> Itu pansalamat ni hi-gatud Tempol tu niya ia-appéh tayu hu penaydayaw tayun hi-gatu. Em, pansalamat itsun hi-gatu niya daydayaw tayu hu ngadan tu.

<sup>5</sup> Tep hi APU DIOS ey kakkayyaggud. Ya impeminhed tu niya tuka pemaptek ni hi-gatsu ey mannananeng ni ingganah.

## 101

*Ya a-appéh nan David*

<sup>1</sup> Ya eya a-appéh kun penaydayaw kun hi-gam e APU, ey meippanggep ni impeminhed mu niya kalinimpiyuh mu.

<sup>2</sup> Kahegag ka et umli ka et baddangan muwak ni mengippahding ni neiptek ma-lat ya kayyaggud niya limpiyuh hu pehpehding kud nan-ap-apuan ku.

<sup>3</sup> Tep eggak i-abulut ni wada hu lawah ni an mekapkapyu.

Angebe-hel ku hu kapehpehding idan eleg mengullug nan Apu Dios. Ey eleggak pinhed ni mekiammuammung ni hi-gada.

<sup>4</sup> Eleggak pinhed ni meieddueddum di lawah ni tutu-u niya bebtawan kud etan hipan lawah ni kapehding.

<sup>5</sup> Pe-neng kudda hu kaum-ehehel ni itek ni meippanggep ni edum dan tuu niya eggak i-abulut ni wadadda hu manghay niyadda kamampahhiyan tuuk.

<sup>6</sup> Ebuh ida etan tuun daka pannananeng ni mengu-unnud ni pinhed mu e APU DIOS, niya ebuh hu kayyaggud ni daka pehpehding hu ebbuluten kun panggunnuk di nan-ap-apuan ku niya manha-ad di baley ku.

<sup>7</sup> Tep eggak i-abulut ni ida mansilbin hi-gak winu ida meihhehennup ni hi-gak hu mangkaitek niyadda mangkaheul.

<sup>8</sup> Kewa-wa-wa ey endien kuddan emin hu tutu-un lawah daka pehpehding niya pampea-allaw kudda eyad bebley nan APU DIOS.

## 102

*Ya dasal ni hakey ni tuun nemahhig hu ligat tu et mampehemhemmek nan APU DIOS*

<sup>1</sup> APU DIOS, dengel mu anhan eya dasal ku et hemeken muwak.

<sup>2</sup> Em, entan tuwak anhan deddeku eyan nemahhig ligat ku, nem gaggannuim ni hummangen eya dasal ku.

<sup>3</sup> Maetung ni peteg hu annel ku e henin apuy niya henin ahuk ni kamangkepuhhipuh la hu biyag ku.

<sup>4</sup> Endi law ni hekey hu elet ku e henin-ak nema-ganan ni helek niya nakka umhigan menggan.

<sup>5</sup> Nemahhig hu palak ku tep henin-ak law genit ni ebuh et mablitan.

<sup>6</sup> Henin-ak hu akup ni pimmuttag di desert. Ey henin-ak ni akup ni kamammu-mu-huk di baew.

<sup>7</sup> Nakka umbabaktad, nem eleg um-ali ugip ku. Ey nakka um-iinglay e henin-ak hu hahhakkey tun sisit ni kaman-e-epad atep.

<sup>8</sup> Nemahhig ni da-ak kapennadngeliddan buhul kun kewa-wa-wa. Da-ak kahenegheg-nuda niya daka ussala hu ngadan kun pan-iddut.

<sup>9-10</sup> Nemahhig bunget mun hi-gak, et humman nengiwallengan mun hi-gak, et adyah e henin nakka kakkanna hu dep-ul niya kaman-ayyuayyuh hu lewak di nakka innuma.

<sup>11</sup> Ya biyag ku ey henin allinnew ni kamangkelinnug hu aggew e anggegannuy attukaw la niya henin helek e kamekpit.

<sup>12</sup> Nem hedini hi-gam e APU, ey mannananeng kalinin mampatul. Ey mandingngel kalinin ingganah.

<sup>13</sup> Nanna-ud ni peang-ang muli hu hemek muddan tutu-um di Jerusalem. Yan nunya law hu pengippeang-angan mun hemek mun hi-gami.

<sup>14</sup> Hi-gamin tuum ni bega-en mu, ey nakappinshed mi huuyan bebley mi, anin ni nebahbah. Et mukun makaggeh ni peteg hu nemnem min menang-ang-ang ni nebahbahan tu.

<sup>15</sup> Emin idalli katuutuud kebebbley ey tekkutan da hi APU DIOS niya emin idalli kepatupatul ey lispituhen da hu et-eteng ni kabaelan tu.

<sup>16</sup> Meippeang-ang ali hu dayaw tun pengiyayaggudan tun nunman ni bebley di Jerusalem.

<sup>17</sup> Ey dedngelen tulli law hu asal idan endi bilbilang dan tutu-u.

<sup>18</sup> Itudek yu eya impahding APU DIOS ma-lat amtaen idallin emin ni manhuluhulul ni meittu-nud ni hi-gatsu et hi-gatu daydayawen da.

<sup>19</sup> Ya ittudek yu ey kanyuy "Nan-uhdung ali hi APU DIOS di kabunyan

<sup>20</sup> ey dinggel tu hu palak idan nangkeikelabut et ibukyut tudda humman idan nagtud keippepetteyyan da."

<sup>21</sup> Huuya impahding tu ma-lat wada inna-nu tun pandingngelan niya keidaydayawan ni ngadan tud Zion di Jerusalem,

<sup>22</sup> et yadman keemmuemmungan idan katuutuud kebebbley ni an menaydayaw ni hi-gatu.

<sup>23</sup> Nganganani ni metteyyak, anin ni kat-agu-ak ni, tep impakepuy tuwak nan APU DIOS, <sup>24</sup> nem nandasallak et kangkuy "Apu e Dios kun wadan ingganah, ipaptek muwak anhan e eleggak ni matey, tep nanengtun kat-agu-ak.

<sup>25</sup> Yan eman ni laputu ey lintum e Apu hu puyek, ya kabunyan niyadda hipan wadadman.

<sup>26</sup> Nem hakey alin aggew et meendiddallin emin humman ni lintum. Heniddalli balwasin kamambalin ni layyut et kamei-ibheng. Nem hedin hi-gam, man wada ka ngu dedan ni ingganah.

<sup>27</sup> Tep eleg kan hekey melullumman niya endi pappeg ni biyag mu. \*

<sup>28</sup> Melingkep idalli u-ungnga min tutu-um, anin idan helag da, tep ippaptek mudda."

## 103

### *Ya a-appéh nan David*

<sup>1</sup> Ikkahhakey ku nemnem kun menaydayaw nan APU DIOS e kayyaggud ni peteg.

<sup>2</sup> Em, hi-gatun ebuh hu nakka daydayawa niya eleggak liwwana hu binabbal tun hi-gak.

<sup>3</sup> Tuka liwwanan emin hu liwat ku niya tuka e-kala hu degeh ku.

<sup>4</sup> Ey tuwak kaihhehwang di ketteyyan ku. Ya impeminshed tu niya hemek tun hi-gak ey eleg ni hekey melullumman.

<sup>5</sup> Tuka pannananeng ni iddawut hu panyaggudan ku, et nanengtun nin makewinginggak e heni-ak tulduh.

<sup>6</sup> Hedin hi APU DIOS, man tudda kabaddangi hu kapanligligat ni edum dan tuu, niya tuka i-ehngeng hu kebbengan da.

<sup>7</sup> Impeamta tun Moses hu pinhed tun meippahding niya impeang-ang tu hu et-eteng ni kabaelan tuddan helag Israel.

<sup>8</sup> Mahmek niya kabbabal hi APU DIOS. Eleg melullumman hu impeminshed tu niya beken ni kabbubunget.

<sup>9</sup> Eleg umgadugadul ni tu pengibbungnetan ni hi-gatsu, niya anin ni umbunget, et eleg mannananeng hu bunget tu.

<sup>10</sup> Anin ni lebbengtun mekastigu itsu tep ya liwat tayu, et eleg daitsu kastigua.

<sup>11</sup> Tep eleg metpeng hu kamannananeng ni impeminshed tuddan kamenaydayaw niya kamengu-unnud ni hi-gatu, henin nambattanan ni puyek niya kabunyan e eleg mabalin ni an metpeng.

<sup>12</sup> Ey ingkal tu liwat tayu et heni indawwi tun hi-gatsu, henin nandawwian ni kasimmili niya kakelinnugin aggew.

<sup>13</sup> Ya hemek APU DIOS idan kamengu-unnud ni hi-gatu ey henin hemek ni hakey ni ama idan u-ungnga tu.

<sup>14</sup> Tep inamta tu e ya tuu ey puyek hu nekapyaan tu.

<sup>15-16</sup> Ya biyag ni tuud puyek ey henin helek e nekemtang ni ebuh hu tuka keteggui niya henin habung e anggegannuy attukaw e intayab lan ddbdib.

<sup>17-18</sup> Nem mannananeng ni ingganah hu impeminshed APU DIOS idan tutu-u tun kamengu-unnud ni hi-gatu niyadda etan eleg da ippangil hu nekitbalan tun hi-gada niyadda etan

\* 102:27 102:27 [25-27] Hebrews 1:10-12

daka pannananeng ni mengu-unnud ni tugun tu. Anin idan helag da et mannananeng dama hu kakinayyaggud tun hi-gada.

<sup>19</sup> Hi APU DIOS ey yad kabunyan hu nengihhammadan tun tuka pan-ap-apui niya hi-gatu hu ap-apun emin, anin di attu.

<sup>20</sup> Hi APU DIOS daydayaw yu, emin kayun et-eteng hu kabaelan tun aanghel ni kamengu-unnud ni hipan tuka ittugun niya tuka immandal.

<sup>21</sup> Em, emin kayun aanghel ni bega-en tun kamengippahding ni pinhed tu ey hi-gatu hu daydayaw yu.

<sup>22</sup> Ey emin kayun lintun APU DIOS, anin ni di attu, et lebbengtun hi-gatu hu daydayaw yu, tep endi hu pappeg ni tuka pan-ap-apui.

Anin daman hi-gak et ikkahhakey ku nemnem kun menaydayaw nan APU DIOS.

## 104

<sup>1</sup> Ikkahhakey ku nemnem kun menaydayaw nan APU DIOS.

APU DIOS e Dios ku, hi-gam hu keta-ta-geyyan niya nanna-ud dedan ni kaka medeyyaw.

<sup>2</sup> Heni ka dilag ni kamambebbennang ni kenayun. Ey heni imbiklag mu hu kabunyan et heni tuldah hu ang-ang tu.

<sup>3</sup> Binehwa mu hu baley mud kad-an idan kulput ni kakelpuin udan. Ey heni muka panluggani hu kulput e heni kalesah mu et daka kaittayab ni dibdib.

<sup>4</sup> Hin-addun ni muka beggaa hu dibdib ni mengippeamtan hipan pinhed mun peamta.

Niya mudda kapambalin hu bega-en mun kamantettebbel ni apuy. \*

<sup>5</sup> Inhammad mu hu sinuunan eyan puyek et eleg meglid.

<sup>6</sup> Et wadaem hu dake ni danum et anin idan duntug et neli-muh.

<sup>7</sup> Minandal mudda humman ni danum et dengelen da hu heni kidul ni tekuk mu ey inu-unnud da et manglaw ida.

<sup>8</sup> Nandayyuddad kedunduntug et manglaw idad nangehayyukung et han ida mam-palaw di indaddan mun panha-adan da.

<sup>9</sup> Inha-ad mu hu kelteg ni keippapegan ni baybay et eleg ida luma-pih et eleg law malbengan hu puyek.

<sup>10</sup> Muka peeyyuh ida hebwak di nehayyukung di nambattanan idan kedunduntug,

<sup>11</sup> et wada kainnumaddan kaman-ayyam di puyek heniddan donkey di muyung.

<sup>12</sup> Ey ida kamambuyya hu sisit di keyew ni neihnup diman ni immena-appah ida.

<sup>13</sup> Muka peelli dama hu udan ma-lat madenuman hu kedunduntug niya muka peellid puyek hu dake ni bendisyon mu.

<sup>14-15</sup> Muka petmel hu helek ni kennen idan baka niya muka petmel hu intanem ma-lat wada pengellaan idan tutu-un kennen dan kelpuan ni elet da. Winedam mewan hu grapes ni kamekapan meinnum ni kamengippeamling ni tuu niya lanan olibah ni daka i-apuap di angah da ma-lat kumayyaggud hu ang-ang da.

<sup>16</sup> Anin idan keyew mun nan-itnem mun sedar di Lebanon et ida kamekaddennumi.

<sup>17</sup> Yadman kapambuyyaiddan sisit. Hedin yadda dama kallangkang, man ida kamambuyyad belbel.

<sup>18</sup> Yad etata-gey ni duntug hu kapambelleyyiddan immeyew ni gelding. Hedin yadda dama badger, man yad deplah hu daka pambelleyyi.

<sup>19</sup> Lintum hu bulan ma-lat pengamtaan ni hambulan. Ey ya aggew ni lintum ey inamta tu hedin pigan kelinnugan tu.

<sup>20</sup> Winedam hu hileng ma-lat hedin na-nget, man kameukkat idan animal di muyung.

<sup>21</sup> Ida kamangngeyyed hu kamangkeetteng ni layon ni daka penemmahemmakin kennen dan winedam e APU DIOS.

<sup>22</sup> Ey hedin kamangkewa-wa, man ida kaumlaw humman ni animal di daka pantattalluin man-iyatu.

<sup>23</sup> Hedin yadda tuu, man ida kameukkat ni an manggunnun kawwalwal meippalpun kakkabbuhhan ingganah ni kakelinnugin aggew.

<sup>24</sup> APU DIOS, napnu puyek ni lintum tep ya kalinaing mu.

<sup>25</sup> Anin ida etan di mangkahkang ni baybay, et immen ni emin ida hu kamambi-biyag ni inha-ad mun nangkamkamdug hu etta-teng niya ekka-ket e eleg ida mebillang.

<sup>26</sup> Yadman kapandellaniddan bapor niya anin etan lintum ni angetakkut ni animal di baybay e Lebayatan, et immen ni kaman-ayyam di diman.

<sup>27</sup> Emin ida huuyan lintum ey hi-gam hu daka pandinnelin kennen dad tsimpuh ni daka penepulli,

<sup>28</sup> et ida kamakaphel idan nunman ni muka iddawat ni kennen da.

\* 104:4 104:4 Hebrews 1:7

<sup>29</sup> Nem hedin inwalleng mudda, man ida kaumtatakut. Ey hedin binangngad mu yayyah da, ey ida kamettyey et kamambangngad ni puyek hu annel da e humman dedan nekapyaan da.

<sup>30</sup> Hedin impalaw mu hu Ispirituh mun hi-gada ey kamewedda hu baluh ni biyag, tep hi-gam hu kakelpuin biyag eyad puyek.

<sup>31</sup> Ya kayyaggud ey mannananeng hu dayaw nan APU DIOS niya man-am-amleng tep yadda etan lintu tu.

<sup>32</sup> Hedin intekel tu eyad puyek ey kamanyegyeg. Ey hedin kinepa tu hu duntug, man kamangkaukat hu ahuk.

<sup>33</sup> Et humman hu, yan nunyan ketagguk ey ia-appeh ku hu penaydayaw kun APU DIOS. Em, lakitdi wada hu yayyah ku ey hi-gatu e Dios ku hu daydayawen ku.

<sup>34</sup> Ya pinhed ku ey um-amleng hi APU DIOS idan nunyan nakka nemnemnema, tep hi-gatu kakelpuin amleng ku.

<sup>35</sup> Ya kayyaggud ey mebahbah idan emin hu tuun neliwtan et mangkeendidda eyad tapew ni puyek.

Ikkahhakey ku nemnem kun menaydayaw nan APU DIOS.

Daydayaw tayu hi APU DIOS!

## 105

*(1 Chronicles 16:8-22)*

<sup>1</sup> Pansalamat itsun APU DIOS niya pandasal itsun hi-gatu. Tayu peenamtaad kebebbley ida etan impahpahding tu.

<sup>2</sup> Iena-appeh tayu hu dayaw tu niyadda etan kaketngain tuun impahpahding tu.

<sup>3</sup> Emin itsun kamengu-unnud nan APU DIOS ey igaggaya tayu hu kayyaggud ni peteg ni ngadan tu.

<sup>4</sup> Hi-gatu pambagai tayun baddang niya hayukup itsud kad-an tun ingganah.

<sup>5-6</sup> Hi-gayuddan helag Abraham e bega-en Apu Dios e helag ida daman Jacob ni pinili tun pantu-u tu, nemnem yudda kaketngain tuun impahpahding Apu Dios ni panyaggudan yu niya nemnem yudda dama hu kalinimpiyuh ni nenuwet tu.

<sup>7</sup> Hi-gatu hu AP-APU e Dios tayu, et humman hu mahapul ni u-unnuden tayun emin ni tuu eyad puyek ida tugun tu.

<sup>8</sup> Eleg tu liwwana hu nekitbalan tu, anin ni piga toon hu melebbah.

<sup>9-10</sup> Et humman hu, pannananeng tu hu nekitbalan tun Abraham e humman dama insapatah tun Isaac. Impidwa tun inhel humman ni nekitbalan tun ingganah nan hi Jacob e hi Israel niyadda helag tu

<sup>11</sup> e kantuy "Iddawat kun hi-gayu hu bebley di Kanaan ni beltanen idan helag yu."

<sup>12</sup> Yan nunman ey hahhakkey ida hu tuun Apu Dios ni nekibebbley di diman Kanaan.

<sup>13</sup> Immenal-aldan idan nekibebbley di edum ni bebley ni nan-ap-apuan idan nambakbaklang ni patul.

<sup>14</sup> Nem endi kuma hakey ni patul ni an nengipelilligat ni hi-gada, tep eleg iebulut nan Apu Dios ni pehding da humman ni hi-gada

<sup>15</sup> e kantuy "Entan tudda panligligat hu pinilik ni tuuk niyadda prophets e bega-en ku."

<sup>16</sup> Entanni ey impaelin APU DIOS hu bisil di Kanaan et endi hu kennen dadman,

<sup>17</sup> nem impamengulu tud Egypt hi Joseph, tep inggatang idan agitu et mambalin ni himbut di diman.

<sup>18</sup> Yan eman ni nengikelabutan dad Egypt nan hi Joseph ey binangkiling da hu heli tu et maliputan niya impewa-ngalan dan gumeke.

<sup>19</sup> Neikelabut hi Joseph ingganah ni immamnun neipahding ida etan inhel tun meippahding ni impeamtan APU DIOS ni hi-gatu. Huyyan neipahding nan Joseph hu nematnaan APU DIOS ni hi-gatu.

<sup>20</sup> Nem entanni et endi maptek ey imbukyut etan ni patul di Egypt hi Joseph di kallabbuttan,

<sup>21</sup> et hi-gatu hu pambalin tun mampaptek di baley tu niyadda hipan kinedangyan tu.

<sup>22</sup> Ey hi-gatu hu nambalin ni apuddan emin ni uupisyal di baley nan patul niya hi-gatu hu kamengittuddun kayyaggud ni pehding idan kaumtugun nan patul.

<sup>23</sup> Entanni ey limmaw idan emin hu pamilyah nan Jacob di Egypt et ida makibebbley di diman.

<sup>24</sup> Yan nunman ni wadaddadman ey indawtan APU DIOS idan dakel ni u-ungnga da. Nangkahlag ida ey nambalin ni hi-gada hu daddakkel niya e-etteng kabaelan da nem yadda iEgypt e buhul da.

<sup>25</sup> Et lektattuy impambalin APU DIOS ni anggebe-hel idan tuud Egypt ida humman ni helag Jacob e tuun APU DIOS, et lawah hu ipenahding dan hi-gada.



<sup>26</sup> Nem intu-dak tu hi Moses e bega-en tu, et hi Aaron e pinili tun pangkadwa tu, et lumaw idan han-agid Egypt ni an memaddang ni hi-gada.

<sup>27</sup> Limmaw idad Egypt et da ipahding di hinanggaddan tuudman hu inhel APU DIOS ni pehding dan kaketngain tuu.

<sup>28</sup> Nambalin nan APU DIOS ni engeenget di emin di bebley di Egypt, nem nanengtun eleg da u-unnuden hu pinhed tu.

<sup>29</sup> Et pambalin tun kuheyaw hu danum di wangwang niyaddad kulukul et mangkatey ida hu nambakbaklang ni deleg diman.

<sup>30</sup> Entanni mewan ey impalaw tu hantapug ni tukak et umapnal idad kebebbebley di Egypt, anin yad baley nan patul.

<sup>31</sup> Impehegyab tu mewan hu aggyiyet niya imuk et menapnapan hu Egypt.

<sup>32</sup> Ey impaeli tu hu nemahhig ni dallallu niya kedyam

<sup>33</sup> et mangkebahbah ida hu keyew niya hipan intanem dadman Egypt. Anin idan intanem dan grapes niyadda figs et nangebahbah ida.

<sup>34</sup> Entanni mewan ey impalaw tu hu hantapug ni dudun

<sup>35</sup> et pangkanen dan emin hu nangekitnem di diman.

<sup>36</sup> Entanni law ey impampapetey tudda hu lakal pin gulwan ni u-ungngaddan iEgypt.

<sup>37</sup> Et han tudda law ipengulu humman idan helag Israel et hi-yanan da hu Egypt e dakel intabin dan silber niya balituk. Ey emin ida ey na-let ida e endi kamandedgeh.

<sup>38</sup> Nemahhig law ni katattakusiddan iEgypt hu helag idan Israel et ida kaman-am-amleng ni neni-yanan dan bebley dad Egypt.

<sup>39</sup> Wada etan impaelin APU DIOS ni kulput di ta-pew da, et humman hu kamenihiddum ni hi-gadan kawwalwal. Ey hedin hileng, man kamambalin humman ni kulput ni apuy ma-lat mabnangan ida.

<sup>40</sup> Nambagaddan detag ey impaeli tu hu dakel ni sisit. Ey kewa-wa-wa ni indawtan tuddan kennen dan manna ni kamelpud kabunyan.

<sup>41</sup> Dinhak tu etan batu ey immebwal hu dakel ni danum ni innumen da, et maweda hu heni wangwang di desert.

<sup>42</sup> Impahding APU DIOS emin ida huuya, tep eleg tu liwwanen hu impakulug tun Abraham e bega-en tu.

<sup>43</sup> Et ipangngupangngulu tudda humman ni tutu-u tu e ida kaman-am-amleng niya ida kaman-a-appah ni neni-yanan dan bebley di Egypt.

<sup>44</sup> Emin hu puyek di bebley idan edum ni tutu-un eleg mengullug ni hi-gatu ey nan-idwat tuddan tutu-u tu et hi-gada law hu nampengalan hipan lameh idan nangekitnem di pupuyek da.

<sup>45</sup> Humman hu impahding tu ma-lat u-unnuden idan tutu-u tun emin hu tugun tu.

Daydayaw tayu hi APU DIOS!

## 106

<sup>1</sup> Daydayaw tayu hi APU DIOS!

Pansalamat itsun APU DIOS tep ya kakinyayggud tu. Ya impeminhed tu ey kamannananeng ni ingganah.

<sup>2</sup> Endi hakey ni tuun kabaalan tun mengippeamtan emin ni impahding APU DIOS ni kaketngain tuu. Ey anin ni hipa pehding tayun menaydayaw ni hi-gatu, et kulang ni peteg humman ni pemelleh tayun kakinyayggud tu.

<sup>3</sup> Kaman-am-amleng ida tutu-un limpiyuh daka pehding niya kayyaggud ni ingganah daka kapkapyaa.

<sup>4</sup> APU DIOS, nemnem muwak anhan ni pemaddangam idallin tutu-um et ihwang muwak dama.

<sup>5</sup> Et hiktamak hu kayyaggud ni biyag ni indawat muddan pinilim ni tutu-um. Ey iebulut mun mei-dummak alin hi-gadan mekiam-amleng niya menaydayaw ni hi-gam.

<sup>6</sup> Nanliwat itu e heni itsuddan eman ni aammed tayu, tep impahding tayu dama hu lawah.

<sup>7</sup> Yan eman ni wadaddad Egypt ey eleg dan hekey hanguden hu impeenang-ang APU DIOS ni kaketngain tuu niya eleg dan hekey ibilang hu impeminhed tun hi-gada. Et peang-ang da hu ngehay dan hi-gatud Madlang ni Baybay.

<sup>8</sup> Nem anin ni hanniman ida et kapyatun inhewang tudda, tep humman dedan hu inhel tun pehding tu niya ma-lat peang-ang tun hi-gada hu et-eteng ni kabaalan tu.

<sup>9</sup> Minandal tu hu Madlang ni Baybay et matduk et ipengulu tudda tutu-u tun nan-agwat di mamega.

<sup>10</sup> Humman hu elaw ni nengihwangan tun hi-gadad buhul dan kamengihhingit ni hi-gada.

11 Nem hedín yadda buhul da ey nalsing idan emin et endin hekey hu an natdaan ni hi-gada.

12 Et yan nunman law hu nengulugan idan tutu-u tun impakulug tun hi-gadan nunman et man-a-appéh idan penaydayaw dan hi-gatu.

13 Nem anggégannu mewán ey liniwwan da humman ni impahding APU DIOS ni hi-gada, et eleg da mewán u-unnuden hu tugun tun hi-gada et ya kumedek pinhed da hu impahding da.

14 Yan eman ni wadaddad desert ey dakel hu daka ibbagan APU DIOS ni pematna dan binabbal tu

15 et pan-idwat tu hu hipan daka ibbaga, nem impaeli tu dama nemahhig ni degeh da.

16 Entanni mewán ey daka keemmehi hi Moses, anin hi Aaron e sinudun APU DIOS ni padi tu.

17 Et endi maptek ey nadhak hu puyek et mangke-hung hi Dathan et hi Abiram et yadda edum tu.

18 Anin idan edum dan nengipahding ni lawah, et giniheb idan apuy ni impaelin APU DIOS.

19 Yan eman ni wadadda humman ni tutu-un APU DIOS di Sinai ey nengapyaddan i-ingneh ni bakan balituk et dayawen dan dios da.

20 Hinullulan da hu kamedaydayaw ni makulug ni Dios ni kinapya dan i-ingneh ni bakan kamengangan ni helek.

21-22 Liniwwan da hi APU DIOS e nengihwang ni hi-gada niya nengipenahding ni kaketngain tuud Egypt niyad Madlang ni Baybay.

23 Et bumunget law ni hi-gada et kantuy petteyen tudda. Nem nampehemhemmek hi Moses e bega-en tu, et eleg tudda pampateyen.

24 Eleg da pinhed ni umlaw etan di kayyaggud ni bebley ni inhel APU DIOS ni iddawát tun pambebleyan da, tep eleg ida medinnel ni inhel tun pengippaptekan tun hi-gadadman.

25 Ida kamangngungudud nangkampuan da niya eleg ida mengu-unnud nan APU DIOS

26 et isapatah tu e petteyen tuddad desert

27 niya pan-iwwahit tuddalli helag dad edum ni bebley et mangkatey idadman. \*

28 Ya mewán eman ni wadaddad Peor ey nei-dum idaddan kamenaydayaw nan Baal e dios idan tuudman, niya nekikakikan idadda etan ni kamei-appit idan netey. †

29 Impabunget da mewán hi APU DIOS tep ya humman idan lawah ni daka pehpehding et paeli tu hu nemahhig ni degeh ni hi-gada.

30 Nem nehagag kuma hi Pinehas et kastiguen tudda hu nengipahding nunman et masiked humman ni degeh ni impaelin APU DIOS.

31 Et meippalpun nunman ey katettebaladdan katuuuu hi Pinehas. ‡

32 Yan eman ni wadaddad Meribah ey impabunget da mewán hi APU DIOS et hi Moses kumedek hu nekastigu,

33 tep impaguhu da et eleg tu pakannemmen hu inhel tu. §

34 Entanni mewán ey intugun APU DIOS ni hi-gadan pampetteyen dadda etan tuun kahing ni hi-gatu, nem eleg da u-unnuden humman ni intugun tu.

35 Nampekiahwadda kumedek ni hi-gada et ya elaw ni inahwa da hu inu-unnud da

36 et daydayawen da hu beken ni makulug ni dios, et humman hu, henidda naknad bitu.

\*

37 Ey in-enappit dadda † hu u-unggadad dimonyoh. ‡

38 Pintey dadda humman ni endi bahul tun u-ungga et iappit daddan dios di Kanaan et mambalin ni beken ni malinih di hinanggan APU DIOS humman ni bebley tep ya humman ni impahding da. §

39 Beken ni ya bebley dan ebuh hu nambalin ni beken ni malinih di hinanggan APU DIOS, nem anin ni ya annel da, tep eleg da ikahhakey nan APU DIOS hu daka pengullug.

40 Nemahhig hu bunget APU DIOS idan nunman ni pinili tun tutu-u tu, et humman hu, anggebe-hel tudda law.

41 Inwalleng tudda et iebulut tun yadda buhul dan eleg mengu-unnud ni hi-gatu hu pan-ap-apu da.

\* **106:27** 106:27 Leviticus 26:33 † **106:28** 106:28 Endi maptek hedín ya keibbellinan ni “netey” ey yadda tuun nangketey winu yadda dios ni kinapyan tu. ‡ **106:31** 106:31 [28-31] Numbers 25:1-13 § **106:33** 106:33 [32-33]

Numbers 20:2-13 \* **106:36** 106:36 [34-36] Judges 2:1-3 et ya 3:5-6 † **106:37** 106:37 Deut. 12:31 niya 32:17. Ang-ang yu 2 Kings 16:3, ya 17:17, ya Ezekiel 16:20-21 niya 1 Corinthians 10:20. ‡ **106:37** 106:37 Ang-ang yu 2

Kings 17:17. § **106:38** 106:38 Numbers 35:33

<sup>42</sup> Impanleleghan idaddan nunman ni buhul da niya impahding dan hi-gada hu hipan pinhed dan pehding.

<sup>43</sup> E-eggel ni inhewang APU DIOS idad ligat da, nem kapyatun ida kamanliwwaliwwat tep ya ngehay dan hi-gatu. Et lektattu ey inlu-lu da annel da tep ya liwat da.

<sup>44</sup> Em, nemahhig ngehay dan APU DIOS, nem himmek tuddan nampehemhemmekan dan hi-gatud dasal da.

<sup>45</sup> Et eleg tudda kastiguen, tep ninemnem tu hu nekitbalan tun panyaggudan da niya tep nemahhig hu impeminhed tun hi-gada.

<sup>46</sup> Anin idan buhul dan kamengippehelheltap ni hi-gada et impambalin tuddan kabbabal idan hi-gada. \*

<sup>47</sup> APU e DIOS mi, ihwang dakemi anhan niya paenamut dakemin emin ni tutu-um ni neiwhahhiwahhit di kebebbley ma-lat maemung kamin mansalamat niya menaydayaw ni ngadan mun kayyaggud ni peteg.

<sup>48</sup> Daydayaw tayu hu AP-APU e DIOS tayun helag Israel. Em, daydayaw tayun ingganah. Emin itsu ey kantayuy "Amen!" †

Daydayaw tayu hi APU DIOS!

## Ya Meikkelliman Libluh ni Psalms

(Psalms 107-150)

### 107

<sup>1</sup> Pansalamat itsun APU DIOS tep ya kakinyaggud tu. Ya impeminhed tu ey kamannananeng ni ingganah.

<sup>2</sup> Hi-gayuddan neihwang di hipan ligat ni kapehpehding idan buhul tayu ey yu paenamta edum tayun tuu e hi APU DIOS hu nengihwang ni hi-gayu.

<sup>3</sup> Tep dakeyulli inemung di neiwehitan yud kebebbley di appit ni kasimmilin aggew, yad tuka kelinnugi, yad south niyad north.

<sup>4</sup> Yadda edum ey ida nanhawahawang di desert, tep eleg da hanhamak hu dellanen dad da pambebleyan.

<sup>5</sup> Neupaupadda niya na-na-wew ida niya heni eleg ida meittu-u.

<sup>6</sup> Et mampehemhemmek idan APU DIOS tep ya nemahhig ni daka panhelheltapi et ihwang tuddad ligat da.

<sup>7</sup> Impangulu tuddad kayyaggud ni dellanen da et lumaw ida etan di bebley ni panhadan da.

<sup>8</sup> Et humman hu, mahapul ni mansalamat idan APU DIOS, tep eleg melumman hu impeminhed tun hi-gada niya dake impahpahding tun panyaggudan da.

<sup>9</sup> Tep tuka iddawat hu innumen idan na-wew niya anin idan neupa et tudda kaiddawsin kayyaggud ni kennen da.

<sup>10</sup> Wadadda edum ni kaumlelemyung e wadadda engeenget, tep nebangkiling idad kallabbutan et ida kamanhelheltap

<sup>11</sup> tep nginhay da hu tugun Apu Dios e Keta-ta-geyyan.

<sup>12</sup> Et idwatan tuddan nekalligat ni ngunu ma-lat anin ni metu-lidda et endi kamemad-dang ni hi-gada.

<sup>13</sup> Et mampehemhemmek idan APU DIOS tep ya nemahhig ni daka panhelheltapi et ihwang tuddad ligat da.

<sup>14</sup> Impa-hep tudda et hi-yanen da hu engeenget ni kad-an da et ekalen tu bangkiling da.

<sup>15</sup> Et humman hu, mahapul ni mansalamat idan APU DIOS, tep eleg melumman hu impeminhed tun hi-gada niya dake impahpahding tun panyaggudan da.

<sup>16</sup> Tep binahbah tu hu giniling ni eheb idan kallabbutan, anin idan gume ni lekbi tu.

<sup>17</sup> Wadadda edum ni tutu-un endi nemnem da e nangngehay ida et helheltapen da nanliwtan da.

<sup>18</sup> Lektattuy ngannganih katey da, tep eleg da hengnguhengnguda kennen da.

<sup>19</sup> Et mampehemhemmek idan APU DIOS tep ya nemahhig ni daka panhelheltapi et ihwang tuddad ligat da.

<sup>20</sup> Himmappit et panyaggud tudda et eleg ida matey.

<sup>21</sup> Et humman hu, mahapul ni mansalamat idan APU DIOS, tep eleg melumman hu impeminhed tun hi-gada niya dake impahpahding tun panyaggudan da.

<sup>22</sup> Ey lebbeng tun man-appit idan pansalamat dan hi-gatu. Niya lebbeng tun i-ena-appah da hu amleng dan mengippeennamtaddan kakkayyaggud ni impenahding tu.

\* 106:46 106:46 [40-46] Judges 2:14-18 † 106:48 106:48 Ang-ang yu Psalm 41:13.

<sup>23</sup> Wadadda edum ni tuun kamangngunnud bapor di baybay e humman daka pambiyagi.

<sup>24</sup> Inenang-ang da hu kayyaggud ni impenahding APU DIOS di diman ni kakei-ang-angin et-eteng ni kabaelan tu.

<sup>25</sup> Tep himmapit ey newada hu na-let ni pewek niya nemahhig ni dalluyun.

<sup>26</sup> Ey kametenuttu-ug hu bapor ni limmaw di dallem tu et nemahhig hu takut da.

<sup>27</sup> Ida kamandapidaping ni aliwet da e henidda nebuteng niya ida kametemman pehding da.

<sup>28</sup> Et mampehemhemmek idan APU DIOS tep ya nemahhig ni daka panhelheltapi et ihwang tuddad ligat da.

<sup>29</sup> Impasiked tu etan pewek niya dalluyun

<sup>30</sup> et ida law kaman-am-amleng. Et ebuhe padekal tuddadman e bebley ni pinhed dan lawwan.

<sup>31</sup> Et humman hu, mahapul ni mansalamat idan APU DIOS, tep eleg melumman hu impeminhed tun hi-gada niya dakel impahpahding tun panyaggudan da.

<sup>32</sup> Ey mahapul ni daydayawen da hi APU DIOS di hinanggaddan neamung ni tutu-u niyadda aap-apu.

<sup>33</sup> Em, lebbeng tun daydayawen tayu hi APU DIOS tep sinduk tudda wangwang niyadda hebwak.

<sup>34</sup> Ey impambalin tun eleg umtetmel hu kameitnem idad puyek ni mateba la ni kameitnem, tep lawah kapehpehding idan nambebley diman.

<sup>35</sup> Wineda tu lebeng idad desert niya wineda tu hu dakel ni utbul ida etan di nakammaganan ni puyek

<sup>36</sup> et palaw tuddadman hu tutu-un endi kennen da, et mengapyaddan pambebleyan dadman.

<sup>37</sup> Binaddangan tudda et kameteggu hu daka ittanem ni daka pengellain kennen da et dakel hu ineni da. Anin idan intanem dan grapes et malemeh.

<sup>38</sup> Binendisyonan tudda et dumakkel ida niya himmegyab hu inhalun da.

<sup>39</sup> Hin-addum ni himmahhakkey ida, tep daka panlelehmani hu kapehpehding idan buhul da.

<sup>40</sup> Nem kababba-ingin APU DIOS humman idan buhul da et tudda katellakad mahkang ni desert.

<sup>41</sup> Nem kabaddangin APU DIOS ida hu anggehmmek ni tutu-u niya tuka pedakkel hu helag da henin kahegyabin kalneroh.

<sup>42</sup> Et emin ida hu kamengu-unnud ni hi-gatu ey ida kaum-amleng hedin inang-ang da huyyan tuka pehding. Nem hedin yadda tuun lawah hu daka pehpehding ey daka pakdag eeneeng.

<sup>43</sup> Hi-gayuddan nangkenemman ey nemnemman yudda huyyan kapehpehding APU DIOS niya entan tu liwwan hu eleg melullumman ni impeminhed tu.

## 108

*Ya a-appeh nan David*

*(Psalm 57:7-11; 60:5-12)*

<sup>1</sup> Nakka makaddinnel ni hi-gam e Apu Dios, et humman hu, nakka man-a-appeh ni penaydayaw kun hi-gam.

<sup>2</sup> Yan nunya ey ihikkak law ni memelpelding ni ayyuding niya gitalah ni kamangkewawa, et heni bengngunen ku hu aggew, tep umbangunak ni dagah ni menaydayaw ni hi-gam.

<sup>3</sup> Mansalamattak ni hi-gam e APU DIOS niya ia-appeh ku hu penaydayaw kun hi-gam di hinanggaddan katuutuud kebebbley.

<sup>4</sup> Tep eleg melumman hu impeminhed mu niya kamannananeng hu muka pemapteke ni hi-gami, niya eleg ida metpeng e henin kasina-gey ni kabunyan.

<sup>5</sup> Apu Dios, peang-ang mud kabunyan e ta-pew ni puyek hu kasina-gey mu, niya peang-ang mud puyek hu dayaw mu.

<sup>6</sup> Et humman hu, dengel mu anhan hu dasal min tutu-um ni nakappinshed mu et ihwang dakemi tep et-eteng kabaelan mu.

<sup>7</sup> Immehel ali hi Apu Dios etan di tuka panhahha-adi et kantuy "Apputen kudda buhul ku et man-am-amlengngak ni mengennadwan Sekem niya nedeklan di Sukkot e bebley da ma-lat i-peng idan tutu-uk.

<sup>8</sup> Ya Gilead niya Manasseh ey bebley kudda. Ey yadda iEpraim hu heni sindaluk. Hedin ya Judah ey yadman ali kelpuan idan patul ku.

9 Pambega-en kudda iMoab ey panhimbut kudda iEdom, ey ittetikuk kulli hu pengapputak idan iPilistia.”

<sup>10</sup> Apu Dios, hipa edum ni mengippengngulun hi-gak di Edom e nehammad ni neluhud ni batu, hedini beken ni hi-gam ni ebuh?

<sup>11</sup> Kaw inwalleng dakemi tu-wangu anhan e Apu Dios? Kaw eleg ka law mekillaw idan sindalu min an mekiggubbat?

<sup>12</sup> Baddangi dakemi anhan ni mengubbat idan buhul mi, tep endi silbin baddang ni tuu.

<sup>13</sup> Nanna-ud ni mengapput kami hedini baddangan dakemi e Apu Dios, tep ya kakulugan tu ey hi-gam dedan hu kamengapput idan buhul mi. \*

## 109

*Ya a-appéh nan David ni meidwat etan ni kamengippangngulun a-appéh*

<sup>1</sup> Apu Dios ni nakka daydayawa, entan anhan tu pakdag eneeneng.

<sup>2</sup> Tep iyyadyan nemahhig e mangkaitek niya lawah ida eya tutu-u e dakel hu daka pebehul ni hi-gak ni beken ni makulug.

<sup>3</sup> Emin ida ey angebe-hel da-ak ni endi puut tu.

<sup>4</sup> Nakka peang-ang hu impeminhed kun hi-gada niya nak ida kaidadasasali, nem kapya tun angebe-hel da-ak ni hi-gada.

<sup>5</sup> Daka bellehin lawah hu kakinyaggud kun hi-gada niya daka bellehin hingit hu impeminhed kun hi-gada.

<sup>6</sup> Apu Dios, pinhed kun ya lawah ni huwet hu tudduen mun manhuwet etan ni hakey ni buhul ku niya pambalin mun yadda ngu edum tu hu mengi-uh-uh ni nambahulan tu.

<sup>7</sup> Ya kayyaggud ey hedini meillaw di korteh, man mekastigu tep nambahul. Niya anin idan e-helen tud dasal tu, et humman ida umhulun ni kekastiguan tu.

<sup>8</sup> Ya kayyaggud ey angagannun mepappeg hu neitu-wan nunman ni tuu ma-lat wada meihhullul ni hi-gatud ngunu tu. \*

<sup>9</sup> Kayyaggud hedini anin ni mepu-hig ida u-ungnga tu niya anin ni mebellu hu ahwa tu.

<sup>10</sup> Ey kayyaggud hedini mebahbah hu baballey idallin u-ungnga tu, et ida manhawahawang niya ida mangkedekedew ni kenne da.

<sup>11</sup> Heballi emin ida hu nan-utangan tu ey da pan-ellan hu hipan limmu tu niya ya hansinu-wan hu mengellan emin ni nan-aatuan tu.

<sup>12</sup> Ey heballi endi hu umhehmek ni hi-gatu niya endi an mengippaptek idan nangkepuhig ni u-ungnga tu.

<sup>13</sup> Niya heballi mangkettey idan emin hu helag tu ma-lat keliwwanan ni ngadan tu.

<sup>14</sup> Ya kayyaggud ey eleg liwwanan APU DIOS ida hu lawah ni impahpahding idan aammed tu niya eleg me-me-kal di listaan hu neitudek ni lawah ni impahpahding inetu.

<sup>15</sup> Ey kayyaggud hedini nenememen nan APU DIOS ni emin hu liwat tu, nem hedini hi-gatu, man kayyaggud hedini meliwwan ni ingganah.

<sup>16</sup> Tep nemahhig humman ni tuu e endin hekey hu impeang-ang tun binabbal tud edum tun tuu. Impanligligat tudda niya pinetepetey tudda hu nangketwetwet niyadda angehemmek ni tutu-u.

<sup>17</sup> Nemahhig ni tuka pan-iidusi hu edum tun tuu, et humman hu, kayyaggud hedini meibbanggad humman idan idut tun hi-gatu. Eleg tu pinhed ni bendisyonan hu edum tun tuu. Et humman hu, kayyaggud hedini endi dama memendisyon ni hi-gatu.

<sup>18</sup> Impeingha tu ngu dedan ni man-iddut henin tuka pambalwasii winu henin tuka innumin danum winu ya tuka penggannin kenne tu.

<sup>19</sup> Et mukun kayyaggud hedini emin ida etan iduidut tu ey meibbanggad ni hi-gatu et heni balwasin meilibbut di annel tu niya heni ballikid ni meilibbed ni hi-gatu.

<sup>20</sup> APU DIOS, humman idan kastigu hu pengastigum idan nunman ni buhul kun lawah hu daka e-e-helan meippanggep ni hi-gak.

<sup>21</sup> Nem hedini hi-gak, man baddangi muwak ngu e APU DIOS e Eta-gey ni peteg, ma-lat meihwanggak, tep humman dedan hu elaw mu. Em, ihwang muwak anhan tep ya eleg melumman ni impeminhed mu.

<sup>22</sup> Makahhapul ku hu baddang mu tep nemahhig ni angehemmekkak niya nakka umlelemyung ni peteg.

<sup>23</sup> Heni-ak law allinnew ni kamangkeummah niya heni-ak dudun ni nelakah ni mepukpuk.

<sup>24</sup> Kaumgeygey ida pukel ku tep nantepetepellak et nepippiguttak e heni-ak genit ni nablatan ni ebuh.

\* **108:13** 108:13 [6-13] Ya Psalm 108:6-13 ey nan-inggeh ni Psalm 60:5-12. \* **109:8** 109:8 Acts 1:20.

<sup>25</sup> Nemahhig ni da-ak kang-i-ngi-ngiidan buhul ku. Hedin inang-ang da-ak, man ida kamanwigiwig ni pihul dan hi-gak.

<sup>26</sup> APU e Dios ku, baddangi muwak et ihwang muwak anhan tep ya eleg melumman ni impeminhed mu.

<sup>27</sup> Peamtam idan buhul ku e hi-gam hu kamengihwang ni hi-gak di ligat ku.

<sup>28</sup> Et anin ni iddutan da-ak idan nunman ni buhul ku, et bendisyonan muwak kaya. Ey hedin mekihhanggaddan hi-gak, man babba-ingi mudda. Nem hedin hi-gak e bega-en mu ey man-am-amlenggak.

<sup>29</sup> Entan anhan tu iebulut ni ida mengapput hu buhul ku, nem ang-ang mu ma-lat mebabba-ingan idan ingganah.

<sup>30</sup> APU DIOS, pedenggedenggel kullid mika keemuemmungi hu nakka pansalamat niya nakka penaydayaw ni hi-gam,

<sup>31</sup> tep nandaddan kan kaumbaddang idan tuun nangkewetwet et ida kameihwang di buhul dan neminhed ni memettye ni hi-gada.

## 110

### *Ya a-appéh David*

<sup>1</sup> Kan APU DIOS nan Apuk ey “Yudung kad winannan ku ingganah apputen kuddan emin hu buhul mu.” \*

<sup>2</sup> Beken ni ebuh di Zion ni pan-ap-apuan mu, nem pambalin dakan APU DIOS ni apud bebley idan buhul mu.

<sup>3</sup> Yallin aggew ni pekihhanggaan muddan buhul mu ey manhehelluddalli tutu-um ni mansilbin hi-gam. Ey um-aliddalli dakel ni nangehiken ni lalakkín memaddang ni hi-gam ni mekiggubbat, et heniddalli delnun kakkabbuhhan e daka teggua neitnem di mamegan puyek.

<sup>4</sup> Hi APU DIOS ey peamnu tu hu insapatah tun hi-gam e kantuy “Pinutuk dakan mampeddin ingganah henin kinapadin Melkisedek.” †

<sup>5</sup> APU DIOS, ‡ wada hu Ap-apud winannan mu. Paka-apputen tuddalli hu papatul hedin medetteng hu aggew ni pengippeang-angan tun bunget tu.

<sup>6</sup> Ey kastiguen tuddalli katuutuud kebebbley et kepuppullay ali annel idan nangketey, tep apputen tuddallin emin papatul da.

<sup>7</sup> Hi-gatulli mengapput di emin ni gubat. Et anin ni di attun bebley ni lawwan tu et um-inum ni danum di hebwak da.

## 111

<sup>1</sup> Daydayaw tayu hi APU DIOS!

Mansalamattak nan APU DIOS di kakeemmungiddan tutu-u tun kamekangngu-unnud ni hi-gatu.

<sup>2</sup> Kakkayyaggud ni emin hu kapehding APU DIOS. Et humman hu, emin ida hu kamengu-unnud ni hi-gatu ey pinhed dan ewwatan ida humman ni tuka pehpehding.

<sup>3</sup> Humman idan tuka pehpehding hu kakei-ang-angin dayaw tu niya kasina-gey tu. Ey kamannananeng ni ingganah hu kakinayyaggud tu.

<sup>4</sup> Eleg tu pinhed ni tayu liwwanen ida humman ni kayyaggud ni tuka pehpehding ni hi-gatsun tuu.

Hi APU DIOS ey kabbabbal niya mahmek. <sup>5</sup> Tuka iddawat hu kenen idan kamengiddinnel ni hi-gatu niya eleg tu liwwana hu nekitbalan tun panyaggudan da.

<sup>6</sup> Impaenang-ang tu hu et-eteng ni kabaalan tun nampeneg-alan tuddan nambebley di Kanaan et ihullul tudda tuu tu.

<sup>7</sup> Neiptek niya limpiyuh ni emin hu tuka pehding niya emin hu tugun tu ey kameiddinnel.

<sup>8</sup> Humman idan tugun tu ey mannananeng ni makulug alin ingganah. Et humman hu, mahapul ni paka-u-unnudin tayu ma-lat limpiyuh hu pehpehding tayu.

<sup>9</sup> Impahding tu hu mahapul ni pehding tu ma-lat meihwang ida tutu-u tud neihbutan da. Ey mannananeng alin ingganah hu nekitbalan tuddan tuu tu. Kayyaggud ni peteg niya kamedeyyaw hu ngadan tu.

<sup>10</sup> Ya kapengu-unnudin APU DIOS hu kakenemnemi. Ey emin ida hu kamengu-unnud ni tugun tu ey inamta da hu kayyaggud ni pehding da.

Hi-gatu hu lebbeng tun daydayawen tayun ingganah!

\* **110:1** 110:1 Matthew 22:44 et ya 26:64, Mark 12:36 et ya 14:62, Luke 20:42-43 et ya 22:69, Acts 2:34-35 niya Hebrews 1:13. † **110:4** 110:4 Hebrews 5:6 et ya 7:17 niya 7:21. ‡ **110:5** 110:5 Ang-ang yu NET Bible.

**112**

1 Daydayaw tayu hi APU DIOS!

Kaman-am-amleng hu tuun tuka paka-u-unnuda hi APU DIOS. Em, kaman-am-amleng humman ni tuun mahlun mengu-unnud ni tugun tu.

2 Yaddalli u-ungngan nunyan tuu ey et-eteng ali kabaelan dad nambebleyan da niya mebedisyonan ida.

3 Ey umkedangyan humman ni tuu niya metbal alin ingganah tep ya kakinyaggud tu.

4 Ya kayyaggud ni tuu ey anin ni heni engeenget hu biyag tu et kamebnangi, tep kabbabbal, mahmek, niya kayyaggud tuka pehding.

5 Kayyaggud ni emin hu kameippahding ni tuun madewat, nelakah ni mampebenneh niya limpiyuh ni emin hu tuka pehding.

6 Humman ni tuu ey eleg meapput, anin ni lawah kameippenahding ni hi-gatu niya eleg ali liwwanan tutu-u hu kakinyaggud tu.

7 Eleg umtakut di hipan lawah ni idaddatteng dan hi-gatu, tep nehammad hu tuka pengullug niya tuka pengiddinnel nan APU DIOS.

8 Kamakaddinnel niya endi takut tu, tep inamta tu e meapput ida buhul tu.

9 Ey madewat ni peteg idan newetwet. Ya pambalanan nunman ni kayyaggud ni elaw tu ey mannananeng alin ingganah. \* Kalispituhaddan tutu-u niya kametbal.

10 Nem hedin yadda lawah ni tutu-u ey daka keemmehi hu henin nunman ni tuu, et daka panggeyeytetgetin bunget da, tep emin hu hipan daka nemnemneman pehding ey eleg um-amnu.

**113**

1 Daydayaw tayu hi APU DIOS!

Em, hi-gayuddan bega-en tu ey daydayaw yu hu ngadan tu.

2 Kayyaggud hedin medaydayaw hu ngadan tun ingganah.

3 Hi-gayuddan katuutuud kebebbebley, meippalpuud kasimmilin aggew ingganah di tuka kelinnugi ey daydayaw yu hu ngadan tu.

4 Tep hi-gatu hu AP-APU di kebebbebley. Ya dayaw tu ey heni lini-bahan tu hu kabunyan.

5 Endin hekey hu an mei-ingnggeh ni hi-gatu e AP-APU e Dios tayu. Immen di tuka pan-ap-apuid kabunyan,

6 nem kamanyu-ung et tuka uh-uhdungi hu kabunyan niya puyek.

7 Tuka baddangidda hu nangketwetwet ma-lat eleg ida mannananeng ni mewetwet.

8 Tudda kaihha-ad di eta-gey ni saad niya tudda kapambalin ni ap-apuddan tutu-u tu.

9 Tuka weddaa hu u-ungngan nebasin bii ma-lat man-an-anlad baley da.

Daydayaw tayu hi APU DIOS!

**114**

1 Yan eman ni inenamutan idan helag Israel ni neni-yanan dan Egypt e nekibebleyan da,

2 ey pinilin Apu Dios hu Judah ni penaydayawan dan hi-gatu niya pinili tu hu Israel ni pan-ap-apuan tu.

3 Inang-ang etan ni Madlang ni Baybay ida tutu-un Apu Dios ey imma-allaw ma-lat wada dellanen da. \* Hanniman dama etan Wangwang e Jordan e nealay nengintettedduk.

4 Hedin yadda dama duduntug ey henidda lakkitun gelding niya impah ni kalneroh ni kamampaypaytuk.

5 Hipa neipahding e Madlang ni Baybay et endi maptek ey kaimma-allaw? Ey kele dama nealay kanatduk e Wangwang e Jordan?

6 Niya hipa dama neipahding ni hi-gayun duduntug et heni kayu lakkitun gelding niya impah ni kalneroh ni kamampaypaytuk?

7 Hi-gam e puyek, panggeyeygey kad hinanggan Ap-apu e Dios nan Jacob.

8 Humman ni Dios hu nengipeukat ni dakel ni danum di batu et maweda hu kulukul niya lebing di gawwan desert.

**115**

1 APU DIOS, beken ni hi-gami hu medeyyaw, nem hi-gam ni ebuh tep eleg melullumman hu impeminhed nu niya kamannaneng hu muka pemaptek ni hi-gamin tuum.

2 Kele kan idan tutu-ud kebebbebley ey "Attu mewan hu Dios yu ey?"

3 Ya Dios tayu ey immen di kabunyan. Ey tuka pehding hu hipan pinhed tun pehding.

\* 112:9 112:9 Ang-ang yu 2 Corinthians 9:9. \* 114:3 114:3 Exodus 14:21

- 4 Nem hedin yadda dios da ey ya silber niya balituk hu nekapyaan da e kinapyan tuu.  
 5 Wada bungut da, nem eleg ida um-ehel niya wada mateda, nem eleg da han-ang-ang.  
 6 Wada tangila da, nem eleg da handengel niya wada eleng da, nem eleg da hanhamuy.  
 7 Wada ngamay da, nem eleg da hankapa, ey wada heli da, nem eleg ida umdalan. Ey anin ni buklew da et eleg umge-hem.  
 8 Emin ida hu kamengennapya niya kamengiddinnel idan nunman ni dios ey mambalin idan heniddan nunman ni dios dan daka kennapyyaa.  
 9 Et humman hu, hi-gatsun helag Israel ey pannananeng tayun idinel hi APU DIOS. Tep hi-gatu hu kaumbaddang niya kamengippaptek ni hi-gatsu e heni happiyaw tayu.  
 10 Emin kayun papaddin helag Aaron ey hi-gatu dama idinel yu. Tep hi-gatu hu kaumbaddang niya kamengippaptek ni hi-gatsu e heni happiyaw tayu.  
 11 Anin ni hi-gayuddan edum ni kamengu-unnud nan APU DIOS et hi-gatu idinel yu. Tep hi-gatu hu kaumbaddang niya kamengippaptek ni hi-gatsu e heni happiyaw tayu.  
 12 Nemnemen daitsun APU DIOS et bendisyonan daitsun helag Israel, anin idan edum tayun papaddi tun helag Aaron.  
 13 Bendisyonan tuddan emin hu kamengu-unnud ni hi-gatun newetwet niya kedangyan.  
 14 Ya kayyaggud ey bendisyonan daitsun APU DIOS et dumakkel itsu niya mangkehlag ida u-ungga tayu niya inap-apu tayu.  
 15 Em, ya kayyaggud ey bendisyonan daitsun APU DIOS e nanletun puyek niya kabunyan.  
 16 Lintu tu kabunyan ni panha-adan tu niya lintu tu dama eya puyek ni panha-adan tayun tuu.  
 17 Beken ni yadda etan nangketey hu mengidaydayaw nan APU DIOS, tep limmaw idad kalawwin netey.  
 18 Nem hi-gatsun mategu hu menaydayaw nan APU DIOS ni ingganah.  
 Daydayaw tayu hi APU DIOS!

## 116

- 1 Nakappinhed ku hi APU DIOS tep tuka dedngela hu asal ku.  
 2 Et humman hu, mandasallak ni hi-gatu ingganah kepappegan ni biyag ku.  
 3 Nemahhig hu takut ku, tep innang hu ketteyyan ku,  
 4 nem nandasallak nan APU DIOS et kangkuy "Ihwang muwak anhan e APU DIOS!"  
 5 Hi APU e Dios tayu ey kakkayyaggud, kabbabbal niya mahmek.  
 6 Tuka ippaptek ida hu tutu-un endin hekey kabaelan dan henin hi-gak, tep yan eman ni ngannganih ketteyyan ku ey binaddangan tuwak et meihwangngak.  
 7 Et humman hu, melinggeppak law tep ya kakinayyaggud nan APU DIOS ni hi-gak.  
 8 Neihwangngak di ketteyyan ku tep ya baddang tun hi-gak. Ingkal tu hu kaumhulun ni nakka lemyungi niya eleg tu iebulut ni da-ak apputen idan buhul ku.  
 9 Et yan nunya law ey ya nakka pengu-unnudin APU DIOS hu nakka pehpehding eyan ketagguk di puyek.  
 10-11 Yan eman ni nehalman hu nakka panligligasi, niya nemahhig hu takut ku ey impannananeng ku hu nakka pengullug, anin ni kangkuy "Endi law hu namnamah ku." Niya kangkuy "Mangkaitek idan emin hu tutu-u."  
 12 Hipa na-mu kayyaggud ni nak iddawat nan APU DIOS ni pansalamatan kun kayyaggud ni impahpahding tun hi-gak?  
 13 Ya kayyaggud ey nak i-appitan ni meinnum ni pengippeang-angan kun nakka pansalamatin hi-gatud nengihwangan tun hi-gak.  
 14 Niya nak peamnud hinanggaddan neamung ni tutu-u tu hu insapatah kun hi-gatu.  
 15 Hi APU DIOS ey nemahhig ni kaumlemyung hedin wada netey ni tuu tu, tep nebalol idan peteg ni hi-gatu.  
 16 APU DIOS, hi-gak hu bega-en mu. Nakka mansilbin hi-gam heni lan ina, tep inhewang muwak di kettayyak.  
 17 Man-appittak ni pansalamat kun hi-gam niya mandasallak ni hi-gam e APU DIOS.  
 18-19 Emin ida etan insapatah kun APU DIOS ni pehding ku ey peamnuk di hinaggaddan tutu-u tun kameemmuemmung di Tempol tud Jerusalem.  
 Daydayaw tayu hi APU DIOS!

## 117

- 1 Emin kayun katuutuud kebebbbley, ey daydayaw yu hi APU DIOS, \*  
 2 tep eleg melumman hu impeminhed tun hi-gatsu niya kamannananeng hu tuka pemaptek ni hi-gatsu.

\* 117:1 117:1 Romans 15:11



Daydayaw tayu hi APU DIOS!

## 118

<sup>1</sup> Pansalamat itsun APU DIOS tep ya kakinayyaggud tu. Ya impeminhed tu ey kamannananeng ni ingganah.

<sup>2</sup> Emin itsun helag Israel ey kan tayuy "Makulug ni endi pappeg tu hu impeminhed APU DIOS."

<sup>3</sup> Emin kayun padin APU DIOS ey kanyu damay "Makulug ni endi pappeg tu hu impeminhed tu."

<sup>4</sup> Emin kayun kamengu-unnud nan APU DIOS ey kanyu damay "Makulug ni endi pappeg tu hu impeminhed tu."

<sup>5</sup> Yan eman ni kamemunnunnu hu nemnem ku et mandasallak nan APU DIOS ey dingngel tu dasal ku et baddangan tuwak.

<sup>6</sup> Hi APU DIOS ey nanengtun tuwak kabaddangi. Et humman hu, anin ni hipa pehding idan tuun hi-gak et eleggak umtakut, tep hipa ni-man hu an pehding ni tuun ebuh ni hi-gak?

<sup>7</sup> Nakka medinnel ni baddangan tuwak nan APU DIOS et meapput ida hu kamekibbuhul ni hi-gak.

<sup>8-9</sup> Et humman hu, heballi hi APU DIOS hu iddinel tayu et beken ni ya tuu, anin ni ap-  
apudda.

<sup>10-11</sup> Hinelikuban da-ak idan buhul ku, nem inenapput kudda tep indinel ku hu et-eteng ni kabaelan nan APU DIOS.

<sup>12</sup> Kineya-munan da-ak idan nunman ni buhul ku e henidda putsukan, nem nelakah hu nengappatak ni hi-gada. Anggegannuy neendidda e henidda nalgab ni gulun tep indinel ku hu et-eteng ni kabaelan nan APU DIOS.

<sup>13</sup> Nemahhig hu impahding dan hi-gak et nakka mangkeapput, nem binaddangan tuwak nan APU DIOS.

<sup>14</sup> Hi-gatu hu kakelpuin elet ku niya hi-gatu kamengidwat ni kabaelan ku. \* Hi-gatu hu kamengihwang ni hi-gak.

<sup>15-16</sup> Kamedngel hu a-appeh ni kapan-an-anlaidan neamung ni tutu-un kamengu-unnud nan APU DIOS. Daka i-ena-appeh e kanday "Hi APU DIOS e et-eteng kabaelan tu hu nengipengapput ni hi-gatsu."

<sup>17</sup> Hedin hi-gak, man eggak ni mettey, nem mambi-biyaggak ma-lat wada inna-nu tun pengippeennamtaan kun impahpading nan APU DIOS.

<sup>18</sup> Nehalman hu impengastigu tun hi-gak, nem eleg tu iebulut ni nak mettey.

<sup>19</sup> Ibeghul yu hu habyen etan ni Tempol ma-lat humgeppak ni an mansalamat nan APU DIOS.

<sup>20</sup> Humman ni Tempol tu ey ebuh ida hu kamengu-unnud ni hi-gatun dammutun umhehgep diman.

<sup>21</sup> Nakka mansalamat ni hi-gam e APU DIOS ni nangngelan mun nampehemmehem-mekan kun hi-gam, et adyah ni binaddangan muwak et ihwang muwak.

<sup>22-23</sup> Ya etan batun binelaw idan kamengapyan baley ey humman anhan law hu impambalin APU DIOS ni kekakkayyaggudan ni meikkapyad baley. † Ey kayyaggud numan humman ni impahding tu.

<sup>24</sup> Huyya hu aggew ni pengippeang-angan APU DIOS ni nengapputan tu. Et humman hu, emin itu ey pan-an-anla itsun nunyan aggew.

<sup>25</sup> Ihwang dakemi e APU DIOS, niya bendisyonim ni emin hu hipan pehding mi.

<sup>26</sup> Kamedeyyaw etan itu-dak alin APU DIOS! ‡ Em, emin kamin wada eyad Tempol APU DIOS ey daydayawen dakan itu-dak tu.

<sup>27</sup> Hi APU tayu ey hi-gatu hu Dios tayun nengipenahding ni dakel ni panyagguddan tayu. Tenged itsun bulung ni palmah et mebenbenteg itsun manliklikweh di altar nan APU DIOS.

<sup>28</sup> Hi-gam hu Dios ku, et mukun mansalamattak ni hi-gam niya daydayawen daka.

<sup>29</sup> Pansalamat itsun APU DIOS tep ya kakinayyaggud tu. Ya impeminhed tu ey kamannananeng ni ingganah.

\* **118:14** 118:14 Yadda edum ni nelaing ni ehel ni Hebrew ey kanday ya keibbellinan ni "hi-gatu kamengidwat ni kabaelan ku" ey "hi-gatu hu ia-appeh ku." † **118:22-23** 118:22-23 Matthew 21:42, Mark 12:10, Luke 20:17, Acts 4:11, Eph. 2:20 et ya 1 Peter 2:7. ‡ **118:26** 118:26 Matthew 21:9, Mark 11:9 et ya Luke 19:38.

## 119

- <sup>1</sup> Kaman-am-amleng ida hu tuun kayyaggud hu daka pehpehding e daka u-unnuda hu tugun APU DIOS.
- <sup>2</sup> Ey man-am-amleng ida hu tuun kamekangngu-unnud ni tugun tu niya hi-gatun ebuh hu daka heppulad biyag da.
- <sup>3</sup> Humman idan tuu ey eleg da pehding hu lawah, tep ya pinhed APU DIOS hu daka pehding.
- <sup>4</sup> Indawat mu e APU DIOS hu tugun mun hi-gami et ehlen mu e mahapul ni pannananeng min u-unnuden ida humman.
- <sup>5-6</sup> Ya ngu pinhed ku ey pannananeng kun enu-unnuden humman idan tugun mu ma-lat endilli nak kebe-ingan.
- <sup>7</sup> Hedin me-duman hu pengewwat kuddan nunman ni kayyaggud ni tugun mu ey nema-man kayyaggud hu nemnem kun menaydayaw ni hi-gam.
- <sup>8</sup> APU DIOS, u-unnuden kun emin hu tugun mu, et humman hu entan anhan tuwak eway.
- <sup>9</sup> Hipa hu mahapul ni pehding idan kamampenikken ma-lat eleg ida manliwat? Mahapul ni u-unnuden da hu tugun mu, e APU DIOS.
- <sup>10</sup> APU DIOS, nakka pehding ni emin kabaelan kun mengu-unnud ni emin ni pinhed mu, nem mahapul ni baddangan muwak ma-lat eggak ipengil ida hu tugun mu.
- <sup>11</sup> Nakka nenemneman emin hu tugun mu ma-lat eggak manliwat ni hi-gam.
- <sup>12</sup> Daka kadaydayawa e APU DIOS. Ituttuddum anhan ni hi-gak ida elaw mu.
- <sup>13</sup> Pennidpidwaen kun e-helen idan emin hu tugun mun indawat mun hi-gami. \*
- <sup>14</sup> E-etteng hu amleng kun mengu-unnud idan tugun mu nem ya umkedangyan.
- <sup>15</sup> Nakka nenemnema hu tugun mu niya nakka eddaeddala hu elaw mu.
- <sup>16</sup> Nakka man-am-amleng ni mengu-unnud idan tugun mu. Et humman hu, nakka hellipat-i ma-lat eggak ida liwwan.
- <sup>17</sup> Ya kayyaggud anhan hu ipahding mun hi-gak e bega-en mu ma-lat mambi-biyaggak niya ma-lat u-unnuden kudda tugun mu.
- <sup>18</sup> Baddangi muwak et heni dedyaten mu hu matak ma-lat awatan kudda hu kayyaggud ni peteg ni kaeddalad tugun mu.
- <sup>19</sup> Nekemtang ni ebuh hu keittu-uan ku eyad puyek. Et humman hu, pinhed kun peamtam ni hi-gak ni emin hu tugun mu, tep humman ida hu mengittuddum pehding kun mambiyag.
- <sup>20</sup> Ihik kun peteg ni amtaen ni emin hu tugun mu ma-lat u-unnuden kudda.
- <sup>21</sup> Muka ibbunget ida hu kamampahhiyyan neidutan ni tutu-un eleg mengu-unnud ni tugun mu.
- <sup>22</sup> Entan anhan tu iebulut ni da-ak pippihulen niya da-ak pennadngelan ni hi-gada, tep inenu-unnud ku ngun emin hu tugun mu.
- <sup>23</sup> Anin idan aap-apu et daka ihhenumangan hu lawah ni pehding dan hi-gak, nem anin ni hanniman hu daka pehpehding et nanengtun ya tugun mu hu nakka eddaeddala.
- <sup>24</sup> Nakka um-amleng ni mengu-unnud idan tugun mu, tep humman ida hu kamenuggun ni hi-gak.
- <sup>25</sup> Nakaddismayahhak ni peteg et nakka mambakbaktad di dep-ul. Peyaggud muwak anhan tep humman hu inhel mun pehding mu.
- <sup>26</sup> Inhel kun emin ni hi-gam hu hipan impahpahding ku ey dingngel mu et humangen mu hu dasal ku. Et humman hu, ituttuddum anhan ni hi-gak hu pinhed mun pehding ku.
- <sup>27</sup> Baddangi muwak ma-lat awatan kudda hu keibbellinan idan tugun mu et nemnem-nemen kudda hu impenahding mun kaketngain tuu.
- <sup>28</sup> Nemahhig hu lemyung ku. Et humman hu, petuled muwak anhan, tep humman dedan hu inhel mun pehding mu.
- <sup>29</sup> Baddangi muwak ma-lat beken ni yadda etan panlawahan hu nak ippahding. Ey peang-ang mu hu binabbal mun hi-gak et ituttuddum hu tugun mun pinhed mun u-unnuden ku.
- <sup>30</sup> Nakka pehebbalin mengu-unnud ni hi-gam niya ingkahahey ku nemnem kun mengippahding idan tugun mu.
- <sup>31</sup> Eggak iwwalleng hu tugun mu. Et humman hu, ang-ang mu anhan ma-lat eggak mebabba-ingan.

\* 119:13 119:13 Ya hakey ni keibbellinan tu ey "Peenamtak ni emin hu tugun mun indawat mun hi-gami."

- 32 Nakka manggagayan mengu-unnud idan tugun mu, tep inamtak e e-dumam hu nakka pan-ewwat.
- 33 APU DIOS, itudum ni hi-gak hu keibbellinan idan emin ni tugun mu, ma-lat humman ida hu u-unnuden kun ingganah.
- 34 Baddangi muwak ma-lat paka-awatan kudda humman ni tugun mu, et peheballik ni mengu-unnud ni emin idan nunman.
- 35 Em, baddangi muwak ma-lat pannananeng kun u-unnuden ida tugun mu, tep humman ida kamengippeamleng ni hi-gak.
- 36 Idwasi muwak ni impeminhed kun mengu-unnud idan tugun mu, et beken ni ya keddangyanan ku hu nak nenemnemen.
- 37 Baddangi muwak ma-lat beken ni yadda etan endi silbitu hu nak gagangaman. Peyaggud muwak anhan tep humman dedan hu inhel mun pehding mu.
- 38 Em, peammum ni hi-gak e bega-en mu hu inhel mun pehding muddan kamengu-unnud ni hi-gam.
- 39 Ekal mu anhan hu nakka keibabbaingi, tep humman hu nakka tattakusi. Inamtak e kayyaggud ni peteg ida tugun mu, tep mebaddangannak hedin u-unnuden kudda.
- 40 Pinhed kun peteg ni u-unnuden ni emin hu tugun mu. Ey baddangi muwak ma-lat maituu-ak tep ya kakinayyaggud mu.
- 41 APU DIOS, peang-ang mu anhan ni hi-gak hu eleg melumman ni impeminhed mu niya ihwang muwak anhan, tep humman dedan hu inhel mun pehding mu, <sup>42</sup> ma-lat wada penummang kuddan kamemennadngel ni hi-gak, tep nakka medinnel ni hipan muka e-hela.
- 43 Baddangi muwak ma-lat ya makulug hu e-helen kun kenayun, tep nakka medinnel e kayyaggud ni emin hu pambalinan idan tugun mu.
- 44 Pannananeng kun ingganah ni u-unnuden ida hu tugun mu.
- 45 Nakka melinggep ni peteg ni mambi-biyag, tep nakka peka-u-unnuda hu tugun mu.
- 46 Eleggak umbaing ni an mengippeennamtaddan papatul ni tugun mu.
- 47 Tep pinpinhed kudda hu tugun mu, et humman hu, nakka um-amleng ni mengu-unnud ni hipan muka ittugun.
- 48 Em, pinpinhed ku niya nakka lispituha hu tugun mu, et mukun humman ida nakka nenemnema.
- 49 APU, entan anhan tu liwwan hu impakulug mun panyaggudan ku e bega-en mu, tep humman hu kamengidwat ni namnamah ku.
- 50 Ey humman ni kammun panyaggudan ku hu kamengippelinggep ni hi-gak di hipan nakka panliggasi.
- 51 Nemahhig kapemippihul idan kamampahhiyan tutu-un hi-gak, nem nanengtun ya tugun mu hu nakka u-unnuda.
- 52 APU DIOS, nanengtun nakka nemnemnemaddan emin hu tugun mu lan nunman, tep humman ida kaum-idwat ni linggep di biyag ku.
- 53 Hedin nakka ang-ang-angadda hu lawah ni tutu-un daka kehingga hu tugun mu, man kaum-ali hu nemahhig ni bunget ku.
- 54 Yadda meippanggep ni tugun mu hu nakka i-ena-appah eyan nekemtang ni ebuh ni keittu-uan ku eyad puyek.
- 55 APU DIOS, anin ni yan hileng et hi-gam nakka nemnemnema, niya nakka nemnemnem-madda hu tugun mu.
- 56 Ya nakka pengu-unnudin tugun mu hu kamengippeamleng ni hi-gak.
- 57 Hi-gam ni ebuh e APU DIOS hu mahapul ku. Ey impakulug kun hi-gam e u-unnuden ku hu tugun mu.
- 58 Ya nakka ibbagan hi-gam ey hemek muwak anhan, tep huyya dedan hu impakulug mun nunman ni pehding mu.
- 59 Ninemnemnem ku hu impahpahding kud biyag ku et peheballik ni u-unnuden ida tugun mu.
- 60 Em, enggak a-ayyapawa, nem pepu-ut kun mengu-unnud idan nunman ni tugun mu.
- 61 Heni indadaddan idan lawah ni tutu-u hu bitun keknaan ku, nem nanengtun ya tugun mu hu u-unnuden ku.
- 62 Anin ni gawan hileng et nakka umbangun ni menaydayaw ni hi-gam, tep kayyaggud ni peteg ida tugun mu.
- 63 Yadda neminshed ni mengippeamleng ni hi-gam niya kamengu-unnud ni tugun mu hu nakka ibbilang ni gagayyum ku.
- 64 APU DIOS, ituttuddum ni hi-gak ni emin humman idan tugun mu, tep kameang-ang hu kamannananeng ni impeminhed mu eyad puyek, anin di attu.

- 65 APU DIOS, kayyaggud kan hi-gak e bega-en mu, tep humman dedan inhel mun hi-gak ni pehding mu.
- 66 Ituttuddum ni hi-gak ida hu mahapul kun amtaen, ey pambalin muwak ni nelaini niya nenemneman tep nakka medinnel idan tugun mu.
- 67 Kinastigu muwak ni nunman tep ya lawah ni impenahding ku, nem yan nunya ey ya tugun mu hu nakka u-unnuda.
- 68 Ituttuddum ni emin hu meippanggep ni tugun mu, tep kayyaggud ka niya kabbabbal ka e APU DIOS.
- 69 Yadda tuun kamampahhiyya ey ida kamengapkapyan itek ni meippanggep ni hi-gak, nem ya kakulugan tu ey nakka paka-u-unnuda hu tugun mu.
- 70 Humman idan tutu-u ey kulang hu daka pengewwat, nem hedin hi-gak ngu, man nakka um-amleng ni mengu-unnud idan nunman ni tugun mu.
- 71 Kayyaggud hu nambalbalinan tu hu nanlelehanan kun impengastigum ni hi-gak, tep na-duman hu inedal kun tugun mu.
- 72 Nebalbalol ni hi-gak hu tugun mu nem ya kalibulibun balituk niya silber.
- 73 Hi-gam hu namyuh ni hi-gak. Et humman hu, baddangi muwak ni mengewwat idan tugun mu ma-lat humman ida u-unnuden ku.
- 74 Emin ida hu kamekangngu-unnud ni hi-gam ey um-amleng idan menang-ang ni hi-gak, tep nakka medinnel e peannum hu impakulug mun pehding mu.
- 75 APU DIOS, inamtak e kayyaggud ni emin hu muka nemneman pehding ni hi-gak, anin ni ya nengastiguan muwak.
- 76 Et humman hu, elubyag muwak anhan ni impeminhed mun eleg mepappeg, tep humman dedan hu inhel mun pehding mun hi-gak e bega-en mu.
- 77 Hemek muwak anhan ma-lat mambi-biyaggak ni-, tep nak ngu kaum-amleng ni mengu-unud idan tugun mu.
- 78 Ya pinhed kun meippahding idan kamampahhiya ey mebabba-ingan ida tep yadda itek ni daka pebehul ni hi-gak. Nem hedin hi-gak ngu ey eleggak issiked ni mangeddaeddal idan tugun mu.
- 79 Ya pinhed ku ey emin ida hu kamenaydayaw ni hi-gam ey umhayukup idan hi-gak ma-lat adalen dan mengu-unnud ni tugun mu.
- 80 Ya- et ngu pinhed ku ey paka-u-unnuden kun emin ida hu tugun mu ma-lat endi nak kebe-ingan.
- 81 APU DIOS, nakka um-aabtun peteg ni pengihwangan mun hi-gak, nem nakka iddinel hu inhel mu.
- 82 Nea-atu-ak law ni menehhegged ni pengippeamnuan mun impakulug mu. Kaw pigantu pemaddangan mun hi-gak?
- 83 Endi silbik e heni-ak kimmutyagung ni katat ni kapengihhudduin meinnum. Nem anin ni hanniman et nanengtu ngun yadda tugun mu hu nakka u-unnuda.
- 84 Apu, kaw ayepaw pay hu penehheggedan kun pemaddangan muwak? Pigantu pengastiguan muddan kamengappelilligat ni hi-gak?
- 85 Yadda tutu-un kamampahhiyyan kahing ni tugun mu ey henidda nengu-kun bitun keknaan ku.
- 86 Kameiddinnel ni emin hu tugun mu. Baddangi muwak anhan et ihwang muwak idad tutu-un kamengappelilligat ni hi-gak ni endi himmulun.
- 87 Innang hu pemetteyan dan hi-gak, nem eggak iwalleng hu tugun mu.
- 88 Ihwang muwak anhan et eleggak matey ma-lat pengipeang-angam ni eleg melulluman ni impeminhed mu et u-unnuden ku hu tugun mu e APU.
- 89 APU DIOS, mannananeng alin ingganah hu ehel mu, anin ni yad kabunyan.
- 90 Kamannanang hu muka pemaptekan idan kamanhuluhulul ni helag ni tuu, henin kapannanangenin puyek di sinuunan tu.
- 91 Ingganah nunya ey emin hu hipan wada eyad puyek ey nannaneng ida, tep neipuan di tugun mu. Em, emin hu hipan wada eyad puyek ey kamansilbin hi-gam.
- 92 Gullat ni endi hu tugun mun kamengippeamleng ni hi-gak et wadan neteyyak la dedanggu, tep nemahhig hu nakka panlelehanid ligat ku.
- 93 Eleggak iwalleng hu tugun mu, tep humman hu gaputun impannaneng muwak ni mategu.
- 94 Apu, ihwang muwak anhan, tep tuu muwak niya inenu-unnud kudda tugun mu.
- 95 Da-ak kaan bebbetakaddan lawah ni tutu-u tep pinhed da-ak ni petteyan, nem anin ni hanniman et nanengtu ya tugun mu hu nakka nenemnema.
- 96 Inamtak e emin ey wada hu tuka kepappegi. Nem ya tugun mu ey endi kulang tu, tep kakkayyaggud ni peteg.

- 97 APU DIOS, nakappinshed ku hu tugun mu et mukun kewa-wa-wa ey humman ida hu nakka nenemnema.
- 98 Em, nakka nenemneman ingganah hu tugun mu. Et humman hu, nelalla-ingngak nem yadda buhul ku.
- 99 E-etteng hu nakka pengewwat ni elaw mu nem yadda kamantuttuddun hi-gak, tep kewa-wa-wa ey nakka eddaeddala humman idan tugun mu.
- 100 Nenemnemmannak nem yadda nangkea-amma tep ya nakka pengu-unnudin tugun mu.
- 101 Inwalleng kun emin hu hipan lawah ni elaw, tep pinhed kun u-unnuden ida hu tugun mu.
- 102 Eleggak ipngil hu hipan intugun mu, tep hi-gam ni mismuh hu nenuttuddun hi-gak.
- 103 Gullat ni kamekkan hu tugun mu et melullummi-ih nem ya putsukan, tep kakkayyaggud ni peteg.
- 104 Nenemnemmannak law tep ya nakka pengu-unnudin tugun mu. Et humman hu, angebe-hel kudda law hu lawah ni elaw.
- 105 Ya tugun mu ey kamei-ellig di dilag e tuka bebnangi hu dalan ku, tep tuka ittudu hu kayyaggud ni pehding.
- 106 Pannananeng kun peamnu hu insapatah ku e u-unnuden kudda humman ni tugun mu, tep kayyaggud ida.
- 107 APU DIOS, nemahhig eya nakka panlelehhani. Baddangi muwak anhan et eleggak matey, tep humman dedan hu inhel mun pehding mu.
- 108 Abulut mu anhan huuyan dasal kun nakka pansalamatin hi-gam niya itudum ni hi-gak hu tugun mu.
- 109 Anin ni umhulun ni ketteyyan ku et pannananeng kun u-unnuden ida tugun mu.
- 110 Heni indadaddan idan lawah ni tutu-u hu bitun keknaan ku. Nem anin ni hanniman et eggak iwalleng ida tugun mu.
- 111 Nakka ibbilang ida tugun mun nebalol ni tenged kun mannananeng ni ingganah, tep humman ida kamengippeamleng ni hi-gak.
- 112 Insapatah kud annel ku e u-unnuden kun ingganah hu tugun mu, anin ni hipa mekapkapa.
- 113 Angebe-hel kudda hu tutu-un kamandinwan mengu-unnud ni hi-gam, tep hedini hi-gak, man nakappinshed kudda tugun mu.
- 114 Hi-gam hu nakka keihhikkugi niya heni ka happiyaw ku, et mukun nakka iddinel hu ehel mu.
- 115 Pampenga-allaw kayuddan lawah ni tutu-u, tep hedini hi-gak ngu, man yadda tugun ni Dios ku hu u-unnuden ku.
- 116 APU DIOS, idwasi muwak ni elet ku ma-lat tumegu-ak, tep humman dedan inhel mun hi-gak ni pehding mu. Entan anhan tu endi humman ni nakka hehhegeda.
- 117 Ipapatek muwak anhan ma-lat meihwangngak di lawah ni meippahding ni hi-gak niya ma-lat wada inna-nuk ni mengu-unnud ni ingganah idan tugun mu.
- 118 Eleg mudda ebbuluta hu tutu-un kamengiwalleng idan tugun mu. Endi silbin hauhaul ni daka pehpending.
- 119 Ya muka pengibbilang idan lawah ni tutu-u ey henidda lugit ni kai-ibheng. Et mukun hedini hi-gak ngu, man ya tugun mu hu pinpinhed kun u-unnuden.
- 120 Nakka umgeygey ni takut kun hi-gam e Apu, nema-ma hedini nakka nemnemnema hu muka penuwet ni tuu.
- 121 Neiptek niya kayaggud hu impahpahding ku. Et humman hu, entan tuwak anhan i-kud idan buhul ku et beken ni hi-gada hu ngenamung ni pinhed dan pehding ni hi-gak.
- 122 Ang-ang mu anhan e Apu et idwat mu hu panyaggudan ku e bega-en mu, niya entan tu iebulut ni nak panlelehhanan hu kapehpending idan kamampahhiya.
- 123 Neayepaw law ni peteg hu nenehhegedan kun pengippeamnuan mun inhel mun nunman ni pengihwangan mun hi-gak.
- 124 Ipahding mun hi-gak hu pinhed mun pehding ni neipuun di impeminhed mun eleg melullumman niya ittuttuddum ni hi-gak ida tugun mu.
- 125 Bega-en muwak e Apu, et humman hu, baddangi muwak anhan ma-lat awatan kudda hu muka ittuttuddu.
- 126 APU DIOS, yan nunya hu pangipahdingim ni pinhed mun pehding, tep eleg u-unnudan tutu-u hu tugun mu.
- 127 Pinpinhed kun peteg hu tugun mu nem ya nemahmah ni balituk.
- 128 Inamtak e kakkayyaggud ni emin hu tugun mu. Et humman hu, angebe-hel kudda hu lawah ni elaw.

- 129 Em, kakkayyaggud ida tugun mu et mukun nak ida kapaka-u-unnudan emin.
- 130 Ya kapengamtain tugun mu hu um-idwat ni kapengewwat e heni tuka bebnangi nemnem ni tuu. Ey kamambalin ni nenemneman hu tuun kulang inamta tu.
- 131 Et humman hu, hedin hi-gak, man nakappinshed kun peteg ni mengamtan tugun mu henin nakka peneppulin danum hedin naka-wewwak.
- 132 Wingi muwak anhan et hemeken muwak, tep humman dedan hu muka pehding idan neminshed ni hi-gam.
- 133 Peamnum anhan hu inhel mun hi-gak et baddangan muwak ma-lat beken ni ya lawah hu nak pehpehding.
- 134 Ey baddangi muwak et meihwanggak di kapehpehding idan kamengippeliligat ni hi-gak ma-lat u-unnuden ku tugun mu.
- 135 Peang-ang mu hu binabbal mun hi-gak e bega-en mu niya ittutduddum ni hi-gak ida tugun mu.
- 136 Nakka i-anteng hu nangih tep ya eleg pengu-unnudiddan tutu-un tugun mu.
- 137 APU DIOS, kakkayyaggud ka niya neiptek ida tugun mu.
- 138 Emin hu tugun mu ey kayyaggud ni peteg. Neiptek ida niya ida kameiddinnel.
- 139 Heni apuy ni kamantettebbel hu bunget kuddan buhul ku, tep daka kehingga tugun mu.
- 140 Muka peamnun emin hu impakulug mu, et mukun nakappinshed kuddan emin.
- 141 Endi bilang kun tuu niya da-ak kapippihuladdan edum ku, nem eggak iwwalleng ida tugun mu.
- 142 Ya kakinayyaggud mu ey kamannananeng ni ingganah niya makulug idan emin hu tugun mu.
- 143 Dakel hu ligat kun kakemunnumunnuin nemnem ku, nem da-ak kapeamleng idan tugun mu.
- 144 Limpiyuh ni emin hu tugun mu. Et humman hu, baddangi muwak anhan ni mengewwat idan nunman ma-lat wada inna-nuk ni mekibi-biyag.
- 145 APU DIOS, nakka mampehemhememek ni mandasal ni hi-gam. Humang muwak anhan ma-lat peka-u-unnudek ida tugun mu.
- 146 Em, nakka mandasal ni hi-gam ma-lat ihwang muwak, et wada inna-nu tun pengu-unnudan kuddan tugun mu.
- 147 Nakka umbangun ni dagah et mandasallak ma-lat mampebaddanggak ni hi-gam, tep nakka medinnel ni ehel mu.
- 148 Ey nakka umtukal ni hileng, tep nakka nenemnema hu meippanggep idan tugun mu.
- 149 APU DIOS, peang-ang mu hu eleg melullumman ni impeminshed mun hi-gak et hemeken muwak ma-lat eleggak ni matey.
- 150 Ida kamangkeihnup di kad-an ku hu kamengippeliligat ni hi-gak. Humman idan tutu-u ey eleg da u-unnuda tugun mu.
- 151 Nem hi-gam e APU DIOS ey wada kad kad-an ku niya kameiddinnel ni emin hu muka ittugun.
- 152 Inedal ku dedangngun nunman e kamannananeng ida tugun mun indawat mu.
- 153 APU, ang-ang mu anhan et baddangan muwak ma-lat ihwang muwak eyad nakka panlelehani, tep impannaneng kun inu-unnud ida tugun mu.
- 154 Iehneng muwak anhan ma-lat ihwang muwak di lawah, tep humman hu inhel mun pehding mu.
- 155 Eleg ida meihwang hu lawah ni tutu-u, tep eleg da u-unnuda hu tugun mu.
- 156 Nem hi-gam e APU DIOS ey eleg melumman hu impeminshed mu. Et humman hu, hemeke muwak anhan et ihwang muwak.
- 157 Nakka panlelehani hu kapehpehding idan dakel ni buhul ku, nem nakka pannananeng ni u-unnuden ida tugun mu.
- 158 Angebe-hel kudda humman ni tutu-un nengiwalleng ni hi-gam, tep eleg da u-unnuda hu muka ittugun.
- 159 APU DIOS, nakappinshed kudda tugun mu. Ihwang muwak anhan, tep eleg melullumman hu impeminshed mu.
- 160 Emin hu muka e-hela ey makulug ida niya mannananeng alin ingganah ida humman ni limpiyuh ni tugun mu.
- 161 Da-ak katenattakutaddan tutu-un nangketa-gey saad da, anin ni endi nambahulan ku, nem eggak umtakut et nanengtun ya tugun mu hu nakka u-unnuda.
- 162 Nakka man-am-amleng e heni-ak etan ni tuun himmamak ni balituk, tep yadda inhel mun panyaggudan ku.
- 163 Angebe-hel kun peteg hu hipan itek, nem pinshed kun u-unnuden hu tugun mu.

- 164 Mangkeppitun han-aggew hu penaydayawan kun hi-gam tep ya kakinayyaggud idan tugun mu.
- 165 Yadda tutu-un ya tugun mu hu pinhed dan u-unnuden ey umlinggep ida niya endi an umhulun ni da kehe-ulan ni mengippahding ni lawah.
- 166 APU DIOS, nakka hehhegeda hu pengihwangan mun hi-gak di lawah tep humman hu nak nengenu-unnudan idan tugun mu.
- 167 Nakka paka-u-unnuda hu tugun mu niya nakappinshed kudda.
- 168 Em, nakka u-unnudan emin hu tugun mu tep inamtam ni emin hu nakka pehpehding.
- 169-170 APU DIOS, dengel mu anhan eya nakka pampehemmehemmekin hi-gam et ihwang muwak niya baddangi muwak ni mengewwat ni tugun mu, tep humman dedan hu inhel mun pehding mu.
- 171 Hi-gam hu daydayawen kun ingganah, tep muka ituttuddun hi-gak ida tugun mu.
- 172 Ey i-ena-appesh kudda hu meippanggep idan nunman ni tugun mu, tep limpiyuh ni emin hu muka ittugun.
- 173 Pandadaddan ka anhan ni memaddang ni hi-gak, tep inenu-unnud kudda hu tugun mu.
- 174 APU DIOS, nakka hehhegeda hu pengihwangan mun hi-gak di lawah, tep ya nakka pengu-unnudin tugun mu hu kamengippeamleng ni hi-gak.
- 175 Iebulut mu anhan et mambi-biyaggak ma-lat wada inna-nuk ni menaydayaw ni hi-gam. Ey pinhed kun baddangan da-ak idan tugun mun mengu-unnud ni hi-gam.
- 176 Heni-ak netalak ni kalneroh. Et humman hu, ali ka anhan ni an menemmak ni hi-gak e bega-en mu yaggud impannananeng kun inu-unnud ida tugun mu.

## 120

### *Ya a-appesh ni pantetyedan di Jerusalem*

- <sup>1</sup> Nakka meligligasi et mampehemmehemmekkak nan APU DIOS di dasal ku ey dingngel tu dasal ku.
- <sup>2</sup> Kangkud dasal kuy "APU DIOS, ihwang muwak anhan idad mangkaitek niyaddad mangkaheul ni tutu-u."
- <sup>3</sup> Hi-gayuddan mangkaitek, ey nanna-ud ni nemahhig ali hu pengastigun APU DIOS ni hi-gayu.
- <sup>4</sup> Em, nemahhig ali hu pengastigu tun hi-gayu e heni dakeyulli pennaen niya heni dakeyulli ittangtang di ngalab.
- <sup>5</sup> Nakka manligligat ni mekibbebley ida eyan mangkabunget ni tutu-u e heni-ak nekibebley di Meshek winu yad Kedar.
- <sup>6</sup> Impeinglay kun mekihahha-ad di hanneyaddan tutu-un ya pambubuhhihian hu pinhed da.
- <sup>7</sup> Hedin nakka pan-e-hela hu meippanggep ni linggepan ey daka pehebballi hu mekiggubbat.

## 121

### *Ya a-appesh ni pantetyedan di Jerusalem*

- <sup>1</sup> Intangaw kuddad duntug ey kangkuy "Attu na-mu kelpuan ni umbaddang ni hi-gak?"
- <sup>2</sup> Nem inamtak e hi APU DIOS, e nanletun puyek niya kabunyan, hu kaumbaddang ni hi-gak.
- <sup>3-4</sup> Anin ni hi-gayu et baddangan dakeyun hi-gatu et maka-ippaptek kayu. Tep eleg meuggip hi APU DIOS niya eleg meblay ni mengi-eddug ni hi-gatsun helag Israel.
- <sup>5</sup> Hi APU DIOS hu kamenguh-uhdung ni hi-gatsu niya hi-gatu hu kamengippaptek ni hi-gatsu, anin ni attu kad-an tayu,
- <sup>6</sup> ma-lat endi an meippahding ni lawah ni hi-gatsun hileng ni yan kawwalwal.
- <sup>7</sup> Hi-gatu hu kamengihwang ni hi-gatsud lawah ni kamekapkapyu, tep hi-gatu kamenettengged ni biyag tayu.
- <sup>8</sup> Em, anin ni attu lawwan tayu et ippaptek daitsun hi-gatun ingganah.

## 122

### *Ya a-appesh nan David ni pantetyedan di Jerusalem*

- <sup>1</sup> Imamlengngak ni nanghelan dan hi-gak e kanday "Elaw itsud baley nan APU DIOS."
- <sup>2</sup> Et deh e immali kami et kami kaman-eh-ehneng eyad eheb ni Jerusalem.
- <sup>3</sup> Huyyan bebley di Jerusalem ey neiyayyaggud hu nengapya da niya nanhehennup hu baballey.

<sup>4</sup> Ida kaum-alidyan emin hu helag Israel ni tutu-un APU DIOS ni menaydayaw\* ni hi-gatu, tep humman hu intugun tun pehding da.

<sup>5</sup> Ey yadya kapanha-adiddan kamanhuluhulul ni patul ni helag David ni menuwet idan tutu-u dan helag Israel.

<sup>6</sup> Idasali tayu hu Jerusalem ma-lat luminggep. Ya pinhed ku ey emin ida hu neminhed ni nunyan bebley ey umyaggud hu biyag da.

<sup>7</sup> Em, ya kayyaggud ey umlinggep hu Jerusalem, anin idad baley ni patul.

<sup>8</sup> Ey gapuh idan aaggik niya gagayyum ku ey kangkuy "Linggep ka e bebley di Jerusalem."

<sup>9</sup> Ey gapuh ni baley ni AP-APU e Dios tayu ey nakka iddasal e ya kayyaggud hu mekapkapyad Jerusalem.

## 123

*Ya a-appeh ni pantetyedan di Jerusalem*

<sup>1</sup> APU DIOS e Ap-apud kabunyan, hi-gam nakka tengngawan pambeggaan ni baddang.  
<sup>2</sup> Hi-gam e AP-APU e Dios mi hu mika hehhegedan umhemek ni hi-gami, henin kapehding ni hakey ni bega-en e tuka hellipat-i hu hipan e-helen ni apu tu.

<sup>3</sup> Hemek dakemi e APU DIOS, tep nemahhig ni intemeg mi hu pihupihul idan buhul min hi-gami.

<sup>4</sup> Em, nehingla kami law ni pihupihul idan manghay niya kamampahhiyan tutu-un angebe-hel dakemi.

## 124

*Ya a-appeh nan David ni pantetyedan di Jerusalem*

<sup>1-3</sup> Mahapul ni ebbuluten tayun helag Israel e gullat ni eleg daitsu baddangan APU DIOS eman ni nengubatan daitsuddan buhul tayu, et nanna-ud ni pintey daitsun emin. Tep nemahhig hu bunget dan hi-gatsu,

<sup>4-5</sup> et heni daitsu in-anud ni nedakkel ni danum di wangwang et malsing itsu.

<sup>6</sup> Et humman hu, pansalamat itsun APU DIOS, tep eleg tu iebulut ni petteyen daitsun buhul tayu.

<sup>7</sup> Heni itsu sisit ni naknad lingen, nem bimmesik itsu tep nebahbah hu lingen idan buhul tayu.

<sup>8</sup> Hi APU DIOS e nanletun puyek niya kabunyan hu kamemaddang ni hi-gatsu.

## 125

*Ya a-appeh ni pantetyedan di Jerusalem*

<sup>1</sup> Yadda tutu-un kamengiddinnel nan APU DIOS ey eleg ida meapput, tep henidda Duntug e Zion e eleg meglid, nem mannananeng alin ingganah.

<sup>2</sup> Kamannananeng ni ingganah hu kapemapteke nan APU DIOS idan tutu-u tu, henin kapannananengin duduntug di nanlinikweh di Jerusalem.

<sup>3</sup> Yadda etan lawah ni tuu ey beken ni hi-gada hu man-ap-apun ingganah di kayyaggud ni tutu-u, tep ebbalinan dadda et ippahding da dama hu lawah.

<sup>4</sup> APU DIOS, ipahding mu hu kayyaggud idan tutu-un kayyaggud hu daka pehpehding niya ida kamengu-unnud ni hi-gam.

<sup>5</sup> Yan pengastiguan muddan lawah ni tuu ey kastigum ida dama etan tuun nengisiked ni mengu-unnud ni hi-gam.

Ya kayyaggud ey mannananeng ni wada linggep eyad bebley di Israel.

## 126

*Ya a-appeh ni pantetyedan di Jerusalem*

<sup>1</sup> Yan eman ni nengibangngadan APU DIOS ni hi-gatsud Jerusalem ey heni i-innep ni ebuh.

<sup>2</sup> Nemahhig hu amleng tayu et manggalagalakgak itsu niya immena-appeh itsu. Et emin ida katuutuud edum ni bebley ey kanday "Makulug ni kayyaggud ni peteg hu impahding APU DIOS ni hi-gada."

<sup>3</sup> Em, makulug ni kakkayyaggud hu impenahding APU DIOS ni panyaggudan tayun nunman et man-am-amleng itsun peteg.

\* 122:4 122:4 Ya edum ni neitudek ey kanday "mansalamat".



<sup>4</sup> Et humman hu, APU DIOS, attu anhan et panyaggud mu mewan hu biyag mi, henin kakelbengin nema-ganan ni kulukul hedini immudan.

<sup>5</sup> Em, hanniman ipahding mu ma-lat yadda etan tuun limmewalewan nantaneman da ey umyaggud hu intanem da et man-an-anladdan pan-ennian da.

<sup>6</sup> Em, makulug ni emin ida hu nannannangngih ni nantaneman da ey bendisyonan idan APU DIOS et i-ena-appeh dalli hu amleng dan mengi-ennamut ni ineni da.

## 127

*Ya a-appeh nan Solomon ni pantetyedan di Jerusalem*

<sup>1</sup> Hedini eleg umbaddang hi APU DIOS ni memehwat ni hakey ni baley, ey endi silbin nea-atuan ni nengapya. Hanniman dama hu bebley e hedini eleg ipaptek nan APU DIOS, ey endi silbi tun an pengugguwalyaan ni nunman ni bebley.

<sup>2</sup> Ey anin ni nemahhig hu kapanggunnun hakey ni tuu e kaumhaleman niya kaumtukal, et endi silbitu hedini eleg baddangin APU DIOS. Tep tu ngu dedan kaidawat hu mahapul idan tutu-u tun pinpinhed tu, anin ni eleg ida umtukatukal.

<sup>3</sup> Yadda u-ungnga ey hi-gada bendisyoni ni indawat APU DIOS.

<sup>4</sup> Yadda in-ungnga tayun kekat-agu tayu ey ida kamei-ellig di panan sindalu.

<sup>5</sup> Man-am-amleng hu tuun dakel hu u-ungnga tu, tep heni dakel panetu et eleg meapput hedini mekihhanggad buhul tu.

## 128

*Ya a-appeh ni pantetyedan di Jerusalem*

<sup>1</sup> Um-amleng etan tuun kamekangngu-unnud ni tugun nan APU DIOS.

<sup>2</sup> Man-am-amleng alin mengngan ni nan-aatuan tu. Et humman hu, man-am-amleng ni peteg niya kayyaggud hu biyag tu.

<sup>3</sup> Ya etan ahwa tu ey kamei-ellig di makallameh ni grapes ni neitnem di baley tu. Ey henidda pakeitnem ni olibah hu u-ungnga tun neamung di pengngannan da.

<sup>4</sup> Em, henin nunya hu panyaggudan ni iddawat APU DIOS idan kamekangngu-unnud ni hi-gatu.

<sup>5</sup> Ya kayyaggud ey bendisyonan dakeyuni APU DIOS e wadad Zion. Ey kayyaggud et hedini umyaggud hu Jerusalem eyan ketaggu tayu.

<sup>6</sup> Ya nakka iddasal ey andukkey et anhan hu biyag yu ma-lat ang-angen yulli inap-apu yu.

Ya kayyaggud ey mannananeng hu linggep eyad bebley di Israel.

## 129

*Ya a-appeh ni pantetyedan di Jerusalem*

<sup>1</sup> Hi-gatsun helag Israel ey ene-ehhel tayu hu nanlelehhanan tayun impahpahding idan buhul tayun hi-gatsu, meippalpu eman ni keu-ungnga tayu.

<sup>2</sup> Em, wada hakkey ni hi-gatsu ey kantayuy "Neipalpu eman ni keu-ungngak ey nanlelehhanan ku hu impahpahding idan buhul kun hi-gak, nem nanengtun eleg dak apputen.

<sup>3</sup> Heni nandalnan ni aledu hu liput di beneg ku.

<sup>4</sup> Nem kayyaggud hi APU DIOS, tep impasiked tu humman ni kapehpeding idan buhul tayun hi-gak et beken nak law ni heni himbut da."

<sup>5</sup> Ya kayyaggud ey meapput idan emin et bumsik ida hu tutu-un angebe-hel da hu Jerusalem.

<sup>6</sup> Ey kayyaggud hedini emin ida ey heniddan helek ni simmemel di atep e eleg meetteng ni nakling,

<sup>7</sup> ey endi ew ngu kamenengngud ni an mengemung et beteken tu.

<sup>8</sup> Ey heballi endidda hu kamangkelebbah ni menghel ni hi-gadan kanday "Bendisyonan dakeyuni APU DIOS" winu "Bendisyonan dakeyud ngadan APU DIOS."

## 130

*Ya a-appeh ni pantetyedan di Jerusalem*

<sup>1</sup> APU DIOS, dengel mu anhan hu dasal ku tep iyyadyan nemahhig ni kamemunnunnu hu nemnem ku.

<sup>2</sup> Em Apu, dengel mu anhan huyyan nakka pampehemhemmekin hi-gam et baddangan muwak.

<sup>3</sup> APU DIOS, inamtak e gullat ni muka ituttuddek ni emin hu liwat ni tuu et endin hi-gami hu eleg mekastigu.

<sup>4</sup> Nem muka liwwana liwat mi, et humman hu, daka peka-u-unnuda.

<sup>5</sup> APU DIOS, nakka hehhegeda hu pemaddangan mun hi-gak, tep nakka medinnel e peamnum hu inhel mu.

<sup>6</sup> Nemahhig hu heged kun pemaddangan mun hi-gak nem ya kapenehhegedin guwalyan kewa-waan tu.

<sup>7</sup> Et humman hu, hi-gatsuddan helag Israel ey hi APU DIOS hu pandineli tayu, tep kamannananeng hu impeminhed tu niya nandadaddan ni menellaknib ni hi-gatsu.

<sup>8</sup> Ya kakulugan tu ey hi-gatulli hu menellaknib ni hi-gatsun helag Israel di liwat tayu. \*

## 131

*Ya a-appeh David ni pantetyedan di Jerusalem*

<sup>1</sup> APU DIOS, eleggak mampahhiya et mukun eggak gamgamidda hu eta-gey ni saad niya eggak patnain ippahding ida hu hipan eggak han-awat.

<sup>2</sup> Endi edum ni mahapul ku, tep hiyya ngu huyyan neitu-wan ku. Heni-ak ni naphun gelang ni wadad kad-an inetu e kaum-eneeneng.

<sup>3</sup> Hi-gatsun helag Israel ey pandinel itsun APU DIOS ni ingganah.

## 132

*Ya a-appeh ni pantetyedan di Jerusalem*

<sup>1</sup> APU DIOS, entan anhan tu liwwan hi David niyadda etan hinelheltap tu.

<sup>2</sup> Ey entan anhan tu liwwan e AP-APU e Et-eteng Kabaelan tun Dios nan Jacob hu insapatah tun hi-gam e kantuy

<sup>3</sup> "Eleggak um-anemut di baley mi, eggak man-i-iyatu

<sup>4</sup> niya eggak meuggip

<sup>5</sup> ingganah gibbuhen kun behwatan hu panha-adan mu e AP-APU e Et-eteng Kabaelan tun Dios lan eman nan Jacob."

<sup>6</sup> Wada kamid Bethlehem ey dingngel mi e wada etan Kaban APU DIOS di a-allaw ni bebley di Jaar et yadman ali mi nengal-an.

<sup>7</sup> Et kammuy "Elaw itsud baley nan APU DIOS et hi-gatu tayu daydayawen."

<sup>8</sup> APU DIOS, ali ka eyad Tempol mu. Pekihep ka eyan Kaban mu e kakei-ang-angin kabaelan mu.

<sup>9</sup> Kayyaggud et hedini emin idalli hu papaddi ey kayaggud ni ingganah hu pehpehding da niya kayyaggud hedini emin idalli hu tuum ey um-ena-appéh idan anla da.

<sup>10</sup> Entan anhan tu iwalleng hu pinilim ni man-ap-apu, tep humman hu insapatah mun bega-en mu e hi David.

<sup>11</sup> Tep eleg mu kekyata hu insapatah mun hi-gatu e kammuy "Hi-gak e hi APU DIOS ey pambalin kullin patul hu hakey ni helag mu. \*

<sup>12</sup> Hedini pannananeng idan helag mun mengu-unnud ni nekitbalan kun hi-gam niya u-unnuden da hu tugun ku ey hi-gadalli hu manhuluhulul ni mampatul ni ingganah."

<sup>13</sup> Pinilin APU DIOS hu Zion ni panha-adan tu et kantuy

<sup>14</sup> "Yadya Zion hu pinhed kun panha-adan ni ingganah. Ey yadya hu pinhed kun pan-ap-apan.

<sup>15</sup> Iddawat kun emin hu mahapul eyan bebley et emin idalli etan en-endi-an ni hekey, ey eleg idalli law mangkullang di kennen da.

<sup>16</sup> Ey bendisyonan kudda padidya ma-lat wada kabaelan dan mengippeamtaddan tutu-u meippanggep ni pengihwangan kun hi-gada. Ey emin idalli hu katuutuudya ey um-ena-appéh idan an-anla da.

<sup>17</sup> Wadalli pambalin kun patul ni melpud helag David. Ey weddaek ali helag nunman ni pilliek ni mampatul niya hi-gatulli hu heni dilag idan tutu-uk.

<sup>18</sup> Pambalin kuddallin mebabba-ingan ida buhul tu. Nem hedini hi-gatu, man umyaggud hu bebley ni pampatul tu et meidaydayaw."

## 133

*Ya a-appeh ni pantetyedan di Jerusalem*

<sup>1</sup> Makulug ni kakkayyaggud niya kamengippeamleng hedini kaman-uunnud ida hu kamengullug nan APU DIOS.

<sup>2</sup> Kamei-ellig di nenginan lanan induyag dad ulun Aaron et umeyuh di iming tu niyad buklew ni balwasi tu.

<sup>3</sup> Ey kamei-ellig di delnun kamelpud Duntug e Hermon ni kamenennum idan duntug di Zion. Yadman hu nanghelan APU DIOS ni bendisyon tu e humman hu biyag ni endi pappeg tu.

## 134

*Ya a-appeh ni pantetyedan di Jerusalem*

<sup>1</sup> Daydayaw tayu hi APU DIOS! Em, emin kayuddan bega-en tun kamangguwalyan hileng di Tempol tu, ey daydayaw yu hi APU DIOS!

<sup>2</sup> Em, ita-gey yu hu ngamay yun pandasilan yud Tempol et daydayawen yu hi APU DIOS.

<sup>3</sup> Ya dasal ku ey hi APU DIOS di Zion e nanletun puyek niya kabunyan hu memendisyon ni hi-gayun emin.

## 135

<sup>1-2</sup> Daydayaw tayu hi APU DIOS!

Emin kayun bega-en APU DIOS ni kamansilbid bawang ni baley tu niyad dallin tu ey daydayaw yu hu ngadan tu.

<sup>3</sup> Daydayaw tayu hi APU DIOS tep ya kakinayyaggud tu niya iena-appeh tayu hu penaydayaw tayun ngadan tu tep ya binabbal tu.

<sup>4</sup> Pinili tudda helag Israel ni tutu-u tu et henidda nebalol ni ganggam tu.

<sup>5</sup> Inamtak e eta-gey ni peteg hi APU DIOS e Apu tayu nem yaddan emin hu edum ni dios.

<sup>6</sup> Tuka pehding hu hipan pinhed tun pehding di kabunyan, yad puyek niyad baybay, niya anin di dallem ni baybay.

<sup>7</sup> Tuka peelli etan kulput ni kamelpud gilig ni puyek ni kamengi-lin udan. Tuka unnudin kedyam hu udan niya tuka peelli hu na-let ni pewek ni kamelpud nambalyan tu.

<sup>8</sup> Impampapetey tudan emin hu pengulwan ni u-ungngaddan iEgypt, anin idan nemangulun impah ni animal da.

<sup>9</sup> Impahding tudda kaketngain tuun pengastigu tun patul niyadda opisyal tu.

<sup>10</sup> Binahbah tu hu dakel ni bebley niya pintey tudda patul ni et-eteng kabaelan da,

<sup>11</sup> henin nan Sihon e patul idan Amorite, hi Og e patul di Bashan, niyaddan emin hu patul di Kanaan.

<sup>12</sup> Et idwat tudan tutu-u tun helag Israel hu nambebleyan idan nunman ni iKanaan e humman hu nebalol ni bineltan da.

<sup>13</sup> APU DIOS, mandingngel alin ingganah hu ngadan mu, tep emin idalli hu manhu-luhulul ni helag mi ey amtaen da hu kasina-gey mu.

<sup>14</sup> Hi-gam e APU DIOS ey muka i-ehngeng niya mudda kahehmeke hu tutu-um ni bega-en mu.

<sup>15</sup> Yadda dios idan edum ni bebley ey kinapyan tuud silber niya balituk.

<sup>16</sup> Wada kinapya dan bungut da niya mateda, nem eleg ida um-ehel niya eleg da han-ang-ang.

<sup>17</sup> Wada tangila da, nem eleg da handengel niya endi yayyah da.

<sup>18</sup> Yadda tutu-un kamengennapyaddan nunman niyadda kamandinne idan nunman ni dios ey mambalin idallin heniddan hi-gada.

<sup>19</sup> Hi-gatsun emin ni helag Israel niya hi-gayuddan papaddi ey hi APU DIOS hu daydayaw tayu.

<sup>20</sup> Hi-gayudda daman helag Levi niya emin kayun kamekanggu-unnud nan APU DIOS, ey hi-gatu hu daydayaw yu.

<sup>21</sup> Daydayaw tayun emin hi APU DIOS di Zion di Jerusalem e bebley tu.

Daydayaw tayu hi APU DIOS!

## 136

<sup>1</sup> Pansalamat itsun APU DIOS tep ya kakinayyaggud tu.

Ya impeminhed tu ey kamannananeng ni ingganah.

<sup>2</sup> Pansalamat itsun Apu Dios e Dios ni emin ni dios.

Ya impeminhed tu ey kamannananeng ni ingganah.

<sup>3</sup> Pansalamat itsun Apu Dios e Ap-apun emin ni aap-apu. \*

Ya impeminhed tu ey kamannananeng ni ingganah.

\* **136:3** 136:3 Ang-ang yu hu 1 Tim. 6:15 niya Rev. 17:14.

- 4 Pansalamat itsun hi-gatu, tep ebuh tun han-ipahding tu hu kaketngain tuu.  
Ya impeminhed tu ey kamannananeng ni ingganah.
- 5 Lintu tu hu kabunyan tep ya laing tu.  
Ya impeminhed tu ey kamannananeng ni ingganah.
- 6 Pansalamat itsun hi-gatu, tep intuun tu hu puyek di dalinat ni baybay.  
Ya impeminhed tu ey kamannananeng ni ingganah.
- 7 Pansalamat itsun hi-gatu, tep hi-gatu nanletun aggew niya bulan.  
Ya impeminhed tu ey kamannananeng ni ingganah.
- 8 Impambalin tu hu aggew ni heni ap-apun kawwalwal.  
Ya impeminhed tu ey kamannananeng ni ingganah.
- 9 Impambalin tu hu bulan niyadda bittuwen ni heni ap-apun hileng.  
Ya impeminhed tu ey kamannananeng ni ingganah.
- 10 Pintey tudda hu pengulwan ni u-ungngaddan iEgypt.  
Ya impeminhed tu ey kamannananeng ni ingganah.
- 11 Impangulu tudda hu tutu-u tun helag Israel et hi-yanan da hu bebley di Egypt.  
Ya impeminhed tu ey kamannananeng ni ingganah.
- 12 Inusal tu hu et-eteng ni kabaelan tun nengipenguluan tun hi-gadan neni-yanan dan nunman e bebley.  
Ya impeminhed tu ey kamannananeng ni ingganah.
- 13-14 Pansalamat itsun hi-gatu tep ginadwa tu hu danum di gawwan Madlang ni Baybay et pandalnan idan tuu tu eman ni nan-agwatan dadman.  
Ya impeminhed tu ey kamannananeng ni ingganah.
- 15 Nem inenud tudda hu sindalun iEgypt niyadda etan patul da.  
Ya impeminhed tu ey kamannananeng ni ingganah.
- 16 Pansalamat itsun hi-gatu, tep hi-gatu nengipenguluddan tutu-u tun helag Israel di desert.  
Ya impeminhed tu ey kamannananeng ni ingganah.
- 17 Pansalamat itsun hi-gatu tep pintey tudda hu et-eteng kabaelan dan papatul.  
Ya impeminhed tu ey kamannananeng ni ingganah.
- 18 Anin ida etan ni nandinggel hu ngangaddan dan patul et pintey tudda.  
Ya impeminhed tu ey kamannananeng ni ingganah.
- 19 Humman idan patul ey hi Sihon e patul di Amor,  
Ya impeminhed tu ey kamannananeng ni ingganah.
- 20 Et hi Og e patul di Bashan.  
Ya impeminhed tu ey kamannananeng ni ingganah.
- 21 Ya puyek idan nunman e patul ey indawat tuddan tuu tu.  
Ya impeminhed tu ey kamannananeng ni ingganah.
- 22 Em, indawat tuddan bega-en tun helag Israel hu puyek idan nunman ni patul.  
Ya impeminhed tu ey kamannananeng ni ingganah.
- 23 Eleg daitu liwwanen eman ni neapputan tayu.  
Ya impeminhed tu ey kamannananeng ni ingganah.
- 24 Daitu kabaddangi et itu kameihwang di buhul tayu.  
Ya impeminhed tu ey kamannananeng ni ingganah.
- 25 Tuka iddawat hu kennen idan emin ni mategun lintu tu.  
Ya impeminhed tu ey kamannananeng ni ingganah.
- 26 Emin itu ey pansalamat itsun hi-gatu e Dios di kabunyan.  
Ya impeminhed tu ey kamannananeng ni ingganah.

## 137

1 Yan eman ni wada kamid gilig idan wangwang di Babilon ey yimmudung kami et mannannangnih kami, tep ninemnem mi hu bebley mid Zion.

2 Nan-ihabley midda hu gitalah middad keyew ni willow,

3 tep eleg mi pinhed ni ia-appehan ida hu buhul min nampap ni hi-gami, anin ni dakemi kapillitan man-a-appeh. Dakemi kaheneghegnudan kanday "Ia-appehi dakemi meippanggep ni bebley yud Zion."

4 Nem hipa inna-nu min mengia-appeh ni penaydayaw min APU DIOS eyad bebley idan edum ni tutu-u?

5 Anin ew katteg ni meendi hu laing kun manggitalah, hedin liwwanen ku hu Jerusalem e Zion e bebley mi.

6 Niya anin ni meendi hu laing kun man-a-appeh, hedin liwwanen ku hu Jerusalem niya beken law ni ya bebley mid Jerusalem hu kamengippeamleng ni hi-gak.

<sup>7</sup> APU DIOS, entan anhan tu liwwan hu impahding idan helag Edom eman ni nangegepan dan Jerusalem et mantetekkuk ida e kandy "Pakabbabhah tayu eya bebley!"

<sup>8</sup> Hi-gayuddan tutu-ud Babilon ey mekabbabhah kayulli. Man-am-amleng ali hu tuun mengibleh ni impahding yun hi-gami.

<sup>9</sup> Em, man-am-amleng ali hu memilliw ni u-ungnga yu et itangnging tud batu.

## 138

*Ya a-appéh nan David*

<sup>1</sup> APU DIOS, nakka mansalamat ni hi-gam di puhuk niyad nemnem ku. Ey ia-appéh ku hu penaydayaw kun hi-gam di hinanggaddan edum ni dios.

<sup>2</sup> Nakka ihhanggad appit ni Tempol mu ni nanyuunggak ni menaydayaw ni hi-gam, tep eleg melullumman hu impeminhed mu niya kamannanang hu muka pemaptek ni tutu-um. Ey impeang-ang mu e hi-gam hu keta-ta-geyyan niya kakkayyagud ni peteg hu tugun mu.

<sup>3</sup> Nandasallak ey hinumang mu et petuled muwak.

<sup>4</sup> Emin idalli hu papatul di puyek ey daydayawen daka, tep dedngelen dallin emin hu tugun mu.

<sup>5</sup> Em, i-ena-appéh dalli hu meippanggep ni impahpahding mu niya et-eteng ni dayaw mu.

<sup>6</sup> Anin ni eta-gey kan peteg e APU DIOS et muka ipapaptek ida hu tutu-un daka pebabah hu annel da. Nem eleg mudda hengnguda hu tutu-un kamampahhiya.

<sup>7</sup> Niya anin ni liktuben da-ak idan buhul ku et wada kan umbaddang et nakka meihwang di hipan lawah ni pinhed dan pehding ni hi-gak, tep hi-gam hu kamekihhanggaddan nunman ni mangkabunget ni buhul ku et mudda kaapputa tep et-eteng kabaelan mu.

<sup>8</sup> APU DIOS, hi-gam hu kamengippeamnun emin ni pinhed mun meipahding ni hi-gak, tep kamannanang hu impeminhed mu. Et humman hu, entan anhan tuwak iwalleng, tep hi-gam hu nanletun hi-gak.

## 139

*Ya a-appéh David ni meidwat etan ni kamengipappangngulun a-appéh*

<sup>1</sup> APU DIOS, naka-amtam ni emin hu hipan neitu-wan ku.

<sup>2</sup> Emin hu nakka pehpehding ey inamtam niya anin ni edawwi kan peteg et inamtam hu wadad nemnem ku.

<sup>3</sup> Muka ang-ang-anga hedin nakka mangngunnu winu nakka man-i-iyatu, tep inamtam ni emin hu nakka pehpehding.

<sup>4</sup> Ey inamtam hu pinhed kun e-helen anin ni eggak ni ehelen.

<sup>5</sup> Niya wada kan ingganah di kad-an ku ma-lat ipaptek muwak tep et-eteng hu kabaelan mu.

<sup>6</sup> Huttan ni nengamtaan mun emin ni meippanggep ni hi-gak ey eggak ni hekey hanawat.

<sup>7</sup> Attu lawwan ku ma-lat eleg muwak han-ang-ang? Ey attu bebsikan ku ma-lat maidawwi-ak ni hi-gam?

<sup>8</sup> Hedin kangkuy umlawwak di kabunyan, ey wada kadman ngu dedan. Ey hedin kangkuy umlawwak di nandaul di bebley idan nangketey, ey wada ka mewan diman.

<sup>9</sup> Niya anin ni kangkuy umtayabbak et lumawwak di neidawwi di kad-an ni kasimmilin aggew winu yad tuka kelinnugi,

<sup>10</sup> ey wada ka ngu dedan ni mengippengngulu niya umbaddang ni hi-gak.

<sup>11</sup> Ey anin ni nak mantellud engeenget niya anin ni mambalin hu kawwalwal ni hileng ma-lat mahenian nak,

<sup>12</sup> ey heni damengu kawwalwal hu muka penang-ang. Tep ya hileng niya kawwalwal ey nan-inggeh idan hi-gam.

<sup>13</sup> Hi-gam hu nanletun emin eyan annel ku eman ni wada-ak di egeh ina.

<sup>14</sup> Et humman hu, daydayawen daka tep kayyagud ni peteg hu nengapyam ni hi-gak. Tep neka-amtak dedan e kayyagud ni peteg niya kamengippetngan emin hu muka pehding.

<sup>15</sup> Yan nakka pangkepkelid egeh ina ey inang-ang mu dedan e immennak diman.

<sup>16</sup> Tep inamta muwak dedan et hannak maiungnga. Ya bilang ni aggew ni pambiyagan ku eyad puyek ey intudek mu ngu dedan di libluh mu.

<sup>17</sup> Apu Dios, eleg mebillang hu wadad nemnem mu niya neligat ni amtaen hedin hipadda humman.

<sup>18</sup> Gullat na-mun billangen ku et daddakkel nem yadda palnah di gilig ni baybay. Nem anin ni hanniman hu elaw tu et nanengtun wada kad kad-an kun bengngunan kun kakkabbuhhan.

<sup>19</sup> Apu Dios, heballi nealay inendim ida hu tutu-un lawah daka pehpehding. Ey kayyaggud et hedini um-a-allaw idad kad-an ku humman idan mangkapetey ni tutu-u.

<sup>20</sup> Lawah ni peteg hu daka pengpenghel ni hi-gam. Endin hekey hu lispituh dan ngadan mu.

<sup>21</sup> APU DIOS, anggebe-hel kuddan peteg ida hu tutu-un anggebe-hel daka. Em, nak ida kapippihula hu kamangngenghay ni hi-gam.

<sup>22</sup> Nemahhig hu hingit kun hi-gada. Et humman hu, nak ida kaibbilang ni buhul ku.

<sup>23</sup> Paka-ang-ang mu anhan e Apu Dios hu nemnem ku niya elaw ku

<sup>24</sup> et itudum hedini wada hu eleg mu pinhed ni hi-gak, et hullulan mun kayyaggud. Ey ituttuddum ni hi-gak hu pehding kun mekibi-biyag ni hi-gam ni ingganah.

## 140

*Ya a-appeh David ni meidwat etan ni kamengipappangngulun a-appeh*

<sup>1</sup> Baddangi muwak anhan e APU DIOS ma-lat meihwangngak ida eyad mangkapetey ni tutu-un lawah daka pehpehding.

<sup>2</sup> Ya lawah hu daka nenemneman pehding et hi-gada hu kaumhuhulun ni kapam-babakalin tutu-u.

<sup>3</sup> Ya daka heppita ey lawah ni peteg e kamei-ellig di gitan uleg e kaupatey. \*

<sup>4</sup> APU DIOS, ihwang muwak anhan di lawah ni kapehding idan tutu-un mapetey, tep pinhed dan peteg ni petteyen da-ak.

<sup>5</sup> Humman idan tutu-un kamampahhiyya ey heni da hinena-adan hu pandellanan kun bitu e anin ni attu lawwan ku et immen ida hu inheged dan keknaan ku.

<sup>6</sup> APU DIOS e Dios ku, dengel mu anhan hu dasal ku et baddangan muwak.

<sup>7</sup> APU DIOS e Eta-gey ni peteg, hi-gam ni ebuh hu wada kabaelan tun mengihwang ni hi-gak et hi-gam hu nengipaptek ni hi-gak di nak nekigubagubatan et eggak matey.

<sup>8</sup> Entan tu iebulut ni an meippahding hu pinpinhed ida etan ni lawah ni tutu-u, tep nema-ma-man mampahhiyyadda, hedini i-abulut mu.

<sup>9</sup> Ya kayyaggud kummaddan ey pambalin mu etan daka nemnemneman pehding dan hi-gak ni memabhah ngun hi-gada.

<sup>10</sup> Pan-egah mu hu ngalab di ulu da niya ibheng muddad kamantettebbel ni apuy winu yad edallem ni bitu, et anin ni mena-yun idadman.

<sup>11</sup> Ang-ang mu et eleg maipahding hu hipan implanuh idan etan ni kamengippebehul ni itek di edum dan tuu. Niya kayyaggud hedini emin ida etan tuun mangkapetey, ey humman ni daka pehpehding hu ketteyyan da.

<sup>12</sup> APU DIOS, inamtak e hi-gam hu kamengi-ehngeng ni kelebangan idan nangkewetwet, niya hi-gam hu kamengippaptek ni hi-gada.

<sup>13</sup> Nanna-ud ni daydayawen dakalli etan idan tutu-un kamekangngu-unnud ni hi-gam, niya makulug ni yallid kad-an mu hu panha-adan da.

## 141

*Ya a-appeh David*

<sup>1</sup> Hi-gam e APU DIOS ni ebuh hu nakka pandasali. Dengel mu anhan eya dasal ku ma-lat eleg mu a-ayapawen ni memaddang ni hi-gak.

<sup>2</sup> Abulut mu anhan huyyan dasal kun henin muka pengebbulusin kayyaggud ni hamuy ni bangbanglu. Niya abulut mu anhan hu nakka pengitata-geyin ngamay kun mandasal ni hi-gam ni henin muka pengebbulusin kamei-appit ni hi-gam ni kekahkahdem.

<sup>3</sup> APU DIOS, baddangi muwak et pepuhdanan ku ni hannak immehel ma-lat beken ni ya nalgem hu nak heppiten.

<sup>4</sup> Niya baddangi muwak ma-lat endi hu lawah ni nak nemnemen ni pehding niya ma-lat endi nak keewwisian ni mengippahding ni lawah ni kapehpehding idan tutu-un lawah daka pehpehding. Ey entan tu iebulut ni nak mekiammuammung idad daka panhahamuli.

<sup>5</sup> Eggak bellawa hu penuggunan da-ak idan tutu-un kayyaggud hu elaw da niya anin ni ibbunget da-ak hedini wada lawah ni pehding ku, tep humman hu panyaggudan ku e kamei-ellig ni lanan neiduyag di uluk.

\* 140:3 140:3 Romans 3:13b

Nem hedin yadda tutu-un lawah hu daka pehpending ey nakka iddasadasal hu kekastiguan da.

<sup>6</sup> Yallin keibbengan idan aap-apu dad deplah hu pengebbulutan idalli law ni tutu-u e makulug hu in-inhel ku.

<sup>7</sup> Humman idan lawah ni tutu-u ey eleg ali meikkullung hu tu-ngal da, nem nealay kepuppullay di gilig ni kulung da e heniddalli batud nealedun payew.

<sup>8</sup> Nem hi-gam ngu e APU DIOS, e Eta-gey ni peteg, hu nakka iddinel ni mengippaptek ni hi-gak ma-lat eggak ni matey.

<sup>9</sup> Apu, ipaptek muwak anhan ma-lat eleggak makna etan di indaddan idan lawah ni tutu-un keknaan ku.

<sup>10</sup> Ya kayyaggud ey hi-gada ngu hu meknad bitun indaddan da. Nem entan ngu tu iebulut ni wada an meippahding ni lawah ni hi-gak.

## 142

*Ya indasal David eman ni wada etan di leyang*

<sup>1</sup> Nampehemhemmeccak nan APU DIOS di dasal ku ma-lat baddangan tuwak.

<sup>2</sup> Et peamtak ni emin ni hi-gatu hu hipan eggak pinhed niya kakemunnunnuin nemnem ku.

<sup>3</sup> Ey hedin kamangkeendi hu namnamah ku ey inamta tu hu kayyaggud ni pehding ku. Yad nakka dellana ey wada inheged idan buhul kun bitu ma-lat makna-ak.

<sup>4</sup> Nakka man-ang-aang-ang ey endi memaddang ni hi-gak, endi kamengippaptek ni hi-gak niya endi kamengikkeguh ni hi-gak.

<sup>5</sup> Et mampehemhemmeccak e kangkuy "APU DIOS, hi-gam ni ebuh hu nakka keihhikkugi, tep hi-gam ni ebuh hu mahapul kud neitu-wan ku.

<sup>6</sup> Dengel mu anhan huyyan dasal ku, tep angehemmeccak ni peteg. Ihwang muwak eyaddad buhul ku, tep na-let ida nem hi-gak.

<sup>7</sup> Ey pekedhel mu nemnem ku ma-lat eleg mannananeng hu kakemunnunnuin nemnem ku \* et wada inna-nuk ni menaydayaw ni hi-gam di kad-an ni kakeemmuemmungin tutu-um, tep ya kakinayyaggud mun hi-gak."

## 143

*Ya a-appah David*

<sup>1</sup> APU DIOS, dengel mu anhan hu dasal ku. Hemek muwak anhan et humangen mu hu dasal ku, tep kayyaggud kan peteg niya kamannananeng hu muka pemaptek.

<sup>2</sup> Ey entan anhan tuwak humalya e bega-en mu, tep endi, anin hakey ni tuun eleg mambahul ni hi-gam.

<sup>3</sup> Heni da-ak dindinweng idan buhul ku et apputen da-ak et ikelabut da-ak eyad engeenget, et heni-ak ida lan netey ni dedangngu.

<sup>4</sup> Yan nunman ey kamangkeendi namnamah ku tep nakaddismayahhak.

<sup>5</sup> Nem entanni ey ninemnem kudda hu kakkayyaggud ni impahpahding mun nunman. <sup>6</sup> Et ita-gey ku hu ngamay kun mandasal ni hi-gam, tep nemahhig ni makahhapul kun peteg hu baddang mu. Heni-ak nemagmag-an ni payew ni kahapulan tun peteg hu danum.

<sup>7</sup> Papatu mu anhan e APU DIOS et humangen mu eya dasal ku. Baddangi muwak, tep endi law namnamah ku. Entan anhan tuwak away ma-lat eggak matey et eggak lumaw di bebley idan nangketey.

<sup>8</sup> Penemnem mun hi-gak ni kakkabbuhhan hu eleg melullumman ni impeminhed mu, tep hi-gam hu nakka iddinel. Hi-gam hu nakka pandasali ma-lat peamtam ni hi-gak hu neiptek ni pehding ku.

<sup>9</sup> APU DIOS, baddangi muwak ma-lat meihwangngak di kapehpending idan buhul ku, tep endi edum ni nakka iddinel ni nak keihhikkugan, nem hi-gam ni ebuh.

<sup>10</sup> Itudum hu pinhed mun pehding ku tep hi-gam hu Dios ku. Ya kayyaggud ey ya Ispiritu mu hu mengittuntun ni hi-gak ma-lat endi hu el-eleg ni an meippahding ni hi-gak.

<sup>11</sup> APU DIOS, baddangi muwak et meihwangngak ida eyad buhul ku ma-lat keiday-dayawan ni ngadan mu. Ey baddangi muwak eyad nakka panligligasi ma-lat keangangan ni kakinayyaggud mu.

<sup>12</sup> Apput muddan emin hu buhul ku et endiem ida tep ya eleg melumman ni impeminhed mun hi-gak e bega-en mu.

\* 142:7 142:7 Yadda edum ni neitudek ey kanday "Pa-hep muwak eyad kallabbutan."

## 144

*Ya a-appéh David*

<sup>1</sup> Daydayawen dakan hi-gak e APU DIOS e kamei-ellig etan di batun kakeihhikkugi. Hi-gam hu kakelpuin elet ku niya laing kun mekiggubbat, tep hi-gam nenuttuddun hi-gak ni elaw ni mekiggubbat.

<sup>2</sup> Hi-gam hu kamengippaptek niya kamengi-ehngeng ni hi-gak. Hi-gam hu nakka keihhikkugi niya hi-gam hu kamengihwang ni hi-gak. Ey muwak kapambalin ni apapuddan tutu-ud edum ni bebley.

<sup>3</sup> APU DIOS, kaw hipa anhan hu tuu et muka ikakkaguh ni peteg?

<sup>4</sup> Tep ya biyag min tuu ey nekemtang ni ebuh. Heni dibdib winu allinnew ni kamangkelebbah e endi maptek ni attukaw la.

<sup>5</sup> Ibeghul mu hu kabunyan et melehbeng kalli e APU DIOS. Kapam ida duduntug ma-lat mampan-a-ahhuk ida.

<sup>6</sup> Paelim hu kedyam et mawehit ida buhul mu niya pampanam ida et mamsik ida.

<sup>7</sup> Panyuung ka anhan di kad-an mud kabunyan et heni muwak nuhnuhen et idekal muwak, tep heni-ak wadad edallem ni lebeng. Ihwang muwak anhan eyad nemahhig ni kapehpehding idan buhul kun nalpud edum ni bebley.

<sup>8</sup> Humman idan tutu-u ey mangkaitek idan peteg, tep anin ni issapatah dan kanday eleg ida man-ittek et ida kaya kaman-ittek.

<sup>9</sup> Apu Dios, manggitalahhak niya man-a-appéhak ni baluh ni a-appéh ni penaydayaw kun hi-gam.

<sup>10</sup> Tep hi-gam hu kamengidwat ni kabaelan idan papatul ni mengapput. Ey hi-gam hu kamengihwang nan David e bega-en mu ma-lat eleg da pateyen di gubat.

<sup>11</sup> Baddangi muwak anhan ma-lat meihwangngak di pehding idan buhul kun nalpud edum ni bebley. Humman idan tutu-u ey mangkaitek idan peteg, tep anin ni issapatah dan kanday eleg ida man-ittek et ida kaya kaman-ittek.

<sup>12</sup> Ya kayyaggud ey yadda u-ungnga min lalakkin kamenikken ey heniddan mangkateban intanem ni naka-ippaptek. Ey kayyaggud hedin yadda u-ungnga min bibi-i ey kataguddan peteg ni kehikkenan da e henidda neiyayyaggud ni nepaot ni tukud ni neial-alkus di baley ni patul.

<sup>13</sup> Niya kayyaggud hedin et anhan mepnu aallang min ineni min dakel ni nambakbaklang ni kaittanem. Ey kayyaggud hedin um-apnal di kudal mi hu kalibulibun kalneroh

<sup>14</sup> niya babakkan naman-impah.

Apu, entan anhan tu iebulut ni dakemi hehgepen idan buhul mi winu dakemi ibbebsik ni hi-gada. Ey ang-ang mu anhan et endi hu an umhulun ni an pannannangngihan idan tutu-ud keltad.

<sup>15</sup> Man-am-amleng ida hu tutu-un keippahdingan tudda huuya. Em, man-am-amleng ida hu tutu-un hi APU DIOS hu Dios da.

## 145

*Ya a-appéh David ni tuka penaydayaw nan APU DIOS*

<sup>1</sup> Daydayawen dakan ingganah e Dios ku niya Patul ku.

<sup>2</sup> Em, kewa-wa-wa ey daydayawen ku hu kasina-gey mu niya mansalamattak ni hi-gam.

<sup>3</sup> APU DIOS, eta-gey kan peteg. Makulug ni hi-gam ni ebuh hu lebbengtung medaydayaw. Eleg ni hekey meewwasi hu kasina-gey mu.

<sup>4</sup> Tettebalen idallin manhuluhulul ni helag idan tutu-u hu kamengippetngan impehding mu. Ey peennamta dallin helag da ida humman ni impahding mu tep ya eteteng ni kabaelan mu.

<sup>5-6</sup> Peennamtak hu kasina-gey mu niya nenemnemen kudda kaketngain tuun impahding mu. Anin idallin tutu-u et ene-ehhelen da damadda humman idan impahding mu.

<sup>7</sup> Em, ene-ehhelen dalli hu kakinayyaggud mu niya man-an-anladdallin mengi-ena-appéh ni binabbal mu.

<sup>8</sup> APU DIOS, makulug ni kababbal kan peteg niya mahmek ka. Beken kan kabubunget niya eleg melullumman hu impeminhed mu.

<sup>9</sup> Kayyaggud hu muka pehding di emin ni tuu. Ey mudda kahehmekan emin hu lintum.

<sup>10</sup> APU DIOS, daydayawen dakallin emin idan lintum. Ey emin idalli kamekangngun nud ni hi-gam ey mansalamat idan hi-gam.

<sup>11-12</sup> Ene-ehhelen dalli hu kasina-gey ni muka pan-ap-apui niya et-eteng ni kabaelan mun mengippahding idan impahding mu ma-lat amtaen ni katuutuu.



13 Tep kamannanang ni ingganah hu muka pan-ap-apui niya hi-gam ali hu Patul ni ingganah.

Hi APU DIOS ey tuka peamnun emin hu tuka e-hela niya emin hu tuka pehpehding ey kameang-ang hu binabbal tu.

14 Tuka baddangidda etan kamelliggasi niya tuka pekedhel hu nemnem idan kamedismayah ni tutu-u.

15 Emin ida hu mategun lintum ey hi-gam hu daka pengittengngawi niya hi-gam hu kamengidwat ni kennen da hedini mahapul da.

16 Endi daka pangkullangi, tep muka iddawat ni emin hu mahapul da.

17 Kayyaggud ni emin hu kapehding APU DIOS niya kabbabbal ni peteg.

18 Nandadaddan ni menummang ni kaibbagaddan kamampehemhemmeki ni hi-gatut dasal da.

19 Em, tuka iddawat ni emin hu mahapul idan kamengu-unnud ni hi-gatu niya tuka dedngela hu daka pampehemhemmeki ma-lat ihwang tudda.

20 Tudda kaippaptek hu tutu-un nemin角度 ni hi-gatu. Nem hedini yadda tutu-un lawah daka pehpehding ey tudda kaendia.

21 Daydayawen ku hi APU DIOS. Em, emin itsun lintu tu ey daydayaw tayun ingganah hu ngadan tu.

## 146

1 Daydayaw tayu hi APU DIOS!

Em, hedini ngun hi-gak, man ikkahakey ku hu nemnem kun menaydayaw ni hi-gatu.

2 Ey i-ena-appah ku hu penaydayaw kun APU DIOS e Dios ku eyan ketagguk.

3 Entan tu ididdineli hu tuu, anin ni eta-gey hu saad tu. Tep endi kabaelan ni tuun mengihwang ni hi-gayu.

4 Tep ida kamettye ni nambalin annel dan dep-ul et kamepappeg hu hipan planuh da.

5 Um-amleng hu tuun kabaddangin APU DIOS e Dios ni dinaydayaw lan eman nan hi Jacob. Em, kaman-am-amleng hu tuun tuka iddineli hu neitu-wan tun hi-gatu

6 e nanletun kabunyan, ya puyek, ya baybay niyaddan emin hu mategun wadadman. Hi-gatu e Dios ey tuka peamnun hu hipan tuka e-helan pehding tu.

7 Hi-gatu kaumbaddang idan tutu-un kapanligligat ni edum dan tuu. Ey tuka iddawat hu kennen idan kameuppa.

Hi APU DIOS hu kamengibbukyat idan neikelabut.

8 Ey tuka e-kala hu kulap idan nangkukulap et kaum-ang-ang hu mateda. Tuka pekedhel hu nemnem idan kamedismayah, niya nakappin角度 tudda hu kayyaggud hu daka pehpehding.

9 Tuka ippaptek ida hu hansinu-wan ni nekibebley eyad bebley tayu, yadda nangkepuihig niyadda nebalu. Nem tuka bahbaha hu planuh idan lawah ni tutu-u.

10 Hi APU DIOS hu Patul ni ingganah. Em, ya Dios tayun iZion hu mannananang ni mampatul.

Daydayaw tayu hi APU DIOS!

## 147

1 Daydayaw tayu hi APU DIOS!

Em, kayyaggud hedini man-a-appah itsun penaydayaw tayun Dios tayu, tep humman dedan hu lebbengtun pehding tayu.

2 Tuka pan-iyayyaggud hu Jerusalem niya tudda kapan-ibbangngad hu tutu-u tun neilaw ni balud di edum ni bebley.

3 Tuka ellubyaga nemnem idan nedismayah niya tuka peyaggud hu liput da.

4 Inamta tu ngu dedan hu bilang idan bittuwen et han tudda letua, niya nginedanan tuddan emin.

5 Eta-gey ni peteg niya et-eteng hu kabaelan ni Ap-Apu tayu. Eleg ni hekey melkud hu kalinaing tu.

6 Tuka baddangidda hu tuun daka pebabah annel da, nem tudda kapebabah ni peteg hu tutu-un lawah daka pehpehding.

7 Unnudi yun gitalah hu a-appah yun yuka penaydayaw nan APU DIOS e Dios tayu.

8 Imbiklag tu hu kulput di kabunyan. Ey wineda tu hu udan ni menennum ni puyek, et kameteggudda hu helek di duduntug.

9 Wineda tu hu kennen idan emin ni kaman-ayyam di puyek niya anin ni ya kakennaddan impah ni gawwang et tuka iddawat hedini ida kamampikpi ni upa da.

10 Hi APU DIOS ey beken ni ya na-let ni kebayyu niya beken ni ya makabbungat ni sindalu hu kamengippeamleng ni hi-gatu.

<sup>11</sup> Tep ya kamengippeamleng ni hi-gatu ey yadda tutu-un kamekangngu-unnud ni hi-gatu niyadda kamengiddinnel ni eleg melullumman ni impemihed tu.

<sup>12</sup> Emin itsun Ijerusalem di Zion ey daydayaw tayu hi APU DIOS e Dios tayu.

<sup>13</sup> Tep daitu kapaka-ippaptek e heni naka-ihhammad tu eheb eyan bebley tayu ma-lat eleg daitu hegepen idan buhul tayu. Ey binendisyonan daitusun tutu-u tu.

<sup>14</sup> Tuka pelinggep eya bebley tayu niya tuka panyaggud hu hipan tayu kaittanem et dakel hu tayu kaennia.

<sup>15</sup> Hedin wada in-olden tud kebebbebley eyad puyek, man anggegannu ni neu-unnud.

<sup>16</sup> Tuka ibbiklag hu dallallu e heni wanal niya tuka iwwahit e heni dep-ul.

<sup>17</sup> Ey tuka peelli hu dallallun heni pantal et endi tuun han-ispel tu hu ketel ni tuka peelli.

<sup>18</sup> Ey hedin nanmandal, man kaum-ali hu dibdib et ida kamambalin ni danum humman idan dallallu et ida kaum-ayuh.

<sup>19</sup> Emin hu tugun tu ey impeamta tuddan tutu-u tun helag Israel.

<sup>20</sup> Hi-gadan ebuh hu nengipeamtaan tu. Eleg ngu amtaddan edum ni tutu-u ida humman ni tugun tu.

Daydayaw tayu hi APU DIOS!

## 148

<sup>1</sup> Daydayaw tayu hi APU DIOS!

Em, emin kayun wadad kabunyan ey daydayaw yu hi APU DIOS.

<sup>2</sup> Emin kayu damaddan aanghel niya hi-gayuddan sindalu tun wadadtan kabunyan ey daydayaw yu hi APU DIOS.

<sup>3</sup> Anin ni hi-gayuddan aggew, ya bulan niyadda bittuwen, et daydayaw yu dama hi APU DIOS.

<sup>4</sup> Ey anin daman hi-gam \* e kabunyan ni wadad eta-gey niya hi-gayun danum ni wadadtan, et daydayaw yu hi APU DIOS. †

<sup>5</sup> Emin kayun lintu tu ey daydayaw yu hu ngadan tu, tep hi-gatu nengimandal et han kayu maltu.

<sup>6</sup> Ey hi-gatu nengimandal hedin attu panha-adan yun ingganah. Niya eleg mabalin ni an melumman humman ni immandal tu.

<sup>7</sup> Hi-gayun wadad puyek niyad baybay, anin idan hi-gayun wadad dallem ni baybay, ey daydayaw yu dama hi APU DIOS.

<sup>8</sup> Anin ni hi-gayun kedyam, ya kulput, ya dallallu, ya pewek, niya dibdib ni kamengu-unnud ni tuka e-hela et daydayaw yu dama hi APU DIOS.

<sup>9</sup> Anin ni hi-gayuddan duduntug, yadda mumuyyung, niyadda kekeyyew ni kamekkan hu lameh da, et daydayaw yu dama hi APU DIOS.

<sup>10</sup> Hi-gayudda daman animal di muyung, anin idan animal di pattullan, hi-gayuddan kaumkadap niyadda sisit, ey daydayaw yu hi APU DIOS.

<sup>11</sup> Hi-gayuddan papatul, hi-gayuddan katuuuu niyadda aap-apu, ey daydayaw yu hi APU DIOS.

<sup>12</sup> Hi-gayuddan kamenikken ni bibi-i niyadda lalakki, yadda nangkei-inna niyadda nangkea-amma, niya anin idan kaungaunga, ey daydayaw yu hi APU DIOS.

<sup>13</sup> Em, emin kayu ey daydayaw yu hi APU DIOS, tep hi-gatu hu keta-ta-geyyan di emin. Ya dayaw tu ey heni lini-bahan tu hu puyek niya kabunyan, tep endi tu kei-inggehan.

<sup>14</sup> Pinutuk APU DIOS hu pampatul idan tutu-u tun helag Israel. Et humman hu, lebbengtun daydayawen idan emin ni kamengu-unnud ni hi-gatu. Em, lebbengtun daydayawen idan helag Israel e tutu-u tun nakappinshed tu.

Daydayaw tayu hi APU DIOS!

## 149

<sup>1</sup> Daydayaw tayu hi APU DIOS!

Ia-appahi tayun baluh ni a-appah ni penaydayaw tayun hi-gatu di tayu kakeemmuem-mungin tutu-u tun nanengtun kamengu-unnud ni hi-gatu.

<sup>2</sup> Pan-am-amleng kayun helag Israel di Zion tep ya Dios yun nanletun hi-gayu. Em, pan-am-amleng kayu tep ya Patul yu.

<sup>3</sup> Panggangangha kayu, panggiggittalah kayu, niya penattayaw kayun penaydayaw yun hi-gatu.

<sup>4</sup> Tep hedin hi APU DIOS, man yadda tutu-u tu hu kamengippeamleng ni hi-gatu, niya tudda kapengapput ida tutu-u tun daka pebabah annel da.

\* 148:4 148:4 Yad hapit ni Hebrew ey kantuy "Hi-gayun kabunyan," tep hedin hi-gada, man beken ni hakey ni ebuh hu kabunyan. † 148:4 148:4 Genesis 1:6-7

<sup>5</sup> Emin kayun kamengu-unnud nan Apu Dios ey pan-am-amleng kayun nengipengap-putan tun hi-gayu, niya anin ni yan hileng et iena-appéh yu hu am-amleng yu.

<sup>6</sup> Elet yu penaydayaw yun Apu Dios niya tenged yu matedem ni ispadah yun

<sup>7</sup> ussalen yun mengapput ni kebebbbley niya mengastiguddan katuutuu.

<sup>8</sup> Bangkiling yudda hu papatul da niyadda aap-apu da.

<sup>9</sup> Kastigu yudda katuutuud kebebbbley, tep humman hu inhel Apu Dios ni pehding yun hi-gada. Huyya hu keidaydayawan idan tutu-u tun kamengu-unnud ni hi-gatu.

Daydayaw tayu hi APU DIOS!

## 150

<sup>1</sup> Daydayaw tayu hi APU DIOS!

Em, daydayaw tayu hi Apu Dios di Tempol tu. Anin ni hi-gayuddan wadad kabunyan ey daydayaw yu hi Apu Dios tep yadta kakeang-angin kasina-gey tu.

<sup>2</sup> Daydayaw tayu hi Apu Dios tep yadda etan impahding tun nengipeang-angan tun et-eteng ni kabaelan tu. Em, daydayaw tayu, tep endin hekey neiingnehan ni kasina-gey tu.

<sup>3</sup> Patnul tayu tangguyup tayu, anin idan ayyuding niya gitalah tayun penaydayaw tayun Apu Dios.

<sup>4-5</sup> Tebab tayu hu a-bek ey panggiggittalah itsu, pan-i-ingngiing itsu, ey pangganggha itsu et menattayaw itsun penaydayaw tayun Apu Dios.

<sup>6</sup> Emin itsun mategu ey daydayaw tayu hi APU DIOS.

Daydayaw tayu hi APU DIOS!

## Proverbs

*Ya meippanggep eyan libluh e Proverbs*

Huyyan libluh hu neamuamung ni in-inhel idan nangkelaing niya nangkenemneman ni tutu-u meippanggep ni biyag et ya kayyaggud ni pekikkillawwan di edum ni tuu et hi Apu Dios. Yadda tutu-un wada takut dan Apu Dios et ida kamengu-unnud ni hi-gatu ey umlaing ida niya menemneman ida. Nem yadda tutu-un endi nemnem da e endi lispituh dan hi-gatu ey eleg da pinhed ni menemneman. Ya hakey ni keibbellinan ni 'Proverbs' e 'mashal' di ehel ni Hebrew ey ansikkei ni na-hel meippanggep ni elaw ni meunnud ma-lat kayyaggud meippahding.

Ya nepenidpidwan na-hel eyad libluh ni Proverbs ey ya meippanggep ni laing niya kenemneman. Ya laing eyad libluh ni Proverbs ey ya inamtan hakey ni tuu et ya kabaelan tun mampilin kayyaggud ni pehding tu meippuun di inamta tun kayyaggud niya makulug.

*Ya neitudek eyad libluh:*

1. Ya tugun ma-lat menemneman ey lumeing hu hakey ni tuu niya ma-lat eleg tu iu-unnud di kapehpehding idan endi nemnem tu. (chapters 1-9)
2. Ya nambaklangan ni tuun nenemneman ey nelaing di tuun endi nemnem tu. (chapters 10-15)
3. Ya panyaggudan ni meelladdan memillin mengippahding ni kayyaggud et ya lawah ni meellan eleg memillin mengippahding ni kayyaggud. (chapters 16-31)

<sup>1</sup> Huyyadda kayyaggud ni ehel niya tugun nan hi Solomon e nampatul lad Israel ni nunman, e u-ungngan David.

<sup>2</sup> Huyyaddan kayyaggud ni ehel niya tugun ey kaumbaddang ni tuu ma-lat menemneman niya ma-lat matugun. Baddangan da mewan hu tuun man-ewwat ni neligat ni meewwatan ni tutuudun makahhapul di neitu-wan.

<sup>3</sup> Ya etan tuun mengu-unnud idan nunyan tugun ey menemneman niya umyaggud elaw tu ma-lat ya neiptek, ya meandeng niya limpiyuh pehding tu.

<sup>4</sup> Ey umbaddang idan tuun nelakah ni meihheppitan ma-lat eleg maheul niya ma-lat maweda hu kayyaggud ni pan-ewwat tu. Niya umbaddang etan ni kamenangpah ma-lat menemneman niya ma-duman hu inamta tu ey amtaen tun memillin kayyaggud ni pehding tu.

<sup>5</sup> Ey anin ni hi-gayuddan nelaing niya nenemneman, et dengel yudda huyyan tugun ma-lat ma-duman laing yu niya nemnem yu niya yuka pan-ewwat.

<sup>6</sup> Niya ma-lat dammutun han-awat yudda neligat ni meewwatan ni keibbellinan etan idan tugun, yadda ab-abig, yadda bullikay et yadda ehel idan nangkelaing niya nenemneman.

<sup>7</sup> Ya kapengilillingisin tuun pengu-unnudan tun APU DIOS hu kakeilleppuin kenemneman tu. Nem hedin yadda endi nemnem tun tuu ey daka kehinga tugun niya eleg da pinhed ni metuggun.

<sup>8</sup> Hi-gam ni u-ungngak, ey u-unnud mu tugun di amam nan inam.

<sup>9</sup> Tep yadda ittugun da hu mengiyyaggud ni elaw mu e henin kayyaggud ni penget winu banggel e kamengippeyaggud ni ang-ang.

<sup>10</sup> Hedin ewwisen dakaddan lawah ni tuu ma-lat ipahding mu dama daka pehpehding, ey entan tu u-unnud.

<sup>11</sup> Entan tudda hangud hedin kandan hi-gam ey "Ikay et itsu mambetak ni tutu-un endi bahul da et patyen tayudda.

<sup>12</sup> Petteyen tayudda humman ni tutu-un bebtaken tayu et anin ni makattagudda niya na-let ida, et henidda mategun meikkullung,

<sup>13</sup> et puenen tayu baballey tayun limmu da niyadda nangkebalol ni tenged dan ellan tayu.

<sup>14</sup> Ikay kuma et tayu ipahding humman et hedin wada ellan tayu, man pangagadwa tayu."

<sup>15</sup> Hi-gam e u-ungngak, ey entan kaya an pekikkillaw idan hanniman ni tutu-u ma-lat eleg mu ipahding hu daka pehpehding,

<sup>16</sup> tep pinhed dan peteg ni pehding ni lawah ey ida kaumpatey.

<sup>17</sup> Inamta tayu e hedin kaang-ang-angaddan sisit muka pampengihha-addin lingen, ey eleg ida mekna.

<sup>18</sup> Nem hedini yadda lawah ni tutu-u, ey meknadda et matey ida etan di ingkapyu dan keknaan ni edum ni tuu.

<sup>19</sup> Hanniman daman nanna-ud ni mettey hu tuun neka-agum e tuka pilliwa limmun edum tun tuu tep huyya hu kepagegan ni tuun henin nunman hu elaw tu.

<sup>20</sup> Hedini ya laing ey kamei-ellig di hakey ni biin kaman-eyyag idan tuud keltad niyaddad mulkaduh.

<sup>21</sup> Tuka pantugguna tutu-u anin ni attu neamungan da, yad heggeppan ni bebley winu yad keltad.

<sup>22</sup> Kantuy "Hi-gayun neikamkampu nemnem tu, kaw pinhed yun hannitan kayun neyun e eleg yu ussala nemnem yu? Isiked yun meneghegnud ida etan ni nelaing niya nenemneman.

<sup>23</sup> Pandengel kayu hedini e-helan dakeyu, tep tuggunen dakeyu niya ituttudduk hu kayyaggud ni wadad nemnem ku ma-lat amtaen yu.

<sup>24</sup> Dakeyu kaeyyaeyyagi ma-lat umli kayud kad-an ku ma-lat baddangan dakeyu, nem eleg yuwak hengguda.

<sup>25</sup> Eleg yu dedngela tugun kun hi-gayu niya eleg yu pinhed ni me-helan,

<sup>26</sup> et humman hu, ngi-ngi-ngian dakeyullin hi-gak hedini wadalli ligat yu.

<sup>27</sup> Ey makulug ni taltalangaan dakeyu niya eleg dakeyu baddangi hedini um-ali nemahhig ni ligat ni memahbah ni hi-gayu e henin na-let ni pewek e tuka bahbaha baley.

<sup>28</sup> Hedini mambegga kayullin baddang ni hi-gak, man eleg dakeyulli hengguda. Et yuwak ali hemmahemmaken, nem eleg yuwak ali hanhamak.

<sup>29</sup> Eleg yu pinhed ni metuttudduan niya eleg yu ilillingisin mengippahding ni pinhed APU DIOS.

<sup>30</sup> Em, eleg yu u-unnuda tugun ku niya eleg yu pinhed ni me-helan

<sup>31</sup> et heni yu intanem hu lawah, et humman hu, enniyen yulli hu mapeit ni lameh tu e humman ali kebahbahen yu.

<sup>32</sup> Tep ya etan tuun endi nemnem tu e tuka iwalleng hi APU DIOS. Eleg tu hengguda kayyaggud ni elaw niya hellamdaken tu ketteyyan tu.

<sup>33</sup> Nem emin ida mandedngel ni tugun ku et u-unnuden da ey umlinggep ida e endi da tekkutan niya endi an meippahding ni hi-gadan lawah."

## 2

### *Ya kayyaggud ni kaidawat ni laing*

<sup>1</sup> Hi-gam ni u-unggak, ey hedini pinhed mun mebendisyonan, man dengel mu eya ittugun ku. Iha-ad mud nemnem mu ey entan tu liwwan hu ituttudduk ni hi-gam.

<sup>2</sup> Pakadngel mudda tugun ni um-idwat ni laing niya kenemneman ey ipahding mun emin hu kabaalam ni mengewwat idan nunman.

<sup>3</sup> Ey hedini makulug ni pinhed mun menemneman niya pinhed mun peteg ni mewedda muka pan-ewwat,

<sup>4</sup> ey hedini heppulem hu laing ni henin kapeneppullin pihhuh winu henin kapenem-makin neitlun nebalol ni tenged,

<sup>5</sup> man amtaem hu pehding mun mengilillingit ni mengu-unnud ni pinhed APU DIOS niya meihhammad hu pengamtaam ni hi-gatu.

<sup>6</sup> Tep hi APU DIOS hu kakelpuin laing, ya dakel ni inamta niya kapan-ewwat.

<sup>7</sup> Hi-gatu kaum-idwat ni panyaggudan niya hi-gatu kaumbaddang. Ey hi-gatu heni happyaw idan kamengu-unnud ni hi-gatu ma-lat endi lawah ni meippahding ni hi-gada.

<sup>8</sup> Tudda kaippatek hu limpiyuh daka pehding ni edum dan tuu niya tudda kaeddugi hu nanengtun kamengu-unnud ni hi-gatu.

<sup>9</sup> Et humman hu, hedini u-unnudem tugun ku, man amtaem hu neiptek. Ey meandeng niya limpiyuh hu pehding mu niya amtaem hu kayyaggud ni elaw.

<sup>10</sup> Et menemneman ka niya um-amleng ka tep yadda humman ni eddalem.

<sup>11</sup> Ey endi lawah ni pehding mu tep inamtam niya muka ewwasi hu kayyaggud ni kapehding.

<sup>12</sup> Ey meihwang kad implanuh ni lawah ni tuun neihla hu daka e-hela tep nelaing ka niya nenemneman ka.

<sup>13</sup> Huyyaddan lawah ni tuu, ey inwalleng da kayyaggud ni elaw et henidda wadad engeenget e daka ippenahding hu lawah.

<sup>14</sup> Daka pan-amlengin mengippahding ni lawah niya ida kaman-an-anlan mene-ul ni edum dan tuu.

<sup>15</sup> Nemahhig itek da, et humman hu, endin hekey dinel ni tuun hi-gada.

*Ya eleg pekiddagyumin makilakin bii*

<sup>16</sup> Hedin nelaing ka niya nenemneman ka, ey eleg ka mehe-ul ni ehel idan makilakin bii.

<sup>17</sup> Humman idan bii ey hini-yan da ahwa da e impangil da hu insapatah dan Apu Dios eman ni nengahwaan da.

<sup>18</sup> Ya lakin kaumlaw di baley ni henin nunman ni bii et ipahding dan dewwa hu lawah ey heni tu indalan di dalam ni ketteyyan et immelan an manha-ad di bebley ni nangketey.

<sup>19</sup> Ya etan lakin kamengi-ullig nunman ni bii ey eleg law meibbangngad tep eleg tu hanhamak hu dalam ni umlaw di ketegguan.

<sup>20</sup> Et humman hu, u-unnud mu hu elaw ni kayyaggud ni tuu et mambiyag kan kayyaggud hu elaw mu.

<sup>21</sup> Tep ya kayyaggud ni tuu ey mannenneng ni manha-ad eyad bebley.

<sup>22</sup> Nem hedin yadda lawah ni tuu, man pe-kal Apu Dios ida eyad bebley.

### 3

*Ya tugun ida etan di kamampenikken ni lalakki*

<sup>1</sup> Hi-gam e u-ungngak, ey entan tudda liwwan hu nakka ittenuttuddun hi-gam. Iha-ad muddad nemnem mu ey huyyadda u-unnud mu.

<sup>2</sup> Tep huyyaddan nakka ittugutugun hu mengidwat ni andukkey ni biyag mu niya mengiyyaggud ni neitu-wam hedin u-unnudem ida.

<sup>3</sup> Peang-ang mun ingganah hu impeminhed mu niya binabbal mun edum mun tuu ey ipahding mu hu inhel mu ma-lat madinel idan hi-gam. Huyyaddan kayyaggud ni kapehding hu heni ibanggal mu niya heni itudek mud puhum.

<sup>4</sup> Hedin pehding mudda huuya ey kayyaggud kad hinanggan Apu Dios niyad tuu.

<sup>5</sup> Hi APU DIOS hu pangidinelim ni emin ni kamekapkapyad biyag mu, beken ni ya annel mu.

<sup>6</sup> Niya emin hu pehding mu ey inemnem mun hi-gatu ma-lat peamta tun hi-gam hu neiptek ni pehding mu.

<sup>7</sup> Beken ni neala ni kammuy nekannemneman ka et mu idinel di muka pannemnem. Hi APU DIOS kumaddan hu dayaw mu niya hi-gatu u-unnud mu, ey entan tu ipahding hu lawah.

<sup>8</sup> Hedin u-unnudem ida huuya ey umyaggud annel mu niya umhinedel ka.

<sup>9</sup> Usal mu kinedangyan mun mengippahding idan keidaydayawan APU DIOS ey idwat mun hi-gatu hu memengngulu niya kekakkayyaggudan ni lameh idan intanem mu.

<sup>10</sup> Hedin hanney pehding mu, man mehewwal hu enniem di inggaud mu et mangkepnu aallang mu niya mangkepnudda pa-nay mun meinum.

<sup>11</sup> Hi-gam e u-ungngak, entan tu langlangkuuya hu kapenuggunin APU DIOS ni hi-gam niya entan tu balaw hedin imbunget daka.

<sup>12</sup> Tep hedin hi APU DIOS, man tudda katugguna hu nakappinshed tu, henin kapenuggunin a-ammed ni u-ungnga da. \*

<sup>13</sup> Kabendisyonin APU DIOS hu tuun pinhed tun menemneman niya pinhed tun mewedda tuka pan-ewwat.

<sup>14</sup> Tep heballi humman ni meweddan hi-gatu nem ya silber winu balituk.

<sup>15</sup> Nebalbalol hu laing nem ya nenginan batu, ey anin ni hipan nebalol ni tenged et eleg mei-ingngeh balol tud balol ni laing.

<sup>16</sup> Tep yadda nelaing niya nenemneman ey kedangyan ida niya ida kamedeyyaw, ey indawat Apu Dios ni hi-gada andukkey ni biyag.

<sup>17</sup> Kayyaggud niya melinggep hu biyag ni tuun nelaing niya nenemneman, ey kamedinnel e endi lawah ni meippahding ni hi-gatu.

<sup>18</sup> Ey kamean-anla hu nelaing niya nenemneman ni tuun eleg tu iwwalleng ni man-eddal. Tep hedin ya laing, man henin keyew e kaum-idwat ni biyag ni tuun kamengngan ni lameh tu.

<sup>19</sup> Dammutun lintun APU DIOS hu puyek niya kabunyan tep nakannemneman niya nelaing.

<sup>20</sup> Ey dammutu mewan ni tuka peukkat hu danum idad hebwak, niya tuka e-gaha udan ni nalpud kulput tep ya laing tu.

<sup>21</sup> Hi-gam ni u-ungngak, ey itnem mud nemnem mu hu kayyaggud ni tugun niya kayyaggud ni kapannemnem. Entan tu liwwan ni pehding ida huuya,

<sup>22</sup> tep umyaggud hu biyag mu hedin pehding mudda huuya tep ya kayyaggud ni elaw mu.

\* 3:12 3:12 [11-12] Hebrews 12:5-6

<sup>23</sup> Iningngah tu hu ippaptek dakaddan kayyaggud ni tugun et endi hu lawah ni meippahding di biyag mu, et eleg ka meiningngah etan di tuun kamandaddallan ey neihungbub.

<sup>24</sup> Hedin meuggip ka, man kayyaggud hu ugip mu tep melinggep ka e endi tekkutam.

<sup>25</sup> Entan tu takusi hu hipan kaumbabhah e endi maptek ni neipahding ni lawah ni tuu, <sup>26</sup> tep kameiddinnel hi APU DIOS ni mengippaptek ni hi-gam.

<sup>27</sup> Hedin mahapul ni edum mun tuu hu baddang mu, ey entan tu ukuh, nem baddangim hedin han-ipahding mu. <sup>28</sup> Hedin dammutun baddangam ni nunya hu sinakdul mu, ey entan tu ehel ni hi-gatu hu "Ali kan kabubuhan." winu "Ali kan pidwa tu, tep inna-nukkaw ni pemaddangan kun hi-gam nunya."

<sup>29</sup> Ey entan an pannemnem ni lawah ni pehding mun sinakdul mu tep kamedinnel e endi mu pehding ni lawah ni hi-gatu.

<sup>30</sup> Entan pengapkapyam ni pebehul mun edum ni tuu hedin endi nambahulan dan hi-gam.

<sup>31</sup> Entan kaemeh mun tuun makabbunget, anin ni kimmedangyan, ey entan tu iu-unnud di tuka pehpehding ni lawah.

<sup>32</sup> Tep angebe-hel APU DIOS hu maheul ni tuu, nem nehhammad hu tuka pekiggayyum idan kayyaggud ni tuu.

<sup>33</sup> Iddutan APU DIOS hu familyah idan lawah ni tuu, nem tuka bendisyoni familyah ni kayyaggud ni tuu.

<sup>34</sup> Ey tudda kang-ni-ngii hu kamenaltalangan hi-gatu, nem kababbal idan daka pebahah annel da. †

<sup>35</sup> Tuka iddawsin keiddeyyawan hu nelaing niya nenemneman ni tuu, nem tuka babba-angi hu tuun endi nemnem tu.

#### 4

<sup>1</sup> Hi-gayun u-ungngak, ey dengel yu hu ittugun ku e hi ameyu ma-lat lumeing kayu niya menemneman kayu.

<sup>2</sup> Kayyaggud hu ittutdudduk ni hi-gayu, et humman hu u-unnud yu.

<sup>3</sup> Ya eman ni keek-ekut kud baley di ama ey nakappinshed tuwak nan ina tep binugtungngak.

<sup>4</sup> Sinugun tuwak nan ama e kantuy "Entan tu liwwan hu tugun ku ey u-unnud mu ma-lat maituu ka.

<sup>5</sup> Entan nisi tu liwwan ida huyyan tugun ku ey entan tudda iwalleng, nem u-unnud mu ma-lat lumeing ka ey menemneman ka niya ma-lat maweda muka pan-ewwat.

<sup>6</sup> Ey entan tu iwalleng hu laing niya kayyaggud ni kapannemnem tep keingngah tu hu ippaptek daka ma-lat endi maipahding ni lawah ni hi-gam.

<sup>7</sup> Endi edum ni nebalbalol nem ya laing niya kayyaggud ni kapannemnem. Et humman hu, kayyaggud hedin umlaing ka niya mewedda kayyaggud ni muka pannemnem, anin ni kantu et mahapul ni tellakem emin hu hipan wadan hi-gam.

<sup>8</sup> Hedin ibbilang mun importanteh hu laing niya kayyaggud ni kapannemnem, ey hedin eleg mu iwwalleng, man peta-gey daka.

<sup>9</sup> Em, tettebaleh daka e heni daka pepngetan ni kakkayyaggud ni penget." Huyya hu kaittugutugun aman hi-gak ni nunman.

<sup>10</sup> Hi-gam ni u-ungngak, ey dengel mu eya ittugun ku ey u-unnud mu hedin e-helan daka ma-lat andukkey ali biyag mu.

<sup>11</sup> Ittutdudduk ni hi-gam hu elaw ni laing niya kayyaggud ni kapannemnem. Huyyaddan ittutdudduk ni hi-gam ey umbaddang ni mengippeyaggud ni elaw mu.

<sup>12</sup> Tep hedin nelaing ka niya nenemneman ka, ey endi umhanin planuh mud biyag mu, e heni ka etan ni tuun kamemsik, nem eleg meihungbub.

<sup>13</sup> U-unnud mu ey entan tu liwwan ida huyyan inedal mun ittutdudduk tep huyyadda um-idwat ni kayyaggud ni neitu-wam.

<sup>14</sup> Entan tu iu-unnud di elaw ni lawah ni tuu.

<sup>15</sup> Em, entan tu u-unnud hu daka pehpehding. Elaw ka kumengud lawwan mu.

<sup>16</sup> Tep hedin hi-gada, man eleg um-ali ugip da ingganah wada pehding dan lawah niya ingganah peligligatan da hu edum dan tuu.

<sup>17</sup> Nakappinshed dan peteg ni mengippahding ni lawah, henin neminshed dan kennen niya danum.

<sup>18</sup> Nem hedin ya elaw ni kayyaggud ni tuu, ey henin tuka kewa-wai e lektattuy nabnangan ni emin et kamaka-ang-ang, nema-ma hedin maka-aggew.

† 3:34 3:34 Ang-ang yu hu James 4:6 niya 1 Peter 5:5.

<sup>19</sup> Nem hin-appil ida ngu lawah ni tuu, tep hedin ya elaw da ey kamei-ingneh di engeenget. Henidda etan ni tuun neihungbub, nem eleg tu amta himmulun ni nehelapdungan tu.

<sup>20</sup> Hi-gam ni u-ungngak, ey dengel mudda ittugun kun hi-gam,

<sup>21</sup> ey iha-ad muddad nemnem mu niya entan tudda iwalleng.

<sup>22</sup> Huyyadda um-idwat ni ketegguan, tep pe-let da niya peyaggud da annel ni tuun mengu-unnud idan nunyan tugun.

<sup>23</sup> Ya makahhapul ni peteg ey ang-ang mu ma-lat endi hu hipan lawah ni an um-alid nemnem mu. Tep ya elaw ni kapambiyag ey kameipuu di kapannemnem.

<sup>24</sup> Entan pan-itek ey entan tu haul hu edum mun tuu tep ya lawah ni muka e-hela.

<sup>25</sup> Ey entan tu iebulut ni wada umheli-wad ninemnem mun pehding mun mambiyag. Nem iu-unnud mu etan di tuun ya dellanen tu hu tuka pepuhdanin ang-angen.

<sup>26</sup> Ihammad mun nemnemen hu elaw ni pambiyag mu. Iu-unnud mu etan di tuun tuka deklana dellanen tu et endi an umheli-wad penettengan tun lawwan tu.

<sup>27</sup> Entan tu iebulut annel mun an mehelli-wad pengippahdingan ni lebbeng tun pehding mun mambiyag. Heni hakey ni ebuh ni dalan hu u-unnud mud biyag mu. Entan tu unud hu dalan idan lawah ni tuu.

## 5

<sup>1</sup> Hi-gam e u-ungngak, ey dengel mudda eya ittugun kun hi-gam

<sup>2</sup> ma-lat amtaem hu mampillin kayyaggud ni pehding mu niya ma-lat amtaem ni mampillin kayyaggud ni e-helen mu.

<sup>3</sup> Ya etan lawah ni biin kai-ulig ni linggeman ni laki ey kaumhaul tep malumi-ih ehel tun heni danun ni putsukan ey henin lanan olibah.

<sup>4</sup> Nem hedin mehe-ul ka et ipahding mu hu pinhed tu, ey manhelheltap ka et iningneh tu hu imminum kan apgu niya heni ka negedged ni hinallung.

<sup>5</sup> Humman ni bii ey tuka ippangulu hu lakin kamei-unnud ni hi-gatud ketteyyan tu et manha-ad di bebley idan nangketey.

<sup>6</sup> Eleg hengguan henin nunman ni bii hu kayyaggud ni elaw ni pambiyag. Heni etan ni tuun anin ni lawah hu dalan et tuka lalgema elaw e eleg tu pepuhdani tuka pampellawwi.

<sup>7</sup> Et humman hu, hi-gayuddan lalakkin u-ungngak, ey u-unnud yudda eya tugun ku ey entan tudda liwwan.

<sup>8</sup> Entan an kaihehennup mun biin henin nunman ey entan keihnap di baley tu.

<sup>9</sup> Tep hedin eleg yu u-unnuda eya tugun ku et pehding yu hu beken ni kayyaggud, ey eleg dakeyu law lispituhaddan tuu niya pilliwen ni endi hemek tun tuu hu wadan hi-gayu.

<sup>10</sup> Henin nunman hu meippahding e ellan ni tutu-un eleg yu amta hu limmu yu niya kinedangan yu.

<sup>11</sup> Et hedin alin kamangkepappeg biyag yu e ebuh law ni kayu kaman-u-uggip tep endi law elet yu ey nemahhig ali tuttuuyu yu.

<sup>12</sup> Et kanyulli law ey "Anggehemmekkak law nunya tep eggak lan hekey pinhed ni umdengel ni tugun ni nunman!"

<sup>13</sup> Eggak hanguhanguden hu tugun idan nangkenemnem,

<sup>14</sup> et hipa law deya e anggeba-ing hu neitu-wak."

<sup>15</sup> Entan tu edahi ahwam. Ikahakey mun hi-gatu impeminhed mu, henin muka pan-ehhuli e yad bubun mun ebuh pan-ahulim. Entan an pan-ahul di bubun ni edum.

<sup>16</sup> Emin ida u-ungnga yu ey melpun hi-gayun han-ahwan ebuh,

<sup>17</sup> endi hu an melpud edum ni biin beken mu ahwa.

<sup>18</sup> Ya kayyaggud ey mebendisyonan et anhan hu ahwam, e nalpuan idan u-ungngam niya hi-gatu pan-amlengam e inahwam eman ni nehikenam.

<sup>19</sup> Kamei-ellig hu ahwam di labah ni makwah e kakkayyaggud ang-ang tu niya kayyaggud annel tu. Ya kayyaggud ni pehding mu ey hi-gatun ebuh hu mengippeamleng ni hi-gam ey pan-an-anla kan impeminhed tun hi-gam.

<sup>20</sup> Et humman hu, hi-gam e u-ungngak, ey entan an paelukuy etan ni biin wada ahwa tu. Hipa ngu anhan mu peminhedan ni biin eleg tu ihhakey impeminhed tun ahwa tu?

<sup>21</sup> Hi APU DIOS ey tuka ang-ang-angan emin hu kapehpehding ni tuu. Endin hekey hu eleg tu amta.

<sup>22</sup> Ya etan lawah ni tuu ey yadda lawah ni tuka pehpehding hu heni bitun keknaan tu.

<sup>23</sup> Tep eleg tu pakannemnema ni impahding tu, et humman umhulun ni ketteyyan tu, tep eleg tu tugguna annel tu.



## 6

*Entan tu iehnung etan tuun umgawat*

- <sup>1</sup> Hi-gam ni u-ungngak, ey entan tu abulut ni mu i-ehnung hu hakey ni tuun umgawat.  
<sup>2</sup> Nem hedin neil-uh kumedek ni inebulut mun hi-gam memeyyad ni utang ni hakey ni tuu hedin eleg tu hambayad et heni mu hinablut annel mu tep ya insapatah mu,  
<sup>3</sup> ey heninnuy hu pahding mu: Elaw kan elaw di kad-an etan ni tuun immutang et kamampehemhemmek ni hi-gatu et ehelem e eleg tu nemnemema etan insapatah mun hi-gatu, ma-lat beken ni hi-gam mambeyyad.  
<sup>4-5</sup> Entan tu pahbudin an man-u-uggip, nem elaw ka kumaddan et ka makihummangan ni hi-gatu ma-lat beken ni hi-gam hu memeyyad etan ni inutang tu. Et heni ka etan ni makwah ni imbesikan tu etan kamandedweng niya heni ka etan ni sisit ni nakna nem bimmesik.

*Ya ittugun idan makahhigan tuu*

- <sup>6</sup> Hi-gayuddan makahhiga, ey ang-ang yu kedi elaw idan abbun ma-lat menemneman kayu.  
<sup>7</sup> Tep anin ni endi ap-apu dan manmandal ni hi-gadan mangngunnu et tagan da ngunu.  
<sup>8</sup> Hedin ugew, man taggan da amung ni kennen da ma-lat wada kennen da hedin mainudan.  
<sup>9</sup> Nem hedin ya makahhigan tuu, ey kaman-u-uggip.  
<sup>10</sup> Kantuy 'Man-u-uggippak pay ni- ey man-eg-egpittak et man-iyiyatu-ak.'  
<sup>11</sup> Nem hedin pelinlinwannan tu, ey kekemtang ali ey nambalin ni nakawwetwet henin kapehding ni matekew e eleg iggibek ni himmegep di baley.  
<sup>12</sup> Yadda lawah niya endi silbitun tuu ey itek daka e-e-hela.  
<sup>13</sup> Ida kaumeni-ding niya dake daka pehding ni daka panhe-ul ni edum dan tuu.  
<sup>14</sup> Lawah hu wadad nemnem da. Et humman hu, ida kaumplanuplanuh ni lawah ni pehding da niya emin hu lawwan da ey ida kaumbabahbah ni kapandadagyunin tuu.  
<sup>15</sup> Et endi maptek ey wadalli ligat dan umhulun ni ketteyyan da tep ya humman ni elaw da.  
<sup>16</sup> Wada enem ni elaw idan tuun anggebe-hel nan APU DIOS. Ya kakulugan tu ey wada pitun kamengippebungnet ni hi-gatu:  
<sup>17</sup> Ya kapampahhiyaid kapehding niyad kapan-e-ehhel, ya kapenghelin beken ni makulug, ya kapemetteyin tuun endi bahul tu,  
<sup>18</sup> ya kapamplennuhin lawah, ya neminshed ni peteg ni mengippahding ni lawah,  
<sup>19</sup> ya panjangkakan ni mantistigu et ya kapemahbahin kayyaggud ni kapandadagyumidan tuu.

*Ya eleg pengi-ebbekin ahwa*

- <sup>20</sup> Hi-gam ni u-ungngak, ey u-unnud mu hu tugun amam niya entan tu liwwan hu intuttuddun inam.  
<sup>21</sup> Iha-ad mudda humman di nemnem mu e heni ittudek muddad puhum.  
<sup>22</sup> Huyyaddan tugun hu heni mengituttuddun pehding mun kewa-wa-wa, anin ni attu lawwam. Heni huyyadda mengippaptek ni hi-gam anin ni hileng niya menuggun ni hi-gam ni kawwalwal.  
<sup>23</sup> Nemnem mu e huyyaddan tugun dan hi-gam hu heni kengkeh ni um-idwat ni benang tep ittudu tu panyaggudam. Daka katugguna ma-lat amtaem mu hu neiptek ni pehding mun mambiyag.  
<sup>24</sup> Huyyaddan tugun hu mengidawwin hi-gam di lawah ni bii ma-lat eleg ka meidngelan ni malumi-ih ni ehel ni biin wada ahwa tu.  
<sup>25</sup> Entan kaheul ni kinamaddikit idan nunman ni bii. Ey entan kaelukuy ni ki-ding ni mate da.  
<sup>26</sup> Tep ya biin tuka pebeyyad annel tu ey dammutun umhulun ni kewetwetan ni laki. Tep anin na-mun humman law ni ebuh hu pihhuh etan ni laki et iggenda tun ibbayad nunman ni bii. Et lektattuy ibbayad tun emin hu wadan hi-gatu, anin ni ya biyag tu.  
<sup>27</sup> Inamta tayun emin e eleg mabalin ni an ihhaki hu ngalab, tep kaw eleg megihheb balwasi?  
<sup>28</sup> Ey kaw dammutun iggasin hu ngalab ey eleg meettungi heli?  
<sup>29</sup> Hanniman dama hu lakin mengi-ullig ni biin wada ahwa tu e mahapul ni mekastigu.  
<sup>30</sup> Dammutu na-mun han-awat idan tuu hedin nenakew ni mekkan hu matekew, tep neupa.  
<sup>31</sup> Nem mahapul ni memulta hedin neha-kupan et meminpittu ibbayad tu etan di sinekew tu, anin na-mun ibbayad tun emin hu wadan hi-gatu.

<sup>32</sup> Nem nema-ma-ma mewan etan lakin mengi-ullig ni beken tu ahwa, tep heni endi nemnem tu e hi-gatu ngu memahbah ni neitu-wan tu.

<sup>33</sup> Tep nanna-ud ni panhelheltap etan ni ahwan bii ey anggeba-ing ngu law ni ingganah hu neitu-wan tu.

<sup>34</sup> Tep ya lakin kaman-annil ey nemahhig bunget tu niya endi hemek tun pengiblehan tu.

<sup>35</sup> Anin na-mun piga e-helen etan ni nambahul ni lakin multa tu et eleg meellubyag hu bunget nunman ni kaman-annil.

## 7

<sup>1</sup> Hi-gam ni u-ungngak, ey entan tu liwwan ida huyyan tugun ku, nenemnem mudda et ipahding mudda.

<sup>2</sup> Paka-u-unnud mudda tugun ku ma-lat mannananeng kan mategu. Ey kamei-ellig ni ipapatek mun peteg henin muka pemapteke idan nebalol ni tenged mu.

<sup>3</sup> Ihaha-ad mudda huyyan tugun kud nemnem mu e heni mudda ittudek di puhum ey heni mu ibbedbed di kimeng mu.

<sup>4</sup> Ibilang mun heni agim hu laing niya kayyaggud ni kapannemnem, ey ibilang mun heni gayyum mu hu pengamtaam ni neiptek niya neihalla.

<sup>5</sup> Tep humman ida hu mengiddawwin hi-gam di biin wada ahwa da e daka ellukuya lalacki tep ya malumi-ih ni ehel da.

<sup>6</sup> Hakey ni aggew ey indu-ngaw kud habhabyen ni baley mi,

<sup>7</sup> ey inang-ang kudda kamenikken ni lalakkan neikamkampu nemnem da. Ey wada hakey ni hi-gadan ka-ang-ang e kulang ni peteg nemnem tu.

<sup>8</sup> Nakka ang-ang-anga ey immelad nampangaan ni keltad di kad-an ni baley etan ni biin makilaki.

<sup>9</sup> Yan nampelawwan tudman ey kamangkehilleng law.

<sup>10</sup> Entanni ey inang-ang ku etan biin nambalwasin henin balwasin biin tuka pebeyyad annel tu e limmaw et tu dammuen. Ey ka-ang-ang e nekattalam humman ni bii.

<sup>11</sup> Ya hanniman ni bii ey na-let ehel tu niya endi baing tu. Endi mewan anemut tud baley tu,

<sup>12</sup> tep anin di attu et wadadman. Mu i-ang-ang di keltad ni immen diman. Limmaw ka kedi mewan di mulkaduh ni wadadman. Kamenemmahemmak ni lakin mengi-ullig ni hi-gatu.

<sup>13</sup> Entanni ey inang-ang ku humman ni biin singnged tu etan laki et akwalen tu. Endi baing tu e kantu etan ni laki ey

<sup>14</sup> "Impahding kun nunya etan insapatah kun pehding ku ey nan-appittak et immen hu natdaan ni detag. Umlaw itad baley et ta ihida.

<sup>15</sup> Immeheppak tep daka hemmaken ey kayyaggud et wada ka.

<sup>16</sup> Indaddan ku etan keuggipan ta e inap-apan kun luput ni nalpud Egypt.

<sup>17</sup> Ey hina-adak ni bangbanglun myrrh, ya aloes et ya cinnamon.

<sup>18</sup> Ikay et lumaw itad baley et ita man-ulig ingganah mewa-wa.

<sup>19</sup> Entan takut mu, tep endi etan ahwak. Wada linawwan tu ey meeyapaw alidman.

<sup>20</sup> Nambalun ni dakel ni pihhu, et humman hu, eleg um-anemut ingganah alin keettengan ni bulan."

<sup>21</sup> Hanniman impanghel etan ni bii ma-lat alukuyen tu etan laki.

<sup>22</sup> Eleg mannemnem etan laki et makilaw tu-wangu etan ni bii. Humman ni laki ey heni bakan eleg tu amta e daka pan-illaw et da palsien. Ey henin makwah ni naknad bitu

<sup>23</sup> et tuka hehheggedan ebuh etan memennan hi-gatu, nem endi inna-nukkaw tun umbesik. Heni mewan ni sisit ni netapangan di lingen et makna. Humman ni laki ey eleg tu amta e anggegannu law kepappegan ni biyag tu.

<sup>24</sup> Et humman hu, hi-gayun lalakkan u-ungngak, ey dengel yu tugun ku.

<sup>25</sup> Ang-ang yu et eleg dakeyu alukuyen ni henin nunman ni bii. Entan an kaihehhennup ni hi-gatu.

<sup>26</sup> Tep ya henin nunman ni bii memahbah ni dakel ni kamenangpah ni lalacki. Niya henin nunman ni bii hu kaumhulun ni kakettayyin dakel ni kamenangpah ni lalacki.

<sup>27</sup> Ya lakin kamekillaw di baley ni hanniman ni bii, ey heni immelad dalan ni katey tep hellamdaken tu ketteyyan tu et maikulung.

## 8

<sup>1</sup> Ya laing ey kamei-ellig di biin kaman-eyyag ni tutu-u anin di attu.

<sup>2</sup> Heni immen di kakeam-amungin tutu-u, yaddad keltad, yaddad nampangaan ni dalan e tudda dammuen ma-lat ayagan tudda.

<sup>3</sup> Ey heni mewan immen di eheb ni bebley ey kaman-e-hel e kantuy

<sup>4</sup> "Hi-gayun emin ni tutu-u, ey dengel yu eya e-helek. Nakka an e-e-helan tutu-u anin di attu eyad puyek ma-lat pakannemnemen da niya u-unnuden da eyadda ittugun ku.

<sup>5</sup> Hedin hi-gayuddan kamenangpah, attu anhan et menemneman kayu law ey? Ey hi-gayun endi nemnem tu, attu et menemneman kayu et lumeing kayuy?

<sup>6</sup> Dengel yuwak kedi anhan, ma-lat mebaddangan kayu eyaddan tugun ku, tep neiptek ida.

<sup>7</sup> Makulug emin nakka e-hela, tep eggak ni hekey pinhed ni man-ittek niya an menghel ni lawah.

<sup>8</sup> Em, neiptek ni emin hu nakka e-hela tep endi nakka e-helan beken ni makulug.

<sup>9</sup> Ya etan tuun dakel hu inamta tu ey inamta tu hu neiptek niya nelakah tun ewwatan e makulug emin nakka e-hela, endi neihalla.

<sup>10</sup> Attu kuma et ya le-ingan yu niya kenemneman yu hu pehebballi yu ey, et beken ni ya pihuh niya keddangyanan yu?

<sup>11</sup> Tep i-imman hu nelaing niya nenemneman ita nem ya kinedangyan e dakel pihuh, tep nebalbalol hu laing nem ya hipan nebalol ni tenged e henin rubies.

<sup>12</sup> Heni immehel hu laing e kantuy 'Hi-gak e laing ey nakka iddawat hu kapan-ewwat ni tuun kamanheppul ni hi-gak, ey nakka ituttuddu hu pehding tu ma-lat maweda inamta tu niya ma-lat menemneman.

<sup>13</sup> Anggebe-hel ku hu kapanpahhiyain tuu, ya lawah ni daka kapkapyaa, niya itek ni daka e-hela. Tep ya tuun kamengu-unnud nan APU DIOS ey anggebe-hel tu hu hipan lawah.

<sup>14</sup> Hi-gak hu kad-an niya kakelpuin kayyaggud ni kapannemnemen, ya kayyaggud ni tugun, ya kapan-ewwat et ya et-eteng ni kabaelan.

<sup>15</sup> Dammutun ida kamampatul hu papatul tep hi-gak ey nak ida kabaddangin mengapyan meandeng ni olden.

<sup>16</sup> Ey nak ida kabaddangi emin hu aap-apud kebebbbley eyad puyek ni man-ap-apun tutu-u da.

<sup>17</sup> Pinhed kuddan emin hu neminhed ni hi-gak. Ey emin ida kamenepul ni hi-gak ey da-ak kahemmaka.

<sup>18</sup> Hi-gak mewan kakelpuin kinedangyan niya dayaw. Kabaelan kun memaddang ni tuu ma-lat kayyaggud ni ingganah pambalanan ni tuka pehding.

<sup>19</sup> Nebalbalol hu hipan nakka iddawat ni tuu nem ya nemahmah ni balituk winu nenginan silber.

<sup>20</sup> Kayyaggud niya meandeng ni ingganah hu nakka pehding.

<sup>21</sup> Nakka iddawat kinedangyan idan neminhed ni hi-gak.

<sup>22</sup> Wineda tuwak nan APU DIOS et hantudda wadaan emin eya wadan nunya.

<sup>23</sup> Niya hi-gak ngu dedan hu sinudu tun pangkadwa tu eman ni laputun eleg tu ni letuen hu puyek.

<sup>24</sup> Em, wineda tuwak dedan ni pangkadwa tu eman ni eleg tu ni panletuan idan baybay ey hebwak,

<sup>25</sup> yadda duntug et yadda nedunduntug di neiha-adan da.

<sup>26</sup> Wineda tuwak dedan et han tu wadaadda puyek, yadda papayyew et yadda kudal. Wineda tuwak eman ni eleg tu ni letuen hu anin ni hakey ni pi-dit ni dep-ul.

<sup>27</sup> Wada-ak dedan law eman ni nanletuan tun kabunyan, ey wada-ak eman ni nengiha-adan tun kelteg ni nandammuan ni kabunyan et ya baybay,

<sup>28</sup> yan nengiha-adan tuddan kulput di kabunyan ey yan eman ni nengiha-adan tuddan kaman-utbul di dallem ni baybay,

<sup>29</sup> yan nengiha-adan tun kelteg ni keihha-adan ni baybay et eleg meideldel hu pappeg da, niyan eman ni nengiha-adan tun yinudungan eyan puyek.

<sup>30</sup> Hi-gak etan kadwan APU DIOS ni namplanuh ni nanletuan tun emin eyaddan wadan nunya. Impeamleng kun kewa-wa-wa hi APU DIOS ey nan-am-amlenggak damad kad-an tu.

<sup>31</sup> Nakka man-am-amleng ni ingganah eyaddan emin ni lintu tu, anin idan tutu-u.

<sup>32</sup> Et humman hu, dengel yuwak e u-unggak ida, tep hedin u-unnuden yu tugun ku, ey man-am-amleng kayu.

<sup>33</sup> U-unnud yudda ittugun kun hi-gayun pehding yu. Entan tu iwalleng hu tugun ku ma-lat lumeing kayu niya menemneman kayu.

<sup>34</sup> Ya etan tuun mengu-unnud ni tugun ku niya ihik ni menammun hi-gak ni kewa-wa-wad dallin ni baley ku, ey man-am-amleng.

<sup>35</sup> Tep ya tuun menemmak ni hi-gak ey hemmaken tu keittu-uan tu ey man-am-amleng hi APU DIOS ni hi-gatu.

<sup>36</sup>Nem ya etan tuun eleg menemmak ni hi-gak ey indawtan tu annel tun panliggatan tu. Ey ya etan tuun anggebe-hel tuwak ey ya katey pinhed tu.' "

## 9

*Ya etan nenemneman niya etan endi hu nemnem tu*

<sup>1</sup>Ya laing ey kamei-ellig di hakey ni biin nengapyan baley tun pitu tukud ni balkon tu.

<sup>2</sup>Nampahemul et pedaddan tudda kennen et yadda meinum niya emin hu mahapul.

<sup>3</sup>Intu-dak tudda bega-en tun bibi-in an man-eyyag ni um-alin mekihhemmul et lumaw idad neduntug etan di bebley et itkuk da e kanday

<sup>4</sup>"Kaman-eyyag hi 'Laing' ni hi-gayun emin ni kamenangpah ni tutu-u. Kantuy 'Keyuy ni emin et manhamul itu.' Anin ni hi-gayuddan endi nemnem tu et kantuy

<sup>5</sup>'Keyuy di baley ku et kanen yu hu indaddan kun kennen niya ma-lat inumen yu hu kinapyak ni meinum.

<sup>6</sup>Iwalleng yu hu endi silbitun elaw yu ma-lat maituu kayu. Kenemnemi kayu ma-lat amtaen yu kayyaggud ni kapehding.' "

<sup>7</sup>Hedin e-helam hu tuun eta-gey tuka pannemnem ni annel tu, man hi-gam kumedek pedngelan tu. Ey hedin ibbunget mu hu lawah nemnem tun tuu, man ibbaleh tu et lipputan tuka kumedek.

<sup>8</sup>Et humman hu, etan tu eheli hu tuun eta-gey tuka pannemnem ni annel tu tep anggebe-helen daka kumedek. Nem hedin ya nenemneman ni tuu e-helam, ey lispihuhen daka anhan law.

<sup>9</sup>Tep ya etan e-helem etan ni nenemneman ni tuu ey umbaddang ni hi-gatu ma-lat ma-duman laing tu, ey ya ituttuddum etan ni kayyaggud ni tuu ey mei-dum di inamta tu.

<sup>10</sup>Ya kapengilillingisin tuun pengu-unnudan tun APU DIOS hu kakeilleppuin kenemneman tu. Ey ya kapekiddagyumin hi-gatu e Kakkayyaggud ni peteg hu pan-eddalan ni kayyaggud ni pambiyag.

<sup>11</sup>Hedin nenemneman hu tuu, man andukkey hu biyag tu eyad puyek.

<sup>12</sup>Et humman hu, hedin nelaing niya nenemneman hu tuu ey panyaggudan tu. Nem hedin iwalleng tudda huyya ey helheltapen tu hu hipan pambalanan tu.

<sup>13</sup>Ya etan tuun endi nemnem tu ey kamei-ellig etan ni biin eleg tu kekkennga ehel tu ey endi baing tu niya endi inamta tu.

<sup>14</sup>Kamanyuyyuddung di habyen ni baley tun nepattuk e kameuhdungin emin hu bebley ma-lat manhehhegged ni he-ulen tun

<sup>15</sup>linggeman ni melebbah, e anin ni wada lawwan da et tudda kaeyyagi.

<sup>16</sup>Kantuy "Emin kayun neikamkampu nemnem tu, ey ali kayu eyad baley ku.

<sup>17</sup>Kayyaggud hu netakew ni danum niya mehengheng-ew hu netakew ni mekkan hedin endi menang-ang ni penggannan."

<sup>18</sup>Nem eleg amtadda etan ni kamengu-unnud ni hi-gatu e ida kamettyey hu kaumhegep di baley tu. Eleg da han-awat e yadda nengu-unnud ni ayag tu ey netey ida law et maikulung ida.

## 10

<sup>1</sup>Huyyadda edum ni tugun eman lan patul e hi Solomon. Ya etan netugun ni u-ungnga ey kamengippeamleng nan ametu, nem ya etan endi nemnem tun u-ungnga ey pedgeh tu nemnem nan inetu.

<sup>2</sup>Ya kinedangyan ni eleg ilingetan ey eleg tu iddawat panyaggudan, nem ya etan tuun kayyaggud tuka pehpending ey meihwang di katey.

<sup>3</sup>Eleg i-abulut APU DIOS ni an meuppa hu tuun kayyaggud tuka kapkapyaa, nem eleg tu i-abulut ni an ellan idan lawah ni tutu-u hu pinhed da.

<sup>4</sup>Ya etan makahhigan tuu ey mewetwet, nem hedin ya etan mahlun tuu, man umkedangyan.

<sup>5</sup>Ya etan tuun nenemneman ey tuka idaddan kennen tun ugew. Nem ya etan tuun endi nemnem tu ey kaman-u-uggip ni ahiani et be-ingen tu annel tu et ya pamilyah tu.

<sup>6</sup>Ya etan kayyaggud ni tuu ey mebendisyonan. Nem hedin ya etan lawah ni tuu ey tuka ihahhanni hu kakkayyaggud ni tuka pan-e-ehhel di lawah ni planuh tu, ey eleg bendisyonin Apu Dios.

<sup>7</sup>Kamengippeamleng ni nemnemnemen ida kayyaggud ni tuu, nem hedin yadda lawah ni tuu, man meliwwan ida.

<sup>8</sup>Ya etan tuun nelaing niya nenemneman ey daka dedngela kayyaggud ni tugun. Nem ya etan tuun tuka lallelgema ehel ey mewedda hu dakel ni ligat tu.

<sup>9</sup> Ya etan tuun kayyaggud tuka pehpehding ey kaippaptek nan APU DIOS. Nem ya etan tuun lawah tuka kapkapyaa ey meha-kupan et mekastigu.

<sup>10</sup> Ya etan tuun eleg tu i-uh-uh makulug ey kaum-idwat ni degeh ni nemnem. Ey ya etan tuun tuka lellelgema ehehel ey bahbahren tu ngu neitu-wan tu.

<sup>11</sup> Ya ehel ni kayyaggud ni tuu ey heni hebwak ni kapan-ehhulin innumen ma-lat tumegu ita. Nem beken ni henin nunman hu lawah ni tuu, tep tuka henniin kayyaggud ni ehel tu hu lawah ni planuh tu.

<sup>12</sup> Ya tuun angebe-hel tu edum tun tuu ey kaumhulun ni kapambabakali, nem hedin wada neminhed tayun edum tayun tuu ey kameliwwan hu lawah ni impahding dan hi-gatsu.

<sup>13</sup> Hedin nelaing ey nenemneman hu hakey ni tuu, man meamtad tuka pan-e-ehhel. Nem ya etan tuun endi nemnem tu ey mekastigu.

<sup>14</sup> Ya etan tuun nelaing niya nenemneman ey dakel eddalen tu. Nem ya etan tuun kulang nemnem tu ey kaumhulun ida etan tuka e-helan panliggatan tu.

<sup>15</sup> Ya kedangyan ey tuka ussala kinedangyan tun panhenni tun annel tu ma-lat endi an maipahding ni lawah ni hi-gatu. Nem ya etan newetwet ni tuu ey endi katteg ngu pemaddang tun annel tu ma-lat endi lawah ni mekapkapyan hi-gatu.

<sup>16</sup> Ya etan kayyaggud ni tuu ey iddawtan APU DIOS ni kayyaggud ni biyag tu, et humman gun-uden tu. Nem ya etan lawah ni tuu ey mekastigu tep ya liwat tu.

<sup>17</sup> Ya etan tuun tuka ebbulutan me-helan di lawah ni tuka pehpehding ey keingngeh tu hu inunud tu etan dalan ni mampellaw di keittu-uan. Nem ya etan tuun eleg tu pinhed ni me-helan ey neihla inunud tun dalan niya ippangulu tu kumedek edum ni tuudman.

<sup>18</sup> Kaumhahaul niya maitek etan tuun kayyaggud tuka pan-e-ehhel, nem tuka itattalu gayam hu bunget tu. Ya etan tuun metumbuk winu itek hu tuka e-hela meippanggep ni edum tun tuu, ey endi nemnem tu.

<sup>19</sup> Hedin tagan ni tuu ehel, ey wadan wada pambehulan tun edum tun tuu. Nem ya etan tuun nenemneman ey tuka pemegga i-ineng.

<sup>20</sup> Ya kae-helan kayyaggud ni tuu ey kamei-ellig di nemahmah ni silber. Nem ya kapannemnem ni lawah ni tuu ey endi silbitu.

<sup>21</sup> Ya kae-helan kayyaggud ni tuu ey kaumbaddang di dakel ni tutu-u. Nem yadda endi nemnem dan tutu-u ey umhulun ni ketteyyan da hu keendin nemnem da.

<sup>22</sup> Ya kinedangyan ey kamelpun APU DIOS. Et humman hu, hedin kimmedangyan kayu, ey entan tu panghel e ma-nu kedi ey tep inlingetan yu.

<sup>23</sup> Ya etan tuun endi nemnem tu ey tuka pan-am-amlengi hu tuka pengippahdingin lawah. Nem ya etan tuun nelaing niya nenemneman ey tuka pan-amlengi hu kayyaggud ni tuka pehpehding.

<sup>24</sup> Ya etan katattakusin lawah ni tuu ey humman kumedek meippahding ni hi-gatu. Nem ya pinhed idan kayyaggud ni tuu ey iddawat Apu Dios ni hi-gatu.

<sup>25</sup> Meendiddalli lawah ni tuu hedin pinhakkey ey immali ligat ni hi-gada henin kaelliin pewek. Nem yadda tuun kayyaggud daka pehding ey melinggep ida niya ippaptek idan APU DIOS.

<sup>26</sup> Ya meantam ni mekkan ey kaum-alinew ni ngipen, ey ya ahuk ey tuka pelwa mata. Hanniman dama hu mahigan tuu e tuka pebungnet hu kamemeggan hi-gatu.

<sup>27</sup> Andukkey hu biyag etan ni tuun tuka ililingisi hu pengippahdingan tun pinhed APU DIOS. Nem ya etan tuun lawah tuka pehpehding ey mesikkekey biyag tu.

<sup>28</sup> Ya kayyaggud ni tuu ey nanna-ud ni et-eteng ali amleng tun edum ni aggew ni keippahdingan ni tuka namnamaha. Nem ya lawah ni tuu ey eleg meippahding hu tuka namnamaha.

<sup>29</sup> Kamei-ellig hi APU DIOS etan di binattun luhud ni kakeihhikkugiddan kayyaggud ni tuu ey tuka ippaptek ida. Nem hedin yadda kamengippahding ni lawah, ey bahbahren tudda.

<sup>30</sup> Yadda kayyaggud ni tuu ey heniddan keyew ni neihammad ni limmamut et eleg ida meeggut, nem hedin yadda lawah ni tuu ey pe-kal APU DIOS idad nambebleyan da.

<sup>31</sup> Ya kaittugun ni kayyaggud ni tuu ey ya tugun ni nelaing niya nenemneman. Nem ya etan lawah ni tuu e itek tuka e-e-hela ey peinneng alin APU DIOS.

<sup>32</sup> Ya kayyagud ni tuu ey inamta tudda lebbeng tun e-helen, nem yadda lawah ni tuu ey kamengippebungnet daka e-hela e yadda beken ni lebbeng tun e-ehhelen.

## 11

<sup>1</sup> Hi APU DIOS ey angebe-hel tu hedin kaussaladdan tutu-u hu beken ni ustuh ni killohhan, nem kaman-am-amleng hedin limpiyuh ni killohhan daka ussala.

<sup>2</sup> Ya etan tuun eta-gey tuka pannemnem ni annel tu ey mebe-ing ali. Nem ya etan tuun kamampekkumbabah ey hi-gatu nenemnem.

<sup>3</sup> Ya limpiyuh ni kapehding ni kayyaggud ni tuu hu mengittuddun u-unnudun tu, nem hedin melangkak hu hakey ni tuu, ey umhulun ali itek tun kebabbahan tu.

<sup>4</sup> Endi silbin kinedangyan ni tuu hedin umdateng ni hi-gatu hu nemahhig ni bunget Apu Dios, nem ya etan tuun mengippahding ni pinhed Apu Dios ey meihwang di katey.

<sup>5</sup> Ya limpiyuh ni kaippenahding ni kayyaggud ni tuu ey et-eteng hu tuka ibbaddang di neitu-wan tu. Nem ya lawah ni kaippenahding ni lawah ni tuu hu umhulun ni kebabbahan tu.

<sup>6</sup> Ya etan limpiyuh ni tuu ey meihwang di lawah ni meippahding, nem ya etan tuun eleg meiddinnel ey bahbahen alin kalwah tu.

<sup>7</sup> Hedin netey hu lawah ni tuu, ey endi pambalanan idan emin ni tuka namnamaha, tep emin hu pinhed tun ellan winu pinhed tun pehding meippuun di kinedangyan tu ey meendi.

<sup>8</sup> Kaihhehwang Apu Dios di nemahhig ni ligat etan tuun limpiyuh tuka pehpehding. Nem yadda lawah ni tuu ey panlelehhanaan dallin peteg tep ya nemahhig ni ligat.

<sup>9</sup> Yadda lawah ni tuu ey dammutun bahbahen da sinakdul da tep ya lawah ni daka e-hela. Nem ya etan kayyaggud ni tuu ey inamta tu pehding tu ma-lat meihwang.

<sup>10</sup> Kaman-an-anladda bimbley hedin wada kayyaggud ni neipahding idan tuun kayyaggud daka pehpehding. Ey ida mewan kaman-an-anla bimbley hedin netey hu lawah ni tuu.

<sup>11</sup> Kamebendisyonidda bimbley tep ya kayyaggud ni kapehding idan kayyaggud ni tuu. Nem ya kae-heladdan lawah ni tuu hu umhulun ni kebabbahan ni bebley.

<sup>12</sup> Ya etan tuun endi nemnem tu ey tuka pihhula edum tun tuu, nem hedin nenemnem etan tuu, man tuka pemegga i-ineng.

<sup>13</sup> Ya etan metumbuk ni tuu ey eleg meiddinnel e tuka e-hela hu beken ni lebbeng tun peamta, nem ya etan kameiddinnel ni tuu ey eleg tu e-e-hela hu beken tun lebbeng ni peamta.

<sup>14</sup> Ya etan bebley ni endi kamengituttuddun kayyaggud ni pehding ey nelakah ni mebahbah, nem ya etan bebley ni dakel hu mengituttuddun kayyaggud ni pehding ey neligat ni mebahbah.

<sup>15</sup> Ya etan tuun kamengi-ehnung ni utang ni hakey ni tuun eleg tu inghaan ey mantuttuyullin edum ni aggew. Heballi eleg pehding humman ma-lat endilli an pantuttuyuan.

<sup>16</sup> Ya etan kabbabbal ni bii ey kapakatbalan tuu, nem ya etan mabunget ni tuu ey ebuh keddangyanan tun tuka gagamgami.

<sup>17</sup> Ya etan kabbabbal ni tuu ey dakel hu umdateng ni panyaggudan tu, nem ya etan mabunget ni tuu ey bahbahen tu neitu-wan tu.

<sup>18</sup> Hanniman mewan etan lawah ni tuu e beken ni kayyaggud hu pambalanan ni neitu-wan tu, nem ya etan tuun tuka pehding hu kayyaggud ey wada gun-uden tu.

<sup>19</sup> Hedin ya tuun tuka pannananeng ni pehding hu kayyaggud, ey kayyaggud neitu-wan tu, nem ya etan tuun nanengtun ya lawah tuka pehpehding ey mettey.

<sup>20</sup> Hi APU DIOS ey anggebe-hel tudda tuun lawah nemnem da, nem kamengippeamleng ni hi-gatu hu tutu-un kayyaggud daka pehding.

<sup>21</sup> Nanna-ud ni mekastigudda hu lawah ni tutu-u, nem hedin yadda kayyaggud ni tutu-u ey meihwang ida.

<sup>22</sup> Endi silbitun an pengitta-yunan ni balituk ni singsing di hunghung ni killum, heni etan ni kat-agun bii e endi silbin kinamaddikit tu hedin eleg tu ussala nemnem tu.

<sup>23</sup> Emin hu kagamgamin kayyaggud ni tuu ey panyaggudan tu. Nem hedin ya etan lawah ni tuu, ey endilli silbin emin ni tuka namnamaha. Ebuh ali nemahhig ni bunget Apu Dios ni kamenehhegged ni hi-gatu.

<sup>24</sup> Wadadda edum ni tuun eleg da ukkuhan umbaddang ni edum dan tuu, nem kamedumi anhan law hu daka lelmua. Nem yadda tuun daka ukkuha umbaddang ni edum dan tuu ey mema-ma kumedek ni mewetwet ida.

<sup>25</sup> Ya etan tuun madewat ni edum tun tuu ey hi-gatu hu wadan ingganah ida mahapul tu. Hanniman dama etan tuun mebaddang e mebaddangan ali dama.

<sup>26</sup> Ya etan tuun kamanggettang ni begah, nem tuka itattallu et han tu ukata hedin ngimmina, ey iddutan idan tuu. Nem ya etan tuun mengigtang ni begah ni tuka iggatang, anin ni eleg ngumina, ey tettebalen idan tuu.

<sup>27</sup> Ya etan tuun ya kayyaggud hu tuka gagamgamin pehding ey et-eteng hu lisipituh idan tuun hi-gatu, nem ya etan tuun ya lawah hu tuka iplanuplanuh ey lawah dama meippahding ni hi-gatu.

<sup>28</sup> Ya etan tuun ya kinedangyan tu tuka pengididdineli ey eleg tu han-ipahding implanuh tu, nem ya etan kayyaggud ni tuu ey mebendisyonan et henin mabulung ni neitnem.

<sup>29</sup> Ya etan tuun kaum-idwat ni ligat di familyah tu ey endi gun-uden tud tuka pehpending. Ey ya etan tuun endi nemnem tu ey pambega-en alin nenemneman ni tuu.

<sup>30</sup> Ya kapehding ni kayyaggud ni tuu ey heni etan ni keyew ni kaumpephel hu lameh tu. Ey ya etan nenemneman ni tuu ey tuka ellukuya edum ni tuun mekiddagyum ni hi-gatu.

<sup>31</sup> Hi Apu Dios ey tuka iddawat hu ginun-ud idan kayyaggud ni tuu meippuun di impahding tun kaweda tu eyad puyek. Et hedini hanniman, ey nema-ma-ma etan ida lawah ni tuu e nanna-ud pengastiguan tun hi-gada.

## 12

<sup>1</sup> Ya etan tuun tuka ebbuluta kapenuggun ni hi-gatu ey pinhed tun me-duman inamta tu, nem ya etan tuun eleg tu pinhed ni metuggun ey endi nemnem tu.

<sup>2</sup> Kaman-am-amleng hi APU Dios idan tuun kayyaggud daka kapkapyaa, nem kastiguen tudda hu tuun lawah daka nemnemneman pehding.

<sup>3</sup> Ya kayyaggud ni tuu ey kamei-ellig di keyew ni eleg meeggut tep neihammad lamut tu, nem ya lawah ni tuu ey kamei-ellig etan di keyew ni eleg maihammad lamut tu et nelakah ni meeggut.

<sup>4</sup> Kaman-am-amleng etan lakin kan-ahwan kayyaggud ni biin kamengippeamleng ni hi-gatu. Nem ya biin tuka be-inga ahwa tu ey kamei-ellig etan di degeh ni memahbah ni annel ni ahwa tu.

<sup>5</sup> Ya planuh ni kayyaggud ni tuu ey kayyaggud keippahdingan tun edum tun tuu, nem ya etan lawah ni tuu ey ya haul tuka ittugun di edum tun tuu.

<sup>6</sup> Ya hakey mewani ni kapehding ni lawah ni tuu ey ya itek tuka e-hela ma-lat pemahbah tun edum tun tuu. Nem ya ehel ni kayyaggud ni tuu ey wada ibbaddang tud edum tun tuu.

<sup>7</sup> Yadda lawah ni tuu ey ida kamebahbah et meendidda eyad puyek. Nem yadda kayyaggud ni tuu ey nanengtun mehlag hu helag da.

<sup>8</sup> Ya nelaing niya nenemneman ni tuu ey katettebalan edum tun tuu, nem ya etan tuun endi nemnem tu ey kapihhulan edum tun tuu.

<sup>9</sup> I-imman hu anin ni nebahah itan tuu nemet wada bega-en, nem ya etan kapeang-ang-ang e eta-gey hu neitu-wan ey ampangun et endi kennen.

<sup>10</sup> Ya etan kayyaggud ni tuu ey tuka paka-ippaptek animal tu, nem ya etan lawah ni tuu ey anggehemekek ni ingganah hu tuka pehding ni animal tu.

<sup>11</sup> Ya etan mahlun tuu ey dakek kennen tu. Nem ya etan tuun endi nemnem tu ey yadda endi silbi tun endi gun-uden tu hu tuka ippenahding.

<sup>12</sup> Yadda lawah ni tuu ey pinhed dan ellan hu hipan daka gagamgamid beken ni limpiyuh ni kapehding, nem humman ida umhulun ni kebahbahan da. Nem yadda kayyaggud ni tuu ey endi an meippahding ni hi-gadan el-eleg.

<sup>13</sup> Ya etan lawah ni tuu ey kamewedda ligat tu tep ya lawah ni tuka e-e-hela. Nem hedini ya kayyaggud ni tuu, man meiddawwid lawah ni kameippenahding.

<sup>14</sup> Hedini kayyaggud hu kae-helan hakey ni tuu, man kayyaggud dama gun-uden tu. Ey ya kayyaggud ni kapehding ni tuu hu kakelpuin panyaggudan tu.

<sup>15</sup> Ya etan tuun ya tuka pannemnem ey neiptek ni emin tuka pehpending ey endi nemnem tu. Nem ya tuun nenemneman ey tuka dedngela tugun.

<sup>16</sup> Ya endi nemnem tun tuu ey nelakah ni umbungit niya tuka peang-ang bunget tu. Nem ya nenemneman ni tuu ey eleg tu hengnguda anin ni pel-itan da.

<sup>17</sup> Ya etan tuun makulug tuka e-hela ey tuka i-uh-uh hu makulug ni inang-ang tu niya dingngel tu. Nem ya kamanlangkak ni tistigu ey ebuh itek ni tuka e-hela.

<sup>18</sup> Ya etan tuun eleg tu nemnema ni inhel tu ey makaggeh ehel tu e heni tewik ni ispadah. Nem hedini ya ehel ni nenemneman ni tuu ey kaum-elubyag.

<sup>19</sup> Hedini neamtaan e itek hu inhel ni hakey ni tuu, man endi law mengullug ni hi-gatu. Nem ya etan tuun makulug tuka e-hela ey kullugen ni tuun ingganah.

<sup>20</sup> Hedini lawah hu planuh ni hakey ni tuun edum tu, ey ebuh hu lawah ni kameitattalud nemnem tu. Nem ya etan tuun kaum-idwat ni linggep di edum tun tuu ey wada anla tun ingganah.

<sup>21</sup> Yadda kayyaggud ni tuu ey kaihhehwang Apu Dios di ligat. Nem ya lawah ni tutu-u ey endi pappeg ni ligat da.

<sup>22</sup> Angebe-hel APU DIOS ida makallangkak ni tuu, nem kapeamleng idan kamengipahding ni daka e-hela.

<sup>23</sup> Ya nelaing ni tuu ey eleg tu peamtan kumpulmih ni tuu hu inamta tu. Nem ya etan tuun endi nemnem tu ey tuka pemegga ehehel et tu ngu kapeamta keendin nemnem tu.

<sup>24</sup> Ya etan makahlun tuu ey lektattuy hi-gatu kamengipappanggulun edum tu. Nem ya etan makahhigan tuu ey mambalin alin bega-en ni edum ni tuu.

<sup>25</sup> Ya kaguh ey henin mebel-at ni in-agtun hakey ni tuu. Nem hedin wada um-ehel ni hi-gatun kabbabbal ni ehel ey heni umya-pew in-agtu tu niya um-amleng.

<sup>26</sup> Ya tugun ni kayyaggud ni tuu ey tuka ippangulu gayyum tud panyaggudan tu. Nem ya kapehding ni lawah ni tuu hu mengillu-lun edum tun tuu.

<sup>27</sup> Yadda edum ni tuu ey mengidluh idan peteg. Eleg da hengngudan mengi-illug niya mengihhe-eng ni dinweng da, nem hedin ya makahlun tuu, man umkedangyan.

<sup>28</sup> Ya etan kayyaggud ni tuu ey tuka unnuda hu dalan ni mampellaw di ketegguan ni mannananeng et ya etan tuun mengidlan diman ey eleg mettey.

### 13

<sup>1</sup> Ya etan nenemneman ni u-ungnga ey tuka u-unnuda tugun ametu, nem ya etan manghay ni u-ungnga ey eleg tu dedngela hedin e-helan da.

<sup>2</sup> Ya etan tuun kayyaggud tuka e-helan edum tu ey wada kayyaggud ni meippahding ni hi-gatu, nem ya etan maheul ni tuu ey ebuh lawah ni pinhed tun pehding di edum tun tuu.

<sup>3</sup> Ya etan tuun tuka kekknengga e-helen tu ey andukkey biyag tu, nem ya etan tuun eleg tu kekknengga tuka e-hela ey bahbahen tu neitu-wan tu.

<sup>4</sup> Ya etan makahhigan tuu ey eleg tu han-ala pinhed tu, nem ya etan makahlun tuu ey dammutun ellan tu emin hu pinhed tu.

<sup>5</sup> Yadda kayyaggud ni tuu ey angebe-hel da itek, nem yadda lawah ni tuu ey angebaing hu daka e-hela.

<sup>6</sup> Ya etan tuun meandeng hu tuka pehding ey hi-gatu umhulun ma-lat eleg maipahding hu lawah, nem ya etan lawah ni tuu ey yadda lawah ni tuka ippenahding hu umhulun ni kebabahan tu.

<sup>7</sup> Wadadda newetwet ni tuun daka peang-ang-ang e kedangyan ida. Ey wadadda mewan kedangyan e hedin ya daka peang-ang-ang, man newetwet ida.

<sup>8</sup> Ya etan kedangyan ni tuu ey dammutun ussalen tu pihhuh tu ma-lat meihwang di ketteyyan tu et heni bineyadan tu biyag tu. Nem hedin ya etan newetwet ni tuu ey eleg umkakaguh ni an meippahding humman ni hi-gatu.

<sup>9</sup> Hedin ya elaw ni kayyaggud ni tuu ey henin matbel ni dilag. Nem hedin ya elaw ni lawah ni tuu ey henin dilag ni kamangke-dep.

<sup>10</sup> Ya kapampahhiyyain tuu hu umhulun ni pekibbekkalan tu, nem ya etan nenemneman ni tuu ey tuka dedngela tugun ni edum tu.

<sup>11</sup> Ya kinedangyan ni beken ni limpiyuh neal-an tu ey anggegannun meendi, nem ya kinedangyan ni inlingetan ey me-duman anhan law.

<sup>12</sup> Nemahhig hu degeh ni nemnem hedin ya kanamnamaha ey nambalin ni endi, nem nemahhig mewan amleng hedin ya etan kanamnamaha ey wada.

<sup>13</sup> Ya etan tuun tuka ngenghaya tugun ey nanna-ud ni mewedda ligat tu. Nem ya etan tuun tuka u-unnuda tugun ey meihwang di lawah ni meippahding.

<sup>14</sup> Ya kaituttuddun tuun nenemneman ey henin danum ni kamelpud hebwak e wada ibbaddang tud keittu-uan. Ya tuun kamengu-unnud idan nunman ni tugun ey meihwang di kebabahan tu.

<sup>15</sup> Ya etan nenemneman ni tuu ey kalispituhaddan tutu-u, nem ya etan tuun eleg meiddinnel ey um-alin hi-gatu nemahhig ni ligat.

<sup>16</sup> Ya etan nenemneman ni tuu ey tuka pakannemnema ni han tu impahding. Nem ya etan endi nemnem tun tuu ey kameang-ang di elaw tu e endi nemnem tu.

<sup>17</sup> Um-idwat kumedek ni ligat etan tuun eleg meiddinnel hedin hi-gatu ittu-dak ni an mekihummangan, nem um-idwat ni linggep etan tuun kameiddinnel ni ittu-dak.

<sup>18</sup> Ya etan tuun eleg tu pinhed ni metuggun ey mewetwet niya mebe-ing, nem kametbal etan tuun pinhed tun me-helan di kameihhallan tuka pehding.

<sup>19</sup> Itsu kaman-am-amleng hedin neipahding hu pinhed tayu. Nem ya etan tuun endi nemnem tu ey eleg tu pinhed ni iwalleng hu lawah ni tuka pehpehding ni pengellaan tun pinhed tu.



<sup>20</sup> Kayyaggud hedin yadda nenemneman hu pekikkillawwan ma-lat menemneman ita dama niya lumeing ita. Nem hedin yadda endi nemnem tu pekikkillawwan ey hellamdaken hu panhelheltapan.

<sup>21</sup> Yadda lawah ni tuu ey wadan wada lawah ni mekapkapyan hi-gada, nem yadda kayyaggud ni tuu ey mebendisyonan ida.

<sup>22</sup> Ya kinedangyan ni kayyaggud ni tuu ey beltanen idan inap-apu tu hedin mettey. Nem hedin ya kinedangyan ni lawah ni tuu, ey umlaw idan kayyaggud ni tutu-u.

<sup>23</sup> Anin na-mun dakel meenni etan di payew ni newetwet ni tuu et pilliwen ni lawah ni tuun beken ni limpiyuh.

<sup>24</sup> Ya etan tuun eleg tu tugguna u-ungnga tu ey keang-angan tun endi neminshed tun hi-gada. Nem ya etan a-ammed ni wada neminshed tun u-ungnga tu ey kastiguen tudda hedin wada impahding dan lawah.

<sup>25</sup> Ya etan kayyaggud ni tuu ey dakel kennen tu, nem ya etan lawah ni tuu ey meuppa tep me-puhan ni kennen tu.

## 14

<sup>1</sup> Ya etan nenemneman ni bii ey inamta tu pehding tu ma-lat kayyaggud ni emin hu mekapkapyad baley da. Nem ya etan endi nemnem tun bii ey hi-gatu memahbah ni lingep di baley da.

<sup>2</sup> Ya etan tuun limpiyuh tuka pambi-biyag ey ka-ang-ang e kamekangngu-unnud nan APU DIOS. Nem ya etan tuun beken ni limpiyuh tuka ippenahding ey tuka pihhula hi APU DIOS.

<sup>3</sup> Ya etan tuun endi nemnem tu e kamampahhiya ey mekastigu tep ya tuka e-hela, nem ya etan nenemneman ni tuu ey ya ehel tu mengihwang ni hi-gatud lawah ni meippahding ni hi-gatu.

<sup>4</sup> Hedin endi newang ni kapan-elladu, ey endi meennin meihha-ad di alang. Nem hedin wada na-let ni newang et pambaddang ni manggunnu ey dakel ennien.

<sup>5</sup> Ya etan tuun kameiddinnel ni mantistigu ey makulug emin tuka e-hela, nem ya etan tuun eleg meiddinnel ey itek emin tuka e-hela.

<sup>6</sup> Ya tuun kaumheneghegnud ey eleg menemnemi niya eleg umlaing, anin ni pinhed tun peteg ni menemneman. Nem hedin nelaing niya nenemneman hu hakey ni tuu, man nelakah ni man-eddal ma-lat ma-duman laing tu.

<sup>7</sup> Entan pekikkillaw mun tuun endi nemnem tu, tep endi kayyaggud ni eddalem ni hi-gatu.

<sup>8</sup> Yadda nelaing niya nenemneman ey daka pakannemnema ustuh ni han da impahding. Nem ya etan tuun endi nemnem tu ey eleg tu nemnema ni impahding tu. Kantu na-mu nem humman hu kayyaggud tep hineul tu ngu annel tu.

<sup>9</sup> Yadda endi nemnem tun tuu ey daka genghayan mantuttuyyu hedin wada hu lawah ni impahding da. Nem hedin yadda kayyaggud ni tuu, ey ihik idan manliwwan ni lawah ni neipahding ni hi-gada.

<sup>10</sup> Hedin kaman-an-anla hu hakey ni tuu, man hi-gatu nekangngamtan gibek tu. Hanniman mewan hedin makaggeh nemnem ni hakey ni tuu e hi-gatun ebuh nengamtan gibek tu.

<sup>11</sup> Mebahbah ali nanha-adan ni lawah ni tuu, nem ya nanha-adan ni kayyaggud ni tuu ey mannenneng.

<sup>12</sup> Dammutun ya kapannemnem ni hakey ni tuu ey naka-iptek hu tuka pehpahding, nem eleg tu amta e humman kumedek umhulun ni ketteyyan tu.

<sup>13</sup> Ya etan tuun kaumlelemyung ey dammutun manggelgelagak ma-lat eleg meamta e kaumlelemyung. Nem hedin negibbuh ni nangngi-ngi-ngi, man nanengtun kaumlelemyung.

<sup>14</sup> Ya etan lawah ni tuu ey mekastigulli meippuun di lawah ni impenahding tu. Ey ya kayyaggud ni tuu ey meidwat hu gun-uden tu meippuun di kayyaggud ni impenahding tu.

<sup>15</sup> Ya etan tuun endi nemnem tu ey tuka kullagan emin hu kae-helan tuun hi-gatu, nem ya etan nenemneman ni tuu ey tuka pakannemnema ni han tu kinulug.

<sup>16</sup> Ya nenemneman ni tuu ey tuka paka-immay-i ma-lat endi tu ippahding ni umhulun ni panliggatan tu, nem ya tuun endi nemnem tu, ey linggeman hu immalid nemnem tu ni impahding tu.

<sup>17</sup> Ya etan tuun kabbunget ey dakel hu kameihhallan tuka pehding. Ey ya etan tuun eleg meiddinnel ey angebe-hel idan tuu.

<sup>18</sup> Ya etan tuun endi nemnem tu ey endi silbitu hu pambalanan ni tuka pehpehding tep eleg tu nemnema ni impahding tu. Nem ya etan nenemneman ni tuu ey kame-dumi inamta tu.

<sup>19</sup> Yadda lawah ni tuu ey mandukun idallid hinanggaddan kayyaggud ni tutu-u ma-lat mambaga idan baddang.

<sup>20</sup> Yadda newetwet ni tuu ey endi bilang dad edum ni tuu, anin idan sinakdul da. Nem hedin yadda kedangyan man dakel gagayyum da.

<sup>21</sup> Ya tuun kabbabbal idan nangkewetwet ey bendisyonan Apu Dios. Nem ya etan tuun tuka pihhula edum tun kantuy endi silbi da ey manliwwat.

<sup>22</sup> Ya etan tuun tuka pehding hu panyaggudan ni bimmebley ey kameiddinnel niya pinpinhed idan tuu. Nem ya tuun kamannemnem ni lawah ni pehding tun edum tun tuu ey naka-ihhalla.

<sup>23</sup> Ya etan tuun makahlu ey eleg mangkullang ni mahapul tu, nem ya etan tuun tuka pemegga yuyyuddung ni immenab-abig ey mewetwet.

<sup>24</sup> Ya etan nenemneman ni tuu ey tuka gun-uda kinedangyan. Nem ya tuun endi nemnem tu ey mandingngel tep ya keendin nemnem tu ey humman gun-uden tu.

<sup>25</sup> Ya etan tistigun tuka i-uh-uh makulug ey ihhehwang tu etan eleg mambahul ni tuud ketteyyan tu. Nem ya etan tistigun kamanlangkak ey tuka he-ula edum tun tuud kasuh.

<sup>26</sup> Ya etan tuun tuka ilillingisin mengippahding ni pinhed APU DIOS ey kamedinnel ni pemaptey APU DIOS ni hi-gatu, anin idan pamilyah tu.

<sup>27</sup> Ya etan tuun tuka ilillingisin mengu-unnud nan APU DIOS ey meihwang di ketteyyan tu. Henin danum di hebwak ni kaum-idwat ni biyag.

<sup>28</sup> Kameang-ang hu kasina-gey ni patul di kedakkel ni tutu-ud bebley ni tuka pan-ap-apu, nem ya etan patul ni hahhakkey tutu-u tud tuka pan-ap-apu ey endi silbitu.

<sup>29</sup> Ya etan tuun inamta tun mengissippel ni bunguet tu ey nenemneman, nem ya etan tuun ekket ni bimmunguet ey humman keang-angan tu e endi nemnem tu.

<sup>30</sup> Ya etan tuun melinggep nemnem tu ey makewiging e endi degeh tu, nem ya etan tuun maemeh ey ngengpuhen ni ameh tu hu annel tu.

<sup>31</sup> Ya etan tuun tuka panligligat ida newetwet ey nginhay tu hi Apu Dios e nanletun hi-gada. Nem ya etan tuun kabbabbal idan newetwet ey tuka daydayawa hi Apu Dios nunman ni tuka pehding.

<sup>32</sup> Ya etan lawah ni tuu ey bahbahen etan ni lawah ni tuka kapkapyaa. Nem ya etan kayyaggud ni tuu ey anin ni mettey et wada dinel tun ippaptey Apu Dios.

<sup>33</sup> Ya etan tuun inamta tu hedin hipa neiptek niya neihalla, ey hi-gatu nelaing niya nenemneman. Nem ya etan tuun endi nemnem tu ey beken ni hannya elaw tu.

<sup>34</sup> Hedin kayyaggud elaw idan bimmebley, man umyaggud niya meiddeyyaw hu bebley da. Nem hedin lawah elaw da ey mebe-ing hu bebley da.

<sup>35</sup> Kaman-am-amleng hu patul hedin nelaing niya nenemneman hu bega-en tu et han-iphahding tu hu pinhed tun pengunnu. Nem kastiguen tu etan bega-en tun eleg tu han-iphahding hu tuka pengunnu.

## 15

<sup>1</sup> Kamedeggem bunguet ni hakey ni tuu hedin kabbabbal penummang mu. Nem kamema-ma bunguet tu hedin pambinungnet mu penummang mu.

<sup>2</sup> Hedin yadda nenemneman hu kaman-e-ehhel, ey dakel hu eddalen. Nem hedin ya endi nemnem tu kaman-e-ehhel, man endi silbin tuka e-e-hela.

<sup>3</sup> Kauh-uhdungin APU DIOS emin hu kamekenapkapyaa. Tuka ang-ang-anga hu kayyaggud niya lawah ni kapehpehding idan tuu.

<sup>4</sup> Ya kabbabbal ni ehel hu kamengippekedhel ni nemnem etan ni kaumlemyung, nem ya lawah ni ehel, man tuka pedgeh nemnem etan ni kamengngel.

<sup>5</sup> Ya etan u-ungngan eleg tu dedngela tugun ametu ey endi nemnem tu, nem ya etan u-ungngan tuka dedngela tugun ametu ey nenemneman.

<sup>6</sup> Ya etan kayyaggud ni tuun kedangyan ey eleg metellak kinedangyan tu. Nem ya etan lawah ni tuu ey kametellak kinedangyan tu hedin wada immalin ligat tu.

<sup>7</sup> Yadda kayyaggud ni kameeddal ey kamelpuddan nangenemneman, tep yadda endi nemnem da ey endi inamta dan kayyaggud ni ittutuddu da.

<sup>8</sup> Kaum-amleng hi APU DIOS ni dasal idan kayyaggud ni tuu, nem anggebe-hel tu kappit idan lawah ni tuu.

<sup>9</sup> Anggebe-hel tu dedan hu kapehpehding idan lawah ni tuu, nem pinpinhed tudda tuun kayyaggud daka pehpehding.

<sup>10</sup> Ya etan tuun tuka iwalleng hu kayyaggud ni kapehding et ya lawah pehpending tu ey nemahhig ali kastigu tu. Hedin eleg pinhed ni tuun metuggun, man hellamdaken tu ketteyyan tu.

<sup>11</sup> Hi APU DIOS ey inamta tun emin hu kameippenahding di bebley idan nangketey. Et nema-ma-man naka-amta tun emin hu wadad nemnem ni tuu.

<sup>12</sup> Ya etan tuun eta-gey tuka pannemnem ni annel tu ey eleg tu pinhed ni me-helan di neihlan impahding tu. Eleg tu pinhed ni mambeggan tugun idan nenemneman nem hi-gatu.

<sup>13</sup> Hedin kaman-an-anla etan tuu, ey kameang-ang di angah tu, nem hedini makaggeh nemnem tu, man kaumlelemyung.

<sup>14</sup> Yadda nelaing ni tuu ey pinhed dan me-duman inamta da. Nem ya tuun endi nemnem tu ey kantuy "Hiyya ngu huyyan inamtak."

<sup>15</sup> Ya biyag ni newetwet ey nekalligat. Nem ya etan tuun kaman-am-amleng ni hipan wadan hi-gatu ey heni kamekihammumul ni kewa-wa-wa.

<sup>16</sup> I-imman hu anin ni newetwet ita nemet kailillingisin mengu-unnud nan APU DIOS, nem ya etan kedangyan ita ey dakel damengu ligat.

<sup>17</sup> I-imman hu mekikkan idan wada impeminhed da, anin ni beken ni detag ihhida, nem ya ita mekihhemmul idan endi impeminhed dad edum da.

<sup>18</sup> Ya etan kabbunget ni tuu ey nelakah ni mekibbekkal, nem ya etan kabbabal ni tuu ey tuka pesikked babakal.

<sup>19</sup> Hedin mahiga hu tuu ey ya ligat hu hanghanggaen tun kewa-wa-wa. Nem ya etan kayyaggud ni tuu ey kabaelan tun hanggaen ligat tu.

<sup>20</sup> Ya etan nenemneman ni u-ungnga ey tuka peamleng ida a-ammed tu, nem ya etan endi nemnem tun u-ungnga ey tuka pihhula a-ammed tu.

<sup>21</sup> Yadda endi nemnem tu ey daka pan-amlengi hu mengippahding ni endi silbitu. Nem ya etan nenemneman ey ya kayyaggud tuka pehding.

<sup>22</sup> Ya etan tuun eleg umdedngel ni kayyaggud ni tugun ey eleg meippahding hu planuh tu. Nem ya etan tuun kamengu-unnud ni tugun ni nenemneman ey kayyaggud hu pambalanan ni planuh tu.

<sup>23</sup> Kaum-amleng etan tuu hedini neiptek inhel tu, e humman hu mahapul etan ni mengngel niya humman hu pinhed idan tuun dedngelen.

<sup>24</sup> Ya etan nenemneman ni tuu ey tuka u-unnuda hu elaw ni kamengittuddun ketegguan ma-lat eleg matey.

<sup>25</sup> Hi APU DIOS ey tuka bahbaha baley ni tuun kamampahhiya, nem tuka ippaptek ida nebalu et endi an meneldel ni pappeg ni puyek da.

<sup>26</sup> Angebe-hel APU DIOS hu lawah ni kapannemnem ni tuu, nem kamengippeamleng ni hi-gatu hu kayyaggud niya kabbabbal ni ehel.

<sup>27</sup> Ya etan neagum ni tuun pinhed tun ellan ni emin hu pinhed tu, anin ni lawah pehding tun mengella, ey hi-gatu um-idwat ni panliggatan ni pamilyah tu. Nem ya etan tuun eleg tu ebbulutan mengippahding ni lawah ma-lat metangdanan ey melinggep biyag tu.

<sup>28</sup> Ya etan kayyaggud ni tuu ey tuka pakannemnema ni han himmumang, nem ya etan beken ni kayyaggud ni tuu ey kamenginhuhumang niya lawah tuka e-hela.

<sup>29</sup> Hi APU DIOS ey tuka dedngela dasar ni kayyaggud ni tuu, nem eleg tu hengnguda dasar ni tuun lawah tuka pehpending.

<sup>30</sup> Yadda tuun kaman-am-amleng ni peteg ey daka peamleng hu edum da niya kapeyaggud ni kayyaggud ni ehel da hu gibek ni kamengngel.

<sup>31</sup> Hedin u-unnuden ni tuu hu kayyaggud ni tugun ey menemneman.

<sup>32</sup> Ya etan tuun eleg tu pinhed ni metuttudduan ey bahbahen tu ngu annel tu. Nem ya etan tuun tuka dedngela kayyaggud ni tugun ey kame-dumi inamta tu.

<sup>33</sup> Ya kapengilillingisin tuun pengu-unnudan tun APU DIOS hu kakeilleppuin kenemneman. Ey mahapul ni mampekumbabah hu hakey ni tuu et han maideyaw.

## 16

<sup>1</sup> Ya tuu ey dammutun mannemnem ni pinhed tun pehding, nem hi APU DIOS hu ngenamung ni mengi-ebbulut winu mengikka-leg ni amnuan nunman ni implanuh tu.

<sup>2</sup> Ya kapannemnem ni tuu ey kayyaggud ni emin hu tuka pehpending, nem hi APU DIOS hu nengamta hedini makulug ni kayyaggud hu wadad nemnem ni tuu.

<sup>3</sup> Idinel mun APU DIOS emin hu planuh mu ma-lat kayyaggud pambalanan da.

<sup>4</sup> Hi APU DIOS hu ngenamung ni emin ni kameippenahding ey tuka pehding hu implanuh tun emin ni lintu tu. Et humman hu, wada gintud tun aggew ni kekastiguan idan lawah ni tuu.

<sup>5</sup> Anggebe-hel APU DIOS ida tuun kamampahhiya ey nanna-ud ni kastiguen tudda, ey eleg mabalin ni da ibbebsikan hu pengastiguan tun hi-gada.

<sup>6</sup> Hedin pannananeng etan ni tuu hu tuka pengullug niya impeminhed tun APU DIOS, ey liwwanen APU DIOS liwat tu. Ey hedin ilillingitan tun mengu-unnud nan APU DIOS, man eleg tu pehding hu lawah.

<sup>7</sup> Hedin ya amlengan APU DIOS hu kapehpehding idan tuu, ey tuka pambalin hu buhul dan kabbabbal ni hi-gada.

<sup>8</sup> I-imman hu anin ni ekket pihhuh nemet limpiyuh nengal-am, nem ya etan dakel pihhuh mu ey beken ni limpiyuh nengal-am.

<sup>9</sup> Ya tuu ey ma-nut tuka iplanuh pehding tu, nem hi APU DIOS hu ngenamung ni mengiebbulul winu mengikka-leg ni amnuan nunman ni implanuh tun pehding.

<sup>10</sup> Indawat APU DIOS idan aap-apu hu kabaelan dan mengamta niya mengippeamtan makulug ni kamekapkanya. Et humman hu, mahapul ni ang-angen da ma-lat limpiyuh pehding dan manhuwas.

<sup>11</sup> Ya pinhed APU DIOS ey ya limpiyuh ni killohhan niya ustuh ni kapanbalol ni kaigggatang.

<sup>12</sup> Ya patul ey eleg tu pinhed hu lawah ni kapehding, tep ya kaikkedhel ni tuka pan-ap-apui ey ya limpiyuh ni kapehding.

<sup>13</sup> Kaum-amleng hu patul di tuun makulug hu tuka e-hela. Pinpinhed tu hu tuun eleg manlangkak.

<sup>14</sup> Hedin bimmunget hu patul, man wadan wada pepettye tu. Nem ya nenemneman ni tuu ey inamta tun meneggem ni bunget ni patul.

<sup>15</sup> Hedin kaman-am-amleng hu patul ni menang-ang ni hakey ni tuu, ey nanna-ud ni wada panyaggudan ni iddawat tun nunman ni tuu e henin udan e tuka teggua neitnem.

<sup>16</sup> I-imman hu nelaing ita niya nenemneman ita nem ya dakel pihhuh.

<sup>17</sup> Ya kayyaggud ni tuu ey tuka iddawi annel tud lawah ni mekapkapan hi-gatu. Et humman hu, ang-ang yu lawwan yu ma-lat endi hellamdaken yun umhulun ni ketteyyan yu.

<sup>18</sup> Ya kapampahhiyyain tuu hu umhulun ni keibbabahan tu niya kebabahan tu.

<sup>19</sup> I-imman hu anin ni newetwet ita niya mampekumbabah ita nem ya ita mekie-ddum idan kamampahhiyan tuu et ita mekigedgedwad hipan wadan hi-gadan beken ni limpiyuh nengal-an da.

<sup>20</sup> Ya etan tuun tuka u-unnuda neituttuddun hi-gatu ey kayyaggud pambalanan tu. Hanniman dama etan tuun kamandinnel nan APU DIOS e man-am-amleng.

<sup>21</sup> Kameamta etan nenemneman ni tuu di kabaelan tun mengewwat. Ey hedin kayyaggud hu tuka pan-e-ehhel, man u-unnuden ni tuu itugun tu.

<sup>22</sup> Ya nelaing niya nenemneman ni tuu ey henin eleg metduk ni hebwak e tuka iddawat hu panyaggudan. Nem ya etan tuun endi nemnem tu ey mekastigulli tep yadda neihallan tuka pehding.

<sup>23</sup> Ya etan nelaing niya nenemneman ni tuu ey inamta tu neiptek ni e-helen tu niya kau-unnadan tuu tuka e-hela.

<sup>24</sup> Ya kabbabbal ni ehel ey heni danum ni putsukan e malumi-ih. Tuka peyaggud gibek ey tuka iddawsin elet etan mengngel.

<sup>25</sup> Hin-addum ni ya kapannemnem ni hakey ni tuu ey naka-iptek etan tuka pehpehding, nem humman kumedek ketteyyan tu.

<sup>26</sup> Ya upa hu umhulun ni keigga-gaan ni tuun manggunnu ma-lat wada kennen tu.

<sup>27</sup> Yadda lawah ni tuu ey ida kamenennang-ang ni pemahbah dan edum dan tuu. Ey nemahhig ni lawah hu daka e-hela e henin apuy ni kaumgiheb.

<sup>28</sup> Ya lawah ni tuu hu kamengipappangngulun kapanbabakali. Ey ya etan makattumbuk hu memahbah ni kayyaggud ni kapandadagyumin tuu.

<sup>29</sup> Ya mabunget ni tuu ey tuka he-ula sinakdul tu niya tuttudduen tun mengippahding ni lawah.

<sup>30</sup> Ang-ang yu kuma etan tuun kaumkeni-ki-ding winu kaum-enimmiimmih, tep huyyan tuu kamannemnemnem ni mengippahding ni lawah ni hi-gam.

<sup>31</sup> Ya kamegun-ud di kapengippahdingin kayyaggud hu kamengippedukkey ni biyag. Ey ya kakeubbani hu kakeang-angin dayaw ni nea-ammaan.

<sup>32</sup> Ya etan tuun kabbabbal e kabalinan tun mengissippel ni bunget tu ey inapput tu etan tuun netuled ni mekiggubbat e dammutun gubbaten tu hakey ni bebley et hegepen tu.

<sup>33</sup> Ya hakey ni kapehding ni tuun mengamtan pinhed APU DIOS ni meippahding ey daka ibbubunut. Nem hi APU DIOS hu ngenamung ni mengippeamtan pinhed tun meippahding.

## 17

<sup>1</sup> I-imman hu anin ni kudih kenen wada linggep, nem ya hantapug meheng-ew ni kenen ey ita kamantutut.

<sup>2</sup> Ya etan nelaing ni bega-en ey lektattuy hi-gatu neta-ta-gey nem ya etan mahiga niya kamengippebabbaing ni u-ungngan kan bega-en ni hi-gatu. Hedin hannya meippahding ey mei-inggeh beltanen etan ni bega-en di u-ungngan kan bega-en ni hi-gatu.

<sup>3</sup> Kaeyyugad apuy hu balituk niya silber ma-lat memahmah. Nem hi APU DIOS hu nengamta hedin kayyaggud winu lawah hu wadad nemnem tayu.

<sup>4</sup> Yadda lawah ni tuu ey pinpinhed dan deddengngelen hu lawah ni kae-ehhela edum da. Hanniman mewan hu makallangkak ni tuu e ya itek hu pinpinhed tun deddengngelen.

<sup>5</sup> Ya etan tuun tuka taltalanggaidda newetwet, ey hi APU DIOS e nanletun hi-gada hu tuka taltalanggai. Ey ya etan tuun kaman-am-amleng hedin wada lawah ni neipahding di edum tun tuu, ey kastiguen APU DIOS.

<sup>6</sup> Yadda nangka-amma ey daka pan-am-amlengi inap-apu da. Hanniman ida dama u-ungnga ey daka pan-am-amlengi a-ammed da.

<sup>7</sup> Beken ni lebbengtun an mampahhiyan man-e-ehhel hu endi nemnem tu. Ey nema-ma-ma hu ap-apu e endi kelebngan tun an manlangkak.

<sup>8</sup> Ya etan tuun tuka beyyadi edum ni tuu ma-lat ipahding tu lawah ni pinhed tu ey heni magic ni hi-gatu humman tep kameippahding hu pinhed tu.

<sup>9</sup> Hedin pinhed mun mannenneng ni kayyaggud hu pekiddagyumam di edum mun tuu, ey mahapul ni liwwanem hu lawah ni impahding dan hi-gam. Nem hedin eleg mu liwwana nanhahallaan yu, et humman hu muka ene-ehhela, ey humman umhulun ni kebabahan ni yuka pandadagyumi.

<sup>10</sup> Ya etan nelaing ni tuu ey me-duman hu inamta tu, anin ni pinhakkey ni ebuh e-helan ni hi-gatud neihallaan tu. Nem ya etan tuun endi nemnem tu, ey anin ni meminhanggatut penepitan ni hi-gatu et eleg tu u-unnuda ittugun mu.

<sup>11</sup> Ya etan lawah ni tuun ebuh guluh ni tuka hemmahemmaka ey lektattuy nemahhig nengastigu dan hi-gatu.

<sup>12</sup> I-imman hu bear ni imbesik da impah tun dammuen nem ya etan tuun endi nemnem tun linggeman tuka pehpending.

<sup>13</sup> Hedin belleham ni lawah hu kayyaggud ni impahding ni edum mun tuun hi-gam, ey lawah alin ingganah mekenapkapyad baley mu.

<sup>14</sup> Ya kakeilleppuin kapantututusi ey heni etan ni ekket ni kaman-ubbuh di nalbeng e hedin eleg iyayyaggud man lektattuy neetteng et maikuluh etan danum. Et humman hu, hedin wada nanhahallaan ey iyayyaggud ni ihummangan ma-lat maisiked et eleg mambalin ni pantutututan.

<sup>15</sup> Angebe-hel ni peteg nan APU DIOS hedin etan nambahul hu kaibbukyat ni huwes et ya etan endi bahul tu hu kastiguen tu.

<sup>16</sup> Heballi eleg an pan-eddal etan endi nemnem tu tep eleg tu damengu pinhed ni metuttudduan ey umkawah kumedek hu pihuh ni ummahen tu.

<sup>17</sup> Ya makulug ni gayyum ey pinhed dakan ingganah, anin ni hipa meippahding. Et mukun winedan APU DIOS hu agi et bumaddang hedin wada ligat.

<sup>18</sup> Ya etan tuun endi nemnem tu ey nelakah tun e-helen hu "Hi-gak ngenamung ni memeyyad ni utang nunman ni tuu hedin eleg tullu hambayad."

<sup>19</sup> Ya etan tuun pinpinhed tun mambehhul ey pinpinhed tu mewan ni mekibbekkal. Ey ya tuun kamampahhiya ey kaumhamahamak ni umhulun ni kebabahan tu.

<sup>20</sup> Ya etan tuun beken ni limpiyuh hu nemnem tu ey beken ni kayyaggud hu mekapkapyan hi-gatu. Hedin itek hu kae-e-hela, man umhulun ni pekibbekkalan ni edum ni tuu.

<sup>21</sup> Endi amleng etan ni hakey ni ammed hedin endi nemnem ni u-ungnga tu, ey ebuh hu lemyung tun wada.

<sup>22</sup> Ya an-anla ey heni agah e tuka peyaggud hu annel. Nem ya etan tuun endi an-anla tu ey heni wada hinakbatan tun mebel-at et kamebebelay.

<sup>23</sup> Ya etan lawah ni huwes ey dammutun iddalunuh ni beyyadan ma-lat eleg mekastigu etan nambahul.

<sup>24</sup> Ya etan nelaing ni tuu ey eleg tu pehding ida hu endi silbitu, nem ya etan tuun endi nemnem tu ey endi nepintek ni tuka nemnema.

<sup>25</sup> Ya etan endi nemnem tun u-ungnga ey kaum-idwat ni nemahhig ni lemyung nan ametu ey degeh ni nemnem nan inetu.

<sup>26</sup> Beken ni kayyaggud ni an mekastigu etan tuun endi bahul tu ey beken mewan ni kayyaggud ni an mekastigudda kayyaggud ni tuu.

<sup>27</sup> Ya etan tuun nelaing niya nenemneman ey inamta tun mengikekkenneng ni annel tu et eleg tu pemegga eheehel.

<sup>28</sup> Et humman hu, kayyaggud hedin kekennengen hu pan-e-ehhel tep anin ni endi nemnem ni hakey ni tuu et kan idan tuuy nelaing niya nenemneman hedin tuka pemegga i-ineng.

## 18

<sup>1</sup> Ya etan tuun endi impeminhed tun edum tun tuu ey ebuh annel tun tuka nenemnema ey tuka huggangngitan emin hu kayyaggud ni tugun.

<sup>2</sup> Ya etan tuun endi nemnem tu ey eleg tu pinhed ni man-eddal di edum ni tuu, tep ya pinhed tu ey hi-gatun ebuh meunnud.

<sup>3</sup> Hedin pedhing ni tuu hu lawah ey meendi lispituh ni edum tun tuun hi-gatu, niya hedin nebaingan tep ya impahding tu, ey man-a-ahhud hu pemel-itan ni tuun hi-gatu.

<sup>4</sup> Ya kayyaggud ni ehel ey kaum-idwat ni panyaggudan e kamei-ellig di naka-iddallem ni danum ni kaman-utbul. Ey ya ehel ni nelaing niya nenemneman ni tuu ey heni daman danum ni kamelpud hebwak ni kamengkal ni ewew.

<sup>5</sup> Beken ni kayyaggud hu an iddedlepan hu lawah ni tuu et eleg meidwat hu kelebengan idan endi bahul tun tuu.

<sup>6</sup> Ya etan tuun endi nemnem tu ey tuka hellamdaka guluh tep ya tuka e-e-hela, et humman hu, lektattuy kineway da.

<sup>7</sup> Ya etan endi nemnem tun tuu ey mebahbah tep heni bitun keknaan tu hu tuka e-hela.

<sup>8</sup> Hedin ya tuu, man pinpinhed dan deddengelen hu tumbuk e heni meheng-ew ni kennen e pinpinhed dan kennen.

<sup>9</sup> Ya etan mahigan tuu ey nan-inggeh ida etan ni tuun ya umbahbah tuka ippenahding.

<sup>10</sup> Hi APU DIOS ey kamei-ellig di nehammad ni binattun luhud ni kabesikiddan kayyaggud ni tutu-un da keihhikkugan.

<sup>11</sup> Nem ya etan kedangyan ni tuu ey kamandinnel di kinedangyan tun panhenni tun annel tud lawah ni mekapkapy, ey tuka ibbilang hu kinedangyan tun heni nehammad ni luhud ni keihhikkugan tu.

<sup>12</sup> Ya etan tuun kamampahhiya ey lektattuy nebahbah, nem kametbal etan tuun inamta tun mampekumbabah.

<sup>13</sup> Anggeba-ing niya endi nemnem ni tuu hedin eleg tu ni dedngela hu kapan-e-helan edum tu ni himmumang.

<sup>14</sup> Hedin wada namnamah etan ni kamandedgeh ni umyaggud, ey dammutun umyaggud, nem hedin endi namnamah tu ey nanna-ud ni eleg umyaggud.

<sup>15</sup> Ya etan nenemneman ni tuu ey pinhed tun me-duman inamta tu, et humman hu, tagan tun man-eddal ma-lat eduman tu hu hipan inamta tu.

<sup>16</sup> Hedin pinhed mun mekihhumangan ni tuun eta-gey saad tu, ey itebin kan iddawat mun hi-gatu, et humman umhulun ni panggagayaan tun menang-ang ni hi-gam.

<sup>17</sup> Ya etan memenggulun um-ehel di korteh ni menghel ni neipahding ey heni hi-gatu numan hu neiptek niya heni hi-gatu hu endi bahul tu. Nem entannit umhel dama etan tuka pekihhangga ey hin-appil law hu umbudal e meamta law hu makulug.

<sup>18</sup> Hin-addum ni ya kayyaggud ni pedhing ni mengippennuh ni kapanhallain dewwan tuu ey ya binnunut.

<sup>19</sup> Nelilligat ni banggaden hu kayyaggud ni kapekiddagyumin hakey ni tuun nengipahdingam ni lawah nem ya penggepan ni hakey ni bebley ni nehammad luhud tu. Tep hedin wada nanhahallaan ni tuu, ey neligat law ni ida mandadagyum.

<sup>20</sup> Ya tuu ey meidwatan ni kayyaggud winu lawah ni gun-uden tu meippuun di tuka e-hela.

<sup>21</sup> Hin-addum ni ya kae-helan hakey ni tuu hu kaumhulun ni ketteyyan tu winu eleg tu ketteyi. Et humman hu, hedin mahlu kan um-eheehel, ey pepuhdanim e-helem tep heltapem ali hu pambalanan ni muka e-e-hela.

<sup>22</sup> Hedin nelahin hu laki man kamei-ellig etan ahwa tud nebalol ni tenged. Ey humman ni ahwatu imbendisyon APU DIOS ni hi-gatu.

<sup>23</sup> Yadda newetwet ni tuu ey ida kapehemhemmek, nem kapambinungnet idan kedangyan humang da.

<sup>24</sup> Hin-addum ey ya etan muka paka-ibbilang ni gayyum mu ey eleg tu pinhed ni umbaddang ni hi-gam hedin makahhapul mu baddang tu, et humman hu, meliggatan ka.

Nem wadadda edum ni nehammad ni gayyum e himmalla anhan law daka pemaddang ni hi-gam nem ya anhan ni agim.

## 19

<sup>1</sup> I-imman etan tuun anin newetwet nemet limpiyuh neitu-wan tu, nem ya etan tuun endi nemnem tun makallangkak niya maheul.

<sup>2</sup> Beken ni kayyaggud hu wada ninemnem ni impahding, e eleg pakannemnema niya eleg amta hu ustuh. Tep hedin henin nunman pehding, ey eleg mambalin hu implanuh tep hin-appil kumedek meippahding.

<sup>3</sup> Ya edum ni tutu-u ey hi-gada ngu ni binahbah da annel da, tep eleg da pakannemnema ni impahding da, et hedin negibbuh, ey hi APU DIOS pebabbahulan da.

<sup>4</sup> Ya etan tuun wadwada-an ey dakel gayyum tu, nem ya etan en-endi-an ni tuu ey endi neminshed ni mekiggayyum ni hi-gatu.

<sup>5</sup> Ya etan tuun mantistigun itek ey nanna-ud ni mekastigu.

<sup>6</sup> Dakel hu tuun kamambeggan baddang etan ni tuun eta-gey saad tu, niya dakel neminshed ni mekiggayyum etan ni tuun madewat.

<sup>7</sup> Ya etan newetwet ey eleg ibbilang idan agi tu niya eleg idan hekey meihnup ni hi-gatu hu gagayyum tu. Ey anin katteg ni mampehemmehemmek ma-lat baddangan da et endin hekey hu neminshed ni umbaddang ni hi-gatu.

<sup>8</sup> Ya etan tuun pinhed tun annel tu ey pinhed tun me-duman inamta tu. Tep ya etan nakappinshed tun man-eddal ey umyaggud biyag tu.

<sup>9</sup> Ya etan tuun mantistigun itek ey nanna-ud ni mekastigu.

<sup>10</sup> Beken ni lebbeng tun an umkedangyan hu endi nemnem tu et manlamlam-ay neitu-wan tu. Nem nema-man beken tu lebbeng ni ya himbut ey an pan-ap-apun etan ni kan himbut ni hi-gatu.

<sup>11</sup> Hedin nelaing niya nenemneman hu tuu ey amta tun mengissippel ni bunget tu. Eleg tu pannenemnem hu hipan lawah ni impahding idan edum ni tuun hi-gatu. Humman keang-angan tun kametbal elaw tu.

<sup>12</sup> Hedin bimmunget hu patul, ey angetakkut e heni bimmunget ni layon, nem hedin mewan himmemek, ey henin kapehding ni udan ni neitnem.

<sup>13</sup> Ya endi nemnem tun u-ungga hu umhulun ni kebahbahan ametu. Ey ya etan matutat ni biin ahwa ey kamengippeinglay e henin kaum-enih-ih ni danum.

<sup>14</sup> Dammutun beltanen di a-ammed hu baley ey kinedangyan. Nem ya kamengidwat ni lakin nenemneman ni biin ahwaen tu ey hi APU DIOS.

<sup>15</sup> Ya mahigan tuu ey ebuh ugip ni pinpinhed tun ippahding, nem ya hanniman ni tuu ey meuppa.

<sup>16</sup> Ya etan tuun kamengu-unnud ni tugun APU DIOS ey ihhehwang tu annel tu. Nem ya etan tuun eleg mengu-unnud nunman ni tugun ey mepappeg biyag tu.

<sup>17</sup> Hedin binaddangan ni hakey ni tuu hu newetwet, ey heni hi APU DIOS hu binaddangan tu, ey iddawat APU DIOS ali kayyaggud ni hi-gatu tep ya humman ni impahding tu.

<sup>18</sup> Tugun yu u-ungga yun keek-eket tu, tep yan nunman nelakah ni pan-eddalan tu. Tep hedin eleg yu tugguna, ey heni baddangan yun memahbah ni annel tu.

<sup>19</sup> Ya etan tuun kabbunget ey mahapul ni heltapen tu pambalanan ni bunget tu. Tep hedin baddangan ni nunya, ey mahapul ni baddangan ali mewan ni pidwa tu.

<sup>20</sup> Hedin dedngelen mu hu tugun niya pinhed mun me-duman inamtam ey lektattuy nenemneman ka.

<sup>21</sup> Ya tuu ey dakel hu tuka ipplanuh ni pehding tu. Nem hi APU DIOS hu ngenamung ni pinhed tun meippahding.

<sup>22</sup> Kedukdul etan tuun kameiddinnel nem ya etan tuun neagum. Kedukdul hu newetwet ita nem ya ita manlangkak ma-lat alen hu pinhed ni ellan.

<sup>23</sup> Ya tayu kapengililingisin mengippahding ni pinhed APU DIOS hu pengidwatan tun hi-gatsun kayyaggud ni neitu-wan tayu ma-lat wadan emin hu mahapul tayu. Ey ippaptek daitsu ma-lat endi hipan lawah ni meippahding ni hi-gatsu. \*

<sup>24</sup> Wadadda edum ni tutu-un nemahhig higeda tep anin ni pengidduhan dan kenne da et higgaan da.

<sup>25</sup> Ya manghay ni tuu ey mekastigu et pan-adalan idan edum ni tuun endi nemnem da. Hedin ya nenemneman ni tuu ey kame-dumi inamta tu hedin inhelan di neihlan impahding tu.

\* 19:23 19:23 Romans 8:28

<sup>26</sup> Ya etan u-ungngan beken ni kayyaggud tuka pehding nan ametu niya tuka pe-hep hi inetud baley da ey be-ingen tu annel tu.

<sup>27</sup> Hi-gam ni u-ungngak, ey entan tu isiked ni mandedngel ni tugun, tep hedin issiked mu, ey lektattuy anin idan inedal mun nunman et iwwalleng mu.

<sup>28</sup> Hedin manlangkak hu tistigu, ey humman kei-ang-angan tu e eleg tu ibbilang hu meandeng ni kapehding. Nem wadadda ngu dedan hu lawah ni tutu-un pinpinhed da hedin kakapkapyaan hakey ni tuu hu lawah.

<sup>29</sup> Yadda kamekannaltalangga niyadda endi nemnem tu ey nanna-ud ni mekastigudda.

## 20

<sup>1</sup> Ya etan tuun kamambuttebutteng ey endi nemnem tu, tep ya etan nebuteng ey kamenaltalangga niya kaumguluguluh.

<sup>2</sup> Hedin bimmunget hu patul, man angetakkut e heni bimmunget ni layon. Et ya etan tuun nengipebunget ni hi-gatu ey intupetu biyag tu.

<sup>3</sup> Ya etan endi nemnem tun tuu ey nelakah ni mekibbekkal. Ang-ang mu et eleg ka makibekal di edum mun tuu et lispituhen dakan hi-gada.

<sup>4</sup> Ya etan tuun kaumhigan mangge-ud ni ahigaud ey endi tu ennien ni ahiani.

<sup>5</sup> Neligat ni meamta hu wadad nemnem ni tuu. Nem ya nelaing ni tuu ey inamta tu pehding tun mekihummangan ni nunman ni tuu ma-lat maukat hu wadad nemnem tu.

<sup>6</sup> Dakel hu tuun kanday nehammad daka pekiggayyum. Nem ya kakulugan tu ey neligat ni mehemmak hu hanniman ni tuu.

<sup>7</sup> Yadda kayyaggud ni tuu ey limpiyuh neitu-wan da, ey bendisyonan Apu Dios hu u-ungnga da.

<sup>8</sup> Hedin yimmudung etan patul ni manhuwes, ey tuka paka-ang-angadda ni etan ebidensyah ma-lat amtaen tudda kayyaggud niya lawah ni neipahding.

<sup>9</sup> Kaw hipa ni-ngangu hu tuun dammutun kantuy "Melinggep hu nemnem ku tep endi nak nanliwatan?"

<sup>10</sup> Hi APU DIOS ey angebe-hel tu hedin kaussaladdan tutu-u hu beken ni limpiyuh ni killohhan niya hipan lekud ma-lat haulen da edum dan tuu.

<sup>11</sup> Kameamtad kapehpehding ni hakey ni tuu hu katutuu tu hedin kayyaggud winu lawah. Ey anin ni gelang et kameamtad tuka pehpehding hedin kayyaggud winu lawah hu nemnem tu.

<sup>12</sup> Indawtan daitsun APU DIOS ni mata ma-lat penang-ang tayu, niya tangila ma-lat pangngel tayu. Et humman hu, kayyaggud hedin ussalen tayun ustuh ida huyya ma-lat wada silbida.

<sup>13</sup> Ya etan tuun pinpinhed tun man-u-uggip ey mema-man mewetwet, nem ya etan tuun mahlun mangngunnu ey eleg mekullangid mahapul tu.

<sup>14</sup> Hedin an umgatang hu tuun hipan gettangen tu, ey tuka pakahhengngai bayad tu, nem hedin impatewalan da, ey tu igaggaya hu nelakah ni nengatang tu etan ni nebalol ni gintang tu.

<sup>15</sup> Neliligat ni hemmaken etan tuun ya tuka pan-e-ehhel ey henin ehel ni nenem-neman, nem yadda nebalol ni peteg ni gangam. Ya hanniman ni kapan-e-ehhel ey nebalbalol nem yadda nebalol ni peteg ni tenged.

<sup>16</sup> Hedin wada um-utang ni hi-gam, ey wada inewit tun eleg tu inghaan ni tuun mengi-ehng ni hi-gatu, ey mahapul ni wada ellam etan ni mengi-ehng ni pengitngedam nunman ni utang ma-lat wada inna-nu tun mambeyyad ni hi-gam.

<sup>17</sup> Ya etan muka ellad beken ni limpiyuh ey ma-nu tep pan-amlengam ni laputu e henin mehng-ew ni kennen, nem entanni ey nambalin ni heni lenad bungut mu.

<sup>18</sup> Ya pehding mu ma-lat eleg maihalla etan ninemnem mun pehding ey pandengel ka nin tugun idan nangenem-neman. Heni etan ni an mekiggubbat e mahapul ni dedngelen tu ni hu ittugun ni edum ni tutu-u et han an makigubat.

<sup>19</sup> Ya etan makattumbuk ni tuu ey endi kameittellud bungut tu tep tuka e-helan emin. Et humman hu, entan pekikkillaw di makattumbuk ni tuu.

<sup>20</sup> Ya etan tuun tuka iddusi a-ammed tu ey mepappeg biyag tu et henin kengkeh e me-dep et engeenget.

<sup>21</sup> Hedin beken ni limpiyuh hu nengal-an ni hakey ni tuun tawid tu niya kinedangyan tu, ey beken alin kayyaggud pambalanan tu.

<sup>22</sup> Hedin wada impahding dan hi-gam ni lawah, ey entan tu nenemnem ni ibbaleh. Idinel mun APU DIOS et baddangan daka.

<sup>23</sup> Nemahhig bungut APU DIOS hedin nan-usal hu tuun beken ni ustuh ni killohhan winu lekud ma-lat haulen da edum dan tuu.



<sup>24</sup> Hi APU DIOS hu ngenamung ni biyag tayun tutu-u. Et humman hu eleg tayu han-awat ni pambalanan ni biyag tayu.

<sup>25</sup> Bahul hedini eleg pakannemneman ustuh ni han ita nansapatah nan Apu Dios. Et humman hu, kayyaggud hedini pakannemnemen ni han ita nansapatah.

<sup>26</sup> Ya etan nenemneman niya nelaing ni patul ey tuka amta hu kamengippenahding ni lawah ey tudda kakastigua e eleg tudda hehmeke.

<sup>27</sup> Indawat APU DIOS hu nemnem ni tuu niya kabaelan tun mengamtan kayyaggud niya lawah. Et humman hu, eleg mabalin ni kan tayuy eleg tayu amta hu makulug ni katutuu tayu.

<sup>28</sup> Mannenneng hu kapan-ap-apuin patul hedini tuka ippaptek ida tuu tu, nem hedini endi impemihed tu, man mepappeg pan-ap-apuan tu.

<sup>29</sup> Yadda kakat-agu ey ida kametbal tep ya elet da, nem nema-ma-man ida kametbal hu nangea-amman neubanan tep dinteng da nea-ammaan da.

<sup>30</sup> Hin-addum ni pakkadek wada meippahding ni hi-gatsun ligat et han tayu iwalleng ida lawah ni elaw tayu.

## 21

<sup>1</sup> Hi APU DIOS hu ngenamung ni kapannemnem ni patul, et humman hu dammutun pambalin tu hu patul ni kamekanggu-unnud ni pinhed tun meippahding, heni tuka pehding ni kulukul e tuka bengngiwa etan danum et palaw tud pinhed tun pengippelawwan.

<sup>2</sup> Ya kapannemnem ni tuu ey kayyaggud emin hu tuka pehpehding, nem hi APU DIOS ey inamta tu hedini kayyaggud winu lawah hu wadad nemnem ni tuu.

<sup>3</sup> Kapehebballin APU DIOS hu tayu kapengippahdingin kayyaggud niya limpiyuh nem ya tayu kapan-appisin hi-gatu.

<sup>4</sup> Ya elaw ni lawah ni tuu ey mampahhiya, ey huyyan elaw ey liwat.

<sup>5</sup> Ya etan makahlun tuu ey tuka pakannemnema ni han tu impahding, ey eleg mekullangin mahapul tu, nem ya etan tuun eleg nemnema ni impahding tu ey mewetwet.

<sup>6</sup> Ya kinedangyan ni beken ni limpiyuh neal-an tu ey nelakah ni meummah niya kaumhulun ni ketteyyan.

<sup>7</sup> Ya lawah ni tuun pinpinhed tun mekibbekkal niya mekippetey ey mebahbah tep kahing ni mengippahding ni kayyaggud.

<sup>8</sup> Ya lawah ni tuu ey lawah tuka pehpehding, nem hedini ya kayyaggud ni tuu, ey kayyaggud elaw tu.

<sup>9</sup> I-imman hu an mea-appil di a-abbung nem ya meki-addum di matutut ni ahwa.

<sup>10</sup> Ya lawah ni tuu ey ebuh pengippahdingan tun lawah ni tuka nenemnema, et anin ni sinakdul tu et eleg tu hehmeke.

<sup>11</sup> Ya etan nelaing niya nenemneman ni tuu ey wada tuka eddalan kayyaggud ni tugun, nem ya endi nemnem tun tuu ey menemneman ni ebuh hedini ang-angen tun mekastigu hu kamampahhiyan tuu.

<sup>12</sup> Hi Apu Dios e meandeng tuka pehding ey inamta tu hu hipan kamekapkapyad baley ni lawah ni tutu-u, ey hi-gatu ngenamung ni memahbah ni hi-gada.

<sup>13</sup> Ya etan tuun endi hemek tuddan kamanligligat ni kaumlaw ni mampebaddang ni hi-gatu, ey endilli dama umhehmek ni hi-gatu hedini meliggatan.

<sup>14</sup> Ya pehding mun mengellubyag ni tuun kaumbubunget ni hi-gam ey idelunuh mun idwasin hipan iddawat mun hi-gatu.

<sup>15</sup> Yadda kayyaggud ni tuu ey ida kaman-an-ala hedini limpiyuh impahding idan aap-apu. Nem hedini yadda lawah ni tuu ey mekaggeh nemnem da hedini limpiyuh neipahding.

<sup>16</sup> Ya etan tuun mengiwwalleng ni kayyaggud ni tugun ey hellamdaken tu ketteyyan tu.

<sup>17</sup> Ya etan tuun nalgem tuka pengippahdingin pihhuh tu heni linggeman ni pan-an-anlaan tu ey mewetwet. Tep eleg umkedangyan hu tuun mainum niya pinpinhed tun mengangan ni nenginan kennen.

<sup>18</sup> Ya etan tuun mengippahding ni panliggatan idan tuun endi bahul tu ey meippahding humman ni hi-gatu.

<sup>19</sup> I-imman hu an mea-appil di desert nem ya meki-addum di matutut ni ahwa.

<sup>20</sup> Ya etan nenemneman ni tuu ey tuka emmunga limmu tu ey wadan ingganah mahapul tud baley tu ey wada kamehewwal. Nem ya etan endi nemnem tun tuu ey tuka ummahan emin hu wadan hi-gatu.

<sup>21</sup> Ya etan tuun kabbabbal niya kayyaggud tuka pehpehding ey mebendisyonan ni andukkey ni biyag niya kinedangyan niya lispituhen ni tutu-u.

<sup>22</sup> Ya etan nenemneman niya nelaing ni ap-apun sindalu ey dammutun apputen tu etan bebley ni dakel hu nelaing ni sindalu da et bahbahren tu hu nehammad ni luhud ni kapandinellin bimbley.

<sup>23</sup> Ya etan tuun eleg tu pinhed ni mekibbekkal ey tuka pekannemnema ni han immehel.

<sup>24</sup> Ya pengamtaan e kamampahhiya hu tuu ey yad tuka pan-e-ehhel e heni endi bilang ni edum ni tuun hi-gatu tep nemahhig tuka pengippeta-gey ni annel tu.

<sup>25</sup> Ya etan mahigan tuun eleg tu pinhed ni manggunnu ey ya higeu hu umhulun ni keteyyan tu. <sup>26</sup> Ya kanenemnan ebuh ni mahigan ni tuu ey yadda pinhed tun meweddan hi-gatu. Nem hedini ya kayyaggud ni tuu, ey madewat niya eleg tu ukkuhan umbaddang.

<sup>27</sup> Hi APU DIOS ey anggebe-hel tun peteg hedini man-appit hu tuun lawah tuka pehpehding. Nema-ma-ma hedini beken ni kayyaggud hu gaputun tu pan-appitan.

<sup>28</sup> Ya etan maitek ni tistigu ey endi kamengullug ni tuka e-hela, nem ya etan tuun makulug tuka e-hela ey hi-gatu kadedngeladdan tuu.

<sup>29</sup> Ya etan lawah ni tuu ey netuled e heni hi-gatu neiptek, nem ya etan kayyaggud ni tuu ey tuka pakannemnema hedini neiptek winu neihalla ni tuu ey impahding.

<sup>30</sup> Eleg um-amnu hu implanuh ni tuu, anin ni kantu et nelaing niya nenemneman, hedini eleg pinhed APU DIOS humman ni planuh tu.

<sup>31</sup> Hanniman mewani di gubat e anin ni indaddan idan tuu hu dakel ni kebayyun ussalan dan mekiggubbat et eleg ida mengapput hedini eleg i-abulut APU DIOS.

## 22

<sup>1</sup> Heballi hu anin ni beken itan kedangyan nemet limpiyuh hu neitu-wan niya daita kalispituhan tuu.

<sup>2</sup> Ya nan-ingngehan ni kedangyan et ya newetwet ey hi APU DIOS hu nanletun hi-gadan dewwa.

<sup>3</sup> Ya etan nenemneman ni tuu ey hedini ang-angen tu winu gibbeken tu e wada meippahding ni lawah, ey meiddawwi et ikiwngan tu. Nem ya etan endi nemnem tun tuu ey tu kumedek ngu dammuen et manhelhelatp.

<sup>4</sup> Ya etan tuun kamampekkumbabah niya tuka ilillingisin mengippahding ni pinhed APU DIOS ey meweddan hi-gatu hu kinedangyan, ya ketbalan tu niya andukkey ni biyag.

<sup>5</sup> Ya etan tuun nebalol ni hi-gatu biyag tu ey kameiddawwiddan lawah e heni bitun keknaan idan lawah ni tuu.

<sup>6</sup> Ituttuddum ni u-ungga hu kayyaggud ni elaw ma-lat hedini mehikken, ey eleg tu iwwalleng.

<sup>7</sup> Yadda kekeddangyan hu kapan-ap-aapuddan newetwet. Hanniman dama etan neutangan e kapambega-en etan ni nampautang ni hi-gatu.

<sup>8</sup> Ya etan tuun kamengippenahding ni lawah ey lawah ali dama meippahding ni hi-gatu et mepappeg ali law nengipelilligatan tun edum tun tuu.

<sup>9</sup> Ya etan tuun madewat e tuka iddawsidda newetwet ni kenne da ey bendisyonan APU DIOS.

<sup>10</sup> Pea-allaw yudda kamekannaltalangga et endi mambabakal ey endi mantututut niya endi um-ipadngel.

<sup>11</sup> Ya kagayyuman ap-apu ey ya etan tuun kayyaggud nemnem tu ey kabbabbal ni um-ehel.

<sup>12</sup> Hi APU DIOS ey tuka ang-anga ma-lat mannananeng hu makulug ni tuttuudu et humman meunnud ni ingganah. Eleg tu i-abulut ni ya kaituttuddudan maheul hu meu-unnud.

<sup>13</sup> Ya etan mahigan tuu ey dakel pengigga-dulin eleg tu panggunnu. Kantuy "Wada layon di dallin, entanniy pintey da-ak di keltad!"

<sup>14</sup> Ya etan lakin kamehe-ul ni malumi-ih ni ehel ni makilakin biin wada ahwa tu et makiugip ni hi-gatu ey heni na-gah di edallem ni bitu. Tep inidutan law APU DIOS hu hipan tuun mengippahding nunya.

<sup>15</sup> Kapya tu hu u-unggan mengippahding ni beken ni kayyaggud, nem hedini hepliten ni a-ammed tu, ey edallem tun mengippahding ni kayyaggud.

<sup>16</sup> Ya etan tuun dakel tuka iddawat idan kekeddangyan et ya etan tuun tuka mama panligatan idan newetwet ma-lat ma-duman kinedangyan tu ey nan-ingngeh ida e lektattuy mewetwet ida.

<sup>17</sup> Kayyaggud hu dedngelen yu kaituttuddun nelaing niya nenemneman ni tuu et maedalan kayu. Ey peka-u-unnud yu nakka ituttuudu,

<sup>18</sup> tep um-amleng kayu hedin ihha-ad yud nemnem yudda humman et eleg yu liwwanen.

<sup>19</sup> Nakka pan-ituttuddudda huyyan tugun ni hi-gayu ma-lat mandinel kayun APU DIOS.

<sup>20</sup> Yahhuy ida telumpulun tugun niya tuttuaddun intudek kun pan-eddalan yu. Kayyaggud ida huyyan tugun niya tuttuaddun nangkenemneman ni tutu-u.

<sup>21</sup> Et humman hu, adal yudda huyyan makulug niya kameiddinnel ni tuttuaddu ma-lat neiptek hu penummang yu hedin wada nengitu-dak ni hi-gayu.

<sup>22</sup> Heninnuy hu memengngulu: Entan tu ma-man panligligat ida newetwet niya entan tudda idiklamuh ma-lat alen yu hu hipan wadan hi-gada.

<sup>23</sup> Tep hedin hi APU DIOS ey tudda kai-ehngeng et hi-gatu mekihhanggaddan kamengip-peligligat ni hi-gada et kastiguen tuddan katey.

<sup>24</sup> Ya meikkadwa: Entan an pekikillaw di tuun nelakah ni umbunget,

<sup>25</sup> tep meebbalinan kayun elaw tu ey neligat yullin iwwalal humman ni elaw.

<sup>26</sup> Ya meikkatlu: Entan tu iehngeng hu utang ni edum ni tuu,

<sup>27</sup> tep hedin eleg kalli pakebayad, ey kumpulmih ali ellan dad hipan nebalol ni hi-gam, anin ya uggippam.

<sup>28</sup> Ya meikka-pat: Entan tu i-tan hu kegad ni inha-ad idan aammed yun nebayag ma-lat piliwen yu hu puyek ni dinagsi yu.

<sup>29</sup> Ya meikkellima: Ya etan tuun kayyaggud tuka pehding ni mengingngunnun kameittuddun ingngunu tu ey hi-gatu dammutun mengingngunnun pengunnun patul.

## 23

<sup>1</sup> Ya meikka-nem: Hedin eyyagan dakan tuun eta-gey saad tun mekikkan ni hi-gatu, ey entan tu liwwan hu neitu-wan nunman ni kadwan ni kamengngan.

<sup>2</sup> Et humman hu, anin ni kantu et naka-upa ka ey kekkenng mu kennen mu.

<sup>3</sup> Entan tu taggan ekan idan mehng-ew ni indaddan tu tep entanniy humman hu pematnaan tun hi-gam.

<sup>4</sup> Ya meikkeppitu: Hedin nenemneman ka, ey entan tu pamehig ngunu et anin ni hileng ey kawwalwal et tagan mu ngunu tep ya neminhed mun umkedangyan. Nemnem mu e endi damengu silbitu.

<sup>5</sup> Tep hedin ya kinedangyan, ey endi maptek ni neendi e heni sisit ni nepayakan e kaumtayab.

<sup>6</sup> Ya meikkewwalu: Entan an pakikan di baley ni nekuliput ni tuu niya entan kaemeh idan mehng-ew ni kennen ni tuka iddaddan.

<sup>7</sup> Tep anin ni kantuy "Imay, pangan kayu kuma niya panginum kayun meinum" nem humman ni ehel tu ey eleg malpud puhu tu. Ya kakulugan tu ey eleg tu pinhed ni i-ayag tep tuka nenemneman ingganah hu kangina etan ni kennen ni indaddan tu.

<sup>8</sup> Gullat ni nekikan ka kumedek ey pinhed mulli law ni i-uta et endilli silbin nampesalamatam ni hi-gatun nengannam.

<sup>9</sup> Ya meikkahyam: Entan tu ipatnan umtugun ni tuun endi nemnem tu, tep pihhulen tu kumedek ittugun mu.

<sup>10</sup> Ya meikkahampulu: Entan tu ekal hu kegad ni inha-ad idan a-ammed ni nebayag ma-lat ideldel yu winu piliwen yu hu puyek idan nepu-hig,

<sup>11</sup> tep hi APU DIOS e kamengi-ehngeng ni hi-gada ey et-eteng kabaelan tu. Baddangan tuddad diklamu da et mekastigu kayu.

<sup>12</sup> Ya meikkahampulut hakey: Pakadngel yu ituttudduk ni hi-gayu niya adal yu hu kayyaggud ni elaw.

<sup>13</sup> Ya meikkahampulut dewwa: Hedin mahapul ni hepliten yudda u-ungnga yu ma-lat panugun yun hi-gada, ey ipahding yu, tep eleg ida mettey ni heplit.

<sup>14</sup> Ya kakulugan tu ey ya penuggunan yuddan u-ungnga yu hu mengiddawwin hi-gadad pengippahdingan dan lawah ni umhulun ni ketteyyan da.

<sup>15</sup> Ya meikkahampulut tellu: Hi-gam ni u-ungngak, ey hedin menemneman ka ma-lat limpiyuh pambiyag mu, ey man-an-anla-ak.

<sup>16</sup> Em, makulug ni man-an-anla-ak hedin dedngelek e neiptek hu muka pan-e-ehhel.

<sup>17</sup> Ya meikkahampulut epat: Entan kaemeh mun kaippenahding idan lawah ni tuu. Ya kumaddan ilillingisim ni pehding ey ya pengu-unnudam nan APU DIOS.

<sup>18</sup> Hedin henin nunman pehding mu ey kayyaggud pambalanan ni biyag mu niya endi mu kedismayahan.

<sup>19</sup> Ya meikkahampulut lima: Hi-gam ni u-ungngak, ey dengel mudda eya tugun ku: Mahapul ni menemneman ka. Entan tu langlangkuyya biyag mu ey pannananeng mun mengippahding ni kayyaggud.

<sup>20</sup> Entan pekikillaw muddan tuun ya meinum niya kennen hu daka peppepdugad biyag da.

21 Tep yadda tutu-un ya buteng niya kennen hu daka pehpehding ey lektattuy mewetwet ida. Humman idan tutu-u ey ebuh hu mengngan niya meuggip ni daka ippenahding ey lektattuy nambalwasiddan layyut.

22 Ya meikkahampulut enem: Dengel mu hu tugun amam tep gullat ni endi hi amam et endi ka. Ey hedini mei-inna hi inam, ey entan tu pihul tugun tu.

23 Panhehellu kan man-eddal ni emin idan makulug ni tutuddu, yadda kaum-idwat ni kenemneman niyadda tutuddun kapengamtain mengimmatun ni neihla niya neiptek, tep nebalol ida huyya. Et humman hu, entan tu langlangkuuya ida huyya.

24 Hedini nenemneman niya kayyaggud hu elaw ni hakey ni u-ungnga, ey man-amamleng ni peteg hi ametu.

25 Et humman hu, ang-ang yu ma-lat menemneman kayu niya kayyaggud elaw yu ma-lat peamleng yu ameyu, nema-ma-man ineyun nengiuunggan hi-gayu.

26 Ya meikkahampulut pitu: U-ungngak, dengel muwak ey iu-unnud mud elaw ku, 27 ma-lat eleg daka haulen ni makilakin bii niya biin tuka pebeyyad annel tu e kamei-ellig di bitun kakeknai et umhulun ni ketteyyan.

28 Huyyaddan bibi-i ey heniddan mangkatekew ni tutu-un kamambebtak di dalam et manheged idan tekkewan da. Ey hi-gada kaumhulun ni eleg pengihhakkeyin lalakin impemihed dan aahwa da.

29 Ya meikkahampulut walu: Yadda kamambuttebutteng ni tutu-u ey endi an-anlan biyag da. Ebuh mekibbekkal niya mekittuttut ni daka pehpehding. Kamelennunggidi hu annel da ey kamambabatag mateda.

30 Hanniman elaw idan mangkainum. Ida kameammuammung idan edum da et taggan da inum ingganah ni hileng.

31 Et humman hu, ang-ang mu et eleg ka madinin menginnum, anin ni madlang ey kayyaggud ang-ang etan ni meinnum di basuh ey mebanglu tamtam tu.

32 Tep hedini imminum ita et nebuteng ita, ey hin-appil kapanggibbek ni kewa-waan tu ey heni daita killat ni uleg.

33 Hedini nebuteng hu tuu, ey hin-appil tuka penang-ang, ya tuka pannemnem niya tuka pan-e-ehhel.

34 Anin ni ya tuka panggibbek et hin-appil e heni wadad bangkan kamangkiddukiddung di danum.

35 Entannit inggibek tu ey kantuy "Kele heni da-ak dinenuntuk ey eggak igibek? Pigantu bengngunak et nak mewan uminum?"

## 24

1 Ya meikkahampulut heyam: Entan kaemeh idan lawah ni tuu niya entan pekikkillaw ni hi-gada,

2 tep ebuh hu umbabhah niya umguluh ni wadad nemnem da. Ey hedini um-ehel ida, man umhulun ni guluh di edum ni tuu.

3 Ya meikkadwampulu: Hedini nenemneman niya nelaing hu hakey ni tuu, ey kamengapyan nehammad ni baley niya kayyaggud hu kamekapkapyad nanha-adan da.

4 Ey umkedangyan et pan-ellan tu hipan nebalol ni tenged et iha-ad tud baley tu tep inamta tu hu kayyaggud ni pehding tu.

5 Ya meikkadwampulut hakey: Ya etan nenemneman ni tuu ey e-etteng hu kabalinan tu nem ya etan na-let ni tuu.

6 E humman hu yadda sindalun an mekiggubbat ey mahapul da nelaing niya nemneman ni mengituttuddun kayyaggud ni pehding da. Tep ya kapengappusi ey kameippuun di dakel ni mengituttuddun kayyaggud ni pehding.

7 Ya meikkadwampulut dewwa: Ya endi nemnem tun tuu ey eleg tu han-awat hu kaennungbaladdan nangkenemneman niya endi ngu dammutun e-helen tu hedini idan kamanhuhummangan hu nangkenemneman.

8 Ya meikkadwampulut tellu: Ya etan tuun ebuh hu lawah ni inamta tun pehding ey mandingngel e hi-gatu kaumhuhulun ni guluh.

9 Ya panliwwatan ni ebuh hu kanenemneman endi nemnem tun tuu. Ey ya etan kamekannaltalangan edum tun tuu ey anggebe-hel idan tuu.

10 Ya meikkadwampulut epat: Hedini medismayah ka tep eleg mu amta pehding mu hedini wada ligat, ey humman keang-angan tu e nekapyu ka.

11 Ya meikkadwampulut lima: Hedini wada tuun meippepettey ey endi bahul tu, ey kayyaggud hedini baddangan ma-lat eleg da pateyen.

12 Kanyu na-muy "Endi ngu bibbiyang kudman." Nem entan tu panghel nuntan tep inamtan Apu Dios hu wadad nemnem ni emin ni tuu. Ey ya tuka iddawat ni gun-uden ey meippuun di impenahding.

<sup>13</sup> Ya meikkadwampulut enem: U-ungngak, ekan kan putsukan tep malumi-ih ey kayyaggud ni hi-gam.

<sup>14</sup> Hanniman mewan hedin nelaing niya nenemneman hu hakey ni tuu e panyaggudan tu humman. Tep hedin nelaing niya nenemneman hu hakey ni tuu ey umyaggud hu biyag tun edum ni aggew.

<sup>15</sup> Ya meikkadwampulut pitu: Entan tu iu-unnud etan di matekew ni tuun tuka hehhegeda peni-yanan ni limpiyuh ni tuun baley tu ma-lat maihullul et an manekew.

<sup>16</sup> Ya etan kayyaggud ni tuu ey anin ni hipan ligat hu um-alin hi-gatu et eleg meapput. Nem ya etan lawah ni tuu, ey anin ni ekket ni ligat et meapput.

<sup>17</sup> Ya meikkadwampulut walu: Hedin wada ligat ni immalin etan ni tuun anggebe-hel daka, ey entan pan-am-amleng.

<sup>18</sup> Tep inamtan APU DIOS hu wadad nemnem mu ey eleg tu pinhed henin nunman. Lektattuy eleg tu kumedek law kastigua humman ni tuu et hi-gam pengi-tanan tun bunget tu.

<sup>19</sup> Ya meikkadwampulut heyam: Entan kaemeh idan lawah ni tuu ey entan takut ni hi-gada.

<sup>20</sup> Tep yadda lawah ni tuu ey endi namnamahen dad biyag dan edum ni aggew. Kamei-ellig hu biyag dad kengkeh ni kame-dep.

<sup>21</sup> Ya meikkatelumpulu: Hi-gam ni u-ungngak, ey dayaw mu hi APU DIOS ey lispituh mu hu patul. Mahapul ni eleg ka mekikkillaw idan tuun kamangngenghay ni hi-gada.

<sup>22</sup> Tep dammutun wadalli um-alin kebabhahan dan peillin Apu Dios winu ya etan patul.

<sup>23</sup> Yauhuy ida dama hu edum ni tugun idan nelaing niya nenemneman ni tutu-u: Beken ni kayyaggud hu an ippahhig ni huwes hu hakey ni pengippennuhan tun kasuh.

<sup>24</sup> Tep hedin kantuy endi bahul etan ni tuun nambahul, ey hi-gatu iddutan ni tutu-u niya hi-gatu anggebe-hel da.

<sup>25</sup> Nem ya etan huwes ni kamengastigun nebahulan ey hi-gatu bendisyonan Apu Dios et yumaggud biyag tu.

<sup>26</sup> Ya etan nehammad ni gayyum ey ya makulug hu tuka e-helan hi-gam.

<sup>27</sup> Ya memengngulun pehding mu ey ang-ang mu et wada pengal-an mun kennen henin payew ni ge-udam ey han ka nengapyan baley mu.

<sup>28</sup> Hedin endi impahding ni dinagsim ni hipan bahul, ey entan an pantistigud korteh et mu ehelen e nebahulan. Niya beken ni kayyaggud hu an he-ulen ida tutu-un pengippahdingan ni henin nunman.

<sup>29</sup> Hedin wada impahding ni edum mun tuun hi-gam ni lawah ey entan tu panghel ey "Pehding ku daman hi-gatu hu impahding tun hi-gak." Ey entan tu nemnemnem ni mengibleh ni nunman ni el-eleg ni impahding tun hi-gam.

<sup>30</sup> Ya elaw ni makahhigan tuu ey heninnuy: Wada pinhakkey ni nak nandaddallan di payew niyad habal ni hakey ni makahhigan tuun endi nemnem tu,

<sup>31</sup> ey nemahhig ni etata-gey hu helek niya hebit, niya neiwalleng ida tuping et mangkagday.

<sup>32</sup> Entannit nakka nemnemnema humman idan nak inang-ang ey heninnuy inedal ku:

<sup>33</sup> Beken ni kayyaggud hu an pelinlinwannan et ita man-u-uggip winu ita man-eg-egpit.

<sup>34</sup> Tep endilli maptek ey nambalin itan nekawwetwet, henin etan ni tuun kamakallin-glinggep ey pinhakkeyey immali matekew et takewen tu pihhuh tu.

## 25

<sup>1</sup> Yauhuy ida pay edum ni tugun Solomon ni impatudek lan patul e hi Hesekiah di Judah:

<sup>2</sup> Daydayaw tayu hi Apu Dios anin ni wadadda hu eleg tu peamtan hi-gatsun tutu-u. Ey ida dama kamedeyyaw ap-apu tep ya daka peamtan hi-gatsun inedal da.

<sup>3</sup> Eleg tayu hanlekud hu kasina-gey ni kabunyan niya kadinallam ni baybay. Hanniman daman eleg tayu han-awat hu wadad nemnem ni patul.

<sup>4</sup> Ya etan kamangngunnun gumek ey mahapul ni eyyugen tu etan silber ma-lat e-kalen tu lugit ni nei-dum et memahmah ni hantu kinapyan hipan pinhed tun kapyaan.

<sup>5</sup> Hanniman daman mahapul ni me-kal ida etan tuun kaum-idwat ni lawah ni tugun etan ni patul et han limpiyuh niya meandeng hu pan-ap-apu tu.

<sup>6</sup> Entan tu peta-gey hu annel mud hinanggan ni patul. Ey entan tu iingngeh annel muddan tuun etata-gey saad da.

<sup>7</sup> I-imman hu heged mu et ngenamung etan patul ni menghel ni hi-gam e dammutun umlaw kad kad-an tu, nem ya tu penghelan ni hi-gam ni um-a-allaw kad kad-an idan opisyal tu et mabeingan kad hinanggan da.

<sup>8</sup> Entan panggannugannun an mandalom hedini wada inang-ang mun neipahding tep entanniy wada hakey ni mantistigun kantuy itek inhel mu et mebe-ingan ka.

<sup>9</sup> Hedini wada nanhallaan yun dinagsi yu, ey iyayyaggud yun ihummangan. Ey hedini wada nanhummanganan yu, man entan tu ene-ehhel di edum ni tutu-u.

<sup>10</sup> Tep hedini wada mengngel ni muka ene-ehhela, ey penghel day metumbuk ka et mebe-ing kan ingganah.

<sup>11</sup> Kayyaggud dengel ni kae-helan edum ni tuu hedini humman pinhed mun dedngelen nunman ni tsimpuh. Ya humman ey heni balituk ni apol ni neiyayyaggud ni neiha-ad di basket ni silber.

<sup>12</sup> Ya tugun idan nenemman ni tuu ey heni nemahmah ni balituk etan ni tuun neminhed ni mengngel.

<sup>13</sup> Ya etan tuun kameiddinnel ni ittu-dak ni mekihummangan ey um-ipeamleng etan di tuun nengitu-dak ni hi-gatu. Hanniman mewan hu metengnin ni danum e kayyaggud ni innumen ni ahianin nemahhig hu petang.

<sup>14</sup> Ya etan tuun kantuy wada ibbaddang tu, nem endi kaya, ey henin kulput ni kaney i-ali tu udan ey endi kumedek.

<sup>15</sup> Hedini kabbabbal hu kapenghel, ey dammutun ihhapitan hu ap-apu. Anin etan tuun nemahhig ni mekelhi puhu tu et lektattuy impeya-meh ni kabbabbal ni ehel.

<sup>16</sup> Hedini wada himmak mun putsukan, ey entan tu pemahhig ekan tep lektattuy i-utam.

<sup>17</sup> Hanniman mewan hu an pekiyuyuddungan di baley ni gagayyum e hedini kewawa-wa, ey lektattuy ibubbunget daita tep imminglay ida.

<sup>18</sup> Ya etan beken ni makulug ni pebehul ni hakey ni tuu ey heni bakdung, ey heni matedem ni hinallung niya panan umpatey.

<sup>19</sup> Ya pengiddinnelan etan ni tuun eleg meiddinnel ey henin pengiggalgalan ni kaman-iwwal ni ngipen winu pengidlanan ni nedahuy ni heli.

<sup>20</sup> Hedini ia-appehan hu kaumlelemyung ni tuu, ey heni ingkal mu balwasi etan ni nekeksetel ni tuu winu heni hina-adam ni ahin hu liput tu.

<sup>21</sup> Hedini wada tuun angebe-hel dakeyu, ey pangan yu hedini neupa niya idwasi yun innumen tu hedini na-wew.

<sup>22</sup> Et ya humman ni kayyaggud ni pehding mu hu umhulun et umbaing law ni lawah ni tuka pehpehding ni hi-gam \* niya hi APU DIOS hu mengidwat ni ginun-ud mun nengipahdingan ni kayyaggud.

<sup>23</sup> Ya tumbuk ey nanna-ud ni umhuhulun ni bungngetan ni tuu. Hanniman dama hu dibdbi ni kamelpud north e nanna-ud ni i-ali tu udan.

<sup>24</sup> I-imman hu ita manha-ad di a-abbung nem ya etan ita mekia-addum di matutut ni ahwa.

<sup>25</sup> Ya amleng ni pengngelan etan ni kayyaggud ni neipeamtan nalpullid neidawwi ey henin amleng ni neka-wew ni tuun um-inum ni makattengnin ni danum.

<sup>26</sup> Ya etan kayyaggud ni tuun kameidngelid kae-helan lawah ni tuu ey kamei-ellig di hebwak ni nekilut winu nakdetan.

<sup>27</sup> Beken ni panyaggudan ni annel hu taggan ekan ni putsukan. Ey lawah mewan hedini pakkadek hekittan ingganah daydayawen ni tutu-u.

<sup>28</sup> Ya etan tuun eleg tu han-isipel bungget tu ey henin bebley ni nebahbah luhud tu et nelakah ni hehgepen ni buhul tu.

## 26

<sup>1</sup> Ya etan tuun endi nemnem tu ey bekken ni lebbengtun an tettebalen ni tutu-u, hanniman daman bekken ni lebbengtun an mandallalu niya an um-udan ni ahiani.

<sup>2</sup> Hedini iddutan ni hakey ni tuu hu endi bahu tu, ey endi pambalanan tu tep humman ni idut ey henin sisit ni tuka pemegga tayatayab e eleg um-e-pa.

<sup>3</sup> Ya penuttuddun kebayyu ey ya heplit niya ya gumekek ni kapekemmal. Hanniman dama e ya heplat hu penuttuddu etan ni tuun endi nemnem tu e eleg tu nemnema ni impahding tu pehding tu.

<sup>4</sup> Hedini huhummangem hu nalnalgem ni kaene-ehhelan tuun endi nemnem tu, ey heni in-inggeh mu annel mun hi-gatu.

<sup>5</sup> Nem hin-addum ni mahapal ni hummangem hu ehel ni tuun endi nemnem tu, tep entanniy kantu ngu nem nelaing.

<sup>6</sup> Hedini iddinel mu etan tuun endi nemnem tun mengi-ehneng ni hi-gam ni an mekihummangan, ey heni pinutul mu helim winu heni ka imminum ni kedet.

\* 25:22 25:22 [21-22] Romans 12:20

<sup>7</sup> Ya etan tugun etan ni tuun endi nemnem tu ey heni nedahuy ni heli.

<sup>8</sup> Endi nemnem hedini tetebbalen etan tuun endi nemnem tu, tep heni mu illastik etan batun neibedbed di lastik mu.

<sup>9</sup> Anggetakkut hu tugun ni tuun endi nemnem tu heni etan ni nebuteng ni nantenged ni bakkung.

<sup>10</sup> Ya etan tuun tuka lelgema ayag idan tutu-un endi nemnem tu winu kumpulmih ni melebbah et tangdanan tudda ey heni etan ni tuun linggeman tuka penna.

<sup>11</sup> Ya etan tuun endi nemnem tu e tuka ippenidwan ippahding hu neihallaan tu ey henin ahun tuka kenna in-utetu. \*

<sup>12</sup> I-imman etan endi nemnem tun tuu nem ya etan tuun ya tuka pannemnem ni annel tu ey nelaing, nem ampangun et eleg.

<sup>13</sup> Ya etan tuun kaumhigan an manggunnu ey eleg um-ehep, tep dakel pengigga-duli e kantuy 'Eggam um-ehep di dallin, tep entanniy wada layon di keltad.'

<sup>14</sup> Ya etan mahigan tuun kaman-u-uggip ni ebuh ni nampiggad ey henin lekbi e limmayud di bitaglah tu ni neibanggad.

<sup>15</sup> Wadadda nemahhig higedan tuu e anin ya pengi-idduhan dan kenne dad bungut da et daka higgai.

<sup>16</sup> Ya kapannemnem ni mahigan tuu ey nelalla-ing nem ya pitun tuun nangkelaing ni umtugun.

<sup>17</sup> Ya etan tuun kamekidimdima-ud kamantututtut ey heni etan ni tuun dinammu tu netagal ni ahud dalan et tengden tu tangilan nunman ni ahhu.

<sup>18-19</sup> Ya etan tuun tuka he-ula edum tun tuu ni hantu ehela e langlangkak tu ey anggetakkut e henin kaman-anggaw ni tuun tuka lellelgema panapana.

<sup>20</sup> Hedin nangpuh etan neitungu, man kame-dep hu apuy. Hanniman dama e mesikked pantutututan hedini endidda umtenumbuk.

<sup>21</sup> Ya etan mabekal ni tuu ey nelakah tun illapu pambabakalan, henin ngalab e tuka petbel ittungu.

<sup>22</sup> Pinpinhed idan tuun deddengngelen hu tumbuk, henin meheng-ew ni kenne e kayyaggud ni ekmunen.

<sup>23</sup> Ya etan kayyaggud ni ehel ni kaihhanid beken ni kayyaggud ni kapannemnem ey henin pintol e kapennin lawah ni ang-ang.

<sup>24-25</sup> Ang-ang yudda kuma hu tutu-un henidda kayyaggud, nem ampangun et lawah kumedek nemnem da. Kayyaggud daka pan-e-ehhel nem ya kakulugan tu ey nemahhig hingit da. Et humman hu, entan tu kulug hu hipan e-helen da.

<sup>26</sup> Nem anin ni hennian da hu lawah ni nemnem da et meamta damengu etan di lawah ni daka pehpehding.

<sup>27</sup> Ya etan tuun kaumku-kun bitun keknaan ni edum tun tuu winu tuka ullina batud edum tu ey lektattuy hi-gatu mekna etan di bitu winu hi-gatu me-gahan ni batu.

<sup>28</sup> Ya etan maitek ni tuu ey anggebe-hel tu edum tun tuun tuka bahbaha tep ya itek ni tuka e-helan hi-gada. Tep hedini eleg malpud puhu kae-hela man kaumbababah kumedek ni ebuh.

## 27

<sup>1</sup> Entan tu ipahhiya hu ninemnem mun pehding ni kabuhhan winu yan edum ni aggew, tep eleg mu amta hedini hipa meippahding ni hi-gam ni kabuhhan winu yan edum ni aggew.

<sup>2</sup> Ngenamung hu edum ni tuun menghel ni kakinayyaggud mu et beken ni an melpud bungut mu.

<sup>3</sup> Mebelbel-at hu ligat ni kaidawat ni endi nemnem tun tuu nem ya bel-at ni batu winu neilanggusih ni palnah.

<sup>4</sup> Ya bunget ey nemahhig ni kaumbabah. Nem nema-ma-man anggetakkut hu kameippahding tep ya annil niya ameh.

<sup>5</sup> I-imman hu e-helan edum ni tuud neihallaan da, tep humman keang-angan tun wada impeminhed ni hi-gada.

<sup>6</sup> Ya etan makulug ni gayyum ey anin ni makaggeh hu penghelan tun neihallaam et dammutun pandinnelam. Nem ang-ang mu kuma etan buhul mun tuka peang-ang-ang e heni wada hu impeminhed tun hi-gam.

<sup>7</sup> Hedin naphel hu hakey ni tuu ey anin ni putsukan et eleg tu ni-ngangu hengngudan tamtaman, nem hedini neupa hakey ni tuu, ey anin ni mekel-it etan mekkan et malumi-ih tuka penamtam.

\* 26:11 26:11 Ang-ang yu hu 2 Peter 2:22.

<sup>8</sup> Ya etan tuun hini-yan tu baley tu et lumaw di edawwi ey heni sisit ni hini-yan tu buyetu.

<sup>9</sup> Ya kayyaggud ni tugun ni hakey ni gayyum ey heni bangbanglu e kaum-idwat ni an-anlan puhu.

<sup>10</sup> Entan tu iwalleng ida gagayyum mu niyadda gagayyum amam, tep edum alin aggew, et mahapul mu hu baddang da niya hi-gada kaddiwelh ni umbaddang ni hi-gam nem yadda agim ni wadad neidawwin bebley.

<sup>11</sup> U-ungngak, pandengel kan tugun ku ma-lat lumeing ka niya ma-lat menemneman ka et umallengngak. Et hedini wada memihhul ni hi-gak di impahding kun nenugun ni hi-gam, ey dammutun hummangan kudda.

<sup>12</sup> Ya nenemneman ni tuu ey tuka iddawwi annel tu hedini wada inang-ang tun lawah ni mekapkapy. Nem hedini ya tuun endi nemnem tu, ey tuka an hipngata humman ni lawah ni meipahding ni han tu hinelheltap law hu neipahding ni hi-gatu.

<sup>13</sup> Hedini wada um-utang ni hi-gam, ey wada inewit tun eleg tu inghaan ni tuun mengi-ehngeng ni hi-gatu, ey mahapul ni wada ellam etan ni mengi-ehngeng ni pengitngedam nunman ni utang ma-lat wada inna-nu tun mambeyyad ni hi-gam.

<sup>14</sup> Hedini kakkabbuhhan ni peteg ey ittetkuk mu pengapngam ni gayyum mu ey ya pengngel tun hi-gam ey heni inidutam.

<sup>15</sup> Ya etan matutut ni ahwa ey henin lemlem e kamengippehigga. <sup>16</sup> Endi inna-nun mengippesikked ni bungut tu, tep henin dibdib e eleg mabalin ni peinneng niya henin lanan eleg mabalin ni gemgemen di tepayya.

<sup>17</sup> Hedini ya tuu ey ya edum tun tuu tuka pan-eddali, hanniman mewan hu gumeke e tuka teddemi edum tun gumeke.

<sup>18</sup> Hedini ippaptek hu keyew ni kamekkan lameh tu, ey wadalli kenen ni illameh tu. Hanniman mewan hu bega-en e hedini paka-ippaptek tu etan kan bega-en ni hi-gatu, ey meiddeyyaw ali.

<sup>19</sup> Ya kapannemnem ni hakey ni tuu ey humman hu mengippeamtan elaw tu. Henin meli-neng ni danum e dammutun pengiddiggalan ni angha.

<sup>20</sup> Endi pappeg ni kaamnawin matan tuu, henin katey e endi siked ni kamettey ni tuu.

<sup>21</sup> Ya balitik niya silber ey daka eyyugad apuy ma-lat memahmah, nem ya makuluk ni elaw ni tuu ey kameamta hedini wada kamenettebal ni hi-gatu.

<sup>22</sup> Ya etan tuun endi nemnem tu ey anin ni panpa-tuen ingganah ni kamangkatkatey, et eleg mabalin ni tuu iwwalak hu lawah ni elaw tu. Beken ni henin pagey e hedini biney, man kameappil hu begah di degi.

<sup>23</sup> Paka-ippaptek mudda animal mu <sup>24</sup> tep ya kinedangyan ey eleg mannananeng, henin kapan-ap-apuin tuu e wada pappeg tu.

<sup>25</sup> Amung mu hu dagemi ma-lat pakan muddan animal mu. Hedini na-puh, ey mu pan-ala helek di duntug et penehheggedan mun meittu-nud ni iggaud yu

<sup>26</sup> ma-lat dakel ippakan mun animal mu. Hedini hannya pehding mu, man dakel dutdut idan kalneroh mun kapyen mun balwasim. Ey dammutun um-igtang kan gelding mu ma-lat pengettang mun puyek ni i-e-dum mud puyek mu.

<sup>27</sup> Hedini hanniman hu pehding mu, ey eleg mekullangin gatas ni melpud gelding mun eleg mu igetang hu familyah mu et yadda bega-en mu.

## 28

<sup>1</sup> Ya etan lawah ni tuu ey kaumbebsik anin ni endi kamampendug ni hi-gatu. Nem hedini ya etan kayyaggud ni tuu ey eleg umtakut e henin layon e endi tuka tekkusi.

<sup>2</sup> Hedini lawah ida bimmebley, ey dakel kamanhuluhulul ni kaman-ap-apun hi-gada. Nem hedini nelaing niya nenemneman hu kaman-ap-apun hi-gada, ey mannananeng ni kayyaggud hu bebley da.

<sup>3</sup> Ya etan newetwet ni tuun kamengippelligat ni edum tun newetwet ey kamei-ellig di na-let ni udan e tuka bahbaha intanem.

<sup>4</sup> Ya etan tuun tuka ngenghaya olden ey humman keang-angan tun tuka pakatbala lawah ni tuu. Nem ya etan tuun tuka u-unnuda olden ey humman keang-angan tun eleg tu iu-unnud di kapehding idan lawah ni tuu.

<sup>5</sup> Eleg han-awat idan lawah ni tutu-u hu meandeng ni kapehding, nem hedini yadda kamengu-unnud nan APU DIOS ey han-awat dan peteg.

<sup>6</sup> I-imman hu anin ni newetwet ita nemet limpiyuh kapehding nem ya etan kedangyan ita, ey beken ni limpiyuh elaw.

<sup>7</sup> Ya etan nenemneman ni u-ungnga ey kamengu-unnud ni olden, nem ya etan u-unggan kamekikkillaw di endi silbi tun tuu ey be-ingen tu a-ammed tu.



<sup>8</sup> Ya etan tuun kimmedangyan tep ya nemahhig ni tuka pampeporsentoh ni pihhuh tu ey lektattuy umlaw kinedangyan tud tuun mahmek idan newetwet.

<sup>9</sup> Ya etan tuun eleg tu u-unnuda hu tugun Apu Dios ey eleg hengngudan Apu Dios ni dedngelen dasal tu tep kamengippebungnet ni hi-gatu.

<sup>10</sup> Ya etan tuun tuka dinnia limpiyuh ni tuu et ipahding tu lawah, ey lektattuy hi-gatu nebabbah. Nem ya tuun limpiyuh tuka pambi-biyag, ey wada kayyaggud ni gun-uden tu.

<sup>11</sup> Ya kapannemnem ni kedangyan ni annel tu ey hi-gatu nakannemneman niya nelaing. Nem ya etan newetwet ni tuun nenemneman ey inamta tu hu makulug ni elaw nunman ni tuu.

<sup>12</sup> Hedin ya kayyaggud ni tuu hu neihullul ni man-ap-apu, ey ida kaman-am-amleng hu tutu-u. Nem hedin ya lawah ni tuu hu yimmudung ni ap-apu ey ida kaanmampantellu tutu-u.

<sup>13</sup> Ya etan tuun eleg tu ebbuluta nambahulan tu ey endi pambalanan idan tuka ingngunungunu. Nem ya etan tuun tuka ebbuluta nambahulan tu ey kamantuttuyyu, ey hehmeken Apu Dios.

<sup>14</sup> Ya etan tuun tuka peka-u-unnuda hu pinhed APU DIOS ey mebendisyonan, nem ya etan tuun impeingha tun mengippahding ni lawah ey mebahbah.

<sup>15</sup> Anggetakkut hedin ya lawah ni peteg ni tuu hu man-ap-apuddan newetwet ni tutu-u, tep heni anggetakkut ni layon ni kaman-elmam niya heni bear ni iyallin umka-nut.

<sup>16</sup> Ya etan ap-apu winu patul ni kapanlelehaniddan tutu-u tu tuka pehding ey kulang tuka pan-ewwat. Nem ya etan ap-apu winu patul ni eleg tu pinhed ni umhaul niya limpiyuh tuka pehding ey dakel ni toon pan-ap-apuan tu.

<sup>17</sup> Ya etan tuun pimmatey ey tuka pannemnemnem hu nambahulan tu ingganah ketteyyan tu. Entan tu baddangi humman ni tuu.

<sup>18</sup> Hedin limpiyuh muka pehpending, ey melinggep ka, nem hedin beken ni limpiyuh muka pehding, ey mebahbah ka.

<sup>19</sup> Ya etan tuun mahlun manggunnu ey dakel pengellaan tun kennen tu. Nem ya etan tuun ya endi silbitu hu tuka ippenahding e eleg an manggunnu ey mambalin ni newetwet.

<sup>20</sup> Ya etan kameiddinnel ni tuu ey man-am-amleng di dakel ni bendisyon tu, nem ya etan tuun pinhed tun anggegannuy kimmedangyan ey nanna-ud ni mekastigu.

<sup>21</sup> Beken ni kayyaggud hu wada an pengippahhigan ni huwes di pengippennuhan tun kasuh, nem yadda edum ni tuu ey ida kamanggagalid ni mengippahding ni lawah, anin ni ekket ibbayad dan hi-gatu.

<sup>22</sup> Yadda makuliput ni tutu-u ey ida kaum-abtun umkedangyan, nem eleg da amta e mambalin idallin newetwet.

<sup>23</sup> Hedin e-helam hu tuud neihlaan tu, ey e-etteng ali pampesalamatan tun hi-gam ni edum ni aggew nem ya mu hintettebbalan ni hi-gatud ehel ni ebuh e beken ni makulug.

<sup>24</sup> Ya etan tuun tuka tekkewid ametun inetu ey kantuy beken ni neihalla impahding tu, ey heni damengu mapetey.

<sup>25</sup> Ya etan tuun pinhed tun hakkeyan hu kahiyatu ey kaumhuhulun ni panhahallaan. Nem ya etan tuun tuka iddinel nan APU DIOS hu mahapul tu ey mebendisyonan et yumaggud biyag tu.

<sup>26</sup> Ya etan tuun tuka ididdinel ni ebuh hu wadad nemnem tu ey eleg menemneman, nem ya etan tuun tuka dedngela tugun idan nangkenenemneman ey endi hu lawah ni mekapkapyan hi-gatu.

<sup>27</sup> Ya etan tuun madewat idan nangkewetwet ey eleg mekullangid mahapul tu. Nem ya etan tuun endin hekey hemek tuddan newetwet ey meiddutan.

<sup>28</sup> Hedin nan-ap-apu hu lawah ni tuu ey ida kaanmangkeiltu tutu-u. Nem hedin nepappeg hu nan-ap-apuan tu, ey ida kamanggagaya hu kayyaggud ni tutu-u et mangkeukkat ida.

## 29

<sup>1</sup> Ya etan tuun e-eggel ni sinugun, nem kapyatun manghay ey lektattuy wada meippahding ni hi-gatun kebabbahan tu et eleg ali law mabalin ni mebaddangan.

<sup>2</sup> Hedin kayyaggud hu kapehding ni ap-apud hakey ni bebley, ey ida kaman-am-amleng tutu-u tu, nem hedin lawah etan ap-apu, ey anggehemmek ida tuu.

<sup>3</sup> Ya etan u-unggan tuka gagamgami le-ingan tu niya kenemneman tu ey peamleng tudda a-ammed tu. Nem hedin kamekikkillaw idan kamebeyyadin bibi-i, ey me-puh kinedangyan tu.

<sup>4</sup> Hedin kaipapaptek etan ni patul et meandeng hu tuka pehding, ey umyaggud hu bebley ni nan-ap-apuan tu. Nem hedin gangaman tu pihuh ni meibbeyad ni hi-gatun pengippahdingan tun lawah ey bahbahen tu kumedek etan bebley.

<sup>5</sup> Ya etan tuun dakel tuka e-helan kayyaggud ni edum tun tuu, nem eleg gayam malpud huhu tu ey heni kamengapya ngun keknaan tu.

<sup>6</sup> Ya etan lawah ni tuu ey ya tuka pambekhuli hu memahbah ni hi-gatu. Nem hedin ya kayyaggud ni tuu, ey kaman-am-amleng niya kaman-a-appéh tep ya amleng tu.

<sup>7</sup> Ya etan kayyaggud ni tuu ey tuka ikakkaguh hu kelebengan idan newetwet, nem ya lawah ni tuu ey eleg tudan hekey ikkaguh.

<sup>8</sup> Yadda tuun endi daka pengibbilang ni edum dan tuu ey ida kamengapkapan guluh di bebley da, nem yadda nenemneman ni tutu-u ey daka pehding hu linggepan ni bebley da.

<sup>9</sup> Hedin wada nanhallaan ni nenemneman ni tuu et ya etan tuun endi nemnem tu, ey endi pambalanan ni panhumngangan da, tep pemegga kumedek etan ni tuun endi nemnem tu hu ngalangala ey umbunget niya umpel-it.

<sup>10</sup> Ya etan tuun mapetey ey anggebe-hel tudu limpiyuh ni tuu niya ihik tudan petteyen, nem ya kayyaggud ni tuu ey tudu kaipapaptek humman idan limpiyuh ni tuu.

<sup>11</sup> Ya etan tuun endi nemnem tu ey tuka peang-ang hu nemahhig ni bunget tu, nem ya nenemneman ni tuu ey tuka issipel bunget tu.

<sup>12</sup> Hedin kapakakkullugan ap-apu emin hu daka idaddatteng ni hi-gatu, anin ni itek, ey lektattuy mambalin ni lawah kapkapaen idan opisyal tu niya man-ittek ida.

<sup>13</sup> Ya nan-inggehan etan ni newetwet ni tuu et ya etan kamengippeligligat ni hi-gatu ey hi APU DIOS hu nengidwat ni hi-gadan dewwan mateda.

<sup>14</sup> Dakel ni toon hu pan-ap-apuan ni patul hedin tuka i-ehng hu kelebengan idan newetwet.

<sup>15</sup> Hedin ibbunget niya tuggunen hu u-ungnga, ey menemneman ida. Nem ya etan u-unggan eleg tuggunan a-ammed tu ey be-ingen tullu inetu.

<sup>16</sup> Hedin man-ap-apudda hu lawah ni tuu, ey mema-ma hu panliwwatan idan tuu. Nem nanengtun mateguddalli hu kayyaggud ni tutu-un kepappegan ni pan-ap-apuan idan nunman ni lawah ni ap-apu.

<sup>17</sup> Hedin tuggunem hu u-unggam man umlinggep ka niya um-amleng ka.

<sup>18</sup> Ya etan tuun eleg mengu-unnud ni tugun Apu Dios ey daka ippahding hu linggeman ni pinhed da. Nem ya etan tuun kamekanggu-unnud ni tugun tu ey man-am-amleng ida.

<sup>19</sup> Ya etan bega-en ni neligat ni mengu-unnud ey eleg umgela hu ehel ni ebuh ni penuggun ni hi-gatu. Et humman hu, mahapul ni wada pehding mu ma-lat matugun. Tep anin ni han-awat tu inhel mun pehding tu, ey eleg tu ippahding.

<sup>20</sup> Kekkeddukdu etan tuun endi nemnem tun tuttudduan ni kayyaggud ni pehding nem ya etan tuun eleg tu nemnema ni immehel.

<sup>21</sup> Hedin i-abulut ni hakey ni tuun pehding ni bega-en tu hu linggeman ni pinhed tun pehding meipalpun keu-ungnga tu, ey um-idwat ali kumedek ni degeh ni nemnem humman ni bega-en ni edum ni aggew.

<sup>22</sup> Ya etan tuun ekket ni bimmunget ey dakel pambekhulan tu, tep wadan wada pekibbekkalan tun hi-gatu kaumhulun.

<sup>23</sup> Ya kapampahhiyain tuu ey hi-gatu ngu hu um-idwat ni kebe-ingan tu. Nem ya etan tuun tuka pebabah annel tu ey melispituh.

<sup>24</sup> Ya etan tuun tuka baddangi matekew ey indawtan tu annel tun nemahhig ni ligat. Tep hedin mantistigu et i-uh-uh tu makulug, ey meillegat ni mekastigu. Hedin mewan nemnemen tun manlangkak, ey kastiguen Apu Dios.

<sup>25</sup> Hedin umtatakut kan e-helen winu nemnemen ni tuun hi-gam, ey heni ka naknad bitu. Nem ya etan tuun hi APU DIOS hu tuka iddinek ni mengippaptek ni hi-gatu ey kamelinggep e endi meippahding ni hi-gatun lawah.

<sup>26</sup> Emin hu tuu ey daka gangamin meihnup ni ap-apu ma-lat mampebaddang ida. Nem hi APU DIOS ni ebuh hu kaumbaddang idan newetwet niya meandeng hu daka pehding.

<sup>27</sup> Yadda limpiyuh ni tuu ey anggebe-hel dadda lawah ni tuu, hanniman ida dama lawah ni tuu e anggebe-hel dadda limpiyuh ni tuu.

### 30

<sup>1</sup> Yaddahhuy hu inhel Agur e u-unggan Jakeh: "Apu Dios, nemahhig lemyung ku. Endi namnamah ku tep yadda eya kameippenahding di neitu-wan ku.

<sup>2</sup> Ya nakka pannemnem ey hi-gak ni ebuh hu endin hekey inamta tu. Niya endin hekey kabaelan kun man-ewwat e heni-ak beken ni tuu.

<sup>3</sup> Bekennak ni nelaing niya bekennak ni nenemneman. Ey eggak mewan han-awat elaw mu e Apu Dios e kayyaggud ni peteg.

<sup>4</sup> Hi Apu Dios ni ebuh hu nelehbeng eyad puyek ni nalpud kabunyan ey hi-gatun ebuh hu nambangnad diman. Hi-gatun ebuh hu nangnged ni dibdib ey hi-gatu hu ngenamung ni pengippellawwan tu. Niya hi-gatu ngenamung ni baybay e heni inggukuh tud balwasi tu. Hi-gatu mewan ni ebuh hu nengiha-ad ni pappeg ni pambebleyan ni tutu-u eyad puyek. Hedin wada edum ni inamta yun nengipahding idan nunya, ey ehel yu hedin hipa humman ngadan tu ey ya ngadan ni u-ungnga tu!

<sup>5</sup> Kaum-amnun emin hu kae-helan Apu Dios. Hi-gatu heni happiyaw idan kamengid-dinnel ni meihikkug ni hi-gatu.

<sup>6</sup> Entan tu edumi inhel tu tep ibbunget daka ey keang-angan tun maitek ka.

<sup>7</sup> APU DIOS, abulut mu anhan eya dewwan ibbagak ni hi-gam et hannak matey:

<sup>8</sup> Ya memengngulu ey entan anhan tu iebulut ni nak manlangkak. Ya meikkadwa ey entan anhan tu iebulut ni nak mewetwet winu nak umkedangyan. Nem idwat mu mahapul kun kewa-wa-wa.

<sup>9</sup> Tep entannit kimmedangyannak ey eggak law mandinnel ni hi-gam, et kangkuy eleg daka law mahapul e Dios ku. Nem hedin mewan mewetwettak, ey entanniy menekkwak et mebe-ing ngadan mu.

<sup>10</sup> Hi-gayun tutu-u, ey entan tu an ene-ehhel etan ni apun bega-en hu itek meippanggep ni bega-en tu, tep iddutan dakan nunman ni bega-en et helheltapem humman ni impahding mu.

<sup>11</sup> Wadadda hu edum ni tuun eleg da lispituha a-ammed da niya daka iddusidda ey eleg ida mampesalamat ni hi-gada.

<sup>12</sup> Wadadda mewan edum ni tutu-un ya daka pannemnem ni annel da ey kayyaggud idan peteg e endi impahding dan lawah, nem ya kakulugan tu ey lawah ida.

<sup>13</sup> Wadadda dama tutu-un nemahhig daka pampahhiya e hedin ya daka pannemnem ni edum dan tuu ey nebahah ni peteg.

<sup>14</sup> Ey wadadda edum ni tuun da kumedek kapilliwa hu hipan kapengellain newetwet niyadda anggehmmek ni tuun kennen da, niya eleg da ikkaguh hedin hipa meippahding ni hi-gada.

<sup>15</sup> Ya etan bilebil ey dewwa tuka panhuphup ni kuheyaw. Heniddan dewwan u-unggan eleg mehingla e kanday "Idwasi muwak pay! Idwasi muwak pay!" Wadadda tellu, eleg, epat ni eleg da amtan mehingla, et endi hu kanday "Hiyya law!"

<sup>16</sup> Huyyadda hu kulung, ya biin nebasi, ya mamegan puyek ni mahapul tu udan et ya gimmanat ni apuy e eleg mabalin ni me-dep et tagan tu giheb ni dammutun gihheben tu.

<sup>17</sup> Ya etan tuun tuka ngenghaya winu tuka pihhula hu a-ammed tu ey lebbengtun metey et kanen ni sisit matetu ey ma-lat kanen ni sisit ni kamengngan ni annel ni netey hu annel tu.

<sup>18</sup> Wadadda mewan tellu, eleg, epat ni kaketngai niya neligat ni ewwatan:

<sup>19</sup> Ya kapehding ni tulduh ni mantayyatayab di kabunyan, ya kapehding ni uleg ni mambulubuluh kakeddapin di batu, ya kapandellanin bapor di baybay, niya kapan-impehhedin laki niya bii.

<sup>20</sup> Ey nemnem yu kedi elaw etan ni biin wada ahwa tu nem makilaki. Kameki-ullig di beken tu ahwa nem hedin negibbuh, ey endi baing tu e kantuy 'Kaw hipa nak impahding ni lawah.' Heni etan ni nengan ni ebuh et da-nihan tu bungut tu.

<sup>21</sup> Wada tellu, eleg, epat ni nemalad ni kamekapkapyaya eyad ta-pew ni puyek:

<sup>22</sup> Ya bega-en ni kamambalin ni patul, ya etan tuun endi nemnem tun wadan emin hu pinhed tun kennen, <sup>23</sup> ya etan biin nemahhig e anggebe-hel tu edum tun tuu, nem entanni ey nengahwa, et ya etan biin bega-en ey lektattuy hi-gatu neihullul etan ni biin kan bega-en ni hi-gatu.

<sup>24</sup> Wadadda epat ni mategu eyad ta-pew ni puyek e ekka-kut ida, nem nakallaing ida.

<sup>25</sup> Ya memengngulu ey yadda abbun. Bekken idan na-let, nem taggan da amung ni kennen da hedin ugew ma-lat wadalli kennen dan ahikettekettelan e endi mehemmak ni kennen.

<sup>26</sup> Ya meikkadwa ey yadda etan rock badgers e ekka-ket ni animal ni kamamballey di batu. Beken idan na-let, nem inamta dan an mamballey di nambattanan ni nadhak ni batu.

<sup>27</sup> Ya meikkatlu ey yadda dudun e endi patul da, nem ida kaman-uunnud ni umtayab insigun di saad dan heniddan sindalu.

<sup>28</sup> Et ya meikka-pat ey ya bannagaw e dammutun mepi-dit, nem ida kamehemmak di baley ni patul.

<sup>29</sup> Wadadda tellu, eleg, epat ni klasih ni mategun henidda hiyyahiyyan kamandaddal-lan:

<sup>30</sup> Ya memenggulu ey ya layon. Hi-gatu keka-ka-letan ey endi takut tu.

<sup>31</sup> Yadda dama edum ni heni hiyyahiyyan umdalan ey ya etan peltan ni manuk, ya lakkitun gelding niya etan patul ni nengipengulun sindalu tu.

<sup>32</sup> Hedin nambalin kan kamampahhiyya winu hedin namplanuh kan lawah ni pehding mu, ey endi nemnem mu. Entan tu nemnemnem e importanteh kan peteg ey entan tu ipahding etan lawah ni implanuh mu. Upup mu ew kuma angah mu tep ya ni baing mu.

<sup>33</sup> Makulug numan e hedin ikkiwakiwa hu gatas, man mangkapyan butter. Ey makulug mewan e hedin duntuken hu eleng ni tuu, man umkuheyaw. Niya makulug mewan e hedin pebungnet mu hakey ni tuu, ey nanna-ud ni mambekkal kayu."

## 31

<sup>1</sup> Yaddahuy hu inhel Lemuel ni intugun inetun hi-gatu:

<sup>2</sup> "Hi-gam ni u-unggak ey newada ka tep nandasadasallak nan Apu Dios. Dengel mudda huyya ittugun kun hi-gam:

<sup>3</sup> Entan tu iu-unnud di elaw ni makibii, tep humman ni elaw hu kaumhulun ni kakebahbahin papatul.

<sup>4</sup> Hi-gam e u-unggak e Lemuel, ey kayyaggud hedin ya ap-apu ey beken ni mainum ma-lat beken ni tu pan-uk-uklungan ida meinum ni kaumbuteng.

<sup>5</sup> Tep hedin imminum hu tuu, ey tu law kaliwwanadda olden ey eleg tu law hengngudan baddangan ida newetwet.

<sup>6</sup> Hedin ya kaumbuteng ni meinum, ey innumen idan kamangkatkatey ni tuu winu yadda nemahhig hu ligat da.

<sup>7</sup> Mukun ida kaum-inum ni nunman idan kaumbuteng ey ma-lat liwwanen da hu newetwetan da niya ma-lat liwwanen da hu lemyung da.

<sup>8-9</sup> Hedin neidalom etan anggehemmek niya newetwet ni tuu, ey mahapul ni meandeng hu pehding mun mengippennuh ni kasus. Iehneng mu kelebengan idan endi kabaelan dan mengi-ehngeng ni annel da.

<sup>10</sup> Neligat ni hemmaken ni laki hu biin kayyaggud ni peteg elaw tu ma-lat hi-gatu ahwaen tu. Ya henin nunman ni bii ey nebalbalol nem ya nenginan tenged.

<sup>11</sup> Ya laki ahwan henin nunman ni bii ey kemedinnel ni peteg e ippaptek nunman ni ahwa tu hu hipan mahapul da ma-lat endi da pangkullangan. Huyyan bii ey tuka pakabbaddangi etan laki et eleg ida makulungan ni mahapul dad baley da.

<sup>12</sup> Ey huyyan bii ey kayyaggud ni ingganah tuka pehding ni ahwa tu e eleg tu bahbaha.

<sup>13</sup> Mahlun man-ebbel niya menguggut.

<sup>14</sup> Huyyan bii ey kamei-ellig di bapor tep mahlun mengi-ennamut ni penennud tun familyah tu, anin ni melpud neidawwi pengellaan tu.

<sup>15</sup> Kaumbangun ni eleg mewa-wa et idaddan tu kenen ni familyah tu niya tuka ittudu pehding idan bega-en tu.

<sup>16</sup> Tuka pakannemnema balol ni puyek ni pinhed tun gettangen ni hantu gintang. Ey tuka ussala pihhuh tu ma-lat taneman tu humman ni puyek ni gintang tu.

<sup>17</sup> Na-let niya mahlun manggunnu.

<sup>18</sup> Anin ni nehileng et tagan tu ngunu niya wada silbin emin ni tuka pan-aatui.

<sup>19</sup> Hi-gatu mewan kamemuddun niya kaman-ebbel ni balwasi da.

<sup>20</sup> Madewat idan nangkewetwet.

<sup>21</sup> Endi tu kegguhan anin ni um-ali ahi ketelan, tep wada maetung ni balwasin ihhuklub idan familyah tu.

<sup>22</sup> Hi-gatu kamengapyan tuka i-ap-ap di unggipan tu niya kayyaggud ang-ang ni balwasi tu.

<sup>23</sup> Yadda edum dan bimbley ey daka lispituha ahwa tu, tep hi-gatu hakey idan kamengippangngulun hi-gadan bimbley.

<sup>24</sup> Huyyan bii ey kamengennapyan balwasi niya ballikid ni tuka iggatang.

<sup>25</sup> Na-let mewan huyyan bii ey kalispituhaddan tutu-u. Eleg umkakaguh hedin attu pengellaan tun mahapul ni familyah tun edum ni aggew tep wada dinel tu.

<sup>26</sup> Nenemneman tuka pan-e-ehhel ey kameiddinnel hu tuka e-hela.

<sup>27</sup> Huyyan bii ey mahu niya tuka paka-ippaptek hu mahapul ni familyah tu.

<sup>28</sup> Kapakallispituhaddan u-ungnga tu ey katettebala daman ahwa tu.

<sup>29</sup> Kan ahwatun hi-gatu ey 'Dakel ida kayyaggud hu biin kayyaggud elaw tu, nem hi-gam hu kekakkayyaggudan.' "

<sup>30</sup> Ya kakinat-agu ey kaumhahaul niya eleg mannananeng. Nem ya biin lebbengtun meiddeyyaw ey ya kamengu-unnud niya kamandaydayaw nan APU DIOS.

<sup>31</sup> Huyyan bii hu lebbengtun lispituhén ni tutu-u ey hi-gatu meidwatan ni gungunah tu tep ya kayyaggud ni impenahding tu.

## Ecclesiastes

### *Ya meippanggep eyan libluh ni Ecclesiastes*

Ya nengitudek eyan libluh ey hi Solomon. Ya eyad libluh ey neitudek hu humang eyan kantuy: "Kaw wada hu silbin biyag eyad ta-pew ni puyek?" Heninnuy hu neamtaan tu: "Endi silbin biyag eyad ta-pew ni puyek hedin endi hi Apu Dios di biyag tayu."

Impeamta etan ni nengitudek eyan libluh ida etan kamepennidwan kameipahpahding eyad ta-pew ni puyek. Pinhed etan ni nengitudek eyan libluh ni amtaen ida etan ni memidbid e ya biyag ni hakey ni tuu eyad ta-pew ni puyek ey makulug ni endi hu silbitu hedin eleg tu ibbilang hi Apu Dios di biyag tu. Et humman hu, makahhapul ni idaydayaw tayu hi Apu Dios di biyag tayu niya mandinnel itsun hi-gatu. Yadda etan tuun mengippahding ni nunya ey panyaggud Apu Dios hu biyag da eyad ta-pew ni puyek.

### *Ya neitudek eyad libluh:*

1. Ya biyag ey heni endi hu silbitu tep yallin edum ni aggew ey mettey itsu niya endi hu tayu ellan ni hipa humman ni nan-aatuan tayu eyad ta-pew ni puyek. (chapters 1-2)
2. Nem hi Apu Dios ey wada hu planuh tun hi-gatsun mategu eyad ta-pew ni puyek ni keiphedan tayu niya keiddeyyawan tu. (chapters 3-10)
3. Yallin edum ni aggew ey mepappeg hu biyag tayu eyad ta-pew ni puyek, et humman hu mahapul ni meiddeyyaw hi Apu Dios di biyag tayu. (chapters 11-12)

### *Emin ey endi silbitu*

<sup>1</sup> Huyyadda in-inhel etan ni mittuduh e u-ungngan David e patul lan nunman. Huyyan mittuduh ey nambebley di Jerusalem. Heninnuy kantu:

<sup>2</sup> Emin ey endi silbitu. Em, emin ey endin hekey silbitu.

<sup>3</sup> Hipa gun-uden ni tuun umngunungunu?

<sup>4</sup> Kamanhinhinullul hu tutu-u, kamangkei-ungnga edum ey kamangkettey edum, nem kamannananeng hu puyek e eleg mehulluli.

<sup>5</sup> Henin aggew e simmimil ni nelinug ey anggegannu mewan ni nambangngad di simmilan tu.

<sup>6</sup> Heni mewan ni dibdib e nampalaw di south ni nampalaw mewan di north e kamambinbinangngad.

<sup>7</sup> Yadda dama kulukul niya wangwang ey ida kamampellaw ni emin hu danum dad baybay nem kapyatun eleg mepnu et eleg mehewwal. Ey nambangngad ida mewan humman ni danum di kulukul niyad wangwang ni nalpuan da.

<sup>8</sup> Kamengippeinglay hu neitu-wan. Eleg mehingla hu matan daka ennang-anga ey eleg mehingla hu tanglan daka deddedngela.

<sup>9</sup> Humman metlaing hu kamekapkapy a endi edum tep yadda etan neipahding ni nunman hu kameipahpahding ni nunya. Emin hu hipan wadad eyad ta-pew ni puyek ey wada dedan ni nunman.

<sup>10</sup> Wadadda na-mu menghel ni kanday "Yan nunyan ebuh hu wada hannya." Nem eleg, tep neipahding dedan lan nunman ni eleg itsu pay ni maiungnga.

<sup>11</sup> Ey mukun hanniman, ey tep eleg hengngudaddan tuun nemnemnemen hu neipenahding lan nunman. Ey henin nunman idalli dama hu mangkei-ungnga e eleg dalli hannemnem hu kameipahpahding ni nunya.

### *Endi silbin laing*

<sup>12</sup> Hi-gak ey mittuduhak niya patullak di Israel ey nambebleyyak di Jerusalem.

<sup>13</sup> Impahding kun emin hu kabaalak ni mengewwat ni emin ni hipan kamekapkapy eyad ta-pew ni puyek. Ey neawatan ku e nekalligat hu neitu-wan ni indawat Apu Dios ni tuu.

<sup>14</sup> Emin hu wada eyad ta-pew ni puyek ey endi silbitu e heni kapeppepduga hu dibdib.

<sup>15</sup> Yadda nepiku ey eleg mabalin ni andengen ey eleg mabalin ni pekibbilang hu endi.

<sup>16</sup> Kangkud nemnem kuy "Nelalla-inggak ey daddakkel inamtak niya daddakkel hineniktamak nem yadda la edum ni nampatul eyad Jerusalem."

<sup>17</sup> Impahding ku mewan ni emin hu kabaalan ku ma-lat amtaen ku hu eleg paninggehan ni kalinaing niya kakinulang ni nemnem. Nem anin huyya et endi silbitu e heni kapeppepduga dibdib.

<sup>18</sup> Hedin kamangke-dumi kalinaing ey kamangkema-ma lemyung. Hedin kamangke-dumi inamta ey kamangke-dumi degeh ni nemnem.

## 2

*Endi silbitu hedini ebuh annel ni kaipapaptek*

<sup>1</sup> Kangku mewani di nemnem kuy "Imay kuma et yadda pan-am-amlengan ni annel hu nak heppuheppulen." Nem neamtaak e endi silbiddan nunman.

<sup>2</sup> Tam heni ita kaman-angngaw hedini ian-anteng hu ngi-ngi. Kaw wada kayyaggud ni megun-ud hedini ebuh pan-amlengan ni annel ni peppepdugen.

<sup>3</sup> Pinatnaak mewani ni an menginnuinnum ma-lat umamlenggak tep pinhed kun hiktaman hu kapan-amlengin kaheppuheppuladdan tutu-u eyad ansikkei ni biyag eyad ta-pew ni puyek. Nem huuyan nakka pehpehding ey hanniman dama kapehpehding idan endi nemnem tu ey ya nakka heppuheppula ey ya laing.

<sup>4</sup> Dakel mewani edum ni impahding kun hamak kun pan-amlengak. Nengapya-ak ni babalkey ey sineneman kudda mahkang ni legunta.

<sup>5</sup> Ey impatenem ku hu galde ku niya leguntak ni klasi ni keyew ni kamekkan lameh tu.

<sup>6</sup> Ey nampekapya-ak idan lebung et alaken ku, et panenum kuddan nunman ni nangkeitnem.

<sup>7</sup> Dakel mewani gintang kun himbut, ey hedini nan-ungngadda ey nambalin ida mewani u-ungnga dan himbut ku. Emin ida la nampampatul di Jerusalem ey hi-gak kedaddakkelan hu kalneroh tu niya gelding tu.

<sup>8</sup> Nan-i-liddan ap-apud edum ni bebley hu balituk, yadda silber niyadda nangkinginan batu. In-ena-apehan da-ak idan lalaki niyadda bibi-in nelaing ni man-a-apeh, ey dakel hu kakat-agun bibi-in imbilang kun ahwak. Emin ida huuya ey kamengippeamleng ni hi-gak.

<sup>9</sup> Nelalla-inggak ey nandingngellak ni peteg nem yadda la edum ni nan-ap-apud Jerusalem.

<sup>10</sup> Emin hu pinhed ku ey illak niya emin kamengippeamleng ni hi-gak ey impahding ku. Ey emin ida hu nakka pehpehding ey nakka pan-amlengi. Huuyadda ginun-ud kud emin ni ngunuk.

<sup>11</sup> Nem entanni et nakka nemnemadda emin etan neligat ni ingnungunuk ey endi silbitu. Heni nak pinpindug hu dibdib. Ya kakulagan tu ey emin hu wadad puyek ey endi silbitu.

<sup>12</sup> Kangkud nemnem kuy "Kaw wada eggak ipahding ni ippahding alin meihullul ni hi-gak ni mampatul?" Entanni ey ninemnem ku hedini hipa silbin kinalaing et ya kakulang ni nemnem. Ey huuya nengamtaan ku e <sup>13</sup> i-imman tu-wa anhan hu laing nem ya endi nemnem. Henin kawwalwal e i-imman nem ya engeenget.

<sup>14</sup> Ya nenemneman ni tuu ey han-ang-ang tu hu tuka dellana. Nem ya tuun endi nemnem tu ey eleg tu han-ang-ang dellanen tu e heni wadad engeenget. Nem anin na-mun nenemneman itu winu endi nemnem tayu et nan-inggeh hu pambalanan tayu tep mettey ituun emin.

<sup>15</sup> Kangku mewani di nemnem kuy "Ma-nut nenemnemannak nem metteyyak metlaing. Et humman ni meippahding ni hi-gak ey meippahding damaddan endi nemnem tu. Hipa tep silbi tun nenemnemannak? Endi."

<sup>16</sup> Tep ya nenemneman ni tuu et ya endi nemnem tu ey nan-inggeh ida e mettey ida et meliwwan ida.

<sup>17</sup> Et humman hu anggebe-hel ku hu biyag, tep endi silbin emin ni kamekapkappa eyad ta-pew ni puyek. Humman kumedek hu kaum-idwat ni degeh ni nemnem tep endi nisi silbin emin e heni kepeppepduga dibdib.

<sup>18</sup> Maggeh pay nemnem ku tep inamtak e yallin edum ni aggew ey hin-appil ali mengellan emin idan limmuk ni nan-aatuan ku.

<sup>19</sup> Ey hipa pengamtaan ku hedini yaddalli memeltan idan limmuk ey kayyaggud ali pehding da winu eleg? Nanna-ud e anin ni nenemneman ida winu eleg, et beltanen dalli metlaing emin hu limmuk ni nan-aatuan ku niya inemung ku tep nelainggak. Aeyulah! Endi silbitu nan-aatuan ku niya laing ku.

<sup>20</sup> Et peteg kumedek lemyung kun nak nan-aatun ni nangngunungunu.

<sup>21</sup> Nangngunungunu hakey ni tuu e inusal tu inamta tu niya laing tu et mawedadda limmu tu ey ihhi-yan tu ni-ngangu etan ni tuun eleg ni hekey maetu. Endin hekey silbitu ey beken ni lebbeng tu huuyan an meippahding.

<sup>22</sup> Hipa silbin emin ni kapan-aatuin tuu eyad ta-pew ni puyek? Endi!

<sup>23</sup> Maggeh hu annel ni kawwalwal ey ita kaumlemyung, tep nemahhig niya neligat hu ngunu. Anin yan hileng et eleg um-ali ugip tep dakel kakemnunnumunnuin nemnem. Nem emin ey endi silbitu.

<sup>24</sup> Ninemnem ku law e ya dedan kayyaggud ni pehding ni hakey ni tuu ey mammangngan niya mengi-innum ey pan-am-amlengan tu hu ngunu tu. Neamtaak e huyyaddan pan-am-amlengan ey nalpun Apu Dios.

<sup>25</sup> Tep gullat ni endi hi Apu Dios ey endi kenen niya endi pan-am-amlengan.

<sup>26</sup> Kaiddawsin Apu Dios ida etan kamengippeamleng ni hi-gatun dakel ni inamta, ya laing niya amleng, nem ya etan tuun neliwatan ey tagan tu amung ni limmu tu, nem lektattuy neidwat etan ni kamengippeamleng nan Apu Dios. Nem endi dama silbitu, huyya heni kapeppepuga dibdib.

### 3

#### *Wada tsimpuh ni emin*

<sup>1</sup> Emin ey wada tsimpuh tu. Anin ni hipan kameippahding eyad ta-pew ni puyek et wada tsimpuh tu.

<sup>2</sup> Wada tsimpuh ni kakei-ungngai ey wada tsimpuh ni kaketteyi. Wada tsimpuh ni pantenneman ey wada tsimpuh ni pengebbutan ni intanem.

<sup>3</sup> Wada tsimpuh ni petteyan ey wada tsimpuh ni pengippeayaggudan. Wada tsimpuh ni pemahbahan ey wada tsimpuh ni pengapyaan.

<sup>4</sup> Wada tsimpuh ni nengngihan ey wada tsimpuh ni ngi-ngian. Wada tsimpuh ni lemyungan ey wada tsimpuh ni penattayawan.

<sup>5</sup> Wada tsimpuh ni pengiwwehitan ni batu ey wada tsimpuh ni pengemmungan. Wada tsimpuh ni pan-aakwalan ey wada tsimpuh ni panhindedkugan.

<sup>6</sup> Wada tsimpuh ni penemmakan ey wada tsimpuh ni penellakan. Wada tsimpuh ni pengituan ey wada tsimpuh ni pengibbengan.

<sup>7</sup> Wada tsimpuh ni pemi-kian ey wada tsimpuh ni penuptupan. Wada tsimpuh ni i-inengan ey wada tsimpuh ni e-helan.

<sup>8</sup> Wada tsimpuh ni pan-impipinhedan ey wada tsimpuh ni pan-inhihingan. Wada tsimpuh ni panggugubatan ey wada tsimpuh ni linggepan.

<sup>9</sup> Hipa kagun-udan tutu-ud daka panligligasin ngunu?

<sup>10</sup> Nakka nenemema hedin hipa pinhed Apu Dios ni pambalanan eyan ngunu tayun indawat tu.

<sup>11</sup> Impeamnun Apu Dios ni emin hu ninemnem tun meippahding ni ustuh ni tsimpuh ni keippahdingan tu. Ey inha-ad tud nemnem ni tuu hu neminhed dan mengewwat ni meippahding alin edum ni aggew. Nem eleg han-awat idan tuu hu pambalanan idan impahding tu nyaddalli ipahding tu.

<sup>12</sup> Et humman hu, ya ngu kangkun kayyaggud ni pehding ni tuu ey man-am-amleng ida, ey ipahding da kayyaggud eyan ketaggu da.

<sup>13</sup> Ey mammangngan ida niya mengi-innum ida et pan-am-amlengan da hu nan-aatuan da, tep emin ida huyya ey indawat Apu Dios.

<sup>14</sup> Emin hu impahding Apu Dios ey mannananeng ni ingganah. Eleg mabalin ni an me-duman winu an me-kalan. Impahding Apu Dios ida huyya ma-lat hi-gatu dayawen tayu.

<sup>15</sup> Emin ida etan kameippahding nunya winu meippahding alin edum ni aggew ey neipahding dedan lan nunman, tep kaippenidwan Apu Dios ni pehding ni emin hu kameippahding.

<sup>16</sup> Ya hakey mewan ni inang-ang kun kameipahpahding eyad ta-pew ni puyek ey beken ni limpiyuh niya beken ni meandeng hu daka pengippennuh ni kasuh di korteh. Yadda kamengapyan olden ey lawah daka pehding.

<sup>17</sup> Kangkud nemnem kuy "Medettengan ali hu gintud Apu Dios ni penuwetan tun tutu-u meippuun di impahding dan kayyaggud winu lawah."

<sup>18</sup> Immalid nemnem ku e mukun kai-abulut Apu Dios hu tutu-un mengippahding ni panliwwatan ey ma-lat pematna tun hi-gada et amtaen da e beken idan kekkeddukdul nem yadda animal.

<sup>19</sup> Ya tuu et ya animal ey nan-inggeh ida e dibdib daka yahyaha, ey mettey idan dewwa. Et humman hu, beken ni kekkeddukdul hu tuu nem ya animal. Eleg meewwasi.

<sup>20</sup> Emin ida ey hakey hu lawwan da, yad puyek hu nalpuan da ey yadman pambangngadan da. Tep hedin mettey ida man mambangngad idad puyek.

<sup>21</sup> Hipa nengamta hedin yad ahpah hu kalawwin linnawan tuu, ey yad dallem ni puyek hu kalawwin ni linnawan animal?

<sup>22</sup> Mukun ya ngu kangku, heballi ni-ngangu man-am-amleng hu tuud ngunu tu. Humman gaputun newada itsu eyad ta-pew ni puyek. Tep kaw hipa nengamta hedin umtagu mewan hu netey et man-am-amleng di biyag tu?



## 4

<sup>1</sup> Inenang-ang ku mewan e emin di kebebbbley eyad ta-pew ni puyek ey wadadda hu tutu-un kapanligligat ni edum da. Ida kaumnanginangih nem endi kamenga-alluk ni hi-gada. Ya man anhan etan kamengippeligligat ni hi-gada ey et-eteng kabaelan da.

<sup>2</sup> Et kangkud nemnem kuy "I-imman ida netey nem yadda mategu.

<sup>3</sup> Nem kekkeddudul ida mewan etan eleg maiungga tep eleg da ang-angen niya eleg da hiktaman hu nemahhig ni ligat ni kameippenahding eyad ta-pew ni puyek."

<sup>4</sup> Inang-ang ku mewan, e mukun ihik hu tuun umkedangyan ey tep kameemmeh ni edum tun tuu. Nem anin ni huuya et endi silbitu e heni kapeppepduga dibdib.

<sup>5</sup> Yadda endi nemnem tun tutu-u ey mettey idan upa da tep eleg da pinhed ni mangngunnu e daka pehebbballin man-eg-egpit.

<sup>6</sup> Hebbballi eleg pemehhig ni mambibi-led ni mangngunnu nemet wada mahapul ey melinggep ita, nem ya etan nemahhig hu kapangngunnu. Tep endi damengu hu kaney hiyya law. Heni kapeppepduga dibdib.

<sup>7</sup> Wada mewan hakey ni inang-ang ku eyad ta-pew ni puyek ni endi silbitu.

<sup>8</sup> Huuya ey meippanggep etan ni hakey ni tuun endi u-ungnga tu niya endi agi tu, nem tagan tu ngunungunu et tagan tu kedangyan. Eleg tu nemnema e endi silbi tun tu tagan ngunu e eleg man-iyatun nekemtang tep endi pengippebeltanan tun kinedangyan tu. Hipa silbitu? Anggehmmek kumedek humman ni tuu.

<sup>9</sup> Kedukdul hu dewwa nem ya hakey tep daddakkel hu gibbuhen dan ngunu da.

<sup>10</sup> Ey kedukdul hu dewwa nem ya hakey ma-lat hedin na-gah hu hakey ey wada memaddang ni hi-gatu. Neligat hedin mehahhakkey ita tep endi memaddang ni hekitta.

<sup>11</sup> Ey hedin mewan ketel ni hileng ey mekekkel etan tuun hakey tu. Nem hedin dewwadda ey man-a-attung ida.

<sup>12</sup> Hedin hakey etan tuu man nelakah ni meapput, nem hedin wada kadwa tu ey mambaddang ida et mengapput ida. Heni etan ni kandan 'Nelihat ni mepegtang hu tellun nelubid nem ya hakey'.

<sup>13</sup> I-imman etan nenemneman ni kamenikken anin ni newetwet, nem ya etan neamman patul ni eleg tu dedngela daka ittugun ni pehding tu.

<sup>14</sup> Ey anin ni beken ni helag ni patul humman ni kamenikken, ey anin ni balud winu newetwet et dammutun mambalin ni patul.

<sup>15</sup> Wada hakkeyey ihik ni memaddang ni henin nunman ni kamenikken. Ey pinhed dan baddangan ma-lat mampatul.

<sup>16</sup> Nem ma-nun lapu tu tep dakel ida kamengu-unnud ni hi-gatu. Nem entanni et nelabah hu pigan toon ey endi kamanlispituh ni hi-gatu tep dingkug da. Endi silbin emin, heni kapeppepduga dibdib.

## 5

<sup>1</sup> Pesi-ngai yu pehding yu hedin umhegep kayud baley Apu Dios. Kedukdul hu mandedngel itan ebuh, nem ya man-appit ni henin kai-appit idan endi nemnem tu e tuka lellelgeman man-appit nan Apu Dios, tep liwat humman.

<sup>2</sup> Ey mahapul ni pakannemnemen ni han inhel hu hipan e-helen tayun nan Apu Dios, tep wadad kabunyan ey wada itsud puyek. Et humman hu, beken ni dakel an e-e-helen.

<sup>3</sup> Hedin wada kanenemnema ey humman kai-innepa. Hedin daman tagan ehel ey kameihla kae-hela.

<sup>4</sup> Hedin wada insapatah mu nan Apu Dios, ey mahapul ni anggagannu ey impahding mu. Entan tu iu-unnud etan ni tuun endi nemnem tu e eleg tu ippahding hu insapatah tu tep eleg pinhed Apu Dios humman.

<sup>5</sup> Heballi pemeggam i-ineng, nem ya kamansapatah ey eleg mu damengu ippahding.

<sup>6</sup> Ey ang-ang mu et beken ni nalgem hu e-helem ni umhulun ni pambehhulan mun han ka limmaw etan ni kamengipappangngulun kapandeyyawid Tempol ni kammuy "Neihla kumedek etan inhel ku. Beken humman ni pinhed kun issapatah." Tep umbunget hi Apu Dios et dammutun endien tun emin hu wadan hi-gam ni nan-aatuam. Et humman hu, ang-ang mu et endi mu e-helen ni mengippebungnet ni hi-gatu.

<sup>7</sup> Endi silbin nemahhig ni kapannemnemen ey nalnalgem hu kaippenahding. Ya kumaddan kayyaggud ni pehding ey lispituhen hi Apu Dios ey mengu-unnud itan hi-gatu.

<sup>8</sup> Hedin wada inang-ang yun newetwet ni kapanligligat idan wada kabaelan tu niya beken limpiyuh hu daka pehding ni hi-gatu, ey entan katnga yu, tep beken ni limpiyuh hu kamekapkapy. Mukun hanniman ey tep emin hu opisyal, eta-gey winu nebahah hu saad tu, ey beken ni limpiyuh hu tuka pehding.

<sup>9</sup> Henin patul e keta-ta-geyyan ni ap-apud bebley e tuka pengallaallai hu limmuddan bimmebley.

<sup>10</sup> Ya etan tuun nemahhig impemihed tun pihuh niya kinedangyan, ey tuka kullangan ingganah hu wadan hi-gatu. Kaw ya kinedangyan hu kaum-idwat ni ustuh ni pan-amlengan? Beken!

<sup>11</sup> Hedin kamangke-dumi hu kinedangyan ey mangke-duman dama hu tuun um-alin umbaddang ni mengummah nunman. Et hipa ginun-ud etan ni tuun nea-atu? Endi. Tuka ang-angan ebuh kinedangyan tu.

<sup>12</sup> Kamaka-uggip hu tuun kamea-atun mangngunnu anin ni ekkut winu dakel hu kennen tu. Nem hedin ya kedangyan ey eleg meuggip ni kaguh tun kinedangyan tu.

<sup>13</sup> Inang-ang ku mewan hu nemahhig ni kakekibbulin nemnem ni tuu eyad ta-pew ni puyek. Tagan ni tuu amung ni ikkedangyan tu nem humman ali umhulun ni kebahbahan tu

<sup>14</sup> winu tellaken tu emin humman gapuh ni lawah ni mekapkapy a et endi law pebeltan tun u-ungnga tu.

<sup>15</sup> Ya tuun ebuh hu keddangyanan tun tuka ipapaptek ey mettey alin en-endi-an, e heni lan neiuungnaan tu eyad ta-pew ni puyek e endin hekey hu ina-alla tu.

<sup>16</sup> Huyya mewan hu hakey ni beken ni kayyaggud. Newada hu tuu eyad ta-pew ni puyek ey hi-yanen tulli e endin hekey tu ittabin ni hipan wadan hi-gatu. Endi silbin nan-aatuan tu, heni tu ingngunungunuan hu dibdib.

<sup>17</sup> Yan ketaggu tu ey endi yayyaggud tu e kaumlelemyung, kameduddukul, kamanligligat niya kaumbubunget ni neyun.

<sup>18</sup> Et humman hu, ya kayyaggud dedan ni pehding eyan ansikkey ni biyag eyad ta-pew ni puyek ni indawat Apu Dios ey mekanggan, menginnuinnun, niya man-am-amleng itan mangngungunnu anin ni hipa humman ni ngunu.

<sup>19</sup> Hedin kantu et indawtan dakan Apu Dios ni kinedangyan winu hipan tenged ni nebalol ey pan-am-amlengim ida humman. Ey ya kayyaggud ni pehding ey mampesalamat kan Apu Dios, ey man-am-amleng kan mangngunnu tep humman indawat nan Apu Dios.

<sup>20</sup> Ya tuun henin nunman tuka pehding ey eleg umlemyung ni mannemnem ida lan nelabah ni tsimpuh tep indawtan Apu Dios ni pan-amlengan tu.

## 6

### *Eleg pandinneli hu kinedangyan*

<sup>1</sup> Wada mewan hu lawah ni peteg ni kaumhulun ni kakemunnumunnuin nemnem idan tuu eyad ta-pew ni puyek.

<sup>2</sup> Ma-nu tep kaiddawat nan Apu Dios ni tuu hu kinedangyan, e henin pihhu, payew, baley niya dayaw et wadan emin hu pinhed tu. Nem eleg i-abulut nan Apu Dios ni da pan-am-amlengan humman idan kinedangyan. Ey lektattuy hin-appil ali kumedek ni tuu hu memeltan idan nunman ni emin. Endi silbi tudda humman ey beken ni kayyaggud hu hanniman ni meippahding.

<sup>3</sup> Anin na-mun umlaw di hanggatut hu u-ungngan hakey ni tuu ey andukkey ni peteg biyag tu, nem hedin endi amleng tud biyag tu niya eleg ali meippaptek ni ketteyyan tu, ey i-imman etan gelang ni netey eman ni neiuungnaan tu nem hi-gatu.

<sup>4</sup> Humman ni gelang ey umlaw etan di engeenget e bebley ni netey ey eleg pay na-mu mangedanan, <sup>5</sup> ey eleg tun hekey ang-angen aggew winu eleg tu pay amta e wada kandan aggew. Nem i-imman ni hi-gatu tep man-iyyatudman nem ya etan tuun andukkey biyag tu ey endi damengu amleng tu.

<sup>6</sup> Tep anin na-mun wada hakey ni tuun meteggun dewwan libun toon nem endi damengu amleng tud biyag tu ey endi silbin neitu-wan tu tep mettey daman henin edum ni tuu.

<sup>7</sup> Emin hu tuu ey daka i-anteng ni mangngunnu ma-lat wada kennen da, nem endi etan kaney 'Hiyya law'.

<sup>8</sup> Anin ni nekannemneman hu hakey ni tuu et beken kekkeddukdul nem ya etan tuun endi nemnem tu. Ey anin ni inamta etan ni newetwet hu kayyaggud ni pehding tu et endi gun-uden tu.

<sup>9</sup> Heballi man-am-amleng itad hipan wadan hekitta, nem ya an gamgaman hu hipan eleg hanggela. Endi silbitu, heni kapeppepduga dibdib.

<sup>10</sup> Emin hu kamekapkapy ey neiplenuh dedan lan nunman. Hi Apu Dios hu nengiplenuh ni pambalanan ni hakey ni tuu, et humman hu, eleg itsu manlilih ni hi-gatu meippanggep ni nunman.

<sup>11</sup> Hedin tagan hu ehel, ey lektattuy endi tunung tu. Et humman hu, heballi kekkenngeng hu e-helen.

<sup>12</sup> Hipa nengamta hedin hipa panyaggudan ni tuu eyad ansikkekey niya endi silbi tun neitu-wan tu eyad ta-pew ni puyek? Heni kamangkelebbah ni ebuh ni alinnew. Hipa nengamtan meippahding alin edum ni aggew hedin netey itsulli law?

## 7

<sup>1</sup> Nebalbalol hu dayaw ni tuu nem ya keningnginnaan ni bangbanglu. Ey kekkeddukdul etan aggew ni kaketteyi nem ya kakei-ungngai.

<sup>2</sup> I-imman hu umlaw ni mekiammuammung di wada netey nem ya an mekiammuammung di wada am-amleng. Tep ya katey hu kamengippenemnem e emin hu tuu ey mettey.

<sup>3</sup> Ey i-imman hu umlelemyung nem ya umngeni-ngi tep kaumbaddang hu lemyung di yaggudan ni elaw.

<sup>4</sup> Ya nenemneman ni tuu ey hin-addum ni limmemyung nem ya tuun endi nemnem tu ey kaumngeni-ngin ingganah.

<sup>5</sup> I-imman hu ibbunget daitan nenemneman ni tuu nem ya daita daydayawen ni tuun endi nemnem tu.

<sup>6</sup> Endi silbin ngi-ngin endi nemnem tu, henin hebit e endi silbi tun pengittungnguan tep kamampeppesin ebuh.

<sup>7</sup> Kamambalin ni endi nemnem tu hu hakey ni tuun nenemneman hedin he-ulen tu edum tun tuu ma-lat piliwen tu limmu tu. Ey hedin ebbuluten ni tuu daka idduul ni hi-gatu ma-lat ipahding tu beken ni limpiyuh ey humman kamebahbah ni nemnem tu.

<sup>8</sup> Kekkeddukdul hu gibbuhen hu inlapun ngunu nem ya ita kahinlapui mewan ni hakey. Ey kekkeddukdul hu neanus ita nem ya ippilit hu pinhed e hekitta meunnud.

<sup>9</sup> Ang-ang mu et beken kan nelakah ni umbunget niya beken ni an ittetengged diman tep henin nunman hu elaw ni endi nemnem tu.

<sup>10</sup> Endi silbitu hu kaney "Kedukdul la hu biyag ni nunman nem yan nunya?" Tep endi nengamta hedin makulug huyya winu eleg.

<sup>11</sup> Ya laing ey heni daman kinedangyan, ya kakulugan tu ey kekkeddukdul hu laing.

<sup>12</sup> Tep dammutun ussalen ni tuu hu laing tu niya pihhuh tu ma-lat alen tu pinhed tu. Nem ya importanteh ni amtaen ey hedin ussalen hu laing niya nemnem ey meihwang itad hipan mekapkapyanya.

<sup>13</sup> Nemnem tayu kedidda emin hu impahding Apu Dios, kaw wada hakey ni tuun kabaelan tun mengi-andeng idan nepikun kinapya tu?

<sup>14</sup> Itsu kaman-am-amleng hedin kayyaggud emin kamekapkapyanya. Nem hedin dimmateng ni hi-gatsu ligat ey mahapul ni nemnemen tayu e nalpu dama humman nan Apu Dios. Humman keang-angan tu e eleg amtan tuu hedin hipa mekapkapyany edum ni aggew.

<sup>15</sup> Huyyan nambiyagan kun endi silbitu ey inang-ang ku e wadadda kayyaggud elaw tun tuun ansikkekey biyag da ey wadadda lawah ni tuun andukkey biyag da.

<sup>16</sup> Et humman hu, entan tu pemahhig kumamman ni pehding hu kakkayyaggud ey entan kenemnemi kumamman ni peteg ma-lat eleg mebahbah neitu-wan.

<sup>17</sup> Entan mewan tu pemahhig ni pehding hu lawah tep hedin hanniman ey endi nemnem yu. Kele yuka abtui ketteyyan yu?

<sup>18</sup> Heballi kekkennengen hu pehding. Tep ya tuun hi Apu Dios tuka u-unnuda ey kayyaggud ngu dedan pambalanan ni tuka ippahding.

<sup>19</sup> Ya nenemneman ni tuu ey e-etteng hu kabaelan tu nem ya hampulun aap-apu etan di bebley.

<sup>20</sup> Endi kumamman hu hakey ni tuu eyad ta-pew ni puyek ni kayyaggud ni ingganah hu tuka pehding e endin hekey tuka panliwwasi.

<sup>21</sup> Entan an pantuttunggul ni kae-e-helan tuu tep entanni ey dedngelen hu lawah ni e-helen ni bega-en mun hi-gam.

<sup>22</sup> Tep anin ni hi-gam et inamtam e hin-addum ni lawah muka e-helan edum mun tuu.

<sup>23</sup> Hedin hi-gak man, pinatnaan kun inusal hu kalinaing kun man-ewwat ni emin idan nunya nem neligat kun ewwatan.

<sup>24</sup> Hipa anhan humman ni kalinaing? Neligat ni peteg ni meewwatan. Kaw wada hakey ni tuun wada kabaelan tun man-ewwat idan nunya.

<sup>25</sup> Intaggan ku nemnem ma-lat maawatan ku laing niya ma-lat amtaen ku hu gaputun newadaan ni emin. Nem ya amtak ey ya tuun eleg tu nemnema ni impahding tu pehding tu niya tuka pehding hu lawah ey endi nemnem tu.

<sup>26</sup> Neamtaan ku pay e ya biin tuka pebeyad annel tud lalakki ey lawah ni peteg nem ya katey tep ya hanniman ni bii ey kamei-ellig di bitun keknaan. Ey ya etan ngamay tun tuka i-akwal ey kamei-ellig bangkiling ni umpepden. Nem endi kabaelan tun memden

etan ni laki kamengippeamleng nan Apu Dios. Ya neliwtan ni laki hu nelakah tun keknaen.

<sup>27</sup> Yan nunya ey heninnuy hu inedal kun nengipatnaak ni mangeddal ni emin ni hipan kapehding.

<sup>28</sup> Yad hanlibun lakaki ey wada na-mu hakey ni nakka pandinneli, nem yaddad bibi-i ey endi anin hakey.

<sup>29</sup> Ya hakey mewan ni inedal ku ey heninnuy: Hi Apu Dios ey lintu tu tuun kayyaggud nem wada hakey ey pinhed tun u-unnuden hu wadad nemnem tu anin ni neihla.

## 8

<sup>1</sup> Kayyaggud et hedini nenemnem hu tuu et maawatan tu niya amtaen tun emin hu hipan kamekapkapy. Ya laing ey tuka peimmih hu tuu et eleg makmaklung hu angah.

<sup>2</sup> U-unnud yu hu kaimmandal ni patul tep humman insapatah yud hinanggan Apu Dios.

<sup>3</sup> Entan tu nemnem ni eleg mengippahding ni ngunum, anin ni eleg mu pinhed humman ni ngunu. Niya entan tu da-yunidda hu kamannemnem ni mengippahding ni lawah. Tep kastiguen alin patul hu eleg mengu-unnud ni hi-gatu.

<sup>4</sup> Emin hu kapehding ni patul ey kameippuun di et-eteng ni kelebengan tu. Et humman hu, endi hakey ni mabalin ni mengehding ni hi-gatu.

<sup>5</sup> Yadda kamengu-unnud ni hi-gatu ey eleg ida mekastigu. Ya nenemnem ni tuu ey inamta tu pehding tu niya inamta tu tsimpuh ni pengippahdingan tu.

<sup>6</sup> Em, wada neiptek ni tsimpuh niya neiptek ni pehding ni emin ni hipan meippahding anin ni tsimpuh ni ligat.

<sup>7</sup> Endi hakey ni tuun nengamta hedini hipalli mekapkapy ey endi hu mengippeamtan hi-gatsu. <sup>8</sup> Ey endi hakey ni tuun damnutun ikka-leg tu ketteyyan tu. Ya katey ey henin dibdib e endi hakey ni tuun kabaelan tun mengippesikked. Ey ya katey ey henin gubat e eleg mabalin ni ita umbesik et hi-yanen. Et humman hu, endi namnamah idan lawah ni tuun kamengiddinnel ni kinalaing dan mengihwang ni annel dan tsimpuh ni ketteyyan da.

<sup>9</sup> Ninemnem kuddan emin huyyan kamekapkapy eyad ta-pew ni puyek, et kangkud nemnem kuy: Kapyatun kapanhelheltap ni tuu hu edum da.

<sup>10</sup> Ey inang-ang ku lawah ni tutu-un neidaydayaw ni neikulungan da. Neligat ni meewwatan tep ida man anhan kaumlaumlaw di simbaan ni ketaggu da ey hi-gada daka daydayawa etan di bebley ni nengipenahding dan lawah.

<sup>11</sup> Mukun kaippahding ni tuu hu lawah ey tep eleg mei-indah hu kastigu da. Et humman hu, kanda na-mu nem eleg ida mekastigu anin ni ippahding da lawah.

<sup>12</sup> Anin meminhanggatut ni mambehul hu hakey ni tuu ey nanengtung mategu, et inamta e kekkeddukdul hu biyag idan kamengu-unnud nan Apu Dios.

<sup>13</sup> Ey inamta e yadda lawah ni tuu ey ansikke hu pambiyagan dan kayyaggud heniddan alinnew e anggagannu ey neendi tep eleg da u-unnuda hi Apu Dios.

<sup>14</sup> Wada mewan hu kamekapkapy eyad ta-pew ni puyek ni eggak han-awat. Hin-addum ni yadda kayyaggud ni tuu hu kapanhelheltap ni edum da ey hin-addum mewan ni yadda lawah ni tuu hu kakeippahdingin kayyaggud. Eleg ni hekey meewwasi.

<sup>15</sup> Et humman hu, ya kuma dedan hu pan-am-amlengan hu ippenahding. Kedukdul hu mammanggan niya menginnuunnum ita ey nan-am-amleng ita. Huyya ew ngu damnutun pehding ni tuun panliwwan tun neligat ni biyag ni indawat Apu Dios idan tuu eyad ta-pew ni puyek.

<sup>16</sup> Ey gapu tep pinhed kun peteg ni meewwatan hu meippanggep ni kamekapkapy eyad ta-pew ni puyek ey lektattuy neamtaan ku e endi pappeg tu kapehpehding ni tuun kewa-wa-wa anin ni hileng.

<sup>17</sup> Ey eleg metlaing meewwasin emin hu kapehpehding Apu Dios, anin ni hipa pehding. Anin idan kelalla-ingan ni tuu et eleg da kaya amta emin anin ni kanday inamta da.

## 9

<sup>1</sup> Intattagga ku nemnemnem ey lektattuy immalid nemnem ku e anin ni hi Apu Dios hu nengiebulut ni kapehpehding idan kayyaggud e nenemnem niya nelaing ni tutu-u et endi nengamta hedini bendisyonan idan Apu Dios ni nunyan ketaggu da.

<sup>2</sup> Nan-iingeh hu pambalanan alin tutu-u, kayyaggud winu lawah, kamekanggu-unnud nan Apu Dios winu eleg, yadda kaman-appit et yadda eleg. Ya kayyaggud ni tuu et ya lawah ni tuu ey nan-inggeh meippahding ni hi-gadan dewwa. Ey ya tuun kamansapatah et ya tuun eleg mansapatah, ey nan-inggeh hu meippahding ni hi-gadan dewwa.

<sup>3</sup> Tep emin hu tuu ey mettey. Huyya lawah ni kamekennapkapy eyad ta-pew ni puyek. Et humman hu, eleg ikkaguh ni tuun mengippahding ni kayyaggud, et yadda pinpinhed da hu daka ippahding, anin ni lawah, tep mettey ida metlaing.

<sup>4</sup> Nem wada namnamah idan mategu. Wada etan kandan 'I-imman hu mategun ahhu nem ya netey ni layon'.

<sup>5</sup> Makulug humman! Tep hedin ya mategu ey amta da e mettey ida, nem hedin yadda netey ey endi inamta da. Endilli da gun-uden ey meliwwan idalli.

<sup>6</sup> Yadda ginibegibek dan ketaggu da e henin impeminhed, ya hingit niya ameh ey endi law. Ey endi law bibbiyang da hedin hipa kameippenahding eyad ta-pew ni puyek.

<sup>7</sup> Et humman hu, pan-am-amleng kan mammangnan niya mengi-innum tep huyya pehding mu ey kai-abulut Apu Dios.

<sup>8</sup> Ey pambalwasi kan kayyaggud niya pan-usal kan bangbanglu.

<sup>9</sup> Pan-am-amleng kan meki-addum ni ahwam ni pinpinhed mu eyad biyang ni indawat Apu Dios ni hi-gam. Em, pan-am-amleng kan mambi-biyag tep huyyan ebuh hu gun-udem eyad neligat ni ngunun keituan.

<sup>10</sup> Anin ni hipa humman ni inggunum et iyayyaggud mun mengingngunnu, tep endi law hu ngunu, ya planuh, ya adal niya laing etan di bebley ni netey ni lawwam.

<sup>11</sup> Ya mewan hakey ni inang-ang ku ey beken etan keka-ka-letan hu kamengapput ni ingganah di bebbesik. Ey beken ida ketultuledan ni kamengapput ni kenayun di gubat. Yadda dama nenemneman ey dakel ni hi-gada hu newetwet. Anin idan nelaing et beken ni hi-gada kaumkedangyan ni kenayun. Ey beken niyadda nan-adal hu kamengellan kenayun ni eta-gey ni saad tep emin tuu ey wada lawah niya kayyaggud ni kameippahding ni hi-gada.

<sup>12</sup> Endi hakey ni tuun nengamtan hipa mekapkapyan hi-gatu, heniddan deleg ni meknad sigay ey heniddan sisit ni meknad lingen. Tep nekekemtang ni wada neipahding ni lawah.

<sup>13</sup> Wada mewan hu hakey ni inedal ku eyad ta-pew ni puyek e humman keang-angan tu hedin hipa kapannemnem ni tuu meippanggep ni kalinaing.

<sup>14</sup> Heninnuy: Wada hakey ni bebley ni hahhakkey nambebley e ginubat ni patul ni et-eteng kabaelan tu. Linikweh tu humman ni bebley et mandaddan ni memabhah ni luhud ma-lat hegepen tu.

<sup>15</sup> Yadman ni bebley ey wada hu tuun nelaing e inamta tu pehding dan mengihwang ni nunman ni bebley da. Nem humman ni tuu ey newetwet et endi anhan hakey ni kamengibbillang ni hi-gatu. Hipa silbin laing ni nunman ni tuu?

<sup>16</sup> Et ya ngu kangku ey i-imman hu kalinaing nem ya elet, nem ay anin ni nelaing hu hakey ni tuu nem newetwet ey endi kamenengngud niya mengngel ni tuka e-hela.

<sup>17</sup> Nem i-imman ni dedngelen hu ehel ni nelaing ni tuu, nem ya tekuk ni ap-apuddan tutu-un endi nemnem tu.

<sup>18</sup> Ya kalinaing ey et-eteng ibaddang tu nem ya dakel ni almas ni kameussal di gubat. Nem ya kabaelan ni hakey ni lawah ni tuu ey bahbahen tu hu dakel ni kayyaggud.

## 10

<sup>1</sup> Yadda netey ni aggyiet ey daka hemmuyi hu hambusih ni bangbanglu. Heni daman ekket ni keihhallaan e bahbahen tu kalinaing niya dayaw.

<sup>2</sup> Ya nenemneman ni tuu ey kayyaggud tuka pehding nem ya endi nemnem tun tuu ey lawah tuka pehding.

<sup>3</sup> Ey ya etan tuun endi nemnem tu ey kamaka-ang-ang di elaw tu hu kakulang ni nemnem tu ey hi-gatu ngu hu mengippeamtan kakulang ni nemnem tu.

<sup>4</sup> Hedin imbunget dakan ap-apum, ey entan pan-ekal di ngunum. Pemeggam i-ineng hedin wada lawah ni nekapkapy et lektattu kaya ey neliwwan hu neka-ihhallan neipahding.

<sup>5</sup> Wada mewan hu lawah ni inang-ang kun meippanggep idan aap-apu eyad ta-pew ni puyek.

<sup>6</sup> Ya etan endi nemnem tun tutu-u hu daka ihha-ad di eta-gey ni saad nem eleg da iddawsidda nenemneman ni kedangyan ni tuun lebbeng tun keiddeyyawan tu.

<sup>7</sup> Wadadda mewan inang-ang kun bega-en ni nantakkay di kebayyu, ey yadda etan u-ungngan patul ni kan himbut ni hi-gada ey kamandaddallan.

<sup>8</sup> Hedin mengu-ku kan bitu, ey ang-ang mu, tep entanni ey hi-gam kumedek hu me-gah diman. Ey hedin memikwal kan tuping ey ang-ang mu tep entanniy wada mengellat ni hi-gam.

<sup>9</sup> Hedin ya mampehhek ni batu ngunum, ang-ang mu tep entanni ey yalli batu manlipput ni hi-gam. Ey hedin menikhal kan keyew, ey ang-ang mu tep entanni ey wahay ali manlipput ni helim.

<sup>10</sup> Hedin nangpuh tadem ni wahay mu et eleg mu ta-lida, ey mahapul ni menge-elet kan menikhal et lektattuy nemahhig atum ey ekket dinikhal mu. Heballi ta-liden dedan hu wahay et han usala. Ussalen laing ma-lat bumaddang et kayyaggud hu pambalanan ni pehding.

<sup>11</sup> Endi law silbi tun an pengeyyuman ni uleg hedin killat daka.

<sup>12</sup> Ya kae-helan nelaing ni tuu hu kamengippedeeyaw ni hi-gatu, nem ya tuun endi nemnem tu ey ya melpud bungut tu memabhah ni hi-gatu.

<sup>13</sup> Hedin kaillapun endi nemnem tun tuun menge-ehhel ni legelegem, ey lektattuy heni law kaman-angngaw.

<sup>14</sup> Ya tuun endi nemnem tu ey heni inamta tun emin hu meippahding ni edum ni aggew ey humman ida man anhan tuka an e-e-hela! Nem kaw hipa kuma nengamtan mekapkapyan edum ni aggew?

<sup>15</sup> Ya tuun endi nemnem tu ey nelakah ni meettu ey tuka pekalliggata angkepaw ni ngunu.

<sup>16</sup> Anggehmemek ida bimbleley hedin u-ungnga hu patul da ey ebuh hamuhamul ni kapehpehding ni aap-apu da anin ni kakkabbuhan.

<sup>17</sup> Nem man-am-amleng ida bimbleley hedin nenemneman hu patul da niyadda aap-apu da e ya ngunu da daka ipapapte e beken ni ya hamul niya inum hu daka pehpehding.

<sup>18</sup> Ya etan tuun makahhigan mengiyayyaggud ni atep ni baley tu ey lektattuy nantudu baley tu et madunut.

<sup>19</sup> Ya hamul niya inum ey kaum-idwat ni amleng. Ey hedin wada pihhuh, ellan emin hu pinhed.

<sup>20</sup> Eleg pihhuladda patul niyadda kekeddangyan anin ni yad nemnem mun ebuh winu yad kuwaltuh mu, tep entanni ey an idaddatteng idan sisit hu inhel mu.

## 11

<sup>1</sup> Kayyaggud hu madewat ita tep hakey ni aggew ey mambangngad ali indawadawat mu.

<sup>2</sup> Ey kayyaggud hu eleg itupput di hakey ni tuu hu iddawtan tep eleg mu amta hedin edum ni aggew ey mahapul mu et-eteng ni baddang.

<sup>3</sup> Hedin mahdel hu kulput et nan-enget ey nanna-ud ni um-udan. Hedin nalngah hu keyew et netu-li ey mannenneng etan di netu-lian tu.

<sup>4</sup> Hedin ihehhegged ni tuu hu pantenneman tun kayyaggud ni tsimpuh, ey lektattuy endi ennien tu.

<sup>5</sup> Neligat ni ewwatan hu elaw Apu Dios, henin dibdib e eleg amta tuka kelpui niya tuka lawwi. Henin kakepkelin gelang di egeh inetu e eleg amta hedin hipa inna-nu tun an napkel.

<sup>6</sup> Taggan yu tanem ni hipan kameitnem et kumpulmih ni umtagu tep eleg inamta hedin hipadman umtemel. Hipa inamta hedin umtemel emin.

<sup>7</sup> Kayyaggud metattaggu ita et man-am-amleng ita nid kawwalwal.

<sup>8</sup> Andukkey na-mu winu ansikkey hu pambiyagan ni tuu nem ya kayyaggud ey man-am-amleng di biyag tu. Nem mahapul ni nemnemen tu e medettengan ali dakel ni aggew ni napnun ligat e kamei-ellig di engeenget. Endilli damengu hu silbin emin ni mekapkapyan.

<sup>9</sup> Hi-gayuddan kaungaunga ey pan-am-amlengi yu keu-ungnga yu. Ipahding yun emin hu pinhed yun pehding. Nem mahapul ni nemnemen yu e huwetan Apu Dios emin hu pehding yu.

<sup>10</sup> Et humman hu, ang-ang yu et endi yu pehding ni umhulun ni lemyungan yu winu dedgehan ni nemnem yu, tep mahapul ni nemnemen yu e anggegannun mepappeg hu kinau-ungnga yu niya elet yu.

## 12

<sup>1</sup> Entan tu liwwan hu nanletun hi-gayu eyan keu-ungnga yu. Dayaw yu hi Apu Dios ni nunyan keu-ungnga yu, tep medetengan ali neligat ni tsimpuh e neligat hu biyag et kanyulliy "Endi am-amleng kud biyag ku."

<sup>2</sup> Hedin meka-a-amma kayulli e heni kulang heyaw ni bulan niya aggew ni penang-ang yu, ey heni nekulputan hu emin, et han yu law nemneman mandeeyaw nan Apu Dios ey neladaw law.

<sup>3</sup> Yallin nunman ey nekakkapuy kayu e endilli law elet ni ngamay yu. Umgeygey ali pukel yu, ey hahhakkey ngipen yu niya megudabbaan ali mateyu.

<sup>4</sup> Eleg ali law pakadngel tangila yu et eleg yu law handengel hu hipan umtenul di dallin, anin idan kamambeyyu. Nem anin alin ehel ni sisit et iggibek yu et umbangun kayu.

<sup>5</sup> Umtakut kayulli law ni umlaw di wada eta-gey tep anggetakkut ni kayu mandalladallan diman. Meliggatan kayulli law ni mandellan ey eleg yulli law han-ipahding hu pinhed yun ippahding. Anin ni bewek yu et mambalin alin uban ni emin. Ngannganah law ni medettengan hu kepappegan ni biyag yu et meillaw ali annel yud panha-adan tun ingganah. Ey umlelemyung idalli mengikkullung ni hi-gayu.

<sup>6</sup> Em, nemnem yu hu nanletun hi-gayu eyan keu-ungnga yu, et han medatngan etan tsimpuh ni mei-ellig kayu law di silber ni kadena ni nakhat, ya balituk ni duyun naphik, ya bewed ni naphik niya linubid ni nepegtang.

<sup>7</sup> Yallin nunman ey meibbanggad hu annel tayud puyek ni nalpuan tu ey mambangngad dama linnawa tayun Apu Dios e nengidwat ni hi-gatsu.

<sup>8</sup> Kan etan ni mittuduh ni nengituttudduddan nunya ey "Endi silbin emin."

<sup>9</sup> Nenemneman etan mittuduh et humman hu, intuttudu tuddan tutu-u hu hipan inamta tu. Ey inedaedal tudda humman ni tugun et patnaan tudda ey hiyya numan e makulug.

<sup>10</sup> Humman ni mittuduh ey beken ni nelaing ni ebuh nem kayyaggud hu tuka pantuttuddu niya makulug hu tuka ittuttuddu.

<sup>11</sup> Ya kae-helan nelaing ni tuu ey kamei-ellig etan di hulkud ni kamampattul ni tuka ussalan mengippengguluddan tuka ippattul. Ey yadda humman ni kayyaggud ni tugun ey mannananeng e henidda patak ni neihammad di neipetakan tu. Nalpuddan emin nan Apu Dios e kamei-ellig ni kamampattul ni hi-gatsun emin.

<sup>12</sup> Nem helipat-im e u-ungngak et huyyaddan ebuh ni kayyaggud ni tugun hu u-unnudem. Tep endi pappeg ni kameittuddek ni libluh, ey hedin kantu et ittudek emin hu tugun ey um-inglay ka metlaing hedin kammuy bidbiden mun emin.

<sup>13</sup> Ya keim-importantehan idan emin eyan neituttuddu ey ya pandeyyawan tayun Apu Dios niya pengu-unnudan ni tugun tu, tep huyyadda neipuunan idan lebbeng tun pehding ni emin ni tuu.

<sup>14</sup> Hi Apu Dios hu huwet tayud emin ni tayu kapehpehding, kayyaggud winu lawah, anin idan eleg meamtan impahding tayu.

## Song of Songs

*Ya meippanggep eyan liblulh*

Huyyan liblulh ey a-appeh nan Solomon ni meippanggep ni impeminhed, ya pan-am-  
amtaan niya kelehhinan. Peamta tu hu kakinyayyaggud niya an-anlan laki niya biin  
nampehhedan. Yadda na-na-hel eyad liblulh ey ya etan kat-agun lakin wada pinhed tun  
bii, ya etan kat-agun bii, yadda gayyum nunman ni kat-agun bii, niyadda gayyum etan  
ni kat-agun laki. Huyyan a-abbig ni meippanggep ni nampehhedan ni laki niya bii ey  
meamtad nanhuhummanganan idan nunyan tutu-u nema-mad huhummangan etan  
ni kat-agun laki et ya etan kat-agun bii.

*Ya neitudek eyad liblulh:*

1. Ya nan-am-amtaan etan ni kat-agun laki et ya etan kat-agun bii. (chapters 1:1-3:5)
2. Ya kasal idan nunyan laki niya bii. (chapters 3:6-5:1)
3. Ya nehammad ni nampehhedan dan han-ahwa. (chapters 5:2-8:14)

<sup>1</sup> Huyya kakkayyaggud ni peteg ni a-appeh ni intudek Solomon.

<sup>2</sup> Immehel etan bii ey kantuy "Hi-gam ni nakappinshed ku, pinhed kun ippenidpidwam  
ni enak-akwalem muwak. Tep huttan ni muka pengippeang-ang ni impeminhed mu ey  
kekkeddukdul nem ya kapenginnumin meinnum.

<sup>3</sup> Kakkayyaggud hu hamuy ni bangbanglum. Hedin nengadan hu ngadan mu ey nakka  
nemnema hu bangbanglum. Ambuley nakappinshed dakaddan kamenikken ni bibi-i.

<sup>4</sup> Papuut mu et awiten muwak di baley mu e apu patul. Ilaw muwak di kuwaltuh mu."

Yadda kat-agun bibi-in gagayyum etan ni patul ey kandan hi-gatuy "Kami kaman-an-  
anla meippanggep ni hi-gam. Anin ni hi-gami et kammi ey 'Ya neminshed mu etan ni  
biin nakappinshed mu ey kekkeddukdul nem ya kapenginnumin meinnum.' "

Immehel etan biin gayyum etan ni laki ey kantuy "Ambuley pinpinshed dakaddan emin  
ni kamenikken ni bibi-i.

<sup>5</sup> Hi-gayun bibi-id Jerusalem, dengel yu eya e-helek: Anin ni andekettak et kat-agu-  
ak. Em, andekettak e henin dekket idan kampun helag Kedar nem kat-agu-ak e henin  
kakinayyaggud ni ang-ang idan kultinah di baley nan Solomon e patul.

<sup>6</sup> Et humman hu, entan tuwak itetekel gapu tep andekettak. Dimmekkettak tep  
nampeppetanggak ni nanggunungunud legunta mi, tep ida kaumbunget hu agik ni  
lalakki hedin eleggak manggunnu. Et mukun endi inna-nuk ni mengippaptek ni annel  
ku."

<sup>7</sup> Immehel mewan etan bii etan ni laki ey kantuy "Hi-gam e nakappinshed ku, attu mu  
pengippattulan idan kalneroh mun nunyan aggew niya attu mu pengihidduman ni hi-  
gadan emaggew? Ehel mu et amtak nak penemmakan ni hi-gam, tep eggak pinhed  
ni heni-ak etan ni biin makilakin an mandaladalan di kad-an idan gagayyum mun  
kamampattul daman kalneroh da."

<sup>8</sup> Hinumang etan ni laki e kantuy "Hi-gam e kekakkayyaggudan hu ang-ang tun bii,  
hedin eleg mu amta lawwak alin entanni ey nealay inunud mu dinlan idan kalneroh  
ku, et hedin dinteng mudda, ey mudda ipattul hu gelding mud kad-an ni a-abbung idan  
edum ni kamampattul.

<sup>9</sup> Hi-gam ni nakappinshed ku, ey heni ka etan ni pakeetteng tun labah ni kebayyun  
nei-dum idad lakkitun kebayyun kamengigguyud ni kalesah nan patul.

<sup>10</sup> Kakkayyaggud angah mu e neibegay hu betling mu. Ey kakkayyaggud ang-ang ni  
buklew mun nebanggelan ni hubeng niya pa-ngaw.

<sup>11</sup> Iddawtan dakan balitik ni betling ni neal-alkusan ni silber ma-lat nema-man  
kakkayyaggud ang-ang mu."

<sup>12</sup> Immehel etan bii etan ni laki ey kantuy "Hi-gam ni patul ku, yan muka  
pambakbaktadid yuddunggam ey napnu bawang ni hamuy ni bangbangluk.

<sup>13</sup> Hi-gam ni nakappinshed ku ey kaka mei-ellig etan di ek-ekut ni luput ni kakeihha-adin  
bangbanglun mir ni imbanggel ku.

<sup>14</sup> Ey heni ka etan ni nabtek ni habung ni nealad leguntad En Gedi."

<sup>15</sup> Immehel etan laki ey kantuy "Hi-gam ni biin nakappinshed ku ey kat-agu kan peteg!  
Kakkayyaggud hu ang-ang ni matam e henin matan paluma."

<sup>16</sup> Immehel etan bii ey kantuy "Hi-gam ni nakappinshed ku ey kayyaggud ni peteg  
neilakyam. Em, makulug ni kayyaggud ni peteg hu neilakyam. Yaddalli eya meya-meh  
ni helek hu i-abek tan pambakbaktadan ta,

<sup>17</sup> ey yad elunggan eyan mabulung ni keyew ni sedar niya fir hu panhidduman ta.



## 2

1 Hedin hi-gak ey nakka mei-ellig ngun ebuh di habung di nandeklan di Saron ey nak mewan kamei-ellig di hakey ni habung ni lily di hengeg ni duntug.”

2 Immehel mewan etan laki ey kantuy “Hi-gam ni biin nakappinshed ku, ey kat-agu kan peteg e heni ka etan ni habung ni kakkayyaggud ni peteg ang-ang tu. Et hedin i-ingneh hu edum ni bibi-in hi-gam ey henidda hebit.”

3 Kan dama etan ni bii ey “Hedin daman hi-gam ey beken kan henin edum ni laki, tep heni ka etan ni kekakkayyaggudan ni keyew e apol di muyung. Pinpinshed kun manhihiddum di hengeg tu ey kakkannen ku hu lameh tun makallumi-ih.

4 Inlaw muwak di kuwaltuh ni kapanhahamuli et peamtam diman hu neminshed mun hi-gak.

5 Idwasi muwak ni raisins niya apol et kanen ku et maibangngad hu elet ku, tep kimpapuyyak tep ya nemahhig ni nakka pannemnem ni neminshed kun hi-gam.

6 Nakka man-am-amleng tep in-iping kud willin ngamay mu ey inakwal mud annel ku hu wannan ni ngamay mu.”

7 “Hi-gayuddan bibi-id Jerusalem, isapatah yun hi-gak di ngadan idan makwah e u-unnuden yu huyyan tugun ku e entan anhan tu distulbuh hu nampinninshedan mi.”

\*

8 Intuluy etan ni biin immehel ey kantuy “Dingngel ku ehel etan ni nekamminhed ni hi-gak. Ammandeh e iyyallin kamanpaypaytuk di duntug.

9 Humman ni nekamminhed ni hi-gak ey henin pakeetteng tun lakkitun makwah e nekalet ni umbesik. Mundeh e dimmateng et kamanhi-hi-dip di habhabyen.

10 Entanniy immehel ni hi-gak humman ni nekamminhed ni hi-gak ey kantuy ‘Inah ka e kat-agun biin nakappinshed ku et makilaw kan hi-gak,

11 haggud beken law ni keteketel niya beken law manginudan.

12 Kahebuhebung idan emin hu neitnem ey nambangngad ida law hu sisit ni kaman-appeh. Anin idan paluma et kamedngel di bebley hu a-appeh da.

13 Kamangkelu-um hu nemangulun lameh ni fig ey mebanglu hamuy ni habung ni grapes. Ikay, e nakakappinshed ku et makilaw kan hi-gak.”

14 Immehel etan laki ey kantuy “Hi-gam ni nakappinshed ku ey heni ka etan ni paluman nantalud nadhak ni batud pinigging ni duntug. Pinhed kun ang-angen hu kakkayyaggud ni angah mu ey pinhed kun dedngelen hu ehel mun kayyaggud dengel tu. Et humman hu, ikay et mekihummangan kan hi-gak.

15 Ta dedpapa ida immeyaw ni ahhu et eleg da bahbahen hu kamanhebbung ni grapes ni intanem tayud legunta tayu.”

16 Kan etan ni bii ey “Hi-gam ni ebuh nakappinshed ku, ey hi-gak ni ebuh nakappinshed mu. Heni ka etan ni pakeetteng tun makwah ni neipattul di kad-an idan habung e lily.

17 Hi-gam ni nakappinshed ku, ikay et heni ka etan ni pakeetteng tun makwah ni kamammangnan ni helek di duntug. Panha-ad kad kad-an ku et ingganah mewa-wan kabubuhan.”

## 3

1 Entanniy immehel mewan etan bii ey kantuy “Kahilehileng ey nakka eni-innepa etan nakappinshed ku. Et hakey ni hileng ey i-innep ku e nakka hemmahemmak nem eggak hanhamak tep endidman.

2 Entanni et bumengunnak kumangngu et epengek hu keltad niyad kapandadamuin tutu-u et nak hamaken etan nakappinshed ku nem eggak ang-angen.

3 Inang-ang da-ak idan kamangguwalyan hileng ni daka pandalladallanid bebley et kangkun hi-gaday ‘Kaw inang-ang yu etan lakin nakappinshed ku?’

4 Kanday ‘Endi.’ Nem entanni et hini-yan kudda ey himmak ku law etan nakappinshed ku. Inakwal ku et eggak iwelak ngamay tu ingganah ni nengidtegang di baley ina et ihpeg ku etan di kuwaltuh ni neiungnga-ak. Huyya ini-innep ku.

5 Ibbagak ni hi-gayun bibi-itya Jerusalem e issapatah yun hi-gak di ngadan idan makwah e u-unnuden yu huyyan tugun ku e eleg yu anhan distulbuha hu nampinninshedan mi.”

\*

6 Immehel ida hu bibi-id Jerusalem ey kanday “Hipadda eman tutu-un nantutu-nud ni iyyalli? Henidda ahuk ni kamenyed ni nalpuddad desert? Huyyaddan nangkasal ey nebanglu hamuy da e henin hamuy ni mir et yadda etan kameikkamdug di kennen ni kaigggatang ni negosyante.

\* 2:7 2:7 Ya edum ni neitudek ey kanday “Entan ni pegigayyum yud lalaki ingganah nandaddan kayu.”

\* 3:5

3:5 Winu “Entan ni pegigayyum yud lalaki ingganah nandaddan kayu.”

<sup>7</sup> Ang-ang yu kedi! Daka pan-i-ali yuddungngan Solomon e ginuwalyaan ni na-nem ni ketultuledan ni sindalun Israel.

<sup>8</sup> Nelaing idan emin humman ni mekiggubbat. Nan-asip ida emin ni ispadah e nandaddan idan mekiggubbat di hipan um-alin buhul dan hileng.

<sup>9</sup> Impekapyan Solomon e patul idan bega-en tu humman ni yuddungngan tu, e nekapyad kayyaggud ni keyew ni nalpuḍ Lebanon.

<sup>10</sup> Yadda tukud tu ey na-meh ni silber ey netakapan ni balituk hu benneggan tu, ey nehephepan etan kayuddungin kakkayyaggud ni neabel ni luput ni madlang. Inyayyaggud idan bibi-id Jerusalem ni inal-alkusan humman ni yuddungngan et kakkayyaggud hu ang-ang tu.

<sup>11</sup> Keyuy ni bibi-id Zion et ang-angen yu hi Solomon e patul. Impenget tu hu impapnget inetun penget ni patul eman ni nangkasalan tu. Et nemahhig hu amleng Solomon ni nunman ni aggew.”

#### 4

<sup>1</sup> Immehel etan laki ey kantuy “Hi-gam ni nakappinshed ku ey kat-agu kan peteg. Kakkayyaggud eya matam ni nehukyungan e heni matan paluma. Ya eya bewek mu ey kayyaggud ang-ang tu e heniddan gelding ni kamandaddayyud duntug di Gilead.

<sup>2</sup> Yadda ngipen mu ey henin binlah idan kalneroh ni pakepu-lit niya paka-meh di wangwang. Endi ni na-kal ni ngipen mu.

<sup>3</sup> Kakkayyaggud bungut mu e heni madlang ni ribbon hu bibil mu. Kakayyaggud eya tamil mun nehukyungan e heni color ni pomegranate.

<sup>4</sup> Ey kakkayyaggud eya buklew mun nebanggelan ni pa-ngaw e henin kakinayyaggud ni eta-gey ni baley David ni neihtableyan idan happiyaw ni netuled ni sindalu.

<sup>5</sup> Kayyaggud mewan pagew mu e henin dewwan impah ni makwah ni kamammangngan di habung ni lily.

<sup>6</sup> Pepu-ut kun umlaw di duntug di kad-an idan mir e bangbanglu et manha-addak diman ingganah ni kewa-waan tun kabuhhan.

<sup>7</sup> Hi-gam ni nakappinshed ku ey kat-agu kan peteg. Em, kat-agu kan peteg!

<sup>8</sup> Peki-li kan hi-gak e ahwak et hi-yanen ta Lebanon. Pandayyu itad Duntug e Amana, etan di Duntug e Senir niyad Duntug e Hermon e kad-an idan leyang ni baley idan layon niya leopard.

<sup>9</sup> Inamtak law e nakappinshed dakan nengitkelam muwak niya nengang-angan kun kamanmussi-lak ni banggel mu.

<sup>10</sup> Nakka man-am-amleng ni neminshed mun hi-gak. Nakka pekeddukduḍ hu hamuy ni bangbanglum nem yadda daka ikkamduḍ di kennen ni bangbanglu.

<sup>11</sup> Malumi-ih hu bibil mu e heni kaleban putsukan. Heni wada gatas niya danum ni putsukan di daul ni dilam. Heni hamuy ni duntug di Lebanon hu balwasim e mebanglu.

<sup>12</sup> Hi-gam ni ahwak ey kaka mei-ellig di nakalluhud ni legunta. Ey kaka mei-ellig di hebwak ni nakalluhud et hi-gak ni ebuh dammutun umhegeg.

<sup>13</sup> Yadda intanem mud leguntam ey yadda pomegranate niyadda edum ni keyew ni kakkayyaggud lameh tu. Ey yadman ni leguntam ey dakel hu henna ey nard,

<sup>14</sup> safron ey cinnamon. Immen ida mewan diman hu dakel ni neitnem ni bangbanglu niya kapampebanglun kennen, anin idan mir ey aloes.

<sup>15</sup> Kaka mei-ellig etan di hebwak ni kaman-utbul di legunta ey kamampedayyud Lebanon.”

<sup>16</sup> Immehel etan bii ey kantuy “Hi-gayun dibdib di appit ni south niya north, ali kayu et idibdib yu banglun leguntak et palaw yu banglu tud kad-an ni nakappinshed kun laki et umli et kanen tu hu lameh idan neitnem e kayyaggud tamtam da.”

#### 5

<sup>1</sup> Immehel dama etan laki ey kantuy “Hi-gam e nakappinshed kun ahwak, immali-ak eyad leguntak. Nakka mengellan bangbanglu, ya mir niyadda kapampebanglun kennen. Ey um-inummak ni danum ni putsukan, ya meinnum niya gatas.”

Immehel ida gagayyum da ey kanday “Hi-gayun dewwan nampehedan, kamei-ellig di kennen hu neminshed yun hanhakkey. Immay, pappangngan kayu ey penginnuinnum kayu et ingganah mehingla kayud nampinninshedan yu.”

*Ya meikka-pat ni a-appeh*

<sup>2</sup> Immehel etan bii ey kantuy “Neuggippak ey nan-i-inneppak e kamangkugkug kumangngu etan nakappinshed kud lekbik.

Kantuy 'Hi-gam ni nakappinshed ku, ibeghul mu anhan eya lekbi et humgeppak tep na-bel hu bewek kun delnu.'

<sup>3</sup> Nem kangkuy 'Endi inna-nuk ni mengibbeghul tep ayepaw mewan hu pambalwasian ku. Hakey pay, ey eggak pinhed ni meluggit hu helik.'

<sup>4</sup> Entanniy inedang ni nakappinshed ku etan pehiw ey nakka mangkebbebbeb ni amleng ku.

<sup>5</sup> Et bumengunnak et ibeghulan ku etan nakappinshed ku. Intenged ku ngamay kun hina-adak ni bangbanglud pehiw ni lekbi,

<sup>6</sup> et ibeghul ku ey attukaw la humman nakappinshed ku. Nemahhig lemyung kun linawwan tu. Nak hihhimmak nem eggak hanhamak. Intekutekuk ku ngadan tu nem endi kaumhumang.

<sup>7</sup> Entanni ey inang-ang da-ak idan guwalyan bebley et panheplaten da-ak et ya-niten da hukyung ku.

<sup>8</sup> Hi-gayun bibi-id Jerusalem, ey isapatah yu anhan e hedin ang-angen yu etan nakappinshed ku ey ehel yun hi-gatu e kimmakapuyyak tep ya neminshed kun pengippeang-angan tun neminshed tun hi-gak."

<sup>9</sup> Immelhel ida etan gagayyum da ey kanday "Hi-gam ni kekakkayyagguddan ang-ang tun bii, kele kammuy issapatah mi e e-helen min hi-gatu huttan? Kaw kekkeddukdul humman ni nakappinshed mu nem ya edum ni lalakki? Hipa neikekkeddukdulan tu?"

<sup>10</sup> Hinumang etan ni bii ey kantuy "Em, tep hedin ya humman ni nakappinshed ku ey hi-gatu kekakkayyagguddan di emin ni lalakki, ey na-let niya kayyagud annel tu. Hedin i-inggeh di hampulun libun lalakki ey hi-gatu kekakkayyagguddan ang-ang tu.

<sup>11</sup> Ey kayyagud ang-ang ni ulu tu e kamei-ellig di nakammahmah ni balituk ey mekaddengyah ey andeket bewek tu e henin deket ni gawwang.

<sup>12</sup> Kakkayyagud mewan ang-ang ni matetu henin kakinayyagud ni ang-ang idan paluman kaman-a-ayyam di gilig ni lebeng.

<sup>13</sup> Ya tamil tu ey henin legunta dakel nangkeitnem. Ya hamuy ni bibil tun na-bel ni mir ey heni etan ni banglun lily.

<sup>14</sup> Yadda ngamay tu ey henidda nemullumul ni balituk ni nangkeihableyan ni nenginan tanged. Kakkayyagud hu annel tu henin malinah ni ivory ni neal-alkusan ni nenginan batu.

<sup>15</sup> Yadda heli tu ey mangkekedhel e henidda tukud ni nekapyan nenginan batun immehnged di nemahmah ni balituk. Kayyagud hu katu tu e henin kakinayyagud ni Duntug e Lebanon e etata-gey keyew tun sedar.

<sup>16</sup> Ey malumi-ih bungut tu niya emin hu ang-ang tu ey kamengippeamleng ni hi-gak. Hi-gayun bibi-in iJerusalem, henin nunya humman ni lakin nakappinshed ku."

## 6

<sup>1</sup> Immelhel ida bibi-in gayyum etan ni bii e kanday "Hi-gam ni kekakkayyagguddan ang-ang tun bii, attu linawwan etan ni lakin nakappinshed mu? Ehel mun hi-gami linawwan tu et baddangan dakan an menemmak ni hi-gatu."

<sup>2</sup> Immelhel etan bii ey kantuy "Immali law humman ni nakappinshed kud kad-ak e heni etan ni legunta tun netaneman ni nangkebanglun kameitnem. Kamengippeamleng ni hi-gatu hu nangkeitnem eyad legunta, ey tudda kaemmuemmunga lily ni neitnem.

<sup>3</sup> Hi-gak ni ebuh hu pinhed tu ey hi-gatu daman ebuh pinpinhed ku."

<sup>4</sup> Immelhel etan laki ey kantuy "Kat-agu kan peteg e nakappinshed kun bii. Heni kaddan bebley di Jerusalem niyad Tirsah e kayyagud ang-ang da.

<sup>5</sup> Bangiw mu anhan matam et hin-appil pengitkelam tep hedin muwak kaitettekel ey hin-appil gibek ku. Ya bewek mun kamanla-la-yud ey heniddan gelding ni kamandaddayyud Duntug e Gilead.

<sup>6</sup> Ya ngipen mu ey makablah ida e heniddan binlah ni paka-meh ni kalneroh. Nampepettek ida ey wadaddan emin e endi na-kal.

<sup>7</sup> Ey ya tamil mun neharian ni hukyung mu ey madlang e henin dalang ni pomegranates.

<sup>8-9</sup> Hi-gam e nakapinshed ku ey heni kan paluma. Endi mei-inggeh ni kinat-agum, anin na-nun na-nem hu ahwan patul, ey newalu hu in-edum tun ahwatu, niya dakel ida kakat-agun bibi-in tuka paka-ibbilang ni gayyum tu. Pininpinhed dakan inam e heni hi-gam ni ebuh hu u-ungnga tun bii. Hedin inang-ang dakaddan kamenikken ni bibi-i ey daka katettebala. Anin idan ahwan patul niyadda in-edum tun ahwa tu et daka kapakatbalad a-appeh da.

<sup>10</sup> Kanday 'Hipa huyyan kakkayyaggud ang-ang tun bii? Kat-agu e heni kaumbenang e heni aggew niya bulan. Ey kakkayyaggud ang-ang tu e heniddan nantutu-nud ni bittuwen.' " \*"

<sup>11</sup> Intu-man etan ni lakin immehel ey kantuy "Nandayyu-ak e nalpu-ak di kad-an idan keyew ni almond et nak ang-angen ida kamemmel ni neitnem niya nak ang-angen hedin kamanhebbung ida grapes niyadda pomegranates.

<sup>12</sup> Ey gapuh ni et-eteng ni neminshed kun hi-gam ey endi maptek ey ya impanggibek ku ey heni-ak u-ungngan patul ni nanlugan di kalesah."

<sup>13</sup> Immehel ida etan bibi-i ey kanday "Pambangngad ka e kad-agun biin iSulam et ang-ang-angen dakan menyeyaw."

Kan etan ni bii ey "Kele pinhed yuwak e biin iSulam ni ang-ang-angen ni meiggawwan menattayaw?"

## 7

<sup>1</sup> Immehel etan laki ey kantuy "Hi-gam e inap-apun patul, kakkayyaggud ang-ang ni nepatutan ni helim ey kayyaggud ang-ang ni ulpum e henin nebalol ni tenged.

<sup>2</sup> Kayyaggud mewan ang-ang ni puheg mu e henin basuh ni kapenginnun e napnun ingganah ni nangkamkamdug ni meinnum. Ya egeh mu ey heni nepu-ul ni wheat ni liniklikweh idan lily.

<sup>3</sup> Ey kayyaggud hu ang-ang ni pagew mu e henin dewwan impah ni makwah.

<sup>4</sup> Ya buklew mu ey henin eta-gey ni baley ni nekapyad ivory. Ey kamanmussi-lak hu matam e henin lebeng di dagsin Eheh di Bat Rabbim di Hesbon. Nekattunggul hu eleng mu e henin Duntug e Lebanon ni inhangga tud Damascus.

<sup>5</sup> Ey kayyaggud hu ang-ang ni ulum e henin eta-gey ni Duntug e Karmel. Ey medengyah niya andeket hu andukkey ni bewek mu. Anin ni ya patul et tuka am-amyawi tu bewek mun nekulut.

<sup>6</sup> Hi-gam ni nakappinshed ku ey kat-agu kan peteg. Kamengippeamleng ni hi-gak hu kayyaggud ni ang-ang mu.

<sup>7</sup> Eta-gey ka ey nengan-andeng annel mu e heni annel ni bewwa. Ey kakkayyaggud pagew mu e henin nebu-ngul ni grapes.

<sup>8</sup> Pinhed kun kellaben humman ni heni bewwa et umla-ak idan nunman ni lameh tu henin pengnged kun nebu-ngul ni grapes. Ya hamuy ni yayyah mu ey mebanglu henin hamuy ni apol.

<sup>9</sup> Ya amleng kun pengakwalam ni hi-gak ey henin amleng kun penginnumak ni kakkayyaggud ni meinnum."

Kan etan ni biyy "Em, e nakappinshed kun laki, pinhed kun akwalen daka ey mei-ellig humman ni pengakwalam kun hi-gam etan ni neminshed kun meinnum.

<sup>10</sup> Hi-gam e nakappinshed ku, hi-gak ni ebuh hu pinhed mu ey hi-gak ni ebuh hu pinpinhedem ni ingganah.

<sup>11</sup> Ikay, peki-li kan hi-gak et hi-yanen ta eya bebley, et ita mandeyad kad-an idan himmabung ni helek.

<sup>12</sup> Et yan kewa-waan tu ey ta ang-angen ida grapes et yadda etan kaumlameh ni keyew hedin himmabung ida. Et isapatah kudman hu neminshed kun hi-gam.

<sup>13</sup> Hahhammuyen ta hu kayyaggud ni hamuy ni neitnem ni mandrake ey ippahding ta hu kei-ang-angan ni nampinninshedan ta, e iddawat kun hi-gam hu nambakbaklang ni lameh ni keyew e ippu-ul kudman. I-eng-eng kudda humman ni hi-gam e nakappinshed ku.

## 8

<sup>1</sup> Hamban agi dakan impan-inum ina, et anin ni akwalen daka hedin nandammu ita et endi an menghel ni anggeba-ing humman ni pehding ku.

<sup>2</sup> Ey gullat ni agi daka et dammutun ikkuyug dakad baley ina e nengituttuddun hi-gak ni kayyaggud ni pehding. Et idaddanan dakan kakkayyaggud ni meinnum ni nekapyad malumi-ih ni pomegranates.

<sup>3</sup> Ey dammutun i-iping ku willin ngamay mu ey i-akwal mun hi-gak hu wannan ni ngamay mu.

<sup>4</sup> Hi-gayun bibi-id Jerusalem, isapatah yu e eleg yu anhan distulbuha hu nampinninshedan mi."

<sup>5</sup> Immehel ida bibi-i ey kanday "Hipa eman biin iyyallin nalpud eleg mebebleyi e tuka itetenged di ngamay ni lakin nakappinshed tu?"

\* 6:10 6:10 Yadda edum ey kanday 'Heniddan sindalun kamengitta-gey ni bandelah.'

Kan etan ni bii etan ni laki ey "Nebangun ka eman ni dinepa dakad henced ni keyew ni apol e nengiuangkaan inam ni hi-gam.

<sup>6</sup> Endi edum ni biin mu pinheden nem hi-gak ni ebuh. Entan tuwak liwwan ey ihuklub ey eya bangga di ngamay mu et peginemnemman mun hi-gak. Tep ya nemihed ey kamei-ellig di kamantetebbel ni apuy e et-eteng kabaelan tu henin katey.

<sup>7</sup> Kamei-ellig hu nampinninhedan ni laki niya bii etan di apuy e endi paka-dep anin etan ni immelwang ni kulukul. Ey eleg mabalin ni megettang, anin na-mun wada hakey ni tuun iggatang tun emin hu wadan hi-gatu, ma-lat gatngen tu nem endi mengebbulut nunman ni ibbayad tu, ey mepihhul kumedek."

<sup>8</sup> Immehel ida lalakkan agi etan ni bii ey kanday "Wada agi min biin u-ungnga pay ni e eleg mabalin ni melehhin. Nem hipa pehdng mi hedn wada nemihed ni mengahwan hi-gatu?"

<sup>9</sup> Humman ni agi mi ey kayyaggud ni bii, et ippaptek mi henin mika pemaptek ni luhud ni bebley mi e ballabagan middan silber ey henin pengihhammad min lekbi e mika e-dahin tablan sedar."

<sup>10</sup> Hinumang etan ni bii hu aaggi tun laki et kantuy "Nehikennak law niya na-lettak e heni-ak etan ni nehammad ni dingding. Ey ya pagew ku ey henin eta-gey ni baley ni kapan-eddugi. Et humman hu, kaum-amleng etan nakappinshed kun menang-ang-ang ni hi-gak."

<sup>11</sup> Intu-man etan ni biin immehel ey kantuy "Wada leguntan Solomon ni netaneman ni grapes ni nginedanan tun Baal Hamon. Impaebang tun tutu-u et emin ida ey hanlibun palatah ni silver hu daka ibbayad ni hi-gatu hedn nedateng.

<sup>12</sup> Nem ya ngu leguntak ey hi-gak hu ngenamung ni pinhed kun pengidwatan ni lameh idan intanem kudman ey nakka iddawat ni liblih. Et humman hu, hi-gam e Solomon, ey eleg mahapul ni mambeyyad kan hi-gak ni hanlibun palatah ni silber et han ka manggagayan menggan ni lameh ni intanem ku. Nem idwat muddan nakka panggunud leguntak hu handedwanggatut ni palatah ni silber."

<sup>13</sup> Immehel etan laki ey kantuy "Kat-agu kan peteg e nakappinshed kun kamanyuyyudung di kad-an idan kakkayyaggud ni habung di leguntam. Pinpinhed idan gagayyum kun mengngel ni ehel mu. Ey anin ni hi-gak et pinhed ku daman dedngelen ehel mu."

<sup>14</sup> Immehel etan bii ey kantuy "Ikay e nakappinshed ku, papuut mu et heni kan pakeetteng ni lakkitun makwah e naka-let ni umbesik ma-lat dammuen muwak di duntug ni netaneman ni kapemanglung kennen."

## Isaiah

### *Ya meippanggep ni nunyan liblul nan Isaiah*

Hi Isaiah e nengitudek ni nunyan liblul ey prophet Apu Dios. Sinuttudduan tudda tutu-ud Jerusalem niyad Judah ni meippanggep nan Apu Dios niya elaw tun na-nem ni toon. Yan eman ni nelabah hu dakel ni toon et han maiungnga hi Isaiah, ey negedwadda helag Israel et mambalin ni dewwa hu bebley da. (1 Kings 12) Yad appit ni north, ey nengadanan ni Israel. Ey yad appit ni south, ey nengadanan ni Judah.

Pinutuk APU DIOS hi Isaiah ni prophet idan tutu-ud Jerusalem niyad Judah ni nunman ni toon ni neteyyan nan patul e hi Ussiah. (740 B.C. Ang-ang yu hu 6:1) Entannit nelabah hu hampulut walun toon, ey inapput idan iAssyria hu Israel et sakupen tu. (722 B.C.) Ey yan eman ni 701 B.C. ey ginubat idan iAssyria ida bebley damad Judah ni nangkelihud et apputen dadda, anin ni ya Jerusalem et ginubat da. (36:1) Entanni ey impatnan patul di Assyria e hi Sennakerib niyadda sindalu tun sekkupen hu Jerusalem, nem eleg dadda apputen hu tutu-udman. (chapters 36-37)

Nem eleg ida mansalamat nan APU DIOS hu tutu-ud Jerusalem ni nengihwangan tuddan sindalun iAssyria. Ida kumedek kamampahhiya niya manghay ida. Eleg da pinhed ni u-unnuden hi APU DIOS, tep daka daydayawadda beken ni makulug ni dios niyadda u-ukkul ni dios dan kinapyan tuu. Gapuh nunman ni daka pehpehding ey inhelan Isaiah e prophet ida hu iJerusalem et peamta tun hi-gada e kastiguen APU DIOS idan pengippeellian tun patul ni Babilon niyadda mangkabunget ni sindalu tun memahbah ni bebley da hedin eleg ida mantuttuyyu etan di daka pampahhiyyai, niya hedin eleg ida mengu-unnud nan APU DIOS. Nem kahing ida e eleg da pinhed ni dedngelen hu inhel Isaiah. Entanni tu-wangu ey hinggep idan sindalun Babilon hu Jerusalem et bahbahen da. Neipahding huuya eman ni nelabah hu dakel ni toon ni neteyyan Isaiah. (586 B.C.) Yan nunman hu neilawwan idan tutu-ud Jerusalem di Babilon et mambalin idan balud diman.

Nem wada la inhel Apu Dios nan Isaiah ni nunman, et humman indinel idan tutu-ud Jerusalem eman ni eleg ni ilaw idan iBabilon di bebley da. (chapters 44-66) Impakulug Apu Dios idan tutu-u tu e ibbanggad tuddallid bebley da hedin megibbuh ni manhelheltap idad Babilon tep ya liwat da. Impakulug tu pay e wadalli itu-dak tun menellaknib ni katuutuun edum ni aggew. (chapters 52:13-53:12)

### *Ya neitudek eyad liblul:*

1. Ya kastigun Apu Dios idan iJudah, yadda iIsrael niyadda tutu-ud edum ni bebley. (chapters 1-39)
2. Ya et-eteng ni kabaelan Apu Dios niya impakulug tun i-abulut tudda tutu-ud Judah ni mambanggad di bebley da. Et ya impakulug tun peelli tullu hu menellaknib idan tutu-u. (chapters 40-66)

<sup>1</sup> Huuyan liblul hu neitudekan idan impeamtan APU DIOS nan Isaiah, e u-unggan Amos meippanggep ni Judah niya Jerusalem eman ni nan-ap-apuan idan nanhuluhulu ni patul diman, e hi Ussiah, hi Jotham, hi Ahas et hi Hesekiah.

### *Ya nengipeang-angan APU DIOS e lawah ida ifudah*

<sup>2</sup> Kan APU DIOS ey "Puyek niya kabunyan, dengal yu eya e-helen ku! Yadda u-unggan impenaptek ku et ettengen kudda ey nginghay da-ak. <sup>3</sup> I-imman ida animal, henin baka niya donkey, tep inamta da hu kan animal ni hi-gada niya kamengippaptek ni hi-gada. Nem yadda tuuk ni helag Israel ey eleg da-ak amta niya eleg da han-awat e hi-gak hu kamengippaptek ni hi-gada."

<sup>4</sup> Hi-gayun helag Israel ey nanna-ud ni mekastigu kayu, tep nakalliwtan kayu niya ebuh lawah ni yuka pehpehding! Inwalleng yu hi APU DIOS niya nginghay yu hu Kayyaggud ni peteg ni Dios yu. \*

<sup>5</sup> Kele nanengtun manghay kayu? Kaw pinpinhed yun mekastigu? Ang-ang yu kedi e kamei-ellig ni nangkeliptan hu ulu yu, et mukun kamemunnumunnu nemnem yu niya endi amleng yu. <sup>6</sup> Meippalpud ulu yu ingganah di dapan yu ey heni kayu nangkeliptan. Eleg malinihan niya eleg meha-adan ni agah ida liput yu. †

\* 1:4 1:4 Isaiah 5:24 † 1:6 1:6 [5-6] Humman idan liput idan helag Israel ey beken ni makulug ni liput, nem humman kei-elligen ni kalinawah dad hinanggan APU DIOS. (Ang-ang yu hu Isaiah 53:4-5)

<sup>7</sup> Anin ya bebley yu et binahbah idan buhul yu † et giheben da. Yuka itettekeli ey daka pan-al-an emin hu lameh ni intanem yu niya daka pambahbahan emin hu wadad bebley yu. <sup>8</sup> Ngannganih ni maka-apput kayun iJudah, tep ebuh law hu Jerusalem e bebley diman ni eleg bahbahen idan buhul yu. Nem eleg kabaeli idan tuudman ni mekihhanggan buhul da. Tep hellikuben ni buhul da humman ni bebley da. Heni etan ni payew ni endi law kaman-eddug, tep neani law hu neitnem et ebuh law etan hukyawwin wadadman.

<sup>9</sup> Gullat ni eleg iebulut APU DIOS e Kabaelan tun emin ni wada hahhakkey ni metdaan di gubat, et netey idan emin hu tutu-ud Jerusalem et henin neipahding di Sodom niyad Gomorrah e nakabbahbah ida. §

<sup>10</sup> Hi-gayun aap-apu niyadda tutu-ud Jerusalem ey heni kayuddan aap-apu niyadda tutu-ud Sodom niyad Gomorrah ni nunman e nemahhig kalinawah da. Nemnem yudda kaituttuddun APU DIOS e Dios tayu niya dengel yu eya tuka pan-e-helan hi-gayu. <sup>11</sup> Kantuy “Kaw kanyu nem nakka um-amleng ida etan ni dakel ni yuka i-enappit ni hi-gak? Nehingla-ak law idan dakel ni animal ni yuka i-appit. Hiyya! Isiked yu law ni man-appit ni hi-gak idan nuntan ni yuka gihheban kalneroh, niyadda tabaddan animal yu, anin idan kuheyaw ni babakka yu, yadda kalneroh yu niyadda gelding yun yuka i-appit.

<sup>12</sup> Entan aliali yu eyad Tempol ku, tep endi silbin yuka pan-appisi, tep ya kakulugan tu ey endi-ak di nemnem yu. <sup>13</sup> Isiked yun mengi-lin endi silbi tun yuka i-enappit ni hi-gak. Eggak law pinhed ni hahhammuyen ida bangbanglun yuka gihheban yuka i-appit. Ey eggak law pinhed hu yuka pehpehding ni Piyestah yun Kaketellakin Bulan, ya yuka pehpehding ni Sabbath, niyan yuka keemmuemmungin mandeyyaw. Nambalin ida emin huyyan endi silbitu, tep nemahhig hu liwat yu. <sup>14</sup> Em, angebe-hel kudda huttan ni yuka pehpehding ni Piyestah yun Kaketellakin Bulan niyadda edum ni piyestah yu.

\* Impeinglay ku law ni peteg.

<sup>15</sup> Hedin mandasal kayu et itta-gey yu ngamay yu ey eggak hengnguda, anin ni ian-anteng yu dasal, tep mapetey kayu et heni etan ni nekukkuheyaw hu ngamay yu. <sup>16</sup> Pantuttuyyu kayu et isiked yudda lawah ni yuka pehpehding ma-lat malinih kayun heni kayu neulahan. Em, isiked yuddan emin hu lawah ni yuka pehpehding, <sup>17</sup> et ya kayyagud hu ipahding yu. Ey ang-ang yu et ya meandeng niya limpiyuh hu meippahding. Baddangi yudda hu anggehmmek ni kapanligligat idan edum ni tuu niya iehngeng yudda nepu-hig niyadda nebalu.”

<sup>18</sup> Immelhel mewan hi APU DIOS e kantuy “Imay, keyuy et man-uungbal itu. Anin ni nakalliwtan kayu e heni kayu nekammansaan ni madlang, et liwwanen kudda liwat yu. Heni dakey paka-ullahan et maka-kal lugit yu, et heni kayu dallallun paka-gah tu. Ey anin ni makadlang mansa yu et pambalin dakeyuan makablah e henin dutdut ni kalneroh. <sup>19</sup> Hedin et anhan u-unnuden yuwak, et ebbuluten yun baddangan dakeyu, ey hi-gayu mengngan idan kayyagud ni lameh ni kameitennem eyad bebley yu. <sup>20</sup> Nem hedin kahing kayu et ngenghayan yuwak, man petteyen dakeyuan buhul yu. Hi-gak ni AP-APU e Dios yu hu nanghel nunya.”

*Ya ngehay idan iJerusalem nan APU DIOS*

<sup>21</sup> Huttan ni bebley yun Jerusalem ey nambebleyan ida lan kamekangngu-unnud nan APU DIOS e daka ikkahakey hu daka penaydayaw ni hi-gatu. Nem yan nunya ey dakel hu beken ni makulug ni dios ni yuka daydayawadtan. Et humman hu, hi-gayun iJerusalem ey heni kayu etan ni biin makilakin tuka pebeyyad annel tu. † Endi law hu kayyagud niya limpiyuh ni nambebley ditan, tep yan nunyay mangkapetey ida wadadtan.

<sup>22</sup> Hi-gayun bimbebley di Jerusalem, yan nunman ey kayu kamei-ellig di silber, nem yan nunya ey endi law ni hekey balol yu. Ey kayu kamei-ellig ni nunman di mebanglun meinnum, nem yan nunya ey kayu kamei-ellig di danum ni endi tamtam tu. <sup>23</sup> Mangkanghay ida aap-apu yu niya ida kamekiddagyum idan mangkatekew. Daka ella kameidwat ni hi-gada niya daka ebbulutan mebeyyadan ma-lat ipahding da lawah. Ey eleg da i-ehngeng ida nebalu niyadda nepu-hig.

‡ **1:7** 1:7 Yan eman ni ketaggun Isaiah ey kagubgabubataddan tutu-ud Israel, ya Syria, ya Assyria, ya Edom niya Pilstia hu Judah. § **1:9** 1:9 Yadda kamangngenghay nan APU DIOS ey nanna-ud ni mebahbah ida. Nem ay, gapuh ni hemek APU DIOS ey in-abulut tun wada metdaan ni hi-gada. (Ang-ang yu hu Romans 9:29 et ya Isaiah 4:3, ya 10:20-23, ya 11:11, 16, niya 43:3-4.) \* **1:14** 1:14 Yadda importanteh ni piyestah idan helag Israel ey ya Piyestah ni Passover, ya Piyestah ni Pentecost niya Piyestah ni Tabernacle. (Ang-ang yu hu Exodus 23:14-17, ya 34:18, ya Leviticus 23:1-44 et ya Deut. 16:1-7.) † **1:21** 1:21 Jeremia 3:6-14, Ezekiel 16:25-26.

<sup>24</sup> Et humman hu, hi-gak e hi APU DIOS, e Kabaelan tun emin e Dios idan helag Israel ey kangkuy “Nambalin kayu law ni buhul ku. Paka-ibbaleh kun hi-gayudda hu impahpahding yu, ma-lat gibeken yu hu nemahhig ni bunget ku. <sup>25</sup> Kastiguen dakeyu et ekalen kudda lawah ni elaw yu, ma-lat yumaggud kayu henin kapehding ni gumek e kaeyyuga ma-lat nemamah. † <sup>26</sup> Weddaen kulli kayyaggud ni aap-apu yun heni dedan lan nunman. Et yallin nunman ni tsimpuh ey ngeddanan alin tutu-u hu bebley yun Jerusalem ni ‘Bebley ni Kayaggud kapehpending ni bimmebley niya kamannanang hu daka pengu-unnud nan APU DIOS.’”

<sup>27</sup> Kayyaggud ni peteg hi APU DIOS, et mukun ihhehwang tu huttan ni bebley yu e Jerusalem niyadda etan tutu-udtan ni mantuttuyyun liwat da. <sup>28</sup> Nem yadda etan manliwwat tep ya ngehay da niya pengiwwallengan dan APU DIOS, ey mebahbah ida niya mettey ida.

<sup>29</sup> Nemahhig ali baing yu hedin ninemnem yu hu nan-enappitan yuddan beken ni makulug ni dios di henge ni keyew, niya nengipenahdingan yun lawah di yuka ngillinan leguntan yuka penaydayawin nunman idan dios yu. § <sup>30</sup> Mei-ellig kayullid keyew ni kamangkekpit bulung tu, niya mei-ellig kayullid neitnem ni eleg medennumi. <sup>31</sup> Nemnem yu huuya: Ya etan tuun et-eteng kabaelan tu ey bahbahen ni lawah ni tuka pehpending, ey endi mabalin ni mengippesikkek ni kebabbahan tu. Henin dagemi e anin ni ngalab ni ebuh et megihheb niya endi mabalin ni mengdep ni apuy ma-lat eleg magiheb.

## 2

### *Ya pan-ap-apan alin APU DIOS*

<sup>1</sup> Huuya impeamtan APU DIOS nan Isaiah e u-ungngan Amos ni meippahding alin Judah niya Jerusalem: <sup>2</sup> Yallin edum ni aggew ey ya etan duntug ni neituunan ni Tempol APU DIOS ey mandingngel, et dakel ali tutu-ud kebbebley eyad puyek ni umlaw diman ni an mandaydayaw. <sup>3</sup> Kandalliy “Keyuy et manteyed itsud duntug APU DIOS e Dios idan helag Israel di Tempol tu et ituttuddu tun hi-gatsu hu pinhed tun pehding tayu et humman u-unnuden tayu.”

Huyyalli e-helen da, tep yan nunman alin tsimpuh ey yad Jerusalem hu keittuttuddan ni ehel APU DIOS.

<sup>4</sup> Hi-gatulli law mengippennuh ni panhahallaan ni katuutuud kebbebley. Yan nunman ali ey eleg ida law mandaddan hu kebbebley ni mekigguubat, tep endi law manggugubat. Pan-e-dihen dalli law hu ispadah da et kapyaan dan aledu niya pangkapyaan dalli pahul dan ewah ni panlinnih dan intanem da.\* <sup>5</sup> Et humman hu, hi-gatsun helag Jacob, attu et ya elaw APU DIOS hu pengiu-unnudan tayu ey?

*Ya aggew ni gintud nan APU DIOS ni pengippebahahan tuddan tutu-un daka peta-gey annel da*

<sup>6</sup> APU DIOS, inwalleng mudda tutu-um ni helag Jacob tep ya daka pehding e daka kulluga hu tuttuudun nalpu etan idad bebley di appit ni kasimmlin aggew. † Ida kamandinnel di anap e henidda iPilistia ‡ niya daka pehding hu kapehpending idan tutu-ud edum ni bebley. <sup>7</sup> Kedangyan hu Judah e bebley dan dakel hu silber niya balituk diman e eleg melkud. § Dakel mewan kebayyu da et tagan da kapyaan kalesah ni kameussal di gubat. <sup>8</sup> Dakel mewan kinapyadan tutu-un dios da. Kinapy da ngu ni dinaydayaw da. <sup>9</sup> Ya pambalanan tu ey meibbahah ida et mabeingan ida. Et humman hu, etan tu liwwan hu liwat da e APU DIOS.

<sup>10</sup> Hi-gayun tutu-u, kayu pantalud leyang niya kayu pangku-kun pantelluan yu, ma-lat eleg maipahding ni hi-gayu hu hipan pehding APU DIOS tep ya bunget tu. Em, patnai yu pangngun mantellu ma-lat eleg yu ang-angen hu kabaelan tu niya dayaw tu.\* Nem ya kakulugan tu, ey eleg ali mabalin ni yu italuan hu bunget tu. <sup>11</sup> Medettengan ali aggew ni meibbahah ida kamampahhiyan tutu-u ma-lat hi APU DIOS dedan hu medeyyaw. <sup>12</sup> Tep wada aggew ni gintud APU DIOS e Kabaelan tun emin ni pengippebahahan tuddan nunman ni et-eteng kabaelan tun tutu-un kamampahhiya. <sup>13</sup> Bahbahen tuddalli etan etata-gey ni keyew ni sedar di Lebanon niyadda etta-teng ni keyew ni oak di

‡ 1:25 1:25 Ang-ang yu hu Isaiah 4:4 et ya 48:10. § 1:29 1:29 Ang-ang yu hu Isaiah 65:3 niya 66:17. \* 2:4 2:4 [2-4] Micah 4:1-3 † 2:6 2:6 Yadda bebley ni na-hel eyad verse ey humman ida na-mu hu Syria et ya Assyria. Iraq law ni nunya hu ngadan ni Assyria ni nunman. ‡ 2:6 2:6 Ang-ang yu hu 1 Samuel 6:2 niya 2 Kings 1:2. § 2:7 2:7 Kimmedangyan ida dakel ni iJudah eman ni hi Ussiah hu patul da. \* 2:10 2:10 Ang-ang yu 2 Thess. 1:8-10.



Bashan. † 14 Ey deklanan tuddalli hu etata-gey ni duntug. 15 Tu-lien tullu etata-gey ni kapanggualyain sindalu niyadda netuping ni luhud di bebley da. 16 Pambahbaben tullu etta-teng ni bapor niyadda etan kakkayyaggud ni bangka et malneng ida. 17 Yan nunman ali ey mebabba-ingan ida hu tutu-un kamampahhiya niyadda manghay. Ebu ali law hi APU DIOS ni medeyyaw ni nunman ni aggew. 18 Mangkeendiddalli law hu dios ni kinapyan tuu.

19 Yallin pengippeang-angan APU DIOS ni nemahhig ni bunget tu e henilli tu iggiwwed eya puyek, ey idalli mampantellu tutu-ud leyang niya mangku-kuddan pantelluan da, tep ya takut da. Patnaan dallin umbesik ma-lat meihwang idad bunget APU DIOS‡ niya ma-lat eleg da ang-angen hu kabaelan tu niya dayaw tu, nem eleg idalli damengu meihwang. 20 Yan nunman alin aggew ey pan-i-ibbeng idallin tutu-ud kad-an ni utut niya panniki hu balituk niya silber ni kinenapya dan dios da. § 21 Memsik idallin an mangkeitlud leyang niyad linggeman ni hungab ma-lat patnaan dan ibsikan hu bunget APU DIOS, ya et-eteng ni kabaelan tu niya dayaw tu ni pengiggiwwedan tullin puyek.

22 Et humman hu, entan pandinel yud tuu, tep endi kabaelan tu niya nanna-ud ni mettey.

### 3

#### *Ya pengastiguan nan APU DIOS idan iJudah et yadda iJerusalem*

1 Ya Ap-apu e hi APU DIOS e Kabaelan tun emin ey e-kalen tu law ni emin hu kapandinnelin tutu-ud Jerusalem niyad Judah, henin kennen, ya danum, 2 yadda aap-apu da, yadda sindalu da, yadda huwet da, yadda prophet da, yadda maebig, yadda konsihal da, 3 yadda aap-apun sindalu da, yadda nelaing ni mengapyan linggeman \* niyadda kaman-ennap. † 4 Et yalli peyuddung APU DIOS ni man-ap-apudan tutu-u ey yadda kamanangpah ni kaungaunga. ‡ 5 Manhintatalam idalli tutu-u. Endilli lispituh idan u-ungngan a-ammed da. Mambabakal idalli tutu-u, anin idan nandadagsi baballey da. Yadda dama endi silbi tun tutu-u ey eleg da lispituha hu tutu-un kametbal ni tuu.

6 Yan kedettengan alin nunman idan aggew ey yadda hampamilyah ey puttuken dalli hu hakey ni hi-gada e kanday "I-imman ni hi-gam tep dammutun wada ibbalwasim, imay kuma et hi-gam pan-ap-apu min nunyan wada ligat."

7 Nem kantullin humang tuy "Beken ni hi-gak hu pan-ap-apu yu tep endi nak ibbaddang ni hi-gayu. Tep anin ni hi-gak et en-endi-an nak daman hekey. Endi dama kennen niya balwasid baley. Et humman hu, entan tuwak kuma putuk ni pan-ap-apu yu."

8 Nanna-ud hu kabbabahan ni Judah niya Jerusalem tep kangengngehayaddan bimmebley hi APU DIOS di daka pehpending niya daka e-e-hela. Daka peang-ang-ang ngehay dad hinanggan tu. 9 Kameka-ang-ang di angah da e nambahul ida. Daka peang-ang-ang hu lawah ni daka pehpending e henidda laddan iSodom. Ey endin hekey baing da. Nanna-ud ni angehemmek ali meippahding ni hi-gada, nem bahul da ngu hu kekastiguan da.

10 Hedin yadda tutu-un kayyaggud ngu dedan hu daka pehpending, ey melinggep idalli niya man-an-anladdalli. Kayyaggud ali pambalanan ni impahding da. 11 Nem hedin yadda tutu-un lawah hu daka pehpending, ey nanna-ud ni mekastiguddalli, tep meippahding daman hi-gada hu lawah ni impahding da.

12 Hi-gayun tutu-uk ey dakeyu kapanligligat idan u-ungnga niyadda bibi-in aap-apu yu. Hin-appil kumedek hu daka ittudun pehding yu, et humman hu eleg yu law amta hu kayyaggud ni u-nunuden yu.

13 Hi APU DIOS e keta-tageyyan ni huwet ey nandaddan ni manhuwet idan tutu-u tu. 14 Anin idan ap-apun tutu-u tu et huwetan tudda et hiktaman da bunget tu. Heninnuy hu kan APU DIOS ni hi-gada: "Binahbah yudda iIsrael e hi-gada kamei-ellig ni leguntak ni netaneman ni grapes. § Hineuheul yudda nangketwet et penuen yu baballey yun inla yun hi-gada. 15 Endi lebbeng yun mengippeligligat idan tutu-uk niya menellatellam

† 2:13 2:13 Ya bebley e Lebanon ni wadad appit ni north ni Israel ey nandingngel tep yadda etata-gey ni sedar ni keyew diman. Ya Bashan ey wadad appit ni kasimmilin aggew di Israel di demang ni Wangwang e Jordan. Nandingngel dama tep yadda etta-teng ni keyew ni oak diman. In-alig nan Isaiah ida huyyan keyew di meippahding alin kamampahhiyan tutu-u. ‡ 2:19 2:19 Revelation 6:15 § 2:20 2:20 Endi silbi tun penaydayawan ni dios ni kinapyan tuu. (Ang-ang yu hu Isaiah 30:22 ya 31:7 ya 40:19-20 ya 44:9-20.) \* 3:3 3:3 Wadadda edum ni tutu-un kanday ya keibbellinan tu huyya ey 'nelaing ni magic' e beken ni 'nelaing ni mengapyan linggeman.' † 3:3 3:3 Ang-ang yu hu Deut. 18:10. ‡ 3:4 3:4 Henin Manasseh e hampulut dewwa toon tu ey nambalin ni patul di Judah. (Ang-ang yu hu 2 Kings 21:1.) § 3:14 3:14 Isaiah 5:1

idan nangkewetwet. Hi-gak hu Ap-apu e hi APU DIOS e Kabaelan tun emin, hu nanghel idan nunya.”

*Inhelan APU DIOS ida bibi-id Jerusalem*

<sup>16</sup> Kan mewan APU DIOS ey “Ang-ang yudda kedi hu bibi-in iJerusalem e ida kamampahhiya. Daka itangngatangngaw hedin ida kamandaddallan. Da mewan kaiyyenayyaggud dalan da niya ka-immatur di daka pengitettekkel e makilakidda. Nemahhig numan e kaumkilikililing hu padang da. <sup>17</sup> Nem kastiguet idalli e weddaek bungul di ulu da et memukmukan ida.”

<sup>18</sup> Medettengan ali mewan hu aggew ni pengkalan Apu Dios idan nunman ni usal idan bibi-in iJerusalem e heniddan padang di heli da, yadda daka ibbedbed di ulu da, yadda banggel da, <sup>19</sup> yadda betling da, yadda takelang, yadda hukung da, <sup>20</sup> yadda taddung da, yadda edum ni daka ihuklub di heli da, yadda daka i-awekeh di gitang da, yadda bangbanglu da, yadda ageyup da, <sup>21</sup> yadda singsing dad galumeymey da niyad eleng da, <sup>22</sup> yadda kakkayyaggud ni balwasi da, yadda pitakah da, <sup>23</sup> yadda diggal da, yadda edum ni balwasi dan nangkengina, yadda panyuk da niyadda luput ni daka iwwa-ngal. \*

<sup>24</sup> Et ya la etan mebanglun hamuy da ey mambalin alin kaman-ebut. Ya etan kayyaggud ni ballikid da ey mambalin alin linubid. Ey endilli law etan andukkey ni kayyaggud ang-ang tun bewek da tep memukmukan ida. Ya kayyaggud ni daka ibbalwasi ey mehullulan alin layyut. Meendilli law kaminaddikit da tep mebabba-ingan ida!

<sup>25</sup> Mangketey idalli hu lalakkid Jerusalem ni an mekiggubbat, anin idan keka-kalitan ni hi-gada. <sup>26</sup> Ey mangkebahbah idalli hu eheb et nemahhig ali lemyung idan tuun natdaan diman. Henilli kaumlelemyung ni biin kamanyukyukmuh di puyek e kaumnanginangih, tep inla dan emin hu wadadman.

## 4

<sup>1</sup> Yan nunman alin aggew ey hahhakkey hu metdaan ni lalaki et pampippilliwian alin pitun bibi-i hu hakey ni laki. Kan idallin bibi-iy “Attu anhan et ibilang dakemin ahwam ma-lat eleg kami bumabbaing tep ya keendin ahwa mi. Anin katteg ni ngenamung kamin manheppul ni kenen ni niya balwasi mi, nemet ibilang dakemin ahwam.”

<sup>2</sup> Nem medettengan ali mewan hu aggew ni yaggudan ni ang-ang etan ni kameingn-gadnin Pangan APU DIOS. \* Emin ali neitnem diman ey makattaba niya kayyaggud panlemme da. Yaddalli etan natdaan ni tutu-udman ey man-an-anladda niya igaggaya dalli hu lameh ni nangkeitnem di bebley da. <sup>3</sup> Emin idalli tutu-un metdaan di Jerusalem ey ibbilang idan APU DIOS ni kayyaggud ni peteg. †

<sup>4</sup> Dammutun pehdung tu huyya tep kastiguen tudda bibi-id ‡ Jerusalem tep ya liwat da et ininggeh tu meullahan lugit da. Anin idan emin ni tutu-un nambebley diman ni pimmpatepatey et kastiguen tudda et meendi law hu lawah di bebley da tep ya pengastigu tu ey kamei-ellig di apuy e kaumgiheb. <sup>5</sup> Peellin APU DIOS di Duntug e Zion niyaddad etan di neamung ni tutu-udman ali hu kulput ni kawwalwal ni mambalin ni apuy ni hileng. Humman ali keang-angan tun wada dayaw APU DIOS ni hi-gada niya tudda kaippaptek. <sup>6</sup> Humman ni kulput hu meniddum idan tutu-ud petang hedin kawwalwal niya humman keihhikkugan da hedin wada pewek niya hedin kaman-uddan.

## 5

*Ya a-appeh ni meippanggep etan ni leguntan netaneman ni grapes*

<sup>1</sup> Dengel yu et ia-appeh ku hu a-appeh ni gayyum \* kun meippanggep ni intanem tun grapes. Humman ni gayyum ku ey wada hu legunta tu etan di duntug ni kayyaggud puyek tu e netaneman ni grapes. † <sup>2</sup> Hinuklay tu et ekalen tudda batu et taneman tun kayyaggud ni grapes. Ingkapa tu mewan hu eta-gey ni a-abbung ni pan-eddugan tu et

\* **3:23** 3:23 [16-23] Ang-ang yu hu 1 Peter 3:3-4. \* **4:2** 4:2 Huyyan kameingngadnin “Pangan APU DIOS” ey tellu hu dammutun keibbellinan tu. Ya hakey ey “Yallin kegibbuan ni kebahbahan ni bebley di Israel ey mekallameh ali mewan law hu meitnem diman.” Ya meikkadwa ey “Yallin megibbuh ni kebahbahan ni bebley di Israel ey umyaggud ali mewan.” Ya meikkatlu ey “Ya etan itu-dak APU DIOS e hi Christo ni Mengippaptek idan tutu-u tu.” (Ang-ang yu hu Jeremiah 23:5, 33:15 et ya Sekariah 3:8, 6:12.) † **4:3** 4:3 Isaiah 1:9 ‡ **4:4** 4:4 Yadda nengamtan ehel ni Hebrew ey kanday ya keibbellinan ni bibi-in na-hel di deya ey beken ni yadda bibi-in ebuh tep anin yadda lalakkid Jerusalem.

\* **5:1** 5:1 Huyyan kan Isaiah ni gayyum tu ey hi APU DIOS. † **5:1** 5:1 Yadda helag Israel ey hin-addum ni hi-gada hu kamei-ellig ni leguntan APU DIOS ni netaneman ni grapes. (Ang-ang yu hu Jeremiah 12:10, ya Psalm 80:8-19, et ya Matthew 21:33-45.)

mengapyan keppallan tu. † Hingged tu kelu-uman ni lameh ni intanem tun grapes, nem entannit nedateng ey mapeit tamtam da.

<sup>3</sup> Kan nunman ni gayyung kuy “Hi-gayun tutu-un nampambebley di Jerusalem niyad Judah, keyuy et ang-angen yu, tep kele hanna-yan intanem ku? <sup>4</sup> Hipa na-mu hu eggak ipahding? Kele mapeit inlameh idan grapes ey hedini ya inamtak, man malumi-ih illameh da?”

<sup>5</sup> Heninnuy law hu ninemnem kun pehding kun leguntak: Bahbahen ku et ekalek ew katteg hu luhud tu et humgep ida hu animal di muhyung et pangkanen da niya pan-igsin da intanem ku. § <sup>6</sup> Eggak pegebbut ma-lat mebel-ah. Eggak puttuli kawit tu niya eggak hukkaya. Diman et keya-munan ni nahbitan ni helek niya mandalen ku hu kulput et eleg tu egahan hu udan.” \*

<sup>7</sup> Huyyan a-appel ku ey meippanggep idan iIsrael niyadda iJudah e tutu-un APU DIOS e Kabaelan tun emin. Hi-gada neidingpatan idan grapes ni inyayyaggud tun intanem. Impandidinel tun kayyaggud pehding da, nem beken kumedek tep ya papatey impenahding da. Ey impandidinel tu e meandeng pehding da, nem beken tep tu kumedek kadenggedenggela hu kapampemhemhemkiddan daka panhelheltap ni edum da.

*Ya kastiguddan tutu-un lawah daka pehpehding*

<sup>8</sup> Anggehemmek kayun tutu-u tep nanna-ud ni mekastigu kayu! Hi-gayun tagan tu gatang † ni baley niya puyek et endi panha-adan ni edum ni tuu, tep ya pinhed yu ey ebuh kayun manha-ad di bebley yu. <sup>9</sup> Nem nanna-ud ni kastiguen dakeyun APU DIOS e Kabaelan tun emin, tep dinggel ku e kantun hi-gak ey “Emin idalli huyyan etta-teng niya kakkayyaggud ni baballey ey mangkebahbah ida niya mangkebe-ew ida. <sup>10</sup> Yadda grapes ni mahkang neitneman tu ey liman galon ni ebuh ni meinum hu kekapyaan tu. Ya hampulun talub ni tanem ey hantalub ni ebuh illameh tu.”

<sup>11</sup> Anggehemmek kayu tep nanna-ud ni mekastigu kayun tutu-u! Kayu kaumhaleman ni umbangun ni kakkabbuhhan et ya inum hu itaggan yu ingganah mehilling niya ingganah makabbutteng kayu. <sup>12</sup> Ya mewani di yuka panhahamuli ey kayu kamenginnun niya kayyaggud hu tenul idan gitalah yu, ya ayyuding yu niya inggiing yu, nem eleg yu hengguda niya eleg yu deyyawa hu kapehding APU DIOS. <sup>13</sup> Et humman hu, pambalin dakeyullin balud di neidawwin bebley. Mettey idalli aap-apu yun upa da, ey hi-gayun edum ey mettey kayulli tep ya ewew yu. <sup>14</sup> Et humman hu, kaman-am-amleng hu Dungay ni mengekmun idan kekeddangyan niyadda nangkewetwet ni iJerusalem, anin idan hi-gayun bimbebley ni kamambuttebutteng ni ngimmalangala.

<sup>15</sup> Yan nunman alin aggew ey mebe-ingan kayun emin niya meibbahbah ida kamampahhiya. <sup>16</sup> Nem hi APU DIOS e Kabaelan tun emin ey meiddeyyaw di meandeng ni tuka panhuwet niya kameang-ang hu kakinayyaggud tun peteg di tuka pehding. <sup>17</sup> Mambalin alin penggannan ni kalneroh niya gelding niyadda impah da hu nebahbah ni bebley yu.

<sup>18</sup> Anggehemmek kayu tep nanna-ud ni mekastigu kayu, tep eleg yu pinhed ni issiked ida lawah ni yuka pehpehding. <sup>19</sup> Kan yu kumedek ey “Hamban pepu-ut nan APU DIOS e Kayyaggud ni peteg ni Dios idan helag Israel et ipahding tun emin hu pinhed tun pehding ni hi-gami, et ang-angen mi pangngu hedini hipa dedan hu wadad nemnem tu.”

<sup>20</sup> Anggehemmek kayu tep nanna-ud ni mekastigu kayu! Hi-gayun nahnahwi tuka pannemnem. Ya lawah ey kanyuy kayyaggud, ya kayyaggud ey kanyuy lawah. Hanniman mewani hu kawwalwal e kanyuy engeenget, ya engeenget ey kanyuy kawwalwal. Ya mapeit ey kanyuy malumi-ih, ey ya malumi-ih ey kanyu mewani ey mapeit.

<sup>21</sup> Anggehemmek kayu tep nanna-ud ni mekastigu kayu tep ya yuka pannemnem ni annel yu ey nakannemnem kayu, niya nakallaing kayu.

<sup>22</sup> Anggehemmek kayu tep nanna-ud ni mekastigu kayun tutu-un na-let ni um-inum niya hi-gayuddan nelaing ni mengapyan meinum. <sup>23</sup> Anin ni hi-gayun beken ni meandeng hu tuka pehpehding e nealadda nambahul et humman ida kanyun endi bahul

‡ 5:2 5:2 Matthew 21:33, Mark 12:1 § 5:5 5:5 Hedini ya kan APU DIOS ni ‘animal di muhyung,’ ey yadda iAssyria ni buhul idan helag Israel ni um-alin memabahbah ni bebley da. \* 5:6 5:6 Hin-addum ni eleg peellin APU DIOS hu udan ma-lat kastiguen tudu hu manghay ni tutu-u tu. (Ang-ang yu hu Deut. 28:23-24, ya 2 Samuel 1:21, et ya 1 Kings 17:1.)

† 5:8 5:8 Yadda helag Israel ey dammutun umbalal idan puyek ni edum da, nem eleg mabalini ni ida umgatang winu ida manggettang ni puyek tep yadda puyek da ey neika-peng ni hi-gadan pampuyek dan ingganah. (Ang-ang yu hu Numbers 27:7-11 et ya 1 Kings 21:1-3)

da ma-lat liblih idad kastigu da, tep bineyadan dakeyu. Et nealadda endi bahul da ey hi-gada kumedek mekastigu. ‡

<sup>24</sup> Et humman hu, kayu kamei-ellig di nema-ganan ni dagemin gihheben. Ey kayu kamei-ellig etan di helek ni nabwel lamut tu e ittayab ni dibdib hu habung tun heni dep-ul. Mebahbah kayu tep nginhay yu hu tuttuddun APU DIOS e Kabaelan tun emin niya Kayyaggud ni peteg ni DIOS idan helag Israel. <sup>25</sup> Nemahhig law bunget APU DIOS ni hi-gayun tutu-u tu, et humman hu pengastiguan dakeyu. Iggiiwwed tudalli duntug § et mangkaiwehid idalli annel ni nangketey di keltad e heniddalli lugit. Nem eleg ali pay medeggem hu bunget APU DIOS. Nandaddan ni mengastigu pay ni hi-gayu.

<sup>26</sup> Eyyagan tudalli buhul yud nangkeidawwin bebley \* et pepu-ut dallin um-alin mengubbat ni hi-gayu. <sup>27</sup> Endin hi-gada hu meettu niya meihhungbub. Eleg ida man-iyatu winu meuggip di dalan. Eleg meubbad hu ballikid da niya iket ni patut da. <sup>28</sup> Matedem hu paneda niya nandaddan idan umpana. Nangka-let hu kebayyu dan mengigguyyud ni kalesah ni panlugganan da niya nangka-let idan umbebsik. Yalli helin kalesah da ey henilli alipuhapuh yu pehding tun mansillen. <sup>29</sup> Yadda sindalu da ey henidda layon ni kaman-elmeh hedin wada pintey dan animal ni daka pan-ibsik di endi an memanggad. Hanniman ali dama pehding daddan tutu-uk.

<sup>30</sup> Yan nunman alin keippahdingan idan nunya ey um-aliddad Israel hu buhul da e henidda layon ni kaman-elmeh e henin bungug ni danum di baybay. Nemahhig ali pehding dan dedpapa da e panhelheltap dadda. Yalli ang-ang ni bebley di Israel ey angehemmek niya engeenget tep hennian ni kulput hu petang. †

## 6

### *Pinutuk APU DIOS hi Isaiah ni prophet tu*

<sup>1</sup> Yan nunman ni toon ni neteyyan Ussiah e patul \* ey inang-ang ku hu Ap-apu † ni yimmudung di yuddunggan ni patut. Kameang-ang dayaw tu ey hinephepan ni andukkey ni balwasi tu hu det-al ni Tempol. <sup>2</sup> Yad nanlinikweh di yinudungan tu ey wadadda anghel ni kamantettebbel ni han-e-nem hu payak da. Hinephepan ni dewwan payak da angh da, ya dewwan payak da ey hinephepan da heli da, et ya dewwan payak da ey daka ussalan umtayab. <sup>3</sup> Entanni ey nan-a-appeh ida e kandad a-appeh day "Hi APU DIOS e Kabaelan tun emin ey Kayyaggud ni peteg, Kayyaggud ni peteg, Kayyaggud ni peteg niya kameang-ang ni emin eyad puyek hu dayaw tu." ‡

<sup>4</sup> Entanni ey kamangeggiwwed hu Tempol tep ya bungug ni a-appeh da niya napnun ahuk.

<sup>5</sup> Et kangkuy "Nanna-ud ni anggetakkut hu meippahding ni hi-gak tep nekalliwtannak. Anin ni ya nakka heppita et lawah ni emin. Ey anin idan edum kun nakka pekikkillawwi ey nekalliwtan ida dama. Ey nealay nak inang-ang eya Patul e hi APU DIOS e Kabaelan tun emin!" §

<sup>6</sup> Entanni ey simmayab etan hakey ni anghel ey immalid kad-an ku e kinipit tu hakey ni ngalab ni tu inlad kapan-appisi. \* <sup>7</sup> Intumuk tud bibil ku et kantuy "Na-kal law liwat mu niya neliwwan tep intumuk ku eya ngalab di bibil mu ma-lat melinggep ka law."

<sup>8</sup> Entanniy dingngel kun immehel hi Apu Dios ey kantuy "Hipa ittu-dak kud kad-an idan tutu-uk ni an mengituttuddun pinhed min ittuttuddun hi-gada?" † Hinumang ku ey kangkuy "Adyahhak, hi-gak itu-dak mu et lumawwak."

<sup>9</sup> Et kantun hi-gak ey "Lakkay tep et mu ehelen idan tutu-uk e kammuy 'Anin ni deddedngelen yu hu nakka ittuttuddu et eleg yu han-awat. Ey anin ni ennang-angen yu et eleg yu damengu amta kameippenahding.'" ‡

‡ 5:23 5:23 Ang-ang yu hu Isaiah 1:23 et ya 10:1-2. § 5:25 5:25 Ang-ang yu hu Isaiah 64:3, ya Jeremia 4:24-26, ya Hebrews 12:26, ya Exodus 19:18 et ya Haggai 2:6. \* 5:26 5:26 Huyyaddan buhul da ey dammutun hi-gada etan ida sindalun Assyria ni nengubat ni Israel niya Judah eman ni 722 B.C. et yan 701 B.C. niyadda iBabilon ni nengubat ni Jerusalem eman ni 605 B.C. † 5:30 5:30 [26-30] Ya pinhed idan nunyan verse ni e-helen ey yadda sindalun Assyria ni um-alin mengubbat niya memabah ni Israel. \* 6:1 6:1 Yan eman ni neteyyan nan Ussiah ey nelabah hu 740 ni toon et han maiungga hi Jesus Christo. † 6:1 6:1 John 12:41 ‡ 6:3 6:3 [1-3] Revelation 4:1-8 § 6:5 6:5 Hedin nampeang-ang hi APU DIOS idan tutu-u, man daka gibbeka e nekalliwtan ida. Ey daka kulluga e hedin ang-angen da hi APU DIOS, ey nanna-ud ni mettey ida. Et mukun simmakut ni peteg hi Isaiah. Ang-ang yu hu Job 42:5-6, ya Luke 5:8 et ya Exodus 33:20. \* 6:6 6:6 Leviticus 16:12 † 6:8 6:8 Eleg ehelen APU DIOS e "pinhed ku," tep kantuy "pinhed mi." Tep huyya keang-angan tu e nalpu daman Ispirituh tu et hi Jesus Christo humman ni meituttuddu. ‡ 6:9 6:9 Mark 4:12 et ya Luke 8:10

<sup>10</sup> Kantu mewan ey “Ma-mam ni pekelhi ulu da ma-lat eleg da awatan. Ey kulap mu mateda e eleg da han-ang-ang, ey tuleng mu tangila da et eleg da handengel niya eleg da han-awat. Tep gullat et ni beken idan henin nunman, ey han-ang-ang da, handengel da niya han-awat da, et mantuttuyyu ida, et pesinsahan ku hu liwat da.” §

<sup>11</sup> Minahmahak e kangkuy “Ingganah ni pigantu pengippahdingak nunya?”

Ey kantuy “Ingganah mebahbah ida bebley et meendidda tutu-udman et mangkabeew emin hu baballey niya mangkebel-ah ida bebley et mambalin ni endi silbi da. <sup>12</sup> Ey ingganah pellow kudda tutu-ud nangkeidawwi et endin hekey mambebley di bebley dad Israel. <sup>13</sup> Ey anin ni kantu et wadadda hahhakkey ni metdaan, et mebahbah ida damengu et henidda keyew ni nalgeh et ebuh law tunged tun wada. Nem anin ni hanniman meippahding et heniddalli etan ni tunged ni keyew ni umpingi mewan.” \*

## 7

*Ya pinhed APU DIOS ni peamtan nan patul e hi Ahas*

<sup>1</sup> Yan nampatulanan Ahas e u-ungngan Jotham e u-ungngan Ussiah di Judah ey ginubat di Resin e patul di Syria et hi Pekah e u-ungngan Remaliah e patul di Israel ida iJerusalem, nem eleg dadda apputen. \*

<sup>2</sup> Dingngel Ahas e patul ni Judah e kabaddangiddan sindalun Syria ida sindalun Israel ni mengubbat ni hi-gadan iJudah ey nemahhig takut tu. † Anin idan tutu-u tu et nemahhig dama takut da et ida kamangegeyey e henidda keyew ni kapan-igiwwed ni pewek.

<sup>3</sup> Nem kan APU DIOS nan Isaiah ey “Ikuyug mu eya u-ungngam e hi Shear Jashub ‡ et yu dammuen hi Ahas e patul. Immen di keltad ni kapangngunnuiddan kamengapyan balwasi etan di pappeg ni alak ni kadellanan danum ni kamelpud Lebeng di Ahat. <sup>4</sup> Ehel mun hi-gatu et mandaddan niya pelinggep tu nemnem tu et eleg tumekut. Ya bunget nan hi Resin e patul, niyadda edum tun iSyria ni hi Pekah e patul e u-ungngan Remaliah, ey beken ni angetakkut tep ya bunget da ey henin kamangeke-dep ni ngalab ni dewwan ittungu. §

<sup>5</sup> Em, implanuh idan nunman ni patul ni Syria niya Israel e <sup>6</sup> gubbaten da hu Judah niya sinattakkut dadda tutu-udman, ma-lat mei-dum idan hi-gada niya ma-lat pambalin dan patul ni Judah etan u-ungngan Tabeel.

<sup>7</sup> Nem hi-gak e hi APU DIOS e Eta-gey ni peteg ey eggak i-abulut ni meippahding humman ni planuh da. <sup>8</sup> Tep beken ni na-na-let hu Syria nem ya Damascus e capital nunman ni bebley. Et humman hu, endi ikkedhel idan tuudman, anin ya patul da e hi Resin. Anin ni ya Israel et melebbah hu na-nem et liman toon et mekababbah. \* <sup>9</sup> Emin hu bebley di Israel ey endi ikkedhel da, anin ni ya Samaria e capital ni bebley da. Et humman hu, endi dama ikkedhel idan tuudman, anin ya patul da e hi Pekah.

Nem hedin eleg yu pannananeng dinel yun hi-gak, man endi kabaelan yu.”

*Ya pengi-immatunan ni ellian nan Emmanuel*

<sup>10</sup> Intu-dak mewan APU DIOS hi Isaiah ni an menghel nan Ahas e patul ni pinhed tun e-helen ni hi-gatu. Heninnuy hu inhel APU DIOS: <sup>11</sup> “Ibegam ni hi-gak e AP-APU e Dios mu hu pengi-immatunam e makulug ni baddangan daka ma-lat apputen mudda buhul mu. Dammutun ya iddawat kun pengi-immatunam ey melpud kabunyan winu melpud nandaul di Dungay, ngenamung kan pinhed mun pillien.”

<sup>12</sup> Nem eleg abuluten Ahas e kantuy “Eleggak mambeggan pengi-immatunak, eggak pinhed tep eleg mahapul ni nak patnaan hu kakulugan tun kae-helan APU DIOS.” †

§ 6:10 6:10 Ang-ang yu hu Matthew 13:15, ya John 12:40 et ya Acts 28:26-27. \* 6:13 6:13 Humman keang-angan tu e anin ni mebahbah ida et wada namnamah dan peyaggud alin APU DIOS hu bebley da. \* 7:1 7:1 Ang-ang yu hu 2 Kings 16:5. † 7:2 7:2 Yan nunman ey hi Ahas e patul et yadda sindalu tu ey inapput idan iSyria et yadda iIsrael di gubat. (Ang-ang yu hu 2 Chronicles 28:5-8.) ‡ 7:3 7:3 Ya keibbellinan ni ngadan nan Sear Jashub ey “Wadaddalli hahhakkey ni tutu-um metdaan.” § 7:4 7:4 Hi Resin e patul ni Syria et hi Pekah e patul ni Israel, ey henidda etan ni kamangeke-dep ni dewwan ngalab tep nekapyu ida sindalu da. Inapput ni Assyria hu Syria eman ni 732 B.C. niya nelabah hu hampulun toon ey inapput ni Assyria hu Israel eman ni 722 B.C. et ilaw dadda iIsrael di bebley da et pambalin daddan himbut diman. \* 7:8 7:8 Yadda etan hahhakkey ni natdaan ni helag Israel ni eleg mailaw di Assyria ey naka-apput ida et malebah hu 65 ni toon (669 B.C.) ey beken law ni hi-gada nan-ap-apun tutu-u da, tep impaelin Assyria e nansakup ni hi-gada hu ap-apu da. † 7:12 7:12 Hi Ahas ey ma-nu ehel tu tep heni makulug ni tuka iddinel hi APU DIOS, nem ya kakulugan tu ey tuka nemnemneman mampabaddang idan iAssyria ni mengubbat idan iIsrael niyadda iSyria. Ang-ang yu hu 2 Kings 16:7-9.

<sup>13</sup> Et kan Isaiah nan Ahas et yadda edum tuy “Hi-gayun edum kun helag David ey nepappeg tu-wa anhan law hu anus kun hi-gayu, ey tuu-ak ni ebuh. Kaw anin ni hi Apu Dios et pinhed yun mepappeg hu anus tun hi-gayu? <sup>14</sup> Imay tep et hi-gatu mengidwat ni pengi-immaturan yulli: Yalli etan kat-agun bii ey i-ungnga tullu hu gelang ni laki, niya ngeddanan tullin hi “Emmanuel.” † <sup>15</sup> Yallin keettengan tun amta tu law ni mampilli hedim hipa kayyaggud niya lawah, ey ya kennen idan tutu-uy ya gatas niya putsukan. § <sup>16</sup> Nem eleg medettengi humman ni aggew ey meapput ida etan dewwan patul e yuka tattakusin patul ni Israel et ya patul ni Syria. Em, nanna-ud ni meapput hu bebley idan nunman ni patul et mawehit idalli tutu-udman.

*Ya pemabahan idan iAssyria ni Judah*

<sup>17</sup> Nem peellillin APU DIOS hu nehalmn ni ligat ni hi-gam, e Ahas, yadda tutu-um et yadda neegin hi-gam. Nehalman ni angettakkut huuyan um-alillin helheltapen yun ligat nem yadda la ligat ni hineniktaman ni bebley tayu neipalpu eman ni neappilan ni Israel di Judah. Peelli tullu hu patul di Assyria et yadda sindalu tu.

<sup>18</sup> Yan nunman alin aggew, ey mantulpip hi APU DIOS et pengamtaan idan iEgypt et heniddalli aggyyet ni um-alin mangkelpud kedaddawi-an ni bebley di pangan Wangwang e Nile. Um-alidda dama hu iAssyria e heniddalli babbayung, <sup>19</sup> et maihinap idan emin eyad bebley yu anin idad nedeklan, yaddad leyang, yaddad nangkahbitan et yaddad pattullan.

<sup>20</sup> Hedim medettengan ali humman ni aggew ey an ali ewwiten nan Apu Dios hu patul di Assyria di ba-hil ni Wangwang e Euphrates et umlin mengubbat ni hi-gayu. Humman ni patul ey henin etan ni kametangdanin kamampu-lit, tep bahbahen tullu emin hu wadan hi-gayu e heni kep-uhan tullu iming yu, ya bewek ni ulu yu, et yadda bewek ni annel yu.

<sup>21</sup> Yan kedettengan alin nunman ni aggew, ey nemahhig ali panhelheltapan idan tutu-un metdaan et ya hakey ni familyah ey hakey ni baka niya dewwan kalneroh ni ebuh hu wadan hi-gada. <sup>22</sup> Et yaddalli hahhakkey ni tutu-un metdaan ey ebuh ali gatas et ya putsukan ni kennen da.

<sup>23</sup> Yan nunman ali mewan ni tsimpuh, ey yadda kayyaggud ni pantenneman ni kame-tennemin hanlibun grapes e kamambalol ni hanlibun palatah ni pilak, ey mangkebel-ah et ya hebit niya gugulun umtemel. <sup>24</sup> Et umlaw idalli tutu-un mandewng diman tep umkeya-mun ali etta-teng ni helek ni nangkahbitan. <sup>25</sup> Yadda etan duntug ni netaneman nunman ey endi law umlaw diman, tep simmemel ida nangkahbitan ni helek ey yadman kapenganniddan babakka niyadda kakalneroh ni helek.”

## 8

*Ya u-ungangan Isaiah hu pengi-immaturan idan tutu-u*

<sup>1</sup> Entanni ey immehel mewan hi APU DIOS ni hi-gak ey kantuy “Ala kan et-eteng ni pantuddekan et ettengem ni ittudek hu: ‘Maher-Shalal-Hash-Bas.’” \* <sup>2</sup> Ayag kan dewwan kayyaggud ni tuun mantistigun nunya. Hi Uriah e padi et hi Sekariah e u-ungangan Jeberekiah hu ayagam.”

<sup>3</sup> Entanni ey newad-an hu ahwak. Neukat humman ni lakin u-ungnga mi ey kan APU DIOS ni hi-gak ey “Ngadani yun ‘Maher-Shalal-Hash-Bas.’” <sup>4</sup> Huuyan ngadan tu mengippeang-ang e eleg ali ni meibbehwang ehel eyan u-ungnga yu et eleg tullu ni han-ehel hu ‘ama’ niya ‘ina’ ey um-ali hu patul ni Assyria et yadda sindalu tu et pan-alen da kinedangyan idan iDamascus niyadda iSamaria et pan-ilaw dad bebley da.

*Kamengelli hu patul di Assyria*

<sup>5</sup> Immechel mewan hi APU DIOS ni hi-gak ey kantuy <sup>6</sup> “Eleg ebbulutaddan tutu-ud Judah hu kayyaggud ni nakka pemaptek ni hi-gada, e kamei-ellig etan di maineng ni Wangwang e Siloah. Ida kumedek kamanggagayan keapputan idallin dewwan patul e di Resin nan Pekah, tep ida kamakaddinnel e baddangan idan Assyria. <sup>7</sup> Nem hi-gak, e Ap-apu ey

† **7:14** 7:14 Ya inhel dedan APU DIOS ni meippanggep nan Emmanuel ey dewwa neipeamnuan tu. Ya nemangulu ey in-ungangan kat-agun bii hu gelang ni laki eman ni nelabah ni ebuh pigan toon neipalpun nanghelan APU DIOS ni nunya. Endi maptek hedim hipa huuyan gelang. Yadda edum ni tuu ey kaday u-ungnga winu inap-apun patul. Ya meikkadwa ey ya in-ungangan Maria e hi Jesus Christo eman ni nelabah hu dakel ni toon neipalpun nanghelan APU DIOS ni nunya. § **7:15** 7:15 Ya edum ni tutu-un nengamtan Hebrew ey kaday, tep ya kennen idan iJudah ey gatas niya putsukan ni ebuh ey humman keang-angan tun wada panliggatan da. Nem ya hakey ni pinhed tun e-helen ey mehawahawwal ali hu kennen di Judah, tep yan nunman ali pengapputan idan iAssyria ni Israel et ya Syria.

\* **8:1** 8:1 Ya keibbellinan tu ey “Anggegannun meibsik hu limmu.”

peellik hu patul ni Assyria niyadda sindalu tu et gubaten da Judah. Um-aliddan heni Wangwang e Euphrates hedini nedakkal e kamanla-la-pih. <sup>8</sup> Um-alidda sindalun Assyria et henidda elwang e deplugen dan emin hu wadad Judah niya heniddalli sisi ni tuka bekyaga payak tu, ey inhepheed tudimpap tun kenne tu. † Hanniman ali pehding idan sindalun Assyria e meihhinna idad kebbebley di Judah.”

Ey hi-gam ni ebuh e Emmanuel hu wada kabaalan tun mengihwang ni hi-gami!

*Anin ni naka-let ida iAssyria e buhul ni Judah et meapput idallin edum ni aggew*

<sup>9</sup> Kaemung kayun emin ni tutu-ud kebbebley ni mekiggubbat! Nem meapput kayulli et mawehit kayu. <sup>10</sup> Taggan yu planuh ni pengubbatan yun hi-gami, nem endilli silbitu, tep ippaptek dakemin Apu Dios.

*Inhelan APU DIOS hi Isaiah*

<sup>11</sup> Inhelan tuwak nan APU DIOS e kantuy “Entan tu iu-unnud di kapehpehding idan edum mun iJudah. <sup>12</sup> Ey entan tu dengel etan kandan hi-gam hu nengihdul ni bebley yu tep ya inhel mun hi-gada ey eleg ida mandinnel di baddang ni iAssyria. Entan tu takusi hu katekkusiddan tutu-um. <sup>13</sup> Nemnem mu e hi-gak e AP-APU e Kabaalan tun emin ey Kayyagguddak ni peteg. Hi-gak ni ebuh hu dammutun tekkutam. <sup>14</sup> Mekihha-addak idallin tutu-uk et ipaptek kudda, nem hedini yadda tutu-ung eleg mengu-unnud ni hi-gak e heniddan tutu-ud Israel niyad Judah, ey heni-ak ali etan ni batun kehellapdungdan da et meihungbuh ida. Ey hedini yadda tutu-ud Jerusalem ey heni-ak ali lingen ni keknaan da. <sup>15</sup> Dakel alin hi-gada hu mehellapdung et ma-gah ida et magmik ida, ey meknaddalli.” ‡ Huyya inhel nan APU DIOS ni hi-gak.

*Ya inhel APU DIOS ni meippanggep ni peki-ungbalan ni netey*

<sup>16</sup> Hi-gayun kamekanggu-unnud ni hi-gak, ey amung yun emin ida impatudek APU DIOS et itlu yu, ey paka-ippaptek yun ingganah. <sup>17</sup> Hedini hi-gak ey nanengtun wada nakka pengullug niya wada dinel kun baddangan daitsun APU DIOS, anin ni eleg daitsu hengngudan tutu-u tun nunya.

<sup>18</sup> Kan etan ni kamengippaptek idan tuu ey “Iyyadya-ak di kad-an idan u-ungngan APU DIOS ni indinel tun hi-gak. Hi-gatu e Kabaalan tun emin e wadad Duntug e Zion, ey pinutuk dakemin mengippeamtaddan tutu-ud Israel ni pinhed tun pehding.” §

<sup>19</sup> E-helen idallin tutu-ung hi-gayun mahmahan yuddan kamammagguway ni kaumtenuttubbu hu pinhed yun amtaen. Nem hedini ya e-helen kun hi-gayu ey hi Apu Dios kumaddan hu pengigbai yuddan nunman. Kele an mahmahan idan mategud nangketey hu meippahding alin edum ni aggew? \*

<sup>20</sup> Dengel yu kuma hu kaituttuddun APU DIOS et beken ni ya kae-heladdan kamammagguway hu yu u-unnuden, tep endi ibbaddang dan panyaggudan yu tep heni eleg ni madilagan hu daka pannemnem.

*Yalli ellian ni ligat*

<sup>21</sup> Idalli manhawahawang hu tutu-ud bebley, tep endi namnamah da ey meu-upadda. Umhulun upa da ey nemahhig ali bunget da et lawah ali e-helen dan patul da et hi Apu Dios. <sup>22</sup> Anin ni attu lawwan dan da pampebaddangan et endi umbaddang ni hi-gada, tep ya kumedek panliggatan da niya keduddukulan ni nemnem da hu hemmaken da, et henidda meibbeng di kad-an ni engeenget.

## 9

*Yalli etan Mamapatul*

<sup>1</sup> Nem anin ni hanniman et eleg mannananeng ni mewedda hu nemahhig ni ligat et heni engeenget ni ingganah. Yadda helag Sebulun niyadda helag Naptali ey nebabbingan idan nunman, nem edum alin aggew ey meiddeyyaw ali bebley da meippalpu Baybay e Mediterranean ingganah di ba-hil ni Jordan. Anin ni Galilee e nambebleyan idan nalpu edum ni bebley et meiddeyyaw ali dama. \*

<sup>2</sup> Yan nunman ali ey yadda tutu-ung heni wadad engeenget ey ang-angen dalli et-eteng ni dilag. Et anin ni nehalman ligat da e henidda wadad engeenget, et umyaggud ali kaya neitu-wan da et henidda mebnangan. † <sup>3</sup> Apu Dios, peamleng mudda iIsrael, e henin

† **8:8** 8:8 Endi maptek hedini ya keibbellinan nunyan sisi ey yadda sindalun Assyria ni um-alillin memahbah idan iJudah winu hi Emmanuel e wada kabaalan tun mengihwang idan iJudah idan nunman ni sindalu. ‡ **8:15** 8:15 [14-15] Ang-ang yu hu Romans 9:33 et ya 1 Peter 2:8 § **8:18** 8:18 Hebrews 2:13 \* **8:19** 8:19 Ang-ang yu hu Isaiah 19:2. \* **9:1** 9:1 Huyyan na-hel e ya Galilee ey meiddeyyaw alin edum ni aggew ey neipeamnu eman ni nambebleyan nan Jesus Christo diman et ittuttuddu tu hu meippanggep nan APU DIOS. † **9:2** 9:2 [1-2] Matthew 4:15-16

amleng ni hakey ni tuun nedateng inggaud tu et man-ani, winu henin amleng idan tutu-un nanggegedwaan da inappat dad gubat. <sup>4</sup> Endilli law kabaelan idan nengipehelhetap idan tutu-um, tep bahbahem idalli ma-lat ihwang mudda tuum henin nengihwangam ni hi-gadan nunman ni nengapputam idan sindalun Midian. † <sup>5</sup> Yan nunman ali ey mangkegiheeb ida patut niya nekukkuheyaw ni balwasiddan sindalun um-alin umgubat. §

<sup>6</sup> Tep mei-ungngallin hi-gami etan lakin gelang ni pan-ap-apu tayu. Ya panggeddan dallin hi-gatu ey 'Kayyaggud ni umtugun' 'Dios ni Kabaelan tun emin' 'Mannanang ni Ama' niya 'Kelpuan ni Linggep.' <sup>7</sup> Mannanang ali kabaelan tu niya melinggep hu pan-ap-apuan tun eleg mepapeg. Hi-gatu meihhullul ni man-ap-apud pan-ap-apuan David. Ya pehdng tun man-ap-apu ey kayyaggud niya meandeng ni ingganah. Hi APU DIOS e Kabaelan tun emin ey nanna-ud ni pehdng tullin emin huuya.

*Ya pengastiguan APU DIOS ni Israel*

<sup>8</sup> Inhel dedan Apu Dios hu kastiguddan iIsrael e helag Jacob. <sup>9</sup> Emin ida ey inamta da huuya, anin idan nambebley di Samaria, nem manghay ida niya ida kamampahhiya e kanday <sup>10</sup> "Em, nangebahbah eya bebley tayu, nem iyayyaggud tayu. Ya batu pan-ikkapya tayu et nehahhammad pay nem ya la etan nebahbah. Neil-uh ni nangkalgheh hu keyew ni sicamore, nem hullulan tayun sedar e kekakkayyaggudan ni keyew."

<sup>11</sup> Ya penummang APU DIOS ni kapampahhiyaddan iIsrael ey peelli tudda buhul da et gubatan dadda. <sup>12</sup> Yadda iSyria di appit ni kasimmilin aggew niyadda iPilistia di appit ni kakelinnugin aggew, ey heni sinekang da bungut dan mengekum idan nunman ni iIsrael. Nem anin ni hanniman et nanengtu pay bunget APU DIOS ni hi-gada, et humman hu, nandaddan ni mengastigun hi-gada.

<sup>13</sup> Tep yadda iIsrael ey eleg ida mambanggad nan APU DIOS e Kabaelan tun emin ma-lat dayawen da. Anin ni kinastigu tudda et nanengtu eleg ida mengu-unnud ni hi-gatu.

<sup>14</sup> Et humman hu, han-aggew ali pengastiguan APU DIOS idan aap-apuddan helag Israel, yadda etan kameingnagnin ulu niya ikul niya pangan palmah niya katlubbung. <sup>15</sup> Yadda aap-apu da niyadda kametbal ni tutu-udman hu kameingnagnin ulu ey yadda prophets ni kamengittentuddun itek hu kameingnagnin ikul. <sup>16</sup> Neihalla hu intuttuddudan nunman ni aap-apu idan tutu-u, et humman hu, eleg law katteg amtaddan tutu-u hedin hipa hu kayyaggud ni pehdng da. <sup>17</sup> Et bumunget law hi Apu Dios ni hi-gadan tutu-u tu et kenastiguan tudda. Eleg tudda hemeken, anin idan nepu-hig niya nebalu, tep emin ida ey eleg ida mengullug ni hi-gatu niya lawah daka pehpending. Lawah ni emin hu kameukkat di bungut dan daka e-hela. Nem anin ni hanniman neipahding ni hi-gada et nanengtu hu bunget APU DIOS ni hi-gada et nandaddan ni mengastigun hi-gada.

<sup>18</sup> Ya kalinawah da ey heni apuy ni umgiheb. Tuka ielgaba nangkahbitan ni helek niya muyung et lumaw di ahat ahuk tu. <sup>19</sup> Peteg bunget APU DIOS e Kabaelan tun emin, et mukun nemahhig hu pengastigu tun hi-gada e heni kamantetebbel ni apuy ni meihhinnap di bebley et mebahbah ida bimbebley, et wadalli hakkey ey ya annel tu ikakkaguh tu. <sup>20</sup> Emin idalli ey pilliwen da hu hipan mekkan ni ang-angen da. Nem endilli hingla da, et anin alin u-ungnga da et pangkennen da. <sup>21</sup> Yadda helag Manasseh niyadda helag Ephraim ey ida kamanggugubat. Nem pambaddangan dallin gubatan ida helag Judah. Nem anin ni hanniman meippahding et nanengtu hu bunget APU DIOS ni hi-gada et nandaddan ni mengastigun hi-gada.

## 10

<sup>1</sup> Nanna-ud ni mekastigu kayun kamengapyan beken ni neandeng ni linteg e kapanliggasiddan tutu-uk. <sup>2</sup> Yuka kapkapyaa huttan idan linteg ma-lat wada inna-nu yun mengkal ni kelebengan idan nangkewetwet, yadda nangekbalu niyadda nangekepuhig, niya ma-lat wada inna-nu yun mengellan limmu da. <sup>3</sup> Hipa pehdng yu hedin medettengan etan aggew ni pengastiguan dakeyun Apu Dios e peelli tu tutu-un melpud edum ni bebley ni memahbah ni hi-gayu? Hipa pampebaddangan yu? Ey attu yu pampengituan idan kinedangyan yu? <sup>4</sup> Mangkettey kayullid gubat niya pambalin dakeyun balud idan buhul yu. Nem anin ni hanninya meippahding ni hi-gayu, et nanengtu bunget APU DIOS ni hi-gayu, et humman hu, nandaddan ni mengastigun hi-gayu.

† 9:4 9:4 Ang-ang yu hu Judges 8:24-27. § 9:5 9:5 Peamnullin APU DIOS huuya inhel tun pengippesikkedan tun emin ni gubat. Et humman hu, emin ali almas ey bahbahen ni tutu-u tep endi law ali silbi da.



*Ya patul di Assyria hu ussalen nan APU DIOS*

<sup>5</sup> Kan APU DIOS ey "I-ussal kudda iAssyria ni heni bakdung et kastiguet ida tuuk ni kamengippebungnet ni hi-gak. <sup>6</sup> Peellik idan mengubbat ni hi-gayun tutu-un eleg mengullug ni hi-gak niya hi-gayun kamengippebungnet ni hi-gak, et pan-alen dan emin hu limmu yu et pan-igsin dakeyun hi-gada e heni kayu lugit di keltad."

<sup>7</sup> Nem eleg ali amtan patul ni Assyria e hi-gak nengitu-dak ni hi-gatu. Hedin yalli wadad nemnem tu ey gubbaten tudda tutu-uk tep neiunnud di planuh tun apputen tun emin kebebbebley et sakupen tudda. <sup>8</sup> Kantulliy "Kaw beken ni patul ida emin opisyal ku? <sup>9</sup> Inapput mi hu Kalno, ya Karkemis, ya Hamat, ya Arpad, ya Samaria et ya Damascus. <sup>10</sup> Inapput mi et sakupen midda humman ni bebley ni kamandeyyaw idan kinapyan tuun dios e daddakkel nem yadda daka deyyawad Jerusalem niyad Samaria. <sup>11</sup> Bahbahaen mi dama Jerusalem niyadda daka deyyawan dios da henin impahding mid Samaria."

<sup>12</sup> Nem kan ni Ap-apu ey "Hedin megibbuh hu pinhed kun meippahding di Zion niyad Jerusalem, man kastiguet hu patul di Assyria tep kamampahhiya. <sup>13</sup> Kamampahhiya e kantuy 'Impahding kudda huyyan endi nemaddang ni hi-gak. Na-lettak dedan niya nelainggak. Inapput kudda huyyan bebley et pan-ekalek pappeg di kebebbebley niya nan-alak kinedangyan da. Heni-ak mewan hu bulug ni baka e nan-igsin kudda papatul idan nunman ni bebley. <sup>14</sup> Nan-alak hu kinedangyan ni kebebbebley eyad puyek henin kapengellain itlug ni sisit ni hini-yan tu buya tu e pemegga pi-dit ey endi ew ngu inetun umpayagpag niya menekang ni hebat tu ma-lat ika-leg tu. Tep endin hekey nengipatnan mekihhanggan hi-gak.'"

<sup>15</sup> Humman hu kantu, nem kan APU DIOS ey "Kaw dammutun hedin ya wahay man e-etteng kabaelan tu nem ya etan kamengi-ussal ni nunman? Kaw kekkeddukdul hu gelgel nem ya etan tuun kamengi-ussal nunman? Beken ni ya bakdung hu kamengitta-gey ni tuu, tep ya tuu kamengitta-gey ni bakdung."

<sup>16</sup> Peellillin APU DIOS e Ap-apun Kabaelan tun emin hu nemahhig ni degeh ni pengastigu tuddan nunman ni nangka-let ni sindalu. Humman ali memabhah ni et-eteng ni kabaelan idan sindalun Assyria e henilli apuy e gihheben tuddan emin et endi metdaan. <sup>17</sup> Tep hi APU DIOS e Kayyaggud ni peteg niya kamei-ellig ni Dilag ni Israel ey mambalin ni apuy et giheben tun han-aggew ida et-eteng kabaelan tun iAssyria e henin kakegihhebin hebit. <sup>18</sup> Anin idallin kayyaggud ni mumuyyung niyadda papayyew da et mangkebabbah e henin kapemabhahin degeh ni annel ni tuu. <sup>19</sup> Hahhakkey ali metdaan idan keyew et anin ni gelang et dammutun billangen tu. \*

<sup>20</sup> Yan nunman alin aggew ey eleg law iddinel idan metdaan ni helag Israel etan bebley ni memabhah et lan hi-gada. Nem iddinel dalli law hi APU DIOS e Kayyaggud ni peteg ni Dios ni Israel. <sup>21</sup> Humman idallin metdaan ni helag Israel ey mambanggad idan mengu-unnud ni hi-gatun Dios dan Kabaelan tun emin. <sup>22</sup> Anin ni dakei idan peteg hu helag Israel e heniddan kedakkel ni palnah di gilig ni baybay et hahhakkey alin hi-gada metdaan. Mebahbah idalli tutu-un APU DIOS tep humman lebbeng tun meippahding ni hi-gada. <sup>23</sup> Em, nanna-ud ni mebahbah emin etan bebley, tep humman ninemnem APU DIOS, e Eta-gey ni peteg, niya Kabaelan tun emin, ni pehding tu. †

*Kastiguen APU DIOS ida iAssyria*

<sup>24</sup> Kan APU DIOS, e Eta-gey ni peteg, niya Kabaelan tun emin, ni hi-gadan tutu-u tud Zion ‡ ey "Hi-gayun tutu-uk, ey entan takut yuddan iAssyria, anin ni panhelheltap dakeyu e henin impahding ida lan iEgypt ni hi-gayu. <sup>25</sup> Anggegannu law ey issiked kun mengastigun hi-gayu et hi-gada law bahbahek. <sup>26</sup> Hi-gak, e hi APU DIOS e Kabaelan tun emin ey kastiguen kudda henin nengastiguk idan iMidian di Batud Oreb niya henin nengastiguk idan iEgypt di Madlang ni Baybay. <sup>27</sup> Yan nunman alin aggew, ey pesikked kuddan man-ap-apun hi-gayu et eleg dakeyu law panhelheltap ni hi-gada."

*Immen idalli mekigubbat*

<sup>28</sup> Iyaddalli buhul tayun iAssyria ni umgubat. Sinekup da Ai ey linabhan da law Migron! Daka pan-ittalud Mikmas hu edum ni ussalen dad gubat! <sup>29</sup> Ey linabhan da law dalan ni neibattan di dewwan duntug niya mandedyaddad Geba. Ida kaumtatakut hu tutu-ud Ramah niya bimmesik ida tutu-ud Gibeah e bebley la nin patul e hi Saul. <sup>30</sup> Pantetekkek kayun tutu-ud Gallim, gapuh alin meippahding ni hi-gayun angetakut! Ey hi-gayun iLaisa, dengel yu dama e-helen ku. Ey hi-gayu daman

\* **10:19** 10:19 [18-19] Ya pinhed nan APU DIOS ni e-helen di deya ey bahbahaen tuddalli dakei ni sindalun Assyria, henin mahkang ni muyung ni mebahbah et hahhakkey metdaan ni keyew. † **10:23** 10:23 [22-23] Romans 9:27-28

‡ **10:24** 10:24 Huyya hakey ni ngadan ni Jerusalem.

iAnathot, anggehemmek kayulli tep ya meippahding ni hi-gayu! <sup>31</sup> Yadda tutu-ud Madmenah niyad Gebim ey ida kamemsik ma-lat meihwang ida. <sup>32</sup> Yan nunya ey immen ida iAssyria di Nob e ihik dan bahbahren humman ni Duntug e Zion di Jerusalem. §

<sup>33</sup> Nem hi APU DIOS e Ap-apun Kabaelan tun emin ey bahbahren tuddan emin henin kapanlelgehin pangan et-eteng ni keyew. Yadda nemahhig daka pampahhiya ey heniddalli melngeh et meibabah ida. <sup>34</sup> Pakabbahbahren idallin APU DIOS ida buhul idan iIsrael, e henin kapanlelgehiddan keyew di gawwan muyung di Lebanon e kaussala wahay.

## 11

### *Ya melinggep ni pan-ap-apuan*

<sup>1</sup> Ya tunged ni keyew ni nalngeh ey kaumpingi. Hanniman dama hu meippahding alin pamlyah Jesse e wadalli mei-unggan meihullul ni mampatul. <sup>2</sup> Iddawtan alin Ispirituh APU DIOS ni laing niya kabaelan tun man-ap-apuddan tutu-u tu humman ni mampatul. Humman alin mampatul ey daydayawen tu hi APU DIOS, amtaen tu pinhed tun pehding tu, <sup>3</sup> niya man-am-amleng ni mengippahding ni nunman. Yalli pehding tun manhuwet ey eleg tu i-alad ang-ang ni hakey ni tuu niyad kae-helan edum ni tutu-u. <sup>4</sup> Nem meandeng ali panhuwet tuddan nangkewetwet niya i-ehneng tu kelebengan idan endi kabaelan da. Hedin mammandal, man mekastigudda kamengippahding ni lawah niya pepettye tudu hu lebbeng dan meippepettye. <sup>5</sup> Meandeng niya kametbal ali pehding tun man-ap-apu.

<sup>6</sup> Yan nunman ali ey man-eeddum ida immeyew ni ahhu, yadda kalneroh, yadda leopard, yadda impah ni gelding, yadda layon niyadda impah ni baka. Ey yalli gelang hu mengippaptek ni hi-gada. <sup>7</sup> Hanniman idalli babakka niyadda bear e mandadagsiddan mengngan ni helek. Melinggep idalli impah dan mandadagsin meuggip. Anin idallin layon et mengngan idan helek e heniddan baka. <sup>8</sup> Man-a-ayyam idalli geggellang di kadan idan nangekitaan ni uleg ey eleg dadda kellata. <sup>9</sup> Endilli lawah ni meippahding niya endilli law umbabhah di diman ni duntug APU DIOS. \* Tep mepnulli humman ni bebley ni tutu-un nengantan hi-gatu e henin kapemnuin danum ni baybay. †

### *Ya pambangngadan idan iIsrael ni neilaw di edum ni bebley*

<sup>10</sup> Yan nunman alin aggew, ey ya etan mampatul ni helag David hu pengi-ang-angan ni kehellakniban ni kebebbebley, ma-lat maemung idalli katuutuun mandeyyaw ni higatud bebley tu. ‡ <sup>11</sup> Hedin medettengan ali humman ni aggew, ey ussalen Apu Dios hu kabaelan tu et ienamut tudu mewan tutu-u tun neiwehit di kebebbebley di Assyria, yad Egypt, yad Patros, yad Kus, yad Elam, yad Babilon, yad Hamat, yadda gilig ni baybay niyadda bebley ni neigawwad baybay, e henin nemangngadan tuddan aammed dan nunman ni neilawwan dad Egypt.

<sup>12</sup> Itta-gey tulli bandelah et pengamtaan idan tutu-ud kebebbebley eyad puyek e tu mewan kapan-emmunga tutu-u tun iIsrael niyadda iJudah e melpuddad kebebbebley eyad puyek. <sup>13</sup> Eleg idalli law um-ameh iIsrael idan iJudah niya eleg ida law mambubuhul. <sup>14</sup> Nem mambabaddang idan mengubbat idan iPilistia di appit ni kakelinnugin aggew niya pan-ellan da limmun tutu-ud appit ni kasimmilin aggew. Gubbaten dalli et apputen dadda iEdom, yadda iMoab et yadda iAmmon, et man-ap-apuddan hi-gada.

<sup>15</sup> Tetdukan alin APU DIOS hu Madlang ni Baybay ni neihnup di Egypt niya peelli tu maetung ni dibdik et matduk hu Wangwang e Euphrates. Mambalin ali humman ni wangwang ni pitun kulukul et dammutun agwatan ni hipan tuu. <sup>16</sup> Meweddalli kayyaggud ni keltad ni melpud Assyria ni dellanen idan natdaan ni helag Israel e tutu-un APU DIOS, henin newad-an ni dillan idan aammed dan nalpuan dad Egypt.

## 12

### *Ya a-apeh ni penaydayaw nan APU DIOS*

§ **10:32** 10:32 [28-32] Emin ida humman ni bebley ni negadan ey neihnup idad Jerusalem e tellun olas hu pandellanan. Humman keang-angan tu e ida law kamangkeihnup hu sindalun iAssyria di Jerusalem. \* **11:9** 11:9 Yad ehel ni Hebrew ey ya keibbellinan nunyan “duntug nan APU DIOS” ey beken ni hakey ni duntug ni ebu, nem emin hu bebley di Israel. (Ang-ang yu hu Exodus 15:17 et ya Psalm 78:54.) † **11:9** 11:9 [6-9] Yallin ellian nan Christo ni man-ap-apu ey eleg ida law umtakut hu animal. Hanniman damadda tutu-u e kayyaggud ali law pandadaguyan da. (Ang-ang yu hu Romans 8:18-22.) ‡ **11:10** 11:10 Romans 15:12

<sup>1</sup> Yan nunman alin aggew ey ia-appéh idallin tutu-u e kanday “Daydayawen daka e APU DIOS! Bimmunget kan hi-gak ni nunman et kastiguen muwak, nem inelubyag muwak nunya tep endi law bunget mu. <sup>2</sup> Hi-gam e Apu Dios hu mengihwang ni hi-gak. Nakka medinnel ni hi-gam niya eleggak umtakut, tep hi-gam e APU DIOS hu kakelpuin elet ku niya hi-gatu kamengidwat ni kabaelan ku. Hi-gam hu kamengihwang ni hi-gak.”

<sup>3</sup> Ya metengnin ni danum ey kamengippeamlang ni na-wew ni tuu. Hanniman ida dama hu tutu-un APU DIOS e nemahhig hu amleng dan pengihwangan tun hi-gada.

<sup>4</sup> Yan nunman alin aggew ey kanyulliy “Pansalamat itsun APU DIOS! Pandasal itsun hi-gatu. Ehel tayun emin ni tutu-u hu impahding tu! Ey i-hel tayu hu kasina-gey tu! <sup>5</sup> Ia-appéhi tayu hi APU DIOS tep yadda kayyaggud ni impahding tu ey peamta tayuddan emin ni tutu-u humman idan impahding tu. <sup>6</sup> Hi-gatsun tutu-ud Zion, itkuk tayu a-appéh tayu tep ya amleng tayu! Tep ya Dios ni Israel ey Kayyaggud ni peteg, et-eteng kabaelan tu niya kamekihahha-ad ni hi-gatsu.”

## 13

### *Kastiguen APU DIOS ida iBabilon*

<sup>1</sup> Huyya impeamtan Apu Dios nan Isaiah e u-ungngan Amos ni kekastiguan ni Babilon.

<sup>2</sup> Ita-gey yu bandelah yud ta-pew ni duntug ni endi keyew niya tekuki yudda sindalu niya inta-gey yu ngamay yu ma-lat hegepen da niya bahbahen da humman ni kamampahhiyan bebley e Babilon. <sup>3</sup> Minandal APU DIOS ida sindalu tun kamakangnungunndu ni hi-gatu, et dadda gubaten hu pinhed tun kastiguen \* tep nemahhig bunget tun hi-gada.

<sup>4</sup> Dengel yu hu ngaladdan dakel ni tutu-ud duduntug. Inemung APU DIOS e Kabaelan tun emin hu sindalud kebebbley et idaddan tuddan mekiggubbat. <sup>5</sup> Mangkelpuddad nangekidawwin bebley di gilig ni puyek, et hi-gada ussalen APU DIOS ni memahbah ni emin nunman ni bebley di Babilon † tep ya bunget tu.

<sup>6</sup> Pampepekkaw kayun takut yu tep iyyallin medettengan hu aggew ni gintud APU DIOS e Kabaelan tun emin ni pemahbahen tun hi-gayu. <sup>7</sup> Meendilli elet idan tutu-u tep ya takut da. ‡ <sup>8</sup> Nemahhig ali takut yu niya manhelheltap kayu henin kapanhelheltapin biin pan-ungngaan tu. Endilli mabalin ni pehding yu, ebuh ni manhintetkel kayu e kang-ang e nemahhig takut yu. Mandadalang ali angha yun baing yu. <sup>9</sup> Medettengan ali etan aggew ni gintud APU DIOS ni pengippeang-angan tun nemahhig ni bunget tu, et bahbahen tu eya puyek et mambalin ni eleg mebebleyi. Pekibbahbah tuddallin emin hu neliwtan. <sup>10</sup> Eleg idalli law umheyaw hu bittuwen niya bulan. Anin alin aggew et me-ngetan. §

<sup>11</sup> Kan APU DIOS ey “Bahbahek eya puyek et kastiguek emin hu lawah ni tutu-u tep ya liwat da, anin idan kamampahhiya, yadda manghay niyadda mabunget ni tutu-u. <sup>12</sup> Hahhakkey idalli metdaan ni tutu-u tep ya huyyan meipahding et daddakkel ali bilang ni nemahmah ni balituk nem hi-gada. Em, daddakkel ali bilang ni balituk di Ophir nem ya bilang ni tutu-un metdaan. <sup>13</sup> Hi-gak e hi APU DIOS e Kabaelan tun emin ey peang-ang ku bunget ku et igiwwed ku kabunyan ma-lat maglid eya puyek di yinudungan tu.”

<sup>14</sup> Yadda an nekibebley di Babilon ey mambebesik idan mambanggad di bebley da e henidda makwah ni kapampedugan kamandedweng, niya henidda kalneroh ni newahit e endi mengippattul ni hi-gada. <sup>15</sup> Yadda etan medpap ni hi-gada ey etwiken idan buhul dadda et matey ida. <sup>16</sup> Ey petteyen dadda u-ungnga da e bakdungan dadda hinangga da. Hehgepen mewan ni buhul da baballey da, et pan-alen da hu hipan wadadman. Pandedpapien dadda bibi-i et piliten daddan i-uling.

<sup>17</sup> Kan mewan APU DIOS ey “Igga-gak ida iMedes \* et gubaten dadda iBabilon. Anin ni piga balituk niya silber ni ia-alluk dan hi-gada, ma-lat eleg da ituluy ni mengubbat ni hi-gada, et eleg da hengnguda. <sup>18</sup> Pampennaen daddalli kakat-agu ey eleg dalli hehmekadda gegellang niyadda kaungaunga. <sup>19</sup> Ma-nu tep ya Babilon hu kekakkayyaggudan ni bebley eyad puyek e kaippahhiyaddan bimbebley, nem hi-gak e hi APU DIOS ey bahbahek ali,

\* **13:3** 13:3 Hin-addum ni kaussalan APU DIOS hu sindalun edum ni bebley ni mengapput idan kamengippehelheltap idan helag Israel. Henin nunya e binegan APU DIOS ida iMedes et bahbahen dadda iBabilon ni nengilaw idan helag Israel di bebley da et mambalin idan balud diman. † **13:5** 13:5 Ya edum ni nengamtan ehel ni Hebrew ey kanday: Ya keibbellinan ni “emin nunman ni bebley di Babilon” ey “emin ni bebley di puyek.” ‡ **13:7** 13:7 Jeremiah 6:24 § **13:10** 13:10 Ang-ang yu hu Joel 2:10, ya 2:31 et ya Revelation 6:12-13. \* **13:17** 13:17 Yadda iMedes ey nambebley idad appit ni north e Iran law ni nunya. Huyyaddan iMedes ey nei-dum idan sindalun Cyrus e patul ni Persia et apputen da Babilon eman ni 539 B.C. (Ang-ang yu hu Jeremiah 51:11, ya 51:28, ya Daniel 5:31 et ya 6:28.)

henin impahding kun Sodom et ya Gomorrah. <sup>20</sup> Et endilli law ni ingganah mambebley diman. Yadda kamandaladalan ni Arab ey eleg ida mangkampudman. Anin idan kamampattul et eleg dalli law ippattul animal dadman. <sup>21</sup> Yadman ali panha-adan idan animal di desert. Yadda etan nekabbabhah ni baballey diman ey panha-adan idallin akup niyadda ostris. Anin idallin immeyew ni gelding et yadman ali pan-a-ayyaman da. <sup>22</sup> Yadda dama hayinah niyadda jakal ey manha-ad idallid nebaew ni kakkayyagud ni baballey idan aap-apu. Humman ni nagtud ni aggew ni kebabhahan ni Babilon ey iyyallin medetteng.”

## 14

*Ya nambangngadan idan iisrael ni neilaw di edum ni bebley*

<sup>1</sup> Nem hehmeken alin APU DIOS ida helag Israel. Ibbilang tuddalli mewan ni tutu-u tu niya ibbangngad tuddan mambebley di bebley da. Anin idalli tutu-ud edum ni bebley et um-aliddan mekibbebley ni hi-gada et mei-dum ida damaddan helag Israel. <sup>2</sup> Baddangan alin dakek ni bebley ida helag Israel ma-lat mambangngad idad bebley dan indawat APU DIOS ni hi-gada. Et pambalin daddalli humman ni tutu-ud edum ni bebley ni bega-en da. Ey apputen daddalli etan tutu-un nengenapput lan hi-gada et hi-gadalli law hu pan-ap-apuddan nunman ni nengipelilligat lan hi-gadan nunman.

*Ya keapputan ni patul di Babilon*

<sup>3</sup> Papegen alin APU DIOS hu neihtutan idan tutu-u tu \* ma-lat masiked hu daka lelemunyi niya daka panhelheltapi, tep ya nekalligat ni ngunun daka ippilit ni pengunnun hi-gada. <sup>4</sup> Yallin pengippahdingan tun nunya, ey taltalangaan idallin tuu tu hu patul di Babilon e kanday “Neapput kaya mewan law hu lawah ni patul di Babilon! Neappag law hu tuka pampelhelheltapin tutu-u.

<sup>5</sup> Tep pinappeg law APU DIOS hu kabaelan idan lawah nemnem tun aap-apu, <sup>6</sup> tep gapuh ni nemahhig ni bunget da ey impanhelheltap dadda kumamman hu tutu-un inenapput da. <sup>7</sup> Yan nunya law ey melinggep ida katuutuud kebebbebley eyad puyek, et humman hu, ida kaman-a-appah ni amleng da. <sup>8</sup> Anin idan keyew e belbel niya sedar di Lebanon et ida dama kaman-an-anlan neapputan ni patul di Babilon, tep endi law manlelnegeh ni hi-gada. †

<sup>9</sup> Ya bebley idan netey e Kadungayan ey nandaddan ni mengapngan patul ni Babilon. Anin idan linnawan aap-apun nunman eyad puyek et imminah idan menammun hi-gatu. <sup>10</sup> Kandan hi-gatuy ‘Nambalin ka damelaw ni nekapuy ni nunya e henin hi-gami. <sup>11</sup> Yan nunman ey et-eteng kabaalam, et humman hu, in-ena-appahan dakaddan tutu-u e pinenelpelding da gitalah dan nenaydayaw dan hi-gam. Nem endi law henin nunman tep iyyadya ka law di bebley ni netey. Muka pambakbaktadi niya muka iwawwangngal ida bigih.’ ”

<sup>12</sup> Hi-gam e patul ni Babilon e kameingngadnin madilag ni bittuwen ni kakkabbuhhan ‡ ey et-eteng hu kabaalam ni nunman e kamengennapput ni tutu-u eyad puyek, nem impedep-ah dakan nalpud kabunyan et ma-gah ka eyad puyek. <sup>13</sup> Tep kammud nemnem muy “Pehding kun emin hu kabaalam ku et lektattuy hi-gak hu eta-ta-gey nem yadda keta-ta-geyyan ni bittuwen. Ya yuddungngak ni man-ap-apu ey yad keta-ta-geyyan ni duntug e kapanha-adiddan dios. <sup>14</sup> Li-bahan kudda kulput et man-ingnegeh kamin APU DIOS e Eta-gey ni peteg.” §

<sup>15</sup> Nem impalaw daka kumedek di daul ni puyek di bebley idan nangketey.

<sup>16</sup> Yadda menang-ang ni hi-gam diman ey daka kapanhintetkeli e daka nemnemnema neipahding ni hi-gam. Kanday “Kaw huyya etan kabaalam tun mengiggiwwed eyan puyek ni kamengippetekkut ni nan-ap-apuan ni edum ni patul? <sup>17</sup> Ey kaw beken ni hi-gatu nemahbah ni kebebbebley et mambalin idan eleg mebebley? Niya kaw beken ni hi-gatu hu nengapput idan etta-teng ni bebley e eleg tudda hemeken hu ingkalebut tu et eleg tudda paenamut?” \*

\* **14:3** 14:3 Impakulug APU DIOS ni papegen tu hu neihtutan idan helag Israel di Babilon henin nemappegan tun neihtutan dad Egypt eman lan nebayag. † **14:8** 14:8 Yadda patul di Assyria niyad Babilon ey nebayag ni impalpalnegeh daddan tutu-u da hu kakkayyagud ni keyew di Lebanon et ienamut dad bebley da. ‡ **14:12** 14:12 Beken ni ebuh hu patul di Babilon ni nengadanan ni “madilag ni bittuwen ni kakkabbuhhan,” nem anin daman hi Satanas. (Ang-ang yu hu Luke 10:18.) § **14:14** 14:14 [12-14] Hi Satanas ey ihik tun pilliwen hu nan-ap-apuan APU DIOS. \* **14:17** 14:17 Ya etan patul di Babilon ey eleg tu ibbukyat ida helag Israel ni ingkalebut tu. Hanniman daman Satanas e eleg tu ibbukyat ida ingkalebut tu, nem immali hi Christo ni mengibbukyat idan ingkalebut nan Satanas. (Ang-ang yu hu Luke 4:18.)

<sup>18</sup> Yadda nangketey ni patul ey immen idad kayyaggud ni kulung da. <sup>19</sup> Nem hedini hi-gam man eleg ka meikkullung e heni kan nahpak ni pangan keyew e pemegga bekah et pan-inggagasinan. Mei-ibbeng ali annel mud bitu et meita-bun ni hi-gam hu annel idan sindalun netey di gubat. <sup>20</sup> Eleg daka iyayyaggud ni ikkulung ni henin daka pehding ni patul tep binahbah mu bebley mu et pampateyem ida tuum. Hi-gam e lawah ni patul ey endiddan lawah ni pamilyah mu hu metdaan ma-lat meliwwan idan ingganah. <sup>21</sup> Hi-gayuddan tutu-u, pampatey yudda u-ungngan nunyan patul tep ya nambahulan ida lan aammed da, ma-lat eleg ida man-ap-apu eyad puyek niya ma-lat eleg ida mampengapyan etta-teng ni bebley.

*Ya pemahbahan nan APU DIOS ni Babilon*

<sup>22</sup> Hi APU DIOS e Kabaelan tun emin ey kantuy “Gubbaten ku hu Babilon et bahbahen ku. Anin idan kaungaunga et endi an metdaan ni umtagu. Hi-gak e hi APU DIOS hu nangel idan nunya. <sup>23</sup> Bahbahek humman ni Babilon et pambalin kun kamelellebbeng et pambalyan idan akup niyadda edum ni sisit. Heggadak ali humman ni bebley ma-lat mahegad ni emin hu wadadman. Hi-gak e hi APU DIOS e Kabaelan tun emin hu nangel nunya.”

*Ya pengastiguan APU DIOS ni Assyria*

<sup>24</sup> Insapatah nan APU DIOS e Kabaelan tun emin e kantuy “Ya implanuh kun pehding ey nanna-ud ni meippahding. <sup>25</sup> Bahbahek ida iAssyria di deya bebley kud Israel e pampetteyey ida eyad duduntug ma-lat masiked hu nanhimbunan idan tutu-uk ni hi-gada niya ma-lat eleg ida law manhelheltap. <sup>26</sup> Henin nunya implanuh kun pehding. Makulug ni kastiguen kun emin hu tutu-ud kebebbebley eyad puyek niya nandaddannak ni mengippahding nunya. <sup>27</sup> Hi-gak e hi APU DIOS e Kabaelan tun emin hu namplanuh nunya. Nanna-ud ni pehding ku huyya e endi mengippesikked ni hi-gak!” †

*Ya pengastiguan APU DIOS ni Pilistia*

<sup>28</sup> Huyya neipeamtan hi-gak e hi Isaiah eman ni toon ni neteyyan nan patul e hi Ahas. <sup>29</sup> Kan APU DIOS ey “Hi-gayun iPilistia, ey entan pan-am-amleung yun neteyyan ni patul ni nampehelheltap ni hi-gayu. Tep ya etan u-ungnga tun meihhullul ey nehalhalman nem hi-gatu. Ya pinhed tun e-helen huyya ey hedini netey hu hakey ni uleg ni negitaan ey mewedda impah tun meihhullul ni nehalhalman nem ya inetu. Humman ni impah tu ey henilli dragon ni memahbah ni hi-gayu. <sup>30</sup> Ippaptek kudda nangketewet ni tutu-uk e henin kapemaptey ni kamampattul idan kalneroh tu. Nak ihhamakan idan panhadan dan endi lawah ni meippahding ni hi-gada. Nem peellik ni hi-gayun iPilistia hu nemahhig ni bisil et endi an metdaan ni hi-gayun meteggu.

<sup>31</sup> Hi-gayuddan iPilistia, elet yu nangih yun takut yu. Tep ida kamengelli dakel ni sindalun melpud north e henidda kaman-ehbuk ni dep-ul hu kedakkel da. Neka-let ida niya endi takut da.

<sup>32</sup> Hipa ihhumang tayuddan buhul tayun um-alin melpud Pilistia? ‡ Kantayulliy ‘Inhammad nan APU DIOS ni kinapya hu Zion ma-lat yadman keihhikkugan idan kamanhelheltap ni tutu-u tu.”

## 15

*Ya pengastiguan nan APU DIOS ni Moab*

<sup>1</sup> Huyya impeamtan APU DIOS ni mekapkapyad Moab: Mebahbah ida bebley di Moab, e Ar niya Kir, ni hakey ni hileng. \* <sup>2</sup> Yadda iDibon di Moab ey umlaw idallid daka pan-appisin duduntug et ida mannannangngih diman. Umlelemyung idalli et kep-uhan dalli iming da niya bewek da ey nannangngihan dadda iNebo niyadda iMedeba tep ya neipahding ni hi-gada. <sup>3</sup> Mambalwasiddan langgusih niya mannannangngih ida, anin ni attu kad-an da, yaddad keltad niyaddad baballey da. <sup>4</sup> Medngel alid neidawwi ingganah di Jahas hu nangih idan iHesbon † niyadda iElealeh. Anin idallin sindalud Moab et nemahhig ali takut da et manggegeyey ida.

† **14:27** 14:27 [24-27] Ya inamnuan nunyan inhel nan APU DIOS ey neitudek di Isaiah 37:21-28. ‡ **14:32** 14:32 Huyyaddan um-alin mekihummangan ni melpud Pilistia ey da na-mu ibbaga et mambabaddang idan mekiggubbat ni iAssyria e buhul da. \* **15:1** 15:1 Yadda iMoab ey nebayag ni buhul idan helag Israel. (Ang-ang yu hu 2 Kings 13:20.) † **15:4** 15:4 Ya bebley e Hesbon ey umlaw di hampulut hakey ni kilometroh di appit ni kasimilin aggew meippalpu Netey ni Baybay. Huyyan bebley hu nampatulan nan hi Sihon eman ni nansakupan ni Israel. (Ang-ang yu hu Numbers 21:23-36.)

<sup>5</sup> Nak ida kahehemekan peteg hu iMoab. Ida kamemsik di Soar † niyad Eglat Selishiya. Daka pedalladallan nangih da ey menyed idad keltad ni mampellaw di Luhit. Yadda edum ey ida kamemsik di Horonaim. Daka nangnangihi nebahbahan ni bebley da. <sup>6</sup> Natduk ida kulukul di Nimrim. Nakling ida helek et endi law kameang-ang ni neitnem. <sup>7</sup> Namsik ida tutu-un nan-ale da emin hu limmu da et man-agwat idad Kulukul e Willows. <sup>8</sup> Ya nangih idan iMoab ey kamedngel di bebley da meippalpu Eglaim ingganah di Beer Elim. <sup>9</sup> Ya wangwang di Dibon ey nambalin ni madlang tep napnun kuheyaw ni nangketey ni tutu-u. Nem wada nehalhalman ni pehding APU DIOS idan iMoab tep anin ni wada metdaan ni hi-gada et peunnud tuddalli layon ni memdug ni hi-gada et pampateyen tudda.

## 16

### *Endi hu namnamah idan iMoab*

<sup>1</sup> Humman idan natdaan ni iMoab ni bimmesik di Selah etan di desert ey immipeilaw idan impah ni kalneroh di Jerusalem e humman pengippeang-angan dan neminhed dan mekihhyayup ni patul di Judah. <sup>2</sup> Yadda bibi-in iMoab ey immen idad gilig ni Wangwang e Arnon e henidda sisit ni nedeg-al di buya dan eleg da law amta lawwan da.

<sup>3</sup> Humman idan iMoab ni limmaw di Jerusalem ni nengilaw ni impah ni kalneroh ey kandaddan iJudah ey “Ehel yu anhan hedini hipa kayyagud ni pehding mi. Hemek dakemi et baddangan dakemi, e heni kayu keyew ni kaum-idwat ni metengnin ni panhidduman hedini nandattek aggew ma-lat man-iyiyatu kami anhan di kad-an yu. Bimmesik kamillid bebley mi et mukun kekdewen mi anhan e ittalu dakemi et endi mememmak ni hi-gami. <sup>4</sup> Iebulut dakemi anhan ni manha-ad eyad bebley yu. Iehneng dakemi anhan niya ihwang dakemid buhul \* min neminhed ni memahbah ni hi-gami.”

Hedini endiddalli law hu kamampehelheltap ni edum dan tuu niyadda kamemahbah ni bebley <sup>5</sup> ey mampatul ali hu hakey ni helag David. Kayyagud niya meandeng ali hu pehding tu tep ya et-eteng ni neminhed tun tutu-u.

<sup>6</sup> Kan idan tutu-ud Judah ey “Dingngel mi e nemahhig hu kapampahhiyyaddan iMoab. Niya inamta mi e nebahbah daka penang-ang ni edum dan tutu-u, nem endi silbin daka pampahhiyyai.”

<sup>7</sup> Mannannangngih idalli humman ni iMoab tep manhelheltap ida. Umnangih idalli niya umlemyung ida hedini ninemnem da hu mangkeheng-ew ni kinakinan dad bebley dad Kir Hareset. <sup>8</sup> Nebahbah ida papayyew di Hesbon niyadda leguntad Sibmah e kakelpuin kamekapan meinum ni kaibuttebutteng idan aap-apud kebebbley ni nunman. Makahkang ida humman ni legunta. Dimmateng di Jaser ingganah di appit ni kasimmilin aggew di desert niyad Netey ni Baybay di appit ni kakelinnugin aggew.

<sup>9</sup> Et humman hu, nakka umnangih tep aeyulah ida humman ni leguntad Sibmah. Henidda mewani ni iJaser e nakka umnangih tep ya kameippenahding ni hi-gada. Nak mewani kaumnangih tep yadda bebley di Hesbon niya Elealeh tep endi law meennidman ni pan-am-amlengan idan tutu-u.

<sup>10</sup> Endi law hu pan-am-amlengan ni tutu-un ahiani. Endi law kaumtenekkutekkek niya kaum-ena-appah di leguntan amleng da. Tep endi law kekpalen ni grapes et mekapan meinum. Em, endi law kaman-am-amleng tep pinappag APU DIOS hu pan-am-amlengan da. <sup>11</sup> Nemahhig lemyung kun neipahding ni Moab niya Kir Hareset.

<sup>12</sup> Ida kamea-atu iMoab ni umlaumlaw ni an mandasal idan dios dad dudung ey endi damengu silbitu.

<sup>13</sup> Huyya dedan la inhel nan APU DIOS ni nunman ni meippahding ni hi-gada. <sup>14</sup> Yan nunya ey kantuy “Melebbah tellun toon et meendi hu kinedangyan idan Moab niya hahhakkey ali metdaan ni tutu-u tu. Humman idallin metdaan ey endi elet da.”

## 17

### *Ya pengastiguan nan APU DIOS ni Syria et ya Israel*

<sup>1</sup> Huyya hu inhel APU DIOS ni kebahbahan ni Damascus: “Ya Damascus e et-eteng ni bebley di Syria ey meendilli tep mebahbah. <sup>2</sup> Hanniman damadda hu bebley di Aroer di Syria e meendillin ingganah hu mamebbley diman. Umlaw idalli babakka niya kakalneroh ni manha-ad diman ey endi mengebbul ni hi-gada. <sup>3</sup> Meendilli law hu nehammad ni netuping ni luhud ni Israel e kakeihhikkugin bimbley. Anin ni

† 15:5 15:5 Ya bebley e Soar ey wadad appit ni south ni Netey ni Baybay. (Ang-ang yu hu Genesis 14:2, ya 19:23 et ya 19:30.) \* 16:4 16:4 Huyyaddan buhul ey humman ida na-mu hu sindalun iAssyria e buhul idan iMoab et ya iJudah.

ya Damascus di Syria et sekkupen alin edum ni bebley, et yadda bimmebley diman ni metdaan ey mebabba-ingan ida heniddan ilsrail tep meendilli et-eteng ni kabaelan da. Hi-gak e hi APU DIOS e Kabaelan tun ermin hu nanghel idan nunya.”

<sup>4</sup> Kan APU DIOS ey “Yan nunman alin aggew ey mepappeg hu dayaw idan ilsrail, niya meendi hu kinedangyan da et mambalin idan nekawwetwet. <sup>5</sup> Tep meiwwalleng ali et heniddan payew di Nedeklan di Rephaim hedin neani et endi law neitnem. <sup>6</sup> Hahhakkey idalli tutu-un metdaan di Israel et henilli keyew ni olibah ni pinlag da lameh tu, et wadan ebuh hu dewwa winu tellun wadad utduk tun eleg mapugah. Ey anin ni makallameh ni panga et epat winu liman ebuh hu lameh tun metdaan. Hi-gak e hi APU DIOS e Dios ni Israel hu nanghel idan nunya.”

<sup>7</sup> Yan kedettengan alin nunman ni aggew ey mandinnel idalli law hu tutu-ud Kayyaggud ni peteg ni Dios ni Israel, e namyuh ni hi-gada. <sup>8</sup> Eleg idalli law mandinnel idan kinenapya dan u-ukkul ni dios da, henin Asherah, niya eleg idalli law man-appit ni insensoh ni megihheb di daka pan-appisin kinapya da.

<sup>9</sup> Anin idan bebley tayun nehammad luhud tun nakagguwalyaan, et mehi-yan ali tep makabbabhah ida, et mambalin ni heniddan bebley idan Hibite et yadda Amorite ni nunman e nangkehi-yan tep bimmesik ida bimmebley tep ya takut dadda lan aammed tayun helag Israel.

<sup>10</sup> Hi-gayun ilsrail, ey liniwwan yu hi APU DIOS ni kamengihwang ni hi-gayu niya kamengippaptek ni hi-gayu, e heni et-eteng ni batun yuka keihhikkugi. Anin na-mun ya kekakkayaggudan ni grapes ni nalpud edum ni bebley hu ittanem yu, <sup>11</sup> et yan nunman ni aggew ey neetteng et mewa-wa ey himmabung, et endi damengu yu ellan ni lameh tu. Ebuh kumedek hu ligat ni helheltapen yu.

#### *Ya neapputan idan buhul ni ilsrail*

<sup>12</sup> Iyaddalli dakel ni sindalun mengubbat ni hi-gayu. Heni bungug ni naka-let ni dalluyun di baybay hu ngaleda. <sup>13</sup> Anin ni henidda anggetakkut ni dalluyun et pesikked APU DIOS ida et lektattuy newahit ida, et manglaw idad nangkeidawwin bebley e henidda dep-ul ni intayul ni pewek. <sup>14</sup> Anggetakkut idan hileng, nem hedin newa-wa, man attukaw ida. Henin nunman meippahding idan memabhah niya mampengellan hipan wada eyad bebley tayu. \*

## 18

#### *Ya pengastiguan APU DIOS idan iKus*

<sup>1</sup> Nanna-ud ni meabhah kayun tutu-un nambebley di Kus di gilig idan wangwang e kamedngel hu bingig ni kamantayyatayab ni dudun. <sup>2</sup> Yadda impaeli yun nanlugan di bangkan nekapyad katlubung ey daka iddalan di Wangwang e Nile et lumaw idad edum ni bebley.

Ey hi-gayun impaeli dan kamehahwisik ni an menghel ni kaippaad idan tutu-ud kebebbebley, anemut kayud bebley yun ginedwan wawangwang, hi-gayun etata-gey ni tutu-u e mangkalinah belat yu niya hin-appil ehel yu niya katekkusiddan tutu-ud kebebbebley. Huyya yu ehel di bebley yu. \*

<sup>3</sup> Emin kayun nambebley di puyek, dengel yu huyya. Hedin neita-gey hu bandelah di duntug ey ang-ang yu. Niya dengel yu hedin simmenul hu tangguyup! <sup>4</sup> Kan APU DIOS ni hi-gak ey “Hi-gak ey nakka man-uh-uhdung e nakka ang-ang-anga hu planuh idan buhul idan iJudah, nem nak ni kapemegga i-ineng, henin kakeweddain delnun hileng ni ahiani. Em nakka man-uh-uhdung henin aggew ni emaggeg.”

<sup>5</sup> Huyya inhel APU DIOS ni meippangep idan buhul tayu, tep eleg da ni ilepun umgubat e ida kamamplanuh e ida kamei-ellig di grapes ni kamangkelu-um, nem umkukumna idalli ey hegpaten idan APU DIOS henin kapenegpasin pangan grapes ni eleg umlameh. † <sup>6</sup> Mangkeiwwehhit idalli annel ni sindalu yud payew et pangkanen idallin sisit ingganah mepappeg hu ugew. Hanniman ida dama animal di muyung e wada kenen da ingganah mepappeg hu ketel.

\* **17:14** 17:14 [12-14] Ang-ang yu hu 37:36-37 ni inamnuan nunyan na-hel deya. \* **18:2** 18:2 [1-2] Humman idan impaeliddan bimmebley di Kus ey immaliddad Judah et ehelen daddan aap-apidman hu planuh ni patul dan mei-dum ida sindalun iJudah idan sindalu tu et makigubat idaddan buhul dan iAssyria. Nem hi Isaiah ey inamta tu e beken ni kayyaggud hu da pengebbulutan nunman, et ya kumaddan pehding da ey mandinnel idan APU DIOS ni mengihwang ni hi-gada. Et ehelen tuddan nunman ni tutu-u e um-anemut idad bebley da. Yan nunman ni ennamutan da ey inebig tu nin hi-gada huyyan meippahding alin edum ni aggew. † **18:5** 18:5 Huyyaddan buhul idan iJudah ni bahbahen APU DIOS ey humman ida sindalun Assyria.

<sup>7</sup> Nem medettengan ali aggew ni pampengi-lian idan etata-gey ni tutu-un malinah belat dan i-appit dan APU DIOS e Kabaelan tun emin. ‡ Humman idan tutu-un hin-appil ehel da ey nambbley idad ginenedwaddan wangwang. Katattakkusiddan emin ni tutu-u tep naka-let ida niya makabbunget ida. Pan-i-ali dalli iddawat dan APU DIOS e Kabaelan tun emin di Duntug e Zion e kapenaydayawin hi-gatu.

## 19

### *Ya pengastiguan nan APU DIOS ni Egypt*

<sup>1</sup> Huyyan meippeamta ey mekapkapyallid Egypt: Hi APU DIOS ey nanlugan di kulput \* ni elistun kamenglaw di Egypt. Ida kauntatakut tutu-udman ey hedini yadda etan dios dan kinapyan tutu-u ey ida kamanggegeygey di hinangga tu.

<sup>2</sup> Kan APU DIOS ey "Weddaek ali gubat di Egypt et hi-gada ngun tutu-udman ey nampapatey ida. Anin ni han-aaggi niya nandadagsi baballey da et nampapatey ida. Yadda tutu-ud etta-teng ni bebley ey hi-gada ngu ni nanggugubat ida. Hedini yadda mewani patul ey mampippilliw idan man-ap-apu. <sup>3</sup> Bahbahek hu planuh idan iEgypt et humigadda. Et humman hu, mambegga idallin baddang idan kinapya dan dios da. Ey dalli ibbagaddan kamammagguway niyadda linnawan nangketey hu ittugun da ma-lat amtaen da hedini hipa pehding da. <sup>4</sup> Yalli pambalin kun man-ap-apun hi-gada ey ya makabbunget niya angetakkut ma-lat panhelheltap tudda. † Hi-gak e hi APU DIOS e Ap-anun Kabaelan tun emin hu nanghel idan nunya."

<sup>5</sup> Metduk ali danum di Wangwang e Nile et mema-ganan dalinat tu. <sup>6</sup> Anin idallin alak niyadda kulukul di diman Egypt et mampanhemmu y ida, tep mambabbabbal ni metduk et malking ida katlubbing niya helek diman. <sup>7</sup> Anin idan hipan simmemel niya nangkeintem di gilig ni Nile et mema-ganan ida et itayab idallin dibdib et meendidda. <sup>8</sup> Yadda daka iddinel neitu-wan dad daka ellan deleg diman ey umnangih idalli tep meuppadda. Endilli law silbin benwit da niya tabukul da. <sup>9</sup> Hedini yadda mewani bibi-in kamaman-ebbel ey meendi ngunnuen da, tep endilli law umtemel idan daka ittanem ni ussalen dan daka i-abel. <sup>10</sup> Ey emin ida kamengapyan luput niyadda nelaing ni mekittangdan ey umlelemyung ida.

<sup>11</sup> Yadda ap-apud bebley e Soan ‡ ey endi nemnem da. Anin idan kelalla-ingan ni tutu-ud Egypt et naka-ihhalla daka ittugun ni patul da! Endi mewani baing dan mampahhiyan patul e kanda ni-ngangu ey nahlag ida kunud nangkelaing ni tutu-u niya nahlag idan patul. <sup>12</sup> Attudda mewani ida nangkelaing ni konsihal ni umtugun ni hi-gam e patul, et ehelen dan hi-gam hu planuh APU DIOS e Kabaelan tun emin ni pehding tun Egypt ey? <sup>13</sup> Endi nemnem idan aap-apud Soan. Hedini yadda dama aap-apud Memphis man nehaul ida. Gullat e kuma ey hi-gada hu mengipappanggulun panyaggudan ni bebley dan Egypt, nem beken, tep lawah kumedek intuttuddu da. <sup>14</sup> Impambalin dedan APU DIOS ni endi petek tu hu daka ituttuddu. Et humman hu, kapan-ipahding idelaw ni tutu-ud Egypt ni emin hu hipan panliwwatan. Henidda nebuteng ni kamandangidangi e meikkudlih idad uta da. <sup>15</sup> Endi hakey ni tuud Egypt ni dammutun umbaddang ni mengituttuddun panyaggudan da, kedangyan niya newetwet, eta-gey saad tu niya nebabah.

### *Daydayawen alin Egypt hi APU DIOS*

<sup>16</sup> Yan nunman alin aggew, ey mambalin ida iEgypt ni endi elet da e henidda bii, niya umgenyeygey idan takut dan penang-angan dan nandaddan hi APU DIOS e Kabaelan tun emin ni mengastigun hi-gada. <sup>17</sup> Nemahhig kaya mewani hu takut daddan iJudah, nema-ma hedini ninemnem da etan implanuh APU DIOS e Kabaelan tun emin ni pehding tullin hi-gada.

<sup>18</sup> Yan nunman alin aggew ey ya ehel idan Hebrew hu mei-hel etan idad liman etta-teng ni bebley di Egypt. § Ey hedini mansapatih ida tutu-u, man issapatih dad ngadan APU DIOS e Kabaelan tun emin. Ya hakey idan nunman ni bebley ey mangeddanan alin 'Bebley ni Aggew.'

‡ **18:7** 18:7 Huyyaddan tutu-un nambbley di Kus e memaddang et idan iJudah ni mekiggubbat ni buhul dan iAssyria, ey daydayawen dalli hi APU DIOS e Dios idan helag Israel ni edum ni aggew. \* **19:1** 19:1 Ang-ang yu hu Psalms 68:4, ya 104:3 et ya Matthew 26:64. † **19:4** 19:4 Huyyan makabbunget ni ap-apu ey hi Esarhaddon na-mu e patul di Assyria. Inapput idan sindalu tu hu Egypt eman ni 670 B.C. (Ang-ang yu hu Isaiah 20:4.) ‡ **19:11** 19:11 Ya Soan ey hakey etan idan etta-teng ni bebley ni kapanha-adiddan ap-apud Egypt. § **19:18** 19:18 Yan negibbuhani ni nemabhani idan sindalun iBabilon ni Jerusalem (586 B.C.) ey dakel ida helag Israel ni bimmesik di Egypt et ida mambbley diman.



<sup>19</sup> Yan nunman ali mewan ni aggew ey wadalli mekapyan pan-appitan nan APU DIOS di gawwan bebley di Egypt. Ey wadaddali peehngeng dan batun penginemnemman dan APU DIOS di gilig ni Egypt. <sup>20</sup> Humman keang-angan tu e wada hi APU DIOS e Kabaelan tun emin di Egypt, et hedini wada kamengippehelheltap ni hi-gada et mandasal idan hi-gatu, ey wada itu-dak tun mengihwang ni hi-gada.

<sup>21</sup> Yan nunman alin aggew hu pengippeamtaan APU DIOS idan iEgypt e hi-gatu makulug dedan ni DIOS. Et hi-gatulli law hu daydayawen da niya hi-gatu i-appitan da. Mansapatah idallin hi-gatu ey pehding dalli humman ni insapatah da. <sup>22</sup> Hanniman ali meippahding e kastiguen APU DIOS ida iEgypt, nem peyaggud tudda dama, tep mambanggad idallin APU DIOS et mandasal idan hi-gatu. Dedngelen tulli dasal da et peyaggud tudda.

<sup>23</sup> Yan nunman alin aggew, ey wada kayyaggud ni keltad ni mekapy meippalpu Egypt ingganah di Assyria, et yadda iAssyria ey umlaw idad Egypt ey yadda iEgypt ey umlaw idad Assyria et mandayaw idallin emin ni hakey ni DIOS. \* <sup>24</sup> Yan nunman alin aggew, ey mei-dum hu Israel ni hi-gada. Man-eeddum idalli huuyan tellu et mebedisyonan idalli huuyan bebley tep ya Israel. <sup>25</sup> Et kan alin APU DIOS e Kabaelan tun emin ey "Bendisyonan dakeyun iEgypt e tutu-uk anin ni hi-gayun iAssyria ni lintuk. Ey bendisyonan dakeyu daman iIsrael ni pililik ni tutu-uk."

## 20

### *Ya pengapputan ni Assyria ni Egypt et ya Kus*

<sup>1</sup> Hedin hi Sargon e patul ni Assyria ey immandal tu etan ni ap-apun sindalu tu et gubaten da Asdod e et-eteng ni bebley di Pilistia et sakupen da. <sup>2</sup> Yan nunman hu nanghelan APU DIOS ni hi-gak e hi Isaiah e u-unggan Amos e e-kalen ku patut ku niya balwasik ni langgusih et nak mandaladalan. \* Inu-unnud ku humman ni inhel tu et ipahding kun tellun toon.

<sup>3</sup> Yan nunman ni nansakupan ni Assyria ni Asdod ey kan APU DIOS ey "Hi Isaiah e bega-en ku ey an nandaladalan ni tellun toon e endi balwasi tu niya endi patut tu. Humman immatun ni mekapkapyallid Egypt niyad Kus. <sup>4</sup> Ellan idallin patul ni Assyria ida iEgypt niyadda iKus et pambalin tuddan balud, anin idan u-ungnga, yadda nangkeamma niyadda nangkei-inna. Eleg idalli mampettut niya endilli balwasida † et meang-ang ali sipeda ma-lat kebabba-ingan ni Egypt. <sup>5</sup> Umhulun ali humman ni meippahding, ey medismayah idalli niya umtakut ida kamengiddinnet ni tutu-ud Kus ‡ et yadda etan kamengippahhiyan Egypt et meendilli namnamah da. <sup>6</sup> Yan nunman alin aggew, ey kan idallin nunman ni nambebley di gilig ni baybay di Pilistia ey 'Ang-ang tayu kedinepahding idan tutu-un tayu kapandinnelin umbaddang ni mengihwang ni hi-gatsun pehding ni patul ni Assyria! Hipa makkaw law inna-nu tayun meihwang?'"

## 21

### *Ya neipeamtan meippahding alid Babilon*

<sup>1</sup> Huuya impeamtan Apu DIOS ni hi-gak ni meippahding ni hi-gayun iBabilon: Wadalli memahbah ni hi-gayun heni na-let ni alipuhhapuh di desert. Melpullid angetakkut ni bebley. <sup>2</sup> Inang-ang ku hu angetakkut ni meippahding ali. Wadalli mengihdul ni Babilon ma-lat mebahbah. Hi-gayun iElam niyadda iMedia, kahelikubi yu ma-lat gubaten yudda iBabilon! Meippahding hu hanniman ni Babilon ma-lat paniked Apu DIOS ni daka pengippehelheltapin tutu-ud edum ni bebley.

<sup>3</sup> Nemahhig takut kun nenang-angak niya nangngelak ni nunyan neipeamtan hi-gak et nemahhig degeh ni annel ku e henin kagibbekan biin man-ungnga. <sup>4</sup> Eggak amta pehding ku. Nakka mangegeygey ni takut ku. Nakka um-aabtun kehillengan tu, nem entannit nehileng ey nema-ma kumedek takut ku.

\* **19:23** 19:23 Yan kagetugut ni toon ey nambuhhulan ida iEgypt et yadda iAssyria, nem yallin edum ni aggew ey kayyaggud ali pandadaguyan da tep ya daka pengullug ni AP-APU. \* **20:2** 20:2 Yan nunman ey kae-kaladdan sindalu hu balwasin balud da ma-lat kebabba-ingan da. Hi Isaiah ey an nandaladalan ni tellun toon e eleg mambalwasi et peang-ang tu e meapput idalli iEgypt di gubat et mambalin idan balud ni iAssyria. † **20:4** 20:4 Micah 1:8 ‡ **20:5** 20:5 Ya bebley ni nengadanan ni Kus ni nunman ey humman hu Sudan e sakup ni Ethiopia ni nunya. § **20:5** 20:5 Yan nunman ey inapput ni Assyria hu appit ni north ni Israel (722-721 B.C.) ey dakel ida hu aap-apud Judah ni kamenegeg nan Heseekiah ni an mekihummangan idan iEgypt et bumaddang idan mengubbat ni Assyria. Nem inhelan nan Isaiah hi Heseekiah niyadda tutu-u tu et eleg ida mandinel idan iEgypt ni umbaddang ni hi-gada tep endi kabaelan da. (Ang-ang yu hu Isaiah 30:1-2 et ya 31:1.)

<sup>5</sup> Entanni mewan ey inang-ang ku e ida kamanhahamul di diman Babilon e yimmudung ida tuud yuddungnan ni mekihhemmul e neiap-ap etan mahdel ni luput. Ida kamammangngan ey mengi-innum ida ey endi maptek ey wada simmekuk e kantuy "Hi-gayun aap-apu, immalidda buhul tayu. Pan-ale yu happyyaw yu. Pandaddan kayun mekiggubbat!"

*Ya kameippenahding di Judah*

<sup>6</sup> Entanni ey kan Apu Dios ni hi-gak ey "Lakkay et mu peehngeng hu guwalya etan di netuping ni luhud \* et peamta tu hedini hipa ang-angen tu. <sup>7</sup> Ehel mu etan ni ihha-ad mun mangguwalya e hedini wada ang-angen tun tutu-un nanlugan di kalesah ni ginuyud ni handedwan kebayyu niya tutu-un nantakkay di kamel niya donkey ey peamta tu."

<sup>8</sup> Immehel etan guwalya ey kantuy "Apu, nanhahha-addak eyad nangguwalyaak ni kahilehiling niyan kewa-wa-wa, <sup>9</sup> ey yan nunya law ni ebuh hu penang-angak idan nantutu-nud ni kakalesah niyadda sindalun kamengelli. Endi! Mebahbah tu-wangu hu Babilon! † Niya emin ida kinapya dan dios dan daka deyyawa ey nangebukli et maiwehit di puyek."

<sup>10</sup> Hi-gayuddan tutu-uk di Israel e kamei-ellig di wheat ni netaltag, ey ‡ inhel kun emin ni nunyan hi-gayu hu kayyaggud ni dingngel kun impeamtan APU Dios e Kabaelan tun emin e Dios idan helag Israel.

*Ya na-hel ni meippahding ni Edom*

<sup>11</sup> Huyya neipeamtan hi-gak ni meippahding ni Edom: § Wadad Edom hu kaumehehel ni hi-gak e kantuy "Guwalya, kaw ayepaw pay et han mewa-wa? Ehel mun hi-gak hedini piga pay ni olas et han mewa-wa." <sup>12</sup> Hinumang ku et kangkuy "Kamangkewa-wa law, nem mehiling ali mewan. \* Hedini pinhed muli mewan ni mahman ey pambangngad kan mengibbegga.

*Ya na-hel ni meipanggep ni Arabia*

<sup>13</sup> Huyya neipeamtan meippahding ni Arabia: † Hi-gayun iDedan ni kamantu-tu-nud ni mangkampud desert di Arabia, <sup>14</sup> idwasi yuddan danum hu na-wew. Ey hi-gayun iTema, idwasi yuddan kenen da etan ida bimesik ni hini-yan da bebley da. <sup>15</sup> Imbesikan dadda umpatey ni hi-gadan nampan-ispadah, yadda nampampana niyadda angetakkut ni meippahding di gubat.

<sup>16</sup> Entanni kan Apu Dios ni hi-gak ey "Melebbah hantoon et mepappeg hu dayaw idan tutu-ud Kedar. <sup>17</sup> Hahhakkey idalli metdaan idan ketultuledan ni tutu-ud Kedar ni nelaing ni umpana." Ya AP-APU e Dios ni Israel hu nanghel idan nunya.

## 22

*Ya neipeamtan meippahding ni Jerusalem*

<sup>1</sup> Huyya neipeamtan hi-gak ni meippahding ni Jerusalem e kameingngadnin "Nandeklan ni wada Kameippeamta." \*

Hipa kamekennapkapy? Kele wadaddan emin tutu-ud atep ni baballey dan ida kaman-an-anla? <sup>2</sup> Kele ida kamangngangala hu tutu-u? Ey kele ida kamantetekkuk e daka kaheppuheppula hu pan-am-amlengan da? † Kawehiwehit hu annel idan nangketey ni tutu-u yu, nem beken ni ispadah hu ingkatey da niya eleg ida matey di gubat, tep netey idan upa niya degeh. <sup>3</sup> Bimesik idan emin aap-apu yu ey endi da impalaw ni paneda, anin ni hakey. ‡ Nem anin ni attu bebsikan da et mehemmak ida

\* **21:6** 21:6 Huyyan guwalya ey manha-ad di nanlinikweh ni Jerusalem et ang-angen tu hedini wada kamengellin buhul da. † **21:9** 21:9 Ya bebley ni Babilon ey neapput eman ni 539 B.C. Nem yad New Testament ey hedini na-hel hu Babilon, man ya keibbellinan tu ey yadda eleg mengullug nan Apu Dios e beken etan ni bebley. (Ang-ang yu hu Revelation 14:8 et ya 18:2.) ‡ **21:10** 21:10 Yadda iJudah ey ida kamei-ellig di wheat ni netaltag tep meapput idallid gubat et mambalin idan balud di Babilon. (Ang-ang yu hu Isaiah 39:5-7.) § **21:11** 21:11-12 Ang-ang yu hu Jeremiah 49:7-22, ya Ezekiel 25:12-14 et ya Amos 1:11-12. \* **21:12** 21:12 Ya dammutun keibbellinan nunyan kantun 'kamangkewa-wa law' ey kamangkepappag law hu kapampehelheltpiddan iAssyria idan iJudah. Ey ya dammutun keibbellinan nunyan kantun 'nem mehiling ali mewan' ey anggegannu law hu pengilleppuan idan iBabilon ni mengippehelhetap idan iJudah. † **21:13** 21:13-17 Jeremiah 49:28-33 \* **22:1** 22:1 Huyyan Nandeklan ey humman na-mu hu nandeklan di daul ni Jerusalem. † **22:2** 22:2 Hedini yadda tutu-ud Jerusalem ey ya pan-am-amlengan dan ebuh hu daka heppuheppula, nem eleg da nemneman peamleng hi APU Dios. (Ang-ang yu hu Isaiah 5:11-12.) ‡ **22:3** 22:3 Huyyaddan aap-apu ey matekui ida. Kameang-ang huyyad impahding nan patul e hi Sedekiah niyadda sindalu tu e eleg da iehngeng hu bebley dan Jerusalem e neala et bumsik ida, nem nadpatul idad neihnpud di Jericho. (Ang-ang yu hu 2 Kings 25:4-6.)

et madpap ida. <sup>4</sup> Et humman hu, kangkuy “Hi-yan yuwak et anin ni hakeyyak. Entan tuwak a-alluk et nannangngihak ida eya tutu-uk ni nangketey.”

<sup>5</sup> Yan nunyan aggew hu pengippelhelheltapan APU DIOS, e Eta-gey ni peteg, niya Kabaelan tun emin, ni hi-gatsu eyad Nandeklan ni wada Kameippeamta. Ey yan nunyan aggew hu nemahhig hu takut et eleg amta pehding. Nebabhah hu tuping ni luhud eyan bebley tayun Jerusalem ey kamedngel di duntug hu pekaw idan tutu-un mampebaddang.

<sup>6</sup> Immalidda hu buhul tayun sindalun iElam ni umgubat e nangkalesah ida niya nampampanadda. Hedin yadda dama sindalud Kir, man nanhappiyaw ida. <sup>7</sup> Napnun sindalun buhul tayu niyadda kalesah da hu nangkedeklan ni puyek di Judah e mateba kameitnen. Humman idan buhul tayun nampantakkay di kebayyu ey immen idad eheb ni Jerusalem e ihik dan umgubat.

<sup>8</sup> Yan nenang-angan yun nunyan neipahding e tutu-ud Judah, ey neendi law namnamah yun meihwang, tep nanna-ud ni hehgepen idan buhul yun emin ida bebley yu ey binsik yun an nengaladdan intalu yun almas yu. <sup>9-10</sup> Entanni mewan ey inang-ang yu e wada meiyayyaggud di netuping ni luhud ni Jerusalem et yu ang-angen ida nangkebabah ni baballey et pambukalen yu et usalen yun mengiyayyaggud idan nunman ni nebabah ni luhud. Ey ya impahding yun nan-amung ni danum, <sup>11</sup> ey nengapya kayun et-eteng ni tangkih di nambattanan ni netuping ni luhud ni bebley, et pan-amungan yun danum ni kamelpud lebung di nengin-ahpat. Huttan ida nandinelan yu, nem eleg kayu mandinel nan Apu Dios. Ey hi-gatu namplanuh dedanggu lan emin idan nuntan et han maipahding.

<sup>12</sup> Yan neipahdingan idan nunya ey inhel APU DIOS, e Eta-gey ni peteg niya Kabaelan tun emin, e mannannangngih kayu, umlelemyung kayu, mampemukmuk kayu niya mambalwasi kayun langgusih et pengipeang-angan yun kayu kamanattutuyyu. <sup>13</sup> Nem nan-am-amleng kayu kumedek et kelengen yu baka niya kalneroh et manhamamul kayu. Nan-ekan yu detag et menginnuinnun kayu. Kanyuy “Panhahamul itu kuma ey penginnuinnun itu, tep mettey itu damengun kabubuhan.” §

<sup>14</sup> Immelhel mewan hi APU DIOS e Eta-gey ni peteg niya Kabaelan tun emin, et kantun hi-gak ey “Huyyan liwat da ey eggak liwwana ingganah ketteyyan da. Hi-gak e hi APU DIOS e Eta-gey ni peteg niya Kabaelan tun emin hu nanghel nunya.”

#### *Ya meipahding nan Sebna*

<sup>15</sup> Inhel APU DIOS, e Eta-gey ni peteg niya Kabaelan tun emin, ni hi-gak e umlawwak di kad-an Sebna e kamengippaptek ni baley patul, ma-lat nak ehelen ni hi-gatu e kangkuy <sup>16</sup> “Kaw hipa ka ni-ngangu et kamengapyan kulung mu eyad mabetun duntug e kullunggan idan papatul? <sup>17</sup> Ma-nu na-mu tep makahhapul kan tuu, nem li-biten dakallin APU DIOS et pela-yud daka. <sup>18</sup> Heni kalli bolah ni tetngeden tu et ibheng dakad etan di et-eteng ni bebley et matey kad kad-an idan kalesah ni muka ippahhiya. Kaka mengippehabbaing di baley ni apum ni muka panggunnu. <sup>19</sup> Makulug ni e-kalen dakallin APU DIOS di eta-gey ni saad mu et ibabah daka.

<sup>20</sup> Yan keippahdingan alin nunya ey peeyyag kulli hi Eliakim e bega-en ku e u-ungngan Hilkiyah, et hi-gatu maihullul ni hi-gam. <sup>21</sup> Pebeltan kullin hi-gatu hu balwasim ni kausalan ap-apu, ya ballikid mu niya kelebbengam. Niya hi-gatulli hu pan-emmaddan iJerusalem niyadda iJudah. <sup>22</sup> Pambalin kullin ap-apu e meihhayned ni patul ni helag David et ya immandal tu hu meunnud. Hi-gatulli mengged ni alladdun pamilyah nan David, et ya kei-elligan tu ey ya etan ibbeghul tu ey endi mengiddekkig, et ya illekti tu ey endi mengibbeghul. \* <sup>23</sup> Meihhammad ali pan-ap-apuan tu, e henin nehammad ni neipa-pan kapengi-ikkessin tulda. Hi-gatulli umhulun ni keiddeyyawan ni pamilyah tu.

<sup>24</sup> Nem hi-gatulli pandinnelan emin ni pamilyah tu niya aaggi tu et lektattuy meliggatan. Henilli etan ni hableyyan ni ngunut, henin babangga niya baldih, <sup>25</sup> et ma-nut naka-ihhammad, nem lektattuy nepekhuh et ma-gah et humman ali kepappegan ni emin ida etan ni neihabley.” Hi-gak e hi APU DIOS hu nanghel idan nunya.

## 23

#### *Ya neipeamtan meipahding ni Tyre*

<sup>1</sup> Huyya neipeamtan meipahding alid Tyre: \* Pantete-ul kayun lemyung yu e nampambapor tep nebabah ida yuka dekkalid Tyre anin idan baballey yudman.

§ **22:13** 22:13 Ang-ang yu hu 1 Corinthians 15:32. \* **22:22** 22:22 Ya keibbellinan ni “Hi-gatu mengged ni alladdu” ey ya etan eta-gey saad tun man-ap-apu. (Ang-ang yu hu Revelation 3:7.) \* **23:1** 23:1 Yadda dewwan et-eteng ni bebley e Tyre niya Sidon ey humman ida hu importanteh ni bebley di Phoenixia. (Ang-ang yu hu verses 2, 4 et ya 12.)

Dedngelen yu la huyyan panda-guhan yud Cyprus ni ennamutan yu. <sup>2</sup> Hi-gayu daman kamampanggettang di Sidon ni nambbley di gilig ni baybay ni impekedangan idan kamambiyahed di baybay, ey i-ineng kayu niya lelemyung kayu! <sup>3</sup> Nanglaw kayud edum ni bebley et kayu gumtang niya kayu nanggatang ni begah idan iEgypt ey kayu nekinegosyoh di kebebbley eyad puyek et mambalin eya bebley yun mulkaduh ni emin ni bebley.

<sup>4</sup> Nem yan nunya ey nebabba-ingan ka e Sidon e et-eteng ni bebley di gilig ni baybay. Heni ka etan ni nelahin ni biin endi u-ungnga tu. Et humman hu, heninnuy hu kan etan ni baybay ni hi-gam: “Endi u-ungngak. Eggak patnaan ni man-ungnga niya eggak patnaan ni menge-etteng ni u-ungnga.”

<sup>5</sup> Anin idallin iEgypt et nemahhig ali lemyung dan pengngelan dan kebabbahan ni Tyre.

<sup>6</sup> Et humman hu, pidwaek ni e-helen ni hi-gayun nambbley di gilig ni baybay e pantete-ul kayun lemyung yu! Pan-agwat kayu et patnaan yun umbesik di Tarsis di Spain! <sup>7</sup> Kaw hanneya tu-wa anhan law nambalanan ni kayyaggud ni bebley yu e Tyre e nebehwat lan nebayag? Natnga-ak tep yan nunman ey kaman-an-anladda bimbley niya daka pampalaw tutu-u dan mansekkup ni edum ni bebley. <sup>8</sup> Kaw hipa kannemem ni mengippahding ni hanneyan Tyre, e nandingngel ni bebley niya kametbal di emin ni bebley eyad puyek hu negosyanteh da? <sup>9</sup> Hi APU DIOS e Kabaelan tun emin hu nannemem ni mengihanniman ni nunyan bebley ma-lat meibabah idan emin hu kapakaddeyyawan tutu-ud kebebbley eyad puyek ma-lat mepappeg hu daka pampahhiyyai.

<sup>10</sup> Hi-gayun tutu-ud Tarsis ey nebahbah ida kadekkalin bapor yud bebley yu. Mambalin kayu law ni newetwet ni mampeyyew e heniddan tutu-ud Egypt. <sup>11</sup> Inusal APU DIOS hu et-eteng ni kabaelan tun memabah idan emin ni kebebbley eyad puyek, anin idan bebley ni wadad gilig ni baybay. Bahbahen tudda nehammad ni neluhud ni bebley di Phoenisia † et meendi kabaelan da. <sup>12</sup> Heninnuy hu inhel tudan tutu-ud Sidon: “Nepappeg law hu pan-an-anlaan yu, et anggehennemek kayulli tep panhelheltap dakeyu. Anin ni umbesik kayud Cyprus et endi damengu hu linggep ni biyag yudman.”

<sup>13</sup> Ang-ang yu impahding ni iAssyria ni bebley idan iBabilon. ‡ Ginubat dadda et bahbahen dan emin hu hipan wadadman ni bebley, anin idan netuping ni luhud da, et yadda law animal di mujung hu kamanha-ad diman. §

<sup>14</sup> Hi-gayun nampampapor ey pantete-ul kayun lemyung yu tep mekababbah hu bebley yun Tyre et endi keihhikkugan yu.

<sup>15</sup> Yan nunman alin aggew ey meliwwan hu Tyre \* ni nepitun toon e humman dama toon ni kapambiyagin hakey ni patul. Nem hedin nelabah humman ni bilang ni toon, ey mambalin ali Tyre ni heni etan ni lawah ni biid hakey ni a-appeh. <sup>16</sup> Heninnuy humman ni a-appeh: “Hi-gam ni lawah ni biin tuka iggatang annel tud laki, ey liniwwan daka law. Alam mewan hu ayyuding mu et petetennul mu et kamanliklikweh eyad bebley ey nan-a-appeh ka et matepangan ida mewan lalakki et umliddan hi-gam.”

<sup>17</sup> Hedin negibbuh humman ni nepitun toon ey i-abulut APU DIOS humman ni bebley ni Tyre et ipahding tu hu manggettang ngu dedan henin nunman et umlidda mewan tutu-ud kebebbley eyad puyek et mansilbin hi-gadan heni lawah ni bii e tuka iggatang annel tu. <sup>18</sup> Nem hedin yalli law tangdanan tu ey eleg tu iddulin, nem mei-appit nan APU DIOS et usalen idan kamandeyyaw ni hi-gatu, ma-lat igtang dad kayyaggud ni kenen niya balwasi da. †

## 24

### *Ya pengastiguan APU DIOS idan tutu-ud kebebbley eyad puyek*

<sup>1</sup> Pakabbabhahen alin APU DIOS hu puyek et mambalin ni eleg mebebley ey iwwahit tuddalli tutu-ud kebebbley. <sup>2</sup> Nan-iinggeh ali meippahding ni emin ni tuu, padi niya beken, himbut niya ap-apu, kaumgatang niya kamanggettang, kaum-utang niya

† 23:11 23:11 Huyyaddan bebley ni nakahhammad ni neluhud di Phoenisia ey ya Sidon niya Tyre. ‡ 23:13 23:13

Yadda sindalun iAssyria ni impangulun Sennakerib ey binabah da hu Babilon eman ni 689 B.C. § 23:13 23:13

Ya pinhed nunyan e-helen ey hedin yadda iBabilon man eleg da kabaelan ni ibbeksikan ida buhul dan iAssyria, ey hanniman dama e endi kabaelan idan tutu-ud Tyre niyad Sidon ni ibbeksikan ida buhul da. \* 23:15 23:15 Ya bebley

e Tyre ey nambalin ni beken law ni importanteh eman ni negibbuhuan ni nansakupan ni sindalun Nebukadnessar e patul di Babilon. Ey yadda bimbley diman ey nambalin ida law ni newetwet. Nelabah hu pigan toon ey neiullul ida iPersia ni nansakup ni hi-gada. † 23:18 23:18 [1-18] Ang-ang yu hu Ezekiel 26:1 ingganah di 28:19 et ya Amos 1:9-10.

kamampeuttang, newetwet niya kedangyan. <sup>3</sup> Nanna-ud ni mebahbah hu puyek niya meendi hu kinedangyan tu tep inhel APU DIOS, et humman meippahding.

<sup>4</sup> Mema-ganan ali puyek niya mekling nangkeitnem et endilli silbiddan aap-apud kebebheley eyad puyek. <sup>5</sup> Binahbah idan tuu eya puyek tep ya nemahhig ni liwat da e daka ngenghaya tugun Apu Dios, niya eleg da pannananeng ni u-unnuden etan nehammad ni nekitbalan tun hi-gadan endi pappeg tu. \* <sup>6</sup> Et humman hu, iddutan alin Apu Dios eya puyek et manhelheltap ida tutu-u tep ya liwat da. Hahhakey idallin ebuh metdaan.

<sup>7</sup> Anin idan grapes et mekling idalli et endi law mekapyan meinum et umlelemyung ida tutu-u, tep endi law pan-an-anlaan da. <sup>8</sup> Endilli law medngel ni tenul ni gitalah niya tambourine. <sup>9</sup> Ey endidda law kaman-am-amleng ni kaman-a-appel niya mengi-innum. Lawah daka penamtam ni meinum tep imminglay idan neitu-wan da.

<sup>10</sup> Nangkebahbah hu bebley ey nampankebidda tutu-ud baballey da. <sup>11</sup> Ida kamantetekuk tutu-ud keltad tep endi law meinum ni kaumbuteng. Neendi law hu amleng di bebley. <sup>12</sup> Mebahbah ali hu bebley, anin idan eheb tu. <sup>13</sup> Hanneyalli meippahding di kebebheley eyad puyek, et hahhakkey idalli tutu-un metdaan e henin lameh ni olibah niya grapes hedini negibbuh ni nebugbug.

<sup>14</sup> Nem huyyaddallin hahhakkey ni tutu-un metdaan ey ittetkuk dalli a-appel da tep ya amleng da. Hedin yadda dama tutu-ud appit ni kakelinnugin aggew ey da ene-ehhelen di edum ni bebley hu elaw ni kasina-gey APU DIOS.

<sup>15</sup> Et humman hu, hi-gayun wadad appit ni kasimmilin aggew, ey mahapul ni deyyawen yu dama hi APU DIOS. Anin ni hi-gayun nambelley di gilig ni baybay, ey mahapul ni deyyawen yu dama hi APU DIOS e Dios ni Israel.

<sup>16</sup> Medngel alid nangkeidawwin bebley hu a-appel dan pandeyyaw dan APU DIOS e limpiyuh ni peteg elaw tu.

Nem makaggeh nemnem ku niya nakka umlelemyung tep nemahhig ni lawah ida tutu-un endi hakey ni dammutun pandinnelan, anin ni hipan tuu, tep daka ihhehdul edum da. <sup>17</sup> Hi-gayun lawah tuka pehpending ni tutu-u eyad puyek ey angetakkut hu meippahding ni hi-gayu. Tep heni kayulli mekna ey heni kayulli mantem-uk di bitu. <sup>18</sup> Hedin ibbesikan yu hu angetakkut ni meippahding ni hi-gayu, man meuhbung kayud bitu. Hedin mewan meukat kayud bitu et umbesik kayu ey mekna kayud hulu.

Nemahhig ali hu udan ni melpud kabunyan niya meiggiwwed ali yinudungan ni puyek. <sup>19</sup> Et humman hu, mangkedhak ali puyek et mangkepi-ang. <sup>20</sup> Nemahhig ali yegyeg et henilli nebuteng hu puyek ni kamandangidangi, niya henin a-abbung ni kapan-idengi ni na-let ni pewek. Tep nemahhig hu liwat ni tutu-u et heni kameibbelasi law hu puyek. Metu-lilli et eleg tuli law pakebangun.

<sup>21</sup> Yan nunman ali pengastiguan APU DIOS idan nanliwat ni anghel ni wadad kabunyan † niyadda kamampahhiyan aap-apu eyad ta-pew ni puyek. <sup>22</sup> Emmungen tuddallid hakey ni bitu et yadman keikkellabutan da et lekbian tudda ingganah ni kedettengan ni pengastiguan tun hi-gada. ‡ <sup>23</sup> Me-ngetan ali bulan niya eleg ali law umpetang hu aggew, tep mampatul ali law hi APU DIOS e Kabaalan tun emin. Hi-gatulli man-apu et yallid Duntug e Zion di Jerusalem panha-adan tu, et panhin-aang-angan idan kamengippanggulun tutu-u hu dayaw tu.

## 25

### *Ya a-appel ni penaydayaw nan APU DIOS*

<sup>1</sup> APU DIOS, hi-gam hu Dios ku. Daydayawen daka tep dakel hu impahding mun kaketngain tuu, niya impeannum hu implanuh mun nebayag. <sup>2</sup> Nambahbah mu hu etta-teng ni bebley \* anin idan bebley ni nehammad ni netuping luhud da. Anin idan baballey ni patul e buhul mi et binahbah mu et eleg dalli law ippidwan behwatan. <sup>3</sup> Et humman hu, daka kadeyyawaddan tutu-ud kebebheley ni et-eteng kabaalan da. Ey daka katekkutiddan bebley ni mangkabunget nampambelley. †

<sup>4</sup> Hi-gam kapampebaddangiddan nangketwetwet niya endi kabaalan da hedini wada ligat da. Hi-gam mewan daka keihhikkugi, ma-lat melinggep ida hedini wada pewek niya hedini nemahhig hu petang. Tep yadda lawah ni kapehding idan lawah nemnem

\* **24:5** 24:5 Huyyan nekitbalan nan Apu Dios ey ya na-mu etan nekitbalan tun Noah ni nunman. (Ang-ang yu hu Genesis 9:8-17) † **24:21** 24:21 Huyyadda na-mu hu lawah ni anghel ni nanggehay nan APU DIOS. (Ang-ang yu hu 1 Corinthians 6:3 et ya Ephesians 6:11-12.) ‡ **24:22** 24:22 Ang-ang yu hu Revelation 20:2 et ya 20:7-10. \* **25:2** 25:2 Huyyan et-eteng ni bebley e Babilon, ey ya elaw ni tuudya ey daka nenghaya ni Apu Dios. Kai-ehngeni ni Babilon emin ida lawah ni tutu-u eyad puyek. † **25:3** 25:3 Huyyadda na-mu hu Egypt niya Assyria.

tun tutu-u ey heni kapehding ni na-let ni pewek, <sup>5</sup> ey heni kapehding ni petang di desert. Nem impasiked mu hu kapampahhiyaidan buhul mi e APU DIOS niya impaineng mu tekuk idan mangkabunget ni tutu-u, henin kapehding ni kulput e tuka hennii nemahhig ni petang et tumengnin hu dibdib.

*Indaddan APU DIOS hu Punhahamulan*

<sup>6</sup> Ya eyad Duntug e Zion ey indaddan APU DIOS e Kabaelan tun emin hu hemmülen ni emin ni tutu-u eyad puyek. <sup>‡</sup> Meheng-ew ida kellen niya kayyaggud ida meinum ni indaddan tu. <sup>7</sup> Yadya pengkalan tun kaumhulun ni kalelemyungin tutu-ud kebebbley eyad ta-pew ni puyek. <sup>8</sup> Hi APU DIOS e Eta-gey ni peteg ey bahbaha tu katey, et meendilli law ni ingganah <sup>§</sup> Pu-nadan tullin emin hu lewa <sup>\*</sup> niya e-kalen tullin baing idan tutu-ud kebebbley eyad puyek. Huyyadda hu inhel nan APU DIOS.

<sup>9</sup> Yan nunman alin aggew ey kan idallin tutu-uy "Huyya APU DIOS mi. Hi-gatu indinel mi, et ihwang dakemi. Hi-gatu APU DIOS ni indinel mi. Pan-an-anla itsud nengihwangan daitu!"

*Ya hu pengastiguan nan APU DIOS ni Moab*

<sup>10</sup> Ippaptek APU DIOS huyyan Duntug e Zion, nem bahbaha tudda iMoab et heniddalli dagemin mangkeiggessin et meikamlut di lugit. <sup>11</sup> Ey heniddalli wadad bitu e ihik idan umbudal diman et daka pan-idewdew hu ngamay da e henin kapehding ni kamangkaykay. Hanniman ali pemapegan Apu Dios ni daka pampahhiyyai niya daka kapkapyaan lawah. <sup>12</sup> Ey bahbaha tuddalli hu etata-gey ni netuping ni luhud ni bebley da, et mangkatleb ida et mambalin idan dep-ul.

## 26

*Ya pengippeapputan APU DIOS idan tutu-u tu*

<sup>1</sup> Medettengan ali aggew ni pengia-appahan ni emin ni tutu-ud Judah eyan a-appah: Nehammad hu bebley tayu! Tep hi APU DIOS e kamengihwang ni hi-gatsu ey heni netuping ni luhud ni tayu kakeihhikkugi. <sup>2</sup> Ibeghul yudda eheb ma-lat humgep ida tutu-un kayyaggud elaw dan ida kamekangngu-unnud nan APU DIOS. <sup>3</sup> Hi-gam kamampelinggep e APU DIOS idan kamandinnel ni hi-gam niyadda kamengikakkaguh ni pengu-unnudan dan hi-gam.

<sup>4</sup> Pannananeng tayu dinel tayun APU DIOS e AP-APU, tep hi-gatu hu heni Batun keihhikkugan tayun mengippaptek ni hi-gatsun ingganah. <sup>5</sup> Tudda kaibbabah hu kamampahhiya niya tuka bahbahadda nangkehammad ni bebley da et mangkatleb netuping ni luhud da et ma-gah idad puyek, <sup>6</sup> et panhinggasinan idan nangkewetwet niyadda nanhelheltap ni tutu-u.

<sup>7</sup> APU DIOS neka-andeng elaw mu, muka iddaddan hu kayyaggud niya nedeklan ni dellanen idan tutu-un kamekangngu-unnud ni hi-gam. <sup>8</sup> APU DIOS, hi-gam pandinnelan min mengippeang-ang ni meandeng ni elaw mu, ey ya pinhed min ebuh ey meiddeyyaw hu ngadan mu. <sup>9</sup> Kahilehileg niya kewa-wa-wa ey pinhed kun peteg ni mekiddagum ni hi-gam. Tep ya kakulugan tu ey pakkadek ni um-ali kallin menuwet idan tutu-u, et han da iwalleng hu lawah et ipahding da hu kayyaggud. <sup>10</sup> Tep anin ni piga binabbal muddan lawah ni tutu-u, et kapyu tun eleg da damengu pehding hu kayyaggud. Tagan da kumedek ni mengippahding ni lawah, anin eyad bebley idan kayyaggud ni tutu-u tep eleg da kulluga kasina-gey mu. <sup>11</sup> APU DIOS, anin ni peamtam e mekastigudda et kahing ida. Et humman hu, ipahding mu anhan kebe-ingan dad pengippeang-angam ni et-eteng ni impeminhed mun hi-gamin tutu-um. Ey bahbah mu anhan ida humman ni buhul mu etan di indaddan mun apuy ni kegihheban da.

<sup>12</sup> APU DIOS, nanna-ud ni pelinggep mu hu neitu-wan mi. Tep ya kakulugan tu ey emin impahding min panyaggudan mi ey dammutun impahding mi tep ya baddang mu. <sup>13</sup> APU DIOS e Dios mi, wadadda edum ni nan-ap-apun <sup>\*</sup> hi-gami, nem hi-gam ni ebuh deyyawen mi e Apu. <sup>14</sup> Humman idan nan-ap-apun hi-gami ey endidda law, tep kinastigum ida et matey ida et eleg ida law mambanggad. Meliwwan ida law ni ingganah et endi an mannemem ni hi-gada. <sup>15</sup> APU DIOS, impedakkel dakemin tutu-um niya impambalin mun mahkang hu pambableyan mi, et humman hu, daydayawen daka.

<sup>16</sup> APU DIOS, kinastigum ida tutu-um et umhulun hu daka panhelheltapi ey nandasal idan hi-gam. <sup>17</sup> Impanelheltap dakemi e APU DIOS, henin kapanhelheltapin biin man-ungga e kamampapalak hedin indegeh tu egeh tu. <sup>18</sup> Nanhelheltap kami, nem

‡ 25:6 25:6 Revelation 19:9 § 25:8 25:8 Ang-ang yu hu 1 Corinthians 15:54. \* 25:8 25:8 Revelation 21:4.

\* 26:13 26:13 Huyyaddan edum ni nan-ap-apu ey nalpuddad Egypt niyad Assyria, e hin-addum ni nan-ap-apuddan iisrael

endi silbitu tep endi mi impahding ni panyaggudan mi, niya endi mi impahding ni kehellakniban idan tutu-u eyad puyek. <sup>19</sup> Nem kami kamedinnel e yadda netey ni tutu-um e APU DIOS, ey metegguan idalli et maweda mewan annel dan wada biyag tu. † Umbangun idalli humman ni kaman-u-uggip di kulung da et man-a-appéh idan amleng da. Humman ni biyag ni nalpun hi-gam, APU DIOS, ey heni delnun kakkabbuhhan. ‡ Hanniman ali pehding mu e tegguem ida nangketey.

*Ya penuwetan niya pengippeyaggudan APU DIOS idan tutu-u tu*

<sup>20</sup> Anemut kayud baballey yu e tutu-uk et manlekbi kayu. Pantalu kayu ni, ingganah medeggem hu bunget APU DIOS. <sup>21</sup> Tep melehbeng ali hi APU DIOS ni melpud kabunyan et kastiguen tudda tutu-ud puyek tep ya liwat da. Anin idan pimmatey ni endi nengamta, et meamtaan ali, et mekastigudda tep peang-ang alin APU DIOS ni emin hu impahding dan penegguan tuddan nunman ni pintey da.

## 27

*Ya pengihwangan APU DIOS idan iIsrael*

<sup>1</sup> Yan nunman alin aggew ey kastiguen nan APU DIOS etan angetakkut ni dragon di baybay e Lebayatan hu ngadan tu. \* I-usal tullu hu makattadem ni ispadah tun memetty nunman ni kamanlikulikuh ni dragon.

<sup>2</sup> Yan nunman ali mewan ey ia-appéh idan tutu-un APU DIOS hu meippanggep ni makallameh ni kapantennemin grapes. <sup>3</sup> Heninnuy etan a-appéh “Hi-gak e hi APU DIOS ey nakka ipapatek hu intanem kun grapes niya nakka ipapatek ni dennuman. Nakka guwalyain hileng niyan kawwalwal ma-lat endi umlin memahbah. <sup>4</sup> Tep endi law bunget kuddan tutu-uk e hi-gada kamei-ellig ni neitnem ni grapes. Hedin wadadda umtemel ni gulun niya hebit e kamei-ellig ni buhul idan tutu-uk ey bahbahek ida e lalgabek et makaggiheb idan emin. <sup>5</sup> Nem hedin eleg pinhed idan buhul dan mebahbah ey pakkadek mansukkuh ida et makidagyum idan hi-gak. Em, mahapul ni mekidagyum idan hi-gak et eleg kudda bahbahen.”

<sup>6</sup> Medettengan ali aggew ni kei-elligen idan tutu-uk ni iIsrael e helag Jacob di keyew ni inhammad tun limmamut et manlameh et lektattuy neihinap di kebebbley eyad puyek hu lameh tu.

<sup>7</sup> Eleg meinggeh nengastigun APU DIOS idan tutu-u tun iIsrael di nengastigu tuddan buhul da, tep nehalhalman nengastigu tuddan buhul da et dakel matey ni hi-gada. <sup>8</sup> Hedin ya nengastigu tuddan tutu-u tu ey impalaw tuddad edum ni bebley † e henidda intayab ni na-let ni dibdib ‡ ni nalpud appit ni kasimmilin aggew. <sup>9</sup> Nem meliwwan ali hu liwat idan helag Israel hedin bahbahen dan emin ida batun kinapya dan pan-appitan dan edum ni dios da, hedin e-kalen dan emin hu inha-ad dan pingenemnemman dan dios dan hi Asherah, niya hedin bahbahen dadda altar ni daka pengi-appisin daka gihheban bangbanglu.

<sup>10</sup> Yadda bebley ni nehhammad ni neluhud di Israel ey mangkebahbah ali et meendidda nambebley diman et endillin hekey tuu et henin desert. Mambalin idalli humman ni bebley ni kudal et panha-adan niya pengngannan ni baka et pammukmukan dalli keyew. <sup>11</sup> Mema-ganan idalli pangan keyew et ma-gah ida et pan-amungen idan bibi-i ma-lat itungu da. § Humman kastiguddan bimmebley diman, tep endi nemnem dan inwalleng da hi APU DIOS, et mukun hi-gatu e nanletun hi-gada ey eleg tudda law hehmeka.

<sup>12</sup> Yan nunman ali, ey hakkehakkeyen nan APU DIOS ni emmungen ida tutu-u tu meippalpud Euphrates ingganah di pappeg ni Egypt e heni tudda illiken et meappil hu nabgahan di nekupeh.

<sup>13</sup> Yan nunman ali mewan, ey umtenul tangguyup ma-lat ayagan dadda helag Israel ni wadad Assyria niyad Egypt, et umliddad duntug nan APU DIOS di Jerusalem ni menaydayaw ni hi-gatu.

## 28

*Yalli meippahding di Samaria*

† 26:19 26:19 Job 12:2 et ya 19:26. ‡ 26:19 26:19 Ya delnun kakkabbuhhan ey makahhapul dad Israel ni ketegguan ni intanem da. \* 27:1 27:1 Huyyan Lebayatan ey tuka i-ehngeng emin ida tuun buhul Apu Dios. † 27:8 27:8 Huyya na-mu hu meippanggep ni ngilawwan idan sindalun iBabilon idan iIsrael et dadda ikelabut di bebley da. ‡ 27:8 27:8 Jeremia 4:11-12 § 27:11 27:11 Yadda iJerusalem ey ida kamei-ellig di pangan keyew ni nema-ganan e endi law kei-ussalan tu, e ittungun ebu.

<sup>1</sup> Nanna-ud ni mebahbah etan et-eteng di bebley e Samaria. Kayyaggud ni peteg ang-ang tu niya nedeklan e mateba kameitnem, nem nanna-ud ni mebahbah ali humman ni bebley ni kaigaggayaddan kamambuttebutteng ni aap-apun nunman ni bebley. Em, nanna-ud ni meendilli kakinayyaggud ni ang-ang tu, e heni nakling ni habung. <sup>2</sup> Tep wadaddalli ittu-dak ni Ap-apun mengubbat ni hi-gada. Humman idallin um-alin mengubbat \* ni hi-gada ey naka-let ida ey et-eteng kabaelan da. Henidda dallallu, henidda na-let ni udan niya henidda elwang ni tuka iddeplug ni emin hu wadad puyek. <sup>3</sup> Mebahbah ali humman ni bebley e Samaria ni kaigaggayaddan kamambuttebutteng ni aap-apu, <sup>4</sup> ma-lat meendi dayaw nunman ni kayyaggud ni bebley. Henilli etan ni nemangulun neluum ni lameh ni fig e hedin wada nenang-ang, man daka geggannuan ellan ni kinan da.

<sup>5</sup> Yan kedettengan alin nunman ni aggew, ey mei-ellig hi APU DIOS e Kabaelan tun emin di kayyaggud ni habung ni penget ni meipnget di uluddan tutu-un metdaan. <sup>6</sup> Ang-angen tullu ma-lat limpiyuh pannemnem idan huwet da. Ey pekedhel tu nemnem idan guwalyad eheb, ma-lat mandaddan idan menangan um-alin umgubat.

<sup>7</sup> Nem yan nunya ey ida kamambuttebutteng aap-apuddan iJudah. Anin idan papaddi niyadda prophet da et ida kamambuttebutteng et ida kamandangidangiw. Eleg da amta pehding da tep nemahhig buteng da. Hedin yadda mewan prophet da ey eleg da han-awat hu pinhed Apu Dios ni peamtan hi-gada. Hedin yadda dama papaddi, ey eleg da han-ipenuh hu diklamuh ni kai-aliddan tutu-un hi-gada. <sup>8</sup> Neutaan ni emin hu tebol da niya kawehiwehit hu uta da e endi eleg mautaan.

<sup>9</sup> El-eleg ni-ngangu mewan daka pannemnem ni hi-gak e kanday “Kaw hipa na-mu kapannemnem nunman ni tuun hi-gatsu et daitu tuttudduan? Kaw hipa kamenepplu ni tuka ittutuddu? Humman ni tuka ittutuddu ey kayyaggud ni ebuh idan geggellang ni kaman-eddal ni um-ehel. Et humman hu, heballi ngu hi-gada tu tuttudduan. <sup>10</sup> Tuka penidpidwaan emin tuka e-e-hela e nedusi. Inhel tu, ni inhel tu.”

<sup>11</sup> Makneg ida e da-ak kangenghayan mantuttuddun hi-gadan edum kun iIsrael. Et mukun mebe-ingan idalli tep peellillin Apu Dios hu tutu-un melpud edum ni bebley e hin-appil ehel da † et sakupen da bebley da et hi-gada mantuttuddun hi-gada. <sup>12</sup> Pinhed Apu Dios ni iddawat idan tutu-u tu hu panyaggudan da niya pan-iyyatuan da ma-lat eleg ida makalligatan di biyag da, nem eleg da dedngela tugun tu tep kahing ida. <sup>13</sup> Et humman hu, tuttudduan idallin APU DIOS et penidpidwaan tu ey hinakkehakkey tun ittutuddu hu pinhed tun amtaen da. Nem kapyu tun eleg idalli metuttuddui. Et humman hu, heniddalli mangkehellapdung et meihungbub ida et mangkaliputan ida niya medpap ida et mambalin idan balud.

*Ya etan nehammad ni batun meikkapyad Zion*

<sup>14</sup> Dengel yu e mangkanghay ni aap-apud Jerusalem eya imbagan APU DIOS. <sup>15</sup> Yuka igaggaya e kanyuy nekihummangan kayun katey, niya kanyuy nekitbal kayuddan wadad Kadungayan. Et kanyu na-mu nem meihwang kayud um-alin ligat, tep kayu kamandinnel di itek niya haul. <sup>16</sup> Nem heninnuy hu kan APU DIOS e Eta-gey ni peteg: “Ihha-ad kud Zion hu batun kekakkayyaggudan ni meippegnad. Ya tuun mengiddinnel nunman ey eleg medismayah. ‡

<sup>17</sup> Ya meandeng ni kapehding niya kakinayyaggud hu keippuunan ni pengibbehwatak ni nunya.

Peellik ali dallallu niya elwang et pan-ideplug tudda itek ni yuka pandinneli. <sup>18</sup> Endilli silbin nekihummangan yun katey, anin ya nekitbalan yud Kadungayan, tep eleg kayu meihwang hedin medettengan hu aggew ni panhelheltapan yu. <sup>19</sup> Kewa-wa-wa niya kahilehileng ey heni dakeyu iddeplug ni elwang tep ya pampehelheltap kun hi-gayu.” Nemahhig takut yu hedin ewwatan yu huyyan peamtak.

<sup>20</sup> Heni kayulli etan ni tuud ab-abig e nengapyan unggippan ni ansikkey, et inna-nukkaw tun mengukyad ni heli tu. Mawenit mewan hu wangal tu et eleg mewengngali annel tu.

<sup>21</sup> Um-alilli hi APU DIOS e nemahhig bunget tu et ipahding tu hu henin nengapputan tuddan iPilistia di Duntug e Perasim niyadda Amorite di nandeklan di Gibeon. § Um-alillin mengippahding ni kamengippetngan ngunu tu. Nanna-ud ni kastiguen tuddalli tutu-u tu.

\* 28:2 28:2 Human hu patul di Assyria niyadda sindalu tu. † 28:11 28:11 Huyyaddan tutu-u ey iAssyria e hin-appil ehel da. Ang-ang yu 1 Corinthians 14:21. ‡ 28:16 28:16 Ang-ang yu hu Romans 9:33, ya 10:11 et ya 1 Peter 2:6. § 28:21 28:21 Ang-ang yu hu 2 Samuel 5:17-21 et ya Joshua 10:1-11.



<sup>22</sup> Entan tu ngi-ngi-ngii eya e-helen kun hi-gayu, tep hedin nanengtun kahing kayu ey nema-ma hu kastigu yu. Hi APU DIOS e Ap-apun Kabaelan tun emin ey inhel tun hi-gak e bahbaha tun emin eya bebley tayu.

*Ya kalinaing nan APU DIOS*

<sup>23</sup> Et humman hu, dengel yu eya e-helek ni hi-gayu. <sup>24</sup> Hedin ya kamampeyyew ey beken ni ya man-elladun ebuh hu pehpehding tun kenayun. Niya beken ni ebuh hu mengiyayyagud ni pantenneman tu hu ngunnen tun kenayun. <sup>25</sup> Tep hedin negibbuh ni indaddan tu, man tuka tennemin cumin hu gilig tu, ya wheat di pangil, barley di pangil, ey sinneman tun dill niya spelt di pangil. <sup>26</sup> Inamta etan ni kamampeyyew pehding tu tep intuttuddun APU DIOS ni hi-gatu hu kayyagud ni pehding tu. <sup>27</sup> Eleg tu mewan usala hu mebel-at ni la-lun menaltag ni bukel ni dill niya cumin tep ya angepaw hu tuka usala. <sup>28</sup> Tu mewan kaang-anga et hedin man-illik ey eleg meguddu begah tu. Tuka illika ineni tud helin kaliton, nem tuka pebababbal ma-lat eleg magudu. <sup>29</sup> Emin ida huyyan laing ni tuu ey nalpun APU DIOS e Kabaelan tun emin e kayyagud tuka penuggun niya hi-gatu kelalla-ingan.

## 29

*Ya pengippeang-angan nan APU DIOS ni bunget tuddan ijerusalem*

<sup>1</sup> Nanna-ud ni mekababbah ali Jerusalem e kad-an ni kapan-appisin APU DIOS niya nambebleyan lan David. Katootoon ni nampiyestah kayu ni nan-appit kayu, nem endi damengu silbitu. <sup>2</sup> Tep peellillin APU DIOS hu pengastigu tun hi-gayu et bahbaha tun bebley yun kameingngadnin "Pan-appitan nan APU DIOS." Mannannangngih kayulli niya umlelemyung kayu, tep huttan ni bebley yun Jerusalem ey mambalin alin heni pan-appitan e nekukkuheyaw. <sup>3</sup> Peelillin APU DIOS hu buhul yu et likwehen da bebley yun Jerusalem, ey tebbaha dan puyek niya ippigil da batud tuping ni luhud yu, et pengidlanan dan menggep ni hi-gayu et bahbaha da bebley yu. <sup>4</sup> Mekabbabbah kayulli et heni kayu immen di dallem ni puyek et mambalin ali ehel yun heni ehel ni banig e itutubbu yu et eleg medngel.

<sup>5</sup> Nem endi maptek ali ey umtakot idallin emin hu buhul yun mengubbat ni hi-gayu, et nealay attukaw ida e henidda degin intayab ni dibdib. Anin idan anggetakkut ni sindalu da et umbesik ida. <sup>6</sup> Tep nekekemtang ey i-alin APU DIOS e Kabaelan tun emin hu na-let ni pewek, ya kidul, ya yegyeg niya kamanhihinyab ni apuy et ihwang dakeyu. <sup>7</sup> Endien tun emin ida neamong ni sindalun memabbah ni Jerusalem, anin idan emin ni asal da. Henilli i-innep humman ni meippahding ni hi-gada e hedin inggibek, man attukaw la. <sup>8</sup> Heni mewan ni neupan tuun ini-innep tun nengan, nem entannit inggibek tu ey nanengtun naka-upa. Ey heni etan ni naka-wew ni tuu e ini-innep tun imminum ni danum, nem entannit inggibek tu ey nanengtun naka-wew. Hanniman ali meippahding idan dakel ni bebley ni mengubbat ni bebley e Zion e ida kamakaddinnel ni mengapput ida, nem meapput ida kumedek.

<sup>9</sup> Hi-gayun aaggik ni ijerusalem, kele eleg yu han-awat ida humman? Kaw nekulap kayu? Tam heni kayu nebuteng ey endi ininum yu. Kayu kamandangidangi, nem eleg kayu manginum. <sup>10</sup> Tep heni impaelin APU DIOS ni hi-gayu hu nemahhig ni ugip et makimit hu mateyu. Yadda prophet hu heni mateyun tutu-u, nem hinenian APU DIOS mateda. <sup>11</sup> Et humman hu, neitlu hu keibbellinan idan nunyan meippeamtan hi-gayu et eleg yu law han-awat. Heni etan ni napketan ni neludun ni papil e hedin inlaw yu etan di nengamtan mambidbid et yu pebidbid ni hi-gatu, man kantuy "Eleg mabalin ni bidbid tep napketan." <sup>12</sup> Hedin inlaw yun eleg mengamtan mambidbid, man kantu mewan ey "Eggak amtan mambidbid."

<sup>13</sup> Kan APU DIOS ey "Kan idan nunyan tutu-uy da-ak kadaydayawa, nem eleg kaya, tep ehel dan ebuh. Ya kakulugan tu ey endin hekey daka pannemnem ni hi-gak. Et humman hu, endi silbi tun da-ak penaydayawan ni hi-gada, tep ya elaw ni daka pandeyyaw ni hi-gak ey daka u-unnuda hu kameu-unnud ni tuttuudun tuu. † <sup>14</sup> Et mukun ippahding kuddallin nunyan tutu-u hu kamengippetngan pengastiguk ni hi-gada. Pambalin kun endi nemnem idan nelaing ni hi-gada et endi silbin laing da." ‡

<sup>15</sup> Nanna-ud ni meabbah idalli humman ni tutu-un kanda na-mu nem eleg amtan APU DIOS hu planuh da. Nekattalam idan namplanuh e kanda na-mu nem endi kamenang-ang-ang niya endi mengamta. <sup>16</sup> Anin anhan et nahnahwidda! Hipa makahhapul, ya kamengapyan pulan banga winu ya pula? Kaw dammutun ya etan nekapyu ey kantu

\* **29:10** 29:10 Romans 11:8 † **29:13** 29:13 Matthew 15:8-9 et ya Mark 7:6-7 ‡ **29:14** 29:14 Ang-ang yu hu 1 Corinthians 1:19.

etan ni nengapyan hi-gatuy “Eleg muwak kapyae.” Ey kaw dammutun kantuy “Eleg mu amta muka pehpending!” §

<sup>17</sup> Nemnem yu eya kan idan tutu-uy “Eleg umbayag ey mambalin hu muyung di Lebanon ni payew et ya etan payew e kayyaggud kameitnem ey mambalin ni mahdel ni muyung.” \*

<sup>18</sup> Yan kedettengan alin nunman ni aggew, ey dedngelen ida law ni netuleng hu libluh ni meibbidbid ni hi-gada. Ey yadda nekulap e eleg da enang-angen kawwalwal ey han-ang-ang da law. † <sup>19</sup> Yaddalli newetwet niyadda nebahah ni peteg ni tutu-u ey gibbeken dalli amleng ni kamelpun APU DIOS e Kayyaggud ni peteg ni Dios idan iIsrael. <sup>20</sup> Meendilli law ida kamengippehelheltap ni edum dan tuu niyadda kamangngenghay nan Apu Dios, tep emin ida ihik ni manliwwat ey mebahbah ida. <sup>21</sup> Anin idan kamengmenghel ni beken ni makulug ni meippanggep ni edum ni tutu-u, yadda kaumhanin kekastiguan idan nambahul, yadda kaman-ittek ni tistigu niyadda endi bahul tu hu mekastigu, et bahbahen idallin APU DIOS.

<sup>22</sup> Et humman hu, yan nunya ey hi APU DIOS e Dios idan iIsrael e nengihwang nan Abraham di ligat ey kantuy “Hi-gayun tutu-uk, ey eleg kayu law mebe-ingi ey endi law tekkutan yu. <sup>23</sup> Hedin ang-angen yulli e kamangedakkel ida u-ungnga yun iddawat kun hi-gayu, ey han yulli law inebulut e hi-gak hu Kayyaggud ni peteg ni Dios idan iIsrael. Deyyawan yuwak ali law niya metnga kayullin hi-gak. <sup>24</sup> Yan nunman alin aggew ey han-awat idalli law ni kamandewadewa ni yadda dakel hu lilih dan kaumngudungudu ey ebbuluten dalli law ni metuttudduan.”

## 30

*Ya endi silbi tun nekitbalan ni Judah di Egypt*

<sup>1</sup> Huyya inhel APU DIOS idan mangkanghay ni tutu-u tu e kantuy “Yadda iJudah ey nanna-ud ni mekastigudda tep da-ak kangengngehaya. Yadda implanuh dan pehding da ey beken ni hi-gak kan planuh. Ida mewan ni-ngangu kamekihummangan idan eleg mengullug ni impahding da inuhummangan dan eggak pinhed. Et humman hu, daka pan-edumi liwat da. <sup>2</sup> Ida kaumlaw di Egypt ni mambeggan baddang ey eleg da ibbagan hi-gak hedin hipa ittugun kun hi-gada. Pinhed dan ya Egypt hu memaddang ni hi-gada, et idinel da etan ni patul diman hu mengihwang ni hi-gada. <sup>3</sup> Nem meendilli kabaelan etan ni patul ni memaddang ni hi-gada, tep ya kapemaptekan ni Egypt ey mambalin ali kumedek ni kebe-ingan da. <sup>4</sup> Tep anin ni wadadda opisyal idan iJudah di Soan niyad Hanes ni mekihummangan ni meippanggep ni panyaggudan ni bebley dad Judah, <sup>5</sup> et mantuttuyyudalli iJudah ni da nengidinelan ni nunman ni eleg meiddinnet ni bebley, tep eleg dallin hekey baddangidda.”

<sup>6</sup> Huyya kan APU DIOS ni meippanggep idan animal di desert di south: “Humman idallin itu-dak dan mengi-ehngeng ni bebley da ey mandellan idallid angetakkut ni bebley e wadadda layon, yadda uleg ni umpatey niyadda kaumtayab ni dragon. Pangkalga dalli donkey da niya kamel dan nangkebalol ni da iddawat idan iEgypt, nem endilli damengu ibbaddang dan hi-gada. <sup>7</sup> Endilli silbitu hu baddang ni Egypt. Et humman hu, nginedanak humman ni bebley ni ‘Dragon ni endi han-ipahding tu.’”

*Ya pangngenghayan idan tutu-un APU DIOS*

<sup>8</sup> Inhel Apu Dios ni hi-gak e ittudek kud libluh hu elaw idan tutu-u, et wada neihammad ni keittuddekan ni kalinawah da. <sup>9</sup> Manghay idan peteg. Itek ni ingganah hu daka e-hela niya eleg da hengguda hu tuttuudun kamelpun APU DIOS. <sup>10</sup> Ey da ni-ngangu kapei-ineng ida prophet e kanday “Hiyya law ida huttan ni yuka e-e-helan hi-gamin kanyun neiptek. Ehel yu kumaddan ida etan pinhed min dedngelen niyadda etan kayyaggud ni meippahding alin hi-gami, anin ni beken ni makulug. <sup>11</sup> Entan dakemi ngu heli-wa, tep eleg ni law pinhed ni dedngelen hu meippanggep ni Kayyaggud ni peteg ni Dios idan helag Israel.”

<sup>12</sup> Nem heninnuy hu humang nunman ni Kayyaggud ni peteg ni Dios idan helag Israel e kantuy “Eleg yu hanguden ida inhel kun hi-gayu niya yuka iddinel di bunget niyad talam. <sup>13</sup> Nekalliwtan kayu! Et humman hu, nanna-ud ni mebahbah kayu henin etagey ni tuping ni nadhak ingganah di henggeg tu, et nekekemtang ali ey megday. <sup>14</sup> Em, mekababah kayulli et heni kayulli etan ni nekabbabah ni pulan bangan endin hekey

§ 29:16 29:16 Ang-ang yu hu Isaiah 45:9 et ya 64:8, Jeremiah 18:1-6 et ya Romans 9:19-21. \* 29:17 29:17 Meippeamta eyad na-hel e yadda endi bilang tun tutu-u ey meippeta-gey ida nem yadda kamampahhiyan kedangan ey meibbahah ida. † 29:18 29:18 Ang-ang yu Isaiah 32:3, ya 35:5, ya 42:7. Ang-ang yu dama Matthew 15:30-31 et ya Luke 4:18.

hu e-etteng ni pi-diten ni dammutun penellukduk ni ngalab di dep-ullan, niya penaklung ni ekket ew ngun danum di bubun.”

<sup>15</sup> Kan mewan APU DIOS e Eta-gey niya Kayyaggud ni peteg ni Dios ni Israel ey “Gullat et ni mambanggad kayun mengiddinnel ni hi-gak, ey meihwang kayu, mambalin kayun na-let niya umlinggep kayu. \* Nem eleg, tep nanengtun manghay kayu. <sup>16</sup> Implanuh yu ni-ngangun mewan hu pehding yu e mantakkay kayud neka-let ni kebayyu ma-lat bumsik kayu. Ma-nu tep em, pakkaw ni umbebsik kayu. Ey kanyu nem neka-let hu kebayyu yun umbebsik, nem eleg yu inamta e na-na-let anhan law hu kebayyuddan memdug ni hi-gayu. <sup>17</sup> Anin ni hakey ni ebuh ni sindaluddan buhul yu, et dammutun hampedug tu hanlibun hi-gayu. Ey anin ni ebuh hu liman buhul yu et pepsik dakeyun emin, et endi an metdaan ni hi-gayu et ebuh etan neipelatan ni bandelah yud ta-pew ni duntug ni metdaan.”

<sup>18</sup> Nem nanengtun hehhegeden APU DIOS hu pantuttuyuan yu et hemeke dakeyu. Tep hi-gatu e Dios ey meandeng emin hu tuka pehding. Et humman hu, man-am-amleng ida kamengiddinnel ni hi-gatu.

*Bendisyonan APU DIOS ida tutu-u tu*

<sup>19</sup> Hi-gayun iJerusalem, medettengan ali aggew ni eleg kayu law umnangih. Kabbabbal ni peteg hi APU DIOS et hedin mampehemhememek kayun hi-gatu, ey baddangan dakeyu. <sup>20</sup> Anin ni kantu et iddawtan dakeyun Apu Dios ni panhelheltapan yu, et wadan ingganah ni mengituttuddun pehding yu. <sup>21</sup> Hedin yuka pan-ihhingngi dellanen yu ey wadad dingkuggan yu e kantuy “Entan tu idlan ditan, yaddih pengidlanim.” <sup>22</sup> Yadda kinenapyan yun dios yu ey iwwalleng yuddalli law et pan-ibbeng yudda, anin ni na-meh ni balituk niya silber. Ibbilang yuddallin lugit et kanyulliy “Imay kuma et ibbeng daka, endi damengu silbim!”

<sup>23</sup> Peelli mewan APU DIOS hu udan et tumattaba intanem yu, et dakel illameh tun enniem yu, et anin idan bakeyu et eleg ida mekullangin kennen da, tep dakel. <sup>24</sup> Yallin nunman mewan, ey ya kekakayyaggudan hu pekkan yun newang yu niya donkey yun yuka panggunnud payew yu, et beken ni ya helek ni ebuh. <sup>25</sup> Yan nunman alin aggew ni pengapputan yuddan buhul yu e pambahbahaen yulli pangguwalyaan da ey pampetteyen yudda, ey kahiuutbul ali hu danum di duduntug. <sup>26</sup> Yalli bulan ey makabnang e henin aggew. Nemahhig ali dama benang ni aggew e henillin benang ni pitun aggew ni nan-aaddum. Hanneyalli meippahding ni pengippeyaggudan APU DIOS idan tutu-u tun liniputan tu.

*Ya pengastiguan APU DIOS ni Assyria*

<sup>27</sup> Meang-ang alid neidawwi hu ellian APU DIOS. Mei-ellig hu bunget tud kaumhinyab ni apuy. Linikweh ni mahdel ni ahuk ey umngengguh hu ehel tu e heni apuy. <sup>28</sup> Hedin ya yayyah tu, man na-let e heni na-let ni elwang e tuka pandeplugan emin hu buhul tu. Tep yalli pehding tu ey henilli yekkayaken tu tutu-ud kebebbley et mebahbah ida lawah ni bimmebley e heniddalli nabngat ni kebayyun meigguuyud di hin-appil ni dalan.

<sup>29</sup> Nem hi-gayun tutu-un APU DIOS, ey man-am-amleng kayulli niya man-a-appah kayu, henin yuka pan-am-amleng piyestah yun hileng. Man-am-amleng kayullin henin amleng yun yuka pengipatnuliddan ingnging yun yuka lawwid Tempol APU DIOS e nengihwang ni hi-gatsun helag Israel.

<sup>30</sup> Pedngel alin APU DIOS hu kamengippetngan ehel tu. Yalli pehding tun mengippey-ibbek ni bunget tun emin ni tutu-u ey peelli tu kaumngengguh ni apuy, ya nemahhig ni udan, ya na-let ni pewek niya dallallun memahbah ni hi-gada. <sup>31</sup> Nemahhig ali takut idan iAssyria ni pengngelan dan ehel APU DIOS niya gibbeken dalli nemahhig ni pengastigu tun hi-gada. <sup>32</sup> Yan nunman alin pengastiguan APU DIOS idan iAssyria ey man-am-amleng ida tutu-u tu et pampetnul dalli gitalah ey pannebaen dalli gangha. Tep hi APU DIOS law hu mekiggubhat idan buhul dan iAssyria. <sup>33</sup> Yan nunman dedan ni nebayag, ey wada neiddadan ni et-eteng ni pan-eppuyan e Tophet † hu ngadan tun pengihheban dan patul ni Assyria. Humman ey edallem ey mahkang ni neku-kuan ni nengipu-ulan dan dakel ni keyew. Yayyahan alin APU DIOS ni apuy et umtebel.

\* **30:15** 30:15 Isaiah 32:17 † **30:33** 30:33 Ya Tophet ey Gehenna hakey ni ngadan tu e ibbengan ni lugit di Jerusalem. Yadman dama ibbengngan idan annel ni netey ni nambahul niyadda netey ni animal ni megihheb. Huyyan inhel Isaiah idan edum tun helag Israel ey meippanggep ni patul di Assyria niyadda sindalu tun mangketey di gubat e henidda megihheb di Gehenna. Yan eman ni nelabah hu dakel ni toon, ey nginedanan Jesus ni Gehenna e ya keibbellinan tu ey impiyernoh.

## 31

### *Ippaptek alin APU DIOS hu Jerusalem*

<sup>1</sup> Nanna-ud ni mekabbabah idalli tutu-un umlaw di Egypt ni an mampebaddang! Daka iddinel di et-eteng ni kabaelan idan kaussalan Egypt ni mekiggubbat e heniddan kebayyu, kakalesah niya dakel ni sindalu. Eleg da iddinel hi APU DIOS e Kayyaggud ni peteg ni Dios idan helag Israel, niya eleg ida mampebaddang ni hi-gatu. <sup>2</sup> Nem nanna-ud ni nelaing hi APU DIOS et inamta tu pehding tu. Et humman hu, nekekemtang ali ey wada peelli tun panhelheltapan idan lawah ni tutu-ud Judah ni umlaw ni an mampebaddang idan iEgypt. Humman ni pehding tullu ey nanna-ud ni pehding tu tep hedin hi-gatu, man eleg tu kekyata hu inhel tun kastiguen tudda huyyan lawah ni tutu-u. Anin idan iEgypt ni kapandinneliddan iJudah et bahbaha tudda dama. <sup>3</sup> Tep hedin yadda iEgypt ey beken idan Dios ni an pandinnelan, tep tuu idan ebuh. Anin idan kebayyu da et endi nambaklangan daddan edum ni kebayyu, tep beken idan ispiritu ni et-eteng kabaelan tu. Yallin pengippeangan APU DIOS ni bunget tu ey mebahbah ali humman ni Egypt e et-eteng kabaelan tun bebley, anin ni Judah e binaddangan tu. Et humman hu, mebahbah idallin dewwa.

<sup>4</sup> Kan APU DIOS ni hi-gak ey "Anin ni hipa pehding idan kamampattul ni mengebbul ni layon ma-lat hi-yanen tu hu kalneroh ni pintey tu, et eleg meebbul. Tagan tu kumedek ekan. Heni daman hi-gak e hi APU DIOS e Kabaelan tun emin e endi dammutun wada an mengi-leg ni pengippaptekun kun Duntug e Zion. <sup>5</sup> Hi-gak e hi APU DIOS e Kabaelan tun emin ey ippaptek ku Jerusalem et ihwang kud buhul tu, henin kapemaptek ni sisit ni impah tud buyetu e eleg tu hi-yana. Em, um-ali-ak et ihwang ku hu Jerusalem henin impahding ku eman ni nelabahan ni anghel kud baballey di Egypt."

<sup>6</sup> Kan mewan APU DIOS ey "Hi-gayun tutu-uk ni helag Israel, nambahul kayun hi-gak niya yuwak kangenggehaya. Nem pantuttuyyu kayu et mambanggad kayun hi-gak. <sup>7</sup> Yan edum alin aggew ey ebbulutan yun emin e nanliwat kayun nengapayaan yuddan dios yun balituk niya silber ni dineyaw yu. Et pan-i-ibheng yuddalli law ida humman.

<sup>8</sup> Mebahbah ali Assyria di gubat, nem beken ni ya tuu mengippahding, tep hi APU DIOS. Tep umbesik idalli tutu-udman ni takut da. Ey yadda kakat-agun lalakki da, ey mambalin idan himbut. <sup>9</sup> Et yaddalli dama aap-apun sindalu da ey umbesik idan penang-angan dan bandelah ni buhul da." Huyya inhel APU DIOS e kamantettebbel hu apuy tud Jerusalem.

## 32

### *Ya Patul ni kayyaggud*

<sup>1</sup> Dengel yu huyya: Wadalli mampatul ni kayyaggud niya meandeng hu tuka pehding. Hanniman ali dama pan-ap-apuddan edum tun aap-apu. <sup>2</sup> Wadalli hakkey ni hi-gada ey mei-ellig etan di kakeihhikkugi hedin wada pewek. Ey mei-ellig idalli etan ni hebwak niya allinnew ni et-eteng ni batud desert ni panhidduman. <sup>3</sup> Medyat ali law mataddan tutu-u niya henilli law neibeghul hu tangila da et handengel da hu ehel APU DIOS. <sup>4</sup> Eleg dalli law lelgema pehding da, tep pekannemnemen da hu neiptek ni han da impahding, ey nepintek ali law e-helen da.

<sup>5</sup> Ey eleg dalli law tettebaladda endi nemnem tu niyadda maheul ni tutu-u. <sup>6</sup> Yadda tuun endi nemnem da ey legelegem daka heppita niya ebuh hu lawah ni pehding dan wadad nemnem da. Eleg da u-ununda hi APU DIOS niya lawah daka e-helan hi-gatu. Makuliput ida mewan ey eleg ida um-idwat, anin ni kennen niya innumen ni danum etan idan anggehemmek ni tutu-u. <sup>7</sup> Yadda dama lawah ni tutu-u, ey itek hu daka e-hela niya lawah daka pehding. Ida kamamplanuh ni lawah niya ida kaman-ittek malat pemahbah daddan newetwet. Et humman hu, eleg meidwat hu kelebengan idan newetwet tep yadda humman ni lawah ni daka ippahding. <sup>8</sup> Nem ya kayyaggud ni tuu ey tuka iplanuh hu panyaggudan ni edum tun tuu, niya kamebendisyonin emin hu tuka pehding.

<sup>9</sup> Hi-gayu damaddan bibi-in nelam-ay hu biyag dan endi daka kakkaguhi ey dengel yu eya e-helek ni hi-gayu. <sup>10</sup> Ma-nun nunya tep melinggep yuka pannemnem, nem yallin balintu ey umlelemyung kayu, tep endilli bugbugen yun grapes niyadda edum ni intanem yu. \* <sup>11</sup> Nelam-ay hu biyag yu et endi umhulun ni kakkaguhan yu, nem yan nunya ey umgeygey kayun takut yu. Pan-ekal yu kuma kakkayyaggud ni imbalwasi yu et mambalwasi kayun langgusih et keang-angan tun kayu kaumlelemyung. <sup>12</sup> Ey pantel-ug yu pagew yun lemyung yu, tep nebahbah ida hu kakkayyaggud ni papayyew yu niyadda

\* **32:10** 32:10 Huyya na-hel ni meippanggep ni lawah ni meippahding ni edum ni aggew, tep um-aliddalli sindalun iAssyria ni umgubat.

yuka pantennemin grapes. <sup>13</sup> Kamemmel hu gulun niya hebit di nambebleyan yun tutu-uk. Nanghi yu bebley yu niya baballey yun kad-an ni amleng yu tep meendiddalli law. <sup>14</sup> Anin alin baley ni patul niya et-eteng ni bebley et mehi-yan, tep bimmesik idan emin hu tutu-udman. Yaddalli dama kapanguwalyai niyadda baballey ni sindalu ey mannananeng ni mebahbah. Et yadda donkey di muyung hu umlaw ni manha-ad diman. Ey yadman dama pengngannan idallin kalneroh.

<sup>15</sup> Nem peellillin Apu Dios hu Ispirituh tu, et yaddalli eleg la ni metennemin nunman ey mambalin alin mateba mewan hu meitnem diman. Ey umyaggud idalli dama papayyew et dakel meenni. † <sup>16</sup> Meandeng niya kayyaggud ali meippahding di emin ni bebley diman, anin idad desert niyaddad payew ni mateba kameitnem. <sup>17</sup> Et humman hu, wada hakkeyey kayyaggud hu tuka pehding et melinggep ali law hu bebley da tep endilli lawah, nem kayyaggud ali hu mekapkapyan ingganah.

<sup>18</sup> Em, melinggep ali law bebley idan tutu-uk niya kayyaggud ali mekapkapyad baballey da et endi keguhan da. <sup>19</sup> Anin ni mekabababab hu bebley niya mebahbah hu mumuyung tep ya nemahhig ni dallallu, <sup>20</sup> et bendisyonan alin Apu Dios ida tutu-u tu, et mateballin emin ittanem da, tep dakel ali danum ni penennum da niya mahkang ali kudal dan pengippattulan dan babakka da niyadda donkey da.

### 33

#### *Ya keihwangan idan tutu-ud Jerusalem*

<sup>1</sup> Nanna-ud ni makabbabab kayulli e iAssyria! Tep anin ni eleg yu hiktaman ni mebahbah niya meihdul, et nambahbah yu niyadda nan-ihdul yudda edum ni bebley. Nem mepappag idalli huttan ni yuka pehpehding et hi-gayulli dama keippahdingan idan nuntan.

<sup>2</sup> “Nem hemek dakemi ngun hi-gam e APU DIOS, et ihwang dakemid lawah ni meippahding ni hi-gami, tep hi-gam mika iddinnel ni mengippaptek ni hi-gamin kewa-wa-wa. <sup>3</sup> Hedin dingngel idan buhul mi hu tekuk mud mu pekiggubbatan ma-lat ihwang dakemi, ey kabsik ida. Hedin mewan impeang-ang mu et-eteng ni kabaalam, man ida kamewehhit. <sup>4</sup> Et yallin nunman ni pengapputam idan buhul mi, ey pan-ibbebsik midden emin hu wadan hi-gada, henin kapehding idan dudun e daka kennan emin hu neitnem di payew.”

<sup>5</sup> Eta-gey hi APU DIOS. Yad kabunyan hu tuka panha-adi. Hi-gatu man-ap-apud Jerusalem et ipahding tu meandeng niya kayyaggud, <sup>6</sup> et maweda linggep eyad bebley. Ippaptek tu tutu-u tun ingganah. Iddawat tu laing da niya baddangan tuddan mengamtan mahapul ni amtaen da. Ya kaipapaptek idan tutu-u tu ey ya penaydayawan dan APU DIOS.

<sup>7</sup> Nem hedin hi-gatsu, man anggetakkut biyag tayu. Anin idan netuled et ida kamambeggan baddang. Ey yadda intu-dak tayun an mekihummangan idan iAssyria ey ida kamannannangngih ni degeh ni nemnem da, tep eleg tetaladdan buhul tayu hu linggepan ni bebley tayu. <sup>8</sup> Eleg pinhed ni Assyria ni peamnu hu nekitbalan da. Eleg da u-unnudan emin intakang dad hinanggaddan nekiungbal da. Endi daka be-ingi. Et humman hu, endi kamengidlan di keltad tayu tep anggetakkut diman.

<sup>9</sup> Mebel-ah ali Israel niya mebahbah ida muyung di Lebanon. Hedin ya dama kayyaggud niya nedeklan ni puyek e Saron ey mambalin ni desert. Anin idan muyung di Bashan niyad Karmel et kamangkeplag bulung idan keyew tep ida kamangketty.

#### *Inhelan nan APU DIOS ida buhul tu*

<sup>10</sup> Kan APU DIOS ey “Wada pehding ku ma-lat peang-ang ku e et-eteng hu dayaw ku niya kabaalan ku. <sup>11</sup> Endi silbin planuh yu niya endi pambalanan idan pehding yu, tep bahbahen dakeyun Ispirituh kun heni apuy. <sup>12</sup> Megihheb kayulli e mambalin kayun heni apul. Heni kayullin hebit ni meeppuyan et magiheb et mambalin ni dep-ul. <sup>13</sup> Hi-gayun tutu-ud kebbebley ni neihnup niya neidawwi, nemnem yudda impenahding ku et abuluten yu e et-eteng kabaalan ku.”

<sup>14</sup> Ida kamangegegyey ni takut da hu nekalliwtan ni tutu-ud Zion e kanday “Heni apuy ni eleg me-me-dep hu kapengastigun Apu Dios. Hipan hi-gatsu hu dammutun meihwang di henin nunman ni tuka pengastigu?”

<sup>15</sup> Dammutun meihwang kayu hedin kayyaggud pehding yu niya e-helen yu. Et humman hu, entan tudda talam hu newetwet. Entan tu abulut ni dakeyu beyyadan ma-lat ipahding yu hu beken ni meandeng. Ey entan pekieddueddum idan kamamplanuh ni umpatey niya kamengippahding ni lawah. <sup>16</sup> Entan tu ipahding ida huuya ma-lat

melinggep hu neitu-wan yu e heni kayu neihikug di bebley ni nehammad ni netuping luhud tu, eleg kayu mekullangin kennen yu niya innumen yun danum.

*Ya kayyaggud ni meippahding alin edum ni aggew*

<sup>17</sup> Ang-angen yulli mewan hu et-eteng kabaelan tun patul e kayyaggud hu pehding tun man-ap-apud et-eteng ni bebley. <sup>18</sup> Yan nunman ali ey endidda law kamansingngil ni buwis niyadda kamansi-im ni hi-gayun nalpud bebley ni buhul yun yuka tekkusin nunman. \* Meendiddalli huuya et endi yu kakkaguhan. <sup>19</sup> Endilli law ang-angen yun mampahhiyan tutu-un nalpud edum ni bebley ni hin-appil ehel dan eleg yu han-awat.

<sup>20</sup> Ang-ang yu hu Jerusalem, e Zion hu hakey ni ngadan tu, e bebley ni pampiyestahan tayun penaydayawan tayun APU DIOS. Kayyaggud humman ni bebley tep melinggep ni panha-adan. Humman ni bebley ey kameiddingpat di kampung neatepan ni tuldah ni eleg pay ni maialdan et eleg meukbuh ida paghek ni neiiketan tu. Anin idan linubid ni iket tu et eleg makmakhat. <sup>21</sup> Yadman ey hi APU DIOS e Kabaelan tun emin hu mengippaptek ni hi-gatsu. Hi-gatu hu kamei-ellig di dakel ni mahkang ni wangwang e eleg mabalin ni agwatan ni bapor ni buhul tayu. <sup>22-23</sup> Tep mebahbah law ida bapor da et endi silbiddan linubid ni ussalan dan mengippeta-gey niya mengippebah ni neita-yun ni luput. Ey eleg law mebekyag ida humman ni luput. Pilliwen tayullin emin hu kinedangan idan buhul tayu. Dakel ali kumamman ni peteg et anin idallin nedahuy et wada patal da tep hi APU DIOS hu meandeng ni huwet tayu niya hi-gatu mengidwat ni linteg tayu. Hi-gatu pampatul tayu niya hi-gatu mengihwang ni hi-gatsu. <sup>24</sup> Et humman hu, endilli mandedgeh idan nambelley eyad bebley tayud Zion et liwwanan alin APU DIOS emin hu liwat idan tutu-u tudya.

## 34

*Kastiguen APU DIOS ida buhul tu*

<sup>1</sup> Ikeuy ni emin ni tutu-ud kebebbebley! Kaemung kayu et dengelen yu e-helek. Awasi yu huuya, hi-gayun emin ni wada eyad puyek. <sup>2</sup> Nemahhig hu bunget nan APU DIOS idan emin ni tutu-ud kebebbebley eyad puyek, anin idan sindalu da. Et humman hu, nannad ni kastiguen tudta et kebabhahan da. <sup>3</sup> Eleg ali meikkullung annel da, nem menayan idallid neipullayan da, et mangkabwel idadman et manhamuy ida. Mandadalang idalli duntug ni kuheyaw da. <sup>4</sup> Yan nunman ali ey meendi hu aggew, ya bulan niyadda bittuwen, e heniddalli dep-ul ni meiwwehhit. Meendilli kabunyan e henilli neludun ni papil. Ey mangke-gah idalli bittuwen, e henidda nakpit ni bulung ni grapes niya lameh ni keyew e fig.\*

<sup>5</sup> Indaddan APU DIOS hu ispadah tud kabunyan, et humman i-usal tun memahbah idan iEdom e kantu dan lan nunman ey bahbahen tu. <sup>6</sup> Melemmuh alin kuheyaw niya taba hu ispadah tu, e henin ewah ni kapengedged ni kai-appit ni kalneroh niya gelding. Tep henilli man-appit hi APU DIOS di et-eteng ni bebley e Bosra di Edom. Dakel alin peteg hu peteyen tudman. <sup>7</sup> Hedin yadda aap-apudman ey henidda newang di muyung niya bubulug ni baka, nem mangketu-liddalli et matey ida dama heniddan edum ni tutu-u, et itmeg ni puyek kuheyaw da niya tabeda. <sup>8</sup> Tep gintud APU DIOS hu aggew ni pengiblehan tun impahding idan buhul tayu. Et humman hu, apputen tudta et ihwang tu hu bebley tayun Zion.

<sup>9</sup> Mambalin ali danum di kulukul di Edom ni aspaltoh niya mambalin ali puyek diman ni sulfur e meka-atung et melgab humman ni bebley. † <sup>10</sup> Endilli paka-dep ni nunman ni apuy et kewa-wa-wa niya kahilehileng ey man-a-ahhuk alin ingganah. Huyyan bebley ey metawwey alin ingganah et endilli law meweddag diman. <sup>11</sup> Yaddalli akup, yadda gawwang niyadda edum ni kaman-ayyam di puyek hu meihhullul ni manha-ad diman ni bebley, tep e-wayen alin APU DIOS humman ni bebley et metawwey. <sup>12</sup> Endilli law man-ap-apudman ni bebley tep meendilli law pan-ap-apuan diman. <sup>13</sup> Umtemel idalli gulun niya hebit di nambelleyan idan papatul ni nunman, anin idad nehammad ni neluhud ni bebley. Ey manha-ad idadman hu jakal niya akup. <sup>14</sup> Mandadamuddadman hu animal di desert niyadda ahhud muyung. Ey manha-ad idadman hu gelding di muyung e manhin-aayag ida. Yadman ali dama pan-iyyatuan idan animal di muyung ni kameukkat ni ebuh ni hileng. <sup>15</sup> Mengapyaddali akup ni buya dadman et man-iftlug ida niya pe-hikan

\* **33:18** 33:18 Huyyan na-hel ey yadda sindalud Assyria e um-aliddallin mengubbat ni Jerusalem, nem apputen APU DIOS ida. (Ang-ang yu Isaiah 17:12-14.) \* **34:4** 34:4 Ang-ang yu Matthew 24:29, ya Mark 13:25, ya Luke 21:26 niya Revelation 6:13-14. † **34:9** 34:9 Ya nebahbahan ni Edom ey henin nebahbahan ni Sodom niya Gomorrah. (Ang-ang yu Jeremiah 49:17-18 niya Genesis 19:24.)

da et e-ettengen dadda impah dadman. Yadman ali dama keemungan idan vulture e sisit ni makan ni annel ni netey. Wada hakkey idan nunyan sisit ey wada kadwa tu.

<sup>16</sup> Ang-ang yud libluh APU DIOS et bidbiden yu huyyan inhel tu. Kantuy “Endi hakey idan nunman ni animal niyadda sisit ni an meendi, niya endi meendian ni kadwa tu.” Huyya inhel APU DIOS ni meippahding ey ya Ispirituh tu mengemung idan nunman ni animal niyadda sisit diman e nebahbah ni bebley e Edom. <sup>17</sup> Hi APU DIOS hu mengihhad ni hi-gadadman et yadman panha-adan dan ingganah.

## 35

*Ya amleng idan inhewang nan APU DIOS*

<sup>1</sup> Henilli man-am-amleng hu desert, tep umhabung idalli meitnem diman. <sup>2</sup> Em, manhebbung idalli neitnem diman et henilli kaman-a-appah niya kamantekuk ni an-anla tu. Kayyaggud alin peteg ang-ang tu et henillin duduntug di Lebanon niya henillin kakinayyaggud ni ang-ang idan kudal di Karmel niya nedeklan ni puyek di Saron. Yan nunman ali penang-angan ni emin ni tuun dayaw niya kasina-gey APU DIOS e Dios tayu.

<sup>3</sup> Lakkayuy et yu peamtadda huyya idan nekakkapuy niyadda neatu ma-lat pa-let yudda. \* <sup>4</sup> Kan yuddan simmakut ey “Entan takut yu! Pekedhel yu nemnem yu † tep um-ali etan Dios yun mengastiguddan buhul yu et ihwang dakeyu.”

<sup>5</sup> Yan nunman ali ey han-ang-ang idalli law ni nekulap niya handengel idalli law ni netuleng. <sup>6</sup> Umpaytuk idalli nedahuy niya menattayyaw ida. Paka-hel idalli nenganga et ittekuk dalli amleng da. ‡ Keeb-ebwal idalli danum di desert et medennuman ali mamegan puyek diman tep mewedda kulukul. <sup>7</sup> Mambalin alin lebung hu maka-atung ni palnah niya meweddalli dake ni hebwak di mamegan puyek. Umtemel ali helek niya katlubbung di nambalyan idan jakal ni nunman.

<sup>8</sup> Mekapyalli keltad diman et mangedanan ni “Keltad ni Kayyaggud ni Peteg.” Endilli an mandellan diman ni lawah niya endi nemnem tun tutu-u. Ebu idalli kamekanggunun nud nan APU DIOS ni mandellan diman. <sup>9</sup> Endilli layon diman niya endi mandellan diman idan angetakkut ni animal. Ebu idan hinelakniban APU DIOS ni mengidlan diman. <sup>10</sup> Et mambanggad idallid Jerusalem et man-a-appah idallin an-anla dan endi pappeg tu. Man-an-anladdalli law ni ingganah tep eleg idalli law umlelemyung.

## 36

*Ya nenattakkutan idan iAssyria idan ifudah*

*(2 Kings 18:13-27; 2 Chronicles 32:1-19)*

<sup>1</sup> Yan eman ni meikkahampulut epat ni toon ni nampatulanan Heseekiah di Judah ey ginubat nan Sennakerib e patul di Assyria ida ifudah et sakupen tudda etta-teng ni bebley diman ni nehammad ni netuping luhud da. <sup>2</sup> Inmandal tu etan ni ap-apuddan sindalu tu e ikkuyug tu hu dake ni peteg ni sindalun melpud Lakis et lumaw idad Jerusalem ma-lat da pansukuh hi Heseekiah e patul diman. An nangkampu humman ni ap-apun sindalu, e ingkuyug tudda sindalu tu etan di keltad ni kapanggunnuiddan kamengapyan luput di gilig ni alak ni kadellanan danum ni kamelpud lebung di nenginahpat.

<sup>3</sup> Entanni ey immalidda tellun ifudah ni an menammun hi-gatu e hi Eliakim e u-unggan Hilkiah e hi-gatu hu kamengippaptek ni emin ni hipan wadad baley nan patul, hi Sebna e sekretarih nan patul et hi Joah e u-unggan Asap e hi-gatu hu kamengittuddek ni kamekapkyad bebley.

<sup>4</sup> Kan nunman ni ap-apun sindalun Assyria ni hi-gaday “Pinhed ni patul mid Assyria e et-eteng kabaelan tun amtaen hedini kela nealay kamakaddinnel hi patul e hi Heseekiah.

<sup>5</sup> Kantuy “Kaw kanyu nem wada kabaelan idan sindalu yun mekihanggan hi-gami? Kanyu nelaing kayun mamplennuh niya kanyuy kabaelan yun mekiggubbat, nem ehel ni ebuh ida huttan. Kaw hipa ni-man yuka ididdinel ni umbaddang ni hi-gayu et yuka nemnemneman mengubbat ni hi-gamin iAssyria? <sup>6</sup> Kele yu pandinnel hu Egypt ni umbaddang ni hi-gayu? Hedin ya Egypt ey kamei-ellig di katlubbung e hedini humman ihhulkud mu ey lektattuy nahpung et masibik kumedek ngamay mu. \* Henin nunman elaw ni patul di Egypt idan kamampebaddang ni hi-gatu.

<sup>7</sup> Nem hedini kanyuy mandinnel kayun APU DIOS e Dios yu, ey kaw beken ni hi-gatu kan altar idan nambahbah nan Heseekiah et ehelen tuddan tutu-ud Judah e hakey ni

\* 35:3 35:3 Hebrews 12:12 † 35:4 35:4 Ang-ang yu hu Joshua 1:6-9 niya verse 18 ‡ 35:6 35:5-6 Matthew 11:5

et ya Luke 7:22 \* 36:6 36:6 Ezekiel 29:6-7

ebuh hu altar di Jerusalem ni pan-appitan da? † 8 Imay kedi kumaddan et man-ungbal itu. Ya patul ni Assyria ey kantuy: Hedin wada dewwan libun sindalu yu, man iddawtan dakeyun dewwan libun kebayyun pantakkayan da. 9 Nem kaw umgeladda makkaw ni ihangga yun hi-gami? Anin na-mun yadda nekakkapuy ni sindalun Assyria pekihhangga yu et eleg kayu umgeгла. Anin ni kantu et wada ibbaddang ni Egypt ni hi-gayun kalesah niyadda sindalun mantakkay di kebayyu, et eleg kayu umgelan menanggan hi-gami. 10 Hakey mewan ey kaw kanyu nem um-ali-ak ni an memahbah nunyan bebley hedin eleg iebulut nan APU DIOS? Ya kakulugan tu ey inhel tun hi-gak e um-ali kami ma-lat bahbahen mi eya bebley yu.”

11 Entanni ey kan di Eliakim, hi Sebna ni hi Joah nunman ni opisyal ey “Ettu anhan et i-hel mun hi-gamin bega-en mud Aramaic, haggud han-awat mi. Entan tu i-hel ni hi-gamid Hebrew, tep dedngelen ida eman ni tutu-un wadad kad-an ni tuping ni luhud.”

12 Nem kan kumedek nunman ni ap-apuy “Eleg, tep eleg tuwak itu-dak ni ap-apuk ma-lat ya patul yu niya hi-gayun ebuh pengippeamtaan kun nunyan nakka pan-e-hela. Pinhed kun dedngelen ida daman tutu-un kamanyuyyudung di tuping et amtaen da e hedin eleg kayu mansukkuh, man kennen dalli dama tai da niya innumen dalli mimi da, henin hi-gayu!”

13 Et umehngeng humman ni opisyal et itkuk tun in-ehel tud Hebrew e kantuy “Dengel yu hu pinhed ni kamedeyyaw ni patul di Assyria ni amtaen yu! 14 Ang-ang yu et eleg dakeyu haulen nan Heseekiah, tep eleg dakeyu han-ihwang di pehding kullin hi-gayu. 15 Ey entan tu iebulut ni dakeyu ihaphapitan ni mengiddinnel nan APU DIOS. Anin ni kantuy nanna-ud ni ihhehwang dakeyun APU DIOS et entan tu kukkullug. Entan tu nemnemnem e ihhehwang dakeyun hi-gatun ellian idan sindaluk ni iAssyria ni an mengubbat ni hi-gayu et sakupen mi eya bebley yu.

16 Entan kaya tu deddengngel hi Heseekiah! Hi-gak e patul ni Assyria ey mandalen dakeyun meukkat eyad bebley yu et mansukuh kayu. I-abulut kun anin ni kennen yudda lameh ni intanem yun grapes niya figs ey anin ni man-ehhul kayud hibuy yu, 17 ingganah kedettengan ni pengillawwan dakeyud edum ni bebley ni yu pekibbebleyan. Humman ni bebley ni pengillawwan dakeyu ey heni dama eyan bebley yu e wadadda grapes ni mekapyan meinnum niya wada wheat ni mekapyan sinapay.

18 Entan nisi tu kulug hu e-helen Heseekiah anin ni kantuy ihhehwang dakeyun APU DIOS. Tep ya kakulugan tu ey endi hakey ni bebley ni inhewang idan dios dan hi-gak e patul di Assyria. 19 Kaw hannemnem yu neipahding idan tutu-ud Hamat, yad Arpad niyad Sepharbaim? Tam eleg ngu anhan baddangan idan dios da. Hanniman mewan hu Samaria, kaw binaddangan idan dios da?

20 Kaw wada ew ngu hakey ni dios idan nunyan bebley ni nengihwang ni hi-gadad et-eteng ni kabaelan ku? Et humman hu, kele yu nemnemnem e kabaelan APU DIOS ni ihhehwang hu Jerusalem?” ‡

21 Nem ida kaum-i-ineng tutu-u e eleg ida umhumang, tep humman inhel patul e hi Heseekiah ni pehding da. 22 Entanni et lumaw di Eliakim, e u-ungngan Hilkiah, e hi-gatu kamengippaptek ni emin ni hipan wadad baley nan patul, hi Sebna e sekretarih et hi Joah e u-ungngan Asap, e hi-gatu kamengittuddek ni kamekapkapyad bebley, di kad-an Heseekiah e nambi-ki da balwasi dan pengippeang-angan dan lemyung da et da idaddatteng hu inhel nunman ni opisyal di Assyria ni hi-gada.

## 37

### *Ya nambagaan nan Heseekiah ni tugun nan Isaiaah (2 Kings 19:1-7)*

1 Dingngel Heseekiah hu indaddatteng idan nunman ni tellun opisyal tu ey bini-ki tu balwasi tun lemyung et mambalwasin langgusih et lumaw di Tempol APU DIOS. 2 Intu-dak tud kad-an ni prophet e hi Isaiaah e u-ungngan Amos di Eliakim e opisyal tun kamengippaptek ni baley tu, hi Sebna e sekretarih niyadda kamengippangngulun papaddi e nampambalwasiddan emin ni langgusih. 3 Limmaw ida et kandan Isaiaah ey “Heninnuy hu inhel Heseekiah: ‘Yan nunyan aggew ey mekastigu itu, manhelheltap itu, niya mebabba-ingan itu. Mei-ellig itsun nunyad man-ungngan biin iyyallin meukkat hu gelang, nem na-puhan ni elet tu. 4 Intu-dak ni patul ni Assyria hu ap-apun sindalu tu et taltalanggaen tu hu Dios tayun wadan ingganah. 5 Nem hamban anhan dingngel APU DIOS e Dios ni humman idan in-inhel tu et kastiguen tudda ey. Et humman hu, pandasal ka anhan nan Apu Dios ma-lat baddangan daitsun tutu-un natdaan.’”

† 36:7 36:7 Ang-ang yu 2 Kings 18:4 et ya 2 Chronicles 31:1. ‡ 36:20 36:20 [18-20] Ang-ang yu hu 2 Kings 18:33-35.



<sup>5</sup> Dingngel Isaiah hu impaad nan patul e hi Heseekiah, <sup>6</sup> ey impalaw tu humang tun hi-gatu e kantuy "Kan APU DIOS ey 'Entan takut mu etan idan inhel ni ap-apun sindalun patul ni Assyria e kantuy eleg daka ihhehwang ni hi-gak. <sup>7</sup> Tep pedngel kullin nunman ni patul hu kae-ehheladdan tutu-ud bebley tu, et humman alin dedngelen tu umhulun ni pambangngadan tud bebley da et hannak ali papetey diman.' "

*Ya hakey mewan ni impenattakkut idan iAssyria idan iJudah  
(2 Kings 19:8-19)*

<sup>8</sup> Entanni ey dingngel nunman ni opisyal ni Assyria e hini-yan ni patul da hu Lakis et immen e kamekiggubbat di Libnah e neihnup ni bebley et unuden tudman et wada tu ibegan hi-gatu.

<sup>9</sup> Yan nunman ey dingngel ni patul ni Assyria e kamengelli hi Tirhakah e iKus e patul ni Egypt ni mengubbat ni hi-gatu. Impalaw tu ni hu tudek tun Heseekiah di Judah et han lumaw ni mekiggubbat ni patul ni Egypt. <sup>10</sup> Kantud tudek tuy "Hi-gam e Heseekiah ey entan kaheul mun inhel ni dios mu, anin ni kantuy eleg mi hansakup ni iAssyria hu bebley yun Jerusalem. Entan tu kukkullug, anin ni hinammad nunman ni dios mun inhel huttan. <sup>11</sup> Kaw eleg mu dengelen hu impahpahding ni papatul ni Assyria ni linggeman ni bebley ni pinhed dan bahbahen? Tam neala ni binahbah dadda. Kaw kammu nem hedin hi-gayu, man meihwang kayu? <sup>12</sup> Binahbah idan aammed kun nunman hu bebley ni Gosan, ya Haran niya Reshep. Ey nampatey dadda iBetheden e nambebley di Telassar. Attu et inhewang idan dios da ey? \* <sup>13</sup> Niya attu et neihwang ida patul di Hamat, yad Arpad, yad Sepharbaim, yad Hena niyad Ibbah ey? † Tam nangeendiddan emini!"

<sup>14</sup> Inlan Heseekiah humman ni tudek et bidbiden tu et lumaw di Tempol. Binekyag tud hinanggan APU DIOS <sup>15</sup> et mandasal e kantuy <sup>16</sup> "APU DIOS e Kabaelan tun emin e Dios ni Israel ni yimmudung ni man-ap-apud ahpat ni kad-an idan anghel, hi-gam ni ebuh hu Dios. Hi-gam ni ebuh Ap-apun emin idan kapan-ap-apuid kebebbebley eyad puyek. Hi-gam ni ebuh nanletun kabunyan niya puyek. <sup>17</sup> APU DIOS, dengel mu anhan eya nakka pampehemhemmeki, niya ang-ang mu anhan eya kameippenahding ni hi-gami. Ey dengel mu hu kapenaltalangan Sennakerib ni hi-gam e Dios ni wadan ingganah.

<sup>18</sup> APU DIOS, inamta mi e makulug numan ni neipahding eya intudek tu e binahbah ida lan eman ni papatul ni Assyria hu dakel ni bebley, et pambalin dadda humman ni bebley ni eleg mebebleyi et endi law silbi da. <sup>19</sup> Nanggiheb dadda beken ni makulug ni dios di diman idan bebley, tep humman ida ey i-inggeh ni ebuh e nekapyad keyew niya batin pinaot ni tuu. <sup>20</sup> Nem yan nunya, e APU DIOS e Dios mi, ey ihwang dakemi anhan idan iAssyria ma-lat pengamtaan idan tutu-ud kebebbebley eyad puyek e hi-gam ni ebuh hu Dios."

*Ya impaad Isaiah nan Heseekiah  
(2 Kings 19:20-37)*

<sup>21-22</sup> Entanni et palaw Isaiah e u-unggan Amos hu tudek tun Heseekiah et ehelen tun hi-gatu hu humang APU DIOS di dasal tu. Kantuy "Huyya inhumang APU DIOS e Dios ni Israel e kantuy 'Dingngel ku dasal mu meippanggep nan Sennakerib e patul ni Assyria. Et huyya hu e-helek ni hi-gatu: Yadda tutu-uk di Zion e Jerusalem ey dakeyu kapippihula e Sennakerib niya dakeyu katalalanggai. Ida kamanwigwigiwi niya ida kamanggalagalagak hu bibi-in menang-ang ni hi-gayun kamemsik.

<sup>23</sup> Kaw hipa pinihul yu et taltalangaan yu hedin beken ni hi-gak e Dios ni Israel e Kayyaggud ni peteg? <sup>24</sup> Intu-dak mudda bega-en mu et ipahhiya dan hi-gak e gapuh idan kalesah yun yuka ussald gubat, ey sinekup yudda keta-ta-geyyan ni duntug di Lebanon, et panlegehen yudda etata-gey ni keyew e sedar niya kekakkayyaggudan ni cypress. Impahhiyam mewan e dinteng mu hu gawwan mahdel ni muyeng. <sup>25</sup> Muka ippahhiya e nangku-ku kayun hibuy idad bebley ni sinekup yu et pan-inumen yu danum diman. Ey muka ippahhiya e inupup mu hu Wangwang e Nile di Egypt et mema-ganan ma-lat man-agwat ida sindalun.

<sup>26</sup> Nem kaw eleg yu amta e implanuh ku dedan ni nebayag e henin nunman meippahding? Et deh e neipahding tu-wangu! Hi-gak hu nengidwat ni kabaelan yu et pambahbahen yudda bebley ni nangehammad ni tuping hu luhud da. <sup>27</sup> Et humman hu, yadda tutu-udman ni bebley ey endi kabaelan da. Simmakut ida et nelakah nengapputam ni hi-gada. Heniddan pakatmel ni helek e nelakah ni iddeyapdap. Ey heniddan helek ni simmemel di atep ni baley e kamekling hedin nemahhig hu petang.

\* **37:12** 37:12 Yadda bebley ni nengadan deya e wadaddad Mesopotamia e Iraq hu ngadan tun nunya. † **37:13** 37:13 Yadda bebley ni nengadan deya ey wadaddad Syria nunya.

<sup>28</sup> Nem inamtak ni emin hu elaw mu, ya muka pehpehding niya muka lallawwi. Ey inamtak e nemahhig bunget mun hi-gak. <sup>29</sup> Dingngel ku nemahhig ni bunget mun hi-gak niya nemahhig ni muka pampahhiya, et humman hu, tetbengek hu eleng mu niya ha-adak bungut mun gumek et pambangngad dakad nalpuam e iddalan mud keltad ni dinlan mun immali.' "

<sup>30</sup> Kan Isaiahan nan Heseekiah ey "Huyyalli pengi-ang-angan mun pengihwangan APU DIOS eyan bebley. Meippalpun nunya ingganah alin balintu ey mengngan kayun kaillameh idan nealay simmemel. Nem yan meikkatun toon ey mantennem kayun pagey niya grapes et hi-gayu mengenni niya mengngan ni illameh idan nunman ni ittanem yu. <sup>31</sup> Kayyaggud ali biyag idan tutu-hud Judah ni natdaan di gubat. Meihhammad idad bebley da, niya medakkel hu helag da ey umkedangyan ida. Heniddalli neitnem ni limmehed lamut tud puyek et mekallameh ida. <sup>32</sup> Wadaddalli metdaan di Jerusalem niyad Duntug e Zion, tep hi APU DIOS e Kabaalan tun emin ey hinammad tun ninemnem e pekullug tudda huyya."

<sup>33</sup> Kan mewan Isaiahan ey "Heninnuy hu inhel APU DIOS meippanggep ni patul di Assyria: 'Eleg mabalin ni an umhegep niya tu pellow panetu, anin ni hakey, di deya Jerusalem. Endi sindalu tun nanhappiyaw ni um-alin an meihnupeyad bebley. Ey endi da pan-ippiggil ni batu niya eleg da pan-ippu-ul hu puyek ma-lat pengidlanan dan umhegep eyad bebley. <sup>34</sup> Humman ni patul ni immali ey eleg umhegep eyad bebley, nem mambangngad e iddalan tud dinlan tun immali. Hi-gak e hi APU DIOS hu nanghel idan nunya. <sup>35</sup> Guwalyaak huyyan bebley niya ippaptek ku ma-lat kaideyawak. Peamnuk hu hinammad kun inhel ni nunman nan hi David e bega-en ku.' " †

<sup>36</sup> Yan nunman ni hileng ey limmaw hu hakey ni anghel nan APU DIOS di nangkampuan idan iAssyria et pateyen tu hanggatut et newalu et liman libun sindalu da. Et yan newawaan tu ey kepuppullay hu anhel idan nangketey ni sindalud kampu da.

<sup>37</sup> Humman binsikan nan Sennakerib e patul ni Assyria et mambangngad di Nineveh.

<sup>38</sup> Entanni et hakey ni aggew ey immen hi Sennakerib ni kamandeyyaw di tempol ni dios tun hi Nisrok ey limmaw ida dewwan u-ungnga tun laki e di Adramelek nan Sareser et patyen da hi ameda e inusal da ispadah da et bumsik idad Ararat. Et meihullul ni nampatul hi Esarhaddon e hakey ni u-ungnga tun laki.

## 38

*Ya nandegehan patul e hi Heseekiah et ya yinaggudan tu*

*(2 Kings 20:1-11; 2 Chronicles 32:24-26)*

<sup>1</sup> Entanni ey nandegeh hi Heseekiah et innang ni mettey. Limmaw hi Isaiahan e prophet e u-ungngan Amos et tu ang-angen et kantun hi-gatuy "Kan APU DIOS ey eleg ka umyaggud. Et humman hu, iyayyaggud mun emin hu hipan mahapul ni iyayyaggud mu et mandaddan ka, tep mettey ka."

<sup>2</sup> Dingngel Heseekiah humman ey nanligguh et ihangga tud dingding et mandasal e kantuy <sup>3</sup> "APU DIOS, nemnem mu anhan e impannananeng kun nansilbin hi-gam. Endi edum ni nak inenu-unnud nem hi-gam ni ebuh, niya impahding kun emin hu kamengippeamleng ni hi-gam." Ginibbuh tun nandasal ey kamannannangngih e nemahhig lemyung tu.

<sup>4</sup> Entanniy intu-dak mewan APU DIOS hi Isaiahan <sup>5</sup> et tu ehelen nan Heseekiah e kantuy "Heninnuy hu inhel APU DIOS e Dios lan ammed mu e hi David. 'Dingngel ku dasal mu niya inang-ang ku lewam. Et humman hu, eleg ka ni mettey, nem meteggu kan hampulut lima pay ni toon. <sup>6</sup> Ihhehwang daka, anin eyan bebley e Jerusalem, di hipan ippahding ni patul ni Assyria. Ippaptek ku huyyan bebley.' "

[21] Kan Isaiahan nan Heseekiah ey "Palut kan fig et iepuap mu eyad pelham ma-lat mapwahan." [22] Entanni ey kan Heseekiah ey "Hipa pengamtaak hedini me-kal eya degeh ku et dammutun nak mandeyyaw nan APU DIOS di Tempol tu?" \*

<sup>7</sup> Kan Isaiahan ey "Heninnuy ali pengi-ang-angan mun amnuan ni inhel APU DIOS ni hi-gam: <sup>8</sup> Pehunnay alin APU DIOS hu allinnew ni aggew etan di teyey ni impekapyan lan patul e hi Ahas ni hampulun akad." Entanniy immamnu e himmunay hu allinnew etan di teyey ni hampulun akad.

<sup>9</sup> Yan yinaggudan nan Heseekiah ey intudek tu huyyan a-appah. <sup>10</sup> Kantud a-appah tuy "Kangku nem mepappeg law biyag kun nunya, e na-lettak pay ni, niya kagedwan ebuh nambiyagak, et umlawwak law di bebley idan nangketey. <sup>11</sup> Kangku nem eggak law ang-angan hi APU DIOS niyadda edum kun tutu-u eyad bebley idan mategu, tep mepappeg

† 37:35 37:35 Ang-ang yu hu 2 Samuel 7:16. \* 38:6 38:6 [21-22] Inu-unnud mi hu TEV e neitu-nud hu verses 21-22 di verse 6.

law biyag ku. <sup>12</sup> Kangku nem pappegen Apu Dios hu biyag ku, et henin a-abbung ni nebahbah niya henin luput ni neabel ni na-kal di pan-ablan. <sup>13</sup> Nemahhig ni inlabbik hu nangih ku, tep maggeh gibek ku e heni kapanhepungan layon hu genit ku. Kangku nem pappegen law Apu Dios hu biyag ku. <sup>14</sup> Eleg umtutu-lu ehel ku niya heni ge-hem ni paluma palak ku. Ey hedin intangaw kud kabunyan ma-lat mampabaddanggak, man kameettu matak. Kangkun hi-gatuy 'APU DIOS, ihwang muwak anhan eyad nakka panhelheltapi.'

<sup>15</sup> Nem hipa nak e-helen? Humman inhel tun hi-gak ni pehding tu et deh e impahding tu. Nemahhig lemyung ku e eleggak pakeugip! <sup>16</sup> Apu Dios, emin hu muka pehding niya muka e-hela ey ketegguan mi niya panyaggudan mi. Et humman hu, yan nunya ey impanyaggud muwak et iebulut mun meteggu-ak. <sup>17</sup> Ebbulutek law e ya etan hinelheltap ku ey nambalin ni panyaggudak. Ey inhewang muwak di ketteyyan ku niya ingkal mu liwat ku tep ya neminhed mun hi-gak. <sup>18</sup> Ya kakulugan tu ey yadda nangkeikulung ni wadad Kadungayan ey eleg daka deyyawa, niya eleg daka ia-appehin pandeyyaw dan hi-gam. Endi namnamah dad eleg melumman ni muka pemapteki ni hi-gada.<sup>†‡</sup>

<sup>19</sup> Nem yadda mandeyyaw ni hi-gam ey yadda mategu. Henin hi-gak e deh e daka kadaydayawa. Anin idan a-ammed et daka ene-ehheladdan u-ungnga da hu eleg melumman ni muka pemapteki. <sup>20</sup> APU DIOS, kayyaggud anhan et impanyaggud muwak! Meippalpun nunya ey man-a-appehha ni penaydayaw kun hi-gam e meunnudan ni gitalah niya ayyuding. Man-a-appeh kamin ingganah ni pandeyyaw min hi-gam di Tempol mu."

## 39

### *Yadda opisyal ni nalpud Babilon* (2 Kings 20:12-19)

<sup>1</sup> Yan nunman ni tsimpuh ey dingngel ni patul di Babilon e hi Merodak Baladan e u-unggan Baladan, e nandegeh hi Heseekiah e patul, nem yimmaggud. Et mantudek ni hi-gatu ey pailaw tu e wada pay in-unnud tun indawat tun hi-gatu. <sup>2</sup> Inapngan Heseekiah ida humman ni immalin iBabilon et peang-ang tun hi-gadan emin hu kinedangyan tun wadad bodegah tu, yaddan silber, yadda balituk, yadda kapampebanglun kennen, yadda lana, yadda usal tud gubat niya emin hu hipan nebalol ni tenged tu. Impeang-ang tun emin hu wadad bodegah tu niyad nan-ap-apuan tu, endi eleg tu peang-ang ni hi-gada.

<sup>3</sup> Entanni ey limmaw hi Isaiah e prophet di kad-an Heseekiah et kantuy "Attu nalpuan idan nunman ni tutu-u niya hipa inhel dan hi-gam?" Kan Heseekiah ey "Nalpuddad Babilon e naka-iddawwin bebley."

<sup>4</sup> Kan mewan nan Isaiah ey "Hipa inang-ang dad baley mu?" Hinumang nan patul e kantuy "Inang-ang dan emin hu kinedangyan ku. Endi hu wadad bodegah ni eggak peang-ang ni hi-gada."

<sup>5</sup> Et kan Isaiah nan Heseekiah ey "Dengel mu eya inhel APU DIOS e Kabaelan tun emin! <sup>6</sup> Medettengan ali aggew ni pengibsikan idan iBabilon ni emin ni wada eyad baley mu, anin idan inemung idelan aammed mu ingganah nunya, et endi an metdaan. \* Huttan inhel APU DIOS. <sup>7</sup> Meillaw idalli edum ni helag mud Babilon et mapnahan ida et ingwan da hu patul diman."

<sup>8</sup> Ya nan-awat nan patul e hi Heseekiah ey mewedda linggep nunman ni ketaggu tu. Et kantuy "Kayyaggud huttan ni inhel mun hi-gak ni impeamtan APU DIOS."

## 40

### *Ya namnamah idan tutu-un nan APU DIOS*

<sup>1-2</sup> Kan Apu Dios ey "A-alluk yudda tutu-uk ni iJerusalem. Ehel yun hi-gada e nepappeg law hu nanhelheltapan da niya nepesinsahan law hu liwat da \* tep negibbuh law nengastiguan kun hi-gada." <sup>3</sup> Wadalli medngel ni um-ehel e kantuy "Pengapya kayud desert ni dellanen APU DIOS ni ellian tu. Iyayyaggud yu dellanen ni Dios tayu!" <sup>†</sup> <sup>4</sup> Tabab yudda nehayyukung niya deklan yudda duntug. Iyayyaggud yudda lawah ni dalan niya andeng yudda eleg meandeng, <sup>5</sup> ma-lat maipeang-ang niya maipeamta hu dayaw APU DIOS ni emin ni tuu." Huyya inhel ni AP-APU ni peamnu tu.

<sup>6</sup> Entanni ey wada immehel e kantuy "Tekuk ka!" Et kangkuy "Hipa ittekuk ku?"

† **38:18** 38:18 Dakel ida tutu-u eman ni eleg ni alian Christo eyad puyek ni eleg mengamta e tegguan alin APU DIOS ida nangketey et ipapteki tudda. ‡ **38:18** 38:18 Ang-ang yu hu 2 Timothy 1:10. \* **39:6** 39:6 Ang-ang yu hu Daniel 1:2 et ya 5:3. \* **40:1-2** 40:1-2 Kan ni edum ni neitudek ey "netekla law hu liwat da. † **40:3** 40:3 Ang-ang yu hu Matthew 3:3, ya Mark 1:3 et ya John 1:23.

Kan etan ni immehel ey "Itkuk mu e kammuy 'Emin hu tuu ey henidda helek e kametty. Ya dayaw da ey heniddan habung e anggegannuy neendi. <sup>7</sup> Kamekling hu helek niya kameplag hu habung hedin immandal APU DIOS. Hanniman dama kameippahding idan tutu-u. <sup>8</sup> Em, nanna-ud ni mekling ida helek niya me-gah habung da, nem hedin ya ehel Apu Dios tayu ey mannananeng ni ingganah.'" ‡

<sup>9</sup> Wada kayyaggud ni meippeamta! Lakkayuy idad tuktuk ni etata-gey ni duntug, et yu itkuk diman et dengelen ida ijerusalem niyadda edum ni ijudah e kanyuy "Iyyalli hu Dios yu." Lakkayuy, entan takut yun mengitkuk nunman idad bebley di Judah. <sup>10</sup> Em, immen ali hi APU DIOS e Eta-gey ni peteg ni man-ap-apun emin ni tutu-u, e wada et-eteng ni kabaelan tu. Ittabin tudda tutu-u tun ginun-ud tun inhewang tu. § <sup>11</sup> Ippaptek tu tutu-u tu henin kapemapteki ni kamampattul ni kalneroh e tuka eppupuadda impah ni kalneroh, niya tuka ippanguludda ineda ma-lat ipaptek tudda. \*

*Ya Dios idan helag Israel e endi kei-ingnghan tu*

<sup>12</sup> Hipa kabaelan tun mantetpeng ni danum di baybay † e ussalen tu ngamay tu? Ey hipa hantepeng tu kalinakkeb ni kabunyan e dedpaen tu ngamay tun mantetpeng? Ey hipa pakatpeng ni kabinel-at eyan puyek niya duduntug e ihhambag tu et ikiloh tu? Ebuh hi APU DIOS ni dammutun mengippahding idan nunya.

<sup>13</sup> Hipa kabaelan tun mengituttuddun APU DIOS ni pehding tu niya hipa dammutun menuggun niya manmandal ni hi-gatu? ‡ <sup>14</sup> Ey hipa nenuttuddun APU DIOS ma-lat han-awat tu niya ma-lat inamta tu kayyaggud ni pehding tu?

<sup>15</sup> Endi, tep ya kakulugan tu ey hedin i-ingnghan ida katuuuuud kebebbbley eyad puyek nan hi APU DIOS, ey henidda hakey ni ih-ih ni ebuh di hambaldih ni danum. Ey hedin ya keingnghan ni bel-at da ey henidda dep-ul ni ebuh di killohhan. Anin idan bebley di gawwan baybay et endi bel-at dan hi-gatu, e henidda pinun dep-ul. <sup>16</sup> Yadda keyew di mumuyyung di Lebanon ey kulang ni pengihheb ni mei-appit nan APU DIOS, niya kulang ida animal diman ni mei-appit ni hi-gatu. <sup>17</sup> Emin ida tutu-ud kebebbbley ey endi silbi da niya endi bilang dan hi-gatu.

<sup>18</sup> Hipa tep law pengi-ingnghan nan hi Apu Dios? Kaw wada mei-ingnghan ni hi-gatu? Endi! <sup>19</sup> Hi-gatu ey beken ni heniddan dios ni kinapkapyan tutu-un nekapyad gumek ni na-meh ni balituk et ituun dad silber. <sup>20</sup> Ey hedin newetwet etan tuu et eleg tu hanggela balituk niya silber, ey ya beken ni kaddudunut ni keyew hu kapyaan tu, nem pekapyaa tun nelaing ni mampaot ma-lat beken ni kattutu-li.

<sup>21</sup> Nemi kaw eleg yu amta niya kaw eleg yu denglen hu elaw ni naltuan eyan puyek? Kaw endi anin hakey ni nengituttuddun hi-gayun elaw nunya? Kaw eleg yu han-awat? <sup>22</sup> Hi Apu Dios hu nanletu eyan puyek. Immen e yimmudung di yuddungngan ni patul di kabunyan e ahpat eyan puyek e meli-bahan ida kulput. Ya tuka penang-ang idan tuu eyad puyek ey henidda abbutun. Heni hephep ni imbiklag tu hu kabunyan et heni tulda ni pambelleyan. <sup>23</sup> Tuka pebabah hu saad idan etata-gey ni ap-apu et pambalin tuddan endi bilang da. <sup>24</sup> Henidda etan ni pakeitnem ni eleg ni meihammad lamut da e hedin impaelin APU DIOS hu maetung ni dibdib ey ida kamekling ni intayab idan dibdib e henidda degi.

<sup>25</sup> Hipa pengi-ingnghan tayun Apu Dios e Kayyaggud ni peteg? Kaw wada mei-ingnghan ni hi-gatu? Endi! <sup>26</sup> Itengaw yud kabunyan, hipa nanletuddan bittuwen? Hi-gatu nanletun hi-gada niya hi-gatu hu nengipebudal ni hi-gada. Hi-gatu pay hu nengamtan ngadan da ey hedin pigadda. Ey gapuh ni kabaelan tu ey endin hi-gada hu netalak, anin ni hakey.

<sup>27</sup> Et humman hu, hi-gayun iIsrael ey entan tu ehel e eleg amtan APU DIOS hu yuka panhelheltapi niya eleg tu hengnguda anin ni dakeyuu kapanhelheltap ni edum ni tuun ni endi puut tu. <sup>28</sup> Kaw eleg yu dengelen niya kaw eleg yu inamta e hi APU DIOS ey hi-gatu hu Dios ni wadan ingganah? Hi-gatu nanletun puyek. Eleg um-inglay niya eleg meettu. Ey endi pakeawat ni kalinaing tu. <sup>29</sup> Tuka iddawat hu et-eteng ni kabaelan idan endi kabaelan da niya tudda kape-let hu nekapuy. <sup>30</sup> Anin ni u-ungnga et kameettu. Ey anin idan kat-agun lalaki et ida kaumkapuy niya kameendi dinel da. <sup>31</sup> Nem hedin yadda kamengiddinnel ni baddang APU DIOS ey pe-let tudda e henidda mepeyyangan et tumyab idad eta-gey e henidda tulduh. Ey anin ni umbesik ida et eleg ida meettu, niya anin ni edawwi delladellanan da et eleg ida mehellangeb.

‡ 40:8 40:8 [6-8] Ang-ang yu hu 1 Peter 1:24-25. § 40:10 40:10 Isaiah 62:11b \* 40:11 40:11 Jeremiah 31:10, Ezekiel 34:11-16 † 40:12 40:12 Job 28:25 ‡ 40:13 40:13 Ang-ang yu Romans 11:34 et ya 1 Corinthians 2:16.

## 41

*Hi APU DIOS hu kamemaddang ni Israel*

<sup>1</sup> Kan APU DIOS ey "I-ineng kayu et dengelen yu eya e-helek. Hi-gayun tutu-ud kebebbbley, anin idan nangkeigawwad baybay, ali kayu et manhuhummangan itsu. Hipan hi-gayu hu dammutun mekihhanggan hi-gak? Iddawtan dakeyun wayah yun un-ehel et ang-angen tayu hedin hipa neiptek.

<sup>2</sup> Hipa nengi-li etan ni tuun nalpud appit ni kasimmlin aggew ni kamekangngapput ni emin ni bebley ni tuka pekiggubbat? \* Hipa nengidwat ni kabaelan tun mengapput idan papatul niyadda tutu-ud kebebbbley hedin beken ni hi-gak ni ebuh? Tuka ussala ispadah tu niyadda panetu et pambalin tudu buhul tun heni dep-ul niya degin ittayab ni dibdib. <sup>3</sup> Tudu kapampedugad dalan ni eleg tu dalanen ni nunman, ey endi kameippahding ni hi-gatun lawah. <sup>4</sup> Hipa nenang-ang ma-lat maipahding idan emin huyyad kebebbbley ni nunman ingganah nunya? Hi-gak e hi APU DIOS e wada dedan ni laputu niya wadallin kepapegan ni puyek, hu nengipahding idan emin nunya."

<sup>5</sup> Inang-ang ni katutuud kebebbbley hu impahding APU DIOS ey ida kaumgeygey ni takut da. Et humman hu meemung idalli et umlidda. <sup>6</sup> Wadalli hakkey idan kamandeyyaw ni dios da ey a-alluken tu kadwa tu e kantuy "Pekedhel yu nemnem yu!" <sup>7</sup> Hi-gayun kamapaot, yadda kaman-e-dih, niya hi-gayun edum ni kamampanggunnu, ey a-alluk yu edum yu e kanyuy "Tam ay deh e kayyagud impahding mu." Ey nambabaddang kayu et peehng yu etan dios yu et ipetak yu ma-lat eleg metu-li.

<sup>8</sup> "Nem hi-gayun helag Israel ni bega-en ku hu pinilik ni tutu-uk e helag nan Abraham e gayyum ku. <sup>9</sup> Inlapu dakeyud nangkeidawwin bebley di gilil ni puyek et kangkun hi-gayuy: Hi-gayu bega-en ku niya pinili dakeyun tutu-uk. Eleg dakeyu iwwalleng. <sup>10</sup> Entan takut yu niya entan kedismayah yu, tep wada-ak ni Dios yu. Pe-let dakeyu, baddangan dakeyu niya ippaptek dakeyu ma-lat ihwang dakeyu.

<sup>11</sup> Mebe-ingan idalli hu kamengibubbunget ni hi-gayu tep meapput idalli. Mettey idalli menggubbat ni hi-gayu <sup>12</sup> et meendidda eyad puyek.

<sup>13-14</sup> Hi-gayun helag Israel, hi-gak e hi APU DIOS e Dios yu hu mengippa-let ni hi-gayu. Et humman hu, entan takut yu tep baddangan dakeyu. Anin ni nekakapuy kayu ey endi bilang yu, et entan nisi takut yu tep baddangan dakeyun hi-gak. Hi-gak e Kayyagud ni peteg ni Dios ni Israel hu mengihwang ni hi-gayu.

<sup>15</sup> Heni kayulli baluh ni kapan-illik ni makattadem hu ngipen tu, et heni yulli pan-illiken hu duduntug † et guduen yudda et pambalin yuddan heni degi. <sup>16</sup> Tel-apen yuddalli et pan-ityab idan dibdib et pan-iwehit idan pewek. Et man-am-amleng kayu tep ya nengulugan yun hi-gak e hi APU DIOS. Ey deyyawen yuwak ali e Kayyagud ni peteg ni Dios ni Israel.

<sup>17</sup> Hedin manheppul kayun tutu-uk ni danum hedin na-wew kayu, ey hi-gak e hi APU DIOS ey dedngelek dasal yu. Hi-gak e Dios ni Israel ey eleg dakeyu iwwalleng. <sup>18</sup> Peukkat ku danum idad ta-pew ni duduntug ni endi kaumtagun neitnem et maweda wangwang ni mampellaw idad nedeklan. Ey weddaen kuddalli hebwak et mambalin idan lebeng hu mamegan puyek. <sup>19</sup> Weddaek ali dama mumuyyung idad desert e mamegan puyek et patmel kudda keyew e henin sedar, yadda akasya, yadda myrtle niyadda olibah. Anin idan belbel, yadda fir, yadda cypress niyadda edum ni klasih ni keyew et umtemel idad puyek ni eleg la ni umtemel kameitnem. <sup>20</sup> Et han ali ang-angan tutu-u huyya et pengamtaan da e hi-gak e hi APU DIOS e Kayyagud ni peteg ni Dios ni Israel hu nanwadaddan nunman. Ey ewwatan dalli law e hi-gak hu nengipahding idan nunya." ‡

*Endi silbiddan beken ni makulug ni dios*

<sup>21</sup> Hi-gak e hi APU DIOS e patul ni Israel ey kangkuy "Imay, hi-gayun dios ni kinapyan tuu, ali kayu et panhuhummangan tayu hedin hipa kanyu. Ey peang-ang yu hu pengimmatunan tayun kakulugan tu e dios kayu. <sup>22</sup> Keyuy et ehelen yu pangngu dedan hedin hipalli mekapkapan edum ni aggew, ey hedin pigantu kekapkapaan tu ma-lat amtaen tayu. Ey ehel yu hedin hipadda neipenahding nunman ey imbage yu keibbellinan idan nunman hedin makulug ni kabaelan yu!

<sup>23</sup> Imay, hedin kanyuy dios kayu, ehel yu hedin hipaddalli meippahding idan tutu-un edum ni aggew. Niya attu et wada pahding yun kayyagud niya lawah ni

\* **41:2** 41:2 Huyyan melpud appit ni kasimmlin aggew ey hi Cyrus e patul di Persia. Inhel APU DIOS e hi-gatu niyadda sindalu tullu mengihwang idan helag Israel ni tutu-u tun neihbutan dad Babilon. (Ang-ang yu hu Isaiah 41:25 et ya 44:28.) † **41:15** 41:15 Ya keibbellinan ni duduntug ey yadda kebebbbley eyad puyek ni buhul ni Israel. ‡ **41:20** 41:20 [17-20] Impakulug APU DIOS e iddawt tun emin hu mahapul idan tutu-u tu hedin mambanggad idad bebley dan melpud Babilon e neilawwan da.

kamengippetnga et matnga kami ma-lat pengamtaan mi e dios kayu? <sup>24</sup> Ya kakulugan tu ey endi dedan silbi yu niya endi silbin yuka pehpending. Yadda kamandeyyaw ni hi-gayu ey lawah ni peteg hu elaw da.

<sup>25</sup> Wada etan pinutuk kud appit ni kasimmilin aggew § ni peellik alin mengubbat idan aap-apu. Ilapu tullid north ni umgubat. Ngedndanen tullu ngadan kud dasal tun pambeggaan tun baddang ku. Mei-ellig ni pan-iggasin tuddalli aap-apu e henidda pitek, ey henin kapehding ni kamengapyan banga e tuka pan-igsin etan pula.

<sup>26</sup> Hipan hi-gayu kabaelan tun mengebbig e hanneyalli mekapkapy? Et hedini umkulug ey kammiy, hiyya numan! Nem ya kakulugan tu ey endi hakey ni nadngel ni immehel. <sup>27</sup> Hi-gak e hi APU DIOS ni ebuh hu nemangulun nanghel idan iZion ni nunyan kayyagud ni meipahding. Intu-dak kud Jerusalem hu an menghel e kandy 'Ida kamengennamut tutu-u yu.' <sup>28</sup> Nem endidda etan ni dios ni kinapyan tuu hu kaumehel, ey endin hi-gada pakehumang ni nakka mahmahi. <sup>29</sup> Huyyadda dedan ni dios ni kinapyan tuu ey endi silbi da. Endi mabalin ni pehding da, tep endi kabaelan da."

## 42

### *Ya etan Bega-en APU DIOS*

<sup>1</sup> Kan APU DIOS ey "Huyya pinilik ni bega-en kun indawtak ni kabaelan tu. Hi-gatu mengippeamleng ni hi-gak. Winedak hu Ispirituh kun hi-gatu et meandeng ali panhumalya tud kebbebley eyad puyek. <sup>2</sup> Hedin hi-gatu, man eleg tu e-leta ehel tu. Eleg tu pedngel ehel tud keltad. <sup>3</sup> Eleg tu ma-maadda nekapuy niya eleg tu endia anin ni ekket ni namnamah. Meandeng alin ingganah hu penuwet tuddan emin ni tutu-u. <sup>4</sup> Hi-gatu ey eleg medismayah niya eleg meendi namnamah tu ingganah ang-angen tu e meandeng emin hu kamekapkapyad kebbebley eyad puyek. Ey anin idan nambebley di nangkeidawwin bebley et ihik dan dedngelen hu tuka ituttuddu." \*

<sup>5</sup> Hi Apu Dios e AP-APU e nanletun kabunyan ey hi-gatu hu heni nengibiklag ni nunman. Lintu tu mewar hu puyek, anin idan emin ni wadadman. Ey hi-gatu nengidwat ni yayyah niya biyag ni emin ni tuu. Kantu etan ni bega-en tun kamengippaptek ni tuu ey <sup>6</sup> "Hi-gak e hi APU DIOS ey pinutuk daka niya indawtan dakan kabaelan mu ma-lat meandeng hu meipahding eyad puyek. Et gapun hi-gam ey peamnuk etan nehammad ni nekitbalak ni panyaggudan idan tutu-uk. Hi-gam mewar dilag ni pellow kud emin ni kebbebley eyad puyek. <sup>7</sup> Dedyatan muli mataddan nekulap ma-lat han-ang-ang da niya ibbukyat muddalli neikelabut."

<sup>8</sup> "Hi-gak ni ebuh hu APU DIOS ni Dios yu. Eleg mabalin ni wada edum ni an medeyyaw hedini beken ni hi-gak ni ebuh. Eggak mewar pinhed ni yadda kinapyan tuun dios ey ida mekiggedwan dayaw ku. <sup>9</sup> Emin ida inhel kun meipahding ey impeamnuk. Yan nunya ey e-helek mewar ida etan eleg ni maipahding."

### *Ya a-appeh ni penaydayaw nan APU DIOS*

<sup>10</sup> Pan-a-appeh kayun baluh ni a-appeh ni penaydayaw yun APU DIOS, hi-gayun emin ni wadad kebbebley eyad puyek, anin ni hi-gayuddan kamampabapor, hi-gayun emin ni wadad baybay niya hi-gayuddan wadad nangkeidawwin bebley. <sup>11</sup> Pakia-appeh kayuddan nambebley di desert. Anin ni hi-gayuddan iKedar et ia-appeh yu dama yuka penaydayaw nan APU DIOS. Hi-gayun iSelah, itkuk yu anla yuddad ta-pew ni duduntug! <sup>12</sup> Dayaw yu hi APU DIOS, niya yu peamtad nangkeidawwin bebley hu dayaw tu.

<sup>13</sup> Meukkat ali hi APU DIOS ni an mekiggubbat e heni bimmubbunget ni sindalun kamantetekkuk ni mekihhanggaddan buhul tu et paka-apputen tudda. <sup>14</sup> Kantuy "Nebayag ni nakka pemegga i-ineng e insisipel ku bunget ku. Nem yan nunya ey pakkadek ni wada pehding ku. Nakka mampalak tep eggak law han-isipel e heniak etan ni biin man-ungnga. <sup>15</sup> Bahbahen kuddalli duduntug ey mag-anan kudda keyew niya helek. Mag-anan kuddalli dama wangwang ey tetdukan kudda lebeng. <sup>16</sup> Ippanguluk idalli tutu-uk, e henidda nekulap di keltad ni eleg da patnaan ni dalanen ni nunman. Ey pambalin kullin kawwalwal hu engeenget ni kad-an da. Deklanan kuddalli nangkehukungan ni dalan da. Huyyaddalli pehding ku tep eggak ida iwalleng.

<sup>17</sup> Nem hedini yadda mengiddin idan kinapyan tuun dios e kandy humman ida dios da, ey eggak ida hengnuda et mabeingan ida."

### *Ya eleg pengun-unnudiddan iIsrael*

§ 41:25 41:25 Huyya inhel APU DIOS e kantuy itu-dak tullu hi Cyrus e patul di Persia et apputen tu kebbebley. Immamnu huyya eman ni nelabah hanggatut et neliman toon ni nengitudekan Isaiah nunya. (Ang-ang yu Isaiah 41:2 yu 44:28.) \* 42:4 42:4 [1-4] Huyyan neabig ey ya illian Christo. (Ang-ang yu Matthew 12:17-21.)

<sup>18</sup> Kan APU DIOS ey “Hi-gayun heni netuleng, ey dengel yu e-helek. Ey hi-gayun heni nekulap, ey deyat yu mateyu. <sup>19</sup> Kaw wada edum ni heni nekulap niya netuleng hedin beken ni hi-gayun helag Israel e bega-en kun intu-dak kun an mengippeamtan makulug? <sup>20</sup> Ma-nu tep han-ang-ang yu niya handengel yu, nem eleg yu hengnguda.”

<sup>21</sup> Hi APU DIOS ey pinhed tudda helag Israel e bega-en tun meippeta-gey et hi-gada keang-angan ni dayaw ni tugun tu. <sup>22</sup> Nem anghehemmek ida law tep piniliw ni buhul da limmu da niya nan-ikelabut dadda, ey endi kaumlaw ni mengihwang ni hi-gada.

<sup>23</sup> Hi-gayun tutu-u tun helag Israel, kele eleg kayu mesilleg? Dengel yu kedi anhan hu tugun nan APU DIOS ni hi-gayu! <sup>24</sup> Kaw beken ni hi-gatu nengiebulut ni pengellaan ni buhul yun emin ni limmu yu? Hi-gatu hu nanliwtan yu! Hi-gatu kan tugun idan eleg yu u-unnuden, et kahingen yu pinhed tun pehding yu. <sup>25</sup> Et humman hu, impagibek tu hu nemahhig ni bunget tun hi-gayu et kastiguen dakeyud gubat. Heni dakeyu intungud apuy et magiheb kayu, nem eleg yu awatan niya eleg kayu masileg.

## 43

### *Ya nenelaknib ni Israel*

<sup>1</sup> Nem yan nunya ey kan APU DIOS e namyuh ni hi-gayuy “Entan takut yu e helag Jacob, tep inhewang dakeyun hi-gak. Ey hi-gayu pinilik ni ingngadnak ni tutu-uk. <sup>2</sup> Wada-ak ni ingganah ni umbaddang ni hi-gayu. Et humman hu, anin ni um-ali hu ligat ni hi-gayun kamei-ellig ni man-agwat di edallem ni danum, et eleg kayu melsing. Ey anin ni kayu kamanhelheltap e kayu kamei-ellig ni kamandaddallan di apuy, et eleg kayu meettungi. <sup>3</sup> Hi-gak e hi APU DIOS e Kayyaggud ni peteg ni Dios ni Israel hu mengihwang ni hi-gayu. Impeapput ku Egypt, ya Ethiopia niya Seba ma-lat penulluk kun keliblihan yu. <sup>4</sup> Em, hi-gayun tutu-uk ey nebalol kayun peteg ni hi-gak niya nakappinhed dakeyu, mukun indawtan dakeyun dayaw yu. Et henin nunman impahding ku e inhullul ku biyag ni edum ni tutu-ud biyag yu.

<sup>5</sup> Ippidwak mewan ni e-helen ni hi-gayu e entan takut yu, tep wada-ak ni mengip-paptek ni hi-gayu. Emmungen dakeyulli niyadda u-ungnga yud appit ni kasimmilin aggew niyad appit ni kakelinnugin aggew et ienamut dakeyu. <sup>6</sup> Et hannak ali eheladdan katuutuud kebebbley eyad puyek e kangkuy 'Ibukyay yudda et pebangngad yudda tutu-uk di bebley da. <sup>7</sup> Tep hi-gada pinilik ni tutu-uk ni lintuk ni mengidaydayaw ni hi-gak.’

<sup>8</sup> Et humman hu, pebangngad yudda humman idan tutu-uk ni hi-gak. Humman idan tutu-uk ey anin ni wada mateda, et henidda nekulap, wada tangila da, nem henidda netuleng.

<sup>9</sup> Hi-gayun emin ni katuutuud kebebbley, kaemung kayu et ehelen yu hedin hipaddan dios yu hu nengabig nunman idan kameippenahding ni nunya. I-li dadda tistigu da ma-lat peang-ang da e neiptek niya makulug hu inhel da.

<sup>10</sup> Nem hedin hi-gak e hi APU DIOS, man wada tistiguk. Hi-gayun helag Israel hu tistiguk niya bega-en kun pinilik ni mengamta niya mengiddinnet ni hi-gak. Em, hi-gayu pinilik ni mengewwat e hi-gak ni ebuh hu Dios, endi edum. Anin ni yan nunman niyallin edum ni aggew et endi edum ni Dios nem hi-gak ni ebuh. <sup>11</sup> Hi-gak ni ebuh hu Dios niya hi-gak ni ebuh hu kaumhelaknib e endi edum. <sup>12</sup> Impeamtak ni hi-gayu hu mekapkapyallin edum ni aggew, et baddangan dakeyu. Yadda dios ni edum ni tutu-u, ey endin hi-gada hu wada kabaelan dan mengippahding ida eyan nakka pehpending. Hi-gayu tistiguk e hi-gak ni ebuh hu Dios. Hi-gak e hi APU DIOS hu nanghel idan nunya. <sup>13</sup> Hi-gak dedan hu Dios ni wadan ingganah. Endi hakey ni dammutun mekihhanggan hi-gak niya an menullul ni ninemnem kun pehding ku.”

### *Ya hemek APU DIOS niya pangngenghayan idan helag Israel*

<sup>14</sup> Hi APU DIOS e Kayyaggud ni peteg ni Dios yun helag Israel e kamengihwang ni hi-gayu ey kantuy “Ya pehding kun mengihwang ni hi-gayu ey peellik ali mengubbat idan iBabilon. Nekallakah penggepan dan nunman ni bebley da. Et mambalin alin nangih hu tekutekuk dan daka pampahhiyai. <sup>15</sup> Hi-gak e hi APU DIOS e Dios yun Kayyaggud ni peteg hu namyuh ni hi-gayun helag Israel ey hi-gak hu patul yu. <sup>16</sup> Hi-gak e hi APU DIOS hu nengapyan dellanen di gawwan baybay ma-lat idlan idan tutu-uk diman. <sup>17</sup> Ey binabhah kudda nangka-let ni sindalun Egypt, yadda kalesah da, niyadda nampantakay di kebayyu. Nangkalsing idad baybay et meendidda e henidda kengkeh ni na-dep.

<sup>18</sup> Nem liwwan yudda humman ni neipahding ni nebayag, <sup>19</sup> tep wadalli hin-appil ni pehding kun ang-angen yullin endi kei-ingngehan tu. Ey tam deh e kamangkeippahding et yuka ang-ang-anga. Mengapya-ak alin keltad ni dellanen yun tutu-uk di desert et umenamut kayu ey weddaen kuddalli wangwang diman. <sup>20</sup> Daydayawen da-ak idallin

animal di muyung e henin jakal niya ostrits ni pengidwatan kun danum ni hi-gadad desert. Em, weddaen kulli hibuy di desert ma-lat wada innumen idan pinilik ni tutu-uk.<sup>21</sup> Hi-gayun helag Israel ey lintu dakeyun pantu-uk ma-lat peamta yud kebebbbley hu dayaw ku.

<sup>22</sup> Nem hi-gayun nakappinshed kun tutu-uk ey eleg yuwak law daydayawa tep impeinglay yuwak. <sup>23</sup> Beken ni hi-gak \* hu nengiappitan yuddan kalneroh yun kagihheba niya eleg yu i-appit ida edum ni nakka ibbagan i-appit yun penaydayaw yun hi-gak. Nem eleg dakeyu panligligat, tep beken ni nehuluk hu imbagak ni i-appit yun pagey niya insensoh. <sup>24</sup> Endi mewan in-appit yun bangbanglu niya endi giniheb yun taban in-appit yun hi-gak ma-lat umamlenggak. Nem impadgeh yu kumedek nemnem ku tep yadda liwat yu. Impeinglay kudda law hu lawah ni impenahding yu.

<sup>25</sup> Nem anin ni henin nuntan et hi-gak e Dios ey nakka pessinsahi hu liwat yu et eggak law nemnememadda humman, tep hanneya elaw ku. <sup>26</sup> Nemnem yudda la nelabah ni aggew et manhuhumangan itsu. Kaw wada hu dammutun peang-ang yun keangangan tun eleg kayu manliwat ni hi-gak? <sup>27</sup> Ya kakulagan tu ey nanliwat la dedan ni hi-gak hu nemangulun aammed yu. † Anin idan aap-apu yu et eleg da-ak u-unnuden. <sup>28</sup> Et humman hu, nanna-ud ni pe-kal kuddalli papaddin ap-apu yud Tempol. Ey i-abulut kullin mebahbah kayun helag Israel et mebabba-ingan kayu.”

## 44

<sup>1</sup> Kan mewan APU DIOS ey “Hi-gayun helag Israel ni pinilik ni bega-en ku, dengel yuwak kedi anhan. <sup>2</sup> Hi-gak hu APU DIOS ni namyuh ni hi-gayu niya hi-gak nemenaddang ni hi-gayu neipalpu eman ni neiungngaan yu. Entan takut yu! Bega-en dakeyun hi-gak niya hi-gayu pinilik ni tutu-uk ni nakappinshed ku. <sup>3</sup> Iddawtan dakeyun dakey ni danum e weddaek ida wangwang di nekamma-ganan ni bebley yu. Peellik Ispirituh kuddan helag yu et bendisyonan kudda. <sup>4</sup> Kayyaggud ali biyag da. Heniddalli mateban helek niya keyew ni willow di gilig ni wangwang e eleg mekullangin danum. <sup>5</sup> Kandalliy ‘Hedin hi-gak, man tuu tuwak APU DIOS’ niya kanday ‘Hedin hi-gak, man nahlaggak nan Jacob.’ Yadda mewan edum ey ittudek dad ngamay da ngadan APU DIOS ey kanday iIsrael ida.”

<sup>6</sup> Kan mewan APU DIOS e Kabaelan tun emin e kamenellaknib idan helag Israel ey “Hi-gak ni Dios ni ebuh hu endi laputu niya endi pappeg tu, endi edum. <sup>7</sup> Kaw wada edum ni henin hi-gak e tuka e-hela hu meippahding alin edum ni aggew, ni kimmulug tu-wangu? Ey kaw wada henin hi-gak e inamtak ngu dedan hu meippahding eman ni laputu ingganah alin kepappegan tu? Ipatna dan e-helen hu meippahding alin edum ni aggew hedin dammutun han-ipahding da. <sup>8</sup> Entan takut yu e tutu-uk. Inamta yu e neipalpu dedan lan nebayag ingganah nunya ey inhel ku hedin hipa meippahding, niya hi-gayu tistiguk. Kaw wada edum ni dios? Endi. Ey endi edum ni heni batun keihhikkugan yu hedin beken ni hi-gak ni ebuh.”

<sup>9</sup> Yadda kamengennapyan tuttu-un dios ey neihalladda. Humman idan dios ni kinapya dan daka ibbilang ni nebalol ni peteg ey endi silbi da. Ey yadda kamandeyyaw idan nunman ey henidda nekulap et endi inamta da. Et humman hu, mebabba-ingan idalli. <sup>10</sup> Kaw hipa gun-uden ni kamenaydayaw ni kinapyan tuun dios? <sup>11</sup> Kaw beken ni ya tuu nengapyan nunman? Yadda kamenaydayaw idan nunman ey mebabba-ingan idalli. Imay, kaemung kayun emin ni kamenaydayaw idan nunman et humalyaen dakeyun hi-gak. Nanna-ud mannuman ni nemahhig takut yu niya baing yu.

<sup>12</sup> Ya kaman-e-dih ey tuka illelleldang hu gumeke ni immelelet ni mammassilyu ma-lat mekapya annel etan ni kapaen tun dios, ni han tu mewan inyenayyaggud ang-ang tu. Lektattuy na-wew humman ni kaman-e-dih ey neupa niya neka-atu.

<sup>13</sup> Hedin yu dama etan kamampaot ni kamengapyan keyew ni dios, ey tu ni katettetpenga ni minenalkaan tu ni tinekataku tu et mekapyan tuttu-u, ni inyenayyaggud tu et kayyaggud ang-ang tu, ni han tu inha-ad etan di babballey ni keihha-adan tu. <sup>14</sup> An na-mu limmengeh ni keyew e sedar ni ussalen tu winu an immalan belbel niya paleyen et tu itnem di muyung winu nantanem ni belbel et hegeden tun peetteng ni udan <sup>15</sup> et han tu lengeha. Et panungu tu et pandangdangan tu niya intungu tun nenaengan tun sinapay. Nem yu edum ey paoten tu et mengapyan dios tun pandukungan tu et dayawen tu. <sup>16</sup> Penunggu tu edum etan ni keyew et pengitangangan tun detag et ihide tu et makaphel ey nandangdangan tu edum e kantuy “Kayyaggud ni pandangdangan eya mangelab ni keyew.” <sup>17</sup> Ya etan natdaan ni keyew ey tuka paotan dios tu ey nanyuung di

\* **43:23** 43:23 Amos 5:25 † **43:27** 43:27 Ya kantun ‘nemangulun aammed’ ey hi Jacob na-mu. Nem kan ni edum ey hi Abraham niya kan idan edum ey hi Adam.



hinanggan nunman ni pinaot tu ni dineyaw tu. Kamandalan mewar nunman ni kinapya tun dios e kantuy "Hi-gam dios ku, ihwang muwak anhan."

<sup>18</sup> Yadda henin nunman ni tutu-u ey eleg da amta daka pehpehding tep endi nemnem da. Eleg da amta niya eleg da han-ang-ang hu makulug tep heni da kinimit mateda et eleg da awatan, tep impekelhi da ulu da. <sup>19</sup> Gullat et, nemnemen idan nunman ni tutu-u e ya etan bengwah nunman ni keyew ey impanungu dan kenen da niya nengitangtangan dan detag et kanen da. Ey kele an kapaen ni dios hu bengwah tu et ita manyuung di hinanggan nunman ni keyew et an daydayawen?

<sup>20</sup> Endi tunung tu humman ni daka pehpehding. Ininggeh tu hu ida kamengngan humman ni tutu-un dep-ul, tep ida kamandinnel di endi kabaalan tun umbaddang. Ey endin hekey hu kandad nemnem day "Kaw dios makkaw ngu eya tayu katettenggedan keyew?"

*Hi APU DIOS hu makulug ni Dios*

<sup>21</sup> Kan APU DIOS ey "Hi-gayun helag Israel, nemnem yu e bega-en dakeyun hi-gak. Hi-gak namyuh ni hi-gayu, eleg dakeyu iwwalleng. <sup>22</sup> Liniwwan ku liwat yu et endi law e henin kulput ni kakkabbuhhan e hedim pimmetang, man neendi. Et humman hu, pambanggad kayun hi-gak tep hi-gak nengihwang ni hi-gayu."

<sup>23</sup> Hi-gayun wadad kabunyan, anin idan hi-gayun wadad puyek, itku yu amleng yu! Ey hi-gayuddan duduntug, yadda mumuyyung, ey hi-gayuyuddan keyew, ia-appah yu amleng yu, tep hi APU DIOS ey inhewang tudda helag Israel et keang-angan ni dayaw tu.

<sup>24</sup> Hi APU DIOS e nengihwang ni hi-gayu niya namyuh ni hi-gayu ey kantuy "Hi-gak hu nanletun emin. Hi-gak mewar hu nengibiklag ni kabunyan niya hi-gak hu nanletun puyek niyaddan emin hu wadadya e endi bimmaddang ni hi-gak. <sup>25</sup> Peang-ang ku e maitek ida humman ni beken ni makulug ni prophet, tep eggak peamnu etan inhel dan meippahding. Anin ni ya inhel idan maebig ni meippanggep idan bibittuwen, ya bulan niya aggew, et eggak peamnu. Ey pambalin kun endi keibbellinan ni kaittugun idan nelaing et mambalin idan heni endi nemnem da.

<sup>26</sup> Nem hedim yadda bega-en ku man-ebbig, niya hedim peamtaddan prophet ku hu planuh ku ey peamnuk ni emin hu e-helen da. Et hedim kanday meiyayyagud ali mewar hu Jerusalem niya Judah et mambeley idalli mewar tutu-udman, ey peamnuk et maipahding. <sup>27</sup> Ey hedim kangkuy mema-ganan hu baybay niyadda wawangwang, ey um-amnu et mema-ganan ida tu-wangu. <sup>28</sup> Ya hakey mewar ey hedim e-helek hu pehding ni hakey ni tuu ey um-amnu et meippahding. Tep henin nan Cyrus e inhel ku e kangkuy: 'Makulug ni hi-gatu ihha-ad kun man-ap-apu. Et hi-gatu mengippahding ni pinhed kun mekapkapa. Hi-gatulli mengimmandal ni pengiyayyagudan dan Jerusalem, anin ya etan keittu-unan ni Tempol et pekapa tu.' " \*

## 45

*Pinutuk APU DIOS hi Cyrus ni mampatul*

<sup>1</sup> Pinutuk nan APU DIOS hi Cyrus ni mampatul. Hi-gatu pinili tun mengapput idan papatul et sakupen tu kebbebley tep baddangan tun heni tu pan-ibbeghul hu eheb idan nunman ni bebley. Kan APU DIOS nan Cyrus ey <sup>2</sup> "Ipappangguluk et idaddan ku dellanem. Pandeklanek ida duntug niya pambahbahek ida eheb ni nekapyad giniling, anin idan gumek ni lekbi da. <sup>3</sup> Iddawat kun hi-gam ida kinedangan \* e nangebalol ni neitlud engeenget e endi nengamta, et pengamtaam mu e hi-gak hi APU DIOS e Dios ni Israel hu nemilin hi-gam. Tep nginedan ku dedan ni nunman hu ngadan mu e pambega-en daka et han ka maweda.

<sup>4</sup> Pinutuk dakan hi-gak ma-lat baddangan ida bega-en kun helag Israel e pinilik ni tutu-uk. Indawtan dakan et-eteng ni dayaw mu, anin ni eleg muwak amta.

<sup>5</sup> Hi-gak hu APU DIOS, endi edum ni Dios hedim beken ni hi-gak ni ebuh. Iddawat ku et-eteng ni kabaalan ni mahapul mu, anin ni eleg muwak amta. † <sup>6</sup> Nakka pehding hannya ma-lat pengamtaan ni katuutuud kebbebley eyad puyek e hi-gak ni ebuh hu DIOS, endi edum. <sup>7</sup> Lintuk hu kawwalwal, niya engeenget niya peellik hu panyagudan

\* **44:28** 44:28 Ebuh hi APU DIOS ni dammutun menghel hedim hipa meippahding alin edum ni aggew. Huyya inhel APU DIOS nan Cyrus, ey nelabah hu hanggatut et neliman toon neipalpun na-helan nunya et han mampatul hi Cyrus. Tep netey hi Isaiah eman ni 681 B.C. ey nampatul hi Cyrus ni neipalpun 559 B.C. \* **45:3** 45:3 Hi patul e hi Cyrus niyadda etan sindalu tu ey ginubat da hu Lydia niya Babilon et pan-alen da hu kinedangan idan nunya bebley.

† **45:5** 45:5 Eleg amtan Cyrus hi APU DIOS anin ni hi-gatu nengidwat ni kabaalan tun mengapput ni dakel ni bebley ni ginubat tu. Et mukun kantu na-mu nem ya etan dios tun hi Marduk e kadeyyawaddan iBabilon hu nemenaddang ni hi-gatu.

niya kebabhahan. Hi-gak e hi APU DIOS hu mengippahding ni emin nunya. <sup>8</sup> Peellik mewan hu manweddan keihwangan niya meandeng ni pehding, ey peellik hu udan ma-lat tummel neitnem. Hi-gak e hi APU DIOS hu mengippahding mewan nunya.”

<sup>9</sup> Kan APU DIOS idan helag Israel ey “Anggehemmek etan tuun kamekibbekkal ni namyuh ni hi-gatu. Ya pulan bangan henin edum tun banga ey eleg mabalin ni kantu etan ni nengapyan hi-gatuy ‘Isiked mun mengapyan hi-gak tep neihalla impahding mul’ Ey eleg mabalin ni kantuy ‘Beken ni kayyaggud muka pengapya!’ <sup>10</sup> Anggehemmek mewan hu hakey ni u-unggan menghel ni a-ammed tun kantuy ‘Kele hanneya nengapya yun hi-gak?’ ”

<sup>11</sup> Huyya humang APU DIOS e Kayyaggud ni peteg ni Dios ni Israel niya nanletun emin ni wada e kantuy “Kaw wada lebbeng yun manlilih ni planuh kuddan u-unggak? Ey kaw tuttudduan yuwak ni pehding ku? <sup>12</sup> Hi-gak hu nanletun puyek niya hi-gak hu namyuh idan tutu-un namebley diman. Dammutun lintuk hu kabunyan et ibiklag ku tep ya kabaalak. Ey hi-gak kamanmandal idan bittuwen, ya aggew niya bulan. <sup>13</sup> Hi-gak mewan hu mengihha-ad nan Cyrus di saad tu, et ipahding tu hu kayyaggud ni pinhed kun meippahding niya ma-lat ya meandeng hu pehding tu. Iyayyaggud tuli hu nebahbah ni bebley kun Jerusalem, niya ibbukyat tudda tutu-uk ni neikelabut. Pehding tuddalli huyyan eleg metangdani. Hi-gak e hi APU DIOS e Kabaalan tun emin hu nanghel idan nunya.”

<sup>14</sup> Kan mewan APU DIOS idan Israel ey “Ellan yulli kinedangyan ni Egypt niya Sudan, ey mambalin idallin himbut yu hu nangkepaddyang ni tutu-ud Seba. Mebangkiling idalli et meinuunnud idan hi-gayu, niya manyu-ung idan pengippeang-angan dan lispituh dan hi-gayu. Ey kandallin hi-gayuy ‘Dakeyu kababbaddangin Apu Dios, hi-gatun ebuh hu Dios.’ ” <sup>15-16</sup> Hi Apu Dios e Dios idan helag Israel e kamengihwang ni hi-gada ey eleg meewwasi hu tuka pehding. Et humman hu, emin idalli tutu-un kamengennapyan dios da ey meababba-ingan ida. <sup>17</sup> Nem hedin yadda helag Israel ey ihhehwang idan APU DIOS, et melinggep idan ingganah. Eleg idallin hekey mebe-ingi tutu-u tu.

<sup>18</sup> Hi APU DIOS hu nanletun kabunyan niya puyek. Hi-gatu hu Dios. Hinammad tun kinapya hu puyek niya eleg tu ipayyag tep hi-gatu namyuh ni tuun manha-ad diman. Kantuy “Hi-gak hu APU DIOS, endi edum ni Dios. <sup>19</sup> Beken ni neligat hu pengamtaan yun pinhed kun pehding yu, tep in-ehel kud nelakah ni ewwatan yun helag Israel. Ey eleggak meidawwin hi-gayu, et humman hu, dammutun mekiddagyum kayun hi-gak hedin pinhed yu. Tep hi-gak e hi APU DIOS ey makulug ni emin hu nakka e-hela niya neiptek ni emin hu nakka peamtan meippahding ali.”

<sup>20</sup> Kan mewan APU DIOS ey “Kaemung kayun emin ni tutu-un himmesik alin nalpud kebebbbley, ma-lat humalyaen dakeyu. Hi-gayun kamengittebbitebbin idan dios yun nekapyad keyew, kele kayu kamandasal ni hi-gada, ey endi kabaalan dan mengihwang ni hi-gayu? Endi nemnem yu! <sup>21</sup> Kaemung kayun emin et humangen yu diklamuh kun hi-gayu hedin kanyu ey wada silbin yuka penaydayawiddan beken ni makulug ni dios. Panhuhummangan kayu. Hipa nengabig ni nebayag idan kameippenahding nunya? Kaw beken ni hi-gak e hi APU DIOS hu nengihwang idan tutu-uk? Endi edum ni Dios nem hi-gak ni ebuh e meandeng niya kaum-ihwang.

<sup>22</sup> Et humman hu, emin kayun tutu-ud kebebbbley eyad puyek, ey idinel yun hi-gak hu keihwangan yu tep hi-gak ni ebuh hu Dios e endi edum. <sup>23</sup> Issapatah ku e makulug ni emin ali tutu-u ey mandukkun idan penaydayaw dan hi-gak niya e-helen dalli e hi-gak ni ebuh hu u-unnuden da. Issapatah kun um-amnulli huyya. †

<sup>24</sup> Kandalliy ‘Hi APU DIOS ni ebuh kakelpuin elet tayu niya kakinayyaggud tayu.’ Nem hedin yadda tutu-un anggebe-hel da-ak ey meababba-ingan idalli. <sup>25</sup> Dammutun meibbillang ni emin ida helag Israel ni kayyaggud ey hi-gak ali deyyawen da tep ya binabbal ku e hi APU DIOS.”

## 46

### *Endi silbiddan dios ni iBabilon*

<sup>1</sup> Endi law ida dios ni Babilon! Humman idan dios da e di Bel nan Nebo ey intakkay dad donkey niya baka et pan-ilaw dadda. Ida kameliggasi hu animal ni nantakkayan da tep mebel-at ida. <sup>2</sup> Endi kabaalan dan mengihwang ni annel da. Piniliw dadda et pan-ibsik dadda. Huyya nepappegan idan nunman ni dios ni Babilon.

<sup>3</sup> Kan APU DIOS ey “Dengel yuwak e helag Israel, hi-gayun natdaan ni tutu-uk, hi-gayun impenaptek ku neipalpu eman ni neiungnaan yu. <sup>4</sup> Hi-gak hu Dios yu! Ippaptek dakeyun hi-gak ingganah mea-amma kayu e meubbanan kayu. Hi-gak namyuh ni

hi-gayu niya hi-gak mengippaptek ni hi-gayu. Baddangan dakeyun hi-gak et ihwang dakeyu.”

<sup>5</sup> Kan mewan APU DIOS ey “Hipa dammutun pengi-ingnehan yun hi-gak? Kaw wada edum ni henin hi-gak? <sup>6</sup> Ya edum ni tutu-u ey daka pan-ukata balituk niya silber da, ni sinangندان da kaman-e-dih et kapyaeu tudda humman ni dios da, ni nandukkun ida et dayawen da. <sup>7</sup> Pinhan da ni da inha-ad di baley tu ey nena-yun diman e endi kabaelan tun meglid di neiha-adan tu. Anin ni tagan da dasal ni hi-gatu et endi kabaelan tun memaddang idan tutu-un kamandal ma-lat meihwang ida.

<sup>8</sup> Hi-gayuddan nekalliwtan ni tutu-u, nemnem yudda huuya. <sup>9</sup> Entan tudda liwwan hu impahding kun nebayag niya abulut yu e hi-gak ni ebuh hu Dios e endi edum ni henin hi-gak. <sup>10</sup> Inhel ku dedan eman ni laputu hu meippahding alin edum ni aggew. Emin hu implanuh ku ey meippahding, tep nakka pehding hu hipan pinhed kun pehding. <sup>11</sup> Wadalli eyyagak ni tuun \* peellik ni melpud appit ni kasimilin aggew. Henilli hegamlan mangkekhep et ipahding tu implanuh kun meippahding. Huyyan inhel ku ey ipahding kulli.

<sup>12</sup> Dengel yuwak e makneg ni tutu-un nekalliwtan. <sup>13</sup> Tep anggegannu law pengihwangak ni tutu-uk niya endi an menaktak nunyan pehding ku. Nandaddannak ni mengihwang ni Jerusalem ma-lat kaideyawan ni Israel.”

## 47

### *Ya kebabahan ni Babilon*

<sup>1</sup> Immehel hi APU DIOS ey kantuy “Hi-gam e bebley e Babilon, yan nunya ey umehep kad yuddunggam ni man-ap-apu et yumudung kad dep-ul. Mepappeg law dayaw mu. Yan nunman ey heni ka etan ni kat-agun biin kamethal niya endi mu neapputan di gubat. Nem yan nunya ey eleg ka law mei-ingneh di maddikit niya nelam-ay hu biyag tun bii tep mambalin kan himbut. <sup>2</sup> Hi-gayun iBabilon, aleyu gillingngan yu et manggiling kayun alinah. Ekal yu hukung yu niyadda kakkayyaggud ni balwasi yu. Pan-ita-gey yu balwasi yu et man-agwat kayuddad wangwang! \* <sup>3</sup> Mebladan kayulli et pan-in-aang-angan dakeyun tutu-u et meibabah kayu niya mebabba-ingan kayu. Ibbaleh ku impenahding yu niya endi an memepan hi-gak.”

<sup>4</sup> Ya etan Kayyaggud ni peteg ni Dios ni Israel hu mengihwang ni hi-gami. Ya ngadan tu ey hi APU DIOS e Kabaelan tun emin.

<sup>5</sup> Immehel mewan hi APU DIOS ey kantuy “Yudung ka e Babilon di engeenget, ey immiineng ka. Eleg daka law ngeddanin biin ap-apun kebebbebley. <sup>6</sup> Impeapput kudda tutu-uk ni hi-gayu tep kinastiguk idan bunget ku, et henidda beken ni tutu-uk hu impahding kun hi-gada. Nem ay nemahhig kumamman e endin hekey hemek yun hi-gada, et anin idan nangkea-amma niyadda nangkei-inna et impanligligat yudda. <sup>7</sup> Kanyu nem man-ap-apu kanyun ingganah di kebebbebley. Eleg yu nemnemen hu meippahding alin edum ni aggew.

<sup>8</sup> Dengel yu, hi-gayun ebuh hu pan-amlengan ni annel yun yuka pehpehding. Kanyud nemnem yuy ‘Eta-gey kamin peteg, iningneh mi hi APU DIOS! Endi henin hi-gami! Eleg kami mebahbah, eleg kami mebellu niya endi mettey ni u-ungnga mi!’ Kanyu na-mu nem melinggep kayun ingganah e endi hu lawah ni meippahding ni hi-gayu. <sup>9</sup> Nem nekekemtang ali ey meippahding ida huyyan anggetakkut ni hi-gayun han-aggew. Anin alin hipa pehding yun magic et mebellu kayulli et meendi u-ungnga yu.

<sup>10</sup> Nandinel kayud lawah ni impenahding yu. Kanyu nem endi kamenguh-uhdung ni hi-gayu. Ya yuka pannemnem ni annel yu ey nakallaing kayu, et iwalleng yuwak tep kanyuy Dios kayu niya kanyuy endi edum ni henin hi-gayu. <sup>11</sup> Et humman hu, nekekemtang ali ey umdateng ligat yu et metemma kayullin pehding yu. Endilli kabaelan yu, anin ni pehding yu magic. Ya etan ligat ni eleg yu nemnemnema ey um-alin hi-gayu. <sup>12</sup> Imay, pandinel kayud sinupya yu, ya magic yu niya ayak yun impenahding yu neipalpu eman ni keu-ungnga yu. Et-eteng na-mu ibbaddang dan hi-gayu niya petekkut da na-mu buhul yu. <sup>13</sup> Endi kabaelan yu anin ni inu-unnud yudda intugun dan hi-gayu. Attudda mewan hu tutu-un kamengeddaeddal ni elaw idan bittuwen e hi-gada kamengmenghel ni hi-gayun meippahding ni kabulabulan ey? Attu mewan et han-ihwang dakeyuddan nunman ni kamengebbig ni bittuwen ey?

\* **46:11** 46:11 Huyyan tuu ey hi Cyrus e patul di Persia. Dedpapen tuddalli buhul tu henin hegamlan e kamanyu-hek ni an mempap ni kennen tu. \* **47:2** 47:2 Ya keibbellinan nunyan na-hel ni hi-gada ey eleg mebeyyag ey meillaw idad edum ni bebley et mambalin idan himbut diman.

<sup>14</sup> Henidda dagemin gihheben alin apuy. Ya kakulugan tu ey endi kabaelan dan menghiwang ni annel da, tep nemahhig ni maetung etan apuy e umgiheb. Humman ni apuy ey kaumbabhah tep beken humman ni apuy ni kapandangdangi. <sup>15</sup> Hi-gayun iBabilon, anin ni nandinel kayuddan nelaing ni meippanggep idan bittuwen neipalpu eman ni keu-ungnga yu et endi kabaelan dan umbaddang ni hi-gayu. Neihalla daka e-helan hipan meippahding ali. Et humman hu, endi law menghiwang ni hi-gayud kebabhahan alin bebley yu.”

## 48

### *Ya ngehay idan iIsrael*

<sup>1</sup> Dengel yu huuya, hi-gayun iIsrael e nahlag nan Judah. Ma-nut yuka issapatah di ngadan APU DIOS e kanyuy yuka daydayawa hu Dios ni Israel, nem ya kakulugan tu ey eleg yu ippahding hu yuka e-hela. <sup>2</sup> Ma-nu mewan tep yuka ippahhiya e nambebley kayud bebley ni pinilin APU DIOS, niya kanyuy yuka iddinel biyag yun hi-gatu e Dios ni Israel e ya ngadan tu ey hi APU DIOS e Kabaelan tun emin.

<sup>3</sup> Et humman hu, kan law nan APU DIOS ni hi-gayun iIsrael ey “Impeamtak dedan lan nunman hedin hipa meippahding, et deh e pinhakkey tu-wanguy impahding ku. <sup>4</sup> Inamtak dedan e makneg kayu. Kamei-ellig hu ngehay yud mekelhin gumek niya gembang. <sup>5</sup> Mukun inhel ku lan nebayag hu meippahding ni hi-gayu. Impanguluk ni inhel hu meippahding ma-lat eleg yu ehelen e yadda dios yun kinapyan tuu hu nengipahding idan nunman.

<sup>6</sup> Emin ida inhel kun nunman ni dingngel yu ey inang-ang yun neipahding ida law. Mahapul ni ebbulutan yun makulug emin ida inhel kun nunman. Yan nunya ey e-helek mewan edum ni mekapkapyallin edum ni aggew ni eggak la ni peamtan nunman.

<sup>7</sup> Yan nunyan ebuh penghelak et eleg yu ehelen e inamta yu dedan. Endi henin nunyan na-hel ni nunman ni nebayag tep gullat ni wada ey kanyuy inamta yu dedan hu meippanggep idan nunya. <sup>8</sup> Inamtak e eleg kayu meiddinnel, tep makanghay kayu dedan neipalpun neiungnga yu. Et humman hu, eleg yu hanguden ni dingngel ida huuya, anin ew ngun hakey ni ehel.

<sup>9</sup> Nem issipel ku ni hu nemahhig ni bunget kun hi-gayu, et eleg dakeyu endien tep ya keiddeyyawan ni ngadan ku. <sup>10</sup> Impanligligat dakeyu tep humman pematnak ni hi-gayu, henin kapengeyyugin silber di apuy ma-lat memahmah. Nem inamtak law e endi silbi yu. <sup>11</sup> Mukun kedin impahding ku humman ey ma-lat ihwang dakeyu et kaideyawk. Niya ma-lat eleg ehelen idan tutu-ud bebley ni eleg mengamtan hi-gak e inapput da-ak idan dios da. Eggak i-abulut ni an meidwat ni edum hu dayaw ku. Ey eggak ebbulutan eleg meiddeyyaw hu ngadan ku.”

### *Ya neilawwan idan iIsrael di Babilon*

<sup>12</sup> Kan APU DIOS ey “Dengel yuwak, hi-gayun helag Jacob ni nambebley di Israel e pinilik ni tutu-uk! Hi-gak ni ebuh hu Dios. Hi-gak etan endi laputu niya endi pappeg tu. <sup>13</sup> Hi-gak hu nengiha-ad ni sinuunan ni puyek, niya hi-gak hu nengibiklag ni kabunyan. Immehellak ey newadadda.

<sup>14</sup> Kaemung kayun emin et denglen yu eya e-helek! Kaw wada etan idan kinapyan tuun dios yu hu nengabig e ya etan pinutuk kun tuu hu mengubbat ni Babilon \* et pahding tu pinhed kun pedhing tu? Endi, anin ni hakey. <sup>15</sup> Hi-gak hu nemilin hi-gatu niya iddawat kulli kabaelan tun mengippahding ni pinhed kun meippahding. <sup>16</sup> Keyuy et denglen yu e-helek. Neipalpu dedan nunman ey impeamtak ni emin hu meippahding et peamnuk.”

Hi APU DIOS e Eta-gey ni peteg ey wineda tun hi-gak hu kabaelan tun nalpun Ispirituh tu et itu-dak tuwak ni mengippahding ni pinhed tu.

<sup>17</sup> Hi APU DIOS e Kayyaggud ni peteg ni Dios ni Israel e nengihwang ni hi-gayu ey kantuy “Hi-gak hu APU DIOS e Dios yun kamengituttuddun panyaggudan yu, niya hi-gak hu mengippengulun kayyaggud ni dellanen yu. <sup>18</sup> Gullat et ni inu-unnud yudda tugun ku, ey tagan ku paelin bendisyon ni hi-gayu ma-lat manla-la-pih panyaggudan yu e henin wangwang ni eleg metmetduk, niya mantutu-nud hu pengapputan yu e heniddan dalluyun di baybay. <sup>19</sup> Ey gullat et nedakkel ni peteg hu helag yu e henin kedakkel ni palnah di gilig ni baybay niya impaptek kudda-et, ma-lat eleg ida meendi.”

<sup>20</sup> Hi-gayun helag Israel, hi-yan yu Babilon! Itkuk yu anla yun mengippeamtad kebebbley eyad puyek e kanyuy “Hi APU DIOS ey inhewang dakemin helag Israel e bega-en tu.” <sup>21</sup> Yan eman ni nengipenguluhan APU DIOS idan tutu-u tud desert ey eleg

\* 48:14 48:14 Humman ni tuu ey hi Cyrus e patul di Persia.

ida manhelheltap ni ewew da, tep impeutbul tu hu danum di pini-ang tun batu et wada ininum da.

<sup>22</sup> Nem hedin yadda manghay ey kan APU DIOS ni hi-gaday “Endi linggep idan lawah ni tutu-u.”

## 49

*Ya bega-en nan APU DIOS*

<sup>1</sup> Dengel yuwak, hi-gayuddan tutu-ud nangkeidawwin bebley. Ya dedan eman ni eggak pay ni maiungnga ey pinili tuwak et tuduen tuwak nan APU DIOS ni pambega-en tu. <sup>2</sup> Impambalin tu ehel kun henin makattadem ni ispadah. Impaptek tuwak niya impambalin tuwak ni heni nekammusingan ni pana e neidaddan ni meussal.

<sup>3</sup> Kantun hi-gak ey “Israel, pambega-en dakan hi-gak. \* Ey deyyawen da-ak idallin tutu-u tep hi-gam.”

<sup>4</sup> Kangkuy “Nemahhig nangngunuk, nem endi silbitu! Endi law elet ku tep ya ngunuk, nem endi nansilbian tu. Nem anin, iddinel kun APU DIOS ni mengi-ehngeng ni hi-gak niya mengidwat ni ginunggunah ku.”

<sup>5</sup> Pinutuk tuwak dedan ni nunman nan APU DIOS ni pambega-en tu eman ni eggak pay ni maiungnga. Yan nunya ey inhel tu e emmungek ida neiwehit ni helag Israel e tutu-u tu, et mambanggad idan hi-gatu. Hi APU DIOS e Dios ku hu kakelpuin dayaw, niya hi-gatu kakelpuin elet ku.

<sup>6</sup> Kantuy “E-etteng hu pengunnuk ni hi-gam nunya e bega-en ku. Tep beken ni ebuh ni ya pengibbangadam idan natdaan ni helag Israel ni mengu-unnud ni hi-gak hu ngunnuem, nem mambalin kan heni dilag di kebebbebley, ma-lat mu peamta hu elaw ni kehellakniban da.” †

<sup>7</sup> Kan APU DIOS, e Kamengihwang niya Kayyaggud ni peteg ni Dios ni Israel, etan ni tuun daka pakappihhula, anggebe-hel ni emin ni kebebbebley eyad puyek, niya bega-en idan aap-apu ey “Ang-angen dakalliddan papatul e uminah idan pengippeang-ang dan lisipituh dan hi-gam. Anin idan u-ungnga da et manyuung idan panlisipituh dan hi-gam.”

Meippahding huuya tep hi-gam pinilin APU DIOS ni bega-en tu. Hi-gatu hu Kayyaggud ni peteg ni Dios ni Israel e tuka pekullug emin hu tuka e-hela. ‡

*Ya panyaggudan ni Jerusalem*

<sup>8</sup> Kan APU DIOS idan tutu-u tuy “Yallin kedettengan ni aggew ni pengihwangak ni hi-gayu, ey bendisyonan dakeyu e pehding kudda etan imbagabaga yud dasal yu et baddangan dakeyu. § Eddugan dakeyu niya ippaptek dakeyu. Ey gapuh ni hi-gayu ey peamnuk etan nekitbalak ni hi-gayun panyaggudan yun emin ni tutu-u. Ibbanggad dakeyulli mewan di bebley yun nebel-ah et mambebley kayudman. <sup>9</sup> Kangkuddallin neikelabut ey ‘Meibbukyat kayu law!’ Hedini yadda wadad engeenget ey kangkulli daman hi-gaday ‘Kaukat kayud kawwalwal!’

Heniddalli kalneroh ni kamammangan ni helek di kudal. <sup>10</sup> Eleg ida meuppa niya eleg ida me-wew. Ey eleg da law hiktami nemahhig ni petang niya atung di desert. Ippanguluk idad wada innumen da tep ya et-eteng ni neminhd kun hi-gada.

<sup>11</sup> Mengapya-ak alin keltad idad duntug et dalnen idan tutu-uk. <sup>12</sup> Huyyaddan tutu-uk ey melpuddallid nangkeidawwin bebley di appit ni north, yad appit ni kakelinnugin aggew niyad Aswan di Egypt.”

<sup>13</sup> Pan-a-appeh kayun kabunyan! Itkuk yu anla yu e puyek. Elet yu dama a-appeh yu e duduntug! Tep hedini hi APU DIOS, man tuka ellubyaga niya tuka hehmeka tutu-u tun kamanligligat.

<sup>14</sup> Nem kan idan tutu-ud Jerusalem ey “Inwalleng daitusun APU DIOS, liniwwan daitu.”

<sup>15</sup> Nem hinumang APU DIOS e kantuy “Kaw dammutun liwwanen ni ina hu gelang ni in-ungnga tu et eleg tu pinheda? Nem anin ni kantu et wada inan tuka iwwalleng u-ungnga tu, ey bekennak ngun hanniman. Eleg mabalin ni dakeyu iwwalleng ni hi-gak. <sup>16</sup> Em, hi-gayun tutu-uk di Jerusalem ey eleg dakeyu iwwalleng ni hi-gak, tep intudek ku ngadan yu eyad tepayyak. Anin idan nebahbah ni luhud yu et eggak liwwanen.

<sup>17</sup> Um-aliddalli mengiyayyaggud ni bebley yu et hi-yanen dakeyulli etan idan nemabah ni hi-gayu. <sup>18</sup> Pan-ang-ang-ang kayu et ang-angen yu kameippenahding! Ida kamangkeemmung u-ungnga yu et ida kamampengennamut! Hi-gak e hi APU DIOS e

\* 49:3 49:3 Huyyan kantun “Bega-en” ey beken ni ebuh ida helag Israel, nem anin ni hi Christo e pinutuk APU DIOS ni mengippaptek emin ni tuu. † 49:6 49:6 Acts 13:47 ‡ 49:7 49:7 [1-7] Huyyan pinilin APU DIOS ni bega-en tun mengippaptek ni tutu-u tu ey hi Jesus Christo. § 49:8 49:8 Ang-ang yu hu 2 Corinthians 6:2.

wadan ingganah ey hammaden kun e-helen e umyaggud ali eya bebley yu. Tep nanna-ud ni igaggaya yuddalli hu edum yun um-anemut henin kapengigaggayain biin melehhin ni inhuclub tu gamgam tu.

<sup>19</sup> Nebahbah bebley yu et meiwalleng, nem yan nunyay kulang kaya mewan ni keihha-dadan ni tutu-u yun kamampengennamut. Ey yadda nemahbah ni bebley yu ey meiddawiddalli law ni hi-gayu. <sup>20</sup> Yaddalli etan mampengennamut ni tutu-u yun neiungngad bebley ni neilawwan yu ey kandalli 'Ek-eket eya bebley. Mahapul tayu e-etteng ni pambebleyan!'

<sup>21</sup> Kanyullid nemnem yuy 'Hipa na-mu hu nampengiungngaddan nunyan u-ungngak? Tam nampatey da u-ungngak et meendidida, ey neilawwak di edum ni bebley et hakeyyak ni natdaan. Hipa nengipaptek idan nunyan u-ungnga, niya hipa nampengi-lin hi-gada?'

<sup>22</sup> Kan APU DIOS e Eta-gey ni peteg ey "Mandalek idalli hu beken kun tutu-u et iepupu da niya la-taen dadda u-ungnga yu et ienamut daddan hi-gayu. <sup>23</sup> Yaddalli patul da niyadda bineley da ey ingngunuan dakeyu e heniddalli a-ammed yun pemaptek dan hi-gayu. Iddawat dallin emin hu mahapul yu, niya manyu-ung idallid hinangga yun pengippeang-angan dan lispituh dan hi-gayu, ey deyyawen dakeyulli. Humman ali pengamtaan yu e hi-gak hi APU DIOS. Yadda mengiddinnel ni hi-gak ey eleg ida medismayah."

<sup>24</sup> Kaw hipa dammutun memilliw ni imbesik ni sindalud gubat? Ey hipa kabaelan tun mengihwang idan balud ni makabbunget ni ap-apu ma-lat maibukyay ida?

<sup>25</sup> Kan APU DIOS ni humang tuy "Henin nunman ali meippahding. Anin idan neikelabut ni sindalu et meibbukyay ida. Anin idan hipan imbesik ni makabbunget ni ap-apud gubat et mebangngad, tep hi-gak mekihhanggaddan mengubbat ni hi-gayu et ihwang kudda u-ungnga yu. <sup>26</sup> Yadda kamengippeligligat ni hi-gayu ey pambalin kuddan makabbunget et ebuh papatey ni inamta da et hi-gada ngu ey nampapatey ida. Humman ali pengamtaan ni katuuuud kebebbbley e hi-gak e hi APU DIOS e Et-eteng kabaelan tun Dios ni Israel hu mengihwang ni hi-gayud buhul yu."

## 50

<sup>1</sup> Immehel mewan hi APU DIOS ey kantuy "Kaw kanyu nem intu-dak dakeyun tutu-uk e heni etan ni lakin intu-dak tu ahwa tu tep hini-yan tu? Gullat ni makulug ni henin nunya neipahding, et attu hu nepilmaan ni papil ni keang-angan tu e hini-yan ku hi ineyu ey? \* Kaw kanyu nem inggatang dakeyu et mambalin kayun himbut, e henin etan ni tuun tuka ibbayad u-ungnga tud utang tu? Eleg. Ya himmulun ni nambalanan yun himbut et alen da hi ineyu, ey tep ya liwat yu e lawah impenahding yu.

<sup>2</sup> Kele yan eman ni inlian kun mengihwang ni hi-gayu ey eleg yu hanguden e tutu-uk ni himmumang? Kele eleg kayu humumang eman ni inhelak? Kaw endi kabaelan kun mengihwang ni hi-gayu? Hi-gak ey kabaelan kun mandalen hu baybay ma-lat memaganan. Ey nakka pambalin hu wangwang ni mamega et mangkatey ida deleg diman et humemuy ida. <sup>3</sup> Kabaelan ku mewan ni pambalin hu kabunyan ni engeenget e heni ibbaluan tu netey."

*Ya bega-en nan APU DIOS ey kamekangngu-unnud*

<sup>4</sup> Hi APU DIOS e Eta-gey ni peteg ey intuttuddu tu e-helen ku ma-lat pa-let kudda tutu-un neatu. Ey pambalin tuwak ni kaman-am-amleng ni kewa-wa-wa, niya kamammamaninin mengngel ni ituttuddu tun hi-gak. <sup>5</sup> Hi-gatu e Eta-gey ni peteg ni APU DIOS ey impeamta tu pinhed tun pehding ku et u-unnudek. Eggak ngehayan niya eggak kahingen hu inhel tu. <sup>6</sup> Intayak hu beneg kuddan nampeneplat ni hi-gak. Pinenadngelan da-ak, nem eggak humumang. Ey nanhepdud ta iming ku niya nanlupdaan da angah ku, nem impakdag ku i-ineng. †

<sup>7</sup> Anin ni hanniman impahding dan hi-gak et eggak mabeingan tep inamtak e hi-gak ali dama mengapput. Insipel kun emin tep tuwak kababbaddangin APU DIOS e Eta-gey ni peteg. <sup>8</sup> Wada hi APU DIOS ni mengi-ehneng ni hi-gak et peamta tullin endi bahul ku. Hipan hi-gayu mengiddiklamuh ni hi-gak et ehelen tu e wada bahul ku? Itsuy ni emin di kamengippenuh ni diklamuh et yuwak idiklamuh! <sup>9</sup> Endi edum ni kamengi-ehneng ni hi-gak nem ebuh hi APU DIOS e Eta-gey ni peteg. Hipan hi-gayu menghel e nambahullak? Nanna-ud ni meendidalli mengiddiklamuh ni hi-gak. Heniddalli luput ni meendi tep kinan ni tubbaybay.

\* 50:1 50:1 Huyyan na-hel ni ina di deya ey ya Jerusalem tep humman keet-etengan ni bebley di Israel. † 50:6 50:6 Ang-ang yu hu Matthew 26:67 et ya 27:28-30.

<sup>10</sup> Emin kayun kamandeyyaw nan APU DIOS niya emin kayun kamengu-unnud ni ehel ni bega-en tu ey hedin neligat hu biyag yun heni wada kayud engeenget, ey ihammad yu dinel yun APU DIOS e Dios yu. <sup>11</sup> Emin kayun kamamplanuh ni memahbah ni edum yun tuu ey yadda implanuh yu hu memahbah ni hi-gayu. Hi APU DIOS hu mengippeamnun nunya et manhelheltap kayu.

## 51

### *Meihwang alin ingganah hu Jerusalem*

<sup>1</sup> Kan APU DIOS ey "Dengel yuwak, hi-gayun emin ni nemihed ni meihwang, niya hi-gayun kaum-alin mambeggan baddang ni hi-gak. Nemnem yu etan kamei-ellig di et-eteng ni batun nepingpingan yu. <sup>2</sup> Em, nemnem yudda aammed yun di Abraham nan Sarah e nahlagan yu. Yan nemutukak nan Abraham ey endi ni u-ungnga tu, nem binendisyonak et idwatak ni u-ungnga tu et pambalin kun dakel ni peteg helag tu.

<sup>3</sup> Hanniman ali mewan pehding ku e hehmekek hu Zion et iyayyagud kun emin hu nebahbah di bebley. Anin idan desert ni bebley di Israel et peyagud ku et pambalin kun legunta et heni lan leguntak e Eden. Man-am-amleng idalli tutu-udman et man-a-appeh idallin penaydayaw da niya pansalamatan dan hi-gak.

<sup>4</sup> Dengel yuwak, hi-gayun tutu-uk. Dengel yu e-helek: Iddawat kulli etan tugun kun meituttuddud kebebbebley et maipeamtalli kalinimpiyuh ku, et humman ali hu kamei-ellig di dilag idan katuuuud kebebbebley. <sup>5</sup> Anggegannu law ey um-ali-ak ni mengihwang ni hi-gayu, eleg mebaybayag ey meihwang kayu. \* Neihnup law pengapputan ku, et hi-gak man-ap-apud kebebbebley. Hi-gak hu daka hehhegedan mengihwang ni hi-gada. <sup>6</sup> Itengaw yud kabunyan niya iuhdung yu eyad puyek! Meendilli kabunyan e henin ahuk, niya mengguh ali puyek e henin balwasi. Emin tuu ey mettey henin aggiyyet. Nem ya penellakniban kuddan tutu-uk niya kayyagud ni pehding kun man-ap-apu ey mannananeng alin ingganah.

<sup>7</sup> Hi-gayun inamta tu kayyagud, dengel yuwak, anin ni hi-gayuddan eleg mangiwal-leng ni nakka ittuttuddu. Anin ni pedngelan dakeyu, niya anin ni itek hu e-e-helen dan meippanggep ni hi-gayu ma-lat pemahbah dan hi-gayu, et entan kaya takut yu. <sup>8</sup> Yadda tutu-un kamengippahding nunman ey meendiddalli e heniddallin balwasin kinan ni tubbaybay. Nem ya kakinayyagud kun peteg ey mannananeng. Hanniman mewan pengihwangak idan tutu-uk e eleg mepappeg, nem mannananeng ni ingganah."

<sup>9</sup> APU DIOS, inah ka et baddangan dakemi! Usal mu kabaalam henin impahding mun nunman e binahbah mu Egypt e Rahab hu hakey ni ngadan tu e humman nengadanan ni dragon di et-eteng ni Wangwang e Nile. <sup>10</sup> Hi-gam mewan hu nanteduk ni baybay et mema-ganan et kumapya kan dalan ni nan-agwatan idan inhewang mun tutu-um. † <sup>11</sup> Yadda inhewang mu ey mambangngad idallid Jerusalem. Ia-appeh dalli niya ittetkuk da amleng da. Man-am-amleng idallin ingganah e eleg ida law umlelemyung niya endi law ligat da.

<sup>12</sup> Kan APU DIOS ey "Hi-gak hu mengellubyag ni hi-gayu. Et humman hu, entan takut yun edum yun tuu tep tuu idan ebuh e heniddan helek e hedin nakling ida, man meendidda. <sup>13</sup> Kaw liniwwan yuwak ni namyuh ni hi-gayu, ey nengibiklag ni kabunyan niya nengiha-ad ni sinuunan ni puyek? Kele yuka tattakusidda kamengippehelheltap niya kamemahbah ni hi-gayu? Nanna-ud ni meendiddalli humman ni kamengippehelheltap ni hi-gayu. <sup>14</sup> Anggegannu law ey meibbukyat ida nangkeikelabut. Et eleg ida mettey di kallabbuttan niya eleg idalli law meuppa.

<sup>15</sup> Hi-gak hi APU DIOS e Dios yu! Humman ni kiniwak hu danum di baybay et mukun kamewedda dalluyun ni kaumbungug. Ya ngadan ku ey hi APU DIOS e Kabaalam tun emin. <sup>16</sup> Hi-gak mewan hu nengibiklag ni kabunyan, niya hi-gak hu nengiha-ad ni sinuunan ni puyek. Hi-gak e Dios ey kangkuddan iJerusalem ey "Tuu dakeyun hi-gak. Indawat ku tugun kun hi-gayu niya ippaptek dakeyu."

### *Ya pappeg ni panhelheltapan ni Jerusalem*

<sup>17</sup> Hi-gayun iJerusalem, bangun kayu! Igibek yu et uminah kayu! Heni kayu nebuteng tep ya impahding kun nengastigun hi-gayu tep nemahhig hu bunget ku e DIOS. Heni impainum kun hi-gayu hu kastigu yu et inumen yun emin et kayu law kamandangiangiw. <sup>18</sup> Endiddan tutu-u yu hu natdaan ni mengipappangngulun hi-gayu niya mengituttuddun pehding yu. <sup>19</sup> Nemahhig ida hu ligat ni immalin hi-gayu.

\* **51:5** 51:5 Huyya hinammad APU DIOS ni inhel e ibbukyat tuddalli tuu tun helag Israel ni neikelabut di Babilon. Ya hakey ni keibbellinan tu ey ya hinammad tun inhel e ihhehwang tun emin kamengullug ni u-ungnga tu e hi Jesus Christo di liwat da. † **51:10** 51:10 Exodus 14:1-31

Nebabhah hu bebley yu tep ya gubat, niya endi kennen idan tutu-u yu, nem ay endi anhan hu kamemmek ni hi-gayu. <sup>20</sup> Emin di kekeltad ey ida kamangketu-li tutu-u tep endi law elet da. Henidda makwah ni naknad bitu. Neipahding ida huyya tep ya bunget ku e AP-APU e Dios yu.

<sup>21</sup> Dengel yu huyya, hi-gayun kamanhelheltap ni tutu-un iJerusalem, hi-gayun kamandangiangiw e heni nangekebuteng. <sup>22</sup> Hi-gak e hi APU DIOS e Eta-gey ni peteg ni Dios yun kamengi-ehneng ni hi-gayu ey kangkuy: Eleg dakeyu law kastiguan hi-gak tep ya bunget ku. Et beken ali law ni heni kayu nebuteng ni kamandangiangiw tep ya yuka panhelheltapi. <sup>23</sup> Nem yadda nengipehelheltap † ni hi-gayu hu kastigiek. Hi-gada nengimandal ni umlukbub kayud puyek, et pan-igsin da beneg yu e heni kayu dep-ul.”

## 52

### *Ihhehwang alin APU DIOS hu Jerusalem*

<sup>1</sup> Inah kayun iJerusalem! Elet kayu et heni mewan lan nunman e hi-gayu kamedmedngel. Hi-gayun nambebley di bebley APU DIOS, ey umyaggud kaya law hu bebley yu. Heni yulli ibbalwasi dayaw yu. Eleg law mabalin ni ida umhegeg hu beken ni tuun APU DIOS eyad bebley yu. <sup>2</sup> Hi-gayun iJerusalem, beken kayu kaya law ni himbut. Inah kayu et kayu yumudung di yuddungnan yun kayuddungin ap-apu. Ekal yudda bangkiling yun iZion tep eleg kayu law maikelabut.

<sup>3</sup> Kan mewan APU DIOS, e Eta-gey ni peteg, idan tutu-u tuy “Yan eman ni nambalin kayun himbut ey endi an neibeyad ni hi-gak ni neihbutan yu, heni daman nunya e endi an meibbeyad ni keibbukyatan yu. \* <sup>4</sup> Makulug ni impanhelheltap dakeyu, tep yan eman ni linawwan yud Egypt ey nambalin kayun himbut idan tutu-udman. Entanni mewan ey impanhelheltap dakeyu damaddan iAssyria. <sup>5</sup> Entanni ey nambalin kayu mewan ni himbut di Babilon ey endi neibeyad ni hi-gak ni neihbutan yu. Ida kamampahhiya hu nengapput ni hi-gayu e da-ak katalalanggai niya da-ak kapennadngeli. Hi-gak e hi APU DIOS hu nanghel nunya. <sup>6</sup> Et humman hu, medettengan ali aggew ni meippeang-ang hu kabaalak ni pengihwangak alin hi-gayu. Ey amtaen yulli e hi-gak hu Dios ni nengipeamta dedan ni nunman ni meippanggep idan nunya. Yan nunman ali pengimamatan yu law hedin hipa-ak dedan.

<sup>7</sup> Kamengippeamleng ni ang-angen hu tuun iyyallin nalpud duntug ni um-alin mengippeamtan kayyaggud ni meippahding ni linggepan ni bebley niya mengippeamtan keihwangan ni Zion e kantun hi-gaday ‘Ya Dios yu hu man-ap-apu.’ † <sup>8</sup> Yadda guwalyad heggepan di bebley ey ida kamantetkuk ni anla da tep daka ang-ang-angan kamangkeibbanggad hi APU DIOS di Zion.

<sup>9</sup> Hi-gayun tutu-un nebabhah bebley dan Jerusalem, pan-a-appéh kayun anla yu, tep ihhehwang APU DIOS huyyan bebley tu niya ellubyagen dakeyun tutu-u tu. <sup>10</sup> Peang-ang tu et-eteng ni kabaalan tun pengihwangan tuddan tutu-u tu, et panhin-aang-angan idallin emin ni katuutuud kebbebley.

<sup>11</sup> Hi-gayun tutu-uk, ey hi-yan yu kuma Babilon! Hi-yan yudda lawah ni peteg ni daka pehpehding ni pi-yew. ‡ Ey hi-gayun kamampaptek idan ngunut di Tempol ey ipahding yu elaw ni kapanlinnih ni annel yu, ey nanglaw kayu. <sup>12</sup> Eleg law mahapul ni pepuppuut yun umlaw ni nunya tep eleg yu law pambinessik. Hi APU DIOS e Dios ni Israel hu mengippenggulun hi-gayu niya mengippaptek ni hi-gayu.”

### *Ya etan kamanhelheltap ni Bega-en nan APU DIOS*

<sup>13</sup> Kan APU DIOS ey “Kayyaggud ali pambalanan ni kapehpehding etan ni bega-en ku. Medaydayaw alin peteg niya mekallispituh ali. § <sup>14</sup> Dakel ni tutu-u natngan nenang-angan dan hi-gatu, tep nemahhig nampelhelheltap dan hi-gatu et heni beken ni tuu hu ang-ang tu. <sup>15</sup> Nem dakel idalli tutu-ud kebbebley ni metngan hi-gatu. Anin idallin papatul et metngaddalli e eleg ida paka-hel. Ewwwatan dalli law niya amtaen da hu eleg da awatan niya eleg da amtan nunman.” \*

‡ 52:23 51:23 Huyyaddan tutu-u ey yadda iBabilon. \* 52:3 52:3 Huyyan verse ey impeang-ang tun in-abulut APU DIOS ida sindalun iBabilon e pambalin dan himbut ida helag Israel e endi neibeyad ni hi-gatu. Hanniman daman endi imbayad tun neibukyatan dan neihbutan da. † 52:7 52:7 Romans 10:15 ‡ 52:11 52:11 Ang-ang yu hu 2 Corinthians 6:17. § 52:13 52:13 Philippians 2:9-11 \* 52:15 52:15 Romans 15:21



## 53

<sup>1</sup> Kaw hipa makkaw mengullug idan intuttuddu mi? Niya hipadda nengipeang-angan APU DIOS ni et-eteng ni kabaelan tu? \* <sup>2</sup> In-abulut nan APU DIOS ni meippahding ni bega-en tun kamei-ellig etan di pakatmel ni neitnem e kamanlemmut di mamegan puyek. Hi-gatu ey nebabah ni tuu niya beken ni kayyaggud ang-ang tu, et humman hu endi umhulun ni keewwisan ni tutu-un hi-gatu. <sup>3</sup> Anggebe-hel ni tutu-u niya daka pippihula. Nemahhig nanhelheltapan tu niya lemyung tu. Endi hakey ni neminshed ni mengitkel ni hi-gatu. Eleg tayun hekey ibilang hu kaweda tu.

<sup>4</sup> Nem inebulut tun helheltapen etan lebbeng tun helheltapan tayu, ey kan tayu nem humman ni hinelheltap tu hu pengastigun Apu Dios ni hi-gatu. † <sup>5</sup> Nem beken, tep gapuh ni liwat tayu ey liniputan da niya nambaig da. Hinelheltap tu humman ma-lat mekidagyum itsun Apu Dios et mambalin itsun kayyaggud. <sup>6</sup> Emin itsu ey heni itsu kalneroh ni netalak e wada hakkey ey nanglaw di lawwan tu. Et humman hu, gullat et hi-gatsu mekastigu, nem hi-gatu hu kinastigun APU DIOS et teklaen tu liwat tayu.

<sup>7</sup> Nemahhig impahpahding dan hi-gatu, nem insipel tu et pemega tu i-ineng. ‡ Hi-gatu ey kamei-ellig ni kalneroh ni inlaw dan da keklengen. § Ey heni impah ni kalneroh e anin ni pampu-litan et kaum-eneeneng. \* <sup>8</sup> Da dimpap ey kanday mekastigu et ilaw da etan di tu ketteyyan. Nem endin hekey nenangud hedin hipa meippahding ni hi-gatu. Tep eleg da amta e mettey tep ya liwat ni emin ni tutu-u. † <sup>9</sup> Nekiketey idan wada bahul da, anin ni endi nambahulan tu niya endi itek ni inhel tu. ‡ Et da ikulung di kulung ni kedangyan. §

<sup>10</sup> Humman pinhed APU DIOS ni meippahding ni hi-gatu e manhelheltap et iketey tu ke-kalan ni liwat ni tuu. Nem hedin megibbuh ni i-appit tu biyag tu tep ya liwat ey ang-angen tuddalli dakel ni helag tu \* ey wadalli andukkey ni biyag tu. † Hi-gatu mengippeamnun planuh APU DIOS. <sup>11</sup> Megibbuh kaya humman ni panhelheltapan tu et man-am-amleng ali law tep inamta tu e wada nansilbian ni nanhelheltapan tu.

Heninnuy hu kan APU DIOS meippanggep ni hi-gatu “Humman ni kakkayyaggud ni bega-en ku hu meneklan liwat ni dakel ni tutu-u, et gapuh nunman ni pedhing tu ey pessinsahan ku liwat da ma-lat maibilang idan kayyaggud. ‡ <sup>12</sup> Et humman hu, pambalin ku humman ni bega-en kun kamedeyyaw niya idawat ku hu et-eteng ni kabaelan tu. Nan-am-amleng ni nengabulut ni pemetteyan da et mailegat di neipahding idan lawah ni tutu-u. § Hi-gatu neneklan liwat idan tutu-u niya nandasal ma-lat mepesinsahan hu liwat da.” \*

## 54

*Ya impeminshed APU DIOS idan helag nan Israel*

<sup>1</sup> Hi-gam ni bebley e Jerusalem ey heni ka etan ni biin endi u-ungnga tu. Nem yan nunya ey itkuk mu a-appah mu tep ya amleng mu. Tep daddakkel kaya law u-ungngam nem ya etan biin eleg hi-yanen ni ahwa tu. \*

<sup>2</sup> Hi-gam ni nambbley, pambalin mun mahkang niya ihammad mu pambebleyan mu. † <sup>3</sup> Sekkupun mulli niyaddalli helag mu hu edum ni bebley di nambinbina-hil niya pambebleyan muddalli nangebahbah ni etta-teng ni bebley.

<sup>4</sup> Entan takut mu. Eleg kalli law kaya mebe-ingi niya eleg ka law medismayah. Meliwwan idalli law etan angeba-ing ni impahding mun eman ni keu-ungngam niyadda angehemmek ni biyag yun henin biyag ni nebalun bii. <sup>5</sup> Ya namyuh ni hi-gam hu heni ahwah e hedin ya ngadan tu ey hi APU DIOS e Kabaelan tun emin. Hi-gatu e Kayyaggud ni peteg ni Dios ni Israel hu mengihwang ni hi-gam. Hi-gatu hu Dios ni Ap-apun emin ni bebley eyad puyek.

\* 53:1 53:1 John 12:38, Romans 10:16 † 53:4 53:4 Matthew 8:17 ‡ 53:7 53:7 Matthew 27:12-14 et ya Luke 23:8-9

§ 53:7 53:7 Ang-ang yu Revelation 5:6 ya John 1:29 ya 1:35. \* 53:7 53:7 Ang-ang yu Revelation 5:6 ya John 1:29

ya 1:35. † 53:8 53:8 [7-8] Acts 8:32-33. ‡ 53:9 53:9 Ang-ang yu hu 1 Peter 2:22. § 53:9 53:9 Matthew 27:57-60

\* 53:10 53:10 Ya keibbellinan nunyan na-hel ni helag nan Christo, ey beken ni tu-wangun helag tu, nem yaddalli mengullug ni hi-gatu. † 53:10 53:10 Ya keibbellinan tu ey “wadalli andukkey ni biyag tu” ey ya netaguan Christo et mannananeng ni mategu. ‡ 53:11 53:11 Romans 5:19 § 53:12 53:12 Luke 22:37 \* 53:12 53:12 [52:13-53:12] Emin ida huyyan verses ey meippanggep ni nanhelheltapan Christo e Bega-en APU DIOS tep ya liwat ni tutu-u ma-lat mehelakniban ida. \* 54:1 54:1 Galatians 4:27 † 54:2 54:2 Yallin pengi-ennamutan APU DIOS idan helag Israel ni nalpuan dad Babilon ni neihbutan da ey et-eteng ali kabaelan da niya mambalin alin mahkang hu bebley da.

<sup>6</sup> Heni ka la ni etan ni kat-agun biin nelahin e nemahhig ni kaumlelemyung tep hini-yan ni ahwa tu. Nem bangngaden daka kaya law nan APU DIOS e kantuy <sup>7</sup> "Hini-yan daka nin nekemtang, † nem bangngaden daka tep ya et-eteng ni impeminhed kun hi-gam. <sup>8</sup> Bimmungettak ni peteg et iwalleng dakan nekemtang, nem peang-ang ku law hu eleg mepappeg ni impeminhed ku niya hemek kun hi-gam." Huyya kan APU DIOS e nengihwang ni hi-gam.

<sup>9</sup> "Yan eman ni ketaggun Noah ey hinammad kun inhel e eggak law lelbenga puyek. § Yan nunya ey hammaden ku mewan ni e-helen e eggak law umbunget ni hi-gam niya eleg daka law kastigua. <sup>10</sup> Anin ni mangkegday duntug et mannananeng hu impeminhed kun hi-gam. Eggak kekyata etan hinammad kun inhel ni hi-gam e kangkuy pelinggep daka." Huyya kan APU DIOS e et-eteng impeminhed tun hi-gam. \*

*Ya meippahding ni Jerusalem ni edum ni aggew*

<sup>11</sup> Immelhel mewan hi APU DIOS ey kantuy "Hi-gam ni bebley e Jerusalem, hi-gam e kamanhelheltap ni bebley ni endi mengellubyag ni hi-gatu, iyayyaggud daka e ussalek ida nangkeningan babattu. Ya tu-unam ey ikkapyak hu sapphire. <sup>12</sup> Hanniman mewan hu eta-gey ni pangguwalyaam e ikkapyak hu ruby e madlang ni nenginan batu. Ey ikkapyak hu kamammussi-lak ni babattud eheb mu niya ikkapyak di luhud mu hu gamgam.

<sup>13</sup> Hi-gak hu menuttudduddallin tutu-um niya iddawtan kuddallin et-eteng ni panyag-gudan da niya linggep da. <sup>14</sup> Ya meandeng niya neiptek ni pehding hu mengippa-let ni hi-gam niya meihwang kallid mengippelligat ni hi-gam niyaddad hipan anggetakkut. <sup>15</sup> Eggak peelli mengubbat ni hi-gam, nem hedin hipa et wada um-alin mengubbat ni hi-gam ey peapput kudda.

<sup>16</sup> Hi-gak nanletuddan kaman-e-dih ni kamengapyan almas, niya hi-gak hu nanle-tuddan sindalun kamengussal idan nunman ni pemettey da. <sup>17</sup> Nem endilli almas ni manlipput ni hi-gam, niya kabaalam alin hummangen hu pebehhul dan hi-gam. Hi-gak ey nakka i-ehng hu bega-en ku ma-lat mengapput ida." Huyya inhel nan APU DIOS.

## 55

*Ya panliwwanan APU DIOS ni liwat*

<sup>1</sup> Kan APU DIOS ey "Ikeyuy ni emin ni na-wew, iyadya danum ni innumen yu. Hi-gayun endi pihhuh tu, ikeyuy et umla kayun pinhed yun kennen et mangan kayu ey uminum kayu gatas niya meinnum, anin ni endi pemeyyad yu. <sup>2</sup> Kele yu ummahen pihhuh yuddad eleg umphehl? Niya kele yu ummahen sinekla yu ey ay nanengtun kayu damengu kameu-upa? Dengel yuwak niya u-unnud yu pinhed kun pehding yu, et humman hu heni kayyaggud ni kennen yu.

<sup>3</sup> Imay, dengel yu huyya e tutu-uk. Ali kayu hi-gak. U-unnud yuwak ma-lat maweda biyag yu. Hammaden ku hu pekitbalak ni panyaggudan yun mannananeng ni ingganah, \* niya bendisonan dakeyu e humman la hinammad kun inhel nan David. † <sup>4</sup> Impambalin ku hi David ni ap-apud kebebbbley et meipeamtaddan katuuuu hu et-eteng ni kabaalak tep hi-gatu. <sup>5</sup> Yan nunya, ey eyyagan yudda tutu-ud edum ni bebley ni eleg mengamtan hi-gayun nunman, et umliddan meki-dum ni hi-gayu! Hi-gak e hi APU DIOS e Dios yun Kayyaggud ni peteg ni Dios ni Israel hu mengippahding idan nunya tep peta-gey dakeyu et kaideyawan yu."

<sup>6</sup> Hi APU DIOS law hu hapul yu. Pandasal kayu law ni hi-gatu, tep nandaddan ni memaddang ni hi-gayu. ‡ <sup>7</sup> Ey hi-gayun lawah taka pehpending, iwalleng yudda lawah ni elaw yu niya hulluli yu hu yuka pannemnem. Hi APU DIOS e Dios tayu kumaddan hu pandineli yu tep hedin hi-gatu, man et-eteng hu hemek tu niya kamanggagalid ni manliwwan ni liwat.

<sup>8</sup> Tep kan APU DIOS ey "Ya nakka pannemnem ey beken ni henin yuka pannemnem, ya elaw ku ey beken ni henin elaw yu tep hin-appil hu elaw ku. <sup>9</sup> Ya kabunyan ey neita-gey ni peteg di puyek, hanniman dama hu elaw ku niya nakka pannemnem e neidawwin peteg di elaw yu niyad yuka pannemnem.

‡ 54:7 54:7 Ya keibbellinan na-mun nunya ey yan eman ni in-abulut APU DIOS ni illaw idan iBabilon hu helag Israel di bebley da et mambalin idan balud diman. § 54:9 54:9 Genesis 9:11 \* 54:10 54:10 [4-10] Yadda helag Israel ey imbilang APU DIOS idan ahwatu. Et humman hu, yan keillawwan dad Babilon et meidawwiddad bebley da, ey heni hi-yanen APU DIOS ida tep ya liwat da. Nem hinammad APU DIOS ni inhel e ibbanggad tu mewan pekiddagyuman ni helag Israel ni hi-gatu. \* 55:3 55:3 Ang-ang yu Jeremiah 31:31, 32:40 niya Hebrews 13:20. † 55:3 55:3 Acts 13:34 ‡ 55:6 55:6 Ang-ang yu Jeremiah 29:13-14.

<sup>10</sup> Ya ehel ku ey heni dallallu niya heni udan e kame-gah ni nalpud kabunyan et madenuman hu puyek. Tuka petmel hu intanem ma-lat maweda bukel dan kaittanem niya ma-lat maweda kennen. <sup>11</sup> Hanniman dama nakka e-hela e eleg meipngil di keippahdingan tu, tep meippahding ida emin pinhed ku, anin ni attu pengippeamtaak.

<sup>12</sup> Man-am-amleng kayullin peteg ni meni-yan ni Babilon. Ey melinggep ali pengipekalan APU DIOS ni hi-gayudman. Et man-a-appéh idalli duduntug tep ya amleng da. Anin idallin keyew et mangkellapkap ida. <sup>13</sup> Meihhullul idalli cypress niya myrtle idad simmelaan ni hebit. Huyyalli mengippenemnem ni ingganah idan impahding ku e AP-APU."

## 56

*I-e-dum nan APU DIOS hu tutu-ud edum ni bebley idan tutu-u tu*

<sup>1</sup> Kan APU DIOS idan tutu-u tuy "Pannananeng yun ipahding hu meandeng niya kayyaggud tep anggeganu law pengihwangan dakeyu. <sup>2</sup> Bendisyonak hu tuun eleg mengippahding ni lawah niya kamengunnud ni elaw ni Sabbath e hi-gak ni ebuh hu pengi-eng-engan tun nunman ni aggew."

<sup>3</sup> Yadda tutu-un nalpud edum ni bebley ni nengidinel nan APU DIOS ey eleg mabalin ni kanday "Eleg i-abulut APU DIOS ni nak mei-dum idan tutu-u tun menaydayaw ni hi-gatu."

Hanniman ida lalakkin napnahan e eleg mabalin ni da e-helen e eleg ida mei-dum di tutu-un APU DIOS tep eleg ida pakeungnga. <sup>4</sup> Tep heninnuy hu kan APU DIOS idan tutu-un hanniman daka penge-ehhel: "Hedin deyyawen yuwak ni pengu-unnudan yun elaw ni Sabbath, yan pengippahdingan yun mengippeamleng ni hi-gak niyan pengu-unnudan yun nekitbalan kun hi-gayu, <sup>5</sup> ey mannananeng anhan law ngadan yun eleg meliwwan di Tempol ku niyaddad tutu-uk. I-imman pay huyyan pehding kun panyaggudan yu nem ya keweddaan ni u-ungnga yu. Eleg kayu anhallaw meliwwan ni ingganah."

<sup>6</sup> Huyya hu kan APU DIOS idan tutu-un beken ni helag Israel ni kamenaydayaw ni hi-gatu, kamansilbin hi-gatu, nemihed ni hi-gatu, kamengunnud ni elaw ni Sabbath niya kamengippenenneng ni nekitbalan tun hi-gada: <sup>7</sup> "Illaw dakeyullin hi-gak di duntug e Zion. Peamleng dakeyullid baley kun kapandasali niya ebbuluten kudda i-appit yud altar ku. Et man-amtalli e ya Tempol ku ey baley ni pandasalan ni katuuuuud kebebbley."

\*

<sup>8</sup> Hi APU DIOS e Eta-gey ni peteg e nengienamut idan tutu-u tun helag Israel ni neilaw di edum ni bebley ey kantuy "I-alik idalli hu edum ni tutu-u et mei-dum ida eyad in-anemut ku."

*Ya kekastiguan idan aap-apuddan helag Israel*

<sup>9</sup> Hi APU DIOS ey ineyagan tudda tutu-ud edum ni bebley et umliddan henidda animal di muyung et pangkanen dadda tutu-u tu. <sup>10</sup> Kantuy "Yadda aap-apud Israel ni mengippaptek ida-et ni tutu-uk ey henidda guwalyan nekulap tep kulang daka pengewwat. Henidda mewan ahhun eleg umgunggung e ebuh ni kaman-u-uggip ey kaum-eni-innep. <sup>11</sup> Henidda mewan ahhun neagum e pinhed tun hakkeyan hu kennen e anin dedan ni naphel et tagan tu ekan. Endi nemnem da e wada hakkeyey tuka ippilit pinhed tu tep ya panyaggudan tun ebuh tuka gamgami. Et humman hu, humman idan aap-apu ey beken idan makulug ni kamappaptek ni tutu-u."

<sup>12</sup> Kan idan nunman ni aap-apuy "Tagan tayu inum ingganah mekabbutteng itsul! Nanna-ud ni i-imman hu biyag tayun kabbhuhan nem yan nunya."

## 57

<sup>1</sup> Hedin netey ida kayyaggud ni tutu-u ey endi kamengewwat niya endi kamannemnem e neipahding ni hi-gada humman, tep inhewang idan Apu Dios di lawah ni mekapkapyallin hi-gada. <sup>2</sup> Tep yadda kayyaggud elaw tun tutu-u ey umlinggep ida niya man-iyatudda hedin netey ida.

<sup>3</sup> Nem hedin hi-gayun nekalliwtan ni tutu-u ey heni kayuddan mabekin kamengipahding ni ayak, heni kayun tutu-un daka i-ulig beken da ahwa niya heni kayuddan daka iggatang annel da. Ikeyuy et humalyaen dakeyu! <sup>4</sup> Hi-gayun makallangkak ni nemahhig liwat da, hipa yuka taltalanggai niya hipa anggengi-ngi yu? Ka-ang-ang e makanghay kayu. <sup>5</sup> Hedin mandeyyaw kayun dios yun kamengippehlag ey kayu kaman-uulig idad hengeg ni keyew ni yuka ngillina. Ey yuka illaw hu u-ungnga yuddad mabetun leyang idad gilig ni wangwang et yu iappit idan dios yu. <sup>6</sup> Ey kayu kaumalan nemulling ni batu ni dineyaw yun dios yu. Yudda kai-appisin pagey ni dinuyagan

\* 56:7 56:7 Ang-ang yu Matthew 21:13, Mark 11:17 ya Luke 19:46.

yuddan meinum ni i-appit yun hi-gada. Kaw kanyu nem nakka um-amleng idan nunman ni yuka pehpehding? <sup>7</sup> Kayu kaumlaw di ta-pew ni duntug et kayu man-appit ni nan-uulig kayudman tep humman mewan hakey ni yuka pehding ni mandeyyaw idan dios yu. <sup>8</sup> Ya ni-ngangu mewan yuka pengihha-adiddan kinapyan tuun dios yu ey yudda kaittalud bawang ni baballey yud dingkuggan ni lekbi yun neilekbi, ni dinaydayaw yudda. Inwalleng yuwak tu-wangu anhan tep beken law ni hi-gak hu yuka daydayawa. Heni kayu etan ni tuun tuka i-abek hu ahwa tu. Tep yuka pehebballin u-unnuden ida humman ni dios nem hi-gak. <sup>9</sup> Yu mewan kapakahha-adi annel yun bangbanglu ni yu dineyaw hu dios yun hi Molek. Yuka e-nguhi hu dios ni deyyawen yu, et kayu kamenu-dak di kebbebley ni an menemmak ni edum ni dios ni deyyawen yu niya kayu mewan kamenu-dak ni an mekihummangan di bebley ni nangketey. <sup>10</sup> Kayu kamea-atun an menemmahemmak ni edum ni dios ni deyyawen yu, nem nanengtun eleg kayu menghep. Kanyu nem dakeyu kaiddawsin elet yuddan dios yu, et humman hu eleg kayu manlungtuy.

<sup>11</sup> Kan APU DIOS ey "Hipadda huyyan dios ni yuka tekkusi et yuwak inwalleng niya yuwak kai-itteki? Kaw eleg yuwak law deyyawa tep nebayag ni nakka pemegga i-ineng?"

<sup>12</sup> Kaw kan yu nem kayyagud ida humman ni impahding yu? Peamtak idalli humman ni impahding yu et meamtaan e endi kabaelan idan dios yun mengihwang ni hi-gayu.

<sup>13</sup> Hedin mambegga kayun baddang, ey yadda dios ni kinapyan tutu-u pambagai yu, et ang-angen tayu panggu dedan hedin wada kabaelan dan memaddang ni hi-gayu. Ya kakulugan tu ey pan-ittayab idallin dibdib et meendidda. Anin ni heb-uk ni ebuh et metu-lidda. Nem hedin yadda kamengiddinnel ni hi-gak ey mambegley idallid bebley ku et daydayawen da-ak di Tempol ku."

<sup>14</sup> Kan mewan APU DIOS ey "Pengapya kayun keltad! Pan-ekal yudda nangkeihenid dellanen idan tutu-uk ni neilaw di edum ni bebley et kayyagud hu dellanen dan pambangadan da.

<sup>15</sup> Hi-gak etan eta-gey niya Kayyagud ni peteg ni Dios ni wadan ingganah. Anin ni naka-itta-gey niya kayyagud ni peteg hu kad-an ku, et mekihha-addak mewan idan tutu-un mampekumbabah niya mantuttuyun liwat da, et wadaen ku mewan dinel da niya namnamah da. <sup>16</sup> Eggak pannananeng hu nakka pebehul niya bunget kun hi-gada ma-lat eleg ida medismayah, tep hedin eggak ihhanniman ey mettey idan emin hu tutu-un lintuk. <sup>17</sup> Bimmubbungettak ni hi-gada tep ya liwat dan nekuliput ida. Et humman hu kinastiguk ida et eggak ida hanguhanguden. Nem eleg ida mesilleg et nanengtun manghay idan daka ipilit pinhed da.

<sup>18</sup> Inang-ang kudda humman ni impahpahding da, nem liwwanek liwat da et ipenguluk ida niya baddangak ida. Ellubyagek ida mewan hu kaumlelemyung ni hi-gada. <sup>19</sup> Pelinggep kuddallin emin, yadda neihnup, niyadda neidawwi. Niya panyagud kuddalli. <sup>20</sup> Nem yadda lawah ni tutu-u, ey endi linggep da e henidda dalluyun di baybay ni kamengihhal ni lugit. <sup>21</sup> Makulug ni endi linggep idan lawah ni tutu-u." Huyya hu inhel ni Dios ku.

## 58

### *Ya makulug ni penaydayaw nan APU DIOS*

<sup>1</sup> Immehel mewan hi APU DIOS ey kantuy "Elet yun umtekuk et ehelen yuddan tutu-uk ni helag Israel hu liwat da, <sup>2</sup> anin ni da-ak kadaydayawan kewa-wa-wa e kanday ihik dan amtaen hu elaw ku niya tugun ku ma-lat u-unnuden da. Ey kanday pinhed dan iddawat kun hi-gada hu kayyagud ni tugun ku niya kanday ida kaman-am-amleng ni mengu-unnid ni hi-gak. Nem ya kakulugan tu ey ehel ni ebuh ida humman.

<sup>3</sup> Kanda mewan ey 'Kele itu mantetpel hedin eleg damengu hengngudan APU DIOS humman ni tayu kapehding?' "

Nem kan APU DIOS ni hi-gaday "Ya kakulugan tu ey ma-nu tep kayu kamantetpel, nem yan nunman ni yuka pantetpeli ey ya panyagudan yu kumedek hu yuka nenemnema. Hakey pay ey yudda kapanligligat hu yuka panggunnu. <sup>4</sup> Hedin mewan aggew ni yuka pantetpeli ey kayu kamambabakal. Mukun eggak dedngela dasal yu tep ya huttan ni yuka pehpehding? <sup>5</sup> Yuka peang-ang-ang ni manlelehhah hedin mantetpel kayu. Yuka iyuyuyung ulu yu e heni bulung ni helek, ni nambalwasi kayun langgusih ey nambakbaktad kayud dep-ul. Kaw henin nuntan kumamman hu kandan mantetpel? Kaw kanyu nem peamleng yuwak nuntan ni yuka pehpehding?"

<sup>6</sup> Heninnuy hu pinhed kun pehding yun mantetpel ma-lat meang-ang yuka penaydayaw ni hi-gak: Isiked yun mengippeligligat idan angehemmek ni tutu-u niya ipahding yu hu meandeng ni hi-gada. Ibukyay yudda tutu-un yuka panligligat ni yuka pillitan

panggunnu. <sup>7</sup> Idwasi yun kenen ida neupa niya pahgep yuddad baballey yu hu endi ennamatan da. Idwasi yuddan balwasi hu endi balwasi da, niya entan ukuh ni umbaddang idan edum yu.

<sup>8</sup> Hedin pehding yudda huyya, man iddawt ku panyaggudan yu niya anggegannuy peyaggud dakeyu, henin benang ni aggew e nekemtang ni neukat di mahdel ni kulput. Ey wada-ak ni ingganah di kad-an yu et hi-gak hu mengippaktek ni hi-gayu anin ni attu kad-an yu. <sup>9</sup> Ey hedin mampebaddang kayun hi-gak, man kangkuy 'Adyahhak ni umbaddang ni hi-gayu.'

Hedin issiked yun mengippelligat idan angehemmek ni tuu, hedin issiked yun mampebehul ni edum ni tutu-u, hedin issiked yun memel-it ni edum yu, <sup>10</sup> hedin iddawtan yun kenen ida etan kameuppa niya hedin baddangan yudda anggehemmek, ey mei-ellig kayud dilag e bebnangan yu nanlinikweh et heni emaggew, et meendi law hu engeenget. <sup>11</sup> Ey wada-ak ni ingganah ni mengituttuddun pehding yu. Ippaktek dakeyu et idwat kudda kayyaggud ni mahapul yu. Iddawtan dakeyun elet yu et heni kayu leguntan eleg mekullangin danum, niya heni kayu hebwak ni eleg metduk. <sup>12</sup> Iyayyaggud idallin u-ungnga yudda hu nangkebahbah ni bebley yu ey pan-ikkapya da baballey dad nekapyaan dedan ni pengibbehwatan da. Man-amtalli e hi-gayu hu kamengiyayyaggud ni nebahbah ni luhud niya baballey."

*Ya gungunahen ni pengu-unnudan ni elaw ni Sabaduh*

<sup>13-14</sup> Kan mewan APU DIOS ey "Hedin pinhed yun meihhammad hu pekiddagyuman yun hi-gak, ey u-unnud yu etan tugun ni meippanggep ni Sabaduh et beken ni ya pan-amlangan yu hu pehebbali yun pehding. Ya pinhed kun ipahding yu, henin nakka pehding, ey ibilang yun importanteh humman ni aggew nem yadda etan edum. Et humman hu, lispituh yu humman ni aggew ma-lat beken ni ya legelegem hu yu enab-abigen, niya beken ni ya ngunu yu, niyadda etan edum ni pinhed yu hu ipahding yu. Hedin hannaman yu pehding yu, man nannana-ud ni bendisyonan dakeyun hi-gak et pawalin dakeyun metbal di kebbebley, niya pebeltan kun hi-gayu etan puyek ni indawat kun eman ni ammed yu e hi Jacob. Hi-gak ni AP-APU hu nanghel ni nunya."

## 59

*Ya nanghelan ni prophet e makastigudda hu tutu-u tep ya liwat da*

<sup>1</sup> Entan tu nemnemne e endi kabaelan APU DIOS ni mengihwang ni hi-gayu winu netuleng et eleg tu handengel hu yuka pambeggain baddang tu. <sup>2</sup> Ya kakulugan tu ey yadda lawah ni yuka pehpehding hu kamengiddawwin hi-gayun Apu Dios. Ya liwat yu hu kaumhulun ni eleg tu pengngelin hi-gayu. <sup>3</sup> Nambahul kayu tep maitek kayu, mabekal kayu niya mapetey kayu.

<sup>4</sup> Nemahhig kapehpehding idan nunyan tutu-u. Hedin mewan limmaw idad korteh, man beken ni ya meandeng hu daka pengippuunin daka e-e-hela. Ya itek daka pengappusid kasuh da. Ida kamamplanuh ni lawah ni pehding dan edum da, ni impahding da.

<sup>5-6</sup> Humman idan planuh da ey lawah tep henin itlug ni uleg ni negitaan e hedin napa, man na-duman hu negitaan ni uleg. Inamtan tutu-u e mettey ida hedin kenen da humman ni itlug. Yadda planuh da ey heni balwasin nekapyad baley ni kakkawwa e endi silbitu. Huyyaddan tutu-u ey daka pehpehding hu lawah ni kapanhelheltapin edum dan tutu-u. <sup>7</sup> Lawah daka iplanuplanuh ni pehding niya daka abtui pengippahdingan dan implanuh da. Anin ni endi bahul ni hakey ni tuu et ida kamangegeyyetget ni memettey ni hi-gatu. Emin daka lawwi ey wada daka bahbaha, niya wada daka panligligat ni edum dan tuu. <sup>8</sup> Eleg da amta pehding da ma-lat melinggep hu pekikkillawwan dad edum dan tuu. † Beken ni meandeng hu daka pehding ni edum da. Eleg da u-unnuda kayyaggud ni elaw. Ya tuun mengu-unnud ni nunya ey endi linggep tu.

<sup>9</sup> Kan idan tutu-uy "APU DIOS, huyyadda hu eleg dakemi pengihwangiddan kamengipelligat ni hi-gami. Et humman hu, heni kami wadad engeenget, anin ni mika namnamahan mebnangan. <sup>10</sup> Heni kami nekulap ni kamandapdapudap di luhud. Anin ni nandattek aggew et meihhungbub kami kumedek, tep heni nehileng mika penang-ang. Heni kami nekattey di kad-an idan makedikad ni tutu-u e endi han-ipahding mi. <sup>11</sup> Endi linggep mi e heni kami bear ni na-let hu ngedey tu niya kami kaumlelemyung e henin nehakke ni paluman kaman-eyyag ni kadwa tu. Mika hehhegeda pengippahdingan ni tutu-un meandeng ni hi-gami, nem endi. Ey mika hehhegeda pengihwangam e APU DIOS ni hi-gami, nem eleg mu ipahding.

\* 59:7 59:7 Romans 3:15-16 † 59:8 59:8 Romans 3:17

<sup>12</sup> Nemahhig dedan nambahulan min hi-gam e APU DIOS. Huyyaddan lawah ni impenahding mi ey kenayun ni kameippenemnem ni hi-gami et mika ebbuluta e nekalliwtan kami. <sup>13</sup> APU DIOS, manghay kamin hi-gam e Dios mi. Inwalleng daka e eleg daka u-unnuden. Impanligligat mi edum min tuu niya itek hu wadad nemnem mi, anin ni ya mika e-hela. <sup>14</sup> Beken mewan ni meandeng hu mika pehdng ni mengippennuh ni diklamuh, niya eleg mi hengguda neiptek. <sup>15</sup> Itek emin kamee-ehhel niya kameippenahding e kunan hu makulug. Ey hedin mewan wada eleg mengippahding ni lawah, man lawah mewan meippahding ni hi-gatu.”

Inang-ang APU DIOS ida huuya ey eleg tu pinhed tep endi hu limpiyuh. <sup>16</sup> Natnga mewan tep endin hekey hu kaumbaddang idan daka panligligat ni tutu-u. Et humman hu, nanna-ud ni ussalen tu et-eteng ni kabaelan tun mengihwang ni hi-gada. Endi edum ni nandinelan dan mengapput ni buhul da, nem hi-gatun ebuh. † <sup>17</sup> Ya kakinayyaggud tu ey kamei-inggeh di usal ni sindalun mekiggubbat, ey ya kabaelan tun um-ihwang ey heni helmet di ulu tu. Ihik tun peang-ang hu nemahhig ni bunget tu niya ihik tun ibbaleh hu nanhelheltapan ni tutu-u tu. <sup>18</sup> Kastiguen tuddalli buhul tu tep yadda lawah ni impahding da, anin idan wadad nangkeidawwin bebley. <sup>19</sup> Et lektattu kaya ey tekkutan ni tutu-u hi APU DIOS niya et-eteng ni kabaelan tu, meippalpuddad bebley di appit ni kasimmilin aggew ingganah di appit ni kakelinnugin aggew. Um-alillin heni elwang ey henin na-let ni dibdib.

<sup>20</sup> Kan APU DIOS idan tutu-u tuy “Hi-gayun helag Jacob, um-ali-ak alid Jerusalem et iehngeng dakeyu ma-lat ihwang dakeyun emin ni nantuttuyun liwat da. <sup>21</sup> Hedin hi-gak, man heninnuy hu pekitbalan kun panyaggudan yu: ‘Weddaen kun hi-gayu hu Ispiritu ku niyadda tugun ku et mannananeng idan hi-gayun ingganah. Et meippalpu nunya ey mengu-unnud kayun hi-gak niya tuttudduan yudda u-ungnga yu niyadda helag da, ma-lat u-unnuden da-ak ni ingganah.’ ” § Hi APU DIOS hu nanghel idan nunya.

## 60

### *Ya keiddeyyawan ni Jerusalem ni edum ni aggew*

<sup>1</sup> Inah kayun tutu-uk ni iJerusalem et ang-angen idan tutu-ud kebebbebley hu benang yu, tep bebnangan dakeyun dayaw APU DIOS. \* <sup>2</sup> Me-nget di kebebbebley, nem bebnangan dakeyun APU DIOS, tep mewedda dayaw tud kad-an yu. <sup>3</sup> Um-aliddalli tutu-u niya papatul di edum ni bebley di kad-an yu tep ya benang yu.

<sup>4</sup> Kan APU DIOS ey “Pan-ang-ang-ang kayud nanlinikweh et ang-angen yu kameip-penahding. Ida kamangkaemung hu edum yu ma-lat umenamut ida. Anin idan u-ungnga yun lalaki et ida kamengennamut ni nalpud nangkeidawwin bebley. Ey yadda dama u-ungnga yun bibi-i ey ida kamangkei-ennamut e henidda gelang ni nangkeiepupu. <sup>5</sup> Mangkedyat ali mamatta yun amleng yu, tep pan-i-aliddallin tutu-ud kebebbebley hu kinedangan dan hi-gayu, anin idan wadad ba-hil ni baybay.

<sup>6</sup> Mebulbulbug idalli um-alin nampangkalgan kamel ni melpud Midian niyad Ephah. Emin ida ey nalpuddad Seba e daka pan-i-ali balituk niya bangbanglun daka gihheban ni penaydayawan dan hi-gak e hi APU DIOS. <sup>7</sup> Mei-lin emin ni hi-gayu hu kalneroh di Kedar niyad Nebayot et meiappit di altar ni hi-gak. Ebbuluten kuddalli humman ni mei-appit ma-lat meidaydayaw hu Tempol ku. †

<sup>8</sup> Hipadda humman ni nakka ang-ang-angan immelan heni kulput ni kamenglaw di Israel winu henidda paluman kamengennamut di buya da? <sup>9</sup> Humman ida bapor ni nalpud nangkeidawwin bebley ni kamampengi-ennamut ni tutu-uk e intabin da silber niya balituk, ma-lat penaydayaw dan hi-gak e hi APU DIOS e Dios yun Kayyaggud ni peteg ni Dios ni Israel. Nambalin kudda tutu-uk ni kamedeyyaw di emin ni kebebbebley eyad puyek.”

<sup>10</sup> Kan mewan APU DIOS idan iJerusalem ey “Iyayyaggud idallin tutu-un nalpud edum ni bebley hu netuping ni luhud yu ey inggunwan dakeyullin patul da. Ya lan nunman ey kinastigu dakeyun bunget ku, nem yan nunya ey kabbabballak ni hi-gayu et hehmeken dakeyu. <sup>11</sup> Kewa-wa-wa, anin ni hileng ey eleg meillekbi hu eheb yu et pan-i-liddan papatul di edum ni bebley hu kinedangan dan hi-gayu. <sup>12</sup> Nem hedin yadda bebley ni eleg mansilbin hi-gayu ey mebahbah ida.

‡ 59:16 59:16 Ya buhul idan tutu-un APU DIOS ey hi Satanas. Hi-gatu e buhul emin ni tuu ey naka-apput nan APU DIOS. § 59:21 59:21 [20-21] Romans 11:26-27 \* 60:1 60:1 Ya nengihwangan APU DIOS ni hi-gatsu, ey kamei-ellig di benang e tuka endia engeenget. (Ang-ang yu Colossians 1:12-13.) † 60:7 60:7 [6-7] Huyyaddan bebley ni negadan eyad dewwan verse ey waddaddad Arabia.

<sup>13</sup> Ya etan keyew ni belbel, ya juniper, ya cypress e humman ida kekakkayyagguddan ni keyew ni kamelpud Lebanon ey pan-i-ali dan hi-gayu et iyayyaggu yu bebley yud Jerusalem, ma-lat kayyaggu ang-ang ni Tempol ku niya ma-lat meidaydayaw hu bebley ku.

<sup>14</sup> Yadda u-unggaddan kamengippeliligat ni hi-gayu ey um-aliddalli et manyuung idan panlisipituh dan hi-gayu. Emin idalli kamemihhul ni hi-gayun nunman ey um-aliddallin manyu-ung ni hi-gayu. Ngeddanan dalli bebley yun 'Bebley APU DIOS, e Zion ngadan tu e Bebley ni Kayyaggu ni peteg ni Dios idan helag Israel.'

<sup>15</sup> Eleg kayu law meiwwalleng niya eleg kayu meibubbunget. Huttan ni bebley yun neiwalleng nunman et mebel-ah ey pambalin kulli law ni kameiddeyyaw niya kakkayyaggu. Eleg ali mepappeg hu pan-an-anlaan di ditan ni bebley. <sup>16</sup> Ippaptek dakeyullin tutu-ud edum ni bebley, anin idan patul da. Ippaptek dakeyullin henin kapemapte ni hakey ni inan u-ungnga tu. Humman ali pengamtaan yu e hi-gak e hi APU DIOS e Kabaalan tun emin e Dios idan helag Israel hu nenelaknib ni hi-gayu.

<sup>17</sup> I-alian dakeyun hi-gak ni balituk e beken ni ya giniling, ey i-alian dakeyun silber niya giniling e beken ni ya gumeke niya keyew, ey i-alian dakeyun gumeke e beken ni ya batu. Ey pambalin kun kababbal ida aap-apu yu, ma-lat eleg dakeyu law panligligat niya pambalin kun melinggep niya meandeng hu pan-ap-apu dan hi-gayu. <sup>18</sup> Endilli law hu papatey ni meippahding di bebley yu, niya endi law um-alin memabhah ni hi-gayu, tep ippaptek dakeyu niya ihhehwang dakeyun hi-gak. Et humman hu, ingngandan yuddalli etan tuping ni luhud yun 'Keihwangan' niyadda etan eheb yun 'Dayaw.'

<sup>19</sup> Eleg yulli law mahapul hu aggew ni memngan ni hi-gayun kawwalwal niya beken law ni ya bulan hu pemnang yun hileng, tep hi-gak e hi APU DIOS e Dios yu hu memngan ni hi-gayun ingganah. Ey ya dayaw ku memngan ni hi-gayu. ‡ <sup>20</sup> Eleg kayu law umlelemyung, tep hi-gak ni AP-APU hu memngan ni hi-gayun ingganah. Ey eleg mepappeg hu pemnangan kun hi-gayu. Beken ni henin aggew ni kamelinnug et engeenget law winu henin bulan e lektattuy netalak. <sup>21</sup> Yan nunman ali ey hi-gayun nambebley di Jerusalem ey paka-u-unnuden yuwak et beltanen yun ingganah huttan ni nambebleyan yu. Tep heni dakeyulli intanem ma-lat maipeang-ang hu et-eteng ni dayaw kud emin ni tutu-u.

<sup>22</sup> Anin ni ek-ekut eya bebley yu et mambalin alin et-eteng ni bebley ni et-eteng hu kabaalan tu. Hi-gak hi APU DIOS! Anggegannu pengippahdingan kun emin nunman etan ni aggew ni gintud kun amnuan tu."

## 61

<sup>1</sup> Ya Ispirituh etan ni Eta-gey ni peteg ni DIOS ey wadan hi-gak, tep hi-gak hu pinutuk tun mengippeamtaddan nangketwetwet ni kayyaggu ni mekapkapyalli, ya mengippeamleng idan kaumlelemyung niya mengippeamtaddan neikelabut e dammutun meibbukyat ida law. <sup>2</sup> Intu-dak tuwak mewan ni mengippeamta e nedateng law hu aggew ni pengihwangan APU DIOS idan tutu-u tu niya pengapputan tun buhul da. Ey intu-dak tuwak ni mengellubyag idan kaumlelemyung, \* <sup>3</sup> nema-madda tutu-ud Zion. Iddawat ku panyaggudan da, ma-lat eleg da law ha-adan ulu dan dep-ul, nem mampepnet idan habung, tep ida law kaman-am-amleng ma-lat isiked da law ni umlewalewa, nem ha-adan da angh dan lana et keang-angan tun ida kaman-am-amleng, niya ma-lat eleg ida medismayah, nem man-a-appah idan penaydayaw dan hi-gak. Hi-gadalli hu heni keyew ni intanem APU DIOS ni keang-angan ni keiddeyyawan tu.

<sup>4</sup> Yan nunman ali ey iyayyaggu dadda bebley dan nebahbah ni nebayag. Anin ni nebel-ah humman ni bebley ni pigan toon et iyayyaggu da law.

<sup>5</sup> Hi-gayun tutu-uk ey ingngunan dakeyullin tutu-un melpud edum ni bebley. Ippaptek dalli halun yu niya nggunuen dalli papayyew yu, niya ippaptek da legunta yun netaneman ni grapes. <sup>6</sup> Kan idallin tutu-uy 'Padi dakeyun AP-APU niya bega-en dakeyun Dios tayu.'

Ikkelmeg yulli kinedangan ni edum ni bebley niya igaggaya yuddalli humman ni kinedangan da. <sup>7</sup> Nepappeg law kaya anggeba-ing ni biyag yu. Mambebley kayulli law di bebley yu dedan niya umkedangan kayullin peteg et man-am-amleng kayullin ingganah.

<sup>8</sup> Kan APU DIOS ey "Pinhed kun peteg hu meandeng niya angebe-hel ku hu an peliligatan hu edum ni tuu, anin idan kamemilliw ni limmun edum dan tutu-u. Eggak kekyatan mengidwat ni gunggunah idan tutu-uk tep ya nanligligatan da. Beken ni

‡ 60:19 60:19 Ang-ang yu hu Revelation 21:23 niya 22:5.

\* 61:2 61:2 [1-2] Luke 4:18-19

huyyan ebu, tep wadalli nehammad ni pekitbalan kun hi-gadan panyaggudan da e mannananeng alin ingganah. <sup>9</sup> Mandinggel idalli helag dad kebebbley, ey emin ali menang-ang ni hi-gada ey inamta da e hi-gada hu binendisyonan ku.”

<sup>10</sup> Nakka man-am-amleng tep ya impahding APU DIOS e Dios kun panyaggudan. Inhewang tuwak niya imbilang tuwak ni kayyaggud. Heni-ak etan ni lakin nambalwasin balwasin mangkal niya hen-ak biin nanggamang ni aggew ni kasal tu. <sup>11</sup> Nanna-ud ni ihhehwang APU DIOS, e Eta-gey ni peteg, ida tutu-u tu henin bukel e nanna-ud ni untemel. Meidaydayaw ali hi APU DIOS di kebebbley.

## 62

*Ya baluh ni ngadan ni Zion*

<sup>1</sup> Et-eteng hu impemihed kun hi-gayun bimbley di Jerusalem e Zion, et humman hu, iddasalan dakeyu ingganah umbenang hu kakinyaggud yu henin tuka kewa-wain kakkabbuhhan niya ingganah meang-ang hu kehellakniban yu henin kamantetebbel ni dilag.

<sup>2</sup> Han ali ang-angan tutu-u niya papatul di kebebbley hu kakinyaggud yu niya dayaw yu. Mehullulan ali ngadan yun iddawat APU DIOS ni panggeddan yu. <sup>3</sup> Mambalin kayullin hen-ak kayyaggud ni penget APU DIOS e Dios tayu. <sup>4</sup> Eleg ali law ngeddanin tutu-u hu bebley yun ‘Inwalleng nan Apu Dios,’ ey eleg dalli ngeddanin ‘Netawwey,’ tep yalli panggeddan da ey ‘Kapan-am-amlengin Apu Dios,’ ey ‘Kaman-an-anlan Nelahin.’ Meippahding idalli huyya, tep kaum-amleng hi APU DIOS ni hi-gayun kamei-ellig ni ahwa tu.

<sup>5</sup> Hi-gayun iJerusalem ey um-amleng ida u-ungnga yun mengippaptek ni bebley yu, henin amleng ni kat-agun lakin melehhin di kat-agun bii. Hanniman dama hi Apu Dios e nanna-ud ni pinheden dakeyu, henin impemihed ni lakin ahwa tu.

<sup>6</sup> Hi-gak ni prophet ey pinutuk kudda mandasal e henidda guwalyan nei-peng di tuping ni luhud ni Jerusalem. Ey mahapul ni mandasal idan APU DIOS ni kewa-wa-wa niyan kahilehileng ma-lat peamnu tudu hu hinammad tun inhel ni panyaggudan idan tuudman. Hi-gayun kamandasal, entan tu isiked ni mampehemhemmek ni hi-gatu. <sup>7</sup> Entan tu nisi isiked ni mandasal ni hi-gatu ingganah pengibbangngadan tun kakinyaggud dedan ni Jerusalem, ma-lat mambalin ni bebley ni kameiddeyyaw di kebebbley eyad puyek.

<sup>8</sup> Hinammad APU DIOS ni inhel e gapuh ni et-eteng ni kabaelan tu ey pehding tu humman ni inhel tu. Kantuy “Eleg law mabalin ni nak i-abulut ni yadda buhul yu niyadda tutu-ud edum ni bebley hu menggan ni inggaw yu niya menginum ni kinapya yun meinum. <sup>9</sup> Tep hi-gayullin nantanem hu menggan idan lameh ni intanem yu, ma-lat daydayawen yu hi APU DIOS. Ey hi-gayun nengipaptek ni grapes ey hi-gayulli menginum ni danum tud dallin ni Tempol ku.”

<sup>10</sup> Hi-gayun iJerusalem, kaukat kayu et pan-iyayyaggud yu keltad ni dellanen idan mampengnamut ni tutu-u! Idaddan yu keltad e pan-ekal yudda babattu niya itagey yudda bandelah ni Israel ma-lat pengamtaan idan tutu-ud kebebbley ni dellanen da. <sup>11</sup> Heninnuy mewar impeamtan APU DIOS di kebebbley: Kantuy “Ehel yuddan iJerusalem e kanyuy ‘Um-ali etan mengihwang ni hi-gayu! Itabin tudu tutu-u tun ginun-ud tun inhewang tu!’ ” \*

<sup>12</sup> Yalli panggeddan ni tutu-un hi-gayu ey “Tutu-un APU DIOS ni pinili tu” niya “Tutu-un inhewang APU DIOS.” Ya mewar Jerusalem e bebley yu ey ngeddanan dan ‘Bebly ni nakappihed APU DIOS’ niya “Bebly ni eleg law iwalleng nan APU DIOS.”

## 63

*Ya pengapputan APU DIOS idan buhul tu*

<sup>1</sup> Hipa huyyan tuun kamengellin nalpud Bosrah di Edom ni nambalwasin kayyaggud ni madlang? Ka-ang-ang e et-eteng kabaelan tu niya naka-let.

“Hi-gak hi APU DIOS e et-eteng kabaelan tun um-ihwang. Immali-ak ma-lat peamtak e hi-gak hu nengapput.”

<sup>2</sup> “Kele makaddalang hu balwasim e hen-ak mu inggasigasin hu lameh ni grapes?”

<sup>3</sup> Himmumang hi APU DIOS ey kantuy “Nan-igsin ku tutu-ud kebebbley, henin kapampengsinin grapes, nem endi immalin bimmaddang ni hi-gak. Nan-igsin kuddan bunget ku et deh e nekukkuheyaw emin eya balwasik. <sup>4</sup> Hanneya impahding ku tep pinhed kun ibbaleh impenahding ni buhul idan tutu-uk. Ninemnem ku e nedatngan

\* 62:11 62:11 Ang-ang yu hu Isaiah 40:10b.



law aggew ni pengihwangak idan tutu-uk et kastigweek ida buhul da. <sup>5</sup> In-ang-ang ku ey endi umbaddang ni hi-gak ey natnga-ak, nem impa-let da-ak ni bunget ku et mengapputtak. <sup>6</sup> Bimmungettak ni peteg et pan-igsin ku tutu-ud kebebbeley eyad puyek, et mangkebabah ida e nangkeipaghit hu kuheyaw dad puyek."

*Ya impeminhed nan APU DIOS idan helag Israel*

<sup>7</sup> E-ehhelen ku hu elaw ni impeminhed APU DIOS ni eleg melumman niya daydayawen ku tep ya impahding tun panyaggudan tayu. Em, dakel hu kayyaggud ni impahding tuddan helag Israel tep ya hemek tu niya et-eteng ni impeminhed tun eleg melumman. <sup>8-9</sup> Kan APU DIOS ey "Tutu-uk ida, et nanna-ud ni eleg da-ak he-ulan hi-gada." Humman nengihwangan tuddad emin di nanhelheltapan da, tep ya hemek tu niya impeminhed tun hi-gada. Hi-gatu nandudug ni nengihwang ni hi-gada e beken ni ya anghel tu. Anin dedan ni nunman et impenaptek tudda. <sup>10</sup> Nem nginhay da et lumelemyung hu Ispirutih tu. Et mambalin ni buhul da hi APU DIOS et panhelheltap tudda law.

<sup>11</sup> Ma-nu mewan tep ninemnem da eman ni kawedan Moses e bega-en APU DIOS et kanday "Kele eleg daitu law baddangi etan ni AP-APU nengihwang ida lan a-ammed tayud baybay? Ey kele eleg daitu baddangin hi-gatun nengipealin Ispirutih tun hi-gadan tutu-u tu? <sup>12-13</sup> Kele nealay eleg daitu baddangin APU DIOS, e gapuh ni et-eteng ni kabaelan tu, ey impanhi-yan tu hu danum di baybay ni nengita-geyan nan Moses ni ngamay tu, et man-agwat ida tutu-u tu ma-lat maidaydayaw ni ingganah? \*

Hi APU DIOS hu nengipengulun hi-gadan mandellan di gawwan baybay et henidda kebayyud duntug e kameka-ihhammad hu gassin da ma-lat eleg ida meihungbub. <sup>14</sup> Impangulun Ispirutih APU DIOS idad kayyaggud ni bebley ni pan-iyyatuan da, henin kamampattul e tuka ippanguludda babakka tud nedeklan e mateba helek diman. Hanniman impahding tu ma-lat kaideyawan tu."

*Ya dasal ni pampehemhemmekan niya pampebaddangan*

<sup>15</sup> "APU DIOS, e wadad kabunyan e kamedeyyaw niya kayyaggud ni peteg ni tuka pan-ap-apui, attu anhan et iuhdung mun hi-gami ey? Attu anhan hu et-eteng ni impeminhed mu, ya hemek mu niya binabbal mun hi-gami ey? Entan dakemi anhan iwalleng! <sup>16</sup> Hi-gam Amemi. Anin ni kantu e eleg dakemi ebbulutad Abraham nan Jacob e aammed mi, et hi-gam e hi APU DIOS e Amemi ey nanna-ud ni ebbuluten dakemin u-ungngam. Tep hi-gam ni ingganah hu kamengihwang ni hi-gami neipalpun nebayag. <sup>17</sup> Nem kele muka i-abulut ni eleg kami mengu-unnud ni elaw mu, niya kele impekelhim ulu mi et deh e manghay kamin hi-gam? Nemnem dakemi anhan! Bega-en dakemin hi-gam ey hi-gami dedan tutu-um.

<sup>18</sup> Hi-gamin tutu-um ey kemtang ni ebuh nan-an-anlaan min nandayaw di Tempol mu, tep binabhah idan buhul mi. † <sup>19</sup> APU DIOS, kele heni eleg dakemi ibbilang ni tutu-um? Ey kele heni beken ni hi-gam hu Ap-apu mi?"

## 64

<sup>1</sup> "Attu et bi-kieim hu kabunyan et ibeghul mu et melehbeng kadyay? Nanna-ud ni anin idan duduntug et umgeygey idan takut da hedin ang-angen daka. <sup>2</sup> Ya apuy ey tuka petbel hu keyew niya tuka pelwag hu danum. Hanniman alin elliam e pegeygey mu katuuud kebebbeley. Et humman hu, ali ka et peang-ang mu kabaalam idan buhul mu. <sup>3</sup> Yan eman ni illian mu et ipahding mudda etan kaketngain eleg mi nemnem ni meippahding, ey anin idad duntug et heni nanyeyeg. <sup>4</sup> Endi mi dinggel niya endi mi inang-ang ni edum ni Dios ni henin hi-gam ni kamengippaptek niya kaumbaddang ni tutu-un kamandinnel ni hi-gatu. <sup>5</sup> Makabbaddang kaddan tuun kayyaggud daka pehding niya kamengu-unnud ni pinhed mu.

Nem hedin hi-gami ey naneng tun kami kamanliw waliwwat ni hi-gam neipalpu lan nebayag, et humman hu, nemahhig hu bunget mun hi-gami. Et mukun hipa makkaw inna-nu min meihwang? <sup>6</sup> Emin kami ey nekalliwtan kami. Anin idan kammin kayyaggud ni mika pehding et lawah ida. Et umhulun hu liwat mi ey heni kami bulung ni nakpit ni intayab ni dibdib. <sup>7</sup> Endin hi-gami hu kamandasal ni hi-gam niya endi kamampebaddang ni hi-gam. Neidawwi kan hi-gami niya inwalleng dakemi tep ya liwat mi.

<sup>8</sup> Nem hi-gam e APU DIOS hu Amemi. Heni hi-gami hu pula niya hi-gam etan kamemkel ni hi-gami. Lintu dakemin hi-gam, <sup>9</sup> et humman hu, entan dakemi anhan ibubbunget niya entan anhan tu nenemnem ni ingganah hu liwat mi. Hi-gami tutu-um, et humman hu, hemek dakemi anhan.

\* **63:12-13** 63:12-13 Exodus 14:15-22 † **63:18** 63:18 Huyyaddan na-hel ni buhul ey yadda sindalun iBabilon.

<sup>10</sup> Yadda pinilin ni bebley, anin ni ya Jerusalem ey nambalin idan desert. Nekabbahbah ida niya nebel-ah ida. <sup>11</sup> Negiheh hu kamengillin ni Tempol mun kayyaggud ni peteg ni nandayawan ida lan a-ammed min hi-gam. Ey nebahbah idan emin hu kayyaggud niya nebalol ni wada eyad bebley mi. <sup>12</sup> APU DIOS, kaw eleg mudda hengnguda huyya? Kaw pemeggam i-ineng e endi mu pehding, ma-lat eleg mannananeng hu nemahhig ni mika panhelheltapi?"

## 65

*Ya pengastiguan nan APU DIOS idan manghay*

<sup>1</sup> Kan APU DIOS ey "Nandaddannak et ni menummang ni dasal idan tutu-uk, nem eleg ida mandasal. Nandaddannak mewan ni mampeamtan hi-gada, nem eleg da-ak heppula. \* Em, eleg ida mandasal ni hi-gak, anin ni nandaddannak ni menummang ni hi-gada et kan ku-et ey "Iyyadya-ak ni ihik ni umbaddang ni hi-gayu."

<sup>2</sup> Nemahhig ida huyyan tutu-uk! Hamban hi-gak u-unnuden da ey ambeken, tep nanengtun lawah daka pehpehding e ya pinhed da daka u-unnuda. Nem ay anin ni hanniman ida et nandaddannak ni ingganah ni linnawan nangketey. Daka kenna detag dan mengippebunggebungnet ni hi-gak. Ida kaumlaw di daka ngillinan legunta ni ida nan-appit di daka daydayawan dios da, ni da giniheb hu bangbangluddad daka pan-appisiddan beken ni makulug ni dios. † <sup>4</sup> Hedin hileng, man umlaw idad leyang niyaddad kukullung et ida makihummangan ni linnawan nangketey. Daka kenna detag ni killum ni neiappit idan beken ni makulug ni dios ‡ niya daka ihhibul hu danum tu. <sup>5</sup> Hedin mewan, kandan edum dan tutu-uy "A-allaw kayu et eleg dakemi kapaen tep neieng-eng kamin Apu Dios." Eggak han-anus hu tutu-un henin nunman. Eggak han-ispel hu nemahhig ni bunget kun hi-gada e heni kaumhiihyab ni apuy ni eleg me-dep.

<sup>6</sup> Ninemnem ku dedan e kastiguck ida. Humman ni ninemnem kun pehding ey neitudek. Eggak pemegga i-ineng. Ibbaleh ku hu nanliwatan da, <sup>7</sup> et ya nanliwatan ida daman aammed dan hi-gak. Tep ginihegiheb da hu bangbanglun in-appit daddan beken ni makulug ni dios dad daka pan-appisid duduntug. Ey lawah daka penghel ni hi-gak. Et humman hu, kastiguck ida tep humman lebbeng tun meippahding ni hi-gada tep ya humman idan impahding da."

<sup>8</sup> Kan mewan APU DIOS ey "Endi hakey ni tuun tu bahbahen ni emin hu intanem tun grapes hedin wadadda lawah, tep eleg tudda bahbaha hu kayyaggud ma-lat usalen tu. Hanniman daman hi-gak e eggak bahbahen emin ida tutu-uk tep ihhehwang kudda etan kamengu-unnud ni hi-gak. <sup>9</sup> Bendisyonak ida helag Judah e helag Israel et pebeltan kun helag da hu bebley dan Israel e kad-an idan duntug ku ma-lat mambebley ida hu pinilik ni tuuk diman. <sup>10</sup> Yallin nunman ey yadda tutu-un kamengu-unnud ni hi-gak ey da ippattul hu kalneroh da niya baka dad Saron niyad Nedeklan e Akor.

<sup>11</sup> Nem beken ni henin nunman hu meippahding idan nengiwalleng ni hi-gak, tep eleg da hanguden ni umlaw di duntug ku e Zion e kad-an ku, niya daka daydayawadda beken ni makulug ni dios e hi Meni nan Gad e humman ida daka kullugan dios ni kamengidwat ni kayyaggud ni gahat da. <sup>12</sup> Nanna-ud ni mepettey kayu, tep eleg yu pinhed ni u-unnuden hu nakka ittuttuddu. Eleg yuwak u-unnuda tep ya lawah hu pinhed yun pehpehding.

<sup>13</sup> Et humman hu, hi-gak e hi APU DIOS e Eta-gey ni peteg ey e-helek ni hi-gayu e yadda kamengu-unnud ni hi-gak ey dakel hu kennen da niya innumen da, nem hedin hi-gayu man meuppa kayu niya endi innumen yu. Man-am-amleng ida, nem hedin hi-gayu man meabba-ingan kayu. <sup>14</sup> Man-a-appel idallin amleng da, nem hedin hi-gayu man mannannangngih kayullin degeh ni nemnem yu. <sup>15</sup> Ussalen idallin tuu hu ngadan yun pan-iddut, tep petteyen dakeyullin hi-gak e hi APU DIOS e Eta-gey ni peteg. Nem hedin yadda kamengu-unnud ni hi-gak, ey iddawtak idan baluh ni ngadan. <sup>16</sup> Hedin wadan hi-gayu mambeggan bendisyon man ibega tun hi-gak e kameiddinnel ni Dios. Ey hedin wada mansapatah, ey isapatah tud ngadan ku. Yadda nelabalabah ni nengipehelheltapak ni hi-gayu, tep ya liwat yu ey mesikked, tep liniwwan ku law ida liwat yu." §

<sup>17</sup> Kan mewan APU DIOS ey "Weddaek hu baluh ni puyek niya baluh ni kabunyan \* et mekalliwwan ida etan nelabalabah ni aggew. <sup>18</sup> Pan-am-amlengan yullin ingganah humman idan weddaek. Man-am-amleng idalli tutu-udman e baluh ni Jerusalem ni

\* 65:1 65:1 Romans 10:20 † 65:3 65:3 Ang-ang yu hu Isaiah 1:29 et ya 66:17. ‡ 65:4 65:4 Leviticus 11:7

§ 65:16 65:16 [15-16] Ang-ang yu hu 2 Thessalonians 1:7-9. \* 65:17 65:17 Ang-ang yu hu Isaiah 66:22, ya 2 Peter 3:13 et ya Revelation 21:1.

weddaek tep ebu ali an-anlan wadadman. <sup>19</sup> Anin ni hi-gak et nakka um-amleng ni nunman ni baluh ni Jerusalem niyadda tutu-udman. Endilli law umnangih diman niya endilli mampehemmehemmek ni mambeggan baddang diman.

<sup>20</sup> Endi mewan mettey diman ni gelang tep meteggudda ingganah ni kea-ammaan da winu kei-innaan da. Yadda meteggu ingganah umlaw di hanggatut toon da ey meibbillang idan u-ungnga pay ni. Hedin kantu et mettey idan eleg da pay datngen humman ni toon ey humman keang-angan tun kinastiguk ida. <sup>21</sup> Mengapyadda tutu-uk ni baballey da et manha-ad idadman. Ey mantennem idan grapes ey hi-gadalli dama menginnum ni danum tu. <sup>22</sup> Beken ni henin neipahding nunman e immalidda buhul da, et piliwen da baballey da niyadda intanem dan grapes. Yaddalli tutu-uk ey heniddalli keyew e andukkey biyag da ey pan-an-anlaan dali nan-aatuan da. <sup>23</sup> Kayyaggud ali pambalanan ni ngunnuen da niya endilli lawah ni meippahding ni u-ungngada. Bendisyonan kuddallin ingganah anin idan meittu-nud ni helag da. <sup>24</sup> Nandaddannak ni menumang ni dasal da e eleg da gibbuha ey pan-iddawat ku law mahapul da. <sup>25</sup> Yadda wolf e heni ahhu niyadda impah ni kalneroh ey makaddagsiddalli law ni mengngan. Yadda layon ey mengngan idalli law ni dagemi e henin baka. Et yaddalli uleg ey beken idalli law ni angetakkut. Yad Zion e duntug ku ey endilli law lawah diman niya endilli law hu umbahbah diman.”

## 66

*Yalli penuwetan APU DIOS ni emin ni tuu*

<sup>1</sup> Kan APU DIOS ey “Yad kabunyan hu nakka yuddungin man-ap-apu ey yad puyek hu nakka pengiddahyayin helik. \* Hipa humman ni baley ni kapyaan yun nak pambelleyan? Kaw pakekapyaya kayu makkaw ni panha-adak? <sup>2</sup> Kaw beken ni hi-gak nanletun emin ni hipan wadad puyek niyad kabunyan? † Ya kamengippeamleng ni hi-gak ey yadda daka pebahah annel da, yadda kamantuttuyun nengipahdingan dan lawah, yadda kaumtakut, niyadda etan kamekangngu-unnud ni hi-gak. Hi-gak e hi APU DIOS hu nanghel idan nunya.

<sup>3</sup> Nem hedini yadda tutu-un kamangngenghay ni hi-gak, ey ya pinpinhed da hu daka pehpending e ida kaman-appit ni bakan hi-gak, nem daka petteya tuu, ida kaman-appit ni pakecteng tun kalneroh, nem daka hehpunga bukley ni ahhun i-appit dan beken ni makulug ni dios, ida kaman-appit ni begah ni hi-gak, nem daka i-appit hu kuheyaw ni killum di edum ni dios, ey ida kaman-appit ni kagihheban bangbanglun hi-gak, nem daka deyyawa beken ni makulug ni dios. Ingge-at dan nengiwalleng ni hi-gak niya daka pan-amlengin mengippahding ni lawah. <sup>4</sup> Et humman hu, pellaw kun hi-gada hu nehalman ni ligat ni daka tattakusi, tep eleg da hengnguda niya eleg da u-unnuda hu nakka e-helan hi-gada tep da-ak kangenghaya. Daka pehebballi mengippahding ni lawah.”

<sup>5</sup> Hi-gayun kamekangngu-unnud ni tugun APU DIOS, dengel yu mewan eya inhel tu. Kantuy “Anggebe-hel dakeyun edum ni aaggi yu niya eleg dakeyu ibbilang ni hi-gada tep ya yuka pengu-unnudin hi-gak. Dakeyu kataltalanggai e kanday ‘Imay pangnu numan et ang-angen ni pengippeang-angan APU DIOS ni kabaelan tun pengihwangan tun hi-gayu ma-lat umamleng kayu.’ Hannitan daka pehding ni hi-gayu, nem hi-gadalli mebe-ingan. <sup>6</sup> Dengel yu kedi! Kele ida kamangngangalad bebley? ‡ Ey hipa humman ni tenul ni kamelpud Tempol? Humman ni tenul ey nalpun hi-gak e hi APU DIOS ni nakka pampengastiguiddan buhul ku.

<sup>7</sup> Ya Jerusalem e bebley ni nakka panha-adi ey kamei-ellig di biin endi maptek ey nan-ungnga e eleg tu heltapen hu degeh tu. <sup>8</sup> Kaw wada dingngel yu winu inang-ang yun hanniman ni neipahding? Kaw neala ni newada hu bebley ni han-aggew? Nem ya Jerusalem e bebley ku ey nekemtang ni ebu panhelheltapan tu ey mewedda humman ni bebley. <sup>9</sup> Anin ni nanhelheltap kayu et entan tu nemnem e eggak peamnu hu planuh kun hi-gayu. Hi-gak hu kamengippeungngan bii, et hanniman dama e nannana-ud ni weddaen ku hu dakel ni mambebley di Jerusalem.” Huyya inhel APU DIOS.

<sup>10</sup> Pakiam-amleng kayuddan iJerusalem, hi-gayun wada impeminhed tun nunman ni bebley, anin ni hi-gayun kaumlemyung tep ya humman ni bebley. <sup>11</sup> Pakiam-amleng kayun hi-gada, tep mekibbingngay kayullin kinedangyan nunman ni bebley, et heni kayulli etan ni gelang ni kaman-am-amleng tep dakel hu danum ni huhun inetu.

<sup>12</sup> Kan APU DIOS mewan ey “I-alik ni hi-gayu hu kinedangyan idan kebebbbley eyad puyek, e henin danum di wangwang ni eleg metduk et mannananeng kayun kedangyan.

\* 66:1 66:1 Ang-ang yu hu Matthew 5:34-35 et ya 23:22. † 66:2 66:2 [1-2] Acts 7:49-50 ‡ 66:6 66:6 Huyyan bebley ni negadan ey Jerusalem.

Heni kayulli gelang ni kai-apupun inetu ma-lat painuman tu tep ya impeminhed tu. <sup>13</sup> A-alluken dakeyun hi-gak di Jerusalem henin kapenga-allukin inan gelang tu.

<sup>14</sup> Yan penang-angan yullin keippahdingan nunya ey um-amleng kayu niya mambalin kayun na-let. Yan nunman ali pengamtaan yu e hi-gak e hi APU DIOS ey nakka baddangi tutu-uk ni kamengu-unnud ni hi-gak. Nem hedin yadda buhul ku ey nemahhig bunget kun hi-gada.”

<sup>15</sup> Hi APU DIOS ey um-alillin wada hu kaumhinyab ni apuy di nanlinikweh ni hi-gatu, et kastiguen tudda etan tuka ibubbunget. Henilli manluggan di naka-let ni pewek. § <sup>16</sup> I-usal tu hu ispadah niya apuy ni mengastigun emin idan tutu-ud kebebbley ni inamta tun neliwtan. Dakel ali mettey.

<sup>17</sup> Kan APU DIOS ey “Bahbahaen kudda kamengippahding ni elaw ni kapanlinnih ni han ida limmaw di legunta dan an mandeyyaw ni dios ni edum ni bebley. \* Daka kennadda pi-yew ni kennen henin detag ni killum, ya utut, niya edum ni pi-yew ni kennen. <sup>18</sup> Inamtak hu nemnem niyadda kapehpehding ni emin ni tutu-ud kebebbley, et humman hu, anggegannu law hu pengemmungak ni emin ni tutu-ud kebebbley ni nambakbaklang hu ehel da ma-lat meihakkey ida et ang-angen da dayaw kud pehding ku.

<sup>19</sup> Pellaw kudda natdaan di bebley di Tarsis, yad Libya, yad Lydia, e bebley idan nandingngel ni mapena, yad Tubal, yad Greece niyaddad nangkeidawwin bebley ni eleg mangngel niya eleg menang-ang ni dayaw ku, ma-lat hi-gada hu mengippeamtad kebebbley ni dayaw ku.

<sup>20</sup> I-ali dallin emin eyad pinilik ni duntug kudya Jerusalem hu edum dan helag Israel ni neiwehit di edum ni bebley e heni da i-appit ni hi-gak e hi APU DIOS. Ittakkay daddad kebayyu, yaddad kamel, yaddad mule, niya illugan daddad kalesah. I-ali daddallin henin kapengi-liin iIsrael ni i-appit dan begah di Tempol e daka ihha-ad di malinih ni kapengihha-adi. <sup>21</sup> Pillien kuddalli edum ni hi-gadan mambalin ni padi et maibilang idan helag Levi.” Huyya inhel APU DIOS. <sup>22</sup> Kan mewan APU DIOS ey “Mannananeng hu baluh ni puyek niya baluh ni kabunyan tep ya et-eteng ni kabaalak. † Ey mannananeng hu ngadan yu niya helag yu. <sup>23</sup> Um-aliddalli tutu-ud kebebbley ni menaydayaw ni hi-gak di deya Jerusalem ni Piyestah ni Kaketellakin Bulan niyan Sabbath. Hi-gak e hi APU DIOS hu nanghel idan nunya.”

<sup>24</sup> “Yallin ennamutan da ey panhin-aang-angan dalli annel idan nangketey ni nangngehay ni hi-gak. Yadda bigih ni kamammangngan idan nunman ni annel ey mannananeng idallin mategu. Ya apuy ni mengihheb idan nunman ey eleg me-me-dep. ‡ Emin idalli menang-ang ey anggengihhew dan ang-ang-angen.

Em, um-aliddalli tutu-ud kebebbley ni menaydayaw ni hi-gak di deya Jerusalem etan ni Piyestah ni Kaketellakin Bulan niyan Sabaduh e kamengillin ni aggew.”

§ **66:15** 66:15 Ang-ang yu hu 2 Thessalonians 1:7-9. \* **66:17** 66:17 Ang-ang yu hu Isaiah 1:29 et ya 65:3 † **66:22** 66:22 Ang-ang yu hu Isaiah 65:17, ya 2 Peter 3:13 niya Revelation 21:1. ‡ **66:24** 66:24 Mark 9:48

## Jeremiah

### *Ya meippanggep ni libluh Jeremiah*

Hi Jeremiah hu hakey ni prophet ni pinutuk Apu Dios ni mengippeamtaddan tutu-ud Judah niyad Jerusalem e kastiguen idallin Apu Dios tep ya liwat da. Dakel nanliwatan da, nema-ma hu nenaydayawan da niya nansilbian dan beken ni makulug ni dios ey beken hi Apu Dios ni inu-unnud da.

Nem yaddan tutu-ud Jerusalem ey eleg da pinhed ni dedngelen hu kae-e-helan Jeremiah tep eleg da pinhed ni mantuttuyyun liwat da. Lektattu law ey in-abulut nan Apu Dios ni hehgepen idan iBabilon hu bebley da et alen da dakel ni aap-apud Jerusalem et ilaw daddad Babilon e nambalin daddan balud. Neipahding huuya eman ni 594 B.C. (Ang-ang yu 2 Kings 24:8-17 niya Jeremiah 29:2)

Entanni et malebah hu hampulut dewwan toon (586 B.C.) ey hinggep mewan idan iBabilon hu Jerusalem et pateyen da dakel ni tuudman ey binahbah da bebley, yadda baballey niya Tempol. Ey dakel ida etan ni tutu-un natdaan hu inlaw daddan balud di Babilon. Et ebuh hu hahhakkey ni sigud ni nambebley di Judah ni natdaan diman. Entanni ey limmaw idad Egypt hu edum ni natdaan ni kamengipappangngulun tutu-ud Judah tep ida kaumtakut ni manha-ad diman. Impilit dan mekillaw hi Jeremiah. Yan kaweda dad Egypt ey intutuluy nan Jeremiah ni sinuttudduan ida etan edum tun iJudah ey impeenamta tu e kastiguen alin Apu Dios hu Egypt et yadda edum ni buhul ni Judah.

### *Ya neitudek eyad libluh:*

1. Impeenamtan Jeremiah hu inhel Apu Dios ni hi-gatu e kastiguen tudda iJudah niya iJerusalem. (chapters 1-33)
2. Ya nanhelheltapan nan Jeremiah. (chapters 34-35)
3. Ya nengipeamtaan Jeremiah e mekastigudda bebley ni buhul ni Judah. (chapters 46-51)
4. Neipidwan neipeamta hu kebabhahan ni Jerusalem niya Tempol diman. (chapter 52)

<sup>1</sup> Huuyan libluh ey meippanggep idan inhel niya inebig Jeremiah e u-ungngan Hilkiyah e hakey ni padid Anathot e nambebleyan idan helag Benjamin. <sup>2</sup> Yan eman ni meikkehampulut tellun toon ni nampatulan Josiah e u-ungngan Amon di Judah ey immehel hi APU DIOS nan Jeremiah. <sup>3</sup> Immehel mewan ni hi-gatu eman ni nampatulan Jehoiakim e u-ungngan Josiah. Et mekihummangan law hi APU DIOS ni hi-gatu ingganah eman ni meikkelliman bulan ni meikkehampulut hakey ni toon ni nampatulan Sedekiah e hakey mewan ni u-ungngan Josiah. Yan nunman ey neilaw ida iJerusalem di edum ni bebley et mambalin idan himbut diman.

### *Ya inhel APU DIOS nan Jeremiah ni nemutukan tun hi-gatun mambalin ni prophet*

<sup>4-5</sup> Kan APU DIOS ni hi-gak ey “Yan eman ni eleg daka ni letuen ey pinili daka ngu dedan ni hakey ni prophet ma-lat mansilbi kad tutu-ud kebebbebley.”

<sup>6</sup> Nem hinumang ku hi APU DIOS e kangkuy “APU DIOS e Eta-gey ni peteg, eggak amta e-e-helen ku, tep u-ungnga-ak pay ni.”

<sup>7</sup> Kan APU DIOS ey “Entan tu ehel huttan. Lakkay kumad kad-an idan tutu-un pengittudakan kun hi-gam et mu ehelen ni hi-gadan emin hu e-helen kun hi-gam. <sup>8</sup> Entan takut mu tep wada-ak ni memaddang ni hi-gam niya mengippaptek ni hi-gam. Hi-gak e DIOS hu nangel nunya.”

<sup>9</sup> Entanni ey kinapan APU DIOS hu bibil ku et kantun hi-gak “Dengel mu huuya, e-helen kudda law ni hi-gam hu mahapul ni e-helen mu. <sup>10</sup> Ey iddawat kun nunya hu kelebngan mud kebebbebley, anin idad kapan-ap-apu in papatul ma-lat dammutun pekal mu ey pappegen mu hu pan-ap-apuan da winu apputen mudda niya bahbahen mu pan-ap-apuan da. Ey iddawat ku kelebngan mun mengippeyaggud ni pan-ap-apuan da.”

<sup>11</sup> Entanni ey kan mewan APU DIOS ni hi-gak ey “Jeremiah, hipa inang-ang mu?”

Hinumang ku et kangkuy “Inang-ang ku pangan almond.”

<sup>12</sup> Kantuy “Neiptek hu inhel mu. Ang-angen ku ma-lat nanna-ud ni meippahding hu inhel kun pengastiguk.”

<sup>13</sup> Entanni ey kan mewan APU DIOS ni hi-gak ey “Hipa inang-ang mu?”

Hinumang ku mewan e kangkuy “Inang-ang kud north hu neiba-nget ni danum ni kamanlewwag e nesigging et ngannganih ni meidduyyag di appet nunya.”

<sup>14</sup> Kantuy “Melpuddallid north hu memahbah idan tutu-un nambebley deya. <sup>15</sup> Ngannganih ni eyyagan kudda tutu-ud bebley di appet ni north et gubaten da Jerusalem et yadda edum ni bebley di Judah et bahbahen dadda luhud et hegepen da. Et iha-ad idallin patul dad heggeppan di deya Jerusalem hu yuddungan dan man-ap-apu. <sup>16</sup> Humman hu pengastiguk idan tutu-uk tep yadda lawah ni impahding da. Inwallengan da-ak et ya edum ni dios hu dayawen da. Em, nengapyaddan dios da, et humman ida law hu daka daydayawa.

<sup>17</sup> Imay, pandaddan ka et mu ehelen ni hi-gadan emin eya e-helen ku. Entan takut mun hi-gada tep lektattuy petekktu daka anhan law ni hi-gak di hinangga da. <sup>18-19</sup> Dengel mu e Jeremiah! Emin ida hu tutu-ud Judah, anin idan papatul, yadda opisyal da niyadda papaddi ey angebe-hel daka. Nem petuled dakan hi-gak ma-lat kabaelan mun mekihhanggan hi-gada. Mei-ellig kalli etan ni et-eteng ni bebley ni nakalluhud ey mei-ellig kalli etan ni gumek ni tukud niya giniling ni luhud et eleg daka kabaelan ni apputen, tep wada-ak ni memaddang ni hi-gam ey ippaptek dakan hi-gak. Hi-gak e Dios hu nanghel nunya.”

## 2

### *Ya liwat idan aammed idan helag Israel*

<sup>1-2</sup> Inhel APU DIOS ni hi-gak e nak peamtaddan tutu-ud Jerusalem huyya: “Nakka nemnemema hu dinel yu lan hi-gak eman ni laputan nemilian kun hi-gayun tutu-uk. Kayu kamei-ellig ni biin inahwak e et-eteng neminhd tun hi-gak ni lapu tu, et mekikkilaw ni hi-gak anin di eleg mebebleyi. <sup>3</sup> Hi-gayun helag Israel, yan nunman ey hi-gak ni ebuh hu kan tuun hi-gayu ey hi-gayun ebuh nemangulun nenaydayaw ni hi-gak. Et mukun emin ida nengipehelheltap ni hi-gayu ey kinastiguk ida et manhelheltap ida et hannak bahbahadda. Hi-gak e Dios hu nanghel nunya.”

<sup>4</sup> Hi-gayun helag Israel dengel yu ehel APU DIOS. <sup>5</sup> Heninnuy hu kantu: “Hipa kabellawadda lan eman idan aammed yun hi-gak? Kele da-ak inwalleng ni hi-gada? Dinaydayaw dadda endi silbi tun dios ni kinapyan tuu, et mambalin ida daman endi silbitu. <sup>6</sup> Eleg da-ak hanguden ni hi-gada, anin ni inhewang kudda, tep hi-gak nengipengulun hi-gada et hi-yanen da Egypt. Impanguluk idan nandalanan dad eleg mebebleyi e mepalnah niya dakel bitu, endi danum ey angetakkut e endi mategun nanha-ad diman ey endi kamengidlan diman anin ni hakey.

<sup>7</sup> Impanguluk idad bebley ni mateba kameitnem ma-lat umamlang ida tep ya dakel ni daka ennia et yadda edum ni wadadman ni panyaggudan da. Nem binahbah da ey hinibit da kumedek et mambalin ni lawah ni peteg humman ni bebley ni indawat kun hi-gada. <sup>8</sup> Inwalleng da-ak ida mewan ni papaddin pinilik ni mansilbin hi-gak ey nginhay da-ak idan aap-apu. Hedin yadda dama prophet, man nansilbiddan Baal ey dinaydayaw dadda edum ni dios ni endi silbitu. <sup>9</sup> Et humman hu, hi-gak e hi APU DIOS ey kangkuy nanliwat ida tuuk ni hi-gak. Anin idan helag dan edum ni aggew ey kangkuy nanliwat ida dama.

<sup>10</sup> Imay, lakkayuy di Cyprus e bebley di appet ni kakelinnugin aggew ey itu-dak kayu pay di Kedar e bebley di appet ni kasimmilin aggew ma-lat da ang-angen hedin wada henin nunyan neipahding. <sup>11</sup> Endi tutu-un da hinullulan hu dios da, anin ni beken ni makulug ida humman ni dios ni daka daydayawa. Nem hi-gayun tutu-uk ey hinullulan yuwak e Dios yun nengipeyayaw ni hi-gayu. Et ihullul yun hi-gak hu dios ni endi kabaelan dan mengippahding ni panyaggudan yu. <sup>12</sup> Mei-ellig ni metnga hu kabunyan ey manggeyey <sup>13</sup> tep nemahhig hu nanliwatan yun tutu-uk. Ya hakey ni liwat yu ey inwalleng yuwak e kamei-ellig di ahullan ni kaum-idwat ni danum ni ketegguan yu. Ya meikkadwa ey dinaydayaw yu hu beken ni makulug ni dios et kayu kamei-ellig ni nanguku-kun bubun, nem kametduk.

<sup>14</sup> Hi-gayun helag Israel ey eleg kayu maiungngan mambalin ni himbut. Nem ay kele hannitan kapehding ni buhul yun hi-gayu? <sup>15</sup> Ida kamei-ellig ni layon ni kamangngengedyed ni hi-gayu. Binahbah da bebley yu e linggab da et mehi-yan et mambalin law ni eleg mebebleyi. <sup>16</sup> Yadda iMemphis niya iTapahnes ey binahbah da hu dayaw niya kabaelan ni bebley yu et kamei-ellig ni minukmukan da ulu yu. <sup>17</sup> Hi-gayun helag Israel, kameippenahding ni hi-gayudda huyya tep hi-gayu ngu kambahul. Nakka pan-itutuddu dedan pehding yun panyaggudan yu nem nginhay yuwak kumedek e APU e Dios yu.

<sup>18</sup> Hipa ginun-ud yun yu nampebaddangan idan iEgypt et ya iAssyria? Kamei-ellig ni kayu an imminum di Wangwang e Nile niyad Wangwang e Euphrates. <sup>19</sup> Inwalleng yuwak niya lawah yuka pehpehding, et humman umhulun ni kekastiguan yulli. Et han

yulli law amtaa e naka-ihhalla impahding yun yuwak nengiwallengan et eleg yuwak idad eta-geyawa e Ap-APU e Dios yu. Hi-gak e DIOS e Eta-gey ni peteg niya Kabaelan tun emin, hu nanghel idan nunya."

<sup>20</sup> Kan mewan APU DIOS e Eta-gey ni peteg, ey "Nebayag dedan ni nginhay da-ak ni hi-gayu. Eleg yu u-unnuda hu tugun ku ey eleg yuwak daydayawa, tep kayu kaumlaw idad eta-gey ni dabant niyad hengeg idan keyew ni an menaydayaw idan dios ni kanyun kamengippetebban kaittanem. <sup>21</sup> Heni kayu etan ni kayyaggud ni bukel ni pinilipilik et itnem ku. Nem ang-ang yu kedi nambalanan yu, heni kayu nabwel ni intanem ni endi silbitu. <sup>22</sup> Anin anhan ni kamei-ellig ni tagan yu apuap ni tabun niya hipan kapengkal ni lugit nem ka-ang-ang damengu hu mansan bahul yu. Hi-gak e hi APU DIOS e Eta-gey ni peteg hu nanghel idan nunya.

<sup>23</sup> Kanyu na-muy 'Beken ni makulug huttan ni inhel mu! Eleg mi daydayawen hi Baall' Nem huuya ihhumang kun hi-gayu: Lakkayuy idad nedeklan et yu ang-angen hu impahding yu. Heni kayu etan di kamengendul ni camel niya kebayyun kamandaladalan ni an menang-ang ni butekal, <sup>24</sup> anin di eleg mebebleyi. Humman ni camel ey eleg mabalin ni meikkubkub. Eleg mahapul ni an hemmaken ni butekal, tep kamanduddug humman ni labah ni camel ni umlaw di kad-an tu. <sup>25</sup> Henin hi-gayun helag Israel e eleg et mahapul ni kayu mea-atun an menemmahemmak idan dios ni deyyawen yu. Nem kanyuy 'Umlawwak kumengun an menemmak ni deyyawen ku. Nakappin角度 kudda dios ni edum ni tutu-u. Humman ida nak deyyawen.' "

### *Lebbeng tun mekastigudda helag Israel*

<sup>26</sup> Kan mewan APU DIOS ey "Ya kamenekkeu ey mebe-ingan hedin meha-kupan. Anin daman hi-gayun helag Israel, yadda patul yu, yadda opisyal yu, yadda padi yu et yadda prophet yu et mebe-ingan kayu. <sup>27</sup> Kanyuy ameyu ey ineyu etan ida pinaot yun keyew niya batu. Nem hi-gak hu yuka pambeggain baddang hedin neligtan kayu ey inwalleng yuwak. <sup>28</sup> Hi-gayun ijudah ey dakel hu dios yun henin kadinakel ni bebley yu. Nem attu et dakeyu kabaddangidan kinapya yun dios yu ey? Imay, hedin wada ligat yu, pambaga kayun hi-gadan baddang et ang-angen tayu hedin kabaelan dan umbaddang ni hi-gayu. <sup>29</sup> Kele kayu kamanlilih? Mukun kinastigu dakeyun hi-gak ey gapu tep inwalleng yuwak. <sup>30</sup> Nem anin ni kinastigu dakeyu et endi damengu silbitu, tep eleg mehullulan hu lawah ni elaw yu. Heni kayu etan ni angetakkut ni layon, tep nampatey yu prophet yu.

<sup>31</sup> Hi-gayun iIsrael, dengel yu kedi eya e-helen kun hi-gayu. Kaw heni-ak ni bebley ni eleg mebebleyi e angetakkut niya engeenget? Hi-gayun tutu-uk, kele kanyuy 'Liblih kamin eleg mengu-unnud nan Apu Dios ey anin pehding mi linggeman ni pinhed min pehding.'

<sup>32</sup> Kaw kaliwwanan biin mengi-ussal ni gamgam tu? Kaw kaliwwanan etan ni biin mengahwan mengihhuklub ni balwasi tun kasal tu? Eleg! Nem hedin hi-gayun tutu-uk, man liniwwan yuwak. Ya kakulugan tu ey nebayag law nengiwallengan yun hi-gak. <sup>33</sup> Anin anhan et lawah ni peteg yuka pehpehding. Anin idan bibi-in nemahhig kalinawah da et yuka ma-maa kalinawah da gapuh idan yuka ituttuddun hi-gada. <sup>34</sup> Nampatey yudda newetwet et yadda endi bahul tu anin ni eleg ida manekew di baballey yu. Nem kanyu ni-ngangu ey <sup>35</sup> 'Endi bahul mi, eleg dakemi kastiguen Apu Dios.' Nem hi-gak e hi APU DIOS ey kastiguen dakeyu tep inamta yu e nambahul kayu, nem eleg yu ebbuluta.

<sup>36</sup> Nampebaddang kayuddan iAssyria ni nunman ey yan nunya ey yuka nemnemnema e baddangan dakeyun iEgypt. Nem dismayahen dakeyulli mewan henin impahding idan iAssyria. <sup>37</sup> Et lektattuy hi-yanen yulli Egypt e iyuyuuung yulli tep ya baing yu. Mukun eleg dakeyu baddangin hi-gada ey tep hi-gak e hi APU DIOS yu ey eggak henggudadda humman ni bebley ni yuka iddinel."

## 3

<sup>1</sup> Kan mewan APU DIOS ey "Hedin hini-yan ni laki hu ahwa tu et wada nemintan nunman ni bii ey eleg mabalin ni an mewan law bangngaden etan ni laki tep pi-yew humman ni tu pehding. Nem hi-gayun helag Israel ey kayu kamei-ellig ni nekienaddum di dakel ni laki tep yuka daydayawa edum ni dios ey pinhed yu mewan ni mambangngad ni hi-gak.

<sup>2</sup> Itengaw yuddad duduntug. Kaw wada hakey ni lugal diman ni eleg yu pandayawan ni edum ni dios? Ihik kayun ingganah ni menaydayaw ni edum ni dios. Et humman kangkun heni kayu biin tuka pebeyyad annel tu e kamanhehhegged di gilig ni keltad ni laki mengi-ullig ni hi-gatu. Ey heni kayu etan ni tuun kamanhehhegged di desert

ma-lat takewan tu hu hipan tuun melebbah. Hinibit yu bebley yu tep yadda humman ni impahding yu. <sup>3</sup> Humman gaputan eleg um-ali udan anin ew ngun a-ammuk. Nem anin hanniman et nanengtun yuka ippahding hu lawah. Heni kayuddan bibi-in daka pebayyad annel da e endin hekey baing da.

<sup>4</sup> Nem yan nunya ey kanyun hi-gak ey 'Ama, pininshed muwak dedan neipalpun eman ni kaglang ku. <sup>5</sup> Et humman hu, entan anhan tuwak ibubbunget ni ingganah.' Manu tep henin nuntan hu kanyu, nem impahding yun emin hu lawah ni kabaelan yun ippahding."

<sup>6</sup> Yan eman ni nampatulan Josiah ey immehel mewan hi APU DIOS ni hi-gak e kantuy "Kaw inang-ang mu hu impahding idan iIsrael? Henidda biin kamengi-ullig ni beken da ahwa tep dineyaw da edum ni dios di ta-pew idan duntug niyad hengeg idan keyew. <sup>7-8</sup> Kangku ngu nem mantuttuyuddan nengipenahdingan dan nunman et mambangngad idan mengu-unnud ni hi-gak, nem eleg. Et humman hu, intu-dak kudda tep hin-appil ni dios hu daka deyyawa. Yadda agi dan iJudah ey hanniman dama impahding da anin ni inang-ang da e lawah hu neipahding idan iIsrael, nem inu-unnud da kumedek hu lawah ni elaw da. <sup>9</sup> Endi peteg hu baing idan iIsrael, ida kamei-ellig etan ni biin tuka i-ulig hu beken tun ahwa tep dinaydayaw da babattu niyadda keyew et hibiten da bebley da. <sup>10</sup> Hedin yadda dama aaggi dan iJudah, man eleg ida mantuttuyu. Dinaydayaw da kumedek hu edum ni dios e beken ni hi-gak. Daka peang-ang-ang ni ebuh hu daka pengu-unnud ni hi-gak, nem ya kakulugan tu ey eleg da-ak u-unnuda. Hi-gak e DIOS hu nanghel idan nunya."

<sup>11</sup> Entanni ey kan APU DIOS ni hi-gak ey "Anin ni inwaleng da-ak idan iIsrael et kedukdul ida nem yadda iJudah. <sup>12</sup> Et humman hu, mu ehel idan iIsrael huuya: 'Kan APU DIOS ey: Hi-gayun iIsrael, inwalleng yuwak, nem pambangngad kayun mengu-unnud mewan ni hi-gak, tep et-eteng hemek kun hi-gayu. Eggak pannanang bunget kun hi-gayu. <sup>13</sup> Abulut yu e nanliwat kayun nanggehayan yuwak e AP-APU e DIOS yu et dayawen yudda dios ni edum ni tutu-ud hengeg idan keyew. Hi-gak e DIOS hu nanghel nunya.

<sup>14</sup> Hi-gayun u-ungngak ni nengiwalleng ni hi-gak, kaibangngad kayun hi-gak, tep tutu-u dakeyu dedan ni hi-gak. Ellan ku hanhakkey ni hi-gayud bebley yu niya handedwad pamilyah yu et ibangngad kud duntug e Zion. <sup>15</sup> Weddaen kulli man-ap-apun hi-gayu. Mekangngu-unnud idallin hi-gak, ey nelaing idalli niya kayyaggud ali pan-ap-apu dan hi-gayu.

<sup>16</sup> Et yallin medakkedakkel kayud bebley yu ey eleg ali law mahapul ni e-ehhelen idan tutu-u hu meippanggep ni Kaban ku ey eleg dalli nemnema e mahapul ni mengapyan hakey ni meihhullul nunman. <sup>17</sup> Yallin nunman ni tsimpuh ey mengeddanan hu Jerusalem ni 'Nan-ap-apuan APU DIOS.' Ey meemmung idallidman hu tutu-ud kebbebley ni mandeyyaw ni hi-gak. Ey eleg dalli law pehding ida lawah ni pinhed da. <sup>18</sup> Yallin nunman ey man-addum mewan hu iJudah niya iIsrael e melpuddad bebley di north ni neilawwan da et meibbangngad idad bebley dan indawat kuddan aammed dan pambibleyan dan ingganah.' "

<sup>19</sup> Kan APU DIOS ey "Hi-gayun helag Israel, nakka um-amleng ni mengibbillang ni hi-gayun u-ungngak niya pinhed kun idawat hu kekakkayyaggudan ni bebley eyad tapew ni puyek ni pambibleyan yu. Et humman hu kangku nem ibbilang yuwak daman hi Ameyu et eleg yuwak law iwwalleng. <sup>20</sup> Nem inwalleng yuwak. Kayu kamei-ellig etan di biin nengiwalleng ni ahwa tu, tep wada edum ni pinpinhed tun laki. Hi-gak e hi APU DIOS hu nanghel nunya."

<sup>21</sup> Kamedngel hu nanghi idan iIsrael di ta-pew idan duntug. Ida kamannengngih e ida kamampehememek tep nambahul ida ey liniwwan da etan AP-APU e DIOS da.

<sup>22</sup> Kan APU DIOS ey "Hi-gayun tutu-uk ni nengiwalleng ni hi-gak, pambangngad kayun mengu-unnud ni hi-gak et peyaggud dakeyu mewan."

Kan idan tutu-uy "Em, mambangngad kamin hi-gam tep hi-gam dedan hu AP-APU e DIOS mi. <sup>23</sup> Nehaul kami kumedek ni nandaydayawan midan beken ni makulug ni dios di ta-pew idan duntug. Hi-gam ni ebuh e AP-APU e DIOS mi hu mengihwang ni hi-gamin helag Israel. <sup>24</sup> Ya nandaydayawan min Baal e anggeba-ing ni dios hu himmulun ni neendian idan dakel ni limmuddan aammed mi neipalpu eman ni nebayag, anin idan animal mi niyadda u-ungnga mi. <sup>25</sup> Umbaktad kami tep ya baing mi, gapuh ni liwat mi niyadda liwat ni aammed mi. Neipalpun keu-ungnga mi ingganah nunya ey eleg mi u-unnuden hu tugun mu e AP-APU e DIOS mi."



## 4

<sup>1</sup> Kan APU DIOS idan helag Israel ey "Hedin pinhed yu, pambangngad kayun mengunnud ni hi-gak. Hedin e-kalen yudda kinapya yun dios yun anggebe-hel ku et pannananeng yun mandeyyaw ni hi-gak <sup>2</sup> niya hedin issapatah yud ngadan kun ebuh e APU DIOS e wadan ingganah ey umyaggud hu elaw yu. Et hedin hanniman meippahding ni hi-gayu ey deyyawen da-ak idallin emin ni tutu-ud kebebbebley et bendisyonan kudda."

<sup>3</sup> Kan mewan APU DIOS idan tutu-ud Judah et yad Jerusalem ey "Heni kayu etan ni eleg maeladun payew ni dakek hebit tu. Iwalleng yu lawah ni yuka pehpehding et yumaggud yu elaw yu. <sup>4</sup> Isiked yun mengippahding ni lawah et hi-gak, e APU yu, hu peka-u-unnuden yu. Hedin eleg yu pehding huuya ey nemahhig ali bunget ku e heni kamantetebbel ni apuy e eleg me-dep tep yadda lawah ni yuka pehpehding.

<sup>5</sup> Peamta yud Judah et yad Jerusalem e kan muddan tutu-uy 'Patnul yu tangguyup di emin eyad bebley' ey tekuk kayuddan ijudah ey iJerusalem e kanyuy 'Besik kayuddad nehammad ni neluhud ni bebley.' <sup>6</sup> Ittudu yu dalan ni mampellow di Zion! Besik kayu et meihwang kayu! Imay, papuut yu tep peellik etan melpud north ni memabhah ni hi-gayul!"

<sup>7</sup> Yadda etan memabhah ni kebebbebley ey mei-ellig ni layon ni neukat di nantalan tu. Iyyalli memabhah ni Judah. Pekabbabhahen tullu et endilli law hu mambebley diman. <sup>8</sup> Et humman hu, pambalwasi kayun langgusih ey pantete-ul kayu tep eleg ma-kal hu nemahhig ni bunget APU DIOS ni hi-gatsu.

<sup>9</sup> Kan APU DIOS ey "Yallin nunman ey me-kal hu tuled ni patul yu et yadda oopisyal tu. Nemahhig ali takut idan padi niyadda prophet."

<sup>10</sup> Et kangkuy "APU DIOS e Eta-gey ni peteg, nakahhaul kamin ijudah et yadda iJerusalem! Tep kammuy umlinggep kami nem eleg tep neiddan hu ispadah ni mendedged ni buklew mi."

<sup>11</sup> Kan APU DIOS ey "Meippeamtaddan bimbebley e medettengan ali tsimpuh ni umalilli meka-atung ni dibdib eyad bebley da. Humman ni dibdib ni melpud eleg mebebleyi ey beken ni henin dibdib ni kamambabbabbal ni mengitteyyab ni degi. <sup>12</sup> Naka-ka-let humman ni dibdib ni peellik tep humman hu pengastiguk idan tutu-uk. Hi-gak e DIOS mismuh hu kamenghel nunya."

<sup>13</sup> Ang-ang yu kedi! Iyyaddalli buhul tayun heniddan kulput niya heni alipuhhapuh hu kalesah da tep na-na-let ida kebayyu dan umbesik nem ya tulduh. Et humman hu, angehemmek itsu tep nanna-ud ni meabhah itsu.

<sup>14</sup> Hi-gayun iJerusalem, ekal yu lawah ni wadad nemnem yu ma-lat meihwang kayu. Pigantu pengissikkedan yun mannemnem ni lawah? <sup>15</sup> Wadadda melpud Dan et yaddad duntug di Epraim ni mengippeamtan kamengellidda buhul ni umbabhah.

<sup>16</sup> Kan APU DIOS ey "Ehel yuddan tutu-ud kebebbebley anin di Jerusalem e iyaddalli buhul dan melpud neidawwin bebley. Huyyaddan buhul da ey ittekuk dalli e gubbaten dadda bebley di Judah <sup>17</sup> ey liktuben da Jerusalem, henin kapehding idan kaman-eddug di payew. Meippahding ali huuya tep nginhay da-ak idan iJerusalem. <sup>18</sup> Neipahding ida huyyan hi-gayun iJudah tep yadda lawah ni impahding yu. Manligligat kayulli e henilli natwik hu puhu yu tep ya liwat yu."

*Kaumlelemyung hi Jeremiah gapuh idan tutu-u*

<sup>19</sup> Kan Jeremiah ey "Iyyadyan eggak pakeisipel ni lemyung ku! Nakka umkenebkeb tep nakka deddenggela hu tenul ni tangguyup niya tekuk ni tutu-ud gubat. <sup>20</sup> Nantutu-nud ida immalin memabhah eyan bebley et deh e nakabbabhah ni emin. Ey neminhakkey ni meabhah hu kampu mi.

<sup>21</sup> Pigantulli kesikkedan ni gubat et eggak law deddenggelen hu tenul ni tangguyup?"

<sup>22</sup> Kan APU DIOS ey "Kele anhan endi nemnem idan tutu-uk? Eleg da-ak law amtan hi-gada. Henidda u-unggan eleg da amta kayyaggud ni pehding da. Nelaing ida kumamman ni mengippahding ni lawah, nem endi inamta dan meippanggep ni kayyaggud."

<sup>23</sup> In-ang-ang kud kebebbebley ey nekabbabhah idan emin ey endi hu mategun natdaan anin ni hakey. Intangaw ku mewan di kabunyan ey kaman-eengnet. <sup>24-25</sup> Ey in-ang-ang kuddad duntug ey henidda kamangkeiggiwed anin idan dunduntug. Endin hekey tutu-u ey anin idan sisit et endidda tep simmayab ida. <sup>26</sup> Yadda la puyek ni mateba kameitnem ey nambalin idan mepantal. Nebabhah emin hu bebley gapuh ni nemahhig ni bunget APU DIOS.

<sup>27</sup> Inhel dedan APU DIOS e kantuy "Bahbahen kun emin hu bebley eyad puyek et mambalin ni endi silbi da. Nem eleg kulli pakabbabhaha. <sup>28</sup> Et yalli puyek ey heni

kaumlelemyung ey engeenget ali kabunyan. Huyyan inhel ku ey eleg ku kekyata, tep nanna-ud ni nakka ipahding hu ninemnem kun pehding.

<sup>29</sup> Memsik idalli tutu-ud mumuyyung ni pengngelan dan ngaladdan sindalun nampan-takkay di kebayyu niyadda nampampana. Ida mampantellu edum di babattu et endillin hekey hu tutu-ud bebley. <sup>30</sup> Hi-gayun iJerusalem, entan pambalwasi yun kayyaggud ni peteg, entan panggamang niya entan iyayyaggud ang-ang yu. Endi silbitu tep mebahbah kayu ey gapu tep inwalleng dakeyun etan ni nekamminhed ni hi-gayun nunman et pinhed dakeyu law ni peteyen.

<sup>31</sup> Nakka deddenggela palak ni biin mengi-ungngan pengulwan ni u-ungnga tu. Hanniman ali palak idan iJerusalem ni kaman-eke-eked yahyah da. Pan-idewdew dalli ngamay da e kanday 'Iyaddalli memettye ni hi-gami! Nanna-ud ni mebahbah kami!' "

## 5

<sup>1</sup> Kan APU DIOS ey "Hi-gayun tutu-ud Jerusalem, lakkayuy et yu paka-ang-angen di emin eyad bebley yu hedin wada ew ngu hakey ni ang-angen yun limpiyuh ey meandeng hu tuka pehding. Et hedin wada hemmeken yu anin hakey man eggak law bahbaha hu Jerusalem. <sup>2</sup> Wadadda na-mu kamenghel ni kanday daka issapatah di ngadan ku e hi APU DIOS e wadan ingganah, nem ya kakulugan tu ey itek da!"

<sup>3</sup> Kangkuy "APU DIOS, inamtak e muka hemmahemmaka hu makulug ni kamengunnud ni hi-gam nem endi. Kinastigum ida ma-lat iyayyaggud da elaw da, nem eleg da issiked ni manliwwat. Ey eleg ida mantuttuyyun liwat da."

<sup>4</sup> Kangkud nemnem kuy "Newetwet ida dedan eya tutu-u ey endi nemnem da niya eleg da inamta hu pinhed AP-APU e Dios dan pehding da. <sup>5</sup> Et ya ninemnem ku ey nak mekihummangan idan ap-apu da, et nanna-ud ni inamta da hu elaw APU DIOS niya inamta da pinhed tun pehding da." Nem emin ida ey daka ngenghaya hi APU DIOS. <sup>6</sup> Et humman hu, yadda animal di muyung, henin layon, yadda ahhud eleg mebebleyi, yadda leopard ey peteyen dadda hu kamengippatnan meukkat di bebley et pambanuten dadda. Mukun meippahding humman ni hi-gada ey tep nemahhig liwat da niya ngehay dan Apu Dios.

<sup>7</sup> Kan APU DIOS ey "Kele nak liwwanen hu liwat ida eyan tutu-uk? Inwalleng dak et daydayawen da beken ni makulug ni dios. Anin ni winedak emin hu mahapul da henin kennen ma-lat eleg ida maupa nem nanengtun lawah elaw da. Daka i-ulig hu beken da ahwa ey ida kamanahha-ad di kad-an idan bibi-in daka pebeyyad annel da. <sup>8</sup> Daka itettekel hu ahwan sinakdul da e henidda nakaphel ni butekal ni kebayyu e ida kamenemmahemmak ni labah ni kebayyu. <sup>9</sup> Kaw beken ni lebbeng tun kastiguen kudda gapuh ni henin nunyan elaw idan nunyan bimbebley? Kaw eggak ibbaleh hu impahding da?"

<sup>10</sup> Nanna-ud ni kastiguen kudda, et humman hu peelik ali buhul dan memahbah ni hi-gada. Pampettyen idallin buhul dadda tep beken kudda tuu. Nem e-helan kuddalli ma-lat eleg dadda pateyen ni emin et wadadda metdaan. <sup>11</sup> Inwalleng tuwak idan iIsrael et yadda iJudah. Hi-gak e hi APU DIOS hu nanghel nunya."

<sup>12</sup> Kan idan nunyan tutu-un APU DIOS ey itek hu inhel idan prophet meippanggep ni kebabbahan da. Kanday "Endi an meippahding ni hi-gatsun lawah. Endi kaya an umalin ligat winu bisil winu gubat." <sup>13</sup> Kanda mewan ey "Maitek ni peteg ida humman ni prophet tep eleg kaya malpun APU DIOS hu daka e-hela. Et humman hu, meippahding alin hi-gada hu daka ebbiebbigan meippahding."

<sup>14</sup> Et humman hu, kan APU DIOS e Kabaalan tun emin ey "Gapu tep hanniman hu inhel idan tutu-u, pambalin kuddan heni apuy hu e-helen kun e-helen mun hi-gada et henidda keyew ni megihheb." <sup>15</sup> Niya kan APU DIOS ey "Hi-gayun helag Israel, peelik hu naka-let ni tutu-un melpud neidawwin bebley ni mengubbat ni hi-gayu. Humman idan tutu-u ey nebayag ngu dedan ni newada bebley da ey eleg yu amta ehel da. <sup>16</sup> Naka-let hu sindalu da ey nelaing idan umpana. Ihik idan umpatey e endi hemek da. <sup>17</sup> Hi-gadalli mengngan ni ineni yu anin idan edum ni kennen ni intalu yu. Bahbahen dalli intanem yun kaumlameh e henin grapes niya fig. Ey pampettyen dalli u-ungnga yu niyadda animal yu. Pambahbahaen daddalli nekalluhud ni bebley yun yuka pandinneli."

<sup>18</sup> Kan APU DIOS ey "Nem yan nunman ali ey eggak i-abulut ni mebahbah emin hu tutu-uk. <sup>19</sup> Hedin mahmahan dalli kele nak impahding ida humman ey kammun hi-gaday 'Mukun impahding APU DIOS ida humman tep inwalleng yu et dayawen yu edum ni dios eyad bebley yu. Et humman hu, mambalin kayullin bega-en idan tutu-ud edum ni bebley.' "

<sup>20</sup> Kan mewan APU DIOS ey "Ehel muddan helag Jacob di Judah e kammuy: <sup>21</sup> Kan APU DIOS ey 'Pandengel kayu, hi-gayun endi nemnem tu. Wada mateyu, nem eleg kayu

pakeang-ang, wada tangila yu, nem eleg kayu pekadngel. <sup>22</sup> Hi-gak hi APU DIOS, kele eleg yuwak deyyawa? Niya kele eleg kayu umtakut ni hi-gak? Hi-gak hu nengihad ni palnah di gilig ni baybay et humman memappeg ni danum et eleg luma-pih anin ni metennuttu-ug. Ey anin ni na-let niya kamabungngug hu dalluyun et eleg meiddeplug humman ni pappeg ni inha-ad ku.

<sup>23</sup> Nem mekelhin peteg hu ulu yu ey makanghay kayu. Inwalleng yuwak et ya edum ni dios hu yuka daydayawa. <sup>24</sup> Eleg yun hekey nemneman menaydayaw ni hi-gak anin ni impaelik hu udan ni tsimpuh ni yuka penepulli ma-lat yumaggud inggadun yun katootoon. <sup>25</sup> Nem gapuh ni liwat yu ey eggak law peellidda huyyan panyaggudan yu.

<sup>26</sup> Kamei-dum di tutu-uk hu lawah idan tutu-u. Ida kamambebbettak, heni etan ni tuun kamanlingnen. Nem beken ni sisit hu daka bebtaka tep ya edum dan tutu-u. <sup>27</sup> Napnu baballey dan sinekew da e henin pukkungngan ni malingen ni sisit e napnun liningen tu. Humman gaputun et-eteng kabaelan da niya kedangyan idan peteg. <sup>28</sup> Mangkatebadda ey ida kamepepnehel. Eleg dan hekey hehmedadda nepu-hig ey eleg da iddawat kelebngan da. Ey beken ni limpiyuh daka pehdng idan anggehmemek ni tutu-u. <sup>29</sup> Nem hi-gak e DIOS hu mengastigun hi-gada et ibleh ku daka pehpending.

<sup>30</sup> Lawah ni peteg ey kamengippetnga hu neipenahding eyad bebley. <sup>31</sup> Itek ni emin hu kaebbigaddan prophet et ya kapehdng ni padin man-ap-ayu ey meippuun di pinhed dan pehdng. Ey pinpinhed ida daman tutu-uk humman ni daka pehdng. Nem hipalli pehdng yu hedin medeteng hu keppapegan ni emin? "

## 6

<sup>1</sup> Hi-gayun helag Benjamin, besik kayu ma-lat meihwang kayu! Hi-yan yu Jerusalem! Patnul yu tangguyup di Tekoa ey pan-apuy kayu et pengamtaan idan iBet Hakkerem tep iyyaddalli hu melpud north ni memabhah ni bebley tayu! <sup>2</sup> Kan APU DIOS ey "Kayyaggud hu ang-ang ni Jerusalem, nem pebahbah ku. <sup>3</sup> Yadda sindalun buhul yu ey heniddallin kamampattul ni kalneroh e ida mangkampud nanlinikweh ni bebley niya wada hakkey ni hi-gada ey manha-ad di pinhed tun panha-adan." <sup>4</sup> Kan idallin nunman ni buhul di edum day "Pandaddan itsu et hegepen tayu hu Jerusalem! Hehgepen tayun emaggew!" Nem kandalli mewan ey "Neladaw law tep deh e kamangkehlleng!" <sup>5</sup> Yan hileng kuman penggepan tayu et bahbaha tayudda nehammad ni luhud."

<sup>6</sup> Hi APU DIOS e Kabaelan tun emin hu nengiolden idan nunyan buhul e lEngehen dadda keyew diman et ipiggil dad hengeg ni luhud ma-lat dalnen dan menggep ni Jerusalem. Tep kantu dedan ni nunman ey "Kastigu yudda tep lawah daka pehpending e dadda kapanligligat hu anggehmemek ni tutu-u. <sup>7</sup> Ya lawah ni kapehpending idan iJerusalem ey kamei-ellig ni danum di hebwak ni eleg metduk, tep lawah ni ingganah daka ippenahding. Ida kamampatey hu tutu-udman. Ey wada liput da niya degeh da. <sup>8</sup> Et humman hu, hedin eleg yu dedngela tugun ku, man iwalleng dakeyu et mambalin hu bebley yun eleg mebebleyi."

<sup>9</sup> Kan mewan APU DIOS e Kabaelan tun emin ey "Anggehmemek kayu tep anin idan hahhakkey ni metdaan ni hi-gayu et meendiddalli. Mei-ellig idalli buhul yu etan di kamemuggah ni grapes e tu eggilahan hu eleg tu pugahan et endin hekey hu metdaan."

<sup>10</sup> Hinumang ku et kangkuy "Kaw wada damengu an mengngel ni hi-gak? Nemahhig mannuman ngehay da. Eleg da pinhed ni dedngelen hu muka e-e-helan hi-gada tep anggenngi-ngi da kumedek. <sup>11</sup> Nemahhig dama bunget kuddan lawah ni kapehpending idan tutu-u, e henin bunget mu e APU DIOS, ey eggak law han-isipel."

Ey kan APU DIOS ni hi-gak ey "Peang-ang ku hu bunget kuddan u-ungngad keltad, yadda kameammuumungun ni kakat-agun lalakki. Anin idan han-ahwa, yadda nangkeamma niya nangkei-inna et meillegat ida. <sup>12</sup> Meidwat alin edum ni tutu-u hu baballey da, yadda papayew da niya aahwa da. Hanneyalli meippahding ni pengastiguan kuddan tutu-u eyad bebley.

<sup>13</sup> Emin ida, newetwet niya kedangyan ey beken ni limpiyuh hu daka pengellain pihuh da, tep daka tellamadda tutu-u. Em, anin idan papaddi niyadda prophet et hanniman elaw da. <sup>14</sup> Ya liwat idan tutu-u ey heni himmalem ni liput, nem eleg da hengngudan eggahan tep kandy beken ni himmalem. Ey eleg da issiked ni manliwwat, tep kandy 'Kayyaggud itsu kaya. Endi tayu kegguhan!' Nem ya kakulugan tu ey endi linggep da. <sup>15</sup> Nem kaw ida kaumbaing tep ya lawah ni daka pehpending? Eleg, tep eleg da amtan umbaing ey endi ngu dedan baing da. Et humman hu, ya meippahding ni hi-gada ey mekastigudda et mabeing ida, et heniddan edum ni kinastiguk. Hi-gak e hi APU DIOS hu nanghel nunya."

*Eleg abuluten idan helag Israel hu intuttuddan APU DIOS*

<sup>16</sup> Kan APU DIOS idan tutu-u tuy “Ehneng kayud nampangaan ni keltad et man-ang-ang kayu. Ey mahmahi yu hedin hipadman hu kekakkayyaggudan ni keltad ni nebayag. Et yadman pengidlanan yu et luminggep hu biyag yu.”

Nem kan idan nunman ni tutu-u tuy “Eleg mi ngu pinhed ni mandellan diman!”  
<sup>17</sup> Pinilik hu mangguwalyan hi-gayu et ehelan dakeyun kanday “Helipat-i yun dedngelen hu umtenul ni tangguyp.” Nem kanyuy “Eleg mi pinhed ni dedngelen!”

<sup>18</sup> Et kan APU DIOS ey “Hi-gayun katuutuud kebebbley, dengel yu niya pan-adali yulli hu meippahding ni tutu-uk ni edum ni aggew. <sup>19</sup> Dengel yu eya e-helen ku: Peellik hu memambah eyaddan tutu-uk tep inwalleng da intuttudduk niya nginhay da ehel ku. <sup>20</sup> Eggak mahapul hu i-appit dan hi-gak ni bangbanglun kamelpud Seba, anin idan daka i-appit ni hi-gak ni pampebanglun kennen ni kamelpud neidawwin bebley. Ey eggak ebbuluta niya eggak um-amleng ni daka i-appit ni hi-gak ni kagihheba.

<sup>21</sup> Et humman hu, yalli pehding kuddan nunyan tutu-u ey mei-ellig ni mangkeihhung-bub ida. Mettey idallin emin, yadda aammed, yadda u-ungnga da, yadda gagayyum da niyadda sinakdul da.”

<sup>22</sup> Kan mewan APU DIOS ey “Um-aliddalli tutu-un melpud north e neidawwin bebley ni umgubat. Ida kamandaddaddan ni mekiggubbat ey nangka-let ida. <sup>23</sup> Indaddan da pana da niya ispadah dan mengubbat ni Jerusalem. Makabbunget ida niya endi hemek da. Hedin nantakkay idad kebayyu et ida kamemsiy ey heni bungug ni dalluyun di baybay hu tenul ni besik da.”

<sup>24</sup> Kan idan iJerusalem ey “Yan nangngelan min meippanggep nunman ni gubat ey neendi elet mi. Mika giggibekan nunya hu meippahding alin hi-gami ey eleg mi han-ispel. Heni kami etan ni biin indegeh ni egeh tu tep ngannganih ni man-ungnga. <sup>25</sup> Et humman hu, endi tuled min um-ehep di neluhud ni bebley mi winu kami mandaddallan di keltad. Nemahhig ni angetakkut di kad-an mi tep nan-almas ida buhul mi.”

<sup>26</sup> Kan APU DIOS idan tutu-u tuy “Pambalwasi kayun langgusih ey baktad kayud dep-ul ni pengipeang-angan yun kayu kaumlemyung! Pantete-ul kayun lemyung yu henin kapanggibek ni ammed ni netey hu binugtung ni u-ungnga tu. Tep pinhakkey ali ey dimmateng buhul yun memambah ni hi-gayu!

<sup>27</sup> Jeremiah, patnaim ida tutu-uk henin kapehding ni kaman-e-dih ni gumeke, et angangen mu hedin hipa neitu-wan da. <sup>28</sup> Nemahhig ngehay da. Mekelhi ulu da e henin kelhin gumeke niya giniling. Neligat idan metuttudduan. Ey nekattalam ida ni-ngangu ey ya tumtumbuk hu daka pehpehding. <sup>29</sup> Kamei-ellig ida tutu-uk di gumeke e anin ni ngimangalab hu apuy et eleg meeyyug, tep eleg dedan mabalin ni memamah. Hanniman ida tutu-uk e endi silbitu nak pengastiguan ni hi-gada tep eleg me-kal hu lawah ni elaw da. <sup>30</sup> Hedin ya ngadan da ey ‘Endi silbi tun gumeke’ tep binelaw APU DIOS ida.”

## 7

### *Ya nantuttudduan Jeremiah di baley APU DIOS*

<sup>1</sup> Huyya inhel APU DIOS ni hi-gak e kantuy <sup>2</sup> “Lakkay di heggeppan di Tempol et mu ehelen idan tutu-uk di Judah huyya: Kan APU DIOS ni hi-gayun iJudah ni kaumhegep deyan mandeyyaw, dengel yu eya e-helen ku. <sup>3</sup> Hi-gak e hi APU DIOS e Kabaelan tun emin ni Dios Israel ey kangkuy: Hulluli yu elaw yu et isiked yun mengippahding ni lawah ma-lat pannanengen dakeyun mambebley eyad bebley yu. <sup>4</sup> Ey entan keidngeli yun kae-ehheladdan tutu-un kanday ‘Melinggep itu e endi lawah ni meippahding ni hi-gatsu tep wadadya hu Tempol APU DIOS!’

<sup>5</sup> Hedin makulug ni belliwan yu elaw yu et issiked yun mengippahding ni lawah et ya limpiyuh pehding yun edum yu <sup>6</sup> niya hedin eleg yu hellamhami tutu-un nekibebley ni hi-gayu, yadda nepu-hig niyadda nebalu, ey hedin eleg yu petteyadda hu endi bahul tu ey hedin issiked yun mandeyyaw ni edum ni dios tep umhulun ni kebabbahan yu, <sup>7</sup> ey pannenneng dakeyun mambebley eyad bebley ni indawat kuddan aammed yu.

<sup>8</sup> Nem ya eggak pinhed ni hi-gayu ey kayu kamandannel di ehel ni endi kakulugan tu. <sup>9</sup> Humman gaputun nanengtun lawah yuka pehpehding: Kayu kamenekkw, kayu kaupatey, yuka i-ulig beken yu ahwa, yuka issapatah hu itek, yuka i-appisi hi Baal ey yuka u-unnudadda dios ni eleg yu amtan nunman. <sup>10</sup> Yuka pehding ida huyyan angebe-hel ku nem nanengtun kayu ni-ngangu kaum-ali eyad Tempol ni kad-ak ni immehneng kayu ni kanyuy ‘Endi an meippahding ni hi-gatsun lawah.’ Kaw kanyu nem endi an meippahding ni lawah ni hi-gayu anin ni yuka pehpehding ida etan kamengippebungnet ni hi-gak? <sup>11</sup> Kaw nambalin ni tallu-an ni matekew eya Tempol ni kad-ak? Inang-ang kun emin impenahding yu.

<sup>12</sup> Lakkayuy di Siloh e nemangulun pinilik ni pandeeyawan yun hi-gak et ang-angen yu impahding kun nunman ni bebley tep ya kalinawah idan edum yun helag Israel. <sup>13</sup> Impahding yun emin ida humman ni liwat. Impenidwak ni inhel ni hi-gayu e issiked yun mengippahding idan nunman nem eleg kayu umdengel. <sup>14</sup> Et humman hu, ya impahding kud Siloh ey pehding kulli damad Tempol kun yuka pandinneli eyad bebley ni indawat kun hi-gayu niyadda aammed yun nunman. <sup>15</sup> Pe-kal dakeyu eyad kad-an ku henin impahding kuddan edum yun helag Israel." Hi-gak e Dios hu nanghel nunya!

*Yadda tutu-ud Judah ey daka ngenghaya hi Apu Dios*

<sup>16</sup> Kan mewan APU DIOS ey "Jeremiah, entan tudda idasali huuyan tutu-u. Entan nangih mun mengiddasal ni hi-gada niya entan tu ibgan hi-gak e baddangan kudda tep eggak damengu dedngela dasal mu. <sup>17</sup> Kaw eleg mu ang-anga hu daka ippahpahding eyad bebley dad Judah niyaddad keltad di Jerusalem? <sup>18</sup> Ida kamengyew u-ungnga da ey kaman-epuy ida amedad pan-appitan da ey kamengapyadda inedan sinapay ni i-appit dan biin dios dan kandan ap-apud kabunyan. Humman ni immidyag idan kameinum ni i-appit dan edum ni dios da et da-ak kapebungget. <sup>19</sup> Kaw hi-gak hu medgehan di daka pehpehding? Beken ni hi-gak tep hi-gada kumedek hu medgehan niya hi-gada hu mebe-ing.

<sup>20</sup> Et humman hu, hi-gak e hi APU DIOS e Eta-gey ni peteg ey nemahhig bunget ku e henin apuy ni endi dammutun mengdep. Peellik hu kebahbahan emin ni tutu-u, yadda animal, yadda keyew niyadda nangkeitnem."

<sup>21</sup> Huyya hu kan APU DIOS e Kabaelan tun emin ni Dios ni Israel: "Imay, pan-appit kayun kagihheba ey pan-appit kayun kahemmula et kanen yun emin ida humman ni i-appit yu tep eggak damengu ebbuluta hu i-appit yun hi-gak. <sup>22</sup> Yan nengipenguluan kuddan aammed yun neni-yanan dan Egypt ey endi immandal kun da-ak i-appitan ni kagihheba winu hipan kamei-appit ni hi-gak. <sup>23</sup> Kangkun hi-gaday 'U-unnud yu tugun ku et hi-gak hu Dios yu ey hi-gayu tutu-uk.' Ey inhel kun hi-gada e ya elaw ni pambiyag da ey mei-unnud di intugun kun hi-gadan pehding da ma-lat kayyaggud emin hu meippahding ni hi-gada.

<sup>24</sup> Nem eleg da-ak u-unnuden niya eleg da hanguden tugun ku. Et ipahding da hu linggeman ni lawah ni immalid nemnem da. Et kaney umkedukdul ida ey nema-kumedek kalinawah da. <sup>25</sup> Meippalpu eman ni nalpuan idan aammed yu Egypt ingganah nunya ey intenu-dak kun hi-gada hu bega-en kun prophet ni mantuttuddun hi-gada. <sup>26</sup> Nem endi hakey ni hi-gadan nenangud ni menggel idan intuttuddu da. Nema-ma kumedek ngehay da nem yadda aammed da.

<sup>27</sup> Et humman hu, anin ni e-helen mun hi-gadan emin huuyan inhel ku et eleg da damengu dedngela. Ey anin ni um-ehel kan hi-gada et eleg ida umhumang. <sup>28</sup> Et humman hu, ehel mun hi-gada huuya, Jeremiah 'Huyyadda bimbley ni eleg mengu-unnud nan APU DIOS niya eleg da pinhed ni metuttudduan. Eleg ida masileg ni kastigu da. Neendi law daka pengullug niya neendi dinel dan hi-gak ey eleg da law e-ehhela meippanggep idan nunman.' "

<sup>29</sup> Kan mewan APU DIOS ey "Lemyung kayud ta-pew idan duntug niya mukmuki yu ulu yu et bekahen yu bewek yu tep hi-gak e APU DIOS ey nemahhig hu bunget ku, et mukun inwalleng dakeyun tutu-uk. <sup>30</sup> Lawah hu impahding idan iJudah. Hinibit da hu Tempol ku tep inha-ad dadman hu beken ni makulug ni dios ni anggebe-hel ku.

<sup>31</sup> Nengapyaddan pan-appitan dad Nedeklan e Hinnom e nginedanan dan 'Tophet' et da iappit ida u-ungnga dan lalacki ey bibi-in giniheb dad apuy. Ey eggak ehelen e pehding da humman. Ya kakulugan tu ey endi ngu nak ninemnem ni henin nunman. <sup>32</sup> Lektattuy eleg law mengeddani humman ni 'Nedeklan e Tophet' winu 'Nedeklan e Hinnom', nem mengeddanan ni 'Nandeklan ni Pemetteyan ni Tutu-u' Ey yadman mismuh hu pengikkullungan ni tutu-u ingganah ni endi law pengikkullungan da. <sup>33</sup> Pangkennen alin sisit niya animal di muyang hu nangketey ni tuu ey endi hakey ni mengebbul ni hi-gada. <sup>34</sup> Ey mambalin alin eleg mebebleyi humman ni bebley et meendi hu hipan kapetnul ni kapan-am-amlengin kasal di Judah niya kapan-am-amlengid keltad di Jerusalem."

## 8

<sup>1</sup> Kan APU DIOS ey "Yan nunman ey ukkatan idallin buhul yu hu tu-ngal ni papatul, yadda oopisyal, yadda papaddi, yadda prophet niyadda tu-ngal ni idan nambbley di Jerusalem, <sup>2</sup> ey mangkaiwehit idad puyek e henidda tai. Eleg ida meemmung et maikulung ida nem meippayag ida et mepeppetangan ida ey hehheyawan ni bulan niya bittuwen e dios dan nakappinshed dan nansilbian da, niya nekihenuhummangan da ey dinaydayaw da. <sup>3</sup> Yadda metdaan ni lawah ni tutu-un meillaw di edum ni bebley ey

daka pekeddukdul ni mettey nem ya ida meittu-u. Hi-gak e hi APU DIOS e Kabaelan tun emin hu nangel nunya.”<sup>4</sup> Entanni mewan ey kan APU DIOS ey e-helen ku huyyaddan tutu-u tu: “Kaw hedini wada neihungbub man eleg um-inah et umehngeng? Ey kaw hedini wada tuun nehamad dalan man kaw eleg mambangngad et idlan tud neiptek ni dalan?”<sup>5</sup> Ey kele hedini hi-gayun tutu-uk man eleg yu nemneman mambangngad ni hi-gak? Yuka itettenged idad dios yu ey eleg yu pinhed ni mambangngad ni hi-gak.<sup>6</sup> Nakka hehhegeda penghelan yun kayu kamantuttuyyu, nem endi kamenghel, anin ew ngun hakey. Gullat et wada menghel ni kantuy ‘Hipa na-mu neihallan impahding ku?’ Nem endi, tep wada hakkey ey tuka pan-ipahding hu pinpinhed tu, henin kebayyu e tagan tu besik di kapanggugubasi.<sup>7</sup> Kele hedini yadda sisit man amta da tsimpuh ni ennamutan da? Heniddan paluma, yadda kalew et yadda edum ni sisit e inamta da hedini pigan pambe-atan dad edum ni bebley. Nem hi-gayu ngun tutu-uk man eleg yu amtadda tugun kun pinhed kun u-unnuden yu.

<sup>8</sup> Kanyuy nelaing kayu tep amta yudda tugun ku, nem ya kakulugan tu ey hinenullulan idan maitek ni kamantuttuddu humman idan tugun ku.<sup>9</sup> Mebe-ing idalli hu nelaing ni hi-gayu. Ey medismayah idalli ey heniddalli nakna. Inwalleng da tugun ku. Hipa namun kalinaing hu wadan hi-gada?<sup>10</sup> Meippalpu kebabbabahan saad tu ingganah di keta-ta-geyyan ey neagum ida tep pinhed dan hakkeyan hu hipan kayyagud. Anin idan padi et yadda prophet et matelam ida. Et humman hu pan-iddawat kulli ahwa dad edum ni lalakki niya papayyew dad edum ni tutu-u.<sup>11</sup> Tep anin ni immen ali gubat et kan idan tutu-uy ‘Melinggep itsu kaya.’ Kamei-ellig ni himmalem hu liput idan tutu-uk nem kanday ‘Nelunggidan ni ebuh.’<sup>12</sup> Nem kaw ida kaumbaing nunman ni daka pehpending? Eleg, tep sigud dedan ni endi baing da! Eleg pay anhan umdalang angh da. Et humman hu, mettey idalli henin edum ni kinastiguk et kepappegan da. Hi-gak e Dios hu nangel nunya!

<sup>13</sup> Pinhed ku et anhan ni emmungen kudda tutu-uk henin kapengemmungin tuun lameh ni intanem da, nem kamei-ellig ida tutu-uk di grapes niya fig ni endi lameh da ey nakpit bulung da. Et humman hu, in-abulut ku tutu-ud edum ni bebley ni meihhullul ni manha-ad eyad bebley da.”

<sup>14</sup> Et kan idalli law ni tutu-uk ey “Kele itsu kaumyuyudung deya? Besik itsu kumad bebley ni nehammad luhud tu et yadman ketteyyan tayu! Tep nanna-ud ni pinhed ni AP-APU e Dios tayun mettey itsu! Heni daitu indawtan ni nakdetan ni danum ni innumen tayu.<sup>15</sup> Kan tayu nem umlinggep itsu ey umyagud itsu nem angetakkut kumede meipahding ni hi-gatsu.<sup>16</sup> Immen ida law buhul tayud bebley idan helag Dan. Kamedngel hu tenul ni kebayyu da. Kaman-eeldeg hu puyek hedini kamanhihi ida kebayyu. Immalidda tu-wangu buhul tayun memahbah ni bebley tayu anin idan tutu-u.”

<sup>17</sup> Kan mewan APU DIOS ey “Peellik hu angetakkut ni buhul yun henidda negitaan ni uleg ni mengellat ni hi-gayu. Et endi mabalin ni pending yu ma-lat eleg dakeyu kalaten.”

#### *Kaumlelemyung hi Jeremiah tep ya liwat idan tutu-u*

<sup>18</sup> Iyyadyan nanengtun nakka umlelemyung e eleg me-me-kal.<sup>19</sup> Deh e kamedngel di emin ni bebley hu palak idan tutu-uk. Ey kanday “Kaw endi law hi APU DIOS di Jerusalem? Kaw endi law etan Patul diman?”

Kan APU DIOS ey “Kele yu dinaydayaw ida endi silbi tun kinapyan tuun dios et papunget yuwak?

<sup>20</sup> Kan idan tutu-uy ‘Nelabah siyaggey ey nelabah ahiani ey eleg itsu meihwang!’

<sup>21</sup> Nemahhig lemyung ku tep angehemmek idan peteg tutu-uk. Natnga-ak nem endi kameukkat ni ehel ku.<sup>22</sup> Wadadda kaman-eggah di Gilead nem kele eleg ida yumagud hu tutu-uk?”

## 9

<sup>1</sup> Hamban wada bubun di uluk niya hebwak di matak ni kelpuan ni lewak et anin ni nannangngihan kun kahilehileng niyan kewa-wa-wa hu tutu-uk ni pintey da et eleg me-puh lewak.<sup>2</sup> Ey hamban wada panha-adan kud eleg mebebley et meiddawwi-ak eyaddan tutu-u tep inwalleng da hi Apu Dios et ya edum ni dios hu daka daydayawa.

<sup>3</sup> Kan APU DIOS ey “Neidaddan idan man-itek ey daka pehebballin umhaul. Endi pappeg ni lawah ni kapehpending idan tutu-uk ey eleg da-ak pay ibbilang ni Dios da.

<sup>4</sup> Helipat-i yu kuma gayyum yu ey entan pandidinel mu anin ni agim tep wada hakey ni agi ey heniddan Jacob e maheul ey wada hakkeyey lawah tuka e-ehhela meippanggep ni gayyum tu.<sup>5-6</sup> Emin ida ey itek daka e-hela ey daka he-ula gayyum da. Imminghad

bungut da hu man-ittek ey eleg da pinhed ni issiked ni manliwwat. Ida kaman-inhahaul ey eleg da-ak lispituhan Dios da. Hi-gak e Dios hu nanghel nunya.”

<sup>7</sup> Et humman hu, hi APU DIOS e Kabaelan tun emin ey kantuy “Hedin ya gumek man kaeyyuga et ma-kal hu neikamdug ni lawah et memahmah kaginumeck tu. Hanniman pehding kuddan tutu-uk e kastiguen kudda et malinihan ida et yumaggud elaw da. Hipa tep law edum ni pehding kuddan tutu-uk ni lawah daka pehpending? <sup>8</sup> Itek hu daka e-e-hela e heni nakdetan ni pana hu dila da. Wada hakkeyey kayyaggud hu tuka pekihuhummangan di sinakdul tu nem ampangunet lawah wadad nemnem tu. <sup>9</sup> Kaw eggak kastigua tuun henin nunman? Kaw eggak ibbaleh hu lawah idan daka pehpending ni tutu-uk? Hi-gak e hi APU DIOS hu nanghel nunya.”

<sup>10</sup> Kangkuy “Nakka umlelemyung ey nakka umnanginangih tep nambalin ida duntug niya kudal ni nema-ganan. Endi law tutu-un kamengidlan diman. Endi law kamedngel ni elug ni baka ey endidda law sisit niya animal diman tep bimmesik ida.”

<sup>11</sup> Kan mewan APU DIOS ey “Bahbahan ku hu Jerusalem et panha-adan idallin jakal. Ey pambalin kudda bebley di Judah ni eleg mebebleyi et endi mambebley diman.”

<sup>12</sup> Kangkun APU DIOS ey “Apu, kele nebahbah niya nekamma-ganan eya bebley et endi law nambebley ey endi law kamandellan? Hipa nelaing ni han-awat tu neipahding? Ey hipa nengitudduan mun mengippeewwat ali?”

<sup>13</sup> Hinumang APU DIOS et kantuy “Neipahding huuya tep eleg u-unnuden idan tutu-uk hu tugun kun hi-gada ey eleg da ipahding hu inhel kun pehding da. <sup>14</sup> Nangngehay ida ey dinaydayaw da hu beken ni makulug ni dios e hi Baal tep humman intuttudduan a-ammed dan pehding da. <sup>15</sup> Hi-gak e hi APU DIOS e Kabaelan tun emin ni Dios idan helag Israel ey kangkuy ‘Dengel yu huuyan e-helen kun pehding kuddan tutu-uk. Mei-ellig ni iddawtan kuddan mapeit ni kennen da niya nakdetan ni innumen da. <sup>16</sup> Ey iwwahit kuddad bebley ni eleg da dengelen anin ida lan aammed da et hannak ali itu-dak hu sindalun mengubbat ni hi-gada ingganah mekababbah ida.’ ”

<sup>17</sup> Kan mewan APU DIOS e Kabaelan tun emin ey “Pannemnem kayu! Yudda ayagi bibi-in daka nengngihi netey et umlidda. <sup>18</sup> Ehel yun hi-gada et papuut dan un-ali et ia-appehan dakemin a-appeh ni netey ingganah um-ayuh lewa mi et itaggan mi nangih. <sup>19</sup> Tep ida kamannengngih tutu-ud Jerusalem. Kanday ‘Nebahbah kami ey nekabbaingan kami. Hi-yanen mi katted eya bebley mi tep nebahbah baballey mi.’ ”

<sup>20</sup> Kangkuy “Hi-gayun bibi-i, pandengel kayun APU DIOS. Pakadngel yu hu pinhed tun e-helen. Tuttuddui yudda bibi-in u-ungnga yun umnangih ey tuttuddui yudda gagayyum yun man-a-appeh ni a-appeh ni netey. <sup>21</sup> Tep kamei-ellig ni himmegep hu katey e indalan tud habhabyen ni baballey tayu anin idad baballey idan aap-apu tayu et mangkatey ida u-ungnga niyadda kakat-agu et endi law kameang-ang ni hi-gadad keltad anin yaddad mulkaduh. <sup>22</sup> Neiwahhiwahhit hu annel idan nangketey e henidda lugit di a-allaw ni bebley ey heniddan negapas ni pagey di payew ni ahiani. Ey endi an natdaan ni mengikkullung ni hi-gada. Huuya inhel APU DIOS ni e-helen ku.”

<sup>23</sup> Kan mewan APU DIOS ey “Ya nelaing ni tuu ey beken ni lebbeng ni tu ippahhiya hu kalinaing tu. Hanniman mewan etan ni na-let ni tuu e beken ni lebbeng ni tu ippahhiya kakina-let tu. Ey ya kedangan ey beken ni lebbeng ni tu ippahhiya kinedangan tu. <sup>24</sup> Hedin pinhed ni hakey ni tuun mampahhiya ey ya lebbeng tu et ni ippahhiya tu ey ya nengamtaan tu niya nan-awatan tu e hi-gak e hi APU DIOS, \* ey kamannananeng niya eleg melumhan hu impemihed ku ey nakka pehding hu limpiyuh niya neiptek. Tep huuyadda kamengippeamleng ni hi-gak. Hi-gak e hi APU DIOS hu nanghel nunya.

<sup>25-26</sup> Medettengan ali tsimpuh ni pengastiguan kuddan iEgypt, yadda iJudah, yadda iEdom, yadda iAmmon, yadda iMoab niyadda nambebley di desert ni impesikkekey da bewek da. Emin ida humman ni tutu-u ey nekugit ida, nem eleg da pannananeng ni nengu-unnud ni Tugun ku. Ey ya kakulugan tu ey endin hi-gada et yadda helag Israel hu nengu-unnud ni Tugun ku.” †

## 10

*Ya pandeyyawan ni beken ni makulug ni dios ey umhulun ni kebabbahan*

<sup>1</sup> Hi-gayun helag Israel, dengel yu hu pinhed APU DIOS ni peamtan hi-gayu. <sup>2</sup> Kantuy “Entan tu iu-unnud di elaw idan tutu-ud edum ni bebley e daka i-ang-ang idad bittuwen hu meippahding alin edum ni aggew. Ey entan takut yu anin ni hipa ang-angen yun hin-appil di kabunyan anin ni nemahhig takut ni edum ni tutu-u. <sup>3</sup> Yaddalli etan daka deyyawa ey endi silbidda. Ida kamanlelgeh ni keyew di muyung ni pinaot da, <sup>4</sup> ey

\* 9:24 9:24 Ang-ang yu 1 Corinthians 1:31 et ya 2 Corinthians 10:17 † 9:25-26 9:25-26 Ang-ang yu hu Romans 2:28-29.

inal-alkusan dan silber niya balituk ey impatak da ma-lat eleg ma-gah. <sup>5</sup> Humman idan dios da ey henidda tattakkut di payew. Eleg ida um-ehel ey mahapul ni pehhanen dadda tep eleg ida umdalan. Et humman hu, entan takut yun hi-gada tep endi da pehding ni hi-gayun lawah winu kayyaggud.”

<sup>6</sup> Nandasallak ni hi-gam, APU DIOS, e endi pengi-ingngehan. Et-eteng kabaalam ey kamedeyyaw hu ngadan mu. <sup>7</sup> Hi-gam hu Patul di emin ni kebbebley, et humman hu, hipa eleg mandeyyaw ni hi-gam? Lebbeng tun hi-gam medeyyaw tep endi henin hi-gam, anin idan nangkelaing niyadda patul di edum ni bebley.

<sup>8</sup> Endi nemnem idan tutu-un kamenaydayaw ni kinapkapyia dan dios dan keyew ni ebuh. Endi silbin daka pengullug. <sup>9</sup> Na-meh ida humman ni dios dan silber ni nalpud Spain ey na-meh idan balituk ni nalpud Uphas. Pinaot idan nelaing ni mampaot ey binalwasian daddan kayyaggud ni neabel ni balwasin kinapyan nelaing ni man-ebbel. <sup>10</sup> Nem hi-gam e APU DIOS ey makulug kan Dios. Hi-gam ni ebuh e wadan ingganah ni Dios hu mannenneng ni Patul. Hedin bimmunget ka, man kamanyegyeg et emin hu tutu-ud kebbebley ey eleg da han-isipel hu bunget mu.

<sup>11</sup> “Ehel muddan etan ni tutu-un kamenaydayaw ni dios ni kinapyan tuu e kammuy ‘Huttan idan dios ni kinapyan tuu ey beken ni hi-gada nanletun kabunyan niya puyek. Mebahbah idalli et meendidda eyad puyek.’ ”

<sup>12</sup> Hi APU DIOS hu nanletun puyek niya kabunyan tep et-eteng kabaalan tu niya nekallaing. <sup>13</sup> Nem hedin immandal tu man kamabungngug hu danum di kabunyan e humman hu udan. Tuka peellidda kulput ni kamelpud gilig ni puyek ey tuka peki-li hu kedyam di udan. Tu mewan kapeukkat hu dibdib di nengitluan tu. <sup>14</sup> Nem yadda tutu-u ey endi kei-ingngehan dan hi-gatu tep endi nemnem da ey endi inamta da. Yadda kamengennapyan dios da e mebe-ing idalli tep beken ni makulug ida dios da, ey endi biyag da niya endi kabaalan da. <sup>15</sup> Lebbeng tun mengi-ngi-an ida tep endi silbi da. Ey nanna-ud ni mebahbah idan kedettengan ni aggew ni gintud APU DIOS. <sup>16</sup> Ya Dios idan helag Israel ey beken ni henin hi-gada tep hi-gatu nanletun emin ey pinili tudda helag Israel ni tutu-u tu. Ya ngadan tu ey hi APU DIOS e Kabaalan tun emin.

<sup>17</sup> Hi-gayuddan ijudah, amung yu ngunut yu et bumsik kayu tep immen idalli mengubbat ni hi-gayu. <sup>18</sup> Kan dedan APU DIOS ey “Pe-kal dakeyun hi-gak eyad bebley yu. Ey peellik hu nemahhig ni ligat ingganah endi metdaan ni tuu eyad bebley.”

<sup>19</sup> Ey kan idan ijerusalem ey “Heni himmalem hu liput mi e eleg mepwahi. Kammi ngu nem han-isipel mi! <sup>20</sup> Nebahbah kampu mi e nakhat ida iket da. Ey yadda u-ungnga mi ey inladdan buhul mi et endi law manha-ad di kampu mi niya endi law mangapyan kampu mi. <sup>21</sup> Endi nemnem idan kamengipappanggulun hi-gatsu. Eleg ida law mambeگان baddang nan APU DIOS. Et mukun endi law kabaalan dan man-ap-apu, et deh e newahit ida edum tayu. <sup>22</sup> Dengel yu huuya! Iyyaddalli dakel ni sindalun nalpud bebley di north. Pambalin daddalli bebley di Judah ni eleg mebebleyi et pambebleyan idan jakal.”

### *Ya dasal Jeremiah*

<sup>23</sup> “APU DIOS, endi hakey ni tuun hi-gatu nengamung ni neitu-wan tu niya ngenamung tun mengippahding ni pinhed tu. <sup>24</sup> APU DIOS, tugun dakemin tutu-um, nem entan tu pamehig ni mengastigun hi-gami hedin bimmunget ka et eleg mepappeg neitu-wan mi. <sup>25</sup> Ya pengipahhigim ni bunget mu ey yadda tutu-un eleg menaydayaw ni hi-gam ey yadda nengiwalleng ni hi-gam. Tep pintey dadda tutu-um ey nemahhig nemahbah dan hi-gami niya bebley mi.”

## 11

### *Eleg maunud hu nekitbalan idan ijudah*

<sup>1</sup> Entanni ey immehel mewan hi APU DIOS ni hi-gak et kantuy <sup>2</sup> “Penemnem mudda hu meunndu di nekitbalan kuddan ijerusalem niyadda ijudah. <sup>3</sup> Ey penemnem mu e hi-gak ni AP-APU e Dios dan helag Israel ey iddutan kuddan emin hu eleg mengu-unnud ni nekitbalan kudda lan <sup>4</sup> aammed da eman ni nengipenguluhan kun hi-gadan neni-yanan dan Egypt e bebley ni nanhelheltapan dan kamei-ellig ni kaumhinyab ni apuy. Inhel kun hi-gada e hedin mengu-unnud idan hi-gak niya ippahding dan emin hu pinhed kun pehding da, ey hi-gada tutu-uk ey hi-gak hu Dios da. <sup>5</sup> Ey peamnuk hu hinammad kun inhel ida lan aammed dan kangkuy iddawat kun hi-gada etan kayyaggud ni puyek ni nambebleyan dan nunya.”

Hinumang ku et kangkuy “Em, APU DIOS.”

<sup>6</sup> Entanni ey kan mewan APU DIOS ni hi-gak ey “Lakkay idad bebley di Judah niyaddad keltad di Jerusalem et ehelen muddan tutu-un u-unnuden dadda etan neitudek di



nekitbalan kudda lan aammed da. <sup>7</sup> Tep yan eman ni nengipengulangan kuddan aammed dan neni-yanan dan Egypt ey inhelan kudda e mahapul ni u-unnuden da-ak ma-lat eleg ida mekastigu. Ey impenidwak ni inhel huyyaddan helag da ingganah nunya. <sup>8</sup> Nem eleg da-ak kulluga et daka pan-ipahding kumedek hu pinpinhed dan pehding. Et paelik law ni hi-gada hu idut ni na-hel etan di nekitbalan kun hi-gada.”

<sup>9</sup> Kan mewan APU DIOS ey “Nan-eppet ida iJudah niya iJerusalem e da-ak kangeng-haya. <sup>10</sup> Daka ippenahding hu henin impahding ida lan aammed dan eleg mengu-unnud ni hi-gak e daka daydayawa ey ida kamansilbiddan beken ni makulug ni dios. Impangil idan iJerusalem niya iJudah hu nekitbalan kudda lan aammed dan nunman. <sup>11</sup> Et humman hu, hi-gak e hi APU DIOS ey inhel kun hi-gadan peellik hu memahbah ni hi-gada et eleg da kabaelan ibbebsikan. Anin ni mampehemmehemmek idan hi-gak ma-lat baddangan kudda et eggak ida hengnguda, <sup>12</sup> et ida mambagan baddang idan dios dan in-enappitan da. Nem endi kabaelan idan nunman ni dios dan pengippeellian kullin memahbah ni hi-gada. <sup>13</sup> Hi-gayun iJudah ey dakel hu dios yun henin kedakkel ni bebley yu. Ey hi-gayun iJerusalem, ey henin kadinakkel ni keltad yu hu kedakkel ni altar yun yuka pan-appisin dios yun hi Baal e kaumhulun ni kebe-ingan yu.

<sup>14</sup> Et humman hu, hi-gam e Jeremiah, entan pandasal ey entan pampehemmehemmek ni hi-gak gapuh idan nunyan tutu-u. Tep eggak hengngudadda anin ni mandasal ida et mambagaddan baddang ni hi-gak hedin wada ligat da.”

<sup>15</sup> Immelhel mewan hi APU DIOS et kantuy “Kele ida kaum-alialid Tempol ku eya tutu-nakappinhed ku ey deh e lawah hu daka ippenahding? Kaw kanda nem dammutun a-alluken da-ak ni daka i-enappit et eggak ida kastigua et man-am-amleng ida?”

<sup>16-17</sup> Hi-gak e hi APU DIOS e Kabaelan tun emin ey heni intanem ku Judah niya Jerusalem et henidda keyew ni olibah e mateba niya makallameh. Nem yan nunya ey mei-ellig ni peellik hu na-let ni pewek ni memahbah ni hi-gada ma-lat heni mengihheb hu bulung da niya mangkepahak hu pangeda. Nem hi-gada ngu kambahul ni keippahdingan tu huyyan hi-gada tep yadda lawah ni impenahding da, niya gapuh ni nengipebungetan dan hi-gak, tep in-enappitan da hi Baal e beken ni makulug ni dios.”

*Ya planuh idan buhul Jeremiah ni pemetteyan dan hi-gatu*

<sup>18</sup> Impeamtan APU DIOS ni hi-gak hu planuh idan buhul kun pemetteyan dan hi-gak. <sup>19</sup> Nak kumedek kamakaddinnel ey ampangunet heni-ak etan ni impah ni kalneroh ni keklengen da. Eggak amta e hi-gak gayam hu pengippahdingan dan lawah ni planuh da. Kanday “Petteyan tayu ma-lat endilli law mannemnem ni hi-gatu anin idan tuka itenuttuddu. Heni tayu lelnehen hu keyew ni nunyan makattaba.”

<sup>20</sup> Et mandasallak e kangkuy “APU DIOS e Kabaelan tun emin, limpiyuh kan huwet ey muka patnai nemnem ni tuu. Nakka medinnel e ippahding mu hu limpiyuh. Ey pinhed ku et anhan ang-angen hu pengiblehan mun hi-gada.”

<sup>21</sup> Yadda iAnathot ey daka ihmahamak hu ni pehding dan memettye ni hi-gak. Tep kanday hedin itutuluy kun mengippeamtan pinhed APU DIOS ey petteyan da-ak.

<sup>22</sup> Et kan APU DIOS e Kabaelan tun emin meippanggep ni hi-gada ey “Kastiguen kudda! Mettey idallid gubat hu kakat-agun lalakki ey mettey idallin upa hu u-ungnga da. <sup>23</sup> Tep humman ida peellik ni pemahbah kuddan nunman ni iAnathot ni kedettengan ni gintud kun aggew et endilli metdaan ni hi-gada.”

## 12

<sup>1</sup> APU DIOS, nanna-ud ni neiptek ni ingganah hu muka pehding et limpiyuh hu pehding mu hedin manlillihhak ni hi-gam. Nem lillihen ku hu meippanggep ni kinalimpiyuh mu. Tep kele kaumkedangan ida lawah hu daka pehphehding? Ey kele kayyaggud kapambalinin kapehding idan beken ni limpiyuh daka pehding? <sup>2</sup> Mei-ellig ni intanem mudda et lumemut ida et meetteng ida et lumemeh ida. Ma-nut kayyaggud hu daka e-ehhela meippanggep ni hi-gam nem ya kakulugan tu ey eleg daka lispituha. <sup>3</sup> Nem hedin hi-gak man naka-amta muwak e APU DIOS, ey muka ang-ang-anga hu nakka pehphehding. Ey inamtam e nakappinhed daka. Attu anhan et ia-allaw mudda huyyan lawah ni tutu-u et henidda kalneroh ni mekleng? Ey appil mudda ingganah mekleng ida.

<sup>4</sup> Pigantu kepappegan ni henin nunya e nema-ganan hu puyek ey kamekpit neitnem? Ey ida kamangkettey hu animal niya sisit tep ya kalwah idan nunyan tutu-u. Kanday “Eleg ang-angan APU DIOS hu tayu kapehphehding.”

*Ya humang APU DIOS*

<sup>5</sup> Kan APU DIOS ey “Jeremiah, kammuy neligat hu biyag mun nunya nem medettengan ali hu tsimpuh ni nelilligat ali anhan law hu biyag mu. Tep yan nunya ey heni ka neatun nekibebsessik idan tutu-u. Nem nema-malli atum tep heni kalli mekibebsessik

idan kebanyu. Ey hedin kaka meihhungbub di kayyaggud ni bebley, ey nema-mallid mamuyung di gilig ni Jordan? <sup>6</sup> Ey anin yadda aaggim niyadda pamilyah mu et inhedul daka. Ey hi-gada anhallaw hu nammamaninin nengippahding ni lawah ni hi-gam. Et humman hu, entan kuma pandiddinnel ni hi-gada, anin ni kayyaggud hu penappihappit da.” <sup>7</sup> Kan mewan APU DIOS ey “Inwalleng kudda helag Israel ni pinilik ni tutu-uk. Et humman hu impebeltan kudda huuyan nakappinneh kun tutu-uk idan buhul da <sup>8</sup> tep inwalleng da-ak. Nambalin ida kumedek ni henin layon di muyung e da-ak kangengyedi tep nginhay da-ak et mukun anggebe-hel kudda. <sup>9</sup> Hi-gadan pinilik ni tutu-uk ey heniddalli sisit ni pambinna-hilan idallin gawwang et panhebaten dadda. Anin idan animal di muyung et um-alidda et mei-dum idan mengngan ni hi-gada.

<sup>10</sup> Yadda tutu-uk ey ida kamei-ellig di kayyaggud ni leguntan sinnemak nem um-alilli dakel ni buhul dan memahbah ni hi-gada et kamei-ellig ni mangkeiggessin niya mambalin idallin endi silbida. <sup>11</sup> Pambalin dallin endi silbin nunman ni leguntak di penang-ang ku. Ey mambalin alin eleg mebebleyi humman idan bebley da tep endin hekey menengngud ni mengippaptek. <sup>12</sup> Hanniman ali meippahding tep peellik ali dakel ni tutu-un mengubbat idan bebley da et endi an metdaan ni hi-gada. <sup>13</sup> Ma-nu tep mantennem ida tutu-uk ni pagey, nem mei-ellig ni hebit ali ennien da. Ey ma-nu tep mambibi-led idan manggunnu, nem endilli gun-uden da. Em, tep nemahhig ali bunget kun hi-gada.”

*Ya inhel APU DIOS meippanggep sinakdul idan helag Israel*

<sup>14</sup> Heninnuy hu kan APU DIOS ni meippanggep idan edum ni tutu-un memahbah nunman ni bebley ni indawat tuddan tutu-u tun helag Israel: “Pe-kal kudda humman ni lawah ni tutu-ud bebley da. Ey ihhehwang kudda helag Judah ni nekibebley ni hi-gada. <sup>15</sup> Nem hehmeken kuddallin emin et pambangngad kuddad nambebleyan da. <sup>16</sup> Ey hedin iu-unnud idan nunman ni lawah ni tutu-u hu elaw idan tutu-uk et daydayawen da-ak niya issapatah dad ngadan ku e hi APU DIOS e wadan ingganah henin nenuttuddu dan tutu-uk ni nansapatah di ngadan Baal, ey meibbillang idan tutu-uk et yumaggud biyag da. <sup>17</sup> Nem yadda eleg mengu-unnud ni hi-gak ey mei-ellig ni gebbuten kudda henin neitnem et matey ida. Hi-gak e hi APU DIOS hu nanghel idan nunya.”

### 13

<sup>1</sup> Entanni ey inhel APU DIOS ni hi-gak e nak umgang ni kayyaggud ni luput e henin kai-awekeh ni padi et usalek, nem eggak kunu e-bela. <sup>2</sup> Et nak gumtang et iewakeh ku. <sup>3</sup> Entanni ey immehel mewan e kantuy <sup>4</sup> “Lakkay di Wangwang e Euphrates et mu itlu huttan ni luput etan di dehak ni batu.” <sup>5</sup> Et lumawwak et nak itlud neihnap di Euphrates.

<sup>6</sup> Nelabah pigan aggew ey immehel mewan hi APU DIOS et kantuy mambangngaddak di Euphrates et nak alen humman ni luput. <sup>7</sup> Limmawwak et petkek etan nengitluan ku, nem inang-ang kuy nebahbah e lawah law ang-ang tu.

<sup>8</sup> Kan APU DIOS ni hi-gak ey <sup>9</sup> “Heninnuy pehding kun memahbah idan kaippahhiyan iJudah niya iJerusalem. <sup>10</sup> Mambalin idalli humman ni lawah ni tutu-un henin eyan luput ni endi law silbitu. Eleg da-ak u-unnudan hi-gada niya nemahhig hu ngehay da e daka daydayawa edum ni dios. <sup>11</sup> Ya et pinhed kun pehding idan iJudah et ya iIsrael ey heni paku-itnged dan hi-gak henin etan ni luput ni neihammad ni neiewakeh, et hi-gada pantu-uk ni ingganah ni mandeyyaw ni hi-gak. Nem eleg da-ak u-unnudan hi-gada.”

<sup>12</sup> Immehel mewan hi APU DIOS et kantuy “Jeremiah, ehel muddan helag Israel: Kan AP-APU e Dios idan helag Israel ey ‘Mehudduan emin hu pa-nay yun meinnum.’ Hedin hummangen dalli e kanday ‘Em, inamta mi dedan e lebbeng tun mehudduan ni emin hu pa-nay ni meinnum.’ <sup>13</sup> Ey kammullin hi-gada ey huuyadda inhel APU DIOS ni hi-gayu: ‘Hi-gak e Dios ey peinnuman kuddalli emin hu tutu-u eyad bebley ni meinnum ingganah mebutteng ida, anin idan patul ni helag David, yadda padi, yadda prophet niyaddan emin hu nambebley di Jerusalem. <sup>14</sup> Petteyen kuddalli nangkea-amma, ya nangkei-inna, niya kaungaunga e mei-ellig idad pa-nay ni pansisikmalen ku et mangkaphik ida. Eggak idalli hehmekan pemetteyan kun hi-gada.’”

<sup>15</sup> Hi-gayun iIsrael, pampekumbabah kayu et denglen yu ehel APU DIOS. <sup>16</sup> Dayaw yu hu AP-APU e Dios yu ma-lat eleg tu paeli hu mei-ellig ni engeenget tep mangkeihhungbub kayud lawwan yud dudungtu. Em, dayaw yu et eleg tu pambalin ni mei-ellig ni engeenget etan kawwalwal ni yuka namnamaha. <sup>17</sup> Hedin eleg yu u-unnuda tep ya kayu kamampahhiyyai ey nemahhig ali nangih kun keillawwan yun tutu-un APU DIOS di edum ni bebley et mambalin kayun balud diman.

<sup>18</sup> Entanni ey immehel mewan hi APU DIOS ni hi-gak et kantuy “Ehel mun patul et hi inetu et ma-kal idad nan-ap-apuan da tep meapput ali hu nan-ap-apuan da.”

<sup>19</sup> Hehgepen alin buhul dadda bebley di Judah di appit ni south ey endi peka-law diman ni memaddang idan tutu-u. Meellan emin ali hu tutu-udman et meillaw idallid edum ni bebley.

<sup>20</sup> Hi-gayun iJerusalem, ang-ang yu kedi! Hi-gayu kapandinneliddan edum yud kebebbebley di Judah ey yudda kaippahhiya, nem attudda law ey iyyaddalli buhul yun melpud north. <sup>21</sup> Hipa yuka pannemnem hedin yadda etan tutu-un yuka nannamahan umbaddang ni hi-gayu hu mengubbat kumedek ni hi-gayu et hi-gada pan-ap-apu yu? Nanna-ud ni maggeh ni peteg nemnem yu, henin kapengidgehin egeh ni biin ngannganih ni man-ungnga. <sup>22</sup> Hedin mahmahan yu gaputun neipahding ida huyyan hi-gayu e meillig ni nangebi-ki balwasi yun nemilitan dakeyun in-ulig ey heninnuy penummang ku: 'Em, tep nemahhig liwat yu.' <sup>23</sup> Kaw dammutun hullulan ni andeket ni tuu hu ang-ang ni belat tu? Ey kaw dammutun e-kalen ni leopard hu batek tu? Eleg. Hanniman ni hi-gayu e endi kabaelan yun mengippahding ni kayyaggud.

<sup>24</sup> Iwwahit dakeyu henin kapengitteyyabin dibdib ni degi. <sup>25</sup> Huyya gahat yu. Ninemnem kun pehding huyyan hi-gayu tep liniwwan yuwak e Dios yu et mandinel kayuddan beken ni makulug ni dios. Hi-gak e Dios hu nanghel nunya. <sup>26</sup> Mei-ellig ni hi-gak mismuh hu mengkal ni balwasi yu et mabladan kayu et mabeingan kayu. <sup>27</sup> Inang-ang ku hu nengipahdingan yuddan angebe-hel ku. Ey inang-ang ku linallawwan yuddad duntug niyad papayew tep ya impeminhed yuddan beken ni makulug ni dios, e henin impeminhed ni peteg ni hakey ni lakin mengi-ullig ni ahwan sinakdul tu, winu henin kapenemmakin lakkitun kebayyun labah. Nanna-ud ni mekastigu kayun iJerusalem! Pigantu kesillegan yu et baliwan yu elaw yu et maibilang kayun malinih."

## 14

<sup>1</sup> Inhel APU DIOS ni hi-gak hu meippanggep etan ni andukkey ni ugew. <sup>2</sup> Kantuy "Umlelemyung idalli iJudah e umyuyudung idad puyek tep kamangkettey ni emin hu neitnem. Ey ida kamampehemhemmek hu iJerusalem ni mampebaddang. <sup>3</sup> Yadda kekeddangyan ey daka be-ala bega-en dan an man-ehhul ni danum nem endi danum idad hebwak et neala ni nambangngad ida e endi inehul da. Nedismayah ida et ida kamanhukyung ma-lat mahenian angah da. <sup>4</sup> Ey ida dama kaumlelemyung hu kamampeyyew et daka hennii dama angah da tep eleg umudan et nekamma-ganan hu puyek. <sup>5</sup> Yadda dama makwah ey hini-yan da impah da tep endi helek ni kennen da. <sup>6</sup> Ey ida kamanghahngah hu kebayyud muyung e henidda jakal. Eleg law um-ang-ang mateda tep neendi elet da tep ya keendin kennen da."

<sup>7</sup> Lektattuy mampehemhemmek ida tutu-uk et kanday "Em, mika ebbuluta e inwalleng daka ey nanliwat kamin hi-gam. Nem hemek dakemi anhan e APU DIOS et baddangan dakemi tep humman hu hinammad mun inhel ni hi-gami. <sup>8</sup> Hi-gam ni ebuh mika namnamahan mengihwang ni hi-gamin helag Israel di ligat mi. Ey kele heni ka hansinu-wan eyad bebley mi e heni ka nalpud edum ni bebley et mekidya kan ebuh ni hanlabbi? <sup>9</sup> Kele heni ka sindalun natnga et eleg tu amta e wada buhul tu niya heni ka sindalun endi kabaelan tun mengapput? Nem nanna-ud ni baddangan dakemi e APU DIOS tep tuu dakemi. Et humman hu, entan dakemi anhan iwalleng."

<sup>10</sup> Kan APU DIOS meippanggep ni hi-gayun tutu-u ey "Pinpinhed yun meiddawwin hi-gak niya eleg yu u-unnuda hu pinhed kun pehding yu. Et mukun eleg dakeyu law ibbilang ni tuuk. Ey kastiguen dakeyu tep ya liwat yu tep eggak liwwana hu kalinawah yu."

<sup>11</sup> Kan APU DIOS ni hi-gak ey "Entan tudda law idasali eya tutu-u. <sup>12</sup> Tep eggak dedngela dasal da niya eggak ida baddangi anin ni mantetpel idan pandasalan dan hi-gak. Ey eggak ebbuluta i-enappit dan hi-gak ni kagihheba niya pagey. Et mukun peellik kumedek hu bisil, ya degeh niya mengubbat ni hi-gada."

<sup>13</sup> Kangkun hi-gatuy "APU DIOS e Eta-gey ni peteg, inamtam e kapan-e-heladdan prophet idan tutu-u e endi kunu um-alin gubat et ya bisil tep kanday impakulug mu e ebuh linggep ni mewedda eyad bebley."

<sup>14</sup> Nem kan APU DIOS ey "Kau-ussaladdan prophet hu ngadan kun man-ittek. Eggak ida kaya itu-dak ni an menghel ni hipan e-helen da. Endi nak inhel kun hi-gada. Nalpu kayad nemnem da humman idan inhel da. <sup>15</sup> Et humman hu, hi-gak e hi APU DIOS ey ya e-helen kun meippanggep idan nunman ni prophet ni kamenghel ni intu-dak kuddan menghel e endi gubat niya bisil ni um-ali eyad bebley ey mettey idallid gubat niyad bisil. Tep itek hu inhel da ey eggak ida itu-dak. <sup>16</sup> Anin idan tutu-un nanghelan daddan nunman et endi an mengikkullung ni hi-gada tep mangkeibbeng ali annel dad keltaid di Jerusalem tep mangkettey idallid gubat niyad bisil. Meippahding alin emin

huyyan inhel kun hi-gada, anin idan ahwa da niyadda u-ungnga da. Pehding kun hi-gada humman tep yadda lawah ni impahding da.”<sup>17</sup> Kan APU DIOS ey “Ehel muddan tutu-u e nakka umlelemyung ey umlewalewa-ak alin kewa-wa-wa niyan kahilehileng tep nemahhig hu neipahding idan tutu-uk.”<sup>18</sup> Limmawwak di a-allaw ni bebley ey inang-ang ku hu kawehiwehit ni annel ni nangketey di gubat. Limmawwak mewan di endi bebley ey inang-ang ku hu tutu-un nangketey ni upa da. Ey yadda padi niyadda prophet ey ma-nut nanengtun daka pehding ngunu da nem eleg da amta daka pehpehding.”

<sup>19</sup> Kan Jeremiah et yadda tutu-u nan APU DIOS ey “Kaw inwalleng mu tu-wangu anhan ida tutu-um ni iJudah? Kaw angebe-hel mudda law hu iJerusalem? Kele nemahhig nanliput mun hi-gami e eleg mepwahi? Ninamnamah mi linggepan mi nem endi damengu kayyaggud ni neipahding. Ninamnamah mi yaggudan mi, nem angetakkut kumedek immalin hi-gami.

<sup>20</sup> Mika ebbuluta e nanliwat kamin hi-gam, e APU DIOS. Em, nanliwat kami anin ida lan aammed mi. <sup>21</sup> Nemnem mu anhan hu nekitbalan mun hi-gami et eleg dakemi pihulen gapuh ni kamedeyyaw ni ngadan mu. Ey entan tu ipahding hu kebe-ingan ni ngadan mu niya Jerusalem e kad-an ni nan-ap-apuam.

<sup>22</sup> Endi edum ni dios ni kabaelan tun mengippeellin udan. Beken ni neala ni impaelin kabunyan hu udan tep hi-gam ni ebuh hu wada kabaelan tu e AP-APU e DIOS mi. Et humman hu, hi-gam pandinnelan mi tep hi-gam ni ebuh kabaelan tun mengippahding idan nunya.”

## 15

<sup>1</sup> Entanni mewan ey immehel hi APU DIOS ni hi-gak et kantuy “Anin ni kantu et wadam Samuel nan Moses ni mampehemhemmek ni hi-gak gapuh idan nunyan tutu-u et eggak damengu hehmekadda. Et humman hu, pan-itu-dak mudda et menga-allaw ida et eggak ida ang-ang-angen. <sup>2</sup> Hedin mahmahan dan hi-gam hedin attu lawwan da, ehel mun hi-gada e inhel ku e mettey ida edum ni hi-gada tep ya degeh, tep humman gahat da! Ya edum ey mettey idad gubat, ey ya edum ey mettey idan bisil tep humman dama gahat da. Ey yadda edum ni hi-gada ey ellan idan buhul da et mambalin idan balud.

<sup>3</sup> Hi-gak e DIOS ey peellik ni hi-gada hu epat ni nemahhig ni nambakbaklang ni meippahding. Mettey idad gubat, ibbebsik ni ahhu annel da, niya kennen idan sisit niyadda animal di muyung hu metdaan ni hi-gada. <sup>4</sup> Gapuh idan impahding etan ni u-ungngan Heseekiah di Jerusalem e hi Manasseh e patul di Judah ey nemahhig hu pengastiguk idan tutu-uk e pambalin kuddalin angebe-hel ni tutu-ud kebebbbley eyad puyek.

<sup>5</sup> Hipalli umlelemyung niya umnangih tep ya neipahding ni hi-gayun iJerusalem? Ey hipalli mannemnem ni mengibga meippanggep ni hi-gayu? Endi! <sup>6</sup> Inwalleng yuwak ey eleg yuwak nemnema. Et humman gaputun pemahbahan kun hi-gayu. Eleg dakeyu hehmeka tep eggak law han-isipel hu bunget ku. <sup>7</sup> Heni dakeyu tel-apen idad eheb eyan bebley. Em, bahbahaen dakeyun tutu-uk ey petteyey ida u-ungnga yu tep eleg yu baliwan hu lawah ni elaw yu.

<sup>8</sup> Umdakkel ali nebalun biid bebley yu, e henin kadinakkel ni palnah di gilig ni baybay. Petteyen kudda lalakkni kameniken ni u-ungnga yu et lumemyung ali ineda. Meminpinhakkey hu pengippahdingak ni hi-gadan nunman ni nemahhig ni ligat ey angetakkut. <sup>9</sup> Ya etan inan meendi hu pitun u-ungnga tu ey pinhakkeyey umkapuy ey mehakkehakkey yahyah tu. Henilli me-ngetan hu aggew tu anin ni kawwalwal pay ni. Mebe-ing ali ey nemahhig lemyung tu. Yadda metdaan ey pebeltan kuddalin buhul dat patyen dadda. Hi-gak e DIOS hu nanghel nunya.”

### *Ya lilih Jeremiah nan APU DIOS*

<sup>10</sup> Kangkuy “Endi katted ngu amleng ku e ina, tep angebe-hel da-ak ni emin ni tutu-u. I-imman dedan hedin netayyak eman ni neiungngaan ku. Endi nak nekibekalan ey endi nak sinattakkut ni impautangan kun pihhuh ma-lat mambayad. Ey endi nak inutang et eggak mambayad. Nem ay da-ak kaidduiddusiddan emin ni tutu-u.”

<sup>11</sup> Kan APU DIOS ey “Ihhehwang dakan hi-gak e Jeremiah, tep in-eng-eng dakad kayyaggud. Ey pambalin ku buhul mun mampebaddang ni hi-gam et idasalan mudda hedin wada ligat da. <sup>12</sup> Kaw wada hakey ni tuun kabaelan tun hehpungen hu gumek winu giniling ni nalpud appit ni north? Endi! <sup>13</sup> I-abulut kuddalli buhul idan tutu-uk ni mengibsik ni kinedangyan da niya tenged da tep ya liwat da. <sup>14</sup> Ey pambalin kuddan himbut ni buhul da etan di bebley ni eleg da ang-angen lan nunman, tep nemahhig bunget kun heni apuy ni mengihheb ni hi-gada.”

<sup>15</sup> Kangkun APU DIOS ey “APU, nemnem muwak anhan et baddangan muwak. Kastigum anhan ida kamengippeligligat ni hi-gak. Entan tu an-anusidda tep lektattuy petteyey da-ak ni hi-gada. Inamtam e nakka manhelheltap tep nakka ene-ehhela hu pinhed mun peamtak idan tutu-u. <sup>16</sup> Nakka u-unnudan emin hu muka e-helan pehding ku. Ey humman hu kaum-idwat ni amleng ni hi-gak tep tuu muwak e APU DIOS e Kabaalan tun emin. <sup>17</sup> Eggak mekikkillaw ni nekiam-amleng di kapanhahamuliddan manghay ni tutu-u tep nemahhig bunget kuddan tuun lawah daka ippenahding. Et nak katteg ngu nehahhakkey tep daka peka-u-unnuda. <sup>18</sup> Nem kele nakka manhelheltap ni ingganah e heni eleg mepmepwahi liput ku? Tam eleg ka meiddinnel ni memaddang ni hi-gak? Kaw heni ka etan ni wangwang ni kametduk ni siyaggew niya heni kan hebwak ni kametduk?”

<sup>19</sup> Hinumang APU DIOS e kantuy “Hedin mantuttuyyu ka, bangngaden dakan bega-en ku. Nem beken ni nalnalgem hu e-helen mu. Yadda makulug ni wada silbitu e-helen mu et mambanggad kan prophet ku. Hi-gam ali ellian idan tutu-u, et beken ni hi-gam umlaw ni hi-gada. <sup>20</sup> Pambalin dakan mei-ellig ni nehammad ni giniling ni luhud et anin ni um-ali idan mekihhanggan hi-gam et eleg daka han-apput tep wada-ak ni mengippaptek ni hi-gam. <sup>21</sup> Ihhehwang dakan hi-gak di hipan pehding idan mapetey niyadda edum dan lawah ni tuu. Hi-gak e DIOS hu nanghel nunya.”

## 16

<sup>1</sup> Entanni ey immehel mewan hi APU DIOS ni hi-gak et kantuy <sup>2</sup> “Entan kalehin niya entan kahlag eyad bebley ni hanneya. <sup>3</sup> Tep peamtak alin hi-gam hu meippahding idallin mei-ungngadya niyadda a-ammed da. <sup>4</sup> Mettey idalli tep ya nemahhig ni degeh nem endilli umlemyung ey endilli mengikkullung ni hi-gada. Meiwahhiwahhit ali annel da, henin tain animal. Mettey ali edum di gubat ey mettey edum ni upa da et pangkanen idallin sisit niyadda animal di muyung hu annel da.”

<sup>5</sup> Immehel mewan hi APU DIOS ey kantuy “Ya hakey ni e-helen kun hi-gam ey entan hegep mud baley ni wada netey et ka makihemul. Ey entan panelemyung mu gapuh ni hipan netey. Eggak law bendisyon hu tutu-uk ni linggep, ey eggak peang-ang ni hi-gada impeminhed ku niya hemek ku. <sup>6</sup> Mettey ali dakel ni tutu-u eyad bebley, kedangyan niya newetwet, nem endilli umlemyung ni neteyyan da niya endi an mengikkullung ni hi-gada. Ey endi an mampemukmuk niya manlipput ni annel dan pengippeang-angan dan lemyung da. <sup>7</sup> Endilli mengillaw ni kenen ni pengelubyag tun edum tun wada netey di pamilyah tu. Ey endilli mengippeang-ang ni hemek tuddan etan ni netey ineda winu ameda.

<sup>8</sup> Ya hakey ni e-helen ku ey entan hegep mud baley ni wada kamanhahamul. Ey entan pakikan niya entan pakiinum mun hi-gada. <sup>9</sup> Jeremiah, ehel mun hi-gada e hi-gak e hi APU DIOS e Kabaalan tun emin ni Dios idan helag Israel ey kangkuy: Yan nunyan ketaggu yu ey endien kun emin hu tenul ni kapan-am-amlengi, anin idad kasal. Ya kakulugan tu ey nanengtullin mategudda tutu-udya et ang-angen daddalli huyyan meippahding.

<sup>10</sup> Hedin e-helen mun hi-gada meippanggep nunya et mahmahan da hedin kele nemahhig hu pengastiguk ni hi-gada ey hedin hipa nanliwatan dan hi-gak e hi AP-APU e Dios da <sup>11</sup> ey kammun hi-gaday: Kan APU DIOS ey ‘Eleg da-ak u-unnuden ida lan aammed yu. Inwalleng da-ak et dayawen da edum ni dios. <sup>12</sup> Nem nema-ma-ma impahding yu nem yadda la eman aammed yu. Lawah kayun emin niya manghay kayu e eleg yuwak u-unnuda. <sup>13</sup> Et humman hu, pe-kal dakey eyad bebley et palaw dakey etan di bebley ni eleg yu ang-angen niya eleg ang-angen ida lan aammed yu. Et dayawen yu edum ni dios di diman ni bebley ni kahilehileng niyan kewa-wa-wa. Eleg dakeyuh ehmekan hi-gak.’”

<sup>14</sup> Kan mewan APU DIOS ey “Medettengan ali tsimpuh ni beken ni kan idan tutu-u ey ‘Issapatah kud ngadan APU DIOS e wadan ingganah ni nengipenguluddan helag Israel ni neni-yan ni Egypt.’ <sup>15</sup> Nem issapatah dalli e kanday ‘Issapatah kud ngadan APU DIOS e wadan ingganah ni nengipenguluddan helag Israel ni neni-yan idan bebley di north niyadda edum ni bebley ni nengipelawwan tudda.’ Tep ibbangngad kuddallid bebley ni indawat ku lan aammed da.”

<sup>16</sup> Entanni ey immehel mewan hi APU DIOS et kantuy “Peellik hu dakel ni tutu-un henidda an menebbukul ni deleg et depapan dadda eya tutu-uk. Ey peellik ida kamandedweng et dewengen daddad duntug, yad leyang niyaddad hungab. <sup>17</sup> Nakka ang-ang-angan emin hu daka pehpehding. Eleg mabalin ni da ittaluliat da. <sup>18</sup> Et humman hu, pidwaen kuddan kastiguen tep ya liwat da niya kalwah da, tep hinibit da eya bebley gapuh idan kinenapya dan dios dan endi yayyah tu. Ey dinaydayaw dadda humman idan beken ni makulug ni dios.”

*Ya dasal Jeremiah*

<sup>19</sup> APU DIOS, e kamengippaptek ni hi-gak, kamengidwat ni elet ku niya kamemaddang ni hi-gak ni tsimpuh ni ligat ku, um-aliddalli tutu-un melpud edum ni bebley di nangginillig eyad puyek et kandan hi-gam ey "Dinaydayaw ida lan aammed mi hu dios ni endi silbi tun kinapyan tuu. <sup>20</sup> Kaw dammutun kapyaeen ni tuu dios tu? Dammutun kapyaeen tu nem beken ni makulug humman ni dios."

<sup>21</sup> Kan APU DIOS ey "Hedin henin nuntan, mahapul ni peang-ang ku et-eteng ni kabaelan ku et pengamtan da e hi-gak hu AP-APU."

**17***Ya liwat niya kastigun iJudah*

<sup>1</sup> Kan mewan APU DIOS ey "Hi-gayun iJudah, yadda lawah ni elaw yu ey kamei-ellig ni neka-ikku-lit di puhu yu niyaddad dugun yuka pan-appisi ey eleg me-kal diman et heni olden e mahapul ni meunnud. <sup>2</sup> Yadda u-ungnga yu ey da dama kadaydayawa hu dios yun hi Asherah idad yuka pan-appisi, yaddad yuka penginemnemid hengeg idan keyew di ta-pew idan duntug <sup>3</sup> niyaddad a-allaw ni bebley. Et humman hu, i-abulut kun ibbebsik idan buhul yu hu kinedangyan yu niyadda nebalol ni tenged yu, tep yuka ippenahding ida panliwwatan di emin di bebley yu. <sup>4</sup> Mahapul ni hi-yanen yu hu bebley ni idawat kun hi-gayu et kayu mansilbiddan buhul yud bebley ni eleg yu denglen tep nemahhig hu bunget kun hi-gayun heni apuy ni kamantetebbel ni ingganah."

<sup>5</sup> Kan mewan APU DIOS ey "Kastiguen ku etan tuun mengiwwalleng ni hi-gak tep tuka pandinneli hu elet ni tuun kamepappag hu biyag tu. <sup>6</sup> Humman ni tuu ey nanna-ud ni beken ni kayyagud hu meippahding alin hi-gatu, heni etan ni keyew di eleg mebebleyi e ek-ekut tep nema-ganan etan puyek ey maehin et endi kaumtetmel diman.

<sup>7</sup> Nem ya etan tuun kamengiddinnel ni hi-gak ey bendisyonan ku. <sup>8</sup> Kamei-ellig etan ni keyew ni simmemel di gilig ni wangwang e limmaw lamut tud edallem et datngen tu danum et anin ni medukkey hu uggew et mannananeng ni meatta bulung tu niya taggan tu lameh. \*

<sup>9</sup> Ya nemnem ni tuu ey kaumhaul ni peteg niya eleg mebellin ni mehullulan elaw tu. Endi tuun han-awat tu humman. <sup>10</sup> Hi-gak e hi APU DIOS ey inamtak ni emin hu wadad nemnem ni tuu niya inamtak hedin kayyagud winu lawah neitu-wan tu. Et humman hu, idawat ku ginun-ud ni hanhakkey ni tuu, meippuun di elaw tu."

<sup>11</sup> Ya etan sisit ni tuka nekkeba hu beken tu itlug et ma-pah ey endi silbitu tep hi-yanen idallin nunman ni impah. Hanniman etan tuun hedin beken ni limpiyuh nengal-an tun kinedangyan tu ey endi silbitu tep meendilli humman ni kinedangyan tun edum ni aggew. Ey yallin kaginawwan biyag tu ey mambalin ni newetwet.

*Ya dasal nan Jeremiah nan APU DIOS*

<sup>12</sup> Ya Tempol mu ey kamedeyyaw neipalpu eman ni laputu. Ey yadman ni ingganah hu pandeyyawan mi. <sup>13</sup> APU DIOS e kad-an ni namnamah idan helag Israel, mebe-ing idalli hu mengiwwalleng ni hi-gam. Meendiddalli e henin ngadan ni neiku-lit di dep-ul tep inwalleng da hi APU DIOS e makabbaddang ni ingganah ey kamei-ellig di hebwak ni eleg metduk.

<sup>14</sup> APU, ekal mu anhan degeh ku et ihwang muwak ma-lat melinggeppak e endi lawah ni meippahding ni hi-gak. Hi-gam ni ebuh nakka daydayawa.

<sup>15</sup> Kan idan tutu-un hi-gak ey "Attu mewan etan kammun inhel APU DIOS ni pehding tu ey? Kele eleg tu pehding nunya?"

<sup>16</sup> "APU DIOS, eggak iwalleng hu ngunuk ni mengituttudduddan tutu-um ni pinhed mun ittuttudduk. Ey inamtam e eleg ku ibgan hi-gam ni kastiguen mudda. <sup>17</sup> Et humman hu, etan tuwak anhan petattakut tep hi-gam keihhikkugak hedin wada ligat ku. <sup>18</sup> Paelim hu ligat idan kamengippehelhelat ni hi-gak et mabeingan ida, nem entan tuwak anhan ilegal. Paelim hu mengippetekkut ni hi-gada, nem entan anhan tu wadan hi-gak hu takut. Paelim hu nemahhig ni ligat et mekababbah ida."

<sup>19</sup> Kan mewan APU DIOS ni hi-gak ey "Jeremiah, lakkay di emin ni eheb, anin di eheb ni heggeppan niya ehheppan idan patul di Judah et ehelen muddan tutu-u hu pinhed kun e-helen ni hi-gada. Ey han ka limmaw idad edum ni eheb ni Jerusalem. <sup>20</sup> Ehel muddan patul, yadda tutu-ud Jerusalem niyaddan emin etan kaumhegeg di eheb eya e-helen ku: <sup>21</sup> Dengel yu eya e-helek et tumegu kayu! Isiked yun manggettang di eheb ni Jerusalem ni aggew ni Sabaduh. <sup>22</sup> Ey entan pangngunu yu, tep mahapul ni ngillinen yu humman ni aggew. Intugun ku huyyadda lan aammed yun nunman. <sup>23</sup> Nem eleg da

\* 17:8 17:8 [7-8] Ang-ang yu Psalm 1:3.

u-unnuden. Nambalin ida kumedek ni manghay. Eleg da u-unnuda niya eleg da pinhed ni amtaen hu nakka ituttuddun hi-gada.

<sup>24</sup> Nem hedini u-unnuden yudda huyyan tugun ku e Dios yu, e eleg kayu manggunnu niya eleg kayu manggetang ni aggew ni Sabaduh et ngillinen yu humman ni aggew, <sup>25</sup> ey mannananeng ni wada mambeley di deya Jerusalem. Ey mannananeng ni wada patul yun heni lan David e patul hu kabaelan tu. Ey ma-lat yadda opisyal da ey nanengtun manluggan idad kalesah, mantakkay idad kebayyun umhegep di heggeppan eyad Jerusalem, <sup>26</sup> niya melpudda tutu-ud bebley di Judah, yad Jerusalem, yaddad nambeleyan idan helag Benjamin, yaddad bebley di hengeg niyad ta-pew ni duntug, niyaddad bebley di appit ni south di Judah ma-lat pan-i-lidad Tempol ku hu i-appit dan kagihheba, yadda edum ni kamei-appit henin pagey, ya insensoh niyadda kai-appit ni kapansalamasin hi-gak.

<sup>27</sup> Nem mahapul nisin u-unnuden da-ak niya pehding da hu elaw ni aggew ni Sabaduh. Ey yan nunman ni aggew ey eleg mabalin ni ida mandellan di eheb ni Jerusalem hu nangkalga, beken ni henin daka pehding ni edum ni aggew. Tep hedini eleg da u-unnuda man lalgaben kudda eheb di Jerusalem et mailegat ida baley ni patul diman Jerusalem et endin hekey paka-dep nunman ni apuy."

## 18

<sup>1</sup> Kan mewan APU DIOS ni hi-gak ey <sup>2</sup> "Lakkay di baley etan ni kamengapyan banga et hannak eheladman hu pinhed kun peamta." <sup>3</sup> Et lumawwak diman ey inang-ang ku hu kamengapyan bangan kamanggunnu. <sup>4</sup> Ey inang-ang ku e hedini nambalin ni lawah ang-ang etan ni pulan bangan tuka pangkapyaa ey tuka bellwi et kapyaan tu hin-appil ni bangan pinhed tun kapyaan.

<sup>5</sup> Entanni ey kan APU DIOS ni hi-gak ey <sup>6</sup> "Kaw beken ni lebbengtun pehding kun hi-gayun ilsrail hu henin kapehding nunman ni kamengapyan banga e ngenamung hu pinhed tun pehding etan ni pula? Hanniman daman hi-gak e ngenamung pinhed kun pehding ni hi-gayu. <sup>7</sup> Et hedini kumpulmih ni tsimpuh ey kangkuy bahbahaen ku winu endien ku hu hakey ni bebley winu kapan-ap-apui ey pehding ku. <sup>8</sup> Nem hedini mantuttuyyudda tutu-u et issiked da lawah ni daka pehpehding ey eggak ittuluy ni pehding etan inhel kun pehding ku. <sup>9</sup> Hedini mewan kangkuy behwatan ku hu hakey ni bebley winu kapan-ap-apui, <sup>10</sup> nem eleg da-ak u-unnudan tutu-udman ni bebley et lawah daka ippenahding ey eggak ittuluy ni pehding hu inhel kun pehding ku.

<sup>11</sup> Imay, lakkay di Judah niyad Jerusalem et kammuddan bimbeley ey: Kan APU DIOS ey 'Implanuh kun kastiguen dakeyun iJudah niya iJerusalem. Isiked yun manliwwat niya baliwan yu elaw yu et isiked yun mengippahding ni lawah.'

<sup>12</sup> Nem inamtak e eleg da dedngela. Kanda kumedek ey 'Endi damengu silbitu. Pehding mi ngu dedan hu implanuh mi. U-unnuden mi hu lawah ni ninemnem mi.'

<sup>13</sup> Hedini hanniman hu kanda, kammuy 'Lawah ni peteg hu yu kapehpehding e helag Israel. Kaw wada makkaw hu henin nunman ni kameippenahding di edum ni bebley?'

<sup>14</sup> Kaw humman ni neendi hu dallallud eta-ta-gey ni duntug di Lebanon? Ey kaw hindaddum ni kametduk ida kulukul di diman idan duntug? Eleg! <sup>15</sup> Anin ni taggan ku tenten et inwalleng da-ak damengu idan tutu-uk. Daka gihheba insensoh ni daka i-appit idan dios ni kinapyan tuu. Nem humman ni daka pehpehding ey kamei-ellig ni daka unnuunnuda dalan ni nebayag e eleg da amta nampelawwan tu. Et humman hu, henidda neihungbub tep daka daydayawa dios ni kinapyan tuu. <sup>16</sup> Impambalin da eya bebley ni endi silbitu ni mepihhul ni ingganah. Emin ali melebbah ey mehngang ida niya metngadda et manwigiwigiwig ida tep ya ang-ang eyan bebley. <sup>17</sup> Iwwahit kudalli tutu-uk di kad-an idan buhul da henin kapengityabin dibdib ni kamelpud kasimmilin aggew ni dep-ul. Ey eggak law hengngudadda et eggak ida baddangin nunman ni tsimpuh ni ligat da.'"

<sup>18</sup> Entanni ey kan idan tutu-uy "Keyuy et mamplanuh itsun pehding tayun Jeremiah! Anin haggud wadadda ngu dedan hu padin mantuttuddun hi-gatsun tugun ey wadadda nelain ni tutu-un menghel ni kayyaggud ni pehding tayu niya wadadda edum ni prophet ni mengippeamtan e-helen APU DIOS. Iddiklamuh tayu hi Jeremiah ey issiked tayun meneddenggel ni tuka e-hela."

<sup>19</sup> Et mandasallak nan APU DIOS et kangkuy "APU DIOS, dengel mu anhan eya asal ku. Dengel mu kedi kae-e-heladdan buhul kun hi-gak. <sup>20</sup> Kaw ya lawah hu pambelleh dan kayyaggud ni nakka pehding ni panyaggudan da? Deh, nengu-kuddan bitun keknaan ku, anin ni nandasallak ni hi-gam et eleg mudda kastiguen. <sup>21</sup> Nem yan nunya law ey iddasal ku e hambaen ew mettey ida u-ungnga dan upada. Ey paelim hu degeh et mangkatey ida nangkea-amma ey papetey mud gubat hu kakat-agun u-ungnga da. Et yadda bii

ey meendi u-ungnga da niya mebelludda. <sup>22</sup> Ey paelim hu mengubbat ni hi-gada et madngel hu pekaw dad neidawwi. Tep ay deh ni-ngangu e nengu-kuddan keknaan ku ey nengapyaddan pengna dan hi-gak.

<sup>23</sup> APU DIOS, inamtam ida huyyan planuh dan memettey ni hi-gak. Mukun entan tu liwwan liwat da. Et ipahding mun hi-gada hu lebbengtun meippahding ni hi-gada gapuh ni bunget mu et peapput mudda.”

## 19

<sup>1</sup> Entanni ey immehel hi APU DIOS ni hi-gak et kantuy “Ka gatang ni bewed ni nekapyad pula ey inaygam ida kamengipappanggulun tutu-u niyadda padi et ikuyug mudda. <sup>2</sup> Et lumaw kayud Nedeklan e Hinnom e idlan yu etan di Ehebe e Potsherd et ehelen mun hi-gadadman hu peamtak ni hi-gam.” <sup>3</sup> Huyya hu inhel APU DIOS ni e-helen ku: “Hi-gayun patul di Judah niyadda tutu-ud Jerusalem, dengel yu eya e-helen ku e hi APU DIOS e Kabaelan tun emin ni Dios yun helag Israel. Peellik ali memahbah eyan bebley et mahngang idalli mengngel nunyan meippahding.

<sup>4</sup> Pehding ku henin nunya tep inwalleng da-ak ni hi-gadan tutu-uk ni helag Israel niya hinibit da eya bebley tep in-enappitan da hu dios ni edum ni bebley ni eleg da am-amtan nunman. Anin ida lan aammed da niyadda patul da et eleg da am-amta humman idan dios. Hakey mewan ey intemeg eyan bebley hu kuheyaw idan tutu-un endi bahul dan pinetepetey da. <sup>5</sup> Nengapyadda mewan ni pan-appitan dan dios dan hi Baal et pangigiheban dan u-ungnga dan i-appit da. Ey endi in-olden kun henin nunman ni pehding da. Endi pay anhan nak ninemnem ni henin nunman. <sup>6</sup> Et humman hu, medettengan ali tsimpuh ni beken law ni Tophet winu Nedeklan e Hinnom hu ngadan nunyan bebley. Tep ya law ngadan tu ey Nandeklan ni Pemetteyan. <sup>7</sup> Bahbahen kulli planuh idan iJudah niyadda iJerusalem ni mekiggubbat et peapput kuddan um-alin buhul dan mengubbat ni hi-gada. Et pampetteyen daddalli et pakan da hu annel dan sisit niyadda animal ni muyung. <sup>8</sup> Pakabbahbahen kulli Jerusalem et panhimpipihulan alin tutu-u, ey emin ali melebbah ni menang-ang nunyan bebley ey mehngang ida. <sup>9</sup> Ey ang-angen kulli et liktuben idan buhul da eya bebley, et mapukung ida ingganah me-puh ni emin hu kenneh da, et pangkennen dalli u-ungnga da niya gagayyum da. Nemahhig ali huyyan heltapen da.”

<sup>10</sup> Entanni mewan ey kan APU DIOS ni hi-gak ey “Pehik mu eya bewed di hinanggaddan tutu-un ingkuyug mu. <sup>11</sup> Et kammun hi-gaday ‘Kan APU DIOS e Kabaelan tun emin ey: Bahbahen kuddalli tutu-ud Judah niyad Jerusalem et heniddalli eyan naphik ni bewed e eleg law mabalin ni meiyayyaggud. Mangketey ali tutu-u et pan-ikulang daddad Tophet e nehbit ni bebley tep endi law edum ni da pengikkullungan ni hi-gada. <sup>12-13</sup> Ey pambalin kullin henin Tophet eya bebley ni Jerusalem e pepnuen kun annel ni nangketey. Hanneyalli pehding ku tep kaman-appit ida tutu-u niyadda papatul dad atep ni baballey dan kagihheban insensoh idan bittuwen niya daka i-enappisin kameinnum hu dios idan edum ni bebley.”

<sup>14</sup> Impeamtak ida huyya et hannak hi-yana hu Tophet e nengitu-dakan tuwak nan APU DIOS ni pengippeamtaan kun pinhed tun peamta. Et mambanggaddak et nak umehngeng di dallin ni Tempol et ehelen kuddan emin ni tutu-u <sup>15</sup> hu inhel APU DIOS. Kangkun hi-gaday “Kan APU DIOS e Kabaelan tun emin ni Dios yun helag Israel ey ‘Peellik ni emin ida inhel kun ligat et pengastiguk ni tutu-u eyad bebley, anin idan bebley di nanlinikweh tep manghay ida e eleg da-ak u-unnuda.’”

## 20

<sup>1</sup> Yan nangngelan etan ni u-ungngan Immer e hi Pashur e padin ap-apuddan kamampaptek di Tempol humman ni inhel ku <sup>2</sup> ey impadpap tuwak et peheplat tuwak et han tuwak pebangkiling da-ak etan di Ehebe e Benjamin di Tempol.

<sup>3</sup> Nawa-wa ey imbukyut tuwak et kangkun hi-gatuy “Pashur, hinullulan APU DIOS hu ngadan mun ‘Tuun Kaumtatakut ni Ingganah.’ <sup>4</sup> Tep kan APU DIOS ey ‘Pambalin dakan kaumtatakut ni annel mu niyadda gagayyum mu. Ey ang-angen muli pemetteyan idan buhul yuddan nunman ni gagayyum mu. Peapput dakeyulli iJudah ni patul di Babilon et ilaw tudda hu edum ni hi-gayud bebley da et pambalin tuddan balud ey pepettey tudda edum. <sup>5</sup> Ey i-abulut APU DIOS ni ellan idan nunman ni buhul yu hu emin ni kinedangyan yun wada eyad bebley yu. Peki-la dadda hu nebalol ni tenged ni patul yud Judah et ilaw dad bebley dad Babilon. <sup>6</sup> Hi-gam e Pashur man medpap ka niyadda pamilyah mu et mailaw kayu damad Babilon. Mettey kayullidman idan gagayyum mun nengipeamtaan mun itek et yadman ali keikkullungan yu.”



*Ya lilih Jeremiah nan APU DIOS*

<sup>7</sup> Kangkun APU DIOS ey "Hineul muwak e APU DIOS niya inapput muwak. Da-ak kangi-angi-angiin tutu-u niya da-ak kaheghegnudan ingganah. <sup>8</sup> Hedin wada e-helen kuddan tutu-un meippanggep ni kebabbahan da niya anggetakkut ni meippahding ni hi-gada ey pakkadek ni ittekuk ku. Et humman hu, da-ak kaheghegnudan tutu-u niya da-ak kailenanglangkak tep ya nakka pengpenghelin pinhed mun peamtak ni hi-gada. <sup>9</sup> Nem hedin kangkuy liwwanen daka e APU DIOS et eggak law an peenamta hu pinhed mun peamta ey mambalin ni henidda apuy ni maetung di puhuk. Impatnak et ni issipel nem eggak han-issipel.

<sup>10</sup> Entanni ey dakel hu nakka deddengngelan kae-ehheladdan tuun hi-gak e kanday 'Anggetakkut ni emin hu tuka e-hela. Imay et tayu idaddatteng idan aap-apu hu meippanggep ni hi-gatu.' Et lumaw idan an nengidaddatteng idan inhel ku. Et humman hu, anin ida law ni gagayyum kun nunman et da-ak kehellipat-i e kanday 'Lektattuy hi-gatu ngu mengippadpap ni anel tu et meibleh ida impahding tu.' <sup>11</sup> Nem inamtak e APU DIOS e et-eteng kabaalan mun memaddang ni hi-gak et eleg maipahding hu implanuh dan mengippehelheltap ni hi-gak. Et mebe-ingan idan ingganah tep endi pambalanan ni planuh da. Et humman ni kebe-ingan da ey eleg ali meliwwan. <sup>12</sup> APU DIOS e Kabaalan tun emin, inamtam hedin kayyaggud hu hakey ni tuu winu eleg, tep inamtam hu wadad nemnem niya puhun tutu-u. Et humman hu, ibleh mu anhan hu impahding idan buhul ku tep hi-gam hu nengidinelan kun ligat ku."

<sup>13</sup> Ia-appeli tayu hi APU DIOS! Ia-appel tayu hu pandeyyaw tayun hi-gatu tep inhewang tudda nangketwetwet di hipan lawah ni pehding idan lawah ni tutu-un hi-gada.

<sup>14</sup> Meiddutan hu aggew ni neiungngan ku! Heballi eleg tuwak dedan iungngan ina. <sup>15</sup> Meiddutan dama etan tuun nengippeamleng nan aman nanghelan tun 'Laki eya u-ungngam!' <sup>16</sup> Hamban mambalin humman ni tuun heni etan ni bebley ni eleg hemeken APU DIOS et bahbahen tu. Ey hamban umtatakut ni kakkabbuhhan ingganah ni hileng gapuh ni gubat <sup>17</sup> tep eleg da-ak patyen eman ni eggak pay maiungnga et nambalin et hu egeh inan kulung ku. <sup>18</sup> Kele dedan nak neiungnga? Kaw neiungnga-ak ma-lat manligigattak niya umlelemyungngak et hannak matey et angeba-ing katteg ngu neituan ku?

## 21

*Eleg ihwang APU DIOS ida ijudah idan iBabilon*

<sup>1</sup> Immehel mewan hi APU DIOS nan Jeremiah eman ni nengitu-dakan ni patul di Judah e hi Sedekiah nan Pashur e u-ungngan Malkiyah, et ya etan padin hi Sephaniah e u-ungngan Maaseiah, ni mekihummangan ni hi-gatu. Kandan Jeremiah ey <sup>2</sup> "Attu et iehnung dakemi et mekihummangan kan APU DIOS, tep hehgepen Nebukadnessar e patul di Babilon niyadda sindalu tu eya bebley tayu? Ilah tu et anhan hedin pehding APU DIOS hu kamengippetnga et eleg ittuluy Nebukadnessar ni mengubbat ni hi-gatsu."

<sup>3</sup> Kan Jeremiah ni hi-gaday "Pambanggad kayu et ehelen yun Sedekiah e kanyuy: <sup>4</sup> Kan ni AP-APU e Dios tayun helag Israel ey 'Pambalin kun endi silbitu hu almas yun pekihhangaan yun Nebukadnessar e patul di Babilon niyadda sindalu tun mengubbat ni hi-gayu. Peellik idad gawwan eyan bebley yu. <sup>5</sup> Hi-gak mismuh e et-eteng kabaalan tun Dios hu mekihhanggan hi-gayu tep nemahhig bunget kun nengiwallengan yun hi-gak. <sup>6</sup> Ey peellik hu nemahhig ni degeh et mangkatey ida tutu-u niyadda animal di bebley yu. <sup>7</sup> Nem hedin hi-gam e Sedekiah e patul ey anin ni kantu et meihwang ka, yadda opisyal mu niyadda edum ni tutu-u eyad gubat, yallid um-alin bisil niyad degeh ey pedpap dakeyu damengun Nebukadnessar e patul di Babilon et pateyen dakeyun emin e eleg dakeyu hehmeken.' "

<sup>8</sup> Kan mewan APU DIOS ni hi-gak ey "Ehel muddan tutu-u e kammuy: Kan APU DIOS ey 'Pampili kayu, ya keteguan yu winu ya ketteyyan yu? <sup>9</sup> Hedin pinhed yun mettey di gubat, yad bisil winu degeh, panha-ad kayudya. Nem hedin pinhed yun mettegu ey kaukat kayu et kayu mansukuh idan iBabilon ni iyallin menggep eyan bebley yu et meihwang kayud katey. <sup>10</sup> Tep nanna-ud ni pebahbah ku eya bebley yu etan ni patul ni Babilon e lलगaben tu et magiheb emin hu wadadya.' "

<sup>11</sup> Kan mewan APU DIOS ni hi-gak ey "Ehel muddan pamilyah etan ni patul di deya Judah <sup>12</sup> ni helag David e kammuy: Huyya kan APU DIOS: Ang-ang yu ma-lat limpiyuh pehding yuddan tutu-u. Baddangi yudda nepiliw limmu da ey ihwang yuddad kamengippeliligat ni hi-gada. Ey ipahding yu kayyaggud tep hedin eleg yu pehding ida huyya ey umbungettak et mei-ellig di kamantetebbel ni apuy hu bunget ku e eleg

mabalin ni me-dep. <sup>13</sup> Hi-gak hu mengubbat ni hi-gayun iJerusalem e kamampahhiyyan kanyuy 'Melinggep itsu eyad bebley tayud duntug. Endi mabalin ni mengubbat ni hi-gatsu.' <sup>14</sup> Kastiguen dakeyun hi-gak tep yadda liwat yu. Lelgaben ku hu muyung yu niya emin hu wadad bebley yu. Hi-gak e APU DIOS hu nanghel nunya."

## 22

<sup>1</sup> Entanni ey immehel mewan hi APU DIOS ni hi-gak et kantuy "Elaw kad baley etan ni patul di Judah et ehelen mu e kammuy: <sup>2</sup> Hi-gam e patul di Judah e helag lan David e patul, yadda opisyal mu niyadda tutu-ud Judah ni kaumhegep idad eheb eyan bebley, dengel yu eya inhel APU DIOS e <sup>3</sup> kantuy 'Hi-gak e DIOS ey mandalan dakeyun mengippahding ni meandeng niya limpiyuh. Baddangi yudda etan tuun kahe-ulan maheul ni tutu-u. Ey entan tu panliligat ida immalin nekibebley ni hi-gayu, yadda nepu-hig niyadda nebalu. Ey entan tudda patey etan endi bahul tu eyad bebley. <sup>4</sup> Hedin u-unnuden yudda huuyan inhel ku ey meitultuluy ni mampatul hu helag David. Hi-gada niyadda opisyal da ey mannenneng ni yadyan eheb eyan baley ni patul hu pengidlanan dan manluggan di kalesah da niya mantakkay di kebayyu da. <sup>5</sup> Nem hedin eleg yu u-unnuda huuyan nakka pan-ittugun ey issapatah ku e mebahbah huuyan baley ni patul. Hi-gak e APU DIOS hu nanghel nunya."

<sup>6</sup> Kan mewan APU DIOS ey "Kayyaggud ni peteg eya baley ni patul ni Judah, henin kakinayyaggud ni Gilead niya duntug di Lebanon, nem bahbahen kulli et endi mambelley. <sup>7</sup> Peellik ali tutu-un mengi-lin wahay da et bukalen da et dikhalen dadda kayyaggud ni sedar ni tukud tu et itungu da.

<sup>8</sup> Dakel ali tutu-un melebbah ni melpod edum ni bebley et kandalli ey 'Kele an impahding APU DIOS hu hanneya eyad et-eteng kabaalan tun bebley?' <sup>9</sup> Hummangen alin edum et kanday 'Tep inwalleng da etan AP-APU e Dios da ey eleg da u-unnuden hu nekitbalan tun hi-gada et dayawen da dios ni kinapyan tuu.'"

<sup>10</sup> Hi-gayun iJudah, entan tu nannangngihi etan netey ni patul yu e hi Josiah. Ya nengngihan yun peteg ey hi Joahas e u-ungga tun daka pan-illaw di edum ni bebley et eleg tullu law ang-anga eya bebley ni neiungngaan tu tep eleg ali law mambangngad. <sup>11</sup> Heninnuy hu inhel APU DIOS meippanggep nan Joahas e neiullul nan ametun hi Josiah e patul di Judah. Kantuy "Inlaw dad neidawwi et eleg law mambangngad eyad bebley tu. <sup>12</sup> Ey mettey alid bebley ni nengilawwan dan hi-gatu et eleg tullu law ang-angen eya bebley tu."

### *Ya neipeamta meippanggep nan Jehoiakim*

<sup>13</sup> Heninnuy inhel APU DIOS ni meippanggep nan Jehoiakim: "Nanna-ud ni mekastigu hi Jehoiakim! Tuka pan-ettenga baley tu meippuun di beken ni limpiyuh ni tuka pehding ey gapuh ni sinelam tu. Tuka panggunnu tutu-u, nem eleg tu iddawat sinangdan da. <sup>14</sup> Kantuy 'Behwatan ku et-eteng ni baley ku e etta-teng ida kuwaltuh tu ey dakel habhabyen tu ey sedar hu mekapyan lekbi tu niya mepintolan ni madlang.'"

<sup>15</sup> Nem kan APU DIOS ni hi-gatuy "Jehoiakim, kaw kammu nem mambalin kan kayyaggud ni patul hedin ya sedar ni keyew hu ikkapyam di baley mu et kakkayyaggud nem ya baley ni edum? Hedin hi amam e hi Josiah ey nebayag nampatulatan tu ey nan-an-anla. Meandeng ey limpiyuh hu impahding tu, et humman hu, kayyaggud emin hu nambalanan emin ni impahding tu. <sup>16</sup> Ey meandeng hu nengipenuh tun kasus ida newetwet, et mukun yimmaggud neitu-wan tu. Hanniman hu elaw ni tuun kamekiddagyum APU DIOS. <sup>17</sup> Nem hedin hi-gam ey ebuhi ida panyaggudan mun muka ipapapte. Muka pampateyadda endi bahul tu ey muka panhelheltap ida tutu-um."

<sup>18</sup> Huyya pay hu inhel APU DIOS meippanggep nan Jehoiakim e u-ungngan Josiah e patul di Judah: "Endilli umlemyung ni ketteyyan tu ey endi menghel ni 'A-ayyuh humman ni patul mi. Kele an netey?' <sup>19</sup> Mettey alin heni kebayyun pemegga da guyyud et da ibbeng di a-allaw ni eheb ni Jerusalem."

<sup>20</sup> Hi-gayun iJerusalem, nangih kayu tep endi law umbaddang ni hi-gayu. Elaw kayud Lebanon et kayu tumkuk diman niya elaw kayud Bashan et kayu numngih diman. Ey elaw kayuddad duntug di Moab et kayu tumkuk tep neapput ni emin ida bebley ni kebadang yu.

<sup>21</sup> Yan eman ni wadan emin ni hi-gayu hu kayyaggud et melinggep kayu ey inhelan dakeyu, nem eleg yu dengelen hu ehel ku. Tep henin nuntan dedan elaw yu e eleg yuwak u-unnuda neipalpun keu-ungga yu ingganah nunya. <sup>22</sup> Mei-ellig ni ittayab ni dididib ida ap-apu yu anin idan kebadang yud gubat et mababbaingan kayu gapuh idan lawah ni impahding yu. <sup>23</sup> Ma-nu mannuman tep kayu kamekalinggep di baballey yun nekapyad

sedar e nalpud Lebanon, nem anggehennemek kayulli tep manhelheltep kayullin henin biin man-ungnga.

<sup>24</sup> Kan APU DIOS etan ni patul ni Judah e hi Jehoiachin e u-ungnga lan patul e hi Jehoiakim ey “Hi-gak e DIOS ni wadan ingganah ey panna-ud ku e anin ni hi-gam hu pinilik ni mampattul e ka kamei-ellig di singsing ni neiuhklub di kimeng ku et e-kalen dakalli <sup>25</sup> et pebeltan dakan etan ni muka tattakusin buhul mu e hi Nebukadnessar e patul di Babilon et yadda sindalu tu. Humman idan buhul mu ey ihik idan memettey ni hi-gam. <sup>26</sup> Pilliten daka, anin hi inam et palaw dakeyud bebley ni eleg yu ang-angen et matey kayudman. <sup>27</sup> Peteg kayullin menang-ang eyan bebley yu, nem eleg kayu law mambanggad deya.”

<sup>28</sup> Immehellak et kangkuy “Kaw nambalin hi Jehoiachin ni henin naphik ni pulan bangan endi neminhed ni mengella? Kele hipa gaputun tu keillawwan anin idan u-ungnga tud bebley ni eleg da ang-angen?” <sup>29</sup> Hi-gayun bimbebley, dengel yu eya inhel APU DIOS: <sup>30</sup> Kantuy “Ibilang yu huyyan tuun heni endi u-ungnga tu. Anin ni hi-gatu et eleg umyaggud biyag tu. Tep endilli u-ungnga tun mampatul di Judah ni meihhullul nan David. Hi-gak e APU DIOS hu nanghel nunya.”

## 23

<sup>1</sup> Anggehennemek ali pehding APU DIOS idan aap-apun memahbah ey mengiwwehhit idan tutu-u tu.

<sup>2</sup> Huyya hu kan AP-APU e Dios ni helag Israel idan ap-apun lebbeng tun mengippatek idan tutu-u tu ey: “Eleg yu ipatek ida tutu-uk nem dinegyun yu kumedek ida et maiwehit ida. Gapuh nunman ni lawah ni impahding yu ey kastiguen dakeyu. <sup>3</sup> Nem emmungen kuddalli natdaan ni tutu-uk idad bebley ni nengipelawwan kun hi-gada ma-lat ibangngad kuddallid bebley da. Et mehlag idalli et dumakkel ida. <sup>4</sup> Ey pillien kulli aap-apun mengippatek ni hi-gada. Et eleg idalli law umtatakut ey eggak ida law kastigua. Hi-gak e hi APU DIOS hu nanghel nunya.” <sup>5</sup> Kan mewan APU DIOS ey “Medettengan ali tsimpuh ni pillien ku hu hakey ni helag David ni mampatul. Humman alin mampatul ey limpiyuh ey meandeng hu pehding tud emin di pan-ap-apuan tu. <sup>6</sup> Ey yan nunman alin pampatul tu ey umlinggep law ida ijudah niyadda emin ni helag Israel. Inngadnan dalli humman ni Ap-apun ‘Ya AP-APU mengi-ehneng ni hi-gatsu.’”

<sup>7</sup> Kan mewan APU DIOS ey “Medettengan ali tsimpuh ni eleg law issapatah ni tutu-un hi-gak e DIOS e wadan ingganah ni nengipenguluddan helag Israel ni neni-yan ni Egypt, <sup>8</sup> nem issapatah da law ni hi-gak e DIOS e wadan ingganah ni nengipenguluddan tutu-uk e helag Israel ni neni-yan idan bebley di north niyaddad edum ni bebley ni nengiwehitan kun hi-gada et mambebley ida law eyad bebley da dedan.”

*Ya impeamtan Jeremiah ni meippanggep idan beken ni makulug ni prophet*

<sup>9</sup> Nakka umlelemyung ni peteg ey nakka umgeygey tep ya kapehpehding idan beken ni prophet. Ey nakka meiddepping e heni-ak nebuteng tep ya inhel APU DIOS ni hi-gada et yadda tutu-u. <sup>10</sup> Lawah elaw idan prophet ey neihalla daka pengussalin kabaelan da et yadda tutu-u ey nemahhig ni lawah dama hu daka pehpehding, et mukun inidutan APU DIOS hu bebley dat nekamma-ganan emin hu puyek da anin idan pattullan da.

<sup>11</sup> Kan APU DIOS ey “Da-ak kangenghayaddan prophet et yadda padi. Anin di Tempol ku et daka pehding hu lawah. <sup>12</sup> Et humman hu, henilli engeenget ey medangleh hu dalan da et man-e-gah ida et metu-lidda. Peellik ali humman ni panliggatan dan gintud kun tsimpuh ni kekastiguan da. Hi-gak e DIOS hu nanghel nunya.”

<sup>13</sup> Inang-ang ku mewan e lawah hu kapehpehding idan prophet di Samaria tep ya meippanggep nan Baal hu daka peennamta et maheul ida tutu-uk et beken law ni hi-gak hu deyyawen da. <sup>14</sup> Nem nema-ma-ma hu kalinawah idan prophet di Jerusalem. Tep daka i-ulig hu beken da ahwa ey maitek ida. Da pay katuttuddui hu tutu-un mengippahding ni lawah et humman gaputun eleg mepappeg kalwah da. Ya nakka penang-ang ni hi-gada ey henidda damengu eman idan lawah ni tutu-ud Sodom niyad Gomorrah.

<sup>15</sup> Et humman hu, yan nunya ey hi-gak e hi APU DIOS e Kabaelan tun emin ey heninnuy hu e-helen ku meippanggep idan prophet di Jerusalem: “Kamei-ellig ni iddawtan kuddan mapeit ni kenna da niya kedet ni innumen da tep hi-gada nengipappangguluddan tutu-un eleg mengu-unnud ni hi-gak.”

<sup>16</sup> Kan APU DIOS e Kabaelan tun emin idan iJerusalem ey “Entan tu kulug hu kaituttudduddan prophet tep beken ni makulug hu daka e-e-helan umlinggep kayu. Nalgem hu kaum-alid nemnem da et humman daka e-helan hi-gayu e beken kumedek hu nakka e-helan hi-gada hu daka ittutuddu. <sup>17</sup> Kan idan etan ni kamangngenghay ni

hi-gak ni kamemihhul ni nakka e-helay 'Kan APU DIOS ey: Umlinggep kayu, et humman hu, entan pandanag yu.' Ey kandaddan etan ni manghay ni tuun lawah pinpinhed dan ippahding ey 'Endi ligat ni um-alin hi-gayu.' "

<sup>18</sup> Kangkuy "Ya kakulugan tu ey endiddan nunyan prophet hu nengamtan APU DIOS. Endin hi-gada hu nan-awat ni inhel tu. Ey endin hi-gada nengu-unnud ni hi-gatu. <sup>19</sup> Et humman hu, nemahhig hu bunget APU DIOS ni hi-gadan lawah ni tutu-u e mei-ellig di na-let ni pewek. <sup>20</sup> Ey eleg me-kal bunget tu ingganah pehding tun emin etan pinhed tun pehding. Et amtaen yulli law hu kakulugan tu."

<sup>21</sup> Kan APU DIOS ey "Eggak baalen ida huttan ni an mengippeamtan pinhed ku ey endi nak inhel ni hi-gadan da peamta, nem kanday nalpun hi-gak hu daka peennamta. <sup>22</sup> Gullat ni inamta da wadad nemnem ku et wadan impeamtak ni hi-gada hu da ittutuddun tutu-u et pasiked daddan mengippahding ni lawah. <sup>23</sup> Hi-gak ey anin ni attu et wada-ak, et mukun neka-amtak emin hu kapehpehding ni tutu-u. <sup>24</sup> Anin ni attu an pantelluan ni tuu et han-ang-ang ku. Tep anin ni attud kabunyan ey puyek et wada-ak. Hi-gak e DIOS hu nanghel nunya."

<sup>25</sup> "Inamtak hu itek idan nunman ni prophet e kanday impei-inep kun hi-gada hu daka e-helan pene-ul daddan tutu-uk. <sup>26</sup> Kaw eleg issiked idan nuntan ni prophets ni mene-uhe-ul idan tutu-uk gapuh ni itek da? <sup>27</sup> Kanda na-mu nem gapuh ni nunman idan i-innep da ey iwwalleng da-ak idan tutu-uk heniddan eman ni aammed da e inwalleng da-ak et hi Baal hu dinaydayaw da. <sup>28</sup> Huyyaddan maitek ni prophet ey ya i-innep da daka ene-ehhela, nem hedin yadda makulug ni prophet ku ey yadda nakka peamtan hi-gada hu daka ittutuddu. Yadda maitek ni peteg ni prophet ey henidda dagemin endi silbitu nem hedin yadda prophet ku ey henidda pagey e wada silbitu. <sup>29</sup> Ya ehel ku ey heni apuy ey heni massilyun tuka bukliya batu.

<sup>30</sup> Kastiguen kudda prophet ni kamengittutuddun inhel ni edum da ey kanday hi-gak nalpuan nunman. <sup>31</sup> Ey kastiguen kudda prophet ni anin ni hi-gada kan nemnem ni daka ittutuddu ey kanday hi-gak nalpuan tu. <sup>32</sup> Dengel yu eya e-helek! Nekamma-man eggak pinhed ida prophet ni ya ini-innep da hu daka ittutuddu et u-unnuden ni tuu hu itek da. Eggak itu-dak ida humman ni prophet ni an mantutuddu. Hakey pay ey endi damengu ibbaddang daddan tutu-u. Hi-gak e DIOS hu nanghel nunya."

<sup>33</sup> Immehel mewan hi APU DIOS ni hi-gak et kantuy "Jeremiah, hedin wadaddan tutu-uk, yadda prophet niyadda papadi hu mengibgan hi-gam e kanday 'Hipa mewan hu inhel APU DIOS ni hi-gam?' Kammun hi-gaday 'Kantuy iwwalleng dakeyun hi-gatu.' <sup>34</sup> Et hedin wadan hi-gada hu kanday 'Ebuh ligat ni kae-helan APU DIOS' ey kastigek humman ni tuu anin ni pamilyah tu. <sup>35</sup> Tep ya et ibbagedan edum da ey heninnuy: 'Hipa inhel APU DIOS?' winu 'Hipa inhumang APU DIOS?' <sup>36</sup> Tep meippalpun nunya ey entan tu law kaney: 'Huyyan nakka pan-e-hela ey nalpun APU DIOS.' Tep ya kamenghel ni henin nunya ey tuka hulluli hu nakka e-hela. Hi-gak e hi APU DIOS e Kabaellan tun emin ni Dios yu ey wada-ak ni ingganah.

<sup>37</sup> Jeremiah, ibegam idan prophet e kammuy 'Hipa inhumang APU DIOS ni hi-gayu? winu, Hipa inhel tun hi-gayu?' <sup>38</sup> Hedin hummangen da e eleg da u-unnuda inhel ku et kanday 'Ebuh ligat ni kae-helan APU DIOS', ey kammun hi-gada ey huyya kan APU DIOS ni hi-gayu: <sup>39</sup> 'Nanna-ud ni iddawwik idad kad-ak et liwwanek ida. Anin etan bebley dan indawat kuddan aammed da et eggak hengnguda. <sup>40</sup> Ey peellik ni hi-gada hu umhulun ni kebe-ingan dan eleg ali meliwwan ni ingganah.' "

## 24

### *Ya impeang-ang nan APU DIOS nan Jeremiah*

<sup>1</sup> Yan negibbuan ni nengal-an Nebukadnessar e patul di Babilon ni patul di Judah e hi Jehoiachin e u-ungngan Jehoiakim niyadda nangkelaing ni mengapyan kumpulmi et ilaw tuddad Babilon ey impeang-ang APU DIOS ni hi-gak hu dewwan basket ni napnun fig di hinanggan Tempol tu. <sup>2</sup> Ya neiha-ad di hakey ni basket ey kayyaggud ni lameh ni fig ey yad hakey ni basket ey lawah e eleg mekkan.

<sup>3</sup> Entanni ey immehel mewan hi APU DIOS ni hi-gak et kantuy "Hipa inang-ang mu e Jeremiah?"

Kankuy "Lameh ni fig e kayyaggud edum ey lawah edum. Kayyaggud ni kennen hu edum ey eleg mekkan hu edum."

<sup>4</sup> Kan APU DIOS ni hi-gak ey <sup>5</sup> "Hi-gak e AP-APU e Dios idan helag Israel ey kangkuy: Yadda etan tutu-un neilaw di Babilon ey nakka ibbilang idan kayyaggud henin muka pengibbillangiddan etan ni fig di hakey ni basket ni kayyaggud. <sup>6</sup> Ippaptek kuddalli et ibangngad kudda eyad bebley da. Em, eggak ida bahbaha nem baddangan kudda

e heni ittanem kuddan eggak ida gebbuta. <sup>7</sup> Weddaen kullin hi-gada impemihed dan mengamtan hi-gak e AP-APU, et amtaen da e tuuk ida ey hi-gak hu Dios da tep et-eteng ali amleng dan mambangngad ni hi-gak.

<sup>8</sup> Yadda etan lawah ni fig ey henidda hi Sedekiah e patul di Judah, yadda opisyal tu, yadda tutu-un nehi-yan di Jerusalem niyadda edum ni wadad Egypt. Ey hi-gak e Dios ey ippahding kun hi-gada hu henin kapehding ni tuun lawah ni fig. <sup>9</sup> Pambalin kuddan angebe-hel ni tutu-ud edum ni bebley eyad puyek. Lawah ali penang-ang dan hi-gada, heghegnuden daddalli, ngi-ngi-ngian daddalli, ey pippihulen dadda anin di attun bebley ni pengippelawwan kun hi-gada. <sup>10</sup> Peellik hu gubat, ya bisil niya degeh ni hi-gadad bebley ni indawat kuddan aammed dan nunman ingganah ni endi metdaan ni hi-gada, anin hakey.”

## 25

<sup>1</sup> Yan eman ni meikka-pat ni toon ni nampatulana Jehoiakim e u-ungngan Josiah di Judah ey impeamtan APU DIOS ni hi-gak hu pinhed tun e-helen idan tutu-udman. Yan nunman hu nemangulun toon ni nampatulana Nebukadnessar di Babilon.

<sup>2</sup> Kangkuddan emin ni iJudah niya iJerusalem ey: <sup>3</sup> “Yan dewampulut tellun toon ni wada kapeanntan APU DIOS ni hi-gak neippalpu eman ni nampatulana Josiah e u-ungngan Amon di Judah ingganah nunya. Inu-unnud ku e eggak ipengil et e-helen kun hi-gayun tutu-u, nem eleg yu hanguden.

<sup>4</sup> Ey anin ni impaelielin APU DIOS ida bega-en tun prophet ni mengippeamtattan pinhed tun peamtan hi-gayu et eleg yu hanguden ni dingngel. <sup>5</sup> Kandan hi-gayu ‘Twalleng yu lawah ni elaw yu ey isiked yun mengippahding ni lawah ma-lat mannaneng kayun manha-ad di bebley ni indawat APU DIOS ni hi-gayu niyadda la aammed yun pambebleyan yun ingganah. <sup>6</sup> Entan tu dayaw ey entan pansilbid edum ni dios. Ey entan tu pabunget hi APU DIOS ni penaydayawan yuddan dios ni kinapya yu, ma-lat eleg dakayu kastiguen ni hi-gatu.’

<sup>7</sup> Ey anin hi APU DIOS et kantuy ‘Eleg yu hanguden ni dingngel hu inhel ku. Impabunget yuwak kumedek gapuh idan kinapya yun dios yu et kastiguen dakeyu tep hi-gayu kambahul. <sup>8</sup> Et humman hu, gapu tep eleg kayu nisi umdengel ni hi-gak e hi APU DIOS e Kabaelan tun emin ey <sup>9</sup> eyyagan kuddan emin hu sindalud appit di north e ippangulun nan Nebukadnessar e patul di Babilon e bega-en ku et gubaten da Judah anin idan bebley ni neihnp diman. Pebabhah kudda huuyan bebley et mannaneng alin nemahhig ni lawah ang-ang tu. <sup>10</sup> Papegen kuddalli hu kamedngel ni tekutekuk idan tutu-udman gapuh ni amleng da, anin idan daka petnul ni pan-an-anlaan ni kasal. Ey endien ku kennen dan pagey ey e-depen ku dilag ni kengkeh da. <sup>11</sup> Mebahbah alin emin huuyan bebley et mambalin ni endin hekey silbitu. Et emin idalli bimbebley di Judah, anin idan bimbebley di nanlinikweh ey mansilbiddallin patul di Babilon ni nepitun toon.

<sup>12</sup> Et hedini negibbuh humman ni nepitun toon ey kastiguen kuddalli iBabilon niya patul da tep ya liwat da. Ey bahbahen ku hu bebley da et mambalin ni endi silbi tun ingganah. <sup>13</sup> Em, kastiguen kuddalli iBabilon. Ya pengastiguk ni hi-gada ey yadda etan impeamtan nan Jeremiah ni neitudek eyad liblun ni pemabhah kun emin ni bebley. <sup>14</sup> Ibbaleh kudda impahding idan iBabilon et mambalin idan himbut ni papatul di dakek ni bebley ni et-eteng kabaelan da.”

<sup>15</sup> Kan mewani AP-APU e Dios idan helag Israel ni hi-gak ey “Alam eya basuh e kamei-ellig ni napnun bunget ku. Ilaw mud emin di bebley ni pengitu-dakan kun hi-gam et painuman muddan emin hu tuudman. <sup>16</sup> Et mandangidangiwi ida ey metellak ali nemnem da gapuh ni gubat ni pellow kun hi-gada.”

<sup>17</sup> Inlak humman ni basuh ni indawat APU DIOS ni hi-gak et nak painuman ida tuu idad bebley ni nengitu-dakan tun hi-gak. <sup>18</sup> Limmawwak di Jerusalem niyadda edum ni bebley di diman Judah et painumak ida tutu-u, yadda patul et yadda ap-apu da et mambalin ida humman ni bebley ni nekabbabhah ni peteg et kamengippetnga ang-ang tu. Et ingganah nunya ey kameussal hu ngadan dan pan-iddu. <sup>19-26</sup> Huyya listaan idan edum ni imminun ni nak intaug: ya patul di Egypt, yadda opisyal tu, yadda ap-apu tu, yadda bimbebley niyadda nekibebley diman, emin ida patul di Us, yadda patul idad etta-teng ni bebley di Pilistia e Askelon, Gaza, Ekron, yadda tutu-un natdaan di Asdod, yadda tutu-ud Edom, yad Moab, yad Ammon, ey emin ida patul di Tyre et yad Sidon, emin ida patul di bebley di kad-an ni Baybay e Mediteranean, yadda tutu-ud etta-teng ni bebley di Dedan, yad Tema, yad Bus, emin ida impesikkek da bewek da, emin ida patul di Arabia, emin ida patul di bebley ni neihnp di eleg mebebleyi, emin ida patul di Simri, yad Elam yad Media, emin ida patul di bebley di appit ni north, yadda bebley ni nangeihnp diman, niyadda katuutuud kebebhebley eyad puyek. Imminun idan

emin nunman ni intaug kun kamei-ellig ni meinnum ni panhelheltapan. Ya manggillig ni um-inum ey ya patul di Babilon.

<sup>27</sup> Entanni ey kan mewan APU DIOS ni hi-gak ey "Ehel muddan emin ni tutu-u e hi-gak e AP-APU e Kabaelan tun emin e Dios idan helag Israel, ey mandalen kuddan um-inum etan ni kamei-ellig ni meinnum ni panhelheltapan, e humman hu gubat ni peellik, ingganah henidda nebuteng et man-utadda, metukkad ida ey eleg ida pakeehng.<sup>28</sup> Hedin eleg da pinhed ni um-inum ni ittaug mu, ehel mun hi-gada e hi-gak e hi APU DIOS e Kabaelan tun emin hu nanghel e mahapul ni um-inum ida. <sup>29</sup> Yad bebley ku pengillepuan kun bahbahen. Penghel na-muddan tutu-uk nem eggak ida kastigua. Nem mahapul ni mekastigudda tep ya kakulugan tu ey peellik hu gubat di emin ni bebley eyad puyek. Hi-gak e APU DIOS e Kabaelan tun emin hu nanghel idan nunya.

<sup>30</sup> Hi-gam e Jeremiah ey mahapul ni mu e-helen idan emin ni tutu-u huyya. Kammuy: 'Hi APU DIOS e yad kabunyan hu tuka panha-adi ey kamantetkuk e heni kidul hu tekuk tu ma-lat denglen idan tutu-u tu. Ey naka-let hu tekuk tu henin tekuk idan kamangkepka ni grapes. Em, tetkukan tun emin hu tutu-ud kebebbebley <sup>31</sup> e medngel di nangginillig eyad puyek tep wada diklamuh tun hi-gada. Huwetan tun emin hu tutu-u et patyen tudda lawah ni hi-gada.' Hi-gak e Dios hu nanghel nunya."

<sup>32</sup> Heninnuy hu kan APU DIOS e Kabaelan tun emin: Kantuy "Ang-ang yu tep mebahbah alin emin hu bebley! Tep kamengelli hu heni neka-let ni pewek ni melpud gilig ni puyek." <sup>33</sup> Yan nunman ali ey mangkeiwwehit ida annel ni tuun petteyey APU DIOS di emin ni bebley. Nem endilli umlemyung ni neteyyan da ey endi mengikkullung ni hi-gada. Heniddalli lugit e nealay nena-yun di puyek.

<sup>34</sup> Pannanangih kayun aap-apu ey panduladulag kayud dep-ul, tep nedatngan law hu tsimpuh ni ketteyyan yu. Mei-ellig kayullin pulan bangan me-gah et maphik. <sup>35</sup> Eleg mabalni ni ibbeksikan yu huyyan meippahding alin hi-gayu.

<sup>36-37</sup> Hi-gayuddan katutuut, dengel yu nangih idan aap-apu yu. Ida kamannengih tep binahbah APU DIOS hu melinggep ni bebley yu tep ya bunget tu. <sup>38</sup> Inwalleng dakeyun APU DIOS, henin layon ni hini-yan tu leyang ni tuka panhahha-adi. Et mambalin ali bebley yun eleg mebebbley tep ya nemahhig ni bunget tu niya angetakkut ni gubat.

## 26

<sup>1</sup> Yan eman ni laputun nampatulani Jehoiakim e u-ungngan Josiah di Judah <sup>2</sup> ey kan APU DIOS ni hi-gak ey "Ehneng kad dallin ni Tempol et ehelen mun emin idan tutu-un um-alin mandeyyaw ni melpud kebebbebley di Judah hu e-helen kun hi-gam. Em, mahapul ni e-helen mun hi-gada e endi mu ittalu. <sup>3</sup> Dedngelen da-et na-mu et iwwalleng dadda lawah ni elaw da et eggak ituluy ni peelli hu pemahbah kun hi-gada tep ya idan lawah ni impahding da."

<sup>4</sup> Entanni ey immehel mewan hi APU DIOS ni hi-gak ey kantuy "Ehel muddan tutu-u e kammuy: 'Kan APU DIOS ey: Mahapul ni u-unnuden yuwak et ipahding yudda intutudduk ni hi-gayu. <sup>5</sup> Ey mahapul ni pehding yu hu inhel idan bega-en kun prophet ni intu-dak kun hi-gayu tep ingganah nunya ey eleg yu u-unnuden hu inhel da. <sup>6</sup> Hedin nanengtan manghay kayu ey bahbahen ku eya Tempol henin impahding kun Siloh et emin ida tutu-ud kebebbebley ey ussalen dan idut hu ngadan eyan bebley yu.' "

<sup>7</sup> Inu-unnud ku et ehelen kudda huyyad Tempol et denglen idan padi, yadda prophet niyadda tutu-u. <sup>8</sup> Nem entanni et ginibbuh kun inhel ida huyyan impeamtan APU DIOS ey linapdit da-ak idan tuu et pan-itkuk da e kanday "Lebbeng tun mettey ka tep ya inhel mu! <sup>9</sup> Kele kammuy inhel APU DIOS e mambalin huyyan Tempol ni henin nambalinan ni Siloh? Ey kammu pay ey mebahbah eya bebley et endi mambebley deya?" Et kaemungan da-ak idan tuu.

<sup>10</sup> Dingngel idan ap-apud Judah hu neipahding ey impapuut dan immehep di baley ni patul et umliddadman di Tempol et lumaw idad Baluh ni Eheb. <sup>11</sup> Et kan idan papaddi et yadda prophet idan ap-apu niyadda tutu-uy "Lebbeng tun meippepettey huyyan tuu tep lawah inhel tu meippanggep eyan bebley tayu. Anin ni hi-gayu et dingngel yu inhel tu."

<sup>12</sup> Et umhellak et kangkuy "Hi APU DIOS hu nemaal ni hi-gak ni menghel idan dingngel yun meippanggep eyan Tempol et yan eya bebley. <sup>13</sup> Mahapul ni belliwan yu elaw yu ey eleg yu law pehding ida etan yuka pehpehding et u-unnuden yu hi APU DIOS e Dios yu. Hedin u-unnuden yu huyyan inhel ku ey eleg tu ittuluy ni memahbah ni hi-gayu. <sup>14</sup> Hedin hi-gak, ngenamung kayun pehding yun hi-gak. Anin ipahding yun hi-gak hu kan yun meandeng ni lebbeng tun meippahding. <sup>15</sup> Nem mahapul ni nemnemen yu huyya: Hedin petteyey yuwak, anin endi bahul ku, ey mebehhulan kayun emin anin

idan tutu-u eyad bebley. Tep hi APU DIOS hu nanghel ni hi-gak ni e-helen ku huyyaddan inhel kun hi-gayu.”

<sup>16</sup> Entanni ey kan idan ap-apu niyadda tutu-u idan papadi et yadda prophet ey “Bineal APU DIOS e Dios tayu huyyan tuu, et humman hu, eleg tayu petteya. Hi AP-APU e Dios tayu hu nanghel ni hi-gatun e-helen tudda huyyan inhel tu.”

<sup>17</sup> Entanni ey wadadda hu kamegipappanggulun immehngeng et ehelen daddan tutu-un neamung e kanday <sup>18</sup> “Yan eman ni hi Heseekiah hu patul di Judah ey inhel lan eman ni prophet e hi Mikah e iMoreshet idan tutu-u huyyan impeamtan APU DIOS e Kabaellan tun emin e kantuy ‘Mebabhah ali Jerusalem e Zion et mambalin alin heni payew ni nealedu. Ey metawwey ali eya Tempol et mambalin alin heni muyung.’ <sup>19</sup> Ey kaw pintey lan eman ni patul e hi Heseekiah et yadda tutu-u hi Mikah gapuh nunman ni inhel tu. Eleg! Nantuttuyyu ida kumaddan di liwat da et dayawen da hi APU DIOS. Ey nampehemhemmek idan hi-gatu et eleg ituluy APU DIOS hu planuh tun memabhah ni hi-gada. Yan nunya ey hi-gatsu ngu mengippeellin kebabbahan tayu hedin petteyen tayu hi Jeremiah.”

<sup>20</sup> (Wada la eman hi Uriah e u-ungngan Semaiah e iKiriath Jearim e henin Jeremiah e impeamta tu hu inhel APU DIOS meippanggep ni lawah ni meippahding ni tutu-u eyad bebley. <sup>21</sup> Et yan nangngelan eman ni patul e hi Jehoiakim et yadda sindalu tun nunman ni impeamtan Uriah ey tu-et la pepettey. Nem neamtaan Uriah hu meippanggep ni pehding dan hi-gatu et bumsik di Egypt tep simmakut. <sup>22</sup> Nem intu-dak nan Jehoiakim hi Elnathan e u-ungngan Akbor et yadda edum tud Egypt et da alen hi Uriah. <sup>23</sup> Imbangngad da hi Uriah et ilaw dan Jehoiakim e patul et papetey tu. Et ibheng da annel tud kulung ni katuutuu.)

<sup>24</sup> Binaddangan Ahikam e u-ungngan Saphan hi Jeremiah et eleg papetey idan tutu-u.

## 27

<sup>1</sup> Yan eman ni laputun nampatulana Sedekiah e u-ungngan Josiah di Judah ey inhel APU DIOS ni hi-gak e kantuy <sup>2</sup> Mengapya-ak ni paku et ikketak ni katat et ibanggal ku.

<sup>3</sup> Entanni ey inhel mewana APU DIOS ni hi-gak e e-helen kuddan bineal ni patul di Edom, yad Moab, yad Ammon, yad Tyre, niyad Sidon ni immalidya Jerusalem ni an mekihummanganan nan Sedekiah e patul e kangkuy: <sup>4</sup> “Kan ni AP-APU e Kabaellan tun emin ni Dios idan helag Israel idan patul yu ey: <sup>5</sup> ‘Gapuh ni et-eteng ni kabaellan ku ey lintuk hu puyek, yadda tutu-u niyadda animal et damtutun iddawat kun kumpulmih ni pinhed kun pengidwatan. <sup>6</sup> Yan nunya ey pebeltan kudda bebley yun bega-en ku e hi Nebukadnessar e patul di Babilon. Ey pambalin kudda pay hu animal di muyung ni mansilbin hi-gatu. <sup>7</sup> Mansilbin emin hu tutu-ud kebebbebley ni hi-gatu, ya etan lakin u-ungnga tu niyadda inap-apu tu ingganah medettengan etan tsimpuh ni keapputan ni bebley tu et sakupen idan edum ni patul et mepapgep hu pan-ap-apan tu.

<sup>8</sup> Hedin wada hakey ni bebley winu pan-ap-apan ni eleg mengu-unnud ni hi-gatu, kastiguen ku e peelik hu gubat, bisil niya degeh diman ingganah pebabah kun Nebukadnessar humman ni bebley.

<sup>9</sup> Entan tu deddenggel hu kae-heladdan beken ni makulug ni prophet yu anin ni hipan man-ebbig ni meippahding alin edum ni aggew meippuun di i-innep da winu meippuun di nekihummanganan dan linnawan netey winu meippuun di nengipahdingan da magic. Emin ida ey kanday eleg kayu mansukkuh ni patul di Babilon. <sup>10</sup> Nem itek da. He-ulen dakeyu kumedek ni hi-gada ma-lat mailaw kayu anhan law di naka-iddawwin bebley. Ya kakulugan tu ey hedin u-unnuden yu hu kanda man babahen ku eya bebley yu ey degyunen dakeyun hi-gak ma-lat meendi kayu. <sup>11</sup> Nem yadda etan mansukkuh ni patul di Babilon et mansilbidan hi-gatu ey pannenneng kudadda bebley da et taneman da puyek da. Hi-gak e hi APU DIOS hu nanghel nunya.”

<sup>12</sup> Impidwak ni inhel APU DIOS nan Sedekiah e patul di Judah e kangkuy “Hedin pinhed mun eleg mettey, pansukuh kan patul di Babilon. Pansilbi kan hi-gatu niyadda tutu-u tu. <sup>13</sup> Tep kan APU DIOS ey ‘Hedin eleg mu u-unnuda et eleg ka mansukkuh nan Nebukadnessar e patul di Babilon ey mettey kayuddan tutu-um di gubat, yad bisil niyad degeh.’ Et humman hu, pansukuh kayu kuma ma-lat eleg kayu matey. <sup>14</sup> Entan nisi tu ideddengel ey entan tu u-unnud ida prophet ni kamenghel ni eleg kayu mansukkuh tep he-ulen dakeyun hi-gada. <sup>15</sup> Hi APU DIOS mismuh hu nanghel e eleg tu baalen ida humman ni prophet nem kanday nalpun hi-gatu hu inebig dan itek. Hedin kullugen yudda man degyunen dakeyun hi-gatu eyad bebley anin idan nunman ni prophet et matey kayun emin di pengillawwan dan hi-gayu.”

<sup>16</sup> Kangku mewana idan padi niyadda tutu-u ey “Kan APU DIOS ey ‘Entan tu kulug hu inhel idan prophet yun kanday meibbangngad ida nebalol ni usal ni Tempol tep itek da.

<sup>17</sup> Em, entan tu kulug hu daka e-hela. Pansukuh kayu kumaddan ni patul di Babilon ma-lat tumegu kayu. Tep hedini eleg kayu mansukkuh man mekabbabhah eya bebley.  
<sup>18</sup> Tep gullat ngun makulug ni prophet ida niya makulug ni impeamtak ni hi-gada hu daka ebbiga ey mandasal ida-et ni hi-gak e APU DIOS e Kabaelan tun emin et eggak iebulut ni meillaw di Babilon ida etan natdaan ni nebalol ni usal di Tempol et yad baley nan patul.'

<sup>19-20</sup> Yan eman ni nengal-an nan Nebukadnessar e patul di Babilon nan Jehoiachin e patul di Judah e u-ungngan Jehoiakim niyadda ap-apud Judah niyad Jerusalem ey eleg tu peki-ladda tukud, ya tangkih ni giniling, ya kaliton niyadda edum ni nebalol ni ngunut di Tempol. <sup>21</sup> Dengel yu huyyan inhel APU DIOS e Kabaelan tun emin ni Dios idan helag Israel meippanggep idan nunman ni natdaan ni nebalol ni ngunut di Tempol et yad baley ni patul diman Jerusalem. Kantuy, <sup>22</sup> 'Meillaw di Babilon ida humman ni nebalol ni ngunut ingganah ni pengibbangngadan kuddalli mewan di deya Jerusalem. Hi-gak e Dios hu nanghel nunya.'

## 28

<sup>1</sup> Yan eman ni meikkelliman bulan ni meikka-pat ni toon ni nampatulan Sedekiah ey ya etan prophet e hi Hananiah e u-ungngan Assur di Gibeon ey immehel ni hi-gak di Tempol di hinanggaddan padi niya tutu-u. <sup>2</sup> Kantuy "Kan ni AP-APU e Kabaelan tun emin ni Dios idan helag Israel ey 'Endien kulli hu kabaelan Nebukadnessar e patul di Babilon. <sup>3</sup> Ey yan melebbah ali dewwan toon ey ibangngad kun emin ida nebalol ni ngunut di Tempol ni inlaw tud Babilon. <sup>4</sup> Ey ibbangngad ku hu patul di Judah e hi Jehoiachin e u-ungngan Jehoiakim niya emin iJudah ni neilaw di Babilon. Em, endien kulli kabaelan ni patul di Babilon. Hi-gak e Dios hu nanghel nunya.'

<sup>5</sup> Et kangkun Hananiah di hinggaddan padi niyadda tutu-ud Tempol ey <sup>6</sup> "Tam em, kayyagud ni peteg huttan ni inebig mu! Hehheggeden ku hu pengippahdingan APU DIOS nuntan ni inhel mu! Kayyagud hedini pannenneng tu huttan ni inebig mu et ibangngad tun emin ida ngunut ni Tempol niya emin ni tutu-un neilaw ni balud di Babilon. <sup>7</sup> Nem dengel mu eya e-helen kun hi-gam niyadda eya tutu-u: <sup>8</sup> Yadda eman nemangulun prophet nem hi-gata ey impeamta da e um-ali gubat, ya bisil niya degeh di dakek ni bebley anin di bebley idan et-eteng kabaelan da. <sup>9</sup> Nem ya etan prophet ni kantuy mewedda linggep ey metbal e makulug ni intu-dak APU DIOS hedini um-amnu numan hu inebig tu."

<sup>10</sup> Entanni ey inlan Hananiah etan keyew ni pakun imbanggel ku et hepungen tu. <sup>11</sup> Et kantud hinanggaddan tutu-uy "Kan APU DIOS ey 'Hanneyalli pehding kun memabhah idan pakun imebanggel Nebukadnessar di kebebbebley eyad puyek. Ey pehding ku huyyan dewwan toon.'" Nem neala et hi-yanen ku.

<sup>12</sup> Eleg mabeyag hu nelabah ni nanhepungan Hananiah ni paku ey immehel hi APU DIOS ni hi-gak <sup>13</sup> et kantuy nak e-helen nan Hananiah e kangkuy "Kan APU DIOS ey 'Manut dammutun himpung mu hu keyew ni paku, nem hullulan kun gumekek ni paku.' <sup>14</sup> Hi-gatu e hi APU DIOS ni Kabaelan tun emin ni Dios idan helag Israel ey kantuy 'Gumekek ni paku hu ussalan kud emin ni bebley et mannanneng idan mansilbin nan Nebukadnessar e patul di Babilon. Anin idan animal di muyung ey mansilbiddan hi-gatu.'

<sup>15</sup> Inhel kun Hananiah huyya et kangku mewan ni hi-gatuy "Dengel mu e Hananiah eya e-helen ku! Ya kakulugan tu ey eleg daka baalen APU DIOS ni mengippeamtan pinhed tun peamta. Itek ida muka ebbiebbiga ey daka ngu dama anhan kapekakkullugaddan tutu-u. <sup>16</sup> Et humman hu, hi APU DIOS mismuh hu nanghel e mettey ka. Eleg megibbuh huyyan toon ey mettey ka tep intuttuddum idan tutu-un mangngenghay nan APU DIOS."

<sup>17</sup> Ey tu-wangun netey hi Hananiah eman ni meikkeppitun bulan nunman ni toon.

## 29

### *Nantudek hi Jeremiah idan Jew di Babilon*

<sup>1</sup> Nantudek hi Jeremiah idan padi, yadda prophet, yadda ap-apu niyadda edum ni iJerusalem ni inlaw Nebukadnessar di Babilon et pambalin tuddan balud diman. <sup>2</sup> Yan nunman ey negibbuh ni neilaw di Babilon di Jehoiachin e patul, hi inetu niyadda opisyal di baley tu, yadda ap-apud Judah niyad Jerusalem, yadda nekangngamtan mengapayan kumpulmih niyadda nelaini ni hipan ngunu. <sup>3</sup> Impaelan Jeremiah humman ni tudek nan Elasahe e u-ungngan Saphan et hi Gemariah e u-ungngan Hilkiyah e hi-gada intu-dak Sedekiah e patul di Judah ni umlaw di kad-an Nebukadnessar e patul di Babilon.

<sup>4</sup> Heninnuy hu inhel tud tudek tu: Huyya inhel ni AP-APU e Kabaelan tun emin ni Dios idan helag Israel idan iJerusalem ni in-abulut tun inlaw Nebukadnessar di Babilon et



mambalin idan balud diman: <sup>5</sup> “Pengapya kayun baley yudtan ma-lat wada nehammad ni panha-adan yu ey pantanem kayu ma-lat wada kennen yu. <sup>6</sup> Ey kalehin kayu et mahlag kayu. Iebulut yu daman melehhin ida u-ungnga yu et mahlag ida, tep mahapul ni medakkel kayu. <sup>7</sup> U-unnud yudda huuya ey idasal yu hu panyaggudan niya linggepan ni Babilon e pengipelawwan kun hi-gayu. Tep hedin umyaggud huttan ni bebley ey umyaggud kayu dama.

<sup>8</sup> Hi-gak hu DIOS e Kabaelan tun emin ni Dios idan helag Israel, e-helen kun hi-gayu e entan kaheul ni e-helen idan prophet yu winu hipan menghel e hi-gatu ey prophet. Entan tu kulug hu e-helen da meippanggep ni ini-innep da tep nalpud nemnem dadda humman. <sup>9</sup> Itek hu daka e-e-helan hi-gayu nem kanday nalpun hi-gak ey eggak ida itu-dak ni man-ebbig.” Huttan hu inhel APU DIOS e Kabaelan tun emin.

<sup>10</sup> Huuya kan APU DIOS ni hi-gayu: “Yallin kepappegan ni nepitun toon ni panha-adan yud Babilon ey ippaptek dakeyun hi-gak ey peamnuk hu inhel kun ibbanggad dakeyud bebley yu. <sup>11</sup> Wada planuh kun hi-gayun hi-gak ni ebuh nengamta. Beken ni kebabhahan yu huuyan planuh ku, nem panyaggudan yun edum ni aggew ey humman hu namnamah yu. <sup>12</sup> Dedngelen kulli law hu dasal yu hedin mandasal kayu hi-gak. <sup>13</sup> Ey hedin makulug ni heppulen yuwak ey hemmeken yuwak. <sup>14</sup> Nanna-ud ni hemmeken yuwak et ibangngad dakeyud bebley yu. Emmungen dakeyulli e illapu dakeyuddallid etan idad bebley ni nengiwewitan kun hi-gayu et ibangngad dakeyud bebley yu. Hi-gak e Dios hu nanghel nunya.”

<sup>15</sup> Nem kanyu na-mu ey “Wada intu-dak APU DIOS ni makulug ni prophet mid Babilon.”

<sup>16</sup> Nem dengel yu eya inhel APU DIOS meippanggep etan ni patul ni man-ap-apid nan-ap-apan David niya meippanggep idan natdaan ni eleg mailaw di Babilon. <sup>17</sup> Kan APU DIOS e Kabaelan tun emin ey “Peellik hu gubat, ya bisil niya degeh ni hi-gada et mambalin idan heni nabwel ni fig ni eleg law mabalin ni mekkan. <sup>18</sup> Em, peellik ni hi-gada hu gubat, ya bisil niya degeh. Ey pambalin kun angetakkut hu meippahding ni hi-gadad kebebbebley. Emin alid bebley ni neilawwan da ey mehngang ida gapuh ni meippahding ni hi-gada. Heghegnuden ey pippihulen aliddan tutu-udda tep hi-gada pengi-ang-angan dan neidutan. <sup>19</sup> Hanniman ali meippahding ni hi-gada tep eleg da u-unnuden hu inhel kuddan prophet ni bega-en kun intu-dak ku. Anin ni hi-gayu et eleg yu dama u-unnuden.

<sup>20</sup> Et humman hu, hi-gayun emin ni nalpud Jerusalem ni neilaw di Babilon, dengel yuwak: <sup>21</sup> Hi-gak e AP-APU e Kabaelan tun emin ni Dios idan helag Israel ey heninnuy hu e-helen kun meippanggep di Ahab e u-ungngan Kolaiah nan Sedekiah e u-ungngan Maaseiah ni kaman-ebbig ni itek nem kanday nalpun hi-gak: Pedpap kuddan Nebukadnessar e patul di Babilon et papetey tuddad hinangga yu. <sup>22</sup> Et hi-gayun ijudah ni neilaw ni balud di Babilon, ussalen yullin pan-iddut hu neipahding ni hi-gada. Kanyulli ey ‘Hamban pehding APU DIOS hu heni impahding Nebukadnessar di Sedekiah nan Ahab e giniheb tuddan mategu.’ <sup>23</sup> Humman neiappitan da tep nemahhig liwat da e in-ulig da beken da ahwa ey itek hu inebiebig da nem kanday nalpun hi-gak e hi APU DIOS. Humman idan impahding da ey eleg mei-unnud di pinhed ku. Inamtak ey inang-ang ku impahding da. Hi-gak e AP-APU hu nanghel idan nunya.” <sup>24-25</sup> Inhel APU DIOS e Kabaelan tun emin ni Dios idan helag Israel e nak e-helen nan Semaiah e iNehelam e kangkuy: “Kan APU DIOS ni hi-gam ey: Hi-gam ngu et mantudek ka etan ni padi e hi Sephaniah e u-ungngan Maaseiah, yadda edum tun padi niyadda tutu-ud Jerusalem. <sup>26</sup> Kammun Sephaniah ey ‘Pinili dakan APU DIOS ni mampeddin meihhulun nan Jehoiada et hi-gam law hu eta-gey ni ap-apun mampaptek ni Tempol APU DIOS. Ya pehding mu ey bangkilingim niya banggelim ni gumek ida etan kaman-a-angngaw ni prophet ni hin-abigan da. <sup>27</sup> Ey kele eleg mu ipahding huayan Jeremiah e iAnathot e heni prophet idan tutu-ud? <sup>28</sup> Mahapul ni pesikked mun man-ebbig huttan ni tuu tep impadeteng tudya Babilon hu abig tun kantuy ayepaw hu panha-adan ida kunun tudya. Et humman hu, kayyaggud et ni mengapyaddan baballey da niya mantennem idan kennen da.”

<sup>29</sup> Dinwat Sephaniah humman ni tudek et ibidbid tun Jeremiah. <sup>30</sup> Entanni ey kan APU DIOS nan Jeremiah ey <sup>31</sup> “Pantudek kaddan emin ni balud di Babilon e kammuy: Heninnuy hu inhel APU DIOS meippanggep nan Semaiah e inhelan mu: ‘Hi-gak e DIOS ey kastiguen ku hi Semaiah et yadda helag tu tep eggak itu-dak ni man-ebbig, nem nan-abig e heni prophet et maheul kayu itek tu. <sup>32</sup> Et humman hu, kastiguen ku et meendi helag tu ey eleg tulli ang-angen ida kayyaggud ni pehding kuddan tuuk. Tep sinuttudduan tuddan manggenghay ni hi-gak. Hi-gak e AP-APU hu nanghel nunya.”

### 30

<sup>1-2</sup> Entanni ey immehel mewah ni APU DIOS e Dios idan helag Israel nan Jeremiah et kantuy “Itudek mun emin di liblul ida inhel kun hi-gam <sup>3</sup> tep medetteng ali etan

tsimpuh ni pengibbangngadan kuddan tuuk ni iJerusalem niyadda iJudah di bebley ni indawat kuddan aammed da et yadman pambebleyan dan ingganah. Hi-gak e AP-APU hu nanghel idan nunya.”

<sup>4</sup> Huyya kan APU DIOS meippanggep idan iIsrael niyadda iJudah: <sup>5</sup> “Nakka deddengngela hu nemahhig ni nangih idan iIsrael niyadda iJudah tep nemahhig katteg ni ida kaumtatakut. <sup>6</sup> Ang-ang yu kedi! Kaw dammutun man-ungnga laki? Kele nakka ang-ang-anga lalakkin daka kakkapaa egeh da e henidda biin indegeh tu egeh tun nganganah ni man-ungnga? Ey kele kimmuphat ida? <sup>7</sup> Nemahhig ali panhelheltapan idan tutu-uk. Endilli kei-ingngahan tu humman niya endi an nanhikam ni henin nunman. Nem meihwang idalli!”

<sup>8</sup> Kan APU DIOS e Kabaelan tun emin ey “Yan nunman alin tsimpuh ey bahbahen ku etan kamei-ellig ni pakud buklew da ey e-kalen ku hu heni bangkiling da et eleg ida law mambalin ni himbut ni tutu-ud edum ni bebley. <sup>9</sup> Tep mansilbiddalli law ni hi-gak e AP-APU e Dios da et yalli helag David hu pambalin kullin patul.

<sup>10</sup> Et humman hu, entan takut yun tutu-uk ey entan kedismayah yu, tep dakeyulli ewwiten etan idad bebley ni neilawwan yu anin idan helag yu ma-lat ienamut dakeyu. Et luminggep kayulli law kaya e endilli law mengippetekktu ni hi-gayu. <sup>11</sup> Tep baddangan dakeyun hi-gak et ihwang dakeyu et pekabbahbahen kuddalli bebley ni nengiwehitan kun hi-gayu. Anin ni hanniman ey eleg mabalin ni eleg kayu mekastigu, nem limpiyuh pengastiguk. Hi-gak e hi APU DIOS hu nanghel idan nunya.”

<sup>12</sup> Kan mewan APU DIOS idan tutu-u tuy “Ya liwat yu ey kamei-ellig himmalem ni liput et eleg law meeggahi. <sup>13</sup> Endi mengippatek ni hi-gayu niya endi dammutun pengeggah nuntan ni liput yu ey endi namnamah ni kayu meeggahan. <sup>14</sup> Tep liniwwan dakeyu niya eleg dakeyu law ibbilang idan emin ni nekidagyuman yu. Em, tep nemahhig nengastiguk ni hi-gayu e heni dakeyu liniputan e heni yuwak buhul ni endi hemek tun hi-gayu tep nemahhig liwat yu. <sup>15</sup> Entan panlilih yu meippanggep ni liput yun endi dammutun pengeggah. Henin nuntan nengastiguk ni hi-gayu tep nemahhig liwat yu ey nemahhig kalwah yu.

<sup>16</sup> Nem edum alin aggew ey mebahbah ida nemahbah ni hi-gayu. Ey meillaw idan balud humman idan buhul yud edum ni bebley. Em, emin ida nengipeligligat ni hi-gayu ey meippeligligat ida dama. Ey meibsik ida dama ngunut idan nengibsik ni ngunut yu. <sup>17</sup> Eggahan kulli liput yu et yumaggud kayu anin ni kan idan buhul yuy neiwalleng kayun iZion e endi menengngud ni hi-gayu. Hi-gak e AP-APU hu nanghel idan nunya.”

#### *Ya kan APU DIOS meippanggep idan tutu-u tu*

<sup>18</sup> Kan mewan APU DIOS ey “Hehmeken kuddan emin tutu-uk anin idan pamilyah da et ibbanggad kuddallid bebley da. Ey meiyayyaggud ali hu bebley dan Jerusalem ey mebehwat ali mewan hu baley ni patul etan di neibehwatan tu dedan lan nunman. <sup>19</sup> Et mantetekkuk idalli hu tutu-uk ni mambebley diman gapuh ni pandeyyaw da niya amleng da. Yan nunman alin tsimpuh ey umdakedakkel ida ey meiddeyyaw ida, tep bendisyonan kudda. <sup>20</sup> Pebanggad ku mewan hu et-eteng ni kabaelan da et heni lan nunman ey ihhammad ku bebley da. Nem yadda nengipeligligat ni hi-gada ey kastiguen kudda. <sup>21</sup> Hi-gada metlaing ni tutu-uk hu kelpuan ni man-ap-apun hi-gada e eleg mel pud edum ni bebley. Meihnup alin hi-gak tep eyyagan kulli. Tep kaw hipa hu neala ni immali hedini eleg meeyaggi? Hi-gak e hi APU DIOS hu nanghel idan nunya.”

#### *Ya inhel APU DIOS idan tutu-u tu*

<sup>22</sup> Ibbilang dakeyulli mewan ni tutu-uk ey hi-gak ali mewan hu Dios yu.

<sup>23</sup> Nemahhig hu bunget APU DIOS idan lawah ni tutu-u. Ey ya bunget tu ey heni pewek ni kaumbahbah. <sup>24</sup> Eleg me-kal hu bunget tu ingganah pehding tun emin ida implanuh tu. Edum alin aggew ey meewwatan idallin tutu-u tun emin huyya.

## 31

<sup>1</sup> Kan mewan APU DIOS ey “Medettengan ali tsimpuh ni hi-gak hu Dios idallin emin ni helag Israel ey hi-gada tutu-uk. <sup>2</sup> Ippaptek kudda tutu-uk henin nengipaptekan kudda lan eman ni natdaan ni eleg matey ni aammed dad eleg mebebleyi eman ni daka heppula pan-iyyatuan da. <sup>3</sup> Kangkuddan aammed dan nunman ey ‘Pinpinhed dakeyu dedan ni tutu-uk. Ya impeminhed kun hi-gayu ey kamannananeng ey eleg melumman.’ <sup>4</sup> Baddangan dakeyulli mewan ni hi-gak et gapuh ni amleng yu ey mangganga kayu ey meneyyaw kayu. <sup>5</sup> Mantennem kayulli mewan law ni grapes idad duntug di Samaria ey hi-gayu law mengngan ni lameh da. <sup>6</sup> Medettengan ali tsimpuh ni tekukan idan man-eddug idad duntug di Epraim e kanday ‘Umlaw itsud Duntug e Zion e kad-an APU DIOS e Dios tayu.’”

<sup>7</sup> Kan APU DIOS ey “Pan-a-appheh kayun amleng yu, Israel e kehahhammadan e bebley. Pan-appheh kayun pandaydayaw yu e kanyuy ‘Ihhewang Apu Dios ida natdaan ni tutu-tun helag Israel.’ <sup>8</sup> Illapuk idad bebley di north ey yaddad bebley di gilig ni puyek et amungen kudda. I-anemut kuddan dakel ni tuu, anin idan nangkekulap, yadda nangkepi-day, et yadda bibi-in nampambutsug niyadda ngannganih ni man-ungnga. Em, i-anemut kuddallin emin. <sup>9</sup> Mandasal idalli ey mannengngih idan mangkeibbanggad. Ippanguluk ida et umenamut ida. Iddalan dad gilig idan wangwang niyaddad nandeklan ni keltad et eleg ida meihungbub. Heni-ak ali aman Israel niya henii pengulwan ni u-ungngak hi Epraim.”

<sup>10</sup> Kan APU DIOS ey “Hi-gayun tutu-ud kebebbebley, dengel yuwak et yu peamtaddad edum ni bebley niyadda neidawwin bebley di ba-hil ni baybay eya e-helen ku. Inwahit ku tutu-uk, nem emmungen kuddalli niya eddugan kuddan henin kapan-eddug ni kamampattul ni kalneroh. <sup>11</sup> Ihhehwang kudda etan di bebley ni et-eteng kabaelan tu, <sup>12</sup> et mampengnamut idad Zion ey man-a-appheh ida gapuh ni amleng da. Et bendisyonan kuddan dakel ni pagey, ya kameinnun, ya lanan olibah, ya kalneroh niya baka et eleg ida makulangan ni mahapul da. Mei-ellig idallin leguntan eleg mekullangin danum. <sup>13</sup> Yadda kakat-agun bibi-i ey idalli menattayyaw gapuh ni amleng da, anin idan kakat-agun lalakki niyadda nangkea-amma. Tep ellubyagen kudda ey peamleng kudda et eleg idalli law umlelemyung. <sup>14</sup> Em, mehawwahawwal ali iddawwat kun mahapul idan tutu-uk et dakel ali i-appit dan iddawwat daddan papaddi. Hi-gak e hi APU DIOS hu nanghel nunya.”

<sup>15</sup> Entanni ey immeheh hi APU DIOS ey kantuy “Medngel ali nangih Rachel di Ramah. Nemahhig ali nangih tu e eleg mea-alluk tep neendidda u-ungnga tu.\*

<sup>16</sup> Isiked yun umnangih ey pu-nadi yu lewa yu. Eleg mabalin ni endi silbin nengipenaptekan yuddan u-ungnga yu tep mambangngad idan melpullid edawwin bebley idan buhul yu. <sup>17</sup> Et humman hu wada kayyaggud ni namnamahan yun edum ni aggew tep mambangngad aliddan hi-gayu u-ungnga yu. Hi-gak e hi APU DIOS hu nanghel nunya.” <sup>18</sup> Immeheh mewan hi APU DIOS ey kantuy “Dingngel ku ehel idan kaumlelemyung ni helag Israel. Kanday ‘Heni kami etan ni eleg memansuh ni newang. Nem gapuh ni nemahhig ni nanmansuh mun hi-gami ey netuttuddan kamin mengu-unnud ni hi-gam. Pambangngad dakemin mengu-unnud ni hi-gam e AP-APU e Dios mi et mandaddan kamin mengippahding ni pinhed mu. <sup>19</sup> Immedawwi kamin hi-gam, nem nambangngad kami tep nantuttuyyu kami. Nemahhig lemyung mi niya baing mi gapuh ni impahding min liwat neipalpun keu-ungnga mi.’

<sup>20</sup> Israel, nakappinheh dakan u-ungngak. Anin ni kinastigu daka et nanengtun et-eteng hu neminheh kun hi-gam. Et humman hu, hehmeken dakalli mewan.

<sup>21</sup> Pengapya kayun kalatulah ni panmalka yun keltad ma-lat hanhamak yu hu dillan yun linawwan yu. Pambangngad kayun helag Israel eyad bebley yu. <sup>22</sup> Entan dedan law keidawwin hi-gak. Pengu-unnud kayu e u-ungngak. Tep wada hin-appil ni pehding kulli ma-lat mekidayyum kan hi-gak e Dios mu.”

<sup>23</sup> Kan ni AP-APU e Kabaelan tun emin ni Dios idan helag Israel ey “Yallin pengibbangngadan kuddan tutu-uk di bebley da ey kan idallin tutu-ud Judah ey ‘APU DIOS e wadad duntug di Jerusalem, bendisyonim eya bebley.’ <sup>24</sup> Mambebley idalli tutu-ud kebebbebley di Judah et mampeyyew idalli ey mampattul ni kalneroh edum. <sup>25</sup> Pe-let kuddalli nekapuy ey ellubyagen kuddalli kaumlelemyung.”

<sup>26</sup> Neugippak et umbanggunnak ey na-lettak law.

<sup>27</sup> Kan APU DIOS ey “Medettengan ali tsiempuh ni pedakkel kudda tuu niya animal di deya Judah niyad Israel. <sup>28</sup> Yan nunman ey hinelipat-an kudda et bahbahen kudda ey dinegyun kudda, nem yan nunya ey hellipat-an kudda, ippaptek kudda niya peyaggud kudda.

<sup>29</sup> Et eleg ali law penghel ni tutu-uy ‘Kinan idan aammed da mapeit ni grapes, nem yadda u-ungnga da nealinew.’ † <sup>30</sup> Tep emin hu kamanliwwat ey mettey tep ya liwat ni impahding tu. Henin kan idan tutu-un: ‘Ya etan mengngan ni mapeit hu meellinew.’ ”

<sup>31</sup> Kan APU DIOS ey “Hakey alin aggew ey wadalli baluh ni pekitbalak idan iIsrael niyadda iJudah. <sup>32</sup> Nem beken ni henin nekitbalan kudda lan aammed da eman ni nengipenguluan kun hi-gadan neni-yanan dan Egypt tep eleg da pannananeng ni u-unnuden hu nekitbalan kun hi-gada, et mukun inwalleng kudda, anin ni ida kamei-ellig ni ahwak.

\* **31:15** 31:15 Matthew 2:18 † **31:29** 31:29 Ya keibbellinan tu huuya ey yadda aammed da nambahul, nem yadda u-ungnga da neneklan bahul da.

<sup>33</sup> Heninnuy hu baluh ni pekitbalan kun hi-gada: Ihha-ad kullid puhu da niyad nemnem da hu tugun ku, et humman ali enu-unnuden da. Yallin nunman ni aggew ey hi-gak ali hu Dios da niya hi-gadalli hu tuuk, et ipaptek kudda. † <sup>34</sup> Eleg ali law mahapul ni da tuttudduan edum dan meippanggep ni hi-gak ma-lat amtaen da-ak. Tep emin ali tuu ey amta da-ak ngu dedan, anin ida etan ni tuun eleg meibbillang niyadda etan tuun kamedeyyaw. Ey anin ni nanliwat ida et hehmeken kuddalli et pesinsahan ku liwat da niya liwwanen kulli hu nambahulan da. Hi-gak e hi APU DIOS hu nanghel nunya.” §

<sup>35</sup> Kan mewan APU DIOS ey: “Hi-gak e hi APU DIOS hu nengiha-ad ni aggew di kabunyan ma-lat pumtang ni kawwalwal, ey inha-ad kudda bittuwan niya bulan ni umheyyaw ni hileng. Ey winedak hu dalluyun ni kaumbungu. Ya ngadan ku ey hi APU DIOS e Kabaelan tun emin. <sup>36</sup> Humman idan lintuk ey mannenneng ida e henin pemaptek kudda helag Israel ni imbilang kun tutu-uk e eleg melumman. <sup>37</sup> Eleg mabalin ni lelkuden ni tuu hu kabunyan niya eleg mabalin ni ang-angen ni tuu hu neituunan ni puyek. Henin nunman ni hi-gak e eleg mabalin ni nak iwwalleng ida tuuk, anin lawah impahding da. Hi-gak e hi APU DIOS hu nanghel nunya.”

<sup>38</sup> Kan mewan APU DIOS ey “Medettengan ali tsimpuh ni meiyayyaggud hu Jerusalem e bebley ku meippalpu Hananel e eta-gey ni kapan-eddugi ingganah di Dugun Eheb. <sup>39</sup> Ya pappeg tu ey meippalpu kakelinnugin aggew ingganah di Duntug e Gareb et han manlikweh ni mampellaw di Goah. <sup>40</sup> Emin ida huyya, anin etan ni nandeklan ni kullunggan, ya etan ibbenggan ni dep-ul niyadda etan papayyew di ahpata ni Nedeklan e Kidron ingganah di Eheb e Kebayyu di appit ni kasimmilin aggew ey mei-eng-eng ni hi-gak e hi APU DIOS. Huyyaddan bebley ey mannenneng ni ingganah e eleg law mebahbah.”

## 32

<sup>1</sup> Yan eman ni meikkeppulun toon ni nampatulana Sedekiah di Judah ey yan nunman hu meikkeppulun walun toon ni nampatulana Nebukadnessar di Babilon ey immehel mewan hi APU DIOS ni hi-gak. <sup>2</sup> Yan nunman ey neikelabuttak di dallin ni baley idan guwalyan patul di Jerusalem. Ey yan nunman hu inlian idan sindalun iBabilon ni mengubbat ni Jerusalem. <sup>3</sup> Mukun ingkalebut tuwak nan Sedekiah ey tep nanengtun nakka e-e-hela hu inhel APU DIOS ni kantuy: ‘I-abulut kun sekkupen ni patul ni Babilon huyyan bebley. <sup>4</sup> Ey hi Sedekiah e patul ey eleg mabalin ni umbesik tep meippebeltan ni patul ni Babilon et man-inang-ang ida et manhumangan ida. <sup>5</sup> Meillaw ali hi Sedekiah di Babilon et manha-ad diman et ngenamung ali pehding kun hi-gatun implanuh ku. Anin ni mekigubbat idan iBabilon et eleg damengu mengapput. Hi-gak e Dios hu nanghel nunya.’

<sup>6</sup> Kan Jeremiah ey “Inhel mewan APU DIOS ni hi-gak e kantuy <sup>7</sup> ‘Um-ali hi Hanamel e u-unggan Sallum e agin a-ammed ku et ibga tu e gettangen ku hu puyek tud Anathot e nambebleyan idan helag Benjamin, tep hi-gak hu neka-ihnu ni agitu ey hi-gak hu lebbeng tun memengngulun pengigtangan tun nunman et han tu ilaw di edum.’”

<sup>8</sup> Yan nanghelan APU DIOS ni hi-gak ey immali tu-wangu hi Hanamel di kad-ak di kallabbutan et kantuy “Gatang mu hu payew kud Anathot di bebley idan helag Benjamin tep hi-gam lebbeng tun mengettang nunman.” Yan nunman ey inamtak e makulug ni immehel hi APU DIOS ni hi-gak.

<sup>9</sup> Gintang ku humman ni payew Hanamel e binilang ku bayad tu et idwat kun hi-gatu. Ya bayad nunman ni payew ey hampulut pitun silber. <sup>10</sup> Pinilmaak etan papil ni neitudekan ni gatang nunman ni payew et hannak pepilmaddan tistigu et bilangan ku mewan etan silber ni bayad tu. <sup>11</sup> Inlak ida etan nepilmaan ni papil. Ya etan hakey ey neitudkan ni meippanggep ni gatang meippuun di linteg ey humman hu napketan ey ya etan hakey ey eleg mapketan. <sup>12</sup> Et idwat kun Baruk e u-unggan Neriah e u-unggan Mahseiah di hinanggan agik e hi Hanamel, yadda tistigun nampilma niyadda tutu-ud Judah ni yimmudung diman dallin.

<sup>13</sup> Kangkun Baruk di hinangga dan emin ey <sup>14</sup> “Hi APU DIOS e Kabaelan tun emin ni Dios idan helag Israel ey in-olden tu e ellan mudda huyyan papil e napketan hakey ey eleg hu hakey et iha-ad mu etan di pa-nay et meitludman ma-lat eleg mebahbah. <sup>15</sup> Inhel dedan APU DIOS e Kabaelan tun emin ni Dios idan helag Israel e mangkegettang idalli baballey, papayyew niyadda leguntan netaneman ni grapes.”

<sup>16</sup> Negibbuh ni indawat kun Baruk humman ni papil et mandasallak nan APU DIOS. <sup>17</sup> Kangkud dasal kuy “APU DIOS e Eta-gey ni peteg, lintum nya puyek niya kabunyan

gapuh ni et-eteng ni kabaelan mu. Endi neligat ni hi-gam tep kabaelan mun emin.<sup>18</sup> Impeang-ang mu hu eleg melumman ni neminhd mudda kalibulibun tuu, nem muka kastigua tep ya liwat ni aammed da. Hi-gam, APU DIOS, eta-gey ni peteg saad mu niya Kabaelan tun emin.<sup>19</sup> Nelaing ka ey kayyaggud emin hu planuh mu ey muka pehdng hu kamengippetnga. Muka ang-ang-angan emin hu kapehdng ni tutu-u et idwat mu gunden da meippuun di daka pehdng.<sup>20</sup> Ya eman lan nebayay ey impahding muddad Egypt hu kamengippetngan eleg kabaelan ni tuu. Ingganah nunya ey nanengtun mudda kaippahding hu kamengippetngadyad Israel niyad edum ni bebley et mandingngel kad kebbebley.

<sup>21</sup> Gapuh ni et-eteng ni kabaelan mu ey impahding mu hu kamengippetngan nengipetakut idan buhul ni aammed mi. Et ipengulum idan neni-yan ni Egypt.<sup>22</sup> Indawat mun hi-gada eya kayyaggud ni bebley e mateba hu kameitnem e humman dedan hu hinammad mun inhel eman ida lan aammed da.<sup>23</sup> Nem yan inlian da eyad bebley et mambbley ida ey eleg da u-unnuden hu tugun mu niyadda intuttuddum ey eleg da ipahding ida pinhd mun pehdng da. Et paelim ida law emin huuyan memabhah ni hi-gada.

<sup>24</sup> Makulug ni kameippenahding ida inhel mu. Et deh e iyyadyadda iBabilon e daka pan-ihha-ad dellanen dan menggep eyan bebley mi. Nanna-ud ni apputen dakemi tep ya negubatan mi ey tep nebisil kami niya gapuh ni degeh.<sup>25</sup> Huyya anhan mahmahak ni hi-gam: APU DIOS e Eta-gey ni peteg, kele inamtam dedangngu e sekkupen idan iBabilon eya bebley ey mu inhel ni hi-gak e gettangen ku humman ni payew ey beyyadan ku hu ustuh di hinanggaddan tistigu ey pilmaan da?"

<sup>26</sup> Entanni ey kan APU DIOS ni hi-gak ey<sup>27</sup> "Hi-gak e hi APU DIOS hu Dios ni tutu-u eyad puyek. Endi neligat ni hi-gak.<sup>28</sup> Iddawat kun Nebukadnessar e patul ni Babilon niyadda sindalu tu eya bebley ma-lat sakupen da<sup>29</sup> et legaben da. Et magiheb ida baballoy idan iJudah et ya iIsrael gapuh ni nengippebungngetan dan hi-gak ni nan-appitan dan kagihheba niya bangbanglu nan Baal di atep ni baballoy da, ey tep immiduyag idan meinum ni in-appit daddan edum ni dios da.<sup>30</sup> Neipalpu dedan eman ni keu-ungnga da, ey endi edum ni impenahding da hedid beken ni ya lawah ni kamengippebungnget ni hi-gak.<sup>31</sup> Impabunget da-ak ni hi-gada neipalpu eman ni newadaan eyan bebley ingganah nunya, et humman gaputun mahapul ni bahbaha ku<sup>32</sup> tep ya liwat idan iIsrael, iJudah ey iJerusalem, yadda patul da, yadda aap-apu da, yadda papaddi da niyadda prophet da.<sup>33</sup> Inwalleng da-ak ni hi-gada. Anin ni tennuttudduan kudda et eleg da dedngela tep eleg da pinhd ni metuttudduan.<sup>34</sup> Hinibit da mewah ku Tempol ku tep inha-ad dad daka pandeyyawin hi-gak etan kamengippebungnget ni kinapya dan dios da.<sup>35</sup> Ey ida nengapyan pan-appitan dan Baal di Nedeklan e Hinnom e daka pengi-appisin u-ungnga dan lalakki niya bibi-i etan ni dios dan hi Molek. Eggak mandalen idan mengippahding nunman ey endi pay di nemnem kun da pehdng humman ni panliwwatan."

<sup>36</sup> Kan ni AP-APU e Dios idan helag Israel ni hi-gak ey "Jeremiah, kammuy gapuh ni gubat, bisil niya degeh ey apputen ni patul ni Babilon hu tutu-ud bebley yu. Nem huuya e-helen kun hi-gam:<sup>37</sup> Emmungen kuddalli tutu-uk ni inwahit kud kebbebley et ibangngad kuddalli eyad bebley da et luminggep ida e endi law lawah ni meippahding ni hi-gada. Inwahit kudda la tep nemahhig bungket kun hi-gada.<sup>38</sup> Hi-gak ali law Dios da ey hi-gada tuuk.<sup>39</sup> Peanhan kullid nemnem dan mandeyyaw ni hi-gak ni ingganah et panyaggudan da niya panyaggudan idallin u-ungnga dan edum ni aggew.

<sup>40</sup> Pannananeng ku hu nekitbalan kun hi-gada ey eggak issiked ni mengippahding ni panyaggudan da. Ey weddaen kulli mewah di nemnem da hu nehammad ni pengi-unnud dan hi-gak et eleg da-ak iwalleng ni hi-gada.<sup>41</sup> Nakka um-amleng ni mengippahding ni panyaggudan da ey pannenneng kuddan mambbley di deya.<sup>42</sup> Manu tep in-abulut kun meippahding hu panliggatan da, nem ippahding kulli mewah hu panyaggudan da e humman hu hinammad kun inhel ni hi-gada.

<sup>43</sup> Ey anin ni kan idan tutu-uy 'Endi law mambbley deya ey endi law animal ni manha-ad deya tep sinekup ni iBabilon.' nem megettang ali mewah puyek eyad bebley.<sup>44</sup> Meiwwa-hi hu papayew di silber ey mepilmaan, memalkaan niya metistiguan hu panggettangan ni puyek di nambebleyan idan helag Benjamin, yaddad bebley ni neihnap di Jerusalem, yaddad bebley di Judah, yaddad bebley di hengeg ni duntug di appit ni kakelinnugin aggew niyaddad bebley di Negeb, tep pebangngad ku kakinedangyan eyan bebley. Hi-gak e Dios hu nanghel nunya."

## 33

<sup>1</sup> Yan eman ni nanengtun wada-ak di kallabbuttan di dallin ni baley ni guwalya ey immehel mewan hi APU DIOS ni hi-gak. <sup>2</sup> Hi-gatu e hi APU DIOS hu nanletu eyan puyek niya kabunyan e kantuy <sup>3</sup> "Pandasal kan hi-gak et humangen kuddan et ehelen kun hi-gam hu kamengippetnga niya kayyaggud ni peteg ni eleg mu amtan nunman. <sup>4</sup> Hi-gak e hi APU DIOS e Dios idan helag Israel ey kangkuy gapuh ni penggepan niya pengubbatan idan iBabilon ni Jerusalem ey mebabah idalli baballey diman anin ya etan baley ni patul di Judah. <sup>5</sup> Hehgepen idallin iBabilon huyyan bebley et mapnun annel ni nangketey ni tutu-u tep nanna-ud ni iwwalleng ku et bahbahen ku gapuh ni nemahhig ni bunget ku tep lawah idan peteg hu bimblebey.

<sup>6</sup> Nem medettengan ali tsimpuh ni peyaggud ku Jerusalem et pelinggep ku ey pekeddangan kudda tutu-uk. <sup>7</sup> Ibbanggad kudda iJudah niya iIsrael e illelpuk idad bebley ni nambalanan dan balud. Ey peyaggud ku huyyan bebley da et heni mewan lan nunman. <sup>8</sup> Kamei-ellig ni ullahan kun emin hu liwat da, ey liwwanen ku hu ngehay dan hi-gak. <sup>9</sup> Et um-amlenggak ey meiddeyyawwak di kebebbebley eyad puyek gapuh eyan bebley di Jerusalem. Ey yadda tutu-ud kebebbebley eyad puyek ey metngaddan peteg ni pengngelan da meippanggep idan impahding kun panyaggudan eyan bebley e Jerusalem niya gapuh ni kinedangan ni indawat kuddan bebley."

<sup>10</sup> Kan APU DIOS ey "Kan idan tutu-uy nebahbah eya bebley da et heni eleg mebebleyi e endi kamanha-ad ni tutu-u niya animal. Ey neiptek numan humman ni inhel dan endin hekey hu tutu-u niya animal idad bebley di Judah ey yadda keltad di Jerusalem, nem medettengan ali mewan tsimpuh ni medngel idallid bebley <sup>11</sup> hu tekuk ni tutu-u tep ya amleng da. Ey medngel ali mewan hu ngaladdan kaman-an-anlan mangkasal niya a-appah idan tutu-un mengi-lin i-appit dan hi-gak eyad Tempol gapuh ni pansalamatan da. Kandalliy 'Pansalamat itsun APU DIOS e Kabaelan tun emin tep kayyaggud ey kamanneng hu impeminh tu.' Em, pekeddangan kulli mewan eya bebley et heni mewan lan nunman. Hi-gak e AP-APU hu nanghel idan nunya."

<sup>12</sup> Kan APU DIOS e Kabaelan tun emin ey "Ma-nu tep endi tutu-u niya animal nem meweddalli mewan ida kamampattul ni kalneroh eyad bebley. <sup>13</sup> Em, pambillangen idallin kamampattul hu kalneroh dadda duntuduntug ni bebley, yadda hengeg ni duntug, yadda appit ni south ni Judah di nambebleyan idan helag Benjamin, yadda bebley ni neihnpud di Jerusalem niyaddad edum ni bebley di Judah. Hi-gak e Dios hu nanghel nunya."

<sup>14</sup> Kan APU DIOS ey "Medettengan ali tsimpuh ni peamnuk idalli etan hinammad kun inhel idan iIsrael niya iJudah. <sup>15</sup> Ey puttuken kulli hakey ni helag David ni mampatul et limpiyuh ey meandeng hu pehding tullin man-ap-apu eyad bebley. <sup>16</sup> Yan nunman ali ey meihwang ida iJudah niyadda iJerusalem et melinggep idalli e endi lawah ni meippahding ni hi-gada. Et yalli panggeddan dan bebley da ey 'Hi APU DIOS hu mengihwang ni hi-gami.' <sup>17</sup> Hi-gak e hi APU DIOS ey hammaden kun e-helen e ya helag David hu mampatul ni ingganah di Israel. <sup>18</sup> Ey wadan ingganah hu padin helag Levi ni mansilbin mengi-appit ni kagihheba, ya pagey et yadda edum ni kamei-appit ni hi-gak."

<sup>19</sup> Entanni ey immehel mewan hi APU DIOS ni hi-gak et kantuy <sup>20</sup> "Nekitballak ni kawwalwal niya hileng ma-lat mewa-wa ey mehilling etan ni nagtud ni tsimpuh. Ey nanna-ud ni um-amnu humman. <sup>21</sup> Hanniman mewan e nanna-ud ni um-amnu hu nekitbalan kun David e yadda helag tu hu mampatul ni ingganah niya um-amnu hu nekitbalan kuddan helag Levi e hi-gadan ingganah hu mampeddin mansilbin hi-gak. <sup>22</sup> Pedakkel kulli helag David e bega-en ku ey pedakkel ku dama helag Levi ni mansilbin hi-gak et endilli pakebilang ni hi-gada tep henilli kadinakkel idan bittuwen di kabunyan ey heniddallin kadinakkel ni palnah di gilig ni baybay."

<sup>23</sup> Kan mewan APU DIOS ni hi-gak ey <sup>24</sup> "Kaw dingngel mu kae-ehheladdan tutu-un kanday pinilik ida iIsrael et ya iJudah ni tuuk nem inwalleng kudda? Humman gaputun dadda kaheghegnudadda tutu-uk e eleg dadda law ibbilang ni hambebleyan. <sup>25</sup> Nem hi-gak e Dios ey kangkuy 'Eggak iwalleng ida tuuk. Ey eggak belliwi elaw ni kawwalwal niya hileng et ya elaw ni puyek niya kabunyan. <sup>26</sup> Hanniman dama e pannenneng ku hu nekitbalan kun hi-gadan helag Jacob. Ey eggak ida iwwalleng hu helag Abraham, hi Isaac et hi Jacob niya eggak kekyaten hu impakulug kun yalli helag David e bega-en ku hu mampatul ni hi-gadan ingganah. Hehmeken kuddalli et ibbanggad kuddallid bebley da.' "

## 34

<sup>1</sup> Yan kapampengubbasin Nebukadnessar ni Jerusalem et yadda neihnpud ni bebley e hi-gadaddan sindalu tu et ya sindaluddan bebley ni sinekup tu ey immehel mewan hi

APU DIOS ni hi-gak <sup>2</sup> et kantuy “Ehel mun Sedekiah e patul di Judah e kammuy: Kan APU DIOS e Dios idan helag Israel ey ‘Pebeltan ku eya bebley etan ni patul ni Babilon et giheben tu. <sup>3</sup> Ey eleg mabalin ni ibbebsikan mu, Sedekiah tep medpap ka et alen dakan hi-gatu et man-innang-ang kayu ey manhummangan kayu. Ey meillaw kad Babilon.

<sup>4</sup> Nem dengel mu e Sedekiah eya e-helen kun hi-gam. Eleg ka mettey di gubat. <sup>5</sup> Melinggep ketteyyan mu ey gihheben idallin tutu-um hu bangbanglun insensoh ni penginemneman dan hi-gam, henin impahding dadda lan aammed mu. Umlelemyung idallin ketteyyan mu e kanday: Netey katteg eya patul mi!’ Hi-gak e DIOS hu nanghel nunya.”

<sup>6</sup> Et nak ehelen nan Sedekiah e patul humman ni inhel APU DIOS. <sup>7</sup> Yan nunman alin tsimpuh ey kapanggubbataddan sindalun patul ni Babilon hu Jerusalem, ya Lakis niya Aseka e humman ida natdaan ni neluhud ni bebley di Judah.

<sup>8</sup> Entanni ey inhummangan di Sedekiah e patul et yadda iJerusalem e ibbukyat dadda <sup>9</sup> edum dan helag Israel ni himbut dan lalaki niya bibi-i et endin hi-gada mengihhimit ni edum dan helag Israel. <sup>10</sup> Simbal idan tutu-u humman ni olden ni patul e hi Sedekiah et ibukyat dadda himbut da. Ey simbal da mewan e eleg da law panhimit hu edum dan helag Israel. <sup>11</sup> Nem entanni ey nantuttuyyudda et bangngaden dadda humman ni himbut da et piliten daddan mambalin mewan ni himbut.

<sup>12</sup> Immehel mewan hi APU DIOS <sup>13</sup> ni hi-gak et kantuy e-helen kuddan tutu-u huyyan inhel tu “Hi-gak e AP-APU e Dios idan helag Israel ey nekitballak ida lan aammed yu eman ni pengipengulan kun hi-gadan neni-yanan dan Egypt et mepappeg neihibutan dadman. Kangkun hi-gaday: <sup>14</sup> Hedin nelabah enem ni toon ni nansilbian etan ni himbut yu ey ibbukyat yuddan meikkeppitun toon et beken yudda law ni himbut. Nem eleg u-unnuden ida lan aammed yu humman ni intugun kun hi-gada. <sup>15</sup> Ang-ang yu kedi, pigan ebuhan ni aggew nelabah ey nantuttuyyu kayu et eleg yuwak peamleng. Simbal yu emin e ibbukyat yudda himbut yu ey insapatah yu humman di Tempol kun yuka pandeyyawin hi-gak. <sup>16</sup> Nem nantuttuyyu kayu et eleg yuwak lispituhen et bangngaden yudda himbut yun imbukyat yu et piliten yuddan mambalin mewan ni himbut yu, anin pinhed dan peteg ni meibbukyat.

<sup>17</sup> Et yan nunya ey kangkuy eleg yuwak u-unnuden, tep eleg yudda ibukyat etan ida edum yun helag Israel ni himbut yu. Et humman hu, ya pehding kun hi-gayu ey kamei-ellig ni ibbukyat dakeyu et liblih kayun mettey gapuh ni gubat, ya bisil niya degeh. Ey mambalin kayun angebe-hel idan tutu-ud kebebbebley tep ya pehding kun hi-gayu. <sup>18-19</sup> Em tep eleg yu peamnun pehding ida inhel yun pehding yu, meippuun di nantetebbalan tayu. Humman ey nantetebbalan tayuddan aap-apud Judah et yad Jerusalem, yadda opisyal di baley nan patul, yadda papaddi, et keklengen yu impah ni baka et pi-angen yu. Et mandalan kayud nambattan an idan nunman ni pengippeang-ang yu e ipahding yu humman ni insapatah yu. Nem gapu tep eleg yu ipahding hu insapatah yu ey pehding kun hi-gayu hu henin neipahding nunman ni impah ni baka. <sup>20</sup> Em, pebeltan dakeyun hi-gak idan buhul yu et pateyen dakeyu. Et kanen idallin animal di muyung et yadda sisit hu annel yu. <sup>21</sup> Pebeltan kulli hu patul yu e hi Sedekiah ey yadda opisyal tuddan sindalun patul ni Babilon ni neminhed ni memettey ni hi-gada. Insiked dan nunyan mengubbat ni hi-gayu, <sup>22</sup> nem eyyagan kudalli mewan et gubaten da bebley yun Jerusalem et sakupen da et giheben da. Nanna-ud ni bahbahen kun emin hu bebley di Judah et endilli mambebley diman. Hi-gak e hi APU DIOS hu nanghel idan nunya.”

## 35

<sup>1</sup> Yan nampatuln Jehoiakim e u-ungngan Josiah di Judah ey immehel hi APU DIOS ni hi-gak et kantuy <sup>2</sup> “Elaw kad kad-an idan helag Rekab et ka makihummangan ni hi-gada ey ineyagan muddad hakey ni kuwaltuh di Tempol et idwatan muddan meinnum.”

<sup>3</sup> Et nak ang-angen hi Jaasaniah e u-ungngan Jeremiah e u-ungngan Habassiniah et ayagan ku anin idan agitu et yadda u-ungnga tu, et hi-gada mengi-ehng emin idan familyah Rekab, et ikuyug kuddad <sup>4</sup> Tempol. Impahgep kuddad kuwaltuh idan u-ungngan etan ni prophet e hi Hanan e u-ungngan Igdaliah. Huyyan kuwaltuh ey wadad ahpat ni kuwaltuh ni u-ungngan Sallum e hi Maaseiah e opisyal ni kamampaptek ni Tempol ey neihnpud di kuwaltuh idan edum ni opisyal.

<sup>5</sup> Indaddanan kudda helag Rekab ni kameinnum e hina-adan ku basuh da et iha-ad kud hinangga da et kangkun hi-gaday “Adyah meinnum, inum kayu.” <sup>6</sup> Nem kanday “Eleg kami um-inum ni kameinnum tep ya la eman ammed mi e hi Jonadab e u-ungngan Rekab ey inhel tun hi-gami et yadda helag mi e eleg kami um-inum ni kameinnum, <sup>7</sup> eleg kami mengapayan baley, eleg kami mampeyyew ey eleg kami mantennem ni

kaumlameh ni keyew. Ey inhel tu e manha-ad kamid kampun neatepan ni tulдах et mannanang kamin mekibbebley eyad bebley ni nekibebleyan mi. <sup>8</sup> Inu-unnud min emin hu intugun eman lan ammed min hi Jonadab ni hi-gami, et humman hu gaputun hi-gami et yadda ahwa mi, yadda u-ungnga min lalakki niyadda bibi-i ey eleg kami uminum ni meinnum, <sup>9</sup> ey eleg kami mengapyan nehammad ni baley ni panha-adan mi, eleg kami mampeyyew ey endi legunta mi. <sup>10</sup> Neka-u-unnud min emin hu intugun eman lan ammed mi e hi Jonadab. <sup>11</sup> Nem yan eman ni nengubatan nan Nebukadnessar eyan bebley ey immali kamidya Jerusalem ma-lat ibsikan midda sindalun iBabilon niyadda iSyria. Et makibebley kami law di deya.”

<sup>12-13</sup> Entanni ey inhel APU DIOS e Kabaelan tun emin ni Dios idan helag Israel ni hi-gak e umlawwak et nak ehelen idan iJudah niya iJerusalem e kangkuy “Kan APU DIOS ey ‘Hi-gak e Dios ey mahmahan kun hi-gayu hedin hipa gaputu et eleg yu u-unnuda nakka ittugun ni hi-gayu? <sup>14</sup> Ang-ang yudda kedi ni-ngangu helag Jonadab e daka paka-u-unnuda intugun lan eman ni ammed da et eleg ida uminuunum ni meinnum ingganah nunya. Ey hedin ngun hi-gayu man e-eggel ni inhelan dakayu nem nanengtun eleg yuwak u-unnuda. <sup>15</sup> Intenu-dak kudda bega-en kun prophet et ehelen dan hi-gayun issiked yun mengippahding ni lawah et ya kayyagud pedhing yu. Ey inhel dan hi-gayu e eleg yu deyyawa ey eleg kayu mansilbiddan edum ni dios ma-lat mannanang kayun mambebley eyad bebley ni indawat kun hi-gayu niyadda aammed yu, nem eleg yu u-unnuda ey eleg yu hengnguda hu intugun ku. <sup>16</sup> Inu-unnud idan helag Jonadab hu intugun la eman ni ammed dan hi-gada, nem hedin hi-gayu ngu man eleg yuwak u-unnuda.

<sup>17</sup> Et humman hu, yan nunya ey hi-gak e hi APU DIOS e Kabaelan tun emin ni Dios idan helag Israel ey peellik ni hi-gayun iJudah niya iJerusalem hu inhel kun memahbah ni hi-gayu, tep eleg yu u-unnuda hu nakka e-helan hi-gayu niya eleg kayu umhumang hedin imnehellak ni hi-gayu.’ ”

<sup>18</sup> Et kan Jeremiah idan helag Rekab ey “Kan APU DIOS e Kabaelan tun emin ni Dios idan helag Israel ni hi-gayu e ‘Inu-unnud yu intugun la eman ni ammed yu e hi Jonadab et ipahding yun emin hu inhel tun hi-gayu, <sup>19</sup> et humman hu, hi-gak e hi APU DIOS e Kabaelan tun emin ni Dios idan helag Israel ey hammadan kun e-helen e wadan ingganah hu mansilbin hi-gak ni lakin helag Jonadab e u-ungngan Rekab.’ ”

## 36

<sup>1</sup> Yan eman ni meikka-pat ni toon ni nampatulан Jehoiakim e u-ungngan Josiah di Judah ey kan APU DIOS ni hi-gak ey: <sup>2</sup> “Ala kan pantuddekan mu et itudek mun emin ida inhel kun hi-gam meippanggep ni Israel niya Judah et ya emin ni bebley, meipalpu eman ni nengilepuan kun imnehel ni hi-gam eman ni nampatulан Josiah ingganah nunya. <sup>3</sup> Et hedin et anhan dedngelen da hu inhel kun peellik hu nemahhig ni ligat ni pemahbah kun hi-gada et mantuttuyudda et issiked dan mengippenahding ni lawah et liwwan ku hu liwat da.”

<sup>4</sup> Ineyagan ku hi Baruk e u-ungngan Neriah et ehelen kun hi-gatu hu inhel APU DIOS ni hi-gak ey pan-ittudek tu. <sup>5</sup> Kangkun hi-gatuy “Eggak law mabalin ni umlaw di Tempol <sup>6</sup> et humman hu, mahapul ni umlaw kadman etan ni aggew ni kapantetpeli et ibidbid muddan tutu-u hu inhel APU DIOS ni hi-gak ni impatudek kun hi-gam. Mu bidbid idan emin ni tutu-u, anin idan nalpud kebbebley di Judah. <sup>7</sup> Et hedin et anhan dedngelen da et mandasal idan APU DIOS et iwwalleng da lawah ni elaw da. Tep nemahhig bunget APU DIOS ni hi-gada et anggetakkut hu inhel tun pedhing tun hi-gada.”

<sup>8</sup> Inu-unnud Baruk hu inhel kun pedhing tu et tu bidbiden di Tempol etan inhel APU DIOS et dengelen idan tutu-u. <sup>9</sup> Impahding tu huyya eman ni aggew ni nantepelan idan tutu-u eman ni meikkahyam ni bulan ni meikkelliman toon ni nampatulан Jehoiakim di Judah. Immalin nunman emin ida tutu-un nalpud kebbebley di Judah et makiemung idaddan tutu-ud Jerusalem. <sup>10</sup> Ya nengibidbidan Baruk idan tutu-un emin etan idan inhel kun neitudek ey yad kuwaltuh nan Gemariah e u-ungngan Saphan. Humman ni kuwaltuh ey wadad ahpat ni dallin ni Tempol e neihnup etan di Baluh ni Eheb e kapanhuhummangani ey kapengippenuhin diklamuh.

<sup>11</sup> Dingngel Mikaiah e u-ungngan Gemariah ey inap-apun Saphan humman ni ehel APU DIOS ni binidbid nan Baruk <sup>12</sup> et lumaw di kuwaltuh ni sekretarih di baley ni patul. Ida kamammimiting diman etan ida opisyal e hi Elishama e sekretarih ni korteh, hi Delaiah e u-ungngan Semaiah, hi Elnathan e u-ungnga Akbor, hi Gemariah e u-ungngan Saphan, hi Sedekiah e u-ungngan Hananiah et yadda edum ni opisyal ni wadadman, <sup>13</sup> et idaddatteng tun emin ni hi-gada hu dingngel tun imbidbid Baruk idan tutu-u. <sup>14</sup> Entanni



et itu-dak idan opisyal hi Jehudi e u-ungngan Nethaniah, e u-ungngan Selemiah, e u-ungngan Kushi et ehelen tun Baruk e illaw tun hi-gada humman ni imbidbid tudan tutu-u, et u-unnuden Baruk et ilaw tu. <sup>15</sup> Ey kandan hi-gatuy "Yudung ka et ibidbid mun hi-gami." Et bidbiden Baruk.

<sup>16</sup> Negibbuh ni binidbid Baruk ey simmakut ida et ida kamanhintetkel et kandan hi-gatuy "Mahapul ni peamta ni huyyan nan patul." <sup>17</sup> Kandan hi-gatuy "Hipa impahding mun nengituedeq emin nunya? Kaw kapan-e-helan Jeremia 36 ey muka pan-ittudek?" <sup>18</sup> Kan Baruk ey "Em, tuka pan-e-hela ey nakka pan-ittudek e inusal ku tinta."

<sup>19</sup> Et kandan hi-gatuy "Mahapul ni kayu mantellun dewwan Jeremia 36, ey entan tu peam-aman hipan tuu hu pantelluan yu." <sup>20</sup> Inha-ad idan opisyal humman ni papel di kuwaltuh Elishama e sekretarih ni korteh et lumaw idad kad-an ni patul et ehelen dan emin ni hi-gatu meippanggep nunman.

<sup>21</sup> Entanni ey intu-dak etan ni patul hi Jehudi ni an mengellan nunman ni papil et tu alen di kuwaltuh nan Elishamah et ibidbid tu etan ni patul et yadda opisyal tun kaman-eh-ehngeng di kad-an tu. <sup>22</sup> Yan nunman ey yimmudung etan patul di hinangan kapan-eppuyid tuka panha-adi hedini tsihpun ni ketel. <sup>23</sup> Et hedini binidbid Jehudi hu pigan linya, kagedgedan etan ni patul ni imheng tud apuy. Hanniman impahding tu ingganah negiheb emin humman ni papil. <sup>24</sup> Ya etan patul et yadda opisyal ni nangngel idan nunman ey eleg ida tumekut ey eleg ida lumemyung. <sup>25</sup> Inhelan di Elnathan, hi Delaiah et hi Gemariah etan patul ma-lat eleg tu itungu etan papil nem eleg tu hanguden hu inhel da.

<sup>26</sup> Minandal tu kumedek etan u-ungngatu e hi Jerahmeel et yadda edum tu e hi Seraiah e u-ungngan Asriel et hi Selemiah e u-ungngan Abdeel ni an mempap ni hi-gamin dewwan Baruk e sekretarih ku, nem intalu dakemin APU DIOS.

<sup>27</sup> Yan nengiheban etan ni patul e hi Jehoiakim etan ni papil ni neituedeqan ni impatudek kun Baruk ey kan APU DIOS ni hi-gak ey <sup>28</sup> "Ala kan hakey ni papil et ipidwam ni petudek humman ni nemangulun impatudek mun intungun etan ni patul e hi Jehoiakim. <sup>29</sup> Ey ehel mun hi-gatu e kammuy: Kan APU DIOS ey 'Intungum etan papil tep neituedeqan diman e um-ali etan ni patul ni Babilon et bahbahen tu eya bebley ey petteyen tudda bimbebley niyadda animal da. <sup>30</sup> Yan nunya ey e-helen kun hi-gam e Jehoiakim e endilli law helag mun mampatul di nan-ap-apuan David. Ey meibheng ali annel mu et mepeppetangan ni kawwalwal ey metetengninan ni hileng. <sup>31</sup> Tep kastiguen daka anin idan helag mu niya opisyal mu tep ya liwat yu. Peellik ni hi-gayuddan iJerusalem niya iJudah hu inhel kun ligat ni pengastiguk ni hi-gayu tep inhelan dakeyu nem eleg yu u-unnuden.' "

<sup>32</sup> Et umla-ak mewan ni hakey ni papil et idwat kun Baruk e u-ungngan Neriah et ipidwak mewan ni impatudek ni hi-gatu emin etan nemangulun intungun etan ni patul. Nem induman ku pay hu impatudek ku.

## 37

<sup>1</sup> Yan nunman ey pinutuk Nebukadnessar e patul ni Babilon hi Sedekiah e u-ungngan Josiah ni meihullul nan Jehoiachin e u-ungngan Jehoiakim ni mampatul di Judah. <sup>2</sup> Hi Sedekiah, yadda opisyal tu niyadda tutu-u ey eleg da dama hanguden hu inhel kun impeamtan APU DIOS ni hi-gak.

<sup>3</sup> Intu-dak Sedekiah hi Jehukal e u-ungngan Selemiah et ya etan padin hi Sephaniah e u-ungngan Maaseriah ni mengibgan hi-gak e iddasal kun AP-APU e Dios mi hu panyaggudan ni bebley mi. <sup>4</sup> Eleggak ni maikelabut ni nunman et dammutun umlawwak di pinhed kun lawwan.

<sup>5</sup> Ey yan nunman ey kapanggubbataddan iBabilon hu Jerusalem. Nem entanni ey dingngel dan kamengellidda sindalun iEgypt ni mekiggubbat et hi-yanen da Jerusalem. <sup>6-7</sup> Entanni ey inhel ni AP-APU e Dios idan helag Israel ni hi-gak e e-helen kun Sedekiah huyya: "Ida kamengelli hu sindalun iEgypt ni umbaddang ni hi-gam, nem mambangngad idad bebley da. <sup>8</sup> Et um-aliddalli mewan hu iBabilon ni mengubbek eyan bebley et sekkupen da et gihheben da. <sup>9-10</sup> Peamtak ni hi-gayu et eleg kayu maheul ni mannemnem e eleg ida mambangngad hu iBabilon, tep nanna-ud ni mambangngad ida. Anin hedini kantu et apputen yuddan emin hu sindalun iBabilon et ebuh ida neliputan ni metdaan ni mambakbaktad di kampu da et umbangun ida et giheben da eya bebley. Hi-gak e Dios hu nanghel nunya."

<sup>11</sup> Yan nengisikedan idan iBabilon ni mengubbat ni Jerusalem tep kamengellidda sindalun iEgypt <sup>12</sup> ey hini-yan ku hu Jerusalem et lumawwak di nambebleyan idan helag Benjamin et nak ang-angen etan puyek ni gintang ku. <sup>13</sup> Nem dimmatengngak di Eheb e

Benjamin ey dimpap da-ak etan guwalya e hi Irijah e u-ungngan Selemiah e u-ungngan Hananiah. Et kantun hi-gak ey "Inamtak e ka mei-dum idan iBabilon!"

<sup>14</sup> Nem hinumang ku e kangkuy "Eleg! Eggak an mei-dum ni hi-gada!" Nem eleg tuwak kullugan Irijah. Et baluden tuwak kumedek et ilaw tuwak idan opisyal. <sup>15</sup> Ey nemahhig bunget dan hi-gak et pampabeig da-ak et han da-ak ikelabut di baley Jonathan e sekretarih ni korteh tep impambalin dan kallabbutan hu baley tun nunman ni tsimpuh. <sup>16</sup> Da-ak ingkalebut etan di kinapya dad dallem ni puyek di daulen nunman ni baley et maha-addak diman ni nebayag.

<sup>17</sup> Entanni ey impaewit tuwak nan Sedekiah et illaw tuwak di baley tu. Yan deddewwa kami ey pinuhdanan tu e kantuy "Kaw wada impeamtan APU DIOS ni hi-gam ni e-helen mu?"

Kangkuy "Em, wada. Medpap kalli et ilaw dakan patul di Babilon."

<sup>18</sup> Entanni et mahmahan kun hi-gatu e kangkuy "Hipa nambahulan kun hi-gam, yadda opisyal mu niyadda tutu-u et muwak impakelabut? <sup>19</sup> Ey hipa neipahding idan prophet mun nanghel ni eleg ida um-ali hu sindalun iBabilon ni mengubbat ni hi-gam et yan eya bebley? <sup>20</sup> Apu patul, entan tuwak anhan ibangngad di kallabbutan di baley Jonathan e sekretarih tep hedin ibbangngad muwak diman ey nanna-ud ni metteyyak."

<sup>21</sup> Et iolden law Sedekiah e da-ak ikkalebut di dallin ni baley ni guwalya et manha-addak diman. Sinapay hu daka iddawwat ni kennen kun kewa-wa-wa. Nem entanni ey endi law sinapay di bebley.

## 38

<sup>1</sup> Entanni ey dingngel nan Sephatiah e u-ungngan Mattan, hi Gedaliah e u-ungngan Pashur, hi Jehukal e u-ungngan Selemiah et hi Pashur e u-ungngan Malkiah hu inhel kun impeamtan APU DIOS idan tutu-u e kangkuy <sup>2</sup> "Yadda tutu-un mannenneng ni manha-ad eyad bebley ey mettey idad gubat, yad bisil niyad degeh. Nem yadda mansukkuh ni iBabilon ey meihwang ida et tumegudda." <sup>3</sup> Ey inhel ku pay hu inhel APU DIOS e kantuy "Peapput ku eya bebley idan sindalun iBabilon ni menggep nunyan bebley."

<sup>4</sup> Entanni ey limmaw ida opisyal di kad-an ni patul et kandan hi-gatuy "Mahapul ni mettey hi Jeremiah tep kamengippedismayah idan sindalu niyadda tutu-u eyad bebley gapuh ni tuka e-e-hela. Kan kumedek ey umbaddang ey eleg tep pinhed tun ya lawah meipahding ni hi-gada."

<sup>5</sup> Et kan Sedekiah e patul ey "Ngenamung kayun pinhed yun pehding ni hi-gatu. Nakka i-abulut ni pehding yu kumpulmih ni pinhed yu."

<sup>6</sup> Et ya impahding dan hi-gak ey immaladdan linubid et iketan da-ak et buyunen da-ak di hibuy Malkiah di dallin ni baley ni guwalya. Natduk humman ni hibuy Malkiah e u-ungngan patul e hi Sedekiah, nem edallem hu pitek tu.

<sup>7-8</sup> Nem entanni ey wada hu hakey ni opisyal e hi Ebedmelek e iEthiopia ni kamangngunnud baley ni patul ni nangngel ni nemuyunan da-ak di hibuy et lumaw di kad-an ni patul e kamampemitting di Eheb e Benjamin et kantun hi-gatuy <sup>9</sup> "Apu patul, lawah hu impahding dan Jeremiah tep binyunun dad hibuy. Entanni ey mettey ni upa tudman tep endi law sinapay eyad bebley."

<sup>10</sup> Et mandalen etan ni patul hi Ebedmelek e iEthiopia e kantuy: "Awit kan telumpulun pan-e-dum mu et yu guyuden hi Jeremiah et eleg matey."

<sup>11</sup> Et an umewit hi Ebedmelek ni lalakkin pan-e-dum tu et lumaw idad baley etan ni patul et umladdan luput et ya balwasid bodegah et layagen dad linubid diman hibuy. <sup>12</sup> Inhel Ebedmelek ni hi-gak e iddedpen kudda humman ni luput di yekyekkan ku ma-lat eleg megadgadan ni linubid. Humman hu impahding ku <sup>13</sup> et guyuden da-ak di bubun et da-ak ikelabut di dallin ni baley etan ni patul et mannanengngak diman.

<sup>14</sup> Wadan pinhakkey hu nengipeyagan da-ak mewan nan Sedekiah di kad-an tu etan di meikkatun heggeppan di Tempol. Kantun hi-gak ey "Wada mahmahan kun hi-gam, ey pinhed kun e-helen mu hu makulug."

<sup>15</sup> Hinumang ku e kangkuy "Hedin e-helen ku hu makulug, ey pepettey muwak. Ey hedin e-helen ku pehding mu man eleg muwak metlaing u-unnuda."

<sup>16</sup> Nem insapatah nan Sedekiah ni hi-gak ni deddewwa kamin endi edum ni mengngel e kantuy "Issapatah kud ngadan APU DIOS e wadan ingganah ni nengidwat ni biyag tayu e eleg daka pepettey winu eleg daka pebeltan idan tutu-un ihik ni memettey ni hi-gam."

<sup>17</sup> Et kangkun hi-gatu ey "Heninnuy hu inhel APU DIOS e Kabaalan tun emin ni Dios idan helag Israel: 'Hedin mansukkuh kaddan sindalun iBabilon man eleg daka petteya, anin idan pamilyah mu ey eleg melgab eya bebley. <sup>18</sup> Nem hedin eleg ka mansukkuh ey hehgepen idan iBabilon eya bebley et lalgaben da. Ey anin ni hi-gam et eleg mabalin ni umbesik ka ma-lat ihwang mu annel mu.'"

<sup>19</sup> Ey kan Sedekiah ni hi-gak ey “Ya nakka tekkusi ey yadda edum tayun helag Israel ni nei-dum idan iBabilon. Tep entanni ey pebeltan da-ak ni hi-gada et panhelheltap da-ak et han da-ak pateya.”

<sup>20</sup> Kangkun hi-gatuy “Eleg daka pebeltan ni hi-gada. Et humman hu kangkun hi-gam ey, attu kuma et u-unnuden mu hu inhel APU DIOS ma-lat kayyaggud ni emin meippahding ni hi-gam? <sup>21</sup> Nem hedini eleg ka mansukkuh ey heninnuy impeamtan APU DIOS ni hi-gak ni meippahding ni hi-gam: <sup>22</sup> Emin idalli bibi-in metdaan di baley mu ey pe-hep dadda et ilaw daddad kad-an idan opisyal ni patul di Babilon. Et menglaw idalli ey heninnuy kanda: Inhedul daka e apu patul ey hineul dakaddan nehammad ni gayyum mu. Inwalleng daka et kamei-ellig ni meillunnek kad leyun ey endi memaddang ni hi-gam et ngenamung kan mengihwang ni annel mu!” <sup>23</sup> Kangku pay hi-gatu ey “Emin kayulli anin idan bibi-i yu niyadda u-ungnga yu ey meidwat idan iBabilon. Anin nisin hi-gam et eleg muddalli ibbeskidda humman ni iBabilon. Pambalin dakallin nan patul di Babilon ni balud, ey lelgaben da eya bebley.”

<sup>24</sup> Kan Sedekiah nan Jeremiah ey “Entan tu ehel ni edum ni tuu e inhel mudda huyyan hi-gak tep hedini e-helen mu man, mettey ka. <sup>25</sup> Hedini amtaen idan opisyal ku e nekiummangannak ni hi-gam et um-alidda et mahmahan da inhumman ta. Et kandan hi-gam ey ‘Ehel mun emin ni hi-gami hu inhumman yun patul tep hedini eleg mu e-hela man, petteyen daka.’ <sup>26</sup> Ya e-helen mun hi-gada ey kammuy ‘Nampemhemhemmekek nan patul ma-lat eleg da-ak pebangngad di kallabbuttan di baley Jonathan et eggak matey diman.’ ”

<sup>27</sup> Entanni ey immalidda tu-wangu opisyal ni patul et mahmahan dan hi-gak hu inhumman mi et ehelen ku hu inhel ni patul ni ihumang ku. Ey endi law edum ni ibbage da tep endi nangngel ni inhumman mi. <sup>28</sup> Nanengtun neikelabuttak di dallin ni baley ni guwalya eman ni nangepan idan buhul min iBabilon ni Jerusalem.

### 39

<sup>1</sup> Yan eman ni meikkeppulun bulan ni meikkahyam ni toon ni nampatulan Sedekiah di Judah ey immali hi Nebukadnessar e patul ni Babilon et yaddan emin hu sindalu tu et gubaten da Jerusalem. <sup>2</sup> Et yan meikkahyam ni aggew ni meikka-pat ni bulan ni mekkahampulut hakey ni toon ni nampatulan Sedekiah ey binahbah idan nunman ni buhul mi hu tuping ni luhud ni bebley mi et hegepen da. <sup>3</sup> Emin ida ap-apun sindalu iBabilon et yadda opisyal da ey ida yimmudung di Nanggawwan eheb: Humman ida ey hi Nergal Sareser di Samgar, hi Nebo Sarsekim e eta-gey ni peteg saad tun ap-apun sindalu et ya etan hakey mewani Nergal Sareser et yadda edum ni opisyal.

<sup>4</sup> Yan nenang-angan Sedekiah et yadda sindalu tun sindaluddan Babilon ey bimmesik idan hileng. Indalan da etan di nantumukan ni dewwan luhud di garden ni patul et mampalaw idad appit ni Nedeklan e Jordan. <sup>5</sup> Nem inunud idan sindalu iBabilon et depapen da hi Sedekiah di nandeklan di Jericho et ilaw dan Nebukadnessar di Riblah di Hamat et ehelen tu kastigun Sedekiah. <sup>6</sup> Yadda lalakkin u-ungngan Sedekiah et yadda opisyal tu ey impapetey tudda Riblah di hinangngan Sedekiah. <sup>7</sup> Hi Sedekiah ey impakulap tu et hantu pebangkiling et pailaw tud Babilon.

<sup>8</sup> Yadda sindalun iBabilon ey linggab da hu Jerusalem, anin ni baley ni patul. Ey binahbah da luhud ni bebley. <sup>9</sup> Yadda natdaan ni bimmebley di Jerusalem ey inlaw Nebusaradan e ap-apun sindalun iBabilon di bebley da. Anin idan iJudah ni nei-dum di sindalu tu et impakilaw tudda. <sup>10</sup> Eleg tu pakilaw ida nangkewetwet et hi-gada mampeyew niya mengipaptek idan legunta.

<sup>11</sup> Ey hi Jeremiah ey in-olden Nebukadnessar nan Nebusaradan meippanggep ni hi-gatu ey <sup>12</sup> kantuy “Yu hamak hi Jeremiah. Entan tu ipahding hu lawah ni hi-gatu nem ipaptek yu ey idwat yu hu hipan ibbage tu.” <sup>13</sup> Et hi Nebusaradan e ap-apun sindalu e edum tudda hu eta-gey ni opisyal e hi Nebushasban et hi Nergal Sareser e konsihal ni patul et yadda edum ni opisyal ni Babilon <sup>14</sup> ey impaeli da hu mengippa-hep ni hi-gak di kallabbuttan. Impepapak da-ak nan Gedaliah e u-ungngan Ahikam e u-ungngan Saphan ma-lat endi lawah ni meippahding ni hi-gak ni ennamutan ku. Et nak makiha-ad idan edum kun iJudah.

<sup>15</sup> Ya dedan eman ni nengikelabutan dan hi-gak di dallin ni baley ni patul ey inhel nan APU DIOS ni hi-gak <sup>16</sup> e e-helen kun Ebedmelek e iEthiopia huyyan kantu: “Hi-gak e Dios e Kabaelan tun emin ni Dios idan helag Israel ey peammuk hu inhel kun meippahding nunyan bebley. Peellik ida memahbah eyan bebley et beken ni panyaggudan tu. Et ang-angen muli keippahdingan tu huyya. <sup>17-18</sup> Nem hi-gam ey ippaptek dakan hi-gak e APU DIOS ey ihhehwang dakadda tutu-un muka tekkusi, ma-lat melinggep ka. Et eleg daka papetey tep muwak kaidinel. Hi-gak e AP-APU hu nanghel nunya.”

## 40

*Ya nekiha-adan Jeremiah nan Gedaliah*

<sup>1</sup> Yan nenang-angan Nebusaradan e ap-apun sindalun iBabilon ni hi-gak e nebangkilangannak e edum kudda iJerusalem niyadda iJudah ni daka pan-illaw di Babilon ey imbukyat da-ak. Et yan nunman ey immehel hi APU DIOS ni hi-gak.

<sup>2</sup> Inaygan da-ak nan Nebusaradan di panggil et kantong hi-gak ey “Ya AP-APU e Dios yu ey inhel tun mebahbah eya bebley <sup>3</sup> et yan nunman hu pengippeamnuan tun inhel tu tep nanliwat ida edum mun helag Israel ni hi-gatu ey eleg da u-unnuden tugun tu. <sup>4</sup> Ingal ku bangkiling mu et ibukyat daka. Hedin pinhed mu pakilaw kan hi-gak di Babilon et ipaptek dakan hi-gak diman. Nem hedin eleg mu pinhed, ngenamung ka. Mahkang eya bebley ni pampillian mun pinhed mun lawwan. <sup>5</sup> Hedin pinhed mun manha-ad deya, lakkay di kad-an Gedaliah e u-ungngan Ahikam e u-ungngan Saphan. Hi-gatu pinutuk ni patul ni manggobornor di Judah. Pakiha-ad kan hi-gatu et makibebley kaddan edum mun helag Israel, ngenamung kan pinhed mun panha-adan.” Et idwatan da-ak ni mahapul ku et ibukyat da-ak.

<sup>6</sup> Et mambangngaddak di Judah di kad-an Gedaliah di Mispah e edum kudda etan hahhakkey ni tutu-un nebatih diman.

<sup>7</sup> Wadadda edum ni sindalu niyadda ap-apun sindalun iJudah ni eleg mansukuh. Dingngel da e pinutuk ni patul di Babilon hi Gedaliah ni manggobornador et man-apapuddin nekawwetwet ni tutu-un nehi-yan di Judah. <sup>8</sup> Et lumaw hi Ismael e u-ungngan Nethaniah, di Johanan nan Jonathan e u-ungngaddan Kareah, hi Seraiah e u-ungngan Tanhumet, yadda u-ungngan Ephai e iNetophah, hi Jesaniah e u-ungngan iMaakah et yadda edum ni tutu-ud kad-an Gedaliah di Mispah.

<sup>9</sup> Kan Gedaliah ni hi-gaday “Pansukuh kayuddan iBabilon et manha-ad kayu metlaing eyad bebley et mansilbi kayun patul di Babilon ma-lat kayyaggud ni emin hu meippahding ni hi-gayu. Entan takut yu tep beken ni itek huyyan inhel ku. <sup>10</sup> Anin ni hi-gak et manha-addak di deya Mispah et hi-gak hu mengi-ehneng ni hi-gayun ellian idan iBabilon. Yu ang-ang hu pinhed yun panha-adan eyad bebley et kayu manha-ad diman. Et hi-gayu mamlag idan lameh ni grapes niyadda edum ni kaumlameh henin olibah. Ey impaptek yu et mengapya kayun meinnun niya mansika et usalen yu.”

<sup>11</sup> Yadda helag Judah ni wadad Moab, yad Ammon, yad Edom et yaddad edum ni bebley ey dingngel da e in-abulut ni patul di Babilon ida nebatih ni tutu-un mambebley di Judah ey pinutuk tu hi Gedaliah ni gubernor diman <sup>12</sup> et mambangngad idad Judah di kad-an Gedaliah di Mispah. Ey dakel pinlag dan lameh ni grapes et yadda edum ni kaumlameh.

<sup>13</sup> Entanni ey immalid Johanan et yadda ap-apun sindalun eleg mansukuh idan iBabilon di kad-an Gedaliah di Mispah <sup>14</sup> et kandan hi-gatuy “Kaw eleg mu amta e intudak nan Baalis e patul di Ammon hi Ismael e u-ungngan Nethaniah ni an memettey ni hi-gam?” Nem eleg kulugen nan Gedaliah humman ni inhel da.

<sup>15</sup> Eleg peamtan Johanan e u-ungngan Kareah di edum ni tuu et tu ungbalen hi Gedaliah e kantuy “Tebulut mu kuma et nak idelunuh ni petteyen hi Ismael e u-ungngan Nethaniah ni nunyan endi ni nengamtan planuh tu ma-lat eleg daka patyen ni hi-gatu. Tep hedin hi-gam mettey ey mewehhit ida mewan eya neamung ni iJudah et endilli law metdaan ni helag Judah!”

<sup>16</sup> Nem kan Gedaliah nan Johanan ey “Entan tu ipahding huttan ni ninemnem mu. Beken ni makulug hu inhel mu meippanggep nan Ismael!”

## 41

<sup>1</sup> Entanni tu-wangu ey limmaw hi Ismael niyadda hampulun edum tun lalakkid Mispah di kad-an Gedaliah e gubernor eman ni meikkeppitun bulan nunman ni toon. Hi Ismael e u-ungngan Nethaniah e u-ungngan Elishama ey membroh ni familiyah etan ni patul. Indaddanan Gedaliah idan kennen da <sup>2</sup> nem endi maptek ey inuknut Ismael et yadda edum tu ispadah da et patyen da hi Gedaliah. <sup>3</sup> Impakipetey dan emin ida iJudah ni edum Gedaliah di Mispah anin idan sindalun iBabilon ni wadadman.

<sup>4</sup> Yan mewa-waan tun endi ni pay nengamtan neteyyan Gedaliah <sup>5</sup> ey immalidda newalun lalakkid nalpud Sekem, yad Siloh et yad Samaria e kinuhkuh da iming da, bini-ki da balwasi da ey liniputan da annel da ey wada intabin dan pagey niya bangbanglun da i-appit di Tempol. <sup>6</sup> Neukat hi Ismael e u-ungngan Nethaniah di Mispah et tudda dammuwen e tuka hinnannangngihi e kantuy “Keyuy anhan et yu ang-angen hi Gedaliah.”

<sup>7</sup> Himmegep idan emin di bebley ey nampatey idaddan Ismael et yadda edum tu et dadda unugen di bubun.

<sup>8</sup> Nem wadadda hampulun nampahpahmek nan Ismael e kanday “Entan dakemi anhan patey et idwat middan hi-gam ida hu intalu min pagey, ya mansikan olibah niya danum ni putsukan.” Et eleg tudda papetey. <sup>9</sup> Ya etan bubun ni nengunagan Ismael ni annel idan pintey da ey humman keet-eteng an ni impeku-kun eman lan patul e hi Asa ni nengubatan Baasha e patul ni Israel ni hi-gada.

<sup>10</sup> Impambalin Ismael emin ida tutu-ud Mispah ni balud, yadda bibi-in u-ungngan patul niyadda edum ni tutu-un impepaptey Nebusaradan e ap-apun sindalun Gedaliah e u-ungngan Ahikam. Et ikuyug tudda et manglaw idad Ammon.

<sup>11</sup> Dinggel Johanan et yadda aap-apun sindalu hu meippanggep nunman ni impahding Ismael <sup>12</sup> et unuden da et ha-kupen da etan di neihnpud di et-eteng ni lebeng di Gibeon. <sup>13</sup> Inang-ang idan balud Ismael hi Johanan et yadda edum tun aap-apun sindalu ey immamleng ida <sup>14</sup> et bumsik idad kad-an Johanan. <sup>15</sup> Nem hi Ismael et yadda walun edum tu ey bimmesik idad Ammon.

<sup>16</sup> Hi Johanan et yadda ap-apun sindalu ey impangulu dad Mispah emin ida etan tutu-uy imbesik Ismael ni nunman ni nemateyan tun Gedaliah. Wadan hi-gada sindalu, bibi-ey kaungaunga ey opisyal idan patul. <sup>17</sup> Mampellaw idad Egypt nem nanda-guh idad Gerut Kimham e neihnpud di Bethlehem. <sup>18</sup> Et ibsikan dadda iBabilon tep ida kaumtakut ni hi-gada, tep pintey Ismael hi Gedaliah e pinutuk ni patul ni Babilon ni gubernor di Judah.

## 42

<sup>1</sup> Entanni ey immali dad kad-an ku hu aap-apun sindalun ingkuyug di Johanan e u-ungngan Kareah, hi Jesaniah e u-ungngan Hoshaiyah ey emin ida tutu-un newetwet niya kedangyan <sup>2</sup> et kandan hi-gak ey “Idasali dakemi anhan nan AP-APU e Dios mu tep ay hahhakkey kamin natdaan ey dakel kami lan nunman. <sup>3</sup> Em, idasal mu anhan nan DIOS mu et peamta tu kayyaggud ni pehding mi ey hedin attu lawwan mi.”

<sup>4</sup> Kangkuy “Em. Mandasallak nan AP-APU e Dios tayu et ehelen kun hi-gayun emin hu e-helen tu. Endi nak ihhaut.” <sup>5</sup> Ey kandan hi-gak ey “Hi APU DIOS e Dios tayu et anhan hu tistigu mi hedin eleg mi u-unnuda hu e-helen tun hi-gam ni ittugun mun hi-gami. <sup>6</sup> Et humman hu, anin hedin kantu et pinhed mi winu eleg et mahapul ni u-unnuden mi hu AP-APU e Dios tayun kammin pandasalan mu tep u-unnuden min emin hu tugun tu ma-lat kayyaggud ni emin meippahding ni hi-gami.”

<sup>7</sup> Entanni et nelabah hu hampulun aggew ey immehel hi APU DIOS ni hi-gak <sup>8</sup> et ayagan ku hi Johanan, yadda aap-apun sindalu et yadda edum ni tutu-u <sup>9</sup> et kangkun hi-gaday “Ya AP-APU e Dios idan helag Israel e kanyun pandasalan ku ey kantuy <sup>10</sup> ‘Hedin makulug ni pinhed tun mambebley deyd Judah ey baddangan dakayu et meihammad hu pambebleyan yudya. Eleg dakeyu bahbaha. Heni dakeyu ittanem e eleg dakeyu gebbuta, tep nak kumedekey kaumlemyung ni nengastiguan kun hi-gayu. <sup>11</sup> Entan takut yu etan ni patul di Babilon, tep baddangan dakeyun hi-gak et ihwang dakeyud hipan pehding tu. <sup>12</sup> Ey gapuh ni hemek kun hi-gayu ey pambalin ku humman ni patul ni kabbabbal ma-lat pambangnad dakeyun mambebley di bebley yu.’

<sup>13</sup> Nem hedin eleg yu u-unnuda hu AP-APU e Dios yu et kanyu kumedekey ey ‘Eleg kami manha-ad eyad bebley mi’ <sup>14</sup> ey hedin ippilit yun umlaw ni mambebley di Egypt tep kanyu nem endi gubat, ya bisil niya ligat diman, <sup>15</sup> ey heninnuy hu kan APU DIOS e Kabaalan tun emin ni Dios idan helag Israel ni hi-gayun natdaan di deya Judah: Kantuy ‘Hedin ippilit yun umlaw di Egypt, <sup>16</sup> ey nanna-ud ni unuden dakeyun gubat niya bisil ni yuka tattakusi et mettey kayudman. <sup>17</sup> Em, mettey idallin emin di gubat, yad bisil niyad degeh hu mengippilit ni umlaw ni an mekibebley di Egypt. Endin hi-gada mettegu ey endi hakey ni tu ibbebsikan hu peelik ni ketteyyan da.’”

<sup>18</sup> Kan mewan AP-APU e Kabaalan tun emin ni Dios idan helag Israel ey “Kinastiguk ida tutu-ud Jerusalem tep nemahhig hu bunget ku. Hanniman dama pehding kun hi-gayu hedin umlaw kayud Egypt. Et hi-gayulli pengiang-angan idan tutu-un neidutan et hehgegnuden dakeyulli, ey eleg yulli law ang-anga eya bebley yu.”

<sup>19</sup> Inhel APU DIOS ni hi-gayun natdaan di Judah ey “Eleg kayu umlaw di Egypt! E-helen kun nunyan hi-gayu <sup>20</sup> e naka-ihhalla kayu hedin umlaw kayud Egypt. Kanyuy mandasallak nan APU DIOS e Dios tayu et u-unnuden yun emin hu e-helen tu <sup>21</sup> et deh e inhel kun hi-gayu, nem inamtak dedan e eleg yu u-unnudan emin hu nakka e-helan inhel ni AP-APU e Dios tayu. <sup>22</sup> Et e-helen ku mewan ni hi-gayun nunya e mettey kayud gubat, yad bisil niyad degeh di bebley ni pinhed yun lawwan ni pambebleyan yu.”

## 43

*Ya neilawwan Jeremiah di Egypt*

<sup>1</sup> Negibbuh ni inhel kuddan tutu-un emin hu inhel APU DIOS ni hi-gak, <sup>2</sup> ey kan di Asariah e u-unggan Hoshaiiah, hi Johanan e u-unggan Kareah et yadda edum ni tutu-un kamampahhiya ey "Itek mu! Beken hi APU DIOS e Dios min nanghel e eleg kami umlaw di Egypt ni mekibbebley diman. <sup>3</sup> Inamta mi et inewis dakan Baruk e u-unggan Neriah ni menghel nuntan ma-lat manha-ad kamidya et pateyen dakemiddan iBabilon winu illaw dakemid bebley da et mambalin kamin balud diman."

<sup>4</sup> Et eleg u-unnuden di Johanan, yadda aap-apun sindalu et yadda tutu-u humman ni inhel APU DIOS ni mannenneng idad Judah. <sup>5</sup> Immegah di Johanan et yadda aap-apu, anin idan etan nambanggad di Judah ni neiwehit di kebebbebley, et lumaw idad Egypt. <sup>6</sup> Humman idan limmaw di Egypt ey lalakki, bibi-i, kaungaunga et yadda bibi-in u-unggan patul ni impepatek nan Nebusaradan nan Gedaliah. Anin ni hi-gak et hi Baruk et impakilaw dakemid Egypt. <sup>7</sup> Eleg da u-unnuden hi APU DIOS et manglaw kamid Egypt et dumteng kamid Tahpanhes.

<sup>8</sup> Wada kamidman ey immehel hi APU DIOS ni hi-gak e kantuy <sup>9</sup> "Ala kaddan ettateng ni batu et iku-kum di kadellanad heggeppan di baley ni patul di deya Tahpanhes. Ipahding mu huyyan daka kaang-ang-angaddan tutu-u. <sup>10</sup> Ey ehel mun hi-gada e hi-gak e Dios e Kabaelan tun emin ni Dios idan helag Israel ey kangkuy 'I-alik hu bega-en ku e hi Nebukadnessar e patul di Babilon di deya Egypt et peha-ad ku yuddunggan tu eyad batun impeiku-kuk. Ey ibbiklag tu tulda tu ni panhiddum tu. <sup>11</sup> Um-ali hi Nebukadnessar et gubbaten tudda Egypt. Et yadda tutu-un neieng-eng ni mettey di degeh ey mettey idan degeh, yadda neieng-eng ni meillaw ni balud ey meillaw idan balud et yadda neieng-eng ni mettey ni gubat ey mettey idad gubat. <sup>12</sup> Ey lelgaben tu baley idan dios di Egypt et alen tudda humman ni dios di Babilon. Peki-la tun emin hu wadad Egypt et endin hekey metdaan henin kapehding ni kamampattul ni kalneroh e tuka peka-kala tumad balwasi tu. Ey hi-yanen alin nunman ni patul di Babilon hu Egypt e eleg melipputan. <sup>13</sup> Bahbahen tuddalli hu hineaddan batud baley ni dios dan aggew di Egypt ey lelgaben tun emin hu baley idan dios dadman.'"

## 44

*Ya kastiguddan kamandeyyaw ni dios ni kinapyaddan tuu*

<sup>1</sup> Entanni ey immehel hi APU DIOS ni hi-gak meippanggep idan helag Judah ni nekibebley di Egypt di appit ni north e Migdol, yad Tahpanhes, yad Memphis niyadda bebley di appit ni south. <sup>2</sup> Kantuy "Hi-gak e AP-APU e Kabaelan tun emin ni Dios Israel ey kangkuy: Anin hi-gayu et inang-ang yu nemahbahan kun Jerusalem niya emin ni bebley di Judah et ingganah nunya ey nanengtun nebahbah et endi nambebley diman. <sup>3</sup> Neipahding huuya tep lawah hu impahding idan bimbebley diman e dineyaw da ey nan-appit idan kagihheban bangbanglu idan dios ni eleg da inamta ey eleg inamtaddan aammed dan nunman. <sup>4</sup> Intenu-dak kudda bega-en kun prophet ni nanghel ni higadan eleg da pehding ida humman ni lawah ni peteg ni anggebe-hel ku, <sup>5</sup> nem eleg da hanguden ni dingngel hu inhel dan hi-gada. Et eleg da isiked ni man-appit idan edum ni dios. <sup>6</sup> Humman gaputun nemahhig bunget kun hi-gadan bimbebley di Judah niyad Jerusalem et legaben ku bebley da. Et ingganah nunya ey nanengtun nebahbah ida.

<sup>7</sup> Et humman hu, hi-gak e Dios ni Kabaelan tun emin ni Dios idan helag Israel ey kangkuy: Kele yuka pehpending hu umhulun ni kebahbahan yu? Kaw pinhed yun peellik hu kebahbahan yun emin ni lalakki, bibi-i, kaungaunga niya gegellang et endi matdaan ni hi-gayu? <sup>8</sup> Kele yuka daydayawa ey yuka i-enappisidda dios di Egypt ni nekibebleyan yu et pabunget yuwak? Kaw yuka pehpending ida huttan ma-lat bahbahen yu annel yu et hehgegnuden dakeyu ey ngi-ngi-ngian dakeyun tutu-ud kebebbebley eyad puyek? <sup>9</sup> Kaw liniwwan yudda lawah ni impahding ida lan aammed yud Judah niya Jerusalem? <sup>10</sup> Liniwwan yu na-mu tep ingganah nunya ey eleg kayu mantuttuyyu. Eleg yuwak dayawen ey eleg yu u-unnuden ida intugun kun hi-gayu niyadda aammed yu.

<sup>11</sup> Et humman hu, hi-gak e AP-APU e Kabaelan tun emin ni Dios idan helag Israel ey kastiguen dakeyu et meendin emin hu helag Judah. <sup>12</sup> Emin kayun natdaan ni iJudah ni nengipilit ni mekibbebley di Egypt, kedangyan niya newetwet ey mettey kayud gubat niyad bisil et hi-gayulli pengi-ang-angan ni katuutuun neidutan et hehgegnuden dakeyulli ey ngi-ngi-ngian dakeyu. <sup>13</sup> Kastiguen dakeyud Egypt ni gubat, ya bisil niya degeh henin nengastiguan kun hi-gayud Jerusalem. <sup>14</sup> Et humman hu, anin ni ihik kayu

mewan ni mambanggad di bebley yud Judah ey hahhakkey ni ebuh ni hi-gayu hu meihwang ni mambanggad diman.”

<sup>15</sup> Entanni ey emin ida lalakkim inamta dan nan-enappit hu ahwa dan kagihheban bangbanglun edum ni dios, yadda bibi-i niyadda dakel ni iJudah ni nambebley di appit ni south ni Egypt ey kandan nenumang dan hi-gak ey <sup>16</sup> “Eleg mi u-unnuda huttan ni inhel mun kammun nalpun APU DIOS. <sup>17</sup> Pehding midda ngu pinhed min pehding et man-appit kamin dios min biin ap-apun wadad kabunyan. Ey um-iduyag kamin meinum ni i-appit min hi-gatu, tep humman dedan mika ippenahding ey humman impenahding ida lan aammed mi, anin ida lan patul mi niyadda aap-apu middad keltad di Jerusalem niyadda Judah. Tep yan nunman ey kayyaggud hu biyag mi e kekeddangyan kami ey kamehawwahawwal hu kenen mi niyadda mahapul mi ey melinggep kami. <sup>18</sup> Nem neipalpu eman ni nengisikedan min man-appit niya mengidduyag ni meinum ni i-appit nunman ni biin ap-apun wadad kabunyan ey nebisil kami ey nangketey edum mid gubat niyad bisil.”

<sup>19</sup> Kan ida daman bibi-i ey “Yadda ahwa mi ey daka tettebala mi la kapehpehding e kami kamengennapyan sinapay ni pingpingkel min u-ukkul nunman ni biin ap-apun wadad kabunyan niyan kami la kaumiduyag ni meinum ni in-appit min hi-gatu.”

<sup>20</sup> Et kangkun hi-gadan emin ey <sup>21</sup> “Kaw kanyu nem eleg amtan APU DIOS winu liniwwan tudda humman ni in-enappit yu niya in-enappit ida la eman ni aammed yu, yadda patul yu niyadda aap-apu yud bebley di Judah niyaddad keltad di Jerusalem? <sup>22</sup> Binahbah tu bebley yu tep eleg tu han-isipel bunget tu gapuh idan nunman ni lawah ni impahpahding yu, et idutan tu ma-lat mannananeng ni mebahbah, et ingganah nunya ey endi nambebley diman. <sup>23</sup> Ya gaputun immalidda huyyan ligat ni hi-gayu ey nanliwat kayun APU DIOS tep nan-enappit kayud edum ni dios ey eleg yu u-unnuden hu tugun tu.”

<sup>24-25</sup> Kangkuddan nunman ni tutu-u anin idan bibi-i ey “Dengel yu huyyan inhel APU DIOS e Kabaalan tun emin ni Dios idan helag Israel ni hi-gayun iJudah ni nekibebley di deya Egypt! Kantuy ‘Hi-gayu niyadda ahwa yu ey insapatah yun i-appitan yu etan biin ap-apun wadad kabunyan niya um-iduyag kayun meinum ni i-appit yun hi-gatu. Et deh e yuka ippenahding ingganah nunya. Imay, pan-ipahding yudda huttan ni insapatah yu.’

<sup>26</sup> Nem dengel yu huyyan e-helen ku: ‘Hi-gak e AP-APU ey issapatah kud kamedeyyaw ni ngadan ku e endi law ni hi-gayun helag Israel ni nekibebley di Egypt hu i-abulut kun mansapatah di ngadan ku. Eleg yulli law e-hela hu: Issapatah kud ngadan APU DIOS e Eta-gatey ni peteg ni wadan ingganah! <sup>27</sup> Nanna-ud ni peellik hu panhelheltapan yu et matey kayud gubat et yad bisil tep eleg dakeyu law ippaptek.

<sup>28</sup> Nem wadalli hahhakkey ni ebuh ni meihwang di katey ni meni-yan ni Egypt et mambanggad di Judah. Yan nunman ali pengamtaan da hedin hipa immamnu hu inhel tu, hi-gada winu hi-gak. <sup>29</sup> Huyyalli pengi-ang-angan yu e kastiguen dakeyudya, et pengamtaan yu e makulug ni meippahding hu inhel kun penattakkut kun hi-gayu. <sup>30</sup> Pebeltan ku etan patul di Egypt e hi Hopra idan buhul tun neminhed ni memetty ni hi-gatu, henin impahding kun Sedekiah e patul di Judah e impebeltan kun buhul tun hi Nebukadnessar e patul di Babilon. Hi-gak e AP-APU hu nanghel idan nunya.”

## 45

<sup>1</sup> Huyya inhel kun Baruk e u-ungngan Neriah eman ni meikka-pat ni toon ni nampatulani Jehoiakim e u-ungngan Josiah di Judah eman ni negibbuh ni intudek tun emin ida inhel kun hi-gatun ittudek tu. Kangkun hi-gatuy <sup>2</sup> “Huyya hu inhel ni AP-APU e Dios idan helag Israel ni hi-gam e Baruk. <sup>3</sup> Kammuy ‘Anggehemmekkak! Induman kumedek nan APU DIOS hu ligat ku et deh e nakka umlelemyung ey kimmappuyak ni peteg niya endi linggep ku!’ ”

<sup>4</sup> Immehel hi APU DIOS ni hi-gak et kantuy “Ehel mun Baruk e ‘Hi-gak e DIOS ey nakka pelliha hu binehwat ku ey nakka gebbuta intanem ku. Hanniman ali pehding kun emin di kebebhebley eyad ta-pew ni puyek. <sup>5</sup> Kaw ya muka heppuheppula ey yadda kamengippeamleng ni hi-gam? Beken ida humman ni heppulem! Tep peellik ali hu memahbah ni emin ni tuu. Nem hedin hi-gam man ihhehwang daka anin ni attu lawwam. Hi-gak e DIOS hu nanghel nunya.’ ”

## 46

*Ya neipeamta meippanggep ni kastigun Egypt*

<sup>1</sup> Huyya impeamtan APU DIOS ni hi-gak ni meippanggep idan edum ni bebley.

<sup>2</sup> Yan eman ni meikka-pat ni toon ni nampatulanan Jehoiakim e u-ungngan Josiah di Judah hu nengapputan Nebukadnessar e patul di Babilon nan Neko e patul ni Egypt di Karkemis di kad-an ni Wangwang e Euphrates.

Yan nunman ey kan APU DIOS idan iEgypt ey <sup>3</sup> “Hi-gayuddan iEgypt, pandaddan kayun an mekiggubbat! Idaddan yu happiyaw yu, <sup>4</sup> panhelmet kayu, ta-lid yu ispadah yu niya ihuklub yu gumek ni balwasi yu. Ikesi yudda kebayyu yu ey pantakkay kayu et kayu mampustuh!”

<sup>5</sup> Nem ay bimesik ida tep simmakut ida. Yadda etan ketultuledan ni sindalu da ey eleg ida manwingiwingi nem anin di attun nampelawwan da et angetakkut. Et meapput ida humman ni sindalu. <sup>6</sup> Anin idan keka-ka-letan ni umbesik et eleg ida pekabsik. Ey yadda ketultuledan ni sindalu ey eleg da ihehwang annel da. Tep meihungbub ida ey netu-liddad gilig ni Wangwang di Euphrates di appit ni north.

<sup>7</sup> Hipa kamanta-gey henin kata-geyin danum di Wangwang e Nile hedini nandinlu? <sup>8</sup> Ya Egypt e humman kamampahhiya e kantuy hinnapen tun emin hu kebebbley eyad puyek et pampeteyen tudda nampambbley diman. <sup>9</sup> Mandal yudda kebayyu et iguyud dadda kalessah. Ali kayun emin ni sindalun Ethiopia, ya Libya niya Lidia ni nelaing ni manhappiyaw niya umpana.

<sup>10</sup> Yan nunyan aggew hu pengiblehan APU DIOS e Eta-gey ni peteg niya Kabaelan tun emin, ni impahding idan buhul tu et kastiguen tudda. Ya pengastigu tu ey ya etan ispadah tun kamei-ellig ni tagan tu inum ni kuheyaw idan tutu-u ingganah me-kal ewew tu. Ey kamei-ellig ni i-appit tudda petteyen tun buhul tud appit ni north di gilig ni Wangwang e Euphrates.

<sup>11</sup> Hi-gayuddan iEgypt, elaw kayud Gilead et kayu menang-ang ni agah. Nem endi silbiddan nunman ni agah tep eleg ida um-agah. Endi hu dammutun meneggah ni hi-gayu. <sup>12</sup> Yadda keka-ka-letan ni sindalu yu ey metu-liddad edum da et metu-lidda law ni dewwa. Mandingngal alid kebebbley hu meippanggep ni nebabba-ingan yu niya pampehemhemmekan yu.

<sup>13</sup> Entanni mewan ey impeamtan APU DIOS ni hi-gak hu meippanggep ni planuh Nebukadnessar e patul di Babilon ni mengubbat ni Egypt.

<sup>14</sup> Kantuy “Ehel muddan tutu-ud bebley di Egypt, nena-mad Migdol, yad Memphis et yad Tahpanhes e kammuy: ‘Pandaddan kayun mekiggubbat niya kayu mampustuh, tep iyyaddalli mengubbat ni hi-gayu et pampetteyen dakeyu. <sup>15</sup> Kele simmakut ida sindalu yu et ida kamemsik? Endi kabaelan da tep apputen APU DIOS ida ey endi kabaelan dan mekihhanggan hi-gatu!’ <sup>16</sup> Neihungbub ida ni netu-lidda ey wada hakkey ey kantun edum tuy ‘Papuut tayu kuma et umenamut itsud bebley tayu et ibsikan tayudda buhul tayu.’

<sup>17</sup> Ey kanda damay ‘Attu mewan kapan-ippahding ni patul tayuy, tam ma-nu ehel tu! Endi dedan kabaelan tu! Nelabah law tsimpuh tun mekihhangga!’ ”

<sup>18</sup> Ya etan Patul ni APU DIOS e Kabaelan tun emin e wadan ingganah ey kantuy “Wadalli um-alin eta-gey ey neka-let ni tuun mengubbat ni hi-gayu. Henillin kasina-gey ni Duntug e Tabor niya Duntug e Karmel di gilig ni baybay. <sup>19</sup> Pandaddan kayun iEgypt tep mambalin kayun balud ni meillaw di edum ni bebley. Mambalin ali Memphis ni eleg mebebley tep mebahbah et endilli law mambbley diman anin ni hakey. <sup>20</sup> Ya Egypt ey kamei-ellig di kayyaggud ni bakan pakeetteng tu ey ya etan buhul tun melpud appit ni north ey mei-ellig di sipep ni menled ni hi-gatu. <sup>21</sup> Ey kamei-ellig idan neipetaban impah ni baka etan ida tinangndan tun sindalun umbandang ni hi-gatu e endi kabaelan da et eleg idan hekey mekiggubbat, nem neala et manligguh ida et mamsik ida. Nedatngan law aggew ni kebahbahan da! <sup>22</sup> Kamei-ellig mewan hu Egypt etan di uleg ni kamemsik eman ni kamengellidda etan sindalun buhul tun nampam-almas idan wahay e kamei-ellig ni manlelgnah ni keyew. <sup>23</sup> Et henilli manlelgnah ni keyew hu pehding idan buhul tun hi-gatu. Daddakkel idalli humman ni sindalun buhul tu nem yadda dudun ni eleg mebillang. <sup>24</sup> Mebabba-ingan ali Egypt tep apputen alin buhul tun nalpullid appit ni north.”

<sup>25</sup> Entanni ey kan ni AP-APU e Kabaelan tun emin ni Dios idan helag Israel ey “Kastiguen ku hi Amon e dios ni Tebes, anin ya Egypt et yadda dios tu, ya patul tu niyadda emin ni kamengiddinnet ni hi-gatu. <sup>26</sup> Pebeltan kuddan Nebukadnessar e patul di Babilon et yadda sindalu tun neminhed ni memettey ni hi-gada. Nem edum alin aggew ey mebebleyan ali mewan hu Egypt, heni lan nunman. Hi-gak e AP-APU hu nanghel nunya.”

<sup>27-28</sup> Kan mewan APU DIOS ey “Hi-gayun tutu-uk ni helag Israel, entan takut yu. Ihhehwang dakeyun hi-gak di neidawwin bebley ni nengilawwan dan hi-gayun nambalanan yun balud et ibbanggad dakeyud bebley yu et luminggep kayu. Endi law



eggelan yu ey endi law mengippetekket ni hi-gayu. Um-ali-ak ni mengihwang ni hi-gayu. Bahbahen kun emin ida bebley ni nengiwehitan kun hi-gayu, nem eleg dakeyu bahbaha. Ma-nut kastiguen dakeyu, nem limpiyuh pehdng ku. Hi-gak e DIOS hu nanghel nunya.”

## 47

### *Ya neipeamta meippanggep ni kastiguudan iPilistia*

<sup>1</sup> Yan eman ni eleg ni gubaten ni Egypt hu Gaza ey impeamtan APU DIOS ni hi-gak hu meippanggep ni Pilistia. <sup>2</sup> Kantuy “Meemmung idalli dakel ni sindalud appit ni north e heniddalli kamangkedakkel ni danum niya henidda limma-pih ni wangwang. Et melbengan alin emin hu bebley niyadda wadadman. Yadda tutu-u ey nemahhig ali nangih dan mampemhemhemmek ni mampabaddang. <sup>3</sup> Medngel ali besik idan kebayyu niya kudun kalesah. Panhi-yanen idallin a-ammed hu u-ungnga da tep simmakut ida ey kimmapuny ida et endi mabalin ni pehdng da.

<sup>4</sup> Nematngan law tsimpuh ni kebabhahan idan iPilistia tep endi law natdaan ni tutu-ud Tyre niyad Sidon ni umbaddang ni hi-gada. Em, hi-gak e hi APU DIOS ey bahbahen kudda iPilistia ni nalpud gilig ni baybay di Crete. <sup>5</sup> Nemahhig hu lemyung idan iGaza ey ida kaum-eneeneng hu iAskelon. Pigantu kepappegan ni lemyungan yun natdaan ni iPilistia?

<sup>6</sup> Kanyuy ‘Hi-gayun kababba-alan APU DIOS ni memetty ni hi-gami, kaw pigantu i-inegan yu? Attu et itlu yu law hu almas yu et mambanggad kayud nalpuan yu et kayu man-iyatu?’

<sup>7</sup> Nem hipa inna-nuddan man-iyatu e wada indawat kun ngunnen da? Minandal kuddan mengubbat ni Askelon niyadda bebley di gilig ni baybay.”

## 48

### *Ya neipeamta meippanggep ni kastigun Moab*

<sup>1</sup> Huyya inhel nan AP-APU e Kabaelan tun emin ni Dios idan helag Israel idan iMoab: “Anggehennemek ida iNebo tep mebahbah idalli. Sekkupun idallin buhul dan iKiriathaim et bahbahen dadda hu daka panguwalyai anin idan eheb da et mabeingan ida bimbebley. <sup>2</sup> Endilli law hu mengippahhiyyan dayaw ni Moab tep yadda buhul dad Hesbon ey implanuh da kebabhahan da. Kanday ‘Bahbahen tayu humman ni bebley et meendi.’ Um-i-ineng idalli dama hu iMadmen tep um-alidda memahbah ni hi-gada. <sup>3</sup> Medngel ali tekuk idan mengubbat ni memahbah idan Horonaim <sup>4</sup> tep mebahbah alin emin hu Moab. Et medngel ali nangih idan u-ungngadman. <sup>5</sup> Ida kamannengngih hu iMoab ey menyed idad duntug di Luhit. Ey kamedngel hu nangih dad keltad di mampedayyud Horonaim tep daka nannangngihi nebahbahen ni bebley da. <sup>6</sup> Besik kayu et kayu mantalud eleg mebebleyi ma-lat meihwang kayu et eleg kayu matey. <sup>7</sup> Hi-gayun iMoab, ellan dakeyulliddan buhul yu et mambalin kayun balud tep yu kaiddinnel hu kabaelan yu niyad kinedangyan yu. Ey meillaw di neidawwin bebley etan dios yun hi Kemos, yadda padi niyadda opisyal tu.

<sup>8</sup> Mebahbah alin emin hu bebley anin idan bebley yud duntug niyad nedeklan tep humman hu inhel ni AP-APU. <sup>9</sup> A-ayyulah hu Moab! Endilli silbitu tep mebahbah et endillin hekey hu mambebley diman anin hakey. <sup>10</sup> Meiddutan idalli etan kaman-e-leg ni mengippahding ni pengunnen APU DIOS. Ey meiddutan ida hu eleg menguknut ni ispadah da et eleg da ittewtik et pumetty ida.”

<sup>11</sup> Kan mewan APU DIOS ey “Yan nunman ey melinggep hu Moab tep endi kamengubbat nunman ni bebley. Kamei-ellig ni meinnum ni eleg makihal ey eleg mei-tan di edum ni kapengihuddui et meli-neng ey nannanengtun kayyaggud tamtam tu. <sup>12</sup> Nem medettengan ali aggew ni pengippeellian kun tutu-un mengippeliligat ni hi-gada et me-ellig idad meinnum ni meidduyag et pehhiken hu neihuduan da. <sup>13</sup> Ibbang dallin nunman hu dios dan hi Kemos heniddalan helag Israel e imbaing da hu nandinelan dan dios da e hi Bethel.

<sup>14</sup> Kaw eleg yu ehelen lan nunman e hi-gayu keka-ka-letan ni mekiggubbat? <sup>15</sup> Nem yan nunya ey e-helen kun hi-gayu e mebahbah ali bebley yun Moab tep hehgepen alin buhul yu. Et pampeteyen dadda kakat-agun lakaki. Hi-gak e Patul e AP-APU e Kabaelan tun emin ni Dios hu nanghel nunya. <sup>16</sup> Em, anggegannu law kebabhahan ni Moab!

<sup>17</sup> Lemyung kayun nambebley di neihnup diman niyadda nengamtan nandingngel humman ni bebley! Kanyuy ‘Kele endi law kabaelan tu niya dayaw tu?’ <sup>18</sup> Hi-gayun iDibon, pampekumbabah kayu ey lemyung kayu. Yudung kayud dep-ul, tep um-aliddalli memahbah ni Moab et bahbahen dadda neluhud ni bebley yu. <sup>19</sup> Ey hi-gayun iAroer,

elaw kayuddad keltad et mahmahan yuddan kamemsik ni nalpud Moab hedini hipa neipahding.

<sup>20</sup> Kandallin penummang day 'Nebabab hu Moab. Lemyung kayu ey nangih kayu. Yu peamtaddan nambebley di gilig ni Wangwang e Arnon e nebabab hu Moab.' <sup>21</sup> Nebabab idan emin hu bebley di nedundung tep humman hu mahapud ni meipahding ni hi-gada. Humman idan bebley ey Holon ya Jahsa, Mephaat <sup>22</sup> ya Dibon, ya Nebo, ya Bet Diblathim, <sup>23</sup> ya Kiriathaim, ya Bet Gamul, ya Bet Meon, <sup>24</sup> ya Keriot niya Bosrah. Nebabab emin hu bebley di Moab, neihnup winu neidawwi tep humman kastigu da.

<sup>25</sup> Endi law hu ikkedhel ni Moab. Heni nepututan hu ha-duk tu ey henih nahpung hu ngamay tu. Hi-gak e Dios hu nanghel nunya." <sup>26</sup> Kan mewani APU DIOS ey "Buteng yu Moab ma-lat mandapidaping, tep nginhay tuwak. Humman ni bebley ni Moab ey kamei-ellig ni nebuteng et ituplak tu uta tu et kangi-ngi-ngiin idan tutu-u." <sup>27</sup> Hi-gayun iMoab, nemnem yu neneghegnud yuddan helag Israel e henidda nadpap et meidum idad matekew.

<sup>28</sup> Hi-gayun iMoab, hi-yan yu bebley yu. Besik kayu et kayu mantalud leyang et henih kayuddan paluman kamambuuyadman. <sup>29</sup> Dingngel ku hu yuka panpahhiyan iMoab. Nemahhig ni kayu kamanpahhiya e nekabbabah hu yuka pannemnem ni edum ni tutu-u. <sup>30</sup> Hi-gak e hi APU DIOS ey inamtak e kayu kamampahhiya, nem endi silbitu ey mepappeg ali yuka pampahhiyai. <sup>31</sup> Et humman hu, nakka mannannangngih gapuh ni hi-gayun iMoab niyadda iKir Hareset.

<sup>32</sup> Nemahhig ali nangih ku gapuh ni hi-gam e Sibmah nem ya Jaser. Ka meih-ellig etan ni grapes ni immakyam hu pingi tu e linabhan tu hu Netey ni Baybay et datngan tu Jaser. Nem nebabab ida lameh mu et endin hekey natdaan. <sup>33</sup> Endi law hu pan-am-amlengan yu tep endi law ida malemeh ni grapes ni intanem yuddan Moab. Impambalin kun endi law hu kekpalen yu et endi law hu kapaen yun meinnum. Endi law hu kamantetekku gapuh ni amleng dan daka pangkekpalin grapes. Ma-nu tep wada kamedngel ni kamantetekku nem beken gapuh ni amleng da. <sup>34</sup> Ya kamedngel ey nangih idan tutu-un nambebley di Hesbon ingganah di Elealeh niyad Jahas, ey meipalpad Soar ingganah di Horonaim niyad Eglat Selisayah. Beken ni ebuh idadman tep anin ni yad kulukul di Nimrim et natduk.

<sup>35</sup> Impahding ku humman ma-lat paniked kun pan-appitan daddan dios dad dudungtu ni daka gihheban bangbanglu. Hi-gak e Dios hu nanghel nunya. <sup>36</sup> Et humman hu, henik etan ni kaman-ayyung ni kaumelemyung gapuh idan iMoab ey iKir Hareset tep endi law kinedangyan da. <sup>37</sup> Nampemukum idan tutu-u, kinuhkuh da iming da, ginedged da ngamay da ey nambalwasiddan langgusih. <sup>38</sup> Ida kaumelemyung ni emin hu iMoab ey ida kamantet-ul di baballey da anin di mulkaduh tep ida kamei-ellig etan ni pa-nay ni endi nemihed ni pinhik ku. <sup>39</sup> Nekabbabah law Moab! Nangih kayun bimbebley! Keheghegnudadda law ni tutu-u bebley yu tep anggeba-ing ey nebabab. Hi-gak e Dios hu nanghel nunya."

<sup>40</sup> Inhel dedan APU DIOS ni nunman e kantuy "Um-alidda tutu-un melpud edum ni bebley ni menggep ni Moab henin kapanyu-hekin tulduh e nebekyag payak tu, <sup>41</sup> et sakupen dadda bebley diman, anin idan nehammad ni neluhud ni tuping. Yallin nunman ey anin idan ketultuledan ni sindalu et endi law tuled ni nemnem da e henidda biin nganganin ni man-ungga. <sup>42</sup> Mebabab hu Moab et eleg ali law mabalin ni pambebleyan tep nginhay da-ak idan bimbebley.

<sup>43-44</sup> Kamei-ellig ni kamanhehheged ni hi-gada hu anggetakkut. Ya etan tuun ipatna tun ibbebsikan etan anggetakkut ni meipahding ey meknad bitu, ey ya etan eleg meknad bitu ey meknad appad. Tep nedatngan law hu tsimpuh ni implanuh kun kekastiguan dan emin. Hi-gak e Dios hu nanghel nunya. <sup>45</sup> Yadda bimesik ey ida-et meihhikkug di Hesbon e nampatulan eman lan hi Sihon, nem kamangkelgab. Anin idan duntug di Moab e bebley idan kamampahhiyan mekiggubbat et nalgab dama.

<sup>46</sup> Anggehemekek idan iMoab ni kamandeyyaw nan Kemos tep mebabab ida ey meillaw ida u-ungga dad edum ni bebley e mambalin idan himbut. <sup>47</sup> Nem peyaggud kulli mewani hu Moab ni edum ni aggew." Huyyaddan emin hu inhel nan APU DIOS ni meipahding ni Moab.

## 49

*Ya neipeamta meippanggep ni kastigun Ammon*

<sup>1</sup> Huyya inhel APU DIOS meippanggep ni Ammon: "Attudda helag Israel? Kele endi impahding dan nengiehneng ni Gad e bebley da? Ey kele yadda kamengidaydayaw nan

Molek hu nambebley diman? <sup>2</sup> Medettengan ali tsimpuh ni pedngel kuddan tutu-ud Rabbah di Ammon hu tekuk idan tutu-un an mekiggubbat. Mebahbah ali humman ni bebley et mambalin ni eleg mebebleyi. Ey yadda etan bebley di nanlinikweh diman ey melgab ida. Et yadda ilsrail ey degyunen dadda etan bimbebley ni nemiliw ni bebley da et bangngaden da humman ni bebley da.”

<sup>3</sup> Huyya hu inhel APU DIOS idan nambebley di Ammon: “Hi-gayun tutu-ud Hesbon, nangih kayu tep nebahbah hu Ai. Ey hi-gayun iRabbah, pambalwasi kayun langgusih ey lemyung kayu. Kayu pantalu, tep meillaw etan dios yun hi Molek di edum ni bebley. Anin idan u-ungngan patul niyadda padin Molek et meillaw ida damad neidawwin bebley. <sup>4</sup> Manghay kayu. Ma-nut yudda kaippahhiya hu kayyaggud ni nangkedeklan ditan bebley yu e makattaba kameitnem nem mebahbah ali. Kele yuka paka-iddinel hu kinedangyan yu? Kanyuy ‘Hipa ni-man hu um-alin mengubbat ni hi-gami?’ ” <sup>5</sup> Kan mewan APU DIOS e Ap-apun Kabaelan tun emin ey “Peellik ali tekkutan yu tep um-alidda nampambebley di nanlinikweh et degyunen dakey. Ey endilli um-alin memaddang ni hi-gayu. <sup>6</sup> Nem peyaggud kulli metlaing hu bebley yun Ammon ey pekeddangyan dakeyulli mewan. Hi-gak e DIOS hu nanghel nunya.”

*Ya meippanggep ni kastigin Edom e bebley idan helag Esau*

<sup>7</sup> Huyya inhel APU DIOS e Kabaelan tun emin ni meippanggep helag Esau ni nambebley di Edom: “Attudda mewan etan nangkenemnan niya nangkelaing ni tutu-udtan Teman ey? Kaw endin hekey, anin hakey ew ngun natdaan ni menuggun ni hi-gayu? <sup>8</sup> Hi-gayun iDedan, besik kayu et kayu mantaluddad leyang tep meilleggat kayulli pengastiguan kuddan helag Esau. Nedatngan law pengastiguan kun hi-gada. <sup>9</sup> Ya etan kamemlag ni grapes ey wadan wada eleg tu peplaga ma-lat wada elan idan nangketwet. Hanniman ida dama kamenekkw ni hileng e ebuh hu pinhed dan daka ella. <sup>10</sup> Nem hedin hi-gak man ang-angen ku et maeladdan emin etan wadad nambebleyan idan helag Esau et endi an matdaan. Mebahbah idan emin hu iEdom, anin idan dinagis. <sup>11</sup> Nem ihhehwang kudda nangkepu-hig ni u-ungnga niyadda nebalun bibi-i tep hi-gak hu daka pandinneli.”

<sup>12</sup> Huyya pay hu inhel APU DIOS: “Hedin manhelheltap etan ida endi bahul tu et nema-ma-ma ngu hu panhelheltapan yu. Em, mahapul ni manhelheltap kayu dama. <sup>13</sup> Hi-gak mismuh ey insapatah ku e ya Bosrah ey mambalin ni angetakkut hu ang-ang tu ey mambalin ni eleg mebebleyi. Et heghegnuden idallin tutu-u ey pengi-ang-angan dan neidutan ni bebley. Anin idan neihnup ni bebley diman ey mebahbah ali et mannaneng ni hanniman ni ingganah. Hi-gak e DIOS hu nanghel nunya.”

<sup>14</sup> Dingngel ku inhel APU DIOS e wadadda neitu-dak ni an nanghel idan tutu-ud kebebbebley et amungen dadda sindalu da et mandaddan idan mengubbat ni Edom. <sup>15</sup> Huyya hu inhel APU DIOS idan iEdom: “Pambalin dakeyun nekakkapuy e endi kabaelan yun makihangga et pihulen dakeyullin emin ni tutu-u. <sup>16</sup> Nemahhig hu yuka pampahhiyya ey yuka petattakkut ida edum ni tutu-u. Ey ma-nut nambebley kayudda mabetud ta-pew ni duntug e henin tulduh e kamanha-ad di naka-itta-gey, nem pelehbeng dakeyullin hi-gak. Hi-gak e DIOS hu nanghel nunya.

<sup>17</sup> Nemahhig ali kebahbahan ni Edom et emin idalli melabbah ey metngadda ey nemahhig ali takut da. <sup>18</sup> Humman ni meippahding alin Edom ey heni lan neipahding di Sodom niya Gomorrah ni nunman et yadda bebley ni neihnup diman, et endi law nambebley diman. Hi-gak e DIOS hu nanghel nunya. <sup>19</sup> Heni-ak alin layon ni melpud mamuyung di gilig ni Wangwang e Jordan et umli-ak di neipattulan idan kalneroh e humman hu Edom et bumsik ida et hi-yanan da bebley. Et pillien kulli law etan man-ap-apu. Hipa henin hi-gak? Kaw wada hakey ni ap-apun kabaelan tun mekihanggan hi-gak?

<sup>20</sup> Et humman hu, dengel yu eya implanuh kun pehding kuddan iEdom niyadda bimbebley di Teman. Pan-inuhnuh idallin buhul da hu u-ungnga da et pan-ibsik dadda. Et nemahhig ali takut idan tuudman.

<sup>21</sup> Yallin kebahbahan ni Edom ey manyegyeg hu puyek ey medngel ali palak idan tutu-u ingganah di gilig ni Madlang ni Baybay. <sup>22</sup> Yadda buhul ni Bosrah ey um-aliddan mengubbat nunman ni bebley ey elistuddan henidda tulduh ni binekyag tu payak tun nanyu-hek. Yan nunman alin aggew ey nemahhig hu takut idan sindalun Edom e heniddan bii indegeh ni egeh tun man-ungnga.”

*Ya neipeamta meippanggep ni kastigin Damascus*

<sup>23</sup> Huyya dama hu inhel APU DIOS meippanggep ni Damascus: “Medennagan ey memunnumunnulli nemnem idan tutu-ud Hamat et yad Arpad tep dingngel da hu lawah ni meippahding ni hi-gada. Ida kaumtatakut ey endi linggep da e heniddan danum di

baybay e endi ineng tu hedin wada pewek. <sup>24</sup> Kimmakkapuy ida tutu-ud Damascus, nem gapuh ni takut da ey umbesik ida. Ey ida kamanhelheltap henin biin indegeh ni egeh tun man-ungnga. <sup>25</sup> Mehi-yan ali humman ni nandingngel ni bebley ey yan nunman la ey ida kaman-am-amleng hu nambebley diman. <sup>26</sup> Nanna-ud ni mangketey idalli kakat-agun lalakid keltad. Emin idalli sindalu ey mettey idan nunman ni tsimpuh. <sup>27</sup> Leigaben kulli Damascus et malgab hu baley ni patul e hi Ben Hadad. Hi-gak e Dios e Kabaelan tun emin hu nangel nunya."

*Ya neipeamta meippanggep ni kastiguddan helag Kedar et yadda nambebley di nan-ap-apuan Hasor*

<sup>28</sup> Huyya dama inhel APU DIOS ni meippanggep idan helag Kedar et yadda bebley ni nan-ap-apuan Hasor e sinekup nan Nebukadnessar e patul di Babilon: "Gubat yu et bahbahren yudda tutu-un nambebley di Kedar di appit ni kasimmilin aggew. <sup>29</sup> Pan-ala yudda tulda da, ya emin ni wadad kampu da niyadda kalneroh da, anin idan kamel da. Ey kanyun hi-gaday 'Anggetakkut law eyad bebley yu.' <sup>30</sup> Hi-gak e hi APU DIOS ey kangkuy 'Besik kayun iHasor et kayu mantalu tep implanuh nan Nebukadnessar e patul di Babilon ni bahbahren dakeyu.'"

<sup>31</sup> Inhel dedan APU DIOS ni hi-gatu e kantuy "Inah ka et mu gubaten humman ni bebley ni kamakallinggep. Nelakah ni hehgepen tep eleg maluhud. <sup>32</sup> Pan-ibsik yuddan tutu-un emin hu kamel da niyadda bakeda. Iwwahit kudda humman ni tutu-un ansikkey bewek da. Peellik hu memabhah ni hi-gadad nambinbina-hil, <sup>33</sup> et mambalin hu Hasor ni eleg mebebleyin ingganah, et panha-adan idan ahhud muyung."

<sup>34</sup> Yan eman ni laputan nampatulan Sedekiah di Judah ey inhel APU DIOS e Kabaelan tun emin ni hi-gak hu pehding tun Elam. <sup>35</sup> Kantuy "Petteyen kuddan emin hu mapenan kaikkedhel idan bimbebley di Elam. <sup>36</sup> Ey peellik ida buhul dan kamei-ellig ni nallet ni dibdib ni mengiwwehht ni hi-gadad kebebbebley eyad puyek. <sup>37</sup> Pambalin kudda humman ni iElam ni umtakut idan buhul dan neminshed ni memettey ni hi-gada. Ey gapuh ni nemahhig ni bunget ku ey bahbahren kudda e pellow kudda sindalun mengubbat ni hi-gada ingganah mettey idan emin. <sup>38</sup> Petteyen ku patul da niyadda aap-apu da et ihha-ad kudman hu pan-ap-apuan ku. <sup>39</sup> Nem peyaggud kulli mewan ida iElam et kumedangyan ida. Hi-gak e Dios hu nangel nunya."

## 50

<sup>1</sup> Huyya inhel APU DIOS ni hi-gak ni e-helen ku meippanggep ni Babilon et yadda tutu-udman. <sup>2</sup> "Hi-gayun tutu-u, peamta tayu huyyad kebebbebley, ey ita-gey tayu hu bandelah et pengamtaan idan tutu-u e meapput hu Babilon. Ey mebahbah idalli hu dios da e di Bel nan hi Marduk et ibbabaing dadda dios dan kinapayan tuu. <sup>3</sup> Wadalli umalin melpud north ni mengubbat ni hi-gada et bahbahren dalli Babilon et mambalin ni eleg mebebleyi. Et yadda tutu-u niyadda animal da ey memsik ida et endilli manha-ad diman."

<sup>4</sup> Kan APU DIOS ey "Et yallin nunman ey mannengngih idallin mampengelli iIsrael niyadda iJudah ni nememmak ni hi-gak e Dios da. <sup>5</sup> Mahmahan dalli hu dalan ni mampellaw di Zion et umlaw idallidman. Et hammaden da law ni mekitbal ni hi-gak e hi APU DIOS ey issapatah dalli e pannananeng da humman pekitbalan dan hi-gak.

<sup>6</sup> Yadda tutu-uk ey henidda kalneroh ni eleg ipaptek idan kamampattul di duntug et matelak ida tep neiwalleng ida. Nanhawahawang ida tep eleg da amta hedin attu dellanen dan mambanggad di pan-iyatuan da tep nehamaadda. <sup>7</sup> Et patyen idan buhul dan nena-kup ni hi-gada. Kan idan buhul day 'Beken ni lawah humman ni impahding tayu, tep nanliwat idan APU DIOS e nandinelan ida lan eman ni aammed da.'

<sup>8</sup> Nem yan nunya ey kangkuy 'Hi-gayun tutu-uk ni helag Israel, hi-yan yu Babilon, heni kayun gelding e daka ippangulu edum da. <sup>9</sup> Tep itu-dak ku dakel ni sindaluddan etta-ting ey nangka-let ni bebley di appit ni north et umliddan mengubbat ni Babilon. Ihamad dallin mampustuh et gubaten da et apputen da. Nelaing idan umpana ey endi kameihhallan daka ippana. <sup>10</sup> Peka-ellan dallin emin hu pinhed dan ellan di Babilon.' Hi-gak e Dios hu nangel nunya."

<sup>11</sup> Kan mewan APU DIOS ey "Hi-gayun iBabilon, nan-ala yun emin hu hipan wadad bebley ku. Kayu kaman-am-amleng ni mambebbessik e heni kayun bakan kaman-illik ey heni kayun kebayyun kaman-eellug. <sup>12</sup> Nem mambalin ali bebley yun endi bilang tu niya metawwey ali et meabba-ingan ey mambalin alin mekamma-ganan et eleg ali law mebebleyi. <sup>13</sup> Tep gapuh ni bunget ku ey mebahbah ali bebley yu et endilli mambeblye diman. Et metngaddallin emin hu menang-ang ni nambalanan tu ey hehgehuden da.

<sup>14</sup> Hi-gayuddan nelaing ni umpana, liktub yu Babilon et pampanaen yudda tutu-udman tep nanliwat idan hi-gak e AP-APU. <sup>15</sup> Ey pantettekkuk kayun mengubbat nunman ni bebley. Deh! Nansukuh ida tep nebahbah hu luhud da. Neipahding humman ni hi-gada tep imbaleh APU DIOS hu impahding da et meipahding daman hi-gada hu impahding dan edum ni tutu-u. <sup>16</sup> Entan tu iebulut idan mantennem ey man-enni. Ey pabsik yudda nekibebley ni hi-gada et umenamut idad bebley da tep ida kamengelli buhul dan mengubbat ni hi-gada."

<sup>17</sup> Kan mewan APU DIOS ey "Yadda tutu-uk ni helag Israel ey ida kamei-ellig di kalneroh ni kapampepdugan layon et maiwehhit ida. Nemangulu eman patul ni Assyria ni nengubat ni hi-gada et maihullul hi Nebukadnessar ni patul di Babilon ey nemahhig hu impahding tun hi-gada. <sup>18</sup> Et gapun nunman ey hi-gak e hi APU DIOS e Kabaelan tun emin ni Dios idan helag Israel ey kastiguen ku hi Nebukadnessar et yadda tutu-u tu, henin nengastiguk ni patul di Assyria. <sup>19</sup> Nem yadda helag Israel ey ibbanggad kuddallid bebley da et kanan dadda simmemel ni kamekkan di Karmel niyad Bashan ey emin ida pinhed dan kennen ni simmemel di duntuduntug di bebley di Epraim niyad Gilead. <sup>20</sup> Yallin nunman ey aggew ey endilli law neliwtan idan iJudah tep pessinsahan kulli liwat idan natdaan ni hi-gada. Hi-gak e Dios hu nanghel nunya.

<sup>21</sup> Gubat yudda iMerathaim niyadda iPekod et pateyen yudda et meendidda. Mahapul ni pehding yudda huyyan immandal kun hi-gayu. Hi-gak e Dios hu nanghel nunya."

<sup>22</sup> Kamedngel hu kamanggugubat di Babilon, ey kamedngel e kamangkebahbah. <sup>23</sup> Yan nunman ey heni massilyu tep kamei-ellig ni minassilyu tu hu kebebbebley eyad puyek et mebuklidda. Nem yan nunya ey nekabbahbah et endi law silbitu. Et mukun kametngadda katutuud kebebbebley ni neipahding ni nunman ni bebley. <sup>24</sup> Hi-gayun bimbebley di Babilon ey nekihangga kayun hi-gak, nem heni dakeyu kinna.

<sup>25</sup> Kamei-ellig ni imbeghul ku hu nengituan kuddan almas et ukaten ku tep hi-gak e DIOS e Eta-gey ni peteg niya Kabaelan tun emin ey wada pehding kun Babilon. <sup>26</sup> Ali kayun tutu-ud edum ni bebley et hegepen yu Babilon et pan-ibeghul yudda aallang idan tutu-u et bahbahen yudda baballey da niyadda luluhood ni bebley da. Mahapul ni bahbahen yu humman ni bebley e endi tetdaan yun eleg mebahbah. <sup>27</sup> Ey patey yun emin ida sindalu da, tep nedatngan law aggew ni kebahbah da. <sup>28</sup> Yadda umbesik ni iBabilon ni umlaw di Jerusalem ey kanday "Imbaleh ni AP-APU e Dios tayu hu nemahbahen ni buhul tun Tempol tu."

<sup>29</sup> "Ali kayun mapena et pampanaen yudda iBabilon. Kaipustuh kayud nanlinikweh di bebley da et endi bumsik. Et ipahding yun hi-gada hu henin impahding dan tutu-ud edum ni bebley et meibleh. Tep nginhay da-ak e kayyaggud ni peteg ni AP-APU e Dios idan helag Israel. <sup>30</sup> Et humman hu, mettey idallin emin di keltad hu kakat-agun lalakkin u-ungnga da, anin idallin sindalu da. Hi-gak e Dios hu nanghel nunya."

<sup>31</sup> "Hi-gayun iBabilon, kastiguen dakeyun hi-gak e DIOS e Eta-gey ni peteg niya Kabaelan tun emin, tep nemahhig yuka pampahhiya. Nedatngan law tsimpuh ni gintud kun kebahbahen yu. <sup>32</sup> Kamei-ellig ni meihhungbub kayun iBabilon e kamampahhiya et metu-li kayu ey endi umbaddang ni hi-gayu. Ey lelgaben ku hu bebley yu et mailegat ida bebley di nanlinikweh ni bebley yu."

<sup>33</sup> Kan mewan APU DIOS e Kabaelan tun emin ey "Ida kamanhelheltap hu iIsrael niyadda iJudah. Eleg ida ibbukyat ni nampap ni hi-gada. <sup>34</sup> Nem ya etan mengihwang alin hi-gada ey neka-let. Ya ngadan tu ey APU DIOS e Kabaelan tun emin. I-ehneng tuddalli ey pelinggep tudda, nem hedin yadda iBabilon ey peelli tu ligat ni hi-gada."

<sup>35</sup> Kan mewan APU DIOS e Kabaelan tun emin ey "Ya ispadah hu ikkatey idan iBabilon, anin idan ap-apu da et yadda nangkelaing. <sup>36</sup> Hanniman dama ikkatey idan maitek ni prophet da et humman keang-angan tu e endi nemnem da. Ey mettey ida dama nangka-let ni sindalu da. <sup>37</sup> Mepettey ida kekebbayyu da ey mebahbah ida kalesah da. Ey mepettey ida dama sindalun edum ni bebley ni mekibbaddang ni hi-gada. Nambalin idan nekakkapuy e henidda bii. Ellan alin buhul dan emin hu hipan wadad bebley da. <sup>38</sup> Eggak peelli udan et matduk ida wangwang niyadda kulukul di bebley da. Mukun pehding kudda humman ey tep napnu hu bebley dan beken ni makulug ni dios ni kinapyan tuu ey nambalin ni endi nemnem idan tutu-u gapuh idan nunman ni beken ni makulug ni dios.

<sup>39</sup> Et panha-adan idallin animal di muyung niyadda sisit hu Babilon. Et humman hu endillin ingganah hu mambebley diman. <sup>40</sup> Ey meipahding alin nunman ni bebley hu henin neipahding di Sodom niyad Gomorrah e binahbah ku anin idan bebley ni neihnpud diman et endi law nambebley diman. Hi-gak e DIOS hu nanghel nunya.

<sup>41</sup> Ang-ang yu kedi! Ida kamengelli hu sindalun nalpud neka-iddawwin bebley di appit ni north. Dakel hu papatul ni nandaddan ni um-alin mengubbat nunman ni

bebley e Babilon. <sup>42</sup> Humman idan sindalu ey makabbunget ida ey endi hemek da ey nanpan-almas idan pana niya pahul. Hedin nantakkay idad kebayyu et ida kamenglaw ey henidda kamabungngug ni dalluyun di baybay. Nandaddan idan mengubbat ni Babilon. <sup>43</sup> Yan pengngelan alin patul ni Babilon meippanggep idan nunman ni sindalu ey umkapuy gapuh ni takut tu ey eleg tu han-isipel hu degeh tu e heni biin ngannganih ni man-ungnga.

<sup>44</sup> Um-ali-ak et pampepdugen kuddalli iBabilon henin ellian ni layon ni melpud mamuyung di gilig ni Jordan et lumaw di kudal et bumsik ida kalneroh. Et yalli pillien ku hu man-ap-apullidman ni bebley. Ang-ang yu kedi, hipa henin hi-gak? Hipa ap-apun kabaelan tun mekihhanggan hi-gak?"

<sup>45</sup> Dengel yu eya implanuh APU DIOS ni pehdng tun Babilon niyadda tutu-udman. Anin idan u-ungnga da et pan-innuhuh idallin buhul dadda et illaw daddad edum ni bebley. <sup>46</sup> Yallin keapputan ni Babilon ey manyegyeg. Medngel alid edum ni bebley hu palak idan tutu-u.

## 51

<sup>1</sup> Huuya inhel APU DIOS: "Peellik ali memahbah ni Babilon niyadda tutu-udman. <sup>2</sup> Em, peellik idalli tutu-ud edum ni bebley ni memahbah ni Babilon, henin kapengityabin dibdib ni degi niya dagemi. Mambinbina-hil idalli mengubbat ni Babilon et endin hekey matdaan diman. <sup>3</sup> Entan tudda idwasi hu sindalu dan wayah dan mengihhuklub ni ussalen dan mekiggubbat. Ey entan tudda idwasin wayah dan umpana. Entan tudda hemek hu kakat-agu niya nangkea-amma. Mahapul ni petteyen yuddan emin. <sup>4</sup> Mangkelipputan idalli et mangkettey idad keltad di Babilon. <sup>5</sup> Tep hi-gak e AP-APU e Kabaelan tun emin ey eggak ida walleng hu ilrael niya iJudah anin ni nanliwat idan hi-gak e kayyaggud ni peteg ni Dios da.

<sup>6</sup> Besik kayu! Hi-yan yu Babilon et meihwang kayu. Ey ang-ang yu et eleg kayu mailegat ni mettey tep ya liwat idan Babilon. Yan nunya pengiblehan kuddan impahding da et kastiguen kudda tep humman lebbeng tun meippahding ni hi-gada. <sup>7</sup> Yadda Babilon ey kamei-ellig ni singnged kun balituk ni basuh ni neha-adan ni meinnum ni ininum idan kebebbbley eyad puyek et mabuteng ida et matelak hu nemnem da. <sup>8</sup> Nem meapput ali ey mebahbah human ni bebley. Lemyung kayu ey nangih kayu. Ey ala kayun pengeggah yun hi-gatu et edihey meeggahan.

<sup>9</sup> Kan idan nekibebley diman ey 'Impatna tayun eggahan hu Babilon nem eleg meeggahi. Et humman hu, hi-yan yu kuma et umenamut itsud bebley tayu tep nemahhig hu nengastigun APU DIOS nunyan bebley.'

<sup>10</sup> Kan idan tutu-uk ey 'Imbaleh APU DIOS hu impahding idan iBabilon ni hi-gatsu. Elaw itsud Jerusalem et tayu peamtaddan tutu-udman hu impahding ni AP-APU e DIOS tayu.'

<sup>11</sup> Hinegnit APU DIOS ida patul di Medes \* et gubaten da Babilon et mebahbah et ibleh tu nemahbahan dan Tempol tu. Kan idan aap-apun sindaludman ey "Ta-lid yudda pana yu ey idaddan yu happyaw yu! <sup>12</sup> Ita-gey yu bandelah ni pengamtaan e gubaten idan sindalu hu Babilon. Ey ihamnah yun ippustuh ida mangguwalya. Ey pandaddan ida an mambebtak tep peamnu law APU DIOS hu implanuh tun meippahding ni Babilon."

<sup>13</sup> Hi-gayun iBabilon ni nambebley di dakel danum ey kedangyan ni bebley tep neka-iggawwan pannegosyohan idan katuuutu, nedatngan law keappagan yu. Kayu kamei-ellig ni sinulid ni kamepegtang. <sup>14</sup> Insapatah APU DIOS e Kabaelan tun emin e i-ali tu dakel ni peteg ni buhul yun henin kadinakkel idan dudun. Ittettetkuk dalli nengapputan dan hi-gayu. <sup>15</sup> Lintun APU DIOS hu puyek ni neiha-adan ida eyan bebley ey imbiklag tu kabunyan gapuh ni et-eteng ni kabaelan tu niya kalinaing tu. <sup>16</sup> Hedin minandal tu danum di kabunyan man kamabungngug. Ey tuka peukkat hu kulput. Ey hi-gatu kamengippeellin kedyam hedin kaman-uddan ey tuka peukkat hu dibdib ni kamelpud neiha-adan tu. <sup>17</sup> Huuyadda hu keang-angan tun endi kei-ingngehan idan tuun hi-gatu, tep ya tuu ey endi nemnem da. Ida kamengapyan dios da, nem gapuh idan nunman ni dios ni daka kekapyaa ey mebe-ing ida tep beken ni makulug ni dios ida humman ey endi biyag da. <sup>18</sup> Endi silbiddan nunman ni beken ni makulug ni dios. Medettengan ni tsimpuh ni mebahbah ida. <sup>19</sup> Hi-gatu e DIOS idan helag Israel ey beken ni heniddan nunman ni beken ni makulug ni dios tep hi-gatu nanletun emin ni hipan wada. Ey pinili tudda helag Israel ni tutu-u tu. Ya ngadan tu ey 'Hi APU DIOS e Kabaelan tun emin.'

<sup>20</sup> Kan APU DIOS ey "Hi-gayun iBabilon ey kayu kamei-ellig ni massilyu ey almas kun kaussalad gubat. Et mukun inusal dakeyun nengubat ni kebebbbley eyad puyek.

\* 51:11 51:11 Ang-ang yu hu Isaiiah 13:17 et ya Daniel 5:31 niya 6:28.

<sup>21</sup> Inusal dakeyun nemahbah idan kalesah, yadda kebayyu, yadda ngimaneho niyadda nampantakkay. <sup>22</sup> Ey inusal dakeyu ni nematey ni tutu-u, nangkei-ina ey nangkea-amma, yadda kakat-agu niyadda kaungaungan bibi-i niya lalakki. <sup>23</sup> Inusal dakeyun nematey idan kamampattul ni kalneroh, yadda daka ippattul, yadda kamampeyew niyadda bakan daka pan-elladu. Ey inusal dakeyun mengapput idan aap-apud kebebbley niyadda opisyal da.

<sup>24</sup> Nem yan nunya ey ang-ang yu pehding kun hi-gayun iBabilon ni pengiblehan kun lawah ni impenahding yuddan tutu-uk di Jerusalem. <sup>25</sup> Hi-gak law mengubbat ni hi-gam e Babilon, e kamei-ellig di duntug ni nemahbah ni kebebbley eyad puyek. Kastiguen daka e ullinen dakad deplah et magudu ka et mambalin kan dep-ul. <sup>26</sup> Et endilli an meellan batun meussal ni meikkapyad baley. Ey mambalin kallin eleg mebebleyin ingganah. Hi-gak e Dios hu nanghel idan nunya.

<sup>27</sup> Ita-gey yu bandelah niya patnul yu tangguyup et amtaen idan kebebbley et mandandan idan mengubbat ni Babilon. Ey ehel yuddan sindalun papatul di Ararat, yad Minni niyad Askenas et da gubaten hu Babilon. Putuk yu hu mengipappangulun mengubbat nunman ni bebley. Ey idaddan yu dakel ni peteg ni sindalun henin kadinakkel idan dudun. <sup>28</sup> Idaddan yudda sindalun patul di Media, yadda opisyal tu et yadda sindaluddan bebley ni sinekup tu et da gubaten hu Babilon. <sup>29</sup> Kamei-ellig ni kamangegeygey ey kamansillesillen hu Babilon ni degeh ni annel tu tep peamnun APU DIOS hu implanuh tun pehding tun hi-gatu et mambalin ni eleg mebebleyi. <sup>30</sup> Binahbah idan immalin ngubat hu eheb niya luhud nunman ni bebley et legaben dadda baballey ey ida kamanhahha-ad hu sindalud kampu da e eleg ida meukkat, tep nambalin ida law ni heni biin neendi tuled da. <sup>31</sup> Kamanhuhhullul hu kaum-alin mengippeamta etan ni patul e binahbah idan buhul da hu luhud di nambinbina-hil ni bebley da et hegepen da. <sup>32</sup> Ey hinenian idan nunman ni buhul dan emin hu dellanen dan umbesik anin idan pan-agwatan dan wangwang. Linggab dadda pay hu kapangguwalyaidman ni bebley. Et humman hu nemahhig takut idan sindalun iBabilon.

<sup>33</sup> Hi-gak ni DIOS e Kabaelan tun emin ni Dios idan helag Israel ey kangkuy: Anggegannu law ni mambalin ni heni illikan hu Babilon et yadda tutu-udman ey heniddalli pagey ni pan-iggasin idan buhul da."

<sup>34</sup> Kan idan iJerusalem ey "Kamei-ellig ni ginudu daitsun Nebukadnessar e patul di Babilon et kanen daitsu. Ey kamei-ellig ni impehel tu kinedangyan tayu tep kamei-ellig ni impambalin daitsun pa-nay ni endi neihudu tep inla tu hu pinpinhed tu et ibbeng tudda eleg tu pinhed. <sup>35</sup> Hamban meibleh hu nengipehelheltapan idan iBabilon ni hi-gatsu niya nemateyan dan dakel ni edum tayu ey."

<sup>36</sup> Kan APU DIOS idan iJerusalem ey "I-ehng dakeyun hi-gak et hi-gak hu mengibleh ni impahding idan buhul yun hi-gayu. Mag-anan kudda wangwang niya kululuk di bebley da. <sup>37</sup> Bahbahen kulli humman ni bebley et pambebleyan idallin animal di muyung. Ey anggetakkut ali ang-ang tu et emin idalli menang-ang ey umtakut ida ey hehegnuden dalli. Ey endilli law mambebley diman.

<sup>38</sup> Yadda iBabilon ey ida kamei-ellig ni layon ni kaum-ngengyed hedin tuka pangkenna pintey tu. <sup>39</sup> Kaw eleg ida mehingla? Et humman hu indaddanan kuddan hemmulen da et painumak ida. Nan-am-amleng ida et ida neugip nem eleg idalli law umbangun. <sup>40</sup> Pellaw kudda memettey ni hi-gada et henidda impah ni kalneroh niya gelding ni mekleng.

<sup>41</sup> Huyya inhel APU DIOS ni meippanggep ni Babilon. Ya etan bebley ni kapekaddeyyawan emin ni tutu-u ey inapput idan buhul tu. Ey nambalin ni anggetakkut hu ang-ang tud tutu-ud kebebbley. <sup>42</sup> Kamei-ellig ni umla-pih hu dalluyun di baybay et malbengan hu Babilon. <sup>43</sup> Nekabbahbah law humman ni bebley ey nambalin ni nekamma-ganan. Et mukun endi law nambabley diman ey endin hekey kamengidlan diman. <sup>44</sup> Anin ni luhud nunman ni bebley et nekabbahbah. Emin ida etan nan-alan iBabilon di edum ni bebley et iappit dan Bel e dios da ey ibbangngad kuddad nengalan da. Ey ya pehding kun mengastigun Bel ey endien ku hu dinel idan tutu-un hi-gatu ma-lat eleg da law dayawen.

<sup>45</sup> Hi-gayun helag Israel ni nekibebley di Babilon, besik kayu et meihwang kayud pehding kulli gapuh ni nemahhig ni bunget ku. <sup>46</sup> Nem entan kedismayah yu ey entan takut yu gapuh idan dedngelen yun meippanggep ni gubat. Katootoon ey wada dedngelen yun meippanggep ni papatey niya gubat idan patul. <sup>47</sup> Tep medettengan ali tsimpuh ni pemahbahan kuddan kinapyan tuun dios di Babilon. Mebabba-ingan ali humman ni bebley ey mepettey alin emin hu nambabley diman. <sup>48</sup> Melpuddallid north hu sindalun memahbah ni Babilon. Ey mantetekkek idalli wadad puyek niyad kabunyan gapuh ni amleng dan nebahbahan tu. <sup>49</sup> Mettey idalli iBabilon tep nampatey

dadda helag Israel niyadda edum ni tutu-ud kebebbbley eyad puyek. Hi-gak e Dios hu nanghel nunya."

<sup>50</sup> Kan APU Dios idan tutu-u tud Babilon ey "Hi-gayun neihwang di katey, hi-yan yu huttan ni bebley. Entan tu pelinlinwannin man-ang-ang-ang. Hedin dammutu, besik kayu. Nemnem yuwak ni AP-APU yu ey nemnem yu hu Jerusalem ni bebley yu, anin ni neidawwin bebley hu kad-an yu."

<sup>51</sup> Kanyuy "Nekabbaingan kami tep hinibit idan tutu-ud edum ni bebley hu Tempol ni AP-APU e DIOS mi."

<sup>52</sup> Ey kangkuy "Medettengan ali tsimpuh ni pemahbahan kuddan beken ni makulug ni dios di Babilon ey medngel alid emin di bebley hu palak idan mangkeliputan ni tutu-u. <sup>53</sup> Anin na-mun kantu et kapyaan idan iBabilon hu eta-gey ni peteg ni luhud da et datngan da kabunyan nem memahbah ni emin hu wadad bebley dan pengipellawan kuddan buhud da. Hi-gak e Dios hu nanghel nunya."

<sup>54</sup> Kan mewan APU DIOS ey "Dengel yu nangih idan tutu-ud Babilon tep nebahbah hu bebley da. <sup>55</sup> Ida kamei-ellig di dalluyun hu buhud ni Babilon. Ida kamengelli ey kamedngel hu tekuk dan mengubbat ni nunman ni bebley. Pebahbah ku hu Babilon ma-lat paineng kudda bimmebley. <sup>56</sup> Nadpap ida sindalu da ey nangebahbah hu pana da tep hi-gak e AP-APU e Dios ni kamengastigun lawah ni tuu ey pehdng ku hu lebbeng tun meippahding ni Babilon.

<sup>57</sup> Buttengen kudda aap-apu da, yadda nangkelaing ni hi-gada, yadda kamengipap-pangngulu niyadda sindalu da. Et hedin meuggip ida ey eleg ida law umbangun. Hi-gak etan Patul e DIOS e Kabaelan tun emin hu nanghel nunya.

<sup>58</sup> Metu-liddalli nehammad ni luhud nunman ni bebley ey megihheb ida eta-gey ni eheb tu. Et mambalin ni endi silbin ingngunungunun bimmebley tep megihheb idalli humman ni nan-aatuan da. Hi-gak e Dios e Kabaelan tun emin hu nanghel nunya."

<sup>59</sup> Hi Seraiah e u-ungngan Neriah e u-ungngan Mahseiah hu kamemaddang nan Sedekiah e patul. Yan nunman ni meikka-pat ni toon ni nampatulan Sedekiah di Judah ey nekilaw hi Seraiah ni hi-gatud Babilon et itugun kudda huyya! <sup>60</sup> Hi-gak e hi Jeremiah ey intudek kuddad liblud emin hu angetakkut ni meippahding ni kebahbahhan ni Babilon niya meippanggep nunman ni bebley. <sup>61</sup> Kangkun Seraiah ey "Hedin umdateng kad Babilon ey ang-ang mu et etelen mun ibbidbid emin hu neitudek deya et dengelen idan tutu-u. <sup>62</sup> Ey pandasal ka la e kammuy 'APU DIOS, inhel mu e bahbahen mu huyyan bebley et endilli law mategun manha-ad di deya, tuu niya animal. Ey kammuy mambalin ni eleg mebebleyin ing-ingganah.' <sup>63</sup> Hedin ginibbuh mun ibbidbid idan tutu-u huyya, ludun mu ey bedbed mu et iiket mu batu et bekahen mud Wangwang e Euphrates. <sup>64</sup> Ey kammuy 'Henin nunya meippahding ni Babilon niyadda tutu-udman e kamei-ellig ni umlaw di dallem tu et eleg ali law umta-pew tep bahbahen APU DIOS.'" Huyya pappeg ni inhel nan Jeremiah.

## 52

### *Ya nebahbahan ni Jerusalem*

<sup>1</sup> Hi Sedekiah ey dewampulut hakey hu toon tu eman ni nampatulan tud Judah et man-ap-apun hampulut hakey ni toon. Ey yad Jerusalem nambebleyan tu. Hi inetu ey hi Hamutal e u-ungngan Jeremiah e iLibnah. <sup>2</sup> Nanliwat hi Sedekiah nan APU DIOS henin eman lan patul e hi Jehoiakim. <sup>3</sup> Et nemahhig hu bunget APU DIOS idan tutu-ud Jerusalem niyad Judah et palaw tuddad edum ni bebley.

Entanni ey ngin hay nan Sedekiah hi Nebukadnessar e patul di Babilon, <sup>4</sup> et umli hi Nebukadnessar e ingkuyug tuddan emin hu sindalu tu et gubaten da Jerusalem eman ni meikkeppulun aggew ni meikkeppulun bulan ni meikkahyam ni toon ni nampatulan Sedekiah. Nangkampud Nebukadnessar di ba-hil ni luhud ni Jerusalem et pan-ikapya da dellanan dan umhegep di bebley. <sup>5</sup> Humman impenahding da ingganah eman ni meikkahampulut hakey ni toon ni nampatulan Sedekiah.

<sup>6</sup> Ya eman ni meikkahyam ni aggew ni meikka-pat ni bulan nunman ni toon e endin hekey law kennen idan tutu-ud bebley, <sup>7</sup> ey binahbah law idan iBabilon etan luhud et hegepen da bebley. Liniktub da bebley, nem bimmesik idan emin hu sindalun Sedekiah ni hileng e indalan da etan di garden ni patul et idlan da etan di eheb ni nandammuan ni dewwan luhud et mamsik idan nampalaw idad appit ni Nedeklan e Jordan.

<sup>8</sup> Nem pindug idan sindalun iBabilon hi Sedekiah et depapen da etan di nandeklan di Jericho et hi-yanen idan sindalu tu. <sup>9</sup> Inlaw da hi Sedekiah di kad-an Nebukadnessar di Riblah di Hamat et bistigalen tu et ehelen tu kastigu tu. <sup>10</sup> Yadman Riblah ey in-oldean Nebukadnessar e patul di Babilon e petteyen idan sindalu tu etan ida lalakkin u-ungngan



Sedekiah ey kaang-ang-angan Sedekiah. Anin idan opisyal di Judah et impapetey tudda.  
<sup>11</sup> Kinulap tu hi Sedekiah et hantu pebangkiling. Entanni ey inlaw tud Babilon et pakelabut tudman ingganah neteyyan tu.

*Ya nebahbahan ni Tempol*

<sup>12</sup> Yan eman ni meikkeppulun aggew ni meikkelliman bulan ni meikkepulut heyam ni toon ni nampatulanan Nebukadnessar di Babilon ey limmaw di Jerusalem hi Nebusaradan e ap-apun guwalyan patul, <sup>13</sup> et legaben tu hu Tempol, ya baley ni patul, yadda edum ni baley diman, niyadda baley idan eta-gey saad tud Jerusalem. <sup>14</sup> Ey binahbah idan sindalu tu etan tuping ni luhud nunman ni bebley. <sup>15</sup> Inlaw nan Nebusaradan hu edum ni nekawwetwet ni tutu-un natdaan di Jerusalem, yadda nelaing ni hipan ngunu et yadda sindalun iIsrael ni nansapatah ni mei-dum ni hi-gadan iBabilon. <sup>16</sup> Nem eleg tudda ikuyug hu edum ni nekawwetwet ma-lat hi-gada mengippaptek idan papayyew niyadda leguntan netaneman ni grapes.

<sup>17</sup> Ey nambahbah idan iBabilon hu etta-teng ni giniling ni tukud ni Tempol, yadda kaliton ni wadadman, anin etan et-eteng ni giniling ni tangkih, et ilaw dan emin hu giniling di Babilon. <sup>18</sup> Ey inla dadda pala, yadda kapengihha-adin dep-ul ni kapanlinnih ni altar, yadda kameussal ni pengippaptekan idan kengkeh, yadda mahukung ni duyun kapengihha-adin kuheyaw ni animal ni kamei-appit, yadda mahukung ni kapengiggihebin bangbanglu niyadda edum ni giniling ni kameussal di kapandeyyawid Tempol. <sup>19</sup> Impeki-la dan emin hu kameussal ni nekapyad balituk niya silber, yadda ekka-ket ni mahukung ni duyu, yadda heni pengiggiheban ni insensoh, yadda mahukung ni duyun kapengihha-adin kuheyaw ni kamei-appit ni animal, yadda kapengihha-adin depul ya kapengippettukin dilag, yadda mahukung ni duyun kapengihha-adin bangbanglun kagihheba niyadda mahukung ni duyun kapengihha-adin meinum ni kamei-appit.

<sup>20</sup> Impeki-la dadda giniling ni kinapya lan eman ni patul e hi Solomon ni kameussal di Tempol. Humman ida ey dewwan et-eteng ni tukud, ya etan et-eteng ni tangkih niyadda hampulut u-ukkul ni lakkitun bakan neipetukan etan ni tangkih. Nemahhig bel-at da e endi hu pekalkud. <sup>21-22</sup> Humman idan dewwan et-eteng ni tukud ey nanginggeh ida e dewampulut pitun piyeh hu kasina-gey da ey hampulut walun piyeh kainetteng da. Nelunguan ida humman ni tukud e ya hedel da ey tellun pulgadah. Neihuapan idan pitu et kagedwah ni piyeh hu kadinukkey tu e neipaot hu giniling ni al-alkus tun pomegranate. <sup>23</sup> Neipaot idadman ni tukud hu al-alkus tun nahyaman et enem ni pomegranate. Et yad ta-pew da ey hanggagatut ni pomegranate.

<sup>24</sup> Yadda edum ni balud ni ingkuyug Nebusaradan di Babilon ey hi Seraiah e eta-gey ni padi, hi Sephaniah e neihayned ni hi-gatu, et yadda tellun opisyal tud Tempol. <sup>25</sup> Impeki-la da hu hakey ni ap-apun sindalun Judah, yadda pitun konsihal ni patul, ya sekretarih ni aap-apun sindalu e ya ngunu tu ey mengellan baluh ni mansindalu, et ya na-nem ni tutu-u. <sup>26</sup> Inlaw Nebusaradan idad kad-an Nebukadnessar e patul di Babilon di Riblah, <sup>27</sup> et papetey idan patul diman. Humman hu neipahding e neilaw ida iJudah di edum ni bebley.

<sup>28</sup> Yan meikkeppitun toon ni nampatulanan Nebukadnessar ey inlaw tu tellun libu et dewampulut tellun balud di Babilon. <sup>29</sup> Yan meikkahampulut walun toon ni nampatulanan tu ey inlaw tu mewam hu walun gatut et telumpulut dewwa. <sup>30</sup> Ey yan meikkadwampulut tellun toon ni nampatulanan tu ey intu-dak tu hi Nebusaradan e ap-apun guwalya tu et ilaw tud Babilon hu pitun gatut et na-pat et liman iJudah. Et ya law bilang emin idan iJudah ni neilaw di Babilon ni nambalin ni balud ey epat ni libu et enem ni gatut.

<sup>31</sup> Entanni ey nampatul hi Ebil Merodak di Babilon et hemeken tu hi Jehoiachin e patul di Judah et pa-hep tud kallabbutan eman ni meikkadwampulu et liman aggew ni meikkahampulut dewwan bulan ni meikkatelumpulut pitun toon ni neikelabutan tu. <sup>32</sup> Kabbabbal hi Ebil Merodak ni hi-gatu et idwatan tun saad ni neta-ta-gey nem yadda edum ni papatul ni neilaw ni balud di Babilon. <sup>33</sup> In-abulut tun mehullulan ni beken ni balwasin balud hu balwasin Jehoiachin ey in-abulut tun mekikkan di tebol ni patul ingganah neteyyan tu. <sup>34</sup> Yan nunman ni ketaggun Jehoiachin ey neidwatan ni kewa-wan pihuh ni iggatag tud mahapul tu.

## Lamentations

*Ya meippanggep nunyan libluh ni Lamentations*

Huyyan libluh ey intudek na-mun Jeremiah. Nampehemhemhemmek hi Jeremiah idan kebebleyan tud Jerusalem, ma-lat mantuttuyyuddan liwat da et ibanggad dan mengunnud nan Apu Dios, nem kahing ida e eleg da u-unnuden hu intugun tu. Et iebulut law nan Apu Dios ni bahbaha idan iBabilon hu Jerusalem niya Tempol. Dakel hu netey ni tutu-u niya dakel ida hu natdaan ni neilaw di Babilon e nambalin idan himbut.

Inang-ang nan Jeremiah ni emin ida huyyan neipahding et nemahhig hu lemyung tu. Et itudek tu huyyan libluh et peamta tu hu degeh ni nemnem tun nebahbahaan ni Jerusalem niya Tempol ey gapuh ni neligat ni biyag idan edum tun Hebrew ni natdaan di gubat.

Kapeamta nunyan libluh e wada namnamah di impeminhed niya kapemaptekan nan Apu Dios idan tutu-u, anin ni in-abulut tun mekastigudda niya in-abulut tun mebahbaha bebley da.

*Ya neitudek eyad libluh:*

1. Ya linelemyungan idan natdaan ni tutu-ud Jerusalem. (chapter 1)
2. Ya neipeang-ang ni bunget Apu Dios idan tutu-ud Jerusalem. (chapter 2)
3. Ya neipeamtaan ni kapemaptekan niya impeminhed Apu Dios ni kamannanang. (chapter 3)
4. Ya kapampahhiyaiddan iJerusalem ni nunman niya nebabba-ingan dan nunya. (chapter 4)
5. Ya nandasalan idan iJerusalem ni nambagaan dan baddang Apu Dios ma-lat meibanggad hu kayyaggud ni pekiddagyuman dan hi-gatu niya ma-lat meibanggad hu kayyaggud ni biyag dan nunman.

<sup>1</sup> Ya Jerusalem nunman ey napnun tutu-u nem yan nunya ey anggeinglay tep endi law nambebley diman. Kamei-ellig di nebalun biin hahhakkey tun kamanyuyyuddung e nemahhig lemyung tu. Yan nunman ey kameiddeyyaw di kebebbebley, nem yan nunya ey kamei-ellig di himbut.

<sup>2</sup> Tuka ilalabbi nangih. Kaman-ayyuayyuh lewa tud tamil tu. Ey endi law gagayyum tun menga-alluk ni hi-gatu. Yadda kamengi-ehneng ni hi-gatun nunman ey nambalin ida law ni buhul tu.

<sup>3</sup> Nedegyun ida iJudah di bebley da et mambalin idan himbut ni kamanhelheltap di edum ni bebley. Linikweh idan buhul da et endi da bebsikan. Endi law hu kandan bebley da.

<sup>4</sup> Anggeinglay law hu dalan ni umlaw di Jerusalem, tep endidda law hu dakel ni tuun kaumlaw di Tempol ni an mandeyyaw. Ida kamampapalak hu papaddi ey ida kamannanangih hu bibi-in kaman-a-appah di Tempol. Nemahhig kapanhelheltapiddan iJerusalem.

<sup>5</sup> Nambalin hu buhul dan apu da. Neipahding hu pinhed idan buhul da, tep huyya impengastigun APU DIOS idan iJerusalem tep ya dakel ni liwat da. Dimpap dadda u-ungnga da et ilaw daddad neidawwin bebley.

<sup>6</sup> Neendi law hu dayaw ni Jerusalem. Yadda aap-apudman ey henidda makwah ni neka-upa e eleg pakabsik ni meni-yan ni buhul tun kamandedweng ni hi-gatu.

<sup>7</sup> Yan nunyan nekabbahbah hu Jerusalem ey kanemnemnemaddan tuudman hu dayaw lan bebley dan nunman. Yan nengubatan ni buhul tun hi-gatu ey endi nemaddang ni hi-gatu, et meapput et ngi-ngi-ngian idan buhul tu hu neapputan tu.

<sup>8</sup> Nemahhig hu liwat idan iJerusalem et heni law neibheng ni da-nih hu bebley da. Et yadda la etan kamenettebal ni bebley da ey da law kapippihula. Kamei-ellig ni ebuh law palak ni tuka i-anteng ey tuka hahhannii angah tun baing tu.

<sup>9</sup> Kamei-ellig e linugit tu annel tun impenahding tun lawah e eleg tu nemnemnemem hu kastigun heltapen tu. Nemahhig impahding ni buhul tu ey endi kaumbaddang ni hi-gatu. Inapput ni buhul tu et kamampehemhemmek nan APU DIOS ma-lat baddangan tu.

<sup>10</sup> Nan-aladdan buhul tun emin hu nangkebalol ni wadan hi-gatu. Inang-ang-ang tu hinggepan dad Tempol ey eleg i-abulut nan APU DIOS hu beken ni Jew ni umhegep diman.

<sup>11</sup> Ida kamampapalak bimbebley diman ey ida kamenemmahemmak ni kennen da. Daka pan-ihullul hu nebalol ni tenged dad kennen da ma-lat eleg ida matey ni upa. Kandan APU DIOS ey "Ang-ang mu anhan hu mika panhelheltapi."

<sup>12</sup> Heni immehel hu Jerusalem et kantuddan kamangkelebbahay “Ang-ang yu kedi hu impahding nan APU DIOS ni hi-gak gapuh ni bunget tu. Endi an nanhiktam ni heni eyan nakka panhelheltapi.

<sup>13</sup> Heni tuwak kinnan APU DIOS et hi-yanen tuwak et helheltapen kun kewa-wa-wa eya nemahhig ni heni apuy di gawwan annel kun impaeli tun nalpud kabunyan.

<sup>14</sup> Ey heni naka-ittudek tun emin hu liwat ku et huuhuppen tu et ibanggal tud buklew ku, et humman hu, endi law elet ku tep ya bel-at tu. In-abulut tun apputen da-ak idan buhul ku, tep endi kabaelan kun mekihhanggan hi-gada.

<sup>15</sup> Ngini-ngi-ngian tudda hu nangka-let ni sindaluk. Impaeli tudda sindalun edum ni bebley ni nemahbah idan kamenikken ni tutu-uk. Henidda grapes hu tutu-uk ni nampedit tud keppallan.

<sup>16</sup> Nemahhig nangih ku ey endin hekey hu menga-alluk ni hi-gak, niya endi hakey ni mengippetuled ni nemnem ku. Ey newetwet ida law ni peteg tutu-uk eman ni nengapputan idan buhul kun hi-gak.

<sup>17</sup> Nakka pan-iddewdew ngamay ku nem endi kaum-alin memaddang ni hi-gak. Ineyagan kumedek APU DIOS emin buhul kud nanlinikweh et heni-ak nekallugit ni da-nih ni impahding da.

<sup>18</sup> Nem limpiyuh humman ni impahding APU DIOS ni hi-gak tep eggak u-unnuden tugun tu. Dengel yu eya e-helen kun hi-gayun tutu-u. Ang-ang yu anhan eya ligat ku et baddangan yuwak, tep nan-ilaw dad edum ni bebley hu kamenikken ni lalakki niya bibi-in u-unggak et mambalin idan balud diman.

<sup>19</sup> Nampehemhememekkak idan gagayyum ku ma-lat baddangan da-ak, nem endin hekey ni hi-gada hu bimmaddang ni hi-gak. Yadda papaddik niyadda ap-apuk ey nangketey idad keltad ni hamak dan kennen da ma-lat tumegudda.

<sup>20</sup> APU DIOS, ang-ang mu anhan ligat ku! Maggeh puhuk niya nemahhig lemyung ku, tep nginhay daka. Daka pampateya tutu-ud keltad. Anin di bebley et kamangkatey tutu-u.

<sup>21</sup> Dingngel idan tutu-u palak ku, nem endin hekey kamengellubyag ni hi-gak. Ida kaman-am-amleng buhul kun nengi-liam ni panhelheltapak. I-lim dama etan inhel mun ligat da et manhelheltap ida et man-iingngeh kami.

<sup>22</sup> Kastigum ida dama tep ya nemahhig ni kalinewah da, henin nengastigum ni hi-gak tep ya liwat ku. Nemahhig lemyung ku tep nakka manhelheltap.”

## 2

*Ya nengastiguan Apu Dios idan iJerusalem tep ya liwat da*

<sup>1</sup> Bimmunget hi Apu Dios ni Jerusalem et pambalin tun heni engeenget. Nekabbabhah tu hu kakinayyaggud nunman ni bebley et anin ni Tempol tu et inwalleng tu.

<sup>2</sup> Endi hemek Apu Dios ni nemahbah ni emin ni bebley di Judah. Anin etan ni nehammad ni binattun luhud ni bebley et binabhah tu et kebabba-ingan idan bimbley niya aap-apu da.

<sup>3</sup> Em, nemahhig hu bunget tu et endien tu kabaelan idan helag Israel. Eleg tudda baddangan ni inlian idan buhul da tep ya nemahhig ni bunget tun hi-gada, e heni kamantetebbel ni apuy et bahbahen tun emin hu bebley da.

<sup>4</sup> Impagibek tuddan tutu-u tud Jerusalem humman ni bunget tun heni apuy. Indgeng tu panetun hi-gada e heni tudda buhul. Nampatey tudda kamenikken ni u-ungnga dan daka pan-amlengi.

<sup>5</sup> Em, henin kapehding ni buhul hu impahding Apu Dios idan helag Israel tep nakabbabhah tudda. Binabhah tudda hu binattun luhud ni bebley niyadda baballey ni patul. Endi pappag ni ligat ni impaeli tuddan helag Israel.

<sup>6</sup> Binabhah tu hu Tempol tun kapandeyyawiddan tutu-u tun hi-gatu et heni nakabbabhah ni a-abbung. Ey impasiked tu hu kapengippahdingin helag Israel idan piyestah et ya daka pengu-unnudin elaw ni Sabaduh tep ya nemahhig ni bunget tu. Anin idan patul niyadda padi et hiniktaman da bunget tu.

<sup>7</sup> Inwalleng nan Apu Dios hu Tempol tu niya altar tu. In-abulut tu buhul idan helag Israel ni memahbah ni nehammad ni luhud ni Jerusalem.

<sup>8</sup> Impanna-ud dedan lan APU DIOS e pakabbabhahen tu hu luhud ni Jerusalem. Ey naka-iplanuh tu pehding tun memahbah idan tutu-u tu. Et peamnu tu et matleb ida binattun luhud niya netu-lidda eta-gey ni baley et mannaneng idan meihanniman.

<sup>9</sup> Neta-bunan ida eheb niya nebahbah lekbi da. Nambalin idan balud di edum ni bebley hu patul niyadda pamilyah tu. Eleg law meituttuddu hu Tugun niya endi law kapei-innep nan APU DIOS idan prophet tu. <sup>10</sup> Ida kamanyuyyuddung

di puyek hu kamengipappanggulun tutu-ud Jerusalem e daka pakdag i-ineng niya nampambalwasiddan langgusih. Nanha-adan da ulu dan dep-ul. Ey kaiyuuyung idan kamenikken ni bibi-i tep ya baing da.

<sup>11</sup> Kamandadalang matak tep in-anteng ku nangih. Nemahhig lemyung kun nebahbahan idan tutu-uk. Kawehiwehit idan u-ungnga niya gegellang ni nangkealiwet di keltad.

<sup>12</sup> Ida kamannengngih ey ida kamambeggan kennen da niya innumen dan ineda ni nangketu-lidda e henidda sindalun nangkeliputan. Ida kamangkatkathey ey nanangtung inhakliddan iinna da.

<sup>13</sup> Anggehimmek ka e Jerusalem e nakappinshed kun peteg ni bebley! Inna-nuk ni mengellubuyag ni hi-gam? Nemahhig ligat mun muka helheltapa e heni baybay ni eleg melkud. Endi edum ni an enelhelatap ni henin muka helheltapa. Hipa hu dammutun mengippeyyaggud ni hi-gam?

<sup>14</sup> Itek ida intenutuddun prophet mun hi-gam. Eleg daka ehelan etan idan impenahing mun panliwwatan. Pinhed da kumaddan ni ihha-ad mud nemnem mu e eleg mahapul ni mantuttuyyu kad liwat mu.

<sup>15</sup> Et yan nunyan nakabbahbah ka ey daka kangi-ngi-ngiin emin ni tuun kamelebbah e kanday "Kaw huyya ngu anhan hu kandan kekakkayaggudan niya kamedeyyaw ni bebley eyad puyek niya kapan-am-amlengin emin ni tutu-u?"

<sup>16</sup> Daka mewan kaheghegnudaddan emin ni buhul mu. Ida kamangegeyyetget ni bunget da e kanday "Binahbah mi kaya mewan humman ni bebley. Nebayag dedan ni hinehhegged mi hu aggew ni kebahbahan tu!"

<sup>17</sup> Yan nunya nengipahdingan APU DIOS ni inhel tun nunman ni pehding tu. Et yan nunya ey endi hemek tun nemahbah ni hi-gam. Impengapput tu buhul mu niya impan-am-amleng tuddan neapputam.

<sup>18</sup> Et humman hu, hi-gayun iJerusalem ey entan tu isiked ni umnangih ni kewa-wa-wa niyan kahilehileng ni mampehemhemmek nan Apu Dios.

<sup>19</sup> Bangun kan hileng ni mandasal nan Apu Dios et mampehemhemmek kan hi-gatu et hemeken tudda u-ungngam ni nangkaplat di keltad tep ya upa da.

<sup>20</sup> Nandasal ida iJerusalem et kanday "APU DIOS, nemnem mu kedi! Hi-gamin tutu-um nengipahdingan nunya. Kapangkana law idan bibi-i hu nakappinshed dan u-ungnga da. Kapampateyaddan buhul mi hu papaddi niyadda prophets di bawang ni Tempol.

<sup>21-22</sup> APU DIOS, gapuh ni bunget mu ey ineyagam hu buhul mid nanlinikweh e henidda mekippiyestah, et pampatyen da nangkei-inna niya nangkea-amma, anin idan u-ungnga min impenaptek min nakappinshed mi. Ey endi hemek mu et pampatyem idan emin et deh e kawehiwehit idad keltad e endi an neihwang."

### 3

#### *Ya hineneltap Jeremia*

<sup>1</sup> Immel hi Jeremia ey kantuy "Nanhelheltappak ni peteg tep ya bunget APU DIOS. <sup>2</sup> Heni tuwak dinegyun et pandalan tuwak di engeenget. <sup>3</sup> E-eggel ni kinastigu tuwak e heni tuwak binenakdungan ni kewa-wa-wa.

<sup>4</sup> Ey nanliputan tu annel ku niya nanhepung tudda genit ku. <sup>5</sup> Heni tuwak mewan ingkalebut di nanhelheltapak et nemahhig lemyung ku. <sup>6</sup> Heni tuwak pinilit ni manhad di engeenget e heniddan nangketey lan nunman.

<sup>7</sup> Endi man anhan namnamah kun umbesik tep heni tuwak binangkiling. <sup>8</sup> Nemahhig hu nakka pandasal e nampehemhemmekkak ni hi-gatu nem eleg tuwak hengnguda. <sup>9</sup> Hina-ninan tu dellanek ni eta-gey ni binattun luhud niya impangulu tuwak di dakek ni nampangapangan nelikaw ni dalan.

<sup>10</sup> Ey heni layon winu bear hi Apu Dios ni nambetak ni hi-gak. <sup>11</sup> Ey heni tuwak lina-nih di keltad et iguyud tuwak di edawwi et pamba-nuten tuwak et hi-yanen tuwak diman.

<sup>12</sup> Indengdeng tu panan hi-gak, <sup>13</sup> et pampanaen tuwak et maipunet idad annel ku hu papan ni pana. <sup>14</sup> Et ngi-ngi-ngian da-ak niya hineneghegnudan da-ak idan tutu-uk di a-appeh dan han-aggew. <sup>15</sup> Heni impakan tu niya impainum tun hi-gak hu nemahhig ni ligat.

<sup>16</sup> Ey heni tuwak impanhungbub et maplag ngipen kun intuktuk tud batu. <sup>17</sup> Endi law linggep ku ey eggak law amta kandan an-anla. <sup>18</sup> Kangkud nemnem kuy 'Anggehimmekkak katteg ngu! Endi law namnamah kun wada kayyaggud ni pehding APU DIOS ni hi-gak.'

<sup>19</sup> Hedin ninemnem kudda nakka panligligasi niya keendin nehammad ni nakka panha-adi, ey makageh nemnem ku. <sup>20</sup> Eggak liwwanadda huyyan neipahding ni hi-gak niya nakka umlelemyung ni peteg. <sup>21</sup> Nem hin-addum mewan ni newada namnamah ku hedin heninnuy immalid nemnem ku e <sup>22</sup> kamannananeng e eleg melumman hu impeminhed APU DIOS. Ey eleg daitsu pekabbabhahen tep ya hemek tu. <sup>23</sup> Ey kameiddin nel ni ingganah hu kamannananeng ni hemek APU DIOS ni hi-gatsun kewa-wa-wa. <sup>24</sup> Kangkud nemnem kuy 'Hi APU DIOS ni ebuh mahapul ku, et humman hu, hi-gatun ebuh pandin nelak!'

<sup>25</sup> Kabbabbal hi APU DIOS idan emin ni kamengiddin nel niya kamanheppul ni hi-gatu. <sup>26</sup> Et humman hu, ya kayyaggud ey man-ennus itsun mengiddin nel ni hi-gatun mengihwang ni hi-gatsu. <sup>27</sup> Ey kayyaggud hedin illapun keu-ungngan man-ennus. <sup>28</sup> Hedin wada impaelin APU DIOS ni ligat tayu, ey ennusan tayu niya peinneng tayu nemnem tayu. <sup>29</sup> Nealay indin el tayun hi-gatu et ngenamung tu, wada na-mu pay namnamah tayun hi-gatu. <sup>30</sup> Ey anin ni panhelheltap daitsun buhul tayu niya pennelitan daitsu et anusi tayu.

<sup>31</sup> Tep eleg pannananeng nan Apu Dios ni daitsu iwalleng ni tutu-u tu. <sup>32</sup> Daitsu kaiddawsin ligat nem daitsu kahehmeka niya nakappin hed daitsu, <sup>33</sup> tep eleg tu pan-amlengi hu daitsu pengippeligigatan.

<sup>34</sup> Inamta tu hu nemahhig ni tayu kapanhelheltapid kallabbuttan. <sup>35</sup> Ey inamta tu hedin eleg meidwat ni hi-gatsu hu kelebngan tayun nalpun hi-gatu. <sup>36</sup> Ey inamta tu mewan hedin beken ni meandeng hu impahding ni huwet ni hi-gatsud korteh.

<sup>37</sup> Yaddan ebuh kai-abulut Apu Dios hu dammutun meippahding. <sup>38</sup> Yadda kayyaggud niya lawah ey mahapul ni meippahding hedin humman in-olden tu. <sup>39</sup> Kele itu manlilih hedin nekastigu itu tep ya liwat tayu?

<sup>40</sup> Attu kuma et nemnemen tayu elaw tayu et ibangngad tayun mengu-annud nan APU DIOS ey? <sup>41</sup> Ehel tayun emin ni hi-gatu hu wadad nemnem tayud pandasalan tayu ey kan tayuy <sup>42</sup> 'APU DIOS, nanliwat kami niya ngin hay daka ey eleg mu liwwanan impahding mi. <sup>43</sup> Et gapuh ni bunget mu ey pindug dakemi et pampatyen dakemi e endi hemek mu.

<sup>44</sup> Hineniam hu annel mun mahdel ni kulput et eleg umdateng dasal min hi-gam. <sup>45</sup> In-abulut mun heni kami lugit ni impahding idan buhul min hi-gami.

<sup>46</sup> Tep pinenadngelan dakemi ey binenabba-ingan dakemiddan buhul mi.

<sup>47</sup> Nanligligat kami niya nebahbah bebley mi ey kami kaumtatakut.'

<sup>48</sup> Iyyadyan nemahhig nanginangih ku tep nebahbah ida tutu-uk. <sup>49</sup> Heni hebwak hu lewak e eleg metduk <sup>50</sup> ingganah ni pengippeang-angan APU DIOS e wadad kabunyan ni hemek tun hi-gatsu. <sup>51</sup> Nemahhig lemyung ku hedin inang-ang ku hu impahding idan buhul mi idan bibi-i eyad bebley mid Jerusalem.

<sup>52</sup> Heni-ak sisit ni kinnaddan buhul ku anin ni endi himmulun. <sup>53</sup> Imbeng da-ak di neku-kuan et pande-hilan da-ak ni batu. <sup>54</sup> Entanni kamangkembeng hu nengibngan dan hi-gak et kangku nem metteyyak law diman.'

<sup>55</sup> Nem yan nunman ni wada-ak diman ey nandasallak ni hi-gam e APU DIOS, <sup>56</sup> et dengelem hu dasal ku e kangkuy 'Dengel mu anhan et baddangan muwak!' <sup>57</sup> Ey hinumang muwak et kammuy 'Entan takut mu.'

<sup>58</sup> 'Apu, binaddangan muwak et ihwang muwak di katey. <sup>59</sup> Inang-ang mu e APU DIOS hu lawah ni peteg ni impenahding dan hi-gak. Hi-gam anhan hu pangihudut e hi-gak neiptek. <sup>60</sup> Ey inang-ang mu hu nemahhig ni lawah ni impahding idan buhul kun hi-gak niya inamtam ida lawah ni implanuh dan pehding ni hi-gak.

<sup>61</sup> Dingngel mu nampemel-itan dan hi-gak e APU DIOS niya inamtam ni emin hu planuh da. <sup>62</sup> Kewa-wa-wa ey ya lawah ni planuh dan hi-gak hu daka ene-ehhela. <sup>63</sup> Ang-ang mudda kedi! Anin ni hipa daka pehpehding et daka i-ena-appen peneghegnuddan hi-gak.

<sup>64</sup> Kastigum ida anhan e APU DIOS tep ya lawah ni impenahding da. <sup>65</sup> Pambalin mu puhu dan manghay ey inidutam ida. <sup>66</sup> Pan-unud muddan bunget mu et bahbahen muddan emin et endi an metdaan ni hi-gada eyad ta-pew ni puyek e APU DIOS.'

## 4

### *Ya nengastigun Apu Dios idan iJerusalem*

<sup>1</sup> Ya Jerusalem ey heni la ni balituk ni kamanlitaak nem nakabbabhah law et endi litaak tu. Neiwahhiwahhit di keltad ida nebalol ni batun neikapyad Tempol.

<sup>2</sup> Henidda la ni nebalol ni balituk hu kaungaungan iJerusalem, nem yan nunya ey henidda law pulan banga e endi balol tu.

<sup>3</sup> Nambalin ida tutu-uk ni heni ostrich e eleg da hengnguda impah da, beken idan heni jakal e daka paka-ippaptek impah da.

<sup>4</sup> Nemahhig ewew idan u-ungnga da et kamangkeipket dila dad alingangnga da. Ida kamangkedekedew ni kennen da nem endi kaum-idwat ni hi-gada.

<sup>5</sup> Anin idan kekeddangyan ni nunman ni imminghan mangkeheng-ew ni kakenna, et ida kamangkakatey ni upa dad keltad. Ida kamenemmahemmak ni kennen dad ibbengngan ni lemek.

<sup>6</sup> Nema-ma-ma hu kastiguddan tutu-uk nem yadda iSodom tep neminpinhakkey hu nemabhahan nan Apu Dios ni hi-gada e endi bimmaddang ni hi-gada.

<sup>7</sup> Yan nunman ey kamei-ellig ida aap-apud Jerusalem di nakallinih ni dallallu, ey mangkablaha ida nem ya gatas niya nangebalol ni tenged e kamanlitaak. Na-let ida e keang-angan tun endi degeh da. <sup>8</sup> Nem yan nunyay andeddekket ida nem ya lagit et eleg ida law meimmutani. Henidda mewang nangkema-ganan ni keyew e nakappigut ida ey neipket belat dad geni da.

<sup>9</sup> I-imman ida nangketey di gubat tep pinhakkeyey netey ida, nem yadda netey ni upa da tep hinelhelheltap da upa da et mambabbabbal idan netey tep ya keendin kennen da.

<sup>10</sup> Nemahhig humman ni immalin nanhelheltapan idan tutu-uk, et anin idan kabbabbal ni bibi-i et kinan dadda u-ungnga dan nakappinched da ma-lat tumegudda.

<sup>11</sup> Impeang-ang APU DIOS hu nemahhig ni bunget tu. Linggab tu hu Jerusalem et magiheh ni emin e endin hekey natdaan.

<sup>12</sup> Eleg kullugaddan papatul niyadda tutu-ud kebebbley e dammutun wada buhul ni menggep idan eheb di Jerusalem ma-lat gubaten da. <sup>13</sup> Nem neipahding tep ya liwat idan prophit niyadda papaddi. Hi-gada himmulun ni nemateyan daddan tutu-un endi bahul tu.

<sup>14</sup> Yan nunya ey ida kamandaladalan di keltad e henidda nekulap. Nekukkuheyaw ida et endi nemihnd ni menggepan hi-gada. <sup>15</sup> Kapantekukiddan tutu-u e kanday "Pampenga-allaw kayu! Nelugit kayu! Entan dakemi kakkappa!" Kapan-intutudakiddan tutu-ud kebebbley e kanday "Eleg mabalin ni ida manha-ad deya!"

<sup>16</sup> Hi APU DIOS hu nengiwelit ni hi-gada. Eleg tudu law baddangi. Endi law kamalispituh idan nunman ni papaddi niyaddan aap-apu.

<sup>17</sup> Nandidinel itsud umbaddang ni hi-gatsun gagayyum tayun edum ni bebley ey endi kumedek immalin bimmaddang. <sup>18</sup> Eleg mabalin ni itsu mandalladallan di keltad, tep wadaddadman buhul tayun daitu kaang-ang-anga. Ngannganih kepappegan tayun emin. <sup>19</sup> E-ellistudda buhul tayu nem yadda tulduh. Anin ni umbesik itsud dutug et daitu kapepduga, ey anin ni umlaw itsud desert et daitu kabektakadman. <sup>20</sup> Kinna da hu pinilih APU DIOS ni ap-apu tayun indinel tayun umbaddang ni hi-gatsu. Kan tayu kumedek nem endi hakey ni bebley eyad puyek ni an mengapput ni hi-gatsu tep hi-gatu ap-apu tayu.

<sup>21</sup> Pan-an-anla kayu e tutu-ud Edom niyad Us ni nunya, nem iyyalli dama ligat yu. Heni kayulli dama nebuteng ni kamandiwadiwag niya mebladan kayulli et mebabba-ingan kayu.

<sup>22</sup> Hi-gayun tutu-ud Jerusalem, mepappeg ali law hu yuka panhelheltapi. Meibbanggad kayulli law di bebley yu. Nem hedin hi-gayun iEdom ey kamangkeilleppu hu kastigu yu. Ngannganih ni mebudhian kalinewah ni yuka ippenahding.

## 5

### *Ya nandasalan idan iJerusalem ma-lat peyaggud idan APU DIOS*

<sup>1</sup> Nandasal ida iJerusalem ey kanday "APU DIOS, entan anhan tu liwwan ida neipahding ni hi-gami. Uhdungi dakemi et ang-angem hu nebabba-ingan mi. <sup>2</sup> Bineltan idan edum ni tutu-un nalpud edum ni bebley hu bebley mi, et mambaley idad baballey mi. <sup>3</sup> Ey nepuhig kami tep nampatey idan buhul mi hu aamma mi et mangkabelu iinna mi. <sup>4</sup> Mahapul ni beyyadan ni danum ni innumen mi niya ittungu mi ey nengina. <sup>5</sup> Nemahhig ida buhul mi e dakemi kapeppepduga et anin ni nea-atu kami et eleg dakemi pan-iyatu. <sup>6</sup> Inebulut min mambalin ida iEgypt niyadda iAssyria ni apu mi, ma-lat idwatan dakemin kennen mi. <sup>7</sup> Nanliwat ida a-ammed mi nem netey ida et han dumteng hu kastigu da. Hi-gami law nanhelheltap ni kastigu da.

<sup>8</sup> Yadda himbut hu nambalin ni ap-apu mi ey endi mengihwang ni hi-gami. <sup>9</sup> Mahapul ni kami menemmak ni kennen mid desert anin ni immen ida umpatey diman. <sup>10</sup> Nemahhig upa mi et kami kamandedgeh e kaman-aatung annel mi e heni pugun. <sup>11</sup> Pinilih idan buhul min in-ulig hu bibi-i eyad Jerusalem niyadda edum ni bebley di Judah. <sup>12</sup> Inla dadda ap-apu mi et ita-yun dadda. Ey endi lispituh daddan

nanakea-amma. <sup>13</sup> Pinilit dadda kamenikken ni lalakkin u-ungnga min mangngunnud gillingngan, ey ida kamangkaidengiw hu kaungaunga tep mebel-at hu pinhan dan keyew. <sup>14</sup> Eleg ida law manyuyyuddung di eheb ni bebley hu nanakea-amma, ey eleg ida law man-a-apeh niya eleg ida law menayyatayyaw hu kamenikken ni lalakki.

<sup>15</sup> Endi law an-anlad puhu mi. Nambalin ni lemyung hu mika penayyatayyaw. <sup>16</sup> Endi law dayaw ni Jerusalem ni ippahhiyya mi. Ey anggehemekek kami tep nekastigu kami tep nanliwat kami. <sup>17</sup> Et humman hu, nemahhig lemyung mi niya eleg um-aang-ang mate mi tep ya lewa mi. <sup>18</sup> Nakabbahbah bebley mi e Jerusalem et ebuh ida law animal di muyung ni kaman-a-ayyam diman.

<sup>19</sup> Nem anin ni hanniman et hi-gam e APU DIOS hu man-ap-apun ingganah. <sup>20</sup> Kele ingganah nunyay liniwwan dakemi? Kele ayepaw ey eleg dakemi hengnguda? <sup>21</sup> Bangngad dakemi anhan e APU DIOS et mambalin kami mewan ni tuum. Pebangngad mu hu an-anla mi lan nunman. <sup>22</sup> Kaw eleg dakemi tu-wangu law hengnguda? Kaw eleg mepappeg bunget mun hi-gami?"

## Ezekiel

### *Ya meippanggep eyan libluh ni Ezekiel*

Hi Ezekiel ey yad Jerusalem hu nambebleyan tu. Yadda katuutuud Judah niyad Jerusalem, anin idan kamengipappanggulun hi-gada et nanliwaliwat idan nan hi APU Dios. Ya nemahhig ni nanliwatan da ey ya daka penaydayawi niya daka pansilbiin edum ni dios. Eleg da ikahhakey hu daka penaydayaw nan Apu Dios e hi-gatun ebuh hu makulug ni Dios. Et humman hu, hin-addum ni kai-abulut nan Apu Dios ni apputen idan iBabilon di daka panggugubasidman Judah niyad Jerusalem et alen daddan balud hu edum dadda et ilaw daddad Babilon. Ya laputun neipahdingan tu huyya ey yan eman ni toon ni 606 B.C. e yan nunman hu neikelabutan Daniel niyadda etan edum tun helag Israel et ilaw daddad Babilon. Ya pidwa tun neipahdingan tu huyya ey yan eman ni toon ni 597 B.C. Yan nunman hu neikelabutan nan Ezekiel niyadda etan edum tun helag Israel et ilaw dadda mewan di Babilon.

Yan neilawwan Ezekiel di Babilon ey yad Tel Abib hu nekibebleyan tu anin ida etan ni edum tun helag Israel. Yan eman ni telumpulu hu toon Ezekiel ey sinudun Apu Dios ni hakey ni prophet tun mengippahding ni pinhed tu. Et ilepu tun ni mengippeamtaddan edum tun helag Israel e eleg ni megibbuh hu pengastiguan Apu Dios ni hi-gadan tuud Judah niyad Jerusalem. Impeenamta tu e dakel idallin hi-gada hu mangkettey di gubat, ya degeh niya bisil. Ey mekabbabhah ali hu bebley dad Jerusalem anin etan Tempol nan Apu Dios.

Eleg pinhed idan tuun kullugen hi Ezekiel tep ya inamta da man indawat Apu Dios ni hi-gada hu bebley da e Judah niya Jerusalem. Ya hakey mewan ey daka kulluga e kamekihahha-ad hi Apu Dios ni hi-gada etan di kinapya dan Tempol tun panha-adan tu. Ma-nu tep henin nunman hu daka pengullug, nem eleg da ebbuluta niya eleg da pannananeng ni u-unnuden hu nekitbalan nan Apu Dios ni hi-gada. Et humman hu immamnu hu inebig Ezekiel ni meippahding ni hi-gada eman ni toon ni 586 B.C. et bahbahren idan iBabilon hu bebley dad Jerusalem et ya etan Tempol diman.

Maippalpun nunman ey kakullugadda law idan helag Israel hu kae-helan nan Ezekiel. Inhel tun hi-gada e eleg iwwalleng Apu Dios idan ingganah tep ibbangngad tuddalli mewan di bebley da niya ihhaddak tun wada hu helag David ni pan-ap-apu da. Inhel tu daman ibbangngad Apu Dios etan nekitbalan tun hi-gada ma-lat makiha-ad mewan ni hi-gada. (37:24-28)

### *Ya neitudek eyad libluh:*

1. Ya nenuduan Apu Dios nan Ezekiel ni hakey ni prophet idan helag Israel di Babilon (chapters 1-3)
2. Ya nengipeamtaan nan Ezekiel idan tuud Judah niyad Jerusalem e kastiguen alin Apu Dios ida. (chapters 4-24)
3. Ya nengipeamtaan nan Ezekiel ida etan ni tuun beken ni Jew e kastiguen idan Apu Dios. (chapters 25-32)
4. Ya nengipeamtaan Apu Dios e bendisyonan tuddalli hu helag Israel. (chapters 33-48)

### *Ya laputun nampeang-angan nan Apu Dios nan hi Ezekiel (1:1-7:27)*

<sup>1</sup> Yan eman ni kaliman aggew ni ka-pat ni bulan eman ni meikkeppulut tellun toon ni nambebleyan middan edum kun iJudah ni neilaw di Babilon di gilig ni Wangwang e Kebar, ey heni neibeghul hu kabunyan et mampeang-ang hi Apu Dios ni hi-gak.

<sup>2</sup> Yan nunman hu meikkelliman toon ni nanha-adan nan patul mi e hi Jehoiachin di deya Babilon neipalpu eman ni nengi-lian dan hi-gatudya. <sup>3</sup> Yan nangngelak di gilig ni Wangwang e Kebar di Babilon ni inhel APU DIOS ni hi-gak e hi Ezekiel e padin u-unggan Busi ey ginibek ku et-eteng ni kabaelan tu.

<sup>4</sup> Intangaw ku ey inang-ang ku e kamengelli pewek ni nalpud appit di north, niya kamangkekedyam e kamelpud etan di mahdel ni kulput. Ey ya etan di kabebnangin kedyam ey wada hu heni giniling ni kamambenbenyag. <sup>5</sup> Yad gawwa tu ey wada hu han-ang-ang kun epat ni mategun heni tuu ang-ang da. <sup>6</sup> Ma-nut heni tuu ang-ang da, nem epat hu angah da ey epat hu payak da. <sup>7</sup> Nan-andeng hu helida ey wada kukub dan heni kukub ni baka ey kamanmullitaak e heni malinah ni giniling. <sup>8</sup> Wada hu epat ni ngamay dan nangeidkep di payak da niya <sup>9</sup> neitumuk hu utduk ni payak dad utduk ni



payak ni neidagsian da. Hedin meglid ida, man ida kameglid ni emin niya anin ni attu pampelawwan da et eleg mahapul ni ida manligguh.

<sup>10</sup> Han-e-pat niya nambakbaklang hu angah idan nunman e epat ni mategun heni tuu ang-ang da. Angah ni tuu hinangga da, angah ni layon hu winannan da, angah ni bulug ni baka hu winilli da ey angah ni tuldu hu dingkuggan da. <sup>11</sup> Yadda handedwan payak da ey nebekyag e neitumuk hu utduk dad utduk ni payak ni neidagsian da. Hedin yadda etan dewwan payak da, man neihepkep di annel da. <sup>12</sup> Emin ida humman ni epat ni mategu ey nambakbaklang hu nengihangga da, niya dammutun mampellaw idad linggeman ni pinhed da anin ni eleg ida manligguh.

<sup>13</sup> Wada hu heni kamantettebbel ni apuy ni eleg me-dep ni hi-gadan epat. Hedin himminyab humman ni apuy, man tuka pellow hu kedyam. <sup>14</sup> Humman idan epat ni mategu ey heni kedyam hu kanelistu dan kamambinbinangnad.

<sup>15</sup> Nakka ang-ang-angadda humman ni epat ni mategu ey wada inang-ang kun hanhakkey dan epat ni heni helin talak di kad-an dad puyek. <sup>16</sup> Nan-iinggeh ida humman ni epat ni heni helin talak e ida kamanlitaak e heniddan chrysolite. Wada mewan hu hanhakkey ni heli dan neiballabag e humman meikkadwan heli da. <sup>17</sup> Et dammutun anin ni attu pampelawwan idan nunman ni epat ni mategu et dammutun mampellaw ida etan helidad nalgem ni pinhed dan lawwan e beken ni pakadek ida manligguh. <sup>18</sup> Eta-gey ida humman ni heni helin talak niya nemataan idad nanginginillig. <sup>19</sup> Hedin naglid ida etan epat ni mategu, man ida kamekiglid ni hi-gada etan ida heli da. Hedin mewan himma-pat ida, man ida dama kaumha-pat humman ni heli da. <sup>20</sup> Ey anin ni attu lawwan idan nunman e epat ni mategu et ida dama kamekillaw etan heli da tep hi-gada kamanmandal ni heli da. <sup>21</sup> Et mukun hedin naglid ida humman ni epat ni mategu, man ida kamekiglid humman ni heni helin talak. Hedin nanha-ad ida, man nanha-ad ida dama ey hedin simmayab ida ey dama kamekiglid, tep wada hu ispirituh idan nunman ni epat ni mategu heli da.

<sup>22</sup> Yad ta-pew ni ulu da ey wada neietep ni heni batun kamandinglih. <sup>23</sup> Niya yad daul tu ey immen idadman humman ni epat ni mategun wada hakkey ey binekyag tu dewwan payak tu ey inhepkep da hu dewwad annel da. <sup>24</sup> Ida kamantattayab ey dingngel ku hu bungug ni payak da e heni bungug ni dalluyun di baybay ey heni baddun dakel ni sindalun kaman-alsituh niya heni bungug ni ehel nan Apu Dios e Han-ipahding tun emin. Hedin insiked dan mantattayab, man daka ihhepkep hu payak dad annel da. <sup>25</sup> Entannit ida kamapan-eh-ehngeng e lineyag da hu payak da ey wadalli immehel ni nalpu etan di heni neietep di ta-pew ni ulu da.

<sup>26</sup> Ey yad ta-pew tu ey wada hu heni yuddungngan ni patul ni sapphire e nekangnginan batu niya wada hu yimmudung ni heni tuu. <sup>27</sup> Meipalpud gitang tu ingganah di ulu tu ey heni nelinahan ni giniling ni naldang. Ey meipalpud gitang tu ingganah di heli tu ey heni kamantettebbel ni apuy niya kaumhilin emin hu annel tu. <sup>28</sup> Humman ni kaumhilid annel tu ey heni sibbunglun.

Henin nunya nenang-ang kun dayaw APU DIOS. Limmukbubbak di puyek nunman ni nenang-angan kun henin nunman ey wada dingngel kun immehel ni hi-gak.

## 2

*Ya nemutukan nan APU DIOS nan Ezekiel ni mambalin ni prophet*

<sup>1</sup> Kan Apu Dios ey "Ehngeng ka e helag ni tuu, tep pinhed kun mekihummangan ni hi-gam." <sup>2</sup> Pinhakkey ey ginibek ku e newadan hi-gak hu Ispirituh tu ey impeehngeng tuwak. Et kantun hi-gak ey <sup>3</sup> "Hi-gam e helag ni tuu ey pellow dakad kad-an idan makanghay ni tutu-ud Israel. Nginhay da-ak ida lan a-ammed dan nunman ey anin ni hi-gada et ingganah nunya ey da-ak kangghaya. <sup>4</sup> Humman idan tutu-un pengittu-dakan daka ey eleg ida metuttuddui niya makneg ida. Nem ittu-dak daka et mu ehelen ni hi-gada eya e-helek e Eta-gey ni peteg ni AP-APU. <sup>5</sup> Et anin ni kantu et u-unnuden da winu eleg tep manghay ida nisi, nem et amtaen da e wada prophet ni limmaw di kad-an da.

<sup>6</sup> Entan takut mun hi-gada, anin ni hipa e-helen dan penattakut dan hi-gam e heni daka hinelikuban ni mangkatedem ni hebit niya gayyaman. <sup>7</sup> Mahapul ni e-helen mun emin huyyan e-helen kun hi-gada, anin ni kantu et kehgingen da winu kullugen da. Nem inamtak et eleg da dedngela tep manghay ida nisi.

<sup>8</sup> Nem hedin hi-gam e helag ni tuu, man dengel mu eya e-helen kun hi-gam et eleg mu iu-unnud ni hi-gada et ka dama mangngengghay. Abulut mu et heni mu tekkangen bungut mu et kanen mu eya iddawat kun hi-gam."

<sup>9</sup> Ey entannit nak i-ang-ang ey wada hu takley ni tuka idedengdeng ni hi-gak etan singged tun neludun ni papil. <sup>10</sup> Binekyag tu etan papil ey inang-ang ku e netudekan di

nambina-hil ni a-appeh di patey e humman ida etan a-appeh ni kaumlelemyung niyadda a-appeh hedini wada ligat.

### 3

<sup>1</sup> Kan Apu Dios ni hi-gak ey "Hi-gam e helag ni tuu, ekan mu eya neludun ni papil et lumaw ka et mu ehelen idan tutu-ud Israel hu neitudek ditan." <sup>2</sup> Et takangek et pakemil tun hi-gak humman ni neludun ni papil.

<sup>3</sup> Et kantuy "Ekan mun emin eya pekkan kun hi-gam ma-lat maphel ka." Kinan ku ey makallumi-ih tamtam tu e heni danum ni putsukan.

<sup>4</sup> Kantu mewan ey "Hi-gam e helag ni tuu, elaw kad kad-an idan helag Israel et ehelem ni emin ni hi-gada eya e-helen kun hi-gam. <sup>5</sup> Beken ni yad kad-an idan hin-appil ni tutu-ud edum ni bebley ni neligat ehel da e eleg mu han-awat hu pengittu-dakan daka tep yad kad-an idan edum mun helag Israel. <sup>6</sup> Gullat ni yad kad-an idan tutu-un neligat hu ehel dan eleg mu han-awat hu pengittu-dakan daka et nanna-ud ni kullugan dakan hi-gada. <sup>7</sup> Ittu-dak dakad kad-an idan helag Israel, nem eleg daka kullugan hi-gada, tep anin ni hi-gak et eleg da-ak kulluga. Emin ida dedan ey kahkahingngan ida ey neligat idan metuttudduan. <sup>8</sup> Nem yan nunya ey pambalin daka daman manghay niya neligat ni metuttudduan. <sup>9</sup> Niya pambalin dakan netuled niya endi takut tu ma-lat mu pan-ehlen hu pinhed kun peamtan hi-gada, anin ni nemahhig ngehay da. Mei-inggeh kad batu niya diamond e makakkelhi."

<sup>10</sup> Kantu mewan ey "Hi-gam e helag ni tuu, pakadngel mu niya entan tu liwwan eya e-helen kun hi-gam. <sup>11</sup> Mu ehel idan edum mun nei-lidya e wada ittugun APU DIOS e Eta-gey ni peteg, ni hi-gada. Anin ni dedngelan da winu eleg et mahapul ni mu e-helen huyya."

<sup>12</sup> Entanni ey lini-bit tuwak nan Ispirituh Apu Dios ey wada dingngel kun naka-let ni ehel di dingkuggan kun kantuy "Daydayaw tayu hi APU DIOS di kabunyan!" <sup>13</sup> Ey dingngel ku hu bungug ni payak ida etan ni mategun simmayab niya kududdan heli da e heni kamanyegyeg. <sup>14</sup> Lini-bit da-ak mewan nan Ispirituh APU DIOS et da-ak kapan-illaw ey makaggeh nemnem ku niya nemahhig bunget ku, nem nanengtun wadan hi-gak etan nehammad ni kabaelan ni nunman e Ispirituh. <sup>15</sup> Yan nambangngadan kud kad-an idan edum kud Tel Abib di Wangwang e Kebar e nambebleyan midan edum kun iJudah ni nepilit ni neni-yan ni bebley mi, ey endi maptek ni nakka panggibbek niya nakka pannemnem ni pitun aggew tep ya humman ni an neipahding ni hi-gak.

<sup>16</sup> Entanni et negibbuh humman ni pitun aggew ey immehel mewan hi APU DIOS ni hi-gak. <sup>17</sup> Kantuy "Hi-gam e helag ni tuu, ey tudduen dakan heni guwalyaddan edum mun helag Israel, et hedini wada impeamtak ni hi-gam, man peamtan daman hi-gada. <sup>18</sup> Hedini impeamtak ni hi-gam e wada hu lawah ni tuun mettey ey eleg mu e-heli ma-lat hullulan tu lawah ni elaw tu et keihwangan ni annel tu, man hi-gam hu pebehhulan ku hedini mettey ey nanengtu hu liwat tu. <sup>19</sup> Nem hedini inhelan mu humman ni tuu ey kapyatun eleg tu issiked ni manliwwat ey netey, ey nanengtu hu liwat tu, man meihwang kad katey, tep eleg daka pebehhuli.

<sup>20</sup> Niya hedini inlapun etan ni kayyaggud ni tuun manliwwat et indawtan kun panliggatan tun pematnaan kun hi-gatu ey eleg mu ehelan ey netey, e nanengtu hu liwat tu, man endi law silbiddan kayyaggud ni impahding tu, tep eggak ibbilang ida humman, et hi-gam hu pebehhulan kun neteyyan tu. <sup>21</sup> Nem hedini inhelan mu humman ni tuu et mantuttuyyu et meihwang di katey, man eleg ka mebehhuli."

<sup>22</sup> Entanni ey newada hu kabaelan APU DIOS ni hi-gak et kantuy "Egah ka et lumaw ka etan di nedeklan et yadman hu ta panhummanganan." <sup>23</sup> Et lumawwak etan di kanton nedeklan ey inang-ang ku hu dayaw APU DIOS e henin inang-ang kun nunman di gilig ni Wangwang e Kebar. Et lumukbubbak di puyek.

<sup>24</sup> Entanni ey newada hu Ispirituh APU DIOS ni hi-gak et peehngeng tuwak. Kantuy "Anemut ka et ka manlekbid baley yu. <sup>25</sup> Belluden daka et manhahha-ad kad baley yu et eleg ka an mekiammuammung idan tutu-u. <sup>26</sup> Ey eleg daka pe-hel ma-lat eleg mu ehelan ida hu tutu-u tep da-ak kangengngehaya damengu. <sup>27</sup> Nem hedini wada peamtak ni hi-gam, man pe-hel daka mewan et mu ehelen idan tuu hu pinhed kun e-helen ni hi-gada. Et mu ehelen e kammuy 'Huyya inhel APU DIOS e Eta-gey ni peteg.' Et dedngelen ni edum hu e-helen mu, nem wadadda etan eleg mengu-unnud tep manghay ida ngu dedan."

\* 3:18 3:18 Ya edum ni neitudek ey kanday "Hedini wada liwat idan nunman ni netey ni eleg meliwwan ey eleg law mabalin ni meliwwan."

## 4

<sup>1</sup> Kan mewan APU DIOS ni hi-gak ey “Hi-gam e helag ni tuu, ala kan kimmelhin pulan nedampillag et pangiku-litam ni mapah ni bebley di Jerusalem. <sup>2</sup> Iku-lit mudman hu neipu-ul ni puyek di hengeg ni luhud ni dellanen idan buhul dan umhegep diman. Ey iku-lit mud nanlinikweh diman hu kampuddan buhul da et yadda ussalan dan memahbah ni netuping ni luhud nunman ni bebley. <sup>3</sup> Ey ala kan palhu et patuun mud nambattanana yu etan ni ingku-lit mun mapah ni Jerusalem ey inhanggam diman. Et u-ukkulem hu pehding idallin buhul dan menggep ni nunman e bebley. Huyya pengi-ang-angan idan iJerusalem ni meippahdng alin edum ni aggew.

<sup>4-5</sup> Hedin negibbuh ni impahding mu huyya, man pampiggad kad winillim et mambakbaktad kan telunggatut et nahyam ni aggew. Tep heni hi-gam hu meneklan liwat idan helag Israel ni nunman ni bilang ni aggew. Ya han-aggew ey i-ehneng tu hu hantoon ni nanliwatan idan iJudah.

<sup>6</sup> Hedin negibbuh humman ni bilang ni aggew, man pampiggad kad winannan mu et mampiggapiggad kan mambakbaktad ni na-pat ni aggew. Et hanniman mewan e ya han-aggew ey bilang tu hantoon ni nanliwatan idan iJudah. <sup>7</sup> Itultuluy mun peennamta hu meippahding alid Jerusalem e iengnga-engngat mu ngamay mu ey pan-ehalem hu lawah ni meippahding ali. <sup>8</sup> Belluden dakan linubid et endi inna-num ni mampiggapiggad ingganah megibbuh etan nebilang ni aggew.

<sup>9</sup> Lakkay et ka umlan alinah, ya barley, ya pukdu, ya keldih ya millet niya spelt et iha-ad muddad pa-nay. Kapyam ida huyyan sinapay et huyyadda kakkannem ni telunggatut et nahyam ni aggew ni pampiggadam ni mambakbaktad di winillim. <sup>10</sup> Hambasuh ni ebuh hu kennem ni han-aggew di nagtud ni olas. <sup>11</sup> Niya dewwan et-eteng ni basuh ni danum hu innumen mun kewa-wa-wad nagtud ni olas. <sup>12</sup> Kapyam kan sinapay et ang-ang-angen dakaddan tutu-u ey pangkennen mu. Ya penungngum ni pene-engam ey ya nema-ganan ni kinweh ni tuu.”

<sup>13</sup> Kan mewan ni APU DIOS ey “Huyya kei-ang-angan tun pangkennen idallin helag Israel hu kameibbilang ni nelugit ni kennen di attun bebley ni pengiwwehitan kun hi-gada.”

<sup>14</sup> Nem kangkuy “Eta-gey ni peteg ni AP-APU, entan anhan tu ehel e ya kinweh ni tuu hu nak penungngu, tep neipalpu ngun keu-unggak ey endi nak kinan ni hipan kameibbilang ni nelugit ni kennen niya endi nak kinan ni detag ni netey ni animal ey endi nak pintey ni animal di muyung.”

<sup>15</sup> Ey kan APU DIOS ey “Anin tep ni ya nema-ganan ni kinweh ni baka hu penungngum ni kapaem ni sinapay et beken ni ya kinweh ni tuu.”

<sup>16</sup> Kantu mewan ey “Hi-gam e helag ni tuu, dengel mu eya e-helen kun hi-gam. Endiek ali kakelpuin kennen ni tutu-ud Jerusalem. Umkakaguh idalli et tetteppengen da hu kennen da niya innumen da. <sup>17</sup> Et lektattuy me-puhan idallin kennen niya danum et umlelemyung idalli ey mambabbabbal idan mettey. Meippahding ali hanneyan hi-gada tep ya liwat da.”

## 5

*Ya kebahbahan alin Jerusalem*

<sup>1</sup> Kan APU DIOS mewan ey “Hi-gam e helag ni tuu, ala kan makattadem ni ispadah et usalem ni mengep-uh ni iming mu niya bewek mu et pantelu-an mun gennadwaen e pan-iingeh mu hu bel-at da. <sup>2</sup> Alam hu katlun nunman e ginenedwam ni bewek et iha-ad mud gawwan etan ni pulan nengiku-litam ni mapah ni Jerusalem. Hedin negibbuh ni inu-ukkul mu hu pehding idallin buhul ni nunman e bebley, man giheb mu humman ni bewek di gawwan mapah. Alam mewan hu katlun ginenedwam ni bewek et tenegtegem et iwehit mud nangingginillig nunman. Ya etan katlun ginenedwam ni bewek ey iwahhiwahhit mu et itayyatayab ni dibdib ey nanhikway muddan ispadah mu, tep henin nunman ali pehding kun mengiwwehhit idan tutu-uk. <sup>3</sup> Itlu kan ekkut ni bewek di lugpin balwasim. <sup>4</sup> Ukat kan ekkut etan ni bewek ni intalum di lugpin balwasim et ibbeng mud apuy ma-lat magiheh. Humman ni apuy ey meihhinnap di emin di kebebbebley di Israel.”

<sup>5</sup> Kan mewan APU DIOS e Eta-gey ni peteg ey “Impambalin ku hu Jerusalem ni keim-importantehan ni bebley eyad puyek et tettebalin alin tutu-ud edum ni bebley. <sup>6</sup> Nem yadda tutu-udman ey daka ngengeghaya tugun ku. Nemahhig dama hu kalwah da nem ya kalwah idan nambabley di nanlinikweh diman. Inwalleng da tugun ku tep eleg da pinhed ni u-unnuden.

<sup>7</sup> Et humman hu, ehel mun hi-gada e kammuy 'Heninnuy hu inhel nan APU DIOS, e Eta-gey ni peteg, ni hi-gayu: Ya eleg yu pengu-unnudan ni tugun ku niyadda etan intuttudduk et ya intuttudduddan nambebley di nanlinikweh ni bebley yu hu inu-unnud yu, hu himmulun et mukun nema-ma-ma hu ngehay yu nem hi-gada.

<sup>8</sup> Et humman law hu, hi-gak e Eta-gey ni peteg ni AP-APU ey kastiguen dakeyun hi-gak tep nambalinnak ni buhul yu. Humman ni pengastiguan kun hi-gayu ey panhin-aangangan ni katuutuud kebebbebley. <sup>9</sup> Nemahhig ali hu pengastiguk ni hi-gayu e endi tu kei-ingnehan di impahding kun nunman niya pehding kun edum ni aggew tep ya etan angebe-hel kun yuka penaydayawin beken ni makulug ni dios. <sup>10</sup> Pangkennen idallin a-ammed hu u-ungnga da niya pangkennen idallin u-ungnga hu a-ammed da. Emin idalli hu metdaan ni hi-gayu ey iwwhahit kuddad kebebbebley.

<sup>11</sup> Hi-gak e Eta-gey ni peteg ni AP-APU e wadan ingganah ey e-helen ku e eleg dakeyu hehmea et pampateyen dakeyu tep ya etan angebe-hel kun impahding yun yuka penaydayawin beken ni makulug ni dios di Tempol ku et mahiditan. <sup>12</sup> Mantetlun grupuh hu pengennadwaan kullin hi-gayu et ya hakey ni grupuh ey degeh niya bisil ali hu ikkatey da. Ya etan hakey ni grupuh ey ya matadem ikkatey da tep petteyen idallin buhul yuddad a-allaw ni bebley. Ya etan meikkatlun grupuh ey meiwwehhit ida, nem unnuden kudda et pampatyen kudda. \*

<sup>13</sup> Nanna-ud ni helheltapen yulli hu pehding ku tep ya nemahhig ni bunget ku ingganah kangkuy hiyya law. Hedin neipahding ni emin ida huuya, man amtaen idan emin ni helag Israel e hi-gak e AP-APU ey impahding ku hu inhel ku tep ya nemahhig ni bunget kun da nengiwallengan ni hi-gak.

<sup>14</sup> Bahbahen dakeyu et panhindedhukan dakeyulliddan emin ni nambebley di nanlinikweh anin idan kamelebbah. <sup>15</sup> Humman ni pengastiguk ni hi-gayu hu kei-angangan tu hu kameippahding hedin bimmungettak. Ey humman ni meippahding ni hi-gayu ey angettakuff idan nambebley di nanlinikweh. Ey humman ni meippahding ni hi-gayu hu dakeyu panhindedhukan ni katuutuu. <sup>16</sup> Ya peellik ni pemahbah kun hi-gayu ey peellik hu bisil et matey kayun upa yu. Humman ni bisil ni peellik ey kamei-ellig di panan umpatey. <sup>17</sup> Mangkettey idalli u-ungnga yun upa da niya pampetteyen idallin animal di muyung hu edum ni hi-gada. Yadda edum ni hi-gayu ey mangkettey idallid nemahhig ni degeh ni peellik. Yadda edum ey yad gubat hu pangketteyyan da. Hi-gak e AP-APU hu nanghel idan nunya. "

## 6

<sup>1</sup> Kan mewan APU DIOS ni hi-gak ey <sup>2</sup> "Hi-gam e helag ni tuu, ihanggam idad duntug di Israel et peamtam hu lawah ni meippahding ni hi-gada. <sup>3</sup> Kammuy 'Dengel yu eya impeamtan APU DIOS, e Eta-gey ni peteg, ni meippahding ni hi-gayun duduntug, yadda nangkedeplan niyadda nangehayyukung. Peellik idadman hu ungubat ni hi-gayu niya bahbahen kun emin hu yuka pandeyyawin dios ni kinapyan tuu. <sup>4</sup> Bahbahen kun emin hu altar yu, anin idan yuka pan-appisin bangbanglu. Niya petteyen kud hinanggaddan nunman e dios hu kamengidaydayaw ni hi-gada. <sup>5</sup> Et meiwahhiwahhit ali annel yu niya tu-ngal yun ilrael ni pampetteyen kuddad yuka an pan-appisi. <sup>6</sup> Mebahbah ni emin hu bebley yud Israel et mangkebahbah idan emin etan yuka an pan-appisin dios yun kinapyan tuu niya anin ida etan ni dios yu et mangkeendidda. Anin idan yuka an pan-appisin bangbanglu et bahbahen ku. <sup>7</sup> Meiwahhiwahhit ali annel ni nangketey ni tutu-u, et humman ali law hu umhulun ni pengebbulutan yu e hi-gak hu AP-APU.

<sup>8</sup> Nem i-abulut kun meihwang ida hu edum ni tutu-u eyad meippahding. Humman idallin metdaan ey meillaw idad edum ni bebley <sup>9</sup> niya mepillit idan manha-ad di diman. Et yan nunman ali law hu pannemneman dan hi-gak niya pengamtaan da e nakka umlemyung tep ya da nengiwallengan ni hi-gak et ya dios ni kinapyan tuu dinenaydayaw da. Niya angebe-hel dalli law hu annel da tep ya humman ni lawah ni peteg ni impahding da. <sup>10</sup> Yan nunman ali law pengamtaan da e hi-gak hu AP-APU niya amtaen da e makulug ni nakka peamnu hu nakka e-helan pehding ku. "

<sup>11</sup> Immehel mewan hi APU DIOS e Eta-gey ni peteg, et kantun hi-gak ey "Ezekiel, si-pak mu tepayyam ey pandaddahhel ka niya lemyung kad lawah ni peteg ni kapehpehding idan helag Israel, tep nanna-ud ni mangkettey idallid gubat niya mangkettey ida tep ya bisil niya degeh. <sup>12</sup> Yadda etan meillaw di nangeidawwin bebley ey mangkettey idallid degeh. Yadda etan wadad nangeihnpun ni bebley ey mangkettey idad gubat. Ey yadda etan metdaan ey mettey idan bisil. Yan nunman ali peniktaman dan nemahhig ni bunget ku. <sup>13</sup> Ey amtaen dalli law e hi-gak hu AP-APU hedin ang-angan da e kawehiwehit hu

\* 5:12 5:12 Huuya keibbellinan ni impahding nan Ezekiel ni bewek tud chapter 5 verse 2.

annel ni nangketey e nangkei-dum idaddan dios dan wadad daka pan-appisi, yaddad tapew ni etata-gey ni duntug, yaddad hengeg idan keyew anin etan di hengeg ni paleyen niyad emin di daka an pengihhebin daka i-appit. <sup>14</sup> Bahbahen kudda dama bebley da et mambalin ni mangketawwey humman ni bebley dan meippalpuud etan di desert di south ingganah di Diblah e bebley di appit ni north. Em, bahbahen kun emin hu nambebleyan idan helag Israel ma-lat pengamtaan da e hi-gak hu AP-APU."

## 7

<sup>1</sup> Immehel mewan hi APU DIOS et kantun hi-gak ey <sup>2</sup> "Hi-gam e helag ni tuu, ehel muddan katuutuu e kammuy 'Inhel nan APU DIOS e Eta-gey ni peteg e kantuy: Mebahbah ali hu Israel e bebley yu. <sup>3</sup> Humman kastigu yun tutu-un nambebley diman tep ya nemahhig ni liwat yu. Nemahhig bunget ku tep lawah ni peteg impenahding yu. <sup>4</sup> Endi law hemek kun hi-gayu. Et humman hu, kastiguen dakey tep ya angebe-hel kun impenahding yu, ma-lat pengamtaan yu e hi-gak hu AP-APU."

<sup>5</sup> Kan mewan ni Eta-gey ni peteg ni AP-APU ey "Endilli kei-ingngehan ni mantutu-nud ni ligat yu. <sup>6</sup> Em, nanna-ud ni medettengan idalli humman ni nemahhig ni helheltapen yu et humman ali kepappegan yu. <sup>7</sup> Hi-gayun helag Israel ey angehemmek kayulli! Anggegannu law kedettengan ni aggew ni tattakutan yu et eleg kayu law an man-an-anlad ta-pew ni duntug. <sup>8</sup> Hiktaman yulli hu nemahhig ni bunget kun pengastiguan kun hi-gayu, tep yadda lawah ni peteg ni impenahding yu. <sup>9</sup> Eleg dakey law ihhehwang niya eleg dakey hehmeke tep nemahhig liwat yu, et yallin nunman hu pengamtaan yu e hi-gak e AP-APU hu nengastigun hi-gayu."

<sup>10</sup> Kantu mewan ey "Kamangedettengi law hu aggew ni kebabbahan yu! Wada hakkey ni hi-gamy ey kamampahhiya niya inhi-met yu hu kalwah yu. <sup>11</sup> Anin ni di attu et ida kamampapatey hu tutu-u et lektattuy endin hi-gada hu an meihwang di kekastiguan da. Emin ali limmu da ey meendi. <sup>12</sup> Em, kamangedettengi law humman ni aggew! Mepappeg ali law pan-an-anlaan idan kaumgatang niya lelemyungan idan kamampanggettang tep mekastiguddan emin ni pengastiguan kun emin ni katuutuu. <sup>13</sup> Ya etan tuun wada inggatung tun puyek ey eleg medettengi pemangngadan tu tep angegannuy mekastigu law hu katuutuu, tep nemahhig hu bunget ku. Huyyan ninemnem kun pehding ku ey nanna-ud ni pehding ku. Endi hakey ni tuun neliwtan ni an meihwang. <sup>14</sup> Anin ni dedngelen da tenul ni tangguyup ni pandaddanan dan emin ni almas dan an mekiggubbat et endin hi-gada hu umlaw ni an mekiggubbat tep nemahhig hu bunget kun hi-gadan emin ni tutu-ud Israel.

<sup>15</sup> Emin ida meni-yan ni bebley ey petteyen idan buhul da. Yadda manha-ad di bebley ey mettey ni degeh niya bisil. Yadda manha-ad di bebley ey mangketey idan degeh da niya upa da. <sup>16</sup> Yadda hahhakkey ni metdaan ni hi-gada ey umbebsik idad kedunduntug e henidda palaman nedegyun di nangedeklan et ida kaan-umhamahamak ni keihhikkugan da. Wadalli law hakkey ey mantuttuyyun liwat tu niya umlelemyung. <sup>17</sup> Manlungtuy idalli tep ya takut da niya umgenyeyku hu ngamay da niya heli da. <sup>18</sup> Mampambalwasiddallin langgusih ey mampemukmuk ida tep ida kaumlelemyung niya ida kamantuttuyyu. Ka-ang-ang alid angah da e ida kaumtatakut niya ida kaumbabaing. <sup>19</sup> Yadda nangkebalol ni tenged da e henin balituk niya silber ey henidda lugit ni da pan-ibbeng di keltad. Endilli kabaelan idan nunman ni nebalol ni tenged dan mengihwang ni hi-gadad bunget ku e hi APU DIOS. Eleg mabalin ni da usalen ida humman ni pengettang dan kenen da niyadda edum ni mahapul da. Ebuu diman ey humman ida himmulun ni naliwaliwatan da. <sup>20</sup> Impahhiya dadda humman ni kakkayyaggud ni tenged da, nem humman ida mewan kinapya dan dios dan angebehel ku. Et mukun impambalin kudda humman ni dios dan endi silbi tun hi-gada. <sup>21</sup> Tep peellik hu nemahhig ni lawah ni tutu-ud edum ni bebley et pan-alen dadda humman. Hibbiten dadda humman ni dios et usalen dad linggeman ni pinhed da. <sup>22</sup> Ey pekdag kulli i-ineng anin ni pambalin da hu Tempol kun angebe-hel ku, tep hehgepen dalli et da pan-alen hu nangkebalol ni kameussal di diman.

<sup>23</sup> Endilli petek tu hu meippahding di bebley yud Jerusalem. Mampapatey idalli edum ey pan-ippahding ni edum hu hipan lawah. <sup>24</sup> Peellik idalli hu nemahhig ni lawah ni tutu-ud edum ni bebley et hi-gada hu manha-ad di baballey da ey hibbiten dalli hu daka pandaydayawi. Humman ali pemappeg kun daka pampahhiyyai. <sup>25</sup> Nanna-ud ni endilli linggep da, ebuh ali takutakut ni wadan hi-gada. Ippenatna dallin heppuheppulen hu linggepan da, nem eleg dalli hanhapul. <sup>26</sup> Mantutu-nud hu ligat ni um-alin hi-gada ey beken ni kayyaggud hu kamee-ehhel ni meippahding di bebley da. Dalli law hemmakan ida etan prophets, nem endi damengu hu nak peamtan hi-gada. Anin idan papaddi et endilli da ittuddun hi-gada niya endi an ittugun

idan nangkenemneman. <sup>27</sup> Umlelemyung ali patul da ey umnanginangih ali u-ungnga tu, tep meendilli namnamah da. Umgeneygey idalli hu katuutuun takut da tep ya pengastiguan kun hi-gada tep ya lawah ni impenahding da. Pehding kullin hi-gada hu henin impenahding dad edum dan tuu. Huyyallin meippahding ni hi-gada hu pengamtaan da e hi-gak hu AP-APU."

## 8

### *Ya nemahhig ni liwat idan ijerusalem di Tempol*

<sup>1</sup> Yan meikkelliman aggew ni meikka-nem ni bulan eman ni meikka-nem ni toon neipalpun nengilawwan dakemid Babilon ey immaliddad baley ku hu aap-apun ijudah. Et kami kamampanyuyyudding ey endi maptek ey newadan hi-gak hu kabaelan APU Dios e Eta-gey ni peteg, <sup>2</sup> ey wada inang-ang kun heni tuu. Ya etan annel tu meipalpuud gitang tu ingganah di heli tu ey heni kamantetebbel ni apuy. Ya ulu tu ingganah di gitang tu ey henin malinah ni giniling e kamanlitaak. <sup>3</sup> Entanni ey wada hu heni ngamay ang-ang tun in-adang tullu et itnged tud bewek ku et ita-gey tuwak nan Ispirituh Apu Dios et heni da-ak intayab lad Jerusalem. Inlaw da-ak kumangngud heggeppan ni Tempol di appit ni north di dallin di ahpat ey immen hu neiha-ad ni kinapyan tuun dios e humman hu angebe-hel ni peteg nan Apu Dios. <sup>4</sup> Pinhakkey ey wada hu nemahhig ni kaumhilin dayaw Apu Dios e Dios idan helag Israel e henin inang-ang kud gilig ni Wangwang e Kebar.

<sup>5</sup> Entanni ey kan APU DIOS ni hi-gak ey "Hi-gam e helag ni tuu, iang-ang mud appit ni north." Et nak i-ang-ang ey wada hu dios ni kinapyan tuun neiha-ad di kad-an ni kapan-appisid eheb e humman kamengippebungnet ni peteg nan Apu Dios.

<sup>6</sup> Kantuy "Kaw inang-ang mu law humman ni daka pehpending? Lawah ni peteg hu kapehpending ida eyan helag Israel ni meneg-al ni hi-gak eyad Tempol ku. Nem beken ni ebuh huyyan daka pehpending tep wadadda hu edum ni nema-ma-man lawah ni liwat da nem yadda huyya."

<sup>7</sup> Entanniy inlaw tuwak mewan di habyan ni dallin ni Tempol et itudu tu hu negu-kangan di tuping ni luhud. <sup>8</sup> Et kantun hi-gak ey "Hi-gam e helag ni tuu, e-etteng mu humman ni negu-kangan." Inu-unnud ku et e-ettengen ku etan negu-kangan ey inang-ang ku hu lekbini neitlun kuwaltuh.

<sup>9</sup> Kantuy "Hegep ka ma-lat ang-angen mu hu lawah ni peteg ni kapehpending idan helag Israel." <sup>10</sup> Et humgeppak ey inang-ang ku hu dakel ni neikenu-lit di dingding ni uleg, yadda bannagaw, yadda etan edum ni beken ni malinih ni animal niyadda etan edum ni dios dan daka daydayawa. <sup>11</sup> Wadaddadman hu nepitun kamengipappanggulun helag Israel anin hi Jaasaniah e u-ungngan Saphan. Nantenged idan emin ni gihhebban ni insensoh e kaman-a-ahhuk hu insensoh ni neiha-ad diman.

<sup>12</sup> Kan APU DIOS ni hi-gak ey "Hi-gam e helag ni tuu, inamtam law hu daka itattallun kapehpending idan nunyan kamengipappanggulun helag Israel. Daka daydayawa eyad kuwaltuh hu kinapkapa dan dios da. Daka pengigga-dulin kanday 'Hini-yan Apu Dios eya bebley tayu. Et humman hu eleg tu han-ang-ang eya tayu kapehpending.' " <sup>13</sup> Kantu mewan ey "Ang-angem ali pay hu daka pehpending ni nema-ma-man angebe-hel ku nem ya huyya!"

<sup>14</sup> Inlaw tuwak mewan di eheb ni Tempol di appit ni north ey inang-ang kudda bibi-in daka nanangngihi hi Tammus e dios dan kanday netey. <sup>15</sup> Kantuy "Ang-ang mu kedi tu-wangu anhan hu kapehpending idan nunyan bibi-i. Nem beken ni ebuh huyya, tep wada pay hu ang-angen mun nema-ma-man nem ya huyya!"

<sup>16</sup> Inlaw tuwak mewan di ahpat ni dallin ni Tempol di ey inang-ang kud habyan di nambattanan ni balkon et ya etan gembang ni kapan-appisi hu dewampulu et liman lalakkini immehngeng ida. Dingkung da hu Tempol et daka iyuyyung di appit ni kasimmilin aggew e daka daydayawa hu aggew.

<sup>17</sup> Kan mewan APU DIOS ni hi-gak ey "Ang-ang mu kedidda huyyan ijudah. Daka e-nguhidda hu inang-ang mun angebe-hel kun daka pehpending di deya niya daka e-nguhi hu patepatey ni daka ippenahding eyad kebbebley et ida kaum-ali eyad Tempol kun an mengippahding ida eyan daka pehpending et daka ma-ma-maa hu bunget kun hi-gada. Inang-ang mudda huyyan nemahhig ni lamhih dan hi-gak eyad daka pehpending. <sup>18</sup> Et humman hu, kastiguen kudda tep ya bunget kun hi-gada. Eggak ida hehmeka, anin ni pehemhemmek idan hi-gak."

## 9

### *Ya nekastiguan idan ijerusalem*

<sup>1</sup> Entanni ey dingngel ku hi APU DIOS ni kamantetkuk e kantuy "Hi-gayuddan mengastigu eyan bebley ey aleyudda almas yu et umli kayu." <sup>2</sup> Ey pinhakkeyey immalidda enem ni lalakkin nalpud nengin-ahpat ni eheb di dallin di appit ni north ni Tempol e wada hakkey ni hi-gada ey nantenged ni almas. Ya etan hakey ey nambalwasin kakkayyaggud ni luput niya wada ingku-bit tun kapantuddeki. Entanni ey limmaw idan emin di dallin ni Tempol et maidagsiddan immehneng etan di giniling ni altar.

<sup>3</sup> Endi maptek ey nanta-gey etan umhilin dayaw APU DIOS e DIOS idan helag Israel e nalpud ta-pew idan anghel et mei-tan di habyen ni Tempol. Ey kan APU DIOS etan ni kayyaggud balwasi tun nangged ni kapantuddeki ey <sup>4</sup> "Elaw kad Jerusalem et mu malkaan hu tuktuk idan emin ni tuun kaumlemyung niya kamemunnunnu nemnem da tep yadda eya lawah ni peteg ni kameippenahding eyad bebley."

<sup>5</sup> Entanni ey dingngel ku e kan Apu Dios ida etan ni edum ni lalakki ey "Kaiunud kayun hi-gatud lawwan tud bebley et yu pampatyen ida hu tutu-udman ni eleg memalkaan tuktuk da. Entan tudda hemek. <sup>6</sup> Patey yuddan emin anin idan nangkea-amma, yadda nangkei-inna, yadda kamampenikken ni lalakki niya bibi-i niyadda kaungaunga, et yadda ineda. Nem entan tu patey ida hu nemalkaan tuktuk da. Ilepun yu eyad Tempol kun ippahding huyyan inhel ku." Inu-unnud da et ilepu dan petteyen ida etan nepitun ap-apun immen di Tempol.

<sup>7</sup> Kan APU DIOS mewan ey "Anin ni pambalin yu eya Tempol kun angebe-hel ku e anin ni tetbunen yun annel ni nangketey hu dallin. Lakkayuy et yu ipahding huyyan inhel kun pehding yu!" Et lumaw idan an memettey ni tutu-ud etan di bebley. <sup>8</sup> Limmaw ida humman ni binegan Apu Dios ni an mampemettey idan tutu-u ey hahhakkeyyak ni nehi-yan et lumukbubbak ni mandasal et kangkuy "Eta-gey ni peteg ni AP-APU, kaw tu-wangun mu pepettey idan emin eya tutu-ud Jerusalem tep ya nemahhig ni bunget mun hi-gada?"

<sup>9</sup> Hinumang APU DIOS ey kantuy "Humman idan tutu-ud Israel niyad Judah ey nemahhig hu liwat da. Ida kamampapatey ey beken ni meandeng hu daka pehding di edum da. Kanday 'Eleg han-ang-ang ni AP-APU hu tayu kapehpehding tep hini-yan tu eya bebley tayu.' <sup>10</sup> Et mukun eggak ida hehmeka. Mahapul ni kastiguen kudda et heni baleh ni impenahding da."

<sup>11</sup> Entanni ey neibanggad etan nambalwasin kayyaggud et kantun APU DIOS ey "Impahding ku hu imbagam ni pehding ku."

## 10

### *Neendi law hu dayaw APU DIOS di Tempol*

<sup>1</sup> In-ang-ang kud etan di atep di ta-pew ni uluddan epat ni anghel ey wada hu heni yuddunggan ni patul ni sapphire hu nekapy. <sup>2</sup> Kan APU DIOS etan ni tuun nambalwasin kayyaggud ey "Elaw kad nambattanan idan henin helin talak di kad-an idan epat ni anghel et ka umekup ni ngalab et mu wahitan ni emin hu bebley di Jerusalem." Entanni ey inang-ang ku e tu impahding humman.

<sup>3</sup> Ida kaman-eh-ehneng hu anghel di Tempol di appit ni south ni hinggepan ni nunman e tuu ey pinhakkeyey newadad nengin-ahpat ni dallin ni Tempol hu kaumhilin dayawan APU DIOS. <sup>4</sup> Entanni ey limmaw etan kaumhilin dayaw tud habyen ni Tempol e nalpud kad-an ida etan ni epat ni anghel ey pinhakkeyey newada damad dallin di nengin-ehpen humman ni kaumhilin dayaw tu. <sup>5</sup> Kamedngel di nengin-ahpat ni dallin ni Tempol hu bungug ni payak idan epat ni anghel e heni ehel Apu Dios e Kabaelan tun emin.

<sup>6</sup> Minandal nan APU DIOS etan lakin nambalwasin kayyaggud ni an um-alan apuy di kad-an idan heni helin talak di kad-an idan anghel. Et lumaw et an umehneng di dagsin hakey ida etan ni heni helin talak. <sup>7</sup> In-adang etan ni hakey ni anghel hu ngamay tud apuy et umlan ngalab et iha-ad tud ngamay etan ni tuu. Et alen nunman ni tuu etan ngalab et umhep la. <sup>8</sup> Inang-ang ku ey wada heni ngamay ni tuud daul ni payak idan nunman ni epat ni anghel.

<sup>9</sup> Yadda etan epat ni heni helin talak ey nei-peng idan neidagsid kad-an idan epat ni anghel. Huyyaddan heni helin talak ey ida kamanliitak e henidda chrysolite <sup>10</sup> niya wada hakkey idan nunya ey wada keingneh dan heni helin talak ni nangkawit di gawwa tu. <sup>11</sup> Anin ni attu nengihangaan ida etan ni anghel ni pinhed dad lawwan et dammutun umlaw ida e eleg mahapul ni ida manligguh. <sup>12</sup> Nemat-an ni emin hu annel da anin ni ya beneg da, ya payak da, ya ngamay da et ya heli da. <sup>13</sup> Entanni ey wada dingngel kun kantuy ya ngadan idan nunman e heni helin talak

ey “Kamambalaliwetwet ni heni helin talak.”<sup>14</sup> Yadda etan anghel ey han-e-pat hu angah dan wada angah ni bulug, angah ni tuu, angah ni layon niya angah ni tulduh.

<sup>15</sup> Humman idan anghel ey humman ida hu inang-ang kud Wangwang e Kebar. Entanni ey simmayab ida la humman ni anghel di ahpat. <sup>16</sup> Anin ni attu lawwan ida etan ni anghel et ida kamei-unnuunnud etan heni helin talak ni hi-gada. Hedin simmayab ida, ni neiunud ida dama etan heni helin talak. <sup>17</sup> Hedin nanha-ad ida, man kamanha-ad ida dama humman ni heni helin talak tep ya ispirituh idan etan ni anghel hu kamanmandal ni hi-gada.

<sup>18</sup> Entanni ey nan-etan etan kaumhilin dayaw APU DIOS di habyen ni Tempol et lumaw di ta-pew idan anghel. <sup>19</sup> Nakka ang-ang-anga ey binekyag idan nunman ni anghel hu payak da et tumyab idad eheb ni Tempol di appit ni kasimmilin aggew ey neiunud ida etan heni helin talak ey neipettek ni hi-gada etan kaumhilin dayaw nan Dios idan helag Israel.

<sup>20</sup> Nimmatunan kun humman idan anghel hu inang-ang kud daul etan ni kaumhilin dayaw nan Dios idan helag Israel eman ni wada-ak di Wangwang e Kebar. <sup>21</sup> Emin ida ey han-e-pat angah da ey payak da niya wada heni ngamay ni tuud daul ni payak da. <sup>22</sup> Ya angah da ey heniddan inang-ang kud gilig ni Wangwang e Kebar. Emin ida humman ni mategu ey ida kamengan-andeng hedin immeladda.

## 11

<sup>1</sup> Entanni ey heni tuwak la lini-bit nan Ispiritu APU DIOS et ilaw tuwak di eheb ni Tempol di appit ni kasimmilin aggew. Ey inang-ang kuddadman etan dewampulut liman lalakkin kamengipappangnguluddan tutu-u. Anin hi Jaasaniah e u-ungngan Assur nan hi Pelatiah e u-ungngan Benaiah et wadaddadman.

<sup>2</sup> Kan APU DIOS ni hi-gak ey “Hi-gam e helag ni tuu, ey huuyaddan lalakki hu kannemnem idan lawah ni daka ittugun idaddan tutu-ud Jerusalem. <sup>3</sup> Kandaddan tutu-uy ‘Pambewaten tayu mewah hu baballey eyad bebley tayu. Huyyan bebley tayu ey heni banga ey heni hi-gatsu hu detag ni neihududman. Endi hu lawah ni an meippahding hi-gatsu tep wada itsu eyad bebley ni keippaptekan tayu.’ <sup>4</sup> Hi-gam e helag ni tuu, lakkay et mu pan-ehelen idan katuuuu hu meippahding alin hi-gada tep ya liwat da!”

<sup>5</sup> Entanni ey newadan hi-gak mewah etan Ispiritu APU DIOS et kantuy nak e-helen idan helag Israel hu inhel nan APU DIOS. Et nak pan-ehelen e kangkuy “Inhel APU DIOS e kantuy ‘Hi-gayun helag Israel, inamtak hu yuka ene-ehela niya inamtak hu yuka nemnemneman pehding. <sup>6</sup> Dakel hu pinetepetey yun tutu-u eyad bebley et mapnu hu keltad ni annel ni nangketey.

<sup>7</sup> Et humman hu, hi-gak e Eta-gey ni peteg ni AP-APU ey e-helen ku e huuyyan bebley ey makulug ni heni banga, nem ya kei-elligan ida etan ni detag ni neihududman ey humman hu annel idan tutu-un pinetepetey yu. Eleg kayu umlinggep, tep degyunen dakeyun hi-gak eyad bebley yu. <sup>8</sup> Yuka tattakusi gubat nem humman peellik. <sup>9</sup> Pampedpap dakeyud tuun melpud edum ni bebley et pa-kal dakeyu eyad bebley yu <sup>10</sup> niya pepetey dakeyu ma-lat pengamtaan ni emin ni tutu-u e hi-gak hu AP-APU. <sup>11</sup> Eleg kayu meihwang di lawah ni mekapkapy eyad bebley yu. Ey beken kayun heni detag ni nantalud banga, tep kastiguen dakeyu anin ni attu hu kad-an yud Israel <sup>12</sup> ma-lat pengamtaan yu e hi-gak hu AP-APU. Henin nunya pehding kun hi-gayu tep eleg yu u-unnud hu tugun ku et ya kumedek elaw ida eyan nambbley di nanlinikweh di bebley yu hu inenu-unnud yu.”

<sup>13</sup> Nanengtun nakka man-e-ehel ey pinhakkeyey nengimpapatey hi Pelatiah e u-ungngan Benaiah. Et lumkubbak di puyek ni mandasal e kangkuy “APU DIOS e Eta-gey ni peteg, entan anhan tu patey idan emin eya natdaan ni tutu-ud Jerusalem!”

<sup>14</sup> Himmumang hi APU DIOS ey kantuy <sup>15</sup> “Hi-gam e helag ni tuu, hi-gayu mannuman idan edum mun nei-li eyad bebley hu kaene-eheladdan nehi-yan di Jerusalem. Kanday ‘Hi-gatsu law nengidwatan nan APU DIOS eyan bebley, tep yadda etan edum tayun neilaw di edum ni bebley ey endi law inna-nu dan mengidaydayaw ni hi-gatu tep neka-iddawwida.’

<sup>16</sup> Et humman hu, ehel mu eya e-helen kun edum muddan nedegyun alid bebley yu e ma-nu tep hi-gak hu nenegyun alin hi-gayud bebley yu et maiwehit kayud nangeidawwin bebley, nem ippaptek dakeyun hi-gak di bebley ni neilawwan yu.

<sup>17</sup> Hi-gak e Eta-gey ni peteg ni AP-APU ey e-helen ku e hi-gayun inwahit kud kebebbley e emmungen dakeyullin hi-gak et ibanggad dakeyud bebley yud Israel.

<sup>18</sup> Yallin nunman ni keibbangngadan yu ey e-kalen yulli law ni emin ida hu angebehel kun dios yun kinapyan tuu. <sup>19</sup> Hullulak ali elaw yu et beken kayulli law ni manghay,



nem mambalin kayun emin ni mekangngu-unnud ni hi-gak. <sup>20</sup> U-unnuden yulli law tugun ku ey yaddalli law etan pinhed ku hu ippahding yu. Hi-gak ali mewan law hu Dios yu ey hi-gak hu kan tuun hi-gayu. <sup>21</sup> Nem hedin yadda etan mengidaydayaw idan angebe-hel kun dios ni kinapkapyan tuu, man kastiguen kudda tep ya humman ni liwat ni impahding da. Hi-gak e Eta-gey ni peteg ni AP-APU hu nanghel idan nunya."

<sup>22</sup> Entanni ey binekyag idan anghel hu payak da et tumyab ida e nekiyab dadda etan heni helin talak. Ya etan kaumhilin dayaw nan Dios idan helag Israel ey immen di ahpap di pettek da. <sup>23</sup> Entanni ey limmaw humman ni kaumhilin dayaw Apu Dios di Jerusalem di duntug diman di appit ni kasimmilin aggew. <sup>24</sup> Entanni ey heni i-innep la mewan hu tuwak nanli-bitan nan Ispirituh Apu Dios et ibangngad tuwak di Babilon di kad-an idan edum kun nedegyun di bebley mi.

Et yan nunman nepappegan ni impeamtan APU DIOS ni hi-gak di Jerusalem. <sup>25</sup> Et ehelen kuddan edum kun helag Israel di diman hu impeenang-ang tun hi-gak.

## 12

<sup>1-2</sup> Entanni ey wada mewan hu impeamtan APU DIOS ni hi-gak e kantuy "Hi-gam e helag ni tuu, mangkanghay ida eya edum mu. Ma-nut wada mateda, nem eleg da han-ang-ang niya ma-nut wada tangila da, nem eleg ida umdengel tep ya humman ni ngehay da.

<sup>3</sup> Heninnuy pinhed kun pehding mu. Ihambag kan hantenged mun ngunut mu ey hinakbatam e heni ka kelabut ni meillaw di edum ni bebley. Yan kawwalwal dedan hu pangipahdingim nunya ma-lat ang-angen idan edum mun helag Israel et ilah tu-et anhan ey ewwatan idan tutu-u huyyan pehding mu, anin ni mangkanghay ida. <sup>4</sup> Yan kawwalwal nisi dedan hu pengi-hepim idan ngunut mu ma-lat ang-angen idan tutu-u. Ipaddih mun tuka pangkehilengi hu e-gaham e henin ka-egahiddan tuun kameillaw di edum ni bebley. <sup>5</sup> Hedin daka kaitettekel idan tutu-u ey gu-kangim dingding ni baley mu et idlan mudman et i-hep mu hu ngunut mu. <sup>6</sup> Peang-ang muddan katuutuu hu pengihakbatan mun ngunut mu ey menglaw kan tuka pangkehilengi. Niya haniim hu matam ni penget mu ma-lat eleg mu han-ang-ang hu lawwan mu. Huttan ni mu pehding hu pengi-ang-angan idan edum mun helag Israel ni meippahding alin hi-gada."

<sup>7</sup> Et ipahding kun emin humman ni inhel APU DIOS ni nunman ni aggew et ihambag kudda ngunut kun henin kapehding ni tuun kameillaw di edum ni bebley. Et kamangkehileng ni nunman ey ginu-kangan kun ngamay ku hu dingding ni baley ku et idlan kudman ni immehep e hinahakbatan ku ngunut ku et da-ak kaang-ang-angaddan tutu-u ey menglawwak.

<sup>8</sup> Yan nawa-waan tu ey kan mewan APU DIOS ni hi-gak ey <sup>9</sup> "Hi-gam e helag ni tuu, deh e kamannahiddan edum mun helag Israel hedin hipa keibbellinan tudda hu muka pehpehding. <sup>10</sup> Ehel mun hi-gada e kammuy 'Heninnuy hu inhel ni Eta-gey ni peteg ni AP-APU e kantuy: Huyyan impeamtak hu meippahding alin Sedekiah di Jerusalem et yadda aap-apu niyadda katuutun wadadman.' <sup>11</sup> Paka-hel mu et awatan dan emin e yadda etan impahding mu hu kei-ang-angan ni meippahding alin hi-gada, tep medegyun idallid baballey da et mailaw idan balud di edum ni bebley.

<sup>12</sup> Anin ni hi Sedekiah et medegyun alid Jerusalem ni hileng. Iddalan tullid etan di negu-kangan ni dingding ni kinapya dan dellanen tu ey yallin ebu hu hantenged tun ngunut tu hu hakbatan tu. Hukungan tulli angah tu niya eleg tulli law ang-anga bebley tu. <sup>13</sup> Tep pedpap kullin heni nak tewwangen et mailaw di Babilon, nem mettey alidman ey eleg tu ang-anga humman ni bebley ni keillawwan tu. <sup>14</sup> Iwwahit kuddalli hu opisyal tu, yadda guwalya tu, niyadda kaumtugun ni hi-gatu, nem pengunnud ku damengu hu an memettey ni hi-gada.

<sup>15</sup> Yan nunman alin pengiwwehhitan kun hi-gadad nangkeidawwin bebley hu pengamtaan da e hi-gak hu AP-APU. <sup>16</sup> Nem wadaddalli hu hahhakkey ni hi-gadan metdaan di gubat, yad bisil niyad degeh et ehelen daddallin nengikelabut ni hi-gada e lawah ni peteg impenahding da. Yan nunman ali law pengebbulutan da e hi-gak hu AP-APU."

<sup>17</sup> Entanni mewan ey kan APU DIOS ni hi-gak ey <sup>18</sup> "Hi-gam e helag ni tuu ey umgeneygey kallin mengngan niya um-inum tep ya takut mu e heni mepegtang law hu yayyah mu. <sup>19</sup> Ehel muddan tutu-ud Israel niyad Jerusalem e huyya inhel nan APU DIOS e Eta-gey ni peteg e kantuy 'Umgeneygey idallin mengngan niya um-inum ni takut da tep mebahbah ali bebley da et meendi limmu da tep yadda lawah ni impahding da. <sup>20</sup> Mangketawwey idalli bebley niya papayew da tep meiwwalleng ida et yan nunman ali pengamtaan da e hi-gak hu AP-APU.'"

<sup>21</sup> Immehel mewan hi APU DIOS ey kantuy <sup>22</sup> "Hi-gam e helag ni tuu, kele heninnuy hu keene-ehheladdan ilsrael e kanday 'Mengmenglaw mannuman hu aggew ey eleg um-amnu hu inhel dan meippahding.' <sup>23</sup> Ehel mun hi-gada e kangkuy: Hi-gak e Eta-gey ni peteg ni AP-APU ey pesikkeed ku humman ni daka ene-ehhelad Israel et kandalli law ey 'Kaum-amnun emin hu neipeamtan meippahding.'

<sup>24</sup> Endiddalli law eyad Israel hu nangeihla hu daka peennamtan meippahding niya endilli law hu menghel ni kantun wada ini-innep tu nem ya kakulugan tu ey endi kaya. <sup>25</sup> Tep hi-gak law e DIOS hu um-ehel ni hi-gada niya emin hu peamtak ey um-amnu. Hedin hi-gayun mangkanghay, man hi-gayu keippahdingan idallin inhel kun meippahding. Hi-gak e Eta-gey ni peteg ni AP-APU hu nanghel idan nunya!"

<sup>26</sup> Entanni ey immehel mewan hi APU DIOS e kantuy <sup>27</sup> "Hi-gam e helag ni tuu, kan idan tutu-u ey 'Ayepaw ali mannuman hu keippahdingan ni nunman ni impeamta tu!' <sup>28</sup> Humman ni daka pengpenghel hu gaputun elaw ka et mu ehelen ni hi-gada e kammuy 'Ya etan Eta-gey ni peteg ni AP-APU ey kantuy: Anggegannu law hu keippahdingan idan impeenamtak. Hi-gak e Eta-gey ni peteg ni AP-APU hu nanghel idan nunya!' "

### 13

<sup>1-2</sup> Entanni ey immehel mewan hi APU DIOS et kantuy "Hi-gam e helag ni tuu, ey mu peamta hu meippahding idan kaumlenangkak ni prophets di Israel. Ehel mun hi-gada et denglen da eya pinhed kun e-helen ni hi-gada.

<sup>3</sup> Hi-gak e Eta-gey ni peteg ni AP-APU ey kangkuy 'Anggehmemek kayun beken ni makulug ni prophets ni endi nemnem tu, tep nanna-ud ni mekastigu kayu! Kanyuy hi-gak nalpuan idan yuka peennamta, nem ya kakulugan tu ey endi hu nak impeamtan hi-gayu tep nalpu ngud nemnem yu hu yuka e-e-hela!

<sup>4</sup> Hi-gayun tutu-ud Israel, huttan idan prophets yu ey henidda ahhud muyung ni kaamenemmahemmak ni kenne dad nangebahbah ni bebley. <sup>5</sup> Hedin yadda nanna-ud ni meippahding ey humman ida hu eleg da e-helan hi-gayun tutu-u, anin ni wada ligat ni um-alin hi-gayu. Niya eleg dakeyu mewan e-helin tutu-u ma-lat isiked yun manliwwat, tep anggetakkut hu meippahding ni tuun manliwwat ni hi-gak. Humman ni daka pehpehding ey keinggeh tu hu eleg da iyayyagud hu nebahbah ni luhud ni daka penennin bebley da hedin wada gubat. Nemnem yu e iyyallin medettengan hu aggew ni gintud APU DIOS ni pemabhahan tun hi-gayu. <sup>6</sup> Tep emin ida etan kandan daka i-innepa niyadda etan daka e-e-hela ey beken ni makulug ida humman. Kanday nalpua hi-gak ida etan daka peennamta, nem eleg kaya tep eggak ida bagaen. Ey da ni-ngangu mewan kanamnamahan um-amnu etan daka e-e-hela. <sup>7</sup> Ambeken nanna-ud ni beken ni makulug hu kandan daka eni-innepa, tep kanda ni-ngangu nalpua hi-gak humman idan daka peennamta, nem itek da humman, tep endi hu nak inhel ni hi-gada.

<sup>8</sup> Et humman hu, hi-gak e Eta-gey ni peteg ni AP-APU ey e-helen ku e kastiguen dakeyu tep itek ida etan yuka e-e-hela niyadda etan kanyun yuka eni-innepa. <sup>9</sup> Em, kastiguen kudda humman ni maitek ni prophets ni kaumhauhaul, e anin ni endi impeamtak ni hi-gada et kanday wada. Eleg idalli meibbillang ni tutu-uk ey eleg ali mei-dum ngadan dad liblul ni neitudekan ni ngadan idan tutu-uk ni helag Israel niya eleg dalli law anganga bebley da. Et yan nunman ali law pengamtaan da e hi-gak hu Eta-gey ni peteg ni AP-APU.

<sup>10</sup> Humman idan beken ni makulug ni prophets ey hineuheul dadda hu tutu-uk e kanday 'Melinggep kayu kaya, endi hu lawah ni an meippahding ni hi-gayu'. Nem ya kakulugan tu ey endin hekey linggep. Henidda etan ni tuun kamantupping ni impakdag tu ga-tuga-tun ni batu ni hinebab tu et kayyagud hu ang-ang tu, nem immen kumedek e kagegedday, tep eleg tu ihammad hu impanuping tu. <sup>11</sup> Ehel yuddan nunman ni prophets e anggegannu law ey mangkegday hu binattun luhud ni sinuping da. Gegday alin na-let ni udan, ya dallalu niya pewek ni peellik. <sup>12</sup> Et penghel idallin katutuutan etan idan nantuping ey 'Kele mewan an nagday ey kan yu ey neihammad?'

<sup>13</sup> Et humman hu, hi-gak e Eta-gey ni peteg ni AP-APU ey e-helen ku e kangkuy 'Peellik hu na-let ni pewek, ya na-let ni udan niya dallalu tep ya bunget ku et mangkagday ida humman ni tuping. <sup>14</sup> Ninemnem kun bahbahen humman ni tuping et mangkatleb et mabudihan hu dalinat tu. Em, mangketey idalli tutu-un meta-bunan ma-lat pengamtaan ni emin ni tuu e hi-gak e AP-APU hu nengipahding ni nunman.

<sup>15</sup> Nemaahhig alin nunman hu bunget kuddan bimbebley di Jerusalem niyadda beken ni makulug ni prophets, et mukun pambahbahen kuddalli luhud yu. Mangkebahbah ali bebley yu niya mangketey ida etan beken ni makulug ni prophets <sup>16</sup> ni nengipanghel idan tuuk ni endi hu lawah ni an meippahding ni hi-gayu, nem itek kaya humman. Hi-gak e Eta-gey ni peteg ni AP-APU hu nanghel idan nunya.' "

*Ya meippanggep idan bibi-in beken ni makulug ni prophets*

<sup>17</sup> Kan APU DIOS mewan ey "Hi-gam e helag ni tuu, mudda eheli hu bibi-in beken ni makulug ni prophet yun ya linggeman ni kaum-alid nemnem da hu daka ebbiga. <sup>18</sup> Kammun hi-gaday 'Kan ni Eta-gey ni peteg ni AP-APU ey: Anggehemmek kayullin bibi-i tep mekastigu kayu! Yuka he-uhe-uladda tuu etan di kanyun magic ni yuka kennapyaan gelhing niya penget. Pinhed yu ni-ngangun wada kabaelan yu e hi-gayu mengippanghel ni pehding idan tuuk di biyag da niya ketteyyan da, ma-lat usalen yuddad panyaggudan yu. <sup>19</sup> Yuwak kababbainga di hinangngab idan tuu tep umhulun anhan hu pengellaan yun anin ni ekket ni begah winu sinapay. Kayu kaman-ittek ni impampapetey yudda tuun endi bahul da et meliblih ida etan nambahul, nem nehaul ida kumedek tuuk et dakeyu kakulluga.

<sup>20</sup> Et humman hu, hi-gak e Eta-gey ni peteg ni AP-APU ey kangkuy: Anggebe-hel kudda etan magic ni yuka ussalan mene-uhe-ul idan tuuk. Dakeyu kakukkulugan hi-gada et henidda sisit ni naknad lingen e eleg pakabsik. Ey heni hi-gayu kamengippanghel ni pehding dad biyag da. Nem pesikked kudda law humman ni magic yu et meliblih idalli law hu tuud daka kehe-uli et henidda neibukyut ni naknan sisit. <sup>21</sup> Niya e-kalen kudda etan yuka ippepnet ni yuka ussalan mengippahding ni magic yu et mepappeg law hu heni yu nanggedan ni biyag idan tutu-u niya ma-lat eleg law mabalin ni yudda he-uhe-ulen. Em, ippahding kudda huuya et pengamtaan yu e hi-gak hu AP-APU.

<sup>22</sup> Ya itek yu mewan hu himmulun ni nedismayahan idan kayyaggud ni tutu-un eggak pinhed ni panhelheltap. Et binaddangan yudda lawah ni tutu-u et eleg ida matey ma-lat itultuluy dan mengippahding ni lawah.

<sup>23</sup> Nem mepappeg law ida itek ni i-innep yu ey yudda magic yu tep baddangak ida tutu-uk ma-lat eleg yudda law ha-uha-ulen. Et yan nunman ali law pengamtaan yu e hi-gak hu AP-APU.' "

## 14

*Ya nandayawan idan ap-apud Israel ni beken ni makulug ni dios*

<sup>1</sup> Entanni ey wadadda immalin kamengippangnguluddan helag Israel ni an memuhdan ni hipan impeamtan APU DIOS ni hi-gak. <sup>2</sup> Ey immehel ni nunman hi APU DIOS et kantun hi-gak ey <sup>3</sup> "Hi-gam e helag ni tuu, huttan idan tuu ey yadda etan dios ni kinapyan tuu hu daka pakakkulluga niya inebulut da hu kameituttuddun kapanliwasi. Nem ay kanda na-mu ngu nem pehding ku hu pinhed dan ibbaga. <sup>4</sup> Ehel muddan nuntan ni tutu-u e hi-gak e Eta-gey ni peteg ni AP-APU ey kangkuy 'Kastiguen kudda hu tutu-ud Israel ni kamenaydayaw ni kinapyan tuun dios ni han ida ni-ngangu mewan limmaw ni an mambeggan baddang idan prophets. <sup>5</sup> Huuya hu pehding ku et ilah tu-et ey isiked idan tutu-uk ni menaydayaw idan dios ni kinapyan tuu et hi-gak law hu daydayawen da.'

<sup>6</sup> Et humman hu, ehel muddan tutu-ud Israel e kammuy 'Kan nan APU DIOS e Eta-gey ni peteg ey: Iwalleng yudda law etan angebe-hel kun dios yun kinapyan tuu niya isiked yudda hu lawah ni yuka pehpehding.

<sup>7</sup> Hedin wadan hi-gadan helag Israel, anin ni yadda tuun binunal di Israel hu mengiwalleng ni hi-gak et ya dios ni kinapyan tuu daydayawen tu, ey han mewan limmaw ni mampebaddang idan prophets, man hi-gak e AP-APU hu mengastigun hi-gatu. <sup>8</sup> Ippahding ku hu lebbeng ni meippahding ni hi-gatu ma-lat ang-angen ni tutu-u et eleg da iu-unnud ni hi-gatu. Eleg law mei-dum idad tuuk humman ni tuu ma-lat pengamtaan yun emin e hi-gak hu AP-APU.

<sup>9</sup> Ey hedin beken ni makulug hu ebbigen idan prophets tep hineul ku, man kastiguen kudda et eleg ida law mei-dum di tuuk ni helag Israel. <sup>10</sup> Yadda humman ni prophet et yadda tutu-un an mambeggan hipan impeamtak ni hi-gada ey nan-inggeh kastigu da. <sup>11</sup> Humman hu pehding kuddan tutu-uk ma-lat eleg da-ak iwalleng niya ma-lat isiked dan mengippahding ni angebe-hel kun peteg ni liwat da, tep tutu-uk ida ey hi-gak hu Dios da. Hi-gak e Eta-gey ni peteg ni AP-APU hu nanghel idan nunya.' "

<sup>12</sup> Entanni ey immehel mewan hi APU DIOS ni hi-gak ey kantuy <sup>13</sup> "Hi-gam e helag ni tuu, dengel mu eya e-helek: Hedin iwalleng da-ak idan tutu-ud hakey ni bebley, et manliwat idan hi-gak, man peellik hu bisil et mangkawkaw ida tutu-u niya animal dadda, et humman hu kastigu da. <sup>14</sup> Ey anin na-mun wadaddadman di Noah, hi Daniel et hi Job et ebuh ngu annel dan meihwang tep ya kakinayyaggud da. Hi-gak e Eta-gey ni peteg ni AP-APU hu nanghel idan nunya.

<sup>15</sup> Niya gullat ni pellow kudda hu angetakkut ni animal di muyung et da pambah-bahen hu bebley da niya ma-lat da pampateyen ida hu tutu-uk diman ni pengastiguk

ni hi-gada, <sup>16</sup> et hi-gak e Eta-gey ni peteg ni AP-APU e wadan ingganah ey issapatah ku e eleg ida meihwang etan tutu-ud ketteyyan da, anin ni wadaddadman humman ni tellun kayyaggud ni tuu. Tep ebuh ida ngu dedan humman ni tellun meihwang, nem mebahbah etan bebley et mambalin ni eleg mebebley.

<sup>17</sup> Niya gullat ni pellow kudman e bebley da hu buhul dan an mengubbat ni hi-gada et da pampateyan ida hu tutu-u niyadda animal da, <sup>18</sup> et anin na-mun wadaddadman humman ni tellun kayyaggud ni tuu, et nakka e-hela e hi-gak e Eta-gey ni peteg ni AP-APU ey eggak keyyata hu ninemnem kun pehding kun hi-gada et eleg da han-ihwang ida tuud ketteyyan da, anin idan u-ungnga da. Ebuh ida humman ni tellun tuun meihwang.

<sup>19</sup> Winu, gullat ni kastiguek ida tutu-ud hakey ni bebley tep ya nemahhig ni bunget ku et palaw kun hi-gada degeh ni kaumpatey ni tuu et ya animal <sup>20</sup> et nakka issapatah e hi-gak e hi APU DIOS e Eta-gey ni peteg niya wadan ingganah, e anin na-mun wadaddadman di Noah, hi Daniel ni hi Job et eleg da han-ihwang hu tutu-u di ketteyyan da, anin idan u-ungnga da. Ebuh hu annel dan meihwang tep ya kakinyaggud da.

<sup>21</sup> Hi-gak e Eta-gey ni peteg ni AP-APU ey e-helen ku e peellik di Jerusalem etan epat ni nambakbaklang ni angetakkut ni pengastiguk idan tutu-u. Peellik hu gubat, ya bisil, yadda angetakkut ni animal di muyung niya degeh ma-lat mangkatey hu tutu-u niyadda animal da. <sup>22</sup> Nem wadaddalli metdaan et mei-liddadya Babilon et mei-dum idan hi-gayu. Anin alin hi-gam et ang-angem hu kalwah da et ebbuluten mulli law e neiptek hu impahding kun nak nemahbahan ni bebley di Jerusalem. <sup>23</sup> Humman ali dama pengamtaan mu e emin hu nakka pehding ey wada hu gaputun nak nengipahdingan. Hi-gak e Eta-gey ni peteg ni AP-APU hu nanghel idan nunya."

## 15

<sup>1</sup> Immehel mewan hi APU DIOS ni hi-gak ey <sup>2</sup> kantuy "Hi-gam e helag ni tuu, hipa nan-inggehan ni wakal ni grapes et ya pangan keyew di muyung? Kaw nan-inggeh kapengissilbiin nunman e wakal et ya pangan keyew? <sup>3</sup> Ya etan wakal ni grapes ey endi law keissilbian tu hedini nealan emin law hu lameh tu. Niya eleg mabalin ni linggeman hu keikkapyaan tu, anin ew ngun hableyan ni banga niya palhu. <sup>4</sup> Manu tep dammutun penunggu hedini nema-ganan, nem kanggengeppuh niya endi hu ngalab tu. <sup>5</sup> Humman hu elaw tu hu wakal ni grapes e anin ni eleg maitungu et endi ngu dedan silbitu, ey nema-ma-ma hedini neitungu law.

<sup>6</sup> Et humman hu, hi-gak e Eta-gey ni peteg ni AP-APU ey kangkuy: Yadda grapes ey winedak idan meie-eddum di keyew di muyung, nem bebhaten kudda niya eppuyan kudda et magihep ida. Henin nunman ali kei-elligan ni pehding kuddan iJerusalem tep endi silbi da. <sup>7</sup> Nehammad hu pengastiguk ni hi-gadan helag Israel, tep anin ni meihwang idad nemangulun kastigu da et pidwaek idan kastiguen. Yan nunman ali pengamtaan da e hi-gak hu AP-APU. <sup>8</sup> Ey pambalin kun eleg ali law mebebley ni bebley da, tep inwalleng da-ak ni hi-gada. Hi-gak e Eta-gey ni peteg ni AP-APU hu nanghel idan nunya."

## 16

<sup>1</sup> Immehel mewan hi APU DIOS ni hi-gak ey kantuy <sup>2</sup> "Hi-gam e helag ni tuu, ey ehelim hu Jerusalem di angebe-hel kun peteg ni tuka pehpehding. <sup>3</sup> Ehel mu e hi-gak e Eta-gey ni peteg ni AP-APU ey kangkuy 'Hi-gam e Jerusalem ey neiuungnga ka ngu anhan ni ebuh di Kanaan. Ey Amorite hi amam niya Hittite hi inam. \* <sup>4</sup> Yan neiuungngaam ey impayyag daka et endi nemutul ni puheg mu, endi nangmeh ni hi-gam, endi nengiepuap ni ahin di annel mu niya endi nemalwasin hi-gam. <sup>5</sup> Endi an nengipahding idan nunyan hi-gam tep endi kaumhemek ni hi-gam niya endi neminshed ni hi-gam. Bingkah dakad payew ma-lat ni matey kadman.

<sup>6</sup> Entanni et nelabahhak ey inang-ang dakan ingkamulug mu kuheyaw mu e kaka umhenikhikyad et agemiden daka et ipaptek daka, tep eggak pinhed ni mettey ka. <sup>7</sup> Impaptek daka et meetteng ka et heni ka etan ni mateban neitnem. Nehiken ka ey nepandukal ka niya andukkey bewek mu. Nem nammu-mu-lih ka e endi balwasim.

<sup>8</sup> Entanni et nak mewan melebbah ey inang-ang dakan daydayutu law ni melehhin ka et idwat kun hi-gam balwasik et mahenian annel mu. Insapatah ku neminshed kun hi-gam et ahwaen dakan hi-gak e Eta-gey ni peteg ni AP-APU et ipaptek daka.

<sup>9</sup> Immeheh dakan nunman et maulah hu kuheyaw di annel mu et han daka apuapan ni lanan kakkayyaggud hu hamuy tu. <sup>10</sup> Binalwasian dakan kayyaggud niya nenginan

\* 16:3 16:3 Yadda Amorite et yadda Hittite hu nambebley di Kanaan et han ida mambebley hu helag Israel diman. Huyyaddan tuu ey yadda beken ni makulug ni dios hu dinaydayaw da.

balwasi et pampatut dakan katat ni patut. <sup>11</sup> Indawtan dakan gamgam mun kakkayyag-gud, ya pa-ngaw, ya gelhing, <sup>12</sup> ya betling ni eleng mu niya tangilam et ya penget mu. <sup>13</sup> Em, impanggamgam dakan balituk niya silber ey binalwasian dakan kayyaggud niya nenginan inebel ni balwasi. Ya sinapay ni muka kenna ey nekapyad kekakkayyaggudan ni alinah ni nekamdugan ni putsukan niya mansikan olibah. Nemahhig kakinat-agum e henin kakinat-agun ahwan patul. <sup>14</sup> Entanni ey nandingngel di kebbebbley hu kakinat-agum ni peteg tep nambalin dakan hi-gak ni kat-agun peteg. Hi-gak e hi APU DIOS e Eta-gey ni peteg hu nanghel idan nunya.

<sup>15</sup> Nem ay gapu mewan anhan tep inamtam e kat-agu ka ey emin kumamman hu lakin kaum-alid kad-an mu ey muka i-ulig. <sup>16</sup> Ingkapyam ida etan indawat kun kakkayyaggud ni balwasid muka pandeyyawiddan beken ni makulug ni dios et yadman muka pengippenahdingin lawah ni henin kapehpehding ni biin tuka iggatang annel tud kalekileki. Namminallad kan peteg! Hipa mu ninennem et mu ipahding huttan ni lawah ni peteg! <sup>17</sup> Yadda etan silber niya balituk ni gamgam mun indawat kun hi-gam ey kinapyam idan dios mun muka daydayawa. Eggak ni hekey pinhed humman ni impahding mun kamei-ellig etan di kapehpehding ni biin tuka pebeyyad annel tud kalekileki. <sup>18</sup> Inusal mu mewan etan indawat kun kayyaggud ni balwasin nebuldaan et pebalwasim idan muka daydayawan beken ni makulug ni dios ni kinapyam et iappit mun hi-gada hu lanan olibah niyadda bangbanglun indawat kun hi-gam. <sup>19</sup> Anin idan kennen mun indawat kun hi-gam ni kayyaggud ni alinah, yadda mansikan olibah niya danum ni putsukan et in-appit muddan nunman e dios tu. Hi-gak e APU DIOS e Eta-gey ni peteg hu nanghel idan nunya.

<sup>20</sup> Kulang pay ida humman ni impahding mu et ilaw mudda u-ungnga tan lalakki niya bibi-i et iappit muddan kennen idan dios mu. Muka e-nguhidda hu impahpahding mun henin kapehpehding ni biin tuka an pebeyyad hu annel tud lalakki. <sup>21</sup> Kele pakkaw pay ni mu pintey ida u-ungnga ta e mudda in-appit idan dios mu? <sup>22</sup> Ya eyan pigan toon ni nengipenahdingan idan nunman ni lawah ni peteg ey eleg mun hekey nemnemen e yan eman ni kaglang mu ey endin hekey hu an nenangud ni mengippaptek ni hi-gam et nealay nammu-mu-lih kan ingkamlut mu hu kuheyaw mu ey kaka umhenikhikyad.

<sup>23</sup> Yan nunya ey hi-gak e DIOS e Eta-gey ni peteg ey kangkuy: Angehemmek kan peteg tep mekastigu ka! Em, mekastigu ka tep ya mu nengipahdingan idan emin ni lawah. <sup>24</sup> Muka e-nguhidda humman et mengapya kad kekelkeltad ni penaydayawan muddan dios mu. <sup>25</sup> Binahbah mu kakinat-agum tep nambalin kan biin tuka pebeyyabeyyad hu annel tud laki et kewa-wa-wa ey muka an ihehhegged hu annel mud linggeman ni kamelebbah. <sup>26</sup> Anin idan dinagsim ni iEgypt e kamanggagayan mengi-ullig ni hi-gam et inebulut mun i-enu-ullig ida. Humman idan muka pehpehding ey nemahhig ni kamengippebungngel ni peteg ni hi-gak.

<sup>27</sup> Et mukun kastiguen daka. I-abulut kun sekkupen idan iPilistia hu edum ni bebley mu. Anin idan iPilistia et daka bellawa humman ni lawah ni muka pehpehding.

<sup>28</sup> Anin ni yadda iAssyria et impabeyabeyad mu annel mun hi-gada tep endin hekey hu kammuy 'Hiyya tu-wa law huuyan nakka pehpehding.' <sup>29</sup> Lektattuy anin ida law ni iBabilon ni negosyanteh et mu in-uliulig ida, nem kapyatun muka e-nguhidda humman ni lawah ni muka pehpehding.

<sup>30</sup> Hi-gak e AP-APU e Eta-gey ni peteg ey nakka e-helan nemahhig ni himmallan peteg hu muka pehpehding. Heni ka tu-wangu etan ni biin tuka pebeyyabeyyad annel tud laki e endin hekey baing mu. <sup>31</sup> Mu ingkenapyad emin di kekelkeltad hu pandeyyawam idan dios mun kinapyan tuu et yadman nengipenahdingan ni henin kapehding ni biin tuka pebeyyabeyyad hu annel tud, nem eleg mu mewan ebbuluta hu kaibbayad idan lakin hi-gam. <sup>32</sup> Heni ka mewan etan ni biin endin hekey hu impemihed tun ahwa tu tep muka an i-uliulig hu edum ni lalakki. <sup>33</sup> Ya biin tuka pebeyyad annel tud laki ey tuka ella daka ibbayad ni hi-gatu. Nem hedin hi-gam, man nahwi ka, tep hi-gam pay kamemeyyad idan lalakkin kamelpud attun bebley ni kamengi-ullig ni hi-gam. <sup>34</sup> Em, nahwi kan peteg, tep haman hi-gam beyyadan da ey eleg, tep hi-gam anhan law hu kamambeyyad. Hakey pay ey endi an nemilit ni hi-gam ni an mambalin ni henin nuntan.

<sup>35</sup> Et humman hu, hi-gam e Jerusalem e henin biin tuka pebeyyabeyyad annel tud kalekileki ey dengel mu eya kan APU DIOS ni hi-gam." <sup>36</sup> Kan ni AP-APU e Eta-gey ni peteg ey "In-uliulig mu hu kalekilekin pininshed mu, niya dinenaydayaw mudda etan angebe-hel kun beken ni makulug ni dios, niya pinetepetey mudda u-ungngam et iappit muddan etan ni dios mun kinapyan tuu. <sup>37</sup> Et mukun heninnuy hu pehding ku: Emmungen kuddan emin hu kalekilekin pininshed mun nengipeamleng ni hi-gam, anin idan angebe-hel mu, et halikuban daka ni han daka binladi ma-lat panhin-aang-angan daka. <sup>38</sup> Mekastigu kan henin kastigun biin tuka i-abek ahwa tu niya mekastigu kan

kastigun pimmatey. Et mukun pepettey daka tep ya nemahhig ni bunget ku. <sup>39</sup> Pebeltan dakan tutu-ud edum ni bebley ni pininpinhed mu et pambahbahren dadda kinenapyam ni baley idan dios mu niya pan-ellan dadda balwasim niya gamgam mu. Endin hekey da tetdaan ma-lat heni daka pepluhan et mebabba-ingan ka!

<sup>40</sup> Mambabaddang idalli humman ni tutu-un pinpinhed mu ma-lat pantegmilen daka niya ma-lat panggimmuken da hu annel mun tennegetegen da <sup>41</sup> ni han da linggab hu baley mu et panhin-aang-angan ni dake ni kabiibii humman ni meipahding ni kastigum. Humman ali penikked kun muka pehpehding ni henin kapehpehding ni biin tuka pebeyyad annel tud laki. Niya humman ali penikked kun muka iddawadawat ni bayad ida etan ni lalakkin pinpinhed mu, <sup>42</sup> ma-lat kadegeman ni bunget ku et umineng law hu nemnem ku. Et endilli law nak bungnetan niya eggak ali law meemmeh ida etan ni dios mu.

<sup>43</sup> Nakalliwwan mu hu nemenaptek kun hi-gam ni kaglang mu. Impabunget muwag tep yadda impahpading mu. Et humman hu, mahapul ni teklaen mun emin ida humman ni nambahulam. Mu mewan ka kae-nguhidda humman et ipenahding mudda etan kamepi-yew tep muka i-uliulig ida hu beken ni ahwam. Niya impenahding mudda etan edum ni angebe-hel ku. Hi-gak e Eta-gey ni peteg ni AP-APU hu nanghel idan nunya.

<sup>44</sup> Kan idallin tutu-un hi-gam e Jerusalem ey 'Heni ka tu-wangu hi inam!' <sup>45</sup> Makulug ni inu-ukkul mu tu-wangu hi inam e angebe-hel tu ahwa tu et yadda u-ungnga tu. Heni ka mewan idan agim ni bii e angebe-hel da ahwa da niya u-ungnga da. Em, makulug ni Hittite hi inam ey Amorite hi amam.

<sup>46</sup> Ya etan agim hi Samaria e pengulwan et yadda u-ungnga tu ey immen idad appit ni north. Hi agim iSodom e neihayned ni hi-gam et yadda u-ungnga tu ey immen idad appit ni south. <sup>47</sup> Hi-gada hu nengiu-unnudan muddan lawah ni elaw mu. Nem nema-ma-man lawah hu elaw mu nem hi-gada.

<sup>48</sup> Hi-gak e Eta-gey ni peteg niya wadan ingganah ni AP-APU ey e-helen ku e i-imman hu liwat nan hi Sodom et yadda u-ungnga tu, nem hi-gayuddan u-unggam. <sup>49</sup> Ya liwat nan agim e hi Sodom niyadda u-ungnga tu ey ida kamampahhiya, mahigadda, ida kamambebeddid, ebuh panyaggudan dan daka ikkaguh, eleg dan hekey ang-anga hu panyaggudan idan edum da niya eleg da baddangidda hu newetwet ni kamanhehhegged di dallin da. <sup>50</sup> I-imman hu daka pannemnem ni annel da nem ya edum ni tutu-u. Niya impenahding da hu angebe-hel ku e humman nemahbahan kun hi-gada. Inamtak et naka-amtam ida huyya.

<sup>51</sup> Anin ni hi Samaria et yadda u-ungnga tu et eleg maikagedwah hu liwat dad liwat mu. Nemahhig ni peteg kalwah ni impenahding mu e ta-bunan tu kalwah idan agim hi Sodom et hi Samaria. Et humman hu, hedin i-ingnegh dakan hi-gada, man heni endi liwat da. <sup>52</sup> Gullat et umbabaing ka tep nemahhig liwat mu nem yadda agim niya gullat nisin i-ingnegh dakan hi-gada et heni eleg ida manliwat.

<sup>53</sup> Binahbah kud Sodom nan hi Samaria et ya u-ungnga dadda, nem panhaddak kulli hu kinedangyan da. Anin ni hi-gam et panhaddak kulli dama kinedangyan mu. <sup>54</sup> Mebabba-ingan kallin peteg tep ya nemahhig ni liwat mu. Et yalli pannemnem idan agim e hi Sodom nan hi Samaria ey kayyaggud ida nem hi-gam. <sup>55</sup> Nem panyaggud kullid Sodom nan hi Samaria, anin idan bimbley diman. Ey anin ni hi-gam et panhaddak kulli dama hu kakinayyaggud ni biyag ni bimbley ditan et heni la mewan ni nunman. <sup>56</sup> Yan nunman ey muka pippihula hu Sodom tep kaka mampahhiya. <sup>57</sup> Nem yan nunya ey nan-amta hu nemahhig ni kalwah mu et hi-gam law hu angebe-hel idan iEdom, yadda iPilistia niyadda etan edum ni bebley di nanlinikweh. <sup>58</sup> Mahapul ni manhelheltap ka et teklaen mudda etan angebe-hel kun impahpading mu. Hi-gak e hi APU DIOS hu nanghel idan nunya."

<sup>59</sup> Yahhuy mewan hu inhel ni Eta-gey ni peteg ni AP-APU e kantuy "Mahapul ni mekastigu ka e Jerusalem tep eleg mu ipahding hu nekitbalan kun hi-gam tep ya ngehay mu. <sup>60</sup> Nem eggak ippangil hu nekitbalan kun hi-gam eman ni keu-unggam niya hammaden kun e-helen mewan e pannenneng kun ingganah humman ni nekitbalan kun hi-gam. <sup>61</sup> Yan nunman ali law pannemneman muddan impenahding mu et umbabaing ka, nema-ma hedin ibbanggad kun hi-gam ida humman ni agim ni pengulwan niya udiyan et heni u-unggam ida, anin ni beken ni henin nunman hu nekitbalak ni hi-gayu. <sup>62</sup> Pannenneng ku huyyan nekitbalan ku et pengamtaam e hi-gak hu AP-APU. <sup>63</sup> Liwwanen kuddalli law liwat mu, nem nenemnemem idalli impenahding mun liwat mu et um-i-ineng kallin baing mu. Hi-gak e Eta-gey ni peteg ni AP-APU hu nanghel idan nunya."

## 17

*Ya etan dewwan tulduh et ya etan wakal ni grapes*

<sup>1</sup> Immelhel mewan ni hi-gak hi APU DIOS e Eta-gey ni peteg et kantuy <sup>2</sup> “Hi-gam e helag ni tuu, mu ehel idan edum mun ilsrail eya a-abbig <sup>3</sup> ni pengamtaan dan pinhed kun e-helen ni hi-gada. Hi-gak e Eta-gey ni peteg ni AP-APU ey kangkuy ‘Wadan nunman etan et-eteng ni tulduh ni kakkayyaggud hu dutdut tu niya melakkeb payak tun nebekyag. Simmayab et lumaw di duntug di Lebanon et tu pu-singen hu utduk etan ni keyew ni sedar <sup>4</sup> et ilaw tud bebley idan negosyanteh et itnem tudman.

<sup>5</sup> Entanni mewan ey limmaw di Israel et an umlan bukel et tu itnem etan di makattaba hu kameitnem niya eleg mekullangin danum. <sup>6</sup> Simmemel et meetteng etan bukel ey humman etan grapes e eleg mandinnukkey, nem heni wakal e kamangkineyya-mun. Wada hu pingi tun neidengdeng di kabunyan di kad-an etan ni tulduh. Ya lamut tu ey neihammad ni limmaw di edallem. Neminggipingngi niya makattaba humman ni grapes.

<sup>7</sup> Entanni ey wada mewan hakey ni et-eteng ni tulduh ni melakkeb dama payak tu niya mahdel hu dutdut tu. Ya lamut niya pingi etan ni grapes ey neidengdeng idad appit nunman e hakey mewan ni tulduh e henidda kamangkedew ni danum, <sup>8</sup> anin ni makattaba hu kameitnem niya eleg mekullangin danum etan di neitneman da et mukun makattaba niya makallameh humman ni kekakkayyaggudan ni grapes.’

<sup>9</sup> Nem ya nakka ibbaga e hi-gak e Eta-gey ni peteg ni AP-APU ey kangkuy ‘Kaw umtagu et meetteng humman ni grapes? E-helen ku e humman ni grapes ey egguten etan ni nemangulun tulduh et panhepungen tu et makling. Beken ni neligat hu pengeggutan nunman ni grapes niya eleg mahapul ni wada ussalen ni pengeggut ni nunman e grapes. <sup>10</sup> Niya anin na-mun wada an mengippidwan mengitnem et mekpit damengu hedin umali maetung ni dibdib.’”

<sup>11</sup> Entanni ey kan APU DIOS ni hi-gak ey <sup>12</sup> “Puhdanim pangngu dedan ida etan ni mangkanghay ni tutu-u hedin inamta da keibbellinan tu huuyan a-abbig. Ehel mun hi-gada e heninnuy keibbellinan tu: ‘Immali etan patul di Babilon di deya Jerusalem et tu padpap etan patul niyadda opisyal tu et ilaw tuddad bebley tud Babilon. <sup>13</sup> Pinili tu hu hakey di pamilyah ni patul ni meihhullul et manhuhummangan ida et pansapatah tun pannenneng tun meiddagyum idan hi-gatu e eleg tu ngenghaya. Impeki-la tudda aapapu et ilaw tuddad bebley tud Babilon et ikelabut tuddadman <sup>14</sup> et endi inna-nuddan edum dan an mewan mannemnem ni mengubbat ni hi-gatu, niya ma-lat mannaneng ni meunnud etan neiuhummangan. <sup>15</sup> Nem humman ni baluh ni patul di Judah ey nginhay tu humman ni inuhummangan da et umipelaw ni opisyal tud Egypt ni an um-alan dakel ni sindalu niya kebayyu. Hipa na-mu dedan hu yuka pannemnem? Kaw kabaelan nunman ni baluh ni patul etan ninemnem tun pehding ni panggehayan tu etan ni inuhummangan dan patul di Babilon? Kaw eleg mekastigun tu pengippahdingan ni henin nunman? Nanna-ud ni mekastigu hedin ngenghayen tu humman ni inuhummangan da!

<sup>16</sup> Hi-gak e Eta-gey ni peteg ni AP-APU niya wadan ingganah ey issapatah ku e nanna-ud ni mekastigu humman ni baluh ni patul di Judah tep meillaw di Babilon et matey diman, tep eleg tu u-unnuden hu insapatah tud hummangan da etan ni patul di Babilon ni nemilin hi-gatun mampatul. <sup>17</sup> Ya etan patul di Egypt niyadda etan hantapug ni sindalu tu ey endi kabaelan dan memaddang ni hi-gatu hedin um-alidda iBabilon et umkapyaddan dellanan dan menggep ni Jerusalem et da pampateyen hu bimmebley. <sup>18</sup> Humman ni baluh ni patul di Judah ey nanna-ud ni mekastigu, tep nansapatah e u-unnuden tu etan inuhummangan dan patul di Babilon, nem nginhay tu.

<sup>19</sup> Hi-gak e Eta-gey ni peteg ni AP-APU niya wadan ingganah ey issapatah ku e kastiguen ku, tep impangil tu hu insapatah tud ngadan ku. <sup>20</sup> Heni nak tewwangen et ilaw kud Babilon et kastiguen kudman, tep eleg tu pannaneng ni mengu-unnud ni hi-gak. <sup>21</sup> Emin ida etan kekakkayyaggudan ni sindalu ey mangkettey idad gubat et yadda etan metdaan ey mehmehyak niya. Meippahding ali huuya et pengamtaan yu e hi-gak e AP-APU hu nanghel idan nunya.’”

<sup>22</sup> Kan mewan APU DIOS e Eta-gey ni peteg ey “Yallin edum ni aggew ey um-alaak ni uhyek ni keyew ni sedar et itnem kud ta-pew ni keta-ta-geyyan ni duntug di Israel. <sup>23</sup> Meetteng alidman et memangngapangnga ey umlameh niya mambalin ni kekakkayyaggudan ni sedar ni panhahha-adan niya panhihidduman ni emin ni nambakbaklang ni sisit. <sup>24</sup> Nan-amtad emin di keyew di diman ni bebley e hi-gak e hi APU DIOS ey nakka lelgeha etata-gey ni keyew ma-lat wada inna-nuddan ekka-ket ni meetteng. Ey nakka pekehyaw ida etan makattagun keyew niya nakka tegguadda etan kaumkehyaw. Hi-gak e AP-APU hu nanghel idan nunya.’”

## 18

<sup>1</sup> Immehel mewan hi APU DIOS et kantun hi-gak ey <sup>2</sup> “Hipa eya kaene-ehheladdan tutu-ud Israel ni kanday ‘Kinan ni a-ammed da mapeit ni grapes, nem yadda u-ungnga da nealinew.’

<sup>3</sup> Hi-gak e hi APU DIOS e Eta-gey ni peteg niya wadan ingganah ey issapatah ku e eleg ali law mepidwan an me-hel huyyad Israel. <sup>4</sup> Em, tep hi-gak hu ngenamung ni emin ni biyag ni tuu, yadda a-ammed niyadda u-ungnga da. Et humman hu, ya etan tuun nanliwat ey hi-gatu mettey.

<sup>5</sup> Ya kayyaggud ni tuun limpiyuh niya meandeng hu tuka pehding <sup>6</sup> ey eleg tu deyyawa hu dios ni kinapyan tuun kadaydayawaddan helag Israel. Eleg tu kenna hu neiappit idad kapandeyyawiddan tuun beken ni makulug ni dios, eleg tu i-abek ahwa tu niya eleg tu i-ulig hu biin eleg masikun hu kamelpud annel tu. <sup>7</sup> Eleg tu tellama niya eleg tu pilliwa hu limmun edum tun tuu, ey tuka ibbanggad hu hipan neibelal ni hi-gatu. Kaum-idwat mewan ni kennen idan kameuppa, ya balwasiddan endi balwasida, <sup>8</sup> ey eleg tu peteppat hu tuka peuttang. Eleg tu pehding hu lawah, ya neiptek hu tuka pehding ni mengippennuh ni kapanhahallaidan tutu-u, <sup>9</sup> niya tuka u-unnudan emin hu tugun ku. Ya kayyaggud ni tuun hanniman hu elaw tu ey meittu-u. Hi-gak e hi APU DIOS e Eta-gey ni peteg hu nanghel idan nunya.

<sup>10</sup> Nem inna-nu hedini humman ni tuu ey wada u-ungnga tun lakin matekew ey mapetey e tuka ngenghaya hu neiptek ni kapehding, <sup>11</sup> niya tuka ipahding ni emin hu lawah ni eleg ipahding ametu, tuka kenna neiappit di kapandeyyawin beken ni makulug ni dios, tuka i-ulig hu beken tu ahwa, <sup>12</sup> tuka tellamadda newetwet, tuka pilliwa limmun edum, eleg tu pebanggad hu tuka bellali, tuka daydayawa hu anggebe-hel kun beken ni makulug ni dios di daka pandeyyawin <sup>13</sup> niya tuka peteppat hu tuka peuttang ni pihuh? Ya henin nunyan tuu ey eleg meittu-u tep ya tuka pengippahdingiddan emin eyan nakka bellawa. Et humman hu, hi-gatu ngu kambahul ni ketteyyan tu.

<sup>14</sup> Nem inna-nu hedini huyyan u-ungnga ey wada dama u-ungnga tun lakin tuka ang-angan emin hu lawah ni tuka pehpehding, nem eleg tu ngu i-u-unnud? <sup>15</sup> Eleg tu deyyawa hu beken ni makulug ni dios idan iIsrael, eleg tu kenna hu neiappit idad daka pandeyyawin beken ni makulug ni dios, eleg tu i-abek ahwa tu, <sup>16</sup> eleg tu peliggasi edum tun tuu, eleg tu pilliwa hu limmun edum tu, tuka pebanggad tuka bellali, kaum-idwat ni kennen idan kameuppa, kaum-idwat ni balwasiddan endi balwasi tu, <sup>17</sup> eleg tu pehding hu lawah, eleg tu peteppat hu tuka peuttang ni pihuh niya tuka u-unnudan emin hu tugun ku. Ya tuun henin nunman hu tuka pehpehding ey meittu-u niya eleg mettey gapu tep ya liwat nan ametu. <sup>18</sup> Nem hedini hi ametu, man nanna-ud ni mettey tep ya liwat tun tuka pemilliwin limmun edum tun tuu niya lawah tuka pehpehding idan edum tun tuu. <sup>19</sup> Nem wadan penghel yu mewan ey ‘Kele eleg meillegat ni mekastigu hu u-ungnga di liwat nan ametu?’ Ya humang kun nuntan ey ‘Eleg meillegat ni mekastigu tep kayyaggud impahding tu.’ Nanna-ud ni meittu-u tep inu-unnud tun emin hu tugun ku. <sup>20</sup> Ya etan nanliwat hu mettey. Ya u-ungnga ey eleg meillegat ni mekastigud liwat nan ametu ey eleg meillegat ni mekastigu hu ama di liwat ni u-ungnga tu. Ya kayyaggud ni tuu ey kayyaggud hu gungunahan tud kayyaggud ni impahding tu. Ya lawah ni tuu ey helheltapen tu kastigu tud lawah ni impahding tu.

<sup>21</sup> Hedini mantuttuyyu etan lawah ni tuu di liwat tu et issiked tun manliwwat, tep u-unnudan tu hu tugun ku, et ya kayyaggud niya neiptek hu ipahding tu, man meittu-u. Eleg mettey. <sup>22</sup> Meliwwan ni emin hu liwat tu et meittu-u e eleg mettey tep neiptek hu impahding tu.” <sup>23</sup> Kan mewan APU DIOS e Eta-gey ni peteg ey “Kaw kanyuy nakka manggagayan menang-ang-ang ni ketteyyan ni lawah ni tuu? Eleg! Nakka pehebballi hu mantuttuyyu ma-lat mambi-biyag.

<sup>24</sup> Nem hedini issiked ni kayyaggud ni tuun mengippahding ni kayyaggud et yadda etan lawah ni anggebe-hel kun tuka pehpehding, man eleg umtagu humman ni tuu. Meliwwan idan emin etan kayyaggud ni impahding tu et nanna-ud ni mettey, tep ya liwat tu, tep eleg tu pannananeng ni ipahding ida etan kayyaggud.

<sup>25</sup> Nem wadan penghel yu mewan ey ‘Beken ni limpiyuh hu kapehding nan Apu Dios.’ Nem e-helen kun hi-gayuddan iIsrael e ya kakulugan tu ey beken ni neihalla hu nakka pehding, tep hi-gayu hu neihalla hu tuka pehpehding. <sup>26</sup> Hedini issiked ni kayyaggud ni tuun mengippahding ni kayyaggud et ipahding tu lawah, man mettey humman ni tuu. Em, tep lawah impahding tu. <sup>27</sup> Nem hedini issiked ni lawah ni tuun mengippahding ni lawah et ya neiptek niya kayyaggud hu pehding tu, man eleg mettey, tep hinelakniban tu annel tu. <sup>28</sup> Inimmatunan tun lawah ida hu tuka pehpehding et



isiked tun mengippenahding idan nunman, et humman eleg tu ketteyyi, nem mambi-biyag. <sup>29</sup> Nem ay hedin hi-gayu ngun iIsrael, man kanyuy neihalla hu nakka pehding. Huttan hu yuka pannemnem, nem ya kakulugan tu ey hi-gayu hu neihalla tuka pehding.

<sup>30</sup> Yan nunya, ey hi-gak e hi APU DIOS e Eta-gey ni peteg ey hummalyaen dakeyun iIsrael ma-lat ehelen ku hu meippahding alin hi-gayu tep yadda impahpahding yu. Isiked yudda hu lawah ni yuka pehpehding ma-lat eleg kayu mebahbah tep ya liwat yu. <sup>31</sup> Iwalleng yudda lawah ni yuka pehpehding et hullulan yun kayyaggud hu nemnem yu niya elaw yu. Kele ngu dedan hedin hi-gayun iIsrael man pinhed yun mettey? <sup>32</sup> Iwalleng yudda hu yuka panliwwasi ma-lat mambi-biyag kayu tep eggak pinhed ni wada an mettey! Hi-gak e AP-APU e Eta-gey ni peteg hu nanghel idan nunya."

## 19

<sup>1</sup> Kan APU DIOS ni hi-gak ey "Ia-appehim ida ap-apud Israel kaia-appeh hedin wada netey. Kammuy <sup>2</sup> Hi ineyu ey kameiddingpat di netuled ni labah ni layon e ine-etteng tudda impah tu et ilaw tuddad muyung di kad-an idan edum tun layon. <sup>3</sup> Sinuttudduan tu hu hakey ni impah tun mandedweng et mambalin ni makan ni tuu. <sup>4</sup> Dingngel idan tutu-u huuya et da kenaen di bitu. Et da benwiten etan di bitu et ilaw dad Egypt.

<sup>5</sup> Hinehhegged inetun meibbanggad, nem endin an immanemut. Lektattu ey neendi law hu namnamah tu. Entanni ey sinuttuddu tu mewan etan hakey ni ine-etteng tu ey nambalin ni angetakkut. <sup>6</sup> Nekikkillaw idan edum tun layon ni an mandedweng et amtaen tu daman mengngan ni tuu. <sup>7</sup> Binahbah tudda luhud idan bebley ey nambahbah tudda bebley et nemahhig hu takut idan tuu hedin kaman-e-lug. <sup>8</sup> Entanni ey ninemnem idan tutu-ud kebebbebley e da petteyen humman ni layon et lumaw ida et da habhabyen ey kinna da. <sup>9</sup> Da inla et da iha-ad di pukkungngan et ilaw dad kad-an nan patul di Babilon. Impekagguwalyaan da et endi law kamedngel di duntug di Israel ni angetakkut ni ngeyed tu.

<sup>10</sup> Hi ineyu ey heni mewan etan ni wakal ni grape ni simmemel di gilig ni kulukul. Neetteng ey nemingngipingngi niya makallameh tep eleg mekullangin danum. <sup>11</sup> Immandu-andukkey et kamaka-ang-ang tep hi-gatu keta-ta-geyyan. Yadda etan pangetu ey makakkedhel ida e kayyaggud ni kapyaan ni hulkud ni patul. \* <sup>12</sup> Nem bimmungettak et aguten ku et bekahen ku ey mina-ganan etan ni maetung ni dibdib ni kamelpud desert. Anin ida etan ni lameh tu et nema-ganan ida. Yadda mangkekedhel ni pangetun nangkema-ganan ey negeni-pung ida et magiheb idad apuy. <sup>13</sup> Nem yan nunya ey neitnem law di maetung niya mamegan puyek di desert. <sup>14</sup> Entanni ey simmebel ida nema-ganan ni bulung tu et mangkagiheb ida pangetu niya lameh tu et endi hu an natdaan anin ew ngun hakey ni mekapyaan hulkud ni patul." Huuya hu kameia-appeh hedin wada netey.

## 20

### *Ya ngehay idan iIsrael*

<sup>1</sup> Yan eman ni meikkahampulun aggew ni meikkelliman bulan ni meikkeppitun toon meippalpun neilawwan mid Babilon ey immalidda edum ni ap-apud Israel ni an memuhdan ni impeamtan APU DIOS ni hi-gak et yumudung idad hinanggan ku.

<sup>2</sup> Entanni ey wada hu impeamtan APU DIOS ni hi-gak <sup>3</sup> ey kantuy "Hi-gam e helag ni tuu, immalidda huuyan tutu-un memuhdan ni hipan impeamtak ni hi-gam. Ehel mun hi-gada e kangkuy: 'Hi-gak e AP-APU e Eta-gey ni peteg niya wadan ingganah ey issapatah ku e eggak hummanga hu hipan ibbageyu.'

<sup>4</sup> Hi-gam e helag ni tuu, ehel mun hi-gada hu kastigu da. Penemnem mun hi-gada hu nemahhig ni angebe-hel kun impahpahding idan aammed dan nunman. <sup>5</sup> Ey ehel mun hi-gada e kammuy 'Kan APU DIOS e Eta-gey ni peteg ni hi-gayu ey: Yan nunman ey pinilik ida helag Israel ni pantu-uk. Nampeang-angngak idan aammed dad Egypt et hammaden kun inhel ni hi-gada e hi-gak hu AP-APU e Dios da. <sup>6</sup> Ey hinammad kun inhel ni hi-gada e ippanguluk idan meni-yan ni Egypt et ilaw kuddad pinilik ni kekakkayyaggudan ni bebley e dakel ni peteg hu gatas niya putsukan. <sup>7</sup> Intugun kun hi-gada e iwalleng dadda dios dan nakappinhed da ma-lat eleg da pambalin hu annel dan beken ni malinih tep yadda humman ni beken ni makulug ni dios idan iEgypt, tep hi-gak hu AP-APU e Dios da.

<sup>8</sup> Nem eleg da pinhed ni dedngelen hu tugun ku, tep ya ngehay dan hi-gak. Eleg da iwalleng ida dios dan kinapyan tuu niya eleg da iwalleng hu dios idan iEgypt ni

\* 19:11 19:11 Huuyan hulkud ni patul ey kapengi-ang-angin kabaelan tun mampatul.

daka daydayawa. Et mukun kangku-et ey kastiguet ida eman ni wadadda nid Egypt tep ya nemahhig ni bunget ku. <sup>9</sup> Nem eggak ida kastiguen tep gullat ni kinastiguk ida et ya ngadan ku damengu hu mebe-ing, tep impeamtak kumedek law idan iEgypt e ippanguluk ida tutu-uk ni meni-yan ni nunman e bebley.

<sup>10</sup> Et ipengupenguluk ida et mampalaw kamid desert. <sup>11</sup> Yadman nengituttudduan kun hi-gadan tugun ku ma-lat humman u-unnuden dad elaw ni pambiyag da. <sup>12</sup> Minandal kuddan u-unnuden da hu tugun kun pehding da hedin aggew ni Sabaduh ma-lat pengipeang-angan dan pengu-unnudan dan nekitbalan kun hi-gada niya humman mengippenemnem ni hi-gadan hi-gak e hi APU DIOS ey impambalin kuddan kayyaggud.

<sup>13</sup> Nem nginhay da-ak idan helag Israel, tep eleg da pinhed ni u-unnuden hu tugun ku eman ni kaweda dad etan di desert. Eleg da pinhed ni u-unnuden hu tugun kun humman hu mengippeamtan kayyaggud ni pambiyag hedin u-unnuden ni tuu. Eleg da mewan u-unnuden hu intugun ku meippanggep ni kamengillin ni aggew ni Sabaduh, et humman law nannemnem kun pengastiguan kun hi-gadad desert tep ya bunget ku.

<sup>14</sup> Nem eggak ipahding tep gullat ni impahding ku et hi-gak damengu hu mebe-ingan. Tep penghel idan nenang-ang ni nengipenguluak ni hi-gadan tutu-uk ey pintey kudda tep eggak kabaelan ni ippaptek ida. <sup>15</sup> Nem insapatah kudman di desert e eggak pedetteng idad etan di intuduk ni kekakkayyaggudan ni bebley e dakel ni peteg hu gatas niya putsukan. <sup>16</sup> Humman law ninemnem kun pehding tep kahing idad nakka ittugun niya eleg da u-unnuda hu tugun kun kamengillin ni aggew ni Sabaduh tep daka pehebballin deyyawen ida etan dios ni kinapyan tuu.

<sup>17</sup> Nem himmek kudda et eggak ida pateyen di desert.' <sup>18</sup> Nan-ehelan kudda hu u-ungnga da e kangkuy 'Entan tu ipahding ida etan lawah ni impahpahding idan aammed yu niya entan tu daydayaw ida etan dios da ma-lat eleg yu pambalin yu annel yun angebe-hel ku. <sup>19</sup> Ey penemnem ku e hi-gak hu AP-APU e Dios yu, et humman hu mahapal ni u-unnuden yu hu tugun ku. <sup>20</sup> E-helen ku mewan ni hi-gayu e ipahding yudda hu kameunnud ni ngilin ni aggew ni Sabaduh et keang-angan tun yuka u-unnuda hu nekitbalan kun hi-gayu niya mengippenemnem ni hi-gayun hi-gak hu AP-APU e Dios yu.'

<sup>21</sup> Nem anin idan u-ungnga dadda et nginhay da-ak dama. Eleg da pinhed ni u-unnuden ida tugun ku niya eleg da pinhed ni pehding ida hu nakka ittuttuddu ey humman ida hu mengippeamtan kayyaggud ni pambiyag hedin u-unnuden dadda humman. Eleg da mewan u-unnuda hu elaw ni ngilin ni aggew ni Sabaduh, et humman pengastiguan ku-et ni hi-gada etan di desert tep ya nemahhig ni bunget ku. <sup>22</sup> Nem eggak ipahding tep gullat ni impahding ku et mebe-ingngannak ida etan di tutu-un nenang-ang ni nengipenguluak idan tutu-uk ni neni-yanan dan Egypt. <sup>23</sup> Et isapatah ku law ni hi-gada etan di desert e iwwahit kuddad kebbebley <sup>24</sup> tep ya nengahingan da nisin tugun ku niya eleg da u-unnuden hu elaw ni aggew ni Sabaduh niya dinenaydayaw dadda hu dios ni kinapyan tuun dinenaydayaw idan aammed da. <sup>25</sup> Et iwalleng kudda et yadda etan neihallan tugun ni beken ni panyaggudan ni biyag da hu inu-unnud da. <sup>26</sup> In-abulut kun pambalin da annel dan beken ni malinih tep ya daka pengi-appisin hi-gak idan eggak pinhed niya anin idan etan ni pengulwan ni u-ungnga da et dadda kai-appit idan dios da. Humman impahding kun hi-gada ma-lat pengamtaan da e hi-gak hu APU DIOS.

<sup>27</sup> Et humman hu, hi-gam e helag ni tuu, ehel mun hi-gada e hi-gak e Eta-gey ni peteg ni AP-APU, ey kangkuy 'Anin ida lan eman ni aammed yu et inwalleng da-ak niya kinehikehing da-ak ni hi-gada. <sup>28</sup> Et yadda etan dios da hu in-enappitan dan bangbanglu niya meinum di hengeg idan etta-teng ni keyew di kedunduntug eman ni nengilawwan kun hi-gadad bebley ni insapatah kun iddawat kun hi-gada. Et humman law hu gaputun nemahhig hu bunget kun hi-gada.' <sup>29</sup> Et kangkun hi-gaday 'Hipa nga anhan humman ni eta-gey ni duntug ni yuka an pandaydayawi?' " (Ingganah nunya ey Bamah hu daka panggeddan nunman ni duntug e ya keibbellinan tu ey eta-gey ni kapandaydayawi.)

<sup>30</sup> Et humman hu, ehel muddan helag Israel e kammuy 'Heninnuy hu inhel nan APU DIOS e Eta-gey ni peteg e kantuy: Kaw enu-unnuden yu dama hu lawah ni impenahding ida lan aammed yu et denaydayawen yudda etan dios ni kinapyan tuu? Kaw pinpinhed yun pambalin yu annel yun angebe-hel ku e heni lan hi-gada? <sup>31</sup> In-enappitan yudda humman ni dios yu niya anin idan u-ungnga yu, et humman hu inhullul yud etan di kamegihheb ni kamei-appit. Ingganah ni nunya ey humman ida hu yuka pehpehding, et humman hu nanengtun impambalin yu hu annel yun angebe-hel ku. Kayu pay kaum-ali ni-ngangun an mengibbeggan hi-gak ni hipa pinhed kun meippahding! Nem hi-gak e AP-APU e Eta-gey ni peteg niya wadan ingganah ey issapatah ku e eleg dakeyu hummangad hipan mahmahan yun hi-gak.

<sup>32</sup> Inhammad yud nemnem yu e kanyuy: Pinhed min iu-unnud di tutu-ud edum ni bebley e yadda batu niya keyew hu daka daydayawan dios da. Nem eleg meippahding huttan ni ninemnem yu. <sup>33</sup> Tep hi-gak e AP-APU e Eta-gey ni peteg niya wadan ingganah ey issapatah ku e hi-gak law hu pan-ap-apu yu. Ey peang-ang ku et-eteng ni kabaelan kun mengastigun hi-gayu tep ya bunget ku. <sup>34</sup> Em, peang-ang kullin hi-gayu hu et-eteng ni kabaelan ku niya nemahhig ni bunget kun pengemmungan kun hi-gayu et ipengulu dakeyun meni-yan idan bebley ni nengiwehitan kun hi-gayu. \* <sup>35</sup> Et ipengulu dakeyu etan di heni desert di gawwan dakel ni bebley et yadman penghelan kud hinanggan yun meippahding ni hi-gayu. <sup>36</sup> Em, kastiguen dakeyun heni impahding kuddan aammed yu e kinastiguk idad desert di Sinai eman ni neni-yanan dan Egypt. Hi-gak e AP-APU e Eta-gey ni peteg hu nanghel idan nunya.

<sup>37</sup> Hellipat-an dakeyu niya ang-angen ku ma-lat u-unnuden yu hu nekitbalan kun hi-gayu. <sup>38</sup> Appilen kudda hu manghay niya kamanliwwat ni hi-gak et pea-allaw kuddad etan di bebley ni neilawwan da, nem eggak ida law pambangngad di Israel et pengamtaan yu e hi-gak hu AP-APU."

<sup>39</sup> Kan mewan APU DIOS e Eta-gey ni peteg ey "Elaw kayu ew katteg ni emin e iIsrael et yu daydayawen ida etan dios ni kinapyan tuu, hedin ihik kayu! Nem edum alin aggew ey kastiguen dakeyu tep ya ngehay yun hi-gak ma-lat eleg yulli law baingen ngadan kun yuka pan-ennappisi idan nunman ni dios. <sup>40</sup> Yan nunman ali ey emin kayun helag Israel ey hi-gak hu daydayawen yu etan di eta-gey ni duntug di Israel ni kad-an ku et peamleng yuwak. Heppulen kullin emin hu i-appit yun hi-gak, yadda kekakkayyaggudan ni kamei-appit niyadda yuka iddawat. Hi-gak e AP-APU e Eta-gey ni peteg hu nanghel idan nunya. <sup>41</sup> Yallin pengippeennamutan kun hi-gayun peni-yanan yuddan bebley ni neiwehitan yu et ammungen dakeyu ey ebbuluten dakeyun heni bangbanglun insensoh ni kamei-appit. Huyyalli pengippeang-angan kud emin di bebley eyad puyek e hi-gak ey kayyagguddak ni peteg. <sup>42</sup> Ey hedin ibbangngad dakeyud Israel e bebley ni inhel kun iddawat kuddan eman ni aammed yun numman, man amtaen yulli e hi-gak hu AP-APU. <sup>43</sup> Et humman ali gaputun nemnemen yulli law hu nemahhig ni liwat yu. Et igugguhu yulli annel yun yu nengipenahdingan idan lawah ni anggebe-hel kun kakeibbe-ingin annel yu. <sup>44</sup> Et humman hu, lebbengtun kastiguen dakeyun hi-gak. Nem humman ni nak pehding ni hi-gayu ey beken ni ebuh ni gapu tep yadda etan lawah ni impenahding yu, nem ma-lat eggak mabeingan niya ma-lat pengamtaan yu e hi-gak hu APU DIOS. Hi-gak e AP-APU e Eta-gey ni peteg hu nanghel idan nunya."

<sup>45</sup> Kan APU DIOS mewan ey <sup>46</sup> "Hi-gam e helag ni tuu, iang-ang mud appit di south et ehlen mu eman ni muyung e kammuy: <sup>47</sup> Hi APU DIOS e Eta-gey ni peteg ey kantun hi-gam ey: Lelgaben daka e muyung et magiheh ni emin hu keyew ni ematta niya nemaganan. Endi hu an paka-dep ni nunman e apuy et magiheh ni emin hu hipan wadadman ni meipalpad appit ni south ingganah di appit ni north. <sup>48</sup> Emin ali hu tuu ey amtaan dan hi-gak e AP-APU hu nanlegab nunman niya eleg ali mabalin ni me-dep."

<sup>49</sup> Nem hinumang ku et kangkuy "APU DIOS e Eta-gey ni peteg, kan idan tuu ey emin hu nakka e-e-hela ey a-abbig ida kunun ebuh."

## 21

### *Ya pengastigun APU DIOS idan iJerusalem*

<sup>1</sup> Immehel mewan hi APU DIOS ni hi-gak ey kantuy <sup>2</sup> "Hi-gam e helag ni tuu, mu peamta hu lawah ni meippahding di Jerusalem niyad daka pandaydayawiddan tutu-u. Ey ehel mun hi-gadan iIsrael <sup>3-4</sup> e hi-gak e hi APU DIOS e Eta-gey ni peteg ey nakka e-helan hi-gayu e buhul yuwak! Et humman hu, uknutek hu ispadah ku et meidaddan ni pemettey kun hi-gayun emin, anin idan kayyaggud winu lawah, meipalpad south ingganah di north, <sup>5</sup> ma-lat pengamtaan ni emin ni tuu e hi-gak e hi APU DIOS ey hedin inuknut ku ispadah ku, man eggak pebangngad di asip tu ingganah pehding ku hu pinhed ku.

<sup>6</sup> Hi-gam e helag ni tuu, peang-ang mud emin ni katuuuu e kakaumlelemung e endi law namnamah mu. <sup>7</sup> Ey hedin puhdanan da hu muka lelemung, man ehel mu e kammuy 'Nakka umlelemung tep ya etan anggetakkut ni nganganh ni meippahding. Yan nunman ali ey umgeygey idalli tutu-un takut da niya umkapuy ida et meendi hu tuled da. Anggegannu law ey medettengan hu gintud kun keippahdingan tu. Hi-gak e AP-APU e Eta-gey ni peteg hu nanghel idan nunya."

<sup>8</sup> Kan mewan APU DIOS ey <sup>9-10</sup> "Hi-gam e helag ni tuu, ey ehel muddan tutu-u hu meippahding niya ehel mu e kangkuy: Hi-gak e hi APU DIOS ey nekatta-lid ku ispadah ku et kaumhili e heni kedyam et meidaddan ni pemettey ku. Endi da pan-an-anlaan tep

\* 20:34 20:34 Ang-ang yu hu 20:41.

eleg da hanguden ida in-inhel kun hi-gada niya eleg ida masileg eman ni nengastiguak ni hi-gada. <sup>11</sup> Em, kamandinglih hu ispadah kun makattadem tep indaddan kun pemettey ku. <sup>12</sup> Et humman hu, hi-gam e tuu, pantete-ul kan lemyung mu ey pantel-ug mu pagew mu tep ya eya ispadah ku ey neieng-eng ni pemettey kuddan tutu-uk ni iIsrael anin idan kamengipappanggulun hi-gada. Nanna-ud ni mettey ida tep endi dedan namnamah da. <sup>13</sup> Huyya hu elaw ni pematnaan kuddan tutu-uk et hedin eleg ida mantuttuyyu, man meippahding huyyan hi-gadan emin.

<sup>14</sup> Hi-gam e helag ni tuu, ya pehding mun mengippeamtaddan tutu-uk ni mekap-kapyallin hi-gada ey heninnuy: Elet mun umpelakpak ni han mu illa hu ispadah et iwehiwah mun mampidwa winu mampitlu. Ya kei-elligan tu humman ey dakel ali mangketey ni hi-gada. <sup>15</sup> Meendilli tuled idan tutu-uk tep ya nemahhig ni takut da. Tep emin di heggeppan ey immen hu ispadah ni kaumhilin heni kedyam e neidaddan ni pemettey ku. <sup>16</sup> Pan-iwwahiwah kulli humman ni ispadah kud winilli niyad winannan winu anin di attun pinhed kun pampengiwwehhiwahan. <sup>17</sup> Hedin negibbuh ni neipahding humman, man me-kal ali law bunget ku et mampakpakpakpak. Hi-gak e hi APU DIOS hu nanghel idan nunya."

<sup>18</sup> Immehel mewan hi APU DIOS et kantuy <sup>19</sup> "Hi-gam e helag ni tuu, mu malkai hu dewwan keltad ni dellanen ni patul di Babilon ni ellian tun ittabin tu ispadah tu. Humman ni dewwan keltad ey hakey alin bebley hu neipalpuan da. Nem anin ni hanniman et mahapul ni mu ha-adin sinyal etan nampangaan etan ni keltad. <sup>20</sup> Imalkam etan di hakey ni dalan e humman hu mampellow di Rabbah e bebley di Ammon. Ya etan hakey ey imalkam e humman hu mampellow di Judah niyad Jerusalem e nehammad ni neluhud. <sup>21</sup> Humman ni patul di Babilon ey um-ehngeng alid nampangaan etan ni keltad et yadman hu pengipahdingan tun pengamtaan tu hedin attu hu pampelawwan tu. Ya pehding tu ey ussalen tu etan papan ni panetun pambubunutan tu, niya puhdanan tuddan dios tu hedin hipa hu kanda, niya i-ang-ang tud altey ni in-appit tu. <sup>22</sup> Nem bunnuten tuli etan panan nemalkaan ni Jerusalem, et humman pengamtaan tun yadman pampelawwan da. Et umkapyaddan pemahbah dan eheb di heggeppan etan ni bebley. Niya da tebbaben ni puyek etan hengeg ni binattun luhud ni dellanen dan mengellab etan ni luhud. Umtenektekkekuk idan pengippeamtaan dan penggepan da etan ni bebley ni da pampemetteyan idan tutu-udman. <sup>23</sup> Yadda iJerusalem ey ida kamansinamma tep kele wada mewan hu hanniman ey nehammad hu hummangan da niya kayyaggud hu daka pambibinnaddangi. Nem humman ali mengippenemnem ni hi-gadan bahul ni impenahding da niya humman mengippeamtan hi-gadan pambalinalan dan kelabut.

<sup>24</sup> Et humman hu, hi-gak e AP-APU e Eta-gey ni peteg ey nakka e-heladdan iJerusalem e kangkuy: Neamtaan ida impenahding yun lawah tep nekalliwtan kayu et humman hu pebeltan dakeyuddan buhul yu et mambalin kayun heni kelabut.

<sup>25</sup> Ey hedin hi-gam e lawah ni ap-apuddan iIsrael ey nedatngan law nagtud ni aggew ni kekastiguan mu. <sup>26</sup> Et mukun hi-gak e AP-APU e Eta-gey ni peteg ey e-helen kun hi-gam e ekal mu hu penget niya taddung ni patul ni impenget mu niya intaddung mu tep hin-appil law hu elaw ni meippahding ni nunya e beken ni heni lan nunman. Tep yadda tuun nebahah hu neitu-wan da ey meippeta-gey ida et yadda tuun eta-gey hu neitu-wan da ey meibbahah ida. <sup>27</sup> Huyyan bebley ey mebahbah ali niya endi tu keiyayyaggudan ingganah ni ellian alin etan ni lebbeng tun man-ap-apu."

#### *Ya kekastiguan idan iAmmon*

<sup>28</sup> "Hi-gam e helag ni tuu, ey ittu-dak dakan hi-gak e Eta-gey ni peteg ni AP-APU, et mu peamta eya e-helen kuddan iAmmon ni kamemennel-it idan iIsrael. Kammun hi-gaday: Nanna-ud ni mebahbah kayu. Neidaddan ni nekatta-lid et kaumhilin heni kedyam hu ispadah kun memettey ni hi-gayu. <sup>29</sup> Ya etan inhel idan prophet yun kanday manlinglinggep kayu e endi hu lawah ni an meippahding ni hi-gayu ey beken ni makulug humman. Niya kanday umyaggud kayu meippuun di daka ang-angad i-innep da niyad daka dibbaa. Nem ya kakulugan tu ey kamangkedettengi law hu nagtud ni aggew ni kekastiguan yu et heni dakey panwehhiwahan ni ispadah ku et matey kayu.

<sup>30</sup> Et humman hu, pan-itlu yudda ispadah yu tep kastiguen dakeyun hi-gak di ditan e bebley yu. <sup>31</sup> Pebeltan dakeyun hi-gak ida etan di mangkabunget ni tutu-un nelaing ni mengippahding ni kapanlelhanin tu ma-lat panlelhanan yu pehding da tep nemahhig hu bunget kun hi-gayu. <sup>32</sup> Mangketey kayulli niya mangkegiheh kayud bebley yu et meliwwan kayu e endilli hu an mannemnem ni hi-gayu. Hi-gak e hi APU DIOS hu nanghel idan nunya."

## 22

*Ya nanliwatan idan tutu-ud Jerusalem*

<sup>1</sup> Entanni ey kan mewan APU DIOS ni hi-gak ey <sup>2</sup> "Hi-gam e helag ni tuu, ey ehel mun nunya hu nanliwatan idan mangkapetey ni tutu-ud Jerusalem. Penemnem mun hi-gada hu nemahhig ni peteg ni nanliwatan da. <sup>3-4</sup> Ey ehel mun hi-gada e kammuy: Kan APU DIOS e Eta-gey ni peteg ey 'Nedateng law hu aggew ni kekastiguan yu, tep pinetepetey yu hu dake ni edum yu niya dinenaydayaw yudda hu beken ni makulug ni dios et pambalin yu hu annel yun anggebe-hel ku. Nanliwat kayu tep kayu kaumpatepatey niya kayu kaumkenapayan dios yu. Et mukun anggegannu law hu kepappegan ni biyag yu. Ey taltalangaan dakeyullin tutu-ud kebebbeley niya ngi-ngi-ngian dakeyulli tep yadda humman ni impenahding yu. <sup>5</sup> Em, taltalangaan dakeyullin katuuuud kebebbeley di nangekhnup niyad nangekidawwi, tep nandingngel hu kalwah yu niya ebuh guluh ni yuka pehpending.

<sup>6</sup> Yadda aap-apu yu ey ida kaumpatepatey tep humman hu pinpinhed dan pehding. <sup>7</sup> Eleg yu u-unnuda niya eleg yu lispituha a-ammed yu. Yuka panligligat hu binunal ni tuun nekibebley ni hi-gayu, anin idan edum yun bimbebley ni nangkepu-hig niya nangkebalun bibi-i. <sup>8</sup> Eleg yudda mewan lispituha hu kameussal ni kapandeyyawin hi-gak niya eleg yu u-unnuda hu elaw ni aggew ni Sabaduh. <sup>9</sup> Ida kamanlangkak hu edum ni hi-gayu ma-lat kateyan idan edum yun tuu. Yadda mewan edum ni hi-gayu ey yuka kenna hu neiappit ni beken ni makulug ni dios niya yuka pehding ida hu anhimmugal ni peteg. <sup>10</sup> Wadaddan hi-gayu hu daka i-ulig hu ahwan ameda niya daka pillitan i-ullig hu biin nanengtu hu kamelpud annel tu. <sup>11</sup> Yadda edum ni hi-gayu ey daka i-abek ahwa da. Ey wadadda edum ni daka i-ulig hu inepu da niya agi da. <sup>12</sup> Wadadda edum ni ida kauntangan ni an umpatey. Yadda edum ey daka pampihuhu hu edum dan tuu tep pinhed dan umkedangan et daka peteppat hu pihuh ni daka pegewwat di edum dan helag Israel. Huyyadda hu kameippenahding tep liniwwan yuwak dedan. Hi-gak e AP-APU e Eta-gey ni peteg hu nangel idan nunya.

<sup>13</sup> Nem emin ida etan kamengippahding ni henin nunman ey nanna-ud ni kastiguen kudda. <sup>14</sup> Yan kegibbuan alin ippahding kun hi-gayu ey meendi tuled yu niya kaumkapuy kayu. Emin ida huyyan nak inhel ni pehding ku ey un-amnun ippahding ku tep hi-gak e hi APU DIOS hu nangel nunya. <sup>15</sup> Iwwahit dakeyud kebebbeley ni penikked kuddan lawah ni yuka ippenahding. <sup>16</sup> Mebe-ingan kayuddad bebley ni keillawwan yu, et humman pengamtaan yulli law e hi-gak hu AP-APU. "

<sup>17</sup> Entanni ey kan mewan APU DIOS ni hi-gak ey <sup>18</sup> "Hi-gam e helag ni tuu, ey endi silbiddan edum mun helag Israel ni hi-gak. Heniddan gembang, ya lata niya gumek winu hipan lubed ni natdaan ni nemahmahan ni silber di apuy. <sup>19</sup> 'Hi-gak e AP-APU e Eta-gey ni peteg ey nakka e-hela e makulug ni heni kayu tu-wangu etan ni endi silbi tun kametdaid kapan-eyyugin gumek, et humman hu nak pengemmungan ni hi-gayud Jerusalem. <sup>20</sup> Ya apuy hu kamengeyyug ni silber, ya gembang, ya gumek niya ihmay winu lata. Nem hedin hi-gak, man ya bunget ku hu heni mengeyyug ni hi-gayu. <sup>21</sup> Emmungen dakeyun emin di Jerusalem et heni dakeyu lennaten ni nemahhig ni bunget kun heni apuy. <sup>22</sup> Em, heni kayu silber ni meeyyug di kamanggangngalab ni apuy tep heni kayu melennat di Jerusalem ni bunget kun hi-gayu. Et yan nunman ali hu pengamtaan yun elaw ni bunget ku. "

*Ya liwat idan kamengippangnguluddan helag Israel*

<sup>23</sup> Immehel mewan hi APU DIOS et kantun hi-gak ey <sup>24</sup> "Hi-gam e helag ni tuu, ey ehel muddan ilsrail e yallin pengastiguan kun hi-gada tep ya bunget ku ey heniddalli etan ni desert e mamega tep endi udan diman. <sup>25</sup> Yadda aap-apu da ey ida kamei-ellig di layon e tuka hehelipati hu hipan kaman-ayyam di muyung ni dedpapan tun kennen tu. Tep humman idan ap-apu ey daka panliniggud ni petteyan hu tuu ni inla da pihuh da niyadda etan edum ni limmu dan dammutun ellan da. Et mukun nedakkel ida nangkebalu. <sup>26</sup> Hedin yadda dama etan papaddi, man daka ippangil hu tugun ku tep eleg da u-unnuda hu elaw ni kamei-eng-eng ni hi-gak. Et eleg da ituttuddu hu nambaklangan ni eleg maieng-eng et ya neieng-eng ni hi-gak winu ya nambaklangan ni kameibbillang ni malinih niya beken. Et mukun ya daka pengibbillang ni aggew ni Sabaduh ey henin kumpulmih ni aggew. Humman ni daka pehpending hu kaumhulun ni eleg da-ak law lispituhaddan tutu-uk. <sup>27</sup> Hedin yadda dama opisyal da, man ida kamei-ellig di ahhud muyung ni tuka pamba-nuta hu tuka petteyan kaman-ayyam di muyung. Niya daka petteya edum dan tuu ma-lat kumedangan ida. <sup>28</sup> Yadda prophet ey daka ippatnan ittaluuda humman ni lawah ni daka pehpending di daka penghelidda etan kandan daka i-innepa, anin ni beken ni makulug. Ida kaman-ittek tep anin ni endi hu nak impeamtan

hi-gada et kanday 'Huuya hu impeamtan APU DIOS e Eta-gey ni peteg.' <sup>29</sup> Hedin yadda tutu-u, man daka pelilligasidda hu nangketwetwet tep daka tekkewa hu limmu da niya beken ni neiptek hu daka pehding idan tuun binunal alid edum ni bebley ni nekibebley ni hi-gada.

<sup>30</sup> Nakka umhamahamak ni tuun limpiyuh niya neiptek hu tuka pehpehding ni mengiehneng nunyan bebley ma-lat eggak bahbahen tep ya bunget ku, nem endi hu nakka hemmaka, anin ew ngun hakey. <sup>31</sup> Et humman hu, bahbahen ku huuyan bebley, tep ya nemahhig ni bunget kun kamei-ellig di apuy. Humman kastigu da tep nanliwat ida. Hi-gak e AP-APU e Eta-gey ni peteg hu nanghel idan nunya."

## 23

### *Yadda han-agin biin nekalliwtan*

<sup>1</sup> Immehel mewan hi APU DIOS ni hi-gak ey kantuy <sup>2</sup> "Hi-gam e helag ni tuu, dengel mu eya e-helen ku. Wadadda dewwan biin han-agi. <sup>3</sup> Yan eman ni keu-ungnga dad Egypt ey nambalin idan daka pebeyyad annel da et kai-ulig idan kalekileki. <sup>4</sup> Ya ngadan etan ni pengulwan ey hi Oholah e hi-gatu neieligan ni bebley di Samaria. Ya ngadan etan ni neihauned ey hi Oholibah e neieligan ni bebley di Jerusalem. Henidda kumangngu ahwak et maweda u-ungngak ni hi-gada.

<sup>5</sup> Hi Oholah ey pininshed tu edum ni lalacki e eleg tu ikahhakey ni hi-gak impeminshed tu. Indawat tu annel tuddan sindalun iAssyria e dinagsi tu. <sup>6</sup> Kayyaggud hu kalekiddan nunman ni sindalun nampambalwasiddan andeket ni balwasin sindalu. Eta-gey hu saad idan edum, niya aap-apudda hu edum e nampantakkay idad kebayyu. <sup>7</sup> Nan-a-ayyaman idan nunman e oopisyal ni sindalun Assyria hi Oholah. Ey dinaydayaw tu hu dios da et pambalin tu annel tun angebe-hel ku. <sup>8</sup> Hini-yan tu hu bebley di Egypt, nem eleg tu isiked humman ni tuka pehpehding et iuliulig ni lalacki tep ihik ngu dedan ni meki-ullig ni hi-gada.

<sup>9</sup> Et pebeltan ku law hi Oholah idan nunman ni iAssyria ni nakappinshed tu e nakamminhed daman hi-gatu. <sup>10</sup> Entanni et lektattuy binladan da et patyen dan ispadah da niya impambalin dan himbut ida u-ungnga tu. Nandingngel di emin ni kabibiid kebebbebley hu meippanggep ni liwat nan Oholah et ya neipahding ni hi-gatu e humman ngu kastigu tu.

<sup>11</sup> Nem anin ni inang-ang-ang nan Oholibah humman ni neipahding nan agitu, et inu-unnud tu kumedek ni hi-gatu ey nema-ma-ma anhallaw hu impahding tun liwat nem hi agitu. <sup>12</sup> Tuka am-amyawidda dama etan aap-apun sindalud Assyria ni kayyaggud ang-ang dan nambalwasiddan balwasin sindalu. Eta-gey saad da niya aap-apudda hu edum e nampantakkay idan emin di kebayyu. <sup>13</sup> Humman idan han-agi ey nan-ingngeh idan lawah ni peteg hu impenahding da.

<sup>14-15</sup> Nem hedin hi Oholibah man nema-ma-ma hu kalwah ni impahding tu nem hi Oholah e agitu. Inang-ang tu hu latlatuh idan kayyaggud ang-ang dan lalakkid Babilon ni mangkadlang balwasi da niya wada neiewakeh di gitang da niya andukkey penget da, ey pininshed tudda tep ya ang-ang da niya tep henidda ap-apun sindalun nantakkay di kebayyu. <sup>16</sup> Inang-ang tudda ey nemahhig ni kaum-ihik ni an meki-ullig ni hi-gada et umitu-dak ni an mengeyyag idan nunman ni iBabilon. <sup>17</sup> Immalidda et iulliullig da, et humman hu eleg law meibbillang ni malinih hu annel tu. Entanni kaya mewan ey nambalin ni angebe-hel tudda et isiked tun meki-ullig ni hi-gada. <sup>18</sup> Hedin hi-gak ey inwalleng ku hi Oholibah eman ni nengiebulutan tun annel tun i-ulig ni kalekileki ey tu man anhan kapeang-ang-ang di katuutuu humman ni lawah ni tuka pehpehding. Nambalin ni angebe-hel kun peteg heni lan agitu. <sup>19</sup> Nem tuka pan-imma-man pehding hu impenahding tud Egypt eman ni keu-ungnga tun tuka pengippebeyyabeyyadin annel tud kalekileki. <sup>20</sup> Kamanggagayan nekienuggiggep idan lalakkid Egypt ni makibiin henidda kebayyu. <sup>21</sup> Hi Oholibah ey tuka peang-ang hu neminhed tuddan lawah ni impenahding tud Egypt eman ni keu-ungnga tun tuka pekienu-ulligiddan lalacki.

<sup>22</sup> Et humman hu, hi-gak e AP-APU e Eta-gey ni peteg ey e-helen ku e kangkuy 'Hi-gam e Oholibah, ey anin ni impeinglay mudda humman ni lalackin nakappinshed mu et eleg mu law pinhed ni mekienu-ullig ni hi-gada et hellikuban dakan hi-gada hedin pambalin kuddallin buhul mu. <sup>23</sup> Tep emmungen kuddalli hu lalackin iBabilon et yadda iKaldea e nalpud Pekod, yad Shoa, et yad Koa niyaddan emin hu iAssyria et paelik ida. Kayyaggud ali ang-ang idan lalackin oopisyal niya aap-apun sindalun peellik. <sup>24</sup> Umaliddan an mengubbat ni hi-gam e melpuddad appit ni north ey mampangalesah idan pengilluganan dan almas da. Mampanhappiyaw ida ey mampanhelmed idan menellikub ni hi-gam. Peapput dakan hi-gak et ngenamung idan pinhed dan pehding ni

hi-gam meippuun di elaw da. <sup>25</sup> Nemahhig bunget kun hi-gam et mukun i-abulut kun anin ni nemahhig pehding dan hi-gam tep makabbunget ida. Panggedgeden dalli eleng mu ey tangilam niya petteyen da edum ni u-ungngam. Ellan da edum ni u-ungngam et giheben daddan mategu. <sup>26</sup> Panyakgaten dalli hu kekakkayyagduddan ni balwasim et mabladan ka niya pan-ellan da ganggam mu. <sup>27</sup> Humman hu meippahding ni hi-gam ma-lat isiked mu hu muka pehphepding ni lawah ni impenahding mu dedan di Egypt e impabeyabeyad mu annel mu neipalpun keu-ungngam. Niya ma-lat eleg mu law nenemnemen ida etan dios dan kinapyan tuu niya eleg mu law nenemnema humman ni bebley.

<sup>28</sup> Hi-gak e AP-APU e Eta-gey ni peteg ey nandaddan nak ni mengippebeltan ni hi-gam idan angebe-hel mun buhul mu. <sup>29</sup> Ey ellan dan emin hu limmun et heni daka pepluhan et mebabba-ingan kad kebebbebley tep ya muka pehphepding e muka pebeyyad annel mud lakaki. <sup>30</sup> Hi-gam ngu kambahul ni nunyan meippahding ni hi-gam tep ya nisi impenahding mu e impebabbayad mu annel mun lakakid kebebbebley, niya dinaydayaw mu dama hu dios ni kinapyan tuu. Et yan nunya law ey nambalin kan angebe-hel ku. <sup>31</sup> Ey gapu tep in-u-unnud mud impenahding agim ey kastiguen daka e henin nengastiguk ni hi-gatu.

<sup>32</sup> Em, hi-gak e AP-APU e Eta-gey ni peteg ey e-helen kun hi-gam e nemahhig hu heltapen mu e henin hinelheltap nan agim. Heni ka um-inum di basuh ni ininuman agim, ma-lat mebahbah ka et taltalangaan dakallin katutuud kebebbebley. <sup>33</sup> Heni kalli nebuteng ey nemahhig alin umlelemyung ka niya memunnumunnu tep mebahbah ka e henin nan agim hi Samaria. <sup>34-35</sup> Heni mu peka-innumen ni emin hu neiha-ad di diman ni basuh ey pinhik mu et pangkulpigem pagew mu. Gapu tep inwalleng muwak ey impahding mu hu lawah e impebabbayad mu annel mu ey nanna-ud ni manhelheltap ka. Hi-gak e AP-APU e Eta-gey ni peteg hu nangelh idan nunya.' "

<sup>36</sup> Immehel mewan hi APU DIOS ni hi-gak ey kantuy "Ehel mud Oholah nan Oholibah e nekalliwtan ida niya penemnem mun hi-gada e lawah ni peteg ni daka pehphepding. <sup>37</sup> Heni da in-ulig hu beken da ahwa, tep beken hi-gak hu dinaydayaw da, nem yadda edum ni dios. Ey pimmatepatey ida tep dinaydayaw da edum ni dios niya pinetepetey da u-ungnga da e in-enappit daddan dios ni kinapyan tuu. <sup>38-39</sup> Impambalin dan Tempol kun angebe-hel ku et beken law ni kayyagud ni pandaydayawan niya eleg da u-unnuden hu meippanggep ni ngilin ni aggew ni Sabaduh. Em, humman hu impahding dan nemateyan daddan u-ungngak ni in-appit dan dios da ni han ida himmegep di Tempol ku.

<sup>40</sup> Ida kamenu-dak ni an man-eyyag ni lalakkid nangkeidawwin bebley. Et hedin immalidda humman ni lalakkid da impaeyag, man kaanman-e-meh ida han-agi ni han da pinitolan mateda ey inhuklub da ganggam da. <sup>41</sup> Ida kamekiyyuddung ni hi-gada etan di kayyagud niya meya-meh ni biin tuka pebeyyad annel tu. <sup>42</sup> Nem kastiguen idallin kayyagud ni tutu-u huyyan han-agi, tep in-ulig da beken da ahwa ey pimmatey ida, tep makulug ni impahding dadda humman. Et mukun lebbengtun meippahding ni hi-gada humman.

<sup>43</sup> Entanni ey kamedngel hu ngalan dakel ni lalakkid nalpuddad eleg mebebleyi. Hina-adan dan takkalang hu ngamay idan nunman ni han-agi ey impampenget daddan kayyagud ni penget. <sup>44</sup> Heninnuy hu kangku: 'Hedin pinhed dan peteg ni i-ulig hu biin in-uliulig ni lalakkid, man anin, iulig dadda huttan ni han-agi tep tam hanniman dama neitu-wan da.' <sup>45</sup> Et iulig idan nunman ni lalakkid di Oholah nan Oholibah henin kapehding ni laki etan ni biin tuka pebeyyad annel tu. <sup>46</sup> Nem kastiguen idallin kayyagud ni tutu-u huyyan han-agi, tep in-ulig da beken da ahwa ey pimmatey ida, tep makulug ni impahding dadda humman. Et mukun lebbengtun meippahding ni hi-gada humman.

<sup>47</sup> Et humman hu, hi-gak e AP-APU e Eta-gey ni peteg ey kangkuy 'Ali kayun dakel ni tutu-un kaumbubunget ni hi-gada et tattakkuten yudda ey alen yu hu hipan limmu da. <sup>48</sup> Pantegmil yudda niya pampalang yudda. Ey pampatey yudda u-ungngada ey panlegab yu baballey da.

<sup>49</sup> Humman penikked kun emin ni hipan lawah ni kamekenapkapy eyad bebley henin kapengi-ulligin beken ni ahwa ma-lat tumekut ida tuun kamengiu-unnud ni impahding da. <sup>50</sup> Kastiguen dakeyun bimbebley tep ya nandayawan yun dios ni kinapyan tuu ma-lat pengamtaan yu e hi-gak hi APU DIOS e Eta-gey ni peteg.' "

## 24

<sup>1</sup> Yan eman ni meikkeppulun bulan ni meikkahyam ni toon, meippalpu eman ni neilawwan mid Babilon ey immehel mewan hi APU DIOS ni hi-gak <sup>2</sup> e kantuy "Hi-gam e helag ni tuu, itudek mu hedin hipa aggew ni nunya, tep yan nunya pengilleppuan

ni patul di Babilon ni mengubbat ni Jerusalem. <sup>3</sup> Ehelim ida mangkanghay ni tutu-uk. Peamtam e hi-gak e AP-APU e Eta-gey ni peteg ey nakka umbubunget ni hi-gada. Heninnuy hu ipahding mu. Pan-apuy ka et iba-nget mu bangan neha-adan ni danum. <sup>4-5</sup> Et kumleng kan kekakkayyaggudan ni kalneroh et iheeng mu etan kekakkayyaggudan ni detag tu e humman hu laman ni ulpu niya lapa niya pakiheeng mudda hu tu-ngal. Pantunguim ma-lat manlellewwag ingganah mekalluttun peteg.

<sup>6</sup> Tep hi-gak e AP-APU e Eta-gey ni peteg ey kangkuy nanna-ud ni mebahbah hu Jerusalem e bebley idan mapetey. Heni law bangan kimmelhi lugit tu tep eleg meenad-adan. Hakkehakkey yun ekat hu neiheeng diman ingganah endi metdaan, <sup>7</sup> tep ka-ang-ang ni peteg lawah ni kapehpehding idan bimmebley. Endi takut idan tuun umpatey ey daka peeyyuh hu kuheyaw ni pintey dad batu ma-lat panhin-aang-angan ni edum da e beken di puyek ma-lat ta-bunan ew ngun dep-ul. <sup>8</sup> Et mukun idduyag ku dama kuheyaw dad batu et peang-ang ku bunget kun hi-gada ey ma-lat ibleh ku impahding da.”

<sup>9</sup> Kan mewan APU DIOS e Eta-gey ni peteg ey “Nanna-ud ni mebahbah hu Jerusalem e bebley idan mapetey. Hi-gak mismuh hu heni mengeppuy ni daul nunyan bebley. <sup>10</sup> Pantungui yu et appuappuyan yu ma-lat mantettebbel ingganah metduk et magiheb ida tu-ngal. <sup>11</sup> Iba-banget yu humman ni bangan giniling etan di kamantettebbel ni apuy ingganah mekaldang ma-lat magiheb etan pimmeket ni lugit tu. <sup>12</sup> Nem anin dedan ni henin nunman hu meippahding et eleg damengu han-ekal ni apuy hu lugit etan ni banga.

<sup>13</sup> Hi-gayun iJerusalem, eleg kayu meibbillang ni malinih tep yadda anhimugal ni yuka ippenahding. Impatnak et anhan ni manlinnih ni hi-gayu, nem eleg yu pinhed. Et humman hu, mannenneng kayun henin nuntan ingganah ke-kalan ni nemahhig ni bunget ku tep ya pengastiguk ni hi-gayu.

<sup>14</sup> Nedatngan law hu tsimpuh ni pengastiguan dakeyu. Eggak pelebba nanliwtan yu ey eleg dakeyu hehmeka. Mekastigu kayu tep ya impahpahding yu. Hi-gak e AP-APU e Eta-gey ni peteg hu nanghel idan nunya.”

*Ya neteyyan ni ahwan Ezekiel*

<sup>15</sup> Immehel mewan hi APU DIOS ni hi-gak ey kantuy <sup>16</sup> “Hi-gam ni tuu, e-helek ni hi-gam e bangngadek hu biyag ni nakappinshed mu. Mangkinnemtang ali ketteyyan tu. Nem eggak pinhed ni mu peang-ang-ang hu lemyung mu. Entan nangih mu niya entan lewam. <sup>17</sup> Anin ni umlelemyung ka, nem entan tu peang-ang. Entan nangih mud kulung tu ey entan tu ekal penget mu ey patut mun pengippeang-angam e kakaumlelemyung. Entan mewan tu hani angah mu ey entan tu ekan hu i-aliddan gagayyum mun kenneh ni nebalu.”

<sup>18</sup> Kakkabuhhan ni newa-waan tu et peamtak idan katuutuu huyyan inhel nan Apu Dios. Kamangkehilling ni nunman ey tu-wangun netey hu ahwak et u-unnuden kun emin hu intugun APU DIOS ni pehding kun newa-waan tu.

<sup>19</sup> Entanni ey kan idan tutu-u ey “Kele eleg ka umlelemyung ey netey hu ahwam? Hipa mewan hu keibbellinan nunya? Tam wada na-mu mewan pinhed mun peamtan hi-gami?”

<sup>20</sup> Hinumang ku et kangkun hi-gada ey “Em wada impeamtan APU DIOS ni hi-gak <sup>21</sup> ni e-helen kun hi-gayun helag Israel: kantuy ‘Hi-gak e hi APU DIOS e Eta-gey ni peteg ey nandaddannak ni memabah ni Tempol ni yuka ippahhiya niya yuka ididdinnel ni keihhikkugan yu. Niya mangketey idad gubat hu u-ungga yun wadad Jerusalem. <sup>22</sup> Et yallin nunman e aggew ey pehding yu hu henin impahding Ezekiel ni nunya. Eleg yulli peang-ang-ang ni tutu-u hu lemyung yu niya eleg yulli kenna hu i-aliddan gagayyum yun kakennan kaumlelemyung. <sup>23</sup> Eleg yulli e-kala penget yu ey patut yu niya eleg kayu umnangih niya eleg kayu umlelemyung, nem mambabbabal kayun mepiggut tep ya liwat yu. <sup>24</sup> Hi Ezekiel hu pengi-ang-angan yun meippahding alin hi-gayu. Pehding yullin emin hu impahding tu. Yallin keippahdingan nunya hu pengamtaan yu e hi-gak hu AP-APU e Eta-gey ni peteg.”

<sup>25</sup> Kan mewan APU DIOS ni hi-gak ey “Yan nunman alin pemabhahan kun Tempol idan helag Israel ni daka ippahhiyan daka pan-amlengi niya daka pandinnelin keihhikkugan da ey ellan kuddalli u-ungnga dadda. <sup>26</sup> Wadalli hu meihwang ni melpud Jerusalem et um-alid Babilon ni an menghel ni hi-gam ni hipan neipahding. <sup>27</sup> Yan nunman ali daman aggew ey meibbanggad hu ehel mu et makiungbal kan hi-gatu. Hi-gam ali pengi-ang-angan idan tutu-un meippahding alin hi-gada. Amtaen dallin nunman ni aggew e hi-gak hu AP-APU.”



<sup>1</sup> Immelhel mewan hi APU DIOS et kantun hi-gak ey <sup>2</sup> “Hi-gam e helag ni tuu, ehel muddan tutu-ud Ammon e mekastigudda. <sup>3</sup> Ehel mu e hi-gak e AP-APU ni Eta-gey ni peteg ey kangkun hi-gaday ‘Kayu kamanggayayan nebahbahan ni Tempol ku et ya bebley idan helag Israel niya neapputan idan tutu-uk ni ijudea et ilaw idan buhul dad edum ni bebley et mambalin idan kelabat di diman. <sup>4</sup> Et humman hu, peapput dakeyuddad nambebley di appit ni kasimmilin aggew. Mangkampuddallid bebley yu et hi-gada mengngan ni inggaud yu anin idan lameh ni intanem yu niya hi-gada menginnum ni gatas ni bakeyu. <sup>5</sup> Pambalin ku hu bebley yud Rabbah niyaddan emin etan bebley yud Ammon ni pattullan ni camel niya kubkubban ni kalneroh et pengamtaan yu e hi-gak hu AP-APU.’”

<sup>6</sup> Kan mewan APU DIOS e Eta-gey ni peteg ey “Nemahhig hu an-anla yu et pinakpakpakan yu niya sinekkutekkukan yu hu nebahbahan idan tuuk ni helag Israel tep anggebe-hel yudda. <sup>7</sup> Et humman hu, peapput dakeyun hi-gak idan buhul yu et pan-alen da limmu yu. Bahbahen dakeyu et hahhakkey ni ebu hu metdaan ni hi-gayu et eleg kayu law meibbillang ni hakey ni bebley. Yan nunman ali pengamtaan yu e hi-gak hu AP-APU.”

#### *Ya neipeamtan meippahding ni Moab*

<sup>8</sup> Kan mewan APU DIOS e Eta-gey ni peteg ey “Yadda etan iMoab ey kanday endi hu an binaklangan etan ni bebley di Judah di edum ni bebley. <sup>9</sup> Et humman hu gaputan peapput kuddad buhul da hu bebley dad Moab, anin idan bebley di gillig tud appit ni kasimmilin aggew ni kamengugguwalyan bebley dan humman ida etan kekakkayyaggudan ni bebley di Bet Jeshimot, Baal Meon, niya Kiriathim. <sup>10</sup> Em, peapput kudda iMoab idan nambebley di kasimmilin aggew, e henin impahding kuddan iAmmon et endilli law an medmedngel ni bebley da. <sup>11</sup> Bahbahen kudda et pengamtaan da e hi-gak hu AP-APU.”

#### *Ya neipeamtan meippahding ni Edom*

<sup>12</sup> Kan mewan APU DIOS e Eta-gey ni peteg ey “Eteng hu nambahulan idan iEdom, tep nemahhig kumamman hu impahding dan nengibleh idan iJudah. <sup>13</sup> Yan nunya ey peamtak e pepettey kuddan emin hu iEdom anin idan inhalun da, et humman hu kastigu da. Niya pambalin kun endi silbitu hu bebley da meippalpu Teman ingganah di Dedan. <sup>14</sup> Yadda tutu-uk ni helag Israel hu mengi-ehngeng ni hi-gak et hi-gada mengibleh ni impahding idan iEdom tep nemahhig bunget kun hi-gada. Humman alin pehding ku hu pengamtaan idan iEdom e hi-gak hu AP-APU e Eta-gey ni peteg.”

#### *Ya neipeamtan meippahding ni Pilistia*

<sup>15</sup> Kan mewan APU DIOS e Eta-gey ni peteg ey “Imbaleh idan iPilistia et bahbahen da hu Judah tep ya etan nebayag ni hingit dan hi-gada. <sup>16</sup> Humman ni impahding da hu gaputan pambalin kuddan buhul ku et pepettey kuddan emin hu iPilistia niyadda Kerethite, anin idan nampambebley di gilig ni baybay. <sup>17</sup> Nemahhig hu pengastiguk ni hi-gadan pengibleh kun impahding da tep nemahhig hu bunget ku. Yan nunman ali pengamtaan da e hi-gak hu AP-APU.”

## 26

#### *Ya neipeamtan meippahding ni Tyre*

<sup>1</sup> Yan eman ni nemangulun aggew ni meikkahampulut hakey ni toon meippalpun eman ni nei-lian mid Babilon ey immelhel mewan hi APU DIOS ni hi-gak ey kantuy <sup>2</sup> “Hi-gam e helag ni tuu, ida kaman-am-amleng hu tutu-ud Tyre e daka pan-ittetkuk e kanday ‘Nebahbah kaya mewan law hu Jerusalem e nangnged ni etta-teng ni negosyoh di appit ni kasimmilin aggew! Hi-gatsu law kaya hu mannegosyoh et kumedangyan itsu!’

<sup>3</sup> Et humman hu, yan nunya ey e-helen kun hi-gayun tutu-ud Tyre e hi-gak e AP-APU e Eta-gey ni peteg ey nambalinnak ni buhul yu! Peellik hu tutu-un melpu dake ni bebley ni an mengubbat ni hi-gayu e henidda dalluyun di baybay. <sup>4</sup> Bahbahen da luhud ni bebley yu ey pambukkalen da etata-gey ni baballey ni yuka pangguwalyai. Hedin hi-gak dama, man tellaken ku hu puyek di diman et mabudihan hu babattu. <sup>5</sup> Mambalin ni eleg mebebleyan hu bebley yud Tyre niya mambalin ni panha-peyan idan kamenelleg ni tabukul da. Pan-ibbebsik idallin tutu-ud edum ni bebley ni emin hu hipan wadad bebley yu. Hi-gak e AP-APU e Eta-gey ni peteg hu nanghel idan nunya. <sup>6</sup> Um-ali idalli buhul yun an mengubbat ni bebley yu et pampateyen dakeyun bimbebley. Et yan nunman ali pengamtaan yun tutu-ud Tyre e hi-gak hu AP-APU.”

<sup>7</sup> Tep kan APU DIOS e Eta-gey ni peteg ey “Hi Nebukadnessar e patul di Babilon e et-eteng ni peteg kabaelan tud emin ni patul di north hu peellik ni an mengubbat ni

hi-gayun tutu-ud Tyre. Ikkuyug tullu dakel ni peteg ni sindalu, anin dakel ida edum dan nampantakkay di kebayyu niya ittabin tullu dakel ni kalesah ni ussalen da. <sup>8</sup> Gubbaten dalli bebley yud gilig ni baybay et pampateyen da tutu-udman. Ey mengapyaddan dellanen dan menggep ni bebley yu et dakeyu pampateyen ni bimbebley et endi pehding yu. <sup>9</sup> Pambahbahren dalli hu netuping ni luhud yu niya pambahbahren dan masuh hu etata-gey ni baballey ni yuka pangguwalyai. <sup>10</sup> Nemahhig ni henilli mahdel ni kulput hu dep-ul ni kaman-elpuk tep yadda hantapug ni kebayyu et eleg kayulli pakeyayyah. Niya anin idan tuping ni luhud ni bebley yu et mampanggiwwed ida tep ya kududdan kebayyun kamengiggyuyud idan kalesah niyadda nampantakkayan idan sindalun kamampengep di nebahbah ni heggepan di bebley yu. <sup>11</sup> Um-apnal idallid emin di kekeltad di bebley yu ey pampetteyen daddalli tutu-u niya pantu-lien da hu nangehammad ni tutukkud yu. <sup>12</sup> Pan-ellan dalli hu nangekebalol ni ngunut yu ey pambahbahren da luluhud yu anin idan kakkayyaggud ni baballey yu. Pan-ibbeng dallid baybay hu keyew niya batun ingkapyu yud baballey yu. <sup>13</sup> Et endilli law hu yu pan-an-anlaan tep pesikked ku hu a-appeh yu niya tenul ni ayyuding yu. <sup>14</sup> Buddihak ali hu babattud bebley yu et panha-peyan ni ebuh idan matebukul ni tabukul da. Et huttan ni bebley yu ey eleg ali law mabalin ni meiyayyaggud. Hi-gak e AP-APU e Eta-gey ni peteg hu nanghel idan nunya."

<sup>15</sup> Yahhuy mewan hu kan APU DIOS e Eta-gey ni peteg, ni meippanggep ni Tyre e kantuy "Yallin pengubbatan ni buhul yun hi-gayu ey nemahhig ali takut idan nambebley di gilig ni baybay ni pengngelan dan palak idan kamangkettey di bebley yu tep meapput kayu. <sup>16</sup> Yaddalli patul da ey iwwalak da hu kinapatul da. Pan-e-kalen dalli hu imbalwasi dan balwasin patul, anin idan nangkinginan daka ihhuklub ni edah ni balwasi da. Umyudung idallid puyek et mampanggeygeygey idan takut da tep ya humman ni meippahding ni hi-gayu. <sup>17</sup> A-appehan dakeyullin a-appeh hedin wada netey e kandalliy 'Nebahbah hu nandingngel ey kayyaggud ni bebley yu. Neendidda law hu dakel ni bapor yud baybay. Yan nunman ey kapetekkut idan nambebley diman hu nampambebley di gilig ni baybay. <sup>18</sup> Yan nunya ey ida kamampanggeygeygey hu tutu-um nampambebley di gilig idan baybay ni takut dan nenang-angen dan neapputan yu.'"

<sup>19</sup> Kan mewan APU DIOS e Eta-gey ni peteg ey "Pekabbabhahren kulli humman ni bebley yud Tyre et endilli law hu an mambebley diman. Pedakkel ku danum di baybay ma-lat malbengan kayu. <sup>20</sup> Ey pellow dakeyud nandaul di dungay et kayu mei-dum idan tutu-u lan nebayag di diman. Humman ni melbengan ni bebley yu ey menayun di nandalleem et endilli an mambebley di diman ni ingganah. Et eleg kayulli law meibbanggad ni an mekibbebley eyad bebley idan mategu. <sup>21</sup> Humman ali law hu kepappegan yu ey humman alin meippahding ni hi-gayu hu keippeang-angan ni angetakkut. Hemmahemmaken dakeyullin tutu-u, nem eleg dakeyulli hanhamak. Hi-gak e AP-APU e Eta-gey ni peteg hu nanghel idan nunya."

## 27

<sup>1</sup> Immehel mewan hi APU DIOS et kantun hi-gak ey <sup>2</sup> "Hi-gam e helag ni tuu, ia-appenheim hu bebley di Tyre ni kameia-appeh di patey. <sup>3</sup> Humman ni bebley ey kameibbilang ni heggepan di baybay niya kapannegosyohin emin ni tutu-ud puyek. Kammud a-appeh muy: Kan APU DIOS e Eta-gey ni peteg ey 'Hi-gayun tutu-ud Tyre e yuka ippahhiya hu kakkayyaggud ni peteg ni bebley yu. <sup>4</sup> Kamangkeetteng hu negosyoh di bebley yu et heni yuka pan-iddeldel hu bebley yud baybay. Ya kakinayyaggud ni bebley yu ey heni kakkayyaggud ni bapor <sup>5</sup> ni nalpud Duntug e Hermon hu tabla tun cypress niya nalpud Lebanon hu tukud tun sedar. <sup>6</sup> Ya etan oak ni yuka pangke-uh ey keyew ni nalpud Bashan. Ya det-al tun haleng ey nalpud Cyprus et al-alkusan yun bakgit ni elephant. <sup>7</sup> Yadda etan kakkayyaggud ni luput ni kameittakyad ni mengippabsik ni bapor ey nalpu damad Egypt. Ey yadda etan kayyaggud ni blue niya purple ni luput ni yuka peniddum ni bapor yu ey nalpud Elisha. <sup>8</sup> Yadda yuka panggunnun kamangke-uh ey nalpuddad Sidon niyad Arbad. Yadda kamengimmanehoh ni bapor yu ey edum yun bimbebley di Tyre. <sup>9</sup> Yadda tuud Gebal ni nangkelain ni mengiyayyaggud ni bapor hu kamengiyayyaggud ni bapor yu hedin wada nebahbah. Huttan ni bebley yun kadekkalin bapor hu kagettangin emin ni kamambiyahah di baybay.'

<sup>10</sup> Yadda sinangندان yun sindalu yun nalpud Persia, yad Lydia niyad Libya ey netuled ida niya kayyaggud hu nambakbaklang ni helmet da niya happiyyaw da. Hi-gada hu gaputun nandingngelan yud kebebbebley. <sup>11</sup> Yadda iArbad niya iHelek hu kamangguwalyad luhud di bebley yu ey yadda iGammad hu kamangguwalyad etata-gey ni baballey ni yuka pangguwalyai. Ey yaddad batun luhud ni bebley yu hu daka pengihhableyiddan happiyyaw da et nema-man kayyaggud hu ang-ang ni bebley yu.

<sup>12</sup> Yadda tuud Tarsis ey ya silber, ya lata, ya gumeke niya ihmay hu daka iwwa-hin bayad ni hipan yuka iggatang ni hi-gada.

<sup>13</sup> Yadda kamanggettang ni kamelpud Greece, yad Tubal niyad Meshek ey yadda etan himbut niya giniling hu daka pemeyyad ni daka gettangan ni hi-gayu.

<sup>14</sup> Yadda dama kamambiyahéh ni kamelpud Bet Togarman ey yadda kebayyun kapanggunnu niyadda kebayyun kameussal di gubat hu daka iwwa-hid yuka kapyaan kameiggettang.

<sup>15</sup> Ya kapanwa-hiddan tuud Rodes niyadda etan nampambebley di gilig ni baybay ni daka gettangan hi-gayu ey yadda bakgit ni elephant niyadda mangkagengan keyew.

<sup>16</sup> Yadda iEdom ey yadda nenginan batu, yadda nangkenginan madlang ni luput, yadda edum ni kakkayyaggud ni luput, ey yadda nenginan heni batu ang-ang tun kameellad baybay hu daka iwwa-hin hi-gayud daka gettangan kinapya yu.

<sup>17</sup> Ya kaiwwa-hiddan iIsrael niya iJudah ni hi-gayu ey ya alinah ni kamelpud Minnit, ya danum ni putsukan, ya lanan olibah niyadda etan kapemanglun kennen.

<sup>18</sup> Anin idan iDamascus et daka i-ali meinnun ni kamelpud Helbon niyadda mablah ni dutdut ni kalneroh ni kamelpud Sahar ni daka panwa-hin dakel ni yuka iggatang.

<sup>19</sup> Yadda kamambiyahéh ni helag Dan et yadda Greek ni kamelpud Usal ey yadda etan pinanday dan gumeke niyadda kapemanglun kennen hu daka iwwa-hin hi-gayud yuka kapyaan daka gettanga.

<sup>20</sup> Yadda iDedan ey yadda luput ni kai-ap-ap di yuddungan di beneg ni kebayyu hu daka iwwa-hid hipan yuka kapyaa.

<sup>21</sup> Yadda iArabia et yadda ap-apud Kedar ey yadda lakkitun kalneroh et yadda impah ni kalneroh niyadda gelding hu daka iwwa-hid daka gettangan hi-gayu.

<sup>22</sup> Ya kaiwwa-hiddan iSeba et yadda iRaamah ni hi-gayu ey yadda nenginan batu niya balituk ni ya yuka iggamgam, yadda kapemanglun kennen niyadda kamekapyan bangbanglu.

<sup>23</sup> Ya kapanwa-hiddan iHaran, iKanneh, iEden, iSeba, iAssur niyadda iKilmad di daka gettangan hi-gayu ey <sup>24</sup> yadda nenginan luput, yadda purple ni luput, yadda nebordahan ni luput, yadda nenginan nealkusan ni aplag ni det-al et yadda nehammad ni linubid.

<sup>25</sup> Emin ida etan dakel niya mangkebel-at ni yuka iggatang ey yadda bapor di Tarsis hu kamengalga. <sup>26</sup> Illaw dakeyun kamangke-uh di baybay, nem yan lawwan yud gawwan baybay ey dammuen yu etan na-let ni pewek ni kamelpud appit ni kasimmilin aggew et bahbahen tu humman ni bapor yu. <sup>27</sup> Et emin idalli neikalgad bapor ey mekilnngg idad dallem ni baybay, anin idan nampanglun, yadda carpenter ni kamanggunnudman e bapor, yadda kamampambiyahéh, niyadda sindalu. <sup>28</sup> Henilli yegyeg hu gibek tud gilig ni baybay tep ya tekuk idalli etan ni tuun nampanglun ni daka pangkelsingi.

<sup>29</sup> Pan-inhihi-yanan idallin kamampanggunnu hu babapor da et ida man-eh-ehng di gilig ni baybay. <sup>30</sup> Mantetekkuk idalli ey mannannangngih ida niya umlelemyung ida et pandep-ulan dalli ulu da niya man-ulliullin idalid dep-ul. <sup>31</sup> Pamukkumkan dalli ulu da ey mambalwasiddan langgusih niya nemahhig ni nannangngihan dalli meippahding ni bebley yun neielig etan ni bapor. <sup>32</sup> Mangngugngug idalli ey ia-appéh da eya a-appéh di patey: 'Endi edum ni bebley ni an mei-ingngéh ni hi-gam e bebley di Tyre! Nem ay kele heni ka law bapor ni nalng di dallem ni baybay e immineng law? <sup>33</sup> Ida kaman-am-amleng hu tutu-ud kebebbebley ni nengatang ni muka iggatang. Ey humman idan in-inlaw mud kebebbebley hu ingkedangan idan papatul. <sup>34</sup> Nem ay yan nunya ey nebabbah ka et itten kan heni ka bapor ni nalng di dallem ni baybay. Et meendin emin hu hipan wadan hi-gam, anin idan muka panggunnu. <sup>35</sup> Emin ida nambebley di gilig ni baybay ey ida kametngan nuntan ni an neipahding ni hi-gam. Niya nemahhig hu takut idan patul dan kameang-ang di angah da. <sup>36</sup> Huttan hu pappeg mu. Emin ali law negosyanteh eyad puyek ey ida kaumtatakut tep daka nemnemnema e entanniy meippahding ali daman hi-gada hu henin neipahding ni hi-gam.' "

## 28

<sup>1</sup> Immehel mewan hi APU DIOS ni hi-gak et kantuy <sup>2</sup> "Hi-gam e helag ni tuu, mu ehel ni patul di Tyre eya pinhed kun peamtan hi-gatu e kammuy 'Kan APU DIOS e Eta-gey ni peteg ey: Eta-gey hu muka pannemnem ni annel mu e kammuy dios kan hi-gam hu ap-apud Tyre e linikweh ni baybay. Nem e-helen kun hi-gam e tuu kan ebuh e endi kabaelan mu! <sup>3</sup> Kammu na-mu ngu ey nelalla-ing ka nem hi Daniel et naka-amtam ni emin hu hipan eleg amtan tuu. <sup>4</sup> Ma-nu tep makulug ni kimmედangyan ka tep ya laing mu et immen e napnu bodegah mun balituk niya silber. <sup>5</sup> Em, kimmekeddangyan ka tep ya laing mu et nemahhig ni humman muka ippahhiyya.

<sup>6</sup> Nem hi-gak e AP-APU e Eta-gey ni peteg ey heninnuy hu e-helen kun hi-gam: Ya muka pannemnem ey neiinggeh hu laing mud dios, <sup>7</sup> et humman hu, peellik hu angetakkut ni buhul mu et bahbahen dan emin hu kayyaggud ni usal mun limmum tep ya laing mu. <sup>8</sup> Niya petteyen dakalli et ibheng dakad baybay et yadman hu kulung mu. <sup>9</sup> Yallin ellian idan buhul mun an memettye ni hi-gam ey eleg kalli law mampahhiyan mekihhanggan hi-gada e ehelem e dios ka. Tep hedin hanggaem idalli law hu buhul mu ey tuu kallin ebuh, beken ni dios. <sup>10</sup> Et heni kalli ahun petteyen idan tuud edum ni bebley ni eleg mengullug ni hi-gak. Hi-gak e AP-APU e Eta-gey ni peteg hu nanghel idan nunya.’ ”

<sup>11</sup> Entanni ey immehel mewan hi APU DIOS ni hi-gak ey kantuy <sup>12</sup> “Hi-gam e helag ni tuu, nannangngihim hu patul di Tyre ey kammun hi-gatuy ‘Kan APU DIOS e Eta-gey ni peteg ey: Yan nunman ey nakallaing ka niya kayyaggud ang-ang mu. <sup>13</sup> Nambebley kad Eden e leguntan APU DIOS. Wadan emin ni hi-gam ida gamgam ni balituk et yadda nenginan batu heni rubies, ya diamond, ya topaz, ya beryl, ya carnelian, ya Jasper, ya sapphire, ya emerald et ya garnet e neidaddan dedangngun neiuungngaam. <sup>14</sup> Bineal ku hu hakey ni anghel ni mengi-eddug ni hi-gam eyad duntug kun kad-an idan nunyan dakel ni nenginan batun kaumhilin heni apuy. <sup>15</sup> Meippalpu eman ni newadaan mu ey neisigud ni kakkayyaggud ka, nem entanni ey inlapum ni mengippahding ni lawah. <sup>16</sup> Ya negosyoh mu hu impapatek mu et kumekeddangyan ka, nem entanni ey nambalin kan makabbunget niya mapetey et manliwat ka. Et humman nemilitan kun ke-kalam eyad duntug ni kad-an ku. Ya etan anghel ni bineal kun mengi-eddug ni hi-gam hu meneg-al ni hi-gam et hi-yanen mu eya kayyaggud ni muka panha-adin kad-an ni dakel ni nangkinginan batu. <sup>17</sup> Ya kakinyayyaggud ni ang-ang mu hu gaputun nambalin kan kamampahhiya niya gapu mewan tep nandingngel ka ey nambalin kan heni eleg menemneman. Et mukun imbeng dakad puyek et panhintetekkulan dakan edum ni papatul. <sup>18</sup> Sinelatelam mu dakel ni edum mun negosyanteh niya hinibit mudda etan muka pandeyyawu et humman gaputun winedak etan apuy ni nengihet ni hi-gam. Et emin hu katuuutu ey nanhin-aang-angan da hu dep-ul di puyek ni nambalinan mu. <sup>19</sup> Huttan nepappegan mu tep meendi ka law ni ingganah! Emin ida hu nengamtan hi-gam ey nekaddismayah ida tep nekabbahbah ka.’ ”

#### *Ya neipeamtan lawah ni meippahding ni Sidon*

<sup>20</sup> Kan mewan APU DIOS ni hi-gak ey <sup>21</sup> “Hi-gam e helag ni tuu, mu peamta e ya bebley di Sidon ey mekastigu. <sup>22</sup> Kammyu ‘Kan APU DIOS e Eta-gey ni peteg ey: Hi-gak hu buhul mu e Sidon. Yallin pengastiguan kun hi-gam ey daydayawen da-ak idan tutu-u niya amtaen dalli law e kayyagguddak ni AP-APU. <sup>23</sup> Peellik hu degeh et mangkatey ida bimbebley niya peellik hu umgubat ni menellikub ni hi-gam et pampateyen dadda hu tetdaan ni degeh et pengamtaam e hi-gak hu AP-APU.’ ”

#### *Mebendisyonan hu Israel et luminggep*

<sup>24</sup> Kan APU DIOS ey “Endiddalli law hu dinagsin helag Israel ni mengippeliligat ni hi-gada, tep ida kamei-ellig di hebit. Yan nunman ali pengamtaan idan helag Israel e hi-gak hu AP-APU e Eta-gey ni peteg.’ ”

<sup>25</sup> Kan mewan APU DIOS e Eta-gey ni peteg ey “Emmungen kuddalli tutu-uk ni winehit kud nangekidawwin bebley et ang-angen alin katuuutu hu kakinyayyagud ku. Et manha-ad idalli law di bebley da dedan ni indawat kun aammed dan hi Jacob e bega-en ku. <sup>26</sup> Et mampemehwat idallin baballey dad Israel niya pantaneman dadda pupuyek da. Melinggep idalli law ni mambebley di diman, tep kastiguet ida dinagsi dan kamemippihul ni hi-gada. Yan nunman ali law pengamtaan idan helag Israel e hi-gak hi APU DIOS e Dios da.’ ”

## 29

#### *Ya neipeamtan lawah ni meippahding ni Egypt*

<sup>1</sup> Yan eman ni meikkeppulut dewwan aggew ni kapulun bulan ni kapulun toon meippalpun neilawwan mid Babilon ey immehel mewan hi APU DIOS ni hi-gak ey kantuy <sup>2</sup> “Hi-gam e helag ni tuu, mu peamta hu lawah ni meippahding alin patul di Egypt niyadda bimbebley diman. <sup>3</sup> Ehel mu e hi-gak e AP-APU e Eta-gey ni peteg ey kangkuy ‘Hi-gam e patul di Egypt ni heni buhayyan kamanluklubub di Wangwang e Nile ey e-helen ku e hi-gak hu buhul mu.’ Kammu ni-nganguy ‘Wangwang ku hu Nile tep hi-gak hu nengapya!’ <sup>4</sup> Nem e-kalen dakadman e Wangwang e Nile tep benwiten dakan hi-gak et mailegat ida edum ni deleg ni meipket di hiphip mun pengiddekkalan daka. <sup>5</sup> Bebkahen daka et mekakbeb kad mamegan puyek di desert et makiketey ida etan edum

ni deleg ni ketteyyan mudman. Eleg meikku-ku hu annel mu et mena-yun ni meippullay di puyek ma-lat panhin-e-kanan idan sisit niyadda animal di muyung.

<sup>6</sup> Et yan nunmman ali pengamtaan idan emin ni tutu-ud Egypt e hi-gak hu AP-APU. Yan eman ni kapenepulliddan helag Israel ni baddang mu ey heni ka katlubbung. <sup>7</sup> Hi-gam hu indidinel dan umbaddang ni hi-gada, nem kaney ihhehka dakan panhulkud da ey nahpung ka kumedek et masibik hu yekyekkan da et man-egah ida et mahpung beneg da.

<sup>8</sup> Et humman hu, hi-gak e AP-APU e Eta-gey ni peteg ey kangkuy: Peellik hu mengubbat ni hi-gam et pampateyen dadda tutu-um niyadda animal mu. <sup>9</sup> Em, mebel-ah ali hu bebley di Egypt et pengamtaan idan bimmebley di diman e hi-gak hu AP-APU.

Kammuy hi-gam hu kan Wangwang e Nile tep kammuy hi-gam hu nengapya, <sup>10</sup> et humman hu, nambalinnak ni buhul mu niya buhul daman nunman e wangwang. Bahbahaen ku hu Egypt et mambalin ni endi silbitu meippalpuud Migdol di appit ni north ingganah di Aswan di appit ni south ingganah di pappeg ni Ethiopia. <sup>11</sup> Endilli law hu an mewennat ni tuu niya animal di diman tep endi hu an manha-ad diman ni na-pat ni toon. <sup>12</sup> Ebuah ali hu bebley di Egypt ni mekabbahbah di emin di bebley eyad puyek et mebel-ah ni na-pat ni toon. Emin ida etan nambebley di diman ey iwwahit kuddad kebbebley di puyek.

<sup>13</sup> Nem hi-gak e AP-APU e Eta-gey ni peteg ey kangkuy: Hedin melebbah hu na-pat ni toon ey nak idalli ewwiten di kebbebley ni nengiwewitan kun hi-gada et ienamut kudda <sup>14</sup> et mambebley ida mewan di Egypt di appit ni south e bebley da dedan. Nem endilli law kabaelan ni nunman e bebley da. <sup>15</sup> Yad nan-ap-apan idan aap-apu dadda ey humman idalli hu kekakkappuyan ni emin eyad ta-pew ni puyek et endilli law hu kabaelan dan umpiliw ni edum ni bebley ey eleg dalli law hu kabaelan ni pambalin hu edum ni bebley ni mengu-unnud ni pinhed da.

<sup>16</sup> Niya eleg law ididdinnel ni Israel ey Egypt ni umbaddang ni hi-gada. Tep huyyan meippahding ni Egypt hu mengippeamtan hi-gada e neka-ihhalla hu da pengididdinelan ni Egypt niya yan nunman ali pengamtaan da e hi-gak hu AP-APU e Eta-gey ni peteg.”

#### *Ya penggepan Nebukadnessar ni Egypt*

<sup>17</sup> Yan eman ni lapun aggew ni lapun bulan ni meikkadwampulut pitun toon ni neilawwan mid Babilon ey immehel mewan hi APU DIOS <sup>18</sup> et kantun hi-gak ey “Hi-gam e helag ni tuu, hi Nebukadnessar e patul ni Babilon ey tu ginubat hu bebley di Tyre. Pinilit tudda sindalu tun mangkalgan mangkebel-at ni kalga et nemahhig ni nangkemukmukan hu ulu da ey nangeliputan hu pahhannan da, nem endi silbi tun da nengubatan ni nunman e bebley tep endi da inlan limmuddan bimmebley di diman. <sup>19</sup> Nem yan nunya ey hi-gak e AP-APU e Eta-gey ni peteg ey i-abulut kun hehgepen nan Nebukadnessar hu Egypt et tu pan-alen ni emin hu hipan nangkebalol ni ngunut di diman ni heni tangdan idan sindalu tu. <sup>20</sup> Em, iddawat ku Egypt ni hi-gatu, tep ya nengu-unnudan idan sindalu tun pinhed kun meippahding et da bahbahaen etan bebley di Tyre. Hi-gak e AP-APU e Eta-gey ni peteg hu nanghel idan nunya.

<sup>21</sup> Ey yallin nunman dama hu pengidwatan kun et-eteng ni kabaelan ni Israel ey beggaen dakalli e Ezekiel ni an mengippeennamtan hi-gada ni pinhed ku et amtaen dalli e hi-gak hi APU DIOS.”

## 30

#### *Ya pengastiguan APU DIOS idan iEgypt*

<sup>1</sup> Immehel mewan hi APU DIOS et kantun hi-gak ey <sup>2</sup> “Hi-gam e helag ni tuu, mu peamta eya e-helen ku e AP-APU e Eta-gey ni peteg. Kammuy: Ngannganih law hu kedettangan ni angettakut ni meippahding! <sup>3</sup> Em, ngannganih kedettangan nunman ni nagtud ni aggew ni pengastiguan APU DIOS ni hi-gayu. Yan nunman ali ey memunnumunnu niya umlelemyung hu katuutuud kebbebley. <sup>4</sup> Um-aliddalli hu mengubbat ni Egypt et dakel hu mangketey ey mebahbah ali humman ni bebley niya pan-ellan da limmun katuutuudman. Anin ni bebley di Ethiopia et meilleggat alid gubat.

<sup>5</sup> Yallin nunman e gubat ey mangketey ida sindalun iEthiopia, iLibya, iLydia, iArabia niyadda tutu-uk ni wadadman. Mekikkettey idalliddan sindalud Egypt.”

<sup>6</sup> Inhel dedan nan APU DIOS e kantu ey “Emin idalli etan sindalud edum ni bebley ni an memaddang ni Egypt ey mangketey idalli et endilli da ikkedhel niya da ippahhiyadman e bebley ni meippalpuud Migdol di appit tud north ingganah di Aswan di appit tud south. Hi-gak e AP-APU e Eta-gey ni peteg hu nanghel idan nunya. <sup>7</sup> Humman ni bebley di Egypt hu mekabel-ah di emin di bebley eyad puyek, tep mekabbahbah niya emin idalli hu kebbebley di nanlinikweh di diman ey mangkebahbah ida. <sup>8</sup> Ey amtaen idallin iEgypt

e hi-gak hu AP-APU ni panlelgaban kun bebley da niyan pemabhahan kuddan bebley ni kamemaddang ni hi-gada.

<sup>9</sup> Yallin nunman dama hu pengittu-dakan kun an mengippeamta Ethiopia e ngannganih law hu kedettengan ni aggew ni kebabhahan da dama. Ida kamekaddinnel nem nemahhig ali takut dan pengamtaan dan nengastiguan kuddan iEgypt.”

<sup>10</sup> Tep kan APU DIOS e Eta-gey ni peteg ey “Peellik hi Nebukadnessar e patul di Babilon ni an mengubbat ni Egypt et mangkatey ida hu dakel ni bimmebley niya ma-lat meendi hu kinedangyan da. <sup>11</sup> Hehgepen tu Egypt et bahbaha tu humman ni bebley ingganah mangkeippu-ul hu nangketey. Hi-gatu et yadda sindalu tu hu kebubungngetan di emin di sindalu. <sup>12</sup> Tetdukan ku hu Wangwang e Nile niya peellik ida humman ni iBabilon e lawah ni tutu-u ma-lat hi-gada man-ap-apudman niya ma-lat pakabbabhahan da humman ni bebley ni Egypt. Hi-gak e hi APU DIOS hu nanghel idan nunya.”

<sup>13</sup> Yahhuw mewan hu inhel nan APU DIOS e Eta-gey ni peteg e kantuy “Bahbaha kuddan emin etan kinapyan tuun dios dad Memphis. Endien ku damadda aap-apud Egypt niya petattakut kuddan emin hu tuudman. <sup>14</sup> Pannenneng kun mebahbah hu bebley di appit ni south ni Egypt ey lelgaben ku hu bebley di Soan niya kastiguan ku hu Tebes. <sup>15</sup> Bahbaha ku dama hu Pelusium e nekahhammad ni neluhud ni bebley gapu tep ya nemahhig ni bunget ku niya petteyan ku hu dakel ni tuud Tebes. <sup>16</sup> Em, lelgaben ku hu Egypt, panhelheltap kudda iPelusium, bahbaha ku hu Tebes niya petattakut kudda iMemphis. <sup>17</sup> Yadda hikken tun lalakid Heliopolis niyad Bubastis ey mangketey idad gubat. Yadda metdaan ey ellan idan buhul da et pambalin daddan kulebut. <sup>18</sup> Ya etan bebley di Tahpanhes ey henilli me-ngetan et heni mehephepan ni kulput ni pengendian kun kabaelan idan iEgypt ni daka ippahhiya. Niya emin idalli hu tutu-udman ey mambalin idan kelabut. <sup>19</sup> Humman idallin nemahhig ni pengastiguk idan iEgypt hu pengamtaan da e hi-gak hu AP-APU.”

#### *Ya neendian ni kabaelan ni patul di Egypt*

<sup>20</sup> Yan eman ni kapitun aggew ni lapun bulan ni meikkeppulut hakey ni toon neipalpu eman ni neilawwan mid Babilon ey immehel mewan hi APU DIOS et kantun hi-gak ey <sup>21</sup> “E-helen kun hi-gam e helag ni tuu, e kamei-ellig ni himpung ku hu ngamay ni patul di Egypt ey endi nenangun ni an memedbed ma-lat mapwahan et dammutun hantenged tu mewan hu ispadah. <sup>22</sup> Yan nunya ey hi-gak e AP-APU e Eta-gey ni peteg ey kangkuy ‘Buhul tuwak ni patul di Egypt. Hehpungen ku hu dewwan ngamay tu, ya etan nahpung et ya etan eleg mahpung, et ma-gah ispadah tu. <sup>23</sup> Niya emin ida etan bimmebley di diman ey iwahit kuddad kebebbebley eyad puyek. <sup>24</sup> Em, hehpungen ku hu ngamay ni patul di Egypt et mambakbaktad ey umpalalalak et matey tep ya nemahhig ni liput tu. Nem ya etan patul di Babilon ey pe-let ku et hi-gatu pengipatngedan kun ispadah ku. <sup>25</sup> Em, pe-let ku hu patul di Babilon et patnged kun hi-gatu ispadah ku et usalen tun an mengubbat ni patul di Egypt anin ni eleg tu han-ita-gey hu ngamay tu. Yan nunman alin aggew hu pengamtaan idan iEgypt e hi-gak hu AP-APU. <sup>26</sup> Iwwahit kuddallid kebebbebley et amtaan da e hi-gak hi APU DIOS.”

## 31

#### *Ya Egypt ey henin keyew e sedar*

<sup>1</sup> Yan eman ni nemangulun aggew ni katlun bulan eman ni meikkeppulut hakey ni toon ni neilawwan mid Babilon ey immehel mewan hi APU DIOS et kantun hi-gak ey <sup>2</sup> “Hi-gam e helag ni tuu, mu ehel nan patul di Egypt niyadda tutu-u tu eya pinhed kun e-helen ni hi-gatu e kangkuy ‘Endi hu hakey ni bebley eyad ta-pew ni puyek ni tu ingngehen hu kabaelan ni bebley yu! <sup>3</sup> Kayu kameiddingpat di et-eteng kabaelan tun bebley di Assyria ni nunman e kamei-ellig etan di kakkayyaggud niya mabulun ni keyew di Lebanon e sedar e dimmukkey et datngen tu kulput. <sup>4</sup> Eleg makulangan ni danum tep wada etan utbul ni kamenennun niya makyew di diman, et humman hu gaputun kayyaggud hu neettengan tu niya dimmukkey ni peteg. <sup>5</sup> Eta-gey niya mapenga ey ettateng pangetu nem yadda edum ni keyew tep eleg mekullangan danum. <sup>6</sup> Nambuyaan idan sisit pangetu ey nan-impahan idan nambakbaklang ni animal hu hengeg tu. Anin idan tutu-ud kebebbebley et nanhiduman da hengeg tu. <sup>7</sup> Kakkayyaggud hu kakyew tu ey andudukkey pangetu niya limmaw di nandallem hu lamut tu et datngen tu danum. <sup>8</sup> Huyya hu kekakkayyaggudan di emin ni keyew. Eleg han-ingnehen idan sedar winu edum ni keyew di garden kud Eden hu kakinayyaggud tu. Niya endi edum ni keyew ni tu ingngehen hu kadinukkey ni pangetu. <sup>9</sup> Hi-gak hu nengidwat ni kakinayyaggud ni ang-ang tu ey hi-gak hu nengipedakkel ni pangetu. Emin hu keyew di garden kud Eden ey ida kaum-ameh etan ni keyew.

<sup>10</sup> Nem yan nunya ey hi-gak e AP-APU e Eta-gey ni peteg ey e-helen kun hi-gayu hu neipahding ni nunman ni keyew ni neetteng et dumukkedukkey et datngen tu kulput. Tep yan neettengan nunman ni keyew ey kamampahhiya. <sup>11</sup> Et humman hu, inwalleng ku et beltanen ni ap-apud edum ni bebley ni et-eteng kabaelan tu. Et ipahding tu hu lebbeng ni meippahding ni nunman ni keyew tep ya lawah ni elaw tu. <sup>12</sup> Linggeh idan makabbunget ni tutu-ud edum ni bebley et metu-li et ipayyag dan neiwahhiwahhit hu pangetud nangkedecklan niyad nangkedunduntug. Nan-inhihiyanan idan etan ni kamanhihiddum di diman et mena-yun di netukkadan tu. <sup>13</sup> Emin ida etan sisit ni kaum-alidman ey daka pan-e-eppai humman ni nalngeh ni keyew niya kapanluklubiddan animal di muyung hu pangetudda. <sup>14</sup> Et humman hu, endi law hu keyew ni an um-anduandukkey et datngen tu kulput ma-lat mampahhiya, anin ni kayyaggud hu simmelan tu eleg mekullangin danum. Tep emin hu keyew ey kamettye, henin tuu e kamettye et kaumlaw di nandaul di dungay.’”

<sup>15</sup> Yahuy hu kan APU DIOS e Eta-gey ni peteg e kantuy “Yan neteyyan ni nunman ni keyew et lumaw di nandaul di dungay ey impasiked kudda danum di wangwang niyad kulukul tep ya tu neteyyan humman ni keyew et keang-angan tu e henidda kaumlelemung. Ey na-ngetan ni emin hu duntug di Lebanon niya anin idan keyew di diman et kimmehyaw ida. <sup>16</sup> Yan nengipelawwan kun nunman e keyew di nandaul di bebley ni netey ey nekakbeb et meigiwwed hu kebebbebley eyad puyek. Niya emin ida keyew di Eden, anin idan nalpud Lebanon ni kayyaggud ni keyew ni limmaw diman dungay ey ida kaman-am-amleng. <sup>17</sup> Neipelow ida damad dungay etan tutu-un nanhiduhidum etan di keyew et ida mei-dum di nangketey di gubat.

<sup>18</sup> Hi-gam e patul ni Egypt hu neieligan tu humman ni keyew. Tep meippahding alin hi-gam niyadda tutu-um eya neipahding ni nunman e keyew anin ni et-eteng hu kabaelan mu niya endi hakey ni tu ingnehen hu kasina-gey ni saad mu. Tep nanna-ud e mettey ka henin kameippahding ni emin ni keyew, anin idan keyew di Eden. Et humman hu, umlaw kalli damad nandaul di dungay e linawwan idan tuun angebe-hel ku e eleg menaydayaw ni hi-gak niyadda netey di gubat. Hi-gak e AP-APU e Eta-gey ni peteg hu nanghel idan nunya.”

## 32

*Ya etan patul ni Egypt ey kamei-ellig di buhayya*

<sup>1</sup> Yan eman ni nemangulun aggew ni meikkeppulut dewwan bulan ni meikkeppulut dewwan toon meippalpu eman ni neilawwan mid Babilon ey immehel mewan hi APU DIOS ni hi-gak e kantuy <sup>2-3</sup> “Hi-gam e helag ni tuu, mu ehel ni patul ni Egypt e kammuy ‘Hi-gak e AP-APU e Eta-gey ni peteg ey wada e-helen kun hi-gam! Kammu na-mu ngu nem heni kan layon ni muka pehpehding ni kebebbebley, nem ya kakulugan tu ey heni ka buhayya e kakillukillutan ebuh ni helim hu danum idad wangwang. Keknaen dakalli et paelik hu tutu-ud edum ni bebley ni an mempap ni hi-gam et idekal daka <sup>4</sup> di mamegan puyek et paelik ida sisit niyadda animal di muyung et panhin-e-kanan daka. <sup>5</sup> Iwahhiwahhit kullid kedunduntug hu annel mun kamangkebwel et yadda tu-ngal mud nampandeklanan tu. <sup>6</sup> Man-ayyuayyuh idallid deplah di kedunduntug hu kuheyaw mu et mangkapnudda kulukul. <sup>7</sup> Yallin nunman ni endien daka ey man-e-nget tep hennian ku hu kabunyan ni mahdel ni kulput et eleg dumilag ida bittuwen, ya bulan niya aggew. <sup>8</sup> Eggak pedillag ida humman ni kaumdilag di kabunyan ma-lat ma-ngetan hu bebley yu. Hi-gak e AP-APU e Eta-gey ni peteg hu nanghel idan nunya.

<sup>9</sup> Emin idalli hu katutuud edum ni bebley ni endi mu diddingngel ni meippanggep ni hi-gada ey umkel-ew idan pengipeamtaan kun neteyyan mu. <sup>10</sup> Umkenel-ew idalli tutu-ud kebebbebley ni pehding kun hi-gam. Et anin idallin papatul dadda et umgeneygey idan takut dan keittu-nudan da.’”

<sup>11</sup> Tep kan APU DIOS e Eta-gey ni peteg ey “Immen ali hu patul di Babilon ni an mengubbat ni hi-gam. <sup>12</sup> Peellik ida mangkabunget ni sindalu et usalen da hu ispadah dan memettye idan emin ni tutu-um et bahbahaen dan emin hu hipan muka ippahhiya. <sup>13</sup> Ey petteyen kuddan emin hu babakka yun impattul yud gilid idan kulukul ma-lat eleg ali law makilut hu danum di diman, tep meendi hu tutu-u niya animal di ditan e bebley! <sup>14</sup> Peyaggud ku danum idad wangwang ditan et meli-neng idalli law ni mabulbulubul. Hi-gak e AP-APU e Eta-gey ni peteg hu nanghel idan nunya. <sup>15</sup> Pambalin kulli hu Egypt e bebley mun endi silbitu, tep bahbahek ni emin hu mategudman. Yan nunman ali pengamtaan yu e hi-gak hu AP-APU.

<sup>16</sup> Huyyan meippeamtan meippahding ey mambalin alin a-appah ni kalemyungin tuu ni ia-appah ni kabiibiid kebebbebley ni lemyung dan neipahding ni bebley di Egypt

niyadda bimbley di diman. Hi-gak e AP-APU e Eta-gey ni peteg hu nanghel idan nunya.”

<sup>17</sup> Yan eman ni meikkeppulut liman aggew ni lapun bulan ni meikkeppulut dewwan toon meippalpu eman ni neilawwan mid Babilon ey immehel mewan hi APU DIOS ni hi-gak e kantuy <sup>18</sup> “Hi-gam e helag ni tuu, lemyung ka tep ya meippahding idan tutu-ud Egypt niya itu-dak kuddad nandaul di dungay e bebley ni netey et ida mei-dum di tutu-un nalpud edum ni bebley ni et-eteng kabaelan da. <sup>19</sup> Kammun hi-gada ey ‘Hi-gayun iEgypt, kaw kanyu nem kakkayyaggud ang-ang yu nem ya hu edum ni tuud edum ni bebley? Nem anin dedan ni kantu et kakkayyaggud hu ang-ang yu, et mettey kayu damengu et umlaw kayun an mei-dum ida etan di endi bilang tun tutu-u.’ <sup>20</sup> Nanna-ud ni mettey idan emin hu iEgypt tep nandadaddan ida buhul dan memettey ni hi-gada. <sup>21</sup> Kan idallin nelaing ni aap-apun sindalun wadad nandaul di dungay ni meippanggep idan iEgypt niyadda nemaddang ni hi-gaday: Immaliddadyan an mei-dum idan endi bilang tun tuu.

<sup>22</sup> Immen ida damad kulung da hu iAssyria niyaddan emin sindalu dan nangketey di gubat. <sup>23</sup> Immen hu kulung dad nandaul di dungay e kalawwin kamettey. Hi-gada lan nunman hu katattakusin katuutuu, nem yan nunya ey hinelikub idan sindalud bebley ni nemenaddang ni hi-gada. <sup>24-25</sup> Anin idan iElam e endi bilang tun tuu niyadda sindalu dadda nangketey di gubat et immen idadman di dungay e bebley ni netey e daka hahhallikubi humman ni bebley. Yan nunman ey nemahhig katattakutisiddan katuutuu humman idan iAssyria nem yan nunya kaya ey nemahhig baing da tep immen idad dungay e nei-dum idad nangketey di gubat.

<sup>26</sup> Anin ni di Meshek nan Tubal et immen ida damadman e hinelikub idan kulung ni sindalu da. Katattakusiddan tuun nunman, nem nunya ey immen idad nandaul e nei-dum idad endi bilang tun tuun nangketey di gubat. <sup>27</sup> Eleg ida meidaydayaw eman ni neteyyan da, nem neala et da i-dum daddad endi bilang tun tutu-u. Beken ni henidda eman ni nandingngel ni sindalun nebayag e kameiyayyaggud kulung da et daka pepunggan ni hi-gada hu ispadah da niya daka itta-pew di annel da hu happiyaw da. Yan ketagguddan nunyan sindalun ey impetattakut da hu tutu-ud kebebbebley.

<sup>28</sup> Hanniman damalli hu meippahding ni hi-gayun iEgypt e pampetteyen dakeyullidan mengubbat ni hi-gayu et kayu mei-dum ni meikkulung di kad-an idan endi bilang tun tutu-un nangketey di gubat.

<sup>29</sup> Immen ida damadman hu iEdom, anin idan papatul niya aap-apu dan nangkeikulung ida. Et-eteng hu kabaelan dan nunman, nem yan nunya ey immen idad dungay e nei-dum idad kulung idan endi bilang tun tuu.

<sup>30</sup> Immen ida damad kulung da hu aap-apud bebley di appit di north et yadda iSidon, tep netey idan emin di gubat. Yan nunman ey katattakusiddan tutu-u, nem yan nunya ey ida kamebabbaingin immen idad dungay e nei-dum idad endi bilang tun tuun nangketey di gubat.

<sup>31</sup> Ya etan patul di Egypt niyadda sindalu tu ey man-am-amleng ida law, tep beken ni hi-gadan ebuh hu manhelheltap. Hi-gak e AP-APU e Eta-gey ni peteg hu nanghel idan nunya. <sup>32</sup> Ma-nu tep hi-gak hu nengitu-dak ni patul di Egypt niyadda sindalu tun menattakut idan katuutuu, nem anin ni henin nunman impahding ku et mettey ida et mei-dum idan mekikkullung di nangketey di gubat idan endi bilang tun tuu. Hi-gak e AP-APU e Eta-gey ni peteg hu nanghel idan nunya.”

### 33

#### *Ya nenuduan APU DIOS nan Ezekiel ni mangguwalya*

<sup>1</sup> Immehele hi APU DIOS ni hi-gak ey kantuy <sup>2</sup> “Hi-gam e helag ni tuu, mu peamtaddan edum mu eya pinhed kun e-helen. Hedin pellaw ku hu buhul ni mengubbat ni bebley, ey ida kaumpili hu tutu-udman e bebley ni mangguwalya. <sup>3</sup> Et hedin ang-angen nunman ni guwalya e iyyaddalli hu buhul ey petnul tu hu tangguyp ni pengamtaan idan tuu e iyyaddalli buhul da. <sup>4-5</sup> Ya etan tuun dedngelen tu humman ni tangguyp, nem mangngengeh hay ey bahu tu ngu hedin petteyen da. Tep gullat ni hinengud tu ey dammutu et ni bimmesik et neihwang. <sup>6</sup> Nem hedin ang-angen etan ni guwalya hu kapengelliiddan buhul, ey eleg tu patnul hu tangguyp ni pengamtaan idan tutu-u, man hi-gatu pebehhul kun ketteyyan idan bimbley. Mannenneng hu liwat dan ketteyyan da, nem ya etan guwalya hu kambahul ni ketteyen da.

<sup>7</sup> Yan nunya ey hi-gam e helag ni tuu, hu pillien kun heni pangguwalyaddan helag Israel. Et humman hu, dengel mu eya e-helen kun hi-gam et ehelan mudda. <sup>8</sup> Tep hedin peamtak e mettey etan lawah ni tuu tep ya liwat tu, nem eleg mu e-heli ma-lat isiked



tun mengippahding ni lawah et eleg matey, man hi-gam hu kambahul ni ketteyyan tu.<sup>9</sup> Nem hedin e-helan mu humman ni tuu, nem kapyu tu ngu dedan ni manghay et eleg tu issiked ni manliwwat, man endi ngu law hu bahul mu, anin ni mettey e nanengtu liwat tu.”

<sup>10</sup> Entanni ey immehel mewan hi APU DIOS et kantun hi-gak ey “Hi-gam e helag ni tuu, ida kamanlilih hu tutu-ud Israel et da-ak kapebehuli e kanday ‘Eleg mi law han-isipel hu nemahhig ni kastigu mid liwat mi. Hipa anhan inna-nu min meteggu?’

<sup>11</sup> Ehel mun hi-gada e hi-gak e AP-APU e Eta-gey ni peteg niya wadan ingganah ey eggak man-am-amleng ni ketteyyan ni neliwatan ni tuu. Ya pinhed ku ey issiked nunman ni tuun manliwwat ma-lat mannananeng hu biyag tu. Et humman hu, hi-gayun tutu-ud Israel, isiked yun manliwwaliwwat. Kaw pinhed yun mettey?

<sup>12</sup> Hi-gam e helag ni tuu, ehel muddan tutu-um ni helag Israel e hedin nanliwat hu kayyaggud ni tuu, man eleg mabalin ni an meihwang tep yadda kayyaggud ni impahding tun nunman. Ey hedin issiked ni lawah ni tuun mengapkayan lawah, man meliwwan hu liwat tu et eleg mekastigu. Nem pidwaen kun e-helen e hedin issiked etan ni kayyaggud ni tuun mengippahding ni kayyaggud et ya panliwwatan tu hu pehpahding tu, man eleg nisi mabalin ni meihwang tep ya kayyaggud ni impahding tun nunman.

<sup>13</sup> Anin na-mun hammaden kun e-helen etan ni kakkayyaggud tuka pehpahding ni tuu e meittu-u, nem hedin ididdinel tu hu kayyaggud ni impahding tun mengihwang ni hi-gatu et penghel tuy anin ni manliwwaliwwat mewan, man ipatey tu humman ni liwat tu, tep endi law bilang tun hi-gak ida kayyaggud ni impahding tun nunman. <sup>14</sup> Ey anin na-mun inhel ku e mettey etan lawah ni tuun kamanliwwaliwwat, nem issiked tun mengippahding ni lawah et ya kayyaggud law kapkapyen tu, <sup>15</sup> e henin pengibbangnadan tun imbalal dan hi-gatu hedin pinhed dan bangngaden, winu ya pengibbangnadan tun sinekew tu hedin wada niya pengissikedan tun manliwwaliwwat, nem u-unnuden tudda hu tugun kun kakelpuin biyag ni endi pappeg tu, man eleg mettey, nem mambi-biyag ni ingganah. <sup>16</sup> Em, tep liniwwan ku nanliwwatan tu et mambi-biyag tep kayyaggud niya neiptek hu impahding tu.

<sup>17</sup> Kan idan tutu-um ey ‘Beken ni limpiyuh hu kapehding nan Apu Dios.’ Nem ya kakulugan tu ey ya elaw da hu beken ni limpiyuh. <sup>18</sup> Pidwaen kun e-helen e hedin issiked ni kayyaggud ni tuun mengippahding ni kayyaggud et ya lawah hu pehpahding tu, man mettey tep ya nengipahdingan tun lawah. <sup>19</sup> Nem hedin issiked ni lawah ni tuu hu lawah ni elaw tu et ya kayyaggud law ipahding tu, man eleg mettey. <sup>20</sup> Hi-gayun helag Israel, kanyuy beken ni limpiyuh hu nakka pehding. Nem huwetan dakeyulli meippuun di impahding yu.

<sup>21</sup> Yan eman ni meikkelliman aggew ni kapulun bulan ni meikkeppulun dewwan toon meippalpun neilawwan mid Babilon ey wada etan tun bimmesik alid Jerusalem et umlin an mengidaddatteng ni hi-gak e hinggep idan buhul mi hu Jerusalem. <sup>22</sup> Yan nunman ni hileng et han dumteng etan tuu ey ginibek kun imbangngad APU DIOS hu ehel ku et dammutun nak law kaumhapit et makihummangan nak nunman ni tuun dintangan tun nawa-waan tu.”

<sup>23</sup> Kan APU DIOS ni hi-gak ey <sup>24</sup> “Hi-gam e helag ni tuu, kan idan tutu-un natdaan di nangkebahbah ni bebley di Israel ey ‘Yan nunman ey e-ebbuh ni hi Abraham, nem indawat nan APU DIOS ni hi-gatun emin eya bebley di Israel. Yan nunya ey dimmakkel itu law ni helag tu, et humman hu, nema-man iddawat APU DIOS ni hi-gatsu huayan bebley.’

<sup>25</sup> Ehel mun hi-gada e kammuy: Kan APU DIOS e Eta-gey ni peteg ey ‘Eleg mabalin ni kanyuy bebley yu huayan bebley tep yuka kenna hu detag ni nanengtu kuheyaw tu, ey yuka daydayawa hu dios ni kinapayan tuu niya yuka pampateyadda hu tuun endi bahul da. <sup>26</sup> Yuka ididdinel hu kabaalan yun mekigubbat niya emin hu yuka pehpahding ey nemahhig ni kamengippebungnet ni hi-gak. Wada hakkey ni hi-gayu ey yuka i-ulig hu beken yu ahwa. Nem ay kele ni-nganguy kanyuy bebley yu eya bebley?’

<sup>27</sup> Ehel mu mewan ni hi-gada e hi-gak e Eta-gey ni peteg ni AP-APU niya wadan ingganah ey kangkuy ‘Mettey idallid gubat humman ni tutu-ud nebahbah ni bebley. Yadda wadad a-allaw ni bebley ey kennen idan animal di muyung niya mangkettey idad degeh hu nampantalud leyang niyad kedunduntug. <sup>28</sup> Mebel-ah ali humman ni bebley tep pambalin kun endi silbitu et mepappeg hu kabaalan dan daka ipahhiya. Pambalin kudda duntug diman ni angettakkut et endilli law tuun an mandellan di diman. <sup>29</sup> Et yan nunman ali law pengamtaan da e hi-gak hu AP-APU tep ya humman ni nak pehding ni hi-gadan kastigu da.”

<sup>30</sup> Kan mewan APU DIOS ey “Hi-gam e helag ni tuu, yadda etan edum mun helag Israel ey hi-gam hu daka ung-ungbala hedin neamuamung idad etan di heggepan ni bebley

niyad dallin ni baballey da. Wada hakkey ni hi-gada ey kanday ‘Tayu puhlanan nan Ezekiel e prophet hedin hipa hu impeamtan APU DIOS ni hi-gatun nunya.’

<sup>31</sup> Henin nunman hu daka pehpehding e ma-nu tep ida kaum-alid kad-am mun an mengngel ni e-helem, nem eleg da pehding hu muka e-helan pehding da. Niya ma-nu tep kabbabal idan kaman-e-ehhel, nem eleg da issiked hu lawah ni elaw da e daka tellama edum da et pan-alen da limmu da. <sup>32</sup> Humman ni daka pehpehding ni hi-gam ey heni ka etan ni nelaing ni man-a-appah niya manggitalah e kakkayyaggud ni deddengngelen. Tep ma-nut daka deddengngela hu muka e-helan pehding da, nem anin ni hakey ew ngu et endi hu da inu-unnud ni an impahding.

<sup>33</sup> Nem yallin amnuan ni emin ni in-inhel mu, tep nanna-ud ni um-amnu, ey amtaen dalli law e prophet ka.”

## 34

### *Yadda heni kamampattul ni iisrael*

<sup>1</sup> Entanni ey immehel mewan hi APU DIOS et kantun hi-gak ey <sup>2</sup> “Hi-gam e helag ni tuu, mu ehel hu mekapkapyaddan etan ni aap-apun heni kamengipappattul idan tutu-uk ni helag Israel. Ehel mun hi-gada e kammuy ‘Kan nan APU DIOS e Eta-gey ni peteg ey: Hi-gayuddan heni kamampattul idan helag Israel, ey nanna-ud ni mekastigu kayu! Mebahbah kayulli tep eleg yu ippaptek ida hu yuka ippattul. Ida kameu-upa ey ma-nun hi-gayu tep kayu kamepeppehel. Kaw beken ni lebbengun ippaptek ni kamampattul hu tuka ippattul? <sup>3</sup> Heni kayu etan ni kamampattul ni kalneroh ni tuka pan-inuma gatas ni tuka ippattul niya tuka kapyaan kakkayyaggud ni balwasi tu hu dutdut da niya tuka palsiadda etan kekakkayyaggudan ni hi-gada ni inhide tu, nem eleg tudda ippaptek. <sup>4</sup> Eleg yu ipaptek ida etan nekapuy ey eleg yu agahan ida kamandedgeh niya neliputan ni hi-gada. Eleg yu mewan an hemmakadda etan kamehihi et ida kametellak. Ya bunget yu kumedek hu yuka peang-ang ni hi-gada et nemahhig ni daka panlelehani hu yuka pehpehding ni hi-gada. <sup>5</sup> Heni endi damengu kamengipappattul ni hi-gada, tep neihihilit ida et pangkanen idan animal di muyung hu edum ni hi-gada. <sup>6</sup> Neiwhhiwahhit idad kedunduntug niyad edum ni bebley eyad puyek nem endi kamenengngud ni an menemmak ni hi-gada.

<sup>7</sup> Et humman hu, hi-gayun aap-apun kamei-ellig di kamampattul, ey dengel yu eya e-helen kun hi-gayu.’ <sup>8</sup> Hi-gak e hi APU DIOS e Eta-gey ni peteg niya wadan ingganah ey kangkuy ‘Eleg yu ipaptek ida tutu-uk ni heni yuka ipappattul et kanen idan animal di muyung. Hi-gayu pinilik ni pampattul ku, nem eleg yu hanguden ni an hemmakan ida kalneroh kun netalak et mahkaw ida kalneroh ku, tep ya annel yu hu yuka ipapaptek. <sup>9</sup> Et humman hu, hi-gayuddan heni kamampattul ni kalneroh, dengel yu eya e-helen kun hi-gayu. <sup>10</sup> Hi-gak e Eta-gey ni peteg ni AP-APU ey e-helek ni hi-gayu e ibbilang dakeyun buhul ku ey pebehhuul kun hi-gayu hu neipahding idan kalneroh ku. Ihhehwang kudda kalneroh ku e ellan kudda ma-lat eleg yudda kanen. Eggak law i-abulut ni ya annel yun euh hu ippaptek yu niya eggak law i-abulut e hi-gayu hu mengipappattul ni hi-gada.

### *Ya kayyaggud ni kamampattul*

<sup>11</sup> Hi-gak e Eta-gey ni peteg ni AP-APU ey e-helen ku e hi-gak hu an menemmak idan kalneroh ku et ipaptek kudda. <sup>12</sup> Heni-ak etan ni kayyaggud ni kamampattul e tudda kaan emmunga kalneroh tu hedin newahit ida tep umlawwak et nak ida hamaken hu nangketalak. Nak panhemmakan ida et paenamut kuddan mangkelpudda kebebhebley ni neilawwan da. Humman ni aggew ni da neilawwan di edum ni bebley ey kamei-ellig etan di kaman-e-engngel niya kamangkukulput ni aggew. <sup>13</sup> Ippanguluk idan peniyanan daddan bebley ni neilawwan da et amungen kudda ma-lat ibangngad kuddad bebley dad Israel. Illaw kuddad emin di kebebhebley di diman Israel et iha-ad kuddad kakkayyaggud ni pampattulan di duntug niyad kulukul. <sup>14</sup> Henidda kalneroh ni nak ippattul di kedunduntug niyad nandeklanan tud Israel ni kayyaggud ni pampattulan. Dakel hu helek di diman niya melinggep ni pappangngannan da niya pambakbaktadan da.

<sup>15</sup> Hi-gak law mengipappattul ni hi-gada et ilaw kuddad pan-iiyyatuan da. Hi-gak e Eta-gey ni peteg ni AP-APU hu nanghel idan nunya.

<sup>16</sup> Nak hemmakan ida etan nangketalak, ey nak i-anemut ida nangkehihin eleg da amta lawwan da niya nak ang-angen ida etan nangkeliputan niya kamampandedgeh ma-lat panyaggud kudda. Nem hedin yadda etan mangkateban et-eteng kabaelan da, man bahbahen kudda. Hi-gak ni kamampattul ey neiptek hu nakka pehding.’

<sup>17</sup> Yahhuy hu kan APU DIOS e Eta-gey ni peteg, ni hi-gayun tutu-u tu. Kantuy ‘Hanhakkeyen dakeyun hummalyaen et appilen kudda hu kayyaggud niya lawah, henin

pengappilan kuddan kalneroh niya gelding. <sup>18</sup> Ya yuka pehpehding ey kamei-ellig di kalneroh e daka pillia hu kekakkayyaggudan ni helek ni kennen da ni nan-ideyapdap dadda etan eleg da kenna. Hanniman mewan hu danum e pandammuan tun imminum kayun meli-neng ey kinilut ni heli yu hu eleg yu inumen. <sup>19</sup> Et yadda law etan edum ni kalneroh ey ya etan neideyapdap ni helek hu daka kenna ey ya nekilut ni danum ni eleg da inumen hu daka innuma.

<sup>20</sup> Et humman hu, yan nunya ey hi-gak e Eta-gey ni peteg ni AP-APU ey e-helen kun hi-gayu e appilen kudda etan mangkateban kalneroh di nangkepigit. <sup>21</sup> Tep hedini yadda etan na-let man daka heksinga niya daka ha-dukadda hu nepigit niya neupan kalneroh et ida kaum-a-allaw et ida kamewehhit di neidawwin bebley. <sup>22</sup> Nem ippaptek kudda et eleg daddalli law panligligat niya appilen kudda etan kakkayyaggud di lawah, <sup>23</sup> ni hannak pinili hu hakey ni mampaptek ni hi-gadan henin nan hi David e bega-en ku et ipaptek tudda. <sup>24</sup> Et hi-gak e hi APU DIOS hu deyyawen dallin DIOS da ey ya henin bega-en kun hi David hu pan-ap-apu da. Hi-gak e hi APU DIOS hu nanghel idan nunya.

<sup>25</sup> Mekittebbalannak alin hi-gada et pelinggep kuddalli tutu-uk et eleg idalli law tumattakut niya man-iyyatudda e endilli law hu el-eleg ni an meippahding ni hi-gada. Anin ni mangkampuddad pattullan niyad muyung et endi tekkutan da, tep ebbulen kudda hu animal diman ni kamengippetekku ni hi-gada. <sup>26</sup> Mambebley idad duntug di kad-an ku ey iddawat ku panyaggudan da et henin udan e peellik hedini mahapul da. <sup>27</sup> Et yadda kaumlameh ittanem da ey manlemmeh ida, ey umyaggud iggaud da niya umlinggep idad pambebleyan da e endi mengubbat ni hi-gada. Yan nunman alin pengihwangan kun hi-gadad neihbutan da hu pengamtaan da e hi-gak hu AP-APU. <sup>28</sup> Eleg ali law mabalin ni an pan-ellan ni tutu-ud edum ni bebley hu limmu da niya eleg ida law kennen animal di muyung. Umlinggep ida law tep endi mengippetekku ni hi-gada.

<sup>29</sup> Pambalin ku law ni umtaha hu meitnem di puyek da ma-lat eleg ida maupa niya ma-lat eleg ida law pippihulen ni tutu-ud edum ni bebley. <sup>30</sup> Huyyalli pengamtaan da e hi-gak e Eta-gey ni peteg ni AP-APU e DIOS da ey nak ida kabaddangi. Hi-gak e AP-APU e Eta-gey ni peteg hu nanghel idan nunya. <sup>31</sup> Hi-gayun tutu-uk hu kalneroh kun nakka ippattul ey hi-gak hu DIOS yu. Hi-gak e Eta-gey ni peteg ni AP-APU hu nanghel idan nunya.' "

## 35

### *Ya neipeamtan lawah ni meippahding di Edom*

<sup>1</sup> Immehel mewan ni hi-gak hi APU DIOS ey kantuy <sup>2</sup> "Hi-gam e helag ni tuu, mu ehel idan iEdom hu angetakkut ni meippahding ni hi-gada. <sup>3</sup> Ehel mun hi-gada e hi-gak e Eta-gey ni peteg ni AP-APU ey kangkuy: Hi-gayun iEdom ey nambalinnak ni buhul yu! Pambalin ku bebley yun mebel-ah et endi silbitu. <sup>4</sup> Tep bahbahen ku et mambalin ni desert ma-lat pengamtaan yu e hi-gak hu AP-APU.

<sup>5</sup> Nampatey yudda helag Israel tep angebe-hel yuddan peteg, ey angehemmek ida dedangnu tep kinastiguk idad liwat da. <sup>6</sup> Et humman hu, hi-gak e Eta-gey ni peteg ni AP-APU niya wadan ingganah ey kangkuy: Nanna-ud ni mettey kayu! Eleg kayu meihwang di meippahding ni hi-gayu tep pimmatepatey kayu, et humman hu, mettey kayu dama. <sup>7</sup> Ey pambalin kun endi silbitu hu nangkedunduntug ni bebley yud Edom niya petteyen kuddan emin hu mandellan di diman. <sup>8</sup> Pepnuen kun annel ni nangketey hu kedunduntug, yadda nangkedeklan, yadda kulukul niyadda nangkehayyukung di bebley yu. <sup>9</sup> Ey mannenneng ni mebahbah hu bebley yu et endi law an mambebley di ditan. Yan nunman ali pengamtaan yu e hi-gak hu AP-APU.

<sup>10</sup> Tep kanyuy 'Pambalin tayu hu Israel niya Judah ni bebley tayu' anin ni wada-ak e hi APU DIOS da di diman. <sup>11</sup> Et humman hu, hi-gak e Eta-gey ni peteg ni AP-APU niya wadan ingganah ey kastiguen dakeyu tep angebe-hel yudda niya yudda kaibubbunget niya yudda kakeemmehi hu tutu-uk. Humman ni pengastiguan kun hi-gayu tep ya impahding yun hi-gada hu pengamtaan da e hi-gak e hi APU DIOS hu nengastigun hi-gayu. <sup>12</sup> Niya humman ali dama pengamtaan yu e hi-gak e hi APU DIOS ey dinggel ku hu nemahhig ni yuka pemippihul ni hi-gada e kanyuy 'Nebahbah ida kaya mewan! Henidida law mekkan ni pemegga ekmun!' <sup>13</sup> Beken ni ebuh humman tep dinggel ku mewan hu nemahhig ni yuka penaltalangan hi-gak.

<sup>14</sup> Hi-gak e Eta-gey ni peteg ni AP-APU ey bahbahen ku hu bebley yu et mambalin ni endi silbitu et man-an-anladda katuuuud kebebbbley ni nebahbahan yu, <sup>15</sup> henin nan-an-anlaan yun nebahbahan ni tutu-uk ni Israel. Et humman hu, mebahbah ali etan Duntug e Seir ey emin hu bebley di Edom ey mambalin ni endi silbi da. Yan nunman ali pengamtaan ni emin ni tutu-u e hi-gak hu AP-APU."

## 36

*Ya bendisyon nan APU DIOS ni Israel*

<sup>1</sup> Kan mewan APU DIOS ni hi-gak ey "Hi-gam e helag ni tuu, mu peamtaddan kedunduntug di Israel e kammuy: Dengel yu hu inhel APU DIOS e Eta-gey ni peteg. <sup>2</sup> Kantuy: 'Kan idan buhul yun daka pemippihul ni hi-gayu ey 'Hi-gami hu kan duntug idan duduntug yu.'

<sup>3</sup> Et humman hu, mu peamta eya pinhed kun e-helen e kammuy: Kan APU DIOS e Eta-gey ni peteg ey 'Yan nengubatan dakeyun buhul yud nambinbina-hil et mambalin kayun heni himbut idan tutu-ud edum ni bebley ey itek hu in-inhel dan meippanggep ni hi-gayu niya pinihupihul dakeyun hi-gada. <sup>4</sup> Et humman hu, hi-gayun duduntug, yadda nansigging, niyadda nangkedecklan niya hi-gayuddan nangkebabah niya nangkebel-ah ni nan-inhihi-yanan dan bebley ni kapan-impipihuliddan kebebbley di nanlinikweh, dengel yu eya e-helen ku e Eta-gey ni peteg ni AP-APU: <sup>5</sup> Nemahhig hu bunget kuddan tuudman e bebley, nema-madda hu iEdom tep ida kamampan-an-anla ni nangegepan dan bebley ku et da pan-alen hu wadaddad halun ku.'

<sup>6</sup> Et humman hu, peamtam mewan idan emin di bebley di Israel, yaddad duduntug, yad nansiggingan tu niyad nandeklanan tu e hi-gak e Eta-gey ni peteg ni AP-APU ey kangkuy 'Nemahhig hu bunget ku tep ya impahpahding idan tutu-ud kebebbley e nan-impipihulan dakeyu niya bineibeing dakeyu.' <sup>7</sup> Hi-gak e APU DIOS e Eta-gey ni peteg ey issapatah ku e kastiguen kudda humman ni bebley et helheltapen da dama pehding kun kebe-ingan da.

<sup>8</sup> Nem hedin yadda tuuk ni iIsrael ni ngannganih law hu ennamutan da, man wada kennen dan keibbangngadan da, tep manlemmeh ida keyew ni kamekkan lameh tu. <sup>9</sup> Ippapte dakeyun tutu-uk niya ang-angen ku ma-lat maeladu niya matenaman hu puyek yu. <sup>10</sup> Pedakkel dakeyun helag Israel niya manha-ad kayu eyad bebley yu ma-lat iyayyaggud yudda hu nangkebabah ni bebley yu. <sup>11</sup> Em, pedakkel dakeyun tutu-uk niya umhegyab dama ippattul yu. Hehlagen kudda u-ungnga yu ma-lat maduman hu kadinakkel yun nunman. Pambebley dakeyu eyad bebley yu ngu dedan niya pekeddangyan dakeyu et pengamtaan yu e hi-gak hu AP-APU. <sup>12</sup> Ibbangngad tutu-uk et mambaley kayu eyad bebley yu. Hi-gayu mengippuyek eyan puyek yu niya eleg idalli law meu-upa hu u-ungnga yu ey inap-apu yu.'

<sup>13</sup> Hi-gak e Eta-gey ni peteg ni AP-APU ey kangkuy: Daka kapippihuladdan edum ni bebley e kanday 'Ya bebley di Israel ey tuka kenna tuu tu niya tuka tellaka hu u-ungnga!' <sup>14</sup> Nem meippalpun nunya ey eleg tellakan nunyan bebley hu u-ungnga ey eleg law mengngan ni tuu. Hi-gak e DIOS e Eta-gey ni peteg hu nanghel idan nunya. <sup>15</sup> Eggak law i-abulut ni pippihulen idan tutu-ud kebebbley niya da babbaingen huyyan bebley. Niya eggak law i-abulut ni an meapput di gubat huyyan bebley. Hi-gak e Eta-gey ni peteg ni AP-APU hu nanghel idan nunya."

<sup>16</sup> Entanni ey immehel mewan hi APU DIOS ey kantuy <sup>17</sup> "Hi-gam e helag ni tuu, yan eman ni kaweddadan helag Israel di bebley da ey impambalin da bebley dan angebebel ku tep ya lawah ni impenahding da. Humman ni lawah ni elaw da ey nakka ibbilang ni nelugit e heni etan ni kamelpud annel ni biin kabulabulan. <sup>18</sup> Nemahhig hu bunget ku tep ya lawah ni peteg ni impenahding dad bebley da e pimmatepatey ida niya dinenaydayaw dadda hu dios ni kinapyan tuu, et humman hu nengastiguan kun hi-gada. <sup>19</sup> Kinastiguk ida et iwehit kuddad edum ni bebley, tep yadda humman ni lawah ni impenahding da. <sup>20</sup> Nem emin di kebebbley ni neiwehitan da ey kameibabbaing hu ngadan ku tep kan idan katuutuu ey 'Tutu-un APU DIOS ida huuya, nem endi hu kabaelan tun mengippapte ni hi-gada et mukun dinegyun idan buhul dad bebley da.' <sup>21</sup> Nakka ikakkaguh hu ngadan kun bineibeing idan tutu-uk di kebebbley.

<sup>22</sup> Et humman hu, mu ehel ida helag Israel et kammuy: Kan APU DIOS e Eta-gey ni peteg ey 'Beken et ni lebbeng tun dakeyu ibbangngad di bebley yu, tep bineibeing yu ngadan kud kebebbley ni linawwan yu, nem i-anemut dakeyu tep ya kakinyaggud kun hi-gayu niya ma-lat keidaydayawan ku. <sup>23</sup> Peang-ang ku hu kakinyaggud kuddan tutu-ud kebebbley ni nemabbaingan yun ngadan ku. Et yallin pengippeang-angan kun kakinyaggud kun hi-gayu hu pengamtaan da e hi-gak hu AP-APU. Hi-gak e Eta-gey ni peteg ni AP-APU hu nanghel idan nunya.

<sup>24</sup> Tep dakeyu ewwiten di kebebbley ni neilawwan yu et ienamut dakeyud bebley yu. <sup>25</sup> Et heni dakeyu wakgihan ni malinih ni danum et maulahan hu heni lugit yun nengidaydayawan yuddan dios ni kinapyan tuu niya emin hu hipan lugit yu. <sup>26</sup> Hullulan ku hu wadad nemnem yu niyad puhu yu ma-lat yumaggud kayu e me-kal hu ngehay yu et mambalin kayun kamakangngu-unnud ni hi-gak. <sup>27</sup> Et u-unnuden yun emin hu

tugun ku ey pehding yun emin hu immandal kun pehding yu, tep weddaek ni hi-gayu hu Ispirituh ku.

<sup>28</sup> Et mambebiley kayud Israel e bebley ni indawat kuddan aammed yu. Hi-gayulli meibbillang ni tuuk ey hi-gak hu Dios yu. <sup>29</sup> Eleg dakeyulli law i-abulut ni mengippahding ni umlugit ni hi-gayu. Peyaggud ku hu hipan ittanem yu ma-lat eleg kayu makulangan ni kennen yu. <sup>30</sup> Em pedakkel ku hu illameh idan keyew ni kamekkan lameh tu niyadda etan edum ni yuka ittanem ma-lat eleg kayu mabisil et eleg dakeyu babbaiangan idan tutu-ud kebebbley. <sup>31</sup> Et lektattuy igugguhu yu hu annel yu hedini ninemnem yudda etan lawah ni impenahding yun nunman ni nanliwtan yu. <sup>32</sup> Nem pinhed kun amtaen yu e hi-gayun tutu-uk ni iisrael ey beken ni kelebengan yu hu nak pengippahdingan idan nunya, nem ippahding ku ma-lat bumeing kayud lawah ni impahpahding yu. Hi-gak e Eta-gey ni peteg ni AP-APU hu nanghel idan nunya.' "

<sup>33</sup> Kan mewan APU DIOS e Eta-gey ni peteg ey "Hedin negibbuh ni heni nak inulahan hu liwat yu, man pambebiley dakeyu mewan di bebley yu dedan ma-lat iyayyaggud yudda etan nangebabbah. <sup>34</sup> Ey tenneman yuddalli law hu papayyew yu et beken ali law ni henin nunman e nanlatang et kapanhin-aang-angin kamelebbah. <sup>35</sup> Yallin pengibbangngadan dakeyu ey emin ali law hu tutu-u ey kanday 'Yan eman ni neiwallengan eyan bebley ey heni desert hu ang-ang tu, nem yan nunya ey heni garden di Eden. Anin idan nangebabbah ni bebley ni nunman et nangeiyayyaggud law ni neluhud niya nangebebleyan ida.' <sup>36</sup> Ey yaddalli etan natdaan ni tutu-ud bebley di nanlinikweh diman ey amtaen da e hi-gak e hi APU DIOS ey nakka iyayyaggud hu kamebabbah ni bebley niya nakka tennemin mangkateban kameitnem hu nebel-ah ni puyek. Tep hi-gak e AP-APU ey nakka ippahding hu inhel kun pehding ku.

<sup>37</sup> Hi-gak e Eta-gey ni peteg ni AP-APU ey kangkuy: Nandaddannak ni mengidwat ni hipan kekdewen idan helag Israel ni hi-gak. Dedngelen ku hu dasal da et henin kadinakkel idan kalneroh hu dakkelan da tep pedakkel kudda. <sup>38</sup> Et mapnu law ni tutu-u hu nangebabbah ni bebley dan nunman, et henin kakepnuin bebley di Jerusalem ni kalneroh hedini nedateng hu piyestah. Et yan nunman ali hu pengamtaan da e hi-gak hu AP-APU."

## 37

*Ya etan nedeklan e napnun nema-ganan ni tu-ngal*

<sup>1</sup> Entanni ey newada mewan hu Ispirituh APU DIOS ni hi-gak et ilaw tuwak di nedeklan ni napnun tu-ngal. <sup>2</sup> Impangupangulu tuwak et hinapen min emin humman ni nedeklan ey inang-ang ku hu hantapug ni nangkema-ganan ni tu-ngal ni nangeiwehit di puyek. <sup>3</sup> Kan APU DIOS ni hi-gak ey "Hi-gam e helag ni tuu, kaw dammutu mewan ni umtagudda huyyan tu-ngal et mambalin idan tuu?"

Hinumang ku et kangkuy "APU DIOS e Eta-gey ni peteg, hi-gam ni ebuh hu nengamtan humang ni nuntan!"

<sup>4</sup> Et kantuy "Ehel kan hi-gada et kammuy 'Hi-gayun nangkema-ganan ni tu-ngal, dengel yu eya e-helen nan APU DIOS ni hi-gayu. <sup>5</sup> Kantuy: Hi-gak e Eta-gey ni peteg ni AP-APU ey weddaek yayyah yu et tumegu kayu. <sup>6</sup> Ha-adan dakeyun laman yu, ya ulat yu, ya belat yu niya yayyah yu et mambangngad kayun mategu ma-lat pengamtaan yu e hi-gak hu AP-APU.' "

<sup>7</sup> Inu-unnud ku et ehelen ku humman ni inhel tu. Nakka man-e-ehhel ey pinhakkey ey wada dingngel kun kamampepsi ey ida kamangkaihuup hu tu-ngal di neihuupan da dedan ni nunman. <sup>8</sup> Nak ida kaitetekel ey kamangkewedda hu laman da ya ulat da niya belat da, nem endi ni yayyah da.

<sup>9</sup> Et kan mewan APU DIOS ni hi-gak ey "Kammun dibdib ey 'Hi APU DIOS e Eta-gey ni peteg ey mandalen daka e dibdib et umli ka, anin ni attu kelpuam, ma-lat yayyahan mudda eya annel ni netey et tumegudda.' "

<sup>10</sup> Et u-unnuden ku mewan humman ni inhel tu ey pinhakkeyey newada yayyah da. Entanni ey keeh-ehngeng idan henidda hantapug ni sindalu.

<sup>11</sup> Kan APU DIOS ni hi-gak ey "Hi-gam e helag ni tuu, huyyaddan tu-ngal ey ida kamei-ellig di helag Israel tep kanday 'Heni kami nema-ganan ni tu-ngal tep endi namnamah min meihwang ni edum ni aggew.' <sup>12</sup> Et humman hu, mu ehel idan nunman e tutu-uk e hi-gak e Eta-gey ni peteg ni AP-APU ey kangkun hi-gaday: Hi-gayun tutu-uk, ey tukwaban kulli kukullung yud bebley ni nanhimbunan yu et paukat dakeyu ma-lat ibangngad dakeyud Israel. <sup>13</sup> Et yallin nunman ni pengippeukkatan kun hi-gayud kulung yu hu pengamtaan yu e hi-gak hu AP-APU. <sup>14</sup> Weddaen ku hu Ispirituh kun hi-gayu et tumegu kayu et mambangngad kayud bebley yu. Yan nunman ali pengamtaan yu e hi-gak hi

APU DIOS. Huyyan inhel ku ey nanna-ud ni pehding ku. Hi-gak e Eta-gey ni peteg ni AP-APU hu nanghel idan kunya.”

*Ya keikkahhakeyan ali mewan ni Israel niya Judah*

<sup>15</sup> Immehel mewan hi APU DIOS et kantun hi-gak ey <sup>16</sup> “Hi-gam e helag ni tuu, ala kan dewwan keyew et itudek mud hakey hu ‘Huyya hu Judah’ ey intudek mud hakey hu ‘Huyya hu Israel’.” <sup>17</sup> Tenged muddan dewwa et panhuup mu hu utduk da ma-lat henidda hakey.

<sup>18</sup> Hedin puhdanan idan tutu-u hu keibbellinan tu humman, ey <sup>19</sup> ehel mun hi-gada e hi-gak e Eta-gey ni peteg ni AP-APU hu mengihhu-up ida etan ni dewwan keyew ni neitudkan ni Israel niya Judah et mambalin ni hakey ni keyew hu ang-ang tu. <sup>20</sup> Humman hu ipahding mu e tenged muddan dewwa et ita-gey mu ma-lat ang-angen idan katuutuu. <sup>21</sup> Ey han mu inhel ni hi-gada e kangkuy: Hi-gak e Eta-gey ni peteg ni AP-APU ey emmungen kuddallin emin hu tutu-uk ni helag Israel ni mangkelpud bebley ni neilawwan da et ibangngad kuddad bebley da. <sup>22</sup> Pangkakahhakey kuddallin ihha-ad di dudutug di Israel et hakey ali law ni ebuh hu patul da et endilli law da kegadwaan. <sup>23</sup> Ey eleg dalli law daydayawa hu dios ni kinapyan tuu niya eleg da ippahding hu daka panliwwasin kaumhulun ni eggak pengebbulusin hi-gada. Tep heni nak ullahan ida et malinihan ida ey baddangan kudda et eleg da law ipahding hu angebe-hel ku. Yan nunman ali hu pengibbillangan kun tuuk ida ey hi-gak ali law hu dios da.

<sup>24</sup> Yalli pan-ap-apuan ni ap-apu da ey henillin nan-ap-apuan lan David e bega-en ku niya hakey alin ebuh hu ap-apu da. \* Emin ali hu tugun ey peka-u-unnuden da.

<sup>25</sup> Mambbley idallid nambebleyan ida lan aammed da e humman hu bebley ni indawat kun nunman nan hi Jacob e bega-en ku. Yadman ali law pambebleyan dan ingganah, anin idan u-ungnga da niyadda inap-apu da. Yalli pampatul dan ingganah ey henilli eman ni bega-en kun hi David. <sup>26</sup> Mekittebbalannak ni hi-gada ma-lat wadalli law linggep dan ingganah. Iddawat ku hu kabaelan da niya hehlagen kudda et medakkel ida. Ang-angen ku ma-lat mannananeng ni meihha-ad di bebley dad Israel hu Tempol ku. <sup>27</sup> Mekihahha-addak ni hi-gadan helag Israel et hi-gak hu dios da niya hi-gada hu tuuk. † <sup>28</sup> Et yan nunman ali pengamtaan ni katuutuud kebebbbley e hi-gak e hi APU DIOS ey pinilik ida helag Israel ni pantu-uk tep ihha-ad kud Israel hu Tempol ku et mannananeng di diman ni ingganah.”

## 38

*Ya nengubatan nan Gog ni Israel*

<sup>1</sup> Immehel mewan hi APU DIOS ni hi-gak ey kantuy <sup>2</sup> “Hi-gam e helag ni tuu, mu peamta e kastiguen ku hi Gog e lawah ni ap-apud Meshek niyad Tubal di Magog. Ehel mun hi-gatu e kangkuy: <sup>3</sup> ‘Hi-gak e Eta-gey ni peteg ni AP-APU hu buhul mu e Gog. <sup>4</sup> Benwiten daka et ilaw dakad mu kebahbahan. Pekillaw kun hi-gam ida etan dakel ni sindalum ni nampangebayyu ey nanhappiyaw niya nampam-ispadah. <sup>5</sup> Mei-dum ni hi-gam ida hu iPersia, yadda iEthiopia niyadda iLibya e nampanhelmet ida niya nampanhappiyaw idan emin. <sup>6</sup> Ey mei-dum ida daman hi-gam etan ida sindalum iGomer, yadda iBet Togarmah di appit di north niyadda sindalud edum ni bebley.

<sup>7</sup> Pandaddan kayuddan dakel ni sindalum ni an mekiggubbat. Hi-gam hu pan-ap-apu dan mammandal ni hi-gada. <sup>8</sup> Yan edum alin aggew ey mandalen dakan an mengubbat ni bebley di Israel e neamungan idan dakel ni tutu-un nalpud edum ni bebley ni neilawwan da. Nambangngad idan nambebley di diman e melinggep law ni bebley ni binahbah ni gubat ni nunman et nebayag ni neiwalleng. <sup>9</sup> Umlaw kallit et yadda sindalum kamemaddang ni hi-gam et yudda gubaten e heni kayulli pewek niya heni kayu kulput ni meihhepkep di bebley da.

<sup>10</sup> Hi-gak e Eta-gey ni peteg ni AP-APU ey e-helen kun hi-gam e yan nunman alin aggew ey mannemnem kan lawah ni pinhed mun pehding et <sup>11</sup> kammulli ey: Nak gubbaten ida helag Israel ni kamakallinglinggep e endi luhud ni neihenid bebley da. <sup>12</sup> Nak hehgepen humman ni neigawwan bebley ni nebahbah ni nunman, nem ay napnu law ni tutu-un nampangngad ni nalpud dakel ni bebley ni neilawwan da et nak pan-alen hu kinedangyan da, tep dakel hu animal da, ya papayyew da niyadda hipan kaikkedangyan.’ <sup>13</sup> Nem yadda iSeba et yadda iDedan niyadda negosyanteh di Tarsis ey kandallin hi-gam ey: Kaw hipa kayun an memilliw ni silber da niya balituk da? Ey hipa kayun an memegnyun ni daka ippattul niya mengellan hipan wadan hi-gada ma-lat mambalin idan newetwet?

\* 37:24 37:24 Ang-ang yu hu 34:24. † 37:27 37:27 Ang-ang yu hu 2 Corinthians 6:16 et ya Rev. 21:3.

<sup>14</sup> Et humman hu, hi-gam e helag ni tuu, ehel mun Gog e kammuy 'Kan APU DIOS e Eta-gey ni peteg ey: Inamtak e Gog e hedim ang-angen mun melinggep ida tutu-uk ni helag Israel, man umlaw kan an mengubbat ni hi-gada. <sup>15</sup> Melpu kad neka-iddawwin bebley mud appit tud north et ipengulum hu hantapug ni sindalun nampantakkay di kebayyun melpud dakel ni bebley. <sup>16</sup> Et heni kayu kulput ni meihhepkep di diman ni bebley. Meippahding ali huyyan edum ni aggew ni pengittu-dakan dakan an mengubbat idan tutu-uk ma-lat peang-ang kun katuutuu hedim hipa-ak niya ma-lat peang-ang ku hu kakinayyaggud kun peteg eyad inhel kun pehding yu. Et yan nunman ali pengamtaan dad kebbebley e hi-gak hu AP-APU."

<sup>17</sup> Kan APU DIOS e Eta-gey ni peteg ey "Hi-gam e Gog hu inhel kun nunman idan bega-en kun prophets ni helag Israel ni kangkun ittu-dak kun mengubbat ni hi-gada, hedim medettengan hu aggew ni gintud ku."

<sup>18-19</sup> Kan mewan APU DIOS e Eta-gey ni peteg ey "Nem yallin pengubbatan nan Gog idan helag Israel ey nemahhig ali bunget ku et peellik ali hu na-let ni yegey ni mengiggiwwed ni Israel. <sup>20</sup> Et emin ali hu katuutuu, yadda deleg, yadda sisit niyadda animal ni ettateng niya ekka-ket ey umgeneygey idan takut da. Tep mangkegday idalli duntug et ya deplah niya mangketleb hu deplah, anin idan batun luluhhud. <sup>21</sup> Peellik alin emin hu hipan ligat ni mengippetekktu nan Gog et lektattuy nampapatey ida ngu hu sindalu tu. Hi-gak e Eta-gey ni peteg ni AP-APU hu nanghel idan nunya. <sup>22</sup> Kastigek hi Gog niyadda edum tu et mampandegheh ida niya mangkatey ida. Ey peellik hu naka-let ni udan, ya dallallu, ya apuy niya sulfur di kad-an di Gog niyadda sindalu tu et yadda sindalud edum ni bebley ni nemaddang ni hi-gatu. <sup>23</sup> Huyyalli pengippeang-angan kud emin ni katuutuu kebbebley ni kakinayyaggud ku niya kasina-gey ku. Et yallin nunman law pengamtaan da e hi-gak hu AP-APU."

## 39

### *Ya neapputan nan Gog*

<sup>1</sup> Immehel mewan hi APU DIOS e Eta-gey ni peteg ey kantuy "Hi-gam e helag ni tuu, mu ehel nan Gog e kangkun hi-gatuy 'Hi-gam e Gog e ap-apud Meshek niyad Tubal ey nambalinnak law ni buhul mu. <sup>2</sup> Peinnah dakad kelpuan mud appit tud north et palaw dakad duduntug di Israel. <sup>3</sup> Paggungek hu singged mun panam et ma-gah et endi law han-ipahding mu. <sup>4</sup> Emin kayuddan sindalun niyadda etan umbaddang ni hi-gam ey mettey kayun emin di duntug di Israel et pakan dakeyuddan sisit niyadda animal di muyung. <sup>5</sup> Em, mettey kayullid a-allaw ni bebley. Hi-gak e Eta-gey ni peteg ni AP-APU hu nanghel idan nunya! <sup>6</sup> Lelgaben ku hu bebley di Magog niyadda melinggep ni bebley idad gilig ni baybay ni kamemaddang ni hi-gam ma-lat pengamtaan yu e hi-gak hu AP-APU.

<sup>7</sup> Henin nunya pehding kun pengippeamtaak idan tutu-uk ni helag Israel ni ngadan kun kayyaggud ni peteg. Ey eggak ali law i-abulut ni an mebe-ing hu ngadan ku. Huyyalli pengamtaan idan tutu-ud kebbebley e hi-gak e kekkayyaggudan ni AP-APU hu Dios idan helag Israel. <sup>8</sup> Huyyan inhel kun meippahding alin hakey ni aggew ey nanna-ud ni meippahding, tep hi-gak e Eta-gey ni peteg ni AP-APU hu nanghel idan nunya.

<sup>9</sup> Yan nunman alin keippahdingan tu huyya ey um-ehep ida bimbebley di Israel et da pan-amungen hu nangkeiha-ad ni almas idan buhul da et pan-itungu da. Humman idallin da emmungen ni hahappiyaw, yadda pana, yadda pahul, niyadda bakdung ey dammutun penunggu dan pitun toon. <sup>10</sup> Eleg ali law mahapul ni ida mengew winu ida manlelgeh ni keyewen da tep wadadda humman ni almas ni penungnga da. Pan-ellan dalli dama law hu limmuddan buhul dan nampengalan limmu dan nunman. Hi-gak e Eta-gey ni peteg ni AP-APU hu nanghel idan nunya."

### *Ya neikulungan nan Gog*

<sup>11</sup> Kan APU DIOS mewan ey "Ya annel Gog niya annel idan sindalu tu ey peikkullung kudda etan di nandeklanan tud Israel ni kadellanan mampellaw di appit ni kasimmilin aggew di appit ni Netey ni Baybay. Nem meendilli law humman ni dalan tep mepnun kulung nan Gog niyadda etan hantapug ni sindalu tu. Yalli panggeddan ni tutu-un nunman e nedeklan ey 'Puyek idan sindalun Gog.'

<sup>12</sup> Umlaw alid pitun bulan hu pengikkullungan idan helag Israel ni emin ni nangketey et han ali law malinih hu ang-ang ni bebley da. <sup>13</sup> Emin idalli hu katuutuu ey mambabaddang idan mengikkullung idan nunman ni nangketey. Ey metettebal idalli helag Israel ni pengebbakan da, tep ya humman ni pehding kun mengippeang-ang ni dayaw ku. Hi-gak e Eta-gey ni peteg ni AP-APU hu nanghel idan nunya.

<sup>14</sup> Hedin negibbuh humman ni pitun bulan man wadaddalli mepillin an mandaladalan ni an menemmak ida etan ni tu-ngal ni eleg maikulung et ikulung dadda ma-lat mambalin law ni malinih hu bebley da. <sup>15</sup> Et hedin wada himmak dan tu-ngal ni tuun eleg maikulung man ha-adan dan malka hu dagsi tu ma-lat ang-angen ida etan ni nepilin kamangkullung et da ikulung etan di nedeklan ni neikulungan idan sindalun Gog <sup>16</sup> et malinih ali mewan law hu bebley da.” (Wadalli hakey ni bebley di diman ni ingngadan da hu ngadan idan sindalun Gog.)

<sup>17</sup> Immehel mewan ni hi-gak hi APU DIOS e Eta-gey ni peteg ey kantuy “Hi-gam e helag ni tuu, ayagim idalli emin hu sisit et yadda animal di muyung et umlidda et kanen dadda indaddan kun kennen da. Et-eteng ali humman ni piyestah ni mekapkapyad duntug di Israel tep pangkennen dalli dakel ni detag niya pan-innumen da hu kuheyaw idan tuu. <sup>18</sup> Em, pangkennen dalli laman idan nangketuled ni sindalu ey pan-innumen da kuheyaw idan aap-apun mangkettey e henidda nakleng ni lakkitun kalneroh, ey impah ni kalneroh niya gelding niya henidda mateban bakan nalpud Bashan. <sup>19</sup> Yan nunman alin pemetteyan kuddan nunman e tutu-un henidda neiappit ey pangkennen idallin sisit niyadda kaman-ayyam di muyung hu tabeda ingganah makaphel ida niya pan-innumen da kuheyaw da ingganah henidda nebuteng. <sup>20</sup> Em, um-alidda et iphel da annel idan nunman ni kekebayyu niyadda sindalu. Hi-gak e Eta-gey ni peteg ni AP-APU hu nanghel idan nunya.”

*Ya keiyayyaggudan ni bebley di Israel*

<sup>21</sup> Kan mewan APU DIOS ey “Yallin pengastiguan kuddan tuud puyek hu pengippeangan kun dayaw ku niya kabaelan ku. <sup>22</sup> Ey meippalpun nunman hu pengamtaan idalli law ni helag Israel e hi-gak hu AP-APU e Dios da. <sup>23</sup> Ey yan nunman ali law pengamtaan idan tutu-ud kebebheley e ya nanliwatan idan tuuk ni helag Israel hu nak nengiwallengan ni hi-gada et apputen idan buhul da et ilaw dadda hu natdaan di edum ni bebley. <sup>24</sup> Inwalleng kudda et meipahding humman ni hi-gada tep ya liwat da. Tep humman hu lebbngtun meippahding ni hi-gada.

<sup>25</sup> Nem yan nunya ey hi-gak e Eta-gey ni peteg ni AP-APU ey kangkuy: Hehmeken kudda et ibangngad kuddad bebley da, e mangkelpuddad bebley ni neihbutan da, et bendisyonan kudda ma-lat keang-angan ni kakinayyaggud kun peteg. <sup>26</sup> Umlinggep idalli law di bebley da e endi an mengubbat ni hi-gada, et liwwanen da nebabba-ingan dan nunman tep ya nanliwatan dan hi-gak, ey endilli law da tekkutan. <sup>27</sup> Ey yallin pengibbangngadan kun hi-gadan tutu-uk ni neilaw di bebley ni buhul da ey yan nunman ali pengippeangan kuddan katutuud kebebheley e hi-gak ey kayyagguddak ni peteg. <sup>28</sup> Yan nunman ali dama pengamtaan idan tutu-uk e hi-gak hu AP-APU e Dios da. Tep ma-nut impalaw kuddan henidda balud di edum ni bebley nem emmungek idallin emin et ibangngad kudda mewan di bebley da e endi hu an mehi-yan ni anin hakey. <sup>29</sup> Ey eggak ali law iwwalleng ida hu tutu-uk tep weddaek hu Ispiritu hu hi-gada. Hi-gak e Eta-gey ni peteg ni AP-APU hu nanghel idan nunya.”

## 40

*Neipeang-ang nan Ezekiel hu mekapyallin baluh ni Tempol di Jerusalem*

<sup>1</sup> Yan eman ni kapulun aggew ni lapun bulan ni meikkadwampulut liman toon meippalpun neilawwan min helag Israel di Babilon e yan nunman hu meikkeppulu et epat ni toon ni nansakupan idan iBabilon ni Jerusalem ey newadan hi-gak hu Ispiritu APU DIOS et ilaw tuwak di Israel. <sup>2</sup> Inlaw tuwak di ta-pew etan ni eta-gey ni duntug et nak i-ang-ang di appit ni south ey wada inang-ang kud hinangngab kun bebley ni dakel baballey. <sup>3</sup> Entanni et ihnup tuwak diman ey wada hu inang-ang kun tuun kaumhili e heni giniling. Kaman-eh-ehneng humman ni tuud heggeppan etan di bebley e wada singnged tun lekud.

<sup>4</sup> Kantun hi-gak ey “Hi-gam e helag ni tuu, pakadngel mu niya paka-ang-ang mun emin hu peang-ang kun hi-gam tep in-ali dakadya ma-lat ehelen muddan helag Israel ni emin hu ang-angen mu.”

*Ya etan eheb di appit ni kasimmlin aggew*

<sup>5</sup> Ya inang-ang ku ey wada etan Tempol ni eta-gey hu luhud tud nanlinikweh. Inukat etan ni tuu hu lekud tun hampulun piyeh kadinukkey tu et lekuden tu etan luhud ey hampulun piyeh ta-gey tu niya hampulu mewan ni piyeh hu hedel tu.

<sup>6</sup> Nanteyed et tu mewan lekuden etan heggeppan di appit ni kasimmlin aggew ey hampulun piyeh dama hu dukkey ni kadellanan umlaw di bawang. <sup>7</sup> Hedin lini-baham humman ni heggeppan ey wada neigawwan kadellanan nambina-hilan ni hantetlun



kuwaltuh idan kamangguwalya. Emin ida humman ni kuwaltuh ey nan-iingnegh ni hampupulun piyeh hu lekud ni dukkey da niya hekang da. Walun piyeh hu lekud ni hedel ni dingding ni neneldak idan nunman e kuwaltuh. Yad pappeg idan nunman e kuwaltuh idan guwalya ey wada mewan hu hampulun piyeh hu dukkey tun kadellanan lawwan di ehheppan di hinanggan etan ni Tempol.

<sup>8</sup> Lingkud etan ni tuu humman ni ehheppan di hinanggan Tempol <sup>9</sup> ey hampulut epat ni piyeh. Humman ni ehheppan ni wadad pappeg ni dalan di hinanggan Tempol ey epat ni piyeh hu hedel ni dingding tu.

<sup>10</sup> Nan-iingnegh hekang ida etan ni kuwaltuh idan guwalya di nambina-hil etan di kadellana niya nan-iingnegh hedel idan dingding ni neneldak idan nunman e kuwaltuh.

<sup>11</sup> Entanni mewan ey tu lingkud hu hekang etan ni kadellana ey dewampulut dewwan piyeh niya hampulut enem ni piyeh hu lakkeb ida etan ni dewwan lekbi etan ni ehheppan. <sup>12</sup> Ya etan ehbabban dingding di hinanggaddan kuwaltuh idan guwalya ey dewampulun pulgadah hu ta-gey tu niya dewampulu mewan ni pulgadah hu hedel tu. Humman idan kuwaltuh idan guwalya ey hampupulun piyeh hekang da.

<sup>13</sup> Lingkud mewan nunman ni tuu hu nambattanan ida etan ni kuwaltuh di nambina-hil etan di kadellana ey na-pat et dewwan piyeh. <sup>14</sup> Lingkud tu mewan etan ehheppan di pappeg ni kadellana ey telumpulu et epat ni piyeh hu hekang tu. <sup>15</sup> Ya lekud ni dukkey ni kadellana meippalpuud dingding tu ingganah di ehheppan ey newalu et epat ni piyeh. <sup>16</sup> Hedin yadda etan tellun kuwaltuh idan guwalya, man wada ekka-ket ni habhabyen dan henin habhabyen di ehheppan. Yad dingding etan di kadellana ey wada hu neipaot ni al-alkus tun heni palmah.

<sup>17</sup> Entanni mewan ey inlaw tuwak nunman ni tuud dallin ni Tempol e indalan mi etan di eheb. Ey wada inang-ang kun telumpulun kuwaltuh di nanlinikweh di dallin ni Tempol. Humman idan kuwaltuh ey naka-ittumuk idad luhud e inhangga da etan di nanlinikweh ni nedalipeyan ni batun kadellanad <sup>18</sup> nengin-ehpen ni dallin. <sup>19</sup> Lingkud mewan etan ni tuu hu dallin di nengin-ehpen ni meippalpuud ehheppan di diman ingganah lad heggeppan di nengin-ahpat ni dallin ey hanggatut et na-nem et walun piyeh.

<sup>20</sup> Entanni ey tu lingkud etan heggeppan ni inhangga tud north ni impalaw etan di nengin-ehpen ni dallin. <sup>21</sup> Wada mewan di nambina-hil etan ni kadellana hu hantetlun kuwaltuh idan kamangguwalya. Ya lekud ni hekang idan nunman ni tellun kuwaltuh di kadellana ey naka-ingnegh di lekud idan wadad heggeppan di appit ni kasimmilin aggew. Humman idan kuwaltuh ey nehenelheldak idan dingding. Ya lekud ni dukkey etan ni kadellana ey newalu et epat ni piyeh niya na-pat et dewwan piyeh hu hekang tu. <sup>22</sup> Yadda habhabyen etan di heggeppan niyadda etan neipaot ni al-alkus dan palmah ey nan-iingnegh ida etan ni wadad eheb di appit ni kasimmilin aggew. Huyyan heggeppan ey wadad pappeg etan ni kadellanad nengin-ahpat. Wada heni teyey ni pitu palekad tun dellanen ni mampeahpat di eheb. <sup>23</sup> Yad hinanggan eheb di dallin di nengin-ehpen ey wada mewan hu eheb ni mampellaw di dallin di nengin-ahpat ni henin etan ni eheb di appit ni kasimmilin aggew. Lingkud etan ni tuu hu nambattanan idan nunyan dewwan heggeppan ey hanggatut et nepitu et liman piyeh.

<sup>24</sup> Entanni mewan ey inlaw da-ak etan ni tuud kad-an etan ni eheb di appit di south. Lingkud tu etan dingding ni nunman e eheb et ya heggeppan tu ey neiingnegh ida etan di edum. <sup>25</sup> Wada dama habhabyen di bawang tu huyyan heggeppan. Ya lekud ni dukkey tu ey newalu et epat ni piyeh niya na-pat et dewwan piyeh hekang tu. <sup>26</sup> Wada etan heni teyey ni pitu palekad tun impeahpat di diman e heggeppan ni inhangga tu damad dallin ni Tempol. Yad dingding etan di kadellana ey wada hu neipaot ni al-alkus tun heni palmah. <sup>27</sup> Huyyan heggeppan ey wada mewan eheb tun mampellaw di dallin di nengin-ahpat. Lingkud etan ni tuu hu nambattanan da etan di meikkadwan eheb ey hanggatut et na-nem et walun piyeh.

<sup>28</sup> Entanni ey inlaw tuwak mewan etan ni tuud heggeppan di appit ni south ni mampellaw di nengin-ahpat ni dallin. Lingkud tu humman ni eheb ey neiingnegh lekud tuddad edum.

<sup>29-30</sup> Yadda kuwaltuh ni kamangguwalya, et ya balkon, niyadda etan nei-dah ni dingding tu ey neiingnegh hu lekud da di lekud ida etan ni nei-dah ni dingding di eheb. Niya wada dama habhabyen di bawang idan heggeppan. Ya bilang tun emin ni lekud ni dukkey humman ni heggeppan ey newalu et epat ni piyeh. Ey ya hekang tu ey na-pat et dewwan piyeh. <sup>31</sup> Ya etan heggeppan tu huyyan eheb ey inhangga tu etan di hakey ni dallin niya yadda dingding tu ey neal-alkusan ni pinaot ni heni palmah hu ang-ang tu. Wada etan heni teyey ni walu palekad tun impalaw di nengin-ahpat.

<sup>32</sup> Entanni mewan ey inlaw tuwak etan ni tuud heggeppan di nengin-ahpat ni dallin di appit ni kasimmilin aggew. Lingkud tu humman ni eheb ey neingnegh etan di edum hu hekang tu. <sup>33</sup> Ya hekang ida etan ni kuwaltuh idan kamangguwalya et ya etan heggeppan ni nunman e heggeppan niyadda etan nei-dah ni dingding ey neingnegh di hekang idan emin etan ni edum ni heggeppan. Wadan emin hu habhabyen da anin ida etan ni heggeppan. Ya lekud ni dukkey tu ey newalu et epat ni piyeh niya na-pat et dewwan piyeh hu hekang tu. <sup>34</sup> Humman ni heggeppan ey inhangga tud dallin di nengin-ehpen. Ey yadda dingding tu ey neal-alkusan ni pinaot ni heni palmah hu ang-ang tu. Wada etan heni teyey tu huyyan heggeppan ni walu palekad tun impalaw di nengin-ahpat.

<sup>35</sup> Entanni ey inlaw da-ak mewan etan ni tuud heggeppan di nengin-ahpat ni dallin di appit ni north. Lingkud tu ey neingnegh hu lekud tuddad edum ni eheb. <sup>36</sup> Wada dama kuwaltuh idan guwalya ey neal-alkusan damadda etan nei-dah ni dingding tu niya wada dama habhabyen etan ni heggeppan. Ya lekud ni dukkey tu ey newalu et epat ni piyeh niya na-pat et dewwan piyeh hu hekang tu. <sup>37</sup> Ya etan heggeppan ey inhangga tu etan di dallin di nengin-ehpen. Ey neal-alkusan mewan hu dingding tun pinaot ni heni palmah hu ang-ang tu. Wada etan heni teyey tun walu palekad tun impalaw di nengin-ahpat.

<sup>38</sup> Huyyan heggeppan ey wada habyen tun impalaw di kuwaltuh di appit ni north. Yadman hu pengullahan daddan annel ni animal ni kamei-appit nan APU DIOS. <sup>39</sup> Wada hu epat ni tebol ni handedwad nambina-hil etan di heggeppan ni daka pengiklengiddan animal ni kamei-appit ni kamegiheh niya kamei-appit tep ya liwat winu bahu. <sup>40</sup> Wada mewan hu epat ni heni nunman ni tebol di dallin di nengin-ehpen ni handedwad nambina-hil etan di heggeppan di appit ni north. <sup>41</sup> Walu nga-mut tun emin ida humman ni tebol ni daka pengiklengiddan animal ni kamei-appit. Han-e-pat hu wadad bawang tu niyad dallin. <sup>42</sup> Yadda etan epat ni tebol ni daka pengiklengin animal ni kagihheban kamei-appit ey pinehek ni batu hu kinapya da. Ya ta-gey da ey dewwampulun pulgadah ey hantetlumpulun pulgadah hu lakkeb da niya dukkey da. Yadman e tabol hu kakeihha-adiddan emin ni ngunut ni kameussal ni pengiddaddanan ni hipan mei-appit. <sup>43</sup> Wadaddad nanlinikweh ni dingding hu tellun pulgadah ni hableyyan ni kamekleng ni animal ni kamei-appit. Niya yaddadman e tabol hu daka pengihha-adiddan dewag.

<sup>44</sup> Entanni ey inlaw tuwak mewan etan ni tuud nengin-ahpat ni dallin. Wada dewwan kuwaltuh ni inhabyen dadman dallin di nengin-ahpat. Ya etan hakey ey neidagsid nengin-ahpat ni eheb di appit ni north e inhangga tud south. Ya etan hakey ey neidagsid nengin-ahpat ni eheb di appit ni south e inhangga tud north. <sup>45</sup> Kan etan ni tuun hi-gak ey "Ya etan kuwaltuh ni inhangga tud south hu panha-adan idan papaddin kamanggunnud Tempol. <sup>46</sup> Ey ya etan kuwaltuh ni inhangga tud north hu panha-adan idan papaddin kamanggunnud altar. Humman idan papaddi ey helag idan Sadok e helag Levi niya hi-gadan ebuh hu mei-ebbulu ni umhegep di Kuwaltuh ni kad-an APU DIOS ni mengippahding ni tuka pengunnu."

<sup>47</sup> Lingkud mewan etan ni tuu etan dallin di nengin-ahpat ey hanggatut et na-nem et walun piyeh hekang niya dukkey tu. Ya etan altar ey wadad hinanggan nunman e Tempol.

<sup>48</sup> Entanni ey inlaw tuwak kumangngu mewan etan ni tuud heggeppan ni Tempol. Lingkud tu mewan humman ey dewwampulu et epat ni piyeh hu hekang tu ey heyam ni piyeh hu ta-gey tu. Ya hedel ni nambina-hil ni dingding ey liman piyeh. <sup>49</sup> Wada etan heni teyey ni hampulu palekad tun mampeahpat di balkon. Humman ni balkon ey telumpulu et epat ni piyeh hu hekang tu ey dewwampulun piyeh hu ta-gey tu. Wada dewwan tukud ni hanhakkey di nambina-hil etan di kadellanadman.

## 41

<sup>1</sup> Entanni ey inlaw tuwak mewan etan ni tuu etan di nanggawwan kuwaltuh di Tempol. Lingkud tu dukkey ni kadellanan umlaw di bawang tu ey hampulun piyeh. <sup>2</sup> Ya etan habyen ni heggeppan ey hampulu et walun piyeh hekang tu. Ya hedel ni dingding tud nambina-hil ey walun piyeh. Lingkud tu humman ni nanggawwan kuwaltuh ey na-nem et walun piyeh dukkey tu ey telumpulu et epat ni piyeh hekang tu.

<sup>3</sup> Limmaw mewan etan di neihudek ni kuwaltuh et lekuden tu etan habyen ni heggeppan ey hampulun piyeh hekang tu ey hampulu et dewwan piyeh hu dukkey tu niya tellun piyeh hedel ni dingding tu. <sup>4</sup> Humman ni kuwaltuh ey neidagsi etan di neigawwan kuwaltuh ni umlaw di telumpulu et epat ni piyeh hu hekang tu niya dukkey tu. Kan etan ni tuu ey "Huyya hu Nekassantuh ni Kuwaltuh nan APU DIOS."

<sup>5</sup> Lingkud etan ni tuu hu hedel idan dingding ni Tempol ey hampulun piyeh. Wadadda ekka-ket ni kuwaltuh ni pitun piyeh hekang da e neida-it idad nanlinikweh etan ni Tempol. <sup>6</sup> Ya etan Tempol ey tellun gladah hu kasina-gey tu niya hantetlumpulu hu

kuwaltuh dan simmuun ida etan di heni palepag di nangginginillig di dingding. <sup>7</sup> Et hedin kaang-ang-anga etan dingding ni Tempol di dallin man heni nan-iinggeh hu hedel tu ingganah lad ta-pew tu. Wadad dallin etan neida-it di dingding ni heni teyney ni dellanen ni mampeahpat etan di dewwan gladuh. <sup>8-11</sup> Ya lekud ni dingding idan kuwaltuh ey walun piyeh hu hedel da. Wada hakey ni habyen ni kadellanan lawwan di kuwaltuh di appit ni north ni Tempol. Niya wada hakey mewan ni habyen ni dellanen ni lawwan idad kuwaltuh di appit ni south. Walun piyeh hu lakkeb ida etan ni heni palepag ni neituunan ida etan ni kuwaltuh di nanlinikweh ni Tempol. Ya etan tuping di nanlinikweh ni Tempol ey hampulun piyeh hu ta-gey tu. Ya hekang ni nambattanan etan ni tuping et yadda etan nanlinikweh ni kuwaltuh idan papaddid Tempol ey telumpulu et epat ni piyeh.

<sup>12</sup> Wada mewan hakey ni heni baley ni simmuun di hinanggan etan ni Tempol di appit ni kakelinnugin aggew. Ya hekang tu ey hanggatut et hampulut enem ni piyeh. Ya dukkey tu ey hanggatut et neliman piyeh niya heyam ni piyeh hu hedel ni dingding tu.

<sup>13</sup> Lingkud mewan etan ni tuu hu dukkey etan ni Tempol ey hanggatut et na-nem et walun piyeh. Ya hekang ni dallin tu ingganah di dallin etan ni hakey mewan ni simmuun ni baley ey hanggatut et na-nem et walun piyeh. <sup>14</sup> Ya hekang etan ni dallin di hinanggan Tempol di appit ni kasimmilin aggew ey hanggatut et na-nem et walun piyeh.

<sup>15</sup> Lingkud tu mewan hu dukkey etan ni simmuun di dingkuggan etan ni Tempol di appit ni kakelinnugin aggew et yadda kuwaltuh di appit ni kakelinnugin aggew niyaddad dingding di nambinengwah ey hanggatut et na-nem et walun piyeh.

Ya kuwaltuh di heggepan ni Tempol, et ya Nesantuh ni Kuwaltuh, et ya Nekassantuh ni Kuwaltuh ey <sup>16</sup> neita-kepan ni keyew hu dingding da meippalpu det-al ingganah di habhabyen. Ey emin ida etan habhabyen ey nangketa-kepan idan keyew. <sup>17-18</sup> Yadda dama etan dingding di bawang ni Tempol ey nangketa-kepan idan tabla meippalpu hengge tu ingganah di ta-pew idan etan ni habyen. Humman idan tabla ey wadadda nangeipaot ni al-alkus dan palmah niya heni anghel hu ang-ang da. Yadda etan al-alkus ni heni palmah hu ang-ang da ey neibenabbattan ida etan di anghel ni netenu-tu-nud di nanlinikweh ni kuwaltuh. Emin etan ida neipaot ni al-alkus ni heni anghel ey dewwa angah da. <sup>19</sup> Angah ni tuu hu hakey niya angah ni layon hu hakey e inwingi dad etan di heni palmah ni neial-alkus di nambina-hil. <sup>20</sup> Henin nunyan emin etan ida dingding meippalpu det-al ingganah di ta-pew idan habyen.

<sup>21</sup> Ya pamedingan etan ni habyen di neigawwan Nesantuh ni Kuwaltuh niyad Nekassantuh ni Kuwaltuh ey kuwadladuh. Yad hinangga etan ni neihudek ni kuwaltuh ey wada hu heni ang-ang etan ni <sup>22</sup> altar e keyew ni emin hu kapkapy tu. Emin hu tukud tu, niyadda kapkapy tud nanlinikweh et ya neituunan tu ey keyew hu nekapyaan da. Ya ta-gey tu ey liman piyeh niya epat ni piyeh hu lakkeb tu. Kan etan ni tuun hi-gak ey "Huyya mengippenemem idan tuun APU DIOS ni kaweda tud kad-an da."

<sup>23</sup> Yad Nesantuh ni Kuwaltuh niyad Nekassantuh ni Kuwaltuh ey wada hu dewwan nantu-nud ni habyen da. Ya etan hakey ey humman hu habyen ni mampellow di nanggawwan kuwaltuh, Ya etan neitu-nud ni habyen ey humman hu mampellow etan di neihudek ni kuwaltuh. <sup>24</sup> Humman idan dewwan habyen ey handedwa hu lekbi da e yad gawwetu pengigga-wian. <sup>25</sup> Wadadda hu palmah niya heni anghel ni neipaot idad habyen ni al-alkus dan henidda etan ni neialkus di dingding. Yad ta-pew etan di hinangngab ni balkon ey wada dimmewdew ni keyew ni heni neietep. <sup>26</sup> Huyyan balkon ey wadadda dama ekka-ket ni habhabyen tu niya dingding tun neal-alkusan idan palmah.

## 42

### *Yadda kuwaltuh idan padi*

<sup>1</sup> Entanni ey impangulu tuwak mewan etan ni tuu et umhiep kamid Tempol e indalan mid Eheh di appit tud north et lumaw kamid kad-an ida etan ni kuwaltuh di appit ni north di ngin-ahpat ni dallin ni Tempol.

<sup>2</sup> Ya dukkey idan nunyan emin ni kuwaltuh ey hanggatut et na-nem et walun piyeh niya newalu et epat ni piyeh hu hekang da. <sup>3</sup> Yadda etan kuwaltuh di pangil ey kameuhdungid nengin-ahpat ni dallin ni telumpulu et epat ni piyeh hu hekang tu. Yadda dama etan kuwaltuh di pangil tu ey kameuhdungidman etan nengin-ehpen ni dallin. Huyyaddan kuwaltuh ey nanhinnangga-an ida etan di meikkatun gladuh. <sup>4</sup> Ya etan kadellamad nambattanan idan nunyan kuwaltuh ey hampulu et enem ni piyeh hu hekang tu. Ya dukkey tu ey hanggatut et na-nem et walun piyeh. Yadda habyen da ey inhangga dad appit ni north. <sup>5</sup> Yadda etan kuwaltuh di meikkadwan gladuh ey

e-ekkeket ida nem yadda etan kuwaltuh di nemangulun gladuh tep ya etan ingkapyada kadellanad gawwa tud nambabattanan idan nunman e kuwaltuh di meikkadwan gladuh. <sup>6</sup> Humman idan tellun gladuh ey eleg ida matukudan tep nangga-tuga-tun idan simmuun di ta-pew da. Beken ni henidda etan ni baballey di dallin e nangketukudan ida. <sup>7</sup> Ya etan dallin di nengin-ehpen ey nedingdingan ingganah lad hinanggaddan kuwaltuh. Ya dukkey tu ey newalu et epat ni piyeh. <sup>8</sup> Neihuup huyyan dingding di kuwaltuh di dallin e ya lekud tu ey newalu et epat ni piyeh. Ya dukkey idan kuwaltuh di nengin-ahpat ni dallin ey hanggatut et na-nem et walun piyeh. <sup>9</sup> Ya heggeppan di diman e kuwaltuh hedin melpu kad nengin-ehpen ni dallin, man wadad appit ni kasimmilin aggew. <sup>10</sup> Yad appit tud south ni Tempol ey wadadda kuwaltuh ni netu-tu-nud di hinanggan dallin di nengin-ahpat. Huyyaddan kuwaltuh ey neiingnegh idadda etan ni kuwaltuh di north.

<sup>11</sup> Ya kadellanad hinanggaddan nunman ni kuwaltuh ey naka-i-ingnegh di kadellanad wadad appit ni north. Anin niya lekud da, ya kapkapyada niya habyen et nan-iingnegh idan emin. <sup>12</sup> Wada dama hu habyen di appit ni south di ehpen idan nunyan kuwaltuh di pappeg ni luhud di appit ni kasimmilin aggew.

<sup>13</sup> Kan etan ni tuun hi-gak ey "Yadda kuwaltuh di nambina-hil hu kuwaltuh idan padin APU DIOS. Yadman pengihha-adan daddan neieng-eng ni neiappit ni pagey, yadda neiappit tep ya liwat winu bahul tep neieng-eng ida nama humman ni kuwaltuh. Ey yadman hu pengangganan idan padin nunman idan neiappit. <sup>14</sup> Hedin um-ehpep ida padid kuwaltuh nan APU DIOS et umlaw idad dallin di nengin-ehpen, man mahapul ni e-kalen da etan neieng-eng ni daka ibbalwasid ngunu da et hullulan dan edum ni balwasi et han ida lumaw di kad-an idan neamung ni tutu-u."

<sup>15</sup> Ginibbuh etan ni tuun lingkud hu bawang ni Tempol ey impangulu tuwak et umhep kami e indalan mi etan di ehheppan di appit ni kasimmilin aggew et lekuden tu hu nanlinikweh. <sup>16</sup> Lingkud tu luhud di appit ni kasimmilin aggew ey walun gatut et napat ni piyeh. <sup>17-19</sup> Lingkud tu damadda etan luhud di appit ni north, yad south niyad appit ni kakelinnugin aggew ey nan-iingnegh hu dukkey dan emin. <sup>20</sup> Kuwadladuh humman ni neluhud tep hanwawalun gatut et na-pat ni piyeh hu lekud tud nambinbinahil. Humman ni luhud hu neneldak ni puyek ni neieng-eng nan hi Apu Dios et yadda puyek ni dammutun ussalen idan tuun pumbiyagan da.

## 43

### *Ya nambangnadan ni dayaw APU DIOS di Tempol*

<sup>1</sup> Entanni ey inlaw tuwak mewan etan ni tuu etan di eheb di appit ni kasimmilin aggew <sup>2</sup> ey pinhakkeyey inang-ang ku hu dayaw ni Dios idan helag Israel e kaumhilin peteg e nalpullid appit ni kasimmilin aggew. Heni bungug ni danum di baybay hu ehel tu niya kaumhili hu hi-law tud puyek. <sup>3</sup> Huyyan inang-ang ku ey heni la eman ni nemangulun inang-ang kun inlian APU DIOS et tu bahbahren hu Jerusalem niya heni la mewan eman ni inang-ang kud Wangwang e Kebar. Limmukbubbak di puyek ni nenang-angan kun nunman. <sup>4</sup> Immali humman ni kaumhilin dayaw APU DIOS di Tempol e indalan tud eheb di appit ni kasimmilin aggew.

<sup>5</sup> Entanni ey inlaw tuwak nan Ispirituh APU DIOS di nengin-ahpat ni dallin ni Tempol ey inang-ang ku e nehi-lawan hu Tempol ni dayaw APU DIOS. <sup>6</sup> Immehnegh etan tuun neidagsin hi-gak ey dingngel ku e immehel hi APU DIOS et kantun hi-gak ey <sup>7</sup> "Hi-gam e helag ni tuu, yadya yuddungan kun man-ap-apu niya yadya pengiddahyayan kun helik. Mekihha-addak idan tutu-uk ni helag Israel et hi-gak hu man-ap-apun ingganah ni hi-gada. Endi law ni hi-gada, anin idan patul da, hu meme-ing ni ngadan ku, tep ya daka pengidaydayawiddan edum ni dios niya daka pemehwasiddan daka penginnememiddan nangketey ni patul da. <sup>8</sup> Humman idan patul da ey naka-iddagsi dan ingkapyad Tempol ku hu baballey da et maka-ittumuk hu tukud niya habyen da et ebu hu dingding ni nambattanan da. Bineing da ngadan ku tep ya lawah ni peteg ni impenahding da, et humman nemahbahren kun hi-gada tep ya bunget ku. <sup>9</sup> Nem hedin issiked dan nunya law ni mengidaydayaw idan edum ni dios niya e-kalen dadda etan daka penginnememiddan papatul dan nunman, man mekihha-addak ni hi-gadan ingganah eyad bebley da."

<sup>10</sup> Intuluy APU DIOS ni immehel ey kantuy "Hi-gam e helag ni tuu, ehel muddan tutu-u hu meippanggep ni Tempol ku niya peang-ang mun hi-gada hu elaw ni kapkapyada tu mal amtaen da niya awatan da hu elaw tu, et bumeing idan liwat da. <sup>11</sup> Et hedin umbaing ida et mantuttuyyuddan impahpahding da, man peamtam ni hi-gada hu meippanggep etan ni Tempol ku et amtaen da hu meippanggep ni kapkapyada tu, ya ang-ang tu, ya eheb tu, ya lekud tu niya kakeihha-adiddan emin ni hipan kameihha-ad di Tempol. Ehel mun

hi-gada etan ida meunnud ni elaw ni pandaydayaw da ey itudek mudda humman ma-lat adalen da.

<sup>12</sup> Ya etan nanlinikweh di ta-pew ni duntug ey eleg mabalin ni wada an umlaw diman tep hi-gak ni ebuh hu neieng-engan tu humman ni duntug ni panha-adan ku. Huyya hu importanteh ni olden ni meunnud ni ingganah di Tempol.

*Ya meippanggep ni altar*

<sup>13</sup> Yahhuy hu lekud idan kapkapyan altar meippuun di kameunnud ni kapanlelkud: Ya etan heni kanal di nanlinikweh di hengeg ni altar ey dewampulun pulgadah hu hekang tu niya dallem tu. Ya etan sigil tu ey hampulun pulgadah ta-gey tu. <sup>14</sup> Ya lekud ni neituunan tu ey epat ni piyeh hu ta-gey tu meippalpuud puyek niya dewampulun pulgadah hu lakkeb tu. Ya etan nemangulun neiga-tun ey pitun piyeh ta-gey tu ey dewampulun pulgadah hu lakkeb tu. <sup>15</sup> Ya etan meikkadwan neiga-tun ey pitun piyeh dama hu ta-gey tu ingganah di ta-pew tu niya wadadda etan heni ha-duk ni dimmewdew di dugu tudda. <sup>16</sup> Ya ta-pew nunman ni altar ey kuwaddaduh e dewampulu et hakey ni piyeh lakkeb tu niya dukkey tu. <sup>17</sup> Ya etan nanggawwan neituunan tu ey kuwaddaduh dama e dewampulu et epat ni piyeh hu lakkeb tu. Wada etan kadellanan danum ni dewampulun pulgadah hu hekang tun neikapyad nanginginillig ni hampulun pulgadah hu ta-gey tu. Niya wada dama etan heni teyey ni kadellanan impeahpat etan di diman altar. Humman ni teyey ey inhangga tud appit ni kasimmilin aggew.”

<sup>18</sup> Kan mewan APU DIOS, e Eta-gey ni peteg, ni hi-gak ey “Hi-gam e helag ni tuu, yahhuy ida hu e-helen kun hi-gam ni meunnud ni pehdng yun man-appit ni kagihheba niya panwakgihan yun kuheyaw hedin megibbuh ni mekapy etan altar. <sup>19</sup> Yadda papaddin helag Levi e helag Sadok ni ebuh hu dammutun um-ali etan di kuwaltuh ni kad-an kun mengippahding ni pengunnuk eyad Tempol. Hi-gak e Eta-gey ni peteg ni AP-APU hu nanghel idan nunya. Idwasi yuddan kilaw ni lakkitun baka et iappit dan ke-kalan ni liwat da. <sup>20</sup> Um-aladdan kuheyaw ni nunman ni kilaw ni baka et wakgihan dadda etan epat ni heni ha-duk ni altar. Wakgihi da daman kuheyaw hu epat ni dugu et ya nanginginillig niya ta-pew ni etan nanggawwan neiga-tun ni kuwaddaduh hu lekud tu. Humman hu heni panlinnih yun altar ma-lat kakkayyaggud hu pan-appitan yun hi-gak. <sup>21</sup> Humman ni kilaw ni bakan i-appit yun hi-gak ni ke-kalan ni liwat ey mahapul ni i-e-hep yud a-allaw ni Tempol et yu giheben etan di neitudun pengiggihheban yu.

<sup>22</sup> Yan kewa-waan tu ey ala kayun lakkitun gelding ni endi degeh tu et iappit yu mewan ni ke-kalan ni liwat. Wakgihi yu daman kuheyaw tu etan altar niya ipahding yu hu elaw ni panlinnih ni henin impahding yun kuheyaw etan ni kilaw ni lakkitun baka. <sup>23</sup> Hedin negibbuh ni impahding yu huyya, man ala kayun kilaw ni endi degeh tun lakkitun baka niya lakkitun kalneroh <sup>24</sup> et i-li yu et ahinan idan padin et han da giheban i-appit ni hi-gak e AP-APU.

<sup>25</sup> Kewa-wa-wan pitun aggew ey ipahding yu hu kapan-appisin ke-kalan ni liwat, nem mahapul ni ya endi degeh tun lakkitun baka, ya gelding niya kalneroh hu i-appit yun hi-gak. <sup>26</sup> Mahapul ni kew-wa-wa ni nunman ni pitun aggew ey ipahding idan papaddi hu elaw ni panlinnih ni altar ni han da mewan inusal. <sup>27</sup> Hedin negibbuh humman ni pitun aggew, man dammutu law ni illapuddan padin man-appit di altar ni i-appit yun hi-gak ni kagihheba niya kahemmula ma-lat umamlenggak. Hi-gak e Eta-gey ni peteg ni AP-APU hu nanghel idan nunya.”

## 44

*Ya usal etan ni eheb di appit ni kasimmilin aggew*

<sup>1</sup> Entanni ey impangulu tuwak mewan etan ni tuu etan di eheb di dallin di appit ni kasimmilin aggew nem neilekbi <sup>2</sup> et kan APU DIOS ni hi-gak ey “Huyyan eheb ey meilekbin ingganah e endi tu keibbeghulan, tep huyya nandalnan ku e hi APU DIOS e Dios idan helag Israel. Et humman hu, eleg law mabalin ni wada an mengidlan di deya. <sup>3</sup> Nem yalli etan man-ap-apu ey dammutun umlaw di deya ni an mengangan ni neiappit ni hi-gak, nem mahapul ni iddalan tud etan di heggeppan ni kuwaltuh di pappeg tu.”

*Yadda mei-ebbulut ni umhegep di Tempol*

<sup>4</sup> Entanni ey inlaw tuwak etan ni tuud eheb di appit ni north di hinanggan Tempol. In-ang-ang ku etan di Tempol APU DIOS ey kaumhili dayaw tu. Et manlukbubbak di puyek <sup>5</sup> ey kan APU DIOS ni hi-gak ey “Hi-gam e helag ni tuu, ey entan tu liwwan eya inang-ang mu niya dengel mudda eya e-helen kun hi-gam ni olden ni meunnud eyad Tempol. Paka-immatumim ida etan dammutun mei-ebbulut ni umhegep niyadda etan eleg mei-ebbulut ni umhegep eyad Tempol.

<sup>6</sup> Ehel muddan mangkanghay ni helag Israel e hi-gak e Eta-gey ni peteg ni AP-APU ey kangkun hi-gada: Isiked yudda etan ida angebe-hel kun yuka pehpending. <sup>7</sup> Inggeb-at yun nengiwalleng ni nekitbalan kun hi-gayu. Hinibit yu eya Tempol ku tep in-abulut yun umhegep idan tsimpuh ni yuka pan-appisi hu tutu-ud edum ni bebley ni eleg makugit niya eleg mengu-unnud ni hi-gak. <sup>8</sup> Eleg yu u-unnuden hu olden ni indawat kun hi-gayun meippanggep ni pengidayawan yun hi-gak di Tempol ku. Tep ya impahding yu ey in-abulut yudda hu tuun nalpud edum ni bebley ni mengippangngulun ngunun intugun kun pehding yu. <sup>9</sup> Et humman hu, hi-gak e Eta-gey ni peteg ni AP-APU ey eggak i-abulut ni an umhegep di Tempol kudda hu tuud edum ni bebley ni eleg makugit niya eleg mengu-unnud ni hi-gak, anin ni yadda etan nekibebley ni hi-gayu.

*Ya pengastiguan APU DIOS idan helag Levi*

<sup>10</sup> Kastiguen kudda helag Levi niyadda edum dan helag Israel ni nengiwalleng ni hi-gak et yadda dios ni kinapyan tuu hu dinaydayaw da. <sup>11</sup> Dammutun panggunnuk idad Tempol et hi-gada pangguwalyak di eheb, ey hi-gada mengleng idan animal ni mei-appit ni hi-gak niya mansilbiddan edum dan tuu. <sup>12</sup> Nem hi-gak e Eta-gey ni peteg ni AP-APU ey issapatah ku e mekastigudda damengu tep impappangngulu dadda hu edum dan helag Israel ni menaydayaw idan dios ni kinapyan tuu et meliwtan ida. <sup>13</sup> Et eleg law mabalin ni ida meihnpud di kad-an kun mengippahding ni nakka pengunpun padi winu ida meihnpud di hipan nakka ibbilang ni neieng-eng ni hi-gak, winu ida umhegep di kad-an ku. Humman kastigu da tep yadda etan impenahding dan angebe-hel ku. <sup>14</sup> Nem hi-gada law menginggunnud edum ni kamengunnud Tempol.

<sup>15</sup> Nem hedini yadda etan padin nahlag nan Sadok e helag Levi ey nannananeng idan nansilbin hi-gak di Tempol, anin ni inwalleng da-ak idan edum dan helag Israel. Et humman hu, hi-gadan ebuh hu dammutun um-alid kad-an kun mengi-appit ni taba niya kuheyaw ni animal ni kamei-appit ni hi-gak. Hi-gak e Eta-gey ni peteg ni AP-APU hu nanghel idan nunya. <sup>16</sup> Hi-gadan ebuh hu umhegep di Tempol ku, ey hi-gada hu mengippahding idan pengunpun di altar niya hi-gada mengippahding idan kapehding di kapandaydayawin hi-gak.

<sup>17</sup> Hedin umhegep ida etan di dallin di ahpat, man mahapul ni ibbalwasi da etan kaibalwasin padi. Eleg mabalin ni da ussalen ida etan balwasin nekapyad dutdut ni kalneroh hedini manggunnuddad dallin winu yad bawang ni Tempol. <sup>18</sup> Mahapul ni ya nekapyad luput hu ibbalwasi da anin ni ya penget da et ya nandallem ni balwasi da. Niya mahapul ni eleg ida mamballikid. <sup>19</sup> Ey hedini um-ehep idad dallin di ehpen di kad-an idan tutu-u man mahapul ni manhullul ida ey e-kalen dadda etan imbalwasi dan nangngunud Tempol et iha-ad dadda etan di nengilinan ni kuwaltuh et ya etan balwasi da dedan hu ihhulul da, ma-lat eleg kap-en idan tutu-u etan nengilinan ni balwasi da et endi hu lawah ni mekapapyan hi-gada.

<sup>20</sup> Eleg mabalin ni ida mampemukmuk winu da pedukkey hu bewek da tep mahapul ni kakkayyaggud hu pu-lit da. <sup>21</sup> Eleg mabalin ni ida um-inum ni meinum ni lawwan dad dallin di ahpat ni da panggunnuan. <sup>22</sup> Eleg mabalin ni da ahwaen hu nekihi-yan ni bii. Mahapul ni ya ahwaen da ey ya etan biin endi ni an nengiuilig ni hi-gatu winu ya etan biin netey hu padin ahwa tu. <sup>23</sup> Mahapul ni ittutduddan nunman ni papaddi idan tutu-uk hu nambaklangan ni nengilinan niya eleg mangilinan et ya nambaklangan ni kameibbilang ni malinih niya beken ni malinih.

<sup>24</sup> Hi-gada mengippennuh ni panhahallaan idan tutu-un meippuun di tugun ku. Mahapul ni pannenneng dan u-unnuden ida in-olden kun meu-unnud ni meippanggep idad piyestah niyadda meippanggep di elaw ni aggew ni Sabaduh.

<sup>25</sup> Eleg mabalin ni an keppaen ni padi hu annel ni netey tep meibbilang idan beken ni malinih hedini. Nem hedini a-ammed tu, winu u-ungga tu, winu agi tun laki, winu agi tun biin eleg malehin, man dammutun keppaen tu. <sup>26</sup> Nem humman ni padi ey mahapul ni ippahding tu hu elaw ni kapanlinnih ma-lat maibilang ida mewani malinih. Niya hedini nelabah hu pitun aggew, <sup>27</sup> man mahapul ni umlaw di dallin di ahpat ni Tempol et iappitan tu hu liwat tu et han dammutu mewani manggunnud Tempol. Hi-gak e Eta-gey ni peteg ni AP-APU hu nanghel idan nunya.

<sup>28</sup> Hedin ya meippanggep ni beltanen idan papaddi, man hi-gak hu mengidwat ni mahapul da. Et mukun endi da beltanen ni pampuyyek da. <sup>29</sup> Hedin ya kennen da, man yadda kamei-appit ni pagey, yadda kamei-appit di liwat, yadda kamei-appit di bahu niyadda etan edum ni kamei-appit ni hi-gak. <sup>30</sup> Meidwat mewani hi-gada hu kekakkayyaggudan ni kamemengngulun kaillameh ni kaittanem idan tuu et yadda kamemengngulun yuka kapyaan alinah, niya emin hu kamei-appit ni hi-gak ey meidwat

ni hi-gada et mebendisyonan ida tutu-u. <sup>31</sup> Eleg mabalini ni da kenenan ida etan sisit winu animal ni nealay netey winu pintey ni edum dan animal.”

## 45

### *Ya negenedwaan ni bebley di Israel*

<sup>1</sup> Immehel mewan hi APU DIOS ey kantuy “Yallin kegennadwaan ni bebley yu et ika-peng yun emin ni helag Israel, ey mahapal ni wada dama meidwat ni hi-gak. Ya lekud tu ey umlaw di dewampulu et hakey ni kilometroh hu dukkey tu niya umlaw ni hampulu et enem ni kilometroh hu hekang tu. Emin humman ey mei-eng-eng ni hi-gak. <sup>2</sup> Yadman e puyek hu keibbehwatan ni Tempol kun kuwadladuh hu lekud tun walun gatut et na-pat ni piyeh hu hekang tu niya dukkey tu. Ya lekud tud nanlinikweh ey mahapal ni newalut epat ni piyeh hu hekang tu. <sup>3</sup> Yad pangil ni nunman e puyek ey mahapal ni lekud mu hu nehuluk ni dewampulu et hakey ni kilometroh dukkey tu niya nehuluk ni walun kilometroh hu hekang tu, et yadman hu keihha-adan ni Tempol kun panha-adak. <sup>4</sup> Mei-eng-eng huuyan puyek ni hi-gak ni panha-adan idan papaddin panggunnuk di diman et yadman pengibbehwatan dan baballey dadda. Ya pangil tu hu keikkapyaan daman Tempol ku. <sup>5</sup> Ya etan pangil tun hanniman dama lekud tu ey meidwat etan idan edum dan helag Levi ni manggunnud Tempol ma-lat pengibehwatan da daman baballey da.

<sup>6</sup> Ya etan dagsi tun nehuluk ni dewampulu et hakey ni kilometroh dukkey tu niya nehuluk ni epat ni kilometroh hekang tu ey panha-adan idan tutu-uk ni helag Israel ni neminhed ni manha-ad diman.

<sup>7</sup> Ya pappeg etan ni puyek ni meidwat ni ap-apuddan helag Israel ey meippalpudd dagsin Tempol di Jerusalem ingganah di appit ni kasimmin aggew e lebbahan tu hu Wangwang e Jordan niyad appit ni kakelinnugin aggew di Baybay e Mediterranean. Ya hekang tu huuyan puyek ey mei-inggeh di hekang ni puyek ni neidwat idan helag Israel. <sup>8</sup> Huuya hu meidwat ni pan-ap-apuddan helag Israel ma-lat eleg tu talamen niya eleg tu piliwen hu limmuddan tutu-uk. Nem hedin yadda edum ni bebley di diman man megennadwadda et ika-peng idan helag Israel.”

### *Ya olden ni u-unnuden ni man-ap-apud Israel*

<sup>9</sup> Kan APU DIOS e Eta-gey ni peteg ey “Nemahhig law nanliwaliwatan yu e aap-apud Israel! Isiked yu law ida hu lawah ni yuka pehpehdig e yuka tellama niya yuka pilliwa hu limmun edum yun tuu niya yudda kapillitan pe-kal di puyek da. Yadda law neiptek niya meandeng hu ipahding yu. Hi-gak e Eta-gey ni peteg ni AP-APU hu nanghel idan nunya. <sup>10</sup> Mahapal ni limpiyuh ni emin hu yuka panlelkud niya killohhan yu anin ida etan ni yuka panlelkud ni mamega niya danum. <sup>11</sup> Ya etan epah hu usal yun panlelkud yudda etan ni mamega ey ya etan bath hu panlelkud yun beken ni mamega. Mahapal ni ya homer hu meunnud di elaw ni panlelkud yu. Ya hakey ni homer ey nan-inggeh ni hampulun epah niya nan-inggeh dama hu hampulun bath di hakey ni homer. <sup>12</sup> Ya meunnud ni panlelkud yun bel-et ey ya shekel. Ya hakey ni shekel ey nan-inggeh ni dewampulun gerah niya ya na-nem ni shekel ey nan-inggeh ni hakey ni minah. †

<sup>13-15</sup> Hedin yadda i-appit yu, man heninnuy hu meunnud ni elaw tu: Hedin na-nem ni langgusih ni wheat winu barley hu ineni yu, man iappit yu hu hakey ni langgusih. Hedin hanggatut ni galon ni mansikan olibah hu inemung yu, man iappit yu hu hakey ni galon. Hedin wada dewanggatut ni kalneroh yun yuka ippattul di deya Israel, man iappit yu hu hakey.

Mahapal ni um-i-li kayu daman pagey ni mei-appit niya animal ni kagihheban mei-appit niyadda mei-appit ni kamehemmul ni keteklaan ni liwat. Hi-gak e Eta-gey ni peteg ni AP-APU hu nanmandal idan nunya.

<sup>16</sup> Mahapal ni emin ida tutu-ud Israel ey um-ilaw idan iddawat dan ap-apud Israel ni i-appit da. <sup>17</sup> Ya lebbeng tun meippahding ey ya etan ap-apu hu mengidwat idan mahapal ni mei-appit di hipan piyestah, henin Piyestah ni Kaketellakin Bulan, niyan Piyestah ni Nungew ni Sabaduh. Niya hi-gatu hu mengidwat idan kamei-appit ni kalan ni liwat, yadda etan kagihheba, yadda begah, yadda meinnun, niyadda mei-appit ni kamehemmul. Emin ida huuyan mei-appit ni keteklaan ni liwat idan helag Israel.”

<sup>18</sup> Kan mewan APU DIOS e Eta-gey ni peteg ey “Yan memengngulun aggew ni kamemengngulun bulan ey mahapal ni i-appit yu hu hakey ni lakkitun baka ni endin

\* **45:11** 45:11 Ya hakey ni homer ey nan-inggeh ni liman bushel winu hanggatut et walun litroh. Ya hakey ni epah ey nan-inggeh ni kagedwah ni bushel winu hampulut walun litroh. Ya hakey ni bath ey nan-inggeh ni lima et kagedwah ni galon. † **45:12** 45:12 Ya hakey ni minah ey nan-inggeh ni ngannganih ni kagedwah ni kiloh.

hekey hu degeh tu. Huyya hu elaw ni ippahding yun heni yu panlinnih ni Tempol.  
 19 Ellan ni padi hu kuheyaw ni animal ni neiappit ni liwat et iwakgih tuddad tukud ni Tempol, yaddad epat ni dugun altar niyaddad tukud ni eheb di dallin di nengin-ahpat.  
 20 Ipahding yu mewan huyya ni kapitun aggew ni nemangulun bulan ni ke-kalan ni liwat idan edum yun eleg da igeb-at winu eleg da amta. Huyya hu ippahding yu niya pannananeng yun eleg mehibbit hu Tempol.

21 Yan meikkeppulut epat ni aggew ni kamemenggulun bulan hu pengilleppuan yun Piyestah ni Passover. Mahapul ni eleg kayu mengngan ni sinapay ni neha-adan ni kamampelbag. 22 Yan etan ni lapun aggew nunman ni piyestah ey mahapul ni man-appit hu ap-apu yun baka ni ke-kalan ni liwat tu niya liwat idan emin ni tuu. 23 Ya lebbeng tun meippahding ey ya etan ap-apu hu mengidwat idan mahapul ni kamei-appit nan APU DIOS. Yan kewa-wa-wa ni nunman e pitun aggew ni piyestah ey mahapul ni um-alan pitun lakkitun baka niya pitun lakkitun kalneroh et giheben yun emin ni i-appit e hakehakey ni mukkel. Niya mahapul daman um-alan hakey ni lakkitun gelding ni mei-appit ni kapitun aggew ni ke-kalan ni liwat. Mahapul ni emin ida humman ni animal ni mei-appit ey endin hekey hu degeh da. 24 Mahapul mewan ni emin ida etan lakkitun baka niya kalneroh ey hanhakkeyen yun unnudan ni ngannganih ni hampupulun kiloh ni begah niya gadwan galon ni mansikan olibah.

25 Hedin yan Piyestah ni A-abbung ni kameippalpun meikkeppulut liman aggew ni kapitun bulan, man mahapul daman kewa-wa-wa ey man-appit etan ap-apu ni heniddan kamei-appit di liwat, ya kagihheban kamei-appit, niyadda kamei-appit ni begah niya mansikan olibah.”

## 46

1 Kan mewan APU DIOS e Eta-gey ni peteg ey “Mahapul ni meillekbin enem ni aggew ni hanlingguan etan eheb di appit ni kasimmilin aggew di dallin di ahpap, nem meibbeghul ni aggew ni Sabaduh e Nungew niyan Piyestah ni Kaketellakin Bulan. 2 Yan lawwan etan ni ap-apud Israel etan di kapan-appisi ey mahapul ni iddalan tud dallin di ehpen et lumaw etan di heggeppan et an maidagsin man-eh-ehneng etan di tukud ni eheb ey pan-i-appit etan ni padi etan ida kamei-appit ni kagihheba niya kahemmula. Ya etan ap-apu ey mahapul ni daydaywen tudman di eheb hi Apu Dios ni han la nambangngad mewan di dallin di ehpen. Eleg meillekbi etan eheb ingganah kehillingan tu. 3 Yan Piyestah ni Sabaduh e Nungew niyan Piyestah ni Kaketellakin Bulan ey mahapul ni manyu-ung idan emin hu katuutuud hinanggan etan ni eheb et daydayawen da-ak e hi APU DIOS. 4 Hedin mewan aggew ni Sabaduh e Nungew ey mahapul ni i-ali etan ni ap-apu hu endi degeh dan enem ni pakeetteng tun kalneroh niya hakey ni lakkitun kalneroh ni kagihheban kamei-appit. 5 Ya etan lakkitun kalneroh ey mahapul ni meunnudan ni ngannganih ni hampulun kiloh ni begah. Hedin yadda etan pakeetteng tun kalneroh man anin ni kumpulmih hu kedakkel ni begah ni mei-peng ni mei-unnud idan nunman. Mahapul mewan ni emin ida etan hampupulun kiloh ni begah ey meunnudan idan kagedwah ni galon ni mansikan olibah. 6 Yan Piyestah ni Kaketellakin Bulan ey mahapul ni i-appit etan ni ap-apu hu enem ni pakeetteng tun kalneroh, ya hakey ni kilaw ni lakkitun baka et ya lakkitun kalneroh, niya mahapul ni endin hekey hu degeh dan emin. 7 Mahapul daman unnudan tun ngannganih ni hampupulun kiloh ni begah humman lakkitun kalneroh niya etan kilaw ni lakkitun baka. Hedin yadda etan pakeetteng tun kalneroh man linggeman hu kedakkel ni begah i-unnud tu. Ya etan ngannganih ni hampulun kiloh ni begah ey mahapul ni unnudan tun kagedwah ni galon ni mansikan olibah. 8 Hedin umhehgep etan ap-apu, man mahapul ni iddalan tu etan di eheb niya hanniman daman e-hepan tu e mahapul ni ibbangngad tun iddalan diman.

9 Yan ellian idan tutu-un piyestah ni pengidaydayawan dan hi-gak e hi APU DIOS ey mahapul ni yadda etan mengidlan di north ni heggeppan da ey mahapul ni iddalan dad south ni e-hepan da. Hedin yadda dama etan mengidlan di south ni heggeppan da man mahapul ni iddalan dad north ni e-hepan da. Yadda etan tuun um-ehep ey eleg da iddalan di nengidlanan dan hinggepan da. 10 Ya etan ap-apu ey mahapul ni umhehgep idan emin hu katuutuu ni han himmegep. Niya mahapul mewan ni um-ehep idan emin hu tuu ni han immehep.

11 Mahapul ni emin di piyestah ey meunnudan ni ngannganih ni hampulun kiloh ni alinah etan mei-appit ni bulug ni baka winu lakkitun kalneroh. Hedin ya mei-unnud ida etan di mei-appit ni pakeetteng dan kalneroh, man anin ni kumpulmih hu kedakkel ni begah ni mei-unnud. Yadda dama etan mei-appit ni begah ey mahapul ni meunnudan idan kagedwah ni galon ni mansikan olibah.



<sup>12</sup> Hedin pinhed etan ni ap-apun iggeb-at ni man-appit nan APU DIOS ni kagihheba winu kahemmula ey meibbeghul etan eheb di appit ni kasimmilin aggew ni mampellaw di dallin di ahpat et dalanen tu. Ya i-appit tu ey nan-ingngeh di tuka i-appit ni piyestah winu yan aggew ni Sabaduh. Hedin negibbuh et immehep la, man meillekbi mewan humman ni eheb.”

<sup>13</sup> Kan APU DIOS mewan ey “Kekakkabbuhhan ey mahapul ni mei-appitannak e hi APU DIOS ni hakey ni pakeetteng tun kalneroh ni endin hekey hu degeh tu. <sup>14</sup> Niya mahapul daman meunnudan ni nehuluk ni dewwan kiloh ni alinah e mekamdugan ni kagedwah ni galon ni mansikan olibah humman ni mei-appit ni hi-gak. Huyyan elaw ni pan-appitan yun hi-gak e hi APU DIOS ey mahapul ni meunnud alin ingganah. <sup>15</sup> Mahapul ni huyya hu mengmenglaw ni pehpending yun ingganah ni kekakkabbuhhan e i-appitan yuwak ni pakeetteng tun kalneroh, ya begah niya mansikan olibah.”

<sup>16</sup> Kan mewan APU DIOS e Eta-gey ni peteg ey “Hedin pebeltan ni ap-apu hu puyek tud hakey ni u-ungnga tu, man mambalin law ni puyek nunman ni u-ungnga tu humman. <sup>17</sup> Nem hedin ya etan tuun tuka panggunnu hu iddawtan tun puyek tu, man dammutun banggaden tu humman ni puyek hedin medettengan etan toon ni Jubilee. (Huyyan toon ni Jubilee ey kamedettengi hedin nelabah hu neliman toon.) Nem hedin yadda etan u-ungnga tu hu pengidwatan tun puyek tu, man pampuyek ida law ni u-ungnga tu humman ni ingganah. Tep ya memeltan ni puyek ni ap-apu ey yadda u-ungnga tun ebuh. <sup>18</sup> Ya etan ap-apu ey eleg mabalin ni tu pilliwen hu puyek idan tutu-u. Ya etan puyek tu ngu dedan hu pebeltan tun u-ungnga tu ma-lat eleg tu panligligat hu tutu-uk ni pemilliwan tun puyek da.”

<sup>19</sup> Entanni ey inlaw tuwak mewan etan ni tuun nengipeang-ang ni Tempol ni hi-gak di dallin et lumaw kamid appit ni south. Wadadman hu habyen idan neieng-eng ni kuwaltuh idan papaddi et peang-ang tudda kuwaltuh di gilig nunman ni dallin di appit ni kakelinnugin aggew. <sup>20</sup> Et kantuy “Yadya hu pengihhe-engan idan papaddi ni kamei-appit ni neieng-eng di bahul niyad liwat. Yadya dama hu pengapyaan daddan sinapay ni kamei-appit ma-lat eleg da ilabbalabbah di dallin di ehpen ida huyyan kamei-appit. Tep entanni ey keppaen idan tutu-un eleg mengamtan keibbellinan ni ngilin tudda huyyan kamei-appit, et humman umhulun ni wada meippahding ni hi-gada.”

<sup>21</sup> Nambanggad kami etan di dallin di ehpen et labhan midda etan nanlinikweh ni epat ni pikdel. <sup>22</sup> Yadman ni epat ni pikdel ey wadadda ekka-ket ni dallin ni hannan-nem et walun piyeh hu dukkey da niya hannana-pat et walun piyeh hu hegang da. <sup>23</sup> Wadaddadman hu eabban teping ni luhud ni neikapyaan idan appuyyan. <sup>24</sup> Kan etan ni tuuy “Yadya hu pengihhe-engan idan kamanggunnud Tempol ni detag ni mei-appit.”

## 47

### *Ya etan wangwang ni nalpud Tempol*

<sup>1</sup> Impangulu tuwak mewan etan ni tuud heggepan di Tempol ey wada inang-ang kun kamambulbulubul ni danum di daul etan ni heggepan ni impalaw di appit ni kasimmilin aggew di nengihangaan ni Tempol. Nalpud appit ni south humman ni danum et labhan tu etan altar et mampalaw di dallin di ehpen. <sup>2</sup> Impangulu tuwak mewan etan ni tuud a-allaw ni Tempol e indalan mi etan di eheb di appit ni north et lumaw kami etan di eheb di appit ni kasimmilin aggew ey wada inang-ang kun kulukul ni nalpullid kad-an ni eheb di appit ni south.

<sup>3</sup> Lingkud etan ni tuu hu limanggatut et na-nem ni metroh etan ni kulukul di appit ni kasimmilin aggew et pagewa tuwak ey kameippappag di mukud ku hu danum.

<sup>4</sup> Dimmaddayyu kami ey lingkud tu mewan hu limanggatut et na-nem ni metroh ey kameippappag law di pukel ku hu danum. Entanni et maglid kami ey lingkud tu mewan hu neliman gatut et na-nem ni metroh di mampedayyu ey kameippappag law hu danum di gitang ku. <sup>5</sup> Lingkud tu mewan hu limanggatut et na-nem ni metroh ey edallem law et eggak hanggawa. Mahapul law ni mangkaykay kan man-gawat. <sup>6</sup> Kantun hi-gak ey “Hi-gam e helag ni tuu, entan tu liwwan huyyan mu inang-ang.”

Entanni ey inlaw tuwak mewan etan ni tuud gilig etan ni kulukul <sup>7</sup> ey wada inang-ang kun dakel ni peteg ni keyew di nambina-hil ni gilig tu. <sup>8</sup> Et kantuy “Huyyan danum ey impalaw di appit ni kasimmilin aggew di Wangwang e Jordan ingganah di Netey ni Baybay et hullulan tu hu danum ni neahinan et mambalin ni kayyaggud. <sup>9</sup> Emin di kadellanan nunyan danum ey kamewedda hu nambakbaklang ni kaman-ayyam di puyek niya nambakbaklang ni deleg. Ya danum ni nunyan kulukul ey pambalin tu etan Netey ni Baybay ni pamballeyan ni dakel ni deleg niya edum ni kaman-ayyam di puyek.

<sup>10</sup> Emin idalli etan tutu-un kaanmenelleg di diman meippalpuḍ En Gedi ingganah di En Eglaim niyadda etan nampambheley di gilig ni baybay ey ihhena-ha-pey dalli hu kinema dan daka ussalan menelleg di diman. Henillid Baybay di Mediterranean e dakel ali dama hu nambakbaklang ni deleg di diman. <sup>11</sup> Nem yad gilig ni nunman e baybay ey maehin ma-lat wada pengellaan ni tutu-un pengehhin da. <sup>12</sup> Yad gilig etan ni kulukul ey umtemel hu dakel ni keyew ni kamekkan lamah da niya umtatabaddan kenayun et kabulabulan ey umlamah ida ma-lat wada kenneḍ idan tutu-u niya pengeggah da bulung da. Hanniman hu meippahding tep nalpuḍ Tempol hu menennum idan nunman e keyew.”

*Yadda pappeg ni bebley di Israel*

<sup>13-14</sup> Heninnuy hu kan APU DIOS e Eta-gey ni peteg ni meunnud ni pangkekeggadan idan etan ni hampulut dewwan helag Israel ni pengennadwaan dan puyek dan i-e-peng da. Kantuy “Emin kayu ey mahapul ni man-iinggeh hu puyek yun beltanen yu. Ebuḥ ida etan helag Joseph ni dewwa hu beltanen da. Humman dedan hu inhel kuddan aammed yu e tewwidan yun helag dadda huyyan puyek.

<sup>15</sup> Ya pappeg di appit ni north ey meippalpuḍ Baybay e Mediterranean et mampalaw di appit ni kasimmilin aggew di bebley di Hetlon, yad Lebo Hamat, yad Sedad, <sup>16</sup> yad Berothah, yad Sibraim, e nambattanan ni Damascus niya Hamat, ingganah di Haser Hattikon di pappeg ni Hauran. <sup>17</sup> Ya pappeg di appit ni North e meippalpuḍ Baybay e Mediterranean et mampalaw lad Enon di appit di kasimmilin aggew ingganah lad nampappegan ni Damascus niyad Hamat di appit ni north.

<sup>18</sup> Ya pappeg di appit ni kasimmilin aggew ingganah lad appit tud south ey meippalpuḍ nambattanan ni Damascus niya Hauran. Ya nangkeggadan ni Israel di appit tud kakelinnugin aggew niya Gilead di appit tud kasimmilin aggew ingganah di Tamar di Netey ni Baybay ey ya etan Wangwang e Jordan.

<sup>19</sup> Ya pappeg di appit ni south ey meippalpuḍ Tamar et mampalaw lad appit ni kakelinnugin aggew ingganah lad Meribah di Kades et unnuunuden pappeg di Egypt ingganah lad Baybay e Mediterranean mewan.

<sup>20</sup> Ya pappeg di appit ni kakelinnugin aggew ey meippalpuḍ north ni Baybay e Mediterranean ingganah di demang ni dalan di Hamat.

<sup>21</sup> Panggadwa yu huyyan puyek et i-peng yun helag Israel <sup>22</sup> et pambebleyan yun emin ni ingganah. Anin idan tutu-ud edum ni bebley ni nekibebley ni hi-gayu et yadda u-ungnga dan neiungngadya e bebley yu et idwasi yuddan puyek ni pambebleyan da. Meibbillang ni il Israel ida niya meilla-kam idad hipan yuka panyaggudin yuka dewwatan hi-gayun helag Israel. <sup>23</sup> Emin ida ey mekiggadwaddad puyek di nekibebleyan dan puyek ni neidwat idan helag Israel. Hi-gak e Eta-gey ni peteg ni AP-APU hu nanghel idan nunya.”

## 48

*Ya nangeddwaan idan helag Israel ni puyek ni neidwat ni hi-gada*

<sup>1-7</sup> “Ya pappeg ni puyek idan helag Israel di appit ni north ingganah lad appit ni kasimmilin aggew ey meippalpuḍ Baybay e Mediterranean et mampalaw di Hetlon, yad Lebo Hamat, yad Enon, ingganah lad etan di nampappegan ni Damascus niya Hamat.

Emin ida helag Israel ey hi-gada memeltan etan ni puyek ni meippalpuḍ pappeg tud appit ni kasimmilin aggew ingganah lad appit ni kakelinnugin aggew di Baybay e Mediterranean. Yahhuy ida nampappeg ni helag Israel ni memeltan ida etan ni puyek ni meippalpuḍ appit ni north ingganah lad pappeg tud appit ni south: Ya memenggulu ey yadda helag Dan, et han ida helag Asher, niyadda helag Naptali, niyadda helag Mannasseh, niyadda helag Ephraim, niyadda helag Reuben, et yadda helag Judah.

*Ya keim-importantehan ni parteh ni bebley*

<sup>8</sup> Ya etan puyek ni neidagsid puyek Judah di appit ni south ey humman hu neieng-eng ni keittu-unan ni Tempol. Ya lekud ni hegang tu meippalpuḍ appit ni north ingganah di appit tud south ey nehuluk ni enem ni kilometroh. Hanniman dama hu lekud ni hegang tun meippalpuḍ appit ni kasimmilin aggew ingganah di kakelinnugin aggew e nehuluk daman enem ni kilometroh. Humman ni hegang ni puyek ni keibbehwatan ni Tempol ey henin hegang ni puyek ni neidwat idan helag Israel.

<sup>9</sup> Ya gawwa etan ni puyek ey humman hu neieng-eng ni keibbehwatan ni panha-adan APU DIOS e ya lekud tu ey nehuluk ni enem ni kilometroh hu dukkey tu niya liman kilometroh hu hegang tu. <sup>10</sup> Yad pangil etan ni keibbehwatan ni Tempol hu panha-adan idan papaddi. Ya lekud tu meippalpuḍ appit ni kasimmilin aggew ingganah lad appit tud kakelinnugin aggew ey nehuluk ni enem ni kilometroh hu dukkey tu niya dewwa

et kagedwah ni kilometroh hu hekang tu. Maka-iggawwadman hu Tempol nan APU DIOS. <sup>11</sup> Yadda etan papaddin helag Sadok hu manha-ad diman, tep impannananeng dan impahding hu impangunun APU DIOS ni hi-gada e eleg da ipahding hu lawah henin impenahding idan edum dan helag Israel niyadda etan edum dan papaddin helag Levi. <sup>12</sup> Ya puyek ni meidwat ni panha-adan idan edum ni padin helag Levi ey ya etan wadad appit tud south. Huyyaddan panha-adan idan papaddi ey nengilinan, tep neieng-eng idan APU DIOS.

<sup>13</sup> Yadda etan edum ni helag Levi ey wada dama hu neieng-eng ni panha-adan dan puyek di dagsin kad-an idan edum dan helag Levi. Ya lekud tu dama ey enem ni kilometroh dukkey tu ey dewwa et kagedwah hu hekang tu. <sup>14</sup> Ya etan puyek ni neieng-eng nan APU DIOS ey humman hu kekakkayyaggudan di emin ni puyek di diman e bebley. Eleg mabalin ni an meiggettang, winu an meiwwa-hi winu an meidwat di edum ni tuu humman ni puyek tep neieng-eng ni ebuh nan APU DIOS.

<sup>15</sup> Ya etan nehuluk ni dewampulut hakey ni kilometroh dukkey tu niya nehuluk ni epat ni kilometroh hekang tun puyek ni natdaan etan di puyek ni neieng-eng nan APU DIOS ey meidwat idan tutu-un pambbleyan da niya pampattulan da, nem mahapul ni yad gawwa tu hu keihha-adan etan ni bebley da. <sup>16</sup> Humman ni bebley e Jerusalem hu ngadan tu ey kuwaddadah hu lekud tu tep ya lekud tud nambinbina-hil ey e dewwan libu et limanggatut et dewampulun metroh. <sup>17</sup> Ya nanlinikweh ey wada pampattulan e hanggatut et na-pat ni metroh hu lekud tud nambinabina-hil. <sup>18</sup> Ya etan natdaan ni puyek di appit ni south e pampeyyewan idan nambebley di Jerusalem ey walun kilometroh dukkey ey epat ni kilometroh lakkeb tud appit di kasimmilin aggew ey walun kilometroh hu dukkey tu ey epat ni kilometroh lakkeb tud appit di kakelinnugin aggew. <sup>19</sup> Emin ida nambebley di diman anin ni hipan pewen hu nahlagan da et dammutun mampeyyew idadman.

<sup>20</sup> Yadda gawwa etan ni puyek ni neieng-eng nan APU DIOS ey nanguwadladuh dama e nehuluk ni enem ni kilometroh hu dukkey tu niya hekang tun nei-dum hu bebley di Jerusalem.

<sup>21-22</sup> Yadda etan natdaan ni puyek di nambinbina-hil ey pampuyyek ni ap-apu: Yad appit ni kasimmilin aggew et yad appit ni kakelinnugin aggew ni keihha-adan ni Tempol, ya puyek ni panha-adan idan papaddi niyadda edum ni helag Levi et ya bebley e Jerusalem. Dimmateng hu pappeg tud appit di kasimmilin aggew ingganah di Baybay e Mediterranean di appit di kakelinnugin aggew. Ya pappeg tud appit ni north ey yadda puyek idan helag Judah et yad south ey puyek idan helag Benjamin.

<sup>23-27</sup> Yadda edum ni helag Jacob ey panggagadwa da hu natdaan ni puyek di appit ni south ni meippalpud appit ni kasimmilin aggew ingganah lad appit ni kakelinnugin aggew di Baybay e Mediterranean. Yadda mampapappeg ni helag Jacob ey yadda helag Benjamin, yadda helag Simeon, yadda helag Issakar, yadda helag Sebulun, et yadda helag Gad.

<sup>28</sup> Ya puyek ni meidwat nan Gad ey yad appit ni south. Ya pappeg tu ey mampellaw di Tamar ingganah di hibuy di Meribah di Kades niya ingganah di pappeg ni Egypt di appit ni Baybay e Mediterranean.

<sup>29</sup> Henin nunman hu panggagadwaan idan helag Israel ni puyek da. Hi-gak e Eta-gey ni peteg ni AP-APU hu nanghel idan nunya."

#### *Yadda eheb di Jerusalem*

<sup>30-34</sup> "Ya Jerusalem ey wada hampulut dewwan eheb tu e neingedan idan nunman hu ngadan ni hampulut dewwan helag Israel. Hantetlu hu neikapyan eheb di epat ni nambinbina-hil ni luhud. Yadda etan tellun eheb ni wadad appit ni north ey nengadanan ni Eheb Reuben, Eheb Judah niya Eheb Levi. Yadda etan tellud appit ni kasimmilin aggew ey nengadanan ni Eheb Joseph, Eheb Benjamin niya Eheb Dan. Yadda etan eheb ni wadad appit ni south ey nengadanan ni Eheb Simeon, Eheb Issakar niya Eheb Sebulun. Yadda appit ni kakelinnugin aggew ey nengadanan ni Eheb Gad, Eheb Asher niya Eheb Naptali. Ya dukkey ni hakey ida etan ni nambinbina-hil ni luhud ey nehuluk ni hakey ni kilometroh.

<sup>35</sup> Ya nga-mut tun lekud ni luhud ni bebley di nambinbina-hil ey ngannganih ni hampulun kilometroh. Ya baluh ni ngadan ni nunman e bebley ey 'Immen diman hi APU DIOS.' "

## Daniel

*Ya meippanggep nuryan libluh nan Daniel*

Hi Daniel hu hakey ni Hebrew di Judah ni neilaw di Babilon. (606 B.C.) Huyyan libluh hu neitudekan ni nepatnaan ni kapengullug nan Daniel et yadda gagayyum tu nan Apu Dios. (1:1-16, 3:1-30 et yad 6:1-28)

Gapu tep nelaing hi Daniel niya kabaelan tun mengamtan keibbellinan ni i-innep ey impambalin nan patul e hi Nebukadnessar ni gubernor ni probinsiya ni Babilon. Ey nambalin ni eta-gey ni opisyal di gubilmun Persia eman ni nengapputan ni Persia ni Babilon et sakupen tu.

Dewwa hu ini-innep nan Nebukadnessar ni inhel nan Daniel hu keibbellinan tu. (2:24-45 et yad 4:19-33) Entanni mewan et ibalikas nan Daniel nan patul e hi Belsassar hu keibbellinan ni intudek ni nampeang-ang ni ngamay di dingding ni baley ni patul. (chapter 5)

Yan eman ni ketaggun Daniel ey impei-innep nan Apu Dios ni hi-gatu hu meippahding etan idan epat ni bebley ni manhuluhulul ni man-ap-apu.

*Yadda etan epat ni bebley di i-innep nan Daniel*

I-innep di Chapter 2	I-innep di Chapter 7	I-innep di Chapter 8	Ngadan ni Bebley
Balitik ni ulu	Nepayakan ni layon		Babilon (2:28)
Silber ni pagew et ya ngamay	Bear	Ram	Media-Persia (8:20)
Giniling ni egeh et ya ulpu	Leopard	Gelding	Greece (8:21)
Gumek ni heli	Anggetakkut ni animal		Rome

*Ya neitudek eyad libluh*

1. Ya nansilbian nan Daniel et yadda gagayyum tu nan Apu Dios et yad gubilmun Babilon. (chapters 1-6)
2. Ya nengipei-innepan nan Apu Dios nan Daniel ni meippanggep ni meippahding eyad puyek ni edum ni aggew. (chapters 7-12)

*Hi Daniel et yadda etan impan-edum tu*

<sup>1</sup> Ya eman ni katlun toon ni nampatulan nan Jehoiakim di Judah ey immali hu patul di Babilon e hi Nebukadnessar niyadda sindalu tu, et gubaten da Jerusalem et liktuben da. <sup>2</sup> Impeapput nan Apu Dios hi Jehoiakim et yan eman ni nambangngadan lad Nebukadnessar di bebley dad Babilon ey nampeki-la dadda edum ni nangkebalol ni kameussal di Tempol Apu Dios et da pan-iha-ad di tempol ni dios da. Niya emin ida etan dimpap dan sindalun Jehoiakim ey impambalin Nebukadnessar idan balud et ikuyug daddad Babilon.

<sup>3</sup> Entanni ey minandal nan Nebukadnessar hi Aspenas e ap-apuddan opisyal tu ma-lat pumilin kamenikken ni lalakkin helag idan patul et ya helag idan ap-apud Israel ni nunman. <sup>4</sup> Kan patul nan Aspenas ey "Ang-ang mu et ya kayyaggud hu impenga-annel da, endi hu degeh da, kayyaggud hu kaleki da, nan-adal ida niya nelaing ida ma-lat dammutun panggunnuk idad baley ku. Hi-gam hu penuttuddun hi-gadan mengi-hel niya memidbid ni ehel tayun iBabilon. <sup>5</sup> Ang-ang mu mewan ma-lat ya kennen da niya innumen dan kewa-wa-wa ey nan-inggeh di kakenna niya kainnumaddan kamanggunnud baley ku. Tuttudduim idan tellun toon et han dammutun manggunnuddad baley ku."

<sup>6</sup> Yadda edum ni nepili ey hi Daniel, hi Hananiah, hi Mishael, et hi Asariah. Emin ida huyya ey helag idan Judah. <sup>7</sup> Hinullulan Aspenas e ap-apuddan opisyal di baley patul hu ngadan da et ya law ngadan Daniel ey hi Belteshasar, hi Shadrak dama hi Hananiah, hi Meshak hi Mishael, et hedin hi Abednego, ey hi Asariah.

<sup>8</sup> Hedin hi Daniel, man ninemnem tu dedan e eleg tu kenna niya eleg tu innuma humman idan daka immangdad di baley nan patul ma-lat eleg mambalin ni beken ni malinih. Et mampebaddang nan Aspenas. <sup>9</sup> Impambalin dedan nan Apu Dios hi Aspenas ni kabbabbal nan hi Daniel. <sup>10</sup> Nem kaumtakut nan patul et kantun Daniel ey "Hi Apu patul hu nengimandal hedin hipa kennen yu niya innumen yu, et nakka umtakut, tep pepettey tuwak hedin hin-appil pekkam min hi-gayu et el-eleg ali hu ang-ang yu nem yadda etan edum yun nangekehiken ni lalakkin wadad baley patul."

<sup>11</sup> Et mandudug law hi Daniel ni nekihummangan etan ni guwalyan sinudun Aspenas ni mengippaptek ni hi-gatu niyadda etan tellun edum tu. <sup>12</sup> Kantuy "Iebulut mu anhan et patnaan dakemin hampulun aggew. Et ya kameitnem ni ebuh ni ya danum hu immangdad yun hi-gami. <sup>13</sup> Et hedin megibbuh humman ni hampulun aggew, ey dakemi iingngeh etan idad edum ni kamenikken ni lalakkin kamengngan ni kakennad baley nan patul. Et hedin hipa penang-ang mun hi-gami, ey ngenamung kan pinhed mun kennen mi."

<sup>14</sup> Inebulut etan ni guwalya et ipatna dan hampulun aggew humman ni inhel Daniel. <sup>15</sup> Negibbuh humman ni nekapulun aggew ey kakkayyaggud hu ang-ang di Daniel niya mehihhinnadel ida anhan law nem yadda etan edum ni kamenikken ni lalakkin nenganangan ni kakennad baley nan patul. <sup>16</sup> Et humman ni neipahding hu nengiebulutan etan ni guwalyan anin ya kameitnem ni ebuh hu kennen da et beken ni ya etan kennen ni kapeiddaddan nan patul.

<sup>17</sup> Indawtan idan Apu Dios humman ni epat ni lalakkin nalpud Judah ni laing da niya kabaelan dan mengewwat niya mengeddal idan dakel ni kameituttuddu. Ey indawtan tu pay hi Daniel ni kabaelan tun mengamtan keibbellinan ni i-innep. Binenidbid da nambakbaklang ni liblueh et dakel adalen da.

<sup>18</sup> Negibbuh etan tellun toon ni in-olden nan patul ni pan-eddalan idan nunman ni kamangkehikken ni lalaki, et ilaw nan Aspenas idan emin di kad-an tu. <sup>19</sup> Et mekihuhummangan hi patul ni hi-gada ey neamtaan tu e nelalla-ing hi Daniel, hi Hananiah, hi Mishael, et hi Asariah nem yadda etan edum da. Et idwatan idan patul ni ngunu dad baley tu. <sup>20</sup> Ey emin hu hipan pinhed etan ni patul ni amtaen winu hipan tuka ketemmai ey kayyaggud ni peteg hu kaittugun idan etan ni epat nem yaddan emin etan nelaing ni magic niyadda etan mangkadiba di kebebbbley ni nan-ap-apuan tu.

<sup>21</sup> Nannaneng hi Daniel ni nangngunud baley nan patul ingganah eman ni nemangulun toon ni nansakupan nan Cyrus e patul di Persia ni Babilon.

## 2

### *Ya ini-innep Nebukadnessar*

<sup>1</sup> Yan eman ni meikkadwan toon ni nampatuln Nebukadnessar ey wada ini-innep tun tuka pannenemnem et eleg meuggip. <sup>2</sup> Et tuddalli paeyag hu tutu-u tun nelaing ni magic, yadda madiba, yadda maeyak, niyadda etan daka dibbaa hu bittuwen. Immalidda et umehng idan emin di hinangga tu <sup>3</sup> et kantun hi-gaday "Wada ini-innep kun nemahhig ni nakka pannenemnem, et humman hu, pinhed kun amtaen hu keibbellinan tu."

<sup>4</sup> Himmumang ida humman ni tuun impaeyag tu e in-ehel dad Aramaic et kanday "Apu patul, ya kayyaggud ey mannengng kan mategu! Ehel mu etan ini-innep mu ma-lat ehelen mi hu keibbellinan tu."

<sup>5</sup> Nem kan patul ey "Eleg, tep ya ninemnem kun pehding yu ey hi-gayu hu menghel ni numman ni ini-innep ku ey han yu inhel hu keibbellinan tu. Tep hedini eleg yu han-ipahding huyn inhel ku, man pepettey dakeyu et pampetegteg ku hu annel yu niya pebahbah ku baballey yu. <sup>6</sup> Nem hedini e-helen yu hu ini-innep ku niya keibbellinan tu, ey wada hu iddawwat kun hi-gayun gungunahan yu niya wada pehding kun keidaydayawan yu. Et humman hu, ehel yu humman ni nak ini-innep, niya ehel yu hu keibbellinan tu."

<sup>7</sup> Nem kanda mewan ni humang day "Pakkadek nisin e-helen mu e Apu patul etan ini-innep mu et han dammutun e-helen mi hu keibbellinan tu."

<sup>8-9</sup> Himmumang etan patul et kantuy "Tam makulug tu-wangu etan nakka nemnem-nema! Yuka penaktaktak ni ebuh huttan ni yuka pehpehding, tep amta yu e tu-wangun pepettey dakeyun hi-gak hedini eleg yu han-ipahding hu nakka ibbagan hi-gayu. Nanhuhummangan kayu et nemnemen yun manlangkak, tep kanyu na-mu nem hedini a-ayyapawen yu humang yu, man kekyatek etan inhel kun kastigu yu. Imay, ehel yu kuma hu ini-innep ku. Hedini e-helen yu, ey humman pengamtaan ku e han-ehel yu keibbellinan tu."

<sup>10</sup> Kan idan nunman ni kaumtugun nan patul ey "Endi hu tuud ta-pew eyan puyek ni han-ipahding tu eya muka ibbaga e apu patul. Niya endi hu patul ni an nengibegan henin nuntan idan nelaing ni magic, yadda madiba, niyadda etan daka dibbaa bittuwen, anin na-mun hi-gatu hu keta-ta-geyyan niya kemeidaydayaw di emin ni patul di puyek.

<sup>11</sup> Apu patul, endi tuun nengamta eyan muka ibbaga, tep nekalligat ni peteg et ebuh ida dios ni nengamta. Nem endiddadya tep eleg ida mekihha-ad ni hi-gatsun tuu."

12-13 Dingngel nan patul humman ey nemahhig bunget tu et iolden tun meippepettey idan emin hu nelaing ni kaumtugun ni hi-gatu di Babilon. Et anin ni hi Daniel niyadda etan tellun gayyum tu et wadadda neitu-dak ni an memettey ni hi-gada.

14 Hi Daniel ey impakannemnem tu hu hipan pehding tu. Et lumaw di kad-an Arioch e ap-apuddan guwalyan patul ni neputuk ni mengippahding ni in-olden nan patul. 15 Et kan tun Arioch ey "Kele wada hanniman ni olden nan patul?" Et ehelen Arioch ni hi-gatu hu nekapkapyya. 16 Dingngel Daniel hu impanumang Arioch et ebuhe papuut tun limmaw et tu ungalen hi patul ma-lat genaden tu hu keippahdingan nunman ni in-olden tu et wada inna-nu tun mengippeamtan patul ni keibbellinan nunman ni ini-inep tu.

17 Yan inenamutan Daniel di baley da ey ine-ehhel tuddan edum tu e hi Hananiah, hi Mishael, ni hi Asariah hu neipahding. 18 Et ehelen tun hi-gada e mandasal idan Apu Dios di kabunyan ma-lat hemeken tudda niya ma-lat peamta tun hi-gada humman ni ini-innep nan patul niya hipa keibbellinan tu, et emin idan nelaing ni kaumtugun nan patul di Babilon ey meihwang di katey. 19 Yan nunman ni hileng ey impeamtan Apu Dios nan Daniel etan ini-innep nan patul ni eleg amtan tuu. Et daydayawen tu hi Apu Dios di kabunyan e kantuy

20 "Daydayawen dakan ingganah e Apu Dios tep hi-gam hu kelalla-ingan niya hi-gam ni ebuh hu kabaelan tun mengippahding ni emin. 21 Hi-gam mewan hu ngenamung ni hipan kamekapkapyya eyad puyek. Ey hi-gam hu kamemillin mampatul niya hi-gam hu kamemappeg ni daka pan-ap-apui. Hi-gam hu kamengidwat ni laing idan nangenemnan niya hi-gam hu kakelpuin kabaelan ni tuun mengewwat idan neligat ni meewwatan. 22 Muka peamta keibbellinan idan eleg han-awat ni tuu. Ey inamtam ida neitlud engeenget, tep hi-gam hu kakelpuin benang. 23 Nakka mansalamat ni hi-gam niya daka kadaydayawa e Dios ida lan aammed ku, tep indawtan muwak ni laing ku niya kabaelan ku. Ey hinumang mu dasal ni niya impeamtan ni hi-gami hu pinhed nan patul ni amtaen."

*Impeamtan Daniel hu ini-innep nan patul et ehelen tu keibbellinan nunman ni ini-innep*

24 Et lumaw mewan hi Daniel ni an menang-ang nan Ariok, e sinudun patul ni an memettey idan nelaing ni kaumtugun nan patul, et kantun hi-gatuy "Entan dakemi anhan pampatey. Ilaw muwak di kad-an patul et nak ehelen ni hi-gatu hu keibbellinan etan ni ini-innep tu."

25 Impapuut Ariok ni inlaw hi Daniel di kad-an patul e hi Nebukadnessar et kantuy "Apu patul, in-alik eya hakey ni iJudah ni nengamtan keibbellinan etan ni ini-innep mu."

26 Et puhdanan nan patul nan Daniel, e hi Belteshasar hu hakey ni ngadan tu, et kantuy ey "Kaw kabaelan mu makkaw ni menghel etan ni ini-innep ku niya keibbellinan tu?"

27 Hinumang Daniel et kantuy "Apu patul, endi, anin hakey ni tuun nelaing, winu kamengippahding ni magic winu maenap winu tuka dibbaa hu bittuwen, ni kabaelan tun mengamtan ini-innep mu niya menghel ni keibbellinan tu. 28 Nem wada hu Dios di kabunyan ni kamengippeamtan eleg tayu amta, et humman hu, hi-gatu nengipeamtan hi-gam e apu patul ni mekapkapyallin edum ni aggew. Heninnuy hu inang-ang mud i-innep mu.

29 Yan nunman ni neugipam e apu patul ey nampeang-ang hi Apu Dios di kabunyan ni hi-gam et peamta tu hu mekapkapyallin hakey ni aggew. 30 Hi-gak nengipeamtan tun nunman ni eleg amtan tuu, nem beken ni gapu tep nelalla-inggak nem ya edum ni tuu, nem ma-lat pengamtaan mu e Apu patul ni keibbellinan ni nunman ni ini-innep mu niya ma-lat awatam hu hipan impenemnem tun hi-gam.

31 Apu patul, yan nunman ni nan-i-innepam ey man-ang-ang ka ey wada kumangngu hu immehngeng di hinanggam ni et-eteng ni peteg ni tuttu-un anggetakkut hu ang-ang tun kaumhili. 32 Ya ulu tu ey nemahmah ni balituk. Ya pagew tu niya ngamay tu ey silber. Ya gitang tu niya ulpu tu ey giniling. 33 Ya heli tu ey gumek, ya dapan tu ey nangkamdug ni gumek niya pula. 34 Nem yan nunman ni muka ang-ang-anga ey wada hu nepikwal alin batud deplah et maulin, nem endi an nemikwal nunman ni batu. Neitegmil humman ni batu etan di dapan etan ni tuttu-un nekapyad gumek niya pula et makabbukli. 35 Et metukkad humman ni tuttu-un neikapyad gumek, pula, giniling, silber niya balituk et mebenukli et heni dep-ul ni kapan-illikin siyaggew hu nangkeguduan tu. Nan-ityab ni didib ni emin et endin hekey natdaan di sinuunan tu. Nem hedini ya etan batu, man immetteng et mambalin ni et-eteng ni duntug et enanan tun emin hu puyek.

36 Huyya hu inang-ang mud i-innep mu, e apu patul. Yan nunya ey e-helek ni hi-gam hu keibbellinan tu. 37 Hi-gam e apu patul hu keta-ta-geyyan di emin ni patul. Hi Apu Dios di kabunyan hu nengidwat ni saad mu, ya kabaelan mu niya dayaw mu. 38 Impambalin

dakan pan-ap-apun emin ni kebebbley eyad puyek, anin idan sisit niyadda edum ni kaman-ayyam di puyek. Ya nan-ap-apuan mu hu neieligan nunman ni ulun balituk.

<sup>39</sup> Ya etan silber ni annel ni tuttu-u ey humman hu kei-elligan ali etan ni bebley ni meihhullul eyad bebley ni nampatulan mud Babilon. Nem humman alin bebley ni meihhullul ey eleg tu han-inggeh hu kabaelan ni nan-ap-apuan. Nem meendilli dama kabaelan tu humman et wadalli meikkatlun man-ap-apud kebebbley e humman hu neieligan etan ni giniling ni annel etan ni tuttu-u. <sup>40</sup> Ya meihhullul mewan alin nunman ni bebley hu neieligan etan ni gumeke ni annel etan ni tuttu-u, et humman ali meikka-pat ni man-ap-apu eyad puyek. Henilli gumeke e tuka bahbahan emin, tep apputen tuddallin emin hu memenggulun man-ap-apu. <sup>41-42</sup> Huyyan meikka-pat ni pan-ap-apuan ey megedwa. Na-let pangil ey nekapuy hu pangil e humman keibbellinan ni nangkamdug ni pula niya gumeke ni neikapyad dapan etan ni tuttu-u. <sup>43</sup> Ya hakey mewan ni keibbellinan nunman ni nangkamdug ni pula niya gumeke ey ippatnaddalli etan ni aap-apu etan di negadwan bebley ni man-aapu ma-lat wada inna-nu tun pangkahhakeyan da, nem endilli tu pambalbalinan humman ni da pehding tep henin kapangkamdugin pula niya gumeke e endi silbitu tep kabubukli.

<sup>44</sup> Nem yallin pan-ap-apuan idan nunman ey weddaen alin Apu Dios di kabunyan hu hakey ni pan-ap-apuan ni mannanang e eleg mepappeg, tep endi hakey ni an mengapput ni hi-gatu. Tep hi-gatu anhallaw hu mengapput ni emin ni aap-apud puyek et ebuh tullin mannenneng. <sup>45</sup> Humman ni pan-ap-apuan alin Apu Dios hu keibbellinan etan ni inang-ang mud i-innep mun nepikwal di deplah ni batu, ey endi an nemikwal, et meitegmil etan di tuttu-un nekapuyad gumeke, pula, giniling, silber niyad balituk. Apu patul, huyyaddan inhel kun hi-gam ni keibbellinan ni ini-innep mun nanna-ud ni um-amnun hakey alin aggew ey hi Apu Dios, e eta-gey ni peteg hu nengipeamtan hi-gam."

#### *Ya neipeta-geyan ni saad Daniel*

<sup>46</sup> Dingngel nan patul e hi Nebukadnessar humman ni inhel Daniel ey nanyuung et dayawen tu hi Daniel. Et imandal tuddan tutu-u e man-appit ida niya gihheben da bangbanglun penaydayaw dan Daniel. <sup>47</sup> Immehel etan patul et kantun Daniel ey "Inamtak law e ya etan Dios mu hu keta-ta-geyyan di emin ni dios. Hi-gatu hu Ap-apun emin ni patul niya hi-gatu hu kamengidwat ni kabaelan ni tuun mengewwat ida etan ni kamekapkapan hi-gatsun tuun eleg tayu han-awat, tep indawat tun hi-gam hu kabaelan mun mengamtan keibbellinan ni ini-innep ku."

<sup>48</sup> Entanni ey nambalin nan patul hi Daniel ni gubernor di Babilon niya hi-gatu law hu apuddan emin ni konsihal di baley tu. Ey indawtan tu hi Daniel ida etan ni nangkinginan kaiddawat ni patul idan tuu tu. <sup>49</sup> Inungbal Daniel hi patul ma-lat idwatan tudda dama etan tellun impan-edum tun hi Shadrak, hi Meshak, et hi Abednego ni eta-gey ni saad dad bebley di diman Babilon, ey inebulut tu. Nem hedin hi Daniel, man nannanang ni nangngunud baley patul.

### 3

#### *Ya nengioldenan Nebukadnessar ni penaydayawan idan emin ni tuu etan ni impekapy tu balituk ni tuttu-u*

<sup>1</sup> Entanni ey nampekapy hi patul e hi Nebukadnessar ni balituk ni tuttu-un nahyam ni piyeh hu kasina-gey tu niya heyam ni piyeh hu kainetteng tu et tu paituun di Dura, e nedeklan ni puyek di probinsiya di Babilon. <sup>2</sup> Negibbuh ni kinapya da et paeyag tudda hu opisyal tud kebebbley di Babilon ma-lat daydayawen da humman ni balituk ni tuttu-un impekapy tu. Emin ida aap-apu, yadda gubernor, yadda konsihal tu, yadda treasurer, yadda huwet, niyadda etan edum ni opisyal di kebebbley di Babilon ey neamung idan mekidayayaw. <sup>3-4</sup> Yan eman ni neamungan dad hinangga etan ni tuttu-u, ey wada etan hakey ni opisyal ni immehneng et itkuk tu e kantuy "Hi-gatsun emin ni neamung ni katuutuun nambakbaklang hu bebley ni nalpuan tu, ya nahlagan tu, niya hapit tu, dengel yu eya olden nan patul: <sup>5</sup> Hedin dedngelen yu hu tenul ni tangguuyup, ya tullaling, ya inggiing, ya ekbiw, ya gitalah niyadda etan edum ni kapetnul, man panyuung itsun emin ma-lat daydayawen tayu eya balituk ni tuttu-un impekapan nan patul tayun hi Nebukadnessar. <sup>6</sup> Yadda etan eleg manyu-ung ni menaydayaw eyan tuttu-u ey meibbeng idad kaumhinyab ni apuy."

<sup>7</sup> Et hanniman neipahding e dingngel idan tutu-u hu impatnul da ey nanyuung idan emin etan neamung ni tuttu-un nambakbaklang hu bebley ni nalpuan da, ya hapit da niya nahlagan da, et daydayawen da etan tuttu-un impekapan patul e hi Nebukadnessar.

<sup>8</sup> Nem wadadda edum ni iBabilon ni limmaw nan patul et da idiklamuh ida Jews. <sup>9-10</sup> Kandan patul e hi Nebukadnessar ey “Ya kayyaggud ey mannenneng kan mategu e Apu patul! In-olden mu e emin hu tuu ey mahapul ni manyu-ung idan menaydayaw etan ni tuttu-un impekapyam hedin dedngelen da hu tenul ida etan ni kapetnul. <sup>11</sup> Niya in-olden mu e ya tuun eleg tu u-unnuda humman ni olden mu, ey mahapul ni meibbeng etan di kaumhinyab ni apuy. <sup>12</sup> Nem wadadda Jews ni ap-apuddan probinsiya eyad Babilon ni eleg mengu-unnud nunman ni olden mu e hi Shadrak, hi Meshak ni hi Abednego. Eleg da daydayawa dios mu niya eleg ida manyu-ung ni menaydayaw etan ni tuttu-un impekapyam.” <sup>13</sup> Dingngel patul humman ni indaddatteng dan hi-gatu ey nemahhig bunget tu et tuddalli paewit humman idan tellun lalakkid hinangga tu <sup>14</sup> et kantun hi-gaday “Kaw makulug numan ni eleg yu daydayawa hu dios ku niya eleg kayu manyu-ung ni menaydayaw etan ni balituk ni tuttu-un impekapyak? <sup>15</sup> Mahapul ni hedin petnul dadda etan tangguyup, ya tullaling, ya ingngiing, ya ekbiw, ya gitalah niyadda etan edum ni kapetnul ey manyu-ung kayun menaydayaw etan ni tuttu-u malat kayyaggud meippahding ni hi-gayu. Nem hedin kahing kayu, man dakeyu bebkahen etan di kaumhinyab ni apuy. Et makkaw et wada hu edum ni dios ni an mengihwang ni hi-gayu?”

<sup>16</sup> Himmumang hi Shadrak, hi Meshak ni hi Abednego ey kanday “Apu patul, eleg mi ippatnan menandin annel mid hinanggam. <sup>17</sup> Ngenamung hi Dios min kan bega-en ni hi-gami. Hi-gatu hu mika iddinel ni mengihwang ni hi-gami etan di kaumhinyab ni apuy niyad hipan pehding mun hi-gami. <sup>18</sup> Nem anin na-mu dedan ni kantu et eleg dakemi hellaknibin hi-gatu, et panna-ud min hi-gam e apu patul e eleg mi daydayawa hu dios mu niya eleg kami manyu-ung ni menaydayaw etan ni tuttu-un impekapyam.”

<sup>19</sup> Dingngel patul humman ni impanumang da ey nema-man limmedang hu angah tun bunget tun hi-gada. Et iolden tuddan tuu tu e peetteng da etan apuy ni da pengibkahan ni hi-gada et mangkappitu hu kainetung tu. <sup>20</sup> Ey minandalan nan patul ida etan keka-kalalan ni sindalu ma-lat baluden dad Shadrak, hi Meshak ni hi Abednego ma-lat dadda ibkah di kaumhinyab ni apuy. <sup>21</sup> Et dadda baluden humman ni tellu et bekahen daddad apuy e nannaneng hu balwasi da niya taddung da. <sup>22</sup> Yadda etan guwalyan patul ni an pengibkah ni hi-gada apuy ey netey ida kumedek tep negiheb ida etan di nemahhig ni atung etan ni apuy. <sup>23</sup> Et humman neipahding e hinammad dan binelud di Shadrak, hi Meshak, ni hi Abednego et meibbeng idad gawwa etan ni kaumhinyab ni apuy.

<sup>24-25</sup> Nem entanni ey pinhakkeyey immehnneng hi Nebukadnessar tep natngan inang-ang tu et kantuddan opisyal tuy “Ang-ang yu kedi, kele nealay eleg ida meettungi? Niya kele epat ida eman nakka ang-ang-angan kaumeniklikweh di apuy? Kaw beken ni tellun ebuh hu binelud yun da bingkah diman?” Himmumang ida etan opisyal et kanday “Tam em, Apu patul, telludda kayan ebuh hu binelud mi!” Ey kan tu mewan ey “Nem ang-ang yu kedi! Eleg ida mabelud niya heni anghel eman neika-pat.”

<sup>26</sup> Et meihnpun hi patul et tekukan tuddad Shadrak, hi Meshak, ni hi Abednego, et kantuy “Hi-gayun bega-en ni Keta-ta-geyyan ni Dios, kaukat kayulli eyad apuy!” Et ebuhe maukat ida. <sup>27</sup> Immaliddan emin hu opisyal nan patul, yadda governor di Babilon, yadda konsihal tu et ang-angen da ey eleg idan hekey maetungan di apuy. Anin ni balwasi da niya bewek da et endin hekey hu an negiheb. Anin ew ngun hamuy ni ahuk et endin hekey hu kamehemmy ni hi-gada.

<sup>28</sup> Et kan Nebukadnessar ey “Daydayaw tayu hu Dios ni kau-unnudad Shadrak, hi Meshak ni hi Abednego. Makulug ni hi-gatu hu nengitu-dak ali etan ni anghel ni an nengihwang ida eyan bega-en tun kamengiddinnel ni hi-gatu et mukun eleg idan hekey maetungan di apuy. Eleg ida tumekut ni mengehning etan ni olden ku, anin ni inamta da e ketteyyan da tep ebuh etan Dios dan daka u-unnuda. <sup>29</sup> Et humman hu, yan nunya ey i-olden ku law e emin kayun katuutuud kebbebley anin ni nambakbaklang hu nahlagan tu niya hapit tu ey mahapul ni lispituhen yu hu Dios di Shadrak, hi Meshak ni hi Abednego. Tep endi edum ni Dios ni kabaalan tun mengihwang idan kamengiddinnel ni hi-gatu henin impahding tuddan eyan tellu. Et ya tuun eleg tu u-unnuda huyyan olden ku ey metennegteg hu annel tu niya mebahbah hu nanha-adan tu.”

<sup>30</sup> Meippalpun nunman ey impeta-gey nan patul hu saad di Shadrak, hi Meshak ni hi Abednego di ngunu dad Babilon.

#### 4

*Ya meikkadwan ini-innep nan Nebukadnessar*

<sup>1</sup> Entanni ey impalaw nan Nebukadnessar huyyan pinhed tun peamtaddan katuutuud kebbebley ni nambakbaklang hu nahlagan da niya ehel da.



Kantuy “Ya kayyaggud ey melinggep kayun emin! <sup>2</sup> Nakka um-amleng ni mengippeaman hi-gayu meippanggep idan kamekapkapyan eleg tayu han-awat niya tayu kaketngain tuun impeang-ang nan Apu Dios e Keta-ta-geyyan ni hi-gak. <sup>3</sup> Humman idan kamekapkapyan eleg tayu han-awat niya tayu kaketngain tuun impeang-ang tun hi-gak hu keang-angan tun makulug ni et-eteng hu kabaelan tu, niya hi-gatu hu kekkakayyaggudan! Hi-gatu hu mannananeng ni man-ap-apu niya eleg mepappeg hu pan-ap-apuan tu.”

<sup>4</sup> “Hi-gak ey kedangyan nak niya kakkayyaggud hu biyag ku et nakka man-an-anla. <sup>5</sup> Nem entanni ey nan-i-innepak ni anggetakkut. <sup>6</sup> Et nak ida paeyag ni emin hu nelaing ni konsihal ku ma-lat ehelen da hu keibbellinan nunman ni nak ini-innep. <sup>7</sup> Et umliddan emin hu nelaing ni magic yadda mangkapelad, yadda maenap niyadda daka dibbaa bittuwen, nem endin hekey ni hi-gada hu nengamtan keibbellinan tu humman ni nak inang-ang di i-innep ku.

<sup>8-9</sup> Entanni ey immali hi Daniel, e nengihuldungan kun ngadan ni dios kun hi Belteshasar, et hi-gatu hu nengibag-an kun keibbellinan etan ni ini-innep ku, tep dingngel kun wadan hi-gatu hu ispirituh idan dios. Et kangkun hi-gatu ey ‘Belteshasar, e ap-apuddan maebig, inamtak e wadan hi-gam hu ispirituh idan dios et mukun inamtam hu hipan eleg amtan tuu. Ehel mu keibbellinan eyan ini-innep ku.

<sup>10</sup> Ini-innep ku e wada kumangngu hu et-eteng ni keyew ni simmemel di gawwa eyan puyek. <sup>11</sup> Neetteng ey dinteng tu hu kabunyan et kameuhdungin emin hu tuud puyek. <sup>12</sup> Nemahhig ni mabulung et kapanhiddumiddan animal di muyung niyay kapambubbuyaidan sisit hu pangetu niya makallameh, e dammutun me-peng ni emin hu tuud puyek ni lameh tu.

<sup>13</sup> Nakka nemnemnema hu keibbellinan tu humman ni nak inang-ang ey wada inang-ang kun anghel ni kamangkelehbeng alid kabunyan. <sup>14</sup> Ey simmekuk e kantuy: Lengeh yu eya keyew et pambegwahan yu hu pangetu niya panhelanghang yun emin hu bulung tu. Ey pan-iwehit yuddan emin hu lameh tu. Em, pandegyun yudda etan nampanhidum di hengeg tun animal niya pan-abul yudda etan sisit di pangetu et lengehen yu. <sup>15</sup> Nem hedini ya tunged tu niya lamut tu, man anin ni diman. Nem lipesi yun gumeke niya giniling et anin ni eway yud mahlek.

Diman humman ni patul ni neieligan nuntan ni keyew et anin ni mededelnu niya anin ni mekihha-ad idan animal di muyung. <sup>16</sup> Tep mambalin alin henin nemnem ni animal hu nemnem tun pitun toon. <sup>17</sup> Impeamtaddan kakkayyaggud ni anghel huyyan kastigu tu. Humman pengi-ang-angan emin ni tuu e ya Keta-ta-geyyan ni Dios hu nangged ni emin ni pan-ap-apuan eyad puyek niya ngenamung tun menuddun pan-ap-apun tuu. Anin ni nebabah saad tu et hi-gatu tudduen tun man-ap-apu.

<sup>18</sup> Huyya, e Belteshasar, hu ini-innep ku. Ehel mu hu keibbellinan tu. Tep emin ida nangkenememan ni kaumtugun ni hi-gak eyad nan-ap-apuan kud Babilon ey eleg da amta keibbellinan tu. Nem hedini hi-gam, man inamtam, tep wadan hi-gam hu ispirituh idan kakkayyaggud ni dios.’

<sup>19</sup> Yan nangngelan Daniel (e Belteshasar hu hakey ni ngadan tu,) nunya ey nahngang et eleg umhel ni nekektang. Nem kangkun hi-gatuy ‘Belteshasar, entan tu tattakusi hu ini-innep ku niya keibbellinan tu.’ ”

Immel law hi Daniel ey kantuy “Apu patul, hamban yadda buhul mu hu keippahdingan tu humman ni ini-innep mu, et beken ni hi-gam ey. <sup>20</sup> Inang-ang mud i-innep mu hu keyew ni eta-gey ni peteg e dinteng ni utduk tu kabunyan et kameuhdungin emin hu tuud puyek. <sup>21</sup> Nemullubullung et kapanhihiddumiddan animal di muyung, ey nemanngapangnga et kapambubbuyaidan sisit, niya nanlameh et dammutun kamepeng ni emin hu tuud puyek. <sup>22</sup> Apu patul, hi-gam hu neieligan tu humman ni keyew, tep immetteng hu kabaelan mu et heni ka etan ni keyew ni dinteng tu kabunyan, niya sinekup ni nan-ap-apuan mun emin hu bebley eyad puyek.

<sup>23</sup> Entannit man-ang-ang ka ey wada hu anghel ni nalpud kabunyan e kantuy ‘Lengeh yu eya keyew et bahbahen yu, nem diman hu tunged tu. Lipesi yun gumeke niya giniling ey inway yud mahlek et anin medeldelnu. Ey diman et makiha-ad idan animal di muyung ni pitun toon.’

<sup>24</sup> Heninnuy hu keibbellinan nunman ni ini-innep mu e apu patul e humman hu in-older ni Keta-ta-geyyan ni Dios ni meippahding ni hi-gam. <sup>25</sup> Medegyun kalli et meidawwi kad kad-an idan tutu-u et ka mei-dum idan animal di muyung et heni kalli bakan menggan ni helek ni pitun toon. Lelgemem ali ugip, anin ni eleg mahiduman et medeldelnu ka ingganah ebbulutem e ya Keta-ta-geyyan ni Dios hu nangged ni kapan-ap-apui eyad puyek niya hi-gatu ngenamung ni menuddun pinhed tun pan-ap-apun tutu-u. <sup>26</sup> Ya kei-elligan tu etan tunged niya lamut etan ni keyew ni in-older etan ni anghel ni

meihhanniman, ey mambanggad kalli mewan ni mampatul hedin ebbuluten mu e hi Apu Dios hu ap-apun emin. <sup>27</sup> Et humman hu, dengel mu e Apu patul, et u-unnuden mu eya e-helen kun hi-gam. Isiked mun manliwwat, ya kayyaggud ipahding mu niya peang-ang mu hu hemek muddan nangkewetwet, ma-lat mannananeng ni kayyaggud hu biyag mu.”

<sup>28</sup> Emin ida huuya ey immamnun neipahding nan patul e hi Nebukadnessar. <sup>29</sup> Hantoon ni ebuh hu nelabah meippalpu eman ni nan-i-innepan tu, ey limmaw di nedeklan ni atep ni baley tu et kaman-ang-ang-ang ey nemahhig ni tuka hanghangai hu kakinyaggud ni bebley dad Babilon. Et kantud annel tuy <sup>30</sup> “Anakkayyang hu kakinyaggud eyan bebley di Babilon! Hi-gak hu nemehwat nunyan kayyaggud ni peteg ni bebley tep et-eteng kabaelan ku et keang-angan ni dayaw ku niya kinapatul ku.”

<sup>31</sup> Eleg tu imuhen humman ni tuka pan-e-hela ey pinhakkeyey wadalli immehel di kabunyan e kantuy “Hi-gam, e Nebukadnessar e patul, dengel mu eya peamtak ni hi-gam: Bekken ka law ni patul! <sup>32</sup> Ey medegyun ka et meidawwi kad kad-an idan tutu-u et ka mei-dum idan animal di muyung. Et heni ka baka e mammangngan kan helek ni pitun toon ingganah ebbuluten mun hi Apu Dios e Keta-ta-geyyan hu nangged ni emin ni kapan-ap-apuin tuu niya hi-gatu kamenuddun pinhed tun pan-ap-apun tutu-u.”

<sup>33</sup> Pinhakkeyey immamnun humman ni inhel etan ni kaman-ayyam di puyek et heni law baka e kamammangngan ni helek niya tuka itettemeg hu delnu. Dimmukkey hu bewek tu et henin kadinukkey ni dutdut ni tulduh niya dimmukkey ida hu kuku tu et henidda kimeng ni sisit.

*Ya nenaydayawan law Nebukadnessar nan hi Apu Dios*

<sup>34</sup> Negibbuh etan pitun toon ey nambanggad law ni kakkayyaggud hu nemnem nan Nebukadnessar et kantuy “Intangaw kun Apu Dios di kabunyan ni pengippeang-angan kun nantuttuyuan kud liwat ku ey nambanggad law ni kakkayyaggud hu nemnem ku. Et daydayawek law etan Keta-ta-geyyan ni Dios e wadan ingganah.

Hi-gatu hu mannananeng ni man-ap-apun ingganah. <sup>35</sup> Ya tuka penang-ang ni tutu-u eyad puyek ey endi silbi da. Hi-gatu ngenamung ni pinhed tun pehding ni hi-gada, anin idan aangel di kabunyan. Ey endi hakey ni tuun dammutun mengippesiked ni pinhed tun pehding winu an mengibga hedine kele nealay hanniman tu pehding.”

<sup>36</sup> “Yan neibangngadan dedan law ni kayyaggud ni nakka pannemnem ey neibangngad ni hi-gak hu dayaw ku, ya kelebengan kun mampatul, niya dayaw ni nan-ap-apuan ku. Ey ida kamanggagaya etan ida kaumtugun ni hi-gak niyadda opisyal tun memangngad ni hi-gak et hi-gak mewan hu patul da, niya e-etteng anhallaw hu dayaw kun nunya nem yan nunman. <sup>37</sup> Et humman hu, hi-gak e hi Nebukadnessar, ey nakka kulluga law niya nakka daydayawa etan Patul di kabunyan. Neiptek numan niya limpiyuh ni emin hu tuka pehding niya kabaelan tun pebahah ida tuun kamampahhiya.”

## 5

*Ya etan neitudek di dingding*

<sup>1</sup> Nelabah hu pigan toon et mambalin ni patul hi Belsassar. Et hakey ni aggew ey nampahemul di baley tu et paeygud tudda hu hanlibun opisyal tu et mengi-innum ida. <sup>2-3</sup> Ida kamengi-innum ey minandal Belsassar ida bega-en tu e peukkat dadda balituk niya silber ni basuh niyadda mahukung ni duyu, et humman ida nengiinuman ida etan ni opisyal tu, yadda aahwa tu niyadda etan edum ni biin imbilang tun ahwa tu. Humman ida hu duyu niya basuh ni imbesik lan ammed tun hi Nebukadnessar di Tempol di Jerusalem. <sup>4</sup> Yan nunman ni neammuammungan da ey dinaydayaw dadda hu kinapya dan dios dan nekapyad balituk, silber, giniling, gumeke, batu niya keyew.

<sup>5</sup> Endi maptek ey inang-ang da hu ngamay ni tuun kamantuddek etan di dingding ni neipettekan ni kengkeh. Inang-ang daman patul humman ni ngamay ni kamantuddek <sup>6</sup> ey kimmuphat ni takut tu niya kamangegeygey hu heli tu. <sup>7</sup> Et itkuk tun daddalli eyyagan ida etan maebig, yadda maenap niyadda etan daka dibbaa hu bittuwen. Immalidda et kantun hi-gaday “Hedin wadan hi-gayu hu hambidbid tu eman neitudek niya inamta tu hu keibbellinan tu, man pebalwasian kun madlang ni balwasin patul, pebanggelan kun balituk niya hi-gatu hu meikkatuln keta-ta-geyyan hu saad tu eyad bebley ni nampatuln ku.”

<sup>8</sup> Nem immaliddan emin hu nelaing ni kaumtugun nan patul ey eleg da amtan memidbid etan ni neitudek niya eleg da amta keibbellinan tu. <sup>9</sup> Et nema-man nemahhig takut nan patul ey nema-man kimmuphat, nem ida kametemma etan opisyal tun pehding da.

<sup>10</sup> Dingngel nan hi ina etan ni patul hu kalang nan patul et yadda opisyal tu, et humgep etan di daka panhahamuli et kantuy “Apu patul, ya kayyaggud ey mannenneng kan mategu! Entan tattakut mu ma-lat eleg ka kumukuphat. <sup>11</sup> Wada eyad bebley ni nan-ap-apuam hu hakey ni tuun wadan hi-gatu hu ispirituh idan dios. Ya lan nampatulanan nan amam e hi Nebukadnessar ey neamtaan hu laing tun endi kei-ingngehan tu e heni dama dios. Et pambalin nan amam ni ap-apuddan nelaing ni magic, yadda maebig, yadda maenap, niyadda etan daka dibbaa hu bittuwen. <sup>12</sup> Hi Daniel ngadan tu, nem nginedanan Nebukadnessar ni hi Belteshasar. Nelaing niya nenemneman ey amta tu hu keibbellinan ni i-innep niya hipan kamekapkapyan eleg tayu han-awat ni tuu. Et hedini kuma, man mulli impaeyag humman ni tuu et hi-gatu pengibbegaan mun keibbellinan eyan neitudek.”

<sup>13</sup> Et dalli aygan hi Daniel, et kan nan patul ni hi-gatuy “Kaw hi-gam hi Daniel e hakey ni ingkuyug alid ama eman ni nalpuan dad Judah? <sup>14</sup> Dingngel ku e wadan hi-gam hu ispirituh idan dios, ey nelaing ka niya nenemneman ka. <sup>15</sup> Impaeyag kudda etan nelaing ni kaumtugun ni hi-gak, yadda maebig, niyadda etan daka dibbaa hu bittuwen, ma-lat bidbiden da huyyan neitudek et ehelen da keibbellinan tu, nem endin hi-gada hu nengamta. <sup>16</sup> Nem hedini hi-gam, man dingngel ku e amtam hu keibbellinan idan neligat ni meewwatan niya amtam keibbellinan idan kamekapkapyan eleg han-awat ni tuu. Hedini hambidbid mu eya neitudek niya peamtam hu keibbellinan tu, ey pambalwasi dakan madlang ni balwasin patul, pebanggelan dakan balituk niya hi-gam hu meikkatlun keta-ta-geyyan hu saad tu eyad bebley ni nampatulanan ku.”

<sup>17</sup> Himmumang hi Daniel ey kantuy “Anin ni eleg mu iddawat ni hi-gak ida huttan ni inhel mu. Hedini pinhed mu, idwat mun edum. Tep anin ni endi iddawat mun hi-gak et bidbidek ngu dedan eya neitudek niya e-helek keibbellinan tu.

<sup>18</sup> Apu patul, inamtam e impambalin nan Apu Dios e Keta-ta-geyyan hi amam lan hi Nebukadnessar ni nandingngel, kamedaydayaw niya kametal di emin ni patul. <sup>19</sup> Hi-gatu hu keta-ta-geyyan idan patul di puyek et emin hu tuud kebebbley, anin ni nambakbaklang hu nahlagan da niya hapit da, et ida kaumgeygey ni takut dan hi-gatu. Hedini pinhed tun pepettey hu hakey ni tuu, man tuka pepettey. Ey hedini eleg tu pinhed ni pepettey hu hakey ni tuu, man eleg tu pepettey. Tuka iddawsin keiddeyyawan hu tuun pinhed tun meidaydayaw, nem tuka babba-inga hu tuun pinhed tun be-ingen. <sup>20</sup> Nem entanni ey nambalin ni kamampahhiyya, ey kahing niya mabunget, et ekalen Apu Dios di tuka pan-ap-apui et endi law kamengidaydayaw ni hi-gatu. <sup>21</sup> Ey nedegyun et meidawwid kad-an idan tutu-u niya nambalin ni henin nemnem ni animal hu nemnem tu, et an mei-dum ni donkey di muyung. Nannangnan ni helek e heni baka niya intettemmeg tu hu delnu, ingganah inebulut tun hi Apu Dios di kabunyan, e Keta-ta-geyyan, hu nangged ni emin ni nan-ap-apuan ni tuud puyek niya hi-gatu hu ngenamung ni menuddun pinhed tun man-ap-apu.

<sup>22</sup> Nem hi-gam ni nei hullul ni hi-gatu, ey eleg mun hekey pebahbah hu annel mun Apu Dios, anin ni inamtam ni emin ida huyyan neipahding lan amam. <sup>23</sup> Ngehay mun Apu Dios di kabunyan hu mu nengipeukatan ida etan ni basuh niya duyun nalpullid Tempol tu, et pengiinnuinnuman yuddan opisyal mu, yadda aahwam niyadda etan edum ni biin imbilang mun ahwam. Em, nenginnuinnunum kayu niya dinaydayaw yudda kinapya yun dios yun nekapyad balituk, silber, gumek, batu niya keyew, anin ni eleg da hangengel, eleg da han-ang-ang niya endi inamta da. Ma-nudda humman idan beken ni makulug ni dios, tep dinaydayaw mudda ey eleg mu dayawen hi Apu Dios di kabunyan, e nengidwat ni biyag mu niya hi-gatu ngenamung ni meippahding ni hi-gam. <sup>24</sup> Et mukun impaeli tu etan ngamay et tu itudek di dingding hu meippahding ni hi-gam.

<sup>25</sup> Ya bidbid idan nunman ni neitudek ey kantuy: Bilang, Bilang, Bel-at, Gadwa. <sup>26</sup> Ya keibbellinan ni ‘Bilang,’ ey binilang nan Apu Dios hu aggew ni kepappegan ni pan-ap-apuan mu. <sup>27</sup> Ya keibbellinan etan ni ‘Bel-at,’ ey heni daka ingkiloh nan Apu Dios ey kulang bel-at mu tep angkepaw ka. <sup>28</sup> Ya keibbellinan ni ‘Gedwa,’ ey megedwa eya bebley ni nan-ap-apuam, et sakupen idan iPersia niyadda iMedia.”

<sup>29</sup> Negibbuh hi Daniel ni immehel et mandalen nan Belsassar ida bega-en tu et balwasian da hi Daniel ni madlang et banggelan dan balituk. Ey nambalin tu hi Daniel ni meikkatlun keta-ta-geyyan hu saad tud bebley ni nan-ap-apuan tu.

<sup>30</sup> Yan nunman ni hileng, ey pintey da hi Belsassar e patul di Babilon <sup>31</sup> et mai hullul ni nampatul hi Darius e iMedes e na-nem et dewwa hu toon tu. \*

\* 5:31 5:31 Ang-ang yu hu Isaiaah 13:17, Jeremiaah 51:11 niya 51:28. Ang-ang yu dama Daniel 6:28.

## 6

*Ya da nengiha-adan Daniel di kubkubban idan layon*

<sup>1</sup> Yan eman ni hi Darius law hu nei hullul ni patul di Babilon ey nannemnem et pumilin hanggatut et dewampulun governor ni man-ap-apid kebebheley di Babilon. <sup>2</sup> Ey pinutuk tu hi Daniel et yadda dewwan edum tun pan-ap-apidan emin nunman ni governor niya memaddang ni hi-gatu ma-lat ya kayyaggud hu meippahding di bebley ni nampatulanan tu. <sup>3</sup> Eleg maeyapaw ey inang-ang nan patul e i-imman ni peteg hu kapehpehding nan Daniel di ngunu tu nem yadda etan dewwan edum tu niyaddan emin etan governor. Et tuka nemnemneman ihha-ad hi Daniel ni pan-ap-apidan emin ni opisyal tud nampatulanan tu. <sup>4</sup> Entanni ey ida kaum-ameh etan dewwan edum tu niyadda etan governor et ida kaumhamahamak ni meihlan pehding Daniel di ngunu tu, nem endin hekey hu daka hemmaka, tep limpiyuh hu tuka pehpehding. Endi hu el-eleg ni tuka pehding niya endi hu tuka tellamad ngunu tu. <sup>5</sup> Wada law hakkey ni hi-gada ey kaday “Endi mannuman hu tayu hemmakan ni pebehul tayun Daniel. Ebu hu tuka pengu-unnudin tugun etan ni Dios tun dammutun wada hu pambekhulan tun patul.”

<sup>6-7</sup> Et lumaw idad kad-an patul et kaday “Ya kayyaggud ey mannenneng kan mategu! Emin kamin kamampaptek eyad nan-ap-apuam, hi-gamidann superbaysor, yadda governor, yadda meihhayned idan governor niyadda edum ni aap-apu ey nantetebbalan kami e kayyaggud hedinn mengapya ka e apu patul ni olden et iolden mu e eleg meibbulut ni telumpulun aggew ni wada hakey ni tuun an mandasal di dios tu winu hipan tuu. Hi-gam ni ebuh e apu patul hu dammutun pandasalan da. Hedinn wada eleg mengu-unnud nunyan olden mu ey tayu e-gahen di kubkubban idan layon. <sup>8</sup> Hedinn ebbuluten mu huuya, man paitudek mu et pilmaan mu ma-lat endi dammutun an mehullulan henin olden idan Medes niyadda iPersia e eleg mabalin ni mehullulan.” <sup>9</sup> Inebulut Darius hu inhel dan hi-gatu, et kapaen da etan olden et pilmaan tu.

<sup>10</sup> Dingngel Daniel humman ni olden, nem immanemut kumedek di baley tu et lumaw etan di kuwaltuh di ha-pat, e yadman tuka pandasalin nampitlun kewa-wa-wa, et mandukkun et mandasal nan Apu Dios di pettek ni habhabyen ni neihanggad apit ni Jerusalem.

<sup>11</sup> Neiunud ida etan opisyal ni kaumhamahamak ni pebehul dan Daniel ey hina-kupan dan kamandalan e kamambeggan baddang etan ni Dios tu. <sup>12</sup> Et ebuhe lumaw idan an mandadatteng nan hi patul. Et kandan hi-gatuy “Apu patul, kaw beken ni makulug e wada pinilmaam ni olden e yan telumpulun aggew ey endi an mandasal di dios tu winu hipan tuu, tep hi-gam ni ebuh hu dammutun pandasalan da? Ey pinilmaam e ya tuun eleg mengu-unnud ni nunman ni olden mu ey an e-gahen di kubkubban idan layon.” Immehel hi patul ey kantuy “Em, humman hu pinilmaan kun olden. Ey humman ni olden ey mahapul ni meunnud henin olden idan Medes niyadda iPersia e eleg mabalin ni an mehullulan.” <sup>13</sup> Et kandan patul ey “Hi Daniel, e hakey ni balud ni ifudah, ey eleg daka lisipitua niya eleg tu u-unnuda humman ni olden mu, tep ingganah nunya ey kamampitlun mandasal ni dios tun kewa-wa-wa.”

<sup>14</sup> Dingngel patul humman ni inhel da ey maggeh ni peteg hu nemnem tun tu nemilmaan ni nunman ni olden et iaggew tu nemnemnem ni pehding tu ma-lat eleg mekastigu hi Daniel. <sup>15</sup> Nem humman hu mahmahdem ey nambangngad ida mewann etan opisyal tu et kaday “Apu patul, inamtan e ya olden idan Medes niyadda iPersia ey eleg mabalin ni an mehullulan.”

<sup>16</sup> Et iolden law nan patul e da ellan hi Daniel et da egahen di kubkubban idan layon. Kantun Daniel ey “Ngenamung ew hu Dios mun muka paka-u-unnudan mengihwang ni hi-gam.”

<sup>17</sup> Ida immalan batun inde-hil dad heggeppan etan ni kubkubban idan layon et imalkan patul hu malka tu et ya malkaddan opisyal tu ma-lat endi tuun an umlaw di kadan Daniel ni an mengihwang ni hi-gatu. <sup>18</sup> Nambangngad hi Darius di baley tu, nem eleg mangan niya eleg um-ali ugip tun nunman ni hileng. Ey eleg tu pinhed ni wada mengippeamleng ni hi-gatu.

<sup>19</sup> Newa-wan nunman et humelaman hi patul di kubkubban idan layon et papuut tun an menang-ang hedinn hipa hu neipahding nan Daniel. <sup>20</sup> Dimmateng diman et tekukan tu hi Daniel e kantuy “Daniel, e bega-en nan Apu Dios e wadan ingganah! Wada-et anhan ni inhwang dakan Dios mun muka paka-u-unnuda e eleg daka kanen idan layon?”

<sup>21</sup> Himmumang hi Daniel ey kantuy “Apu patul, ya kayyaggud ey mannananeng kan mategu! <sup>22</sup> Intu-dak alin Apu Dios hu anghel tu et imiden tu hu bungut idan layon et eleg da-ak kanen, tep inamtan tu e endi bahul ku niya endi nak impahding ni hi-gam ni lawah.”

<sup>23</sup> Immamleng ni peteg etan patul tep endi an neipahding nan Daniel et iolden tu et da gayuden hi Daniel et ang-angen da ey endin hekey hu nelunggidan di annel tu, tep impaptek nan Apu Dios e nengidinelan tun biyag tu. <sup>24</sup> Hedin yadda law etan tuun nengidiklamuh nan Daniel, man an ida impadpap nan patul et anin ida ahwa da niyadda u-ungnga da ey neki-la dadda et dadda pan-egahen di kubkubban idan layon. Hedin ingah dadda kubkub, man eleg da dettenga hu puyek tep kapanhikmataddan layon ni nanhimbaba-nutan dadda.

<sup>25</sup> Entanni ey nengapyan olden hi Darius et palaw tud tutu-ud kebebbebley di nan-ap-apan tun nambakbaklang hu nahlagan da niya hapit da. Kantu etan di impaitudek tun olden tuy

“Ya pinhed ku ey kayyaggud kayun emin. Katuutuud kebebbebley di nan-ap-apan ku, <sup>26</sup> yan nunya ey i-olden ku e mahapul ni ya tekkutan yu niya daydayawen yu ey ya etan Dios ni kakulluga niya kau-unnudan Daniel. Humman ni Dios ey wadan kenayun niya man-ap-apan ingganah. Ya nan-ap-apan tu ey endi tu kebahbahan niya mannananeng ni ingganah hu et-eteng ni kabaelan tu. <sup>27</sup> Humman ni Dios ey tuka hellaknibi tutu-u tu niya tuka pehding hu kaketngain tuu di kabunyan niyad puyek. Hi-gatu hu nengihwang nan Daniel et eleg kanen idan layon.”

<sup>28</sup> Yan nampatulan nan Darius et hi Cyrus e iPersia ey kakkayyaggud hu neipahpahding nan Daniel. \*

## 7

*Yadda etan epat ni anggetakkut ni animal ni inang-ang Daniel di i-innep tu*

<sup>1</sup> Wada hakey ni hileng ni nan-i-inneppak et itudek ku hu inang-ang kud i-innep ku. Yan nunman hu nemangulun toon ni nampatulan nan Belsassar di Babilon. <sup>2</sup> Heninnuy hu ini-innep ku: Man-ang-anggak kumangngu ey nemahhig hu dibdib ni kamelpud nambinbina-hil etan di inang-ang kun baybay e ida kamanhiphipngat di gawwa tu et endi maptek ni kalawwin danum. <sup>3</sup> Entanni mewan ey neukat alid baybay hu epat ni nambakbaklang ni etta-teng niya anggetakkut ni animal.

<sup>4</sup> Ya etan nemangulu ey heni layon hu ang-ang tu, nem nepayakan ni heni payak ni tulduh. Nakka ang-ang-anga ey nelekh payak tu. Neipeehneng e heni tuu et meidwatan ni nemnem ni tuu.

<sup>5</sup> Ya etan neikadwa ey heni bear e immehneng di dewwan heli tu e wada ingkamil tun tellun genit ni taglang. Entanni ey wada hu dingngel kun immehel e kantuy “Mu pan-ekan hu tuu ingganah mehingla ka.”

<sup>6</sup> Ya etan neikatun inang-ang kun neukat alid baybay ey heni leopard hu ang-ang tu, nem epat hu ulu tu niya wada hu epat ni payak tun heni payak ni sisit. Neidwat ni hi-gatu hu kelebngan tun man-ap-apu.

<sup>7</sup> Ya etan neika-pat ni inang-ang ku ey nemahhig ni anggetakkut niya na-let ni peteg. Etta-teng hu ngipen tun heni gumeke et tudda kapangketketa hu tuka dedpapa ni nan-ekan tudda. Ey tudda kapan-ideyadpap hu sindaan tu. Hin-appil hu ang-ang tudda etan di edum, e hampulu ha-duk tu. <sup>8</sup> Nakka itettekkel etan ida ha-duk tu ey inang-ang kun neukat ali hu ekkeket ni ha-duk et hek-ilen tudda etan tellu. Humman ni ekkeket ni ha-duk ey nemataan ni heni matan tuu niya wada bungut tun kamampahhiyyan kaman-e-ehhel.

<sup>9</sup> Yan nunman mewan ni nakka man-ang-ang-ang ey kamangekihha-ad ida hu kayuddungin patul et lumaw hi Apu Dios e wadan ingganah et an yumudung ni manhuwet. Ya balwasi tu ey makablah e heni dallallu. Anin ya bewek tu et makablah e heni dutdut ni kalneroh. Ya etan yinudungan nunman ni man-ap-apu ey nahlian ni henin helin talak e kamantettebbel. <sup>10</sup> Et henilli danum ni kamambulbulubul di wangwang hu apuy ni kameukkat etan di yinudungan tu. Wadadda kalibulibun anghel di kad-an tun daka pan-ippahding hu neitudun ngunnen da. Niya immen ida damad hinangga tu hu kemilyomilyon ni kamenehhegged hedin hipa hu e-helen tun pehding da. Entanni ey neilepu law hu panhummalayaan etan ni huwet ey nebekyag ida etan libluh tu.

<sup>11</sup> Naneng tun nakka man-ang-ang-ang ey nakka deddenggela etan ekkeket ni ha-duk e tagan tun kamampahhiyyan kaum-eheehel. Entanni ey inang-ang kun pintey da etan meikka-pat ni animal et da bekahen hu annel tud apuy et magiheh. <sup>12</sup> Yadda etan tellu ey eleg dadda ni pateyen, nem na-kal hu kelebngan dan man-ap-apu.

\* 6:28 6:28 Ang-ang yu hu Isaiah 13:17, Jeremiah 51:11 et ya 51:28. Ang-ang yu dama Daniel 5:31.

<sup>13</sup> Entanni mewan ey wada inang-ang kun heni hi-gatu etan pengulwan ni emin ni tuu e nalpullid kabunyan ey linikweh ni kulput. Immelad kad-an etan ni Wadan Ingganah et ipengulu dad hinangga tu. \* <sup>14</sup> Neidwat ni hi-gatu hu kelebengan tu, ya kabaelan tu niya keiddeyyawan tu ma-lat hi-gatu hu pan-ap-apun katuutuud kebebbley ni nambakbaklang hu nahlagan da niya ehel da. Hi-gatulli hu mannananeng ni man-apu niya endi hu an kebabahan ni pan-ap-apuan tu, nem mannananeng alin ingganah.

*Ya keibbellinan ni ini-innep Daniel*

<sup>15</sup> Nemahhig takut ku, tep ya humman ni nak ini-innep. <sup>16</sup> Et meihnuppak etan ni hakey ni kaman-eh-ehngem diman et ibegak ni hi-gatu hedin hipa keibbellinan idan nunman ni nak ini-innep. Ey kantun hi-gak ey <sup>17</sup> 'Ya kei-elligan ida etan ni epat ni etta-teng ni angetakkut ni animal ey humman idalli epat ni bebley ni man-ap-apu eyad puyek. <sup>18</sup> Nem yallin kegibbuan ni emin ey ihullul idallin Apu Dios e Keta-ta-geyyan hu pinili tun tutu-u tu, et hi-gada hu meihullul ni man-ap-apun ingganah.'

<sup>19</sup> Pinuhlanan ku hu meippanggep etan ni neika-pat ni animal e hin-appil hu ang-ang tu niya nemahhig ni angetakkut. Kagalalan gumek ni ngipen tu hu tuka dedpapa niya kagudduan giniling ni kimeung tu ni nan-idehidah ni heli tu hu sindaan tu. <sup>20</sup> Ey pinuhlanan ku hu meippanggep etan ni hampulun ha-duk tu et ya etan ek-eket ni ha-duk tun angetakkut hu ang-ang tun nemataan niya nebungutan, et kamampahhiyyan man-e-ehhel. Humman ni ek-eket ni ha-duk hu nenek-il ida etan ni tellu et mapugah ida.

<sup>21</sup> Nakka ang-ang-anga mewan ey kapanggubbataddan nunman ni ha-duk ida hu tuun Apu Dios et ngannganih ni apputen tudda. <sup>22</sup> Nem immali hi Apu Dios e Keta-ta-geyyan e Wada dedan nunman et manhuwet ey impengapput tudda pinili tun tutu-u tu. Nedatngan law hu pan-ap-apuan idan tuu tu.

<sup>23</sup> Yahhuy hu inhel etan ni nengibag-an kun keibbellinan ni ini-innep ku: "Ya etan neikapat ni animal ey humman kei-elligan etan ni meikka-pat alin bebley ni man-ap-apu eyad ta-pew ni puyek. Bimmaklang ali etan di edum ni bebley di puyek. Ey apputen tuddallin emin hu ap-apud edum ni bebley. <sup>24</sup> Ya etan hampulun ha-duk ey humman kei-elligan idalli etan ni hampulun patul ni mampan-ap-apudman e bimmaklang ni bebley. Nem wadalli hu hakey ni meubbungngget ni hin-appil ni patul et apputen tuddalli hu tellu etan idan hampulun patul. <sup>25</sup> Lawah ali hu e-e-helen tun meippanggep nan Apu Dios e Keta-ta-geyyan ey panliligat tuddalli hu tuun kamengullug nan Apu Dios. Ippatna tullin hullulan ida tugun ni daka u-unnuda, anin idan piyestah da. Humman ni meikka-pat ni man-ap-apu hu pan-ap-apu dan tellu et kagedwah ni toon.

<sup>26</sup> Nem kastiguen alin Apu Dios humman ni patul et umpappeg hu pan-ap-apuan tu.

<sup>27</sup> Yallin kegibbuan ni emin ey iddawat alin Apu Dios e Keta-ta-geyyan idan pinili tun tutu-u tu hu kelebengan dan man-ap-apun ingganah di kebebbley di puyek. Et-eteng ali kabaelan da, et emin idalli hu edum ni aap-apu ey u-unnuden dadda.

<sup>28</sup> Huyya hu pappeg ni ini-innep ku. Umbangunnak ey kimmuphattak tep nemahhig takut ku, nem endi hu nak nenge-ehhelan eyan nak ini-innep."

## 8

*Ya ini-innep Daniel ni lakkitun kalneroh niya gelding*

<sup>1</sup> Yan eman ni meikkatun toon ni nampatulan nan Belsassar ey nan-i-inneppak mewan e humman hu meikkadwan i-innep ku. <sup>2</sup> Yad i-innep ku ey wada-ak kumangngud Susa, e neluhud ni et-eteng ni bebley di probinsiya di Elam. Et nak kumangngu kaman-eh-ehngem etan di gilig ni wangwang di Ulai <sup>3</sup> ey wada inang-ang kun lakkitun kalneroh ni dewwa ha-duk tun andukkey. Nem andudukkey hu hakey, anin ni nanggillig ni simmulu. <sup>4</sup> Nakka ang-ang-anga humman ni lakkitun kalneroh ey tagan tu ha-duk e tuka panha-dukadda etan edum tun wadad appit ni kakelinnugin aggew, yad north niyad south. Katekkusiddan emin ni edum ni animal di puyek et endi hu hakey ni wada kabaelan tun mengippesikked ni tuka pehpending. Et entanni ey nambalin ni et-eteng law kabaelan tu et tuka pehding ni emin hu pinhed tun pehding.

<sup>5-6</sup> Entanni et nakka nemnemnema hu keibbellinan nunman ey pinhakkey ey iyyalli kamambeessik ni lakkitun gelding ni nalpullid appit ni kakelinnugin aggew. Na-let ni peteg ni umbesik e heni eleg umgasin hu heli tud puyek. Humman ni gelding ey hakey ni ebuh hu ha-duk tun wadad nambattanan ni matetu. Immelan tu ha-duken etan lakkitun kalneroh ni dewwa ha-duk tun kaman-eh-ehngem di gilig ni wangwang.

<sup>7</sup> Indeplug tu etan kalneroh et panha-duken tu et mehepngit etan dewwan ha-duk tu.

\* 7:13 7:13 Ang-ang yu hu Matthew 24:30 ey 26:64, Mark 13:26, 14:62 niya Luke 21:27

Endi law kabaelan nunman ni kalneroh et tu-lien etan ni gelding et pan-igsin tu, nem endi kameheggag ni kaan memaddang etan ni kalneroh. <sup>8</sup> Nema-ma law ni et-eteng ni peteg kabaelan nunman ni gelding. Nem entanni ey nepugah hu ha-duk tu et mahululan ni epat ni etta-teng ni ha-duk ni nambakbaklang hu nengihangga da. <sup>9</sup> Entanni mewan ey pimmingi hu hakey ida etan ni epat ni ha-duk. Et-eteng kabaelan nunman ni ek-eket ni ha-duk niya sinekup ni nan-ap-apan tu etan ida bebley di appit ni south niyad appit ni kasimmilin aggew ingganah lad bebley idan tutu-un Apu Dios di Israel. <sup>10</sup> Nambalin ni et-eteng ni peteg kabaelan tu humman ni pingin ha-duk et gubaten tudda sindalud kabunyan et egahen tudda edum ni bittuwen et pan-igsin tudda. <sup>11</sup> Anin ni ya etan Ap-apuddan sindalud kabunyan et kinehing tu, et pasiked tu hu kamei-appit ni hi-gatun kewa-wa-wa, niya binahbah tu hu Tempol. <sup>12</sup> Gapuh nunman ni impahding tu ey wadadda law helag Israel ni kamangngenghay. Ey impanhelheltap tudda kamengullug. Emin etan kapehding idan tuun Apu Dios ni neiptek ni daka penaydayaw ni hi-gatu ey impasiked tu. Ey emin etan pinhed tu ey impahding tu.

<sup>13</sup> Entanni ey dingngel ku hu hakey ni anghel e kantu etan ni edum tun anghel ey "Pigan tulli hu keippahdingan eyan inang-ang ku? Ey pigan tu hu kegibbuhan ni nemahhig ni lawah ni kemeipahpahding di Tempol et han dammutu mewan ni man-appit ida tuun Apu Dios ni kewa-wa-wan hi-gatu? Ey pigan aggew hu panhelheltapan idan tutu-un Apu Dios niyadda sindalu tu? Niya pigan aggew hu pangngengghayan dan Tempol?"

<sup>14</sup> Himmumang etan hakey ni anghel ey kantuy "Mengmenglaw ali humman ni lawah ni meippahding ni hanlibu et hanggatut et neliman aggew. \* Yan nunman alin tsimpuh ey eleg meippahding etan kapan-appisiddan tuun Apu Dios ni hi-gatun kekakkabbuhhan niya kekahkahdem. Pakkadek ni melebbah huyyan nebilang ni aggew et han mewan mambanggad ni emin etan kakkayyaggud ni kameippahding di Tempol."

*Inhel ni anghel e hi Gabriel hu keibbellinan ni ini-innep Daniel*

<sup>15</sup> Nakka nemnemema hu keibbellinan nunman ni nak ini-innep ey pinhakkeyey wada hu heni tuun immehngeng di hinanggak. <sup>16</sup> Entanni ey wadalli kaman-e-hel etan di Wangwang e Ulai e kantuy "Gabriel, ehel mun hi-gatu hu keibbellinan eyan ini-innep tu."

<sup>17</sup> Immali hi Gabriel et meidagsin hi-gak ey netukkaddak ni takut ku. Et kantun hi-gak ey "Hi-gam e tuun ebu, ey mahapul ni ewwatam e huyyan inang-ang mud i-innep mu, ey humman idalli hu mekapkapyallin kepappegan ni puyek."

<sup>18</sup> Kaman-e-ehhel ey nealimudengngak e limmukbubbak di puyek. Nem singnged tuwak et peehnged tuwak.

<sup>19</sup> Kantu ey "Dengel mu et ehelen kun hi-gam hu meippahding alin kepapegan eyan puyek ni pengippeang-angan Apu Dios ni bunget tu. <sup>20</sup> Ya etan dewwan ha-duk etan ni lakkitun kalneroh ni inang-ang mu, ey humman ida etan bebley di Media niyad Persia.

<sup>21</sup> Ya etan gelding, ey i-ehngeng tu hu bebley di Greece. Ya etan ha-duk di nambattanan ni matetu, ey humman ali etan memengngulun patul di Greece. <sup>22</sup> Yadda etan epat ni ha-duk ni simmeme ni nei hullul etan di nehepngit ni ha-duk ey humman idalli etan epat ni bebley ni kegennadwaan ni bebley di Greece. Endillin hi-gada hu meki-ingngeng di kabaelan etan ni nemangulu.

<sup>23</sup> Yallin ngannanin ni kepapegan idan nunman e kapan-ap-apui, tep ya nemahhig ni lawah ni daka pehpending, ey wadalli hu meihullul ni mampatul ni makabbunget niya nekattalam. <sup>24</sup> Et-eteng ali kabaelan tu, nem eleg ali melpun hi-gatu humman ni kabaelan tu. Nemahhig ali bahbahen tu niya meippahding alin emin hu pinhed tu. Anin idallin et-eteng kabaelan da niyadda tutu-un Apu Dios et bahbahen tudda.

<sup>25</sup> Nelaing alin peteg ni umtalam niya umhaul et he-ulen tulli hu dakek ni tuu et apputen tudda. Endillin maptek ey bahbahen tu dakek ni tutu-u ey eleg dalli am-amta. Et-eteng ali pampahhiyyaan tud tuka pehpending, et anin ali etan ni Keta-ta-geyyan ni Ap-apu et kakkahingen tu. Mettey ali humman ni patul, nem beken alin tuu hu memettey ni hi-gatu.

<sup>26</sup> Hedin ya etan meippanggep ni pan-appitan ni kekakkabbuhhan niyan mahmahdem ni inang-ang mud i-innep mu ey makulug ni um-amnudda, nem entan tu ni e-ehhel tep ayepaw ali amnuan tu."

<sup>27</sup> Impandegeh kun pigan aggew humman ni nak ini-innep. Nem entanni ey inhikal ku et lumawwak di ngunuk ni indawat nan patul ni hi-gak. Nem nanengtun humman ni nak inang-ang di i-innep ku hu nakka pannenemnem, tep eggak han-awat.

\* **8:14** 8:14 Ya edum ni version ni Bible ey impakibilang da hu kakkabbuhhan niya mahmahdem ni daka pan-appisi, et humman hu neituede ni 2,300 tep nandubli hu kadinakkel ni impamilang da.

## 9

*Ya dasal nan Daniel idan tuun APU DIOS*

<sup>1</sup> Ya neihullul ni patul di Babilon ey hi Darius di Media e u-ungngan Serses. <sup>2</sup> Ya eman ni lapun toon ni nampatulanan tu, ey inedaedal ku etan intudek lan Jeremiah ni impeamtan APU DIOS ni hi-gatu, et nakka nenemnema etan kantun kebabahan alin bebley di Jerusalem e mannananeng ni eleg meiyayyaggud ni nepitun toon. <sup>3</sup> Et mampehemhemmekek nan Apu Dios di dasal ku. Nantepellak, ey nambalwasi-ak ni langgusih niya yimmudungngak di dep-ul.

<sup>4</sup> Nandasallak nan APU DIOS e Dios ku, et abuluten ku e nanliwat itsun tutu-u tu. Kangkud dasal kuy "Apu Dios, hi-gam, hi-gam ey eta-gey ka niya hi-gam mika daydayawa. Muka pannananeng ni peang-ang hu et-eteng ni impeminhed muddan neminhed ni hi-gam niya kamengu-unnud ni tugun mu. <sup>5</sup> Nem nanliwat kami tep lawah impenahding mi. Nginhay daka e eleg mi u-unnuden ida etan intugun mun neiptek ni pehding. <sup>6</sup> Eleg mi mewan u-unnuden ida nalpun hi-gam ni impeamtadan bega-en mun prophets idan patul mi, yadda edum ni kamengipappanggulun hi-gami, yadda la aammed mi niya hi-gamin emin ni bimbley.

<sup>7</sup> Hi-gam, e Apu mi, ey neiptek ni kenayun hu muka pehding. Nem emin kamin tuud Judah niyad edawwi, ey bineibeing mi annel mi tep ya eleg mi pengu-unnudan ni hi-gam. <sup>8</sup> Anin ni yadda la patul mi, yadda ap-apu mi niyadda la aammed mi et angeba-ang hu impahpahding da, tep nanliwaliwat idan hi-gam, e AP-APU mi. <sup>9</sup> Nem mahmek ka e Apu e Dios mi, niya muka liwwana hu hipan liwat mi, anin ni eleg mi u-unnuden ni emin hu tugun mu. <sup>10</sup> Em, eleg daka u-unnuden e APU e Dios mi, tep eleg mi ipahding ida tugun mun intenuttuddudda lan bega-en mun prophets ni kamengippeamtan pinhed mu. <sup>11</sup> Emin kamin helag Israel ey inwalleng midda tugun mu niya eleg mi pinhed ni dedngelen hu hipan muka-e-helan hi-gami. Nanliwat kamin hi-gam, et paelim ni hi-gami etan ida ligat niya kastigun intudek lan Moses e bega-en mu.

<sup>12</sup> Impahding mu tu-wangu eman kammun pehding mun hi-gami et yadda ap-apu mi, et deh e nehalhalman hu kapanlelehanidan tuud Jerusalem nem yadda edum ni tutu-ud puyek. <sup>13</sup> Hinelheltap midda humman ni kastigun intudek lan Moses, nem anin ni yan nunya et nanengtun eleg mi ipahding ida etan kamengippeamleng ni hi-gam e APU e Dios mi, tep eleg mi issiked ida etan lawah ni mika pehpahding ma-lat u-unnuden midda makulug ni tuttuddum. <sup>14</sup> Hi-gam, e APU e Dios mi, ey nandadaddan kan mengastigun hi-gami et deh e kinastigu dakemi. Tep limpiyuh ni emin muka pehding, nem eleg daka u-unnuden.

<sup>15</sup> APU e Dios mi, impeang-ang mu hu et-eteng ni kabaelan mu eman ni nengipenguluan muddan tutu-um ni neni-yan ni Egypt. Et mandingngel ka ingganah nunya. Nem ay anin dedan et nanengtun nemahhig ni kami kamanliwwaliwwat. <sup>16</sup> Apu, impaeng-ang mu hu binabbal muddan tuum ni nunman, anin ni ida kamanliwwaliwwat. Et humman hu, peang-ang mu anhan mewan ni nunya hu binabbal mun hi-gamin nambley di Jerusalem e bebley ni neikapyad duntug ni kad-an mu. Baddangi dakemi tep nemahhig ni kapanhimpipihulin tutu-ud kebabbeley hu Jerusalem, anin ni hi-gamiddan tutu-um, tep ya liwat mi niya liwat ida lan aammed mi.

<sup>17</sup> Apu Dios, dengel mu anhan huayan dasal ku e bega-en mun kamampehemhemmek ni hi-gam. Iyayyaggud mu anhan hu Tempol mun nebahbah ma-lat penang-angan ni katutuu e hi-gam hu makulug ni Dios. <sup>18</sup> Em, Apu Dios, dengel mu anhan eya dasal ku. Ey uhdungi dakemi anhan ma-lat ang-angen mu eya mika panlelehanin ligat mi niya ma-lat ang-angen mu eya nebahbahan eyan bebley mun Jerusalem. Inamtak e beken kamin kayyaggud tep neliwatan kami, nem kami kamandasal ni hi-gam tep inamta mi e mahmek ka niya kabbabbal ka. <sup>19</sup> Apu e Dios ku, dengel mu anhan hu dasal ku et liwwanem hu liwat mi. Ey entan anhan tu a-ayyapaw pengippahdingam ma-lat wada inna-nu tun keidaydayawan mu, tep tuu dakemin hi-gam niya bebley mu eya bebley mid Jerusalem."

<sup>20</sup> Intagan ku dasal et ehelek ni emin hu liwat ku niyadda liwat idan edum kun helag Israel niya nampehemhemmekek nan APU DIOS e Dios ku ma-lat iyayyaggud tu Tempol tu. <sup>21</sup> Yan nunman ni nakka pandasali ey pinhakkeyey simmayab ali et umlid kad-an ku etan anghel, e hi Gabriel hu ngadan tu e hi-gatu etan anghel ni inang-ang kun nunman di i-innep ku. Yan nunman hu tsiimpuh ni kapan-appisin mahmahdem. <sup>22</sup> Kantun hi-gak ey "Immali-ak ma-lat baddangan dakan et awatan mudda etan ini-innep mu. <sup>23</sup> Inebulut Apu Dios hu dasal mu, tep et-eteng impeminhed tun hi-gam



et adyah ni intu-dak tuwak alin an mengippeamtan hi-gam eyan pinhed tun peamta. Dengel mu, et ehelek ni hi-gam hu keibbellinan ni ini-innep mu.

<sup>24</sup> Kan Apu Dios ey melebbah hu epat ni gatut et nahyam ni toon et han tu pasiked ida etan lawah ni kamekapkapyad bebley tu e Jerusalem niya kapanliwwaliwasiddan tuu tu. Liwwanan tullu liwat idan tuu tu, niya limpiyuh ali law hu meipahpahding ni hi-gadan ingganah. Mambanggad ni hi-gatulli mewan law hu daydayawen dad Tempol tudman Jerusalem ma-lat amnuan ida etan ni ineni-innep niya in-inhel ida lan bega-en Apu Dios ni kaanmengippeamtan pinhed tu.

<sup>25</sup> Pakadngel mu et paka-awatan mu e meippalpun pengi-oldenan Apu Dios ni keiyayyaggudan ni Jerusalem ey melebbah hu na-pat et heyam ni toon et ya epat ni gatut et telumpulut epat ni toon et han umli etan patul ni sinudu tu. Meiyayyaggud alin emin hu keltad di Jerusalem niya meihhammad ali mewan law hu nanlinikweh ni batun luhud di diman e bebley. Nem nanengtun panlelehanan idan tuu hu ligat da. <sup>26</sup> Yan kepappegan tullu humman ni epat ni gatut et telumpulut epat ni toon ey iwwalleng dalli et petteyen da etan sinudun Apu Dios ni pan-ap-puddan tutu-u tu. Hedin megibbuh ni mekapkapy huyya, man um-aliddalli hu sindalun peellin hakey ni ap-apud edum ni bebley ni memahbah ni Jerusalem et ya etan Tempol. Humman alin tsimpuh ey henin wangwang hedin nedakkel danum e eleg mabalin ni mela-het. Tep wadalli gubat niya nemahhig ni ligat e humman implanuh dedan nan Apu Dios. <sup>27</sup> Humman ni ap-apu ey nehammad ali pekitbalan tudan dakel ni tutu-un pitun toon. Nem hedin melebbah hu tellu et kagedwah ni toon, man kekyaten tullu nekitbalan tu, ey pesikked tullu hu kapan-apisiddan helag Israel nan Apu Dios ni kewa-wa-wa. Niya ihha-ad tullu hu nemahhig ni kabellawan Apu Dios di Tempol tu, et mannananeng alidman ingganah medettengan etan gintud Apu Dios ni ketteyyan tu humman ni ap-apu."

## 10

*Ya i-innep Daniel di gilig ni Wangwang e Tigris*

<sup>1</sup> Ya eman ni katlun toon ni nampatulan nan Cyrus di Persia ey wada mewan hu impeamtan Apu Dios nan hi Daniel e hi Belteshasar hu hakey ni ngadan tu. Humman ni impeamtan Apu Dios nan hi Daniel di i-innep tu ey humman etan anggetakkut ni gubat ni nanna-ud ni um-amnun hakey alin aggew.

<sup>2-3</sup> Heninnuy hu intudek Daniel ni ini-innep tu e kantuy "Wada mewan ini-innep ku. Yan nunman ni tsimpuh ey nemahhig lemyung kun tellun lingguan. Eleggak mangamangan ni meheng-ew ni kennen, anin ni ya detag. Eggak mewan uminuinum ni hipan meinum. Anin ni emeh et eggak man-e-emmeh niya eggak hahhagguen hu bewek ku ingganah nelabah humman ni tellun lingguan.

<sup>4</sup> Ya eman ni meikkadwampulut epat ni aggew ni nemangulun bulan ni nunman e toon ey wada-ak kumangngu etan di Wangwang e Tigris e nakka man-eh-ehng

<sup>5</sup> ey intangaw ku ey inang-ang ku hu tuun nambalwasin luput niya namballikid ni nemahham ni balituk. <sup>6</sup> Kamandinglih annel tu e heni etan idan nangkinginan batu. Kaumhili angah tu e heni kedyam, ey heni kamantetebbel ni apuy hu matetu. Kamammussi-lak ida heli tu niya ngamay tu e henidda malinah ni giniling. Niya heni ngalan dakel ni peteg ni tutu-u hu ehel tu.

<sup>7</sup> Ebuhhak, e hi Daniel, ni nenang-ang ni nunya, tep endi maptek ey wada hu sinekutan ida etan ni impan-edum ku, et bumsik ida et ida mamपालु. <sup>8</sup> Et e-ebuhhak, tep nan-inhihi-yanan da-ak. Pinhakkeyey kimmapun ni peteg hu annel ku niya kimmuphattak ni takut ku etan ni nak inang-ang. <sup>9</sup> Dingngel kun immehel ey nealimudengngak et lumukbubbak di puyek. <sup>10</sup> Entanni ey wada hu ngamay ni nangngend ni hi-gak et ita-gey tuwak et humka-ak et mandukkunnak, ey nakka manggegeygey.

<sup>11</sup> Immehel humman ni tuu ey wadalli kantuy 'Daniel, e nakappinhed nan Apu Dios, ehng ka et pepuhdanan mu eya e-helen kun hi-gam, tep hi Apu Dios hu nengitu-dak alin hi-gak di kad-an mu.' Dingngel ku huyya et umehngngak, ey naneng tun nakka umngenegey.

<sup>12</sup> Et kantu ey 'Entan takut mu, e Daniel. Dingngel nan Apu Dios hu asal mu neipalpu eman ni nengipebabahan mun annel mu ma-lat wada inna-num ni mengewwat ni impeamta tud i-innep mu. Et mukun intu-dak tuwak alid ya. <sup>13</sup> Nem netaktakkak alin dewampulut hakey ni aggew et yan nunyan ebuh dintengak, tep kaikka-leg etan ni dimonyoh di bebley di Persia ni ellian kudya. Et pakkaw immali hi Michael e hakey ni ap-apuddan anghel ni nemaddang ni hi-gak, tep hahhakkeyyak di diman Persia. <sup>14</sup> Immali-ak ma-lat peamta ni hi-gam hu meippahding idallin tutu-um ni edum ni aggew. Tep huayan neipeang-ang ni hi-gam ey meippahding alin edum ni aggew.'

<sup>15</sup> Dingngel ku humman ni inhel etan ni anghel ey na-meddak et nakka itettekkel ni ebuh di puyek. <sup>16</sup> Nem entanni ey kimpan nunman ni heni tuu ang-ang tu hu bibil ku et umhellak law. Kangku etan ni kaman-eh-ehngeng di hinangngab ku ey 'Nakka umtatakut etan ni nak inang-ang di i-innep ku, et mukun nakka umgeneygey niya neendi elet ku, e apu. <sup>17</sup> Apu, hipa inna-nuk e bega-en mun mekihhumngan ni hi-gam ey deh e endin hekey elet ku niya nakka meliggasin umyayyah?'

<sup>18</sup> Nem entanni ey kimpa tuwak mewan ey ginibek ku e kamangekeibbangngad hu elet ku. <sup>19</sup> Et kantun hi-gak ey 'Entan tattakut mu niya entan kakkaguh mud linglinggeman, tep nakappinshed dakan Apu Dios.' Negibbuh ni inhel tu humman ey nema-man na-na-letannak et kangkun hi-gatuy 'Apu, ehel mu hedin hipa humman ni pinhed mun e-helen, haggud ay neibangngad law elet kun nangngelan kun inhel mu.' <sup>20-21</sup> Et kantuy 'Kaw inamtam hu gaputun nak illian? Immali-ak ma-lat nak peamtan hi-gam etan neitudek di liblul ni neitudkan ni makulug, et hannak mambangngad. Nem yan pambangngadak la ey mahapul ni nak mekihhangga etan ni dimonyoh di Persia. Hedin inapput ku humman ni dimonyoh, man meihhullul mewan ni mekihhanggan hi-gak etan dimonyoh ni nangnged ni bebley di Greece. Ya lan ebuh memaddang ni hi-gak ni menanggan hi-gada ey hi Michael, e anghel di Israel.' "

## 11

*Ya pan-ap-apuan alin patul di Egypt niya patul di Syria*

<sup>1</sup> Intuluy etan ni anghel hu pinhed tun e-helen ni hi-gak et kantuy "Meippalpu eman ni lapun toon ni pan-ap-apuan Darius di Medes, et ingganah ni nunya, ey hi-gak kamemabbaddang ni hi-gatu. <sup>2</sup> Makulug huyyan e-helen kun hi-gam. Wadaddalli hu tellun patul ni manhuluhulul ni man-ap-apud Persia et han ali wada etan meikka-pat ni patul \* ni kekekkekdangyanan ni hi-gadan emin. Et-eteng ali hu kabaelan tu tep ya humman ni kinedangyan tu, et ipatna tullin gubbaten hu bebley di Greece.

<sup>3</sup> Wadalli dama hu hakey ni patul ni mampatul di Greece e et-eteng ali dama hu kabaelan tu, † et emin ali etan pinhed tu ey ippahding tu. <sup>4</sup> Nem lektattulli et man-e-pat ni megennadwa humman ni bebley di Greece ni nampatulan tu, et wadaddalli hu epat ni patul ni meihhullul ni hi-gatu. Nem humman idallin epat ni patul ey eleg dalli han-inggeh kabaelan tu, niya hin-appil ali hu kelpuan da. Tep me-kal di nan-ap-apuan tu et yadda beken ni helag tu hu man-ap-apu.

<sup>5</sup> Yalli hakey ida etan ni epat ni patul ey hi-gatulli hu mampatul di Egypt. ‡ Et-eteng ali hu kabaelan tu, nem wadalli etan e-etteng kabaelan tun ap-apuddan sindalu tun la-pahan tullu humman ni patul, et hi-gatulli § hu man-ap-apud daddakkal ni bebley di diman Egypt. <sup>6</sup> Entannit melebbah ali hu pigan toon et umlaw ali etan patul di Egypt et an mekiggayyum etan ni patul di Syria \* et peahwa tullu etan hu u-ungnga tun biid † u-ungnga etan ni patul di Syria, ma-lat wada inna-nu tun panhimbabaddangan da. Man-ahwaddalli humman ni u-ungnga da, nem ya etan hummangan dan panhimbabaddangan da ey umpappeg ali, tep petteyen dallidman Syria etan bii, anin ya ahwa tu niya u-ungnga da, niyadda etan bega-en tud Egypt ni nekilaw ni hi-gatud Syria.

<sup>7</sup> Nem wadalli hu meihhullul ‡ ni mampatul di Egypt ni melpud pamilyah ni nahlagan nunman ni bii. Gubbaten tullu etan patul di Syria et hegepen tu, et apputen tu. <sup>8</sup> Ey i-anemut tud Egypt etan ida kinapa dan i-inggeh ni dios dad Syria, anin idan balituk ni duyu niya basuh ni daka ussalan daka penaydayawin dios da. Umlinggep ali humman ni bebley ni pigan toon. <sup>9</sup> Nem ipatnalli mewan etan ni patul di Syria § ni gubbaten hu Egypt, nem meapput ali. <sup>10</sup> Nem mambabaddang idalli etan lalakkan u-ungngan patul di Syria et mandaddan idan hantapug ni sindalu et lumaw idan mengubbat mewan ni Egypt. Ya hakey \* ni hi-gada ey ippangulu tudda sindalu tun an mekiggubbat et bahbahaen da hu tuping ni luhud ni bebley ni buhul da. Heniddalli na-let ni elwang e eleg mabalin ni mela-het. <sup>11</sup> Nem nemahhig ali bunget ni patul di Egypt † et ippangulu

\* **11:2** 11:2 Huyyan meikka-pat ni patul ey hi Serses. Ang-ang yu hu Esther 1:1. † **11:3** 11:3 Huyyan patul ey hi Alexander e nandingngel ni patul. ‡ **11:5** 11:5 Huyyan patul ey hi Ptolemy Soter. § **11:5** 11:5 Ya ngadan nunyan ap-apu ey hi Seleucus Nicator. \* **11:6** 11:6 Ya patul di Syria nunyan tsimpuh ey hi Antiochus. † **11:6** 11:6 Ya ngadan nunyan bii ey hi Bernice. ‡ **11:7** 11:7 Yalli meihhullul nan Bernice ey ya agin Ptolemy III. § **11:9** 11:9 Ya patul di Syria nunyan tsimpuh ey hi Seleucus Callinicus. Beken ni hi-gatu etan patul e hi Antiochus e ngadan di

verse 6. \* **11:10** 11:10 Huyyan hakey ni u-ungngan patul ey hi Antiochus e nandingngel. Hi-gatulli hu meihhullul nan ametun mampatul. † **11:11** 11:11 Ya patul di Egypt nunyan tsimpuh ey hi Ptolemy Philopater.

tudda sindalu tu et da gubbaten etan patul di Syria † niyadda etan hantapug ni sindalu tu et apputen tudda. <sup>12</sup> Mampahhiyyalli humman ni patul di Egypt ni pengapputan tuddan nunman ni hantapug ni sindalud Syria, nem nekemtang ni ebuh hu pan-am-amlengan tu. <sup>13</sup> Tep mambangngad hu patul di Syria et tu iddaddan hu daddakkel ni peteg ni sindalu tu nem yadda la nekigubat nunman niya paka-iddaddan dallin emin hu daka ussalad gubat et han ida lumaw mewan ni an mengubbat ni Egypt.

<sup>14</sup> Dakel idallin nunman hu tuud Egypt ni eleg meminhet etan ni patul § et ipatna dan ngenghayen humman ni patul da. Niya wadaddalli edum mu e Daniel, ni helag Israel ni mangngenghay, et ipatna dallin gubbaten humman ni patul di Egypt, tep ya ang-angen dad i-innep da, nem meapput idalli. <sup>15</sup> Ippaddih idallin sindalud Syria \* ni nunman hu da penggepan etan ni hakey ni bebley ni nehammad hu luhud tud nanlinikweh ni sinekup ni Egypt. Endilli kabaelan idan sindalud Egypt ni mekiggubbat ni hi-gada et meapput ida. Anin ida etan ni kelalla-ingan ni sindaludman et endilli hu kabaelan dan mekihhangga. <sup>16</sup> Et humman ni patul di Syria ey pehding tullu hu hipan pinhed tu, tep endi hu menanggan hi-gatu, et anin alin bebley nan Apu Dios et illagat tun i-e-dum di nan-ap-apuan tu.

<sup>17</sup> Mamplennuh ali mewan ni an mengubbat idan sindalud Egypt. Et peahwa tullu hakey ni u-ungga tun bii † di patul di Egypt ‡ ma-lat talamen tu et sakupen tun emin hu bebley diman. Nem eleg ali um-amnu humman ni pinhed tun pehding. <sup>18</sup> Entanni mewan ey gubbaten tuddalli hu nambebley di gilig ni baybay et sekkupen tu hu dakel ni bebley diman. Nem wadalli etan hakey ni ap-apud edum ni bebley ni mengapput ni hi-gatu, et humman ali pappeg ni pampahhiyaan tu. <sup>19</sup> Mambangngad di Syria humman ni patul et umlaw etan di bebley tun nehammad luhud tu, nem meapput ali, et humman ali kepappegan ni biyag tu.

<sup>20</sup> Wadalli mewan hu meihhullul § ni mampatul di Syria e mandalen tullu hakey ni opisyal tu et panliligat tuddalli hu tuu tu, tep peetteng tu hu bayad ni buwis da ma-lat i-dum tud kinedangyan tu. Nem nekemtang alin ebuh hu pan-ap-apuan tu humman ni patul, tep mettey, nem beken ni yad gubat hu ketteyyan tu.”

*Ya etan kelallawwahan ni patul di Syria*

<sup>21</sup> Intuluy etan ni anghel etan tuka pan-e-hela et kantuy “Yalli etan meihhullul ni patul di Syria ey lawah alin peteg. \* Endi lebbeng tun an mampatul, tep endi hu an nampatul ni aammed tu. Nem impampinilliw tu hu nampatulan tu niya nansinallam tu. <sup>22</sup> Emin idalli etan eleg um-unud di pinhed tu ey pepettey tuddan emin. Anin etan Eta-gey ni padin Apu Dios et pepettey tu. <sup>23</sup> He-ulen tuddalli etan ap-apud edum ni bebley ni pekitbalan tu et meihhammad pan-ap-apuan tu, anin ni hahhakkey ida kamengunnud ni hi-gatu. <sup>24</sup> Endilli maptek ni tu ginubat ida hu kekeddangyan ni bebley et pehding tullu hu eleg han-ipahding ni anin hakey idan aammed tun nunman. Emin ali etan kinedangyan ni pan-ellan tud gubat ey ebuh ida etan kamengunnud ni hi-gatun iddawtan tu. Ipplanuh tullin gubbaten hu nangkehammad ni neluhud ni bebley, nem anggegannulli ey mepappeg humman ni tuka pehpehding.

<sup>25</sup> Mandaddan alin hantapug ni sindalu tu et tu gubbaten hu patul di Egypt. Iddaddan ali dama etan ni patul di Egypt hu hantapug ni sindalu tun mekiggubbat idan iSyria, nem meapput ali humman ni patul di Egypt. <sup>26</sup> Tep mehe-ul ali et pehding tudda hu nangkeihlan kaittugun idan opisyal ni kaumtugun ni hi-gatu, et mangkettey idalli humman ni hantapug ni sindalu tu. <sup>27</sup> Ippatnaddallin nunman e dewwan patul ni man-ungbal et ihummangan da hu panyaggudan da, nem endi tu pambalbalinan humman, tep wadalli hakkey ni hi-gada ey man-ittek. Et endilli an um-amnun planuh da, tep implanuh dedan law nan Apu Dios hu meippahding. <sup>28</sup> I-anemut nunman ni patul di Syria hu dakel ni kinedangyan idan iEgypt ni inla tud gubat. Ya lan pambangngadan tu ey pehding tu kabaelan tun memahbah ni kapengullug idan tutu-un Apu Dios di Israel. <sup>29</sup> Mandaddan ali mewan humman ni patul di Syria et tu gubbaten hu Egypt, nem hin-appil ali law hu meippahding e beken ni heni lan nunman. <sup>30</sup> Tep um-alidda etan nampambapor ni sindalud Rome ni an mengubbat ni hi-gatu et umtakut. Yan

‡ **11:11** 11:11 Ya patul di Syria nunyan tsimpuh ey hi Antiochus III. Ya hakey mewan ni ngadan tu ey hi Antiochus e nandingngel. § **11:14** 11:14 Ya patul di Egypt nunyan tsimpuh ey ya etan meikkelliman Ptolemy. \* **11:15** 11:15 Ya patul di Syria nunyan tsimpuh ey hi-gatu metlaing etan Meikkatun Antiochus. † **11:17** 11:17 Ya ngadan nunyan biin u-unggan Antiochus ey hi Cleopatra. ‡ **11:17** 11:17 Huyyan patul di Egypt ey hi-gatu metlaing etan patul di verse 14. § **11:20** 11:20 Huyyan meihhullul nan Antiochus e nandingngel ey ya etan meikka-pat ni Seleucus Philopater. \* **11:21** 11:21 Huyyan lawah ni patul ey hi Antiochus Epiphanes.

pambangngadan tu la ey imma-ma tu law bunget tuddan tutu-un Apu Dios, tep ya neapputan tu. Niya peang-ang tu binabbal tuddan nengiwalleng ni daka pengullug nan Apu Dios.

<sup>31</sup> Yadda etan edum ni sindalu tu, ey yalli lawah ni kapanliwwasi hu da pehpending di Tempol niya pesikked da etan kapan-appisin kewa-wa-wa et ihhullu tun ihha-ad di bawang ni Tempol etan angebe-hel ni peteg nan Apu Dios. † <sup>32</sup> He-ulen tuddalli etan iIsrael ni nengiwalleng ni daka pengullug nan Apu Dios et hi-gatu hu u-unnuden da, nem emin ida etan nehammad daka pengullug ey mekihhanggaddan hi-gatu.

<sup>33</sup> Emin idalli etan nelaing niya nenemneman ni kamengipappangnguluddan helag Israel ey tuttuuddan dalli hu dakel ni tutu-u. Nem mangketey idalli hu edum ni hi-gadan pekiggubatan da. Metekkew hu hipan limmun edum, panggihheben dadda edum, anin ni nanengtun mategudda, niya meikkellabut hu edum. <sup>34</sup> Dakel ali hu panliggatan idan kamengullug nan Apu Dios, nem hahakkey idalli hu makulug ni umbaddang ni hi-gada, tep ma-nut dakel idalli hu mei-dum ni hi-gada, nem hinkukkullugan dallin ebuh, tep ya annel dan ebuh hu daka ipapaptek. <sup>35</sup> Dakel idalli mangketey etan idan kamengipappangnguluddan kamengullug, nem ya pambalanan tu humman ey keihhammadan ni kapengullug ni dakel ni tuu. Mengmenglaw ali hanneyan meippahding ingganah medettengan etan gintud nan Apu Dios ni kepapegan ni emin.

<sup>36</sup> Humman ni patul di Syria ey mampahhiyalli, tep ibbilang tullu annel tun eta-tagey nem yadda etan nambakbaklang ni dios, anin ni hi Apu Dios, e Keta-ta-geyyan di emin. Emin ali etan pinhed tu ey ipahding tu ingganah mepappeg hu bunget nan Apu Dios idan tutu-u tu, tep huuya dedan implanuh nan Apu Dios ni meippahding. <sup>37</sup> Humman ni patul di Syria ey endilli law ibbilang tun dios tun daydayawan tu, tep inwalleng tuddan emin. Anin idan dios ni dinaydayaw idan aammed tu niyadda etan dios ni kadaydayawaddan kabiibii ey eleg tudda daydayawa. Tep tuka ibbilang hu annel tun eta-tagey nem yadda humman ni dios. <sup>38</sup> Yalli daydayawan tu ey ya etan dios ni kamengipaptek idan nehammad ni luhud da. Et i-appitan tullin balituk, ya silber niyadda etan nangebalol ni gangam humman ni dios ni eleg ni hekey daydayawan idan aammed tu. <sup>39</sup> Humman idallin dios ni edum ni bebley hu iddinel tu, et gubbaten tuddalli hu tutu-un nangehammad luhud ni bebley da et apputen tudda. Emin idalli etan tuun mengu-unnud ni hi-gatu ey ihha-ad tuddad eta-gey ni saad niya iddawtan tuddan puyek.

<sup>40</sup> Yallin ngannganin ni kepapegan ni pan-ap-apuan tu humman ni patul di Syria, ey um-alilli mewan etan patul di Egypt ni an mengubbat ni hi-gatu. Nem henilli pewek ni mekiggubbat et ihangga tullin hi-gada hu hantapug ni sindalu tun nampangkebayyu, yadda nampangkalesa niyadda etan nampambapor. Henilli etan ni dillu, e eleg mabalin ni mela-het hu kei-inggehan ni pehding tun mengubbat ni dakel ni bebley. <sup>41</sup> Anin ni ya bebley idan helag Israel et gubbaten tu et petteyen tuddalli kalibulibun tuudman. Nem umbebsik idalli hu iEdom, yadda iMoab niyadda metdaan ni iAmmon. <sup>42</sup> Sekkupun tullu dakel ni bebley, et anin ni Egypt et meilleggat. <sup>43</sup> Pan-ellan tullin emin hu balituk niya silber di Egypt, niya kumpulmih ni nangebalol ni gangam da. Anin ni ya Libya niya Ethiopia et sekkupen tudda. <sup>44</sup> Nem wadalli dedngelen tun tekkutan tun melpud appit ni kasimmilin aggew niyad north, et humman ali umhulun ni pengilleputan tun tu pengubbatan ni kebebbebley et dakel alin peteg petteyen tun tutu-u. <sup>45</sup> Pebehwat tullu ni-ngangu mewan hu et-eteng ni kampu tu etan di nambattanan ni baybay niyad duntug ni inehngan ni Tempol Apu Dios. Yadman ali hu kepapegan ni biyag tu e endi memaddang ni hi-gatu.”

## 12

### *Yalli kepapegan ni emin*

<sup>1</sup> Immelhel mewan humman ni anghel et kantun hi-gak ey “Yallin nunman ey um-ali etan angel ni et-eteng kabaelan tun hi Michael e hi-gatu hu kaman-eddug ni bebley yud Israel. Ey wadalli hu nemahigh ni panliggatan yun endi tu kei-inggehan meipalpu eman ni newad-an ni bebley eyad puyek. Nem emin idalli etan neitudek hu ngadan dad libluh nan Apu Dios ey meihwang ida. <sup>2</sup> Yallin nunman hu ketegguan idan dakel ni tutu-un nangketey. Et yalli edum ni hi-gada ey man-am-amleng idalli law, tep meidwatan idan biyag ni endi pappeg tu. Nem wadaddalli edum ni manhelheltap ida niya umbabaing idan ingganah. <sup>3</sup> Emin idalli etan nelaing niya nangkenemneman ni nengipappangnguluddan kamengullug ey heniddallin wadad kabunyan ni kaumhili.

† **11:31** 11:31 Daniel 12:11, ya Matthew 24:15, et ya Mark 13:14.

Yadalli etan nenuttuddun dakel ni tutu-u et ya pinhed Apu Dios hu impahding da ey heniddalli bittuwen di kabunyan ni kamambebbennang ni ingganah.”

<sup>4</sup> Entanni mewan ey kantun hi-gak ey “Daniel, entan tu peam-amta hu neitudek eyad libluh ingganah alin kepappegan ni emin. Dakel idalli tutu-un mengippatnan mengamtan keibbellinan idan hipan kameippenahding, nem endilli hu silbitu.”

<sup>5</sup> Entanni ey inang-ang ku hu dewwan lakin kaman-eh-ehngeng di nambina-hil di gilig ni wangwang. <sup>6</sup> Kan etan ni hakey ni laki etan ni tuun nambalwasin luput ni kaman-eh-ehngeng di gilig ni wangwang di ahpat ey “Pigan tu hu keippahdingan idan nunyan kamengippetnga?”

<sup>7</sup> Inta-gey etan ni anghel hu dewwan ngamay tud kabunyan et isapatah tun Apu Dios e wadan ingganah, ey dingngel kun kantuy “Mengmenglaw ali huyyan tellu et kagedwah ni toon. Hedin mepappeg ali hu panhelheltapan idan tutu-un Apu Dios ey humman ali hu kepappegan ni emin.”

<sup>8</sup> Dingngel ku hu inhel tu, nem eggak awatan et puhdanan ku e kangkuy “Hipa innanullin kepappegan ni emin?” <sup>9</sup> Nem kantu ey “Lakkay kuma law e Daniel, tep huyyaddan inhel ku ey eleg ni meippeamta ingganah ni kedettengan ni kepappegan ni emin. <sup>10</sup> Dakel idalli tuun kamengullug nan Apu Dios ni meihhammad hu daka pengullug tep yaddalli huyyan ligat ni meippahding. Nem yaddalli etan tutu-un lawah daka pehpehding ey eleg dalli issiked ni mengippahding ni lawah niya eleg dalli ewwasi huyya. Ebuh idalli nangkenemneman ni mengewwat idan keibbellinan tudda huyya.

<sup>11</sup> Meippalpun keissikkedan ni kapan-appisin kewa-wa-wa ey melebbah hu hanlibu et dewanggatut et nahyam ni aggew et han ali wada hu hakey ni tuun mengihha-ad etan ni nemahhig ni kabellawan Apu Dios. \* <sup>12</sup> Emin idalli etan tuun pannananeng da hu daka pengullug ingganah kegibbuan ni hanlibu et telunggatut et telumpulut liman aggew ey man-am-amleng idalli.

<sup>13</sup> Hi-gam e Daniel, ey mahapul ni pannananeng mu hu muka pengullug ingganah kepappegan ni biyag mu. Tep mettey kalli, nem umtagu kallin kepappegan ni emin ma-lat dawatem ali gungunah mu.”

---

\* **12:11** 12:11 Ang-ang yu hu Daniel 11:31, Matthew 24:15 niya Mark 13:11.

## Hosea

*Ya meippanggep nunyan libluh nan Hosea*

Hi Hosea hu hakey ni prophet ni nengipeamtan ehel nan Apu Dios idan tutu-ud Israel ma-lat isiked dan menaydayaw niya mansilbi etan idan beken ni makulug ni dios et mambanggad idan mengu-unnud ni hi-gatu.

Inahwan Hosea hi Gomer et maweda hu tellun u-ungnga da. Nem entanni ey hini-yan nan Gomer et an makiaddum ni edum ni lalakki. Nem anin ni henin nunman impahding nan Gomer et intugun nan Apu Dios nan Hosea e tu hemmaken humman ni ahwa tu et ienamut tud baley da et man-addum ida mewan.

Hi Gomer ey kamei-ellig di bebley e Israel tep ya impahding nan Gomer ey inwalleng tu ahwatu et mambahul ni nekiuligan tun edum ni lalakki. Ey hanniman dama hu impahding idan iIsrael e inwalleng da hi Apu Dios et mansilbidda niya dinaydayaw da edum ni dios. Hi Baal e dios ni kinapyan tuu hu impeheballiddan helag Israel ni u-unnuden. Hi-gatu hu hakey ni dios ni kaiddinel idan tutu-ud Kanaan, tep daka kulluga e kaum-idwat ni dakek ni enniin da niya dakek ni u-ungnga da. Gapuh ni mengu-unnudan idan iIsrael ni nunman ni dios idan iKanaan ey inu-unnud da law hu lawah ni elaw da, et humman nekastiguan da. (Ang-ang yu 2 Kings 17:7-17)

Hi Hosea hu neusal ni pengi-ang-angan ni elaw Apu Dios. Tep liniwwan tu nambahulan Gomer e ahwatu et tu awiten et ienamut tud baley da. Hanniman daman Apu Dios e impannananeng tu hu impeminhed tuddan helag Israel. Pinhed tun banggaden ida et ipaptek tudda hedin mantuttuyyuddan liwat da. Nem eleg pinhed idan helag Israel ni mantuttuyyud lawah ni elaw da et iebulut law nan Apu Dios hu Assyria ni mengapput ni hi-gadat gubat et alen daddan balud di bebley da. (722 B.C.)

*Ya neitudek eyad libluh:*

1. Ya nelahinan Hosea, ya neni-yanan nan Gomer ni hi-gatu ni ya nan-adduman da mewan. Huyya hu neipeang-angan ni planuh nan Apu Dios ni mengibbanggad ni kayyaggud ni pekiddagyuman idan helag Israel ni hi-gatu. (chapters 1-3)
2. Ya nengipeamtaan Apu Dios e kastiguen tudda helag Israel tep ya ngehay da niya liwat da. (chapters 4-13)
3. Ya nanghelan Apu Dios ni liwwanen tu liwat idan helag Israel niya ippaptek tudda hedin mantuttuyyuddan liwat da. (chapter 14)

<sup>1</sup> Yahhuy ida hu impeamtan APU DIOS nan Hosea e u-ungngan Beeri eman ni nampatulan Ussiah, hi Jotham, hi Ahas et hi Hesekiah di Judah et yan eman ni nampatulan Jeroboam e u-ungngan Jehoas di Israel.

*Ya familyah nan Hosea*

<sup>2</sup> Yahhuy hu nemangulun inhel APU DIOS nan Hosea ni peamta tuddan helag Israel. Kantun hi-gatuy "Kalehin ka e Hosea di hakey ni biin eleg tu ikkahhakey ni hi-gam impeminhed tu. Et humman hu, i-anemut tullin hi-gam hu u-ungnga tud edum ni laki. Humman ali pengi-ang-angan ni elaw idan tutu-uk ni helag Israel e eleg da pannananeng hu impeminhed dan hi-gak tep nanliwat ida e daka daydayawa edum ni dios."

<sup>3</sup> Et ahwaen nan Hosea hi Gomer e u-ungngan Diblaim. Entanni ey neiungnga hu pengulwan ni u-ungnga da ey laki. <sup>4</sup> Ey kan APU DIOS nan Hosea ey "Ingedan mu hu Jesreel ni u-ungnga yu, tep kamangkedettengi hu pengastiguan kun patul di Israel ma-lat ibleh ku hu pinetepetey lan aputu hi Jehu di Jesreel. Ya kakulugan tu ey pappegek hu pan-apapuan ni Israel. <sup>5</sup> Bahbahren kullin nunman hu nangka-let ni sindalun Israel di nandeklan di Jesreel."

<sup>6</sup> Entanniy newad-an mewan hi Gomer et man-ungngan bii. Et kan APU DIOS nan Hosea ey "Ngadanim ni Lo-Ruhamah. Ya keibbellinan tu ey 'Endi neminhed ni hi-gatu,' tep endi law nak peang-ang ni impeminhed kuddan iIsrael niya eggak law pessinsahi liwat da.

<sup>7</sup> Nem hedin yadda iJudah, man peang-ang ku neminhed kun hi-gada. Hi-gak e AP-APU e Dios da hu mengihwang ni hi-gadat buhul da e eleg meussal hu almas winu sindalu."

<sup>8</sup> Naphu hi Lo-Ruhamah ey newad-an mewan hi Gomer et man-ungngan laki. <sup>9</sup> Kan APU DIOS nan Hosea ey "Ngadanim ni Lo-Amami. Ya keibbellinan tu ey 'Beken kun tutu-u.' Tep beken kudda law ni tutu-u hu iIsrael niya beken law ni hi-gak hu Dios da.

<sup>10</sup> Nem edum alin aggew ey umdakkal ida iIsrael et heniddalli palnah di gilig ni baybay e eleg mebillang. Et ma-nut kangkun nunyay 'Beken kayu law ni tutu-uk' nem yan

nunman ali law ey kangkulliy 'U-ungnga dakeyun hi-gak e Dios ni wadan ingganah.' \*

<sup>11</sup> Mangkakahakey idalli law iIsrael niyadda iJudah ey hakey ali pillien dan pan-apu da. Hi-yanen dalli etan bebley ni nengilawwan dan hi-gada et mambangngad idad bebley da, et man-am-amleng ida tep panyaggud kulli bebley da. Em, yan nunman ali kekakkayyaggudan ni aggew di Jesreel!"

## 2

<sup>1</sup> Et wada hakkey alin hi-gayun iIsrael ey kanyullin edum yuy 'Tutu-u daitsun Apu Dios ni nakappinshed tu.'

*Ya pengastiguan APU DIOS idan iIsrael niyalli pengippeyaggudan tun hi-gada*

<sup>2</sup> "Nem yan nunya ey hi-gak e Dios yu ey mandalen dakeyun iIsrael ma-lat ehelan yu hi ineyu. Anin ni eggak law ibbilang ni ahwa niya beken tuwak law ni ahwa et eheli yu et isiked tu hu tuka pehpehding henin tuka pengi-ulligin beken tu ahwa niya tuka pengiggettangan annel tu. <sup>3</sup> Tep hedin eleg tu issiked ida humman ni tuka pehpehding, man bebladak et henin eman ni neujunggaan tu e endi balwasi tu, niya pambalin kun henin puyek ni mamegan eleg mebebleyi et lektattuy netey ni ewew tu. <sup>4-5</sup> Endi nak peang-ang ni impeminshed kun hi-gayun u-ungnga tu, tep beken dakeyun u-ungnga. U-ungnga dakeyun ineyud edum ni lakin nekiulig tu, tep endi baing tu. Kantuy "Umlawwak ida etan di lalakkin neminshed ni hi-gak et hi-gada pinhedek e beken hi ahwak. Hi-gada pengiddinnelan kun um-idwat ni kennek, ya innumek ni danum et ya meinum, ya kayyaggud ni balwasi niya lanan olibah."

<sup>6</sup> Et mukun ya law pehding kun hi-gatu ey ippukung ku ey kinubkub kun hebit et endi inna-nu tun umlaw di pinhed tun lawwan tu. <sup>7</sup> Et anin ni ihik ni mei-unnud etan idan lakin pinpinhed tu et inna-nukkaw tu. Niya anin hipa neminshed tun an menemmak ni hi-gada et eleg tudda hanhamak. Et lektattuy kantud nemnem tuy 'Mambangngaddak ew katteg nan ahwak tep i-imman la neitu-wan kun nunman nem yan nunya.'

<sup>8</sup> Ingganah nunya ey eleg tu ebbuluta e hi-gak hu nengidwat ni emin ni wadan hi-gatun kenen tu niya innumen tu, ya lanan olibah, niyaddan emin hu silber niya balituk ni tuka ussalan menaydayaw nan Baal e dios tu. <sup>9</sup> Et humman hu, yallin kedettengan ni ahiani ey bangngaden kudda indawat kun pagey, ya meinum, yadda kakkayyaggud ni luput niya balwasin indawat kun nunman ni penephep tun annel tu. <sup>10</sup> Bebladan kullid hinanggaddan tuka pekia-ayyam ni laki. Niya endi hu hakey ni kabaelan tun mengihwang ni hi-gatud pehding kun hi-gatu. <sup>11</sup> Papegen kun emin hu piyestah ni tuka pan-an-anlai, heniddan sinnoon niya binnulan ni piyestah, ya Sabaduh ni Nungew niyadda edum ni piyestah.

<sup>12</sup> Bahbahen kudda pay hu intanem tun grapes niyadda fig e kantun indawat idan lalakkin tuka pekia-ayyam ni bayad kunun neminshed tun hi-gada. Niya pambalin ku hu legunta tun mebel-ah et panganan idan animal di muyung. <sup>13</sup> Kastigiek tep ya nengiwallengan tun hi-gak et man-appit ni insensoh ni pandeeyaw tun Baal. Inusal tu mewan hu betling et ya edum ni gangam tu et panepang tuddan tuka pekia-ayyam ni lalaki. Hi-gak e AP-APU hu nanghel idan nunya.

<sup>14</sup> Nem ippanguluk ali etan di mamegan puyek ni eleg mebebleyi et a-alluken ku et mambangngad ni hi-gak. <sup>15</sup> Ibbangngad kullin hi-gatu hu legunta tu niya papegen ku hu tuka panligligasi et maweda namnamah tu. Hengnguden tuwak ali mewan law heni eman ni tuka penikkenin nalpuan tud Egypt. <sup>16</sup> Et yalli law pan-eyyag tun hi-gak ey beken ni 'Apu' tu, nem kan tulli law e hi-gak hu ahwa tu. <sup>17</sup> Eleggak ali law i-abulut ni tu ngeddanen hu ngadan Baal, tep issiked tulli law ni menaydayaw ni hi-gatu.

<sup>18</sup> Yallin nunman ey mekitballak idan animal di muyung et yadda sisit di kabunyan ma-lat endi da pehding ni lawah idan tutu-uk. Niya endiek emin hu kameussal di gubat di bebley da henin ispadah niya pana et luminggep ida tep endi da tekkutan."

<sup>19</sup> Immehel mewan hi APU DIOS ey kantuy "Hi-gayuddan helag Israel ey heni hi-gayu bineley kun ingganah. Ikkahhakey ku niya pannenneng ku hu neminshed kun hi-gayu. Hehmeken dakey niya pehding ku hu limpiyuh ni hi-gayu et panyaggudan yu. <sup>20</sup> Pannananeng kullin ingganah hu hinammad kun inhel ni hi-gayu niya ebbuluten yulli law e hi-gak hu AP-APU yu.

<sup>21-22</sup> Yan nunman ali penummangak ni dasal yun tutu-uk e helag Israel e kamenged-danin Jesreel. Iddawat kulli hu mahapul yu niya peellik hu udan et tummel hu ittanem yun pagey, ya grapes et ya olibah.

<sup>23</sup> Panyaggud dakeyullin tutu-uk di bebley yud Israel. Hi-gayun kangku lan nunman ni 'Eggak pinhed' ey pinheden dakeyulli law ni hi-gak. Niya hi-gayun nanghelak ni 'Beken

\* 1:10 1:10 Romans 9:2

dakeyun tutu-u' ey kangkulli law ni hi-gayuy 'Tutu-u dakeyu.' Hummangen yulli daman kanyuy 'Hi-gam hu Dios mi.' "

### 3

*Ya nemangngadan nan Hosea nan Gomer hu keang-angan ni neminhed nan APU DIOS idan iIsrael*

<sup>1</sup> Entanniy kan APU DIOS ni hi-gak ey "Mu banggad hu ahwam et pinhedem mewan anin ni nekiulliullig di edum ni lalakki. Mahapul ni pinhedem e henin hi-gak e nanengtu neminhed kuddan helag Israel, anin ni daka daydayawa edum ni dios. Niya anin ni nakappinhed dan mengngan idan in-appit dan raisins etan idan dios dan daka iddinel."

<sup>2</sup> Et nak banggaden et gatangen kun hampulut liman palatah ni silber niya pitun bushel ni barley. <sup>3</sup> Entanni et kangkun hi-gatuy "Mahapul ni issiked mun meki-ullig di beken mu ahwa niya manha-ad ka eyad baley ku. Niya anin ni hi-gak et mebeyyag et han daka iulig."

<sup>4</sup> Ya keibbellinan tu huyya ey mebeyyag ni endilli mampatul winu man-ap-apud Israel. Niya endilli hu tempol niya padi ey endilli man-appit winu menaydayaw ni beken ni makulug ni dios. <sup>5</sup> Nem medettengan ali hakey ni aggew ni pambangngadan idan helag Israel nan APU DIOS e Dios da niya etan helag David e patul da. Yan nunman ali ey tekkutan da niya mengu-unnud ida law nan APU DIOS et bendisyonan tudda.

### 4

*Ya kan APU DIOS ni bahul idan iIsrael*

<sup>1</sup> Dengel yu hu ehel APU DIOS e tutu-ud Israel. Heninnuy hu inhel tun bahul yu. Kantuy "Endi kameiddinnel ni hi-gayu niya endi impeminhed yun edum yun tuu. Niya inwalleng yuwak e Dios yu. <sup>2</sup> Maidut kayu, maitek kayu, mapetey kayu, matekew kayu niya yuka i-ulig hu beken yu ahwa. Niya yuka pan-imma-man mengippahding ni lawah et kamantu-tu-nud daka petteyan hi-gayu. <sup>3</sup> Et mukun metduk alin emin hu danum di bebley yu et matey ni emin hu mategu, anin idan animal, yadda sisit niyadda deleg."

*Ya inhel APU DIOS ni bahul idan papaddi*

<sup>4</sup> Immehel mewan hi APU DIOS ey kantuy "Entan tu ledeng hu hakey ni tuun pengippenuyyuan yun bahul yu! Hi-gayuddan padi hu kangkun nambahul. <sup>5</sup> Ya kastigu yu ey henin pengastiguk idan beken ni makulug ni prophet, tep emin kayu ey lawah yuka pehpending. Et humman hu, bahbahek hu Israel e kamei-ellig ni ineyu. <sup>6</sup> Kamangkebahbah ida tutu-uk, tep eleg da amta hu neiptek ni pehding dan mengu-unnud ni hi-gak. Hi-gayu e papaddi kambahul nunya tep anin ni hi-gayu et eleg yuwak pinhed ni u-unnuden tep inwalleng yuwak. Et humman hu, iwalleng dakeyu dama et eleg dakeyu law tetbalan pampeddik. Niya eggak bendisyonu u-ungnga yu, tep inwalleng yu tugun ku.

<sup>7</sup> Kayu kamangkedakkel ni papaddi ey kamangkema-ma hu liwat yun hi-gak. Et humman hu, pambalin ku hu dayaw yun kebe-ingan yu. \* <sup>8</sup> Pinpinhed yu kumedek ni manliwwat hu tutu-uk ma-lat dakek hu ellan yun i-appit da tep ya liwat da. <sup>9</sup> Hi-gayun papaddi et yadda tutu-u ey nan-iingeh kayun lawah kayun emin. Et humman hu, mekastigu kayun emin tep yadda lawah ni impahpahding yu. <sup>10</sup> Mukun anin ni kennekennan yu patal yun kai-appit idan tutu-u et kapyatun kayu kameuppa. Niya anin ni meki-ulliullig kayun yuka pebabbayad annel yu et eleg kayu damengu pakeungnga." † <sup>11</sup> Immehel mewan hi APU DIOS ey kantuy "Netalak kumedek hu meandeng ni kapannem idan tutu-uk tep ya meinum niya tep ya daka pengi-ulliulligin beken da ahwa. <sup>12</sup> Daka puhdanin nebengwah ni keyew hedin hipa pehding da. Kanda na-mu nem han-ibgan pasing hedin hipa meippahding alin edum ni aggew. Nambalin idan endi amta da tep ya daka penaydayawin edum ni dios. Inwalleng da-ak et ya edum ni dios dayawen da e heniddan tuun daka pebeyyad annel da. <sup>13</sup> Ida kaumlaw ni an man-appit di ta-pew ni duntug ni giniheb da hu bangbanglu etan idad hengeg ni mangkapengan keyew ni kayyaggud ni panhidduman.

Et humman hu, nambalin ida u-ungnga yun bibi-in daka pebeyyad annel da niya ida kameki-ullig hu inepu yun bibi-i di beken da ahwa. <sup>14</sup> Nem eggak ida kastigua, tep anin daman hi-gayu et kayu kaumlaw di kad-an idan bibi-id tempol ni daka pebeyyad annel da. Ey kayu kamei-dum ni hi-gadan man-appit idan dios da. Endi nemnem yu! Kaw

\* **4:7** 4:7 Ya edum ni neitudek ey kanday "Inhullul yuwak e kamedeyyaw ni Dios idan anggeba-ing ni dios yun kinapyan tuu." † **4:10** 4:10 Kan ni edum ni neitudek ey "Ey anin ni daydayawen yu hu dios ni kamengidwat ni u-ungnga et eleg kayu damengu pakeungnga."



eleg yu amta e mebahbah kayulli tep eleg yu pinhed ni ewwatan hu pinhed kun pehding yu?

<sup>15</sup> Hi-gayun iIsrael, anin ni hanniman hu yuka pehding e eleg yu ikkahhakey ni hi-gak hu impemihed yu, e heni kayu etan ni tuun kameki-ullig di beken tun ahwa, ey entan tu ngu dinidda hu iJudah et eleg da iu-unnud ni hi-gayu. Isiked yun an mandaydayaw di Gilgal winu yad Bet Aben e napunan ni lawah ni peteg. Niya isiked yun mansapatah di ngadan ku e 'hi APU DIOS e wadan ingganah.' <sup>16</sup> Makneg kayun iIsrael e heni kayu bakan kahin-elawwi et inna-nukkaw ni pengippaptekak ni hi-gayun henin nakka pehding ni mengippaptek ni kalneroh di kudal. <sup>17</sup> Hi-gayun iIsrael ey heni kayu nekiaddum idan dios ni kinapyan tuu. Et humman hu, ngenamung kayu-ew katteg! <sup>18</sup> Hedin mewan ni-ngangun negibbuh kayun nenginnuinnun, man limmaw kayun an mengi-ullig ni biin daka pebeyyad annel da, tep yuka peheballin mengippahding ni angeba-ing nem ya keiddeyyawan yu. <sup>19</sup> Nem bahbahen dakeyulli e heni dakeyulli ittayab ni na-let ni dibdib ma-lat mebabba-ingan kayu tep in-enappitan yudda hu beken ni makulug ni dios."

## 5

### *Ya pengastiguan APU DIOS idan iIsrael niyadda iJudah*

<sup>1</sup> Dengel yu eya e-helen kun hi-gayun papaddi. Niya hi-gayuddan iIsrael, nemnem yu huyya, anin ni hi-gayun pamilyah nan patul. Huyya kastigu yu: Eleg kayu meihwang! Tep heni impangulu yudda tuud keknaan dan nenaydayawan dan beken ni makulug ni dios di Mispah niyad Tabor. <sup>2</sup> Niya heni kayu kimmu-kun edallem ni bitud Akasya. Et humman hu, kastiguen dakeyun emin ni hi-gak. <sup>3</sup> Inamtak hu elaw yun iIsrael. Eleg mabalin ni yu ihhaut ni hi-gak. Lawah kayu e ebuh. Heni kayu etan ni biin tuka i-ulig hu beken tu ahwa. Et humman hu, endi lebbeng yun meibbilang ni tuuk.

<sup>4</sup> Eleg yu pinhed ni issiked ida lawah ni yuka pehpehding ma-lat mambangngad kayun mengu-unnud ni hi-gak e Dios yu. Tep pinpinhed yun peteg ni mandeeyyaw ni beken ni makulug ni dios niya eleg yu ebbuluta e hi-gak hu AP-APU.

<sup>5</sup> Ya yuka pampahhiyyain iIsrael hu keang-angan tun naka-ihhalla kayu. Et humman hu, manhelheltap kayulli tep ya liwat yu. Anin ni hi-gayun iJudah et manhelheltap kayulli daman liwat yu. <sup>6</sup> Um-ali kayullin mengi-appit ni kalneroh yu niya bakeyun hi-gak e hi APU DIOS, nem endilli law silbitu tep neladaw. Inwalleng dakeyu law ni hi-gak. <sup>7</sup> Tep inwalleng yuwak e AP-APU e Dios yu et mandinel kayuddan beken ni makulug ni dios. Eggak ida ibbilang ni u-unggak hu u-ungnga yu tep in-ungnga yuddan nandayawan yuddan dios yu, et humman hu heniddan hi-gayu. Et humman hu, mebahbah kayun emin anin idan intanem yu.

### *Ya gubat di Judah niyad Israel*

<sup>8</sup> Patnul yu tangguyup di Gibeah niyad Ramah et pengamtaan ni tutu-u e wada gubat. Niya peamta yu damad Bet Aben. Em, pandaddan kayun helag Benjamin ni mekiggubbat! <sup>9</sup> Nedatngan law hu aggew ni kekastiguan yun iIsrael! Yallin nunman ni aggew ey makulug ni mebahbah kayu.

<sup>10</sup> Kastiguen kudda dama aap-apud Judah tep eleg da u-unnuden tugun kun eleg da daydayawa hu beken ni makulug ni dios. Henidda etan ni tuun mapiliw ni puyek e eleg tu ibbilang hu neiha-ad ni kegad di pappeg. Et humman hu, heniddalli melbengan ni pengastiguk ni hi-gada. <sup>11</sup> Nemahhig ali hu panhelheltapan yun iIsrael tep nakappinhed yun menaydayaw ni beken ni makulug ni dios. <sup>12</sup> Bahbahen dakeyullin hi-gak henin kapemahbahin tubbaybay ni balwasi. Bahbahek damadda iJudah et heniddalli nedunut ni keyew. <sup>13</sup> Inang-ang yun iIsrael niya hi-gayuddan iJudah e nekapuy hu sindalu yu e henidda kamandedeggeh ni neguggulid ni tutu-u et palaw idan aap-apun iIsrael hu an mambeggan baddang ni patul di Assyria. Nem eleg dakeyu baddangan. Mei-ellig ni eleg maegahan hu degeh yu et heni kayu etan ni tuun negannaan e eleg meeggahi degeh tu. <sup>14</sup> Hi-gayuddan iIsrael niya hi-gayuddan iJudah, endi hakey ni kabaelan tun mengihwang ni hi-gayu di pengastiguk tep heni-ak ali layon e pamba-nuten dakeyu et ibsik dakeyu.

<sup>15</sup> Yan nunman alin penelheltapan yun kastiguk ey mambangngaddak di Tempol kud kabunyan et manhahha-addak diman e eleg dakeyu baddangi ingganah ni ebbuluten yu nanliwtan yu. Et hemmaken yuwak ali kaya mewan law tep ya humman ni panhelheltapan yu.

## 6

### *Eleg pinhed idan iIsrael ni mantuttuyud liwat da*

<sup>1</sup> Ma-nu tep kanyulli ey “Mantuttuyyu itsun liwat tayu et ibangngad tayun menay-dayaw nan APU DIOS. Heni daitso nanliputan, nem eggahan daitso kaya et yumagguud itsu.

<sup>2</sup> Nanna-ud ni melebbah dewwa winu tellun aggew et kayyagguud ali kaya mewan hu pengibbillang tun hi-gatsu et dammutu mewan ni mekihha-ad itsun hi-gatu. <sup>3</sup> Et humman hu, mahapun ni pehding tayu kabaelan tayun mengamtan hi-gatun ustuh. Et nanna-ud ni um-alin memaddang ni hi-gatsu, henin aggew e umsimil ngu dedan ni kakkabbuhhan niya henin udan e me-gah ngu dedan et danuman tu puyek hedin nedateng hu mainudan.”

<sup>4</sup> Nem kan APU DIOS ni hi-gayu ey “Hi-gayuddan iIsraël niya hi-gayuddan iJudah, hipa pehding kun hi-gayu? Anggegannu ni neendi hu impeminhed yun hi-gak, henin kulput niya delnun kakkabbuhhan e kekemtang la ni neendi. <sup>5</sup> Et humman hu, impaelik ida prophet kun mengippeamtan hi-gayu e bahbahen dakeyun hi-gak. <sup>6</sup> Tep ya pinhed ku ey ya nehammad ni impeminhed yun hi-gak, beken ida etan ni animal ni yuka i-appit. \* Ey nakka pehebballi hu paka-amtaen yuwak nem ya etan kayu man-appit ni kagihheba ey eleg damengu malpud puhu yu.

<sup>7</sup> Heni kayuddan edum yun nambbley di Adam e eleg da u-unnuden hu nekitbalan dan hi-gak. <sup>8</sup> Anin ida daman iGilead et lawah idan peteg niya mapetey ida. <sup>9</sup> Hi-gayun papaddi, ey hen i kayuddan matekew e mapiliw ni limmun tuu. Kayu kamanhehgedged ni tuun pilliwen yu limmu tu. Anin etan di keltad ni mampellow di bebley di Sekem et kayu kamambektak diman ni pimatey kayu. Anggeba-ing ida huyyan yuka pehpehding. <sup>10</sup> Himmalla hu yuka pehpehding e tutu-uk ni iIsraël tep inwalleng yuwak niya yuka daydayawa hu dios ni kinapyan tuu. Heni kayu etan ni biin inwalleng tu bineley tu et ya edum ni laki tuka i-ulig. <sup>11</sup> Hi-gayu daman iJudah ey wada gintud kun aggew ni pengastiguan kun hi-gayu tep yadda lawah ni yuka pehpehding, anin ni pinhed kun peteg ni bendisyonan dakeyun tutu-uk.”

## 7

<sup>1</sup> “Em, pinhed kun peteg ni bendisyonan dakeyun tutu-uk ni iIsraël et kumedangyan kayu, nem inna-nukkaw, tep kamaka-ang-ang kalinewah yun emin di bebley yu, nemand Samaria. Wada hakkey ey yuka tellama edum yu. Yuka hehgepa baley ni edum yu ni nenakew kayu niya yuka bebtaka nalgem ni tuud dalan ma-lat piliwen yu pihhuh tu. <sup>2</sup> Anin anhan et eleg meihha-ad di nemnem yu e inamtak emin hu lawah ni yuka pehpehding. Kamaka-ang-ang ni peteg hu liwat yu tep ya panliwwatan yun ingganah yuka pehpehding. <sup>3</sup> Nan-iingeh kayuddan patul yu niyadda opisyal tu e lawah kayun emin. Ida kaman-am-amleng hedin lawah yuka pehpehding niya hedin nan-itek kayu ma-lat talamen yu edum yu. <sup>4</sup> Emin kayun tutu-uk ni iIsraël ey inwalleng yuwak. Wada hakkey ni hi-gayu ey nemahhig ni kamanggagalid ni mengippahding ni lawah. Ya neminhed yun mengippahding ni lawah ey kamei-ellig etan di matbel ni apuy ni eleg me-dep. <sup>5</sup> Ey yan eman ni nedatngan ni aggew ni nenaydayawan yun patul yu ey nebuteng, anin idan opisyal tu, et pihulen da edum dan tuun kamekangngu-unnud ni elaw APU DIOS. <sup>6</sup> Kameihaha-ad di nemnem yu hu pengippahdingan yun lawah di edum yun tuu. Ya bunget yu ey hen i etan ni mangelab ni apuy ni hileng e hedin hineb-ukan ni kakkabbuhhan, man kamengintetebbel.

<sup>7</sup> Et mukun endi takut yun memettey idan aap-apu yu. Yuka petteyan emin hu kamampatul ni hi-gayu ey endi hakey ni hi-gayun kamandalan ni hi-gak ma-lat pappegen ku hu henin nunman ni kamekapkapyu.

<sup>8</sup> Kayu kamengippebungnet ni tutu-uk ni iIsraël. Heni kayu etan ni sinapay e manut nelutu pangil, nem eleg malutu pangil tep eleg mepiggad. Eleg kayu mandinnel ni hi-gak tep yuka iddinel ida hu tutu-un nambbley di nanlinikweh ni bebley yu. <sup>9</sup> Eleg yu nemnema e umkapuy kayu kumedek ni yu pengiddinnelan ni tuud edum ni bebley ni umbaddang ni hi-gayu. Heni kayu etan ni neubanan ni tuun eleg tu amta e neamma law et endi law elet tu. <sup>10</sup> Nemahhig e kayu kamampahhiya et eleg yu pinhed ni mantuttuyyud liwat yu. Anin ni hinelheltap yudda ligat ni impaelik ni hi-gayu et eleg kayu mannemnemnem ma-lat mambangngad kayun menaydayaw ni hi-gak e AP-APU e Dios yu. Eleg kayu pay ni-ngangu mambeggan baddang ni hi-gak. <sup>11</sup> Anggehemmek kayun tutu-uk ni iIsraël. Kayu kahin-elawwin yu pambeggaan ni baddang. Heni kayu etan ni paluma e nelakah ni mehe-ul. Lektattuy kayu nambagan baddang di buhul yun iAssyria niya iEgypt. <sup>12</sup> Nem keknaen dakeyullin hi-gak ni lawwan yud bebley da et hen i kayu sisit. Kastiguen dakeyu tep yadda lawah ni impahding yu.

\* 6:6 6:6 Ang-ang yu hu Matthew 9:13 et ya 12:7

<sup>13</sup> Anggehemmek kayu tep bahbahen dakeyun hi-gak. Ma-nu kedi ey inwalleng yuwak niya yuwak kangenghaya. Kayu kamandinnel ni baddang ni edum, nem eleg kayu mandinnel ni hi-gak. Pinhed kun peteg ni mengihwang ni hi-gayu, nem eggak ippahding, tep itek yu etan kanyun hi-gak hu yuka daydayawa. <sup>14</sup> Hedin wada yuka panhelheltapi, ey kayu kaumnangih ni yuka pambeggain baddang etan idan beken ni makulug ni dios. Ey gullat et dedan, hi-gak hu pandinnelan yu ma-lat hi-gak hu pambeggaan yun baddang, nem endi, tep inwalleng yuwak. Hedin mewan mandasal kayu ma-lat yumaggud hu inggaud yu niya ma-lat wada innumen yu, ey yuka lippusi annel yu, tep kanyu nem humman pengidwatan ni dios yun yuka ibbaga. <sup>15</sup> Anin ni hi-gak nengituttuddun emin ni inamta yu niya hi-gak hu nengipa-let ni hi-gayu et kapyatun lawah hu yuka nenemneman pehding ni hi-gak. <sup>16</sup> Eleg kayu mandinnel ni hi-gak e Keta-ta-geyyan ni AP-APU, tep ya dios ni endi kabaelan tu hu yuka pandinneli. Heni kayu etan ni nepikun pana e kameihla. Ma-nu kapenahhappit idan ap-apu yu, tep hiyyan ida kamampeta-gey. Nem pampetteyey idallin buhul yudda et ngi-ngi-ngian idallin iEgypt."

## 8

*Nemahhig law kapenaydayaw idan iIsrael ni beken ni makulug ni dios*

<sup>1</sup> Kan APU DIOS ey "Patnul yu tangguyup yu et pengamtaan idan tutu-u e iyalli buhul yu. Immen idallin henidda tulduh ni kamengellin memahbah ni hi-gayun tutu-uk, tep eleg yu u-unnuden hu nekitbalan kun hi-gayu niya nginhay yu tugun ku. <sup>2</sup> Hi-gayun iIsrael ey ma-nu tep kayu law kamandasal niya kayu law kamampehemhemmek e kanyuy "Baddangi dakemi, tep hi-gam Dios mi!" <sup>3</sup> Nem endi law silbitu tep neladaw! Inwalleng yuwak niya inwalleng yudda hu kayyaggud ni intuttudduk ni hi-gayu. Et humman hu, um-alidda law buhul yu et pampedugen dakeyu.

<sup>4</sup> Nampili kayu mewan e tutu-uk ni patul yu niya ap-apu yu, nem eleg yu ibega hedini hipan hi-gayu pinhed kun man-ap-apu. Inla yu mewan hu silber niya balituk yu et kapyayan yun dios yu. Huyyaddan impahding yu hu memahbah ni hi-gayu.

<sup>5</sup> Anin ni hi-gayun iSamaria et nemahhig bunget kun hi-gayu, tep nengapya kayun lakkitun bakan yuka daydayawan dios yu. Pigantu pengissikkedan yun menaydayaw ni beken ni makulug ni dios? <sup>6</sup> Kinapyan edum yun iIsrael ida eya yuka daydayawa. Bekeken ni makulug ni dios huttan ni bakan nekapyad balituk. Et humman hu, mebahbah ali et mebenukli. <sup>7</sup> Endi silbiddan nuntan ni yuka pehpehding. Heni kayu nantanem ni dibdib e beken ni pagey, et humman hu, pewek ali enniyen yu. Mekpit ali ittanem yu et endi illameh tu. Anin ni kantu et wada enniyen yu, ey pilliwen idallin buhul yu et hi-gada mangan. <sup>8</sup> Hi-gayun iIsrael ey heni dakeyulli ekmunen ni buhul yu, tep mebahbah kayu. Anin dedanggun nunya et endi silbi yun kapenang-ang ni tutu-ud kebebbley ni hi-gayu tep heni kayu nabhin banga. <sup>9</sup> Manghay kayun peteg e iIsrael. Heni kayu ma-lem ni kebayyun neligat ni mengu-unnud. Kayu nambagan baddang di Assyria, tep eleg yu pinhed ni mampebaddang ni hi-gak. Heni kayu etan ni biin tuka iggatang annel tud dakel ni laki. <sup>10</sup> Et gapu tep ya huuyan yu impahding ey emmungen dakeyu et kastiguen dakeyu. Em, anggehemmek kayulli tep nanna-ud ni i-abulut kun panhelheltap dakeyun patul ni Assyria.

<sup>11</sup> Ma-nut yuka pan-edumi hu kapyan pan-appitan yun ke-kalan ni liwat yu, nem kamangke-dumi anhallaw liwat yu tep yadda beken ni makulug ni dios hu yuka i-enappisi. <sup>12</sup> Dakel impaitudek kun intugun kun panyaggudan yu, nem nginhay yu e heni eleg malpun hi-gak ida humman ni tugun.

<sup>13</sup> Ma-nu tep yuka i-appit ni hi-gak ida etan animal yu niya kayu kaman-appit ni yuka hemmula, nem hi-gak e AP-APU ey eggak tetbaladda humman ni yuka i-appit. Eleggak liwwana hu kalinewah yu. Et humman hu, kastiguen dakeyu et mambalin kayu mewan ni himbut heni lan kaweda yud Egypt ni nunman. <sup>14</sup> Ya mewan impahding yun iIsrael ey nengenapya kayun baballey ni papatul yu. Hi-gayu daman iJudah ey nangkapya yu bebley yun nangkehammad luhud tu. Nem liniwwan yuwak e nanletun hi-gayu. Yadda kinenapya yu hu nandinelan yu e beken ni hi-gak. Et humman hu, peellik ali apuy et malgab ni emin ida humman ni kinenapya yu."

## 9

*Impeamtan Hosea hu kastiguddan iIsrael*

<sup>1</sup> Hi-gayun tutu-ud iIsrael, isiked yudda huttan ni piyestah yu, tep inwalleng yu hu dios yu et heni kayuddan tutu-ud edum ni bebley e yu dama kapan-an-anlai hu piyestah ni beken ni makulug ni dios. Heni kayu mewan etan ni biin tuka pebeyyad annel tun lalakki. Yuka daydayawa edum ni dios niya kayu kaman-am-amleng ni ineni yu, tep

kanyuy huttan bayad ni nenaydayawan yun hi-gada. <sup>2</sup> Nem me-puhan kayullin kenneu ni yu meinum. <sup>3</sup> Et lektattuy eleg kayu manneng e helag Israel eyad bebley APU DIOS, tep mambalin kayullin himbut e henin nanhimbutan ida lan aammed yud Egypt ni nunman et pangkanen yulli pi-yew ni kenneu di Assyria. <sup>4</sup> Yadman alin bebley ni panhimbutan yu ey eleg mabalin ni kayu man-appit ni meinum winu kenneu nan APU DIOS. Tep hedini yadda kenneu diman ey ippephel ni egeh ni ebuh. Tep hedini i-appit yudda humman ey eleg tu tetbalad Tempol tu. Et humman hu, ya etan tuun mengngan niya man-appit idan nunman ey meibbillang ni beken ni malinih di hinangngab nan APU DIOS, tep humman ni kenneu ey henin daka immangdad hedini wada netey.

<sup>5</sup> Kaw kanyu nem hedini nambalin kayu himbut di edum ni bebley et nedateng etan ida piyestah ni pan-an-anlaan yun pandeyyawan yun APU DIOS ey dammutun pehding yu? <sup>6</sup> Anin ni kantu et meihwang kayu pehding ni Assyria et eleg kayu metey, et meihullul mewan hu Egypt ni mengappit ni hi-gayu et heni dakeyulli pan-ikkulung di Memphis. Et umtemel ali hu helek ni nahbitan di baballey yu niya mangkebahbah hu hipan nebalol ni tenged yun heniddan silber.

<sup>7</sup> Hi-gayun iIsrael, nedatngan law hu aggew ni kekastiguan yu tep yadda lawah ni impahding yu. Lebbeng tun meippahding ni hi-gayu huuya niya nanna-ud ni inamta yu ngu dedan.

Kanyuy 'Ida kaman-angngaw hu prophet nan APU DIOS.' Nem henin nuntan hu yuka penghel tep anggebe-hel yuwak niya nemahhig liwat yu. <sup>8</sup> Hi-gak ni hakey ni prophet ey binega tuwak nan APU DIOS ma-lat ehelan dakeyun iIsrael e tutu-u tu et panyaggudan yu. Nem emin kumedek hu nakka lawwi ey heni-ak sisit ni yuka kekkekaa. Anin di Tempol APU DIOS et nambalin ida tuudman ni buhul idan prophet. <sup>9</sup> Nemahhig hu kalinewah yu e heni kayudda lan iGibeah. Nem eleg liwwanan APU DIOS hu liwat yu. Et humman hu, nanna-ud ni kastiguan dakeyun hi-gatu.

*Impeang-ang nan APU DIOS hu nanliwatan idan iIsrael*

<sup>10</sup> Kan APU DIOS idan iIsrael ey "Yan eman ni laputan nanghelak idan aammed yu e hi-gada pinilik ni pantu-uk ey henin kapenemmakin simmemel ni grapes di desert niya henin kapenennang-angin nemangulun neluum ni lameh ni fig. Nem yan eman ni linawwan dad duntug e Peor ey hi Baal kumedek dinaydayaw da. Et lektattuy ida kamengippebungnet e heniddan etan idan pinpinhed dan dios.

<sup>11</sup> Et humman hu, meendillin hi-gayun iIsrael hu dayaw yun nalpun hi-gak e henilli sisit ni simmayab. Beken ni ebuh huayan meippahding tep yaddalli aahwa yu ey eleg idalli man-ungnga. <sup>12</sup> Anin ni kantu et mewedda u-ungnga yu et pappegek hu biyag da et nemahhig ali lemyung yun keendian da. Nanna-ud e hedini iwwalleng dakeyun hi-gak man himmalla hu meippahding ni hi-gayu. <sup>13</sup> Hi-gayun tutu-ud Israel ey kakkayyaggud ni peteg hu biyag yun nunman e heniddan tutu-ud Tyre. Heni kayu palmah ni kayyaggud neitneman tu. Nem mekastigu kayulli et matey idalli u-ungnga yu." Huuya inhel APU DIOS ni meippahding ni hi-gayun iIsrael.

*Ya humang Hosea nan APU DIOS*

<sup>14</sup> Immebel hi Hosea e kantuy "Hipa kekdekek ni hi-gam e APU DIOS? Ya kekdekek ni pehding mu ey pambalin mudda bibi-i dan eleg pakeungnga niya pambalin mun endi peinum dan u-ungnga da."

*Inhel APU DIOS e kastiguan tudda iIsrael*

<sup>15</sup> Kan APU DIOS ey "Yad Gilgal hu nengilepuan idan iIsrael ni mengippahding ni lawah. Neilepu damadman hu bunget kun hi-gada. Et humman hu, degyunen kuddad bebley dan indawat ku. Eggak ida law pinhed. Nginhay da-ak idan emin ni aap-apu da. <sup>16</sup> Ida kamei-ellig hu iIsrael di intanem ni nema-ganan lamut tu. Ya hanniman ni intanem ey eleg umlameh. Hanniman ali meippahding ni iIsrael e eleg idalli pakeungnga. Nem anin ni kantu et wadalli u-ungnga da, ey pappegek hu biyag dadda humman ni u-ungnga dan nakappinhed da."

*Inhel daman Hosea e mekastigudda iIsrael*

<sup>17</sup> Immebel mewan hi Hosea ey kantuy "Hi APU DIOS ni kan bega-en ni hi-gak ey iwwalleng dakey tep eleg yu u-unnuda inhel tun pehding yu. Et humman hu, kayulli manhawahawang di kebebbebley eyad puyek."

**10**

<sup>1</sup> Hi-gayun iIsrael ey heni kayu etan ni neitnem ni grapes ni limmalameh. Nem kaney kayu kamengeddangan ey tagan yu kumedek kapyan pan-appitan yuddan beken ni makulug ni dios. Niya kan mewan et kamangkedakkel hu yuka ennia ey tagan yu

yenayyaggud idan kinapya yun yuka deyyawan batun tukud. <sup>2</sup> Lawah kayu! Eleg yu daydayawa hu makulug ni DIOS. Et humman hu, kastiguen dakeyu tep ya liwat yu. Bahbahen alin APU DIOS ida etan yuka pan-appisi niyadda batun tukud ni yuka daydayawa.

<sup>3</sup> Han yulli ehela e kanyuy 'Endi patul tayun umbaddang ni hi-gatsu tep eleg tayu dayawen hi APU DIOS. Nem anin ni kantu et wada patul tayu et endi damengu ibbaddang tun hi-gatsu.' <sup>4</sup> Eleg yu u-unnuda nan-uungbalan yu niya eleg yu ippahding hu hinammad yun inhel. Et humman hu, dakel kamandidiklamuh ni hi-gayu, henin kedakkel ni kaumkekdet ni helek di nealedun payew.

<sup>5</sup> Nanna-ud ni mekastigu kayu. Yan nunya danggu ey ida kaumtatakut hu tutu-ud Samaria niya ida kaumnangih ni kaguh dan keendian etan ni balituk ni kilaw ni bakan dios dad Bet Aben. Humman idan tuu niyadda papaddi dan kamansilbin nunman ni dios ni kinapyan tuu ey nannangngihan dalli humman ni dios da, tep ellan alin buhul da et ilaw dad bebley da. <sup>6</sup> Humman ni dios da ey meillaw alid Assyria et da idwat ni patul dadman. Et mebabba-ingan kayullin iIsrael ni nandinelan yun nunman ni dios yu. <sup>7</sup> Anin ya patul yun iIsrael di Samaria et meillaw alid edum ni bebley, henin kakei-ennudin ek-eket ni pasing di wangwang. <sup>8</sup> Niya mebahbah idalli yuka pandeyyawin iIsrael idan kinapya yun dios yud duntug di Aben. Hi-yanen yulli hu yuka pan-appisi et mahlekan. Yan nunman alin ellian ni buhul yu ey kanyullin duntug ey 'Kagday kayu et meta-bunan kami.' \*

<sup>9</sup> Kan APU DIOS ey "Hi-gayun iIsrael ey nanengtun yuwak kangenghaya heni lan impahding idan aammed yud Gibeah. Negubat ida humman ni aammed yu et matey idadman. Ey humman ni neipahding ni hi-gada ey nanna-ud ni mekapkapyu daman hi-gayu. <sup>10</sup> Ninemnem kun mengastigun hi-gayu tep nemahhig hu liwat yu. Ya pengastiguk ni hi-gayu ey pan-aaddum ku hu tutu-ud edum ni bebley et umliddan mengubbat ni hi-gayu.

<sup>11</sup> Yan nunman ey heni kayu nekammansuh ni kilaw ni baka e nandaddan niya pinpinhed tun man-illik. Nem yan nunya ey mahapul ni ha-adan hu buklew yun mebel-at ni paku. Hi-gayun iIsrael niya iJudah e helag Jacob ey heni kayu bakan mahapul ni pilliten ni man-elladud mekelhin puyek. <sup>12</sup> Et humman hu, mandalen dakeyu et ipahding yu hu henin kapehding ni kamampeyyew ni mengelladun makakkelhin puyek ni eleg maelaeladu.

Kangkun hi-gayu ey 'Pantanem kayun kalinimpuyuh et anien yu bendisyon ku e humman illameh ni eleg yu pengiwallengin impeminhed yun hi-gak. Pambangngad kayun menaydayaw ni hi-gak e DIOS yu et bendisyonan dakeyu mewan ni hi-gak, tep hedini hi-gak, man meandeng hu nakka pehding.

<sup>13</sup> Nem ya lawah kumedek intanem yu, et anien yu dama lawah. Niya kinan yu inlameh ni itek yu, tep indinel yu kakina-let yu niya kakina-let idan sindalu yu. <sup>14</sup> Apputen dakeyullin buhul yu ma-lat mebahbah idalli eya nehammad ni netuping ni luhud yu. Henillin nemahbahan nan patul e hi Salman etan ni Bet Arbel ni nengubatan tun nunman e bebley. Eleg da hemeken ida bibi-i da niyadda u-ungnga da et pambakdungen dadda et mangkatey ida. <sup>15</sup> Hanniman ali meippahding ni hi-gayun iBethel tep nemahhig liwat yu. Ey yallin keillepuan nunman ni gubat ey metey hu patul yun iIsrael et humman ali pappeg ni pan-ap-apuan tu.' "

## 11

*Ya impeminhed APU DIOS idan iIsrael*

<sup>1</sup> Kan APU DIOS ey "Nakappinhed kudda helag Israel neipalpu dedan eman ni keu-ungnga da. Imbilang kudtan u-ungngak et ayagan kudda ma-lat hi-yanen da Egypt. \*

<sup>2</sup> Nem pan-eyyagak ida ey mangkeiddawwiddan hi-gak. Limmaw ida kumedek ni ida nan-appit nan Baal ni nanggiheb da bangbanglu et iappit dan edum ni dios. <sup>3</sup> Heni hi-gak hu nengituttudun hi-gadan umdalan e pineppedden kudda. Nem eleg da ebbuluta e hi-gak hu nengipenaptek ni hi-gada. <sup>4</sup> Kababbalak idan helag Israel tep nakappinhed kudda. Heni ingkal ku hu pakud buklew da et manyuungngak et pangan kudda. <sup>5</sup> Nem eleg da pinhed ni mambangngad ni hi-gak. Et humman hu, mambalin ida mewan ni himbut heni lan nanhimitan idan aammed dad Egypt, tep man-ap-apu hu Assyria ni hi-gada. <sup>6</sup> Megubbat ali emin bebley da et mangkebahbah hu eheb da et kebahbahan ni lawah ni planuh da. <sup>7</sup> Da-ak kaiwalleng e ebuh idan tuuk. Ma-nut kanday hi-gak hu Keta-ta-geyyan ni AP-APU, nem eleg da-ak daydayawa. <sup>8</sup> Inna-nu makkaw ni

dakeyu pengiwwallengen e tutu-uk ni helag Israel? Kaw dammutun bahbaben dakeyun henin nemahbahak ni Admah winu nak pehding ni hi-gayu hu henin impahding kun Seboim? Eggak han-ipahding humman ni hi-gayu, tep nakappinshed dakeyun peteg. <sup>9</sup> Eleg dakeyu bahbaha anin ni nemahhig hu bunget kun hi-gayu. Tep hi-gak e hi Apu Dios ey kayyagguddak ni peteg e beken nak ni tuu. Em, eleg dakeyu bahbaha, tep nakka mekihha-ad ni hi-gayu.

<sup>10</sup> Tep edum alin aggew ey u-unnuden da-ak idan tuuk. Heni-ak ali layon ni um-elmem et mambangngad idalli tutu-uk e manggegeyey idallin takut da e melpuddallid kakelinnugin aggew. <sup>11</sup> Pepuppuut dalli e heniddalli sisit ni simmayab ni nalpud Egypt niyad Assyria et mambangngad idad bebley da. Hi-gak hu mengibbangngad alin hi-gada. Hi-gak e AP-APU hu nanghel idan nunya."

*Impeang-ang mewan APU DIOS hu nanliwatan idan iIsrael niyadda iJudah*

<sup>12</sup> Kan APU DIOS ey "Kai-anteng idan iIsrael hu itek niya haul. Anin idan iJudah et da-ak kangenghaya e Dios ni tuka pannananeng hu impeminhed tu niya kayyaggudd ni peteg."

## 12

<sup>1</sup> Endi silbin yuka pehpehding e iIsrael. Heni yuka peppepduga dibdib ni kewa-wa-wa. Tagan yu haul ey tagan yu patey. Yuka ihhenammad ni meki-ungbal idan iAssyria, nem yu dama kaillawwid Egypt ni lanan olibah, ey buhul idan iAssyria.

<sup>2</sup> Wada inamtan APU DIOS ni bahul idan iJudah. Niya kastiguen tudda tep yadda lawah ni impahding da. <sup>3</sup> Yan wada pay hi Jacob di egeh inetu ey nekibekal nan agitu hi Esau. Kimmat-agu et makibultung nan APU DIOS. <sup>4</sup> Em, nekibultung ni anghel et mengapput. Nimmangih ni nunman et mampehemhemmek et mabagan bendisyon. Et yadman di Bethel hu nampeang-angan nan Apu Dios ni hi-gatu et mekihummangan. <sup>5</sup> Hi-gatu hi APU DIOS e Kabaelan tun emin. Hi-gatu hu AP-APU ni lebbeng tun meiddeyyaw. <sup>6</sup> Hi-gayun helag Jacob ey mahapul ni mambangngad kayun Apu Dios yu et hi-gatu pandinelan yu. Niya emin di yuka pehding ey peang-ang yu impeminhed yun hi-gatu. Ipahding yu hu limpiyuh niya anusi yun hehgeden hu pehding tun panyagguddan yu.

<sup>7</sup> Immel mewan hi APU DIOS ey kantuy "Hi-gayun iIsrael ey pinpinhed yun umhaul di yuka pengi-ussalin killohhan yu. <sup>8</sup> Kanyuy 'Kimmedangyan itu. Limpiyuh impahding tayun kimmedangyan. Endi an menghel e wada nambahulan tayu.' <sup>9</sup> Hi-gak e AP-APU e Dios yu hu nengihwang ni hi-gayun nanhimbunan yud Egypt. Nem kastiguen dakeyu et panha-ad dakeyu mewan di a-abbung henin lan nanha-adan yud desert. <sup>10</sup> E-eggel ni inhel kuddan prophet hu pinhed kun peamtan hi-gayu niya impeeni-innep kun hi-gada ma-lat ehelen dan hi-gayu e mekastigu kayu hedin eleg kayu me-heli. <sup>11</sup> Mebahbah kayulli henin nebahbahan idan tutu-ud Gilead tep lawah idan peteg. Hanniman ida mewan hu tutu-ud Gilgal e ida kaman-appit ni bulug ni baka idan dios da. Et humman hu, mebahbah idalli hu daka pan-appisi et mangkebukli et mangkaiwehit."

<sup>12</sup> Immel mewan hi Hosea ey kantuy "Ya impahding lan Jacob e ammed tayu ey bimmesik di bebley di Aram et an mampappattul ni kalneroh et tangdanen tu ahwa tu. <sup>13</sup> Et entanni impanguluddan APU DIOS hu helag Jacob, e humman ida iIsrael et hi-yanen da Egypt. Inusal tu hi Moses e prophet tun nengipatek ni tutu-tu ni niya nengituttuddun pehding da. <sup>14</sup> Nem hi-gayun helag iIsrael ey impabunget yun peteg hi APU DIOS tep nemahhig liwat yu. Et humman hu, kastiguen dakeyun hi-gatu tep lebbengtun mettey kayu."

## 13

*Ya nemahhig ni bunget APU DIOS idan iIsrael*

<sup>1</sup> Yan nunman ey hedin immel ida aap-apud Epraim ey kapaka-u-unnudaddan edum dan iIsrael tep dadda kalispitua. Nem entanni ey impappangnguluddan nunman ni aap-apu hu edum dan menadayaw nan Baal et manliwat ida. Et humman hu, mahapul ni mekastigudda et matey ida. <sup>2</sup> Daka pan-imma-ma anhallaw ni manliwwat tep tagan da kapyan dios dan nekapyad silber ni deyyawen da. Inyenayyaggudd numan etan ni nelaing ni mengapya ni kanday "Huyyaddan dios hu pan-appitan tayu." Winu kanday "Akwal yu eya i-ingngeh ni impah ni baka." <sup>3</sup> Humman idan tuun kamandeyyawan idan nunman ey heniddalli kulput ni kakkabbuhhan e angegannuy attukaw. Heniddalli degin kaittayab ni dibdib niya heniddalli ahuk di appuyyan e kemtang ni neendi.

<sup>4</sup> Kan APU DIOS ni hi-gaday "Hi-gak hu AP-APU e Dios yun nengihwang ni hi-gayun nanhimbunan yud Egypt. Hi-gak ni ebuh Dios yu, tep endi edum ni dammutun mengihwang ni hi-gayu. <sup>5</sup> Impenaptek kudda aammed yu etan di desert e mamegan

peteg ni bebley. <sup>6</sup> Nem yan dintengan dad kayyaggud ni bebley et makaphel ida e kayyaggud law biyag da ey ida law kamampeta-gey niya liniwwan da-ak henin hi-gayun nunya. <sup>7</sup> Et humman hu, um-ali-ak et bahbahen dakeyu e henin kapehding ni layon ni edum tun animal ni tuka kenna, niya heni-ak etan ni leopard ni nambetak ni kennen tu. <sup>8</sup> Pehding kun hi-gayu hu henin kapehding ni bimmunget ni inan bear tep imbesik da impah tu. Ya pengastiguk ni hi-gayu ey henin kapehding ni layon etan ni animal ni kennen tu e tuka pamba-nuta.

<sup>9</sup> Mebahbah kayun tutu-ud Israel tep anggebe-hel yuwak, anin ni hi-gak ni ebuh hu kaumbaddang ni hi-gayu. <sup>10</sup> Nambaga kayun patul niya aap-apu yu, nem attudda mewan et baddangan dakeyu ey? Attudda aap-apun bebley yun mengihwang ni hi-gayu ey? <sup>11</sup> Em, indawtan dakeyun patul yu tep ya bunget kun hi-gayu, nem inendik tep ya nemahhig ni bunget ku. <sup>12</sup> Neitudek hu liwat yun iIsrael et meiltu neitudkan tu ingganah alin kedettangan ni kekastiguan yu. <sup>13</sup> Heni kayu etan ni gelang ni nedatngan getud ni keukkatan tu ey eleg tu pinhed ni meukkat. Tep endi nemnem yu e eleg yu pinhed ni mantuttuyyun liwat yu.

<sup>14</sup> Kaw hellakniban dakeyun hi-gak di ketteyyan yu? Eleg. Panligligat mudda e katey. Tep endi law hemek kun hi-gada. <sup>15</sup> Anin ni ya helag Epraim hu kekekkekdangyanan ni hi-gadan han-aaggi et peellik ali hu maetung ni dibdib ni melpod kasimmilin aggew et matduk hu yuka pan-ehhuli. Niya emin idalli nebalol ni ngunut yu ey meendin hi-gayu. <sup>16</sup> Henidda daman iSamaria e mekastigudda tep nginhay da-ak. Megubbat idalli et mangkatey ida. Mangkeillegat ali gegellang ni mangkettey niya anin idallin nampambutsug ni bibi-i et mangketwik idan ispadah."

## 14

*Inhelan idan Hosea hu iIsrael ma-lat mambangngad idan mengu-unnud nan APU DIOS*

<sup>1</sup> Kan Hosea idan edum tun iIsrael ey "Pambangngad kayun AP-APU e Dios yu e tutu-ud Israel. Ya liwat yu hu himmulun ni nebahbahan yu. <sup>2</sup> Pambangngad kayun APU DIOS niya pandasal kayun hi-gatu e kanyuy 'Liwwan mu anhan emin liwat mi et abuluten dakemi ma-lat dayawen daka. <sup>3</sup> Eleg dakemi han-ihwang ni Assyria. Anin ni ya mika ussalad gubat et eleg mi iddinel. Ey eleg kami law mambeggan baddang idan dios ni kinapya min mika deyyawa. Tep hi-gam ni ebuh e APU DIOS hu kaumhemek idan anggehmemek ni tutu-u.' "

*Ya inhel APU DIOS idan helag Israel*

<sup>4</sup> Kan APU DIOS idan helag Israel ey "Hi-gayun helag Israel, ey inwalleng yuwak. Nem na-kal law bunget kun hi-gayu. Et humman hu, peyaggud dakeyu et liwwanen yu law hu mandeyyaw ni beken ni makulug ni dios. Bangngaden dakeyu et pakappinheden dakeyu e endi lekud ni pemihhed ku, tep meendi law bunget kun hi-gayun ingganah. <sup>5</sup> Heni-ak ali udan ni menennum ni puyek idan iIsrael et heniddalli kayyaggud ni habung ni lily niya heniddallin sedar di Lebanon e limmaw di dallem ni puyek hu lamut tu. <sup>6</sup> Kakkayyaggud ali ang-ang da henin mapengan keyew ni olibah, niya heniddan mekkabbanglun sedar di Lebanon. <sup>7</sup> Mambangngad idalli tuuk di bebley da e endi tekkutan da. Tep hi-gak ali mewan law mampaptek ni hi-gada et heniddalli etan ni tuun kaman-an-anlan kamanhihiddum di keyew. Niya heniddallin inggaud ni pimmappagey niya heniddallin limmalameh ni grapes. Mandingngel idalli e heniddan meinnum ni daka kapyaad Lebanon. <sup>8</sup> Hi-gayun tutu-uk ni iIsrael, attu law anhan et iwwalleng yudda etan dios ni kinapyan tuu ey! Tep hi-gak e AP-APU hu kamenummang ni dasal yu niya hi-gak kamengippaptek ni hi-gayu. Heni-ak mapenga niya malemeh ni keyew, tep hi-gak hu kakelpuin emin ni panyaggudan yu."

<sup>9</sup> Yadda nenemnan ni tuu ey han-awat da eyadda neitudek niya u-unnuden da et ipahding da. Neiptek ni emin hu kapehding APU DIOS. Yadda kamengu-unnud ni hi-gatu ey pehding da tugun tu. Nem yadda manghay ni tuu ey eleg da hengnguda hu tugun tu, et humman hu, mekastigudda.

## Joel

*Ya meippanggep ni nunyan libluh nan Joel*

Impeamtan Joel hu inhel Apu Dios idan tutu-ud Judah niyad Jerusalem. Inhel tu e umali hu dakel ni dudun e meihhinnap idad kebbebley di Judah et mebahbah hu nan-itnem da. Nebayag ni eleg umudan di emin ni bebley dad Judah. (chapter 1) Inamtan Joel e neipahding ida huyya tep ya ngehay idan tutu-ud Judah nan Apu Dios.

Inhelan idan Joel hu tutu-ud Judah e kantuy nanna-ud ni kastiguen Apu Dios ida hedin eleg ida mantuttuyud liwat da. Makulug ni neipahding humman. Ey makulug tu-wangun immalidda dudun et kanen dan emin hu hipan intanem da. (1:13-15 et ya 2:1-17)

Nem anin ni henin nunman neipahding et insapatah nan Apu Dios e panyaggud tuddalli mewan hu pinili tun tutu-u tu, anin idan tutu-ud kebbebley. Pehding tu huyyan pengippeellian tun hi-gadan Ispirituh tu. (2:8-32) Nem kastiguen Apu Dios ida beken ni Hebrew ni mampehelheltap idan tutu-u tu. Meipahding huyyan pemabhahan tullin hi-gadad et-eteng ni gubat di Nandeklan di Jehoshaphat. (3:1-16)

*Ya neitudek eyad libluh:*

1. Kinastigun Apu Dios ida tutu-u tu tep ya liwat da et palaw tu hu dakel ni dudun et mebahbah hu intanem da et ya bebley da. (chapters 1:1-2:17)
2. Inhel Apu Dios e panyaggud tudda tutu-u tu hedin mantuttuyudda. (chapter 2:18-27)
3. Ninemnem nan Apu Dios ni panyaggud tudda tutu-u tun edum ni aggew, anin idan tutu-ud kebbebley. Ya pengihwangan tun hi-gada ey meippuun di pengiddinnelan dan hi-gatu. (chapters 2:28-31 et ya 3:17-21)
4. Ninemnem Apu Dios ni mengastiguddan tutu-un nampehelheltap ni tutu-u tu. (chapter 3:2-16)

*Ya linelemyungan idan iJudah tep nebahbah intanem da*

<sup>1</sup> Yahhuy hu inhel APU DIOS nan hi Joel e u-ungngan Pethuel.

<sup>2</sup> Hi-gayun kamengipappangngulu niya hi-gayun emin ni iJudah, kaw wada an neipahding eman ni tsimpuh idan aammed yun heni eyan nekapkapyan nunya? <sup>3</sup> Ehel yuddan u-ungnga yu huyyan neipahding et e-ehhelen dalli daman u-ungnga da ni han da dama inhel idan u-ungnga dadda.

<sup>4</sup> Heninnuy hu neipahding: Nanhinhinullul hu hantapug ni dudun ni immali et pangkanen da hu intanem yun iJudah. Ya etan natdaan ni eleg kanen ni nemangulun immali ey kinan idan neitu-nud.

<sup>5</sup> Imutalngi yu, hi-gayun kamambuttebutteng et nannangngihan yu hu nebahbah ni intanem yun grapes, tep endi law kapyaan yun baluh ni meinum. <sup>6</sup> Immalidda dakel ni dudun e henidda sindalun eleg mebillang et bahbahen da intanem tayu. Makattadem hu ngipen da e henin ngipen ni layon. <sup>7</sup> Binahbah da grapes yu niya kinan da belakkibak idan keyew ni fig et kameang-ang hu mablah ni annel da niyadda panga da.

<sup>8</sup> Pannannangngih kayun lemyung yu e henin kapehding ni kat-agun biin netey ah-waen tu. <sup>9</sup> Endi law begah niya meinum ni mei-appit di Tempol APU DIOS. Et humman hu, ida kaumlelemyung niya ida kaumnangngih hu papaddi. <sup>10</sup> Nakabbahbah ni emin hu neitnem di payew. Endin hekey law hu pagey ni kennen, ya meinum niya mansikan olibah.

<sup>11</sup> Em, lelemyung kayun kamampantennem, tep nebahbah ni emin intanem yun wheat niya barley. <sup>12</sup> Nangkema-ganan ida grapes niyadda fig. Emin ida keyew ni kamekkan lameh da e henin palmah, yadda pomegranate niyadda apol ey nangkakpit ida. Endi law ni hekey amleng idan tuu.

*Inhel etan ni prophet idan tutu-un mantuttuyudda*

<sup>13</sup> Hi-gayun papaddin kamangngunud altar ni Dios ku ey pambalwasi kayun langgusih et lumaw kayud Tempol et lumelemyung kayu, ey ilallabbi yun mannannangngih, tep endi law begah niya meinum ni i-appit yun Apu Dios.

<sup>14</sup> Ayagi yuddan emin hu iJudah, anin idan ap-apu da et maemung ida. Ey imandal yun mantetpel ida et mandasal kayun AP-APU e Dios tayud Tempol tu et mampehemhemmek kayun hi-gatudman. <sup>15</sup> Tep kamangkedettengi hu aggew ni gintud APU DIOS e Kabaelan tun emin ni pengastiguan tun tutu-u. Anggetakkut ali hu meipahding nunman ni aggew.



<sup>16</sup> Inang-ang-ang tayu nebahbahan ni intanem tayu. Endi law hu tayu pan-an-anlaan di Tempol ni Dios tayu. <sup>17</sup> Nakatduk hu papayyew tayu et eleg umtemel hu intanem tayu. Endi law neiha-ad di alang tayu et na-way ida. <sup>18</sup> Ida kamanhawahawang ey ida kaum-eluelug hu babakka tep endi kennen da. Anin idan kalneroh et ida kamanhelheltap tep neu-upadda.

<sup>19</sup> Nakka mampehemhemmek ni hi-gam e APU DIOS, tep endi law pampattulan niya nangkema-ganan ida keyew e heni giniheb ni apuy. <sup>20</sup> Henidda dama kamampehemhemmek ni hi-gam hu animal di mujung, tep natduk hu wangwang ni daka innumi.

## 2

<sup>1</sup> Patnul yu tangguyup di Zion e duntug APU DIOS ma-lat manggegeygey idan emin hu tuud Judah ni takut da, tep kamangedettengi hu aggew ni pengastiguan APU DIOS ni tutu-u. <sup>2</sup> Yallin nunman ey man-e-nget hu bebley e heni kamangkukulput. Tep pinhakkey ali ey immali hu daker ni peteg ni dudun et maihinap idad keunduntug e heniddalli daker ni sindalun nangka-let. Endi henin nunman ni nepahding nunman ey eleg ali mepidwan meippahding humman ni nemahhig ni mekapkapyu.

<sup>3</sup> Henin kapemahbahin apuy hu pehding idan nunman ni dudun ni intanem, tep kennen dan emin et endi da tetdaan. Anin ni kakkayyaggud etan bebley e heni Garden di Eden et pambalin dan henin desert. <sup>4</sup> Nangka-let idan umbesik e henidda kebayyu. <sup>5</sup> Hedin ida kamenglaw, man ida kamangkukudu e henidda kalesah niya henin tenul ni nekamma-ganan ni helek ni kamantetebbel. Henidda mewan sindalun nandaddan ni megiggubbat.

<sup>6</sup> Nemahhig ni angetakkut ida, et humman hu, kaumkuphat ni takut da hu menang-ang ni hi-gada. <sup>7</sup> Na-let idan umbesik e henidda nelaing ni sindalu niya daka kellaba luhud ni bebley. Ida kamantu-tu-nud ni umlaw di lawwan da e endi kamehi-yan. <sup>8</sup> Eleg ida manhihinneksing, ey wada hakkey ni hi-gada ey ida kamangan-andeng ni menglaw. Daka pampaytuka hu neiheind dellenan da niya endi dammutun mengippesikked ni hi-gada, anin ni hipan almas ussalen da. <sup>9</sup> Daka keyya-muni hu bebley. Niya daka pangkalaba luhud ni hinggep da baballey e henidda mangkatekew, tep daka pan-idlan di habhabyen.

<sup>10</sup> Hedin ida kamenglaw, man kamanyegyeg hu puyek niya kameiggiwwed hu kabunyan. Kame-ngesi hu aggew niya bulan niya eleg law umdilag ida bittuwen. <sup>11</sup> Heni kidul hu ehel APU DIOS ni mammandal idan nunman ni hantapug ni sindalu tun nangka-let. Nanna-ud ni endilli meihwang ni pengippahdingan APU DIOS nunya.

<sup>12</sup> Kan APU DIOS ey "Pambanggad kayun mengu-unnud ni hi-gak ni nunya, haggud eleg pay ni maledaw. Pannannangnih kayu niya pantepel kayun lemyung yun pengippeang-angan yu e nantuttuyuy kayu. <sup>13</sup> Peang-ang yu hu makulug ni lemyung yun liwat yu, et beken ni yu bi-kien balwasi yun ebuh.

Pambanggad kayun mengu-unnud nan APU DIOS e Dios yu tep hedin hi-gatu, man mahmek niya kababbal. Beken ni kabbubunget niya eleg melumman hu impeminhed tu. Eleg manggalid ni mengastigun hi-gayu. <sup>14</sup> Ilah tu et anhan ey hehmeken dakeyu et eleg tu ippahding hu ninemnem tun kastigu yu et bendisyonan dakeyu et dumakkel enniun yu ma-lat wada i-appit yun AP-APU e Dios yun begah niya meinnum.

<sup>15</sup> Patnul yu tangguyup di Zion ma-lat maemung ida tutu-u et ehelen yun hi-gada et mantepel ida. <sup>16</sup> Mahapul ni meemung idan emin hu katuutuu, yadda nangkeamma, yadda kaungaunga, yadda kamampan-innum ni gelang niyadda pakelahin tu, et umli kayun menaydayaw ni hi-gak. <sup>17</sup> Ey ehel yuddan papaddin kaman-appit et numengih idan mandasal ni hi-gak etan di nambattanin ni altar niyad heggeppan di Tempol. Pandasal idan kanday 'Ihwang dakemi anhan ni tutu-um ey entan anhan tu iebulut e APU DIOS ni dakemi ngi-ngi-ngian idan tutu-ud edum ni bebley winu dakemi pippihulen e kanday: Attu mewan hu Dios ni Israel ey? Tam endi na-mu dedan kabaelan tu?"

<sup>18</sup> Hedin hi APU DIOS, man tuka paka-ikkaguh hu bebley tu niya tuka pakahmeka tutu-u tu. <sup>19</sup> Et humangen tu dasal da e kantuy "Iddawtan dakeyu law ni kennen yu, ya innumen yu niya mansikan olibah et mawedan emin mahapul yu. Eleg dakeyulli law ngi-ngi-ngian tutu-ud edum ni bebley niya eleg dakeyu pippihula. <sup>20</sup> Pan-ebbulek idalli hu dudun e henidda hantapug ni sindalun nalpud north et idawwik idan hi-gayu. Pellaw kuddad desert et mangkatey idadman. Yadda etan wadad dingkuggan ey pellaw kuddad Netey ni Baybay ey yadda etan wadad hinangga ey pellaw kuddad Baybay e Mediterranean. Manhemmu ali nabwel ni annel da eyad bebley. Bahbahen kuddalli tep ya impenahding dan hi-gayu."

Makulug ni dakel impenahding APU DIOS ni kaketngain tuu. <sup>21</sup> Hi-gam ni puyek, ey entan takut mu, nem pan-am-amleng ka tep yadda panyaggudam ni impahding tu. <sup>22</sup> Anin ni hi-gayuddan animal, et entan takut yu, tep simmemel ida law helek ni kennen yu. Limmameh ida law keyew, anin idan fig niyadda grapes.

<sup>23</sup> Pan-am-amleng kayu e tutu-ud Jerusalem. Pan-am-amleng kayun AP-APU e Dios tayu, tep peelli tu dakel ni udan ni mahapul ni intanem yu di tsimpuh ni yuka panheppuli et peang-ang tu kakinayyaggud tu. <sup>24</sup> Umdakkel ali ennien yu et mangkeipu-ul di alang yu. Anin alin innumen yu niya mansikan olibah ni mahapul yu et mangkehewwal di ha-addan yu. <sup>25</sup> Kan APU DIOS ey "Pebanggad kudda hu neendin hi-gayu eman ni nemabahan ni dakel ni dudun ni intanem yu. Ya kakulugan tu ey hi-gak hu nengitudak idan nunman ni dudun. <sup>26</sup> Nem medakkel ali kaya kennen yu et dayawen yuwak e AP-APU e Dios yun kamengippahding idan nunyan miracle ma-lat panyaggudan yu. Eleg kayulli law mebe-ing ni tutu-uk. <sup>27</sup> Amtaen yullin nunman e hi-gak hu AP-APU e Dios yu e endi edum. Niya amtaen yu e wada-ak eyad bebley yud Israel et eleg kayulli law mebabba-ingi. <sup>28</sup> Hannak ali paeli Ispirituh kud emin ni tuu et peamtaddallin u-ungnga yuddan bibi-i niyadda lalakki hu pinhed kun e-helen ni hi-gayu. Wadalli peang-ang kuddan kamenikken niya pei-innep kuddallin nangkea-amma hu mekapkapyan edum ni aggew. <sup>29</sup> Anin idallin bega-en kun lalakki niyadda bibi-i et peellik hu Ispirituh kun hi-gadan nunman alin tsimpuh.

<sup>30</sup> Wadalli peang-ang kud kabunyan niyad puyek ni ketngaan ni tuu. Ey wadalli angangen yun kuheyaw, ya apuy et ya ahuk. <sup>31</sup> Me-ngetan ali aggew niya umdalang ali bulan et heni kuheyaw et han medatngan humman ni angetakkut ni aggew ni gintud kun pengastiguan kun tutu-u. <sup>32</sup> Et emin ali hu mambeggan baddang ni hi-gak ni nunman ni aggew ey mehellakniban. \* Wadaddalli hu meihwang ni iZion di Jerusalem e humman ida pinilik, tep humman dedan la inhel kun nunman." †

### 3

#### *Ya penuwetan APU DIOS ni tutu-ud kebebbley*

<sup>1</sup> Immehel mewan hi APU DIOS ey kantuy "Medettengan ali aggew ni pengibbangn-gadan kun kinedangyan ni Judah niya Jerusalem. <sup>2</sup> Emmungek alin emin hu tutu-ud kebebbley et ilaw kuddad Nandeklan di Jehoshaphat et yadman penuwetan kun hi-gada tep inwahit daddad kebebbley hu tutu-uk ni helag Israel et panggagadwa da hu bebley kun Israel. <sup>3</sup> Ya hakey mewan ni impahding da ey imbubunut da mengellan balud ni tutu-uk. Niya inggatang dadda kaungaunga ma-lat wada pemeyyad dan bibi-in daka pebeyyad annel da niya ma-lat wada iggatang dad meinum.

<sup>4</sup> Hi-gayun tutu-ud Tyre, yad Sidon niyad Pilistia, kele hanniman yu impahding? Kaw wada pinhed yun ibbaleh ni hi-gak? Hedin henin nuntan, man ang-ang yu kuma tep kekemtang ey impahding ku hu pengibleh kun emin ni impahding yu. <sup>5</sup> Nan-aley silber ku niya balitik ku niyadda edum ni nebalol ni tenged ku, et ilaw yuddad tempol ni dios yu. <sup>6</sup> Nan-igtang yudda iJudah niyadda iJerusalem idan tutu-ud Greece et meidawwiddad bebley da.

<sup>7</sup> Nem yan nunya ey pe-kal kuddad bebley ni nengilawwan yun hi-gada et ipahding kun hi-gayu hu henin impahding yun hi-gada. <sup>8</sup> Pambalin kun himbut idan iJudah hu u-ungnga yu et han dadda mewan ihbut ni tutu-ud Arabia e naka-iddawwin bebley. Hi-gak e AP-APU hu nanghel idan nunya.

<sup>9</sup> Ehel yuddan tutu-ud kebebbley e kanyuy 'Pandaddan kayun mekiggubbat. Amung yudda sindalu yu et ungah kayun an mekiggubbat. <sup>10</sup> Kapyu yudda aledu yun ispadah niya kapyu yun pahul ida edum ni usal yud legunta.'

Anin idan kamanyangan hi-gayu et ehel da e kanday 'Na-lettak ni mekiggubbat.'

<sup>11</sup> Papuut yu, emin kayun tutu-ud kebebbley et maemung kayun emin di nedeklan."

APU DIOS, paelim ida sindalum et gubaten dadda.

<sup>12</sup> Immehel mewan hi APU DIOS ey kantuy "Mahapul ni um-alin emin hu katuuuud Nandeklan di Jehoshaphat et hi-gak e AP-APU hu menghel ni kastigu dadman. <sup>13</sup> Lawah ida e ebu! Keyuy et pampalngan yudda tep nedatngan law hu aggew ni kekastiguan da. Panhegpat yudda henin kapangeppasin pagey ni ahiani niya pan-ideyapdap yudda et henin grapes ni napnud keppallan." <sup>14</sup> Kalibulibulli meemung di Nandeklan ni kedettengan ni panhuwetan APU DIOS. <sup>15</sup> Me-ngetan ali aggew niya bulan niya eleg idalli law umdilag bittuwen. <sup>16</sup> Mantetekuk ali hi APU DIOS e heni kidul dengel tud Duntug e

\* 2:32 2:32 Acts 2:21 niya Romans 10:1 † 2:32 2:32 [28-32] Acts 2:17-21

Zion di Jerusalem. Meweddalli yegyeg eyad puyek niya meiggiwwed ali kabunyan. Nem hedin yaddalli helag Israel ey hi APU DIOS hu keihhikkugan da, tep tutu-u tudda.

<sup>17</sup> Kan APU DIOS ey “Yaddalli humman ni pehding ku hu pengamtaan yu e hi-gak e AP-APU e Dios yu ey wada-ak di Zion e duntug ku. Et humman hu, eleg ali law mabalin ni an sekkupen ni tutu-ud edum ni bebley hu Jerusalem e bebley ku.

<sup>18</sup> Yan nunman alin aggew ey mehephepan hu kedunduntug ni neitnem ni grapes, et dakel alin peteg hu meinum niya mampan-a-ayyam idalli hu dakel ni babakkad duntug et menawwahawwal ali gatas. Keut-utbul ali danum di Judah. Wadalli hebwak ni melpud Tempol ni menennum ni nangkeitnem ni akasyah di Nandeklan di Sittim.

<sup>19</sup> Nem hedin ya Egypt ey mambalin alin desert niya mebahbah ali Edom et mebelah. Hanniman ali meippahding tep nemahhig hu impahding idan iEgypt niyadda iEdom idan iJudah e nampatey dadda anin ni endi bahul da. <sup>20-21</sup> Et humman hu, kastigiek ida et iewit kudda etan nampatey da. Nem i-ehneng kudda iJudah niyadda iJerusalem et mannananeng hu bebley dan mebebleyan ni ingganah. Niya hi-gak e AP-APU e Dios ey mambebleyyak di Zion.”

## Amos

### *Ya meippanggep ni libluh nan Amos*

Hi Amos ey hakey ni prophet nan Apu Dios idan iJudah di south, nema-ma-maddan iIsrael di north. Yan nunman ni kapantuttudduin Amos idan iIsrael ey et-eteng hu kabaelan idan sindalu dad man niya kekeddangyan ida tutu-u, anin ida etan ni kamengippangngulun hi-gada. Nem inhelan Amos ida et peamta tu e mebahbah idalli, tep inwalleng da hu nekitbalan Apu Dios ni hi-gada niya eleg da pinhed ni mambangngad ni menaydayaw ni hi-gatu.

Ya hakey mewan ni nambahulan da ey dadda kapanliligat hu nangkewetwet (2:7, 4:1, 5:11-12 et ya 8:4-6), beken ni limpiyuh daka pehding, lawah daka pehpehding, ida kamambuttebutteng niya daka ngenghaya hu inhel Apu Dios e mantuttuyyuddan liwat da. Ya nemahhig ni liwat da ey daka daydayawa hu beken ni makulug ni dios. Huyyaddan iIsrael ey lawah ida e heniddan tutu-un nampambebley di nanlinikweh di bebley da. Et humman hu, nanna-ud ni kastiguen Apu Dios ida tutu-u tu tep ya liwat da, henin pehding tuddan tutu-ud edum ni bebley. Entanni tu-wangu et nelabah hu telumpulun toon meippalpun nanghelan Amos ni nunya ey inlaw idan iAssyria di bebley da e nambalin daddan balud diman. (722-721 B.C.)

### *Ya neitudek eyad libluh:*

1. Ya pengastiguan alin Apu Dios idan tutu-un nampambebley di nanlinikweh di Israel niyad Judah. (chapters 1:1-2:3)
2. Ya pengastiguan alin Apu Dios idan tutu-ud Judah, nema-ma-madda tutu-ud Israel. (chapter 2:4-16)
3. Ya nengibungetan Amos idan tutu-ud Israel niyad Judah tep ya liwat dan Apu Dios et ehelen tun hi-gada e mantuttuyyuddan liwat da tep kamangkedettengi law pengastiguan idan Apu Dios. (chapters 3-6)
4. Ya nengipei-innepan Apu Dios nan Amos ni meippanggep ni kebahbahan alin Judah niya Israel. (chapters 7:1-9:10)
5. Ya nanghelan Apu Dios ni pengibbangngadan tuddan helag Israel di bebley da et bendisyonan tudda. (chapter 9:11-15)

<sup>1</sup> Yahhuy ida hu inhel Amos ni impeamtan APU DIOS ni hi-gatu meippanggep ni Israel eman ni nelabah dewwan toon et han wada etan yegyeg. Hi Ussiah hu patul di Judah ni nunman, ey hi Jeroboam e u-ungngan Jehoas hu patul di Israel. Hi Amos ey iTekoa ni kamampattul ni kalneroh.

<sup>2</sup> Kantuy: Inlet APU DIOS hu ehel tud Tempol tud Duntug e Zion di Jerusalem. Ey pinhakkey ey nema-ganan hu helek di kudal di Karmel.

<sup>3</sup> Kan APU DIOS ey "Nanliwaliwat hu tutu-ud Damascus et mukun nanna-ud ni kastiguek ida tep nemahhig bunget kun hi-gada. Nemahhig hu impahding daddan tutu-uk ni iGilead e heni dadda impadelan di illikkan ni gumeke ngipen tu. <sup>4</sup> Et humman hu, peellik ali apuy ma-lat malgab hu baley ni binehwat nan patul e hi Hasael. Niya ma-lat magiheh et mebahbah hu nehammad ni luhud ni kinapyan Benhadad. <sup>5</sup> Bahbahen kudda eheb di Damascus niya pe-kal kudda nampambebley di Nandeklan e Aben, anin etan Ap-apud Bet Eden. Ey pellow kudda tutu-ud Syria di Kir et mambalin idan balud diman." Hi-gak e AP-APU hu nanghel nunya.

<sup>6</sup> Immehel mewan hi APU DIOS ey kantuy "Nanna-ud ni kastiguen kudda dama iGaza tep nanliwaliwat ida. Inlaw dadda tuuk di Edom et panhimbut daddadman. <sup>7-8</sup> Peellik hu apuy di Gaza et magiheh etan nehammad ni luhud da. Niya bahbahek ida hu ap-apud Asdod niyad Askelon, anin idan iEkron et matey idan emin iPilistia et endi an metdaan ni hi-gada, anin hakey." Hi-gak e AP-APU e Eta-gey ni peteg hu nanghel nunya.

<sup>9</sup> Immehel mewan hi APU DIOS ey kantuy "Nanliwaliwat ida dama tutu-ud Tyre et mukun nanna-ud ni kastiguek ida. Eleg da u-unnuden hu nekitbalan dan Israel e mambibinaddang ida. Et pambalin da kumedek ida iIsrael ni himbut di Edom. <sup>10</sup> Et humman hu, peellik hu apuy ma-lat magiheh etan nehammad ni luhud di Tyre."

<sup>11</sup> Immehel mewan hi APU DIOS ey kantuy "Nanliwaliwat ida dama tutu-ud Edom et mukun nanna-ud ni kastiguen kudda. Heni da dindinweng hu nekitbalan dan iIsrael et nemahhig hu impahding dan hi-gada e endi hemek da. <sup>12</sup> Et humman hu, peellik ali apuy di et-eteng ni bebley dad Teman et magiheh etan nehammad ni luhud di Bosrah."

<sup>13</sup> Immehel mewan hi APU DIOS ey kantuy "Nanliwaliwat ida dama iAmmon et mukun nanna-ud ni kastiguen kudda. Tep yan nengubatan dan Gilead ma-lat ideldel da pappeg

ni bebley da ey lawah ni peteg hu impahding dan tutu-udman e nambeghi da egeh idan bibi-in nampambutsug e inusal da ispadah da. <sup>14</sup> Et humman hu, peellik hu apuy di Rabbah et magiheb ni emin hu nehammad ni luhud da, anin idan etata-gey ni baley ni kapanha-adin guwalya. Mantetekkek idalli buhul dan mengubbat ni hi-gada. Niya nemahhig ali pehding dan hi-gada e henin kapehding ni na-let ni pewek. <sup>15</sup> Niya ellan alin buhul da patul da niyadda opisyal tu et ilaw daddad bebley da. Hi-gak e AP-APU hu nanghel nunya.”

## 2

*Ya inhel APU DIOS ni meippahding idan iMoab*

<sup>1</sup> Kan APU DIOS ey “Nanliwaliwat ida dama tutu-ud Moab et mukun nanna-ud ni kastiguen kudda. Eleg da lispihuhen hu patul ni Edom et giheben da genit tu et mambalin ni dep-ul. <sup>2-3</sup> Et humman hu, peellik ali apuy di Moab et magiheb ida nehammad ni luhud di Keriot. Niya petteyek hu patul di diman Moab, anin idan opisyal tu. Yan nunman ali ey medngel hu tekuk ni tutu-un kamanggugubat niya medngel hu tenul ni tangguyup da. Hi-gak e AP-APU hu nanghel nunya.”

<sup>4</sup> Immehel mewan hi APU DIOS ey kantuy “Nanliwaliwat ida dama tutu-ud Judah et mukun nanna-ud ni kastiguen kudda. Inwalleng da intuttudduk niya eleg da u-unnuden tugun ku. Nehaul ida et daydayawen da hu beken ni makulug ni dios heni mewan ni impahding ida lan aammed da. <sup>5</sup> Et humman hu, peellik hu apuy di Judah ma-lat magiheb ida nehammad ni luhud ni Jerusalem.”

*Ya inhel APU DIOS ni meippanggep ni Israel*

<sup>6</sup> Kan APU DIOS ey “Nanliwaliwat ida dama tutu-ud Israel et mukun nanna-ud ni kastiguen kudda. Daka pambalin ni himbut hu kayyaggud ni tutu-u tep daka gangami pihhuh. Da mewan kapanhimbut hu nekawwetwet tep eleg da hambayad hu patul ni inutang dan hi-gada. <sup>7</sup> Heni daka pan-igsin hu endi elet tun tuu niya en-endi-an, niya eleg da iddawat kelebengan da. Da mewan kababbainga ngadan ku, tep kamanhuhullul hu han-aman mengi-ullig ni himbut dan bii. <sup>8</sup> Hedin ya mewan di daka pan-appisin dios da ey ida kaumbaktad e nanengtun imbalwasi da hu balwasin inla da etan idan newetwet, tep ya utang da. Niya daka i-innumad baley ni dios da hu meinum ni inla daddan immutang ni hi-gadan pihhuh.

<sup>9</sup> Ey kaw eleg yu nemneman tutu-uk ni helag Israel e yan eman ni yu pambebleyan di Kanaan ey binabhah kudda Amorite, anin ni etata-gey ida e henidda keyew ni sedar niya mangkekedhel ida e henidda keyew ni oak? Heni binabhah ku hu lameh da niya lamut da. <sup>10</sup> Hi-gak nengipengulun hi-gayun neni-yanan yun Egypt, et ipenapteke dakeyu etan di desert ni na-pat ni toon et ipebeltan kun hi-gayu hu bebley idan Amorite et pambebleyan yu. <sup>11</sup> Pinilik ida edum ni u-ungnga yun mambalin ni prophet ku niya pinilik ida edum ni mambalin ni Nasirite. Hi-gayun tutu-uk ni helag Israel ey inamta yun makulug huuya. Hi-gak e AP-APU hu nanghel nunya. <sup>12</sup> Nem hedin ya kumedek impahding yu ey dinini yudda hu Nasirite et uminum idan kaumbuteng ni meinum niya inoldenan yudda prophet ku e eleg da e-hela hu impeamtak ni hi-gada.

<sup>13</sup> Et humman hu, bahbahen dakeyu henin kapemabhahin kalesah ni napnun begah ni hipan iddihen tu. <sup>14</sup> Anin idallin angka-let ni umbesik et meha-kup ida, ey anin ni angka-let ida et meendi elet da. Anin idallin sindalu yu et eleg dalli han-ihwang hu annel da. <sup>15</sup> Hedin yaddalli mapena ey umhunay ida. Yaddalli angka-let ni umbesik ni sindalu ey meha-kup ida et eleg ida meihwang. Anin idallin nantakkay di kebayyu et eleg ida meihwang. <sup>16</sup> Yan nunman alin aggew ey anin ni ketultuledan ni sindalu et pan-ippullay tu emin almas tu et mamsik. Hi-gak e AP-APU hu nanghel nunya.”

## 3

<sup>1</sup> Hi-gayun iIsrael, ey dengel yu eya e-helek ni inhel APU DIOS ni hi-gayun heni hakey ni pamilyah ni impangulu tun neni-yanan yun Egypt. <sup>2</sup> Kantuy “Hi-gayu pinilik ni pantu-uk di emin ni tutu-u eyad puyek, et ipenapteke dakeyu. Nem yan nunya ey kastiguen dakeyu tep ya liwat yu.” <sup>3</sup> Kaw neala ni nangkuyug ida dewwan tuun mandaddallan hedin eleg da panhummangan hedin attu lawwan da? <sup>4</sup> Niya kaw kaum-enelmem hu layon di muyung hedin endi dimpap tun kennen tu? Heni daman pakeetteng tun layon e eleg mangngengeyyed hedin endi dimpap tun kennen tu. <sup>5</sup> Hanniman dama sisit e beken ni neala ey nakna hedin eleg meha-adan ni tapang hu lingen. Beken mewan ni neala ni nabkah hu appad hedin endi nakna. <sup>6</sup> Niya kaw dammutun eleg umtakut ida bimbebley hedin impatnul da tangguyup e humman pengamtaan dan wada gubat? Ey kaw neala ni wada immalin ligat di hakey ni bebley hedin eleg paelin APU DIOS?

<sup>7</sup> Hi APU DIOS e Eta-gey ni peteg ey tuka e-heladdan prophet tun emin hu hipan implanuh tun pehding tu, ni hantu impahding.

<sup>8</sup> Kaw eleg umgeygey hu tuun takut tu hedin immelmem hu layon? Hanniman dama e hedin immehel hi APU DIOS e Eta-gey ni peteg, man mahapul ni meippeamta hu inhel tu.

<sup>9</sup> Yu pan-ehel idan wadad baley nan patul di Egypt niyad Asdod e kanyuy “Kayu kaemung idad duntug di Samaria et ang-angen yu hu endi yayaggud tun kapehpehding idan tuudman.”

<sup>10</sup> Kan APU DIOS ey “Huyyaddan tutu-u ey daka pepnua hu etta-teng ni baballey dan hipan ngunut da, nem beken ni limpiyuh nengal-an da tep inla dadda humman di takew niya papatey. Eleg da dedan amta hu limpiyuh ni pehding. <sup>11</sup> Et humman hu, kan APU DIOS e Eta-gey ni peteg ey: Hellikuben idallin buhul da bebley da et bahbahen da nangehammad ni luhud da et pan-alen da nangebalol ni limmu da.”

<sup>12</sup> Kan mewan APU DIOS ey “Ya kamampattul ni kalneroh ey hin-addum ni ebuh law tangila winu kukub ni ha-kupan tun sindaan ni layon. Henin nunman ali meippahding idan iSamaria e hahhakkey alin ebuh hu metdaan ni hi-gada, anin ni ida kamambakbaktad di nangkengina niya kakkayyaggud ni andukkey ni yuddungngan ni nunya.”

<sup>13</sup> Kan APU DIOS e Eta-gey ni peteg niya Kabaelan tun emin ey “Dengel mu huyya et ehelem idan helag Jacob e kangkuy: <sup>14</sup> Yallin pengastiguak idan iIsraël tep ya liwat da ey bahbahek idalli hu daka pan-appisin beken ni makulug ni dios di Bethel et mehepngit ida etan heni ha-duk ni altar da et mangka-gah di puyek. <sup>15</sup> Bahbahek idalli kakkayyaggud ni baballey dan daka panha-adin ahikettekettelan, anin etan idan daka panha-adin siyaggew. Pekibbahbah kuddalli hu baballey dan neal-alkusan ni ivory, anin ida etan ni etta-teng ni baballey da. Hi-gak e AP-APU hu nanghel idan nunya.”

## 4

<sup>1</sup> “Dengel yu eya e-helen ku, hi-gayun mangkateban bibi-id Samaria ni heniddan kamepepphel ni mangkateban bakad Bashan. Hi-gayun bibi-in kamengippeliligat idan nekapuy niya angehemmek ni tutu-u. Hedin kuma, kanyun aahwa yuy ‘I-li ka pay ni ibbuteng ta.’ ” <sup>2</sup> Hi APU DIOS e Eta-gey ni peteg niya kakkayyaggud ey insapatah tu e kantuy “Medettengan ali aggew ni heni kayu deleg e mebenwit kayun emin et mailaw kayud edum ni bebley. <sup>3</sup> Iddalan yullin emin di negutbawan ni luhud yu et palaw dakeyud appit ni Harmon. Hi-gak e AP-APU hu nanghel nunya.” <sup>4</sup> Immehel mewan hi APU DIOS e Eta-gey ni peteg ey kantuy “Imay, lakkayuy ni iIsraël et kayu man-appit idan beken ni makulug ni dios di Bethel niyad Gilgal et yu pan-eduman hu liwat yu. Ilaw yu i-appit yun kakkabbuhhan niya ilaw yu hu kapulun limmu yun yuka iddawat hedini nelabah tellun aggew. <sup>5</sup> Pan-appit kayun sinapay ni pampesalamatan yuddan dios yu. Ey ipahhiyya yu hu yuka iggeb-at ni i-appit. Tep huyyadda pinpinhed yun pehding e iIsraël. Hi-gak e AP-APU hu nanghel nunya.”

<sup>6</sup> Hi-gak e hi APU DIOS hu nengipealin bisil di emin ni bebley yu, nem kapyatun eleg kayu mambangngad ni mengu-unnud ni hi-gak.

<sup>7</sup> Eleggak paeli udan etan ni tsimpuh ni kapeneppulin intanem yu et mebahbah ida. Impalaw ku udan di hakey ni bebley, nem eggak palaw di edum ni bebley. Et ma-nu tep nedanuman papayyew di hakey ni bebley, nem natduk payew dad edum ni bebley, et matey hu intanem da niya nakling ida helek diman. <sup>8</sup> Ida nanhawahawang di edum ni bebley hu tutu-un da pan-ehhulan ni innumen da tep na-wew ida, nem kulang ni peteg. Nem kapyatun eleg kayu mambangngad ni mengu-unnud ni hi-gak. Hi-gak e AP-APU hu nanghel idan nunya.

<sup>9</sup> Impaelik mewan hu degeh ni intanem et mebahbah intanem yu. Niya impaelik hu dudun et kanen da intanem yun grapes niyadda keyew ni fig niya olibah. Nem kapyatun eleg kayu mambangngad ni mengu-unnud ni hi-gak.

<sup>10</sup> Impaelik hu ligat ni hi-gayu, henin ligat ni impalaw kud Egypt ni nunman. Niya impapetey ku hu u-ungnga yud gubat, anin idan kebayyu yu, et nemahhig hamuy idan nangketey. Nem kapyatun eleg kayu mambangngad ni mengu-unnud ni hi-gak.

<sup>11</sup> Binahbah ku edum ni hi-gayu, henin nemahbahak ni Sodom niya Gomorrhah. Et yadda natdaan ey henidda kamantetebbel ni pasing ni ginamhut kud apuy et meihwang ida. Nem kapyatun eleg kayu mambangngad ni mengu-unnud ni hi-gak. Hi-gak e AP-APU hu nanghel idan nunya.

<sup>12</sup> Et humman hu, kastiguen dakeyun iIsraël. Et mukun mahapul ni mandaddan kayun menammun hi-gak e Dios yu, tep nanna-ud ni pehding ku huyyan inhel ku.”

<sup>13</sup> Hi APU DIOS hu nanletun kedunduntug niya dibdib, niya tuka peamtaddan tutu-u hu wadad nemnem tu. Tuka peelli kawwalwal niya hileng niya kamandaddallan di ta-pew idan duntug eyan puyek. Ya ngadan tu ey hi APU DIOS e Kabaelan tun emin.

## 5

<sup>1</sup> Hi-gayun iIsrael, dengel yu eya a-appeh di patey ni ia-appeh kun hi-gayu: <sup>2</sup> “Hi-gam Israel e nakappinshed ku, heni ka na-gah et mena-yun kad puyek ni na-gaham, tep endi memaddang ni hi-gam ni um-ehng.”

<sup>3</sup> Kan APU DIOS e Eta-gey ni peteg ey “Ya hakey ni et-eteng ni bebley di Israel ey um-itu-dak ni hanlibun sindalun an mekiggubbat, nem ebuh hanggatut ni mambanggad. Um-itu-dak mewan hakey ni bebley ni hanggatut, nem ebuh hampulun mambanggad.”

<sup>4</sup> Immehel mewan hi APU DIOS idan iIsrael ey kantuy “Hi-gayun iIsrael, pambanggad kayun mengu-unnud ni hi-gak ma-lat tumegu kayu. <sup>5</sup> Entan elaw yud Beersheba ni an menaydayaw ni dios ni kinapyan tuu. Niya entan tuwak an hamak di Bethel tep endilli hu pambalinalan nunman ni bebley. Entan mewan elaw di Gilgal tep meillaw idallid edum ni bebley hu tutu-udman.”

<sup>6</sup> Pambanggad kayun mengu-unnud nan APU DIOS ma-lat tumegu kayu. Hedin eleg kayu mengu-unnud ni hi-gatu ey um-alilli e heni apuy et bahbahen dakeyu et endilli hu dios yud Bethel ni paka-dep nunman ni apuy.

<sup>7</sup> Lawah kayun iIsrael! Yuka pambalin hu makulug ni itek. Beken mewan ni limpiyuh hu yuka pehding tep yuka endia kelebengan idan newetwet ni kamanligligat.

<sup>8</sup> Hi APU DIOS hu nanletun bittuwen et iha-ad tuddad neiha-adan da. Tuka bebnangi hu engeenget niya tuka pambalin ni engeenget hu kawwalwal. Tuka ekkupa hu danum di baybay ni ingkuyag tud puyek. <sup>9</sup> Nekomtang ni ebuh hu pemahbahan tun emin ni nangehammad ni luhud ni et-eteng ni bebley.

*Ya kayyaggud hu pillien, beken ni ya lawah*

<sup>10</sup> Angebe-hel yu hu tutu-un kamengi-ehng ni limpiyuh niyadda tistigun kamengi-huddut ni makulug.

<sup>11</sup> Impanligat yudda nangkewetwet niya piniliw yu kennen da tep impeta-gey yu buwis da niya nengina hu yuka pebeyad ni abang da. Et humman hu, anin ni kinapya yu kakkayyaggud ni batun baballey yu et eleg kayu manha-ad diman. Niya anin ni nantanem kayun grapes di legunta yu et beken alin hi-gayu menginum idan nunman.

<sup>12</sup> Inamtak e himmalla liwat yu niya inamtak ida etan lawah ni impahding yun edum yu. Yuka panligat ida limpiyuh ni tuu ey yuka ebbuluta pemeyad dan hi-gayu ma-lat man-itek kayu et eleg maipahding hu limpiyuh. Hi-gayu kaumhani et eleg ida law han-alan nangkewetwet hu kelebengan dad korteh.

<sup>13</sup> Et humman hu, neala law ni immi-ineng hu nenemneman ni tuu, tep lawah ni emin hu kamekapkapa.

<sup>14</sup> Ittugun kun hi-gayu e ya kayyaggud hu ipahding yu, beken ni yadda lawah, ma-lat tumegu kayu niya ma-lat umamnu hu kanyun i-ehng dakeyun APU DIOS e Kabaelan tun emin. <sup>15</sup> Balaw yu lawah niya unud yu kayyaggud. Niya ang-ang yu ma-lat mengapput hu limpiyuh di korteh. Et ilah tu et ey hehmeken dakeyun natdaan nan APU DIOS e Kabaelan tun emin.

<sup>16</sup> Humman nanghelan APU DIOS e Eta-gey ni peteg niya Kabaelan tun emin e kantuy “Umlelemyung ida niya mannannangngih idalli katuutuud keltad niyad mulkaduh tep yadda nangketey. Anin idan kamangngunnud payew et mei-dum idaddan netangdanan ma-lat nannangngihan dadda nangketey.

<sup>17</sup> Kanengineng idalli tutu-ud emin ni legunta. Emin huuya ey meippahding tep um-ali-ak alin mengastigun hi-gayu. Hi-gak e AP-APU hu nanghel nunya.”

<sup>18</sup> Angehemmek kayullin kamenehhegged ni ellian APU DIOS! Kele yuka abtui ellian tu? Kaw kanyu nem hedin um-ali, man kayyaggud meippahding ni hi-gayu? Henilli mannuman engeenget ni nunman ni aggew ni ellian tu. <sup>19</sup> Tep yan nunman alin aggew ey heni kayulli etan ni tuun tuka pan-ibbebsiki layon, ey dinammu tu hu bear. Hini-yan tu mewan etan bear et dumteng di baley tu et ihka tud luhud, ey killat ni uleg. <sup>20</sup> Em, yallin ellian APU DIOS ey endilli tu iddawat ni kayyaggud winu an-anla. Henilli engeenget ni peteg. <sup>21</sup> Kan APU DIOS ey “Angebe-hel kun peteg hu yuka keam-amungin piyestah yun kanyun pengippeang-ang yun yuka penaydayaw ni hi-gak. Nem ya kakulugan tu ey ma-lat peenang-ang-ang yun ebuh. <sup>22</sup> Eggak ebbuluta hu yuka i-enappit ni yuka gihheba niya begah. Eggak mewan ebbulutadda animal ni impateba yun yuka i-appit ni hi-gak. <sup>23</sup> Isiked yu hu umpaliteng ni a-appeh yu. Eggak pinhed ni deddengngelen ida gitalah

yu. <sup>24</sup> Ya pinhed ku ey ya limpiyuh niya neandeng ni kapehding hu pannananeng yu, et henin wangwang e eleg metduk e kaman-in-inayyun hu danum ni kamengmenglaw.

<sup>25</sup> Yan eman ni nengipenguluak ni hi-gayun iIsrael di desert ey nan-enappit kayun na-pat ni toon. Nem kaw hi-gak hu nengienappitan yuddan nunman? \* <sup>26</sup> Bekken, tep hedin ya wadad puhu yu ey yadda etan beken ni makulug ni dios e hi Sakkut e kan yun patul ni dios yu, et hi Kaiwan e kan yun dios ni bittuwen yu, e hi-gayu metlaing nengenapya. <sup>27</sup> Et humman hu, kastiguen dakeyu et palaw dakeyud edum ni bebley e melebbahan hu Damascus di appit ni kasimmilin aggew. Hi-gak e AP-APU e Kabaelan tun emin hu nanghel idan nunya."

## 6

<sup>1</sup> "Anggehemmek kayulli, hi-gayun kamakaddinnel, yadda melinggep niyadda nand-ingngel ni tutu-ud Jerusalem niyad Samaria ni kapambeggain katutuun baddang. <sup>2</sup> Yu ang-ang hu neipahding ni bebley di Kalneh, yad Hamat e et-eteng hu kabaelan tun bebley niyad Gath di Pilistia. Anin ni kantu et e-etteng kabaelan yu nem yadda humman ni bebley, et mebahbah kayu dama. <sup>3</sup> Eleg yu pinhed ni nemnemnemen hu kedettengan ni aggew ni kekastiguan yu, nem anggegannulli ey nedatngan tep lawah yuka pehpehding.

<sup>4</sup> Himmallalli hu ligat ni um-alin hi-gayun kekeddangyan ni kamambakbaktad di nakanggina niya kakkayyaggud ni kama, niya ebuh hammuhammul ni mangkateban baka niya kalneroh ni yuka i-anteng. <sup>5</sup> Tagan yu ena-appeh ni giniggitalahan yu. Ey hedin kuma, nengapkanya kayun a-appeh yun heni kayu nelaing e heni lan David e patul. <sup>6</sup> Tagan yu mewan inum ni meinnum ni nan-iepuap yud annel yu hu nangkinginan bangbanglu, nem eleg kayun hekey umlemyung ni kebahbahan ni Israel e bebley yu. <sup>7</sup> Et humman hu, nanna-ud ni hi-gayulli memengngulun meillaw di edum ni bebley et mambalin kayun balud diman. Mepappeg ali law hu kayyaggud niya nelam-ay ni biyag yu."

<sup>8</sup> Hi APU DIOS e Eta-gey ni peteg niya Kabaelan tun emin ey insapatah tud annel tun kantuy "Anggebe-hel kudda hu tutu-uk ni helag Israel ni kamampahhiya, anin idan etta-teng niya kakkayyaggud ni baballey da. Et humman hu, pebeltan kullin buhul da hu bebley da niyaddan emin hu hipan wadadman."

<sup>9</sup> Hedin wada hampulun metdaan di hakey ni baley, man mettey ida damengu. <sup>10</sup> Niya hedin um-ali hu hakey ni agi dan netudun mengippaptek ni annel ni netey et kantu etan ni hakey ni natdaan ey "Kaw wada pay edum mu?" Et penghel ali etan ni natdaan ey "Endi!" Kan alin nunman ni agi day "Eneeneng ka! Eleg ta pay e-ehhela ngadan APU DIOS, tep entanniy dedngelen daita." <sup>11</sup> Tep hedin hi APU DIOS nanmandal, man mangkebahbah hu baballey, yadda etta-teng niyadda ekka-ket. <sup>12</sup> Kaw dammutun mambebsik hu kebayyud mabetu? Niya kaw dammutun man-elladudman? Heni endi nemnem ni mengibgan nunya. Nem henin nunya yuka pannemnem e yuka pambalin hu limpiyuh ni kapehding ni heni kedet, niya yuka pambalin ni neihla hu neiptek.

<sup>13</sup> Yu mewan kaippahhiya nengapputan yun Lo Debar, ey kanyuy "Sinekup mi Karnaim tep na-let kami dedan."

<sup>14</sup> Nem kan APU DIOS e Kabaelan tun emin ey "Hi-gayun iIsrael, anggegannu law ey peellik hu hakey ni bebley ni buhul yun mengubbat ni hi-gayu et sakupen da bebley yu meippalpu Lebo Hamat di appit ni north ingganah di Kulukul di Arabah di appit ni south."

## 7

### *Ya neipeang-ang nan Amos*

<sup>1</sup> Wada impeang-ang APU DIOS e Eta-gey ni peteg ni hi-gak. Inang-ang ku hu hantapug ni dudun ni wineda tun peelli tu eyad bebley. Yan nunman hu negibbuan ni neanian ni bingay nan patul niya iyallin kamemmel hu impidwa.

<sup>2</sup> Entanni ey inang-ang kun kinan idan dudun ni emin hu nangkeitnem di bebley ey kangkun APU DIOS ey "Eta-gey ni peteg ni AP-APU, liwwan mu anhan hu liwat min tutu-um. Inna-nu anhan ni ketegguan mi? Ey ay deh dedanggu e hahakkey kami law niya nekapuy kami."

<sup>3</sup> Entanniy nantuttuyuy hi APU DIOS et eleg tu ipahding hu impeang-ang tun pehding tu et kantuy "Eleg um-amnu humman ni inang-ang mu."

<sup>4</sup> Heninnuy mewan hu hakey ni impeang-ang APU DIOS e Eta-gey ni peteg ni hi-gak: Nandaddan ni mengastiguddan tutu-u tun gihheben tudda. Ya etan apuy ni nalpu dallem ni puyek ey giniheb tu hu baybay et kamengeddap ali law di puyek.



<sup>5</sup> Et kangkuy “APU DIOS e Eta-gey ni peteg, ettu anhan et edepem eman apuy ey? Innanu anhan ni ketegguan mi? Ey ay deh dedanggu e hahakkey kami law niya nekapuy kami.”

<sup>6</sup> Et mantuttuyyu mewan hi APU DIOS et kantuy “Eggak ew peamnu humman ni inang-ang mu.”

<sup>7</sup> Entanni mewan ey wada impeang-ang APU DIOS ni hi-gak. Inang-ang ku kumanggu hi APU DIOS ni kaman-eh-ehngeng di dagsi etan ni netuping ni luhud ni nepelsik. Wada singnged tun pemelsik tu ma-lat ang-angen tu hedini neandeng hu nengapya dan nunman ni luhud. <sup>8</sup> Kantun hi-gak ey “Hipa eya muka ang-ang-anga e Amos?” Kangkuy “Pelsik.”

Ey kantuy “Huyya ussalek ni mengippeang-ang idan tutu-uk e ida kamei-ellig di netuping ni luhud ni eleg mampetek. Eleggak law mantuttuyyun mengastigun hi-gada. <sup>9</sup> Mebahbah alin emin hu kapandeyyawiddan iIsrael. Hedin yadda pamilyah nan patul e hi Jeroboam ey mettey idallin emin et mepappeg pan-ap-apuan ni helag tu.”

<sup>10</sup> Entanni impalaw nan Amasiah e padid Bethel hu tudek tun patul ni Israel. Kantud tudek tuy “Wada planuh Amos ni lawah ni pehding tun hi-gam. Humman idan tuka ene-ehhelan tutu-udya Israel ey kaumbabahbah di nampatulam. <sup>11</sup> Heninnuy hu kantuy: ‘Mettey ali hi Jeroboam di gubat niya meillaw idalli iIsrael di edum ni bebley.’”

<sup>12</sup> Entanni ey kan Amasiah nan Amos ey “Pampenga-allaw kadya e prophet! Pambanggad kad Judah et yadman mu pan-abiabigan ma-lat pakitangdanam. <sup>13</sup> Isiked mu law ni um-abiabig di deya Bethel, tep yadya hu kapandeyyawin patul mi niya anin hi-gami.”

<sup>14</sup> Hinumang Amos ey kantuy “Beken ni hi-gak etan prophet ni kamebeyyadi. Ya ngu ngunuk ey mampattul niya mampaptek ni keyew ni fig. <sup>15</sup> Nem inhel APU DIOS e hi-yanen ku humman ni ngunuk et mandalen tuwak ni mambalin ni prophet di deya Israel ma-lat peamta ku hi-gayu hu e-helen tu. <sup>16</sup> Kammun hi-gak ey ‘Isiked mun menghel ni hi-gamin impeamtan APU DIOS ni lawah ni meippahding alin Israel niya entan dakemi tenuttuddui.’”

Nem dengel mu eya e-helen APU DIOS ni hi-gam. <sup>17</sup> Kantuy ‘Mambalin ali ahwam ni biin tuka pebeyyad annel tud lalakki niya mettey idalli u-ungngam di gubat. Niya hedini hi-gam e Amasiah, man mettey kallid bebley idan eleg mengullug nan APU DIOS. Hedin yalli puyek mu, man gennadwaen idallin edum ni tutu-u et pampuyek da. Niya nanna-ud ni meillaw idalli iIsrael di edum ni bebley.’”

## 8

<sup>1</sup> Entanni mewan ey wada impeang-ang APU DIOS e Eta-gey ni peteg ni hi-gak. Inang-ang ku hu hakey ni basket ni napnun nelutun lameh ni keyew. Et kantun hi-gak ey <sup>2</sup> “Hipa inang-ang mu e Amos?” Hinumang ku e kangkuy “Inang-ang ku hu basket ni napnun nelutun lameh ni keyew.”

Kan APU DIOS ni hi-gak ey “Kamei-ellig ida tuuk ni iIsrael di nelutun lameh ni keyew, tep nedateng law aggew ni kekastiguan da. Eleggak a-ayyapawa pengastiguak ni hi-gada. <sup>3</sup> Yan nunman ali ey mambalin hu a-appeh di Tempol ni a-appeh di patey, tep dakek alin peteg hu mettey ni tutu-u et kepuppullay ali annel da. Um-i-ineng idalli mengi-hep idan nangketey di bebley. Hi-gak e Eta-gey ni peteg ni AP-APU hu nanghel idan nunya.”

<sup>4</sup> Dengel yu huyya, hi-gayun kamengippeliligat idan angehemmek niya newetwet ni tutu-u eyad bebley.

<sup>5</sup> Eleg yu hanheged hu kegibbuhan ni Sabaduh e nungew niyadda etan edum ni piyestah et wada inna-nun panggettangan yu ma-lat yu mewan pantalamen ida newetwet e yuka ussaladda beken ni ustuh ni lekud winu killohhan et maheul ida umgatang. <sup>6</sup> Anin idan hinegad yud det-al ni degi et yuka ikkamdug di wheat ni yuka iggatang. Yudda mewan kapambalin ni himbut hu nangkewetwet ni tutu-u, tep wada inutang dan hi-gayun hakey ni palatah ni silber winu hakey ni palis ni patut.

<sup>7</sup> Hi APU DIOS e DIOS idan helag Israel ey insapatah tu e kantuy “Eggak ni hekey liwwana hu lawah ni impahpahding da. <sup>8</sup> Et humman hu, manyegyeg ali eyad puyek et gumegey ni emin hu tutu-u tep yadda humman ni impahding da. Em, manyegyeg ali et mekuhuhuhul hu puyek e henin danum di Wangwang e Nile di Egypt. <sup>9</sup> Yan nunman alin aggew ey melinnug hu aggew ni emaggew et ma-nget ni kawwalwal. Hi-gak e Eta-gey ni peteg ni AP-APU hu nanghel idan nunya. <sup>10</sup> Pambalin kudda hu piyestah yun tsimpuh ni lemyungan yu niya pambalin ku hu kamengippeamleng ni a-appeh yun nangih. Mambalwasi kayullin emin ni langgusih niya mampemukmuk kayulli et heni kayun a-ammed ni netey hu binugtung ni u-ungnga tu. Nemahhig ali lemyung yun nunman ni aggew.”

<sup>11</sup> Immehel mewan hi APU DIOS e Eta-gey ni peteg ey kantuy “Medettengan ali aggew ni pengippeelliak ni bisil. Huyyan bisil ey beken ni keendin kennen winu innumen ni danum, nem ya nemahhig alin neminshed ni tutu-un mengngel ni ehel ku.

<sup>12</sup> Manhawahawang idalli katuutuud kebebbley ni an menepull ni ehel ku, nem endilli hemmaken da tep neladaw law. <sup>13</sup> Yan nunman ali ey anin idan kakat-agun kamenikken ni bibi-i niyadda kamenikken ni lalakki et meillukkuy idan atu da, tep ya hapul dan hapit ku e hi APU DIOS e heni ida naka-wew. <sup>14</sup> Hedin yaddalli mansapatah idan dios di Samaria, yad Dan niyad Beersheba e kanday ‘Yad ngadan ni dios di Dan’ winu ‘Yad ngadan ni dios di Beersheba’ ey heniddalli meihhungbub et mena-yun idan eleg ida law um-inah.”

## 9

<sup>1</sup> Entanniy inang-ang ku hi APU DIOS ni kaman-eh-ehngeng di kad-an ni altar e kantuy “Penge-elet kayun manmessuh ni ta-pew idan tukud ni Tempol et matleb hu atep tu et meta-bunan ida tutu-u. Yadda eleg mettey diman ey petteyey idad gubat. Endi an umbebsik ni hi-gada.

<sup>2</sup> Anin ni kantu et mangku-kuddad puyek ingganah dettengen da hu bebley ni netey, winu umkalab idad kabunyan, et eddangek ida metlaing et iguyud kudda. <sup>3</sup> Hedin mewan mantelluddad ta-pew ni Duntug e Karmel ey nak ida hemmaken et alek ida. Niya anin ni ida mantellud dallem ni baybay et mandalek etan anggetakkut ni uleg et kalaten tudda. <sup>4</sup> Niya anin ni inlaw idan buhul dad edum ni bebley et pepettey kuddan nunman idan buhul da. Ang-angek et ya lawah hu meippahding ni hi-gada tep eggak ida baddangi.”

<sup>5</sup> Hi APU DIOS e Eta-gey ni peteg niya Kabaelan tun emin ey hedin kinepa tu puyek, man kameummah, et emin hu nambebley ni tutu-u ey kaumlemyung. Hin-addum ni heni impeta-pew tu hu puyek ni impeda-ul tu et henin danum di Wangwang e Nile di Egypt hedin dimmakkel ni immekket. <sup>6</sup> Ingkapyan APU DIOS di kabunyan hu baley tu et payudung tu tukud tud puyek. Inekup tu danum di baybay ni induyag tud puyek. Hi APU DIOS hu ngadan tu. <sup>7</sup> Kan APU DIOS ey “Hi-gayun tutu-ud Israel, kaw kanyu nem eleg man-ingneh hu nakka pengibbillang ni hi-gayu idan iEthiopia? Kaw kanyu nem kekkeddukdul kayu nem ya edum ni tuu? Dakeyulli inewit di Egypt, nem kaw eggak ipahding damaddan edum ni bebley? Tam nak idalli dama inewit hu iPilistia di Crete et yadda iSyria di Kir.

<sup>8</sup> Hi-gak e Eta-gey ni peteg ni AP-APU ey inang-ang-ang ku hu nemahhig ni liwat idan tutu-ud Israel. Degyunen kudda et iwehit kuddad kebebbley eyad puyek. Nem insapatah ku e eggak ida pakabbabhaha hu helag Israel. <sup>9</sup> Tep in-olden ku e manligligat idad edum ni bebley niya henidda alinah ni meyekkayak, nem endi an metellak ni hakey ni hi-gada. <sup>10</sup> Nem mettey idad gubat hu tutu-uk ni nakalliwtan e kanday ‘Eleg i-abulut APU DIOS ni an meippahding hu lawah ni hi-gatsu.’ ”

<sup>11</sup> Kan APU DIOS ey “Medettengan ali aggew ni pengiyayyaggudan ku mewan ni pan-ap-apan David, e kamei-ellig di nebahbah ni baley. Iyayyaggud kuddalli dingding tu et meihammad mewan e heni lan nunman. <sup>12</sup> Et lektattuy sinekup idan iIsrael hu natdaan ni bebley di Edom niyadda bebley ku. Hi-gak e AP-APU hu mengippahding niya nanghel nunya.” \*

<sup>13</sup> Immehel mewan hi APU DIOS ey kantuy “Medettengan ali hu aggew ni anggegannuy neetteng hu intanem yun pagey niya grapes et dakel ali enniem yu. Et eleg yu gibbuha ahiani ey medettengan mewan pan-elladuan yu. Niya eleg mebugbug ni emin hu grapes ey nedateng hu pantenneman yu et manla-la-pih ali meinum ni grapes. <sup>14</sup> Ibbangngad kuddalli tutu-uk et iyayyaggud da mewan hu nebahbah ni bebley da et pambebleyan da. Mantennem idallin grapes et wada innumen da niya mange-ud ida et wada kanen da. <sup>15</sup> Mei-ellig ni ittanem kuddalli tutu-uk di bebley da et endilli law an mengebbut ni hi-gada. Hi-gak e AP-APU hu nanghel idan nunya.”

\* 9:12 9:12 [11-12] Acts 15:16-17

## Obadiah

### *Ya meippanggep ni liblul nan Obadiah*

Huyyan liblul hu neitudekan ni impeamtan APU DIOS nan Obadiah e prophet tun meippanggep ni pengastiguan tuddan tutu-ud Edom. Yadda tutu-ud Edom ey nahlag idan Esau e agin Jacob. Hi Jacob hu nahlagan idan kameingnadin helag Israel. (Genesis 25:21-26) Et humman hu, han-aaggidda hu iEdom et yadda helag Israel, nem ida kamambubuhul.

Et mukun kamanggagayadda iEdom eman ni nengubatan idan sindalun Babilon ni Jerusalem, e importanteh ni bebley idan helag Israel, et bahbahen da. (588-586 B.C.) Eleg dadda baddangan e ya kumedek impahding da ey intenekkutekkuk da hu pengippetuledan daddan sindalun Babilon ma-lat bahbahen da Jerusalem. (Psalm 137:7) Bimmaddang ida pay ni nengibsik ni kinedangyan ni Jerusalem. (verse 13) Dimpap da pay ida edum ni iJerusalem ni kamemsik et pebeltan daddan sindalun Babilon. (verse 14)

Yadda iEdom ey daka igaggayan peteg hu Petra, e importanteh ni bebley da, tep heni nepaot ni batun duntug di nanlinikweh. Et mukun ya daka pannemnem ey endi hu hipan buhul dan pakahgep diman. Nem inhel Apu Dios e humman ni bebley idan iEdom ey mebahbah ali et matey ida hu tutu-udman. Inhel tu damaddan helag Israel e mambanggad idallid bebley dan edum ni aggew et mambebley ida mewan di bebley da dedan. (verses 17-18)

### *Ya neitudek eyad liblul*

1. Ya nanghelan Apu Dios ni pengiblehan tuddallin iEdom ni impahpahding daddan helag Israel. (verse 1-16)
2. Ya nengisapatahan Apu Dios ni pengibbangngadan tuddallin helag Israel di bebley da et panyaggud tudda. (verses 17-21)

### *Kastiguen APU DIOS ida iEdom*

<sup>1</sup> Huyya hu impeamtan APU DIOS e Eta-gey ni peteg, nan Obadiah ni meippahding alin bebley e Edom. Dingngel min inhel tu e kantuy "Hi-gak e AP-APU ey wada intu-dak kun an mengippeamtaddan tutu-ud kebebbebley e heninnuy e-helen da: 'Pandaddan kayu ma-lat yu gubaten hu Edom.' "

<sup>2</sup> Niya kan APU DIOS idan tutu-ud Edom ni helag Esau ey "Pekeppuy dakeyu niya pambalin dakeyun ek-ekut ni bebley et panhimpipihulan dakeyun tutu-u. <sup>3</sup> Nehaul kayu et kayu kamampahhiya, tep nehammad ni tuping hu luhud yu niya ingkapyu yu baballey yud ta-pew idan etata-gey ni duntug, et kanyuy "Hipa makkaw hu wada kabaelan tun menggep ni bebley tayu?" <sup>4</sup> Nem anin na-mun ikkapyu yud naka-itta-gey hu baballey yu e henin kasina-gey ni buyan tulduh, niya ikkapyu yud kad-an idan bittuwen, et guyyuden dakeyu damengun hi-gak et melehbeng kayu. Hi-gak e AP-APU hu nanghel idan nunya.

\*

<sup>5</sup> Hedin immalidda mangkatekew ni hileng ey daka tekkewan ebuh hu pinhed da. Hanniman damadda hu memugbug ni grapes, e wadan wada daka li-bahin eleg da bugbuga. Nem hedin yaddalli buhul yu, man endi da tetdaan ni hi-gayu. <sup>6</sup> Niya ellan dallin emin hu hipan nebalol di bebley yu e helag Esau.

<sup>7</sup> Dingkug dakeyuddan bebley ni kaumbaddang ni hi-gayu hedin wada gubat. Umbaddang idallin mengebbul ni hi-gayud bebley yu. Issapatah dalli e melinggep kayu, nem pan-iplanuh da kebahbahen yu. Eleg yulli am-amta ey kapan-iddaddan idan gagayyum yun yuka pandinneli hu bitun keknaan yu.

<sup>8</sup> Hi-gak e AP-APU ey bahbahek alin emin hu nelaing niya nenemneman ni hi-gayun iEdom hedin medettengan hu aggew ni pengastiguak ni hi-gayu. <sup>9</sup> Nemahhig ali takut yun nangketuled ni sindalud Teman niya emin ali sindalu yud Edom ey mettey.

### *Ya gaputun nekastiguan idan iEdom*

<sup>10</sup> Mebahbah kayun iEdom niya mebabba-ingan kayullin ingganah, tep nan-ale yudda limmun aaggi yun helag Jacob niya nampatey yudda. <sup>11</sup> Eleg yudda hanguden ni baddangan eman ni makahhapul da baddang yu. Impemegga yu tettekkel ni hidagan inlian ni buhul da et alen da kinedangyan ni Jerusalem et gedgedwaen da.

\*

Heni kayu damengu buhul da. <sup>12</sup> Lawah hu impahding yu. Nebabah nenang-ang yuddan aaggi yun iJudah ni neligtan da. Nemahhig mewan an-anla yu eman ni kapampemahbahin buhul dan hi-gada. Niya nemahhig nampahhiya yun nanhelheltapan da. <sup>13</sup> Nengamlengan yu kumedek neligtan da et lumaw kayud bebley da et pan-alen yudda natdaan ni kinedangyan da. Eleg yudda anhan hemeken tutu-uk. <sup>14</sup> Mina-ma yu mewan tep nambetak kayud dalam et depapen yudda bimmesik ni hi-gada et pebeltan yuddan buhul da.

*Ya penuwetan APU DIOS ni emin ni tutu-u*

<sup>15</sup> Neihnup law hu aggew ni penuwetan nan APU DIOS ni emin ni tutu-u. Et meippahding alin hi-gayun iEdom hu impenahding yu. Mambangngad alin hi-gayu hu lawah ni impahding yu. <sup>16</sup> Nemahhig hinelheltap idan tutu-uk di duntug ku, nem nehalhalman ali dama hu helheltapen yun pengastiguk ni hi-gayu, anin idan bimbebley di nanlinikweh, ma-lat meendi kayun emin e heni kayu endi dedan nunman.

*Ya nengapputan idan helag Jacob*

<sup>17</sup> Nem yad Duntug e Zion di Jerusalem e kakkayyaggud ni bebley hu keihhikkugan idan meihwang ni tutu-un APU DIOS. Mambebley idalli mewan law hu helag Jacob diman, tep bebley da dedan humman. <sup>18</sup> Bahbahen idallin helag Joseph e u-unggan Jacob ida iEdom e helag Esau, e henin kapemahbahin apuy ni dagemi. Endillin hekey metdaan ni helag Esau. Hi-gak e hi AP-APU hu nanghel idan nunya! <sup>19</sup> Et mambebley idallid Edom hu tutu-uk ni wadad appit ni south di Judah. Hedin yadda dama nambebley di duntug di appit ni kakelinnugin aggew ey manha-ad idad Pilistia, yad Epraim niyad Samaria. Hedin yadda dama helag Benjamin ey sekkupen da Gilead. <sup>20</sup> Hedin yadda edum dan helag Israel ni nambangngad ni nalpud edum ni bebley ni nengilawwan dan hi-gada ey sekkupen da Phoenicia ingganah di Sarephat appit ni north. Hedin yadda iJerusalem ni neilaw di Sepharad ey sekkupen da hu Judah di appit ni south. <sup>21</sup> Umlaw iddalli hu iJerusalem ni nakangngapput di gubat et gubaten da Edom et hi-gada man-apudman. Ey hi APU DIOS ali pampatul da.”

## Jonah

*Ya meippanggep ni liblun nan Jonah*

Hi Jonah ey hakey ni prophet di Israel eman ni nampatulana Jeroboam diman. (2 Kings 14:25) Yadda iAssyria ni nambebley appit ni north niyad kasimmilin aggew di Israel ey buhul idan helag Israel. Ya capital ni Assyria ey ya Nineveh. Yadman Nineveh hu nengitu-dakan Apu Dios nan Jonah ma-lat tu peamtaddan tutu-udman e eleg mebeyyag ey mebahbah hu bebley da tep ya lawah ni daka pehpending.

Nem eleg pinhed Jonah ni u-unnuden hu inhel nan Apu Dios ni pehding tu, tep yadda tutu-ud Assyria ey buhul idan Israel. Eleg tu pinhed ni meidwatan ida iNineveh ni tsimpuh ni menggel nunya ma-lat mantuttuyyudda. Tep inamtan Jonah e hedini mantuttuyyudda, man hehmeke Apu Dios ida et eleg tudda kastigua.

Et mukun impatnan Jonah ni umbesik ma-lat meidawwin Apu Dios et an manlugan di bapor ni umlaw di Tarsis e naka-iddawwin bebley di Nineveh. Nem impaelin Apu Dios hu pewek di baybay et yan nengamtaan idan kamanggunnud bapor e hi Jonah hu gaputun newada pewek ey impedep-ah dad baybay. Nem inhewang Apu Dios hi Jonah, tep indaddan tu hu et-eteng ni deleg ni nengekmun ni hi-gatu et han tu iutad gilig ni baybay.

Entanni law et u-unnuden Jonah hi Apu Dios et lumaw di Nineveh et tu peamta hu inhel Apu Dios idan tutu-udman. Nantuttuyyudda numan et eleg kastiguen Apu Dios ida ey eleg tu bahbahen hu bebley da. Huyyan liblun nan Jonah ey impeang-ang tu e hedini hi Apu Dios, man tuka hehmeke niya tuka ippaptek ni emin hu tutu-u tu, beken ni yadda hu tutu-ud Israel ni ebuh.

*Ya neitudek eyad liblun:*

1. Ya nengitu-dakan APU DIOS nan Jonah et tu ehelen idan tutu-ud Nineveh e mekastigudda, nem eleg tu u-unnuden. (chapter 1)
2. Ya dasal Jonah nan APU DIOS eman ni wadad egeh ni et-eteng ni deleg. (chapter 2)
3. Ya pidwa tun nengitu-dakan APU DIOS nan Jonah di Nineveh et u-unnuden tu law. (chapter 3)
4. Ya nengipeang-angan APU DIOS nan Jonah ni hemek tu niya tuka pemaptek idan emin ni tutu-u tu. (chapter 4)

*Ya eleg pengun-unnudan Jonah nan APU DIOS*

<sup>1</sup> Hakey ni aggew ey immehel hi APU DIOS nan Jonah e u-unggan Amittai. <sup>2</sup> Kantuy "Lakkay di Nineveh, e et-eteng ni bebley, et mu peamtaddan tuudman e kastiguen kudda, tep inamtak e nekalliwtan ida."

<sup>3</sup> Nem eleg u-unnuden Jonah hu inhel APU DIOS ni pehding tu. Ma-nu tep immegah, nem hin-appil kumedek nampelawwan tu e pinhed tun meiddawwin APU DIOS. Et lumaw di Joppa ey wada etan bapor ni umlaw di Tarsis \* et baydan tu hu plitih tu et makilaw idan kamanggunnudman e bapor.

<sup>4</sup> Nem pinhakkeyey impaelin APU DIOS hu naka-let ni pewek di baybay ey nemahhig ni anggetakkut e bahbahen tu etan bapor. <sup>5</sup> Simmakut ida etan kamanggunnud bapor et wada hakkeyey kamandal ma-lat baddangan ni dios tu. Entanni ey ninemnem da et pambekahan da hu edum ni kalga da ma-lat kumekkeppaw etan bapor et eleg malneng.

Nem hedini hi Jonah, man immen ngud kuwaltuh di daulen etan ni bapor e naka-uyeng. <sup>6</sup> Limmaw etan kapitan ni bapor et kantuy "Kele ma-nu ni-ngangun hi-gam tep kaka man-u-uggip? Bangun ka et mandasal kan dios mu et ilah tu-et anhan ey hehmeke daitu et eleg itu matey!"

<sup>7</sup> Entanni ey ninemnem ida etan ni kamanggunnud bapor ey kanday "Mahapul ni mambubunut itu ma-lat meamtaan hedini hipan hi-gatsu hu himmulun et an newada hu hanneya."

Et mambubunut ida ey hi Jonah hu nebunut. <sup>8</sup> Et kanda law ni hi-gatu ey "Ehel mun hi-gami hedini hi-gam himmulun et an wada huyyan anggetakkut ni kamekapkapan hi-gatsu. Hipa ngunum niya attun bebley hu nalpuan mu?" <sup>9</sup> Himmumang hi Jonah et kantuy "Hi-gak ey Hebrew hak. Nakka deyyawa hi APU DIOS di kabunyan ni nanletun puyek niya baybay." <sup>10</sup> Et peamta tun hi-gada e bimmesik ma-lat meidawwin APU DIOS.

Dinggel da humman ni inhel Jonah ey nema-ma hu takut da et kanda hi-gatuy "Nem kele dedan endin hekey hu takut mun an mengippahding ni henin nuntan?" <sup>11</sup> Entanni

\* 1:3 1:3 Ya Tarsis ey bebley di Spain ni nunman.

ey tuka pan-ihi-met hu pewek et kandan hi-gatuy “Hipa na-mu hu pehding min hi-gam ma-lat masiked eya pewek?”<sup>12</sup> Kan law nan Jonah ni hi-gaday “Anin ew katteg ni bekah yuwak di baybay nemet masiked eya pewek. Tep inamtak e hi-gak hu kambahul ni wada huyyan nemahhig ni anggetakkut ni pewek et deh e meilleggat kayu kumedek.”<sup>13</sup> Eleg pinhed ida etan ni kamanggunnud bapor ni da bebkahen hi Jonah di baybay et tagan dan daka illaput ni mangke-uh ma-lat padekal da etan bapor; nem endi damengu e eleg da han-idekal tep tuka pan-ihi-met hu pewek.<sup>14</sup> Et mandasal ida law nan APU DIOS e Dios nan Jonah e kanday “APU DIOS, entan anhan dakemi kastigun katey ni pemetteyan mi eyan tuu, tep hi-gam hu nengipanghel eyan meippahding!”<sup>15</sup> Ginibbuh da humman ni dasal da et li-biten da hi Jonah et egahen dad baybay ey pinhakkey ey netatsiked hu pewek.<sup>16</sup> Inang-ang idan nunman ni kamanggunnud bapor hu neipahding ey wada law hu takut dan APU DIOS et iappitan da niya insapatah da e mansilbiddan hi-gatu.<sup>17</sup> Hedin hi Jonah, man eleg matey tep wada etan binegan APU DIOS ni et-eteng ni deleg ni mengekmun ni hi-gatu et manhahha-ad di egeh nunman ni deleg ni tellun aggew niya tellun labbi. †

## 2

### *Ya dasal nan Jonah*

<sup>1</sup> Yan eman ni kawedan Jonah di egeh etan ni deleg ey nandasal nan AP-APU e Dios tu.  
<sup>2</sup> Kantuy “APU DIOS, innang ni metteyyak et nakka pannana-ud ni umlawwak di dungay e bebley idan netey, nem dinggel mu hu dasal ku et ihwang muwak.”<sup>3</sup> Impeibheng muwak di dallem ni baybay et meta-bunannak ni etta-teng ni dalluyun.<sup>4</sup> Kangku ngu nem impea-allaw muwak di kad-an mu et endilli law hu nak penang-angan ni Tempol ni muka panhahha-adi.<sup>5</sup> Innang ni melsinggak etan di kamansillesillen ni danum di baybay niya nehibuhubudan hu uluk ni bagiw.<sup>6</sup> Nalnenggak di nandallem di hengeg ni heni duntug di baybay et kangku ngu nem mena-yunnak ni heni meikkellabut diman. Nem himmek muwak et ihwang muwak, e APU e Dios ku.

<sup>7</sup> Nakka mangkatkatey ey nandasallak ni hi-gam e APU DIOS ey dinggel mud Tempol mu hu dasal ku.<sup>8</sup> Yadda nengiwalleng ni hi-gam niyadda etan beken ni makulug ni dios hu daka daydayawa ey daka dedkuga hu binabbal mu.<sup>9</sup> Nem hedin hi-gak ngu, man ia-appéh ku hu penaydayaw kun hi-gam niya i-appitan daka niya peamnuk hu hipan issapatah kun hi-gam ni pehding ku, tep hi-gam ni ebuh e APU DIOS hu kabaelan tun umhelakniib.”<sup>10</sup> Entanni law ey minandal APU DIOS etan et-eteng ni deleg et iuta tu hi Jonah di gilig ni baybay.

## 3

### *Ya nengu-unnudan Jonah nan APU DIOS*

<sup>1</sup> Entanni ey pinidwan APU DIOS ni intu-dak hi Jonah di Nineveh<sup>2</sup> et kantuy “Elaw kad Nineveh, e et-eteng ni bebley, et mu peamtaddan tuodman etan inhel kun hi-gam ni meippahding alin hi-gada.”<sup>3</sup> Inu-unnud law nan Jonah hi APU DIOS et lumaw di Nineveh. Humman ni bebley ey mahkang et umlaw di tellun aggew hu penellanan ni emin ni bebley di diman.<sup>4</sup> Yan lapun aggew ni dintengan Jonah di diman ey in-aggew tun impeenamtaddan tutu-udman hu inhel APU DIOS ni tu peamtan hi-gada. Kantuddan katuutuuy “Melebbah hu na-pat ni aggew et bahbahen Apu Dios huyyan bebley!”

<sup>5</sup> Kinulug idan iNineveh humman ni impeamtan Jonah ni inhel Apu Dios, et getuden da aggew ni pantetpelan dan eleg ida mengngan. Et emin ida, kedangyan winu newetwet ey nambalwasiddan langgusih ma-lat peang-ang dan nantuttuyuddad liwat da.<sup>6</sup> Dingngel nan patul di Nineveh humman ni an inhel Jonah ey imminah di tuka yuddungin man-ap-apu et ekalen tu hu balwasi tu et mambalwasi daman langgusih et an yumudung di dep-ul.<sup>7</sup> Et itu-dak tu hu an mengippeamtaddan emin ni tutu-ud Nineveh ni impekapyu tun olden e kantuy “Hi-gak niyadda eya opisyal ku ey i-olden mi e emin itu ey mahapul ni eleg itu ni umkan ni hipan kamekkan niya eleg itu ni um-inum ni danum niya hipan kameinnum. Anin idan animal tayu et eleg ida pengngan niya eleg ida peinnumi.”<sup>8</sup> Emin itu ey mahapul ni mambalwasi itsun langgusih. Anin idan hipan impaknan tayu et mahapul ni hukluban sayiddan langgusih. Niya mahapul ni ihammad tayun mandasal nan hi Apu Dios, niya isiked tayun mengippahding ni emin ni hipan lawah.<sup>9</sup> Et ilah tu et anhan ey hehmeken daitsun Apu Dios et mantuttuyun memahbah ni hi-gatsu.”<sup>10</sup> Inang-ang Apu Dios e nantuttuyuddan liwat da niya insiked dan mengippahding ni lawah ey himmek tudda et eleg tu ituluy ni pehding etan ninemnem tun pemahbahan tun hi-gada.

† 1:17 1:17 Matthew 12:40

## 4

*Ya binungetan Jonah nan hi APU DIOS*

<sup>1</sup> Kaumbubunget hi Jonah niya peteg guhu tu tep eleg peamnun Apu Dios hu inhel tun pemahbahan tun Nineveh. <sup>2</sup> Et mandasal hi Jonah e kantuy "APU DIOS, kaw eggak ehelen dedan eman ni eleggak peni-yanan alin bebley mi e henin nunya pehding muddan buhul mi? Mukun bimmesikkak et di Tarsis, tep inamtak dedan e kabbabbal kan peteg, mahmek ka, beken kan kabbubunget, eleg melumman hu impeminhed mu niya nandadaddan kan eleg mengippeamnun hipan inhel mun pengastigum. <sup>3</sup> APU DIOS, anin ew ni patey muwak, nakka pehebbalin anin ni metteyyak nem ya nak meittu-u." <sup>4</sup> Nem hinumang APU DIOS et kantun Jonah ey "Kaw wada kelebngan mun umbunget?" <sup>5</sup> Entanni ey limmaw hi Jonah di a-allaw etan ni bebley di Nineveh di appit ni kasimmilin aggew et kumapyan hukyawwin panhidduman tu et manyuyyuddung diman et hehheggeden tu hedin hipa hu meippahding idan tuudman. <sup>6</sup> Entanni ey wada etan wakal ni winedan APU DIOS ni nengin-eetteng et keya-munan tu etan hukyawwin kapanyuyyuddungin Jonah et mahiduman ey kaman-am-amleng. <sup>7</sup> Nem entanni et kamangkewa-wa ey impaelin Apu Dios hu bigih et kanen tu humman ni wakal et makpit. <sup>8</sup> Entanni mewan et inlet tu petang ey impaelin Apu Dios hu maetung ni dibdib ey kameni-weh hu petang di ulun Jonah et heni mehellangeb, tep nemahhig hu atung ni petang et peteg hu guhu tun an neteyyan etan ni wakal. Et humman hu, pinhed tu mewan ni mettey. Kantun Apu Dios ey "Heballi ew ni-ngangu hu metteyyak." <sup>9</sup> Nem immehel mewan hi Apu Dios ni hi-gatu et kantuy "Endi lebbeng mun an umbubunget ni neteyyan etan ni wakal."

Himmumang hi Jonah et kantuy "Wada lebbeng kun umbunget niya anin ni metteyyak ni bunget ku."

<sup>10</sup> Nem kan APU DIOS nan Jonah ey "Nem kele makaggeh nemnem mun neteyyan etan ni wakal? Kaw intanem mu niya kaw mu impaptek ew ngu? Tam neala ey newadan labbi tu, nem neala et matey mewan ni newa-waan tu. <sup>11</sup> Nem lebbeng tun hehmekek ida hu tutu-ud Nineveh tep nehuluk ni hanggatut et dewampulun libudda e eleg da amta hu neiptek ni pehding da, niya dakel animal da."

## Micah

*Ya meippanggep nunyan libluh nan Micah*

Hi Micah ey hakey ni prophet ni kamengippeamtan kae-helan Apu Dios idan tutu-u niyadda aap-apud Israel niyad Judah. Ya Samaria hu capital ni Israel ni nunman ey ya Jerusalem hu capital ni Judah. Impeamtan Micah ni hi-gada e kastiguen Apu Dios ida tep lawah daka pehpending.

Daka daydayawa hu beken ni makulug ni dios idan beken ni Hebrew ni nekibebley ni hi-gada niya eleg da u-unnuda hi APU DIOS e hi-gatun ebuh hu makulug ni Dios. Dakel pay hu edum ni lawah ni impenahding da. Eleg u-unnuden idan aap-apu da hu Tugun Apu Dios niya pinhed dan ellan hu hipan wadan edum da, e daka panhina-ul niya daka pampinilliw hu daka pehding ni mengelladdan nunman. Hedin beken mewan ey daka tattakkuta winu daka petteya hu kan kukuwah ni hipan pinhed dan ellan. (2:1-2 et ya 3:9-11) Yadda mewan hu kekeddangyan ey eleg da hehmeka niya eleg da baddangidda nangkawetwet ni nekibebley ni hi-gada e nemahhig kumedek hu daka pehding ni hi-gada. (2:9, 3:2-3 et ya 6:10-12)

Gapuh idan nunyan liwat idan tutu-ud Israel niyad Judah ey impeamtan Apu Dios e kastiguen tudda, nem kapyatun eleg pinhed idan tutu-ud Israel ni mengu-unnud. Et bahbahun ida law ni sindalun Assyria hu bebley da niya inla da hu dakel ni hi-gada et pambalin daddan balud di Assyria. (721-722 B.C.) Entanni et ehelan Micah ida hu tutu-ud Judah et peamta tun hi-gada e hedin eleg da issiked ni mengippahding ni lawah, man mekastigudda dama.

Intuttuddun Micah idan tutu-u e ya namnamah dan ebuh ey mambangngad idan menaydayaw nan APU DIOS niya mandinnel idad hemek tu. (4:1-5:15 et yad 7:18-19) Huyyan hemek tu ey neipeamtad planuh tun mengihwang idan tutu-u tun helag Israel niyaddan emin hu tutu-u eyad puyek. Impeamtan Micah e huyyan planuh ey peamnully etan ni mengihwang ni inhel APU DIOS ni peelli tu. (5:2-5)

*Ya neitudek eyad libluh:*

1. Ya kekastiguan idallin helag Israel ey ya keihwangan da. (chapters 1-2)
2. Ya nengipeamtan nan Micah ni nanliwatan idan aap-apud Israel, nem impeamta tu e wada namnamah dan emin ni helag Israel. (chapters 3-5)
3. Ya nengipeamtan APU DIOS ni nanliwatan idan helag nan Israel ni ya pengapputan alin nan-ap-apuan tu. (chapters 6-7)

<sup>1</sup> Yan eman ni nampatulani di Jotham, hi Ahas et hi Hesekiah di Judah ey impeamtan APU DIOS nan Micah e iMoreshet hu meippahding alid bebley di Samaria niyad Jerusalem.

<sup>2</sup> Et kan Micah idan tutu-u ey "Hi-gayun katuutuu eyad puyek, dengel yu eya e-helek ni hi-gayu: Hi APU DIOS, e Eta-gey ni peteg, e immen di Tempol tud kabunyan ey kantuy nambahul kayun emin. <sup>3</sup> Hi APU DIOS ey melpullid tuka panha-adi et melehbeng e mandellan di ta-pew idan duntug ma-lat umlin mengastigun hi-gayu. <sup>4</sup> Mangkelennat idalli duntug ni pandellanan tu e henidda kendel ni linenat ni apuy ey um-ayuh iddallid nangkedecklan. Heniddalli elwang ni man-a-ayyuh di duntug.

<sup>5</sup> Meippahding idallin emin huuya tep kangenghayaddan ilIsrael niyadda iJudah hi Apu Dios niya nanliwat idan hi-gatu. Impappangnguluddan tutu-ud Samaria hu edum dan ilIsrael ni nanliwat nan Apu Dios. Ya dama nengipappangnguluddan iJudah ni nanliwat ey yadda tutu-ud Jerusalem."

<sup>6</sup> Et humman hu, kan APU DIOS ey "Bahbahek ali Samaria niyadda etan binattan baballey da et mambalin ni mangkeipiggil ni batu. Niya pan-ullinek idalli batud nandeklan di ehpen et mabudihan hu inehnengan ni bebley. Mambalin alin heni leguntan kapantennemin grapes tep endillin hekey mambebley diman.

<sup>7</sup> Mangkebukillin emin hu nebalol ni kinenapya dan dios da niya megihheb alin emin hu hipan neidwat di tempol da. Tep humman idan indawadawat da ey heni sinangdan ni bibi-in daka iggatang annel da, tep inemung dan nandayawan dan beken ni makulug ni dios. Et humman hu, emin etan pihhuh ni inusal dan nenaydayaw idan nunman e dios ey ellan idallin buhul da et ilaw dad bebley da et usalen da \* daman penaydayawan daddan dios dadman."

\* 1:7 1:7 Wada na-mun huyyan pihhuh ey inusal idan buhul dan penangdan da ida etan ni bibi-in daka pebeyyad annel dad kalekileki etan di tempol da.



<sup>8</sup> Et kan Micah ey “Gapu tep henin nunyalli meippahding ey mannannangngihhak ali niya umlelemyungngak. Eggak ali mampettut niya eleggak mambalwasin an mandal-adalan. Mantete-ullak ali e heni-ak immeyew ni ahhu niya mangngugngugnguggak e heni-ak ali akup. <sup>9</sup>Henin nekalliputan ida hu iSamaria e eleg law mabalin ni meeggahan. Anin idan iJudah et anggehmmek ida, tep kamangkeddetengi dama kekastiguan da. Niya anggeannuy um-aliddalli buhul da et babbahan da Jerusalem.

<sup>10</sup> Entan tu ehel idan buhul tayun iGath hu keapputan rayu niya entan lelemyung yu. Nem hedin hi-gayuddan tutu-ud Bet Leaprah ey pandulladullag kayud dep-ul ma-lat peang-ang yu lemyung yu. <sup>11</sup>Deh ida tutu-ud Saphir e mambalin idan balud et kapan-illaw idan buhul dad edum ni bebley e eleg ida mampanbalwasi et nemahhig baing da. Eleg ida meukkat hu tutu-ud Saanan ni takut dan buhul da. Nemahhig ali lemyung ni tutu-ud Bet Esel ni keapputan da. Endilli law kabaelan dan memaddang ni hi-gayun iJerusalem. <sup>12</sup>Hi-gayun tutu-un nambebley di Marot ey hehgeden yulli umbaddang ni hi-gayu ma-lat meihwang kayu, nem endilli um-ali. Tep ittu-dak alin APU DIOS hu dakel ni buhul yu ma-lat mebahbah hu bebley yu, anin idan nambebley di neiñnu di Jerusalem! <sup>13</sup>Hi-gayun tutu-ud Lakis ey papuut yun umbesik. Panluga kayud kalesah yu et manglaw kayu, tep iyyaddalli buhul yu. Hi-gayu nemangulun nambebley di Judah ni nengiu-unnud di kapanliwwasin Israel e daka daydayawa hu dios ni kinapyan tuu. Et deh e impappanggulu yudda tutu-ud Jerusalem ni manliwwat. <sup>14</sup>Hi-gayun aap-apid Judah ey eleg yuddalli law ang-anga hu iMoreshet Gath, tep apputen idallin buhul da et meillaw idallid edum ni bebley. Pilliten dakeyulli daman nunman idan buhul dan um-idwat ni pihuh ni hi-gada. Mehe-ul idalli papatul ni Israel, tep kanda na-mu nem baddangan idan iAksib ey eleg ali meippahding tep anin alin hi-gada et meapput ida. <sup>15</sup>Niya hi-gayun iMareshah ey anggehmmek kayulli tep peellillin APU DIOS ida buhul yun menggep ni bebley yu. Yaddalli nandingngel ni aap-apid Israel ey ida mantellu etan di leyang di Adullam.

<sup>16</sup>Hi-gayu daman iJudah ey pampemukmuk kayu et keang-angan ni nemahhig ni lemyung yu, tep mangkeillaw idalli hu nakappinhed yun u-ungnga yud edum ni bebley.”

## 2

### *Ya kastiguddan kamengippelliligat ni newetwet*

<sup>1</sup>“Anggehmmek kayun tutu-un kaumtukal ni mamplennuh ni mengippahding ni lawah. Hedin bimmangan kayun kamangkewa-wa, man impahding yudda humman ni implanuh yu tep kabaelan yun mengippahding. <sup>2</sup>Yuka pampiliwa papayew niya baballey ni pinhed yun ellan. Yuka tellama bineltan ni edum yun tuu.”

<sup>3</sup>Et mukun kan APU DIOS ni hi-gayuy “Ninemnem kun peelli hu ligat ni pengastiguk ni hi-gayu. Endilli hakey ni hi-gayun an meihwang. Eleg kayulli law mampahhiyya hedin umdateng humman ni ligat yu. <sup>4</sup>Ene-ehhelen alin tutu-u humman ni mekapkapan hi-gayu niya i-ena-appah da e kanday: ‘Binahbah idan APU DIOS niya impalaw tuddad edum ni bebley. Binangngad tu hu bebley da et idwat tuddan buhul da.’”

<sup>5</sup>Et humman hu, hedin meddettangan ali hu pengibbangngadan APU DIOS ni hi-gayud bebley yu ey endi an meidwat ni hi-gayun pambebleyan yu, tep eleg kayu law meibbillang ni tutu-u tu. <sup>6</sup>Kan idan beken ni makulug ni prophet yuy ‘Isiked mu huttan ni muka e-e-hela, tep nanna-ud ni eleg ippahding nan Apu Dios hu kebe-ingan mi.’

<sup>7</sup>Nem heninnuy penummang ku “Hi-gayun helag Jacob, kaw kanyu nem eleg dakeyu kastiguan APU DIOS hedin henin nuntan e lawah yuka pehpehding? Nanna-ud ni kastiguan dakeyu. Kaw eleg yu amta e kan APU DIOS ey yaddan ebuh hu kayyaggud daka pehding hu pengippahdingan tun kayyaggud?”

<sup>8</sup>Tep kan APU DIOS ey “Hi-gayun tutu-uk ey heni kayu nambalin ni buhul idan edum yun helag Israel, tep lawah yuka pehpehding ni hi-gada. Yu pay anhan katekkewa hu balwasiddan sindalan kamangeibbangngad ni an nekigubat ey ay ida katteg kamakaddinnel e ya daka pannemnem ey endi meippahding ni hi-gadan lawah. Nem ampangunet itten kumedek e hi-gayu hu mengippahding ni hanniman ni hi-gada. <sup>9</sup>Anin idan bibi-in tutu-uk et dineg-al yuddad nehammad ni baballey da. Inendi yu law ni ingganah hu panyaggudan idan u-ungnga dan indawat kun hi-gada. <sup>10</sup>Ka-kal kayun tutu-u eyad bebley, tep endi law linggep deya! Deh e kamangkeddetengi hu kebabbahan eyan bebley tep kaumhulun hu liwat yu.

<sup>11</sup>Yadda maitek niya maheul ni prophet hu pinpinhed yu, nema-ma hedin kandan hi-gayuy ‘Meddettangan ali aggew ni keweddaan ni dakel ni meinum ni pan-am-amlengan yu.’ Tep humman pinpinhed yun dedngelen.”

<sup>12</sup> Kan APU DIOS ey “Anin ni henin nunya hu meippahding alin hi-gayu e helag Jacob et emmungen dakeyulli mewan ni natdaan et heni kayulli dakel ni kalneroh ni neamong di halun. Yallin nunman ey medakkel kayu et mepnulli eya bebley yu.”

<sup>13</sup> Hi APU DIOS e patul da hu mengigbeghul alin eheb ni bebley ni neilawwan idan tutu-un helag Israel et ipengulu tuddan um-anemut eyad bebley da.

### 3

#### *Mekastigudda hu lawah ni ap-apu niyadda maitek ni prophet*

<sup>1</sup> Dengel yuwak e aap-apud Israel. Gullat et ya limpiyuh hu pehding yun man-ap-apu. <sup>2-3</sup> Nem eleg, tep pinpinhed yu kumedek hu lawah niya anggebe-hel yu hu kayyaggud. Ida kamanhelheltap ni peteg hu tutu-uk, tep lawah yuka pehpehding ni hi-gada. Heni yuka panlatlata belat da, niya heni yuka panhepunga genit da. Heni yuka panggedgeda laman da ni inhaeng yud banga ni nangkan yu. <sup>4</sup> Nem medettengan ali aggew ni pampehemhemmekan yun APU DIOS, nem eleg dakeyu hengnguda. Eleg tuli dedngela dasal yu tep ya liwat yu.

<sup>5</sup> Heninnuy hu kan APU DIOS ni hi-gayun maitek ni prophet “Yuka ippangupanguludda tutu-uk di neihlan dalan. Tep hedin indawtan dakeyu etan ni tuun kennen yu, kanyu etan ni nengidwat ey ‘melinggep hu biyag mu.’ Nem hedin wada etan eleg umidwat, kanyun hi-gatuy ‘anggetakkut ali mekapkapan hi-gam.’ <sup>6</sup> Et humman hu, kamangkedettengi hu kepappegan ni kameippeamtan hi-gayu. Endilli law pei-innep kun hi-gayu, niya eggak ali law peamtan hi-gayu hedin hipalli mekapkapan edum ni aggew. Heni kayulli law wadad engenget ni ingganah, tep endilli law kabaelan yun mengamta hedin hipa meippahding. <sup>7</sup> Hennian yulli angh yun baing yu, tep yan nunman ali ey ihih yun amtaen hedin hipa mekapkapan edum ni aggew, nem eleg dakeyulli hummanga.” Huyya inhel Apu Dios ni meippahding ni hi-gayun mangkaitek ni prophet.

<sup>8</sup> Nem hedin ngun hi-gak, man wada kabaalak ni kamelpun Uspirituh APU DIOS. Et mukun dammutun han-ipahding ku hu neiptek niya eleggak umtakut ni mengippeamtan helag Jacob e mekastigudda tep nanliwat idan APU DIOS.

<sup>9</sup> Dengel yu e aap-apuddan helag Jacob. Anggebe-hel yu hu limpiyuh niya yuka pambalin ni lawah hu kayyaggud. <sup>10</sup> Impambalin yun ya elaw ni kapambiyag di deya Jerusalem ey meippuun di kalwah niya papatey. <sup>11</sup> Hi-gayun aap-apu ey kayu kamebeyyadi ma-lat ipahding yu hu beken ni limpiyuh. Niya hi-gayun papaddi ey kayu kamangkekdey ni tangdan yun yuka pengituttudduin Tugun APU DIOS. Anin ni hi-gayuddan prophet et ya pihuh yuka gangamin yuka pengheliddan tutu-un meippahding ni hi-gadan edum ni aggew. Niya emin kayu ey kanyuy hi APU DIOS hu yuka iddinel. Kanyuy ‘Endi hu lawah ni meippahding ni hi-gami, tep baddangan dakemin APU DIOS.’

<sup>12</sup> Et humman hu, hi-gayu hu umhulun ni kebahbahan alin Zion et henilli nealedun payew. Emin ali Jerusalem ey mebahbah et henilli natbun ni lugit. Anin alin Tempol et mebahbah et umtemel hu helek niya hebit di duntug ni sinuunan tun nunya.

### 4

#### *Ya pan-ap-apuan alin APU DIOS di kebebbley eyad puyek*

<sup>1</sup> Yallin edum ni aggew ey ya etan duntug ni neituunan ni Tempol APU DIOS ey mandinggel, et dakel ali tutu-ud kebebbley eyad puyek ni umlaw diman ni an mandaydayaw.

<sup>2</sup> Kandalliy “Keyuy et manteyed itsud duntug APU DIOS e Dios idan helag Israel di Tempol tu et ituttuddu tun hi-gatsu hu pinhed tun pehding tayu et humman u-unnuden tayu.”

Huyyalli e-helen da, tep yan nunman alin tsimpuh ey yad Jerusalem hu keittuttuddan ni ehel APU DIOS.

<sup>3</sup> Hi-gatulli law mengippennuh ni panhahallaan ni katuuuud kebebbley ni et-eteng hu kabaelan da, neihnup winu neidawwi. Yan nunman ali ey eleg ida law mandaddan hu kebebbley ni mekiggubbat, tep endi law manggugubat. Pan-e-dihen dalli law hu ispadah da et kapyen dan aledu niya pangkapyen dalli pahul dan ewah ni panlinnih dan intanem da. <sup>4</sup> Wadalli law hakkey ey melinggep di nambalyan tu, tep endi law tekkutan tu. Niya waddalli hakkey ey wada legunta tun pantenneman tun mekkan, henin grapes niya figs. Huyya insapatah APU DIOS e Kabaelan tun emin ni meippahding ali. <sup>5</sup> Anin ni kantu et wada hakkey idan tutu-ud kebebbley ey ya dios dan kinapya da hu daydayawen da, ey hedin ngun hi-gatsu, man hi APU DIOS hu daydayawen tayu niya u-unnuden tayun ingganah.

<sup>6</sup> Kan APU DIOS ey “Kinastiguk ida tutu-uk et palaw kuddad edum ni bebley et manhelheltap idadman. Nem edum alin aggew ey emmungek ida mewan et ipaptek kudda. <sup>7</sup> Henidda nepi-day e anggehemmek ida niya neidawwiddad bebley da. Nem pambalin kullin et-eteng kabaelan ni bebley da. Meippalpullin nunman ey hi-gak e AP-APU hu man-ap-apun ingganah ni hi-gadad Duntug e Zion.

<sup>8</sup> Hedin hi-gayu e tutu-ud Jerusalem, e nambebley di nehammad ni bebley di Zion ey issapatah kun hi-gayu e pembangngad kulli hu dayaw ni bebley yu et mambalin ali mewan ni et-eteng kabaelan tu et yadman ali panha-adan ni puttukek ni mampatul.”

<sup>9</sup> Hi-gayun iJerusalem, nem kele kayu kamantete-ul niya kayu kamanhelheltap e heni kayu biin ngannganih ni man-ungnga? Kaw gapu tep nekakkapuy hu patul yu et heni damengu endi tu? Niya kaw gapu tep henidda damengu nangketey konsihal yu? <sup>10</sup> Makulug ni manhelheltap kayu e tutu-ud Jerusalem. Et humman hu, anin ni mampapalak kayu e henin biin ngannganih ni man-ungnga, tep um-alilli buhul yu, et mahapul ni hi-yanen yu eya bebley yu et kayu mangkampud endi nambebley. Meillaw kayullid Babilon et mansilbi kayun himbut diman. Nem bangngaden dakeyullin APU DIOS ni hakey ni aggew et ihwang dakeyud buhul yu.

<sup>11</sup> Anin ni yan nunya et neamung dakel ni sindalud kebebbebley ni mengubbat ni hi-gayu. Kaday ‘Mahapul ni bahbahen tayu Jerusalem et mebabba-ingan ida tuudman, et ipahhiya tayulli hu nengapputan tayun hi-gada.’

<sup>12</sup> Nem eleg amtaddan nunman ni buhul yu e ya wadad nemnem APU DIOS ey emmungen tudda et kastiguen tudda e henin kapehding ni negapas ni pagey di illikkan e kapan-igsin ni nambakdungan. <sup>13</sup> Kan APU DIOS ey “Inah kayun iJerusalem et kastiguen yudda buhul yu. Iddawtan dakeyun elet yun henin elet ni bulug ni baka e heni gumek hu ha-duk tu niya heni gembang hu kukub tu. Et heni yu pan-iggasin ida humman ni tutu-ud dakel ni bebley et pan-alen yu kinedangyan dan beken ni limpiyuh nalpuan tu et iappit yun hi-gak e AP-APU e Ap-apun emin ni kebebbebley eyad ta-pew ni puyek.”

## 5

<sup>1</sup> Hi-gayun iJerusalem, amung yudda sindalu yu, tep linikweh daitsun buhul tayu et daitsu kapanggubbata. Gubbaten dalli ap-apu tayun iIsrael et apputen da.

### *Ya Ap-apun mei-ungngad Bethlehem*

<sup>2</sup> Nem kan APU DIOS ey “Ya Bethlehem di Eprathah hu keek-eketan ni bebley di Judah, nem yadman hu kelpuan ali etan ni puttuken kun patul ni Israel. Humman alin mampatul ey helag ni patul ni nunman.”

<sup>3</sup> Et humman hu, iwalleng ali nin APU DIOS hu helag Israel ingganah ni kei-ungngaan nunman ni patul. Yan nunman ali dama pambangngadan idan iIsrael ni neilaw di edum ni bebley et mei-dum idan edum da eyad bebley da.

<sup>4</sup> Humman alin mampatul ey ipapaptek tulli tutu-u tu e henin kapemaptek ni kamampattul ni kalneroh tu. Melpullin APU DIOS hu kabaelan tun mampatul niya meippeang-ang ali dayaw tud pehding tun man-ap-apu. Endilli law an tekkutan idan tutu-u tu tep ebbulwen alin tutu-ud kebebbebley hu kasina-gey tu. <sup>5</sup> Hi-gatulli mengidwat ni linggep da.

Hedin gubbaten idan iAssyria hu bebley tayu, et bahbahen da batun luhud tayu et hehgepen daitsu, ey hanggaen tayudda e ippanguluddan keka-ka-letan ni aap-apu tayu.

<sup>6</sup> Et hi-gadalli mengihwang ni hi-gatsu idan nunman ni iAssyria hedin gubbaten daitsu. Apputen idallin aap-apu tayu hu Assyria e Nimrod hu hakey ni ngadan tu. Pellaw tayuddalli sindalu tayun man-ap-apud bebley da. <sup>7</sup> Yadda metdaan ni helag Jacob ey mandinnel idan APU DIOS, beken ni ya tutu-u. Meiwwehhit idallid kebebbebley et mambalin idallin panyaggudan ni katuutuu. Heniddalli delnu niya udan ni kamelpun APU DIOS e kamengippeteggung neitnem. <sup>8</sup> Huyyaddan tutu-un Israel ni metdaan ey mambalin idan nangka-let ni ap-apud kebebbebley ni neiwehitan da. Heniddalli layon ni kamenemmak ni kenen tud muyung winu kamampemettey ni kalneroh di pattullan e tuka pamba-nutadda, ey endi dammutun mengihwang ni dimpap tu. <sup>9</sup> Makulug ni paka-apputen idallin iIsrael hu buhul da et pakabbahbahen daddan emin.

<sup>10</sup> Nem kan APU DIOS idan eleg mengu-unnud ni hi-gatuy “Yan nunman alin aggew ey pakabbahbahek ni emin hu yuka ididdinel, henin kebayyu niya kalesah yun yuka ussalad gubat. <sup>11</sup> Pambahbahek ali etta-teng ni bebley yu, anin ida etan ni nangkehammad ni tuping ni luhud yu. <sup>12</sup> Niya bahbahek idalli kabaelan yun mengippahding ni magic niya man-ennap et eleg yulli law han-ipahding. <sup>13</sup> Bahbahek ida dios yun kinapyan tuu niyadda hinead yun batun yuka deyyawa. Eleg kayulli law manyu-ung ni menaydayaw idan kinapyan ngamay yu. <sup>14</sup> Pan-e-kalek ali impeehngeng

yun i-ingnegh ni dios yu e hi Asherah niya bahbahek ida bebley yu. <sup>15</sup> Niya kastiguek idallin emin hu tutu-ud kebbebley ni eleg mengu-unnud ni hi-gak et humman pengibleh kun hi-gada tep ya bunget ku.”

## 6

*Ya inhel Apu Dios ni nanliwatan idan tuu tu*

<sup>1</sup> Hi-gayun helag Israel, dengel yu hu inhel APU DIOS ni hi-gayun tutu-u tu. Kantun hi-gak ey “Peamtam hu lilih ku eyaddan Beor ma-lat idutan dakeyu, nem impambalin kun panyaggudan yu hu impaeli tun hi-gayu. Niya nemnem yu hu nengipenaptekan dakeyu neipalpu eman ni nalpuan yud Sittim ingganah ni dintengan yud Gilgal. Huyya penangan-angan yun hi-gak e AP-APU yu ey kamannananeng hu kayyaggud ni nakka pehding ni hi-gayu.”

<sup>5</sup> Nemnem yu e tutu-uk eman ni pemahbahan dakeyu-et nan patul di Moab e hi Balak e intu-dak tu hi Balaam e u-ungngan Beor ma-lat idutan dakeyu, nem impambalin kun panyaggudan yu hu impaeli tun hi-gayu. Niya nemnem yu hu nengipenaptekan dakeyu neipalpu eman ni nalpuan yud Sittim ingganah ni dintengan yud Gilgal. Huyya penangan-angan yun hi-gak e AP-APU yu ey kamannananeng hu kayyaggud ni nakka pehding ni hi-gayu.”

<sup>6</sup> Hipa i-appit tayud hinanggan APU DIOS e Keta-ta-geyyan hedini tayu daydayawen? Kaw dammutun ya impah ni bukan hantoon tu hu i-appit tayun kagihheba? <sup>7</sup> Kaw peamleng tayu hi APU DIOS hedini i-appit tayun hi-gatu hu linnibun lakkitun kalneroh niya dakel ni lanan olibah ni henin hampulun libun wangwang hu kedakkel tu? Niya kaw kanyu nem hedini i-appit yu hu pengulwan ni u-ungnga yu, man metekla hu liwat yu?

<sup>8</sup> Eleg! Tep impeamta tu law ni hi-gayu hedini hipa kayyaggud, et inamta yu law hedini hipa pinhed APU DIOS ni pehding yu. Ya pinhed tu ey ya nelimpiyuh hu pehding yun edum yun tuu, man-an-anla kayun mengippeang-ang ni hemek yu niya mampekumbabah kayud hinangga tud yuka pengu-unnudin hi-gatu.

<sup>9</sup> Dengel yuwak kedi! Hedini makulug ni nenemneman kayu ey u-unnud yu hi APU DIOS. Tuka pan-e-helan hi-gayun tutu-ud Jerusalem e kantuy “Kamangedettengi hu pengastiguan dakeyun hi-gak. <sup>10</sup> Hi-gayun lawah tuka pehpehding ni tutu-u, kaw kanyu nem liwwanek e kimmedangan kayu tep ya nenalatalaman yun edum yun tutu-u? Yuka ussala killohhan ni kulang kiloh tu. <sup>11</sup> Kastiguek hu tuun kaman-ussal ni killohhan ni kulang kiloh tu niya beken ni limpiyuh ni lekud. <sup>12</sup> Mangkabunget kayun kekeddangan niya yudda kapanhelheltap hu edum yun tuu. Emin kayun nambebley di Jerusalem ey mangkaitek kayu. <sup>13</sup> Et humman hu, inlapuk law ni pemahbah ni hi-gayu tep ya liwat yu. <sup>14</sup> Mengngamengngan kayulli, nem meu-upa kayu. Tagan yulli amung ni hipan kinedangan yu, nem meendiddallin hi-gayu, tep itu-dak kuddalli buhul yu et pambahbahan da. <sup>15</sup> Mantennem kayulli, nem endilli yu enni. Mengapya kayullin lanan olibah, nem beken alin hi-gayu mengussal. Mengapya kayullin meinum ni grapes, nem beken ni hi-gayu menginum.”

<sup>16</sup> Meippahding idalli huyyan hi-gayun tutu-ud Jerusalem, tep inu-unnud yu lawah ni peteg ni impenahding eman lan patul e hi Omri nan hi patul e hi Ahab e u-ungnga tu. Et humman hu, bahbahek ali bebley yu et pippihulen dakeyullin katuuuud kebbebley.”

## 7

*Yadda tutu-ud Israel ey nemahhig kalwah da*

<sup>1</sup> Hi-gak e hi Micah ey nakka umlelemyung ni peteg! Heni-ak etan ni tuun neupa et kaanmenemmahemmak ni kennen tun lameh ni grapes niya figs di legunta, nem endi tuka hemmaka, tep inehim dan emin. <sup>2</sup> Henin nunman neipahding idan kayyaggud ni tutu-unn kamengu-unnud nan Apu Dios e endi natdaan ni hi-gada. Ebuhi ida law hu maheul niya ihik ni umpatey ni edum dan tuun natdaan. <sup>3</sup> Nelaing idan emin ni mengippahding ni lawah. Yadda huwet niyadda ap-apu ey ida kamebeyyadi mal-lat ipahding da hu beken ni kayyaggud. Niya kapillitaddan kedangan hu tutu-unn mengippahding ni pinhed da. Ida kamambabaddang ni mamplennuh ni mengippahding ni lawah. <sup>4</sup> Anin ida etan ni kekakkayyaggudan niya kelimlimpiyuhan ni hi-gada et henidda nahbitan ni helek. Et humman hu, kangkun hi-gayuy “Nedateng law hu aggew ni kekastiguan yun helag Israel e humman dedan la hu inhel Apu Dios idan prophet tu et peamta dan hi-gayu. Et yan nunya ey eleg yu amta pehding yu tep ya takut yu.”

<sup>5</sup> Entan tu pandidinelu hu sinakdul yu winu gayyum yu. Niya helipat-i yu e-helen yud tuu, anin ni ya ahwa yu. <sup>6</sup> Tep yan nunyan tsimpuh ey yadda u-ungngan lalaksi ey daka pihhula ameda. Yadda bibi-i ey daka ngenghaya ineda. Anin ida inepun bii et daka bekkala inan ahwada. Ya kakulugan tu, ey yalli buhul ni hakey ni tuu ey ya edum tud bawang ni baley tu.

<sup>7</sup> Nem anin ni henin nunman ali meippahding et hedini ngun hi-gak, man nakka makaddinnel e um-alilli hi APU DIOS kun memaddang ni hi-gak et ihwang tuwak. Inamtak e dedngelen tullu dasal ku.

<sup>8</sup> Hi-gayuddan buhul mi ey entan pan-an-anla yu tep ya ligat mi. Heni kami nan-egah, nem umbangun kamilli mewan. Heni kami wadad engeenget, nem hi APU DIOS hu dilag mi. <sup>9</sup> Bimmunget hi APU DIOS ni hi-gami tep nanliwat kamin hi-gatu. Nem enusan mi bunget tu ingganah ni medettengan hu tsimpuh ni pengi-ehngan dakemi et kastiguen tudda buhul mi tep yadda lawah ni impahding dan hi-gami. Heni dakemilli i-ukat di kawwalbey et neihngan di Wangwang e Euphrates niyadda nangkeidawwin bebley e lebbahan ida baybay niyadda duntug. <sup>10</sup> Nem mekabbahbah idalli edum ni bebley eyad puyek tep ya lawah ni peteg ni kapehding ni tutu-un nampambebley diman.

<sup>11</sup> Kan APU DIOS ey "Hi-gayun helag Israel, anggegannu law ey medettengan hu pengiyayyaggudan yun tuping ni luhud ni bebley yu. Umlakkeb ali bebley yu, tep geglidek ali pappeg. <sup>12</sup> Niya yan nunman alin aggew ey um-aliddalli tutu-un melpud neidawwin bebley et mei-dum idan hi-gayu. Melpuddad Assyria niyad Egypt, yaddad kebbebley di neihngan di Wangwang e Euphrates niyadda nangkeidawwin bebley e lebbahan ida baybay niyadda duntug. <sup>13</sup> Nem mekabbahbah idalli edum ni bebley eyad puyek tep ya lawah ni peteg ni kapehding ni tutu-un nampambebley diman."

<sup>14</sup> "APU DIOS, ali ka anhan ma-lat ipaptek dakemin tutu-un, henin kapemapteki ni kamampattul ni kalneroh tu e tudda kaillaw di pattullan ni mateba helek. Tep kami kamei-ellig di kalneroh ni nea-appil di bebley ni endi helek ni kennen mi, tep neidawwi kamin hi-gam. Ilaw dakemid Bashan niyad Gilead e mateba kameitnem ma-lat man-am-amleng kami e henin lan nunman."

<sup>15</sup> Himmumang hi APU DIOS ey kantuy "Em, pehding kuddalli hu miracle ni henin impahding kun dakeyu nengawitan di Egypt."

<sup>16</sup> Et yallin penang-angan idan tutu-ud kebbebley ni nunman ni pehding APU DIOS ey metngadda niya umbaing ida et neala law ey uppupen da tangila da niya immiden da bungut da, tep endi law kabaelan idan sindalu da. <sup>17</sup> Heniddalli uleg ni meukkat di baley dan kamambulubuluh di dep-ul niya heniddalli edum ni kamangkadadakap di puyek. Tep meukkat idallid nangkehammad ni nantaluan da e manggegeyyengeng idalli tep nemahhig takut da. Et mansukkuh idalli law nan AP-APU e DIOS tayu.

<sup>18</sup> "Endi hu DIOS henin hi-gam e AP-APU. Muka liwwana liwat min tutu-un ni natdaan. Eleg mu pannananeng bunget mun hi-gami, tep kaka man-am-amleng ni mengippeang-ang ni hemek mun hi-gami. <sup>19</sup> Kami kamedinnel e hehmeken dakemilli mewan et liwwanem idalli liwat mi. Henilli pan-iggasin mudda liwat mi et pan-ibheng mud edallem ni baybay. <sup>20</sup> Em, kami kamedinnel e pannananeng mu hu impeminhed mu niya hemek mun hi-gamin tutu-un ni helag Jacob e helag Abraham, tep humman dedan la hinammad mun inhel idan aammed min nunman."

## Nahum

*Ya meippanggep nunyan libluh nan Nahum*

Yadda iAssyria ey angetakkut ida niya mabunget ida tep ya kapehding idan sindalu da ey daka bahbahadda kebebheley ni nan-ala da hu hipan nebalol ni meelladman. Hin-addum mewan ni nealay ingkuku da buhul da, anin ni ya mategudda. Yan nunman ni tsimpuh ey sinekup law idan sindalu da hu edum ni bebley, anin ni ya north ni Israel (721 B.C.) niyadda edum ni bebley di Egypt. (663 B.C.) Pinatnaan da mewan ni sekkupen hu Judah, nem inapput idan Apu Dios hu sindalu da. (701 B.C. Ang-ang yu hu Isaiiah 36-37) Nem anin ni henin nunman et nannaneng hu et-eteng ni kabaelan da niya hi-gada hu kametekkusin buhul idan tutu-un Apu Dios di Judah.

Nelabah hu hanggatut et neliman toon eman ni linawwan nan Jonah di Nineveh e capital ni Assyria ey nantuttuyyudda tutu-udman ni nangngelan dan impeamtan Jonah ni pemabahan Apu Dios ni bebley da tep ya liwat da. Nem yan nunyan tsimpuh nan Nahum ey nambalin mewan ni lawah hu kapehpehding idan tutu-udman. Et mukun yan nunyan tsimpuh ey impeamtan Nahum ni hi-gada e mebahbah ida niya endi law hu namnamah ni bebley da e Nineveh ni meihwang, anin hi-gadan bimbebley.

Meippahding huyya tep hi Apu Dios ey kayyaggud ni peteg et mahapul ni kastiguen tudda lawah ni tutu-un buhul idan tutu-u tu. Huyyan impeamtan Nahum hu immidwat ni namnamah idan tutu-ud Judah. Immamnu huyya ni nemabahan ni Media niya Babilon ni Nineveh eman ni 612 B.C.

*Ya neitudek eyad libluh*

1. Hi Apu Dios ey kayyaggud ni peteg. Tuka kastiguadda hu lawah ni tutu-u. (chapter 1)
2. Neipeamta hu kebabbahan ni Nineveh. (chapter 2)
3. Lawah idan peteg hu iNineveh. Ya kastigu da ey mekababbah ida. (chapter 3)

<sup>1</sup> Huyyan neipeamtan meippahding ni Nineveh ey impei-innep APU DIOS nan Nahum e prophet di Elkos.

<sup>2</sup> Hi APU DIOS ey eleg tu pinhed ni wada hu edum ni dios ni daydayawen. Tuka kastiguaddan bunget tu hu kamengehding ni hi-gatu. Tuka bahbahadda buhul tu. <sup>3</sup> Beken ni kabbunget hi APU DIOS, nem mahapul ni kastiguen tudda nambahul. Et-eteng ni peteg kabaelan tu. Tuka peang-ang hu kabaelan tud pewek. Yadda kulput ey humman ida dep-ul ni kapeehbuk ni heli tu. <sup>4</sup> Hedin mewan minandal tu hu baybay niya wangwang ma-lat mema-ganan ey tu-wangun kamema-gani, et kamangkakpit hu mateban helek di pattullan di Bashan niyad Karmel, anin idan habung di Lebanon. <sup>5</sup> Kamanyegyeg hu etata-gey ni duntug niya kamangkaumah hu nangkedunduntug hedin nampeang-ang hi APU DIOS. Et humman hu, nemahhig hu takut ni tutu-ud kebebheley ni hi-gatu.

<sup>6</sup> Hipa tuun dammutun meihwang hedin bimmubunget hi APU DIOS? Heni kamantetebbel ni apuy hu bunget tu niya kamangkebukli hu babattu et ida kamambalin ni dep-ul di hinangga tu.

<sup>7</sup> Kayyaggud hi APU DIOS. Hi-gatu hu kakeihhikkugiddan neligtan niya tuka ippaptek ida hu kamengiddinnet ni hi-gatu. <sup>8</sup> Nem hedin yadda buhul tu ey tudda kapakabbabhaha e henin kapehding ni dinlu e endi kametdai. Hanniman ali pehding tun Nineveh et mepappeg. Anin ni umbesik ida tuudman et mantaluddad engeenget et hemmeken tudda damengu et bahbahen tudda. <sup>9</sup> Kameminpinhakkey hu kapemabahan APU DIOS idan tuun kamamplennuh ni mekihhanggan hi-gatu. <sup>10</sup> Heniddalli meknad hebit hu buhul tu et mandangidangiw idan henidda nebuteng. Niya heniddalli nemanagan ni dagemid payew e kaepuyi et magiheh. <sup>11</sup> Hipa ni-man huttan ni patul di Nineveh ni an namplanuh ni lawah ni pehding tun APU DIOS?

<sup>12</sup> Heninnuy hu kan APU DIOS idan tutu-u tun helag Israel "Anin ni dakel hu bebley ni memaddang ni Assyria di pekiggubbatan da et mebahbah idalli et meendidda. Kinastigu dakeyun tutu-uk e in-abulut kudda humman ni iAssyria ni mengippehelhelat ni hi-gayu, nem eggak law ippidwa. <sup>13</sup> Tep pegtangek law hu nemangkiling dan hi-gayu et pappegek hu yuka panhelhelatpin daka pehpehding."

<sup>14</sup> Heninnuy hu kan APU DIOS idan iAssyria di Nineveh. Kantuy "Eleg kayulli mehlag ma-lat endilli memeltan ni ngadan yu. Niya nakka pan-iddaddan ida kulung yu tep nemahhig kalinewah yu. Bahbahek ida hu i-ingngeh ni dios yud kinenapya yun baley da.

<sup>15</sup> Iang-ang yu e iJudah eman di duntug. Iyyalli hu tuun mengippeamtan kayyaggud hu meippahding niya peamta tu e melinggep kayu law. Pampiyestah kayun iJudah, niya ipahding yudda insapatah yu. Endilli law hu buhul yun um-alin mengubbat ni hi-gayu tep mekabbabhah idallin emin.”

## 2

### *Ya keapputan idan iNineveh*

<sup>1</sup> Hi-gayun iNineveh, ey pandaddan kayun mekiggubbat tep iyyaddalli buhul yun mengubbat ni hi-gayu. Guwalyai yu hu batun luhud ni bebley yu niya pambetak kayud keltad. <sup>2</sup> Pebanggad law nan APU DIOS hu dayaw ni Israel ni binabhah yun nengubagubatan yun nunman ni bebley et mambalin law ni heni eleg mebebleyi.

<sup>3</sup> Inlapun buhul yun mengubbat ni hi-gayun iNineveh. Madlang hu happyaw da niya balwasi da. Kamanlitaak e heni apuy hu gumek ni kalesah da niya papahhul da. <sup>4</sup> Kamehahhahwisik ida kalesah dan kamambinbinanggad etan di bebley e henidda kedyam niya henidda kamantetebbel ni dilag. <sup>5</sup> Intekug etan ni patul hu olden tuddan opisyal tu ey ida kamangkeihhungbub e daka pepuppuut ni kamenglaw di luhud ni bebley ma-lat ikapya da hu penenni dan annel da. <sup>6</sup> Nem neladaw tep neil-uh ni neibeghul hu eheb di appit ni wangwang et humgep ida buhul da. Et bahbahen da hu baley nan patul.

<sup>7</sup> Entanni ey neiolden e meillaw ida iNineveh di edum ni bebley et mambalin idan balud diman. Ang-ang yudda kedi bibi-in bega-en e daka pantel-uga pagew dan lemyung da tep ya nangegepan ni buhul dan bebley da. <sup>8</sup> Kamei-ellig hu Nineveh di lebeng ni neikuluh et kamenglaw hu danum tep ida kamemsik hu nambebley diman. Wada kamantetekuk e kantuy “Entan panglaw yu!” Nem kabsik ida kumedek e endi kamengiwwingngi. <sup>9</sup> Kapan-itkuk idan nengubat ni Nineveh e kanday “Kedangyan ni peteg eya bebley! Hantapug hu silber niya balituk! Pan-ala tayu!” <sup>10</sup> Nebabhah hu Nineveh! Attukaw la emin kinedangyan tu. Ida kamanggegeygey hu tutu-un takut da niya kimmuphat hu angh da.

<sup>11</sup> Endi law etan la bebley ni nandingngel. Yan nunman ey kamei-ellig di naka-let ni layon e endi takut tun mekihhanggan buhul tu. Ida la ni kamakallinggep hu nangkeamma, yadda nangei-inna niyadda u-ungnga, tep endi tekkutan da. <sup>12</sup> Em, hi-gam e bebley e Nineveh ey heni ka la etan ni naka-let ni layon e tuka petteya hu tuka dedpapan animal ey bineni-ki tu ma-lat pakan tuddan impah tu et ya kadwa tu. Napnu kan balud ni nalpud edum ni bebley niya napnu kan inlam ni kinedangyan ni edum ni tutu-u.

<sup>13</sup> Heninnuy hu inhel APU DIOS e Kabaelan tun emin ni hi-gayun iNineveh “Hi-gak hu buhul yu. Gihhebek ida kalesah yun yuka ussalad gubat niya pepettye kudha hu kamenikken ni lalakkin u-ungnga yud gubat. Endi law yu ellan ni limmun tutu-ud edum ni bebley. Niya eleg law meu-unnud hu ehel idan intu-dak yun an mengippetekkut ni tutu-ud kebebbebley eyad puyek.”

## 3

### *Ya kastiguddan iNineveh*

<sup>1</sup> Anggehemmek ida tutu-ud Nineveh ni mangkapetey niya mangkaitek. Ma-nu tep napnu bebley dan kinedangyan da, nem pan-ellan alin buhul da. <sup>2</sup> Dengel yu kedi hu tenul ni heplit, ya tenul ni helin kalesah niya killang tu, niya dahhel idan kebayyun kamemsik. <sup>3</sup> Heninnuy mewan hu ang-angen yullin meippahding: Um-aliddalli sindalun ungubat e nampantakkay idad kebayyu. Umhililli iispadah da niya papahhul da. Dakel ali petteyen da et meippu-ud annel idan nangketey e eleg ida mebillang et mangkehlapdung idalli sindalu etan idad annel ni nangketey. <sup>4</sup> Meippahding alin emin huyyan Nineveh, tep kamei-ellig huyyan bebley di biin tuka pebeyyad annel tud kalekileki. Kakkayyaggud hu ang-ang tu et mukun hineul tu dakel ni tutu-ud kebebbebley et dayawen dadda hu dios dan beken ni makulug.

<sup>5</sup> Kan APU DIOS e Kabaelan tun emin ey “Kastiguen dakeyun iNineveh. Heni dakeyu bebladan et panhintetekkelan dakeyun tutu-ud kebebbebley et mebabba-ingan kayu.

<sup>6</sup> Pampaklitan dakeyullin lugit et pan-in-aang-angan dakeyun katuuu. <sup>7</sup> Et emin ali menang-ang ni hi-gayu ey umbebsik ida e kanday ‘Nakabbabhah hu Nineveh! Hipa makkaw hu umhehnek ni hi-gatu? Hipa neminhed ni menga-alluk idan tuudman?’ ”

<sup>8</sup> Kaw kanyun iNineveh nem kekkeddukdul ni melinggep kayu nem yadda tutu-ud Tebes? Ya hanin bebley da ey ya etan Wangwang e Nile. Linikweh ni danum hu bebley da et heni humman luhud da. <sup>9</sup> Sinekup ni Tebes hu Ethiopia niya Egypt, et hi-gada kakelpuin kabaelan tun eleg mepappeg. Kaumbaddang ida mewan ni hi-gatu

hu Put niya Libya. <sup>10</sup> Nem neapput humman e bebley e Tebes et sakupen ni edum ni bebley et mambalin idan balud hu bimmebley. Nampatey idan buhul dan sindalu hu gegellang diman et maiwahhiwahhit idad keltad. Niya binangkiling dadda ap-apudman et ibubunut idan sindalu hu mengallan hi-gada et pambega-en dadda.

<sup>11</sup> Yan nunya dama hu panhelheltapan yun iNineveh et mambalin kayun heni nebuteng ni kamandangidangiw. Mantellu kayulli tep ya takut yun buhul yu. <sup>12</sup> Mangkebahbah ali hu nangkehammad ni batun luhud yu e heniddallin ebuh ni keyew e fig ni neluum hu nemangulun lameh tu e anin ni pemegga giwwed et mangke-gah di bungut. <sup>13</sup> Heniddalli bii hu sindalu yu e endi elet da. Meibbeghul idalli eheb ni bebley yun pengidlanan idan buhul yu niya eppuyan dalli et magiheh.

<sup>14</sup> Pandaddan kayu tep gubbaten dakeyun buhul yu! Pan-ahul kayun dakel ni danum niya ihammad yu yuka pangguwalyai. Pengu-ku kayun pulan dampillagen yu et iyayyaggud yudda etan nebahbah ni tuping ni bebley yu. <sup>15</sup> Nem anin ni piga pehding yun mandaddan et heni dakeyulli ekmunen ni apuy. Pantetwiken dakeyullin ispadah. Mangkettey kayulli et ma-puh kayu et henin kapehding ni dudun ni intanem e endi tuka tetdai. Anin na-mun mehlag kayu et medakkel kayu et heni kayun kedakkel ni taggunnay, et eleg yu damengu han-ihwang annel yu. <sup>16</sup> Ma-nu tep kedangyan kayu, tep dakel ni peteg hu kamannegosyoh di ditan bebley yu e henin kedakkel ni bittuwen di kabunyan, nem henidda dudun e daka kenna emin hu neitnem ni nanglaw ida. <sup>17</sup> Hedin yadda mewan ida ap-apu yu niyadda opisyal yu ey henidda dama dudun ni kameammuammung di tuping ma-lat eleg ida maktel. Nem hedin pimmetang, man ida kaumtayab ni emin ey endi nengantan linawwan da.

<sup>18</sup> Hi-gam e patul di Assyria, ey bimmaktad ida opisyal mud puyek e netey ida. Niya newahit ida tutu-um di kedunduntug ey endi an mengemmung ni hi-gada. <sup>19</sup> Eleg meeggahi hu liput yun tutu-ud Nineveh, tep himmalem ni peteg et nanna-ud ni ikkatey yu. Yadda mengngel ni nebahbahan yu ey ida kamampalpalakpak ni gaya da. Tep kaw hipa hu eleg menelheltap ni impahpahding yu tep ya bunget yu?



## Habakkuk

### *Ya meippanggep ni nunyan libluh nan Habakkuk*

Huyyan libluh ey meippanggep ni nanhumnganganan di Habakkuk nan APU DIOS. Nanlilih hi Habakkuk nan APU DIOS tep nehingla law ni lawah ni elaw idan edum tun iJudah ey heni etan ni kapemeggan APU DIOS hu eneeneng tep eleg tudda kastigua tep ya liwat da.

Hinumang APU DIOS hi Habakkuk et ehelen tun hi-gatu e peelli tudda hu sindalun Babilon ni nagtud ni tsimpuh et bahbahren dadda tutu-ud Judah tep ya liwat da. Ey nema-ma kumedek mewan ni eleg han-awat nan Habakkuk hu an pengi-ebbolutan APU DIOS idan iBabilon ni memahbah ni tutu-ud Judah tep nema-ma-ma liwat idan iBabilon nem hi-gadan iJudah. (1:13) Et ehelen APU DIOS nan Habakkuk e nanna-ud ni kastiguen tudda iBabilon tep ya liwat da, heniddan iJudah e nanna-ud ni mekastigudda dama tep ya liwat da. (2:2-20) Pinhed APU DIOS ni peamtan nan Habakkuk e nanengtun hi-gatu hu Ap-apun yimmudung di kabunyan niya hi-gatu hu ngenamung ni emin ni kameippenahding eyad puyek. (2:20)

Dingngel Habakkuk hu impanumang nan Apu Dios ey dineyaw tu tep hi-gatu hu Dios niya gapuh ni limpiyuh ni impahding tuddan tutu-u anin idan tutu-u tun nunman. Neamtaan tu law e limpiyuh hu impahding APU DIOS idan tutu-u tun nunman niya limpiyuh dama hu pehding tullin edum ni aggew. (3:1-19)

### *Ya neitudek eyad libluh:*

1. Kamanlilih hi Habakkuk nan hi APU DIOS tep eleg tu kastiguadda iJudah ey nemahhig hu liwat da. (chapter 1:1-4)
2. Hinumang APU DIOS ey kantuy i-abolut tudda iBabilon ni mengastigun hi-gadan iJudah. (chapter 1:12-2:1)
3. Inhel Habakkuk e nema-ma-ma hu liwat idan iBabilon nem yadda iJudah. (chapter 1:12-2:1)
4. Inhel APU DIOS e mekastiguddalli dama hu iBabilon. Nem yadda etan mengiddinnel ni hi-gatu ey meidwatan idan gun-uden da. (chapter 3:1-19)

<sup>1</sup> Yahhuy hu impeamtan APU DIOS nan Habakkuk e hakey ni prophet tu.

### *Ya lilih Habakkuk nan hi APU DIOS*

<sup>2</sup> Kan Habakkuk ey "APU DIOS, kele umbagabaga-ak anhan ni baddang mu ey eleg mu dedngela dasar ku? Pigan tu pengihwangan dakemid angetakkut ni kameippenahding? <sup>3</sup> Kele muka i-abolut hu lawah ni an meippenahding di kebebbley? Kaw henin nunyallin ingganah ang-ang-angek e ebuh liwat niya ligat ni kewa-wa-wa? Inwingik di pangil ni lawah ni peteg kamekenapkappa. Emin eya tutu-u ey pinpinhed dan mantutut ni nambabakal ida. <sup>4</sup> Endi law silbin linteg. Anin di korteh et endi limpiyuh. Daddakel idan peteg hu lawah nemnem tu nem ya kayyaggud ni tutu-u, et mukun ida kamebeyyadi hu kamengippennuh ni kasuh et eleg law meippahding hu limpiyuh."

<sup>5</sup> Himmumang hi APU DIOS ey kantuy "Ang-ang yudda kedi edum ni bebley. Makulug ni metnga kayullin pehding ku eyan ketaggu yu et anin ni wadalli menghel ni hi-gayu et eleg yulli kulluga.

<sup>6</sup> Nakka pan-iddaddan ida iBabilon ma-lat mambalin hu bebley dan et-eteng kabaellan tu. Angetakkut ida niya mangkabunget ida ey sekkupen dalli kebebbley. <sup>7</sup> Nandingngel ni makabbunget idan daka petekktu hu katuutuu. Emin pinhed da ey humman kameunnud niya endi hu hakey ni dammutun mengippesikked ni hi-gada. <sup>8</sup> Na-na-let ni umbesik kebayyu da nem ya leopard. Niya nemahhig ni angetakkut ida nem ya neupan immeyew ni ahhu. Yadda sindalu dan nampantakkay di kebayyun nalpud edawwin bebley ey henidda tulduh ni an manhehkeb ni kennen da. <sup>9</sup> Nemahhig hu takut idan tutu-u idan nunman e sindalun kamengelli tep himmalla hu daka pehding. Niya dakel hu tutu-un ellan dan balud, henin kadinakkel ni palnah. <sup>10</sup> Ngengngehayan dalli papatul niya aap-apu. Niya ngi-ngi-ngian dalli hu nehammad ni luhud ni bebley tep pu-ulen dalli puyek di hengeg tu ni neba-hil idad bebley. <sup>11</sup> Um-aliddallin henidda pewek e bahbahren dan emin ni nanglaw ida la. Humman idan lawah ni tutu-u ey daka iddinel elet da e heni humman dios da."

<sup>12</sup> APU e Dios ku e wadan ingganah niya kayyaggud ni peteg, kaw neipalpu dedan eman ni laputu ey implanuh mu e endien dakemi? Inamtak et eleg mu pehding humman, tep hi-gam hu heni et-eteng ni batun mika keihhikkugi. Inamtak e pinilim ida iBabilon et

idwatam idan kabaelan da ma-lat hi-gada hu mengastigun hi-gami tep ya nemahhig ni liwat mi. <sup>13</sup> Limpiyuh huyyan impahding mu. Nem kaw hi-gam e eleg tu i-abulut hu liwat ey pemeggam ang-ang-ang ni hi-gami, anin ni heni dakemi ekmunen idan buhul mi? Kaw ia-abbulut mu hu lawah ni tutu-un memabhah idan nelimlimpiyuh nem hi-gada?

<sup>14</sup> Ya muka pehding ni hi-gamin tutu-um ey heni kami deleg di baybay, niya heni kami mategud baybay ni endi mengipappanggulun hi-gada. <sup>15</sup> Kaw i-abulut mun heni dakemi pambenwiten idan iBabilon ey nantabukul dakemi ni nan-an-anladda? <sup>16</sup> Et hedin negibbuh ey dinaydayaw da hu tabukul da ni in-appitan da et kanday "Huyyaddan tabukul hu dios ni nengidwat ni kinedangyan tayu!" <sup>17</sup> Kaw i-abulut mun tagan da bahbah ni tutu-ud kebebbeley e endin hekey hemek da?

## 2

<sup>1</sup> Hi-gak e hi Habakkuk ey umlawwak etan di eta-gey ni baley ni nakka pan-eddugi et hegeden ku hu e-helen APU DIOS niya hedin hipa hu ihhumang tu etan di nakka illilih.

*Ya humang APU DIOS nan Habakkuk*

<sup>2</sup> Entanniy kan APU DIOS ni hi-gak ey "Itudek mu humang kud nedampillag ni babattu. Etta-teng mu niya iyayyaggud mun ittudek et nelakah ni bidbiden ni an mengippeamtan edum ni tutu-u. <sup>3</sup> Itudek mu tep huyyaddan implanuh ku ey eleg ida ni meippahding nunya. Nem medettengan ali etan nagtud ni aggew ni keippahdingan tu et makulug ni um-amnu. Anin ni heni ayepaw kedettengan tu et heged yu, tep nanna-ud ni um-amnu huyya.

<sup>4</sup> Heninnuy hu pinhed kun peamtan hi-gayu: Ya lawah ni tuu ey kamampahhiya niya tuka iddinel di kabaelan tu. Nem hedin ya kayyaggud ni tuu ey hi-gak tuka iddinel. \* <sup>5</sup> Kaumhahaul kumedek hu kinedangyan. Tep ya kakulugan tu ey endi linggep idan kedangyan ni tutu-un kamampahhiya, tep pinhed dan hakkeyan emin hu hipan wada. Ida kamei-ellig di katey e eleg mehingla. Mukun ida kaumlaw di kebebbeley et pambalin da tutu-un balud niya daka pan-ala kinedangyan da. <sup>6</sup> Nem medettengan ali aggew ni penaltalangkaan idan balud dan hi-gada. Kandalli ey 'Hi-gayuddan mangkatekew! Nedatngan law hu panhelheltapan yu! Tep yan nunya keiblehan ni impenahding yun nanligligat yu tutu-u niya pinilit yun inla kinedangyan da.'

<sup>7</sup> Umkukumna kayulli ey bimmunget ida hu tutu-un nambalin yun balud et petekkut dakeyu niya pan-ellan dan emin hu wadan hi-gayu. Pemegga yulli ang-ang-ang niya manggegeygey kayullin takut yu. <sup>8</sup> Nan-ale yu limmuddan katuuuuud kebebbeley eyad puyek, nem yan nunyay pan-ellan ida daman natdaan hu limmu yu. Tep dakel nampatey yun hi-gada niya nambahbah yu hu dakel ni bebley.

<sup>9</sup> Nanna-ud ni mekastigu kayun tutu-u, tep ingkedangyan yu hu hauhaul yun edum ni tuu. Kanyu na-mu nem endi el-eleg ni meippahding ni hi-gayu tep kedangyan kayu. <sup>10</sup> Nem implanuh yu nebabbahan ni dakel ni tutu-u. Et humman hu, mebe-ing hu pamilyah yu niya meendi kayulli dama. <sup>11</sup> Yadda batun neituping di dingding ni babalag yu niyadda keyew ni nangged ni atep yu hu tistiguddan nunman ni lawah ni impenahding yu.

<sup>12</sup> Em, nanna-ud ni mekastigu kayun tutu-un nemeawat ni bebley meippuun di papatey niyadda etan edum ni lawah ni kapehding. <sup>13</sup> Tep insaptah APU DIOS e Kabaelan tun emin e megihheb alin emin hu kinedangyan idan kebebbeley et mambalin ni depul. Et humman hu, endilli silbitu emin hu kinenapyan tutu-udman ni nan-aatuan da. <sup>14</sup> Nem hakey alin aggew ey umdakkal ni peteg hu tutu-ud kebebbeley ni mengamta niya menaydayaw nan APU DIOS henin kakepnuin danum di baybay. <sup>15</sup> Em, nanna-ud ni mekastigu kayun tutu-un kamengipehelheltap ni edum yun tuu. Tep heni yudda pinilit ni binuteng ma-lat mebabba-ingan ida, tep inang-ang-ang yu hu nabladaan ni annel da. <sup>16</sup> Nem kamangkedettengi law hu aggew ni kekastiguan yu dama! Keyuy et manginun kayu et mandangidangiwi kayu! Tep henilli peinum nan APU DIOS hu kastigu tun hi-gayu et mambalin ali dayaw yun kebe-ingan yu. <sup>17</sup> Nanlengheh yu keyew di Lebanon niya nampatey yu hu animal di muyung diman niyadda tutu-ud kebebbeley e endin hekey hemek yun hi-gada. Et humman hu, yan nunya ey meippahding daman hi-gayu hu impenahding yu.

*Endi hu silbitu penaydayawan ni dios ni kinapyan tuu*

\* 2:4 2:4 Ang-ang yu hu Romans 1:17, Galatians 3:11 niya Hebrews 10:38.

<sup>18</sup> Kaw hipa silbin dios ni kinapyan tuu? Kele kayu mandinnel di kinapyan ngamay yu e eleg pay anhan um-ehel? Endi nemnem yun mengukkullug ni itek. <sup>19</sup> Anggehennemek kayullin tutu-un kamampehemhememek di dios yun pinaot ni keyew winu batu e endi yayyah tu, ma-lat ihwang dakeyu. Yuka ibbagan eleg um-ehel ni batu hedini hipa pehding yu. Kaw dammutun um-ehel hu tuttu-u et ehelen tu hu pinhed Apu Dios ni peamta? Anin na-mun na-meh idan balituk niya silber et endi damengu yayyah da.

<sup>20</sup> Nem hedini hi APU DIOS ey wadad Tempol tu. Et humman hu, emini itsun tutu-ud kebebbley ey i-ineng itsud hinangga tu.”

### 3

#### *Ya dasal Habakkuk*

<sup>1</sup> Huyya dasal Habakkuk e prophet ni in-a-appéh tu. <sup>2</sup> Kantuy “APU DIOS, dingngel kun emini hu meippanggep ni hi-gam ey nakka metngan impenahding mu. Yan nunya ey makahhapul dakan peteg. Et humman hu, baddangi dakemi henin impahding mu lan nunman. Peang-ang mu mewani nunyan hi-gami hu kabaelan mun mengihwang ni hi-gami. Anin ni nemahhig bunget mu et hemek dakemi.

<sup>3</sup> Immen ali hi Apu Dios e kayyaggud ni peteg e nalpud Edom niyad duntug di Paran. Binnangan ni dayaw tu hu kabunyan. Hi-gatu kadaydayawan tutu-ud kebebbley.

<sup>4</sup> Nalpu hu kaumhiliin benang tud ngamay tu e henin simmimil ni aggew. Ey yad ngamay tu neituan ni kabaelan tu. <sup>5</sup> Tuka peelli degeh ni minandal tu katey ni meittunud. <sup>6</sup> Hedini immehng, man kamanyegyeg hu puyek. Hedini mewani intekel tu, man kaumgeygey hu tutu-ud kebebbley. Hedini dimmalan di etata-gey ni duntug niyaddad duntuduntug ni wada dedanggu lan nunman ey ida kamangkagday. Nem eleg me-kali hu kabaelan tu niya eleg umkapuy.

<sup>7</sup> Ida kamangegeygey hu tutu-ud Kushan niyad Midian ni takut da.

<sup>8</sup> Kaw yu bunget mu e APU DIOS hu nanmandalam idan wangwang niya baybay et megedwadada? Eleg, tep ma-nu kedi ey humman impahding mun mengihwang idan tutu-um. <sup>9</sup> Heni panam hu et-eteng ni kabaelan. Inusal mu hu kabaelan et piangem hu puyek et maweda wangwang. <sup>10</sup> Inang-ang dakaddan duntug et gumeygey ida. Inang-ang daka daman baybay ey simma-gey niya kamabungngug hu dalluyun.

<sup>11</sup> Hedini impalaw mu hu panam niya indehnag mu hu pahul mun kaumhili litaak da ey kamehephepi benang ni aggew niya bulan. <sup>12</sup> Nemahhig hu bunget mu et pan-igsin mu tutu-ud kebebbley. <sup>13</sup> Binaddangam ida tutu-um et ihwang mudda. Binahbah mu apapudan lawah ni tutu-u niya inendim hu kabaelan da. <sup>14</sup> Inusal mu pahul idan buhul mi et bahbahem ida eman ni henidda pewek ni immalin an mengiwwehhit ni tutu-um ni helag Israel e kan da na-mu nguy nelakah hu pengapputan dan hi-gada. <sup>15</sup> Impadelan mu kalesah mud baybay et mangkibkiyaw danum diman.

<sup>16</sup> Kamampagpagpag hu puhuk niya kamangegeygey hu bibil kun nangngelak idan nunya. Anin idan helik et kamangegeygey et eggak pakehng. Nem enusak ni hehgeden hu kekastiguan idan buhul min nengubat ni hi-gamin tutu-um.

<sup>17</sup> Anin ni eleg umhabung hu keyew ni fig niya eleg umlameh hu grapes, niya anin ni mebahbah hu lameh ni olibah niya endi meennid payew, ey anin ni mettey ida impah ni kalneroh, niya anin endi law hu bakad kubkub da, <sup>18</sup> et nanengtun man-an-anla-ak nan APU DIOS e kamenellaknib ni hi-gak. <sup>19</sup> Hi APU DIOS e Eta-gey ni peteg hu kakelpuin elet ku. Ihhammad tu gassin ku e henin makwah et melinggep hu pandellanak di ta-pew ni duntug.”

Ya pehding ni kamantuttuddun a-appéh: Huyyan dasal ey megittalahan hedini ia-appéh.

## Sephaniah

*Ya meippanggep ni nunyan libluh nan Sephaniah*

Hi Sephaniah hu hakey ni prophet nan APU DIOS eman ni nampatulnan nan Josiah di Judah. Yan nunman ni tsimpuh ey kedangyan ida tutu-ud Judah. Ma-nu tep inu-unnud da hi APU DIOS, (2 Kings 22-23) nem nekemtang ni ebuh, tep anggegannu ey inwalleng da et yadda beken ni makulug ni dios kumedek hu inu-unnud da. Et peamtan APU DIOS e kastiguen tudu-ud Judah niyad Jerusalem tep ya liwat da, nem kapyatun eleg da pinhed ni mantuttuyyu. Et humman hu, yan eman ni 586 B.C. ey binahbah idan iBabilon hu Jerusalem.

Ma-nut impeamtan APU DIOS e bahbahen tudu-ud hu iJerusalem, nem insapatah tu mewan ni hi-gada e yan edum alin aggew ey ihhehwang tudu-ud hu tutu-u tun neiwehit di edum ni bebley niya ibbanggad tudu-ud Israel et bendisyonan tudu-ud.

*Ya neitudek eyad libluh*

1. Kastiguen alin APU DIOS hu tutu-ud Judah tep ya liwat da. (chapters 1:1-2:3)
2. Kastiguen ali daman APU DIOS hu tutu-ud edum ni bebley. (chapters 2:4-3:8)
3. Hinammad APU DIOS ni inhel e emmungen tuddalli mewan hu Jews ni neiwehit di edum ni bebley et ibanggad tudu-ud e mambebley ida mewan di Israel niyad Judah e bebley da dedan. (chapter 3:9-20)

<sup>1</sup> Huyya impeamtan APU DIOS nan Sephaniah, e u-ungngan Kushi e u-ungngan Gedaliah e u-ungngan Amariah e u-ungngan Heseekiah, eman ni hi Josiah e u-ungngan Amon hu patul di Judah.

*Ya inhel APU DIOS ni pehdng tuddallin iJudah*

<sup>2</sup> Immebel hi APU DIOS ey kantuy "Bahbahen kun emin hu wada eyad ta-pew ni puyek. <sup>3</sup> Bahbahen kuddu tutu-u, yadda animal, yadda sisit niyadda deleg. Bahbahen kuddu hu lawah ni tutu-u. Em, bahbahen kuddu emin hu tutu-u et endi an metdaan. Hi-gak e AP-APU hu nanghel nunya.

<sup>4</sup> Kastiguen idan emin iJerusalem niyadda iJudah. Niya endiek ni emin hu hipan daka penginemnemnem Baal, anin idan papaddin kaman-appit ni hi-gatu et endilli an mannem ni hi-gada. <sup>5</sup> Bahbahek ida dama tutu-un kamenaydayaw ni aggew niya bulan di atep ni baballey da, yadda kamenaydayaw niya kamansapatah di ngadan ku, nem ay ida mewan kamansapatah nan Molek e dios da, <sup>6</sup> yadda nengiwalleng ni hi-gak niyadda etan eleg mampebaddang ni hi-gak ma-lat itugun kun hi-gada hu kayyaggud ni pehdng da."

<sup>7</sup> I-ineng kayun tutu-ud hinanggan APU DIOS e Eta-gey ni peteg, tep kamangkedettengi hu aggew ni penuwetan tun emin ni tutu-u. Indaddan tu tutu-u e heni tudu-ud i-appit, tep inayan tudu-ud buhud dan memetty ni hi-gada.

<sup>8</sup> Kan APU DIOS ey "Yallin nunman ni aggew ey kastiguen ida kamengipappangngulun bebley, yadda u-ungngan patul ni lalaki niya emin hu kamengu-unnud idan kaippenahding ni eleg mengullug ni hi-gak. <sup>9</sup> Niya kastiguen kuddu emin hu kameki-emmung di kapandeyyawiddan eleg mengullug ni hi-gak, yadda matekew niyadda mapetey mal-penuen da hu tempol ni dios dan piniliw dan kinedangyan ni edum dan tuu.

<sup>10</sup> Hi-gak e AP-APU ey issapatah ku e yan nunman alin aggew ey wadalli medngel ni nangih di Eheb ni Deleg niyad baluh ni bebley di Jerusalem. Niya wadalli medngel ni heni kamangkedday ni duntug. <sup>11</sup> Pantete-ul kayun nampambebley di kad-an ni mulkaduh, tep metty idallin emin hu kamampanggettang ditan.

<sup>12</sup> Yan nunman alin tsimpuh ey ussalek hu kengkeh et hinapek hu Jerusalem et nak panhamaken ida hu tutu-un kamakaddinnel ni kamengippenahding ni liwat e kandad nemnem day 'Endi damengu kapehdng APU DIOS ni hipan lawah winu kayyaggud ni hi-gatsu.' <sup>13</sup> Meendilli kinedangyan da niya mangkebahbah ali baballey da. Memehwat idallin baballey da, nem eleg ida mambelley diman. Mantennem idallin grapes, nem beken ni hi-gada hu menginum ni meinum ni kopyaen da."

<sup>14</sup> Anggegannu law kedettengan ni aggew ni keippahdingan ni inhel APU DIOS ni meippahding. Yan nunman alin aggew ey nemahhig hu ligat et anin alin netuled ni sindalu et umnangih, tep meendi namnamah tu. <sup>15</sup> Yan nunman alin aggew ey heni meidduyyag idan tutu-u hu nemahhig ni bunget APU DIOS. Nemahhig alin peteg hu ligat niya panhelheltapan ni tutu-u. Mangkebahbah alin emin et henilli kamangkukulput niya kaman-eengnet. <sup>16</sup> Medngel ali hu tenul ni tangguyup ni mengippeamttadan

sindalun mandaddan idan mekiggubbat. Medngel ali tekuk idan sindalun kamenggep di nehammad ni luhud ni bebley niyaddad etata-gey ni kapanguwalyai.

<sup>17</sup> Kan APU DIOS ey “Peellik hu ligat yun tutu-u, tep nanliwat kayun hi-gak e AP-APU, et mambalin kayullin heni nekulap ni tuka dapdapdapa dellanen tu. Mangkeidduyyag ali kuheyaw yud dep-ul niya mangkebwel ali annel yud puyek.”

<sup>18</sup> Yan nunman alin aggew ni pengippeang-angan APU DIOS ni bunget tun heni apuy ey mebahbah alin emin hu wadad ta-pew ni puyek, et pinhakkey ey mepappeg hu biyag ni emin ni mategu. Anin alin kekeddangan et eleg ida meihwang tep eleg kabaelin balituk da niya silber dan mengihwang ni hi-gada.

## 2

*Ya nantuttuyuan idan tutu-u*

<sup>1</sup> Kaemung kayu et mandasal kayu e tutu-un endi baing tu. Kenemnemi kayu tu-wa law, <sup>2</sup> tep lektattuy heni kayu degin ittayab ni dibdib hedin medettengan hu aggew ni pengippeang-angan APU DIOS ni nemahhig ni bunget tu. <sup>3</sup> Pampehemhemmek kayun APU DIOS, hi-gayuddan inamta tun mampekumbabah niya hi-gayun kamengu-unnud ni hi-gatu. Ipahding yu kayyaggud ey nampekumbabah kayud hinangga tu, et dammutu na-mun meihwang kayu hedin medettengan hu aggew ni pengippeang-angan tun bunget tu.

*Ya kebahbah idan etan ni bebley di nanlinikweh di Jerusalem*

<sup>4</sup> Mangkebahbah idalli bebley idan iPilistia di Gaza, yad Askelon, yad Asdod niyad Ekron. Endilli an metdaan idan nampambebley diman tep mangkedegyun ida. <sup>5</sup> Anggehemmek kayullin iPilistia ni nambebley di gilig ni baybay niyad Kanaan tep kastiguen dakeyun APU DIOS. Kantuy “Bahbahen dakeyu niya endilli an metdaan ni hi-gayu.”

<sup>6</sup> Mambalin ali bebley yud gilig ni baybay ni pattullan niya kubkub idan kalneroh. <sup>7</sup> Pampuyyek idallin natdaan ni tutu-ud Judah ida humman ni puyek yu et pampattulan dan kalneroh da. Pambelleyan daddalli hu nangkehi-yan ni baballey di Askelon. Ippaptek APU DIOS idalli tutu-u tu niya pebangngad tu kinedangan da.

<sup>8-9</sup> Kan APU DIOS e Kabaelan tun emin e Dios idan iIsrael e wadan ingganah ey “Dingngel ku e katenattakutaddan iMoab niyadda iAmmon ida tutu-uk niya ida kamampahhiya e kanday pilliwen da bebley da. Et humman hu, issapatah ku e makabbahbah ali Moab niya Ammon, henin nebahbahen ni Sodom niya Gomorrah. Mambalin ali bebley dan mebel-ah niya neka-ahinan. Mebahbah alin ingganah. Panellan idallin natdaan ni tutu-uk hu hipan wadadman niya hi-gada law mambebley diman.”

<sup>10</sup> Huyya kastiguddan nampambebley diman tep nemahhig daka pampahhiyya ey daka pennadngeli niya daka taltalanggai hu tutu-un APU DIOS e Kabaelan tun emin. <sup>11</sup> Nemahhig ali takut dan pehding APU DIOS ni pampemahbahen tuddan emin ni dios di bebley da. Et han idalli law mandayaw ni hi-gatu hu katuutuud kebebbbley di bebley da.

<sup>12</sup> Immehel mewan hi APU DIOS ey kantuy “Hi-gayun tutu-ud Ethiopia ey petteyen dakeyu daman hi-gak.”

<sup>13</sup> Bahbahen APU DIOS hu Assyria niya pakabbahbahen tu hu Nineveh et mambalin ni desert. <sup>14</sup> Mambalin alin pattullan idan baka niyadda kalneroh. Mamballey idalli animal di muyung diman niya pan-e-eppaan alin akup niya gawwang ida baballey diman tep nangebahbah dingding da.

<sup>15</sup> Henin nunyalli meippahding ni bebley ni kaippahhiyaddan bimbebley hu et-eteng ni kabaelan da. Humman idan tutu-u ey melinggep idad nemnem da. Niya kanda na-mu nem humman ni bebley da hu keet-etengan kabaelan tun bebley eyad puyek. Nem nemahhig ali kebahbahen nunyan bebley da et panha-adan alin animal di muyung. Et humman hu, emin ali melebbah ey ngi-ngi-ngian dallin pemihhul da niya manwigwigiwig ida.

## 3

*Nanliwat ida ijerusalem*

<sup>1</sup> Mebahbah ali Jerusalem e nambebleyan idan mangkanghay niya mangkatelam ni tutu-u. Hi-gada ngu ni nanligligat da tutu-u da. <sup>2</sup> Endi daka u-unnuda. Eleg da pinhed ni metuttudduan. Eleg ida mandinnel nan APU DIOS e Dios da niya eleg da heppula baddang tu. <sup>3</sup> Henidda kaman-elmeh ni layon hu opisyal da niya henidda ahhud muyung hu

huwet da e tuka kennan emin kennen tun hileng et endi law natdaan ni kennen tun kakabbuhhan. <sup>4</sup> Hedin yadda mewan prophets da ey nemahhig daka pampahhiyya. Mangkaitek ida niya mangkaheul ida. Yadda papaddi da ey daka pehding hu anggebaing di Tempol. Eleg da u-unnuda Tugun APU DIOS niya daka hehwia hu Tugun ma-lat panyaggudan da.

<sup>5</sup> Nem hedin hi APU DIOS, man nanengtun wadad bebley dad Jerusalem. Meandeng niya nelimpiyuh ni ingganah tuka pehding ni tutu-u tu, ey endin hekey baing idan lawah nemnem dan tutu-u tu.

<sup>6</sup> Kan APU DIOS ey "Binahbah ku dakel ni bebley, anin idan nangehammad ni luhud da niyadda daka pangguwalyai. Endi law tutu-un kameweddag di keltad. Nangebahbah idan emin et endin hekey natdaan. <sup>7</sup> Kangku ngu nem lispituhen da-ak law idan iJerusalem tep ya humman ni neipahding ni hi-gada et mengu-unnud ida law ni Tugun ku et eleg law mahapul ni kastiguen kudda mewan. Nem eleg, tep newa-wa ni nehileng ni impahding da ngu dedan hu lawah ni daka pehpehding.

<sup>8</sup> Et humman hu, kangkuy 'Heged yu hu aggew ni gintud kun pengippeang-angak ni bunget ku. Emmungek idalli katuutuud kebebbebley et ehelek nambahulan da et peang-ang kun hi-gada hu nemahhig ni peteg ni bunget ku e heni apuy. Mebahbah alin emin hu hipan wada eyad ta-pew ni puyek.'

<sup>9</sup> Yan nunman alin aggew ey hullulak hu elaw idan tutu-u et hi-gak ali law ni ebuh u-unnuden da niya deyyawen da. <sup>10</sup> Um-aliddalli law tutu-uk ni nambebley di Ethiopia et man-appit idan hi-gak. <sup>11</sup> Yallin nunman ey mengu-unnud kayulli law ni hi-gak e tutu-uk et eleg law mahapul ni kayu umbabaing. Endiek alin emin hu kamampahhiya niya kamangngenghay, tep endillin hekey hu tuun mampahiyad duntug ku. <sup>12</sup> Ebu idalli hu tuun inamta tun mampekumbabah e eleg mampeta-gey ni manha-ad diman, tep hi-gada hu kamengiddinnel ni hi-gak e hi APU DIOS. <sup>13</sup> Yaddalli metdaan ni helag Israel ey eleg dalli ippahding hu lawah di edum dan tuu. Eleg idalli man-ittek niya eleg ida umhaul. Melinggep ali biyag da niya maka-uggip ida niya endilli da tekkutan."

<sup>14</sup> Hi-gayun helag Israel ey pan-a-appeh kayu et itkuk yu amleng yu! <sup>15</sup> Tep siniked nan APU DIOS hu kastigu yu niya inendi tu buhul yu. Hi-gatu e Patul ni Israel ey wadad kad-an yu et endi law yu tekkutan.

<sup>16</sup> Yan nunman alin aggew ey kan idallin tutu-un hi-gayun iJerusalem ey "Entan takut yu niya entan kedismayah yu! <sup>17</sup> Tep immali hi APU DIOS e Dios yun mekihha-ad ni hi-gayu. Et-eteng kabaelan tun mengihwang ni hi-gayu. Man-am-amleng alin peteg tep hi-gayu. Endien tullin emin takut yu tep ya impeminhed tun hi-gayu niya ia-appeh tu hu amleng tun hi-gayu."

<sup>18</sup> Kan APU DIOS ey "Pappegek hu ligat yu et eleg kayu law lumelemyung, nem man-am-amleng kayu kumaddan.

<sup>19</sup> Anggegannu law ey medettengan hu aggew ni pengastiguak idan nengipeheltap ni hi-gayu. Baddangan kudda hu nangkepi-day niya emmungek ida hu tutu-uk ni nedegyun di edum ni bebley. Iddawtak idan keiddeyyawan da et mepappeg baing dad bebley ni nebabba-ingan da. <sup>20</sup> Em, yan nunman alin aggew ey emmungen dakeyu et ienamut dakeyu. Iddawtan dakeyullin keiddeyyawan yud kebebbebley. Tettebalen dakeyullin penang-angan dan pengippebanggadak ni emin ni hipan kinedangyan yu. Hi-gak e AP-APU hu nanghel idan nunya!"

## Haggai

*Ya meippanggep nunyan libluh nan Haggai*

Yan eman ni 538 B.C. ey in-olden nan Cyrus e patul di Persia e dammutun mambangngad idad Jerusalem hu Jews ni neilaw di Babilon. Et dakel ida hu Jews ni nambangngad ni nunman ni tsimpuh. Inyayyaggud da hu altar nan APU DIOS et ikapya da hu pengibbehwatan dan Tempol ni nebahbah. Nem entanni ey wada hakkey ey ya baley tu kumedek hu tuka pangkapyaa niya ya intanem tu hu tuka ipapaptek. Ya hakey mewan ey ida kaumtatakut ni buhul da et isiked dan mengiyayyaggud ni Tempol.

Nelabah hu hampulut liman toon ey natduk papayyew da et endi da ineni tep umhulun hu liwat da, nema-ma-ma tep liniwwan dan mansilbin nan APU DIOS niya eleg da gibbuhen ni iyayyaggud hu Tempol. Et putuken APU DIOS hu prophet ni menghel idan tutu-u niyadda ap-apu da ma-lat mambangngad idan mansilbin hi-gatu niya ma-lat gibbuhen dan iyayyaggud hu Tempol. Hi Haggai hu hakey ni pinili tun prophet tu. (Inu-unnud idan tutu-u hu inhel tu et gibbuhen dan iyayyaggud hu Tempol eman ni 516 B.C.)

*Ya neitudek eyad libluh:*

1. Inhel APU DIOS ni governor niyadda tutu-u e iyayyaggud da hu Tempol, et ilepuddan tutu-un mangngunnu. (chapter 1)
2. Ya impeamtan APU DIOS nan Serubbabel e governor et hi Joshua e eta-gey ni padi: Ya baluh ni Tempol ey meidaydayaw ali. (chapter 2:1-9)
3. Inhel APU DIOS e bendisyonan tudda tutu-u tu hedini mantuttuyyuddan liwat dan eleg da pengu-unnudan ni hi-gatu. (chapter 2:10-19)
4. Ya nengisapatahan APU DIOS nan Serubbabel e bahbahen tullu kabaelan idan edum ni bebley. (chapter 2:20-23)

*Intugun APU DIOS e mebehwat mewan etan Tempol*

<sup>1</sup> Yan eman ni nemangulun aggew ni meikka-nem ni bulan ni meikkadwan toon ni nampatulan Darius di Persia ey immehel hi APU DIOS nan Haggai e prophet. Et an ehelen nan Haggai nan Serubbabel e governor di Judah e u-ungngan Sealtiel, et hi Joshua e eta-gey ni padi e u-ungngan Jehosadak. <sup>2</sup> Kantuy "Heninnuy hu inhel APU DIOS e Kabaelan tun emin 'Kan ida eyan tutu-u ey beken nin nunyan tsimpuh ni pengiyayyaggudan ni Tempol.' "

<sup>3</sup> Et ehelen APU DIOS nan Haggai huayan e-helen tuddan tutu-u e kantuy <sup>4</sup> "Kele nangkehammad hu baballey yu e tutu-uk ey hedini ya Tempol ku, man nanengtun nebahbah tep eleg yu iyayyaggud? <sup>5</sup> Kaw eleg yu ang-anga kameippenahding ni hi-gayu? <sup>6</sup> Dakel inggaud yu, nem ekkut ineni yu. Ma-nut wada kennen yu, nem kayu kameuppa. Wada meinum ni yuka innuma, nem kulang. Niya wada balwasi yu, nem kayu kamektel. Tagan yu ngunu, nem kaumkulang yuka tangdanad mahapul yu." <sup>7</sup> Immehel mewan hi APU DIOS e Kabaelan tun emin ey kantuy "Kaw eleg yu amta hedini kele henin nuntan kameippenahding? <sup>8</sup> Kayu pangelan keyew di muyung et iyayyaggud yu eya Tempol ku et dayawen yuwak, tep humman dedan hu lebbeng tun pehding yu ma-lat man-am-amlengngak.

<sup>9</sup> Kanyu nem dakel enniyen yu, nem entanni et kayu man-enni ey ekket ineni yu. Entanni mewan et ienamut yu ey endi maptek ey na-puh tep hineb-uk ku. Impahding ku humman tep nena-yun ni nebahbah Tempol ku ey wada hakkey ni hi-gayu ey ya baley tu hu tuka kennapyaa. <sup>10</sup> Humman mewan gaputun endi udan et endi kaumtemel ni intanem yu. <sup>11</sup> In-alik hu ugew eyad bebley yu et mema-ganan hu papayyew yu, yadda muyung yu, yadda legunta yun nangketaneman ni grapes niya olibah, niyadda edum ni intanem yu ma-lat maupa kayu niyadda animal yu, niya ma-lat mebahbah ni emin hu hipan nan-aatuan yu."

*Ya nengu-unnudan idan tutu-un APU DIOS ni tugun tu*

<sup>12</sup> Entanniy inu-unnud di Serubbabel e u-ungngan Sealtiel, hi Joshua e eta-gey ni padi e u-ungngan Jehosadak, niyaddan emin etan tutu-un natdaan, hu inhel APU DIOS e DIOS da nan hi Haggai e prophet tu. Et daydayawen da law hi APU DIOS.

<sup>13</sup> Entanniy inhel Haggai hu pinhed APU DIOS ni e-helen tuddan tutu-u. Kantuy "Kan APU DIOS ey 'Issapatahan kun hi-gayu e baddangan dakeyun ingganah. Hi-gak e AP-APU hu nanghel idan nunya.' " <sup>14</sup> Winedan APU DIOS hu amleng di Serubbabel e governor ni Judah, hi Joshua e u-ungngan Jehosadak e eta-gey ni padi niyaddan emin etan natdaan

ni tutu-un Apu Dios. Et lapuan dan mangngunnud Tempol AP-APU e Dios da e Kabaelan tun emin. <sup>15</sup> Yan nunman hu meikkadwampulut epat ni aggew ni meikka-nem ni bulan ni meikkadwan toon ni nampatulana Darius.

## 2

<sup>1</sup> Entanni et yan eman ni meikkadwampulut hakey ni aggew ni meikkeppitun bulan ni nunman ni toon ey immehel mewan hi APU DIOS nan Haggai <sup>2</sup> et kantuy "Ehel mun Serubbabel e governor, hi Joshua e eta-gey ni padi e u-ungngan Jehosadak ni yaddan emin hu tutu-u e kammuy: <sup>3</sup> 'Kan APU DIOS ey: Kaw wadan hi-gayu hu hannemnem tu hu kakinayyaggud ni ang-ang ni Tempol ni nunman? Hipa law ang-ang tun nunya? Nanna-ud ni heni endi silbitu yuka penang-ang nunya. <sup>4</sup> Nem emin kayu ey pekedhel yu nemnem yu et mangngunu kayu tep baddangan dakeyun hi-gak e AP-APU e Dios yun Kabaelan tun emin. <sup>5</sup> Insapatah kun neni-yanan yun Egypt e wada-ak di kad-an yun ingganah. Anin ni yan nunya e eleg dakeyu hi-yana, et humman hu, entan takut yu."

<sup>6</sup> Eleg meeyypaw ey iggiwwed ku hu kabunyan niya puyek, anin ni ya baybay. \* <sup>7</sup> Iggiiwwed ku hu kebebbebley et i-liddan katuuuu eyad Tempol ku hu kinedangyan da, ma-lat maideyaw eya baley ku. <sup>8</sup> Emin hu silber niya balituk di kebebbebley ey kukkuwah ku. <sup>9</sup> Yalli etan mekapan Tempol ey kakkayyaggud alin peteg ang-ang tu nem ya la etan nekapan nunman. Niya pelinggep kulli huuyan bebley. Hi-gak e AP-APU e Kabaelan tun emin hu nanghel idan nunya.'

<sup>10</sup> Yan eman ni meikkadwampulut epat ni aggew ni meikkahyam ni bulan ni meikkadwan toon ni nampatulana nan Darius ey immehel mewan hi APU DIOS e Kabaelan tun emin nan Haggai e prophet <sup>11</sup> e kantuy "Ibegam idan papaddi hedin hipa kantud Tugun. <sup>12</sup> Hedin inggukuh ni hakey ni tuu detag ni neieng-eng nan APU DIOS et neitumuk humman ni balwasid sinapay, winu nelutun kennen, winu meinum, ya lanan olibah winu kumpulmih ni hipan mekkan, ey kaw dammutun mambalin ida dama humman ni neitumukan ni balwasin neieng-eng?"

Imbage tuddan padi huuya ey hinumang da e kanday "Eleg!"

<sup>13</sup> Imbaga mewan Haggai e kantuy "Inna-nu hedin neibilang ni beken ni malinih etan hakey ni tuu tep kinapa tu annel ni netey ni tuu, kaw meibbillang ida daman beken ni malinih etan keppaen tun kennen?"

Kan idan padiy "Em!"

<sup>14</sup> Et kan Haggai ey "Kan APU DIOS ey hanniman ida damadda tutu-u eyad bebley e ida kameibbillang ni beken ni malinih, tep lawah elaw da et mukun emin daka i-appit ey kameibbillang daman beken ni malinih."

<sup>15</sup> Immehel mewan hi APU DIOS ey kantuy "Kaw eleg yu ang-anga neipahding ni hi-gayu? Yan eleg yu pay ni lapuan ni mengiyayyaggud eyan Tempol, <sup>16</sup> ey hedin nani kayu, ey kanyu nem wada hu ennien yun dewampulun langgusih, nem endi, tep hampulun ebuh ni langgusih hu ineni yu. Kanyu mewan nem umlaw di neliman galon hu metluan ni kinapya yun meinum, nem yu ang-angen ni dewampulun ebuh. <sup>17</sup> Impaelik hu degeh ni intanem yu niya dallallun memahbah ni intanem yu, et mambalin ni endi silbitu nan-aatuan yu, nem kapya tun eleg kayu mantuttuyyu ma-lat mambanggad kayun mengu-unnud ni hi-gak. <sup>18</sup> Entan tu liwwan huuyan aggew e meikkadwampulut epat ni aggew ni meikkahyam ni bulan, tep yan nunya hu negibbuhana ni pengibbehwatan yun Tempol ku. <sup>19</sup> Anin ni eleg kayu ni pay mantanem niya eleg ni lummeh ida hu grapes, ya figs, ya pomegranates, niya olives ni intanem yu et meippalpun nunya ey bendisyonan dakeyu."

<sup>20</sup> Yan nunman ni aggew e meikkadwampulut epat ni aggew ni nunman ni bulan, ey immehel mewan hi APU DIOS nan Haggai. <sup>21</sup> Kantuy "Ehel mun Serubbabel e governor ni Judah e kamangeddetti law pengiggiwwedan kun kabunyan niya puyek, <sup>22</sup> ma-lat meppappeg hu nampatulana idan patul. Pantu-liek ali kakalesah da. Et emin ida etan kebayyu niyadda nampantakkay ey nealay nangketukkad ida et wadalli hakkey idan sindalu ey petteyen tu edum tu."

<sup>23</sup> 'Nem hedin hi-gam e Serubbabel e bega-en ku e u-ungngan Sealtiel ey yallin keippahdingan tu huuya ey tudduen dakan man-ap-apu niya pillien dakan heni singsing di galumeymey ku.' Hi-gak e AP-APU e Kabaelan tun emin hu nanghel nunya."

\* 2:6 2:6 Hebrews 12:26



## Sekariah

*Ya meippanggep nunyan libluh nan Sekariah*

Hi Sekariah, henin nan Haggai ey impeamta tuddan tutu-ud Jerusalem e mahapul ni iyayyaggud da hu Tempol. Tep ya Tempol di Jerusalem ey beken ni ebuh ni penaydayawan idan tutu-u nan hi Apu Dios, tep yadman hu tuka panha-adi ma-lat mekiha-ad idan tutu-u tu. Inhel Apu Dios idan ijudah niyadda iJerusalem e hedin mengunnud ida mewan ni hi-gatu, ey mambangngad daman hi-gada. (1:3)

Ey inhel tu e umyaggud niya umlinggep hu Jerusalem. (1:17 et ya 8:8) Meippahding huyyan kegibbuan ni pengastiguan tuddan buhul ni Israel (9:1-8) et han ali law man-apu-ey ad eyad puyek hu pinutuk nan Apu Dios ni Patul. (9:9-10)

*Ya neitudek eyad libluh:*

1. Ya nanghelan Apu Dios idan iJerusalem e mantuttuyyudda. (chapter 1:1-6)
2. Ya nengidwatan Apu Dios ni walun i-innep nan Sekariah meippanggep idan Jew ni ya kapengibbillang nan APU DIOS ni hi-gada. (chapters 1:7-6:8)
3. Hi Joshua e eta-gey ni padi ey pingngetan dan penget ni patul ma-lat meipeamta e edum alin aggew ey um-ali etan Mengippaptek ni tuu e Patul niya Padi ni pinutuk Apu Dios. (chapters 6:9-15)
4. Ya endi silbitun kapantetpeliddan Jew. Ya nanghelan Apu Dios e bendisyonan tuddalli tutu-u tun edum ni aggew. (chapters 7-8)
5. Ya ellian alin Christo e Mengippaptek ni tutu-u. Iwwalleng alin tutu-u, nem yallin udidih tu ey hi-gatu mengapput niya hi-gatu mampatul. (chapters 9-14)

*Pambangngad itsun mengunnud nan APU DIOS*

<sup>1</sup> Yan eman ni meikkewwalun bulan ni meikkadwan toon ni nampatulani Darius di Persia ey impeamtan APU DIOS huyyan hi-gak e prophet e hi Sekariah e u-ungngan Berekiah e u-ungngan Iddo. <sup>2-3</sup> Kantuy "Ehel muddan tutu-u e heninnuy hu pinhed kun peamtan hi-gada: Hi-gak, e AP-APU e Kabaelan tun emin, ey nemahhig bunget kuddan aammed yu. Nem yan nunya ey kangkun hi-gayuy: Pambangngad kayun mengunnud ni hi-gak et bangngaden dakeyu daman tutu-uk. <sup>4</sup> Entan tu iu-unnud ida lan aammed yu e manghay ida. Inhelan eman ida lan prophet e issiked dan manliwwat et mambangngad idan mengunnud ni hi-gak, nem eleg da hanguden ni dedngelen hu inhel da et mekastigu ida.

<sup>5</sup> Nebayag law neteyyan idan nunman ni aammed yu niyadda prophet yu. <sup>6</sup> Nem emin hu inhel idan bega-en kun prophet ey neipahding idan aammed yu. Et han ide law mantuttuyyu et kanday 'Neipahding ni hi-gami hu lebbeng tun kastigu min nalpun APU DIOS e Kabaelan tun emin, tep humman dedan inhel tu lan nunan ni pehding tu.' "

<sup>7</sup> Yan eman ni meikkadwampulut epat ni aggew ni meikkeppulu et hakey ni bulan e Sebat ni meikkadwan toon ni nampatulani Darius di Persia ey wada impeamtan APU DIOS ni hi-gak e hi Sekariah e prophet, e u-ungngan Berekiah e u-ungngan Iddo.

<sup>8</sup> Yan nunman ni hileng ey inang-ang kud i-innep ku hu hakey ni lakin nantakkay di madlang ni kebayyun immehngeng di kad-an idan keyew ni myrtle di nedeklan. Wadadda neitu-nud ni edum ni kebayyun madlang, ya brown niya mablah e wadadda dama nampantakkay. <sup>9</sup> Entanni et ibgak etan ni anghel ni nakka pekihuhummangan e kangkuy "Apu, kele wadadda huyyan kebayyu?" Ey kantuy "E-helen kun hi-gam hedin hipa keippahdingan da." <sup>10</sup> Ey immehel etan lakin kaman-eh-ehngeng di kad-an idan keyew ni myrtle ey kantuy "Humman ida intu-dak APU DIOS ni an menang-ang hedin hipa kameippenahding eyad ta-pew ni puyek."

<sup>11</sup> Entanniy limmaw ida etan edum ni nantakkay di kebayyu et kanda etan ni anghel nan APU DIOS ey "Limmaw kamid kebebbley eyad puyek ey inang-ang mi e melinggep ida tutu-u tep endi law gubat." \*

<sup>12</sup> Ey kan nunman ni anghel ey "APU DIOS e Kabaelan tun emin, nemahhig bunget muddan iJerusalem niya ijudah ni nepitun toon. Pigantu pengippeang-angam ni hemek mun hi-gada?" <sup>13</sup> Et a-alluken APU DIOS etan anghel ni nekihummangan ni hi-gak.

<sup>14</sup> Entanniy kan nunman ni anghel ni hi-gak ey "Mu ehel ni katuutuu eya inhel APU DIOS e Kabaelan tun emin. Kantuy 'Nemahhig hu nemihed ku niya kaguh kuddan tutu-uk di Jerusalem e bebley ku. <sup>15</sup> Nem nemahhig hu bunget kuddan edum ni bebley

\* 1:11 1:11 Hi Darius e patul niyadda sindalu tu ey inapput dadda aap-apud kebebbley ni nanggehay ni hi-gatu.

ni kamekallinggep niya kayyaggud biyag da, tep ma-nut bimmungettak idan tutu-uk et pekastiguk ida, nem nehalmam kumamman impahding dan nengastigun hi-gada, ey beken ni hanniman hu pinhed kun meippahding.

<sup>16</sup> Et mukun nambangngaddak di Jerusalem ma-lat peang-ang ku hemek kuddan bimmebley. Mebehwat ali mewan Tempol ku niya meiyayyaggud ali hu Jerusalem.' "

<sup>17</sup> Immehel mewan ni hi-gak etan anghel ey kantuy "Peamtam e heninnuy pay hu inhel APU DIOS e Kabaelan tun emin. Kantuy 'Mambalin ali mewan ni kedangyan ni peteg ida bebley kud Israel, tep baddangak ida. Niya ibbilang kulli mewan hu Jerusalem ni bebley ku.' "

<sup>18</sup> Entanni mewan ey inang-ang ku hu epat ni ha-duk. <sup>19</sup> Kangku etan ni anghel ni kamekihuhummangan ni hi-gak ey "Kele wadadda huyya?"

Ey kantun hi-gak ey "Huyyaddan ha-duk hu mengi-ehngeng idan epat ni et-eteng kabaelan dan bebley eyad puyek ni nengiwhehit idan iJudah, yadda iIsrael niyadda iJerusalem."

<sup>20</sup> Entanni mewan ey impeang-ang APU DIOS hu epat ni ma-dih e singnged da masuh. <sup>21</sup> Imbagak mewan hedin hipa keibbellinan tudda humman ey kan etan ni anghel ey "Immalidda ma-lat ipahding da hu angettakkut idan nunman ni epat ni bebley ni nampengiwehit niya nemalpaligat idan iJudah."

## 2

*Ya etan neipeang-ang ni linubid ni kapanlelkud*

<sup>1</sup> Entannit in-ang-ang ku mewan ey inang-ang ku hu tuun singnged tu hu linubid ni kapanlelkud. <sup>2</sup> Kangkun hi-gatuy "Attu lawwam mu?" Ey kantuy "Nak lelkuden hu Jerusalem."

<sup>3</sup> Entanniy inang-ang ku etan anghel ni nekihummangan ni hi-gak e kamengelli ey wada mewan hakey ni anghel ni kamangkeiddammun hi-gatu. <sup>4</sup> Kan etan ni meikkadwan anghel ni hi-gatuy "Papuut mu et ehelem eman ni tuun nangnged ni linubid ni kapanlelkud e kammuy 'Medakkel alin peteg hu tutu-ud Jerusalem et mahewal idalli edum! Dakel ali mambebley di ba-hil ni luhud niya anin alin animal da et umdakkel, nem melinggep idalli. <sup>5</sup> Tep hi-gak e AP-APU ey heni-ak ali apuy ni meilluhhud di nanlinikweh di Jerusalem niya manha-addak diman et meidaydayaw humman ni bebley!' "

<sup>6-7</sup> Kan APU DIOS idan tuu tuy "Inwahit dakeyud kebebbebley, nem yan nunya ey kangkun hi-gayuy, besik kayu et hi-yanen yu Babilon et mambangngad kayud Jerusalem e bebley yu. <sup>8</sup> Yadda etan mengipahding ni lawah ni hi-gayuy, ey impahding daddan tutu-un nakappinhed ku." Et itu-dak tuwak nan APU DIOS e Kabaelan tun emin idad bebley ni nemiliw ni emin ni limmuddan tutu-u tu ni an mengippeamtan inhel tu. <sup>9</sup> Kantuy "Hi-gak ali mismuh hu mekihhanggan hi-gayuy et pan-alen idallin himbut yun nunman hu limmu yu." Yallin amnuan tu huyya hu pengamtaan yu e makulug ni hi APU DIOS e Kabaelan tun emin hu nengitu-dak ni hi-gak. <sup>10</sup> Immehel mewan hi APU DIOS ey kantuy "Itkuk yu anla yu e tutu-ud Jerusalem tep um-ali-ak et mekibebleyyak ni hi-gayuy." <sup>11</sup> Yan kedettengan alin nunman ni aggew ey dakel idalli hu mengu-unnud nan APU DIOS et mambalin idan tuu tu niya mekihha-ad ni hi-gada. Yallin nunman ni aggew ey amtaen yulli e AP-APU e Kabaelan tun emin hu nengitu-dak ni hi-gak di kad-an yu. <sup>12</sup> Mambalin ali Judah ni bebley nan APU DIOS ni nebendisyonan niya pillien tullu mewan ni panha-adan hu Jerusalem ni nakappinhed tu.

<sup>13</sup> I-ineng itsun emin ni katuutuu, tep imminah hi APU DIOS di baley tu e iyallin manhuwet ni tutu-u.

## 3

*Ya etan neipeang-ang ni eta-gey ni padi*

<sup>1</sup> Entanniy impeang-ang APU DIOS ni hi-gak hi Joshua e eta-gey ni padi e kaman-ehngeng di hinangga etan ni anghel APU DIOS. Wada hi Satanas di winannan etan ni anghel e dakel tuka pan-ehelan bahul nan Joshua. <sup>2</sup> Nem kan APU DIOS nan Satanas ey "Hi-gak e AP-APU ey eggak kulluga hu nan-ehel mun kammun bahul nan Joshua. Em, hi-gak e AP-APU, e nemilin Jerusalem ey kastiguen daka, nem huuyan tuu ey meihwang e heni pasing ni negamhut di kamantetebbel ni apuy et eleg magiheh." <sup>3</sup> Nelullugit balwasin Joshua ni inehngengan tud hinangga etan ni anghel. <sup>4</sup> Et kan etan ni anghel idan edum ni kaman-eh-ehngeng diman ey "Ekal yu hu nelugit ni balwasi tu." In-ang-ang tun Joshua ey kantuy "Ya keibbellinan ni nunya ey ingkal ku liwat mu niya iddawtan dakan baluh niya kakkayyaggud ni balwasim."

<sup>5</sup> Entanni et kangkuy “Pengeti yu hu ulu tun malinini ni penget.” Et pengetan da ulun Joshua ni penget ni padi et balwasian dan baluh ni balwasi ey immen etan anghel APU DIOS e kaman-eh-ehng.

<sup>6</sup> Entanni ey kan etan ni anghel APU DIOS nan Joshua ey <sup>7</sup> “Heninnuy hu kan APU DIOS e Kabaelan tun emin! Kantuy: Hedin u-unnudem mu hu tugun ku niya pehding mu pinhed ku, ey hi-gam hu mannananeng ni mengippatek ni Tempol ku, anin etan ni dallin tu. Niya iddawat kun hi-gam hu kelebngan ni mekihummangan ni hi-gak henidda eyan aanghel kun kaman-eh-ehng.” <sup>8</sup> Dengel muwak e Joshua e eta-gey ni padi, niya hi-gayun edum ni papaddi. Hi-gayu kei-ang-angan idan kayyagud ni meippahding ni edum ni aggew. Peellik ali etan bega-en ku e nengadnan ni Panga. <sup>9</sup> Ang-ang yu eya hakey ni batun inha-ad kud hinanggan Joshua. Pitu angah tu niya wadalli ikku-lit kudman. Meminpinhakkey ali pengkalak ni liwat idan tutu-u eyad bebley ni hakey ni aggew. <sup>10</sup> Yan nunman alin aggew ey eyyagan yulli sinakdul yu et mekiam-amleng idan hi-gayud melinggep niya kayyagud ni biyag yu. Hi-gak e AP-APU e Kabaelan tun emin hu nanghel idan nunya.”

## 4

*Ya etan neipeang-ang ni pattukkan ni kengkeh niya dewwan keyew ni olibah*

<sup>1</sup> Entanni ey immali mewan etan anghel ni nekihummangan ni hi-gak et bangunen tuwak e heni-ak neugip. <sup>2</sup> Ey kantun hi-gak ey “Hipa muka ang-ang-anga?” Kangkuy “Nakka ang-ang-anga hu pattukkan ni kengkeh ni nekapyad balituk niya neita-pew hu mahukung ni duyun neha-adan ni lana. Wada hu pitun kengkeh di nanlinikweh nunman ni mahukung ni duyu e nei-peng hu pitu mewan ni neidengdeng ni neha-adan ni mitsah. <sup>3</sup> Niya wada dewwan keyew e olibah. Wada hakey di winilli etan ni mahukung ni duyu niya wada hakey di winannan.” <sup>4</sup> Kangku etan ni anghel ni kamekiung-ungbal ni hi-gak ey “Hipadda huuya e apu?” <sup>5</sup> Kantun hi-gak ey “Kaw eleg mu amta hedin hipadda humman?” Kangkuy “Eleg, apu.” <sup>6</sup> Entanni ey kantuy “Heninnuy hu kan APU DIOS e Kabaelan tun emin nan Serubbabel ‘Mengapput ka e Serubbabel tep ya kabaelan ni Ispirituh ku, beken ni gapuh ni kabaelan mu niya elet mu. <sup>7</sup> Endi an umhani, anin ni henin kainetteng ni duntug et eleg umhanid pengippahdingam ni implanuh kun pehding mu, tep medeklan ali humman ni duntug di hinanggam. Gibbuhem ali hu Tempol. Et yallin pengihha-adam ni manggillig ni batu ey itetkuk idallin tutu-u e kanday: Hi Apu DIOS hu mengidwat ni bendisyon! Em, hi Apu DIOS hu mengidwat ni bendisyon!’ ”

<sup>8</sup> Entanniy immehel mewan hi APU DIOS ni hi-gak ey kantuy <sup>9</sup> “Hi Serubbabel hu nengikapan pengibbehwatan ni Tempol niya hi-gatulli hu mengibbuh. Yallin keippahdingan tu huuya hu pengamatan idan tutu-uk e hi-gak e AP-APU e Kabaelan tun emin hu nengitu-dak ni hi-gam. <sup>10</sup> Entan tu pihul eya ekket ni neilepun neingunu, tep hi-gak ey nakka man-an-anlan menang-ang e nelapuan hu ngunu. Niya man-an-anladdalli tuu hedin ang-angen da hi Serubbabel e singnged tu panlelkud.”

Entanni ey inhel etan ni anghel hu keibbellinan etan ni impeang-ang tun hi-gak e kantuy “Humman idan pitun kengkeh ey heni humman ida matan APU DIOS ni kamenang-ang-ang ni kapehpehding idan tutu-ud kebebbbley.”

<sup>11</sup> Entanni et kangku etan ni anghel ey “Hipa huayan dewwan keyew ni olibah ni nambina-hil di pattukkan ni kengkeh? <sup>12</sup> Niya kele wada eya dewwan pangan olibah ni neidagsid dewwan balituk ni gulipuh ni kakeukkasin lanan olibah?”

<sup>13</sup> Ey kantun hi-gak ey “Kaw eleg mu amta?” Kangkuy “Eleg, apu.”

<sup>14</sup> Entanni et kantuy “Humman ida etan dewwan tuun neputuk ni mansilbin Apu DIOS eyad kebebbbley di puyek.”

## 5

*Ya etan neipeang-ang ni kamantayyatayab ni neludun ni papil*

<sup>1</sup> Entanni mewan et i-ang-ang ku ey wada kamantayyatayab ni neludun ni papil.

<sup>2</sup> Kan etan ni anghel ni hi-gak ey “Hipa muka ang-ang-anga?”

Kangkuy “Wada kamantayyatayab ni neludun ni papil ni telumpulun piyeh kad-inukkey tu niya hampulu et liman piyeh kalinakkeb tu.” <sup>3</sup> Et kantun hi-gak ey “Ya neitudek diman ni papil ey yadda idut ni um-alid katutuud kebebbbley. Yad ba-hil ni papel ey neitudek e meippa-kal idan emin hu matekew. Niya yad piggad etan ni papil ey neitudek ni meippa-kal ni emin ida etan kaman-ittek etan di bebley.” <sup>4</sup> Immehel mewan hi APU DIOS e Kabaelan tun emin ey kantuy “Peellik hu idut di kapanha-adiddan matekew niyadda kamansapatah ni itek di ngadan ku. Niya mannananeng humman

ni idut kun hi-gadad nanha-adan da, ingganah ni mekabbahbah ida keyew niya batun neikapyadman.”

*Ya etan neipeang-ang ni bii etan di basket*

<sup>5</sup> Entanni ey neihnup etan anghel ni kamekiung-ungbal ni hi-gak ey kantuy “Itengaw mu kedi et ang-angem eman nampeang-ang.” <sup>6</sup> Kangkuy “Hipa humman?”

Kantuy “Humman hu basket ni kapanlelkud e napnun liwat ni emin ni tutu-u eyad bebley.” <sup>7</sup> Entanni et ma-kal hu ihmay ni hu-keb etan ni basket ey wada hu biin yimmudung di bawang tu. <sup>8</sup> Kan etan ni anghel ey “Ya kai-ehneng eyan bii ey emin hu lawah ni kameippenahding.” Inhel tu humman ey ebuhe intalmed tu etan biid basket et ihu-keb tu mewan.

<sup>9</sup> Intangaw ku mewan ey inang-ang ku hu dewwan biin kamantattayab e heni payak ni stork hu payak da niya andukkey hebat da. Simmayab idad kad-an ku et ita-gey da etan basket et ityab dad ahpap. <sup>10</sup> Kangku etan ni anghel ey “Ettu pengillawwan da etan ni basket?” <sup>11</sup> Kantuy “Illaw dad Babilon tep mengapyaddad man ni tempol ni pengihha-adan dan nunman ni basket. Hedin negibbuh ni nekapy etan tempol ey ittuun da humman ni basket di pattukkan tu.”

## 6

*Ya etan neipeang-ang ni epat ni kalesah*

<sup>1</sup> Intangaw ku mewan ey wada neipeang-ang ni hi-gak ni epat ni kalesah ni nalpud nambattanan ni dewwan giniling ni duntug. <sup>2</sup> Ya etan nemangulun kalesah ey ingguyud idan madlang ni kekebayyu. Ya etan meikkadwan kalesah ey ingguyud idan andeket ni kekebayyu. <sup>3</sup> Ya etan meikkatlu ey ingguyud idan mablal ni kekebayyu, ey ya etan meikka-pat ey ingguyud idan nampandep-ul ni kebayyu. <sup>4</sup> Kangku etan ni anghel ey “Hipa keibbellinan idan nunya?”

<sup>5</sup> Ey kantuy “Huyyadda etan epat ni ispirituh di kabunyan ni kaman-eh-ehneng di kad-an ni Ap-apun emin di kebebbbley eyad puyek. <sup>6</sup> Ya etan kalesah ni ingguyud idan andeket ni kebayyu ey kamenglaw di north di Babilon. Ya etan kalesah ni ingguyud idan mablal ni kebayyu ey kamenglaw di appit ni kakelinnugin aggew. Hedin ya etan kalesah ni ingguyud ida etan ni nampandep-ul ni kebayyu ey kamenglaw di appit ni south.”

<sup>7</sup> Ihik ida huyyan angka-let ni kebayyun umlaw di kebebbbley eyad puyek. Et kan APU DIOS ni hi-gaday “Lakkayuy et yu ang-angen hedin hipa kamekennapkapyad kebebbbley.” Et manglaw ida.

<sup>8</sup> Entanni ey intekuk etan ni anghel ni hi-gak e kantuy “Dinegem idan kebayyun nampalaw di north hu bunget APU DIOS.”

*Ya etan nepilin man-ap-apu*

<sup>9</sup> Imnehel hi APU DIOS ni hi-gak ey kantuy <sup>10</sup> “Alam ida etan silber niya balituk ni i-alid Heldai, hi Tobijah et hi Jedaiah ni inla dad Babilon ni indawat idan helag Israel ni neilaw diman. Hedin umdateng ida, ey mudda dammud baley Josiah e u-ungngan Sepaniah. <sup>11</sup> Kapyam ida humman ni balituk niya silber ni pengget et papngget mud ulun Josiah e eta-gey ni padi e u-ungngan Jehosadak. <sup>12</sup> Ehel mun hi-gatu e hi-gak e AP-APU e Kabaelan tun emin ey kangkuy ‘Huyya hu tuun kameingngadnin Panga. Kamei-ellig e umpangallid kad-an tu et behwatan tu Tempol APU DIOS. <sup>13</sup> Hi-gatulli memehwat ni Tempol niya meidwat alin hi-gatu hu dayaw ni lebbeng tun meidwat ni patul et hi-gatulli pan-ap-apidan tutu-u tu. Hi-gatulli metlaing hu mampeddin mengi-ehneng idan tutu-u tu niya kayyaggud alin emin mekenapkapyan tsimpuh tu.’\* ”

<sup>14</sup> Humman ni pengget ey meihha-ad di Tempol APU DIOS et penginemnemman idan nengidwat e hi Heldai, hi Tobiah, hi Jedaiah et hi Josiah e u-ungngan Sepaniah.”

<sup>15</sup> Dakel ali tutu-un melpud nangeidawwin bebley ni umbaddang ni memehwat ni Tempol APU DIOS. Yallin kedettangan ni amnuan nunya et mebehwat hu Tempol ey amtaen yulli e nalpun APU DIOS e Kabaelan tun emin eya intakang ku. Niya hedin pannenneng yun u-unnuden hi APU DIOS e Dios yu et ippahding yun emin hu tugun tu, ey makulug ni um-amnu huyya.

## 7

*Ya meandeng ni pehdng ey ya hemek, beken ni ya mantetpel*

\* 6:13 6:13 [11-13] Hi Joshua e eta-gey ni padi ey napngetan ni pengget ni patul ma-lat maipeang-ang e ya etan pinutuk APU DIOS e hi Christo ey dewwa hu saad tu e patul niya padi.

<sup>1</sup> Yan eman ni meikka-pat ni aggew ni meikkahyam ni bulan e Kislev ni meikka-pat ni toon ni nan-ap-apuan Darius ey immehel hi APU DIOS ni hi-gak. <sup>2</sup> Yan nunman ey intudak idan iBethel di Sareser nan hi Regemmelek niyadda tutu-u da ma-lat mampebaddang idan APU DIOS. <sup>3</sup> Niya ma-lat da puhdanan idan padi niyadda prophet di Tempol APU DIOS e Kabaelan tun emin e kandy "Kaw nanengtun umlelemyung kami niya mantetpel kami hedini nedatngan hu meikkelliman bulan et peginemnemneman min nebahbahan ni Tempol e henin impenahding min katootoon?"

<sup>4</sup> Entanniy kan APU DIOS e Kabaelan tun emin ni hi-gak ey <sup>5</sup> "Ehel muddan tutu-u eyad bebley niyadda papaddi e ma-nu tep nantepel ida niya limlelemyung idan meikkellima niya meikkepitun bulan ni katootoon eyan nelabah ni nepitu toon ni kaweda dad edum ni bebley, nem beken ni ma-lat penaydayawan dan hi-gak hu nengipahdingan daddan nunman. <sup>6</sup> Niya anin ni yan yuka panhahamulin piyestah yu et eleg yuwak nemnema, tep ebuh pan-an-anlaan ni annel yun yuka ikakkaguh. <sup>7</sup> Kaw eggak dedan ehelen ida huyya eman idan prophet yun nunman eman ni kedangan niya hantapug tutu-ud Jerusalem niyad Judah, anin di Negeb niyaddad bebley di hengeg idan duntug di Judah?"

<sup>8-9</sup> Entanni ey immehel mewan ni hi-gak hi APU DIOS e Kabaelan tun emin e kantuy "Mahapul ni meandeng hu pehding yun mengippennuh ni nanhahallaan yu, niya peang-ang yu binabbal yu niya hemek yun edum yu.

<sup>10</sup> Entan tudda panligligat hu nebalun bii, yadda nepu-hig, yadda tutu-un nalpud edum ni bebley ni nekibebley ni hi-gayu niyadda newetwet. Niya entan pannemnem ni pemahbah yun edum yun tuu.

<sup>11</sup> Nem hedini yadda aammed yun nunman ey nginhay dadda huyyan intugun kun hi-gada. <sup>12</sup> Nemahhig ni impekelhi da puhu da et heni batu et eleg dan hekey hengnguda niya eleg da dedngela hu tugun kun intuttudduddan prophet kun nunman. Et humman hu, nemahhig bunget kun hi-gada. <sup>13</sup> Et gapu tep eleg da hangunden ida intugun ku, ey eleggak dama dengelen hu dasal da. <sup>14</sup> Heni-ak dama law pewek e intayag kudda et maiwehit idad nangekidawwin bebley ni endi nengam-amtan hi-gada. Nebel-ah law bebley da et endi law kamandellan diman. Nambalin hu kayyaggud la nin peteg ni bebley dan desert. Hi-gak e AP-APU e Kabaelan tun emin hu nanghel idan nunya."

## 8

<sup>1</sup> Immehel mewan hi APU DIOS e Kabaelan tun emin ni hi-gak ey kantuy <sup>2</sup> "Nakappinhd kun peteg hu Jerusalem et mukun nemahhig hu bunget kuddan buhul tu. <sup>3</sup> Mambangngaddak ali et mambebileyyak di Jerusalem e bebley ku dedan. Mengeddanan ali humman ni bebley ni Bebley ni daka Pannananeng hu daka Pengu-unnud. Niya mengeddanan ali hu duntug kun Duntug ni kad-an APU DIOS e Kabaelan tun emin." <sup>4</sup> Kantu mewan ey "Yan nunman alin tsimpuh ey mandalladalan idalli nangeki-inna niyadda nangeka-amman nampanhulkud di keltad ni Jerusalem niya umyenuyyuddung idallid mulkaduh di bebley da. <sup>5</sup> Dakel idallin peteg hu kaungaungan mampan-a-ayyam di keltad. <sup>6</sup> Ya kapannemnem idan natdaan ni tutu-uk ey eleg mabalin ni meippahding huyya. Nem kaw wada hu eggak han-ipahding? Hi-gak e AP-APU e Kabaelan tun emin hu nanghel nunya. <sup>7</sup> Hi-gak ali mengihwang idan tutu-uk ni neilaw di kebebbebley di appit ni kasimmilin aggew niyad kakelinnugin aggew. <sup>8</sup> I-anemut kuddalli et melinggep idan mambebiley di Jerusalem. Hi-gadalli mewan law tutu-uk. Niya hi-gak ali hu mannananeng niya limpiyuh ni Dios da. <sup>9</sup> Et humman hu, hi-gak e hi APU DIOS e Kabaelan tun emin ey kangkun hi-gayuy 'Pekedhel yu nemnem yu et gibbuhen yu Tempol ku. Dingngel yu hu in-inhel ida lan prophet ni nunman neipalpu eman ni daka pampengikkapyain pengibbehwatan ni Tempol ku. <sup>10</sup> Yan eman ni eleg pay ni mailepu ngunud Tempol ey endi hakey ni tuun kabaelan tun umtangan ni tuu winu um-abang ni animal ni panggunnu tu. Endi linggep idan kamandalladalan, tep impambalin kun kamambibinnuhul emin tutu-u. <sup>11</sup> Nem yan nunya ey eggak law pehding idan natdaan ni tutu-uk hu impahding kun nunman. <sup>12</sup> Melinggep idallin mantennem ni ittanem da. Makallameh ali ittanem dan grapes niya emin alin hipan ittanem da. Niya peellik ali dakel ni udan ni menennun ni intanem da. Iddawat kullin emin ida huyyan panyaggudan idan natdaan ni tutu-uk di Judah niyad Israel. <sup>13</sup> Yan nunman ey nambalin kayun iJudah niya iIsrael ni kei-ang-angan ni neidutan ni tutu-u. Nem yan nunya ey hi-gak mengihwang ni hi-gayu et mambalin kayullin kelpuan niya kei-ang-angan ni bendisyon. Et humman hu, entan takut yu niya entan kedismayah yu. Ituluy yu kuman memehwat ni Tempol! "

<sup>14</sup> Kan mewan APU DIOS e Kabaelan tun emin ey "Tep yan nengipebungetan da-ak idan aammed yu ey eggak keyatan hu planuh kun kastiguen kudda et ipahding ku. <sup>15</sup> Et yan nunya ey eggak dama bangngada hu insapatah kun memendisyon ni Jerusalem,

anin idan tutu-ud Judah, et humman hu, entan takut yu. <sup>16</sup> Nem mahapul ni heninnuy pehdng yu: Mahapul ni ya makulug hu e-helen yun edum yun tuu. \* Ang-ang yu et ya meandeng hu pengippennuh yun kapanhahallain edum yu ma-lat melingkep kayu. <sup>17</sup> Entan pamplanuh ni pemabhahan yun edum yu. Niya isiked yun mengissapatah ni itek. Angebe-hel kun peteg ida henin nunman ni kameippahding.”

<sup>18</sup> Immehel mewan hi APU DIOS e Kabaelan tun emin ni hi-gak ey kantuy <sup>19</sup> “Hi-gayun ijudah, ya etan yuka u-unnudan pantetpelan ni meikka-pat, ya meikkelima, ya meikkeppitu niya meikkeppulun bulan ey nepappeg law nunya. Mambalin ida law humman ni tsimpuh ni pan-an-anlaan yun tutu-ud Judah. Eleg law mahapul ni kayu umlemyung. Et humman hu, ya makulug niya linggep hu unud yu.”

<sup>20</sup> Kan mewan APU DIOS e Kabaelan tun emin ey “E-helek ni hi-gayu e um-alilli katuutuud kebebbebley eyad bebley yud Jerusalem. <sup>21</sup> Yadda tutu-ud hakey ni bebley ey kandallin tutu-un nalpud edum ni bebley ey ‘Ikeyuy et lumaw itsun emin di Jerusalem et itsu mandasal nan APU DIOS e Kabaelan tun emin et bendisyonan daitu.’ <sup>22</sup> Et humman hu, dake idalli hu um-alin melpud edum ni bebley, anin idallin bimbebley di et-eteng kabaelan da et um-aliddadya Jerusalem ni an mandasal nan APU DIOS e Kabaelan tun emin ma-lat mebendisyonan ida. <sup>23</sup> Yan kedettengan alin nunman ni tsimpuh ey wadaddalli um-alin hampulun tutu-un melpud nambakbaklang ni bebley ni mengitnged di utduk ni balwasin hakey ni helag Israel et kandallin hi-gatuy ‘Mekillaw kami anhan ni hi-gam, tep dingngel mi e daka kapakabbaddangin APU DIOS.’ Hi-gak e AP-APU e Kabaelan tun emin hu nanghel idan nunya.”

## 9

<sup>1</sup> Yahhuy mewan hu inhel APU DIOS ni meippanggep ni pengastigu tuddan tutu-ud Hadrak niyad Damascus, tep emin ida hu impanhelheltap da, nema-madda hu iIsrael ey daka hehgedga pengihwangan APU DIOS ni hi-gada. <sup>2</sup> Nanna-ud ni mekastigudda hu iHamat ni neihnup di Damascus, anin idan bebley e Tyre et ya Sidon, anin ni ya daka pannemnem ey nelaing ida. <sup>3</sup> Nengapya hu tutu-ud Tyre ni nangkehammad ni tuping ni luhud da niya dake ni peteg hu inemung dan balituk niya silber et heni dep-ul kadinakkel dad keltad. <sup>4</sup> Nem endien alin APU DIOS emin kinedangyan da, tep meibheng di baybay niya melgab ali bebley da.

<sup>5</sup> Ang-angen alin iAskelon hu kebabhahan ni Tyre et nemahhig ali takut da. Umgeygey idalli dama iGaza niyadda iEkron ni takut da, tep mebahbah ali hu bebley ni daka pandinneli. Megubbat ali Gaza et meapput niya petteyen dalli patul da. Endillin hekey hu tutu-un metdaan di Askelon. <sup>6</sup> Mambbebley idalli tutu-un nangkulpud nambakbaklang ni bebley di Asdod, et humman ali pemappeg APU DIOS ni kapampahhiyaddan iPilistia. <sup>7</sup> Kan APU DIOS ni meippanggep idan metdaan ni iPilistia ey: “Eleg idalli law mengangan ni detag ni nannaneng kuheyaw tu niya eleg dalli law kenna hu mekkan ni kameibbillang ni beken ni malinih. Hi-gak ali law deyyawen da niya meibbillang idallin henin hakey ni helag nan Judah. Anin idallin iEkron et ebbulutek idan tutu-uk henin neipahding idan iJebus e inebulut kudnan nunman. <sup>8</sup> Guwalyaak hu Tempol ku ma-lat eleg hegepen idan sindalun buhul ni Israel. Endilli law an um-alin mengippehelheltap idan tutu-uk tep paka-eddugak ida.”

<sup>9</sup> Immehel mewan hi APU DIOS ey kantuy “Hi-gayun tutu-ud Jerusalem, pan-am-leng kayun peteg! Itkuk yu amleng yu tep iyyalli patul yu. Hi-gatu ey kayyaggud niya kabaelan tun mengihwang. Nem inamta tun mampekumbabah, tep nantakkay di pakeetteng tun donkey. \* <sup>10</sup> E-kalek ni emin di Israel ida kameussal di gubat, hennidan kalesah niyadda kebayyu, niya bahbahek ida pana. Weddaen alin nunman ni patul yu hu linggep di kebebbebley niya man-ap-apu meippalpud hakey ni baybay ingganah lad gilig ni hakey mewan ni baybay, niya meippalpud Wangwang e Euphrates ingganah di pappeg ni bebley eyad puyek.

<sup>11</sup> Nehammad hu nekitbalan kun hi-gayun tutu-uk tep ya kuheyaw ni kalneroh ni neiappit. Yan nunya ey neikelabut hu edum ni hi-gayud edum ni bebley e henidda wadad bitun endi innumen ni danum. Nem gapu tep ya humman ni nekitbalan ku ey ibbukyat kudda. <sup>12</sup> Et humman hu, pambangngad kayud bebley yu e tutu-uk ni nepilit ni neilaw di edum ni bebley tep wada law namnamah yu. Em, pambangngad kayud bebley yun wada law linggep. Issapatah kun nunyan aggew e mampidwalli kainetteng ni bendisyon kun hi-gayu tep nemahhig hinelheltap yu. <sup>13</sup> Ussalek hu lalakid Judah niyad Israel ni heni panak. Niya ussalek ida lalakid Jerusalem ni heni ispadah kun mekiggubbat idan Greek.”

\* 8:16 8:16 Ephesians 4:25 \* 9:9 9:9 Matthew 21:5, John 12:15

<sup>14</sup> Mampeang-ang ali hi APU DIOS di ahpat idan tutu-u tu. Henilli kedyam hu panetun kamenglaw. Petnul alin APU DIOS e Eta-gey ni peteg hu tangguyup tu niya henilli nalet ni alipuhhapuh ni melpud south. <sup>15</sup> Ippaptek alin APU DIOS e Kabaelan tun emin hu tutu-u tu et apputen dalli buhul da e ussalen da bayyabey da. Mantetekkuk idallin mekiggubbat e henidda nebuteng ey pampetteyen da buhul da. Heniddalli mahukung ni duyun kameussal ni pan-appitan e napnun kuheyaw ni kaiwwakgih di dugun altar, tep mekukkuheyaw idalli.

<sup>16</sup> Yan nunman alin aggew ey pengapput nan APU DIOS ida tutu-u tu et ihwang tudda, e henin kapemaptek ni kamampattul e tuka ang-anga et meihwang ida kalneroh tu. Heniddalli kamanlitaak di bebley tu e heniddan gamgam ni neipket di penget ni patul, tep meidaydayaw ida. <sup>17</sup> Kayyaggud alin peteg ang-ang da! Mekapkapheil idalli kamenikken ni bibi-i niya lalakki, tep dakel ali kennen niya meinnum.

## 10

*Yalli pengidwatan APU DIOS ni panyaggudan idan tutu-u tu*

<sup>1</sup> Pambaga kayun APU DIOS ni udan hedin mahapul yu et idwat tu. Tep hi-gatu hu kamengapyan kulput ni kamenggah ni udan ma-lat madenuman kapeyepew et tumeba neitnem. <sup>2</sup> Yadda etan tutu-u ey ida kamampebaddang di beken ni makulug ni dios, anin ni endi tuka ibbaddang. Yadda etan mapelad ey endi silbin daka ittugun niya itek daka ebbiga, hanniman ida dama etan kamenghel ni keibbellinan ni i-innep. Et humman hu, henidda nangketalak ni kalneroh hu tutu-uk. Henidda kalneroh ni endi kamampattul ni hi-gada et endi mengippaptek niya endi mengippenggulun lawwan da et daka pemegga hawahawang.

<sup>3</sup> Kan APU DIOS ey "Hi-gak e AP-APU e Kabaelan tun emin ey nemahhig hu bunget kuddan tutu-ud edum ni bebley ni impan-ap-apuddan tutu-uk. Et humman hu, kastiguen kudda. Ippaptek kudda tutu-uk ni ijudah et pambalin kuddan heni nalet ni kebayyun mekiggubbat. <sup>4</sup> Melpullin hi-gada hu aap-apu, yadda mengippappangulu niyadda apapun sindalu. <sup>5</sup> Mambabaddang idalli huyyan tutu-uk et makigubat ida et apputen da buhul da et pan-igsin daddan henidda pitek. Tep hi-gak e AP-APU ey baddangak idalli. Anin idan nampangkebayyun buhul da et apputen daddalli.

<sup>6</sup> Hi-gak hu mengihwang niya mengidwat ni elet idan tutu-uk ni ijudah niyadda ilrael. Tep hehmeken kudda et ienamut kuddad bebley da e heni eggak ida iwalleng nunman. Ippahding ku huuya tep hi-gak hu AP-APU e Dios da niya dedngelek ali dasar da. <sup>7</sup> Mambalin idallin henin nangka-let ni sindalu hu helag Israel. Niya nemahhig ali anla da et heniddallin lalakkin nebubbutteng. Ang-angen idallin u-ungnga da huyyan nengapputan da et um-amleng idalli damad impahding ku e AP-APU.

<sup>8</sup> Eyyagak idalli tutu-uk et amungen kudda tep hi-gak ali mengihwang ni hi-gada. Medakkel idallin peteg et heni mewan lan kedakkel dan nunman. <sup>9</sup> Anin ni inwahit kuddad kebebbley et nemnemen da-ak ali metlaing ni hi-gadad nangekilawwan dan bebley. Meihwang idalli, anin idan u-ungnga da et umenamut idallin emin eyad bebley dad Israel. <sup>10</sup> Nak idalli pan-ewwiten di Egypt niyad Assyria et ienamut kudda. Medakkel idalli et penuen da bebley dad Gilead niyad Lebanon. Mepnuddalli et endilli pambebleyan ni edum da. <sup>11</sup> Melinggep ali pan-agwatan dad baybay di Egypt, tep peinneng kulli dalluyun niya ma-ganak hu dalinat ni Wangwang e Nile. Endiek ali hu kapampahhiyyain Assyria, niya mepappeg ali pan-ap-apuan ni Egypt. <sup>12</sup> Pambalin kullin et-eteng hu kabaelan idan tutu-uk niya hi-gak ali deyyawen da niya u-unnuden da. Hi-gak e AP-APU hu nanghel idan nunya!"

## 11

*Ya keapputan idan nengipelilligat idan ilrael*

<sup>1</sup> Ibeghul yu eheb ni bebley yun iLebanon et humgep hu apuy et malgab ida keyew yun sedar di mumuyyung yu. <sup>2</sup> Pannanangih kayu niya lemyung kayun keyew ni belbel niya oak di Bashan tep nangketu-lidda hu keta-ta-geyyan niya kekakkayyaggudan ni keyew e sedar. Em, nangih kayu tep daka panlengaha keyew ni sedar di mumuyyung.

<sup>3</sup> Dengel yu ngugngug idan kamampattul, tep nebahbah hu kayyaggud ni pattullan da. Dengel yu hu layon e ida kaum-enelmem, tep nebahbah law hu mahdel ni muying di gilig ni Wangwang e Jordan ni daka pantellui.

<sup>4</sup> Immehel AP-APU e Dios ku ey kantun hi-gak ey "Mu ipattul ida kalneroh ni petebban mekleng. <sup>5</sup> Kapangkelengaddan nengatang ni hi-gada ey eleg ida mekastigu. Kan idan nengitang ni hi-gaday 'Medeyyaw hi APU DIOS, tep kimmedangyannak!' Anin idan kamampattul ni hi-gada e eleg dadda hehmeka kalneroh da.

<sup>6</sup> Henin nunman kameippenahding idan tutu-uk, tep eleggak ida dama law hehmeka. I-abulut ku et wada hakkeyey binuhul tu dinagsi tu et mampatey ida. Niya i-abulut ku e man-ap-apun hi-gada hu lawah nemnem tun ap-apu ma-lat pambalin da hu bebley ni eleg mebebley. Pemeggak ali i-ineng et eleg ida meihwang.”

<sup>7</sup> Et ippattul kudda kalneroh ni neappil ni petebban mekleng. Humman ida etan nepalpaligat. Entanni et alen ku hu dewwan hulkud kun nginedanak ni ‘Binabbal’ etan hakeyey ‘Keikkahhakeyan’ hu meikkadwa. <sup>8</sup> Entanni ey ingkal kudda hu tellun lawah nemnem tun kamampattul nunman ni hambulan. Entanni mewan ey da-ak kabellawaddan kalneroh ni nakka ippattul niya impeinglay kudda dama. <sup>9</sup> Et kangkun hi-gaday “Beken law ni hi-gak hu mengippattul ni hi-gayu. Netey kayu ey netey kayu! Yadda etan metdaan ey pan-in-eekkan kayu.”

<sup>10</sup> Inlak etan hulkud kun nginadnak ni ‘Binabbal’ et hepungek. Ya keibbellinan tu huuya ey meendi law hu nekitbalan kuddan tutu-ud kebebbbley. <sup>11</sup> Humman ni aggew hu nepappegan ni nekitbalan kun hi-gada. Da-ak kaang-ang-angaddan kaumgatang niya kamanggettang ni kalneroh ey inamta da e ya keibbellinan tu etan nakka pehpending ey humman hu pinhed APU DIOS ni peamtan hi-gada. <sup>12</sup> Et kangkun hi-gaday “Hedin pinhed yu, ey idwat yu sinangdan ku. Anin ni ngenamung hu kanyun penangdan yun hi-gak. Nem hedin eleg yu pinhed ni iddawat, man anin ditan ew katteg.” Ey indawat da hu telumpulun palatah ni silber ni tangdan ku. \*

<sup>13</sup> Entanni kan APU DIOS ni hi-gak ey “Mu iha-ad huttan ni pihhuh di daka pengihhadin pihhuh di Tempol.” Et nak iha-ad etan pihhuh diman. <sup>14</sup> Himpung ku mewan hu meikkadwan hulkud ni nginedanak ni ‘Keikkahhakeyan.’ Ya keibbellinan tu ey endi law hu kayyaggud ni pan-uunnudan idan ijudah niyadda ilrael.

<sup>15</sup> Entanni ey kan mewan APU DIOS ni hi-gak ey “Lakkay mewan et kamampattul. Nem yan nunya ey u-ukkul mu hu kapehding ni kamampattul ni endi nemnem tu. <sup>16</sup> Tep i-abulut kullin mewedda hu hakey ni heni kamampattul eyad bebley ni eleg tun hekey ippapteke tuka ippattul. Eleg tullu hengngudan an hemmakan ida netalak, anin idan pakeimpah. Niya eleg tullu eggahi liput da niya eleg tuddalli ippattul di kad-an ni dakel kenden da. Nem pangkeklengen tuddalli kumedek et kanen tudda hu mangkateban tuka ippattul niya panlephuken tu kukub da.

<sup>17</sup> Nanna-ud ni mekastigulli huuyan endi nemnem tun kamampattul e tuka hi-yana tuka ippattul. Lipputan alin ispadah hu wannan ni ngamay tu et ya wannan ni matetu. Et endilli silbin nunman ni ngamay tu niya mekullap humman ni wannan ni matetu.”

## 12

### *Ya keihwangan alin Jerusalem*

<sup>1</sup> Hi APU DIOS e nengibiklag ni kabunyan niya nanletun puyek niya nengidwat ni biyag ni tuu ey heninnuy inhel tun meippanggep ni Israel:

<sup>2</sup> Pambalin ku hu Jerusalem ni heni kaumbuteng ni meinum et butengen tudda tutu-ud nanlinikweh ni bebley ma-lat palaw da sindalu da et likwehen da Jerusalem niyadda edum ni bebley di Judah. <sup>3</sup> Yan nunman alin aggew ey pambalin ku mewan Jerusalem ni heni makabbel-at ni batu et emin hu mengipattan menglid ey melipputan ida.

<sup>4</sup> Yan nunman alin aggew ey ippapteke kudda ijudah. Nem kullapen ku niya petekkut kulli kebayyuddan buhul da niya tellakek hu nemnem idan nampantakkay. <sup>5</sup> Et kan idallin aap-apud Judah di nemnem day ‘Naka-let ida tutu-ud Jerusalem tep hi APU DIOS e Kabaalan tun emin hu Dios da.’

<sup>6</sup> Yan nunman alin aggew ey pambalin kudda hu aap-apud Judah ni heni apuy di muyung niya heni apuy di payey ni nganganih ni meenni pagey et bahbahen tu hu nanlinikweh ni kebebbbley, nem hedin ya Jerusalem ey mannananeng ni melinggep.

<sup>7</sup> Memengngulun pengapput kudda ijudah et beken ni e-etteng hu dayaw idan tutu-ud Jerusalem niyadda helag David e patul nem yadda edum ni tutu-ud Judah. <sup>8</sup> Yan nunman alin aggew ey ippapteke kudda tutu-ud Jerusalem et yalli etan nekakkapuy ni hi-gada ey mambalin idallin naka-ka-let e heni lan David e patul nunman. Yadda helag David hu mampatul ni hi-gada e heni hi-gak mismuh winu ya anghel ku hu pehding dan mengippengngulun edum da. <sup>9</sup> Yan nunman ali pemahbahak idan emin ni tutu-ud kebebbbley ni mengubbat ni Jerusalem.

<sup>10</sup> Weddaek aliddan helag David niyadda tutu-ud Jerusalem hu neminshed dan mandasal niya puhun mahmek. Et yallin penang-angan dan hi-gak e hinudpak dan nunman ni pahul \* ey nemahhig alin peteg hu lemyung da e heniddallin a-ammed ni

\* 11:12 11:12-13 Matthew 27:9-10 \* 12:10 12:10 John 19:37



kaumlemyung tep netey hu binugtung ni u-ungnga tu, niya heniddallin a-ammed ni netey hu pengulwan ni u-ungnga tun laki. <sup>11</sup> Yan nunman alin aggew ey nemahhig nangih idan tutu-ud Jerusalem, heni lan nangih idan bimmebley di Rimmon e nedeklan ni bebley di Megiddo. <sup>12-14</sup> Emin ali ilsrail ey nemahhig ngugngug da niya lemyung da: Yadda pamilyah ni helag David, hi Nathan, hi Levi, hi Simei niyaddan emin hu edum ni pamilyah. Wada hakkey alin pamilyah ey pehding da hu elaw ni daka pengippeang-angin lemyung da e meappil ida lalakki niyadda bibi-i.

## 13

<sup>1</sup> Immehel mewan hi APU DIOS e Kabaelan tun emin ey kantuy "Yan nunman alin aggew ey mewedda hu hebwak ni heni pengullahan idan helag David niyadda bimmebley di Jerusalem ni liwat da.

<sup>2</sup> Yallin kedettengan nunman ni aggew ey e-kalek di Jerusalem emin hu dios ni kinapyan tuu et anin ali law ni ngadan idan nunman ni dios et meliwwan. E-kalek idalli dama hu beken ni makulug ni prophet, anin idan lawah ni ispirituh ni kamengidwat ni kabaelan da. <sup>3</sup> Hedin wada hu tuun mengippillit ni mambalin ni beken ni makulug ni prophet et ippahding tu etan ngunu tu, ey mahapul ni e-helen nan ametun inetun hi-gatu e kanday 'Mahapul ni mettey ka, tep itek hu in-inhel mu ey kammuy nalpun APU DIOS.' Et tetwiken nan inetun ametu et matey.

<sup>4</sup> Yallin nunman ni aggew ey umbaing ida hu beken ni makulug ni prophet. Eleg da ippahhiya hu ini-innep da niya eleg ida mambalwasin henin balwasiddan makulug ni prophet ma-lat isiked da law ni mene-ul ni tutu-u. <sup>5</sup> E-helen dalli law makulug e kanday 'Bekkennak ni prophet. Yad payew ngu nakka panggunnui neipalpu eman ni keu-ungngak.' <sup>6</sup> Niya hedin wada mengibbeggan kantuy 'Kele itten ida piklat mud pagew mu?' Hummangen tullu e kantuy 'Neliputannak ni nunman di baley etan ni hakey ni gayyum ku.' "

*Neliputan etan kamampattul et maiwehit ida etan kalneroh tu*

<sup>7</sup> Kan APU DIOS e Kabaelan tun emin ey "Inah ka e ispadah et tewikem hu nakka pampattul e gayyum ku! Patey mu et maiwehit ida kalneroh ni tuka ippattul et pateyen kudda. \* <sup>8</sup> Mettey idalli hu nehuluk ni kagedwah ni tutu-ud kebebbley. Nem metdaan idalli hu kulang ni kagedwah di bebley. <sup>9</sup> Patnaak idalli huuyan metdaan et henin kapehding ni manmahmah ni silber niya balituk e kaussala apuy. Et lektattuy mandasal idallin hi-gak et humangek dasal da. E-helek alin hi-gada e tutu-uk ida, niya ebbuluten dalli e hi-gak hu AP-APU e Dios da."

## 14

*Ya ellian etan ni man-ap-apu*

<sup>1</sup> Kamangkedettengi law aggew ni penuwetan nan APU DIOS ni hi-gayun tutu-ud Jerusalem. Pan-ellan idallin buhul yu hu kinedangyan yu et genedwaen dad hinangga yu, nem pemegga yulli ang-ang-ang. <sup>2</sup> Yan nunman alin aggew ey emmungen alin APU DIOS idan emin tutu-ud kebebbley et gubaten da bebley yun Jerusalem. Hehgepen dalli bebley yu niya pan-ellan dan emin hu pinhed dan ellan di baballey yu niya pilliten da bibi-in i-ulig. Meillaw ali kagedwah ni bimmebley di edum ni bebley, nem metdaan ali kagedwah.

<sup>3</sup> Hedin negibbuh ali huuyan neipahding ey mebe-al ali hi APU DIOS ni mengubbat idan nunman ni bebley e henin impenahding tun nemenaddangan tun tutu-ud Israel ni nunman. <sup>4</sup> Yan nunman alin aggew ey um-ehngeng di Duntug ni Olibah e wadad appit ni kasimmilin aggew di Jerusalem. Et megedwalli humman ni Duntug meippalpu appit ni kasimmilin aggew ingganah di kakelinnugin aggew et mawedalli hu mahkang ni nedeklan di gawetu. Meglid ali hu gedwan duntug di appit ni north niya meglid hu kagedwad appit ni south. <sup>5</sup> Umbesik kayullid etan di dineklan hu, tep umdateng alid Asel hu pappeg tu, henin binsikan idan aammed yun nanyegyegan tu eman ni nampatulnan Ussiah. Yan nunman ali ellian ni AP-APU e Dios ku e ikkuyug tudda pinili tun tuu tu.

<sup>6</sup> Yan nunman alin aggew ey endilli law ida kakelpuin benang niya endilli law ketel. <sup>7</sup> Nem endilli hileng tep kawwalwal alin ingganah! Ebuhi hi APU DIOS ni nengamtan keippahdingan tu huuya.

<sup>8</sup> Yan nunman alin aggew ey mewedda hu kaum-idwat ni biyag ni danum ni umbewal di Jerusalem et mannananeng alin umeyuh. Eleg metduk, anin ni uggew niyan ahi

\* 13:7 13:7 Matthew 26:31, Mark 14:27

ketelan. Manggedwalli etan danum et mampalaw edum di Netey ni Baybay ey nampalaw edum di Baybay e Mediterranean di appit ni kakelinnugin aggew.

<sup>9</sup> Yallin nunman ni aggew ey hi APU DIOS law hu mampatul di kebebbebley eyad puyek. Hi-gatu deyyawen ni emin ni tuu niya hi-gatun ebuh amta dan Dios da. <sup>10</sup> Mepettuk ali hu bebley e Jerusalem, tep emin ali bebley ni meippalpu Gebah di appit ni north et ingganah di Rimmon di appit ni south ey medeklan idalli. Yalli pappeg ni Jerusalem ey meippalpu Eheb Benjamin ingganah di Dugun Eheb e kad-an eman lan nemangulun eheb, niya meippalpu etan di Eta-gey ni baley ingganah di keppallan idan patul. <sup>11</sup> Mepnulli tutu-un mambbley di Jerusalem niya melinggep ida, tep endi law um-alin memahbah ni bebley da et ingganah.

<sup>12</sup> Wadalli peellin APU DIOS ni degeh idan bebley ni nengubat ni Jerusalem. Humman ni degeh ey nealay kamangkabwel hu laman, ya mata niya dilan hakey ni tuu, anin ni mategu. <sup>13</sup> Pambalin alin APU DIOS ni nemahhig takut da niya metallatallak nemnem da, et endi maptek ni nampapatey ida. <sup>14</sup> Mekiggubbat idalli iJudah et baddangan da Jerusalem et pan-alen da dakel ni kinedangyan ni kebebbebley, henin balituk, yadda silber niyadda nangkengina niya kakkayyaggud ni balwasi.

<sup>15</sup> Anin idallin animal idan buhul da, heniddan kebayyu, yadda kamel niyadda edum ni animal da et mandedgeh idan henin degeh ni tutu-u.

<sup>16</sup> Yaddalli metdaan ni tutu-ud kebebbebley ni nengubat ni Jerusalem ey um-aliddan katootoon ni menaydayaw nan Patul e hi APU DIOS e Kabaelan tun emin niya mekian-anladdan Piyestah ni Kampu. <sup>17</sup> Hedin yaddalli tutu-un eleg meminhed ni um-alid Jerusalem ni menaydayaw nan Patul e hi APU DIOS e Kabaelan tun emin ey endi an me-gah ni udan di bebley da. <sup>18</sup> Hedin daman eleg pinhed idan iEgypt ni meki-emmung ni tsimpuh ni Piyestah ni Kampu ey endi dama um-alin udan di bebley da. Niya peellin nan APU DIOS daman hi-gada hu kastigun henin kastiguddan edum ni bebley ni eleg meki-emmung ni Piyestah ni Kampu. <sup>19</sup> Humman hu kastigun Egypt, anin idan edum ni bebley ni eleg umlaw di Jerusalem ni mekippiyestah ni Piyestah ni Kampu.

<sup>20</sup> Yallin nunman ni aggew ey metuddekan hu neitakyad ni kingking ni kebayyu e heninnuy meittuddek: 'Neieng-eng nan APU DIOS.' Ey yadda bangan wadad Tempol ey heniddallin mahukung ni duyun wadad hinanggan altar e mei-eng-eng ida et mausal ni ebuh di altar. <sup>21</sup> Ya kakulugan tu ey emin ali bangan daka ussalan mene-eng di Jerusalem niyad Judah ey mambalin idallin meussal ni penaydayawan nan APU DIOS e Kabaelan tun emin. Yaddalli tutu-un um-alin man-appit ni animal ey dammutun pengihhe-engan dadda humman ni banga. Yallin nunman ni aggew ey endilli law hu manggettang di Tempol APU DIOS e Kabaelan tun emin.

## Malachi

*Ya meippanggep nunyan liblul nan Malachi*

Hi Malachi ey prophet nan APU DIOS idan helag Israel eman ni pakelappu dad Babilon. Ya Tempol di Jerusalem ni nebahbah nunman ey neiyayyaggud law niya ida law kamanappit meippuun di neitudek di Tugun. (Ang-ang yu hu liblul nan Ezra.)

Nem anin ni nambanggad idad Jerusalem et eleg da pannananeng hu daka pengu-unnudin APU DIOS. Lawah kapehding idan padi niya eleg da daydayawa hi APU DIOS, tep daka i-appit hu animal ni wada dipektoh tu. Ma-nut daka peang-ang-ang e kayyaggud ida, nem ya kakulugan tu ey lawah ida. Eleg da lispituha hi APU DIOS. Nambahul ida dama lakki tep inaddum dadda hu bibi-in beken ni Jews et dayawen da dios ni kinapyan tuu e beken hi APU DIOS. Ya hakey mewan ni daka pehding ey daka hi-yana ahwa da e eleg da pannananeng hu insapatah da eman ni nelahinan da. Ya hakey mewan ni liwat da ey eleg da iddawat nan APU DIOS hu lebbengtun meidwat ni hi-gatun kapulun limmu da.

*Ya neitudek eyad liblul:*

1. Ya impeminhed nan APU DIOS idan tutu-ud Israel niya ya anggeba-ing ni daka pehpehding. (chapters 1:1-2:9)
2. Imbunget nan Malachi ida helag Israel tep ya liwat da niya ngehay dan APU DIOS. (chapter 2:10-17)
3. Impeamtan APU DIOS e anggegannu law hu ellian tun pengastiguan tuddan tutu-u tu. (chapters 3:1-4:6)

*Nakappinhed nan APU DIOS ida tutu-u tu*

<sup>1</sup> Huyya inhel nan APU DIOS nan Malachi ni e-helen tuddan iIsrael.

<sup>2</sup> Kan APU DIOS idan tutu-u tuy "Pininhed dakeyu dedan ni hi-gak." Nem hinumang da et kanday "Inna-num ni nengipeang-ang ni neminhed mun hi-gami?"

Et kan APU DIOS ey "Han-agid Esau nan Jacob, nem ya eman la ammed yun hi Jacob niya hi-gayun helag tu hu pininhed ku. <sup>3</sup> Eleggak pinheden hi Esau niyadda helag tun iEdom. \* Binahbah ku hu nambebleyan dan duduntug et mambalin hu bineltan dan bebley ni nambebleyan idan animal di desert, henin jackal."

<sup>4</sup> Hedin kan idan iEdom e helag Esau ey "Anin ni nangkebahbah hu bebley mi et iyayyaggud mi."

Nem hummangen nan APU DIOS e Kabaelan tun emin et kantuy "Anin ni iyayyaggud da et bahbahek ali damengu. Mandingngel ali bebley dan 'Bebley ni Liwat' niya mendeddanan ali nampambebley diman ni "Tutu-un Kaibubbunget APU DIOS ni ingganah!" <sup>5</sup> Ang-angen idallin iIsrael hu nebahbah nunman ni bebley et kandalliy 'Impeang-ang nan APU DIOS hu et-eteng ni kabaelan tu, anin di edum ni bebley e beken ni ebuh eyad bebley tayun iIsrael.' "

*Ya nengibungetan APU DIOS ida etan ni padin nengiappitan dan endi silbi tun kamei-appit*

<sup>6</sup> Kan APU DIOS e Kabaelan tun emin idan padi ey "Ya u-ungnga ey tuka lispituha ametu. Hanniman dama hu bega-en e tuka lispituha hu kan bega-en ni hi-gatu. Ey hedin hi-gayu, man hi-gak hu ameyu niya apu yu, nem eleg yuwak lispituha. Nginhay yuwak. Nem kanyuy 'Hipa inna-nu min nangngehay ni hi-gam?"

<sup>7</sup> Nginhay yuwak ni nengiappitan yuddan nakka bellawan in-appit yud altar ku. Kan yu mewan ey 'Inna-nu tun eleg mi panlispituhan ni hi-gam?' E-helek ni hi-gayu e eleg yuwak lispituhun, tep ngineh hay hu impahding yun nan-appit ni hi-gak.

<sup>8</sup> Hedin in-appit yu hu nekulap winu kamandedgeh, niya nepi-day ni animal yun hi-gak, kaw ya yuka pannemnem ey beken ni neiha impahding yu? Ipatna yun iddawat hu hanniman ni animal ni gubernor yu et ang-angen tayu hedin man-am-amleng winu hedin umbaddang di hipan mahapul yu! Hi-gak e AP-APU e Kabaelan tun emin hu nanghel nunya.

<sup>9</sup> Imay, pandasal kayu pangngu et mampehemmehemmek kayun hi-gak! Kaw kan yu nem dedngelen dakeyu ey henin nuntan yuka i-appit ni hi-gak? Hi-gak e AP-APU e Kabaelan tun emin hu nanghel idan nunya. <sup>10</sup> Hamban wada hakey ni hi-gayun mengillekbin Tempol et eleg maiappit ida hu endi silbi tun kamei-enappit ey.

\* 1:3 1:3 [2-3a] Romans 9:13

Eggak ebbuluta hu yuka i-appit, tep eggak um-amleng ni hi-gayu. <sup>11</sup> Nem daydayawen idallin катуutuud kebebbley hu ngadan kun kakkabbuhhan ingganah ni mahmahdem. Gihheben da bangbanglun i-appit dan hi-gak niya i-appit da hu nakka ebbulutan kamei-appit. Emin ida ey hi-gak daydayawen da, tep mandingngel ali ngadan kud kebebbley. Hi-gak e AP-APU e Kabaelan tun emin hu nanghel idan nunya. <sup>12</sup> Nem hedin hi-gayu ey eleg yu deyyawa ngadan ku tep yuka i-appit di Tempol ku hu kamepihul ni mekkan. Ya pinhed yun e-helen eyad yuka pengippahdingin nuntan ey endi silbin altar ku. <sup>13</sup> Kan yu mewan ey 'Impeinglay mi huuyan kaippenahding!' ni intangaw yu eleng yun ngehay yun hi-gak. Nemnem yu kedi, yuka i-appit ni hi-gak ida sinekew yu, ya nepi-day niya kamandedgeh ni animal yu. Kaw kan yu nem ebbulutek ida huttan ni i-appit yun hi-gak? Hi-gak e AP-APU e Kabaelan tun emin hu nanghel nunya. <sup>14</sup> Kastiguen kudda hu kamengi-appit ni hi-gak ni endi silbi tun animal e anin ni wada dedan hu kayyaggud ni animal dan inhel dan i-appit dan hi-gak, et beken humman ni daka i-appit. Tep nandingngellak ni patul niya kametekuti ngadan kud kebebbley, nem ay eleg yuwak ni-ngangu lispituha. Hi-gak e AP-APU e Kabaelan tun emin hu nanghel nunya."

*Ya nanliwatan idan padi nan APU DIOS ni ya nengipappangnguluan daddan tutu-un nanliwat*

## 2

<sup>1</sup> Kan APU DIOS e Kabaelan tun emin ey "Dengel yu e papaddi tep hi-gayu penghelak nunya! <sup>2</sup> Hedin eleg yuwak dedngela et eleg yu deyyawa ngadan ku ey iddutan dakeyu. Pambalin ku hu panyaggudan yun idut. Ya kakulugan tu ey inidutak law ida bendisyon yu, tep yuka ngenggehaya tugun ku. <sup>3</sup> Kastiguen kudda helag yu. Mellakmakak hu angah yun lugit idan animal ni yuka i-appit niya peki-ibheng dakeyud ibbengandal idan nunman ni lugit. <sup>4</sup> Et humman ali law pengamtaan yu e hi-gak hu nengimandal nunya ma-lat mangmanglaw hu nekitbalan ku lan ameyun hi Levi. Hi-gak e AP-APU e Kabaelan tun emin hu nanghel nunya.

<sup>5</sup> Ya ninemnem kun nekitbalan kun hi-gatu ey ma-lat idwatan kun kayyaggud niya melinggep ni biyag et lispituhen tuwak niya u-unnuden tuwak. Et makulug ni linispituh tuwak niya inu-unnud tun emin tugun ku. <sup>6</sup> Intuttuddu tuddan tutu-u hu makulug niya neiptek. Eleg man-itek niya meandeng niya melinggep hu nambiyag tu. Impappangngulu tudda tutu-un mengippahding ni kayyaggud niya mengissikked ni manliwwat. <sup>7</sup> Tep humman dedan hu ngunun padi e ittuttuddu tu hu inamta tu niya hi-gatu pengamtaan ni tutu-un pehding da. Hi-gatu mewan hu kapenghelin APU DIOS e Kabaelan tun emin ni pinhed tun peamta.

<sup>8</sup> Nem hi-gayuddan papaddin nunya ey dingkug yu tugun ku et hi-gayu himmulun ni nanliwatan idan tutu-u, tep neiha intenuttuddu yu. Eleg yu u-unnuden hu nekitbalan kun hi-gayu. Hi-gak e AP-APU e Kabaelan tun emin hu nanghel nunya. <sup>9</sup> Et humman hu, yan nunya ey nambalin dakeyun kamepihul di hinanggaddan ilrael, tep eleg yu u-unnuden hu pinhed kun pehding yu, niya eleg man-iinggeh hu yuka pehding idan tutu-uk."

*Eleg pannananeng idan ifudah ni mengu-unnud nan hi APU DIOS*

<sup>10</sup> Kaw beken ni hakey ni ebuh Ame tayu e hi Apu Dios? Niya kaw beken ni hi-gatu hu nanletun hi-gatsun emin? Ey kele tayu kangenghaya hu nekitbalan tun hi-gatsu niya kele tayu kapehding hu lawah di edum tayu?

<sup>11</sup> Yadda tutu-ud Judah ey inwalleng da hu insapatah dan APU DIOS ni pehding da. Impahding da hu lawah di Jerusalem niyad edum ni bebley di Israel. Heni da linugit hu Tempol ni nakappinhed APU DIOS, tep nampekiahwaddad bibi-in kamenaydayaw ni beken ni makulug ni dios. <sup>12</sup> Ya dasal ku ey e-kalen APU DIOS eyad bebley tayud Israel ida tutu-un kamengippahding ni henin nunya ma-lat eleg ida law maiebulut ni man-appit ni hi-gatu e APU DIOS e Kabaelan tun emin.

<sup>13</sup> Ya hakey mewan ni yuka pehding ey nemahhig nangih yu e lelbengen yun lewa yu hu altar nan APU DIOS, tep eleg tu ebbuluta hu yuka i-appit ni hi-gatu. <sup>14</sup> Kanyuy "Hipa na-mu himmulun ni eleg pengebbulutin APU DIOS ni mika i-appit?" Ya himmulun ey hi APU DIOS hu tistigu yu eman ni nansapatahan yun han-ahwan nan-ahwaan yun keu-ungga yu. Nem hi-gam e laki ey dingkug mu insapatah yu, tep eleg mu ihakkey nan ahwan hu neminhed mu.

<sup>15</sup> Lintu dakeyun APU DIOS niya nambalin dakeyun han-ahwan hakey, ma-lat mahlag kayu et maibilang ida u-ungga yud pamilyah tu. Et humman hu, pannananeng yu insapatah yun ahwa yu. <sup>16</sup> Tep kan APU DIOS e Dios idan helag Israel ey "Angebehel

ku hu hi-yan. Eleggak pinhed huuyan lawah ni peteg ni yu pehding ni ahwa yu. Et humman hu, ang-ang yu et pannananeng yu insapatah yun ahwa yu.”

<sup>17</sup> Impeinglay law nan APU DIOS hu ehehel yu. Nem ay kanyuy ‘Hipa impahding mi et dakemi impeinglay nan APU DIOS?’ Ya yuka pengpenghelin pinpinhed tudda tutu-un kamengippenahding ni lawah, tep eleg tudda kastigua. Ey hin-addum mewan ni kanyuy ‘Attu mewan etan Dios ni limpiyuh ey?’

*Ya penuwetan nan APU DIOS ni tutu-u*

### 3

<sup>1</sup> Hinumang APU DIOS e Kabaelan tun emin ey kantuy “Dengel yu eya e-helen ku: Wadalli ittu-dak kun mengiddaddan ni dellanek. \* Et pinhakkey ali ey immalid Tempol tu hu yuka hehhegedan Ap-apu. Hi-gatulli hu ittu-dak kun um-alin mengippeamtan planuh ku.”

<sup>2</sup> Yallin nunman ni aggew ni ellian tu ey endilli hu dammutun meibbillang ni kayyaggud di hinangga tu. Tep henilli matbel ni apuy e tuka lennata gumek ma-lat memamah. Niya henilli tabun e tuka appila lugit. <sup>3</sup> Umyudung alin menuwet idan helag Levi e papaddi ma-lat mantuttuyyudda et iappit da dedan law nan APU DIOS hu lebbengtun mei-appit ni hi-gatu. Yalli pehding tun hi-gada ey henillin kapehding ni apuy ni silber niya balituk ma-lat memamah. <sup>4</sup> Et mengippeamleng ali mewan law nan APU DIOS hu i-appit idan tutu-ud Judah niyad Jerusalem e heni lan nunman.

<sup>5</sup> Kan APU DIOS e Kabaelan tun emin ey “Um-ali-ak alin menuwet ni hi-gayu, et kastiguen kudda maeyak, yadda daka i-ulig hu beken dan ahwa, yadda kaman-ittek ni tistigu, yadda eleg mengidwat ni ustuh ni tangdan ni daka panggunnu, yadda kamengipelliligt ni nebalu niyadda nepu-hig niyadda nalpud edum ni bebley. Anin idan tutu-un endi lipituh dan hi-gak et kastiguen kudda.

*Ya pengidwatan nan hi APU DIOS ni lebbeng tun meidwat ni hi-gatu*

<sup>6</sup> Hi-gak e AP-APU ey eleggak hulluli nemnem ku. Et gumman hu, eleg dakeyu endian emin e helag Jacob, anin ni lebbengtun makabbabhah kayu. <sup>7</sup> Heni kayuddan aammed yu e eleg da u-unnuden tugun ku. Attu kuma et ibangngad yun mengu-unnud ni hi-gak et ipapteke dakeyu mewan ni hi-gakey? Nem kanyuy ‘Inna-nu min mambangngad?’ <sup>8</sup> Kaw dammutun tellamen ni tuu hi Apu Dios? Ya kakulugan tu ey sinelatelam yuwak.

Nem kanyu mewan ey ‘Hipa impahding min nenalam ni hi-gam?’

Sinelatelam yuwak ni eleg yu pengid-idwatan ni lebbeng tun iddawat yun hi-gak e henin kapulun limmu yu niyadda lebbengtun i-appit yun hi-gak. <sup>9</sup> Mekastigu kayun emin ni bimbley tep sinelam yuwak. <sup>10</sup> I-li yun emin hu kapulun limmu yu et eleg kumulang hu kennen eyad Tempol. Hedin pehding yu huuya ey ibbeghul ku hu habhabyen ni kabunyan et pan-ikuyag ku hu dakel ni bendisyon et mahewal di pengihha-adan yu. Patnai yu kedin pehding huuyan inhel ku et ang-angen yu meippahding. <sup>11</sup> Eggak mewan i-abulut ni mebahbah hu ittanem yu, anin idan grapes ma-lat dakel illameh da. <sup>12</sup> Et emin idalli tutu-ud kebebbley ey kanday nebendisyonan kayu tep kayyaggud ali bebley yun pambleyan. Hi-gak e AP-APU e Kabaelan tun emin hu nangel nunya. <sup>13</sup> Dakel hu in-inhel yun lawah ni meippanggep ni hi-gak. Nem kanyuy ‘Hipa mi in-inhel ni lawah ni hi-gam?’

<sup>14</sup> Tam kanyuy ‘Endi silbitu hu mansilbin Apu Dios. Hipa ginun-ud tayun nengu-unnudan tayun intugun tu, niya hipa silbitun nengepeang-angan tayun AP-APU e Kabaelan tun emin ni nantuttuyuan tayud liwat tayu? <sup>15</sup> Ang-ang tayu kedi, tam ida kaman-am-leng hu mangkanghay ni tutu-u. Niya kimmedangan ida anhan law hu lawah daka pehpehding. Eleg da issiked ni mengippahding ni lawah ey eleg kastiguaddan Apu Dios.’”

<sup>16</sup> Entanniy nanhuhummangan ida hu tutu-un kamengu-unnud nan APU DIOS. Dinggel APU DIOS ida inhel da et paitudek tu hu ngadan idan nunman e kamengu-unnud niya kamenaydayaw ni hi-gatu.

<sup>17</sup> Kan APU DIOS e Kabaelan tun emin idan nunyan tutu-uy “Hi-gada hu tutu-uk. Hedin medettangan ali aggew ni gintud ku, man nebalol idallin hi-gak. Hehmekek idallin henin kapenmekin hakey ni aman u-ungnga tun kamakangngu-unnud ni hi-gatu. <sup>18</sup> Yan nunman alin aggew ey ang-angen yu hu nambaklangan idan kayyaggud daka pehpehding niyadda etan lawah daka pehpehding, yadda etan kamansilbin hi-gak niyadda kamengiwwalleng ni hi-gak.”

\* 3:1 3:1 Ang-ang yu hu Matthew 11:10, Mark 1:2 niya Luke 7:27.

## 4

*Ya aggew ni gintud nan APU DIOS ni penuwetan tun tutu-u*

<sup>1</sup> Kan APU DIOS e Kabaelan tun emin ey "Kamangedettengi hu aggew ni kehuwetan ni tutu-u. Megihheb idallin emin hu kamampeta-gey niya lawah daka pehpehding ni tutu-u etan di kaumhinyab ni apuy et heniddalli negiheb ni dagemi e endilli metdaan ni hi-gada.

<sup>2</sup> Nem hedin hi-gayun kamengu-unnud ni hi-gak ey ang-angen yulli kakinyayaggud ku e henilli aggew e bebnangan dakeyu et yumaggud kayulli. Man-an-anla kayullin heniddan impah ni bakan neibukyay di kubkub. <sup>3</sup> Yan nunman alin aggew ey heniddalli dep-ul hu tutu-un lawah daka pehpehding, tep pan-iggasin yuddalli. <sup>4</sup> Mahapul ni nemnemen yu et u-unnuden yudda intuttudduk ni pehding yu niya Tugun kun indawat kun bega-en ku e hi Moses di Duntug e Sinai e humman ida hu u-unnuden yun emin ni helag Israel. <sup>5</sup> Nem dengel yu eya e-helek! Peellik ali ni hi Elijah e prophet et han medatngan etan nemahhig ni angetakkut ni aggew ni gintud nan APU DIOS. <sup>6</sup> Yalli tuttuddu tu hu mengippeyaggud ali law ni pannemnem idan a-ammed ni u-ungnga da niya kayyaggud ali dama law hu pannemnem idan kaungaungan a-ammed da. Tep hedin eleg meippahding huyya ey um-ali-ak et bahbahek hu bebley yu."

## Ya Impaitudek Apu Dios nan Matthew ni Meippanggep Nan Jesus

*Ya tenten ni impan-ammed nan Jesus  
(Luke 3:23-38)*

<sup>1</sup> Heninnuy hu neitudek ni tenten idan impan-ammed nan Jesus Christo e helag nan David e helag daman Abraham.

<sup>2</sup> Wada hi Abraham et man-ungnga hi Sarah e ahwatu et wada hi Isaac e aman nan hi Jacob. Hi Jacob hu aman Judah et yadda etan edum ni agi tu. <sup>3</sup> Nan-ahwad Judah nan Tamar et mawedad Peres nan Serah. Hi Peres hu aman Hesron. Hi Hesron hu aman Ram. <sup>4</sup> Hi Ram hu aman Amminadab. Hi Amminadab hu aman Nahson. Hi Nahson hu aman Salmon. <sup>5</sup> Inahwan Salmon hi Rahab et wada hi Boaz. Inahwan Boaz hi Ruth et wada hi Obed. Hi Obed hu aman Jesse. <sup>6</sup> Hi Jesse hu aman David e patul.

Man-unggad David nan Bathsheba e ahwa lan Uriah ey wada hi Solomon. <sup>7</sup> Hi Solomon hu aman Rehoboam. Hi Rehoboam hu aman Abihah. Hi Abihah hu aman Asa. <sup>8</sup> Hi Asa hu aman Jehoshaphat. Hi Jehoshaphat hu aman Joram. Hi Joram hu aman Ussiah. <sup>9</sup> Hi Ussiah hu aman Jotham. Hi Jotham hu aman Ahas. Hi Ahas hu aman Heseekiah. <sup>10</sup> Hi Heseekiah hu aman Manasseh. Hi Manasseh hu aman Amos. Hi Amos hu aman Josiah. <sup>11</sup> Hi Josiah hu aman Jekoniah et yadda etan edum ni agi tu e neiungngadda eman ni kaweda dad Babilon. Yan nampatulnan nan hi Jekoniah hu nugubatan idan iBabilon ni tutu-ud Israel et apputen dadda, et ilaw daddad Babilon et panhumbut dadda.

<sup>12</sup> Yan negibbuhan ni nanha-adan dad Babilon ey nantanud hi Jekoniah et wada hi Sealtiel e aman Serubbabel. <sup>13</sup> Nantanud hi Serubbabel ey wada hi Abiud e aman Eliakim. Nantanud hi Eliakim ey wada hi Asher e aman Sadok. <sup>14</sup> Nantanud hi Sadok ey wada hi Akim e aman Eliud. <sup>15</sup> Nantanud hi Eliud ey wada hi Eleasar e aman Mattan e aman Jacob. <sup>16</sup> Nantanud hi Jacob ey wada hi Joseph e ahwan Maria. Hi Maria hu inan Jesus e hi Christo.

<sup>17</sup> Meippalpun Abraham ingganah nan David, ey nampinhampulut epat hu nahlagan da. Ey meippalpun David ingganah ni pengilawwan dan hi-gadad Babilon, ey nampinhampulut epat mewan hu nahlagan da. Ey meippalpu eman ni kaweda dad Babilon ingganah ni neiungngaan nan Christo, ey nampinhampulu mewan et epat hu nahlagan da.

*Ya neiungngaan Jesus  
(Luke 2:1-7)*

<sup>18</sup> Henninuy hu elaw ni neiungngaan nan Jesus Christo. Hi Maria ey neitgan nan hi Joseph, nem eleg ida ni man-ahwa ey nambutsug hi Maria gapuh ni kabaelan ni Ispirituh Apu Dios. <sup>19</sup> Eleg amtan Joseph hu elaw ni nambutsugan Maria et kantu na-mu ngu nem initulan da. Hi Joseph ey tuka peka-u-unnudan emin hu olden, \* niya kayyaggud ni tuu, et humman hu, eleg tu pinhed ni mebe-ingan hi Maria. Et ya ninemnem tun pedhing ey eleg tu peam-amta hu eleg tu pengittulluyin hi-gatu. <sup>20</sup> Nem yan tuka nemnemnema huyyan eleg tu pengittulluyi ey entanni ey wada nampeang-ang ni anghel di i-innep tu e kantun hi-gatuy "Joseph e helag David, entan takut mun mengahwan Maria, tep ya u-ungngan imbutsug tu ey nalpun Ispirituh Apu Dios. <sup>21</sup> Lakilli humman ni i-ungnga tu et inggadnan yullin hi Jesus tep hi-gatu menellaknib idan tuu tu di liwat da."

<sup>22</sup> Huyya nekapkapyan inamnuan ni ehel Apu Dios ni impeamta la eman ni prophet ni kantuy <sup>23</sup> "Mambutsug ali biin endi ahwa tu et man-ungngallin laki et inggadnan dallin hi Emmanuel e ya keibbellinan tu, ey wada hi Apu Dios di kad-an tayu."

<sup>24</sup> Inu-unnud Joseph humman ni inhal etan ni anghel Apu Dios et ahwaen tu hi Maria, <sup>25</sup> nem eleg tu iulig ingganah nan-ungnga. Nan-ungnga ey laki et ingadnan Joseph ni hi Jesus.

## 2

*Ya illian idan nenemneman ni tuun nalpud edum ni bebley ni an nenaydayaw nan Jesus*

\* **1:19** 1:19 Ya hakey ni olden da ey anin ni neitgan ebuh hu biin laki, nem ittulan da hu bii, man eleg ida mantulluy.

<sup>1</sup> Yad Bethlehem di Judea hu neitungnaan nan Jesus. Hi Herod hu patul di Judea ni nunman. Entanni ey wadadda immalid Jerusalem ni lakin nalpud appit ni kasimmilin aggew. Humman idan tuu ey amta da elaw ni abig ni bittuwen. <sup>2</sup> Immalidda ey kandy "Attu kad-an etan ni neitungnaan pampatul idallin Jews ey? Inang-ang mi etan bittuwen di appit ni kasimmilin aggew e pengimmatunan ni neitungnaan tu et mukun immali kamin menaydayaw ni hi-gatu."

<sup>3</sup> Dingngel Herod e patul et yadda tuud Jerusalem hu inhel idan nunman ni tuu ey kamemnunnumunnu nemnem da. <sup>4</sup> Et amungen Herod ni emin hu ap-apuddan padi et yadda etan kamantuttuddun Tugun Moses et kantun hi-gaday "Attu inamta yun keitungnaan etan ni pinutuk Apu Dios ni pan-ap-apuddallin Jews ey?" <sup>5</sup> Kandy "Yad Bethlehem di Judea tep intudek lan prophet e kantuy

<sup>6</sup> "Ya bebley di Bethlehem ey endi bilang tud bebley di Judea, nem importanteh humman ni bebley tep yadman hu kelpuan ni ap-apun mengippaptek idan tuuk ni helag Israel."

<sup>7</sup> Et paeyag idan Herod etan tuun nalpud appit ni kasimmilin aggew, et ibega tun hi-gada hedin pigan la hu ustuh ni tsimpuh ni neipeang-angan etan ni bittuwen. E-ebbuh ida e endi edum ni nangngel ni hummangan da. <sup>8</sup> Sinugun tudda et kantuy "Lakkayuy di Bethlehem et yu pakahhiliben etan u-ungnga et hedin hemmakan yu, ey peamta yullin hi-gak ma-lat nak dama dayawen."

<sup>9</sup> Huyya inhel Herod ni hi-gada et ebuhe manglaw idad Bethlehem. Wadaddad dalan ey himmawang etan bittuwen ni inang-ang da lad bebley da. Et humman ni bittuwen nengippangngulun hi-gada. Dinteng tu pettek etan ni u-ungnga ey nansiked diman. <sup>10</sup> Immamleng idan peteg ni nenang-angan da etan ni bittuwen. <sup>11</sup> Dinteng da kad-an etan ni u-ungnga et humgep ida etan di baley ni kad-an da ey inang-ang da etan u-ungnga et hi inetu e hi Maria et ebuhe mandukkun idan menaydayaw etan ni u-ungnga. Inukat dadda balituk, ya insensoh niya mira et idwat dan hi-gatu.

<sup>12</sup> Entanni ey impeamtan Apu Dios di i-innep idan nunman ni tuu e eleg ida mambanggad di kad-an Herod et idlan dad hin-appil ni dalan ni inenamutan da.

#### *Ya binsikan idan han-aammad Egypt*

<sup>13</sup> Limmaw ida etan tuu, ey nan-i-innep mewan hi Joseph ey nampeang-ang hu anghel nan Apu Dios et kantuy "Pandaddan kayu kuma et bumsik kayud Egypt, tep kaan hemmahemmakan Herod eya u-ungnga ma-lat papetey tu. Panha-ad kayudman ingganah penghelan kun dammutun hi-yanen yu humman ni bebley."

<sup>14</sup> Et yan nunman ni hileng ey nandaddan hi Joseph et awiten tudda etan hanina et manglaw idad Egypt. <sup>15</sup> Nanha-ad idadman ingganah netey hi Herod. Huyya nekapkapan inamnuan ni impatudek nan Apu Dios ni prophet tun nunman lan nangkalan tun kantuy "Ineyagan ku u-unggak et hi-yanen tu Egypt."

#### *Ya nengipepateyan Herod idan lalakkin gelang*

<sup>16</sup> Entanni ey neamtaan nan Herod e himmak ida etan ni tuu etan u-ungnga, nem eleg ida mambanggad di kad-an tu ey bimmunget et iolden tu e petteyen daddan emin hu gelang ni lakid Bethlehem niyad bebley di nanlinikweh diman ni dewwa toon da winu kulang ni dewwa, tep inhel ida etan ni tuu e umlaw ni dewwan toon hu nelabah neipalpu eman ni laputun nenang-angan da etan ni bittuwen. <sup>17</sup> Huyya nekapkapan inamnuan ni inhel eman lan prophet e hi Jeremiah ni kantuy

<sup>18</sup> "Wadalli medngel di Ramah ni kaumnanginangih. Kangungngugngugin Rachel ida u-ungnga tun nangkety. Tagan tu nangingangih e eleg mea-alluk tep netey idan emin hu u-ungnga tu." \*

#### *Ya nambanggad di Joseph di Israel ni nalpuan dad Egypt*

<sup>19</sup> Entanni ey netey law hi Herod ey nan-i-innep hi Joseph di Egypt, ey impeang-ang mewan etan anghel nan Apu Dios et kantuy <sup>20</sup> "Bangun ka et awiten mudda eya hanina et mambanggad kayud bebley di Israel, yaggud netey law etan memettyey eyan u-ungnga." <sup>21</sup> Bimmangun hi Joseph et awiten tudda etan hanina et mambanggad idad Israel.

<sup>22</sup> Nem kaumtakut hi Joseph ni manha-ad di Judea tep dingngel tun hi Arkelaus hu neiullul nan hi ametu e hi Herod ni ap-apudman. Et itudun nan Apu Dios ni hi-gatud i-innep tu hu pehding tu et lumaw idad Nazareth di provincia di Galilee. <sup>23</sup> Nanha-ad idadman tep humman inamnuan ni inhel lan prophet e kantuy "Yad Nazareth nalpuan tu."

\* 2:18 2:18 Jeremiah 31:15



## 3

*Ya kaittenuttuddun John e kamemenyag*

*(Mark 1:1-8; Luke 3:1-18; John 1:19-28)*

<sup>1</sup> Yan nunman ni tsimpuh, ey immali hi John e kamemenyag ni an mantuttuddun desert di Judea. <sup>2</sup> Ya intenuttuddu tu ey kantuy "Pantuttuyyu kayun liwat yu tep immali law etan intu-dak Apu Dios ni man-ap-apu." <sup>3</sup> Hi John hu inhel la etan ni prophet e hi Isaiah ni kantuy "Wadalli an mengit-itkuk di desert ni kantuy 'Idaddan yu niya iyayyaggud yu dellanen ni Apu tayu.' " \*

<sup>4</sup> Ya balwasin John ey humman hu inebel ni dutdut ni kamel et ya ballikid tu ey katat. Ya tuka kenna ey dudun et ya putsukan. <sup>5</sup> Immalidda katutuun nalpud Jerusalem, yaddad edum ni bebley di Judea et yaddad nanlinikweh ni bebley di Wangwang e Jordan ni an mandedngel ni tuka ituttuddu. <sup>6</sup> Nan-ehel dan hi-gatu hu liwat da et pambenyagan tudda etan di Wangwang e Jordan.

<sup>7</sup> Immalidda dama dakel ni Pharisee et yadda Sadducee ni an pebenyag ni hi-gatu. Nem yan nenang-angan idan John, ey kantun hi-gaday "Lawah kayun tutu-u e heni kayu tu-wangu uleg! Kaw kanyu nem hedin pebenyag kayu, man eleg dakeyulli kastiguan Apu Dios? <sup>8</sup> Mahapul ni issiked yu hu lawah ni yuka pehpehding et u-unnuden yu hi Apu Dios, et keang-angan tu e makulug ni nantuttuyyu kayun liwat yu. <sup>9</sup> Entan tu ididdinel hu kanyuy yaggud hi Abraham hu nahlagan yu et mukun dammutun ebbuluten dakeyuan Apu Dios. Tep dammutun pambalin tuddan tuu eya batun meihhullul ni hi-gayun u-ungangan Abraham. <sup>10</sup> Kamangkedetteng law hu pengastiguan Apu Dios idan lawah ni tuu et heniddalli etan ni keyew ni lawah tuka illameh e melngeh et maepuyan.

<sup>11</sup> "Immali-ak ni an memenyag ni hi-gayun danum. Huyyan pemenyagan kun hi-gayu hu immatun ni nantuttuyuan yun liwat yu. Nem yalli etan um-alin meihhullul ni hi-gak ey hi-gatu mengidwat ni Ispirituh Apu Dios ni hi-gayu winu ya kekastiguan yud apuy. † Hi-gatu ey eta-ta-gey ni peteg nem hi-gak et nakka umbaing ni tuwak pambega-en. † Yallin ellian tu ey ennappilen tu hu tutu-u, heni etan ni tuun kamenel-ap e tel-apan tu begah et ikulbung tu. Nem ibbeng tu hu degi et magiheh di apuy ni eleg me-me-dep." ‡

*Ya nebenyagan Jesus*

*(Mark 1:9-11; Luke 3:21-22)*

<sup>13</sup> Entanni ey immali hi Jesus ni nalpud Galilee, et lumaw di kad-an John di Wangwang e Jordan ni an mampebenyag ni hi-gatu. <sup>14</sup> Eleg et pinhed nan John ni hi-gatu memenyag nan Jesus et kantuy "Ya lebbeng tu ey hi-gak kumaddan hu benyagan mu, et beken ni hi-gam hu an pebenyag ni hi-gak." <sup>15</sup> Nem kan Jesus ey "Heninnuy elaw tu. Huyya pehding ta ma-lat u-unnuden tan emin hu pinhed Apu Dios." Et abuluten law nan John ni benyagan hi Jesus.

<sup>16</sup> Negibbuh ni nebenyagan hi Jesus et kumeyad di gilig ni wangwang, ey pinhakkeyey heni neibeghul hu kabunyan ey inang-ang tu hu Ispirituh Apu Dios e heni paluma hu ang-ang tun iyalli ey immehan hi-gatu. <sup>17</sup> Entanniy wada immehel di kabunyan ni kantuy "Huyya hu U-ungngak ni nakappinhed kun tuwak kapeamleng ni peteg."

## 4

*Ya nengipatnaan Satanias ni menuttullun nan Jesus ni mengippahding ni lawah*

*(Mark 1:12-13; Luke 4:1-13)*

<sup>1</sup> Entanni ey impangulun Ispirituh Apu Dios hi Jesus di desert ma-lat an haulen Satanias ni manliwwat. <sup>2</sup> Na-pat ni aggew niya na-pat ni labbi hu eleg pengannan Jesus diman et neu-upan peteg. <sup>3</sup> Ey immali hi Satanias di kad-an tu et kantun hi-gatuy "Hedin makulug ni U-ungnga dakan Apu Dios, ey pambalin mu eyadda batun sinapay." <sup>4</sup> Nem hinumang Jesus et kantuy "Beken ni ya kennen ni ebuh hu iddinel ni tuun ketegguan tu, nem mahapul daman iddinel tun emin hu ehel Apu Dios tep hi-gatu hu nangged ni biyag ni tuu."

<sup>5</sup> Entanni et ikuyug Satanias hi Jesus di Jerusalem et papetuk tud etan di keta-ta-geyyan ni bubung ni Tempol <sup>6</sup> et kantun hi-gatuy "Hedin makulug ni U-ungnga dakan Apu Dios, man dep-ah ka yaggud impatudek tu e kantuy

\* 3:3 3:3 Ya pinhed nunyan e-helen ey pandaddan kayu e iyayyaggud yu elaw yu tep um-ali Apu tayu. † 3:11 3:11 Ya keibbellinan tun huyya, ey hi Jesus hu kamengidwat ni Ispirituh Apu Dios idan kamengullug ni hi-gatu. Ya keibbellinan ni 'apuy' ey mekastigudda hu eleg mengullug ni hi-gatu. ‡ 3:12 3:12 Humman ni kan John ni um-alilli, ey hi Christo, tep um-alin mengappil idan tuun Apu Dios etan idad lawah ni tuu. Humman idan tuun lawah ey mekastiguddad apuy ni eleg me-me-dep.

'Be-alen kudda anghel et ipaptek daka ma-lat anin ni man-e-gah ka et hikmaten daka ma-lat eleg maliputan helim.' " \*

<sup>7</sup> Hinumang Jesus et kantuy "Nem neitudek damad ehel nan Apu Dios e kantuy 'Entan tu patnai hi Apu Dios e Dios yu.' "

<sup>8</sup> Et ilaw mewan Satanas hi Jesus di eta-gey ni peteg ni duntug et tu peang-ang ni emin hu kapan-ap-apuin tuud puyek et yadda emin hu kayyagud ni wadadman. <sup>9</sup> Et kantun hi-gatuy "Iddawat kun hi-gam ni emin huuya hedini mandukkun kan menaydayaw ni hi-gak." <sup>10</sup> Nem kan Jesus ni hi-gatuy "Satanas, a-allaw ka, tep neitudek di ehel Apu Dios e kantuy 'Ebhuh hi Apu Dios ni dayaw yu niya hi-gatun ebuh hu u-unnud yu.' " <sup>11</sup> Et hi-yanen Satanas hi Jesus ey immalidda anghel Apu Dios ni an memaddang ni hi-gatu.

*Yad Galilee hu nemangulun nantuttudduan Jesus*

*(Mark 1:14-15; Luke 4:14-15)*

<sup>12</sup> Yan nanggelan Jesus e neikelabut hi John, ey hini-yan tu Judea et lumaw di provincia di Galilee. <sup>13</sup> Beken di Nazareth ni nanha-adan tu law, nem yad Capernaum e hakey ni bebley ni neihnup di Baybay e Galilee di nambebleyan idan helag Sebulun niyadda helag Naptali. <sup>14</sup> Huuya inamnuan ni ehel nan Apu Dios ni intudek lan prophet e hi Isaiah e kantuy

<sup>15</sup> "Yadda tuud Sebulun et yad Naptali di kad-an ni baybay e li-bahan hu Wangwang e Jordan niyad Galilee e nambebleyan idan dakel ni Gentiles <sup>16</sup> ey henidda la ni wadad engeenget tep eleg da amta hu kayyagud ni elaw ni u-unnuden da. Nem yan nunya ey henidda law wadad kawwalwal tep wadad kad-an da etan kamengippeamtan kayyagud ni elaw. Yadda dama etan tuun henidda wada la nid engeenget tep endi biyag dan endi pappeg tu ey henidda law nedilgan tep wada law biyag dan mannananeng."

<sup>17</sup> Yan nunman nengilapwan Jesus ni mantuttuddu et kantuddan tuu ey "Pantuttuyyu kayun liwat yu tep immali law etan intu-dak Apu Dios ni man-ap-apu."

*Ya nengaygan Jesus ida etan ni epat ni matebukul ni deleg ni disipol tu*

*(Mark 1:16-20; Luke 5:1-11)*

<sup>18</sup> Hakey ni aggew ni nandalnan Jesus di gilig ni Baybay e Galilee, ey inang-ang tudda han-agi e di Simon, e Peter hakey ni ngadan tu, nan hi Andrew. Ida kamenebbukul ni deleg di baybay tep humman daka pambiyagi. <sup>19</sup> Et kan Jesus ni hi-gaday "Pekikkillaw kayun hi-gak et metuttudduan kayun mengewwis ni tuu ma-lat unuden da-ak." <sup>20</sup> Ey pinhakkeyey hini-yan da tabukul da et maikuyug idan Jesus.

<sup>21</sup> Entanni ey imma-allaw di Jesus ey inang-ang tudda dama etan han-agi e di James nan John e u-unggaddan Sebedi. Wadaddad bangka, anin hi ameda, e daka paniddaddan hu tabukul da ey ineyagan Jesus humman idan han-agi, <sup>22</sup> ey pinhakkeyey hini-yan da hi ameda niya bangka da et makilaw idan Jesus.

*Ya nantuttudduan Jesus et ya nampangkalan tun degeh idan tuu*

*(Luke 6:17-19)*

<sup>23</sup> Dillan Jesus idan emin hu kebebbley di Galilee ni an nantuttuddud kesimsimbaan ni meippanggep ni nan-ap-apuan Apu Dios. Ey ing-ingkal tudda nambakbaklang ni degeh idan tuu et yumagud ida. <sup>24</sup> Nan-amtad kebebbley di Syria ida humman ni impahding tu et pan-i-liddan tutu-u hu kamampandeghe ni nambakbaklang ni degeh. Ing-ingkal tudda dimonyoh ni kameihhuklung ni tuu niya impeyagud tudda kamangkeldah niya nedahuy. <sup>25</sup> Ey dakel ida tuun kamengu-unnud ni hi-gatul Galilee, yad Decapolis, yad Jerusalem et yadda nambebley di ba-hil etan ni Wangwang e Jordan.

## 5

*Ya panyaggudan idan kamengullug*

*(Luke 6:20-23)*

<sup>1</sup> Yan nenang-angan Jesus idan dakel ni tuun kamangkeemmung ey nanteyed di duntug et an manyuyyuddung ey inunud idan disipol tu et mahelikub idad kad-an tu.

<sup>2</sup> Inlaputun mantuttuddun hi-gada et kantuy

<sup>3</sup> "Man-am-amleng ida etan tuun kamengebbulut e eleg da han-ipahding hu kayyagud hedini eleg ida baddangin Apu Dios, tep hi-gada hu meilla-kam di kapan-ap-apuin Apu Dios.

<sup>4</sup> Man-am-amleng ida etan tuun kaumlemyung, tep a-alluken idallin Apu Dios.

\* 4:6 Psalm 91:11-12

- <sup>5</sup> Man-am-amleng ida etan tuun daka pebah anel da, tep iddawwat alin Apu Dios ni hi-gadan emin hu panyaggudan da di baluh ni puyek ni pan-ap-apuan tu.
- <sup>6</sup> Man-am-amleng ida etan tuun daka ilillingisin mengippahding ni pinhed Apu Dios niya daka ilillingisin ang-angen hu amnuan tu humman, tep ang-angen dalli.
- <sup>7</sup> Man-am-amleng ida etan tuun daka hehmeka edum da, tep hehmeken ida daman Apu Dios.
- <sup>8</sup> Man-am-amleng ida etan tuun kamengikkahakey ni nemnem dan mengippahding ni pinhed Apu Dios, tep hi-gadalli menang-ang ni hi-gatu.
- <sup>9</sup> Man-am-amleng ida etan tuun kamengippaptek ni linggepan ni edum dan tuu, tep ibbilang idallin Apu Dios ni u-ungnga tu.
- <sup>10</sup> Man-am-amleng ida etan tuun daka panlelehani kapehding ni edum dan tuun hi-gada tep ya daka pengippenahdingin pinhed Apu Dios, tep meippaptek idad nan-ap-apuan tu.
- <sup>11</sup> Hi-gayuddan kapippihulan tuu, daka pelilligasi niya daka iddedded-ekin bahul ni endi gaputu tep ya yuka pengu-unnudin hi-gak ey kayyaggud ali gahat yu. <sup>12</sup> Pan-am-amleng kayu ey panggaya kayu, tep iddawtan dakeyullin Apu Dios ni panyaggudan yud kabunyan. Nemnem yu e ya kameippenahding ni hi-gayu ey neipenahding ida daman prophets ni nunman.

*Ya kamengullug ey heni dilag niya ahin  
(Mark 9:50; Luke 14:34-35)*

<sup>13</sup> Hi-gayun kamengullug ni hi-gak ey kayu kamei-ellig di ahin, tep ya ahin ey humman hu kamengippeyaggud ni tamtam ni kennen. Hanniman daman hi-gayu e hi-gayu kamengippeyaggud ni elaw idan tuu eyad puyek. Nem hedin na-kal hu tamtam ni ahin, man endi silbitu tep eleg mabalin ni pebanggad hu tamtam tu. Et humman hu, ya law pehding ey i-ibbeng et panggassigassinan ni tuu.

<sup>14</sup> Kayu kamei-ellig di dilag e tuka bebnangi engeenget tep hi-gayu hu kapengi-ang-angan tuun kayyaggud ni elaw. Ya kayyaggud ni elaw yu ey kamei-ellig etan ni neimuttat ni bebley di ta-pew ni duntug e kameka-ang-ang. <sup>15</sup> Endi tuun tu integan hu kengek et tu itlu, nem integan tu et iha-dang tud ha-danggan tu ma-lat mabnangan ni emin hu wadad bawang. <sup>16</sup> Henin hi-gayu e peang-ang yuddan tuu hu kayyaggud ni elaw yu e kamei-ellig ni dilag ma-lat ang-angen da hu kayyaggud ni yuka pehpehding et dayawen da hi Ametayu e hi Apu Dios di kabunyan.

*Ya etan Tugun ni dinwat Moses nan hi Apu Dios*

<sup>17</sup> Entan tu nemnem e immali-ak di puyek ni an mengkal ni intugun Moses la et yadda eman prophets lan nunman. Eggak umlin mengkal ni intugutugun dan nunman, nem immali-ak ni an mengittuttuddun ustuh ni keibbellinan tu. <sup>18</sup> Dengel yuwak tep e-helek ni hi-gayu e ingganah ni nanengtu eya puyek et ya kabunyan, ey endin hekey hu an mekal idan nunman ni Tugun Moses anin hakey ni ehel winu ku-lih ingganah um-amnun emin huyyan tugun. <sup>19</sup> Et mukun ya etan tuun eleg tu u-unnuda hu neikamkampun tugun et tuttudduan tudda dama etan edum tun tuun eleg mengu-unnud ni nunman ni tugun ey hi-gatulli hu kebababahan hu saad tud kabunyan. Nem ya tuun kamengu-unnud ni nunman ni tugun et ittuttuddu tud edum tun tuu, ey eta-gey ali saad tud kabunyan. <sup>20</sup> Et humman hu, nakka e-helan hi-gayu e hedin beken ni nehahhammad hu yuka pengu-unnud nan Apu Dios nem ya kapengu-unnud idan kamantuttuddun nunman e Tugun et yadda Pharisee, ey eleg mabalin ni mekihha-ad kayud nan-ap-apuan Apu Dios.

*Ya kapambalinin bunget*

<sup>21</sup> Inamta yu hu neitugun idan tuun nunman ni kantun: Entan patey. Tep hedin umpatey ka ey mahapul ni mekastigu ka. <sup>22</sup> Nem e-helen kun hi-gayun nunya e beken law ni ebuh hu kaumpatey ni mekastigu, nem anin ya etan tuun anggebe-hel tu edum tun tuu ey mahapul ni mekastigu. Ya tuun mapihul ni edum tun tuu ey mahapul ni mekastigu, ey ya tuun iddutan tu edum tun tuu ey kastiguen nan Apu Dios di apuy. <sup>23-24</sup> Et humman hu, anin ni wada kayud Tempol ni kaman-appit nan Apu Dios ey ninemnem yun wada bahul yu, ey pambanggad kayu nid kad-an etan ni tuun nambahulan yu et yu hudhuden humman ni nambahulan yu et han kayu umlin mengi-appit ni i-appit yud Tempol.

<sup>25</sup> Hedin wada nengidiklamuh ni hi-gayu, ey pakihummangan kayun hi-gatu ma-lat eleg dakey ilaw di huwet, tep pekullabut dakeyun huwet etan ni guwalyad kallabbutan. <sup>26</sup> E-helen kun hi-gayu e makulug ni hedin meikkellabut kayu, man mahapul ni pakatteklaen yu multa yu, anin ni hakey ni hepeng, ni han kayu neibukyat.

*Ya kapengi-ebbekin ahwa*

<sup>27</sup> Dingngel yu mewan eya tugun ni kantuy 'Entan tu iebek hu ahwa yu.' <sup>28</sup> Nem e-helen kun hi-gayu e anin kaung-ang-angan ebuh ni tuu hu bii, nem wadad nemnem tu e pinhed tun i-ulig et heni tu damengu in-abek hu ahwa tu. <sup>29</sup> Hedin ya wannan ni mateyu hu kaumhulun ni panliwwatan yu, ey heballi ukuit yu et bekahen yu. Tep i-imman hu meukkit hakey ni mata nem ya an pellow Apu Dios ni emin hu annel yud apuy di impiernoh. <sup>30</sup> Hedin ya wannan ni ngamay yu kaumhulun ni panliwwatan yu, ey heballi putul yu. Tep i-imman hu meputtul hu hakey ni ngamay yu nem ya an umlaw ni emin annel yud apuy di impiernoh.

*Ya peni-yanan ni ahwa*

(Matthew 19:9; Mark 10:11-12; Luke 16:18)

<sup>31</sup> Wada mewan neitugun lan nunman e kantuy 'Hedin hi-yanan ni laki hu ahwa tu, ey mahapul ni wada mekapyan papil ni peni-yanan tu et pilmaan tu et idwat tu etan ni biin hi-yanan tu.' <sup>32</sup> Nem e-helen kun hi-gayu e ya lakin meni-yanan ni ahwatun eleg makiulig di edum ni laki ey mambekhul, tep hedin bintanen da humman ni bii ey heni in-abek tu ahwatu. Ey ya lakin memintan nunman ni bii ey heni dama in-abek tu ahwatu, tep nanengtun kaibbilang nan Apu Dios ni han-ahwadda etan bii et ya lakin neni-yanan ni hi-gatu.

*Ya elaw ni kaissapatah*

<sup>33</sup> Dingngel yu mewan eman neitugun nunman ni kantuy 'Entan tu keyat hu yuka issapatah. Mahapul ni peamnu yu hu yuka issapatah nan Apu Dios ni pehding yu.' <sup>34</sup> Nem yan nunya, ey e-helen kun hi-gayu e entan pansapatah yu hedin wada e-helen yu. Entan tu isapatah di kabunyan tep yadman kapan-ap-apuin Apu Dios. <sup>35</sup> Ey entan tu isapatah di puyek tep yadman hu heni kapengiddahayain Apu Dios ni heli tu. Niya entan tu isapatah di Jerusalem tep humman bebley etan ni eta-gey ni Patul. <sup>36</sup> Entan tu ehel hu 'Anin metteyyak' hedin wada issapatah yu, nem idinel yu hi Apu Dios, tep endi kabaelan yun an pambalin ni mablal winu andeket hu anin hakey ni bewek. <sup>37</sup> Hedin wada e-helen yu, ey entan tu isapasapatah niya entan panlangkak yu. Hedin makulug, kaney 'Em.' Nem hedin beken ni makulug, nealay kaney 'Eleg'. Entan tu edumin nalgem ni ehel, tep lawah. Ya linggeman ni ehel ni i-e-dum yud sapatah yu ey kamelpun Satanas.

*Ya meippanggep ni baleh*

(Luke 6:29-30)

<sup>38</sup> Dingngel yu et inamta yu hu tugun ni nunman ni kantuy 'Hedin kinulap ni tuu hakey ni matan edum tun tuu, ey mahapul ni kullapen dama hakey ni mata etan ni nambahul. Hedin ingkal ni tuu hakey ni ngipen ni edum tun tuu, ey mahapul ni e-kalen dama hakey ni ngipen etan ni nambahul.' <sup>39</sup> Nem e-helen kun hi-gayu e yan nunya ey beken ni henin nunman, tep lawah hedin man-imbabaleh kayu. Hedin ampingen dakeyu, ey ihulug yu. <sup>40</sup> Hedin wada mengiddiklamuh ni hi-gayu ma-lat pengal-an dan balwasi yu, edumi yu et idwat yu edum ni balwasi yu. <sup>41</sup> Hedin wada mengippepillit ni hi-gayun mengippepahan ni kalga tu ingganah ni dewwan kilometroh, anin pahan yu ingganah di meikka-pat ni kilometroh. <sup>42</sup> Idwasi yu mangkekdew ni hi-gayu, ey pabenehi yudda umbaneh ni hi-gayu.

*Ya kamengullug ey mahapul ni pinheden tu hu buhul tu*

(Luke 6:27-28, 32-36)

<sup>43</sup> Dingngel yu mewan etan tugun ni nunman ni kantuy 'Mahapul ni pinheden yudda edum yu, nem anggebe-hel yudda buhul yu.' <sup>44</sup> Nem yan nunya ey e-helen kun hi-gayu e mahapul ni pinheden yudda buhul yu niya iddasalan yudda tuun kamengippeliligat ni hi-gayu <sup>45</sup> ma-lat peang-ang yu hu henin elaw nan Apu Dios e Ametayud kabunyan. Tep hi Apu Dios ey wineda tu hu petang ma-lat maptangan ni emin hu tuu, anin ni kayyagud elaw da winu lawah. Tuka peelli hu udan ni penennum ni emin ni tuu anin ni limpiyuh nemnem da winu beken ni limpiyuh. <sup>46</sup> Hedin ebuh ida etan tuun neminhed ni hi-gayun pinheden yu, man eleg dakeyu tetbalan Apu Dios tep anin yadda etan nepihul ni tuun kaman-emmung ni buwis et daka ippahding hanniman. <sup>47</sup> Hedin ebuh ida etan gayyum yun peki-ungbal yu, ey heni kayu damengu etan idan eleg mengullug nan Apu Dios tep hanniman daka pehding. <sup>48</sup> Mahapul ni kayyagud ni peteg hu elaw yu, henin kakinayyagud Ameyu e hi Apu Dios."

**6**

*Ya pemaddangan ni edum ni tuu*

<sup>1</sup> “Helipat-i yu ma-lat beken ni ya penettebalan ni tuun hi-gayu hu pengippahdingan yun kayyaggud. Tep hedin huyya pengippahdingan yun kayyaggud, ey endilli panyaggudan yun iddawat Ametayu e hi Apu Dios di kabunyan.

<sup>2</sup> Et humman hu, hedin wada iddawat yuddan nangkewetwet, ey beken ni an peang-ang-ang di kedaklan ni tuu ma-lat tettebalan dakeyu e henin kapehding idan kapetpetbal ni tuud simbaan niyad keltad. Daka ippahding huyya tep ebuh ketbalan dan pinhed da. Nemnem yu huyya, tep yadda henin nunyan tuun kapetebbatebbal, ey endilli an iddawat Apu Dios ni hi-gada. Tep dinwat da law ni emin hu gungunah da di nenettebalan ni tuun hi-gada. <sup>3</sup> Hedin um-idwat kayun pihuh idan nangkewetwet, ey entan tu peamtan edum yu. <sup>4</sup> Tep anin ni eleg yu peamta et amtan Apu Dios et iddawtan dakeyun panyaggudan yu.

*Ya elaw ni neiptek ni pandasal  
(Luke 11:2-4)*

<sup>5</sup> Hedin mandasal kayun Apu Dios, ey entan tu iu-unnud di elaw ida etan ni kahinkukkullugi. Tep hedin mandasal ida, man pinhed dan um-ehngeng di kesimsimbaan et yad mulkaduh ma-lat ang-angen idan tuu. Makulug ni e-helen kun hi-gayu e endilli iddawat Apu Dios ni hi-gada tep ebuh ketettebalan dad tuun daka gangami. <sup>6</sup> Nem hedin ngun mandasal kayu, ey entan tu peam-amta, nem nealay himmegep kayud kuwaltuh yu, ey inlekbi yu et han kayu mandasal nan Ametayu e hi Apu Dios e eleg meang-ang. Endi edum ni an menang-ang ni hanniman ni pehding yu, nem ebuh hi Ametayun hi Apu Dios et iddawat tu hu panyaggudan yu.

<sup>7</sup> Hedin mewan mandasal kayu, entan tu ipenidwan e-helen hu endi silbitu, henin kapehding idan tuun eleg mengullug nan Apu Dios. Kanda na-mu nem peamnun Apu Dios hu dasal da tep andukkey daka pandasal. <sup>8</sup> Entan tu iu-unnud di elaw da, tep hi Ama ey inamta tu ngu dedan hu mahapul yu et han yu ibega. <sup>9</sup> Heninnuy pandasal yu: ‘Ama Apu Dios di kabunyan, pinhed min medeyyaw ka <sup>10</sup> niya pinhed min hi-gam hu man-ap-apu. Emin hu pinhed mun meippahding di puyek ni henin kamekapkapyad kabunyan ey pinhed min meippahding law. <sup>11</sup> Idwat mu anhan hu mahapul min kewa-wa-wa. <sup>12</sup> Ey pesinsahim anhan hu liwat mi, henin pemessinsahan min nambahulan ni edum ni tuun hi-gami. <sup>13</sup> Ipapte dakemi ma-lat eleg kami madinin manliwwat. Ey baddangi dakemi ma-lat eleg dakemi haulan nan Satanas ni mengippahding ni lawah.’ ”

<sup>14</sup> Immehel mewan hi Jesus ey kantuy “Hedin liwwanen yu hu bahul ni tuun nambahul ni hi-gayu, ey liwwanen daman Apu Dios di kabunyan hu liwat yu. <sup>15</sup> Hedin eleg yu liwwana hu bahul etan ni nambahul ni hi-gayu, ey eleg dama liwwanan Apu Dios hu liwat yu.

*Ya neiptek ni elaw ni tepel*

<sup>16</sup> Hedin ittetpelan yu hu pandasalan yun Apu Dios, ey entan tu peang-ang-ang di angha yu e kayu kamantetepel henin kapehpehding idan kapetebbatebbal. Tep hedin mantetpel ida, ey daka peang-ang-ang di angha dad katuuuu e wada intepelan da. Nem e-helen kun hi-gayu e negibbuh ni sinettebal idan tuu, et endilli law an iddawat Apu Dios ni hi-gada. <sup>17</sup> Nem hedin mantetpel kayu ngu, da-lupi yu angha yu niya hagu yu bewek yu, <sup>18</sup> ma-lat eleg meamta e wada intepelan yu. Tep anin ni endi mengamta, et amtan Ametayun hi Apu Dios e eleg meang-ang et iddawtan dakeyun panyaggudan yu.

*Ya makulug ni kinedangyan ni kamengullug ey wadad kabunyan  
(Luke 12:33-34)*

<sup>19</sup> Beken ni ya penepulan yun dakel ni kinedangyan eyad puyek hu gagangami yu. Tep ya kinedangyan eyad puyek ey dammutun e-puhen ni utut, ya bubuk, niya matekew. Ey meummah winu melessian hu pihuh yu et metellak idallin emin. <sup>20</sup> Nem ya gagangami yu ey ya kinedangyan ni iddawat alin Apu Dios ni hi-gayud kabunyan ni eleg meummah niya eleg metellak. <sup>21</sup> Tep hedin attu kad-an ni kinedangyan ni tuu, ey yadman dama kad-an ni nemnem tu.

*Ya kapambalinin kayyaggud ni nemnem  
(Luke 11:34-36)*

<sup>22</sup> Ya mata hu kamei-ellig ni kamemnang ni nemnem ni tuu. Et humman hu, hedin nabnangan hu nemnem ni tuu, man kayyaggud dama elaw tu. <sup>23</sup> Nem hedin engeenget hu nemnem ni tuu, man lawah dama hu elaw tu. Et humman hu, anggehemmek ni peteg hu tuun mehullulan hu kayyaggud ni nemnem tun lawah, tep mei-ellig ni immen di engeenget ni peteg.

*Idinel tayu hi Apu Dios ni mengippaptek ni hi-gatsu ma-lat eleg itsu mandanag di hipan mahapul tayu*

*(Luke 16:13; 12:22-31)*

<sup>24</sup> Eleg mabalin ni unnuden ni tuu hu dewwan ap-apu. Tep eleg tu amta hedini hipan hi-gada u-unnuden tu, et pinhedun tu hakey, ey angebe-hel tu hakey. Winu pihhulen tu hakey, ey peka-u-unnuden tu hakey. Henin pengu-unnudan nan Apu Dios e endi inna-nu yun mengu-unnud ni hi-gatu hedini ya kinedangyan hu gagamangan yu.

<sup>25</sup> Et mukun nakka e-helan hi-gayu e beken ni ya kennen niya innumen, niya ibbalwasi hu ikakkaguh yud biyag yu. Nem mahapul ni nemnemen ni tuu hu hipa gaputun wada biyag tu. <sup>26</sup> Nemnem yudda sisit. Eleg ida mantennem niya eleg ida man-enni. Niya endi alang da, nem kapengangan idan Apu Dios. Et nema-ma ngun hi-gayun tuu e e-etteng hu kapengibbillang Apu Dios ni hi-gayu nem yadda sisit. <sup>27</sup> Hakey pay, kaw hedini umkakkaguh kayu, man dammutun meduddukkey hu biyag yu anin ew ngun nekemtang?

<sup>28</sup> Kele kayu kaumkakkaguh ni pengellaan yun ibbalwasi yu? Nemnem yudda kedi hu hakhaklung di halun. Eleg ida manggunu ey eleg ida man-ebbel ni balwasi da. <sup>29</sup> Nem kakkayyagud ang-ang da nem ya ang-ang ni nenginan balwasi lan Solomon e kedangyan ni peteg ni patul. <sup>30</sup> Et humman hu, hedini hanniman kapemapteke Apu Dios idan habung ni wadan nunya, nem meppuyan ni kabuhhan, kaw beken ni nema-ma pemapteke tun hi-gayun tuu? Ey kele eleg kayu medinnel e ippaptek dakey Apu Dios? <sup>31</sup> Entan kakkaguh yu. Ey entan tu ibegabega hu 'Hipa kennen tayu? Hipa innumen tayu, niya hipa ibbalwasi tayu?' <sup>32</sup> Yadda kamengikakkaguh idan nunya ey yadda etan eleg mengullug nan Apu Dios. Nem hedini hi-gayu, man wada hi Ameyu e hi Apu Dios ni nengamtaddan nunyan emin ni mahapul yu. <sup>33</sup> Ya kumaddan hu pehebballi yun nemnemen ey ya keilla-kaman yud nan-ap-apuan Apu Dios niya pengippahdingan yun pinhed tun pehding yu et nanna-ud ni iddawat tun emin hu mahapul yu.

<sup>34</sup> Et humman hu, entan tu nenemnem hu ligat yullin edum ni aggew, ma-lat eleg mangkei-dum di ligat yun nunya. Tep endi damengu silbitun yu pengikakkaguhan ni ligat yullin edum ni aggew.

## 7

*Ya neiptek ni elaw ni pengibbillang ni edum ni tuu*

*(Luke 6:37-38, 41-42)*

<sup>1</sup> Entan tu pihul edum yun tuu et eleg kayu dama mapihul. <sup>2</sup> Tep hedini nemahhig hu pemihhul yun edum yun tuu ey nemahhig dama kepihhulan yu. Ya pengibbillang yun edum yun tuu ey henin nunman dama pengibbillang Apu Dios ni hi-gayu." <sup>3-5</sup> Indingpat nan Jesus di buta hu pengittutduddan tun pihul et kantuy "Eleg mabalin ni yu e-kalen hu butad matan edum yu hedini wada et-eteng ni butad mateyu. Mahapul ni e-kalen yu neibutad mateyun etteteng et han yu ekala butad matan edum yu. Maitek kayun peteg hedini wada butad mateyu ey kanyuy e-kalen yu butad matan edum yu. Pabukul yun e-kalen butad mateyu et han yu ipatnan e-kalen hu butad matan edum yu. \*

<sup>6</sup> Entan tu ittutduddu elaw nan Apu Dios idan manghay ni tuun henidda netagal ni ahhu niya henidda killum, tep eleg da damengu u-unnuda. Ey eleg mabalin ni an mehullulan ni kayyagud hu elaw dan heni elaw ni ahhu winu killum. Pampihhulen da kumedek niya ngi-ngi-ngian dakeyun ebuh.

*Mahapul ni eleg issiked ni mandasadasal*

*(Luke 11:9-13)*

<sup>7</sup> Pandasadasal kayu ma-lat idwat Apu Dios hu pinhed yun ibbagan hi-gatu. Tep ya elaw ni pandasal ey heninnuy: Hedini tagan yu hamak ni sillak yu, ey lektattuy hemmakan yu. Hedini tagan yu tugtug di habyen ni baley, ey ibbeghulan dakeyu. <sup>8</sup> Tep ya tuun mambegga ey meidwatan. Ya tuun menemmak ni pinhed tu ey hemmakan tu. Ya tuun mantugtug di habyen ey meibbeghulan. <sup>9</sup> Ey endi hakey ni tuun ya batu hu tu iddawat, hedini mambegga u-ungga tun sinapay, <sup>10</sup> niya endi tuun ya uleg hu tu iddawat ni u-ungga tu, hedini mambeggan deleg. <sup>11</sup> Hi-gayun tutu-u, ey lawah kayu, nem inamta yun um-idwat ni kayyagud idan u-ungga yu. Et nema-ma ngun Ameyun hi Apu Dios di kabunyan, tep iddawat tullu hu kayyagud ni ibbageyu.

<sup>12</sup> Ya pinhed yun ippahding ni tuun hi-gayu ey humman et dama ipahding yun hi-gada. Huyya keibbellinan ni tugun Moses et ya ittutduddu ida lan prophet ni nunman.

\* **7:3-5** 7:3-5 Ya pinhed tun e-helen huuya ey eleg mabalin ni yu ippaptek hu edum yud nambahulan tun angkepaw hedini eleg yu han-ippaptek ni e-kalen hu nela-med ni bahul yu.

*Ya nelakah niya neligat ni elaw ni u-unnuden*

*(Luke 13:24)*

<sup>13-14</sup> Ya kayyaggud ni elaw ni u-unnuden ma-lat maweda hu biyag ni endi pappeg tu, ey neligat ni peteg, et mukun ekket ida kamengu-unnud. Ya etan elaw ni linggeman ni beken ni kayyaggud ey nelakah ni u-unnuden et mukun dakel ida tuun kamengu-unnud idan nunman. Nem ya pambalanan idan tuun mengu-unnud idan nunman ni linggeman ni elaw ey manhelheltap ali.

*Ya neidingpatan etan ni keyew niya etan lameh tu*

*(Luke 6:43-44)*

<sup>15</sup> Helipat-i yuddalli etan tuun kanday prophet idan Apu Dios tep heni kayyaggud hu daka peang-ang e henidda etan ni kalneroh ni maka-ayup, nem lawah ni peteg hu waday nemnem da e henidda etan ni mabunget ni ahhu tep pinhed dan bahbahen etan kayyaggud ni neitugun ni hi-gayu. <sup>16</sup> Amtaen yuddalli huyyan tuu tep ya pehpending dan lawah. Huyyalli penang-angan yun mangkaitek ida. Inamta yu e ya nangkahbitan ni wakal ey endi da illameh ni grapes. Henin nunman alin hi-gada e eleg da hanggelan mengippahding ni kayyaggud. <sup>17</sup> Heni daman keyew e hedin kakkayyaggud kakyew tu, man kakkayyaggud dama illameh tu. Hedin lawah kakyew tu ey lawah dama illameh tu. <sup>18</sup> Eleg mabalin ni mebussingew illameh ni kayyaggud ni keyew ey eleg mabalin ni kayyaggud hu illameh ni lawah ni keyew. <sup>19</sup> Yadda keyew ni lawah hu daka illameh ey humman ida melngeh et maitungu. <sup>20</sup> Huyya neidingpatan idan kanday prophet ida, nem beken ida kaya. Em, amtaen yulli e maitek ida huyyan tuu tep lawah daka pehpending.

*Yadda etan eleg mengamtan Jesus*

*(Luke 13:25-27)*

<sup>21</sup> Beken ni emin hu tuun kamenghel e hi-gak hu Apu da ey ippaptek Apu Dios, tep ebuhi ida etan kamengipahding ni pinhed Ama Apu Dios di kabunyan ni ippaptek tu. <sup>22</sup> Medettengan ali aggew ni penuwetan Apu Dios ni tuu, et dakel idalli menghel ni kanday 'Apu, inamta dakemin hi-gam, tep hi-gam nengidwat ni kabaelan min nengituttudun ehel Apu Dios ni um-amnulli. Ey ing-ingkal midda dakel ni kameihhuklung ni dimonyoh ey impahding midda dakel ni miracle e kaketngain tuu gapuh ni kabaelan ni indawat mun hi-gami.' <sup>23</sup> Humman hu kandallin hi-gak, nem kangkullin hi-gaday 'Eleg dakeyu amta. Pampenga-allaw kayun lawah hu tuka pehpending!'

*Ya etan dewwan tuun kimmayyan baley*

*(Luke 6:47-49)*

<sup>24</sup> Ya tuun kamengngel ni hi-gak et ipahding tu nakka e-hela ey kamei-ellig etan di tuun nelaing ni nengapyan baley tu, tep imbehwat tud batu. <sup>25</sup> Immali na-let ni pewek niya na-let ni udan et luma-pih dillud wangwang, et datngen tu kad-an etan ni baley, nem eleg metukkad tep neihammad. <sup>26</sup> Ya tuun kamengngel ni hi-gak, nem tuwak kakehinga, ey heni etan ni tuun linglinggem tu kapyan baley tu e impakdag tu tuun ni tukud di palnah. <sup>27</sup> Immali na-let ni pewek niya na-let ni udan, et luma-pih hu dillud wangwang et datngen tu etan di baley ey netukkad et mekababhah."

*Ya kasina-gey ni saad Jesus*

<sup>28</sup> Ginibbuh Jesus ni inhel huyya ey natngadda etan neamung ni tuun elaw ni tuka penuttuddu <sup>29</sup> tep ka-ang-ang e et-eteng kelebengan tun mantuttuddu nem yadda kamantuttuddun Tugun Moses.

## 8

*Ya nangkalan Jesus ni degeh etan ni tuun kamengmengpuh annel tu*

*(Mark 1:40-45; Luke 5:12-16)*

<sup>1</sup> Nandayyullid Jesus etan di duntug ey inunud idan dakel ni tuu. <sup>2</sup> Entanni ey immali etan tuun kamengmengpuh annel tud kad-an Jesus et mandukku di hinangga tu et kantuy "Apu, hedin pinhed mu, ekal mu anhan degeh ku tep amtak e dammutun e-kalen mu."

<sup>3</sup> Kinepan Jesus hu annel nunman ni kamandedgeh et kantuy "Pinhed ku. Na-kal kaya law huttan ni degeh mu." Ey pinhakkeyey na-kal numan hu degeh tu. <sup>4</sup> Et kan Jesus ni hi-gatuy "Entan tu ehehel huyyan impahding kun hi-gam, nem panna-ud kan elaw di kad-an ni padi et mu peang-ang ni hi-gatu hu na-kalan ni degeh mu. Ey ka pan-appit

nan Apu Dios, tep humman hu intugun lan Moses ni nunman ma-lat pengamtaan ni tutu-u e na-kal hu degeh mu.”

*Ya nangkalan Jesus ni degeh etan ni bega-en etan ni sindalu  
(Luke 7:1-10)*

<sup>5</sup> Dimmateng hi Jesus di Capernaum ey wada ap-apun hanggatut ni sindalu, e beken ni Jew. Immalid kad-an Jesus et mampemhemhemmek <sup>6</sup> et kantuy “Apu, wada bega-en kun nedahuy e nemahhig degeh tu et kaumbabaktad.” <sup>7</sup> Kan Jesus ni hi-gatuy “Um-ali-ak et ekalen ku degeh tu.” <sup>8</sup> Nem hinumang etan ni ap-apu et kantuy “Apu, nakka umbaing ni hehgepan mud baley mi. Anin ni muka ehelan ebuh et inamtak e me-kal degeh tu. <sup>9</sup> Inamtak e wada kabaelan ni ehel ni ap-apu, tep impeinghak ni mengu-unnud ni ehel idan apuk, ey anin ni hi-gak et hakeyyak daman ap-apun sindalu. Et hedini kangkun sindaluk ey ‘Lakkay,’ ey kaumlaw. Ey hedini kangkuy ‘Ikay,’ ey kaum-ali. Ey hedini kangkun bega-en ku ey ‘Ipahding mu diyyay,’ ey tuka ippahding.” \*

<sup>10</sup> Dingngel Jesus huyya ey natngan kapengullug nunman ni ap-apu et kantuddan neamung ni kamengu-unnud ey “Makulug eya e-helen kun hi-gayu. Endi ni nak inang-ang ni henin nunya hu tuka pengullug ni hi-gak eyad Israel. <sup>11</sup> Dakel idalli beken ni Jew ni melpud kebebheley eyad puyek ni um-alid kapan-ap-apuin Apu Dios di kabunyan et mekikkan idad Abraham, hi Isaac et hi Jacob. <sup>12</sup> Nem dakel idalli Jews, e hi-gada-et umlaw di kabunyan, nem pellow idallin Apu Dios di engeenget et umnangianghi idalli niya ngellingellidihen dalli hu ngipen da tep nemahhig ligat diman.” <sup>13</sup> Et kan Jesus etan ni ap-apun sindaluy “Anemut ka. Na-kal degeh ni bega-en mu tep muka kulluga e wada kabaelan kun mengkal.” Ey tu-wangun na-kal hu degeh nunman ni bega-en ni nunman ni olas ni nanghelan Jesus.

*Ya nampangkalan Jesus ni degeh idan dakel ni tuu  
(Mark 1:29-34; Luke 4:38-41)*

<sup>14</sup> Limmaw hi Jesus di baley Peter ey inang-ang tun kamandedgeh hi inan ahwan Peter e maetung ni peteg annel tu. <sup>15</sup> Kinepan Jesus ngamay tu et ma-kal atung ni annel tu, et uminah et an bumaddang ni mengippaptek ni mahapul di Jesus.

<sup>16</sup> Kamangkehilleng ey nan-i-li dad kad-an Jesus hu dakel ni tuun nehuklungan ni dimonyoh. Ejuh ehel nan Jesus ey na-kal ida etan dimonyoh ni nangekihuklung. Ing-ingkal tu dama degeh idan emin ni kamampandedgeh. <sup>17</sup> Huyya nekapkapyan inamnuan ni inhel eman lan Isaia e prophet ni kantuy “Hi-gatu nangkal emin ni degeh tayu.”

*Hedin itsu kamengullug nan Jesus, man mahapul ni hi-gatu hu u-unnuden tayu  
(Luke 9:57-62)*

<sup>18</sup> Inang-ang Jesus e dakel ida nehalikub di kad-an tu, et kantuddan disipol tuy “Umlaw itsud demang ni baybay.” <sup>19</sup> Entanni ey immali etan kamantuttuddun tugun Moses di kad-an Jesus et kantun hi-gatuy “Mekillawwak ni hi-gam, anin attu lawwam.”

<sup>20</sup> Kan Jesus ni hi-gatuy “Yadda animal di muyung ey wada daka panha-adi. Yadda sisit ey wada buya da, nem hedini hi-gak e Pengulwan ni emin ni tuu, man endi panha-adan ku.” <sup>21</sup> Wada pay hakey ni tuun pinhed tun mekillaw nan Jesus, nem kantuy “Apu, mambanggaddak nid baley et nak ikulung hi ama.” † <sup>22</sup> Nem kan Jesus ni hi-gatuy “Pakilaw kan hi-gak, ngenamung ida eleg mengullug ni mengikkullung ni edum dan netey.”

*Ya nengipesikdan Jesus ni pewek di baybay  
(Mark 4:35-41; Luke 8:22-25)*

<sup>23</sup> Yan hinggepan Jesus di bangsa, ey nekihgep ida disipol tu. <sup>24</sup> Kamenglaw etan bangsa ey nekekemtang ey pim mewek ni na-let di baybay et kamangkepnu bangkan danum. Neugip hi Jesus, <sup>25</sup> nem limmaw ida etan edum tud kad-an tu et bangunen da. Kanday “Apu, baddang ka tep ay melsing itsu!” <sup>26</sup> Kan Jesus ni hi-gaday “Kele kayu kaumtatakut? Tam eleg kayu medinnel ni hi-gak!” Imminah et pasiked tu etan pewek niya dalluyun ey nesiked ida.

<sup>27</sup> Natngadda hu disipol tu et kanday “Hipa na-mu ingkatuun nunyan tuu? Kele kau-unnudan dibdib et ya dalluyun hu ehel tu?” ‡

\* **8:9** 8:9 Ya pinhed tun e-helen ey hedini han-ipahding nunman ni tuu huyya, ey nema-ma-man Jesus e wada kabaelan tun mengkal ni degeh ni bega-en nunman ni tuu, anin ni ebuh ehel tu. † **8:21** 8:21 Ya aman nunyan tuu ey eleg ni matey. Nem ya keibbellinan ni inhel etan ni tuu ey entanni et ipaptek tu ni hi ametu ingganah mettey.

‡ **8:27** 8:27 [26-27] Psalm 65:7



*Ya nangkalan Jesus ni dimonyoh ni neihuklung etan di dewwan tuu  
(Mark 5:1-20; Luke 8:26-39)*

<sup>28</sup> Yan dintengan di Jesus di ba-hil ni baybay di bebley idan iGadarene, ey hinipngat tudda dewwan lakin nalpud kullungngan. Nehuklungan idan dimonyoh et nemahhig e angetakut ida, et mukun endi hakey ni kamengittuled ni mengidlan di kad-an da. <sup>29</sup> Inang-ang da hi Jesus ey inlet da ehel da e kaday "Hi-gam e U-ungngan Apu Dios, hipa pehding mun hi-gami? Entan dakemi ni anhan kastigu ingganah kedettengan ni aggew ni kehuwetan mi."

<sup>30</sup> Neipapaddih ni nunman ni wadadda dakel ni killum ni kamanhubhub etan di duntug <sup>31</sup> et mampehemhemmek ida etan dimonyoh nan Jesus et kaday "Hedin e-kalen dakemi, palaw dakemidda eman di killum et hi-gada hu mi keihhuklungan."

<sup>32</sup> Kan nan Jesus ni hi-gaday "Lakkayuy." Et lumaw ida et maihuklung idad killum. Ey bimmesik humman idan killum di nansigging ni duntug et yumepah idad baybay et mangkalsing ida. <sup>33</sup> Yadda kamampaptek idan nunman ni killum ey bimmesik idad bebley et da ehlen ni emin hu neipahding etan idan tuun nehuklungan ni dimonyoh.

<sup>34</sup> Et yadda etan tutu-ud bebley ey limmaw idad kad-an Jesus, et mampehemhemmek idan hi-gatu ma-lat hi-yanen tu humman ni bebley da.

## 9

*Ya nangkalan Jesus ni dahuy etan ni tuu  
(Mark 2:1-12; Luke 5:17-26)*

<sup>1</sup> Hi Jesus et yadda disipol tu ey nambangkadda et umenamut idad bebley dad ba-hil etan ni baybay. <sup>2</sup> Entanni ey wada in-alidan tuun nedahuy e kaumbabaktad. Inang-ang Jesus e wada hu daka pengullug, et kantun etan ni nedahuy ey "Agik, entan kadenagim tep pinesinsahan ku liwat mu." <sup>3</sup> Wadadda edum ni kamantutuddun Tugun Moses e kandad nemnem day "Hipa ni-ngangu huuyan tuun tuka la-pahi hi Apu Dios?" <sup>4</sup> Nem inamtan Jesus hu wadad nemnem da et kantuy "Kele hanniman hu yuka pannemnem e lawah? <sup>5</sup> Hipa nelallakkah? Ya kaney 'Nepesinsahan hu liwat mu,' winu 'Inah ka! Alam hu ayyud mu et umenamut ka?' <sup>6</sup> Nem imay et peang-ang kun hi-gayu e hi-gak e Pengulwan emin ni tuu ey wada kelebngak eyad puyek ni memessinsah ni liwat." \* Inhanggan Jesus etan ni nedahuy et kantuy "Inah ka! Alam hu ayyud mu et umenamut ka." <sup>7</sup> Ey imminah tu-wangu etan tuu et lumaw.

<sup>8</sup> Yadda etan tutu-un nenang-ang nunya ey simmakut ida et dayawen da hi Apu Dios, tep indawat tun tuu huuyan kabaelan.

*Ya nengayagan Jesus nan Matthew  
(Mark 2:13-17; Luke 5:27-32)*

<sup>9</sup> Hini-yan Jesus humman ni bebley et kamenglaw di lawwan tu ey inang-ang tu hi Matthew e kaman-emmung ni buwis ni yimmudung di upisinah tu. Kan Jesus ni hi-gatuy "Pakilaw kan hi-gak." Ey pinhakkeyey imminah hi Matthew et makilaw nan Jesus.

<sup>10</sup> Yan kapengngannin Jesus di baley di Matthew, ey immali dakel ni kaman-emmung ni buwis niyadda edum dan neliwtan ni tuu, et makikan idan Jesus et yadda disipol tu. <sup>11</sup> Inang-ang idan edum ni pharisee huuya ey kandaddan disipol tu ey "Kele kamekikkan hu apu yuddan kaman-emmung ni buwis niyadda edum dan neliwtan?" <sup>12-13</sup> Dingngel Jesus hu inhel da et kantuy "Ya kamandedgeh hu kamanheppul ni doktor, beken ida etan ni tuun endi degeh da. Heni daman hi-gak e immali-ak ma-lat peyaggud kudda neliwtan. Eggak ida baddangi tuun kamenghel ni endi liwat da. Nem hedini hi-gayu ngu, man mahapul ni amtaen yu pehding yun umhehnek tep impatudek Apu Dios e kantuy 'Ya hemek yun edum yu hu pinhed ku, beken idan yuka i-appit.'" "

*Ya meippanggep ni tepel  
(Mark 2:18-22; Luke 5:33-39)*

<sup>14</sup> Immalidda disipol John di kad-an Jesus et kandan hi-gatuy "Kele hedini hi-gami et yadda Pharisee, man hin-addum ni kami kamantetpel, nem yadda disipol mu ey endin hekey daka pantetpeli?"

<sup>15</sup> Hinumang Jesus et kantuy "Kaw ida kamantetpel hu gagayyum ni lakin mangkasal? Eleg, tep wada etan gayyum dan lakin manhehngel. Nem hedini wada memetty etan ni nanhenget, ey yan nunman ali law pantetpela idan gayyum tu. Yadda disipol ku ey heni

\* **9:6** 9:6 [5-6] Hedin yadda Jews ey inamta da e hi Apu Dios ni ebuh hu kamengkal ni liwat. Ey inamta da e hi Apu Dios ni ebuh hu kamengkal ni degeh. Et humman hu, yan nengipeyaggudan Jesus etan ni tuun nedahuy ey impeang-ang tu mewan e wada kabaelan tun mengkal ni liwat, henin nan Apu Dios. Huuya nengipeang-angan Jesus ni kinaDios tu.

gayyum ni manhehngtet tep yan nunyan wada-ak di kad-an da ey eleg ida mantetpel, nem hedini endi-ak ali law di kad-an da, ey mantetpel ida tep ya pannemnem dan hi-gak.”

<sup>16</sup> Intuttuddun Jesus hu pengamtaan dan eleg mabalin ni i-e-dum da hu elaw tud elaw dan nebayag et kantuy “Endi tuun tu ittuftup hu baluh ni luput di daan ni balwasi, tep hedini hanniman, ey umkayhen etan baluh ni ittuftup tu et mekyub etan balwasi et mema-man mebi-ki. <sup>17</sup> Hanniman dama e endi tuun tu ihha-ad hu pakekapyan meinum di kimmelhin katat ni ha-addan ni meinum tep eleg meinnat. Et hedini um-atung hu meinum, ey mebeghi etan katat ni ha-addan et umkawah hu meinum. Mukun ya pakekapyan meinum, ey mahapul ni yad pakekapyan katat hu pengihha-adan.”

*Ya nenagwan Jesus etan ni netey ni u-ungngan Jairo*

*(Mark 5:21-43; Luke 8:40-56)*

<sup>18</sup> Kapan-e-helan Jesus huyyaddan edum tu ey immali hakey ni ap-apun Jew. Nandukkun di hinanggan Jesus et kantuy “Pakattay ni u-ungngak ni bii. Ikay anhan et mu kap-en et tumegu.”

<sup>19</sup> Inebulut Jesus et unuden tu etan ap-apu ey neikuyug ida etan disipol tu. <sup>20</sup> Ida kamandaddallan ey wada etan hakey ni biin hampulut dewwan toon hu nelabah ey eleg mesikked hu kuheyaw ni kamelpud annel tu. Hinnup tu hi Jesus di benneggan tu et kap-en tu gilig ni balwasi tu, <sup>21</sup> tep kantud nemnem tuy “Anin ni nakka kap-an ebuh hu gilig ni balwasi tu et me-kal degeh ku.” <sup>22</sup> Nanwingi hi Jesus ey inang-ang tu etan bii et kantuy “Agik, na-kal law huttan ni degeh mu tep ya muka pengullug ni hi-gak.” Ey pinhakkeyey na-kal degeh tu.

<sup>23</sup> Yan dintengan dad baley Jairo e ap-apun Jew, ey inang-ang da e ida kaumlelemyung etan ida tutu-u niya kanengih ida tep netey etan u-ungngan Jairo. <sup>24</sup> Kan Jesus ni hi-gaday “Ehep kayun emin. Eleg matey etan u-ungnga, neugip ni ebuh.” Nem daka ngi-ngii hi Jesus. <sup>25</sup> Immehep ida et humgep hi Jesus di kuwaltuh etan ni biin u-ungngan kandan netey et tengeden tu ngamay tu, ey pinhakkeyey netagwan. <sup>26</sup> Nandingngel di kebebbley diman huyyan impahding Jesus.

*Ya nangkalan Jesus ni kulap ida etan ni dewwan tuu*

<sup>27</sup> Hini-yan Jesus humman ni bebley et kamenglaw ey neiunud ida etan dewwan tuun nekulap. Inlet da ehel da et kanday “Hanat nan David, hemek dakemi anhan!” <sup>28</sup> Inunud da hi Jesus di baley ni hinggepan tu, et kan tun hi-gaday “Kaw yuka kulluga e wada kabaelan kun mengkal ni kulap yu?” Kanday “Em. Mika kulluga.” <sup>29</sup> Et kapaen Jesus mateda et kantuy “Neipahding hu pinhed yu tep ya yuka pengullug.” <sup>30</sup> Ebu humman ey na-kal kulap da et han-ang-ang da law. Sinugun idan Jesus et kantuy “Entan tu ehehel idan tuu huyya.” <sup>31</sup> Nem limmaw ida kumedek et da pan-ehelen di kebebbley humman ni impahding nan Jesus.

*Ya nangkalan Jesus ni ngangan etan ni tuu*

<sup>32</sup> Ida kamenglaw humman ni tuu ey indateng dad kad-an Jesus hu nginengan dimonyoh ni kameihhuklung. <sup>33</sup> Ingal Jesus hu neihuklung ni hi-gatun dimonyoh ey kaum-ehel law. Natgadda tuu et kanday “Endi tayu inang-ang ni hannayan an neipahding ni nunman eyad bebley tayud Israel.” <sup>34</sup> Nem kan idan Pharisee ey “Ya ap-apun dimonyoh e hi Satanas hu nengidwat ni kabaelan Jesus ni mengkal ni kameihhuklung.”

*Ya et-eteng ni hemek Jesus idan tuu*

<sup>35</sup> Limmaw hi Jesus di kebebbley ni an mantuttuddud kesimbasiwaan idan Jews. Intuttuddu tu meippanggep ni nan-ap-apuan Apu Dios niya ing-inkal tu dakel ni nambakbaklang ni degeh idan tuu. <sup>36</sup> Kahehemekan Jesus ida etan tuun kameemmuemmung, tep dakel daka kakkagui ey endi kabaelan da. Henidda kalneroh ni inway ni kamengippattul ni hi-gada et mukun angehemmek ida. <sup>37</sup> Kan Jesus idan disipol tuy “Dakel ida tuun nemihed ni mengullug ni hi-gak, nem kulang ida umlaw ni an mantuttuddun hi-gada. Kamei-ellig di dakel enni, nem hahhakkey ida tuun man-enni. <sup>38</sup> Et humman hu, pandasal kayun Apu Dios ma-lat umitu-dak ni edum ni an mantuttuddu e hi-gada hu neieligan idan man-enni, tep hi-gatu hu kam payew.”

## 10

*Yadda etan Hampulut dewwan disipol Jesus*

*(Mark 3:13-19; Luke 6:12-16)*

<sup>1</sup> Ineyagan Jesus ida Hampulut dewwan disipol tu et idwatan tuddan kabaelan dan mengkal ni dimonyoh ni kameihhuklung. Ey indawat tun hi-gada kabaelan dan mengkal

ni dakek ni nambakbaklang ni degeh. <sup>2-4</sup> Ya ngadan idan nunman ni Hampulut dewwan disipol Jesus ey hi Simon, e Peter hu hakey ni ngadan tu, hi agitu e hi Andrew, yadda etan u-ungngan Sebedi e di James nan John, hi Philip, hi Bartolomew, hi Tomas, hi Matthew, e ya ngunu tun nunman ey kaman-emmung ni buwis, hi James e u-ungngan Alphaeus, hi Thaddaeus, hi Simon e Zealot, \* et hi Judas Iscariot e nengihdul nan Jesus.

*Ya nengitu-dakan Jesus ida etan ni Hampulut dewwan disipol tu  
(Mark 6:7-13; Luke 9:1-6)*

<sup>5</sup> Sinugun Jesus ida huyyan disipol tu et han tudda itu-dak. Kantun hi-gaday "Entan elaw yud bebley idan beken ni Jews et yad kebebbebley di Samaria. <sup>6</sup> Nem elaw kayud kebebbebley idan edum tayun Jews e helag nan Israel, tep eleg da amta hu makulug ni elaw nan Apu Dios e henidda netalak ni kalneroh. <sup>7</sup> Ituttuddu yun hi-gada e immali law hu intu-dak nan Apu Dios ni man-ap-apu. <sup>8</sup> Ekal yu degeh da, tagu yudda nangketey, ekal yu degeh idan kamengmengpuh annel da niya ekal yudda dimonyoh ni kameihhuklung ni tuu. Eleg pebeyyad Apu Dios huyyan kabaelan ni indawat tun hi-gayu, et humman hu, entan tu pabeyad hu pehding yuddan tuu. <sup>9</sup> Entan pambalun yun pihhuh, <sup>10</sup> niya entan pan-akbut yu. Entan alan balwasi niya patut ni panhullulan yu, ey anin entan panhulkud yu. Ngenamung ida hu tuun baddangan yun umhemek ni hi-gayu.

<sup>11</sup> Hedin dimmateng kayud hakey ni bebley, ey hamak yu hu neminshed ni mengeyyag ni hi-gayu. Pakiha-ad kayun hi-gada ingganah peni-yanan yun nunman e bebley. <sup>12</sup> Hedin wada hehgepan yun baley, man kanyuy 'Melinggep kayu kaya.' <sup>13</sup> Ey hedin pehgep dakeyuan kambaley, man um-amnun pelinggep nan Apu Dios etan kambaley. Nem hedin ihhingal dakeyu ey nanna-ud ni eleg ida pelinggep nan Apu Dios. Humman ni linggep ni kamelpun hi-gatun heni yu illaw ni hi-gada ey mannenneng ni hi-gayu. <sup>14</sup> Hedin hi-yanan yu etan bebley ni dakeyu kaihhingal, ey pukpuki yu hu dep-ud di dapan yu et penang-angan dan nanliwat ida tep ya dakeyu kapengihhingngali. <sup>15</sup> E-helen kun hi-gayu e yallin aggew ni penuwetan Apu Dios ni tuud puyek, ey makulug ni i-imman ali hu kastiguddan nekalliwtan ni tutu-ud Sodom et yad Gomorrah nem ya kastiguddallin tutu-ud bebley ni mengihhingal ni hi-gayu.

*Ya panlelehanan idallin kamengullug  
(Mark 13:9-13; Luke 21:12-17)*

<sup>16</sup> Dengel yuwak, tep yad pengittu-dakan kun hi-gayun yu pengittutudduan ni elaw ku, ey heni kayu kalneroh ni an mei-dum di mangkabunget ni ahhud muyung. Et humman hu, mahapul ni pekahhellipat-an yu e heni kayu uleg e tuka pekahhellipat-i ma-lat eleg matey. Mahapul mewan ni endin hekey hu yu nemnemen ni lawah e heni kayu paluma. † <sup>17</sup> Helipat-i yu tep wadaddalli mengippadpap ni hi-gayu et idiklamuh dakeyu niya pambe-igen dakeyud simbaan da. <sup>18</sup> Ey illaw dakeyud hinangngab idan gubernor niyad hinangan edum ni ap-apu tep ya yuka pengullug ni hi-gak. Et yan nunman ali hu pengippeamtaan yun elaw kun hi-gada et yadda Gentiles. <sup>19</sup> Hedin medettengan hu panhumalyaan dan hi-gayu, ey ebuh kakkaguh yu, tep hi Apu Dios hu mengittuddun ihhumang yu et ya elaw ni penummang yu. <sup>20</sup> Em, ebuh kakkaguh yu, tep ngenamung hu Ispirituh Ameyu e hi Apu Dios ni mengippeheppit ni hi-gayu.

<sup>21</sup> Mampapatey idalli tutu-u. Anin idallin han-aaggi et ya han-aamma et mampapatey ida. Pepettey ni u-ungnga tu hu a-ammed tu niya pepettey ni a-ammed tu hu u-ungnga tu. <sup>22</sup> Anggebe-hel dakeyullin dakek ni tuu tep ya yuka pengullugin hi-gak. Nem ya tuun mengitultuluy ni mengullug ni hi-gak ingganah ni kegibbuan tuddalli huyyan ligat ey mehellakniban. <sup>23</sup> Hedin pelelehanan dakeyud hakey ni bebley, ey besik kayud edum ni bebley. E-helen kun hi-gayu e eleg yulli gibbuha ngunu yud kebebbebley eyad bebley tayud Israel, ey immali-ak e Pengulwan ni emin ni tuu.

<sup>24</sup> Ya kaman-eddal ey beken ni eta-ta-gey nem ya mittuduh tu. Ya bega-en ey beken ni eta-ta-gey nem ya apu tu. <sup>25</sup> Heni daman hi-gayu et hi-gak tep yadda edum ni tuu ey pinihul da-ak e Ap-apu yu et ingadnan da-ak ni hi Satanas e ap-apun emin ni lawah. Nema-man hi-gayu tep kadwa dakeyu et pihhulen dakeyu dama.

*Ya tekkutan tayu ey ya panliwwatan tayun Apu Dios  
(Luke 12:2-7)*

<sup>26</sup> Nem entan takut yun hi-gada. Ya kaippahding ni tuud neha-ninan ey meamtalli. Tep emin hu eleg meamtan nunya ey meamtallin edum ni aggew. <sup>27</sup> Ya nakka ituttuddun hi-gayun nunya, ey mahapul ni pampeamta yullin hakey ni aggew et dengelen alin dakek ni tuu. <sup>28</sup> Entan tu takusidda hu memettey ni hi-gayu tep anin petteyen da

\* **10:2-4** 10:2-4 Huyyan Zealot ey hakey ni grupuh ni tuun eleg meminshed ni mengu-unnud ni gubilnun Rome.

† **10:16** 10:16 Luke 10:3.

annel yu et eleg mabalin ni wada da pehding ni linnaweyu. Heballi kumaddan hi Apu Dios tekkutan yu tep hedin petteyen dakeyu, dammutun pellaw dakeyud impiernoh e kalawwin kamekastigu. <sup>29</sup> Anin ya pippiwweng e kagedwah ni hepeng ni ebuh hu bayad tu, et eleg mabalin ni an mettey hedin eleg i-abulut Ameyu e hi Apu Dios. <sup>30</sup> Et nema-ma ngun hi-gayu, tep dakeyu kapaka-ikkaguh nan Apu Dios, tep anin ni bewek yu et amta tu bilang tu. <sup>31</sup> Et humman hu, etan takut yu tep nebalol kayun peteg ni hi-gatu nem yadda pippiwweng.

*Mahapul ni eleg itsu umbaing ni mengippeamtan itsu kamengullug nan Jesus*  
(Luke 12:8-9)

<sup>32</sup> Hedin ya tuun menghel ni edum tun tuun tuwak kakulluga ey ebbuluten kulli damad kad-an nan Ama e hi Apu Dios di kabunyan. <sup>33</sup> Nem hedin ya etan tuun menghel di edum tun tuu e eleg tuwak kulluga ey eggak ali dama ebbulutad kad-an nan Ama di kabunyan.

*Megennadwaddalli tuu tep hi Jesus*  
(Luke 12:51-53; 14:26-27)

<sup>34</sup> Entan tu nemnem e immali-ak di puyek ni mengippelinggep ni emin ni tuu, tep ya kakulugan tu ey dakel idalli man-imbabalaw tep hi-gak. <sup>35</sup> Anin idan han-ama, yadda han-ina, niyadda nan-aapu et mambabakal ida tep umhulun ni hi-gak. <sup>36</sup> Ya pekibbuhul ni hakey ni tuu ey yadda ngu pamilyah tu.

<sup>37</sup> Ya tuun e-etteng impeminhed tun a-ammed tu winu u-ungnga tu nem ya impeminhed tun hi-gak ey beken humman ni meingngadnan ni kamengu-unnud ni hi-gak. <sup>38</sup> Hedin pinhed yun mengu-unnud ni elaw ku, mahapul ni u-unnuden yuwak anin ni umhulun ni panligligatan yu. Hedin eleg yu pehding huyya, man eleg kayu meibbillang ni kamengullug ni hi-gak. <sup>39</sup> Ya tuun ebuh annel tu niya biyag tud puyek ni tuka nenemnema ey endi gun-uden tu, tep hedin mettey, endi biyag tud kad-an Apu Dios. Nem ya tuun mengihikkal ni ligat tun tuka pengullugin hi-gak, tep pinhed tun wadalli biyag tun endi pappeg tu, ey makulug ni meidwatan ni nunman ni biyag.

*Ya panyaggudan ni dewwatan tayu*  
(Mark 9:41)

<sup>40</sup> Yadda tuun mengebbulut ni hi-gayu ey ebbuluten da-ak dama. Ey ya tuun mengebbulut ni hi-gak ey ebbuluten tu dama etan nengitu-dak ni hi-gak. <sup>41</sup> Yadda tuun mengebbulut ni prophet Apu Dios ey iddawtan tudda daman henin iddawt tuddan prophet tu. Niyadda etan tuun ebbuluten da hu tuun kayyaggud, ey iddawtan idan Apu Dios ni henin iddawt tuddan tuun kayyaggud. <sup>42</sup> Ya tuun peinumman tun anin ni hambasuh ni danum etan ida nebahah ni tuun kamengu-unnud ni hi-gak, tep ya daka pengu-unnudin hi-gak, ey iddawtan idan Apu Dios ni panyaggudan da."

## 11

*Ya nenu-dakan John ni disipol tud kad-an Jesus*  
(Luke 7:18-35)

<sup>1</sup> Ginibbuh nan Jesus ni intuttudduddan disipol tu huyya et lumaw di edum ni bebley di diman Galilee ni an mantuttuddu.

<sup>2</sup> Yan nunman ey wada hi John e kamemenyag di kallabbutan, nem dingngel tu impahpahding nan Jesus et itu-dak tu dewwan disipol tud kad-an tu. <sup>3</sup> Limmaw ida et kandan Jesus ey "Kaw hi-gam hu inhel lan Apu Dios ni um-ali, winu wada hin-appil ni hehgeden mi?" <sup>4-5</sup> Kan Jesus ni hi-gaday "Kaibangngad kayud kad-an John et yu ehelen ni hi-gatu eyadda yuka deddengngela niya yuka ang-ang-anga, e ida law kaum-ang-ang hu nangkekulap, ida kaumdalan hu nepi-day, ey ida kaumdedngel law hu netuleng, na-kal law hu degeh idan kamengmengpuh annel da, netagwan ida nangketey niya kamangkeituttudduddan newetwet hu et-eteng ni impeminhed Apu Dios ni hi-gada. <sup>6</sup> Ey ehel yun John e um-amleng hu tuun pannananeng tun ingganah hu tuka pengullug ni hi-gak."

<sup>7</sup> Limmaw ida la etan disipol nan John ey kan Jesus ida etan ni neamung ey "Hipa ninemnem yun an ang-angen eman ni linawwan yud desert di kad-an John? Kaw ya etan tuun endi tunung ni nemnem tu e henin elkat ni kapellupelluyan dibdib ni ebuh? <sup>8</sup> Winu ya tuun nambalwasin nekangngina? Beken, tep ya kamambalwasin nekangngina ey wadad baley ni patul, eleg umlaw di desert. <sup>9</sup> Inamtak et ya pinhed yun an ang-angen ey ya prophet, et makulug ni humman ni yu inang-ang ey humman keta-ta-geyyan ni prophet e hi John ngadan tu. <sup>10</sup> Tep wada dedan neitudek ni meippanggep ni hi-gatu e kantuy 'Hi-gak e hi Apu Dios ey pemengnguluk eya mengituttuddun meippanggep ni hi-gam et han ka dateng.' "

<sup>11</sup> Intu-man nan Jesus et kantuy “Pinili dedan Apu Dios hi John ni keta-ta-geyyan ni emin ni tuu. Nem ya etan kebababahan di nan-ap-apuan Apu Dios ey eta-ta-gey nem hi-gatu. <sup>12</sup> Neilepun eman ni nantuttudduan nan John ingganah nunya, ey ihik ida tuun mei-dum di nan-ap-apuan nan Apu Dios. <sup>13</sup> Emin idela prophets nunman et yadda nantuttuddun Tugun Moses ey intenuttuddu da meippanggep ni nan-ap-apuan Apu Dios ingganah eman ni kawedan John. <sup>14</sup> Gullat ni yuka kulluga humman ni intenuttuddu da, ey inamta yu e hi John etan kan idan prophets ni um-ali tep hi-gatu etan immalin heni hi Elijah la hu elaw tu. <sup>15</sup> Hedin et inewatan yu law, ey kulug yu huyyan in-inhel dan hi-gayu.

<sup>16</sup> Hipa na-mu pengi-ingnehan kun elaw yun tutu-un nunya? Heni kayuddan etan ni u-ungnan kamampam-a-ayyam di mulkaduh. Yadda etan edum ey kandaddan edum day <sup>17</sup> ‘Nanggangangha kamin pan-am-amlengan, nem eleg kayu meneyyaw. Ey impatna mi mewan ni mengia-appeh ni kalemyungi, nem eleg kayu umlemjung.’ Heni kayuddan nunyan u-ungnga, tep endi maptek ni pinhed yu. Eleg yuwak u-unnuda niya eleg yu dama u-unnuda hi John. <sup>18</sup> Tep immali hi John e kamemenyag ey nakneng tuka kenna niya eleg um-inum ni kaumbuteng, nem kanyuy ‘Wada dimonyoh ni neihuklung ni hi-gatu.’ <sup>19</sup> Ey immali-ak e Pengulwan ni emin ni tuu et nakka mengnan niya nakka menginnu ni meinnu ey kanyuy nadmuttak, nakka mambutteng, niya nakka meki-eddueddum idan kaman-emmung ni buwis niyadda edum ni neliwtan.

Nem neihla kayu tep yadda tuun nengu-unnud ni elaw John et ya elaw ku ey hi-gada hu kei-ang-angan ni kakinayaggud ni elaw Apu Dios niya kalinaing tu.”

*Ya kastiguddallin tuud kebebbley ni eleg mengullug nan Jesus  
(Luke 10:13-15)*

<sup>20</sup> Peteg hu bunget Jesus ida etan ni katuu-tuud kebebbley ni nengipeenang-angan tun miracle, tep eleg ida mantuttuyyun liwat da. <sup>21</sup> Et kantun hi-gaday “Anggehemekek kayun iKorasin niya iBetsaida, tep nanna-ud ni mekastigu kayu, tep anin ni inenang-ang yudda miracle, et eleg kayu mantuttuyyun liwat yu. Yadda la tuud Tyre et yad Sidon ey nemahhig liwat da, nem gullat ni inang-ang dadda miracle ni inenang-ang yu et nanna-ud ni nantuttuyyu idan liwat dan dagah et mambalwasiddan nebi-bi-ki niya nandep-ulan da annel dan pengippeang-angan dan nantuttuyyuddan liwat da. <sup>22</sup> Et humman hu, nemahhig ali kastigu yu nem yadda la eman tutu-ud Tyre niyad Sidon. <sup>23</sup> Hi-gayun iCapernaum ey kanyu na-mu ngu nem metbal kayud kad-an Apu Dios, nem eleg, tep pellow dakeyullid impiernoh. Tep gullat ni inang-ang idan tuud Sodom hu miracle ni inenang-ang yu, ey nantuttuyyu ida-et eleg et bahbahen Apu Dios bebley da et nanengtun nunya. <sup>24</sup> E-helen kun hi-gayu e yallin panhuwetan Apu Dios ni tuu ey nemahhig ali kastigu yu nem ya kastiguddan tuu lad Sodom e nemahhig liwat da.”

*Ya nandasalan Jesus  
(Luke 10:21-22)*

<sup>25</sup> Entanni ey nandasal hi Jesus e kantuy “Ama e Ap-apud kabunyan niyad puyek, nakka mansalamat ni hi-gam, tep eleg mu peamta elaw muddan nan-adal niyadda nelaing, nem impeamtam idan eleg man-adal niyadda beken ni nelaing. <sup>26</sup> Humman e Ama hu neipahding tep humman pinhed mu.”

<sup>27</sup> Kan tu mewan ey “Indawat Ama hu saad kun man-ap-apun emin. Hi-gatun ebuh hu nekangngamtan hi-gak niya endi edum ni nekangngamtan Ama, nem hi-gak ni ebuh niyadda pinhed kun pengippeamtaan ni hi-gatu.

<sup>28</sup> Hi-gayudda etan ni kamelilligiasid biyag tu, ey hi-gak idinel yu et baddangan dakeyu. <sup>29</sup> Kulug yuwak et u-unnuden yuwak ma-lat wada inna-nu tun pengeddalan yun elaw ku. Hi-gak ey neanussak niya mahmekkak et mukun dakeyu kahehemeke. <sup>30</sup> Eleg kayu meliggasin mengu-unnud ni elaw ku hedin kullugen yuwak tep baddangan dakeyun hi-gak et melinggep nemnem yu.”

## 12

*Intuttuddun Jesus hu meippanggep ni aggew ni Sabaduh  
(Mark 2:23-28; Luke 6:1-5)*

<sup>1</sup> Hakey ni Sabaduh, ey nandalan hi Jesus di payew. Neupadda etan disipol tu et pumas-ing idan pagey et kukkussimen da et kanen da. <sup>2</sup> Inang-ang idan Pharisee et kandan Jesus ey “Ang-ang mudda kedi eya disipol mu, kele ida kamema-sing ni pagey ey pi-yew tep Sabaduh?”

<sup>3-4</sup> Nem hinumang Jesus et kantuy “Kaw eleg yu bidbiden etan neitudek ni impahding David eman ni neupaan tu et yadda etan edum tun binsikan da tep ya buhul da? Endi da

pengellaan ni kennen da ey neupaddan peteg et humgep hi David di Tabernacle e baley Apu Dios, et tu alen etan sinapay ey pi-yew ni pengngannan ni linggeman ni tuu, tep ebuah hu padin kamengngan ni nunman. \* <sup>5</sup> Ey kaw eleg yu bidhiden di Tugun Moses e yadda padi ey ida kamangngunnud Tempol anin ni Sabaduh? Nem eleg ibbilang nan Apu Dios ni liwat da humman, tep humman hu ngunu da. <sup>6</sup> Ya eya ngunuk ey kedukdul ni peteg nem ya ngunuddan padid Tempol. Ey kele kanyuy neliwatan ida eya disipol ku? <sup>7</sup> Wada etan impatudek nan Apu Dios ni kantuy 'Hi-gak e hi Apu Dios ey ya hemek yun edum yun tuu hu nakka gamgami, beken etan idan yuka i-enappit ni hi-gak.' Gullat ni yuka ewwasi huyyan inhel Apu Dios, et eleg yu penghel ey nanliwat ida etan disipol ku. <sup>8</sup> Tep hi-gak e Pengulwan ni emin ni tuu hu kamengippanghel ni hipan kamepi-yew, niya hipa eleg mepi-yew ni Sabaduh e kamengillin ni aggewe."

*Ya etan tuun negikuy ngamay tu  
(Mark 3:1-6; Luke 6:6-11)*

<sup>9</sup> Hini-yan di Jesus humman ni bebley et lumaw ida etan di hakey ni simbaan ey <sup>10</sup> wadadman hu tuun negikuy ngamay tu. Wadaddadman etan Pharisee ni kaumhamahamak ni idded-ek dan Jesus ni bahul tu et kandan hi-gatuy "Kaw liwat ni pengkalan ni degeh hedid Sabaduh tep humman hu kamengillin ni aggewe?" <sup>11</sup> Kan Jesus ni hi-gaday "Inna-nu hedid wada me-gah ni kalneroh yud bitun napnun danum, kaw kanyuy diman tep Sabaduh et liwat ni an pengellaan? Inamtak et yu ellan malat eleg matey. <sup>12</sup> Et nema-ma-ma ngu hu tuu e beken ni liwat ni pengippahdingan ni panyaggudan tu anin ni Sabaduh." <sup>13</sup> Et kan Jesus etan ni negikuy ngamay tuy "Ukyad mu eya ngamay mu." Inukyad tu ngamay tu ey nei-haddak et kayyaggud law e henin hakey ni ngamay tu. <sup>14</sup> Nem immehep ida Pharisee et manhuhummangan idan pehding dan memetty nan Jesus.

*Hi Jesus hu pinutuk Apu Dios ni heni bega-en tu*

<sup>15</sup> Nem inamtan Jesus humman ni planuh da et hi-yanen tu humman ni bebley ey inunud idan dakel ni tuu et pan-ekalen tun emin hu degeh idan kamampandedgeh. <sup>16</sup> Sinugun idan Jesus et kantuy eleg da peennamtaddan edum ni tuu humman ni impahding tu. <sup>17</sup> Humman ni impahpading Jesus hu inamnuan eman ni ehel Apu Dios ni inhel lan Isaiiah ni kantuy <sup>18</sup> "Adyah etan pinilik ni bega-en ku. Nakappinhed ku ey tuwak kapeamleng ni peteg. Iddawat ku hu Ispirituh kun hi-gatu et hi-gatu mengippeamtan penuwetan kun emin ni tuu. <sup>19</sup> Eleg mekittuttut niya eleg tu e-e-leta ehel tu. Eleg an umteketekuk di kekelkeltad. <sup>20</sup> Eleg tudda e-waya etan eleg meihammad hu daka pengullug, nem bennaddangan tudda ingganah pesikked tullin emin hu lawah. <sup>21</sup> Hi-gatulli hu iddinel idan tuud kebebbley ni mengippaptek ni hi-gada, anin hipa neituvan da."

*Hi Jesus nan hi Satanas  
(Mark 3:20-30; Luke 11:14-23)*

<sup>22</sup> Entanni ey wada in-ali dad kad-an Jesus ni tuun nekulap niya nenganga tep nehuklungan ni dimonyoh. Ingkal nan Jesus kulap tu et ya nangatuy ey kaum-ehel law niya kaum-ang-ang. <sup>23</sup> Natngaddan emin hu tuu et kanday "Tam hi-gatu na-mu etan pinilin Apu Dios ni helag David ni man-ap-apu?" <sup>24</sup> Nem dingngel idan Pharisee hu inhel idan tuu ey kanday "Hi Satanas e ap-apuddan dimonyoh hu nengidwat ni kabaelan Jesus ni nampangkalan tun nangeihuklung." <sup>25-26</sup> Inamtan Jesus humman ni wadad nemnem da et kantun hi-gaday "Kanyuy hi Satanas kakelpuin kabaelan kun mengkal idan dimonyoh ni kameihhuklung, nem beken. Neihla huttan ni yuka pannemnem tep kaw tuwak baddangan Satanas ni mengkal idan dimonyoh ni kameihhuklung ey bega-en tudda? Hedid makulug ni tuwak kabaddangin Satanas, tam tuwak tep kabaddangin mengippesikked ni hi-gatu e apu da. Ya bebley ni eleg man-uunnud hu ap-apu da et ida kamegennadwa hu tuu, ey endi hakey ni tuun mannananeng ni man-ap-apidman. Hanniman dama hu han-abungan ni eleg man-uunnud, e lektat tu ey nekiwadda. Heni damad nan-ap-apan Satanas e endi inna-nu tun an mannananeng di nan-ap-apan tu hedid pesikked tudda etan kameihhuklung ni kaumbaddang ni hi-gatu. Kanyuy hi Satanas hu kamemaddang ni hi-gak ni mengkal ni dimonyoh ni kameihhuklung, <sup>27</sup> nem hedid makulug huttan ni kanyu, hi-gatu tep dama kamemaddang idan edum yun kamengkal ni kameihhuklung. Humman keang-angan tun naka-ihla kayun peteg. <sup>28</sup> Tep hedid hi-gak, man ya kabaelan kun mengkal ni kameihhuklung ey kamelpun

\* 12:3-4 12:3-4 Eleg ibbilang nan Apu Dios ni liwat di David hu da nengannan ni nunman ni sinapay anin ni beken idan padi.

Ispirituh Apu Dios. Et huyya keang-angan tun wadadya eyad kad-an yu hu intu-dak Apu Dios ni man-apu.

<sup>29</sup> Eleg mabalin ni an ibbebsik ni tuu hu limmun hakey ni tuun na-na-let nem hi-gatu. Pakkaw belluden tu ni et han dammutun ibbebsik tu limmu etan ni hakey ni tuu.” †

<sup>30</sup> Kan Jesus mewan ey “Ya tuun eleg mengullug ni hi-gak ey kamekibbuhul ni hi-gak. Ya etan tuun eleg tu pinhed ni umbaddang ni pengullugan idan tuun hi-gak ey tuka degyunadda etan nemihed ni mengu-unnud ni hi-gak.

<sup>31</sup> E-helen kun hi-gayu e emin hu liwat, anin ni pemihhulan ni edum ni tuu ey dammutun mepesinsahan. Nem ya tuun wada lawah ni e-helen tun Ispirituh Apu Dios ey eleg mepesinsahi. <sup>32</sup> Ya tuun memihhul ni hi-gak e Pengulwan ni emin ni tuu ey dammutun pessinsahan Apu Dios humman ni liwat tu. Nem ya tuun memihhul ni Ispirituh Apu Dios ey eleg mepessinsahi humman ni liwat tu.

*Ya etan keyew niya lameh tu  
(Luke 6:43-45)*

<sup>33</sup> Ya kayyaggud ni keyew ey kayyaggud illameh tu. Nem hedin lawah hu kakyew tu, ey lawah dama illameh tu. Kameamta hedin kayyaggud winu lawah hu keyew di tuka illameh.” <sup>34</sup> Kan Jesus mewan ni hi-gaday “Lawah kayu tu-wangun peteg! Ebu hu lawah ni wadad nemnem yu, et humman gaputun endi kayyaggud ni yuka e-hela. Tep ya wadad nemnem ni tuu ey kameamtad tuka e-hela. <sup>35</sup> Hedin kayyaggud nemnem ni tuu, ey kayyaggud dama pehding tu. Nem hedin lawah nemnem ni tuu, ey lawah dama pehding tu.

<sup>36</sup> E-helen kun hi-gayu e yallin aggew ni penuwetan nan Apu Dios ni tuu ey mahapul ni hummangen yun emin hu in-inhel yun endi silbitu. <sup>37</sup> Tep ya heppiten yun nunya hu keippuunan tu hedin kastigun dakeyun Apu Dios winu eleg. Tep hedin kayyaggud hu heppiten yu, humman keamtaan tun kayyaggud hu nemnem yu. Nem hedin lawah kaheppitan hakey ni tuu, ey humman keamtaan tun wada liwat tu et mekastigu.”

*Ya meippanggep ni miracle  
(Mark 8:11-12; Luke 11:29-32)*

<sup>38</sup> Yadda edum ni Pharisee et yadda kamantuttudun intugun lan Moses, ey kandan Jesus ey “Apu, pinhed min ang-angen hu immatun ni kakulugan tu e wada kabaelan mun indawat nan Apu Dios.” <sup>39</sup> Nem kan Jesus ni hi-gaday “Lawah kayun tuun nunya. Yuka ipatnan memillit ni hi-gak ni mengippeang-ang ni immatun ni kabaelan nan Apu Dios ma-lat amtaen yu hedin makulug ni intu-dak tuwak nan Apu Dios. Nem endi edum ni idawat nan Apu Dios ni hi-gayun mengippeang-ang ni kabaelan tu nem ebu hu neipahding lan Jonah e prophet. <sup>40</sup> Hi Jonah ey inekmun ni etteteng ni deleg et manha-ad di egeh tun tellun aggew. Hanniman ali daman hi-gak e Pengulwan ni emin ni tuu, tep manha-ad dak di kulung ni tellun aggew. <sup>41-42</sup> Yadda la tuud Nineveh hu keang-angan tun lawah kayu tep yan eman ni kawedan Jonah ey inu-unnud da intenuttuddu tu et mantuttuyuddan liwat da. Yan nunya ey iyyadya-ak e neta-ta-gey nem hi Jonah, nem eleg kayu mengullug ni hi-gak et eleg kayu mantuttuyun liwat yu. Ya hakey mewan ni keang-angan tun kekastiguan yu, ey ya impahding la etan ni biin ap-apud Seba di Arabia. Anin ni edawwin bebley hu nalpuan tu, et limmaw di kad-an Solomon ni an menggel ni kalinaing tun indawat Apu Dios ni hi-gatu. Yan nunya ey iyyadya-ak di kad-an yu e nelalla-ing nem hi Solomon, nem eleg yuwak kulluga. Huyyadda keang-angan tun kekastiguan yullin penuwetan Apu Dios ni tuud puyek.”

*Ya elaw idan dimonyoh  
(Luke 11:24-26)*

<sup>43</sup> Kan mewan Jesus ey “Wada etan dimonyoh ni neihuklung di hakey ni tuu. Na-kal di neihuklungan tu et an mandaladalan di desert ni an menang-ang ni pan-iyyatuan tu, nem endi tuka hemmaka. <sup>44</sup> Et kantud nemnem tuy ‘Mambangngaddak ew etan di neihuklungan kun hini-yan ku.’ Et mambangngad ey inang-ang tun kayyaggud law etan tuun neihuklungan tun nunman. <sup>45</sup> Et an ali uwewit humman ni dimonyoh ni pitun edum tu e lawah idan peteg nem hi-gatu et maihuklung ida etan di tuu ey nema-ma law ni peteg etan tuu nem yan eman ni laputu. Henin nunya hu kei-ingnehan ni meippahding alin hi-gayu tep nemahhig hu kalwah yu.”

*Hi inan Jesus et yadda agitu  
(Mark 3:31-35; Luke 8:19-21)*

† 12:29 12:29 Ya pinhed tun e-helen huyya ey ya kabaelan nan Jesus ni mengidduppih nan Satanas.

<sup>46</sup> Kaman-e-ehhel hi Jesus ey dimmateng ida agitun lalakki et hi inetu. Immehngeng idad dallin ey daka pan-ibbaga hi Jesus tep pinhed dan meki-ungbal ni hi-gatu. <sup>47</sup> Kan ni hakey ni tuu nan Jesus ey "Immen di inam et yadda agim ni lalakkiid dallin e pinhed dan meki-ungbal ni hi-gam." <sup>48-50</sup> Kan Jesus etan ni tuu ey "Endi nepilin inak winu agik tep ya nakka ibbilang ni inak niya agik ey yadda etan tuun kamengu-unnud ni pinhed nan Ama." Inledeng tudda etan ni disipol tu et kantuy "Adyah ida eya nakka ibbilang ni inak niya agik."

## 13

*Ya etan inab-abig Jesus ni tuun an nanha-bug ni bukel*

*(Mark 4:1-9; Luke 8:4-8)*

<sup>1</sup> Yan nunman ni aggew, ey immehep hi Jesus etan di baley et lumaw di gilig ni baybay et an manyuyyuddung. <sup>2</sup> Entanni ey neamung ida dakel ni tuud kad-an tu et humgep di bangka et yumudung diman et mantuttuddu. Immehngeng ida tuud gilig ni baybay ni mengngel ni tuka ittuttuddu. <sup>3</sup> Dakel inena-abbig Jesus ni penuttuddu tuddan tuu et huyya hu hakey ni ina-abbig tu. Kantuy "Wada etan tuun an nantanem e nanhinna-bug tu bukel ni intanem tu. <sup>4</sup> Yan nengihebwagan tuddan bukel ey wadadda na-gah di gilig ni dalan, et umliidda sisit et kanen da. <sup>5-6</sup> Yadda edum ni bukel ey na-gah di mabetu. Et ma-nut anggagannu ey simmemel ida, nem pimmetang ey nakpit ida tep meingpih hu puyek et eleg lumhed hu lamut da. <sup>7</sup> Na-gah di magulun hu edum, ey simmemel ida, nem inhengan idan gulun. <sup>8</sup> Yadda edum ey na-gah di kayyaggud ni puyek ey simmemel ida. Limmameh ida ey wadadda etan malemeh, nem wadadda etan edum ni melallammeh ey wadadda etan mekallameh ni peteg." <sup>9</sup> Et kantuy "Hedin wada tangila yu, awasi yu huyyan inhel ku et nemnememen yu."

*Ya gaputun kapan-ina-abbig Jesus hu tuka penuttuddu*

*(Mark 4:10-12; Luke 8:9-10)*

<sup>10</sup> Entanni ey immalidda etan disipol tu et kanday "Kele muka pan-ina-abbig hedini wada e-helen mun hi-gada e eleg mu panna-ud?" <sup>11</sup> Kan Jesus ni hi-gaday "Hedin hi-gayu, man nakka panna-ud ni ittuttuddu hu elaw ni nan-ap-apuan Apu Dios ni eleg tu peamta ingganah nunya. Nem hedini yad edum ni tuu, man nakka pan-ina-abbig ni ebuh hu nakka penuttuddun hi-gada. <sup>12</sup> Ya etan tuun mengu-unnud ni ehel ku ey baddangan Apu Dios et amtaen tun mengewwat ni nakka ittuttuddu ma-lat ma-duman inamta tu et lumeing. Nem ya etan tuun wada ekket ni inamta tu, nem eleg tu u-unnuda ey meendi humman ni ekket ni inamta tu. <sup>13</sup> Eggak panna-ud hu nakka penuttuddun hi-gada, tep anin ang-angen da elaw ku et heni eleg da ang-angen. Anin ni dedngelen da elaw ku et heni eleg da denglen et eleg da ewwasi. <sup>14</sup> Humman inamnuan ni inhel lan Isaiiah e prophet ni kantuy

'Deddengngelen yulli, nem eleg yu han-awat. Ang-ang-angen yulli, nem eleg yu han-immatun. <sup>15</sup> Hanniman kayu tep kahing kayu, et humman hu eleg yu pinhed ni dedngelen niya eleg yu pinhed ni ewwatan. Gullat et ni beken kayun henin nunman, ey han-awat yu hu kameituttuddun hi-gayu, et mantuttuyyu kayu, et pesinsahan ku hu liwat yu.' \*

<sup>16</sup> Nem negahat kayu, tep han-ang-ang ni mateyu niya handengel ni tangila yu, tep inewatan yu hu elaw nan Apu Dios. <sup>17</sup> Makulug ni e-helen kun hi-gayu e dakel ida prophet et yadda edum ni kayyaggud ni tuun nunman ni neminhed ni menang-ang eyan yuka ang-ang-anga, nem eleg da ang-angen. Pinhed dan dedngelen eya yuka deddengngela, nem eleg da dengelen."

*Ya keibbellinan etan ni ina-abbig nan Jesus ni tuun an nengiha-bug ni bukel*

*(Mark 4:13-20; Luke 8:11-15)*

<sup>18</sup> Inhel Jesus keibbellinan etan ni ab-abig tun nantanem et kantuy <sup>19</sup> "Yadda etan bukel ni na-gah di gilig ni dalan ey humman ida etan tuun dingngel da hu elaw ni kapan-ap-apuin Apu Dios, nem eleg da han-awat, tep hineul idan Satanas, et pinhakkeyey liniwwan da hu dingngel da. <sup>20</sup> Yadda etan na-gah di mabetu ey heni humman ida etan tuun kamanggagayan nangngelan dan ehel Apu Dios, <sup>21</sup> nem eleg meihammad hu daka pengullug, et anggagannu ey liniwwan da. Hedin wada ligat da tep ya daka pengullug, ey pinhakkey ey insiked dan mengullug.

<sup>22</sup> Yadda etan bukel ni na-gah di magulun hu neiiligen idan tuun nangngel ni ehel nan Apu Dios, nem eleg da hengnguda, tep ya pambiyagan da niya keddangyanan da hu daka nenemema. <sup>23</sup> Yadda etan bukel ni na-gah di kayyaggud ni puyek hu neiiligen

\* 13:15 13:15 Isaiiah 6:10



idan tuun nangngel ni ehel nan Apu Dios ey inewatan da et mannananeng idan mengu-unud. Et kayyaggud elaw ni edum, kakkayyaggud hu elaw ni edum ey kayyaggud ni peteg hu elaw ni edum.”

*Ya ab-abig ni pagey niyadda helek*

<sup>24</sup> Inab-abig mewan nan Jesus hu hakey ni ab-abig ni keiddingpatan ni elaw ni kapan-ap-apuin Apu Dios et kantuy “Ya elaw ni kapan-ap-apuin Apu Dios ey heni etan ni tuun netaneman payew tu. <sup>25</sup> Neugip ida tuun nunman ni hileng ey immali etan buhul tu et taneman tun bukel ni helek etan payew ni netamman ni pagey et bumsik. <sup>26</sup> Neetteng etan pagey et kamambukkal ey neetteng ida dama etan helek. <sup>27</sup> Immalidda etan bega-en ni kampayew et kandan hi-gatuy ‘Kele kayyaggud hu intanem mun bukel di payew mu ey attu an nalpuan ni nemahhig ni helek?’ <sup>28</sup> Kan etan ni kampayew ey ‘Inamtak et wada immalin buhul ni an nampengitnem ni nunman idan helek.’ Kan ida etan ni bega-en tuy ‘Kaw mi panggebbuten?’ <sup>29</sup> Kan etan ni Apu day ‘Ebuh, anin diman tep entanni ey pekiggebbut yudda pagey. <sup>30</sup> Diman ew et ngenamung alin ahiani. Hedin ali ew me-teng, ey e-helen kuddan man-enni et pamengulu dan gebbuten ida etan helek et panlakhen da et da apuyan ni han da ineni etan pagey.’”

*Ya keiddingpatan etan ni ekkeket ni bukel*  
(Mark 4:30-32; Luke 13:18-19)

<sup>31</sup> Inab-abig mewan Jesus hu hakey ni pengi-ingngehan tun elaw ni kapan-ap-apuin Apu Dios et kantuy “Kamei-ellig hu nan-ap-apuan Apu Dios etan ni bukel ni mustard e keek-eketan di emin ni bukel. <sup>32</sup> An intanem etan ni hakey ni tuu et meetteng ey humman kee-ettenggan ni emin ni intanem. Nambalin ni heni keyew ey nemangngapangnga et pambuy-an ni dakel ni sisit.”

*Ya keiddingpatan etan ni yeast*  
(Luke 13:20-21)

<sup>33</sup> In-ingngeh mewan Jesus hu elaw ni kapan-ap-apuin Apu Dios di yeast et kantuy “Ya kapan-ap-apuin Apu Dios ey heni etan ni yeast e hedin in-edum di handilin alinah, man tuka pelbag.”

*Ya elaw ni kapenuttuddun Jesus ey tuka pan-ina-abbig*  
(Mark 4:33-34)

<sup>34</sup> Huyyadda hu ab-abig Jesus ni nengiingngehan tun elaw ni kapan-ap-apuin Apu Dios. Impan-ina-abbig tun emin hu nengitenuttuddun tuun elaw ni kapan-ap-apuin Apu Dios. <sup>35</sup> Huyyan impahding tu hu inamnuan ni inhel lan eman ni prophet ni kantuy “Pan-ina-abbig ku hu pengippeamtaan kun hi-gadan etan ni eleg meamtan nunman ni nekapyaan ni puyek ingganah ni nunya.”

*Ya keibbellinan etan idan pagey niyadda etan helek di a-abbig*

<sup>36</sup> Entanni ey hini-yan Jesus ida etan tuu ey himmegep etan di hakey ni baley. Immalidda disipol tu et kandy “Ehel mun hi-gami hu pinhed mun e-helen di a-abbig mun helek ni nekihiken di pagey.” <sup>37</sup> Et kan Jesus ni hi-gaday “Ya etan tuun nengitnem ni kayyaggud ni bukel ey hi-gak e Pengulwan ni emin ni tuu. <sup>38</sup> Ya etan payew ey humman eya puyek e nanha-adan ni tuu. Ya pagey ni neitnem ey humman ida tuun Apu Dios. Ya etan helek ey humman ida impantuun Satanas e ap-apun emin ni lawah. <sup>39</sup> Ya etan kangkun buhul ni nengitnem ni helek ey hi Satanas. Ya pengennian etan ni pagey ey humman getud ni kepappegan ni puyek, ey yadda etan man-enni ey humman ida anghel. <sup>40</sup> Ya pengemmungan dan helek et apuyan da, ey henin nunman ali mekapkapyan kepappegan ni puyek. <sup>41</sup> Tep ittu-dak kuddalli anghel Apu Dios et dalli pan-emmungen etan nengituttuddun tuun panliwwatan et yadda emin hu kamengippahding ni lawah <sup>42</sup> et palaw daddallid kamantettebbel ni apuy. Umnanginangih idalli ey ngellingellidihen dalli ngipen da. <sup>43</sup> Meang-ang ali kakinyaggud ni elaw idan tuun Apu Dios di pan-apuan tu. Hedin wada tangila yu, awasi yu huyyan inhel ku et nemnemnemen yu.

*Ya keiddingpatan etan ni neitlun gamgam*

<sup>44</sup> Ya elaw ni kapan-ap-apuin Apu Dios ey heni etan ni balituk ni neiku-kud puyek. Himmak ni hakey ni tuu et ta-bunan tu. Kaman-am-amleng ni peteg et lumaw et tu pan-igtang ni emin hu limmu tu ma-lat pangetang tun etan ni puyek ni wada balituk ni neiku-ku.

*Ya keiddingpatan etan ni inipul*

<sup>45</sup> Ya hakey pay ni pengi-ingngehan ni elaw ni kapan-ap-apuin Apu Dios ey heni etan ni tuun kaan-umgatagatang niya kaum-enang-ang ni kayyaggud niya nenginan inipul.

<sup>46</sup> Wada himmak tun hakey ni kekakkayyaggudan et mambangngad et tu pan-igtang ni emin hu letu tu et gatngan tu humman ni inipul.

*Ya etan tabukul niyadda etan deleg*

<sup>47</sup> Ya mewan hakey ni pengi-inggehan ni elaw ni kapan-ap-apuin Apu Dios ey heni etan ni tabukul ni deleg. Hedin da inta-mel di baybay, man kameknan emin hu nambakbaklang ni deleg. <sup>48</sup> Hedin napnu etan tabukul, ey iddakal dad gilig ni baybay ni nampili dadda etan kayyaggud et iha-ad dad tallu-an da. Yadda etan lawah ni deleg ey dadda kaibheng. <sup>49</sup> Hanniman ali hedin mepappeg hu puyek tep um-alidda anghel nan Apu Dios et amungen dadda tuu et appilen dadda kayyaggud et yadda lawah. <sup>50</sup> Pellaw dadda lawah di kamantettebbel ni apuy. Umnanginangih idallidman ey ngellingellidihen da ngipen da."

<sup>51</sup> Kan Jesus idan disipol tuy "Kaw yuka ewwasi emin nakka e-ehhela?" Kandan hi-gatuy "Em." <sup>52</sup> Et kan Jesus ey "Emin ida etan kamengituttuddun Tugun Moses ni kamengu-unnud ni hi-gak et ya elaw ni kapan-ap-apuin Apu Dios hu daka ituttuddu, ey wada kabaelan dan mengitenuttuddun elaw ni nebayag et ya dama baluh ni elaw. Henidda law etan ni tuun peukkat tun emin hu limmu tud baley tun baluh et yadda nebayag ni panyaggudan idan tuu."

*Ya eleg pengullugiddan kebebleyan Jesus ni hi-gatu*

*(Mark 6:1-6; Luke 4:16-30)*

<sup>53</sup> Ginibbuh Jesus humman idan a-abbig tu et hi-yanen tu humman ni bebley. <sup>54</sup> Nambangngad di bebley da et mantuttuddud simbaan da. Ida kametnga tuun tuka ittenuttuddu et kanday "Attu nalpuan ni laing tu niya kabaelan tun mengippahding idan miracle?" <sup>55</sup> Tam u-ungnga ngu ahan ni karpenter, ey inamta tayu hi inetu e hi Maria et yadda etan agitu e hi James, hi Jose, hi Simon et hi Judas. <sup>56</sup> Wadaddadya dama etan agi tuddan bii. Nem kele attu nengal-an tun kabaelan tu?" <sup>57</sup> Inhel da humman tep daka keemmehi et anggebe-hel da hi Jesus. Kan Jesus ni hi-gaday "Makulug ni yadda prophet ey ida kamelispih di kebebbley niya dadda kalluga, nem yadda mismuh ni kebebleyan da niyadda agi da ey eleg dadda kulluga."

<sup>58</sup> Eleg tu peang-ang hu dakel ni miracle diman, tep eleg ida mengullug ni hi-gatu.

## 14

*Ya neteyyan John e kamemenyag*

*(Mark 6:14-29; Luke 9:7-9)*

<sup>1</sup> Yan nunman ni tsimpuh ey hi Herod hu ap-apud provincia di Galilee. Dingngel tu e wada huyyan hi Jesus, <sup>2</sup> et kantuddan edum ni ap-apudman e bebley ey "Hi John e kamemenyag humman nem ay netagwan, et humman hu wada law kabaelan tun mengippahding ni miracle." <sup>3</sup> Ninemnem Herod huuya tep hi-gatu nengipadpap nan John et paikelabut tu. Impaikelabut Herod tep impapilit ni ahwa tu e hi Herodias ni ikkalebut da. Hi Herodias ey ahwan Philip e agin Herod nem piniliw Herod. <sup>4</sup> Katemmuin John nan Herod e kantuy "Lawah ka e Herod, tep mu piniliw hu ahwan agim." <sup>5</sup> Pinhed nan Herod ni pepettey hi John, nem kaumtakut ida etan ni Jews tep daka ibbilang ni prophet hi John.

<sup>6</sup> Nem entanni ey nedatngan hu aggew ni pan-an-anlaan dan penguinemnemman dan neiungngaan Herod, et maneyaw etan biin u-ungngan Herodias di hinanggaddan tutu-un neamung ey kaman-am-amleng ni peteg hi Herod <sup>7</sup> et isapatah tu etan ni bii e kantuy "Anin ni hipa ibbagam et idawat ku." <sup>8</sup> Inhel inetu hu e-helen tu et kantuy "Papatul mu ulun John e kamemenyag et peiha-ad mud duyu et i-lidadya." <sup>9-10</sup> Kamantuttuyyu hi Herod ni nangngelan tun nunman, nem eleg tu pinhed ni keyyaten hu insapatah tu, tep dingngel idan mangili tu, et tu paputul hu ulun John di kallabbutan. <sup>11</sup> In-ali da e inha-ad dad duyu et idwat tu etan ni bii et tu idwat nan inetu. <sup>12</sup> Immalidda etan disipol John et alen da annel tu et da ikulung et lumaw idan an mengiddatteng nan hi Jesus.

*Impangan Jesus hu liman libun tuu*

*(Mark 6:30-44; Luke 9:10-17; John 6:1-14)*

<sup>13</sup> Yan nangngelan nan Jesus nunya, ey hini-yan tu humman ni bebley et an mambangka et an manhahhakkey etan di endi nambebley. Nem dingngel idan tuu e limmaw hi Jesus ey ebuhe nanhi-yan da bebley da et pan-unuden da hi Jesus. Indallan da ingganah dimmateng idad kad-an tu. <sup>14</sup> Neukat hi Jesus di bangsa ey inang-ang tudda dakel ni tuun neamung. Himmek tudda et pan-ekalen tu degeh da.

<sup>15</sup> Yan nunman ni mahmahdem ey immalidda disipol Jesus di kad-an tu et kanday "Mehilleng ey endi baballey di deya. Attu et itu-dak mudda eya tuu et ida mangetang

ni kennen da ey?" <sup>16</sup> Nem kan Jesus ey "Anin ni dideyaddadya. Idwasi yudda kuman kennen da!" <sup>17</sup> Kandan hi-gatuy "Iyyadya kuma nem lillimman sinapay et ya deddewwan deleg ni ebuh." <sup>18</sup> Et kantuy "Anin i-li yudya."

<sup>19</sup> Impayudung tuddad mahlek hu tuun neamung et alen tu etan liman sinapay et ya etan dewwan deleg. Intangaw tud kabunyan et mansalamat nan Apu Dios. Negibbuh et teneg-angen tu hu sinapay et pan-idwat tuddan disipol tu et da pan-iwatwat di emin ni tuu. <sup>20</sup> Nengan idan emin et maphel ida. Inemung da natdaan ey napnu hu hampulut dewwan basket. <sup>21</sup> Limmaw ni liman libu lakin nengan, hin-appil ida bii et yadda u-ungnga.

*Ya nandalnan Jesus di ta-pew ni danum di baybay*

*(Mark 6:45-52; John 6:15-21)*

<sup>22</sup> Yan negibbuhan ni ekan, ey impahgep idan Jesus hu disipol tud bangka et pamengulu tudda lan nan-agwat et ebuhe pampaenamut tudda hu neamung ni tuu. <sup>23</sup> Entanni ey limmaw etan di duntug ni an mandasal. Nehileng, ey nanengtun hahhakkey tudman. <sup>24</sup> Yadda etan disipol tu ey nangginawwadda law di baybay, nem nemahhig hu dalluyun tep ya dibdib e kameiddammu et kametenuttu-ug hu bangka.

<sup>25</sup> Kamangkewa-wa ey kamenglaw hi Jesus di kad-an idan disipol tu e kamandaddallan di ta-pew ni danum. <sup>26</sup> Inang-ang da ey nemahhig takut da et kanday "Banig humman!" Ey kapkaw ida. <sup>27</sup> Nem pinhakkeyey immehel hi Jesus et kantuy "Entan takut yu, tep hi-gak huuya." <sup>28</sup> Et kan nan Peter ey "Hedin makulug ni hi-gam, man pandalan muwak damad ta-pew ni danum et umli-ak di kad-an mu." <sup>29</sup> Kan Jesus ey "Ikay." Immehep hi Peter di bangka et kamandaddallan di ta-pew ni danum ey kamenglaw di kad-an Jesus. <sup>30</sup> Nem inang-ang tu na-let ni pewek ey simmakut et kamangkelneng et tumkuk e kantuy "Apu, ihwang muwak!" <sup>31</sup> Pinhakkeyey hinikmat Jesus ngamay Peter et tengeden tu. Kantun hi-gatuy "Kulang muka pengullug. Kele ka nandinwa?" <sup>32</sup> Himmegep di Jesus nan Peter di bangka ey nesiked dibdib. <sup>33</sup> Et dayawen idan disipol hi Jesus e kanday "Makulug ni hi-gam hu U-ungngan Apu Dios."

*Ya nampangalan Jesus ni degeh idan tuud Genesaret*

*(Mark 6:53-56)*

<sup>34</sup> Inagwat da etan baybay et dumteng idad Genesaret. <sup>35</sup> Inimmatunan idan tuudman e bebley hi Jesus et pampaeyag dadda kamampandedgeh di nangkeihnup ni bebley diman et pan-i-lidaddad kad-an tu. <sup>36</sup> Nampehemhemhemmek idan hi-gatu e kanday "Pakepam anhan idan kamampandedgeh hu gilig ni balwasim ma-lat ma-kal degeh da." Ey emin ida etan nengapan balwasi tu ey na-kal degeh da.

## 15

*Ya elaw idan Pharisee*

*(Mark 7:1-13)*

<sup>1</sup> Hakkey ni aggew ey wadadda immalin nalpud Jerusalem ni Pharisee et yadda edum ni kamantuttuddun Tugun Moses et kandan Jesus ey <sup>2</sup> "Kele hedin yadda disipol mu, man eleg da u-unnuda hu elaw idan aammed tayun nunman e mahapul ni mambululu ni han nengan?" <sup>3</sup> Hinumang Jesus ey kantuy "Tam yu anhan law kakehinga hu tugun nan Apu Dios, tep ya elaw yu hu yuka u-unnuda. <sup>4</sup> Tep kan ni tugun nan Apu Dios ey 'U-unnud yu hi ameyun ineyu. Ya etan tuun wada lawah ni e-helen tun ametu winu hi inetu ey mahapul ni mettey.' <sup>5</sup> Nem yuka ittutuddu e kanyuy 'Emin etan ibbaddang yud ineyun ameyu ey anin eleg yu ibbaddang ni hi-gada hedin iddawat yun Apu Dios ida humman.' <sup>6</sup> Huuya keang-angan tun yuka iwwaklin hu tugun nan Apu Dios, tep ya elaw yu hu yuka u-unnuda. <sup>7</sup> Maitek kayu, tep kayu kahin-u-unnudin ehel Apu Dios. Makulug eya impeamta lan eman ni prophet e hi Isaiiah ni inhel Apu Dios ni meippanggep ni hi-gayu e kantuy

<sup>8</sup> 'Huuyyaddan tuu ey ma-nu ehel da, tep kanday da-ak kadeyyawa, nem ya kakulugan tu ey eleg da-ak kaya nemneman hi-gada. <sup>9</sup> Et humman hu, endi silbi tun da-ak penaydayawan ni hi-gada, tep ya elaw ni daka pandeyyaw ni hi-gak ey daka u-unnuda hu kameu-unnud ni tuttuddun tuu.' "

*Ya kaumhulun ni kapanlawahin tuu*

*(Mark 7:14-23)*

<sup>10</sup> Inaygan Jesus ida tuud kad-an tu et kantun hi-gaday "Dengel yu et awatan yu eya e-helen ku. <sup>11</sup> Beken ni ya kakennan tuu hu kakelpuin kalwah ni tuu, nem ya kamelpud bungut tun tuka e-hela hu kakelpuin kalwah tu." <sup>12</sup> Entanni ey limmaw ida disipol tud kad-an tu et kandan hi-gatuy "Humman ni inhel mu ey impabunget tudda Pharisee."

<sup>13</sup> Kan Jesus ey “Emin ida etan kamengituttuddun beken ni elaw nan Ama Apu Dios di kabunyan ey beken hi Apu Dios hu nengitu-dak ni hi-gada, et humman hu mesikked hu daka ittenuttuddu ey eleg tudda hellaknibid kekastiguan da. <sup>14</sup> Entan kakkaguh yuddan Pharisee. Ngenamung ida. Henidda etan ni nekulap ni kamengippengngulun dellanen ni edum tun nekulap, e hedin nan-egah, man man-e-gah idan dewwa.”

<sup>15</sup> Immehel hi Peter et kantuy “Hipa pinhed mun e-helen ni kammun beken ni ya kennen hu kaumhulun ni panlawahan ni tuu?” <sup>16</sup> Kan Jesus ey “Kele eleg yu han-awat hu nakka e-hela? <sup>17</sup> Kaw eleg yu amta e hedin kinan hu kennen et limmaw di egeh, man meukkat di tuka keukkasi? <sup>18</sup> Nem ya lawah ni kae-helan tuun nalpud nemnem tu ey humman panlawahan tu. <sup>19</sup> Tep ya lawah ni nemnem ni tuu hu kaumhulun ni kapampapateyiddan tuu, ya daka pengi-ebbeebbekin ahwa da, ya daka pansiwsiwid edum dan tuu, ya daka penekkwewi, ya daka panlangkaki niya daka penumtumbukin edum da. <sup>20</sup> Huyyadda kaumhulun ni kapanlawahin tuu e beken etan ni kandan pakkaw mambullu ni han nengan.”

*Ya et-eteng ni kapengullug ni hakey ni biin beken ni Jew  
(Mark 7:24-30)*

<sup>21</sup> Hini-yan Jesus humman ni bebley et lumaw di Tyre et yad Sidon. <sup>22</sup> Wada biidman e beken ni Jew ni immalid kad-an Jesus et kantuy “Apu e helag David, hemek muwak anhan tep nehuklungan ni dimonyoh hu u-ungngak ni bii et nemahhig e tuka panlelehani.” <sup>23</sup> Nem eleg hummangan Jesus ni hekey. Hinnup idan disipol tu et kanday “Pea-allaw mu eya biin kamei-unnuunnud tep kaumpapaliteng.” <sup>24</sup> Entanni ey kan Jesus etan ni biiy “Neitu-dakkak ni an memaddang idan ebuh ni Jews ni helag Israel ni eleg mengamtan elaw nan Apu Dios.” <sup>25</sup> Nem immali mewan etan biin beken ni Jew et mandukkun di hinanggan Jesus et kantuy “Apu, baddangi muwak anhan.” <sup>26</sup> Hinumang Jesus et kantuy “Lawah hu an ellan hu kennen ni u-ungnga et an pakan ni ahhu.” <sup>27</sup> Kan etan ni bii ey “Makulug huttan e Apu, nem anin daman ahhu, et dammutun kennen tu hu kae-gahan kan-ahhun hi-gatu.”

<sup>28</sup> Et kan Jesus etan ni bii ey “Et-eteng muka pengullug. Meidwat ni hi-gam hu pinhed mu.” Yan nunman ni olas ey na-kal hu dimonyoh ni neihuklung ni u-ungngan etan ni bii.

*Ya nampangkalan Jesus ni degeh ida etan ni dakel ni tuu*

<sup>29</sup> Hini-yan Jesus humman ni bebley et idlan tud gilig ni Baybay e Galilee. Nanteyed di duntug et yumudung diman <sup>30</sup> ey immalidda dakel ni tuud kad-an tu. Nan-i-li dadda nangkepi-day, yadda nekulap, yadda nedahuy, yadda nangkenganga et yadda edum ni kamampandedgeh et pan-ekalen nan Jesus emin degeh da. <sup>31</sup> Natngadda tutuun nenang-angan da e ida kaum-ehel law hu nangkenganga, kayyaggud ida law hu nedahuy, ida kaumdalam law hu nangkepi-day, ida kaum-ang-ang law hu nangekekulap, et daydayawen da hu Dios idan helag Israel.

*Ya nengipengannan Jesus ni umlaw di epat ni libun tuu  
(Mark 8:1-10)*

<sup>32</sup> Entanni et ayan Jesus ida disipol tud kad-an tu et kantuy “Nak ida kahehmekan emin eya tuu. Nekihahha-ad idan hi-gak di deyan tellun aggew ey endi law kennen da. Eggak pinhed ni peennamut ida tep neu-upadda et melngat ida lad dalam.” <sup>33</sup> Kan idan disipol ni hi-gatuy “Attu tayu pengellaan eyad endi nambebley ni pekkkan eyan dakel ni tuu?” <sup>34</sup> Kan Jesus ni hi-gaday “Piga sinapay ni wadan hi-gayu?” Kanday “Pitu niya ekket ni deleg.”

<sup>35</sup> Et ehelen Jesus idan tuu et yumudung ida. <sup>36</sup> Illa tu etan pitun sinapay et ya etan ekket ni deleg et mansalamat nan hi Apu Dios et teneg-angan tu et idwat tuddan disipol tu et da pan-iwatwat idan tuu. <sup>37</sup> Nengan idan emin et maphel ida. Inemung da natdaan ey napnu pitun basket ni sineneg-ang tun sinapay niya deleg. <sup>38</sup> Limmaw ni epat ni libu hu lakin nengan, e eleg makibilang ida bii et ya u-ungnga dadda. <sup>39</sup> Negibbuh et paenamut idan Jesus et mambangka et lumaw di bebley di Magadan.

## 16

*Ya nengibag-an idan tuun pengippeang-angan Jesus ni hi-gadan miracle  
(Mark 8:11-13; Luke 12:54-56)*

<sup>1</sup> Yadda edum ni Pharisee et yadda Sadducee, ey limmaw idad kad-an Jesus ni mematan hi-gatu. Imbagedan hi-gatun peang-ang tu miracle ni keang-angan tu hedin makulug ni hi Apu Dios hu nengitu-dak ni hi-gatu, tep eleg da kulluga e intu-dak alin Apu Dios. <sup>2</sup> Nem hinumang Jesus et kantuy “Hedin kamangkelinnug hu aggew, ey

kanyuy meuggew ni kabuhhan, tep madlang hu kabunyan. <sup>3</sup>Nem hedin kakkabbuhhan et kamangkukulput ey kanyuy um-udan. Nelaing kayun mengamtan keibbellinan ni yuka ang-angad kabunyan, nem kayu kametemman mengimmatun ni kamekapkapyan nunya. <sup>4</sup>Lawah kayu, tep yuka ipatnan memillit ni hi-gak ni mengippeang-ang ni immatun ni kabaelan nan Apu Dios, nem endi edum ni meidwat ni penang-angan yun kabaelan tu, nem ebuah hu neipahding lan Jonah e prophet." Inhel nan Jesus huyya et hi-yanen tudda et manglaw.

*Ya neihlan kaituttudduan Pharisee niya Sadducee e humman heni etan ni yeast, tep kaum-abelin*

*(Mark 8:14-21)*

<sup>5</sup>Nan-awat di Jesus et yadda etan disipol tu etan di baybay et han da nemnema e liniwwan da et eleg ida mambalun ni sinapay. <sup>6</sup>Entanni ey kan Jesus ni hi-gaday "Helipati-yu hu yeast idan Pharisee et yadda Sadducee." <sup>7</sup>Ida kaum-enungbal hu disipol tu et kanday "Inhel tu humman tep endi balun tayu." <sup>8</sup>Inamtan Jesus hu wadad nemnem da et kantuy "Tam kulang yuka pengullug ni hi-gak, kele ya keendin balun tayu hu yuka ennungbala? <sup>9</sup>Kaw eleg yu awatan hu nakka pehpehding? Kaw liniwwan yu neneg-angan kun liman sinapay et pangan ku hu liman libun tuu et matdaan hu pigan basket? <sup>10</sup>Niya kaw liniwwan yu eman pitun sinapay ni sineneg-ang ku et meiwatwat di epat ni libun tuu et amungen yu hu pigan basket ni natdaan? <sup>11</sup>Kele kanyuy ya kennen hu nakka pan-e-helan hi-gayu? Helipati-yu kuma etan kaitenuttudduan Pharisee et yadda Sadducee." <sup>12</sup>Inawtan da law e beken ni yeast ni kaikkamdug di sinapay hu kapan-e-helan Jesus, nem ya neihlan kaituttudduan Pharisee ni yadda Sadducee.

*Ya nanghelan Peter ni tuka pengullug nan Jesus*

*(Mark 8:27-30; Luke 9:18-21)*

<sup>13</sup>Limmaw di Jesus di bebley ni neihnup di Cesarea Philippi et yadman hu nengibegaan tuddan disipol tu e kantuy "Hipa dedan hu kan idan tuun hi-gak e Pengulwan ni emin ni tuu?" <sup>14</sup>Ey kanday "Ya edum ey kanday hi-gam la eman hi John e kamemenyag. Ya edum ey kanday hi-gam hi Elijah la. Ey ya edum, ey kanday hi-gam hi Jeremia la, winu hakey lan prophet ni netagwan."

<sup>15</sup>Kan Jesus ni hi-gaday "Nem inna-nu dedan ni hi-gayu, hipa dan kanyun hi-gak?"

<sup>16</sup>Hinumang Peter et kantuy "Hi-gam hi Christo e U-unggan Apu Dios e wadan ingganah." \*

<sup>17</sup>Kan Jesus nan Peter ey "Hi-gam e Simon e u-unggan John ey man-am-amleng ka, tep huttan ni inhel mu ey beken ni nalpud nemnem mu, nem impeamtan Ama Apu Dios di kabunyan ni hi-gam. <sup>18</sup>Et yan nunya, ey inggadnan dakan hi Peter e ya keibbellinan tu ey batu. Hi-gam e Peter e meinggadnan ni batu hu umhulun ni pengullugan idallin tuun hi-gak tep ya humman ni inhel mun hi-gak. Humman idan mengullug ni hi-gak ey endi kabaelan Satanas ni mengapput ni hi-gada ma-lat endi silbin daka pengullug. <sup>19</sup>Iddawat kun hi-gam hu saad mu et hi-gam hu mengnged idan alladdud nan-ap-apuan Apu Dios, et ya e-legen mud puyek ni pehpehding ni tuu ey e-legen daman Apu Dios di kabunyan. Ya ebbuluten mud puyek ey ebbuluten daman Apu Dios di kabunyan."

<sup>20</sup>Negibuh humman ni inhel tu et pakattugunen tudda e eleg da e-ehhelad edum e hi-gatu hi Christo ni pinutuk Apu Dios ni mengippatek ni emin ni tuu.

*Ya nanghelan Jesus ni elaw ni panlelehanan tu et ya ketteyyan tu*

*(Mark 8:31-9:1; Luke 9:22-27)*

<sup>21</sup>Yan nunman hu laputun nengipeamtaan tuddan disipol tun mekapkapyallin hi-gatu et kantuy "Mahapul ni umlawwak di Jerusalem et nak panlelehanan hu pehding ida etan ni kamengippangnguluddan Jews, yadda etan ap-apuddan padi niyadda etan kamantuttuddun intugun Moses. Et pepettey da-ak ali, nem metegguan nak ni katlun aggew."

<sup>22</sup>Nem inaygan Peter hi Jesus di pangil et ibunget tu. Kantuy "Eleg mabalin ni an meipahding ni hi-gam e Apu huttan ni inhel mu. Eleg pinhed nan Apu Dios hu hanniman." <sup>23</sup>Nem inligguh nan Jesus nan Peter et kantuy "A-allaw kad kad-an ku. Heni ka hi Satanas e ap-apun lawah. Ya pinhed mu ey i-e-leg mu hu mahapul ni meipahding ni hi-gak. Nemnem tu-wangun tuu hu nemnem mu, beken ni henin nemnem nan Apu Dios."

<sup>24</sup>Entanni ey kan Jesus idan disipol tu ey "Ya etan tuun neminhed ni meikukkuyyug ni hi-gak ma-lat metuttudduan ni elaw ku, ey mahapul ni eleg tu nemnema hu nelakah

\* **16:16** 16:16 Ya keibbellinan ni Christo ey ya etan pinutuk Apu Dios ni Menellaknib ni tuu.

ni pambiyagan tu, nem ebbuluten tu panligligatan tu. Anin ni humman umhulun ni ketteyyan tu, et mahapul ni hi-gak hu u-unnuden tu. <sup>25</sup> Tep ya tuun ya neitu-wan tu eyad puyek hu tuka ikakkaguh ni ebuh ey endilli biyag tun endi pappeg tud kad-an Apu Dios. Nem ya tuun tuwak kau-unnuda anin ni umhulun ni ketteyyan tu ey meidwatan ni biyag ni endi pappeg tud kabunyan di kad-an Apu Dios. <sup>26</sup> Tep anin ni ellan ni tuun emin eya wadad puyek et endi silbitu hedini endilli biyag tud kad-an Apu Dios, tep mekastigullin ingganah. Endi edum ni nebalbalol nem ya biyag ni tuun endi pappeg tu, e eleg mabalin ni an mebeyyadan ma-lat alen tu. <sup>27</sup> Makulug huuya tep hi-gak e Pengulwan ni emin ni tuu ey um-ali-ak ali mewan ni an menuwet ni tuu. Meang-ang ali dayaw nan Aman hi-gak ni ellian midda etan ni bega-en tun anghel. Yan nunman alin aggew ey kastiguen kudda etan lawah impahpahding da. Nem yadda etan kayyaggud impahpahding da ey iddawat kun hi-gada hu panyaggudan da. <sup>28</sup> Nemnemnem yu eya e-helek ni hi-gayu e makulug ni wadaddan hi-gayun nunya hu eleg mettey ingganah ang-angen dalli hu pan-ap-apuan ku e Pengulwan ni emin ni tuu."

## 17

*Ya nelummanan ni ang-ang nan Jesus*

*(Mark 9:2-13; Luke 9:28-36)*

<sup>1</sup> Nelabah enem ni aggew ey an ingkuyug Jesus di Peter et yadda etan han-agi e di James nan John et manteyed ida etan di eta-gey ni duntug et e-ebbuh idadman. <sup>2</sup> Wadad dadman ey nelumman hu ang-ang Jesus e ya angha tu ey heni aggew e kaumhili. Ya balwasi tu ey nambalin ni mekabkablak e kamammussi-lak ni peteg. <sup>3</sup> Entanni ey inang-ang ida etan ni tellun disipol di Moses nan Elijah e ida kamekiung-ungbal nan Jesus. <sup>4</sup> Et kan Peter nan Jesus ey "Apu, kayyaggud illian tayudya. Hedini pinhed mu, umkapyak-ak ni tellun a-abbung, hakey ni hi-gam, hakey nan Moses niya hakey nan Elijah."

<sup>5</sup> Kaman-e-ehhel hi Peter ey pinhakkeyey nehiduman idan kulput ni kaumhili, ey wada immehel alid kulput e kantuy "Huuya hu U-ungngak ni nakappinhed ku niya kamengippeamleng ni hi-gak. Kulug yu hu ehel tu."

<sup>6</sup> Simmakut ida etan tellun disipol tun nanggelan dan etan ni ehel et lumukpap idad puyek. <sup>7</sup> Nem hinnup idan Jesus et kap-en tudda et kantuy "Entan takut yu. Inah kayu."

<sup>8</sup> Intangaw da ey ebuh law hi Jesus ni wada.

<sup>9</sup> Ida kamenayyud duntug ey sinugun idan Jesus et kantuy "Entan tu e-ehhel humman ni inang-ang yu ingganah ni metegguan nak di katey."

<sup>10</sup> Ey kandan Jesus ey "Kele kan idan kamantutuddun Tugun Moses ey pakkadek mebukkul ni um-ali mewan hi Elijah et han umli etan mengippaptek ni tuu?"

<sup>11</sup> Hinumang Jesus ey kantuy "Makulug ni pakkadek um-ali hi Elijah et idaddan tun emin. <sup>12</sup> Nem e-helek ni hi-gayu e immali hi Elijah, nem eleg immatunan idan tuu et panligligat da. Hanniman dama pehding dan hi-gak e panligligat da-ak ni hi-gada."

<sup>13</sup> Inewatan da law e hi John e kamemenyag hu tuka pan-e-hela.

*Ya nangkalan Jesus ni neihuklung ni dimonyoh etan ni u-ungnga*

*(Mark 9:14-29; Luke 9:37-43)*

<sup>14</sup> Yan nambangngadan dad kad-an idan tuun neamung ey limmaw etan hakey ni tuud kad-an Jesus et mandukun et kantuy <sup>15</sup> "Apu, hemek mu anhan u-ungngak et ekalen mu keldah tu tep tuka panlelehani. E-eggel ni nan-egah di danum et yad apuy. <sup>16</sup> Inlaw kud kad-an idan disipol mu, nem eleg da han-ekal degeh tu."

<sup>17</sup> Kan Jesus ni hi-gaday "Ayyakaw kayun tuun nunya, lawah kayu niya endi yuka pengullug! Piga binabbal kun hi-gayu? Kaw mekihahha-addak ni hi-gayun ingganah et han kayu mangulug? I-li yudya etan u-ungnga." <sup>18</sup> Et pea-allaw tu etan neihuklung ni dimonyoh etan ni u-ungnga ey pinhakkeyey yimmagud law.

<sup>19</sup> Entanni ey limmaw ida disipol tud kad-an tu et e-ebbuh ida ey kandan hi-gatuy "Kele eleg mi han-ekal hu neihuklung ni dimonyoh etan ni u-ungnga?" <sup>20</sup> Kan Jesus ni hi-gaday "Em, tep beken ni nehammad hu yuka pengullug. E-helen kun hi-gayu e makulug ni anin ni henin kainekket ni bukel ni mustard hu yuka pengullug nan hi Apu Dios, nem nehammad ni peteg et dammutun hedini kanyuy mei-tan hu duntug, man mei-tan tu-wangu hedini humman pinhed Apu Dios. Han-ipahding yu hu hipan pinhed yun pehding hedini nehammad yuka pengullug. <sup>21</sup> Nem ya henin nunman ni dimonyoh ni neihuklung ey mahapul ni mantetpel kayun mandasal et han ma-kal di tuu."

*Ya pidwa tun nanghelan Jesus ni elaw ni ketteyyan tu*

*(Mark 9:30-32; Luke 9:43-45)*

<sup>22</sup> Yan neamungan idan disipol nan Jesus di Galilee, ey kan Jesus ni hi-gaday “Hi-gak e Pengulwan ni emin ni tuu ey ellan da-ak idallin edum ni tuu et nemahhig pehding dan hi-gak. <sup>23</sup> Pepetty da-ak, nem yan katlun aggew ni ketteyyan ku, ey metegguan nak ali.” Yan nanggelan idan disipol tun nunya ey ida kaumlelemyung.

*Ya bayad ni buwis di Tempol*

<sup>24</sup> Yan linawwan dad Capernaum ey limmaw ida kaman-emmung ni buwis di kad-an nan Peter et kanday “Kaw kamambeyyad apu yun buwis di Tempol?” <sup>25</sup> Hinumang nan Peter et kantuy “Kele tep eleg? Tam kamambeyyad.”

Himmegep hi Peter etan di baley ey nemangulun immehel hi Jesus et kantuy “Simon, hipa kamambeyyad ni buwis di gubilnud Rome, kaw yadda tuu ngu dedan diman e bebley winu yadda etan binunal diman?”

<sup>26</sup> Kan Peter ey “Yadda binunal hu kamambeyyad.” Ey kan nan Jesus ey “Hedin hanniman, ey eleg ida tep mahapul ni mambeyyad hu tuu dedan diman ni buwis dad gubilnu. Heni daman hi-gak e U-unggan Apu Dios e eleg mahapul ni nak mambeyyad ni buwis di Tempol tu. <sup>27</sup> Nem anin elaw ka et ka memenwit di baybay et ya etan memenggulun benwiten mu, ey tewab mu bungut tu et ang-angen mu etan pihhuh ni palatah ni ingkamil tu et alen mu, ma-lat humman ibbayad tayun buwis di Tempol.”

## 18

*Ya elaw ni makulug ni kasina-gey di biyag*

(Mark 9:33-37; Luke 9:46-48)

<sup>1</sup> Yan nunman, ey limmaw ida disipol Jesus di kad-an tu et kanday “Hipa keta-tageyyan di kapan-ap-apuin Apu Dios?” <sup>2</sup> Immayag hi Jesus ni u-ungnga et peehngeng tud hinangga da et kantuy <sup>3</sup> “Dengel yu eya makulug ni e-helen kun hi-gayu. Eleg kayulli mei-dum di nan-ap-apuan Apu Dios hedini eleg melumman nemnem yu ma-lat henin nemnem idan u-ungnga, e beken idan makehing, nem nelakah dan ebbuluten hu elaw ni makulug. <sup>4</sup> Ya tuun pebabah tu annel tu e henin eyan u-ungnga, ey hi-gatu keta-tageyyan di kapan-ap-apuin Apu Dios. <sup>5</sup> Ya etan tuun pinhed tudda hu u-ungnga, tep tuka ibbilang ni u-ungngak ida, ey pinhed tuwak dama.

*Mahapul ni hellipat-an tayu ma-lat ya kakkayyaggud hu elaw tayu*

(Mark 9:42-48; Luke 17:1-2)

<sup>6</sup> Nem ya etan tuun hi-gatu umhulun ni pengiwallengan ni pakekulug tun tuka pengullug ni hi-gak, ey heballi ta-yunan bukdeu tun et-eteng ni batu et an lenengen di baybay. <sup>7</sup> Anggehemmek tuud puyek tep wadan kenayun hu kamenuttullun ni hi-gadan manliwwat. Humman idan kamettullun ey anggehemmek idalli, nem nema-maddalli etan kaumtuttullun, tep anggehemmek idallin peteg tep ya kastigu da.

<sup>8</sup> Hedin ya heli yu niya ngamay yu hu kaumhulun ni yuka pengippahdingin lawah, heballi putul yu et bekahen yu. I-imman hu anin megumhulan kayu nemet wada hu biyag yun mannananeng, nem ya hu wadan emin ngamay yu niya heli yu ey kayu umlaw di apuy ni eleg me-dep et kayu manha-ad diman ni ingganah. <sup>9</sup> Ey hedini ya mateyu hu kaumhulun ni yuka panliwwasi, ey heballi ukut yu. I-imman hu anin endi mateyu, nemet wada hu biyag yun mannananeng, nem ya hu wadan dewwa hu mateyu ey kayu umlaw di apuy et kayu manha-ad diman ni ingganah.

*Ya kei-ingngehan etan ni kalneroh ni netalak*

(Luke 15:3-7)

<sup>10</sup> Ang-ang yu et endi yu pihhulen ni anin hakey ida eyan u-ungnga, tep e-helek ni hi-gayu e yadda anghel da ey wadaddan kenayun di kabunyan di kad-an nan Apu Dios e kamenang-ang-ang ni hi-gada. <sup>11</sup> Hi-gak e Pengulwan ni emin ni tuu ey immali-ak di puyek ni an menellaknib ni tuud liwat da.

<sup>12</sup> Kaw amta yu hu pehding etan ni tuun wada hanggatut ni kalneroh tu hedini metellak hu hakey? Inamtak et ya pehding tu ey hi-yanen tu etan nahyam et heyam ni kalneroh di pattullan et tu hamahamakan etan hakey ni netalak. <sup>13</sup> Et hedini himmak tu etan hakey ni netalak ey e-eteng amleng tun nenamakan tu, nem ya hu amleng tudda etan ni nahyam et heyam ni kalneroh ni eleg matelak. <sup>14</sup> Hanniman dama elaw Ama Apu Dios di kabunyan. Eleg tu pinhed ni wada eleg mehellaknibin anin hakey ni u-ungnga.

*Ya elaw ni penuggun yudda etan ni edum yun nambahul ni hi-gayu*

<sup>15</sup> Hedin wada mambekhul ni hakey ni tuun hi-gayu, elaw kayud kad-an tun e-ebbulh kayu et yu peamtan hi-gatu humman ni bahul tun hi-gayu. Et hedini mantuttuyun liwat tu, ey han-ayyam kayu law mewan. <sup>16</sup> Nem hedini eleg tu ebbuluta bahul tu, ey

ayang kayun dewwa winu tellun pan-e-dum yun penugunan yun hi-gatu ma-lat wada mengngel ni ittugun yu. <sup>17</sup> Nem anin ni um-ikuyug kayu, nem kapya tun eleg tu ebbuluta niya eleg tu dedngela penuggun yu, ey anin ehel yuddan emin ni kamengullug et hi-gada menuggun ni hi-gatu. Hedin eleg tu dedngela, anin ew ngenamung tu, nem entan tu ibilang ni kamengullug humman ni tuu.

*Ya pehdng yun mengi-leg niya mengi-ebbulut*

<sup>18</sup> Makulug eya e-helek ni hi-gayu e emin e-legen yud puyek ni pehpending ni tuu, ey e-legen daman Ametayun hi Apu Dios di kabunyan. Ya ebbuluten yud puyek ey ebbuluten tu dama."

<sup>19</sup> Kantu mewan ey "Hedin ihummangan ni dewwa hu pinhed dan ibbagan Apu Dios di dasal da, man makulug ni iddawatu. <sup>20</sup> Tep anin ni dewwa, winu tellu hu meemungun ni menaydayaw ni hi-gak, tep ya daka pengullug et wada-ak di kad-an da."

*Liwwan tayu bahul ni edum tayun hi-gatsu*

<sup>21</sup> Immali hi Peter di kad-an Jesus et kantuy "Apu, inna-nu hedin eleg issiked ni edum ni tuun mambehhul ni hi-gak, kaw liwwanan kun neyun? Hedin nangkappitun nambahul ni hi-gak hu hakey ni tuu, kaw mangkappitu daman liwwanan ku bahul tu?"

<sup>22</sup> Kan Jesus ey "Anin na-mun mampittun mandubli hu nepitun pambenhulan tun hi-gam et mahapul ni liwwanan mu."

<sup>23</sup> In-inggeh nan Jesus hu kapan-ap-apuin Apu Dios etan ni hakey ni ap-apu et kantuy "Wada etan ap-apun pinhed tun beyyadan idan bega-en tu hu utang dan hi-gatu. <sup>24</sup> Illa tu etan neitudekan ni wada utang dan hi-gatun pihhuh ey in-ali da etan hakey ni bega-en tun linnibu pihhuh ni beyyadan tu. <sup>25</sup> Nem eleg tu hambayad tep endi pihhuh tu. Et kan etan ni apu tu ey mahapul ni meigtang ni emin hu limmu tu niya meigtang idan han-ahwa et yadda u-ungnga da, ma-lat pameyad tun utang tu. <sup>26</sup> Nem nandukkun etan bega-en di hinanggab ni apu tu et mampehemhemmek e kantuy 'Heged mu ni anhan et han nak ali bayadin emin inutang ku.' <sup>27</sup> Himmek etan ni ap-apu humman ni bega-en tu et kantuy 'Anin ew ni eleg mu beyyadi humman ni utang mu.'

<sup>28</sup> Et lumaw etan bega-en ey dinammu tud dalan etan keinggeh tun bega-en ni impautangan tun hanggatut ni pihhuh. Hingkel tu et kantuy 'Bayadim etan inutang mun hi-gak.'

<sup>29</sup> Nandukkun etan bega-en di hinangga tu et kantuy 'Entanni anhan yaggud beyyadak alin emin, nem panheged ka anhan ni ekket.'

<sup>30</sup> Nem eleg pekahged et tu paikelabut humman ni hakey ni bega-en ni impautangan tu ingganah teklaen tun emin hu utang tu. <sup>31</sup> Inang-ang idan edum tun bega-en emin humman ni neipahding ey eleg da pinhed et da idaddatteng ni apu da. <sup>32</sup> Et paeyag ni apu da etan bega-en tu et kantuy 'Lawah kan peteg ni bega-en. Nampehemhemmek kan hi-gak et eggak pabeyad etan utang mu, <sup>33</sup> ey kele anhan endi hemek mu etan ni kadwam ni bega-en ni henin impahding kun hi-gam?' <sup>34</sup> Bimmunget etan ap-apu tep ya elaw tu et paikelabut tu ingganah teklaen tun emin hu utang tu." <sup>35</sup> Et kan Jesus law ni impanggillig tun inhel ey "Hanniman dama hu pehdng nan Apu Dios, e hedin eleg yu liwwana hu bahul ni edum yu, man eleg tu dama liwwana hu liwat yu."

## 19

*Ya nengituttudduan Jesus ni meippanggep ni panhi-yanan ni han-ahwa (Mark 10:1-12)*

<sup>1</sup> Ginibuh nan Jesus humman ni intuttuddu tu et hi-yanan tu humman ni bebley di Galilee et lumaw idad bebley di Judea e ba-hil ni Wangwang e Jordan. <sup>2</sup> Neiumud ida dakel ni tuun hi-gatu ey nan-ekal tu degeh idan kamanpandedgeh.

<sup>3</sup> Entanni ey wadadda immalin Pharisee di kad-an Jesus et da patnaan hedin meihhalla penummang tu eyan ibbageda, et kandan hi-gatuy "Hipad elaw tayu hu dammutun umhulun ni peni-yanan ni laki ahwa tu?" <sup>4</sup> Kan Jesus ey "Kaw eleg yu benidbiden hu neitudek ni ehel nan Apu Dios e kantuy 'Ya eman ni laputun naltuan ni emin ey kinapyan Apu Dios hu laki et ya bii?' <sup>5</sup> Et kantu mewan ey 'Et mukun ya laki ey hi-yanan tud ametun inetu et an menang-ang ni ahwaen tu, et man-addum ida et henidda law hakey ni annel.' "

<sup>6</sup> Intuluy Jesus et kantuy "Humman idelaw ni dewwan nan-addum ey henidda law hakey, et humman hu, eleg mabalin ni an panhi-yan ni tuu hu impan-addum nan Apu Dios." <sup>7</sup> Kandan hi-gatuy "Kele kan Moses ey 'Dammutun manhi-yan hu han-ahwa hedin kapyaen ni laki hu papil ni panhi-yanan da et idwat tun ahwatu?' "



<sup>8</sup> Kan Jesus ni hi-gaday “Annagam in-abulut Moses ni manhi-yan hu han-ahwa, tep mekelhi ulu yun Jews. Nem yan laputan nanletuan Apu Dios ni emin ey eleg tu iebulut humman. <sup>9</sup> E-helek ni hi-gayu e ya lakin hi-yanen tu ahwa tu et mambintan, ey in-abek tu ahwa tu. Ya dammutun peni-yanan ni lakin ahwa tu ey ebuh hedini in-abek ni ahwa tu.”

<sup>10</sup> Et kan idan disipol tu ey “Hedin tep henin nuntan, man heballi ew eleg mengahwa.”  
<sup>11</sup> Nem kan Jesus ni hi-gaday “Beken ni emin tuu ey kanday eleg ida mengahwa, tep hahhakkey ida hu indawtan Apu Dios ni gahat dan eleg mengahwa. <sup>12</sup> Ya eleg pengahwain edum ni tuu ey kapyatun neiungngaddan eleg mengahwa. Yadda edum ey eleg ida mengahwa tep ya impahding ni edum dan tuun hi-gada. Yadda edum ey eleg ida mengahwa tep ya ngunu dan meippanggep ni kapan-ap-apuin Apu Dios. Hi-gayuddan eleg tu pinhed ni mengahwa ey kayyaggud hedini humman u-unnuden yu.”

*Indasalan Jesus ida u-ungnga*  
*(Mark 10:13-16; Luke 18:15-17)*

<sup>13</sup> Wadadda tutu-un nan-ilaw da u-ungnga dad kad-an Jesus et da pakepan hi-gatu malat idasalan tuddan panyaggudan da. Nem imbunget idan disipol Jesus, tep kanday daka helli-waa hi Jesus. <sup>14</sup> Nem kan Jesus ey “Entan tu ika-leg ellian idan u-ungngad kad-an ku, tep yadda etan tuun henin elaw idan eyan u-ungnga hu elaw da hu meilla-kam di nan-ap-apuan Apu Dios.” <sup>15</sup> Et kap-en tu uludda etan ni u-ungnga et idasalan tudda et han tudda hi-yana.

*Ya etan tuun kedangyan ni eleg tu pinhed ni mengu-unnud nan Jesus*  
*(Mark 10:17-31; Luke 18:18-30)*

<sup>16</sup> Entanni ey wada immalin tuud kad-an Jesus et kantuy “Apu, hipa kayyaggud ni pehding ku ma-lat mawedan hi-gak hu biyag ni endi pappeg tu?” <sup>17</sup> Kan Jesus ni hi-gatuy “Kele kammuy kayyagguddak? Endi edum ni kayyaggud nem ebuh hi Apu Dios. Hedin pinhed mu biyag ni endi pappeg tu, man unud mu intugun Apu Dios.” <sup>18</sup> Kan etan ni tuu ey “Hipa u-unnuden kun intugun tu?” Kan Jesus ey “Entan patey mu, entan tu iebek ahwam, entan panekew mu, niya entan pan-itek mu. <sup>19</sup> U-unnud yudda a-ammed yu niya pehed yu edum yun tuu, henin impeminhed yun annel yu.” <sup>20</sup> Kan etan ni tuu ey “Emin huayan tugun ey nakka u-unnuda. Hipa kulang ku?” <sup>21</sup> Kan Jesus ni hi-gatuy “Hedin pinhed mun endi kakulang ni elaw mud hinanggan Apu Dios, man lakkay et mu igtang ni emin hu limmum et mu idwat idan nangkewetwet ma-lat maweda kinedangyan mud kabunyan. Ey immali ka et maiunud kan hi-gak.”

<sup>22</sup> Yan nangngelan etan ni tuun nunman ey limmeyung et manglaw, tep kedangyan ni peteg.

<sup>23</sup> Et kan Jesus idan disipol ey “Nelihat hu kedangyan ni mei-dum di nan-ap-apuan nan Apu Dios. <sup>24</sup> E-helek ni hi-gayu e nelallakkah hu kamel ni um-usip di telek ni lubay nem ya an keilla-kaman ni kedangyan di nan-ap-apuan Apu Dios.”

<sup>25</sup> Yan nangngelan idan disipol tun nunya, ey natngadda et kanday “Kaw! Et hipadda tep hu dammutun mehella-kniban?” <sup>26</sup> Kaitettekeli idan Jesus ey kantuy “Ya tuu ey endi kabaalan tun menella-knib ni annel tu. Nem hi Apu Dios ey han-ipahding tun emin.”

<sup>27</sup> Ey himmapit hi Peter et kantuy “Nem ang-ang mu kedi e Apu, inwalleng min emin et adyah e hi-gam hu mika u-unnuda, nem hipalli iddawat mun hi-gami?” <sup>28</sup> Kan Jesus ni hi-gaday “Dengel yu tep e-helen kun hi-gayu e makulug ni yallin kehullulan ni emin eyan wadan nunya ey hi-gak ali e Pengulwan ni emin ni tuu ey umyudunggak alid kayuddungin ap-apu. Hedin hi-gayulli dama, man umyudung kayu etan di yuddungngan ni hampulut dewwan ap-apu et hi-gayu hu pan-ap-apuddan \* helag idan hampulut dewwan u-ungngan Israel. <sup>29</sup> Emin ida etan tuun hi-yanen da a-ammed da, ya u-ungnga da niya aaggi da, ya payew da niya baley da, tep ya daka pengu-unnudin hi-gak, ey hi-gadalli hu meidwatan ni dakel ni panyaggudan dan hakey ni aggew, ey meidwatan idallin biyag dan endi pappeg tu. <sup>30</sup> Nem yadda etan kameibbillang ni tuun nunya ey humman idalli hu eleg meibbillang ni tuu. Ey yaddalli etan tuun endi bilang tun nunya ey hi-gadalli meibbillang ni tuu.”

## 20

*Ya intuttuddun Jesus meippanggep ni nemangulu et ya nanggillig*

<sup>1</sup> Nan-a-abbig hi Jesus et kantuy “Ya elaw ni kapan-ap-apuin Apu Dios ey heni etan ni tuun himmaleman ni an menang-ang ni mangngunnud galden tu. <sup>2</sup> Wadadda

\* **19:28** 19:28 Ya hakey ni keibbellinan nunya ey menuwet.

hinummangan tun tangdanan tuddan henin katangdanan tuun han-aggew et ilaw tuddan an manggunnu. <sup>3</sup> Neta-nang aggew et lumaw mewan di mulkaduh ey wadadda inang-ang tun edum ni tuun endi daka pehpehding e idan ebuh kaman-eh-ehngeng. <sup>4</sup> Et kantun hi-gaday 'Lakkayuy et kayu mangngunud galden ku et tangdanan dakeyun tangdan ni han-aggew.' Et lumaw ida etan tuun an manggunnu. <sup>5</sup> Yan nandattekan ni aggew niyan hambatangangan, ey wadadda mewan tu inaygan ni an manggunnu. <sup>6</sup> Kamangkehilleng ey limmaw mewan di mulkaduh ey wadadda inang-ang tun tuun kaman-eh-ehngeng ni ebuh. Kantun hi-gaday 'Kele kayu kamanhahha-ad di deyan han-aggew ey endi yuka ngunnungunna?' <sup>7</sup> Kandan hi-gatuy 'Tep endi kamegeyyag ni hi-gamin an manggunnu.' Kantun hi-gaday 'Elaw kayu et kayu mangngunud galden ku.'

<sup>8</sup> Yan nunman ni mahmahdem ey kan etan ni kan galden etan ni kamengipappaptek ni galden tuy 'Ayagim ida kamanggunnu et idwat mu tangdan da. Pamengulum ida etan nanggillig ni nanggunu et han mu idwat tangdan ida etan ni nemangulun nanggunu.' <sup>9</sup> Immalidda etan nanggillig ni nanggunu et idwat tu tangdan dan henin tangdan ni tuun han-aggew nanggunuan tu. <sup>10</sup> Yan illian ida etan ni nemangulun nanggunun kakkabbuhhan, ey kanda na-mu nem e-edduman tu hu tangdan dan han-aggew, nem eleg. <sup>11</sup> Yan nenawtan dan tangdan da, ey ida kaman-e-nguh et ida kamangngungudu e kanday <sup>12</sup> 'Yadda nanggillig ey han-olas ni ebuh nanggunuan da. Hi-gami ey nepeppetang kamin han-aggew ni nanggunu, nem ay kele nan-iingngeh tangdan mi?' <sup>13</sup> Nem kan etan ni kan galden ey 'Agik ida, endi yu bellawen ni hi-gak tep indawat ku hu inummangan tayun tangdan yun han-aggew. <sup>14</sup> Aleyu kuma eya tangdan yu et umenamut kayu. Ngenamung ngak hedin kangkuy i-ingngeh ku hu tangdan idan nanggillig di tangdan yun nemangulu. <sup>15</sup> Endi biyang yud pihuh ku. Kaw kayu kaumameh tep himmek kudda?' " <sup>16</sup> Et kan Jesus ey "Yadda tuun eleg meibbillang ni nunya ey hi-gadalli neta-ta-gey. Yadda etan eta-gey ni tuun nunya ey hi-gadalli meibbillang ni nebabah ni hakey aggew."

*Ya pitlu tun penghelan Jesus ni ketteyyan tu  
(Mark 10:32-34; Luke 18:31-34)*

<sup>17</sup> Yan kapampenglawwid Jesus di Jerusalem, ey ineyagan tudda etan disipol tu et e-ebbuu ida ey kantun hi-gaday <sup>18</sup> "Yan lawwan tayud Jerusalem ey hi-gak e Pengulwan ni emin ni tuu ey pedpap da-ak idan ap-apuddan padi et yadda etan kamantuttuddun tugun Moses. E-helen da e wada bahu ku et pepettey da-ak. <sup>19</sup> Illaw da-ak di kad-an idan tuun beken ni Jew et pan-impipihulan da-ak, niya pan-imbabaigan da-ak et han da-ak ipetak di krus et yadman ketteyyan ku. Nem yan katlun aggew ey metegguannak."

*Ya etan imbagan inad James nan John  
(Mark 10:35-45)*

<sup>20</sup> Immali hi ahwan nan Sebedi et yadda etan dewwan u-ungnga tun disipol Jesus et mandukku di hinangga tu et kantuy "Wada et anhan ibbaga ni hi-gam." <sup>21</sup> Kan Jesus ey "Hipa pinhed mun ibbaga?" Kantuy "Payudung muddalli anhan eya dewwan u-ungngak di winannan mu et yad winillim di pan-ap-apanulli."

<sup>22</sup> Nem kan Jesus etan idan han-agi ey "Eleg yu amta hu kapan-ibbagan ineyu. Kaw makkaw et dammutun han-isipel yu hu ligat ni heni eyan panliggatan ku?" Kandan hi-gatuy "Dammutun han-isipel mi."

<sup>23</sup> Et kan Jesus ni hi-gaday "Makulug ni panligligatan yuddalli etan henin panligligatan ku, nem endi kelebengan kun mengippanghel hedin hipa umyudung di winannan ku niyad winillik di pan-ap-apan ku. Ngenamung hi Ama Apu Dios ni mampilli hedin hipa pinhed tun pillien."

<sup>24</sup> Dingngel ida etan ni hampulun disipol Jesus humman ni an imbagad James nan John ey ida kaumbubunget ni hi-gada. <sup>25</sup> Et paeyag idan Jesus ni emin di kad-an tu et kantun hi-gaday "Inamta yu elaw ni ap-apuddan Gentiles e daka peta-gey annel da niya daka ba-aba-aladda tutu-u. <sup>26</sup> Nem beken ni henin nunya hu elaw tun hi-gayu. Hedin wada pinhed tun eta-gey ali saad tu, man mahapul ni hi-gatu pambega-en yun emin. <sup>27</sup> Ey hedin wadan hi-gayu hu pinhed tun hi-gatulli keta-ta-geyyan, ey mahapul ni mambalin ni heni himbut ni mengingunggunun panyaggudan yun emin. <sup>28</sup> Tep anin hi-gak e Pengulwan ni emin ni tuu et immali-ak ni an mambalin ni bega-en tep ya panyaggudan idan tuu. Eleggak umlin man-ap-apan, nem immali-ak ni an mettey ni peneklaan kun liwat ni tuu ma-lat mahelakniban ida."

*Ya nangkalan Jesus ni kulap ida etan ni dewwan tuu  
(Mark 10:46-52; Luke 18:35-43)*

<sup>29</sup> Kapanhi-yanad Jesus etan bebley di Jericho ey neiunud ida dakel ni tuu. <sup>30</sup> Wadadda etan dewwan lakin nekulap ni yimmudung di giligi ni keltad. Dingngel da e kamangkelebbah hi Jesus ey ida kamantetekkuk e kanday “Apu Jesus e helag David, hemek dakemi anhan!” <sup>31</sup> Ey imbunget ida etan ni neamung ni tuu e kanday “Eneeneng kayu!”

Nem da anhan law kapan-ihimet et ida kamantetekkuk e kanday “Apu e helag nan David, hemek dakemi anhan!” <sup>32</sup> Immehneng hi Jesus et aygan tudda et kantuy “Hipa pinhed yun pehding kun hi-gayu?”

<sup>33</sup> Kandan hi-gatuy “Apu, pinhed min e-kalen mu kulap mi.” <sup>34</sup> Himmek idan Jesus et kap-en tu mateda ey pinhakkeyey kaum-ang-ang law hu mate da et maikuyug idan Jesus.

## 21

### *Ya linawwan Jesus di Jerusalem*

(Mark 11:1-11; Luke 19:28-40; John 12:12-19)

<sup>1</sup> Ida kamenetteng di Jesus et yadda disipol tud Jerusalem, e wadaddad Betpage di Duntug e Oliba, ey impamengulu tudda dewwan disipol tu. <sup>2</sup> Kantun hi-gaday “Ibubbukkul yu lad eman di bebley di Betpage et hedin ang-angen yu la etan han-inan kebayyun neiket, ey ukah yu et i-li yudya. <sup>3</sup> Hedin wada um-ehel ni hi-gayu ey nealay kanyuy ‘Mahapul ni Apu tayu’ et i-abulut tu kaya.”

<sup>4</sup> Huyya nekapkapyan inamnuan eman ni inhel lan prophet Apu Dios ni kantuy <sup>5</sup> “Ehel yuddan tuud Jerusalem e iyalli law etan patul da. Tuka pebabah annel tu et mantakkay di kilaw ni kebayyu.” \*

<sup>6-7</sup> Inu-unnud ida etan ni dewwan disipol hi Jesus et lumaw ida et dalli alen etan ida han-inan kebayyu et ekalen da ta-kep ni balwasi da et idpen dad beneg idan nunman ni kebayyu et mantakkay hi Jesus. <sup>8</sup> Nan-ekal idan dakel ni tuun neamung hu ta-kep ni balwasi da et pan-iap-ap dad keltad. Ida nengala edum ni tuun bulbulungngan et da pan-iap-ap di keltad ni dellanen Jesus. Humman elaw ni nenaydayawan dan hi-gatu. <sup>9</sup> Yadda tuun nemangulu niyadda etan kameitu-tu-nud nan Jesus ey daka pan-itkuk hu daka penaydayaw ni hi-gatu e kanday “Kaka medeyyaw e helag nan David! Em, kaka medeyyaw tep intu-dak dakan Apu Dios. † Dayaw tayu hi Apu Dios e Keta-ta-geyyan.”

<sup>10</sup> Yan dintengan di Jesus di Jerusalem, ey natngaddan emin tuudman et kanday “Hipa huyyan tuu?” <sup>11</sup> Hinumang ida etan ni dakel ni tuun neikuyug nan Jesus ey “Hi Jesus di Nazareth di Galilee e prophet.”

### *Ya linawwan Jesus di Tempol*

(Mark 11:15-19; Luke 19:45-48; John 2:13-22)

<sup>12</sup> Himmegep hi Jesus di Tempol et pampa-hep tudda etan kamampanggettang et yadda kaumgatang di bawang. Binetu-lang Jesus ida tebol idan kamenullul ni pihhuh et ya yuddungngan idan kamanggettang ni paluma, <sup>13</sup> et kantun hi-gaday “Kan Apu Dios di ehel tuy ‘Ya baley ku ey meingngadnan ni dassallan,’ nem ay impambalin yun heni tallu-an idan mangkatekew, tep hauhaul hu yuka pengellain pihhuh idan tuudya.”

<sup>14</sup> Immalidda nekulap et yadda nepi-day di kad-an Jesus di Tempol et ekalen tu kulap da et ya pi-day da. <sup>15</sup> Nem yadda ap-apuddan padi et yadda kamantuttuddun Tugun Moses ey bimmunget idan nenang-angan dan nunyan kayyaggud ni kapehphehding Jesus, niyan nangngelan daddan u-ungnga e daka ittettetkuk di Tempol e kanday “Kaka medeyyaw e helag nan David!” <sup>16</sup> Kandan Jesus ey “Kaw eleg mu dedngela daka ittettetkuk?” Ey kan Jesus ni hi-gaday “Nak ida kadeddengngela. Daka pampeamnu hu impatudek nan Apu Dios. Kaw eleg yu benidbiden etan neitudek e kantuy ‘Anin idan kaungaanga niya gegellang et sinuttudduam idan menaydayaw ni hi-gam.’ ‡”

<sup>17</sup> Hini-yan di Jesus humman idan tuu et lumaw idad Betania et manha-ad idadman ni hanlabbi.

### *Ya pinhed tun e-helen etan eleg lummeh ni keyew ni fig*

(Mark 11:12-14, 20-24)

<sup>18</sup> Yan newa-waan tun nambangngadan Jesus di Jerusalem ey neu-upad dalan. <sup>19</sup> Inang-ang tu etan keyew e fig di giligi ni keltad et tu ang-angen ey endi lameh tu, ebuh bulung tu, et kan tuy “Eleg kalli law umlameh ni ingganah.” Ey pinhakkeyey nakpit etan keyew. <sup>20</sup> Inang-ang idan disipol tu humman ni neipahding ey natngadda.

\* **21:5** 21:5 Huyyan klasih ni kebayyu ey donkey. Hedin nantakkay hu patul di donkey, ey peang-ang tu e linggep in-ali tu. Nem hedin ya ustuh ni kebayyu hu nantakkayan tu, man mekigguabbat. † **21:9** 21:9 Psalm 118:26 ‡ **21:16** 21:16 Psalm 8:2

Kanday “Kele pinhakkeyey nakpit eya keyew?” <sup>21</sup> Kan Jesus ni hi-gaday “Makulug eya e-helen kun hi-gayu e hedin wada dinel yun Apu Dios niya eleg kayu mandinwa, ey dammutun han-ipahding yu hu impahding ku eyan keyew. Beken ni ebuh humman, nem dammutu mewan ni hedin kanyun duntug ey ‘kei-tan kad baybay,’ man mei-tan tu-wangu hedin pinhed nan Apu Dios. <sup>22</sup> Anin hipa ibbageyun Apu Dios et iddawat tu hedin wada yuka pengullug.”

*Ya kelebengan Jesus ni mantuttuddu  
(Mark 11:27-33; Luke 20:1-8)*

<sup>23</sup> Himmegep hi Jesus di Tempol et kamantuttuddu ey immalidda etan ap-apuddan padi niyadda ap-apuddan Jews di kad-an tu et kanday “Hipa kelebengan mun mengippahding ida eyan muka pehpending? Hedini wada kelebengan mu, hipa ni-ngangu nengidwat?”

<sup>24</sup> Hinumang Jesus et kantuy “Wada ni dama ibbagak ni hi-gayu. Hedini hummangen yuwak, ey e-helen ku dama nalpuan ni kelebengan ku. <sup>25</sup> Hipa nengitu-dak nan hi John ni an memenyag, ya tuu winu hi Apu Dios?” Nanhuhummangan ida et kanday “Hedin kan tayuy ‘hi Apu Dios,’ ey kan tulliy ‘Nem tamey eleg yu kulugen hu intuttuddun John.’ <sup>26</sup> Nem hedini kan tayuy ya hu tuu nengidwat ni saad tu, anggetakkut ida eya tuu tep daka kulluga e prophet nan Apu Dios hi John.”

<sup>27</sup> Et kanda law nan Jesus ey “Tawwey, eleg mi amta.” Ey kan daman Jesus ni hi-gaday “Hedin hanniman, eggak tep dama e-helan hi-gayu hu nengidwat ni hi-gak ni kelebengan kun kamengippenahding eyan nakka pehpending.”

*Ya a-abbig ida etan ni han-agin laki*

<sup>28</sup> Nan-ab-abis hi Jesus ni hi-gada e kantuy “Nemnem yu eya a-abbigen ku. Wada etan hakey ni tuun dewwa u-ungnga tun laki. Limmaw hi amedad kad-an ni pengulwan et kantuy ‘Lakkay et ka mangngunud galden tayun nunya.’

<sup>29</sup> Kan etan ni pengulwan ey ‘Eggungu.’ Nem entanni ey nantuttuyyu et lumaw. <sup>30</sup> Limmaw dama etan amedad kad-an ni neihned ni u-ungnga tu et kantuy ‘Lakkay et ka mangngunu.’ Ey kan etan ni neihned ey ‘Em, umlawwak.’ Nem eleg lumaw.”

<sup>31</sup> Kan Jesus ey “Hipan hi-gada hu nengu-unnud nan ameda?” Kan idan ap-apu ey “Ya etan pengulwan.”

Et kan Jesus ni hi-gaday “E-helen kun hi-gayu e makulug ni heni kayu etan ni neihayed. Yadda lawah ni tuun henidda etan ni kaman-emmung ni buwis niyadda etan biin daka pebeyyabeyyad hu annel dad laki ey kekkeddudkul ida nem hi-gayu, tep nelakah idan umlaw di kad-an nan Apu Dios nem hi-gayu. <sup>32</sup> Tep intuttuddun John e kamemenyag hu kayyaggud ni elaw ni u-unnuden ey eleg yun hekey kulugen, nem kinulug ida ni-ngangu nunman idan kaman-emmung ni buwis et yadda etan lawah ni biin daka pebeyyabeyyad annel dad laki. Inamta yu e kinulug da elaw ni intudun John, nem eleg kayu mantuttuyyu et eleg yu u-unnuden.

*Ya a-abbig etan idan nengipaptek ni puyek ni netaneman ni grapes  
(Mark 12:1-12; Luke 20:9-19)*

<sup>33</sup> Dengel yu eya hakey mewan ni a-abbigen kun hi-gayu. Wada etan tuun sinneman tu hu puyek tun grapes, et luhuden tu nanlinikweh. Kimmapiyan pengikpala ni lameh ni grapes niya nengapiyan eta-gey ni pangguwalyaan idan mengipaptek ni nunman ni puyek. Impepapak tek ni humman ni sinneman tu et lumaw di edum ni bebley. <sup>34</sup> Nedateng humman ni intanem tu et itu-dak tudda bega-en tun an mengellan dewatu. <sup>35</sup> Nem dimpap idan kamampaptek humman idan bega-en et pateyen da hakey, nambaig da hakey, niya nantengba da etan hakey. <sup>36</sup> Immitu-dak mewan ni daddakkel ni bega-en tu, nem henin neipahding idan limmaw ni laputu hu neipahding ni hi-gada. <sup>37</sup> Entanni ey intu-dak tu etan lakin u-ungnga tu tep kantuy ‘Amtak et nanna-ud ni be-ingan da et lisipituen da.’

<sup>38</sup> Nem inang-ang idan kamengipapaptek ni nunman ni puyek etan u-ungnga tu et manhuhummangan ida et kanday ‘Immali u-ungnga tun memeltan alin puyek tu. Pandada-da itu et pateyen tayu et pampuyek tayu eya puyek ni beltanen tu.’ <sup>39</sup> Et depapen da et ia-allaw dad ba-hil etan ni netaneman ni grapes et pateyen da.”

<sup>40</sup> Et kan Jesus idan kamandeddenggel ey “Hipalli na-mu pehding etan ni kampuyek etan idan kamampaptek ni nunman ni puyek tu hedini um-ali?” <sup>41</sup> Kandan hi-gatuy “Pepettey tudda et pepaptek tu puyek tun edum ni tuun nengidwat ni dewa tu hedini nedateng.”

<sup>42</sup> Kan Jesus ni hi-gaday “Kaw eleg yu benidbiden etan impatudek nan Apu Dios ni kantuy

'Ya etan batun binelaw idan kamengapyan baley ey humman anhan law hu impambalin

Apu Dios ni kekakkayyaggudan ni meikkapyad baley.' " §

<sup>43</sup> Et kan Jesus ida etan ni ap-apu ey "Hi-gayu hu neingingehan etan idan kamengapyan baley niyadda etan nengipaptek ni puyek etan ni tuu, tep impebeltan nan Apu Dios ni hi-gayun Jews hu kakkayyaggud ni elaw ni pan-ap-apuan tu, nem ay bangngaden tullu et pebeltan tuddan tuun mengullug ni hi-gatu. <sup>44</sup> Ya tuun man-e-gah etan di batun binelaw idan kamengapyan baley ey mangkehpung tu-ngal tu niya mangkemitmit ni peteg etan ippiten nunyan batu." \*

<sup>45</sup> Yan nangngelan idan ap-apuddan padin Jews et yadda Pharisee ni nunya ey inamta da e hi-gada hu nengieligan Jesus etan ni inhel tu. <sup>46</sup> Et pinhed dan belluden hi Jesus, nem ida kaumtakut idan neamung ni dakel ni tuu tep daka ibbilang hi Jesus ni prophet nan Apu Dios.

## 22

*Ya a-abbig etan ni kasal*

*(Luke 14:15-24)*

<sup>1</sup> Wada mewan ina-abbig Jesus ida etan ni tuu e kantuy <sup>2</sup> "Ya elaw ni kapan-apu Apu Dios ey heni eyan a-abbigen kun hi-gayu: Wada etan patul ni indaddan tu pangkasalan ni lakin u-ungga tu. <sup>3</sup> Intu-dak tudda bega-en tu et ida man-ayag ni tuun mekihheumul, nem endi kaum-aliddan etan ni tuun neaygan. <sup>4</sup> Et itu-dak tudda mewan edum ni bega-en tu et ida man-ayag e kanday 'Ali kayu et kayu makihemul tep mengahwa u-unggak. Nakleng hu newang niya baka et neidaddan emin hu kennen.' <sup>5</sup> Nem eleg ida hengnguda etan ni neayagan hu inhel ida etan ni intu-dak ni patul. Wada hakkey ni hi-gada ey wada lawwan da. Limmaw ida edum di papayyew da ey limmaw ida edum ni an manggettang. <sup>6</sup> Yadda etan edum ni neaygan, ey dimpap dadda kumedek etan bega-en da et pambaigen dadda et pateyen dadda. <sup>7</sup> Dingngel etan ni patul humman ni impahding daddan bega-en tu ey bimmunget et itu-dak tudda sindalu tu et da pampateyen ida etan nematey idan bega-en tu et panlegaben da bebley da. <sup>8</sup> Inaygan etan ni patul ida edum ni bega-en tu et kantuy 'Neidaddan hu pangkasalan ni u-unggak, nem diman ida etan inaygak, tep eggak pinhed ni um-alidda tep lawah ida. <sup>9</sup> Lakkayuy idad keltad et yadda tuun ang-angen yudman hu ayagi yu.' <sup>10</sup> Et lumaw ida etan bega-en tud keltad et dadda pan-ayagan emin tuun inang-ang da, kayyaggud niya lawah, et dakel ida law tuun nekihemul.

<sup>11</sup> Limmaw etan patul et tudda ang-angen hu tutu-un immali ey wada inang-ang tun tuun beken ni henin balwasin an meikkasal hu imbalwasi tu. <sup>12</sup> Et kan etan ni patul ni hi-gatuy 'Inna-nun hinggepan mu ey eleg ka mambalwasin henin balwasin an meikkasal?' Nem eleg umhumang etan tuu. <sup>13</sup> Et kan etan ni patul ey 'Bedbed yu ngamay tu et ya heli tu et bekahen yud dallin di engeenget. Anin manha-ad diman et numenginengih ey anin ngellingellidihen tu ngipen tudman.'" <sup>14</sup> Et kan nan Jesus ey "Henin nunman hu elaw ni kapan-ap-apuin Apu Dios, tep dakel meeyagan, nem hahhakkey ida umlaw di nan-ap-apuan tu."

*Ya meippanggep ni pambeyyadan ni buwis nan Cesar e ap-apud Rome*

*(Mark 12:13-17; Luke 20:20-26)*

<sup>15</sup> Hini-yan idan Pharisee hi Jesus et da ihuhummangan hu ibbage dan hi-gatu ma-lat hedin wada meihlan e-helen tu, ey humman pebehul dan hi-gatu. <sup>16</sup> Intu-dak dadda edum ni kamengu-unnud ni elaw da ey nekilaw ida dama etan edum ni tuun Herod di kad-an Jesus et kanday "Apu, inamta mi e makulug muka e-hela ey muka ittuttuddu makulug ni elaw nan Apu Dios. Niya eleg mu hengnguda hu ingkatuun hipan tuu. <sup>17</sup> Et yan nunya ey wada pinhed min ibbagan hi-gam, kaw kamei-ebbulut di Tugun Moses e hi-gatsun Jews ey mambeyyad itsun Cesar e ap-apud Rome ni buwis winu eleg?"

<sup>18</sup> Nem inamtan Jesus e ida kaumhamahamak ni ebuh ni pebehul dan hi-gatu et kantuy "Mangkaitek kayun peteg! Kele yuwak kapatpatnai? <sup>19</sup> Peang-ang yun hi-gak hu palatah ni yuka pemeyyad ni buwis." Impeang-ang da, <sup>20</sup> et kan tun hi-gaday "Hipa kan-angah niya kan ngadan eyan wadad palatah?" <sup>21</sup> Kanday "Tam hi Cesar." Et kantun hi-gaday "Idwat yun Cesar hu yu kaiddawat ngu dedan ni hi-gatu ey idwat yun Apu

§ 21:42 21:42 Psalm 118:22-23, ya Mark 12:10, ya Luke 20:17, ya Acts 4:11, ya Ephesians 2:20, et ya 1 Peter 2:7.

\* 21:44 21:44 Ya pinhed tun e-helen etan ida tuun man-e-gah etan di batu et mangkhpung tu-ngal da ey humman ida etan eleg da kulluga niya daka kehingga etan binegan Apu Dios ni umhelaknib ni tuu et nemahhig ali kastigu da.

Dios hu lebbeng tun meidwat ni hi-gatu.”<sup>22</sup> Dingngel da humman ni impanumang tu ey natngadda et hi-yanen da.

*Ya meippanggep ni ketegguan ali  
(Mark 12:18-27; Luke 20:27-40)*

<sup>23</sup> Yan nunman ni aggew ey immalidda edum ni Sadducee di kad-an Jesus. Humman idan tuu ey kandy eleg meteggui tuun netey. Kandan Jesus ey<sup>24</sup> “Apu, intuttuddu lan Moses e hedinetey hu hakey ni laki ey endi u-ungnga tu, man mahapul ni ahwaan ni agi tun laki etan biin nebalu ma-lat hedinetey man-ungngadda, man meibbilang ni u-ungnga da etan ni netey.”<sup>25</sup> Inna-nu tep hedinetey heninnuy neipahding: Wadadda pitun lalakkin han-aaggi. Nelahin etan pengulwan da, nem endi u-ungnga da ey netey etan laki et beltanen etan ni hened etan ahwa tu ey endi mewan u-ungnga da ey netey.<sup>26</sup> Nambelbeltanan idan nunman ni pitun han-aaggi humman ni biin inahwa, nem netey idan emin ey endi u-ungnga da.<sup>27</sup> Entanni ey netey law dama etan bii.<sup>28</sup> Inna-nu hedinetey makulug ni metegguan idallin emin hu nangkete, hipalli tep kan-ahwan nunman ni bii ey aye nambelbeltanan idan pitun han-aaggi?”

<sup>29</sup> Nem hinumang Jesus et kantuy “Huttan neipngilan yu! Ey huttan keang-angan tu e eleg yu han-awat hu impatudek nan Apu Dios ni ehel tu niya kabelaan tu.<sup>30</sup> Tep yallin ketegguan idan nangkete ey eleg idalli law man-aahwa, tep heniddalli anghel Apu Dios di kabunyan.<sup>31</sup> Hedinetey ya meippanggep ni nangkete, ey kaw eleg yu bibbiden etan impatudek Apu Dios e kantuy<sup>32</sup> ‘Hi-gak hu Dios nan Abraham, hi Isaac ni hi Jacob.’ Et huyya pengamtaan tayu e humman idan aammed tayu ey netey ida, nem eleg ibbilang Apu Dios idan netey, tep tegguen tuddalli emin tuu tu. Hi-gatu ey Dios idan mategu, beken ni yadda netey.”<sup>33</sup> Dingngel idan tuu humman ni intuttuddu tu ey natngadda.

*Ya importanteh ni peteg ni tugun Apu Dios  
(Mark 12:28-34; Luke 10:25-28)*

<sup>34</sup> Dingngel idan Pharisee e eleg hanhumang idan Sadducee hu inhel nan Jesus et maemung idad kad-an tu.<sup>35</sup> Wada hakey ni hi-gadan Pharisee ni abugaduh ni himmapit, tep pinhed tun patnaan hi Jesus<sup>36</sup> et kantuy “Apu, hipa keim-importantehan ni tugun nan Apu Dios?”

<sup>37</sup> Kan Jesus ni hi-gatuy “Mahapul ni pakappinheden yu hi Apu Dios ey emin hu yuka nemnemema niya yuka pehpending ey inemnem yun Apu Dios.<sup>38</sup> Huyya hu keim-importantehan ni intugun Apu Dios.<sup>39</sup> Et ya neikadwa ey ‘Mahapul ni pinheden yu edum yun tuu henin neminheden yun annel yu.’<sup>40</sup> Huyyaddan dewwan tugun Apu Dios hu neipuunan emin ni Tugun Moses et yadda intenuttudduddan prophet ni nunman.”

*Hi Christo ey beken ni helag David ni ebuh, nem Apu tu dama  
(Mark 12:35-37; Luke 20:41-44)*

<sup>41</sup> Nanengtudda Pharisee di kad-an Jesus<sup>42</sup> et kantun hi-gaday “Hipa yuka pannemnem meippanggep nan Christo? \* Hipa kan helag ni hi-gatu?” Kandan hi-gatuy “Ya kan helag ni hi-gatu ey hi David la.”<sup>43</sup> Kan Jesus ni hi-gaday “Hedinetey makulug ni hi David la hu kan helag ni hi-gatu, kele impa-hel ni Ispirituh Apu Dios hi David ey kantuy Apu tu etan pinutuk nan Apu Dios?<sup>44</sup> Tep kan David ey ‘Kan Apu Dios etan ni Apuk e hi Christo ey ‘Yudung kad winannan ku ingganah apputen kuddan emin hu buhul mu.’ ” †

<sup>45</sup> Intu-man nan Jesus ni immehel et kantuy “Nemnem yu kedi, hedinetey kaibbilang nan David hi Christo ni Apu tu, inna-nun kanyu ey helag nan David hi Christo?”<sup>46</sup> Ey endin hekey penummang dan Jesus, et eleg da law ipidpidwan memabbagan hi-gatu, tep ida kaumbaing ni tuka penummang ni daka ibbaga.

## 23

*Ya lawah ni elaw idan kamantuttuddun tugun Moses niyadda Pharisee  
(Mark 12:38-39; Luke 11:43, 46; 20:45-46)*

<sup>1</sup> Kan Jesus idan dakel ni tuu et yadda disipol tuy<sup>2</sup> “Yadda kamantuttuddun Tugun Moses et yadda Pharisee ey wada kelebengan dan mengituttuddun intugun nan Apu Dios.<sup>3</sup> Et humman hu, u-unnud yu hu daka ituttuddu, nem entan tu u-unnud hu daka pehpending, tep ma-nu tep kayyagud daka ituttuddu, nem eleg da u-unnuda.<sup>4</sup> Daka ippilit idan tuun mengu-unnud ni elaw ni neligat, nem eleg dadda baddangin pengu-unnudan da.<sup>5</sup> Ey emin daka pehpending ey daka peang-ang-ang idan tuu, tep daka

\* 22:42 22:42 Ya keibbellinan ni Christo ey pinutuk Apu Dios ni menellaknib ni tuu. † 22:44 22:44 Psalm 110:1

gangami penettebalan ni tuun hi-gada. Et humman hu, daka ibbedbed hu neituede ni ehel Apu Dios di ulu da et yad ngamay da, niya ida kamambalwasin andukkey ngummei tun balwasi. <sup>6</sup> Pinpinhed dan umyudung di yuddungngan ni kametbal ni tuu hedini wada hamul et yad simbaan. <sup>7</sup> Ey ida kapetebbatebbal di mulkaduh e kad-an ni dakel ni tuu. Ey pinhed dan kan idan tuu ey mittuduh ida. <sup>8</sup> Nem endi an meingngadnan ni hi-gayun mittuduh, tep nan-ingei kayun emini ey hakei ni ebuh mittuduh yu. <sup>9</sup> Ey endi yu ingngadnan di puyek ni Ameyu, tep hakei ni ebuh hu Ametayun wadad kabunyan. <sup>10</sup> Lawah mewani hedini wada menghel ni kanday Apu kayu, tep hakei ni ebuh Apu yu e hi Christo. <sup>11</sup> Ya keta-ta-geyyan saad tun hi-gayu, ey mahapul ni mambalin ni bega-en yu. <sup>12</sup> Ya tuun tuka peta-gey annel tu ey meibbabah ali. Nem ya tuun tuka pebabah hu annel tu ey meiddeyyaw ali.

*Ya nengibungtan Jesus idan Pharisee niyadda kamantuttuddun intugun Moses tep ya lawah ni elaw da*

*(Mark 12:40; Luke 11:39-42, 44, 52; 20:47)*

<sup>13</sup> Hi-gayuddan Pharisee niya kamantuttuddun Tugun Moses, ey mangkaitek kayu. Anggehemmek kayu tep mangkekastigu kayulli, tep hin-appil intenuttuddu yuddan tuun pinhed dan umlaw di kapan-ap-apuin Apu Dios, et eleg ida law paka-law diman, nem anin hi-gayu et eleg kayu paka-law diman.

<sup>14</sup> Hi-gayuddan Pharisee niya kamantuttuddun intugun Moses la, ey anggehemmek kayu katted, tep mekastigu kayulli. Mangkaitek kayun peteg. Yuka dukkeya dasal yun Apu Dios e heni kayu kayyaggud, nem yudda kahe-uhe-uladda nangekebalun bii ma-lat wada inna-nu yun mengellan limmu da, et mukun nemalehig hu kastigu yu tep ya huttan ni yuka pehpending.

<sup>15</sup> Hi-gayuddan Pharisee ey hi-gayun kamantuttuddun Tugun Moses, ey mangkaitek kayun peteg. Anggehemmek kayu tep nanna-ud ni mekastigu kayulli. Kayu kamanadaladalan di edawwin bebley, anin di ba-hil ni baybay ni an mantuttuddu, nem hedini wada nengu-unnud ni intuttuddu yu, ey nema-man lawah elaw tu, e heniddan hi-gayu. Et humman hu, mahapul ni umlaw idad impierno. Anin hi-gayu et mahapul ni umlaw kayud impierno, nem nema-ma kastigu da tep inu-unnud da intudu yu.

<sup>16</sup> Anggehemmek kayu tep nanna-ud ni mekastigu kayulli. Heni kayu nekulap ni tuka ippatnan ippangulu edum tun nekulap, tep eleg yu han-awat hu kayyaggud ni kameituttuddu. Yuka ituttuddu e kanyuy hedini wada issapatah ni tuu, et yad Tempol hu pengissapatahan tu, ey anin ni eleg tu peamnu et eleg manliwwat. Nem hedini ya etan di balituk ni wadad Tempol hu pengissapatahan tu, man mahapul ni peamnu tu tep manliwwat hedini eleg tu peamnu. <sup>17</sup> Nem neipngil humman ni yuka ittenuttuddu! Ka-ila endi tu-wangu inamta yu. Eleg yu han-awat, tep heni kayu nekulap. Kele yuka pehebballi balituk nem ya hu Tempol? Ya etan balituk ey nebalol ni ebuh tep wadad Tempol. <sup>18</sup> Yu pay kaituttuddu e kanyuy hedini wada issapatah etan ni tuu, ey yad altar hu pengissapatahan tu, man anin eleg tu peamnu et eleg manliwwat. Nem hedini yad etan di meidwat nan Apu Dios hu pengissapatahan tu, ey mahapul ni peamnu tu hu insapatah tu, tep hedini eleg tu ippahding ey manliwwat. <sup>19</sup> Heni kayu tu-wangu nekulap. Beken ni nebalbalol hu meidwat nan Apu Dios nem ya hu altar. Nebalol ni ebuh etan meidwat nan Apu Dios tep wadad altar. <sup>20</sup> Hedini yad altar hu pengissapatahan ni tuu, ey beken ni ebuh di altar hu nengisapatahan tu, nem insapatah tu daman etan idan wadad altar, et mahapul ni peamnu tu. <sup>21</sup> Hanniman damad Tempol e hedini yadman hu pengissapatahan ni tuu, ey hi Apu Dios dama hu nengisapatahan tu tep wadadman hi Apu Dios. <sup>22</sup> Hedini yad kabunyan hu pengissapatahan ni tuu, man insapatah tu damad yinudungan Apu Dios di nan-ap-apuan tu, niya hi Apu Dios dama hu nengisapatahan tu, tep hi-gatu yimmudung diman.

<sup>23</sup> Hi-gayun kamantuttuddun Tugun Moses, niya hi-gayun Pharisee, ey anggehemmek kayu, tep mekastigu kayulli. Mangkaitek kayun peteg. Ma-nut yuka ikakkaguh ni iddawat nan Apu Dios hu kapulun intanem yu, nem eleg yun hekey hengnguda etan kaituttuddun tugun meippanggep ni kinalimpiyuh, ya hemek, niya dinel. Idwat yu ngu dedan hu kapulun intanem yu, nem entan tu iwalleng ida humman ni importanteh ni tugun. <sup>24</sup> Heni kayu etan ni nekulap ni kamengippatnan mengippangnguluddan edum tun nekulap, tep eleg yu amta hu importanteh ni tugun. Yuka hellipatin e-kalen hu allangngaw ni neita-mel di innumen yu, nem yuka ekmuna hu camel. \*

\* **23:24** 23:24 Ya keibbellinan nunyan inhel Jesus ey beken ni ya importanteh ni tugun hu daka u-unnuda, nem ya daka paka-u-unnuda ey yadda beken ni importanteh ni tugun.

<sup>25</sup> Hi-gayun kamantuttuddun Tugun Moses niya hi-gayudda daman Pharisee, ey anggehmemek kayu tep mekastigu kayulli. Mangkaitek kayun peteg. Ma-nut yuka ikakkaguh pengu-unnudan yun elaw yun meippanggep ni linih henin pengullahan ni basuh niya duyu, nem lawah ni peteg hu nemnem yu, tep yuka pilliwa limmun edum yu niya eleg yu kekkennga hu pinhed ni annel yu. <sup>26</sup> Hi-gayun Pharisee, ey heni kayu nekulap. Isiked yu lawah ni elaw yu et ya kakkayyaggud hu peang-ang yud emin di yuka pehpending.

<sup>27</sup> Hi-gayun kamantuttuddun tugun Moses niya hi-gayun Pharisee, ey anggehmemek kayu tep mekastigu kayulli. Mangkaitek kayun peteg. Lawah hu elaw yu e heni kayu etan ni kulung e kayyaggud hu ang-ang tu, nem nabwel hu wadad bawang tu. <sup>28</sup> Heni kayun nunman tep ya yuka peang-ang idan tuu ey kayyaggud, nem lawah niya nambakbaklang ni panliwwatan hu wadad nemnem yu.

*Ya kekastiguan idan Pharisee niyadda etan kamantuttuddun Tugun Moses  
(Luke 11:47-51)*

<sup>29</sup> Hi-gayun kamantuttuddun Tugun Moses niya hi-gayun Pharisee, ey anggehmemek kayu tep mekastigu kayulli. Mangkaitek kayun peteg. Endi silbi tun yuka an pengiyyenayyaggudin kulung idan prophet et yadda etan kayyaggud ni tuuddan nunman, tep ya kakulugan tu ey kayu kaman-am-amleng ni nematepateyan idan aammed yun hi-gada. <sup>30</sup> Ma-nut kanyuy gullat ni wada kayun nunman et eleg yu pateyan ida humman ni prophet, nem itek huttan ni inhel yu. <sup>31</sup> Huttan ni inhel yu hu kakulugan tun makulug ni yadda aammed yu nematepateyan idan prophet. <sup>32-33</sup> Lawah kayun peteg, tep yuka pan-in-inayyun ida humman ni impahpahding idan aammed yu. Ka-ila tu-wangu lawah hu kan u-ungngan hi-gayu. Nem e-helen kun hi-gayu e eleg mabalin ni yulli ibbebsikan hu kekastiguan yud impiernoh. <sup>34</sup> Ittu-dak kuddalli prophet, yadda nenemnan niyadda mengittuddun elaw ku, nem petteyan yudda edum niya peippettak yudda edum di krus. Panheplaten yudda edum di yuka keemmuemmungi niya unnuunnuden yudda edum anin attu bebley ni lawwan da et yudda panligligat. <sup>35</sup> Et mukun hi-gayun tuun nunya hu kastiguen nan Apu Dios, tep yuka ebbuluta nematepateyan idan aammed yun nunman idan kayyaggud ni tuu, neipalpun Abel e endi bahul tu, ingganah ni nemateyan dan Sekariah e u-ungngan Barakiah e pintey dad nambattanan ni altar et ya Tempol. <sup>36</sup> Makulug huuya, et mukun e-helen kun hi-gayu e emin huayan impahpahding da ey liwat yu et hi Apu Dios ey kastiguen dakeyan tuun nunya tep hanniman kayulli dama e petteyan yulli etan intu-dak nan Apu Dios.

*Ya et-eteng ni impemihed Jesus idan tuud Jerusalem  
(Luke 13:34-35)*

<sup>37</sup> Hi-gayun tuud Jerusalem ey anggehmemek kayu, tep nanna-ud ni mekastigu kayu. Yuka pampateyadda prophets, niya yudda kapantengbaadda hu kamengittuttuddun ehel Apu Dios. Neminpigga hu pinhed ku-et anhan ni pengemmungan ni hi-gayu henin kapengemmungan manuk idan impah tud payak tu, nem eleg yuwak pinhed. <sup>38</sup> Han yulli ang-angan hi-gayun tuud Jerusalem, tep iwwalleng alin Apu Dios hu bebley yu et ya Tempol, et mebahbah ida. <sup>39</sup> Et e-helen kun hi-gayu e eleg yuwak ali law ang-angan ingganah kanyuy 'Kakkayyaggud hu intu-dak nan Apu Dios e kamengippeamtan hi-gatu.'

## 24

*Ya kebahbahan alin Tempol  
(Mark 13:1-2; Luke 21:5-6)*

<sup>1</sup> Kapanhi-yanan Jesus etan Tempol di Jerusalem ey immalidda etan disipol tu et daka pan-ittudun hi-gatu etan kayyaggud ni peteg ni Tempol niyadda edum ni baballey diman. <sup>2</sup> Et kan nan Jesus ni hi-gaday "Em, yudda kaang-ang-angan nunya humman idan kakkayyaggud, nem e-helen kun hi-gayu e edum alin aggew ey mebahbah idan emin humman. Endilli hakey ni batun an mannenneng di neikapyaan tu."

*Ya panligligatan niya panlehhahan alin hakey ni aggew  
(Mark 13:3-13; Luke 21:7-19)*

<sup>3</sup> Nanteyed hi Jesus di Duntug di Olibah et kamanyuyyuddung ey immalidda disipol tud kad-an tu. E-ebbuh ida et kandan hi-gatuy "Pigan tullu amnuan nunyan inhel mu niya hipalli pengi-immatanun hedin kamangkedettengi amnuan tu? Hipalli pengi-immatanun ni getud ni pambangngadan mu niya pigan tu kepapegan ni puyek?"



<sup>4</sup> Ey kan nan Jesus ni hi-gaday “Helipat-i yu ma-lat eleg kayulli maheul. <sup>5</sup> Tep dake idalli tuun um-ali et kanday hi-gada hi Christo, \* et he-ulen dalli dake ni tuu. <sup>6</sup> Ey dedngelen yulli meippanggep ni gubat di kebebhebley di neihnup, niyad neidawwi, nem entan ali takut yu, tep mahapul ni mekapkapyaddalli humman. Nem beken alin nunman ni kepappegan ni puyek. <sup>7</sup> Em, manggugubat idalli kebebhebley, tep wada hakkey ni apapu ey gubaten tu hu edum tun ap-apud edum ni bebley. Ey meweddalli bisil niya manyegyeg alid dake ni bebley eyad puyek. <sup>8</sup> Nem huyyaddallin ebuh hu keilleppuan idan anggetakkut ni mekapkapyu.

<sup>9</sup> Wadaddalli tuun pampedpap dakeyu et dakeyu pampapetey. Angebe-hel dakeyullin emin ni tuud puyek tep ya yuka pengu-unnudin hi-gak. <sup>10</sup> Dake idalli mengissiked ni mengu-unnud ni hi-gak tep ya daka panlelehmani. Man-inhehdul idalli katuutuu tep wadalli hakkey ni tuu ey angebe-hel tu edum tu. <sup>11</sup> Dake idalli man-ittek e kanday prophet idan Apu Dios, et dake ali he-ulen dan tuu. <sup>12</sup> Nemahhig alin nunman hu lawah ni kamekapkapyu, et dake idalli hu kamengullug ni hi-gak ni me-kal impeminhed dan edum da. <sup>13</sup> Nem yadda tuun mengihikkal ni ligat da niya eleg mehulluli nemnem dan mengu-unnud ni hi-gak ey hi-gadalli hu mehella kniban. <sup>14</sup> Meippeamtallid kebebhebley eya elaw ni kapan-ap-apuin Apu Dios, ma-lat dengelen idallin emin ni tuud puyek, et han medatngan hu kepappegan ni puyek.

*Ya kedettengan etan ni anggetakkut  
(Mark 13:14-23; Luke 21:20-24)*

<sup>15</sup> Ang-angen yulli etan kapekabbellawan Apu Dios ni meihha-ad di Tempol di kuwaltuh Apu Dios e humman la inhel Daniel e prophet. † (Hi-gayun mambidbid, ey awasi yu huyyan neitudek.) <sup>16</sup> Ey emin idalli tuud Judea ey mahapul ni umbesik idad duntug. <sup>17</sup> Yadda etan tuun wadad dallin ni baley dan nunman ni aggew ey mahapul ni eleg ida mantaktaktak ni umhegep di bawang ni an mengellan hipan mahapul da, nem nealay bimmesik ida kuma. <sup>18</sup> Yaddalli dama tuun wadad payew ey lamang katteg hu um-anemut di baley dan an mengellan balwasi da. Mahapul ni umbesik ida kuma ma-lat eleg ida ha-kupan ni buhul da. <sup>19</sup> Angehemmek idalli nampambutsug et yadda wada gelang dan kaman-innum, hedin medettengan idalli humman ni aggew. <sup>20</sup> Pandasal kayun Apu Dios ma-lat eleg ali maipaddih ni keteketel winu yan Sabaduh, e aggew ni kamengillin, hu keippahdingan tu huyya. <sup>21</sup> Hedin medettengan ali humman ni aggew, man wadalli nemahhig ni panligligatan e endi kei-ingnehan tun neipalpu eman ni laputun nanletuan Apu Dios eyan puyek ingganah ni nunya. Nem endilli law hu henin nunyan an meippahding. <sup>22</sup> Kullangan alin Apu Dios humman ni aggew ni panligligatan, tep ya hemek tuddan pinili tun tuu tu. Gullat ni eleg tulli kullangi humman ni aggew, et mangketey ni emin hu tuu.

<sup>23</sup> Hedin wadalli menghel ni hi-gayun kantuy ‘Wadadya hi Christo’ winu ‘wadad dimmun,’ ey entan kaya kulug tu. <sup>24</sup> Tep wadaddalli tuun kanday hi-gada hi Christo niya kan alin edum ey prophet ida. Ippahding dalli kaketngain tuu niya peang-ang dalli hu et-eteng ni kabaelan da. Et humman hu, gullat ni dammutu et, anin idallin tuun Apu Dios et mehe-ul ida. <sup>25</sup> Entan tu liwwan huyyan inhel kun hi-gayun mekapkapyalli, <sup>26</sup> ma-lat anin ni wada menghel ni kantuy wadad desert hi Christo et ebuh kaya elaw yudman. Niya hedin kanday ‘Wadadya e nantalu,’ man ebuh kaya kulug tu. <sup>27</sup> Tep mangkinnemtang ali hu ellian ku, e Pengulwan ni emin ni tuu, e heni kedyam ni kang-ang e tuka bebnangi hu kabunyan meippalpu kasimmilin aggew ingganah di tuka kelinnugi.”

<sup>28</sup> Kan Jesus mewan ey “Yad kad-an ni netey hu kakeemmungiddan kamengngan ni netey.” ‡

*Ya ellian ali mewan nan Jesus ni an menuwet idan tuu  
(Mark 13:24-27; Luke 21:25-28)*

<sup>29</sup> Intu-man Jesus ni immehel et kantuy “Hedin melebbah ida humman ni aggew ni panligligatan, ey me-ngetan hu aggew niya bulan. Mangke-gah alid puyek hu bittuwen. Yan nunman ali ey endi petekkan tuddan wadad kabunyan, tep meendilli kabaelan da. § <sup>30</sup> Hedin negibuh idelaw huyya, man meang-ang alid kabunyan hu immatun ni ellian kud puyek et yaddalli nambakbaklang ni tuud puyek ey umnanginangih idallin tuttuuyyu dan liwat da, tep anggegannuy medettengan law hu kekastiguan da. Ey ang-angen da-ak

\* 24:5 24:5 Ya keibbellinan ni Christo ey pinutuk Apu Dios ni mengippatek ni emin ni tuu tu. † 24:15 24:15 Ang-ang yu Daniel 11:31, 12:11, et ya Mark 13:14. ‡ 24:28 24:28 Ya pinhed tun e-helen huyya ey emin ida etan tuun kamengkapkapan lawah ey mekastigudda. § 24:29 24:29 Ang-ang yu Isaiah 13:10, ya 34:4, niya Joel 2:10.

ali e Pengulwan ni emin ni tuu etan di kulput e meang-ang ali et-eteng ni kabaelan ku niya dayaw ku. <sup>31</sup> Wadalli na-let ni tenul ni tangguyup, et yan nunman hu pengittudakan kuddallin anghel di kebebheley di puyek et da amungen ida tuun pinilin Apu Dios ni pantu-u tu.

*Ya etan keyew ni fig*

*(Mark 13:28-31; Luke 21:29-33)*

<sup>32</sup> Nemnen yu e hedini kamemullung hu keyew e fig, ey amta yu e kamangkedettengi hu siyagew. <sup>33</sup> Hanniman dama e hedini ang-angen yuddallin kameipahpahding huyyan inhel ku, ey inamta yu e kamangkedettengi law hu pambangngadan ku. <sup>34</sup> E-helen kun hi-gayu e makulug ni yadda edum ni hi-gayun tuun nunya ey eleg ida ni mettey ey umannulli emin eya inhel ku. <sup>35</sup> Meendilli kabunyan et ya puyek, nem mannenneng alin ingganah hu ehel ku.

*Endin hekey nengamtan kedettengan ni ellian ali mewan nan Jesus di puyek*

*(Mark 13:32-37; Luke 17:26-30, 34-36)*

<sup>36</sup> Endi nengamtan gintud Apu Dios ni aggew winu olas ni amnuan eyan inhel ku. Anin yadda anghel di kabunyan et eleg da amta. Anin hi-gak e U-ungngan Apu Dios et eggak amta. Tep ebuh hi Ama Apu Dios ni nengamta. <sup>37</sup> Yalli mekapkapyaddan tuun ellian ku e Pengulwan ni emin ni tuu, ey heni lan nekapkapyaddan tuun ketaggun Noah. <sup>38</sup> Tep yadda tuun nunman ni ketaggun Noah ey ebuh mengngan, ya menginum niya mengahwa hu sinamwan da ingganah eman ni hinggepan di Noah di bapor ni nalbengan ni puyek. <sup>39</sup> Eleg da amta hedini hipa mekapkapyaya ey umkukumna ida ey nalbengan hu puyek et mangkalsing ida, tep eleg ida mandaddan. Henin nunman ali daman pambangngadan kud puyek, e eleg idalli mandaddan hu tuu. <sup>40</sup> Wadaddalli dewwan lakin kamanggunnud payew ey ewwiten kulli hakey ey mehi-yan hu hakey. <sup>41</sup> Yaddalli dewwan biin kamanggilling ey ewwiten kulli dama hakey ey mehi-yan hu hakey. <sup>42</sup> Et humman hu, helipat-i yu tep eleg yu amta aggew ni pambangngadak e hi Apu yu. <sup>43</sup> Tep gullat ni antan kambaley hu ellian ni matekew, ku umtukal et helipat-an tu ma-lat eleg humgep etan matekew. <sup>44</sup> Heni daman hi-gayu e mahapul ni mandaddan kayun kenayun ni menehhegged ni hi-gak e Pengulwan ni emin ni tuu, tep eleg yu amta hedini pigan tu pambangngadan ku.

*Ya ab-abig etan ni lawah niya kayyaggud ni bega-en*

*(Luke 12:41-48)*

<sup>45</sup> Ya etan bega-en ni nenemnan niya kameiddinnel ey hi-gatu pillien ni apu tun pan-ap-apuddan edum tun bega-en ni mengippaptek ni kennen da hedini nedatngan hu pengnganan da. <sup>46</sup> Um-amleng etan bega-en hedini um-ali apu tu ey ang-angen tu e kayyaggud tuka pehphehding. <sup>47</sup> E-helen kun hi-gayu e hedini hanniman, man makulug ni peta-gey ni apu tu saad tu et hi-gatu mengippaptek ni emin ni limmun nunman ni apu tu. <sup>48-49</sup> Nem hedini lawah nemnen etan ni bega-en et kantuy 'Anin hipa pehding ku yaggud mebeyyag ali ap-apu mid linawwan tu.' Et peliligatan tudda edum tu, niya ebuh hamul niya buttebutteng ni tuka pehphehding. <sup>50</sup> Nem entanni kumedek, ey immali etan apu tu et ha-kupan tu, <sup>51</sup> et kastiguen tu et palaw tun an mei-dum ida etan ni mangkaitek e ida kaumnanginangih niya daka ngellingellidih ngipen dan degeh ni kastigu da."

## 25

*Ya ab-abig meippanggep etan idan hampulun bii*

<sup>1</sup> Wada mewan ina-abbig Jesus e kantuy "Ya ellian kullin an man-ap-apu ey heni eyan a-abbig ku. Wadadda hampulun biin nandilag et lumaw idan an menamtu etan ni lakin mengahwa. <sup>2</sup> Eleg menemnenan ida lima ey nenemnenan ida lima. <sup>3</sup> Yadda etan liman eleg menemnenan, ey eleg da eduman hu inla dan patidolyoh ni pandillag da. <sup>4</sup> Nem yadda etan liman nenemnenan, ey induman da inla dan patidolyoh ni pandillag da. <sup>5</sup> Netaktak etan lakin mengahwa et hehheggedan da. Entanni ey peteg ugip ida etan ni kamenehhegged et mauyeng idan emin.

<sup>6</sup> Entannit gawan hileng ey wada simmekuk e kantuy 'Yalli etan lakin mengahwa! Ikeyuy et tayu dammuen.' <sup>7</sup> Et bumengun ida etan hampulun bii et pan-iyayyaggud da dilag da. <sup>8</sup> Ey kan ida etan ni liman biin eleg menemnenan ey 'Idwasi dakemi anhan ni patidolyoh yu, tep ay kamangke-dep hu dilag mi.' <sup>9</sup> Nem kan ida etan ni nenemnenan ni bii ey 'Eleg, tep hedini um-idwat kami, man mekullangan itsun emin. Kayu gatang di tenda-an.' <sup>10</sup> Et lumaw ida etan eleg menemnenan ni biin an umgatang. Nem limmaw ida ey dimmateng etan lakin mengahwa et makilaw ida etan biin nenemnenan et humgep idan emin etan di baley ni pengnganan et ilekbi da.

<sup>11</sup> Entanni ey dimmateng ida dama etan eleg menemneman ni bii ey neilekbi et kanday 'Apu, ibeghul mu anhan.' <sup>12</sup> Nem kan etan ni laki ey 'Eleg, tep makulug ni eleg dakeyu ngu amta.' "

<sup>13</sup> Et kan law nan Jesus ey "Helipat-i yu tep eleg yu amta hu aggew niya olas ni pambangngadan ku."

*Yadda etan bega-en et ya etan pihhuh ni impatnged ni apu dan hi-gada*  
(Luke 19:11-27)

<sup>14</sup> "Wada mewan hu hakey ni a-abbigen kun keiddingpatan ni elaw ni kapan-ap-apuin Apu Dios. Wada hu tuun umlaw di edawwin bebley et paeyag tudda bega-en tu et kantuy 'Ngenamung kayu eyan limmuk.' <sup>15</sup> Et idwatan tuddan pihhuh neipupun di kabaelan da. Ya hakey ni bega-en, ey indawtan tun liman libun pihhuh. Ya etan hakey, ey indawtan tun dewwan libu et ya etan hakey, ey indawtan tun hanlibu. Et lumaw humman ni apu da. <sup>16</sup> Ya etan nengidwatan tun liman libu, ey nampuunnan tu et ma-duman ni liman libu. <sup>17</sup> Hanniman dama impahding etan ni nengidwatan tun dewwan libu et pambalin tun epat ni libu. <sup>18</sup> Nem ya etan nengidwatan tun hanlibu, ey limmaw et tu ngu iku-kud puyek etan pihhuh ni apu tu.

<sup>19</sup> Nebayag et han mambangngad etan apu da, et paeyag tudda et ibega tu piga nambalanan ni pihhuh ni indawat tun hi-gada. <sup>20</sup> Immali etan neidwatan ni liman libu et idwat tun apu tu hu hampulun libu et kantuy 'Apu, liman libu hu indawat mun hi-gak et pampuunnak et ma-duman ni liman libu.' <sup>21</sup> Kan ni apu tun hi-gatuy 'Kayyaggud kan bega-en, tep naka-u-unnud mu tugun ku. Anin ni ekket indawat kun hi-gam, et impedakkel mu. Et mukun peta-gey ku saad mu et hi-gam hu mengippaptek ni daddakel ni limmuk. Mekihha-ad kan hi-gak ey mekiam-amleng kan hi-gak.'

<sup>22</sup> Immali dama etan hakey ni neidwatan ni dewwan libun pihhuh et kantun etan ni apu tuy 'Apu, dewwan libu indawat mun hi-gak et pampuunnak et ma-duman ni dewwan libu.' <sup>23</sup> Kan ni apu tun hi-gatuy 'Kayyaggud kan bega-en, tep naka-u-unnud mu tugun ku. Anin ni ekket indawat kun hi-gam, et impedakkel mu. Et mukun peta-gey ku saad mu et hi-gam hu mengippaptek ni daddakel ni limmuk. Mekihha-ad kan hi-gak ey mekiam-amleng kan hi-gak.'

<sup>24</sup> Entanni ey immali etan neidwatan ni hanlibun pihhuh et kantun apu tuy 'Inamtak e mabungget kan tuu. Muka ella hu nan-aatuan ni edum mun tuu, et humman hu ingkedangyan mu. <sup>25</sup> Simmakuttak ni hi-gam et nak itlud puyek hu pihhuh ni indawat mu et adyah e eleg maumah. Ibbangngad kun hi-gam huyyan pihhuh mu.'

<sup>26</sup> Ey kan etan ni apu tun hi-gatuy 'Lawah ka niya mahiga kan bega-en. Inamtam nisi dedan e hanniman elaw ku e nakka ella hu nan-aatuan ni edum ni tuu <sup>27</sup> ey kele eleg mu ibangkoh eya pihhuh ku et wada nei-dum eyan nambangngadak?'

<sup>28</sup> Et kan etan ni apu da etan idan edum ni bega-en tuy 'Aleyu etan hanlibun pihhuh ni imbangngad eyan lawah ni bega-en et idwat yu etan ni bega-en ni hampulun libu pihhuh tu. <sup>29</sup> Ya tuun tuka ippaptek hu neidwat ni hi-gatu ey me-duman et dumakkel ni peteg. Nem ya etan tuun eleg tu ippaptek hu neidwat ni hi-gatu, anin ekket ey meendi humman ni wadan hi-gatu. <sup>30</sup> Ya eya bega-en kun endi silbitu ey heballi depap yu et bekahen yud engeenget di kad-an idan kanenginengih niya daka ngellingellidiha ngipen da.' "

*Ya penuwetan Jesus idan tuun pambangngadan tullu*

<sup>31</sup> Et kan nan Jesus ey "Hi-gak e Pengulwan ni emin ni tuu ey mambangngad dak ali mewan. Emin idalli anghel di kabunyan ey meki-liddan hi-gak. Ey meang-ang ali kasinagey ku, tep meyudungngak alid yuddungngan ni keta-ta-geyyan ni Ap-apu. <sup>32</sup> Emin idalli katutuud kebebbley di puyek ey meemmung idallid kad-an ku et enappilek ida henin kapengappilin kamampattul ni gelding niya kalneroh. <sup>33</sup> Emin idalli etan kayyaggud ni tuun kamengullug ni hi-gak ey appilek idad winannan ku. Nem yadda etan lawah ey pattalen kuddad winillik. <sup>34</sup> Et kangkulli ida etan ni wadad winannan kuy 'Ikeyuy di kad-an Ama, hi-gayuddan binendisyonan tu, tep yadman dedan hu indaddan tun panha-adan yu, neipalpu eman ni naltuan ni emin eyan wadan nunya. <sup>35</sup> Tep neupa-ak ey indawtan yuwak ni kennen ku. Na-wewwak ey impainuman yuwak. Eleg yuwak amta, nem minengili yuwak di baley yu. <sup>36</sup> Yan endi balwasik ey indawtan yuwak. Nandeghhak ey impaptek yuwak. Neikelabuttak, ey immali kayun an nengidu-ngaw ni hi-gak.'

<sup>37</sup> Et kan dallin hi-gak ey 'Apu, kaw pigan tu la neupaam et pangan daka, niya pigan tu la na-wewam et painuman daka? <sup>38</sup> Ey pigan tu lan nenang-angan daka e eleg daka amta ey minengili daka? Ey pigan la nanhapulam ni balwasi et balwasian daka? <sup>39</sup> Ey

pigan tu la nandegham niya pigan la neikelabutam et umli kamin an nengipaptek ni hi-gam?"

<sup>40</sup> Nem kangkullin hi-gaday 'Hedin impahding yudda huuyan tuun kamengullug ni hi-gak, anin na-mun endi bilang da, ey heni hi-gak hu nengipahdingan yu.'

<sup>41</sup> Nem kan kulliddan etan ni tuun lawah elaw dan eleg mengullug ni hi-gak ey 'A-allaw kayud kad-an ku, tep lawah kayu. Lakkayuy di kad-an ni apuy ni eleg me-me-dep e neidaddan ni lawwan Satanase et yadda etan edum tun dimonyoh. <sup>42</sup> Umlaw kayudman tep neupa-ak ey eleg yuwak pangan. Na-wewwak ey eleg yuwak painuman. <sup>43</sup> Immali-ak di bebley yu ey eleg yuwak ayagan di baley yu. Endi balwasik ey eleg yuwak balwasian. Neikelabuttak niya nandegghak ey eleg yuwak ipaptek.'

<sup>44</sup> Hummangen dalli dama et kanday 'Apu, kaw pigan tu nenang-angan min hi-gam ni neupa, niya na-wew, niya eleg mu pambalwasian, niya nandedgehan mu, niya neikelabatan mu ey eleg daka ipaptek? Niya pigan tu hu inliam ey eleg daka ayagan di baley mi?' <sup>45</sup> Nem kangkullin hi-gada ey 'E-helen kun hi-gayu e ya eleg yu pemaddangan idan kamengullug ni hi-gak, nema-madda etan nebabah neitu-wan da ey hi-gak hu eleg yu baddangan.' <sup>46</sup> Et humman hu, umlaw ida humman ni lawah ni tuud impierno di kekastiguan dallin ingganah. Nem yadda etan tuun kayyaggud elaw dan kamengullug ni hi-gak ey umlaw idad kad-an Apu Dios et wada biyag dan endi pappeg tu."

## 26

*Ihik ida buhul nan Jesus ni memetty ni hi-gatu*

*(Mark 14:1-2; Luke 22:1-2; John 11:45-53)*

<sup>1</sup> Negibbuh ni intuttuddan Jesus emin humman ey kantuddan disipol tu ey <sup>2</sup> "Inamta yu e melebbah dewwan aggew et medettengan hu Piyestah ni Passover e humman dama getud ni pempapan dan hi-gak et ippatak da-ak di krus."

<sup>3</sup> Neamung idan nunman etan ap-apuddan padi et yadda kamengippangnguluddan Jews di baley Kayaphas e Eta-gey ni Padi, <sup>4</sup> et manhuhummangan idan pehding da malat eleg amtaen idan tuu hu pempapan dan Jesus et da papetey. <sup>5</sup> Nem kanday "Eleg tayu ippaddih ni piyestah hu pempapan tayun hi-gatu, tep dakel ida tuu et entanni ey umbunget ida."

*Ya nengiduyagan etan ni biin lana di ulun Jesus*

*(Mark 14:3-9; John 12:1-8)*

<sup>6-7</sup> Ida kamengangan di Jesus di Bethany di baley etan ni kamengmengpuh la ni annel tu e hi Simon, ey wada himmegep ni bii et duygan tu hu ulun Jesus ni hambusi ni nakangnginan lana. <sup>8</sup> Inang-ang idan disipol Jesus humman ey peteg bunget da et kanday "Aeyulah humman ni lana! <sup>9</sup> Gullat et ni inggatang et dakel humman ni pihhuh ni meidwat idan nangketwetwet." <sup>10-11</sup> Nem inamtan Jesus humman ni inhel da et kantun hi-gaday "Kele henin nuntan yuka penge-ehhel ni hi-gatu? Humman ni impahding tu ey kayyaggud, tep hedin hi-gak ey enggak mekihahha-ad ni hi-gayudyan ingganah. Yaggud yaddalli tuun nangketwetwet ey wadaddallin ingganah di kad-an yu, et dammutun bennaddangan yuddalli. <sup>12</sup> Huuyan nengiduyagan nunyan biin lanad annel ku ey humman hu heni pengiddaddanan tun annel kun meikkullung. <sup>13</sup> E-helen kun hi-gayu e makulug ni emin alid kebebbbley ni keippeamtaan ni impahding Apu Dios ni panyaggudan ni tuu, ey me-me-hel damalli huuyan impahding eyan biin penginemnemneman ni hi-gatu."

*Ya nengabulutan Judas ni mengihdul nan Jesus*

*(Mark 14:10-11; Luke 22:3-6)*

<sup>14</sup> Entanni ey limmaw hi Judas Iskariot e hakey ida etan ni Hampulut dewwan disipol Jesus di kad-an idan ap-apuddan padi <sup>15</sup> et kantun hi-gaday "Ittuduk hu pehding yun mampap nan Jesus, nem mahapul ni tangdanan yuwak." Et idwatan dan telumpulun pihhuh ni palatah ni tangdan tu. <sup>16</sup> Neipalpu nunman ey kamannemnemnem hi Judas ni hipan pehding tun mengihdul nan Jesus.

*Ya nengannan di Jesus et yadda etan disipol tun Piyestah ni Passover*

*(Mark 14:12-21; Luke 22:7-14, 21-23; John 13:21-30)*

<sup>17</sup> Yan lapun aggew ni Piyestah ni Sinapay ni eleg meha-adan ni yeast ey limmaw ida disipol Jesus di kad-an tu et kanday "Attu baley ni pinhed mun lawwan min mi pengiddaddanan ni pengngannan tayun Piyestah ni Passover?" <sup>18</sup> Kan Jesus ey "Lakkayuy di bebley di Jerusalem. Hedin umdateng kayu et dammuen yu etan hakey ni tuu, ey ehel yu e kaney 'Kan ni Apu tayu ey eleg mebeyyag ey wada mekapkapan hi-gatu. Um-ali kunu et yad baley yu hu tu pengngannan ni Piyestah e edum tudda disipol

tu.' <sup>19</sup> Inu-unnud ida etan ni disipol Jesus hu inhel tu et lumaw idan an mengiddadan ni da pengngannan ni nunman ni Piyestah.

<sup>20</sup> Mahmahdem et lumaw di Jesus et yadda etan Hampulut dewwan disipol tun an mengngan etan di baley ni da nengiddadan ni kennén. <sup>21</sup> Yimmudung ida et ida kamengngan ey kan Jesus ni hi-gaday "E-helek ni hi-gayu e makulug ni wada hakey ni hi-gayun mengihdul ni hi-gak." <sup>22</sup> Makaggeh ni peteg nemnem da et wada hakkeyey kanday "Makulug ngu et beken ni hi-gak hu mengihdul ni hi-gam!" <sup>23</sup> Kantuy "Ya etan pekitta-mel tu hu sinapay tud duyun nakka pengitta-meli hu mengihdul ni hi-gak. <sup>24</sup> Hi-gak e Pengulwan ni emin ni tuu ey metteyyak e humman amnuan ni impatudek Apu Dios eman lan nebayag, Nem angehemmek etan tuun mengihdul ni hi-gak. Heballi ew nem eleg maiungnga humman ni tuu."

<sup>25</sup> Hi Judas e hi-gatu etan mengihdul, ey kantuy "Apu, kaw hi-gak mengihdul ni hi-gam?" Kan Jesus ni hi-gatuy "Em, hi-gam."

*Ya pekikkannan etan ni sinapay niya peki-innuman etan ni meinum ni penginemnemen ni neteyyan Jesus*

(Mark 14:22-26; Luke 22:14-20; 1 Corinthians 11:23-25)

<sup>26</sup> Yan daka pengnganni, ey illan Jesus hu sinapay et mansalamat nan hi Apu Dios. Sineneg-ang tu et ika-peng tun hi-gada et kantuy "Aleyu eya sinapay et kanen yu. Huyyan sinapay ey huyya annel ku." <sup>27</sup> Et alen Jesus hu hakey ni basuh ni neha-adan ni meinum et mansalamat nan hi Apu Dios. Indawat tun hi-gada et kantuy "Inum kayun emin eyad basuh <sup>28</sup> tep huyya kuheyaw kun um-ayuh ni amnuan etan ni baluh ni nekitbalan Apu Dios ni panyaggudan ni dakel ni tuu, tep humman ke-kalan ni liwat da. <sup>29</sup> E-helek ni hi-gayu e makulug ni endilli law mewan hu nak penginnuman nunyan meinum ingganah alin aggew ni penginnuman tayu mewan ni baluh ni meinum di kad-an nan Ama di nan-ap-apan tu." <sup>30</sup> Negibbuh humman et man-a-appéh idan penaydayaw dan Apu Dios et lumaw idad duntug di Olibah.

*Ya nanghelan Jesus ni pengihhe-utan alin Peter e hi-gatu hakey ni disipol tu*

(Mark 14:27-31; Luke 22:31-34; John 13:36-38)

<sup>31</sup> Kan Jesus ni hi-gaday "Emin kayu ey pan-inhihi-yanan yuwak ali tep ya mekapkapan hi-gak ni nunyan hileng, tep humman amnuan etan ni impatudek nan Apu Dios ni kantuy 'Pepettey kulli etan kamengippaptek idan kalneroh et bumsik ida et mawehit ida.' <sup>32</sup> Makulug ni petteyan da-ak, nem yan ketegguak ey mebukkul lak ni umlaw di Galilee et han kayu maiunud." <sup>33</sup> Kan Peter nan Jesus ey "Anin ni hi-yanan dakadda eyan edum tep ya mekapkapan hi-gam et eleg daka ngu hi-yanan hi-gak." <sup>34</sup> Nem kan Jesus ni hi-gatuy "E-helek ni hi-gam e makulug ni yan nunyan hileng ey mampitulli pengihhe-utam e am-amta muwak et han tumkuk hu manuk." <sup>35</sup> Kan Peter ni hi-gatuy "Anin na-mun mekikketteyyak ni hi-gam et eleg mabalin ni nak e-helen e eleg daka am-amta." Ey emin ida etan edum ni disipol tu ey hannya inhel da.

*Ya nandasalan Jesus di Gethsemani*

(Mark 14:32-42; Luke 22:39-46)

<sup>36</sup> Limmaw di Jesus et yadda disipol tud Gethsemani et kan tun hi-gada ey "Yudung kayudya et nak ali mandasal di dimmun." <sup>37</sup> Ingkuyug Jesus di Peter et yadda etan dewwan u-ungngan Sebedi. Kaumlelemyung ni peteg hi Jesus niya makaggeh ni peteg hu nemnem tu. <sup>38</sup> Kantun hi-gaday "Iyyadyan makaggeh ni peteg hu nemnem ku et heni ikkatey ku. Dideya itsu ey ebuh kaugip yu et kadwaan yuwak." <sup>39</sup> Limmaw hi Jesus di a-allow tu ey limmukbub di puyek et mandasal nan Apu Dios et kantuy "Ama, hedin dammutu, man ekal mu huyyan nak panhelheltapan. Nem ngenamung ka, ya pinhed mu hu meunnud, beken ni ya pinhed ku."

<sup>40</sup> Entanni ey imminah et lumaw di kad-an idan disipol tu ey neugip ida. Et kan Jesus nan Peter ey "Kele anhan eleg yu han-isipel ugip yu anin ew ngun han-olas ni ebuh? <sup>41</sup> Ebuh kaugip yu niya pandasal kayun Apu Dios ma-lat eleg kayulli maheul ni manliwwat. Ma-nu nemnem yu tep pinhed yun u-unnuden hu nakka e-hela, nem eleg han-pahding ni annel yu hu wadad nemnem yu."

<sup>42</sup> Yan pidwatun neni-yanan Jesus idan disipol tu ey limmaw mewan ni an mandasal et kantuy "Ama, hedin pakkadek meippahding humman ni helheltapek, anin ew, hedin humman pinhed mu." <sup>43</sup> Nambanggad hi Jesus mewan di kad-an da ey inang-ang tun neugip ida tep kamekimmit mateda.

<sup>44</sup> Hini-yan tudda mewan et lumaw ni pitlu tun an mandasal e humman mewan hu inhel tun Apu Dios. <sup>45</sup> Nambanggad hi Jesus di kad-an idan disipol tu et kantun hi-gaday "Kele yuka i-anteng ugip? Kaw tagan yu iyyatu? Bangun kayu tep nedatngan law

hu pemetteyan dan hi-gak. Ang-ang yu kedi, immalidda law eman nangkeliwitan ni tuun an memetteyan ni hi-gak e Pengulwan ni emin ni tuu. <sup>46</sup> Inah kayu et lumaw itsud kad-an da. Ang-ang yu kedi, ammundeher etan tuun nengihdul ni hi-gak.”

*Ya nampapan dan Jesus*

(Mark 14:43-50; Luke 22:47-53; John 18:3-12)

<sup>47</sup> Nanengtun kaman-e-ehhel hi Jesus ey immali hi Judas, e hakey ida etan ni Hampulut dewwan disipol tu, e ingkuyug tudda hu dakel ni edum tun nampan-ispadah niya nampantenged ni baktung, e humman ida intu-dak idallin ap-apuddan padi niyadda kamengipappanggulun Jews ni an mempap nan Jesus. <sup>48</sup> Hedin hi Judas, ey sinugun tudda dedan etan edum tu e kantuy “Ka-immatur la etan tayu dedapen tep humman la akwalen ku. Hedin inakwal ku, ey immali kayu et depapen yu.” <sup>49-50</sup> Limmaw hi Judas di kad-an Jesus et kantuy “Apu, immali kami.” Ey in-akwal tu. Ey kan Jesus ni hi-gatuy “Anin ipahding mu hu pinhed mun pehding ni hi-gak.” Et umlidda etan tuun impan-edum Judas et depapen da hi Jesus. <sup>51</sup> Inuknut etan ni hakey ni disipol Jesus hu ispadah tu, et palngen tu hu tangila etan ni bega-en ni Eta-gey ni Padi. <sup>52</sup> Nem kan Jesus ni hi-gatuy “Pebanggad mu eya ispadah mud asip tu tep ya tuun umpatey ey mahapul ni mettey dama. <sup>53</sup> Kammu na-muy baddang mu huttan, nem eleg, tep gullat ni pinhed kun mebaddangan ey ibbagak nan Apu Dios et paeli tu hu kalibulibun anghel ni memaddang ni hi-gak. <sup>54</sup> Nem beken humman ni pehding ku, tep inna-nun amnuan ni impatudek Apu Dios ni ehel tun meipahding ni hi-gak.”

<sup>55</sup> Kan Jesus idan neamung ey “Kaw matekewwak et pakkadek ni kayu man-ispadah niya kayu mampantenged ni baktung ni um-alin mempap ni hi-gak? Tam kewa-wa-wa ey wada-ak di Tempol ni kamantuttuddu, kele eleg yuwak depapen diman? <sup>56</sup> Nem anin, tep mahapul ni meipahding huuya ma-lat amnuan etan ni intudek idan prophet.” Ey pinhakkeyey attukaw ida etan disipol Jesus tep bimmesik idan emin.

*Ya nehumalyaan Jesus di hinanggan ap-apuddan Jews*

(Mark 14:53-65; Luke 22:54-55, 63-71; John 18:13-14, 19-24)

<sup>57</sup> Inlaw ida etan ni tuu hi Jesus di baley Kayaphas e Eta-gey ni Padi, tep yadman neamungan ida etan ni kamengipappangguluddan Jews et yadda etan kamantuttuddun intugun Moses. <sup>58</sup> Neiunnuunnud hi Peter, nem eleg meihnup et meipappeg di dallin. Nekiyudung ida etan ni guwalyad dallin, tep pinhed tun ang-angen hedin hipa pehding dan Jesus. <sup>59-60</sup> Emin ida etan ap-apuddan padi et yadda ap-apuddan Jews ey dakel daka idded-ek nan Jesus ni itek ni kandan bahul tu ma-lat wada inna-nu tun pemetteyan dan hi-gatu. Nem endi daka hemmakan makulug ni bahul tu. Immalidda dakel ni tuun an nan-itek ni mengihheddak ni kanday nambahul hi Jesus, nem endi daka pebehul ni umhulun ni da pemetteyan ni hi-gatu. Entanni ey wadadda dewwan immali <sup>61</sup> ey kanday “Hi-gatu hu nanghel ni kantuy bahbahen tu etan Tempol nan Apu Dios, nem ihhaddak tullin katlun aggew.”

<sup>62</sup> Ey immehngeng etan Eta-gey ni Padi et kantun Jesus ey “Kele eleg ka umhapit? Kaw makulug numan ni inhel mu humman?” <sup>63</sup> Nem kaum-eneeneng hi Jesus. Ey kan mewan etan ni Eta-gey ni Padi hi-gatuy “Entan pan-itek ni menummang eyan ibbagak, tep dedngelen nan Apu Dios e wadan ingganah. Kaw makulug ni hi-gam hi Christo e U-unggan Apu Dios?” <sup>64</sup> Kan Jesus ni hi-gatuy “Makulug huttan ni inhel mu. Nem e-helek ni hi-gayun emin e ang-angen yuwak alin umyudung di winannan Apu Dios e Keta-ta-geyyan. Ey ang-angen yuwak alid kulput ni pambangngadan kud puyek.” <sup>65</sup> Inhel Jesus huuya ey ebuhe bini-ki etan ni Eta-gey ni Padi hu balwasi tu ngu ey kantuy “Makulug ni lawah huuyan tuu, tep tuka ibbilang annel tun Apu Dios. Humman makulug ni keang-angan tun tuka la-pahi hi Apu Dios. Hiyya, negibbuh law huuyan diklamuh. Eleg mahapul ni wada an mengihheddak ni tuka panla-pahin Apu Dios, tep dingngel tayun emin. <sup>66</sup> Hipa kanyun tuu?” Kanday “Mahapul ni mettey tep nambahul.”

<sup>67</sup> Nanlupdaan idan tuu angh tu et panduntuken da. Ey nan-amping idan edum et <sup>68</sup> kanday “Christo, ehel mu hedin hipa dedan nengamping ni hi-gamah.”

*Ya nengiheutan Peter ni nengam-amtaan tun Jesus*

(Mark 14:66-72; Luke 22:56-62; John 18:15-18, 25-27)

<sup>69</sup> Wada hi Peter e kamanyuyyuddung di dallin ey immali etan biin bega-en di kad-an tu et kantuy “Tam hi-gam etan hakey ni kadkadwan Jesus e iGalilee.” <sup>70</sup> Nem inhaut nan Peter et kantuy “Tawwey ngu, eggak ngu amta huttan ni muka pan-e-hela.” <sup>71</sup> Entanni et lumaw hi Peter di kad-an etan ni eheb ey immali mewan etan hakey ni biin bega-en et kantuddan tuu ey “Tam hi diyay hu hakey ni kadkadwan Jesus e iNazareth.” <sup>72</sup> Nem inhaut mewan nan Peter et mansapatath e kantuy “Makulug et eggak amta humman ni

tuu.” <sup>73</sup> Entanni ey immalidda edum ni tuud kad-an Peter et kanday “Makulug ni hi-gam hakey ni kadwan Jesus, tep nan-ingneh hu yuka pan-e-ehhel.” <sup>74</sup> Inhaut Peter mewan et kantuy “Anin metteyyak et makulug ni eggak amta huttan ni tuu.”

Ey pinhakkeyey simmekuk manuk, <sup>75</sup> ey ninemnem Peter hu inhel Jesus ni hi-gatun kantuy “Mampitulli penghelam ni eleg muwak am-amta et han tumkuk hu manuk.” Et umhep hi Peter et an mannannangnih tep maggeh ni peteg nemnem tu.

## 27

*Ya nengal-an idan buhul Jesus ni hi-gatu et ilaw dad kad-an Pilate*  
(Mark 15:1; Luke 23:1-2; John 18:28-32)

<sup>1</sup> Kamangkewa-wa ey nanhuhummangan ida etan ap-apuddan padi et yadda edum ni ap-apuddan Jews ni pehding dan memettye nan Jesus. <sup>2</sup> Impabelud da et ilaw dad kad-an Pilate e Gobernor.

*Ya neteyyan Judas*  
(Acts 1:18-19)

<sup>3</sup> Inamtan Judas e petteyen da tu-wangu hi Jesus ey nantutuyyun tu nengihdulan ni hi-gatu et lumaw ni an mengippebanggad etan ni telumpulun palatah ni pihhuh idan ap-apuddan padi et yadda ap-apuddan Jews. <sup>4</sup> Kantun hi-gaday “Neliwtannak tep inhedul ku tuun endi bahul tu.” Nem kan ida etan ni ap-apuy “Ngenamung ka ngu. Endi ngu biyang midtan.” <sup>5</sup> Et ihebwag nan Judas etan palatah di det-al ni Tempol et lumaw et an mampuhuh.

<sup>6</sup> Nangkupkup ida etan ni ap-apuddan padi etan palatah et kanday “Eleg mabalin ni mei-dum di pihhuh ni Tempol huyya tep bayad ni nengihdulan dan ketteyyan ni hakey ni tuu.” <sup>7</sup> Et manhuhummangan ida et gatangen da hu puyek etan ni tuun mekapyan banga et pambalin dan pengikkullungan idan tuun binunal di bebley da. <sup>8</sup> Et mukun inggadnan da humman ni “puyek ni nanhedulan” ingganah nunya.

<sup>9</sup> Huyya nekapkapyan inamnuan ni inhel lan Jeremiah e prophet ni kantuy “Illa da telumpulun pihhuh ni palatah e humman inuhummangan idan Jews ni heni gatang etan ni tuu.” <sup>10</sup> Humman ni telum pulun pihhuh ni palatah hu impangatang da etan ni puyek ni tuun mekapyan banga tep humman hu inhel ni Apu tayun hi-gak ni nunman.”

*Ya nanhumalyaan Pilate nan Jesus*  
(Mark 15:2-5; Luke 23:3-5; John 18:33-38)

<sup>11</sup> Inlaw da hi Jesus di hinanggan Pilate et kantun Jesus ey “Kaw hi-gam hu Patul idan Jews?” Hinumang Jesus et kantuy “Tam deh e inhel mu.”

<sup>12</sup> Emin ida etan ap-apuddan padi et yadda etan kamengipappangnguluddan Jews ey dakel daka idded-ek nan Jesus ni bahul tu, nem kaum-eneeneng hi Jesus. <sup>13</sup> Et kan Pilate ni hi-gatuy “Kaw eleg mu dedngela eya daka pebehul ni hi-gam?” <sup>14</sup> Nem eleg hummangan Jesus ni hekey hu daka pebehul ni hi-gatu, et kametngan peteg hi Pilate.

*Ya nengipepatayan dan Jesus*  
(Mark 15:6-15; Luke 23:13-25; John 18:39-19:16)

<sup>15</sup> Katootoon ey hedin nedatngan hu Piyestah ni Passover, man wada hakey ni kapebukyat ni gubernor ni neikelabut ni pinhed idan tuun meibbukyat. <sup>16</sup> Yan nunman ey wada neikelabut e hi Barabbas e nan-amtad kebebbebley hu nambahulan tu. <sup>17</sup> Neamung ida tuud kad-an Pilate ey kantun hi-gaday “Hipa pinhed yun ibbukyat ku, hi Barabbas winu hi Jesus e kameingngadnin hi Christo?” <sup>18</sup> Imbagan Pilate humman, tep inamta tu e endi bahul nan Jesus, nem ameh ni ebuh hu nengipadpapan idan kamengipappangngulun Jews ni hi-gatu.

<sup>19</sup> Yan yinudungan nan Pilate ni manhumalya, ey wadalli impaad ni ahwatu e kantuy “Entan tu legelegem hu pehding mu etan ni tuun endi bahul tu, tep nan-i-inneppak ni angetakktu tep hi-gatu, et nakka umkenel-ew.” Et mukun pinhed Pilate ni ibbukyat hi Jesus.

<sup>20</sup> Nem inhaphapitan idan ap-apudan padi et yadda kamengipappangngulun Jews hu tutu-u ma-lat ehelen dan Pilate e hi Barabbas ibbukyat tu, et hi Jesus hu pepettye da. <sup>21</sup> Et mukun yan nengibgaan mewan Pilate idan tuu e kantuy “Hipan hi-gadan dewwa hu pinhed yun pebukyat ku?” Ey kanday “Hi Barabbas!”

<sup>22</sup> Et kan Pilate ni hi-gaday “Hipa tep pehding kun Jesus e kameingngadnin hi Christo?” Kandan emin ey “Ipetak yud krus!”

\* 27:9 27:9 Huyyan tuu ey hi Christo

<sup>23</sup> Kan Pilate ey “Kela? Hipa bahul tu?” Nem da kumedek kapan-eleta tekuk e kanday “Ipetak yud krus!”

<sup>24</sup> Inamtan Pilate e endi silbin tuka e-e-hela tep daka pan-illapun umguluh et umlan danum et ihangga tuddan tuu et mambulu ey kantuy “Endi bahul kun ketteyyan eyan tuu. Ngenamung kayu ngu.”

<sup>25</sup> Ey kan idan tuu ey “Anin ngenamung kami. Anin ni bahul mi niya bahul idallin u-ungnga mi hu ketteyyan tu.” <sup>26</sup> Et ebuhe, pebukyat tu hi Barabbas et panpeebliq tu hi Jesus et tu paipetak di krus.

*Ya neneghegnudan idan sindalu nan hi Jesus*

*(Mark 15:16-20; John 19:2-3)*

<sup>27</sup> Entanni ey inlaw idan edum ni sindalun governor hi Jesus di baley governor ey immalidda hantapug ni sindalu tu et kaemungan da hi Jesus. <sup>28</sup> Ingkal da balwasi tu et pebalwasi dan hi-gatu etan madlang ni kaibbalwasin patul. <sup>29</sup> Immaladdan hebit et palikuhen da et papnget dad ulu tu et patngedan dan paul hu wannan ni ngamay tu. Et mandukkun idad hinangngab tu ni hineghegnud da e kanday “Dayaw tayu numan eya patul idan Jews.” <sup>30</sup> Ey nanlupdaan da et alen da etan paul et panheplaten da ulu tu. <sup>31</sup> Negibbuh ni hineghegnud da hi Jesus et ekalen da impebalwasi dan heni balwasin ap-apu et pebalwasi da balwasi tu et ilaw dad da pengippettakan ni hi-gatud krus.

*Ya neipetakan Jesus di krus*

*(Mark 15:21-32; Luke 23:26-43; John 19:17-27)*

<sup>32</sup> Ida kamenglaw ey hinipngat da hi Simon di Cyrene et papilit idan sindalun pehhahan tu etan keyew ni pengippettakan dan Jesus, et pahnen tu. <sup>33</sup> Dimmateng idad duntug e Golgotha e ya keibbellinan tu ey heni genit ni ulu ang-ang tu, <sup>34</sup> ey immaladdan meinnun ni na-duman ni agah ni kamangkel-it ni peinum dan Jesus. Nem sinamtaman tu ey eleg tu pinhed ni innumen.

<sup>35</sup> Impatak dad krus et mambubunut ida sindalu hedini hipan hi-gada hu mengellan balwasin Jesus. <sup>36</sup> Negibbuh humman ey yimmudung ida et a-addugan da. <sup>37</sup> Wada neituede di ta-pew ni ulu tu e humman indeek dan hi-gatu e kantuy: “Huyya hi Jesus e Patul idan Jews.” <sup>38</sup> Wadadda dewwan matekew ni neipetak di nambina-hil nan Jesus e hakey di winilli tu ey hakey di winannan tu.

<sup>39</sup> Emin ida tuun kamelebbah ey ida kamanwigwigiwig ni daka peneghegnud ni hi-gatu <sup>40</sup> e kanday “Maitek ka, tep kammuy bahbahen mu hu Tempol et behwatan mu mewan hedini melebbah tellun aggew. Hedin makulug ni hi-gam hu U-ungngan Apu Dios, ey ihwang mu annel mu. Ka-kal ka eyad neipetakan mun krus et keangangan tu.” <sup>41</sup> Anin ida daman ap-apuddan padi et yadda kamantuttuddun Tugun Moses niyadda kamengipappangguluddan Jews et daka pan-impipihili hi Jesus e kanday <sup>42</sup> “Binaddangan tu edum ni tuu, nem eleg han-ihwang tu annel tu. Tep kaw dedan hi-gatu Patul tayun helag Israel? Nem ka-immatun numan hedini makulug ni hi-gatu Patul tayun Jews, tep e-kalen tu annel tun nunya eyad neipetakan tu. Hedin numan me-kal, man kullugen tayu.” <sup>43</sup> Kanda mewan ey “Tuka iddinel hi Apu Dios di emin, ey kantuy hi-gatu U-ungngan Apu Dios. Ang-ang tayu pangngu numan hedini baddangan Apu Dios et e-kalen tun nunya eyad neipetakan tu.” <sup>44</sup> Anin ida etan ni dewwan matekew ni neipetak dama et daka heghegnuda hi Jesus.

*Ya neteyyan Jesus*

*(Mark 15:33-41; Luke 23:44-49; John 19:28-30)*

<sup>45</sup> Entannit nandattek hu aggew, ey pinhakkeyey nan-enget di emin di puyek ingganah nelabah tellun olas. <sup>46</sup> Humman hu hambatangan aggew, ey simmekuk hi Jesus ey kantuy “Eloi, Eloi, lama sabactani.” Ya keibbellinan nunman ni inhel tu ey “Ama Apu Dios, Ama Apu Dios, kele muwak impayyag?” †

<sup>47</sup> Eleg ida awatan etan ni edum ni kaman-eh-ehngeng ni nangngel ni hi-gatu et kanday “Tam tuka pan-eyyagi na-mu hi Elijah.”

<sup>48</sup> Wada hakey ni hi-gadan impepuppuut tun an immalan mapeit ni meinnun et itamel tu bulak et ipelat tud paul et tu pahimut di bungut Jesus. <sup>49</sup> Nem kan idan edum ey “Diman et ang-angen tayu numan hedini um-ali Elijah ni an mengkal ni hi-gatud krus.” <sup>50</sup> Impidwan Jesus ni simmekuk ey ebuhe netey.

<sup>51</sup> Nunman ni neteyyan tu, ey pinhakkeyey nepikgat etan mahdel ni kultinah di Tempol meippalpad ta-pew tu ingganah di hengge tu. Ey nanyegyeg et mangketeg-ang ida batu. <sup>52</sup> Nangketukwaban ida kulung et dakel ida nangketagwan ni tuun Apu

† 27:46 27:46 Psalm 22:1



Dios ni nangketey. <sup>53</sup> Ey yan netagwan Jesus, ey neukat idad kulung etan ida tuun nangketagwan et lumaw idad Jerusalem et peang-ang idaddan dakel ni tuu.

<sup>54</sup> Inggibek etan ni ap-apun sindalu niyadda sindalu tun kamangguwalyan Jesus hu nanyegyegan tu niya inang-ang dan emin nekapkapy a ey simmakut ida. Kanday “Makulug ni U-ungngan Apu Dios huyya.” <sup>55</sup> Wadadda dakel ni biin nenang-ang-ang di a-allaw tuddan nunyan nekapkapy. Humman ida etan biin nalpud Galilee ni neiunnuunnud nan Jesus ni an himmenaddang ni hi-gatu. <sup>56</sup> Wadad man hi Maria Magdalena, hi Maria mewan e inad James nan hi Jose et hi inaddan u-ungngan Sebedi.

*Ya neikulungan Jesus*

*(Mark 15:42-47; Luke 23:50-56; John 19:38-42)*

<sup>57</sup> Kamangkehilleng ey dimmateng etan hakey ni kamengullug nan Jesus e hi Joseph di Arimatea e kedangyan. <sup>58</sup> Limmaw di kad-an Pilate ni an mengibeggan annel Jesus et imandal Pilate e iddawat da annel Jesus ni hi-gatu. <sup>59</sup> Ingal Joseph annel tud krus et libutan tun malinih ni luput <sup>60</sup> et tu ikulung etan di netukitukan ni batun kullungngan e pakekapy. Sinengeb tun et-eteng ni batu hu habyen ni kulung et lumaw. <sup>61</sup> Wadaddadman di Maria Magdalena et ya etan hakey mewan ni Maria e yimmudung idad habyen ni kulung.

*Ya nengadugan dan kulung Jesus*

<sup>62</sup> Yan newa-waan tu e Sabaduh, ey neamung ida etan ap-apuddan padi et yadda Pharisee di kad-an Pilate <sup>63</sup> et kandan hi-gatuy “Apu, ninemnem mi tu-wa hu kan eman lan maitek e hi Jesus ni kantuy metegguan kunun katlun aggew ni ketteyyan tu. <sup>64</sup> Et humman hu, imandal mu et da paka-adugan etan kulung ingganah ni katlun aggew, tep entanni ey umlaw ida etan disipol tu et da ellan hu annel tu et han dalli ehela e netagwan. Nema-man kukkulugen dalli huyyan itek tun nemahhig nem ya eman itek tun laputan kantuy hi-gatu intu-dak nan Apu Dios.” <sup>65</sup> Et kan Pilate ni hi-gaday “Awit kayuddan sindaluk et yu paka-adugan.” <sup>66</sup> Et da ihammad hu tangeb etan ni kulung et han da hi-yanadda etan sindalun man-eddug.

## 28

*Ya netagwan Jesus*

*(Mark 16:1-10; Luke 24:1-12; John 20:1-10)*

<sup>1</sup> Negibbuh hu Sabaduh et kamangkewa-wan Linggu ey limmaw hi Maria Magdalena et ya etan hakey mewan ni Maria ni an menang-ang ni kulung. <sup>2</sup> Pinhakkeyey nanyegyeg ni na-let tep wada hu anghel nan Apu Dios e nalpud kabunyan ni immalid kad-an ni kulung. Inulin tu etan batun tangeb ni kulung et yumudung etan di batu. <sup>3</sup> Ya ang-ang etan ni anghel ey kamammussi-lak e heni kedyam, ey ya balwasi tu ey makablah e heni dallallu. <sup>4</sup> Simmakut idan peteg etan tuun nan-adug, et ida kamanggegeygey ey netu-lidda e henidda netey.

<sup>5</sup> Entanni ey kan etan ni anghel etan idan bii ey “Entan takut yu. Inamtak et yuka an ennang-anga hi Jesus e neipetak di krus, <sup>6</sup> nem endiyya tep immamnu hu inhel tu, et netagwan law. Ikeyuy et ang-angen yu binaktadan tu. <sup>7</sup> Papuut yu kuman umlaw di kad-an idan disipol tu et yu ehlen ni hi-gada e netagwan! Ehel yu e nemangulun limmaw di Galilee et yadman la penang-angan yun hi-gatu. Dengel yu tep makulug huyyan nakka pan-e-helan hi-gayu.” <sup>8</sup> Ida kauntatakut, nem ida kaman-am-amleng ni peteg tep ya dinggel da et pepuppuut dan lumaw di kad-an idan disipol tun an menghel ni nunman.

<sup>9</sup> Ida kamenglaw ey dinammu da hi Jesus ey kantuy “Meweddan hi-gayu linggep!” Nandukkun idad hinangga tu et kapaen da dapan tu et daydayawen da. <sup>10</sup> Et kan Jesus ni hi-gaday “Entan takut yu. Lakkayuy et yu ehelen idan disipol ku et lumaw idad Galilee et yadman la penang-angan dan hi-gak.”

*Ya nanlangkakan etan ni guwalya, ni neipahding ni annel Jesus*

<sup>11</sup> Yan neni-yanan ida etan ni biin kulung, ey limmaw ida etan edum ni sindalun nan-adug diman et da idaddatteng idan ap-apuddan papaddi humman ni nekapkapy. <sup>12</sup> Et maemung ida etan ap-apuddan papaddi et yadda ap-appuddan Jews et manhuhumangan ida hedin hipa pehding da. Ey ya ninemnem dan pehding da ey beyyadan dadda sindalun nan-adug ni dakel ni pihhuh ma-lat man-itek ida. <sup>13</sup> Et kandan hi-gaday “Ya penghel yuddan tuu ey neugip kayu ey immalidda disipol Jesus et alen da annel tu.” <sup>14</sup> Kanda pay ey “Hedin dedngelen ni governor huyyan neipahding, ey ngenamung kamin menummang ni hi-gatu ma-lat eleg kayu mekastigu.” <sup>15</sup> Et u-unnuden

ida etan ni sindalu humman ni inhel idan ap-apun pehding da, et alen da etan pihuh ni impameyad dan hi-gada. Humman ni inhel da ey nan-amta ingganah nunya.

*Ya nampeang-angan Jesus ida etan ni Hampulut hakey ni disipol tu  
(Mark 16:14-18; Luke 24:36-49; John 20:19-23; Acts 1:6-8)*

<sup>16</sup> Limmaw ida etan hampulut hakey ni disipol Jesus di duntug di Galilee, tep yadman hu inhel lan Jesus ni da penggedan ni hi-gatu. <sup>17</sup> Et yan nenang-angan dan Jesus, ey dinaydayaw da, nem wadadda edum ni kamandinwa. <sup>18</sup> Neka-ihnup hi Jesus idan disipol tu et kantuy "Neidwatannak ni eta-gey ni saad et hi-gak hu ngenamung ni emin eyan wadad puyek et yad kabunyan. <sup>19</sup> Et humman hu, elaw kayu et ituttudduan yuddan emin hu tuud puyek ni elaw ku ma-lat mengu-unnud idan hi-gak. Ey benyagi yuddad ngadan Ama Apu Dios, niyad ngadan ni U-ungnga tu et yad ngadan ni Ispirituh tu. <sup>20</sup> Ituttuddu yun emin ni tuu e mahapul ni u-unnuden dan emin hu intugun kun hi-gayu et wada-ak ni hi-gayun kenayun ingganah ni kepapegan eyan puyek."

## Ya impaitudek Apu Dios nan Mark ni meippanggep Jesus

<sup>1-2</sup> Huyya neitudek ni impahding Jesus Christo e U-ungngan Apu Dios ni panyaggudan ni tuu. Ya laputu ey ya etan inamnuan eman ni intudek Isaiah e prophet Apu Dios e kantuy:

“Um-itu-dakkak ni hakey ni tuun memengngulun an mengtuttuddun meippanggep ni hi-gam et han ka dumteng. <sup>3</sup> Umlaw di endi bebley di desert et tu ittettetkuk e kantuy ‘Idaddan yu niya iyayyaggud yu dellanen ni Apu tayu.’ ” \*

<sup>4</sup> Entanni tu-wangu ey wada hi John e kamemenyag. Nanha-ad di desert, et mantuttuddudan tuu niya binenyagan tudda. Kantud intuttuddu tu ey “Pantuttuyyu kayun liwat yu ma-lat pesinsahan dakeyun Apu Dios, et benyagan dakeyun pengippeangan yun nantuttuyuan yu.” <sup>5</sup> Immalidda katutuud Judea et yad Jerusalem ni mengngel ni kaituttuddun John. Nan-ehel da liwat dan hi-gatu, et pambenyagan tudda etan di Wangwang e Jordan.

<sup>6</sup> Ya balwasin John ey inebel ni dutdut ni kamel niya katat hu ballikid tu. Ya tuka kenna ey dudun et ya tuka innuma ey danum ni putsukan. <sup>7</sup> Kantuddan tutu-u ey “Yalli etan um-alin meihullul ni hi-gak ey eta-ta-gey nem hi-gak. Et anin ni mengubbah ni iket ni patut tu et eggak lebbeng, tep nebabahhak ni peteg. <sup>8</sup> Hedin hi-gak, man benyagan dakeyun danum, nem hedin hi-gatu, man benyagan dakeyun Ispirituh Apu Dios.”

*Ya nebenyagan Jesus et ya nenuttullunan Satanas ni hi-gatun mengippahding ni lawah  
(Matthew 3:13-4:11; Luke 3:21-22; 4:1-13)*

<sup>9</sup> Entanni ey immali hi Jesus e nalpud Nazareth di provincia di Galilee, et benyagan John di Wangwang e Jordan. <sup>10</sup> Dimmakal hi Jesus etan di wangwang ey inang-ang tu e nantekang hu kabunyan ey immali hu Ispirituh Apu Dios e heni paluma hu ang-ang tu, et umpun hi-gatu.

<sup>11</sup> Ey wada immehel alid kabunyan e kantuy “Hi-gam hu U-ungngak ni nakappinshed kun kamengippeamleng ni hi-gak.”

<sup>12</sup> Entanni ey impalaw ni Ispirituh Apu Dios hi Jesus di desert, <sup>13</sup> et manha-ad diman ni na-pat ni aggew. Impenatnan Satanas ni tinuttullun hi Jesus diman ma-lat manliwwat. Wadaddad man hu anggetakkut ni animal, nem wadadda dama anghel ni nengippapptek ni hi-gatu.

*Ya nengayagan Jesus idan epat ni matebukul ni deleg ni mambalin ni disipol tu  
(Matthew 4:18-22; Luke 4:14-15; 5:1-11)*

<sup>14</sup> Yan eman ni nengipekalebutan Herod nan John ey limmaw hi Jesus di Galilee ni mantuttuddun meippanggep nan Apu Dios. <sup>15</sup> Kantuy “Pantuttuyyu kayun liwat yu et kulugen yu hu impahding Apu Dios ni panyaggudan ni tuu, tep immali law hu intu-dak tun man-ap-apu.”

<sup>16</sup> Nandalan hi Jesus di gilig ni Baybay e Galilee, ey inang-ang tudda hu han-agi e di Simon nan Andrew ni kamantebbukul ni deleg, tep humman ngunu da. <sup>17</sup> Inaygan idan Jesus et kantun hi-gaday “Pakilaw kayun hi-gak, et tuttuuduan dakeyun mengewwis idan tuu, et hi-gak hu u-unnuden da.” <sup>18</sup> Pinhakkeyey hini-yan da tabukul da et maikuyug idan Jesus.

<sup>19</sup> Ida kamenglaw ey inang-ang Jesus ida dama han-agin u-ungngan Sebedi, e di James nan John, et yadda bega-en dad bangsa e daka pan-iddaddan hu tabukul da. <sup>20</sup> Inaygan tudda dama et pinhakkeyey hini-yan da hi ameda, et yadda bega-en da, et makilaw idan hi-gatu.

*Ya nangalan Jesus ni neihuklung ni dimonyoh etan ni tuu  
(Luke 4:31-37)*

<sup>21</sup> Limmaw idad Capernaum et yan nedatngan ni Sabaduh, ey limmaw hi Jesus di simbaan idan Jews et mantuttuddu. <sup>22</sup> Yadda etan tutu-un nangngel ni hi-gatu ey natngadda, tep ka-ang-ang e et-eteng kelebengan tun mantuttuddu nem yadda kamantuttuddun Tugun Moses.

<sup>23</sup> Ey neipapaddih ni nunman ni wadadman hu tuun nehuklungan ni dimonyoh, ey kamantetekkkuk e kantuy <sup>24</sup> “Jesus e iNazareth, hipa pehding mun hi-gami? Kaw immali

\* **1:3** 1:3 Ya pinhed nunyan e-helen ey pandaddan kayu e iyayyaggud yu elaw yu, tep um-ali Apu tayu.

kan mengastigun hi-gami? Inamta daka. Hi-gam etan kayyaggud ni peteg ni intu-dak Apu Dios.”

<sup>25</sup> Nern imbunget Jesus etan dimonyoh e kantuy “Eneeneng ka niya ka-kal ka eyan tuu.” <sup>26</sup> Pinhakkeyey impegeyey ni dimonyoh etan tuu, ey simmekuk et han ma-kal. <sup>27</sup> Natngadda etan tutu-u et wada hakkeyey kanday “Inna-nu tu huyyan neipahding? Endi tayu diddingngel ni hanneya. Kele ebuh ehel tu ey kameippahding hu pinhed tu? Deh numan e anin ni dimonyoh ni neihuklung, et kabaelan tun e-kalen!” <sup>28</sup> Et humman hu, anggegannu ey nandingngel hi Jesus di kebebbeley di Galilee.

*Ya nangkalan Jesus ni degeh idan dakel ni tuu*

*(Matthew 8:14-17; Luke 4:38-41)*

<sup>29</sup> Immehep hi Jesus di simbaan et lumaw di baley idan han-agi e di Simon nan Andrew. Nekilaw ni hi-gatud James nan John. <sup>30</sup> Himmegep ey daka pan-e-helan hi-gatu e kaumbabaktad hi inan etan ni ahwan Simon, tep nemahhig hu atung ni annel tu. <sup>31</sup> Limmaw hi Jesus di kad-an tu et tengeden tu ngamay tu et peehngeng tu. Ey pinhakkeyey na-kal hu atung ni annel tu, et ipaptek tu kennen di Jesus.

<sup>32</sup> Entannit kamangkelinnug hu aggew ey nan-i-liddan katuutuu hu kamampandedgeh niyadda nangkehuklungan ni dimonyoh di kad-an Jesus. <sup>33</sup> Et emin ida tutu-ud man ni bebley ey neamung idad dallin ni baley Simon. <sup>34</sup> Et pan-ekalen Jesus hu nambakbaklang ni degeh idan nunman ni tutu-u anin idan neihuklung ni dimonyoh Inamtaddan dimonyoh e U-unggan Apu Dios hi Jesus, nem eleg pinhed Jesus ni hi-gada mengippeamta, et humman hu, eleg tudda i-abulut ni umhapit.

*Ya nantuttudduan Jesus di kebebbeley di Galilee*

*(Luke 4:42-44)*

<sup>35</sup> Kamangkewa-wa ey bimmangun hi Jesus et lumaw di endi bebley et an mandasal.

<sup>36</sup> Newa-wa et lumaw di Simon et yadda etan edum tu et da hamahamaken. <sup>37</sup> Entanni ey himmak da et kandan hi-gatuy “Daka kaanhemmahemmakaddan katuutuu.” <sup>38</sup> Nern kan Jesus ni hi-gaday “Itsuy kuma tep mahapul ni umlaw itsud edum ni bebley et nak mantuttuddu damadman, tep humman gaputun inlian ku.” <sup>39</sup> Dillan tu dakel ni bebley di Galilee, et mantuttuddud kesimsimbaan niya ingkal tudda dimonyoh ni neihuklung di tuu.

*Ya nangkalan Jesus ni degeh etan ni tuun kamengmengpuh annel tu*

*(Matthew 8:1-4; Luke 5:12-16)*

<sup>40</sup> Wada etan hakey ni tuun kamengmengpuh annel tun immalid kad-an Jesus, et mampehemhemmek ni hi-gatu. Ey nandukkun et kantuy “Ekal mu anhan eya degeh ku hedin pinhed mu, tep inamtak e dammutun han-ekal mu.” <sup>41</sup> Himmek Jesus et kap-en tu et kantuy “Pinhed ku. Na-kal kaya law huttan ni degeh mu.” <sup>42</sup> Ey pinhakkeyey na-kal numan hu degeh tu.

<sup>43</sup> Nekattugun Jesus humman ni tuu et han tu itu-dak. <sup>44</sup> Et kan Jesus ni hi-gatuy “Entan tu i-i-hel huyyan impahding kun hi-gam, nem panna-ud ka kuman umlaw di kad-an ni padi et mu peang-ang ni hi-gatu e na-kal hu degeh mu. Ey u-unnud mu tugun Moses et mu iappitan hi Apu Dios ma-lat pengamtaan ni tutu-u e na-kal hu degeh mu.”

<sup>45</sup> Nern limmaw kumedek etan tuu et tu pan-i-hel di kebebbeley humman ni impahding Jesus. Et humman hu, kaelielidda dakel ni tuu et endi inna-nu tun umlaw di edum ni bebley. Limmaw etan di endi bebley, nem limmaw ida metlaing hu dakel ni tuun nalpud kebebbeley di kad-an tu.

## 2

*Ya nangkalan Jesus ni dahuy etan ni tuu*

*(Matthew 9:1-8; Luke 5:17-26)*

<sup>1</sup> Nelabah pigan aggew ey nambangngad di Jesus di Capernaum, ey nandingngel e wadad man. <sup>2</sup> Et maemung mewan hu dakel ni tuu, et mapnu etan baley ni dinuttuk da, anin di habyen et endi inna-nun tuun umhegep. Tuka pan-ituttuddu hu ehel Apu Dios idan katuutuu <sup>3</sup> ey wada in-ali dan tuun nedahuy ni in-attang idan epat ni tuu. <sup>4</sup> Endi inna-nu dan mengihgep di kad-an Jesus, tep napnun tuu etan baley, et ida gumu-kang di atep ni nengipedalnan da etan ni nedahuy. Iniketan da etan ayyud ni binaktadan tu, et layagen dad petek nan Jesus. <sup>5</sup> Inang-ang Jesus e wada hu daka pengullug, et kantu etan ni nedahuy ey “Agik, pinesinsahan ku liwat mu.”

<sup>6</sup> Wadadda etan kamantuttuddun intugun Moses ey kandad nemnem day <sup>7</sup> “Kele hanniman hu kapan-e-ehel eyan tuu e tu ni-ngangu kala-pahi hi Apu Dios. Endi edum ni kamemessinsah ni liwat, nem ebuh hi Apu Dios.”

<sup>8</sup> Inamtan Jesus humman ni daka nemnemnema et kantun hi-gaday “Kele henin nuntan yuka pannemnem? <sup>9</sup> Hipa nelallakkah? Ya kaney ‘Nepesinsahan hu liwat mu,’ winu ‘Inah ka, alam hu ayyud mu et umenamut ka?’ <sup>10</sup> Nem imay et peang-ang kun hi-gayu e hi-gak e Pengulwan emin ni tuu ey wada kelebengak eyad puyek ni memessinsah ni liwat.” \* Et ihanggan Jesus etan ni nedahuy et kantuy <sup>11</sup> “Inah ka, alam hu ayyud mu et umenamut ka.”

<sup>12</sup> Ey immehneng etan nedahuy et alen tu ayyud tu et manglaw. Ey natngaddan emin hu tuun wadadman et daydayawen da hi Apu Dios. Kanday “Endi tayu inenang-ang ni hanneya, ebuh nunya!”

*Ya nengaygan Jesus nan Levi ni mambalin ni disipol tu*  
(Matthew 9:9-13; Luke 5:27-32)

<sup>13</sup> Wada mewan hu linawwan di Jesus di gilig ni Baybay e Galilee ey neamung hu dakel ni tuud kad-an tu et tuttudduan tudda.

<sup>14</sup> Negibbuh ni sinuttuudduan tudda et kamenglaw ey inang-ang tu etan u-ungngan Alpeus e hi Levi e kaman-emmung ni buwis ni yimmudung di upisinah tu. Kan Jesus ni hi-gatuy “Pakilaw kan hi-gak.” Ey pinhakkeyey imminah hi Levi et makilaw nan Jesus.

<sup>15</sup> Yan hakey ni aggew ni kapengngannid Jesus et yadda disipol tud baley Levi ey nekikan idan hi-gadadda etan kaman-emmung ni buwis niyadda edum dan neliwtan ni tuu, tep dakel law ni hi-gada hu kamekikkilaw ni hi-gatu. <sup>16</sup> Wadadda etan edum ni Pharisee ni kamantuttuuddun Tugun Moses hu nenang-ang nan Jesus ni nekikan etan idan neliwtan ni tuu et kandaddan disipol Jesus ey “Kele kamekikkan hi Jesus idan kaman-emmung ni buwis niyadda edum dan neliwatan?”

<sup>17</sup> Dingngel Jesus humman ni inhel da et kantuy “Ya kamandedgeh hu kamanheppul ni doktor, beken ida etan ni tuun endi degeh da. Henin hi-gak e immali-ak ni an memaddang idan neliwatan. Eleggak umlin memaddang idan tuun kanday endi liwat da.”

*Ya meippanggep ni kapantetpeli*  
(Matthew 9:14-17; Luke 5:33-39)

<sup>18</sup> Wadan hakey ni aggew ni nantepel ida disipol John e kamememyag et yadda Pharisee. Et kan idan tuun nan hi Jesus ey “Kele ngu eleg mantetpel ida disipol mu, ey yadda disipol John niyadda Pharisee ey ida kamantetpel?”

<sup>19-20</sup> Kan Jesus ni hi-gaday “Kaw ida kamantetpel hu gagayyum ni lakin mangkasal? Eleg, tep wada etan gayyum dan lakin manhehnget. Nem hedin wada memettye etan ni nanhenget, ey yan nunman ali law pantetpelan idan gayyum tu. Yadda disipol ku ey heni gayyum ni manhehnget tep yan nunyan wada-ak di kad-an da ey eleg ida mantetpel, nem hedin endi-ak ali law di kad-an da, ey mantetpel ida tep ya pannemnem dan hi-gak.”

<sup>21</sup> Kan tu mewan ey “Endi tuun tu ittuftup hu baluh ni luput di daan ni balwasi, tep hedin hanniman pehding tu, ey umkayhen etan baluh ni ittuftup tu et mekyub etan balwasi et mema-man mebi-ki. <sup>22</sup> Hanniman dama etan katat ni ha-addan ni meinum e eleg ihha-ad hu pakekapyan meinum di kimmelhin katat, tep hedin um-atung etan meinum, man mebeghi etan neitluan tu et umkawah kumedek anin etan meinum. Et humman hu, mahapul ni yad pakekapyan katat hu pengihha-adan ni pakekapyan meinum.”

*Ya kameituttuuddun meippanggep ni Sabaduh*  
(Matthew 12:1-8; Luke 6:1-5)

<sup>23</sup> Hakey ni Sabaduh, ey nandalan di Jesus di payew et puma-sing ida disipol tun pagey et kukkussimen da. <sup>24</sup> Inang-ang idan Pharisee et kandan Jesus ey “Ang-ang mudda kedi eya disipol mu, kele ida pimma-sing ni pagey ey pi-yew tep Sabaduh?”

<sup>25</sup> Hinumang Jesus e kantuy “Kaw eleg yu bidbiden etan neitudek ni impahding David ni neupaan da? Neupa David et yadda edum tu, <sup>26</sup> et humgep idad Tabernacle e baley Apu Dios, et kuman ni sinapay ni neiappit nan Apu Dios eman ni hi Abiathar hu Eta-gey ni Padi et idwatan tudda edum tu ey pi-yew hu pengngannan da, tep ebuh hu padin kamengngan ni nunman.”

<sup>27-28</sup> Intuluy Jesus ni immehel et kantuy “Awasi yu e winedan Apu Dios humman ni aggew e Sabaduh ma-lat panyaggudan ni tuu. Eleg tu letuen hu tuu ma-lat panyaggudan ni Sabaduh. Hi-gak e Pengulwan ni emin ni tuu hu mengippanghel ni hipan kamepi-yew niya hipa eleg mepi-yew ni Sabaduh e kamengillin ni aggew.”

\* **2:10** 2:10 Yadda Jews ey inamta da e hi Apu Dios ni ebuh hu kamemessinsah ni liwat niya kamengkal ni degeh. Et humman hu, yan nengipeyaggudan Jesus etan ni nedahuy ey impeang-ang tu e Dios hi-gatu.

## 3

*Ya nengipeyaggudan Jesus ni negikuy ni ngamay etan ni tuu  
(Matthew 12:9-14; Luke 6:6-11)*

<sup>1</sup> Hakey mewan ni Sabaduh ey himmegep hi Jesus di simbaan idan Jews, ey wada etan tuun negikuy ngamay tu. <sup>2</sup> Wadadda etan edum ni tuun daka hellipat-i hedini peyaggud Jesus etan gikuy ni ngamay nunman ni tuu, ma-lat wada pebehul dan hi-gatu, tep Sabaduh ni nunman e daka ngillinan aggew. <sup>3</sup> Inaygan Jesus humman ni tuu et kantuy "Ikay dih et umehneng kad hinanggaddan eyan tutu-u."

<sup>4</sup> Inhanggan Jesus idan etan ni katuutuu et kantuy "Hipa kan ni Tugun ni mabalin ni pehding, hedini Sabaduh? Kaw ya kayyaggud hu pehding ma-lat bumaddang, anin ni Sabaduh winu ya lawah ni umbabhah hu pehding? Kaw kan ni Tugun ey diman hu tuu et matey winu baddangan ma-lat tumegu?" Nem endin hekey idan etan ni tutu-u kaumhumang.

<sup>5</sup> Peteg bunset Jesus ni tuka penang-ang-angiddan etan ni neamung niya makaggeh nemnem tu. Tep neihla nemnem da niya manghay ida e eleg da pinhed ni ebbuluten hu kameituttudun meippanggep nan Apu Dios. Et kan Jesus etan ni negikuy ey "Ukyad mu ngamay mu." Inukyad tu ngamay tu ey kayyaggud law.

<sup>6</sup> Pinhakkeyey immehep ida etan Pharisee et da panhuhummanganan idan tuun Herod hedini hipa pehding dan memettey nan Jesus.

*Ya neiunudan idan dakel ni tuu nan hi Jesus*

<sup>7</sup> Hini-yan Jesus et yadda disipol tu etan simbaan et lumaw idad gilig ni Baybay e Galilee, ey nangkeiunnud ida dakel ni tuun nalpud kebebheley diman Galilee, yad Judea, <sup>8</sup> yad Jerusalem, yad Idumea, yad ba-hil ni Wangwang e Jordan, yad kad-an ni Sidon et yad Tyre. Immalidda tep diddingngel dadda hu kayyaggud ni impahding tu. <sup>9</sup> Dakel idan peteg hu tuu et an paelan Jesus idan disipol tu hu bangka ma-lat yadman hu yuddangan tu tep nahkit etan di gilig ni baybay. <sup>10</sup> Mukun neiunnud hu dakel ni tuu, ey tep ingkal Jesus hu nambakbaklang ni degeh, et nemahhig ida etan edum ni kamandedgeh e ida kamampampippilliw ni umlaw di kad-an tun an mengeppan hi-gatu ma-lat ma-kal degeh da.

<sup>11</sup> Hedini inang-ang idan nehuklungan ni dimonyoh hi Jesus, ey neala ni nanlukbub idad kad-an tun nantetekuk ida e kanday "Hi-gam hu U-ungngan Apu Dios!"

<sup>12</sup> Nem imbunget Jesus ida etan dimonyoh, tep eleg tu pinhed ni hi-gada mengippeamta e hi-gatu hu U-ungngan Apu Dios.

*Ya nemilian Jesus ida etan ni Hampulut dewwan disipol tu  
(Matthew 10:1-4; Luke 6:12-16)*

<sup>13</sup> Limmaw hi Jesus di duntug e inaygan tudda etan pinpinhed tu, <sup>14</sup> et pilien tudda hampulut dewwa, et ingadnan tuddan apostles. Hi-gada hu mekikkillaw ni hi-gatun itu-dak tun an mantuttuddu. <sup>15</sup> Ey iddawat tun hi-gada hu kabaelan dan mengkal idan neiuklung ni dimonyoh.

<sup>16</sup> Huyyadda ngadan idan Hampulut dewwan apostle ni pinili tu. Hi Simon e inggadnan tun Peter, <sup>17</sup> yadda u-ungngan Sebedi e di James nan John e inggadnan tuddan u-ungngan Kidul, <sup>18</sup> hi Andrew, hi Philip, hi Bartolomew, hi Matthew, hi Tomas, hi James e u-ungngan Alphaeus, hi Thaddeus, hi Simon e Zealot \* <sup>19</sup> et hi Judas Iskariot e nengihdul nan hi Jesus.

*Hi Jesus et hi Satanas  
(Matthew 12:22-32; Luke 11:14-23; 12:10)*

<sup>20</sup> Negibbuh huuya et umenamut di Jesus ey neamung ida mewan hu dakel ni tuu et endi inna-nu dan mengngan.

<sup>21</sup> Dingngel idan agin Jesus et lumaw idan an mengewwit ni hi-gatu, tep wadadda edum ni tuun kanday immangngaw.

<sup>22</sup> Ey yadda edum ni nalpud Jerusalem ni kamantuttudun Tugun Moses ey kanday "Hi Satanas e ap-apun emin ni dimonyoh hu kameihhuklung nan Jesus, et mukun han-ekal tudda dimonyoh."

<sup>23</sup> Inaygan idan Jesus et kantun hi-gaday "Kele mewan an pea-allaw Satanas hu edum tu?"

<sup>24</sup> Kantu mewan ey "Yadda himmebley ni eleg manhinbabaddang ey mebahbah idan emin, tep megennadwadda. <sup>25</sup> Heni daman wadad hakey ni baley e hedini ida

\* 3:18 3:18 Yadda Zealot ey humman ida etan eleg meminhed ni mengu-unnud ni gubilnun Rome.

kamambabakal, man lektattuy nekiwadda. <sup>26</sup> Hanniman daman Satanas e hedin hi-gatu ngu ey mekibuhul idan edum tun dimonyoh et megennedwadda ey nanna-ud ni mepappeg hu nan-ap-apuan tu.”

<sup>27</sup> Kantu mewan ey “Eleg mabalin ni wada an menekkew di baley etan ni na-let ni tuu, pakkaw ni bellunden tu etan na-let ni tuu et han dammutun umhegep et tu pan-ibsik hu nangekiha-ad etan di baley.” †

<sup>28</sup> Kan Jesus pay ey “Nemnemnem yu eya e-helen kun hi-gayu. Ya tuun manliwwat, anin ya pemihhulan tun edum ni tuu ey dammutun mepessinsahan humman ni liwat tu. <sup>29</sup> Nem ya tuun lawah hu e-helen tun Ispirituh Apu Dios ey eleg mabalin ni mepessinsahan. Et mannananeng humman ni liwat tu.” <sup>30</sup> Huyya inhel Jesus, tep wadadda edum ni kanday nehuklungan hi-gatun dimonyoh.

*Hi Jesus et yadda etan agitu  
(Matthew 12:46-50; Luke 8:19-21)*

<sup>31</sup> Entanni ey dimmateng ida agin Jesus et hi inetu, et umehneng idad dallin et umitudak idan an mengeyyag nan Jesus. <sup>32</sup> Kan ida etan ni nehalikub ni tuud kad-an tuy “Daka kapan-ibbagad inam niyadda agim di dallin.” <sup>33</sup> Hinumang Jesus et kantuy “Kaw wada neputuk ni inak niya agik?”

<sup>34</sup> In-ang-ang tudda etan ni tuun nehalikub di kad-an tu et kantuy “Emin ida eya tuun neamung ey inak ida niya agik ida. <sup>35</sup> Tep emin hu tuun kamengu-unnud ni pinhed Apu Dios ey humman ida nakka ibbilang ni inak niya agik.”

## 4

*Ya a-abbig ni meippanggep etan ni nanha-bug ni bukel  
(Matthew 13:1-9; Luke 8:4-8)*

<sup>1</sup> Hakey mewan ni aggew ey wadad Jesus di gilig ni Baybay e Galilee et mantuttuddu. Dakel ida neamung ni tuu et yad bangka yinudungan tu. Yadda etan tutu-u ey wadaddad gilig ni baybay ni kamandeddenggel ni tuka ituttuddu.

<sup>2</sup> Dakel hu intuttuddu tun hi-gada e nan-ina-abbig tu. <sup>3</sup> Kantun hi-gaday “Dengel yu eya a-abbig ku. Wada etan tuun an nantanem e nanhinna-bug tu. <sup>4</sup> Yan nengiha-bugan tu ey wadadda edum ni bukel ni na-gah di dalan et kanen ni sisit. <sup>5-6</sup> Na-gah ida edum ni bukel di mabetun ekket hu puyek tu et ma-nut anggagannun simmemel, nem pimmetang ey nakpit ida, tep eleg lumhed hu lamut da. <sup>7</sup> Wadadda edum ni bukel ni na-gah di magulun, nem entanni ey nehilung ida et eleg ida lumme. <sup>8</sup> Yadda etan neiha-bug di kayyaggud ni puyek ey simmetemmel ida niya kakkayyaggud ida. Limmameh ida ey wada malemeh, wada edum ni melallammeh niya wadadda edum ni mekallameh.” <sup>9</sup> Kan Jesus ey “Nemnemnem yu huyyan inhel ku ma-lat awatan yu.”

<sup>10</sup> Yan eman ni e-ebbuh law hi Jesus et yadda etan Hampulut dewwan disipol tu et yadda etan edum ni tuun nangngel ni inhel tu, ey kandan hi-gatuy “Hipa keibbellinan etan ni ina-abbig mu?” <sup>11</sup> Kan Jesus ni hi-gaday “Nakka ituttuddun hi-gayu etan elaw ni kapan-ap-apuin Apu Dios ni eleg tu peamta ingganah nunya. Nem hedin yadda etan edum ni tuu, man nakka pan-ina-abbig hu nakka penuttuddu, tep eleg da ebbuluta hu elaw ku,

<sup>12</sup> “Tep anin ni daka ang-ang-anga nakka pehpehding niya daka deddenggela nakka ituttuddu et eleg da han-awat, tep eleg da pinhed ni ewwatan hu ehel Apu Dios. Tep gullat et ni daka ewwasi, ey mantuttuyuddan liwat da ma-lat pesinsahan Apu Dios hu nanliwtan da.” \*

*Ya keibbellinan etan ni a-abbig ni nanha-bug ni bukel  
(Matthew 13:18-23; Luke 8:11-15)*

<sup>13</sup> Kan Jesus ida etan ni disipol tuy “Kaw eleg yu han-awat hu keibbellinan eyan ina-abbig ku? Inna-nu tep ni pengewwatan yun edum alin ia-abbig ku?”

<sup>14</sup> Ya etan tuun nanha-bug ni bukel, ey kamei-ellig etan di nengituttuddun ehel Apu Dios.

<sup>15</sup> Ya etan bukel ni na-gah di dalan, ey kamei-ellig ida etan ni tuun nangngel ni neituttuddun ehel Apu Dios, nem immali hi Satanas et haulen tudda, et pinhakkeyey liniwwan da hu dingngel da.

<sup>16</sup> Yadda etan bukel ni na-gah di mabetu, ey kamei-ellig ida etan ni tuun nangngel ni neituttuddun ehel Apu Dios, et ida kamanggagayan mengebbulut ni dingngel da, <sup>17</sup> nem

† **3:27** 3:27 Ya pinhed tun e-helen ey ya kakina-let Jesus ni mengidduppih nan Satanas. \* **4:12** 4:12 Ang-ang yu hu Isaiah 6:9 niya 43:8, ya Jeremiah 5:21, ya Ezekiel 12:2, ya Matthew 13:14, ya Luke 8:10, ya John 12:40, et ya Romans 11:8.

kulang daka pengullug et hedin wada pinatnaan dan ligat tep ya daka pengullug, ey daka issiked ni mengu-unnud ni neituttuddun ehel Apu Dios.

<sup>18</sup> Yadda etan bukel ni na-gah di magulun hu neieligan idan tuun nangngel ni neituttuddun ehel Apu Dios, <sup>19</sup> nem eleg da hengngudda tep ya daka nenemnema ey ya mahapal dad pambiyagan da, ya keddangyanan da, niya pan-am-amlengan da, et humman kaumpapakkuk ni pengullugan dan Apu Dios.

<sup>20</sup> Ya etan bukel ni na-gah di kayyaggud ni puyek hu neieligan idan tuun nangngel ni neituttuddun ehel Apu Dios et abuluten da et maihammad hu daka pengullug et kayyaggud hu elaw ni edum, nema-man kayyaggud hu elaw ni edum, ey kayyaggud ni peteg hu elaw ni edum.”

*Ya kei-elligan etan ni dilag  
(Luke 8:16-18)*

<sup>21</sup> Nan-a-abbig mewan hi Jesus et kantuy “Kaw wada tuun tu integan hu kengkeh et hukbungan tu, winu tu ihha-ad di daul ni unggipan tu? Endi, tep emin tuu ey tuka ippatuk ma-lat meang-ang ni emin. <sup>22</sup> Humman keang-angan tu e emin hu neitlun eleg meamtan nunya ey meamtallin edum ni aggew, henin elaw ni nan-ap-apuan Apu Dios. <sup>23</sup> Pakannemnem yu huyyan inhel ku.”

<sup>24</sup> Kantu mewan ni hi-gaday “Pekadngel yu hu nakka ittuttuddun hi-gayu et u-unnuden yu. Hedin pehding yu huyya, man me-duman hu inamta yu. <sup>25</sup> Tep ya tuun mengu-unnud ni ehel ku ey baddangan Apu Dios et ma-duman hu inamta tu. Nem ya etan tuun wada ekket ni inamta tu, nem eleg tu u-unnuda hu kameituttuddun hi-gatu ey meendi humman ni ekket ni inamta tu.”

*Ya a-abbig ni meippanggep ni katetmelin kaittanem*

<sup>26</sup> Tagan Jesus hu tuttuudu e kantuy “Ya elaw ni nan-ap-apuan Apu Dios ey heni etan ni tuun an nan-ehek <sup>27</sup> et umenamut. Nelabah pigan aggew et tu ang-angen ey simmemel ida intanem tu et meetteng ida, nem eleg tu amta hedin inna-nu dan simmemel. <sup>28</sup> Ya etan puyek hu katetmeli niya kalemmehin kameitnem. Kamemengngulu hu temel tu, et han hu annel tu ni han law hu lameh tu. <sup>29</sup> Hedin na-teng hu pagey, ey humman law tsimpuh ni pengennian etan ni nengitnem.”

*Ya a-abbig ni meippanggep etan ni bukel ni mustard  
(Matthew 13:31-34; Luke 13:18-19)*

<sup>30</sup> Kan mewan Jesus ey “Hipa edum ni pengi-elligan tayun nan-ap-apuan Apu Dios? <sup>31</sup> Kamei-ellig hu nan-ap-apuan Apu Dios di bukel ni mustard e keekkeketan ni bukel, <sup>32</sup> nem hedin simmemel et neetteng ey humman kee-ettengngan idan emin ni kaittanem. Kamemangngapangga et dakel ida sisit ni kamampambuuya niya kamanhiddum.”

<sup>33</sup> Heniddan nunyan a-abbig hu nenuttuddun Jesus idan tuun meippanggep ni nan-ap-apuan Apu Dios e dakel nengieligan tu, nem ebuh ida etan han-awat dan intuttuudu tu. <sup>34</sup> Emin hu intuttuddun Jesus ey tuka pan-ina-abbig. Nem hedin ebuh ida disipol tu, ey tuka e-helan hi-gada hu keibbellinan etan ni tuka a-abbiga.

*Ya nengipesikdan Jesus ni pewek di baybay  
(Matthew 8:23-27; Luke 8:22-25)*

<sup>35</sup> Kamangkehilleng ni nunman ni aggew ey kan Jesus idan disipol tuy “Man-agwat itsud demang eyan baybay.” <sup>36</sup> Et manlugan ida etan di bangkan nanyuyyuddungan Jesus, et hi-yanan dadda etan katuutuu. Wadadda dama etan edum ni nampambangkan nekilaw ni hi-gada. <sup>37</sup> Wadaddad gawwan baybay ey immali na-let ni pewek, ey kamangkepnu hu bangkan danum tep kala-bungan dalluyun hu bangka.

<sup>38</sup> Hi Jesus ey wadad utduk etan ni bangka e neugip. Et bangunen idan disipol tu. Kanday “Apu! Kaw eleg ka umkaguh ey deh e melsing itu?” <sup>39</sup> Bimmangun hi Jesus et kantuy “Kasiked kan pewek niya dalluyun.”

Pinhakkeyey nesiked hu pewek ey immineng law hu danum. † <sup>40</sup> Kan Jesus ni hi-gaday “Kele nemahhig takut yu? Kaw ingganah nunya ey eleg kayu medinnel ni hi-gak?” <sup>41</sup> Wada hakkeyey natnga et kanday “Hipa na-mu ingkatuun nunyan tuu? Kele kau-unnudan dibdib niya dalluyun hu ehel tu?”

## 5

*Ya nangkalan Jesus idan neihuklung etan ni kaman-angngaw ni tuu  
(Matthew 8:28-34; Luke 8:26-39)*



<sup>1</sup> Entanni ey inagwat da etan Baybay e Galilee, et dumteng idad Gerasene. <sup>2</sup> Immehep di Jesus etan di bangka ey dinammu da etan hakey ni lakin nehuklungan ni dimonyoh <sup>3</sup> e nalpullid kullungngan tep kamanhahha-ad diman. Eleg ni hekey mebellud anin ni takilala pemellud dan hi-gatu, tep neka-let. <sup>4</sup> Anin ni binelubelud dan takilala, et tuka pampegtanga. Endin hekey hu na-let ni kabaelan tun memden ni hi-gatu. <sup>5</sup> Anin ni kawwalwal niyan hileng ey kamanhahha-ad di kad-an idan kulung et yaddad neduntung, e kaumtekutekek niya tuka panggandusi annel tun batu.

<sup>6</sup> Entannit inang-ang tu hi Jesus di neidaddawwi, ey nambesik et an mandukkun di hinangga tu, <sup>7</sup> ey kamantetekkek e kantuy "Jesus e U-ungngan Apu Dios e Keta-tageyan, hipa pedhing mun hi-gak? Entan tuwak anhan kastigu." <sup>8</sup> Inhel tu huyya tep ya nanghelan Jesus ni um-a-allaw etan dimonyoh. <sup>9</sup> Kan Jesus ey "Hipa ngadan mu?" Kan etan ni dimonyoh ey "Linibu ngadan mi, tep dakel kami." <sup>10</sup> Nampehemhememek etan dimonyoh nan Jesus e kantuy "Entan dakemi anhan palaw di edawwi."

<sup>11</sup> Neipapaddih ni nunman ni wadadda dakel ni killum ni kamanhubhub etan di pangil ni duntug diman <sup>12</sup> et kan idan dimonyoh ey "Palaw dakemidda eman di killum et hi-gada hu mi keihhuklungan." <sup>13</sup> Inebulut Jesus et palaw tudda etan idad killum, ey kabsik ida et dumep-ah ida etan di eta-gey ni deplah et mangkalsing idad baybay. Ya bilang idan nunman ni killum ey umlaw di dewwan libu.

<sup>14</sup> Nambessik ida etan kamemappakkan nunman idan killum di bebley et da ehelen idan katuutuu humman ni neipahding. Et lumaw idan emin hu nangngel nunman, et da ang-angen. <sup>15</sup> Immaliddad kad-an Jesus et ang-angen da etan lakin nehuklungan la nin dimonyoh e kamanyuyuddung, e nambalwasi law niya kakkayaggud law hu nemnem tu, ey simmakut ida. <sup>16</sup> Humman idan tutu-un nenang-ang ni neipahding ida etan ni killum niya neipahding etan ni laki ey da nan-ehel idan edum da. <sup>17</sup> Ida kaumtatakut et ehelen dan Jesus e heballi hi-yanen tu ew hu bebley da.

<sup>18</sup> Kamenggep hi Jesus di bangka ey immali etan lakin nehuklungan la ni et kantun hi-gatuy "Attu anhan et makilawwak ni hi-gam ey?" <sup>19</sup> Nem eleg pinhed Jesus et kantun hi-gatuy "Anemut ka kuma et mu ehelen idan tutu-u hu impahding Apu Dios ni hi-gam tep ya hemek tu." <sup>20</sup> Et lumaw etan laki et tu pan-i-hel idan tutu-u etan di hampulun bebley di Decapolis hu impahding Jesus ni hi-gatu, ey ida kametnga.

*Ya nenagwan Jesus etan ni netey ni u-ungngan Jairo  
(Matthew 9:18-26; Luke 8:40-56)*

<sup>21</sup> Nan-agwat di Jesus di ba-hil etan ni baybay ey dakel ida mewan hu neamung ni tuud kad-an tu. <sup>22</sup> Wada etan hakey ni ap-apun sindalu e hi Jairus ngadan tu e immali et mandukkun di hinanggan Jesus. <sup>23</sup> Et mampehemhememek e kantuy "Ikay anhan et mu kap-en hu u-ungngak ni kamangkatkatey ma-lat yumaggud." <sup>24</sup> Nekilaw hi Jesus ey dakel ida tuun nekilaw et daka keammuummungi.

<sup>25</sup> Wadadman hu hakey ni biin nelabah hampulut dewwan toon ey eleg mesikked hu kuheyaw ni kamelup annel tu. <sup>26</sup> Nampaegaegah ni dakel ni doktor et maumah ni emin hu limmu tu, nem eleg maegahan ey tuka pan-ihhi-met kumedek. <sup>27</sup> Dingngel tu lan nunman hu kapehpehding Jesus et mukun limmaw di dingkuggan tu, et tu kap-en hu balwasi tu <sup>28</sup> e kantud nemnem tuy "Anin ni nakka kap-an ebuh hu balwasi tu et me-kal degeh ku." <sup>29</sup> Yan nengapaan tun balwasin Jesus ey ginibek tu e nesiked law etan kamelup annel tu.

<sup>30</sup> Ey hedini hi Jesus, ginibek tu dama e wada ingkal ni kabaelan tun degeh, et manligguh et kantuddan tuu ey "Hipa la nengapan balwasik?" <sup>31</sup> Kan idan disipol tuy "Endi maptek ni nengapan hi-gam, tep neamungan dakan dakel ni tuu." <sup>32</sup> Nem kamanang-aang-ang hi Jesus ma-lat ang-angen tu etan nengapan hi-gatu. <sup>33</sup> Ya etan bii, ey ginibek tu hu neipahding ni hi-gatu et kamangegeygey ni takut tu, et an mandukkun di hinanggan Jesus et ehelen tu hu makulug ni neipahding ni hi-gatu. <sup>34</sup> Kan Jesus ni hi-gatuy "Agik, na-kal law huttan ni degeh mu tep ya muka pengullug ni hi-gak. Anemut ka ey pelinggep mu nemnem mu, tep eleg ali law mambangngad huttan ni degeh mu."

<sup>35</sup> Yan nunman ni kapan-e-ehhelin Jesus ey dimmateng ida etan nalpullid baley Jairo et kandan Jairo ey "Endi silbi tun mu pengeyyagan eyhan mittuduh e hi Jesus, tep neendi etan u-ungngam." <sup>36</sup> Dingngel Jesus humman ni inel dan Jairo, nem eleg tu hanguden et kantun Jairo ey "Entan pandanag mu. Kadinel kan hi-gak."

<sup>37</sup> Limmaw hi Jesus, nem ebuh di Peter et yadda etan han-agi e di James nan John hu ingkuyug tu, tep eleg tu pinhed ni mekillaw ida etan edum. <sup>38</sup> Dimmateng di Jesus di baley di Jairo ey ida kaumlemyung etan tutu-u, ey endi petekkan tu tep kamampangngulugul hu edum niya kamannangngih hu edum. <sup>39</sup> Himmegep hi

Jesus di bawang et kantuddan etan ni tutu-u ey “Kele kayu kaumlelemyung niya kaumnanginanghi kayu? Huyyan u-ungnga yu ey eleg matey, nem neugip ni ebuh.”

<sup>40</sup> Ey kaheghegnudaddan etan ni tutu-u, nem impa-hep Jesus ida. Et ebuh ida etan ammed ni u-ungnga niyadda etan tellun ingkuyug tun himmegep di kuwaltuh ni kadan nunman ni u-ungnga. <sup>41</sup> Singnged Jesus hu ngamay nunman ni u-ungnga et kantuy “Talitha koum!” ya keibbellinan tu ey “U-ungnga, inah ka.” <sup>42</sup> Pinhakkeyey imminah tu-wangu humman ni u-ungnga et dumlan. (Hampulut dewwa hu toon nunman ni u-ungnga.) Ey natngan peteg ida etan tutu-un nenang-ang nunman ni impahding Jesus. <sup>43</sup> Sinugun idan Jesus e kantuy “Entan tu an ehehel huyyan impahding ku.” Et mampaelan kennen nunman ni u-ungnga et pengannen da.

## 6

*Ya eleg pengullugiddan kebebleyan Jesus ni hi-gatu*  
(Matthew 13:53-58; Luke 4:16-30)

<sup>1</sup> Hini-yan Jesus humman ni bebley et umenamut di bebley da e ingkuyug tudda etan Hampulut dewwan disipol tu. <sup>2</sup> Nedayngan hu Sabaduh et lumaw hi Jesus di simbaan idan Jews et an mantuttuddu. Ey dakel ida etan kameneddenggel ni hi-gatu hu natnga. Kanday “Kele ettu ni-ngangu an nan-adalan eyan tuun tuka ituttuddu? Kele nekallaing? Kabaelan tu pay ni mengippahding ni miracle. <sup>3</sup> Tam hi-gatu ngu anhan etan karpenter ni u-unggan Maria, ey agin James, hi Jose, hi Judas, et hi Simon. Ey tam wadadda ya etan ida agitun bibi-i.” Humman hu daka pengheli, et humman hu daka kehingga.

<sup>4</sup> Kan Jesus ni hi-gaday “Yadda prophet ey ida kamedeyyaw di emin di kebebbebley, nem yadda kebebleyan tu, yadda aaggi tu et ya pamilyah tu ey eleg da kulluga.”

<sup>5-6</sup> Hi Jesus ey kametngan eleg da pengullugin hi-gatu. Beken ni dakel hu impahding tudman ni miracle, et ebuh ni kinepa tudda hahhakkey ni tuun kamandedgeh et ma-kal degeh da.

*Ya nengitu-dakan Jesus ida etan ni Hampulut dewwan disipol tu*  
(Matthew 10:5-15; Luke 9:1-6)

Entanni ey limmaw di Jesus di kebebbebley et an mantuttuddud man. <sup>7</sup> Hakey ni aggew ey inayngan tudda etan Hampulut dewwan disipol tu et handedwaen tuddan intudak ni an mantuttuddud kebebbebley. Ey indawat tu hu kabaelan dan mengkal idan dimonyoh ni kameihhuklung. <sup>8-9</sup> Sinugun tudda e kantuy “Entan pambalun ni hipan mahapul yud lawwan yu henin kennen, ya hakbat, ya pihhuh niya balwasin panhullulan yu. Nem ala kayun hulud niya patut.”

<sup>10</sup> Kantu pay ni hi-gaday “Hedin umlaw kayud hakey ni bebley, panha-ad kayu etan di baley etan ni mengeyyag ni hi-gayu ingganah peni-yanan yun nunman ni bebley. <sup>11</sup> Ey hedin umlaw kayud hakey ni bebley ey eleg da pinhed ni dedngelen hu yuka ituttuddu niya eleg dakeyu pehgep di baley da, ey pukpuk yu hu dep-ul di dapan yun peni-yanan yun nunman ni bebley et pengipeang-ang yun hi-gada e nanliwat ida.”

<sup>12</sup> Et lumaw ida humman ni Hampulut dewwan disipol Jesus di kebebbebley ni an mantuttuddu. Intuttuddu da e mahapul ni mantuttuyyudda tuun liwat da. <sup>13</sup> Ingkal dadda hu neihuklung ni dimonyoh niya inepuapan dan lana etan ida kamampandedgeh et ma-kal degeh da.

*Ya nengipeputulan Herod ni ulun John*  
(Matthew 14:1-12; Luke 9:7-9)

<sup>14</sup> Hi Herod e patut di Galilee ey dingngel tun emin ida huuya, tep nandingngel hi Jesus et ya tuka pehpending. Kan idan edum ni tuu ey “Hi-gatu la eman hi John e kamemenyag, nem netagwan et mukun han-ipahding tu hu miracle.” <sup>15</sup> Nem yadda edum ey kanday “Hi-gatu la eman prophet e hi Elijah.” Kan ida daman edum ey “Hi-gatu etan prophet ni henidda lan prophets ni nebayag.” <sup>16</sup> Dingngel Herod humman, nem kantuy “Hi-gatu eman hi John e impaputul ku ulu tu, nem netagwan.”

<sup>17-20</sup> Tep yan nunman ey impadpap Herod hi John idan sindalu tu, et pakelabut tu. Mukun impahding tu huuya, ey tep kae-e-helin John e kantuy lawah hi-gatu, tep piniliw tu hi Herodias e ahwan agitu e hi Philip. Et mukun anggebe-hel Herodias hi John et pinhed tun pepettey nan Herod. Nem kaum-agel hi Herod tep inamta tu e kayyaggu ni tuu hi John niya endi bahu tu et ipaptek tud kallabbutan. Pimpinhed tun deddengngelen hu kaituttuddun John, anin ni hin-addum ni kamemunnumunnu nemnem tu.

<sup>21</sup> Entanni ey nedatngan hu aggew ni pan-am-amlengan dan neungngaan Herod. Et yan nunman hu nannemnem nan Herodias ni pengippepetteyan tun John. Neamung idan emin hu ap-apu, yadda kekeddangyan niyadda ap-apun sindalun an mekikkan di

baley Herod. Nangkalpudda humman ni tuud Galilee. <sup>22</sup> Entanniyimmehep ali etan u-ungngan Herodias ni bii, et ianteng tu tayaw, ey kaman-am-leng ida etan mangili. Anin hi Herod et immanlan peteg et kantu etan ni u-ungngan bii ey “Ibegam hedin hipa pinhed mun iddawat kun hi-gam. Anin hipa ibbagam et iddawat ku. <sup>23</sup> Issapatah ku e anin na-mun kammuy ya kagedwah ni bebley ni nan-ap-apuan ku hu kekdewem et dammutu.”

<sup>24</sup> Limmaw etan biid kad-an inetu et kantuy “Ina, hipa ibbagak ni iddawat tu?” Kan inetuy “Ya ulun John e kamemenyag.”

<sup>25</sup> Impapuut etan ni u-ungngan biin limmaw di kad-an idan neamung et kantun Herod ey “Pinhed kun iddawat mun nunya hu ulun John e kamemenyag e meihha-ad di duyu.”

<sup>26</sup> Nemahhig tuttuyyun Herod, nem neil-uh ni insapatah tu, ey dingngel idan mangili tu e kantuy anin hipa ibbagan nunman ni bii et iddawat tu. Et humman hu, kaumbaing ni mengyat ni inhel tu.

<sup>27</sup> Et menu-dak ni sindalu tun an mengellan ulun John. Limmaw etan hakey ni sindalu et tu putulen hu ulun John di kulabbutan. <sup>28</sup> Inha-ad tud duyu et ilaw tu etan ni bii et tu dama idwat nan inetu. <sup>29</sup> Dingngel idan disipol John e pintey da hi-gatu et da al-en annel tu et da ikulung.

*Impambalin Jesus ni dakel etan liman sinapay*

*(Matthew 14:13-21; Luke 9:10-17; John 6:1-14)*

<sup>30</sup> Nambanggad ida etan Hampulut dewwan intu-dak Jesus, et idaddatteng dan emin hu impahpahding da niya intuttuddu da.

<sup>31</sup> Anin anhan et kamanhuluhulul hu kameemmung ni tutu-u et endi inna-nud Jesus niyadda disipol tun mengangan. Et kan Jesus ni hi-gaday “Itsuy ew di nea-appil et itsu man-iyatu.” <sup>32</sup> Et mambangkaddan limmaw ida ma-lat e-ebbuh ida. <sup>33</sup> Nem dakel ida damengu nenang-ang ni hi-gada, et kabsik ida etan tutu-un nangkalpud kebebbley et mamenguluddan limmaw etan di gilig ni baybay ni dekkalan di Jesus. <sup>34</sup> Dimmateng di Jesus et umhep idad bangsa, ey inang-ang tudda dakel ni tuun neamung ey himmek tudda, tep henidda kalneroh ni impayyag ni kamampattul. Et dakel hu intuttuddu tun hi-gada.

<sup>35</sup> Kamangkehilleng law ey kan idan disipol Jesus ni hi-gatuy “Akkunu, kamangkehilleng ey endi tayu pengellaan ni kenneh di deya, tep nea-appil huyyan bebley. <sup>36</sup> Itu-dak mudda ew eya tutu-u et ida gumtang ni kenneh dad neihnuh ni bebley.”

<sup>37</sup> Nem kan Jesus ni hi-gaday “Idwasi yudda kuman kenneh da!” Kanday “Nem attu mi pengellaan ni dakel ni pihhuh? Mahapul hu dakel ni pihhuh ni iggatang di kenneh da.”

<sup>38</sup> Kan Jesus ni hi-gaday “Yu ang-ang idan tutu-u hedin piga sinapay ni wada.” Ida nenang-ang ey wada et kandan hi-gatuy “Tam wada nem lillimman sinapay niya deddewwan deleg ni ebuh.”

<sup>39</sup> Ey kan Jesus idan disipol tuy “Lakkayuy et yudda amungen etan tutu-u et payudung yuddad mahlek.” <sup>40</sup> Et yumudung ida tuu e negenedwaddan hanggatut niya hannenelima. <sup>41</sup> Illan Jesus etan liman sinapay et ya etan dewwan deleg et itengaw tud kabunyan et mansalamat nan Apu Dios, et peni-angen tu etan sinapay niya deleg, et idwat tudan disipol tu et da pan-iwatwat idan tuu. <sup>42</sup> Negibbuh ni nengan idan emin et maphel ida ey dakel sindaan da. <sup>43</sup> Inemung idan disipol Jesus hu natdaan ey napnu hampulut dewwan basket. <sup>44</sup> Ya bilang idan lalakkan nengan ey liman libu.

*Ya nandalnan Jesus di ta-pew ni danum di baybay*

*(Matthew 14:22-33; John 6:15-21)*

<sup>45</sup> Negibbuh idan nengan et pahgep idan Jesus etan disipol tud bangsa, et pamengulu tudan impalaw di Betsaida di ba-hil ni nengannan da, et han tudda pampaenamut etan tutu-u. <sup>46</sup> Immanemut idan emin hu tuu et manteyed hi Jesus di duntug ni an mandasal.

<sup>47</sup> Nehileng law ey wadaddad gawwan baybay etan disipol tu, ey nanengtun immen hi Jesus di duntug e hahhakkey tu. <sup>48</sup> Inang-ang Jesus e ida kameligligasi, tep kameihhipngat hu dibidib. Et humman hu, kamangkewa-wa ey limmaw di kad-an da e nandalan di ta-pew ni danum. Melebbah et la, <sup>49</sup> nem inang-ang da et tumekut ida, tep kanda na-mu nem banig. Et ida kamantetekkuk e kanday “Ammundehep hu banig!” <sup>50</sup> Simmakut idan peteg ni nenang-angan dan hi-gatu et kan Jesus ni hi-gaday “Entan takut yu, pandinel kayu, tep hi-gak.”

<sup>51</sup> Et humgep hi Jesus di bangsa et makiyudung ni hi-gada ey nesiked hu pewek. Natngaddan peteg hu disipol tun nenang-angan dan neipahding. <sup>52</sup> Tep eleg dan hekey awatan etan nengipedakkalan tun sinapay ni binelun da, tep mekelhi ulu da niya kulang dinel dan hi-gatu.

*Ya nampangkalan Jesus ni degeh idan tutu-ud Genesaret  
(Matthew 14:34-36)*

<sup>53</sup> Nambangkadda et man-agwat idad Genesaret et iiket dadman hu bangsa. <sup>54</sup> Inimmatunan idan tuudman hi Jesus, <sup>55</sup> et papuut dan limmaw di kebebbley et dadda pan-iattang hu kamampandedgeh et pan-ilaw dad kad-an tu, anin ni attu lawwan tu. <sup>56</sup> Emin di bebley ni kalawwin Jesus ey kapan-iunud idan tutu-un hi-gatud mulkaduh hu kamandedgeh ma-lat kap-en da, anin ni giligi ni balwasi tun ebuh. Ey emin ida etan nengapa ey na-kal degeh da.

## 7

*Ya elaw idan Pharisee  
(Matthew 15:1-9)*

<sup>1</sup> Yan pinhakkeyey neamung idan Pharisee niyadda edum ni kamantutuddun Tugun Moses ni nalpud Jerusalem di kad-an Jesus <sup>2</sup> ey inang-ang dadda etan edum ni disipol tu e eleg ida mambulu et mangan ida. <sup>3</sup> Yadda Pharisee niyadda edum dan Jews ey daka paka-u-unnuda hu meippanggep ni elaw idan aammed dan mambullu ni han ida nengan. <sup>4</sup> Ey mahapul ni ullahan da hu daka gettanged mulkaduh ni han da kinan. Dakel ida pay hu edum ni tugun idan aammed dan mahapul ni peka-u-unnuden da henin elaw ni pengullahan ni duyu, ya basuh, ya pa-nay, ya banga niya unggippan.

<sup>5</sup> Kan idan nunman ni kamantutuddun Tugun Moses et yadda Pharisee nan hi Jesus ey “Kele eleg u-unnudaddan disipol mu hu tugun idan aammed tayun nunman? Kele daka pemegga ekan e eleg da ipahding hu elaw ni mambullu?”

<sup>6</sup> Hinumang Jesus et kantuy “Makulug hu inhel lan eman ni prophet e hi Isaiiah meippanggep ni hi-gayun maitek e kantuy ‘Huyyaddan tuu ey kanday da-ak kadaydayawa, nem eleg kaya, tep ehel dan ebuh. Ya kakulugan tu ey eleg da-ak ni hekey nemnema. <sup>7</sup> Endi silbitu daka pandeeyawin hi-gak, tep ya tugun ni tuu hu daka itutuddun u-unnuden ni tuu ey kanday hi-gak hu kan tugun, nem beken kaya.’”

<sup>8</sup> Inwalleng yu hu tugun Apu Dios et ya tugun ni tuu hu yuka u-unnuda.”

<sup>9</sup> Kan Jesus mewan ey “Netalam kayun nengiwaklin ni tugun Apu Dios ma-lat ya elaw yu hu u-unnuden yu. <sup>10</sup> Tep kantud Tugun Moses ey ‘U-unnud yud ameyun ineyu. Ya tuun wada e-helen tun lawah nan ametu winu hi inetu ey anin ni petteyen.’” <sup>11</sup> Nem yuka itutuddu e kanyuy ‘Emin hu iddawat yu et idan ammed yun ibbaddang yun hi-gada ey anin ni eleg yu iddawat ni hi-gada hedin hi Apu Dios hu pengidwatan yuddan nunman.’ <sup>12</sup> Et humman hu, kanyu law ey anin eleg baddangi hu ammed ni kamanheppul ni baddang, hedin meidwat nan Apu Dios etan ibbaddang yu et ni hi-gada. <sup>13</sup> Nem humman ni yuka itutuddu ey humman hu yuka pengiwaklinin tugun Apu Dios. Ey dakel ida pay hu edum ni henin nunman ni yuka pehpending.”

*Ya kamengippelawah ni tuu  
(Matthew 15:10-20)*

<sup>14</sup> Inaygan mewan Jesus ida tuud kad-an tu et kantun hi-gaday “Dengel yun emin eya e-helen kun hi-gayu et awatan yu. <sup>15</sup> Beken ni ya kakennan tuu hu kaumhulun ni panlawahan tu, nem ya kamelpud nemnem tu. <sup>16</sup> Pakannemnem yu huyyan inhel ku.”

<sup>17</sup> Hini-yan Jesus ida humman ni neamung et an humgep etan di baley, ey neiunud ida disipol tu et kandan hi-gatuy “Hipa keibbellinan etan ni inhel mu?” <sup>18</sup> Kan Jesus ni hi-gaday “Kaw anin ni hi-gayu et eleg yu han-awat? Kaw eleg yu amta e beken ni ya kakennan tuu hu tuka panlawahi?” <sup>19</sup> Tep eleg meappektali nemnem, tep ya kakenna, ey kaumlaw di egeh ni neukat di tuka keukkasi.” Huyyan inhel Jesus ey ippeamta tu e dammutun kenneh hu hipan kamekkan.

<sup>20</sup> Intuluy Jesus ni immel et kantuy “Ya kamelpud nemnem ni tuu hu kaumhulun ni kapanlawahin tuu. <sup>21-22</sup> Yad nemnem ni tuu kakelpuin lawah ni tuka pehding, henin makibii winu makilaki, ya takew, ya umpatey, ya pengi-ulligan ni beken ni ahwa, ya um-agum, ya mengapkapan linggeman ni lawah, ya umhaul, ya bengang, ya um-ameh ni limmun edum ni tuu, ya itek hu e-helen meippanggep ni edum ni tuu, ya mampahhiyya, niya nealay impahding hu hipan pinhed. <sup>23</sup> Huyyaddan emin ni lawah ey kamelpud nemnem, et huyyadda kaumhulun ni kapanlawahin tuu.”

*Ya kapengullug etan ni biin beken ni Jew  
(Matthew 15:21-28)*

\* 7:7 7:7 Isaiiah 29:13 † 7:10 7:10 Exodus 21:17

<sup>24</sup> Etanni ey hini-yan Jesus humman ni bebley et lumaw di bebley di Tyre. Limmaw etan di hakey ni baley, tep pinhed tun endi mengamtan kad-an tu, nem inunud ida damengun tutu-u. <sup>25</sup> Et wada etan biin nehuklungan ni dimonyoh hu u-ungnga tu e dingngel tun wada hi Jesus diman, et lumaw di hinangatu et mandukkun. <sup>26</sup> Humman ni bii ey Gentile e nalpud Phoenicia di Syria. Nampehemmehemmek nan Jesus ma-lat ekalan tu etan dimonyoh ni neihuklung ni u-ungnga tu.

<sup>27</sup> Nem kan Jesus ni hi-gatuy "Eleg, tep mahapul ni pengngan ida ni hu u-ungnga ni han impangan ida ahhu hedin wada sindaan da." <sup>28</sup> Nem kan etan ni bii ey "Makulug huttan e Apu Jesus, nem anin ya ahhu et dammutun kennen tu hu inggah idan u-ungngan kennen." ‡

<sup>29</sup> Et kan Jesus ni hi-gatuy "Hedin huttan hu kammu, ey anemut ka haggud nakal etan neihuklung ni dimonyoh etan ni u-ungngam." <sup>30</sup> Immanemut etan bii ey kamambakbaktad etan u-ungnga tu, e na-kal law hu neihuklung ni hi-gatu.

*Ya nangkalan Jesus ni nganga niya tuleng etan ni tuu*

<sup>31</sup> Hini-yan Jesus humman ni Tyre, et lumaw di Sidon niyadda etan di hampulun bebley e Decapolis hu ngadan da, et dumteng di Baybay e Galilee.

<sup>32</sup> Etanni ey wadadda nengi-lin Jesus ni netuleng niya nenganga, et mampehemmehemmek idan hi-gatu ma-lat kapaen tu.

<sup>33</sup> Ingkuyug Jesus humman ni tuu et ida meappil. Ingkapan Jesus hu dewwan kimeng tud tangila etan ni tuu et lupdaan tu kimeng tu, et ikepa tud dila etan ni tuu. <sup>34</sup> Nemahhig hemek tu et itangaw tud kabunyan et kantuy "Ephphatha!" Ya keibbellinan tu ey "Dengel kan tangila."

<sup>35</sup> Pinhakkeyey handengel law etan ni netuleng ey kameibbehwang law ehel tu. <sup>36</sup> Sinugun Jesus ida etan tutu-u e kantuy "Entan tu an i-i-hel huuyan impahding ku." Nem limmaw ida kumedek etan tuu et da anhallaw pan-i-hel idan katutuun humman ni impahding tu. <sup>37</sup> Emin ida hu nangngel nunman ni neipahding ey ida kametnga. Et kanday "Kayyaggud numan emin hu tuka ippahding. Anin numan idan netuleng et tuka e-kala tuleng da niya tuka peheppit ida nenganga!"

## 8

*Impangan Jesus hu epat ni libun tuu  
(Matthew 15:32-39)*

<sup>1</sup> Wada mewan ni pinhakkey hu neamung ida dakel ni tuu ey na-puhan idan kennen, et aygan Jesus ida disipol tu et kantuy <sup>2</sup> "Anggehemmek kudda eya tutu-u, tep tellun aggew hu nekiha-adan dan hi-gatsu ey endi law kennen da. <sup>3</sup> Hedin peennamut kudda ey eleg ida mangan, man meillukkuy ida lad dalan, tep nangkeidawwi man anhan hu nalpuan idan edum."

<sup>4</sup> Kan ida etan ni disipol Jesus ey "Kaw attu an pengellaan ni pekkan ida eyan dakel ni tuu eyad endi bebley?" <sup>5</sup> Kan Jesus ni hi-gaday "Kaw piga etan sinapay ni binelun yu?" Kanday "Tam pitun ebuh."

<sup>6</sup> Et payudung Jesus ida etan tutu-u. Inla tu etan sinapay et mansalamat nan Apu Dios, et peni-angen tu et idwat tuddan disipol tu et da pan-iwatwat idan tutu-u. <sup>7</sup> Inla tu mewan etan pippiggan deleg, et mansalamat nan Apu Dios et idwat tuddan disipol tu et da pan-iwatwat. <sup>8-9</sup> Nengan idan emin et maphel ida et amungen idan disipol tu hu natdaan ey napnu pitun basket. Yadda tuun nengan ey limmaw di epat ni libu.

Impaenamut Jesus ida <sup>10</sup> et han ida pambangkaddan disipol tu, et manglaw idad Dalmatia.

*Ya nengibag-an idan Pharisee ni peang-ang Jesus hu miracle  
(Matthew 16:1-4)*

<sup>11</sup> Dingngel idan Pharisee e wada hi Jesus diman et lumaw idan mekihhubbeg ni pematnaan dan hi-gatu. Kanday "Hedin makulug ni intu-dak dakan Apu Dios, peang-angi dakemin miracle." <sup>12</sup> Nedismayah hi Jesus ni hi-gada, et kantuy "Kele hedin hi-gayun tuun nunya, man pakkaw ni wada ang-angen yun miracle? E-helen kun hi-gayu e eleg dakeyu peang-angin miracle."

<sup>13</sup> Inhel tu humman et hi-yanen da humman ni bebley et meagwat idad demang ni baybay.

‡ 7:28 7:28 Humman hu impanghel etan ni bii, tep inamta tu hu keibbellinan ni inhel Jesus. Ya kei-elligan nunman ni inhel Jesus ey kantuy mahapul ni baddangan tudda ni- edum tun Jews et hantu baddangidda edum ni tuu.

*Ya neieligan ni yeast ni kaituttudduddan Pharisee et hi Herod  
(Matthew 16:5-12)*

<sup>14</sup> Liniwwan idan disipol ni nambalun, nem wada kuma hakey ni ebuh ni natdaan ni sinapay di bangka. <sup>15</sup> Kan Jesus ni hi-gaday “Helipat-i yu kuma hu yeast idan Pharisee niyadda etan tuun Herod.” <sup>16</sup> Wada hakkeyey kanday “Inhel tu humman, tep liniwwan tayun nambalun.”

<sup>17</sup> Inamtan Jesus humman ni inhel da et kantuy “Kele ya eleg tayu pambalunan hu yuka nenemnema? Kaw ingganah ni nunya ey eleg yu han-awat hu nakka ittuttuddu? Kaw kulang nemnem yu? <sup>18</sup> Kele heni endi mateyu niya tangila yu? <sup>19</sup> Kaw liniwwan yu eman impahding ku etan ni liman sinapay ni ebuh, nem impangan tayu hu liman libun tuu? Piga basket ni napnun inemung yun natdaan?” Kanday “Tam hampulut dewwa.”

<sup>20</sup> Kantu mewan ey “Kaw liniwwan yu impahding ku eman ni pitun sinapay ni impakan tayuddan epat ni libun tuu? Piga basket ni napnun inemung yun natdaan?” Kanday “Tam pitu.”

<sup>21</sup> Kan Jesus ni hi-gaday “Tam ay, amta yu, ey kele nanengtun eleg kayu medinnel ni hi-gak?”

*Ya nangkalan Jesus ni kulap etan ni tuud Betsaida*

<sup>22</sup> Dimmateng di Jesus di Betsaida ey wadadda tuun nengi-lin nekulap, et mampehem-mehemmek idan Jesus e keppaen tu ma-lat ma-kal kulap tu. <sup>23</sup> Et ipengulun Jesus etan nekulap di a-allaw etan ni bebley. Linupdaan Jesus hu matetu et kap-en tu et kantuy “Kaw wada law muka ang-anga?”

<sup>24</sup> Ey kan etan ni tuu ey “Wada nakka ang-angan tuu, nem henidda keyew ni kamangginlid.”

<sup>25</sup> Et kapaen mewan Jesus matetu ey pinhakkeyey kayyaggud law hu tuka penang-ang.

<sup>26</sup> Impaenamut Jesus di baley da e kantuy “Entan tu idlan di bebley.”

*Ya nanghelan Peter nan Jesus ni tuka pengullug e hi-gatu kaumhelaknib  
(Matthew 16:13-20; Luke 9:18-21)*

<sup>27</sup> Hini-yan Jesus et yadda disipol tu hu Galilee et lumaw idad kebebbebley ni neihnut di Cesarea Philippi. Wadaddad dalan ey kan Jesus ni hi-gaday “Hipa-ak na-mun kan idan tutu-u?”

<sup>28</sup> Kan idan disipol tu ey “Tam kan idan edum ey hi-gam la eman hi John e kamemenyag. Yadda edum ey kanday hi-gam hi Elijah ey kan idan edum ey hi-gam hu hakey lan prophet ni netagwan.”

<sup>29</sup> Kan Jesus ni hi-gaday “Inna-nu daman hi-gayu, hipa-ak ni kan yu?” Kan Peter ey “Hi-gam hi Christo e intu-dak Apu Dios ni kamengippaptek idan tuu tu.”

<sup>30</sup> Nem inhelan idan Jesus et kantuy “Entan tu i-i-hel di edum ni tuu huttan.”

*Ya nanghelan Jesus ni meippanggep ni panlelehanan tu et ya ketteyyan tu  
(Matthew 16:21-28; Luke 9:22-27)*

<sup>31</sup> Inlapun Jesus ni mengheli ni hi-gadan meippanggep ni meippahding alin hi-gatu. Kan tuddan disipol tu ey “Hi-gak e Pengulwan ni emin ni tuu ey mahapul ni manhelheltappak. Eleg ali ebbulutaddan kamengipappangngulun Jews, yadda apapuddan padi et yadda kamantuttuddun Tugun Moses e hi-gak hi Christo. Et pepettey da-ak ali, nem metegguan nak ni katlun aggew.”

<sup>32</sup> Huyya hu impanna-ud Jesus ni inheli ni hi-gada. Ey inaygan nan Peter di a-allaw tu et ehelan tu, tep eleg tu pinhed ni meippahding humman ni hi-gatu. <sup>33</sup> Nem nanligguh hi Jesus et in-ang-ang tuddan disipol tu et ibunget tu hi Peter. Kantuy “A-allaw ka! Heni ka dama hi Satanas. Ya nemnem mu ey nemnem ni tuu, beken ni henin nemnem Apu Dios.”

<sup>34</sup> Inaygan Jesus ida etan tuun neamung et yadda disipol tu et kantun hi-gaday “Ya tuun pinhed tun mengu-unnud ni hi-gak, ey mahapul ni eleg tu ikkakaguh hu panyaggudan tud puyek, nem ennanan tu ligat ni pengu-unnudan tun hi-gak, anin ni humman umhulun ni ketteyyan tu. <sup>35</sup> Tep ya tuun ya neitu-wan tu eyad puyek hu tuka ikkakaguh ni ebuh ey endilli biyag tun endi pappeg tu. Nem ya tuun tuka ikkakaguh ni mengu-unnud ni hi-gak niya tuka ikkakaguh ni mengippeamtan et-eteng ni impeminhed Apu Dios idan tuu, anin umhulun ni ketteyyan tu ey meidwatan ni biyag ni endi pappeg tu. <sup>36</sup> Tep anin ni ellan ni tuun emin hu wada eyad puyek et endilli silbitu hedin endilli biyag tun endi pappeg tu et meiddawwin Apu Dios ni ingganah. <sup>37</sup> Tep ya tuun meiddawwin Apu Dios ni ingganah ey endi mabalin ni pehding tu. <sup>38</sup> Dakel idan nunya hu tutu-un lawah ni nengiwalleng nan Apu Dios. Et humman hu, ya tuun kamengibbe-ing ni hi-gak e Pengulwan ni emin ni tuu niya nakka ittuttuddu, ey eggak ali ibbilang ni tuuk

ni pambangngadan kun hi-gamiddallin aanghel ni pengippeang-angan kun dayaw min Ama e hi Apu Dios.”

## 9

<sup>1</sup> Kan mewan Jesus ey “Nemnemnem yu eya e-helen ku, e wadaddallin hi-gayu hu eleg mettey ingganah ni ang-angen dalli nan-ap-apuan Apu Dios e et-eteng kabelaan tu.”

*Ya nambaliwan ni ang-ang Jesus  
(Matthew 17:1-13; Luke 9:28-36)*

<sup>2</sup> Nelabah enem ni aggew ey inaygan Jesus di Peter, hi James et hi John et manteyed ida etan di eta-gey ni duntug et e-ebbuh idadman. Nekekemtang ey inang-ang da e hin-appil hu ang-ang Jesus. <sup>3</sup> Ya balwasi tu ey nambalin ni mabkablak e kamammussi-lak ni peteg e endi kei-ingnehan tu eyad puyek.

<sup>4</sup> Entanni, ey newadad Moses nan Elijah e ida kamekiung-ungbal nan Jesus. <sup>5</sup> Kan Peter nan Jesus ey “Apu, kayyaggud et wada itsud ya! Umkapyu kamin tellun a-abbung et hi-gam ni hakey, hi Moses ni hakey niya hi Elijah ni hakey.” <sup>6</sup> Inhel tu humman tep simmakut idan peteg eleg tu amta e-helen tu.

<sup>7</sup> Entanni ey newada kulput ey hiniduman tudda. Ey wadalli immehel etan di kulput e kantuy “Huyya hu U-unggak ni nakappinshed ku. U-unnud yu hu e-helen tun hi-gayu.”

<sup>8</sup> Da i-ang-ang ey attukaw lad Moses nan Elijah, ebuhi hi Jesus ni wada. <sup>9</sup> Ida kamandayyud duntug, ey sinugun idan Jesus e kantuy “Entan tu i-i-hel humman ni inang-ang yu ingganah alin keteguan kun ketteyak e Pengulwan ni emin ni tuu.”

<sup>10</sup> Inu-unnud da humman ni inhel tu, nem hi-gada ngu ey ida kamanahummangan e kanday “Hipa na-mu pinhed tun e-helen ni kantuy meteguan ali?”

<sup>11</sup> Et kandan Jesus ey “Kele kan idan kamantuttuddun Tugun Moses ey memenggulun um-ali mewan hi Elijah et han umli etan mengippaptek ni tuu?”

<sup>12</sup> Hinumang Jesus et kantuy “Makulug numan humman, tep mahapul ni um-ali ni hi Elijah et tu idaddan ida tuun mengebbulut etan ni mengippaptek ni hi-gada. Nem wada neitudek ni ehel Apu Dios ni kantuy hi-gak e Pengulwan ni emin ni tuu ey mahapul ni panlelehanan kun pehding dan hi-gak niya mepihhullak ali. <sup>13</sup> Nem e-helen kun hi-gayu e immali dedanggu la hi Elijah et panlelehanan tu hu impahpahding idan tuun hi-gatu, et humman hu inamnuan tu-wangun eman ni inhel Apu Dios ni pehding dan hi-gatu.”

*Ya nangalan Jesus ni neihuklung etan ni u-ungnga  
(Matthew 17:14-21; Luke 9:37-43)*

<sup>14</sup> Dimmateng di Jesus di kad-an idan edum ni disipol tu, ey inang-ang da neamung ni dakel ni tuu. Wadadda etan kamantuttuddun Tugun Moses e ida kamekihhubbeg idan disipol tu. <sup>15</sup> Inang-ang idan katuuuu hi Jesus ey immamlang ida et mambesik idan an menammun hi-gatu. <sup>16</sup> Kan Jesus idan disipol tu ey “Hipa yuka pekihhubbegin hi-gada?”

<sup>17</sup> Ey wadalli hakey ni immehel e kantuy “Apu, in-alik hu u-unggak ni neihuklungan ni dimonyoh et eleg paka-hel. Pinhed ku anhan ni e-kalen mu humman ni neihuklung ni hi-gatu. <sup>18</sup> Hedin himpaw ni neihuklung, man tuka pan-ibeknay hu annel tud puyek, ey kaman-uupag bungut tu, ey kamangkeketket ngipen tu niya kaumkedhel annel tu. Kan kuddan disipol muy e-kalen da, nem eleg da han-ekal.”

<sup>19</sup> Kan Jesus ey “Ayyakaw kayun tuun nunya, lawah kayu niya endi yuka pengullug! Piga binabbal kun hi-gayu? Kaw mekihahha-addak ni hi-gayun ingganah et han kayu mangulug? I-li yudya etan u-ungnga.”

<sup>20</sup> Et ilaw da etan u-unggad kad-an Jesus. Inang-ang etan ni neihuklung hi Jesus ey pinhakkeyey impegeyey tu etan u-ungnga et metu-lid puyek ey kaman-uliulin niya kaman-uupag bungut tu.

<sup>21</sup> Kan Jesus etan ni aman nunman ni u-ungnga ey “Pigan tu nengilapwan tun hanniman?” Kan etan ni ametu ey “Tam neipalpu eman ni kageggellang tu. <sup>22</sup> E-eggel ni innang ni mettey, tep neala ni nanteb-ung di apuy winu danum. Hemek dakemi anhan et baddangan dakemi hedin dammutu.”

<sup>23</sup> Kan Jesus ey “Baddangan dakeyu. Nem entan kantuy ‘hedin dammutu,’ tep kaw eleg mu amta e ya tuun kamengullug nan Apu Dios ey mebaddangan di hipan mahapul tu?”

<sup>24</sup> Inlet etan ni aman u-ungnga ehel tu e kantuy “Nakka mengullug, nem kulang nakka pengullug, baddangi muwak anhan!”

<sup>25</sup> Inang-ang Jesus e kaelieliddan emin hu tuud kad-an tu et kantu etan ni neihuklung ey “Hi-gam ni neihuklung hu gaputun nenganga niya netuleng eya u-ungnga, ka-kal kan hi-gatu ey entan ali law pambangngad.”

<sup>26</sup> Ey pinhakkeyey impatkuk etan ni neihuklung etan u-ungnga, ey kimmedhel e heni netey et wada hakkeyey kanda na-mu nem netey. <sup>27</sup> Nem singnged Jesus et peehneng tu ey immehng.

<sup>28</sup> Entanni ey limmaw di Jesus etan di baley et humgep ida et e-ebbuh ida ey kan idan disipol tun hi-gatuy "Kele eleg mi han-ekal etan neihuklung?" <sup>29</sup> Kan Jesus ey "Endi edum ni mabalin ni mengkal ni nunman ni kameihuklung, ebuh dasal."

*Ya pidwa tun nanghelan Jesus ni ketteyyan tu*  
(Matthew 17:22-23; Luke 9:43-45)

<sup>30</sup> Hini-yan da humman ni bebley et idlan dad Galilee, tep eleg pinhed Jesus ni wadadda edum ni tuun mengamtan kad-an tu, tep wada ittuttuddu tuddan disipol tu. <sup>31</sup> Kantun hi-gaday "Hi-gak e Pengulwan ni emin ni tuu ey ellan da-ak idallin edum ni tuu et pateyen da-ak, nem yan katlun aggew ni ketteyyan ku ey metegguan nak." <sup>32</sup> Eleg da awatan humman ni tuka e-e-hela, nem wada egen dan manmahmah meippanggep nunman.

*Ya elaw ni makulug ni kasina-gey*  
(Matthew 18:1-5; Luke 9:46-48)

<sup>33</sup> Dimmateng idad Capernaum et humgep idad hakey ni baley. Kan Jesus idan disipol tuy "Hipalli yuka ennungbalad dalan?" <sup>34</sup> Nem endi kaumhumang, tep ya daka ennungbala ey hedini hipa keta-ta-geyan saad tun hi-gadan emin. <sup>35</sup> Yimmudung hi Jesus et kan tuddan disipol tuy "Ya etan tuun pinhed tun hi-gatu keta-ta-geyyan ey mahapul ni pebahah tu annel tu et mambalin ni bega-en idan edum tu."

<sup>36</sup> Immayag hi Jesus ni u-ungnga et peehneng tud hinaggadan emin. Inakwal tu etan u-ungnga et kantun hi-gaday <sup>37</sup> "Ya etan tuun pinhed tudda u-ungnga gapuh ni hi-gak ey humman ida neminhed ni hi-gak. Ey ya etan tuun neminhed ni hi-gak ey pinhed tu dama etan nengitu-dak ni hi-gak e hi Apu Dios."

*Ya tuun makulug ni daka kulluga hi Jesus ey beken idan buhul tu*  
(Luke 9:49-50)

<sup>38</sup> Kan John ni hi-gatuy "Apu, wada inang-ang min tuun han-ekal tu neihuklung, tep ya ngadan mu tuka ussalan mengkal ni neihuklung, nem impasiked mi tep beken ni edum tayu."

<sup>39</sup> Nem kan Jesus ey "Entan tu pasiked tep ya tuun ya ngadan ku hu tuka ussalan mengippahding ni miracle ey beken ni lawah hu e-helen tun hi-gak. <sup>40</sup> Tep emin ida etan tuun eleg umbangking ni hi-gatsu ey edum tayudda humman. <sup>41</sup> E-helen kun hi-gayu e ya etan tuun mengippeinum ni hi-gayun anin ni hambasuh ni danum tep inamta tu e yuwak kakulluga ey iddawtan kun panyaggudan tu.

*Mahapul ni hellipat-an tayu ma-lat ya kakkayaggud elaw tayu*  
(Matthew 18:6-9; Luke 17:1-2)

<sup>42</sup> Nem ya etan tuun hi-gatu umhulun ni pengiwwallengen ni pakekulug tun tuka pengullug ni hi-gak, ey heballi ta-yunan hu buklew tun et-eteng ni batu et an lenengen di baybay <sup>43-44</sup> Hedin ya ngamay yu hu kaumhulun ni yuka panliwwasi, ey heballi putul yu. Tep i-imman hu anin megumhulan hu ngamay yu nemet wada biyag yun endi pappeg tu, nem ya wadan dewwa ngamay yu ey umlaw kayu damengud impierno e eleg me-me-dep apuy diman. <sup>45-46</sup> Hedin ya heli yu hu kaumhulun ni yuka panliwwasi, ey heballi putul yu. Tep i-imman hu anin ni endi hakey ni heli yu nemet wada hu biyag yun endi pappeg tu nem ya wadan dewwa heli yu ey umlaw kayu damengud impierno. <sup>47</sup> Ey hedini ya mateyu hu kaumhulun ni yuka panliwwasi, ey heballi ukit yu. Tep i-imman hu hakey mateyu nemet wada hu biyag yun endi pappeg tu nem ya wadan dewwa mateyu ey umlaw kayu damengud impierno e eleg me-me-dep apuy diman. <sup>48</sup> Yadman ey mebigbiggihan hu annel niya eleg me-me-dep hu apuy. \*

<sup>49</sup> Emin hu mengullug ni hi-gak ey panligligatan da niya panlelehanan da ma-lat meihammad hu daka pengullug.

<sup>50</sup> Kayyaggud kei-ussalan ni ahin. Nem hedini na-kal hu tamtam tu, man endi law silbitu, tep eleg mabalin ni an pebanggad humman ni tamtam tu. Heni daman kamengullug e et-eteng pansilbian dan panyaggudan ni tuu, tep hi-gada kamengippeang-ang ni kayyaggud ni elaw. Nem hedini iwwalleng yu tugun ku, ey endi law silbi yud edum ni tuu. Et humman hu pan-imbabaddang kayu niya mahapul ni melinggep kayun emin."

\* 9:48 9:48 Huyyan verses ey nan-ingneh di verse 44 niyad verse 46, nem huyyaddan dewwan verse ey eleg maitudek di edum ni version.



## 10

*Ya nengituttudduan Jesus ni meippanggep ni panhi-yanan ni han-ahwa  
(Matthew 19:1-12; Luke 16:18)*

<sup>1</sup> Hini-yan di Jesus hu Capernaum et lumaw idad bebley di Judea, et man-agwat idad Wangwang e Jordan. Entanni ey neamung ida mewan hu dakel ni tuu et tuttuduan tudda, henin tuka pehpending.

<sup>2</sup> Wadadda immalin Pharisee ni pinhed dan patnaan hi Jesus et kandan hi-gatuy “Hipad elaw tayu hu lebbeng ni umhulun ni peni-yanan ni lakin ahwa tu?” <sup>3</sup> Kan Jesus ey “Kaw hipa intugun nan Moses ni hi-gayun meippanggep ni panhi-yanan ni han-ahwa?”

<sup>4</sup> Kanday “Tam kantuy dammutu hedini wada kapyaan ni lakin papil ni panhi-yanan dan han-ahwa ey hantu intu-dak hu ahwa tu.”

<sup>5</sup> Nem kan Jesus ni hi-gaday “In-abulut Moses humman, tep nemahhig kayu e eleg kayun hekey metuttuddui. <sup>6</sup> Nem yan laputun nanletuan Apu Dios ni emin ey lintu tu hu hakey ni laki niya hakey ni bii. <sup>7</sup> Et humman hu, ya laki ey hi-yanan tu hu ammed tu et tu addumen etan ahwa tu. <sup>8</sup> Et hedini nan-addum ida huyyan dewwa ey henidda law hakey. Beken ida law ni dewwa, nem nehakkey ida law. <sup>9</sup> Et humman hu, eleg mabalin ni an panhi-yan ni tuu hu impan-addum Apu Dios.”

<sup>10</sup> Nambangngad di Jesus etan di baley ey kan ida etan ni disipol tu ey “Hipa humman ni inhel mu?” <sup>11</sup> Kan Jesus ni hi-gaday “Ya lakin hi-yanan tu ahwa tu et mambintan ey in-abek tu hu ahwa tu. <sup>12</sup> Anin daman bii e hedini hi-yanan tu ahwa tu, et bintanen da, ey in-abek tu etan nemangulun ahwa tu.”

*Ya et-eteng ni impeminhed Jesus idan u-ungnga  
(Matthew 19:13-15; Luke 18:15-17)*

<sup>13</sup> Hakey ni aggew ey wadadda edum ni tuun in-alidadda u-ungnga dan da pekeppan Jesus ma-lat idasalan tudda, nem imbunget idaddan disipol tu. <sup>14</sup> Dingngel Jesus humman ey bimmunget et kantuy “Entan tu ika-leg ellian idan u-ungngad kad-an ku, tep yadda etan tuun henin elaw idan eyan u-ungnga hu elaw da hu meilla-kam di nan-ap-apuan Apu Dios. <sup>15</sup> E-helen kun hi-gayu e mahapul ni iddinel ni tuu hi Apu Dios ni henin kapengiddinel ni u-ungngan kapemaptekan ni a-ammed da et han maila-kam di nan-ap-apuan Apu Dios.” <sup>16</sup> Inepupu tudda etan u-ungnga et ita-pew tu ngamay tud ulu da et idasalan tudda.

*Ya meippanggep etan ni kedangyan ni tuu  
(Matthew 19:16-30; Luke 18:18-30)*

<sup>17</sup> Kamenglaw di Jesus di lawwan da ey pindug etan ni hakey ni laki et an mandukkan di hinangga tu, et kantuy “Kayyaggud ni Apu, hipa pehding ku ma-lat mawedan hi-gak hu biyag ni endi pappeg tu?”

<sup>18</sup> Kan Jesus ni hi-gatuy “Kele kan muy kayyagguddak? Endi edum ni kayyaggud nem ebuh hi Apu Dios. <sup>19</sup> Inamtam ida etan tugun ni kantuy ‘Entan patey mu, entan tu iebek ahwan, entan panekew mu, entan pan-itek mu, entan tu haul hu edum mun tuu niya u-unnud mud amam nan inam.’”

<sup>20</sup> Kan etan ni lakiy “Ma-nudda huttan e Apu, tep inu-unnud ku dedan emin eman ni keu-ungngak.”

<sup>21</sup> In-ang-ang Jesus e ka-ang-ang e wada impeminhed tun hi-gatu, et kantuy “Hakey ni ebuh law hu mahapul ni pehding mu. Pambangngad ka ni- et mu igtang ni emin hu kinedangyan mu et idwat muddan nangkewetwet hu nangatngam et han ka maikuyug ni hi-gak, et wadalli kinedangyan mud kabunyan.”

<sup>22</sup> Dingngel etan ni laki humman ey limmemyung e maggeh nemnem tu et manglaw, tep kedangyan ni peteg.

<sup>23</sup> In-ang-ang Jesus idan disipol tu et kantuy “Neligit ida hu kedangyan ni meilla-kam di nan-ap-apuan Apu Dios.” <sup>24</sup> Dingngel da humman ni inhel tu ey natngadda. Kan mewan Jesus ey “Makulug ni neligit ni peteg ni meilla-kam di nan-ap-apuan Apu Dios. <sup>25</sup> Nelallakkah hu kamel ni um-usip di telek ni lubay nem ya an keilla-kaman ni kedangyan di nan-ap-apuan Apu Dios.”

<sup>26</sup> Dingngel ida mewan ni disipol tu humman ey nema-man natngaddan peteg et wada hakkey ni hi-gada ey kanday “Kaw! Et hipadda tep hu dammutun mehellakniban?”

<sup>27</sup> In-ang-ang mewan Jesus ni hi-gada et kantuy “Ya tuu ey endi kabaalan tun menellaknib ni annel tu. Nem hi Apu Dios ey han-ipahding tun emin.”

<sup>28</sup> Immehel hi Peter ey kantuy “Nem nemnem mu kedi e Apu, inwalleng min emin hu wadan hi-gami et deh e hi-gam hu mika u-unnuda.” <sup>29</sup> Kan Jesus ey “Makulug huttan et mukun nakka e-hela nisin hi-gayu e ya tuun hi-yanan tu ammed tu, ya u-ungnga tu,

ya agitu, ya baley tu niya puyek tu tep ya tuka pengu-unnudin hi-gak niya ehel Apu Dios,<sup>30</sup> ey meidwatan ni nunyan ketaggu tun et-eteng ni panyaggudan tu. Umdakkel hu u-ungnga tu, ya aaggi tu, ya a-ammed tu, baley tu niya payew tu. Nem wadalli dama panligligatan tu tep pampalpaligat idallin edum ni tuu, nem yallin hakey ni aggew ey meidwatan ni biyag ni endi pappeg tu.<sup>31</sup> Nem yadda etan tuun kameibbillang ni etagey ni nunya, ey hi-gadalli nebah ey yadda etan nebah ni nunya, ey hi-gadalli meibbillang ni neta-ta-gey.”

*Ya pitlu tun penghelan Jesus ni ketteyyan tu  
(Matthew 20:17-19; Luke 18:31-34)*

<sup>32</sup> Yan eman ni wadad Jesus di dalan ni daka penglawwid Jerusalem ey hi Jesus hu nemangulu. Emin ida etan disipol tu et yadda etan tuun kameitu-tu-nud ey ida kaumtatakut, tep umlaw hi Jesus diman. Entannilli ey inemung idan Jesus etan Hampulut dewwan disipol tu et ehelen tu mewan ni hi-gada hu mekapkapan hi-gatu.<sup>33</sup> Kan Jesus ni hi-gaday “Yan lawwan tayud Jerusalem ey hi-gak e Pengulwan ni emin ni tuu ey pedpap da-ak idan ap-apuddan padi et yadda kamantuttuddun tugun Moses. Et kandalli ey mahapul ni metteyyak ey pebeltan da-ak idan beken ni Jew et hi-gada memettey ni hi-gak.<sup>34</sup> Heghegnuden da-ak ali, pan-inlulupdaan da-ak niya pambe-igen da-ak et han da-ak pateya. Nem yallin katlun aggew ni ketteyyan ku ey metegguan nak.”

*Ya imbagad James nan John ni pinhed dan pehdng alin Jesus ni hi-gada  
(Matthew 20:20-28)*

<sup>35</sup> Entanni, ey immalidda etan u-ungngan Sebedi e di James nan John, et kandan Jesus ey “Apu, wada anhan hu pinhed min ibbagan hi-gam.”<sup>36</sup> Kan Jesus ey “Hipa humman?”

<sup>37</sup> Kan idan nunman ni han-agi ey “Pinhed mi et ni yallin yuddungam ni pan-ap-apuan mu ey peyuddung dakemid nambina-hil ni hi-gam, e ya hakey di winannan mu et ya hakey di winillim.”

<sup>38</sup> Nem kan Jesus ni hi-gaday “Eleg yu kattedg amta yuka pan-ibbaga. Kaw makkaw et han-isipel yullin heltapen etan helheltapen kulli?”

<sup>39</sup> Kanday “Dammutun han-isipel mi.” Kan Jesus ey “Nanna-ud dedan ni manhelheltap kayulli gapuh ni yuka pengu-unnudin hi-gak, nem hedin meippanggep ni mekiyyuddung ni hi-gak ey<sup>40</sup> beknak ni mengippanghel, tep hi Ama e hi Apu Dios hu mengippeyuddung etan idan pinili tu dedan.”

<sup>41</sup> Dingngel ida etan ni edum ni disipol tu ey imbunget dad James nan John.<sup>42</sup> Et ayagan Jesus idan emin et kantun hi-gaday “Inamta yu e yadda ap-apun Gentiles ey daka peta-gey ni peteg annel da niya daka ba-aba-aladda tutu-u<sup>43</sup> Nem beken henin nunman ni hi-gayu. Hedin wadaddan hi-gayu hu pinhed tun hi-gatu hu keta-ta-geyyan, man mahapul ni mambalin hi-gatun heni bega-en idan edum tu.<sup>44</sup> Ey hedin wada etan pinhed tun hi-gatu man-ap-apu, man mahapul ni mambalin ni heni bega-en.<sup>45</sup> Tep hi-gak e Pengulwan ni emin ni tuu ey immali-ak ni mambalin ni bega-en ni emin ni tuu, beken ni an man-ap-apu. Immali-ak ni mengikkettey ni liwat ni tuu ma-lat mahelakniban ida.”

*Ya nangkalan Jesus ni kulap nan Bartimeo  
(Matthew 20:29-34; Luke 18:35-43)*

<sup>46</sup> Entanni ey dimmateng di Jesus di Jerico. Yan daka pampeni-yanin nunman ni bebley ey dakel ida neikuyug ni hi-gada. Wada etan nekulap ni kamanyuyyuddung di gilig ni keltad e kamangkedekedew idan tuun kamelebbah di kad-an tu. Ya ngadan tu numman ni nekulap ey hi Bartimeo e u-ungngan Timeo.<sup>47</sup> Dingngel tu e kamangkelebbah hi Jesus di Nazareth ey kamantetekuk et kantuy “Apu Jesus e helag David, hemek muwak anhan!”

<sup>48</sup> Ey imbunget ida etan ni tuu e kanday “Eneeneng ka!” Nem tu anhan law kapan-eleta tekuk tu. Kantuy “Apu e helag David, hemek muwak anhan!”<sup>49</sup> Immehneng hi Jesus et kantuy “Yulli ayagi.” Et da ayagan. Kandan hi-gatuy “Amleng ka law, tep deh e daka kapan-eyyagin hi-gatu!”

<sup>50</sup> Ey inainah etan ni nekulap e inwekillih tu etan neita-kep ni balwasi tu et lumaw di kad-an Jesus.<sup>51</sup> Kan Jesus ni hi-gatuy “Hipa pinhed mun pehdng kun hi-gam?” Kantuy “Apu, pinhed kun e-kalen mu kulap ku.”

<sup>52</sup> Kan Jesus ey “Lakkay law, na-kal hu kulap mu tep ya muka pengullug ni hi-gak.” Pinhakkeyey kaum-ang-ang law hu mate tu et maikuyug nan Jesus.

## 11

*Ya linawwan Jesus di Jerusalem et daydayawen idan tutu-u  
(Matthew 21:1-11; Luke 19:28-40; John 12:12-19)*

<sup>1</sup> Neihnpup law di Jesus di Jerusalem e wadaddad appit ni Betania et yad Betpage etan di Duntug e Olibah, ey impamengulun Jesus ida etan dewwan disipol tu et kantun hi-gaday <sup>2</sup> “Pan-ipappangngulu yu la eman di bebley di Betpage et hedindettengen yu etan neiiket ni kilaw ni kebayyun eleg ni metakkayan, ey ukah yu et i-li yudya. <sup>3</sup> Hedin wada tuun penghel tuy ‘Kele yu ellan?’ Ey kanyuy ‘Mahapul ni Apu mi huuya, nem ibbangngad millin mekemkemtang.’”

<sup>4</sup> Et ipappangnguludda etan ni dewwa. Limmaw ida ey wada tu-wangu hu kebayyud gilig ni keltad ni neiiket di neihnpup di hakey ni baley. <sup>5</sup> Daka pan-ukkaha ey kan ida etan ni tuun nenang-ang ni hi-gaday “Kele yuka pan-ukkaha iket tu?”

<sup>6</sup> Nem inhumang da etan inhel Jesus ni ihhumang da et ida law kaum-eneeneng etan tuu. <sup>7</sup> Inlaw da humman ni kebayyud kad-an Jesus et idpen da balwasi dad beneg tu et mantakkay hi Jesus. \*

<sup>8</sup> Nan-ekal idan dakel ni tuu hu balwasi da et pan-iap-ap dad keltad ni dellanen Jesus. Ey ya damadda edum ey bulung ni keyew hu in-ap-ap dad dalan.

<sup>9</sup> Yadda etan tuun nemangulu, et yadda etan kameitu-tu-nud nan Jesus ey daka pan-itkuk hu daka penaydayaw ni hi-gatu. Kanday “Kamedeyyaw hi Apu Dios! Kamedeyyaw eya intu-dak tu! † <sup>10</sup> Anggegannu law hu kedettengan ni pan-ap-apan eman ni apu tayu la e hi David. Kamedeyyaw hi Apu Dios di kabunyan.”

<sup>11</sup> Dimmateng di Jesus di Jerusalem et humgep di Tempol et man-ang-ang-ang di nanlinikweh. Nem kamangkehilleng, et ikuyug tudda etan Hampulut dewwan disipol tu, et lumaw idad Betania.

*Ya etan keyew ni fig ni eleg lummeh  
(Matthew 21:18-19)*

<sup>12</sup> Yan newa-waan tuun nalpuan dad Betania, ey neupa hi Jesus. <sup>13</sup> Inang-ang tu etan bimmubbulung ni keyew ni fig, et lumaw ni an menang-ang ni lameh tu ey endi, tep beken nunman hu ahilammelammehan ni fig. <sup>14</sup> Inidutan Jesus humman ni keyew e kantuy “Hi-gam ni keyew ey eleg kalli umlamelameh ni ingganah.” Emin ida disipol tu ey dingngel da humman ni inhel tu.

*Ya linawwan Jesus di Tempol  
(Matthew 21:12-17; Luke 19:45-48; John 2:13-22)*

<sup>15</sup> Dimmateng di Jesus di Jerusalem et lumaw mewan di Tempol. Et pampa-hep tudda etan kaumgatang niyadda etan kamampanggettang di bawang. Binetu-lang tudda etan tebol ni daka pengippehullulin pihhuh niyadda etan yuddungngan idan kamanggettang ni paluma. <sup>16</sup> Impasiked tudda tuun mengihgep ni daka iggatang di bawang ni Tempol. <sup>17</sup> Kantuddan tuu ey “Neitudek di libluh hu ehel Apu Dios e kantuy ‘Ya baley ku ey keemungangan idan nambakbaklang ni tuud puyek ni mandasal ni hi-gak.’ Nem ay impambalin yun heni tallu-an idan matekew, tep hauhaul hu yuka pengellain pihhuh idan kaum-alin mandasal.”

<sup>18</sup> Dingngel idan ap-apuddan padi niyadda etan kamantuttuddun Tugun Moses humman, ey ida kaumnenemnem ni pehding dan memettey nan Jesus. Tep ida kauntakut, tep inamta da e dakel ida tuun nangngel ni intuttuddu tu ey daka pakakkulluga.

<sup>19</sup> Mahmahdem ni nunman ey hini-yan di Jesus et yadda disipol tu humman ni bebley.

*Ya etan keyew ni fig ni inidutan Jesus  
(Matthew 21:20-22)*

<sup>20</sup> Yan newa-waan tu, ey indalan dad kad-an etan ni keyew ni fig, et ang-angen da, ey nema-ganan ni emin hu bulung tu ingganah di lamut tu. <sup>21</sup> Ninemnem Peter etan inhel Jesus et kantuy “Apu, ang-ang mu kedi eman inidutan mun keyew. Nekamma-ganan law.”

<sup>22</sup> Kan Jesus ni hi-gaday “Hedin wada yuka pengullug nan Apu Dios, <sup>23</sup> ey dammutun hedinduntug ey kei-tan kad baybay, ey makulug ni mei-tan hedinduntug Apu Dios. Emin hu yuka nemnemneman meippahding ey um-amnu hedinduntug eleg kayu mandinwa e meippahding humman ni pinhed yu. <sup>24</sup> Mukun nakka e-helan hi-gayu e

\* **11:7** 11:7 Huuyan klasih ni kebayyu ey donkey. Hedin nantakkay hu patul di donkey, ey peang-ang tu e linggep hu in-ali tu. Nem hedinduntug ni kebayyu hu nantakkayan tu, man mekiggubbat. † **11:9** 11:9 Psalm 118:26

hedin mandasal kayu e wada ibbageyun Apu Dios, ey makulug ni meidwat hu hipan ibbageyu hedini kullugen yu.<sup>25</sup> Ey hedini mandasal kayu, man pesinsahi yu nambahulan idan edum yun hi-gayu ma-lat pesinsahan daman Ama tayu e hi Apu Dios hu hipan nambahulan yu.”<sup>26</sup> Nem hedini eleg yu pessinsahi nambahulan ni edum yun tuu, man eleg dama pessinsahin Apu Dios hu nambahulan yu. ‡

*Ya eleg pengebbulusiddan ap-apuddan Jews e wada lebbeng Jesus ni mantuttuddu niya mengippahding idan pehding tu*

(*Matthew 21:23-27; Luke 20:1-8*)

<sup>27</sup> Nambanggad di Jesus di Jerusalem et humgep di Tempol ey immalidda ap-apuddan padi, yadda kamantuttuddun Tugun Moses, niyadda ap-apuddan Jews, ey kandan hi-gatuy<sup>28</sup> “Hipa kelebengan mun mengippahding ida eyan muka pehpehding? Hedini wada kelebengan mu, hipa ni-ngangu nengidwat?”

<sup>29</sup> Kan Jesus ni hi-gaday “Wada ni ibbagak, et hedini hanhumang yu, ey han ku dama hinumang hu yuka pan-ibbagan hi-gak.”<sup>30</sup> Hipa nengidwat ni kelebengan John ni mambenyag, kaw hi Apu Dios winu ya tuu?”

<sup>31</sup> Humman imbagan Jesus ey ida kaman-imbaga, e kanday “Hipa penummang tayu? Tep hedini kan tayuy ‘Hi Apu Dios,’ penghel Jesus ey ‘Nem tamey eleg yu kulugen hu intuttuddun John.’”<sup>32</sup> Hedini mewani kan tayuy ‘Ya tuu,’ ey angetakkut!” Ida kaumtakut idan tutu-u tep daka kulluga e makulug ni prophet hi John.

<sup>33</sup> Et kandan Jesus ey “Tawwey, eleg mi amta.” Et kan daman Jesus ey “Hedini hanniman, eggak tep dama e-helan hi-gayu hu nengidwat ni hi-gak ni kelebengan kun kamengippenahding eyan nakka pehpehding.”

## 12

*Ya a-abbig meippanggep idan etan ni kamampatek ni netamman ni grapes*

(*Matthew 21:33-46; Luke 20:9-19*)

<sup>1</sup> Nan-a-abbig hi Jesus et kantuy “Wada etan tuun sinamman tu puyek tun grapes, et luhuden tu hu nanlinikweh. Kimmapiyan pengkepakan et ya eta-gey ni pan-eddugan et pepatek tun edum ni tuu et lumaw di edum ni bebley.

<sup>2</sup> Nemateng humman ni intanem tu, et itu-dak tu etan hakey ni bega-en tun an mengellan dewatu.”<sup>3</sup> Nem limmaw etan bega-en ey dimpap ida etan ni kamampatek ni nunman ni neitnem, et pambaigen da et han da pambanggad, e endi da indawat ni hi-gatun dewa etan ni kampuyek.”<sup>4</sup> Nenu-dak mewani etan kampuyek ni hakey ni bega-en tu, ey nampa-tu da mewani et pambaingan da.”<sup>5</sup> Nenu-dak mewani etan kampuyek ni hakey ni bega-en tu ey pintey da. Wadadda pay edum ni intu-dak tu ey pintey dadda edum niya nambaig da edum.”<sup>6</sup> Endi law edum ni itu-dak tu, et itu-dak tu etan u-ungnga tun nakappinhet tu. Tep kan etan ni kampuyek ey ‘Panggu ew et ya eya u-unggak hu itu-dak ku. Nanna-ud ni be-ingan da et lipituhen da.’

<sup>7</sup> Limmaw etan u-ungnga tu ey kan ida etan ni kamampatek ni nunman ni puyek ey ‘Iyyalli u-ungnga tun memeltan alin puyek tu. Pandada-da itu et pateyen tayu et pampuyek tayu eya puyek ni beltanen tu.’<sup>8</sup> Dimpap da tu-wangu etan u-unggan kampuyek, et pateyen da et da bekahan annel tu.”

<sup>9</sup> Kan Jesus ida etan ni tuu ey “Hipalli na-mu pehding etan ni kampuyek etan idan kamampatek ni nunman ni puyek tu? Makulug anhan et tudda pepettey etan kamampatek ni puyek tu, et pepatek tun edum ni tuu.”

<sup>10</sup> Negibbuh huyyan a-abbig tu et kantu mewani ey “Wada na-mun binidbid yu etan neitudek ni kantuy

‘Ya etan batun binelaw idan kamengapiyan baley ey humman anhan law hu impambalin Apu Dios ni kekakkayyaggudan ni meikkapyad baley.”<sup>11</sup> Humman ni impahding tu ey tayu katetbala e kayyaggud ni peteg.’”

<sup>12</sup> Ihik idan etan ni ap-apuddan Jews ni dedpapi hi Jesus, tep inamta da e hi-gada nengipadngelan tun nunman ni a-abbig, nem ida kaumtakut idan tuu et neala et hiyanen da.

*Ya pambeyadan ni buwis nan hi Cesar e ap-apud Rome*

(*Matthew 22:15-22; Luke 20:20-26*)

<sup>13</sup> Entanni, ey intu-dak dadda Pharisee et yadda etan edum ni tuun Herod ni an mematan Jesus. Limmaw ida et kandan hi-gatuy<sup>14</sup> “Apu, inamta mi e makulug emini hu muka e-hela ey muka ituttuddu makulug ni elaw Apu Dios niya eleg ka meidngelin

‡ 11:26 11:26 Huyyan verse ey eleg maitudek di edum ni version.

kae-heladdan tutu-u niya eleg mu hengnguda hu ingkatuun hipan tuu. Ehel mun hi-gami, kaw kamei-ebbulut di Tugun Moses e hi-gatsun Jews ey mambeyyad itsun Cesar e ap-apud Rome ni buwis winu eleg?"

<sup>15</sup> Nem inamtan Jesus e pinhed dan ebuh ni patnaan hedini hipa kantu. Et kantun hi-gaday "Kele yuwak kapatpatnai? I-li kayullin palatah et ang-angen ku ah." <sup>16</sup> Et idwat da ey kan Jesus ni hi-gada ey "Hipa kan-angah niya kan-ngadan eyan neimalka eyad pihuh?" Kanday "Tam hi Cesar."

<sup>17</sup> Et kan Jesus ni hi-gaday "Idwat yun Cesar hu lebbeng tun meidwat ni hi-gatu, niya idwat yun Apu Dios hu lebbeng tun meidwat ni hi-gatu." Ey natngaddan nenumang tu et hi-yanen da.

*Ya meippanggep ni ketegguan ali  
(Matthew 22:23-33; Luke 20:27-40)*

<sup>18</sup> Entanni, ey wadadda mewan immalin Sadducee di kad-an Jesus. Humman idan tuu ey kanday eleg meteggui tuun netey. <sup>19</sup> Kandan Jesus ey "Apu, intuttuddu lan Moses e hedini netey hu hakey ni laki ey endi u-ungnga tu, man mahapul ni ahwaen ni agi tun laki etan biin nebalu ma-lat hedini man-ungngadda, man meibbillang ni u-ungnga da etan ni netey. <sup>20</sup> Inna-nu tep hedini heninnuy neipahding: Wadadda pitun lalakkin han-aaggi. Nelahin etan pengulwan da, nem endi u-ungnga da ey netey. <sup>21</sup> Bineltan ni neihned humman ni bii ey netey dama ey endi u-ungnga da. <sup>22</sup> Nambelbantan da ey netey idan emin ey endi u-ungnga da. Entanni, ey netey dama law etan bii. <sup>23</sup> Hedini makulug ni metegguan idallin emin hu nangketey, hipalli tep law kan-ahwan nunman ni bii, tep aye nambelbantan idan pitun han-aaggi?"

<sup>24</sup> Hinumang Jesus et kantuy "Neihla kayu. Huttan keamtaan tu e eleg yu han-awat hu impatudek Apu Dios ni ehel tu niya kabaelan tu. <sup>25</sup> Yallin ketegguan idan nangketey ey heniddalli anghel di kabunyan e eleg idalli law man-aahwa. <sup>26</sup> Hedini ya meippanggep ni ketegguan idan nangketey, kaw eleg yu awatan hu intudek Moses ni inhel Apu Dios ni nekiummanganan tun hi-gatu etan di kamantettebbel ni kekkeyyew? Kantuy 'Hi-gak hu Dios nan Abraham, hi Isaac ni hi Jacob.' <sup>27</sup> Et huyya pengamtaan yu e humman idan aammed tayu ey netey ida, nem eleg ibbilang Apu Dios idan netey, tep tegguen tuddalli emin tuu tu. Hi-gatu ey Dios idan mategu, beken ni yadda netey. Huttan kangkun neihla kayun peteg."

*Ya keim-importantehan ni tugun Apu Dios  
(Matthew 22:34-40; Luke 10:25-28)*

<sup>28</sup> Wada etan hakey ni kamantuttuddun Tugun Moses ni nangngel ni nunman ni inhel Jesus, et inamta tu e kayyagud humman ni inhumang tuddan Sadducee, et lumaw di kad-an Jesus et kantuy "Hipa keim-importantehan di emin ni tugun?" <sup>29</sup> Hinumang Jesus et kantuy "Na-hel hu keim-importantehan ni tugun Apu Dios eman ni nanghelan tun kantuy 'Dengel yun tutu-ud Israel huyya: Hi Apu Dios ey hakey ni ebuh et endi edum ni Apu tayu. <sup>30</sup> Hi-gatun ebuh hu pinheden yud puhu yu, yad emin di yuka nemnemnema, niyad emin di yuka pehding. <sup>31</sup> Ya meikkadwa: Mahapul ni pinheden yu edum yun tuu, henin impeminhed yun annel yu.' Huyyan dewwan tugun hu keim-importantehan di emin ni tugun tu."

<sup>32</sup> Kan etan ni kamantuttuddun Tugun Moses ey "Makulug huttan ni inhel mu e Apu. Makulug ni endi edum ni Apu tayu nem ebuh hi Apu Dios, niya endi edum ni Dios, nem hi-gatun ebuh. <sup>33</sup> Mahapul ni hi-gatu pakappinheden tayu niya pinheden tayu dama edum tayun tuu henin impeminhed tayun annel tayu. Huyyadda keimimportantehan ni tugun ni meunnud nem yadda etan kamei-appit ni kagihheba niya hipaddan edum ni kamei-appit nan Apu Dios." <sup>34</sup> Inamtan Jesus e neiptek humman ni inhel tu et kantuy "Ngannganih ni meilla-kam kad nan-ap-apan Apu Dios." Negibbuh humman ey ida law kaumbaing ni memabbagan Jesus.

*Hi Christo ey beken ni helag David ni ebuh, tep hi-gatu ey Ap-apun David metlaing  
(Matthew 22:41-46; Luke 20:41-44)*

<sup>35</sup> Yan eman ni kapantuttudduin Jesus di Tempol, ey kantuddan tuu ey "Kele kan idan kamantuttuddun Tugun Moses ey hi David ali kehlagan nan Christo? <sup>36</sup> Tam impa-hel ni Ispirituh Apu Dios nunman hi David et kantuy:

Kan Apu Dios etan ni Ap-apu tayu e hi Christo ey 'Yudung kad winannan ku ingganah apputen kuddan emin hu buhul mu.' \*

<sup>37</sup> Huyya keang-angan tu e anin ni hi David et tuka ingngadni hi Christo ni Ap-apu tu. Et hedini hanniman, kele inna-nu et hi Christo ey helag David?"

\* 12:36 12:36 Psalm 110:1

Emin ida etan tuun neamung ey pinpinhed dan deddengngelen humman ni kapan-e-helan Jesus.

*Ya lawah ni elaw idan kamantuttuddun Tugun Moses  
(Matthew 23:1-36; Luke 20:45-47)*

<sup>38</sup> Kan mewan Jesus ni hi-gaday "Helipat-i yu et eleg yu u-unnudun hu elaw idan kamantuttuddun Tugun Moses, tep pinhed dan emin hu tuu ey immatunan dadda e mittuduh ida, tep ida kamambabalwasin andukkey niya pinhed dan tettebalen emin ni tuu ida, nema-ma hedin wadaddad mulkaduh. <sup>39</sup> Pinhed da pay ni hi-gada umyudung di kayuddungin kametbal ni tuud simbaan niya pinhed dan yad kayuddungiddan kametbal ni tuu hu yuddunggan da hedin wada hamul. <sup>40</sup> Dadda kaa-amiha hu nangkebalun bii et daka pan-ala hu limmu da, nem hedin ida kamandasal, man anakkayang numan e daka dukkedukkeya dasal da e heni etan ni beken ni lawah hu daka pehphehding. Et humman hu, nemahhig ali pengastigun Apu Dios ni hi-gada tep yadda humman ni lawah ni daka pehphehding."

*Ya indawat etan ni nebalun biid Tempol  
(Luke 21:1-4)*

<sup>41</sup> Yimmudung hi Jesus di Tempol di demang etan ni kapengi-emmungin pihhuh ni kaiddawat idan tutu-u et tuka ang-ang-angadda katutuun kamampengihha-ad ni pihhuh da. Dakel ida kekeddangyang ni nampengiha-ad ni dakel ni pihhuh da. <sup>42</sup> Entanni ey immali hu newetwet ni nebalun bii ey deddewwan hepeng ni ebuh hu inha-ad tu. <sup>43</sup> Inaygan Jesus ida etan disipol tu et kantun hi-gaday "E-helen kun hi-gayu e ya etan deddewwan hepeng ni inha-ad ni nebalun bii hu e-etteng balol tu nem ya indawat idan etan ni edum. <sup>44</sup> Tep yadda inha-ad etan idan kedangyan ey humman nehawal ni kinedangyan da. Nem ya etan newetwet ni nebalun bii ey ebuh humman ni pihhuh tu, nem inhanekul tun indawat ni emin."

## 13

*Ya nanghelan Jesus ni kebabahan etan ni Tempol et ya panlelehhanaan niya panligligatan tulli*

*(Matthew 24:1-2; Luke 21:5-6)*

<sup>1</sup> Yan kapampeni-yanid Jesus etan ni Tempol, ey kan etan ni hakey ni disipol tuy "Apu, ang-ang mu kedi, kakkayyaggud eya Tempol! Ey etta-teng ni peteg hu batun nangeikakapya!"

<sup>2</sup> Kan Jesus ey "Em, kayyaggud eya yuka ang-ang-angan nunya, nem edum alin aggew et mangkebabah idan emin huuya. Endiddallin eyan batu hu mannenneng di neikapyaan tu, anin hakey."

<sup>3</sup> Yan eman ni linawwan di Jesus di Duntug e Olibah, ey limmaw di demang ni Temple et an yumudung diman. Entanni ey limmaw hi Peter, hi James, hi John, ni hi Andrew di kad-an tu et e-ebbuh idadman ey kandan hi-gatuy <sup>4</sup> "Pigan tulli amnuan nunyan inhel mu niya hipalli pengi-immatunan hedin kamangkedettengi amnuan tu?"

<sup>5</sup> Kan Jesus ey "Helipat-i yu ma-lat endi an mehe-ul ni hi-gayu, <sup>6</sup> tep dakel idalli um-alin kanday hi-gada hi Christo et dakel ali tuun mehe-ul. <sup>7</sup> Ey dedngelen yulli e ida kamanggugubat hu tutu-ud neihnup niyad neidawwi, nem entan ali takut yu. Huyyaddalli mekapkapy, nem beken alin nunman ni kepapegan ni puyek. <sup>8</sup> Em, manggugubat idalli kebebbebley, tep wada hakkey ni ap-apu ey gubbaten tu hu edum tun ap-apud edum ni bebley. Ey meweddalli bisil niya yegyeg. Huyyaddalli hu keilleppuan ni ligat.

<sup>9</sup> Helipat-i yu, tep dedpape dakeyulli et illaw dakeyud hinanggaddan huwet. Pambeigen dakeyud kesimsimbaan niya peehneng dakeyud hinanggaddan ap-apu tep ya yuka pengullug ni hi-gak. Et yan nunman hu pengippeamtaan yun hi-gadan meippanggep ni hi-gak. <sup>10</sup> Tep mahapul ni meippeamtad kebebbebley hu meippanggep ni impahding kun panyaggudan ni tuu et han medatngi hu kepapegan ni puyek.

<sup>11</sup> Hedin dedpape dakeyulli et illaw dakeyud hinanggaddan huwet, entan kadenagi yun e-helen yu. Ehel yu hu hipan wadad nemnem yu, tep emin ali etan e-helen yu ey melpu etan ni Ispirituh Apu Dios, beken kayun kan nemnem. <sup>12</sup> Yalli agi ey hi-gatu mengippepettey ni agi tu, ya a-ammed ey hi-gatu mengippepettey ni u-ungnga tu. Et yadda u-ungnga ey pepettey da a-ammed da. <sup>13</sup> Emin idalli tuu ey anggebe-hel dakey tep ya yuka pengullugin hi-gak. Nem yaddalli etan mengissippel ni ligat da niya mengippenenneng ni daka pengullug ni hi-gak ingganah ni megibbuh emin ida huuya, ey meihwang ida.

*Ya meippanggep ali etan ni angetakkut  
(Matthew 24:15-28; Luke 21:20-24)*

<sup>14</sup> Wadalli etan lawah ni peteg ni ang-angen yun kapekabbellawan Apu Dios ni meihha-ad etan di beken ni lebbeng ni keihha-adan tu. (Hi-gayun memidbid ni nunya ey mahapul ni ewwatan yu huyya.) Emin idalli tuud Judea ey mahapul ni umbesik idad duntug. <sup>15</sup> Ya etan tuun wadad dallin ni baley tu ey mahapul ni eleg mantaktaktak ni umhegep di bawang ni an mengellan hipan mahapul tu, nem nealay bimmesik ma-lat eleg ha-kupan ni buhul tu. <sup>16</sup> Yadda etan tuun wadad payew ey mahapul ni eleg ida mantaktaktak ni umlaw di baballey dan an mengellan balwasi da, nem nealay bimmesik ida ma-lat eleg ida meha-kupan. <sup>17</sup> Anggehemmek idalli bibi-in nampambutsug et yaddalli etan wada gelang dan kaman-innum hedin medettengan idalli humman ni aggew. <sup>18</sup> Pandasal kayun Apu Dios ma-lat eleg ali maipaddih ni keteketel, <sup>19</sup> tep humman ni ligat ey nehalmu ni peteg nem yadda la emin ni ligat, neipalpu eman ni naltuan ni puyek ingganah nunya. Ey endilli law hu henin nunman ni ligat hedin megibbuh. <sup>20</sup> Nem ay kayyaggud et ingkalan Apu tayu hu bilang ni aggew ni panliggatan alin tuu gapuh idan etan ni tuu tun pinili tu, tep gullat ni eleg tu ekanan, et mettey emin hu tuu.

<sup>21</sup> Ey hedin wadaddalli etan menghel ni kanday wadad dimmun winu wadadya hi Christo, ey entan kaya kulug tu. <sup>22</sup> Tep dakel ali hu menghel e kanday hi-gada hi Christo ey yaddalli edum ey kanday prophets ida. Ipahding dalli kaketngain tuu niya peang-ang dalli hu et-eteng ni kabaelan da, et humman hu, gullat ni mabalin et, anin idallin tuun Apu Dios et mehe-ul ida. <sup>23</sup> Et humman hu, helipati-yu, yaggud impamenguluk ni inhel ni hi-gayu.

*Ya ellian ali mewan Jesus  
(Matthew 24:29-31; Luke 21:25-28)*

<sup>24</sup> Hedin megibbuh idalli huyyan ligat, man me-dep ali law hu aggew niya eleg ali dama law umbenang hu bulan. <sup>25</sup> Ey mangke-gah idalli bittuwwen di kabunyan. Yan nunman ali ey endi petekkan tuddan wadad kabunyan, tep meendilli kabaelan da. \* <sup>26</sup> Hedin negibbuh ni neipahding ida huyya, ey ang-angen da-ak ali e Pengulwan ni emin ni tuu etan di kulput e meang-ang ali et-eteng ni kabaelan ku niya dayaw ku. <sup>27</sup> Ittu-dak kuddalli anghel ku et dadda emmungen ali emin hu pinilin Apu Dios ni tuu tud kebebbbley di puyek.

*Ya etan keyyew ni fig  
(Matthew 24:32-35; Luke 21:29-33)*

<sup>28</sup> Nemnem yu e hedin kamemullung hu keyew e fig, ey amta yu e kamangkedettengi hu siyaggew. <sup>29</sup> Heni daman ellian kulli e hedin neipahding idalli huyyan inhel ku, inamta yu e kamangkedettengi law hu pambangngadan ku. <sup>30</sup> E-helen kun hi-gayu e makulug ni yadda edum ni hi-gayun tuun nunya ey eleg ida ni mettey ey um-amnulli emin eya inhel ku. <sup>31</sup> Meendilli kabunyan et ya puyek, nem mannenneng alin ingganah hu ehel ku.

*Endin nengamtan ellian ali Jesus mewan di puyek  
(Matthew 24:36-44)*

<sup>32</sup> Nem endi hakey ni nengamtan aggew winu tsimpuh ni ellian ku. Anin idan anghel et hi-gak e U-ungngan Apu Dios et eleg mi amta. Ebuh hi Ama e hi Apu Dios ni nengamta. <sup>33</sup> Et humman hu, helipati-yu, et mandaddan kayu, tep eleg meamta hu aggew ni nagtud ni ellian ku. <sup>34</sup> Heni etan ni tuun indinel tuddan bega-en tu hu baley tu. Wada hakkeyey, intudu tun ngunnuen tu. Et tugunen tu etan hakey ni bega-en e peka-eddugan tu habyen. Et lumaw di edum ni bebley ey endi maptek ni pambangngadan tu."

<sup>35</sup> Kan mewan Jesus ey "Helipati-yu, tep endi maptek ni pambangngadan ku, heni etan ni tuun limmaw di edum ni bebley e eleg meamta hedin yan mahmahdem, yan gawan hileng, yan tekuk ni manuk, winu yan kakkabbuhhan hu keibbangngadan tu. <sup>36</sup> Heni daman hi-gak e endi maptek ni keibbangngadan ku et inna-nu hedin ha-kupan dakeyun eleg mandaddan. <sup>37</sup> Huyyan nakka pan-e-hela ey beken ni hi-gayun ebuh hu nakka pampengheli, nem emin hu tuu. Et humman hu, helipati-yu emin ni tuu."

## 14

*Ya nan-ungbalan idan buhul Jesus ni pemetteyan dan hi-gatu  
(Matthew 26:1-5; Luke 22:1-2; John 11:45-53)*

\* 13:25 13:25 [24-25] Ang-ang yu Isaiaah 13:10, ya 34:4, niya Joel 2:10.

<sup>1</sup> Dewwan aggew law ey medettengan hu Piyestah ni Passover niya Piyestah ni Sinapay ni eleg ma-duman ni yeast. Ey yadda etan ap-apuddan padi niyadda kamantuttuddun Tugun Moses ey ida kaumhamahamak ni pehding dan mengilligud ni mempap nan Jesus et pateyen da. <sup>2</sup> Nem kanday “Eleg tayu ippaddih ni piyestah hu pempapan tayun hi-gatu, tep daket ida tuu et entanni ey umguluh ida.”

*Ya nengiduyagan etan ni biin nenginan lana nan Jesus*

*(Matthew 26:6-13; John 12:1-8)*

<sup>3</sup> Kamengngan di Jesus di Betania di baley Simon e hi-gatu etan wada la leprosih tu, \* ey immali etan hakey ni biin wada hambusih ni nenginan lanetu et iduyag tud ulun Jesus. <sup>4</sup> Yadda etan edum ni tuun wadadman ey peteg bunget da etan ni bii. Kanday “A-ayyulah humman ni lana, tam impakewah tu. <sup>5</sup> Tam gullat ni iggatang humman et daket ni pihuh ni meidwat et idan nangketwet.” Et iheng-ak da etan bii.

<sup>6</sup> Nem kan Jesus ni hi-gaday “Kenamung tu ngu. Kele yu ihheng-ak ey kayyagud ni peteg humman ni tu impahding ni hi-gak? <sup>7</sup> Gaway ida newetwet tep wadaddangu dedan ni ingganah di kad-an yu, et linggeman ni tsimpuh ni pinhed yun pemaddangan ni hi-gada et dammutu, nem hedih hi-gak, man eleggak mena-yun ni mekihahha-ad ni hi-gayu. <sup>8</sup> Impahding eyan bii hu mabalin ni pehding tun hi-gak. Dinuygan tu annel kun lana ma-lat maidaddan, tep ay ngannganih keikkullungan ku. <sup>9</sup> Nemnemnem yulli huyyan impahding tu, tep emin alid kebbebley di keippeamtaan ni ehel Apu Dios ey meippeamta dama huyyan impahding tun penginnemnemman alin hi-gatu.”

*Ya nengabulutan Judas ni mengihdul nan Jesus*

*(Matthew 26:14-16; Luke 22:3-6)*

<sup>10</sup> Entanni ey limmaw hi Judas Iskariot e hakey ni disipol Jesus di kad-an idan ap-apuddan padi et makihummangan meippanggep ni pengippedpapan dan Jesus. <sup>11</sup> Ida kamanggayaya et ehlen dan Judas e beyyadan dan pihuh hi-gatu. Neilepun nunman ey kahellipat-in Judas hu pehding tun mengihdul nan Jesus.

*Ya nengannan di Jesus et yadda etan disipol tun Piyestah ni Passover*

*(Matthew 26:17-25; Luke 22:7-14, 21-23; John 13:21-30)*

<sup>12</sup> Yan lapun aggew ni Piyestah ni Sinapay ni eleg mekamdugan ni yeast e yan nunman hu daka pampalsiin impah ni kalneroh ni daka kennan Piyestah ni Passover, ey kan idan disipol Jesus ni hi-gatuy “Attu pinhed mun mi pengiddaddanan ni pengngannan tayun Piyestah?”

<sup>13</sup> Ey kan Jesus etan ni dewwan disipol tuy “Lakkayuy eman di bebley et hedih wada ang-angen yu etan ni nan-agtun bewed, man unud yu ingganah etan di baley ni pengihgepan tu. <sup>14</sup> Kan yu etan ni kambaley ey ‘Kan Apu tayuy attu pengngannan midan disipol kullin tsimpuh ni Piyestah ey?’ <sup>15</sup> Et ittudu tun hi-gayu etan et-eteng ni kuwaltuh di meikadwan glaruh e wadan emin hu mahapul tayu. Yadman hu pengiddaddanan yun pengngannan tayulli.”

<sup>16</sup> Et lumaw ida etan dewwad bebley ey makulug numan hu inhel Jesus et da idaddan diman emin hu pengngannan dan Piyestah ni Passover.

<sup>17</sup> Mahmahdem nunman ey dimmateng di Jesus et yadda etan Hampulut dewwan disipol tu. <sup>18</sup> Nangginawwa da ekan ey immehel hi Jesus e kantuy “E-helen kun hi-gayu e makulug ni wada hakey ni hi-gayun mengihdul ni hi-gak. Iyyadyan nunya e kamekikkan ni hi-gatsu.”

<sup>19</sup> Dingngel da humman ey maggeh nemnem da et wada hakkeyey kantuy “Kaw hi-gak?” <sup>20</sup> Kan Jesus ey “Ya hakey ni hi-gayun tuka pekihhiwhiw hu sinapay tud nakka pengihhiwhiwi hu mengihdul ni hi-gak. <sup>21</sup> Ma-nu tep makulug ni kan ni neitudek ni ehel Apu Dios ey metteyyak e Pengulwan ni emin ni tuu, nem angehemmek alin peteg etan mengihdul ni hi-gak. Heballi ew nem eleg maiungnga humman ni tuu.”

*Ya pengngannan etan ni sinapay niya penginnuman etan ni meinnum ni penginnem-neman ni neteyyan Jesus*

*(Matthew 26:26-30; Luke 22:15-20; 1 Corinthians 11:23-25)*

<sup>22</sup> Ida kamengngan ey illan Jesus etan sinapay et mansalamat nan Apu Dios et peni-angen tu et ika-peng tun hi-gada. Kantuy “Ekan yu tep huyya annel ku.” <sup>23-24</sup> Negibbuh ey illa tu mewan etan basuh et mansalamat nan Apu Dios. Indawat tun hi-gada et kantuy “Inum kayun emin eyad basuh tep huyya kuheyaw kun um-ayuh ni amnuan etan ni nekitbalan Apu Dios ni panyaggudan ni daket ni tuu.” Et uminum idan emin. <sup>25</sup> Kan Jesus mewan ey “E-helen kun hi-gayu makulug e eggak ali law um-inum mewan

\* 14:3 14:3 Ya degeh ni leprosy ey kamengnganpuh hu annel.



ni henin nunyan meinnum ingganah alin innuman ku ni baluh ni meinnum di nan-apuan Apu Dios.”

<sup>26</sup> Negibbuh humman et man-a-appéh idan penaydayaw dan Apu Dios et han ida lumaw di Duntug e Olibah.

*Ya nanghelan Jesus ni pengihhe-utan alin Peter e hi-gatu hakey ni disipol tu*  
(Matthew 26:31-35; Luke 22:31-34; John 13:36-38)

<sup>27</sup> Entanni ey kan Jesus ni hi-gaday “Emin kayulli ey pan-inhihi-yanan yuwak, tep humman amnuan etan ni impatudek Apu Dios ni meippahding ni hi-gak e kantuy ‘Pepettey kulli etan kamampaptek idan kalneroh et mawehit ida kalneroh tu.’ <sup>28</sup> Nem yallin ketegguan ku ey memengngulu-ak ni umlaw di Galilee.”

<sup>29</sup> Nem kan Peter ey “Anin na-mun hi-yanen dakaddan edum et eleg mabalin ni daka hi-yanen ni hi-gak.”

<sup>30</sup> Nem kan Jesus ni hi-gatuy “Nemnemnem mu eya e-helen kun hi-gam, yan nunyan hileng ey mampitlun ihhaut mu e kammuy eleg muwak amta et han tumkuk hu manuk ni pidwatu.”

<sup>31</sup> Nem kan Peter anhallaw ey “Anin na-mun mekitteyyak ni hi-gam et eleg mabalin ni nak e-helen e kankuy eleg daka amta.” Ey anin damaddan edum tun disipol ey humman inhel da.

*Ya an nandasalan Jesus di Gethsemani*  
(Matthew 26:36-46; Luke 22:39-46)

<sup>32</sup> Limmaw idad Gethsemani et kan Jesus ni hi-gaday “Panyuyuyuddung kayullidya et nak mandasal di dimmun.” <sup>33</sup> Ebu di Peter, hi James, et hi John ni ingkuyug tu. Maggeh ni peteg nemnem Jesus niya nemahhig lemyung tu. <sup>34</sup> Kantun hi-gaday “Maggeh ni peteg hu nemnem ku et iyyadyan heni ipatey ku. Dideya kayu ey entan kaugip et wada pan-eddum ku.”

<sup>35</sup> Imme-eddawin ekket et manlukbub et mandasal nan Apu Dios ma-lat eleg et anhan an manhelheltap. <sup>36</sup> Kantun Apu Dios ey “Ama, hi-gam ey kabaelan mun mengippahding ni emin. Attu anhan et ekalen mu huyyan nak panhelheltapan ey? Nem ngenamung ka, ya pinhed mu hu meu-unnud, beken ni ya pinhed ku.”

<sup>37</sup> Nambangngad hi Jesus di kad-an idan disipol tu ey neugip ida. Kantun Simon Peter ey “Kaw neugip kayu? Kele eleg yu pakeisipel ugip yu, anin han-olas ni ebuh?” <sup>38</sup> Kantu pay ni hi-gaday “Ebu kaugip yu, nem pandasal kayu ma-lat eleg kayulli maheul ni manliwwat. Inamtak e pinhed yun mengu-unnud, nem kulang hu kabaelan yu.”

<sup>39</sup> Limmaw mewan et an mandasal nan Apu Dios ey humman mewan hu indasal tu. <sup>40</sup> Et mambangngad ey neugip ida mewan etan disipol tu, tep eleg dan hekey han-isipel ugip da. Bimmangun ida ey eleg da amta e-helen dan hi-gatu.

<sup>41</sup> Yan pitlu tun pambangngadan tu, ey kantun hi-gaday “Kaw tagan yu ugip niya kaw man-i-yyatu kayu? Hiyya law, bangun kayu tep nedatngan hu pemetteyan idan nangkeliwtan ni tuun hi-gak e Pengulwan ni emin ni tuu. <sup>42</sup> Inah kayu et lumaw itsud kad-an da. Ammundehe etan tuun nengihdul ni hi-gak.”

*Ya nampapan dan Jesus*  
(Matthew 26:47-56; Luke 22:47-53; John 18:3-12)

<sup>43</sup> Nanengtun kaman-e-ehhel hi Jesus ey immali hi Judas e hakey idan etan ni Hampulut dewwan disipol Jesus. Ingkuyug tudda dakel ni tuun nampapan-ispadah niya nampantenged ni bakdung, e humman ida intu-dak idan etan ni aap-apuddan padi niyadda etan kamantuttuddun Tugun Moses, niyadda kamengipappangngulun Jews.

<sup>44</sup> Sinugun idan Judas e kantun hi-gaday “Ka-immatun la etan tayu dedpapen, tep humman etan akwal ku. Hedin inakwal ku, immali kayu et pedenen yu niya pekagguwwalyai yun pengillawwan yu.”

<sup>45</sup> Limmaw hi Judas di kad-an Jesus et kantuy “Immali kami, Apu” ey in-akwal tu. <sup>46</sup> Et umlidida etan tuu et pedenen da hi Jesus. <sup>47</sup> Nem inuknut etan ni hakey ni disipol Jesus hu ispadah tu et palngen tu etan bega-en ni Eta-gey ni Padi ey neiptek di tangile tu.

<sup>48</sup> Immehel hi Jesus et kantun hi-gaday “Kaw matekewwak et pakkadek ni kayu man-ispadah niya kayu mampantetnged ni bakdung ni um-alin mappap ni hi-gak? <sup>49</sup> Tam kewa-wa-wa ey wada-ak di Tempol ni kamantuttuddu, kele eleg yuwak depapen diman? Nem anin tep huyya amnuan etan ni neitudek ni inhel Apu Dios.” <sup>50</sup> Emin ida etan disipol Jesus ey bimmesik ida.

<sup>51-52</sup> Wada etan hakey ni kamengullug nan Jesus ni nanwawwangngal e kameitu-tun nud ni hi-gatu. Pinden da e dedpapen da et, nem bimmesik e nammu-lih tep neya-nit hu wangal tu.

*Ya nengimbistigalan dan Jesus di hinanggaddan ap-apuddan Jews*  
(Matthew 26:57-68; Luke 22:54-55, 63-71; John 18:13-14, 19-24)

<sup>53</sup> Et ilaw da hi Jesus di baley etan ni Eta-gey ni Padi. Ey neamung idan emin diman etan aap-apuddan padi, yadda ap-apuddan Jews, niyadda kamantuttuddun Tugun Moses. <sup>54</sup> Neiunnuunnud hi Peter ni hi-gada, nem eleg meihnp. Nanha-ad di dallin et mei-dum idan guwalyan nandangdang di apuy.

<sup>55</sup> Sinaggan idan aap-apuddan padi et yadda ap-apuddan Jews hu mahmamahmah idan tuun pebehul dan Jesus, ma-lat humman umgapuh ni pengipepetteyan dan hi-gatu, nem endi himmak dan bahul tu. <sup>56</sup> Dakel ida etan nan-itek ni nantistigun kanday nambahul hi Jesus, nem eleg man-uunnud hu inhel da.

<sup>57-58</sup> Entanni ey wadadda etan nan-itek e kanday "Dingngel mi la inhel tu e kantuy bahbahen tu kunu etan Tempol, nem melebbah kunu tellun aggew ey behwatan tu hakey mewan ni Tempol ni beken ni kinapyan tuu." <sup>59</sup> Nem anin hi-gada et eleg man-uunnud hu inhel da.

<sup>60</sup> Immehng etan Eta-gey ni Padi et kantun Jesus ey "Kele eleg ka umhapit? Kaw makulug numan ni inhel mu humman?" <sup>61</sup> Nem kaum-eneeneng hi Jesus e eleg ni hekey man-e-ehhel. Immehel mewan etan Eta-gey ni Padi e kantuy "Kaw hi-gam hi Christo e U-unggan Apu Dios ni mengippaptek ni emin ni tuu?" <sup>62</sup> Kan Jesus ey "Em. Ang-angen yuwak ali e Penguluwan emin ni tuun umyudung di winannan Apu Dios e Keta-ta-geyyan. Ang-angen yuwak ali mewan di kulput ni pambangngadan kud puyek."

<sup>63</sup> Inhel Jesus huyya ey bini-ki etan ni Eta-gey ni Padi hu balwasi tun bunget tu. Et kantuy "Hiyya! Negibbuh huyyan diklamuh. Eleg mahapul ni wada edum ni tistigu, tep dingngel tayu inhel tu. <sup>64</sup> Dingngel tayu hu tuka panla-pahin Apu Dios. Ey hipa yuka pannemnem?" Kan idan emin ni tuu ey "Mahapul ni mettey." <sup>65</sup> Yadda edum ey linupdaan da hi Jesus. Ey hedin hinephepan da matetu, dinuntuk da ni kanday "Ehel mu dan hu nenuntuk ni hi-gamah?" Nan-amping ida dama etan ni guwalya.

*Ya nengiheutan Peter e edum tu hi Jesus*

(Matthew 26:69-75; Luke 22:56-62; John 18:15-18, 25-27)

<sup>66</sup> Hedin hi Peter, nanengtun wadad dallin e kamekiddangdangdang idan guwalya. Immali etan hakey ni biin bega-en etan ni Eta-gay ni Padi ey <sup>67</sup> inimmatunan tu hi Peter et kantuy "Tam hi-gam la etan hakey ni kadwan Jesus e iNazareth."

<sup>68</sup> Nem inhalt Peter e kantuy "Tawwey ngu, enggak ngu amta huttan ni muka pan-e-hela." Neba-hil hi Peter etan di luhud ey simmekuk hu manuk.

<sup>69</sup> Inang-ang mewan etan ni biin bega-en et kantudda etan ni tutu-u ey "Hi-gatu kaya hakey ni edum nan Jesus." <sup>70</sup> Nem inhalt mewan Peter e kantuy beken tu.

En-entanni ey kan mewan idan tuun nan hi Peter ey "Eleg mabaln ni mu ihhaut, tep anin ni hi-gam et nalpu kad Galilee."

<sup>71</sup> Nem insapatah Peter e kantuy "Anin na-mun petteyan tuwak Apu Dios et makulug ni enggak amta etan tuun yuka e-e-hela."

<sup>72</sup> Tuka pan-e-hela humman ey simmekuk hu manuk e humman pidwatu ey ninem-nem Peter etan la inhel Jesus ni hi-gatun kantuy "Mampitulli penghelam e kammuy eleg muwak amta et han tumkuk hu manuk ni pidwatu." Et ebuhe mannannangngih.

## 15

*Ya nemistigalan Pilate nan Jesus*

(Matthew 27:1-2, 11-14; Luke 23:1-5; John 18:28-38)

<sup>1</sup> Kakkabbuhhan ni nunman ey neamung ida mewan etan ap-apuddan padi, yadda etan ap-apuddan Jews, yadda kamantuttuddun Tugun Moses, niyadda konsihal et panhuhumanganan da hedin hipa pehding dan Jesus. Binangkilingan da hi Jesus et ilaw dad kad-an Pilate, tep hi-gatu governor ni nunman.

<sup>2</sup> Binistigal Pilate e kantuy "Kaw hi-gam hu Patul idan Jews?" Kan Jesus ey "Tam deh e inhel mu."

<sup>3</sup> Ey dakel kapebehul idan aap-apuddan padin hi-gatu. <sup>4</sup> Et kan Pilateh ni hi-gatuy "Hipa penummang mu eyan daka pebehul idan hi-gam?"

<sup>5</sup> Nem kapemeggan Jesus hu i-inneng ey natnga hi Pilate.

*Ya meippanggep ni pengippepetteyan dan Jesus*

(Matthew 27:15-26; Luke 23:13-25; John 18:39-19:16)

<sup>6</sup> Hedin Piyestah ni Passover ey wada keibbukyat ni governor ni hakey ni neikelabut ni pinhed idan tuun meibbukyat. <sup>7</sup> Wadaddan nunman hu neikelabut ni pimmatey eman

ni nekigubatan dad Rome e hi Barrabas hu hakey. <sup>8</sup> Ida kamangkeemmung hu tutu-ud kad-an Pilate ma-lat ibega dan hi-gatu hu pinhed dan meibbukyat ni neikelabut. \*

<sup>9</sup> Et kan tun hi-gaday "Kaw pinhed yun yan eya Patul idan Jews hu ibbukyat ku?"  
<sup>10</sup> Huyya inhel Pilate tep inamta tu e yadda aap-apuddan padi ey daka keemmehin peteg hi Jesus, et humman himmulun ni da nengilawwan ni hi-gatud kad-an tu. <sup>11</sup> Nem sinuttullun idan aap-apuddan padi hu tutu-u et kanday hi Barrabas hu pebukyat nan Pilate e beken hi Jesus. <sup>12</sup> Et ibega mewan Pilate hu pehding tun Jesus, e kantun hi-gaday "Hipa tep pehding ku eyan Patul idan Jews?" <sup>13</sup> Simmekuk idan emin ey kanday "Ipetak yud krus!"

<sup>14</sup> Nem kan Pilate ey "Nem kaw hipa bahul tu?" Nem da anhan law kapan-eleta tekuk da e kanday "Ipetak yu kumad krus!"

<sup>15</sup> Inu-unnud tu pinhed idan tutu-u et ibukyat tu hi Barrabas. Hedin hi Jesus ey impabeig tu et han tu pebeltan idan sindalun Rome ma-lat da ipetak di krus.

*Ya neneghegnudan idan sindalu nan hi Jesus*

*(Matthew 27:26-31; John 19:2-3)*

<sup>16</sup> Illaddan sindalu hi Jesus et ilaw dad baley ni governor et aygan daddan emin hu edum dan sindalu. <sup>17</sup> Immaladdan madlang ni balwasi et pebalwasi dan Jesus, tep humman kaibbalwasin patul et kumapyaddan hebit et palikuhen da et papnget dan hi-gatu. <sup>18</sup> Daka heghegnuda e kanday "Anakkayang numan eya Patul idan Jews!"  
<sup>19</sup> Nanheplat da ulu tu niya nanlupdaan da, ni nandukkun idad hinangga tu, ni linanglangkakan dan menaydayaw ni hi-gatu. <sup>20</sup> Negibbuh ni hineghegnud da et ekalen da etan impebalwasi da et pebanggad da etan imbalwasi tu et ilaw dan da ippatak di krus.

*Ya neipetakan Jesus di krus*

*(Matthew 27:32-44; Luke 23:26-43; John 19:17-27)*

<sup>21</sup> Wadaddad dalan ey dinammu da hi Simon e iCyrene e amad Alexander nan Rufus et papilit idan sindalun pehhanen tu hu krus Jesus. <sup>22</sup> Inlaw da hi Jesus di duntug e Golgotha e ya keibbellinan tu ey heni genit ni ulu ang-ang tu. <sup>23</sup> Yan dintengan da ey peinumman et idan sindalun meinum ni na-duman ni mira e agah, nem eleg tu pinhed. <sup>24</sup> Et ipetak idan sindalud krus. Inla da balwasi tu et ibubunus da hedin hipan balwasi tu hu ellan ni hanhakkey ni hi-gada.

<sup>25</sup> Neta-nang hu aggew ni nunman ni nengipetakan dan Jesus. <sup>26</sup> Intudek dad ta-pew ni ulu tu etan impabehul dan hi-gatu. Ya neitudek ey: "Huyya Patul idan Jews."

<sup>27</sup> Wadadda dewwan matekew ni impatak da damad krus e hakey di winilli tu et ya hakey di winannan tu. <sup>28</sup> Huyya inamnuan eman ni ehel Apu Dios ni neitudek ni kantuy "Imbilang dan nambahul."

<sup>29</sup> Emin ida kamelebbah ey ida kamanwigiwigiwi niya daka pan-impipihuli hi Jesus. Kanday "Attu mewan etan kammuy bahbahren mu etan Tempol et behwatan mun meikatlun aggew ey? <sup>30</sup> Tamey eleg mu kabaelan ni baddangan annel mu et ma-kal ka eyad neipetakan mu?"

<sup>31</sup> Anin idan aap-apuddan padi et yadda kamantuttuddun Tugun Moses et daka pan-impipihuli hi Jesus e kanday "Kele binenaddangan tudda edum ey eleg han-ihwang tu annel tu? <sup>32</sup> Ang-ang tayu numan eya nanghel ni kantuy hi-gatu Christo e Patul idan Jews, hedin me-kal eyad neipetakan tu ah! Hedin numan me-kal, man kullugen tayu." Anin ida dama etan dewwan neipetak et daka pampadngeli hi Jesus.

*Ya neteyyan Jesus*

*(Matthew 27:45-56; Luke 23:44-49; John 19:28-30)*

<sup>33</sup> Nandattek aggew nunman ey pinhakkeyey na-ngetan emin hu bebley ni tellun olas. <sup>34</sup> Entannit hambatanganan ey simmekuk hi Jesus e kantuy "Eloi, Eloi, lama sabaktani!"  
 Ya keibbellinan tu ey "Apu Dios ku! Apu Dios ku! Kele muwak impayyag?" †

<sup>35</sup> Yadda etan edum ni tuun nangngel, ey kanday "Eneeneng itsu et denglen tayu ah. Tam tuka pan-eyyagi na-mu hi Elijah."

<sup>36</sup> An ginagannu etan ni hakey ni tuun inta-mel hu bulak di mapeit ni meinum et iplat tud paul ma-lat pehuphup tun Jesus. Kantuy "Ang-ang tayu numan hedin um-ali hi Elijah ni memaddang ni hi-gatu ah!"

<sup>37-38</sup> Entanniy simmekuk mewan hi Jesus et matey. Yan neteyyan tu ey neidihhan ni nepikgat etan mahdel ni kultinah di Tempol neipalpad ta-pew tu ingganah di hengeg tu.

\* 15:8 15:8 Ya kapehding ni governor ey wada hakey ni tuka ibbukyat ni neikelabut ni katootoon. † 15:34 15:34 Psalm 22:1

<sup>39</sup> Ya etan ap-apun sindalun kaman-eh-ehneng di kad-an ni neipetakan Jesus ey dingngel tu tekuk tu et kantuy "Makulug ni U-unggan Apu Dios Huyya."

<sup>40</sup> Wadaddad Maria Magdalena, hi Maria mewan e inad James nan hi Jose, ni hi Salome et yadda edum ni biin dalli kaang-ang-anga hi Jesus di a-allaw tu. <sup>41</sup> Huyyaddan bii hu neiunnuunnud nan Jesus niya bimmenaddang ni hi-gatun linallawwan tuddad bebley di Galilee. Wadadda pay hu edum ni biin neki-lin hi-gatud Jerusalem.

*Ya neikulungan Jesus*

*(Matthew 27:57-61; Luke 23:50-56; John 19:38-42)*

<sup>42-43</sup> Kamangkehilling ni nunman e Kalima, ey immali hi Joseph e iArimatea e hakey ni kametbal ni ap-apu. Eleg tumekut ni limmaw di kad-an Pilate et tu ibega hedini dammutun ellan tu annel Jesus. Hi Joseph ey hi-gatu hakey ni kaum-aabtun kedettengan ni pan-ap-apuan Apu Dios. <sup>44</sup> Natnga hi Pilate tep nengimpapatey hi Jesus et paeyag tu etan ap-apun sindalu et ibega tu hedini makulug ni netey hi Jesus. <sup>45</sup> Dingngel tu e makulug ni netey et iebulut tun ellan Jose hu annel tu. <sup>46</sup> Et lumaw hi Jose et tu ekalen hu annel Jesus di neipetakan tud krus, et libutan tun luput et tu ikulung etan di neitukituk ni kulung di batu, et tangeben tun et-eteng ni batu.

<sup>47</sup> Inang-ang di Maria Magdalena nan hi Maria e inad Jose hu neikulungan ni annel Jesus.

## 16

*Ya netagwan Jesus*

*(Matthew 28:1-8; Luke 24:1-12; John 20:1-10)*

<sup>1</sup> Nelabah law hu Sabaduh e kamengillin ni aggew et an gumtang di Maria Magdalena, hi Maria e inan James, et hi Salome ni spices ni da i-apuap di annel Jesus.

<sup>2</sup> Yan kakkabbuhan nunman ni Linggun simmimil hu aggew, ey himmaleman idan limmaw di kulung. <sup>3</sup> Wadaddad dalan ey kan ni hanhakkey ni hi-gaday "Hipa tu-wa la mengullin etan ni et-eteng ni batun neitengeb di kulung?"

<sup>4</sup> Nem umdateng ida ey neulin etan ni et-eteng ni batun neitengeb. <sup>5</sup> Neala law et pakdag da hegeg etan di kulung ey immegyat ida tep wada lakin nambalwasin mablah e yimmudung di wannan ni binaktadan lan Jesus. <sup>6</sup> Kan nunman ni laki ey "Entan takut yu tep inamtak et hi Jesus di Nazareth ni neipetak di krus hu yu ang-angen, nem endidya law tep netagwan. Ang-ang yu kedi, adyadeh la binaktadan tu. <sup>7</sup> Lakkayuy kuma et ehlen yun Peter et yadda etan edum ni disipol tu e memappangngulu lad Galilee et ya ladman hu pan-in-aang-angan da, e henin inhel tu lan nunman."

<sup>8</sup> Et bumsik ida eida kamangegeygey ni takut da. Ey eleg ida man-e-ehhel di edum ni tuu, tep nemahhig hu takut da.

*Ya nampeang-angan Jesus nan hi Maria Magdalena*

*(Matthew 28:9-10; John 20:11-18)*

<sup>9</sup> Yan eman ni netagwan Jesus ni kakkabbuhan ni Linggu, ey hi Maria Magdalena hu nemangulun nampeang-angan tu. Hi-gatu la etan biin nangkalan Jesus ni pitun neihuklung ni dimonyoh. <sup>10-11</sup> Limmaw hi Maria di kad-an idan etan ni disipol Jesus ni kaumlelemyung niya kaumnanginangih et ehlen tun hi-gada e simmagu hi Jesus ey inang-ang tu hi-gatu, nem eleg da kulluga.

*Ya nampeang-angan Jesus idan etan ni dewwan disipol tu*

*(Luke 24:13-35)*

<sup>12</sup> Ya mewan eman ni kapenglawwiddan etan ni dewwan disipol Jesus di edum ni bebley ni nalpuwan dad Jerusalem, ey nampeang-ang hi Jesus ni hi-gada, nem eleg da ni immatunan. <sup>13</sup> Nambanggad ida et da ehelen idan edum da, nem humman idan edum da ey eleg dadda kulluga.

*Ya nampeang-angan Jesus ida etan ni Hampulut hakey ni disipol tu*

*(Matthew 28:16-20; Luke 24:36-49; John 20:19-23; Acts 1:6-8)*

<sup>14</sup> Entanni mewan, ey nampeang-ang hi Jesus etan idan Hampulut hakey ni disipol tun daka pengnganni. Imbunget tudda tep kulang hu daka pengullug niya daka kehhignadda etan nenang-ang ni hi-gatun netagwan tu.

<sup>15</sup> Kantun hi-gaday "Elaw kayud kebbebley di puyek et yu ittutduddan katuuuu hu impahding kun panyaggudan ni tuu. <sup>16</sup> Et yadda etan tuun mengullug et pebenyag ida ey mehallakniban ida. Nem yadda etan eleg mengullug ey mekastigudda. <sup>17</sup> Kamimmatun idalli etan kamengullug, tep wadalli kabaelan dan mengkal ni kameihhuklung tep ya daka pengullug ni hi-gak, niya wadalli kabaelan dan mengihheppit ni hin-appil

ni ehel. <sup>18</sup> Anin ni tetngeden da uleg et eleg dadda kellata niya anin ni wada innumen dan kedet et eleg ida mettey. Wadalli kabaelan dan mengkal ni degeh ni tuu, anin daka kap-an ebuh.”

*Ya neibangngadan Jesus di kabunyan*

*(Luke 24:50-53; Acts 1:9-11)*

<sup>19</sup> Ginibbuh tun inhel ida humman ey impaenamut Apu Dios di kabunyan et an yumudung di winannan Apu Dios.

<sup>20</sup> Et yadda etan disipol tu ey limmaw idad kebebbbley et ida mantuttuddu. Et baddangan idan Apu Dios niya indawtan tuddan kabaelan dan nengipahding idan miracle et keang-angan tu e makulug hu intuttuddu da.

## Ya impaitudek Apu Dios nan Luke ni meippanggep nan Jesus

<sup>1-4</sup> Agik Teofilo, inamtak et dakel ida nengitudek ni meippanggep ni impahding Jesus et ya neipahding ni hi-gatu. Et yadda intudek da ey ya dingngedingngel dan intutudduudan tuun nenang-ang idan impahding Jesus neipalpun laputun nantutudduudan tu. Gapuh tep, anin hi-gak ey impekammahmahhan ku et peka-amtaen kun emin hu makulug meippanggep idan nunya ey ninemnem kun ittudek ni hi-gam, ma-lat amtaen hu makulug ni neituttuddu.

*Ya neipeamtaan ni kei-ungngaan nan John e kamemenyag*

<sup>5</sup> Yan eman ni nampatulana Herod di Judea ey wada hi Sekariah e padin Jew. Yadda padin Jews ni nunman ey nengaddangaddan hu grupuh da. Hi Sekariah, ey nei-dum di grupuh ni kandan Abihah. Ya ahwan Sekariah ey hi Elisabeth e nahlag nan Aaron. <sup>6</sup> Hi-gadan han-ahwa ey daka paka-u-unnuda Tugun Apu Dios, mukun ida kametbal ni hi-gatu. <sup>7</sup> Nem endi u-ungnga da tep nebasi hi Elisabeth ey nei-inna law. Anin daman hi Sekariah et nea-amma law.

<sup>8</sup> Hakey ni aggew ey kamangngunnu hi Sekariah di Tempol, tep nedatngan hu panggunnuan idan padin nei-duman tu. <sup>9-10</sup> Ya elaw ni padin Jew ey ida kamambubunus hedin hipa mengihheb ni insensoh di bawang ni Tempol. Et mambubunut ida, ey hi Sekariah hu nepili. Himmegep hi Sekariah ni an mengihheb ni insensoh ey ida kamanpandasal hu tutu-ud dallin.

<sup>11</sup> Wada hi Sekariah di bawang ey nampeang-ang ni hi-gatu hu anghel Apu Dios e immehngeng di wannan ni tebol di neiha-adan ni insensoh. <sup>12</sup> Inang-ang nan Sekariah etan anghel ey simmakut et eleg tu amta pehding tu. <sup>13</sup> Nem kan etan ni anghel ni hi-gatuy "Entan takut mu e Sekariah, tep dingngel Apu Dios dasal mu. Hi Elisabeth e ahwam ey man-ungngallin laki et inggadnan yullin hi John. <sup>14</sup> Um-amleng kayullin peteg ey man-am-amleng idalli dama etan edum ni tuu. <sup>15</sup> Hi-gatu ey tettebalen alin Apu Dios. Eleg ali um-inum ni meinum ni kaumbuteng. Meweddallin hi-gatu hu Ispirituh Apu Dios meippalpun kei-ungngaan tu. <sup>16</sup> Et tutudduan tuddalli helag Israel et dakel alin hi-gada hu mantuttuyyun liwat da et mambangngad idan mengu-unnud nan Apu Dios e Apu da. <sup>17</sup> Tep hi-gatulli mengiddaddan idan tuun mengebbulut etan ni itu-dak Apu Dios. Henillin Elijah e prophet, tep wadallin hi-gatu hu kabaelan ni Ispirituh Apu Dios. Tutudduan tuddalli a-ammed et mambangngad hu impeminhed dan u-ungnga da niya tuggunen tuddalli mangkanghay ni tuu et mengu-unnud idan kaitutudduudan kamengullug. Ey tutudduan tuddalli tuu ma-lat idaddan tuddan mengebbulut etan ni Ap-apu dan um-ali." \*

<sup>18</sup> Nem kan Sekariah ey "Inna-nun pengamtaan ku hedin makulug ni man-ungnga ahwak? Tam nea-amma-ak law niya nei-inna dama ahwak." <sup>19</sup> Kan etan ni anghel ey "Hi-gak hi Gabriel. Wada-ak ni ingganah di kad-an nan Apu Dios, tep hi-gatu hu nakka ingungngunni. Intu-dak tuwak ma-lat nak ehelen ni hi-gam hu kayyaggud ni meippahding ni hi-gayu. <sup>20</sup> Meippalpun nunya ey eleg kalli paka-hel ingganah ni kei-ungngaan alin etan ni gelang, tep eleg mu kulugen hu inhel ku. Makulug emin inhel ku ey um-amnullin nunman ni aggew ni gintud Apu Dios."

<sup>21</sup> Yadda etan tuud dallin ey daka hehhegeda hi Sekariah ni um-ehep et kanday "Kele na-mu ayepaw hi Sekariah di bawang?" <sup>22</sup> Neukat ali law ey eleg paka-hel et tuka issinyas hu pinhed tun e-helen. Ey inewatan idan tuu e wada nampeang-ang ni hi-gatud bawang ni Tempol.

<sup>23</sup> Negibbuh hu ngunu tud Tempol et umenamut di baley da. <sup>24</sup> Entanni ey nambutsug tu-wangu hi Elisabeth e ahwatu et mantattallud baley dan liman bulan. <sup>25</sup> Kantud nemnem tuy "Kayyaggud anhan et huyya impahding Apu Dios ni pemaddang tun hi-gak et aggak mebabaingi gapuh ni nebasian ku."

*Ya neipeamtaan ni kei-ungngaan Jesus*

<sup>26</sup> Nelabah enem ni bulan ni nan-i-innepan Sekariah ey intu-dak mewan Apu Dios etan anghel e hi Gabriel di Nazareth di Galilee, <sup>27</sup> tep wada tu e-helen etan ni biin neitgaan nan Joseph e helag David. Ya ngadan etan ni bii ey hi Maria. <sup>28</sup> Limmaw etan anghel

\* 1:17 1:17 Malachi 4:5-6

di kad-an Maria et kantun hi-gatuy “Meweddan hi-gam hu linggep, Maria. Immali-ak ni menghel ni hi-gam e bendisyonan dakan Apu Dios niya ippatek dakan hi-gatu.”

<sup>29</sup> Kaumnenemnem hi Maria ni keibbellinan nunman ni inhel etan ni anghel. <sup>30</sup> Nem kan etan ni anghel ey “Entan takut mu e Maria, tep hi-gam hu pinilin Apu Dios ni meidwatan ni et-eteng ni panyaggudan. <sup>31</sup> Tep mambutsug kalli et man-ungnga kan laki et ingngadan yullin hi Jesus. <sup>32</sup> Eta-gey ali saad tu ey mengeddanan alin U-ungngan Apu Dios e Keta-ta-geyyan. Hi-gatu patul yullin ittu-dak Apu Dios ni meihhullul eman lan aammed tu e hi David. <sup>33</sup> Et hi-gatulli pampatul idan helag Jacob ey endilli pappeg ni pan-ap-apuan tu.”

<sup>34</sup> Nem kan Maria etan ni anghel ey “Inna-nun nak pan-ungnga ey endi ahwak?” <sup>35</sup> Hinumang etan ni anghel et kantuy “Ittu-dak alin Apu Dios hu Ispirituh tun hi-gam et hi-gatu mengippahding ni nunya. Et humman hu, mengeddanan ali humman ni i-ungngan ni U-ungngan Apu Dios. <sup>36</sup> Hi agim e hi Elisabeth e nebasu ey anin ni nei-inna ey nambutsug law e meikka-nem bulan tun nunya. <sup>37</sup> Huyya keang-angan tu e hi Apu Dios ey et-eteng kabaelan tu et tuka ippahding ni emin.” <sup>38</sup> Kan Maria ey “Anin, ebbuluten ku huttan ni inhel mun pehding Apu Dios ni hi-gak, tep bega-en tuwak ni hi-gatu.” Et ebuhe hi-yanen etan ni anghel.

*Ya an nambisitan Maria nan hi Elisabeth*

<sup>39</sup> Entanni ey nandaddan hi Maria et papuut tun limmaw etan di duntuduntug ni bebley di Judea. <sup>40</sup> Limmaw di Sekariah nan Elisabeth ey Elisabeth ey “Immali-ak.” <sup>41</sup> Dingngel Elisabeth hu ehel Maria ey kimmubul etan gelang di egeh tu. Ey newada Ispirituh Apu Dios ni hi-gatu <sup>42</sup> et eleten tu ehel tu e kantun Maria ey “Endi edum ni negahat ni biin henin hi-gam, tep binendisyonan dakan Apu Dios et ya etan i-ungngam ali. <sup>43</sup> Nakka man-am-amleng ni peteg, tep immali kan menang-ang ni hi-gak ey hi-gam ali mengi-ungngan Apu tayu. <sup>44</sup> Yan nangngelan kun ehel mu ey kimmubul eya gelang di egeh ku, tep kaman-am-amleng. <sup>45</sup> Inamtak et ka dama kaman-am-amleng, tep kinulug mu e um-amnu hu impeamtan Apu Dios ni hi-gam.”

*Ya a-appeh Maria ni impenaydayaw tun Apu Dios*

<sup>46</sup> Kan Maria di a-appeh tu ey “Nakka daydayawa hi Apu Dios. <sup>47</sup> Nakka man-am-amleng tep hi Apu Dios hu menellaknib ni hi-gak. <sup>48</sup> Anin ni nebabahhak ni tuu et ninemnem tuwak e bega-en tu. Et meippalpun nunya ey emin idalli tuuy kanday binendisyonan da-ak nan Apu Dios <sup>49</sup> gapuh eyan impahding tun hi-gak tep ya et-eteng ni kabaelan tu. Hi-gatu ey kayyaggud ni peteg. <sup>50</sup> Tuka hehmekan emin hu tuun kamengullug ni hi-gatu, anin idan helag da. <sup>51</sup> Dakel ida impahding tun pengi-ang-angan ni et-eteng ni kabaelan tu. Inwahit tudu tutu-un kamampahhiya niya manghay. <sup>52</sup> Impampa-kal Apu Dios ida ap-apud saad da niya impeta-gey tudu etan nebabah ni tuu. <sup>53</sup> Indawat tu mahapul idan kameuppan tuu, nem impea-allaw tudu kedangyan, e endi indawat tun hi-gada. <sup>54</sup> Impeamnu tu impakulug tu lan aammed tayu, et daitu kabennaddangi e bega-en tun helag Israel. <sup>55</sup> Hinehhehemek tun ingganah hi Abraham, anin ni hi-gatsun helag tu. Et peamnu tudu lan aammed tayu hu impakulug tu.”

<sup>56</sup> Nanha-ad hi Maria diman di baley Elisabeth ni ngannganih ni tellun bulan et han mambanggad di bebley da.

*Ya neiungnga John e kamemenyag*

<sup>57</sup> Nematngan hu pan-ungnga Elisabeth ey laki in-ungnga tu. <sup>58</sup> Emin ida sinakdul tun niyadda agi tu, ey inamta da e himmek Apu Dios et ida kamekiam-amleng ni hi-gatu.

<sup>59</sup> Nelabah walun aggew ey kinugit da etan u-ungnga. Pinhed idan tuun ngeddanan ni Sekariah e ngadan ametu, <sup>60</sup> nem kan inetuy “Eleg! Ya ngadan tu ey hi John.” <sup>61</sup> Kandan hi-gatuy “Nem kaw wada agi yun nangngadan ni John?” <sup>62</sup> Et isinyas dan ametu hedini hipa pinhed tun panggeddan etan ni u-ungnga. <sup>63</sup> Nambaga hi Sekariah ni papil ni pantuddekan tu et huyya intudek tu “Ya ngadan tu ey hi John.” Emin ida etan tuu ey natngadda. <sup>64</sup> Pinhakkeyey nanhaddak law hu ehel Sekariah et dayawen tu hi Apu Dios. <sup>65</sup> Ey natngadda sinakdul da. Emin huyyan nekapkapyad baley di Sekariah ey nan-amtad kebebbbley di Judea. <sup>66</sup> Emin ida tuun nangngel nunman ey kandad nemnem day “Hipalli na-mu pambalanan nunman ni u-ungnga hedini meetteng?” Ka-ang-ang e wada kabaelan Apu Dios ni hi-gatu.

*Ya kapenaydayaw Sekariah nan Apu Dios*

<sup>67</sup> Newada hu Ispirituh Apu Dios nan Sekariah e ametu et pa-hel tu et huyya hu kantu <sup>68</sup> “Kakayyaggud hi Apu Dios e kamedeyyaw ni Apu tayun helag Israel. Kayyaggud tep ninemnem daitsun tuu tu et paelli tu meneklan liwat tayu. <sup>69</sup> Humman ni peelli tu ey helag David e et-eteng kabaelan tun memaddang ni hi-gatsun tuu tu.

<sup>70</sup> Huyya keang-angan tu e um-amnu hu inhel Apu Dios ida lan eman ni prophets <sup>71</sup> e ihhehwang daitsud buhul tayu et yaddad tutu-un anggebe-hel daitu. <sup>72</sup> Huyya pengippeang-angan tun immamnu hu inhel tuddan aammed tayun nunman e kantuy hehmeken tudda. <sup>73</sup> Insapatah tun Abraham e ammed tayu e <sup>74</sup> ihhehwang daitsud buhul tayu ma-lat eleg itsu tumekut ni mengu-unnud ni hi-gatu <sup>75</sup> et eleg itsu manliwat niya kayyaggud ni ingganah hu elaw tayud hinanggab Apu Dios.

<sup>76</sup> Hi-gam e u-unggak ey ingngadnan dakalliddan tuun prophet Apu Dios e Keta-tageyyan, tep hi-gam ali mengippeamtan meippanggep etan ni Apu tayun um-alilli. <sup>77</sup> Ituttudum idallin tuun Apu Dios e pakkaw mepessinsahan hu liwat da et han tudda abuluta. <sup>78</sup> Et-eteng hemek Apu Dios ni hi-gatsu, et humman hu ittu-dak tulli menellaknib ni hi-gatsu. Yallin ellian nunman ni ittu-dak tu ey heni kamenimmil ni aggew, <sup>79</sup> tep ya aggew ey tuka bebnangi emin hu na-ngetan. Peamta tulli hu kayyaggud ni u-unnuden tayu ma-lat eleg itsu mekastigu niya ma-lat luminggep itsu.”

<sup>80</sup> Nehiken hi John ey nakannemneman. Nanha-ad di desert ingganah ni nengilepuan tun mantuttudduiddan helag Israel.

## 2

### *Ya neiunggaan Jesus (Matthew 1:18-25)*

<sup>1-2</sup> Yan eman ni hi Agustus hu ap-apud Rome ey in-olden tud emin ni bebley ni sinekup tu e mahapul ni an mampelistadda hu tutu-u etan di bebley ni nalpuan ni aammed da. (Ya gubernor di Syria ni nunman ni nemangulun nanlistaan dan tutu-u ey hi Quirinius.) <sup>3</sup> Et wada hakkeyey limmaw ni an pelistad bebley ni nalpuan ni aammed tu.

<sup>4</sup> Ya nambebleyan di Joseph ni nunman ey yad Nazareth di Galilee, nem limmaw idad Bethlehem di Judea ni mampelista, tep yadman hu bebley eman ni ammed tu e hi David. <sup>5</sup> Hi Maria ey nambutsug ni nunman ni nengikuyugan Joseph ni hi-gatu <sup>6</sup> et yan eman ni wadaddadman Bethlehem ey yan nunman hu pan-unggaan tu. <sup>7</sup> Nem endi da panha-adan, tep napnun emin hu kabelebeley tep dakel tuun nunman, et lumaw ida etan di hidduman idan baka. Nan-ungga hi Maria ey laki e humman hu pengulwan ni u-ungga tu. Et libutan tun luput et pebaktad tu etan di heni ballunglung ni ekkanan ni baka.

### *Ya nampeang-angan etan ni anghel Apu Dios ida etan ni kamampattul ni kalneroh*

<sup>8</sup> Neipaddih ni nunman ni hileng ni wadadda etan kamampattul ni kalneroh di ba-hil etan ni bebley e daka a-addugi kalneroh da. <sup>9</sup> Pinhakkeyey nampeang-ang hu anghel Apu Dios ey nabnangan ni dayaw ni Ap-apu hu kad-an da ey simmakut ida. <sup>10-12</sup> Nem kan etan ni anghel ni hi-gaday “Entan takut yu! Dengel yu kuma tep ya e-helen kun hi-gayu ey kayyaggud e mengippeamleng emin ni tuu. Neiunggan nunyad Bethlehem e bebley lan David etan mengippaptek ni emin ni tuu. Hi-gatu hi Christo e Ap-apu. Ya pengimmatunan yun makulug huyya ey ang-angen yu la etan gelang ni nelibutan ni luput e kamambakbaktad di ekkanan ni baka.” <sup>13</sup> Nekekemtang mewan ey newadadda dakel ni anghel Apu Dios ni nei-dum etan ni hakey ni anghel ey daka pan-ia-appah hu daka pandaydayaw nan Apu Dios. Kandad a-appah day

<sup>14</sup> “Kamedeyyaw hi Apu Dios di kabunyan. Pelinggep tudda tuud puyek ni pengippeang-ang tun binabbal tu.”

<sup>15</sup> Nambanggad ida etan anghel di kabunyan et kan idan kamampattul ey “Umlaw itsu pangnud Bethlehem et tayu ang-angen humman ni impeamtan Apu Dios ni hi-gatsu.” <sup>16</sup> Et papuut da et lumaw ida ey himmak dad Maria nan Joseph et ya etan gelang ni kamambakbaktad di ekkanan ni baka. <sup>17</sup> Et da pan-ehlen emin ni tuudman hu dinggel dan meippanggep etan ni gelang. <sup>18</sup> Natngaddan emin hu nanggel ni inhel ida etan ni kamampattul ni kalneroh. <sup>19</sup> Nem hedin hi Maria ey tuka nenemnema humman idan inhel da. <sup>20</sup> Nambanggad ida etan kamampattul e daka daydayawa hi Apu Dios gapuh nunman ni inhel idan anghel ni hi-gada, ey tep inang-ang da e makulug numan hu inhel idan nunman ni anghel ni hi-gada.

### *Ya nangngadanan dan Jesus*

<sup>21</sup> Meikkewalun aggew etan ni gelang et kugiten da. Et ngadnan dan hi Jesus e humman hu inhel ni anghel nan Maria et han mambutsug.

### *Ya nengilawwan dan Jesus di Tempol*

<sup>22-23</sup> Nemateng hu aggew ni pengu-unnudan di Joseph nan Maria ni Tugun Moses. Et lumaw idad Tempol di Jerusalem e ingkuyug da hi Jesus et da i-kud nan Apu Dios tep



humman neitudek di tugun tu e kantuy “Emin hu pengulwan ni laki, ey mahapul ni mei-kud nan Apu Dios.”<sup>24</sup> Et man-appit idan Apu Dios tep humman tugun tu e kantuy “Mahapul ni man-appit kayun dewwan ginepad ni balug winu paluma et han dammutun meki-emma hu biin menaydayaw nan Apu Dios.”

<sup>25</sup> Wadad Jerusalem etan tuun kayyagud elaw tu e hi Simeon ngadan tu. Nemahhig tuka pengu-unnud nan Apu Dios et tuka nemnemnan kenayun etan impakulug Apu Dios ni kantuy wadalli ittu-dak tun mengippaptek emin ni tuu ma-lat ihwang tudda helag Israel. Wadan hi-gatu hu Ispirituh Apu Dios<sup>26</sup> ni nengipeamtan hi-gatu e eleg mettey ingganah ang-angen tu amnuan ni inhel lan Apu Dios ni kantuy um-ali hu mengippaptek emin ni tuu.

<sup>27</sup> Entanni ey impangulun Ispirituh Apu Dios hi Simeon di Tempol et humgep ey wadad Joseph nan Maria e in-ali dad man hi Jesus et ippahding da hu elaw dan intugun lan Moses.<sup>28</sup> In-apupun Simeon hi Jesus et daydayawen tu hi Apu Dios e kantuy

<sup>29-32</sup> “Apu, yan nunyan immamnu hu inhel mu lan nunman ey anin ni metteyyak law e bega-en mu et melinggep hu nemnem ku, tep inang-ang ku eya intu-dak mun menellakni ni emin ni tuu. Kamei-ellig hi-gatun dilag ni memnang ni kamei-ellig di engeenget ni nemnem idan Gentiles ma-lat u-unnuden daka niya ma-lat meidaydayaw ida tuum ni helag Israel.”

<sup>33</sup> Ey natngadda etan ammed Jesus ni nunman ni inhel Simeon ni meippanggep nan Jesus.<sup>34</sup> Entanni ey binendisyonan Simeon ida. Ey kantun Maria ey “Huyyan u-ungngan intu-dak Apu Dios ey kehgingen alin dakel ni helag Israel, et mukun mekastiguddalli. Nem dakel idalli dama peamleng tu.<sup>35</sup> Et humman, keamtaan alin wadad nemnem ni hipan tuu. Ey hi-gam e inetu ey maggeh alin peteg nemnem mu tep ya meippahding alin hi-gatu.”

<sup>36</sup> Wada damad man di Tempol etan biin prophet Apu Dios ni helag Asher e hi Ana e u-ungngan Panuel. Nengahwa et malebah pitun toon ey netey ahwatu.<sup>37</sup> Nei-inna law e newalut epat toon tu. Neipalpun nebaluan tu, ey eleg tu hi-hi-yana etan Tempol, nem kewa-wa-wa niya kahilehileng ey tuka an daydayawa hi Apu Dios. Hin-addum ni kamantetpel et ya dasal hu tuka i-anteng.<sup>38</sup> Entanni ey limmaw hi Ana di kad-an da et mansalamat nan Apu Dios gapuh nan Jesus. Ey tuka pan-ehela meippanggep nan Jesus e hi-gatu daka hehhegedan mengihwang idan helag Israel.

<sup>39</sup> Impahding di Joseph nan Maria hu intugun Moses ni meippanggep ni nan-ungngan bii niya pengulwan ni u-ungngan et umenamut idad Nazareth di Galilee.<sup>40</sup> Kamangkehikhen hi Jesus ey na-let niya nekannemnan. Ey kapekabbabalin Apu Dios hi-gatu.

### *Ya nekilawwan Jesus di Tempol eman ni keu-ungnga tu*

<sup>41</sup> Katootoon ey kaumlaw ida a-ammed Jesus di Jerusalem hedid nedatngan hu Piyestah ni Passover.<sup>42</sup> Yan eman ni hampulut dewwa toon tu ey nekilaw di Jerusalem ni an mekippiyestah.<sup>43-44</sup> Negibbuh humman ni piyestah et umenamut ida tuu, anin idan a-ammed tu. Nem hedid hi-gatu, man nanha-ad di Jerusalem. Kan idan a-ammed tu nem nekilaw ida lan edum dan nemappanggulun immanemut, et manglaw ida. Eleg da amta e nehi-yan hi Jesus di Jerusalem. Nandalan idan han-aggew et mahileng ey endi hi Jesus et da pan-ibegad edum da niyaddad gayyum da, nem endi.<sup>45</sup> Eleg da hanhamak et mambanggad idad Jerusalem ni an menang-ang ni hi-gatu.

<sup>46</sup> Nelabah tellun aggew ey himmak dad Tempol e kamanyuyuddung di gawwaddan etan ni neamung ni kamantuttuddun elaw ni Jews e kamandeddenggel niya dakel tuka mahmahi.<sup>47</sup> Emin ida etan nangngel ni hi-gatu ey ida kametngan kabaelan tun man-ewwat niya kalinaing tun umhumang.<sup>48</sup> Natngadda a-ammed tun nenang-angan dan hi-gatudman. Kan inetun hi-gatuy “Kele kaka mengippekkagguh? Nemahhig kaguh mi et daka hamahamaken.”

<sup>49</sup> Hinumang Jesus et kantuy “Hipa yuwak penemmahemmakan? Kaw eleg yu pannaud e wada-ak eyad Tempol e baley Ama?”<sup>50</sup> Nem eleg da awatan humman ni inhumang tu.

<sup>51</sup> Nekienamut hi Jesus di Nazareth et u-unnuden tu tugun idan a-ammed tu. Emin huyyan neipahding ni hi-gatu ey kanemnemnan inetu.<sup>52</sup> Kamangkehikhen hi Jesus ey nema-man kamangke-dumi inamta tu ey kametbal nan Apu Dios et yadda tuu.

## 3

*Ya kaituttuddun John e kamemenyag  
(Matthew 3:1-12; Mark 1:1-8; John 1:19-28)*

<sup>1</sup> Yan meikkepulut liman toon ni nan-ap-apuan Tiberius, ey hi Pontius Pilate hu gubernor di Judea. Hi Herod hu ap-apud Galilee, hi Philip e agin Herod hu ap-apu damad bebley di Iturea et yad Trakonis niya hi Lisaniyas hu ap-apud Abilene. <sup>2</sup> Di Annas nan hi Kayaphas hu Eta-gey ni Padin nunman. Yan nunman dama hu neipeamtaan ni ehel Apu Dios nan John e u-ungngan Sekariah di desert. <sup>3</sup> Limmaw hi John di emin ni nangeihnup ni bebley di Wangwang e Jordan, et tu ituttudduan tutu-u e mahapul ni mantuttuyyuddan liwat da niya mampebenyag ida e humman pengi-immatanun ni nantuttuyyuan dan liwat da ma-lat pesinsahan Apu Dios hu liwat da. <sup>4</sup> Huyyan impahding John hu inamnuan ni intudek lan Isaiyah e prophet Apu Dios ni kantuy “Wadalli umtekutekuk di desert e kantuy ‘Idaddan yu niya iyayyaggud yu dellanen ni Apu tayu. \* <sup>5</sup> Tabab yudda emin hu nehayyukung niya deklan yuddan emin hu duntug. Iyayyaggud niya pan-andeng yudda dalan ni eleg meandeng. † <sup>6</sup> Et ang-angen alin emin ni tuu etan itu-dak Apu Dios ni umhelaknib.’”

<sup>7</sup> Dakel ida immalin tutu-un pebenyag nan John, nem kanton hi-gada ey “Lawah kayun tutu-u e heni kayu tu-wangu uleg! Kaw kanyu nem hedin pebenyag kayu, man eleg dakeyulli kastiguan Apu Dios? <sup>8</sup> Mahapul ni issiked yu hu lawah ni yuka pehpehding et u-unnuden yu hi Apu Dios, et keang-angan tu e makulug ni nantuttuyyuy kayun liwat yu. Entan tu ididdinel hu kanyuy yaggud hi Abraham hu nahlagan yu et mukun dammutun ebbuluten dakeyun Apu Dios. Tep dammutun pambalin tuddan tuu eya batun meihhullul ni hi-gayun u-ungngan Abraham. <sup>9</sup> Kamangkedetteng law hu pengastiguan Apu Dios idan lawah ni tuu et heniddalli etan ni keyew ni lawah tuka illameh e melngeh et maepuyan.”

<sup>10</sup> Kan idan etan ni kameemmuemmung ni tuu ey “Hipa tep pehding mi?” <sup>11</sup> Hinumang idan John e kantuy “Hi-gayun dewwa balwasi tu, ey idwat yu hakey etan ni endi balwasi tu. Hi-gayun wada kennen tu, idwasi yu etan endi kennen tu.”

<sup>12</sup> Yadda etan kaman-emmung ni buwis ey immaliddan an mampebenyag et ibega da e kanday “Apu, hipa pehding mi?” <sup>13</sup> Ey kan John ni hi-gaday “Hi-gayun kaman-emmung ni buwis, entan tu edumi hu ibbageyuddan tuun buwis.”

<sup>14</sup> Immalidda dama sindalun an mampebenyag et kanday “Apu, hipa dama pehding mi?” Hinumang John et kantuy “Entan tu ipilit pinhed yu. Entan tu tenattakkut ida tuu ma-lat al-en yu pihuh da. Entan panlilih ni tangdan yu.”

<sup>15</sup> Dingngel idan tutu-u hu kaituttuddun John ey nema-man daka hehhegeda ellian etan ni inhel lan Apu Dios ni um-alin menellaknib ni tuu, et wadadda edum ni hi-gadan kanda na-mu nem hi John humman. <sup>16</sup> Nem immehel hi John et kantuy “Immali-ak ni an memenyag ni hi-gayun danum. Huyyan pemenyagan kun hi-gayu hu immatun ni nantuttuyyuan yun liwat yu. Nem yalli etan um-alin meihhullul ni hi-gak ey hi-gatu mengidwat ni Ispirituh Apu Dios ni hi-gayu winu ya kekastiguan yud apuy. ‡ Hi-gatu ey eta-ta-gey ni peteg nem hi-gak et nakka umbaing ni tuwak pambega-en. <sup>17</sup> Yallin ellian tu ey ennappelen tu hu tutu-u, heni etan ni tuun kamenel-ap e tel-apan tu begah et ikulbung tu. Nem ibbeng tu hu degi et magiheh di apuy ni eleg me-me-dep.”

<sup>18</sup> Dakel pay hu edum ni intuttuddun John ni impanugun tuddan tuun nengituttudduan tun meippanggep ni ellian etan ni mengippaptek ni tuu.

<sup>19</sup> Entanni ey inhelan tu hi Herod e Gubernor di Galilee, tep inahwa tu hi Herodias e ahwan agi tu e hi Philip, tep impahpahding tuddan dakel ni lawah. <sup>20</sup> Et humman himmulun ni nengipakelabutan Herod nan John et ma-duman hu hantapug ni liwat tu.

*Ya nebenyagan Jesus*  
(Matthew 3:13-17; Mark 1:9-11)

<sup>21</sup> Yan nemenyagan John ni dakel ni tuu, ey nampebenyag dama hi Jesus ni hi-gatu. Nandasal hi Jesus ni nunman ey nantekang hu kabunyan <sup>22</sup> et umli hu Ispirituh Apu Dios e heni paluma hu ang-ang tu et umpad annel Jesus. Ey wadalli immehel di kabunyan e kantuy “Hi-gam e U-ungngak ni nakappinhed ku hu kamengippeamleng ni peteg ni hi-gak.”

*Ya nahlagan ni impan-ammed Jesus*  
(Matthew 1:1-17)

<sup>23-38</sup> Telumpulu toon Jesus ey inlapu tu law ni mantuttuddu. Ya impan-aman Jesus ey hi Joseph, et huyya hu tenten ni aammed tu. Ya nemangulun lintun Apu Dios ey hi

\* **3:4** 3:4 Ya keibbellinan tu huyya ey pandaddan kayu e iyayyaggud yu elaw yu tep um-ali Apu tayu. † **3:5** 3:5 [4-5] Isaiyah 40:3-5 ‡ **3:16** 3:16 Ya keibbellinan tun huyya, ey hi Jesus hu kamengidwat ni Ispirituh Apu Dios idan kamengullug ni hi-gatu. Ya keibbellinan ni ‘apuy’ ey mekastigudda hu eleg mengullug ni hi-gatu.

Adam. Nahlag hi Adam ey wada hi Seth e aman Enos. Nahlag hi Enos ey wada hi Kenan e aman Mahalalel. Nahlag hi Mahalalel ey wada hi Jared et mahlag ey wada hi Enoch e aman Methushelah. Nahlag hi Methushelah ey wada hi Lamek e aman Noah e aman Shem. Nahlag hi Shem ey wada hi Arpaksad et mahlag ey wada hi Kainan e aman Selah. Nahlag hi Selah ey wada hi Eber et mahlag ey wada hi Peleg e aman Reu. Nahlag hi Reu ey wada hi Serug et mahlag ey wada hi Nahor e aman Terah. Nahlag hi Terah ey wada hi Abraham et mahlag ey wada hi Isaac e aman Jacob. Nahlag hi Jacob ey wada hi Judah e aman Peres. Nahlag hi Peres ey wada hi Hesron et mahlag ey wada hi Arni e aman Admin. Nahlag hi Admin ey wada hi Amminadab et mahlag ey wada hi Nashon e aman Salmon. Nahlag hi Salmon ey wada hi Boaz. Nahlag hi Boaz ey wada hi Obed e aman Jesse e aman David. Nahlag hi David ey wada hi Nathan et mahlag ey wada hi Mattatha e aman Menna e aman Melea. Nahlag hi Melea ey wada hi Eliakim et mahlag ey wada hi Jonam e aman Joseph e aman Judah. Nahlag hi Judah et wada hi Simeon et wada hi Levi e aman Mathat e aman Jorim. Nahlag hi Jorim et wada hi Elieser e aman Joshua, e aman Er e aman Elmadam. Nahlag hi Elmadam et wada hi Kosam et wada hi Addi e aman Melki e aman Neri. Nahlag hi Neri et wada hi Sealtiel e aman Serubbabel e aman Resa. Nahlag hi Resa et wada hi Johanan e aman Joda e aman Josek. Nahlag hi Josek et wada hi Semein e aman Mattathiah e aman Maat e aman Naggai. Nahlag hi Naggai et wada hi Esli e aman Nahum e aman Amos e aman Mattathiah. Nahlag hi Mattathiah et wada hi Joseph e aman Jannai e aman Melki e aman Levi. Nahlag hi Levi et wada hi Mathat e aman Heli. Nahlag hi Heli et wada hi Joseph e kameibbilang ni impan-aman Jesus.

## 4

*Ya nematnaan Satanans ni mene-ul nan Jesus*

*(Matthew 4:1-11; Mark 1:12-13)*

<sup>1-2</sup> Newada hu et-eteng ni kabaelan ni Ispirituh Apu Dios nan Jesus eman ni nalpuan tud Wangwang e Jordan. Et ipengulun nunman ni Ispirituh hi Jesus di desert. Yadman nengipenatnaan Satanans ni mene-ul ni hi-gatun na-pat ni aggew ma-lat manliwat. Yan nunman ey neka-upa Jesus tep eleg mangamangan. <sup>3</sup> Kan Satanans ni hi-gatuy "Hedin makulug ni U-ungnga dakan Apu Dios, ey pambalin mu eya batun sinapay." <sup>4</sup> Nem hinumang Jesus et kantuy "Ya neitudek di ehel Apu Dios ey kantuy 'Beken ni ya kennen ni ebuh hu iddinel ni tuun ketegguan tu.' "

<sup>5</sup> Inlaw Satanans hi Jesus di eta-gey ni duntug et ebuhe peang-ang tun hi-gatun emin hu kapan-ap-apuin tuu et kantong hi-gatuy <sup>6</sup> "Dammutun iddawat kun hi-gam hu saad ni man-ap-apun emin diman ma-lat maidaydayaw ka. Tep hi-gak neidwatan ni emin idan nunya et ngenamungngak ni mengippebeltan di pinhed kun memeltan. <sup>7</sup> Hedin hi-gak hu daydaywen, man iddawat kun emin humman ni hi-gam." <sup>8</sup> Nem hinumang mewan nan Jesus et kantuy "Ya neitudek di ehel Apu Dios ey kantuy 'Ebih hi Apu Dios ni dayaw yu niya hi-gatun ebuh hu u-unnud yu.' "

<sup>9</sup> Inlaw Satanans hi Jesus di Jerusalem etan di keta-ta-geyyan ni bubung ni Tempol et kantong hi-gatuy "Hedin makulug ni U-ungnga dakan Apu Dios, man dep-ah ka yaggud impatudek tu e kantuy <sup>10-11</sup> 'Be-alen kudda anghel et ippaptok daka ma-lat anin ni man-e-gah ka et hikmaten daka ma-lat eleg maliputan helim.' " <sup>12</sup> Hinumang Jesus et kantuy "Nem wada dama neitudek ni ehel Apu Dios e kantuy 'Entan tu patnai hi Apu Dios e Dios yu.' "

<sup>13</sup> Impatnan Satanans emin hu kabaelan tun men-ul nan Jesus ma-lat manliwat, nem eleg tu hanhaul et hi-yanen tu ni- et ngenamung ali mewan hu pene-ulan tun hi-gatu.

*Ya laputun pantuttudduan Jesus di Galilee*

*(Matthew 4:12-17; Mark 1:14-15)*

<sup>14</sup> Entanni et mambangngad hi Jesus di provincia di Galilee ey newadan hi-gatu et-eteng ni kabaelan ni indawat ni Ispirituh Apu Dios et mandingngel di kebebbley diman gapuh idan intuttuddu tu niya impahding tu. <sup>15</sup> Nantuttuddud kesimsimbaan idan Jews ey katettebaladdan emin ni tuu.

*Ya eleg pengullugiddan kebebleyen Jesus ni hi-gatu*

*(Matthew 13:53-58; Mark 6:1-6)*

<sup>16</sup> Limmaw hi Jesus di Nazareth e bebley dan nehiknan tu. Et lumaw di simbaan ni Sabaduh, tep humman dedan tuka pehding. Immehnung hi Jesus ni memidbid ni

\* 4:10-11 4:10-11 Psalm 91:11-12

neitudek ni ehel Apu Dios <sup>17</sup> ey indawat dan hi-gatu etan neludun ni neitudekan ni inhel eman lan prophet e hi Isaiiah. Binekyag tu et petken tu etan kantuy

<sup>18</sup> “Wadan hi-gak hu Ispirituh Apu Dios, tep pinutuk tuwak Apu Dios ni mengippeamtad-dan nangkewetwet etan ni meippahding ni panyaggudan ni tuu. Ey intu-dak da-ak ni an mengippeamtan meibbukyat ida neikelabut niya pakeang-ang ida nekulap. Ey immaliyak ni memaddang idan tuun kapanligligat idan edum da. <sup>19</sup> Ey intu-dak tuwak ni mengippeamtan kedettengan ni aggew ni penellakniban Apu Dios idan tuu tu.”

<sup>20</sup> Binidbid Jesus huyya et ludunen tu et ibangngad tu etan ni kaumbaddang di bawang ni simbaan et yumudung ni mantuttuddu. Emin ida etan tuud simbaan ey daka itettekel et kantun hi-gaday <sup>21</sup> “Yan nunya ey immamnu etan dingngel yun binidbid kun neitudek ni ehel Apu Dios.”

<sup>22</sup> Emin ida etan tuu, ey daka tettebala ey natngadda etan ni kayyaggud ni tuka penuttuddu. Kanday “Kaw beken ni hi-gatu etan u-ungngan Joseph?”

<sup>23</sup> Kan Jesus ni hi-gaday “Makulug anhan et e-helen yullin hi-gak etan kandan: ‘Hedin makulug ni kaka man-egga, agahim hu degeh mu,’ niya kanyulliy ‘Hedin makulug ni intu-dak dakan Apu Dios, ey peang-ang mu eyad bebley mu hu henin etan ni dingngel min impahding mud Capernaum.’”

<sup>24</sup> Kan pay Jesus ey “Dengel yu eya e-helen ku, ya kakulugan tu ey yadda prophets ey eleg kullugaddan kebebleyan da, <sup>25-26</sup> heni lan Elijah e prophet Apu Dios. Yan eman ni kaweda tud puyek ey wada nemahhig ni bisil di kebebbley di Israel, tep endi udan ni tellu et kagedwah ni toon. Wadadda dakel ni nebalun biin kebebleyan tun mahapul da baddang tu, nem beken ni hi-gada binaddangan tu. Tep ya etan nebalun biid Sarephat di Sidon hu nengitu-dakan Apu Dios ni hi-gatun tu baddangan. <sup>27</sup> Hanniman daman Elisha e prophet. Yan ketaggu tu ey dakel di Israel hu kamampandedgeh ni leprosi, nem eleg ekalen Elisha hu degeh da. Nem ya etan iSyria e hi Naaman e kamanleprosi hu impeyaggud tu, ey beken edum tayun Jew.”

<sup>28</sup> Yan nangngelan idan tuun nunman ni inhel Jesus ey nemahhig bunget dan hi-gatu. <sup>29</sup> Et pan-inuhnuh da et ilaw dad gilig ni bebley etan di mu-tuk ni duntug ma-lat da e-gahan et di deplah, <sup>30</sup> nem endi maptek ey attukaw hi Jesus e nandalan di gawwaddan neamong ni tuu et manglaw.

*Ya nangkalan Jesus ni neihuklung ni dimonyoh etan ni tuud Capernaum  
(Mark 1:21-28)*

<sup>31</sup> Entanni et lumaw hi Jesus di Capernaum di Galilee et mantuttuddud simbaan ni Sabaduh. † <sup>32</sup> Ey natngadda tuun intuttuddu tu, ey kameang-ang di tuka pantuttuddu e wada kelebengan tun mantuttuddu.

<sup>33</sup> Yad man ni simbaan ey wada etan tuun nehuklungan ni dimonyoh.

<sup>34</sup> Kamantetekuk e kantuy “Hipa pehding mun hi-gami e Jesus di Nazareth? Kaw immali kan mengastigun hi-gami? Inamta daka. Hi-gam etan kayyaggud ni peteg ni intu-dak Apu Dios.”

<sup>35</sup> Nem imbunget Jesus etan dimonyoh e kantuy “Eneeneng ka niya ka-kal ka eyad tuu.” Sinu-li etan ni neihuklung etan tuu et han ma-kal, nem endi neliputan ni hi-gatu.

<sup>36</sup> Natngaddan emin hu tuu et ida kaman-imbagga e kanday “Hipa huyyan nekapy? Kele hin-appil ni peteg? Tam et-eteng kabaelan ni ehel tu. Deh nunman e anin ni neihuklung ni dimonyoh ey tuka e-kala!” <sup>37</sup> Et mandingngel hu meippangep nan Jesus di kebebbley di nanlinikweh diman.

*Ya nampangkalan Jesus ni degeh idan tuu  
(Matthew 8:14-17; Mark 1:29-34)*

<sup>38</sup> Immehep hi Jesus di simbaan et lumaw di baley Simon. Himmegep ey inhel dan hi-gatu e kamandedgeh hi inan ahwan Simon e nemahhig hu atung ni annel tu. Kan idan etan ni tuun hi-gatu ey “Ekal mu anhan degeh tu.” <sup>39</sup> Neihnup hi Jesus di kad-an tu et ehlen tun me-kal hu atung tu ey na-kal tu-wangtu et uminah ni an mengippaptek ni kenen di Jesus.

<sup>40</sup> Kamangkelinug aggew ey nan-i-liddan katuuuu hu kamampandedgeh di kad-an Jesus. Et ita-pew tu ngamay tun hi-gada et mangka-kal degeh da. <sup>41</sup> Anin idan nehuklungan ni dimonyoh ey nan-ekal tudda neihuklung. Hedin me-kal ida ey ida ni kaumtetuk e kanday “Hi-gam hi Christo e U-ungngan Apu Dios.” Nem eleg i-abulut Jesus ni umhapit ida, tep eleg tu pinhed ni hi-gada mengippeamta e hi-gatu hi Christo.

† 4:31 4:31 Hedin yadda Jews ey ya Sabaduh hu daka ngillinan aggew.

*Ya nantuttudduan Jesus di kebbebley di Galilee  
(Mark 1:35-39)*

<sup>42</sup> Kamangkewa-wan nunman ey hini-yan Jesus humman ni bebley et lumaw di a-allaw tun endidda tuu et an mehahhakkey diman. Entanni ey an nanhamak idan tutu-u hi Jesus. Himmak da et ipatna dan impeked. <sup>43</sup> Nem kan Jesus ni hi-gaday "Eleg, tep mahapul ni umlawwak di edum ni bebley ni an mengippeamtan meippanggep ni nan-apuan Apu Dios, tep huyya nengitu-dakan tun hi-gak." <sup>44</sup> Et lumaw hi Jesus ni an mantuttuddud kesimsimbanan idan Jews di Judea.

## 5

*Ya nengaygan Jesus ida etan ni tuun matebukul ni deleg ma-lat mambalin idan disipol  
(Matthew 4:18-22; Mark 1:16-20)*

<sup>1</sup> Hakey ni aggew ni kaman-eh-ehnung hi Jesus di gilig ni Baybay e Genesaret ey ida kamampampippilliwi hu dakel ni tuun umlaw di kad-an tun an mengngel ni tuka ituttuddun ehel Apu Dios. <sup>2</sup> Inang-ang Jesus hu dewwan bangkad gilig ni baybay, e endi nanlugan, tep immehep ida etan kan bangkan an nengullah ni tabukul da. <sup>3</sup> Himmegep hi Jesus di bangkan Simon et ehelen tu e geggenaden tun eket di baybay. Et yumudung et ituluy tun mantuttuddudan tutu-un neamung di gilig ni baybay.

<sup>4</sup> Ginibbuu tun nantuttuddu et kantun Simon ey "Palaw yud petek ni edallem eya bangka et yad man hu pantebbukulan yu." <sup>5</sup> Hinumang Simon e kantuy "Apu, inlapu min nahdem ingganah ni kamangkewa-wan mantebbukul ey endin hekey sinebukul mi, nem hedin huttan hu kammu, ku anin."

<sup>6</sup> Et ita-mel da tabukul da ey netabukul nunman hu dakel ni deleg ey nemahhig kumamman e kamangkebi-ki etan tabukul da. <sup>7</sup> Et aygan dadda edum dan wadad hakey ni bangka et mambabaddang ida. Impekapnu da etan dewwan bangkan deleg et kamangkelneng kumedek hu bangka da.

<sup>8</sup> Inang-ang Simon huyyan kadinnakel ni sinebukul da ey nandukkun di kad-an Jesus et kantuy "Entan keihnuu ni hi-gak, tep nelilliwatannak." <sup>9-10</sup> Inhel tu huyya tep natngan peteg. Anin idan edum tu et yadda etan enak Sebedi e di James nan John et natngadda dama. Kan Jesus nan Simon ey "Entan takut! Meippalpun nunya ey ka an mengewwis ni tuun mengu-unnud ni hi-gak." <sup>11</sup> Impadekal da bangka da et hi-yanen dan emin et makilaw idan Jesus.

*Ya nangkalan Jesus ni degeh etan ni tuun kamanleprosi  
(Matthew 8:1-4; Mark 1:40-45)*

<sup>12</sup> Hakey ni aggew ey limmaw hi Jesus etan di hakey ni bebley ey wadadman hu tuun kamanleprosi. Inang-ang tu hi Jesus ey nandukkun di kad-an tu et kantuy "Apu, hedin pinhed mu, ekal mu anhan degeh ku, tep amtak e dammutun e-kalen mu."

<sup>13</sup> Kimpan Jesus hu annel nunman ni tuu et kantuy "Pinhed ku. Na-kal kaya law huttan ni degeh mu." Ey pinhakkeyey na-kal numan hu degeh tu. <sup>14</sup> Sinugun Jesus e kantuy "Entan tu i-i-hel di edum ni tuu huyyan impahding kun hi-gam. Panna-ud ka kuman elaw di kad-an ni padi et mu peang-ang ni hi-gatu e na-kal degeh mu. Ey pan-appit kan Apu Dios e humman hu intugun lan Moses ni nunman, ma-lat pengamtan ni tutu-u e na-kal hu degeh mu."

<sup>15</sup> Inhel Jesus etan ni tuu e eleg tu e-ehhela impahding tu, nem nan-amta damengud kebbebley et umlidida dakel ni tuud kad-an tun an mengngel ni tuka ituttuddu niya mampe-kal ni degeh da. <sup>16</sup> Nem anin ni dakel hu tuun kaum-alin Jesus et humman ni limmaw di endi bebley et an mehahhakkey diman ni mandasal.

*Ya nangkalan Jesus ni dahuy etan ni tuu  
(Matthew 9:1-8; Mark 2:1-12)*

<sup>17</sup> Hakey ni aggew ni kapantuttudduin Jesus ey wadadda Pharisee niyadda etan kamantuttuddun Tugun Moses ni nangkaldud kebbebley di Galilee, yad Jerusalem niyad Judea ni mekideddengngel ni tuka ituttuddu. Hedin hi Jesus, man wada kabaellan Apu Dios ni hi-gatu, mukun kabaellan tun mengkal ni degeh. <sup>18</sup> Entanni ey wadadda immalin nengiatang ni nedahuy ni tuu tep neparalize. Ida kaum-enang-ang ni dellanen dan mengillaw kad-an Jesus, <sup>19</sup> nem endi dellanen da, tep dakel tuu. Et iklab dad atep et gumu-kang ida et buyunen da etan nedahuy ni neiayyud di petek Jesus.

<sup>20</sup> Inang-ang Jesus e wada hu daka pengullug, et kantu etan ni nedahuy ey "Agik, pinesinsahan ku liwat mu."

<sup>21</sup> Yadda Pharisee et yadda kamantuttuddun Tugun Moses ey kanda nemnem day “Hipa ni-ngangu huyyan tuun tuka la-pahi hi Apu Dios? Endi edum ni kamemessinsah ni liwat, nem ebuh hi Apu Dios.”

<sup>22</sup> Inamtan Jesus hu daka nemnemnema et kantun hi-gaday <sup>23</sup> “Kele henin nuntan yuka pannemnem? Hipa nelallakkah? Ya kaney ‘Nepesindahan hu liwat mu,’ winu ‘Inah ka! Alam hu ayyud mu et umenamut ka?’ <sup>24</sup> Nem imay et peang-ang kun hi-gayu e hi-gak e Pengulwan ni emin ni tuu ey wada kelebengak eyad puyek ni memessinsah ni liwat.” \*

Et ihanggan Jesus etan ni nedahuy et kantuy “Inah ka, alam hu ayyud mu et umenamut ka.”

<sup>25</sup> Ey pinhakkeyey imminah tu-wangu etan nedahuy e inang-ang ida etan ni dakel ni tuu et alen tu ayyud tu et lumaw di baley da, e tuka daydayawa hi Apu Dios.

<sup>26</sup> Natgaddan emin hu tuun nenang-ang et dayawen da dama hi Apu Dios. Kanday “Nakkayang! Hipa huyyan tayu inang-ang nunya?”

*Ya nengayagan Jesus nan Levi ni disipol tu*

*(Matthew 9:9-13; Mark 2:13-28)*

<sup>27</sup> Negibbuh huyya et kamenglaw la hi Jesus ey inang-ang tu hi Levi e kaman-emption ni buwis ni yimmudung di upisinah tu. Kan Jesus ni hi-gatuy “Pakilaw kan hi-gak.” <sup>28</sup> Pinhakkeyey imminah hi Levi et hi-yanen tu upisinah tu et makilaw nan Jesus.

<sup>29</sup> Entanni ey nampahemul hi Levi di baley da tep impalsian tu hi Jesus. Ey dakel ida kaman-emption ni buwis niyadda edum ni tuun nekiheyuyung nan Jesus. <sup>30</sup> Nem yadda etan Pharisee et yadda kamantuttuddun Tugun Moses ey sinemyaw dadda disipol Jesus e kanday “Kele kayu kamekikkan idan kaman-emption ni buwis niyadda edum dan neliwatan?”

<sup>31</sup> Hinumang Jesus et kantun hi-gaday “Ya kamandedgeh hu kamanheppul ni doktor, beken ida etan ni endi degeh da. <sup>32</sup> Henin hi-gak e immali-ak ni an memaddang idan neliwatan ma-lat mantutuyyuddan liwat da. Eleggak umlin memaddang idan tuun kanday endi liwat da.”

*Ya meippanggep ni kapantetpeli*

*(Matthew 9:14-17; Mark 2:18-22)*

<sup>33</sup> Kandan hi-gatuy “Kele yadda disipol John et yadda Pharisee ey ida kamantetpel ni daka pandaydayawin Apu Dios, ey hedin yadda ngu disipol mu ey eleg ida mantetpel?”

<sup>34-35</sup> Hinumang Jesus et kantuy “Kaw ida kamantetpel hu gagayyum ni lakin mangkasal? Eleg, tep wada etan gayyum dan lakin manhehngget. Nem hedin wada memettey etan ni nanhenget, ey yan nunman ali law pantetpelan idan gayyum tu. Yadda disipol ku ey heni gayyum ni manhehngget tep yan nunyan wada-ak di kad-an da ey eleg ida mantetpel, nem hedin endi-ak ali law di kad-an da, ey mantetpel ida tep ya pannemnem dan hi-gak.”

<sup>36</sup> Kan mewan Jesus ni hi-gaday “Endi tuun tu pikgaten hu baluh ni balwasi et ittuftup tud daan ni balwasi. Tep hedin hanniman, man ayyuh law etan baluh ni balwasi niya eleg meidngeng hu baluh ni meittuftup di daan ni balwasi.

<sup>37</sup> Hanniman dama etan katat ni ha-addan ni meinum e eleg ihha-ad hu pakekapan meinum di kimmelhin katat, tep hedin um-atung etan meinum, man mebeghi etan neitluan tu et umkawah kumedek anin etan meinum. <sup>38</sup> Et humman hu, mahapul ni yad pakekapan katat hu pengihha-adan ni pakekapan meinum.” † <sup>39</sup> Kantu mewan ey “Ya tuun impeingha tu napget ni meinum ey eleg tu pinhed ni innum hu pakekapan meinum, tep ya inamta tu ey kayyagud hu napget ni meinum.”

## 6

*Ya meippanggep ni Sabaduh*

*(Matthew 12:1-8; Mark 2:23-28)*

<sup>1</sup> Hakey ni Sabaduh ey indalan di Jesus di payew et puma-sing ida etan disipol tun pagey et kukkussimen da. <sup>2</sup> Kan idan edum ni Pharisee ey “Kele kayu pimma-sing ni pagey ey pi-yew tep Sabaduh?” <sup>3-4</sup> Hinumang Jesus et kantuy “Kaw eleg yu bidbiden etan

\* **5:24** 5:24 [23-24] Hedin yadda Jews ey inamta da e hi Apu Dios ni ebuh hu kamemessinsah ni liwat. Ey inamta da e hi Apu Dios ni ebuh hu kamengkal ni degeh. Et humman hu, yan nengipeyagudan Jesus etan ni nedahuy ey impeang-ang tu mewan e wada dama kabaelan tun memessinsah ni liwat henin nan Apu Dios. Huyya nengipeang-angan Jesus ni kinaDios tu. † **5:38** 5:38 [36-38] Ya keibbellinan ina-abbig Jesus ey eleg mabalni ni an pan-e-dum hu elaw ni nebayag et ya baluh ni elaw.

neitudek ni impahding David eman ni neupaan tu et yadda etan edum tun binsikan da tep ya buhul da? Endi da pengellaan ni kenne da ey neupaddan peteg et humgep hi David di Tabernacle e baley Apu Dios, et tu alen etan sinapay ey pi-yew ni pengngannan ni linggeman ni tuu, tep ebuh hu padin kamengngan ni nunman. \* <sup>5</sup> Hi-gak e Pengulwan ni emin ni tuu hu mengippanghel ni hipan kamepi-yew niya hipa eleg mepi-yew ni Sabaduh e kamengillin ni aggew.”

*Ya nengipeyaggudan Jesus ni negikuy ni ngamay etan ni tuu*  
(Matthew 12:9-14; Mark 3:1-6)

<sup>6</sup> Hakey mewan ni Sabaduh e himmegep hi Jesus di simbaan ni an mantuttuddu ey wada hu tuun negikuy hu wannan ni ngamay tu. <sup>7</sup> Yadda etan kamantuttuddun Tugun Moses et yadda Pharisee ey ida kaumhamahamak ni pebehhul dan Jesus et daka hellipat-i hedin peyaggud tu ngamay etan ni tuu ni nunman ni Sabaduh e kamengillin ni aggew. <sup>8</sup> Nem hi Jesus ey inamta tu daka nemnemnema et kantun etan ni tuun negikuy ngamay tuy “Ikay deya et umehneng kad hinanggaddan eyan tutu-u.” Et lumaw humman ni tuud kad-an Jesus et umehneng. <sup>9</sup> Et kan Jesus ida etan ni tuu ey “Wada ibbagak ni hi-gayu. Hipa kan ni Tugun Moses ni dammutun ippahding ni Sabaduh e kamengillin ni aggew? Kaw ya kayyaggud hu ippahding ma-lat bumaddang ita winu ya lawah hu pehding ni umbabhah? Kaw gapu tep Sabadu ey diman hu tuu et matey winu ippaptek ma-lat tumegu?” Nem endi kaumhumang.

<sup>10</sup> Inhel Jesus huuya ey in-ang-ang tuddan etan ni tutu-un wadadman et kantun etan ni tuun negikuy ey “Ukyad mu ngamay mu.” Inukyad tu ngamay tu ey kayyaggud law. <sup>11</sup> Nem yadda Pharisee ey nemahhig bunget dan nengipeyaggudan Jesus ni ngamay etan tuu, et panhuhummanganan da pehding dan memetty ni hi-gatu.

*Ya nemilian Jesus ida etan ni Hampulut dewwan apostles tu*  
(Matthew 10:1-4; Mark 3:13-19)

<sup>12</sup> Hakey ni aggew ey limmaw hi Jesus di duntug ni an mandasal et manha-ad diman ni hanlabbi. <sup>13</sup> Yan newa-waan tu ey inaygan tudda etan disipol tu et pilien hampulut dewwan hi-gada et ngadanan tuddan apostles. <sup>14-16</sup> Yadda pinilin Jesus ey hi Simon e nginedanan tun hi Peter, hi Andrew e agin Simon, hi James, hi John, hi Philip, hi Bartolomew, hi Matthew, hi Tomas, hi James e u-ungngan Alphaeus, hi Simon e Zealot, † hi Judas e u-ungngan James et hi Judas Iskariot e nengihdul nan Jesus.

*Ya neiunudan ni dakel ni tuu nan Jesus ma-lat dengelen da ituttuddu tu niya ma-lat ekalen tu degeh da*

(Matthew 4:23-25)

<sup>17-18</sup> Nandayyud Jesus et umehneng ida etan di nedekdeklan ey neamung ida etan dakel ni kamengu-unnud ni hi-gatu et yadda dakel ni tutu-un nalpud Jerusalem, yad edum ni bebley di Judea, et yaddad bebley di gilig ni baybay di Tyre et yad Sidon. Immali idad kad-an tun an mengngel ni ituttuddu tu niya da pe-kal hu degeh dan hi-gatu. Anin idan nehuklungan ni dimonyoh et immalidda et pan-ekalen Jesus hu dimonyoh ni nangkeihuklung ni hi-gada. <sup>19</sup> Wada hakkey idan etan ni kamandedgeh ey pinhed dan keppaen hi Jesus, tep anin daka kap-an ebuh hi Jesus et kame-kal hu degeh da.

*Ya pan-am-amlengan niya panyaggudan idan kamengullug nan Jesus*  
(Matthew 5:1-12)

<sup>20</sup> In-ang-ang Jesus idan disipol tu ey kantuy “Hi-gayuddan newetwet ey man-am-amleng kayu, tep hi-gayu hu meilla-kam di kapan-ap-apuin Apu Dios. <sup>21</sup> Hi-gayun kameu-upan nunya ey man-am-amleng kayu tep mepeppehel kayulli. Hi-gayun kaumnangih ni nunya ey man-am-amleng kayu tep mangngi-ngi-ngi kayulli. <sup>22</sup> Man-am-amleng kayu hedin dakeyu kabellawan edum ni tuu e dakeyu kaappila et dakeyu kapihhula niya anggebe-hel dakeyu gapuh ni yuka pengullugin hi-gak e Pengulwan ni emin ni tuu. <sup>23</sup> Kayyaggud tu pan-am-amleng kayu hedin henin nunman hu kapehding ni tuun hi-gayu, tep wada indaddan Apu Dios ni panyaggudan yud kabunyan. Heni kayudda lan eman ni prophets Apu Dios ni impangligat idan ammed idan kamengippeliligat ni hi-gayun nunya. <sup>24</sup> Hi-gayuddan kedangyan, kayyaggud hu biyag yun nunya, nem anggehemmek kayulli, tep tellaken yullin emin kinedangyan yu. <sup>25</sup> Hi-gayuddan wadan emin hu mahapul tun nunya, anggehemmek kayu tep mangkulakulang kayulli. Hi-gayun kamangngi-ngi-ngin nunya, anggehemmek kayulli

\* **6:3-4** 6:3-4 Beken ni padi hi David et yadda edum tu, nem kinan da etan sinapay ey ebuh padin dammutun mengngan ni nunman ni sinapay. Nem eleg ibilang Apu Dios humman ni liwat nan David et yadda disipol tu.

† **6:14-16** 6:14-16 Ya Zealot ey hakey ni grupuh ni tuun eleg meminhed ni mengu-unnud ni gubilnun Rome.

tep umlelemyung kayulli ey umnanginangih kayulli. <sup>26</sup> Hi-gayuddan kaingngadnin emnin ni tuun kayyaggud, anggehemmek kayulli, tep henin nunman dama hu kan dadda lan eman idan beken ni makulug ni prophet, tep ya kakulugan tu ey beken kayun kayyaggud.

*Ya peminhedan idan kamengullug Jesus ni buhul da  
(Matthew 5:38-48; 7:12)*

<sup>27</sup> Nem hi-gayuddan neminhed ni mengngel ni ehel ku, mahapul ni pinheden yu damadda buhul yu niya ipahding yu kayyaggud idan tuun anggebe-hel dakeyu. <sup>28</sup> Anin idan kamengiddut niya kamengippehelheltap ni hi-gayu ey idasali yudda ma-lat idwat Apu Dios hu panyaggudan da. <sup>29</sup> Hedin ampingen dakeyu, ey ihulug yu. Hedin wada tuun mengellan edah ni balwasi yu, idwat yu pay etan nei-dahan tu. <sup>30</sup> Idwat yu hu kaibbaga etan ni kamambeggan baddang ni hi-gayu. Ey hedin kantu et wada illan tuun hi-gayu, man entan tu pilit ni bangngaden. <sup>31</sup> Ya pinhed yun ippahding ni edum yun tuun hi-gayu ey humman dama ipahding yun hi-gada.

<sup>32</sup> Hedin ebuh ida etan tuun neminhed ni hi-gayun pinheden yu, man eleg dakeyu tetbalan Apu Dios, tep anin idan neliwtan et hanniman hu daka ippahding. <sup>33</sup> Hedin ebuh ida kamengippahding ni hi-gayun kayyaggud ni pengippahdingan yun kayyaggud, man eleg dakeyu tetbalan Apu Dios, tep anin idan neliwtan et hanniman hu daka ippahding. <sup>34</sup> Hedin ebuh ida etan tuun inamta yun hambayad da hu utang dan peuttangan yu, ey eleg dakeyu tetbalan Apu Dios, tep hanniman dama kapehding idan neliwtan. <sup>35</sup> Beken ni hanniman hu pehding yu, nem mahapul ni pinheden yudda buhul yu et ipahding yu kayyaggud ni hi-gada ey pautangi yu etan tuun eleg tu hangkipuh ni beyyadan hu utang da. Hedin ippahding yudda huttan, ey et-eteng ali iddawat Apu Dios ni panyaggudan yu niya ibbilang dakeyullin u-ungnga tu. Tep hi Apu Dios ey tudda kaiddawsin panyaggudan ida tuun neliwatan et yadda tuun eleg mansalamat ni hi-gatu. <sup>36</sup> Hemek yudda edum yun tuun henin Apu Dios e Ameyud kabunyan e mahmek.

*Ya elaw ni pengibbillang idan kamengullug ni edum dan tuu  
(Matthew 7:1-5)*

<sup>37</sup> Entan tu pambalin hu annel yun huwet, tep beken ni hi-gayu menghel hedin lawah winu kayyaggud hu impahding idan edum, nem ngenamung hi Apu Dios. Hedin pehding yu humman ey mekastigu kayu. Hemek yudda edum yun tuun nambahul ni hi-gayu et beken ni nealay kanyuy mekastigudda, ma-lat hemeken dakeyu daman Apu Dios hedin mambehul kayu. Pesinsahi yu hu kamambehul ni hi-gayu ma-lat pesinsahan daman Apu Dios hu bahul yu. <sup>38</sup> Entan ukuh tun umbaddang ni edum yun tuu hedin mahapul da baddang yu, tep endi ukuh Apu Dios ni umbaddang ni hi-gayu. Tep hedin eleg yu ukkuhan umbaddang ni edum yun tuu, ey eleg dama ukkuhan Apu Dios ni umbaddang ni hi-gayu, nem nehuhulluk anhan law hu ibbaddang tun hi-gayu."

<sup>39</sup> Nan-a-abbig hi Jesus e kantuy "Ya nekulap ey eleg mabalin ni tu ippangulu hu edum tun nekulap, tep man-e-gah ida kumedek di nantengillig. <sup>40</sup> Hanniman dama hu kaman-eddal, e eleg maiinggeh di mittuduh tu. Pakkaw gibbuhen tu adal tu et han dammutun maiinggeh di mittuduh tu.

<sup>41-42</sup> Eleg mabalin ni yu e-kalen hu butad matan edum yu hedin wada et-eteng ni butad mateyu. Mahapul ni e-kalen yu neibutad mateyun etteteng et han yu e-kala butad matan edum yu. Maitek kayun peteg hedin wada butad mateyu ey kanyuy e-kalen yu butad matan edum yu. Pabukul yun e-kalen butad mateyu et han yu ipatnan e-kalen hu butad matan edum yu. ‡

*Ya keyew et ya lameh tu  
(Matthew 7:16-20; 12:33-35)*

<sup>43</sup> Ya kayyaggud ni keyew ey kayyaggud dama hu lameh tu. Ya lawah ni keyew ey eleg tu illameh hu kayyaggud. <sup>44</sup> Kaw beken ni makulug e ya keyew ey kameamtad lameh tu hedin kayyaggud winu lawah? Inamta tayu e ya etan hebit niya gulun ey eleg ida umlameh ni kayyaggud ni mekkan. <sup>45</sup> Henin tuu, e ya etan kayyaggud nemnem tu ey kayyaggud dama tuka pehpehding. Nem ya tuun lawah nemnem tu ey lawah dama tuka pehpehding. Kameamtad ehel ni tuu hedin kayyaggud winu lawah hu wadad nemnem tu.

*Ya a-abbig meippanggep ni dewwan nemehwat ni baley  
(Matthew 7:24-27)*

‡ **6:41-42** 6:41-42 Ya keibbellinan tu huyya ey ang-ang mu ni hu bahul mu et han mu ang-anga hu bahul ni edum mun tuu. Ey tugun mu ni annel mu et han mu tuguna hu edum mun tuu.



<sup>46</sup> Kele kanyuy hi-gak hu Apu yu ey eleg yu u-unnuda hu nakka ittugun? <sup>47</sup> E-helen kun hi-gayu hu elaw ni tuun tuka dedngela niya tuka u-unnuda hu nakka ittutdu. <sup>48</sup> Humman ni tuu ey kamei-ellig etan di tuun nelaiing ni nengapyan baley tu, tep imbehwat tud batu. Immali pewek niya na-let ni udan et luma-pih dillud wangwang, et datngen tu etan baley, nem eleg metukkad tep neihammad. <sup>49</sup> Nem ya etan tuun dingngel tu hu nakka ittutdu, nem eleg tu u-unnuda ey kamei-ellig etan di tuun eleg tu ikapya hu pegnad ni nengibehwatan tun baley tu. Et hedini immali pewek ey nealay netukkad humman ni baley et mekababbah."

## 7

*Ya nangkalan Jesus ni degeh etan ni bega-en*  
(Matthew 8:5-13)

<sup>1</sup> Ginibbuh Jesus humman ni tuka pan-itutdu et mambanggad di Capernaum. <sup>2</sup> Wadamman etan ap-apun hanggatut ni sindalun wada bega-en tun nemahhig degeh tu et kamangkatatey. Nakappinhd etan ni ap-apu humman ni bega-en tu. <sup>3</sup> Dingngel tu e wada hi Jesus et umitu-dak ni ap-apuddan Jews ni an mengewwit ni hi-gatu ma-lat ekalen tu degeh etan ni bega-en tu. <sup>4</sup> Limmaw ida etan intu-dak tud kad-an Jesus et kandan Jesus ey "Ikay kunu anhan e kan etan ni ap-apun sindalu et mu ekalen degeh etan ni bega-en tu. <sup>5</sup> Tep ma-nut beken ni edum tayun Jews, nem nakappinhd daitu niya hi-gatu numan hu nengipebehwat ni simbaan tayu."

<sup>6</sup> Et makilaw hi Jesus, nem ida kamenetteng ey nenu-dak mewan etan ap-apu. Kandan Jesus ey "Heninnuy hu inhd ni ap-apu mi, kantuy <sup>7</sup> 'Apu, anin ew entan alim et eleg ka maheli-wa. Nakka umbaing ni ellian mud baley ku niya nakka umbaing ni um-alin menammun hi-gam. Anin ni muka ehelan ebuh et inamtak e me-kal degeh tu. <sup>8</sup> Inamtak elaw ni saad, tep impeinghak ni mengu-unnud ni kae-helan ap-apuk ey anin ni hi-gak et hakeyyak daman ap-apun sindalu. Hedini kangkun sindaluk ey 'Lakkay,' ey kaumlaw. Hedini mewan kangkuy 'Ikay,' ey kaum-ali. Ey hedini kangkun bega-en ku ey 'Iphahding mu diyyay,' ey tuka ipahding." \*

<sup>9</sup> Dingngel Jesus huyya ey natngan kapengullug nunman ni ap-apu et iang-ang tudda etan ni neamung ni neinud ni hi-gatu et kantuy "Endi ni nak inang-ang ni henin nunya hu tuka pengullug ni hi-gak eyad Israel."

<sup>10</sup> Nambanggad ida humman ni intu-dak ni ap-apu ey inang-ang da e na-kal tu-wangu degeh etan ni bega-en.

*Ya nenagwan Jesus ni u-ungnga etan ni nebalun bii*

<sup>11</sup> Entanni ey limmaw hi Jesus di Nain ey nekilaw ida disipol tu et yadda dakel ni tuu. <sup>12</sup> Ida kamenetteng di Jesus etan di bebley ey dinammu dadda hambenteg ni an mengikkullug etan ni netey ni binugtung ni u-ungngan etan ni nebalun bii ey dakel hu edum dan bimbley ni nekilaw. <sup>13</sup> Inang-ang Jesus etan nebalu ey et-eteng hemek tun hi-gatu et kantuy "Entan nangih."

<sup>14</sup> Et lumaw di kad-an etan ni netey et kap-en tu etan lungun ey immehngeng ida etan tuun nengiatng. Kantuy "U-ungnga, bangun ka!" <sup>15</sup> Bimmangun etan netey ey himmapit et palaw Jesus di kad-an inetu.

<sup>16</sup> Natngaddan emin hu tuun wadamman et daydayawen da hi Apu Dios. Kanday "Iyyadyan hi-gatsu hu prophet Apu Dios ni et-eteng kabaalan tu. Himmek Apu Dios hu tuu tu et umitu-dak ni menellaknib ni hi-gatsu." <sup>17</sup> Nandingngel huyyan ipahding Jesus di kebbebley di Judea et yad nanlinikweh diman.

*Ya nenu-dakan John ni disipol tud kad-an nan Jesus*  
(Matthew 11:2-19)

<sup>18</sup> Limmaw ida disipol John di kad-an tud kallabbuttan et ehelen dan emin ni hi-gatu hu ipahding Jesus. Et itu-dak John hu dewwan hi-gadad kad-an Jesus. <sup>19</sup> Kantun hi-gaday "Yu ibegan hi-gatu e kanyuy 'Kaw hi-gam hu inhd lan Apu Dios ni um-ali, winu wada hin-appil ni hehgeden mi?" <sup>20</sup> Limmaw ida etan intu-dak John di kad-an Jesus et kanday "Kan John e kamemenyag ey 'Kaw hi-gam kunu hu inhd lan Apu Dios ni itu-dak tun hi-gami winu wadalli hin-appil ni hehgeden mi?" "

<sup>21</sup> Yan nunman ey neipahdih ni nan-ekal Jesus hu degeh et yadda neihuklung, niya impebanggad tu kapenang-ang idan nekulap. <sup>22</sup> Hinumang Jesus humman ni imbageda e kantuy "Kaibanggad kayud kad-an John et yu ehelen ni hi-gatu hu dingngel yu niya

\* **7:8** 7:8 Ya pinhd tun e-helen ey hedini han-ipahding nunman ni tuu huyya, ey nema-ma-man Jesus e wada kabaalan tun mengkal ni degeh ni bega-en nunman ni tuu, anin ni ebuh ehel tu.

inang-ang yu e ida law kaum-ang-ang hu nekulap, ida kaumdalan hu nepi-day, na-kal degeh idan kamengmengpuh annel da, ida law kaumdedngel hu netuleng, netagwan ida netey niya kamangkeituttuddudan newetwet hu et-eteng ni impeminhed Apu Dios ni hi-gada. <sup>23</sup> Ey ehel yun John e um-amleng hu tuun pannananeng tun ingganah hu tuka pengullug ni hi-gak."

<sup>24-26</sup> Limmaw ida la humman ni disipol John ey kan Jesus ida etan ni neamung ey "Hipa ninemnem yun an ang-angen eman ni linawwan yud desert di kad-an John? Kaw ya tuun kamandewadewa e kamei-ellig di katlubbung ni kapellupelluyan dibdib, winu ya tuun nambalwasin nekangngina? Beken, tep ya kamambalwasin nekangngina ey wadad baley ni patul, eleg umlaw di desert. Inamtak et ya pinhed yun an ang-angen ey ya prophet, et makulug ni humman ni yu inang-ang ey humman keta-ta-geyyan ni prophet e hi John ngadan tu. <sup>27</sup> Tep heninnuy hu neitudek ni meippanggep ni hi-gatu: 'Hi-gak e hi Apu Dios ey pemengnguluk eya mengituttuddun meippanggep ni hi-gam et han ka dateng.' "

<sup>28</sup> Intuluy Jesus ehel e kantuy "Pinili dedan Apu Dios hi John ni keta-ta-geyyan ni emin ni tuu. Nem ya etan kebabbabahan di nan-ap-apuan Apu Dios ey eta-ta-gey nem hi-gatu."

<sup>29</sup> Yadda etan tuu nampebenyag nan John, anin etan ni kaman-emmung ni buwis ni nampebenyag dama ey dineyaw da hi Apu Dios ni nangngelan dan nunman ni inhel Jesus. <sup>30</sup> Nem yadda Pharisee et yadda kamantuttuddun Tugun Moses ey kinehing da intuttudun John meippanggep nan Apu Dios, mukun eleg ida ngu mampebenyag ni hi-gatu.

<sup>31</sup> Kan mewan Jesus ey "Hipa na-mu pengi-ingnehan kun elaw yun tutu-un nunya? <sup>32</sup> Heni kayuddan etan ni u-unggan kamampan-a-ayyam di mulkaduh. Yadda etan edum ey kandaddan edum day 'Nanggangangha kamin pan-am-amlengan, nem eleg kayu meneyyaw. Ey impatna mi mewan ni mengia-appeh ni kalemyungi, nem eleg kayu umlemyung.' Heni kayuddan nunyan u-ungnga, tep endi maptek ni pinhed yu. Eleg yuwak u-unnuda niya eleg yu dama u-unnuda hi John. <sup>33</sup> Tep immali hi John e kamemenyag e hin-appil tuka kenna ey eleg um-inum ni kaumbuteng, nem kanyuy 'Wada dimonyoh ni neihuklung ni hi-gatu.' <sup>34</sup> Ey immali-ak e Pengulwan ni emin ni tuu ey nakka mengngan niya nakka menginnum ni meinnum ey kanyuy nadmuttak, nakka mambutteng niya nakka mekiiedueddum idan kaman-emmung ni buwis niyadda edum ni neliwtan.

<sup>35</sup> Nem neihla kayu, tep yadda tuun kamengu-unnud ni elaw John et ya elaw ku ey hi-gada hu kei-ang-angan ni kakinyayaggud ni elaw Apu Dios niya kalinaing tu."

<sup>36</sup> Hakey ni aggew ey inayagan etan ni hakey ni Pharisee e hi Simon hi Jesus ni an mekikkan di baley da et lumaw hi Jesus. <sup>37</sup> Wada etan biidman ni bebley e nan-amtan lawah elaw tu e makilaki. Dingngel tu e kamengngan di Jesus di baley etan ni Pharisee et lumaw e wada intabin tun hambusih ni bangbanglun nekangngina. <sup>38</sup> Himmegep et lumaw di dingkuggan Jesus di petek ni helitu et kamannannangngih ey mangke-gah lewa tud helin Jesus et pu-nadan tun bewek tu. Intumuk tu angah tud helin Jesus et duyagan tun bangbanglu. <sup>39</sup> Inang-ang etan ni Pharisee ni nengayag nan Jesus humman ey kantud nemnem tuy "Gullat ni prophet Apu Dios huyyan tuu et amta tu-et e nelilliwatan eya biin kamengitettenged ni hi-gatu."

<sup>40</sup> Inamtan Jesus humman ni wadad nemnem tu et kantuy "Simon, wada a-abbigen kun hi-gam." Kan Simon ey "Hipa humman e Apu?" <sup>41</sup> Kan Jesus ey "Wadadda dewwan tuun immutang ni pihhuh etan ni hakey ni tuu. Ya inutang ni hakey ey limanggatut. Ya etan hakey ey nelima. <sup>42</sup> Entanni ey eleg ida pakebayad et eleg law pabeyad etan ni nampautang." Kan Jesus nan Simon ey "Hipan hi-gadan dewwa hu e-etteng impeminhed tun etan ni nampautang?"

<sup>43</sup> Hinumang nan Simon e kantuy "Ya etan nengutang ni limanggatut." Kan Jesus ni hi-gatuy "Neiptek huttan ni inhumang mu."

<sup>44</sup> Inwingin Jesus etan ni bii et kantun Simon ey "Kaw inang-ang mu impahding eyan bii? Himmegeppak eyad baley mu ey eleg ka umidwat ni danum ni pengullah kun helik, nem huyyan bii ey inulahan tu helik ni lewatu et pu-nadan tun bewek tu. <sup>45</sup> Ey eleg muwak akwalen ni himmegepan ku eyad baley mu ey humman hu elaw tayu, nem yan eya bii ey eleg tu iwwalak helik. <sup>46</sup> Eleg mu lanaen uluk, nem hedin hi-gatu, man dinuyagan tu helik ni bangbanglu. <sup>47-48</sup> E-helen kun hi-gam e anin ni dakel liwat tu et nepesinsahan law, tep impeang-ang tu et-eteng ni impeminhed tun hi-gak. Nem yadda etan tuun ekket liwat dan nepesinsahan ey ekket dama impeminhed dan hi-gak." <sup>49</sup> Yan nangngelan idan nekikan ni nunman ey kandad nemnem day "Kele hipa huyyan

tuun han pesinsah tu liwat ni tuu?" <sup>50</sup> Kan Jesus etan ni bii ey "Ya muka pengullug hu nepesinsahan ni liwat mu. Lakkay di baley yu et pelinggep mu law nemnem mu."

## 8

*Yadda biin nekikkillaw nan Jesus*

<sup>1</sup> Entanni ey limmaw hi Jesus di kebebbebley ni an mantuttuddun meippanggep ni nan-ap-apuan Apu Dios. <sup>2</sup> Nekilaw ida etan Hampulut dewwan disipol tu et yadda edum ni biin ingkal Jesus hu degeh da et yadda dimonyoh ni neihuklung ni hi-gada. Humman idan biin nekilaw ey hi Maria Magdalena e na-kalan ni pitun dimonyoh ni neihuklung, <sup>3</sup> hi Juana e ahwan Kusah e kamampaptek di baley Herod e ap-apu, hi Susana et yadda edum ni bii. Hi-gada hu kaumbaddang ni um-idwat ni mahapul Jesus et yadda disipol tu.

*Ya a-abbig meippanggep etan ni inha-bug dan bukel ni intanem*  
(*Matthew 13:1-9; Mark 4:1-9*)

<sup>4</sup> Hakey ni aggew ey neamung idad kad-an Jesus hu hantapug ni tuun nalpud kebebbebley et man-ab-abig e kantuy <sup>5</sup> "Wada etan hakey ni tuun an nantanem e nanhinna-bug tu bukel ni intanem tu. Wadadda nangka-gah ni bukel di dalan et panigsin ni tuu niya kinan ni sisit edum. <sup>6</sup> Et yadda edum ey na-gah idad mabetu ey ma-nut simmemel ida, nem anggegannuy nakpit ida, tep meingpih hu puyek et ekket hu intemeg tun danum. <sup>7</sup> Na-gah di magulun hu edum ey inhengan idan gulun. <sup>8</sup> Yadda edum ey na-gah idad kayyaggud ni puyek ey kayyaggud temel da niya mangkalemech ida." Ginibbuh tu huyyan ina-abbig ey kantuy "Dengel yu huyya hedin wada tangila yu ma-lat amtaen yu hu pinhed tun e-helen."

*Ya intuttuddun Jesus meippanggep nunman ni a-abbig tu*  
(*Matthew 13:10-17; Mark 4:10-12*)

<sup>9</sup> Kan idan disipol Jesus ey "Hipa keibbellinan nunyan ina-abbig mu?" <sup>10</sup> Hinumang Jesus e kantuy "Hedin hi-gayu, man nakka panna-ud ni ituttuddun hi-gayu hu elaw ni nan-ap-apuan Apu Dios ni eleg meipeamta ingganah nunya. Nem hedin yad edum ni tuu, man nakka pan-ina-abbig ni ebuh hu nakka penuttuddun hi-gada ma-lat anin ang-ang-angen da niya deddedngelen da nakka ituttuddu ey eleg da han-awat, tep eleg da pinhed ni ewwatan hu elaw Apu Dios.

<sup>11</sup> Heninnuy hu keibbellinan tu. Ya etan bukel ni inha-bug etan ni tuu ey mei-ellig di ehel Apu Dios. <sup>12</sup> Yadda etan bukel ni na-gah di dalan ey kamei-ellig di ehel Apu Dios ni dingngel idan tuu, nem immali hi Satanas et linglingen tud nemnem da ma-lat eleg da kulugen et eleg ida mehelakniban. <sup>13</sup> Yadda etan bukel ni na-gah di mabetu ey kamei-ellig di ehel Apu Dios ni dingngel idan tuu et ida kaman-am-amleng ni nengulug, nem neikamkampu daka pengullug et hedin wada ekket ni ligat da ey pinhakkeyey iwwalleng da hu daka pengullug.

<sup>14</sup> Yadda etan bukel ni na-gah di magulun hu neieligan idan tuun nangngel ni ehel Apu Dios, nem anggegannuy liniwwan da tep ebuh hu neitu-wan da, ya keddangyanan da niya pan-am-amlengan dan daka nenemnema. <sup>15</sup> Yadda etan bukel ni na-gah di kayyaggud ni puyek hu kamei-ellig ida etan di tuun nangngel ni ehel Apu Dios et maihammad hu daka pengullug et kayyaggud law hu nemnem da et ya kayyaggud hu pinhed dan ippahding."

*Ya kei-elligen etan ni dilag*  
(*Mark 4:21-25*)

<sup>16</sup> Intuluy Jesus ni immehel et kantuy "Endi tuun tu integran hu kengkeh et tu hukbungan, winu tu ihha-ad di daul ni unggippan, nem ihha-dang tu kumaddan di neitata-gey ma-lat han-ang-ang idan emin ni umhegep ni tuu. <sup>17</sup> Ya mei-ellig huyya etan di neitlu niyad eleg meamta e meamtaddallin edum ni aggew. <sup>18</sup> Et humman hu, pakadngel yu eya kayyaggud ni tugun ku et u-unnuden yu, tep e-helen kun hi-gayu e ya etan tuun kamengu-unnud ni tugun ku ey me-duman hu inamta tu. Nem ya etan tuun wada ekket ni inamta tu, nem eleg tu u-unnuda ey meendi humman ni ekket ni inamta tu."

*Hi inan Jesus et yadda agi tu*  
(*Matthew 12:46-50; Mark 3:31-35*)

<sup>19</sup> Immali inan Jesus et yadda agitu, nem endi inna-nu dan umlaw di kad-an tu, tep hinelikuban ni dakel ni tuu. <sup>20</sup> Kan idan tuun nan hi Jesus ey "Immalid inam et yadda

agim et immen idad dallin e daka kapan-ibbaga." <sup>21</sup> Nem kantun hi-gaday "Yadda tuun menggel ni ehel Apu Dios et u-unnuden da ey hi-gada nakka ibbilang ni inak ey agik."

*Ya nengipesikdan Jesus ni pewek di baybay  
(Matthew 8:23-27; Mark 4:35-41)*

<sup>22</sup> Hakey ni aggew ey nekihgep hi Jesus idan disipol tud bangka et kantun hi-gaday "Pan-agwat itsu et lumaw itsud demang eyan baybay."

<sup>23</sup> Ida kamenglaw ey neugip hi Jesus. Entanni ey pimmewek ni na-let di baybay et kamangkepnu bangkan danum ey henidda melsing. <sup>24</sup> Et bangunen da hi Jesus et kanday "Apu! Apu, melsing itsu!"

Bimmangun hi Jesus et pasiked tu etan pewek niya dalluyun ey nesiked ida. <sup>25</sup> Kan Jesus ni hi-gaday "Kele endi dinel yun hi-gak?"

Natngaddan emin et wada hakkeyey kanday "Hipa na-mu ingkatuun nunyan tu? Kele kau-unnudan dibdib et ya dalluyun hu ehel tu?"

*Ya nangkalan Jesus etan ni neihuklung etan ni kaman-angngaw ni tuu  
(Matthew 8:28-34; Mark 5:1-20)*

<sup>26</sup> Entanni ey dimmateng idad bebley idan iGerasene e demang ni probinsiya di Galilee. <sup>27-29</sup> Immehep hi Jesus di bangka ey an dinammu etan ni tuun nehuklungan ni dimonyoh e nalpulli etan di bebley. Nebayag ni eleg mambalwasi niya eleg manha-ad di baley tu et yad kad-an idan kullungngan hu nanhaha-adan tu. Anin ni bangkilingan da et tuka pegtanga ni bimmesik di endi bebley. Yan nenang-angan tun Jesus ey simmekuk et mandukkun di hinangga tu ey inlet tu ehel tu e kantuy "Jesus e U-ungngan Apu Dios e Keta-ta-geyyan, hipa pehding mun hi-gak? Entan tuwak anhan kastigu." Mukun inhel etan ni dimonyoh humman ey tep inhel Jesus e me-kal etan di tuun neihuklungan tu.

<sup>30</sup> Kan Jesus etan ni neihuklung ey "Hipa ngadan mu?" Hinumang tu e kantuy "Linibu hu ngadan mi." Inhel tu huyya tep dakel idan dimonyoh ni neihuklung etan ni tuu. <sup>31</sup> Nampehemhemmek idan Jesus ma-lat eleg tudda palaw etan di kapanhelheltapin ingganah.

<sup>32</sup> Neipapaddih ni nunman ni wadadda dakel ni killum ni kamanhubhub etan di duntug et kandan Jesus ey "I-tan dakemi eman idan killum et hi-gada hu keihhuklungan mi."

Ey inebulut Jesus. <sup>33</sup> Et ma-kal ida etan ni tuu et man-etan idadda etan di killum. Pinhakkeyey nambesik ida etan killum et dumep-ah idad deplah et mangkalsing idad baybay.

<sup>34</sup> Inang-ang etan idan kamampaptek ni killum humman ni nekapkapy ey nambelessik idad bebley et yaddad nanlinikweh diman, et ehelen daddan tutu-u. <sup>35</sup> Et mampanglaw ida etan tutu-un nanggel nunman et da ang-angen. Immaliddad kad-an Jesus ey inang-ang da etan tuu e nambalwasi law niya kamanyuyuyudding di kad-an Jesus e kayyaggud law nemnem tu et kamandeddenggel ni tuka pan-ituttuddu. Ey simmakut ida etan tutu-u gapuh nunman ni nekapkapy. <sup>36</sup> Yadda etan nenang-ang ni impahding Jesus ey nan-i-hel daddan kebebleyan da hu meippanggep ni na-kalan ida etan ni neihuklung etan ni tuu. <sup>37</sup> Et gapuh ni takut idan bimmebley di Gerasene ey inhel dan Jesus e hi-yanen tu bebley da. Et mambangkad Jesus et man-agwat idad demang ni baybay.

<sup>38</sup> Yan eman ni kapenggepin Jesus di bangka ey kan etan ni tuun nehuklungan la ni ey "Attu anhan et makilawwak ni hi-gam ey?" Nem kan Jesus ey <sup>39</sup> "Anemut ka kuma et mu e-ehelen hu impahding Apu Dios ni hi-gam." Et lumaw humman ni tuu et tu pan-i-hel di bebley da hu impahding Jesus ni hi-gatu.

*Ya nenagwan Jesus ni netey ni u-ungngan Jairo  
(Matthew 9:18-26; Mark 5:21-43)*

<sup>40</sup> Nambanggad di Jesus di Galilee ey immamleng ida tuudman ni kamenehhegged ni hi-gatu. <sup>41</sup> Wadadman hi Jairus e hakey ni ap-apud simbaan ni Jew ni immalid kad-an Jesus et mandukkun di hinangga tu et mampehemhemmek et makilaw hi Jesus di baley da. <sup>42</sup> Pinhed Jairo ni mekillaw hi Jesus di baley da tep kamangkatkathey etan binugtung ni biin u-ungnga tun hampulut dewwa toon tu. Nekilaw hi Jesus ey nemahhig e nehayebheb ida tuun hi-gatu.

<sup>43</sup> Ey wada etan hakey ni biin hampulut dewwa toon ni eleg mesikked hu kamelpud annel tu. Inumah tun emin hu limmu tu, nem endi hakey ni kinabaelan tun inegahan humman ni degeh tu. <sup>44</sup> Limmaw humman ni biid dingkuggan Jesus et kap-en tu gilig ni balwasi tu ey pinhakkeyey nesiked etan kamelpud annel tu. <sup>45</sup> Et kan Jesus ey "Hipa nengapan balwasik?" Kandan emin ey "Tawwey."

Immehel hi Peter ey kantuy "Apu, inna-nun pengamtaan ni nengapan balwasim ey hinelikuban dakan dakek ni tuu?"

<sup>46</sup> Nem kan Jesus ey "Wada nengapan hi-gak tep ginibek ku e wada degeh ni ingkal ni kabaelan ku."

<sup>47</sup> Yan nengamtaan etan ni bii e inamtan Jesus hu neipahding, ey immalid kad-an tu e kamangegeyyengeng ni takut tu et mandukkun di hinangga tu et ehelen tu gapun nengapaan tun balwasi tu et ya na-kalan ni degeh tu. Emin ida etan tutu-u ey dingngel da humman ni inhel tu.

<sup>48</sup> Kan Jesus ni hi-gatuy "Agik, na-kal law huttan ni degeh mu tep ya muka pengullug ni hi-gak. Anemut ka, et melinggep ka kaya law."

<sup>49</sup> Kapan-e-helan Jesus huuya ey wada dimmateng ni nalpullid baley di Jairo e kantun Jairo ey "Anin ew kattedg ni entan tu ayagi etan mittuduh, tep netey etan u-ungngam."

<sup>50</sup> Nem dingngel Jesus humman ey kantun Jairo ey "Entan pandanag mu etan ni u-ungngam. Pandinel kan hi-gak."

<sup>51-53</sup> Yan dintengan dad baley Jairo ey kaumlelemyung ida etan tutu-u ey kanengih ida tep netey etan u-ungnga. Nem kan Jesus ey "Entan nangih tep eleg matey huuyan u-ungnga, neugip ni ebuh."

Yadda etan tutu-u ey daka ngi-ngi-ngii hi Jesus tep inamta da e netey etan u-ungnga. Himmegep hi Jesus ey endi edum ni tuun impahgep tu, ebuh di Peter, hi James, et hi John et ya ammed etan ni u-ungnga. <sup>54</sup> Singnged tu ngamay etan ni u-ungnga et kantuy "Inah ka e u-ungngak." <sup>55</sup> Et tumegu etan u-ungnga ey pinhakkeyey imminah. Et mampaela hi Jesus ni kennen tu et pangan da. <sup>56</sup> Natngadda a-ammed etan ni u-ungnga, nem sinugun idan Jesus e kantuy "Entan tu i-i-hel huuyan neipahding eyan u-ungnga."

## 9

*Ya nengitu-dakan Jesus ida etan ni Hampulut dewwan disipol tu  
(Matthew 10:5-15; Mark 6:7-13)*

<sup>1</sup> Hakey ni aggew ey inemung Jesus ida etan Hampulut dewwan disipol tu et idwat tu kabaelan dan mengkal ni neihhuklung ni dimonyoh niya degeh. <sup>2</sup> Et itu-dak tuddan mengippahding idan nunman niya mengituttuddun meippanggep ni nan-ap-apuan Apu Dios. <sup>3</sup> Kantun hi-gaday "Entan pantabin ni hipan mahapul yud lawwan yu, ya hulkud niya hakbat, ya kennen, ya pihhuh niya balwasi. <sup>4</sup> Panha-ad kayud baley etan ni mengeyyag ni hi-gayu ingganah ni peni-yanan yun nunman ni bebley. <sup>5</sup> Hedin wada lawwan yun bebley ey endi um-ayag ni hi-gayu, pukpuk yu hu dep-ul di dapan yu et pengamtaan dan nanliwat ida, tep eleg dakeyu ayagan." <sup>6</sup> Et lumaw ida etan Hampulut dewwan disipol Jesus di kebebbebley et da ituttuddu hu meippanggep ni inlian etan ni intu-dak Apu Dios ni mengippaptek ni tuu niya nan-ekal da hu degeh idan tuu.

*Ya kakemunnumunnuin nemnem Herod gapuh nan Jesus  
(Matthew 14:1-12; Mark 6:14-29)*

<sup>7</sup> Dingngel Herod e ap-apud Galilee ida huuyan impahding Jesus ey kamemunnumunnu nemnem tu. Tep emin ida tuu ey hi Jesus hu daka ung-ungbala. Kan ni edum ey hi-gatu la eman hi John e kamemenyag ni netagwan. <sup>8</sup> Ey kan ni edum ey hi-gatu hi Elijah. Yadda edum, ey kanday hi-gatu hu hakey ni prophet Apu Dios ni nunman ni simmagu. <sup>9</sup> Kan Herod ey "Tam impaputul ku kaya ulun John, nem kele hipa humman ni tuun dakek nakka deddedngelan tuka pehpehding?" Et ihik tun ang-angen hi Jesus.

*Impambalin Jesus ni dakek etan liman sinapay et pangan tudda liman libun tuu  
(Matthew 14:13-21; Mark 6:30-44; John 6:1-14)*

<sup>10</sup> Nambangngad ida etan disipol Jesus et e-ehhelen dan hi-gatun emin hu impahpahding da. Ingkuyug idan Jesus et lumaw idad Betsaida et e-ebbuh idadman. <sup>11</sup> Nem inang-ang ida damengun tutu-un linawwan da et unuden dadda. Et tuttudduan idan Jesus meippanggep ni nan-ap-apuan Apu Dios niya ingkal tu degeh idan kamampandedgeh.

<sup>12</sup> Hambatanganan ey limmaw ida etan Hampulut dewwan disipol di kad-an tu et kanday "Itu-dak mudda ew kattedg eyad katuutuud nangkeihnup ni bebley et ida menang-ang ni pandedyaan da niya pengellaan dan kennen da tep endi pengellaan ni kennen deya."

<sup>13</sup> Nem kan Jesus ni hi-gaday "Idwasi yudda kuman kennen da!" Hinumang da et kanday "Nem tam lillimman sinapay niya deddewwan deleg ni ebuh hu wada. Kaw umlaw kami tep ni an umgatang ni kennen idan emin eyan tutu-u?" <sup>14</sup> Ya bilang idan etan ni tutu-u ey umlaw ni liman libu.

Kan Jesus idan disipol tuy "Payudung yudda eya tutu-un hannenelima." <sup>15</sup> Inu-unnud da inhel tu et payudung dadda.

<sup>16</sup> Illan Jesus etan liman sinapay et ya etan dewwan deleg et itengaw tud kabunyan et mansalamat nan Apu Dios. Sineneg-ang tu et pan-idwat tuddan disipol tu et da pan-iwatwat idan tuu. <sup>17</sup> Nengan idan emin et maphel ida ey dakel hu natdaan. Inemung da ey napnu hampulut dewwan basket.

*Ya inhel Peter hedin hipa hi Jesus  
(Matthew 16:13-20; Mark 8:27-29)*

<sup>18</sup> Hakey ni aggew ni kamandasal hi Jesus ey wadadda etan disipol tud a-allaw tu. Kantun hi-gaday "Hipa-ak dedan ni kan idan tuu ah?"

<sup>19</sup> Hinumang da et kanday "Kan idan edum ey hi-gam eman la hi John e kamemenyag, yadda edum ey kanday hi-gam hi Elijah, ey yadda dama edum ey kanday hi-gam hakey lan prophet ni netagwan."

<sup>20</sup> Ey kan Jesus ni hi-gaday "Nem hi-gayu ngay dama, hipa-ak ni kanyu?" Hinumang Peter et kantuy "Hi-gam hi Christo e pinutuk Apu Dios ni mengippaptek ni tuu."

<sup>21</sup> Inhel Peter huyya ey nekattugun ida Jesus e kantuy "Entan tu an i-i-hel ni edum ni tuu."

*Ya nanghelan Jesus ni meippanggep ni panlelehanan tu niya ketteyyan tu  
(Matthew 16:21-28; Mark 8:31; 9:1)*

<sup>22</sup> Kantu mewan ey "Hi-gak e Pengulwan ni emin ni tuu ey mahapul ni manhelheltapak. Eleg ali ebbulutaddan kamengippangngulun Jews, yadda ap-apuddan padi et yadda kamantuttuddun Tugun Moses e hi-gak hi Christo. Et pepettey da-ak ali, nem metegguan nak ni katlun aggew."

<sup>23</sup> Entanni ey kantuddan etan ni tuun neamung ey "Ya tuun neminshed ni mengu-unnud ni hi-gak ey mahapul ni eleg tu ikakkaguh hu neitu-wan tu eyad puyek ey ennsan tu ligat ni pengu-unnudan tun hi-gak, anin ni humman umhulun ni ketteyyan tu. <sup>24</sup> Tep ya tuun ya neitu-wan tu eyad puyek hu tuka ikakkaguh ni ebuh ey endilli biyag tun endi pappeg tu kad-an Apu Dios. Nem ya tuun tuwak kau-unnuda anin umhulun ni ketteyyan tu ey meidwatan ni biyag ni endi pappeg tud kabunyan di kad-an Apu Dios. <sup>25</sup> Tep anin ni ellan ni tuun emin hu wada eyad puyek et endilli silbitu hedin endilli biyag tun endi pappeg tu et meiddawwin Apu Dios ni ingganah. <sup>26</sup> Ey ya tuun mengibbabaing ni hi-gak et ya nakka ituttuddu ey eggak ali ibbilang ni tuuk ni ellian kulli mewan ni pengippeang-angan kun dayaw min Ama et yadda anghel tu. <sup>27</sup> E-helen kun hi-gayu e wadadda edum yudyan naneng tullin mategun kedettengan ni nan-ap-apuan Apu Dios."

*Ya nelummanan ni ang-ang nan Jesus  
(Matthew 17:1-8; Mark 9:2-8)*

<sup>28</sup> Nelabah hanlingguan ey inaygan Jesus hi Peter, hi James et hi John et ikuyug tudda et manteyed idad duntug ni an mandasal. <sup>29</sup> Et kamandasal hi Jesus ey nelumman ang-ang ni angah tu niya kamammussi-lak hu balwasi tu. <sup>30</sup> Entanni ey wadadda dewwan tuun kamekiung-ungbal ni hi-gatu e di Moses nan hi Elijah. <sup>31</sup> Ka-ang-ang e ida kamedeyyag ni peteg. Ya inung-ungbal dad Jesus ey meippanggep ni ketteyyan tullid Jerusalem.

<sup>32</sup> Hi Peter et yadda edum tu ey neuyeng ida, nem bimmangun ida ey inang-ang da e kaumhili hi Jesus ey inang-ang dadda etan dewwan tuu e ida kaman-eh-ehng di kad-an tu. <sup>33</sup> Kapanhi-yanad Moses nan Elijah hi Jesus ey kan Peter ey "Apu, kayyaggud et wada isudya. Umkapyu kamin tellun a-abbung et hi-gam ni hakey, hi Moses ni hakey niya hi Elijah ni hakey." Huyya inhel Peter tep natnga et eleg tu amta e-helen tu.

<sup>34</sup> Yan nunman ni kaman e-ehhel hi Peter ey pinhakkeyey nehiduman idan kulput ey simmakut ida. <sup>35</sup> Entanni ey wadalli immehel etan di kulput e kantuy "Huyya U-ungngak ni pinutuk kun mengippaptek ni emin ni tuu. Kulug yu e-helen tu."

<sup>36</sup> Insiked etan ni kaman-e-ehhel ey ebuh hi Jesus ni inang-ang dan wadadman. Huyyaddan disipol ey eleg da e-ehhelen huyyan inang-ang dad edum ni tuu.

*Ya nangkalan Jesus ni neihuklung etan ni u-ungnga  
(Matthew 17:14-18; Mark 9:14-27)*

<sup>37</sup> Nawa-wa et mandayyud Jesus ey hinipngat idan dakel ni tuu. <sup>38</sup> Pinhakkeyey wada hakey ida etan ni tuu hu kamantekuk e kantuy "Apu, ang-ang mu kedi anhan eya binugtung ni u-ungngak ni laki. <sup>39</sup> E-eggel ni dimpun kameihhuklung ni nantetekuk. Kaumkambil annel tu niya kaman-uupag hu bungut tu. Tuka pan-ibe-hig hu annel tu, ey ayepaw man anhan ni han hini-yan etan ni dimonyoh ni kameihhuklung ni hi-gatu. <sup>40</sup> Namphehemhemmekkak idan disipol mu, nem eleg da han-ekal."

<sup>41</sup> Kan Jesus ni hi-gaday “Ayyakaw kayun tuun nunya, lawah kayu niya endi yuka pengullug! Piga binabbal kun hi-gayu? Kaw mekihahha-addak ni hi-gayun ingganah et han kayu mangulug? I-li yudya etan u-ungnga.”

<sup>42</sup> Daka pan-illaw etan u-ungngad kad-an Jesus ey sinu-li etan ni neihuklung et manggegeygey niya kimmembil annel tu. Nem imbunget Jesus etan neihuklung et mal. Yimmaggud law etan u-ungnga et paewit tun ametu. <sup>43</sup> Ey natngadda etan tutu-un nenang-angan dan kabaelan Apu Dios.

*Ya pidwa tun nanghelan Jesus ni ketteyyan tu*  
(Matthew 17:22-23; Mark 9:30-32)

Yan nunman ni natngadda etan tutu-un impahding tu ey kan Jesus idan disipol tu ey <sup>44</sup> “Ihammad yun dedngelan eya e-helen kun hi-gayu. Hi-gak e Pengulwan ni emin ni tuu ey meihdullak ali et ellan da-ak idallin tuu et nemahhig pehding dan hi-gak.”

<sup>45</sup> Eleg da han-awat humman ni inhel tu, nem ida kaum-e-gen ni mengibbeggan hi-gatu.

*Ya makulug ni keta-ta-geyyan*  
(Matthew 18:1-5; Mark 9:33-37)

<sup>46</sup> Entanni ey kaung-ungbaladdan disipol Jesus hedin hipallin hi-gada hu keta-ta-geyyan ni hi-gadan emin. <sup>47</sup> Inamtan Jesus hu wadad nemnem da et umewit ni u-ungnga <sup>48</sup> et kantun hi-gaday “Ya tuun pinheden tu eya u-ungnga gapuh ni hi-gak ey pinhed tuwak dama. Ey ya tuun neminshed ni hi-gak ey pinhed tu dama etan nengitu-dak ni hi-gak e hi Apu Dios. Tep ya etan kebababahan ni hi-gayu ey humman kaibbilang Apu Dios ni keta-ta-geyyan.”

*Yadda etan beken buhul Jesus ey edum tayudda*  
(Mark 9:38-41)

<sup>49</sup> Entanni ey kan John nan Jesus ey “Apu, wada inang-ang min tuun han-ekal tu kameihhuklung tep tuka ngeddana ngadan mu, nem kan miy issiked tu, tep beken ni edum tayu.”

<sup>50</sup> Nem kan Jesus nan John ey “Entan tu pasiked, tep ya tuun eleg daitu kehingga ey edum tayu.”

*Ya eleg peminhedan idan iSamaria nan Jesus*

<sup>51</sup> Yan eman ni kamangkedettengi aggew ni keibbangngadan Jesus di kabunyan ey ninemnem tun umlaw di Jerusalem. <sup>52</sup> Impamengulu tun intu-dak di Samaria hu an mengiddaddan ni panha-adan tu etan di hakey ni bebley diman. <sup>53</sup> Nem yadda bimbley diman ey eleg da pinhed ni iddalan di Jesus diman tep inamta da e yad Jerusalem hu lawwan da. \* <sup>54</sup> Yan nengngelan idan disipol tu e di James nan John ni nunya, ey kanday <sup>55</sup> “Apu, kaw pinhed mu et ibega min Apu Dios et legaben tu humman ni bebley?” Nem inwingin Jesus ey ibunget tudda. <sup>56</sup> Et mampalaw ida etan di hakey ni bebley.

*Yadda etan kamandinwan mengu-unnud nan Jesus*  
(Matthew 8:19-22)

<sup>57</sup> Ida kamenglaw ey wada etan hakey ni tuun kantun Jesus ey “Mekikillawwak ni hi-gam anin attu lawwan mu.” <sup>58</sup> Nem hinuang Jesus ni hi-gatu e kantuy “Yadda animal di muyung ey wada baley da, anin ni sisit et wada buya da, nem hedin hi-gak e Pengulwan ni emin ni tuu ey endi baley ku, anin ni pengi-ippingan kun uluk et endi.”

<sup>59</sup> Nem ya etan ni hakey ni tuu ey kan Jesus ni hi-gatuy “Pakilaw kan hi-gak.” Hinuang tu hi Jesus e kantuy “Apu, mambangngaddak nid baley et nak ikulung hi ama.” † <sup>60</sup> Nem kan Jesus ni hi-gatuy “Ngenamung ida ngu etan eleg mengullug ni hi-gak ni mengikkullung ni edum dan mettey. Nem hedin hi-gam, man mahapul ni umlaw kan an mengittutduddan meippanggep ni nan-ap-apuan Apu Dios.”

<sup>61</sup> Kan dama etan ni hakey ni tuu nan hi Jesus ey “Mekillawwak ni hi-gam, nem pakkaw nin nak peamtaddan agik.” <sup>62</sup> Nem kan Jesus ni hi-gatuy “Hedin makulug ni pinhed ni tuun mengu-unnud ni hi-gak, ey pakkaw ni ikkahlakey tu nemnem tud pengunnu Apu Dios. Nem hedin eleg pehding ni tuu huuya, ey endi bilang tud nan-ap-apuan Apu Dios. Henin kaman-elladu e endi inna-nu tun mengippaptek ni ngunu tu hedin kamanwingiwingi.”

\* **9:53** 9:53 Yadda tutu-ud Samaria ey daka pihhuladda iJerusalem. Hanniman ida dama hu iJerusalem e daka pihhuladda iSamaria. † **9:59** 9:59 Eleg ni matey hu aman nunyan tuu. Nem ya keibbellinan tu ey ipaptek tu ni hi ametu ingganah ketteyyan tu.

## 10

### *Ya nengitu-dakan Jesus idan nepitu et dewwan disipol di kebebbebley*

<sup>1</sup> Entanni ey pinilin Jesus mewan hu nepitu et dewwan tutu-u et pamengulu tuddan itu-dak e handehandedwan mantuttuddu etan idad bebley ni tuka nememneman lawwan tu. <sup>2</sup> Kantun hi-gaday “Dakel ida tuun neminshed ni mengullug ni hi-gak, nem kulang ida umlaw ni an mantuttuddun hi-gada. Kamei-ellig di dakel enniem, nem hahhakkey ida tuun man-enni. Et humman hu, pandasal kayun Apu Dios ma-lat umitu-dak ni edum ni an mantuttuddu e hi-gada hu neieligan idan man-enni, tep hi-gatu hu kam payew. <sup>3</sup> Yad pengittu-dakan kun hi-gayun yu pengittuttudduan ni elaw ku, ey heni kayu kalneroh ni an mei-dum di mangkabunget ni ahhud muyung. <sup>4</sup> Entan pambalun yun pihhuh, entan pan-akbut yu ey entan pampatut yu. Entan pantaktaktak ni mekiung-ungbal idan tuun dammuen yud dalan.

<sup>5</sup> Anin hipan baley hehgepan yu et pamengulu yun e-helen melinggep kayu kaya. <sup>6</sup> Hedin ebbuluten ni kambaley hu inhel yu, ey makulug ni um-amnu et umlinggep ida. Nem hedin eleg da ebbuluta, ey mambanggad ni hi-gayu humman ni inhel yu et eleg um-amnu. <sup>7</sup> Yad nemangulun baley ni dinuttuk yu hu panha-adi yu niya pekikkannan yu. Ekan yu hu hipan immangdad da. Humman hu heni tangdan yu, tep ya kamanggunnu ey mahapul ni metangdanan. Entan pan-aldaaldan di kabelebeley.

<sup>8</sup> Hedin umlaw kayud hipan bebley ey hedin kaum-amleng ida bimbebley ni hi-gayu, anin ekan yu hipan immangdad dan hi-gayu <sup>9</sup> niya ekal yu degeh idan kamanpandedgeh diman. Kan yuddan tutu-u ey ‘Immali law etan intu-dak Apu Dios ni man-ap-apu.’ <sup>10</sup> Nem hedin umlaw kayu etan di bebley ey eleg ida um-amleng ni hi-gayu et eleg dakeyu eyyagi ey elaw kayud keltad et kanyuy <sup>11</sup> ‘Pukpuken mi inhulun ni dapan min dep-ul eyad bebley yu et pengamtaan yu e nanliwat kayu. Nemnem huuya: Meibbillang kayu et di nan-ap-apan Apu Dios, nem eleg yu pinhed.’ ” <sup>12</sup> Kan pay Jesus ey “Yallin panhuwetan Apu Dios, ey nemahhig ali pengastigutuddan tuudman ni bebley nem ya kastigudda lan eman ni tutu-ud Sodom.”

### *Ya kastiguddallin tutu-ud kebebbebley ni eleg mengullug nan Jesus (Matthew 11:20-24)*

<sup>13</sup> Entanni mewan ey kan Jesus ey “Anggehemmek kayun iKorasin niya iBetsaida, tep nanna-ud ni mekastigu kayu, tep anin ni inenang-ang yudda miracle, et eleg kayu mantuttuyyun liwat yu. Yadda la tuud Tyre et yad Sidon ey nemahhig liwat da, nem gullat ni inang-ang dadda miracle ni inenang-ang yu et nanna-ud ni nantuttuyyun idan liwat dan dagah et mambalwasiddan nebi-bi-ki niya nandep-ulan da annel dan pengippeang-angan dan nantuttuyyuddan liwat da. <sup>14</sup> Mukun nemahhig ali kastigu yu nem yadda la eman tutu-ud Tyre niyad Sidon. <sup>15</sup> Hi-gayun iCapernaum ey kanyu namu ngu nem meipedeyyaw kayud kad-an Apu Dios, nem eleg, tep pellow dakeyullid impierno.”

<sup>16</sup> Kan Jesus idan disipol tuy “Ya etan tuun mengebbulut ni ittuttuddu yu, ey ebbuluten tuwak dama. Et ya tuun eleg mengebbulut ni ittuttuddu yu ey eleg tuwak dama ebbuluta. Ey ya etan tuun eleg mengebbulut ni hi-gak, ey eleg tu dama ebbuluta hi Apu Dios e nengitu-dak ni hi-gak.”

### *Ya nambangngadan idan nepitu et dewwan intu-dak Jesus.*

<sup>17</sup> Nelabah pigan aggew ey nambangngad ida etan nepitu et dewwan intu-dak Jesus. Ida kaman-am-amleng e kanday “Apu, anin idan dimonyoh et dakemi kau-unnuda hedin nginedan mi ngadan mu.”

<sup>18</sup> Hinumang Jesus et kantuy “Em, inang-ang ku hi Satanas e pinhakkeyey heni kedyam hu nengipea-allawan Apu Dios ni hi-gatud kabunyan. <sup>19</sup> E-helen kun hi-gayu e makulug ni indawat kun hi-gayu hu kabaelan yun mengidduppih nan Satanas e buhul tayu. Ey anin ni iggasin yudda uleg niya gayyaman et endi an meipahding ni hi-gayu. <sup>20</sup> Anin ni wada kabaelan yu et beken etan nengu-unnudan ni dimonyoh ni hi-gayu hu pam-am-amlengan yu, nem amleng kayu tep neitudek ngadan yud liblud tud kabunyan di kad-an Apu Dios.”

### *Ya kapan-am-amlengin Jesus (Matthew 11:25-27; 13:16-17)*

<sup>21</sup> Kaman-am-amleng ni nunman hi Jesus tep impeamleng ni Ispirituh Apu Dios et mandasal e kantuy “Ama e Ap-apud kabunyan niyad puyek, nakka mansalamat ni higam, tep eleg mu peamta elaw muddan nan-adal niyadda nelaing, nem impeamtam idan eleg man-adal niyadda beken ni nelaing. Humman e Ama hu neipahding tep humman pinhed mu.”



<sup>22</sup> Kan Jesus mewan ey “Indawat Ama hu saad kun man-ap-apun emin. Hi-gatun ebuh hu nekangngamtan hi-gak niya endi edum ni nekangngamtan Ama, nem hi-gak ni ebuh niyadda pinhed kun pengippeamtaan ni hi-gatu.”

<sup>23</sup> Entanni et e-ebuh idaddan disipol tu et kantun hi-gadan ebuh ey “Negahat kayu tep yuka ang-ang-anga hu nakka pehpending. <sup>24</sup> Yadda la eman dakel ni prophets Apu Dios et yadda la eman papatul ni nunman ey pinhed dan peteg ni ang-angen eyadda inenang-ang yun impahpahding ku, nem eleg da ang-angen. Pinhed dan peteg ni dedngelen hu diddingngel yun in-inhel ku, nem eleg da denglen.”

*Ya etan kayyaggud ni iSamaria*

<sup>25</sup> Wadan pinhakkey e immali hu hakey ni kamantuttuddun Tugun Moses di kad-an Jesus et kantuy “Apu, hipa pehding ku ma-lat mawedan hi-gak hu biyag ni endi pappeg tu?”

<sup>26</sup> Himmumang hi Jesus et kantuy “Hipa kan etan ni neitudek ni Tugun Apu Dios? Hipa muka pengewwat ni nunman?”

<sup>27</sup> Kan etan ni tuu ey “Ya nakka pan-ewwat ey pakappinheden hi Apu Dios et emin hu nemnemen niya ippahding ey innemnem emin ni hi-gatu. Ey pinheden hu edum ni tuu, henin impemihed ni annel.”

<sup>28</sup> Kan Jesus ey “Neiptek huttan ni inhel mu. Ipahding mudda ma-lat maweda biyag mun endi pappeg tu.”

<sup>29</sup> Nem inamta etan ni tuu e eleg tu peka-u-unnuden ida humman ni neitugun et kahimbaggan tu e kantuy “Hipadda sinakdul ku?”

<sup>30</sup> Hinumang Jesus ni a-abbig e kantuy “Wada etan hakey ni edum tayun Jew ni nalpud Jerusalem e umlaw di Jerico. Wadad dalam ey wadadda matekew et piliwen dan emin hu wadan hi-gatu. Anin ya balwasi tu et neki-la ey nambakdungan da ingganah hen metey et handa hi-yana. <sup>31</sup> Neipaddih ni yadman hu nengidlanan daman hakey ni padi et ang-angen tu humman ni tuu, nem indalan tud pangil et labhan tu. <sup>32</sup> Immali mewan etan hakey ni helag Levi e kaumbaddang ni ngunud simbaan et ang-ang tu dama humman ni tuu, nem inliglig tu dama et labhan tu. <sup>33</sup> Entanni ey immali etan hakey ni iSamaria e beken ni kebebleyan etan ni tuu et ang-angen tu e neliputan humman ni tuu. Himmek tu <sup>34</sup> et ulhan tudda liput tu et agahan tu. Intakkay tud kebayyu tu et ilaw tu etan di kamebeyyadin kapanda-guhi et ipaptek tudman. <sup>35</sup> Newa-wa et mambayad et kantu etan ni kambaley ey ‘Iaptek mulli anhan eya tuu. Han dakalli bayadin pengippaptekan mun hi-gatun pambangngadan ku.’ ”

<sup>36</sup> Et kan Jesus etan ni kamantuttuddun Tugun Moses ey “Hipaddan eyan tellun tuu hu muka nemnemneman kameibbillang ni sinakdul etan ni liniputan idan matekew?”

<sup>37</sup> Himmumang etan kamantuttuddun Tugun Moses e kantuy “Ya etan nengipaptek ni hi-gatu.” Et kan Jesus ey “Neiptek huttan ni inhumang mu. Lakkay et mu dama ipahding hu henin nunman.”

*Ya an nenang-angan Jesus ida etan ni han-agi e di Maria nan Martha*

<sup>38</sup> Kamenglaw hi Jesus et yadda disipol tud Jerusalem ey dinteng da etan hakey ni bebley. Wadadman etan biin hi Martha ngadan tu. Kaman-am-amleng ni nenang-angan tud Jesus et ayan tuddad baley da. <sup>39</sup> Wada agin Martha e hi Maria ngadan tu. Limmaw et an yumudung di kad-an ni helin Jesus tep pinpinhed tun deddengngelen hu tuka ituttuddu. <sup>40</sup> Kameduddukul hi Martha ni dakel ni ingngunun pandaddanan dan kennen, et kantun Jesus ey “Apu, ang-ang mu kedi eya hi Maria e inhi-yan tun hi-gak hu ingngunu. Ehel mun hi-gatu et baddangan tuwak.”

<sup>41</sup> Nem kan Jesus ey “Hi-gam kedi e Martha, ambeken et ni ya dakel ni ingngunu hu keduddukulam, <sup>42</sup> tep ya makahhapul ni peteg ey yan eya nakkae-ehhelen kadeddengngelan Maria. Tep makulug ni eleg ali metellak huyyan hi-gatu.”

## 11

*Ya nenuttudduan Jesus idan disipol tun mandasal  
(Matthew 6:9-13; 7:7-11)*

<sup>1</sup> Wada hakey ni aggew ni nandasal hi Jesus et yan negibbuan tu ey kan ni hakey ni disipol tu ey “Apu, tuttuuddu dakemin mandasal henin John e tinuttuddun tudda disipol tu.” <sup>2</sup> Himmapih hi Jesus et kantuy “Heninnuy dedan hu idasal yu.

‘Ama, hi-gam et hu medeyyaw niya hi-gam hu man-ap-apu. <sup>3</sup> Idwat mu anhan hu mahapul min kewa-wa-wa. <sup>4</sup> Ey pesinsahim anhan hu liwat mi, henin pemessinsahan min nambahulan ni edum ni tuun hi-gami. Ey baddangi dakemi anhan ma-lat eleg kami maheul ni manliwwat.’ ”

<sup>5</sup> Kan mewan Jesus ni hi-gaday “Inna-nu hedin wada immalin mangili yun gawan hileng ey neipaddih ni endin hekey hu immangdad yun kennen. Et lumaw kayud baley etan ni gayyum yu et kayu mangkugkug e kanyuy <sup>6</sup> ‘Kaw wada ni eleg yu kanen, tep ay wada dimmateng ni mangilik ey neipaddih ni endi sindaan min kennen?’

<sup>7</sup> Ey himmumang ali e kantuy ‘Entan panukal mu. Neilekbi law hu habyen ey neugip kami. Nakka mihigan umbangun ni mengellan muka ibbaga.’ <sup>8</sup> E-helen kun hi-gayu e anin ni kaumhigan umbangun et umbangun kaya ma-lat idwat tu hu hipan mahapul nunman ni gayyum tu. Beken gapu tep hanggayyum ida, nem gapu tep tagan tu kugkug.

<sup>9</sup> Et mukun kangkun hi-gayuy: Ibga yun Apu Dios hu mahapul yu, et idwat tu. Yu hamak hu mahapul yu et wada. Pangkugkug kayu et ibeghulan dakey. <sup>10</sup> Tep ya tuun mambegga ey meidwatan. Ya tuun menemmak ni pinhed tu ey hemmak tu. Ya tuun mantugtug di habyen ey meibbeghulan. <sup>11</sup> Hi-gayuddan wada u-ungnga tu, kaw hedin mambegga u-ungnga yun deleg, man iddawtan yun uleg? <sup>12</sup> Ey kaw hedin mambeggan itlug, man iddawtan yun lulluwat? <sup>13</sup> Lawah kayun tutu-u, nem amta yun um-idwat ni kayyaggud idan u-ungnga yu. Et nema-ma ngun Ameyun hi Apu Dios di kabunyan, tep emin mambeggan hi-gatu ey iddawat tu Ispirituh tun hi-gada.”

*Di Jesus nan Satanas*

*(Matthew 12:22-30; Mark 3:20-27)*

<sup>14</sup> Wada etan hakey ni tuun nenganga tep wada neihuklung ni hi-gatu. Nem ingkal Jesus etan neihuklung ey kaumhapit law etan tuu et matngadda tutu-u. <sup>15</sup> Nem yadda etan edum ni nenang-ang ey kanday “Hi Satanas e ap-apuddan kameihhuklung hu nengidwat ni kabaelan tun mengkal ni kameihhuklung.” <sup>16</sup> Yadda edum ey pinhed dan patnaan hi Jesus et kanday “Ipahding mu miracle et keang-angan tu e makulug ni nalpu kan Apu Dios.”

<sup>17-18</sup> Nem inamtan Jesus hu daka nemnemnema et kantun hi-gaday “Wadad nemnem yu e kanyuy hi Satanas kakelpuin kabaelan kun mengkal ni kameihhuklung. Nem neihla huttan ni yuka pannemnem. Tep kaw tuwak baddangan Satanas ni mengkal idan kameihhuklung ey humman ida bega-en tu? Hedin makulug ni tuwak kabaddangan Satanas, tam tuwak tep kabaddangan mengippesikked ni hi-gatu e apu da. Mebahbah hu bebley hedin eleg ida man-uunnud hu ap-apuda et ida kamegnadwa hu tuu. Hanniman dama hu han pamilyah e hedin eleg ida man-uunnud, man lektattuy nekiwadda. Heni damad nan-ap-apuan Satanas e eleg mannenneng hu nan-ap-apuan tu hedin mambubuhulan ida dimonyoh tu. Kanyuy hi Satanas hu kamemaddang ni hi-gak ni mengkal ni dimonyoh ni kameihhuklung, <sup>19</sup> nem hedin makulug huttan ni kanyu, hi-gatu tep dama kamemaddang idan edum yun kamengkal ni kameihhuklung. Humman keang-angan tun naka-ihhalla kayun peteg. <sup>20</sup> Hedin ngun hi-gak, man nakka e-kala hu kameihhuklung tep wada kabaelan Apu Dios ni hi-gak. Et huyya keang-angan tun immali law hu intu-dak tun man-ap-apu.”

<sup>21</sup> Pinhed Jesus ni peamtan hi-gada e eta-ta-gey hi-gatu nem hi Satanas. Heninnuy hu kantu: “Hedin wada na-let ni tuun man-eddug di baley tu niya wada almas tu, man eleg mabalin ni wada menekkew ni hipan neiha-ad etan di baley tu. <sup>22</sup> Nem hedin wada um-alin na-na-let nem hi-gatu, ey nanna-ud ni apputen tu et pilliwen tu etan almas ni tuka pandinneli et pan-ellan tu hipan nangkeiha-ad etan di baley et panggagadwa daddan edum tu.”

<sup>23</sup> Kan Jesus mewan ey “Ya tuun eleg mengullug ni hi-gak ey kamekibbuhul ni hi-gak. Ya etan tuun eleg tu pinhed ni umbaddang ni pengullugan idan tuun hi-gak ey tuka degyunadda etan neminhed ni mengu-unnud ni hi-gak.”

*Ya elaw idan dimonyoh ni kameihhuklung*

*(Matthew 12:43-45)*

<sup>24</sup> Wada mewan ina-abbig Jesus ni kantuy “Wada etan dimonyoh ni kameihhuklung ni na-kal etan di tuun neihuklungan tu et an mandaladalan di desert e kamengnang-ang ni tu pan-iyatuan. Endi tuka hemmaka et kantuy ‘Mambangngadd ew etan di neihuklungan kun hini-yan ku.’ <sup>25</sup> Et mambangngad ey inang-ang tun kayyaggud law etan tuun neihuklungan tun nunman. <sup>26</sup> Et an ali umewit humman ni dimonyoh ni pitun edum tu e lawah idan peteg nem hi-gatu et maihuklung ida etan di tuu ey nema-ma law ni peteg etan tuu nem yan eman ni laputu.”

*Yadda etan makulug ni kaman-am-leng*

<sup>27</sup> Ginibbuh Jesus ni inhel huyya ey wadalli hakey ni bii etan di neamung e kantuy “Meka-am-leng ni-ngangu etan biin nengiuungnga niya nengipeinuinum ni hi-gam.”

<sup>28</sup> Nem kan Jesus ey “Nem nema-ma-ma amleng etan ni nangngel ni ehel Apu Dios et u-unnuden tu.”

*Kamandinwadda tutu-un mengullug e hi Apu Dios hu nengitu-dak nan Jesus (Matthew 12:38-42)*

<sup>29</sup> Kamangkedakkel ida tuun neamung di kad-an Jesus ey kantuy “Lawah kayun tuun nunya. Yuka ippatnan memillit ni hi-gak ni mengippeang-ang ni immatun ni kabaelan nan Apu Dios ma-lat amtaen yu hedin makulug ni intu-dak tuwak nan Apu Dios. Nem endi edum ni iddawat nan Apu Dios ni hi-gayun mengippeang-ang ni kabaelan tu nem ebuh hu neipahding lan Jonah e prophet. <sup>30</sup> Yadda eman tuud Nineveh ey humman ni neipahding nan Jonah hu nengimmatunan dan hi-gatu intu-dak Apu Dios. Henin hi-gak e yalli etan meippahding ni hi-gak hu pengi-immatunan yu e hi-gak hu intu-dak Apu Dios. <sup>31</sup> Ya keang-angan tun lawah kayu ey heninnuy: Wada la eman biin apud Seba di Arabia. Edawwi humman ni bebley ni nalpuan tu, nem immalid kad-an Solomon ni an mengngel ni laing tun indawat Apu Dios ni hi-gatu. Nem yan nunya ey iyyadya-ak e nelalla-ing nem hi Solomon, nem eleg yuwak kulluga. <sup>32</sup> Ya hakey mewan ni keang-angan tun kekastiguan yulli ey yadda la eman tuud Nineveh. Tep yan kawedan Jonah ey inu-unnud da intuttuddu tu et mantuttuyyuddan liwat da. Nem yan nunya ey iyyadya-ak e neta-ta-gey nem hi Jonah, nem eleg kayu mengullug ni hi-gak et eleg kayu mantuttuyyun liwat yu. Huyyadda keang-angan tun mekastigu kayullin penuwetan Apu Dios ni tuud puyek.

*Ya kapehding ni tuu ey kameippuun di wadad nemnem tu (Matthew 5:15; 6:22-23)*

<sup>33</sup> Endi tuun tu integran hu kengkeh et tu ha-ninan. Nem ihha-dang tud ka-ang-ang ma-lat han-ang-ang idan umhegep di bawang.

<sup>34</sup> Ya mata hu kamei-ellig ni kamemnang ni nemnem ni tuu. Et humman hu, hedin kayyaggud nemnem yu, man kayyaggud dama elaw yu. Nem hedin lawah nemnem yu, man lawah dama elaw yu. <sup>35</sup> Et humman hu, helipat-i yu ma-lat eleg mahululan ni lawah hu kayyaggud ni nemnem yu. <sup>36</sup> Hedin kayyaggud hu nemnem yu ey kayyaggud dama elaw yu. Huyya kei-elligan etan ni dilag ni tuka bebnangi emin.”

*Ya lawah ni elaw idan Pharisee niyadda kamantuttuddun tugun Moses (Matthew 23:1-36; Mark 12:38-40)*

<sup>37</sup> Negibbuh ni immehel hi Jesus et ayagan etan ni hakey ni Pharisee ni an mekikkan di baley da et makilaw. <sup>38</sup> Ida mengngan ey natnga etan Pharisee tep eleg ipahding Jesus hu elaw dan mambullu.

<sup>39</sup> Nem kan Jesus ey “Hi-gayun Pharisee ey ma-nut yuka ikakkaguh hu elaw yun meippanggep ni lilih henin pengullahan ni basuh niya duyu, nem lawah ni peteg hu nemnem yu, tep yuka pilliwa limmun edum yu niya eleg yu kekennenga hu pinhed ni annel yu. <sup>40</sup> Endi nemnem yu. Kaw eleg yu amta e hi Apu Dios ey inamta tu wadad nemnem ni tuu, tep kaw beken hi-gatu nengapayan emin, ya kameang-ang niya eleg meang-ang? <sup>41</sup> Beken hu elaw yun meippanggep ni lilih hu ikakaguh yu, nem ya kumaddan hu pemaddangan yuddan etan ni anggehennemek ni tuu, tep humman hu kei-angan ni kapengu-unnudin Apu Dios. Ipahding yu humman et ibilang dakeyun Apu Dios ni malinuh.

<sup>42</sup> Anggehennemek kayu katteg ni Pharisee tep mekastigu kayulli. Ma-nut yuka ikakkaguh ni um-idwat nan Apu Dios ni intanem yu, nem eleg yu ippahding hu kayyaggud di edum yun tuu. Et ya kakulugan tu ey endi impeminhed yun hi-gatu. Lebbeng dedan ni um-idwat kayun Apu Dios idan intanem yu, nem entan tu iwalleng ida edum ni pinhed Apu Dios ni pehding yu.

<sup>43</sup> Anggehennemek kayun Pharisee tep mekastigu kayulli. Pinpinhed yun hi-gayu unyudung di yuddngngan ni kametbal ni tuud simbaan. Ey pinpinhed yun tettebalen dakeyun tutu-ud mulkaduh. <sup>44</sup> Makulug anhan et anggehennemek kayu. Anin ni eleg meamta e lawah kayu et nanna-ud ni lawah kayu. Mukun kayu kamei-ellig etan di kulung ni kapan-ingagasinin tutu-u, tep eleg da amta.”

<sup>45</sup> Hinumang ni hakey ni kamantuttuddun Tugun Moses e kantuy “Apu, anin ni hi-gami et nebaingan kamin nanghelan mun nuntan.”

<sup>46</sup> Kan Jesus ey “Em, inamtak. Anin ni hi-gayun kamantuttuddun Tugun Moses et anggehennemek kayu dama tep mekastigu kayulli. Yuka pillitadda tuun mengu-unnud ida etan ni tugun yun neligat, e anin ni hi-gayu et eleg yu kabaelan ni u-unnuden, nem endi hemek yun hi-gada. <sup>47</sup> Ey anggehennemek kayulli tep nemahhig ali kastigu yu. Tep ma-nut kayu kamengennapayan kayyaggud ni kulung idan prophets Apu Dios ni pintey

idan aammed yu <sup>48</sup> ma-lat peang-ang yu e yudda kalispituha, nem ya kakulugan tu, ey yuka ebbuluta humman ni impahpahding idan aammed yu. Pintey dadda ey ingkapyaan yudda daman kulung da. <sup>49</sup> Inamta dedan Apu Dios huyya, mukun kantuy 'Ttu-dak kudda prophets et yadda apostles ni mengittenuddun meippanggep ni hi-gak, nem mepettey ali edum ey meippehelheltap ali edum.' <sup>50</sup> Et humman hu, anin hi-gayun tuun nunya et mekastigu kayu, tep yuka ebbuluta nemateyan idan aammed yun nunman idan prophets, <sup>51</sup> neipalpun Abel ingganah nan Sekariah, e pintey dad kad-an ni altar di bawang ni Tempol. Ippidwak ni e-helen e makulug ni meilleggat kayullid kastigu idan aammed yu, tep petteyen yulli dama etan intu-dak Apu Dios.

<sup>52</sup> Anggehemmek kayu kamantuttuddun Tugun Moses tep kastiguen dakeyun Apu Dios gapuh ni eleg yu pengittuttuudun makulug ni keibbellinan ni tugun. Et anin ni hi-gayu et eleg yu pinhed ni u-unnuden. Ey hi-gayu kaumhanin pengu-unnudan idan nemihed ni mengu-unnud."

<sup>53</sup> Hini-yan Jesus etan baley ni nekikannan tu ey nekilaw ida etan kamantuttuddun Tugun Moses et yadda Pharisee. Dakel daka mahmahi niya ida kamekihhubbeg nan Jesus, <sup>54</sup> tep pinhed dan wada meihlan e-helen tu ma-lat wada pengigga-dulan dan pebehul ni hi-gatu.

## 12

*Emin tayu kapehpehding ey meamtallin hakey ni aggew*  
(Matthew 10:26-27)

<sup>1</sup> Yan nunman ey neamung ida kalibulibun tutu-u et kamangekeigsin hu edum. Inlapun Jesus ni mantuttuudu et kantuddan disipol tuy "Helipat-i yu hu elaw idan Pharisee et eleg yu u-unnuden, tep henidda kayyagud, nem lawah hu nemnem da. <sup>2</sup> Nem endi mabalina ni wada meitlu, tep anin ni eleg meamtan nunya et meamtallin edum ni aggew. <sup>3</sup> Emin in-inhel yud engeenget ni e-ebbuh kayu, ey mandingngel alin kewa-waan tu. Ey emin ittutubbu yud bawang di nelekbian ey meitkuk alid bubung et amtaen alin emin ni tuu.

*Ya kumaddan hu tekkutan tayu ey ya panliwwatan tayun Apu Dios*  
(Matthew 10:28-31)

<sup>4</sup> E-helen kun hi-gayun gagayyum ku e etan tu takusidda etan memettey ni hi-gayu, tep hedin pintey dakeyu, endi law edum ni ippahding dan hi-gayu. Ya ittugun kun hi-gayu, ey <sup>5</sup> hi Apu Dios hu takusi yu, tep dammutun petteyen dakeyu, niya dammutun pellaw tu linnawa yud impiernoh e kalawwin kamekastigu. Hi-gatu hu kan kun tekkutan yu.

<sup>6</sup> Ya pippiweng ey endi balol da tep dewwan hepeng ni ebuh hu bayad ni lima. Nem kaippaptek idan Apu Dios. <sup>7</sup> Et nema-ma ngun hi-gayu, tep anin ni ya bilang ni bewek yu et inamta tu e kei-ang-angan tun e-etteng kapengikkeguh Apu Dios ni hi-gayu. Et humman hu, etan takut yu tep nebalol kayu peteg ni hi-gatu nem yadda pippiweng."

*Entan baing yun mengippeamtan kayu kamengullug nan Jesus*  
(Matthew 10:19-20; 10:32-33)

<sup>8</sup> Kan mewan Jesus ey "Ya tuun menghel ni edum tun tuun tuwak kakulluga ey ibbilang ku daman tuuk di hinanggaddan anghel Apu Dios. <sup>9</sup> Nem hedin ya etan tuun menghel di edum tun tuu e eleg tuwak kulluga ey eggak ali dama ibbilang ni tuuk di hinanggaddan anghel Apu Dios. <sup>10</sup> Ya tuun memihhul ni hi-gak e Pengulwan ni emin ni tuu ey dammutun pessinsahan Apu Dios humman ni liwat tu. Nem ya tuun memihhul ni Ispiritu Apu Dios ey eleg mepossinsahi humman ni liwat tu.

<sup>11</sup> Hedin ya yuka pengullugin hi-gak hu umhulun ni dakeyu panhumalyaan di hinanggaddan Jews et yaddad hinanggaddan ap-apun gubilnu, etan kakkaguh yun ihumang yu. <sup>12</sup> Tep ya Ispiritu Apu Dios hu mengittuuddullin hi-gayun e-helen yu."

*Ya etan kedangyan ni tuu*

<sup>13</sup> Wada etan hakey ni tuun nekiemung e kantun Jesus ey "Apu, ehel mun agik et panggadwa mi etan impebeltan ni ammed min hi-gami." <sup>14</sup> Hinumang Jesus e kantuy "Endi lebbeng kun manhuwet niya mengadwan beltanen yu." <sup>15</sup> Kan Jesus idan neamung ey "Helipat-i yu et eleg yu gangaman ni ellan hu beken yu nan-aatuan, tep anin ni piga kinedangyan ni tuu ey beken humman ni nangged ni biyag tu."

<sup>16</sup> Et ehelen Jesus ni hi-gada hu hakey ni a-abbig. Kantuy "Wada etan kedangyan e yimmaggud hu inggaud tu. <sup>17</sup> Kaumnenemnem tep nangkapnu alang tu et endi law hu pengihha-dan tu. <sup>18</sup> Entanni ey kantuy 'Heballi bukkalen kudda alang ku et hululan kuddan etta-teng et pengiha-adan kun meenni niya edum ni limmuk. <sup>19</sup> Dakel huyyan nan-aatuan ku. Et anin ni pigan toon hu melebbah et eleg me-puh. Anin ni

umyenuyuddunggak et mammangngannak ey menginnuinnummak niya man-am-amlenggak.’

<sup>20</sup> Nem kan Apu Dios ni hi-gatuy ‘Neka-ihhalla huttan ni muka pannemnemnem! Yan nunyan hileng ey mettey ka et endi silbi tudda humman ni limmun.’”

<sup>21</sup> Et kan Jesus ey “Hanniman ali meippahding etan ni tuun ebuh kinedangyan tun tuka nenemnema et eleg tu nemnema hu pansilbian tun Apu Dios.”

*Hi Apu Dios hu idinel tayun mengippaptek ni hi-gatsu  
(Matthew 6:25-34)*

<sup>22</sup> Kan mewan Jesus idan disipol tuy “E-helen kun hi-gayu e entan kakkaguh yun mahapul yud biyag yu, ya kennen yu niya balwasi yu. <sup>23</sup> Mahapul ni nemnemen ni tuu hu hipa gaputun wada biyag tu, beken ya kennen niya balwasi tun ebuh hu nenemnemen tu. <sup>24</sup> Nemnem yudda kedi hu sisit, eleg ida mantennem ey eleg ida man-enni niya endi alang da, nem kenamung hi Apu Dios ni kennen da. Et nema-ma ngun hi-gayun tuu e peka-ippaptek dakeyun hi-gatu, tep nebalbalol kayu. <sup>25</sup> Hakey pay, kaw hedini umkakaguh kayu, man dammutun meduddukkey hu biyag yu anin ew ngun nekemtang? <sup>26</sup> Ey teaye endi hu kabaelan yun mengippahding ew ngun nunman, man kele kayu kaumkakaguh ni edum ni mahapul yu?

<sup>27</sup> Nemnem yudda kedi hu hakhlakung di halun. Eleg ida mangngunu ey eleg ida man-ebbel ni balwasi da. Nem kakkayyaggud ang-ang da nem ya ang-ang ni nenginan balwasi lan Solomon e kedangyan ni peteg ni patul. <sup>28</sup> Et humman hu, hedini hanniman kapemaptek Apu Dios idan habung ni wadan nunya, nem meeppuyan ni kabubuhan, kaw beken ni nema-ma pemaptek tun hi-gayun tuu? Ey kele eleg kayu medinnel e ippaptek dakeyun Apu Dios? <sup>29</sup> Entan kakaguh yun meippanggep ni mahapul yu, ya kennen yu niya innumen yu. <sup>30</sup> Yadda kamengikkakaguh idan nunya ey yadda etan eleg mengullug nan Apu Dios. Nem hedini hi-gayu, man wada hi Ameyu e hi Apu Dios ni nengamtaddan nunyan mahapul yu. <sup>31</sup> Ya kumaddan keilla-kaman yud nan-ap-apuan Apu Dios hu pehebballi yun nemnemen et nanna-ud ni iddawat tun emin hu mahapul yu.

*Ya kinedangyan ni kamengullug ey wadad kabunyan  
(Matthew 6:19-21)*

<sup>32</sup> Hi-gayuddan kamengu-unnud ni hi-gak, entan pandanag yu, tep kaman-am-amleng hi Apu Dios ni nemilin hi-gayun meibbillang di nan-ap-apuan tu. <sup>33</sup> Igtang kayun limmu yu et ibaddang yuddan newetwet, ma-lat gapun nuntan ni ippahding yu ey meweddalli kinedangyan yud kabunyan ni eleg me-puh, eleg metekkew niya eleg mebahbah. <sup>34</sup> Tep hedini yad kabunyan hu kad-an ni kinedangyan ni tuu, man yadman dama hu tuka nenemnema. Nem hedini yad puyek kad-an ni kinedangyan tu, ey yadman dama hu tuka nenemnema.

*Ya ellian ali mewan Jesus di puyek.*

<sup>35-36</sup> Ang-ang yu et mandaddan kayullin pambangngadan ku, henin kapandaddanidan bega-en ni daka penehheggedin keibbangngadan ni apu dan an nekihemul di kasal, ma-lat hedini um-ali et tugtugen tu lekbi, ey gagannu idan mengibbeghul. <sup>37</sup> Um-amleng ida bega-en hedini um-ali apuda ey ha-kupan tuddan kamanhehhegged ni hi-gatu. E-helen kun hi-gayu e mambalwasi etan Apu dan balwasin bega-en et idaddanan tuddan kennen da. <sup>38</sup> Anin ni gawan hileng winu anin ni kimmapih hu pambangngadan ni apu da et um-amleng idan menehheged ni hi-gatu, tep nanna-ud ni wada iddawat tun hi-gadan panyaggudan da. <sup>39</sup> Nemnem yu e gullat ni inamtan kambaley hu ellian ni matekew et eleg tu hi-yana baley tu, tep eddugan tu ma-lat eleg humgep hu matekew. <sup>40</sup> Heni daman hi-gayu, e mahapul ni mandaddan kayun kenayun ni menehhegged ni hi-gak e Pengulwan ni emin ni tuu, tep eleg yu amta hedini pigan tu pambangngadan ku.”

*Ya etan lawah niya kayyaggud ni bega-en  
(Matthew 24:45-51)*

<sup>41</sup> Immehel hi Peter et kantun Jesus ey “Kaw hi-gami muka pampengittuggunin nuntan winu emin eya tuu?” <sup>42</sup> Hinumang Jesus e kantuy “Ya etan nelaing niya kameiddinnel ni bega-en ey hi-gatu pillien ni apu tun pan-ap-apuddan edum tun bega-en ni mengippaptek ni kennen da hedini nedatngan hu pengngannan da. <sup>43</sup> Um-amleng etan bega-en hedini um-ali apu tu ey ang-angen tu e kayyaggud tuka pehpehding. <sup>44</sup> Nemnem yu eya e-helen kun hi-gayu, hedini hanniman hu pehpehding tu, ey peta-gey ni apu tu hu saad tu et mambalin ni hi-gatu hu mengippaptek ni emin ni limmun nunman ni apu tu. <sup>45-46</sup> Nem hedini kan nunman ni bega-en di nemnem tu ey ‘Anin hipa pehding ku yaggud

mebeyyag ali ap-apu mid linawwan tu.' Et pelilligatan tudda edum tu, niya ebuh hamul niya buttebutting ni tuka pehpehding. Nem entanni ey immali etan apu da et ha-kupan tu humman ni tuka pehpehding et kastiguen tun henin kastiguddan etan ni eleg mengu-unnud.

<sup>47</sup> Ya bega-en ni nengamtan tugun ni apu tu, nem eleg tu u-unnuda, ey nemahhig kastigu tu. <sup>48</sup> Nem ya bega-en ni eleg mengamtan tugun ni apu tu, et eleg tu u-unnuden, ey mekastigu dama, nem beken ni nemahhig hu kastigu tu. Ya etan tuun nenemneman niya wadwada-an di emin, ey hi-gatu et kuma hu e-etteng pehding tun panyaggudan. Et humman hu, hedin et-eteng hu neidinel ni hakey ni tuu, ey mahapul daman et-eteng hu pehding tu. Ey hedin et-eteng ni peteg hu neidinel ni hakey ni tuu, ey et-eteng ni peteg dama hu mahapul ni pehding tu.

*Ya kegennadwaan idallin tuu tep nambabaklang hu daka pannemnem meippanggep Jesus*

*(Matthew 10:34-36)*

<sup>49</sup> Ya gaputun inlian ku eyad puyek ey ma-lat meamta hu kamengullug et ya eleg mengullug. Ey pinhed ku- et anhan ni megibbuh law huyyan ngunuk. <sup>50</sup> Nemahhig ali panligligatan ku et deh e anin ni nunya et endin hekey linggep ku ingganah megibbuh humman ni ligat ku. <sup>51</sup> Kaw kanyuy immali-ak ma-lat luminggep emin hu tuud puyek? Eleg, tep dakel idalli mambabakal gapuh ni hi-gak. <sup>52</sup> Meippalpun nunya, ey anin hampamilyah et eleg ida man-uunnud e manhahalladda. <sup>53</sup> Anin idan han-aamma, yadda han-iinna et yadda han-aaydu et manhahalladda."

<sup>54</sup> Kan mewan Jesus idan neamung ey "Hedin tengngawen yu kabunyan ey nekulpunan, ey kanyuy um-udan. Ey makulug ni um-udan. <sup>55</sup> Hedin tengngawen yu kabunyan ey endi kulput, kanyuy meuggew. Ey makulug ni meuggew. <sup>56</sup> Maitek kayun peteg. Nelaing kayun mengamtan keibbellinan ni yuka ang-angad kabunyan niyad puyek, nem kele kayu kametemman mengimmatun ni kamekapkapyan nunya?"

<sup>57</sup> Kele eleg yu amta kayyaggud ni pehding yu? <sup>58</sup> Hanniman mewan hedin wada megiddiklamuh ni hi-gayu e ipatna yun mekihummangan ma-lat eleg dakeyu ilaw di huwet. Tep peella dakeyun huwet et dakeyu pekellabut. <sup>59</sup> E-helen kun hi-gayu e hedin neikelabut kayu, man eleg kayu meibbukyat ingganah beyyadan yun emin hu multa yu, anin hepeng."

## 13

*Emin tuu ey mahapul ni mantuttuyyuddan liwat da*

<sup>1</sup> Yan nunman ni kamantuttuddu hi Jesus, ey wadadda etan ni nekiemung hu nengipeamtan hi-gatu meippanggep idan iGalilee ni impapetey Pilate et i-dum tu kuheyaw dad kuheyaw ni killeng da. <sup>2</sup> Hinumang Jesus e kantuy "Kaw kanyu nem nehalman hu liwat da nem yadda edum ni tuud Galilee gapu tep henin nunman hu elaw ni neteyyan da? <sup>3</sup> Eleg. Nem e-helen kun hi-gayu e nanna-ud daman mettey kayu hedin eleg kayu mantuttuyyun liwat yu. <sup>4</sup> Henidda mewan eman lan hampulut walun netey ni nede-hilan ni netukkad ni eta-gey ni baley di Siloam. Kaw penghel yu nem gaput henin nunman hu neteyyan da ey nekalliwtan ida nem yadda edum dan bimbley di Jerusalem? <sup>5</sup> Eleg! Nem e-helen kun hi-gayu e nanna-ud daman mettey kayu hedin eleg kayu mantuttuyyun liwat yu."

*Ya a-abbig ni meippanggep etan ni keyew e fig*

<sup>6</sup> Entanni et a-abbigen Jesus hu meippanggep etan keyew ni fig. Kantuy "Wada etan lakin wada intanem tun fig. Kaumlaw ni menang-ang ni lameh tu, nem endi tuka illameh. <sup>7</sup> Et kantu etan ni tuka pangngunggunnu ey 'Lengeh mu katteg eman keyew tep tellun toon law ni nakka hellipat-i lemmehan tu ey eleg umlameh. Ebuh diman ey kaum-eennan.' <sup>8</sup> Nem kan etan ni tuka pangngunggunnu ey 'Apu, diman ni han toon et ku-kuan ku hengeg tu et ha-adan kun abonoh et <sup>9</sup> hedin dedanggun kapyatun eleg umlameh ni balin tu, hanmulli impalngeh.' "

*Ya nangkalan Jesus ni bu-kung etan ni bii*

<sup>10-11</sup> Hakey ni Sabaduh ey kamantuttuddu hi Jesus di simbaan ni Jew, ey wadad man hu biin ni impandegeh ni neiuhklung ni dimonyoh ni hampulut walun toon. <sup>12</sup> Nebukung et eleg mabalin ni man-andeng ni um-ehneng. Inang-ang Jesus ey inaygan tu et kantuy "Na-kal law degeh mu." <sup>13</sup> Kimpan Jesus annel tu ey pinhakkeyey neandeng beneg tu et dayawen tu hi Apu Dios.

<sup>14</sup> Nem bimmunget etan Jew ni ap-apud simbaan tep ingkal Jesus degeh nunman ni bii ey Sabaduh e kamengillin ni aggew. Kan nunman ni ap-apu etan idan neamung

ey "Wada enem ni aggew ni pangnungnuan. Hedin pinhed yun me-kal degeh yu, ali kayun edum ni aggew, beken ni Sabaduh." <sup>15</sup> Hinumang Apu Jesus e kantuy "Maitek kayun peteg! Emin kayu ey yuka ukkaha iket ni newang yu et ya kebayyu yu et yudda impainuman, anin ni Sabaduh. <sup>16</sup> Iyyadya eya biin helag Abraham e hampulut walu toon hu nandegehan tu, tep impandegeh Satanas. Kaw lawah hu nangkalan kun degeh tun Sabaduh?"

<sup>17</sup> Inhel Jesus huyya ey bimmaing ida etan tuun kamengehning ni hi-gatu. Nem kaman-amleng ida edum ni tuu gapuh nunman ni kayyaggud ni impahpahding Jesus.

*Ya etan ekkeket ni bukel*  
(Matthew 13:31-32; Mark 4:30-32)

<sup>18</sup> Kan Jesus ey "Wada ittuttudduk ni hi-gayun meippanggep ni nan-ap-apuan Apu Dios. <sup>19</sup> Kamei-ellig hu nan-ap-apuan Apu Dios etan ni bukel ni mustard e keek-eketan di emin ni bukel. Simmemel et meetteng et pambuyaan idan sisit di pangetu."

*Ya etan yeast*  
(Matthew 13:33)

<sup>20</sup> Entanni ey kan Jesus ey "Hipa mewan hu hakey ni kei-elligen ni nan-ap-apuan Apu Dios? <sup>21</sup> Kamei-ellig etan ni yeast ni ingkamdug ni hakey ni biid alinah et palbag tu etan kinapya tun sinapay."

*Ya etan nahkit ni habyen*  
(Matthew 7:13-14, 21-23)

<sup>22</sup> Yan kapenglawwid Jesus di Jerusalem ey nanda-guh ida etan idad bebley ni nengidlanan da et mantuttuddu. <sup>23</sup> Entanni ey wada etan hakey ni tuun nengibgan hi-gatu e kantuy "Kaw hahhakkey ida mehellakniban?" <sup>24</sup> Kan Jesus ey "Em, tep neligat ni u-unnuden hu kameituttuddun meippanggep nan Apu Dios. Heni etan ni ekkeket ni habyen ni neligat ni hehgepan. Et humman hu, ipahding yun emin hu kabaelan ni pehding yun mengu-unnud nan Apu Dios anin ni neligat, tep ma-nut dakel hu tuun neminshed ni umlaw di kad-an tu, nem hahhakkey ida peka-law diman. <sup>25</sup> Tep hedin eleg yu ipahding hu kabaelan yun mengu-unnud ey heni kayulli etan ni tuun pinhed tun umhegep etan di baley, nem inlekbi etan ni kambaley. Et kaum-eehngeng di dallin. Et tagan tu tugtug et kantuy 'Apu, pahgep muwak anhan.' Nem kan etan ni kambaley ey 'Eleg daka pehgep, tep eleg daka amta.' <sup>26</sup> Nem kan etan ni tuuy 'Tam nekikakikan kamin hi-gam niya nantuttuddu kad bebley mi ey kele kammuy eleg muwak amta?' <sup>27</sup> Nem immehel mewan etan kambaley et kantuy 'Makulug et eleg daka amta. Pampenga-allaw ka, tep lawah kan tuu.' Henin nunya hu pehding alin Apu Dios ni hi-gayu hedin eleg kayu mantuttuyyun liwat tu.

<sup>28</sup> Umnanganingih kayulli niya ngellingellidihen yulli ngipen yun penang-angan yu e wadaddad kad-an Apu Dios ida aammed tayu la e hi Abraham, hi Isaac, hi Jacob et yadda emin hu prophets Apu Dios. Ey hedin hi-gayu, man eleg dakeyu pehgep. <sup>29</sup> Ey anin idallin kamengullug di kebebbebley di puyek ey wadaddad man ni kamekikkikkan nan Apu Dios. <sup>30</sup> Nemnem yu eya e-helen ku: yadda tuun endi bilang dan nunya ey hi-gadalli meibbilang ni eta-gey ey yadda tuun kameibbilang ni eta-gey ni nunya ey hi-gadalli endi bilang tu."

*Ya et-eteng ni impeminhed Jesus idan tuud Jerusalem*  
(Matthew 23:37-39)

<sup>31</sup> Entanni ey wadadda immalin Pharisee di kad-an Jesus et kandan hi-gatuy "Mahapul ni um-a-allaw kadya, tep pinhed Herod ni petteyen daka."

<sup>32</sup> Hinumang Jesus et kantuy "Lakkayuy di kad-an nunman e hi Herod e nekattalam, et ehelen yun hi-gatu e pan-e-kalen kuddan nunya et yan kabuhhan hu kameihhuklung ni dimonyoh niya degeh idan tuu. Et yan katlun aggew ey megibbuh hu ngunuk. <sup>33</sup> Anin attu lawwan kun nunya, yan kabuhhan et yan bewahtu et endi an mengi-leg ni hi-gak. Tep mahapul ni umlawwak di Jerusalem e bebley ni nematepateyan da lan nunman idan prophets APU DIOS, tep yadman dama pemetteyan dan hi-gak.

<sup>34</sup> Hi-gayun tutu-ud Jerusalem, anggehmmek kayu, tep nanna-ud ni mekastigu kayu. Yuka pampateyadda prophets, niya yudda kapantengbaadda hu kamengituttuddun ehel Apu Dios. Neminpigga hu pinhed ku-et anhan ni pengemmungan ni hi-gayu henin kapengemmungin manuk idan impah tud payak tu, nem eleg yuwak pinhed. <sup>35</sup> Em, anggehmmek kayu, tep iwwalleng Apu Dios hu Tempol et ya bebley yu. Et e-helen kun hi-gayu e eleg yuwak ali law ang-anga ingganah kanyuy 'Kakkayyaggud hu intu-dak Apu Dios e kamengippeamtan hi-gatu.' "

## 14

*Ya nangkalan Jesus ni degeh etan ni tuun limmebag annel tu*

<sup>1</sup> Hakey ni Sabaduh, ey limmaw hi Jesus ni an nekikan di baley ni hakey ni apuaddan Pharisee. Ey emin ida etan tuun wadad man ey daka hellipat-i hu pehding tu, <sup>2</sup> tep wadad hinanggan tu etan tuun limmebag ida heli tu et ya ngamay tu. <sup>3</sup> Kan Jesus idan kamantuttuddun Tugun Moses et yadda Pharisee ey "Kaw kai-abulut ni Tugun Moses hu pengkalan kun degeh ni tuun Sabaduh e kamengillin ni aggew?" <sup>4</sup> Ey endi kamenumang ni hi-gatu et kapaen tu humman ni kamandedgeh et ma-kal degeh tu et paenamut tu.

<sup>5</sup> In-ang-ang Jesus ni hi-gada et kantuy "Inna-nu hedin me-gah hu u-ungnga yu winu newang yud edallem ni bitu, kaw anin ew ni diman tep Sabaduh? Inamtak et yu gegannuen ni nuhnuhen." <sup>6</sup> Endi da penummang nunman et ida kaum-eneeneng.

*Ya tugun ni pengippebabahan ni annel*

<sup>7</sup> Yan nunman ni wada hi Jesus di diman ni baley ni tu nekikannan ey tudda kaang-ang-anga etan tutu-un kamenggep ni kamampippilliw ni umyudung etan di yuddungngan ni kametbal. Et kan tuddan nunman ni tutu-un neayagan ey <sup>8</sup> "Hedin umlaw kayun an mekihheumul di kasal, ey entan an yudung di yuddungngan ni kametbal. Tep hedin um-ali etan kametbal, ey <sup>9</sup> pea-allaw dakey etan ni nengayag ni hi-gayu et ya etan kametbal hu peyuddung tud yinudungan yu. Anggeba-ing hu yu ke-kalan di yuddungngan ni kametbal et kayu mei-tan di yuddungngan ni nebabah ni tuu. <sup>10</sup> Kayyaggud hu hedin wada nengayag ni hi-gayu, heballi yudung kayud yuddungngan ni nebabah ni tuu, et hedin um-ali etan kambaley ey kantuy 'Agik, ka yudung eman di yuddungngan ni kametbal,' ey han ka limmaw ni umyudung diman. Et hedin hanniman, nanna-ud ni tettebalean dakaddan edum mun an nekihheumul. <sup>11</sup> Huyya tugun ku, tep ya tuun tuka petagey annel tu ey meibbabah ali. Nem ya tuun tuka pebabah hu annel tu ey meiddeyyaw ali."

<sup>12</sup> Kan Jesus etan ni nengayag ni hi-gatuy "Hedin mampehemmul ka, beken ida gagayyum mu niya aaggim ni kedangyan hu ayagim, tep eyyagan dakalli dama hedin mampehemmul ida et heni nebayadan hu mu nekihheumul. <sup>13</sup> Nem hedin mampehemmul ka, yadda newetwet, yadda nepikluy, yadda nepi-day et yadda nekulap hu ayagim, <sup>14</sup> et um-amleng ka, tep anin ni endi kabaelan dan memeyyad ni hi-gam, ey wadalli panyaggudam ni melpun Apu Dios ni penegguan tuddallin nangketey ni imbilang tun kayyaggud."

*Ya a-abbig ni pekihheumul di kad-an Apu Dios  
(Matthew 22:1-10)*

<sup>15</sup> Dingngel etan ni hakey ni tuun nekikan ey kantun Jesus ey "Um-amleng etan tuun an mekikkan alid kad-an Apu Dios." <sup>16</sup> Hinumang Jesus ni a-abbig e kantuy "Wada etan tuun ninemnem tun mampehemmul et paeyag tudda dakel ni tuun an mekikkan. <sup>17</sup> Neidaddan emin hu kennen et itu-dak tu bega-en tun an mengeyyag ni hi-gada. Kantun hi-gatuy 'Kan mun hi-gada ey, ikeyuy tep neidaddan law hu kennen.' <sup>18</sup> Nem emin ida etan tuun neayagan ey kaday endi inna-nu dan umlaw. Ya etan hakey ey kantuy 'Eggak um-ali, tep wada ginetang kun puyek et pakkaw ni nak ang-angen.'

<sup>19</sup> Ya dama etan hakey ey kantuy 'Eggak um-ali, tep ginetang ku hampulun newang et nak ida kahakkehakkeyan ippatnan pan-elladu.' <sup>20</sup> Et ya etan hakey ey kantuy 'Eggak um-ali, tep pakeahwak.'

<sup>21</sup> Nambangngad etan bega-en di kad-an ni kan bega-en ni hi-gatu, et ehelen tu hu inhel ida etan ni tuun neayagan, ey bimmunget et kantuy 'Lakkay di dalan niyad mulkaduh et mudda pan-aygan hu nangkewetwet, yadda nedahuy, yadda nekulap niyadda nepi-day.'

<sup>22</sup> Neba-ba-ba ey nambangngad etan bega-en tu ey kantuy 'Apu, inu-unnud ku inhel mu, nem kulang immalin tuu.' <sup>23</sup> Kan etan ni kan bega-en ni hi-gatuy 'Lakkay idad keltad et yaddad dalan et piliten mudda dakel ni tuun um-ali, tep pinhed kun mepnu tuud baley ku. <sup>24</sup> Nem e-helen kun hi-gam e endi, anin hakey ida etan ni tuun neayagan ni laputu hu menamtam ni indaddan kun hemmullen.'"

*Ya tuun mengu-unnud nan Jesus ey mahapul ni hi-gatu pakappinheden tu  
(Matthew 10:37-38)*

<sup>25</sup> Hakey ni aggew ey dakel ida tuun nekilaw nan Jesus. In-ang-ang tun hi-gada et kantuy <sup>26</sup> "Ya tuun neminhed ni mengu-unnud ni hi-gak ey pakkaw ni e-etteng hu peminhed tun hi-gak nem ya a-ammed tu, ya ahwa tu, yadda u-ungnga tu, yadda agitu, anin ya annel tu. Em, pakkaw hannya pehding tu et han dammutun meibbillang ni



disipol ku. <sup>27</sup> Ey ya tuun eleg tu han-ispel ni mekihelheltap ni hi-gak ey eleg tuwak han-u-unnud.

<sup>28</sup> Hedin pinhed yun mengu-unnud ni hi-gak, ey mahapul ni pekannemnem yu. Henin etan ni tuun pinhed tun mengapyan et-eteng ni baley e pakkaw pekannemnem tu hedin hanggela tun kapyau. <sup>29</sup> Tep hedin inhamang tun ebuh etan baley ey na-puh pihuh tu et eleg tu gibbuhen, ngi-ngi-ngian idan edum tun tuu. <sup>30</sup> Kandalliy 'Wada etan tuun ngilepun mengapyan et-eteng ni baley, nem eleg tu hanggela gibbuhen.' "

<sup>31</sup> Kan Jesus mewan ey "Hedin wada patul ni pinhed tun gubbaten hu edum ni patul, mahapul ni pekannemnem tu hedin dammutun apputen ni hampulun libun sindalu tu hu dewampulun libun sindalun buhul tu. <sup>32</sup> Nem hedin nemnem tuy eleg tu han-apput, pakkaw ni um-itu-dak ni an mekihummangan ma-lat eleg ida matuluy ni manggubbat, nem manggayyum ida. <sup>33</sup> Heni daman etan ni tuun nemnhed ni mengu-unnud ni hi-gak e mahapul ni ittuppug tun hi-gak hu nemnem tu, tep hedin wada hin-appil ni u-unnuden tu e beken hi-gak ni ebuh ey eleg mambalin ni disipol ku."

*Ya endi silbi tun ahin*

*(Matthew 5:13; Mark 9:50)*

<sup>34-35</sup> Kantu mewan ey "Ya ahin ey kayyaggud tuka pansilbii. Nem hedin na-kal tamtam tu, man endi law silbitu ey eleg mabalin ni an pebanggad humman ni tamtam tu. Et humman hu, ibbeng ew katteg law. Ya nemnhed ni mengngel nunyan inhel ku ey nemnemnem tu et awatan tu." \*

## 15

*Ya a-abbig meippanggep ni kalneroh ni netalak*

*(Matthew 18:12-14)*

<sup>1-2</sup> Hakey ni aggew ni kamantuttuddu hi Jesus ey wadadda kaman-emption ni buwis niyadda edum dan nangkeliwtan di kad-an tun mengngel ni tuka ittuttuddu. Et yadda Pharisee niyadda kamantuttuddun Tugun Moses ey ida kamangnguddu e kanday "Huyya ngu daman tuu e kele tuka pekahhengguda eyadda nangkeliwtan ni tuu ey kamekikkan man anhan ni hi-gada?" <sup>3</sup> Hinumang idan Jesus ni a-abbig meippanggep ni netalak ni kalneroh. <sup>4</sup> Kantuy "Inna-nu hedin wada hakey ni tuun wada hanggatut ni kalneroh tu ey netalak hakey, kaw eleg tu hi-yana etan nahyam et heyam di pattullan et tu hamakan etan hakey ni netalak ingganah hemmakan tu? <sup>5-6</sup> Et hedin himmak tu, man-am-amleng ey pinhan tu et ienamut tu et kan tuddan gagayyum tu niya sinakdul tuy 'Kaemung itsu et man-am-amleng itsu, tep himmak ku netalak ni kalneroh ku.'

<sup>7</sup> Henin nunman ni tuu e heni netalak tep ya liwat tu, nem entannit nantuttuyyu ey heni nehamak. E-helen kun hi-gayu e et-eteng amleng di Apu Dios di kabunyan ni pantuttuyyuan ni hakey ni tuun neliwatan, nem ya nahyam et heyam ni kanday kayyaggud ida et eleg mahapul ni mantuttuyyudda."

*Ya etan palatah ni netalak*

<sup>8</sup> Kan mewan Jesus ey "Hipa pehding ni biin wada hampulun palatah tu ey netalak hakey, kaw eleg tu integri kengkeh et manegad ma-lat peka-ang-angen tud emin di hulek ingganah hemmakan tu? <sup>9</sup> Et hedin himmak tu, eyyagan tudda gayyum tu niyadda sinakdul tu et kantuy 'Man-am-amleng itsu, tep himmak ku hu netalak ni palatah ku.'

<sup>10</sup> E-helen kun hi-gayu e hanniman ida dama hu anghel Apu Dios e ida kaman-am-amleng hedin wada hakey ni tuun nantuttuyyun liwat tu."

*Ya etan nantalak ni kat-agun laki*

<sup>11</sup> Nan-ab-ibig mewan hi Jesus e kantuy "Wada etan hakey ni tuun wada dewwan lakin u-ungga tu. <sup>12</sup> Entanni ey kan etan ni udidyan nan ameday 'Idwat mun hi-gak hu beltanen ku.' Et gedwaen ameda hu limmu tu et idwat tuddan nunman ni dewwan u-ungga tu. <sup>13</sup> Nelabah pigan aggew ey inggatang ni udidyan emin hu bineltan tu et hianen tu baley ameda et lumaw di edawwin bebley et tu legelegemen ni inu-ummah hu pihuh tu et maumah emin. <sup>14</sup> Entanni ey wada bisil di kebebbley diman ni linawwan tu et kameu-upa, nem endi law pihuh tu. <sup>15</sup> Et an manemak ni pekittangdanan tu. Nambalin ni bega-en et ya ngunu tu ey mampaptek ni killum. <sup>16</sup> Neka-upa et anin na-mun kennen ni killum et kennen tu, nem endi anhan hu kaum-idwat ni kennen tu. <sup>17</sup> Entanni law ey tuka nemnemnema humman ni tuka panhelheltapi et kantud nemnem

\* **14:34-35** 14:34-35 Ya keibbellinan tu huyya ey yadda nemnhed ni mengu-unnud nan Jesus Christo e pakkaw ni pakannemnem tu, tep hedin eleg tu han-u-unnud tep wada edum ni pinhed tun u-unnuden, man endi silbi tun tu pengipatnaan ni mengu-unnud ni hi-gatu.

tuy: Dake! ida bega-en ama ey kamehewwahawwal kenne da. Ey iyyadya-ak di deya e metteyyak ni upak. Mambangngaddak ew di kad-an ama et kangku la ey <sup>18</sup> 'Ama, nanliwattak nan Apu Dios niya nambahullak ni hi-gam. <sup>19</sup> Eleggak law meibbillang ni u-ungngam, nem ibilang muwak anhan ni bega-en mu.' <sup>20</sup> Humman hu ninemnem tun pehding tu et umgah ni mambangngad di baley ametu.

Neidawwi ni pay di baley da ey inimmatunan ametu ey kaman-am-amleng ni peteg ni nenang-ang ni hi-gatu. Nambesik hi ametun an menipngat ni hi-gatu et akwalen tu. <sup>21</sup> Kan nunman ni u-ungngatu ey 'Ama, nanliwattak nan Apu Dios niya nambahullak ni hi-gam. Eggak law meibbillang ni u-ungngam.'

<sup>22</sup> Nem kan ametuddan bega-en tuy 'Papuut yu et yu alen hu kekakayyaggudan ni balwasi et pebalwasi yu eyan u-ungngak. Iha-ad yu singsing di kimeng tu niya patut di heli tu. <sup>23</sup> Ey kayulli alan mateban kilaw ni baka et wa-teken yu et hamulen tayu et man-am-amleng itsu. <sup>24</sup> Tep huyyan u-ungngak ey heni netey, nem ay simmagu, netalak, nem ay nehamak.' Et ilepu dan man-am-amleng.

<sup>25</sup> Wada etan pengulwan di payew ni nunman. Et yan ennamutan tu e kamenetteng di baley da, ey dingngel tu gangha niya inang-ang tudda kameneyyaw. <sup>26</sup> Inaygan tu hakey ni bega-en et ibegatu hipa gaputun daka pangganghai niya daka peneyyaw. <sup>27</sup> Kan ni bega-en ni hi-gatuy 'Immanemut dedan etan agim et pepalsin amam hu kilaw ni baka ma-lat man-am-amleng itsu tep mategu hi agim.'

<sup>28</sup> Nem bimmunget etan pengulwan ey eleg tu pinhed ni umhegep di baley da. Et umhep hi ametu et tu a-alluken. <sup>29</sup> Nem kantun ametuy 'Nebayag ni ingngunungunuan daka e heni-ak himbut ey endin hekey nak kinehing ni intugun mu. Nem endi indawat mun hi-gak anin ew ngun impah ni gelding et hamulen middan gagayyum ku. <sup>30</sup> Nem yan nunyan immanemut eya u-ungngam ni nengumah ni pihhuh mu gapuh ni lawah ni bii ey impulsian mun mateban baka.' <sup>31</sup> Kan ametuy 'Hi-gam e u-ungngak ey wadawada kan kenayun di kad-an ku et emin hu limmuk ey ellam ni emin. <sup>32</sup> Kayyaggud tu man-am-amleng itsu tep heni netey hi agim, nem ey netagwan. Ey heni netalak, nem ay nehamak.'"

## 16

### *Ya etan lawah ni bega-en*

<sup>1</sup> Wada mewan ina-abbig Jesus idan disipol tu e kantuy "Wada etan kedangyan ni wada hakey ni bega-en tun kamengipaptek ni limmu tu. Entanni ey dingngel etan ni kedangyan e kau-ummahan etan ni bega-en hu pihhuh tu et <sup>2</sup> paeyag tu et kantun hi-gatuy 'Kaw makulug eya dingngel kun muka u-ummaha pihhuh ku? I-lim ida neitudekan ni limmuk, tep me-kal kad ngunum.' <sup>3</sup> Kan nunman ni bega-en di nemnem tuy 'Hipa na-mu pehding ku, tep ay e-kalen da-ak di ngunuk ey eggak umkipuh ni mangge-ud niya nakka umbaing ni mangkekkedew ni mahapul ku. <sup>4</sup> Nem anin, inamtak pehding ku ma-lat hedini me-kallak, man wadaddalli gagayyum kun memaddang ni hi-gak.'

<sup>5</sup> Et ayagan tudda etan immutang etan ni kan bega-en ni hi-gatu et hakkehakkeyen tuddan inungbal. <sup>6</sup> Kantu etan ni nemangulun immutang ey 'Piga utang mun apuk?' Kan nunman ni immutang ey 'Hanggatut ni galon ni mansika.' Kan etan ni bega-en ni hi-gatuy 'Adyah etan neitudkan ni utang mu. Yudung ka et papuut mun hullulan et itudek mu e neliman ebuh utang mu.'

<sup>7</sup> Kantu dama etan ni neikadwan immutang ey 'Piga utang mun apuk?' Kan etan ni neikadwan immutang ey 'Hanggatut ni kaban ni begah.' Kan nunman ni bega-en ni hi-gatuy 'Itudek mu hu newalun kaban ni ebuh.' <sup>8</sup> Yan nengamtaan ni apu tun meippanggep nunman ni impahding tu ey kantuy 'Hiyya numan e netalam ni peteg.' " Huyya ina-abbig Jesus et kantuy "Makulug ni yadda eleg mengullug ey nelalla-ing idan mannemnem ni pehding da hedini wada ligat da nem yadda kamengullug. <sup>9</sup> Nem ya e-helen kun hi-gayu ey hedini wada pihhuh yu, man baddangi yudda nangkewetwet, tep hakey alin aggew et endi silbitu hu pihhuh yu. Hedini huyya pehding yu, man et-eteng ali panyaggudan yun ingganah di kad-an Apu Dios.

<sup>10</sup> Ya tuun kameiddinnel di hipaddan ekket ni balol ey kameiddinnel damaddad et-eteng ni balol. Et ya tuun illapu tun menekkew ni ekket ey lektattu et e-eteng hu tekkewen tu. <sup>11</sup> Et humman hu, hedini eleg kayu meiddinnel di kinedangyan eyad puyek ni kameumma ey eleg kayu meiddinnel di kinedangyan di kabunyan ni kamannananeng. <sup>12</sup> Tep hedini eleg mabalin ni meiddinnel ni hi-gayudda hu wadad puyek ni indawat Apu Dios, kaw tu idawat ni hi-gayu etan panyaggudan alid meikadwan biyag yud kad-an tuh?

<sup>13</sup> Eleg mabalin ni unnuden ni tuu hu dewwan ap-apu. Tep eleg tu amta hedin hipan hi-gada u-unnuden tu, et pinheden tu hakey, ey angebe-hel tu hakey. Winu pihhulen tu hakey, ey peka-u-unnuden tu hakey. Henin pengu-unnudan nan Apu Dios e endi inna-nu yun mengu-unnud ni hi-gatu hedin ya kinedangyan hu gagamgaman yu."

*Yadda intuttuddun Jesus*

*(Matthew 11:12-13; 5:31-32; Mark 10:11-12)*

<sup>14</sup> Yadda Pharisee e ya pihhuh hu daka gagamgami ey daka pippihula hi Jesus ni nangngelan dan inhel tu. <sup>15</sup> Nem kan Jesus ni hi-gaday "Yuka peang-ang e kayyaggud kayu ma-lat tettebalan dakeyuddan tuu, nem hi Apu Dios ey dakeyu kauh-uhdungi et amta tu nemnem yu. Ya tuun ebuh hu penettebalan ni edum dan tuu hu daka gagamgami ey bellawen idan Apu Dios.

<sup>16</sup> Ya Tugun Moses et yadda intudek ida lan prophets Apu Dios ey neitenuttuddu ingganah eman ni kawedan John e kamemenyag. Et meippalpun nunman ey kameittuttuddu hu meippanggep ni nan-ap-apuan Apu Dios. Et yadda tuu ey daka ippatnan mengippillit ni meilla-kam di nan-ap-apuan Apu Dios. <sup>17</sup> Nem entan tu nemnem e endi silbin Tugun Moses, tep anin meummah hu puyek niya kabunyan et mannenneng ida humman ni Tugun, anin ni hakey ni ku-lit ni ebuh.

<sup>18</sup> Ya lakin hi-yanen tu ahwa tu et mambintan ey in-abek tu hu ahwa tu. Ey ya etan lakin mengahwa etan ni biin hini-yan ni ahwa tu ey manliwwat dama."

*Ya etan kedangyan et hi Lasarus*

<sup>19</sup> Nan a-abbig mewan hi Jesus et huyya hu ina-abbig tu "Wada etan kedangyan e nangkinginan peteg emin hu balwasi tu niya wadan emin hu mahapul tu. Ey kamehewwahewwal hu kennen di baley tu. <sup>20</sup> Ey wada dama hi Lasarus e anggehemekek tep newetwet ni peteg niya negulid emin annel tu. Daka illaw di eheb ni baley nunman ni kedangyan et mambakbaktad diman. <sup>21</sup> Penghel tu et hedin wada imbing nunman ni kedangyan ni hinewal tun kennen, ey hayuden tu. Et ida kama-ali ahhu et daka himmuhimmusi hu gulid tu. <sup>22</sup> Hakey ni aggew ey netey humman ni newetwet et ilaw idan anghel Apu Dios di kad-an Abraham. Entanni ey netey dama etan kedangyan et maikulung <sup>23</sup> Huyyan kedangyan ey lehan tun peteg di impiernoh ni linawwan tu. Intangaw tu ey inang-ang tu hi Abraham ey wada hi Lasarus di kad-an tu, e humman la etan newetwet. <sup>24</sup> Simmekuk et kantun Abraham ey 'Apu, hemek muwak anhan. Itu-dak mu hi Lasarus ma-lat anin ew ni itta-mel tun ebuh kimeng tud danum et ih-ihan tu dilak ma-lat metengninan ni ekket, tep nakka helheltapa atung ni apuy di deya.'

<sup>25</sup> Nem kan Abraham ey 'Unggak, nemnem mu e yan wada ka lad puyek ey nan-am-amleng ka tep wadan ingganah emin mahapul mu, nem hedin hi Lasarus katteg, man anggehemekek. Nem yan nunya, ey kaman-am-amleng hi Lasarus di deya et hi-gam hu kamanhelheltap. <sup>26</sup> Hakey pay, ey edawwin peteg nambabattanan tayu, et eleg mabalin ni wada melpud yan umlaw ditan niya eleg mabalin ni wada melpud tan ni um-alidya.'

<sup>27</sup> Hinumang etan ni kedangyan et kantuy 'Anin anhan e ama Abraham, nem itu-dak mu tep hi Lasarus di baley di ama <sup>28</sup> tep wada pay liman agik. Et tugunen tudda ma-lat eleg ida dama um-lidya, tep nemahhig hu kapanhelheltapidya.'

<sup>29</sup> Nem kan Abraham ey 'Eleg mahapul, tep inamta da Tugun Moses et yadda intuttudduddan prophets lan Apu Dios et dammutun humman ida u-unnuden da.'

<sup>30</sup> Kan mewan etan ni kedangyan ey 'Apu Abraham, daka kehinggadda humman, nem hedin et wada netey ni mambanggad di kad-an da, ey nanna-ud ni kullugen da hu e-helen tu et mantuttuyyuddan liwat da.'

<sup>31</sup> Nem hinumang daman Abraham et kantuy 'Eleg, tep hedin daka kehingga Tugun Moses et yadda prophets lan Apu Dios, ey kehgingen da metlaing hu itugun ni tuun umtagu.' "

## 17

*Ya elaw ni liwat*

*(Matthew 18:6-7, 21-22; Mark 9:42)*

<sup>1</sup> Kan Jesus idan disipol tu ey "Dakel hu kaumhulun ni kapanliwwasin tuu. Nem anggehemekek etan tuun hi-gatu umhulun ni panliwwatan ni edum tu, tep nemahhig hu kastigu tu. <sup>2</sup> Heballi ta-yunan hu buklew tun et-eteng ni batu et an lenengen di baybay nem ya etan hi-gatu an umhulun ni pengiwwallangan ni pakekulug tun tuka pengullug ni hi-gak. <sup>3</sup> Et humman hu, helipat-i yun kenayun hu yuka pehding.

Hedin wada nambahul ni hi-gayu, tugun yu et hedin mantuttuyyu, pesinsahi yu hu nambahulan tun hi-gayu. <sup>4</sup> Anin ni mangkeppitun mambahul hu hakey ni tuun

hi-gayun han-aggew, nem mangkepitan mantuttuyyu et hudhuden tun hi-gayu hu nambahalan tu ey mahapul ni pessinsahan yu humman ni tuu."

*Ya meippanggep ni kapengullug*

<sup>5</sup> Kan idan disipol Jesus ni hi-gatuy "Ihammad mu hu mika pengullug." <sup>6</sup> Hinumang Jesus e kantuy "Anin ni henin kainekekete ni bukel ni mustard hu yuka pengullug nan Apu Dios, nem nehammad, ey dammutun kanyu etan ni keyew ey 'Kei-tan kad gawan baybay,' ey tu-wangun mei-tan.

*Ya elaw ni bega-en*

<sup>7</sup> Inna-nu et dedan hedin wada bega-en yun yuka panggagga-ud niya yuka pampappattul ni kalneroh. Kaw makkaw et hedin dimmateng ni nalpu payew, man kanyun hi-gatuy 'Ikay kuma et mangan itu?' <sup>8</sup> Eleg anhan. Tep inamtak et kanyuy 'Panhullul kan balwasim et ipatek mu kenen ku et hedin negibbuhhak ni nengan, han ka nengan.' <sup>9</sup> Ey kaw makkaw et mansalamat kayu etan ni bega-en yu hedin inu-unnud tu inhel yun pehding tu? Eleg anhan tep humman ngu dedan hu ngunu tu. <sup>10</sup> Hanniman daman hi-gayu e entan tu nemnem hu ketbalan yun yuka pengu-unnudin Apu Dios, tep humman dedan hu mahapul ni pehding yu."

*Ya nangkalan Jesus ni degeh ida etan ni hampulun tuun kamanleprosih*

<sup>11</sup> Yan linawwan Jesus di Jerusalem ey nandalan di nambattanin ni provincia di Samaria et yad Galilee. <sup>12</sup> Ida kamenetteng etan di bebley ey hinipngat da hampulun tuun kamanleprosih. <sup>13</sup> Eleg ida meihnu di kad-an Jesus, nem intekuk dan hi-gatu e kandy "Apu Jesus, hemek dakemi anhan."

<sup>14</sup> Inang-ang tudda ey kantuy "Lakkayuy et yu peang-ang annel yu etan ni padi." Et ida kamenglaw ey na-kal degeh da.

<sup>15</sup> Yan nenang-angan ni hakey ni hi-gada e na-kal degeh tu ey nambangngad di kad-an Jesus et daydayawen tu hi Apu Dios. <sup>16</sup> Nandukkun di hinangngab Jesus et mansalamat. ISamaria humman ni tuu, beken ni Jew. <sup>17</sup> Kan Jesus ey "Tam hampuludda etan tuun na-kal degeh da. Kele eleg ida mambangngad etan heyam ni an mansalamat? <sup>18</sup> Kele ebuh eya iSamaria ni nambangngad ni nansalamat nan Apu Dios?" <sup>19</sup> Et kan Jesus etan ni tuu ey "Inah ka et lumaw ka. Ya muka pengullug hu nangkai ni degeh mu."

*Ya nan-ap-apuan Apu Dios*

*(Matthew 24:23-28, 37-41)*

<sup>20</sup> Wadan pinhakkey ni nanmahmahan idan Pharisee nan Jesus e kandy "Pigan tu keillepuan ni pan-ap-apuan Apu Dios?"

Kan Jesus ey "Endi pengamtaan hedin pigan tuli keillappuan ni pan-ap-apuan Apu Dios. <sup>21</sup> Eleg mabalin ni kaney 'Wadadya kapan-ap-apui Apu Dios' winu 'Wadad dimmun.' Tep anin yan nunya et wadan hi-gayu nan-ap-apuan Apu Dios."

<sup>22</sup> Et kan Jesus idan disipol tu ey "Wadalli aggew ni pinhed yun man-ap-apu-ak ni anin ew ngun han-aggew ni ebuh, nem eleg ali mabalin. <sup>23</sup> Yallin nunman ey wadaddalli tuun menghel ni kandy 'Immali hu Pengulwan ni emin ni tuu et wadad dimmun.' Ey kan alin edum ey 'Wadadya.' Nem entan tuli kulug ida humman. <sup>24</sup> Tep ya keibbangngadak e hi-gak e Pengulwan ni emin ni tuu ey henillin kedyam e man-amta, tep mebnangan hu puyek niya kabunyan. <sup>25</sup> Nem mebukkul ni kehgingen da-ak ey panligligat da-ak ni peteg idan tuun nunya.

<sup>26-27</sup> Ya pehpehding idan tuun ellian kulli ey henin impahpahding ida lan tuu eman ni ketaggun Noah e eleg dan hekey nemnema hi Apu Dios, tep ebuh enekkaekkan, niya innuinnun niya pengahwaan da hu daka nenemnema. Entanni ey immali lebeng ey nalbengan ida et mangkatey ida tep eleg ida mandaddan, et ebuh di Noah ni natdadan tep himmegep ida etan di bapor. Hanniman idalli dama tuun ellian kulli mewan di puyek e eleg idalli mandaddan.

<sup>28-30</sup> Hanniman mewan eman lan ketaggun Lot e eleg nemnemaddan tutu-u hi Apu Dios tep ebuh kenen da, ya innumen da, ya gatagatang, ya tanetanem, niya memehwat ni baley ni impahpahbudan da. Entanni ey impalaw Apu Dios hu apuy di diman Sodom et mangkagiheb ida tuudman, et ebuh di Lot ni bimmesik ni nunman ni aggew. Em, wadalli hakkeyey pan-ippahding tu hu imminghan tuka pehpehding ni kewa-wa-wa ingganah medettengan hu ellian ku mewan di puyek.

<sup>31</sup> Yan nunman alin ellian ku mewan ey hedin neipaddih ni ya etan tuu ey wadad dallin, ey pakkaw ni eleg umhegep ni an mengellan ngunut tud bawang. Ey ya etan tuun wadad payew ey pakkaw ni eleg mantaktaktak ni um-anemut di bebley. \*

\* 17:31 17:31 Ya keibbellinan tu huyya ey mahapul ni mandadaddan itsun kenayun ni ellian Jesus.

<sup>32-33</sup> Nemnem yu hu neipahding eman lan ahwan Lot, tep kamandewadewan mengu-unnud ni ehel Apu Dios. Ya tuun ebuh hu neitu-wan tu eyad puyek ni tuka nemnemnema ey endi silbitu, tep endilli biyag tun endi pappeg tud kad-an Apu Dios. Nem ya tuun tuwak kapaka-u-unnuda, anin ni humman umhulun ni ketteyyan tu, ey hi-gatu meidwatan ni biyag ni endi pappeg tu. <sup>34</sup> E-helen kun hi-gayu, e yan nunman alin ellian ku mewan di puyek ey hedin wada dewwan neungip di hakey ni abek ey ewwiten ku etan kayyaggud elaw tu et mehi-yan etan lawah elaw tu. <sup>35-36</sup> Ey hedin wada dewwan biin kamambeyyu ey ewwiten ku etan kayyaggud elaw tu et mehi-yan etan lawah elaw tu.” †

<sup>37</sup> Yan nangngelan dan nunya ey kandan Jesus ey “Attu keippahdingan idallin nunya?” Kan Jesus ey “Hedin attu kad-an ni netey, ey yadman dama kad-an idan kamengngan ni annel ni netey.” ‡

## 18

*Ya etan nebalun bii niya etan huwet*

<sup>1</sup> Huyya intuttuddun Jesus idan disipol tu ma-lat eleg ida uminglay ni mandasal. <sup>2</sup> Kantuy “Wada etan huwet di hakey ni bebley ni endi takut tun Apu Dios niya endi tuka pengibbillang idan tuu. <sup>3</sup> Yad bebley nunman ni huwet, ey wada dama etan nebalun biin wada nambahul ni hi-gatu. Kaman-inlaw humman ni biid kad-an nunman ni huwet et tuka ibbagabagan ippanuh tu nambahulan ni hakey ni tuun hi-gatu. <sup>4-5</sup> Nem nebayag ey eleg hengnguda etan ni huwet hu kaibbagan nunman ni nebalun bii. Nem entanni ey kantud nemnem tuy ‘Anin ni eleggak umtakut nan Apu Dios niya endi nakka pengibbillang ni tuu ey heballi ew baddangak tep e-eggel ni immali humman ni nebalun biin mambeggan baddang et nakka peinglay.’” \*

<sup>6</sup> Entanni ey kan Apu Jesus ey “Dingngel yu hu impahding nunman ni huwet ni endi tuka pengibbillang ni tuu, nem entanni kaya ey binaddangan tu etan bii. <sup>7</sup> Et humman hu, nema-ma ngu hi Apu Dios e mahmek niya tuka dedngela dasal idan tuu tu. Em, makulug ni tuka baddangidda tuu tun kamandasadasal ni kewa-wa-wa niyan kahilehileng. <sup>8</sup> Dengel yu, tep e-helen kun hi-gayu e hi Apu Dios ey makulug ni tuka gagannuan baddangan ida pinili tun tuu tu. Nem yallin ellian ku e Pengulwan ni emin ni tuu ey piga na-mu ha-kupan kun nanengtun kamengullug ni hi-gak?”

*Yadda etan dewwan tuun nandasal di Tempol*

<sup>9</sup> Wada ina-abbig Jesus ni meippanggep ida etan ni tuun kamampahhiyan kanday kayyaggud ida ey daka pihhula edum dan tuu. <sup>10</sup> Kantuy “Wada dewwan tuun an nandasal di Tempol. Ya hakey ey Pharisee, ey ya hakey ey kaman-emmung ni buwis e maheul ni tuu.

<sup>11</sup> Immehngeng etan Pharisee ni mandasal et kantuy ‘Apu Dios, nakka mansalamat ni hi-gam tep kayyagguddak e bekennak ni henin edum ni tuu e matelam ey lawah elaw da ey daka i-abek ahwa da. Ey nakka mansalamat tep kayyagguddak nem yan eya tuun kaman-emmung ni buwis. <sup>12</sup> Nakka mantetpel ni mandasal ni dewwan aggew ni hanlingguan niya emin nakka lelmua ey daka kaippatali.’

<sup>13</sup> Ya dama etan kaman-emmung ni buwis ey an neappil ey inyuung tu gapuh ni baing tu et mandasal. Tuka pantel-uga pagew tu tep kamantuttuyun liwat tu et kantuy ‘Apu Dios, hemek muwak anhan, tep nanliwattak.’”

<sup>14</sup> Et kan Jesus ey “E-helen kun hi-gayu e ya etan kaman-emmung ni buwis ey immanemut e dingngel Apu Dios hu dasal tu, nem ya etan Pharisee ey eleg tu hanguden hu dasal tu. Tep ya tuun tuka peta-gey annel tu ey meibbabah ali. Nem ya tuun tuka pebabah hu annel tu ey metbal ali.”

*Ya kapengibbillang Jesus idan u-ungnga*

*(Matthew 19:13-15; Mark 10:13-16)*

<sup>15</sup> Wadadda tuun nan-i-li dadda u-ungnga dan dadda pekeppan Jesus ma-lat idasalan tudda. Nem inang-ang idan disipol tu ey imbunget dadda, tep kanday daka helli-waa hi Jesus. <sup>16</sup> Nem inaygan Jesus ida et yadda u-ungnga da et kantuddan disipol tuy “Entan tu ika-leg ellian idan u-ungngad kad-an ku, tep yadda etan tuun henin elaw idan eyan

† **17:35-36** 17:35 Yad edum ni neitudek ey wada verse 36 e kantuy “Hanniman ida daman etan ni dewwan lakin wadad payew e ewwiten ku hu hakey.” ‡ **17:37** 17:37 Ya keibbellinan nunyan inhel Jesus ey “Hedin attu kapanha-adin tuu, ey yadman hu penuwetan Apu Dios ni hi-gatu.” \* **18:4-5** 18:4-5 Ya inhel etan ni huwet ni kantuy “tep nakka peinglay,” ey ya ustuh ni inhel tu ey kantuy “Pedekket alin eyan bii hu matak.” Ya keibbellinan tu ey “Lawah ali e-ehhelen eyan biin meippanggep ni hi-gak et endilli law lipituh idan kebbeleyan kun hi-gak.”

u-ungnga hu elaw da hu meilla-kam di nan-ap-apuan Apu Dios. <sup>17</sup> E-helen kun hi-gayu e mahapul ni iddinel ni tuu hi Apu Dios ni henin kapengiddinel ni u-ungngan kapemapteke ni a-ammed da et han maila-kam di nan-ap-apuan Apu Dios."

*Ya etan kedangyan ni tuu  
(Matthew 19:16-30; Mark 10:17-31)*

<sup>18</sup> Wada etan ap-apun kantun Jesus ey "Kayyaggud ni Apu, hipa pehdng ku ma-lat wada biyag kun endi pappeg tu?"

<sup>19</sup> Hinumang Jesus et kantuy "Kele kammuy kayyagguddak? Endi edum ni kayyaggud, nem ebuh hi Apu Dios. <sup>20</sup> Amtam ida intugun Apu Dios ni kantun 'Entan tu iebek ahwam, entan patey mu, entan panekew mu, entan pan-itek mu niya u-unnud mudda a-ammed mu.'"

<sup>21</sup> Kantun Jesus ey "Tam inenu-unnud kun emin ida huttan, meipalpu eman ni keu-ungngak et ingganah ni nunya."

<sup>22</sup> Dingngel Jesus huyyan inhel tu ey kantun hi-gatuy "Nem wada hakey ni kulang mu. Lakkay et mu igtang ni emin lesum et idwat muddan newetwet ma-lat meidwatan kallin et-eteng ni kinedangyan di kad-an Apu Dios. Ipahding mudda huuya et pakilaw kan hi-gak."

<sup>23</sup> Nem yan nangngelan etan ni tuun nunyan inhel Jesus ey limmemyung, tep kedangyan ni peteg. <sup>24</sup> In-ang-ang Jesus etan ni kedangyan et kantuy "Neligat hu kedangyan ni meilla-kam di nan-ap-apuan Apu Dios. <sup>25</sup> Em, nelallakkah hu kamel ni um-usip di telek ni lubay nem ya an keilla-kaman ni kedangyan di nan-ap-apuan Apu Dios."

<sup>26</sup> Kan idan nangngel ey "Kaw! Et hipadda tep hu dammutun mehella-kniban?" <sup>27</sup> Nem kan Jesus ey "Ya tuu ey endi kabaelan tun menella-knib ni annel tu. Nem hi Apu Dios ey han-ipahding tun emin."

<sup>28</sup> Kan Peter ey "Nem inna-nun hi-gami, inwalleng min emin et mekikillaw kamin hi-gam." <sup>29</sup> Kan Jesus ni hi-gaday "Dengel yu tep e-helen kun hi-gayu e makulug ni emin tuun meni-yan ni baley da, ya ahwa da, ya agida, ya a-ammed da niya u-ungnga da, tep ya nemihed dan hi-gak niya nemihed dan mengippeamtan nan-ap-apuan Apu Dios <sup>30</sup> ey hi-gada meidwatan ni panyaggudan dan peteg. Et yallin hakey ni aggew ey wadalli biyag dan endi pappeg tu."

*Ya pitlu tun penghelan Jesus ni ketteyyan tu  
(Matthew 20:17-19; Mark 10:32-34)*

<sup>31</sup> Ingkuyug Jesus ida disipol tud a-allaw tu et kantuy "Umlaw itsud Jerusalem, tep yadnan amnuan ni emin ni intudek ida lan prophets Apu Dios ni meippahding ni hi-gak e Pengulwan ni emin ni tuu. <sup>32</sup> Ellan da-ak idallin beken ni Jew et heghegnuden da-ak ey ba-iba-ingen da-ak niya pan-inlulupdaan da-ak. <sup>33</sup> Pambe-igen da-ak ali et pateyan da-ak. Nem yallin katlun aggew ey metegguannak." <sup>34</sup> Nem eleg dan hekey awatan niya eleg da amta humman idan inhel tun hi-gada.

*Ya nangkalan Jesus ni kulap etan ni tuu  
(Matthew 20:29-34; Mark 10:46-52)*

<sup>35</sup> Yan kamenetteng hi Jesus di Jerico ey wada nekulap ni yimmudung di gilig ni keltad ni kamangkedekedew. <sup>36</sup> Dingngel etan ni nekulap hu kapankelebbahiddan daket ni tuu ey kantun hi-gaday "Kele hipa kamekapkapy?" <sup>37</sup> Kanday "Kamangkelebbah hi Jesus di Nazareth."

<sup>38</sup> Ey pinhakkeyey simmekuk et kantuy "Apu Jesus e helag David, hemek muwak anhan!"

<sup>39</sup> Ey imbunget ida etan ni tuu e kanday um-eneeneng. Nem tu anhan law kapan-eleta tekuk tu et kantuy "Apu e helag David, hemek muwak anhan!"

<sup>40</sup> Immehneng hi Jesus et ehelen tun illaw da etan nekulap di kad-an tu. In-ali da ey kan Jesus ni hi-gatuy <sup>41</sup> "Hipa pinhed mun pehdng kun hi-gam?" Kantuy "Apu, pinhed kun e-kalen mu kulap ku."

<sup>42</sup> Kan Jesus ey "Me-kal law kaya kulap mun nunya tep ya muka pengullug ni hi-gak." <sup>43</sup> Pinhakkeyey kaum-ang-ang law hu mate tu et maikuyug nan Jesus et daydayawen tu hi Apu Dios. Emin ida etan tuun nenang-ang ey daka daydayawa dama hi Apu Dios.

<sup>1</sup> Kamangkelebbah di Jesus di Jerico <sup>2</sup> ey wadadman etan kedangyan ni peteg ni tuu e hi Sakeyus, tep hi-gatu hu ap-apuddan kaman-emmung ni buwis. <sup>3</sup> Pinhed tun ang-angen hi Jesus, nem ansikkey hi-gatu et eleg tu han-ang-ang tep dakel tuu et kamehennii. <sup>4</sup> Et ya impahding tu, ey nambesik et mabukul et an kumlab di keyew e sycamore malat ang-angen tu hi Jesus hedini melebbah diman. <sup>5</sup> Dimmateng hi Jesus di petek tu ey sinengaw tu et kantuy "Sakeyus, papuut mun man-eyyuhu, tep pemengngili-ak di baley yun nunya." <sup>6</sup> Impapuut nan Sakeyus ni nan-ayuhu et man-am-amleng ni nengikuyug nan Jesus di baley tu. <sup>7</sup> Nem ida kamangngungudu hu tuun nenang-ang ni linawwan Jesus di baley Sakeyus ey daka tumtumbuka e kanday "An impamengili hi Jesus di baley ni nekalliwtan ni tuu."

<sup>8</sup> Nem immehngeng hi Sakeyus di kad-an Apu Jesus et kantun hi-gatuy "Apu, iddawwat ku kagedwah ni kinedangyan kuddan newetwet ey hedini wada sinelam ku, pangki-pat kun beyyadan."

<sup>9</sup> Kan Jesus ni hi-gatuy "Yan nunyan aggew ey mehellakniban idan emin hu wadad baley yu, tep impeang-ang mu e helag dakan Abraham tep ya muka pengullug. \* <sup>10</sup> Tep hi-gak e Pengulwan ni emin ni tuu ey immali-ak di deya e puyek ni menellaknib idan tuun neidawwin Apu Dios ma-lat meidagyum idan hi-gatu."

*Ya etan bega-en et ya etan pihhuh ni impatnged ni apu tun hi-gatu  
(Matthew 25:14-30)*

<sup>11</sup> Yan nunman ni kamandeddengngel ida etan tutu-u ey nan-a-abbig hi Jesus ni meippanggep ni dettengan ni nan-ap-apuan Apu Dios. Et gapu tep neihip idad Jerusalem ey kan da na-mu nem hedini umdateng hi Jesus di diman ey ang-angen da law hu keilleppuan ni nan-ap-apuan Apu Dios. <sup>12</sup> Kan Jesus ey "Wada etan kedangyan ni ap-apun neayagan di edawwin bebley ma-lat tu dawatan hu kelebengan tun man-ap-apu ey han ali mambanggad. <sup>13</sup> Yan eman ni eleg pay ni lumaw ey inaygan tudda etan hampulun bega-en tu et idwatan tuddan hanggatut ni pihhuh. Kantun hi-gaday 'Ipaptek yu huuyan indawat ku. Huyya pampunnan yu et hedini wada genansahen yu, kenamung alin keibbanggadan ku.'

<sup>14</sup> Nem wadaddan kebebleyan tu hu anggebe-hel da hi-gatu et pangunud dadda hu edum dan an menghel ni hi-gatu e eleg da peminhed hi-gatun man-ap-apu. <sup>15</sup> Nem anin ni hanniman et hi-gatu metlaing hu nan-ap-apu. Immanemut et aygan tudda etan bega-en tun nengidwatan tun pihhuh ma-lat amtaen tu hedini piga nambalinan ni pihhuh da.

<sup>16</sup> Ya etan nebukul ni immali, ey kantuy 'Apu, ya etan pihhuh ni indawat mun hi-gak ey neminhampulun dimmakkel.' <sup>17</sup> Kan etan ni ap-apu ey 'Kayyaggud kan bega-en ey kakameiddinnel, tep anin ni ekket hu indawat kun hi-gak et impaptek mu. Et humman hu, pan-ap-apu dakad hampulun bebley.'

<sup>18</sup> Immali dama etan neikadwan bega-en ey kantuy 'Apu, ya etan pihhuh ni indawat mu ey neminlimman dimmakkel.' <sup>19</sup> Kan etan ni ap-apun hi-gatuy 'Man-ap-apu kad liman bebley.'

<sup>20</sup> Immali ngu etan neikatlu ey kantuy 'Adyadeh etan pihhuh ni indawat mun hi-gak. Yan nunman ni nengidwatan mu ey linibutan kun luput et itluk. <sup>21</sup> Simmakuttak ni hi-gam tep inamtak e mabungget ka. Muka ella hu beken ni limmum niya muka ennia beken mu intanem.'

<sup>22</sup> Kan etan ni ap-apun hi-gatuy 'Lawah ka! Eleg ka meiddinel. Ya inhel mu hu mengastigun hi-gam. Inamtak e mabunggettak ey nakka ella hu beken ku limmu niya nakka ennia hu beken ku intanem, <sup>23</sup> ey kele mu intalun ebuh pihhuh ku? Gullat et mu inha-ad di bangkoh ma-lat yan nunyan nambangngadan ku ey wada ekket ni nei-dum.'

<sup>24</sup> Et kan tudda etan idan bega-en tun kaman-eh-neng ey 'Yu ala pihhuh kun hi-gatu et yu idwat etan ni bega-en ni kedaddakkelan limmu tu.' <sup>25</sup> Kan idan bega-en tuy 'Apu, kele hi-gatu an nengidwatan ey dakel law pihhuh tu?'

<sup>26</sup> Kan etan ni ap-apu ey 'E-helen kun hi-gayu e ya tuun ippaptek tu wadan hi-gatu ey me-duman. Nem ya etan tuun eleg tu ippaptek hu wadan hi-gatu ey anin ya etan ekket ni wadan hi-gatu et meendi. <sup>27</sup> Hedini yadda etan tuun eleg meminhed ni hi-gak hu man-ap-apu et patey yuddad hinanggak.' "

*Kan idan tuu ey hi Jesus hu intu-dak Apu Dios  
(Matthew 21:1-11; Mark 11:1-11; John 12:12-19)*

\* **19:9** 19:9 Ya kaeibbellinan nunya ey hi Sakeyus ey wada law hu tuka pengullug e heni lan Abraham. Ang-ang yu Romans 4:3 et ya verse 12.

<sup>28</sup> Negibbuh ni ina-abbig Jesus huyya et ibubbukkul daddan edum tun limmaw di Jerusalem. <sup>29</sup> Ida kamenetteng di Betpage niyad Betania di Duntug e Olibah ey impabukul tudda dewwan disipol tu, <sup>30</sup> kantun hi-gaday "Ibubbukkul yu la eman di bebley. Hedin umdateng kayu, ang-angen yu la kilaw ni kebayyu † ni eleg ni metakkayan. Ukah yu iket tu et i-li yudya. <sup>31</sup> Hedin wada tuun kantun hi-gayuy 'Kele yuka pan-ukaha iket ni kebayyu?' kanyuy 'Tep mahapul Apu tayu.' "

<sup>32</sup> Limmaw ida etan dewwan impabukul Jesus ey makulug inhel tu. <sup>33</sup> Yan daka pampengukkahin iket etan ni kebayyu ey kan etan ni kankebayyu ey "Kele yuka pan-ukkaha iket tu?" <sup>34</sup> Inhumang da etan inhel Jesus ni hi-gada e kanday "Em, tep mahapul ni Apu tayu."

<sup>35</sup> Inlaw da etan kebayyud kad-an Jesus et idpen da edah ni balwasi dad beneg nunman ni kilaw ni kebayyun pantakkayan Jesus. <sup>36</sup> Kamenglaw di Jesus ey nan-ekal idan tutu-u hu edah ni balwasi da et pan-iap-ap dad keltad ni dellanen Jesus ni penaydayaw dan hi-gatu.

<sup>37</sup> Kamenetteng hi Jesus di kamedayyud Duntug e Olibah ey emin ida kamekikkillaw ni hi-gatu ey nansalamat idan Apu Dios niya dinaydayaw da gapuh idan inang-ang dan impahding Jesus. <sup>38</sup> Kanday "Kamedeyyaw eya ap-apun intu-dak Apu Dios. In-ali tu lingep Apu Dios. Dayaw tayu hi Apu Dios e Keta-ta-geyyan."

<sup>39</sup> Kan idan edum ni Pharisee nan Jesus ey "Apu, ehelim ida eya disipol mu et umi-ineng ida." <sup>40</sup> Hinumang Jesus et kantuy "E-helen kun hi-gayu e hedin um-i-ineng ida ey yadda eya batu hu mengitkuk ni penaydayaw dan hi-gak."

#### *Ya et-eteng ni hemek Jesus idan tuud Jerusalem*

<sup>41</sup> Kamenetteng hi Jesus di Jerusalem et iang-ang tudman ey kamanlelewwa tep ya hemek tuddan tudman, <sup>42</sup> kantuy "Gullat et ni kinulug yuwak e kakelpuin lingep, ey wada et hu lingep yu. Nem eleg law mabalin. <sup>43</sup> Medettengan ali aggew ni ellian idan buhul yu et liktuben dakeyu et eleg kayu pakabsik. <sup>44</sup> Bahbahen dalli eya bebley yud Jerusalem ey pampetteyen dakeyu niyadda u-ungnga yu. Ey pakabbahbahen dallin emin. Endilli hakey ni batun neikapayan mannenneng di neiha-adan tu. Hanniman ali mekapapya, tep eleg yuwak ebbuluta e intu-dak Apu Dios ni menellaknib ni hi-gayu."

#### *Ya linawwan Jesus di Tempol*

*(Matthew 21:12-17; Mark 11:15-19; John 2:13-22)*

<sup>45</sup> Entanni ey himmegep hi Jesus di Tempol ey nan-ipa-hep tudda hu kamanggettang di bawang, <sup>46</sup> et kantuy "Ya neitudek ni ehel Apu Dios e kantuy 'Ya baley ku ey kapandasali.' ‡ Nem ay impambalin yun kapanggettangi et panekewan yun pihuh idan kaum-alin mandasal, tep yudda kahe-ula."

<sup>47</sup> Et neipalpun nunman ey yadman Tempol hu kapantuttudduin Jesus ni kewa-wa-wa. Yadda ap-apuddan padi et yadda kamantuttuddun Tugun Moses et yadda ap-apuddan Jews ey ida kaumnenemnem ni pehding dan memettey ni hi-gatu. <sup>48</sup> Nem endi inna-nu da, tep emin ida tuu ey daka pakakkulluga taka ittuttuddu.

## 20

#### *Ya kelebengan Jesus ni mantuttuddu niya mengippahding idan pinhed tu*

*(Matthew 21:23-27; Mark 11:27-33)*

<sup>1</sup> Hakey ni aggew e kamantuttuddu hi Jesus di Tempol meippanggep ni et-eteng ni impeminhed Apu Dios ey immalittud kad-an tu hu ap-apuddan padi, yadda kamantuttuddun Tugun Moses, niyadda ap-apuddan Jews <sup>2</sup> et kandan hi-gatuy "Hipa kelebengan mun mengippahding ida eyan muka pehpehding? Hedin wada kelebengan mu, hipa ni-ngangu nengidwat?" \*

<sup>3</sup> Hinumang Jesus e kantuy "Wada ni dama ibbagak ni hi-gayu et hannak humanga huttan. <sup>4</sup> Hipa nengitu-dak nan John ni memenyag, ya tuu winu hi Apu Dios?"

<sup>5</sup> Imbagan Jesus humman ey nan-uungbal ida e kanday "Hedin kan tayuy 'hi Apu Dios,' kan tulliy 'Nem tamey eleg yu kulugen hu ittuttuddun John.' <sup>6</sup> Hedin kan tayu mewan ey 'Ya hu tuu nengitu-dak,' ey umtengba ida eya tutu-u, tep daka kulluga e hi John ey prophet Apu Dios." <sup>7</sup> Et humangen da e kanday "Tawwey, eleg mi amta nengitu-dak nan John."

† 19:30 19:30 Huyyan klasih ni kebayyu ey donkey. Hedin nantakkay hu patul di donkey, ey peang-ang tu e lingep in-ali tu. Nem hedin ya ustuh ni kebayyu hu nantakkayan tu, man mekiggubbat. ‡ 19:46 19:46 Isaiah 56:7 \* 20:2 20:2 Huyya elaw ni daka pengehingin hi-gatu.



<sup>8</sup> Ey kan Jesus ni hi-gaday “Hedin hanniman, eggak tep dama e-helan hi-gayu hu nengidwat ni hi-gak ni kelebengan kun kamengippenahding eyan nakka pehpending.”

*Ya a-abbig meippanggep etan ni puyek ni netaneman ni grapes*  
(Matthew 21:33-46; Mark 12:1-12)

<sup>9</sup> Intuluy Jesus ni mantuttuddu e impan-inna-abbig tun hi-gada meippanggep etan ni tuun nantanem ni grapes. Kantuy “Wada etan tuun sinamman tu mahkang ni puyek tun grapes. Impaebang tu et paipaptek tu et lumaw di edum ni bebley et mabeyag alidman.

<sup>10</sup> Nedateng humman ni intanem tu et itu-dak tu hakey ni bega-en tun an mengellan dewatu. Nem ya kumedek impahding idan etan ni nan-abang ey nanheplat da humman ni bega-en et pan-itu-dak da e endi indawat dan dewwan apu tu. <sup>11</sup> Immitu-dak mewan etan kampuyek ni hakey ni bega-en tu, nem nambaig da et ba-iba-ingen da et paenamut da e endi mewan indawat da. <sup>12</sup> Intu-dak tu hu meikkatun bega-en tu, nem liniputan da et pan-itu-dak da. <sup>13</sup> Entanni ey kan etan ni kampuyek ey ‘Hipa na-mu pehding ku? Pangngu et itu-dak ku eya u-ungngak ni nakappinhed ku. Wada et anhan ni be-ingan da et lispituhed da.’

<sup>14</sup> Nem inang-ang ida etan ni nan-abang nunman ni puyek etan u-ungngan kan puyek ey nan-ungbal ida e kanday ‘Immali u-ungnga tun memeltan ni puyek tu. Pandada-da itu et pateyen tayu et pampuyek tayu eya puyek ni beltanen tu.’ <sup>15</sup> Et ilaw dad ba-hil etan ni puyek et da pateyen diman.”

Et kan Jesus ida etan ni kameneddengngel ey “Hipalli na-mu pehding etan ni kampuyek etan idan kamampaptek ni nunman ni puyek tu? <sup>16</sup> Makulug anhan et tudda pepettye etan kamampaptek ni puyek tu, et pepaptek tun edum ni tuu.”

Kan ida etan ni kamandeddengngel ey “Eleg et anhan na-mu i-abulut Apu Dios ni an meippahding humman.”

<sup>17</sup> Intekel nan Jesus ni hi-gada et kantuy “Hipa tep pinhed tun e-helen etan neitudek ni kantun

‘Ya etan batun binelaw idan kamengapyan baley ey humman anhan law hu impambalin Apu Dios ni kekakkayyaggudan ni meikkapyad baley.’ †

<sup>18</sup> Emin tuun man-e-gah etan di batu ey mangkehpuung tu-ngal da niya mangkemitmit ni peteg etan ipiten nunyan batu.”

<sup>19</sup> Inamtadda etan ni kamantuttuddun Tugun Moses et yadda ap-apuddan padi e hi-gada hu nengipadngelan Jesus ni a-abbig tu et pinhed dan pedpap ni nunman, nem sinekutan dadda tuun kamengu-unnud ni hi-gatu.

*Ya pambeyyadan ni buwis nan hi Cesar e ap-apud Rome*  
(Matthew 22:15-22; Mark 12:13-17)

<sup>20</sup> Entanni et da law kahellipat-i hu pambekhulan Jesus et menu-dak idan an meneddengngel ni meihlan e-helen tu et hedin wada, ded-eken da et paela dan gubernor ma-lat bistigalen tu. <sup>21</sup> Yadda etan neitu-dak ey daka hinbaggai e kanday “Apu, amta mi e neiptek emin muka e-hela ey muka ittuttuddu hu makulug ni elaw Apu Dios. Nan-inggeh muka pengibbillang ni tuu e endi muka pengippahhigi. <sup>22</sup> Imayah, ehel mun hi-gami, kaw kamei-ebbulut di Tugun Moses e hi-gatsun Jews ey mambeyyad itsun Cesar e ap-apud Rome ni buwis winu eleg?”

<sup>23</sup> Nem inamtan Jesus e ida kaumhamahamak ni pebehul dan hi-gatu et kantun hi-gaday <sup>24</sup> “Ukat kayun palatah et ang-angen tayu ah. Hipa kan-angah niya kan-ngadan eyan wada eyad palatah?” Kanday “Tam hi Cesar.”

<sup>25</sup> Et kantuy “Idwat yun Cesar hu lebbeng tun meidwat ni hi-gatu ey idwat yun Apu Dios hu lebbeng tun meidwat ni hi-gatu.”

<sup>26</sup> Dingngel da humman ni impanumang tu ey endi law hu pengigga-dulan dan pempapan dan hi-gatud, tep endi dingngel dan neihlan inhel tud hinangngaddan tutu-u. Natngadda et neala law et umi-ineng ida.

*Ya meippanggep ni ketegguan ali*  
(Matthew 22:23-33; Mark 12:18-27)

<sup>27</sup> Entanni ey wadadda dama immalin Sadducee di kad-an Jesus. Humman idan tuu ey kanday eleg meteggu tuun netey. <sup>28</sup> Kandan Jesus ey “Apu, intuttuddu lan Moses e hedin netey hu hakey ni laki ey endi u-ungnga tu, man mahapul ni ahwaen ni agi tun laki etan biin nebalu ma-lat hedin man-ungngadda, man meibbillang ni u-ungnga da etan ni netey. <sup>29</sup> Inna-nu tep hedin heninnuy neipahding: Wadadda pitun ulakkin han-aaggi. Nelahin etan pengulwan da, nem netey ey endi u-ungnga da etan ni ahwa tu. <sup>30-32</sup> Bineltan ni hened humman ni ahwan pengulwan ey netey dama ey endi u-ungnga

† 20:17 20:17 Psalm 118:22-23

da. Hanniman mewan neipahding ni neikatlu. Nambebeltanan dan pitun han-aaggi etan bii ey netey idan emin ey endi u-ungnga da. Entanni ey netey law dama etan bii. <sup>33</sup> Et inna-nu tep hedini medettengan ali hu ketegguan emin ni nangketey, hipalli kan-ahwan nunman ni bii ey nambebeltanan idan pitun han-aaggi?"

<sup>34</sup> Hinumang Jesus e kantuy "Kamampan-aahwa hu lalaki niya bibi-i eyad puyek, <sup>35</sup> nem yaddalli etan metegguan ni meidwatan ni biyag ni endi pappeg tu ey eleg idalli law man-aahwa <sup>36</sup> niya eleg ida metey, tep heniddallin anghel di kabunyan. Hi-gada hu u-unggan Apu Dios tep hi-gadalli etan metegguan. <sup>37</sup> Ya ketegguan idan nangketey ey makulug. Anin lan hi Moses et inamta tu e makulug huuya. Ya kei-ang-angan tu ey ya etan intudek tu meippanggep ni nanhumanganan dan immehelan Apu Dios etan di kamantettebbel ni kekkeyyew, e ya inhel tu ey hi-gatu hu Dios nan Abraham, hi Isaac, ni hi Jacob. <sup>38</sup> Et huuya pengamtaan tayu e humman idan aammed tayu ey netey ida, nem eleg ibbilang Apu Dios idan netey, tep tegguen tuddalli emin tuu tu. Hi-gatu ey Dios idan mategu, beken ni yadda netey. Hi Apu Dios ey tuka ibbilang ni mategudda emin hu kamengullug anin idan netey."

<sup>39</sup> Kan idan edum ni kamantuttuddun Tugun Moses ey "Apu, neiptek ni peteg inhumang mu." <sup>40</sup> Et wada law hakkeyey ida kaumbaing ni memabbagan hi-gatu.

*Ya meippanggep etan ni pinutuk Apu Dios ni Christo*

*(Matthew 22:41-46; Mark 12:35-37)*

<sup>41</sup> Kan Jesus ni hi-gaday "Kele kan idan tuuy 'Hi Christo e ittu-dak Apu Dios ni mengippaptek ni tuu ey helag David?' <sup>42-43</sup> Tep ya inhel David di intudek tun Psalms ey kantuy:

Kan Apu Dios etan ni Apuk e hi Christo ey 'Yudung kad winannan ku ingganah apputen kuddan emin buhul mu.' ‡

<sup>44</sup> Nemnem yu kedi, hedini kaibbilang David hi Christo ni Apu tu, inna-nu tu humman hedini helag David hi Christo?"

*Ya lawah ni elaw idan kamantuttuddun Tugun Moses*

*(Matthew 23:1-36; Mark 12:38-40)*

<sup>45</sup> Ida kamandeddenggel etan tuu ey kan Jesus idan disipol tuy <sup>46</sup> "Helipati-yu ey eleg yu u-unnuden hu elaw idan kamantuttuddun Tugun Moses. Ida kamambal-wasin andukkey ma-lat immatunan idaddan tutu-u e mittuduh ida numan. Ey ida kapetebbatebbal di mulkaduh e kad-an ni daki ni tuu. Ey pinhed dan umyudung di kayuddungiddan kametbal ni tuud simbaan et yadda wada hamul. <sup>47</sup> Ey hedini mewan mandasal idad kedaklan ni tuu ey daka dukkedukkeya, et ya penang-ang idan tuun hi-gada ey makakulug ni kayyaggud ida. Nem ya kakulugan tu ey dadda kahe-ula nebalun bibi-i ma-lat pan-alen da limmu da. Et humman hu, nemahhigi ali pengastigun Apu Dios ni hi-gada tep yadda humman ni lawah ni daka pehpending."

## 21

*Ya indawat etan ni nebalun biid Tempol*

*(Mark 12:41-44)*

<sup>1</sup> Kaman-ang-ang-ang hi Jesus di Tempol ey inang-ang tudda kekeddangan ni kamampengihha-ad ni pihhuh dad kapengi-emmungin pihhuh ni kaiddawat idan tutu-u. <sup>2</sup> Entanni ey immali hu newetwet ni nebalun bii ey deddewwan hepeng ni ebuh hu inha-ad tu. <sup>3-4</sup> Kan Jesus ey "E-helen kun hi-gayu e ya etan deddewwan hepeng ni inha-ad ni nebalun bii hu e-etteng balol tu nem ya indawat idan etan ni edum. Tep yadda inha-ad etan idan kedangan ey humman nehawal ni kinedangan da. Nem ya etan newetwet ni nebalun bii ey ebuh humman ni pihhuh tu, nem inhanekul tun indawat ni emin."

*Ya kebabahan ali etan ni Tempol*

*(Matthew 24:1-2; Mark 13:1-2)*

<sup>5</sup> Entanni ey yadda etan edum ni disipol Jesus ey daka ung-ungbala meippanggep ni kakinyaggud ni Tempol, tep kayyaggud ang-ang idan batun nangkeikapya anin idan etan indawat idan tuun in-appit dan Apu Dios. <sup>6</sup> Nem kan Jesus ey "Kayyaggud ida huuyan yuka ang-ang-angan nunya, nem edum alin aggew ey mebahbah ni emin et endi hakey ni batun mannenneng di neikapyaan tu."

<sup>7</sup> Kandan hi-gatuy "Pigan tullu amnuan nuyuan inhel mu niya hipalli pengi-immatunan hedini kamangeddenggi amnuan tu?"

*Ya panligligatan niya panলেখহানan alin hakey aggew  
(Matthew 24:3-14; Mark 13:3-13)*

<sup>8</sup> Kan Jesus ey "Helipat-i yu ma-lat eleg kayulli maheul. Tep dakel idalli tuun um-ali et kanday hi-gada hi Christo \* ey kandalliy kamangkedettengi hu kepappegan ni puyek, nem entan tu kaya kulug ida. <sup>9</sup> Ey dedngelen yu meippanggep ni gugubat et ya guluh di kebebbley, nem entan ali takut yu, tep meippahding idalli dedan humman. Nem beken alin nunman ni kepappegan ni puyek.

<sup>10</sup> Em, manggugubat idalli kebebbley, tep wada hakkey ni ap-apu ey gubbaten tu hu edum tun ap-apud edum ni bebley. <sup>11</sup> Ey meweddalli na-let ni yegyeg, ey nemahhig ali bisil niya degeh di kebebbley. Wadaddalli meang-ang ni anggetakktu niya wadaddalli meang-ang di kabunyan ni kamengippetnga. <sup>12-13</sup> Nem yalli meubukkul ni meippahding et han wadaddalli huuya ey manhelheltap kayu gapuh ni yuka kapengullug ni hi-gak. Dedpapien dakeyulli et ilaw dakeyud hinanggaddan aap-apud simbaan ni Jew et pakelabut dakeyu. Ey ya edum ni hi-gayu ey mehumalyad hinanggaddan gubernor niyaddad eta-gey ni aap-apu gapuh ni daka pengullug ni hi-gak. Yan nunman ali pengituttudduan yun meippanggep ni hi-gak. <sup>14</sup> Entan kakkaguh yu hedin hipa ihhumang yud ibbagea, <sup>15</sup> tep hi-gak ali ngenamung ni mengippenemnem ni ihhumang yu ma-lat endilli ina-nuddan buhul yun mengapput ni hi-gayu. <sup>16</sup> Ya edum alin hi-gayu ey ihhehdul aliddan a-ammed da, yadda agi da, et yadda gayyum da. Em pepettey dalli edum ni hi-gayu. <sup>17</sup> Angebe-hel dakeyullin dakel ni tuu tep ya yuka pengu-unnudin hi-gak. <sup>18</sup> Nem anin ni henin nunman ali meippahding, et eleg dakeyu iwwalleng nan Apu Dios, nem ippaptek dakeyu. <sup>19</sup> Pannananeng yulli yuka pengullug ni hi-gak, anin ni nemahhig hu ligat yu ma-lat meihwang kayu.

*Ya kebahbahan ni bebley di Jerusalem  
(Matthew 24:15-21; Mark 13:14-19)*

<sup>20</sup> Hedin ang-angen yulli e liniktub idan sindalu hu Jerusalem ey humman ali pengamtaan yu e kamangkedettengi hu kebahbahan nunman ni bebley. <sup>21</sup> Yadda tuud Judea ey mahapul ni umbesik idad duntug. Anin idan tuud Jerusalem et mahapul ni umbesik ida dama, ey yadda etan wadad a-allaw ni Jerusalem ey mahapul ni eleg ida umhegeg di bebley. <sup>22</sup> Tep yallin kebahbahan ni Jerusalem ey yan nunman ali hu amnuan ni inhel idan prophets lan Apu Dios ni meippanggep ni pengastiguan alin Apu Dios ida etan ni tutu-un eleg mengullug ni hi-gatu. <sup>23</sup> Angehemmek idalli nampambutsug et yadda etan wada gelang dan kaman-innum hedin medettengan idalli humman ni aggew. Nemahhig ali panhelheltapan ni tuudman, tep humman hu kastigu da. <sup>24</sup> Yaddalli edum ni hi-gada ey petteyen idallin tuun beken ni Jew, ey yadda edum ey ibbesik daddallid edum ni bebley et maiwehit idad kebebbley di puyek. Et meihhullul idalli beken ni Jew ni man-ap-apud Jerusalem ingganah alin pappeg ni aggew ni gintud Apu Dios ni pan-ap-apuan da.

*Ya ellian ali mewan nan Jesus  
(Matthew 24:29-31; Mark 13:24-27)*

<sup>25</sup> Wadaddalli ang-angen yud kabunyan ni eleg yu enang-angen lan nunman. Melumman ali aggew, ya bulan et yadda bittuwen. Emin ali tuud kebebbley di puyek ey umtatakut ida niya umkenel-ew idan pengngelan dan na-let ni bungug ni dalluyun di baybay. <sup>26</sup> Nemahhig ali takut idan tuu tep ya anggetakktu ni ang-angen dan mekapkapyad puyek, ey anin idan wadad kabunyan et endi maptek ni meippahding niya meendilli kabaelan da. <sup>27</sup> Hedin megibbuh ni meippahding ni emin huuya ey hannak nambangngad. Ey ang-angen da-ak e Pengulwan ni emin ni tuud kulput e meang-ang ali hu et-eteng ni kabaelan ku niya dayaw ku. <sup>28</sup> Hedin ang-angen yuddalli huayan um-amnu, ey entan takut yu, nem pan-am-amleng kayu tep ngannganih hu kepappegan ni ligat yu."

*Ya etan keyew ni fig  
(Matthew 24:32-35; Mark 13:28-31)*

<sup>29-30</sup> Nan-inna-abbig Jesus hu nenuttuddu tun meippanggep ni keibbangngadan tu. Kantuy "Inamta yu e ya keyew ni fig et yadda edum ni keyew ey hedin ida kamemullug, ey amta yu e kamangkedettengi hu siyaggew. <sup>31</sup> Henin nunman daman man-ap-apuan Apu Dios e hedin ang-angen yullin kameipahpahding ida huayan inhel ku, ey humman ali pengimmatunan yu e kamangkedettengi law hu pengittu-dakan da-ak ali mewan Apu Dios ni man-ap-apu. <sup>32</sup> E-helen kun hi-gayu e makulug ni yadda edum ni hi-gayun tuun

\* 21:8 21:8 Ya keibbellinan ni Christo ey pinutuk Apu Dios ni mengippaptek ni emin ni tuu tu.

nunya ey eleg ida ni mettey ey um-amnulli emin eya inhel ku. <sup>33</sup> Meendilli kabunyan et ya puyek, nem mannenneng alin ingganah hu ehel ku.

*Mahapul ni hellipat-an tayu keibbangngadan Jesus di puyek*

<sup>34-35</sup> Helipat-i yu et beken ya hamul niya buttebuttehu hu pehpehding yu. Ey beken ni yan ebuh hu kahapulan yun nunyan ketaggu yu hu ikakkaguh yu, tep endi maptek ni pambangngadan kun manhuwet ni emin ni tuud puyek et ha-kupan dakeyulli. <sup>36</sup> Ya kayyaggud ey pandaddan kayun ingganah niya pandasal kayun Apu Dios ma-lat pa-let dakeyun mengan-anus ni ligat yu et eleg kayulli bumeing ni um-ehngeng di hinanggak e Pengulwan ni emin ni tuu.”

<sup>37-38</sup> Kewa-wa-wan nantuttuddu hi Jesus di Tempol et ida kaumhaleman dakel ni tuun an meneddengngel ni tuka ituttuddu. Hedin nehileng, ey kaumlaw di Duntug e Olibah ni an meuggip.

## 22

*Ihik ida buhul Jesus ni memettey ni hi-gatu*

*(Matthew 26:1-5; Mark 14:1-2; John 11:45-53)*

<sup>1</sup> Entanni ey kamangkedettengi law hu Piyestah ni Sinapay ni eleg mekamdugan ni yeast e humman hu Piyestah ni Passover. <sup>2</sup> Yadda ap-apuddan padi et yadda kamantuttuddun Tugun Moses ey ida kaumhamahamak ni pehding dan mengilligud ni pempapan dan Jesus ma-lat papetey da, nem daka tekkusidda katuuuu, tep daka tetebala hi Jesus.

*Ya nengabulutan Judas ni mengihdul nan Jesus*

*(Matthew 26:14-16; Mark 14:10-11)*

<sup>3</sup> Entanni ey neihuklung hi Satanas nan Judas Iskariot e hakey ni disipol Jesus, <sup>4</sup> et lumaw di kad-an idan ap-apuddan padi et yad kad-an idan ap-apun sindalun kamanguwalyan Tempol, et makihummangan e umbaddang ni pempapan dan Jesus. <sup>5</sup> Immaleng ida tep pinhed tun umbaddang et ehelen dan hi-gatu e tangdanan dan pihhuh. <sup>6</sup> Et meippalpun nunman ey kahellipat-in Judas hu pengihdulnan tun Jesus ma-lat liguden dan dedpapan et eleg amtaen idan tuu.

*Ya nengannan di Jesus et yadda disipol tun eman ni Piyestah ni Passover*

*(Matthew 26:17-25; Mark 14:12-21; John 13:21-30)*

<sup>7</sup> Entanni ey nedatngan law humman ni Piyestah ni Sinapay ni eleg mekamdugan ni yeast e yan nunman hu daka pengi-appisin impah ni kalneroh ni daka kennan Piyestah ni Passover. <sup>8</sup> Et itu-dak Jesus di Peter nan John e kantuy “Lakkayuy et yu idaddan hu kennen tayun piyestah.” <sup>9</sup> Kanday “Attu pinhed mun mi pengiddaddanan mi?”

<sup>10</sup> Kan Jesus ey “Elaw kayu eman di bebley et hedin ang-angen yu etan tuun nan-agtun bewed ni netalwan ni danum ey unud yu etan di baley ni hehgepan tu <sup>11</sup> et kanyu etan ni kambaley ey ‘Attu kunu hu kuwaltuh ni pengngannan etan ni Mittuduh et yadda disipol tu?’

<sup>12</sup> Et ittudu tu lan hi-gayu etan mahkang ni kuwaltuh etan di meikkadwan gladuh ni baley e wadan emin hu mahapul tayu. Yadman hu yu pengiddaddanan ni kennen tayu.”

<sup>13</sup> Limmaw ida etan dewwad Jerusalem ey makulug numan hu inhel Jesus et idaddan da hu kennen dan nunman ni Piyestah ni Passover.

*Ya nengannan di Jesus ni nunman ni Piyestah ni Passover*

*(Matthew 26:26-30; Mark 14:22-26; 1 Corinthians 11:23-25)*

<sup>14</sup> Nedatngan hu pengngannan da et yumudung di Jesus et yadda disipol tu. <sup>15</sup> Ey kan Jesus ni hi-gaday “Nebayag ni pinhed kun peteg ni mekikkan ni hi-gayun nunyan piyestah et hannak manhelheltap. <sup>16</sup> Tep endilli law nak pekikkannan ni hi-gayun hanneyan piyestah ingganah um-amnun emin hu pinhed Apu Dios di nan-ap-apuan tu.”

<sup>17</sup> Entanni ey illan Jesus hu basuh ni netalwan ni meinum et mansalamat nan Apu Dios et kantun hi-gaday “Aleyu eya basuh et manteltelpang kayun emin. <sup>18</sup> Endilli nak innuman mewan ni hanneya ingganah alid pan-ap-apuan Apu Dios.”

<sup>19</sup> Inla tu etan sinapay et mansalamat mewan nan Apu Dios et teneg-angen tu et ika-peng tun hi-gada et kantuy “Huyya annel kun iddawat kun panyaggudan yu. Aleyu et kanen yu. Huyyalli pahpahding yun penginemnemneman yun hi-gak.”

\* **22:7** 22:7 Huyyan Passover hu penginemnemneman ni nengitu-dakan Apu Dios ni anghel tun an nampematey idan lakin pengulwan ni u-unggaddan tuud Egypt.

<sup>20</sup> Negibbuh idan nengan ey illa mewan Jesus etan basuh ni netalwan ni meinnum et kantuy "Huyyan innumen yu hu amnuan etan ni baluh ni nekitbalan Apu Dios ni hi-gayu, tep um-ayuh hu kuheyaw ku ma-lat panyaggudan yu.

<sup>21</sup> Nem wada hakey ni hi-gayun nunya hu mengihdul ni hi-gak. <sup>22</sup> Tep hi-gak e Pengulwan ni emin ni tuu ey metteyyak ngu dedan tep humman hu planuh Apu Dios. Nem anggehmemek ali ngun peteg humman ni tuun mengihdul ni hi-gak." <sup>23</sup> Inhel Jesus huyya ey ida kaman-imbagan hedini hipan hi-gada hu mengippahding ni nunman.

*Ya meippanggep ida etan ni tuun eta-gey saad da*

<sup>24</sup> Entanni ey ida kamantututut hu disipol Jesus hedini hipan hi-gada hu keta-ta-geyyan ali saad tu. <sup>25</sup> Et kan Jesus ni hi-gaday "Ya elaw idan ap-apun Gentiles ey daka peta-gey annel da niya daka ba-aba-aladda tutu-u, ni kanda ni-nganguy mebaddang ida. <sup>26</sup> Nem entan tu u-unnud humman ni elaw da. Yadda heni peppenggulwan ey kayyaggud hedini eleg da peta-gey annel da, nem i-inggeh dan udidyan. Hanniman et damadda aap-apu e mahapul ni mambalin idan heni bega-en. <sup>27</sup> Hipa neta-ta-gey saad tu? Kaw ya etan yimmudung winu ya etan kamengiddaddan ni kennen nunman ni yimmudung? Ma-nu tep makulug ni ya etan tuun daka idaddani. Nem beken ni henin nunman ni hi-gak, tep bega-en da-ak ni hi-gayu, anin hi-gak hu Ap-apu yu.

<sup>28</sup> Hi-gayu ey eleg yuwak iwalleng anin yan nanligligatan ku. <sup>29</sup> Et humman hu, e-helen kun hi-gayu e peki-ap-apu dakeyullin hi-gak e pinutuk Ama e hi Apu Dios ni man-ap-apu. <sup>30</sup> Et mekikkan kayullin hi-gak ni pan-ap-apuan kulli. Ey hi-gayulli hu pan-ap-apuddan † helag idan hampulut dewwan u-ungngan Israel."

*Ya nanghelan Jesus ni pengihhe-utan alin Peter e hi-gatu hakey ni disipol tu (Matthew 26:31-35; Mark 14:27-31; John 13:36-38)*

<sup>31</sup> Intuluy Jesus ehel e kantuy "Simon, dengel mu eya e-helen ku. Imbagan Satanas nan Apu Dios e panliggat dakeyu tep pinhed tun iwwalak yu hu yuka pengullug ni hi-gak. <sup>32</sup> Nem indasalan dakeyu, nema-man hi-gam e Simon Peter, ma-lat eleg mu iwelak hu muka pengullug ni hi-gak. Umkapuy ali pengullug mun hi-gak, nem hedini mantuttuyyu kan nengiwelakan mun muka pengullug ni hi-gak ey mahapul ni baddangan mudda edum mun kamengullug ma-lat maihammad hu daka pengullug."

<sup>33</sup> Kan Peter nan Jesus ey "Apu, eggak iwwalak nakka pengullug ni hi-gam. Anin mekikkelabuttak niya mekikketteyak ni hi-gam et eggak ni hekey iwwalak hu nakka pengullug ni hi-gam." <sup>34</sup> Kan Jesus ey "E-helen kun hi-gam e Peter e mampitlulli pengihhe-utam e inamta muwak et han tumkuk hu manuk."

<sup>35</sup> Entanni ey kan Jesus ni hi-gadan emin ey "Yan eman ni nengitu-dakan kun hi-gayun an nengituttudun meippanggep ni hi-gak, ey inka-leg ku pengittebbinan yun patut yu niya hakbat yu, ey inka-leg ku pambellunan yun pihhuh. Et kaw nekulingan kayun mahapul yu?" Kanday "Tam eleg, wadan emin hu mahapul mi."

<sup>36</sup> Kan Jesus ey "Nem beken ni hanniman ni nunya. Hi-gayuddan wada pihhuh tu niya hakbat tu, mahapul ni ittabin yu. Hedini endi ispadah yu, igtang kayun balwasi yu ma-lat gumtang kayun ispadah yu. <sup>37</sup> Mahapul ni pehding yu huyya, tep nedatngan law hu amnuan ni neitudek ni meippahding ni hi-gak ni kantuy 'Neilegat di neipahding idan nambahul ni tutu-u.'" ‡

<sup>38</sup> Yan nanghelan Jesus ni hi-gadan mahapul da ispadah ey kandan hi-gatuy "Apu, wada dewwan ispadah tayu." Kan Jesus ey "Hiyya huttan."

*Ya an nandasalan Jesus di Gethsemani di Duntug e Olibah (Matthew 26:36-46; Mark 14:32-42)*

<sup>39</sup> Immehep hi Jesus ey limmaw di Duntug e Olibah, tep yadman hu kenayun ni tuka lawwi, ey nekilaw ida disipol tu. <sup>40</sup> Dimmateng idadman et kan Jesus ni hi-gaday "Pandasal kayu ma-lat eleg kayu maheul ni manliwwat."

<sup>41</sup> Inhel Jesus huyya et lumaw di a-allaw tu et mandukkun et mandasal. Kantud dasal tuy <sup>42</sup> "Ama, ettu anhan et anin ni eleg meippahding huyyan nak panhelheltapan ey? Nem ngenamung ka, ya pinhed mu hu meunnud, beken ni ya pinhed ku."

<sup>43</sup> Entanni ey wada anghel Apu Dios ni nalpud kabunyan ni nengipa-let ni hi-gatu. <sup>44</sup> Tagan tu dasal ey nemahhig ni kaman-ih-ih-ih hu linget tu.

<sup>45</sup> Entanni ey imminah di nandasalan tu et lumaw di kad-an idan disipol tu ey neugip ida, tep neatudda niya ida kaumlelemyung. <sup>46</sup> Kan Jesus ni hi-gaday "Kele neugip kayu? Bangun kayu et mandasal kayu ma-lat eleg kayulli maheul ni manliwwat."

† 22:30 22:30 Ya hakey ni keibbellinan nunya ey menuwet. ‡ 22:37 22:37 Ang-ang yu Isaiah 53:12

*Ya nampapan dan Jesus**(Matthew 26:47-56; Mark 14:43-50; John 18:3-11)*

<sup>47</sup> Kapan-e-helan Jesus huuya ey himmawang ida dakel ni tuun ingkuyug Judas e hakey ni disipol tu. Limmaw hi Judas et tu akwalen hi Jesus. § <sup>48</sup> Nem kan Jesus ey “Judas, kaw inakwal muwak ma-lat ihdul muwak e Pengulwan ni emin ni tuu?”

<sup>49</sup> Inamtaddan etan ni disipol hu meippahding nan Jesus, et kanday “Apu, kaw pampellangen midda?” <sup>50</sup> Et uknuten etan ni hakey ni hi-gada hu ispadah tu et palngen tu etan bega-en ni Eta-gey ni Padi, ey nepalang hu wannan ni tangila tu.

<sup>51</sup> Nem kan Jesus ey “Hiyya! Entan pakipetey yu.” Et kap-en tu tangilan etan ni bega-en ey neiaddak.

<sup>52</sup> Kan Jesus ida etan ni ap-apuddan padi, yadda etan ap-apuddan sindalun kamanguwalyad Tempol niyadda etan kamengipappangnguluddan Jews ey “Kaw matekewwak et pakkadek ni kayu man-ispadah niya kayu mampantetnged ni bakdung ni um-alin mempap ni hi-gak?” <sup>53</sup> Tam kewa-wa-wa ey wada-ak di Tempol ni kamantuttuddu, kele eleg yuwak depapen diman? Nem anin, tep yan nunya pengippahdingan yun pinhed Satanas e ap-apun emin ni lawah.”

*Ya nengiheutan Peter e inamta tu hi Jesus**(Matthew 26:57-58, 69-75; Mark 14:53-54, 66-72; John 18:12-18, 25-27)*

<sup>54</sup> Dimpap da hi Jesus et ilaw dad baley ni keta-ta-geyyan ni padi. Kamei-unnuunnud hi Peter, nem eleg meihnap. <sup>55-56</sup> Nan-apuy ida tuud dallin nunman ni baley et makidandang hi Peter. Entanni ey kaitetekel etan ni hakey ni biin bega-en et kantuy “Tam huuya etan hakey ni inang-ang kun kadkadwan Jesus.” <sup>57</sup> Nem inhaut Peter e kantuy “Tam eleg ku ngu amta humman ni tuu.”

<sup>58</sup> Neba-ba-ba ey wada mewan hakey ni tuun nenang-ang nan Peter et kantun hi-gatuy “Tam hi-gam etan hakey ni kamekikillaw nan Jesus.” Nem kan Peter mewan ey “Beken! Kaw ngun nak nekikillaw ni hi-gatu?”

<sup>59</sup> Nelabah han-olas ey wada mewan hakey ni immalin tuu ey kantu dama ey “Hi-gam anhan hu hakey ni kadkadwan Jesus, tep ka-immatun e iGalilee ka.” <sup>60</sup> Nem kan Peter ey “Tawwey ngu. Eggak amta huttan ni muka pan-e-hela.” Inhel tu huuya ey pinhakkeyey simmekuk manuk. <sup>61</sup> Inwingin Jesus et itkel tun Peter ey ninemnem Peter hu inhel lan Jesus e kantuy “Mampitullu pengihhe-utan mu e inamta muwak et han tumkuk hu manuk.” <sup>62</sup> Et umhep hi Peter et an mannannangngih tep maggeh ni peteg nemnem tu.

*Ya neneghegnudan da niya nampengawayan dan Jesus**(Matthew 26:67-68; Mark 14:65)*

<sup>63</sup> Entanni ey yadda etan kamangguwalyan Jesus ey daka heghegnuda hi-gatu ni nan-inheheplatan da. <sup>64</sup> Hinenian da matetun luput et pan-inkakawayan da et kanday “Hipa dedan hu nengaway ni hi-gam?” <sup>65</sup> Ey dakel hu lawah ni in-inhel dan nemadngel dan hi-gatu.

*Ya nehumalyaan Jesus di hinanggaddan ap-apuddan Jews**(Matthew 26:59-66; Mark 14:55-64; John 18:19-24)*

<sup>66</sup> Kamangkewa-wa ey neamung idan emin hu kamengipappangnguluddan Jews, et yadda ap-apuddan padi, niyadda etan kamantuttuddun Tugun Moses et i-li da hi Jesus di kad-an da. Kandan hi-gatuy <sup>67</sup> “Kaw hi-gam hi Christo e kamengippatek ni emin ni tuuh?” <sup>68</sup> Kan Jesus ni hi-gaday “Anin kangkuy em et eleg yu damengu kulluga. Ey hedini wada ibbagak ni hi-gayu ey eleg yu hummanga. <sup>69</sup> Nem nedatngan law hu tsimpuh ni yuddungan ku e Pengulwan ni emin ni tuud winannan Apu Dios e Keta-ta-geyyan.” \*

<sup>70</sup> Kan idan etan ni tuun wadamnan ni hi-gatu ey “Kaw hi-gam tep hu U-ungngan Apu Dios?” Hinumang Jesus et kantuy “Em. Makulug huttan ni inhel yu.” <sup>71</sup> Ey kan ida etan ni aap-apu ey “Eleg law mahapul ni wada edum ni mengihhuddut ni inhel tu, tep dingngel tayun emin. Humman ni inhel tu hu umhulun ni ketteyyan tu.”

**23***Ya nemistigalan Pilate nan Jesus**(Matthew 27:1-2, 11-14; Mark 15:1-5; John 18:28-38)*

<sup>1</sup> Inlaw idan aap-apu hi Jesus di kad-an Gubernur Pilate et kanday <sup>2</sup> “Huuyan tuu ey tuka ituttuddudan edum min Jews hu pengehingan dan linteg ni gubilnu. Ey tuka

§ 22:47 22:47 Hedin ya elaw idan tuun nunman, ey daka akwala edum dan tuun pengippeang-angan dan apnga da.

\* 22:69 22:69 Ya yinudungan Jesus di winannan Apu Dios ey humman keang-angan tu e eta-gey saad tu.

kehingga pambeyyadan min buwis di ap-apud Rome. Kantu pay ey hi-gatu hi Christo e patul.”

<sup>3</sup> Et kan Pilate nan Jesus ey “Kaw hi-gam hu Patul idan Jews?” Hinumang Jesus et kantuy “Tam deh e inhel mu.”

<sup>4</sup> Inligguh Pilate idan ap-apuddan padi et yadda etan edum ni tuu et kantun hi-gaday “Endi himmak kun bahu eyan tuun umhulun ni kekastiguan tu.”

<sup>5</sup> Nem daka pepippilit e kanday “Nem hi-gatu kaumhuhulun ni kapambabakalin tutu-u tep ya tuka ittutuddu. Inlapu tud Galilee et deh e dimmateng law di deyad Judea.”

<sup>6</sup> Yan nangngelan Pilate ni nunya ey imbagetu hedin iGalilee hi Jesus. <sup>7</sup> Yan nengamtaan Pilate e iGalilee hi Jesus ey impalaw tud kad-an Herod e ap-apudman ma-lat hi-gatu hu memistigal nan Jesus tep neipaddih ni wadan nunman di Jerusalem.

<sup>8</sup> Immamleng hi Herod ni nenang-angan tun Jesus tep nebayag ni pinhed tun ang-angen. Dakel hu diddingngel tun impahpahding Jesus ni miracle e kaketngain tuu et mukun ihik ni menang-ang ni edum ni ippahding tun miracle. <sup>9</sup> Et dakel hu imbagan Herod ni nemistigalan tun hi-gatu nem eleg ni hekey umhumang.

<sup>10</sup> Yadda ap-apuddan padi et yadda kamantuttuddun Tugun Moses ni kaman-eh-neng diman ey daka pan-itkuk hu daka pebehul nan Jesus. <sup>11</sup> Entanni ey anin damad Herod et yadda sindalu tu ey daka heghegnuda niya daka pippihula. Impambalwasi da balwasin ap-apu et pebangngad dad kad-an Pilate. <sup>12</sup> Neipalpun nunman ey nanggayyum law di Pilate nan Herod, ey ida la kamambuhul.

#### *Ya nengipepateyan dan Jesus*

*(Matthew 27:15-26; Mark 15:6-15; John 18:39; 19:16)*

<sup>13</sup> Impaeyag Pilate ida etan ap-apuddan padi et yadda ap-apun Jews niyadda edum ni katuutuu <sup>14</sup> et kantun hi-gaday “Kanyuy kaituttuddu eyan tuu hu pengehnging yun linteg, nem dingngel ku ehel tun nemistigalan kun hi-gatu ey endi nakka hemmakan bahu tun yuka pebehul ni hi-gatu. <sup>15</sup> Anin hi Herod et binistigal tu, nem endi himmak tun bahu tu, mukun impebangngad tudya. Endi umhulun ni an pemetteyan ni hi-gatu. <sup>16</sup> Et humman hu, pampeablig kun ebuh ey han ku imbukyatu.”

<sup>17</sup> Katootoon ey wada hakey ni kaibbukyat Pilate ni neikelabut hedin nedatngan hu Piyestah ni Passover. <sup>18</sup> Ey emin ida tuu ey ida kamantetekkek e kanday “Patey yu huttan ni tuu! Hi Barabbas hu ibukyatu yu.” <sup>19</sup> Hi Barabbas ey neikelabut tep pimmatey ey nei-dum ni nekiguluh di Jerusalem, tep eleg da pinhed hu gubilnud Rome.

<sup>20</sup> Impatnan Pilate mewan ni e-helan ida etan tuu tep pinhed tun ibbukyat hi Jesus, <sup>21</sup> nem tagan da tekuk e kanday “Ipetak yud krus! Ipetak yud krus!”

<sup>22</sup> Impitlun Pilate ni immehel ida etan ni tuu e kantuy “Nem kaw hipa bahu eyan tuu? Endi gaputun an pemetteyan ni hi-gatu. Et humman hu, pampeablig kun ebuh et han ku ibukyatu.” <sup>23</sup> Nem nema-ma anhan law ni daka pan-itkuk e kanday meippettak di krus. <sup>24</sup> Et u-unnuden law Pilate hu pinhed idan etan ni tuun meippahding. <sup>25</sup> Et hi Barabbas law hu imbukyatu tu. Hi-gatu ey nambahul et meikelabut tep pimmatey niya nei-dum ni nekiguluh. Et hi Jesus law hu in-abulut tun petteyan da, tep daka pepillit.

#### *Ya neipetakan Jesus di krus*

*(Matthew 27:32-44; Mark 15:21-32; John 19:17-27)*

<sup>26</sup> Daka pan-illaw hi Jesus etan di da pengippettakan ni hi-gatud krus ey hinipngat da hi Simon e iCyrene e um-anemut et. Impilit idan sindalun impapehan ni hi-gatu etan krus et meitu-tu-nud nan Jesus. <sup>27</sup> Dakel ida tuun kamei-unnuunnud ni daka pampengillawwin Jesus ey wadadda bibi-in kaumnanginangih niya nemahhig lemyung da. <sup>28</sup> Nem inwingin Jesus ni hi-gada et kantuy “Hi-gayuddan bibi-id Jerusalem, entan tuwak nannangngihi. Ya annel yu niya u-ungnga yu hu nangihi yu. <sup>29</sup> Tep medettangan ali aggew ni lehan yullin peteg et wadaddalli edum ni kanday ‘Ma-nudda ni-ngangu etan biin endi u-ungngadan kaman-innum.’ <sup>30</sup> Ey kan idallin tuu etan idad duntug ey ‘Kagday kayu et maita-bun kayun hi-gami.’ <sup>31</sup> Tep yan nunman ali ey nemahhig hu panligligatan idan tutu-u. Tep ang-ang yu kedin hi-gak e endi bahu ku, nem lawah hu daka pehpehding ni hi-gak e da-ak kapanhelheltap, et nema-malli ngun etan ni tuun nambahul.” <sup>32</sup> Yan nunman ey wadadda dama dewwan balud ni inlaw dan meippettak damad krus.

<sup>33</sup> Dimmateng idad duntug e Golgotha e ya keibbellinan tu ey heni genit ni ulu ang-ang tu, et ipetak dad krus hi Jesus et yadda etan dewwan balud. Nambina-hilan da e hakey di winilli tu et ya hakey di winannan tu. <sup>34</sup> Kan Jesus nan Apu Dios ey “Ama, pesinsahim anhan hu liwat ida eyan tutu-u, tep eleg da amta daka pehpehding.”

Yadda etan sindalu ey imbubunut da hedin hipan hi-gada hu mengellan balwasin Jesus.

<sup>35</sup> Kaman-ang-ang-ang ida etan neamong ni tuu ey kaheghegnudaddan aap-apun Jews hi Jesus. Kandy “Tam binenaddangan tu edum ni tuu. Diman panggu numan et ang-angen tayu hedin han-ihwang tu annel tu et keang-angan tu e hi-gatu pinutuk Apu Dios ni mengippaptek ni emin ni tuu.”

<sup>36</sup> Anin idan sindalu et da dama kaheghegnuda et idwatan dan mapeit ni meinnum <sup>37</sup> et kandy “Hedin makulug ni hi-gam hu Patul idan Jews, baddangim annel mu ma-lat eleg ka matey.”

<sup>38</sup> Wada neitudek di ta-pew ni ulun Jesus di krus ni kantuy “Huyya Patul idan Jews.”

<sup>39</sup> Anin dama etan hakey ni balud ni neipetak et tuka heghegnuda hi Jesus e kantuy “Kaw beken hi-gam hu pinutuk Apu Dios ni mengippaptek ni emin ni tuu? Ettu et baddangan mu annel mu, anin ni hi-gami.”

<sup>40</sup> Nem kan etan ni hakey ni balud ey “Kele hannitan muka pan-e-ehhel ni hi-gatu? Kaw endi takut mun Apu Dios, anin ni amtam e mettey ka? <sup>41</sup> Hedin hi-gata, man lebbeng tun mettey ita, tep huyya kastigu ta gapuh ni impahpading ta. Nem hedin hi-gatu, man endi tu kinapkapayan lawah.” <sup>42</sup> Et kantun Jesus ey “Jesus, nemnem muwak ali anhan ni pan-ap-apuam.” <sup>43</sup> Ey kan Jesus ni hi-gatuy “Em, anin ni yan nunya et mekihha-ad kan hi-gak di kad-an ni linggep et ya an-anla.”

*Ya neteyyan Jesus*

*(Matthew 27:45-56; Mark 15:33-41; John 19:28-30)*

<sup>44</sup> Entannit nandattek hu aggew ey endi maptek ey na-ngetan ni emin hu puyek ni tellun olas <sup>45</sup> e neendi petang ni aggew. Ey nepikgat etan kultina di Tempol, neipalpu ta-pew tu ingganah di hengeg tu. <sup>46</sup> Entanni ey simmekuk hi Jesus et kantuy “Ama, ngenamong kan ispirituh ku.” Inhel tu huyya et matey.

<sup>47</sup> Yan nenang-angan ni ap-apun sindalun nunman ni neipahding ey dineyaw tu hi Apu Dios et kantuy “Makulug ni endi bahul eyan tuu.” <sup>48</sup> Ey yadda etan tutu-un nenang-ang ni neteyyan Jesus ey ida kaumlemyung ni immanemut. <sup>49</sup> Emin ida etan gagayyum Jesus et yadda etan bibi-in nalpu Galilee ni nekikillaw ni hi-gatu ey inang-ang-ang dan emin hu nekapkapa, nem eleg ida meihnp.

*Ya neikulungan Jesus*

*(Matthew 27:57-61; Mark 15:42-47; John 19:38-42)*

<sup>50-51</sup> Wada etan hakey ni Jew e hi Joseph di Arimatea. Hi-gatu ey katettebaladdan tuu tep kayyagud elaw tu. Et humman hu, anin ni hi-gatu hakey ni ap-apuddan Jews, et eleg tu pinhed humman ni da impahding nan Jesus. Hi-gatu dama hakey ni kamenehhegged ni kedettengan ni nan-ap-apuan Apu Dios. <sup>52</sup> Yan neteyyan Jesus ey limmaw hi Joseph di kad-an Pilate ni an mengibeggan annel Jesus. <sup>53</sup> Ingkal tud krus et libutan tu et tu ikulung etan di neitukituk di batun endi ni an neikulung diman. <sup>54</sup> Yan nunman ni nengikulungan dan Jesus ey kamangkelinnug hu aggew e yan nunman hu keillappuan ni Sabaduh e kamengillin ni aggew.

<sup>55</sup> Yadda etan bibi-in iGalilee ni nekikillaw nan Jesus ey nekilaw idan Joseph ni tu nengikulungan ni hi-gatu, et inang-ang da neiha-adan ni annel tud kulung. <sup>56</sup> Immanemut ida et da pan-idaddan hu bangbanglun lana et yadda etan edum ni daka ihha-ad di annel ni netey. Nem nannungew ida tep nedatngan hu Sabaduh e kamengillin ni aggew tep humman hu kan ni Tugun.

## 24

*Ya netagwan Jesus*

*(Matthew 28:1-10; Mark 16:1-8; John 20:1-10)*

<sup>1</sup> Kamangkewa-wan Lingsu ey limmaw ida etan bibi-id kulung. Inlaw da etan indaddan dan da iapuap di annel Jesus. <sup>2</sup> Dimmateng idad kulung ey inang-ang da e neulin etan batun neitengeb. <sup>3</sup> Himmegep ida ey attukaw etan annel Jesus. <sup>4</sup> Ida kaumenemnem hedin hipa neipahding ni annel tu ey nekekemtang ey wada immehng ni dewwan anghel di kad-an dan kamammusi-lak balwasi da. <sup>5</sup> Ey simmakut idan peteg et daka iyuyuuung, nem kan ida etan ni anghel ni hi-gaday “Kele yadya hu yu penemmakan etan ni mategu? <sup>6</sup> Endidya tep simmagu! Kaw liniwuan yu hu inhel tun nunman ni hi-gayud Galilee? <sup>7</sup> Kantuy ‘Ya Pengulwan ni emin ni tuu ey ellan idallin lawah ni tuu et ippatak dad krus et mettey, nem metegguan ni katlun aggew.’”

<sup>8</sup> Ninemnem da humman ni inhel tu la <sup>9</sup> et hi-yanen da etan kulung. Et lumaw idad kad-an idan etan ni Hampulut hakey ni disipol et yadda edum ni kamengullug et ehelen

\* 23:45 23:45 Ya etan mahdel ni kultina ey neiha-nin di kuwaltuh ni kapanhahha-adin Apu Dios.



dan hi-gada hu inang-ang da. <sup>10</sup> Humman idan bibi-in limmaw di kulung ey hi Maria Magdalena, hi Juana, hi Maria e inan James et yadda etan edum ni bii. <sup>11</sup> Nem yadda etan disipol ey eleg da kulluga humman ni indaddatteng idan nunman ni bibi-i, tep kan da nem beken ni makulug.

<sup>12</sup> Nem hi Peter ey nambesik ni limmaw di neikulungan Jesus. Dimmateng et ihi-dip tu bawang ey inang-ang tu libut ni annel Jesus, nem endi etan annel tu. Et kamangkeibbangngad ey tuka nemnemnema humman ni nekapyia.

*Ya nampeang-angan Jesus ida etan ni dewwan disipol tu  
(Mark 16:12-13)*

<sup>13</sup> Yan nunman ni aggew ey wadaddad dalan etan dewwan disipol nan Jesus e ida kamenglaw di Emmaus e hampulut dewwan kilometroh hu kadinawwi tud Jerusalem. <sup>14</sup> Ida kamengmenglaw ey daka ung-ungbala meippanggep etan ni nekapkapyia. <sup>15</sup> Ey entanniy dinteng idan Jesus et mangmanglaw idan emin. <sup>16</sup> Inang-ang da, nem eleg da immatunan, tep eleg ni iebulut Apu Dios ni immatunan da. <sup>17</sup> Kan Jesus ni hi-gaday "Hipa yuka ennungbala?" Immehneng ida ey ka-ang-ang di angah da e ida kaumlemyung.

<sup>18</sup> Kan etan ni hakey e hi Cleopas ey "Tam hi-gam na-mu ngun ebuh hu mangilin wadad Jerusalem ni eleg mengaman nekapkapyadman eyan pigan aggew ni nelabah."

<sup>19</sup> Kan Jesus ni hi-gaday "Hipa nekapkapyia?" Et kandan hi-gatuy "Yadda nekapkapyan nan Jesus e niNazareth. Hi-gatu ey prophet Apu Dios. Mika tetbala e et-eteng kabaelan tun mengippahding ni miracle ey nelaing ni mantuttuddu tu niyad emin ni tuka pehding. Endi edum ni henin hi-gatud hinanggan Apu Dios et yad tuu. <sup>20</sup> Nem nealay impadpap idan ap-apuddan padi et yadda ap-apu tayu et ilaw dad kad-an Pilate et imbigtiganen tu et ipetak dad krus. <sup>21</sup> Kammi na-mu ngu nem hi-gatu mengihwang ni hi-gatsun Jews idan tuud Rome et beken ida law ni pan-ap-apu tayu. Huyya katlun aggew ni neteyyan tu. <sup>22</sup> Nem himmaleman ida edum min bibi-in kakkabbuhhan ni limmaw di neikulungan tu ey natnga kami tep ya indaddatteng da. <sup>23</sup> Kanday endid man etan annel tu ey kanday wada inang-ang dan dewwan anghel e kanda kunuy netagwan. <sup>24</sup> Limmaw ida edum ni hi-gamid kulung ey makulug numan hu inhel da e endidman etan annel Jesus."

<sup>25</sup> Kan Jesus ni hi-gaday "Kele kattedg anhan kulang nemnem yu? Kele neligat yun ewwatan hu inhel ida lan prophets ni meippahding nan Christo? <sup>26</sup> Tam inhel idan nunman hu meippahding nan Christo e kanday mahapul ni mettey et han pan-ap-apun emin ni tuu?"

<sup>27</sup> Et ittutuddu tun hi-gada hu keibbellinan ni emin ni neitudek ni meippanggep ni hi-gatu, e inlapu tud Tugun Moses et yadda intudek ida lan prophets.

<sup>28</sup> Dimmateng ida etan dewwad bebley ni lawwan da ey melebbah et hi Jesus, <sup>29</sup> nem impeked da e kanday "Pandeyya itsu tep mehillingan ka lad dalan." Et manda-guh hi Jesus.

<sup>30</sup> Entannit mengngan ida ey illan Jesus hu sinapay et mansalamat nan Apu Dios et teneg-angen tu et idwat tun hi-gada. <sup>31</sup> Ey pinhakkeyey inimmatunan da law e hi-gatu hi Jesus, nem endi maptek ey attukaw la. <sup>32</sup> Wada law hakkey ni hi-gada ey kanday "Ambuley kakkayyaggud ni peteg hu gibek kud dalan ni tuka pampenghelin keibbellinan ni neitudek di ehel Apu Dios."

<sup>33</sup> Entanni et umgah ida et mambangngad idad Jerusalem. Umdateng idadman ey wadadda etan hampulut hakey ni disipol Jesus et yadda edum ni kamengullug e neamong ida. <sup>34</sup> Ey ya netaguan Jesus hu daka ennung-ungbala e kanday "Makulug ni netagwan hi Apu Jesus, tep nampeang-ang nan Peter."

<sup>35</sup> Et e-ehhelen ida daman nunman ni dewwan disipol hu nampeang-angan Jesus ni hi-gada et ya nengimmatunan dan hi-gatun neneg-angan tun sinapay.

*Ya nampeang-angan Jesus ida etan ni Hampulut hakey ni disipol tu  
(Matthew 28:16-20; Mark 16:14-18; John 20:19-23; Acts 1:6-8)*

<sup>36</sup> Yan daka pampenghelin nunya ey pinhakkeyey wada hi Jesus e immehneng di kadan da. Et kantuy "Meweddhan hi-gayu hu linggep."

<sup>37</sup> Immegyat ida ey simmakut ida tep kanda na-mu ngu nem beken tu. <sup>38</sup> Et kan Jesus ni hi-gaday "Kele kayu kaumtatakut? Kaw eleg yu kulluga e hi-gak hi Jesus? <sup>39</sup> Ang-ang yu kedi ngamay ku et ya helik ni neliputan ni neipetakan ku. Kapa yuwak et pangulugan yu e bekennak ni banig, tep hedini ya banig, man endi annel tu."

<sup>40</sup> Tuka pan-e-hela huyya ey tuka pampeang-ang hu ngamay tu niya heli tun hi-gada. <sup>41</sup> Ma-nut immamleng ida tuun neamong, nem ida kamandinwa hedini makulug ni netagwan hi Jesus. Et kan Jesus ni hi-gaday "Kaw wada kennen?" <sup>42-43</sup> Et idwatan dan nelutun deleg et kanen tu.

<sup>44</sup> Kan Jesus mewan ni hi-gaday “Kaw eggak ehelen ni hi-gayun nunman eman ni hi-gatsun emin e pakkaw um-amnu emin hu intudek Moses et ya intudek idan prophets et ya neitudek di Psalms ni meippanggep ni hi-gak?”

<sup>45</sup> Inhel tu huyya et hantu idwat ni hi-gada kabaelan dan mengewwat ni neitudek ni ehel Apu Dios. <sup>46</sup> Kantun hi-gaday “Neitudek dedan di ehel Apu Dios e hi Christo ey mahapul ni manhelheltap et han matey, nem meteguan ni katlun aggew. <sup>47</sup> Et huyyan neteyyan tu hu gaputun pessinsahan Apu Dios hu liwat ni tutu-u, hedin mantuttuyyudda. Huyya hu mahapul ni meituttuddud kebebbley meippalpu Jerusale. <sup>48</sup> Hi-gayu ittudak kun an mantuttuddu, tep hi-gayu nenang-ang ni inamnuan idan neitudek ni ehel Apu Dios meippanggep ni hi-gak. <sup>49</sup> Nem panha-ad kayu nidya Jerusale et hegeden yu etan peellik ni Ispirituh Apu Dios ni memaddang ni hi-gayu, tep huyya dedan la inhel Ama.”

*Ya linawwan Jesus di kabunyan*

*(Mark 16:19-20; Acts 1:9-11)*

<sup>50</sup> Neba-ba-ba ey ingkuyug tudda et lumaw idad Betania. Dimmateng ida et ita-gey tu ngamay tu et idasal tu pemendisyon tun hi-gada. <sup>51</sup> Binendisyonan tudda ey nealay neendi, tep impaenamut Apu Dios di kabunyan. <sup>52</sup> Dineyaw da hi Jesus et ida kaman-am-leng ni peteg ni nambanggad di Jerusale. <sup>53</sup> Et neipalpun nunman ey ida kaum-umlaw di Tempol ni an mandaydayaw nan Apu Dios.

## Ya impaitudek Apu Dios nan John ni meippanggep nan Jesus

<sup>1</sup> Yan eman ni endi nin emin eyadda wadan nunya, ey wada ngu dedan etan Ehel ni mengippeamtan Apu Dios. Hi-gatu ey wadan Apu Dios, tep Dios dedan. <sup>2</sup> Wada ngu dedan nan Apu Dios et han mawedan emin eya wadan nunya. <sup>3</sup> Gapuh ni hi-gatu ey naltun emin eya wadan nunya. Endi hakey eyan wadan nunyan eleg tu letuen. <sup>4</sup> Hi-gatu nalpuan ni biyag ni tuu niya hi-gatu hu dilag ni kamemnang ni nemnem ni tuu ma-lat awatan da meippanggep nan Apu Dios. <sup>5</sup> Huyyan dilag hu kamemnang ni engeenget ma-lat endi tu ke-ngetan, nem mannananeng ni ingganah.

<sup>6-7</sup> Wada etan tuu e hi John e pinutuk Apu Dios ni mengippeamtad emin ni tuu meippanggep nunman ni dilag ma-lat kulugen da. <sup>8</sup> Beken ni hi John humman ni dilag, nem hi-gatu mengittuddun meippanggep ni nunman ni dilag.

<sup>9</sup> Huyyan dilag ey immali eyad puyek. Hi-gatu hu makulug ni dilag ni kamemnang ni nemnem ni tuu ma-lat amtaen da meippanggep nan Apu Dios. <sup>10</sup> Hi-gatu hu gaputun newada eya puyek, nem yan inlian tud puyek, ey eleg immatunan idan tuu. <sup>11</sup> Em, immali et mekiha-ad idan tuu tu, nem daker ni hi-gada hu eleg manglebulut ni hi-gatu. <sup>12</sup> Nem wadadda edum ni tuun nengabulut ni hi-gatu, et humman idan tuu hu nengidwatan tun kelebengan dan meibbillang ni u-ungngan Apu Dios, tep nandinel idan hi-gatu. <sup>13</sup> Humman ni da neibilangan ni u-ungngan Apu Dios ey beken ni nalpud nemnem ni tuu niya beken ni henin kakei-ungngain tuu, tep ya neiungngaan da ey gapuh ni kabaelan Apu Dios, et humman hu, hi-gatu law hu Ameda.

<sup>14</sup> Humman ni Ehel ni mengippeamtan Apu Dios ey nangkapan tuu et mekiha-ad ni hi-gatsun pigan toon eyad puyek. Inenang-ang ni ey makulug ni emin hu in-inhel tu niya et-eteng binabbal tun hi-gatsun tuu. Inenang-ang ni et amtaen mi e hi-gatu etan binugtung ni U-ungngan Apu Dios. Hi-gatu kei-ang-angan ni dayaw Ametu e hi Apu Dios.

<sup>15</sup> Hi-gatu hu impeenamtan John e kantuy "Huyya etan kametbal ni tuun inhel kun hi-gayun um-ali. Eta-gey ni peteg saad tu nem hi-gak, tep wada dedan et hannak maweda."

<sup>16</sup> Gapuh ni et-eteng ni impemihed tu niya binabbal tun hi-gatsun tutu-u ey daker ni peteg hu panyaggudan ni peelli tun dewwatan tayu. <sup>17</sup> Ya Tugun Apu Dios ey hi Moses hu nenawat. Nem ya endi pappeg tun impemihed niya binabbal Apu Dios et ya makulug ni meippanggep ni hi-gatu ey hi Jesus Christo hu nengipeamtan hi-gatsu. <sup>18</sup> Endi edum ni nenang-ang nan Apu Dios, ebuh etan binugtung ni U-ungnga tu, tep wadan kenayun ni hi-gatu. Et hi-gatu nengipeamtan meippanggep nan Apu Dios.

*Ya kaituttuddun John e kamemenyag*

*(Matthew 3:1-12; Mark 1:1-8; Luke 3:1-18)*

<sup>19</sup> Yadda ap-apud Jerusalem ey intu-dak dadda padi et yadda kaumbaddang ni hi-gadad Tempol et lumaw idad kad-an John ni an mengibbegga hedin hipa ingkatuu tu. <sup>20</sup> Et ehelen John hu makulug e kantuy "Bekennak hi Christo ni pinutuk Apu Dios ni mengippaptek ni tuu tu."

<sup>21</sup> Et kandan hi-gatuy "Kaw hi-gam tep hi Elijah?" Kan John mewan ey "Beken nak ni hi Elijah."

Et kan da mewan ey "Kaw hi-gam tep etan prophet ni impakulug Apu Dios ni um-ali?" Kan John ey "Beken ni hi-gak humman ni prophet."

<sup>22</sup> Et kanday "Hipa ka tep? Mahapul ni e-helen mu hedin hipa ka et wada e-helen midan nengitu-dak ni hi-gami."

<sup>23</sup> Kan John ey "Hi-gak etan inhel lan Isaiah e prophet e kantuy

'Wadalli etan mengit-itkuk di eleg mebebleyi e kantuy: Idaddan yu ey iyayyaggud yu dellanen ni Apu tayu.' " \*

<sup>24</sup> Etanni ey kan mewan idan nunman ni intu-dak idan Pharisee ey <sup>25</sup> "Hedin beken kan hi Christo, ey beken kan hi Elijah niya beken kan prophet Apu Dios ni kantun um-ali, kele tep muka benyagidda tuu?" <sup>26</sup> Hinumang John et kantuy "Wada kelebengan kun memenyag idan tuu, nem danum hu nakka pemenyag ni hi-gada. Nem wada hakey ni hi-gatsun nunyan eleg yu amta. <sup>27</sup> Hi-gatu etan kangkun meihullul ni hi-gak. Hi-gatu ey kamedeyyaw ni peteg tep eta-gey saad tu et nakka umbaing ni mambalin ni bega-en tu."

\* **1:23** 1:23 Ya keibbellinan nunya ey pandaddan kayu e iyayyaggud yu elaw yu tep um-ali Apu tayu.

<sup>28</sup> Huyya nekapkapyad bebley di Betania di ba-hil ni Wangwang e Jordan ni kapemenyagin John idan tutu-u.

*Hi Jesus ey kamei-ellig di kalneroh, tep ingkatey tu liwat ni tuu*

<sup>29</sup> Yan newa-waan tu, ey inang-ang John hi Jesus e iyyallid kad-an tu et kan John idan tuu ey "Iyalli etan intu-dak Apu Dios ni kamei-ellig di Kalneroh tun mengkal ni liwat ni tuu." <sup>30</sup> Hi-gatu etan inhel kun um-alin meihhullul ni hi-gak e neta-ta-gey saad tu nem hi-gak, tep wada ngu dedan et hannak maweda. <sup>31</sup> Anin ni hi-gak et eggak dama la ni amtan nunman huyyan um-alin meihhullul ni hi-gak, nem binenyagak ida tuun danum ma-lat wada inna-nu tun pengamtaan idan tuudya Israel ni hi-gatu."

<sup>32</sup> Huyya hu inhel John ni nengamtaan tun Jesus: "Yan nunya ey inamtak law e hi-gatu hi Christo, tep inang-ang ku hu Ispirituh Apu Dios e heni ang-ang ni paluman nalpud kabunyan et umpan hi-gatu." <sup>33</sup> Eggak la ni amta e hi-gatu hu pinutuk Apu Dios ni Christo, nem inhel tu eman ni nengitu-dakan tuwak ni memenyag idan tuun danum e kantuy 'Ya etan e-paan ni Ispirituh kun heni paluma ang-ang tu ey humman hi Christo. Hi-gatu hu mengibbenyag ni Ispirituh kuddan tuu.' <sup>34</sup> Inang-ang kun emin huyyan neipahding, et mukun nakka i-e-hel e hi-gatu ey makulug ni U-ungngan Apu Dios."

*Ya nengamtaan di Andrew nan Peter nan hi Jesus*

<sup>35-36</sup> Yan newa-waan tu ey kaman-eh-neng di John et yadda etan dewwan disipol tu ey nelabah hi Jesus et kan John ni hi-gaday "Hi-gatu etan kamei-ellig di Kalneroh ni kamei-appit nan Apu Dios." <sup>37</sup> Dingngel da humman ni inhel John ey nekilaw idan Jesus. <sup>38</sup> Nanwingi hi Jesus ey inang-ang tudda e ida kameitu-tu-nud ni hi-gatu et kantun hi-gaday "Hipa ibbageyu?" Kanday "Apu, attu muka panha-adi?" <sup>39</sup> Kantun hi-gaday "Ikeyuy et yu ang-angen." Et makilaw idan an nenang-ang ni tuka panha-adi et umdateng ida ey hambatanganan. Nekihuhummangan idan hi-gatu ingganah nehileng.

<sup>40</sup> Hi Andrew e agin Simon Peter etan hakey ni disipol John ni nekilaw nan Jesus. <sup>41</sup> Et ya nebukul ni impahding tu ey tu inang-ang hi agi tu e hi Simon et kantun hi-gatuy "Inang-ang mi etan pinutuk Apu Dios ni Christo ni mengippaptek ni tuu."

<sup>42</sup> Et ikuyug Andrew hi agi tu e hi Simon di kad-an Jesus. Ey kan Jesus ni hi-gatuy "Hi-gam hi Simon e u-ungngan John, nem yan nunya ey hullulan ku ngadan mu et hi-gam law hi Peter." Ya keibbellinan nunyan ngadan ey Batu.

*Disipol daman Jesus di Philip nan Nathaniel*

<sup>43</sup> Newa-wan nunman et lumaw hi Jesus di Galilee ey dinteng tu hi Philip et kantun hi-gatuy "Kaikuyug kan hi-gak."

<sup>44</sup> Hi Philip ey kebebleyan di Andrew nan Peter di Betsaida. <sup>45</sup> Limmaw hi Philip et tu ang-angen hi Nathaniel et kantun hi-gatuy "Inang-ang mi hi Christo, meippanggep ni hi-gatu hu intudek lan Moses et yadda la eman prophets, Ya ngadan tu ey hi Jesus e iNazareth e u-ungngan Joseph."

<sup>46</sup> Nem kan Nathaniel ey "Kaw wada kayyaggud ni iNazareth?" Kan Philip ey "Ikay et mu ang-angen."

<sup>47</sup> Inang-ang Jesus e iyyalli hi Nathaniel ey kantuy "Iyyalli hu makulug ni helag Israel e endin hekey itek tu."

<sup>48</sup> Kan Nathaniel ey "Kele inamta muwak?" Kan Jesus ey "Inang-ang daka dedan eman ni muka panhihiddumid hengeg ni keyew e fig et han daka ayagin Philip."

<sup>49</sup> Et kan Nathaniel ni hi-gatuy "Apu, hi-gam hu makulug ni U-ungngan Apu Dios. Hi-gam hu makulug ni Ap-apun helag Israel."

<sup>50</sup> Kan Jesus ni hi-gatuy "Kinulug muwak tep inhel ku e inang-ang dakad hengeg ni keyew e fig. Nem wadalli edum ni ketngaan mun peteg nem ya huyya."

<sup>51</sup> Kan Jesus mewan ey "Dengel yu eya e-helen ku, makulug ni ang-angen yulli e meibbeghul hu kabunyan et wadaddalli anghel Apu Dios ni mambinbinangngad idan um-alid kad-an ku e Pengulwan ni emin ni tuu."

## 2

*Ya kasal di Kanah*

<sup>1</sup> Nelabah dewwan aggew ey wada hu kasal di Kanah di Galilee ey wadadman hi inan Jesus. <sup>2</sup> Wada damad man hi Jesus et yadda disipol tu. <sup>3</sup> Entanni ey na-puh hu meinnum ey kan inan Jesus ni hi-gatuy "Tam endi law innumen da."

<sup>4</sup> Kan Jesus nan inetuy "Kele hi-gak mu pengibgaan? Eleg ni medatngan tsimpuh ni pengippeang-angan kun kabaelan Apu Dios."

<sup>5</sup> Nem kan inetu etan idan bega-en ni kamampaptek ey “U-unnud yu hu hipan e-helen Jesus ni hi-gayu.”

<sup>6</sup> Wadadman hu enem ni pa-nay ni simmuun ni kapan-ullahiddan tuu tep humman elaw idan Jews. Ya kaellan hakey ni pa-nay ni han napnu ey dewampulu winu telumpulun galon ni danum.

<sup>7</sup> Kan Jesus ida etan ni bega-en ey “Penu yudda eman pa-nay ni danum.” Inu-unnud da et penuen dadda etan pa-nay ni danum.

<sup>8</sup> Entanni ey kan Jesus ni hi-gaday “Yu pamengulun ittaugan etan kamengippaptek eyan kasal.” Et da iteugan.

<sup>9</sup> Sinamtaman nunman ni kamengippaptek ni kasal humman ni danum ni nambalin ni meinum, nem eleg tu amta hu nalpuan tu. Ebuh ida etan bega-en ni nengamta. Ey impaeyag tu etan lakin kankasal <sup>10</sup> et kantuy “Ya inamtak ni elaw tayu ey tayu kapebukkul ni ittaug hu kakkayyaggud ni meinum, et hedin na-puh, ey han tayu intunud hu lagat hedin wada. Nem kele hedin hi-gayu, man iyadya yu impanggillig ni kayyaggud ni yu intaug?”

<sup>11</sup> Humman ni impahding Jesus di Kanah di Galilee hu nemangulun miracle ni nengipeang-angan tun kabaalan tu. Et nema-man nengulug ida disipol tun hi-gatu.

<sup>12</sup> Entanni ey limmaw hi Jesus di Capernaum e nekilaw hi inetu, yadda agitu et yadda disipol tu et manha-ad idadman ni pigan aggew.

*Ya linawwan Jesus di Tempol*

*(Matthew 21:12-13; Mark 11:15-17; Luke 19:45-46)*

<sup>13</sup> Nganganah ni medettengan hu Piyestah ni Passover et lumaw di Jesus di Jerusalem. <sup>14</sup> Limmaw ida etan di Tempol ey dakel ida kamanggettang ni baka, yadda kalneroh, yadda paluma et yadda etan kamenullul ni pihhuh. <sup>15</sup> Immala hi Jesus ni linubid et kapyaeen tun heplit et pandegyunen tudda baka et yadda kalneroh ni daka iggatang ey binetu-lang tu tebol idan kamenullul ni pihhuh et maiwekay hu pihhuh da. <sup>16</sup> Et kan tudan etan ni kamanggettang ni paluma ey “Pan-ia-allaw yudda eya paluma yu. Kele yuka pambalin ni mulkaduh eya baley Ama?”

<sup>17</sup> Ninemnem idan disipol tu etan neitudek la e kantuy “Apu Dios, nemahhig kaguh ku eyan baley mu, et maggeh nemnem ku hedin nalgem hu keussalan tu.” \*

<sup>18</sup> Kan idan Jews nan Jesus ey “Hipa miracle ni peang-ang mu et keang-angan tu e wada kelebengan mun mengippahding idan eyan impahding mu?” <sup>19</sup> Kan Jesus ni hi-gaday “Bahbah yu eya Tempol et behwaten kun tellun aggew.”

<sup>20</sup> Et kan idan Jews ey “Kele kuma na-pat et enem ni toon et han mebehwat huayan Tempol ey kammu kuma ey hambehwat mun tellun aggew hedin mebahbah?”

<sup>21</sup> Nem ya tempol ni inhel Jesus ey ya annel tu. † <sup>22</sup> Et yan eman ni netagwan Jesus ni katlun aggew ni neteyyan tu, ey ninemnem idan disipol tu humman ni inhel tu. Huyya gaputun kinulug da impatudek Apu Dios ni ehel tun meippanggep ni ketegguan Jesus niya kinulug da dama humman ni inhel Jesus ni hi-gada.

*Inamtan Jesus hu wadad nemnem ni tuu*

<sup>23</sup> Yan nunman ni wada Jesus di Jerusalem ni nunman ni Piyestah ni Passover ey impahding tudda miracles et dakel ida tuun nengulug ni hi-gatu. <sup>24-25</sup> Nem eleg medinnel hi Jesus e nehammad hu daka pengullug, tep inamta tu hu elaw ni tuu, anin ni eleg da e-hela hu wadad nemnem da.

### 3

*Ya ung-ungbal di Nikodemus nan Jesus*

<sup>1</sup> Wada hu hakey ni Pharisee ni ap-apuddan Jews e hi Nikodemus ngadan tu. <sup>2</sup> Nehileng ey limmaw di kad-an Jesus et kantun hi-gatuy “Apu, inamta mi e hi-gam etan mittuduh ni intu-dak Apu Dios, tep eleg han-ipahding ni tuu etan ida muka pehpehding, hedin eleg baddangin Apu Dios.”

<sup>3</sup> Kan Jesus ni hi-gatuy “E-helen kun hi-gam e makulug ni eleg mabalin ni meilla-kam hu tuud nan-ap-apuan Apu Dios hedin eleg meippidwan mei-ungnga.” <sup>4</sup> Kan Nikodemus ey “Inna-nun an mei-ungnga mewan hu tuu hedin nehiken law? Kaw mambanggad di egeh inetu et han mewan maukat?”

<sup>5</sup> Kan Jesus ey “Dengel muwak tep makulug ni mahapul ni ya danum et ya Ispirituh Apu Dios hu mengippidwan kei-ungngaan ni tuu et han maila-kam di nan-ap-apuan Apu Dios. <sup>6</sup> Ya in-ungngan tuu ey elaw ni tuun ebuh hu wadan hi-gatu. Nem ya etan tuun

\* 2:17 2:17 Psalm 69:9 † 2:21 2:21 [19-21] Ya keibbellinan ni inhel Jesus ey anin ni mettey et umtagun katlun aggew.

meippidwan mei-ungnga et mawedan hi-gatu hu Ispirituh Apu Dios ey heni law daman elaw Apu Dios hu elaw tu. <sup>7</sup> Et humman hu, entan katngan nanghelan kun mahapul ni meippidwan mei-ungnga hu tuu. <sup>8</sup> Ya tuun meippidwan mei-ungnga et mawedan hi-gada hu Ispirituh Apu Dios ey kamei-ellig etan di dibdib. Inamta tayu e ya dibdib ey kamegibbek niya linggeman hu tuka pellowwi. Tayu kadedngela bungtu, nem eleg tayu amta tuka kelpui niya tuka lawwi tep eleg meang-ang. Henin nunman etan tuun wadan hi-gatu hu Ispirituh Apu Dios, e eleg tayu han-awat hu kapehding ni Ispirituh Apu Dios ni hi-gatu, nem ka-ang-ang e nehullulan hu elaw tu et kayyaggud law.”

<sup>9</sup> Kan Nikodemus ey “Kele inna-nu tu makkaw huayan inhel mu?” <sup>10</sup> Kan Jesus ey “Kele hi-gam hu kametbal ni mittuduh ni elaw tayun Jews ey eleg mu amta huuya? <sup>11</sup> Dengel mu eya e-helen ku, tep makulug hu mika e-e-hela, tep inamta mi niya inang-ang mi, nem eleg yu kulluga. <sup>12</sup> Inhel kun hi-gayun emin hu meippanggep ni kamekapkapyad puyek, nem eleg yu kulluga et nema-ma ngun eleg yun hekey kulluga hedin ya kamekapkapyad kabunyan di kad-an Apu Dios hu e-helen kun hi-gayu. <sup>13</sup> Endi edum ni limmaw ni an nenang-ang alin kabunyan, ebuhhak e Pengulwan ni emin ni tuu, tep yadman ali nalpuan ku.

<sup>14</sup> Hi Moses eman ni wadaddad eleg mebebleyan ey inla tu etan giniling et kopyaen tun heni uleg et ipelat tu et itu-bek tu, et humman hu sinengaw idan kinlat ni uleg et eleg ida matey. Hanniman daman hi-gak e Pengulwan ni emin ni tuu e meippetakkak ali damad keyew <sup>15</sup> et emin hu mengullug ni hi-gak ey wada biyag tun endi pappeg tu.

<sup>16</sup> Hi Apu Dios ey nakappinshed daitun tuud puyek et humman gaputun eleg tu kawwanan etan binugtung ni U-ungnga tu et itu-dak tu eyad puyek ma-lat emin ida mengullug ni hi-gatu ey meidwatan idan biyag ni endi pappeg tu et eleg ida lumaw di nandaul. <sup>17</sup> Eleg itu-dak Apu Dios hu U-ungnga tud puyek ni an manhuwet ni tuun mekastigu, nem intu-dak tun an menellaknib ni tuu.

<sup>18</sup> Et ya etan tuun mengullug ni hi-gatu ey eleg ali kastiguen Apu Dios, nem ya etan tuun eleg mengullug ni hi-gatu ey mekastigu tep ya eleg tu pangulugan ni U-unggan Apu Dios. <sup>19</sup> Humman ni dilag ey immali eyad puyek ni memnang ni nemnem ni tuu, nem eleg da pinhed ni issiked hu lawah ni daka pehpehding, et humman hu mekastigudda. <sup>20</sup> Yadda etan tuun ya lawah daka pehpehding ey eleg da pinhed ni mebnangan ida tep meamta hu lawah ni daka pehpehding. <sup>21</sup> Nem yadda etan tuun ya kayyaggud hu daka pehpehding ey pinpinhed dan um-alid kad-an ni dilag ma-lat meang-ang e indawtan Apu Dios idan kabaelan dan mengippahding ni kayyaggud.”

*Ya saad Jesus ey eta-gey ni peteg nem hi John*

<sup>22</sup> Entanni ey limmaw hi Jesus di Judea et makilaw ida disipol tun hi-gatu. Nanha-ad idadman et pambenyagan dadda tuud man. <sup>23</sup> Wada dama hi John di Aeon e neihnu di Salim e tudda kapambenyagi tuud man, tep dakel danum diman. <sup>24</sup> Yan nunman ni tsimpuh ey dakel kaum-alin mampebenyag nan John. Yan nunman ey eleg pay ni maikelabut.

<sup>25</sup> Entanni ey nekitutud ida etan disipol John etan ni hakey ni Jew meippanggep ni benyag. <sup>26</sup> Limmaw ida huayan disipol John di kad-an tu et kandan hi-gatuy “Apu, kaw hannemnem mu etan tuun kadwam di ba-hil ni wangwang e Jordan e kanmun hi Christo? Tagan tu kunu benyag nunya ey dakel hu tuun kaumlaw ni mampebenyag ni hi-gatu.”

<sup>27</sup> Hinumang John et kantuy “Eggaq um-ameh hedin dakel ida kamampebenyag ni hi-gatu. Endi edum ni kakelpuin kelebengan ni tuu, nem ebuh hi Apu Dios. <sup>28</sup> Inhel kun hi-gayun nunman et inamta yu e bekennak ni pinutuk Apu Dios ni mengippaptek ni tuu, nem intu-dak tuwak ni an mengiddadan idan tuun mengebbulut ni hi-gatu. <sup>29</sup> Hi-gak ey nakka mei-ellig etan ni kamangkellun e u-unnuden tu e-helen etan ni lakin tu ikkalun. Tep hi-gak ey immali-ak ni mengippeamtan Christo. Et yan nunya, ey nakka man-am-amleng law ni peteg tep immali ey inebulut idan tutu-u. <sup>30</sup> Et humman hu, mahapul ni hi-gatu meiddeyyaw ni peteg, beken ni hi-gak.

<sup>31</sup> Hi Jesus e nalpud kabunyan ey hi-gatu keta-ta-geyyan. Ya nalpud puyek ey ebuh hu wadad puyek ni tuka ewwasi, et humman ni ebuh hu inamta tun e-helen. Et mukun kulangngak tep yad puyek hu nalpuan ku. Nem hedin hi-gatu, man amta tun emin tep nalpud kabunyan ey hi-gatu keta-ta-geyyan ni emin. <sup>32</sup> Ya tuka ituttuddu ey ya inang-ang tu niya dingngel tud kabunyan, nem hahhakkey ida kamengebbulut. <sup>33</sup> Nem yadda etan kamengebbulut ni tuka ituttuddu ey hi-gada kamengihhuddut e makulug emin hu ehel Apu Dios. <sup>34</sup> Emin hu kae-helan Jesus ey nalpud Apu Dios e nengitu-dak ni hi-gatu, tep indawat Apu Dios ni hi-gatu hu Ispirituh tu e et-eteng kabaelan tu. <sup>35</sup> Hi Apu Dios ey nakappinshed tu hi Jesus e U-ungnga tu et idwat tun emin ni hi-gatu hu kelebengan ni

man-ap-apun emin. <sup>36</sup> Emin tuun mengullug nan Jesus e U-ungngan Apu Dios ey wada biyag dan endi pappeg tu. Nem yadda etan tuun eleg mengullug ni hi-gatu ey endin hi-gada humman ni biyag, nem kastiguen idallin Apu Dios ni ingganah.”

#### 4

*Ya nekiungbalan Jesus etan ni biin iSamaria*

<sup>1</sup> Yadda etan Pharisee ey dingngel da e daddakkel ida kamekikkilaw nan Jesus ey dakel ida kamampebenyag ni hi-gatu, nem hi John. <sup>2</sup> Nem ya kakulugan tu ey endin hekey kaya an binenyagan Jesus, tep yadda disipol tu hu kamemenyag idan tuu. <sup>3</sup> Inamtan Jesus e dingngel idan Pharisee hu meippanggep ni nunman, et hi-yanen da Judea et mambangngad idad Galilee. <sup>4</sup> Yan linawwan da ey indalan dad Samaria <sup>5</sup> et dumteng idad Saykar e hakey ni bebley diman e neihnip di puyek ni impebeltan Jacob lan u-ungnga tu e hi Joseph.

<sup>6-8</sup> Dinteng da etan hibuy ni kinu-kuan lan Jacob et yumudung hi Jesus tep neatu. Yadda etan disipol tu ey limmaw idallid bebley ni an umgatang ni kenen da, et hahhakkey hi Jesus ni nehi-yan di hibuy. Yan nunman ni ngannganih ni mandattek aggew ey wada immalin biin an man-ehhul etan di hibuy et kan Jesus ni hi-gatuy “Ala kallin danum et uminummakah.” <sup>9</sup> Natnga etan bii et kantuy “Kele kamambaggan hi-gak ni danum, ey iSamariahkah ey hi-gam ey Jew ka?” Inhel etan ni bii huuya, tep eleg pinhed idan Jews hu iSamaria.

<sup>10</sup> Kan Jesus ey “Gullat et ni inamtam etan kaiddawat Apu Dios niya inamtam hedini hipa-ak et wadan mambegga kan hi-gak ni danum ni um-idwat ni biyag ni endi pappeg tu.”

<sup>11</sup> Kan etan ni bii ey “Attu makkaw mu pangellaan ni kammun danum ni um-idwat ni biyag ni tuu ey endi pena-nuk mun eyad edallem ni hibuy? <sup>12</sup> Kaw neta-ta-gey ka nem hi Jacob e apu tayu lan nengu-ku eyan hibuy? Huuyan hibuy hu ininuinuman Jacob et yadda u-ungnga tu niyadda animal da. Kaw wada tep hin-appil ni kayyagud ni danum ni dammutun iddawat mu?”

<sup>13</sup> Kan Jesus ni hi-gatuy “Ya danum eyad hibuy ey anin ni innuinnumen ni tuu et nekemtang ali mewan ni na-wew. <sup>14</sup> Nem ya etan tuun menginum ni danum ni iddawat ku ey eleg law me-wew, tep humman ey kamei-ellig di danum ni utbul ni eleg metduk. Et ya tuun ebbuluten tu humman ni nakka iddawat ey wada biyag tun endi pappeg tu.” <sup>15</sup> Kan etan ni biin hi-gatuy “Apu, idwasi muwak nunman ni danum ma-lat eggak ma-ma-wew et eggak um-umlidyan an man-ehhul.”

<sup>16</sup> Kan Jesus ni hi-gatuy “Elaw ka ni et mulli awiten ahwam.” <sup>17-18</sup> Hinumang etan ni bii et kantuy “Endi ahwak.”

Kan Jesus ey “Makulug huttan ni inhel mun endi ahwam, tep ma-nut liman laki nekiawhaam, nem ya etan nekiaddumam ni nunya ey beken mu ahwa.”

<sup>19</sup> Kan etan ni bii ey “Apu, inawtan ku law e prophet ka. <sup>20</sup> Et pinhed kun ibbagan hi-gam hedini kele yadda aammed min nunman ey ya eyad duntug hu daka penaydayawin Apu Dios, nem hi-gayun Jews, ey kanyuy mahapul ni yad Jerusalem hu penaydayawan yun hi-gatu.”

<sup>21</sup> Kan Jesus ey “Kulug mu eya e-helen ku e wadalli tsimpuh ni eleg mahapul ni yad eyad duntug winu yad Jerusalem hu penaydayawan nan hi Ama Apu Dios. <sup>22</sup> Hi-gayun iSamaria ey kulang ni peteg hu yuka pan-ewwat ni elaw Apu Dios, nem hi-gamin Jews ey inamta mi elaw tu, tep hi-gamin Jews hu nalpuan etan ni pinutuk Apu Dios ni menellaknib ni tuu. <sup>23</sup> Nem yan nunya ey anin ni hipan tuu ey dammutun mekiddagyum nan Apu Dios. Ya kei-angan tu huuya ey wadadda law hu kamenaydayaw nan Apu Dios di nemnem da niya daka kulluga e makulug hu meippanggep ni hi-gatu. Huuya elaw ni penaydayaw ni pinhed Apu Dios ni u-unnuden ni tuu. <sup>24</sup> Hi Apu Dios ey Ispirituh, et humman hu ya tuun menaydayaw ni ustuh ni hi-gatu ey mahapul ni baddangan ni Ispirituh ni mandeyyaw ni hi-gatud nemnem tu meippuun di makulug ni kameituttuddu.”

<sup>25</sup> Kan etan ni bii ey “Inamtak e um-alilli etan pinutuk Apu Dios ni mengippaptek ni emin ni tuu e hi Christo ngadan tu. Yallin ellian tu hu pengippeewwatan tun hi-gatsun emin ni eleg tayu han-awat.” <sup>26</sup> Kan Jesus ni hi-gatuy “Hi-gak hi Christo.”

<sup>27</sup> Tuka pan-e-hela huuya ey dimmateng ida disipol tu. Ey natngadda tep kamekiung-ungbal hi Jesus etan ni bii, nem endin hi-gada nengibegan hi-gatu hedini hipa tuka pan-ibbaga etan ni bii winu hipa daka ennungbala.

<sup>28</sup> Hini-yan etan ni bii etan tu et i-ahul et mambangngad di bebley et kantuddan tuu ey <sup>29</sup> “Ikeyuy kedi. Immen etan tuun inamta tun emin hu impahpahding ku et ehlen tun

hi-gak. Hi-gatu na-mu pinutuk Apu Dios ni mengippaptek ni emin ni tuu.”<sup>30</sup> Et ebuhe wada hakkey ida etan ni tuu etan di bebley ey limmaw idan an menang-ang nan Jesus.

<sup>31</sup> Eleg pay ni dumteng ida etan tuu ey kan idan disipol Jesus ey “Apu, pangan ka law.”  
<sup>32</sup> Nem kan Jesus ey “Wadan hi-gak etan kenen ni eleg yu amta.”

<sup>33</sup> Wada hakkey ni hi-gami ey kantuy “Hipa na-mu immi-lin kenen tu?”<sup>34</sup> Kan Jesus ey “Ya kamei-ellig ni kenen ku ey ya pengippahdingan kun pinhed Apu Dios e nengitudak ni hi-gak niya mengibbuh ni ngunun indinel tun hi-gak.”<sup>35</sup> Wada etan yuka ehelan kanyuy ‘Melebbah epat ni bulan et medetteng hu ahiani.’ Nem e-helen kun hi-gayu e yan nunya law hu pan-ennian tep nedateng. Ang-ang yu eyadda dakel ni tuun kamampengellin nandaddan ni mengullug ni hi-gak. Hi-gada hu neieligan ni nedateng ni meenni.<sup>36</sup> Ey yadda kaman-enni neieligan idan kamantuttuddun meippanggep Apu Dios, ey wada tangdan da. Tep ya neieligan ni daka pan-ennia ey yadda etan tuun mengullug ni kameituttuddu e hi-gada meiddawtan ni biyag ni endi pappeg tu. Huyyan kayyaggud ni meenni hu pambalanan ni ngunuddan nantanem e yadda nengani. Et mukun ida kaman-am-amleng.<sup>37</sup> Makulug etan kandan ‘Mantennem edum ey man-enni edum.’<sup>38</sup> Intu-dak dakeyun an mengennin beken yu intanem. Wadaddala nemangulun neatun nantanem et yan nunya ey hi-gayu mengenni.”\*

<sup>39</sup> Dakel ida nengulug nan Jesus di Samaria tep ya nanghelan etan ni biin inamtan Jesus hu impahpahding tun nunman.<sup>40</sup> Yan nunman ey imbagaddan iSamaria nan Jesus, e manha-ad nid bebley da, et tebalen tu et manha-ad ni dewwan aggew.

<sup>41</sup> Et yan nunman ni nanha-adan Jesus diman, ey dakel ida nei-dum ni nengulug gapuh ni intuttuddu tu.<sup>42</sup> Kan idan tuu etan ni bii ey “Beken ni ya inhel mun ebuh hu gaputun nengulugan mi, nem dingngel mi intuttuddu tu et kulugen mi e hi-gatu etan tayu kahehhegedan Menellaknib idan tuu.”

*Ya nangkalan Jesus ni degeh etan ni u-ungngan ap-apu*

<sup>43</sup> Nelabah dewwan aggew ni nanha-adan dad Samaria et lumaw hi Jesus di Galilee.  
<sup>44</sup> Inhel Jesus ni nunman e kantuy “Ya prophet ey eleg kullugaddan kebebleyan tu.”

<sup>45</sup> Dimmateng hi Jesus di Galilee ey ida kaman-am-amleng tudman, tep inang-ang dadda impahding tud Jerusalem ni miracles eman ni Piyestah ni Passover.

<sup>46</sup> Entanni ey limmaw mewan hi Jesus di Kana di Galilee. Yadman la hu nengipahdingan tu eman ni miracle e impambalin tu danum ni meinnun. Wadadman etan hakey ni ap-apud Capernaum e kamandedgeh u-ungnga tu.<sup>47</sup> Dingngel tun dimmateng hi Jesus di Galilee ni nalpuan tud Judea et lumaw di Kana. Dinteng tu Jesus diman et mampehemhemmek ma-lat makilaw di Capernaum et tu ekalen degeh etan ni u-ungnga tu, tep kamangkatkathey.

<sup>48</sup> Kan Jesus etan ni ap-apu ey “Kaw pakkadek ni wada ang-angen yun miracles ni han yuwak kinulug?”<sup>49</sup> Nem kan etan ni ap-apu ey “Ikay kuma anhan et eleg matey etan u-ungngak.”

<sup>50</sup> Et kan law Jesus ey “Meteggu kaya etan u-ungngam. Anemut ka kuma.” Kinulug etan ni ap-apu humman ni inhel Jesus et umenamut.

<sup>51</sup> Yan newa-waan tun tuka pangkeibbanggadi ey nandadammuddan bega-en tu et ehelen dan hi-gatu e na-kal degeh etan ni u-ungnga tu.<sup>52</sup> Imbagetun hi-gada hedid pigantu la na-kalan ni degeh tu ey kanday “Ya lan ala unah ni kaalman hu nedageman ni atung ni annel tu.”

<sup>53</sup> Inamta tu e yan nunman ni olas hu nanghelan Jesus ni hi-gatun kantuy “Meteggu kaya etan u-ungngam.” Et emin idan hampamilyah, anin ida etan ni kamekihha-ad di baley da ey nengulug idan Jesus.<sup>54</sup> Humman neikadwan impeang-ang Jesus ni kabaelan Apu Dios ni nambangngadan tud Galilee ni nalpuan tud Judea.

## 5

*Ya etan kamandedgeh ni wadad gilig ni lebeng*

<sup>1</sup> Entanni ey nedatngan hu piyestah idan Jews di Jerusalem et lumaw diman hi Jesus.  
<sup>2</sup> Wadadman etan lebeng ni kandad ehel ni Jews ni Bethesda e neihip di eheb ni heggeppan idan kalneroh. Yaddad gilig nunman ni lebeng ey wadadda liman a-abbung ni hiddumman<sup>3</sup> e napnun tuun kamampandedgeh. Wadadda nangkekulap, yadda nangkepi-day et yadda nangkedahuy.<sup>4</sup> (Mukun wadaddadman ey tep daka hehhegeda hu kakekiwwain etan ni danum, tep wada anghel Apu Dios ni kaum-alin kamengiwwa. Et ya etan kamemengngulun umgawa hedid nekiwa, ey kame-kal degeh tu, anin hipa

\* **4:38** 4:38 Ya kebellinan tu huyya ey wadadda edum ni nanligligat ni nengitenuttuddun meippanggep nan Jesus et neidaddan ida tuun mengullug ni hi-gatu e yadda disipol tu hu mengittulluy nunman ni ngunu da.



humman ni degeh.)<sup>5</sup> Wada etan hakey ni lakin kamambakbaktad ni diman e nandegheh ni telumpulu et walun toon.<sup>6</sup> Inang-ang Jesus humman ni lakin kamambakbaktad diman ey inamta tu e nebayag ni nandegheh, et kantun hi-gatuy "Kaw pinhed mun me-kal degeh mu?"

<sup>7</sup> Kantuy "Em, nem hedin nekiwa eman danum di lebeng et kangkuy mebukullak ni umgawa, man wadan kenayun hu kamebukkul, tep endi umbaddang ni hi-gak."<sup>8</sup> Kan Jesus ni hi-gatuy "Anin, na-kal kaya law hu degeh mu. Inah ka! Alam eya abek mu et umenamut ka."<sup>9</sup> Ey pinhakkeyey na-kal degeh tu et alen tu abek tu et manglaw.

Nem yan nunman ni aggew ey Sabaduh.<sup>10</sup> Et yan nenang-angan idan ap-apuddan Jews ni nunman ni tuu ey kandan hi-gatuy "Kele muka tettenggeda eya abek mu ey Sabaduh nunya e kamengillin ni aggew?"<sup>11</sup> Kantun hi-gaday "Ya ngu etan tuun nangkai ni degeh ku hu nanghel ni kantuy ellak eya abek ku et umenamuttak."

<sup>12</sup> Kan idan Jews ey "Hipa ni-man humman ni tuun nanghel ni hi-gam nuntan?"<sup>13</sup> Nem eleg amtan nunman ni tuu, tep pinhakkeyey hini-yan Jesus et maikamdug ida etan di dakel ni tuud gilig etan ni lebeng.

<sup>14</sup> Entanni ey dinteng Jesus etan tuud Tempol et kantun hi-gatuy "Deh e yimmaggud ka, ang-ang mu et eleg mu law ippahding hu lawah, tep entanniy meidwatan kan nemahhig ni ligat nem ya etan hiniktamam."

<sup>15</sup> Inamta law etan ni tuu e hi Jesus hu nangkai ni degeh tu, et lumaw et tu ehelen idan Jews.<sup>16</sup> Et nemahhig bunget idan Jews nan hi Jesus tep Sabaduh hu nengipahdingan tun nunya.\*

<sup>17</sup> Nem kan Jesus ni hi-gaday "Kanyuy pi-yew ni hi-gatsun Jews ni manggunnu hedin Sabaduh. Nem hi Ama Apu Dios ey kamanggunnun kenayun ni panyaggudan ni tuu, anin hipan aggew, et humman hu mahapul ni humman dama hu pehding ku."

<sup>18</sup> Dingngel idan Jews humman ni inhel Jesus ey nema-man pinhed dan petteyen hi Jesus gapuh ni nengahingan tun elaw dan meippanggep ni aggew ni Sabaduh, et ya nengianggehan tun annel tun Apu Dios, tep kantuy Ametu hi Apu Dios.

*Ya kelebengan Jesus ni menuwet emin ni tuu*

<sup>19</sup> Kan Jesus ida etan ni Jews ey "Dengel yu eya makulug ni e-helen kun hi-gayu. Hi-gak e U-unggan Apu Dios ey beken ni nak petebbatebbal et ya pinhed ku hu nakka pehpehding tep ya nakka ang-ang-angan kapehpehding Ama hu nak dama kapehpehding. Et humman hu, emin etan kapehpehding Ama ey humman dama nakka pehpehding."<sup>20</sup> Hi Ama ey nakappinhed tuwak e U-ungnga tu et mukun emin hu tuka pehding ey tuka ittudun hi-gak. Wadalli pay ittudu tun pehding kun miracles ni nemanan ketngaan idan tuu, nem ya eya impahding kun nunya.<sup>21</sup> Hi Ama Apu Dios ey tuka teggua netey. Heni daman hi-gak e U-ungnga tu e nakka iddawat hu biyag etan ni tuun pinhed kun pengidwatan.<sup>22</sup> Beken ni hi Ama Apu Dios hu manhuwet ni tuu, tep indinel tun hi-gak e U-ungnga tu hu kelebengan kun manhuwet ni emin ni tuu,<sup>23</sup> ma-lat hi-gak e U-ungnga tu ey deyyawen da-ak idan tuu henin daka penaydayawin Ama. Ya tuun eleg tuwak deyyawa e U-unggan Apu Dios ey eleg tu dama deyyawa hi Ama e nengitu-dak ni hi-gak.

<sup>24</sup> Dengel yuwak, tep makulug ni ya tuun kullugen tu ehel ku niya kullugen tu hi Apu Dios e nengitu-dak ni hi-gak ey wadalli biyag tun endi pappeg tu, et eleg law mekastigu.<sup>25</sup> Ey e-helen kun hi-gayu e makulug ni hakey alin aggew, anin yan nunya, et wadadda eleg mengullug e henidda netey, nem hedin dedngelen da ehel ku e U-unggan Apu Dios, et kullugen da ey wada biyag dan endi pappeg tu.<sup>26</sup> Hi Ama ey wada ngu dedan ni hi-gatu huyyan biyag et mukun hi-gatu kakelpuin nunyan biyag. Hanniman daman hi-gak e U-ungnga tu e wadan hi-gak tep indinel tun hi-gak.<sup>27</sup> Ey indawat tun hi-gak hu kelebengan kun menuwet idan tuu, tep hi-gak hu Pengulwan ni emin ni tuu.<sup>28-29</sup> Entan katnga yu eyan e-helen ku, tep makulug ni wadalli aggew e emin idalli nangketey di kakulukulug ey dedngelen dalli ehel ku et meukkat ida. Emin ida etan kayyaggud impahpahding da tep ya ngulugan dan hi-gak ey meidwatan idan biyag ni endi pappeg tu. Nem yadda etan lawah hu kinapkapy da ey mekastiguddan ingganah.

<sup>30</sup> Endi nakka ippahding ni eleg iebulut nan Ama. Tep hi-gak ey beken ni ya pinhed ku hu nakka pehpehding tep emin eya nakka kapkapyaa ey humman intudun Aman hi-gak ni pehding ku. Et humman hu, ya nakka panhuwet ni tuu ey limpiyuh tep humman hu pinhed nan Ama e nengitu-dak ni hi-gak.

<sup>31</sup> Gullat ni hi-gak ngu kamengene-ehhel ni meippanggep ni annel ku, ey beken ni makulug ida humman ni nakka e-e-hela.<sup>32</sup> Nem wada hi Ama Apu Dios ni

\* 5:16 5:16 Yadda Jews ey daka kulluga e pi-yew ni manggunnu Sabaduh.

kamengihhudut ni kakulugan tu hedin hipa-ak. Ey inamtak et emin hu e-helen tun meippanggep ni hi-gak ey makulug. <sup>33</sup> Nenu-dak kayu lan nunman di kad-an John e kamemenyag ni manmahmah meippanggep ni hi-gak et ehelen tu makulug, tep hi-gatu dama hakey ni kamengihhudut ni meippanggep ni hi-gak. <sup>34</sup> Eleg mahapul ni wada tuun mengihhudut ni meippanggep ni hi-gak, nem mukun inhel ku humman ey ma-lat penemnem ku niya ma-lat wadan mengullug kayu et mahelakniban kayu.

<sup>35</sup> Hi John la ey kamei-ellig etan di makaddilag ni dilag, tep impeamta tun hi-gayu hu meippanggep ni hi-gak ey kayu kaman-am-amleng, nem nekemtang ni ebuh. <sup>36</sup> Makulug ni emin hu in-inhel John ni meippanggep ni hi-gak. Nem ya nehahhammad ni pengi-angan yu e hi-gak hu makulug ni intu-dak Ama ey ya kabaelan kun mengippahding idan miracles ni kaketngain tuu et yadda nakka ituttuddu, tep huyyadda hu indinel Aman hi-gak ni ngunuk. <sup>37-38</sup> Et hi Ama e nengitu-dak ni hi-gak ey tuka ihhudut hu makulug ni meippanggep ni hi-gak. Nem eleg yu han-awat hu tuka peamta niya tuka peang-ang ey eleg yu u-unnuda ehel tu tep eleg yuwak kulluga. <sup>39-40</sup> Yuka eddaeddala hu impatudek Apu Dios ni ehel tu, tep kanyu ngu nem ya pengeddalan yu hu mengidwat ni biyag ni endi pappeg tu. Nem e-helen kun hi-gayu e emin ida humman ni impatudek Apu Dios ey daka ihhudut hu meippanggep ni hi-gak, nem eleg yuwak kulluga. E-helen kun hi-gayu e gullat ni kullugen yuwak, et makulug ni wadan hi-gayu humman ni biyag ni endi pappeg tu.

<sup>41</sup> Hi-gak ey eggak gangami penettebalan da-ak ni tuu, <sup>42</sup> nem inamtak et endi impeminhed yun Apu Dios tep <sup>43</sup> intu-dak tuwak ni an mengippeamtan meippanggep ni hi-gatu ey eleg yuwak kulluga. Nem inamtak et gullat ni ya edum um-alin mantuttuddun hi-gayu et kullugen yu anin ni eleg itu-dak Apu Dios. <sup>44</sup> Ya penettebalan dakeyun edum yun tuu hu yuka gagamgami, nem eleg yu gangami penettebalan Apu Dios ni hi-gayu, et mukun eleg kayu mengullug ni hi-gak. <sup>45</sup> Entanni ey penghel yu nem hi-gak hu menghel nan Ama e mekastigu kayu, nem ya kakulugan tu ey eleg mahapul ni e-helen ku tep nanna-ud ni mekastigu kayu tep eleg yu u-unnuden hu tugun Moses ey humman hu nengidinelan yun pengebbulutan dakeyun Apu Dios. <sup>46</sup> Gullat ni yuka paka-u-unnuda hu tugun Moses ey kullugen yuwak et, tep humman idan intugun tu ey meippanggep ni hi-gak. <sup>47</sup> Nem ay, eleg yu kulugen ida humman ni intugun Moses, et humman hu, nema-man eleg yu kullugadda nakka ituttuddun hi-gayu."

## 6

*Impambalin Jesus ni dakel etan liman sinapay et pangan tudda liman libun tuu  
(Matthew 14:13-21; Mark 6:30-44; Luke 9:10-17)*

<sup>1</sup> Entanni ey neagwat hi Jesus di demang ni Baybay e Galilee e Tiberias hu hakey ni ngadan tu. <sup>2</sup> Ida kameiunnuunnud hu dakel ni tuu tep ya inang-ang daddan miracles ni impahding Jesus ni nangkalan tun degeh idan tuu. <sup>3</sup> Nanteyed hi Jesus niyadda disipol tu etan di duntug et tuttudduan tudda. <sup>4</sup> Yan nunman ey ngannganih hu kedettengan ni Piyestah ni Passover.

<sup>5</sup> Ida kamanyuyyuddung ey inang-ang Jesus ida dakel ni tuun kamenyed di kad-an da, et kan tun Philip ey "Attu na-mu tayu pengellaan ni pekkan tayudda eyan dakel ni tuu?" <sup>6</sup> Inamtan Jesus pehding tu, nem imbagetun Philip ma-lat amtaen tu hedin hipa dedan hu ihhumang tu.

<sup>7</sup> Hinumang Philip et kantuy "Anin na-mun iggatang ni emin hu sildun tuun walun bulan et hanna-kuten ni iddawat ida eyan tuu et kulang damengun peteg."

<sup>8</sup> Kan etan ni hakey ni disipol Jesus e hi Andrew e agin Simon Peter ey <sup>9</sup> "Iyyadya balun eyan u-unggan liman ekka-kek ni sinapay et ya dewwan deleg, nem kaw me-peng ida eya hantapug ni tutu-u?"

<sup>10</sup> Kan Jesus ey "Anin, payudung yudda." Et payudung idan disipol tu etan ida tutu-ud mahlek. Ya bilang idan lakin neamung ey limmaw di liman libu, eleg makibilang ida bibi-i. <sup>11</sup> Illan Jesus humman ni sinapay et ya deleg et mansalamat nan Apu Dios et pan-iwatwat daddan tuu et mangan idan emin et makaphel ida. <sup>12</sup> Kan Jesus idan disipol tuy "Amung yudda natdaan ma-lat endi umkawah." <sup>13</sup> Inemung da ey napnu hampulut dewwan basket ni natdaan etan di liman sinapay.

<sup>14</sup> Inang-ang idan tuu huyyan miracle ni impahding tu ey kanday "Makulug ni hi-gatu etan prophet ni tayu kahehhegedan um-ali." <sup>15</sup> Inamtan Jesus e ippilit idan tuun hi-gatu pan-ap-apu da et hi-yanen tudda et manyed lad duntug et an manhahhakkey diman.

*Ya nandalnan Jesus di ta-pew ni danum di baybay  
(Matthew 14:22-33; Mark 6:45-52)*

<sup>16-17</sup> Kamangkehilling et mandayudda disipol Jesus et da hegeden di gilig ni baybay. Nem na-nget ey endi pay hi Jesus ni kaumdateng et mambangkadda et manglaw idad Capernaum. <sup>18</sup> Nemahhig hu dalluyun di baybay ni nunman tep na-let hu dibdib. <sup>19-20</sup> Nangginawwadda etan disipol di baybay ey inang-ang da hi Jesus e iyyallin kamandalladallan di ta-pew ni danum. Simmakut idan peteg, nem immehel ey kantuy "Hi-gak huyya, entan takut yu." <sup>21</sup> Et umamleng idan peteg et pahgep da hi Jesus di banga. Pinhakkeyey dimmateng idad Capernaum.

*Ya an nenamhamkan idan tuun nan hi Jesus*

<sup>22</sup> Yan newa-waan tu ey naneng tudda etan tuud gilig ni baybay. Kanda na-mu ngu nem naneng tudman hi Jesus tep inang-ang dan eleg makilugan idan disipol tun linawwan dad Capernaum, niya inang-ang da e ebuh humman ni banga. <sup>23</sup> Entanni ey wadadda bangan nalpullid Tiberias ni immali etan di kad-an ni nengipengannan Jesus idan dakek ni tuun negibbuan ni nampesalamatan tu. <sup>24</sup> Nem yan nengamtaan idan nunman ni tutu-un endid man hi Jesus et yadda disipol tu ey mampambangkadda et mangeliddad Capernaum ni an menang-ang ni hi-gatu.

*Hi Jesus hu kennen ni um-idwat ni biyag ni endi pappeg tu*

<sup>25</sup> Dimmateng idad Capernaum ey inang-ang da hi Jesus et kandan hi-gatuy "Apu, kele pigan tu dintengam di deya?" <sup>26</sup> Kan Jesus ey "E-helen kun hi-gayu e makulug ni yuwak kaanhemmahemmaka tep ya nemepphelan kun hi-gayun kaalman, beken ni ya inang-ang yun miracle ni impahding ku. <sup>27</sup> Beken et kuman ya kennen yu hu gagamaman yu, tep ya kennen ey kame-puh. Ya gamaman yu et kuma ey ya etan kennen ni kaum-idwat ni biyag ni endi pappeg tu. Endi edum ni mengidwat nunman ni kennen nem hi-gak e Pengulwan ni emin ni tuu, tep hi-gak ni ebuh hu nengidinelan nan Ama Apu Dios."

<sup>28</sup> Kan idan tuun hi-gatuy "Hipa pehding mi ma-lat ya pinhed Apu Dios hu ippading mi?" <sup>29</sup> Hinumang Jesus et kantuy "Ya pinhed Apu Dios ey kullugen yuwak tep hi-gak hu binega tu."

<sup>30</sup> Kan ida mewan ni tuu ey "Hipa miracle ni peang-ang mun hi-gami et pangulugan mi e hi-gam hu binegan Apu Dios? <sup>31</sup> Kaw dammutun han-ipahding mu hu henin impahding lan Moses e impappakkanan tudda aammed tayun nunman ni manna ni nalpud kabunyan eman ni wadaddad desert? Makulug huyya tep impatudek Apu Dios e kantuy 'Indawtan idan Moses ni sinapay ni nalpud kabunyan.'"

<sup>32</sup> Kan Jesus ni hi-gaday "Dengel yu eya e-helen ku, kan yu na-mu ngu nem humman ni kennen ni indawat Moses hu makulug ni kennen, nem beken, tep ya makulug ni kennen ey ya etan nalpud kabunyan ni indawat Aman hi-gayu. <sup>33</sup> Humman ni kangkun kennen ni indawat Apu Dios ni nalpud kabunyan ey humman hu kaum-idwat ni biyag ni endi pappeg tu."

<sup>34</sup> Kandan hi-gatuy "Apu, idwasi dakemin nunman ni kennen ni kewa-wa-wa." <sup>35</sup> Himmapi hi Jesus et kantuy "Hi-gak hu neieligan nunman ni kennen ni um-idwat ni biyag ni endi pappeg tu. Ya tuun mengullug niya medinnel ni hi-gak ey eleg meuppa niya eleg me-wew."

<sup>36</sup> Inhel ku dedan lan hi-gayun nunman e anin enngang-angen yu nakka pehpehding et eleg kayu mengullug ni hi-gak. <sup>37</sup> Nem yadda etan indinel Apu Dios ni mengullug ni hi-gak ey kullugen da-ak niya manggagaya-ak ni mengebbulut ni hi-gada. <sup>38</sup> Tep intudak tuwak nan Apu Dios eyad puyek ma-lat ipahding ku pinhed tu, beken ni ya pinhed ku. <sup>39</sup> Et ya pinhed tun pehding ku ey ippaptek kuddan emin hu tuun indinel tun hi-gak et taguen kuddallin emin ni udidih ni aggew et endi hakey ni meiddawwin hi-gatun umlaw di nandaul. <sup>40</sup> Makulug huyya tep pinhed Ama ni emin ida tuun mengullug niya mengebbulut e hi-gak hu U-ungnga tu ey wada biyag dan endi pappeg tu ey tegguen kuddallin hakey aggew."

<sup>41</sup> Ida kamangngungudu hu Jews tep ya nanghelan Jesus ni kantuy hi-gatu etan kennen ni nalpud kabunyan. <sup>42</sup> Et kanday "Kele kantu ni-nganguy nalpud kabunyan? Kaw beken ni hi-gatu hu u-ungngan Joseph? Tam inamta tayu hi ametu et hi inetu."

<sup>43-44</sup> Himmapi hi Jesus et kantuy "Isiked yun umngudungudu tep pakkadek ni baddangan Apu Dios hu tuu ni han nengulug ni hi-gak. Humman idan mengullug ey tegguen kuddallin hakey ni aggew. <sup>45</sup> Intudek ida lan prophets e kanday 'Emin idalli tuu ey tuttudduan idan Apu Dios.' Et yadda etan mengngel et u-unnuden da ittutuddu tu ey ebbuluten da-ak. <sup>46</sup> Endi edum ni nenang-ang nan Ama Apu Dios, hi-gak ni ebuh tep nalpu-ak ni hi-gatu.

<sup>47</sup> Dengel yu eya e-helen kun hi-gayu: Ya tuun mengullug ni hi-gak ey meweddin hi-gatu hu biyag ni endi pappeg tu. <sup>48</sup> Hi-gak hu neieligan etan ni kennen ni um-idwat ni biyag ni endi pappeg tu. <sup>49</sup> Makulug ni kinakinan ida lan aammed yu hu manna

eman ni wadaddad desert, nem ay netey ida damengu. <sup>50</sup> Nem ya etan kenne ni nakka pan-e-helan hi-gayu ey makulug ni nalpud kabunyan, ey eleg mettey hu tuun mengngan nunman. <sup>51</sup> Hi-gak etan kenne ni nalpud kabunyan, et ya etan tuun mengngan nunyan kenne ey wada biyag tun endi pappeg tu. Huyyan kangkun kenne ey ya annel kun i-appit ku ma-lat kehelakniban ni tutu-u.”

<sup>52</sup> Ida kamanhuhubeg hu tutu-u tep ya human ni inhel Jesus. Kanday “Inna-nu kuman nunyan tuun mengippekan ni annel tun hi-gatsu?” <sup>53</sup> Kan Jesus ni hi-gaday “Makulug e hedini eleg yu kenna annel ku niya eleg yu innuma hu kuheyaw ku e Pengulwan ni emini ni tuu, ey endi biyag yun endi pappeg tu. <sup>54</sup> Ya tuun mengngan ni annel ku niya menginum ni kuheyaw ku ey mewedda biyag tun endi pappeg tu ey hi-gatulli tegguen kun hakey alin aggew. <sup>55</sup> Tep ya annel ku hu makulug ni kenne ey ya kuheyaw ku hu makulug ni meinnum. <sup>56</sup> Ya tuun mengngan ni annel ku niya menginum ni kuheyaw ku ey wada-ak ni hi-gatun kenayun ey wadan hi-gak daman kenayun. <sup>57</sup> Hi Ama e wadan ingganah hu nengitu-dak ni hi-gak et hi-gatu hu kakelpuin biyag, et humman ni biyag ni wadan hi-gatu ey wada daman hi-gak. Et ya etan tuun mengngan ni annel ku ey wada daman hi-gatu humman ni biyag. <sup>58</sup> Hi-gak hu makulug ni kenne ni nalpud kabunyan. Ya etan manna ey kinakinan ida lan aammed yu, nem netey ida. Nem yadda ngu mengngan ni annel ku ey wada biyag dan endi pappeg tu et mambi-biyag idallin ingganah.” <sup>59</sup> Huyya intuttuddun Jesus di simbaan idan Jews di Capernaum.

*Yadda kaituttuddun Jesus hu um-idwat ni biyag ni endi pappeg tu*

<sup>60</sup> Dingngel ida etan ni dakel ni tuun kamekikillaw nan Jesus huyyan intuttuddu tu ey kanday “Neliga ni meewwatan huyyan tuka ituttuddu, hipa makkaw ngu mengullug nunman?” <sup>61</sup> Inamtan Jesus huyyan daka e-ehhela et kantuy “Kaw yuka bellawa hu intuttudduk? <sup>62</sup> Hipa pannemnem yu hedini ang-angen yuwak e Pengulwan ni emini ni tuun immela-ak di kabunyan e kad-an ku dedan? Kaw nanengtun eleg yuwak kulluga? <sup>63</sup> Ya Ispirituh Apu Dios hu mengidwat ni biyag ni endi pappeg tu, beken ni ya kabaelan ni tuu. Humman idan intuttudduk ni hi-gayu ey nalpun Ispirituh Apu Dios. Et humman hu, ya tuun mengebbulut idan nunman ey dewwatan tu humman ni biyag.

<sup>64</sup> Nem wadaddan hi-gayu hu eleg mengullug ni hi-gak.” Inhel Jesus huyya tep sigud ni amta tudda etan eleg mengullug ni hi-gatu niya amta tu etan mengihdul ni hi-gatu. <sup>65</sup> Kan Jesus mewan ey “Huyya gaputun nanglehan ku lan kangkuy eleg mabalin ni da-ak kullugen ni tuu hedini eleg baddangin Apu Dios.”

<sup>66</sup> Neipalpun nunman ey dakel law idan etan ni neikuyyukuyyug nan Jesus hu neniyan ni hi-gatu. <sup>67</sup> Kan Jesus idan Hampulut dewwan disipol tu ey “Kaw anin hi-gayu et hi-yanen yuwak dama?”

<sup>68</sup> Himmapi hi Peter ey kantuy “Apu, endi edum ni u-unnuden mi. Hi-gam ni ebuh hu kamengituttuddun kaum-idwat ni biyag ni endi pappeg tu. <sup>69</sup> Inamta mi niya kinulug mi e hi-gam etan intu-dak Apu Dios ni mengippaptek ni tuu.”

<sup>70</sup> Ey kan Jesus ni hi-gada ey “Hi-gak hu nemilin hi-gayun Hampulut dewwa, nem wada hakey ni hi-gayun henin nemnem Satanas hu nemnem tu.” <sup>71</sup> Humman ni kan Jesus ni heni nemnem Satanas nemnem tu ey hi Judas e u-unggan Simon Iskariot. Hi-gatu hakey ni Hampulut dewwan disipol nan Jesus, nem hi-gatu nengihdul ni hi-gatu.

## 7

*Hi Jesus et yadda agitu*

<sup>1</sup> Entanni ey limmaw hi Jesus di kebebbley di Galilee. Eleg law lumaw di Judea, tep emini ida ap-apun Jews diman ey pinhed dan petteyen. <sup>2</sup> Yan nunman ey ngannganih ni medetengan hu Piyestah ni Kampu. \* <sup>3</sup> Et kan idan agin Jesus ni hi-gatuy “Hi-yan mu huyyan bebley et lumaw kad Judea ma-lat mu peang-angan idan miracles etan ida nengulug ni hi-gam diman. <sup>4</sup> Tep ya tuun pinhed tun man-amta ey eleg tu ittalu hu tuka ippahding. Peang-ang mun katuuuu hedini makulug ni miracles hu muka pehpehding.” <sup>5</sup> Huyya inhel idan agin Jesus, tep anin hi-gada et eleg da kulluga hi Jesus.

<sup>6</sup> Hinumang Jesus ida agitu ey kantuy “Eleg ni medatngan hu pengippeang-angan kun kabaelan ku. Beken ni henin hi-gayun tuu e linggeman ni aggew ey dammutun peang-ang yu hu hipan kabaelan yu. <sup>7</sup> Tep hedini hi-gayu, man beken dakeyun anggebe-hel idan eleg mengullug, nem hedini hi-gak, man anggebe-hel da-ak tep nakka peamta hu lawah ni daka pehpehding. <sup>8</sup> Anin ipappangngulu yun umlaw di piyestah, eggak umlaw

\* 7:2 7:2 Yan nunman ni Piyestah ey ida kamengapya hu Jews ni a-abbung et manha-ad idadman ni hanlingguan.

tep eleg ni medatngan hu pengippeang-angan kun kabaelan ku." <sup>9</sup> Huyya inhel Jesus et manha-ad di Galilee.

*Ya linawwan Jesus di Piyestah ni Kampu*

<sup>10</sup> Nem limmaw ida la etan agitu, ey eleg tu peam-amta et maiunud. <sup>11</sup> Kahellipatiddan ap-apun Jews hi Jesus di piyestah. Wada hakkey ni hi-gaday kanday "Kele endi hi Jesus?" <sup>12</sup> Emin ida tuu ey ya meippanggep nan Jesus hu daka ung-ungbala. Kan idan edum ey "Kayyaggud hi Jesus." Nem yadda edum ey kanday "Tuka he-uhe-ula tutu-u." <sup>13</sup> Huyyadda kae-e-heladdan tutu-u, nem eleg da pededdenggel di katuutuu, tep ida kaumtakut idan ap-apuddan Jews.

<sup>14</sup> Gimminawwa humman ni piyestah ey limmaw hi Jesus di Tempol et an mantuttuddu. <sup>15</sup> Ida kametnga hu ap-apuddan Jews ni nangngel ni tuka ituttuddu et kanday "Kele nelaing huyyan tuu ey endi adal tu?"

<sup>16</sup> Inamtan Jesus humman ni daka e-e-hela et kantun hi-gaday "Huyyan nakka ituttuddu ey beken ni nalpud nemnem ku, nem nalpun Apu Dios e nengitu-dak ni hi-gak. <sup>17</sup> Ya tuun neminshed ni mengippahding ni pinhed Apu Dios ey amtaen tu hedin nalpun Apu Dios winu nalpun hi-gak eya nakka ituttuddu. <sup>18</sup> Ey ya tuun ebuh annel tun tuka e-hela ey ya penettebala ni tuun ebuh ni hi-gatu hu tuka nenemema. Nem hedin ngun hi-gak ey ya keiddeyyawan Apu Dios e nengitu-dak ni hi-gak hu wadad nemnem ku, ey makulug emin hu nakka e-hela ey eleggak umhaul.

<sup>19</sup> Indawat Moses ni hi-gayu hu Tugun Apu Dios, nem endi hakey ni hi-gayun kamengunnud. Tep gullat ni kinulug yu humman ni tugun, ey kele yuwak pemetteyan?"

<sup>20</sup> Hinumang idan tuu ey kanday "Tam nehuklungan kan dimonyoh! Kaw hipa an memettye ni hi-gam?" <sup>21</sup> Kan Jesus ni hi-gaday "Ingkal ku degeh ni hakey ni tuu, ey bimmunget kayu tep kanyuy pi-yew hu pangngunuan ni Sabaduh. <sup>22</sup> Nem ya kakulugan tu ey kayu dama kamangngunun Sabaduh ni yuka pengu-unnudin Tugun Moses ni kantuy pekuggit ida u-unggan laki. (Huyyan kapenguggitin gelang ey elaw ida dedanggun aammed tayun nunman ni ketaggun Abraham.) <sup>23</sup> Tep hedin neipaddih ni Sabaduh hu aggew ni penguggitan yun u-ungnga yun laki ey yuka pehding ma-lat eleg yu kahingen hu Tugun Moses. Ey kele hedin hi-gak, man yuwak kaibbunget ni nak nangkalan ni degeh etan ni tuu tep Sabaduh? <sup>24</sup> Ya kayyaggud ey pakannemnem yu ni han kayu immehel. Et beken ni nealay kan yuy lawah hu impahding ni hakey ni tuu."

*Ya kan idan tutu-u meippanggep nan Jesus*

<sup>25</sup> Yadda edum ni iJerusalem ni nangngel ni inhel Jesus ey kanday "Tam hi-gatu etan kan idan ap-apuddan Jews ni da petteyen. <sup>26</sup> Tam ay kayan iyayadan tagan tun kamantuttuddu ey eleg da pesikked? Anin na-mun hi-gada et inamta da e hi-gatu etan Christo ni intu-dak Apu Dios. <sup>27</sup> Nem inna-nun hi-gatu hi Christo ey hedin hi Christo, man eleg meamta kelpuan tu? Ey hedin hi-gatu, tam inamta tayu hu nalpuan tu."

<sup>28</sup> Nanengtun kamantuttuddu hi Jesus ey inlet tu ehel tu et kantuy "Kanyuy inamta yuwak, tep inamta yu bebley ni nalpuan ku, nem ya kakulugan tu ey eleg yuwak amta. Gullat ni inamta yuwak, ey inamta yu-et kuma dama etan nengitu-dak ni hi-gak. Ya inlian ku ey beken ni hi-gak kannemnem, nem humman hu pinhed ni nengitu-dak ni hi-gak. Eleg yu amta humman ni nengitu-dak ni hi-gak, <sup>29</sup> nem hedin hi-gak, man inamtak tep nalpu-ak alid kad-an tu ey hi-gatulli nengitu-dak ni hi-gak."

<sup>30</sup> Inhel Jesus humman ey dedpapan da et, nem endi hakey ni nengipahding nunman ni hi-gatu, tep eleg ni medatngan hu aggew ni nagtud ni pempapan dan hi-gatu. <sup>31</sup> Dakel ida tuun nengulug nan Jesus et kanday "Hi-gatu na-mu etan pinutuk Apu Dios ni um-alin mengippaptek ni tuu, tep hipa makkaw edum ni an um-alin et-eteng kabaelan tun mengippahding ni miracles."

*Ya nenu-dakan dan sindalun an mempap nan Jesus*

<sup>32</sup> Entanni ey dingngel idan Pharisee hu kae-e-heladdan tuun meippanggep nan Jesus et manhuhummangan idaddan ap-apuddan padi et umitu-dak idan guwalyad Tempol ni an mempap ni hi-gatu.

<sup>33</sup> Nem kan Jesus ey "Nekemtang law ni ebuh hu pekihha-adan kun hi-gayu et mambanggaddak di kad-an etan ni nengitu-dak ni hi-gak. <sup>34</sup> Yuwak ali hemmahemmaken, nem eleg yuwak hanhamak. Ey eleg mabalin ni yuwak unnuden di lawwan ku."

<sup>35</sup> Ida kametemma hu Jews ni pinhed Jesus ni e-helen et wada hakkey ey kanday "Attu na-mu numan hu lawwan tu et eleg tayu hanhamak? Umlaw na-mud kad-an idan edum tayun Jews di bebley idan Gentiles. Umlaw na-mun an mantuttuddudan anggebe-hel tayun Gentiles. <sup>36</sup> Kele ni-nganguy kantuy tayulli hemmahemmaken, nem eleg tayu

hanhamak, niya kele kantuy eleg mabalin ni tayu unnuden di lawwan tu? Hipa na-mu pinhed tun e-helen?"

*Ya hebwak ni eleg metduk*

<sup>37</sup> Yan nunman ni pappeg ni piyestah e humman hu importanteh ni aggew ni nunman ni piyestah ey immehneng hi Jesus di hinanggaddan katuutuu et eleten tun immehel et kantuy "Hedin wada na-wew ni hi-gayu, ey alid kad-an ku et uminum. <sup>38</sup> Tep kan ni impatudek Apu Dios ni ehel tuy 'Ya tuun mengiddinnel ni hi-gak ey meweddan hi-gatu hu danum ni kakelpuin biyag e kamei-ellig di hebwak ni eleg metduk.'" <sup>39</sup> Humman ni kan Jesus ni danum ni kakelpuin biyag ey humman hu Ispirituh Apu Dios ni mewedda etan ni tuun mengullug ni hi-gatu. Yan nunman ni nanghelan Jesus nunya ey endi ni hu Ispirituh Apu Dios di tuu, tep eleg ni mambangngad hi Jesus di kabunyan e keiddeyawan tu.

*Ya negadwaan idan tuu*

<sup>40</sup> Dingngel idan tuu huyyan inhel tu ey kan idan edum ey "Huyya hu makulug ni prophet Apu Dios ni impakulug tun peelli tun hi-gatsu." <sup>41</sup> Yadda edum ey kanday "Hi-gatu hu pinutuk Apu Dios ni mengippaptek ni tuu." Nem wadadda edum ni kanday "Beken, tep nalpud Galilee hi Jesus et inamta tayu e beken ni yad Galilee hu kelpuan etan ni pinutuk Apu Dios ni mengippaptek ni tuu. <sup>42</sup> Tep ya neitudek ni ehel Apu Dios ey kantuy helag David hi Christo niya mei-ungngad Bethlehem e bebley David." † <sup>43</sup> Eleg man-uunnud hu kapannemnem idan tuu meippanggep nan Jesus. <sup>44</sup> Wadadda edum ni pinhed dan dedpapi hi Jesus, nem endi kamengippatna.

<sup>45</sup> Nambangngad ida etan intu-dak ni ap-apuddan padi et yadda Pharisee ey kan dan hi-gaday "Kele mewan eleg yu i-lidya hi Jesus?" <sup>46</sup> Kanday "Eleg mi depapen tep dingngel mi tuka penuttuddu ey endi an meki-ingnggeh ni hi-gatu."

<sup>47</sup> Kan idan Pharisee ey "Kaw anin daman hi-gayu et nehaul kayun itek tu? <sup>48</sup> Endin hekey ni hi-gamin Pharisee et yadda ap-apu tayu hu nengulug ni hi-gatu. <sup>49</sup> Yadda etan nengulug ni hi-gatu ey humman ida ngu hu eleg mangewat ni tugun Moses, nem diman ida, yaggud kastiguen idallin Apu Dios."

<sup>50</sup> Immehel hi Nikodemus e Pharisee ni limmaw lad kad-an Jesus ni an nekiung-ungbal ni hi-gatu et kantuy <sup>51</sup> "Yad linteg tayun Jews ey eleg mabalin ni nealay kan tayuy mekastigu hu hakey ni tuu hedin eleg ni mebistigal, tep eleg ni meamta hedini hipa nambahulan tu." <sup>52</sup> Hinumang da humman ni inhel Nikodemus et kanday "Kele muka iddedlepi hi Jesus? Kaw anin hi-gam et kebebleyan dakan Jesus di Galilee? Bidbid mu kedi etan impatudek Apu Dios ni ehel tu, kaw wada tu inhel ni wada melpud Galilee ni prophet? Tam endi." <sup>53</sup> Negibbuh humman ni inung-ungbal da et mampangenamut ida.

## 8

*Ya etan biin in-ulig tu beken tu ahwa*

<sup>1</sup> Nem hedini hi Jesus ey nanteyed di Duntug e Olibah. <sup>2</sup> Newa-wa et humelaman ni limmaw di Tempol ey dakel ida neamung ni tuu et yumudung et mantuttuddu. <sup>3</sup> Entanni ey in-aliddan kamantuttuddun Tugun Moses et yadda Pharisee hu biin neha-kupan ni nekiulig di beken tu ahwa. Impeehneng dad gawwan neamung ni tutu-u <sup>4</sup> et kandan Jesus ey "Huyyan bii ey neha-kupan ni nekiulig di beken tu ahwa. <sup>5</sup> Kantud Tugun Moses ey pantengbaen et matey hu hanniman ni tuu, nem pinhed min amtaen hedini hipa dedan dama kammu."

<sup>6</sup> Mukun inhel da humman nan Jesus ey tep daka hellipati meihallan e-helen tu et wada pebehul dan hi-gatu. Nem nanyuung hi Jesus et tuka pan-ikku-lit hu kimeng tud puyek. <sup>7</sup> Nem tagan da puhdapuhan ni hi-gatu et umehneng et kantuy "Hedin wadan hi-gayu hu endin hekey liwat tu, hi-gatu kabukul ni menengba eyan bii." <sup>8</sup> Et manyuung mewan e tuka pan-ikku-lit kimeng tud puyek.

<sup>9</sup> Dingngel da humman ni inhel Jesus ey nanligud idan nehakkehakkey ni limmaw e nemanguludda etan nangkea-amman aap-apu da et lektattuy attukaw idan emin. Ebuhi hi Jesus et ya etan biin wada. <sup>10</sup> Immehneng hi Jesus et kantu etan ni bii ey "Attudda mewan la etan tuun kanday pantengbaen daka ey?" <sup>11</sup> Kan etan ni bii ey "Limmaw idan emin." Kan Jesus ey "Anin, anemut ka, nem isiked mu law ni manliwwat. Eleg daka kastiguan hi-gak."

*Ya nengingnehan Jesus ni annel tud dilag*

† 7:42 7:42 Huyya kanda tep kanda na-mu ngu nem yad Galilee neiungngaen Jesus.

<sup>12</sup> Entanni ey an nantuttuddu mewan hi Jesus di Tempol et kantuy “Hi-gak etan kame-ellig ni dilag ni kamemnang ni engeenget. Ya etan tuun mengiddinnel ni hi-gak et u-unnuden tuwak ey meweddand hi-gatu hu biyag ni endi pappeg tu.” <sup>13</sup> Kan idan Pharisee ni hi-gatuy “Itek mu. Hi-gam ngu ni ine-ehhel mu hu meippanggep ni annel mu.”

<sup>14</sup> Hinumang idan Jesus ey kantuy “Anin ni ene-ehhelen ku hu meippanggep ni annel ku, haggud makulug. Tep amtak hu nalpuan ku niya amtak hu lawwan ku, nem hedin hi-gayu, man eleg yu amta nalpuak niya lawwak. <sup>15-16</sup> Huttan hu kan yu, tep ya yuka panhuwet ni tuu hedin lawah winu kayyaggud ey neipuu di nemnem ni tuu. Nem beken ni henin nunman ni hi-gak. Tep hedin wada huwetan ku, man limpiyuh tep dewwa kamin Ama e nengitu-dak ni hi-gak ni kamanhuwet. <sup>17</sup> Anin ya Tugun Moses ni yuka u-unnuda et kantuy ‘Hedin dewwan tuun kamengihuddut, ey humman hu makulug.’ <sup>18</sup> Hi-gak hu hakey ni kamengihuddut ni meippanggep ni hi-gak et ya meikkadwa ey hi Ama e nengitu-dak ni hi-gak.”

<sup>19</sup> Kan idan Pharisee nan Jesus ey “Attu kad-an nan Amam?” Hinumang Jesus et kantuy “Eleg yuwak amta, et humman hu, eleg yu dama amta hi Ama. Gullat ni inamta yuwak et inamta yu dama hi Ama.”

<sup>20</sup> Huyyadda inhel Jesus eman ni nantuttudduan tud Tempol etan di daka pengimungin kaiddawat idan tuun pihhuh, nem endi an nampap ni hi-gatu, tep eleg ni medatngan hu aggew ni gintud Apu Dios ni pempapan dan hi-gatu.

<sup>21</sup> Entanni mewan ey kan Jesus ni hi-gaday “Umlawwak et yuwak ali hemmahem-maken, nem mettey kayulli ey eleg mepesinsahan hu liwat yu, et humman hu eleg mabalin ni kayu umlaw etan di lawwan ku.” <sup>22</sup> Ida kamanhuhummangan etan Jews e kaday “Mampettey na-mu, keke kantuy eleg mabalin ni tayu unnuden di lawwan tu?”

<sup>23</sup> Et kan Jesus ni hi-gaday “Hi-gayu ey tuu kayun ebuh, et humman hu, ebuh hu meippanggep ni wadad puyek ni wadad nemnem yu. Nem beken ni hanniman ni hi-gak, tep nalpu-ak di kabunyan. <sup>24</sup> Huyya gaputun nanghelan kun nunman ni hi-gayun kangkuy mettey kayulli ey eleg mepesinsahan hu liwat yu hedin eleg yu kulluga e hi-gak hu Christo ni intu-dak Apu Dios ni mengippaptek ni tuu.”

<sup>25</sup> Ey kan idan Jews ni hi-gatuy “Nem kaw hipa ka?” Kan Jesus ey “In-inhel ku dedangu lan hi-gayu hedin hipa-ak ingganah nunya, nem eleg yu kulluga. <sup>26</sup> Dakel et hu e-helen kun lawah ni elaw yun umhulun ni kekastiguan yu. Nem ya nakka e-helan ebuh ey ya inhel etan ni nengitu-dak ni hi-gak, tep inamtak e makulug ni emin hu tuka e-hela.” <sup>27</sup> Emin ida etan nangngel nunya, ey eleg da amta e hi Apu Dios hu kapan-e-helan Jesus.

<sup>28</sup> Kan Jesus ni hi-gaday “Yallin pengitta-geyan yuwak di keyew e Pengulwan ni emin ni tuu hu pengamtaan yun kakulugan tu hedin hipa-ak niya amtaen yulli dama e emin nakka pehpending niya nakka e-e-hela ey intuttuddun Ama. <sup>29</sup> Ya etan nengitu-dak ni hi-gak ey wadan hi-gak ni kenayan. Eleg tuwak e-waya, tep nakka ippahding ni emin hu pinhed tu.” <sup>30</sup> Inhel Jesus huyya ey dakel ida tuun nengulug ni hi-gatu.

#### *Yadda u-ungngan Abraham*

<sup>31</sup> Kan Jesus idan Jews ni nengulug ni hi-gatuy “Hedin pannananeng yun mengu-unnud ni nakka ituttuddu, man hi-gayu hu makulug ni kamengu-unnud ni hi-gak. <sup>32</sup> Amtaen yulli hu makulug et isiked yun mengippahding ni lawah e mei-ellig etan ni himbut ni neliblih di nehimbutan tu.” <sup>33</sup> Kan idan edum ni Jews ni hi-gatuy “Hi-gamin helag Abraham ey endi hakey ni hi-gamin an nanhimbut ingganah nunya. Hipa pinhed mun e-helen etan ni kammun meliblih kamid nehimbutan mi?”

<sup>34</sup> Hinumang Jesus et kantuy “Dengel yu eya e-helen kun hi-gayu. Makulug e ya tuun kamanliwwaliwwat ey heni himbut ni liwat tu, tep endi kabaalan tun mengippahding ni kayyaggud. <sup>35</sup> Ya himbut ey eleg meibbillang di pamilyah etan ni kan himbut ni hi-gatu, tep bega-en ni ebuh et anin hipan aggew et dammutun meippa-hep ali. Nem ya u-ungnga da ey ibbilang dan ingganah di pamilya da. <sup>36</sup> Hi-gak e U-ungngan Apu Dios ey wada kabaalan kun umbaddang ni hi-gayu ma-lat isiked yun mengippahding ni lawah ey mewedda kabaalan yun mengippahding ni kayyaggud. <sup>37</sup> Inamtak e helag dakeyun Abraham, nem beken ni henin elaw tu hu elaw yu. Tep hedin hi-gayu, man pinhed yun petteyen yuwak, tep eleg yu pinhed ni u-unnuden hu nakka ituttuddu. <sup>38</sup> Hi-gak ey ya inang-ang kun Ama hu nakka e-e-hela. Nem hi-gayu ey yuka u-unnuda hi ameyu, et humman hu lawah hu yuka pehpending.”

<sup>39</sup> Kanda mewan ey “Endi edum ni impan-ammed mi, ebuh hi Abraham.” Kan Jesus ey “Gullat ngun hi Abraham hu ameyu et iu-unnud yud kayyaggud ni impahpahding tu. <sup>40</sup> Nem beken ni hi-gatu ameyu tep pinhed yuwak ni petteyen ni nakka penghelin

hi-gayun diddingngel kun Apu Dios. Hi Abraham ey eleg tu ipahding hu henin nunman.  
<sup>41</sup> Emin kayu ey yuka pehpehding hu lawah, henin kapehpehding ameyu.”

Kandan hi-gatuy “Kaw kammuy inla-la-gah kami? Ambeken kamin inla-la-gah, tep hakey ni ebuh hu Amemi e hi Apu Dios.”

<sup>42</sup> Kan Jesus ey “Gullat ngun hi Apu Dios hu Ameyu, et pinheden yuwak, tep nalpuak ni hi-gatu. Immali-ak eyad puyek tep intu-dak tuwak ni hi-gatu, beken ni gapu tep pinhed ku. <sup>43</sup> Eleg yu han-awat hu nakka e-e-hela, tep eleg yu pinhed ni dedngelen.

<sup>44</sup> Heni kayu tu-wangu hi ameyu hi Satanas, tep pinpinhed yun pehding ida pinhed tu. Gapun hi-gatu ey kamettey hu tuu. Eleg tu pinhed hu kayyaggud tep endin hekey hu kayyaggud ni elaw tu. Ebuh haul niya itek ni wadan hi-gatu. Hi-gatu ap-unun emin ni maitek. <sup>45</sup> Et mukun eleg yuwak kulluga hedini nakka pan-e-helan hi-gayu hu makulug.

<sup>46</sup> Hipan hi-gayu hu menghel ni wada liwat ku? Endi. Nem tamey hedini nakka e-e-helan hi-gayu hu makulug ey eleg yu kulluga. <sup>47</sup> Ya makulug ni tuun Apu Dios ey tuka u-unnuda tugun tu. Hedini hi-gayu, man eleg yu u-unnuda hi Apu Dios, et humman keang-angan tun beken kayun tuu tu.”

#### *Ya elaw Jesus et hi Abraham*

<sup>48</sup> Kan idan Jews nan Jesus ey “Tam makulug etan inhel min iSamaria ka niya nehuklungan kan dimonyoh!” <sup>49</sup> Hinumang Jesus e kantuy “Endi neihuklung ni hi-gak. Ya nakka daydayawa ey hi Ama, nem yuwak kapippihula. <sup>50</sup> Hi-gak ey beken ni ya keiddeyyawan ni annel ku nakka gangami, tep ngenamung hi Apu Dios ni mengipedeyyaw ni hi-gak. Hi-gatu manhuwet ni hi-gayu.

<sup>51</sup> E-helen kun hi-gayu e makulug ni ya tuun kullugen tu eya nakka ituttuddu ey eleg mettey.” <sup>52</sup> Ey kan mewan idan etan ni Jews nan Jesus ey “Makulug ni nehuklungan ka tu-wangu. Hi Abraham et yadda la prophets ey nangketey ida, ey kele hedini hi-gam kuma ey kammuy eleg mettey hu mengullug ni hi-gam? <sup>53</sup> Kaw eta-ta-gey ka nem di Abraham et yadda la eman nangketey ni prophets? Hipa ni-ngangu muka pannemnem ni annel mu?”

<sup>54</sup> Hinumang Jesus e kantuy “Hedini hi-gak hu kamengidaydayaw ni annel ku, ey endi silbitu. Nem hi Apu Dios e kanyun Dios yu hu kamengipedeyyaw ni hi-gak. <sup>55</sup> Ya kakulugan tu ey eleg yu amta hi Apu Dios, nem hedini hi-gak, man naka-amtak ni peteg. Eleg mabalin ni kangkuy eggak amta, tep hedini humman kangku, maitekkak tep. Nem bekenan ni henin hi-gayu e maitek, tep makulug ni naka-amtak hi Apu Dios et hi-gatu nakka u-unnuda. <sup>56</sup> Hi Abraham e impan-ammed yu la ey pinhed tun ang-angen hu ellian ku et kaman-am-amleng eman ni nenang-angan tu.”

<sup>57</sup> Kan idan Jews ey “Kulang pay ni nelima hu toon mu, ey kele kanmuy inang-ang mu hi Abraham ey netey dedanggu la et han ka maweda?” <sup>58</sup> Nem kan Jesus ey “E-helen kun hi-gayu e makulug ni sigud ni wada-ak et han maweda hi Abraham.”

<sup>59</sup> Inhel Jesus huuya ey kaeladdan batu etan Jews ni penengba dan hi-gatu, nem nanligud ni limmaw et hi-yanen tuddad Tempol.

## 9

#### *Ya nangkalan Jesus ni kulap etan ni tuun sigud ni nekulap eman ni neiungngaan tu*

<sup>1</sup> Kamangkelebbah hi Jesus ey wada inang-ang tun lakin nekulap. Humman ni laki ey sigud ni nekulap ni neiungngaan tu. <sup>2</sup> Kan idan disipol tu ey “Apu, hipa gaputun an mei-ungnga ey nekulap, kaw gapuh ni liwat ni a-ammed tu winu ya liwat tu?”

<sup>3</sup> Kan Jesus ey “Beken gapuh ni liwat tu winu liwat ni a-ammed tu hu nekulapan tu, nem nekulap ma-lat peang-ang Apu Dios hu kabaelan tun pengkalan tun kulap tu. <sup>4</sup> Mahapul ni yan nunyan kawwalwal, ey emin itsu ey pan-ingngunu tayu kuma hu ngunun indinel ni negitu-dak ni hi-gak, tep hedini mehilling ey mesikked ni emin hu ngunu tep endi inna-nu tayun mangngunnu. <sup>5</sup> Ya eyan wada-ak di puyek ey kamei-ellig ni bebnangan ku nemnem ni tuu ma-lat amtaen da hu makulug.”

<sup>6</sup> Inhel tu huuya et lumupdad puyek et umlan etan ni linupdaan tu et ida-nih tud mata etan ni nekulap <sup>7</sup> et kantun hi-gatuy “Lakkay et mu da-lupan di Lebeng e Siloam.” (Ya keibbellinan ni Siloam ey “Neitu-dak.”) Limmaw etan tuu et an manda-lup et mambanggad ey han-ang-ang tu law.

<sup>8</sup> Yadda sinakdul tu et yadda edum ni nenang-ang lan hi-gatun kamangkekkeddew ey kanday “Kaw beken ni hi-gatu la etan kaumyuyudung ni kamangkekkeddew?”

<sup>9</sup> Kan idan edum ey “Tam em, hi-gatu.” Kan ni edum ey “Beken tu, nem ya ang-ang tu ey heni hi-gatu.” Nem kan nunman ni tuu ey “Hi-gak humman ni nekulap la.”

<sup>10</sup> Et kandan hi-gatuy “Inna-nu et ma-kal kulap mu?” <sup>11</sup> Kantuy “Ya etan tuun kandan hi Jesus ey limmupdad puyek et umla etan ni linupdaan tu et ida-nih tud mata et



kantuy nak da-lupan di Siloam. Limmawwak et manda-luppak ey kaum-ang-ang law hu matak.”<sup>12</sup> Kandan hi-gatuy “Attu humman ni tuu?” Kantuy “Eggak amta.”

<sup>13</sup> Entanni et ilaw da humman ni tuud kad-an idan Pharisee,<sup>14</sup> tep neipaddih ni Sabaduh e kamengillin ni aggew hu nangkalan Jesus ni kulap tu.<sup>15</sup> Et ibegaddan nunman ni Pharisee etan ni tuu hedin inna-nun na-kalan ni kulap tu. Et kantun hi-gaday “Limmupda hi Jesus di puyek et umla etan ni linupdaan tu et ida-nih tud matak et nak da-lupan ey nakka um-ang-ang.”

<sup>16</sup> Kan idan edum ni Pharisee ey “Beken hi Apu Dios hu nengitu-dak ni nunman ni tuu, tep eleg tu u-unnuda elaw ni Sabaduh e kamengillin ni aggew.”

Nem kan ni edum ey “Inna-nun nengipahdingan tun miracles hedin makulug ni neliwtan?” Necedwadda tep eleg man-uunnud hu daka pannemnem ni meippanggep nan Jesus.

<sup>17</sup> Kanda mewan etan ni na-kal kulap tuy “Hipa dedan kammun meippanggep etan ni tuun nangkalan ni kulap mu?” Kantuy “Hi-gatu hu prophet Apu Dios.”

<sup>18</sup> Eleg kullugaddan Jews e sigud ni nekulap humman ni tuun neiungnga tu et paeyag dadda a-ammed tu.<sup>19</sup> Kandan hi-gaday “Kaw u-ungnga yu huyyan laki? Kaw makulug ni nekulap ni neiungnga tu? Kele inna-nu et kaum-ang-ang law?”<sup>20</sup> Kan idan a-ammed tuy “Huyyan u-ungnga mi ey nekulap dedan ni neiungnga tu.”<sup>21</sup> Nem eleg mi amta hedin inna-nun na-kalan ni kulap tu niya eleg mi amta etan nangkalan ni kulap tu. Ibege yun hi-gatu, haggud nehiken et inamta tun umhumang.”

<sup>22</sup> Huyya inhel idan a-ammed tu, tep ida kaumtatakut idan aap-apuddan Jews, tep kanday e-kalen dad simbaan da hu tuun menghel ni hi Jesus hu Christo ni pinutuk Apu Dios ni mengippaptek ni tuu, et eleg law mabalin ni an mandeyyaw diman.<sup>23</sup> Et mukun kan idan a-ammed tuy “Ibege yu ngun hi-gatu, haggud nehiken.”

<sup>24</sup> Et ipidwa dan paeyag etan na-kal kulap tu et kandan hi-gatuy “Dayaw mu hi Apu Dios tep hi-gatu nangkalan ni kulap mu, beken ni hi Jesus, tep inamta mi e neliwtan.”

<sup>25</sup> Kantuy “Eggak amta hedin neliwtan winu eleg. Nem ya ngu inamtak ey nekulappak la ni, nem yan nunya ey kaum-ang-ang law hu matak.”

<sup>26</sup> Kandan hi-gatuy “Nem hipa impahding tun hi-gam? Inna-nun nangkalan tun kulap mu?”<sup>27</sup> Kantun hi-gaday “Tam inhel ku lan hi-gayu, nem eleg yu hengngudan dengelen. Kele pinhed yun pidwaen ni dedngelen? Kaw pinhed yu daman mengu-unnud ni hi-gatu?”

<sup>28</sup> Nem nampadngelan da et kanday “Hi-gam ngun ebuh hu mengu-unnud ni hi-gatu, tep hedin hi-gami ey ya Tugun Moses hu mika u-unnuda.<sup>29</sup> Inamta mi e nekiungbal hi Apu Dios nan Moses, nem hedin ya etan tuun kammun nangkalan ni kulap mu ey eleg mi amta nalpuan tu.”

<sup>30</sup> Kan etan ni na-kal kulap tu ey “Nakka metemman hi-gayu! Kanyuy eleg yu amta hedin attu nalpuan tu ey hi-gatu nangkalan ni kulap ku.”<sup>31</sup> Inamta tayu e eleg dedngelan Apu Dios hu dasal idan neliwtan ni tutu-u, nem tuka dedngela dasal idan kamenaydayaw ni hi-gatu niya kamengippahding ni pinhed tu.<sup>32</sup> Neipalpu eman ni naltuan ni puyek ingganah nunya ey endi hakey ni tuun tayu dingngel ni han-ekal tu hu kulap ni tuun nekulap neipalpuan neiungnga tu.<sup>33</sup> Et humman hu, gullat ngun beken ni hi Apu Dios hu nengitu-dak ni hi-gatu et kele nealay han-ipahding tu huuya.”

<sup>34</sup> Ey bimmunget ida etan Pharisee et kandan hi-gatuy “Sigud dedan ni neiungnga mun neliliwatan ka. Kele dakemi ni-ngangu tuttudduan ni hi-gam!” Et pa-hep da etan di simbaan.

*Ya eleg mengullug ey kamei-ellig di nekulap*

<sup>35</sup> Dingngel Jesus hu nengipa-hepan idan Jews ni nunman ni tuu et yan nena-kupan Jesus ni hi-gatu ey kantun hi-gatuy “Kaw muka kulluga etan Pengulwan ni emin ni tuu?”

<sup>36</sup> Kantuy “Apu, hipa humman ni tuu? Ehel mu, ma-lat kulugen ku.”

<sup>37</sup> Kan Jesus ni hi-gatuy “Inang-ang mu, tep hi-gatu ey kamekiung-ungbal ni hi-gam.”

<sup>38</sup> Ey kantuy “Apu, daka kakullugan hi-gak.” Et dayawen tu hi Jesus.

<sup>39</sup> Entanni ey kan Jesus ey “Immali-ak di puyek ni mengippeamtan Apu Dios malat meamtadda nekulap et yadda eleg makulap. Et yadda nekulap ni neminhed ni mengamtan hi-gatu ey hi-gada me-kal kulap da. Nem yadda kamenghel ni inamta da hi Apu Dios, nem ya kakulugan tu ey eleg da amta ey hi-gada hu makulug ni nekulap.”

<sup>40</sup> Yadda edum ni Pharisee ni wadad kad-an tu, ey kandan hi-gatuy “Kaw ya kammu ey nekulap kami dama?”<sup>41</sup> Kan Jesus ni hi-gaday “Gullat ni yuka ebbuluta e nekulap kayu ey me-kal et liwat yu. Nem gapu tep kanyuy eleg kayu makulap ey mannenneng hu liwat yu.”

## 10

*Ya kamampattul et ya kalneroh*

<sup>1-2</sup> Intulug Jesus et kantuy “Dengel yu eya e-helen kun hi-gayu. Ya etan tuun kamampaptek ni kalneroh ey tuka iddalan di habyen ni kubkub ni kalneroh. Nem ya matekew winu mapetey ey eleg tu iddalan di habyen, hin-appil hu tuka pengidlani. <sup>3</sup> Hedin ya kamampaptek hu umhegep ey kaibbeghul etan ni kamangguwalya hu habyen ni kubkub. Ey kapaka-immaturidnan kalneroh hu ehel tu, tep tudda kahakkehakkeyan ngeddana hu ngadan da ni hantudda impa-hep. <sup>4</sup> Et tudda kaippangulu et ida kamei-unnuunnud ni hi-gatu, tep ininghaan da ehel tu. <sup>5</sup> Nem hedin hin-appil ni tuu hu mengeyyag ni hi-gada, man umbesik ida tep eleg da peingha ehel tu.”

<sup>6</sup> Yadda nanggel nunyan intuttuddun Jesus ni meippanggep ni hi-gatu, ey eleg da awatan hu pinhed tun peewwat ni hi-gada.

*Hi Jesus hu kayyaggud ni kamampattul*

<sup>7</sup> Et kan mewan Jesus ey “E-helen kun hi-gayu hu makulug. Hi-gak hu neieligan ni habyen ni kadellanadda etan ni kalneroh ni umhegep di kubkub da. <sup>8</sup> Emin ida etan nemangulu nem hi-gak ni kanday hi-gada hu pinutuk Apu Dios ni mengippaptek ni tuu ey ida kamei-ellig ni matekew niya mapetey tep daka he-uhe-uladda tutu-u. Nem endi etan idan makulug ni kamengullug ni hi-gak hu nengulug ni hi-gada. <sup>9</sup> Makulug ni hi-gak hu kamei-ellig di eheb ni kubkub idan kalneroh. Et yadda etan mengidlan ni hi-gak ey mehellakniban ida, tep ippaptek kudda henin kapemaptek ni kamampattul ni kalneroh e tudda kape-hep ni tudda impattul ni han tudda impahgep. <sup>10</sup> Ya kapehding ni matekew ey ya menekew, umpatey niya umbabhah. Nem hedin hi-gak, ey immali-ak ni an mengidwat ni kayyaggud ni biyag ni endi kulang tu.

<sup>11</sup> Nakka mei-ellig etan ni kayyaggud ni kamampattul ni kalneroh e tuka ikkatey hu pemaptek tun hi-gada. <sup>12-13</sup> Ya kamatangdanin mampattul ey eleg maiingneh etan di kan kalneroh hu tuka pengikkeghul idan etan ni kalneroh. Tep gullat ni wada um-alin ahhud muyung ni menggan idan kalneroh et umbesik tep beken ni kalneroh tudda etan tuka ippaptek, tep netangdanan ni ebuh et kulang kaguh tudan nunman ni kalneroh. Et pangkennen law etan ni ahhu edum ey pampepdugen tu edum et mangkahilit ida.

<sup>14</sup> Hi-gak hu neieligan etan ni kayyaggud ni kamampattul ni kalneroh. Neka-amtak ida tuuk e kamei-ellig di kalneroh ku ey neka-amta da-ak dama. <sup>15</sup> Henin hi-gamin Ama e neka-amta tuwak ey neka-amtak dama. Heni-ak etan ni tuun ikkatey tu pemaptek tun kalneroh tu, tep hi-gak ey ikkatey ku pemaptek kuddan tuuk. <sup>16</sup> Wadadda edum ni tuun eleg ni mangulug ni hi-gak ni nunya, nem hakey alin aggew kaya et mengullug ida, tep pengullug kuddalli et emin idalli kamengullug ni hi-gak ey man-eeddum ida et hi-gak alin ebuh hu mengippaptek ni hi-gadan emin et henidda hakey ni halun e hakey hu kamengippaptek ni hi-gada.

<sup>17</sup> Nakappinhed da-ak nan Ama tep ikkatey ku hu panyaggudan ni tuu e humman pinhed tu. Metteyyak ali, nem metegguannak ali mewan. <sup>18</sup> Hi Ama nengidwat ni kabaelan kun mengiwwellak niya memangngad ni biyag ku, et humman hu endi dammutun tuwak petteyen ni tuu hedin eggak pinhed, nem metteyyak hedin pinhed ku.”

<sup>19</sup> Dingngel idan Jews huyyan inhel Jesus ey negedwadadda. <sup>20</sup> Kan idan edum ni hi-gaday “Hipa an peneddengngelan ni tuka e-e-hela ey kaman-angngaw tep nehuklungan ni dimonyoh.” <sup>21</sup> Ey kan ni edum ey “Beken ni henin nuntan hu kapenahhappit ni nehuklungan ni dimonyoh. Hakey pay, ey kaw wada kabaelan ni dimonyoh ni mengkal ni kulap?”

*Ya eleg peminhedan idan Jews nan Jesus*

<sup>22</sup> Entanni ey nedateng etan piyestah di Jerusalem ni penginemnemneman idan Jews ni neiyayyaggudan ni Tempol da. Ahikettekettelan ni nunman. <sup>23</sup> Hi Jesus ey kamandalladallan etan di Balkon Solomon etan di Tempol. <sup>24</sup> Neaming idan Jews di kad-an tu et kandan hi-gatuy “Panna-ud mun e-helen ni hi-gami hedin makulug ni hi-gam hu Christo ni pinutuk Apu Dios ni mengippaptek ni tuu winu beken et eleg kami mandinwa.”

<sup>25</sup> Kan Jesus ey “Inhel kun hi-gayu, nem eleg yu kulluga. Yadda nakka ippahding ni miracles, gapuh ni kabaelan kun indawat Ama, hu keang-angan tu e intu-dak tuwak ni hi-gatu, <sup>26-27</sup> nem eleg yuwak kulluga, tep eleg kayu dedan maibilang ni tuuk. Yadda tuuk ey daka kulluga ehel ku et da-ak kau-unnuda henin kakedinnelin kalneroh etan ni kamampattul ni hi-gada. <sup>28</sup> Humman ida tuun iddawtan kun biyag ni endi pappeg tu, ma-lat eleg ida meiddawin Apu Dios. Ey endi, anin hakey ni dammutun an memilliw

ni hi-gadan tuuk ma-lat iwelak kudda. <sup>29</sup> Tep hi Ama e keta-ta-geyyan ni nemiliddan nunman ni kamengullug ni hi-gak, ey et-eteng kabaelan tu, et humman hu, endi hakey ni wada kabaelan tun memilliw ni hi-gada. <sup>30</sup> Hi-gamin Ama ey hakey kami.”

<sup>31</sup> Ey kaeladda mewan ida etan Jews ni batun penengba dan hi-gatu. <sup>32</sup> Kan Jesus ni hi-gada ey “Dakel impahding kun kayyaggud ni inhel Aman pehding ku. Hipaddan nunya gaputun penengbaan yun hi-gak?” <sup>33</sup> Kanday “Beken ida etan kayyaggud ni impahding mu hu gaputun penengbaan min hi-gam, nem gapuh tep muka i-ingneh hu annel mun Apu Dios. Kammuy hi-gam et hi Apu Dios ey hakey kayu. Hi-gam ey tuu kan ebuh.”

<sup>34</sup> Nem kan Jesus ni hi-gaday “Tam wada intudek lan Moses ni inhel Apu Dios ni kantuy ‘Hi-gayun tutu-u ey dios kayu dama.’ <sup>35</sup> Inamta tayu e eleg mabalin ni tayu kehinghen hu ehel Apu Dios, tep makulug. Yadda eman pinutuk Apu Dios ni mantuttuddun meippanggep ni hi-gatu ey humman ida etan kantun henin hi-gatu. <sup>36</sup> Hedin hanniman, kele kanyuy nakka ibbabah hi Apu Dios ni nanghelan kun hi-gak hu U-ungnga tu? Makulug ni hi-gak hu pinutuk tu et itu-dak tuwak ni um-alidya puyek. <sup>37</sup> Anin ni entan tuwak kulug hedin eggak han-ipahding ida etan keang-angan ni kabaelan Apu Dios. <sup>38</sup> Nem hedin peang-ang kudda humman ni keang-angan ni kabaelan tu ey anin ni eleg yuwak kulluga et kulug yudda nakka pehpehding ma-lat amtaen yu ni niya awatan yu e hi-gamin Ama ey hakey kami.”

<sup>39</sup> Da et mewan depapen hi Jesus, nem intalwan tudda.

<sup>40</sup> Et manglaw di Wangwang e Jordan et manha-ad etan di kad-an ni nampemenyagan lan John idan tuu. <sup>41</sup> Dakel ida neiunud ni hi-gatu ey wada hakkey ni hi-gaday kanday “Endi an impahding John ni miracle, nem kele immamnun emin hu in-inhel tun meippanggep eyan tuu?” <sup>42</sup> Ey dakel ida tuudman ni nengulug ni hi-gatu.

## 11

### *Ya neteyyan Lasarus*

<sup>1</sup> Wada etan kamandedgeh di Bethany e hi Lasarus ngadan tu. Wada dewwan biin agi tu e di Maria nan Martha. <sup>2</sup> Hi Maria eman nanlana lan helin Jesus et pu-nadan tun bewek tu. <sup>3</sup> Nenu-dak ida humman ni biin agin Lasarus ni an mengeyyag nan Jesus. Kanday “Ehel yun Jesus e kanyuy ‘Kamandedgeh etan nakappinhed mun gayyum mu.’”

<sup>4</sup> Dingngel Jesus humman ni inhel da, nem kantuy “Eleg tu ikkatay humman ni degeh tu tep humman hu kei-ang-angan ni et-eteng ni kabaelan Apu Dios ma-lat keidaydayawan tu. Ey anin ni hi-gak e U-ungnga tu et meiddeyyawwak dama.”

<sup>5</sup> Et-eteng hu impeminhed Jesus ni hi-gadan han-aaggi e hi Maria, hi Martha ni hi Lasarus. <sup>6</sup> Nem anin ni dingngel tu e kamandedgeh hi Lasarus, et hingged tun dewwan aggew et han lumaw. <sup>7</sup> Nelabah humman ni dewwan aggew ey kantuddan disipol tu ey “Mambanggad itu mewan di Judea.”

<sup>8</sup> Nem kandan hi-gatuy “Kele itu mewan mambanggad diman ey ihik idan Jews ni memettye ni hi-gam?” <sup>9-10</sup> Kan Jesus ey “Ya han-aggew ey wada kawwalwal niya wada hileng. Ya tuun mandalladallan ni kawwalwal ey eleg man-e-gah tep han-ang-ang tu. Nem ya tuun mandaladallan ni hileng ey man-e-gah tep engeenget et eleg tu han-ang-ang.” <sup>11</sup> Kan tu pay ey “Hi Lasarus e gayyum tayu ey neugip, nem umlawwak et nak bangunen.”

<sup>12</sup> Et kandan hi-gatuy “Apu, kayyaggud hedin neugip ma-lat ma-kal degeh tu.” <sup>13</sup> Nem ya pinhed Jesus ni e-helen ey netey hi Lasarus, nem kanda na-mu ngu nem tu-wangun neugip ni ebuh. <sup>14</sup> Et panna-ud law Jesus ni inhel e kantuy “Netey hi Lasarus. <sup>15</sup> Nem kayyaggud et endi-ak diman ni neteyyan tu ma-lat ang-angen yu pehding ku, et maihammad hu yuka pengullug ni hi-gak. Ikeyuy et tayu ang-angen.” <sup>16</sup> Hi Tomas e kandan hi Dupi-il ey kantuddan edum tuy “Mekillaw itsun Jesus et anin mekikettye itsun hi-gatu.”

### *Hi Jesus hu meneggun netey*

<sup>17</sup> Yan dintengan di Jesus di Bethany, ey dingngel tu e epat ni aggew law hu nelabah ni neikulungan Lasarus. <sup>18</sup> Ya Bethany ey ngannganih ni tellun kilometroh ni ebuh hu kadinawwi tud Jerusalem. <sup>19</sup> Et humman hu, dakel ida Jews ni ijerusalem ni limmaw di kad-an di Martha nan Maria ni an mengippeang-ang ni hi-gada e ida dama kaumlemyung ni neteyyan ni agi da.

<sup>20</sup> Yan nangngelan Martha ni kamengelli hi Jesus, ey limmaw ni an menipngat ni hi-gatu. Nem nanha-ad hi Maria di baley da. <sup>21</sup> Nandammu ida et kan Martha nan Jesus ey “Gullat et anhan ni imma-alli ka, eleg et matey hi agik. <sup>22</sup> Nem anin, inamtak e anin hipa ibbagam nan Apu Dios et pehding tu.” <sup>23</sup> Kan Jesus ni hi-gatuy “Metegguan hi agim.”

<sup>24</sup> Kan Martha ni hi-gatuy “Inamtak et metegguan alin ketegguan ni emin ni tuun kepappegan ni aggew.” <sup>25</sup> Kan Jesus ni hi-gatuy “Hi-gak hu kameneggun netey niya hi-gak kakelpuin biyag. Ya etan tuun kamengullug ni hi-gak ey anin mettey et umtagullin hakey ni aggew. <sup>26</sup> Et humman hu, emin ida tuun kamengullug ni hi-gak ey eleg ida mettey, tep wada biyag dan endi pappeg tun melpun hi-gak. Kaw muka kulluga huuya e Martha?”

<sup>27</sup> Kan Martha ni hi-gatuy “Em Apu, nakka kulluga e hi-gam pinutuk Apu Dios ni mengippaptek ni tuu niya nakka kulluga e U-ungnga dakan Apu Dios. Hi-gam etan impakulug Apu Dios ni um-alid puyek.”

#### *Ya ninengihan Jesus*

<sup>28</sup> Inhel Martha huuya et lumaw ni an mengeyyag nan agitu e hi Maria. Intuttubbu tu e kantuy “Immali Ap-apu tayu et daka kapampeyyag.” <sup>29</sup> Dingngel Maria ey negagannun imminah et tu dammuen hi Jesus. <sup>30</sup> Eleg ida ni dumteng di Jesus etan di bebley tep nanengtuaddalli ni etan di an nenammuan Martha ni hi-gada. <sup>31</sup> Yadda etan Jews ni limmaw ni menga-alluk idan agin etan ni netey ey inang-ang da hi Maria e negagannun imminah et lumaw, ey inunud da tep kanda na-mu nem umlaw di kulung tep tu nengngihhan agi tun netey.

<sup>32</sup> Dimmateng hi Maria di kad-an Jesus ey nandukkun di heli tu et kantun hi-gatuy “Apu, gullat et anhan ni imma-alli ka, eleg et matey hi agik.”

<sup>33</sup> Yan nenang-angan Jesus e kamannengngih hi Maria et yadda Jews ni neiunud ni hi-gatu, ey immali nemahhig ni hemmek tun hi-gada <sup>34</sup> et kantuy “Attu nengikulungan yun hi-gatu?” Kanday “Apu, itsuy et tayu ang-angen.”

<sup>35</sup> Nimmangih hi Jesus <sup>36</sup> ey kan idan Jews ey “Nemahhig impeminhed tu etan ni netey.” <sup>37</sup> Nem kan ni edum ey “Tam hi-gatu nangkal ni kulap etan ni hakey ni tuu. Gullat et ingkal tu dama degeh Lasarus et eleg matey.”

#### *Ya netagwan Lasarus*

<sup>38</sup> Nemahhig mewan hu lemyung Jesus. Dimmateng ida etan di kulung e netangeb ni batu <sup>39</sup> et kantuy “Ekal yu eya batu.” Kan Martha e agin etan ni netey ey “Apu, mahemuy mannuman ni peteg tep nelabah law epat ni aggew ni neikulungan tu.”

<sup>40</sup> Kan Jesus ni hi-gatuy “Kaw eggak ehelen ni hi-gam e hedini wada muka pengullug, man ang-angen mu et-eteng ni kabaelan Apu Dios ni keiddeyyawan tu?”

<sup>41</sup> Ingkal da etan batu et itengaw Jesus di kabunyan et kantuy “Ama, nakka mansalamat tep dingngel muwak. <sup>42</sup> Inamtak e muwak kadedngelan kenayan, nem impadngel kudda eyan tutu-u huuyan inhel ku ma-lat kulugan da e hi-gam nengitu-dak ni hi-gak.” <sup>43</sup> Inlet tu ehel tu e kantuy “Lasarus, kaukat ka.” <sup>44</sup> Ey neukat ali hi Lasarus e nanengtun nelibutan hu annel tun libut ni netey. Ey hin-appil hu neilibut di ulu tu. Kan Jesus ni hi-gaday “Ekal yu libut tu et umenamut di baley da.”

#### *Ihik idan buhul Jesus ni memettey ni hi-gatu.*

*(Matthew 26:1-5; Mark 14:1-2; Luke 22:1-2)*

<sup>45</sup> Dakel ida Jews ni an nenang-ang nan Maria ni nengulug law nan Jesus, tep inang-ang da nenaganan tun Lasarus. <sup>46</sup> Nem wadadda edum ni hi-gadan eleg mangulug et lumaw idad kad-an idan Pharisee et da e-ehhelen hu impahding Jesus. <sup>47</sup> Et maemung ida ap-apun padi, yadda Pharisee et yadda ap-apun Jews et kanday “Hipa pehding tayun nunman ni tuu? Deh e tagan tu peang-ang ni miracles. <sup>48</sup> Hedin eleg tayu pesikked, ey lektattuy mengullug ni emin hu tuun hi-gatu et umbunget ida ap-apud Rome et memaman ikka-leg da lebbeng tayun mengippahding ni elaw tayun Jews niya bahbahen da hu Tempol tayu.”

<sup>49</sup> Yan nunman ni toon ey hi Kaypas hu Eta-gey ni Padi. Kantun hi-gaday “Kele kayu kametemma? <sup>50</sup> I-imman hu mettey huuyan hakey ni tuun panyaggudan tayun emin, nem ya hu itu mettey emin ni tuu eyad bebley.”

<sup>51</sup> Huuyan inhel Kaypas ey beken ni nalpud nemnem tu, tep hi Apu Dios hu nengipenemnem ni nunyan hi-gatu, tep hi-gatu neputuk ni keta-ta-geyyan ni padin nunman ni toon. <sup>52</sup> Humman ni inhel tun meippanggep ni ketteyyan Jesus ey beken ni panyaggudan idan ebuh ni Jews, nem panyaggudan damaddan tutu-un Apu Dios ni neihihap di kebebbebley ma-lat maikahhakey idallin emin ni kamengullug ni hi-gatu.

<sup>53</sup> Neipalpun nunman ey kaihhenummangan idan ap-apuddan Jews hu pehding dan memettey nan Jesus. <sup>54</sup> Et isiked law Jesus ni mantuttuddudman Judea et lumaw di bebley di Ephraim di gilig ni desert et manha-ad idaddan disipol tudman.

<sup>55</sup> Ngannganih ni medettengan hu Piyestah ni Passover ey dakel ida hu Jews di kebebbebley ni limmaw di Jerusalem ni an mengippahding ni pandaddanan dan

mekippiyesta. <sup>56</sup>Pinhed dan ang-angen hi Jesus et yan neamungan dad Tempol ey wada hakkeyey kanday “Hipa na-mu, um-ali hi Jesus ni mekippiyesta winu eleg?”

<sup>57</sup>Yadda etan ap-apuddan padi et yadda Pharisee, ey sinugun dadda tuu e kanday “Hedin wadan hi-gayu hu menang-ang nan Jesus, ey alid kad-an min mengippeamta ma-lat mi depapen.”

## 12

*Ya nenuygan etan ni biin nenginan lana nan Jesus  
(Matthew 26:6-13; Mark 14:3-9)*

<sup>1</sup>Enem law ni aggew ey medettengan hu Piyestah ni Passover ey limmaw hi Jesus di Bethany e bebley nan Lasarus e hi-gatu la etan netey, nem sinagwan tu. <sup>2</sup>Indaddanan da hi Jesus ni kennen. Hi Martha hu nengipaptek ey nekiheyuyung hi Lasarus e agitu. <sup>3</sup>Entanni ey illan Maria hu hambusi ni nenginan lana e nard ngadan tu et duygan tu helin Jesus et pu-nadan tun bewek tu. Ey napnu bawang ni hamuy nunman ni lana.

<sup>4</sup>Wadadman hi Judas Iskariot e hakey ni disipol Jesus e hi-gatu mengihdul alin hi-gatu. Inang-ang Judas humman ni impahding Maria, ey sinemyaw tu et kantuy <sup>5</sup>“Aeyulah humman ni bangbanglun lana! \* Gullat et ni neigtang, dakel ni pihhuh ni meiwatwat idan nangkewetwet.” <sup>6</sup>Ya tuka penge-ehhel ey heni numan tuka ikakkaguh ida nangkewetwet, nem ya kakulugan tu ey eleg, tep matekew. Ya ngunu tu ey hi-gatu kamengeng ni pihhuh idan disipul ni kaihhehmek idan tuu, nem tuka ittalu edum.

<sup>7</sup>Kan Jesus ey “Anin. Ngenamung tu ngu. Impahding tu huuya ma-lat pengidaddanan tun annel kun keikkullungak ali. <sup>8</sup>Gaway ida nangkewetwet tep wadaddad kad-an yun kenayun, nem hedin hi-gak ey nekemtang law ni ebuh hu pekihha-adan kun hi-gayu.”

*Ihik idan padin memettye daman Lasarus*

<sup>9</sup>Entanni ey dingngel idan dakel ni Jews e wada hi Jesus di Bethany et ebuhe ka-kalaw idadman. Hakey pay ey pinhed dan ang-angen hi Lasarus e sinagwan Jesus. <sup>10</sup>Et humman hu, nanhuhummangan ida ap-apuddan padi e pinhed dan pepettye dama hi Lasarus, <sup>11</sup>tep ya netagwan tu hu himmulun ni nengiwallengan ni dakel ni tuun elaw ni Jew, et hi Jesus law hu daka kulluga.

*Limmaw hi Jesus di Jerusalem et daydayawen idan tuu e kanday hi-gatu hu intu-dak Apu Dios*

*(Matthew 21:1-11; Mark 11:1-11; Luke 19:28-40)*

<sup>12</sup>Newa-wa ey dingngel idan dakel ni tuun an mekippiyestah di Jerusalem hu ellian Jesus diman, <sup>13</sup>et ida mampangelan bulung ni palmah e heni bulung ni neyug, tep humman hu elaw ni daka penaydayaw, et lumaw idan an menammun Jesus. Katkuk ida e kanday “Daydayaw tayu hi Apu Dios! Daydayaw tayu eya intu-dak tun Patul di Israel.” <sup>14</sup>Inang-ang Jesus etan kilaw ni kebayyu et mantakkay. Huuya inamnuan etan ni inhel Apu Dios ni impatudek tu e kantuy

<sup>15</sup>“Entan takut yun ijerusalem tep iyalli Patul yun nantakkay di kilaw ni kebayyu.” †

<sup>16</sup>Emin ida disipol Jesus ey eleg da ni awatan huayan kamekapkapy. Ya law eman ni netaguan tun neteyyan tu hu nengamtaan da e humman idan nekapkapy inamnuan idan neitudek ni meippanggep ni hi-gatu.

<sup>17</sup>Emin ida nenang-ang ni nenagwan Jesus nan Lasarus ey da nan-ehel di katuuuu. <sup>18</sup>Et humman gaputun dakel ida tuun limmaw ni an nenammun Jesus. <sup>19</sup>Wada law hakkey ida etan ni Pharisee ey kanday “Endi tayu pehding. Ang-ang tayu kedi, emin ida law hu tuu ey hi-gatu daka daydayawa.”

*Ya neidingpatan etan ni bukel ni neitnem*

<sup>20</sup>Wadadda Greek ni immalid Jerusalem ni mekippiyestah ni Passover. <sup>21</sup>Limmaw idad kad-an Philip e iBetsaida di Galilee et kandan hi-gatuy “Apu, pinhed min meki-ungbal nan Jesus.” <sup>22</sup>Et lumaw hi Philip di kad-an Andrew et tu ehlen et lumaw idan dewwan an nangel nan Jesus. <sup>23</sup>Hinumang Jesus et kantuy “Nedatngan law hu gintud Apu Dios ni keang-angan ni keiddeyyawan ku e Pengulwan emin ni tuu. <sup>24</sup>Dengel yu eya makulug ni e-helen ku. Ya bukel ey mahapul ni meitnem et tummel et han medakkel. ‡ <sup>25</sup>Ya etan tuun ebuh hu annel tu niya biyag tud puyek ni tuka ikakkaguh ey endilli biyag tun endi pappeg tu tep meiddawwin Apu Dios. Nem ya etan tuun beken ni ya biyag tu hu tuka

\* **12:5** 12:5 Ya balol tu ey tangdan ni hantoon. † **12:15** 12:15 Huayan klasih ni kebayyu ey donkey. Hedin nantakkay hu patul di donkey, ey peang-ang tu e linggep in-ali tu. Nem hedin ya ustuh ni kebayyu hu nantakkayan tu, man ya pinhed tun e-helen ey mekigubbat. ‡ **12:24** 12:24 Huuya kei-elligan Jesus e mahapul ni mettey et wada inna-nutun kehellakniban ni dakel ni tuu.

ikakkaguh ey wadalli biyag tun endi pappeg tu. <sup>26</sup> Ya tuun neminshed ni mansilbin hi-gak ey mahapul ni u-unnuden tuwak et anin ni attu kad-ak ey wada damad man et hi-gatu idaydayaw Ama.

*Ya nanghelan Jesus ni ketteyyan tu*

<sup>27</sup> Nakka memunnumunnun mannemnem etan ni meippahding alin helheltapen ku, nem eleg mabalin ni nak ibbagan Ama ma-lat eleg maipahding humman ni hi-gak, tep humman gaputun inlian ku." <sup>28</sup> Et kan Jesus nan Apu Dios ey "Ama, peang-ang mu kasina-gey mu." Ey wadalli immehel di kabunyan e kantuy "Impeang-ang ku dedan la kasina-gey ku, nem peang-ang ku mewan."

<sup>29</sup> Dingngel idan neamung ey kan idan edum ey kidul humman. Yadda edum ey kanday anghel ni nekiungbal nan Jesus. <sup>30</sup> Et kan Jesus ey "Humman ni ehel ni nalpud kabunyan ey hi-gayu nengipadngelan Apu Dios ni nunman, bekennak, ma-lat pengamtaan yu e dingngel tu inhel kun hi-gatu. <sup>31</sup> Mehuwetan ida law hu eleg mengullug ni hi-gak et mekastigudda. Ey gapuh ni meippahding ni hi-gak ey memahmahan e meapput hi Satanas et endi law kabaelan tun man-apu eyad puyek. <sup>32</sup> Yallin keittageyan ku ey pengullug kuddalli tutu-un hi-gak." § <sup>33</sup> Inhel tu huyya et peamta tuddan tuu hu elaw ni ketteyyan tu.

<sup>34</sup> Kan idan etan ni neamung ey "Tam kantud Tugun Moses ey mannananeng e eleg mettey etan pinutuk Apu Dios ni mengippaptek ni tuu. Nem kele kammuy mettey ali etan Pengulwan emin ni tuu? Hipa humman ni kammun Pengulwan ni emin ni tuu?"

<sup>35</sup> Kan Jesus ni hi-gaday "Hi-gak hu kamei-ellig ni memnang ni nemnem ni tuu, tep nakka peewwat hu makulug, nem nekemtang ni ebuh hu pekihha-adan kun hi-gayu. Et humman hu, yan nunyan wada-ak, ey u-unnud yu nakka ituttuddu ma-lat beken ni heni kayu wadad engeenget. Tep ya tuun wadad engeenget ey eleg tu han-ang-ang dellanan tu. <sup>36</sup> Et mukun kangkuy yan nunyan wada-ak ni memnang ni hi-gayu ey pangulug kayun hi-gak ma-lat mabnangan kayu. Ya pengullugan yuwak ey panyaggudan ni elaw yu et henin elaw ku." Inhel Jesus huyya ey hini-yan tudda et eleg mampeang-ang ni hi-gada.

*Ya eleg pangulugan idan Jews nan Jesus*

<sup>37</sup> Nem anin ni inenang-ang idan tuun emin hu impahpahding Jesus ni miracles et eleg da kulugen. <sup>38</sup> Huyya inamnuan ni intudek lan Isaiiah e prophet e kantuy "Apu, hipa makkaw hu mengullug ni ituttuddu mi? Hipadda tep nengipeamtaam ni et-eteng ni kabaelan mu?" \*

<sup>39-40</sup> Huyya pay hu inhel lan Isaiiah meippanggep ni eleg da pengullugin Jesus. Kantuy "Impambalin Apu Dios idan heni nekulap niya heni endi nemnem da, tep kahing idan peteg. Et humman hu, anin ennang-angen da humman ni kapeennang-ang Apu Dios et eleg idan hekey mengullug niya eleg da han-awat. Gullat et ni beken idan henin nunman, ey ewwatan da hu kameituttuddun hi-gada et mantuttuyyudda et mangulug ida, et pesinsahan Apu Dios hu liwat da." †

<sup>41</sup> Huyya la impeamtan Isaiiah meippanggep nan Jesus, tep inang-ang tud i-innep tu hu keiddeyyawan Jesus.

<sup>42</sup> Nem anin ni hanniman et dakek ida tuun nengulug nan Jesus, anin idan edum ni ap-puddan Jews, nem eleg da pinhed ni peamta tep ida kaumtakut ni pengkalan idaddan Pharisee ni hi-gadam simbaan dan Jews. <sup>43</sup> Tep ya penettebalan ni tuun hi-gada hu daka gagangami, beken ni ya penettebalan Apu Dios ni hi-gada.

*Ya inhel Jesus hu keippuanan ni panhuwetan tun tuu*

<sup>44</sup> Inlet Jesus ehel tuddan etan ni neamung e kantuy "Ya tuun kamengullug ni hi-gak ey tu dama kakulluga hi Apu Dios e nengitu-dak ni hi-gak. <sup>45</sup> Ya etan tuun nenang-ang ni hi-gak ey inang-ang tu dama hi Apu Dios e nengitu-dak ni hi-gak. <sup>46</sup> Tep immali-ak eyad puyek et benangan ku hu kamei-ellig di engeenget ni nemnem ni tuu ma-lat amtaan da hi Apu Dios. Et emin ida kamengullug ni hi-gak ey beken law ni henidida kamanha-ad di engeenget. ‡ <sup>47</sup> Eggak huwesi etan tuun nangngel ni inhel ku, nem eleg tu u-unnuden, tep immali-ak di puyek ni menellaknib idan tuu, beken ni an menuwet ni hi-gada. <sup>48</sup> Ngenamung alin kedettengan ni aggew ni kehuwetan emin ni tuu hu kekastiguan idan kahing ni hi-gak niya eleg mengullug ni nakka e-e-hela. Humman

§ 12:32 12:32 Ya pinhed tun e-helen hu keitta-geyan nan Jesus ey ya pampettakan tud krus, ya tegguan tu et ya keibbanggadan tud kabunyan. \* 12:38 12:38 Isaiiah 53:1, Romans 10:16 † 12:39-40 12:39-40 Isaiiah 6:10

‡ 12:46 12:46 Ya keibellinan nunya, ey ya etan tuun mengullug nan Jesus ey kamei-ellig ni mebnangan nemnem tu, tep amtaan tu law hu kayyagud ni elaw ni u-unnuden.

idan makulug ni nakka e-e-hela hu keippuunan ni kekastiguan da. <sup>49</sup> Tep humman idan in-inhel ku ey beken ni nalpud nemnem kun ebuh, nem nalpun Ama e nengitu-dak ni hi-gak. <sup>50</sup> Hedin kullugen ni tuu humman idan tugun Ama ey meweddan hi-gatu hu biyag ni endi pappeg tu. Et mukun emin etan tuka e-helan hi-gak ey humman ida dama nakka e-hela."

## 13

### *Ya nengulhan Jesus ni heliddan disipol tu*

<sup>1</sup> Yan mahmahdem nunman et han mewa-wa e humman ni aggew hu keilleppuan ni Piyestah ni Passover, ey inamtan Jesus e yan nunman ni hileng hu pappeg tun pekihhadan tud puyek, tep mambanggad law di kad-an Ametud kabunyan. Nakappinhed Jesus idan emin hu tuud puyek ni kamengu-unnud ni hi-gatu, et mukun pinhed tun peang-ang hu et-eteng ni impeminhed tun hi-gada.

<sup>2</sup> Yan kapengngannid Jesus nunman ni mahmahdem ey impenemnem Satanas nan Judas Iskariot e u-ungnan Simon hu pehding tun mengihdul nan Jesus.

<sup>3</sup> Inamtan Jesus e wadan emin ni hi-gatu hu kabaelan ni indawat Apu Dios e hi Ametu niya inamta tu e intu-dak Ametun um-alidya puyek, nem mambanggad di kad-an tu.

<sup>4</sup> Entanni ey imminah hi Jesus et ekalen tu balwasi tu et alen tu tuwalya et iewakeh tud gitang tu. <sup>5</sup> Ey immiduyag ni danum di besin et pan-ulhan tu hu heliddan emin ni disipol tu et pampu-nadan tun tuwalya. <sup>6</sup> Nedatngan hi Simon Peter et kantun Jesus ey "Apu, kele hi-gam anhan law hu an mengullah ni helik?" <sup>7</sup> Kan Jesus ni hi-gatuy "Eleg mu ni meewwasi eya nakka pan-ippahding, nem meba-ba-ba et han-awat mu."

<sup>8</sup> Kan Peter ni hi-gatuy "Eleg mabalin ni nak peullah hu helik ni hi-gam." Kan Jesus ni hi-gatuy "Hedin eggak ullahi helim, eleg ka law meibbillang ni disipol ku." <sup>9</sup> Kan Simon Peter ni hi-gatuy "Hedin hannitan, ku pakiulah mu tep hu ngamay ku niya uluk."

<sup>10</sup> Nem kan Jesus ni hi-gatuy "Hedin nan-emeh hu tuu, man malin的角度 hu annel tu et anin ni ebuh hu heli tun ullahan tep humman hu kamededep-ul ni tuka an pandaldalni. Malin的角度 kayu, nem wada hakey ni hi-gayun beken ni malin的角度." <sup>11</sup> Inamtan Jesus etan hakey ni hi-gadan mengihdul alin hi-gatu et mukun kantuy "Wada hakey ni hi-gayun beken ni malin的角度."

<sup>12</sup> Negibbuh ni inulhan tu heli da ey nambalwasi mewan et yumudung et kantun hi-gaday "Kaw inamta yu hu gaputun nengulahan kun heli yu? <sup>13</sup> Yuwak kaingngadnin mittuduh yu niya Ap-apu yu et kayyaggud huttan, tep makulug ni hi-gak hu mittuduh yu niya Ap-apu yu. <sup>14</sup> Hi-gak hu mittuduh yu niya Ap-apu yu, nem heni-ak bega-en yun nunya, tep ulahan ku heli yu, hanniman dama hu pahding yud edum yu. <sup>15</sup> Huyyan impahding ku hu pengiu-unnudan yu. <sup>16</sup> Dengel yu eya e-helen ku. Makulug ni ya bega-en ey beken ni eta-ta-gey nem ya ap-apu tu. Et ya bega-en ey beken ni eta-ta-gey nem ya etan kan bega-en ni hi-gatu. <sup>17</sup> Hedin inewatan yu huyyan inhel ku, ipahding yu et umamleng kayu. <sup>18</sup> Nem beken ni hi-gayun emin hu nakka pampenghelin nunya. Emin kayu ey naka-amta dakeyun hi-gak tep hi-gak nemilin hi-gayu. Nem um-amnulli etan neitudek ni kantuy 'Ya etan hakey ni nekikan ni hi-gak ey hi-gatu mengihdul ni hi-gak.' <sup>19</sup> E-helen ku huuya eyan eleg ni maipahding ma-lat hedim um-amnu, man kullugen yulli e hi-gak hu Christo ni pinutuk Apu Dios ni an mengippatek ni tuu.

<sup>20</sup> Makulug eya e-helen kun hi-gayu e ya tuun ebbuluten tu hu bega-en kun intu-dak ku ey ebbuluten tuwak dama, ey ya tuun mengebbulut ni hi-gak ey inebulut tu dama hi Apu Dios e nengitu-dak ni hi-gak."

### *Ya nanghelan Jesus ni pengihdulan Judas ni hi-gatu* (*Matthew 26:20-25; Mark 14:17-21; Luke 22:21-23*)

<sup>21</sup> Inhel Jesus huuya ey makageh hu nemnem tu et kantuddan disipol tuy "Ya kakulugan tu ey wada hakey ni hi-gayun mengihdul ni hi-gak." <sup>22</sup> Ida kaman-intetkel hu disipol tu, tep eleg da amta hedim hipan hi-gada hu kapan-e-helan Jesus. <sup>23</sup> Neitakdul nan Jesus etan disipol ni nakappinhed tu et <sup>24</sup> ituttubban Simon Peter ni hi-gatu e kantuy "Ibegam pangngu hedim hipan hi-gatsu hu kantun mengihdul ni hi-gatu." <sup>25</sup> Et kan etan ni neitakdul nan Jesus ey "Apu, hipan hi-gami etan inhel mu?"

<sup>26</sup> Kan Jesus ey "Itta-mel ku eya sinapay et ya etan tuun pengidwatan ku ey hi-gatu mengihdul ni hi-gak." Et ita-mel tu sinapay ey indawat tun Judas Iskariot e u-ungnan Simon. <sup>27</sup> Dinwat Judas etan sinapay ey neihuklung hi Satanas ni hi-gatu.

Kan Jesus ni hi-gatuy "Papuut mu et ipahding mu etan muka nenemneman ippahding." <sup>28</sup> Emin ida etan edum ni nekiheyuyung nan Jesus ey eleg da amta gaputun an nanghelan Jesus nan Judas nunya. <sup>29</sup> Yadda etan edum ey kanday inhel na-mun Jesus huuya, tep pinhed tun an umgangat hi Judas ni mahapul dan piyestah winu tu

iwwatwatan ni pihhuh ida nangkewetwet, tep hi Judas hu kamengnged ni pihhuh da.  
<sup>30</sup> Negibbuh ni kinan Judas etan sinapay ey pinhakkeyey immehep ni nunman ni hileng.

*Ya etan baluh ni tugun Jesus*

<sup>31</sup> Limmaw la hi Judas ey kan Jesus ey “Nedatngan law hu keippeang-angan ni keiddeyyawan ku e Pengulwan emin ni tuu. Yan nunya law pengippeang-angan kun dayaw Apu Dios. <sup>32</sup> Hedin meiddeyaw hi Apu Dios di pehding ku, ey peiddeyaw tuwak dama ey anggegannuy ippahding tu huuya. <sup>33</sup> Hi-gayuddan aaggik, ey nekemtang law ni ebuh hu pekihha-adan kun hi-gayu. Yuwak ali hemmahemmake, nem e-helen ku daman hi-gayu hu inhel kudda lan Jews e eleg mabalin ni kayu mei-unnud di lawwan ku. <sup>34</sup> Ya baluh ni ittugun kun hi-gayu ey pan-impipinshed kayu, henin impeminshed kun hi-gayu. U-unnud yu hu elaw ni impeminshed kun hi-gayu. <sup>35</sup> Hedin wada impeminshed yun edum yu, man huuya pengi-immatunatan idan tutu-u e kayu kamengullug ni hi-gak.”

*Ya nanghelan Jesus ni pengihhe-utan alin Peter e hi-gatu hakey ni disipol tu  
 (Matthew 26:31-35; Mark 14:27-31; Luke 22:31-34)*

<sup>36</sup> Kan Simon Peter ni hi-gatuy “Apu, attu lawwan mu?” Kan Jesus ey “Yad lawwan ku ey eleg mabalin ni ka mekillaw ni nunya. Nem mei-unnud kallin hi-gak ni edum ni aggew.”

<sup>37</sup> Kan Peter ey “Apu, kele eleg mabalin ni nak mei-unnud ni hi-gam ni nunya? Nandaddannak ni mengikkettey ni hi-gam!” <sup>38</sup> Kan Jesus ey “Kaw makulug makkaw ni anin ni mettey ka gapuh ni hi-gak? Dengel mu eya e-helen kun hi-gam, mampitlulli penghelan mun eleg muwak amta et han tumkuk hu manuk.”

## 14

*Hi Jesus hu dalan ni tuun umlaw di kad-an Apu Dios*

<sup>1</sup> Kan Jesus idan disipol tuy “Entan kadenagi yu. Pandinel kayun Apu Dios ey pandinel kayu daman hi-gak. <sup>2</sup> Yad kad-an Ama ey dakel hu panha-adan. Et mukun um-anemuttak et nak iddaddan hu panha-adan yu. Eggak e-hela huuya hedin beken ni makulug. <sup>3</sup> Hedin negibbuh ni iddaddan kun emin ey um-ali-ak ali mewan ni mengikkuyyug ni hi-gayu ma-lat makiha-ad kayun hi-gak diman ni ingganah. <sup>4</sup> Inamta yu hu dalan ni umlaw di lawwan ku.”

<sup>5</sup> Kan Tomas ni hi-gatuy “Apu, eleg mi amta hu lawwan mu. Et inna-nun pengamtaan min dalan?” <sup>6</sup> Kan Jesus ni hi-gatuy “Hi-gak ni ebuh hu dalan ni dellanen ni tuun umlaw di kad-an Ama. Hi-gak ni ebuh hu makulug ni kullugen yu niya iddinel yun mengippaptek ni hi-gayu. Ey hi-gak hu kakelpuin biyag ni endi pappeg tu. Endi tuun dammutun umlaw di kad-an Ama hedin eleg tu iddalan ni hi-gak. <sup>7</sup> Hedin makulug ni inamta yuwak, man inamta yu dama hi Ama. Et humman hu, meippalpun nunya ey inamta yu law niya inang-ang yu hi Ama.”

<sup>8</sup> Kan Philip ni hi-gatuy “Apu, peang-ang mun hi-gami hi Amam et eleg kami mandinwa.” <sup>9</sup> Kan Jesus ni hi-gatuy “Philip, nebayag ni nekiahaha-addak ni hi-gayu ey kele eleg muwak amta? Kele kanmuy peang-ang kun hi-gayu hi Ama? Ya etan tuun nenang-ang ni hi-gak ey inang-ang tu dama hi Ama. <sup>10</sup> Kaw eleg yu kulluga e hi-gak ey wada-ak nan Ama ey hanniman daman Ama e wadan hi-gak? Emin hu nakka ippahding niya nakka e-e-hela ey makulug ni hi Ama e wadan hi-gak hu kamengippahding. <sup>11</sup> Kulug yu e hi-gak ey wada-ak nan Ama niya hi-gatu ey wada daman hi-gak, winu kulug yu huayan inhel ku tep yadda nakka pehpehding ni miracles.

<sup>12</sup> Ya kakulugan tu ey ya tuun mengullug ni hi-gak ey kabaelan tu daman ippahding ida impahding ku, nem nema-man um-impatnga ippahding tu, tep umlawwak di kad-an Ama. <sup>13</sup> Anin hipa ibbageyun hi-gak ni baddang et iddawat ku hedin medinnel kayun hi-gak \* ma-lat pangipeang-angan kun dayaw Ama. <sup>14</sup> Ippidwak ni e-helen ni hi-gayu e emin hu ibbageyun hi-gak ni baddang ey iddawat ku hedin hi-gak ni ebuh hu iddinel yu. <sup>15</sup> Ka-immatur hedin pinshed yuwak tep u-unnuden yu hu tugun kun hi-gayu.

*Impakulug Jesus ni um-ali hu Ispirituh Apu Dios ni memaddang idan kamengullug*

<sup>16</sup> Ibbagak nan Ama et itu-dak tullu Ispirituh tun meihhullul ni hi-gak ni umbaddang ni hi-gayu et mawedan hi-gayun ingganah. <sup>17</sup> Humman ni kangkun Ispirituh Apu Dios hu mengippeamtan hi-gayun makulug. Eleg mabalin ni an dewwatan idan eleg mengullug humman ni Ispirituh tu, tep eleg da amta niya eleg da han-awat. Nem hi-gayun kamengullug ey amta yu, tep wadad kad-an yu ey meweddallin hi-gayun ingganah.

\* **14:13** 14:13 Huayan kantuy ‘medinnel kayun hi-gak’ ey yad ehel ni Greek ey kantuy ‘medinnel kayud ngadan ku.’



<sup>18</sup> Anin ni hi-yanen dakeyu et eleg dakeyu e-waya tep mambangngaddak alin hi-gayu. <sup>19</sup> Ngannganih law hu eleg da-ak penang-angiddan eleg mengullug. Nem hedin hi-gayu ey ang-angen yuwak ali mewan. Wadalli biyag yun endi pappeg tu, tep metegguan nak et mekibi-biyag kayullin hi-gak ni ingganah. <sup>20</sup> Amtaen yullin nunman e hi-gak ey wada-ak nan Ama, et henin hi-gayu e wada kayun hi-gak niya wada-ak daman hi-gayu. <sup>21</sup> Ya tuun kamengu-unnud ni tugun ku ey hi-gatu neminhd ni hi-gak. Ey ya tuun neminhd ni hi-gak ey pinpinhd daman Ama niya pinhd ku dama. Ey hi-gatu pengippeewwatan ku hedin hipa-ak.”

<sup>22</sup> Himmapi etan hakey ni Judas, e beken hi Judas Iskariot e kantun Jesus ey “Apu, kele ebuh kamin pengippeamtaan mu hedin hipa ka? Kele beken ni emin ni tuu?” <sup>23</sup> Kan Jesus ni hi-gatuy “Tep ebuh ida etan neminhd ni hi-gak niya kamengu-unnud ni tugun kun pengippeamtaan ku hedin hipa-ak. Pinheden idan Ama niya ippaptek midda tep wada kamin hi-gadan ingganah. <sup>24</sup> Nem ya etan tuun eleg meminhd ni hi-gak ey kehgingen tudda tugun ku. Yadda eya nakka e-e-hela ey beken ni nemnem kun ebuh, nem nalpun Ama e nengitu-dak ni hi-gak.

<sup>25</sup> Nakka e-e-helan emin huuyan hi-gayu eyan wada-ak nin kad-an yu. <sup>26</sup> Nem hedin um-alilli law etan ittu-dak Ama ni meihhuullu ni hi-gak ni umbaddang ni hi-gayu e humman Ispirituh tu ey ittuluy tu eya ngunuk ma-lat paka-awatan yu hu meippanggep ni hi-gak. Ey paka-ittuttuddu tullin emin niya penemnem tun kenayun ni hi-gayu etan intenuttudduk.

<sup>27</sup> Anin ni umlawwak law, yaggud adyah e ihhi-yan kun hi-gayu hu linggep. Beken ni henin linggep idan eleg mengullug, tep beken humman ni makulug ni linggep. Et humman hu, etan kadenagi yu niya etan tattakut yu. <sup>28</sup> Diddinggel yun nunman hu in-inhel kun kangkuy umlawwak, nem mambangngaddak ali mewan di kad-an yu, et hedin makulug ni pinhd yuwak, man wadan um-amleng kayun lawwan kud kad-an Ama e neta-ta-gey nem hi-gak. <sup>29</sup> Nakka e-e-heladda emin huuyan nunyan eleg ni maipahding ma-lat hedin um-amnuddalli ey mengullug kayulli law ni hi-gak. <sup>30</sup> Nekomtang law hu pekiung-ungbalan kun hi-gayu, tep iyyalli law hi Satanas e apapun emin ni lawah ni tu peang-ang hu kabaelan tu, nem eleg mabalin ni tuwak apputen. <sup>31</sup> Emin hu pinhd Ama ey humman hu ippahding ku ma-lat amtaen emin ni tuud puyek e et-eteng hu impeminhd kun hi-gatu.” Negibbuh humman ni inhd Jesus ey kantuy “Inah kayu tep umlaw itu.”

## 15

### *Hi Jesus hu neeligan etan ni annel ni wikal*

<sup>1</sup> Wada intuttuddun Jesus ni in-alig tu. Kantuy “Hi-gak hu kamei-ellig di makulug ni wikal ey hi Ama hu kamampaptek. <sup>2</sup> Hi-gayun kamengullug ni hi-gak hu kamei-ellig di pingin etan ni wikal. Yadda eleg mengu-unnud ni hi-gak, ey pea-allaw Apu Dios, henin etan ni pingin wikal ni eleg umlameh ni hepngiten etan ni kamampaptek et bekahen tu. Nem yadda mengu-unnud ni hi-gak, ey ippaptek Ama henin kapemaptek etan ni kamampaptek ni wikal ma-lat dakel illameh tu. <sup>3</sup> Inu-unnud yu hu intuttudduk ni hi-gayu, et humman hu kayu kamei-ellig etan di pingin nelinihan. <sup>4</sup> Hedin na-kal di annel tu etan pingi, man eleg umlameh. Et humman hu, hi-gayun kamei-ellig di pingin wikal ey mahapul ni mannenneng kayun hi-gak henin hi-gak e mannennenggak ni hi-gayu. Tep hedin eleg kayu mannenneng ni mengullug ni hi-gak, man eleg yu han-ipahding hu pinhd ku.

<sup>5</sup> Em, hi-gak hu kamei-ellig etan ni wikal ey hi-gayu hu kamei-ellig ni pingi tu. Ya tuun mannananeng ni hi-gak, henin hi-gak e pannananeng kun pemaptek kun hi-gatu ey kayyaggud ida ippahding tu et kamei-ellig ni dakel illameh tu. Tep makulug ni pakkadek baddangan ku hu tuu et han dammutun kayyaggud pehdng tu. <sup>6</sup> Nem ya etan tuun eleg tu pannananeng ni mengullug ni hi-gak, ey endi silbin biyag tu. Heni etan ni pingin wikal ni eleg umlameh e kakekhata ni imbeng et hedin nakpit, man inepuyan. <sup>7</sup> Nem hedin mannananeng kayun mengullug ni hi-gak niya eleg yu iwwalleng ida intuttudduk, ey anin ni hipa ibbageyun hi-gak et pehdng ku. <sup>8</sup> Ya keiddeyyawan Ama ey yadda etan dakel ni illameh yu e humman ida etan kayyaggud ni pehdng yu tep ya yuka pengun-unnudin hi-gak. Humman hu keang-angan tu e hi-gayu hu makulug ni disipol ku.

<sup>9</sup> Ya neminhd Aman hi-gak ey henin nunman dama hu neminhd kun hi-gayu, et humman hu, pandinel kayud neminhd kun hi-gayu. <sup>10</sup> Hedin peka-u-unnuden yu tugun ku ey mannenneng kayun mengiddinnel ni neminhd kun hi-gayu. Heni daman hi-gak e nakka u-unnuda hu tugun Ama et ya keang-angan tu ey nakka medinnel ni neminhd

tun hi-gak. <sup>11</sup> Inhel ku huyyan hi-gayu ma-lat ya amleng ni wadan hi-gak ey wada daman hi-gayu et endi an pangkullangan ni pan-am-amlengan yu.

<sup>12</sup> Ya ittugun kun hi-gayu ey pan-impipinshed kayu henin neminshed kun hi-gayu. <sup>13</sup> Ya tuun ikkatey tu panyaggudan ni edum tu ey humman kei-ang-angan tun et-eteng impeminshed tu ey endi kei-ingnehan ni henin nunyan impeminshed. <sup>14</sup> Ey hi-gayu makulug ni gayyum ku hedini u-unnuden yu tugun ku. <sup>15</sup> Eleg dakeyu law inggadnin bega-en ku, tep ya bega-en ey eleg tu amta hu wadad nemnem ni apu tu, nem inggadnan dakeyun gayyum ku, tep emin dingngel kun Ama ey impeamtak ni hi-gayu. <sup>16</sup> Eleg yuwak pilien. Hi-gak nemilin hi-gayu. Pinutuk dakeyun hi-gak ni mengu-unnud ni tugun ku et yu ittutuddu ma-lat dumakkel ida mengullug ni hi-gak. Humman hu heni lameh yun kayyaggud ni mannenneng. Et iddawwat Ama hu hipan ibbageyu hedini iddinel yun hi-gak. <sup>17</sup> Ya ittugun kun hi-gayu ey pan-impipinshed kayu.

*Yadda eleg mengullug ey anggebe-hel dadda kamengullug nan Jesus*

<sup>18</sup> Hedin anggebe-hel dakeyuddan eleg mengullug ni hi-gak, ey nemnem yu e hi-gak nemangulun anggebe-hel da. <sup>19</sup> Gullat ni heni kayuddan eleg mengullug ni hi-gak, et pinpinheden dakeyun hi-gada. Nem beken kayun henin hi-gada, tep pinili dakeyun mengu-unnud ni elaw ku, et humman gaputun anggebe-hel dakeyuddan eleg mengullug ni hi-gak. <sup>20</sup> Nemnem yu hu inhel ku lan hi-gayu e ya bega-en ey beken ni eta-ta-gey nem ya aputu, henin hi-gayu et hi-gak. Impanhelheltap da-ak idan eleg mengullug, et hanniman ali daman hi-gayu e makulug ni panhelheltap dakeyulli dama. Gullat et ni kinulug da hu ittutudduk, ey kullugen dalli et dama hu ittutuddu yu. <sup>21</sup> Anggebe-hel dakeyulli et panhelheltap dakeyu tep ya yuka pengu-unnudin hi-gak, niya gapu tep eleg da amta hi Apu Dios e nengitu-dak ni hi-gak. <sup>22</sup> Gullat ni eggak umli eyad puyek ni mantutuddu, ey eleg et meamta hu liwat dan daka pengehingin hi-gak. Nem immaliak, et humman hu, endi da pengigga-dulan tep inamta da, nem kahing ida. Et humman hu, mekastiguddalli. <sup>23</sup> Ya tuun anggebe-hel da-ak ey anggebe-hel tu dama hi Ama. <sup>24</sup> Gullat ni eggak ipahding ida miracles, e eleg kabaelin tuu ey eleg ida et manliwat. Nem inenang-ang da ey kappya tun anggebe-hel dakemin Ama. <sup>25</sup> Huyya inamnuan ni neitudek lad Tugun Moses e kantuy 'Anggebe-hel da-ak ni endi gaputu.'

<sup>26</sup> Nem itu-dak kulli etan umbaddang ni hi-gayun melpun Ama e humman Ispirituh tu et ittudu tullin hi-gayu hu makulug ey peamta tullu hu meippanggep ni hi-gak. <sup>27</sup> Mahapul daman yu ittutuddu meippanggep ni hi-gak, tep neikukkuyyug kayun hi-gak ni laputun nantutudduan ku ingganah nunya."

## 16

<sup>1</sup> Kan mewan Jesus idan disipol tuy "Inhel kudda huyyan hi-gayu ma-lat eleg yulli iwalleng hu yuka pengullug ni hi-gak anin ni waddada panligligatan yu. <sup>2</sup> Tep edum alin aggew ey e-kalen dakeyud simbaan idan Jews. Ey yan nunman ali ey petteyen dakeyullin edum ni tuu, tep kanda na-mu ngu nem humman pinhed Apu Dios. <sup>3</sup> Huyyalli ipahding da, tep eleg da amta hi Ama niya eleg da-ak dama amta. <sup>4</sup> Inhel ku huyyan hi-gayun nunya ma-lat hedini um-amnulli, ey nemnemen yu e impamenguluk ni inhel ni hi-gayu. Yan laputun nantutudduan ku ey eggak ehelen ida huyyan hi-gayu tep wada-ak nid kad-an yu.

*Ya ngunun Ispirituh Apu Dios*

<sup>5</sup> Yan nunya ey mambangngaddak law di kad-an ni nengitu-dak ni hi-gak, ey endi, anin hakey ni hi-gayun kamammahmah hedini attu lawwan ku. <sup>6</sup> Tep kayu kumedek kaumlelemyung ni nanghelan kun hi-yanen dakeyu. <sup>7</sup> Nem e-helen kun hi-gayu e makulug ni panyaggudan yu hu peni-yanan kun hi-gayu. Tep hedini eggak umlaw ey eleg um-ali hu Ispirituh Apu Dios ni umbaddang ni hi-gayu. Et humman hu, mahapul ni umlawwak et nak ali itu-dak. <sup>8</sup> Et yan ellian tullu ey peamta tuddan eleg mengullug e neliwatan ida niya peamta tun hi-gada hu kakinayyaggud ku, ya elaw ni penummalyan Apu Dios niya elaw ni tuka pengastigu. <sup>9</sup> Peamta tun hi-gada e ya liwat da ey ya eleg da pengullugin hi-gak. <sup>10</sup> Ey peamta tun hi-gada e kayyaggud emin hu nakka pehding. Et ya kei-ang-angan ni kakinayyaggud ku ey ya pambangngadan kud kad-an Ama et eleg yuwak ali law ang-anga. <sup>11</sup> Ey ya elaw ni panhuwetan alin Apu Dios ey meang-ang di nanhuwetan tun Satanas e ap-apun emin ni lawah et kastiguen tullu.

<sup>12</sup> Dakel et hu pinhed kun e-helen ni hi-gayu, nem eleg yu ni dama han-awat ni nunya. <sup>13</sup> Hedin um-ali etan Ispirituh Apu Dios e kamangippeamtan emin ni makulug, man peamta tullin emin ni hi-gayu hu makulug ni u-unnuden yu. Yadda peamta tu ey yadda etan pinhed Apu Dios niyadda etan mekapkapyallin hakey aggew. <sup>14</sup> Ey peiddeyyaw tuwak ali, tep peennamta tullin hi-gayu hu tugun ku. <sup>15</sup> Ey emin hu keiddeyyawan

Ama ey keiddeyyawan ku dama, et humman gaputun nanghelan kun kankuy peamtallin Ispirituh tun hi-gayu hu tugun ku. <sup>16</sup> Anggegannu law ey eleg yuwak ali ang-anga, nem nekemtang ni ebuh ey ang-angen yuwak mewan."

*Ya lemyungan da niya pan-am-amlengan da*

<sup>17</sup> Wada hakkey idan disipol Jesus ey kandan edum day "Kele kantuy anggegannu law ey eleg tayu ang-anga, nem nekemtang ali kunu mewan ey ang-angen tayu? Ey kele kantuy um-anemut di kad-an Ametu? <sup>18</sup> Hipa na-mu pinhed tun e-helen? Kele eleg meewasi huyyan inhel tu?"

<sup>19</sup> Inamtan Jesus humman ni pinhed dan peteg ni amtaen et kantuy "Kaw pinhed yun amtaen hu keibbellinan ni kangkun anggegannu law ey eleg yuwak ang-anga, nem nekemtang ni ebuh ey ang-angen yuwak ali mewan? <sup>20</sup> E-helen kun hi-gayu e makulug ni umlemyung kayulli tep ya meippahding ni hi-gak. Nem yadda eleg mengullug ni hi-gak ey man-am-amleng idalli tep ya humman ni meippahding ni hi-gak. Nem humman ni lemyungan yu ey mambalin alin amlengan yu. <sup>21</sup> Ya bii ey tuka panlelhani hu pan-ungnga tu. Nem hedin neukat hu u-ungnga tu, man tuka liwwana degeh ni nan-ungnga tu tep ya amleng tun u-ungnga tu. <sup>22</sup> Hanniman daman hi-gayu e kayu kaumlemyung nunya, nem hedin ang-angen yuwak ali mewan, ey man-am-amleng kayu ey endi tuun tu pesikked humman ni amleng yu.

<sup>23</sup> Yan nunman ali ey eleg mahapul ni hi-gak hu pengibbeggaan yun hipan mahapul yu, tep e-helen kun hi-gayu e makulug ni emin hu ibbagayun Ama ey iddawat tu tep ya yuka pengullugin hi-gak. <sup>24</sup> Endi ni yu nengipatnaan ni nambagaan nan Aman baddang tun neipuun di yuka pengullug ni hi-gak. Nem e-helen kun hi-gayu e anin hipa ibbageyun hi-gatu et iddawat tu ma-lat umamleng kayun peteg.

*Inapput Jesus ni emin hu lawah ni kapehpehding Satanas*

<sup>25</sup> Impan-inna-abbig ku hu ittutdukk ni hi-gayu, et humman gaputun neligat yun ewwatan. Nem edum alin aggew, ey panna-ud kulli law ni ittutdukk hu meippanggep nan Ama ma-lat nelakah yun ewwatan. <sup>26-27</sup> Yallin nunman ni aggew ey anin inna-ud yun Ama hu hipan ibbageyu. Eleg mahapul ni hi-gak hu mengibbegga tep nakappinhed dakeyun hi-gatu tep pinhed yuwak ey kinulug yu e intu-dak tuwak ni hi-gatu. <sup>28</sup> Em, nalpu-ak nan Ama di kabunyan et umli-ak eyad puyek, nem yan nunya ey hi-yanen dakeyu tep mambangngaddak di kad-an tu."

<sup>29</sup> Et kan ida law ni disipol tuy "Kameewwasi hu muka ittutdukk, tep eleg mu law pan-inna-abbig. <sup>30</sup> Inamta mi law e inamtam ni emin, anin ya nemnem ni tuu. Inamtam hu pinhed ni tuun ibbaga et han tu ibega, et humman hu mika kulluga e intu-dak dakan Apu Dios."

<sup>31</sup> Kan Jesus ni hi-gada ey "Yuwak law kakulluga, <sup>32</sup> nem e-helen kun hi-gayu e mekemkemtang ali, anin yan nunya et pan-inhihi-yanan yuwak et hahhakkeyyak tep wada hakkey ni hi-gayu ey um-anemut di baley tu. Nem wada hi Aman hi-gak ni kenayun. <sup>33</sup> Inhel ku huyya ma-lat madinel kayun hi-gak et pelinggep ku nemnem yu. Yadda eleg mengullug ey panliligat dakeyulli, nem entan takut yu, tep makulug ni inapput ku etan ap-apun emin ni lawah eyad puyek."

## 17

*Ya nengidasalan Jesus idan kamengullug ni hi-gatu*

<sup>1</sup> Inhel Jesus huyya ey intangaw tu et mandasal nan Apu Dios e kantuy "Ama, nedatngan law hu gintud mun pengippeang-angan mun keiddeyyawan ku e U-ungngam. Peang-ang mu humman ni keiddeyyawan ku ma-lat ang-angen idan tuu hu kasina-gey mu. <sup>2</sup> Indawat mu kelebengan kun man-ap-apun emin ni tuud puyek, ma-lat wadaen ku biyag ni endi pappeg tudan tuun impangulug mun hi-gak. <sup>3</sup> Et yadda etan tuun amta daka e makulug ni Dios niya amta da-ak e hi Jesus Christo e intu-dak mun um-alid puyek, ey hi-gadalli hu mekibi-biyag ni ingganah di kad-an mu. <sup>4</sup> Impeang-ang kud ngunun indawat mun hi-gak hu dayaw mu et adyah e ginibbuu ku humman ni ngunuk. <sup>5</sup> Et yan nunya e Ama, ey peang-ang mu law hu keiddeyyawan kun henin dayaw ku eman ni wada-ak ni hi-gam eman ni eleg ni mawedadda eya wadan nunya. Peang-ang mu humman ni dayaw ku eyan pambangngadan kun hi-gam.

<sup>6</sup> Impeamtak hu meippanggep ni hi-gam idan tuun impangulug mun hi-gak. Eleg ida la ni mengullug, nem pinutuk muddan mengullug ni hi-gak. Tuun ida dedan, mukun nengulug idan hi-gak niya impaka-u-unnud da tugun mu. <sup>7</sup> Inamta da law e emin hu impahding ku niya ittutdukk ey nalpun hi-gam. <sup>8</sup> Intutdukk ni hi-gada hu tugun

ni indinel mun hi-gak et u-unnuden da. Inamta da law e nalpu-ak ni hi-gam niya daka kulluga e intu-dak muwak.

<sup>9</sup> Ama, nakka pan-iddasalidda ma-lat baddangan mudda. Beken ni yadda etan eleg mengullug ni hi-gak hu nakka pan-iddasali, nem yadda etan tuum ni impangulug mun hi-gak, tep tuum ida. <sup>10</sup> Endi hu tuum ni beken kun tuu. Hanniman idan tuuk e tuum ida dama, et ya dayaw ku ey meippeang-ang ni hi-gada. <sup>11</sup> Ngannangnih law peniyanan kun hi-gada puyek, tep um-anemuttak di kad-an mu. Ama e kekakkayyaggudan niya et-eteng kabaelan tu, ipaptek mu anhan ida eya impangulug mun hi-gak, ma-lat mandadagyum ida henin nandagyuman ta. <sup>12</sup> Impapaptek kudda eyan nekihahha-adan kun hi-gada tep ya et-eteng kabaelan kun indawat mun hi-gak et endi hakey ni hi-gadan mekastigu. Ebuh etan hakey ni tuu e hi Judas, nem neipahding tep humman hu inamnuan ni impaitudek mud ehel mu.

<sup>13</sup> Ittela-ak law, ey nakka pan-e-hela huyyan hi-gada ma-lat umamleng idan peteg henin hi-gak. <sup>14</sup> Intuttudduk ni emin hu tugun mun hi-gada et u-unnuden da. Et mukun anggebe-hel idaddan eleg mengullug, tep hin-appil law hu elaw da e henin elaw ku. <sup>15</sup> Eggak ibbagan hi-gam ni mudda pattalen hu kamengullug et yadda eleg mengullug, nem nakka ibbaga anhan ni hi-gam e baddangim ida kamengullug ma-lat eleg ida haulen Satanas e ap-apun emin ni lawah. <sup>16</sup> Yadda kamengullug ey eleg law man-inggeh hu elaw dad elaw idan eleg mengullug, tep henin elaw ku hu elaw da. <sup>17</sup> Baddangim idan mengu-unnud ni tugun mu, tep makulug emin hu tugun mu. <sup>18</sup> Ittu-dak kuddan an mantuttuddudan eleg mengullug henin nengitu-dakan muwak eyad puyek ni an mantuttuddun meippanggep ni hi-gam. <sup>19</sup> Gapuh ni hi-gada ey i-eng-eng ku annel kun hi-gam, et u-unnuden ku hu pinhed mu, ma-lat maieng-eng ida dama et hi-gam ni ebuh hu u-unnuden da.

<sup>20</sup> Beken ni yaddan ebuh eya disipol ku hu nakka pan-iddasali, nem anin idallin mengullug ni hi-gak ni edum ni aggew tep ya daka ituttuddu. <sup>21</sup> Ama, nak ida kaiddasali ma-lat mandadagyum idan emin henin nandagyuman ta. Ey ma-lat mandadagyum itsun emin et kulugen idan eleg mengullug e intu-dak muwak. <sup>22</sup> Peiddeyyaw kudda henin nengipedayawan mun hi-gak ma-lat mandadagyum ida henin hi-gata. <sup>23</sup> Pinhed kun mannengeng ni wada-ak ni hi-gada henin kawedam ni hi-gak ma-lat mandadagyum ida et pengamtaan idan eleg mengullug e intu-dak muwak, niya ma-lat amtaen da e nakappinhed mudda hu kamengullug henin neminhed mun hi-gak.

<sup>24</sup> Ama, pinhed kun yadda kamengullug ni impangulug mun hi-gak ey mekiha-ad idan hi-gak di kabunyan, ma-lat ang-angen da dayaw kun indawat mu la eman ni eleg mu ni letuen eya puyek, tep nakappinhed muwak. <sup>25</sup> Ama, e kakkayyaggud ni peteg, eleg daka amtaddan eleg mengullug ni hi-gam, nem inamta dakan hi-gak. Ey yadda eya kamengullug ni hi-gak ey inamta da e intu-dak muwak. <sup>26</sup> Impeamtak ni hi-gada hu meippanggep ni hi-gam, ey pannananeng kun pehdng, ma-lat pinheden da edum da henin impeminhed mun hi-gak et makidagyummak ni hi-gada."

## 18

### *Ya nampapan dan Jesus*

*(Matthew 26:47-56; Mark 14:43-50; Luke 22:47-53)*

<sup>1</sup> Negibbuh humman ni dasal Jesus et manglaw ida. Inagwat da hu kulukul e Kidron ey dinteng da etan leguntan netamman ni keyew ni olibah. <sup>2</sup> Hi Judas e nengihdul nan Jesus ey naka-amta tu humman ni linawwan da, tep yadman hu daka lallawwid Jesus.

<sup>3</sup> Entanni ey limmaw hi Judas et tuddalli ikuyug hu sindalu niyadda guwalyad Tempol ni intu-dak idan Pharisee niyadda ap-apuddan padin an mappan nan Jesus e nampandilag ida niya nampandipadah ida. <sup>4</sup> Inamta dedan Jesus humman ni mekapkapyan hi-gatu et tu dammuen ida et kantun hi-gaday "Hipa yuka hemmahemmaka?" <sup>5</sup> Kanday "Hi Jesus di Nazareth." Kan Jesus ni hi-gaday "Hi-gak hi Jesus." Hi Judas e nengihdul nan Jesus ey wadaman e kamekieh-ehneng idaddan etan ni sindalu.

<sup>6</sup> Yan nanghelan tun kantuy hi-gatu hi Jesus, ey pinhakkeyey himmunay ida ey netuliddad puyek. <sup>7</sup> Impidwan Jesus mewan et kantuy "Hipa yuka hemmahemmaka?" Ey kanday "Hi Jesus di Nazareth."

<sup>8</sup> Kan Jesus ey "Tam kankuy 'Hi-gak humman.' Hedin hi-gak hu yuka an hemmahemmaka, entan tu ilegal ida eya edum ku et lumaw ida." <sup>9</sup> Huyya inamnuan eman lan inhel tun nunman ni kantuy "Ama, endiddan eyan tuun impangulug mun hi-gak hu mekastigu."

<sup>10</sup> Pinhakkeyey inuknut Peter hu ispadah tu et palngen tu wannan ni tangilan Malkus e bega-en ni Eta-gey ni Padi. <sup>11</sup> Nem inhelan Jesus hi Peter e kantuy "Pebanggad mud asip

eya ispadah mu. Ebbuluten kun manhelheltap, tep huyya pinhed Aman meippahding ni hi-gak.”

<sup>12</sup> Inhel tu humman ey limmaw ida sindalu, ya ap-apu da et yadda guwalyan Tempol et baluden da hi Jesus. <sup>13</sup> Ya nemangulun nengilawwan dan hi-gatu ey yad kad-an Annas e aman ahwan Kayaphas e neputuk ni Eta-gey ni Padi nunman ni toon. <sup>14</sup> Hi Kayaphas hu nanghel idaddal edum tun ap-apun Jews ni kantuy “I-imman hu mettey huyyan hakey ni tuu ma-lat panyaggudan tayun emin, nem ya itsu mettey ni emin ni Jews.”

*Inhaut Peter e inamta tu hi Jesus*

*(Matthew 26:69-70; Mark 14:66-68; Luke 22:55-57)*

<sup>15</sup> Hi Simon Peter et ya etan hakey ni disipol ey neiunud idad nengilawwan dan Jesus. Humman ni hakey ni disipol ey neka-amtan etan ni Eta-gey ni Padi, et ma-nun hi-gatu tep nekilaw nan Jesus di baley etan ni padi. <sup>16</sup> Nem hedini hi Peter, ey nan-eh-ehngeng ngud eheb ni luhud etan ni baley. Limmaw humman ni hakey ni disipol et tu ehlen etan ni biin kamanguwalyad eheb ma-lat pahgep tu hi Peter. <sup>17</sup> Kan nunman ni bii nan Peter ey “Kaw beken ni hi-gam hu hakey ni disipol Jesus?” Kan Peter ey “Beken.”

<sup>18</sup> Nan-apuy ida bega-en et yadda guwalyan Tempol, tep keteketel et mandangdang ida et makidangdang hi Peter ni hi-gada.

*Ya nemistigalan ni Eta-gey ni Padi nan Jesus*

*(Matthew 26:59-66; Mark 14:55-64; Luke 22:66-71)*

<sup>19</sup> Hedin hi Jesus, ey kapanhumalyaan etan ni Eta-gey ni Padi, e tuka mennahmahi hu meippanggep idan disipol tu et yadda intuttuddu tu. <sup>20</sup> Ey kan Jesus ni hi-gatuy “Nandinggel ida intuttudduk di katuuuu tep yad kesimsimban tayun Jews niyad Tempol hu nantuttudduan kun kenayun ey yadman hu kakeemmumungin dakel ni tuu. Endi nak intalun nak intuttuddu. <sup>21</sup> Kele muwak kabistigalan meippanggep ni intuttudduk? Ibegam ida etan ni nangngel ni intuttudduk et inamta da.”

<sup>22</sup> Inhel Jesus huyya ey inamping etan ni guwalyan neitakdul ni hi-gatu et kantuy “Kele hannitan muka penummang ni Eta-gey ni Padi? Kaw endi lispituh muh?” <sup>23</sup> Kan Jesus ni hi-gatuy “Hedin neihla hu inhel ku, ehel mu hu neihlaan ku. Kele muwak ampingen ni nak nanghelan ni makulug?”

<sup>24</sup> Hi Jesus e nanengtun nebabbalud ey impalaw Annas di kad-an Kayaphas e Eta-gey ni Padi.

*Ya pidwatun nengiheutan Peter e inamta tu hi Jesus*

*(Matthew 26:71-75; Mark 14:69-72; Luke 22:58-62)*

<sup>25</sup> Nanengtun kamandangdangdang hi Simon Peter ey kandan hi-gatuy “Kaw beken ni hi-gam hu hakey ni disipol etan ni binelud da?” Inhaut Peter et kantuy “Tam bekennak ngu.” <sup>26</sup> Nem kan etan ni hakey ni bega-en ni Eta-gey ni Padi hi-gatuy “Tam hi-gam etan inang-ang kun kadwan Jesus etan di leguntan natneman ni olibah.” Humman ni bega-en ey neiegi etan ni bega-en ni pinlang Peter tangila tu. <sup>27</sup> Nem inhaut mewan Peter. Pinhakkeyy simmekuk hu manuk.

*Ya nambistigalan Pilate nan Jesus*

*(Matthew 27:1-2, 11-14; Mark 15:1-5; Luke 23:1-5)*

<sup>28</sup> Negibbuh hu nemistigalan Kayaphas nan Jesus ni kamangkewa-wa et ilaw dad baley Pilate e governor. Yadda ap-apun Jews ey eleg ida mekihgep, tep pi-yew ni pekihemmulan dan Piyestah ni Passover hedini umhegep idad baley ni beken ni Jew. <sup>29</sup> Et mukun immehep hi Pilate et kantun hi-gaday “Kaw hipa kan yun nambahulan eyan tuu?” <sup>30</sup> Kandan hi-gatuy “Gullat kedi ngun endi bahul tu et kele mi i-allid kad-an muh?”

<sup>31</sup> Kan Pilate ni hi-gaday “Ilaw yu ngu et yu bistigalan meippuun di linteg yu.” Nem kan idan Jews ni hi-gatuy “Pinhed min ippatak, nem endi kelebnggan min Jews ni memettey ni tuu, tep humman hu olden yun iRome.” <sup>32</sup> Huyyan meippahding hu amnuan eman ni inhel tu lan elaw ni ketteyyan tun kantuy meippettak.

<sup>33</sup> Himmegep hi Pilate di bawang et pahgep tu hi Jesus et kantun hi-gatuy “Kaw hi-gam hu Patul idan Jews?” <sup>34</sup> Kan Jesus ey “Kaw nalpud nemnem mu huttan winu dingngel mud edum ni tuu?”

<sup>35</sup> Kan Pilate ey “Bekennak ni Jew, et humman hu eggak amta hu meippanggep ni hi-gam. Nem hipa dedan impahding mu et daka in-aliddan edum mun Jews niyadda ap-apuddan padid ya?” <sup>36</sup> Kan Jesus ey “Beken ni herin kapan-ap-apuid puyek hu elaw ni nan-ap-apuan ku. Tep gullat ni hanniman et wadan mekidpap ida kamengu-unnud ni hi-gak ma-lat eleg da-ak baluden idan Jesus.”

<sup>37</sup> Kan Pilate ey “Et patul ka tep?” Kan Jesus ey “Makulug huttan ni inhel mu. Huyya gaputun inlian ku eyad puyek et maiungnga-ak ni tuu ma-lat wada inna-nuk ni mengituttuddun makulug. Emin ida neminhed ni mengamtan makulug ey daka kulluga nakka ittuttuddu.” <sup>38</sup> Kan Pilate ey “Inna-nun pengamtaan ni makulug?”

*Ya nengipepateyan dan Jesus*

*(Matthew 27:15-31; Mark 15:6-20; Luke 23:13-25)*

Inhel tu huyya ey immehep mewan di kad-an idan Jews et kantuy “Endi himmak kun bahul tu. <sup>39</sup> Nem katootoon ey wada etan elaw yu e hedin Piyestah ni Passover, man yuka ibbagan hi-gak et nakka ibbukyat hu hakey ni neikelabut. Kaw pinhed yun ibbukyat ku hu Patul yun Jews?” <sup>40</sup> Nem katkuk ida etan tutu-u e kanday “Hi Barabbas hu ibukyat mu, beken tu!” Hi Barabbas ey et-eteng nambahulan tu.

## 19

<sup>1</sup> Et imandal Pilate ni pan-ebligen idan sindalu tu hi Jesus. <sup>2</sup> Immaladda pay hu sindalun hebit et palikuhen da et papngget dad ulun Jesus. Et pebalwasian dan madlang ni kaibbalwasin patul. <sup>3</sup> Limmaw idad kad-an tu ni hineghegnud da e kanday “Dayaw tayu numan eya patul idan Jews!” Inhel da humman ni inamping da.

<sup>4</sup> Immehep mewan hi Pilate et kantuddan Jews ey “Pe-hep ku etan tuu ma-lat pengamtaan yu e endi nakka hemmakan bahul tu.” <sup>5</sup> Et umhep hi Jesus e nanengtun imbalwasi tu etan madlang niya nampenget ni hebit. Kan Pilate ni hi-gaday “Adyah etan tuu.”

<sup>6</sup> Inang-ang idan ap-apuddan padi et yadda guwalya hi Jesus ey katkuk ida e kanday “Ipetak yud krus! Ipetak yud krus!” Kan Pilate ni hi-gaday “Ilaw yu ngu et yu ipetak di krus tep endi nakka hemmakan bahul tu.” <sup>7</sup> Kan idan Jews ni hi-gatuy “Nambahul di elaw mi tep kantuy hi-gatu U-unggan Apu Dios, et humman hu mahapul ni mettey.”

<sup>8</sup> Dingngel Pilate huyya ey nema-man simmakut ni peteg. <sup>9</sup> Himmegep di baley da et ayagan tu mewan hi Jesus et kantun hi-gatuy “Kaw attu nalpuam?” Nem eleg umhumang. <sup>10</sup> Et kan Pilate ey “Kele eleg ka umhumang? Kaw eleg mu amta e wada kelebengan kun mengibbukyat ni hi-gam winu mengippepettak ni hi-gam di krus?” <sup>11</sup> Kan Jesus ni hi-gatuy “Endi kelebengan hedin eleg iebulut Apu Dios hu hipan pehdng mun hi-gak. Et humman hu, yadda etan nengi-lin hi-gak di kad-an mu ey nela-la-med liwat da nem hi-gam.”

<sup>12</sup> Inhel Jesus huyya ey impatnan Pilate mewan ni ibbukyat et, nem ida kamantetekkuk hu Jews e kanday “Hedin ibbukyat mu eya kantun hi-gatu patul ey bellawen dakan Cesar. Tep ya tuun kantuy hi-gatu patul ey buhul Cesar.”

<sup>13</sup> Yan nangngelan Pilate nunya ey impa-hep tu hi Jesus et yumudung hi Pilate di kapanbistigali e kameingngadnin Nedalipeyan ni Batu. (Yad ehel ni Hebrew ey Gabbata.)

<sup>14</sup> Ngannganih ni mandattek hu aggew ni nunman ni pandaddanan dan Piyestah ni Passover ey kan Pilate idan Jews ey “Adyah eya patul yu.” <sup>15</sup> Ey ida kamantetekkuk e kanday “Ilaw yu et yu ipetak!” Kan Pilate ni hi-gaday “Kaw peippettak ku patul yu?” Kan idan ap-apuddan padi ey “Endi edum ni patul mi! Hi Cesar ni ebuh.”

*Ya nengipetakan dan Jesus di krus*

*(Matthew 27:32-44; Mark 15:21-32; Luke 23:26-43)*

<sup>16</sup> Et iebulut law Pilate ni ellan idan Jews hi Jesus et da paipetak idan sindalun Rome di krus. <sup>17</sup> Impapehan dan Jesus etan krus tu et ilaw dad duntug e Golgotah e ya keibbellinan tu ey heni genit ni ulu ang-ang tu. <sup>18</sup> Impatak idan sindalu hi Jesus et igawwa dad nambattanan idan dewwan balud ni neipetak dama.

<sup>19</sup> Wada impaitudek Pilate ni sinyal et ipetak dad ta-pew ni ulun Jesus di krus. Ya neitudek ey kantuy “Huyya hi Jesus di Nazareth e Patul idan Jews.” <sup>20</sup> Neitudek humman di tellun ehel, yad Hebrew, yad Latin niyad Greek. Ey dakel ida Jews ni nemidbid nunman, tep neihipud di Jerusalem humman ni nengipetakan dan Jesus. <sup>21</sup> Entanni ey kan idan ap-apuddan padi nan Pilate ey “Hullulim eman neitudek ni ‘Patul idan Jews’ et kammuy ‘Huyyan tuu ey kantuy hi-gatu hu patul idan Jews.’” <sup>22</sup> Nem kan Pilate ey “Eggak hulluli humman ni intudek ku!”

<sup>23</sup> Yan nengipetakan idan etan ni epat ni sindalu nan hi Jesus ey illa da balwasi tu et i-peng da. Neki-la da etan andukkey ni balwasi tun inebel ni endi kugut tu. <sup>24</sup> Et iuungbal da e kanday “Eleg tayu bi-kia huyya, nem ibinnunut tayu et ngenamung ni hi-gatsu mengella.” Huyya inamnuan etan ni neitudek ni ehel Apu Dios e kantuy “In-epeng da balwasik niya iminnunut da hu andukkey ni balwasik.” \*

\* 19:24 19:24 Psalm 22:18

Et humman tu-wangu impahding idan etan ni sindalu.

<sup>25</sup> Wadaddadman di inan Jesus, hi agin inetu e hi Maria e ahwan Kelopas et hi Maria Magdalena. Immehneng idad neihnup di krus ni neipetakan Jesus. <sup>26</sup> Inang-ang Jesus hi inetu e kaman-eh-ehng di kad-an etan ni nakappinhed tun disipol tu ey kantuy "Ina, yan nunya ey ibilang mu hi ditten u-ungngam." <sup>27</sup> Et kantu daman etan ni disipol ey "Ibilang mu hi ditten hi inam." Neipalpun nunman ni aggew ey ingkuyug nunman ni disipol hi inan Jesus et manha-ad di baley da.

*Ya neteyyan Jesus*

(*Matthew 27:45-56; Mark 15:33-41; Luke 23:44-49*)

<sup>28</sup> Inamtan Jesus e ginibbuh tu law ni emin hu pinhed Apu Dios ni meippahding et kantuy "Na-wew wak." Huyya inamnuan ni impatudek Apu Dios. <sup>29</sup> Wadadman hu pimmaid ni meinnum et ita-mel dadman hu bulak et iplat dad paul et itumuk dad bungut Jesus. <sup>30</sup> Sinamtaman Jesus ey kantuy "Negibbuh ngunuk." Ey inyuung tu ey netey.

<sup>31</sup> Eleg pinhed idan ap-apun Jews ni mannenneng ida etan neipetak di krus ni nunman ni aggew ni pandaddanan da, tep yan kewa-waan tu ey Sabaduh e daka pakangngillinan peteg tep Piyestah ni Passover. Et lumaw idad kad-an Pilate ni mengibbega hedin dammutun hehpungen da hu heliddan neipetak ma-lat anggegannuy netey ida et dadda ikulung. <sup>32</sup> Et umitu-dak hi Pilate ni sindalu et da hepungen hu heliddan etan ni dewwan edum Jesus ni neipetak. <sup>33</sup> Nem hedin hi Jesus, da ang-angen ey netey et eleg da hepungen heli tu. <sup>34</sup> Nem hinudpak ni hakey ni sindalun pahul tu hu taglang Jesus ey neukat kuheyaw niya danum. <sup>35</sup> Emin ida huyyan nekapkanya ey makulug tep inang-ang ku, et mukun intudek ku ma-lat mangulug kayu. <sup>36</sup> Huyya inamnuan ni impatudek Apu Dios ni kantuy "Endi an mehpung ni tu-ngal tu." <sup>37</sup> Ya hakey mewan ni immamnun impatudek Apu Dios ey ya etan kantuy "Ang-ang-angen dalli etan hinudpak dan pahul." †

*Ya neikulungan Jesus*

(*Matthew 27:56-61; Mark 15:42-47; Luke 23:50-56*)

<sup>38</sup> Wada hi Joseph e iArimatea ni limmaw di kad-an Pilate et tu ibega e ellan tu annel Jesus ma-lat tu ikulung. In-abulut Pilate et alen Joseph etan annel Jesus et tu ikulung. Hi Joseph hu hakey ni kamengullug nan Jesus, nem eleg tu peam-amta, tep kaumtakut idan Jews. <sup>39</sup> Hi Nikodemus e hi-gatu la etan limmaw di kad-an Jesus ni hileng ey in-ali tu dama bangbanglun kameihha-ad di annel ni netey e ngannganih ni neliman kiloh. <sup>40</sup> Et mambaddang idan nengiha-ad nunman ni bangbanglud annel Jesus et libutan dan mablaha ni luput, tep humman elaw idan Jews ni daka pemapteke ni annel ni meikkullung. <sup>41</sup> Ya etan di neihnup di nengipetakan dan Jesus, ey wadadman hu leguntan wada pakekapan kulung ni endi ni neikulung diman. <sup>42</sup> Et gapu tep yan nunman ni aggew ey pandaddanan dan Piyestah ni Passover ey yan kewa-waan tu ey Sabaduh ey ingkulung dadman hi Jesus tep neihnup.

## 20

*Ya netagwan Jesus*

(*Matthew 28:1-8; Mark 16:1-8; Luke 24:1-12*)

<sup>1</sup> Kamangkewa-wan Linggu ey limmaw hi Maria Magdalena di kulung Jesus ey inang-ang tu e naglid etan batun neitengeb di kulung. <sup>2</sup> Et mambebossik ni limmaw di kad-an Peter et ya etan nakappinhed Jesus ni disipol tu et kantun hi-gaday "Inla da annel Apu Jesus di kulung, tawwey ngu nengilawwan da!"

<sup>3</sup> Et besiken di Peter ni limmaw di kulung. <sup>4</sup> Linakthingan etan ni hakey ni disipol hi Peter et mabukul ni dimmateng di kulung. <sup>5</sup> Nem eleg humgep. Inhi-dip tu kulung ey attukaw hu annel Jesus, ebuh hu libut ni annel tun wada. <sup>6</sup> Dimmateng dama hi Peter et ipa-yuh tun humgep. Ey inang-ang tu dama libut ni annel Jesus <sup>7</sup> et ya libut ni ulu tu. Ya etan libut ni ulu tu ey neappil ni neludun. <sup>8</sup> Et humgep dama law etan hakey ni disipol et ang-angen tun emin ey kinulug tu e netagwan hi Jesus. <sup>9</sup> Tep ingganah nunman ey eleg da awatan etan impatudek Apu Dios ni kantuy metegguan hi Jesus.

<sup>10</sup> Et umenamut ida.

*Ya nampeang-angan Jesus nan Maria Magdalena*

(*Matthew 28:9-10; Mark 16:9-11*)

<sup>11</sup> Hedin hi Maria, ey hini-yan dad kulung e kaumnanginangih. Inhi-dip tu bawang ni kulung <sup>12</sup> ey inang-ang tu dewwan anghel e mablaha balwasi da e yimmudung idad

neiha-adan la nin annel Jesus. Yimmudung etan hakey ni anghel di petek ni nengiuullan Jesus, ey ya etan hakey di andayyan.

<sup>13</sup> Kandan Maria ey “Kele kaka umnanginangih?” Kantun hi-gaday “Tep illa da annel Apu Jesus ey eggak amta nengilawwan da.” <sup>14</sup> Inhel tu huuya et manwingi ey wada inang-ang tun tuun immehneng di dingkuggan tu. Hi Jesus humman, nem eleg tu immatunan. <sup>15</sup> Et kan Jesus ni hi-gatuy “Kele kaka mannengngih? Hipa muka hemmahemmaka?” Kan Maria na-mu ngu nem hi-gatu etan kamampaptek idan keyew ni neitnem diman et kantun hi-gatuy “Apu, hedin hi-gam hu nengalan annel Jesus, itudum hu mu nengiha-adan et nak alen.”

<sup>16</sup> Himmapiit hi Jesus et kantuy “Maria.” In-ang-ang Maria ey inimmatunan tu et kantuy “Rabboni.” (Huuya ey ehel ni Hebrew e ya keibbellinan tu ey “Mittuduh.”)

<sup>17</sup> Kan Jesus ni hi-gatuy “Entan tu itetenged ni hi-gak, tep eggak ni lumaw di kad-an Ama. Lakkay kumad kad-an idan kamengullug ni hi-gak e impan-agik et ehelen mun hi-gada e mambanggaddak di kad-an Ama e Ameyu dama ey Dios ku niya Dios yu.”

<sup>18</sup> Et lumaw hi Maria Magdalena di kad-an idan disipol Jesus et kantuy “Inang-ang ku hi Apu Jesus.” Et ehlen tun hi-gada inhel Jesus.

*Ya nampeang-angan Jesus idan disipol tu*

(Matthew 28:16-20; Mark 16:14-18; Luke 24:36-49)

<sup>19</sup> Mahmahdem nunman ni Linggu ey neamung ida disipol Jesus e inlekbi da tep ida kaumtatakut idan ap-apuddan Jews. Nem pinhakkeyey wada hi Jesus e immehneng di kad-an da et kantun hi-gada ey “Meweddian hi-gayu linggep.” <sup>20</sup> Et peang-ang tu liput idan ngamay tun nepatak et ya taglang tun nehudpak. Ey immamleng idan peteg ni nenang-angan dan Apu Jesus.

<sup>21</sup> Kan Jesus mewan ey “Meweddian hi-gayu linggep. Ittu-dak dakeyu henin nengitudakan Aman hi-gak et kayu mantuttuddu.” <sup>22</sup> Ginibbuh tun inhel huuya ey hineng-aban tudda et kantuy “Dawat yu Ispirituh Apu Dios. <sup>23</sup> Ya tuun mantuttuyyun liwat tu, ey kanyuy ‘Pessinsahan Apu Dios hu liwat mu,’ ey makulug ni pessinsahan tu. Nem ya tuun eleg mantuttuyyun liwat tu, ey kanyuy ‘Eleg pessinsahin Apu Dios hu liwat mu,’ ey makulug ni eleg tu pessinsahi.”

*Ya nengipeang-angan Jesus ni ngamay tun Tomas*

<sup>24</sup> Hi Tomas e nginedanan dan hi Dupi-il e hakey ni disipol Jesus, ey eleg tu ang-angen hi Jesus, tep endin nunman ni inlian tu. <sup>25</sup> Kan idan edum tun disipol ey “Inang-ang mi hi Apu Jesus.” Nem kantuy “Pakkadek ang-angen ku et tedeken ku hu liput ni nepatak di ngamay tu niya mahapul ni keppaen ku etan nehudpak di taglang tu et hannak kuluga e netagwan.”

<sup>26</sup> Nelabah walun aggew ey neamung ida mewan hu disipol Jesus e wada law hi Tomas ni nunman. Neilekbi habyen, nem endi mewan maptek ey wada hi Jesus e immehneng di kad-an da. Kantuy “Meweddian hi-gayu linggep.”

<sup>27</sup> Et kantun Tomas ey “Ang-ang mu eya ngamay ku et tedeken mu liput ku. Kapam pay eya nehudpak di taglang ku. Entan law pandewadewam, nem kulug mu e netagwannak.” <sup>28</sup> Ey kan Tomas ni hi-gatuy “Makulug e hi-gam hu Ap-apu, niya hi-gam hu Dios ku!” <sup>29</sup> Kan Jesus ni hi-gatuy “Kinulug muwak law tep inang-ang muwak. Nem man-am-amleng ni peteg hu tuun kamengullug ni hi-gak, anin ni eleg tuwak ang-angen.”

*Ya gaputun neitudkan emin eyan neitudek*

<sup>30</sup> Dakel pay hu impahpahding Jesus ni miracles ni eleg maitudek eyad libluh. <sup>31</sup> Nem neitudek ida huuya ma-lat kulugen yu e hi Jesus hu pinutuk Apu Dios ni mengippaptek ni tuu niya ma-lat kulugen yu e hi-gatu hu U-unggan Apu Dios et meidwatan kayun biyag ni endi pappeg tu tep ya yuka pengullug ni hi-gatu.

## 21

*Ya nampeang-angan Jesus idan ni pitun disipol tu*

<sup>1</sup> Entanni ey nampeang-ang mewan hi Jesus idan disipol tud kad-an ni baybay di Tiberias. Heninnuy neipahding: <sup>2</sup> Wadad Simon Peter, hi Tomas e daka ingngadnin hi Dupi-il, hi Nathaniel di Kanah di Galilee, yadda etan dewwan u-unggan Sebedi et yadda dewwan edum dan disipol Jesus. <sup>3</sup> Kan Peter ey “Umlawwak ni an menebbukul ni deleg.” Ey kan idan edum tuy “Mekillaw kamin hi-gam.” Et mambangkadda et ilallabbi dan nantabukul, nem endin hekey tinebukul da.

<sup>4</sup> Kamangkewa-wa ey wada hi Jesus e kaman-eh-ehneng di gilig ni baybay, nem eleg da immatunan e hi-gatu humman. <sup>5</sup> Immehel ni hi-gada e kantuy “Kaw wada sinebukul yu e aaggik?” Kandai “Tam endi nisin hekey.”



<sup>6</sup> Kantun hi-gaday “Bekah yu tabukul yud appit ni winannan ni bangka et dakek ellan yu.” Et bekahan da tabukul dadman ey dakek numan hu netabukul ni deleg et eleg da hangguyud hu tabukul di bangka tep mebel-at.

<sup>7</sup> Ey kan etan ni disipol ni nakappinshed Jesus nan Peter ey “Hi-gatu hi Apu Jesus.” Dingngel Peter humman ey nambalwasi tep nammu-lih et dumep-ah et lumaw di kad-an Jesus. <sup>8</sup> Nanha-ad ida edum di bangka e daka pan-igguyud hu tabukul ni napnun deleg. Neihnup idad gilig ni baybay e wada hanggatut na-mun ebuh ni mitroh hu kadinawwi da.

<sup>9</sup> Dimmakal ida ey inang-ang da ngimmaban apuy ni kapampengittangtangan Jesus ni deleg ey wada sinapay. <sup>10</sup> Kan Jesus ey “I-li kayun deleg ni sinebukul yu.”

<sup>11</sup> Limmaw hi Peter di bangka et idekal tu etan tabukul. Napnu tabukul ni etta-teng ni deleg e hanggatut et nelima et tellu. Mebel-at etan tabukul tep napnun deleg, nem eleg mebi-ki. <sup>12</sup> Kan Jesus ni hi-gada ey “Ikeyuy et mangan itsu.” Ida kaum-e-gen ni mengibeggan ngadan tun nenang-angan da, tep inamta da e hi-gatu hi Apu Jesus. <sup>13</sup> Illa tu etan sinapay niya deleg et iwatwat tun hi-gada. <sup>14</sup> Huyya pitlutun nampeang-angan Jesus idan disipol tu neipalpun netagwan tu.

*Ya nan-ung-ungbalan di Peter nan Jesus*

<sup>15</sup> Immipah ida ey kan Jesus nan Simon Peter ey “Simon e u-ungngan John, kaw e-etteng impeminhed mun hi-gak nem yadda eya edum mu?” Kantun Jesus ey “Em, Apu. Inamtam e pinhed dakan hi-gak.” Kan Jesus ni hi-gatuy “Ipaptek mudda kamengullug ni hi-gak henin kapemaptek ni kamampattul ni impah ni kalneroh.”

<sup>16</sup> Impidwan Jesus e kantun Simon ey “Simon e u-ungngan John, kaw pinhed muwak?” Kan mewan Peter ey “Em, Apu. Inamtam e pinhed dakan hi-gak.”

Kan mewan Jesus ni hi-gatuy “Ipaptek mudda kamengullug ni hi-gak henin kapemaptek ni kamampattul ni impah ni kalneroh.”

<sup>17</sup> Impitlun Jesus et kantuy “Simon e u-ungngan John, kaw pinhed muwak?” Makaggeh law nennem Simon Peter tep kaippenidpidwan Jesus ni e-helen humman ni hi-gatu et kantun Jesus ey “Apu, inamtam ni emin. Inamtam et pinhed dakan hi-gak.”

Kan Jesus ni hi-gatuy “Ipaptek mudda kamengullug ni hi-gak henin kapemaptek ni kamampattul ni impah ni kalneroh. <sup>18</sup> Dengel mu eya makulug ni e-helen ku. Yan muka penikkeni, ey nambalwasi ka ni limmaw kad pinhed mun lawwan. Nem hedin meamma kalli, ey iddedew mulli ngamay mu et baluden ni edum ni tuu et ilaw dakad eleg mu pinhed ni lawwan.” <sup>19</sup> Humman inhel Jesus tep pinhed tun amtaen Peter hu elaw alin ketteyyan tu ma-lat kaideyawan Apu Dios. Et kan Jesus nan Peter ey “U-unnud muwak.”

*Ya nanghelan Jesus nan hi Peter ni meippanggep nan John*

<sup>20</sup> Nanligguh hi Peter ey inang-ang tu etan disipol ni nakappinshed Jesus e kameitu-tunud ni hi-gada. Hi-gatu la hu neitakdul nan Jesus ni nengannan dad Jerusalem, et ibega tun hi-gatu hedin hipan hi-gada hu mengihdul ni hi-gatu. <sup>21</sup> In-ang-ang Peter nunman ni disipol et kantun Jesus ey “Apu, hipalli dama mekapkapyan hi-gatu?”

<sup>22</sup> Kan Jesus nan Peter ey “Kaw hedin kangkuy mannenneng alin mategu ingganah ni pambangngadan ku, ey kaw hipa humman ni hi-gam? U-unnud muwak.”

<sup>23</sup> Gapun nunyan inhel Jesus ey nanhinap e kanday eleg ali mettey humman ni disipol. Nem beken humman ni inhel Jesus, tep kantun ebuh ey “Kaw hedin kangkuy mannenneng alin mategu ingganah ni pambangngadan ku, ey kaw hipa humman ni hi-gam?”

<sup>24</sup> Hi-gak hu disipol Jesus ni nenang-ang ni emin idan nunyan neipahding et itudek ku. Ey inamta mi e makulug ida huyyan intudek ku.

*Ya nanggillig ni neitudek*

<sup>25</sup> Dakek ida impahpahding Jesus ni eleg maitudek. Tep gullat ni ittudek idan emin et umkulang pay eya puyek ni pengihha-adan idan libluh ni meittudek.

## Ya Impahpahding Idan Apostles

<sup>1</sup> Agik Teofilo,

Yad etan di nemangulun intudek kun hi-gam ey inhel kud man ni emin hu impahpahding Jesus niya intuttuddu tu eman ni laputu <sup>2</sup> ingganah eman ni nengipeenamutan Apu Dios ni hi-gatud kabunyan. Eleg ni umenamut di kabunyan, ey intuttuddu tuddan pinili tun apostles tu hu tugun ni nalpun Ispirituh Apu Dios ni pinhed tullin pehpehding da. <sup>3</sup> Neipalpu eman ni netagwan tu ingganah ni linawwan tu lad kabunyan ey nampeang-ang idan apostle tun na-pat ni aggew niya dakel impahding tun mengippeamtan hi-gada e makulug ni netagwan. Ey intuttuddu tun hi-gada hu meippanggep ni nan-apapuan Apu Dios. <sup>4</sup> Yan eman ni pinhakkey ni daka pengngannin emin, ey kantun hi-gaday "Entan tu ni hi-yan hu Jerusalem et hegeden yu etan inhel kun impakulug Ama ni iddawat tun hi-gayu. <sup>5</sup> Hi John ey danum hu impemnyag tuddan tuu, nem eleg melebbah hu pigan aggew ey mebenyagan kayun Ispirituh Apu Dios." \*

*Ya inenamutan Jesus di kabunyan*

<sup>6</sup> Yan pinhakkey ni nampeang-angan Jesus ida apostles tu ey kandan hi-gatuy "Apu, kaw yan nunya law hu pengibbangadan mun gubilnu mid Israel?"

<sup>7</sup> Kan Jesus ni hi-gaday "Ngenamung hi Apu Dios ni nuntan tep hi-gatu Ap-apun emin, et eleg mahapul ni amtaen yu hedin pigan tu. <sup>8</sup> Nem dewwatan yulli hu Ispirituh Apu Dios et mewedda kabaelan yun mengituttuddun meippanggep ni hi-gak di Jerusalem, yad Judea, yad Samaria, niyad emin di kebebbbley di puyek."

<sup>9</sup> Inhel Jesus huuya ey inang-ang da e nampalaw lad kabunyan ey pinhakkeyey hinenian ni kulput et eleg law meang-ang. <sup>10</sup> Nanengtun daka itatangaw di kabunyan e daka peunnuunnudi la ey pinhakkeyey wadadda dewwan tuun nambalwasin mablak ni immehng di kad-an da. <sup>11</sup> Kan idan nunman ni dewwan tuu ey "Hi-gayun tuud Galilee, kele yuka itatangaw di kabunyan? Hi Jesus ni inang-ang yun limmaw lad kabunyan ey mambanggad ali. Ya elaw ni inang-ang yun linawwan tu lad kabunyan ey henin nunman ali mewan elaw tu hu pambangngadan tu."

*Ya nemilian dan neihullul nan Judas*

<sup>12</sup> Yad Duntug e Olibah hu neipahdingan nunya. Negibbuh humman et mambangngad idad Jerusalem. Humman ni duntug ey wada han kilometro ni ebu ni kadinawwi tud Jerusalem. <sup>13</sup> Dimmateng idad Jerusalem et meni-weh idan himmegep etan di kuwalthu ni meikkadwan gladuh etan ni baley ni daka panhahha-adi. Humman idan himmegep di bawang ey hi Peter, hi John, hi James, hi Andrew, hi Philip, hi Tomas, hi Bartolomew, hi Matthew, hi James e u-ungngan Alpaesus, hi Simon e Zealot, ni hi Judas e enak James. <sup>14</sup> Kenayun ni ida kameemmung ni mandasal. Anin idan bibi-i, hi inan Jesus et yadda agi tun laki ey ida kameki-emmung ni mekiddasal ni hi-gada.

<sup>15</sup> Ya eman ni pinhakkey ni neamungan idan kamengullug e limmaw idan hanggatut et dewampulu ey immehng hi Peter et kantun hi-gaday <sup>16</sup> "Hi-gayun kaegiegi, immamnu tu-wangu eman inhel lan David e patul ni impeamtan Ispirituh Apu Dios ni hi-gatun meippanggep Judas e nengipenguluddan guwalyan Tempol ni mampap nan Jesus. <sup>17</sup> Hi Judas hu hakey ni hi-gamin hampulu et dewwan apostles, tep hi-gatu dama hakey ni nepilin mekibbaddang di ngunu mi."

<sup>18</sup> (Ya etan tandan Judas ni nengihudulan tun Jesus ey neigtang di puyek e yadman hu nampuhuhan tu et ma-gah et mebeghi egeh tu. <sup>19</sup> Emin ida tutu-ud Jerusalem ni nangngel nunman ni neipahding ey nginadnan da humman ni puyek ni Akeldama e ya keibbellinan tu ey Puyek ni Nekuheyawan.)

<sup>20</sup> Intuluy Peter ni immehel e kantuy "Wada inhel Apu Dios ni impaitudek tud liblul ni Psalms ni meippanggep nan Judas e kantuy 'Mebe-ew alin ingganah hu baley tu tep endilli an manha-ad.' †

Ya pay hakey ni neitudek ey kantuy 'Wadalli meihullul ni hi-gatud saad tu.' ‡

<sup>21-22</sup> Et humman gaputun mahapul ni wada hakey ni meihullul nan Judas, et pan-e-dum min an mengituttuddun neteyyan niya netagwan Jesus. Nem mahapul ni ya etan nekikillaw ni hi-gatsud Jesus meipalpu eman ni nemyagan John ni hi-gatu ingganah ni netagwan tu et umenamut di kabunyan."

\* 1:5 1:5 Ang-ang yu John 14:16-17 et ya 16:7-15 † 1:20 1:20 Psalm 69:25 ‡ 1:20 1:20 Winu "ngunu tu." Psalm 109:8

<sup>23</sup> Wadadda etan dewwan pinutuk dan pampillian da e hi Joseph Barsabas e kandan hi Justus et hi Mathias. <sup>24</sup> Nandasal ida e kanda dasal day "Apu Dios, inamtam ni emin hu nemnem ni tuu, et humman hu mika ibbagan hi-gam hedin hipadda eyan dewwan tuu hu pinilim <sup>25</sup> ni meihhullul nan Judas e nengiwelak ni kina-apostoles tu et lumaw di neiappitan tu dedan." <sup>26</sup> Negibbuh ni nandasal ida et ibubunut da ey hi Mathias hu nepilin meihhullul et hi-gatu law hu nei-dum ida etan ni hampulut hakey ni apostles Jesus.

## 2

### *Ya newadaan ni Ispirituh Apu Dios idan kamengullug*

<sup>1</sup> Nedatngan hu aggew ni Pentecost ey neamung idan emin hu kamengullug. <sup>2</sup> Ey pinhakkeyey wada kamabungngug e heni na-let ni dibdib ni nalpud kabunyan ey napnu etan bawang ni baley ni neamungan da. <sup>3</sup> Entanni ey nei-peng ni hi-gada heni tebel ni apuy. <sup>4</sup> Pinhakkeyey newadan hanhakkey ni hi-gada hu Ispirituh Apu Dios et daka pan-ihhapit hu nambakbaklang ni hapit tep humman ni Ispirituh hu nengipehapit ni hi-gada.

<sup>5</sup> Yan nunman ni tsimpuh ey wadaddad man Jerusalem hu kamengullug nan Apu Dios ni Jews ni nangkulpud kebebbbley di puyek. <sup>6</sup> Yan nangngelan idan tuun nunman ni kamabungngug ey neamung idan emin. Ey natngadda tep dingngel da e ya ehel da hu kapan-ihhapit idan nunman ni kamengullug nan Jesus. <sup>7-8</sup> Wada hakkey ida etan ni tuu ey kanday "Tam iGalilee ida kaya. Nem kele amta da nambakbaklang ni hapit tayu? <sup>9-11</sup> Ma-nu tep Jews itsun emin, nem nambakbaklang hapit tayu tep nanhihin-appil ni bebley hu nalpuan tayu. Wadaddan hi-gatsu hu iPartia, iMedes, iElam, iMesopotamia, iJudea, iCappadocia, iPontus, iAsia, iPaligya, iPampilya, iEgypt, ey yadda iLibya ni neihnpud di Cyrene. Wadadda pay edum tayun nalpud Rome, yad Crete et yad Arabia. Ey wadadda edum tayun beken ni Jews, nem ida kamengung-unnud ni Tugun Moses. Ey kele daka pan-ihhapit di hapit tayun daka pampengitudduin kamengipetngan impahding Apu Dios?" <sup>12</sup> Ida kametemman nunman ni neipahding et wada hakkey ni hi-gada ey kanday "Hipa na-mu elaw tu huuya?"

<sup>13</sup> Nem wadadda edum ni dadda kaheghegnuda e kanday "Nebuteng ida mannuman humman ni tutu-u."

### *Ya intuttuddun Peter*

<sup>14</sup> Entanni ey immehngeng hi Peter et yadda etan hampulut hakey ni edum tun apostles et eleten tun umhel idan katuutuu e kantuy "Hi-gayuddan edum min Jews niya hi-gayuddan nampambebley di Jerusalem, pakadngel yu et awatan yu eya e-helen kun hi-gayu. <sup>15</sup> Kanyuy nebuteng kami, nem eleg tep kaw wada kamebutteng ni hanneyan ta-nang tu? <sup>16</sup> Huuyan kamekapkapyu hu inamnuan eman ni inhel lan Joel e prophet ni inhel Apu Dios ni kantuy

<sup>17</sup> 'Yallin udih ni aggew ey peellik hu Ispirituh kud emin ni tuu et peamtaddallin u-ungnga yuddan bibi-i niyadda lalakki hu pinhed kun e-helen ni hi-gayu. Wadalli peang-ang kuddan kamenikken niya pei-innep kuddallin nangkea-amma hu mekapkapyan edum ni aggew. <sup>18</sup> Anin idallin bega-en kun lalakki niyadda bibi-i et peellik ni hi-gada hu Ispirituh ku et peamta da hu hipan e-helen ku. <sup>19</sup> Wadalli peang-ang kud kabunyan niyad puyek ni ketngaan ni tuu. Ey wadalli ang-angen yun kuheyaw, ya apuy niya ahuk. <sup>20</sup> Me-ngetan ali aggew niya mambalin alin heni kuheyaw hu bulan et han medatngi humman ni anggetakkut ni aggew ni gintud kun penuwetan kuddan tuud puyek. <sup>21</sup> Et emin ali hu mambeggan baddang ni hi-gak ni nunman ni aggew ey mehellakniban.' " \*

<sup>22</sup> Intuluy Peter e kantuy "Hi-gayuddan tuud Israel, dengel yu eya e-helen kun hi-gayu. Hi Jesus di Nazareth ey indawat Apu Dios ni hi-gatu et-eteng ni kabaelan tu et ipahding tudda dakel ni miracles ni kaketngain tuu et yadda edum ni pengi-immatunan e hi-gatu intu-dak Apu Dios. Inamta yu huuya tep inenang-ang yu. <sup>23</sup> Nem impapetey yu huuyan hi Jesus idan tuun nangkeliwatan e impatak dad krus, nem inamta dedan Apu Dios humman ni impahding yu, tep humman hu planuh tu. <sup>24</sup> Nem sinegun Apu Dios et mategun nunya, tep eleg mabalin ni an mannananeng ni netey. <sup>25</sup> Huuya inamnuan ni intudek lan David e kantuy

'Inamtak e wadan hi-gak hi Apu Dios ni kenayun, et humman hu nakka makaddinnel ni tuka pemaptek ni hi-gak. <sup>26</sup> Et humman hu, nakka man-am-amleng niya nakka itekkutekkuk hu nakka penaydayaw ni hi-gam e Apu Dios, tep nakka makaddinnel

\* 2:21 2:21 [17-21] Joel 2:28-32

ni tegguan muwak alin ketteyyan ku. <sup>27</sup> Tep inamtak e Apu et eleg muwak nayunad kulung, tep eleg mu pinhed ni nak mebwel di diman, tep pinutuk muwak ni bega-en mu. <sup>28</sup> Impeamtam ni hi-gak e tegguen muwak ni ketteyyan ku. Et nakka man-am-amleng tep wada kan kenayun ni hi-gak.' " †

<sup>29</sup> Intuluy Peter ni immehel e kantuy "Agik ida, pinhed kun amtaen yu e beken hi David hu tuka pan-e-hela. Tep hi David e ammed tayu ey netey dedanggu la, et nanengtun immen etan gungat tu eyad kad-an tayu. <sup>30</sup> Hi David ey hakey ni prophet lan Apu Dios, et humman hu amta tu hu inhel Apu Dios e kantuy 'Wadalli hu hakey ni melpud helag David ni meihhullul ni hi-gatun pan-ap-apun emin ni tuu.' Et huyya hu inamnuan tu. <sup>31</sup> Inamtan David mewan huyyan ketegguan Jesus Christo et mukun inhel tu la e kantuy 'Eleg mena-yun hi Christo di kulung et eleg mebwel hu annel tu.'

<sup>32</sup> Hi Jesus hu tuka pan-e-helan sinegun Apu Dios ey mika ihhudut e makulug tep inang-ang mi. ‡ <sup>33</sup> Sinegu tu et paenamut tud kabunyan et yumudung di winannan tu et idwat tun hi-gatu hu kelebengan tun mengippeellin Ispirituh Apu Dios ni hi-gami e humman la eman impakulug tu. Huyyan inlian ni Ispirituh Apu Dios hu dingngel yu niya inang-ang yun nunya. <sup>34-35</sup> Eleg lumaw hi David di kabunyan, nem intudek tu dedan huyyan nunman e kantuy:

Kan Apu Dios nan Apuk ey 'Yudung kad winannan ku ingganah peka-apputen kuddan emin hu buhul mu.' "

<sup>36</sup> Kan mewan Peter ey "Hi-gayun edum kun Jews, pinhed kun peamtan hi-gayu e ya etan impapetey yu e hi Jesus ey hi-gatu pinutuk Apu Dios ni Ap-apu tayu niya Christo ni mengippaptek ni emin ni tuu!"

<sup>37</sup> Dingngel idan tuu huyya ey maggeh ni peteg hu nemnem da, et kandan Peter et yadda edum tun apostles ey "Hi-gayun aaggi mi, hipa tep law pehding mi?"

<sup>38</sup> Kan Peter ni hi-gaday "Mahapul ni mantuttuyyu kayun emin ni liwat yu ey kullugen yu hi Jesus Christo niya pebenyag kayu ma-lat mepesinsahan hu liwat yu et dawaten yu hu Ispirituh Apu Dios. <sup>39</sup> Tep impakulug Apu Dios humman ni hi-gatsu, yaddalli u-ungga tayu niyaddan emin hu katuuuud kebebbebley ni pambalin tullin mengullug ni hi-gatu."

<sup>40</sup> Huyyadda inhel Peter ni hi-gada et tugunen tudda e kantuy "Abulut yu hi Jesus ni mengippaptek ni hi-gayu niya iwelak yudda lawah ni elaw yu ma-lat eleg dakeyulli kastiguen Apu Dios ni pengastiguan tuddan tuun nangkeliwtan!" <sup>41</sup> Yan nunman ni aggew ey limmaw idan tellun libu hu tuun nengulug ni inhel Peter et pebenyag ida et mei-dum idad kamengullug nan Jesus. <sup>42</sup> Et mekiammuammung idan man-eddal ni kaituttudduddan apostles, nekidasal idan hi-gada niya nekikan idan hi-gadan daka penginnemnemine neteyyan Jesus.

*Ya elaw idan nengulug nan Jesus ni laputu*

<sup>43</sup> Dakel hu impahding idan apostles ni miracles et yadda edum ni pengi-immatanun ni et-eteng ni kabaalan Apu Dios et ida kametngan emin hu tuun nenang-ang-ang idan nunman. <sup>44</sup> Emin ida etan kamengullug ey kenkenayun ni ida kameemmuemmung ey ida kaman-uunnud ni emin. Emin hu daka lelmua ey daka iddawsu edum da. <sup>45</sup> Hedin wada kahapulan ni edum da, ida kaum-igtang hu edum ni puyek da et ya hipan tenged da, et ya pihhuh ni nangatngan da ey daka iddawsidda kamanheppul, meipuun di kahapulan da. <sup>46</sup> Kenkenayun ni ida kameemmuemmung di Tempol. Ey hedin negibbuh idan nandayaw ey ida nengan di baley ni hakey ni hi-gada. Ey et-eteng salamat dan Apu Dios niya ida kaman-am-amleng ni manhin-e-kan ni kennen da. <sup>47</sup> Emin ida ey daka daydayawa hi Apu Dios ey katettebaladdan tuu. Kewa-wa-wa ey ida kamangke-dumi hu kamengullug ni kahellaknibin Apu Dios.

### 3

*Ya na-kalan ni pi-day etan ni tuu*

<sup>1</sup> Hakey ni hambatanganan ey limmaw di Peter nan John ni an mandasal di Tempol, tep hambatanganan hu kapandasalin tuudman. <sup>2</sup> Ey wada etan lakin nedahuy ngu dedan ni neiungngaan tu etan di Kakkayyaggud ni Ehebe di Tempol. Wada kamengillaw ni hi-gatud man ni kewa-wa-wa et an mangkekkeddew ni pihhuh idan kamelebbah ni kaumlaw di Tempol. <sup>3</sup> Kamangkelebbah di Peter nan John ey kamangkekdedew ni pihhuh.

<sup>4</sup> In-ang-ang dan hi-gatu et kan Peter ey "Tang-ang mun hi-gami." <sup>5</sup> In-ang-ang tun hi-gada ey kantu na-mu ngu nem iddawtan dan pihhuh, <sup>6</sup> nem kan Peter ni hi-gatuy "Endi katteg pihhuh min iddawtan min hi-gam, nem baddangan daka. Imay, ehngeng ka

et dumlan ka tep binaddangan dakan Jesus Christo di Nazareth.”<sup>7-9</sup> Et tengenden Peter hu wannan ni ngamay tu et peehneng tu ey pihakkeyey kayyaggud law heli tu ey na-let law ni umdalan et mekihgep ni hi-gadad Tempol. Emin ida etan tuud Tempol ey inang-ang da etan tuun kaumdalan law ey kamanya-ya-dan ni gaya tun menaydayaw nan Apu Dios.<sup>10</sup> Inimmatunan da e hi-gatu la etan kamangkekkedded etan di Kayyaggud ni Eheh ni Tempol et matngaddan emin ni nunman ni neipahding ni hi-gatu.

*Ya intuttuddun Peter di Tempol*

<sup>11</sup> Neamungan idan tutu-u humman ni laki e tuka itettenged di Peter nan John etan di Balkon Solomon. Wada hakkeyey daka itettekel tep natngaddan emin ni nunman ni kayyaggud ni peteg ni neipahding.<sup>12</sup> Entanni ey kan Peter idan etan ni tuu ey “Hi-gayun edum kun helag Israel, keke kayu kametnga et dakemi kaitettekel? Kaw kanyu nem ya kabaalan mi niya kakinayyaggud mi hu nengipadlan eyan tuu?”<sup>13-14</sup> Beken ni hi-gami, nem hi Jesus Christo hu nengipeyaggud ni hi-gatu. Tep hi Apu Dios e dinaydayaw di Abraham, hi Isaac, hi Jacob, niyadda la eman aammed tayu ey impedaydayaw tu etan bega-en tun U-ungnga tu e hi Jesus eyad neipahding. Endin hekeye bahul tu tep hedini hi-gatu, man kayyaggud ni peteg, nem impadpap yu et ilaw yud kad-an Pilate et kanyuy nambahul. Kan Pilate ey ibbukyat tu- et tep endi bahul tu, nem ihik yun pepettey tu et ya etan tuun pimmatey hu impebukyat yu.<sup>15</sup> Pintey yu hi Jesus e kakelpuin biyag ni endi pappeg tu, nem sinegun Apu Dios. Makulug huyyan mi e-ehhela tep inang-ang mi.<sup>16</sup> Ya kabaalan Jesus niya dinel min hi-gatu hu nangkal ni dahuy eyan lakin yuka ang-ang-anga. Et deh e kayyaggud law.

<sup>17</sup> Agik ida, makulug et hi-gayu niyadda ap-apu yu ey lawah hu impahding yun Jesus, nem umhulun hu eleg yu pengamtaan ni hi-gatu.<sup>18</sup> Nem huyyan impahding yu hu nengipeamnuan Apu Dios ni inhel idan eman lan prophets tu e hi Christo, e mengippaptek ni tuu ey mahapul ni panlelehanan tu.<sup>19</sup> Nem anin hanniman et mahapul ni mantuttuyyu kayun liwat yun Apu Dios ma-lat pesinsahan tu liwat yu et pelinggep dakeyu,<sup>20</sup> niya ma-lat itu-dak tulli mewani hi Jesus Christo e pinutuk tun pan-ap-apu tayu.<sup>21</sup> Nem manhahha-ad nid kabunyan ingganah um-amnun emin etan pinhed Apu Dios ni meippahding eyad puyek ni impeamta tudda lan prophets tu.<sup>22</sup> Makulug huyya tep yan eman lan nebayag ey wada inhel Moses idan aammed tayu e kantuy ‘Puttunen alin Apu Dios hu hakey ni prophet ni hi-gatsun henin hi-gak. Mahapul ni u-unnuden yullin emin hu e-helen tun hi-gayu.<sup>23</sup> Yaddalli etan tuun eleg mengu-unnud ni e-helen nunman ni prophet ey mepattal idallid tuun Apu Dios et mekastigudda.’ ”

<sup>24</sup> Intuluy Peter e kantuy “Emin ida la prophets Apu Dios meippalpun Samuel ey impeamta dadda eya kamekapkapyan nunya.<sup>25</sup> Ey hi-gayu keippeamnuan idan panyaggudan ni impakulug Apu Dios ni impeamtaddan prophets tu ey nei-dum kayud nekitbalan Apu Dios idan aammed tayu. Huyya inamnuan ni inhel Apu Dios nan Abraham e kantuy ‘Bendisyonan kuddalli emin tuud puyek gapuh idan helag mu.’ ”<sup>26</sup> Et mukun hi-gatsun Jews hu nemangulun nengitu-dakan tun U-ungnga tu ma-lat peyaggud daitu et iwalleng tayudda lawah ni elaw.”

## 4

*Ya nemistigalan idan ap-apuddan Jews di Jerusalem nan Peter et hi John*

<sup>1</sup> Nanengtun kaman-e-ehhel di Peter nan John ey dimmateng ida etan Jews ni ap-apuddan padi, yadda ap-apun guwalyad Tempol niyadda Sadducee.<sup>2</sup> Ey bimmunget ida tep kaitenuttuddud Peter nan John e netagan ni Jesus, et humman kakulugan tu e kameteggui netey.<sup>3</sup> Mahmahdem ni nunman ey dimpap dad Peter nan John et ikelabut dadda ingganah ni newa-waan tu.<sup>4</sup> Nem dakel ida nengulug ni nunman ni intuttuddud Peter nan John, tep limmaw ni liman libu hu bilang ni lalakkin nengulug. (Eleg makibilang ida bibi-i niyadda u-ungnga.)

<sup>5</sup> Yan newa-waan tu ey neamung idad Jerusalem hu ap-apuddan Jews, yadda etan peppenggulwan, niyadda kamantuttuddun Tugun Moses.<sup>6</sup> Wadaddadman di Annas e Eta-gey ni Padi, hi Kayaphas, hi John, hi Alexander niyadda aaggin Annas.<sup>7</sup> Da impawit di Peter nan John et kandan hi-gaday “Hipa impahding yun nangkal ni dahuy eyan tuu? Hipa nemaddang ni hi-gayu et dammutun han-ekal yu dahuy tu?”

<sup>8</sup> Impetuled ni Ispirituh Apu Dios hi Peter, et kantuy “Dengel yu e hi-gayuddan ap-apu niya hi-gayuddan peppenggulwan.<sup>9</sup> Hedin ya umhulun ni kebestigalan min nunya ey ya kayyaggud ni impahding mi eyan nedahuy niya inna-nun yimmaggudan tu ey dengel

\* 3:25 3:25 Genesis 22:18

yu eya e-helen ku. <sup>10</sup> Tep pinhed kun peamtan hi-gayun emin ni helag Israel e ya nangkali ni dahuy eyan laki ey ya kabaelan Jesus Christo e iNazareth e impatak yud krus, nem sinagwan Apu Dios et mategu law. <sup>11</sup> Hi Jesus hu neieligan etan ni neitudek ni inhel Apu Dios ni kantuy

'Ya etan batun binelaw idan kamengapyan baley ey humman anhan law hu kekakkayyaggudan ni batun meikkapyad baley.' \*

<sup>12</sup> Endi edum ni kamenellaknib ni tuu nem ehub hi Jesus, tep hi-gatu pinutuk Apu Dios ni memessinsah ni liwat tayu ma-lat abuluten daitsun hi-gatu et ipaptek daitsu."

<sup>13</sup> Natngadda emin etan ap-apun nambistigal tep endi takut di Peter nan John ni himmapit niya inamta da e nebabah hu adal da, nem nelaing idan mantuttuddu. Et humman law nengamtaan dan hi-gada hu nekikkillaw lan Jesus. <sup>14</sup> Endi innanuddan etan ni aap-apun mengehing ni hi-gada, tep wada etan lakin na-kal dahuy tun kaman-eh-ehng di kad-an da. <sup>15</sup> Entanni et pa-hep da nid Peter nan John et manhuhummangan idan pehding dan hi-gada. <sup>16</sup> Kanday "Hipa na-mu pehding tayun hi-gada? Tam emin ida tuud Jerusalem ey inamta da e makulug humman ni impahding dan miracle et endi inna-nu tayun mengihhe-ut e makulug humman. <sup>17</sup> Nem anin, e-helen tayun hi-gada et isiked dan mengittenuttuddun meippanggep nan Jesus ma-lat eleg manhinap di kebebbley."

<sup>18</sup> Et paeyag dadda mewan et ehelen dan hi-gada e issiked dan mengituttuddun meippanggep nan Jesus. <sup>19</sup> Nem hinumang di Peter nan John e kanday "Hedin hi-gami, man hi Apu Dios hu u-unnuden mi et beken ni hi-gayu, <sup>20</sup> tep eleg mabalin ni mi issiked ni ittuttuddu da inang-ang mi niya diddingngel mi."

<sup>21</sup> Et pamehig ida mewan ni aap-apun tinattakut ida, et han dadda pebukyat. Endi inna-nu dan mengastigun hi-gada tep emin ida tuu ey dadda kabaddangi et daka daydayawa hi Apu Dios tep ya humman ni impahding da. <sup>22</sup> Nehuluk ni na-pat hu toon etan ni lakin na-kal dahuy tu.

*Ya dasal idan kamengullug nan Apu Dios ma-lat petuled tudda*

<sup>23</sup> Imbukyat daddad Peter et mambanggad idad kad-an idan edum da et idaddatteng idan hi-gada hu inhel ida etan ni peppenggulwan dan Jews et yadda ap-apuddan papaddi. <sup>24</sup> Dingngel da humman ni inhel di Peter nan John et mandasal idan emin nan Apu Dios. Kandad dasal day "Apu Dios e Keta-ta-geyyan, hi-gam hu nengapyan puyek et ya kabunyan niya baybay niyaddan emin hu hipan wadadman. <sup>25</sup> Impahpit ni Ispirituh mun nunman hi David e ammed mi niya bega-en mu et kantuy

'Kele an um-alid nemnem ni tutu-ud kebebbley ni mangngenghay nan Apu Dios? Ey kele ya endi silbitu hu daka nenemnan ipahding?'

<sup>26</sup> Yadda papatul niyadda aap-apud kebebbley ey ida kamanhuhummangan ni pehding dan mekihhanggan Apu Dios et ya etan pinutuk tun um-ali e hi Christo.'

<sup>27</sup> Et deh e neipahding huyya, tep neamung ida la tutu-u, hi Herod, hi Pontius Pilate, yadda Gentiles, niyadda Jews et manhuhummangan ida et pateyen da etan intu-dak mun U-unggam e hi Jesus e hi-gatu pinutuk mun Christo, e bega-en mun endi liwat tu. <sup>28</sup> Ya kakulugan tu ey neipahding huyyan neiunnud di planuh mu dedan ni meippahding. <sup>29</sup> Et yan nunya e Apu Dios, ey baddangi dakemi ma-lat tumuled kamin mantuttuddu, tep ay sinattakut dakemi tep ya mika pengituttudduin meippanggep nan Jesus. <sup>30</sup> Ey paelim hu et-eteng ni kabaelan et ekalan nu degeh idan kamampandedgeh niya wadam ni hi-gami hu kabaelan min mengippahding idan kaketngain tuu niyadda miracles tep ya kabaelan Jesus e kayaggud ni peteg ni bega-en mu."

<sup>31</sup> Negibbuh humman ni dasal da ey pinhakkeyey neigiwwed etan baley ni neamungan da ey newadan hi-gadan emin hu tuled ni nalpun Ispirituh Apu Dios et endi law takut dan mengituttuddun ehel tu.

*Ya daka pan-indadawwasin daka lelmua*

<sup>32</sup> Emin ida etan kamengullug ey kaman-uunnud hu nemnem da niya pinhed da. Emin hu limmu da ey heni limmu dan emin tep ida kaman-indadawat ni hipan wadan hi-gada.

<sup>33</sup> Impetuled Apu Dios ida apostles et da pan-ituttuddu hu meippanggep ni netaguan Apu tayu e hi Jesus Christo. Emin ida etan kamengullug ey et-eteng hu baddang Apu Dios ni hi-gadan panyaggudan da. <sup>34-35</sup> Endi law hu kamekullangin hi-gada, tep ida kamanhimbabaddang hedin wada mahapul ni hakey. Yadda etan kamengullug ni wadwada-an ey ida kaum-igtang ni baley da winu puyek da et ya nangatngan da ey

\* 4:11 4:11 Psalm 118:22 † 4:26 4:26 [25-26] Psalm 2:1-2

daka iddawwat idan apostles et hi-gada kamengikka-peng ida etan ni kamengullug ni en-endi-an meippuun di mahapul da.

<sup>36-37</sup> Hi Joseph di Cyprus e helag Levi hu hakey ni immigtang ni puyek tu et idwat tuddan apostles hu nanggatngan tu. Hi Joseph ey ingngadnan idan apostles ni Barnabas e ya keibbellinan tu ey “Kaum-ipetuled.”

## 5

### *Ya lawah ni impahding di Ananayas nan Sappira*

<sup>1</sup> Wadadda dama etan han-ahwa e di Ananayas nan Sappira e immigtang idan puyek da. Kanday iddawwat daddan newetwet ni kamengullug. <sup>2</sup> Nem nanhumangan idan han-ahwa et itlu da edum. Et ya etan edum ni gatang etan ni puyek ey indawat daddan apostles. Et kanday humman ni ebuh hu gatang tu. <sup>3</sup> Nem kan Peter nan Ananayas ey “Ananayas, keke mu in-abulut ni daka he-ulen nan Satanas et man-itek kan Ispiritu Apu Dios? Kammuy indawat mun emin hu gatang etan ni puyek, nem ya kakulugan tu ey intalum edum. <sup>4</sup> Humman ni puyek ey puyek yu. Ey anin ya pihuh ni nanggatngan yu et pihuh yu. Nem keke kayu man-itek? Beken ni hi-gami hu nan-itekan yu, tep hi Apu Dios.”

<sup>5</sup> Dingngel Ananayas humman ey pinhakkeyey netukkad et matey. Emin ida etan tuun nangngel ni nunman ni neipahding ey simmakut idan peteg. <sup>6</sup> Immalidda etan lalakkin kamampenikken et libutan da annel tu et da ikulung.

<sup>7</sup> Nelabah tellun olas ey immali dama etan ahwan Ananayas, nem eleg tu amta neipahding nan ahwa tu. <sup>8</sup> Kan Peter ni hi-gatuy “Kaw makulug ni ebuh humman ni gatang etan ni puyek yu?” Kan etan ni ahwan Ananayas ey “Em, humman ni ebuh.”

<sup>9</sup> Et kan Peter ni hi-gatuy “Keke nan-epet kayun han-ahwa? Kaw kanyuy hanhaul yu hu Ispiritu Apu Dios? Ang-ang mu kedi e immalidda eya an nengikulung nan ahwan et daka dama ikulung.” <sup>10</sup> Pinhakkeyey netukkad tu-wangu humman ni ahwan Ananayas et matey dama et alen da annel tu et da ikulung di dagsin kulung ahwa tu. <sup>11</sup> Emin ida etan kamengullug, yadda etan edum ni nangngel, niyadda nenang-ang ni nunman ey nemahhig takut da.

### *Yadda miracles ni impahding idan apostles*

<sup>12</sup> Dakel hu impahding idan apostles Jesus ni miracles niyadda kaketngain tuu. Emin ida kamengullug ey ida kameemmuemmung di Tempol etan di Balkon Solomon. <sup>13</sup> Yadda etan eleg mengullug nan Jesus ey et-eteng daka penettebal idan kamengullug, nem ida kaum-angel ni meki-emmung ni hi-gada. <sup>14</sup> Nem anin ni hanniman et ida kamangke-dumi hu lalaki niya bibi-in kamengullug nan Apu Jesus. <sup>15</sup> Dingngel idan katuutuu humman ni kapehpehding idan apostles Jesus et pan-ilaw dadda hu kamampandedgeh et dadda ihged di pengidlanan di Peter ma-lat hedin melebbah ida et meiptek hu allinnew tun hi-gada ey me-kal degeh da. <sup>16</sup> Nan-i-lidda daman katuutuud kebebbeley di Jerusalem hu kamampandedgeh niyadda etan nangehuklungan et pan-ekalen idan apostles nan Jesus hu degeh da niyadda neihuklung ni hi-gada.

### *Ya nanlelhanan idan apostles*

<sup>17</sup> Ya etan Eta-gey ni Padi niyadda gagayyum tun Sadducee ey daka keemmehidda apostles nan Jesus <sup>18</sup> et padpap dadda et ikelabut dadda. <sup>19</sup> Nem yan nunman ni hileng ey intu-dak Apu Dios hu anghel tu et ibeghul tu etan neikelabutan da et kantun hi-gaday <sup>20</sup> “Lakkayuy di Tempol et yu ituttuddudan tutu-u hu meippanggep ni baluh ni biyag ni kamelpun Apu Dios.” <sup>21</sup> Inu-unnud da et kamangkewa-wan nunman ey limmaw idad Tempol et mantuttudduda.

Ey ya etan Eta-gey ni Padi niyadda edum tu ey inaygan dadda ap-apuddan Jews et umitu-dak idan an mengewwit idan etan ni apostles di kallabbutan ma-lat bistigalen dadda. <sup>22</sup> Et lumaw ida etan guwalyan an mengewwit ni hi-gada, nem endiddad kallabbutan. Nambanggad ida et kan dadda etan ni ap-apu ey <sup>23</sup> “Limmaw kamid kallabbutan ey neialladdu niya nei-peng idan emin hu guwalyad habyen, nem imbeghul mi ey endidda.”

<sup>24</sup> Dingngel etan ni ap-apuddan guwalyad Tempol niyadda ap-apuddan padi humman ni neipahding ey natngadda niya ida kaunnenemnem hedin hipalli pambalanan tu humman.

<sup>25</sup> Entanni ey wada immalin hakey ni tuu et kantudda etan ni aap-apu ey “Hedin yadda etan ingkalebut yu, man immen idad Tempol e ida kamantuttuddu.” <sup>26</sup> Et ikuyug etan ni ap-apun guwalyad Tempol ida tuu tu et daddalli awiten. Nem eleg da piliten idan

inewit tep ida kaumtakut idan tuu tep entanni ey umbunget ida anhan law et tengbaen dadda.

<sup>27</sup> Inlaw dadda etan apostles di kad-an idan ap-apuddan Jews et bistigalen etan ni Eta-gey ni Padi ida. <sup>28</sup> Kantun hi-gaday “Kele inhel min hi-gayun issiked yun mengituttuddun meippanggep Jesus ey eleg dakemi u-unnuden? Hipadman e nan-amta law di Jerusalem hu meippanggep ni hi-gatu? Ey kele kanyuy hi-gami hu nengipepatey nan Jesus?” <sup>29</sup> Hinumang Peter et yadda edum ni apostles e kanday “Nem mahapul ni u-unnuden mi hi Apu Dios, beken ni ya tuu. <sup>30</sup> Hi Apu Dios e dinaydayaw ida lan aammed tayun nunman hu nenagun Jesus ni neteyyan tun nengipetakan yud krus. <sup>31</sup> Sinangun Apu Dios hi Jesus et paenamut tud kabunyan et yumudung di winannan tu et hi-gatu pan-ap-apun emin niya hi-gatu menellaknib ni emin ma-lat wada inna-nu tayun Jews e helag Israel ni mantuttuyyun liwat tayu ma-lat pesinsahan Apu Dios hu liwat tayu. <sup>32</sup> Inang-ang midda huuyan nekapkapy ey neipeamtan hi-gami, mukun mika ihhudut e makulug. Anin ya Ispirituh Apu Dios ni dinwat idan kamengullug ey tuka ihhudut e makulug huuya.”

*Ya tugun nan Gamaliel*

<sup>33</sup> Dinggel idan ap-apu huuyan inhel idan apostles ey peteg bunget da et pinhed dan pepettey ida. <sup>34</sup> Nem wada etan hakey ni edum dan eleg meiuunnud hu nemnem tun hi-gadan kamantuttuddun Tugun Moses e hi Gamaliel e hakey ni Pharisee niya kametbal ni tuu. Immehneng di hinanggaddan edum tun ap-apu et imandal tu e pe-hep dadda ni etan apostles. <sup>35</sup> Et kantuy “Hi-gatsun tuud Israel ey pakannemnem tayu ni et han tayu ipahding hu hipan pinhed tayun pehding idan nuntan ni tuu. <sup>36</sup> Tep wada la etan hi Theudas e kantuy et-eteng kabaelan tu. Et wadadda nengu-unnud ni hi-gatun umlaw idad epat ni gatut. Nem entanni ey pintey da et mahilit idadda nengu-unnud ni hi-gatu, e humman law hu pappeg tu. <sup>37</sup> Entanni ey wada dama hi Judas di Galilee eman ni tsimpuh ni pambillangan ni gubilnun tutu-u e wadadda nengu-unnud hi-gatu. Nem entannit pintey da ey nehilit ida dama nengu-unnud ni hi-gatu. \* <sup>38</sup> Mukun ya ngu ittugun ku ey heballi ibbukyat tayudda humman ni ingkalebut tayu. Tep hedin nalpud nemnem dan ebuh hu daka ituttuddu niya daka pehpending ey lektattuy mepappeg. <sup>39</sup> Nem hedin hi Apu Dios hu nalpuan ni daka ituttuddu, ey endi pehding tayun mengippesikked ni hi-gada. Umkukumna kayu, ey hi Apu Dios kumedek hu yuka pekibbuhul.”

<sup>40</sup> Dinggel ida etan ni ap-apu humman ni inhel Gamaliel et u-unnuden da. Nem impaeyag dadda etan apostles Jesus et pampabeig dadda et ehelen da mewan ni hi-gadan issiked dan mengituttuddun meippanggep nan Jesus et han dadda pebukyat. <sup>41</sup> Ida kamanggagaya etan apostles ni neni-yanan daddan aap-apu, tep anin ni nanlelehhanaan da ey inamta da e kaibbilang Apu Dios idan kameiddinnel ni mantuttuddun meippanggep nan Jesus. <sup>42</sup> Kewa-wa-wa ey eleg ida umhigan mantuttuddud Tempol niyad kabelebeley ni meippanggep Jesus e hi-gatu intu-dak Apu Dios ni mengippaptek ni tuu.

## 6

*Ya nepilian idan etan ni pitun mengippaptek idan newetwet ni nebalun bibi-i*

<sup>1</sup> Nem entanni et ida kamangkedakkel hu kamengullug nan Jesus ey ida kamanlillih etan Jews ni Greek hu hapit da etan idan Jews ni Hebrew ehel da e kanday ida kamekullangi edum dan nebalun bibi-i etan ni kennen ni kameiwwatwat ni hi-gadan kewa-wa-wa. <sup>2</sup> Et ayagan idan etan ni Hampulut dewwan apostles ida emin etan kamengullug et kandan hi-gaday “Lawah hedin iwwalleng min mantuttuddun meippanggep nan Jesus et huttan hu ippaptek mi. <sup>3</sup> Ya kayyaggud ey pili kayun pitun edum yun nenemneman niya amta yun kapekabbaddangin Ispirituh Apu Dios et hi-gada hu mengippaptek idan nuntan <sup>4</sup> ma-lat ya ippaptek mi ey ya mandasal niya mantuttuddu meippanggep nan Jesus.”

<sup>5</sup> Ey pininshed da humman ni inhel idan apostles, et pilien da hi Stephen e nehammad tuka pengullug nan Jesus niya kapekabbaddangin Ispirituh Apu Dios, hi Philip, hi Pelkulus, hi Nicanor, hi Timon, hi Parmenas, et hi Nicolas di Antioch e Gentile, nem kamengu-unnud ni elaw idan Jews, ey nengulug law nan Jesus. <sup>6</sup> Inlaw dadda humman ni pinili dad kad-an idan apostles et ita-pew idan apostles hu ngamay dad ulu da et idasalan dadda.

<sup>7</sup> Kamangkeihhinnap hu ehel Apu Dios di kebebbebley ey ida kamangke-dumi hu kamengullug nan Jesus di Jerusalem ey dakel ida damaddan papaddi hu nengabulut ni mengu-unnud nan Jesus.

\* 5:37 5:37 [36-37] Di Tewdas nan Judas ey impatna dan gubbaten hu gubilnun nunman, nem neapput ida.



*Ya nampapan dan Stephen*

<sup>8</sup> Hi Stephen ey indawtan Apu Dios ni et-eteng ni kabaelan tun mengippahding ni miracles niyadda edum ni kaketngain tuu. <sup>9</sup> Nem entanni ey wadadda tuun kaumkahing ni hi-gatu et ida kamekihhubbehbeg ni hi-gatu. Humman ida Jews ni nalpud simbaan di Cyrene niyad Alexandria e ida kameingngadnin Himbut ni Neliblih di kinahimbut da. Yadda edum ey nalpuddad Cilicia et yad Asia. <sup>10</sup> Nem eleg dan hekey han-apput hi Stephen, tep kabaddangin Ispirituh Apu Dios ni mannemnem ni e-helen tu.

<sup>11</sup> Et ya law impahding da ma-lat padpap da hi Stephen idan ap-apu ey bimmayad idan maitek ni tuu et man-itek e kanday "Hedin hi Stephen, man dingngel mi e tuka kehginga hu tugun Moses niya tuka kehginga tugun Apu Dios."

<sup>12</sup> Dingngel idan tuu, yadda kamengipappanggulun Jews, niyadda kamantuttuddun Tugun Moses huuya ey bimmunget ida et padpap da hi Stephen et ilaw dad kad-an idan ap-apuddan Jews e kandan Sanhedrin e hi-gada kamemistigal ni nambahul. <sup>13</sup> Immayag ida mewan ni maitek ni tistigu et kanday "Huuyan tuu ey dakel tuka e-e-helan lawah ni meippanggep ni Tempol tayu et ya Tugun Moses. <sup>14</sup> Tep dingngel mi la inhel tu e kantuy bahbahaan kunun Jesus e iNazareth hu Tempol tayu ey hullulan tu hu elaw ni bineltan tayuddan aammed tayun intuttuddun Moses ni hi-gada."

<sup>15</sup> Ey amin ida etan ap-apun yimmudung ey daka itettekel hu angah Stephen, tep heni angah ni anghel e kaumhili.

## 7

*Ya intuttuddun Stephen*

<sup>1</sup> Kan etan ni Eta-gey ni Padi nan Stephen ey "Kaw makulug numan eya daka pebehul ni hi-gam?"

<sup>2</sup> Hinumang Stephen et kantuy "Hi-gayuddan kaegiegi niya keammeammed, dengal yu eya e-helen kun hi-gayu. Hi Apu Dios e kamedeyyaw ey impeang-ang lan eman ni ammed tayu e hi Abraham eman ni kaweda tud Mesopotamia et han lumaw di Haran.

<sup>3</sup> Kan Apu Dios ni hi-gatuy 'Hi-yan mu bebley mu niyadda aaggim, et lumaw ka etan di bebley ni ittuduk ni hi-gam.' \* <sup>4</sup> Inu-unnud Abraham et hi-yanen tu humman ni Chaldea et mambebley di Haran.

Nem yan neteyyan ametu ey inhel mewan Apu Dios ni hi-gatu e hi-yanen tu humman ni bebley et lumaw di Kanaan e mahkang ni bebley ni nambebleyan tayun nunya. <sup>5</sup> Nem yan inlian tudya ey endi imebeltan Apu Dios ni hi-gatu, anin ew ngun ekket ni puyek, nem impakulug tu e pampuyyek alin Abraham amin eya bebley niya beltanen idallin helag tu. Yan eman ni nanghelan Apu Dios ni nunya ey endi ni u-ungngan Abraham. <sup>6</sup> Inhel pay Apu Dios ni hi-gatu e kantuy 'Yaddalli helag mu ey mambunnal idallid edum ni bebley et panlelehanan dalli hu ngunu dadman ni epat ni gatut ni toon tep mambalin idallin himbut diman. <sup>7</sup> Nem kastiguen kuddalli humman ni mengihhimbut ni hi-gada et hi-yanen dalli humman ni bebley et mambangngad idallidya et daydayawen da-ak di deya.' <sup>8</sup> Ey intugun Apu Dios nan Abraham e mahapul ni pekuggit ida helag tu, tep humman hu pengippeang-angan dan nengulagan dan pengippeamnuan Apu Dios ni nekitbalan tun hi-gada. Et mukun yan meikkewwalun aggew ni neiungngaan etan ni u-ungnga tu e hi Isaac ey kinugit tu. Nantanud dama hi Isaac ey wada hi Jacob et kugiten tu dama. Nantanud dama hi Jacob ey wadadda hampulut dewwan u-ungnga tun lalakki et kugiten tudda dama. Humman idan hampulut dewwan u-ungnga tu hu nahlagan tayun Jews.

<sup>9-10</sup> Inemehan idan nunman ni u-ungngan Jacob etan hakey ni agi da e hi Joseph, et igtang dan iEgypt e mambalin ni himbut diman. Nem binenaddangan Apu Dios di emin ni ligat tu ey indawtan tun et-eteng ni kalinaing tu niya kayyaggud ni elaw, et mukun pinpinhed Pharaoh e patul di Egypt et pambalin tun governor diman niya hi-gatu kamampaptek di baley Pharaoh.

<sup>11</sup> Entanni ey wada nemahhig ni bisil di kebebbebley di Egypt, anin di Kanaan. Et panlelehanan idan tutu-u hu upa da tep endin hekey law hu kennen. <sup>12</sup> Nem dingngel kuman Jacob e wada kennen di Egypt et itu-dak tudda u-ungnga tun an umgatang diman. <sup>13</sup> Yan pidwa tun linawwan da ey impeamtan Joseph e hi-gatu etan agi da, et yan nunman hu nengamtaan daman Pharaoh ni hi-gada. <sup>14</sup> Et ehelen nan Joseph idan agi tu e ikkuyug da hi ameda et yadda pamilyah da et umliddan amin di Egypt. Et ya bilang dan amin ni limmaw di Egypt ey nepitu et lima. <sup>15</sup> Nekilaw hi Jacob di Egypt et yadman neteyyan tu ey yadman dama neteyyan idan u-ungnga tu e humman ida nahlagan tayu. <sup>16</sup> Emin

\* 7:3 7:3 Genesis 12:1

ida ey neikulung idad Shechem e gungat ni gintang eman ni ammed tayu e hi Abraham idan helag Hamor.

<sup>17</sup> Yan nganngani hu pengippeamnuan Apu Dios eman ni inhel tu lan Abraham ey dimmakkel ida law ni peteg hu helag tud Egypt. <sup>18</sup> Nem entanni ey wada neihullul ni patul di Egypt ni eleg mengaman meippanggep nan Joseph, tep netey ni nebayag. <sup>19</sup> Humman ni patul ey namplanuh ni lawah ni pedhing tuddan aammed tayu niya makabbunget ni hi-gada. Pinilit tuddan ibbeng da u-ungnga da ma-lat mangkatey ida.

<sup>20-21</sup> Yan nunman hu neiungngaan nan Moses e kakayyaggud ni u-ungnga niya nakappinshed Apu Dios. Tellun bulan ni ebuh hu nengitattalluan idan ammed tud baley da et da ihha-ad di gilig ni wangwang, nem himmak etan ni biin u-ungngan Pharaoh et alen tu et ipappaptek tu ingganah nehiknan tu et ibilang tun u-ungnga tu. <sup>22</sup> Inedal tun emin hu hipan inamtaddan iEgypt, et mambalin ni nelaing di emin ni tuka ippahding niya tuka penepit.

<sup>23</sup> Hakey ni aggew eman ni na-pat hu toon Moses ey ninemnem tun an ang-angen ida edum tun helag Israel. <sup>24</sup> Ey inang-ang tu e kapanlelehani etan ni hakey ni helag Israel hu kapehpehding etan ni hakey ni iEgypt et lumaw et pateyan tu humman ni iEgypt. <sup>25</sup> Impahding tu humman tep kantu na-mu ngu nem kaewwasiddan edum tun helag Israel e hi-gatu hu intu-dak Apu Dios ni memaddang ni hi-gadad daka panhelheltapid Egypt, nem eleg da awatan. <sup>26</sup> Yan newa-waan tu, ey dinteng tu mewan hu dewwan helag iIsrael ni kamandedpap. Et ipatna tun um-ehel ni hi-gada e kantuy 'Kele han-agi kayu ey kayu kamandedpap?'

<sup>27</sup> Nem intuldun kumedek etan ni nambahul hi Moses et kantuy 'Hipa nemutuk ni higam ni mambalin ni huwet mi niya ap-apu mi?' <sup>28</sup> Kaw petteyan muwak dama e henin impahding mu etan ni iEgypt ni kaalman?' <sup>29</sup> Dingngel Moses humman ey simmakut et bumsik di bebley di Midian. Nelahin diman et wada dewwan u-ungnga tu.

<sup>30</sup> Nelabah hu na-pat ni toon ey nampeang-ang hu anghel Apu Dios ni hi-gatu etan di kekkeyyew ni kamantettebbel di desert di Duntug e Sinai. <sup>31</sup> Natnga hi Moses ni nenangan-angan tun nunman et immelan tu hehnupen ma-lat pakabbinbinen tu ey dingngel tu ehel ni Ap-apu e kantuy <sup>32</sup> 'Hi-gak hu Dios idan aammed mun hi Abraham, hi Isaac ni hi Jacob.' Kamangegeygey hi Moses ni takut tu et eleg tu pinhed ni i-ang-ang diman.

<sup>33</sup> Kan Apu Dios pay ni hi-gatuy 'Ekal mu eya patut mu tep wada-ak di inehngam!' <sup>34</sup> Inang-ang ku hu kapanlelehaniddan tuuk di Egypt. Dingngel ku palak da et mukun immali-ak ni mengihwang ni hi-gada. Ittu-dak dakad Egypt et mu ipahding hu pinhed kun pedhing mun hi-gada. "

<sup>35</sup> Intuluy Stephen ehel e kantuy "Huyyan hi Moses ey eleg abuluten idan edum tun helag Israel ni kamandedpap et kandan hi-gatuy 'Hipa nemutuk hi-gam ni mambalin ni huwet mi niya ap-apu mi?' Nem hi Moses hu intu-dak Apu Dios ni man-ap-apu niya mengihwang idan tuu tud Egypt. Indawat Apu Dios ni hi-gatu hu kelebangan tun man-ap-apu eman ni nampeang-angan ni anghel ni hi-gatud kamantettebbel ni kekkeyyew. <sup>36</sup> Impahding Moses ida miracles ni nengipenguluan tuddan helag Israel ni neni-yan ni Egypt, yan nan-agwatan dad Madlang ni Baybay, et yan nandaldalan dad desert ni nat pat ni toon. <sup>37</sup> Hi Moses hu nanghel idan helag Israel ni kantuy 'Wadalli hu um-alin ittu-dak Apu Dios ni prophet e henin hi-gak ni melpun hi-gayu.' <sup>38</sup> Hi Moses nisi hu nengipenguluddan tuun Apu Dios di desert niya nekihummangan etan anghel APU DIOS ni hi-gatud Duntug e Sinai. Hi-gatu nenawat etan ni neitudek ni Tugun Apu Dios ni kaum-idwat ni biyag ni endi pappeg tu e humman hu neipebeltan ni hi-gatsu.

<sup>39</sup> Nem yadda eman aammed tayu ey kinehing da hi Moses et pinhed dan mambangngad di Egypt. <sup>40</sup> Et kandan Aaron e agin Moses ey 'Kapya kan dios ni mengipappangngulun hi-gatsu, tep eleg tayu amta neipahding nan Moses e nengipengulun hi-gatsun neni-yanan tayun Egypt.' <sup>41</sup> Et mengapyaddan dios dan heni impah ni baka hu ang-ang tu et iappitan da et daydayawan da. <sup>42</sup> Bimmunget hi Apu Dios et ewayen tudda et daydayawan da aggew, ya bulan niyadda bittuwwen di kabunyan, et humman ida impambalin dan dios da. Humman inumnuan ni impatudek Apu Dios idan eman ni prophets tu e kantuy

'Hi-gayun helag Israel, beken ni hi-gak hu nengiappitan yuddan kinleng yun kaweda yud desert ni na-pat ni toon. <sup>43</sup> Nem in-appit yudda etan ni kinapya yun dios yu, e hi Molek e neiha-ad di babballey ni intabitabin yu, ya etan u-ukkul ni bittuwwen ni kinapya yun kanyun hi Rephan. Humman idan dios hu dinaydayaw yu. Et humman hu, pellow dakeyud Babilon et manhimbut kayud man et humman kastigu yu. "

<sup>44</sup> Intuluy Stephen ehel e kantuy “Yadda eman aammed tayu ey wadan hi-gada etan Tabernacle ni kinapyan Moses eman ni wadaddad desert e inu-unnud tu etan impeang-ang Apu Dios ni hi-gatun pengiu-unnudan tu. <sup>45</sup> Netey hi Moses ey neihullul hi Joshua ni nengipenguluddan aammed tayu et ida mambebley di bebley idan tutu-un inapput dad gubat tep ya baddang Apu Dios. Ey nannaneng ni hi-gada humman ni bineltan dan Tabernacle tep intabitabin da. Et ingganah eman ni nampatulana David ey wadan hi-gada humman ni Tabernacle. <sup>46</sup> Et-eteng impeminhed Apu Dios nan David et ibegan David ni hi-gatu hedini pinhed tun umkapyan nehammad ni baley ni pandaydayawan dan hi-gatu e dinaydayaw Jacob. <sup>47</sup> Nem eleg iebulut Apu Dios et ya nengapyan nunman ey hi Solomon e u-unggan tu. <sup>48</sup> Nem hi Apu Dios e Keta-ta-geyyan ey eleg manha-ad di baley ni kinapyan tuu, tep inhel eman ni prophet e kantuy:

<sup>49</sup> Inhel Apu Dios e kantuy ‘Yad kabunyan hu yuddungan kun man-ap-apu et yad puyek hu pengiddahyayan kun helik. Hipa huttan ni baley ni kapyaan yun nak pambellean? Kaw pakekapyay kayun panha-adan ku? <sup>50</sup> Kaw beken ni hi-gak nanletun emin ni hipan wadad puyek anin yad kabunyan?’ ” †

<sup>51</sup> Ya nangillig ni inhel Stephen ey kantuy “Hi-gayun tutu-u, ey mangkanghay kayu. Endin hekey nemnem yu ey heni kayu nangketuleng e eleg yu iddedngel hu ehel Apu Dios. Heni kayudda lan eman ni aammed tayu e yuka kakkahinga hu Ispirituh Apu Dios. <sup>52</sup> Kaw wada hakey ni prophet Apu Dios ni eleg panhelheltap idan aammed yu? Pintey dadda hu intenu-dak Apu Dios ni immalin mengippeamtan ellian nan Christo e kayyagud ni peteg. Et yan illian tu ey inhedul yu et pateyen yu. ‡ <sup>53</sup> Ma-nut hi-gayu nenawat ni Tugun Apu Dios ni impaeli tuddan anghel, nem ay kinehing yu.”

#### *Ya nampenengbaan dan Stephen*

<sup>54</sup> Dinggel idan ap-apu humman ni inhel Stephen ey nemahhig bunget da et wada hakkeyey kamanggegeyyetget. <sup>55</sup> Nem hi Stephen e kapekabbaddangin Ispirituh Apu Dios ey intangaw tud kabunyan et ang-angen tu dayaw Apu Dios niya inang-ang tu hi Jesus ni immehngeng di winannan Apu Dios. <sup>56</sup> Kantuddan tuu ey “Ang-ang yu kedi kabunyan e neibeghul et ka-ang-ang hi Jesus ni kaman-eh-ehngeng di winannan Apu Dios.”

<sup>57-58</sup> Inhel tu humman ey pinhakkeyey inupup idan tuu tangila da niya katkuk ida et ga-bunan dan dimpap hi Stephen et ilaw dad gilig ni bebley et da pan-intetengbaan diman ingganah netey. Yadda etan tuun nematey ni hi-gatu ey da impatnged nan Saul hu balwasi da.

<sup>59</sup> Yan daka pampenengbain Stephen ey kantuy “Apu Jesus, dawaw mu linnawak.” <sup>60</sup> Nandukkun et itkuk tu e kantuy “Apu, etan tu ibilang ni liwat da huyyan impahding da!” Inhel tu humman ey ebuhe netey.

## 8

### *Ya nanlelehanan idan kamengullug Jesus ni impahding Saul*

<sup>1-2</sup> Yadda edum ni kamengullug ey da ingkulung hi Stephen e nemahhig lemyung da. Nem hi Saul ey kantuy kayyagud et pintey da hi Stephen. Huyyan nemateyan dan hi-gatu hu neilepuan ni nengipehelheltapan daddan kamengullug di Jerusalem. Et bumsik ida et mangkaiwehit idad kebebbebley di Judea niyad Samaria. Ebuhe ida etan apostles ni eleg bumsik.

<sup>3</sup> Nema-man Saul e impahding tun emin hu kabaelan tun nengipehelheltap idan kamengullug nan Jesus. Impeng tun limmaw di kabelebeley et tudda piliten ni impampaukat hu lalaki niya bibi-in kamengullug, et tudda pampaikelabut.

### *Ya nengabulutan idan tuud Samaria ni kameituttuddun panyaggudan ni tuun impahding Jesus*

<sup>4</sup> Nem hedini yadda etan kamengullug ni bimesik et mangkaiwehit idad kebebbebley ey da nan-ituttuddu hu panyaggudan ni tuun impahding Jesus idad bebley ni linawwan da. <sup>5</sup> Hi Philip ey limmaw di Samaria et mantuttuddud man. Kantuy hi Jesus hu Christo e kamengippaptek ni tuu. <sup>6</sup> Yadda tuud man ey daka deddengela hu tuka ituttuddu, tep inang-ang dadda hu miracles ni impahding tu. <sup>7</sup> Dakel ida neihuklungan ni dimonyoh, nem ingkal tudda neihuklung ni hi-gada. Hedini me-kal ida etan dimonyoh, man ida kaumpepkih. Ey impeyagud tudda hu nedahuy niya nepi-day. <sup>8</sup> Et mukun kaman-am-leng ida tuud Samaria.

### *Ya lawah ni elaw Simon e nelaiing ni magic*

† 7:50 7:50 Ang-ang yu Isaia 66:1-2. ‡ 7:52 7:52 Ang-ang yu dama Acts 22:14 et ya 1 John 2:1.

<sup>9</sup> Wada etan hakey ni tuudman e hi Simon e nelaing ni magic, et hedin impeangangan tudda tuud Samaria ni magic, man ida kametnga. Tuka ippahhiyya humman ni magic tu e kantuy et-eteng kabaelan tu. <sup>10</sup> Et humman hu, emin ida tuudman, ey daka tettebala e kanday "Makulug numan ni et-eteng kabaelan tu e heni hi Apu Dios." <sup>11</sup> Daka pekakkulluga tep nebayag ni tuka pehpending hu magic. <sup>12</sup> Nem yan nengituttudduan Philip ni meippanggep ni nan-ap-apan Apu Dios niya kapemessinsahin Jesus Christo ni liwat ey dakel ida nengulug ni bibi-i niya lalakki et mampebenyag ida. <sup>13</sup> Anin hi Simon et nengulug dama et mampebenyag. Et mekikkillaw nan Philip ey kametngan nenangangan tuddan miracles ni impahding tun pengi-immatunan ni et-eteng ni kabaelan Apu Dios.

<sup>14</sup> Dingngel idan apostles di Jerusalem e kinulug idan tuud Samaria hu ehel Apu Dios et itu-dak dad Peter nan John diman. <sup>15</sup> Et yan dintengan dadman, ey indasalan dadda kamengullug diman ma-lat dawten da hu Ispirituh Apu Dios ni memaddang ni hi-gada, <sup>16</sup> tep nebenyagan idan ebuh di ngadan Jesus Christo. <sup>17</sup> Nandasal di Peter nan John et ikepa da ngamay dan hi-gada et dawten da hu Ispirituh Apu Dios.

<sup>18-19</sup> Inang-ang Simon e makulug ni dinwat idan kamengullug hu Ispirituh Apu Dios ni nengita-pewan idan apostles ni ngamay dan hi-gada et kantun hi-gaday "Iddawtan dakeyun pihhuh ma-lat idwat yu daman hi-gak huttan ni kabaelan et emin ida dama hu pengita-pewan kun ngamay ku ey dewwatan da hu Ispirituh Apu Dios."

<sup>20</sup> Nem hinumang Peter e kantuy "Eleg megettang hu kaiddawat Apu Dios. Huttan ni pihhuh mu ey meendi niya umlaw kad impiernoh, tep lawah hu nemnem mu. <sup>21</sup> Endin hekey biyang mu eyad ngunu mi, tep lawah hu kapenang-ang Apu Dios ni nemnem mu. <sup>22</sup> Pantuttuyuu ka ey pandasal kan Apu Dios ma-lat pesinsahan tu huttan ni liwat mu. <sup>23</sup> Tep inamtak e maemeh ka ey ebuh hu panliwwatan ni muka pehpending." <sup>24</sup> Himmapi hi Simon et kantud Peter nan John ey "Idasali yuwak anhan et ibega yun Apu Dios ma-lat endilli meippahding eyan inhel mu."

<sup>25</sup> Negibbuh ni intuttuddu Peter nan John hu inang-ang dan impahpahding Jesus niyadda intuttuddu tu et han ida mambangngad di Jerusalem. Ey nantuttuddudda damad nandalnan dad kebebbbley di Samaria.

*Ya nenammuan Philip etan ni ap-apun iEthiopia*

<sup>26</sup> Entanni ey nampeang-ang etan anghel Apu Dios nan Philip et kantun hi-gatuy "Pandaddan ka et lumaw ka etan di desert etan di keltad ni nalpud Jerusalem ni mampellaw di Gaza."

<sup>27-28</sup> Et mandaddan hi Philip et lumaw ey dinammu tu hu hakey ni tuun iEthiopia e nanlugan di kalesah. Huyyan tuu ey eta-gey saad tu tep treasurer di upisinah ni biin ap-apid Ethiopia e Candace daka pangngeddin. Nalpullid Jerusalem ni an nandayaw nan Apu Dios et kamangkeibbangngad di bebley da. Tuka bidbidbida hu liblul ni intudek lan eman ni prophet e hi Isaiiah.

<sup>29</sup> Kan ni Ispirituh Apu Dios nan Philip ey "Lakkay eman di kalesah." <sup>30</sup> Nambesik hi Philip et lumaw etan di kalesah ey dingngel tu e kabidbidbida etan ni tuu hu liblul ni intudek Isaiiah et kantun hi-gatuy "Kaw han-awat mu eya muka pambidbida?"

<sup>31</sup> Kan nunman ni tuu ey "Eleg nisi. Pakkadek et ni wada mengituttuddun hi-gak." Et ayagan tu hi Philip et makiyudung ni hi-gatu. <sup>32</sup> Yahhuy etan neitudek ni binidbid tu: "Hi-gatu ey kamei-ellig ni kalneroh ni inlaw dan da keklengen. Ey heni impah ni kalneroh e anin ni pampu-litan et kaum-eneeneng. <sup>33</sup> Humman ni tuu ey bina-ibaing da, beken ni meandeng hu impanhuwet dan hi-gatu. Endilli tuun menge-ehhel ni helag tu, tep pinapppeg da biyag tu eyad puyek." \*

<sup>34</sup> Minahmahan etan ni tuu nan Philip e kantuy "Hipa kapan-e-hela etan ni prophet eyad intudek tu ya annel tu winu ya edum ni tuu?" <sup>35</sup> Et humman ni binidbid nunman ni tuu hu nengilepuan Philip ni mengituttuddun meippanggep ni impahding Jesus Christo ni panyaggudan ni tuu.

<sup>36</sup> Ida kamengmenglaw ey wada dinteng dan danum et kan etan ni iEthiopia ey "Tam adyag hu danum. Kaw dammutun pebenyaggak di deya?"

<sup>37</sup> Kan Philip ey "Dammutun benyagan daka hedin muka kulluga hi Jesus." Ey kan etan ni iEthiopia ey "Nakka kulluga e hi Jesus hu U-unggan Apu Dios."

<sup>38</sup> Et pasiked tu etan kalesah et umhiep idan dewwa. Gimmawaddad danum et benyagan Philip. <sup>39</sup> Negibbuh et dumeikal ida ey pinhakkeyey attukaw la hi Philip, tep inlaw lan Ispirituh Apu Dios. Eleg law ang-angen etan ni iEthiopia hi Philip, nem kaman-am-leng ni limmaw lad lawwan tu.

\* 8:33 8:33 [32-33] Isaiiah 53:7-8

<sup>40</sup> Hedin hi Philip ey endi maptek ey wadad Asotus. Nantuttuddun meippanggep nan Jesus diman et yad kebebbbley ni dinlan tu ingganah ni dintengan tud bebley di Cesarea.

## 9

### *Ya nengabulutan Saul nan hi Jesus*

<sup>1</sup> Hedin hi Saul, ey nanengtun ihik tun pepettey ida kamengullug nan Jesus et lumaw di kad-an etan ni eta-gey ni Padi <sup>2</sup> et mampekapyan tudek ni peang-ang tuddad aap- apuddan Jews di kesimsimbaan di Damascus et amtaen da e wada kelebngan tun mempap idan bii niya lakin kamengullug diman ma-lat illaw tuddad Jerusalem et maikelabut idadman.

<sup>3</sup> Illa tu humman ni papil ni impekapy tu et manglaw di Damascus. Nem kamenetteng ey endi maptek ey wadalli nalpud kabunyan ni kaumhilin dilag ni neidengdeng di kad-an tu. <sup>4</sup> Netu-li ey dingngel tu hu kaman-e-hel ni hi-gatu e kantuy "Saul! Saul! Kele muwak kapanligat?"

<sup>5</sup> Hinumang Saul e kantuy "Apu, hipa ka?" Himmumang ali etan immehel ey kantuy "Hi-gak hi Jesus ni muka panligat. <sup>6</sup> Inah ka et lumaw kad bebley et itudu dan hi-gam hu pehding mu."

<sup>7</sup> Emin ida etan tuun ingkuyug Saul ey ida kametemma tep dingngel da etan kaman-e-hel, nem eleg da han-ang-ang. <sup>8</sup> Imminah hi Saul et deyaten tu matetu, nem eleg um-ang-ang. Et peppeddenen idan edum tu ingganah dimmateng idad Damascus. <sup>9</sup> Tellun aggew hu nekulapan Saul ey eleg mangamangan niya eleg uminum ni danum.

<sup>10</sup> Wada etan hakey ni kamengullug nan Jesus di Damascus e hi Ananayas ngadan tu. Entanni ey nampeang-ang hi Jesus ni hi-gatud i-innep tu et kantuy "Ananayas." Himmumang hi Ananayas et kantuy "Kela e Apu?"

Kan Jesus ni hi-gatuy <sup>11</sup> "Elaw ka etan di Meandeng ni Keltad et mu ang-angen di baley Judas hi Saul e iTarsus. Immen e kaumdasadasal, <sup>12</sup> tep impei-innep kun hi-gatu e wada hu tuun hi Ananayas ngadan tun umlaw di kad-an tun mengeppan hi-gatu et ma-kal kulap tu."

<sup>13</sup> Nem hinumang Ananayas et kantuy "Apu, tam dakel hu dingngel kun indaddatteng idan tuu meippanggep ni hi-gatu niya impahpahding tun mengippeligat idan kamengullug ni hi-gam di Jerusalem. <sup>14</sup> Ey dingngel min indawtan idan ap- apuddan padin kelebngan ni mengippekelabut idan kamengullug ni hi-gam."

<sup>15</sup> Nem kan Apu Jesus ey "Anin, lakay kuma tep hi-gatu pinutuk tun mengituttuddun meippanggep ni hi-gak idan Gentiles, yadda patul niyadda edum mun Jews. <sup>16</sup> Peamtak alin hi-gatu hu panligat tu tep ya pengituttudduan tun meippanggep ni hi-gak."

<sup>17</sup> Et lumaw hi Ananayas etan di baley ni kad-an Saul et ita-pew tu ngamay tun hi-gatu et kantuy "Agik Saul, hi Apu Jesus e hi-gatu etan nampeang-ang ni hi-gam di dalan hu nengitu-dak ni hi-gak ma-lat ma-kal kulap mu niya ma-lat dawatem hu Ispirituh Apu Dios ni umbaddang ni hi-gam."

<sup>18</sup> Pinhakkeyey ginibek Saul e heni wada na-gah ni lukhip ni nalpud matetu ey han-ang-ang tu law et ebuhe pebenyag. <sup>19</sup> Neba-ba-ba et mangan et mambanggad hu elet tu.

### *Ya nantuttudduan Saul di Damascus*

Nekiha-ad ni hi Saul ni pigan aggew idan kamengullug nan Jesus di Damascus. <sup>20</sup> Et eleg mabeyag ey inlapu tun mantuttuddud kesimsimbaan di Damascus et ittuttuddu tu e kantuy "Hi Jesus ey U-unggan Apu Dios!"

<sup>21</sup> Emin ida tuun nangngel ni hi-gatu ey ida kametnga. Kanday "Kaw beken hi-gatu etan tuun kamengippepettepettey idan kamengullug nan Jesus di Jerusalem? Ey kaw beken ni ya illian tud ya ey ma-lat tudda pan-alen ida kamengullug nan Jesus et ilaw tuddad kad-an idan ap- apuddan padi?"

<sup>22</sup> Nem nema-man kamangke-dumi hu kabaelan Saul ni mengituttuddun meippanggep nan Jesus, et endi kabaelan idan Jews di Damascus ni mengehing ni kabaelan tun mantuttuddu niya tuka pehding ni mengippeamtan kakulugan tu e hi Jesus hu intu-dak Apu Dios ni mengippaptek ni tuu.

<sup>23</sup> Nelabah pigan aggew ey nanuhummangan ida Jews e petteyen da hi Saul. <sup>24</sup> Et kewa-wa-wa niya kelallabbi ey daka bebtakad eheb ni bebley ma-lat patyen da. Nem dingngel tu damengu humman ni ninemnem dan pehding dan hi-gatu. <sup>25</sup> Et hakey ni hileng ey binaddangan idan sinuttudduan tu et iha-ad dad ayyud et padelan dad habhabyen et layagen dad ba-hil ni luhud et bumsik.

### *Ya an nenang-angan Saul idan kamengullug nan Jesus di Jerusalem*

<sup>26</sup> Yan dintengan Saul di Jerusalem ey impatna tun meki-emmung idan kamengullug diman, nem ida kaumtakut ni hi-gatu, tep kanda nem itek tu hu kantun kamengullug law nan Jesus. <sup>27</sup> Nem ingkuyug Barnabas et ilaw tud kad-an idan apostles et peamta tun hi-gada hu nampeang-angan Jesus et makiungbal ni hi-gatud dalam di Damascus. Ey inhel tun hi-gada hu nengituttuddan Saul di Damascus ni meippanggep nan Jesus. <sup>28</sup> Et abuluten law idan apostles et mekikillaw ni hi-gadan nandaladalan di Jerusalem et endi takut tun nengituttuddan meippanggep nan Jesus. <sup>29</sup> Wadaddadman etan Jews ni Greek hu ehel dan nekihubehubeg nan Saul et pinhed dan petteyen. <sup>30</sup> Nem dingngel idan kamengullug humman, et ilaw dad Cesarea et manglaw di Tarsus.

<sup>31</sup> Yadda kamengullug di Judea, yad Galilee et yad Samaria ey limminggep ida law ey kamangkeihhammad hu daka pengulug. Ey ida kamangkedakkel ey daka paka-u-unnuda hu pinhed Apu Dios ni pedhing da tep ya baddang ni Ispirituh tu.

*Ya an nenang-angan Peter idan kamengullug nan Jesus di Lidda niyad Joppa*

<sup>32</sup> Hi Peter ey nanglananglaw di kebebheley et dumteng di Lidda ni an menang-ang idan kamengullug nan Apu Dios diman. <sup>33</sup> Wadadman etan nedahuy e hi Aeneas e walun toon law hu nambakbaktadan tu. <sup>34</sup> Kan Peter ni hi-gatuy "Aeneas, imepyaggud daka law nan Jesus Christo. Inah ka. Alam eya abek mu." Ey pinhakkeyey immehneng tu-wangu e kayyaggud law. <sup>35</sup> Inang-ang idan tuud Lidda niyadda tuud Saron humman ni neipahding ey nengulug idan emin nan Apu Jesus Christo.

<sup>36</sup> Ey yad Joppa ey wadad man etan hakey ni biin kamengullug nan Jesus. Hi Tabitha hu ngadan tu e yad ehel ni Greek ey Dorcas e ya keibbellinan tu ey makwah. Kayyaggud elaw tu tep dakel hu binaddangan tu niya dakel hu inhemehemek tuddan nangkewetwet. <sup>37</sup> Entanni ey nandegeh et matey. Impaptek da e immeh da et balwasian da et da iha-ad di nengin-ahpat ni kuwaltuh ni baley tu. <sup>38</sup> Dingngel idan kamengullug di diman Joppa e wada hi Peter di Lidda, et menu-dak idan an mengikkuyyug ni hi-gatu. Anggagannu ey immalidda tep nanhenup hu Lidda niya Joppa.

<sup>39</sup> Dimmateng di Peter et ipengulu da etan di kad-an ni netey ey wada hakkey idaddan nebalun bii ey ida kamannengngih ey daka pampeang-ang nan Peter hu babalwasi dan kinugut lan Dorcas. <sup>40</sup> Nem impa-hep Peter idan emin etan wadad kawaltuh et mandukkun ni nandasal. In-ang-ang tu etan ni netey et kantuy "Tabitha, bangun ka." Pinhakkeyey dinyat tu matetu. Inang-ang tu hi Peter et ebuhe yumudung. <sup>41</sup> Singnged Peter hu ngamay tu et peehneng tu. Et pahgep tudda etan nebalu niyadda etan edum ni kamengullug et peang-ang tun hi-gada e netagwan. <sup>42</sup> Nandingngel huyyad bebley di Joppa ey dakel ida tuun nengulug law nan Apu Jesus.

<sup>43</sup> Nekihahha-ad hi Peter ni pigan aggew di Joppa di baley Simon e mekapyan katat.

## 10

*Ya linawwan Peter di baley di Cornelius*

<sup>1</sup> Yad Cesarea ey wada hi Cornelius e ap-apun hanggatut ni sindalud Italy. <sup>2</sup> Beken ni Jew hi Cornelius, nem tuka pakaddeyyawa hi Apu Dios niya emin idan wadad baley tu ey ida kamengullug nan Apu Dios. Makabbaddang idan nangkewetwet ni Jews niya kamandasal ni kenayun nan Apu Dios.

<sup>3</sup> Hakey ni hambatanganan ey nampeang-ang ni hi-gatu hu anghel Apu Dios e kantuy "Cornelius, immali-ak." <sup>4</sup> Kaitettekel nan Cornelius ey simmattakut et kantuy "Apu, hipa ibbagam?" Kan etan ni anghel ey "Dingngel Apu Dios hu dasal mu ey inang-ang tu hu baddang muddan nangkewetwet." <sup>5</sup> Itu-dak kan tuum di Joppa et dalli awiten hi Simon Peter. <sup>6</sup> Wadad baley etan ni kamengapyan katat e hi Simon, di gilig ni baybay."

<sup>7</sup> Endi maptek ey attukaw etan anghel, et ebuhe itu-dak Cornelius ida etan dewwan bega-en tu et ya etan hakey ni sindalu tun nehammad dama tuka pengullug nan Apu Dios ni an mengewwit nan Peter. <sup>8</sup> Ine-ehhel tun hi-gada hu neipahding et han tudda itu-dak di Joppa.

<sup>9</sup> Nawa-wan nunman ey ida kamenetteng di Joppa etan ida intu-dak Cornelius. Ey kamenglaw dama hi Peter di nedeklan ni atep ni baley ma-lat an mandasal diman. Nandattek aggew ni nunman <sup>10</sup> et wadadman ey ginibek tu e neka-upa. Nem kapan-iddaddan idan edum tud baley hu kenneh da ey wada nampeang-ang ni hi-gatu e heni nan-i-innep. <sup>11</sup> Intangaw tud kabunyan ey neibeghul ey wada inang-ang tun nelayag alin melakkeb ni wangal ni neiketan di epat ni dugu tu. <sup>12</sup> Ey inang-ang tu e immen idan emin hu nambakbaklang ni kaman-ayyam di puyek. Wadadda epat heli tu, yadda kamambinulluh et yadda kamantinayyab ni kapi-yewaddan Jews ni kenneh. <sup>13</sup> Entanni ey wada immehel ey kantuy "Imay Peter, pampili kan pinhed mun palsien ni ihhidam."

<sup>14</sup> Nem hinumang Peter et kantuy “Eleg e Apu, tep endin hekey hu nak nengannan ni heniddan nunyan eleg meibbillang ni malinih.” <sup>15</sup> Impidwa tullu mewan ni imnehel ey kantuy “Entan tu ibilang ni beken ni malinih hu impambalin Apu Dios ni malinih.”

<sup>16</sup> Nampitlu humman ni inang-ang Peter et han la maguyud etan wangal di kabunyan.

<sup>17</sup> Kaunnenemnem hi Peter tep eleg tu amta hu keibbellinan nunman ni inang-ang tu ey dimmateng idad eheb etan intu-dak alin Cornelius tep wada nengitudo e humman baley Simon <sup>18</sup> et daka pan-ibbaga hedin kamanha-ad diman hi Simon Peter.

<sup>19</sup> Nanengtun kaunnenemnem hi Peter tep ya humman ni inang-ang tu ey kan ni Ispirituh Apu Dios ni hi-gatuy “Dimmateng ida etan tellun lakin daka kapan-ibbaga. <sup>20</sup> Lakay et mudda ang-angen et makilaw kan hi-gada. Entan pandinwan mekillaw ni hi-gada, anin ni beken idan Jews, tep hi-gak nengitu-dak ni hi-gadan mengewwit ni hi-gam.” <sup>21</sup> Immehep hi Peter et kantuddan nunman ni tuu ey “Hi-gak hu yuka pan-ibbaga. Kele wada kayudya?” <sup>22</sup> Kan idan etan ni tuu ey “Intu-dak dakemillin Cornelius e apun sindalun Rome. Kayyagud ni tuu ey nehammad hu tuka pengullug nan Apu Dios niya kapekatbaladdan emin ni Jews. Wada nampeang-ang ni anghel ni hi-gatu et ehelen tu e peeyyag daka kunud baley tu et denglen tu ituttuddum.” <sup>23</sup> Et pahgep idan Peter et mandeyaddaman ni nunman e hileng.

Newa-wan nunman et makilaw hi Peter et yadda edum ni kamengullug ni iJoppa. <sup>24</sup> Nehilngan idad dalan et yan newa-waan tu hu dintengan dad Cesarea. Hi Cornelius, ey inemung tudda agi tu et yadda gayyum tu et hehheggeden dadda. <sup>25</sup> Kamenggep hi Peter ey an dinammun Cornelius et mandukun di hinanggan Peter ma-lat dayawen tu. <sup>26</sup> Nem impeehneng Peter et kantun hi-gatuy “Ehneng ka. Entan tuwak dayaw tep nan-inggeh ita e tuu itan dewwa.”

<sup>27</sup> Ida kaman-ung-ungbal ni himmegep ey inang-ang Peter hu dakel ni neamung ni tuu. <sup>28</sup> Kan Peter ni hi-gada ey “Anin hi-gayu et inamta yu e pi-yew ni hi-gamin Jews ni mekiammuammung idan beken ni edum min Jews. Nem impeamtan Apu Dios ni hi-gak e eggak pi-yewa hu pekiammuammung kun kumpulmih ni tuu. Et humman hu, yan nunya ey anin hi Jew hak ey nakka mekiammuammung ni hi-gayun beken ni Jews. <sup>29</sup> Et mukun impaeyag yuwak ey nenginteteballak et umli-ak. Nem hipa gaputun yuwak nengipeayagan?”

<sup>30</sup> Imnehel hi Cornelius et kantuy “Ya eman lan epat ni aggew hu nelabah ni henin nunyan hambatanganan ey nakka mandasal di baley mi ey endi maptek ey wada hu lakin imneheng di hinanggak e kaumhili balwasi tu. <sup>31</sup> Kantun hi-gak ey ‘Cornelius, dingngel Apu Dios dasal mu ey eleg tu liwwanen ida imbenaddag muddan newetwet. <sup>32</sup> Penu-dak kad Joppa et dalli awiten hi Simon Peter. Wadad baley Simon e mekapan katat e wadad gilig ni baybay baley tu.’ <sup>33</sup> Et mukun nenu-dakkak ni mengeyyag ni hi-gam et ay kayyagud et immali kayu. Et deh e neamung kamin nunya ey daitu kauh-uhdungin Apu Dios tep pinhed min dedngelen hu hipan intugun Apu Dios ni ituttuddum ni hi-gami.”

#### *Ya nantuttudduan Peter di baley di Cornelius*

<sup>34</sup> Himmapiit hi Peter et kantuy “Yan nunya law nengamtaan kun emin hu tuu ey nan-iingeh idad hinanggan Apu Dios, <sup>35</sup> tep anin attu nalpuan ni hakey ni tuun tuka daydayawa hi Apu Dios niya kayyagud hu tuka pehding ey kaebbulutan Apu Dios.

<sup>36</sup> Inamta yu etan ehel Apu Dios ni impeamta tun hi-gamin Jews meippanggep ni linggepan tayu tep hi Jesus Christo e Apun emin ni tuu. <sup>37</sup> Ey inamta yudda etan nekapkapyad kebebbley di Judea neipalpu Galilee meippanggep idan impahding Jesus Christo. Neamta huuya eman ni negibbuh ni intuttuddun John hu meippanggep ni benyag. <sup>38</sup> Ey inamta yu e hi Jesus di Nazareth hu nanwadaan Apu Dios ni Ispirituh tu niya et-eteng ni kabaelan tu. Et lumaw di kebebbley et kayyagud ida impahpahding tu niya nan-ekal tu hu dimonyoh ni neihuklung idan tuu tep kabaddangin Apu Dios. <sup>39</sup> Hi-gamin apostles hu nenang-ang-ang ni emin ni impahpahding Jesus di kebebbley di Judea et yad Jerusalem. Pintey da e impatak dad krus, <sup>40</sup> nem sineguan Apu Dios ni katlan aggew et mampeang-ang ni hi-gami. <sup>41</sup> Eleg nampeang-ang di emin ni tuu, nem hi-gamin ebuh ni pinilin Apu Dios ni mengippeamtan meippanggep ni hi-gatu. Et hi-gamidida hu nekikakikan niya nekiinuinum ni hi-gatu eman ni netaguwan tu mewan.

<sup>42</sup> Sinugun dakemin Jesus e mi ituttuddun katuutuu hu meippanggep ni hi-gatu niya peamta mi e hi-gatu hu pinutuk Apu Dios ni manhuwet ni emin ni tuu anin idan netey. <sup>43</sup> Emin ida la eman prophets ey intudek da meippanggep nan Jesus e kanday mepeessinsahan hu liwat ni tuun mengullug nan Christo.”

#### *Ya nenawtan idan Gentiles ni Ispirituh Apu Dios*

<sup>44</sup> Nanengtun kaman-e-ehhel hi Peter ey immali hu Ispirituh Apu Dios et dawten idan emin ni kameneddenggel nunman ni tuka pan-ituttuddu. <sup>45</sup> Ey emin ida etan Jews ni neikuyug nan Peter ey ida kametnga, tep emin ida etan nenawat ni Ispirituh Apu Dios ey beken idan Jews. <sup>46</sup> Inamta da e makulug ni wada law Ispirituh Apu Dios ni hi-gada tep dingngel da e daka daydayawa hi Apu Dios niya kabaelan da law ni mengihheppit ni hin-appil ni ehel ni eleg da amta.

Et kan Peter idan edum tu <sup>47</sup> "Ang-ang yu kedi, beken idan Jews, nem dinwat da hu Ispirituh Apu Dios henin hi-gatsu. Kaw mabalin ni e-legen hu pebenyagan da?" <sup>48</sup> Et ehelen Peter ni hi-gada e pebenyag ida ma-lat peang-ang da nengabulutan dan Jesus. Negibbuh ni nebenyagan ida et ehelen dan manha-ad nidman di Peter, anin pigan aggew ni ebuh.

## 11

*Ya inhel Peter ni gaputun nekiemungan tu niya nekikannan tuddan Gentiles*

<sup>1</sup> Dingngel idan apostles di Jerusalem et yadda kamengullug di bebley di Judea humman ni nengabulutan idan Gentiles ni ehel Apu Dios meippanggep nan Jesus Christo. <sup>2</sup> Nem yan neibangngadan Peter di Jerusalem ey kapihhuladdan edum tun Jews ni kamengullug. <sup>3</sup> Et kandan hi-gatuy "Kele ka nekiammuammung niya kele ka nekikan idan eleg makugit ni tuu?"

<sup>4</sup> Et ehelen tun hi-gadan emin hu neipahding. <sup>5</sup> Kantuy "Hakey ni aggew ni wada-ak di Joppa, ey nakka mandasal etan di atep ey wada impeang-ang Apu Dios ni hi-gak ni nebuyun alid kad-an kun wangal e neiketan hu epat ni dugu tu. <sup>6</sup> Wadan emin etan di wangal hu nambakbaklang ni animal ni kaman-ayyam di muyeng niyad bebley. Wadadda epat heli tu, yadda kamambinullah niyadda kamansinayyab. <sup>7</sup> Entanni ey wada dingngel kun imnehel e kantuy 'Peter, inah ka et mampili kan pinhed mun palsien ni ihhidam."

<sup>8</sup> Nem kankuy 'Eleg e Apu, tep endin hekey nak kinan ni kamepi-yew.' <sup>9</sup> Ey kan mewan etan ni imnehel di kabunyan ey 'Entan tu ibilang ni beken ni malinih hu impambalin Apu Dios ni malinih.' <sup>10</sup> Inpitlu tun inhel humman et han maguyud lad kabunyan humman ni wangal.

<sup>11</sup> Yan nunman ey dimmateng ida etan di baley ni nakka panha-adi etan tellun tuun nalpullid Cesarea ni intu-dak dan an mengewwit ni hi-gak. <sup>12</sup> Ey kan ni Ispirituh Apu Dios ni hi-gak ey eggak mandinwan mekillaw ni hi-gada, anin ni beken idan Jews. Et lumaw kamid baley Cornelius di Cesarea e nekilaw idan hi-gak hu enem ni edum tayun kamengullug. <sup>13</sup> Yan dintengan mid baley tu ey ine-ehhel tun hi-gami hu inang-ang tun anghel e kantu kunun hi-gatuy 'Mulli paeyag hi Simon Peter di Joppa <sup>14</sup> et ituttuddu tu hu elaw ni kehellakniban ma-lat emin kayu, anin idan kamekiha-ad ni hi-gam eyad baley yu ey mehellakniban kayu emin.'

<sup>15</sup> Et lumawwak diman et ilepuk ni mantuttuddu ey immali hu Ispirituh Apu Dios ni hi-gada, heni daman hi-gatsun Jews lan nunman. <sup>16</sup> Ey ninemnem ku eman inhel lan Apu Jesus ni kantuy 'Nambenyagan John ida tuun danum, nem hedin hi-gayu ey mebenyagan kayullin Ispirituh Apu Dios.' <sup>17</sup> Et hedin hanniman e winedan Apu Dios hu Ispirituh tun hi-gadan beken ni Jews, heni dama lan nanwadaan tun Ispirituh tun hi-gatsun Jews ni nengulugan tayun Apu Jesus, et kaw hipa-ak ni an mengikka-leg ni pinhed tun pehding?"

<sup>18</sup> Dingngel da humman ni inhel Peter ey insiked da law ni memihhul ni hi-gatu et daydayawen da hi Apu Dios. Kanday "Hedin tep hanniman, indawat tep daman Apu Dios hu wayah idan Gentiles ni mantuttuyyun liwat da ma-lat dammutun meidwatan idan biyag ni endi pappeg."

*Na-duman ida kamengullug nan Jesus di Antioch*

<sup>19</sup> Yan eman ni nemateyan dan Stephen hu laputun nanhelheltapan idan kamengullug nan Jesus di Jerusalem et maiwehit ida e namsik idad edum ni bebley. Limmaw ida edum di Phoenicia, yad Cyprus, et yad Antioch et ituttuddu da hu meippanggep nan Jesus idan Jews ni ebuh. <sup>20</sup> Nem wadadda kamengullug ni iCyprus niya iCyrene ni limmaw di Antioch et pan-ituttuddaddan Gentiles hu meippanggep nan Apu Jesus. <sup>21</sup> Binaddangan idan Apu Dios et dakel ida Gentiles ni nantuttuyyun liwat da et mangulug idan Jesus.

\* **11:2** 11:2 Yadda Jews, kanday hedin kamengullug hu hakey ni tuu nan Jesus, man mahapul ni pekuggit ma-lat pangipeang-angan tun tuka pengullugi.



<sup>22</sup> Dingnel idan kamengullug di Jerusalem e dakel law hu Gentiles ni kamengullug di Antioch, et itu-dak da hi Barnabas diman. <sup>23</sup> Limmaw diman hi Barnabas ey kaman-am-leng tep em nunman e et-eteng hu baddang Apu Dios ni hi-gada. Et tugunen tudda e mahapul ni ihhammad da daka pengullug nan Apu Jesus niya ittuluy dan mengu-unnud ni hi-gatu. <sup>24</sup> Hi Barnabas ey kayyaggud ni tuu, nehammad tuka pengullug nan Apu Jesus niya et-eteng baddang ni Ispirituh Apu Dios ni hi-gatu. Et humman hu, dakel ida nei-dum ni kamengullug nan Jesus.

<sup>25</sup> Entanni ey limmaw hi Barnabas ni an menang-ang nan hi Saul di Tarsus. <sup>26</sup> Dinteng tudman et ikuyug tu et mambanggad idad Antioch. Et manha-ad idadman ni hantoon et tuttudduan da dakel ni kamengu-unnud nan Jesus. Yadman Antioch hu laputan neingadnan idan kamengullug nan Jesus ni Christiano.

<sup>27</sup> Yan nunman ni nanha-adan dadman ey wadadda hu immalin prophets ni nalpud Jerusalem. <sup>28</sup> Hi Agabus e hakey idan nunman ni prophets ey immehneng et pa-hel ni Ispirituh Apu Dios et kantuy wadalli nemahhig ni bisil di kebbebley di puyek. Huyyan inebig tu ey immamnu eman ni nanpatulan Kelaudius. <sup>29-30</sup> Dingnel idan kamengullug diman humman ni inebig Agabus ey wada hakkeyey immidwat idan kumpulmih ni ibbaddang daddan kamengullug di Judea. Impaela dad Barnabas nan Saul et da la idwat idan kamengipappangguluddan kamengullug diman.

## 12

### *Ya nengipehelheltapan Herod e patul idan kamengullug nan Jesus*

<sup>1</sup> Yan nunman hu nengipehelheltapan Herod e patul idan edum ni kamengullug nan Jesus. <sup>2</sup> Ya hakey ni impahding tu, ey impaputul tu ulun James e agin John. <sup>3</sup> Inamta tu e pinpinhed idan edum ni Jews humman ni tuka pehpending et padpap tu dama hi Peter et pakelabut tu. Impahding tu huyya eman ni Piyestah ni Sinapay ni eleg mekamdugan ni yeast. <sup>4</sup> Hampuluddan enem hu sindalun guwalyan Peter e han-e-pat hu kamanhulluhullul ni mangguwalya. Kanemnemneman Herod e peukkat tuli hi Peter hedin megibbuh hu Piyestah ni Passover, et bistigalen tud hinanggaddan tuu et han tu papetey. <sup>5</sup> Nem yan neikelabutan Peter ey kaiddasadasaliddan kamengullug nan Jesus ma-lat ippaptek Apu Dios.

### *Ya nengibukyatan ni anghel nan Peter*

<sup>6</sup> Yan nunman ni hileng e yan kewa-waan tu hu kan Herod ni kebistigalan Peter, ey binangkiling da hu ngamay tu niya heli tu, et paugip dad nambattanan ni dewwan guwalya. Ey wadadda edum ni sindalun guwalyad habyen ni kallabbutan. <sup>7</sup> Endi maptek ey nabnangan hu bawang etan ni kallabbutan ey wada anghel Apu Dios ni immehneng di kad-an tu. Inwedwed tu hi Peter et bangunen tu. Kantuy "Imay, papuut mu et uminah ka!" Imminah hi Peter ey na-kal ida bangkiling di ngamay tu niyad heli tu. <sup>8</sup> Ey kan etan ni anghel ey "Pambalwasi ka niya pampatut ka." Et u-unnuden Peter. Ey kan mewan etan ni anghel ey "Alam etan mahde ni balwasim et maiunud kan hi-gak."

<sup>9</sup> Et makilaw hi Peter etan ni anghel et umhiep idad kallabbutan. Nem kantu ngu nem i-innep tun ebuh. <sup>10</sup> Linabhan da etan nemangulun guwalya et ya etan neikadwa et dumteng ida etan di habyen ni gumeke ey nealay neibeghul et maukat idad keltad. Ida kamenglaw ey endi maptek ey attu kaw la etan anghel.

<sup>11</sup> Impepuhdanan Peter ey kantuy "Tam beken ni i-innep, makulug ni immali hu anghel Apu Dios ni nemaddang ni hi-gak et meihwang ngak di pinhed di Herod et yadda Jews ni pehding ni hi-gak."

<sup>12</sup> Nangnanglaw la et ipa-yuh tud baley di Maria e hi inan John e kandan hi Mark ey dakel ida neamung ni tuu e ida kamandasal. <sup>13</sup> Sinugtug Peter hu habyen et lumaw etan bega-en da e hi Rodah ni an mengibbeghul. <sup>14</sup> Inimmatunan tu ehel Peter ey hamban tuka ibeghul ey nambesik ni gayetu et kantuddan neamung ey "Immen hi Peter di dallin!" <sup>15</sup> Nem kan idan neamung ey "Itek mu, nemalad!" Nem tuka pepippilit e makulug et kan ida law ni tuu ey "Humman hu anghel Apu Dios ni kamemabbaddang ni hi-gatu."

<sup>16</sup> Ey hedin hi Peter, tagan tu tugtug et da ibeghul. Inang-ang da ey hi-gatu tu-wangu ey natngadda. <sup>17</sup> Impaineng tudda et e-ehhelen tu hu impahding Apu Dios ni nengibukyatan ni hi-gatu. Kantun hi-gaday "Ehel yullin James niyadda edum tayun kamengullug nan Jesus huyyan neipahding." Inhel tu humman et lumaw lad lawwan tu.

<sup>18</sup> Yan newa-waan tu ey wada hakkey idan sindalu ey ida kametemma hedin hipa neipahding et attukaw hi Peter. <sup>19</sup> Immandal Herod e da panhemmakan, nem eleg da hanhamak. Et bistigalen tudda etan sindalun nangguwalya et papetey tudda.

Negibbuh huyya et hi-yanen Herod hu Judea et lumaw di Cesarea et manha-ad nidman.

*Ya neteyyan Herod*

<sup>20</sup> Hi Herod ey anggebe-hel tudda tuud Tyre et yad Sidon. Et lumaw idan an mekihummangan ni hi-gatu ma-lat ma-kal bunget tun hi-gada, tep kamelpud bebley Herod hu kennen da. Limmaw ida ey wada hi Blastus e eta-gey saad tud kapan-apu in Herod. Et ehelen dan hi-gatu e pinhed dan mekihummangan nan Herod.

<sup>21</sup> Yan nagtud ni aggew ni panhuhummanganan da ey imbalwasin Herod hu balwasin patul et an yumudung di yuddunggan tu et umhel idan tuu. <sup>22</sup> Ey ida kamantetekkuk e kanday "Beken ni tuu eya kamanheppit, nem hakey idan dios." <sup>23</sup> Ey pinhakkeyey impandegheh ni anghel Apu Dios hi Herod tep inebulut tu humman ni nenaydayaw idan tuun hi-gatu e eleg tu dayawen hi Apu Dios. Ya degeh tu ey nebigihan hu annel tu et matey.

<sup>24</sup> Entanni ey neihinap hu ehel Apu Dios di kebebbebley ey ida kamangkedakkel hu kamengullug nan Jesus.

<sup>25</sup> Ginibbuh di Barnabas nan Paul hu ngunu dad Jerusalem et mambangngad idad Antioch e ingkuyug da hi John e kandan hi Mark.

## 13

*Ya nepilian di Barnabas nan Paul ni an mantuttuddud kebebbebley*

<sup>1</sup> Yadda kamengullug di Antioch ey wadaddan hi-gada hu prophets niyadda kamantuttuddu henin Barnabas, hi Simeon e andeket ni tuu, hi Lucius di Cyrene, hi Manaen e inetteng eman lan aman Herod, et hi Paul. <sup>2</sup> Yan eman ni pinhakkey ni daka penaydayawin Apu Dios e nantepel ida, ey kan ni Ispirituh Apu Dios ni hi-gaday "Pili yud Barnabas nan Paul ni menginggunun pinhed kan pengunun hi-gada."

<sup>3</sup> Et yan negibbuhan ni nandasalan da niya nantepelan da, ey indasalan dad Barnabas nan Saul e inta-pew dan emin hu ngamay dan hi-gada et han da itu-dak idan an mantuttuddu.

*Ya linawwan di Barnabas nan Paul di Cyprus*

<sup>4</sup> Hanniman hu nengitu-dakan ni Ispirituh Apu Dios di Saul nan Barnabas. Et lumaw idad Selusia et han ida mambangkan limmaw di Cyprus. <sup>5</sup> Ingkuyug da hi John Mark ni memabbaddang ni hi-gada. Dimmateng idad Salamis di Cyprus et ilepu dadman ni mantuttuddun ehel Apu Dios idad simbaan ni Jews.

<sup>6</sup> Impeng da kebebbebley di Cyprus ni da nantuttudduan et lektattuy dimmateng idad Papos e gilig ni bebley diman. Yadman nenammuan dan Bar-Jesus e magician. Kantuy hi-gatu hu prophet Apu Dios, nem itek tu kaya. <sup>7</sup> Humman ni tuu ey gayyum etan ni nelaing ni gubernor diman ni bebley e hi Sergius Palus. Impaeyag Sergius Palus di Barnabas nan Paul, tep pinhed tun dedngelen hu ehel Apu Dios. <sup>8</sup> Nem kapihhulan Bar-Jesus (e kandan hi Elimas di ehel ni Greek) hu kaituttuddud Paul nan Barnabas, tep eleg tu pinhed ni kullugen Sergius Palus hu daka ituttuddun meippanggep nan Jesus. <sup>9</sup> Nem hi Saul e Paul hu hakey ni ngadan tu ey impetuled ni Ispirituh Apu Dios et makihanggan Elimas. <sup>10</sup> Et kantuy "U-ungnga dakan dimonyoh! Muka kehingan emin hu kayyaggud ey maheul ka. Muka kehinga makulug ni kameituttuddun meippanggep nan Apu Dios et muka pambalin ni lawah. <sup>11</sup> Yan nunya ey kastiguen dakan Apu Dios et makulap kan nekemtang." Pinhakkeyey eleg um-ang-ang tu-wangu hu matan Elimas et kaum-ayaayag ni memden ni hi-gatu. <sup>12</sup> Yan nenang-angan etan ni gubernor nunman ni neipahding ey nengulug. Hakey pay ey kametngan inedal tun intuttuddud Paul ni meippanggep nan Jesus Christo.

*Ya nantuttudduan di Paul di Antioch*

<sup>13</sup> Entanni ey hini-yan di Paul et yadda etan edum tu hu bebley di Papos et ida mambangka et lumaw idad Pelga di Pampilya. Yadman hu neni-yanan John Mark ni hi-gada et mambangngad di Jerusalem. <sup>14</sup> Limmaw damad Paul di Antioch di Pisidia. Nedatngan hu Sabaduh et lumaw idad simbaan idan Jews et makiemung idan mandeyyaw nan Apu Dios. <sup>15</sup> Negibbuh ni nebidbid hu Tugun Moses et ya intudek idan prophets ey yadda etan ap-apud simbaan ey kan dad Paul nan Barnabas ey "Agi midda, hedini wada pinhed yun ittugun ni hi-gamin neamung ey kayyaggud tu hu ehel yu."

<sup>16</sup> Imminah hi Paul et paineng tudda et kantuy "Hi-gayuddan edum kun helag Israel, niyadda beken ni helag Israel ni kamenaydayaw nan Apu Dios, dengel yu eya e-helen kun hi-gayu. <sup>17</sup> Hi Apu Dios e Dios tayun helag Israel ey pinili tudda aammed tayun nunman ni pantu-u tu et yan eman ni wadaddad Egypt ey impedakkel tudda. Nelabah

hu pigan toon ey impangulu tudda et hi-yanen da Egypt gapuh ni et-eteng ni kabaelan tu. <sup>18</sup> Et an-anusan tuddan na-pat ni toon di eleg mebebleyi. <sup>19</sup> Impeapput tun hi-gada hu nampambebley di pitun bebley di Kanaan et idwat tun hi-gadan pambbebleyan da. <sup>20</sup> Huyyadda neipahding ni umlaw ni epat ni gatut et neliman toon.

Negibbuh humman et pilien Apu Dios ida ap-apu daddan nanhuluhulul ni mengipaptek ni hi-gada ingganah eman ni wada hi Samuel e prophet. <sup>21</sup> Entanni ey nambagaddan mampatul ni hi-gada et putuken Apu Dios hi Saul e u-ungngan Kish e helag Benjamin, et hi-gatu nampatul idan aammed tayun na-pat ni toon. <sup>22</sup> Ingkal Apu Dios hi Saul et ihullul tu hi David e u-ungngan Jesse, et yan nunman nanghelan Apu Dios ni kantuy 'Hi David hu pinutuk ku tep tuka u-unnudan emin hu elaw ku.' <sup>23</sup> Impakulug Apu Dios e yalli hakey ni helag David hu menellaknib idan helag Israel. Et peamnu tun nengipealian tun Jesus. <sup>24</sup> Nem eleg ni ilepun Jesus Christo ni mantuttuddu ey wada hi John ni nengituttuddan helag Israel e mahapul ni mantuttuyuddan liwat da et han ida pebenyag. <sup>25</sup> Yan eman ni kamangkegibbuh hu impangunun Apu Dios nan John ey kan tuddan tuu ey 'Bekennak etan ni impakulug Apu Dios ni menellaknib ni tuu, nem wadalli um-alin meihhullul ni hi-gak. Hi-gatu ey neta-ta-gey ni peteg hu saad tu nem hi-gak et eggak pay anhan meibbillang ni mambalin ni bega-en tu.'

<sup>26</sup> Intuluy Paul e kantuy "Hi-gayuddan edum kun helag Abraham niya hi-gayuddan Gentiles ni kamenaydayaw nan Apu Dios, ey hi-gatsun emin hu nengipeamtaan Apu Dios ni elaw ni kehellakniban. <sup>27</sup> Yadda tuud Jerusalem et yadda ap-apu da ey eleg da amta e humman ni Jesus hu pinutuk Apu Dios ni menellaknib ni tuu niya eleg da awatan e meippanggep ni hi-gatu hu intudetudek ida eman lan prophets ni daka bennidbidad simbaan ni kesabasabaduh. Et papetey da hi Jesus et umamnudda hu binenidbid da. <sup>28</sup> Endi gaputun pemetteyan dan Jesus tep endi daka hemmakan bahul tu, nem kapyu tun pinhed dan pepettey nan Pilate. <sup>29</sup> Negibbuh ni impahding dan emin hu neitudek ni meippanggep ni keteyyan tu ey ingkal dad neipetakan tud krus et da ikulung, <sup>30</sup> nem sineguan Apu Dios. <sup>31</sup> Et mampaenang-ang idan nekikillaw ni hi-gatu eman ni linawwan dad Jerusalem ni nalpuan tud Galilee. Et yan nunya ey hi-gada hu kamengituttuddan tuud Israel ni meippanggep nan Jesus. <sup>32-33</sup> Et mukun immali kamidyan nunya ey ma-lat peamta min hi-gayu huyyan kayyaggud ni inhel Apu Dios. Huyya eman impakulug tudda lan aammed tayu et deh e immamnun nunyan hi-gatsun helag da. Tep makulug ni sinagwan tu hi Jesus ni neteyyan tu. Huyya neitudek di Psalms ni meippanggep ni hi-gatu e kantuy

'U-ungnga dakan hi-gak. E-helen kun nunya e hi-gak hi Amam.' \*

<sup>34</sup> Ey ya kakulugan tun eleg iebulut Apu Dios ni mebwel annel Jesus di kulung tep sinagwan tu, ey neitudek e kantuy

'Peamnuk daman emin ni hi-gam hu impakulug ku lan eman ni ammed mu e hi David.'

† <sup>35</sup> Neitudek pay di liblul ni Psalms e kantuy

'Eleg mebwel annel etan ni nakappinshed ku, tep tegguan kun keteyyan tu.' ‡

<sup>36</sup> Beken ni hi David hu pinhed tun e-helen. Tep hedin hi David ey ginibbuh tun emin hu pinhed Apu Dios ni pehding tu et matey et maikulung di gungat idan aammed tu et mabwel hu annel tu. <sup>37</sup> Nem eleg mabwel hu annel Jesus tep sinagwan Apu Dios.

<sup>38</sup> Et humman hu, hi-gayun kaegi, pinhed min amtaen yu e ya neteyyan Jesus et ya netagwan tu hu gaputun pessinsahan Apu Dios hu liwat tayu. <sup>39</sup> Ey gapuh nan Jesus ey emin hu mengullug ey mepessinsahan hu liwat tu et mambalin ni kayyaggud di kapenang-ang Apu Dios. Huyya hu eleg han-ipahding ni pengu-unnudan ni Tugun Moses. <sup>40</sup> Helipat-i yu ma-lat eleg maipahding ni hi-gayu hu inhel ida lan eman ni prophets e kanday

<sup>41</sup> 'Hi-gayun tuka pihhula ehel Apu Dios, metnga kayullin pehding ku, nem eleg yu kulluga anin ni wada mengippeamtan hi-gayu. Et humman hu, mettey kayulli et meidawwi kayun hi-gak.'

<sup>42</sup> Negibbuh ni intuttuddu Paul nan Barnabas ida huyyad simbaan ey immalidda etan Jews et ehelen da e pinhed dan mambanggad idan mantuttuddu mewan ni hakey alin Sabaduh. <sup>43</sup> Nebukal idad neamungan da ey dakek ida Jews niyadda beken ni Jews ni kamengu-unnud ni elaw ni Jews ni neiunud di Paul nan Barnabas et tugunen dadda e eleg da issikked ni mengu-unnud nan Apu Dios, niya pannananeng dan mengiddinnel ni binabbal tu.

<sup>44</sup> Nedatngan mewan hu Sabaduh ey neamung idan emin hu tuud man ni an menggel ni ittuttuddu dan ehel Apu Dios. <sup>45</sup> Nem inang-ang idan ap-apuddan Jews

\* **13:32-33** 13:32-33 Ang-ang yu Psalm 2:7, Hebrews 1:5 et ya 5:5. † **13:34** 13:34 Ang-ang yu Isaiah 55:3. ‡ **13:35** 13:35 Ang-ang yu Psalm 16:10.

ni eleg mengullug hu dakel ni tuun neamung ey peteg ameh dan Paul. Daka pippihula niya daka kakkahinga hu tuka ituttuddu. <sup>46</sup> Nem endi takut di Paul nan Barnabas ni nantuttuddu. Kanday “Ya kakulugan tu ey hi-gayun edum middan Jews hu memengngulun pengippeamtaan min meippanggep ni ehel Apu Dios, nem gapu tep eleg yu ebbuluta tep kahing kayu ey humman keang-angan tu e eleg yu pinhed ni wadalli biyag yun endi pappeg tu. Et humman hu, yadda ew ngu hu Gentiles hu mi pengituttudduan <sup>47</sup> tep wada la dedan intugun Apu Dios ni hi-gamin kantuy ‘Pinutuk dakeyun heni dilag ni an mengippeamtaddan Gentiles di kebebbley di puyek ni meippanggep ni kehellakniban.’ ” §

<sup>48</sup> Dingngel idan Gentiles huyya ey ida kaman-am-amleng et daydayawen da hi Apu Dios tep kinulug da ehel tu. Emin ida etan pinilin Apu Dios ni menewwat ni biyag ni endi pappeg tu ey nengulug ida.

<sup>49</sup> Et huuyan ehel Apu Dios ey nan-amtad kebebbley diman. <sup>50</sup> Nem entanni ey sinuttullun idan edum ni Jews ni kahing ni elaw Jesus etan edum ni ap-apudman niyadda edum ni bibi-in Gentiles ni eta-gey saad dan kamenaydayaw nan Apu Dios et pampalpaligat dad Paul nan Barnabas et pea-allaw daddadman ni bebley. <sup>51</sup> Et pampukpuken di Paul nan Barnabas hu dep-ul di patut da et lumaw idad Iconium. Humman ni nemukpuken dan dep-ul di patut da hu pengippeang-ang dan nanliwat ida etan bimbley. <sup>52</sup> Nem yadda ngu kamengullug di Antioch ey ida ni-ngangu kaman-am-amleng niya et-eteng baddang ni Ispirituh Apu Dios ni hi-gada.

## 14

### *Ya linawwan di Paul di Iconium*

<sup>1</sup> Yan linawan di Paul nan Barnabas di Iconium ey ida nantuttuddud simbaan ni Jews ey dakel ida nengulug ni Jews niyadda Gentiles tep kayyaggud hu nenuttuddu da. <sup>2</sup> Nem yadda etan Jews ni eleg mengullug ey sinuttullun dadda Gentiles e kanday lawah ida hu kamengullug nan Jesus. <sup>3</sup> Nem nanha-ad di Paul nan Barnabas diman ni nebayag e eleg ida tumekut ni nengituttuddun meippanggep ni et-eteng ni baddang Apu Jesus. Indawtan idan Apu Dios ni kabaelan dan mengippahding idan miracles ma-lat peang-ang da kakulugan tu e nalpun Apu Dios hu daka ituttuddu. <sup>4</sup> Nem negadwadda tuud Iconium. Yadda edum ey kinulug da hu kae-e-hela ida etan ni Jews ni hi-gada. Nem yadda edum ey kinulug da intuttuddud Paul nan Barnabas.

<sup>5</sup> Entanni ey ninemnem idan edum ni Gentiles et yadda Jews niyadda ap-apu dan tengbaen di Paul nan Barnabas. <sup>6-7</sup> Nem indaddatteng idan tuu humman ni ninemnem dan pehding et ebuhe bumsik idad Listera et yad Derbe di Liconia et yadda nanlinikweh ni bebley diman. Et itulug dan mantuttuddu meippanggep nan Jesus.

### *Ya linawwan di Paul di Listera niyad Derbe*

<sup>8</sup> Yan kaweda dad Listera ey wada etan lakin kaumyuyudung tep nedahuy dedan ni neiungnaan tu et eleg tun hekey patnaan ni dimmalan. <sup>9</sup> Kamantuttuddu hi Paul ey kamandeddengngel humman ni nedahuy. In-ang-ang Paul ni hi-gatu ey inamta tu e tuka kullugan me-kal degeh tu <sup>10</sup> Et eleten Paul ni inhel e kantuy “Ehneng ka!” Pinhakkeyey immehneng et dumlan. <sup>11</sup> Inang-ang idan neamung humman ni impahding Paul ey ida kamampantetekuk e kanday “Huyyaddan immali ey dios ni nangkapyan tu!” Hedin di Paul nan Barnabas, ey eleg da awatan humman ni daka itettetkuk, tep eleg da amta hapit da. <sup>12</sup> Inngadnan da hi Barnabas ni hi Zeus e hakey ni dios da ey hedin hi Paul, kanday hi-gatu hi Hermes tep hi-gatu kaumhapihapit. <sup>13</sup> Ya baley nan Zeus ey wadad a-allaw ni bebley. Ya etan padin Zeus ey nan-i-li tu babakka et yadda edum ni i-appit da etan di eheb, tep pinhed dan i-appitan di Paul nan Barnabas.

<sup>14</sup> Nem dingngel di Paul nan Barnabas humman ni da ipahding ey bini-ki da balwasi dan pengippeang-angan da e eleg da pinhed humman et papuut dan limmaw di kadan idan tuu et kandan hi-gaday <sup>15</sup> “Ayyakaw kayu. Kele hipa huuyan yu ippahding? Hi-gami ey tuu kami henin hi-gayu. Immali kamin mengituttuddun meippanggep nan Jesus Christo ma-lat isiked yudda huuyan yuka pehpehding ni endi silbitu et hi Apu Dios e wadan ingganah hu daydayawen yu. Tep hi-gatu nanletun puyek, ya kabunyan, ya baybay niya emin ni wadadman. <sup>16</sup> Yan eman ni nebayag ey in-abulut Apu Dios ni pehding yun Gentiles hu pinhed yu, <sup>17</sup> nem indawtan dakeyun pengi-immatunan yu e wada hu makulug ni Dios, tep tuka iddawat hu panyaggudan yu. Tuka peelli udan, tuka pelemmeh hu intanem yu, dakeyu kaidawsin kenen yu niya dakeyu kapeamleng.”

§ 13:47 13:47 Ya dewwan et-eteng ni bendisyon idan nehelakniban ey ya kakepessinsahin liwat et ya kapenewwatin biyag ni endi pappeg tu.

<sup>18</sup> Anin ni inhel di Paul nan Barnabas ida huuya et neligatan idan nengika-leg ni panappitan idan tuun hi-gada.

<sup>19</sup> Entanni ey wadadda immalin eleg mengullug ni Jews ni nalpud Antioch et tuttullunen dadda edum ni tuu et pantengbaen da hi Paul et pan-iguyud dad a-allaw ni bebley tep kanda na-mu ngu nem netey. <sup>20</sup> Nem entannit neamung ida etan kamengullug di kad-an tu ey bimmangun et mambanggad di bebley. Newa-wan nunman et lumaw idan Barnabas di Derbe.

*Ya nambangganan di Paul di Antioch*

<sup>21</sup> Nantuttuddu idad man ni meippanggep nan Jesus ey dakel ida nengulug. Et mambanggad idad Listera, yad Iconium et yad Antioch di Pisidia <sup>22</sup> Sinuttudduan dadda kamengullug ma-lat maihammad hu daka pengullug. Ey sinugun dadda e pannenneng da daka pengullug. Kanday “Kapyta tun manliggat itsu dedan tep mahapul ni pelebbah tayu hu dakel ni ligat et han itsu maila-kam di nan-ap-apuan Apu Dios.” <sup>23</sup> Pinutuk di Paul nan Barnabas hu mengipappangnguluddan edum dan kamengullug di kesimsimbanan diman. Ey nantetepel idan nengidasadasalan dan hi-gada ma-lat baddangan idan Apu Jesus e daka pandinneli.

<sup>24</sup> Negibbuh humman et manglaw di Paul nan Barnabas di Pampilya e indalan dad Pisidia. <sup>25</sup> Et mantuttudduddad Pelga ni meippanggep nan Jesus et han ida mandayyud Attalia. <sup>26</sup> Nanlugan idad bapor diman et mambanggad idad Antioch di Syria, tep ginibbuh da impangunun Apu Dios ni hi-gada. Yadman hu nengidasalan ida lan edum dan kamengullug eman ni nengilepuan dan nunman ni ngunu da ma-lat ipaptekan idan Apu Dios.

<sup>27</sup> Yan nambangganan dad Antioch ey inemung dadda kamengullug diman et e-ehhelen dan emin hu nemenaddangan Apu Dios ni hi-gada et ya nengipeamtaan tuddan Gentiles e dammutu daman mehellakniban ida hedin mengulug idan Jesus. <sup>28</sup> Et makihaad di Paul nan Barnabas idan kamengullug diman ni pigan bulan.

## 15

*Ya neamungan idan ap-apuddan kamengullug nan Jesus di Jerusalem*

<sup>1</sup> Yan nunman ni wadad Paul nan Barnabas di Antioch di Syria ey wadadda immalin Jews ni nalpud Judea et ittuttuddu daddan Gentiles ni kamengullug Jesus e mahapul ni pekuggit et han abulutan Apu Dios ida, tep humman kunu hu kan Moses di Tugun tu. <sup>2</sup> Huuya hu himmulun ni nekihubeagan di Paul nan Barnabas ni hi-gada. Entanni ey kanday mahapul ni umlaw di Paul nan Barnabas et yadda edum ni kamengullug di Jerusalem et da ihuhummangan idaddan apostles et yadda kamengipappangnguluddan kamengullug hu meippanggep ni nunman ni daka panhahallai.

<sup>3</sup> Yan linawwan dadman Jerusalem, ey indalan dad Phoenicia et yad Samaria et e-ehhelen daddan kamengullug diman hu nengulugan idan Gentiles ey immamleng idan emin ni nangngel ni nunman. <sup>4</sup> Dimmateng idad Jerusalem ey kamanggayayadda hu kamengullug diman anin idan apostles niyadda kamengipappangnguluddan kamengullug. Ine-ehhel daddan kamengullug diman hu nemenaddangan Apu Dios ni hi-gadan nantuttudduan da.

<sup>5</sup> Nem wadadda etan Pharisee ni kamengullug law nan Jesus ni immehneng et kanday “Mahapul ni pekuggit ida Gentiles ni nengulug niya mahapul ni u-unnuden da Tugun Moses.”

<sup>6</sup> Neamung ida apostles niyadda kamengipappangnguluddan kamengullug et ihuhummangan da humman. <sup>7</sup> Nebayag ni himmenummangan ida ey pinhakkeyey immehneng hi Peter et kantuy “Kaegiegi, inamta yu e hi-gak hu pinutuk Apu Dios nunman ni hi-gatsun an mengituttudduan Gentiles ni meippanggep nan Jesus ma-lat amtaen da et kullugen da hu et-eteng ni impeminhed Apu Dios ni hi-gatsun tuu. <sup>8</sup> Hi Apu Dios e nengamtan wadad nemnem ni tuu ey impeang-ang tu hu nengabulutan tun hi-gadan nengidwatan tun Ispiritu tun hi-gada, henin nengidwatan tun hi-gatsu. <sup>9</sup> Endi an nengituppagan Apu Dios ni kakinayyaggud tu, tep anin ni hi-gada et taka panyaggud nemnem da hedin ida kamengullug ni hi-gatu. <sup>10</sup> Et humman hu, kele yu pepillit ni u-unnuden idan Gentiles ni kamengullug hu Tugun Moses? Tam anin ni hi-gatsu et yadda aammed tayun Jews et eleg dan hekey han-u-unnud ida humman ni Tugun. <sup>11</sup> Ya kakulugan tu ey hi-gatsun Jews ni kamengullug ey tayu kakulluga e mehellakniban itsu gapuh ni binabbal niya hemek Apu Jesus ni hi-gatsu henin nunman damaddan beken ni Jews.”

<sup>12</sup> Humman hu inhel Peter ey immeneeneng ida et deddengngelen da hu ine-ehhel di Paul nan Barnabas ni nemenaddangan Apu Dios ni hi-gada et ipahding da dakel ni

miracles niyadda pengi-immatunan ni et-eteng ni kabaelan tun linawwan dad bebley idan Gentiles. <sup>13</sup> Negibbuh humman ey himmapit dama hi James. Kantuy “Kaegiegi, dengel yu eya pinhed kun e-helen ni hi-gayu. <sup>14</sup> Inhel Simon Peter ni hi-gatsu hu meippanggep ni laputun nengipeang-angan Apu Dios ni kaguh tuddan Gentiles ni nemilian tun edum ni hi-gadan mambalin ni tuu tu. <sup>15</sup> Huyya inamnuan eman inhel Apu Dios ni impeamta tuddan prophets et itudek da. Kantuy

<sup>16</sup> ‘Hehmeken kuddalli mewan hu helag David et daydayawan da-ak ali mewan ni hi-gada heni lan eman ni ketaggun David. <sup>17</sup> Et yallin nunman ey heppulen da-ak alin edum ni tutu-ud puyek tep pinilik ida daman pantu-uk.’ <sup>18</sup> Huyya la hu impeamta dedan Apu Dios eman ni nebayag.”

<sup>19</sup> Kan pay James ey “Nakka nemnemnema e beken ni tayudda panliligat hu Gentiles ni nengulug nan Apu Dios. <sup>20</sup> Nem ya kumaddan pehding tayu ey mantuddek itsun hi-gada et tugunen tayudda e eleg da kenna hu detag ni in-appit daddan beken ni makulug ni dios, ya kuheyaw, ya detag ni animal ni daka pansinillud niya ma-lat eleg da iulig hu beken dan ahwa. <sup>21</sup> Tep huyyaddan intudek Moses ni Tugun ey neitenuttuddud kakeemmumungiddan Jews ni Sabaduh, neipalpu eman lan nebayag ingganah nunya.”

*Ya nantudkan daddan Gentiles ni nengulug nan Jesus*

<sup>22</sup> Et manhuhummangan ida apostles, yadda kamengipappangnguluddan kamengulug et yadda edum ni kamengullug, et pilien dadda dewwan kamengipappangngulun mekillaw di Paul nan Barnabas di Antioch. Yadda nepili ey hi Judas e Barsabas hu hakey ni ngadan tu, et hi Silas. <sup>23</sup> Hi-gada hu nengilaw ni nunman ni kinapya dan tudek.

Ya etan neitudek ey kantuy “Hi-gayuddan agi min Gentiles di Antioch, yad Syria, et yad Cilicia, huyyan tudek ey nalpun hi-gamiddan apostles niyadda kamengipappangnguluddan kamengullug di Jerusalem. <sup>24</sup> Dingngel mi e wadadda nalpudyan immalidtan ni nantuttuddun hin-appil ni u-unnuden yu. Eleg mi itu-dak ida huttan ni immalin mantuttuddu <sup>25-26</sup> et mukun neamung kamin kamengullug di deya et pilien midda hu meki-lid Paul nan Barnabas ni mengidteng eyan intudek mi. Huyyaddan agi tayu e di Paul nan Barnabas ey impeladdan da biyag dan nengituttudduan dan meippanggep nan Apu tayu e hi Jesus Christo. <sup>27</sup> Hi Silas et hi Judas ey ittu-dak min menghel ni hi-gayun eyan neitudek. <sup>28</sup> Impenemnem ni Spiritu Apu Dios ni hi-gami e eleg mi e-dumi eya ittugun min hi-gayu ma-lat eleg ma-duman hu ligat yu. <sup>29</sup> Yan ebuh hu pinhed min u-unnuden yu ey entan tu ekan hu detag ni neiappit di beken ni makulug ni dios, ya kuheyaw, niya nansinillud ni animal, niya entan tu iulig hu beken yu ahwa. Panyaggudan yu hedin u-unnuden yudda huyya. Hi-gamiddan apostles et yadda kamengipappangnguluddan kamengullug hu nengitudek ni nunya. Huyyan ebuh hu pinhed min e-helen ni hi-gayu.”

<sup>30</sup> Et lumaw di Paul, hi Barnabas, hi Judas et hi Silas di Antioch, et amungen dadda emin hu kamengullug nan Jesus et idwat da etan tudek. <sup>31</sup> Binidbid da ey ida kaman-am-amleng, tep kayyaggudd humman ni intugun da. <sup>32</sup> Hi Judas et hi Silas ey kabaelan da daman mantuttuddu et dakel hu intuttuddudaddan kamengullug diman ma-lat maihammad hu daka pengullug. <sup>33-34</sup> Nanha-ad idadman ni pigan aggew et yan eman ni peni-yanan da law idan kamengullug diman ey kandan hi-gaday “Kayyaggudd la pandellanan yu ey meihwang kayud hipan lawah.” Et mambanggad idad Jerusalem. \* <sup>35</sup> Hi Paul et hi Barnabas ey nanha-ad ida ni damadman Antioch et mambabaddang idaddan iAntioch ni nengituttuddun meippanggep nan Apu tayu e hi Jesus Christo.

*Ya nanhi-yanan di Paul nan Barnabas*

<sup>36</sup> Hakey ni aggew ey kan Paul nan hi Barnabas ey “Umlaw itan an menang-ang idan emin ni nengulug di kebbebley di nantuttudduan tan meippanggep nan Apu Jesus et pengamtaan ta hedin nanengtun ida kamengullug.” <sup>37</sup> Inebulut Barnabas, nem pinhed tun ikuyug da hi John e Mark hu hakey ni ngadan tu, <sup>38</sup> nem eleg ni hekey pinhed Paul, tep eleg ituluy John Mark ni bimmaddang ni hi-gada ingganah ni negibbuh hu ngunu da, nem nealay hini-yanan tudda eman ni wadaddad Pampilya. <sup>39</sup> Ebuh humman ey nanhubeg ida, et humman himmulun ni nanhi-yanan da. Et ikuyug Barnabas hi John Mark et mambangkadda et lumaw idad Cyprus. <sup>40</sup> Hi Paul, ey hi Silas dama impangkadwa tu. Neamung ida kamengullug diman Antioch et mandasal idan Apu Dios ma-lat ipaptek

\* **15:33-34** 15:33 Yadda edum ni neitudek di Greek ni libluh ni Acts ey wada verse 34 et huyya kantu: Nem hi Silas ey ninemnem tun eleg mambanggad et manha-ad diman.

tud Paul nan Silas. <sup>41</sup> Indalan dad Syria et yad Cilicia et tuttudduan dadda kamengullug diman ma-lat maihammad hu daka pengullug.

## 16

*Ya nekilawwan Timothy di Paul nan Silas*

<sup>1</sup> Limmaw di Paul nan Silas di Derbe et han ida lumaw di Listera ey wada etan kamengullug diman e hi Timothy ngadan tu. Hi inetu ey Jew e kamengullug dama, nem hi ametu ey Greek. <sup>2</sup> Katettebaladdan kamengullug di Listera et yad Iconium hi Timothy. <sup>3</sup> Pinhed Paul ni ikkuyug ni an mantuttuddu et pakugit tu, tep inamtaddan Jews diman e eleg makugit tep Greek hi ametu. <sup>4</sup> Emin di kebebbeley ni linawwan da ey intuttuddu dadda etan mahapul ni u-unnuden dan tugun e humman ida etan inuhummangan idan apostles niyadda kamengipappangnguluddan kamengullug di Jerusalem. <sup>5</sup> Kamangkeihhammad hu kapengullug idan nengulug ey ida kamangkedumin kewa-wa-wa hu kamengullug.

*Ya ini-innep nan Paul di Troas*

<sup>6</sup> Indalan di Paul di bebley di Paligya et yad Galatia tep kaikka-leg ni Ispirituh Apu Dios hu da pantuttudduan idad bebley di Asia. <sup>7</sup> Dimmateng idad gilig ni bebley di Misia et pinhed da et ni umlaw di Bitinia, nem kaikka-leg mewan ni Ispirituh Apu Dios <sup>8</sup> et idlan da law di Misia et mandayyuddad Troas. <sup>9</sup> Yan nunman ni hileng, ey nan-innep hi Paul e wada etan tuun nalpud Macedonia e kantun hi-gatuy "Ali kayu anhan di Macedonia et dakemi baddangan." <sup>10</sup> Gapuh nunman ni i-innep Paul ey nandaddan kami et lumaw kamid Macedonia, tep inamta min pinhed Apu Dios ni kami mantuttuddudman ni meippanggep ni impahding Jesus Christo ni panyaggudan ni tuu.

*Ya nengabulutan Lydia e hi Jesus hu Apu tu*

<sup>11</sup> Nanlugan kamid bapor et lumaw kamid Samotesia. Newa-wa et lumaw kamid Neapolis. <sup>12</sup> Et han kami lumaw di Philippi e et-eteng ni bebley di Macedonia et manhad kamidman ni pigan aggew. Humman ni bebley ey sinekup ni Rome.

<sup>13</sup> Nematngan hu Sabaduh et lumaw kamid ba-hil etan ni bebley di gilig ni wangwang, tep mika nemnemnema e wada daka keemmungidman ni pandaydayawan dan Apu Dios. Nekieming kamidman bii et ittuttuddu min hi-gada hu meippanggep nan Jesus Christo. <sup>14</sup> Wada etan hakey ni bii e hi Lydia di Tiatira e kamanggettang ni nenginan luput. Hi Lydia ey Gentile, nem kamei-e-eddum idan Jews ni mandaydayaw nan Apu Dios. Hi-gatu ey kamei-ellig ni binnangan Apu Dios hu nemnem tu et kulugen tu hu intuttuddun Paul ni meippanggep nan Jesus. <sup>15</sup> Et pebenyag hi Lydia et yadda wadad baley da. Kan Lydia ni hi-gamiy "Hedin dakemi kaibbilang ni kamengullug law nan Jesus, pakilaw kayud baley mi et anin yadman panha-adan tayu." Et makilaw kami et makiha-ad kamidman.

*Ya neikelabutan di Paul nan Silas*

<sup>16</sup> Hakey ni aggew e immela kamin an mandeyyaw nan Apu Dios ey dinammu dakemi etan ni biin bega-en ni wada kameihhuklung ni hi-gatun dimonyoh. Yadda etan kan bega-en ni hi-gatu ey dakel hu daka emmungan pihhuh ni kaibbayad idan tutu-un kamampedibban hi-gatu, tep kabaelan tun e-helen hu hipan meippahding alin hakey ni aggew etan ni tuu. <sup>17</sup> Neipunud ni hi-gamid Paul ey tuka itettetkuk e kantuy "Huyyaddan tuu ey intu-dak idan Apu Dios e Keta-ta-geyyan. Daka ittuttuddu hu elaw ni kehellakniban yu."

<sup>18</sup> Humman hu kaitteketekuk nunman ni bega-en ni biin kewa-wa-wa ey impeinglay nan Paul et kantu etan ni neihhuklung ey "Hi-gam ni dimonyoh, ey gapuh ni et-eteng ni kabaelan Jesus Christo, ey ka-kal ka eyad bii." Ey pinhakkeyey na-kal humman ni dimonyoh.

<sup>19</sup> Yan nengamtaan idan kan bega-en nunman ni bii, e endi law pengellaan dan dakel ni pihhuh ey impadpap dad Paul nan Silas et ilaw daddad mulkaduh di kad-an ni apapud man ni bebley. <sup>20</sup> Inlaw daddad kad-an ni apapu et kanday "Huyyaddan Jews ey daka ipappangngulu hu guluh eyad bebley tayu. <sup>21</sup> Daka ittuttuddu hu hin-appil ni elaw ey eleg mabalin ni ebbuluten tayu winu tayu u-unnuden tep neibilang itsun tuud Rome."

<sup>22</sup> Ey emin ida etan neamung diman ey kanday "Em nunman." Impakal idan apapu hu balwasid Paul nan Silas et pampabeig dadda. <sup>23</sup> Negibbuh ni nambaig dadda et ikelabut dadda et ehelen daddan guwalya e pakagguwalyaan dadda. <sup>24</sup> Ya etan apapud kalebut ey tu impukung di Paul nan Silas di neigawwan kuwaltuh di kalebut et hipitan da hu helidan mebel-at ni keyew.

<sup>25</sup> Yan gawan hileng ey nandasal di Paul nan Silas ey nan-a-appeh idan penaydayaw dan Apu Dios ey kadeddengeladdan edum ni neikelabut. <sup>26</sup> Pinhakkeyey nanegyeg ni na-let ey nealay neibeghul emin hu lekbin kalebut. Ey nangka-kal hu neihipit di heliddan neikelabut niyadda bangkiling da. <sup>27</sup> Bimmangun etan ap-apud kalebut ey inang-ang tu e neibeghul ni emin hu habyen et uknuten tu ispadah tu et mampettey et, tep kantu na-mu ngu nem bimmesik ida neikelabut. <sup>28</sup> Nem simmekuk hi Paul e kantuy “Entan pampatey mu. Iyyadya kamin emin ni neikelabut.”

<sup>29</sup> Nampaelan dilag etan ap-apud kalebut et humgep di bawang ni kalebut e kamanggegeyey ni takut tu et mandukkun di hinanggad Paul nan Silas. <sup>30</sup> Et pa-hep tudda ey kantun hi-gaday “Hipa pehding ku ma-lat mahelaknibannak?”

<sup>31</sup> Kanday “Pangulug kan Apu Jesus et mehelakniban ka, anin idan pamilyah mu et yadda kamanha-ad di baley yu hedini mengullug ida dama.” <sup>32</sup> Et ittutuddud Paul hi-gatu et yadda pamilyah tu anin idan kamekihha-ad di baley tu meippanggep nan Apu Jesus. <sup>33</sup> Yan nunman ni hileng ey inulahan nunman ni ap-apun kalebut hu liput di Paul nan Silas et pebenyag idan hanpamilyah anin idan kamekihha-ad di baley da tep kinulug da hi Jesus. <sup>34</sup> Impahgep tuddad baley da et pangan tudda. Ey ida kaman-am-amleng ni emin tep kinulug da hi Apu Dios.

<sup>35</sup> Newa-wa ey nenu-dak ida ap-apun iRome ni pulit di kad-an etan ni ap-apun kalebut et kandan hi-gatuy “Ibukyat mudda kunu etan dewwan laki.” <sup>36</sup> Et kan nunman ni ap-apun kalebut nan Paul ey “Kan idan ap-apu mi ey ibbukyat dakeyu. Dammutun anin lakkayuy.”

<sup>37</sup> Nem kan Paul ida etan ni pulit ni immali ey “Eleg mabalin ni nealay kami limmaw. Kele dakemi nambaig di hinanggan dakel ni tuu et ikelabut dakemi ey eleg kami mebigtal et pengamtan hedini makulug ni nambahul kami. Hi-gami ey Jews kami, nem neibilang kami daman tuud Rome, et mukun inamta mi e lawah humman ni impahding dan hi-gami. Et pinhed da law ni eleg man-amta keibbukyatan mi. Mahapul ni um-alidda etan ap-apu et hi-gada mengibbukyat ni hi-gami et keang-angan tu e lawah humman ni impahding da.”

<sup>38</sup> Indaddatteng idan pulit huayan inhel Paul ey simmakut ida etan ap-apun nengamtan da e tuuddad Rome di Paul nan Silas. <sup>39</sup> Immalidda etan ap-apud kad-an di Paul nan Silas et hudhuden dan emin hu impahpahding da et ibukyatan dadda et kanday “Heballi ey hi-yan yu huayan bebley.” <sup>40</sup> Yan nalpuan dad kalebut ey limmaw ida nid baley Lydia et mandadammu idaddan edum dan kamengullug diman et tugunen daddan pannenneng da hu daka pengullug. Et han da hi-yana humman ni bebley.

## 17

### *Ya linawwan di Paul di Thessalonica*

<sup>1</sup> Indalan di Paul nan Silas di Ampipolis et yad Apolonia ni linawwan dad Thessalonica e wada simbaan idan Jews diman. <sup>2</sup> Kaumlaw diman hi Paul ni mandeyyaw nan Apu Dios hedini Sabaduh, tep humman imminghan tuka pehding. Et hi-gatu nantutuddun tellun Sabaduh ni meippanggep ni neitudek ni ehel Apu Dios. <sup>3</sup> Intutuddu tu hu keibbellinan etan ni neitudek e mahapul ni panlelehhahan Christo et matey, nem metegguan. Kan Paul ey “Huayan hi Jesus e nakka peennamtan hi-gayu ey hi-gatu hi Christo.” <sup>4</sup> Wadadda edum ni nengulug et mei-dum idad Paul nan Silas. Nei-dum ida dama dakel ni Greek ni kamenaydayaw nan Apu Dios, anin idan edum ni bibi-in Greek ni eta-gey saad da tep nengulug ida.

<sup>5</sup> Nem nemahhig hu ameh idan Jews et ida umeyag ni mangkanghay et ida mengapkayan guluh di diman ni bebley. Hinggep da baley Jason e nekiha-adan di Paul nan Silas ma-lat depapen dadda, <sup>6</sup> nem endid Paul diman. Neala law et hi Jason et yadda etan edum ni kamengullug hu nan-inuhnuh da et ilaw daddad kad-an idan ap-apudman ni bebley e daka pan-itku e kanday “Immalidda law eyad bebley tayu etan ida tuun kaumbabhah ni nemnem ni tuud kebebbley <sup>7</sup> et ayyan idan Jason di baley da. Emin ida ey daka kehinga hu olden nan Cesar tep kanday wada hu keta-tageyyan ni ap-apu e hi Jesus kunu ngadan tu.” <sup>8</sup> Dingnel idan ap-apu et yadda tuu humman ni inhel da ey kamemunnunnu nemnem da. <sup>9</sup> Hedini hi Jason et yadda edum tu, ey minultaddan ap-apu et han dadda ibukyatan.

### *Ya linawwan di Paul di Berea*

<sup>10</sup> Kaikkakaguh idan kamengullug diman di Paul nan Silas et itu-dak daddad Berea ni hileng. Dimmateng idadman et ipa-yuh dan limmaw di simbaan idan Jews. <sup>11</sup> Kayyagud hu nemnem idan Jews diman nem yadda Jews di Thessalonica tep pinpinhed dan mandeddengnel ni kaitutuddud Paul nan Silas. Ey daka bidbidan kewa-wa-wa etan



neitudek ni ehel Apu Dios ma-lat amtaen da hedim makulug hu daka ituttuddu. <sup>12</sup> Dakel ida nengulug diman, anin idan bibi-in Greek ni eta-gey saad da niyadda dakel ni lalakki.

<sup>13</sup> Nem dingngel idan edum ni Jews di Thessalonika e kaituttuddud Paul hu ehel Apu Dios di Berea ey limmaw ida mewan et ida mengapkapyan guluh diman. <sup>14</sup> Et papuut idan kamengullug et pabsik da hi Paul e kinadwaan dan nampalaw di gilid di baybay. Nem hedim hi Silas nan Timothy ey nanha-ad idad Berea. <sup>15</sup> Inlaw idan kamengullug hi Paul di Athens et yan pambangngadan da ey impaad tun hi-gada e mei-unnud di Silas nan Timothy di Athens.

*Ya nantuttudduan Paul di Athens*

<sup>16</sup> Yan nunman ni wada hi Paul di Athens ni tu kapenehheggedid Silas nan Timothy ey lawah tuka pannemnem tep dakel hu kinapyaddan tuud man Athens ni nambakbaklang ni dios ni daka daydayawa. <sup>17</sup> Kewa-wa-wa ni limmaw hi Paul di simbaan idan Jews ni mantuttuddun hi-gada niyadda Gentiles ni kamandaydayaw nan Apu Dios ey kameki-enung-ungbal ni hi-gada et yadda tutu-ud mulkaduh. <sup>18</sup> Wadadda damadman etan ida nangkelaing ni tuun nengadal ni elaw Epikulus et ya Stoic e nekienung-ungbal idan Paul. Yadda edum ni hi-gada ey kanday "Hipa kae-e-hela eyan tuu e nalgenalgem hu tuka heppita." Kan idan edum ey "Meippanggep na-mun dios ni edum ni bebley hu tuka ituttuddu." Huyya kan da tep kaituttuddun Paul hu meippanggep nan Jesus et ya netagwan tu. <sup>19</sup> Ingkuyug idan tuu hi Paul et ilaw daddan etan ni kan dan Areopagus et kandan hi-gatuy "Ehel mu pangngun hi-gami meippanggep eyan baluh ni muka ituttuddu. <sup>20</sup> Hin-appil ni peteg huttan ni muka ituttuddu, et humman hu pinhed min amtaen hu keibbellinan tudda huttan." <sup>21</sup> Yadda tuudman Athens, anin idan etan ni nekibebley ey pinpinhed dan an mandeddengngel niya meki-enung-ungbal meippanggep ni hipan hin-appil ni kamee-ehhel.

<sup>22</sup> Et umehngeng hi Paul et kantuddan neamung ey "Hi-gayun tuud Athens, nakka ang-ang-anga ey nemahhig hu yuka penaydayaw idan dios yu. <sup>23</sup> Tep nak nandalladallan et ang-ang-angen kudda dakel ni kinapya yun yuka daydayawa ey inang-ang ku neitudek etan di hakey ni yuka pan-apisi e kantuy 'Huyya pan-appitan etan ni dios ni eleg meamta.' Huyyan Dios ni yuka daydayawan eleg yu amta hu peamtak ni hi-gayun nunya.

<sup>24</sup> Humman ni Dios hu nengapya eyan puyek et yadda hipan wadadya. Hi-gatu ap-apun emin ni wadad puyek et yad kabunyan. Huyyan Dios ey eleg manha-ad di kakapyaan tuun pambelleyan tu. <sup>25</sup> Ey eleg tu mahapul hu hipan kapehding winu kaidawat ni tuu tep endi mahapul tu. Hi-gatu anhan law hu kamengidwat ni biyag, ya yayyah niya emin ni mahapul idan tuu. <sup>26</sup> Hi-gatu nanletun nemangulun tuun nahlagan ni emin ni tuud puyek. Simpeng tu biyag ni tuud puyek niya attu panha-adan da. <sup>27</sup> Huyya impahding Apu Dios ma-lat wada inna-nun tutu-un manmemmen niya mengamtan hi-gatu, tep ya kakulugan tu ey eleg meidawwin hi-gatsu. <sup>28</sup> Makulug numan etan kanday 'Hi Apu Dios hu kamengidwat ni biyag tayu, yadda wadan hi-gatsu, niya hi-gatu gaputun wada itsudya.' Anin eman lan hakey ni edum yun nangkelaing ni mantuddek ey wada intudek tun kantuy 'Emin itsu ey u-ungnga daitsun Apu Dios.' <sup>29</sup> Et hedim hanniman e u-ungnga daitsun Apu Dios, eleg tayu nemnemnema e hi-gatu ey heiddan yuka kekapyaan dios yun balituk, gumeke, keyew winu batu. <sup>30</sup> Hi Apu Dios ey eleg tu kastiguen ida tuun nunman ni eleg da pengamtaan ni hi-gatu, nem yan nunya law ey pinhed tun mantuttuyyuddan emin hu tuun liwat da niya issiked dan menaydayaw idan beken ni makulug ni dios et hi-gatu law hu daydayawen da. <sup>31</sup> Tep gintud tu aggew ni panhuwetan tun emin ni tuud puyek niya limpiyuh hu tuka panhuwet. Ya kei-angangan tu e makulug huyya ey sineguan tu hi Jesus ni neteyyan tu et hi-gatu putuken tun manhuwet ni emin ni tuu."

<sup>32</sup> Dingngel da humman ni inhel Paul meippanggep ni kaketteguin netey ey anggengngiddan edum. Nem wadadda dama edum ni kanday "Pinhed min mandedngel ali mewan ni pidwatun pantuttudduam ni meippanggep ni nuntan."

<sup>33</sup> Entanni et hi-yanen Paul ida etan neamung. <sup>34</sup> Nem wadadda edum ni nengabulut ni intuttuddun Paul et mangulug ida. Ya hakey ni nengulug ey hi Dionisio e hakey ni konsihal et ya etan hakey daman bii e hi Damaris et wadadda pay edum da.

## 18

*Ya linawwan di Paul di Corinth*

<sup>1</sup> Entanni et hi-yanen Paul hu Athens et lumaw di Corinth. <sup>2</sup> Dinteng tuddad man hu han-ahwan Jew e di Aquila nan Priscila e iPontus ida. Akelappu dan han-ahwad Rome di Italy, tep in-olden ni ap-apudman e hi Kelaudius e emin ida Jews ey mahapul ni hi-yanen

da hu Rome. <sup>3</sup> Nekiha-ad hi Paul di baley da tep henin ngunu tu hu ngunu dan daka pambiyagi e ida kamengapyan tulda ni daka iggatang. <sup>4</sup> Kesabasabaduh ey kaumlaw hi Paul di simbaan idan Jews ni an mantuttudduan Jews et yadda Gentiles, tep pinhed tun mengullug idan Jesus Christo.

<sup>5</sup> Yan dintengan di Silas nan Timothy ni nalpuan dad Macedonia ey insiked Paul ni mekinggunnun tulda, tep ingkakhakey tu law hu ngunu tun mantuttudduan Jews ni meippanggep nan Jesus e hi-gatu hi Christo ni pinutuk Apu Dios ni mengippaptek ni tuu. <sup>6</sup> Nem kakakkahingaddan Jews diman hu tuka ituttuddu ey daka ba-iba-inga. Et yagyan tu balwasi tun dep-ul ni pengippeang-angan tun neliwtan ida. Kantuy "Ngenamung kayu tep ngu hedin eleg kayulli mehellaknibi, tep kahing kayu et hi-gayu ngu kan bahu, bekennak. Meippalpun nunya ey umlawwak di kad-an idan Gentiles et hi-gada nak tuttudduan."

<sup>7</sup> Immehep hi Paul etan di simbaan et lumaw di baley Titius Justus e beken ni Jew, nem tu dama kadaydayawa hi Apu Dios. Neitakdul etan di simbaan idan Jews hu baley tu. <sup>8</sup> Entanni ey hi Crispus e ap-apud simbaan idan Jews et ya pamilyah tu, anin idan kamanha-ad di baley tu ey nengulug idan emin nan hi Jesus Christo. Ey dakel ida tuud man Corinth ni nangngel ni intuttuddun Paul et mangulug ida dama et pebenyag ida.

<sup>9</sup> Hakey ni hileng ey nampeang-ang hi Apu Jesus nan hi Paul di i-innep tu ey kantuy "Entan takut mu! Ey entan tu isiked ni mantuttuddu. <sup>10</sup> Tep wada-ak ni ingganah ni mengippaptek ni hi-gam et endi lawah ni mekapkapan hi-gam ey tep dakel ida tuuk ni pinilik di deya." <sup>11</sup> Et manha-ad diman hi Paul ni hantoon et kagedwah et ituttuddu tu hu meippanggep nan Jesus Christo.

<sup>12</sup> Nem yan eman ni hi Gallio hu gubernor di Achaia ey nanhuhummangan ida dakel ni Jews et da depapen hi Paul et ilaw dad kad-an tu ma-lat mebigtal. <sup>13</sup> Kanday "Huyyan tuu ey tuka ituttudduan tutu-u hu neihlan elaw ni pandeyyaw nan Apu Dios e eleg meiunnud di kapandeyyaw ni kamei-ebbulut di linteg."

<sup>14</sup> Um-ehel et hi Paul, nem immehel hi Gallio et kantuy "Hi-gayuddan Jews, dengel yu eya e-helen kun hi-gayu. Hedin yad gubilnu hu nambahulan tu winu wada neihlaan tud elaw ni linteg ni gubilnu, hi-gak hu ngenamung ni mengippennuh. <sup>15</sup> Nem hedin hanniman e ya elaw yun Jews hu kanyun nambahulan tu, ey ngenamung kayun mengippennuh." <sup>16</sup> Et pampa-hep tuddad dallin ni upisinah tu. <sup>17</sup> Neala ey hi Sostenes e ap-apud simbaan hu nengipenuyan da et depapen da et pambakdungan dad hinanggan upisinah ni huwet, nem kapakdag nan Gallio eneeneng.

#### *Ya nambangnagan di Paul di Antioch*

<sup>18</sup> Nekiha-ad nidman hi Paul ni pigan aggew et han manlugan di bapor ni umlaw di Syria e ingkuyug tud Aquila nan hi Priscila. Indalan di Paul di Cenchrea et mampemukmuk, tep humman pengi-immatanun ni wada hu insapatah tun Apu Dios ni pehding tu et han ida lumaw lad lawwan da. <sup>19</sup> Dimmateng idad Ephesus et hi-yanan tudman di Aquila nan Priscila. Nem limmaw nid simbaan hi Paul et an makiung-ungbal idan Jews. <sup>20</sup> Pinhed idan tutu-u manha-ad nidman hi Paul, nem eleg tu pinhed. <sup>21</sup> Kantun hi-gaday "Mambangnagad ali mewan hedin pinhed Apu Dios." Et ebuhe manlugan di bapor et manglaw di Cesarea.

<sup>22</sup> Dimmateng di Cesarea et lumaw di Jerusalem ni an menang-ang idan kamengullug diman et lumaw mewan di Antioch. <sup>23</sup> Nanha-ad mewan diman ni pigan aggew et han lumaw di kebbebley di Galatia et yad Paligya et tugunen tudda kamengullug e ihhammad da hu daka pengullug.

#### *Ya linawwan Apollos di Corinth di Greece*

<sup>24</sup> Wada etan Jew e hi Apollos e iAlexandria di Egypt ni immalid Ephesus. Nelaing ni mantuttuddu niya dakel amta tun neitudek ni ehel Apu Dios. <sup>25</sup> Ey inamta tu pay hu intuttuddun John e kamemenyag la meippanggep nan Apu Jesus. Ma-nut mahlun mantuttuddun meippanggep idan nunyan inamta tu, nem ebu hu intuttuddun John ni inamta tu e ya meippanggep ni benyag. <sup>26</sup> Dingngel di Priscila nan Aquila e endi takut Apollos ni mantuttuddud simbaan idan Jews et ikuyug da et tuttudduan dan edum ni meippanggep nan Jesus.

<sup>27</sup> Entanni ey pinhed Apollos ni umlaw di Greece et baddangan idan kamengullug diman Ephesus et pamengulu da tudek daddan kamengullug diman ma-lat apngaen dan dettengan tudman. Et yan dintengan tu ey et-eteng baddang tuddan kamengullug diman gapuh ni hemek Apu Dios. <sup>28</sup> Inapput tudda hu Jews diman ni nekihenummangan tud hinanggan dakel ni tuu. Impeang-ang tun hi-gada etan ida nangkeitudek ni ehel Apu Dios ni mengippeamta e hi Jesus hu pinutuk Apu Dios ni Christo ni menellaknib ni tuu.

## 19

*Ya linawwan Paul di Ephesus*

<sup>1</sup> Yan wada hi Apollos di Corinth ey limmaw dama hi Paul di Ephesus e indalan tuddad duntug. Dimmateng diman ey wadadda dinammu tun kamengullug nan Jesus <sup>2</sup> et kantun hi-gaday “Kaw dinwat yu hu Ispirituh Apu Dios eman ni nengulugan yu?” Kanday “Endi, tam eleg mi ngu amta huttan ni Ispirituh Apu Dios.” <sup>3</sup> Et kan Paul ey “Inna-nu tep ni nebenyagan yu?” Kanday “Ya impemenyag John.”

<sup>4</sup> Kan Paul ni hi-gaday “Ya nampebenyagan idan tuu lan John ey humman pengippeang-angan dan neminshed dan mantuttuyyun liwat da. Nem neka-ittugun tu e mahapul ni kullugen tayu etan um-alin meihhullul ni hi-gatu e humman hi Jesus.”

<sup>5</sup> Dingngel da huyyan inhel Paul et mampebenyag idad ngadan Jesus, tep kinulug dan emin hu neituttuddun meippanggep ni hi-gatu. <sup>6</sup> Inta-pew Paul hu ngamay tud ulu da ey dinwat da hu Ispirituh Apu Dios ey daka pan-i-e-hel di nambakbaklang ni ehel hu daka pan-ehelan impeamtan Apu Dios ni hi-gada. <sup>7</sup> Ya bilang dan emin ey hampulu et dewwa.

<sup>8</sup> Kesabasabaduh ni tellun bulan ey limmaw hi Paul di simbaan idan Jews ni an nantuttuddu. Eleg tumekut ni nekiung-ungbal idan tuun meippanggep ni nan-ap-apuan Apu Dios. <sup>9</sup> Nem wadadda etan manghay ni eleg mengullug et daka pihhula kapengullug meippanggep nan Apu Jesus di hinanggan dakel ni tuu, et ikuyug Paul ida etan edum tun kamengullug et hi-yanan da humman ni simbaan idan Jews, et lumaw idad et-eteng ni baley ni kapantuttudduin Tiranus. <sup>10</sup> Nantuttuddu law diman hi Paul ni dewwan toon et man-amtaddan tuud Asia, e Jews niyadda beken ni Jews, hu meippanggep nan Apu Jesus.

*Yadda etan pitun lakin u-ungngan Skeba*

<sup>11</sup> Hi Paul ey dakel hu miracles ni impahding tu tep ya et-eteng ni kabaelan Apu Dios. <sup>12</sup> Et anin ni panyuk niya balwasin neitumuk ni hi-gatu et hedin da impakepaddan kamandedgeh, man kame-kal hu degeh da niya kame-kal ida dimonyoh ni neihuklung ni hi-gada.

<sup>13-14</sup> Wadadda etan lalakkin Jews ni kaumlaw di kebebbley ni mengkal ni kameihhuklung. Humman idan Jews ey u-ungnga idan etan ni ap-apuddan padin Jews e hi Skeba. Entanni ey impatna da daman ngeddanen hu ngadan Jesus ni mengkal ni neihuklung e kanday “Hi Jesus e kaituttuddun Paul hu mengkal ni hi-gam.” <sup>15</sup> Nem hinumang etan ni neihuklung ey kantuy “Inamtak hi Jesus niya inamtak hi Paul, nem hipa kayu?” <sup>16</sup> Pinhakkeyey dimpap etan ni nehuklungan ni dimonyoh ida et apputen tudda. Nangkaway tudda et mamsik ida e nangkeliputan ida ey nabladan ida.

<sup>17</sup> Humman ni nekapkapyay ey dingngel idan Jews et yadda beken ni Jews di Ephesus, et tumekut ida ey nema-ma law ni daka idaydayaw ni peteg hi Apu Jesus. <sup>18</sup> Dakel law idan etan ni nengulug nan Jesus hu kameki-emmung idan edum dan kamengullug et ehlen dad kedaklan hu lawah ni elaw ni inu-unnud dan nunman. <sup>19</sup> Wadadda dakel ni magicians ni nampengi-lin liblud dan nan-adalan dan magic et giheben dad hinanggan dakel ni tuu. Ya balol idan nunman ey umlaw ni neliman libun palatah. <sup>20</sup> Et hummahumman ey kamangkedakkel ida kamengullug niya kamangkeihhammad hu daka pengullug nan Apu Jesus.

*Ya nangguguluhan idan tuud Ephesus*

<sup>21</sup> Negibbuh ida humman ni nekapkapyay ey ninemnem Paul ni umlaw di Macedonia et yad Greece et han lumaw di Jerusalem. Et kantud nemnem tuy “Hedin negibbuh ni limmawwak di Jerusalem ey mahapul ni umlawwak di Rome.” <sup>22</sup> Et pamengulu tuddad Macedonia di Timothy nan Erastus e kaumbabbaddang ni hi-gatu et manha-ad nid Asia.

<sup>23</sup> Nem yan nunman ey wadaddad Ephesus hu kamengapkapayan guluh, tep umhulun hu kameituttuddun meippanggep nan Apu Jesus. <sup>24</sup> Wada etan ma-dih e hi Demetrio ngadan tu e hi-gatu kamengapayan gumeke ni babballey ni tuttu-ua dios e hi Artemis. Dakel ni pihhuh hu daka panggettangiddan nunyan daka kennapayaa niya dakel ida tuun tuka pangngunnu. <sup>25</sup> Inemung Demetrio ida et yadda etan edum ni henin nunman hu ngunu da, et kantun hi-gaday “Hi-gayuddan edum ku, inamta tayun emin e huyyan ngunu tayu hu tayu kapengellain dakel ni pihhuh. <sup>26</sup> Et humman hu, neamung itsun nunya tep dingngel yu ey inang-ang yu e wada etan hakey ni tuun hi Paul ngadan tun kamengituttuddan tuu e beken kunun makulug hu dios ni kinenapayan tuun dios da. Dakel ida nengulug ni hi-gatudya Ephesus et yaddad kebebbley di Asia. <sup>27</sup> Huyyalli umhulun ni keissikkedan nunyan ngunu tayu, tep eleg dalli law gettanga eya tayu kakennapayaa. Et hakey pay ey lektattuy endilli law bilang nan Artemis e tayu

kapekaddeyyawan dios di kebebbley di Asia et yad edum ni bebley. Ey me-way ali law hu tempol ni tayu kapenaydayawin hi-gatu.”

<sup>28</sup> Dingngel da humman ey nemahhig bunget da et daka pan-itkuk e kanday “Hi Artemis hu keta-ta-geyyan ni dios ni tayu kadaydayawad Ephesus.” <sup>29</sup> Entanni ey neihipap di Ephesus humman ni guluh et dadda depapen di Geyus nan Alistalkus et pan-inuhnuh dadda etan di kakeemmungiddan tuun daka pan-ay-ayami. Humman idan dewwan tuun iMacedonia hu kadwan Paul ni immalidman Ephesus. <sup>30</sup> Pinhed Paul ni umlaw diman et an umhel, nem kaikka-leg idan etan ni kamengullug. <sup>31</sup> Anin ida etan ni gagayyum tun aap-apudman et wada intu-dak dan an menghel nan Paul et eleg lumaw diman.

<sup>32</sup> Nambakbaklang hu kaitettetkuk idan etan ni tuun neamung, tep dakel ni hi-gada hu eleg mengamtan kamekapkapyadman. Eleg da amta hedin hipa gaputun da neamungan. <sup>33</sup> Yadda edum ni Jews ey impeehng da hi Alexander ni um-ehel ida etan ni neamung ma-lat ehlen tu hu kamekapkapy. Et paineng tudda etan tuu ma-lat wada inna-nu tun um-ehel, <sup>34</sup> nem yan nengimkatunan da e Jew ey katkuk ida mewan e kanday “Ebuh hi Diana ni keta-ta-geyyan ni kadaydayawan tuud Ephesus!” Et humman intekutekuk dan dewwan olas.

<sup>35</sup> Entanni ey immali law etan hakey ni ap-apudman Ephesus et paineng tudda tuu et kantuy “Hi-gatsun katuutuud Ephesus, inamtan emin ni tuu e hi-gatsu hu kamengipappaptek ni tempol Artemis, tep ya eyad bebley tayu hu na-gahan etan ni batun nalpud kabunyan ni tayu kadaydayawa. <sup>36</sup> Endi hakey ni kameghehng ni nunya, et humman hu isiked yu law ni umtektekuk niya entan panmallamallaan mengippahding ni linggeman. <sup>37</sup> Yadda eya tuun in-ali yudya ey endi bahul da, tep endi da sinekew di tempol Artemis ey eleg da pihhula hu tayu kadaydayawa. <sup>38</sup> Hedin wada diklamuh nan Demetrio et yadda edum tun meippanggep ni bahul idan eyan tuu, ey ilaw dadda kapandiklamuhi et yadman da kebistigalan. Neibeghul hu upisinah ni huwet et dammutun dedngelen dan nunya hu diklamuh yu. <sup>39</sup> Hedin wada edum ni pinhed yun ibbaga, dammutun ippanuh idan kamengippennuh ni diklamuh. <sup>40</sup> Tep entanni ey penghel day itu kaumhuhulun ni pandedeppapan idan tuu tep ya huyyan kamekapkapy. Nakka umkakaguh tep entanni ey mekastigu itu tep endi gaputun tayu nengipahdingan ni henin nunya.” <sup>41</sup> Negibbuh humman ni inhel tu et pan-itu-dak tudda neamung et umenamut ida.

## 20

### *Ya linawwan Paul di Macedonia*

<sup>1</sup> Entanni ey impaeyag Paul ida kamengullug et tugunen tudda ma-lat tumuled ida et han lumaw di Macedonia. <sup>2</sup> Emin la bebley ni dillan tu ey sinugutugun tudda kamengullug e ihhammad da daka pengullug. Entanni ey dimmateng di Greece <sup>3</sup> et manha-ad diman ni tellun bulan. Umlaw et di Syria, nem dingngel tu e pinhed idan Jews ni petteyen diman et eleg matuluy ni limmaw et mambangngad lad Macedonia. <sup>4</sup> Nekilaw ni hi-gatu hi Sopater di Berea, e u-unggan Pirhus, di Alistalkus nan Secundus di Thessalonica, hi Geyus di Derbe, hi Timothy, et di Taykikus nan Terupimus di Asia. <sup>5</sup> Nemappangguluddan limmaw, nem hingged dakemid Paul di Troas, <sup>6</sup> tep nanha-ad kami nid Philippi ingganah ni negibbuh etan Piyestah ni Sinapay ni eleg mekamdugan ni yeast. Nelabah hu liman aggew et han kami mandadamudman Troas et manha-ad kamidman ni hanlingguan.

<sup>7</sup> Yan nemangulun aggew di hanlingguan \* ey neamung kamin mengngan ni penginemnemneman ni neteyyan Jesus. Intultuluy Paul ni nantuttuddu ingganah ni gawan hileng tep inamta tun mewa-wa et umlaw. <sup>8</sup> Dakel dilag etan di meikkatlun gladuh ni baley ni neamungan mi. <sup>9</sup> Wada etan kamenikken ni laki hi Utikus ngadan tun yimmudung di habhabyen nunman ni baley. Entanni ey kaumtenu-tu-mel et lektattuy neuyeng et ma-gah lad dallin e ya man-anhan di meikkatlun gladuh hu naganah tu. Da ang-angen ey netey. <sup>10</sup> Immehep hi Paul et tu hakukuten et kantuy “Entan kakkaguh yu. Mategu!” <sup>11</sup> Et humgep mewan hi Paul et mangan kami. Intuluy Paul ni nantuttuddu ingganah newa-waan tu et han kami lumaw. <sup>12</sup> In-anemut idan edum tu hi Utikus ey ida kaman-am-amleng, tep mategu.

### *Ya linawwan Paul di Miletus*

\* **20:7** 20:7 Ya kan ni edum ni neitudek ey “Neamung kamin mahmahdem ni Sabaduh.” Ya elaw idan Jews ni daka pengibbillang ni han-aggew ey daka illapun nelinugan ni aggew.

<sup>13</sup> Nanlugan kamid bapor et memappangngulu kami lan limmaw di Assos et hegeden mi hi Paul diman, tep kantuy mandellan ni umlaw. <sup>14</sup> Dinteng dakemid man et makilugan ni hi-gamid bapor et lumaw kamid Mitilene. <sup>15</sup> Nawa-wa et umgah kami et lumaw kamid demang tud Kius et mandeya kamidman. Nawa-wa et lumaw kamid Samos et mandeya kamidman ni hanlabbi et mewa-wa et dumteng kamid Miletus. <sup>16</sup> Eleg mi idlan di Ephesus, tep eleg pinhed Paul ni metaktak lad Asia, tep kaum-abtun umdateng di Jerusalem et han madeteng hu Piyestah ni Pentecost.

*Ya nenugunan Paul idan ap-apuddan kamengullug di Ephesus*

<sup>17</sup> Dimmateng kamid Miletus et menu-dak hi Paul ni an mengeyyag idan ap-apun kamengullug di Ephesus.

<sup>18</sup> Immalidda et kantun hi-gaday "Hi-gayun agik ida, wadan inamta yu hu biyag kun nekihahha-adan kun hi-gayu neipalpu eman ni dintengan kud Asia ingganah nunya. <sup>19</sup> Impebahah kun peteg annel kun nengituttudduan kun meippanggep nan Jesus, ey hin-addum ni nakka umlewa. Insipesipel ku hu ligat kun impahpahding idan Jews ni hi-gak. <sup>20</sup> Inamta yu et intuttudduk ni emin hu makulug ni mengippehammad ni yuka pengullug di kedaklan ni tuu, anin di baballey yu. <sup>21</sup> Nan-ingneh hu intuttudduk idan Jews et yadda Gentiles, e mahapul ni u-unnuden da hi Apu Dios et mantuttuyyuddan liwat da et hi Apu tayun hi Jesus hu kullugen da.

<sup>22</sup> Et yan nunya ey mahapul ni u-unnuden ku hu pinhed ni Ispirituh Apu Dios e mahapul ni umlawwak di Jerusalem, anin ni eggak amta hedini hipa pehding dan hi-gak diman. <sup>23</sup> Nem ya impeamta dedan ni Ispirituh nan Apu Dios e anin ni attun bebley lawwan ku et wada panligligatan ku niya wada keikkellabatan ku. <sup>24</sup> Nem hedini kantu et petteyan da-ak, anin nemet gibbuhen ku ngunuk ni impanggunun Apu Jesus, e humman hu an mantuttuddun meippanggep ni impahding tun panyaggudan ni tuu tep ya et-eteng ni binabbal Apu Dios niya impeminhed tun hi-gatsun tuu.

<sup>25</sup> Inamtak et emin kayun sinuttudduan kun meippanggep ni nan-ap-apuan Apu Dios ey eleg yuwak ali law ang-anga. <sup>26</sup> Nem anin yaggud intuduk ni emin ni hi-gayu et deh e e-helen kun hi-gayu e endilli ngu bahul ku hedini wadalli eleg mehella knibin hi-gayu, <sup>27</sup> tep intuttudduk ni emin hu pinhed Apu Dios ni amtaen yu.

<sup>28</sup> Hi-gayu hu pinutuk ni Ispirituh Apu Dios ni mengippaptek idan kamengullug Jesus, et humman hu helipati yu annel yu ey baddangi yuddan emin hu edum tayun kamengullug ma-lat ihammad da daka pengullug, tep hi-gatsu gaputan an neteyyan Jesus e U-unggan Apu Dios. <sup>29</sup> Tep inamtak et hedini hi-yanen dakeyu ey wadaddalli um-alin mene-ul ni hi-gayun mantuttuddun neihalla. <sup>30</sup> Anin hi-gayu et wadaddalli edum yun man-ittek et hewhien dalli eya kameituttuddun makulug ni meippanggep nan Jesus ma-lat wada mengu-unnud ni hi-gada. <sup>31</sup> Et humman hu, helipati yu et eleg kayu maheul. Nemnem yu e yan eyan tellun toon ni nekihahha-adan kun hi-gayu ey sinuttudduan dakeyun kewa-wa-wa niya kahilehileng. Ey hin-addum ni nakka umnangih tep ya kaguh kun hi-gayu.

<sup>32</sup> Et yan nunya ey iddinel dakeyu law nan Apu Dios et hi-gatu mengipaptek ni hi-gayu ey e-helen kun hi-gayu e idinel yu hu ehel tun umbaddang ni hi-gayu. Pandinel kayu e ihammad tu yuka pengullug et iddawat tun emin ni hi-gayu hu kayyaggud ni tuka iddawat idan tuun tuka ebbuluta. <sup>33</sup> Endi nak illan liblih ni hipan wadan hi-gayu. <sup>34</sup> Inamta yu et inggunwan kun emin hu inggatang kud mahapul ku niyadda mahapul idan edum ku. <sup>35</sup> Emin hu impahpahding ku ey impeang-ang ku e kayyaggud hu manhehlu itan manggunnu ma-lat wada ibbaddang idan tuun kamanheppul ni baddang. Nemnem tayu etan kan Apu Jesus e kantuy 'E-etteng hu amleng hedini hekitta um-idwat nem ya etan hekitta iddawat da.' "

<sup>36</sup> Negibbuh humman ni inhel tu et mandukkun idan emin et mandasal ida. <sup>37</sup> Wada hakkeyey ida kamanlelewwa ey daka pan-akwala hi Paul. <sup>38</sup> Ida kaumnangih tep ya nanglehan Paul ni kantuy endilli law da penangan-an ni hi-gatu. Et ilaw dad kad-an ni panlugganan tun bapor.

## 21

*Ya linawwan di Paul di Jerusalem*

<sup>1</sup> Hini-yan midda et lumaw kamid Kos e nanlugan kamid bapor. Nawa-wa et idlan mid Rodes et dumteng kamid Patara. <sup>2</sup> Wada dinteng midman ni bapor ni umlaw di Phoenicia et makilugan kami. <sup>3</sup> Linabhan mi Cyprus et dumteng kamid Tyre di Syria et manda-guh kami, tep wada kalgan idda-guh ni bapor diman. <sup>4</sup> Wadadda dinteng min kamengullug diman et makiha-ad kamin hi-gadan hanlingguan. Inhel idan nunyan kamengullug e eleg umlaw hi Paul di Jerusalem, tep huyya impeamtan Ispirituh Apu Dios ni hi-gada.

5 Nem eleg menghep hi Paul et medatngan hu aggew ni lawwan mi ey nekilaw idan emin hu kamengullug di gilig ni baybay, anin idan bibi-in ahwada et yadda u-ungnga da. Nandukkun kami et mandasal kami et kan min hi-gaday “Ngenamung kayu tep umlaw kami.”<sup>6</sup> 6 Nanlugan kamid bapor et immela kami ey ida dama kamangkeibbangngad di baballey da.

7 Hini-yan mi Tyre et manda-guh kamid Tolemas ni han-aggew et mi ang-angen ida kamengullug diman et mandeya kami.<sup>8</sup> 8 Newa-wa et lumaw kamid Cesarea. Limmaw kamid baley etan ni hakey ni kamantuttuddun elaw Jesus e hi Philip et makiha-ad kamidman. Hi-gatu hakey ida etan ni pitun nepilin mengippaptek idan kamengullug di Jerusalem.<sup>9</sup> 9 Wadadda epat ni u-ungnga tun biin eleg ni mengahwa. Prophets ida e daka peamta hu pinhed Apu Dios ni peamta.

10 Yan nunman ni nanhahha-adan midman ni pigan aggew, ey immali etan prophet e hi Agabus e nalpullid Judea.<sup>11</sup> 11 Immalid kad-an mi ey illa tu etan ballikid Paul et bedbeden tu heli tu et ya ngamay tu et kantuy “Inhel ni Ispiritu Apu Dios e hanniman ali pemedbed idan Jews di Jerusalem etan ni kan ballikid nunya et ilaw dad kad-an idan ap-apun Gentiles.”

12 Dingngel mi huyya et emin kamiddan ingkuyug Paul et yadda kamengullug diman ey eleg mi et pinhed hu lawwan tud Jerusalem, nem kantuy<sup>13</sup> “Entan pannannangngih yu. Yuka e-e-dumin ebuh hu degeh ni nemnem ku. Nandaddannak ni meikkellabut di Jerusalem ey anin ni petteyen da-ak diman tep ya nakka pengituttudduin meippanggep nan Apu Jesus.”<sup>14</sup> 14 Inamta mi law e eleg mi han-ika-leg hi Paul et isiked min mengleg ni hi-gatu. Et kan min hi-gatuy “Ya pinhed Apu Dios hu meu-unnud.”

15 Et meba-ba-ba et mandaddan kami et lumaw kamid Jerusalem.<sup>16</sup> 16 Wadadda nekilaw ni hi-gamin kamengullug di Cesarea et ipengulu dakemid baley Mason e tuud Cyprus et makiha-ad kamidman. Hedin hi Mason, hi-gatu hakey ni nemangulun nengulug ni nunman.

*Ya nekiung-ungbalan di Paul ida etan ni ap-apuddan kamengullug di Jerusalem*

17 Dimmateng kamid Jerusalem ey ida kamangagaya kamengullug diman.<sup>18</sup> 18 Newa-wa et lumaw kamid Paul et mi ang-angen di James ey neamung idan emin etan kamengipappangnguluddan edum tayun kamengullug diman.<sup>19</sup> 19 Dimmateng kami ey kan Paul ni hi-gaday “Kayyaggud et iyyadya kayun emin di deya.” Et e-ehhelen tun emin hu nemenaddangan Apu Dios ni hi-gatun nantuttudduan tuddan Gentiles.

20 Dingngel da humman et daydayawen da hi Apu Dios. Nem kandan Paul ey “Angang mu kedi e agi mi, dakek idadya kalibulibun Jews ni nengulug nan Jesus, nem da metlaing kapeka-u-unnuda Tugun Moses.<sup>21</sup> 21 Makaggeh hu nemnem da tep dingngel da e intuttuddum ida kunun Jews di bebley idan Gentiles liwwanen da law hu Tugun Moses. Kammu kunuy anin ni eleg da pekuggit hu u-ungnga dan laki niya anin ni eleg da u-unnuda law hu elaw tayun Jews.<sup>22</sup> 22 Hipa na-mu pehding tayu? Makulug ni dedngelen da kedin immali ka et um-alidda.<sup>23</sup> 23 Kayyaggud tu hu unud mu eya e-helen min hi-gam. Iyyaddadya epat ni lalakkan wada insapatah dan Apu Dios ni pehding dan pengippeangangan dan daka penaydayaw ni hi-gatu.<sup>24</sup> 24 Et nedatngan hu pampemukmukan da, tep humman hu pengi-immatanun ni wada insapatah dan pehding da. Pakilaw kan hi-gada et hi-gam hu memeyyad ni pampemukmukan da ma-lat penangangan da e muka u-unnuda hu elaw tayun Jews. Hedin pehding mu huyya, amtaen idan tuu e beken kayan makulug hu in-inhel dan meippanggep ni mu kunu intuttuddu niya amtaen da e eleg mu kehHINGA hu Tugun Moses.<sup>25</sup> 25 Hedin yadda etan Gentiles ni kamengullug nan Jesus, ey nantudek kamin hi-gadan issiked dan mekikkakikkan neiappit di beken ni makulug ni dios, ya kuheyaw, ni ya detag ni animal ni daka pansinillud niya eleg da i-ulig hu beken da ahwa.”

26 Inu-unnud Paul humman ni inhel da et mewa-wan nunman et ilaw tudda etan epat ni lakin an mengippahding ni insapatah dan Apu Dios. Et lumaw hi Paul di bawang etan ni Tempol et tu ehelen idan padi hu aggew ni pengibbuhan dan nunman ni elaw, et yan nunman ali pengi-appitan dan i-appit da.

*Ya nampapan dan Paul di Tempol di Jerusalem*

27 Ngannganih ni megibbuh etan pitun aggew ni pengippahdingan idan etan ni lakin nunman ni insapatah da ey inang-ang idan Jews ni nalpud Asia hi Paul di Tempol. Inemung dadda tuu et da padpap hi Paul.<sup>28</sup> 28 Katkuk ida e kanday “Tuud Jerusalem, ikeyuy et baddangan dakemi. Kayyaggud et nadpap eya tuun tuka pihhupihhulad kebebbbley hu elaw tayun Jews et ya Tugun Moses niya Tempol tayu. Hi-gatu mewan nengilaw idan tuun Gentiles di Tempol tayu ey tayu kapi-yewa humman.”<sup>29</sup> 29 Kanday wada inlaw Paul ni tuun Gentile di Tempol, tep inang-ang da nengikuyugan tun

Terupimus e Gentile di diman Jerusalem ey tuud Ephesus et kanda na-mu ngu nem inhegep tud Tempol.

<sup>30</sup> Ida kaumguguhun emin tuudman e bebley tep yadda humman ni impabehul dan Paul et umlidda et da pan-inuhnuh lad dallin ni Temple et pan-ilekbi dan emin hu habyen. <sup>31</sup> Petteyen da et nunman hi Paul, nem wada kuma an nanghel etan ni ap-apun sindalun Rome e wada guluh diman Jerusalem. <sup>32</sup> Et ipengulu tudda sindalu tu et yadda edum ni ap-apu da et papuut dan limmaw di kad-an idan neamong ni tuu. Inang-ang idan tuu humman idan sindalu ey insiked dan mampeneplat nan Paul. <sup>33</sup> Hinnup etan ni ap-apun sindalu hi Paul et pebangkiling tu et kantudda etan ni tuu ey “Hipa huayan tuu niya hipa bahul tu?” <sup>34</sup> Ey eleg man-uunnud daka e-hela tep wada hakkeyey hin-appil tuka pan-ittetkuk et eleg handengel etan ni ap-apun sindalu hu daka pan-ehelan meippanggep nan Paul et neala et pailaw tud kampuddan sindalu. <sup>35</sup> Wadadda etan di heni teyey etan di kampun sindalu ey nemahhig ida etan tuu e ihik idan memettey nan Paul et pakkadek law ni pinhan da ma-lat eleg kawayen idan tuu. <sup>36</sup> Ida kamei-uunnud etan tuu e daka ittekutekuk e kanday “Patey yu huttan ni tuu.”

*Ya nengiehnengan Paul ni annel tu*

<sup>37</sup> Ihhegep da et law hi Paul, nem kantu etan ni ap-apun sindalu ey “Wada anhan e-helen kun hi-gam.” Kan etan ni ap-apun sindalu ey “Kaw inamtam hu ehel ni Greek? <sup>38</sup> Kaw beken ni hi-gam etan tuud Egypt ni nengipappangnguluddan tuun mekiggubbat ni gubilnu niya nengikuyug di desert idan etan ni epat ni libun tuun mangkapetey?”

<sup>39</sup> Kan Paul ey “Beken, tep hedin hi-gak ey Jew hak, nem ya bebley ku ey Tarsus di Cilicia e nan-amtda kebebbbley.” Kantu pay ey “Ibulut mu anhan et wada e-helen kudda eyan tuu.”

<sup>40</sup> Inebulut etan ni ap-apun sindalu et pa-hel tu hi Paul. Et umehneng hi Paul etan di heni teyey et paineng tudda etan tuu et humepit e in-ehel tud Aramaic.

## 22

<sup>1</sup> Kantuy “Kaegiegi ey keammeammed, dengel yu anhan eya e-helen kun hi-gayu.” <sup>2</sup> Dingngel dan tuka pan-ihhapit di ehel ni Aramaic ey immi-ineng ida. <sup>3</sup> Et kantuy “Hi-gak ey Jew hak, nem neingung-ak di Tarsus di Cilicia, nem neettengngak di deya Jerusalem et ituttuddan tuwak nan Gamaliel. Hi-gatu ap-apun mittuduh ni elaw tayun Jews hu nengitenuttuddan hi-gak ni mengu-unnud ni Tugun niyadda emin hu elaw idan aammed tayun nunman. Impaka-u-unnud kun emin ida humman et emin hu pehding ku ey pinhed kun keiddeyyawan Apu Dios e henin hi-gayun nunya. <sup>4</sup> Et mukun ya lan nunman ey impanlelehanan idan kamengullug nan Jesus hu impahpahding kun hi-gada. Impapetey ku edum niya impakelabut kudda bibi-i niya lalakki. <sup>5</sup> Anin ni yu ibbagan etan ni Eta-gey ni Padi et yadda ap-apuddan Jews et ihhudat da tep hi-gada nengidwat ni hi-gak ni tudek ni kelebengan kun umlaw di Damascus ni an mampengelladdan kamengullug nan Jesus diman et i-lik idadya Jerusalem ma-lat mekastigudda.

*Ya nengipeamtaan Paul ni nengulugan tu*

<sup>6</sup> Illak etan tudek et manglawwak di Damascus. Nakaddattek hu aggew ey kami kamenetteng idan edum ku ey pinhakkeyey wadalli nalpud kabunyan ni kaumhilin dilag ey binnangan tu nanlinikweh di kad-an ku. <sup>7</sup> Netu-li-ak ey wada dingngel kun immehel alid kabunyan e kantuy ‘Saul! Saul! Kele muwak kapanligligat?’ <sup>8</sup> Hinumang ku et kankuy ‘Apu, hipa ka?’ Kantuy ‘Hi-gak hi Jesus di Nazareth ni muka panligligat.’ <sup>9</sup> Yadda etan edum ku, ey inang-ang da etan kaumhilin dilag, nem eleg da awatan hu inhel etan ni immehel ni hi-gak. <sup>10</sup> Et kangkuy ‘Apu, hipa pehding ku?’ Kantuy ‘Inah ka et lumaw kad Damascus et mu denglen ni emin hu ittugun Apu Dios ni hi-gam diman.’ <sup>11</sup> Kinulap da-ak etan ni kaumhilin dilag et peppeddenen da-ak idan edum ku ingganah dimmateng kamid Damascus.

<sup>12</sup> Wadad Damascus hu laki hi Ananayas e nemahhig tuka penaydayaw Apu Dios niya tuka peka-u-unnuda Tugun Moses ey emin ida Jews diman ey daka pakatbala. <sup>13</sup> Immali et umehneng di kad-an ku ey kantuy ‘Hi-gam e agik Saul, meihhaddak kaya law hu muka penang-ang.’ Pinhakkeyey kaum-ang-ang law hu matak et aang-angen ku hi Ananayas. <sup>14-15</sup> Et kantan hi-gak ey ‘Hi Apu Dios e dinaydayaw idan aammed tayun nunman ey pinili dakan mengamtan pinhed tu. Pinili dakan menang-ang etan ni intu-dak tun Limpuyuh ni peteg elaw tu, niya pinili dakan mengngel ni ehel tu. Et hi-gam law hu umlaw ni mengippeamtaddan katuutuun inang-ang mu niya dingngel mu. <sup>16</sup> Imay, inah ka kuma et ibegam nan Jesus et pesinsahan tu liwat mu et pebenyag ka.’

*Ya nanghelan Paul ni nemilian Apu Dios ni hi-gatu*

<sup>17</sup> Nambangngaddak di Jerusalem et wadan pinhakkey hu nakka mandasal di Tempol ey heni-ak nan-i-innep ey inang-ang ku hi Apu Jesus <sup>18</sup> e kantun hi-gak ey 'Hi-yan mu kuma eya bebley di Jerusalem, tep eleg damengu kullugaddan tuudya hu ittutudun ni meippanggep ni hi-gak.' <sup>19</sup> Hinumang ku et kangkuy 'Apu, kele hipa eleg da pengullugi? Ma-nu tep impelligitan kuddan nunman hu kamengullug ni hi-gam tep nak ida kapampaukat di simbaan ni impampaikelabut kudda niya nak ida kapampabeig. <sup>20</sup> Ey yan eman ni nemateyan dan Stephen e hakey ni kamantutuddun meippanggep ni hi-gam ey wada-ak diman et hi-gak hu hakey ni kamengebbulut ni pemetteyan dan hi-gatu. Hi-gak nenettengged ni balwasiddan nematey ni hi-gatu. Nem hedin ang-angen da law e hi-gak hu pinutuk Apu Dios ni mengippeang-ang e makulug huuyan elaw ni kinehikehing kun nunman, man kullugen da-ak kaya law!' <sup>21</sup> Nem kan Apu Jesus ey 'Eleg, lakkay kuma tep hi-gam hu ittu-dak kud kad-an idan Gentiles.'

<sup>22</sup> Yadda etan tuu ey daka deddengngela hu kapenge-ehhelin Paul ni neipahpahding ni hi-gatu, nem yan nanghelan tun kantuy intu-dak Apu Dios di kad-an idan Gentiles, ey katkuk ida e kanday "Patey yu eya tuu. Endi silbin nuntan ni tuu." <sup>23</sup> Katkuk ida ey daka pambekaha babalwasi da niya daka pan-ihhebwag hu dep-ul tep ya bunget dan Paul. <sup>24</sup> Entanni ey in-olden etan ni ap-apun sindalu e ihhehgep da hi Paul di kampu da et pambaigen da, ma-lat ehelen tu hu gaputun nemahhig bunget idan tuun hi-gatu. <sup>25</sup> Daka pambelluda hi Paul ma-lat baigen da ey himmapit et kantu etan ni ap-apun sindalun neitakdul ni hi-gatuy "Kaw kai-abulut ni linteg ni gubilnu tayud Rome e anin ni eleg mebistigal hu tuu et eleg meamta hedin nambahul winu eleg, ey pambe-igen? Hi-gak ey Jew hak, nem tuu-ak daman Rome."

<sup>26</sup> Yan nangngelan etan ni ap-apun sindalun nunman, ey limmaw etan ni ap-apu da et kantuy "Kele hanniman tayu pehding? Tam humman ni tuu ey tuun Rome. Kaw eleg itsu mambehhul hedin nealay nambaig tayu?" <sup>27</sup> Et lumaw humman ni ap-apu et kantun Paul ey "Kaw makulug ni tuu kad Rome?" Kan Paul ey "Em."

<sup>28</sup> Ey kan etan ni ap-apun sindalu ey "Hedin hi-gak, man et-eteng ginastuk et hannak maibilang ni tuud Rome." Nem kan Paul ey "Hedin hi-gak, man tuu-ak ni Rome tep yadda hu a-ammed ku ey neibilang idan tuud Rome." <sup>29</sup> Et hi-yanen ida etan ni sindalun mampeme-ig et ni hi-gatu. Anin etan ni ap-apun sindalu et simmakut, tep in-olden tu e bangkilingan da niya be-igen da ey eleg mabalin ni an pehding humman di hakey ni tuun Rome, hedin eleg ni mebistigal.

<sup>30</sup> Yan newa-waan tu, ey pinhed etan ni ap-apun sindalun amtaen hu kapebehhul idan Jews nan Paul. Et pa-kal tu bangkiling nan Paul et paey tudda etan ap-apuddan padi et yadda ap-apuddan Jews et iolden tun bistigalen da hi Paul.

## 23

<sup>1</sup> In-ang-ang Paul idan etan ni ap-apuddan Jews ey kantuy "Kaegiegi, inamtan Apu Dios e neipalpun nunman ingganah nunya, ey ya mengippeamleng ni hi-gatu hu impenahding ku." <sup>2</sup> Gapun nunman ni inhel Paul ey impeappep Ananayas e Eta-gey ni Padi hu bungut tu etan ni neitakdul ni hi-gatu. <sup>3</sup> Et kan Paul ni hi-gatu ey "Heni ka kakkayyagdu hedin wada kad hinanggaddan tuu, nem lawah gayam nemnem mu hedin nanligguh ka. Hi Apu Dios hu mengibleh eyan impahding mun hi-gak, tep hi-gam et dedan mengippennuh eyan kasuh ku meippuun ni Tugun tu, nem hi-gam hu eleg mengu-unnud nunman ni Tugun, tep nealay impeappep muwak."

<sup>4</sup> Kan ida etan ni neitakdul nan Paul ey "Kele henin nuntan hu muka pehding ni mekihummangan ni Eta-gey ni Padi pinilin Apu Dios?" <sup>5</sup> Hinumang Paul et kantuy "Kaegiegi, eggak amta e hi-gatu hu Eta-gey ni Padi. Gullat ni inamtak et eggak ihanniman nenumang ku, tep neitudek di ehel Apu Dios e kanuty 'Eleg e-hela hu lawah ni ap-apu.' "

<sup>6</sup> Inang-ang Paul e wadadda Sadducee et yadda Pharisee et itkuk tu e kantuy "Hi-gak et yadda a-ammed ku ey Pharisee. Ya gaputun iyadya-ak di deyan nunyan mebistigal ey gapu tep nakka kulluga e tegguan Apu Dios idalli nangketey." <sup>7</sup> Inhel Paul huuya ey kamantututut ida etan neamung ni Pharisee et yadda Sadducee et megedwadda, <sup>8</sup> tep yadda Sadducee ey eleg da kulluga e kateguun Apu Dios hu netey niya eleg da kulluga e wada anghel et ya linnawan tuu. Nem yadda Pharisee ey daka kullugaddan tellu. <sup>9</sup> Entanni ey ida kamangngangala ey immehneng ida etan Pharisee ni kamantutuddun Tugun Moses et kanday "Kaw hipa numan bahul eyan tuu? Inna-nu numan hedin humman hu inhel ni anghel winu Ispirituh Apu Dios ni hi-gatu?"

<sup>10</sup> Ey wada law hakkeyey daka pan-eleta tekuk da ey daka pan-iinnasi hi Paul. Simmakut etan ap-apuddan sindalu, tep entanniy petteyen da hi Paul et ehelen tuddan



sindalu tu et da piliten ni inlad gawaddan nunman ni tuu et ilaw dad kampuddan sindalu.

<sup>11</sup> Yan nunman ni hileng ey nampeang-ang hi Apu Jesus nan hi Paul et kantun hi-gatuy “Entan takut mu. Petuled mu nemnem mu, tep umlaw kad Rome ni mengipeamtan hi-gak henin nengipeamtan mun hi-gak di deya Jerusalem.”

*Ya nanhuhummangan idan Jews ni pemetteyan dan Paul*

<sup>12</sup> Nawa-wan nunman ey nanhuhummangan ida etan edum ni Jews et kanday eleg ida mengngan niya eleg ida um-inum ingganah petteyen da hi Paul. <sup>13</sup> Nehuluk idan napat hu nengihuhummangan ni nunman. <sup>14</sup> Limmaw idad kad-an idan ap-apuddan padi et yadda etan kamengipappangnguluddan Jews et kandan hi-gaday “Hinammad min inuhummangan e eleg kami mengngan niya eleg kami um-inum ingganah ni petteyen mi hi Paul. <sup>15</sup> Ngenamung kayuddan emin ni ap-apun menghel etan ni ap-apun sindalu et i-li da hi Paul di deya. Haul yu etan ap-apu e kanyuy ‘Pei-lim hi Paul tep pinhed min pekabbistigalen.’ Ngenamung kamin memettey ni hi-gatu tep bebtaken mi.”

<sup>16</sup> Nem dingngel etan ni lakin u-ungngan biin agin Paul et tu idaddatteng nan Paul di kampuddan sindalu. <sup>17</sup> Et aygan Paul etan hakey ni sindalu et pailaw tu etan u-ungngad kad-an etan ni ap-apu da ma-lat tu idaddatteng humman ni dingngel tu. <sup>18</sup> Inlaw etan ni sindalud kad-an ni ap-apu da et kantuy “Apu, impei-lin Paul eya u-ungnga tep wada kunu e-helen tun hi-gam.” <sup>19</sup> Singnged etan ni ap-apu hu ngamay tu et humgep idad endi tuu et kantuy “Hipa e-helen mun hi-gak?”

<sup>20</sup> Kan etan ni u-ungnga ey “Wadadda Jews ni nanhuhummangan ni mengibgan hi-gam e peillaw mu hi Paul ni kabbuhhan di kad-an idan ap-apun Jews ma-lat bistigalen da kunu. <sup>21</sup> Nem entan kaya tu iebulut ni umlaw di kad-an da tep wadadda nehuluk ni na-pat ni tuun mambektak di dalan ni memettey ni hi-gatu. Insapatah da e eleg ida mengngan niya eleg ida um-inum ingganah petteyen da hi Paul. Nandaddan ida et daka hehheggedan ebuh hu pengi-ebbulutan mun pengillawwan dan hi-gatud man.” <sup>22</sup> Et kan etan ni ap-apun sindalu etan ni u-ungnga ey “Entan tu e-ehhel eya indaddatteng mun hi-gak.” Et paenamut tu.

*Ya nengipelawwan dan Paul di kad-an Gubernur Felix*

<sup>23</sup> Impaeyag etan ni ap-apun sindalu hu dewwan apuddan sindalu tu et kantun hi-gaday “Pandaddan yudda dewanggatut ni sindalu, et ya nepitun sindalun mangkeb-bayyu niya dewanggatut ni mampenhul et lumaw kayud Cesarea ni hileng ni alas nuwebe. <sup>24</sup> Pantakkay yu hi Paul di kebayyu niya ang-ang yu ma-lat kayyaggud pengidtengan yun hi-gatud kad-an Gubernur Felix.”

<sup>25</sup> Et mantudek nan hi Gubernur e kantuy <sup>26</sup> “Gubernur Felix e kamedeyyaw ni ap-apu. <sup>27</sup> Huyyan tuun impaelik di kad-an mu ey dimpap idan Jews et petteyen da et la, nem limmaw kamiddan sindaluk et mi awiten tep nak amtaen ey tuun Rome. <sup>28</sup> Pinhed kun amtaen hedini hipa nambahulan tu et ilaw kud kad-an ni ap-apuddan Jews ey kanday <sup>29</sup> ya tuka pengehingin elaw idan Jews hu bahul tu. Endi edum ni inamtak ni bahul tun an pengippepetteyan winu an pengikkellabutan ni hi-gatu. <sup>30</sup> Nem dingngel kun wadadda nanhuhummangan ni memettey ni hi-gatu, et humman hu adya e pei-lik di kad-an mu. Inhel kudda etan ni nemihed ni kekastiguan tu e um-aliddad kad-an mu, et ehlen dan hi-gam hedini hipa nambahulan tu. Ebuh huyyan e-helen ku. Hi-gak hi Klaudius Laysias.”

<sup>31</sup> Et ikuyug idan sindalu hi Paul et manglaw idan nunman ni hileng di Antipatris. <sup>32</sup> Nawa-wa et manbanggad ida etan edum ni sindalud kampu et ebuh ida etan nangkebayyun nengilaw nan Paul di Cesarea. <sup>33</sup> Dimmateng idadman et idwat da tudek Lysias nan hi Gubernur Felix et pebeltan da hi Paul ni hi-gatu. <sup>34</sup> Binidbid etan ni Gubernur etan tudek et ibega tu hedini attu bebley Paul. Et ehelen Paul e yad Cilicia. Ey kan etan ni Gubernur ey “Ngenamung alin dettengan ida etan ni nengidalom ni hi-gam.” <sup>35</sup> Et paguwalya tu hi Paul etan di baley ni impekapy lan eman ni patul e hi Herod.

## 24

*Ya nengidiklamuhan dan Paul*

<sup>1</sup> Nelabah liman aggew ey immali hi Ananayas e Eta-gey ni Padi et hi Tertullus e abugaduh et yadda etan edum ni kamengipappangnguluddan Jews ni nengidalom nan Paul. <sup>2</sup> Impaeyag da hi Paul et mamengulu hi Tertullus ni himmapit et tentenen tudda daka pebehul nan Paul. Huyyadda kantu: “Kamedeyyaw ni Gubernur di deyan bebley, et-eteng amleng mi tep indawtan dakemin Jews ni linggep mi ey et-eteng yimmaggudan ni bebley tayu. <sup>3</sup> Humman gaputun mika ebbuluta hu kakinyayaggud mu niya et-eteng

mika pansalamatin hi-gam. <sup>4</sup> Eleg mi pinhed ni mehelli-wa ka, nem dengel mu anhan eya e-helen min meippanggep eyan tuu.

<sup>5</sup> Huyyan tuu ey hi-gatu kaumhulun ni guluh di emin ni bebley ni tuka lawwi niya tuka ngenghaya gubilmun Rome. Ey hi-gatu ap-apuddan Nazarene ni kamengu-unnud ni hin-appil ni elaw. <sup>6</sup> Impatna tun ngenghayan hu elaw di Tempol, nem dimpap mi ma-lat kastiguen mi et, <sup>7</sup> nem immali hi Laysias e ap-apuddan sindalu, et piliten tun impaela <sup>8</sup> et iolden tu e hi-gam memistigal ni hi-gatu. Huyyan inhel ku ey amtaen mun makulug ni emin hedin bistigalen mu huyyan tuu."

<sup>9</sup> Ey emin ida etan Jews ey nan-uunnud hu daka e-hela e kanday "Em numan, makulug emin hutta."

*Ya ngeniehnengan nan Paul ni annel tud hinangngab nan Felix e Gubernur*

<sup>10</sup> Negibbuh hi Tertullus ni himmapit et pahepit daman Gubernur hi Paul. Et umhel e kantuy "Apu Gubernur, inamtak e nebayag kan nanhuwet eyad bebley mi, et humman hu nakka medinnel ni menummang ni daka pebehhul ni hi-gak di hinangngab. <sup>11</sup> Nelakah ni amtaen mu kakulugan tu e hampulut dewwan aggew ni ebuh hu nelabah eman ni dintengan kud Jerusalem ni an menaydayaw nan Apu Dios di Tempol. <sup>12</sup> Endi nak nekitutut di Tempol niya endi nak impappangngulun guluh di attun simbaan idan Jews winu attun bebley di Jerusalem. <sup>13</sup> Anin ni hipa pehding da et endi da peang-ang ni kakulugan tun impahding kudda etan daka pebehhul ni hi-gak. <sup>14</sup> Nem nakka ebbuluta e nakka u-unnuda etan kandan elaw ni intuttuddun Jesus ni kandan neihla. Nakka daydayawa hu Dios ida lan aammed mi niya nakka pekakkulluga hu Tugun Moses et yadda intudek ida lan prophets. <sup>15</sup> Ey hedin hi-gak dama, man nakka kulluga hu daka kulluga e tegguan alin Apu Dios ida netey, lawah niya kayyaggud. <sup>16</sup> Huyyadda gaputun ya kayyaggud hu nakka pehpehding ma-lat endi nak panliwwatan di hinangngab Apu Dios niya endi nak pambehhulan di edum kun tuu.

<sup>17</sup> Nelabah pigan toon ni nanha-adak di edum ni bebley et mambangngad dak di Jerusalem, tep inlaw ku etan pihhuh ni mahapul idan edum kun newetwet ni Jews niya nak et man-appit nan Apu Dios. <sup>18</sup> Yan nak pengpahdingan etan ni insapatah kun meippanggep ni linih hu nenang-ngan da-ak di Tempol, nem endidda kaya nandedeppap. <sup>19</sup> Nem wadadda Jews ni nalpullid Asia ni nenateng ni hi-gak diman, nem ay hi-gada hu endin nunya. Hi-gada nengamta hedin makulug ni wada bahul ku, et humman hu, hi-gada et dedan hu um-alidya et ehelen da hedin hipa nambahulan ku, <sup>20</sup> winu ibegam ida eyan Jews ni wadan nunya et ehelen da hedin wada himmak dan bahul kun nemistigalan da-ak di hinangngaddan ap-apun Jews. <sup>21</sup> Endi edum ni da pebehhul ni hi-gak, nem ebuh etan inhel kun kangkuy: Ya gaputun wada-ak deyan mebistigal nunya ey ya nakka pengullugin tegguan idallin Apu Dios hu netey!"

<sup>22</sup> Hi Gubernur Felix ey naka-amta tu hu elaw idan kamengullug nan Jesus, et pasiked tu humman ni bistigal et kantuy "Mahapul ni um-ali hi Laysias e ap-apun sindalu et hannak ipenuh huyyan kasuh." <sup>23</sup> Et paguwalya tu hi Paul idan sindalu, nem eleg da ika-leg hu penang-ngan idan gagayyum tu niya pengi-lian dan mahapul tu.

<sup>24</sup> Nelabah pigan aggew ey immali mewan hi Gubernur Felix et hi Drusila e ahwa tun Jew. Entanni ey impaeyag Felix hi Paul ma-lat ituttuddu tu hu meippanggep ni pengullug nan Jesus Christo. <sup>25</sup> Nem yan kapanpengituttudduin Paul meippanggep ni kakinayyaggud, ya pengekkenneng ni annel, ni ya kedettengan ni panhuwetan alin Apu Dios ey simmakut hi Felix et kantuy "Anin hiyya ni hutta. Han dakalli mewan paeyag hedin wada wayah ku." <sup>26</sup> Kan na-mu ngun Felix nem iddawtan Paul ni pihhuh ma-lat ibukyut tu, et humman hu e-eggel ni impaeyag tu ni immenung-ungbal ida.

<sup>27</sup> Nem nelabah dewwan toon ey neihullul hi Porsius Festus nan hi Felix ni gubernor. Hi Felix ey kapetebbatebbal idan Jews, et mukun impannanang tu hi Paul di kallabbutan.

## 25

*Ya neminhedan Paul ni mebistigal di kad-an ni ap-apud Rome*

<sup>1</sup> Tellun aggew nelabah ni nanha-adan Festus di diman Cesarea ey limmaw di Jerusalem. <sup>2</sup> Dimmateng diman ey kapantentenaddan ap-apuddan padi et yadda ap-apuddan Jews ni hi-gatu hu daka pebehhul nan Paul. <sup>3</sup> Ey imbagedan Festus e i-aldan tu anhan hi Paul di Jerusalem. Tep ya wadad nemnem da ey da bebtaken di dalan hedin i-ali da ma-lat pateyen da. <sup>4</sup> Nem hinumang Festus e kantuy "Eleg, anin ni yad Cesarea keikkellabatan tu, tep anggegannu ey mambangngaddak metlaing diman. <sup>5</sup> Yadda ap-apu yu hu itu-dak yu et makilaw idan hi-gak diman hedin wada inamta yun nambahulan tu."

<sup>6</sup> Nelabah na-mu walu winu hampulun aggew et han mambangngad hi Festus di Cesarea. Et mewa-wa et paeyag tu hi Paul di pandidiklamuhan da. <sup>7</sup> In-ali da hi Paul ey ka-hel ida etan Jews ni neki-lin nan Festus ni linggeman ni kandan bahul Paul, nem endi daka peang-ang ni kakulugan tun nambahul hi Paul. <sup>8</sup> Himmapi hi Paul ey kantuy “Endi nak nambahulan di elaw ni Tugun ni kau-unnudan Jews winu ya kameu-unnud di Tempol, anin hi Cesar e keta-ta-geyyan ni ap-apud Rome ey endi bahul kun hi-gatu.”

<sup>9</sup> Nem pinhed Festus ni tettebalen idan Jews et kantun Paul ey “Kaw pinhed mun umlaw di Jerusalem et yadman nak pemistigalan ni hi-gam?” <sup>10</sup> Nem kan Paul ey “Eleg, tep iyyadya-ak law di kakebistigalin tuud Rome e lebbengtun kebistigalan ku. Anin hi-gam et inatam e endi bahul kuddan Jews. <sup>11</sup> Hedin wada mehemmak ni bahul ku et humman ketteyyan ku anin, eggak umtakut ni mettey. Nem hedin memahmahan hu kakulugan tun eggak mambahul, eleg mabalin ni muwak pebeltan ida eyan tuu et da-ak pateyen. Ibbagak et yad kad-an Cesar law hu pandidiklamuhan mi!” <sup>12</sup> Nanhuhummangan di Festus et yadda etan edum tun ap-apun nangngeni ni nunman ni kasuh et kantun Paul ey “Hedin hannitan tep e pinhed mun illaw nan Cesar huuyan kasuh mu, anin ni i-abulut min umlaw kad kad-an tu et ngenamung tu!”

*Ya neamungan di Agripa, hi Bernice, hi Festus niyadda katuuuun mengngel ni e-helen Paul*

<sup>13</sup> Nelabah pigan aggew ey immalid Patul Agripa nan agitun bii e hi Bernice ni an menang-ang Festus e ap-apu law di Cesarea. <sup>14</sup> Yan nanha-adan dadman, ey ine-ehhel Festus nan Patul Agripa hu meippanggep ni kasuh nan Paul. Kantuy “Wada etan neikelabut ni inhi-yan lan Felix ni hi-gak. <sup>15</sup> Yan linawwan kud Jerusalem, ey indiklamuh idan ap-apun padi niyadda kamengipappanggulun Jews et kanda pepetey ku. <sup>16</sup> Nem inhel kun hi-gada e hedin ya elaw ni gubilnud Rome ey beken ni nealay kinastigu hu tuun neidiklamuh, tep pakkadek ni mebistigal ma-lat wada inna-nu tun menummang ni hipan daka pebehul ni hi-gatu. <sup>17</sup> Et umlidda etan nengidiklamuh nan Paul et mewa-wa et paeyag ku hi Paul di pandidiklamuhan da. <sup>18</sup> Nem sinnten da hu daka pebehul ni hi-gatu ey endi daka e-helan bahul tun umhulun ni kekastiguan tu. <sup>19</sup> Tep ya meippanggep ni daka pengullug et ya meippanggep etan ni tuu e hi Jesus e netey, nem kan Paul ey simmagu. <sup>20</sup> Nakka metemman mengippennuh ni henin nunman ni diklamuh et kangkuy umlaw di Jerusalem et yadman da pengippennuhan ni nunman. <sup>21</sup> Nem pinhed Paul ni yad kad-an Cesar e keta-ta-geyyan ni ap-apud Rome hu keippennuhan ni kasuh tu. Et peguwalyak law ingganah ni pengippelawwan kun hi-gatud kad-an Cesar.”

<sup>22</sup> Entanni ey kan Agripa nan Festus ey “Pinhed kun dedngelen pangnu hu e-helen nunyan tuu.” Et kan Festus ey “Ku anin nem entanni et yan kabubuhan.”

<sup>23</sup> Nawa-wa et mambalwasid Agripa nan Bernice ni kekakkayyaggudan ni balwasi. Et umliddad daka keemmungi hedin wada panhuhummanganan. Ingkuyug dadda ap-apun sindalu et yadda ap-apud bebley diman. Et an pei-lin Festus hi Paul di kad-an da. <sup>24</sup> Et kan Festus nan Agripa ey “Hi-gam Agripa e kamedeyyaw ni patul, ey hi-gayuddan emin ni neamung ni nunya, adyah etan tuun kapepillit idan emin ni Jews di Jerusalem niyadya Cesarea ni pepetey ku. <sup>25</sup> Nem endi nakka hemmakan bahul tun tu ketteyyan. Nem kantu ngu ey pinhed tun ya ap-apu tayud Rome hu memistigal ni hi-gatu et abuluten ku. <sup>26</sup> Nem hipa na-mu ittudek kun Cesar? Tep endi inamtak ni bahul tu. Et mukun impaeyag kun nunya et wada kayu, nema-man hi-gam e Patul Agripa ma-lat hedin wada hemmakan tayun bahul tu ey humman ittudek ku lan Cesar. <sup>27</sup> Tep kaw nealay impalaw kun Cesar hu tuun neidiklamuh hedin endi hu maptek ni bahul tu?”

## 26

*Ya nengiehnengan Paul ni annel tud hinanggan Agripa*

<sup>1</sup> Et kan Agripa nan Paul ey “Pe-hel dakan nunya et denglen mi hedin hipa penummang mu eyan daka pebehul ni hi-gam.”

<sup>2</sup> Imminah hi Paul et kantuy “Nakka man-am-amleng ni nunyan wada ka e apu Patul Agripa et denglen mu hu penummang kuddan emin ni kapebehul idan Jews ni hi-gak. <sup>3</sup> Tep inamtak et neka-amtam hu elaw idan Jews niyadda daka panhahallai. Et humman hu, ebuh anhan inglay mu et dengelen mun emin hu hipan e-helen ku.

<sup>4</sup> Inamtaddan emin ni Jews e neipalpu eman ni kaglang ku ingganah nunya ey inu-unnud ku elaw min Jews di bebley mi, anin eman ni wada-ak di Jerusalem. <sup>5</sup> Inamta da kaya, nem eleg da pinhed ni e-helen hu makulug e hi-gak hu hakey ida etan ni Pharisee e nemahhig hu mika pengu-unnud ni elaw min Jews. <sup>6</sup> Yan nunya ey da-ak kaiddiklamuh et deh e nakka mebennistigal, tep nakka kulluga e tegguan Apu Dios ida nangkete y e humman impakulug tuddan aammed mi. <sup>7</sup> Huuyan impakulug Apu Dios

hu kahehhegedaddan hampulun dewayan u-ungngan Jacob et yadda helag da. Et kewa-wa-wa niya kahilehileng ey daka daydayawa hi Apu Dios, tep daka kulluga e peamnu tu humman ni impakulug tu e tegguan tudda nangketey et huyya, apu patul, hu kandan nambahulan ku.”

<sup>8</sup> In-ang-ang tuddan neamung et kantuy “Kele anhan hedin hi-gayu, man neligat yun kullugen e tegguan Apu Dios ida nangketey? <sup>9-10</sup> Ma-nu tep anin ni hi-gak lan nunman et kahingngak idad hipan kameittuttuddun meippanggep nan Jesus di Nazareth, et kangkuy mahapul ni pehding kun emin hu kabaelan kun mengikka-leg ni da pengittuttudduan anin di Jerusalem. Et humman impahding ku. Nekihummangannak idan ap-apuddan padi et idwat da kelebngan kun mampengikkellabut idan kamengullug nan Jesus. Hedin imbagedan hi-gak hu pemetteyan dan hi-gada, man nakka i-abulut ni petteyan dadda. <sup>11</sup> Limmalimmawwak di kesimsimbaan et nak pampalpaligat ida kamengullug nan Jesus, tep pinhed kun issiked dan mengullug. Anggebe-hel kuddan peteg et anin umbesik idad neidawwin bebley et nak ida kapan-unuda.

*Ya pidwa tun nengi-helan Paul ni nengulugan tu*

<sup>12</sup> Et humman gaputun linawwan kud Damascus ni an mempap idan kamengullug diman e nakka tettenggeda hu papil ni indawat idan ap-apuddan padin kelebngan kun mempap ni hi-gada. <sup>13</sup> Kami kamenetteng diman ni emaggew ey pinhakkeyey wada inang-ang kun makaddilag nem ya aggew e binnangan dakemi. <sup>14</sup> Netukkad kamin emin ey entanniy wada dingngel kun immehel e in-ehel tud ehel idan Jews e kantuy ‘Saul! Saul! Kele muwak kapanligligat? Isiked mu tep eleg muwak damengu han-apput.’ <sup>15</sup> Hinumang ku et kankuy ‘Apu, hipa ka?’ Kantulliy ‘Hi-gak hi Jesus e muka panligligat. <sup>16</sup> Inah ka! Nampeang-angngak ni hi-gam tep hi-gam pinilik ni ittudak kun an mengippeamtaddan tuun nenang-angan muwak niya nangngelan mun ehel ku niyaddalli peamtak ni hi-gam ni edum ni aggew. <sup>17</sup> Ittu-dak dakad kad-an idan Jews niyadda Gentiles, et mu peamta meippanggep ni hi-gak. Ippaptek dakan hi-gak di hipan lawah ni pehding dan hi-gam. <sup>18</sup> Peamtam hu meippanggep ni hi-gak malat mewalwan hu nemnem da et isiked dan mengu-unnud ni lawah ni elaw Satanas e kamei-ellig di engeenget. Ey ma-lat kulugen da-ak et mepesinsahan hu liwat da et maibilang idan tuun Apu Dios.’

<sup>19</sup> Apu Agripa, eggak kahingen humman ni inhel Jesus ni nampeang-angan tun hi-gak. <sup>20</sup> Et mukun pinhakkeyey limmawwak di Damascus, yad Jerusalem, et yad kebebbebley di Judea et yad kad-an idan Gentiles et nak pampeamta humman. Ey intuttudduk idan tuu e mantuttuyyuddan liwat da ey peang-ang dad daka pehpehding e hi Apu Dios law hu daka u-unnuda. <sup>21</sup> Huyya himmulun ni nampapan da-ak idan Jews di Tempol et kanday petteyan da-ak. <sup>22</sup> Nem neipalpu eman ni nantuttudduan kun meippanggep nan Jesus ingganah nunya ey impaptek tuwak Apu Dios et adya-ak nunyan mengippeamtan meippanggep ni hi-gatud emin ni tuu, eta-gey niya nebabah saad da. Huyyan nakka pan-e-hela ey humman dama inebig lad Moses et yadda la prophets <sup>23</sup> e kanday ‘Hi Christo e pinutuk Apu Dios ni mengippaptek ni tuu ey manhelheltap ali et han matey, nem hi-gatulli memengngulun metegguan di nangketey, et hi-gatulli menellaknib idan Jews niyadda Gentiles ni mengullug ni hi-gatu.”

<sup>24</sup> Ginibbuh Paul humman ni inhel ey simmekuk hi Festus e kantuy “Kaka man-angngaw e Paul! Impan-angngaw dakan dakel ni inedal mu.”

<sup>25</sup> Hinumang Paul et kantuy “Apu governor Festus, eggak man-angngaw. Makulug emin huyyan nakka pan-e-hela. <sup>26</sup> Anin hi apu Patul Agripa et amta tudda huyyan emin. Eggak mandewadawan menghel idan nunya, tep inamtak et inamta tudda huyyan nekapkappa tep nan-amtad katuutuu. <sup>27</sup> Hi-gam e apu Agripa, kaw muka kulluga hu neitudek ni inhel ida lan eman ni prophets? Amtak et muka kulluga.” <sup>28</sup> Nem kan Agripa ey “Paul, kaw penghel mu nem nealay kinulug ku hi Jesus?” <sup>29</sup> Kan Paul ey “Anin na-mun yan nunya winu anin meabbayyag hu pengullugam et nakka iddasal nan Apu Dios ma-lat emin kayun nangngel eyaddan inhel ku ey mengullug kayun Jesus henin hi-gak, nem beken ni kayulli dama meikkellabut.”

<sup>30</sup> Entanni ey imminah hi apu Agripa, hi Gobernador Festus, et hi Bernice et yadda etan neamung. <sup>31</sup> Ey wada hakkeyey kanday “Tam endi numangngu bahul Paul ni umhulun ni tu ketteyyan winu tu keikkellabutan.” <sup>32</sup> Kan daman Agripa nan Festus ey “Gullat et ni eleg tu ibga e hi Cesar e ap-apud Rome hu mengippennuh ni kasuh tu, et dammutu-et ni meibbukyat.”

<sup>1</sup> Entanni ey nedatngan hu nagtud ni aggew ni pengippelawwan dad Rome nan Paul et yadda etan edum ni neikelabut. Hi Julius e hakey ni ap-apun sindalun Agustus Cesar di Rome hu nengidinelan dan hi-gada. <sup>2</sup> Wada etan bapor ni nalpud Adramitium ni umlaw di Asia et manlugan kamid man. Hi Alistalkus e iThessalonica e bebley di Macedonia ey nekilaw ni hi-gami.

<sup>3</sup> Newa-wan nunman ey dimmateng kamid Sidon et manda-guh kami nidman. Kabbabbal hi Julius nan Paul et iebulut tun an man-a-ayyam hi Paul et tu ang-angen ida etan inam-amta tu ma-lat umidwat idan mahapul tu. <sup>4</sup> Immegah kamidman et kami kamenglaw ey dinammu mid baybay hu na-let ni dibdib et idlan mid ba-hil ni Cyprus. <sup>5</sup> Indalan mid gilig ni baybay di bebley di Cilicia niyad Pampilya ey entanni dimmateng kamid Mira di Licia. <sup>6</sup> Wada kamidman ey inang-ang etan ni ap-apun sindalu hu bapor ni nalpullid Alexandria ni umlaw di Italy et manlugan kamidman.

<sup>7</sup> Kamambabbabbal etan bapor tep kameiddammu hu na-let ni dibdib et malebah pigan aggew et han kami dumteng di Nidus. Dimmateng kamidman ey nemahhig e na-let hu dibdib et eleg paka-law hu bapor et idlan mid pangil di gilig ni bebley di Crete et labhan mi hu Salmone. <sup>8</sup> In-unuunud mid gilig ni baybay, nem neligligatan kami ingganah dimmateng kamid kandan "Fair Havens e da-guhhan ni bapor" e neihnup di Lasea.

<sup>9</sup> Gapuh ni netenaktakan mi ey nedatngan hu ahipewwepewwekan et angetakkut ni mambapor di baybay. Mukun inamta mi ey tep nelabah law hu Aggew ni Kapan-tetpeliddan Jews. Et ipatnan Paul ni um-ehel ida etan ni ap-apuddan kamanggunnud bapor. <sup>10</sup> Kantun hi-gaday "Ya nakka pannemnem ey wada meippahding ni lawah hedin ippilit tayun umlaw. Mebahbah eya bapor et meendi kalga tayu, niya wada mettey ni hi-gatsu." <sup>11</sup> Nem hi Julius e ap-apuddan sindalun mangguwalyaddan balud ey tuka kulluga kae-heladda etan ni kanbapor niya etan kapitan, e eleg tu kulluga hi Paul. <sup>12</sup> Ey anin idan edum mi et kanday angetakkut kunu anhan law hu manhahha-ad diman hedin henin nunman e ahipewwepewwekan et wada hakkeyey daka peheballin umlaw ma-lat dumteng kamid Phoenix di Crete. Tep yadman hu kakkayyaggud ni da-guhhan ni bapor hedin ahipewwepewwekan. (Ya Phoenix ey kayyaggud ni panda-guhan ni bapor tep endi na-let ni pewek ni kaum-alid man tep inhangga tud southwest et yad northwest.)

*Ya netaktakan di Paul di baybay tep ya pewek*

<sup>13</sup> Entanni ey inlapu tun kaumenibdib et kan idan tuu na-mu ngu nem dammutun paka-law hu bapor et nuhnuhen da etan gumek ni lineyag dad dallem ni danum ni kamengippesikked ni bapor et manglaw kami e inunuunud mi gilig ni baybay di Crete.

<sup>14</sup> Nem entanni ey dimmateng hu na-let ni pewek ni nalpullid Crete. <sup>15</sup> Kameiddammud lawwan ni bapor et neala law et iunud mid kalawwin dibdib.

<sup>16</sup> Lektattuy dimmateng kamid Kauda e ekkeket ni bebley ni neigaggawwad baybay et meha-ninan kami etan ni pewek, nem nampalpaligat idan nengipahgep etan ni ekka-ket ni bangkad bawang etan ni bapor. <sup>17</sup> Impahgep da humman ni bangsa et pambedbedan dan kablih etan bapor tep ida kaumkaguh ni kebahbahan tu hedin meiddungpup etan di henidda dunduntug ni pantal di gilig ni baybay di Libya. Et pannuhnuhen da etan neibiklag ni tuldah ni kamengituttullud etan ni bapor et yad kapellawwin dibdib law la hu inunnu-unud ni bapor. <sup>18</sup> Newa-wan nunman ey tuka pan-ihhi-met hu pewek et pan-ibbeng da edum ni kalgan bapor. <sup>19</sup> Newa-wa mewan ey hanniman metlaing et pambekahan da edum ni alumintan mahapul di bapor. <sup>20</sup> Nelabah pigan aggew ey nanengtun eleg tu issiked pewek ey endi kameang-ang ni petang ni aggew niya bittuwwen et wada hakkeyey endi namnamah tun meteggu.

<sup>21</sup> Eleg kami mangamangan ni pigan aggew tep ya takut mi, et kan Paul idan edum miy "Gullat dedan ni dinggel yu hu kangku et nanha-ad itsulli nid Crete, endi et hu hanneyan an mekapkapy. <sup>22</sup> Nem anin, entan tattakut yu. Mebahbah eya bapor, nem endi an mettey ni hi-gatsu. <sup>23</sup> Tep yan nahdem ey intu-dak alin Apu Dios e nakka daydayawa niya kantuun hi-gak, hu anghel tu <sup>24</sup> et kantun hi-gak ey 'Paul, entan kakkaguh mu. Umdateng kayud Rome, tep mahapul ni umlaw kad kad-an Caesar e ap-apud man. Ey ippaptek Apu Dios ida eya edum mu et endi an mettey ni hi-gayu gapuh ni hemek tun hi-gam.' <sup>25-26</sup> Et humman hu, entan kakkaguh yu tep nakka kullugan peamnun Apu Dios humman ni tu inhel anin ni wada la keiddungpupan eyan bapor."

<sup>27</sup> Dewwan lingguan hu nengihuyyahuyawan ni pewek etan ni bapor ni nanlugnan mid Baybay e Mediterranean. Gawan labbin nunman ni meikkeppulut epat ni hileng ey ginibek idan kamanggunnud bapor e neihnup kami law di puyek. <sup>28</sup> Simpeng da kadinalem etan ni kad-an mi ey na-pat ni mitloh. Simmu-tu-lu kami et tepengen da mewan ey telum pulun mitloh hu kadinalem tu law. <sup>29</sup> Ida kaumkaguh ni

keiddungpupan ni bapor di batu et pan-buyunen da etan epat ni mebel-at ni gumek ni neiket di gegpep ni bapor di awwidan tu ey immeneng etan bapor. Wada hakkey law ey kaum-abtun kewa-waan tu.

<sup>30</sup> Yadda etan kamangngunnud bapor, ey pinhed dan umbesik et pa-hep da hakey etan ni ekkeket ni bangkan panlugganan dan umbesik. Daka hinngungngunnui etan ni gumek di hunghung etan ni bapor, nem ampangun kaya et daka pan-i-amag etan ekkeket ni bangkan panlugganan dan umbesik. <sup>31</sup> Nem hi Paul, ey inamta tu humman et kantu etan ni ap-apun sindalu et yadda etan sindalu tu ey “Ang-ang yu kuma tep hedin umbesik ida eman kamangngunnud bapor ey nanna-ud ni mettey itsun emin.” <sup>32</sup> Et ebuhe pututen idan sindalu hu iket etan ni ekkeket ni bangkan impa-hep dan panlugganan da-et, et maienud la.

<sup>33</sup> Kamangkewa-wan nunman ey kan Paul ey “Meikkeppulut epat ni aggew nunyan eleg yu pengangan tep ya takut yu. <sup>34</sup> Pangan itsu kuma ma-lat wada i-e-let tayu. Entan tattakut yu, tep endi an mettey ni hi-gatsu.”

<sup>35</sup> Inhel tu humman ey immala etan ni sinapay et mansalamat nan Apu Dios di hinangga dan emin et peni-angen tu et mangan. <sup>36</sup> Na-kal takut dan emin et wada hakkey law ey nengan. <sup>37</sup> Ya bilang min emin ni nanluga etan di bapor ey dewanggatut et nepitu et enem. <sup>38</sup> Negibbuh kamin nengan et pambekahen dad baybay hu kalga min wheat ma-lat mekekkeppawan etan bapor.

### *Ya nebabbahan ni bapor*

<sup>39</sup> Nawa-wa ey eleg amtadda etan ni kamangngunnud bapor hu petek ni kad-an mi, nem in-ang-ang dad gilig tu ey wada nedeklan ni mepantal et daka nemnemnema hedidammutun yadman dekkalan mi. <sup>40</sup> Et ebuhe pututen da iket ida etan ni gumek ni lineyag dan kamengged ni bapor hedidammutun et mangkaleng ida etan gumek di baybay niya inukah da etan linubid ni nemedbed daddan keyew ni heni ipay ni neikeput di awwidan etan ni bapor. Et at-aten da etan tulda di gegpep etan ni bapor di hunghung tu ma-lat ihuyaw ni dibdib etan bapor di dekkalan mid gilig ni baybay. <sup>41</sup> Kamenglaw etan bapor, nem pinhakkeyey neilubub hu hunghung tud nepuppu-ul ni pantal et eleg law paka-law. Ey binabbah ni na-let ni dalluyun hu awwidan tu.

<sup>42</sup> Kan ida etan ni sindalu ey petteyen daddan emin etan tuun nebangkiling, tep entanniy umdakal ida et umbesik ida, <sup>43</sup> nem eleg pinhed etan ni ap-apu dan mettey hi Paul et eleg dadda law pateyen. Inhel tu anhan law ni hi-gada e yadda nengaman mangkaykay ey umdep-ah idat dumekal ida. <sup>44</sup> Nem yadda eleg mengaman mangkaykay ey um-aladdan tablan nangka-kal etan di bapor ma-lat pengitngedan da et dumekal ida. Huyya impahding da et endi an nalsing ni hi-gami, tep dimmakal kamin emin etan di nedeklan ni mepantal.

## 28

### *Ya dimmakalan mid Paul di Malta*

<sup>1</sup> Dimmakal kami law di gilig ni baybay et amtaen mi e ya ngadan nunman ni bebley ni neigawwad baybay ey Malta. <sup>2</sup> Kabbabbal ida tuodman ni hi-gami. Nan-apuy ida et mampondangdang kami tep mainudan ey nemahhig ketel. <sup>3</sup> An ali nengaklam hi Paul ni pasing et tuka pan-ittungud apuy ey wadalli neukat ni uleg et mailipet di ngamay tu. <sup>4</sup> Inang-ang idan tuodman ey kanday “Pimmatey eya tuu tep ay ma-nut neihwang ali et eleg matey di baybay, nem ay killat ni uleg et humman na-mu kastigu tu. Gahat tun mettey huyyan tuu.” <sup>5</sup> Nem inwagkih nan Paul etan uleg di apuy ey endi nekalat di ngamay tu. <sup>6</sup> Kahehhegedaddan tuu hu lelbagan ni ngamay nan Paul niya ketu-lian tu et matey, nem nebayag ey endi an nekapkapan hi-gatu et kanday “Tam dios na-mu eya tuu.”

<sup>7</sup> Ya ap-apudman ni bebley ey hi Publius e kampuyek ni emin etan ni neihnap di gilig ni baybay. Inyagan dakemi et makiha-ad kamid baley dan tellun aggew ey impaptek dakemi. <sup>8</sup> Neipaddih nunman ni kamandedgeh hi ametu e kaman-aatung annel tu niya na-duman ni kuheyaw hu tuka ibheng. An inang-ang nan Paul di tuka pambakbaktadi et idasalan tu et kap-en tu et ma-kal degeh tu.

<sup>9</sup> Nan-amta humman ni impahding Paul ey nan-i-liddan tuu hu kamampandedgeh diman ni bebley et pan-ekalen Paul hu degeh da.

<sup>10-11</sup> Telumbulan hu nanha-adan mid Malta ey kabbabbal ida bimbebley ni hi-gami et yan eman ni peni-yanan midda ey nan-i-li da hu mahapul mid lawwan mi. Nanluga kami etan di bapor ni nalpud Alexandria. Nehaem kami et manha-ad kamid man ingganah nelabah hu ahipepewepewekan. Ya ngadan nunman ni bapor ni nanluga ni ey “Nandupi-il ni dios.”

<sup>12</sup> Entanni ey dimmateng kamid Syracuse et manha-ad kamidman ni tellun aggew. <sup>13</sup> Immegah kamidman et dumteng kamid Regium. Newa-wa et umgah kami mewan ey na-let hu dibdib ey kapellow di pellowwan mi et kadwan aggew ni ebuh ey dimmateng kamid Puteoli. <sup>14</sup> Wadadda dinteng min kamengullug diman et panha-ad dakemidman ni pitun aggew et han kami mandinallan ni limmaw di Rome. <sup>15</sup> Dingngel idan kamengullug di Rome hu dintengan mi et umliddan menammun hi-gamid mulkaduh di Apius. Yadda edum ni hi-gada ey dinammu dakemi etan di bebley e Tellun Pandaguan hu ngadan tu. Inang-ang Paul ida humman ni kamengullug ey kaman-am-amleng et mansalamat nan Apu Dios.

*Ya nengituttudduan Paul ni meippanggep nan Jesus di Rome*

<sup>16</sup> Yan dintengan midman Rome ey in-abulut ni ap-apud man e ngenamung hu pinhed Paul ni tu panha-adan, nem gowalyaan ni hakey ni sindalu. <sup>17</sup> Nelabah tellun aggew et paeyag idan Paul hu ap-apuddan Jews di diman Rome et kantun hi-gaday "Hi-gayuddan aaggik ni Jews, kayyaggud et neamung itsun nunya tep pinhed kun peamtan hi-gayu e endi amtak ni nak kinapkapyan lawah idan edum tayun Jews niya endi nak kinehing ni elaw tayun bineltan tayuddan aammed tayu, nem ay dimpap da-ak di Jerusalem et pakelabut da-ak di gubilnun Rome. <sup>18</sup> Binenistigal da-ak idan ap-apuddan gubilnu et pinhed dan ibbukyat da-ak tep endi daka hemmakan bahul kun umhulun ni da-ak pemetteyan, <sup>19</sup> nem eleg pinhed idan ap-apuddan Jews ni nak meibbukyat, et humman hu imbagak e pinhed kun hi Cesar hu mengippennuh ni kasuh ku, anin ni endid nemnem ku hu mengiddiklamuh ni hi-gada tep nak ida kaibbilang ni agik.

<sup>20</sup> Impaeyag dakeyu tep pinhed kun ang-angen dakeyu et ehelen kun hi-gayu e ya gaputun wada-ak di deyan nebangkiling ey tep ya nakka pengullugin inhel Apu Dios ida lan aammed tayun helag Israel meippanggep nan Christo et ya penegguan tun nangketye."

<sup>21</sup> Kan dan hi-gatu ey "Endi mi dinwat ni tudek ni nalpud Judea niya endi mi dingngel ni an ine-ehhel idan immalidyan edum tayun Jews ni lawah meippanggep ni hi-gam. <sup>22</sup> Nem pinhed min amtaen hu muka pannemnem nuntan ni hin-appil ni kapengulug, tep ya amta min ebuh ey eleg da pinhed di kebebbbley."

<sup>23</sup> Et getuden da hu aggew ni keemmungan dalli mewan. Nedatngan humman ni aggew ey dakek ida neamung di baley nan Paul. Et ia-aggew tu ingganah nehileng ni nantuttuddun hi-gada meippanggep ni nan-ap-apuan Apu Dios, ya keibbellinan ni Tugun Moses et yadda in-inhel ida lan prophets, tep pinhed tun kullugen da hi Jesus. <sup>24</sup> Ey wadadda edum ni nengulug ey wadadda edum ni eleg. <sup>25</sup> Eleg ida man-unnud et ida kamantututut, nem kan Paul ni hi-gada et han ida mabukal ey "Makulug numan etan inhel lan Isaiiah idan aammed tayun nunman ni inhel ni Ispirituh Apu Dios ni hi-gatu e kantuy

<sup>26</sup> 'Mu ehel idan tuuk ni helag Israel e kammuy: Kan Apu Dios ey deddedngelen dalli ehel ku, nem eleg da ewwasi, ennang-angen dalli pehding ku, nem eleg da amta keibbellinan tu. <sup>27</sup> Tep humman idan tuu ey manghay ida, heni endi tangila da niya mateda. Gullat et ni beken idan hanniman ey amtaen da meippanggep ni hi-gak et hi-gak u-unnudan da et peyaggud kudda.' " \*

<sup>28</sup> Et kan Paul ni hi-gaday "Et humman hu, e-helen kun hi-gayu e hi Apu Dios ey peamta tuddan Gentiles humman ni penellakniban tun hi-gada et mehellakniban ida tep kullugen da." <sup>29</sup> Inhel Paul huyya et mabukal ida ey nema-man ida kamantututut.

<sup>30</sup> Dewwan toon hu nanhahha-adan Paul etan di baley ni inebangan tudman Rome. Et hedin wadadda immalin an menang-ang ni hi-gatudman ey kameapngan hi-gada.

<sup>31</sup> Ey eleg tumekut ni nengituttuddun meippanggep ni nan-ap-apuan Apu Dios et ya meippanggep nan Jesus Christo.

\* **28:27** 28:27 Ang-ang yu Isaiiah 6:9-10.

## Ya Tudek nan Paul idan Kamengullug di Rome

<sup>1</sup> Huyyan tudek ey nalpun hi-gak e hi agi yun hi Paul e bega-en Jesus Christo ni pinutuk Apu Dios ni apostle tun an mengituttuddun elaw ni penellakniban Jesus Christo ni hi-gatsu.

<sup>2</sup> Huyyan penellakniban daitsun Jesus Christo ey impeamtan Apu Dios ida lan prophets tu et itudek dad Ehel tu. <sup>3</sup> Impeamta tu meippanggep nan Apu tayun hi Jesus Christo e U-ungnga tu, e nambalin ni tuu et henin hi-gatsu, tep in-ungngan helag David. <sup>4</sup> Nem nan-amta e beken ni tuun ebuh, tep hi-gatu ey Dios dama. Ya netaguan tu, gapuh ni et-eteng ni kabaelan Apu Dios hu neipeang-angan tu e hi-gatu ey U-ungngan Apu Dios dedan. <sup>5</sup> Ya impahding Jesus hu nengipeang-angan Apu Dios ni binabbal tun hi-gak, et putuken tuwak ni hakey ni apostle tun an mengituttudduan Gentiles di kebebbley ni meippanggep nan Jesus, ma-lat hi-gatu kulugen da niya u-unnuden da. <sup>6</sup> Anin ni hi-gayun tutu-ud Rome et pinutuk dakeyu daman Apu Dios ni tuun Jesus Christo.

<sup>7</sup> Nakka pan-ittudek huyyan hi-gayun tuud Rome ni nakappinshed Apu Dios niya pinili tun pantu-u tu.

Pinhed kun meweddan hi-gayu hu binabbal niya linggep ni kamelpun Apu Dios e Ametayu et hi Jesus Christo e Apu tayu.

### *Ya nandasalan Paul ni panyaggudan idan tuud Rome*

<sup>8</sup> Ya memenggulun e-helen kun hi-gayu ey pinhed kun amtaen yu e et-eteng nakka pansalamatin Apu Dios tep nan-amtad kebebbley hu yuka pengullug nan Jesus. Et nakka pedellan nan Jesus Christo huyyan nakka pansalamatin Apu Dios. <sup>9</sup> Hi Apu Dios e nakka pengikkahakeyin nakka pansilbiin pengituttudduan kun meippanggep ni penellakniban daitsun U-ungnga tu e hi Jesus Christo ey inamta tu e dakeyu kaiddasadasalin hi-gak ni kenayun.

<sup>10</sup> Ey nak pay kaiddasadasal ni hi-gatu hedin dammutu et law ni i-abulut tun um-ali-ak ni menang-ang ni hi-gayu. <sup>11</sup> Tep pinhed kun peteg ni ang-angen dakeyu et tuttudduan dakeyu ma-lat paka-awatan yu hu meippanggep nan Apu Dios et ma-duman hu kabaelan yun kamelpun Ispiritu tu, ey ma-lat maihammad hu yuka pengullug. <sup>12</sup> Hakey pay ey pinhed ku et ni mebaddangan kayu tep ya nakka pengullug niya mebaddangan nak dama tep ya yuka pengullug.

<sup>13</sup> Kaegiegi, ya hakey pay ni gaputun nebayag ni pinhed kun um-alidtan ey malat ya pambalanan ni ittutudduk ni hi-gayu ey me-duman kayu henin neipahding ni nantuttudduan kuddan Gentiles, nem ay ingganah nunya ey endi inna-nuk ni um-ali. <sup>14</sup> Tep mahapul ni nak ittutuddu hu meippanggep nan Jesus Christo di emin ni tuu, anin hipa neitu-wan da, nan-adal winu eleg, tep humman hu nei-kud ni hi-gak ni ngunuk. <sup>15</sup> Et mukun ihikkak ni um-alidtan ni mengituttuddu daman hi-gayun tutu-ud Rome ni impahding Jesus Christo ni penellakniban tun tuu.

### *Ya penellakniban Apu Dios ni tuun neliwtan*

<sup>16</sup> Eggak umbaing ni mengituttuddun nunman ni kayyaggud ni impahding tun panyaggudan tayu, tep humman hu keippeamtaan ni et-eteng ni kabaelan Apu Dios ni menellaknib ni emin ni tuun mengullug ni nunyan kameituttuddu. Yadda Jews hu nemangulun nengamatan nunya, nem emin hu tuun mengullug nan Jesus ey hellakniban Apu Dios, yadda Jews niyadda beken ni Jews. <sup>17</sup> Tep huyyan kameituttuddun impahding nan Jesus hu kamengippeang-ang, e ya kapengibbilangin Apu Dios ni tuun kayyaggud ey ya tuka pengullug nan Jesus Christo ni ebuh. Neiingneh huyya etan ni impatudek Apu Dios ni kantuy "Ya etan tuun kaibbilang Apu Dios ni kayyaggud, tep ya tuka pengullug, ey humman hu meidwatan ni biyag ni endi pappeg tu." \*

### *Emin hu tuu ey wada liwat tu*

<sup>18</sup> Hi Apu Dios di kabunyan ey peamta tu bunget tun pengastiguan tuddan tuun kamengippahding ni lawah, e humman hu kaumpapakuk ni keippeamtaan ni makulug ni kameituttuddun meippanggep ni hi-gatu. <sup>19</sup> Et humman hu, kastiguen idan Apu Dios, tep amta da meippanggep ni hi-gatu, tep indawat tun emin ni hi-gada hu dammutun pengamatan dan hi-gatu, nem kapyatun daka kehingga. <sup>20</sup> Et humman keang-angan tu e neihla ida, tep anin ni eleg meang-ang hi Apu Dios, et neipeang-ang di emin ni lintu tu hu kinaDios tu niya et-eteng ni kabaelan tun wada dedan ni hi-gatu neipalpu eman ni naltuan ni emin. Et humman hu, endi da pengigga-dulan ni eleg da pengullugin

\* 1:17 1:17 Habakkuk 2:4



hi-gatu. <sup>21</sup> Tep inamta dan wada hi Apu Dios, nem eleg da daydayawa niya eleg ida mansalamat ni hi-gatu. Nambalin ni endi silbitu nemnem da. Ey heni engeenget hu daka pannemnem, tep endi kabaelan dan mengamtan elaw tu. † <sup>22</sup> Kanday nenemnem ida, nem ya kakulugan tu, ey nambalin idan endi nemnem da. <sup>23</sup> Tep beken ni hi Apu Dios e wadan ingganah hu daka daydayawa, nem yadda etan kinapya dan heni ang-ang ni tuun kametty niyadda edum ni lintun Apu Dios, henin animal, yadda sisit, niyadda kaumkadap di puyek hu daka daydayawa.

<sup>24</sup> Et iwalleng law Apu Dios ida et yadda law etan lawah ni pinpinhed da hu daka pehpending. Et mukun ya kaumbebgang niyadda angeba-ing hu daka pehpending di annel da, niyad annel ni edum da. <sup>25</sup> Inamta da hu makulug ni meippanggep nan Apu Dios, nem inggeb-at dan kinulug hu beken ni makulug, et beken ni hi-gatu e nengapyan emin hu daka daydayawa, nem yadda kemedek etan kinapya tu hu daka daydayawa niya daka u-unnuda. Ey hi-gatun ebuh hu kamedeyyaw ni ingganah. Amen.

<sup>26</sup> Huyya gaputun nengiwallengan Apu Dios ni hi-gada et ebuh law hu angeba-ing ni pinhed dan daka pehpending. Anin idan bibi-i et eleg da u-unnuda hu kayyaggud dedan ni elaw e ya edum dan bii hu daka i-ulig. <sup>27</sup> Hanniman ida daman lalakki e inwalleng da hu kayyaggud dedan ni elaw e ya edum dan laki hu pinhed dan i-ulig. Gapuh idan nunyan lawah ni daka pehpending ey heltapen dalli hu lebbengtun kastigu da.

<sup>28</sup> Eleg dan hekey ibbilang hi Apu Dios, et humman hu inwalleng tudda, et ipahding dan emin hu hipan lawah ni kaum-alid nemnem da. <sup>29</sup> Wadan emin ni hi-gada hu hipan lawah ni elaw e neagum ida, mapihul ida, maemeh ida, mabunget ida, mapetey ida, maheul ida, makilam ida, metumbuk ida, <sup>30</sup> lawah hu daka e-helan meippanggep ni edum da, angebe-hel da hi Apu Dios, mepadngel ida, manghay ida, ida kamampahhiyya, ebuh hu annel dan daka e-ehhela, nelaing idan mannemnem ni pengippahdingan dan lawah, eleg da u-unnuda a-ammed da, <sup>31</sup> endi baing dan mengippahding ni lawah, eleg da pehding hu inhel da, endi binabbal da niya endi hemek dan edum da. <sup>32</sup> Inamta da etan tugun Apu Dios e mekastigun ingganah hu mengippahding idan nunman ni lawah ni daka pehpending, nem daka pan-ima-ma kumedek. Beken ni humman ni ebuh, nem daka tettebala hu tuun kamengippahding idan nunman ni lawah ni elaw.

## 2

### *Meandeng hu pengastiguan Apu Dios idan neliwtan*

<sup>1-3</sup> Kaegiegi, inamta tayu e limpiyuh hu pengastiguan Apu Dios idan tuun kamengippahding idan nunyan lawah. Nem anin ni hi-gayun kamemihul idan tuun henin nunman e kanyuy “Nekaliwtan ida humman e lebbeng tun mekastigudda,” et kastiguen dakeyu daman Apu Dios, tep anin ni hi-gayu et hanniman hu yuka pehpending. Tep hi Apu Dios ey tuka kastiguan emin hu tuun kamengippahding ni lawah. Et mukun nanna-ud ni mekastigu kayu. <sup>4</sup> Nem kanyu na-mu ey eleg dakeyu kastiguan Apu Dios tep kababbal niya tuka ennusidda etan tuun lawah daka pehpending. Nem eleg, tep hi Apu Dios ey beken ni pinhakkeyey kinastigu tu hu tuun kamengippahding ni lawah, tep pinhed tun iddawtan ni wayah tun mantuttuyyun liwat tu ma-lat mahelakniban.

<sup>5</sup> Nem manghay kayun peteg e eleg yu iwwalleng hu lawah ni yuka pehpending, et mukun nema-ma-malli kastigu yun panhuwetan Apu Dios ni tuu. Yallin nunman hu keang-angan ni kalinimpiyuh tu niya bunget tu. <sup>6</sup> Ya elaw ni penuwet alin Apu Dios idan tuun nunman ni kedettengan ni panhuwetan tu, ey meippuun idad impahding da. <sup>7</sup> Emin idalli etan tuun eleg mangsiked ni mengippahding ni kayyaggud tep pinhed dan meiddeyyaw niya metbal idad kad-an Apu Dios, niya pinhed dan mambi-biyag idallin kenayun ey iddawtan idallin Apu Dios ni biyag ni endi papge tu. \* <sup>8</sup> Nem yadda etan ebuh hu annel dan daka nenemnema niya eleg da u-unnuda etan makulug ni kameituttuddu et ya lawah hu daka pehpending ey nemahhig ali pengastigun Apu Dios ni hi-gada. <sup>9</sup> Emin ida lawah ni tuu ey kastiguen idan Apu Dios et panlelehhanan da, memengnguludda Jews et han ida hu beken ni Jews. <sup>10</sup> Nem emin ida etan kamengun-unnud ni kayyaggud, Jews winu beken, ey tettebalen Apu Dios ida, peiddeyyaw tudda niya pelinggep tudda. Yadda Jews hu memengngulun pengippahdingan tuddan nunya et han tu ipahding idan beken ni Jews. <sup>11</sup> Tep hi Apu Dios ey endi tuka pengittupugin bunget tu niya kakinayyaggud tu, tep nan-iingeh hu tuka pehding ni emin ni tuu.

<sup>12</sup> Emin hu tuu, Jews winu beken ey neliwtan, et humman hu kastiguen Apu Dios ida. Kastiguen tudda Gentiles hedin nanliwat ida, anin ni endin hi-gada hu neitudek ni Tugun tun indwat tun Moses. Et yadda Jews ni nengamtan nunman ni Tugun, ey neliwtan

† 1:21 1:21 Ephesians 4:17-18 \* 2:7 2:7 Ebuha hu nengulug nan Jesus Christo ni henin nunya hu elaw da.

ida metlaing, tep eleg da u-unnuden. Et humman hu, kastiguen tudda meippuun di Tugun. <sup>13</sup> Tep gullat ni wada tuun han-u-unnud tun emin hu Tugun Apu Dios, ey hi-gatu hu ibbilang tun kayyaggud et beken ni ya etan tuun inamta tun ebuh humman idan tugun. <sup>14-15</sup> Anin ni eleg dawten idan Gentiles hu Tugun et kapyatun hin-addum ni daka u-unnuda. Humman keang-angan tun wada ngu dedan di nemnem da etan pinhed Apu Dios ni pehding da, tep kaum-alid nemnem da hedini neihalla winu neiptek hu impahding da.

<sup>16</sup> Yallin kedettengan ni aggew ni pengippehuwetan Apu Dios nan Jesus Christo idan tuu, ey meamtallin emin hu neitlud nemnem ni tuu niyadda impahpahding dan eleg meamta. Huyyadda nakka peamtan nakka pengittutduin impahding Jesus Christo ni panyaggudan ni tuu.

*Ya eleg pengu-unnudiddan Jews ni tugun Apu Dios*

<sup>17</sup> Hi-gayun edum kun Jews, ey kayu kamampahhiya tep Jews kayu, niya kayu kamakaddinnel e ebbuluten dakeyun Apu Dios ni tuu tu tep hi-gayu hu nenawat ni Tugun tu. <sup>18</sup> Kanyuy inamta yu pinhed Apu Dios ni pehding yu niya kanyuy inamta yu kayyaggud niya lawah, tep neituttuddun hi-gayu hu Tugun tu. <sup>19</sup> Ey kanyuy wada kabaelan yun mengittutduun elaw Apu Dios ida etan ni tuun eleg dan hekey han-awat e henidda nekulap. Kanyu pay ey kayu kamei-ellig etan ni dilag ni tuka bebnangi engeenget ni kapannemnem ni tuu, tep kanyuy yuka baddangidda tuun mengamtan makulug ni kayyaggud ni elaw. <sup>20</sup> Ey gapu tep hi-gatsu nenawat ni Tugun Moses ey kanyuy hi-gatsu nengamtan emin, tep wada etan di Tugun hu makulug ni kameituttuddu. Et kayu kamakaddinnel e dammutun tuggunen yudda tutu-un eleg da amta hu neiptek niyadda tutu-un endi hu amta da meippanggep nan Apu Dios.

<sup>21</sup> Makulug ni yuka tuttuddui edum yun tuu, nem kele eleg yu ipahding hu yuka ittutuddu? Yuka ittugun hu eleg menekkeu, nem kele kayu kamenekkeu? <sup>22</sup> Kanyuy lawah hu pengi-ebbakan ni ahwa, nem kele yuka i-abek hu ahwa yu? Yudda kapihhula hu tuun kamenaydayaw ni dios dan kinapyan tuu, nem kele kayu kaumhegep di daka penaydayawin nunman idan dios dan an menekkeu? <sup>23</sup> Ey yuka igaggaya hu nengamtaan yun Tugun Apu Dios, nem ya kakulugan tu ey eleg yu deyyawa, tep eleg yu u-unnuda Tugun tu. <sup>24</sup> Ambuley neitudek dedan di Ehel Apu Dios e kantuy "Humman ni lawah ni elaw yun Jews hu kapemihhuliddan Gentiles nan Apu Dios."

<sup>25</sup> Hi-gatsu mewani ni Jews ey nekugit itu, tep humman hu intugun Apu Dios ni pengimmatunan e hi-gatsu hu pinili tun tuu tu. Nem endi silbi tun nekugitan tayu hedini eleg tayu u-unnuda hu Tugun tu. <sup>26</sup> Nem inna-nudda etan ni beken ni Jews ni eleg makugit, inna-nu hedini u-unnuden da hu Tugun Apu Dios, kaw eleg tudda dama ibbilang ni tuu tu? <sup>27</sup> Makulug ni eleg ida makugit, nem hedini u-unnuden da hu Tugun Apu Dios, humman keang-angan tun lawah kayun Jews, tep dinwat yu humman ni Tugun, nem eleg yu u-unnuda. Et humman hu, endi silbin nekugitan yu.

<sup>28</sup> Kaw hipa kan tayun kaibbilang Apu Dios ni tuu tu, ya etan nekugit? Eleg, tep anin ni nekugit hu tuu et yad annel tun ebuh. <sup>29</sup> Ya kaibbilang Apu Dios ni makulug ni tuu tu ey ya etan hinullulan ni Ispirituh Apu Dios hu nemnem tu, beken ni ya nekugitan tu. Huyyan tuu ey anin ni eleg tetebalan edum tun tuu et katetbalan Apu Dios.

### 3

<sup>1</sup> Wadan penghel yu mewani ey "Hipa tep silbi tun Jews itu, niya hipa tep silbin nekugitan tayu?" <sup>2</sup> Dakel silbitu. Ya et-eteng ni panyaggudan tun hi-gatsun Jews ey hi-gatsu nengidinelan Apu Dios ni Ehel tu. <sup>3</sup> Anin ni kantu et wadadda edum ni Jews ni eleg mengu-unnud ni pinhed Apu Dios, et beken humman ni umhulun ni pengyatan Apu Dios ni impakulug tu, <sup>4</sup> tep hedini hi Apu Dios, man eleg man-ittek, anin ni man-ittek emin hu tuu. Heninnuy hu neitudek ni ehel Apu Dios e kantuy "Hi-gam Apu Dios, ey hedini wada inhel mu, man kaum-amnu, tep makulug ni emin hu muka e-hela. Ey gullat ni ded-eken dakaddan tutu-u et endini hekey da hemmakan ni pebehul dan hi-gam." \*

<sup>5</sup> Ey wadadda na-mu edum ni tuun kahing et kanday "Lawah hedini kastiguen deitsun Apu Dios gapu tep ya liwat tayu, tep ya liwat tayu ey humman keang-angan tu e kakkayyaggud hi Apu Dios." <sup>6</sup> Nem neihla humman ni nemnem da, tep hedini beken ni limpiyuh hi Apu Dios, endi tep kelebengan tun manhuwet ni tuu.

<sup>7</sup> Wadan penghel yu mewani ey "Hipa tuwak pengastiguan Apu Dios hedini ya eggak pengu-unnudin tugun tu hu keang-angan tun kameiddinnel hi Apu Dios ni mengippahding ni kayyaggud? Kaw beken ni keiddeyyawan tu humman?" <sup>8</sup> Hedini

\* 3:4 3:4 Psalm 51:4

hanniman hu yuka pannelnem, kanyu tep ey “Anin tep manliwwat itsu, yaggud kayyaggud pambalanan tu, tep keiddeyyawan Apu Dios.” Wadadda etan edum ni tuun nan-itek, et kanday henin nunman hu nakka ituttuddu, nem itek da humman. E-helen kun hi-gayu e, makulug ni kastiguen Apu Dios ida kamengituttuddun hanniman.

*Emin hu tuu ey lawah*

<sup>9</sup> Et gapu na-mu mewan tep Jews itsu ey penghel yuy kekkeddukdul itsu nem yadda beken ni Jews. Nem eleg, tep inamta tayu e emin hu tuu ey neliwtan, anin idan Jews niya beken. <sup>10</sup> Huyya ey na-hel etan di neitudek ni ehel Apu Dios e kantuy

“Endi tuun kayyaggud di kapenang-ang Apu Dios, anin hakey. <sup>11</sup> Ey endi hakey ni tuun han-awat tu hu meippanggep nan Apu Dios, niya hi-gatu hu tuka paka-u-unnuda.

<sup>12</sup> Tep emin tuu ey inwalleng da hi Apu Dios et mambalin idan lawah. Et mukun endin hekey hu tuun kamengippahding ni kayyaggud. † <sup>13</sup> Ya bungut da ey kamei-ellig etan di eleg matengeb ni kulung e kamanhemmu, tep lawah hu daka heppita. Daka he-ula edum dan tuu. ‡ Ya daka heppita ey lawah ni peteg e kamei-ellig di gitan uleg e kaumpatey. §

<sup>14</sup> Maidut ida \* niya mekaggeh hu daka e-hela. <sup>15</sup> Anin ni ekket umhulun, et umpatey ida. <sup>16</sup> Emin di daka lawwi ey wada daka bahbaha niya dadda kapelilligasi edum dan tuu. <sup>17</sup> Eleg da amta pehding da mal-lat melinggep hu pekiddagyuman dan edum dan tuu. † <sup>18</sup> Ey eleg ida umtakut ni manliwwat nan Apu Dios.” ‡

<sup>19</sup> Inamta tayu e hi-gatsun Jews hu nengitugunan Apu Dios ni Tugun tu. Nem ay eleg tayu u-unnuda. Et humman hu, eleg mabalin ni kan tayuy endi hu liwat tayu. Tep anin ni hi-gatsun Jews et neliwtan itsu dama, heniddan Gentiles. Et humman hu, mahapul ni ebuluten tayu e nanliwat itsun emin et mukun lebbengtun mekastigu itsu, Jews winu Gentiles. <sup>20</sup> Et humman hu, endin hekey hu tuun mabalin ni ibbilang Apu Dios ni kayyaggud gapuh ni tuka pengu-unnudin Tugun. Et gapu tep endi kabaelan tayun mengu-unnud ni emin ni Tugun, ey humman keang-angan tu e neliwtan itsun emin.

*Ya elaw ni kapengibbillangin Apu Dios ni kayyaggud hu tuun neliwtan*

<sup>21</sup> Nem yan nunya law ey neipeamta hu elaw ni kapengibbillangin Apu Dios ni hi-gatsun kayyaggud, beken ni gapuh ni pengu-unnudan ni Tugun. Huyya hu neipeamtad Tugun Moses niyad intudek ida lan eman ni prophets. <sup>22</sup> Daitu kaibbilang Apu Dios ni kayyaggud hedid iddinel tayu hi Jesus Christo ni mengkal ni liwat tayu. Henin nunya hu kehellakniban emin ni kamengullug, anin ni hipa neitu-wan tayu niya hipa impahding tayu. <sup>23</sup> Tep emin itsu, Jews niya Gentiles ey nanliwat itsu. Et humman hu, eleg tayu han-inggeh hu kakinayyaggud Apu Dios. <sup>24</sup> Nem ay himmek daitun hi-gatu, et itu-dak tu hi Jesus ni meneklan liwat tayu et hedid mengullug itsun hi-gatu, man ibbilang daitun Apu Dios ni kayyaggud, tep humman hu pinhed tu. <sup>25-26</sup> Em, itu-dak Apu Dios hi Jesus et matey ma-lat mepesinsahan hu liwat ni tuu hedid mengullug idan hi-gatu. Huyyan impahding Apu Dios hu pengippeang-angan tun kalinimpuyuh tu. Tep anin ni eleg tu kastiguen ida eman nanliwat ni nunman, ey nanengtun limpiyuh, tep ingkatey Jesus hu liwat ni tuu. Huyya keang-angan tun meandeng hu kapengibbillangin Apu Dios ni hi-gatsun kayyaggud hedid mengullug itsun Jesus.

<sup>27-28</sup> Et humman hu, eleg mabalin ni tayu igaggaya e kantayuy kakkayyaggud itsu tep ya tayu kapengipatnain mengu-unnud ni Tugun Apu Dios. Tep beken ni ya tayu kapengu-unnudin Tugun hu kapengippuunin Apu Dios ni tuka pengibbillangin hi-gatsun kayyaggud, nem ya tayu kapengullugin Jesus Christo ni ebuh. <sup>29</sup> Entan tu nemnem e ebuh ida hu Jews ni kaibbilang Apu Dios ni tuu tu, et eleg tudda ibbilang hu beken ni Jews. Tep ibbilang tun tuu tun emin hu kamengullug, Jews niya beken, <sup>30</sup> tep hakey ni ebuh hu Dios. Et humman hu, anin Jews winu beken ni Jews et kaibbilang idan Apu Dios ni kayyaggud hedid ida kamengullug nan Jesus. <sup>31</sup> Et hedid hanniman, kaw iwalleng tayu tep hu Tugun Apu Dios hedid kullugen tayu hi Jesus? Eleg, tep hedid hi-gatu hu tayu kakulluga, nema-man u-unnuden tayu Tugun Apu Dios.

## 4

*Ya kapengullug Abraham nan Apu Dios*

<sup>1</sup> Nemnem tayu hi Abraham e nahlagan tayun Jews. <sup>2</sup> Gullat ni imbilang Apu Dios hi Abraham ni kayyaggud gapuh ni kayyaggud ni impahpahding tu, et mabalin ni impahhiya tu. Nem eleg mampahhiya, tep beken ni ya kakinayyaggud ni

† 3:12 3:12 [10-12] Psalm 14:3, niya 53:1-3 ‡ 3:13 3:13 Psalm 5:9 § 3:13 3:13 Psalm 140:3 \* 3:14 3:14 Psalm 10:7 † 3:17 3:17 Isaiah 59:8 ‡ 3:18 3:18 Psalm 36:1

kapengibbillangin Apu Dios ni tuun kayyaggud. <sup>3</sup> Huyya ey kameang-ang etan di neituede ni kantuy "Kinulug Abraham hu inhel Apu Dios, et humman nengbilangn Apu Dios ni hi-gatun kayyaggud." \*

<sup>4</sup> Inamta tayu e ya tuun kapangngunnu ey kametangdani. Et humman ni sinangdan tu ey beken ni liblih, tep ingngunwan tu. <sup>5</sup> Nem hi-gatsun neliwtan ey liblih hu pengibbillangan Apu Dios ni hi-gatsun kayyaggud. Eleg tayu tangdanad kayyaggud ni tayu kapehding, nem ebuh hu tayu kapengullugin Jesus Christo. <sup>6</sup> Huyya hu pinhed David ni e-helen ni nanghelan tun et-eteng amleng ni tuun imbilang Apu Dios ni kayyaggud, anin ni endi tu impahding ni kayyaggud

<sup>7</sup> Kantuy "Man-am-amleng idan peteg hu tuun pinesinsahan Apu Dios hu liwat da niyadda hipan lawah ni impahding da tep ya ngehay dan hi-gatu. <sup>8</sup> Em, man-am-amleng ida, tep eleg law ibbilang Apu Dios idan neliwtan." †

<sup>9-10</sup> Nem kaw ebuh ida Jews ni man-am-amleng tep nekugit ida? Winu anin idan Gentiles, anin ni eleg ida makugit? Makulug ni anin idan Gentiles et neila-kam ida tep ya daka pengullug hu kapengibbillangin Apu Dios ni hi-gadan kayyaggud. Anin hi Abraham e nahlagan tayun Jews et inamta tayu e imbilang Apu Dios ni kayyaggud, tep ya tuka pengullug, et han makugit. <sup>11</sup> Humman ni nampakugitan tu, ey pengimmatunan ni ebuh ni neibilangan tun kayyaggud tep ya tuka pengullug nan Apu Dios eman ni eleg pay ni makugit. Imbilang Apu Dios hi Abraham ni pan-emman emin ni tuun meibbilang ni kayyaggud, tep ya daka pengullug, anin ni eleg ida makugit. <sup>12</sup> Ey kameibbilang hi Abraham ni ama damaddan nangkekugit e yadda Jews ni kamengullug nan Apu Dios, henin kapengullug Abraham eman ni eleg tu kakugitan.

*Ya tugun Apu Dios hu keang-angan tu e neliwtan itsun emin*

<sup>13</sup> Impakulug Apu Dios nan Abraham e hi-gatu niyaddalli helag tu ey beltanen da eya puyek et hi-gada hu pan-ap-apun emin ni tuu. Inhel tun Abraham huyya tep ya tuka pengullug ni hi-gatu et maibbilang ni kayyaggud. Ya neibilangan Abraham ni kayyaggud ey beken ni ya nengu-unnudan tun Tugun Apu Dios ni dinwat Moses, tep endi ni humman ni tugun eman ni ketaggu tu. <sup>14</sup> Et humman hu, beken ni yad pengu-unnudan ni Tugun hu pengippeamnuan Apu Dios ni impakulug tun panyaggudan tayu, nem meippuun di kapengullug ni hi-gatu. Tep gullat ni beken ni hanniman, ey endi law tep silbitu hu kapengullug ni tuu niya eleg um-amnu hu impakulug tu, tep endi kabaelan ni tuun mengu-unnud ni emin ni Tugun tu. <sup>15</sup> Ya eleg pengu-unnudin Tugun hu kaumhulun ni kekastiguan. ‡ Tep gullat ni endidda humman ni Tugun, ey eleg itsu et manliwwat, tep endi tayu kehgingen.

<sup>16</sup> Et humman hu, ya amnuan ni impakulug Apu Dios ey neipuu di kapengullug niyad binabbal niya hemek tu. Makulug ni dewwatan idan emin ni tuu humman ni impakulug tu hedin ya daka pengullug ey henin kapengullug lan Abraham, beken ni ebuh ida Jews e nenawat nunman ni Tugun. Tep hi Abraham ey hi-gatu kameibbilang ni impan-aman emin ni kamengullug. <sup>17</sup> Wada neitudek ni ehel Apu Dios ni kantuy "Hi-gam e Abraham hu pan-emman emin ni kamengullug di kebebbebley." Et humman hu, makulug ni hi Abraham hu kameibbilang ni impan-ama tayun emin ni kamengullug, tep hi Apu Dios hu nengipanghel ni nunman. Ey makulug ni um-amnu humman ni inhel tu. Hi Apu Dios hu indinel lan Abraham, tep hi-gatu hu kameneggun netey niya tuka weddaa hu eleg maweda.

<sup>18-19</sup> Hi Abraham ey nehammad hu tuka pengullug nan Apu Dios, tep anin ni amta tun eleg mabalin ni mantennud et et-eteng namnamah tu et kulugen tun um-amu hu inhel tu e hi-gatu mambalin ni a-ammed ni dakel ni tuud kebebbebley. Huyya inhel Apu Dios lan hi-gatu: "Dakel alin peteg hu helag mu heniddan bittuwen di kabunyan e eleg mebilang." § Yan nunman ni nanghelan Apu Dios ni nunya, ey ngannganih ni hanggatut hu toon Abraham et kamei-ellig ni netey hu annel tu. Ey hedin hi Sarah dama, man nebasi, nem eleg mandewadewa hi Abraham di tuka pengullug nan Apu Dios et deh e immamnun dakel helag tu.

<sup>20-21</sup> Em, eleg mandinwa, nem et-eteng hu dinel tun kabaelan Apu Dios ni peamnu humman ni inhel tu. Et humman hu, nema-man nehammad hu tuka pengullug et daydayawen tu hi Apu Dios. <sup>22</sup> Humman ni kapengullug Abraham hu nengibilangan Apu Dios ni hi-gatun kayyaggud.

<sup>23-24</sup> Imbilang Apu Dios hi Abraham ni kayyaggud tep ya tuka pengullug, nem beken ni ebuh tu, tep emin itsun kamengullug ni hi-gatu ey daitsu dama kaibbilang ni kayyaggud.

\* 4:3 4:3 Genesis 15:6, et ya Galatians 3:6, niya James 2:23. † 4:8 4:8 [7-8] Psalm 32:1-2 ‡ 4:15 4:15 Endi tuun han-u-unnud tun emin humman idan Tugun. § 4:18-19 4:18 Genesis 15:5

Makulug e hedin medinnel itsun Apu Dios e nenagun Jesus Christo e Apu tayu, man ibbilang daitson kayyaggud. <sup>25</sup> In-abulut Apu Dios ni mettey hi Jesus ma-lat teklaen tu hu liwat tayu, nem sineguan tu ma-lat wada inna-nu tun pengibbillangan daitson Apu Dios ni kayyaggud, hedin mengullug itsun Jesus.

## 5

*Ya pambalinalan ni tayu kapengullug nan Jesus ey mewedda linggep Apu Dios ni hi-gatsu*

<sup>1</sup> Et humman hu, gapuh tep imbilang daitson Apu Dios ni kayyaggud tep ya tayu kapengullug, ey itsu law kamekillinggep ni hi-gatu tep ya impahding Jesus Christo e Apu tayu. <sup>2</sup> Ey gapuh ni tayu kapengullug nan Jesus Christo ey inhayukup daitson Apu Dios et gibeken tayu pemaptek tu niya binabbal tun hi-gatsu. Et humman hu, itsu kaman-am-amleng, tep makulug ni meiddeyyaw itsullin keiddeyyawan Apu Dios. <sup>3</sup> Anin ni itsu kameliligasi, et itsu kaman-am-amleng, tep inamta tayu e humman idan ligat hu pan-eddalan tayun man-an-anus. <sup>4</sup> Humman ni pangan-anusan ni ligat ey umbaddang ni mengiyayyaggud ni elaw tayu, et humman keippuunan ni namnamah tayun meiddeyyaw itsud kad-an alin Apu Dios. <sup>5</sup> Humman ni tayu kanamnamaha ey um-amnu, tep impaelin Apu Dios hu Ispirituh tun hi-gatsu. Et humman ni Ispirituh tu hu kamengippeamtan hi-gatsun impeminhed Apu Dios.

<sup>6</sup> Yan eman ni eleg tayu pangulgan ey endin hekey kabaelan tayun mengippahding ni kayyaggud tep neliwtan itsu, nem impaelin Apu Dios hi Jesus Christo ni nengiketey ni liwat tayu eman ni aggew ni gintud tu. <sup>7</sup> Inamta tayu e kunan hu tuun mengikketey ni pengihwangan tun kayyaggud niya limpiyuh ni tuu, nem endi hakey ni tuun an nengiketey ni pengihwangan tun lawah ni tuu. <sup>8</sup> Nem hi Apu Dios, ey impeang-ang tu hu et-eteng ni impeminhed tun hi-gatsu, anin ni inamta tu e neliwtan itsu, et itu-dak tu hi Jesus ni nengiketey ni liwat tayu. <sup>9</sup> Humman ni nengiketeyan Jesus ni liwat tayud krus hu nengibilangan daitson Apu Dios ni kayyaggud. Et inamta tayu e mehellakniban itsud kekastiguan tayu, tep hi Jesus hu kamengi-ehngeng ni hi-gatsud hinanggan Apu Dios. <sup>10</sup> Yan nunman ey buhul daitson Apu Dios tep neliwtan itsu, nem nekidagyum itsu law ni hi-gatu eman ni nengiketeyan Jesus ni liwat tayu. Et gapuh tep nekidagyum itsu law ni hi-gatu ey itsu kamedinnel e mehellakniban itsu, tep netagan hi Jesus et kamambi-biyag law di kad-an Apu Dios ni kamengi-ehngeng ni hi-gatsu. <sup>11</sup> Et mukun itsu law kamekiam-amleng nan Apu Dios tep nekidagyum itsun hi-gatu gapuh ni impahding Jesus Christo e Apu tayu.

*Ya nambalinalan ni impahding Adam ey ketteyyan, nem ya nambalinalan ni impahding Jesus ey ketegguan ni ingganah*

<sup>12</sup> Ya liwat Adam e nemangulun tuu ey bineltan idan helag tu. Et humman hu, emin tuu ey neliwtan. Et gapu tep nanliwat emin tuu ey mettey ida. <sup>13</sup> Anin ngu dedan eman ni eleg ni idwat Apu Dios hu Tugun tun Moses et neliwtan ida hu tutu-u, nem eleg da inamta e nehalmah hu liwat da, tep endi ni etan Tugun tun mengippeamtan eleg tu pinhed hu liwat. Nem neliwtan ida ngu dedan. <sup>14</sup> Et meippalpu eman ni nanliwtan Adam ingganah eman ni nenawtan Moses etan ni Tugun Apu Dios ey kamettey hu tuu, anin ni endi da kinehing ni intugun Apu Dios ni henin nanliwtan Adam.

Nem humman ni nanliwtan Adam ey neilegat ni emin hu tuu. Nem gapuh ni impahding etan ni neitu-nud ni hi-gatu e hi Jesus Christo ey meilleggat idan mehellakniban emin hu tuun mengullug ni hi-gatu. <sup>15</sup> Nem eleg man-ingnggeh, tep ya nambalinalan ni nanliwtan Adam ey ketteyyan emin ni tuu. \* Nem ya nambalinalan ni neteyyan Jesus Christo ey kepeessinsahan ni liwat tayun emin, tep ya et-eteng ni binabbal niya hemek Apu Dios ni hi-gatsu. <sup>16-17</sup> Humman ni liwat ni hakey ni tuun hi Adam hu himmulun ni kapanliwwasin emin ni tuu, et mahapul ni mekastiguddan emin. Tep makulug e emin itsun tuu ey itsu kamettey, tep humman nambalinalan ni nanliwtan Adam. Nem et-eteng binabbal niya hemek Apu Dios ni hi-gatsun neliwtan, et itu-dak tu hi Jesus Christo ma-lat emin hu tuun mengullug ni hi-gatu ey mepeessinsahan hu liwat da et mehellakniban idad kastigu da et mekibi-biyag idallin Jesus ni ingganah, tep kaibbilang ida law Apu Dios ni kayyaggud.

<sup>18</sup> Em, humman ni nanliwtan Adam hu himmulun ni nekastiguan ni emin ni tuu, nem gapuh ni impahding Jesus ey kameibbillang hu dakel ni tuun kayyaggud di hinanggan Apu Dios et meidwatan idan biyag ni endi pappeg tu. <sup>19</sup> Ey gapuh ni eleg pengu-unnudan Adam nan Apu Dios, ey neliwtan itsun emin, tep bineltan tayu hu kalinawah tu. Nem

\* 5:15 5:15 Ya gaputun kamettey ni emin hu tuu ey tep bineltan da hu kalinawah Adam et ida law kamanliwwat.

gapuh ni nengu-unnudan Jesus nan Apu Dios ey humman hu pengibbillangan daitsun Apu Dios ni kayyaggud, † hedin kullugen tayu hi Jesus.

<sup>20</sup> Neidwat hu Tugun ma-lat amtaen ni tuu e nekalliwtan ida. Kameang-ang huyyad eleg da ngu pengu-unnudan nunman ni Tugun. Nem e-helen kun hi-gayu, e anin ni hipa kainetteng ni liwat ni tuu, et e-etteng ngu dedan hu binabbal Apu Dios niya hemek tu. <sup>21</sup> Et humman hu, awasi tayu e emin itsun tuu ey itsu kamettey tep ya liwat tayu, nem e-etteng hu binabbal Apu Dios niya hemek tu, et ibilang daitsun kayyaggud et wada biyag tayun endi pappeg tu, tep ya impahding Jesus Christo e Apu tayu.

## 6

*Ya nengiwallengan tayun liwat et mahululan ni baluh hu elaw tayu*

<sup>1</sup> Nem anin ni henin nunya hu elaw tu, et entan tu panghel ey anin ni manliwwaliwwat itsu, haggud hehmeken daitsun Apu Dios tep kabbabal. <sup>2</sup> Beken ni henin nunya hu tayu pannemem, tep hi-gatsun kamengullug nan Jesus ey beken law ni ya liwat hu heni nangged ni hi-gatsu, tep ingkatey Jesus hu neneklaan tun liwat tayu. Et humman hu, lawah hedin tayu igebgeb-at ni manliwwat. <sup>3-4</sup> Kaw liniwwan yu e yan eman ni nengulugan tayu et mebenyagan itsu ey heni itsu nekiketey eman ni neteyyan Jesus Christo tep ya liwat tayu, niya heni itsu nekikulung et makitegu itsun hi-gatu? Et ya nampebenyagan tayu hu nengipeang-angan tayun nengulugan tayu e ingkatey Jesus hu liwat tayu. Nem netagwan tep ya et-eteng ni kabaelan Ametu e hi Apu Dios ma-lat wada inna-nu tun umbaddang ni hi-gatsun mambi-biyag ni kayyaggud. Em, netey hi Jesus et maikulung, nem gapuh ni et-eteng kabaelan Ametu ey sineguan tu. Hanniman daman hi-gatsu, e heni itsu nekitegun Jesus et maweda baluh ni biyag tayu, henin dinwat tu eman ni netagwan tu.

<sup>5</sup> Heni itsu nekiketey ni neteyyan tu, et humman hu metegguan itsulli dama henin hi-gatu. <sup>6</sup> Ya mewan ni neipetakan tud krus ey heni nekipetak hu lawah ni neitu-wan tayu ma-lat mepappeg hu kabaelan ni liwat ni mengnged ni hi-gatsu, et beken itsu law ni heni bega-en ni liwat.

<sup>7-8</sup> Gapu tep heni itsu nisi nekiketey nan Jesus Christo ey neliblih itsu law di kabaelan ni liwat, et mukulug tayu kakulluga e mekillakam itsud baluh ni biyag tu. <sup>9</sup> Inamta tayu e makulug huyya tep netey hi Jesus, nem netagwan. Et humman hu, eleg law mettey, tep endi law kabaelan ni katey ni hi-gatu. <sup>10</sup> Yan neteyyan tu ey sinekla tun emin hu liwat ni tuu. Et humman hu, eleg mahapul ni um-ali mewan et ipidwa tun mettey, tep hiyya humman ni nengiketeyan tun liwat tayu. Mategu law ni ingganah tep netagwan, ey emin hu tuka pehpending ey keiddeyyawan Apu Dios. <sup>11</sup> Et humman hu, nemnem tayu e nekiketey nan Jesus hu nekalliwtan ni neitu-wan tayu et kabaelan tayu law ni mengippahding ni keiddeyyawan Apu Dios, gapuh ni impahding Jesus Christo.

<sup>12</sup> Et humman hu, entan tu u-unnud hu lawah ni pinhed ni annel tayun kamettey. <sup>13</sup> Entan tu usal hu annel yun mengippahding ni hipan panliwwatan. Nem isual yud hipan pinhed Apu Dios ni pengussalan yun keiddeyyawan tu. Tep heni itsu netey ni nunman, nem heni itsu netaguan, tep neidwatan itsun baluh ni biyag ni nengulugan tayun Jesus. Et humman hu, mahapul ni i-eng-eng tayu hu annel tayun Apu Dios malat ya kayyaggud hu pehding tayu. <sup>14</sup> Kabaelan tayu law ni eleg mengippahding ni panliwwatan, tep beken law ni ya pengu-unnudan ni tugun Moses hu pengiddinnelan tayun kehellakniban tayu, tep ya law hu binabbal niya baddang Apu Dios hu tayu kaiddinel.

*Impambalin daitsun Apu Dios ni tuu tu*

<sup>15</sup> Nem wadan panghel yuy "Yaggud beken law ni ya pengu-unnudan ni Tugun Moses hu kehellakniban tayu, et ku anin tep ni manliwwaliwwat itsu, yaggud et-eteng hu binabbal niya hemek Apu Dios ni hi-gatsu." Nem neihtan peteg humman! <sup>16</sup> Tep kaw eleg yu amta e hedin hipa pinhed mun u-unnuden ey humman hu apum? Tep hedin ya panliwwatan hu pinhed tayun pehpending, et makulug ni mekastigu itsud impierno. Nem hedin hi Apu Dios hu u-unnuden tayu, man pambalin daitsun kakkayyaggud, et hi-gatu law hu pan-eppu tayun ingganah. Henin bega-en, e hedin nambalin kan bega-en ni hakey ni tuu, man mahapul law ni hi-gatu u-unnuden mun kenayun. <sup>17</sup> Nakka mansalamat ni et-eteng nan Apu Dios, tep anin ni impenahding yun nunman hu panliwwatan, nem yan nunya ey yu law kapaka-u-unnuda eya makulug ni kameituttuddun meippanggep nan Jesus. <sup>18</sup> Huyya elaw tu, tep nepappeg law hu nanhimbunan yun Satanas et hi Jesus Christo law hu kan bega-en ni hi-gatsu ma-lat ya

kayyaggud hu ipahding tayu. <sup>19</sup> Mukun indingpat ku hu kapanliwwasid bega-en e tuka peka-u-unnuda hu kan bega-en ni hi-gatu ey ma-lat nelakah ni ewwatan yu, tep kulang yuka pengewwat. Tep yan nunman ey heni ya lawah hu kan bega-en ni hi-gatsu, tep tayu kapehding hu hipan lawah ni pinhed ni annel tayu. Nem yan nunya law ey mahapul ni u-unnuden yudda kayyaggud ni elaw et ya kakkayyaggud hu ippahding yu, tep heni humman baluh ni apu yu.

<sup>20</sup> Ya lan nunman ey heni dakeyu bega-en ni lawah, ey endin hekey hu yuka nemneman mengippahding ni kayyaggud, et ebuh lawah ni impenahding yu. <sup>21</sup> Nem kaw wada kayyaggud ni ginen-ud yuddad lawah ni impahding yun anggeba-ing? Endin hekey. Tep ya pambalinalan idan nunman ey ketteyyan, e humman hu keiddawwian nan Apu Dios ni ingganah. <sup>22</sup> Nem ay kayyaggud et himmek dakeyun Apu Dios et pesinsahan tu liwat yu et pambalin dakeyun bega-en tu. Et yan nunya law ey impambalin dakeyun kayyaggud, et humman hu, dewwatan yu etan biyag ni endi pappeg tu. <sup>23</sup> Ya pambalinalan ni kapanliwwasin tuu ey ketteyyan tu et mekastigun ingganah, et meidawwin Apu Dios. Nem ya kaidawat Apu Dios idan kamengullug nan Apu tayu hi Jesus Christo, ey ya biyag ni endi pappeg tu.

## 7

### *Beken law ni ya Tugun Moses hu iddinel tayu*

<sup>1</sup> Inamtak et han-awata yun kaegiegi eya e-helen kun hi-gayu, tep naka-amta yu hu Tugun. Ya Tugun ey mahapul ni u-unnuden ni tuun ketaggu tun ebuh. Tep hedin netey hu tuu, man mepappeg law hu pengu-unnudan tun nunman ni Tugun. <sup>2-3</sup> Henin bii e hedin mengahwa, ey eleg mabalin ni an mengahwa mewan ni hin-appil ni laki, tep humman hu wadad tugun. Tep mambekhul hedin mengahwan edum ey nanengtun mategu etan ahwa tu, tep humman ni tu pehding ey i-abek tu ahwa tu. Nem hedin netey hu ahwa tu, dammutun mengahwa mewan.

<sup>4</sup> Hanniman ni hi-gayun kaegiegi e heni kayu nekittey nan Jesus Christo eman ni neteyyan tu. Et humman hu, eleg law mahapul ni iddinel tayu etan Tugun Apu Dios ni dinwat Moses. Tep hi Jesus Christo ni netaganan hu neihullul ni iddinel tayu et ya law hu pinhed Apu Dios hu ippahding tayu. <sup>5</sup> Yan eman ni eleg itu ni mangulug ey impahpahding tayu hu kapanliwwasin pinhed ni annel tayu. Ey yan eman ni neipeamta etan Tugun Moses ni hi-gatsu, ey nema-ma anhan law hu neminhed tayun mengippahding ni lawah, tep humman impeingha tayu, nem humman hu umhulun ni ketteyyan tayu e keiddawwian tayun Apu Dios. <sup>6</sup> Nem yan nunyan ngelug itu law ey beken ni ya tayu kapengu-unnudin Tugun hu pandinnelan tayu, tep neliblih itsud man ni nekiketeyan tayun Jesus. Et humman hu, beken law ni ya etan Tugun ni neitudek ni nebayag hu tayu u-unnuden. Nem hi Jesus Christo law hu u-unnuden tayu tep wada law hu nalpu etan ni Ispirituh Apu Dios ni kabaelan tayun mengu-unnud ni hi-gatu.

### *Ya Tugun ni dinwat Moses hu pengamtaan ni kalinawah ni tuu*

<sup>7</sup> Nem wadan penghel yuy "Hedin hanniman, kaw lawah tep humman ni Tugun Apu Dios ni dinwat Moses?" Eleg, beken ni lawah humman ni Tugun, tep humman hu nengipeamtan keibbellinan ni liwat. Gullat ni endi humman ni Tugun et eggak amta e liwat hu um-ameh, tep ya Tugun hu nengipeamtan lawah humman, tep kantuy "Entan kaemeh yud hipan limmun edum yun tuu." \* <sup>8</sup> Nem yan nengamtaan kun kan ni Tugun ey lawah hu um-ameh di hipan wadan edum, ey nema-ma anhan law ni nakka um-ameh di hipan nakka ang-anga. Et humman hu, gullat ni endi humman ni Tugun, et eleg tayu amta e neliwtan itu tep endi mengipeamtan hi-gatsu.

<sup>9</sup> Henin hi-gak e yan eman ni eggak ni awatan etan Tugun, ey kangku ngu nem kakkayyaguddak. Nem entanni et inawtan ku, ey inamtak law e nemahhig gayam hu liwat ku et nanna-ud ni meiddawwi-ak nan Apu Dios, e heni-ak netey. <sup>10</sup> Kangku na-mu ngu nem ya pambalinalan ni pengu-unnudan ni Tugun hu pekibi-biyagan di kadan Apu Dios, nem entannit inawtan ku law ey beken gayam, tep humman ni Tugun hu umhulun ni ketteyyan ku et meidawwi-ak ni hi-gatun ingganah. <sup>11</sup> Hineul da-ak kumedek eyan lawah ni neitu-wan ku, tep kangku ngu nem ya pengu-unnudan kun Tugun hu keweddaan ni biyag kun endi pappeg tu, nem beken gayam, tep endi kabaelan kun mengu-unnud ni emin ni Tugun, et humman kumedek hu umhulun ni ketteyyan ku.

<sup>12</sup> Nem anin ni hanniman hu elaw nunyan Tugun, et nanengtun kakkayyaggud tep kayyaggud niya neiptek hu tuka ituttuddu, tep nalpun Apu Dios. <sup>13</sup> Et beken humman

\* 7:7 7:7 Exodus 20:17 et yad Deut. 5:21

ni kayyaggud ni Tugun hu gaputun neidawwi itsun Apu Dios, nem gapuh ni eleg tayu pengu-unnudin nunman ni Tugun. Et humman nengipeang-ang e nemahhig hu liwat tayu.

*Endi kabaelan tayun mengippahding ni kayyaggud hedini eleg umbaddang hi Jesus Christo ni hi-gatsu*

<sup>14</sup> Inamta tayu e kayyaggud hu Tugun tep nalpun Ispirituh Apu Dios. Nem hi-gak ey tuu-ak ni ebuh et eggak han-u-unnud ni emin hu Tugun, tep heni-ak bega-en ni liwat. <sup>15</sup> Eggak han-awat ni hekey neitu-wan ku, tep ya kayyaggud ni pinhed kun ippahding ey beken humman ni nakka pehding. Yadda kumedek etan lawah ni eggak pinhed ni pehding hu nakka pehpehding. <sup>16</sup> Et gapuh tep hanniman e eggak pinhed ida etan lawah ni nakka pehpehding ey humman keang-angan tu e nakka ebbulutan kayyaggud hu Tugun. <sup>17</sup> Nem humman idan lawah ni nakka pehpehding ey eggak igebgeb-at, tep ya eya neitu-wan kun lawah hu kamengigga-gan hi-gak ni mengippahding idan nunman. <sup>18</sup> Huyya nengamtaan kun endi kayyaggud di neitu-wan ku, tep anin ni ya kayyaggud hu pinhed kun pehding et eggak han-ipahding. <sup>19</sup> Makulug huyya tep ya etan kayyaggud ni pinhed kun pehding ey humman kumedek hu eggak ippahding. Nem ya etan lawah ni eggak pinhed ni ippahding ey humman kumedek hu nakka ippahding. <sup>20</sup> Hedin hanniman e anin ni eggak pinhed ni pehding etan lawah, nem humman nakka ippenahding, ey humman keang-angan tu e ya lawah ni neitu-wan ku hu kamengigga-gan hi-gak ni mengippahding ni nunman, beken etan baluh ni neitu-wan ku.

<sup>21</sup> Et humman hu, yan nunya ey inamtak e kapyatun anin ni ya kayyaggud hu pinhed ni ippahding, et ya lawah kumedek hu kaippahding. <sup>22</sup> Tep ma-nut yad nemnem ku ey nakka ebbuluta e kakkayyaggud hu Tugun Apu Dios, <sup>23</sup> nem ya lawah ni neitu-wan ku ey ya lawah hu pinhed tun pehding. Heninnuy hu kamekapkapy: Yad nemnem ku ey kangkuy ippahding ku hu kayyaggud, nem hin-appil hu kapehding ni annel ku. Et humman hu, heni-ak bega-en ni lawah ni pinhed ni annel ku.

<sup>24-25</sup> [25b] Hanniman e heni nandewa-an hu elaw ni neitu-wan ku, tep ya nemnem ku ey pinhed kun u-unnuden hu Tugun Apu Dios, nem ya lawah ni neitu-wan ku ey ya lawah hu pinhed tun pehding. [24] Tawwey, eggak amta pehding ku! Gullat ni endi hu umbaddang ni hi-gak et ya lawah hu pehpehding ku. Et ya pambalanan tu ey meiddawwi-ak nan Apu Dios ni ingganah. [25a] Nem kayyaggud et wada hi Jesus Christo ni nenelaknib ni hi-gak et eleggak meidawwin Apu Dios. Humman hu gaputun nakka pansalamatin hi-gatu.

## 8

*Ya Ispirituh Apu Dios hu umbaddang ni hi-gatsun mengippahding ni kayyaggud*

<sup>1</sup> Et humman hu, hi-gatsuddan kamengullug nan Jesus Christo ey eleg itu law mekastigu. <sup>2</sup> Ya liwat hu kaumhulun ni kaketteyin tuu, nem gapu tep neiegi itu law Jesus Christo, ey liniblih daitsun Ispirituh Apu Dios di liwat ni heni namden ni hi-gatsu. Ey wada law kabaelan tayun mengippahding ni kayyaggud tep ya biyag tayun baluh ni kamelpun Ispirituh Apu Dios. <sup>3</sup> Eleg itu mehellaknibid tayu kapengu-unnudin Tugun Apu Dios, tep lawah dedan hu neitu-wan tayu, et humman hu, eleg tayu han-u-unnud ni emin hu Tugun. Nem pinesinsahan Apu Dios hu liwat tayu, tep intu-dak tu hu Ungnga tun meneklan liwat tayu. Et mambalin ni tuu e heni hi-gatsu, nem endi liwat tu. Sineka tu hu liwat tayu tep neipetak hu annel tud krus et matey ma-lat meliblih itsud nanliwatan tayu. <sup>4</sup> Huyya impahding tu, ma-lat hi-gatsun kamengullug ey mewedda kabaelan tayun mengippahding ni neiptek heniddan neitudek di Tugun Moses. Et hi-gatsun kamengullug ey beken law ni ya lawah ni pinpinhed ni annel tayu hu u-unnuden tayu, nem ya pinhed ni Ispirituh Apu Dios.

<sup>5-6</sup> Ya tuun ya lawah ni pinpinhed ni annel tu hu tuka nenemnema ey humman u-unnuden tu, \* nem ya pambalanan tu ey meiddawwin Apu Dios. Nem ya etan tuun kamengu-unnud ni pinhed ni Ispirituh Apu Dios, ey humman dama tuka nenemneman pehding, ey ya pambalanan tu ey melinggep nemnem tu niya meidwatan ni biyag ni endi pappeg tu. <sup>7</sup> Et humman hu, ya tuun ya lawah ni neitu-wan tu hu tuka u-unnuda ey buhul Apu Dios humman. Eleg tu u-unnuda hu Tugun, tep endi kabaelan tun mengu-unnud. <sup>8</sup> Yadda etan tuun kamengu-unnud ni pinhed ni lawah ni neitu-wan da ey eleg da peamleng hi Apu Dios.

<sup>9</sup> Nem hedini hi-gatsu, ey beken law ni ya lawah ni neitu-wan tayu hu heni nangged ni hi-gatsu, nem ya Ispirituh Apu Dios, tep wada law ni hi-gatsu. Nem yadda tuun endi

\* 8:5-6 8:5 Galatians 5:19-21



humman ni Ispirituh ni hi-gada e Ispirituh daman Jesus Christo ey beken idan tuu tu. <sup>10</sup> Nem teaye wada hi Jesus Christo ni hi-gatsu, ey anin ni mettey annel tayu tep ya liwat, et wadan hi-gatsu etan baluh ni biyag, tep imbilang dait sun Apu Dios ni kayyaggud. <sup>11</sup> Ey gapu tep wadan hi-gatsu hu Ispirituh Apu Dios e nenagun Jesus Christo ni neteyyan tu, ey tegguen tullu dama eya kamettey ni annel tayu, tep wada Ispirituh tud annel tayu.

<sup>12</sup> Et humman hu, kaegiegi, beken law ya pinhed ni neitu-wan tayun lawah hu pehpending tayu, nem mahapul ni ya pinhed ni Ispirituh Apu Dios hu pehding tayu.

<sup>13</sup> Tep hedin ippahding tayu lawah ni pinhed ni neitu-wan tayu, ey meiddawwi itsun Apu Dios ni kenayun. Nem hedin ebbuluten tayu hu baddang ni Ispirituh Apu Dios et issiked tayun mengippahding ida etan ni pinhed ni lawah ni neitu-wan tayu, ey mekibi-biyag itsun Apu Dios. <sup>14</sup> Tep emin hu kamengu-unnud ni Ispirituh Apu Dios ey hi-gada hu kameibbilang ni u-unggan Apu Dios. <sup>15</sup> Et humman hu, beken law ni ya takut hu nangnged ni hi-gatsu, tep wada law hu Ispirituh Apu Dios ni hi-gatsu, et mukun medinnel itsun menghel ni hi-gatun "Ama."

<sup>16</sup> Ya Ispirituh Apu Dios hu kamengippeamtan hi-gatsu e makulug ni u-ungnga dait sun Apu Dios. <sup>17</sup> Ey teaye itu kameibbilang ni u-ungnga tu, ey meilla-kam itsullid panyaggudan ni iddawat tun Jesus Christo. Ey ma-nu tep itu kamanligligat tep ya tayu kapengu-unnudin Jesus, nem makulug ni mekiddeyyaw itsulli damad keiddeyyawan tu.

*Ya kehellakniban tayud ligat*

<sup>18</sup> Inamtak e ya tayu kapanligligasin nunya, ey endi bilang tu hedin i-ingneh tayud dayaw ni iddawat alin Apu Dios ni hi-gatsu. <sup>19</sup> Tep emin hu lintun Apu Dios ey kaum-aabtun pengippeang-angan tun keiddeyyawan idan u-ungnga tu. <sup>20</sup> Eleg ni umamnu hu pinhed Apu Dios ni meippahding idan lintu tu, tep impambalin tuddan kamebahbah. Beken ni gapu tep humman pinhed da, nem humman pinhed Apu Dios ni pehding tu. Nem anin ni hanniman, et nanengtun wada namnamah tayun <sup>21</sup> edum alin aggew ey panyaggud Apu Dios ni emin hu lintu tu, henillin pengiyyaggudan tuddan tuu tu, et mambalin itu etan di pinhed tun pambalinan tayu. <sup>22</sup> Tep inamta tayu e emin hu lintun Apu Dios ey ida kamanligligat ingganah nunyan daka penehheggedin keiyyaggudan da, henin kapanligligasin biin man-ungnga. <sup>23</sup> Anin ni hi-gatsun kamengullug nan Jesus e nenawat ni Ispirituh Apu Dios et itu dama kameliligasi. Et humman hu, itu kaum-abtun kehellakniban tayud ligat tayu et keang-angan tun u-ungnga dait sun Apu Dios. Tep yallin nunman ey mehullulan ali eya annel tayun kamettey ni baluh ni annel ni eleg mettey. <sup>24</sup> Et gapu tep hinelakniban dait sun Apu Dios di liwat tayu ey tayu kanamnamaha huayan meippahding ali. Nem inamta tayu e eleg ni maipahding, tep gullat ni immamnu et eleg mahapul ni tayu namnamahen. <sup>25</sup> Nem gapu tep itu kamedinnel e um-amnu huuya ey tayu kaan-anusin menehhegged ni amnuan tu.

<sup>26</sup> Ey dait su kabaddangin Ispirituh Apu Dios di tayu kapangkullangi. Henin tayu kapandasali e eleg tayu amtan mandasal niya eleg tayu amta hedin hipa ibbaga tayun Apu Dios. Nem dait su kabaddangin Ispirituh tu et hi-gatu hu kamengi-hel ni pinhed tayun ibbagan Apu Dios ni eleg tayu han-i-hel. <sup>27</sup> Hi Apu Dios ey inamta tu nemnem ni tuu niya amta tu hu pinhed ni Ispirituh tun ibbaga hedin dait su kapan-iddasali. Tep ya etan ibbagan Ispirituh Apu Dios ey humman pinhed Apu Dios ni iddawat ni hi-gatsu.

<sup>28</sup> Ey inamta tayu e emin hu kamekapkapyan hi-gatsu ey pambalin Apu Dios ni panyaggudan tayun neminhed ni hi-gatu e impantuu tu e humman dedan planuh tu. <sup>29</sup> Tep emin ida etan tuun Apu Dios ey pinili tu dedan ni pambalin tun henin † Jesus e U-ungnga tu, ma-lat hi-gatu hu heni pengulwan emin ni kamengullug. <sup>30</sup> Pinilin Apu Dios dedan ida tuu tu et hi-gada hu impambalin tun mengullug ni hi-gatu. Ey yan eman ni nengulgan da, ey imbilang tuddan kayyaggud, et hi-gada hu neila-kam di keiddeyyawan tu.

*Ya et-eteng ni impeminhed Apu Dios ni hi-gatsun tuu tu*

<sup>31</sup> Et hedin tep hanniman e hi Apu Dios hu kantuun hi-gatsu, endi tep law hu mabalin ni mengapput ni hi-gatsu. <sup>32</sup> Eleg kawwanan Apu Dios etan binugtung ni U-ungnga tu et paeli tu et iketey tu hu panyaggudan tayu. Et humman keang-angan tun eleg tu kawwanan iddawat ni emin hu mahapul tayun panyaggudan tayu. <sup>33</sup> Hi Apu Dios hu nemesinsah ni liwat tayu niya hi-gatu hu nengibilang ni hi-gatsun kayyaggud, et humman hu, endi lebbeng ni hakey ni tuun menghel ni lawah itsun pinilin Apu Dios ni tuu tu. <sup>34</sup> Et humman hu, eleg mabalin ni wada tuun kantuy lebbeng ni mekastigu itu, tep netey hi Jesus ma-lat panyaggudan tayu. Ya keang-angan tu huuya ey sineguan Apu Dios et peta-gey tun man-ap-apu et immen di winannan tun kamengi-ehngeng ni hi-gatsu.

† 8:29 8:29 Ang-ang yu hu 2 Corinth 3:18

<sup>35</sup> Anin ni hipa mekapkapyan hi-gatsu e eleg mepappeg hu impeminhed Jesus Christo ni hi-gatsu. Anin na-mun itsu kameliligasi winu lehan tayu gapuh ni tayu kapengullug, niya anin na-mun itsu kame-puhin kennen, winu endi balwasi tayu, winu wada hu anggetakkut ni kamekapkapyan hi-gatsu, winu wada memettey ni hi-gatsu, et nanengtun pinhed daitun Jesus Christo. <sup>36</sup> Tep neitudek dedan di ehel Apu Dios e kantuy

“Mika hanghangaan kenayun hu ketteyyan mi tep ya mika pengu-unnudin hi-gam e Apu Dios. Makulug huyya, tep ya kapannemnem ni tuun hi-gami ey heni kami kalneroh ni kamenehhegged ni kepalsian tu.” †

<sup>37</sup> Nem anin hanneya e itsu kamanligligat et wada dinel tayun mengapput itsu, tep baddangan daitun Jesus Christo e neminshed ni hi-gatsu. <sup>38</sup> Nakka medinnel e eteng impeminhed Apu Dios ni hi-gatsu. Ey endi an mengippesikked ni nunman ni impeminhed tu, anin ni mettey itsu, winu mategu itsu, anin idan anghel, yadda dimonyoh, niyadda etan edum ni eleg meang-ang ni wada kabaelan tu. Ey anin ni hipa mekapkapyan hi-gatsun nunya niyan edum alin aggew, <sup>39</sup> anin idan wadad kabunyan niyad nandallem winu hipan lintun Apu Dios, et endi hu kabaelan dan mengippesikked ni impeminhed tun hi-gatsun neiegin Jesus Christo e Apu tayu.

## 9

### *Yadda Jews hu nemangulun pinilin Apu Dios ni tuu tu*

<sup>1</sup> Kaegiegi, hi-gak e hakey ni kamengullug nan Jesus Christo et mukun makulug eya e-helen kun hi-gayu. Anin ya Ispiritu Apu Dios et tuka ebbuluta e makulug eya wadad nemnem ku. <sup>2</sup> Makagegh ni peteg hu nemnem kun ingganah tep yadda agik ni Jews ey eleg ida mengullug nan Jesus Christo. <sup>3</sup> Gullat ni mabalin, et ku anin ew katteg ni hi-gak hu meiddawwin Jesus Christo ni ingganah et palaw da-ak nan hi Apu Dios di impierno, nemet mahelakniban ida edum kun Jews. <sup>4</sup> Hi-gamin Jews ey negahat kami, tep hi-gami hu pinilin Apu Dios dedangngun pambalin tun tuu tu. Impeang-ang tun hi-gami hu dayaw tu, niya nekiha-ad ni hi-gami. Hi-gami hu nengipeamtaan Apu Dios ni nekitbalan tu, et idwat tun hi-gami hu Tugun tu. Hi-gami hu nengituttudduan tun ustuh ni penaydayaw ni hi-gatu niya dakel hu impakulug tun pehding tun panyaggudan mi. <sup>5</sup> Yadda aammed mi hu nemangulun pinutuk Apu Dios ni pantu-u tu. Ey anin hi Jesus Christo, et Jew dama ingkatuu tu. Hi-gatu ey Dios e Ap-apun emin niya hi-gatu medeyyaw ni ingganah! Amen.

<sup>6-7</sup> Pinutuk Apu Dios ida Jews ni tuu tu, nem eleg tu ibilang ni tuu tuddan emin. Nem hedin hanniman, kaw kinyat tu tep humman ni impakulug tun hi-gada? Eleg, tep manut impakulug Apu Dios nan hi Abraham e yaddalli helag Israel hu meibbillang ni tuu tu, nem eleg maibilang ni emin hu helag tun tuun Apu Dios. Tep ma-nut hi Abraham hu nahlagan dan emin ni Jews, nem beken ni emin ida ey ida kamengullug e henin hi-gatu. Makulug huyya tep wada dedan hu inhel Apu Dios nan Abraham e kantuy “Ebuh idalli helag Isaac e u-ungngam ni meibbillang ni helag mu.”

<sup>8</sup> Ya pinhed tun e-helen ey yadda tuun Apu Dios ey beken idan neiungngan gandat, nem hi-gada hu inamnuan ni impakulug tun Abraham et hi-gada hu kameibbilang ni helag tu. <sup>9</sup> Neipeang-ang huyya eman ni nanghelan tun Abraham ni meippanggep ni keweddaan alin u-ungnga tun kantuy “Yallin balintun pambangngadan ku, ey man-ungngallin laki hi Sarah e ahwam.”

<sup>10-12</sup> Hakey pay ey hi Rebecca e ahwan Isaac e nahlagan tayun Jews e yan nengibutsugan tuddan nandupi-il ni u-ungnga tu e di Esau nan Jacob, ey kan Apu Dios ni hi-gatuy “Yalli mebukkul ni meukkat ey u-unnuden tullu hu meikkadwan meukkat tep hi-gatulli heni apu tu.” Yan nanghelan tun nunman ey endi ni hu kayyaggud winu lawah ni impahding da, tep eleg ida ni maiungnga. Nem pinutuk Apu Dios hu hakey et han ida maiungnga ma-lat meang-ang e tuka puttuka hu pinhed tun puttukan. Tep ya kapemuttukin Apu Dios ni tuu tu ey eleg maipuun di kayyaggud ni kapehding ni tuu, nem ngenamung hu pinhed tu. <sup>13</sup> Tep impatudek Apu Dios dedan e kantuy “Hi Jacob hu pinhed ku, beken hi Esau.”

<sup>14</sup> Nem kaw hedin hanniman, man kan tayuy beken ni meandeng hu kapehding Apu Dios tep pinhed tu hu hakey ey eleg tu pinhed hu hakey? Eleg. <sup>15</sup> Tep kan Apu Dios nan Moses ey “Peang-ang ku hu binabbal ku niya hemek ku etan ni tuun pillien ku.”

<sup>16</sup> Et humman hu, eleg maipuun di pinhed ni tuu winu yad tuka pengippahdingin kayyaggud hu kapemmekin Apu Dios ni tuu, nem ngenamung hu pinhed tun hehmeken.

<sup>17</sup> Nem hedin eleg tu pinhed ni hehmeken hu tuu, ey ngenamung tu. Ya kei-ang-angan

tu huuya ey ya etan impatudek tun inhel tun etan ni patul di Egypt ni eleg tu hemeken e kantuy

“Pinutuk dakan hi-gak ni mampatul ma-lat hedin apputen dakan hi-gak, ey ang-angen idan tutu-u hu et-eteng ni kabaelan ku et mandinggel hu ngadan kud kebbebley.”

<sup>18</sup> Huuya keang-angan tu e ngenamung hu pillien Apu Dios ni pinhed tun hehmeken. Nem hedin yadda tuun eleg tu pinhed ni hehmeken, ey kantuy diman et pan-ihimet da hu kalinawah da.

*Ya elaw ni bunget niya hemek Apu Dios*

<sup>19</sup> Nem wada na-mu mewan edum ni hi-gayun kantuy “Ku gullat tep et endi bahul tayu, tep hipa kabaelan tayun mengi-leg, hedin humman pinhed Apu Dios ni meippahding?”

<sup>20</sup> Nem e-helen kun hi-gayu e hi-gatsun tuu ey endi lebbeng tayun menghel ni hanniman nan Apu Dios, tep hi-gatsu ey tuu itsun ebuh. Lawah hu tayu pebehul nan Apu Dios winu tayu bellawen hu pinhed tun meippahding ni hi-gatsu et kan tayuy “Kele hanniman impengapayam ni hi-gak?” <sup>21</sup> Henin kamengapayan bewed e ngenamung tun pinhed tun kapyaan. Hedin pinhed tun paka-iyayyaggud hu hakey ey eleg hu hakey, man ngenamung tu.

<sup>22</sup> Heni daman Apu Dios e ngenamung tun mengippahding ni pinhed tun pehding ni hi-gatsun tuun lintu tu. Hedin kantuy kastiguen tudda pinhed tun pengippeang-angan tun bunget tu ma-lat meamta et-eteng ni kabaelan tu, ey ngenamung tu. <sup>23</sup> Nem tudda kaanansi ma-lat peang-ang tu kasina-gey tun hi-gatsun pinili tun himmek tun mekiddeyyaw ni hi-gatud kabunyan. <sup>24</sup> Ey kayyaggud et pinili daitsun Jews, nem beken ni hi-gatsun Jews ni ebuh, tep anin ida daman Gentiles. <sup>25</sup> Kameang-ang huyyad impatudek Apu Dios nan Hosea e kantuy

“Yadda tuun eleg maibilang ni tuuk nunman ey hi-gada law hu pillien kun pantu-uk.

Ey pinheden kudda law hu eggak la ni pinheden ni nunman. \* <sup>26</sup> Ey yadda etan tuud kebbebley ni eleg la ni maibilang ni tuuk ey ibbilang kuddallin tutu-uk niya u-unggak, tep hi-gak e Dios ni wadan ingganah hu kan tuun hi-gada.” †

<sup>27</sup> Huuya impaebig Apu Dios nan Isaiah daman meippanggep idan Jews, Kantuy

“Ma-nut dakel ida Jews e heniddan kadinakkel ni palnah di gilig ni baybay, nem hahhakkey ni hi-gada hu mehella kniban, <sup>28</sup> tep nanna-ud ni kastiguen idan Apu Dios hu tuud puyek ni eleg mengullug ni hi-gatu.” ‡

<sup>29</sup> Ey huuya dedan inebig lan Isaiah e kantuy “Gullat ni endi hemek Apu Dios e Kabaelan tun emin et endi tu intedan hi-gatsun Jews, et heni itsuddan bimmebley di Sodom niyad Gomorrah e netey idan emin.” §

*Ya eleg pangulugan idan Jews nan Jesus*

<sup>30</sup> Ya keibbellinan tu emin huuya ey heninnuy: Yadda Gentiles ey eleg dan hekey ikkaguh ni nunman hu pengibbillangan Apu Dios ni hi-gadan kayyaggud, nem imbilang tudda law ni kayyaggud tep ya nengulugan dan Jesus. <sup>31</sup> Nem hedin yadda Jews, ey indinel dad Tugun, tep kanda nem humman hu pengippuunan Apu Dios ni pengibbillangan tun hi-gadan kayyaggud, nem beken. <sup>32</sup> Nem kele na-muy eleg ibbilang Apu Dios idan kayyaggud? Em, tep indinel dad daka pengu-unnudin Tugun, e beken hi Christo. Ya eleg da pengebbulutin Christo hu kakei-elligi etan ni kameingngadnin batud Zion ni kakehellapdungin tuu. <sup>33</sup> Huuya ey kamei-unnud etan di impatudek Apu Dios e kantuy

“Wada puttuken kud Zion ni kamei-ellig di batun kehella pdungan ni tuu et man-egah ida.

Nem yadda tuun mengiddinnel ni hi-gatu ey eleg ida mantuttuyyu, tep hellakniban tudda.” \*

## 10

<sup>1</sup> Kaegiegi, pinhed ku et anhan ni mehella kniban ida edum kun Jews, et humman hu nak ida kaiddasadasali. <sup>2</sup> Inamtak e pinhed dan peteg ni mengu-unnud nan Apu Dios, nem neihladda, tep kulang daka pan-ewwat ni meippanggep ni hi-gatu. <sup>3</sup> Tep eleg da pinhed ni ebbuluten hu elaw ni kapengibbillangan Apu Dios ni kayyaggud hu tuun neliwtan. Tep ya daka pengiddinnelin keibbillangan dan kayyaggud, ey ya daka pengu-unnudin Tugun e beken ni ya binabbal Apu Dios. <sup>4</sup> Neihla humman ni daka pannemnem, tep pinappeg Christo hu kapengiddinnelin nunman ni Tugun, et hi-gatu law hu pengiddinnelan tayun pengebbulutan daitsun Apu Dios.

\* 9:25 9:25 Hosea 2:23 † 9:26 9:26 Hosea 1:10 ‡ 9:28 9:28 [27-28] Isaiah 10:22-23 § 9:29 9:29 Isaiah 1:9

\* 9:33 9:33 Isaiah 8:14 et yad 28:16

*Ya penewwatan tayun elaw ni kehellakniban tayu*

<sup>5</sup> Hi Moses ey impeang-ang tu e pakkaw ni u-unnuden emin hu Tugun hedin humman hu pengibbillangan daitsun kayyaggud, et huyya hu kantuy “Ya tuun paka-u-unnuden tun emin hu Tugun et endi tu panliwwatan, ey hi-gatu hu menewwat ni biyag ni melpun Apu Dios.” <sup>6-7</sup> Ma-nut hanniman, nem kaw kapepillit Apu Dios ni ippahding tayudda etan eleg tayu kabaelin ippahding et han daitsu ibilang ni kayyaggud et helakniban daitsu? Eleg, tep ya kakeippuunin pengibbillangan tun kayyaggud hu hakey ni tuu ey ya tuka pengullug. Huyya ey mei-ingngeh etan di neitudek ni kantuy “Eleg mahapul ni kayu umlaw di kabunyan ni an mengikkuyyug alin Christo di deya niya eleg mahapul ni kayu umlaw di nandaun ni an mengikkuyyug alin hi-gatu et han kayu mahelaknibi.” Ambeken ni henin nunya, tep ya elaw ni kehellakniban ey ya kapengiddinnelin Jesus Christo. <sup>8</sup> Ya impeantan Apu Dios ey eleg mahapul ni meliggatan kayun mengewwat ni elaw ni kehellakniban ni tuu e huyya eya mika ituttuddu. Huyya ey kamei-unnud etan di impatudek Apu Dios e kantuy “Nelakah ni ewwatan humman ni elaw, tep emin kayu ey mabalini ni nemnemen yu niya ung-ungbalen yu hu meippanggep nunman.” \*

<sup>9</sup> Et humman hu, hedin e-helen tayu e hi Jesus hu Ap-apu niya kullugen tayu e sinegun Apu Dios eman ni neteyyan tu, ey makulug ni mehellakniban itsu. <sup>10</sup> Tep ya kapengullug hu kapengibbillangan Apu Dios ni kayyaggud hu tuun neliwtan, niya mahapul ni peamta tud edum ni tuu humman ni nengulugan tu et keang-angan tun nehelakniban. <sup>11</sup> Huyya ey kamei-ingngeh etan di neitudek ni kantuy “Ya tuun mengiddinnel nan Christo ey eleg ali mantuttuyyun nengidinelan tun hi-gatu, tep mehellakniban.” † <sup>12</sup> Endi an nengipahhigan Apu Dios ni hemek tu, tep tudda kahehmeka Jews niyadda Gentiles. Endi nambaklangan ni Jews niyadda Gentiles, tep hakey hu Dios da niya hi-gatu Ap-apun emin ni tuu. Et humman hu, anin hipan tuun mambeggan baddang ni hi-gatu et tudda kapakahmeka. <sup>13</sup> Kamei-ingngeh dama huyya etan di neitudek ni kantuy “Emin hu menghel ni kantuy ‘Apu, helaknibi muwak’ ey nanna-ud ni mehellakniban.” ‡

*Endi pengigga-dulan idan Jews ni eleg da pengullugin Jesus*

<sup>14</sup> Nem inna-nun pengibbeagaan dan Jesus Christo et hellakniban tudda, hedin eleg ida mengullug ni hi-gatu? Ey inna-nun pengiddinnelan dan hi-gatu, hedin endi da diddinggel ni meippanggep ni hi-gatu? Niya inna-nu dan mengngel hedin endi an mengituttuddun hi-gada? <sup>15</sup> Et humman hu, mahapul ni wadadda kamengullug ni meittu-dak ni an mantuttuddu. Huyya kei-elligan etan ni impatudek Apu Dios ni kantuy “Hedin wada umlaw ni an mantuttuddu ey man-am-amleng ida etan tutu-un mengngel etan ni kayyaggud ni meituttuddun panyaggudan ni tutu-u.” §

<sup>16</sup> Nem beken ni emin hu nangngel ni neituttuddu ey nengulug ida. Meang-ang huyya etan di impatudek Apu Dios nan Isaiah e kantuy “Apu, hipa makkaw hu mengullug ni ituttuddu mi?” \* <sup>17</sup> Ya kapengngelin tuun kameituttuddun meippanggep nan Christo hu keweddaan ni pengullug tu.

<sup>18</sup> Nem inna-nu tep ida etan ni Jews ni eleg mengullug? Kaw egda tep denglen? Dingngel da kaya, tep wada neitudek ni ehel Apu Dios e kantuy

“Nandinggel di kebebheley eyad puyek hu meippanggep nan Apu Dios.” †

<sup>19</sup> Inewatan idan tuud Israel hu neituttuddun hi-gada, tep anin la eman ni kawedan Moses, et kan Apu Dios ni hi-gaday

“Hehmeken kudda Gentiles. Yudda kapihhula e kanyuy beken idan tuu, tep eleg da-ak amtan hi-gada. Nem umguguhu kayulli tep ya ameh yun pemaptek kun hi-gada.” ‡

<sup>20</sup> Entanni mewan ey eleg tumekut hi Isaiah et peamta tu hu inhel Apu Dios meippanggep idan Gentiles e kantuy

“Hi-gak ni Dios ey nampeamta-ak idan etan ni tutu-un eleg menengngud ni mengamtan hi-gak ni nunman. Eleg da-ak heppulan nunman, nem yan nunya ey inamta da-ak law ni hi-gada.” §

<sup>21</sup> Nem hedin yadda Jews, ey kan Apu Dios ni hi-gaday “Anin anhan et pinhed kun peteg ni ebbuluten yu-et hu impeminhed kun hi-gayu, nem yuwak kadedkuga.” \*

## 11

*Ya et-eteng ni hemek Apu Dios idan Jews*

\* 10:8 10:8 [6-8] Deut. 30:12-14 † 10:11 10:11 Isaiah 28:16 ‡ 10:13 10:13 Joel 2:32 § 10:15 10:15 Isaiah 52:7

\* 10:16 10:16 Isaiah 53:1 † 10:18 10:18 Psalm 19:4 ‡ 10:19 10:19 Deut. 32:21 § 10:20 10:20 Isaiah 65:1

\* 10:21 10:21 Isaiah 65:2

<sup>1</sup> Anin dakel ida Jews ni eleg mengu-unnud nan Apu Dios, et eleg tudda iwwalleng. Henin hi-gak e Jew hak, nem eleg tuwak iwwalleng. Helag tuwak nan Benjamin niya helag tuwak daman Abraham. <sup>2</sup> Eleg iwwalleng Apu Dios ida hu tuu tun pinili tun laputu. Kaw eleg yu hannemnem hu binenidbid yun neitudek ni meippanggep ni nanlilihan Elijah ni hi-gatu gapu tep ya lawah ni impahding ida etan ni edum tun Jews? <sup>3</sup> Tep kan Elijah ey "Apu Dios, pintey idan tuum ni Jews hu prophets ni intu-dak mu. Ey binabhah dadda hu altar ni mika pan-appisin hi-gam. Ebuh hak law ni natdaan ni kamengullug ni hi-gam ey ihik idan memettye ni hi-gak." \*

<sup>4</sup> Nem hinumang Apu Dios et kantuy "Eleg, beken kan hakey ni ebuh ni kamengu-unnud ni hi-gak. Tep ma-nut dakel nengiwalleng ni hi-gak et hi Baal hu daka daydayawa, nem nanengtun wadadda pitun libun nakka ipapaptek et hi-gak hu daka daydayawa e beken ni hi Baal." † <sup>5</sup> Henin nunya, e wadadda edum ni Jews ni kamengu-unnud nan Apu Dios ni pinili tun pantu-u tu, tep kabbabbal ni hi-gada. <sup>6</sup> Ya nemilian tun hi-gada ey beken ni ya kayyaggud ni impahding da, nem gapuh ni binabbal tun hi-gada. Tep gullat ni ya kayyaggud ni kapehding hu kapemilliin Apu Dios ni tuu tu, ey beken tep law ni gapuh ni binabbal tu, tep hedin ya binabbal tu, man liblih.

<sup>7</sup> Ya elaw tu huttan ey heninnuy: Ma-nut dakel ida Jews ni nengipatnan kabaelan da ma-lat abuluten idan Apu Dios, nem hahhakkey idan ebuh hu imbilang tun kayyaggud, e humman ida wada dinel dan hi-gatu. Huyyaddan imbilang tu ey pinili tudda dedan ni nunman ni pantu-u tu. Nem yadda edum ni hi-gada ey inwalleng tudda, tep manghay ida. <sup>8</sup> Neitudek huyyad ehel Apu Dios e kantuy

"Impambalin Apu Dios ni mekelhi ulu da et eleg da han-awat hu elaw tu. Heni tu kinimit hu mateda et eleg da han-ang-ang niya heni hinulatan tu tangila da et eleg da handengel ingganah nunya." ‡

<sup>9</sup> Ey wada pay impatudek Apu Dios nan David ni meippanggep ni hi-gada, e kantuy "Hamban ya pengippeanhanan dan hamul ni daka pan-amlengi hu umhulun ni kebahbahan da, niya mambalin ni heni bitun ke-gahan da et kekastigan da. <sup>10</sup> Ey hamban gapuh ni eleg da pengullugi ey mengmenglaw hu panliggatan da et heni da ipappahhan hu mebel-at niya mambalin idan heni nekulap ma-lat eleg da han-ang-ang." §

<sup>11</sup> Kaw gapu tep eleg ida mangulug nan Christo ey mannananeng idan neiddawwin Apu Dios? Eleg. Tep ya eleg da pangulugan hu nambalin ni kehellakniban idan beken ni Jews. Huyya impahding Apu Dios ma-lat maemeh ida Jews ni pengippaptekan tuddan Gentiles et edihey mengullug ida dama. <sup>12</sup> Gapuh nunman ni eleg pangulugan idan Jews ey impeang-ang law Apu Dios hu binabbal tuddan Gentiles et mangulug ida. Nem nema-ma binabbal tullin hi-gada hedin mengullug idalli law emin hu Jews.

*Ya elaw ni penellakniban Apu Dios ni tuu, yadda Jews niyadda Gentiles*

<sup>13</sup> Hi-gayun Gentiles hu nakka pampenghelin nunya. Hi-gak hu pinutuk Apu Dios ni mambalin ni apostle yu. Et nakka manhehellun mengippahding ni nunyan ngunuk <sup>14</sup> ma-lat wada inna-nuddan edum kun Jews ni meemeh ni hi-gayun Gentiles et ilah tu ey mehellakniban ida dama edum ni hi-gada. <sup>15</sup> Kayyaggud hu nambalinan ni nengiwalleng Apu Dios idan Jews ni nekemtang, tep inebulut dakeyu law ni hi-gatu. Nem hedin mengullug ida dama law hu Jews ey nema-man kayyaggud alin peteg hu meippahding gapuh ni hemek Apu Dios ni hi-gatsun emin. Em, ya kakinnayyaggud alin nunman ni meippahding ey henin ketegguan ni netey.

<sup>16</sup> Hi-gatsun Jews ey daitsu kaebbulutan Apu Dios, tep nahlag itsun Abraham. Pinilin Apu Dios hi Abraham ni tuu tu, anin idan helag tu. Ya kei-elligan tu huyya, ey ya etan handilin alinah ni mekapan sinapay. Tep ya elaw tayu ey itsu kaum-e-kal ni hampekan tayu kai-appit nan Apu Dios. Hedin inebulut Apu Dios humman ni in-appit tayu, ey humman keang-angan tu e tuka ibbilang ni kayyaggud ni emin etan nepalut ni alinah. Huyyan hampekan alinah ey heni hi Abraham. Ya etan edum ni nepalut ni alinah ey heni humman ida Jews ni helag tu. Kamei-ellig mewan etan ni keyew e hedin kayyaggud hu lamut tu, ey kayyaggud dama hu pangetu. Ey hi Abraham hu heni lamut ey yadda helag tu hu heni panga. <sup>17</sup> Nem sinungil Apu Dios hu edum ni pangan olibah, et hi-gayuddan Gentiles hu heni pangan olibah ni nealay simmemel hu inhuup tudman ni sinungil tu ma-lat makitegu kayun nunman ni neitnem ni olibah. Ya kei-elligan nunman ni neitnem ni olibah ey yadda Jews, tep hi-gada hu pinutuk dedan Apu Dios ni pantu-u tu, nem dingkug Apu Dios ida edum ni Jews et ya inhullul tun hi-gada ey hi-gayun

\* **11:3** 11:3 Ang-ang yu 1 Kings 19:10, 14. † **11:4** 11:4 Ang-ang yu 1 Kings 19:18. ‡ **11:8** 11:8 Deut. 29:4 niya Isaiiah 29:10 § **11:10** 11:10 [9-10] Psalm 69:22-23

Gentiles. <sup>18</sup> Nem entan tu kaney keduksul kayu nem yadda Jews, tep nalpun hi-gada hu panyaggudan yu. Nem endi nalpun hi-gayun panyaggudan da.

<sup>19</sup> Nem wadan penghel idan edum yuy “Nem sinungil tudda et maihullul kami ma-lat hi-gami hu ebbuluten tun tuu tu.” <sup>20</sup> Makulug ni neiullulul kayun hi-gada tep eleg ida mangulug. Ey hedin hi-gayu, man inebulut dakeyun tuu tu tep kayu kamengullug, nem mahapul ni pannananeng yun iddinel hu hemek tun hi-gayu. Tep hedin eleg yu pannananeng, man iwalleng dakeyu dama. Et humman hu, entan pampahhiyya yu, nem helipat-i yu ma-lat eleg maipahding ni hi-gayu hu neipahding ni hi-gada <sup>21</sup> Yadda Jews ey tuu dedan lan Apu Dios ida, nem inwalak tudda, tep eleg ida mengu-unnud. Hedin hanniman dama pehdng yu, ey iwwaklin dakeyu daman Apu Dios.

<sup>22</sup> Ma-nu tep em, mahmek hi Apu Dios, nem tudda kakastigua hu kamangngenghay ni hi-gatu, heniddan Jews ni eleg mengu-unnud ni hi-gatu. Nem hedin hi-gayu, man dakeyu kahehmeka. Nem hedin eleg yu pannananeng hu yuka pengullug ni hi-gatu, ey iwwaklin dakeyu dama, et mei-ellig kayu etan ni pangan tungngilen tu.

<sup>23-24</sup> Anin idan Jews ni inwalleng Apu Dios, et ibbangngad tuddad netungilan da hedin mambangngad idan mengullug ni hi-gatu, tep hi Apu Dios ey kabaelan tun pehdng humman. Nelallakkah ni bangngaden Apu Dios ida, tep tuu tudda dedan. Nem hedin hi-gayu, man beken kayun sigud ni tuu tu, nem imbilang dakeyud pamilyah tu. Huyya kei-elligan etan ni kandan nelallakkah ni pebangngad etan netungil ni pangan neitnem ni olibah di netungilan tu nem ya etan an umtungil ni pangan nealay simmemel ni olibah et an ihullul etan di pangan netungil ni neitnem ni olibah. \*

*Ya pemmekan Apu Dios ni tuu, anin hipa neitu-wan tu*

<sup>25</sup> Kaegiegi, pinhed kun peamtan hi-gayu etan eleg meamtan nunman ingganah nunya, ma-lat eleg kayu mampahhiya e kanyuy dakeyu kapehebballin Apu Dios nem yadda Jews. Mahapul ni ewwatan yu, e ya eleg pengullugiddan edum ni Jews ey eleg mannananeng. Tep mepappeg ali hedin mengullug idan emin hu Gentiles ni pinilin Apu Dios. <sup>26</sup> Hedin medetteng ali humman ni nagtud ni aggew ey mehellakniban idallin emin hu Jews e helag Israel. Huyyalli hu amnuan ni neituede di ehel Apu Dios e kantuy “Wadalli melpud Zion ni umhelaknib et hi-gatulli menikked ni lawah ni kapehpahding idan helag Jacob. <sup>27</sup> Yallin nunman ey pessinsahan kun emin hu liwat da et umamnu hu nekitbalan kun hi-gada.” †

<sup>28</sup> Yadda Jews, ey buhul idan Apu Dios nunya, tep daka kehingga hu kameituttuddun impahding Jesus Christo ni panyaggudan ni tuu. Nem ya nengahingan da ey nambalin ni panyaggudan yu. Nem nanengtun yadda Jews hu pinilin Apu Dios ni pantu-u tu, et nanengtun hu impemihed tun hi-gada tep yadda la impakulug tun aammed dan nunman. <sup>29</sup> Tep hi Apu Dios ey eleg tu kekyata hu nemilian tun hi-gada, anin idan pengippahdingan tun panyaggudan da. <sup>30</sup> Hi-gayuddan Gentiles ey manghay kayu e eleg yu u-unnuden hi Apu Dios ni laputu, nem himmek dakeyun hi-gatu tep kinehing idan Jews. <sup>31</sup> Em, ingganah nunya ey eleg ida mengu-unnud ni hi-gatu. Nem yallin edum ni aggew ey hehmeken tuddalli dama, henin nammekan tun hi-gayun Gentiles. <sup>32</sup> Humman impahding Apu Dios ni mengippeang-ang e emin hu tuu, Jews niyadda Gentiles, ey naniingeh idan emin e neliwatan ida, et humman hu, nammekan tun hi-gadan emin.

*Ya kakinayyaggud niya dayaw Apu Dios*

<sup>33</sup> Kayyaggud ni peteg hu Dios tayu! Makulug ni et-eteng hu hemek tun hi-gatsu. Endi henin hi-gatu, tep inamta tun emin. Eleg tayu han-awat hu kalinaing tu niya gaputun tuka pengippahdingiddan tuka pehdng. <sup>34</sup> Makulug numan etan intudek lan Isaiah e prophet e kantuy

“Endi hakey ni nengamtan nemnem Apu Dios niya endi mabalin ni menuttuddun hi-gatu. <sup>35</sup> Ey endi hakey ni tuun tu impautangan hi Apu Dios.”

<sup>36</sup> Em, makulug humman, tep emin eya wadan nunya ey nalpun hi-gatu. Hi-gatu hu nangged ni emin. Ey emin lintu tu niya emin kamekapkapyu ey keiddeyyawan tu. Dayaw tayun ingganah hi Apu Dios! Amen.

## 12

*Yadda etan pehdng ni mengippeamleng nan Apu Dios*

<sup>1</sup> Hi-gayun kaegiegi, ey inewatan tayu law e et-eteng hu hemek Apu Dios ni hi-gatsu, et humman hu, nakka e-helan hi-gayu e i-appit tayu annel tayun hi-gatu et ipahding tayun emin hu kabaelan tayun mengippahding ni kayyaggud ma-lat peamleng

\* 11:23-24 11:23-24 Ya keibbellinan tu huyya ey nelakah ni pebangngad Apu Dios ida Jews di pamilyah tu, tep tuu tudda dedan. † 11:27 11:27 Isaiah 59:20-21

tayu, tep humman hu neiptek ni penaydayaw ni hi-gatu. <sup>2</sup> Entan tu iu-unnud di kapehpehding idan eleg mengullug, nem mahapul ni belliwan yu hu yuka pannemnem, ma-lat yumaggud hu elaw yu. Tep hedin hanniman pehding yu, man makulug ni amtaen yu hu pinhed Apu Dios ni pehding yun kayyaggud e humman mengippeamleng ni hi-gatu.

<sup>3</sup> Kabbabbal hi Apu Dios ni hi-gak, et idwat tu kabaelan kun mengituttuddun elaw tu. Et yan nunya ey nakka e-helan hi-gayun emin e entan tu nemnem e nekatta-gey kayu nem ya makulug ni ingkatuu yu, Nem abulut yu e ya kabaelan ni hanhakkey ni hi-gayu ey neipuun di kalinammad ni yuka pengullug nan Apu Dios, tep eleg man-iingeh, nem wada hakkey ey iddawtan tun kabaelan tu. <sup>4</sup> Henin annel tayu e hakey, nem dakel hu parteh tu niya nambakbaklang hu kabaelan dan pehding. <sup>5</sup> Et hanniman ni hi-gatsun kamengullug, tep anin ni dakel itsu e nambakbaklang hu neitu-wan tayu, et heni itsu hakey ni annel gapuh ni neiegian tayun Jesus Christo.

<sup>6</sup> Gapuh ni binabbal Apu Dios ni hi-gatsu ey indawtan daitsun emin ni nambakbaklang ni kabaelan. Et hedin ya neidwat ni hi-gam ni kabaelan ey ya mantuttuddun impeamta Apu Dios, ey humman ipahding mu. Nem mahapul ni kullugen mu e makulug humman ni impeamta tun hi-gam. <sup>7</sup> Ey hedin ya neidwat ni kabaelan mu, ey ya umbaddang ni edum ni tuu, ey mahapul ni humman hu ipapatek mun pehding. Ey hedin ya kabaelan ni mantuttuddu hu neidwat ni hi-gam, ey humman hu ipahding mu. <sup>8</sup> Ey hedin ya mengihhammad ni kapengullug ni edum hu kabaelan ni indawat Apu Dios ni hi-gam, ey humman ipahding mu. Hedin ya kabaelan ni hakey ey ya um-idwat ni hipan kameidwat, ey mahapul ni eleg tu ukkuhan umbaddang. Hedin ya mengippangnguluddan kamengullug hu kabaelan ni indawat Apu Dios ni hi-gam, ey mahapul ni manhehellu kan mengippahding ni nunman. Ey hedin ya umbaddang idan anggehemmek hu kabaelan mun indawat Apu Dios, ey mahapul ni man-am-amleng kan nemaddang ni hi-gada. \*

<sup>9</sup> Mahapul ni makulug hu impeminhed yun edum yu e nalpud puhu yu. Dekug yu lawah et ya kayyaggud hu u-unnuden yu. <sup>10</sup> Pan-impipinhed kayu henin kapan-impipinhediddan han-aaggin kamengullug nan Jesus Christo. Ey ya pengibbillang yun edum yun tuu, ey ida kametbal nem hi-gayu. <sup>11</sup> Panhehellu kayun mengingngunnun pengunnun Apu Jesus niya u-unnud yu pinhed tu. <sup>12</sup> Ey pan-am-amleng kayu tep wada tayu kanamnahaman panyaggudan tayun melpun Apu Dios gapuh ni tayu kapengullug. An-anusi yu ligat yu niya entan tu isiked ni mandasal. <sup>13</sup> Hedin wada mahapul ni edum yun kamengullug, baddangi yudda. Ey apnga yudda kamanda-guh di baley yu, entan tudda ihingal.

<sup>14</sup> Anin ni yuka panlelehmani kapehding ni edum yun tuu, et entan tudda idusi, nem idasali yudda. <sup>15</sup> Hedin wada kaman-am-amleng, pekiam-amleng kayu, niya hedin wada ligat ni hakey, ey ligat yun emin. <sup>16</sup> Ang-ang yu et ya kayyaggud pandadagyuman yu. Entan tu peta-gey annel yu, nem pekikkillaw kayudda etan ni tuun nebabah saad da. Ey entan tu nemnem e nelaing kayu niya amta yun emin.

<sup>17</sup> Hedin wada lawah ni impahding ni edum yun tuun hi-gayu, ey entan tu ibleh, nem ya kayyaggud hu pahding yun hi-gada. Ang-ang yu ma-lat emin hu pehpehding yu, ey kayyaggud hu kapanemnem idan edum ni tuu. <sup>18</sup> Ipahding yu kabaelan yun mekibi-biyag ni melinggep di emin ni tuu hedin mabalin. † <sup>19</sup> Kaegiegi, entan nisi tu ibleh hedin wada lawah ni impahding dan hi-gayu, tep ngenamung hi Apu Dios ni mengastigun hi-gada. Tep neitudek di ehel tu e kantuy "Hi-gak hu mengibleh niya mengastigu etan ni tuun wada lawah ni impahding tun hi-gayu." Huyya inhel Apu Dios. ‡

<sup>20</sup> U-unnud tayu impatudek Apu Dios ni kantuy "Hedin wada tuun anggebe-hel dakeyu, ey pangan yu hedin neupa, niya idwasi yun innumen tu hedin na-wew. Tep hedin ippahding yu huyya, ey umbaing ni nengipahdingan tun lawah ni hi-gayu." § <sup>21</sup> Hedin wada lawah ni pehpehding dan hi-gayu, ey entan tu peapput hu nemnem yu, nem ipahding yu kayyaggud ma-lat meapput hu lawah.

## 13

*Ya pengu-unnudan tayuddan ap-apu tayun kamangngunnud gubilnu*

<sup>1</sup> Emin itsu ey mahapul ni u-unnuden tayudda hu ap-apun kamangngunnud gubilnu, tep hi Apu Dios hu nengiha-ad ni hi-gadad saad da niya hi-gatu nengidwat ni kelebengan dan man-ap-apu. <sup>2</sup> Et humman hu, hedin wada tuun tuka kehinga ap-apud gubilnu, ey heni hi Apu Dios hu kinehing tu, et humman hu mekastigu. <sup>3</sup> Tep

\* 12:8 12:8 [6-8] Ang-ang yu 1 Corinthians 12:4-11. † 12:18 12:18 James 3:18 ‡ 12:19 12:19 Deut. 32:35

§ 12:20 12:20 Proverbs 25:21-22

hedin kayyaggud hu elaw ni tuu, ey endi umhulun ni bungnetan idan ap-apud gubilnu. Tep yadda etan lawah daka pehpehding hu daka ibbungnet. Et humman hu, ya kayyaggud ipahding yu et tettebalen dakeyun ap-apu. <sup>4</sup> U-unnud yudda tep hi-gada bega-en Apu Dios ni menginggunnun panyaggudan yu. Nem hedini ippahding yu lawah, ey humman tekkutan yu, tep indawat Apu Dios hu kelebengan dan mengastigun tuun kamengippahding ni lawah. <sup>5</sup> Et humman hu, mahapul ni u-unnuden tayudda, beken ni gapu tep itsu kaumtakut ni kekastiguan tayu, nem gapu tep inamta tayu e humman hu neiptek ni pehding ma-lat melinggep hu nemnem.

<sup>6</sup> Et mukun lebbeng tun mambeyyad itsun buwis idan ap-apu, tep hi Apu Dios hu nemilin hi-gadan mengippatek ni ngunud gubilnu. <sup>7</sup> Et humman hu, mahapul ni beyyadan tayun emin hu hipan mahapul ni mebeyyadan. Ey mahapul ni beyyadan yu buwis yu, u-unnud yudda niya tettebal yudda etan kametbal.

*Yadda kayyaggud ni pehding di edum ni tuu*

<sup>8</sup> Hedin wada utang yu, ey bayadi yu, ma-lat endi yu nemnemnemen. Nem wada hakey ni mahapul ni eleg tayu lilliwunan kenayun ni heni utang tayu, e mahapul ni man-impinshed itsun emin. Tep ya tuun pinheden tu edum tun tuu, ey inu-unnud tun emin hu Tugun Apu Dios. <sup>9</sup> Tep hedini u-unnuden yu etan tugun ni kantuy pinheden yu hu edum yun tuu, henin impeminhed yun annel yu, man inu-unnud yun emin eyadda intugun Apu Dios, e kantuy: Entan tu iebek hu ahwa yu, entan patey, entan panekew, entan ameh ni limmun edum yu, niyadda edum ni intugun tu, ey neihakey di hakey ni tugun e kantuy pinheden hu sinakdul henin impeminhed ni annel. <sup>10</sup> Tep hedini pinheden tayu edum tayun tuu, ey eleg tayu ippahding hu lawah ni hi-gada. Et humman hu, hedini wada impeminhed tayun edum tayu, ey tayu kau-unnudan emin hu intugun Apu Dios ni hi-gatsu.

<sup>11</sup> Beken ni humman ni ebuh pehding tayu, nem inamta tayu e mahapul ni pehding tayun emin kabaelan tayun mengu-unnud nan Apu Dios, tep nekemtang law penginggunnunan tayun pengunnu tu. Tep kamangedettengi law hu kehellakniban tayu, beken ni henin eman ni lallappu tun nengulugan tayu. Et humman hu, beken ni tayu pelinlinwannan. Eleg tayu iu-unnud di tuun mahiga e kaman-u-uggip anin ni wada inggunu tu. <sup>12</sup> Heni kamangkewa-wa, e anggagannu law ni kawwalwal. Mukun mahapul ni dedkugen tayu hu lawah, ihhammad tayu hu tayu kapengullug, niya ipahding tayu kayyaggud ma-lat mandaddan itsun mekihhanggan Satan. Et heni itsun sindalun nandaddan ni mekiggubbat e nanhappiyaw niya nan-ispadah. <sup>13</sup> Mahapul ni ya kayyaggud hu elaw tayu niya henin elaw ni newalwalan hu nemnem tu, tep beken law ni heni na-ngetan hu nemnem tayu. Et mukun mahapul ni issiked tayu law ni meki-emmaemmung idan tuun lawah daka pehpehding, issiked tayun mambutteng, niya beken itsun makibii winu makilaki. Entan pandedeppap yu niya entan kaemeh ni wadan edum yun tuu. <sup>14</sup> Nem ya kayyaggud ey iinggeh tayu elaw tayun Jesus Christo e Apu tayu. Ey entan tu u-unnud hu lawah ni pinhed ni neitu-wan yun lawah.

## 14

*Ya eleg pemihhulin edum ni kamengullug*

<sup>1</sup> Hi-gayun kamengullug, abulut yudda etan tuun eleg maihammad hu daka pengullug ni neminshed ni meki-emmung ni hi-gayu. Nem entan pakihubeg yun hi-gada meippanggep etan ni daka ibbilang ni neiptek winu neipngil ni kapehding. <sup>2</sup> Henin kennen e hedini eleg maihammad hu kapengullug ni tuu, ey tuka kulluga e pi-yew hu pengihiddaan ni detag, et ebuh hu kameitnem ni tuka ihhida. Nem hedini neihammad hu kapengullug ni tuu, ey tuka kennen emin hu kamekkan. <sup>3</sup> Nem anin ni hanniman, et entan tu pihul ida edum yu. Hi-gayuddan kamengngan ni emin ni kamekkan, ey entan tudda pihul hu edum yun wada eleg da kenna. Hanniman daman hi-gayun wada eleg da kenna e entan tudda pihul hu kamengngan ni emin ni kamekkan, tep inebulut dakeyun emin nan Apu Dios. <sup>4</sup> Hakey pay ey eleg mabalin ni hi-gatsu menghel ni lawah edum ni hi-gatsu, ey kayyaggud hu edum, tep bega-en dakeyun emin nan Apu Dios, et hi-gatu ngu ngenamung ni menghel hedini neiptek winu neihalla kapehding ni hakey ni tuu. Ey inamta tayu e hi Apu tayun hi Jesus Christo hu memaddang idan tuu tu, ma-lat ya kayyaggud ipahding da.

<sup>5</sup> Wadadda edum ni tuun kanday "Wada hu neputuk ni aggew ni penaydayawan nan Apu Dios." Nem kan ni edum ni tuu ey "Eleg, tep nan-iingeh ni emin hu aggew." Nem beken humman ni yu panhahallaan, nem wada hakeyey ngenamung tun mannemnem ni pinhed tun penaydayawan tun Apu Dios. <sup>6</sup> Nem entan tu nemnem e neipngil hu elaw da hedini bimmaklang ida, tep ya etan tuun wada tuka pekeddukul ni aggew ni



penaydayawan tun Apu Dios ey humman hu aggew ni tuka penaydayawi. Hanniman dama etan ni tuun tuka kennan emin kamekkan, tep humman ni tuka pehpending ey meideyyaw hi Apu Dios, tep hi-gatu tuka pansalamatin nengidwatan tun nunman ni kennan. Anin daman etan ni tuun wada eleg tu kennan kamekkan et hi Apu Dios dama kameideyyaw, tep hi-gatu dama tuka pansalamatin kennan tu.

<sup>7</sup> Emin itsun kamengullug, anin ni yan nunyan ketaggu tayu, niyallin ketteyyan tayu ey mahapul ni hi Apu Jesus peamleng tayu, et beken ni ya annel tayu. <sup>8</sup> Tep ya gaputun mategu itsu ey keiddeyyawan Apu Jesus. Ey anin ni mettey itsu et hi-gatu metlaing hu meiddeyyaw, tep yad kad-an tu lawwan tayu. Et humman hu, anin ni mategu itsu winu netey itsu et tuu daitsun Apu Jesus Christo. <sup>9</sup> Tep netey et metagwan ma-lat hi-gatu hu pan-ap-apuddan mategu niyadda nangketey. <sup>10</sup> Et humman hu, beken ni nebabah hu tayu pengibbilang ni edum tayun kamengullug e eleg tayudda pihhula. Beken ni kayyagud humman ni pehding, tep hakey alin aggew ey um-ehnged itsullin emin di hinanggan Apu Dios ma-lat mebigistigal itsu. Et mahmahan tun hanhakkey ni hi-gatsu hedini hipa hu impahpahding tayu. \* <sup>11</sup> Neitudek dedan huyyad ehel Apu Dios e kantuy “Hi-gak ni Dios ni wadan ingganah ey kangkuy: Makulug e emin ali tuu ey mandukun idad hinanggal ni menaydayaw ni hi-gak niya e-helen dalli e hi-gak hu makulug ni Dios.” †

<sup>12</sup> Em, wadalli hakkeyey mahapul ni e-helen tud hinanggan Apu Dios emin hu impahpahding tun ketaggu tu.

<sup>13</sup> Et humman hu, isiked tayun umpihupihul ni edum tayun tuu, nem ya pehding tayu ey nemnem tayu ma-lat beken itsun umhulun ni panliwwatan idan agi tayun kamengullug. <sup>14</sup> Gapuh ni neiegian kun Apu Jesus ey inamtak e endi kamepi-yew ni kennan. Nem hedini wada tuun tuka kulluga e wada pi-yew ni kennan, ey makulug ni manliwwat hedini kennan tu hu tuka pi-yewa. <sup>15</sup> Hedini kebabahan ni kapengullug ni edum tayu hu pengngannan yu etan ni kantuy pi-yew, nem yuka kenna, ey humman keang-angan tun endi impemihed yun agi yu. Et humman hu, helipati tayu et beken ni ya kennan hu memababah ni kapengullug idan agi tayun ingkatey daman Jesus Christo hu panyagudan da. <sup>16</sup> Anin ni inamta yu e beken ni panliwwatan hu ipahding yu, ey heballi entan tu ipahding hedini wada kamenghel ni lawah humman. <sup>17</sup> Tep hi-gatsun neila-kam di kapan-ap-apuini Apu Dios ey beken ni ya tayu kakena niya kainnuma hu importanteh, nem ya kumaddan hu kakinayyagud ni elaw, ya linggep niya amleng tayun kamelpun Ispiritu Apu Dios. <sup>18</sup> Hedini henin nunya hu pehding tayun mengunund nan Jesus Christo, ey peamleng tayu hi Apu Dios niya tettebalen daitsun edum ni tuu.

<sup>19</sup> Et humman hu, ya mengippelinggep ni hi-gatsu ni ya mengihhammad ni kapengullug ni edum tayu hu ipahding tayu. <sup>20</sup> Anin ni inamta tayu e dammutun kennan hu hipan kamekkan, et entan tu ekan hedini humman memababah ni kayyagud ni ipahding Apu Dios idan agi tayu. Ma-nu tep em, endi hu pi-yew ni kamekkan, nem lawah hedini kennan tayu hu kapi-yewan edum ni agi tayu, et humman hu umhulun ni panliwwatan tu. <sup>21</sup> Heballi ew entan ekan yun detag, entan inum yun kaumbuteng niya entan tu ipahding hu hipan kaumhulun ni kapanliwwasin agi tayun kamengullug. <sup>22</sup> Nem hedini muka kulluga e beken ni liwat hu muka pehpending, ey wadan hi-gam. Ngenamung kayun Apu Dios ni nengamtan nunman. Tep man-am-amleng etan tuun eleg mandinwa etan di tuka pehding, tep kamedinnel e neiptek humman ni ipahding tu. <sup>23</sup> Nem ya tuun kamandinwa hedini kayyagud winu lawah hu pengngannan tu etan ni mekkan, ey heballi eleg tu kenna, tep manliwwat nan Apu Dios hedini kennan tu. Tep ya nengannan tu ey eleg maipuun di tuka pengullug. Em, manliwwat hu tuu hedini ipahding tu hu tuka kullugan neihalla.

## 15

### *Ya pengippeamlengan ni edum ni kamengullug*

<sup>1</sup> Hi-gatsun nehammad hu tuka pengullug ey mahapul ni ennusan tayun baddangan ida etan edum ni tuun kulang daka pengullug, et beken ni ya panyagudan tayun ebuh hu nemnemen tayu. <sup>2</sup> Emin itsu ey mahapul ni peamleng tayu hu edum tayu, hedini humman panyagudan da, ma-lat maihammad hu pengullug da. <sup>3</sup> Tep hanniman ipahding Christo e eleg tu peamleng hu annel tu. Humman hu inamnuan etan ni impatudek Apu Dios ni meippanggep ni hi-gatu e kantuy “Hi-gak hu neilawwan ni pihul idan tuun hi-gam e Apu Dios.” \*

\* **14:10** 14:10 Ang-ang yu 2 Corinthians 5:10 † **14:11** 14:11 Isaiah 45:23 \* **15:3** 15:3 Psalm 69:9

<sup>4</sup> Huyya keang-angan tu e emin impatudek Apu Dios ni nunman ey neitudek ma-lat pan-adalan tayu niya ma-lat maihammad hu dinel tayun hi-gatu. Tep ya impatudek tu hu kaumbaddang ni hi-gatsun mengan-anus ni ligat tayu, niya mengippetuled ni hi-gatsun mengitultuluy ni mengu-unnud ni hi-gatu.

<sup>5</sup> Ya dasal kun Apu Dios e kakelpuin kabaelan tayun mengan-anus idan ligat tayu niya mengihammad ni tayu kapengullug ni hi-gatu ma-lat eleg itu medismayah ey baddangan dakeyu ma-lat melinggep hu pekibi-biyagan yun pengu-unnudan yun elaw Jesus Christo. <sup>6</sup> Huyya pinhed kun pehding yu ma-lat emin kayu ey man-uunnud hu yuka penaydayaw nan Apu Dios e Aman Jesus Christo e Apu tayu.

*Ya pehding ni pandeyyaw nan Apu Dios*

<sup>7</sup> Et humman hu, pan-in-aabulut kayu henin nengabulutan dakeyun Jesus Christo ma-lat kaideyawan Apu Dios. <sup>8</sup> Tep inamta yu e immali hi Christo eyad puyek et mambalin ni bega-en idan Jews ma-lat amtaen da e immamnu law hu impakulug lan Apu Dios idan aammed da. <sup>9</sup> Ya hakey pay ni gaputun inlian Christo eyad puyek ey ma-lat wada dama inna-nuddan Gentiles ni menaydayaw daman Apu Dios tep ya hemek tun hi-gada. Huyya inamnuan ni neitudek dedan di ehel Apu Dios e kantuy

“Meki-dummak idan Gentiles ni menaydayaw ni hi-gam e Apu Dios. Ey i-ena-appéh ku hu penaydayaw kun hi-gam.” † <sup>10</sup> Wada pay impatudek Apu Dios e kantuy “Hi-gayun Gentiles, ey pakiam-amleng kayuddan pinilin Apu Dios ni tuu tu.” ‡ <sup>11</sup> Ya hakey pay ni neitudek ey kantuy “Emin kayun Gentiles, ey daydayaw yu hi Apu Dios. Em, emin kayun tutu-ud puyek, ey pan-a-appéh kayun penaydayaw yun hi-gatu.” § <sup>12</sup> Wada dama intudek lan Isaiiah ni meippanggep nunya e kantuy “Wadalli lakin mei-ungngan melpud helag Jesse, et hi-gatulli pan-ap-apun emin ni Gentiles niya hi-gatullin ebuh hu iddinél dan menellaknib ni hi-gada.” \*

<sup>13</sup> Et humman hu, nakka iddasal nan Apu Dios, e neipuunan ni tayu kanamnahaman kehellakniban tayu ma-lat peamleng dakeyu, pelinggep dakeyu gapuh ni yuka pengullug niya ma-lat ihammad tu dinel yun hi-gatu, gapuh ni kabaelan ni Ispirituh Apu Dios ni wadan hi-gatsu.

*Ya ngunun Paul ni indawat Apu Dios*

<sup>14</sup> Kaegiegi, nakka medinnel e eleg kayu mangkulang ni kakinayyaggud yu niya dakel law inamta yun meippanggep nan Jesus Christo et dammutun manhintutugun kayu. <sup>15</sup> Nem anin ni hanniman ey wada tuled kun nengitudek ni pinhed kun penemnem ni hi-gayu. Ey wada tuled kun nangelh nunya, tep hi Apu Dios e kabbabal hu nengidwat eyan ngunun <sup>16</sup> ni an mantuttudduan Gentiles tep bega-en tuwak nan Apu Jesus Christo. Heni-ak padin mengippeamtan hi-gada meippanggep ni penellakniban Apu Dios ni tutu-u, ma-lat hedín kullugen da, man hi-gada hu ebbuluten tun mei-appit ni hi-gatu gapuh ni baddang ni Ispirituh tu.

<sup>17</sup> Ey gapu tep binaddangan tuwak nan Jesus Christo ey nakka man-am-amleng eyad kapengunnun Apu Dios ni hi-gak. <sup>18</sup> Endi edum ni nak e-ehhelen nem ebuh hu baddang Christo ni hi-gak ma-lat mangulug ida Gentiles ni hi-gatu gapuh ni intuttudduk ni hi-gada niya impahpahding ku. <sup>19</sup> Nengulug ida pay tep yadda miracles ni impahding ku. Kinabaelan kun nengipahding idan nunya gapuh ni et-eteng ni kabaelan ni Ispirituh Apu Dios. Et yad emin di linawwan ku ey intuttudduk hu impahding Jesus Christo ni panyaggudan ni tuu, neipalpu Jerusalem ingganah di Illiricum. <sup>20</sup> Tep ya pinhed ku dedan ey peamtak hu meippanggep nan Jesus Christo idad tutu-u eleg ni mengamtan hi-gatu, tep hedín umlawwak mewán ni an mantuttuddud tutu-u nanggel law ni meippanggep ni hi-gatu ey heni-ak beken ni apostle e nak hek-ilen hu edum di ngunu da. <sup>21</sup> Hanniman hu impahding ku ma-lat peamnuk etan neitudek ni kantuy “Yadda eleg mengamtá niya eleg manggel meippanggep ni hi-gatu hu an pantuttudduan ma-lat amtaen da niya ma-lat awatan da elaw tu.” †

*Ya nannemneman Paul ni tu penang-angan idan kamengullug di Rome*

<sup>22</sup> Netenaktakkak ni um-alid tan tep nak nantuttuddud edum ni bebley. <sup>23</sup> Nem yan nunyan negibbuh law ngunun deya, ey dammutun um-ali-ak ditán, tep nebayag dedan ni pinhed kun um-ali. <sup>24</sup> Nakka nemnemneman manda-guh ditán ni nekemtang ni lawwan kud Spain, et hedín dammutu, ey baddangi yuwak ni lawwan kudman. <sup>25</sup> Nem yan nunya, ey umlawwak nid Jerusalem ni mengillaw eyan meibbaddang idan kamengullug diman. <sup>26</sup> Tep ninemnem idan kamengullug di Macedonia niyad Greece ni um-idwat

† 15:9 15:9 Ang-ang yu 2 Samuel 22:50 et ya Psalm 18:49 ‡ 15:10 15:10 Deut. 32:43a § 15:11 15:11 Psalm 117:1 \* 15:12 15:12 Isaiiah 11:10 † 15:21 15:21 Isaiiah 52:15

ni ibaddang daddan newetwet ni Jews ni kamengullug di Jerusalem. <sup>27</sup> Ida kaman-am-leng ni mengippahding nunya, tep daka nemnemnema, e et-eteng hu utang daddan Jews, tep hi-gadan Jews ni kamengullug hu nengituttuddun pehding dan meilla-kam di impahding Jesus Christo ni panyaggudan ni tuu. <sup>28</sup> Hedin negibbuh ni indawat ku huyyan pihuh idan Jews ni inemung idan Gentiles, ey iddalan kuladatan ni an menang-ang ni hi-gayun lawwan kud Spain. <sup>29</sup> Nakka medinnel e yan ellian kudtan, ey baddangan tuwak nan Jesus Christo ma-lat baddangan dakeyud keihhammadan ni yuka pengullug.

<sup>30</sup> Ey e-helen kun hi-gayuddan agik, e gapuh ni tayu kapengullug nan Jesus Christo e Apu tayu niya gapuh ni impeminhed tayun indawat ni Ispirituh Apu Dios ni hi-gatsu, ey ibbagak anhan ni hi-gayu e idasali yuwak ma-lat baddangan tuwak Apu Dios di ngunuk, <sup>31</sup> niya ma-lat meihwangngak di kanenememaddan eleg mengullug di Judea ni pehding dan hi-gak. Ey ma-lat yadda kamengullug nan Apu Dios di Jerusalem ey ebbuluten da eya pihuh ni illaw kun hi-gada. <sup>32</sup> Et hedin i-abulut Apu Dios, ey man-am-lengngak ni um-alid tan ni mekiam-amleng ni hi-gayu. <sup>33</sup> Ya nakka iddasal ey hi Apu Dios, e kakelpuin linggep hu kenayun ni wadan hi-gayun emin. Amen.

## 16

*Ya nanggillig ni intugun Paul idan tuud Rome.*

<sup>1</sup> Hi Phoebe e agi tayun biin kaumbabbaddang idan kamengullug di Cenchrea ey ittelad tan. <sup>2</sup> Abulut yun pan-eggi yu henin yuka pengebbulutin edum ni kamengullug nan Apu Jesus Christo, tep humman hu kayyagud ni kapehding idan tuun Apu Dios. Et hedin wada mahapul tu, ey baddangi yu, tep binenaddangan tu dakel ni tuu. Anin numan ni hi-gak et binenaddangan tuwak.

<sup>3</sup> Ey pinhed kun peamta yud Priscila nan hi Aquila e nak ida kanenemnema. Hi-gada numan hu impan-edum kun nangngunun impangunun Jesus Christo ni hi-gak. <sup>4</sup> Impeladdan da biyag da tep ya panyaggudan ku. Et-eteng nakka pansalamatin hi-gada. Anin idan Gentiles ni kamengullug et ida kamansalamat daman hi-gada. <sup>5</sup> Ehel yudda daman kamengullug ni kameemmuemmung di baley da, e nak ida kanenemnema.

Ey ehel yun Epenetus e gayyum kun nakappinshed ku, e nak dama kanenemnema. Hi-gatu hu nemangulun iAsia ni nengulug nan hi Jesus Christo. <sup>6</sup> Anin daman hi Maria e nekililligat ni nengipeamtaan tun hi-gayun meippanggep nan Jesus, et ehel yu e nak dama kanenemnema. <sup>7</sup> Ey ehel yu damad Andronikus nan hi Junias e nak ida kanenemnema. Jews ida dama, henin hi-gak niya nekielabut daddan hi-gak ni nunman. Ey anin idan apostles et daka tetbaladda. Hi-gada pay hu nemangulun nengulug nan Jesus Christo, nem hi-gak.

<sup>8</sup> Ehel yu damaddan eyan ngeddanen ku e nak ida kanenemnema: hi Ampliatu e gayyum kun neiegin nan hi Jesus Christo, <sup>9</sup> hi Urbanus e bimmenaddang ni hi-gamid ngunun Christo, hi Stachys e nakappinshed ku, <sup>10</sup> hi Apelles e impeang-ang tu numan hu tuka pengullug nan Jesus, yadda pamilyah nan Aristubulus, <sup>11</sup> hi Herodion e edum kun Jew, niyadda dama kamengullug di baley Narcissus.

<sup>12</sup> Ey ehel yu e nak dama kanenemnemadda etan mahlun mansilbin Apu Jesus, e di Tryphaena nan Tryphosa, et hi Persis e gayyum kun peteg e mahu daman mansilbin Apu tayu, <sup>13</sup> hi Rufus e mahu daman mansilbin Apu tayu, et hi inetu e tuwak numan kaibbilang ni u-ungga tu, <sup>14</sup> hi Asinkeritus, hi Pehlegon, hi Hermes, hi Patrobas, hi Hermas niyadda etan edum daddan ni kamengullug, <sup>15</sup> hi Pilologus, hi Julia, hi Nereus niya etan agi tun bii, hi Olimpasi niyadda edum daddan ni kamengullug.

<sup>16</sup> Hedin meemmung kayun mandeyyaw nan Apu Dios, ey peang-ang yu hu yuka pan-impinshedi. Emin ida kamengullug di deyan kameemmuemmung ni kamandaydayaw nan Jesus Christo, ey kanday dakeyu kanenemnema.

<sup>17</sup> Kaegiegi, dengel yu eya e-helen kun hi-gayu. Helipati yu et eleg kayu mekidagdagyum ida etan ni tuun kaumhuhulun ni kegennedwaan yu, e kamamahbah ni yuka pengullug. Daka kehingga hu kameituttuddun meippanggep nan Jesus Christo ni neituttuddun hi-gayu. <sup>18</sup> Yadda tuun hanniman hu elaw da ey beken ni hi Apu tayu e hi Jesus Christo hu daka u-unnuda, nem ya panyaggudan dan ebuh hu daka nenemnema. Kayyagud ni peteg daka penappihappit ma-lat haulen dadda etan nelakah ni mehe-ul. <sup>19</sup> Nandinggel hu yuka pengu-unnudin Jesus, et mukun nakka man-am-amleng tep hi-gayu. Pinhed kun peingha yun mengippahding ni kayyagud, et beken ni ya lawah hu ipenahding yu. <sup>20</sup> Et hi Apu Dios e kakelpuin linggep hu memaddang ni hi-gayu ma-lat angganganu ey apputen yu hi Satanas. Ya nakka iddasal ey mewedda hu binabbal Apu Jesus Christo ni hi-gayu.

<sup>21</sup> Hi Timothy e kamekingunggunnun hi-gak ey kantuy dakeyu kanemnemnema. Hanniman damad Lucius, hi Jason et hi Sosipater e edum kun Jews.

<sup>22</sup> Anin hi-gak e hi Tertius e nengipetudekan Paul eyan tudek ey nak dama kae-hela e dakeyu kenenemneman emin, tep hi-gak dama hu hakey ni kamengullug nan Apu Jesus.

<sup>23</sup> Kan Geyus ey dakeyu dama kanenemneman emin. Hi-gatu kambaley ni nakka panha-adi niya yadya kakeemmuemmungin edum tayun kamengullug.

<sup>24</sup> (Nakka iddasal e meweddan hi-gayun emin hu binabbal nan Jesus Christo e Apu tayu. Amen.)

<sup>25</sup> Daydayaw tayu hi Apu Dios, tep kabaelan tun mengihhammad ni yuka pengullug nan Jesus Christo e neipuun di intuttudduk mippanggep ni neteyyan tun panyaggudan tayu. Huyyan neituttuddu ey eleg meamtan lan nunman. <sup>26</sup> Nem ya law nunya ey impeamtan Apu Dios, et dammutu law ni han-awat tayudda hu impatudek tuddan prophets tun nunman. Et yan nunya ey hi Apu Dios e endi laputu niya endi pappeg tu hu nengipanghel ni mahapul ni meituttuddu idan tutu-ud kebebbeley di puyek hu meippanggep ni hi-gatu ma-lat mangulug ida niya ma-lat u-unnuden da.

<sup>27</sup> Hi Apu Dios ni ebuh hu makulug ni nengamtan emin ey hi-gatu hu daydayaw tayun ingganah tep ya impahding Jesus Christo. Amen.

## Ya Nemangulun Tudek Paul idan Kamengullug di Corinth

<sup>1</sup> Hi-gak e hi Paul et hi Sostenes e agi tayun kamengullug hu nengitudek ni nunya. Hi-gak ey pinutuk tuwak Apu Dios ni pan-apostle nan Jesus Christo.

<sup>2</sup> Huyya tudek min hi-gayun kamengullug di Corinth ni pinilin Apu Dios ni tuu tu. Binendisyonan dakeyu et ibilang dakeyun kayyagud gapuh ni nengulugan yun Jesus Christo, heniddan emin ni kamengullug di kebebhebley ni kamenaydayaw nan Jesus Christo e Apu tayun emin.

*Ya et-eteng ni baddang Apu Dios idan kamengullug di Corinth  
(Ephesians 1:3-14)*

<sup>3</sup> Pinhed kun meweddand hi-gayu hu binabbal niya linggep ni kamelpun Apu Dios e Ametayu et hi Jesus Christo e Apu tayu.

<sup>4</sup> Nakka mansalamat ni kenayun nan Apu Dios tep ya binabbal tun hi-gayu gapuh ni neegian yun Jesus Christo. <sup>5</sup> Tep gapuh ni neegian yun hi-gatu ey et-eteng law hu kabaelan yu et yu law kaewwasi hu elaw tu niya nelaing kayu law ni mengituttuddun meippanggep ni hi-gatu. <sup>6</sup> Ey nebaliwan law ni kayyagud hu elaw yu, tep kinulug yu hu intuttudduk ni meippanggep nan Christo. <sup>7</sup> Et humman hu, nakka medinnel e endi yu pangkullangan ni kabaelan yun nalpun Apu Dios eyan tayu kapenehgeddin ellian Jesus Christo e Apu tayu. <sup>8</sup> Hi-gatu mengihhammad ni yuka pengullug ma-lat endilli hu bahul yun hemmeken tun kedettengan alin etan ni aggew ni ellian tun menuwet ni tuu. <sup>9</sup> Hi Apu Dios hu kameiddinnel ni mengippahding ni emin nunya, tep emin hu tuka e-hela ey tuka ippahding. Ey hi-gatu hu nemutuk ni hi-gayun meki-eggin U-ungnga tu e hi Jesus Christo e Apu tayu.

*Ya kapanhahallaidan kamengullug di Corinth*

<sup>10</sup> Hi-gayun kaegiegi, dengel yu anhan eya e-helen kun tugun Apu tayu e hi Jesus Christo. Mahapul ni kayyagud hu pandadagyuman yu ma-lat eleg kayu magenadwa, nem man-uunnud kayun mengu-unnud nan Apu Dios. <sup>11</sup> Nakka pan-ittugun huyya, tep indaddatteng idan nalpud baley di Cloe e wadadda kunun hi-gayun kaegiegi hu kamantututut. <sup>12</sup> Tep wadadda kunu edum ni hi-gayun kanday hi-gak e hi Paul hu daka u-unnuda. Yadda edum ey kanday hi Apolos, yadda edum ey kanday hi Peter, ey wadadda edum ni kanday hedin hi-gada kunu ngu, man hi Jesus Christo hu daka u-unnuda. <sup>13</sup> Lawah huttan ni yuka pehpehding. Kaw dammutun gennedwaen hi Jesus Christo? Kaw hi-gak e hi Paul hu neipetak di krus tep ya panyaggudan yu? Kaw yad ngadan ku nebenyagan yu? Beken, tep hi Jesus Christo.

<sup>14</sup> Kayyagud ew et endi edum ni nak binenyagan ni hi-gayu, nem ebuh di Kerispus nan hi Geyus. <sup>15</sup> Tep gullat na-mu et nema-man wadadda edum ni mengippahhiyya e hi-gak hu nemenyag ni hi-gada. <sup>16</sup> Ay em tu-wa, binenyagan ku dama hi Stephanas et yadda pamilyah tu, nem endi law edum ni nakka nemnemneman binenyagan ku. <sup>17</sup> Tep beken hu memenyag ni impangunun Jesus ni hi-gak, nem ya an mantuttuddun meippanggep ni impahding tun panyaggudan ni tuu. Ey eleg meippuun di kinelaing kun umhapit hu nakka penuttuddu, ma-lat beken humman hu gaputun pengullugan ni tuu et tawwey kumedeke law etan kameituttuddun meippanggep ni neteyyan Jesus di krus.

*Ya neteyyan Jesus hu keang-angan ni kabaelan niya kalinaing Apu Dios*

<sup>18</sup> Yadda etan umlaw alid impiernoh e kalawwin kamekastigu, ey kanday endi silbin etan ni kameituttuddun meippanggep ni neteyyan Jesus di krus ni panyaggudan idan neliwtan. Nem hi-gatsun kamengullug ni mehelakniban, ey amta tayu e huyyan kameituttuddu hu mengippeamtan kabaelan Apu Dios ni menellaknib ni tuu. <sup>19</sup> Makulug huyya, tep kan dedan Apu Dios di neitudek ni ehel tu ey "Pambalin kun endi silbitu hu nemnem idan kameibbillang ni nenemneman ey pambalin kun endi silbitu hu kalinaing idan nangkelaing." \* <sup>20</sup> Attu kaya mewan hu kalinaing idan kandan nangkenemneman, yadda eta-gey adal da, niyadda nangkelaing ni umhapit meippanggep ni elaw ni biyag ni nunya ey? Eleg ida meibbillang, tep impeang-ang Apu Dios e endi silbin kalinaing da. <sup>21</sup> Tep gapuh ni kalinaing Apu Dios ey ninemnem tun eleg mabalin ni amtaen ni tuu hi-gatu meippuun di kalinaing da. Nem ya pinhed tu ey hellakniban tun emin ida kamengullug meippuun di mika ituttuddu e humman hu kan idan edum ni endi silbitu.

\* 1:19 1:19 Isaiiah 29:14

<sup>22</sup> Em, tep hedin yadda Jews ey mahapul ni wada ang-angen dan miracles ni han ida nengulug. Ey hedin yadda dama Greek ey ya daka kullugan ebuh ey ya kaebbulutan kalinaing da. <sup>23</sup> Et mukun hedin mika ituttuddu hu meippanggep ni neteyyan Jesus di krus, ey anggebe-hel idan Jews ey yadda dama Greek ey kanday endi silbitu. <sup>24</sup> Nem hi-gatsun pinutuk Apu Dios ni pantu-u tu, Jew winu Gentile, ey tayu kakulluga e ya neteyyan Jesus di krus hu keang-angan tun et-eteng hu kabaelan niya kalinaing Apu Dios ni menellaknib ni hi-gatsu. <sup>25</sup> Tep huyyan kan idan tuun endi silbi tun ninemnem Apu Dios ni kehellakniban tayu, ey endi tu kei-inggehan, tep kedukdul ni peteg nem ya kalinaing ni tuu. Ey ya mewan hu kandan kapuy hi Apu Dios tep netey hi Jesus di krus, ey humman anhan law hu keang-angan ni et-eteng ni kabaelan tun endi tu kei-inggehan.

<sup>26</sup> Nemnem yun kaegiegi, e yan nemilian dakeyun Apu Dios ni tuu tu ey kunan ni hi-gayu hu kedangyan, winu nelaing, winu nan-adal. <sup>27</sup> Nem hi Apu Dios, ey pinili tudda hu tuun endi bilang da ma-lat mebabba-ingan ida etan tuun kanday nelaing ida. Ey pinutuk tudda endi kabaelan da, ma-lat mebabba-ingan ida hu eta-gey saad da. <sup>28</sup> Pinutuk tudda hu endi bilang tun kapihhulan edum da ma-lat peamta tu e endi bilang idan kamengiddinnel ni kabaelan da eyad puyek. <sup>29</sup> Huyyadda impahding Apu Dios ma-lat endin hekey hu mampahhiyyad hinangga tu. <sup>30</sup> Yan nengulugan tayu hu nengidagyuman Apu Dios ni hi-gatsun Jesus Christo. Intu-dak tu eyad puyek et matey di krus ma-lat mawedan hi-gatsu hu kalinaing ni pengamtaan tayun hi-gatu. Et ibilang daitsun kayyaggud ni neneklaan Jesus Christo ni nehellakniban tayud liwat et ieng-eng daitsun hi-gatu. <sup>31</sup> Et mukun wada neitudek ni ehel Apu Dios e kantuy "Ya tuun pinhed tun mampahhiyya ey ya impahding ni Ap-apu tayu hu ipahhiyya tu e beken ni ya annel tu." †

## 2

*Ya tayu kapengullug ey neipuun di kabaelan Apu Dios, beken di kalinaing ni tuu*

<sup>1</sup> Yan laputun illian kud kad-an yun kaegiegin nak nengituttudduan ni elaw Apu Dios ey eggak ihepit di henin kapanhahhapit ni nelaing ni umhapit. <sup>2</sup> Tep ya ninemnem kun peamtan hi-gayu ey ebuh hu meippanggep nan Jesus Christo et ya neteyyan tud krus. <sup>3</sup> Yan inlian kun mantuttun hi-gayu, ey nakka umkakaguh tep endi dinel kud annel ku et nakka umgeneygey, tep inamtak e kulang hu kabaelan kun mantuttuddu. <sup>4</sup> Nelakah ni neawatan yu hu intuttudduk ni hi-gayu, et mangulug kayu gapuh ni et-eteng ni kabaelan ni Ispirituh Apu Dios, anin ni beken ni henin kapan-e-ehhel ni mahepit hu nenuttudduk ni hi-gayu. <sup>5</sup> Et humman hu, ya yuka pengullug ey eleg maipuun di kalinaing winu adal ni tuu, nem yad et-eteng ni kabaelan Apu Dios.

*Ya planuh niya kalinaing Apu Dios*

<sup>6-7</sup> Gaway tep hedin yadda neihammad hu daka pengullug hu nakka tutttuddui, man henin kapantuttuddun nelaing hu nakka penuttudun hi-gada. Ey neipuun di kalinaing Apu Dios, beken ni kalinaing ni tuu eyad puyek niya beken ni neipuun di kelebengan idan kaman-ap-apun kamepappeg hu daka pan-ap-apui. Ya nakka ituttuddu ey meippanggep ni kalinaing tun namplanuh ni keiddeyyawan tayulli. Implanuh tu dedan huyya et han maweda emin eya wadan nunya, nem yan nunyan ebuh hu nengipeamtaan tu. <sup>8</sup> Nem endiddan aap-apun nunya hu nengamtan nunyan planuh Apu Dios, tep gullat ni inamta da et eleg da et paipetak di krus etan kamedeeyaw ni Ap-apu. <sup>9</sup> Humman hu keibbellinan ni neitudek ni ehel Apu Dios e kantuy "Endi hakey ni an nenang-ang, winu an nangngel, winu an nannemnem ni implanuh Apu Dios ni panyaggudan idan neminid ni hi-gatu." \* <sup>10</sup> Nem hi-gatsun kamengullug hu nengipeamtaan ni Ispirituh Apu Dios ni nunman ni planuh tu, tep hi-gatu nengamtan emin, anin hipan wadad nemnem Apu Dios. <sup>11</sup> Ya tuu ey hi-gatun ebuh hu nengamtan wadad nemnem tu, beken ni neala ey inamtan edum ni tuu humman ni wadad nemnem tu. Et nema-ma ngu hu nemnem Apu Dios e ya Ispirituh tun ebuh hu nengamta. <sup>12</sup> Ey mukun newadan hi-gatsun kamengullug hu Ispirituh Apu Dios, et humman hu, eleg tayu u-unnuda kalinaing niya kapannemnem idan eleg mengullug, ey ma-lat awatan tayun emin hu baddang tun hi-gatsu tep ya hemek tu. <sup>13</sup> Et humman hu, yadda eya mika ituttuddu ey nalpun Ispirituh Apu Dios, beken ni nalpud kalinaing ni tuu. Ey yadda tutu-un wada Ispirituh Apu Dios ni hi-gada hu mika pengittuttudduin elaw Apu Dios.

<sup>14</sup> Nem ya etan tuun eleg mangulug nan Jesus ey endi Ispirituh Apu Dios ni hi-gatu, et eleg tu ebbuluta hu kameituttuddun kamelpun Ispirituh Apu Dios. Em, tep eleg tu

ibbilang ida humman ey eleg tu ewwasidda huyyan kameituttuddu tep endi Ispirituh Apu Dios ni hi-gatun mengippeewwat. <sup>15</sup> Ya etan tuun wada hu Ispirituh Apu Dios ni hi-gatu ey inamta tu hu kayyaggud niya beken ni kayyaggud, nem yadda etan tuun endi hu Ispirituh Apu Dios ni hi-gada tep eleg ida mengullug ey eleg da ewwasi hu elaw niya kapannemnem etan ni tuun wada hu Ispirituh Apu Dios ni hi-gatu. <sup>16</sup> Wada neitudek ni inhel Apu Dios e kantuy “Endi nengamtan nemnem Apu Dios, et humman hu, eleg mabalin ni wada an menuttuddun hi-gatu.” † Nem hi-gatsun kamengullug ey henin kapannemnem nan Jesus hu tayu kapannemnem.

### 3

*Ya kakulang ni kapengullug idan tuud Corinth*

<sup>1</sup> Kaegiegi, yan eman ni nantuttudduan kun hi-gayu ey eggak ittuttuddu hu neligat, nem inlapuk ni intuttuddu nelakah ma-lat awatan yu. Tep heni kayu geggellang, tep eleg ni maihammad hu yuka pengullug nan Jesus Christo. <sup>2</sup> Et mukun ya ittuttudduk ey ya nelakah yun ewwatan, e kamei-ellig di gatas ni kainnum gelang e nelakah ni meekmun. Tep inamtak e gullat ni ya neligat ya ittuttudduk e kamei-ellig di mekelhin kennen ni kakennan nehiken ey eleg yu han-awat. Ya kakulugan tu ey anin yan nunya, et eleg yu ni han-awat hu neligat ni kameituttuddu, tep eleg ni maihammad hu yuka pengullug. <sup>3</sup> Ka-immaturun di yuka pehpending e nanengtun ya pinhed ni annel yu hu yuka u-unnuda, e henin elaw idan eleg mangulug nan Jesus hu elaw yu, e kayu kamanin-aameh niya kayu kamantutut. <sup>4</sup> Wada hakkeyey kamampahhiyyan kantuy hi Apolos winu hi-gak hu tuka u-unnuda et huyyan yuka pehding hu keang-angan tu e heni kayu damengu eleg mangulug.

*Hi Apu Dios hu daydayawen, beken ida bega-en tu*

<sup>5</sup> Kaw hipa dedan hu deyyawen? Kaw hi-gak? Kaw hi Apolos? Beken, tep bega-en dakemin ebuh nan Apu Dios ni nantuttuddun hi-gayu ma-lat mangulug kayun Jesus. Wada hakkey ni hi-gami ey mika ippahding hu ngunun indawat Apu Dios ni hi-gami. <sup>6</sup> Hi-gak hu kamei-ellig di nantanem, tep hi-gak hu nemangulun nantuttuddun hi-gayun meippanggep nan Apu Dios. Hi Apolos hu kamei-ellig ni nenaddannum etan ni intanem ku, tep hi-gatu hu nengituluy ni nantuttuddun hi-gayun meippanggep nan Apu Dios. Nem hi Apu Dios hu kamei-ellig ni nengipatmel, tep hi-gatu hu nengidwat ni yuka pengullug. <sup>7</sup> Beken ni ya etan nengitnem winu ya etan nenaddannum hu importanteh, nem hi Apu Dios, tep hi-gatu hu kamengipatmel. <sup>8</sup> Endi an nambaklangan etan ni nengitnem et ya etan nenaddannum. Hi Apu Dios hu ngenamung ni mengidwat ni gunden da meippuun di ingngunu da. <sup>9</sup> Mika pambaddangin Apolos hu impangunun Apu Dios ni hi-gami. Ey kayu kamei-ellig ni payaw Apu Dios ni mika panggunui.

Kayu kamei-ellig ni baley Apu Dios. <sup>10-11</sup> Gapuh ni kabalaan kun indawat Apu Dios ey heni inhammad kun ingkapyu hu sinuunan ni baley tun henin impahding ni nelaing ni mengapyan baley. Ey yan nunya ey wadadda nengilepun kamampemehwat diman, nem mahapul ni hellipat-an da hu ikkapyu da niya pehding dan memehwat. Huyyaddan kamampemehwat hu neieliang idan kamantuttuddun meippanggep nan Jesus Christo e mahapul ni endi edum ni ittuttuddu da e hi-gatun ebuh, tep hi-gatu kamei-ellig di nehammad ni sinuunan ni baley. <sup>12-13</sup> Hi-gatsun kamengullug hu neieliang idan kamampemehwat ni baley e wadadda kamengikkapyad sinuunan tun balituk, ya silber, niya nenginan batu. Nem wadadda edum ni kamengikkapyan keyew niya gulun. Nem hakey alin aggew ni ellian Jesus Christo ni panhuwetan tun tuu, ey meamtalli hedin hipa inusal dan nengapya. Henilli meppuyan hu binehwat dan baley et meang-ang hedin hipa eleg megihheb hu ingkapyu tu. <sup>\*</sup> <sup>14</sup> Yalli etan eleg megihheb hu ingkapyu tu ey wadalli gun-uden tu. <sup>15</sup> Yalli etan megihheb hu ingkapyu tu ey endi tu ellan ni gun-uden tu, nem mehella kniban alin ebuh e heni etan ni tuun neukat di kamangelgab ni baley, e endi tu in-ukat ni hipan wadad bawang ni baley.

<sup>16</sup> Kaw eleg yu amta e hi-gatsun kamengullug hu tempol Apu Dios tep wadan hi-gatsu hu Ispirituh tu? Inamtak et inamta yu huyya. <sup>17</sup> Et humman hu, hedin wada memabhah ni tempol Apu Dios, ey bahbahen ali daman Apu Dios humman ni tuu. Tep kakkayyaggud ni peteg hu tuka penang-ang ni tempol tun panha-adan tu ey hi-gatsun kamengullug hu kamengeddanin tempol tu.

<sup>18</sup> Entan kaheul yu, tep hedin iddinel yud kalinaing ni tuu, man endi silbitu. Ya tuun tuka iddinel di kalinaing tu e humman hu kaibbilang ni tuun ustuh ni kalinaing ey

† 2:16 2:16 Isaiah 40:13 \* 3:12-13 3:12-13 Huyya keiddingpitan ni panhuwetan alin Jesus Christo idan kamengullug hedin kayyaggud winu lawah hu kinapkapyu da.

heballi iwwalleng tu humman ni tuka pannemnem et hi Apu Dios ni ebuh hu iddinel tu, anin ni kan idan tutu-uy endi inamta tu. <sup>19</sup> Tep ya kalinaing ni tuu ey endin hekey silbi tun Apu Dios. Huyya hu kantu etan di neitudek ni ehel tu.

“Ya tuun tuka ididdinel ni ebuh di kalinaing tu ey pambalin Apu Dios hu kalinaing tun kehe-ulan tu kumedek.” †

<sup>20</sup> Wada mewan hakey ni impatudek tun kantuy “Inamtan Apu Dios e endi silbin kapannemnem idan nangkelaing ni tuu.” ‡ <sup>21</sup> Et humman hu, entan tu ipahhiyya hu kalinaing ni hipan kamantuttuddun hi-gayu. Hi Apu Dios ni ebuh hu pandineli yu, tep hi-gatu hu kakelpuin emin ni mahapul yu. <sup>22</sup> Anin ni hi-gami, hi-gak, hi Apolos ni hi Peter et iyyadya kami tep intu-dak dakemin Apu Dios ni an memaddang ni hi-gayu. Ya eya puyek ey lintun Apu Dios ma-lat wada panha-adan tayu. Ey indawat tu dama biyag yu. Ya pambalanan ni emin, anin ya katey niya emin ni kamekapkapyan nunya et ya hipan mekapkapyallin hakey ni aggew ey panyaggudan yun emin ida humman, <sup>23</sup> tep tuu dakeyun Apu Jesus Christo e U-ungngan Apu Dios.

## 4

### *Ya kapengibbillangin Apu Dios ni elaw tayun kamengullug*

<sup>1</sup> Et humman hu, ya pinhed ku ey ibilang dakemin bega-en Jesus Christo ni neidinel ni mengituttuddu etan ni eleg peamtan Apu Dios ni nunman ingganah nunya. <sup>2</sup> Ya bega-en, ey mahapul ni u-unnuden tuka e-helan kan bega-en ni hi-gatun pehdng tu. <sup>3</sup> Hi Apu Dios hu kan bega-en ni hi-gak et mukun beken ni importanteh ni hi-gak hu yuka pannemnem winu kapannemnem ni tuu meippanggep ni nakka pehdng ni ngunuk. Anin hi-gak et eleg mabalin ni nak e-helen e nakka meiddinnel winu eleg. <sup>4</sup> Anin ni ya nakka pannemnem ey endi neihallan impahding ku, et eleg ku amta hedhin humman hu kapannemnem Apu Dios ni hi-gak. Hi-gatun ebuh hu nengamta hedhin neiptek winu neihla hu nakka pehdng. <sup>5</sup> Et humman hu, beken ni hi-gatsu hu an menghel hedhin kayyaggud hu hakey ni tuu winu lawah, nem ngenamung ali hi Apu tayun pambangngadan tu. Peamta tullin emin hu impahding ni hanhakey ni hi-gatsu, anin idan etan ni eleg meamtan impahding tayu et yadda wadad nemnem tayu. Yan nunman ali ey tettebalen Apu Dios ida etan nengipahding ni kayyaggud.

### *Ya kaippahhiyyaddan iCorinth ni neihlan elaw da*

<sup>6</sup> Hi-gayun kaegiegi, inhel ku huyyan meippanggep ni hi-gamin Apolos ma-lat amtaan yu hu keibbellinan etan ni tugun ni impaitudek Apu Dios ni kantuy “Entan tu ihla pengu-unnudan yun tugun ku.” Et humman hu, entan tu tettebal hu hakey ey pinihul yu hu hakey. <sup>7</sup> Entan tu nemnem e kedukdul kayu nem ya edum, tep emin tuu ey wada indawat Apu Dios ni hi-gatu. Et humman hu, entan tu ipahhiyya hu wadan hi-gayu e heni hi-gayu nalpuan idan nunman.

<sup>8</sup> Tam ay ni-ngangu! Ya yuka pannemnem ey endi yuka pangkullangid hinanggan Apu Dios, tep kan yuy nekahammad hu yuka pengullug ey dinwat yun emin hu panyaggudan ni kamelpun hi-gatu. Ey kanyuy ap-apu kayu law et kanyuy hedhin hi-gami, man beken kami nin ap-apu. Kayyaggud et hedhin makulug ni ap-apu kayu ma-lat mekiap-apu kamin hi-gayu. <sup>9</sup> Ya nakka pannemnem ey in-abulut Apu Dios e hi-gamin apostles ni pinutuk tu hu kebabahan di emin ni tuu e mabalin ni pepettey di hinanggaddan tuu niyadda anghel.

<sup>10</sup> Kan idan tuu ey kulang nemnem mi tep ya mika pengituttudduin meippanggep nan Jesus Christo. Nem hedhin ni-ngangun hi-gayu, kanyuy nelaing kayu meippanggep nan Christo. Ey anin ew ngun kanday hi-gami hu kulang tuka pengullug, et hi-gayu hu nehammad hu tuka pengullug. Dakemi kapippihuladdan edum ni tuu, nem dakeyu ni-ngangu katettebala. <sup>11</sup> Anin yan nunya et kami kameu-upa niya kami kamee-ewew. Mika panlelehmani hu kapehpehdng idan tuun hi-gami. Nangkebi-bi-ki law balbalwassi mi niya endi ustuh ni mika panha-adi. <sup>12</sup> Ey kami kamea-atu tep nemahhig ni mika illelput ni manggunnu ma-lat wada pengellaan min pambiyagan mi. Anin ni lawah kae-e-heladdan tuun hi-gami et ya kayyaggud hu mika penummang ni hi-gada. Ey anin panlelhanan mi kapehdng idan tuun hi-gami et mika ennuusi. <sup>13</sup> Anin ni itek daka e-e-hela meippanggep ni hi-gami, et ya kayyaggud hu mika ihhumang. Ingganah nunya ey ya kapannemnem idan tuun hi-gami ey endi bilang mi, e heni kami lugit ni meibbeng.

<sup>14</sup> Beken ni ya dakeyu peme-ingan hu gaputun nak nengitudkan nunya, nem penuggun kun hi-gayun nakka ibbilang daman u-ungngak ni nakappinhed ku. <sup>15</sup> Tep anin na-mun



wadadda hampulun libun kamengituddun hi-gayun nunyan meippanggep ni pengu-unnudan yun Jesus Christo, et nanengtun hi-gak hu heni ameyud yuka pengullug, tep hi-gak hu nemangulun nengituddun hi-gayun meippanggep ni impahding Jesus ni panyaggudan yu et han kayu mangulug ni hi-gatu. <sup>16</sup> Et humman hu, nakka ibbagan hi-gayu e u-unnud yudda hu nakka pehpehding. <sup>\*</sup> <sup>17</sup> Ittu-dak kudtan hi Timothy. Hi-gatu ey nakka ibbilang ni u-ungngak ni nakappinhed ku. Nehammad hu tuka pengu-unud nan Apu tayu e hi Jesus Christo. Ya gaputun pengittu-dakan kun hi-gatu ey ma-lat penemnem tun hi-gayu hu elaw ni pengu-unnudan nan Jesus Christo e humman nakka u-unnuda niya nakka ittenuttudduddad kesimsimbaan di kebebbbley.

<sup>18</sup> Ida law kamampahhiya hu edum ni hi-gayu, tep kan da na-muy eggak law umalidan ni an menang-ang ni hi-gayu. <sup>19</sup> Nem hedin i-abulut Apu Dios, ey wadan anggegannu ey um-ali-ak et nak ida pangngu ang-angen huttan ni tuun kamampahhiya, hedin wada numan hu kabaelan dan nalpun Apu Dios winu ehel dan ebuh. <sup>20</sup> Tep ya tuun neila-kam di nan-ap-apuan Apu Dios ey meang-ang hu kabaelan Apu Dios di tuka pehding, et beken ni ehel ni ebuh. <sup>21</sup> Hipa pinhed yu, um-ali-ak et ibunget dakeyu? Winu um-ali-ak et peang-ang ku hu impeminhed ku niya binabbal kun hi-gayu ma-lat ya kakkayyaggud ellian kudtan?

## 5

*Ya nemahhig ni kalwah etan ni hakey ni tuu*

<sup>1</sup> Wada nengidaddatteng ni hi-gak e wada hakey ni hi-gayun lawah ni peteg tuka pehpehding, tep piniliw tu hu binintan ametu. Nela-med hu bahul tu, tep anin idan eleg mengullug et eleg da pehding humman. <sup>2</sup> Kaw huttan anhan hu yuka pampahhiyyai? Hamban kayu kabaing ey eleg. Gullat et kuma, eleg yu law i-abulut ni mei-dum humman ni tuud yuka keemmungi.

<sup>3-5</sup> Anin endi-ak di kad-an yu et heni wada-ak, tep dakeyu kanenemnema. Ey hedin ya etan nengipahding nuntan ey amtak law kastigu tu. Ya pehding yu, ey kaemung kayu et gapuh ni kabaelan Apu tayu e hi Jesus Christo ni wadan hi-gayu ey ika-leg yu law hu pekiemmungan nunman ni tuun hi-gayu, et ngenamung hi Satanas ni mengippeligligat ni hi-gatu, ma-lat masileg et isked tu humman ni tuka pehpehding ni lawah et mehellakniban alin ellian Apu Jesus ni penuwetan tun tuu.

<sup>6</sup> Lawah huttan ni yuka pampahhiyyai e yuka ebbuluta tuun hanneya elaw tu. Kaw eleg yu amta keibbellinan etan ni ehel ni kantuy, anin ekket ni yeast et dammutun pelbag tu hu handilin alinah ni mekapyan sinapay? <sup>7</sup> Et humman hu, mahapul ni ekal yudda hu lawah ni elaw yun kamei-ellig ni yeast ni kaumhulun ni yuka panliwwasi, ma-lat ya kayyaggud law hu pehding yu, tep baluh law neitu-wan yu e kayu kamei-ellig etan ni baluh ni sinapay ni endi neikamdug ni yeast. Nemnem yu e humman idan lawah ni elaw yu hu gaputun neteyyan Jesus di Krus. Tep hi-gatu hu kamei-ellig ni Kalneroh ni neiappit nan Apu Dios ni Piyestah ni Passover. <sup>8</sup> Et humman hu, hi-gatsun kamengullug, ey mahapul ni heni itsu etan ni tuun imbeng tun emin hu yeast ni wadad baley tun pandaddanan tun mekippiyesta ni Passover. <sup>\*</sup> Ya keibbellinan tu huyya ey mahapul ni iwwalleng tayu hu lawah ni neitu-wan tayun nunman et mehullulan ni baluh et ya kayyaggud law pehding tayu niya kayyaggud nemnemnemen tayu.

<sup>9</sup> Inhel ku lan hi-gayud tudek kun nunman e entan kei-dum yud tuun makibii niya makilaki. <sup>10</sup> Nem beken ni kangkuy entan pakikukkuyyug yuddan eleg mengullug ni makibii niya makilaki, yadda neagum, yadda matekew, et yadda kamenaydayaw ni beken ni makulug ni dios, tep pakkadek ni um-a-allaw kayud puyek et han yu ipahding huyya. <sup>11</sup> Nem ya pinhed kun e-helen di tudek ku la ey, hedin kan ni tuu ey kamengullug, nem makibii winu makilaki, neagum, tuka daydayawa beken ni makulug ni dios, manghay, kamambuttebutteng, ey matekew, man entan kaikenukkuyyug ni hi-gatu, winu pakikan ni hi-gatu.

<sup>12-13</sup> Beken ni hi-gatsun kamengullug hu menghel ni hipan kastiguddan eleg mengullug, tep ngenamung hi Apu Dios. Nem hi-gatsun kamengullug ey mahapul ni e-helan tayudda edum tayun kamengullug ni lawah tuka pehpehding. Et humman hu, u-unnud yu hu tugun Apu Dios ni kantuy "Pea-allaw yu etan tuun lawah ni nei-dum ni hi-gayu."  
†

\* **4:16** 4:16 Ang-ang yu hu 1 Corinthians 11:1 et ya Philippians 3:17. \* **5:8** 5:8 Exodus 13:7 et ya Deut. 16:3

† **5:12-13** 5:12-13 Deut. 13:5, ya 17:7 niya verse 12. Ang-ang yu dama Deut. 21:21 et ya 22:21, niya 1 Corinthians 5:2

## 6

*Ya pehding idan kamengullug ni mengippennuh ni daka panhahallai*

<sup>1</sup> Hi-gayuddan kamengullug, kele endi baing yun an mengiddiklamuh ni edum yud hinanggan huwet ni eleg mengullug? Hamban ya edum yun kamengullug hu eyyagan yun mengippennuh, ey beken. <sup>2</sup> Tep kaw eleg yu amta e baddangan tayulli hi Jesus Christo ni ellian tun menuwet idan eleg mengullug? Et hedin hanniman e umbaddang kayullin manhuwet, ey kaw endi kabaelan yun mengippennuh ni neikamkampun yuka panhahallaih? <sup>3</sup> Ey kaw eleg yu amta e huwetan tayuddalli hu anghel? Et humman hu, nema-ma ngu hu edum tayun tuu eyad puyek. <sup>4</sup> Ey kele yudda kaeyyagi tuun eleg mengullug ni manhuwet ni hi-gayu hedin wada nanhahallaan yu? <sup>5</sup> Endi baing yu. Kaw endi anhan hakey ni hi-gayun kamengullug ni kabaelan tun mengippennuh ni yuka panhahallaih? <sup>6</sup> Hamban hi-gayu ngu ni impanuh yu ey endi, tep yuka iddiklamuh hu edum yud eleg mengullug, et hi-gada hu kamanhuwet ni hi-gayu.

<sup>7</sup> Humman neihaan yun peteg, tep kayu kaman-indidiklamuh. I-imman hu ihhulug yu et anin ew ni hi-gayu meluggih winu wada tellaken yun kukkuwah yu nem ya kayu man-indidiklamuh. <sup>8</sup> Nem endi kumedek, tep hi-gayu ngu ni impahding yu hu lawah di edum yun kamengullug, et humman hu, kayu kamanhindidiklamuh ma-lat piliwen yu hu hipan wadan edum yuddan kamengullug.

<sup>9</sup> Kaw eleg yu amta e yadda lawah ni tuu ey eleg idalli meilla-kam di nan-ap-apuan Apu Dios? Entan kaheul yu, tep yadda etan makibii, yadda makilaki, yadda kamenaydayaw ni beken ni makulug ni dios, yadda daka i-abeabek ahwada, yadda kamengi-ullig ni keingngeh dan laki, winu keingngeh dan bii, <sup>10</sup> yadda matekew, yadda neagum, yadda kamambuttebutteng, yadda kamenghel ni itek meippanggep ni edum da, et yadda maheul ey eleg idalli meilla-kam di nan-ap-apuan Apu Dios. <sup>11</sup> Hanniman kayun edum ni nunman, nem yan nunya ey nepesinsahan law hu liwat yu, ey pinili dakeyuan Apu Dios ni pantu-u tu. Imbilang dakeyuan hi-gatun kayyaggud tep ya impahding nan Apu tayun hi Jesus Christo, niya gapuh ni et-eteng ni kabaelan ni Ispirituh Apu Dios ni wadan hi-gatsu.

*Ya siwsiw di bii ey bahbaha tu ingkatuun tuu*

<sup>12</sup> Wadadda edum ni tuun kanda "Hi-gak ey liblih hak ni mengippahding ni linggeman." Ma-nu tep em, nem beken ni emin hu hipan kapehding ey panyaggudan. Et humman hu, hi-gak ngu ey eleg mabalin ni nak pehding ida etan linggeman ni beken ni panyaggudan di biyag, tep hedin immingha kumedek ey neligat ni e-kalen. <sup>13</sup> Nem wadan penghel mewan idan edum ey "Newada eya annel ma-lat ipahding tu hipan pinhed tu. Henin egeh e newada ma-lat keiha-adan ni kennen, niya newada kennen tep mahapul ni egeh." Makulug huyya, nem pappegen alin Apu Dios ida huyuan edum ni aggew. Ya annel tayu ey beken ni an lintun Apu Dios ma-lat ipahpahding tayudda etan lawah ni kebngangan, henin pengi-ulligan ni beken ni ahwa. Nem newada ma-lat mandaydayaw itsun Apu Jesus e kamengippaptek ni hi-gatsu. <sup>14</sup> Hi Apu Dios ey sinegu tu hi Apu Jesus tep ya et-eteng ni kabaelan tu, et humman hu, tegguen daitsulli dama.

<sup>15-16</sup> Ya annel tayun kamengullug ey nambalin ni parteh ni annel Jesus Christo, et humman hu, lawah ni peteg hu meki-ayyam ni tuun daka pebeyad hu annel da. Tep hedin hanniman hu pehpehding yu, ey impambalin yu hu annel Jesus ni nabngang. Kaw eleg yu amta e hedin nan-ulig hu lakin bii, man heni da law hakey ni annel? Makulug huyya, tep wada impatudek Apu Dios ni kantuy "Hedin ya dewwa et nan-addum, man heni hakey law hu annel da." \* <sup>17</sup> Ya kayyaggud ni nemnemen tayu ey ya pengu-unnudan tayun Apu Jesus Christo, tep ya tuun kamengullug ni hi-gatu ey ya pinhed tu dama.

<sup>18</sup> Entan tu nemnemnem hu mengi-ullig ni beken yu ahwa, tep huyuan panliwwatan ey tuka illagat annel. Tep ebuh huyuan liwat ni kaumbahbah ni annel. <sup>19</sup> Kaw eleg yu amta e ya annel tayu hu tempol ni Ispirituh Apu Dios ni indawat tun hi-gatsu? Ya annel tayu ey beken itsun kan-annel, nem hi Apu Dios e kan tuun hi-gatsu. <sup>20</sup> Tep heni dakeyuan gintang Apu Dios, tep ingkatay Jesus hu pemangngadan tun hi-gatsu ma-lat helakniban daitsu. Et humman hu, iusal tayu hu annel tayud keiddeyyawan Apu Dios.

## 7

*Ya elaw ni han-ahwa*

<sup>1</sup> Ya law e-helen kun hi-gayu ey ya penummang kun imbageyud tudek yun meippanggep ni pengahwaan. Hedin ngun hi-gak, ey kangkuy kayyaggud hu eleg

\* 6:15-16 6:15-16 Genesis 2:24

mengahwa. <sup>2</sup> Nem gapu tep dakek hu tuun nabngang e daka i-ulig hu beken da ahwa, ey heballi mengahwa hu tuu ma-lat wada hakkeyey wada ahwa tu. <sup>3</sup> Ya elaw ni han-ahwa, ey mahapul ni wada hakkeyey pehding tu hu pan-amlengan dan dewwa. <sup>4</sup> Tep ya nengahwan bii ey beken ni tu hinakkeyan hu annel tu. Ey hanniman daman laki, tep ya han-ahwa ey kameibbillang ni annel dan dewwa hu annel da. <sup>5</sup> Et humman hu, entan panhin-e-leg ni pan-ulligan yu. Nem dammutun anin man-appil kayun meuggip hedin inhumngan yu, ma-lat wada inna-nu yun mandasal. Nem beken ni kahilehileng, tep entannit eleg kayu pakeisipel ey wada penemnem Satanas ni lawah ni pene-ul tun hi-gayu.

<sup>6</sup> Nem eggak pepillit ni u-unnuden yu, ngenamung kayu, tep tugun ku ngun ebuh huyya. <sup>7</sup> Ya kakulugan tu, ey pinhed ku et ni ermin tuu ey eleg mengahwa henin hi-gak. Nem inamtak e eleg mabalin, tep nambabaklang hu gahat ni indawat Apu Dios ni hanhakkey ni hi-gatsu.

<sup>8</sup> Ya pinhed kun ittugun idan eleg mengahwa et yadda nangkebalun bibi-i ey kedukdul hu eleg ida mengahwa, henin hi-gak. <sup>9</sup> Nem hedin eleg da han-isipel ni eleg mengahwa, heballi pengahwadda, nem ya hu da panlelehanan hu daka pannemnem ni pengahwaan da.

<sup>10</sup> Ya e-helen ku damaddan nampengahwa ey ya tugun Apu tayu e kantuy: Ya bii ey eleg mabalin ni tu hi-yanen hu ahwa tu. <sup>11</sup> Nem hedin wada biin hini-yan tu ahwa tu ey eleg mabalin ni an mambintan, nem dammutun mambangngad ni ahwa tu. Hanniman daman laki e lawah hedin hi-yanen tu ahwa tu.

*Ya ittugun Paul idan kamengullug ni eleg ni mangulug hu ahwa da*

<sup>12-14</sup> Et ya hakey ni ittugun kun eleg panna-ud etan ni Ap-apu tayun impeamtan hi-gak ey yahhuy: Hedind wadan hi-gayun kamengullug, laki winu biin neihelaut ni nengahwan eleg mengullug ey pinhed nunman ni ahwa yun mannananeng hu nan-ahwaan yu, man entan tu hi-yan. Tep hedind kamengullug hu hakey ni hi-gayun hambaley, man ebbuluten Apu Dios etan eleg mengullug ni ahwa yu, tep gullat ni eleg tu ebbuluta, eleg tu et dama abuluten hu u-ungnga yu.

<sup>15</sup> Nem hedind pinhed etan ni ahwa yun eleg mengullug ni mekihhi-yan ni hi-gayu, eleg kayu mambahhul hedind ebbuluten yun manhi-yan kayu. Tep ya pinhed Apu Dios ey melinggep kayun u-ungnga tu. <sup>16</sup> Tep endi metlaing maptek hedind dammutun ewwisen yun mengullug hu ahwa yu ma-lat wada inna-nu tun mehella kniban.

*Ipapatek tayu hu hipan ngunu tayun indinel Apu Dios ni hi-gatsu*

<sup>17</sup> Mahapul ni wada hakkey ni hi-gatsu ey ebbuluten tayu hu gahat ni indawat Apu Dios ni pambiyagan tayun nemilian tun hi-gatsun pantu-u tu. Huyya hu nakka ittuttuddandan kamengullug di ermin ni kesimsimbaan di kebebbebley. <sup>18</sup> Hi-gayuddan lalakkin neiluh ni nekugit et han mangulug, ey entan tu ibeing hu nekugitan yu. Ey hi-gayun eleg makugit ni kamengullug, eleg mahapul ni kayu mampekugit. <sup>19</sup> Tep beken ni importanteh hedind nekugit winu eleg makugit hu hakey ni laki. Ya importanteh ey ya pengu-unnudan tayun pinhed Apu Dios.

<sup>20</sup> Et humman hu, wada hakkey ni hi-gatsu ey pannananeng tayu hu hipan saad tayun eman ni nemilian daitun Apu Dios ni mengullug ni hi-gatu. <sup>21</sup> Hedind himbut kayun nunman ni nemilian dakeyun Apu Dios, ey beken humman ni pandennagan yu. Nem hedind dammutun melibilih kayud kinahimbut yu, ey ipahding yu kabaelan yu, ma-lat eleg kayu manhimbut ni ingganah. <sup>22</sup> Tep anin ni himbut kayu eman ni nemilian dakeyun Apu Jesus Christo ni mengullug ni hi-gatu, et makulug ni baddangan dakeyun hi-gatu ma-lat beken kayu law ni himbut ni liwat. Ey ya dama etan beken himbut ni ngulug ey hi Jesus Christo law hu kanhimbut ni hi-gatu. <sup>23</sup> Tep ya neteyyan Jesus hu nenekla tun liwat tayu, et mukun hi-gatu law hu u-unnuden tayu, beken ni ya tuu. <sup>24</sup> Hi-gatsun kaegiegin kamengullug, anin hipa humman ni elaw ni biyag tayun nengulugan tayu, et pannananeng itsun mengu-unnud nan Apu Dios, tep hi-gatu kamengipapatek ni hi-gatsu.

*Ya tugun Paul idan kat-agun bibi-in eleg ni mengahwa et yadda nangkebalun bii*

<sup>25</sup> Ya pinhed ku mewan ni ittugun ni hi-gayu, ey ya nakka nemnemneman ittugun idan eleg mampengahwa. Beken ni hi Apu tayun hi Jesus hu nengitugun ni nunya, nem nakka medinnel e neiptek huyyan ittugun kun hi-gayu, tep himmek tuwak et idwat tu kabaelan kun umtugun.

<sup>26</sup> Yan nunya ey nemahhig hu ligat tayu, et humman hu nakka e-helan hi-gayun eleg mengahwa, e entan ni pengahwa yu. <sup>27</sup> Nem hi-gayuddan wada ahwa tu, entan gadugadul ni yu peni-yanan ni ahwa yu. Ey hi-gayudda nisin eleg ni mengahwa, ey entan

pengahwan nunyan nemahhig hu ligat. <sup>28</sup> Nem hedini ihik kayun mengahwa, ey anin pengahwa kayu, tep ambeken ni liwat hu mengahwa. Nem mukun nakka pehebballin eleg kayu mengahwa, ey tep nemahhig ali panliggatan idan nengahwa et eleg ku pinhed ni kayu manliggat ni hanniman.

<sup>29</sup> Ya pinhed kun ewwatan yun kaegiagi ey ansikkey law hu tsimpuh ni pengippahdingan tayun ngunun Apu Dios. Et humman hu, hi-gayuddan nampengahwa ey beken ni ya kaguh yun ahwa yu hu umheli-wan hi-gayud pengu-unnudan yun Apu tayu.

<sup>30</sup> Ang-ang tayu et beken ni ya ligat, ya pan-am-amlengan niya panheppulan ni ikkedangyan hu umheli-wan pengu-unnudan tayun Apu Dios. <sup>31</sup> Ey beken ida eya kamekapkapyad puyek hu pengikkahakeyan tayun nemnem tayu, tep inamta tayu e ya puyek et yaddan emin eya wadad ya ey mepappeg.

<sup>32</sup> Ya pinhed ku ey beken ni dakel hu yu ikakkaguh. Ya lakin eleg malehin ey tuka ikkahahekey nemnem tud kapengunnun Apu Dios tep pinhed tun peamleng. <sup>33</sup> Nem ya etan nelahin ni laki ey tuka nenemna hu mahapul ni pamilyah tu niya pehding tun mengippeamleng ni ahwa tu. <sup>34</sup> Et humman hu, endi maptek ni nemnemen tu. Heni damaddan eleg mengahwan bibi-i e ebuh hu pengu-unnudan dan Apu tayun daka ikakkaguh, tep endi ahwa dan ikkaguh da. Nem ya nengahwan bii ey dakel hu tuka ikakkaguh, henin ngunu tud baley da niya pehding tun mengippeamleng ni ahwa tu.

<sup>35</sup> Huyyan intugun kun hi-gayu ey panyagguddan yu, beken ni nak pengleg ni pengahwaan yu. Mukun inhel kudda huyya, ey tep pinhed kun kayyaggud hu panbiyagan yu niya ma-lat endi umheli-wan pengu-unnudan yun Apu Jesus Christo.

<sup>36</sup> Hedini wada neitgan laki, nem endi planuh dan mantulluy, nem entanniy peteg etan lakin mengi-ahwa etan ni bii, anin ni man-ahwadada et beken ni liwat humman. <sup>37</sup> Nem hedini hinammad ni neitgan lakid nemnem tun eleg mengahwa, ey kayyaggud mewan humman ni ninemnem tu, nemet hangkekenneng tu annel tu, et anin ni eleg tu i-ahwa etan neitgan tu. <sup>38</sup> Et humman hu, kayyaggud hedini mengahwa hu hakey ni laki, nem kedukdul mewan hedini eleg mengahwa.

<sup>39</sup> Ya biin wada ahwa tu ey eleg mabalin ni an um-abulut ni hakey ni laki hedini nanengtun mategu ahwa tu. Nem hedini mettey hu ahwa tu, man dammutun um-abulut ni lakin pinhed tu, nem mahapul ni ya kamengullug. <sup>40</sup> Nem ya ngu kangku, kedukdul hedini eleg mambintan. Huyyan intugun ku ey nakka kulluga e huyya impeamtan Ispirituh Apu Dios ni hi-gak.

## 8

### *Ya meippanggep ni kennen ni neiappit di beken ni makulug ni dios*

<sup>1</sup> Yan nunya law, ey pinhed kun hummangen etan yuka ibbagan meippanggep ni kennen ni neiappit di beken ni makulug ni dios. Makulug ni emin itu, ey wadan emin inamta tayun meippanggep nunya. Nem humman ni inamta tayu, ey kaumhulun ni hin-addum ni wada hakkeyey kamampahhiyya. Huyya hakey ni kaumbahbah ni hi-gatsun kamengullug, tep tuka bahbaha hu tayu kapan-impipinhed, ey huyyan kapan-impipinhed hu kamengiyaggud ni hi-gatsun emin ni kamengullug. <sup>2</sup> Ya tuun kamampahhiyyan kantuy amta tun emin, ey makulug ni kulang ni hu inamta tun meippanggep nan Apu Dios. <sup>3</sup> Nem ya etan tuun makulug ni pinhed tu hi Apu Dios ey hi-gatu kaibbilang Apu Dios ni tuu tu.

<sup>4</sup> Hedini ya meippanggep ni kennen ni neiappit di beken ni makuug ni dios, ey heninnuy hu dammutun ittugun ku: Inamta tayu e beken ni makulug ni dios hu daka pengi-appiti, tep hakey ni ebuh hu Dios. <sup>5</sup> Anin ni kan idan edum ni tuuy dakel ida dios, yadda ap-apud puyek niyad kabunyan, <sup>6</sup> et inamta tayu ngu e hakey ni ebuh hu Dios tayun kamengullug. Hi-gatu hu tayu kaibbilang ni Ametayu. Hi-gatu nanletun emin niya hi-gatu nengidwat ni biyag tayu ma-lat daydayawen tayu hi-gatu. Ey hakey ni ebuh hu tayu kaibbilang ni Apu tayu e hi Jesus Christo. Emin eya wadan nunya, ey newadan emin gapuh ni hi-gatu. Ey hi-gatu nalpuan ni biyag tayu.

<sup>7</sup> Nem ay wadada etan edum tayun kamengullug ni eleg da amta huyya. Imminghad nemnem da e tu-wangun dios hu neiappitan idan nunman ni kennen. Et mukun hedini kinan da, ey ya daka panemnem, ey henidda nekidaydayaw idan nunman ni beken ni makulug ni dios. Et humman hu, nanengtun nunyan ida kamandinwa hedini pi-yew pengngannan dan nunman winu beken. <sup>8</sup> Ya kakulugan tu, ey beken ni ya tayu kakenna hu kamengihnpun ni hi-gatsun Apu Dios. Eleg me-dumi tayu kapengullug hedini kennen tayu ey eleg me-kali hedini eleg tayu kenna.

<sup>9</sup> Nem helipati yu ma-lat beken humman ni umhulun ni panliwwatan idan eleg meihammad hu daka pengullug. <sup>10</sup> Makulug ni hi-gayuddan nehammad law hu tuka

pengullug, ey amta yu e beken ni lawah hu pengngannan idan nunman ni kenne. Nem yadda etan kulang ni hu daka pengullug, ey ida kamandinwa hedin dammutun kenne da winu eleg. Et inna-nu hedin ang-angen dakeyun hi-gadan kayu kaumlaw ni mekikkan di tempol idan beken ni makulug ni dios, kaw eleg ida meemmeh et pangkennen da dama ey panliwwatan da? Tep nanengtun daka ibbilang e humman hakey ni kapehding ni tuun penaydayaw tun beken ni makulug ni dios. <sup>11</sup> Et humman hu, hedin ippahding yu humman, ey hi-gayu umhulun ni panliwwatan etan ni eleg ni maihammad hu tuka pengullug ni edum tayun ingkatey Jesus hu panyaggudan tu. <sup>12</sup> Et anin ni hi-gayu et manliwwat kayu daman Jesus Christo tep dinini yu humman ni tuun mengippahding etan ni tuka nemnemman lawah. <sup>13</sup> Et humman hu, anin ni lebbeng tayun mengngan ni pinhed tayun kenne, ey heballi eleg tayu kenna hedin humman hu umhulun ni panliwwatan ni edum tayun kemengullug.

## 9

*Ya nengiwallengan Paul ni kelebengan tun meidwatan ni mahapul tu*

<sup>1</sup> Hi-gak, ey dammutun ippahding ku hipan pinhed kun pehding. Tep kaw beken nak ni apostle niya kaw eggak ang-angen hi Apu tayu e hi Jesus Christo? Ya ngulugan yun Apu Dios ni nunya ey humman hu keang-angan ni ngunuk ni nantuttudduan kun meippanggep nan Jesus. <sup>2</sup> Anin ni eleg da-ak ibbilang ni apostle idan edum ni tuu, et lebbeng ni ibbilang yuwak ni hakey ni apostle, tep nantuttudduak ni hi-gayu et mangulug kayun Apu Jesus Christo e humman hu keang-angan ni kinaapostle ku.

<sup>3</sup> Heninnuy hu penummang kuddan etan ni kamemihhupihhul ni hi-gak meippanggep ni kinaapostle ku. <sup>4</sup> Kaw beken ni lebbeng tun iddawtan yuwak ni kenne ku niya innumen kud nak pantuttudduan ni hi-gayu? <sup>5</sup> Ey kaw endi lebbeng kun mengahwa et ikuyug kud nakka lawwi hedin et dedan pinhed kun mengahwa? Tam wada lebbeng ku, heniddan agin Apu tayun hi Jesus, et hi Peter niyadda etan edum ni apostles. <sup>6</sup> Kele hedin hi-gamin Barnabas, man mahapul ni ingngunwan mi kenne mi, ey hedin yadda edum mi, man yudda kaiddawsin mahapul da?

<sup>7</sup> Hipa inamta yun sindalun an mekiggubbat ey hi-gatu ngenamung ni mahapul tu? Ey hipa inamta yun kamantennem ni eleg tu tamtami lameh ni intanem tu? Niya kaw eleg mabalin ni um-inum hu kamampattul ni kalneroh ni gatas ni tuka ippattul? <sup>8</sup> Beken ni nalpud nemnem ni tuun ebuh huyyan kelebengan ni nakka e-e-hela, tep anin di Tugun Apu Dios et wada huyyan neitugun. <sup>9</sup> Kan ni neitudek di Tugun ey "Entan tu bedbedi hunghung ni newang ni kaman-illik et anin umkan ni tuka pan-illika." <sup>10</sup> Kaw ya newang ni ebuh hu kaikakkaguh Apu Dios ni mahapul ni mengngan? Ya pinhed nunyan neitudek ni e-helen ey hi-gamin kamantuttuddun ehel Apu Dios ey heni kami etan ni kamanggeud niya kaman-enni, tep wada daka namnamahad inggaud dan ennie da. Heni daman hi-gami e lebbeng tun iddawtan dakemin mahapul mi. <sup>11</sup> Ya mika pengituttudduin ehel Apu Dios ni hi-gayu, ey heni dakeyu kaingunggunnu. Et kaw beken ni kayyaggud hedin um-idwat kayun mahapul mih? <sup>12</sup> Hedin yadda etan edum ni kamantuttuddun hi-gayu hu mambeggan mahapul da, man yudda kaiddawsi, et kaw beken ni nema-ma anhan law ni hi-gami?

Nem hi-gami ngu kan nemnem ni eleg mambeggan mahapul mi, anin ni inamta min wada lebbeng min mambeggan hi-gayu, tep ninemnem mi e kedukdul hu issipel mi ligat mi, tep entanniy penghel yuy humman mika gangami et umhulun kumedek ni eleg yu pengullugin mika ituttuddun meippanggep ni impahding Jesus ni panyaggudan tayu. <sup>13</sup> Kaw eleg yu amta e hedin yadda kamanggunnud Tempol, man kamelpud Tempol hu daka kenna? Ey anin ida daman padin kamengiddasal ni kai-appit idan tuu nan Apu Dios, et wada daka ellan bingay daddan nunman ni neiappit. <sup>14</sup> Hanniman damaddan edum ni kamantuttuddun meippanggep ni kehellakniban ni tuu e kan Apu tayu ey yadda daka tuttuudui hu lebbeng tun mengidwat ni hipan mahapul da.

<sup>15</sup> Nem hi-gak e wada kelebengan kun mambeggan hi-gayun baddang, ey eggak mambagan hi-gayu. Nem entan tu panghel ey nakka pan-itudek huyya ma-lat umidwat kayun mahapul ku, tep endi huyyad nemnem ku. Nakka pekeddukdul ni meteyyak ni upa nem ya etan da-ak iddawtan ni mahapul ku, tep nakka man-amamleng ni mantuttuddun hi-gayu, anin ni liblih. <sup>16</sup> Nem eggak ippahhiyya ngunuk ni mengituttuddun meippanggep nan Jesus Christo, tep huyyan ngunu hu indawat Apu Dios ni hi-gak. Ey inamtak e wada anggetakkut ni meippahding ni hi-gak hedin eggak u-unnuda. <sup>17</sup> Beken ni nak pinilin pekittangdanan ku huyyan ngunu. Nem hi Apu Dios hu nemutuk ni hi-gak, et mahapul ni pehding ku hu impangunu tu, anin ni endi iddawtan yu hi-gak. <sup>18</sup> Ya amleng kun mantuttuddun meippanggep nan Jesus Christo hu gaputun

nakka panhehelluin mengippahding ni nunyan ngunuk, mukun eggak mambeggan tangdan ku, anin ni lebbeng tun metangdanannak.

<sup>19</sup> Hi-gak ey beken nak ni henin himbut e mahapul ni tennudan ni kanhimit ni hi-gatu, nem inggeb-at ku ngun mambega-en ma-lat nak ituttuddun katuuuu hu meippanggep nan Jesus et dumakkel ida mengullug ni hi-gatu. <sup>20</sup> Hedin nei-dummak idan edum kun Jews, man nakka iu-unnud di elaw da hu nakka pehpending ma-lat maewis idan mengullug nan Jesus. Ey hedin nei-dummak idan kamengu-unnud ni Tugun, ey nak daman kaiu-unnud di elaw da ma-lat maewis idan mengullug nan Jesus. <sup>21</sup> Ey hedin nei-dummak idan Gentiles e endin hi-gada hu Tugun Apu Dios ni indawat tun Moses, ey nakka iu-unnud di elaw da ma-lat wada inna-nun pengewwisan kun hi-gada et mangulug ida daman Jesus. Nem wadan penghel yuy nakka kehinga Tugun Apu Dios hedin hanniman, nem eleg, tep nakka u-unnuda tugun Christo. <sup>22</sup> Ey hedin nei-dummak idan eleg maihammad hu daka pengullug, ey eggak peang-ang e kedukdullak e nehammad hu nakka pengullug nem hi-gada ma-lat wada dinel dan mengngel ni nakka ituttuddu et maihammad hu daka pengullug.

Anin ni hipan tuu hu nakka peki-dumi, et hannya nakka pehding ma-lat wada inna-nu dan mengullug ni nakka ituttuddu meippanggep nan Jesus et mehelakniban ida. <sup>23</sup> Huyyadda nakka pehding ma-lat wada inna-nu tun meituttuddu meippanggep nan Jesus Christo et maila-kammak di panyaggudan tu.

<sup>24</sup> Inamta tayu e emin kameki-apput di bebbessik ey daka pehding emin kabaelan dan umbesik, nem hakey ni ebuh kamengapput. Et humman hu, ipatna yun emin kabaelan yun mengu-unnud nan Apu Dios ma-lat emin kayu ey heni kayu etan ni kamengapput di bebbessik, tep wadalli iddawat Apu Dios ni panyaggudan yu. <sup>25</sup> Emin ida kameki-apput ey daka eddaeddalan kenayun hu elaw ni meki-apput ma-lat hi-gadalli mengella etan ni kameidwat ni kamengapput et maidaydayaw ida. Nem humman ni dayaw ey wada pappeg tu. Nem ya keiddeyyawan tayullid kabunyan ey endi pappeg tu. <sup>26</sup> Et mukun hedin hi-gak, heni-ak etan ni kameki-apput di bebbessik e ya pengapputan ku nakka nenemnema. Beken nak ni heniddan edum ni kamekibboksing e daka lallelgema duntuduntuk et ida kameapput. <sup>27</sup> Nakka pehding emin hu kabaelan kun mengekkneng ni annel ku, ma-lat beken ni legelegem hu pehding ku, tep hedin eggak pehding humman ey e-kalen da-ak ni meki-apput. Ya pinhed kun e-helen ey anin ni wadadda tinuttudduan ku et mangulug ida e heni hi-gada inewis kun meki-apput, nem endi gun-uden ku hedin nalnalgem hu pehding ku.

## 10

*Ya indawat Apu Dios ni panyaggudan idan aammed idan Jews ni impakewah da*

<sup>1</sup> Kaegiegi, entan tu liwwan eman neipahding idan aammed tayun nebayag ni nengipenguluan idan Moses. Yan nunman ey wada impaelin Apu Dios ni kulput, et humman nengipengulun hi-gada. Ey impanhi-yan tu hu danum di baybay et mangawat ida et meihwang idad buhul dan kamampemdug ni hi-gada. <sup>2</sup> Yan nunman ni wadaddad gawwan baybay ey hiniduman idan kulput, e humman hu nebenyagan dan emin, et keang-angan tun hi Moses hu u-unnuden da. <sup>3</sup> Ya kinakinan dan emin ey ya etan kaiddawat Apu Dios ni kennen. <sup>4</sup> Ey ya ininum dan emin ey ya etan danum ni impabudal Apu Dios di batu. Humman ni batu ey hi Jesus Christo e nekikkillaw ni hi-gada. <sup>5</sup> Nem anin ni hanniman impahpahding Apu Dios ni nengipenaptek tun hi-gada, nem kopya tun dakel ida eleg mangipeamleng ni hi-gatu et kastiguen tudda et mangkatey idad desert.

<sup>6</sup> Nemnemnem tayudda huyyan nekapkapan hi-gada ma-lat beken ni ya lawah hu tayu nenemnemem ni pehding henin impahding da. <sup>7</sup> Ey beken ni yadda etan beken ni makulug ni dios hu tayu daydayawen henin impahpahding idan edum ni hi-gada. Wada etan di impatudek Apu Dios ni kantuy "Nengan ida et menginnuunnum ida niya nenattayyaw idan penaydayaw da etan ni kinapya dan dios da."

<sup>8</sup> Ey mahapul ni eleg tayu pehding hu lawah e henin kepengi-ulligin beken ni ahwa, tep hanniman impahding ida lan aammed tayu, et humman gaputun neteyyan ni dewampulut tellun libun hi-gadan han-aggew. <sup>9</sup> Beken ni tayu patpatnaan hu binabbal Apu Dios ma-lat pengamtaan tayu hedin wada kabaelan tun umkastigu winu endi, tep henin nunman impahpahding idan edum ni nunman et matey ida, tep impakelat tuddan uleg. <sup>10</sup> Ey entan panlilih yu, tep henin nunman hu impahding idan edum ni nunman et itu-dak Apu Dios hu anghel ni memetty ni hi-gada.

<sup>11</sup> Humman idan nekapkapan hi-gadan nunman hu pengamtaan tayun kapehding Apu Dios idan kamanliwwat. Ey impatudek tudda humman ma-lat tumekut itsun

menggipahding idan eleg tu pinhed, tep kamangkedettengi law hu kepappegan ni puyek et mahuwetan ida tuu. <sup>12</sup> Et humman hu, ya etan tuun kantuy nehammad hu taka pengullug ey helipat-i tu kuma, tep entanni kumedek ey manliwwat. <sup>13</sup> Ma-nu tep emin itu ey itu kamepatnain mehe-ul ni menggipahding ni panliwwatan, nem kapyatu, tep tuu itu. Nem kameiddinnel hi Apu Dios ni memaddang ni hi-gatsu, tep eleg tu i-abulut ni itu mepatnaan di eleg tayu kabaelan. Ey daitsu kabaddangi ma-lat eleg tayu ipahding hu lawah.

*Helipat-i tayu ma-lat beken ni yadda etan beken ni makulug ni dios hu u-unnuden tayu*

<sup>14</sup> Et humman hu, hi-gayun kaegiegi, entan tu dayaw hu beken ni makulug ni dios. <sup>15</sup> Nangkenemnem kayu et ngenamung kayun mannemnem hedin neiptek winu neihla eya nakka pan-e-hela. <sup>16</sup> Hedini imminum itu etan di basuh ni pampesalamatan ni itu kapenginnemnem kuheyaw Jesus Christo ni immayuh eman ni neteyyan tu, ey itu kameilla-kam di panyaggudan ni neteyyan tu. Ey kaw eleg itu mewan meilla-kam hedini nekikan itu etan di itu kapemi-angin sinapay ni itu kapenginnemnem annel tun neipetak di krus? <sup>17</sup> Et anin ni dakel itu et heni itu hakey, tep hakey ni ebuh hu sinapay ni itu kakenna.

<sup>18</sup> Henin nunya hu kapandeyyaw idan Jews e hedini nan-appit ida et kinan da etan in-appit dan Apu Dios, man ida kamekiddagyum nunman ni Dios ni in-appitan da. Et hanniman ida dama etan hu tuun kamambekki \* e hedini nan-appit ida et kinan da etan in-appit dan nunman ni beken ni makulug ni dios, man ida kamekiddagyum daman nunman ni dios ni in-appitan da. <sup>19</sup> Kaw eleg yu nemnema e hedini daydayawen yu beken ni makulug ni dios, man endi silbitu, anin ni ya pan-appitan yun hi-gada? <sup>20</sup> Pinhed kun amtaen yu e ya kai-appisiddan eleg mengullug ey yadda dimonyoh, beken hi Apu Dios, et humman hu, enggak pinhed ni kayu mekiddagyum idan dimonyoh.

<sup>21</sup> Et mukun eleg mabalni ni kayu um-inum niya mengangan di kapenginnemnem neteyyan Apu Jesus, ey kayu mewan nekikan niya nekiinum di daka pandaydayawiddan dimonyoh. <sup>22</sup> Tep pinhed Apu Dios ni hi-gatun ebuh hu daydayawen tayu. Eleg tu pinhed ni wada edum. Kaw pinhed yun pebungnet? Kaw kan yu nem e-etteng kabaelan yu nem hi-gatu?

<sup>23</sup> Wadadda etan kamenghel ni kanday "Dammutin ippahding tayu hipan pinhed tayu." Makulug huuya, nem e-helen kun hi-gayu e beken ni emin hu pinhed tayun pehding ey panyaggudan tayu. <sup>24</sup> Beken ni ya panyaggudan tayun ebuh hu itu nenemnem, tep ya kayyaggud ni pehding ey nemnem tayu dama hu panyaggudan idan edum tayu.

<sup>25</sup> Eleg mahapal ni kayu umkakaguh ni yuka gettangan detag di mulkaduh hedini neiappit di beken ni makulug ni dios winu eleg, tep beken ni pi-yew hu pengngannan ni linggema ni detag. <sup>26</sup> Kan etan ni impatudek Apu Dios ey "Ya eya puyek niya emin eya wadaya ey nalpun Apu tayun mansilbin hi-gatsu." †

<sup>27</sup> Hedini wada eleg mengullug ni mengeyyag ni hi-gayun an mekikkan di baley da, dammutun elaw kayu hedini pinhed yu, ey anin ekan yu hu hipan kenne ni immangdad dan hi-gayu. Entan kakkaguh yu hedini humman ni kenne ni immangdad da ey neiappit di beken ni makulug ni dios winu eleg. <sup>28</sup> Nem hedini wada menghel ni hi-gayun kantuy "Neiappit mannum huuya detag di beken ni makulug ni dios," entan tu ekan humman, tep entanni ey penghel tu ey yuka kehinga elaw Jesus hedini kenne yu et lawah pannemnem tun hi-gayu. <sup>29</sup> Hedini wada hanniman, importanteh hu kapannemnem ni edum, beken ni ya yuka pannemnem.

Nem wadan penghel yuy "Kele ya nemnem ni edum ni tuu hu menggipahding ni enggak penggipahding kelebengan ku?" <sup>30</sup> Kele hipa da penglegan ni pengngannan ni kenne hedini nakka mansalamat nan Apu Dios, tep humman ni kinapya tun kenne ey insilbin annel ku?"

<sup>31</sup> Nem lawah hedini humman hu umhulun ni kedismayahan idan edum yu. Ya kayyaggud ey emin hu ippahding yu, anin ya pengngannan yu niya pengngannan yu ey nemnem yu keiddeyyawan Apu Dios. <sup>32</sup> Ang-ang yu et beken ni hi-gayu hu umhulun ni eleg pengullugan idan Jews winu Gentiles, winu hi-gayu umhulun ni panliwwatan idan edum tayun kamengullug nan Jesus. <sup>33</sup> Iu-unnud yun nakka pehding e beken ni ya panyaggudan kun ebuh hu nakka nenemnem, nem ya panyaggudan daman edum ni tuu, ma-lat wada inna-nu dan mehella kniban.

\* **10:18** 10:18 Ya pinhed nunyan e-helen ey beken ni yadda kamambekkin ebuh, nem anin hipan tuun kaman-appit ni beken ni makulug ni dios. † **10:26** 10:26 Psalm 24:1

## 11

<sup>1</sup> Iu-unnud yun hi-gak, tep nak dama kiau-unnud nan Apu Jesus Christo.

*Ya meippanggep ni panhukyungan idan biid daka pandeyyawin Apu Dios*

<sup>2</sup> Et-eteng hu nakka pengiddeyyaw ni hi-gayu, tep yuwak kanenemnema niya yuka u-unnuda hu intuttudduk ni hi-gayu. <sup>3</sup> Nem pinhed kun ewwatan yu e ya laki ey neta-ta-gey nem ya ahwa tu. Hi Apu Dios ey neta-ta-gey nem hi Jesus Christo, ey hi Jesus Christo ey neta-ta-gey nem ya tuu, tep hi-gatu Ap-apun emin ni tuu, et humman hu, hi-gatu kamei-ellig ni ulun emin ni laki. <sup>4</sup> Et mukun hedini mantaddung hu laki winu manhukyung ni pandasalan tu winu pantuttuddun tun ehel Apu Dios di yuka pandeyyawin ey eleg tu deyyawa hi Jesus Christo. <sup>5-6</sup> Nem ya biin eleg manhukyung ni mandasal winu mantuttuddun ehel Apu Dios ey be-ingen tu ahwa tu, tep heni tu linapahan. Ya biin eleg tu pinhed ni manhukyung ey heni metlaing nampemukum. Nem anggeba-ing hu mampekumuk winu mampepu-lit hu bii, et humman hu, heballi dedan manhukyung. <sup>7</sup> Newada hu laki kei-ang-angan ni kasina-gey niya kakeiddeyyawin Apu Dios, et humman hu, lawah hedini manhukyung hu lakid kapandeyyawin Apu Dios, tep ibbabah tu kasina-gey ni saad tun indawat Apu Dios ni hi-gatu. Nem ya dama bii ey newadan kei-ang-angan ni kasina-gey ni laki, et humman hu neta-ta-gey hu laki nem ya bii. <sup>8</sup> Tep ya nebukul ni newada ey ya laki et han maweda hu bii, tep yad annel ni laki hu nengal-an Apu Dios ni kinapya tun bii. <sup>9</sup> Ey yan eman ni laputun newad-an ni tuu, ey newada hu bii, ma-lat baddangan tu hu laki. Beken ni an newada hu laki, ma-lat baddangan tu hu bii. <sup>10</sup> Et humman hu, mahapul ni eleg la-pahin bii hu ahwa tu, tep humman kei-elligen ni panhukyungan ni biid simbaan ni keang-angan tun nebababah ida nem ya ahwa da, niya keang-angan tu daman daka panlisipituh idan anghel.

<sup>11</sup> Nem hedini hi-gatsun kamengullug nan Apu Jesus, ey mahapul ni eleg tayu liwwana e kinapyan Apu Dios hu laki niya bii et mambandang ida. <sup>12</sup> Tep ma-nut ya laki hu nalpuan ni nemangulun bii, nem ay ya law hu bii hu kamengi-ungngan laki, nem emin ey wadan nunya ey hi Apu Dios hu nalpuan da.

<sup>13</sup> Nemnem yu e beken ni kayyaggud hedini eleg manhukyung hu bii hedini mandasal. <sup>14</sup> Ey inamta tayu ngu dedan e lawah ang-ang tu hedini andukkey hu bewek ni laki. <sup>15</sup> Nem ya bii ey kayyaggud dedan ang-ang tu hedini andukkey bewek tu, tep indawat Apu Dios humman ma-lat penephep tun ulu tu et heni humman dayaw tu. <sup>16</sup> Nem hedini wada kayun kahing, ya e-helen kun hi-gayu ey inna-nu ey humman hu elaw ni tayu kapenaydayaw nan Apu Dios e mahapul ni manhukyung hu bii hedini mantuttuddu winu mandasal, ey anin idan edum ni kamengullug ey huuya daka pehding.

*Ya pekikkannan etan ni sinapay niya peki-innuman etan ni innumen ni penginnemnem ni neteyyan Jesus*

*(Matthew 26:26-30; Mark 14:22-25; Luke 22:15-20)*

<sup>17</sup> Ya hakey mewan ni e-helen kun hi-gayu ey meippanggep etan ni eggak pinhed ni yuka pehpehding ni lawah di yuka pandaydayawin Apu Dios. <sup>18</sup> Daka idaddatteng ni hi-gak e hedini kunun neamung kayun mandeyyaw nan Apu Dios, ey eleg kayu manunnud, nem kayu kamegennadwa et anin law ni hi-gak et nakka kulluga. <sup>19</sup> Nem huttan ni yuka kegennadwai ey kapyatu, tep wadadda huttan ma-lat meang-ang ida etan makulug ni kamengullug.

<sup>20</sup> Hedini neamuamung kayud yuka pengngannin penginnemnemman yun neteyyan Apu Jesus, ey hin-appil kumedek wadad nemnem yu. <sup>21</sup> Tep hedini mengngan kayu, man wada hakkeyey pan-ikkan tu ey eleg um-idwat ni in-ali tun kennen, et humman hu endi kennen ni edum. Hanniman mewan ni meinnum e eleg kekkennangan edum hu daka innuma et ida kamebuteng. <sup>22</sup> Lawah huttan ni yuka pehpehding. Kaw endi hu baballey yun pengngannan yu niya penginnuman yuh? Kaw hanniman yuka pehpehding tep eleg yudda lisipitua edum yun kamengullug nan Apu Dios niya ma-lat baingen yudda nangkewetwet? Kaw kan yu nem tetebalen dakeyun nuntan ni yuka pehding?

<sup>23</sup> Tep huuyan intuttudduk ni hi-gayun meippanggep ni pengngannan ni kapenginnemnemni neteyyan Apu Jesus Christo ey intudu tun hi-gak. Yan eman ni nengannan di Jesus ni nunnan ni hileng ni nengihdulan Judas ni hi-gatu, ey illa tu sinapay <sup>24</sup> et mansalamat nan Apu Dios. Pineni-ang tu et kantuy "Huuya annel kun iddawit kun panyaggudan yu. Aleyu et kanen yu. Huuyalli pahpahding yun penginnemnemman yun hi-gak." <sup>25</sup> Negibbuh idan nengan ey illa tu basuh ni netalwan ni meinnum et mandasal e kantuy "Huuyan innumen yu hu amnuan etan ni baluh ni nekitbalan Apu Dios ni panyaggudan ni tuu gapuh ni keteyyan ku. Inum kayun emin. Ipahding yulli huuyan ingganah et penginnemnemman yun hi-gak." <sup>26</sup> E-helen kun hi-gayu e pehpehding tayu huuya e kennen



tayu sinapay niya innumen tayu meinum ingganah alin pambangnagan Apu Jesus Christo. Huyya mengippenemnem e netey hi Jesus Christo ma-lat panyaggudan tayu.

<sup>27</sup> Et humman hu, hedin beken ni ustuh hu kapannemnem ni tuun mengngan nunman ni sinapay ey um-inum nunman ni meinum, ey manliwwat nan Apu Jesus e nengiappit ni annel tu niya kuheyaw tu. <sup>28</sup> Et mukun mahapul ni wada hakkeyey pakannemnem tu hedin kayyagud winu lawah hu elaw tu. Tep hedin lawah, ey mahapul ni mantuttuyyu ni, ey han kimman ni sinapay niya han imminum etan di basuh. <sup>29</sup> Tep hedin umkan hu tuu etan ni sinapay niya um-inum etan di basuh, nem eleg tu nemnema keibbellinan ni annel Apu Jesus, ey manliwwat et mekastigu, tep tuka lellegema. <sup>30</sup> Huyya gaputun dakel ni hi-gayu hu nekapuy, kamandedgeh niya dakel ida netey ni hi-gayu. <sup>31</sup> Nem gullat ni tayu kapakannemnema hu elaw tayu, et han-itsu nekikan, ey eleg daitsu kastiguan Apu Dios. <sup>32</sup> Nem hedin daitsu kapanligligat ni hi-gatu, ey humman penuggun tun hi-gatsu ma-lat eleg itsulli mailegat ni panhuwetan tulliddan tuun eleg mengullug ni hi-gatu.

<sup>33</sup> Et humman hu, hi-gayun agik ida, hedin neamung kayun mengngan ni pengin-nemneman yun neteyyan Apu Jesus, ey pan-inhehged kayu et mandidihhan kayun mengngan. <sup>34</sup> Ey hedin wadadda neupan hi-gayu, heballi mengan alid baley tu et han makiemung ma-lat endi huwetan Apu Dios ni hi-gayu. Ngenamung alin ellian ku hu pengung-ungbalan tayun edum ni pinhed kun ittugun.

## 12

### *Ya kabaelan idan kamengullug ni kaidawat ni Ispirituh Apu Dios*

<sup>1</sup> Kaegiegi, pinhed kun peaman hi-gayu hu meippanggep ni nambabaklang ni kabaelan ni kaidawat ni Ispirituh Apu Dios di hanhakkey ni hi-gatsu. <sup>2</sup> Amta yu e yan nunman ni eleg yu ni pay pangulugan ey nehawl kayu et dayawen yudda kinapyan tuun dios ni eleg paka-hel. \* <sup>3</sup> Nem yan nunyan nengulug kayu ey wadan hi-gayu hu Ispirituh Apu Dios. Et hedin makulug ni wada Ispirituh Apu Dios di hakey ni tuu, eleg tu e-hela hu lawah nan Jesus. Ey pakkaw ni wada Ispirituh Apu Dios di hakey ni tuu et han mabalin ni kantuy hi Jesus hu Apu tu.

<sup>4</sup> Hi-gatsun kamengullug ey dakel hu nambakbaklang ni kabaelan tayu, nem hakey hu kamengidwat idan nunman e humman hu Ispirituh Apu Dios. <sup>5</sup> Nambakbaklang hu indinel Apu Dios ni ngunun hi-gatsun panyaggudan ni edum tayun kamengullug, nem ebuh hi Jesus Christo ni Apu tayu. <sup>6</sup> Ey nambakbaklang hu kabaelan tayun mansilbin hi-gatu, nem hakey hi Apu Dios ni nalpuan da.

<sup>7</sup> Emin itsun kamengullug ey wada hakkeyey wada neidwat ni hi-gatun kabaelan tun umbaddang ni panyaggudan tayun emin e humman keang-angan tu e wada Ispirituh Apu Dios ni hi-gatsu. <sup>8</sup> Ya edum ni kamengullug ey indawat ni Ispirituh Apu Dios hu kabaelan tun umtugun. Yadda edum ey indawtan tuddan kabaelan ni mengewwat ni ehel Apu Dios et ittutuddu dad edum da. <sup>9</sup> Yadda edum ey indawtan ni Ispirituh Apu Dios ni nehammad ni kapengullug nan Apu Dios et han-ipahding da hu pinhed tu. Ey yadda edum ey indawtan tuddan kabaelan ni mengkal ni degeh. <sup>10</sup> Yadda edum ey indawtan tun kabaelan ni mengippahding idan miracles. Ey yadda edum ey indawtan tun kabaelan ni mengituttuddun ehel Apu Dios. Wadadda edum ni indawtan tun kabaelan dan mengimmatun hedin makulug ni nalpuan Apu Dios hu kaituttuddun hakey ni tuu winu eleg. Wadadda edum ni indawtan tun kabaelan dan mengi-hel ni nambakbaklang ni ehel, anin ni eleg da adalen humman ni ehel. Ey wadadda edum ni indawtan tun kabaelan dan mengippeaman keibbellinan idan nunman ni ehel. <sup>11</sup> Emin huyyan nambakbaklang ni kabaelan ey hakey nalpuan da, e ya Ispirituh Apu Dios ey hi-gatu ngenamung ni pinhed tun pengidwatan.

<sup>12</sup> Henin annel ni tuu e dakel hu parteh tu, nem hakey ni annel ni ebuh. Heni daman hi-gatsun kamengullug e ma-nut nambakbaklang itu, nem hakey kan-annel ni hi-gatsu e hi Jesus. <sup>13</sup> Tep emin itu, anin Jew winu Gentile himbut winu beken, ey hakey nemyang ni hi-gatsu e humman Ispirituh Apu Dios et mawedan hi-gatsun emin, tep hi-gatu nengihakkey ni hi-gatsud annel Jesus Christo.

<sup>14</sup> Em, ya annel ni tuu ey hakey, nem dakel parteh tu. <sup>15</sup> Henin heli e gullat ni um-ehel et penghel tuy "Bekennak ngun parteh ni annel, tep beken nak ni ngamay," et neipngil humman, tep anin hanniman kantu et nanengtun parteh ni annel. <sup>16</sup> Ey gullat ni kan ni tangila ey "Bekennak ngun parteh ni annel, tep bekennak ni mata," et neipngil humman, tep anin hanniman kantu et nanengtun parteh ni annel. <sup>17</sup> Tep gullat ni matan emin

\* 12:2 12:2 Psalm 115:4-5, Isaiah 46:7, Jeremiah 10:5 et ya Habakkuk 2:18

hu annel, inna-nu tun mengngel? Ey gullat ni emin hu annel ey tangila, inna-nu tun menemmuy hedini endi eleng? <sup>18</sup> Beken ni hanniman hu nengapyan Apu Dios ni hi-gatsu, tep kinapyatu nambakbaklang ni parteh ni annel tayu meippuun di pinhed tun kei-ussalan da. <sup>19</sup> Hipa na-mu ang-ang ni annel hedini hakey ni ebuh ni parteh hu wada? <sup>20</sup> Et mukun, hakey ni ebuh hu annel, nem dakel nambakbaklang ni parteh tu.

<sup>21</sup> Ya humman hu, eleg mabalin ni kan ni mata ey "Eggak mahapul hu ngamay." Ey ya ulu, ey eleg mabalin ni kantuy "Eggak mahapul hu heli." <sup>22</sup> Tep ya kakulagan tu, anin idan kan tayun beken ni importanteh ni parteh ni annel et makahhapul tayudda. <sup>23</sup> Yadda etan parteh ni annel ni kan tayuy beken ni importanteh hu usal da, ey humman ida tayu kapaka-ippaptek. Ey yadda etan parteh ni annel ni anggeba-ing ni peang-ang, ey tayu kaippaptek ni hennian. <sup>24</sup> Nem beken ni mahapul ni henin nunman hu kapemaptek idan edum ni parteh ni annel. Hanniman hu impengapyan Apu Dios ni annel tayu ma-lat ipapaptek tayudda etan parteh ni kantayuy beken ni importanteh hu usal da. <sup>25</sup> Emin hu parteh ni annel ey makahhapul tayudda ma-lat man-imbaddang ida. Henin hi-gatsun kameibbillang ni annel Jesus, e mahapul ni man-uunnud itu, niya man-impapaptek itu. <sup>26</sup> Tep hedini wada hakey ni parteh ni annel ni neligtan ey ligat tayun emin. Hanniman dama e hedini wada hakey ni hi-gatsun kametettebal, ey ketbalan tayun emin.

<sup>27</sup> Ya keibbellinan tu huyyan nakka pan-ituttuddu ey wada hakkey ni hi-gatsun kamengullug ey itu kameibbillang ni annel Jesus Christo, nem wada hu nambakbaklang ni ngunun neidinel ni hi-gatsu. <sup>28</sup> Huyyadda hu nambakbaklang ni ngunun indinel Apu Dios ni hi-gatsun kamengullug. Yadda nemangulun pinili tu ey yadda apostles, ya meihayned ey yadda prophets e kamengippeamtan ehel Apu Dios, ya meikkatlu ey yadda etan kamantuttuddu. † Ey wadadda dama kamengippahding ni miracle, yadda kamengkal ni degeh, yadda kaumbaddang ni edum da, yadda kaman-ap-apu niyadda edum ey kabaelan dan mengi-hel ni nambakbaklang ni ehel.

<sup>29</sup> Et mukun eleg itu mapilin emin ni man-apostle, winu prophet, winu mantuttuddun ehel Apu Dios. Ey beken ni emin itu ey han-ipahding tayu hu miracle. <sup>30</sup> Ey eleg itu meidwatan emin ni kabaelan ni mengkal ni degeh, winu mengi-hel ni nambakbaklang ni ehel winu mengippeamtan keibbellinan tu. <sup>31</sup> Nem ya importanteh ni gangaman tayun kabaelan ey ya etan umbaddang ni panyaggudan ni edum tayun kamengullug.

Nem wada hakey ni kekakkayyaggudan e humman hu impeminhed.

## 13

### *Ya elaw ni impeminhed*

<sup>1</sup> Makahhapul hu impeminhed di edum ni tuu, tep anin na-mun wada kabaelan kun mengi-hel ni nambakbaklang ni ehel ni tuu niya ehel ni anghel, nem endi impeminhed kun edum kun tuu, et endi silbitu e henin kaumpapaliteng ni gangha niya henin kaumpipipeng ni kingking. <sup>2</sup> Anin na-mun iddawat Apu Dios ni hi-gak hu kabaelan ni mengituttuddun ehel tu, ey anin na-mun inamtak ni emin hu eleg peamtan Apu Dios, niya wada kabaelan kun mengewwat ni elaw tu, et endi silbitu hedini endi impeminhed kun edum kun tuu. Ey anin na-mun nehammad hu nakka pengullug et hedini kangku etan ni duntug ey "Pan-etan ka," ey nan-etan tu-wangu, ey endi silbik ni tuu hedini endi impeminhed kun edum ku. <sup>3</sup> Ey anin na-mun madewattak et iddawat kun emin hu wadan hi-gak idan newetwet, niya anin na-mun ihhulug ku hu annel ku et magiheb gapuh ni nakka pengullug nan Jesus Christo, ey endi silbiddan nunman hedini endi impeminhed ku.

<sup>4</sup> Ya tuun wada impeminhed tun edum tu, ey kababbal niya mahmek. Eleg tu keemmehi edum tu, eleg mampahhiyya, <sup>5</sup> beken ni manghay, eleg tu pepillit hu pinhed tu, beken ni kabubunget niya eleg tu nenemnema hu lawah ni impahding dan hingat. <sup>6</sup> Eleg tu pan-am-amlengi hu lawah, nem ya kayyaggud hu tuka pan-amlengi. <sup>7</sup> Hedini wada impeminhed ni tuun edum tu, ey eleg tu nenemnema hu hipan lawah ni impahding da. Kamedinnet di edum tun tuu niya tuka namnamaha e kayyaggud ni ingganah hu ipahding da. Niya tuka ennusi hu hipan ligat.

<sup>8</sup> Ya impeminhed ey eleg mepappeg, nem mannananeng ni ingganah. Yadda kabaelan, henin mengituttuddun kapeamtan Ispirituh Apu Dios ey mepappeg, anin ya kabaelan ni mengi-hel ni nambakbaklang ni ehel et mepappeg. Ey anin yadda hipan inamta tayu et eleg ali law mahapul. <sup>9</sup> Tep kulang itsun man-ewwat niya kulang itsun mengituttuddun kapeamtan Ispirituh Apu Dios. <sup>10</sup> Nem yallin elian Jesus, ey eleg tayulli law mahapul ida huyyan kabaelan ni wada kulang tu.

† 12:28 12:28 Ephesians 4:11

<sup>11</sup> Heninnuy hu elaw tu: Yan keu-unggak, ey henin kapeneppit ni u-ungnga hu nakka peneppit, anin ni ya nakka pannemem niya nakka pan-ewwat. Nem yan nehikenan ku, ey endidda law humman ni elaw kun keu-unggak. <sup>12</sup> Henin nunman ni hi-gatsun kamengullug e kulang ni hu tayu kapengewwat ni meippanggep nan Apu Dios, e heni itu kamandiddigal etan di nekulap ni diggal e eleg meka-ang-ang hu angah. Nem hakey alin aggew ey mekihinnangga itsun Apu Dios et peka-amtaen tayulli elaw tu, henin nengamtaan dait sun hi-gatu.

<sup>13</sup> Yadda etan kabaelan ni mannananeng alin ingganah ey ya pengullug, ya namamah, niya impeminhed. Nem ya keim-importantehan idan nunyan tellu ey ya impeminhed.

## 14

*Ya importanteh ey ya kabaelan ni mengituttuddun hipan kapeamtan Ispirituh Apu Dios*

<sup>1</sup> Ya kayyaggud ni gamgaman yu ey ya pan-impipinhedan yu et yadda etan kabaelan ni iddawat ni Ispirituh Apu Dios, nema-ma etan kabaelan ni mengituttuddun kapeamtan Apu Dios. <sup>2</sup> Tep ya etan tuun kabaelan tun mengi-hel ni nambakbaklang ni ehel ey hi Apu Dios hu tuka peki-ungbal, beken ni ya tuu, tep eleg da ewwasi hu tuka e-e-hela. Wada kabaelan tun mengituttuddudan eleg meamta tep ya baddang ni Ispirituh Apu Dios. <sup>3</sup> Nem ya etan kamengituttuddun kapeamtan Ispirituh Apu Dios ni hi-gatu ey tuka ituttuddudan edum tun kamengullug ma-lat petuled tudda, ey ma-lat mea-alluk idad daka panligligasi niya ma-lat maihammad hu daka pengullug. <sup>4</sup> Et humman hu, ya etan tuun kamengituttuddun kapeamtan Ispirituh Apu Dios ey tuka baddangin emin hu kamengullug. Nem ya etan tuun wada kabaelan tun mengi-hel ni nambakbaklang ni ehel ey ebuh annel tun kamebaddangi.

<sup>5</sup> Pinhed ku et ni emin kayu ey kabaelan yun mengi-hel ni nambakbaklang ni ehel, nem nakka pehebballu hu emin kayu ey wada kabaelan yun mengituttuddun impeamtan Ispirituh Apu Dios ni hi-gayu. Tep neta-ta-gey etan kamengituttuddun ehel Apu Dios nem ya etan han-i-hel tu nambakbaklang ni ehel. Nem nan-inggeh ida hedun wada mengibbellin nunman idan ehel et wada law pansilbian tudan kamengullug. <sup>6</sup> Tep inna-nu hedun um-ali-ak di kad-an yun kaegiegi et i-hel kud nambakbaklang ni ehel, ey eleg yu amta hu pinhed kun e-helen, kaw wada silbi tun hi-gayu? Endi. Nem wada silbi tun hi-gayu hedun um-ali-ak et ituttudduk hu impeamtan Apu Dios ni hi-gak di ehel ni han-awat yu.

<sup>7</sup> Anin ni gitalah winu tullaling et endi tunung tu hedun kapemegga patnul. <sup>8</sup> Hanniman dama etan tangguyp idan sindalun kamekiggubbat. Hedun kalellegema etan ni kamengipatnul et eleg metunung, ey eleg amtaddan sindalu hedun humman pandaddanan dan mekiggubbat. <sup>9</sup> Heni daman hi-gayu e hedun meki-ungbal kayun tuud ehel ni eleg da amta, ey endi silbitu, tep eleg da han-awat hu pinhed yun e-helen ni hi-gada. Heni ka kumedek kamekihuhummangan di annel mu.

<sup>10</sup> Dakel nambakbaklang ni ehel eyad puyek ey humman idan ehel ey wada keibbellinan da, nem mahapul ni ewwatan et han wada silbitu. <sup>11</sup> Nem hedun meki-ungballak etan ni eggak amta ehel tu, ey eleg tu dama amta ehel ku, eleg kami man-in-awwasi, tep eleg kami man-hin-amtan ehel. <sup>12</sup> Ya pehding yu, tep ihik kayun meidwatan ni kabaelan ni kamelpun Ispirituh Apu Dios, ey heballi yadda kabaelan ni umbaddang idan kamengullug hu gamgami yu.

<sup>13</sup> Et humman hu, ya etan tuun han-i-hel tu hu nambakbaklang ni ehel ni eleg ewwasin tuu, ey mahapul ni mandasal ma-lat awatan tu hu keibbellinan ni tuka e-hela. <sup>14</sup> Tep hedun mandasal hu hakey ni tuud ehel ni eleg tu amta ey ma-nu tep kamandalal hu ispirituh tu, nem eleg tu han-awat hu tuka pan-iddasal. <sup>15</sup> Et humman hu, ya ew hu kayyaggud ni pehding tayu, ey mandasal itsud kaittudun ispirituh tayu, ey mandasal itsud ehel ni kameewwasi. Hanniman dama pehding tayu hedun man-a-appeh itu. <sup>16</sup> Tep hedun eleg yu pehding humman, ey inna-nu hedun in-ehel etan ni kamandalal di ehel ni eleg han-awat ni edum tu, inna-nun penghelan dan "Amen," \* hedun eleg da awatan hu dasal tu? <sup>17</sup> Tep anin ni kayyaggud indasal yu, nem eleg ida mebaddangi hu edum yu et endi silbitu humman ni dasal yun hi-gada.

<sup>18</sup> Hedun hi-gak, ey nakka mansalamat nan Apu Dios, tep et-eteng hu indawat tun kabaelan kun mengi-hel ni nambakbaklang ni ehel nem hi-gayu. <sup>19</sup> Nem hedun yan tayu

\* **14:16** 14:16 Ya keibbellinan ni "Amen!" ey "Em numan!"

kakeemmuemmungin tayu kapandaydayawin Apu Dios, ey heballi anin ekket ni ebuh hu e-helen kun han-awat ni tuu nem ya hu nak e-helen hu dakel ni eleg da han-awat.

<sup>20</sup> Kaegiegi, entan tu iu-unnud di kapannemnem idan u-ungnga, tep pinhed kun heni kayuddan nangkenemnem. Nem hedin ya meippanggep ni lawah, ey pinhed kun heni kayuddan u-ungnga e ida kamenangpah. Nem hedin ya meippanggep idan nunyan tuttuddu, ey pinhed kun heni kayuddan nehiken di pengewwat yu. <sup>21</sup> Wada impatudek Apu Dios ni kantuy "Ittu-dak kuddalli beken ni Jews ni hin-appil ehel dan mengippeamtaddan tuuk ni tugun ku, nem kapyatun eleg da-ak dedngela." †

<sup>22</sup> Et humman hu, ya kabaelan ni mengi-hel ni nambakbaklang ni ehel ey beken ni immatun ni kekastiguan idan kamengullug nan Apu Dios, nem immatun ni kekastiguan idan eleg mengullug. Nem ya kabaelan ni mengituttuddun pinhed Apu Dios ni peamta ey humman kaumbaddang idan kamengullug, nem endi tu panyaggudan idan eleg mengullug. <sup>23</sup> Tep hedin neamung kayun mandaydayaw nan Apu Dios ey wada hakkeyey tuka pan-i-hel di hin-appil ni ehel ey neipaddih ni wadadda nekiemung ni hi-gayun eleg mengamtan elaw tu huttan winu eleg mengullug nan Apu Dios, ey kaw eleg da penghel ey kayu kaman-angngaw? <sup>24</sup> Nem hedin wada hakkey ni hi-gayu ey ituttuddu tu etan pinhed Apu Dios ni peamta, ey wada nekiemung ni eleg mengullug, nanna-ud ni ebbuluten tu e neliwatan ni nanggelan tun intuttuddu yu. Et nemnemen tu law e nanliwat <sup>25</sup> gapuh etan ni neipeamtan lawah ni elaw tun tuka itattalud nemnem tu et nanna-ud ni mandukkun ni menaydayaw nan Apu Dios et kantuy "Makulug ni wada hi Apu Dios ni hi-gayu!"

*Ya kayyaggud ni pehding hedin neamuamung itsun kamengullug ni menaydayaw nan Apu Dios*

<sup>26</sup> Ya pinhed kun e-helen ni hi-gayun kaegiegi, ey hedin neamuamung kayun menaydayaw nan Apu Dios, ey wada hakkeyey ippahding tu kabaelan tun neidwat ni hi-gatu ma-lat panyaggudan yun emin. Wada man-a-appreh, wada mantuttuddu, wada mengippeamtan impeamtan Apu Dios, wada um-ehel ni nambakbaklang ni ehel ey wada mengidwat ni keibbellinan tu. <sup>27</sup> Hedin wadadda um-ehel ni nambakbaklang ni ehel ni eleg meewwasi, ey hiyya hu dewwa winu tellun manhuluhulul ni um-ehel, ey mahapul ni wada mengidwat ni keibbellinan ni e-helen da. <sup>28</sup> Nem hedin endi nekiemung ni kabaelan tun menghel ni keibbellinan ni e-helen da, mahapul ni um-eneeneng ida malat ebuh hi Apu Dios ni nengamta etan ni da et e-helen.

<sup>29</sup> Dammutu hu dewwa winu tellun mengituttuddun pinhed Apu Dios ni peamta hedin neamung kayu, ey mahapul ni nemnemen idan mandedngel hedin makulug ni nalpun Apu Dios hu neituttuddu. <sup>30</sup> Nem hedin wada kaman-e-ehhel, ey wada impeamtan Apu Dios ni hakey ni tuu, ey mahapul ni issiked nunman ni kaman-e-ehhel ma-lat umhel dama etan wada impeamtan Apu Dios ni hi-gatu. <sup>31</sup> Ey kayyaggud hedin hi-gayun wada pinhed tun peamtan impeamtan Ispirituh Apu Dios, ey mehakkehakkey kayun um-ehel ma-lat wada inna-nuddan kamandeddengngel ni nengamta etan ni pinhed yun e-helen ma-lat maihammad hu yuka pengullug. <sup>32</sup> Yadda kamengituttuddun impeamtan Apu Dios ni hi-gada ey mahapul ni hangkekkenneng da annel da et hegeden da hu tsimpuh dan um-ehel. <sup>33</sup> Tep hi Apu Dios, ey eleg tu pinhed hu nengelangaw ni pandeyyaw, tep ya pinhed tu ey wada ulnus niya linggep di tayu kakeemmuemmungin menaydayaw ni hi-gatu.

Hedin neamung itsun menaydayaw nan Apu Dios <sup>34</sup> ey mahapul ni um-eneeneng ida bibi-i. Endi lebbeng dan an um-ehel, nem mahapul ni mengu-unnud ida, tep humman dama hu neitudek di Tugun. <sup>35</sup> Hedin wada pinhed dan ibbagan meippanggep etan di neituttuddu, ey ibbagedan ahwadad baley dan ennamutan da, tep beken ni lebbeng tun pehding ni bii humman di tayu kakeemmungi.

<sup>36</sup> Kaw beken ni kayyaggud huyyan tugun ku, winu kan yu na-mu nem hi-gayu hu nebukul ni mengituttuddun ehel Apu Dios, winu hi-gayun ebuh hu neituttudduan tu? <sup>37</sup> Hedin wada kayun kamenghel ni kantuy hi-gatu hu kamengituttuddun ehel Apu Dios winu wada kabaelan tun nalpun Ispirituh Apu Dios, mahapul ni nemnemen tu e huyyan nakka pan-ittudek ey intugun ni Apu tayu. <sup>38</sup> Nem hedin wada eleg mengebbulut nunyan nakka pan-e-hela, entan tu kulug humman ni tuu.

<sup>39</sup> Et humman hu, hi-gayun kaegiegi, gangami yu etan kabaelan ni mengituttuddun kapeamtan Ispirituh Apu Dios ni hi-gayu, nem entan tu ka-legidda hu wada kabaelan dan mengi-hel ni nambakbaklang ni ehel. <sup>40</sup> Nem mahapul ni neiptek hu pehding yud yuka keemmuemmungi, niya mahapul ni ya kayyaggud ni emin hu pehpehding yu.

† 14:21 14:21 Isaiah 28:11-12

## 15

*Ya elaw ni netagwan Jesus Christo*

<sup>1</sup> Kaegiegi, pinhed kun penemnem ni hi-gayu hu intuttudduk ni hi-gayun meippanggep ni panyaggudan tayun impahding Jesus Christo. Inebulut yu et humman neipuunan ni yuka pengullug. <sup>2</sup> Ya humman ni nengulugan yu hu nehelakniban yud kastigu yu et nema-ma-ma hedin nehammad hu yuka pengullug. Nem mahapul ni pannananeng yu yuka pengullug nan Jesus, tep endi silbitu hedin ehel ni ebuh hu yuka pengullug.

<sup>3-4</sup> Huyyadda importanteh ni intuttudduk ni hi-gayun neipeamtan hi-gak, e netey hi Jesus Christo gapuh ni liwat tayu, et maikulung et metagwan ni katlun aggew e humman inamnuan ni inhel Apu Dios ni meippahding. <sup>\*</sup> <sup>5</sup> Yan netagwan tu ey nampeang-ang nan Peter et han mampeang-ang ni hi-gadan emin ni hampulut dewwan apostles tu. <sup>6</sup> Entanni ey nampeang-ang di nehuluk ni liman gatut ni kamengullug ni hi-gatu. Ey ingganah nunya ey dakel ida mategun nenang-ang ni hi-gatu. <sup>7</sup> Entanni ey nampeang-ang mewana nan James et han mampeang-ang idan emin ni apostles.

<sup>8</sup> Hi-gak hu nanggillig ni nampeang-angan tu, et yan nunman hu nengulugan ku, † anin ni eggak ni pinhed ni mengu-unnud ni hi-gatu, tep lawah la ni hu elaw ku. <sup>9</sup> Et nemahhig hu impahpahding kun nanlelehanan idan tutu-un kamengullug nan Apu Dios. Et mukun kangkuy hi-gak hu kebababbahan ni apostle, niya beken pay ni lebbeng tun nak meibbillang ni apostle. <sup>10</sup> Nem gapuh ni binabbal Apu Dios ni hi-gak, ey impambalin tuwak ni apostle. Beken ni endi silbitu humman ni binabbal tun hi-gak, tep nemahhig hu nangngunungunuk nem yadda edum kun apostles. Beken ni gapuh ni kabaelan ku hu nengipahdingan kun ngunuk, nem gapuh ni baddang Apu Dios ni hi-gak. <sup>11</sup> Et anin ni hi-gak winu yadda edum kun apostles hu kamantuttuddu ey nan-inggeh hu mika ittutuddu e meippanggep nan Jesus et ya importanteh ey nengulug kayu.

*Ya elaw ni ketegguan idan kamengullug*

<sup>12</sup> Intuttuddu min hi-gayu e hi Jesus Christo ey simmagun neteyyan tu, et humman hu keang-angan tu e emin hu tuu ey umtagu idalli dama. Nem ay kele wadadda edum ni hi-gayun kahing e kanday eleg idalli umtagu hu nangketey ni hakey alin aggew? <sup>13</sup> Et hedin tep makulug ni eleg umtagu hu nangketey, eleg tep dama tumegu hi Jesus. <sup>14</sup> Et hedin makulug ni eleg taguen Apu Dios hi Jesus, endi tep silbitu hu intuttuddu min hi-gayu, et endi tep law silbi tun nengulugan yu. <sup>15-17</sup> Et hedin henin nuntan, maitek kami tep ni apostles, tep intuttuddu mi e sinegun Apu Dios hi Jesus. Et hedin makulug ni eleg ida umtagu hu nangketey, eleg tep dama tumegu hi Jesus, et endi tep silbitu hu yuka pengullug et nanengtun eleg mepesinsahan hu liwat yu. <sup>18</sup> Ey emin ida tep hu nangketey ni nengulug nan Jesus Christo, ey neidawwidda tep nan Apu Dios, et mekastiguddallin ingganah. <sup>19</sup> Et hedin makulug idan emin huyya, endi tep silbi tun nandinelan tayun Jesus hedin mettey itsu. Et hi-gatsu tep ni kamengullug hu angehemmek ni peteg di emin ni tuu. Hedini neituu itsun ebuh eyad puyek e eleg itsulli meteggui, ey ebuh tep ni ketaggu tayu eyad puyek ni pengippaptekan daitsun Jesus Christo.

<sup>20</sup> Nem ya kakulugan tu, ey netagwan hi Jesus Christo. Hi-gatu hu nemangulun netagwan et huyya hu keang-angan tu e yadda nangketey ni kamengullug ey metegguan idalli dama. <sup>21</sup> Emin itsu ey mettey itsulli, gapuh ni impahding etan ni hakey ni tuu e hi Adam. Nem emin itsu ey metegguan itsulli mewana tep ya impahding dama etan ni hakey ni tuu e hi Jesus. <sup>22</sup> Kamettey emin hu tuu, tep neilegat itsun nanliwatan Adam, nem metegguan itsulli gapuh ni neiegian tayun Jesus Christo. <sup>23</sup> Ey wada nagtud ni aggew ni ketegguan tayulli, tep ya nemangulun sinagwan Apu Dios ey hi Jesus, et yallin keibbangnadan Jesus ey hi-gatsun tuu tu dama tegguen tu. <sup>24</sup> Yallin nunman ey apputen Jesus idan emin hu ap-apun kamekibbuhul nan Apu Dios. Bahbahan tuddalli buhul tu, anin ya kabaelan da. Yan nunman ali pengippeang-angan Jesus e ebuh hi Ame tayun hi Apu Dios ni wada kelebengan tun man-ap-apun ingganah. <sup>25</sup> Tep nanengtun hi Jesus hu man-ap-apu ingganah apputen tuddan emin hu buhul tu. <sup>26</sup> Ya manggillig ni apputen tun buhul tayu ey ya katey. <sup>27</sup> Ya neitudek ni ehel Apu Dios ey kantuy "Pambalin alin Apu Dios hi Jesus Christo ni Ap-apun emin." Nem eleg meigappat hi Apu Dios, tep hi-gatu nalpuan ni kelebengan Jesus ni man-ap-apu. <sup>28</sup> Tep hedini inapput Jesus Christo ni emin hu buhul tu, ey hi-gatu hu mambalin ni Apun emin, et hantulli idinel nan Apu Dios ni man-ap-apun emin, tep hi Ametu hu keta-ta-geyyan di emin.

<sup>29</sup> Wadadda etan edum ni ida kapebenyag ma-lat penginemnemman daddan kapengullug ni aammed da niyadda agi dan nangketey. Nem gullat ni makulug hu kan idan edum e eleg idalli meteggui hu nangketey, kele daka pehding humman?

\* **15:3-4** 15:3-4 Psalm 16:8-10, Matt. 12:40 et ya Acts 2:24-32 † **15:8** 15:8 Acts 9:3-6

<sup>30</sup> Ey inna-nun hi-gami, gullat ni beken ni makulug e umtaguddalli netey, ey kele mika hanghanggaadda angetakkut ni ketteyyan ni kewa-wa-wa niya kele mika helheltapa hu ligat tep ya mika pengullug nan Jesus Christo?

<sup>31</sup> Hi-gayun aaggik ida, nakka hanghangгаа ketteyyan kun kewa-wa-wa tep ya nakka pengittuttudduin meippanggep nan Jesus. Nem et-eteng dama hu nakka pengiddeyyaw ni hi-gayu tep ya nungunnadan yun Apu tayun hi Jesus Christo. <sup>32</sup> Gullat ni makulug ni eleg umtagu hu nangketey, ku endi tep hu ginen-ud kun nak et ketteyyan di deya Ephesus ni nekihenanggaan kuddan buhul kun henidda layon. Heballi tep ya pan-amamlengan eyad puyek hu an hemmahemmaken et iu-unnud idan edum ni tuun ebuh biyag dad puyek ni daka nemnemema. Kanday “Pan-ekan tayu kuma hu hipan kenen niya pan-inum tayu hu hipan meinnum, tep kaw wadalli mewan law hedim mettey itu?”  
‡

<sup>33</sup> Entan kaheul yuddan tuun hannya daka pengullug, ey entan tudda deddengngel, tep lektattu ey mealdanan kayun lawah ni elaw da et mei-inggeh kayun hi-gada. <sup>34</sup> Kenemnemni kayu et isiked yu law ni mengapkapayan law ni lawah. Wadadda edum ni hi-gayun kamenghel ni ida kamengullug, nem eleg da amta hi Apu Dios. Kaw eleg kayu umbaing?

*Ya elaw ni annel tayulli hedim metegguan itu*

<sup>35</sup> Nem penghel yu na-muy “Inna-nun ketegguan ni netey? Hipalli inna-nun annel da?”  
<sup>36</sup> Ya etan tuun mengibbegan nunya ey endi nemnem tu. Kaw eleg yu amta e hedim ittanem yu hu bukel ey pakkaw ni i-e-hek et han tummel? <sup>37</sup> Heni etan ni pagey niyadda etan edum ni bukel, e hedim eleg meitnem, man mannenneng ni bukel ni ebuh. Nem hedim neitnem et simmemel, man hin-appil law hu ang-ang tu. <sup>38</sup> Emin nambakbaklang ni bukel ey eleg man-iinggeh hu ang-ang ni temel da, tep henin nunman pengapayan Apu Dios.

<sup>39</sup> Heni damaddan eyan mategun wadad puyek e nambakbaklang. Hin-appil annel idan tuu, yadda animal, yadda sisit niyadda deleg.

<sup>40</sup> Ey wadadda lintun Apu Dios eyad puyek et yad kabunyan. Nem nambaklang hu kakinyayaggud ni ang-ang idan wadad puyek et yadda wadad kabunyan. <sup>41</sup> Henin aggew, e kaumhili heyaw tu, nem ya bulan ey kaumheyaw dama, nem eleg umhili. Hin-appil dama dilag ni bittuwen tep kulang heyaw tu. Ey nambakbaklang hu kakinyayaggud ni ang-ang da. Anin ni yadda bittuwen et wada hakkeyey nambakbaklang hu kakinyayaggud ni ang-ang da.

<sup>42</sup> Ya gaputun nakka penghelin nunya ey ma-lat amtaen yu e hin-appil hu annel tayun nunya etan di annel tayullin ketegguan tayu. Tep kamettey hu annel tayun nunya, nem yalli etan metegguan ni annel tayu ey eleg ali mabalin ni mettey. <sup>43</sup> Ya annel tayu ey lawah ang-ang tu hedim netey, ey endi law kabaelan tu. Nem hedim metegguan ali, ey kakkayaggud hu ang-ang tu niya et-eteng kabaelan tu. <sup>44</sup> Hedim mettey itu, ey meikkulung hu annel tayud puyek. Nem hedim metegguan itu, hin-appil ali annel tayu e humman melpun Apu Dios. Gapu tep wada annel tayun nunyad puyek ey wadalli dama annel tayud kabunyan. <sup>45</sup> Makulug huuya, tep huuya kan ni impatudek Apu Dios e kantuy “Hi Adam hu nemangulun mategun tuu,” nem wada dama etan kandan Adam ni nanggillig e hi Christo. Hi-gatu hu Ispirituh ni kamengidwat ni biyag. <sup>46</sup> Ey ya meikkadwan biyag tayu ey yad kabunyan, et humman hu, ya nemangulu ey ya annel tayu eyad puyek, beken etan annel tayud kabunyan. <sup>47</sup> Ya etan nemangulun tuu e hi Adam ey nalpu annel tu eyad puyek. Nem hi Jesus e kameingngadnin neikadwan Adam, ey nalpu kabunyan et mambalin ni tuu. <sup>48</sup> Hi-gatsun tuu e helag Adam e nalpu annel tud puyek ey henin annel tu hu annel tayu. Nem yadda etan tuun dinwat da baluh ni biyag etan ni tuun nalpu kabunyan e hi Jesus Christo ey henillin annel tu annel da. <sup>49</sup> Neingingeh hu elaw ni neitu-wan tayun nunya etan ni neitu-wan nan Adam e nalpu annel tud puyek, nem mei-inggeh ali dama elaw ni neitu-wan tayun Jesus Christo e nalpu kabunyan.

<sup>50</sup> Kaegiagi, e-helen kun hi-gayu e huuyan annel tayun laman niya kuheyaw ey eleg mabalin ni mekihha-ad di nan-ap-apan Apu Dios. Tep huuyan annel tayu ey kamettey, eleg mannananeng ni ingganah e beken henin annel tayullid kabunyan.

<sup>51</sup> Dengel yu eya ittuttudduk ni hi-gayun nunya, tep huuya ey eleg la peamtan Apu Dios ni nunman. Beken ni emin itsun kamengullug ey mettey, nem emin itsulli, netey winu mategu, ey mehullulan ali annel tayu. <sup>52</sup> Ya kehullulan alin annel tayu ey mangkinnetang henin kapengimkinin mata. Meippahding ali huuyan manggillig ni tenul etan ni tangguyup di kabunyan. Ey meiddihhan ni metegguan ida kamengullug ni

nangketey ey mehullulan ali annel da. Anin hi-gatsullin mategu et mehullulan ali dama annel tayu et eleg itsulli law mettey. <sup>53</sup> Tep huyyan annel tayun kamettey ey mehullulan alin mannananeng ni annel e eleg mettey. <sup>54</sup> Yallin keippahdingan tu huuya hu amnuan etan ni impatudek Apu Dios e kantuy "Neapput hu katey." §

<sup>55</sup> Et humman hu, hi-gatsun kamengullug ey eleg itsu law umtakut ni mettey, tep makulug ni emin idalli hu kamengullug ni nangketey ey metegguan idalli et eleg idalli law mettey.

<sup>56</sup> Ya liwat hu gaputun tayu kaketteyi, ey ya eleg tayu pengu-unnudin Tugun Moses hu tayu kapanliwawasi. <sup>57</sup> Nem pansalamat itsun Apu Dios, tep tegguen daitisulli tep ya nengulugan tayun Apu Jesus Christo.

<sup>58</sup> Et humman hu, hi-gayun kaegiegi, entan tu peapput hu nemnem yu, nem ihammad yu hu yuka pengullug nan Apu Jesus. Ipapaptek yun kenayun hu ngunu yun indinel nan Apu Jesus ni hi-gayu, tep emin hu tayu kaippahding ni impangunu tu ey wada silbitu.

## 16

*Ya kaemmungaddan kamengullug ni pemaddang dan edum da*

<sup>1</sup> Ya law ittudek ku ey ya meippanggep ni yuka emmungan ibbaddang yuddan edum tayun kamengullug ni nangketewet di Jerusalem. Pinhed kun ippahding yu hu henin intuttudduk ni kapehding idan edum tayun kamengullug di kebebbley di Galatia.

<sup>2</sup> Ya kayyaggud ni pehding yu ey yan nemengngulun aggew ni hanlingguwan ey wada hakkeyey um-appil ni limmu tu meipuun di tuka lelmua, ma-lat hedini um-ali-ak ditan ey eleg law mahapul ni kayu mengemmung. <sup>3</sup> Tep ya pinhed ku ey hedini immali-ak, neidaddan ni neamung hu pinhed yun ibbaddang et pailaw tayuddan pillien yun mengillaw di Jerusalem. Ey mantuddekkak idan kamengullug diman ma-lat amtaen da e hi-gatsu nengitu-dak ni hi-gadan mengillaw ni ibbaddang yu. <sup>4</sup> Nem hedini mahapul ni mekillawwak, anin ikkuuyug kudda.

*Ya nannememan Paul ni tudda penang-angan ni kamengullug di Corinth*

<sup>5</sup> Ninemnem kun um-alidtan, nem manda-guhak nid Macedonia et mantuttudduak diman, et hannak la meda-puh ni an menang-ang ni hi-gayu. <sup>6</sup> Nakka nemnemema e mebabbayyaggak ni manha-ad ditan, anin na-mun ingganah ni kegibbuan ni ketel. Et wadan dammutullin wada ibbaddang yun hi-gak ni lawwak di edum ni bebley. <sup>7</sup> Eggak pinhed ni nekemtang ni ebuh hu panha-adan kud tan tep pinhed kun hedini um-ali-ak ey mebabbayyag hu pekihha-adan kun hi-gayu hedini i-abulut Apu tayu. <sup>8</sup> Nem ay pinhed ku nin manha-ad di deyd Ephesus ingganah medettengan hu Piyestah ni Pentecost, <sup>9</sup> tep dakel ida nemihned ni mengngel ni nakka ittenuttuddudya meippanggep nan Apu tayu, anin ni dakel ida buhul ku.

<sup>10</sup> Hedini umlaw ditan hi Timothy, peang-ang yu kayyaggud ni hi-gatu, tep hi-gatu hakey ni kamantuttuddun ehel Apu tayu e henin hi-gak. <sup>11</sup> Ang-ang yu et endi an manlalamhi ni hi-gatu, nem baddangi yu ma-lat melinggep ali pambangngadan tudya, tep nakka um-abtun peki-lian tudan edum ni agi tayun um-ali.

<sup>12</sup> Inhel kun Apolos e pinhed kun peteg ni meikkuyug idan edum tayun umlaw ditan, nem eleg tu ni pinhed. Kantuy beken nin nunya, nem hedini wadalli wayah tu, ey um-ali.

*Ya nangillig ni tugun nan Paul*

<sup>13</sup> Helipat-iyu et eleg kayu maheul ni mengippahding ni lawah. Ihammad yu hu yuka pengullug. Ey entan takut yun mengu-unnud ni tutttuddun Jesus. <sup>14</sup> Emin hu pehding yu ey ipahding yu gapuh ni impeminhed yun edum yu.

<sup>15</sup> Kaegiegi, inamta yu hu meippanggep nan Stepanas et ya pamilyah tu. Hi-gada hu nemangulun nengulug nan Jesus di bebley di Greece ey binenaddangan dadda edum tayun kamengullug. <sup>16</sup> Nak anhan kaibbagan hi-gayun kaegiegi e u-unnud yudda tuun henin nunman elaw da et yadda etan tuun kaumbenaddang di ngunun meippanggep nan Apu tayu.

<sup>17</sup> Nakka man-am-amleng ni illian di Stepanas, hi Fortunatus et hi Akaikus, tep hi-gada kamengi-ehneng ni hi-gayun umbaddang ni hi-gak, tep endi kayudya. <sup>18</sup> Impeamleng da-ak henin nengipeamlengan dan hi-gayu. Yadda henin nunyan tuu hu lebbeng tun metbal.

<sup>19</sup> Kan idan kamengullug di Asia ey dakeyu kanenemema. Hanniman damad Aquila nan Priscila et yadda edum ni kameki-emmung di baley dan kamandaydayaw nan Apu Dios e kanday dakeyu kanenemema tep ya nengulugan tayun Apu tayu. <sup>20</sup> Ey emin ida kamengullug di deya ey kanday dakeyu kanenemema.

Peang-ang yu hu yuka pan-impipinhedin yuka pandadammui, tep kayu kamengullug.

<sup>21</sup> Hi-gak hi Paul e nengipetudek nunya. Dakeyu kanenemnema daman hi-gak.

<sup>22</sup> Yadda etan eleg meminhed nan Apu tayu e hi Jesus ey mekastiguddalli et kuma. Ey mambanggad et law hi Apu tayu et ipaptek daitsun emin.

<sup>23</sup> Pinhed kun meweddan hi-gayun kenayun hu binabbal Apu tayu e hi Jesus.

<sup>24</sup> Et-eteng hu impeminhed kun hi-gayun emin tep ya nengulugan yun Apu Jesus Christo.



## Ya Neikadwan Tudek Paul idan Kamengullug di Corinth

<sup>1</sup> Huyyan tudek ey nalpun hi-gak e hi Paul e pinutuk Apu Dios ni pan-apostle nan Jesus Christo. Ya kadwak ni nengitudek nunya ey hi Timothy e agi tayu.

Tudek mi huyyan hi-gayun kamengullug nan Apu Dios di Corinth et yadda edum ni kamengullug di kebebheley di Greece.

<sup>2</sup> Pinhed kun meweddann hi-gayu hu binabbal niya linggep ni kamelpun Apu Dios e Ametayu et hi Jesus Christo e Apu tayu.

*Ya kapemaddangin Apu Dios ni hi-gatsud tayu kapanliggasi*

<sup>3</sup> Pansalamat itsun Apu Dios e Aman Apu tayu e hi Jesus Christo. Hi-gatu pansalamatan tayu tep mahmek niya hi-gatu hu kakelpuin emin ni baddang. <sup>4</sup> Baddangan daitsu ma-lat dammutun issipel tayun emin hu ligat tayu et wada inna-nu tayun umbaddang damaddan edum tayun neligan. Wada kabaelan tayun umbaddang tep ya nemaddangan daitsun Apu Dios. <sup>5</sup> Manlelehhan itsun peteg henin Jesus Christo tep ya tayu kapengullug ni hi-gatu, nem et-eteng ali dama pemaddang tun hi-gatsu. <sup>6</sup> Et mukun kami kamanhelheltap ma-lat baddangan dakeyu et mehelakniban kayu. Dakemi kabaddangin Apu Dios ma-lat wada inna-nu min memaddang ni hi-gayun mengissippel ni hipan yuka panhelheltapin henin hinelheltap mi. <sup>7</sup> Et-eteng dinel min pannananeng yu hu yuka pengullug tep inamta mi e anin ni kayu kamekililligat ni hi-gami, et baddangan dakeyun Apu Dios ni henin nemaddangan tun hi-gami.

<sup>8</sup> Kaegiegi, pinhed min peamtan hi-gayu hu nemahhig ni ligat ni hinelheltap mid probinsia di Asia, et kan mi ngu nem mettey kami. <sup>9</sup> Kan mi nem yan nunman law hu gintud Apu Dios ni ketteyyan mi. Nem inamta mi e neipahding ida humman ma-lat beken ni ya annel mi iddinel mi, nem ebuh hi Apu Dios e tuka teggua netey. <sup>10</sup> Hi-gatu hu nengihwang ni hi-gamid angetakkut ni ketteyyan mi, ey anin yan nunya et dakemi kaippaptek, et mukun kami kamedinnel e meihwang kami, anin ni hipa mekapkapy. <sup>11</sup> Em, nanna-ud ni meihwang kami, tep dakemi kabaddangid dasal yu. Et humman hu, hedin dakel hu mandasal ni keihwangan mi, ey dakel dama mampesalamat nan Apu Dios ni nanggulan tun dasal yu.

*Ya eleg pangituluayan Paul ni lawwan tu-et di Corinth*

<sup>12</sup> Kami kaum-amleng ni menghel e kayyagud hu wadad nemnem mid mika pekiddagyumiddan tuu, nema-man hi-gayu tep inu-unnud mi hu pinhed Apu Dios. Beken ni ya kalinaing ni tuu hu mi nengipahdingan ni henin nunya, nem gapuh ni baddang Apu Dios.

<sup>13-14</sup> Ya intudek min hi-gayu ey ebuh ida etan kabaelan yun bidbiden niya kabaelan yun ewwatan. Nem anin hedin kantu et ekket hu inewatan yun nunya, ey ewwatan yullin emin et anhan ni edum ni aggew. Et yallin pambangngadan Apu Jesus ey igaggaya dakemin hi-gayu henin hi-gami e igaggaya dakeyulli dama.

<sup>15</sup> Et-eteng hu dinel kun ebbuluten yuwak, et mukun ninemnem ku et ni mampidwak ni um-alin menang-ang ni hi-gayu, ma-lat meihammad hu yuka pengullug nan Jesus Christo. <sup>16</sup> Tep ya et hu pinhed ku ey manda-guhhak ditan ni lawwan kud Macedonia et hannak ali mewann manda-guh ni pambangngadan ku, ma-lat baddangan yuwak et ni lawwan kud Judea. <sup>17</sup> Nem anin ni eggak matuluy ni immali et entan tu panghel hu heni-ak etan ni tuun kamandinwa hedin wada implanuh tu, winu heni-ak etan ni tuun ma-nut kantuy "Em, ippahding ku huyya," nem wada kayad nemnem tu e eleg tu pehding hedin beken ni panyaggudan tu. <sup>18</sup> Tep bekennak ni henin nunman, tep nakka iu-unnud nan Apu Dios e eleg man-ittek. <sup>19</sup> Ey anin hi Jesus Christo e U-unggan Apu Dios, e meippanggep ni hi-gatu intuttuddu mid Silas ni hi Timothy ni hi-gayu, et tuka pehding ni emin hu tuka e-hela, endi eleg tu ippahding ni tuka da-yuni. <sup>20</sup> Tep hi-gatu hu kamengippeamnun emin ni impakulug Apu Dios. Et humman gaputun kan tayuy "Amen" di dasal tayu e ya keibbellinan tu ey itu kamedinnel nan Jesus e ebbuluten tu dasal tayu ma-lat madeyaw hi Apu Dios. <sup>21</sup> Hi Apu Dios hu kamengihhammad ni tayu kapengullug nan Jesus Christo, hi-gatu hu nemilin hi-gatsun pangngunnu tu. <sup>22</sup> Ey impaeli tu Ispirituh tun hi-gatsu ma-lat pengiummatunan tun hi-gatsu tuu tu ey humman keang-angan tun dewwatan tayun emin hu panyaggudan ni inhel Apu Dios ni iddawat tun hi-gatsu.

<sup>23</sup> Ya eggak alian ni menang-ang ni hi-gayu ey ma-lat wada inna-nu yun mantuttuyyun yuka pehpending, tep gullat ni immali-ak et imbunget dakeyu tep ya elaw yu. Hi Apu Dios hu mengi-uh-uh e makulug huuya, tep inamta tu nemnem ku. <sup>24</sup> Nem entan tu nemnem e mika pepillit pinhed min hi-gayu, tep inamta mi e neihammad law hu yuka pengullug. Nem ya pinhed min ebuh ni pehding ey baddangan dakeyu ma-lat man-am-amleng kayun mengu-unnud nan Apu tayu e hi Jesus Christo.

## 2

<sup>1</sup> Yan eman ni illian kudtan ey kayu kaumlemyung tep ya nengibungetan kun hi-gayu. Et mukun ninemnem kun heballi ew eggak um-ali mewan hedin pakkadek ni ibbunget dakeyu, tep eggak pinhed ni dakeyu mewan pelemyung. <sup>2</sup> Tep hedin pelemyung dakeyu, endi law mengippeamleng ni hi-gak. <sup>3</sup> Et mukun eggak umli et ya tudek ku impaelik, ey tep eggak pinhed ni nak mebe-ing gapuh ni lawah ni elaw yu. Tep gullat et dedan et hi-gayu hu mengippeamleng ni hi-gak. Tep inamtak et inamta yu e man-am-amlenggak hedin kayu dama kaman-am-amleng. <sup>4</sup> Et mukun yan eman ni nantudkan kun hi-gayun nunman ey makaggeh ni peteg hu nemnem ku niya nakka umkakaguh ni hi-gayu, gapuh ni lawah ni elaw yu, et nakka manlelewwan nakka pampengittuddekin nunman ni tudek ku. Beken ni ya dakeyu pengippelemyungan hu gapuh tun nantudekan kun hi-gayu, tep pinhed kun peamta hu et-eteng ni impeminhed kun hi-gayu.

*Mahapul ni pesinsahan yu hu lawah ni impahding ni edum yun hi-gayu*

<sup>5</sup> Ya etan hakey ni edum yun lawah hu kinapkarya tu ey beken ni hi-gak ni ebuh hu bineing tu, tep nema-man hi-gayun emin. Nem eggak pinhed ni nemahhig kumamman hu nak e-helen gapuh nunman ni impahding tu. <sup>6</sup> Tep hiyya humman ni impengastigu yun hi-gatu. <sup>7</sup> Et liwwan yu law humman ni lawah ni impahding tu et a-alluken yu. Tep hedin eleg yu pehding humman, ey lektat tu ey nanlu-lu. <sup>8</sup> Et mukun nakka ibbaga anhan ni hi-gayu e anin ni wada hanniman ni nambahulan tu et peang-ang yu hu makulug ni impeminhed yun hi-gatu. <sup>9</sup> Ya gaputun nantudkan ku lan hi-gayu ey pinhed kun amtaen hedin inu-unnud yu hu tugun kun kastiguen yu humman ni tuu ey ma-lat amtaen ku hedin u-unnuden yun kenayun hu nakka ittugun. <sup>10</sup> Nem nakka medinnet ni neiptek hu pehding yu. Et hedin pesinsahan yu hu bahul nunman ni tuu, ey pesinsahan ku dama gapuh nan Jesus Christo, ma-lat panyaggudan yu <sup>11</sup> niya ma-lat eleg daitu haulen nan Satanas, tep neka-amta tayu hu elaw ni haul tu.

*Ya kinakkaguhan Paul di Troas*

<sup>12</sup> Yan dintengan kud Troas ni an mengittuddun meippanggep nan Jesus Christo, ey inang-ang ku e indaddan Apu tayu etan ida tutu-un mengebbulut ni ittudduk. <sup>13</sup> Nem nedanagannak ni peteg, tep endi immalin Titus ni an mengiddetteng ni hi-gak hedin hipa ina-nu yu. Et mukun kangkuddan kamengullug diman ey "Ngenamung kayulli tep umlawwak." Et hi-yanen kudda et manglawwak di Macedonia ni an menang-ang ni hi-gatud man. \*

*Ya ngunun indinel Apu Dios ni hi-gatsu*

<sup>14</sup> Nem et-eteng nakka pansalamatin Apu Dios, tep tuka peang-ang ni kenayun hu nengapputan tun Satanas di kapemaddangin Jesus Christo ni hi-gatsu. Heni kami etan ni kayyaggud ni hamuy ni insensoh ni kahemmuyaddan tutu-u, tep hi-gami mengippeennamaddan katuutuun meippanggep nan Jesus, anin di attu lawwan mi. <sup>15-16</sup> Em, hi-gatsun kamengullug ey itsu kamei-ellig etan di kayyaggud ni hamuy ni kamengippeamleng nan Apu Dios, tep hi-gatsu kamengittudduddin tuun meippanggep nan Jesus Christo. Humman ni mika ittuddu ey heni kayyaggud ni hamuy ni kaumidwat ni ketegguan idan mengullug. Nem yadda etan kamengehding nunman ni mika ittuddu ey heni hamuy ni um-idwat ni ketteyyan da. † Huyyan ngunu ey neligat, et endi tuun han-ipahding tu huuya, hedin iddinet tun ebuh di kabaelan tu. <sup>17</sup> Nem han-ipahding mi huuya, tep hi Apu Dios hu kamengidwat ni kabaelan min mengippahding ni nunyan ngunu. Eleg kami man-ittek, nem ya panyaggudan ni emin ni tuu hu mika pantuttuddui, tep binega dakemin Apu Dios ni an mengittuddun meippanggep nan Jesus Christo. Hi Apu Dios ey tuka ang-anga mika pehpending tep bega-en dakemin Christo. Beken kami ngun henidda etan ni dakel ni tuun kamantuttuddu e ebuh hu

\* **2:13** 2:13 [12-13] Acts 20:1 † **2:15-16** 2:15-16 Ya keibbellinan nunya ey yadda neminhed ni mengullug, ey pinhed dan dedngelen hu kameittuddun meippanggep nan Jesus Christo, et wadalli biyag dan mannananeng di kad-an Apu Dios. Nem yadda kahing ni mengullug ey eleg da pinhed ni dedngelen. Mukun meiddawi idallin Apu Dios ni kenayun.

pihuh ni ellan dan daka gagamgami, tep ya daka pannemnem ey kameiggettang hu ehel Apu Dios.

### 3

#### *Ya etan baluh ni nekitbalan Apu Dios ni panyaggudan tayu*

<sup>1</sup> Wada na-mu mewan hu menghel ni hi-gayun mika ippahhiyya huayan ngunu mi tep ya huayan inhel ku. Ey kanyu na-mu mewan ey heniddan edum e pakkaw ni wada peang-ang min tudek ni hi-gayu et han yu abuluta ituttuddu mi, niya pakkaw ni um-ala kamin hi-gayun tudek et han dakemi abulutad lawwan mi. <sup>2</sup> Nem hedin hi-gami, man eleg mi mahapul ida henin nunman ni tudek tep hi-gayu hu heni tudek ni mengippeang-ang idan edum e kayyaggud hu mika ituttuddu. Tep inamta mi e nan-amta hu kayyaggud ni elaw yud katuutu, tep yuka u-unnuda hu intuttuddu mi. Et humman ni elaw yu ey heni tudek ni kamebidbid. <sup>3</sup> Humman ni kayyaggud ni elaw yu ey heni tudek ni impatudek Christo ni hi-gami, tep intuttuddu min hi-gayu hu elaw tu et heni etan ni neitudek law di nemnem yu hu elaw tu. Beken ni henin eman ni nebayag e ya Tugun Apu Dios ey neitudek di dewwan batun ebuh, nem yan nunya ey neitudek di nemnem yu hu elaw tu. Ya etan Ispirituh Apu Dios ni wadan ingganah hu nengitudek, beken ni tinta niya beken di batu neitudekan tu, nem yad nemnem yu.

<sup>4</sup> Mukun mika e-heladda huuya ey kami kamedinnet e ebbuluten Apu Dios hu ngunu mi tep ya baddang Jesus Christo. <sup>5</sup> Beken ni kan miy nalpun hi-gami hu kabaalan min mengippahding ni nunyan ngunu, nem hi Apu Dios hu nalpun ni kabaalan mi. <sup>6</sup> Hi-gatu hu nengidwat ni hi-gamin kabaalan ni mengippeamtan baluh ni nekitbalan tun meippanggep ni kehellakniban tayu. Huayan nekitbalan tun impeamtan Ispirituh Apu Dios ey beken ni henin Tugun Moses. Tep huayan Tugun ni neitudek ey ketteyyan ni tuu, tep ya etan eleg mengu-unnud nunyan Tugun Moses ey meiddawwin Apu Dios ni ingganah. Nem humman ni impeamtan Ispirituh Apu Dios ey kakelpuin biyag ni endi pappeg tud kad-an Apu Dios.

<sup>7</sup> Ya eman ni nenawatan Moses nunman ni Tugun Apu Dios ni neitudek ey nemahhig e kaumhili dayaw Apu Dios di angah nan Moses. Et anin eman ni kamangkeummah hu kaumhilin dayaw Apu Dios di angah tu et eleg mabalin ni itettekel idan helag Israel ni hi-gatu. Hedin hanniman hu dayaw tun neipeang-ang eman ni neidwatan nunman ni Tugun e ketteyyan hu pambalanan tu, <sup>8</sup> et nema-ma tep hu dayaw Apu Dios ni meippeang-ang etan di baluh ni nekitbalan tun impeamtan Ispirituh tu. <sup>9</sup> Tep ma-nut kamedeyyaw dana humman ni Tugun e kaumhulun ni kekastiguan idan eleg mengu-unnud, nem nema-ma hu dayaw ni peang-ang etan ni baluh ni nekitbalan Apu Dios ni pengibbillangan daitun hi-gatun kayyaggud. <sup>10</sup> Et humman ni Tugun ni kameiddeyyaw ni nunman ey endi law dayaw tu hedin i-inggeh tayud etan di et-eteng ni kakeiddeyyawin baluh ni nekitbalan Apu Dios. <sup>11</sup> Tep hedin et-eteng dayaw etan ni Tugun ni eleg ali mannananeng, ey nema-man et-eteng hu dayaw etan ni baluh ni nekitbalan Apu Dios, tep mannananeng alin ingganah.

<sup>12</sup> Et gapu tep kami kamedinnet ni nunyan baluh ni nekitbalan Apu Dios ey netuled kamin mengituttuddun meippanggep nunya. <sup>13</sup> Beken ni heni kami lan Moses e hinenian tu angah tu ma-lat eleg ang-angen idan helag Israel etan kaumhilin dayaw Apu Dios ni kamangkeummah di angah tu. <sup>14</sup> Nem ya kakulugan tu ey ya nemnem idan Jews ni nebayag ey heni nehpehan e eleg da han-awat ingganah nunya humman ni impatudek Apu Dios hedin binidbid da. Ebuh ida hu kamengullug nan Jesus Christo hu dammutun mengewwat ni meippanggep ni nunman. <sup>15</sup> Ingganah nunya ey anin ni bennidbiden idan Jews hu Tugun Moses et nanengtun eleg da han-awat, tep heni wada neihehid nemnem da. <sup>16</sup> Nem hedin mantuttuyyu hu tuu et kullugen tu hi Apu tayu, ey mekal etan heni neihehid nemnem tun kaumpapakkuk ni pengewwatan tun meippanggep nunman ni impatudek Apu Dios. <sup>\*</sup> <sup>17</sup> Humman ni kangkun Apu tayu ey ya etan Ispirituh Apu Dios. Et hedin hi-gatu hu meweddanan hi-gatsu, ey melibilih itu law di hipan elaw ni nangged ni hi-gatsu. <sup>18</sup> Et humman hu, hi-gatsun emin ni kamengullug ey endi law etan heni neihehid nemnem tayu, et hi-gatsu hu keang-angan ni dayaw Apu tayu e hi Jesus Christo. Ey itultuluy tun hullulan hu elaw tayu et lektattuy mei-inggeh itsun hi-gatu. <sup>†</sup> Humman daman Apu tayun menullul ni elaw tayu ey humman hu Ispirituh Apu Dios.

\* 3:16 3:16 Exodus 34:34-35 † 3:18 3:18 Romans 8:29

## 4

*Ya kabaelan tayun kamengullug ni mengan-anus ni hipan ligat tayu, tep ya baddang Jesus ni hi-gatsu*

<sup>1</sup> Himmek dakemin Apu Dios et mukun binega dakemin mengituttuudu eyan baluh ni impeamta tu. Et humman hu, eleg kami umhigan mengippahding nunyan ngunu, anin ni hipa panligligatan mi. <sup>2</sup> Dingkug midda hipan anggeba-ing ni elaw. Eleg mi he-uladda tutu-un pengewwiswan min hi-gadan mengullug nan Jesus. Ey eleg mi edumin itek hu mika ituttuudun ehel Apu Dios. Nem mika pehding emin kabaelan min mengituttuudu meippanggep ni nunyan makulug, ma-lat hedin dedngelen idan tuu, man amtaen dan makulug hu mika ituttuudu. <sup>3</sup> Nem wadadda etan edum e heni nehhephepan hu nemnem da et eleg da han-awat hu mika ituttuudun meippanggep ni impahding Jesus ni panyaggudan ni tuu, et hi-gadalli hu eleg mehellaknibi. <sup>4</sup> Hi Satanas e apun emin ni lawah hu nemahbah ni nemnem idan eleg mengullug et mukun eleg da han-awat hu kameituttuudun meippanggep ni dayaw Christo e kakei-ang-angin Apu Dios. <sup>5</sup> Ya mika ituttuudu ey ya meippanggep nan Jesus Christo e hi-gatu Apu tayu, e beken ni ya annel mi. Tep hedin hi-gami ey bega-en dakemin hi-gayu ma-lat mansilbi kamin Jesus. <sup>6</sup> Yan eman ni naltuan ni puyek ey engeenget et kan Apu Dios ey "Kaweda kan kawwalwal" ey newalwalan. Hi-gatu metlaing hu heni nanwalwal ni nemnem tayu ma-lat amtaen tayu hu dayaw Apu Dios ni wadan Jesus Christo.

<sup>7</sup> Kami kamei-ellig di pulan banga e kappepehnik, tep endi kabaelan mi, nem indinel tun hi-gami huyyan ngunu, tep pinhed tun peamta e hi-gatu kakelpuin kabaelan min mengippahding ni nunyan ngunu, beken ni hi-gami. <sup>8</sup> Dakel ligat min mika pengituttuudun meippanggep nan Jesus, nem eleg mi issiked, anin ni hin-addum ni kami kameteman pehding mi, tep kami kamedinnel e baddangan dakemin Apu Dios. <sup>9</sup> Dakemi kapanhelheltap idan edum ni tuu, nem eleg dakemi e-wayan Apu Dios. Ey e-eggel ni heni dakemi petteyen, nem gapuh ni et-eteng ni baddang Apu Dios, ey nanengtun mategu kami kaya. <sup>10</sup> Emin di ligat mi ey heni mika henniktami hu hinelheltap Jesus et han matey, nem huyya kamekapkapa ma-lat keang-angan tun mategu hi Jesus di annel mi, tep ya baddang tun hi-gami. <sup>11</sup> Yan eyan ketaggu mi ey heni mika hanghangaan kenayun hu ketteyyan mi tep ya mika pengippenahdingin impangunun Jesus. Nem eleg mi issiked, tep humman keang-angan tun wada hi Jesus ni kamemaddang ni hi-gami. <sup>12</sup> Anin hanniman e mika hanghangaan kenayun hu ketteyyan min mika pantuttuudi, ey anin nemet ya pambalanan tu ey wada hu biyag yun endi pappeg tu.

<sup>13</sup> Wada etan neitudek ni ehel Apu Dios e kantuy "Nenguluggak, et humman nak inihel di edum." Henin nunman dama mika pehpehding e mika an ene-ehhelad edum hu kinulug mi. <sup>14</sup> Tep inamta mi e gapuh ni nengulugan min Jesus ey tegguen dakemillin Apu Dios henin nenaganun tun Jesus Christo. Hanniman ali dama pehding tun hi-gayu ma-lat emin itsullin kamengullug ey ikkuyug daitsun Jesus di kad-an Apu Dios et makihaad itsun hi-gatun ingganah. <sup>15</sup> Pinhed min amtaen yu e emin huyyan kamekapkapa ey panyaggudan yu gapuh ni binabbal Apu Dios ma-lat medakkel ida tuun mengullug nan Jesus et ma-duman ida dama hu mansalamat ni hi-gatu et kaideyawan tu.

*Ya gangaman tayu ey ya baluh ni annel tayulli*

<sup>16</sup> Et humman hu, eleg kami umhigan mengu-unnud ni hi-gatu, anin ni kewa-wa-wa ey umkapuy ni umkapuy hu annel mi tep ya ligat. Nem kamangeihammad hu mika pengullug. <sup>17</sup> Huyyan beken ni nehalman ni mika panligligasi ey nekemtang ni ebuh ey mambalin ni et-eteng ni keiddeyyawan min ingganah di kad-an Apu Dios. <sup>18</sup> Et humman hu, beken ni ya kameang-ang eyad puyek ni kamepappeg hu mika gangami, nem ya etan eleg meang-ang hu mika gagangami e kamannanang ni ingganah.

## 5

<sup>1</sup> Makulug huyya, tep inamta tayu e mebahbah ali eya annel tayun heni baley tayu eyad puyek, nem hullulan alin Apu Dios ni eleg mebahbah ni annel ey mannananang ni ingganah di kabunyan. <sup>2</sup> Itsu kamanligligat eyad puyek, et mukun itu kaum-aabtun mehullulan hu annel tayu etan ni annel ni eleg mebahbah di kabunyan. <sup>3</sup> Tep hedin mettey itu, beken ni ya linnawa tayullin ebuh hu wadad kabunyan, tep anin ya baluh ni annel tayu et wada dama. <sup>4</sup> Ya annel tayu eyad puyek ey tuka panlelehmani ey wada pappeg tu tep kamettey, et humman hu, itu kaum-abtun mehullulan. Beken ni tayu kaabtui ketteyyan tayu, nem ya pinhed tayu ey mehullulan huyyan annel tayud puyek ni annel di kabunyan, et ya biyag tayudyan wada pappeg tu ey mehullulan ni biyag ni mannananang ni ingganah. <sup>5</sup> Indaddan daitsun Apu Dios ni menewwat ni nunman

ni baluh ni annel, et ya keang-angan tun makulug ni meippahding ali huyya ey ya nengidwatan tun Ispiritudun tun hi-gatsu.

<sup>6</sup> Et, itu kamedinnel e pehding Apu Dios humman. Ey inamta tayu e eleg itu mekihha-ad ni hi-gatud kabunyan hedini nanengtun mategu itu e wada eya annel tayun mebahbah ali. <sup>7</sup> Ya tayu kapandinnelin mekihha-ad itsun hi-gatu ey neipuun di tayu kapengullug nan Jesus. Eleg mahapul ni ang-angen et han kuluga. <sup>8</sup> Em, itu kamedinnel nan Apu Dios niya tayu kapehebbalin mekihha-ad nan Jesus e Apu tayud kabunyan ma-lat hi-yanen tayu eya annel tayud puyek. <sup>9</sup> Et humman hu, ya nenemnemen tayun ippahding ey ya pengippeamlengan tayun Apu Dios, anin ni wada itsudya puyek winu wada itsud kabunyan. <sup>10</sup> Tep yallin edum ni aggew ey um-ehneng itsullin emin di hinanggan Jesus Christo et huwetan daitu ma-lat hanhakkey ni hi-gatsu ey dewwatan tu hu lebbeng ni hipan idawat Jesus ni hi-gatsu insigun di impahpahding tayu. Ya tuun lawah impenahding tun ketaggu tu ey lawah gun-uden tu, et ya tuun kayyagud impenahding tu ey kayyagud dama gun-uden tu.

*Baluh law hu elaw tayu tep ya nengulugan tayun Jesus Christo*

<sup>11</sup> Inamta mi e angetakkut hu panhuwetan daitun Apu tayu, et humman hu, mika pehding kabaelan min mengewwis idan katuuun mengullug ni hi-gatu ma-lat eleg ida mekastigu. Inamtan Apu Dios e endi edum ni wadad nemnem min mika pengippahdingin ngunu mi, ebuh hu pengippeamlengan min hi-gatu, et nakka medinnel e anin hi-gayu et inamta yu e humman hu wadad nemnem mi. <sup>12</sup> Entan tu nemnem e kami kapetebatebbal ni hi-gayun mika penghelin nunya, nem pinhed kun peka-amtaen yu elaw mi ma-lat madinel kayun hi-gami niya amtaen yu hu penummang yudda etan ni tuun kamengippahhiyan daka pehpehding, e beken hu kakinayyagud ni ingkatuun hakey ni tuu. <sup>13</sup> Hedin wadadda kamenghel ni kanday heni kami kaman-angngaw ni mika pengituttuudun meippanggep nan Apu Dios, man anin, haggud keiddeyyawan tu. Nem kami kamedinnel ni amta yu e eleg kami man-angngaw, tep ya panyaggudan yu mika pehpehding. <sup>14</sup> Ya gaputun pinhed min peteg ni ituttuddu meippanggep nan Jesus Christo, ey tep et-eteng hu impeminhed tun hi-gatsun tuu. Et yan nunyan inamta tayu law e ingkatey Jesus hu panyaggudan ni emin ni tuu, ey inamta tayu dama e neibilang itsun emin di neteyyan tu. <sup>15</sup> Netey tep ya panyaggudan ni emin ni tuu, et humman hu, emin itsun mategu ey beken et ni ya annel tayu hu nenemnemen tayun peamleng, nem ya etan hu nengiketey ni hi-gatsu et metagwan.

<sup>16</sup> Et gapu tep hi-gatsun kamengullug ey neiegi itsun Jesus Christo, ey eleg tayu law ibbilang hu ingkatuun tuu henin kapehding idan eleg mengullug. Anin hi Jesus Christo et henin nunman hu nengibilang tayu dama lan nunman ni hi-gatu. Nem yan nunya ey beken ni henin nunman law hu tayu kapengibbilang ni hi-gatu, tep inamta tayu law e hi-gatu hu U-unggan Apu Dios. <sup>17</sup> Ya tuun nengulug nan Jesus Christo ey nambalin ni baluh ni tuu, tep nehullulan law ni kayyagud hu lawah ni neitu-wan tun nunman. <sup>18</sup> Impahding Apu Dios huyyan eman ni nengitu-dakan tun U-ungnga tu e hi Jesus Christo et matey ma-lat mepesinsahan hu liwat tayu. Mukun impahding tu humman ey ma-lat wada inna-nu tun mepappeg hu nekibuhulan tayun hi-gatu. Ey hi-gatsun kamengullug hu nengidinelan Apu Dios ni mengituttuudun meippanggep ni hi-gatuddan tutu-u ma-lat mekidagyum ida daman hi-gatu. <sup>19</sup> Ya pinhed kun e-helen ey ingkal Apu Dios hu kapekibbuhulin tuun hi-gatun nengitu-dakan tun Jesus Christo ni an netey di krus tep ya liwat tayu. Et huyya hu kayyagud ni peteg ni indinel tun hi-gamin mi ituttuddu.

<sup>20</sup> Et humman hu, intu-dak dakemin Apu Dios ni hi-gayun an mengituttuudun meippanggep nan Jesus Christo. Tep ya anhan pinhed mi ey ebbuluten yu hu impahding Christo ma-lat ma-kal hu nekibuhulan yun Apu Dios et maihammad hu yuka pekidagyumin hi-gatu. <sup>21</sup> Hi Jesus ey endi liwat tu, nem gapuh ni panyaggudan tayu, ey intu-dak Apu Dios ni an mengikketty ni liwat tayu ma-lat hedini mei-eggi itsun hi-gatu, man meilla-kam itsud kakinayyagud Apu Dios.

## 6

<sup>1</sup> Hi Apu Dios hu kaumbaddang ni hi-gamin kenayun eyad ngunu mi, et mukun kan min hi-gayu ey entan tu pakewah hu binabbal nan Apu Dios ni hi-gayu. <sup>2</sup> Tep kan Apu Dios etan di impatudek tu ey

“Yan eman ni nambagaan yun baddang ni hi-gak ey hinengud ku et baddangan dakeyu et helakniban dakeyu eman ni aggew ni gintud ku.” \*

\* 6:2 6:2 Isaiiah 49:8

Et humman hu, dengel yu tep e-helen kun hi-gayu e yan nunya hu penengngudan Apu Dios ni tuun kamabeggan baddang ni hi-gatu. Yan nunya hu gintud Apu Dios ni penellakniban tun tuu.

<sup>3</sup> Hi-gamin kamantuttuddu ey mika hellipati ma-lat endi mi pehding ni umhulun ni eleg pengullugiddan tutu-u nan hi Jesus niya ma-lat endi umhulun ni kepihhulan ni ngunu min indinel Apu Dios ni hi-gami. <sup>4</sup> Mika peang-ang e makulug ni bega-en dakemin Apu Dios di mika pengissippelin emin ni mika helheltapa. Dakel lawah ni kamekapkapyan hi-gami, e <sup>5</sup> inenablig dakemi, ingkalekalebut dakemi, inenambun dakemi, kami kameu-upa niya kami kametuttukal tep nemahhig ngunu mi. <sup>6</sup> Mika peang-ang e bega-en dakemin Apu Dios di kakinayyaggud mi, yad mika pengennusin ligat, yad nan-awatan min makulug ni elaw tu, niyad binabbal mi. Ey ka-immatun e wada Ispirituh Apu Dios ni hi-gamid nehammad ni impeminhed min edum mi. <sup>7</sup> Ya makulug hu mika ittuttuddu niya mika ippahding ni emin hu ngunu mi tep ya kabaelan Apu Dios ni wadan hi-gami. Ey gapu tep imbilang dakemin Apu Dios ni kayyaggud, ey kabaelan mi law ni mengapput idan buhul mi e hi Satanas niyadda etan dimonyoh tu. <sup>8</sup> Hin-addum ni kami kameiddeyyaw, nem hin-addum ni kami kamebe-ingi. Hin-addum ni dakemi katettebala, nem hin-addum ni inhapitan dakemin lawah. Kanday maitek kami, anin ni makulug hu mika e-hela. <sup>9</sup> Wadadda edum e kanday endi bilang mi, nem yadda edum ey daka tettebala hu ngunu mi et mukun nandingngel kami. Ey mika hanghangaan kenayun hu ketteyyan mi, nem kayyaggud kaya anhan et mategu kami. Neipahding ida huyya ma-lat panugun Apu Dios ni hi-gami, nem eleg tu iebulut ni kami mettey. <sup>10</sup> Anin ni hin-addum ni makaggeh nemnem mi, nem nanengtun kami kaman-am-amleng. Kanday newetwet kami, nem heni mi impakedangyan ida tutu-un intuttudduan mi, tep nengulug ida et mawedan hi-gada hu biyag ni endi pappeg tu. Ey anin ni en-endi-an kamin peteg, nem wadan emin ni hi-gami hu panyaggudan ni kamelpun Apu Dios.

<sup>11</sup> Hi-gayuddan kaegiegid Corinth, inhel min emin hu pinhed min e-helen ni hi-gayu, tep et-eteng hu impeminhed min hi-gayu. <sup>12</sup> Entan tu kan ey kulang hu impeminhed min hi-gayu, tep hi-gayu anhan law hu kulang impeminhed tun hi-gami. <sup>13</sup> Huyya hu nakka e-helan hi-gayu tep dakeyu kaibbilang ni u-ungngak, et humman hu, pinhed kun ibbilang yuwak daman a-ammed yu ma-lat ya impeminhed yun hi-gak ey henin kainetteng ni impeminhed kun hi-gayu.

*Ya eleg tayu pengi-ingngehin elaw tayud elaw idan eleg mengullug*

<sup>14</sup> Entan pakidagyum yuddan eleg mengullug nan Jesus, tep eleg mabalin ni man-unnud hu kayyaggud niya lawah ey ya kawwalwal niya eengeget. <sup>15</sup> Heni damad Jesus Christo nan Satanas e eleg mabalin ni ida man-unnud. <sup>16</sup> Entan tu kulug niya entan tu dayaw hu beken ni makulug ni dios, ebuh hi Apu Dios ni dayaw yu. Tep hi-gatsun kamengullug hu kapanha-adin Apu Dios e wadan ingganah. Huyya kantud impatudek tu:

“Yadda kamengullug ni hi-gak ey hi-gada hu panha-adan ku et wada-ak ni hi-gadan ingganah. Hi-gak hu Dios da et hi-gada hu tuuk.” †

<sup>17</sup> Huyya gaputun nanghelan Apu tayun kantuy:

“Mahapul ni eleg kayu mekiddagyum idan eleg mengullug. Entan tu ipahding hu lawah et abuluten dakeyun hi-gak, ‡ et hi-gak pan-emma yu ey hi-gayu pan-u-ungngak. Huyya inhel Apu tayu e Kabaelan tun emin.”

## 7

<sup>1</sup> Kaegiegi, huyyan emin hu impakulug Apu Dios ni pehding tun hi-gatsu. Et humman hu, dekeg tayun emin hu hipan lawah ni tayu kapehpehding niya lawah ni nemnem. Ikaahakey tayun mengippahding ni pinhed tu ey dayaw tayu ma-lat mambalin itsun kayyaggud.

*Ya kapan-am-amlengin Paul*

<sup>2</sup> Kayyaggud et hedini nehammad hu peminhed yun hi-gami. Endi met lawah ni mi impahding ni hi-gayu. Endin hi-gayu hu mi impambalin ni lawah niya endi mi hineul ni hi-gayu. <sup>3</sup> Beken ni ya dakeyu pengibbungngetan hu nakka pampenghelin hi-gayun nunya, tep inhel ku dedan ni hi-gayun nunman e et-eteng hu impeminhed min hi-gayu. Et anin ni hipa mekapkapyan hi-gami ey mannananeng humman ni impeminhed min hi-gayu. <sup>4</sup> Et-eteng dinel ku e nehammad hu yuka pengullug, et mukun dakeyu

† 6:16 6:16 Ang-ang yu Leviticus 26:12, Jeremiah 32:38 et ya Ezekiel 37:27 ‡ 6:17 6:17 Ang-ang yu Isaiah 52:11.

kaigaggayaddad edum ni tutu-u. Et humman hu, anin ni dakel hu mika panhelheltapi et nanengtun et-eteng hu amleng mi tep hi-gayu.

<sup>5</sup> Yan dintengan mid Macedonia ey endi linggep min peteg, tep anin ni attu lawwan mi et wada hu ligat mi tep anggebe-hel dakemin dakel ni tuu. Hakey pay ey nemahhig hu kaguh min pengiwwallengan yun yuka pengullug. <sup>6</sup> Nem hi Apu Dios e kamengippeamleng idan kaumlemyung ey impeamleng dakemin dintengan Titus ni nalpuan tullidtan. <sup>7</sup> Beken ni ya dintengan tun ebuh hu inamlengan mi, nem gapuh pay ni indaddatteng tun nengipeamlengan yun hi-gatu. Inhel tun hi-gami hu abtu yun menang-ang ni hi-gak niya nantuttuyuan yun lawah ni impahpahding yu, et ay et-eteng law hu neminhd yun mengu-unnud etan ni intudek kun hi-gayu.

<sup>8</sup> Nantuttuyuu-ak lan nantudekan kun hi-gayu, tep impelemyung dakeyu kumedek ni nekemtang tep ya humman ni tudek ku. <sup>9</sup> Nem ay nak law kaman-am-amleng ni nak nantudkan, nem beken ni gapu tep impelemyung dakeyu, nem gapuh ni nantuttuyuan yun liwat yu et kayyaggud law hu elaw yu, e humman hu pinhed Apu Dios. Et humman hu, wada silbi tun nantudekan ku, tep nambalin ni panyaggudan yu. <sup>10</sup> Ya tuun tuka ebbuluta nanliwatan tun Apu Dios, et mantuttuyuu ey hi-gatu mehella kniban. Ey ya etan tuun kaumlemyung tep ya lawah ni nambalinan ni liwat tu, nem eleg mantuttuyun Apu Dios ni nanliwatan tu ey meiddawwin Apu Dios ni ingganah. <sup>11</sup> Nem beken kayun henin nunman tep gapuh ni tudek ku ey nantuttuyuu kayun nanliwatan yun Apu Dios. Et pasiked yu etan lawah ni kamekapkapyad tan ni anggeba-ing, tep kayu kaumtakukt ni pengastiguan Apu Dios ni hi-gayu. Huyya nengipeang-angan yun eleg yu pinhed hu lawah ni kapehding ni edum yu, nem impahding yu kabaalan yu et kayyaggud kayu law. Et deh e pinhed yun um-ali-ak et kayyaggud mewan hu pandadaguyan tayu. <sup>12</sup> Beken ni panyaggudan ni ebuh etan ni tuun nambahul, winu etan tuun nambahulan tu hu gaputun nantudkan ku, nem nantudekkak ma-lat peamtak ni hi-gayu e et-eteng hu impeminhd yun hi-gamid hinangan Apu Dios. <sup>13</sup> Ey gapuh nunyan kayyaggud ni nambalinan ni tudek ku ey kami kaman-am-amleng.

Beken ni ebuh humman, nem nema-man kami kaman-am-amleng ni kapan-am-amlengin Titus ni nengipellingeapan yun hi-gatun inlian tud tan. <sup>14</sup> Tep ine-ehhel ku dedan nan Titus hu kakinnayyaggud yu et han umlid tan. Kayyaggud et impeang-ang yun hi-gatu e makulug ni emin hu in-inhel kun meippanggep ni hi-gayu, tep gullat et mebe-ingan nak hedin. Ey emin dedan hu inhel min hi-gayu ey makulug. Et yan nunya ey neipeang-ang e makulug hu in-inhel min Titus ni meippanggep ni hi-gayu. <sup>15</sup> Et-eteng law hu impeminhd tun hi-gayu, nema-ma hedin ninemnem tu hu mengu-unnudan yun hi-gatu niya nengipeang-angan yun hi-gatun kaguh yun mengippeamleng ni hi-gatu. <sup>16</sup> Et-eteng hu amleng kun hi-gayu tep nak law kamekaddinnel ni hi-gayu.

## 8

### *Ya baddang ni idawat idan kamengullug*

<sup>1</sup> Kaegiegi, pinhed min peamtan hi-gayu hu elaw ni nemaddangan Apu Dios idan kamengullug di Macedonia. <sup>2</sup> Anin ni nemahhig hu daka panligligasi et nanengtun et-eteng hu amleng da. Ey anin ni newetwet idan peteg, ey madewat ida et wada imbaddang daddan kamanheppul ni baddang. <sup>3</sup> Ey inamtak e beken ni ebuh hu hangkipuh dan daka nemnemneman idawat, nem induman da. Endi nemilit ni hi-gada, nem pinhed da ngu dedan ni um-idwat. <sup>4</sup> Tep hi-gada nanghel ni hi-gamin pinhed da daman umbaddang idan newetwet ni kamengullug di Jerusalem. <sup>5</sup> Et-eteng hu amleng min hi-gada, tep inu-unnud da hu pinhed Apu Dios ni pehding da et baddangan dakemi e humman dedan hu mika namnamahan pehding da. Ey kayyaggud pay hu impahding da, tep imbilang dan importanteh hu pengippeamlengan dan Apu Dios di emin ni daka pehding. <sup>6</sup> Kayyaggud huyyan impeang-ang idan tuud Macedonia, et mika nemnemneman kayyaggud et kuma dama hedin ittuluy yu etan yuka panaammungin ibbaddang yuddan nangkewetwet. Et mukun mika dennegeda hi Titus e nengilepun amnung yu eman ni nekiha-adan tun hi-gayu, e kan miy mambanggad di tan ma-lat baddangan dakeyun mengemmung ni i-ammung yu ma-lat megibbuh ni ngangu. <sup>7</sup> Inamtak e kayyaggud hu elaw yu, tep nehammad hu yuka pengullug nan Jesus, ey kabaalan yun mantuttuddun meippanggep ni hi-gatu, yuka peka-ewwasi hu meippanggep nan Apu Dios, et-eteng hu neminhd yun mengippahding ni ngunu tu, niya et-eteng hu impeminhd yun hi-gami. Kayyaggud emin huyyan yuka pehpehding, nem kayyaggud et hedin et-eteng hu neminhd yun umbaddang idan nangkewetwet.

<sup>8</sup> Eleg dakeyu pillitan um-idwat ni ibbaddang yu, nem intudek ku huyyan hi-gayu ma-lat amtaen yu hu impeminhd idan edum ni umbaddang idan nangkewetwet, et

u-unnuden yu humman ni kayyaggud ni elaw da et keang-angan tun makulug dama hu impeminhed yu. <sup>9</sup> Tep inamta yu hu impahding Apu tayun hi Jesus Christo ni nengipeang-angan tun binabbal tun hi-gatsu, tep anin ni wadan emin hu kayyaggud ni hi-gatud kabunyan et nambalin ni newetwet eman ni inlian tu eyad puyek et iketey tu liwat tayu ma-lat maila-kam itsud emin ni kayyaggud ni wadan hi-gatu.

<sup>10</sup> Nakka nenemnema e kedukdul hu gibbuhen yu huttan ni ammung yun inlapu yun matsaggew. Hi-gayu nemangulun neminshed ni um-idwat niya hi-gayu hu nemangulun immidwat. <sup>11</sup> Et humman hu, ituluy yu et gibbuhen yu humman ni inlapu yun ammung yu ma-lat keang-angan tu e et-eteng hu impeminhed yun mengibbuh ni nunman henin neminshed yun laputu. Ey emin kayu ey idwat yu hanggela yun iddawat. <sup>12</sup> Tep ya pinhed Apu Dios ey ya impeminhed tayun um-idwat. Tep hedin pinhed tayun um-idwat, man ebbuluten tu hu kumpulmih ni hanggela tayun iddawat, ekket winu eteng. <sup>13-14</sup> Beken ni kangkuy ihhanekul yun iddawat hu wadan hi-gayu et ibaddang yun edum yu, et hi-gayu kumedekek law hu meliggatan. Nem ya pinhed ku ey hedin hi-gayun wadwada-an ni nunya ey kayyaggud hu baddangi yudda etan en-endi-an ma-lat hedin edum ni aggew et hi-gayu dama hu mahapul tu hu baddang ey hi-gada hu wadwada-an, man baddangan dakeyu daman hi-gada et man-iingeh itsun endi meliggatan. <sup>15</sup> Henin impatudek Apu Dios ni meippanggep ida eman ni aammed tayun nengamuamung ni manna eman ni wadaddad desert e kantuy "Ya etan tuun dakel inemung tu ey endi tu hinewal. Ey ya etan tuun ekket inemung tu ey eleg mekulngan." \*

<sup>16</sup> Et-eteng mika pansalamatin Apu Dios, tep binaddangan tu hi Titus et ihik ni umbaddang ni hi-gayu, heni daman hi-gami e et-eteng neminshed min umbaddang ni hi-gayu. <sup>17</sup> Gapu tep pinhed tun peteg ni um-alidtan, ey kaman-am-amleng ni nengabulut ni inhel min um-alidtan ni bumaddang ni hi-gayu, tep nandadaddan ngu dedan ni um-alidtan. <sup>18</sup> Pekillaw mi lan hi-gatu eya hakey ni agi tayun kapekatbaladdan emin ni kamengullug di kebebbley, tep ya tuka pengituttuduin meippanggep ni impahding Jesus ni panyaggadan ni tuu. <sup>19</sup> Hi-gatu mewan hu piniliddan kamengullug ni mekillaw ni hi-gamin umbaddang ni mengiwwatwat etan ni meidwat idan nangkewetwet ni kamengullug. Huyyan ngunu mi ey keiddeyyawan Apu Dios niya huyya keang-angan ni neminshed min memaddang idan edum tayun kamengullug. <sup>20</sup> Paka-ippaptek ni pengikka-pengan mi eyan dakel ni pihhuh ni neamung ma-lat endilli ketuntumbukan mi. <sup>21</sup> Ya pinhed min pehding ey beken ni ebuh ni ya ketbalan mid hinanggan Apu Dios, nem anin daman yad hinanggan tuu.

<sup>22</sup> Pekillaw min Titus eyadda edum ni agi tayu. Impeka-amta mi e mahlun mengippahding ni kapengunnun Apu Dios niya pinhed tun peteg ni umbaddang ni hi-gayu, nema-ma tep et-eteng law hu dinel tun hi-gayu. <sup>23</sup> Hi Titus hu kadkadwak ni nangngunungunun pemaddangan min hi-gayu. Ey yadda eya dewwan agi tayun mekillaw ni hi-gatu hu intu-dak idan kamengullug. Yadda tutu-un henin hi-gada hu kakeidaydayawin Jesus Christo. <sup>24</sup> Et humman hu, peang-ang yun Titus et yadda eya pan-e-dum tu hu impeminhed yun hi-gada ma-lat pengipeang-angan idan kamengullug di kebebbley e makulug hu impeminhed yu niya amtaen da e makulug hu mika igaggayan meippanggep ni hi-gayu.

## 9

### *Ya pemaddangan tayuddan edum tayun kamengullug*

<sup>1</sup> Eleg mahapul ni nak mewan mantuddek ni meippanggep ni pihhuh ni emmungen yun ibbaddang yuddan kamengullug nan Jesus di Jerusalem di Judea. <sup>2</sup> Tep inamtak e hedin hi-gayu, man pinhed yun umbaddang. Et mukun, inggagaya dakeyuddad edum tayun kamengullug di Macedonia e kan kuy hi-gayuddan agi midtan Greece ey et-eteng neminshed yun umbaddang neipalpun matsaggew. Et humman hu, dakel ida dama law ni hi-gada hu neminshed ni umbaddang. <sup>3</sup> Nem itu-dak kudda huyyan agi tayu ma-lat baddangan dakeyun mengemmung ni iddawat yun pihhuh ma-lat meidaddan hu ibbaddang yu, tep eggak pinhed ni yad ehel ni ebuh hu nak pengigagayaan ni hi-gayu. <sup>4</sup> Tep inna-nu hedin wadaddalli meki-lin hi-gak ditan ni melpu Macedonia ey eleg yu ni pay idaddan hu ibbaddang yu? Tam kebe-ingan mi kumedekek, nema-man hi-gayu, tep inggagaya dakeyu tep ya neminshed yun umbaddang. <sup>5</sup> Et mukun ninemnem kun mahapul ni memengnguludda huyyan agi tayun um-alidtan ma-lat baddangan dakeyun mengiddaddan ni kanyun ibbaddang yu et kaddiweh alin ellian ku. Humman keang-angan tu e hi-gayu ngu dedan hu kan nemnem ni um-idwat, e beken ni dakeyu pinilit.

\* 8:15 8:15 Ya pinhed tun e-helen huyya ey ya etan tuun dakel inemung tu ey tuka iddawsu hu tuun ekket inemung tu.



<sup>6</sup> Nemnem yu eya kantuy “Ya tuun ekket ittanem tu ey ekket hu enniem tu. Nem ya tuun dakel ittanem tu ey dakel hu enniem tu.” <sup>7</sup> Wada hakkeyey ngenamung tun mengidwat ni ninemnem tun iddawat e beken ni pilit hu tu pengidwatan winu tu kawwanan hu iddawat tu. Tep pinpinhed Apu Dios ida etan tuun kaman-am-amleng ni um-idwat. <sup>8</sup> Hi Apu Dios ey kabaelan tun iddawat ni emin hu panyaggudan yu, ey anin hipa mahapul yu et iddawat tu ey e-edduman tu, ma-lat wada inna-nu yun umbaddang ni edum yu. <sup>9</sup> Tep ya etan madewat ni tuu ey hi-gatu neieligan ni impatudek Apu Dios ni kantuy  
 “Madewat ni peteg idan newetwet. Ya pambalinan nunman ni kayyaggud ni elaw tu ey mannenneng alin ingganah.” \*

<sup>10</sup> Hi Apu Dios hu kamengidwat ni kaittanem idan kamantennem niya hi-gatu hu kakelpuin kennen tayu. Hi-gatu mewan hu mengidwat ni hipan mahapul yu, niya eduman tu iddawat tun hi-gayu, ma-lat wadan nema-man e-etteng hu ibbaddang yuddan edum yu. <sup>11</sup> Iddawat tun kenayun hu mahapul yu ma-lat dammutun um-idwat kayun kenayun, et dakel ali tuun mansalalamat nan Apu Dios gapuh nunman ni iddawat yun mi iwwatwat.

<sup>12</sup> Tep ya pambalinan tu humman ni iddawat yu ey mebaddangan ida tuun Apu Dios di mahapul da niya man-an-ala idan mansalalamat nan Apu Dios. <sup>13</sup> Tep yad pemaddangan yuddan tutu-un Apu Dios hu keang-angan tun makulug ni yuka u-unnuda kaituttuddun Jesus, et gapuh nunman ey daydayawen da hi Apu Dios. <sup>14</sup> Et humman hu, et-eteng ali neminhed dan mandasal ni panyaggudan yu tep binaddangan dakeyun Apu Dios, et mambalin kayun madewat. <sup>15</sup> Ey pansalamat itsun emin nan Apu Dios tep indawat tun hi-gatsu U-ungga tu e humman panyaggudan tayun endi kei-ingnehan tu.

## 10

### *Ya kelebengan Paul ni mantuttuddu*

<sup>1</sup> Ya edum ni hi-gayu ey kandy hi-gak e hi Paul ey endi lebbeng kun umtugun tep ma-nu kunu hedin neidawwi-ak, tep nakka mengin-inhel di tudek kun penuggun kun hi-gayu, nem hedin kunun wada itsun emin, man nakka um-e-gen ni umtugun ni hi-gayu. Ya ihhumang kun nuntan ni inhel dan hi-gak, ey mukun endi tuled ku ey pinhed kun iu-unnud nan Christo e kababbal niya tuka pebabah hu annel tu. <sup>2</sup> Nem wada metlaing hu lebbeng kun umtugun, et humman hu, ya ibbagak anhan ni hi-gayu ey iyayyaggud yu elaw yu ma-lat eggak mapilit ni mengibbungnget ni hi-gayun ellian kullidtan. Tep makulug ni nehalman hu bunget kudda etan ni kamemihhul ni hi-gamin kandy ebuh hu panyaggudan min mika pehpending henin kapehding idan eleg mengullug. <sup>3-4</sup> Manut makulug ni wada neingnehan min hi-gada tep tuu kamin emin, nem ya mika pengapput idan kaumhanin pengamtaan idan tutu-un meippanggep nan Jesus, ey beken ni ya kalinaing ni tuud puyek, nem ya kabaelan min kamelpun Apu Dios. <sup>5</sup> Humman ni kabaelan ni indawat Apu Dios ni hi-gami hu mika pengapput ida etan ni tutu-un kamengituttuddun neihla niyadda etan tutu-un kamampahhiyyan eleg da pinhed ni amtaen hi Apu Dios, ma-lat mebalbaliwan hu daka pannemnem et hi Jesus Christo law hu u-unnuden da. <sup>6</sup> Nakka medinnel e iyayyaggud yu elaw yun mengu-unnud nan Christo, nem yadda etan nanengtun kahing ey kastiguen middallin ellian midtan.

<sup>7</sup> Mahapul ni awasi yu e beken ni ya kayyaggud ni ang-ang ni tuu hu pengibbillangan yun neitu-wan ni tuu. Hedin wadan hi-gayu etan tuka nemnemneman ebuh tun tuka peka-u-unnuda hi Jesus Christo, ey nemnem tu e beken ni ebuh tu, tep anin daman hi-gami et mika peka-u-unnuda hi Christo. <sup>8</sup> Anin na-mun kanyuy nehalman hu mika pengigaggayain kelebengan min mantuttuddu et eggak umbaing, tep huyyan kelebengan mi ey pemaddang min hi-gayu, beken ni pemahbah min hi-gayu. <sup>9</sup> Eggak pinhed ni heni dakeyu tattakkuten ni ebuh eyad tudek ku. <sup>10</sup> Tep wadadda etan kandy “Entan kaya tu hangud hu tugun nan Paul, tep ma-nut heni mabungget di tudek tu, niya heni wada kelebengan tun umtugun, nem hedin wadad kad-an tayu, man kamepihhul ang-ang tu niya endi amta tun umhapit.” <sup>11</sup> Nem pinhed min amtaen idan nunman ni tuu e makulug ni ippahding millin ellian mi humman ni inhel mid tudek mi.

<sup>12</sup> Eleg mi i-ingnehe hu elaw midtan kamampahhiyya, tep kami kaumbaing ni mengihhanniman. Ey beken kamin henin hi-gada e hi-gada ngu kamenghel ni kakkayyaggud ida nem ya edum ni tuu. Huttan ni inhel da kei-ang-angan tu e endi nemnem da.

<sup>13</sup> Hi-gami ngu, ey hedin mika igaggaya hu ngunu mi, man beken ni lawah, tep humman ey impangunun Apu Dios henin nengituttudduan min meippanggep nan Jesus

\* 9:9 9:9 Psalm 112:9

ni hi-gayu. <sup>14</sup> Ey neibilang kayu etan di indinel Apu Dios ni hi-gamin mi tuttuudun. Huyya keang-angan tun wada kelebengan min mantuttuudun hi-gayu, tep hi-gami nemangulun immalidtan ni nengituttuudun meippanggep nan Christo. <sup>15-16</sup> Et ya pinhed ku ey ewwatan yu e hedini hi-gami, beken kamin heniddan edum ni tuun daka pilliwa dayaw ni ingnunun edum. Tep ya gaputun nemahhig mika panggunun indinel Apu Dios ni hi-gami, ey tep pinhed min meihhammadu hu yuka pengullug ma-lat wada inna-nu mi daman mantuttuudun meippanggep nan Christo di edum ni bebley ni endi limmaw ni an nantuttuudu. Eleg mi pinhed ni idaydayaw hu ngunun edum, nem ebuh ngu etan ngunun indinel Apu Dios ni hi-gami. <sup>17</sup> Tep impatudek Apu Dios e kantuy "Ya tuun mampahhiyya ey mahapul ni ya impahding Apu tayu hu ippahhiyya tu." <sup>18</sup> Tep beken ni ya tuu hu mengippanghel ni kayyaggud hu elaw tu, tep hi Apu tayu hu mengippanghel hedini kayyaggud hu hakey ni tuu.

## 11

*Ya kaguh Paul ni pengiwallengan idan iCorinth ni daka pengullug nan Jesus*

<sup>1</sup> Anin ni heni-ak etan ni tuun endi nemnem tun kaman-e-ehhel et anusi yu anhan et dengelen yu hu ekket ni pampahhiyyaan ku. <sup>2</sup> Nakka umkakaguh ni hi-gayu, tep eggak pinhed ni wada edum ni u-unnuden yu, e beken ni hi Jesus Christo. Anin hi Apu Dios, et hanniman dama hu pinhed tu. Et mukun mahapul ni ippatek dakeyu ma-lat endi an memilliwi ni hi-gayu. Tep hi Jesus Christo hu kamei-ellig ni ingkalun kun hi-gayu e heni hi-gayu hu biin ahwaen tu. Et ya pinhed ku ey pakappinheden yu hi Jesus niya hi-gatun ebuh hu u-unnuden yu. <sup>3</sup> Ma-nu tep inamtak e neikahhakey hu impeminhed yun Jesus niya hi-gatun ebuh hu inu-unnud yu, nem ay nakka umkakaguh ni kehe-ulan yudda etan di beken ni makulug hu daka ituttuudu, et heni kayullin Eva e nehual ni itek etan ni uleg. \* <sup>4</sup> Tep nelakah yun kullugen hu kaituttuuddun edum ni kaumalin mantuttuudu, anin ni eleg maiunnud hu daka ituttuudu etan di mika ituttuudun meippanggep nan Jesus. Henin etan ni daka ituttudu e beken ni hi Jesus ni ebuh hu kameinellakni ni tuu niya hin-appil hu daka ituttuudun meippanggep ni Ispirituh Apu Dios.

<sup>5</sup> Kayu kameid-idngeli etan idan kanday apostles ida niya kanday endi mei-ingngeh ni hi-gada, nem inamtak e bekennak ni nebababah nem hi-gada. <sup>6</sup> Inamtak e wadaddan hi-gayu kamemippihil ni hi-gak e kanday beken nak ni nelaing ni umhapit. Ma-nut makulug ni beken nak ni mahepit, nem nakka medinnel e inamtak e makulug ni emin hu nakka e-e-hela niya anin ni hi-gayu et yuka ebbuluta, tep inamta yu impahding min nantuttuudun hi-gayu.

<sup>7</sup> Impebabah ku hu annel kun nengituttuudun kun hi-gayun meippanggep nan Apu Dios et ya impahding tun panyaggudan ni tuu, tep endi nak imbagan hi-gayun tangdan ku. Nem kaw lawah humman ni impahding ku? <sup>8</sup> Yan nantuttuudun kun hi-gayu, ey yadda edum ni kamengullug hu immidwat ni inggang kud mahapul ku. Gullat et dedan ey hi-gayu hu lebbeng tun mengidwat ni mahapul kun nantuttuudun kun hi-gayu. Nem beken, tep yadda edum ni kamengullug di edum ni bebley hu immidwat ni mahapul ku. <sup>9</sup> Ey yan eman ni wada-ak ditan e na-puhannak ni mahapul ku ey eggak mabagan hi-gayu, tep immi-lidda agi tayun iMacedonia ni mahapul ku. Et anin yan nunya et eggak mabagan hi-gayun mahapul ku. <sup>10</sup> Ey makulug ni eggak ali mabeggan hi-gayun mahapul ku ma-lat endi pengippuunan ni tutu-ud kebebheley di Greece ni mengippesikked ni hi-gak ni pengippahhiyyaan kun eggak pambagaan ni mahapul kun hi-gayu. Em, makulug huyya, henin kakulug ni nakka ittuttuudun meippanggep nan Christo. <sup>11</sup> Nem anin ni eggak mabeggan baddang ni hi-gayu ey entan tu panghel e eleg dakeyu pinhed. Tep makulug ni et-eteng hu impeminhed kun hi-gayu, ey anin hi Apu Dios et inamta tu.

<sup>12</sup> Henin nunman nak ngu, e beken nak ni henidda etan ni kandan hi-gada ustuh ni apostles, ma-lat endi da pemihhul ni hi-gak ni kanday "Endi nambaklangan mid Paul meippanggep ni ngunun Apu Dios, tep anin hi-gatu et tuka ella hu yuka ibbaddang, henin hi-gami." <sup>13</sup> Ya kakulugan tu, ey humman idan tuu ey beken idan makulug ni apostles, nem hi-gada etan kaumhual. Kanday apostles idan Jesus Christo, nem beken kaya. <sup>14</sup> Eleg itu metngaddan nunman, tep hedini dedan hi Satanas, man dammutun mambalin ni kakkayyaggud ni anghel. <sup>15</sup> Et humman hu, eleg itu metnga hedini yadda etan bega-en Satanas ey dammutu daman peang-ang da e heni kayyaggud hu daka pehding. Nem mekastigu idalli tep ya lawah ni daka pehpehding.

\* 11:3 11:3 Genesis 3:13 Revelation 12:9

*Ya nanligligatan Paul di ngunu tu*

<sup>16</sup> Ippidwak mewan ni e-helen ni hi-gayu e entan tuwak ibilang ni endi nemnem tu. Nem hedini humman hu yuka pannemnem ni hi-gak, ey anin, nem dengel yu anhan hu ituttudduk henin yuka peneddengelin keittuttuddun endi nemnem tu, ma-lat ipahhiyyak daman eket hu kelebengan kun mantuttuddu. <sup>17</sup> Makulug ni eleg pinhed Apu tayu eya nakka pan-e-ehhel nunyan nakka pampahhiya, tep henin nunman hu kapan-e-ehhel ni tuun endi nemnem tu. <sup>18</sup> Nem ay dakel ida kamengippahhiyyan annel da, et mukun ippahhiyyak dama annel ku. <sup>19</sup> Kanyuy nenemneman kayu, nem gullat ngun makulug et kele yudda kakukkuluga endi nemnem tu? <sup>20</sup> Ey gullat ni makulug ni nenemneman kayu, et kele nealay yuka u-unnudan emin hu kae-heladdan lingeman ni tuun hi-gayu, niya yuka ebbulutan anin ni pilliwen da hu limmu yu, niya anin ni lawah pehpahding dan hi-gayu? Ey kele yuka enusinan anin a-amihen dakeyu ey anin pampel-itan dakeyu? <sup>21</sup> Nakka ebbuluta hu yuka pemihhal ni hi-gak e kanyuy nekapuyyak ni peteg niya bekennak ni heniddan nunyan tuu, tep makulug ni nakka umbaing ni mengippahding ni henin daka pehpahding ni hi-gayu.

Nem hedini kanyuy kayyaggud ni netuled hu tuun mengippahhiyyan annel tu, ey anin hi-gak et mampahhiyya-ak dama henin etan ni tuun endi nemnem tu. <sup>22</sup> Hedini ida kamampahhiyya tep Hebrews ida, ey anin hi-gak et Hebrew hak dama. Hedini ida kamampahhiyya tep nahlag idan Israel, ey anin daman hi-gak et helag tuwak daman Israel. Ey hedini ida kamampahhiyya tep kanday hi Abraham hu nahlagan da, ey nahlaggak daman hi-gatu. <sup>23</sup> Hedini ida kamampahhiyyan kanday bega-en idan Jesus Christo, ey kedukdullak ni bega-en Jesus nem hi-gada. Heni-ak etan ni endi nemnem tun peteg tep ya nakka pengipahhiyyain nunya, nem makulug ni kedukdullak tep et-eteng impahding nun nengittuttuddun meippanggep nan Jesus nem hi-gada. Ey nemindakkel hu neikelakelabutan ku nem hi-gada tep ya nakka pengu-unudin Jesus Christo. Ey nanlehhannak ni peteg tep neenabliggak ey henin nak kahanghangгаа hu ketteyyan kun kewa-wa-wa. <sup>24</sup> Nampillima hu nengabligan da-ak idan edum kun Jews ni telumpulut heyam ni eblig. <sup>25</sup> Nampitlu hu nampemakdungan da-ak idan tuud Rome. Ey pinhakkey hu nantengbaan da-ak ni batu ey nampitlu hu nebahbahan ni bapor ni nanlugnan ku et yan pinhakkey, ey intenged kud nangkalkalyap ni keyew di baybay ni han-aggew et hanlabbi, tep naleng hu nanlugnan kun bapor. <sup>26</sup> Ey emin hu nak nandaldalan ey hineniktaman ku hu angetakkut. Inenagwat ku nandakkel ni danum di wangwang ey dinenamuk ida matekew ni memettey et ni hi-gak. Kenayan ni kaippenatnaddan Jews niyadda Gentiles ni mengippahding ni lawah ni hi-gak niya wadadda etan daka hingukkullugin Jesus, nem lawah gayam hu nemnem dan hi-gak. Ey emin di linallawwan kud kebebbley, anin ni yad baybay niyad eleg mebebbley, et angetakkut hu biyag ku. <sup>27</sup> Nakka metuttukal tep nemahhig hu ngunuk. Ey kadema ey kulang hu danum ni innumen ku, ya kennen ku, niya balwasik. Ey hin-addum ni endi panha-adan ku. <sup>28</sup> Dakel ida pay hu edum ni ligat kun hineneltap ku, nem ya hakey ni e-helen ku ey ya nakka pengikakkaguh idan emin ni kamengullug di kebebbley ni kewa-wa-wa. <sup>29</sup> Tep hedini wada hakey ni kimmappuy hu tuka pengullug nan Jesus, man nemahhig hu kaguh kun hi-gatu, ey hedini wada hu hakey ni nanliwat, man maggeh di nemnem ku.

<sup>30</sup> Et humman hu, hedini nepilitak ni mampahhiyya, ey ebuh ligat ku niya kakulang ni kabaelan kun nakka ippahhiyya. <sup>31</sup> Hi Apu Dios e Aman Apu tayu e hi Jesus Christo e kamedeyyaw ni kenayan, ey amta tu e makulug ni emin eya in-inhel ku. <sup>32</sup> Ey yan eman ni wada-ak di Damascus ey da-ak et pedpap etan di eheb ni bebley etan ni gubernor diman ni kamansilbin Aretas e patul. <sup>33</sup> Nem inha-ad da-ak di et-eteng ni gampa et padlan da-ak di habhabyen et buyunen da-ak di ba-hil ni tuping ni bebley et bumsikkak.

## 12

*Ya inang-ang Paul di i-innep tu*

<sup>1</sup> Beken ni kayyaggud hu nak ippahhiya hu annel ku, tep endi silbitu, nem gapuh ni hi-gayu ey nampahhiyyaak. Et yan nunya ey e-helen kun hi-gayudda hu impeang-ang nan Apu tayun hi-gak niyadda impeamta tu. <sup>2</sup> Wada etan hakey ni tuun kamengu-unnud nan Jesus ni inang-ang kun limmaw di kabunyan ni nekemtang. Hampulut epat ni toon law hu nelabah ni neipahdingan tu humman. Eggak amta hedini ya annel tu hu limmaw winu ya linnawetun ebuh. Hi Apu Dios ni ebuh hu nengamta. <sup>3</sup> Ippidwak ni e-helen, ebuh na-mu hu linnawetu, winu pati annel tu, nem eggak amta, ebuh hi Apu Dios ni nengamta. Nem inamtak e limmaw di kabunyan di kad-an Apu Dios. <sup>4</sup> Yan eman ni kaweda tud kabunyan ey wada hu dingngel tun hapit ni endi paka-hel ni keibbellinan

tu niya eleg i-abulut Apu Dios ni ene-ehhelen di kumpulmih ni tuu. <sup>5</sup> Gullat et, humman ni neipahding hu dammutun ippahhiyak, nem eggak pinhed ni ippahhiya. Tep ya ngu pinhed kun ebuh ni ippahhiya ey ya kakulang ni kabaelan ku. <sup>6</sup> Nem anin et dedan ni mampahhiyya-ak et bekennak ni henin etan ni tuun endi nemnem tu, tep ya ngu makulug hu e-helen ku. Nem eggak mampahhiyya, tep eggak pinhed ni humman hu pengibbillangan ni tuun hi-gak. Tep ya pinhed kun pengibbillangan da-ak ey meippuun di inang-ang dan impahding ku niya dingngel dan intuttudduk ni hi-gada.

<sup>7</sup> Et gapu tep eleg pinhed Apu Dios ni mampahhiyya-ak gapu ni nenang-angan kun nunman ni impeamta tun hi-gak ey in-abulut tu hi Satanas ni mengippeliligat ni hi-gak ma-lat endi inna-nuk ni mengippedaydayaw ni annel ku. <sup>8</sup> Nampitlu ngendiasalan kun Apu Jesus ma-lat ekalen tu huyyan ligat ku. <sup>9</sup> Nem kantu ey "Ya mahapul mu ey ya baddang kun hi-gam ma-lat dammutun ennusan mu hu ligat mu. Tep hedin wada pangkullangan ni kabaelan ni tuu, ey humman hu umhulun ni pengiddinnelan tun hi-gak et baddangan ku niya humman hu pengiggibbekan tun baddang ku." Humman hu kan Jesus ni hi-gak, et nakka man-am-amleng law ni mengippahhiyan kakulang kun mengan-anus ni ligat ku, tep hedin eggak pakeanus, man yan nunman nakka panggibbekin baddang Jesus Christo ni hi-gak. <sup>10</sup> Et humman hu, nakka um-amleng ni mengebbulut ni kakulang ku, ya daka pemennadngelin hi-gak niya daka peme-ibe-igin hi-gak tep ya nakka pengu-unnudin Jesus Christo. Tep hedin wada nakka pangkullangi niya hedin nakka meliggasi, ey nema-man kameihhammad hu dinel kun hi-gatu.

#### *Ya kaguh Paul idan tuud Corinth*

<sup>11</sup> Eggak et pinhed ni mampahhiyyan henin etan ni tuun endi nemnem tu, nem nakka mepillit tep hi-gayu. Gullat et ni eleg kayu meid-idngeli ey hi-gayu et hu menummang idan kamemihhul ni hi-gak. Tep anin endi bilang kun tuu, nem beken nak ni nebababah nem yadda etan kanyun nangketa-gey ni apostles. <sup>12</sup> Yan eman ni wada-ak ditan, ey impeang-ang kun emin ni hi-gayu hu pengi-immaturan yu e hi-gak hu hakey ni makulug ni apostle di nengan-anusan kun ligat ku, niyad nengipahdingan kuddan miracles niya hipan kamengippetngan tuu. <sup>13</sup> Eggak mangkulang ni impahpahding kun panyaggudan yu, tep nan-ingingeh hu nemaptek kun hi-gayu et yadda edum ni kamengullug di edum ni bebley. Ya inamtak ni ebuh ni eggak ipahding ni hi-gayu ey eggak mambagan ihheheme yun hi-gak. Pesinsahi yuwak hedin neihalla huyyan impahding ku.

<sup>14</sup> Nandaddan nak law ni um-ali mewan ni an menang-ang hi-gayu. Huyya law hu pitlu tun ellian ku, nem nanengtun eggak pinhed ni kayu manliggat gapun hi-gak, tep beken ni ya pihhuh yu hu nakka gangami, nem ya panyaggudan yu. Tep henin a-ammed e lebbeng tun ippaptek tu u-ungga tu. Beken ni ya u-ungga hu mengippaptek ni a-ammed tu. <sup>15</sup> Henin hi-gak e man-am-amlengngak ni mengummah ni emin ni wadan hi-gak, ey anin ni manliggattak gapuh ni hi-gayu nemet baddangan dakeyud yuka pengullug. Henin nunya hu kainetteng ni impeminhed kun hi-gayu, et kaw eleg yuwak pinpinhed dama? <sup>16-17</sup> Anin hi-gayu et amta yu e endin hekey hu nak nambagaan ni hi-gayun mahapul ku, nem wadan yuka kullugadda etan kamemihhul ni hi-gak ni kanday "Ma-nut beken hi Paul ni kaum-alin mengellan pihhuh tayu, nem netalam, tep tuka itu-dak hu edum ni tuun um-alin mengella et han da idwat ni hi-gatu." Nem kaw wada indawat yun pihhuh ni indawat dan hi-gak? Endi. Inamta yu et endi nak itu-dak ni netalam ni hi-gayu. <sup>18</sup> Intu-dak ku hi Titus ni immalid tan ey impakilaw ku etan agi tayun pangkadwa tu. Nem kaw hineul dakeyu Titus et wada tu illan hi-gayu? Inamta yu et endi inla tu, tep hedin hi-gamin dewwa, man nan-ingingeh hu nemnem mi niya elaw mi.

<sup>19</sup> Wadan penghel yuy intudek midda huyyan hi-gayu ma-lat paneni mi etan ni daka pebehhlun ni hi-gami. Nem beken tep ya keihhammadan ni yuka pengullug nan Jesus hu gaputun nantudkan min hi-gayu. Ey inamtan Apu Dios e makulug huyya. <sup>20</sup> Nakka um-ag-agel tep entanniyun ellian ku ey bellawen yuwak ni pengibungetan kun hi-gayu hedin amtaen kun wada beken ni kayyaggud ni yuka pehpehding e kayu kamandedeppap, kayu kaman-in-aameh, kayu kamanhimbubunget, makuliput kayu, yuka bahbaha edum yu tep ya itek ni yuka e-helan meippanggep ni hi-gatu, metumbuk kayu, kayu kamampahhiyya, niya wada hakkeyey tuka ippilit hu pinhed tu. <sup>21</sup> Makulug ni nakka um-agel, tep entannit um-ali-ak ditan ey mebabba-ingannak nan Apu Dios ey umlemyungngak hedin wadadda eleg mengiwalleng ni lawah ni daka pehpehding, henin pengippahdingan ni anhihimugal, ya pengi-ulligan ni beken ni ahwa, niya hipan angebada-ing ni kapehding.

## 13

*Ya nanggillig ni tugun Paul idan tuud Corinth*

<sup>1</sup> Yan ellian ku hu pitlu tun nak penang-angan ni hi-gayu. Hedin nanengtun wadaddan hi-gayu hu lawah daka pehpehding, ey eggak ida hehmekad kekastiguan da, tep u-unnuden ku hu impatudek Apu Dios ni kantuy "Ya tuun nambahul ey mekastigu hedin wada dewwa winu tellun mengihhuddut ni bahul tu." <sup>2</sup> Ya eman ni pidwa tun illian ku, ey inhel kudda etan ni kamengippenahding ni lawah niya inhel kun hi-gayun emin e kangkuy hedin eleg kayu mantuttuyun liwat yu, ey eleg dakeyu hehmeda, tep kastiguan dakeyu. Ey ippidwak mewan nunyan e-helen e nemahhig hu kastigu etan ni mengippahding ni hipan lawah. <sup>3</sup> Ey gapu tep pinhed yun peang-ang ku hu kakulugan tun indawat Jesus Christo hu kelebengan kun mantuttuddun meippanggep ni hi-gatu, ey peang-ang kullin pengastiguan kuddan etan ni kamanliwwaliwwat ditan, ma-lat pengamtaan yu e hi Jesus Christo ey et-eteng hu kabaelan tun mengastigun hi-gayu, tep impeang-ang tu e et-eteng ni peteg kabaelan tu. <sup>4</sup> Yan eman ni neteyyan Jesus di krus, ey heni endi kabaelan tu, tep netey, nem sinegun Apu Dios tep et-eteng kabaelan tu. Heni kamin hi-gatu la e wada kakulugan ni kabaelan mi, nem gapuh ni kabaelan Apu Dios, ey meilla-kam kamid biyag nan Jesus, et humman hu, endi pangkullangan ni kabaelan min mengastigun hi-gayu.

<sup>5</sup> Nemnem yu hu elaw yu hedin makulug ni wada yuka pengullug nan Jesus winu endi. Kaw eleg yu amta e wada hi Jesus ni hi-gatsun kamengullug? Nem hedin eleg yu kullug hi Jesus, humman keamtaan tu e beken dakeyu tuun hi-gatu. <sup>6</sup> Nem nakka medinnel e anin ni hi-gayu et inamta yu e makulug ni tuu dakemin Jesus. <sup>7</sup> Beken ni ya pengippeang-angan min kakulugan tu e wada hi Christo ni hi-gami hu mika nenemema, nem ya pengiddasalan min hi-gayu ma-lat eleg yu ipahding hu lawah. Tep ya pinhed mi ey ya kayyaggud hu pehpehding yu, anin ni humman hu eleg mi pengippeang-angan indawat Jesus Christo ni kelebengan min mengastigun hi-gayu. <sup>8</sup> Tep ya ngunun indawat Jesus Christo ni hi-gami ey baddangan midda hu tuu tu ma-lat maihammad hu daka pengullug etan di makulug ni kameituttuddu meippanggep ni hi-gatu, beken ni mi hennian hu pengullugan da. <sup>9</sup> Kami kaman-am-amleng, anin ni endi inna-nu min mengippeang-angan ni kelebengan min umkastigu hedin makulug ni nehammad hu yuka pengullug. Et humman hu, kami kamandalan nan Apu Dios ma-lat meihhammad ni peteg hu yuka pengullug nan Jesus, et hi-gatu mewan peka-u-unnuden yu. <sup>10</sup> Et mukun pemengguluk huyyan tudek kun hi-gayu, ma-lat hedin um-ali-ak ditan, ey eleg mahapul ni dakeyu ibbunget, et beken mewan ni maggeh hu nemnem yun hi-gak ni pengippeang-angan kun hi-gayun kelebengan kun indawat Apu tayun mengastigudda etan ni kamengapkapan lawah. Tep pinhed kun ussalen ku hu kelebengan kun umbaddang ni mengihhammad ni yuka pengullug, beken ni ya kebahbahan ni yuka pengullug.

<sup>11</sup> Ya manggillig ni e-helen kun hi-gayun kaegiegi ey iyayyaggud yu elaw yu. U-unnud yu anhan huyyan tugun kun hi-gayu e pandadagyum kayu ma-lat melinggep kayun emin. Hedin ippahding yudda huyya, ey hi Apu Dios e kakelpuin kapeminhed niya linggep hu wadan hi-gayun kenayun. <sup>12</sup> Hedin meemmuemmung kayun emin ni menaydayaw nan Apu Dios, ey peang-ang yu hu impeminhed yun edum yu niya panhin-aapnga kayu.

<sup>13</sup> Emin ida eya tuun Apu Dios di deya ey kanday dakeyu kanenemneman hi-gada.

<sup>14</sup> Ya pinhed ku ey meweddan hi-gayu hu binabbal nan Apu tayu e hi Jesus Christo, ey gibbeken yu hu nehammad ni impeminhed Apu Dios ni hi-gayu, niya gibbeken yu hu baddang ni Ispirituh tu ma-lat kayyaggud hu pandadagyuman yu.

## Ya Tudek Paul idan Kamengullug di Galatia

<sup>1</sup> Huyyan tudek ey nalpun hi-gak e hi Paul e neputuk ni apostle ni mengituttuddun meippanggep nan Jesus Christo. Beken ni ya tuu nemutuk ni hi-gak, nem hi Jesus Christo et hi Ama Apu Dios e nenagun hi-gatun neteyyan tu. <sup>2</sup> Emin kami eyaddan agi tayudya ey dakeyu kanenemneman kamengullug di kebebbley di Galatia.

<sup>3</sup> Pinhed kun meweddan hi-gayu hu binabbal niya linggep ni kamelpun Ametayu e hi Apu Dios et hi Jesus Christo e Apu tayu. <sup>4</sup> Hi Jesus ey ingkatey tu hu peneklaan tun liwat tayu ma-lat wada inna-nu tun kehellakniban tayu eyad lawah ni kapehpehding idan tutu-un nunya, tep humman hu pinhed Apu Dios e Ametayun pehding nan Jesus ni hi-gatsu. <sup>5</sup> Et humman hu, lebbeng tun meidaydayaw hi Apu Dios ni ingganah. Amen.

### *Ya tayu kapengullug nan Jesus hu menellaknib ni hi-gatsud liwat tayu*

<sup>6</sup> Natnga-ak ni peteg ni hi-gayu tep nekemtang mewan anhan ni ebuh ey yuka pan-iwwalleng hi Apu Dios e nengbilang ni hi-gayun u-ungnga tu gapuh ni binabbal Jesus Christo, e beken law ni hi-gatu hu yuka u-unnuda. Tep kayu law kahindengelin hin-appil ni kameituttuddu e eleg meiuunndu di inedal yun kapenellaknibin Apu Dios ni hi-gatsu. <sup>7</sup> Endi edum ni makulug ni kameituttuddun kehellakniban yu, tep ebuh hu meippanggep nan Jesus Christo ni intuttuddu min hi-gayu. Et humman hu, nakka e-helan hi-gayu e neihla humman ni yuka deddengelan daka ituttuddu. Tep itten idadnan hu kamene-uheul ni hi-gayu e daka hehhehwia hu intuttuddu min hi-gayu. <sup>8</sup> Nem e-helen kun hi-gayu e anin na-mun hi-gami winu yadda anghel di kabunyan hu un-alin mantuttuddun hin-appil, e eleg maiinggeh di intuttuddu min inebulut yun nunman, et kastiguen Apu Dios. <sup>9</sup> Deh e pidwaen ku mewan ni e-helen ni hi-gayu e kastiguen Apu Dios hu hipan tuun mengituttuddun hin-appil ni kameituttuddun eleg maiinggeh di intuttuddu min inebulut yun nunman.

<sup>10</sup> Kan idan edum ni tuu ey ya penettebalan da-ak ni tuu hu nakka gagamgami, nem huyyaddan nakka pan-e-hela hu keang-angan tun beken ni ya tuu hu pinhed kun peamleng, nem hi Apu Dios ni ebuh. Gullat ni ya tuu hu pinhed kun peamleng, ey beken et hi Jesus Christo hu nakka u-unnuda.

### *Ya impeamtan Jesus hu kaituttuddun Paul*

<sup>11-12</sup> Kaegiegi, deh e e-helen kun hi-gayu ma-lat amtaen yu e huyyan nakka ituttuddun meippanggep ni kehellakniban tayu ey eleg meipuun di kapannemnem ni tuu niya beken ni ya tuu mengituttuddun hi-gak. Nem huyyan nakka ituttuddu ey impeamtan Jesus Christo ni hi-gak.

<sup>13</sup> Dingngel yu e hi-gak ey nemahhig hu nakka pengu-unnud lan nunman ni elaw min Jews ey endi hemek kuddan kamengullug nan Jesus, tep nanlelehanan dan peteg hu impahpahding kun hi-gada, ey impatnak hu kabaelan kun mengippesikked ni daka pengullug. <sup>14</sup> Emin ida etan keingngeh kud toon ey hi-gak hu nemahhig hu nengu-unnud tun elaw min Jews, tep naka-u-unnud kun peteg hu elaw idan aamed mi.

<sup>15</sup> Nem kabbabbal ni peteg hi Apu Dios ni hi-gak et putuken tuwak ni mansilbin hi-gatu eman ni eggak ni maiungnga. \* <sup>16</sup> Et yan eman ni impeamtan tun hi-gak hi Jesus Christo e U-ungnga tu et nak ituttudduddan Gentiles hu meippanggep ni impahding tun panyaggadan ni tuu, ey eggak lumaw di hipan tuun an nampetuttuddu. <sup>17</sup> Ey eggak lumaw di Jerusalem ni an nenang-ang idan nemappanggulun apostles winu an nengibegan hi-gadan pehding ku. Tep ya impahding ku, ey nedagahhak di Arabia et han nak ngu law mambanggad di Damascus.

<sup>18</sup> Nelabah tellun toon et han nak lumaw di Jerusalem ni an nenang-ang nan Peter et makiha-addak diman ni hampulut liman aggew. <sup>19</sup> Endi edum ni nak inang-ang diman ni apostle, ebuh tu et hi agin Jesus e hi James. <sup>20</sup> Hedin hi-gak, man eleggak manlangkak et nakka issapatahan nan Apu Dios e makulug eya nakka pan-ittudek. <sup>21</sup> Nelabah humman ni dewwan linggwan e umgahhak di Jerusalem et lumawwak di Syria et yad Cilicia. <sup>22</sup> Yan nunman ey eleg da-ak ni amtaddan kamengullug nan Jesus Christo di kebebbley di Judea. <sup>23</sup> Ya dingngel dan ebuh ni meippanggep ni hi-gak, ey ya inhel idan edum ni kamengullug e kanday "Humman ni tuu ey impanhelheltap daitsun kamengullug, niya nemahhig e impahding tun emin hu kabaelan tun mengippesikked ni tayu kapengullug, nem yan nunya law ey ya meippanggep nan Jesus hu tuka ituttuddu." <sup>24</sup> Ey emin ida ey daka idaydayaw hi Apu Dios gapuh ni neipahding ni hi-gak.

\* 1:15 1:15-16 Ang-ang yu Acts 9:3-6, ya 22:6-10, et ya 26:13-18

## 2

*Kaebbulutaddan kamengippangngulluddan kamengullug di Jerusalem e neiptek hu kaituttuddun Paul*

<sup>1</sup> Nelabah hampulup epat ni toon et maibangngaddak di Jerusalem e ingkuyug kud Barnabas nan Titus ni pangkadwak. <sup>2</sup> Limmawwak diman tep impeamtan Apu Dios e mahapul ni umlawwak. Dimmateng kami et ayagan kudda hu kamengippangngulung kamengullug et e-ebbuh kamin nanhuhummangan, et ehelen kun hi-gada hu intuttudduk idan Gentiles hu meippanggep ni impahding Jesus Christo ni nenelakni ni hi-gatsu. Tep mahapul ni ebbuluta da hu nak intuttuddu, tep hedin eleg da ebbuluta, ey penghel ida etan ni kaumkahing ni hi-gak ey beken ni makulug hu intuttudduk. <sup>3</sup> Nem kayyaggud et inebulut da, et anin hi Titus e Gentile ni impangkadwak, et eleg da piliten ni mampekuggit, anin ni humman hu elaw min Jews. <sup>4</sup> Wadadda etan nei-dum ni kahingkukkullugan dan Jesus e kanday mahapul ni mekuggit hi Titus, nem eleg mi abuluten. Nekiammuammung ida humman ni tuun hi-gami, tep pinhed dan bahbahen hu nelibhian tayud elaw ni Jews tep nengulug itsun Jesus Christo. Ya pinhed da ey hi-gada hu meu-unnud. <sup>5</sup> Nem kinehing midda, tep eleg mi pinhed ni metellak ni hi-gayu hu makulug ni kameituttuddun meippanggep nan Jesus.

<sup>6</sup> Anin ida etan ni kametbal ni kamengippangngulung kamengullug, et endi da in-edum di nakka ittenuttuddu. Anin ni kangkuy ida kametbal, et ya kakulugan tu ey naniingeh emin hu tuud kapengibbillang Apu Dios. <sup>7</sup> Huyyaddan kamengippangngulu ey daka ebbuluta e pinutuk tuwak nan Apu Dios ni apostle ni mantuttudduddan Gentiles ni meippanggep nan Jesus, heni daman Peter e pinutuk Apu Dios ni apostle ni mantuttudduddan edum min Jews. <sup>8</sup> Nan-ingnege hu baddang Apu Dios ni hi-gamin dewwan Peter etan di indinel tun ngunu mi. Tuwak kabaddangin mantuttudduddan Gentiles ey tu dama kabaddangi hi Peter ni mantuttudduddan Jews. <sup>9</sup> Anin di James, hi Peter ni hi John e hi-gada hu kametbal ni kamengippangnguluddan kamengullug, et inebulut da e hi Apu Dios hu nengidwat nunyan ngunuk et abuluten dakemin Barnabas ni pan-e-dum dan mantuttuddu. Inhuhummangan mi e hi-gamin Barnabas hu mantuttudduddan Gentiles ey hi-gada dama mantuttudduddan edum min Jews. <sup>10</sup> Kandan hi-gami ey eleg mi liwwanan umbaddang idan newetwet ni Jews. Nem anin ngu dedan ni eleg da e-hela, et humman ngu nakka pehpending.

*Ya nengibungetan Paul nan Peter tep neihlan impahding tu*

<sup>11</sup> Nem yan inlian Peter di Antioch ey inhelan kud kedaklan ni tuu tep ya neihlan impahding tu. <sup>12</sup> Heninnuy hu elaw ni neihlaan tu: Ya eman ni eleg ida ni dumteng etan edum min Jews ni intu-dak James, ey nekikkikkan hi Peter idan Gentiles ni kamengullug nan Jesus di diman Antioch. Nem entanni et dimmateng ida etan intu-dak James ey pipinhakkey law hu tuka pekikkanni et lektattuy insiked tu, tep kaumtakut ni pemihhulan idan edum min Jews ni kamenghel ni lawah hu pokie-edduman min Jews idan Gentiles. <sup>13</sup> Et anin ida law ni edum ni Jews ni kamengullug diman e henin Barnabas, et in-u-unnud dan Peter et isiked dan mekikkan idan Gentiles, anin ni amta da e beken law ni pi-yew. <sup>14</sup> Et yan nengamtaan kun nunman ni tuka pehpending ni eleg maiunnud di kameituttuddu meippanggep nan Jesus Christo ey inhelan ku hi Peter di hinanggaddan edum ni kamengullug et kangkun hi-gatuy "Hi-gam e Peter ey Jew ka, nem dingkug mu elaw tayun Jews tep neipeamtan hi-gam e eleg law mahapul ni humman u-unnudem. Ey keley yan nunya mewan ey insiked mun mekie-eddum idan Gentiles ni kamengullug. Huttan ni impahding mu ey heni muka pepillit ni u-unnuden da hu elaw tayun Jews ni inwalleng mu. Neihla huttan ni impahding mu!"

*Emin tuu ey ibbilang Apu Dios ni kayyaggud, anin ni hipa neitu-wan da, hedin ida kamengullug nan Jesus*

<sup>15</sup> Hi-gatsun Jews ey makulug ni beken itsun heniddan neliwtan ni Gentiles e eleg da amta hu Tugun Moses. <sup>16</sup> Nem yan nunya, ey inamta tayu law e ya kapengibbillangin Apu Dios ni kayyaggud hu hakey ni tuu, ey ya tuka pengullug nan Jesus Christo, et beken ni ya tuka kapengu-unnuddan Tugun ni kau-unnudan Jews. <sup>17</sup> Et humman hu, anin ni hi-gatsun Jews et neliwtan itu dama, et pakkadek ni nengulug itsun Jesus Christo et han daitu ibbilang nan Apu Dios ni kayyaggud. Et mukun eleg tayu law iddinel di pengu-unnudan ni Tugun Moses hu pengibbillangan daitun Apu Dios ni kayyaggud. Nem anin ni hanniman et beken ni tayu penghel e kai-abulut Jesus Christo ni anin manliwwat itu.

<sup>18</sup> Tep gulat ni banggaden tayu mewan ni mengiddinell idan nunman ni Tugun ni inwalleng tayu, ey nanna-ud ni manliwwat itu, tep eleg tayu kabaelin paka-u-unnuden ni emin hu Tugun. <sup>19</sup> Em, emin itu, ey eleg tayu kabaelin ni u-unnuden emin humman

idan Tugun. Et humman hu, hedin ngun hi-gak ey beken law ni ya pengu-unnudan ni Tugun hu nakka iddinel ni kehellakniban ku, nem nakka iddinel hu binabbal Apu Dios. Humman ni binabbal tu ey neipeang-ang eman ni nengiketeyan Jesus Christo ni liwat tayun emin, ma-lat hi Apu Dios hu u-unnuden tayu. <sup>20</sup> Heni-ak nekittey nan Christo eman ni neteyyan tud Krus. Et humman hu, ya biyag kun nunya ey beken ni henin nunman, tep wada law hi Jesus Christo ni hi-gak. Hi-gatu e U-ungngan Apu Dios hu nakka iddinel tep ingkatey tu hu kehellakniban ku tep ya impeminhed tun hi-gak. <sup>21</sup> Hedin ya pengu-unnudan ni Tugun Moses hu iddinel tayun pengibbillangan dait sun Apu Dios ni kayyaggud, ey heni eleg tayu pinhed hu binabbal tun hi-gatsun nengitudakan tun Jesus et iketey tu liwat tayu. Et humman hu, hedin hi-gak ngu ey beken law ni ya pengu-unnudan ni Tugun Moses hu iddinel ku, nem hi Jesus ni ebuh.

### 3

*Ya kapengullugin Jesus hu kapengibbillangan Apu Dios ni kayyaggud hu hakey ni tuu, beken ni ya kapengu-unnudin Tugun*

<sup>1</sup> Hi-gayun tutu-ud Galatia, keke naka-ihlan peteg hu yuka pannemnem. Kele anhan kakhahaul kayu? Neka-amta yu mewan dedan hu meippanggep ni neteyyan Jesus Christo di krus, ey kele kayu nehaul et pinhed yun iwalleng humman? <sup>2</sup> Tam inamta yu e dinwat yu hu Ispirituh Apu Dios tep kinulug yu neituttuddun meippanggep ni neteyyan Jesus ni panyaggudan yu, et beken ni ya nengu-unnudan yun Tugun Moses. <sup>3</sup> Endi tu-wangu nemnem yu! Yan laputun nengulugan yu ey binenaddangan dakeyun Ispirituh Apu Dios ni mengu-unnud ni elaw tu, ey kaw yan nunya ey kanyuy ngenamung kayu law? <sup>4</sup> Kaw liniwwan yudda etan panyaggudan ni dinwat yun nengulugan yun Jesus? Eleg yu na-mu et anhan liwwanen. <sup>5</sup> Kele wadan hi-gayu Ispirituh Apu Dios et kabaelan yun mengippahding idan miracles? Kaw ya nangngelan yu niya nengidinelan yun Jesus Christo, winu ya nengu-unnudan yun Tugun? Inamtak et inamta yu e neipuun di nengulugan yun Jesus Christo.

<sup>6</sup> Wada impatudek Apu Dios ni meippanggep nunya e kantuy "Kinulug Abraham hu inhel Apu Dios, et humman nengibilangan Apu Dios ni hi-gatun kayyaggud." \* <sup>7</sup> Et humman hu, awasi yu e emin hu kamengullug nan Apu Dios ey hi-gada kameibbillang ni helag Abraham. <sup>8</sup> Neitudek dedan di ehel Apu Dios e kantuy ibbilang tuddallin kayyaggud hu Gentiles tep ya daka pengullug. Huyya keibbellinan ni inhel lan Apu Dios nan Abraham e kantuy "Gapuh ni hi-gam, ey emin iddalli tuud kebebbley ey meidwatan idan panyaggudan da." <sup>9</sup> Kinulug Abraham etan inhel Apu Dios et mebendisyonan, et humman hu, emin kamengullug ey mebendisyonan ida henin Abraham, tep ya daka pengullug.

<sup>10</sup> Emin ida tuun daka iddinel hu daka pengu-unnudin Tugun ni kehellakniban da ey kastiguen idallin Apu Dios, tep impatudek tu dedan e kantuy "Mekastigu etan tuun eleg tu peka-unnudan emin hu Tugun." <sup>11</sup> Huyya pengamtaan tayu e endi hakey ni tuun meibbillang ni kayyaggud di hinangngan Apu Dios tep ya daka pengu-unnudin Tugun. Huyya ey kamei-unnud etan di neitudek di ehel Apu Dios ni kantuy "Ya etan tuun wada tuka pengullug, ey hi-gatu imbilang Apu Dios ni kayyaggud et hi-gatu menewwat ni biyag ni endi pappeg tu." <sup>12</sup> Tep ya kapengu-unnudin Tugun ey hin-appil ni peteg di kapengullugin Jesus. Kan ni impatudek Apu Dios ey "Pakkaw ni peka-u-unnuden ni tuu emin ida etan Tugun Apu Dios ni dinwat Moses et han mawedan hi-gatu hu biyag ni endi pappeg tu."

<sup>13</sup> Nem eleg tayu nisi han-u-unnud ida etan Tugun, et mukun immali hi Jesus Christo et helakniban dait sud kekastiguan tayu. Wada etan neitudek ni ehel Apu Dios ni kantuy "Ya etan tuun meitta-yun di keyew ey hi-gatu keillawwan ni kastigu." <sup>14</sup> Humman hu neipahding nan Jesus ma-lat mailla-kam ida dama Gentiles etan di panyaggudan ni impakulug Apu Dios nan Abraham ni nunman tep ya daka pengullug nan Jesus Christo. Et humman hu, emin itsun kamengullug ey wadan hi-gatsu hu Ispirituh tun impakulug tun peelli tu.

*Ya nambaklangan ni tugun Apu Dios et ya impakulug tu*

<sup>15</sup> Hi-gayuddan kaegiegi, huyyan impakulug Apu Dios nan Abraham ni pehding tu ey heni daman tayu kapehding e hedin wada dewwan tuun nehammad hu nantebalan da et mampilmaddad papil, ey eleg mabalin ni an endien ni hakey niya eleg mabalin ni tu e-duman hu nan-ungbalan da. <sup>16</sup> Hanniman daman etan ni impakulug Apu Dios nan Abraham et ya etan hakey ni helag tu. Beken ni kantuy yadda dakel ni helag tu, nem

\* 3:6 3:6 Genesis 15:6, ya Romans 4:3, niya James 2:23



kantuy “Ya etan hakey ni helag mu hu amnuan ni impakulug kun hi-gam.” Et humman ni helag tu ey hi Christo. <sup>17</sup> Heninnuy hu pinhed kun e-helen: Ya etan nekitbalan Apu Dios nan Abraham ey eleg mepappeg, nem mannananeng. Ma-nut indawat tu Tugun tun Moses eman ni nelabah hu epat ni gatut et telumpulun toon, nem humman ni Tugun ey eleg mabalin ni tu endien winu tu hullulan humman ni nekitbalan tun Abraham e neipuunan ni impakulug Apu Dios, tep beken ni ya kapengu-unnudin Tugun hu penettebalan Apu Dios ni hi-gatsu. <sup>18</sup> Tep gullat ni ya pengu-unnudan tayun Tugun Apu Dios hu pengidwatan tun panyaggudan tayu, endi tep law silbi etan ni impakulug Apu Dios nan Abraham. Nem gapuh ni et-eteng ni binabbal Apu Dios ey hinammad tun inhel e iddawat tun Abraham humman ni panyaggudan tu.

<sup>19</sup> Nem penghel yu na-mu ey “Hipa tep silbin nunman ni Tugun?” Ya gaputun nengidwatan Apu Dios nunman ni Tugun ey ma-lat keang-angan tu e nelawatan hu tuu. Nem nepappeg law humman ni Tugun, tep immamnu law etan impakulug Apu Dios ni kantun um-alin melpud helag Abraham e hi Christo. Humman ni Tugun ey indawat Apu Dios idan anghel tu et ideteng dan Moses et han pebeltan Moses idan tuu et hi-gatu hu nambattanan idan tuu et hi Apu Dios. <sup>20</sup> Inamta tayu e hedini wada pantebbalan ni dewwan tuu, ey mahapul ni wada pambattanan da. Nem hi Apu Dios ey nandudug eman ni nekitbalan tun Abraham.

*Indawat Apu Dios hu tugun tun hi-gatsun pengippeang-angan tun neliwatan itu ey endi edum ni menellaknib ni hi-gatsud liwat tayu nem ebuh hi Jesus*

<sup>21</sup> Penghel yu na-mu mewan ey “Eleg ida tep man-unnud hu Tugun Apu Dios niyadda impakulug tun pehding tu.” Nem beken ni hanniman, tep gullat ni ya pengu-unnudan nunman ni Tugun hu kaum-idwat ni biyag ni endi pappeg tu, ey humman et pengibbillangan Apu Dios ni tuun kayyaggud. <sup>22</sup> Nem ya kakulugan tu ey kan ni neituede ni ehel Apu Dios ey neliwatan ni emin hu tuud puyek. Nem yadda etan medinnel nan Jesus Christo, tep daka kulluga e hi-gatu hu menellaknib ni hi-gada ey dewwatan da etan impakulug Apu Dios ni iddawat tu.

<sup>23</sup> Yan nunman ey mahapul ni u-unnuden tayu hu Tugun. Nem eleg tayu pakeu-unnud ni emin, et humman hu itu kamanliwwaliwwat et umhulun ni kekastiguan tayu. Nebayag ni hanniman ingganah impeamtan Apu Dios e mahapul ni mengullug nan itsun Jesus Christo. <sup>24</sup> Ya Tugun hu nengituttuddun pehding tayu ingganah ni inlian Jesus Christo, et amtaan tayu law e ya tayu kapengullug ni hi-gatu hu pengibbillangan daitsun Apu Dios ni kayyaggud. <sup>25</sup> Ey yan nunya law ey hi Jesus Christo hu tayu kapengiddinneli, et mukun eleg law mahapul ni tayu iddineli di Tugun hu pengibbillangan daitsun Apu Dios ni kayyaggud.

<sup>26</sup> Ya kapengibbillangan Apu Dios ni u-ungnga daitsu ey ya tayu kapengullug nan Jesus Christo. <sup>27</sup> Tep emin hu nengulug nan Jesus Christo et mebenyagan ida ey henin elaw tu law hu elaw da e kayyaggud. <sup>28</sup> Et humman hu, endi nambaklangan idan tuun Gentiles niyadda Jews, yadda himbut niyadda beken, ya laki niya bii, tep nan-inging itsun emin tep ya neiegian tayun Jesus Christo. <sup>29</sup> Et yan nunyan neiegi itsun Jesus Christo, ey neibilang itu law ni helag Abraham ni menewwat ni panyaggudan ni impakulug Apu Dios ni iddawat tu.

## 4

<sup>1-2</sup> Ya neiingingehan ni penewwatan etan ni panyaggudan ni inhel Apu Dios ey henin pemeltanan ni u-unggan tawid tu. Tep hedini eleg pay ni mahiken humman ni u-ungnga, ey heni himbut tep endi ni tawid tu. Mahapul ni u-unnuden tudda ni etan bega-en ametun kamengippaptek ni hi-gatu niya tawid tu ingganah medettengan etan aggew ni dammutu law ni pengippebeltanan ametun hi-gatu. <sup>3</sup> Henin nunman lan eleg itu ni mangulug e heni itu himbut ni elaw ni kau-unnudaddan aammed tayu, tep mahapul ni humman u-unnuden tayu. <sup>4</sup> Nem entanni ey nedatngan etan aggew ni gintud Apu Dios ni pengippeellian tun U-ungnga tu eyad puyek. Nambalin ni tuu et iunggan bii et anin hi-gatu e inenu-unnud tu hu Tugun Moses. <sup>5</sup> Mukun intu-dak alin Apu Dios ey ma-lat helakniban daitsud kastigu tayun eleg tayu pengu-unnudin Tugun, e ibilang daitsun Apu Dios ni u-ungnga tu.

<sup>6</sup> Ya keamtaan tun u-ungnga daitsun Apu Dios ey ya nanwadaan tun Ispirituh ni U-ungnga tun hi-gatsu et dammutu law ni kan tayuy “Ama” hi Apu Dios! <sup>7</sup> Et humman hu, beken itu law ni heni himbut ni mengu-unnud etan ni Tugun Moses, tep nambalin itu law ni u-unggan Apu Dios, et emin hu pebeltan tu ey beltanen tayu.

*Ya kakakkaguhin Paul ni pengiwwallengan idan kamengullug di Galatia nan Apu Dios*

<sup>8</sup> Yan nunman ni eleg yu ni amta hi Apu Dios ey heni kayu himbut idan beken ni makulug ni dios, tep hi-gada hu inenu-unnud yu. <sup>9</sup> Nem ay yan nunya ey pinappeg tu nanhimbunan yuddan nunman ni dios, tep inamta yu law hi Apu Dios ey nema-man hi-gatu e neka-amta dakeyu. Nem ay kele pinhed yu mewan ni mambangngad ni himbut idan nunman ni beken ni makulug ni dios ni endi silbitu? <sup>10</sup> Ey nanengtun yuka ngillina aggew, ya bulan niya toon, nem endi silbi tudda humman. <sup>11</sup> Nakka umkakaguh ni hi-gayu, tep hedin hanniman, endi tep silbitu intuttudduk ni hi-gayu.

<sup>12</sup> Kaegiegi, pinhed ku et anhan ni iu-unnud yun hi-gak et eleg yu idinel di pengu-unnudan yun Tugun, nem hi Jesus Christo ni ebuh hu iddinel yun kehellakniban yu. Inamta yu e anin ni Jew hak et nambalinnak ni henin hi-gayun beken ni Jews, tep eggak law iddinel hu Tugun. Yan eman ni nekihahha-adan kun hi-gayu ey kayyaggud kayun peteg ni hi-gak, tep endi yu impeang-ang ni lawah. <sup>13</sup> Inamta yu e yan laputun nengituttudduan kun hi-gayun meippanggep nan Jesus Christo ey nandegehhak, et humman hu nebayagan kudtan ni nantuttuddu. <sup>14</sup> Nem ay kayyaggud et anin ni nanligligatan yu hu nandegehan kun nunman, et eleg yuwak pihulen, ey eleg yuwak ipayyag, nem heni-ak anghel Apu Dios winu heni-ak hi Jesus Christo ni impapaptek yu. <sup>15</sup> Et-eteng hu amleng yun nekihahha-addan kun hi-gayun nunman niya et-eteng impeminhed yun hi-gak e gullat na-mun dammutu et wadan inukit yu mateyu et indawat yun hi-gak. Nem ay kele hanniman kayun nunya? <sup>16</sup> Kaw nambalinnak law ni buhul yu tep ya nakka pengpenghelin hi-gayun makulug?

<sup>17</sup> Mahapul ni amtaen yu e yadda etan edum ni tuun immalin mantuttuddun hi-gayu, ey kayyaggud daka peang-ang ni hi-gayu, nem lawah hu wadad nemnem da. Tep ya pinhed da ey meputtut hu nan-aagian tayu, et hi-gada u-unnuden yu e beken ni hi-gak. <sup>18</sup> Ma-nu tep em, kayyaggud hedin wadadda mengipeang-ang ni kayyaggud ni hi-gayu hedin kayyaggud hu wadad nemnem da. Nem kayyaggud hedin hanniman hu peang-ang dan hi-gayun kenayun, anin ni endi-ak ditan. <sup>19</sup> Nem, hi-gayun u-unggak idan nakappinhed ku, iyyadya mewan ni nakka pandedeggeh ni peteg di nemnem ku, tep pinhed ku et anhan ni henin elaw nan Jesus Christo hu elaw yu. <sup>20</sup> Pinhed ku et ni wada-ak ni nunyad tan ma-lat kayyaggud hu pan-ung-ungbalan tayu et beken ni nak pansinuttuddek, tep nakka umkakaguh ni peteg ni hi-gayu.

*Huyya a-abbig hu kei-elligan ni pambalanan ni pengu-unnudan ni Tugun ni intuttuddu lan Moses*

<sup>21</sup> Hi-gayun kaegiegin kamengiddinnel ni pengu-unnudan ni Tugun Moses ni kehellakniban yu, kaw makulug makkaw ni inamta yu hu kaituttuddun nunman ni Tugun? <sup>22</sup> Wada etan neitudek ni meippanggep ni nunman ni Tugun e neidingpatan ida etan ni dewwan lakin u-ungngan Abraham di dewwan bii e himbut hu hakey, ey beken etan hakey. <sup>23</sup> Ya etan u-ungngan Abraham etan ni himbut ni bii ey beken ni hi-gatu inannuan ni impakulug Apu Dios, nem neiungnga ngun gandat. Nem ya etan hakey ni u-ungnga tu etan ni beken ni himbut ey hi-gatu hu inannuan ni impakulug Apu Dios. <sup>24-25</sup> Huyyaddan dewwan bii hu neieligan etan ni dewwan nambaklang ni nekitbalan Apu Dios. Ya etan hakey ni nekitbalan ey meippuun di Tugun ni dinwat Moses di Duntug e Sinai di Arabia e huyya neieligan Hagar niyadda u-ungnga tu e himbut idan emin. Huyya pay hu neieligan idan etan ni bimbley di Jerusalem e ya pengu-unnudan ni Tugun hu daka tettengedi. Et humman hu, henidda himbut ni daka pengu-unnudin nunman ni Tugun Moses. <sup>26</sup> Nem ya etan hakey ni nekitbalan Apu Dios ey humman neieligan nan Sarah e beken ni himbut. Hi-gatu heni inaddan kamengullug niya hi-gatu kei-elligan ni Jerusalem di kabunyan. <sup>27</sup> Huyya keibbellinan etan ni impatudek Apu Dios ni kantuy "Hi-gam ni nebasin bii, ey pan-am-amleng ka, tep anin ni eleg mu hiktaman hu degeh ni man-ungnga, et dakel ali kaya u-ungngam. Heni ka etan ni biin hini-yan ni ahwatu, nem hehmeken dakalli kayan Apu Dios et daddakkel ali u-ungngam nem ya etan biin eleg hi-yanen ni ahwa tu." \*

<sup>28</sup> Kaegiegi, inamta yu e impakulug Apu Dios e mantennud hi Abraham, ey immamnu tep wada hi Isaac. Et hi-gatsun kamengullug ey heni itu hi Isaac, tep impakulug Apu Dios dama e yadda mengullug ey u-ungnga tudda. <sup>29</sup> Hi Isaac ey neiungnga gapuh ni kabaelan ni Ispirituh Apu Dios, nem hi Ismael e agitu ey beken ni hanniman. Ey inamta tayu e nanlelehhanan Isaac hu impahpading nan Ismael e u-ungngan himbut. Henin hi-gatsun kamengullug, e tayu kapanlelehhanani hu kapehpending idan kamengippilit ni pengu-unnudan tayun Tugun Moses. <sup>30</sup> Nem neitudek di ehel Apu Dios hu meippanggep nunya e kantuy "Pea-allaw mu etan biin himbut, anin etan u-ungnga tu, tep humman

\* 4:27 4:27 Isaiiah 54:1

ni u-ungngan himbut ey eleg mekiggedwad pebeltan ametu etan ni u-ungnga tud beken ni himbut ni bii."

<sup>31</sup> Et humman hu, hi-gatsun kamengullug ey beken itsun u-ungngan himbut, nem heni itsu nahlag etan ni biin beken ni himbut. Tep hi Jesus law hu iddinel tayu, e beken law hu pengu-unnudan tayun Tugun Moses.

## 5

### *Neliblih itsud neihtutan tayud Tugun Moses tep sineklan Jesus*

<sup>1</sup> Hi Jesus Christo ey liniblih daitsud neihtutan tayud Tugun Moses ni nunman, et eleg law mahapul ni humman tayu u-unnuden. Et humman hu, helipat-i yu ma-lat eleg yulli mewan idinel nunman ni Tugun et eleg kayu mewan mambangngad ni heni himbut nunman ni Tugun.

<sup>2</sup> Kaegiegi dengel yuwak anhan: Hedin mampekuggit kayu tep humman yuka iddinel ni pengibbillangan dakeyun Apu Dios ni kayyaggud, ey humman keang-angan tun endi law silbin yuka pengullugin Jesus Christo. <sup>3</sup> Ippidwak ni e-helen et pekaddenglen yu, e hedin ippilit yun mampekuggit, tep humman yuka iddinel ni pengibbillangan Apu Dios ni hi-gayun kayyaggud, mahapul ni peka-u-unnuden yun emin hu Tugun. <sup>4</sup> Yadda kamengiddinell ni Tugun ni pengibbillangan Apu Dios ni hi-gadan kayyaggud ey endi law silbin impahding Jesus Christo ni hi-gada, et humman hu eleg ida law meilla-kam di binabbal Apu Dios. <sup>5</sup> Nem hedin ngun hi-gatsu, ey ihhammad ni Ispirituh Apu Dios hu dinel tayun ibbilang daitsun Apu Dios ni kayyaggud gapuh ni tayu kapengullugin Jesus Christo. <sup>6</sup> Tep hedin hi-gatsun kamengullug nan Jesus Christo ey beken ni ya kekuggitan tayu winu ya eleg tayu kekuggisi hu importanteh, nem ya tayu kapengullug e kameang-ang di impeminhed tayun edum tayun tuu.

<sup>7</sup> Kaegiegi, ma-nun laputun nengulugan yu tep nehammad hu nengu-unnudan yu etan ni makulug ni neituttuddu, nem kele mewan yan nunya ey inwalleng yu? Hipadda kamengittenuttuddun hin-appil ni hi-gayu et kayu neidngelan? <sup>8</sup> Eleg mabalin ni hi Apu Dios hu nengipahding, tep hi-gatu nemilin hi-gayun nengu-unnud ni hi-gatu. <sup>9</sup> Wada etan kandan "Anin ni ekket ni ebuh ni yeast hu meikkamdug et pelbag tu etan sinapay." Ya kei-inggehan tu huuya ey ya etan lawah ni tuun anin hakey tun neikamdug ni hi-gayu et aldanan dakeyun emin. <sup>10</sup> Nem nakka medinnel e gapuh ni yuka pengullug nan Jesus Christo ey eleg yu ebbuluta hu ittuttuddun edum ni eleg mainggeh di ittuttudduk ni hi-gayu, et mekastigulli etan kamengittuttuddun neihtan hi-gayu, anin ni hipa humman ni tuu.

<sup>11</sup> Kaegiegi, gullat ni makulug ni nanengtun nakka ittuttuddu e mahapul ni u-unnuden tayu hu tugun ni kau-unnudaddan Jews e nema-ma etan daka pengippillitin mampekuggit, ey eleg da-ak et panhelheltapaddan edum kun Jews. Nem itek, tep ya nakka ittuttuddu ey ya meippanggep ni neteyyan Jesus di krus, et huuya gaputun nakka panlehhani hu kapepheading idan edum kun Jews ni hi-gak. <sup>12</sup> Huttan idan tuun kamengippillit ni kekuggitan ey heballi tep mampegeppun ida.

<sup>13</sup> Nem hi-gayun kaegiegi, pinili dakeyun Apu Dios ni pantu-u tu et beken law ni ya pengippahdingan yun Tugun ni kau-unnudaddan Jews hu pengiddinnelan yu. Nem anin ni hanniman, et mahapul ni kekkennengen yu hu annel yu et eleg yu ipahding hu lawah. Nem ya kayyaggud ey man-imbabaddang kayu tep ya impeminhed yun edum yu. <sup>14</sup> Tep kantud Tugun ey "Mahapul ni pinheden yu edum yu, henin impeminhed yun annel yu." Huayan tugun hu neikahhakeyan ni emin ni Tugun Apu Dios ni ittuttuddun Moses. <sup>15</sup> Nem hedin heni kayu etan ni ahhu winu edum ni animal e ida kamangagangal niya ida kamandedeppap, ey ang-ang yu tep mebahbah hu yuka pandadagyumi.

### *Nambaklang hu pinhed ni annel tayu et ya pinhed ni Ispirituh Apu Dios*

<sup>16</sup> Ittugun kun hi-gayu e u-unnud yu hu pinhed ni Ispirituh Apu Dios, et beken ni ya lawah ni pinhed ni annel yu hu u-unnuden yu. <sup>17</sup> Tep ya pinhed tayu et ya pinhed ni Ispirituh Apu Dios ey nambaklang. Ya pinhed ni lawah ni neitu-wan tayu ey eleg pinhed ni Ispirituh tu. Ya pinhed ni Ispirituh tu ey eleg pinhed ni neitu-wan tayu. Et mukun neligat ni u-unnuden hu hakey, tep henidda kamampipilliwi. <sup>18</sup> Nem hedin ya pinhed ni Ispirituh Apu Dios hu u-unnuden tayu, ey eleg law mahapul ni tayu iddinel di pengu-unnudan ni Tugun Moses.

<sup>19</sup> Ka-immamatun hedin ya lawah ni pinpinhed ni annel hu kau-unnudan tuu, tep lawah daka pepheading, niya lawah hu wadad nemnem da, tep daka i-ulig hu beken da ahwa, <sup>20</sup> daka deyyawa hu beken ni makulug ni dios, mabekidda, ida kamambubuhul, ida kamambabakal, ida kaman-in-aameh, mabunget ida, pinhed dan hi-gada meunnud, eleg man-uunnud nemnem da, ida kameena-appil di edum dan tuu, <sup>21</sup> daka keemmehi edum

da, ida kamambuttebutteng, mangelawngaw ida hedin ida meki-innum niya dakel hu daka pehpending ni lawah. Inhel kun hi-gayun nunman ey pidwae ku mewan ni e-helen, e ya tuun mengippahding idan henin nunya ey eleg mabalin ni meilak-kam di pan-ap-apuan Apu Dios.

<sup>22</sup> Nem yadda etan tuun kamengu-unnud ni kaituttuddun Ispirituh Apu Dios ey hi-gada hu wada ipeminhed da, ida kaman-am-amleng, melinggep ida, neanus ida, kayyaggud ida, ida kameiddinel ni mengippahding ni daka e-hela, <sup>23</sup> kabbabbal ida niya hangkekkeneng da annel da. Endi neitudek di Tugun ni kantuy lawah ida huuya. <sup>24</sup> Yadda kamengullug nan Jesus Christo, ey heni nekipetak ni hi-gatud krus hu lawah ni neitu-wan da et eleg da law ipahding ida etan lawah ni impeinghan annel da. <sup>25</sup> Ya law Ispirituh Apu Dios hu kakelpuin nunyan baluh ni neitu-wan tayu, et humman hu mahapul ni u-unnuden emin hu pinhed tu. <sup>26</sup> Ey mahapul ni eleg itsu mampahhiya, eleg tayu pebungnet hu edum tayu niya eleg itsu um-ameh ni hipan wadan edum tayu.

## 6

### *Ya kayyaggud ni pehding ey man-imbabaddang itsun emin*

<sup>1</sup> Hi-gayun kaegigi, hedin wada edum yun inamta yun nanliwat, ey hi-gayuddan kameibbillang ni nenemman ni kamengullug, ey mahapul ni pebababbal yun tuggunen. Nem helipati yu, tep entanni ey anin hi-gayu et mambekhul kayu dama. <sup>2</sup> Pan-imbabaddang kayu et baddangan yudda edum yun wada ligat tu, tep humman elaw ni pengu-unnudan yun tugun Jesus Christo. <sup>3</sup> Hedin wada etan kantuy kakkayyagud hu elaw tu nem ya edum tu, nem ya kakulugan tu ey beken kaya, ey ya annel tu ngu hu ini-ittekan tu. <sup>4</sup> Et humman hu, mahapul ni wada hakkeyey nemneman tu hu tuka pehpending hedin kayyaggud winu eleg. Et hedin kayyaggud, ey kadinel kayu e impahding yu hu lebbeng tun pehding yu et eleg mahapul ni yu i-eni-inggeh hu annel yud edum ni tuu. <sup>5</sup> Tep hedin umlaw itsud hinanggan Apu Dios ni hakey alin aggew, man wada hakkeyey ngenamung tun menummang ni impahpahding tu.

<sup>6</sup> Ya etan tuun netuttuddun ni ehel Apu Dios ey kayyaggud hu iddawtan tu etan nenuttuddun hi-gatan anin hipan kayyaggud ni wadan hi-gatu.

<sup>7</sup> Entan kaheul yu et eleg yu panghel ey dammutun he-ulen yu hi Apu Dios et eleg kayu mekastigu hedin wada ipahding yun lawah, tep ya lawah ni kapehpending ni tuu ey lawah mewan hu pambalinan tu. Nem hedin ya kayyaggud hu kapehpending ni tuu, ey kayyaggud dama hu pambalinan tu. Tep inamta tayu e ya intanem ni hakey ni tuu ey humman hu enniem tu. <sup>8</sup> Ya tuun ebuh annel tun tuka nemnemnema niya lawah tuka pehpending ey ya ketteyyan tu niya keiddawian tun Apu Dios hu pambalinan tu. Nem ya tuun tuka u-unnuda etan pinhed ni Ispirituh Apu Dios ey dewwatan tu hu biyag ni endi pappeg tun kaidawat ni Ispirituh Apu Dios. <sup>9</sup> Et humman hu, entan tu peinglay ni mengippahding ni kayyaggud, tep makulug ni dewwatan tayu etan panyaggudan ni iddawtan tun hi-gatsu ni tsimpuh ni gintud tu hedin pannenneng tayun mengippahding ni kayyaggud. <sup>10</sup> Et mukun nakka e-helan hi-gayu e hedin wada wayah tayun mengippahding ni kayyaggud di edum tayu, man ipahding tayu, nema-maddad edum tayun kamengullug ni neigappat di pamilyah Apu Dios.

### *Ya nanggillig ni tugun Paul idan kamengullug nan Jesus di Galatia*

<sup>11</sup> Hi-gak law hu kamampengittuddek eyan nanggillig ni ittugun kun hi-gayu, et mukun etta-teng hu nakka penuddek. <sup>12</sup> Pinhed kun peamtan hi-gayu e yadda etan kamengippillit ni mampekuggit kayu ey pinhed dan ebuh ni tetebalen idan edum min Jews ni kamengu-unnud ni Tugun Moses ida. Tep gullat ni peamta da e beken ya Tugun Moses, nem ya pengullugan ni neteyyan Jesus Christo di krus hu kehellakniban ni tuu, ey pihhulen idaddan edum min Jews. <sup>13</sup> Ma-nut ida kamampekuggit, nem eleg da hanu-unnud ni emin hu Tugun Moses. Nem ya pinhed da ey pekuggit kayu ma-lat ipahhiya da nengu-unnudan yun Tugun ni daka pepillit ni hi-gayu. <sup>14</sup> Nem hedin hi-gak ngu, endi edum ni nakka ipahhiya, nem ebuh hu neteyyan Jesus Christo di krus, tep heni nak nekittey ni hi-gatud krus. Et humman hu, yadda etan linggeman ni lawah di puyek ey eggak ida law pinhed et beken ida law humman ni wadad nemnem ku. <sup>15</sup> Beken ni importanteh hedin pekuggit itsu winu eleg, nem ya importanteh ey ya nemaliwan Apu Dios ni nemnem tayu. <sup>16</sup> Yadda mengu-unnud idan nunyan tugun ey pelinggep niya hehmeken idan Apu Dios tep hi-gada hu tuu tu.

<sup>17</sup> Nemnem yu e nanlehhanan ku et dakel piklat di annel ku gapuh ni nakka pengu-unnudin Jesus Christo. Et humman hu, ipahding yun emin hu intugun ku ma-lat eleg yu pan-eduman hu kaguh kun hi-gayu.

<sup>18</sup> Nakka iddasal e emin kayun kaegiegi ey meweddán hi-gayu hu binabbal Apu tayu e hi Jesus Christo. Amen.

## Ya Tudek Paul idan Kamengullug di Ephesus

<sup>1</sup> Huyyan tudek ey nalpun hi-gak e hi Paul e pinutuk Apu Dios ni pan-apostle nan Jesus Christo. Tudek ku huyyan hi-gayun kamengullug di Ephesus ni kamengu-unnun nan Jesus Christo.

<sup>2</sup> Pinhed kun meweddin hi-gayu hu binabbal niya linggep ni kamelpun Apu Dios e Ametayu et hi Jesus Christo e Apu tayu.

*Ya panyaggudan tayun kamengullug ni indawat Apu Dios gapuh ni neiegian tayun Jesus Christo*

<sup>3</sup> Daydayaw tayu hi Apu Dios e Aman Apu tayu e hi Jesus Christo, tep indawat tun hi-gatsun kamengullug emin hu panyaggudan tayun kamelpud kabunyan tep ya neiegian tayun Jesus Christo. <sup>4-5</sup> Pinili daitsun Apu Dios ni pantu-u tu gapuh nan Jesus Christo et han maweda emin eya wadan nunya ma-lat ibilang daitsun kayyaggud e endi liwat tayud hinanggab tu. Ninemnem tu dedan nunman e pambalin daitsun u-ungnga tu et iketey Jesus Christo hu liwat tayu. Huyya hu impahding Apu Dios tep ya impeminhed tun hi-gatsu. <sup>6</sup> Et humman hu, daydayaw tayu hi Apu Dios tep impeang-ang tu et-eteng ni binabbal tun hi-gatsun kamengullug gapuh ni impahding Jesus Christo e U-ungnga tun nakappinhed tu.

<sup>7</sup> Yan nengiketeyan Jesus Christo ni liwat tayu ey nepesinsahan itsu law tep netekla law liwat tayu et beken itsu law ni himbut ni liwat. Huyya keang-angan tu e kabbabbal ni peteg hi Apu Dios ni hi-gatsu, <sup>8</sup> e endi tu kei-inggehan. Nekallaing hi Apu Dios e inamta tu emin et <sup>9</sup> peamta tun hi-gatsun nunya hu planuh tu dedan lan nunman ni peamnun Christo. <sup>10</sup> Ya implanuh tu ey iyayyaggud tun emin hu lintu tun wadad kabunyan et yad puyek ma-lat mangkakahakey ida hedin medettengan hu aggew ni gintud tun pengiyayyaggudan tudda, et hi Jesus Christo hu man-ap-apun emin.

<sup>11-12</sup> Emin kaippahding Apu Dios ey meippuun di pinhed tu niyad planuh tu, et humman hu, pinili daitsu dedan nunman ni mengullug nan Jesus Christo et han maweda emin eya wadan nunya. Ey impamengulu dakemin Jews ni pinili tun mengullug ma-lat idaydayaw mi hu kasina-gey tu. <sup>13</sup> Hanniman daman hi-gayun beken ni Jews e yan nangngelan yun kameituttuddun meippanggep ni kehellakniban ni tuu, ey kinulug yu hi Jesus et ibilang dakeyun Apu Dios ni tuu tun nanwadaan tun hi-gayun Ispirituh tun impakulug tu. <sup>14</sup> Ya kawedan Ispirituh Apu Dios ni hi-gatsu hu keang-angan tu e dewwatan tayulli hu impakulug tun idawat tun hi-gatsun u-ungnga tu hedin meihhiknad hu kehellakniban tayu. Ya pambalanan tu huyya ey keiddeyyawan tu tep ya kasina-gey tu.

*Ya dasal Paul idan edum tun kamengullug nan Jesus*

<sup>15</sup> Et mukun, neipalpun eman ni nangngelan ku e nehammad hu yuka pengullug nan Apu Jesus Christo niya et-eteng hu impeminhed yuudan tuun pinilin Apu Dios ni pantu-u tu ey <sup>16</sup> eggak isiked ni mansalamat nan Apu Dios gapuh ni hi-gayu. Ey dakeyu kaiddasadasali <sup>17</sup> ma-lat baddangan dakeyun Ispirituh Apu Dios e Aman Apu tayu e hi Jesus Christo et menemneman kayu niya idwat tu kabaelan yun mengewwat ni elaw tu, niya ma-lat ma-duman hu inamta yun meippanggep nan Apu Dios. <sup>18</sup> Ey nakka iddasal ma-lat amtaen yu niya ewwatan yu kakinayyaggud etan ni ninemnem tun meippahding ni hi-gayu niyadda etan kayyaggud ni beltanen tayun nepilin tuun Apu Dios, <sup>19</sup> niya ma-lat amtaen yu hu et-eteng ni kabaelan Apu Dios ni umbaddang ni hi-gatsun kamengullug. Neipeang-ang huyyan kabaelan tun <sup>20</sup> nenaguan tun Jesus ni neteyyan tu, et payudung tud winannan tud kabunyan <sup>21</sup> et hi-gatu keta-ta-geyyan ni Ap-apun emin ni ap-apu, anin idan ap-apun eleg meang-ang, et hi-gatu hu nangnged ni emin niya hi-gatu man-ap-apun emin idan ap-apun nunya et yadalli man-ap-apun edum ni aggew. <sup>22</sup> Indawat Apu Dios nan Jesus hu kelebengan tun pan-ap-apun emin ni lintu tu. Ey hi-gatu pinutuk Apu Dios ni mengippaptek ni hi-gatsun kamengullug et hi-gatu heni ulu tayu <sup>23</sup> ey hi-gatsun kamengullug hu heni annel tu. Et humman hu, endi pangkullangan tayun kamengullug, tep emin hu wadan hi-gatu ey weddaen tu daman hi-gatsun kameibbillang ni annel tu. Hi-gatu kamenang-ang-ang ni emin ni wadad puyek niyad kabunyan.

## 2

*Heni itsu lani netey, nem yan nunya ey neila-kam itsud biyag Jesus Christo*

<sup>1</sup> Ya lan eleg yu ni pangulugan nan Apu Dios ey heni kayu netey, tep endi biyag yun kamannanang ni kamelpun hi-gatu gapuh ni liwat yun yuka pengehingin hi-gatu. <sup>2</sup> Tep ya nin nunman ey yuka u-unnudadda lawah ni kapehpehding idan eleg mengullug. Inenu-unnud yu hi Satanas e ap-apuddan lawah ni eleg meang-ang di nambattanan ni kabunyan niya puyek. Ey hi-gatu kamenettengged idan etan ni eleg mengullug nan Apu Dios. <sup>3</sup> Ma-nu tep emin itsun nunman, anin ni hi-gamin Jews ey impahding tayudda etan lawah ni wadad nemnem tayu niyadda etan kapambembangin pinpinhed ni annel tayu. Et humman hu, gullat et nannana-ud ni kastiguen daitsun Apu Dios, heniddan edum ni eleg mengullug.

<sup>4</sup> Nem anin ni hanniman et et-eteng hu hemek Apu Dios ni hi-gatsu niya et-eteng hu impeminhed tun hi-gatsu. <sup>5</sup> Et mukun heni itsu netey tep ya eleg tayu pangulugan nan Jesus Christo, nem heni itsu nekitegu mewan eman ni nenagan Apu Dios ni hi-gatu ma-lat eleg itsu law mekastigu. Huyya keang-angan tu e nehelakniban itsu tep ya binabbal tu. <sup>6</sup> Beken ni itsu nekitegun ebuh nan Christo, nem inla-kam daitsun Apu Dios di kelebengan Jesus ni man-ap-apud kabunyan. <sup>7</sup> Impahding tu emin huyyan pengippeang-angan tun et-eteng ni hemek tu niya binabbal tun ingganah ni hi-gatsun neiegi law nan Jesus Christo. <sup>8</sup> Hinelakniban daitsun Apu Dios eman ni nengulugan tayu tep et-eteng ni hemek tu niya binabbal tun hi-gatsu. Tep endi kabaelan tayun menellaknib ni annel tayu. Huyyan nehelakniban tayu ey kamelpun Apu Dios ni ebuh, <sup>9</sup> beken ni gapuh ni kayyaggud ni tayu kapehding ma-lat endi hakey ni tuun tu ippahhiyya hu nehelakniban tu. <sup>10</sup> Hi Apu Dios hu nenelaknib ni hi-gatsu gapuh ni tayu kapengullug nan Jesus Christo ma-lat ipahding tayu kayyaggud, tep humman dedan hu ninemnem Apu Dios et han maweda emin.

*Beken law ni ebuh ida hu Jews ni kabaddangin Apu Dios, nem anin ida dama law ni Gentiles*

<sup>11</sup> Nemnem yu e Gentiles kayu dedan eman ni neitungnaan yu, ey gapu tep eleg kayu makigit ey dakeyu kapipihuladdan Jews. Nem ya kakulugan tu ey ya kapampekuggisi ey malkan annel ni ebuh. <sup>12</sup> Ya lan nunman ni eleg kayu ni mangulug ey endi yu neiegian nan Jesus Christo. Ey eleg kayu maila-kam di panyaggudan idan Jews ni pinilin Apu Dios ni tuu tu niya eleg kayu maila-kam di impakulug Apu Dios ni pehding tuddan tuu tu. Et humman hu, yan nunman ey endi inna-nu yun menellakniban, tep eleg yu ni amta hi Apu Dios. <sup>13</sup> Nem yan nunya ey beken law hanniman tep neiegi kayun Jesus Christo. Neidawwi kayu lan Apu Dios, nem nekidagyum kayu law ni hi-gatu tep ya nengiketeyan Jesus Christo di krus ni liwat tayu. <sup>14</sup> Hi Jesus hu nengidagyum ni hi-gamin Jews ni hi-gayun Gentiles, et hakey itsu law ni pamilyah, tep ingkal tu hu neihehin nengappil ni hi-gatsu et eleg itsu law mambubuhulan. <sup>15</sup> Pinappeg Jesus eman ni neteyyan tu hu pengu-unnudan min Jews ni Tugun et endi law hu kapambabaklangin Jews niyadda Gentiles ma-lat hi-gatu law hu kullugen tayun emin, et mandadagyum itsu et luminggep itsun emin. <sup>16</sup> Ey gapuh ni neteyyan nan Jesus di krus ey eleg itsu law mambubuhul, nem man-unnud itsu et mangakahhakey itsun emin ni mekidagyum nan Apu Dios. <sup>17</sup> Immali et ittutuddu tu hu pekiddagyuman emin ni tuu nan hi Apu Dios. Beken law ni hi-gamin Jews ni ebuh hu kameibbillang ni tuu tu, nem anin ni hi-gayun Gentiles e neidawwi lan nunman ni hi-gatu. <sup>18</sup> Gapuh ni nengulugan tayun Jesus Christo ey dammutun mandasal itsun emin nan Apu Dios tep baddangan daitsun Ispirituh tu.

<sup>19</sup> Et humman hu, beken law ni endi yu neibilangan nan Apu Dios, nem neibilang kayun tuu tu tep nengulug kayu. Heni kayuddan edum yun kamengullug ni neibilang ni tuun Apu Dios. <sup>20</sup> Ya neihakkeyan tayun Apu Dios ey neielig di baley e hi Jesus Christo hu kamei-ellig ni pegrad tayu. Yadda kaitutuddun apostles niyadda prophets hu kamei-ellig ni neituun etan di pegrad e hi Christo. <sup>21</sup> Hi Apu Jesus hu mengikkahhakey ni emin ni kamengullug, et hi-gada hu kayyaggud ni panha-adan Apu Dios tep ya neidagyuman dan hi-gatu. <sup>22</sup> Kayu law kamengullug ni hi-gatu, et humman hu meibbillang kayu daman panha-adan Apu Dios tep wada Ispirituh tun hi-gatsun emin.

### 3

*Ya ngunun Paul ey ya mengituttudduddan Gentiles ni meippanggep nan Jesus Christo*

<sup>1</sup> Et mukun hi-gak e hi Paul e neikelabut tep ya nakka pengituttudduun meippanggep nan Jesus ni hi-gayun Gentiles ey nanengtun dakeyu kaiddasali. <sup>2</sup> Inamtak et dingngel yu e gapuh ni binabbal Apu Dios ey indinel tu huyyan ngunuk ni panyaggudan yu. <sup>3</sup> Ya etan eleg maipaamtan nunman ni planuh Apu Dios ni meippahding ey hi-gak hu nengipeamtan tu et pakitudek ku edum eyad tudek kun hi-gayu. <sup>4</sup> Et hedin bidbiden yu, ey amtaen yu humman ni inamtak ni eleg meamtan nunman meippanggep nan

Jesus Christo. <sup>5</sup> Eleg peamtan Apu Dios idan tuun nunman, nem impeamta law ni Ispirituh tuddan apostles tu et yadda prophets tu. <sup>6</sup> Heninnuy hu planuh tu: Beken ni hi-gamin Jews ni ebuh hu memeltan ni kayyaggud ni kamelpun Apu Dios, nem anin ni hi-gayu daman Gentiles. Neibilang kayu dama law ni u-ungnga tu, tep inebulut yu hu neituttuddu meippanggep nan Jesus Christo et heni hi-gatsun emin law hu annel tun meilla-kam di impakulug Apu Dios ni pehding tun panyaggudan tayu, gapuh nan Jesus Christo.

<sup>7</sup> Ey gapuh ni kakinayyaggud Apu Dios, ey pinutuk tuwak ni mengippeamtan meippanggep nunyan planuh tu. Et gapuh ni et-eteng ni kabaelan tu ey indawat tu kabaelan kun mengippahding nunyan ngunuk. <sup>8</sup> Hi-gak hu kebababahan ni emin ni tuun Apu Dios, nem ay hi-gak hu pinutuk tun mengituttudduandan Gentiles etan ni meippanggep ni et-eteng ni panyaggudan tayun wadan Jesus Christo. Humman ni panyaggudan ey endi tu kei-ingnegan. <sup>9</sup> Pinutuk tuwak mewan ni mengippeamtaddan katuutuun inna-nun pehding Apu Dios e nanletun emin, ni mengippeamnun planuh tun eleg tu peamtan eman ni laputu, ingganah nunya. <sup>10</sup> Huyyan implanuh Apu Dios ni hi-gatsun kamengullug hu kamengippeamtaddan ap-apuddan anghel et yadda ap-apun eleg meang-ang, kayyaggud niya lawah, e nekallaing hi Apu Dios. Ya keang-angan tu ey ya etan kamekapkapyan hi-gatsun kamengullug. <sup>11</sup> Huyya dedan hu ninemnem tun nunman ni meippanggep, et hi Jesus Christo e Apu tayu hu nengipeamnun tu. <sup>12</sup> Et yan nunya law ey netuled itsun mandasal nan hi Apu Dios, tep itsu kamedinnel ni ebbuluten tu dasal tayu tep ya tayu kapengullug nan Jesus. <sup>13</sup> Et humman hu, etan kedismayah yu tep nakka manlelehan ma-lat panyaggudan yu et matbal kayulli.

*Ya et-eteng ni impeminhed nan Jesus Christo ni hi-gatsun tuu tu*

<sup>14-15</sup> Hedin ninemnem ku kalinaing Ama Apu Dios e namyuh ni emin ni pamilyah ni wadad kabunyan et yad puyek, ey nakka mandasal ni pandeyyaw kun hi-gatu. <sup>16</sup> Nakka ibbagad dasal kun Apu Dios e meippuun di et-eteng ni kabaelan tu, ey pe-let ni Ispirituh tu hu nemnem yu, <sup>17</sup> niya wadan kenayun hi Jesus di nemnem yu, tep ya yuka pengullug ni hi-gatu. Ey nakka iddasal e emin itu ey meihhammad hu impeminhed tayun edum tayun tuu, <sup>18</sup> ma-lat hi-gayudtan niyaddan emin hu pinilin Apu Dios ni tuu tu ey ewwatan tayu hu et-eteng ni impeminhed nan Jesus Christo ni hi-gatsu. <sup>19</sup> Anin kulang hu nemnem tayun man-ewwatan nunman ni impeminhed tun hi-gatsu, nem nakka iddasal e lektat tu et anhan ey ya elaw tayu ey mei-inggeh di elaw Apu Dios e endi tu pangkullangan.

<sup>20</sup> Hi Apu Dios hu kamedeyyaw, tep et-eteng kabaelan tun memaddang ni hi-gatsu et tuka iddawata hu nehuluk nem ya ninemnem tayun ibbagan hi-gatud dasal tayu. <sup>21</sup> Hi-gatsun emin ni kamengullug, idaydayaw tayun ingganah hi Apu Dios, tep ya impahding Jesus Christo. Amen.

## 4

*Emin itsun kamengullug nan Jesus ey mahapul ni man-uunnud hu nemnem tayu*

<sup>1</sup> Hi-gak e hi agi yun neikelabut tep ya nakka pengituttudduin meippanggep nan Apu tayun hi Jesus Christo, ey pinhed ku et anhan ni mei-inggeh hu elaw yud pinhed Apu Dios, tep humman gaputun nemutukan daitu. <sup>2</sup> Ya kayyaggud ni pehding yu ey pebahah yu annel yu niya pan-an-anus kayu. Ey mahapul ni kababbal kayun kenayun. Hedin wada nanhahallaan yu, pan-inhuhulug kayu, tep humman elaw ni man-impipinhed. <sup>3</sup> Ipahding tayu hu kabaelan tayu et mannananeng hu panhahakkeyan tayu et melinggep itsun emin, tep wada Ispirituh Apu Dios ni hi-gatsu. <sup>4</sup> Hi-gatsun emin ni kamengullug ey itsu kameibbillang ni heni hakey ni annel, henin Ispirituh Apu Dios e hakey ni ebuh. Hakey dama etan tayu kanemnemneman lawwan tayullin hakey ni aggew e yad kadan Apu Dios di kabunyan, tep humman gaputun daitu nemutukan ni pantu-u tu. <sup>5</sup> Ey hakey ni ebuh hu Apu tayu e hi Jesus, ey hi-gatan ebuh hu tayu kakulluga, niya emin itu ey hakey ni ebuh hu elaw ni nengipeang-angan tayun nengulugan tayu, e humman hu nampebenyagan tayu. <sup>6</sup> Hakey ni ebuh hi Apu Dios e Ametayun emin ni kamengullug. Hi-gatu keta-ta-geyyan ni emin, hi-gatu nangnged ni emin niya wadan hi-gatsun emin, tep wada Ispirituh tun hi-gatsun kamengullug.

<sup>7</sup> Nem hedin ya meippanggep ni kabaelan tayun kamengullug ey nambakbaklang hu indawat Jesus Christo ni hi-gatsu. <sup>8</sup> Makulug huyya tep wada dedan impatudek Apu Dios ni kantuy "Yan nambangngadan tud kabunyan eman ni netagwan tu ey impeang-ang tu e naka-apput tudda buhul tu e hi Satanas niyadda dimonyoh et henidda law balud tu. Ey indawat tuddan tuu tu hu nambakbaklang ni kabaelan da." <sup>9</sup> Ey gapuh tep kantuy 'nambangngad di kabunyan,' ey meewwatan e immalid puyek et han



mambangngad. <sup>10</sup> Ya etan immalidya ey hi-gatu hu nambangngad di kabunyan et hi-gatu law keta-ta-geyyan ni emin ma-lat meamta e hi-gatu hu nangged ni emin. <sup>11</sup> Et hi-gatu hu nalpan ni nambakbaklang ni kabaelan ni indawat tuddan kamengullug, ya kabaelan ni man-apostle niya manprophet, ya kabaelan ni mengewwis idan tuun mengullug nan Jesus, ya kabaelan ni mengippaptek idan kamengullug niya kabaelan ni mantuttuddun meippanggep nan Apu Dios. <sup>12</sup> Huyyaddan kabaelan ey indawat tun hi-gatsun kamengullug ma-lat han-ipahding tayudda etan ngunun keiddeyyawan Apu Dios niya ma-lat hi-gatsun emin ni kamengullug ni kameibbilang ni heni annel Jesus ey meihhammad ni peteg hu tayu kapengullug. <sup>13</sup> Et lektattuy man-iinggeh hu neihammadan ni tayu kapengullug niya peka-amtaen tayullin emin hi Jesus e U-ungngan Apu Dios ey mei-inggeh hu elaw tayun hi-gatu. <sup>14</sup> Tep lawah hu heni itu u-ungngan nelakah ni medinni e hedin wada immalin mantuttuddun hin-appil, ni kinulug tayu anin ni neiha hu daka ituttuddu. <sup>15</sup> Nem ya kayyaggud et ey ebuh ida hu neiptek ni kameituttuddun e-ehhelen tayuddan edum tayu tep ya impeminhed tayun hi-gada, et meitultuluy ni umyaggud hu elaw tayun emin et meiatingeh de elaw Jesus Christo e heni ulu tayun emin ni kamengullug. <sup>16</sup> Hi-gatu hu kakelpuin emin ni biyag niya kabaelan tayu, tep hi-gatu hu heni ulu tayu. Et humman hu, emin itsun heni nambakbaklang ni parteh ni annel tu ey ippahding tayu hu neidinel ni hi-gatsun ngunu, et man-imbabaddang itu gapuh ni impeminhed et meihhammad hu tayu kapengullug.

*Yadda nengulug nan Jesus ey mahapul ni mebaluhan hu elaw da*

<sup>17</sup> Huyya e-helen kun hi-gayu: Ya pinhed Apu Jesus ey entan tu law iu-unnud di elaw idan eleg mengullug, tep neiha daka pannemnem, <sup>18</sup> et mukun eleg da han-awat hu elaw Apu Dios ey endi biyag dan kamelpun hi-gatu. Tep eleg da amta hi Apu Dios niya kahing ida. <sup>19</sup> Endi hu daka ikkapyan baing da ey lawah emin hu wadad nemnem da, et humman hu daka illaput ni mengippahding ni kumpulmih ni lawah.

<sup>20</sup> Nem hin-appil law hu elaw ni inedal yun nengabulutan yun Jesus Christo. <sup>21</sup> Tep inedal yu et u-unnudun yu hu makulug ni kayyaggud ni elaw tu. <sup>22</sup> Lawah hu elaw yun nunman et han kayu mangulug. Et humman hu, mahapul law ni iwwalleng yu humman ni elaw. Tep yan nunman ey neala ni inu-unnud yu hu pinhed yu, ey humman kaumbabhah ni neitu-wan yu. <sup>23</sup> Et mahapul law ni ya kayyaggud hu wadad nemnem yu niya kayyaggud hu elaw yu. <sup>24</sup> Em, mahapul law ni ya baluh ni elaw ni dinwat yun Apu Dios ni henin elaw tu hu u-unnud yu et peang-ang yu hu kakinyaggud tu ma-lat hi-gatu hu peamleng yu.

<sup>25</sup> Emin itu law ey mahapul ni eleg itu man-ittek, nem ya makulug hu e-helen tayun edum tayu, tep emin itu law ni kamengullug ey itu kameibbilang ni hakey ni annel Jesus. <sup>26</sup> Hedini wada binungetan yu, ang-ang yu et beken humman ni umhulun ni panliwwatan yu. Entan tu pangpanglaw hu bunget yu, <sup>27</sup> tep meidwatan hi Satanas ni wayah ni mene-ul ni hi-gayun manliwwat. <sup>28</sup> Hedini wada matekew ni hi-gayu, mahapul ni isiked tu et manggunu kumaddan ni kakkayyaggud ni ngunun pambiyagan tu, ma-lat wada inna-nu tun umbaddang idan newetwet. <sup>29</sup> Helipat-i yu mewan et hedini mekihuhummangan kayu, ey ya kayyaggud hu ene-ehhel yu ma-lat wada ibbaddang tu etan ni tuun menggel. <sup>30</sup> Ey entan tu pealmet hu Ispiritu Apu Dios ni wadan hi-gayu, tep winedan Apu Dios hu Ispiritu tun hi-gatsun heni malka tayun tuu tu, ey ya kaweda tun hi-gatsun keang-angan tun pekaggibbuhen tullin hakey ni aggew hu nehelakniban tayu. <sup>31</sup> Entan tu tettengedi hedini wada nanhahallaan yu, entan bubbunget yu, ey beken ni ya itek hu ehel yu meippanggep ni edum yu, ey entan pan-impipihul yu niya entan pan-imbabalaw yu. <sup>32</sup> Nem ya kayyaggud ey kabbabbal kayu, man-inhehkek kayu niya man-impepesinsah kayu hedini wada nanhahallaan yu henin nemesinsah Apu Dios ni liwat tayu tep ya impahding Jesus Christo.

## 5

*Ya engeenget niya kawwalwal ey nambaklang, henin kayyaggud niya lawah ni elaw e nambaklang idan peteg*

<sup>1</sup> Neibilang kayu law ni u-ungngan Apu Dios ni nakappinhed tu, et humman hu mahapul ni ippahding tayu kabaelan tayu et iu-unnud tayud elaw ni pinhed tu. <sup>2</sup> Mahapul ni man-impipinhed kayu henin impeminhed Jesus ni hi-gatsu et iketey tu hu liwat tayu. Huyyan impahding tu ey impeamleng tu hi Apu Dios tep heni mebanglun neiappit ni hi-gatu.

<sup>3</sup> Ey hi-gayun kameibbilang law ni tuun Apu Dios, ey ang-ang yu et beken ni ya lawah hu pehpehding yu henin makibii winu makilaki, ya ameh niya linggeman ni kaumbelang. Entan tu ipahding ida huyya, ma-lat endi an me-me-hel ni hi-gayun

hipan lawah. <sup>4</sup> Ey beken ida etan lawah niya endi silbitu hu yu enung-ungbalen niya entan tu halmani huhhuggut. Ya kayyaggud ey manpasalamat itsun Apu Dios gapuh ni kakinayyaggud tu. <sup>5</sup> E-helen ku mewan ni hi-gayu e makulug ni yadda makibii winu makilaki, yadda nangkabngang, niyadda maegum ey eleg ida meilla-kam di nan-apapan di Apu Dios nan Jesus Christo. Ya kangkun agum ey humman hakey ni elaw ni kapenaydayaw ni beken ni makulug ni dios.

<sup>6</sup> Entan kaheul yudda etan ni tuun kanday beken ni lawah ida huyya, tep nemahhig bunset Apu Dios idan mengippahding ni heniddan nunyan liwat et kastiguen tudda. <sup>7</sup> Et humman hu, entan keie-eddum yuddan nunman ni tuu. <sup>8</sup> Yan nunman ey heni kayu wadad engeenget tep ya liwat yu, nem ay yan nunya law ey heni kayu wadad kawwalwal tep nebalihan hu nemnem yun nengulugan yun Apu Jesus Christo. Et humman hu, mahapul ni kayyaggud hu pehpehding yu henidda etan ni tuun nebalihan nemnem da. <sup>9</sup> Tep ya tuun nebalihan nemnem tu, ey ya limpiyuh, ya kayyaggud niya neiptek hu taka pehpehding. <sup>10</sup> Ey mahapul ni ippahding yu kabaelan yun mengeddal niya mengippahding idan kayyaggud ni kamengippeamleng nan Apu Dios. <sup>11</sup> Entan tu ipahding hu kaippahding idan tuun eleg mabeliwan elaw da, nem ya kayyaggud hu ipahding yu ma-lat mabeingan ida. <sup>12</sup> Humman idan lawah ni keiddalunuh idan eleg mengullug ni daka pehpehding ey anggeba-ing ni ung-ungbalen idan kamengullug. <sup>13</sup> Nem hedin ibbunget tayudda et peamta tayudda humman ni daka pehpehding, man heniddalli nedilgan di engeenget et wadan amtaen dan lawah ida humman ni daka pehpehding et u-unnuden da kayyaggud ni elaw. <sup>14</sup> Humman keibbellinan etan ni neitudek ni kantuy "Hi-gayun nangkeugip, bangun kayu etan di heni neteyyan yu et benangan dakeyun Jesus Christo."

<sup>15</sup> Helipati-yu et peang-ang yu hu kayyaggud ni elaw ma-lat keang-angan tun nenemneman kayu et beken ni heni kayudda etan ni endi nemnem tun tuu. <sup>16</sup> Iilingsisi yun mengippahding ni kayyaggud, tep nemahhig e lawah hu kamekapkapan nunya. <sup>17</sup> Et humman hu, beken ni neala ni impahding hu pehding, nem mahapul ni nemnemen yu et amtaen yu hu pinhed Apu Dios ni pehding yu. <sup>18</sup> Entan pambuteng yu, tep humman umhulun ni panliwwatan. Nem idinel yu hu Ispirituh Apu Dios et hi-gatu mengekkenneng ni pehding yu. <sup>19</sup> Ya kayyaggud kumaddan ni pehding yu ey ia-appeh yudda hu Psalms niyadda edum ni a-appeh idan kamengullug ni pandeyyaw yun Apu Dios. Ey pannananeng yun hi-gatu daydayawen yud a-appeh yud nemnem yu. <sup>20</sup> Ey mahapul ni mansalamat kayun Ama tayu hi Apu Dios di emin ni mekapkapy e pedellan yud ngadan Apu tayu e hi Jesus Christo.

<sup>21</sup> Mahapul ni man-u-unnud kayu, tep humman keang-angan tun tayu kadaydayawa hi Jesus Christo.

*Ya tugun ni mahapul ni u-unnuden idan nampengahwan bii*

<sup>22</sup> Hi-gayuddan bibi-in nampengahwa, ey u-unnud yu ahwa yu henin yuka pengu-unnudin Apu tayu e hi Jesus Christo. <sup>23</sup> Ey hi-gayun lalaki hu lebbeng tun mengipappangulun ahwa yu henin Jesus Christo e hi-gatu kamengipappangguluddan kamengullug ni kameibbilang ni heni annel tun hinelakniban tu. <sup>24</sup> Et humman hu, hi-gayuddan bibi-i, mahapul ni u-unnuden yu hu ahwa yu, henin hi-gatsun kamengullug e hi Jesus Christo hu tayu kau-unnuda.

*Ya tugun ni mahapul ni u-unnuden idan lalakkinnampengahwa*

<sup>25</sup> Hi-gayudda daman lalakkinnampengahwa, peang-ang yu hu impeminhed yun ahwa yu henin nengipeang-angan Jesus Christo ni impeminhed tun hi-gatsun kamengullug, e ingkatey tu hu panyaggudan tayu. <sup>26</sup> Pinhed tun mambalin itsun kayyaggud di hinangan Apu Dios tep humman neipahding eman ni nengulugan tayun ehel tu et pebenyag itu. <sup>27</sup> Huyya impahding tu ma-lat hi-gatsun kamengullug ni kameibbilang ni ahwan Christo ey kakkayyaggud itu e endi liwat tayud hinangga tu. <sup>28-30</sup> Humman ni elaw ni impeminhed Jesus idan kamengullug hu pengiu-unnudan ni lakin peminhed tun ahwa tu. Tep ya laki, hedin inahwa tu hu bii ey heni hakey law hu annel da. Endi tuun anggebe-hel tu hu annel tu, nem taka ippaptek. Et humman hu, hedin kaibbilang ni lakin annel tu dama law hu annel ni ahwa tu, man mahapul ni ipapaptek tu humman ni ahwa tu, henin Jesus e taka-ippaptek ida kamengullug ni kameibbilang ni annel tu. <sup>31</sup> Huyyan kapan-addumin laki niya bii ey hi Apu Dios hu nengipanghel, e kamei-unnud etan di impaitudek tun kantuy "Ya laki ey hi-yanen tu ammed tu et man-addum idan ahwa tu et henidda law hakey ni annel." \* <sup>32</sup> Neligat ni meewwatan huyya, nem ya kei-elligan tu, ey ya meippanggep nan hi Jesus et hi-gatsun kamengullug ni kameibbilang

\* 5:31 5:31 Genesis 2:24

ni annel tu. <sup>33</sup>Nem ya pinhed daman nunyan e-helen, ey hi-gatsun lalacki, e mahapul ni pinheden tayu hu ahwa tayu, henin impeminhed tayun annel tayu. Hi-gayu damaddan bibi-i, ey mahapul ni lisipituh yu ahwa yu.

## 6

*Ya tugun ni mahapul ni u-unnuden idan u-ungnga et yadda ammed da*

<sup>1</sup>Hi-gayuddan u-ungnga, u-unnud yudda a-ammed yu, tep humman hu lebbeng tun pehding idan kamengullug nan Apu Jesus. <sup>2</sup>Tep intugun Apu Dios e kantuy "U-unnud yu hi ameyun ineyu." \* Huyya nemangulun tugun tun wada impakulug tun panyaggudan idan mengu-unnud nunyan tugun. <sup>3</sup>Kantud impakulug tuy "Kayyaggud ali meippahding ni hi-gayu, ey metu-tuan kayud puyek hedini u-unnuden yu huyyan tugun."

<sup>4</sup>Hi-gayuddan a-ammed da, entan tudda pabunget hu u-ungnga yun penuggunan yun hi-gada, nem tuttuddui yuddan elaw ni kamengullug ey itugun yu etan pinhed Apu tayun ittugun yu.

*Ya tugun ni mahapul ni u-unnuden idan himbut niyadda apu da*

<sup>5</sup>Hi-gayuddan himbut, peka-u-unnud yudda ap-apu yud puyek ma-lat peamleng yudda e heni hi Jesus Christo hu yuka ingungnungunni. <sup>6-7</sup>Entan tu peang-ang-ang e mahu kayun ebuh hedini wada ap-apu yun menang-ang-ang ni hi-gayu, et kayu petebbatebbal. Nem ya pengu-unnudan yun hi-gada ey mahapul ni melpud puhu yu, tep humman hu pinhed Apu Dios ni pehding yu. Tep kamei-ellig di bega-en dakeyu daman Jesus Christo. <sup>8</sup>Tep inamta tayu e wada panyaggudan ni iddawat Apu tayu e hi Jesus idan tuun kayyaggud hu daka pehpehding, yadda himbut niyadda beken.

<sup>9</sup>Hi-gayudda daman apu da, ipahding yu kayyaggud damaddan himbut yu. Entan tudda tenattakut, tep emin itsun tuu, himbut winu beken, ey nan-iingeh hu Apu tayu e hi Apu Dios di kabunyan. Ey hedini hi-gatu, man endi tuka pengituppugin kakinayyaggud tu winu bunget tu. Nem ya tuka panhuwet ey kameippuun di kakapkapayaan tuu.

*Ya pehding tayu hedini ippatnan Satanasi ni mene-ul ni hi-gatsu ma-lat eleg itsu manliwat*

<sup>10</sup>Ya manggillig ni e-helen ku, ey idinel yu hi Apu tayu e hi Jesus et ya et-eteng ni kabaelan tun memaddang ni hi-gayu ma-lat maihammad hu yuka pengullug ni hi-gatu. <sup>11</sup>Iusal yun emin hu indawat Apu Dios ni hi-gayun heni penenni yun annel yu ma-lat eleg kayu meapput hedini ippatnan Satanasi ni mene-ul ni hi-gayu. <sup>12</sup>Helipati yu, tep yadda buhul tayu, ey beken ni tuu, nem humman ida etan eleg meang-ang ni kaum-idwat ni lawah niya ligat di puyek. Yadda eleg meang-ang ni buhul tayu, ey humman ida dimonyoh niyadda ap-apu dan eleg meang-ang ni wada eyad puyek niyad ahpai di nambattanan eyan puyek niya kabunyan, e et-eteng kabaelan dan mengippahding ni lawah. <sup>13</sup>Et humman hu, iusal yun emin hu indawat Apu Dios ni penenni yun annel yu ma-lat hedini ippatnaddan nunman ni buhul yun mene-ul ni hi-gayu, man eleg kayu meapput, nem apputen yudda hedini ippatna yun emin hu kabaelan yun meapput ni hi-gada.

<sup>14</sup>Et humman hu, mahapul ni heni kayu sindalun nandaddan ni kenayun ni mekiggubbat. Ya kamei-ellig ni ballikid yu ey ya pengi-ehneng yun makulug ni kameu-unnud. Ey ya kamei-ellig ni ihhani yud pagew yu ey ya pengippahdingan yun kayyaggud. <sup>15</sup>Ya kamei-ellig ni patut yu ey ya neminhed yun peteg ni mengippeamtan tuttuddun Apu Dios ni kamengippelinggep. <sup>16</sup>Ey mahapul ni nehammad ni kenayun hu yuka pengullug, tep humman hu kamei-ellig ni happiyaw ni ihhani yud haul Satanasi e heni kamantetebbel ni ippana tun hi-gatsu. <sup>17</sup>Idinel yu nehelakniban yud liwat yun menennin hi-gayu, heni etan ni sindalun tuka iddinel hu helmet tun penenni tun ulu tu. Ey pandaddan kayun menghel ni ehel Apu Dios ni penemnem ni Ispirituh tun hi-gayu tep huyya heni ispadah yu.

<sup>18</sup>Anin hipa mekapkapan hi-gayu, et idinel tayu Ispirituh Apu Dios ni memaddang ni hi-gatsud pandasalan tayu. Pandasal itsun ingganah et baddangan daitsun Apu Dios. Ey entan tu liwwan ni iddasalan ida edum tayun pinili tun tuu tu. <sup>19</sup>Idasali yuwak dama ma-lat peamtan Apu Dios hu e-helen kun nak pengituttudduan ni meippanggep nan Apu tayu, niya ma-lat eggak tumekut, nem umtuleddak ni mengituttuddun nunyan panyaggudan ni eleg meamtan nunman. <sup>20</sup>Ya nakka pengituttudduin meippanggep nan Jesus hu gaputun nebangkilingannak eyad kalebut. Nem anin, idasali yuwak ma-lat eggak tumekut ni mantuttudu, tep humman hu ngunuk ni indawat Apu tayu e hi Jesus ni hi-gak.

\* 6:2 6:2 Exodus 20:12; Deut. 5:16

<sup>21-22</sup> Ittu-dak kudtan hi Taykikus e hakey ni nakappinshed tayun agi tayu niya kayyaggud ni bega-en Jesus et hi-gatu hu menghel ni hi-gayun kamekapkapyan hi-gak niyadda edum kudya, niya ma-lat petuled dakeyu.

<sup>23</sup> Kaegiegi, ya dasal ku ey hi Ama e hi Apu Dios et hi Apu Jesus Christo ey pelinggep dakeyu niya ihhammad da yuka pengullug ma-lat mannananeng hu yuka pan-impipinshedi. <sup>24</sup> Niya nakka iddasal e mewedda hu binabbal Apu Dios ni hi-gayun emin ni nehammad hu impeminshed tun Apu Jesus Christo.

## Ya Tudek Paul idan Kamengullug di Philippi

<sup>1</sup> Nalpun hi-gamin bega-en Jesus Christo e hi Paul et hi Timothy huyyan tudek min hi-gayun iPhilippi ni kamengullug nan Jesus Christo, hi-gayuddan kamengippangngulu, niya hi-gayuddan kaumbaddang idan kamengullug.

<sup>2</sup> Pinhed kun meweddan hi-gayu hu binabbal niya linggep ni kamelpun Apu Dios e hi Ametayu et hi Jesus Christo e Apu tayu.

*Ya dasal Paul ida etan ni tuun nantudkan tu*

<sup>3</sup> Nakka mansalamat ni kenayun nan Apu Dios hedini ninemnem dakeyu <sup>4</sup> niya nakka man-am-amleng ni peteg ni nakka pengiddasalin hi-gayu, <sup>5</sup> tep et-eteng hu imbaddang yun hi-gak ni mengippeamtan meippanggep ni impahding Jesus ni panyaggudan ni tuu, neipalpu la eman ni laputun nangngelan yu, ingganah nunya. <sup>6</sup> Et nakka medinnel e hi Apu Dios e bimmaddang ni nengulugan yu ey itulutuy tun mengippeyaggud ni elaw yu ma-lat kakkayyaggud kayullin peteg ni pambangngadan Jesus ni an manhuwet ni tuu.

<sup>7</sup> Heninnuy hu nakka pannemnem, gapuh ni et-eteng ni impeminhed kun hi-gayu ey neila-kam kayud hemek Apu Dios ni hi-gak tep nekibaddang kayud ngunuk ni inekud Apu Dios ni hi-gak. Em, binaddangan yuwak, anin eman lan eggak ni maikelabut ingganah nunyan iyyadya-ak di kallabbutan, gapuh ni nakka pengi-ehngeni, niya nengituttudduan kun meippanggep ni impahding Jesus ni panyaggudan tayu. <sup>8</sup> Et humman hu, nakka um-aabtun menang-ang ni hi-gayu, ey anin hi Apu Dios et inamta tu huyyan impeminhed kun hi-gayun henin impeminhed Jesus Christo.

<sup>9</sup> Dakeyu kaiddasadasali ma-lat maihammad hu impeminhed yun edum yu ey ma-lat ma-duman hu inamta yu niya pan-ewwat yu anin hipa mekapkapyu, <sup>10</sup> niya ma-lat amtaen yu hedini hipa kekakkayyaggudan ni pehding yu et endilli ha-kupan Jesus Christo ni liwat yun pambangngadan tun panhuwetan tun tuu. <sup>11</sup> Baddangan dakeyu et anhan nan Jesus Christo ni mengippahding ni kenayun ni kayyaggud, ma-lat medaydayaw hi Apu Dios.

*Endi an umpakkuk ni keippeamtan ni meippanggep ni impahding Jesus Christo ni panyaggudan ni tuu*

<sup>12</sup> Hi-gayun kaegiegi, pinhed kun peamtan hi-gayu e emin eya kamekapkapyan hi-gak, anin eya neikelabutan ku, ey bimmaddang di neipeamtan ni impahding Jesus Christo ni panyaggudan ni tuu. <sup>13</sup> Tep emin ida tutu-ud ya, anin idan eyan kamanguwalyan hi-gak di kallabbutan ey inamta da e neikelabuttak tep ya nakka pengituttudduin meippanggep nan Jesus Christo. <sup>14</sup> Ey gapuh ni neikelabutan ku ey dakel ida agi tayun kamengullug nan Apu Jesus ni neihammad law hu daka pengullug et nema-man eleg ida law umbaing ey endi takut dan mengituttuddun ehel Apu Dios.

<sup>15</sup> Ma-nu tep em, wadadda edum ni tuun kamengituttuddun meippanggep nan Jesus Christo tep ya ameh dan hi-gak, tep pinhed dan hi-gada hu metbal ni kamantuttuddu. Nem wadadda edum ni kayyaggud hu wadad nemnem dan daka pantuttuddui. <sup>16</sup> Ida kamantuttuddu tep ya impeminhed dan hi-gak tep inamta da e pinutuk tuwak nan Apu Dios ni mengi-ehngeni ni kameituttuddun meippanggep ni impahding Jesus Christo ni panyaggudan ni tuu. <sup>17</sup> Nem yadda edum ni tuu ey beken ni makulug ni kayyaggud hu wadad nemnem dan daka pantuttuddui, tep pinhed dan hi-gada meunnud. Pinhed dan ma-maen eya nakka panhelhelapid kallabbutan. <sup>18</sup> Nem anin ni hanniman hu daka pehpehding et nakka man-am-amleng, tep ya importanteh ni hi-gak ey ya keihhinnapan ni kameituttuddun meippanggep nan Christo anin na-mun kayyaggud winu lawah hu wadad nemnem ni edum ni kamantuttuddu.

<sup>19</sup> Ey mannananeng ni man-am-amleng ngak ali dama tep inamtak e emin eya kamekapkapyan hi-gak ey mambalin ni keihwangan kud ligat ku tep ya dasal yun hi-gak niya tep ya baddang ni Ispirituh Jesus Christo ni hi-gak. <sup>20</sup> Ya pinhed kun peteg et ya nakka namnamaha, ey endi nak pehding ni anggeba-ing di nakka pengippahdingin ngunuk, niya nanengtun wada tuled kun mengituttuddun elaw Jesus ni nunya heni lan nunman, ma-lat anin metteyyak, winu mambi-biyaggak et hi Jesus Christo hu kenayun ni meiddeyyaw di biyag ku. <sup>21</sup> Tep hedini hi-gak ngun nunyan mateguak, ey ya keiddayawan Jesus Christo hu pinhed kun pehpehding. Nem hedini mewan metteyyak, ey nema-man man-am-amlengngak, tep umlawwak di kad-an tu. <sup>22</sup> Nem hedini nanengtun mambi-biyaggak ni, ey nema-man dakel ippahding ku eyad ngunuk ni panyaggudan ni dakel ni tuu, et humman hu, eggak amta hedini hipa kedukdul, metteyyak winu mambi-biyaggak ni. <sup>23</sup> Eggak amta hedini hipa kakkayyaggud

idan nunyan dewwa, nem makulug ni nakka pekeddukdul ni anin metteyyak law et lumawwak di kad-an Jesus, tep humman kakkayyaggud. <sup>24</sup> Nem ay gapuh ni nakka pannemnem ni panyaggudan yu ey kedukdul hedin eggak ni mettey. <sup>25</sup> Et humman hu, inamtak e eggak ni mettey ma-lat mabalin ni um-ali-ak ni memaddang ni hi-gayu et maihammad hu yuka pengullug nan Jesus Christo ey nema-man man-am-amleng kayu. <sup>26</sup> Et emin kayu et ditan ey mema-ma amleng yun penaydayawan yun Jesus Christo, ni ellian ku mewan ni menang-ang ni hi-gayu.

<sup>27</sup> Nem anin ni hipa meippahding ni hi-gak, et ya importanteh, ey mahapul ni hellipatan yu et u-unnuden yun ingganah hu kameituttuddun meippanggep ni impahding Jesus Christo ni panyaggudan ni tuu. Ma-lat anin um-ali-ak winu eggak um-alin menang-ang ni hi-gayu, ey kayyaggud hu dedngelen kun meippanggep ni hi-gayu e kayu kaman-uunnud ni emin ni mengi-ehngeng ni nunman ni kameituttuddun kinulug tayu. <sup>28</sup> Entan takut yuddan buhul yu, tep humman pengi-immaturan dan mekastigudda tep ya liwat da, et hi-gayu hu mehellakniban. Tep endi edum ni menellaknib ni hi-gayu, nem ebuh hi Apu Dios. <sup>29</sup> Em, entan takut yu, tep beken ni dakeyu pinutuk Apu Dios ni mengullug nan Jesus Christo ni ebuh, nem panlelehhanaan yu dama, tep ya yuka pengu-unnudin hi-gatu. <sup>30</sup> Et humman hu, itsu kamekihhanggan emin etan ni buhul Apu Dios. Ey inamta yu e nemahhig hu nanligligatan kun nunman ey anin yan nunya et nanengtun nakka mekihennanggaddan buhul tu.

## 2

### *Kapebahah Jesus hu annel tu*

<sup>1</sup> Nakka medinnel ni peteg e gapuh ni yuka pengullug nan Jesus Christo ey neteled kayu niya meellubyag kayu, tep et-eteng hu impeminhed tun hi-gayu. Ey nakka medinnel e gapuh ni baddang ni Ispirituh Apu Dios ey kayu kamanhimbababbal niya kayu kaman-inhehnek. <sup>2</sup> Et humman hu, peang-ang yu hu nan-impipinhedan yu, pandadagayum yu hu nemnem yu niya panhimbabaddang kayu ma-lat nema-man um-amlenggak ni peteg. <sup>3</sup> Beken ni ya panyaggudan yun ebuh hu nemnemen yu ey entan pampahhiyya yu, nem pebahah yu annel yu niya ibilang yun kekkeddukdul hu edum ni tuu nem hi-gayu. <sup>4</sup> Nemnem yu dama panyaggudan ni edum yun tuu, et beken ni ya panyaggudan yun ebuh hu ikakkaguh yu.

<sup>5</sup> Ya elaw nan Jesus Christo hu pengiu-unnudi yun emin ni elaw yu.

<sup>6</sup> Tep hi Jesus ey Dios ngu dedan, nem eleg tu nemnemen ni mannenneng di saad tu, <sup>7</sup> ey inhulug tun emin hu kasina-gay tu et ibilang tu annel tun bega-en. Ey nambalin ni tuu, et humman hu, yan kaweda tud puyek ey tuu hu ang-ang tu. <sup>8</sup> Impebahah tu annel tu et iketey tu nengu-unnudan tun pinhed Apu Dios, anin ni angebahing humman ni neteyyan tud krus. <sup>9</sup> Et gapuh nunman ey hi-gatu inha-ad Apu Dios ni keta-ta-geyyan di kabunyan ni kamedeyyaw et hi-gatu law hu Ap-apu emin. <sup>10</sup> Et humman hu, emin hu wadad puyek, yad kabunyan et yad nandaul, ey mandukkun idan mandeyyaw ni hi-gatu. <sup>11</sup> Ey emin idalli tuu ey ihhudut da e makulug ni hi Jesus Christo hu Ap-apu et maidaydayaw hi Apu Dios e Ametayu.

### *Daitsu kabaddangin Apu Dios ni mengippahding ni pinhed tu*

<sup>12</sup> Hi-gayun aaggik ida ey yan eman ni wada-ak ditan kad-an yu, ey neka-u-unnud yu tugun ku, et yan nunyan neidawwi-ak ni hi-gayu ey pinhed kun ilillingitan yun u-unnuden ida humman ni inedal yun hi-gak. Niya pinhed kun ihhammad yun mengu-unnud nan Apu Dios e umtakut kayun mengippahding ni lawah ma-lat mambalin kayu etan ni pinhed tun pambalanan yu e humman gaputun nenelakniban tun hi-gayu. <sup>13</sup> Mahapul ni humman pehding tayu, tep hi Apu Dios hu kakelpuin kabaelan tayu niya impeminhed tayun mengippahding ni pinhed tu.

<sup>14</sup> Ipahding yudda hipan pehding yu e eleg mahapul ni kayu manlillih niya mekittuttut, <sup>15</sup> ma-lat endi pambehhulan yu niya endi lawah ni mee-ehhel ni hi-gayu. Et hi-gayu keang-angan ni makulug ni u-unggan Apu Dios e heni kayu bittuwen ni kaumbenang, tep hin-appil hu elaw yud elaw idan lawah ni tuun neipngil hu daka pannemnem. <sup>16</sup> Et hi-gayu pengi-ang-angan da niya pengamtaan da etan ni kameituttuddun kakelpuin biyag ni endi papgep tu. Hedin ippahding yudda huuya, ey man-am-amlenggak alin pambangngadan Jesus Christo, tep wada silbin ngunuk ni nak nea-atuan ni panyaggudan yu. <sup>17</sup> Anin na-mun mahapul ni metteyyak ma-lat endi kulang tu hu yuka pengullug, ey anin, man-am-amlenggak ni mengihullug ni biyag ku nemet maka-ihhammad hu yuka pengullug nan Jesus, <sup>18</sup> ma-lat wada inna-nu tun man-am-amleng itsun emin.

*Di Timothy nan Epaproditus*

<sup>19</sup> Nakka medinnel e i-abulut Apu Jesus ni ittu-dak kula hi Timothy ditan ma-lat dakeyu pepuhdanan hedinn inna-nu kayud tan, et hedinn mambangngad ey wadan um-amlengngak alin mengngel ni meippanggep ni hi-gayu. <sup>20</sup> Hi-gatu ittu-dak ku, tep hi-gatun ebuh hu kamengikakkaguh ni hi-gayu, tep tuka pakannemnema hu panyaggudan yu, ey henin nakka pannemnem ni hi-gayu hu tuka pannemnem. <sup>21</sup> Tep yadda eya edum ni wadadya ey ebuh panyaggudan dan daka nenemnema e beken ni ya pengipahdingan dan impangunun Jesus Christo ni hi-gada. <sup>22</sup> Nem inamta yu e hi Timothy ey impeang-ang tud elaw tu e kameiddinnel ey heni kami han-aman kamanbinnaddang, tep binenaddangan tuwak ni nengituttudduan kun meippanggep ni impahding Jesus Christo ni panyaggudan ni tuu. <sup>23</sup> Hi-gatulli ittu-dak kudtan, nem hehgeden ku ni- et amtaen ku hedinn hipa meippahding ni hi-gak di deya. <sup>24</sup> Nem nakka medinnel nan Apu Jesus Christo et wadan anggegannu law ey meibbukyattak eyad kallabbuttan et wadan anin hi-gak et um-ali-ak ali daman menang-ang ni hi-gayu.

<sup>25</sup> Nem ay, nakka nemnemnema mahapul ni pambangngad kudtan eya hakey ni intu-dak yun bimmaddang ni hi-gak e hi Epaproditus. Hi-gatu numan hakey ni agi tayun kamengullug ni heni sindalun impangkadwak ni nangngunungunun impangunun Jesus. <sup>26</sup> Anin ew ni um-alidtan, tep ihik ni menang-ang ni hi-gayu ey kamedennagin nangngelan yun nandegehan tu. <sup>27</sup> Makulug ni nandegeh et innang ni mettey, nem himmek Apu Dios et yumaggud. Himmek tuwak dama, tep gullat ni netey et nangkeidum di ligat ku. <sup>28</sup> Et mukun nakka um-abtun lawwan tudtan ma-lat man-am-amleng kayun menang-ang mewan ni hi-gatu niya ma-lat ma-kal dama danag kun hi-gayu. <sup>29</sup> Hedinn umdateng ditan, ey peang-ang yu amleng yu niya lispituh yun hi-gatu e agi tayun kamengullug nan hi Jesus. Lispituh yudda dama etan tutu-un henin hi-gatu elaw da. <sup>30</sup> Hi Epaproditus ey beken numan ni ya annel tu hu ingkakaguh tun nengipahdingan tun ngunun indawat Jesus Christo, et mukun innang ni mettey ni nemaddangan tun hi-gak. Tep inamta tu e endi inna-nu yun memaddang ni hi-gak, tep endi kayud ya.

### 3

*Ya dinel tayun Jesus Christo hu keippuunan ni pengibbillangan dait sun Apu Dios ni kayyaggud*

<sup>1</sup> Ya law e-helen kun hi-gayun kaegiegi ey pinhed kun man-am-amleng kayu tep ya neiegian tayun Apu tayu hi Jesus Christo. Eggak higgain mengippenidwan mengittuddek ni nunyan emin ni tugun ni hi-gayu, tep panyaggudan yu niya meihwang kayud lawah.

<sup>2</sup> Helipat-i yudda etan tutu-un heni ahhun endi baing da. Neihla hu daka ituttuddu, tep kanda, ya kekuggitan hu kapengibbillangan Apu Dios ni kayyaggud hu tuu. <sup>3</sup> Ya makulug ni kaibbilang Apu Dios ni kayyaggud ey hi-gatsun kamengullug, tep daitu kabaddangin Ispirituh tun tayu kapenaydayawin hi-gatu, ey tep hi Jesus Christo hu tayu kaidinnel ni menellaknib ni hi-gatsu, beken ni ya kapampekugiti.

<sup>4</sup> Tep gullat ni ya kapampekuggiti winu ya impahding hu pengibbillangan Apu Dios ni pengibbillangan tun kayyaggud hu tuu ey hi-gak et hu tinetebbal tun kayyaggud, tep daddakkel hu impahpahding kun pengippuunan tun kayyagguddak. <sup>5</sup> Tep hi-gak, ey inu-unnud kun emin hu tugun ni kau-unnudaddan Jews. Nekugittak eman ni kawelun aggew ni neiungnga-ak, niya helag tuwak Israel ni pinutuk Apu Dios ni pantu-u tu, tep helag da-ak Benjamin. Ey Pharisee hak lan nunman, et naka-u-unnud kun emin hu intugun Apu Dios nan Moses. <sup>6</sup> Et gapuh ni nakka pengi-ehngeng ni nunman ni nakka u-unnuda ey nemahhig hu impahding kun nengipehelheltap idan kamengullug nan Jesus, tep kanku ngu nem humman hu pinhed Apu Dios. Endin hekey hu eggak u-unnuden idan tugun min Jews.

<sup>7</sup> Emin ida huuya ey kangku ngu nem humman pengibbillangan Apu Dios ni hi-gak ni kayyaggud. Nem ay nakka nemnemnema law ey endi silbiddan nunman. Et humman hu, inwalleng kudtan emin, et hi Jesus Christo law hu nakka iddinel. <sup>8-9</sup> Makulug ni endi edum ni kekkeddukdul ni peteg nem ya pengamtaan kun Apu Jesus Christo. \* Huuya gaputun inwalleng kudtan emin ida etan nandinelan ku, et hi Jesus Christo law hu nakka iddinel. Eggak law iddinel hu nakka pengu-unnudin Tugun Moses, tep beken ida humman ni kapengippuunan Apu Dios ni pengebbulutan tun tuu. Yan nunya ey tuwak law kaibbilang nan Apu Dios ni kayyaggud tep ya nengulugan kun Jesus. <sup>10</sup> Et humman hu, ya pinhed ku law ey peka-amaten ku hi Jesus Christo, † niya gibbeken ku et-eteng ni kabaelan ni netagwan tu. Ey pinhed ku pay ni mekilliligat di nanligligatan tu et yad

\* **3:8-9** 3:8-9 Ya keibbellinan tu: "nem ya peki-eggian kun Apu Jesus Christo." † **3:10** 3:10 Ya keibbellinan tu: "ey ya nehammad ni peki-eggian kun Jesus Christo."

neteyyan tu, et mabeliwan hu elaw ku et maiingneh ni elaw tu, <sup>11</sup> ma-lat umamnu hu nakka namnama e meteguan nak ali dama e henin hi-gatu.

*Ya pehding tayu ma-lat hakey alin aggew, ey henillin elaw Jesus Christo hu elaw tayu*

<sup>12</sup> Beken ni kangkuy impahding ku law emin huuya ey heni law elaw Jesus hu elaw ku, nem nakka ippatnan emin hu kabaelan kun mengu-unnud ni pinhed tun pambalanan kun nenelakniban tun hi-gak. <sup>13</sup> Kaegiegi, makulug ni eggak ni mambalin etan di pinhed Jesus Christo ni pambalanan ku, nem ya pehding ku ey liwwanan ku hu neitu-wan ku lan nunman, et ikahhakey ku nemnem kud pinhed Apu Dios ni pehding ku. <sup>14</sup> Et humman hu, ippahding kun emin hu kabaelan kun mengippahding nunman ni pinhed Apu Dios, e humman gaputun nemilian tun hi-gak ni pengidwatan tun panyaggudan kud kabunyan, gapuh ni impahding Jesus Christo.

<sup>15</sup> Hi-gatsuddan neihammad hu tuka pengullug, mahapul ni man-iingeh hu pannemnem tayu, ma-lat anin ni wadadda etan edum ni bimmaklang hu daka pannemnem meippanggep ni nunya, ey iddinel tayun Apu Dios et ngenamung tun memaddang ni hi-gada ma-lat awatan da. <sup>16</sup> Nem anin ni hanniman ey itultuluy tayun u-unnuden etan neituttuddun hi-gatsun kayyaggud.

<sup>17</sup> Kaegiegi, iu-unnud yun hi-gak heniddan edum tayu. Impeang-ang min emin hu kayyaggud ni u-unnuden yu. Et humman hu, iu-unnud yud elaw mi. <sup>18</sup> Iyyadyan nakka umlewan mannemnem ida etan ni dake ni tuun in-inhel kun hi-gayun nunman, tep nanengtung daka kakkahinga hu neteyyan Jesus di krus ni neneklaan tun liwat tayu. <sup>19</sup> Huuyaddallin tutu-u ey mekastiguddan ingganah di impierno, tep ya pinhed ni annel da hu impambalin dan heni dios da, niya daka ippahhiyadda etan anggeba-ing ni daka pehpehding. <sup>20</sup> Nem hedin hi-gatsu ngun kamengullug, ey yad kabunyan hu panhadan tayullin ingganah. Et humman hu, itu kaum-aabtun ellian Apu Jesus Christo e nenelaknib ni hi-gatsu. <sup>21</sup> Et gapuh ni et-eteng ni kabaelan tu ey belliwat tu eya kamettye ni annel tayun henin annel tun netagwan tu, ma-lat eleg itsulli law mettey. Et hi-gatulli law hu man-ap-apun emin, anin di attu.

## 4

*Ya tugun meippanggep ni umus, ya amleng niya linggep*

<sup>1</sup> Hi-gayun kaegiegin kamengullug ni nakappin角度 ni niya kamengippeamleng ni hi-gak, ey pinhed dakeyun peteg ni ang-angen. Hi-gayu hu nambalanan ni nan-aatuan kud ngunuk. Et humman hu, ihammad yu hu yuka pengullug nan Apu tayu e hi Jesus Christo.

<sup>2</sup> Ya pinhed ku daman hi-gayu e Uodia nan Sintayki ey isiked yu law ni man-indekdug. Iyayyaggud yun ihummangan ey pan-inhuhudhud kayu hedin wada nanhallaan yu, tep humman hu kayyaggud ni kapehding ni kamengullug nan Jesus. <sup>3</sup> Hi-gam e kaumbaddang ni hi-gak, baddangim ida anhan huayan bii, tep binenaddangan da-ak numan ni hi-gada eman ni nak nantuttudduan ni meippanggep ni impahding Jesus ni panyaggudan ni tuu. Hi-gada numan ni emin di Clemente et yadda etan edum hu nekibaddang ni hi-gami. Anin ni eggak ida ngeddana et inamtak e wada ngadan dad liblul ni keittuddekan ni ngadan idan tuun meidwatan ni biyag ni endi pappeg tu.

<sup>4</sup> Pinhed kun meweddand ingganah ni hi-gayu hu amleng tep ya neiegian tayun Jesus Christo. Ippidwak ni e-helen e pan-am-amleng kayun emin.

<sup>5</sup> Peang-ang yud emin ni tuu hu binabbal yu, tep kamangkedettengi law hu ellian Apu tayu e hi Jesus Christo. <sup>6</sup> Entan kakkaguh yuddad hipa humman, nem idasal yun Apu Dios et ehelen yun emin ni hi-gatu hu mahapul yu, niya pansalamat kayun hi-gatu. <sup>7</sup> Ya pambalanan tudda huuya ey pelinggep daitsun Apu Dios et eleg itu umkakaguh di linggeman niya eleg itu umnenemnem, tep baddangan daitsun Jesus Christo. Humman ni linggep ni kamelpun Apu Dios ey eleg tayu han-awat, tep kulang itsun man-ewwat.

<sup>8</sup> Kaegiegi, ya mangillig ni e-helen kun hi-gayu, ey nemnem yudda etan kayyaggud, ya neiptek, ya limpiyuh, ya keiddeyyawan niya ketbalan di kayyaggud, et humman ida pehding yu. <sup>9</sup> Emin hu inedal yun hi-gak niya inenang-ang yun impahding ku, ey humman ida pehding yu, et wada hi Apu Dios e kakelpuin linggep ni umbaddang ni hi-gayu.

*Kamansalamat hi Paul idan tuud Philippi tep ya baddang dan hi-gatu*

<sup>10</sup> Nebayag ni endi yu impaelin baddang yu, nem ay nakka man-am-amleng law mewat tep wada impaeli yu. Beken ni yuwak inwalleng, nem inamtak e endi innanu yun mengippeellin baddang yun hi-gak. <sup>11</sup> Entan tu nemnem e nakka pan-e-hela huuya gapuh ni mahapul ku. Eggak manlilih tep nakka mepnik ni hipan wadan hi-gak. <sup>12</sup> Inamtak hu meippanggep ni neligat niya nelam-ay ni biyag. Et humman hu, anin ni



hipa meippahding ni hi-gak ni nunyan mategu-ak ey um-amlenggak. Anin ni en-endin hekey ni hi-gak winu wadwada-an nak et nan-ingneh metlaing. <sup>13</sup> Mukun kabaelan kun ennusan hu hipan meippahding ni hi-gak, ey tep tuwak kabaddangin Jesus Christo.

<sup>14</sup> Nem anin ni hanniman, et kayyaggud anhan et binaddangan yuwak di ligat ku. <sup>15</sup> Hi-gayuddan kamengullug di Philippi, ey inamta yu e yan eman ni neni-yanan kun Macedonia ni nengilepuan kun nantuttuddun meippanggep nan Jesus ey hi-gayun ebuh hu bimmaddang ni hi-gak di mahapul ku. <sup>16</sup> Anin eman ni wada-ak di Thessalonica et immenidwat kayun mahapul ku. <sup>17</sup> Beken ni nak e-helen huyya, tep nakka gamgami hu iddawat yun hi-gak, nem tep pinhed kun amtaen yu e wadalli iddawat Apu Dios ni gen-uden yu, gapuh ni nemaddangan yun hi-gak. <sup>18</sup> Yan nunya law ey wadan emin hu mahapul ku, tep dinwat ku hu dakel kumamman ni imbaddang yun hi-gak ni impaela yun nan hi Epaproditus. Huyyan indawat yun hi-gak ey heni hi Apu Dios hu nengidwatan yu, ey tuka ebbuluta niya kaman-am-amleng ni nunyan impahding yu. <sup>19</sup> Et hi Apu Dios e wadan emin ni hi-gatu hu mengidwat ni emin ni mahapul yu, gapuh ni yuka pengullugin Jesus Christo.

<sup>20</sup> Hi Apu Dios e Ametayu hu meidaydayaw ni kenayun. Amen.

<sup>21</sup> Pinhed kun peamta yuddan emin ni edum tayun kamengullug nan Jesus ditan e hi-gak et yadda agi tayun kamengullug ni wadadya ey dakeyu kanenemnema. <sup>22</sup> Ey emin ida kamengullug di deya, nema-madda eya kamampangngunnud baley ni patul ey kanday dakeyu dama kanenemneman hi-gada.

<sup>23</sup> Pinhed kun mewedda hu binabbal Apu Jesus Christo ni hi-gayun emin.

## Ya Tudek Paul idan Kamengullug di Colossae

<sup>1</sup> Huyyan tudek ey nalpun Timothy e agi tayu et hi-gak e hi Paul hu pinutuk Apu Dios ni pan-apostle nan Jesus Christo. <sup>2</sup> Tudek mi huyyan hi-gayun kaegiegid Colossae ni tuun Apu Dios e edum min nehammad hu tuka pengullug nan Jesus Christo.

Pinhed kun meweddian hi-gayu hu binabbal niya linggep ni kamelpun Apu Dios e Ametayu.

### *Ya dasal di Paul idan kamengullug di Colossae*

<sup>3</sup> Kenayun ni dakeyu kaiddasali niya kami kamansalamat nan Apu Dios e Aman Apu tayu e hi Jesus Christo <sup>4</sup> tep ya nangngelan min yuka pengullug nan Jesus Christo et ya yuka pemihed idan tuun Apu Dios. <sup>5</sup> Neipalpu eman ni nengamtaan yun makulug ni kameituttuddu e humman hu impahding Jesus ni kehellakniban tayun neliwtan, ey nehammad hu yuka pengullug tep yuka namnamaha etan kaihehhegged Apu Dios ni hi-gayud kabunyan. Et gapun nunman ni yuka hehheggeda, ey kayu kamengullug niya wada impemihed yun edum yu. <sup>6</sup> Huyyan kameituttuddu ey kamangkeihhinnap di kebbebley. Ey dakei ida law hu tuun nehelakniban et mabeliwan biyag da henin nebiawan ni biyag yu eman ni nangngelan yu et awatan yu meippanggep ni binabbal Apu Dios idan neliwtan. <sup>7</sup> Inedal yu huyyan kameituttuddu nan Epaphras e kameiddinnel ni edum tayun bega-en nan Jesus Christo ni kamemabbaddang ni hi-gamin mantuttuddun meippanggep ni hi-gatu. <sup>8</sup> Inhel tun hi-gami hu impemihed yun nalpu etan ni Ispirituh Apu Dios.

<sup>9</sup> Et mukun yan nangngelan min meippanggep ni yuka pengullug ey indasadasalan dakeyu ingganah nunya, ma-lat baddangan dakeyun Apu Dios et paka-awatan yu hu kameituttuddun kamelpun Ispirituh tu. Ey ma-lat amtaen yun emin hu pinhed tun pehdng yu, <sup>10</sup> niya ma-lat meiuunnud hu pambi-biyag yud pinhed tu, et umamleng. Et gapuh ni kayyaggud ni pehdng yu, ey mebaddangan ida dakei ni tuu, niya me-duman hu inamta yu meippanggep nan Apu Dios. \* <sup>11</sup> Mika iddasal nan Apu Dios e gapuh ni et-eteng ni kabaelan tu ey petuled dakeyu ma-lat anin ni hipan ligat hu um-alin hi-gayu ey kabaelan yun ennsuan. <sup>12</sup> Ey ma-lat man-am-amleng kayun mansalamat nan Ametayu e hi Apu Dios, tep indawat tun hi-gatsun kamengullug ni kelebngan tayun umlaw di kad-an tud kawwalwal ni ingganah. <sup>13</sup> Ingkal daitsud engeenget ni kapan-ap-apuin Satanas, et i-tan daitsud kapan-ap-apuin Jesus Christo e U-ungnga tun nakappinshed tu. <sup>14</sup> Hi-gatu hu nangkal ni liwat tayu, tep sinekla tun neteyyan tu.

### *Hi Jesus hu keta-ta-geyyan*

<sup>15</sup> Hi Jesus Christo hu pengi-ang-angan tayun Apu Dios e eleg meang-ang. Hi Jesus ey wada ngu dedan et han mawedan emin eya wadan nunya, niya hi-gatu keta-ta-geyyan di emin. <sup>16</sup> Emin eya wadad puyek, anin idan wadad kabunyan ni kameang-ang niya eleg meang-ang, yadda nambakbaklang ni ap-apu, niyadda anghel ni kayyaggud niya lawah, ey wineda tu ma-lat kaidaydayawan tu. <sup>17</sup> Wada ngudedan hi Jesus et han mawedan emin eya wadan nunya. Ey wada panuh ni emin ni hipan naltu, tep hi-gatu hu kamengippaptek ni emin. <sup>18</sup> Hi-gatsun kamengullug hu heni annel tu niya hi-gatu heni hu ulu tayu, et hi-gatu kamenettengged ni hi-gatsun emin. Hi-gatu keta-ta-geyyan, tep sinegun Apu Dios, et humman hu, hi-gatu kamedaydayaw di emin ni kamedeyyaw. <sup>19</sup> Mukun hanniman, ey tep hi Jesus Christo e U-ungngan Apu Dios ey wada kinaDios tu, et humman hu, emin hu wadan Apu Dios ey wada daman hi-gatu, tep humman dedan hu pinhed Apu Dios. <sup>20</sup> Hi Apu Dios ey pinhed tun manhaddak ni hi-gatu hu mengippaptek ni emin ni wadad kabunyan niyad puyek. Humman gaputun intu-dak tu hi Jesus eyad puyek et matey di krus ma-lat wada inna-nu tayun mekillinggep ni hi-gatu.

<sup>21</sup> Yan nunman lani ey buhul dakeyun Apu Dios, tep lawah lani nemnem yu, niya lawah hu yuka pehpending. <sup>22</sup> Nem yan nunya ey beken daitsu law buhul nan Apu Dios, tep ingkatey Jesus hu liwat tayu, et ibilang daitsu law ni kayyaggud. <sup>23</sup> Nem mahapul ni pannananeng tayun mengiddinnel ni neituttuddun hi-gatsu meippanggep ni neteyyan Jesus e humman pengiddinnelan tayun kehellakniban tayu. Huyyan neituttuddun hi-gatsu ey nan-amtad kebbebley di puyek. Ey hi-gak e hi Paul hu hakey ni pinutuk Apu Dios ni mengittuttuddun nunyad kebbebley.

### *Ya ngunun indinel Apu Dios nan Paul*

\* **1:10** 1:10 Ya keibbellinan ni "me-duman hu inamta yu meippanggep nan Apu Dios" ey "meihammad hu pekiddagyuman yun Apu Dios."

<sup>24</sup> Yan nunya ey nakka man-am-amleng, anin ni nakka panlelehani hu nakka pengituttudduin panyaggudan yu, tep huyyan nakka panlelehani ey heni-ak neilegat di nanlelehanan Jesus Christo ma-lat umamnu hu pinhed tun meippahding di nanhelheltapan tu, et panyaggudan tayun kamengullug e kamebillang ni annel tu. <sup>25</sup> Hi-gak hu hakey ni pinutuk Apu Dios ni mengihhammad ni pengullug idan kamengullug ni pengituttudduan kun emin ni pinhed tun meituttuddu, nema-man hi-gayun beken ni Jews. <sup>26</sup> Humman ni nakka ituttuddu ey eleg tu la ni peamtan nunman, nem impeamta tu law idan tuu tun neibilang ni kayyaggud. <sup>27</sup> Et hi-gatsun tuu tu hu pinutuk tun pengippeamtaan tun nunman ni kakkayyaggud ni planuh tu dedan la. Huyyan planuh tu ey mewedda hi Jesus Christo ni hi-gatsun kamengullug, anin ni hi-gayun beken ni Jews, et humman hu, tayu kanamnamaha e meilla-kam itsud keiddeyyawan Apu Dios.

<sup>28</sup> Et humman hu, mika ippatnan emin hu kabaelan min mengituttuddun meip-panggep nan Jesus Christo di emin ni mika lawwi ma-lat mangulug idan hi-gatu, niya ma-lat meihhammad ali hu pengullug dan hi-gatu. <sup>29</sup> Huyya gaputun nakka man-eellet di ngunuk, anin ni neligat. Nem nakka iddinel hu kabaelan ni indawat Jesus ni hi-gak ni mengippahding idan nunya.

## 2

<sup>1</sup> Hi-gayun kamengullug di Colossae ey pinhed kun amtaen yu e hi-gak ey nemahhig hu kaguh kun hi-gayu et mukun dakeyu kaiddasadasali, anin idan kamengullug di Laodicea niyadda etan edum ni eleg mengang-ang ni hi-gak. <sup>2</sup> Tep pinhed kun petuled dakeyu ma-lat pannananeng yu hu yuka pengiddinnet nan Jesus Christo et paka-amtaen yu meippanggep ni hi-gatu e humman hu eleg peamtan Apu Dios ni nunman. Ey pinhed kun man-uunnud kayu tep ya impeminhed yun edum yu. <sup>3</sup> Hi Jesus ey kamei-ellig di alladdun kapenukwab ni emin ni neitlud nemnem Apu Dios niya kalinaing tu. Tep hi-gatu mengippeamtaan Apu Dios ni hi-gatsu niya wadan hi-gatu emin hu wadan Apu Dios.

<sup>4</sup> Inhel kun hi-gayu huyya ma-lat eleg kayu maheul hedin wadadda um-alin mantuttuddun hin-appil, anin ni kayyaggud daka penappihappit. <sup>5</sup> Tep anin ni endi-ak ditan, et heni-ak damengu wada tep dakeyu kanenemna. Ey nakka man-am-amleng ni menang-ang ni elaw yun kayyaggud et ya nehammad ni yuka pengullug nan Jesus Christo.

*Hi Christo ni ebuh hu kakelpuin emin ni panyaggudan tayu*

<sup>6</sup> Et gapu tep inebulut yu hi Jesus Christo ni Apu yu, ey mahapul ni itultuluy yun medinnet e baddangan dakeyun hi-gatun kewa-wa-wa, <sup>7</sup> e mei-ellig ni umlamut kayun hi-gatu, et hi-gatu mengippeteggun hi-gayu, ma-lat meihhammad hu yuka pengullug ni hi-gatu et hi-gatu hu u-unnuden yun emin di yuka pehpehding henin neituttuddun hi-gayun nunman. Ey kayyaggud ni mampesalamat kayun kenayun ni hi-gatu.

<sup>8</sup> Helipat-iyu ma-lat eleg kayu maheul idan um-alin mantuttuddun beken ni makulug. Tep ma-nut nekallaing idan umhapi, nem eleg malpun Jesus Christo hu daka ituttuddu, tep nalpud tuu et yadda dimonyoh ni kaumhaul ni tuud kebebbbley. <sup>9</sup> Nemnem yu e hi Jesus Christo ey nambalin ni tuu, nem wadan emin hu kabaelan Apu Dios ni hi-gatu, tep hi-gatu ey Dios dedan. <sup>10</sup> Et gapu tep neidagyum kayun Jesus Christo ey neila-kam kayud biyag tun endi kulang tu tep ya yuka pengullugin hi-gatu. Hi Jesus hu keta-ta-geyyan di emin ni ap-apu, anin idan edum ni wada kabaelan dan eleg meang-ang, heniddan dimonyoh niya anghel.

<sup>11</sup> Hi-gatsun kamengullug ey heni itu nekugit, nem ya nekugitan tayu ey beken ni henin kaehding ni tuu. Nem humman hu nengipesikedan Jesus Christo ni hi-gatsun mengippahding idan etan ni lawah ni pinpinhed ni neitu-wan tayun lawah. <sup>12</sup> Tep yan eman ni nebenyagan yu ey heni nekikulung nan Jesus Christo hu lawah ni neitu-wan yu. Nem yan netagwan tu ey heni kayu nekitegun hi-gatu et mehullulan hu neitu-wan yu, tep kinulug yu kabaelan Apu Dios ni nenagun hi-gatu.

<sup>13</sup> Heninnuy hu elaw tu: Hi-gayun beken ni Jews ni eleg ni mengamtaan Apu Dios ey heni kayu lani netey tep ya liwat yu, nem heni dakeyu sinegun Apu Dios niya pinesinsahan tu liwat yu tep heni kayu nekitegun Jesus Christo eman ni netagwan tu. <sup>14</sup> Gullat et mekastigu itu tep ya liwat tayun eleg tayu pengu-unnudan idan tugun tu, nem pinesinsahan tun emin liwat tayu eman ni neipetakan Jesus di krus. <sup>15</sup> Ya neipetakan tud krus hu nengapputan tuddan emin ni dimonyoh niyadda ap-apu da et mepappeg hu kelebengan dan man-ap-apun hi-gatsu. Huyya pengamtaan emin ni katuutu e hi Jesus ni ebuh hu Ap-apu.

<sup>16</sup> Et humman hu, ang-ang yu et eleg dakeyu haulen idan um-alin menghel ni kanday wada kamepi-yew ni kennen, ya meinum, yadda kamengillin ni bulan niya aggew, henin Sabaduh. <sup>17</sup> Huyyaddan tugun ey eleg law mahapul, tep henidda allinnew ni ebuh etan ni makulug ni u-unnuden tayu e hi Jesus Christo. <sup>18</sup> Entan tu kukkullug ida etan kamemihlu ni yuka pengullug e kanday nehammad hu daka pengullug. Tep hedini hi-gada, ey heni daka pebabah numan hu annel da tep dakek ni daka pi-yewa niya kanday daka daydayawadda anghel. Nem ya kakulugan tu ey daka peta-gey annel da, tep kanday wada daka ang-angad i-innep da, ey humman man anhan hu daka importantehan ittutuddu. Nem ya gaputun daka pannemnemiddan henin nunya ey tep eleg mabeliwan hu nemnem da. <sup>19</sup> Beken hi Jesus Christo hu kapandinneliddan nunman ni tuu. Nem ya kakulugan tu ey hi-gatu hu heni ulu tayu. Hi-gatu nangnged ni hi-gatsun heni parteh ni annel tu. Niya hi-gatu kamengippa-let ni hi-gatsun mengu-unnud ni emin ni pinhed Apu Dios ni pambalihan tayu.

*Heni itsu nekiketey nan Jesus et makitegu itsu mewani ni hi-gatu*

<sup>20</sup> Hi-gatsun kamengullug ey heni itsu nekiketey nan Jesus Christo eman ni neteyyan tu, et beken ida law etan lawah ni eleg meang-ang hu man-ap-apun hi-gatsu. Nem keke nanengtun yuka iu-unnud di tugun idan eleg mangulug, e kanday <sup>21</sup> "Entan tu tenged hu dimmen," ey "Entan tu ekan dimmen," niya "Entan tu kapa dimmen." <sup>22</sup> Emin ida huyyan daka ikkakaguh ey beken idan importanteh, tep eleg ida mannenneng, nem meendidda. Nalpuddad tuu huyyan tugun, beken hi Apu Dios. <sup>23</sup> Yadda etan tuun kamengu-unnud idan nunyan tugun ey henidda numan nenemnem, tep daka pehding ni emin kabaelan dan mengu-unnud ni hipan kandan mahapul ni u-unnuden. Anin namun daka panlelehani et daka an-anusi. Ey yad daka pengu-unnuddan nunya ey heni da numan kebabah hu annel da. Nem huyyaddan daka pehding ey endi silbitu, tep eleg umbaddang ni hi-gadan mengissiked ni mengippahding ni lawah ni pinhed ni annel da.

### 3

*Ya elaw ni baluh ni neitu-wan ni kamelpun Jesus*

<sup>1</sup> Hi-gayu law ey kayu kameibbillang ni nekitegun Jesus Christo, et humman hu, ya nemnem yu law ey ya etan meidwat ni hi-gayud kabunyan di pan-ap-apuan Jesus Christo e yimmudung di winannan nan Apu Dios. <sup>2</sup> Ya nemnem yu ey ya biyag yullid kabunyan et beken ida eya linggeman di puyek ni nemnem yu. <sup>3</sup> Tep ya etan neitu-wan tayu ngu dedan ey heni nekiketey nan Jesus Christo, et mehullulan ni baluh ni neitu-wan tayu, et ya biyag yu ey wada law ni hi-gatud kad-an Apu Dios. <sup>4</sup> Yan pambangngadan alin Jesus Christo, e kakelpun biyag tayun kamengullug, ey meilla-kam ittullid keiddeyyawan tu.

<sup>5</sup> Et humman hu, mahapul ni issiked tayun mengippahding ni lawah ni pinhed ni annel tayu. Entan tu iulig hu beken yu ahwa, entan tu ipahding ida hipan lawah, entan tu nemnem ida etan lawah ni pinhed ni neitu-wan yu, niya entan tu nemnem ni ellan ni emin hu wadan edum yu, tep ya ameh ey humman hakey ni elaw ni kapenaydayaw ni beken ni makulug ni dios. <sup>6</sup> Ya pengippahdingan idan nunya hu kamengippebungget nan Apu Dios et umhulun ni pengastiguan tuddan mengippahding idan nunya. <sup>7</sup> Nem anin ni hi-gayu et hanniman dama lani elaw yun nunman ni eleg kayu mangulug.

<sup>8</sup> Nem yan nunya law e kayu kamengullug, ey mahapul ni beken kayu mabunget, beken ni yu anggebe-helen hu edum yun tuu, beken ni ya lawah hu heppiten yu, entan tu padngeli edum yu, <sup>9</sup> niya entan tu i-itteki edum yu, tep inwaklin yudda law humman ni lawah ni elaw <sup>10</sup> et hululan yun kayyaggud. Et hi Apu Dios e nanwadan baluh ni neitu-wan tayu ey ittutuluy tun mengippeyaggud ni elaw tayu et lektattuy mei-inggeh hu elaw tayud elaw tu ma-lat hi-gatu hu paka-amtaen tayu. <sup>11</sup> Et yan nunyan baluh law hu neitu-wan tayu, ey endi nambaklangan tayud hinanggan Jesus Christo, Gentiles itsu winu Jews itsu, nekugit winu eleg, himbut winu beken, nan-adal winu eleg. Tep ya importanteh ey wadan hi-gatsun emin ni kamengullug hi Jesus Christo e Ap-apu tayu anin ni hipa neitu-wan tayu.

<sup>12</sup> Nakappinhed dakeyun Apu Dios, et pilien dakeyun mambalin ni tuu tu, et humman hu mahapul ni man-inhehnek kayu, man-inbababbal kayu, man-in-aanus kayu, ey entan pampahhiya yu. <sup>13</sup> Pan-inhuhulug kayu niya pan-impepesinah kayud yuka panhahallai. Nemnem yu hu nemesinsahan Apu Jesus ni liwat yu, et humman hu, pesinsahi yudda dama nambahul ni hi-gayu. <sup>14</sup> Ey mahapul ni man-impipinhed kayu, tep ya kapan-impipinhed hi kamengihhammad ni kapan-unnudi. <sup>15</sup> Ya linggep tayun kamelpun Jesus ey humman et kuma hu mahapul ni mannananeng ni hi-gatsu, tep

humman gaputun nengibbillangan dait sun Apu Dios ni heni annel Jesus. Ey pansalamat kayun Apu Dios di emin ni kayyagud ni impahding tun hi-gayu.

<sup>16</sup> Nemnem yudda etan intenuttuddun Jesus Christo ma-lat emin ittuttuddu yu niya ittugun yu ey nei-lad inedal yu ma-lat hannemnem yun emin meippanggep nan Jesus. Pansalamat kayun Apu Dios ey ia-appéh yudda etan psalmis niyadda etan a-appéh ni kapenaydayaw ni hi-gatu. <sup>17</sup> Emin ipahding yu niya heppiten yu ey inemnem yun Apu Jesus, niya pansalamat kayun Ama Apu Dios di ngadan Jesus.

*Mahapul ni ya kayyagud hu pehpehding tayuddan edum tayun kamengullug*

<sup>18</sup> Hi-gayuddan bibi-i, u-unnud yu hu ahwa yu, tep humman hu kayyagud ni elaw ni kamengullug nan Apu Jesus. <sup>19</sup> Hi-gayudda daman lalakki, ey peang-ang yu impeminhed yun ahwa yu, niya entan tudda ibubbunget. <sup>20</sup> Ey hi-gayuddan u-ungnga, u-unnud yudda a-ammed yu, tep humman kamengippeamleng nan Apu Dios. <sup>21</sup> Hi-gayuddan a-ammed, entan tu halmi bunget idan u-ungnga yu, tep entanni ey um-almet ida anhan law.

<sup>22</sup> Hi-gayuddan himbut, u-unnud yun kenayun hu ap-apu yu. Entan tu peang-ang e makahlu kayun ebuh hedin wadaddan kamenang-ang-ang ni hi-gayu. Nem ya pengu-unnudan yun hi-gada ey melpud puhu yu niya gapuh ni yuka u-unnudin Apu Dios, et beken ni ma-lat tettebalen dakeyu. <sup>23</sup> Panhehellu kayun mengingngunnu ingngunu yu e heni hi Apu Jesus hu yuka ingngunungunui e beken ni ya tuun ebuh. <sup>24</sup> Tep inamta yu e hakey alin aggew et hi Apu Jesus Christo hu um-idwat ni heni tangdan tayud ngunu tayu. Ya kakulugan tu ey hi-gatu kan bega-en ni hi-gatsu. <sup>25</sup> Nem yadda etan mengapkapayan lawah ey makulug ni kastiguen Jesus ida. Tep hi-gatu ey limpiyuh et nan-iingngheh tuka pehding di emin ni tuu, endi tu nengituppugan ni kakinayyagud tu.

#### 4

<sup>1</sup> Hi-gayuddan ap-apu, ya kayyagud hu ipahding yuddan himbut yu. Nemnem yu e wada dama Ap-apu yud kabunyan e hi Apu Dios.

<sup>2</sup> Ey hi-gayuddan kamengullug, helipati yu et eleg yu liwwanem ni mandasal ni kenayun niya pansalamat kayun Apu Dios di hipan tuka iddawt ni hi-gayu. <sup>3</sup> Idasali dakemi anhan ma-lat baddangan dakemin Apu Dios di mi pengitenuttudduan eyan meippanggep ni kapenellaknibin Jesus Christo idan neliwtan e huyya eleg peamtan Apu Dios ni nunman, nem ay impeamta tu law et nak ittuttuddu et huyya gaputun neikelabatan ku. <sup>4</sup> Ey idsali yuwak dama et baddangan tuwak Apu Dios, ma-lat nelakah ni meewwatan hu penuttudduk.

<sup>5</sup> Hedin wada kayud kad-an idan eleg mengullug, man e-ehhel yun hi-gada meippanggep nan Jesus Christo niya ang-ang yu ma-lat ya kayyagud hu peang-ang yun hidagan kenayun. <sup>6</sup> Ey ang-ang yu et emin heppiten yu ey kayyagud hu pengngelan idan menggel niya wada panyaggudan tun hi-gada. Hedin wada mahmahan da, ang-ang yu et ya neiptek penummang yu.

<sup>7</sup> Ngenamung la hi Taykikus ni mengippeamtan hi-gayun emin ni meippanggep ni hi-gak. Hi-gatu hakey ni kameiddinnel ni kamekingngunnu hi-gamin meippanggep nan Apu tayu. <sup>8</sup> Ittu-dak ku la ma-lat peamta tun hi-gayun emin hu kamekapkapan hi-gamidya et wadan nema-man umamleng kayu. <sup>9</sup> Mekillaw la dama eya hakey ni nakappinhed tayu niya kameiddinnel ni agi tayun kebebleyan yu, e hi Onesimus. Ngenamung ida lan nengippeamtan emin ni kamekapkapyada.

<sup>10</sup> Hi Alistalkus e kadwak ni neikelabut ey kantuy dakeyu kanenemnema. Hanniman dama hi Mark e agin Barnabas e kantuy dakeyu dama kunu kanenemnema. Inhel mi lan hi-gayu e hedin um-alid tan, peang-ang yun hi-gatu amleng yu. <sup>11</sup> Anin hi Joshua e hi Justus hakey ni ngadan tu e kantuy dakeyu dama kanenemnema. Huyyadda numan ni tellun Jews hu kamemabbaddang ni hi-gak ni mantuttuddun meippanggep ni nan-apapan Apu Dios.

<sup>12</sup> Hi Epaphras e kebebleyan yu ey hakey daman bega-en Jesus Christo, e kantu dama ey dakeyu kanenemnema. Dakeyu kaiddasadasalin kenayun ni hi-gatu tep pinhed tun maka-ihammad hu yuka pengullug nan Jesus ma-lat paka-amtaen yu et u-unnuden yun emin hu pinhed Apu Dios ni pehding yu. <sup>13</sup> Nakka ihhudut e nemahhig numan tuka pengiddasadasalin hi-gayu et yadda tutu-ud Laodicea et yad Hierapolis.

<sup>14</sup> Hanniman damad Demas et hi Lucas e nakappinhed tayun doctor e kanday nemahhig kunu dama daka pannemnem ni hi-gayu.

<sup>15</sup> Ehel yudda etan ni edum tayun kamengullug di Laodicea et hi Nympha niyadda etan kameemmuemmung di baley da e midda kanenemneman emin.

<sup>16</sup> Hedin binidbid yu huyyan tudek, ey ang-ang yu et palaw yu damad Laodicea ma-lat bidbiden da dama, niya bidbid yu dama etan melpullidman ni tudek.

<sup>17</sup> Entan tu liwwan et ehelen yun Arkippus e mahapul ni gibbuhen tu hu impangunun Apu Jesus Christo ni hi-gatu.

<sup>18</sup> Hi-gak e hi Paul e agi yu hu nengitudek eyan nanggillig ni pinhed kun e-helen ni hi-gayu. Dakeyu kanenemneman hi-gak ni kenayun, ey entan tuwak anhan dama liwwan eyad kalebut et idasalan yuwak.

Nakka iddasal e meweddan hi-gayun emin hu binabbal nan Apu Dios.

## Ya Nebukul ni Tudek Paul idan Kamengullug di Thessalonica

<sup>1</sup> Hi-gak et di Silas nan Timothy hu kan tudek nunya. Mika pan-ittudek huyyan hi-gayun iThessalonica ni kamengullug nan Apu Dios e Ametayu et hi Jesus Christo e Apu tayu.

Pinhed kun meweddán hi-gayu hu binabbal niya linggep ni kamelpun hi-gada.

*Ya elaw ni kapengullug idan tuud Thessalonica*

<sup>2</sup> Kenayun ni kami kamansalamat nan Apu Dios niya dakeyu kaiddasali hedín ninemnem dakeyu. <sup>3</sup> Tep hedín kami kamandalan nan Apu Dios e hi Ametayu, ey mika nemnemema hu kayyaggud ni yuka pehpending gapuh ni yuka pengullug, ya hinlu yun mengippahding ni impangunun Apu Dios tep ya impeminhed yu, niya nengidinelan yun peteg nan Apu Jesus Christo.

<sup>4</sup> Hi-gayun kaegiegin kamengullug ni nakappinhed Apu Dios, inamta mi e pinutuk dakeyun pambalin tun tuu tu <sup>5</sup> gapuh ni kayyaggud ni nambalinan ni nengituttudduan min hi-gayun impahding Jesus ni panyaggudan ni tuu, et kulugen yu. Beken ni ya ehel min ebuh, nem impahding mi hu kabaelan min indawat ni Ispirituh Apu Dios ni mengewwis ni hi-gayu et peang-ang mi e humman ni intuttuddu min hi-gayu ey makulug. Tep inamta yu e yan eman ni nekiha-adan min hi-gayu ey ya panyaggudan yu hu mika nemnemema. <sup>6</sup> Ey kayyaggud et inu-unnud yu hu elaw Apu tayu e hi Jesus Christo henin hi-gami. Anin ni nanligligat kayu tep ya nengabulutan yun intuttuddu mi, et kayu kaum-amleng tep dakeyu kapeamleng ni Ispirituh Apu Dios.

<sup>7</sup> Et humman hu, hi-gayu law hu pengiu-unnudan idan emín ni kamengullug di probinsiya di Macedonia niyaddad edum ni bebley di Greece. <sup>8</sup> Beken diman ni ebuh hu nadngelan ni ehel Apu Dios niya yuka pengullug ni hi-gatu, nem nandingngel anin di edum ni bebley. Anin ni eleg mi e-ehhela hu kakkayyaggud ni nekapkapyan eman ni illian mid bebley yu, <sup>9</sup> et yadda tutu-un nangngel hu kamege-ehhel nunman ni meippanggep ni apnga yun hi-gami niya meippanggep ni nengiwallengán yun menaydayaw ni linggeman ni dios et ya law makulug ni Dios e wadan ingganah hu yuka daydayawa. <sup>10</sup> Ey daka ene-ehhela hu yuka penehhegedin ellian mewán Jesus Christo e U-unggan Apu Dios ni melpullid kabunyan. Hi-gatu ey sinegun Apu Dios eman ni neteyyan tu niya hi-gatu menellaknib ni hi-gatsud pengastiguan Apu Dios idan tuun neliwtan.

## 2

*Ya impahpahding Paul di Thessalonica*

<sup>1</sup> Kaegiegin kamengullug di Thessalonica, inamta yu et kayyaggud hu nambalinan ni illian midtan kad-an yu. <sup>2</sup> Inamta yu pay e yan eman ni linawwan mid Philippi et han kami umlidtan ey nemahig hu hinelheltap midman, tep lawah impahpahding dan hi-gami niya kinakkahing dakemi. Nem anin hanniman, ey kayyaggud et impetuled dakemin Apu Dios ni nengituttudduan min hi-gayun impahding Jesus Christo ni panyaggudan ni tuu, anin ni dakel ida neminhed ni mengippesikked ni hi-gami. <sup>3</sup> Yan nantuttudduan min hi-gayu et mangulug kayu ey eleg maipuun di lawah ni kapannemnem, tep eleg dakeyu haulen niya eleg dakeyu talamen.

<sup>4</sup> Nem ya kakulugan tu, ey inebulut Apu Dios hu elaw mi et idinel tun hi-gami hu mengituttuddun impahding Jesus Christo ni panyaggudan tayu. Beken ni ya penettebalan ni tuun hi-gami hu mika gamgami, nem ya pinhed mi ey peamleng mi hi Apu Dios e nengamtan makulug ni wadad nemnem ni tuu. <sup>5</sup> Naka-amta yu e beken ni hauhaul niya itek hu mi impahpahding, ma-lat pengal-an min pihuh yu winu limmu yu, ey anin hi Apu Dios et inamta tu huyya. <sup>6-7</sup> Inamta yu pay e eleg kami mampedaydayaw ni hi-gayu winu hipan tuu, anin ni lebbeng tu et ni meidaydayaw kami tep apostles kami. Impeang-ang min hi-gayu hu henin binabbal idan iinna e daka paka-ippaptek hu u-ungnga da. <sup>8</sup> Nakappinhed dakeyu, et mukun inlilingitan min immalin mengippeamtan hi-gayun elaw ni penellakniban Apu Dios ni tuun neliwtan. Impeladdan mi biyag mi nemet mebaddangan kayu, tep makulug ni nakappinhed dakeyu.

<sup>9</sup> Kaegiegi inamta yu pay e yan nantuttudduan min hi-gayun meippanggep ni et-eteng ni impeminhed Apu Dios ni hi-gatsun neliwtan, ey nanligligatan min peteg hu mahapul mi, tep anin hileng niyan kawwalwal et kami kamanggunnu, tep eleg mi pinhed ni kayu meliggatan tep ya mahapul mi. <sup>10</sup> Hi-gayu et hi Apu Dios hu mengihuddut e

kayyaggud hu impahpahding mi eman ni nekiha-adan min hi-gayu, et humman hu, endi mi nambahulan ni hi-gayun edum min kamengullug. <sup>11</sup> Ey inamta yu e ya impahding min nantuttuddun hi-gayu ey henin kapehding idan a-ammed ni u-ungnga da. <sup>12</sup> Inalluk dakeyu niya sinugun dakeyu ma-lat ya elaw ni pambiyag yu ey mei-unnud di pinhed Apu Dios e nemutuk ni hi-gatsun mekihha-ad ni hi-gatud pan-ap-apuan tu et maila-kam itsud dayaw tu.

<sup>13</sup> Ey et-eteng pay hu mika pansalamatin Apu Dios tep yan eman ni nengituttudduan min hi-gayun ehel tu ey beken ni hi-gami hu ninemnem yun nalpuan tu, nem kinulug yu et abuluten yu e humman ey makulug ni tuttuddun Apu Dios e kaumbaddang ni hi-gatsun nengulug.

<sup>14</sup> Kaegiegi, impanlelehanan yu hu impahpahding idan kebebleyan yun hi-gayu, henin impahpahding idan Jews di Judea idan kebebleyan dan edum dan Jews ni kamengullug nan Jesus Christo.

<sup>15</sup> Hi-gadan Jews hu nematey nan Apu Jesus Christo niyadda la eman prophets ni nunnan, ey hi-gada neneyun ni hi-gami. Daka pebungnet hi Apu Dios niya angebehel da edum dan tuu. <sup>16</sup> Anin ni mi pantuttudduan ni ehel Apu Dios idan Gentiles ma-lat mehelakniban ida niya daka ippahding emin hu kabaelan dan mengippesikked ni hi-gami, et mukun nemahhig bunget Apu Dios ni hi-gada, tep nemahhig humman ni liwat da.

### *Ya neminhedan Paul ni mambangngad di Thessalonica*

<sup>17</sup> Kaegiegi, yan nekemtang ni nandadawwian tayu ey nemahhig e dakeyu kanenemema. Et humman hu, impahding min emin hu kabaelan min um-alin menang-ang ni hi-gayu, <sup>18</sup> nema-man hi-gak e hi Paul e agi yu, nem endi inna-nuk, tep tuwak kataktakan Satanas. <sup>19</sup> Pinhed min peteg ni um-ali tep hi-gayu kamengippeamleng ni hi-gami niya hi-gayu hu mika namnamahan gungunah min igaggaya mid hinanggan Apu Jesus Christo ni pambangngadan tu, tep kinulug yu intuttuddu min ehel Apu Dios. <sup>20</sup> Makulug ni dakeyu kaigaggaya niya hi-gayu hu gaputun kami kaman-am-amleng.

## 3

<sup>1-2</sup> Entanni ey kami kamedandanagin peteg tep mika nenemnema hedin nehammad winu eleg hu yuka pengullug. Et ebuhe kan miy anin manha-ad kami nid Athens et itu-dak midtan hi Timothy, e hakey ni edum min bega-en Apu Dios ni kamengituttuddun impahding nan Jesus Christo ni panyaggudan tayu, ma-lat dakeyu baddangan ni mengihhammad ni yuka pengullug. <sup>3</sup> Niya ma-lat anin ni nemahhig hu lehan yu gapuh ni nengulugan yu ey eleg kayu medimayah et eleg yu iwalleng hu yuka pengullug. Tep inamta yu e kapyu tun hi-gatsun kamengullug ni manhelheltap, tep huyya dedan hu planuh Apu Dios ni hi-gatsun tuu tu. <sup>4</sup> Anin eman ni wada itsudtan ni emin, et inihel min hi-gayu e wadan wada hu panhelheltapan tayu gapuh ni tayu kapengullug. Et deh tu-wangu e immamnu. <sup>5</sup> Mukun intu-dak ku Timothy ditan ey ma-lat tu pepuhdanan hedin inna-nun yuka pengullug, tep eggak mengmenghep ni mengamta. Nakka umkakaguh tep entanniy he-ulen dakeyun Satanas et endi silbitu hu nea-atuan min nantuttuddun hi-gayu.

<sup>6</sup> Nem ay kayyaggud tep nambangngad hi Timothy ey kakkayyaggud ni emin hu indaddatteng tun meippanggep ni yuka pengullug niya kayu kaman-impipinhed. Ey ine-ehhel tu hu nemahhig ni yuka pannemnem ni hi-gami et mukun ihik kayu kunun menang-ang ni hi-gami. Hanniman daman hi-gami e dakeyu kanenemneman peteg et ihik kamin menang-ang ni hi-gayu. <sup>7</sup> Et humman hu, hi-gayun kaegiegi, anin ni nemahhig hu ligat mi niya lehan min peteg gapuh ni kapehding idan tuu, ey timmuled kami law ni nangngelan min yuka pengullug nan Apu tayu. <sup>8</sup> Kami kaman-am-amleng et dammutu law ni mika issipel hu mika panhelheltapi, tep nehammad hu yuka pengullug nan Apu Jesus.

<sup>9</sup> Kami kametemma hedin hipa inna-nu min mansalamat nan Apu Dios tep ya amleng min hi-gayun nangngelan min nanengtun kayu kamengullug. <sup>10</sup> Kewa-wawa niya kahilehileng ni kami kamandasal nan Apu Dios ma-lat baddangan dakemin mambangngad ditan, et mi tubtuban hedin wada yuka pangkullangid yuka pengullug.

<sup>11</sup> Nakka iddasal nan Apu Dios e hi Ametayu et hi Apu tayu e hi Jesus Christo ma-lat iebulut tu hu ellian midtan. <sup>12</sup> Niya nakka iddasal e hi Jesus Christo e Apu tayu hu mengihhammad ni yuka pan-impipinhedin han-aaggin kamengullug niya impeminhed yun edum yun tuu ma-lat henin impeminhed min hi-gayu. <sup>13</sup> Niya petuled dakeyu et nan Jesus Christo e Apu tayu ma-lat ipahding yudda pinhed tun pehding yu, et yallin



pambangngadan tun edum tudda tuu tu ey endillin hekey liwat yud hinanggan Ametayu e hi Apu Dios.

## 4

*Ya elaw ni biyag ni mengippeamleng nan hi Apu Dios*

<sup>1</sup> Inedal yu hu intuttuddu min hi-gayun kaegiegin pehding yun mambiyag ma-lat peamleng yu hi Apu Dios, et deh e inu-unnud yu. Ey mika ittugun ni hi-gayun pannananeng yun u-unnuden huyyan tugun tep ya tayu kapengullugan Jesus e Apu tayu. <sup>2</sup> Inamta yu e huyyaddan mika ittugun ni hi-gayu ey nalpun Apu tayu e hi Jesus Christo. <sup>3</sup> Ya pinhed Apu Dios ey kayyaggud hu elaw yu niya nemnem yu. Ey pinhed tun eleg yu ippahding hu henin kapehding ni makilaki niya makibii. <sup>4</sup> Nem mahapul ni amta yun mengekkenneng ni annel yu ma-lat maiunnud etan di pinhed Apu Dios ni pehding ni hambaley et kayyaggud hu pambalanan ni nan-ahwaan yu, <sup>5</sup> et beken ni henin kapehding idan eleg mengamtan Apu Dios e anhihimugal hu daka pehding. <sup>6</sup> Inhel mi la mewan ni hi-gayu e lawah hedun yu he-uhe-ulen ida edum yu et yu pan-ayyaman hu ahwa da, tep nemahhig pengastigun Apu Dios idan henin nunman ni tuu. <sup>7</sup> Tep beken ni ya panlawahan hu daitsu nemilian Apu Dios ni pantu-u tu, nem pinili daitsu ma-lat ya kayyaggud pehding tayu. <sup>8</sup> Et humman hu, ya tuun kehgingen tu huyyan tugun ey beken ni ya tuu hu kinehing tu, nem hi Apu Dios e kamengippeallin Ispirih tuun hi-gatsun kamengullug.

<sup>9</sup> Eleg mahapul ni dakey tuggunen di meippanggep ni pan-impipinhedan, tep impeamta dedanggun Apu Dios ni hi-gayun mahapul ni man-impipinhedan itsun emin. <sup>10</sup> Anin yan nunya et kameang-ang hu yuka pan-impipinhedan hi-gayun kaegiegin kamengullug di Macedonia. Et ya pinhed mi ey pannananeng yu niya ihhammad yu pay humman ni elaw ni yuka pan-impipinhedan. <sup>11</sup> Intugutugun min nunman ni hi-gayu e ya nemnemen yu ey ya linggepan ni biyag yu. Ey entan pekidimdima-u yud biyag ni edum ni tuu. Panhelu kayu kuman menginggunun inggunu yu e humman la intugun min hi-gayu, <sup>12</sup> ma-lat lispituhun dakeyuddan eleg mengullug niya ma-lat eleg yu ididdinel hu edum yun tuu.

*Ya elaw ni pambangngadan alin Jesus di puyek*

<sup>13</sup> Kaegiegi, pinhed min amtaen yu hu meippahding idallin edum tayun kamengullug ni nangketey ma-lat eleg kayu lumelemyung et beken kayun heniddan eleg mangulug e endi namnamah da. <sup>14</sup> Hi-gatsun kamengullug ey tayu kakulluga e netey hi Jesus, nem sinegun Apu Dios. Et hanniman ida daman emin ni kamengullug nan Jesus ni ellian mettey ida et tegguan idallin Apu Dios et ikuyug idallin Jesus ni pambangngadan tu.

<sup>15</sup> Huyya hu inhel Apu Jesus Christo ni meippanggep ni hi-gatsun kamengullug: Hedin hi-gatsun nanengtun mategullin pambangngadan tu ey beken ni hi-gatsu memengngulu, nem mekiddidhan itsulliddan nangketey ni kamengullug ni kamengullug ni menammun Jesus ni ellian tullu mewan. <sup>16</sup> Yan ellian tullin kelpuan tud kabunyan ey wadalli dedngelen tayun nalet ni ehel ni kaman-eyyag ni hi-gatsun kamengullug, ey umtetkuk ali etan ap-apuddan anghel niya wadalli nalet ni tenul ni tangguyup Apu Dios, et emin ida nangketey ni kamengullug ey metegguan idalli. <sup>17</sup> Hedin hi-gatsun mategun kamengullug ey mekillaw itsullin hi-gadan an menammun Apu Jesus di kulput, ey mekihha-ad itsullin emin ni hitagun ingganah. <sup>18</sup> Et humman hu, kayyaggud hedun huyya ia-alluk tayuddan edum tayu.

## 5

*Ya penehheggedan tayun ellian Jesus*

<sup>1</sup> Kaegiegi, eleg mahapul ni pekittudek mi hedun pigan ali keippahdingan idan nunya. <sup>2</sup> Tep inamta yu e ya ellian Apu Jesus ni manhuwet ey henin kaellin matekew ni hileng e endi nengamta. <sup>3</sup> Emin idalli tuu ey ida kamakaddinnel tep ya daka pannemnem ey melinggep ida niya endi lawah ni meippahding ni hi-gada, nem eleg da amta e pinhakkeyey kinastigun Apu Dios ida et eleg mabalin ni ida meihwang. Henin nambutsug ni bii e nanna-ud ni heltapen tu degeh ni pan-unggaan tu.

<sup>4</sup> Nem hedun hi-gayun kaegiegin kamengullug, man endi yu ketemmaan, tep amta yu law hu meippanggep ni ellian Jesus ni manhuwet. Et yan ellian tullu e henin kaellin matekew ni hileng, ey nandaddan kayulli. <sup>5</sup> Tep emin itsun kamengullug ey heni itu wadad kawwalwal et inamta tayu huyyan meippahding tep tuu daitsun hi-gatun pinili tun mengippahding ni kayyaggud, beken ni ya lawah. <sup>6</sup> Et humman hu, mahapul ni eleg tayu lellelgema hu pehpahding tayu, beken ni heniddan eleg mangulug e henidda neugip.

<sup>7</sup> Yan hileng hu kakeuggipin tuu niya yan nunman hu kedaklan hu kamebutteng. Ey yadda etan tutu-un kangkun eleg mandaddan ey ida kamei-ellig di tutu-un neugip winu nebuteng. <sup>8</sup> Nem hi-gatsun kamengullug ey hi-gatsu tuu tu. Et humman hu, mahapul ni kekkenengen tayu hu elaw tayu. Ey mahapul ni nehammad hu tayu kapengullug niya nehammad hu tayu kapan-impipinhedi et humman hu heni happiyaw tayun ihhani tayud lawah. Ey ya namnamah ni kehellakniban tayu hu kamei-ellig ni helmet tayu eyan tayu kapenehhegedin ellian Jesus. <sup>9</sup> Tep hi Apu Dios ey beken ni daitu pinili ma-lat tayu panlelehanan hu pengastigu tu, nem pinili daitun mehella kniban, gapuh nan Jesus Christo e Apu tayun <sup>10</sup> nengiketey ni liwat tayu, ma-lat makiha-ad itsun higatun ingganah, anin ni mategu itsulli winu netey itsullin ellian tu. <sup>11</sup> Et humman hu, panhimbabaddang kayun mengippetuled ni hanhakkey ni hi-gayu niya panhintutugun kayu, henin yuka pehpehding ni nunya.

<sup>12</sup> Kaegiegi, lispituh yudda pinilin Apu tayun mantuttuddu niya menuggun ni hi-gayu. <sup>13</sup> Peang-ang yu hu lispituh yu niya impeminhed yun hi-gada tep ya humman ni ngunu da. Ey kayyaggud hu pan-uunnud kayu, ma-lat melinggep kayu.

<sup>14</sup> Ya pinhed min hi-gayun kaegiegi ey tugun yudda etan mangkahiga ma-lat humludda. Petuled yu nemnem idan edum yun nedismayah, niya baddangi yudda etan eleg maihammad hu daka pengullug. Ey panhin-a-anus kayu. <sup>15</sup> Ang-ang yu et hedini wada lawah ni impahding ni edum ni tuun hi-gayu, ey beken ni ya pengiblehan yu hu nenemnemen yu, nem ya kayyaggud ni kenayun hu ipahding yun edum yun kamengullug niyad emin ni tuu.

<sup>16-18</sup> Ya pinhed Apu Dios ni hi-gayun kamengullug nan Jesus Christo ey man-amamleng kayun ingganah, mandasal kayu niya mansalamat kayun Apu Dios di emin ni meippahding ni hi-gayu.

<sup>19</sup> Entan tu kahing hu Ispirituh Apu Dios <sup>20</sup> niya entan tu pihul hu kameituttuddun impeantan Apu Dios. <sup>21</sup> Nemnem yudda emin humman ni kameituttuddu, et hedini kayyaggud, ey u-unnud yu, <sup>22</sup> nem hedini lawah, ey iwalleng yu.

<sup>23</sup> Hi Apu Dios e kakelpuin linggep hu mengippeyaggud ni hi-gayu, ma-lat maiinggeh hu elaw yud elaw tu. Et emin hu nemnem yu niya pehding yu \* ey mei-unnud di pinhed tu, ma-lat endillin hekey hu liwat yun pambangngadan Apu Jesus Christo. <sup>24</sup> Hi Apu Dios e nemilin hi-gayu ey kameiddinnel ni mengippahding idan nunyan inhel ku.

<sup>25</sup> Hi-gayun kaegiegi, idasali dakemi dama anhan ni hi-gayu.

<sup>26</sup> Hedini nandaddammu kayun kamengullug, ey peang-ang yu hu nan-impipinhedan yu.

<sup>27</sup> Pinhed Apu Dios ni bidbiden yu huyyan tudek ni keemungan yun emin ni kamengullug ditan.

<sup>28</sup> Pinhed kun meweddani hi-gayu hu binabbal Apu tayun hi Jesus Christo.

\* 5:23 5:23 Kan tud Greek ey "ma-lat maipaptek hu nemnem yu, ya linnaweyu niya annel yu."

## Ya Neikadwan Tudek Paul idan Kamengullug di Thessalonica

<sup>1</sup> Huyyan tudek ey nalpun hi-gami e hi Paul, hi Silas et hi Timothy. Mika pan-ittudek huyyan hi-gayun iThessalonica ni kamengullug nan Ametayu e hi Apu Dios et hi Apu tayu e hi Jesus Christo. <sup>2</sup> Pinhed kun meweddand hi-gayu hu binabbal niya linggep ni kamelpun Apu Dios e Ametayu et hi Jesus Christo e Apu tayu.

*Ya elaw ni panhuwetan alin Jesus*

<sup>3</sup> Kayyaggud hu mansalamat kamin kenayun nan Apu Dios gapuh ni hi-gayun kaegiegi, tep kamangkeihhammad law hu yuka pengullug nan Jesus niya impeminhed yun edum yu. <sup>4</sup> Et humman hu, dakeyu kaigagayad emin ni simbaan ni mika lawwin mika pantuttuddui. Mika ene-ehhelan hi-gada e kami kaman-am-amleng, tep intultuluy yun mengiddinnel nan Apu Dios, anin ni humman hu kaumhulun ni dakeyu kapanhelheltapaddan edum ni tuu.

<sup>5</sup> Humman ni nengan-anusan yun ligat yu niya nanlelehanan yun impahpahding idan edum yun tuu hu keang-angan tun dayu tun hi-gayu menewwat alin etan ni kayyaggud ni iddawat Apu Dios, tep hi-gatu hu gaputun kayu kamanligligat, nem ya pambalanan tu ey hi-gayu hu lebbeng tun meilla-kam di pan-ap-apuan tu. <sup>6</sup> Limpiyuh hi Apu Dios, et humman hu kastiguen tuddalli etan kamengipehelheltap ni hi-gayu. <sup>7</sup> Papegen tullu hu tayu kapanligligasin pambangngadan nan Apu tayu e hi Jesus Christo e edum tudda angel tun et-eteng kabaelan da. Yan kelpuan tullid kabunyan ey wada hu kaumhinyab ni apuy di nanlinikweh ni hi-gatu. <sup>8</sup> Um-ali et kastiguen tuddalli etan eleg mengaman Apu Dios e eleg mengullug ni impahding Apu Jesus ni panyaggudan ni tuu. <sup>9</sup> Yalli kastiguddan nunman ey lehan dallin ingganah. Ey meiddawwi idallin Jesus, et eleg dalli ang-anga hu et-eteng ni kabaelan tun endi pengi-inggehan. \* <sup>10</sup> Yan nunman alin aggew ni ellian tu ey nemahhig hu penaydayaw idallin emin ni kamengullug ni hi-gatu, niya anin hi-gayu et daydayawen yulli dama, tep kinulug yu intuttuddu min hi-gayun nunman ni meippanggep ni hi-gatu.

<sup>11</sup> Et mukun dakeyu kaidasadasalin kenayun ma-lat yumaggud hu elaw yu et meingngeh di pinhed Apu Dios ni pambalanan yu e pinili tun tutu-u tu. Ey mika iddasal e gapuh ni kabaelan tu ey baddangan dakeyu ma-lat ipahding yudda etan kayyaggud ni pinhed yun ippahding e kei-angan ni yuka pengullug nan Jesus. <sup>12</sup> Humman dasal ni ma-lat meidaydayaw hi Apu Jesus Christo gapuh ni elaw yu, niya meilla-kam kayud keidaydayawan tu, tep ya binabbal tu niya binabbal Ametayu e hi Apu Dios.

## 2

*Ya elaw etan ni tuun kelellewwahan*

<sup>1</sup> Ya e-helen ku law ni hi-gayu ey ya meippanggep ni ellian Jesus Christo e Apu tayu niya keemungan tayullin menammun hi-gatu. <sup>2</sup> Nakka ibbagan hi-gayun kaegiegi e entan kakkaguh yu niya entan takut yu etan ni kandan nedatngan law hu Aggew ni panhuwetan Apu tayuddan tutu-u. Entan keidngeli yu, anin ni kanday huyya impeamtan Ispirituh Apu Dios winu kanday hi-gami nangel, winu kandalliy intudek min hi-gada. <sup>3</sup> Entan kaheul yu, anin hipa kanda, tep eleg mabalin ni medettengan yu pambangngadan Jesus ingganah dakek ida mengiwwalleng niya mangngenghay nan Apu Dios, niya ingganah ni peang-ang etan kelellewwahan ni tuun tuka kehinga tugun Apu Dios. Huyyallin tuu ey nanna-ud ni meippellaw di impierno et manhelheltap diman ni ingganah. <sup>4</sup> Humman alin tuu ey ngenghayen tun emin hu meippanggep nan Apu Dios niyadda etan dios ni kadaydayawan edum ni tuu. Ey kantulliy endi edum ni kamedeyyaw nem hi-gatun ebuh. Et an umyudung etan di yuddungangan di Tempol Apu Dios et kantuy hi-gatu hi Apu Dios. \*

<sup>5</sup> Inhel ku dedan ni hi-gayu hu meippanggep idan nunya eman ni wada itsun emin ditan, nem kaw liniwwan yu? <sup>6</sup> Inamta yu e eleg mabalin ni mampeang-ang humman ni kelellewwahan ni tuun nunya, tep wada kamengikka-leg ni hi-gatu. Nem mampeang-ang ali hedin medettengan etan aggew ni gintud Apu Dios. <sup>7</sup> Anin yan nunya et wadadda etan kamangngenghay nan Apu Dios, nem eleg ni meamta etan kelellewwahan ni tuun

\* 1:9 1:9 Ang-ang yu Isaiah 2:10.

\* 2:4 2:4 Daniel 11:36 et Ezekiel 28:2

kamengipappangngulun hi-gada. Ey eleg ni um-ali ingganah me-kal etan kamengikka-leg ni hi-gatu. <sup>8</sup> Hedin na-kal humman ni kamengikka-leg, ey han immali humman ni kelellewwahan ni tuu. Nem yallin ellian Apu tayun hi Jesus ey meippeang-ang hu et-eteng ni kabaelan tu, et heng-aban tulli et mettey. <sup>9</sup> Hi Satanas hu mengidwat ni et-eteng ni kabaelan nunman ni kelellewwahan ni tuu, et peang-ang tulli dakel ni miracles niyadda kamengippetnga, ma-lat maheul ida tuu. <sup>10</sup> Et humman kehe-ulan idalli etan ni tuun umlaw di impierno, tep daka kehinga etan makulug ni kameituttuddu e humman et kehellakniban da. <sup>11</sup> Et humman hu, i-abulut alin Apu Dios ni mehe-ul ida et kullugen dalli hu hipan neihlan tuttuddu. <sup>12</sup> Et kastiguen idallin Apu Dios, tep eleg da kulugen etan makulug ni kameituttuddu, nem nan-am-amleng idan nengipahding ni pinpinhed dan lawah.

*Yadda nepilin mehellakniban*

<sup>13</sup> Nem kayyaggud tu mansalamat kamin kenayun nan Apu Dios gapuh ni hi-gayun kaegiegin nakappinshed Apu Jesus, tep pinili dakeyu dedan nan Apu Dios ni mehellakniban et han mawedan emin eya wadan nunya, ma-lat peyaggud dakeyun Ispirituh tu, tep kinulug yu hu makulug ni kameituttuddu. <sup>14</sup> Hi-gayu pinili tun mehellakniban et itu-dak dakemin an mengituttuddun impeminhed tun hi-gatsun tutu-u, tep pinhed tun meilla-kam kayud keiddeyyawan Jesus Christo e Apu tayu. <sup>15</sup> Et humman hu, hi-gayun kaegiegi, ey pannananeng yu hu yuka pengullug, niya entan tu iwalleng ida etan makulug ni intuttuddu mi niya intudek min hi-gayu.

<sup>16</sup> Hi Jesus Christo e Apu tayu, et hi Apu Dios e Ametayun neminpinhed ni hi-gatsu e nengipetuled ni hi-gatsun kenayun, niya nengipehammad ni dinel tayu gapuh ni binabbal dan hi-gatsu <sup>17</sup> ey petuled dakeyu niya pe-let dakeyun mengippahding niya menghel ni hipan kayyaggud.

### 3

*Ya nanghelan Paul ni pengiddasalan idan iThessalonica ni hi-gada*

<sup>1</sup> Ya manggillig ni e-helen min hi-gayun kaegiegi ey idasali dakemi dama ma-lat baddangan dakemin Apu Dios et anggegannu ey mandingngel hu kaituttuddun Apu Jesus niya meiddeyyaw humman ni ehel tun pengebbulutan idan tuu, henin neipahding ni hi-gayu. <sup>2</sup> Ey idasal yun Apu Dios et baddangan dakemi ma-lat meihwang kamid kapehpehding idan mangkaitek niya lawah ni tuu, tep ay dakel ida ni pay hu eleg mengullug nan Jesus Christo. <sup>3</sup> Nem kameiddinnel hi Jesus Christo e Apu tayun mengihhammad ni yuka pengullug niya mengippaptek ni hi-gayu et endi kabaelan Satanas e kelellewwahan ni mene-ul ni hi-gayu. <sup>4</sup> Ey kami kamedinnel e yuka itutuluy ni pehding emin hu intuttuddu min hi-gayu, tep baddangan dakeyun Apu Jesus Christo. <sup>5</sup> Mika ibbagan Apu Jesus et baddangan dakeyu ma-lat paka-awtan yu elaw ni impeminhed Apu Dios niya ma-lat an-anusan yu ligat yu henin nengan-anusan Jesus Christo ni ligat tu.

*Ya eleg panhiggai*

<sup>6</sup> Ya pinhed Apu tayun hi Jesus Christo ey entan kaikukkuyyug yuddan edum tayun kamengullug ni mahiga e eleg da u-unnuda tugun min meippanggep ni hinlun mangngunu. <sup>7</sup> Inamta yu hu impahpahding mi eman ni wada itsudtan e eleg kami humigan nangngunu, et humman hu pengiu-unnudan yu. <sup>8</sup> Et endi mi liniblih, tep mika beyyadin emin hu hipan daka i-alin hi-gami. Inamta yu et anin hileng winu kawwalwal et kami kamangngunu ma-lat wada ussalen mi, tep eleg mi pinhed ni kayu melilligatan gapuh ni hi-gami. <sup>9</sup> Lebbeng e dedan ni hi-gayu ngenamung ni mahapul mi, nem eleg kami mambagan hi-gayu, tep pinhed min peang-ang ni hi-gayu hu kayyaggud ni pengiu-unnudan yu. Et humman gaputun nanhehellu kamin nangngunun ikkelmeg mi eman ni kaweda tayun emin ditan. <sup>10</sup> Tep ya dedan eman ni wada itsun emin ditan ey intugun min hi-gayu e kan mi ey "Ya tuun kaumhigan mangngunu ey eleg mengngan."

<sup>11</sup> Mika ittugun ni hi-gayu huyya, tep dingngel mi e wadadda kunu edum yun mahigan mangngunu et ya tumtumbuk ni edum dan tuu hu daka pehpehding. <sup>12</sup> Hi Apu tayu e hi Jesus Christo ey eleg tu pinhed hu henin nunman ni elaw, et mukun mika ittugun e humman idan tuu ey kayyaggud tu hu mangngunnudda daman pambiyagan da.

<sup>13</sup> Hi-gayun kaegiegin kamengullug, entan higa yun mengippahding ni kayyaggud. <sup>14</sup> Hedin wada eleg mengu-unnud eyan intudek min hi-gayu, ey helipat-iyu humman ni tuu et eleg kayu meikukkuyyug ni hi-gatu ma-lat wada inna-nu tun umbaing. <sup>15</sup> Nem entan kumamman tu ibilang ni buhul yu, nem ibilang yun agi yun tuggunen yu.

<sup>16</sup> Pinhed kun iddawtan dakeyun ingganah ni linggep nan hi Jesus Christo e Apu tayun kakelpuin linggep, anin ni hipa mekapkapyan hi-gayu. Niya pinhed kun baddangan dakeyun ingganah ni hi-gatu.

<sup>17</sup> Hi-gak e hi agiyun hi Paul hu nengipetudek nunya niya hi-gak law kamampengit-tuddek eyan nanggllig ni e-helen ku: Et endi edum ni nak e-helen, nem pinhed kun peamtan hi-gayu e dakeyu kanenemnema. Wadan immatunan yu lad pilmak et yan eyad nakka penuddek e hi-gak nalpuan tu huyyan tudek. <sup>18</sup> Pinhed kun meweddand hi-gayun emin hu binabbal nan Apu tayu e hi Jesus Christo.

## Ya Nebukul ni Intudek Paul nan Timothy

<sup>1</sup> Huyyan tudek ey nalpun hi-gak e hi Paul e apostle Jesus Christo. Hi Apu Dios e kamenellaknib ni hi-gatsun kamengullug, et hi Apu tayu e hi Jesus Christo e tayu kapengiddinnelin menellaknib ni hi-gatsu, hu nemutuk ni hi-gak ni man-apostle. <sup>2</sup> Tudek ku huyyan hi-gam e Timothy e nakka ibbilang ni u-unggak tep ya taka pengullug.

Pinhed kun meweddan hi-gam hu binabbal, ya hemek niya linggep ni kamelpun Ametayu e hi Apu Dios et hi Jesus Christo e Apu tayu.

*Ya nenugunan Paul nan Timothy ma-lat tugunen tudda dama edum tu ma-lat eleg da ittutuddu hu hin-appil*

<sup>3</sup> Ya ittugun kun hi-gam ey ya eman inhel ku la et hannak lumaw di Macedonia e kangkuy mahapul ni manha-ad kad Ephesus ma-lat pasiked mudda etan kamengituttuddun neihla. <sup>4</sup> Ey ehelim ida tutu-u ma-lat isiked dan um-enab-abig idan legelegem ni neipahding lan nunman niya ehel mu et isiked dan menennenten idan aammed ni nahlagan da, tep endi silbiddan nunman niya kaumhulun kumedek ni kapantutututin edum. Endi ibbaddang idan nunyad pengu-unnudan tayun pinhed Apu Dios tep ya kaumbaddang ey ya tayu kapengullug nan Jesus. <sup>5</sup> Nakka pan-ittugun ida huyya ma-lat man-impipinhed itsu e meplud kayyaggud ni kapannemnem, yad kayyaggud ni elaw, niyad nehammad ni tayu kapengullug nan Jesus. <sup>6</sup> Nem wadadda etan edum ni tuun inwalleng da huyyan tugun et ya linggeman ni endi silbitu hu daka enung-ungbala. <sup>7</sup> Pinhed dan hi-gada mengeddan ni kamengituttuddun Tugun Apu Dios ni dinwat lan Moses, nem anin hi-gada et eleg da amta daka e-e-hela, tep eleg da han-awat hu keibbellinan ni daka ittutuddu niya daka ippilit e neiptek ida.

<sup>8</sup> Amta tayu e huyyan Tugun ey kakkayyaggud, nem mahapul ni nemnemen hedini hipadda kapengittugunin Apu Dios ni nunya. <sup>9</sup> Tep huyyan Tugun ey beken ni an penuggun Apu Dios idan kayyaggud ni tuu, nem penuggun tuddan tuun eleg mengu-unnud ni olden, yadda manghay, yadda eleg mangulug ni hi-gatu, yadda kamengehding ni hi-gatu, yadda kamemihhul ni elaw tu, yadda daka petteya a-ammed da niya edum ni tuu, <sup>10</sup> yadda makibii niya makilaki, yadda daka i-ulig keingngeh dan laki winu bii, yadda daka ibesik edum dan tuu ni da inggang, yadda maitek, yadda daka issapatah hu itek, niyadda eleg mengu-unnud ni hipan makulug ni kameituttuddu <sup>11</sup> meippanggep ni impahding Jesus ni panyaggudan ni tuu e huyya indinel nan Apu Dios ni hi-gak ni nak peamtaddan katuuuu. Hi-gatu e Dios ey kamedeyyaw niya kakelpuin amleng.

*Ya et-eteng ni hemek Apu Dios nan Paul*

<sup>12</sup> Et-eteng hu nakka pansalamatin Jesus Christo e Apu tayu tep imbilang tuwak ni kameiddinnel ni mansilbin hi-gatu, <sup>13</sup> anin ni kinakkahing ku, ey pinihipihul ku lan nunman, niya impanlelahan kudda kamengullug ni hi-gatu. Nem kayyaggud anhan et himmek tuwak Apu Dios, tep eggak la ni mangulug, et eggak amta hu nakka pehpending. <sup>14</sup> Kabbabbal ni peteg hi Apu Dios ni hi-gak et baddangan tuwak ni mengullug ni hi-gatu niya meminhed ni edum kun tuu. Huyyadda ey dammutun pehding tayu gapuh ni tayu kapengullug nan Jesus Christo.

<sup>15</sup> Wada etan kame-me-hel e kantuy "Immali hi Jesus Christo di puyek ni menellaknib idan neliwtan ma-lat eleg kastiguen Apu Dios ida." Ey makulug huyya, et mukun ya kayyaggud ey kullugen ni emin ni tuu huyya. Ey nakka nemnemnema ey hi-gak hu kee-ettenggan liwat tu. <sup>16</sup> Nem anin ni nemahhig hu liwat ku et himmek tuwak Apu Dios ma-lat pengi-ang-angan idan tuun binabbal Jesus Christo idan neliwtan, henin hi-gak. Ey ma-lat pengamtaan da e anin ni nemahhig hu liwat ni hakey ni tuu, nem mengullug nan Jesus ey mewedda biyag tun endi pappeg tu. <sup>17</sup> Et humman hu, hi Apu Dios e Patul ni endi laputu, endi pappeg tu niya eleg meang-ang, hu medaydayaw niya metbal ni ingganah. Hi-gatun ebu hu Dios. Amen.

<sup>18</sup> Huyyaddan intugun kun hi-gam e u-unggak Timothy ey neiunnud etan di neipeamta dedan nunman ni pehding mu. U-unnud mudda huyya et apputen mudda buhul Jesus, <sup>19</sup> ey pannananeng mu hu muka pengullug niya kayyaggud ni nemnem mu, ma-lat endi lawah ni mu nemnemen. Tep wadadda edum ni tuun anin ni namta da kayyaggud ni u-unnuden da, et inggeb-at dan eleg u-unnuden, et ya nambalanan tu ey iwalleng da hu daka pengullug nan Jesus. <sup>20</sup> Henid Haymenaus nan Alexander e inwalleng kudda et ngenamung hi Satanas ni hi-gada ma-lat masileg idat isiked dan memihhul nan Apu Dios.

## 2

*Ya neiptek ni penaydayaw nan Apu Dios*

<sup>1</sup> Ya memengngulun ittugun ku ey iddasalan tayun emin hu tuu ma-lat baddangan Apu Dios ida. Ey pansalamat itsud emin ni hipan kaiddawat Apu Dios ni hi-gatsun tuu. <sup>2</sup> Ey idasali tayudda dama ap-apun gubilnud kebbebley et yadda edum ni kamengipappangngulun bebley ma-lat meandeng hu pan-ap-apu da niya kayyaggud pehding da, et melinggep itsun mengu-unnud ni kayyaggud ni elaw, tep humman pinhed Apu Dios ni pehding tayu. <sup>3</sup> Kayyaggud ida huyyan iddasal tayu, tep huyya kaebbulutan Apu Dios e Apu tayun kaumhelaknib. <sup>4</sup> Pinhed tun mehellakniban emin hu tuu niya pinhed tun amtaen da hu makulug meippanggep nan Jesus Christo. <sup>5</sup> Huyya pinhed Apu Dios, tep ebuh tun Dios niya endi edum ni tuun mengi-ehneng ni hi-gatsun tuun neliwtan di hinangga tu, nem ebuh hi Jesus Christo e tuun henin hi-gatsu. <sup>6</sup> Immali Jesus et iketey tu liwat emin ni tuu eman ni gintud Apu Dios ni ellian tu. Huyya keang-angan tun pinhed Apu Dios ni mehellakniban emin hu tuu et eleg ida makastigu. <sup>7</sup> Ey mukun pinili tuwak nan Apu Dios ni hakey ni apostle ma-lat nak itutuddudan beken ni Jews hu makulug ni kameituttuddun kehellakniban da gapuh ni pengullugan dan Jesus. Huyyan inhel ku ey makulug, beken itek.

<sup>8</sup> Pinhed kun anin di attun kakeemmungiddan kamengullug ni menaydayaw nan Apu Dios ey yadda lalakki hu mandasal e itta-gey da ngamay da. Huyyaddan lalakki ey mahapul ni beken idan matutut winu mabunget.

<sup>9</sup> Ya pinhed ku damaddan bibi-i ey iyayyaggud dan mambalwasi, e beken ni anhihimugal ni kaumbebgang niya nekangngina hu ibbalwasi da. Ey beken ni nehalmann kumamman hu pehding dan mengiyayyaggud ni annel da. Ey beken ni kayyaggud hedindakel hu da pehding ni bewek da niya dakel hu ihha-ad dan balituk niya hipan nebalol ni tenged di annel da. <sup>10</sup> Nem ya importanteh ey ya kakinayyaggud ni elaw e humman keang-angan kumaddan ni makulug ni kapengullug ni hakey ni bii.

<sup>11</sup> Ey hedindandeyyaw kayun Apu Dios, ey mahapul ni um-eneeng ida bibi-i et mandeddengngel idan ebuh niya mekangngu-unnud ida. <sup>12</sup> Eggak i-abulut e yadda bibi-i hu mantutuddu niya mengipappangnguluddan lalakki. Ya pinhed ku ey um-eneeng ida nisi et mandeddengngel idan ebuh. <sup>13</sup> Tep yan nanletuan Apu Dios ni tuu ey nebukul hu lakin lintu tu e hi Adam, et han hi Eva. <sup>14</sup> Ey ya etan bii e hi Eva hu hineul Satanas et manliwat, beken hi Adam hu hineul tu. \* <sup>15</sup> Nem anin ni hanniman e nakahhaul hi Eva, et mehellakniban ida biin pan-ungnga da, † hedindandeyyaw dan mengullug nan Jesus, pinhed da hu edum dan tuu, pannananeng da kayyaggud ni elaw da, niya kekkenngan da annel da.

## 3

*Ya kayyaggud ni elaw ni mahapul et han mabalin hu hakey ni tuun mengipappangnguluddan kamengullug*

<sup>1</sup> Makulug etan kandan “Hedindandeyyaw ni tuun mengipappangnguluddan kamengullug ey kayyaggud humman ni ninemnem tun pehding.” <sup>2</sup> Nem ya mengipappangngulun hi-gatsun kamengullug ey mahapul ni kayyaggud hu elaw tu ma-lat endi umhulun ni wada lawah ni me-hel meippanggep ni hi-gatu. Mahapul ni hakey ahwa tu e beken ni makibii. Ey mahapul ni hangkekkenngan tu annel tu, endi hingal tuddan tuun kaum-alid baley tu niya wada kabaelan tun mantutuddun ehel Apu Dios. <sup>3</sup> Ey beken ni mabuteng, beken ni anin ni ekket et umbunget, nem kabbabbal, beken ni matutut niya eleg tu gamgami pihuh. <sup>4</sup> Mahapul ni hantugun tu pamilyah tu ey kapaka-u-unnudaddan u-ungnga tu, et daka pekallispituha. <sup>5</sup> Humman ida mahapul, tep hedindandeyyaw ni hantugun pamilyah tu, endi dama kabaelan tun mengippengnguluddan kamengullug nan Apu Dios. <sup>6</sup> Ey mahapul ni beken ni pakeilepu tun mengullug, tep entanni ey igaggaya tu saad tu et kastiguen Apu Dios e henin Satan. <sup>7</sup> Ya hakey ni gaputun mahapul ni kayyaggud elaw tu ey ma-lat lispituhen idan eleg mengullug, tep hedindandeyyaw ni hantugun da, et humman hu pengapputan Satan e heni tu kinna. Huyya hu mahapul ni elaw ni mengipappangngulu.

*Ya kayyaggud ni elaw ni mahapul et han mabalin ni umbaddang hu hakey ni tuu etan ni kamengipappangngulun kamengullug*

<sup>8</sup> Hanniman ida dama etan umbaddang idan kamengipappangngulun kamengullug e mahapul ni kayyaggud hu elaw da: Eleg ida man-ittek, eleg ida mambuttebutteng

\* 2:14 2:14 Genesis 3:1-6 † 2:15 2:15 Ya hakey ni keibbellinan nunya ey ya bii hu nengiuungan Christo e kaumhelaknib.

niya beken ni ya pihhuh hu daka gagamgami. <sup>9</sup> Pakkaw pannananeng da hu daka pengullug ni impeamtan Apu Dios ni hi-gatsun kamengullug, niya mahapul ni kayyaggud daka pehpehding ma-lat melinggep hu nemnem da. <sup>10</sup> Mahapul nin peang-gud da e ida kameiddinnet, et han yu abulutaddan umbaddang idan kamengipappangulun kamengullug.

<sup>11</sup> Hanniman ida daman biin kaumbaddang \* e mahapul ni kayyaggud hu elaw da niya beken idan metumbuk. Ey mahapul daman hankekkeneng da annel da niya ida kameiddinnet di emin.

<sup>12</sup> Ya edum ni pinhed kun ittugun idan lalakkin kaumbaddang ey mahapul ni hakey ahwa da e beken idan makibii, hantugun da u-ungnga da niya kabaelan dan ippaptek hu pamilyah da. <sup>13</sup> Tep yadda etan mahlun umbaddang idan kamengullug ni kakkayyaggud daka pehpehding ey tettebale idan tuu niya wada dinel dan menge-ehhel ni daka pengullug nan Jesus.

*Ya etan nekalligat ni meewwatan ni tayu kakulluga*

<sup>14</sup> Nakka pan-ittudek ni emin eya pinhed kun ittugun ni hi-gayu, anin ni nakka nenemneman anggegannulli ellian kun menang-ang ni hi-gayu, <sup>15</sup> ma-lat hedid wada ketaktakan ku et eggak pakeali, ey amta yu pehpehding yud yuka keemmungin menaydayaw nan Apu Dios e wadan ingganah. Tep hi-gatsun kamengullug hu kamengiehneng ni makulug ni kameituttuddu meippanggep nan Jesus Christo. <sup>16</sup> Endi an keingingehan etan ni impeamtan Apu Dios ni hi-gatsu e humman tayu kakulluga. Inamta tayu e makulug huuya tep wada etan na-hel ni kantuy:

Hi Christo ey nambalin ni tuu et peamtan Ispirituh Apu Dios e hi-gatu ey kakkayyaggud ni peteg. Hi-gatu ey inang-ang idan anghel niya neipeamtad kebbebley hu meippanggep ni hi-gatu et wadadda nengulug ni hi-gatu. Entanni ey impaenamut Apu Dios di kabunyan e keiddeyyawan tu.

## 4

*Ya elaw idan kamengituttuddun neihla*

<sup>1</sup> Impeamtan Ispirituh Apu Dios e makulug ni hakey alin aggew ey wadaddalli mengiwalleng ni daka pengullug nan Jesus Christo, tep mehe-ul idallin neihlan tuttuddun kamelpuddan dimonyoh. <sup>2</sup> Yadda mengituttuddun kaituttuddun dimonyoh ey yadda etan tutu-un maitek e heni numan kakkayyaggud hu daka pengehhe-ehhel, nem ebuh lawah ni wadad nemnem da, tep hi Satanah e apun emin ni lawah hu kamenettengged ni hi-gada. <sup>3</sup> Ituttuddu dalli e kanday pi-yew pengahwaan ni edum ni tuu niya pi-yew ni kennen hu edum ni kamekkan. Nem neihladda, tep emin kamekkan ey lintun Apu Dios ma-lat emin ida hu kamengullug ni daka ewwasi hu makulug ni kameituttuddu ey kennen da hedid nansalamat idan Apu Dios. <sup>4</sup> Tep kayyaggud emin hu lintun Apu Dios et endi hu mekkan ni kamepi-yew hedid nansalamat itsun nengidwatan tuddan nunman. <sup>5</sup> Dammutun kennen tayu hu linggeman ni kamekkan, tep humman hu kan ni ehel Apu Dios niya hedid nansalamat itsun hi-gatu.

<sup>6</sup> Hedid ittuttuddum ida huayan inhel kun hi-gam di edum tayun kamengullug ditan ey kayyaggud kan bega-en Jesus Christo. Humman keang-angan tu e nanengtun muka eddaeddala hu kameituttuddun mengippehammad ni kapengullug niya muka u-unnuda hu kayyaggud ni kameituttuddu. <sup>7</sup> Entan pantaktaktak ni meki-enna-abbig meippanggep ni linggeman ni beken ni keiddeyyawan Apu Dios. Ya kayyaggud kumaddan ni pehding mu ey adaadal mu hu elaw ni keihhammadan ni muka pengullug nan Apu Dios. <sup>8</sup> Tep humman hu importanteh, henin exercise e wada panyaggudan tud annel, nem kedukdul hedid ya kapengullug nan Apu Dios hu meihhammad, tep ya kapengullug ey beken ni panyaggudan tayun nunyan ebuh, nem panyaggudan tayun ingganah. <sup>9</sup> Huayan inhel ku ey makuug et mukun kayyaggud et hedid kullugen idan tuu, tep panyaggudan da. <sup>10</sup> Et humman hu, mahapul ni pannananeng tayun mengippeamtan meippanggep nan Apu Dios anin ni neligat. Tep itu kamedinnet e hi Apu Dios e wadan ingganah hu kamengippaptek ni emin ni tuu, nema-madda hu kamengullug.

<sup>11</sup> Ituttuddum di edum mun tuu ida huayan intugun kun hi-gam. <sup>12</sup> Peang-ang mu hu kayyaggud ni elaw muddad edum mun kamengullug di muka penepit, yad muka pehding, yad impeminhed mun edum mu, yad muka pengullug nan Apu Dios niya kayyaggud ni muka pannemnem, ma-lat hi-gam pengiu-unnudan da. Hedid hanneya pehding mu, ey endi pemihhul dan hi-gam, anin ni u-ungnga ka nem hi-gada. <sup>13</sup> Ya pehding mu, ingganah alin ellian ku, ey ibidbid muddan kamengullug hu impatudek Apu

\* 3:11 3:11 Ya edum ni keibbellinan nunya ey ahwaddan lalakkin kaumbaddang.



Dios niya ehel mu keibbellinan tu, niya tugun mudda ma-lat u-unnuden da. <sup>14</sup> Entan tu iwalleng hu kabaalan mun indawat ni Ispirituh Apu Dios ni nunman lan nengtipewan idan ap-apun kamengullug ni ngamay dad ulum, et peamta da e wada humman ni kabaalan mu.

<sup>15</sup> Nemnemnem mu huyyan tugun ku et paka-u-unnudem et ang-angen idan tuu e nehammad hu muka pengullug. <sup>16</sup> Helipat-im et ya kayyagud ni ingganah hu elaw mu, niya pepuhdanim et ya makulug ni ebuh hu ittutuddum. Tep hedin u-unnuden mu huyyan tugun, ey beken ni hi-gam ni ebuh hu meidwatan ni biyag ni endi pappeg tu, nem anin idan etan ni mengengel ni ittutuddum.

## 5

<sup>1</sup> Entan tu ibunget ida nangkea-amma hedin wada neihlaan da, nem pebabbabbal mun ehelidda e heni mudda a-ammed. Ey ibilang mudda kamampenikken ni lalakkini heni udiyan mudda. <sup>2</sup> Ey yadda dama nangkei-inna, ey ibilang mudda daman heni inam ida, niya peang-ang mu kayyagud idan bibi-in kamenikken e heni mudda udiyan.

<sup>3</sup> Hi-gayun kamengullug hu memaddang ni edum yun kamengullug ni bibi-in nebalun endi mengippaptek ni hi-gada. <sup>4</sup> Nem hedin wada u-ungnga da winu inap-apuda, ey ngenamung idan mengippaptek ni hi-gada. Tep hedin makulug ni pinhed ni u-ungnga da et ya inap-apu da hi Apu Dios, man mahapul ni heni da dama beyyadan hu nengipenapakan idan a-ammed dan hi-gada, tep humman pinhed Apu Dios. <sup>5</sup> Nem ya etan nebalun biin endin hekey hu memaddang ni hi-gatu, ey ebuh katteg hi Apu Dios ni tuka iddinil ni mengippaptek ni hi-gatu, et kamandasal ni kewa-wa-wa niya kahilehileng. <sup>6</sup> Nem ya etan nebalun biin ebuh hu pan-amlengan tu eyad puyek ni tuka nenemema ey anin ni mategu et heni netey. <sup>7</sup> Itugun muddan kamengullug huyya ma-lat eleg ida mapihul. <sup>8</sup> Nem hedin wada tuun eleg tu ippaptek ida agi tu, nema-ma hu pamilyah tu, ey endi silbin tuka pengullug, tep beken ni hanniman hu elaw ni kamengullug. Hedin henin nunman hu elaw ni hakey ni kamengullug, ey kedukdul etan eleg mangulug nem hi-gatu, tep anin yadda eleg mangulug et daka ippaptek hu pamilyah da niyadda agi da.

<sup>9</sup> Hedin wada nebalun biin meputtuk ni umbaddang idan kamengullug, ey pakkaw ni ya na-nem toon tu winu nehuluk, pinhakkey ni ebuh nengahwaan tu, <sup>10</sup> nandingngel e kayyagud elaw tu e impaptek tu u-ungnga tu et nekattugun ida, kameka-apngaddan kaumdutuk di baley tu, kabbabbal ni memaddang idan edum tun kamengullug, e eleg tu ukkuhan umbaddang idan tuun wada ligat da niya tuka itultuluy ni meminhed ni mengippahding ni kayyagud. Hedin impenahding tu huyyan emin, man abulut yun umbaddang.

<sup>11</sup> Entan tudda i-dum ni umbaddang hu nebalun bibi-in eleg mei-inna, tep nelakah ni melumman hu nemnem da, et entanniy nambintan ida et iwwalleng da hu impangunun Jesus Christo ni hi-gada. <sup>12</sup> Et hedin hanniman, ey mepihhul ida, tep kinyat da hu impakulug dan baddangan dadda kamengullug. <sup>13</sup> Hakey pay ey entanniy umhigadda et pelinlinwannan dan mekiyenuyuddung di kabelebeley et ya tumbuk kumedek hu pehpahding da, ey anin endi kelebengan da et mekibibbiyang ida niya linggeman ni endi silbitu hu ennungbalen da. <sup>14</sup> Mukun ya nakka ittugun idan nebalun bibi-in eleg mei-inna ey heballi mambintan ida ni-ngangu et man-unggadada et wada ippaptek dad baballey da ma-lat endi an pemihhul idan buhul tayun hi-gatsun kamengullug. <sup>15</sup> Tep wadadda edum ni nebalun bibi-in nengiwalleng ni makulug ni elaw, et ya elaw Satanas hu da law kau-unnuda.

<sup>16</sup> Hi-gayuddan kamengullug, ey ipaptek yu hu agiyun nebalun bii hedin wada, et beken ni ya edum yun kamengullug hu mengippaptek ni hi-gada, ma-lat wada inna-nu dan mengippaptek idan edum ni nebalun bibi-in endi agi dan mengippaptek ni hi-gada.

<sup>17</sup> Ya hakey mewan ni pinhed kun ittugun ey ang-ang yu et idwat yu hu lebbengtung idawat yun tangdan idan kamengippangngulun hi-gayun kamengullug, nema-ma hedin mahludda numan ni mantuttuddun ehel Apu Dios. <sup>18</sup> Mahapul ni pehding yu huyya, tep humman keibbellinan ni inhel Apu Dios ni kantuy "Entan tu benget hu hungnung ni newang ni kaman-illik ni pagey, et anin ni umkan ni tuka pan-illika." Ya hakey pay ni neitudek ey kantuy "Ya kamangngunnu ey mahapul ni metangdanan." <sup>19</sup> Hedin wada hakey ni kamengippangngulun hi-gatsun kamengullug ni indeekan dan lawah, man entan kulug tu hu hipan daka idded-ek, tep pakkaw ni wada dewwa winu tellun mengihuddut ni kakulugan tu. <sup>20</sup> Nem hedin neamtaan e makulug ni nambahul, ey tugun yud hinanggan emin ni kamengullug, ma-lat denglen idan edum, et tumekut idan manliwwat.

<sup>21</sup> Timothy, pakadngel mu eya tugun kun hi-gam niya nemnem mu e hi Apu Dios et hi Jesus Christo niyadda anghel e bega-en da, ey daita kauh-uhdngin daka kapampenugguni. Hedin wada ippanuh mun nanhallaan ni dewwan tuu, ey ebuh tu ipahhig ni hakey, nem pan-ingneh mu hu penuwet mun hi-gada.

<sup>22</sup> Entan tu panhinaggahaggag hu pemillian yun pan-ap-apu yun kamengullug, tep mahapul ni paka-amtaen yu ni hu elaw da hedin kayyaggud. Tep hedin lalgemen yu, ey mekibbehhul kayun hi-gatu hedin wada pehding tun lawah. Et humman hu, mahapul ni paka-ang-ang yu et endi yu ippahding ni henin nuntan ni pambehhulan, nem ya kayyaggud ni emin ipahding yu.

<sup>23</sup> Ya hakey ni ittugun kun hi-gam ey beken ni ya danum ni ebuh hu inum mu, nem inum kan ekket ni meinum ma-lat bumaddang di egeh mun e-eggel ni dimmegeh et ya edum ni degeh mun muka panligligasi.

<sup>24</sup> Ya liwat ni edum ni tuu ey ka-ang-ang, et inamta tayu e mekastiguddallin edum ni aggew. Nem wadadda etan edum ni eleg meamtan nunya hu lawah ni daka pehpehding, nem meamtan alin hakey ni aggew. <sup>25</sup> Wadadda dama edum ni tuun kamaka-amta hu kayyaggud ni daka pehpehding. Nem wadadda edum ni kayyaggud daka pehpehding, nem eleg meamtan nunya, nem meamtallin edum ni aggew. \*

## 6

### *Ya pehding ni himbut*

<sup>1</sup> Hi-gayun himbut ni kamengullug ey mahapul ni lispituhen hu ap-apu yu ma-lat eleg mapihul hu ngadan Apu Dios et ya kameituttuddun tugun tu. <sup>2</sup> Et hedin kamengullug ida dama ap-apu yu, ey ambeken ni yu penghel ey anin ni eleg yu peka-u-unnuda, haggud kayu kamengullug ni dewwa, nem paka-u-unnud yu anhan law, tep humman idan yuka ingungnunnui ey ida kamengullug nan Christo henin hi-gayu, niya nan-ingneh hu impeminhed tuddan apu yud impeminhed tun hi-gayu.

### *Endi edum ni tayu u-unnuden nem ebuh hu elaw Apu Dios*

Timothy e u-unggak, mahapul ni paka-ittugun mu niya ittuttuddum ida huyyan hi-gada ma-lat paka-u-unnuden da. <sup>3</sup> Nem hedin wadadda edum ni hin-appil hu daka ittuttuddun eleg maiingneh di kaituttuddun Apu Jesus Christo e humman tayu kau-unnuda, <sup>4</sup> ey ida kapehiyyahiyaya niya endi inamta da. Pinhed dan mammaymayakmak niya ida kamekittutut ni meippanggep ni keibbellinan ni ehel Apu Dios. Endi silbitu huyya tep ya pambalanan tu ey man-in-aameh hu tuu niya mantutut ida et dakel e-e-helen dan lawah ni edum da niya lawah pannemnem dan edum da. <sup>5</sup> Ey mambabakal ida tep binabhah ni lawah hu nemnem da et eleg da law hengguda hu makulug ni kameituttuddu. Neihla nemnem da, tep kanda na-mu ngu nem umkedanganan ida hedin u-unnuden da hi Apu Dios.

<sup>6</sup> Nem makulug ni yadda etan tuun kamengu-unnud nan Apu Dios ey et-eteng amleng dan hipan wadan hi-gada, niya hi-gada hu kameibbilang ni nehammad ni kedanganan. <sup>7</sup> Tep nebalbalol hu kapengullug nan Apu Dios nem ya kinedanganan, tep yan neiungangan tayu ey endin hekey tayu in-ali, et yan ketteyyan tayu ey endin hekey hu tayu ellan anin hipan lemu tayu. <sup>8</sup> Et humman hu, hedin wada kennen niya wada balwasi tayu, man hiyya humman. <sup>9</sup> Nem yadda tuun ya keddanganan da hu daka nenemna, ey nelakah idan mehe-ul di panliwwatan da niya pinpinhed dan mengippahding ni lawah. Nem ya pambalanan tu ey kebabahan da. <sup>10</sup> Tep ya impeminhed ni pihhuh hu kaumhulun ni kapengippahdingin tuun dakel ni lawah. Wadadda edum ni nangehaul et iwelak da hu daka pengullug nan Jesus, tep ginamngaman da pihhuh, et humman hu himmulun ni maggeh hu nemnem da.

<sup>11</sup> Nem hedin hi-gam, Timothy e pinutuk Apu Dios ni an mengituttuddun meippanggep ni hi-gatu, et humman hu, entan tu u-unnud hu kapehpehding idan nunyan lawah ni tuu. Nem u-unnud mu hu elaw ni kayyaggud et ya pinhed Apu Dios ni ipahding mu. Pannananang mu hu muka pengullug, ya impeminhed mun edum mun tuu niya binabbal mun hi-gada. Ey anusim emin hu kamekapkapan hi-gam. <sup>12</sup> Ihammad mu hu muka pengullug anin ni neligat, et heni ka etan ni meki-apput e pehding mun emin kabaellan mu ma-lat mengapput ka. Ey nemnem mu e nanna-ud ni meilla-kam kad biyag ni endi pappep tu e humman nemilian Apu Dios ni hi-gam. Ey humman ni muka pengullug hu in-ehehel mud hinanggaddan dakel ni tuu. <sup>13</sup> Ey nemnem mu e hi Apu Dios e kamengidwat ni emin ni biyag et hi Jesus Christo e nanghel ni makulug nan

\* 5:25 5:25 [24-25] Inhel Paul huyya ma-lat tuduen Timothy idan ebuh hu tuun kamaka-amta hu kayyaggud ni daka pehpehding ni mambalin ni mengippangnguluddan kamengullug.

Pilate eman ni nebigtigan tu ey amta da huuyan ittugun kun hi-gam. <sup>14</sup> Pannananeng mun u-unnuden ni emin hu neitugun ni hi-gam ma-lat endi an meippebehul ni hi-gam ingganah ni pambanggadan alin Apu tayu e hi Jesus Christo <sup>15</sup> ni aggew ni gintud Apu Dios. Endi edum ni ap-apun heni hi Apu Dios e kamedeyyaw. Hi-gatu hu Patul idan emin ni patul niya Ap-apun emin ni ap-apu. \* <sup>16</sup> Hi-gatun ebuh hu eleg mettey. Yad kad-an tu ey kaumhilin peteg et endi mabalin ni meihnup diman. Endi nenang-ang ni hi-gatu niya endi mabalin ni menang-ang ni hi-gatu. Daydayaw tayu hi Apu Dios ey abulut tayu e hi-gatu keta-ta-geyyan ni man-ap-apun ingganah. Amen.

<sup>17</sup> Timothy, itugun muddan kekeddangyan e eleg da ippahhiya niya eleg da iddinel hu kinedangyan da, tep nelakah ni metellak hu kinedangyan. Nem hi Apu Dios hu mahapul ni iddinel da, tep hi-gatu kamengidwat ni emin ni kayyaggud ni pan-am-amlengan ni tuu. <sup>18</sup> Itugun mun hi-gada et ipahding da kayyaggud, et humman hu heni ikkedangyan da. Ey itugun mun hi-gada e kayyaggud hedin madewat ida niya hehmeken da edum dan tuun kamanligligat. <sup>19</sup> Tep hedin ippahding da huuya, man medinnel ida e ya nehammad ni ikkedangyan dad kabunyan ni hakey alin aggew ey ya biyag ni endi pappeg tu. Tep kedukdul hu humman ni biyag nem ya kinedangyan eyad puyek.

<sup>20</sup> Timothy, paka-ippaptek mu hu impangunun Apu Dios ni hi-gam. Entan tu hangud hu kameituttuddun beken ni keiddeyyawan tu, tep endi silbitu humman. Ey entan keidngelin ehel idan kamengehging ni ehel Apu Dios e kanday ya daka ituttuddu hu nehammad ni adal. Nem neihalladda kaya, <sup>21</sup> tep wadadda nehaul ni nengulug ni nunman ni tuttuddu et inwalleng da kumedek hu daka pengullug nan Jesus.

Ya dasal ku ey meweddin hi-gayun emin hu binabbal Apu Dios.

---

\* 6:15 6:15 Psalm 136:3

## Ya Neikadwan Intudek Paul nan Timothy

<sup>1</sup> Nalpu huuyan tudek ni hi-gak e hi Paul e apostle ni pinutuk Apu Dios ni mengippeamtaddan tutu-u meippanggep ni biyag ni endi pappeg tun impakulug tun dewwatan tayu, hedin kullugen tayu hi Jesus Christo. <sup>2</sup> Tudek ku huuyan hi-gam e Timothy, e nakka ibbilang ni u-unggak.

Pinhed kun meweddan hi-gam hu binabbal, ya hemek et ya linggep ni kamelpun Ametayu e hi Apu Dios et hi Jesus Christo e Apu tayu.

*Intugun Paul nan Timothy e ihhammad tu tuka pengullug*

<sup>3</sup> Timothy, nakka mansalamat nan Apu Dios tep ya muka pengullug. Kayyaggud nemnem kun nakka pengu-unnudin hi-gatu henin kapengullug ida lan aammed ku. Kewa-wa-wa niya kahilehileng ey daka kaiddasali. <sup>4</sup> Hedin ninemnem ku hu ninengihan mun neni-yanan daka, man pinhed kun ang-angen daka mewan et man-am-amlenggak. <sup>5</sup> Inamtak e nehammad hu muka pengullug nan Jesus henin kapengullug nan apum e hi Lois et hi inam e hi Eunice. <sup>6</sup> Mukun penemnem kun hi-gam ma-lat itultuluy mun mengussal ni kabaelan mun mantuttuddun indawat Apu Dios ni nengita-pewan kun ngamay kud ulum. <sup>7</sup> Tep ya Ispirituh Apu Dios ni indawat tun hi-gatsun kamengullug ey beken ni hi-gatu kakelpuin takut winu baing, tep hi-gatu kakelpuin kabaelan tayun mengu-unnud ni tugun tu, ya peminhedan tayun edum tayu niya penuggun tayun annel tayu.

<sup>8</sup> Et humman hu, entan baing ni mengituttudun meippanggep nan Jesus e Apu tayu. Ey entan tu ibeing eya neikelabutan ku gapuh ni nakka pengu-unnudin Jesus. Nem abulut mun mekililligat ni pengituttudduan mun impahding Jesus Christo ni panyaggudan ni tuu, tep iddawat Apu Dios hu kabaelan mun mengan-anus ni ligat mu. <sup>9</sup> Hinelakniban daitsun Apu Dios ma-lat mengu-unnud itsun hi-gatu. Nem beken ni gapuh ni kayyaggud ni tayu kaippahding, nem gapuh ni binabbal tun hi-gatsu e humman hu pinhed tun pehding, tep ingkatey Jesus Christo hu liwat tayu. Humman dedan hu wadad nemnem tun pehding tu et han mawedan emin eya wadan nunya. <sup>10</sup> Et yan nunya, ey neipeang-ang law humman ni binabbal tun inlian Jesus Christo et helakniban daitsu niya inapput tu katey ni netagwan tu, et humman pengamtaan tayu e metegguan itsulli daman ketteyyan tayu niya meidwatan itsun biyag ni endi pappeg tu gapuh ni pengullugan tayun kameituttuddun impahding Jesus ni panyaggudan tayun emin ni tuu. <sup>11</sup> Pinutuk tuwak Apu Dios ni hakey ni apostle tu et itu-dak tuwak ni an mengituttuddun impahding Jesus Christo ni panyaggudan ni tuu. <sup>12</sup> Humman hu gaputun nakka panlelehani eyad kallabbuttan. Nem eggak ibbaing, tep inamtak etan nakka kulluga e hi Apu Dios niya nakka medinnel e kabaelan tun mengippaptek ni hi-gak ingganah ni keddetangan alin aggew ni panhuwetan tun tuu.

<sup>13</sup> Pannananeng mun u-unnuden ida huuyan neiptek ni kameituttuddun dingngel mun hi-gak niya pannananeng mu hu muka pengullug niya impeminhed mu gapuh ni neiegian tayun Jesus Christo. <sup>14</sup> Et ya etan Ispirituh Apu Dios ni wadan hi-gatsun kamengullug hu pangidinelim ni umbaddang ni hi-gam ni mengituttuddu etan ni indinel Apu Dios ni hi-gam.

<sup>15</sup> Amtam e insiked idan emin ni kamengullug di Asia ni memaddang ni hi-gak, anin di Pigelus nan hi Hermogenes. <sup>16</sup> Nem kayyaggud et wada hi Onesiporus ni eleg bumeing ni immalialin nengidu-ngaw ni hi-gak di deya kallabbuttan. Pinhed kun mewedda hu hemek nan Apu Dios ni hi-gatu niyadda familyah tu, tep binenaddangan tuwak numan. <sup>17</sup> Yan eman ni inlian tudya Rome, ey tuwak numan hūnemahemak et hamaken tuwak di kallabbuttan. <sup>18</sup> Ey inamtak dama e et-eteng hu imbaddang tun hi-gak eman ni wada kamid Ephesus. Pinhed kun mewedda hu hemek nan Apu Dios ni hi-gatun pambangganan alin Apu tayu e hi Jesus ni menuwet ni emin ni tuun hakey alin aggew.

## 2

*Ya tugun Paul ni pengan-anusan Timothy ni ligat*

<sup>1</sup> Hi-gam e u-unggak Timothy, idinel mu hi Jesus Christo ni memaddang ni hi-gam, tep et-eteng binabbal tun hi-gatsun kamengullug. <sup>2</sup> Yadda etan diddingngel mun intuttudduk di dakel ni tuu, ey ittuttuddum damaddad kameiddinnel ni tuu, ma-lat ittuttuddu da damad edum dan tuu.

<sup>3-4</sup> Isipel mu hu muka pekilehhanin hi-gami gapuh ni muka pengullug nan Jesus, tep heni ka sindalu tu. Ya sindalu ey ebuh hu nansindaluan tun tuka nemnemnema,

eleg tu hengnguhengnguda hu elaw ni beken ni sindalu, ma-lat peamleng tu ap-apu da. <sup>5</sup> Hanniman dama hu kameki-apput e eleg mabalin ni mengapput hedin eleg tu u-unnuda hu elaw ni peki-apputan. <sup>6</sup> Henin kamangge-ud e hedin ipapaptek tu hu inggaud tu, man dakel ennién tu. <sup>7</sup> Nemnem mudda huyyan intugun kun hi-gam et baddangan dakan Apu Dios ni mengewwat idan nunya. \*

<sup>8</sup> Entan tu liwwan hi Jesus Christo e helag David e nangkapyan tuu et matey, nem netagwan. Huyya kayyaggud ni impahding Jesus ni panyaggudan ni tuun nakka peennamta. <sup>9</sup> Ya nakka pengituttudduin nunya hu gaputun neikelabutan ku et nakka panlelehmani niya nebangkilnggak e heni et-eteng bahul ku. Nem anin na-mun pesikked da-ak ni mengituttuddun ehel Apu Dios, et nanengtun meituttuddu ngu dedan. <sup>10</sup> Et mukun nakka ennusi ligat ku ma-lat mahelakniban ida etan pinilin Apu Dios ni mengullug nan Jesus Christo e hi-gatu hu kamenellaknib ni neliwtan, et mekidaydayaw idallin hi-gatun kenayun. <sup>11</sup> Makulug eya ehel ni kantuy

“Hedin nekiketey itsun hi-gatu, man mekittегgu itsulli daman hi-gatu. <sup>12</sup> Hedin anusan tayu ligat tayu et eleg tayu issiked ni mengu-unnud nan Jesus, ey meki-apu itsullin hi-gatu. Nem hedin ibbaing tayu hi Jesus, ey ibbaing daitsulli dama e kantuy beken daitsun tuu tu. <sup>13</sup> Anin ni hin-addum ni eleg tayu u-unnuda, et nanengtu ngu dedan ni ippaptek daitsu, tep eleg tu kekyata hu impakulug tun pehding tu.”

*Ya pehding ni pengippeamleng nan Apu Dios*

<sup>14</sup> Penemnem muddan kamengullug huyyaddan intugun ku ma-lat eleg da liwwanan. Ey ehel mun hi-gada e eleg pinhed Apu Dios ni yu pantutututan hu keibbellinan ni hipan ehel, tep endi silbitu niya umbabhah kumedek ni kapengullug idan kameneddenggel.

<sup>15</sup> Ipatnam emin kabaelan mun mengippeamleng nan Apu Dios ma-lat tetebalen dakan hi-gatu. Ey ya neiptek hu ipahding mun mengituttuddun ehel tu ma-lat eleg ka mabeingan. <sup>16</sup> Entan tu deddenggel ida kameituttuddun beken ni keiddeyyawan Apu Dios, tep endi silbiddan nunman, nem umhulun kumedek ni kebabhahan ni kapengulug idan edum. <sup>17</sup> Tep humman idan daka ituttuddun neihla, ey heni gannan kameihhinnap di annel ni tuu. Di Haymenaus nan hi Piletus hu kamengituttuddun henin nunya. <sup>18</sup> Beke ni makulug hu daka ituttuddu, tep kanday negibbuh hu netaguan idan nangketey, et huyyan daka ituttuddu hu himmulun ni nebahbahan ni kapengulug ni edum. <sup>19</sup> Nem anin ni hanniman e wadadda kamantuttuddun neihla, et eleg mabalin ni mehullulan hu tuttuddun Apu Dios, tep kamei-ellig etan di et-eteng ni batun pegnad e eleg meglid. Hanniman idan nehammad hu daka pengullug ni hi-gatu, tep neitudek e kantuy “Inamtan Apu Dios ida tuu tu.” Ya hakey mewan ni neitudek ey kantuy “Yadda etan kanday tuun Apu Dios ida, ey mahapul ni issiked dan mengippahding ni lawah.”

<sup>20</sup> Yad baley ni kedangyan ey wada dakel ni nambakbaklang ni kameussal. Wadadda nekapyad balituk winu silber. Yadda edum ey nekapyad keyew winu pulan puyek. Nem ya etan kedangyan ey tuka ikkakaguh ni peteg etan ida nebalol ni tuka ussala hedin wada bisita tu. Nem yadda etan edum ey linggeman hu tuka pengussali. <sup>21</sup> Heni daman etan ni tuun pinhed tun tetebalen Apu Dios e mahapul ni issiked tun mengippahding ni lawah et maidaddan di hipan pinhed Apu Dios ni pengunnun hi-gatu ma-lat wada pansilbian tun kayyaggud.

<sup>22</sup> Ang-ang mu et eleg mu ipahding hu lawah ni kapan-amlengin annel ni kapehpehding idan kamenikken. Iillingisim ni mengippahding ni kayyaggud, ihammad mu hu muka pengullug niya peang-ang mu impeminhed mun edum mun tuu. Ey ya kayyaggud hu pekidagyum muddan nehammad hu dinel dan mampebaddang nan Apu tayu e hi Jesus. <sup>23</sup> Entan tu hangud hu legelegem ni kameung-ungbal tep endi silbitu, nem umhulun kumedek ni pekihhubbegam. <sup>24</sup> Ya kapanggunnun Apu Dios ey eleg mekittuttut, nem kababbal di emin ni tuu, nelaing niya neanus ni mantuttuddu. <sup>25</sup> Mahapul ni iyayyaggud tun e-helan ida etan tuun kamengehding ni hi-gatu, ma-lat kayyaggud pengngelan da et wadan baddangan et anhan idan Apu Dios ni mantuttuyyun liwat da. Et lektattuy amtaen da etan makulug ni kameituttuddu, <sup>26</sup> et mambangngad hu kayyaggud ni nemnem da et meendi law kabaelan Satanas ni hi-gada, tep hineul tuudan mengippahding ni pinhed tu.

\* 2:7 2:7 [3-7] Inhel Paul nan Timothy hu meippanggep ni sindalu, ya kameki-apput niya kamangge-ud ma-lat awatan nan Timothy ey ya tuun pinhed tun ellan hu tuka namnamaha ey tuka ebbuluta hu ligat tun pengellaan tu et tuka iipatna hu kabaelan tu.

## 3

*Ya elaw idallin tuun ellian mewan Jesus*

<sup>1</sup> Huyya nemnem mu, Timothy e yallin ngannganih ni kedettengan ni ellian mewan Apu Jesus ey wadalli nemahhig ni ligat di puyek. <sup>2</sup> Neagum idalli tuu, ebuh hu annel da niya pihhuh ni daka nenemnema. Wada hakkeyey mampahhiya, manghay idalli niya lawah daka e-hela meippanggep ni edum dan tuu. Eleg da u-unnuda tugun ni a-ammed da, eleg ida mansalamat niya eleg da nemnema hi Apu Dios. <sup>3</sup> Endi impeminhed dan edum da, eleg da pessinsahi edum da niya daka pekpekdag hu deedeek ni lawah di edum da. Eleg da hangkekkneng hu lawah ni daka pehpending, mabunget ida niya anggebe-hel dan emin hu kayyaggud. <sup>4</sup> Daka ihhehdul hu edum da, eleg da ikkaguh hu pambalanan alin daka pehpending, daka peta-gey hu annel da niya ebuh hu pan-am-lenglan ni annel dan daka nenemnema, nem eleg da nemnema hi Apu Dios. <sup>5</sup> Kandalli ey daka peka-u-unnuda hi Apu Dios, nem itek da kaya, tep eleg da ebbuluta pemaddangan tun hi-gada ma-lat yumaggud hu elaw da. Helipat-im ida henin nunyan tuu et eleg ka makidagum ni hi-gada.

<sup>6</sup> Yadda edum ni henin nunyan tuu ey ida kaumlaw di kabelebeley ni an mekiyuyyud-dung et mantuttuddudun hin-appil ni tudtuddu, ma-lat haulen dadda hu lawah ni bibi-in nelakah ni mehe-ul e kamemunnunnu nemnem da tep inamta da e lawah hu daka pehpending. <sup>7</sup> Huyyaddan bii ey daka ebbulutan emin hu kameituttuddu, nem eleg dan hekey han-awat hu makulug ni kameituttuddu. <sup>8</sup> Humman idan kamantuttuddun hin-appil ey daka kehinga hu makulug ni kameituttuddu, henidda lad Hanes nan Hambres e impatna dan la-pahan hi Moses e bega-en lan Apu Dios. Nebahbah hu nemnem idan nunyan tutu-u niya neihla hu kinulug da. Entan tu ibilang ni kamengullug nan Jesus hu heniddan nunman ni tuu. <sup>9</sup> Nem eleg ali mengenglaw huyyan daka pehpending, tep amtaen idallin tuu e itek humman ni daka ituttuddu et eleg daddalli law kulluga heni lad Hanes nan Hambres e buhul Moses.

<sup>10-11</sup> Nem hi-gam e Timothy e u-ungngak, ey neka-amtam hu nakka ituttuddu, ya elaw ku, ya impahpahding kun nengipeamleng nan Apu Dios, ya nakka pengullug nan Jesus, ya anus ku niya impeminhed ku. Eggak isiked ni nengu-unnud nan Jesus, anin ni nanlelehanan ku hu kapehpending idan tuu, niya anin ni dakel hu ligat ni hineniktaman ku. Inamtam e nanlelehanan ku hu impahpahding idan tuun hi-gak ni linawwan kud Antioch, yad Iconium niyad Listera. Nem kayyaggud anhan et impaptek tuwak nan Apu Dios di emin ni ligat ku. <sup>12</sup> Nem beken ni hi-gak ni ebuh hu manhelheltap, tep emin ida neminhed ni mengu-unnud ni pinhed Apu Dios gapuh ni daka pengullug nan Jesus Christo ey panlelehanan dalli dama ligat. <sup>13</sup> Yadda etan tutu-u kamantuttuddun hin-appil e daka he-ula edum dan tuu ey he-ulen daman Satanas ida et ihhi-met da kalinawah da.

<sup>14</sup> Nem hi-gam, Timothy, itultuluy mun u-unnuden hu kameituttuddun dinggel mu e humman hu inhammad mun kinulug, tep inamtam et hi-gamin nenuttuddun hi-gam ey kami kameiddinnel. <sup>15</sup> Ey inamtam e neipalpu eman ni ekaglang mu ey neitenuttuddun hi-gam hu impaitudek Apu Dios ni ehel tu. Huyyan ehel tu hu mengippeamtan elaw ni kehellakniban ni tuu gapuh ni tuka pengullug nan Jesus Christo. <sup>16</sup> Emin hu neitudek ni ehel Apu Dios ey impatudek tu. Ey humman ni ehel tu ey umbaddang ni hi-gatsun mengituttuddun neiptek, ey peamta tu hipa neihalan kapehpending, niya ittudu tu hu kayyaggud ni elaw ni pambi-biyag. <sup>17</sup> Huyyan impatudek Apu Dios ni ehel tu ey baddangan tudda etan kamengullug ni hi-gatu, et endi da pangkullangan ni mengippahding ni kayyaggud di edum dan tuu.

## 4

*Ya pengippahdingan Timothy etan ni impangunun Apu Dios*

<sup>1</sup> Hi Apu Dios et hi Jesus Christo e menuwet alin emin ni tuu, anin idan netey niyadda mategullin nunman ni pambangngadan tun man-ap-apu, ey daka tetbala huyyan nakka pan-ittugun ni hi-gam. <sup>2</sup> Ipahding mu emin hu kabaelan mun mengituttuddun ehel Apu Dios, anin ni hipan tsimpuh niya anin ni tetbalen ni tuu winu pihhulen da. Tugun mudda tutu-udtan. Ehelim ida ma-lat mangulug ida et ya law kayyaggud ipahding da. Niya petuled mudda kamengullug ma-lat maihammad hu daka pengullug niya ma-lat ipapanukiil dan mengippahding ni kayyaggud. Niya an-anusim ni mengituttuddun ehel Apu Dios idad tuu. <sup>3</sup> Tep ay kamangkedettengi law hu getud ni keweddaan idan tuun eleg meminhed eyan makulug ni kameituttuddu. Tep wadalli hakkeyey an menemmak ni mantuttuddun hi-gatu anin neihla hu daka ituttuddu nemet maiunnud etan di pinhed dan dedngelen. <sup>4</sup> Inwalleng da hu makulug ni kameituttuddu et ya neihlan nalpud

nemnem ni tuu hu pinhed dan u-unnuden. <sup>5</sup> Nem hedin hi-gam, man mahapul ni pesingaim hu pehding mu, anin ni hipa mekapkapy. Entan tu isiked ni mengu-unnud nan Apu Dios, anin ni panlelehanan mu. Tupug mu huyyan ngunum ni mengituttuddun meippanggep nan Jesus Christo. Ey ipahding mun emin hu impangunun Apu Dios ni hi-gam.

*Ya nanligligatan Paul*

<sup>6</sup> Nakka ittugun idan emin huyyan hi-gam, tep ay kamangkedettengi law hu ketteyyan ku. Tep ya biyag ku ey mei-ellig ni mei-appit ni meinnum ni meidduyyag di altar nan Apu Dios <sup>7</sup> Impahding kun emin hu kabaelan kun nengipahding ni impangunun Apu Dios ni hi-gak, et deh e negibbuh. Heni-ak etan ni kameki-apput e nengapputtak, tep inu-unnud kun emin hu tugun tu niya impannananeng ku hu nakka pengullug. <sup>8</sup> Et yan nunya, ey nakka medinnel e wada kameihehhegged ni hi-gak ni kayyaggud ni genuden kun iddawat ni limpiyuh ni Apu tayun huwet e ibbilang tuwak ni kayyaggud ni kedettengan alin panhuwetan tun tutu-u. Nem beken ni hi-gak ni ebuh hu menewwat ni nunman ni megen-ud, tep emin idalli etan kamenehhegged ni ellian tu mewan.

<sup>9-10</sup> Timothy, papuut mun um-alidya, tep nan-inhihi-yanan da-ak. Hini-yan tuwak nan Demas, tep ebuh biyag eyad puyek ni tuka nenemnema et lumaw di Thessalonica. Ey hedin daman hi Keresente, man limmaw di Galatia. Ey limmaw dama hi Titus di Dalmatia. <sup>11</sup> Ebuh hi Luke ni kadwak di deya. Ayagim ali hi Mark ni ellian mudya, tep et-eteng hu ibbaddang tun hi-gak. <sup>12</sup> Intu-dak ku hi Taykikus di Ephesus. <sup>13</sup> Hedin um-ali ka, alam ali etan mahdel ni balwasik di baley Carpus di Troas, niya alam ali ida etan papil ku. Entan tu liwwan etan neludun ni papil ni neitudekan ni ehel Apu Dios, tep makahhapul ku.

<sup>14</sup> Hi Alexander, e ma-dih, ey lawah ni peteg hu impahding tun hi-gak, nem ngenamung hi Apu Dios ni mengastigun hi-gatu. <sup>15</sup> Helipat-im huyyan tuu, tep kinehing tun emin hu intuttuddu mi.

<sup>16</sup> Yan laputun nebigtigan ku, ey endin hekey hu nengiehneng ni hi-gak, tep nan-inhihi-yanan da-ak. Imbagak Apu Dios e eleg tudda kastigua, nem hehmeke tudda. <sup>17</sup> Nem anin ni hanniman impahding da, et eleg tuwak iwalleng nan Apu Dios, nem binaddangan tuwak niya impetuled tuwak ni mengitultuluy ni mengituttuddun meippanggep nan Jesus Christo idan beken ni Jews. Pinhed idan buhul kun petteyen da-ak, nem inhewang tuwak Apu Dios. <sup>18</sup> Emin di lawah ni mekapkapyan hi-gak ey makulug ni ippaptek tuwak nan Apu Dios et meihwanggak, et umlawwak alin hakey ni aggew di nan-ap-apuan tu. Hi Apu Dios hu medaydayaw ni ingganah. Amen.

<sup>19</sup> Ehel mun Priscila, hi Aquila niyadda dama pamilyah nan Onesiporus e nakka nenemnemadda. <sup>20</sup> Nena-yun hi Erastus di Corinth. Hini-yan ku hi Terupimus di Miletus, tep nandegheh. <sup>21</sup> Ang-ang mu ma-lat dumteng kadya et han medatngi keteketel.

Wadadyad Eubulus, hi Pudens, hi Linus, hi Klaudia niyadda edum ni kamengullug e kanday daka kanenemneman hi-gada.

<sup>22</sup> Nakka iddasal e baddangan dakeyun ingganah nan Apu Dios niya meweddand gayu binabbal tu.

## Ya Tudek Paul nan Titus

<sup>1</sup> Hi-gam e Titus, huyyan tudek ey nalpun hi-gak e hi Paul e bega-en Apu Dios niya apostle Jesus Christo. Ya ngunun nei-kud ni hi-gak ey ya mantuttuddu ma-lat meihammad hu kapengullug ida etan ni pinilin Apu Dios ni tuu tu niya ma-lat tubtuban ku hu inedal dan makulug ni kameituttuddu et mengu-unnud idan Apu Dios. <sup>2</sup> Yadda tuun mengullug nunyan kameituttuddu ey medinnel idan meidwatan ni biyag ni endi pappeg tu e humman impakulug Apu Dios et han mawedan emin eya wadan nunya. Makulug huyya, tep eleg man-ittek.

<sup>3</sup> Et yan nunya ey nedatngan hu gintud Apu Dios ni keippeamtaan nunyan tuttuddun panyaggudan ni tuu. Hi-gatu e kamenellaknib ni hi-gatsu hu nengidinel ni hi-gak ni mengituttuddun nunya.

<sup>4</sup> Nakka pan-ittudek huyyan hi-gam e Titus, e nakka ibbilang ni u-ungngak tep ya nengulugan tan Jesus.

Pinhed kun mewedan hi-gam hu binabbal niya linggep ni kamelpun Apu Dios e Ametayu et hi Jesus Christo e kamenellaknib ni hi-gatsu.

### *Ya ngunun Titus di Crete*

<sup>5</sup> Hini-yan dakan hi-gak di Crete, tep pinhed kun gibbuhen mun ippahding ida etan eleg megibbuh ni ngunu niya ma-lat pilien mudda mengipappanggulun kamengullug di kebebbebley ditan Crete, henin intugun ku lan hi-gam. <sup>6</sup> Ya mengipappangguluddan kamengullug ey mahapul ni kayyaggud elaw tu ma-lat endi lawah ni e-helen ni tuun meippanggep ni hi-gatu. Mahapul ni hakey ahwa tu e beken ni makibii. Ey mahapul ni kamengullug ida u-ungnga tu niya beken idan manghay, nem hangkekkenneng da annel da ma-lat endi lawah ni me-me-hel ni hi-gada. <sup>7</sup> Tep ya mengipappanggulun kamengullug ey hi-gatu hu heni nangged ni ngunun Apu Dios, et mukun mahapul ni endi lawah ni me-me-hel ni hi-gatu, eleg mampahhiya, beken ni kabbubunget, beken ni mabuteng, beken ni matutut, niya eleg tu gamgami pihuh. <sup>8</sup> Mahapul ni apngaen tu hu mangili tu, ya kayyaggud ni ebuh hu pinhed tun ippahding, eleg tu ippahding hu lawah niya hangkekkenneng tu annel tu. <sup>9</sup> Mahapul ni nehammad hu tuka pengullug etan di makulug ni neituttuddun hi-gatu, et ituttuddu tuddan edum ma-lat humman hu u-unnuden da. Niya peamta tuddan kaumkahing e neihla hu daka ituttuddu.

<sup>10</sup> Tep dakek ida kaumkahing niya kaumhaul e endi silbin daka e-e-hela, nema-madda etan kamengippillit ni u-unnuden hu elaw idan Jews. <sup>11</sup> Mahapul ni pe-neng yudda, tep ida kaumbabahbah ni kapengullug idan hampamilya, tep endi baing idan nunman ni kamantuttuddu e ya pihuh ni ebuh hu daka gamgami. <sup>12</sup> Anin la eman hakey ni prophet ni nalpuktan Crete et kantuy "Yadda tuud Crete ey maitek ida, mabunget ida, mahigadda, nem pinhed dan mepepehhel, niya ma-nu demut da e henidda animal di muyung."

<sup>13</sup> Makulug numan ida huyyan inhel tu. Mukun pan-ehelim ida niya pantugun mudda et wadan meihammad et hu daka pengullug, <sup>14</sup> ma-lat eleg da u-unnuden hu kaituttuddudan edum ni Jews niyadda tugun idan tutu-un nengiwalleng ni makulug ni kameituttuddu.

<sup>15</sup> Ya kayyaggud ni tuu ey kayyaggud dama hu tuka nemnemnema, niya eleg tu hengnguda hu legelegem ni kamepi-yew. Nem yadda hu lawah niya eleg mengullug ey dakek pi-yew ni daka paka-u-unnuda, anin ni beken ni pi-yew, tep binambah ni lawah hu nemnem da. <sup>16</sup> Kanday daka u-unnuda hi Apu Dios, nem eleg kaya, tep lawah hu daka pehpehding. Ida kamengippebungnet, ey manghay ida niya endi kabaelan dan mengippahding ni kayyaggud.

## 2

### *Ya kayyaggud ni kameituttuddu*

<sup>1</sup> Nem hedini hi-gam, ey mahapul ni ituttuddum hu neiptek e humman dedan hu neitudun hi-gatsun nunman. <sup>2</sup> Tugun mudda nangkea-amma et kekkennengen da annel da, ma-lat matbal idad daka pehding, neiptek hu daka pengullug, nehammad hu impemihed dan edum dan tuu, niya pannananeng da hu daka pengullug, anin ni heltapen da hipan ligat ni um-alin hi-gada. <sup>3</sup> Tuttudduim ida dama nangkei-inna ma-lat daydayawen da hi Apu Dios di emin ni daka pehpehding, et beken ni ya tumbuk hu pehuban da niya ma-lat eleg ida mambuttebutteng. Nem ya kumaddan pehding da ey ituttuddu da hu kayyaggud <sup>4</sup> idan kamenikken ni bibi-i, ma-lat adalen dan meminhed



ni ahwa da niyadda u-ungnga da, <sup>5</sup> kekkennengen da annel da, ya kayyaggud ni ebuhr hu wadad nemnem da, ippaptek da pamilyah da, niya u-unnuden da hu ahwa da ma-lat endi umhulun ni pemihhulan ni tuun tuttuuddun Apu Dios.

<sup>6</sup> Tugun mudda dama lalakkin kamenikken ma-lat kekkennengen da annel da. <sup>7</sup> Hedin hi-gam, man mahapul ni peang-ang mu hu kayyaggud di emin ni muka pehding ma-lat wada pengiu-unnudan idan edum ni kamengullug. Ey mahapul ni kayyaggud hu elaw ni penuttuuddum ma-lat ang-angen da e muka ipapaptek hu ngunum, <sup>8</sup> ey ya neiptek hu ittutuuddum, ma-lat hedin wadadda etan kaumkahing ey umbaing ida, tep endi da ang-angen ni pihhulen dan hi-gatsu.

<sup>9</sup> Ey tugun mudda dama himbut et u-unnuden dadda kan himbut ni hi-gada niya peamleng dadda emin ni pehding da. Mahapul ni eleg ida mekittuttut ni kanhimit ni hi-gada, <sup>10</sup> niya eleg ida menekkew, nem peang-ang dad elaw da e ida kameiddinnel ma-lat meang-ang di emin ni daka pehding hu kakiniyayyaggud ni kameituttuuddum meippanggep nan Apu Dios e kamenellaknib ni hi-gatsu.

<sup>11</sup> Tep impeamtan Apu Dios hu binabbal tun hi-gatsu ma-lat wada inna-nu tun kehellakniban tayun tutu-u. <sup>12</sup> Ya binabbal tun hi-gatsu hu menuggun ni hi-gatsu ma-lat iwalleng tayudda elaw ni eleg pinhed Apu Dios niyadda lawah ni pinhed ni tuud puyek. Ey tuggunen daitsun mengekkenneng ni annel tayu, ya mengi-andeng ni elaw tayu niya mengu-unnud nan Apu Dios eyan ketaggu tayu. <sup>13</sup> Huyyadda pehding tayu eyan tayu kapenehheggedin kedettengan ni Aggew ni ellian Jesus Christo e eta-gey ni Dios tayu niya kamenellaknib ni hi-gatsun kamengullug. Yallin nunman ni aggew ey man-am-amleng itsu tep ang-angen tayulli dayaw tu. <sup>14</sup> Hi Jesus Christo ey ingkatey tu neneklaan tun liwat tayu ma-lat iwalleng tayun emin hu lawah et pambalin daitsun tuu tu et ya kayyaggud hu pakappinheden tayun pehding.

<sup>15</sup> Huyyaddan intugun kun hi-gam e Titus hu ittutuuddum idan tuum niya petuled mudda ma-lat maihammad hu daka pengullug ey ehelim idad neihsan da. Wada kelebhangen mun mengippahding idan nunya. Et humman hu, hedin wada umkahing ni hi-gam ey ibunget mu.

### 3

#### *Ya elaw ni kamengullug nan Jesus*

<sup>1</sup> Penemnem muddan kamengullug ditan e mahapul ni u-unnuden da hu elaw ni gubilnu, niya u-unnuden dadda ap-apu, niya mandaddan idan kenayun ni mengippahding ni kayyaggud. <sup>2</sup> Tugun mudda ma-lat beken ni ya lawah hu e-helen da meippanggep ni edum dan tuu, eleg ida mekittuttut, kabbabbal ida niya peang-ang da kayyaggud di emin ni tuu.

<sup>3</sup> Tep anin hi-gatsu lan nunman et endi nemnem tayu. Eleg tayu u-unnuden hu pinhed nan Apu Dios, nem kinehing tayun emin hu hipan tugun tu. Nehaul itsu et kulengen tayu hu neihsan tuttuuddu, ya neihsan elaw hu impeingha tayu niyadda lawah ni pinpinhed ni annel tayu hu impahding tayu, ya lawah hu pinhed tayun meippahding di edum ni tuu, tayu kakeemmehi hu edum tayun tuu, angebe-hel tayu edum tayun tuu niya angebe-hel daitsun dama.

<sup>4</sup> Nem hi Apu Dios e kamenellaknib ni hi-gatsun kamengullug ey impeang-ang tu hu binabbal tu niya impinshed tun hi-gatsu, <sup>5</sup> et helakniban daitsu, beken ni gapuh tep ya kakiniyayyaggud tayu, nem gapuh ni hemek tun hi-gatsu. Ya elaw ni nenelakniban daitsu ey impidwan Ispiritu Apu Dios hu neitunggaan tayu et idwatan daitsun baluh ni biyag e heni daitsu inulahan. <sup>6</sup> Impaelin Apu Dios hu Ispiritu tun hi-gatsu gapuh ni impahding Jesus Christo e kamenellaknib ni hi-gatsun kamengullug. <sup>7</sup> Et ibilang daitsun Apu Dios ni kayyaggud, tep kabbabbal ni hi-gatsu et idwat tu etan tayu kanamnamahan biyag ni endi pappeg tu. <sup>8</sup> Huyyan kameituttuuddu ey nehammad ni pandinnelan.

Et humman hu, pinhed kun paka-ittutuuddum ida huuya, ma-lat yadda law hu kayyaggud hu pehding idan etan ni kamengullug nan Apu Dios. Kakkayyaggud ida huayan intugun kun hi-gam et panyaggudan idan menggel hedin u-unnuden da. <sup>9</sup> Entan tu pelinlinwannin mekittuttut ni meippanggep idan tenten ni aammed niya meippanggep ni Tugun Moses, tep endi silbi tudu humman.

<sup>10</sup> Hedin wada tuun kaumhulun ni kekiwwaan idan kamengullug, ey ehelim ma-lat isiked tu. Nem hedin ippidwan ni e-helan ey nanengton kahing, diman ew et ngenamung tu. <sup>11</sup> Inamta ya e ya henin nunman ni tuu ey neihsa hu tuka pannemnem. Ey immingha lawah ni hi-gatu niya inamta tu e humman hu kekastiguan tu.

#### *Ya nanggillig ni tugun Paul nan Titus*

<sup>12</sup> Nakka nemnemneman ittu-dak hi Artemas winu hi Taykikus ditan Crete ma-lat wada meihullul ni hi-gam. Hedin wada umdateng ni hi-gada, papuut mun um-alid Nikopolis et mandammu itadman, tep ninemnem kun manha-ad diman ni kedettengan ni keteketel. <sup>13</sup> Ipahding mun emin hu kabaelam ni memaddang nan Senas e abugaduh, et hi Apolos ni e-gahan da, ma-lat wadan emin hu mahapul dan pambe-atan da. <sup>14</sup> Ehelim ida kaegiegin kamengullug ma-lat ya kayyaggud ni kenayun hu pehpehding da, henin pemaddangan daddan kamanheppul ni baddang, ma-lat wada silbin biyag da.

<sup>15</sup> Emin ida eya edum kudya ey kanday daka kanenemneman hi-gada. Ehel muddan emin ni kamengullug ni neminshed ni hi-gami e nak ida dama kanenemnema.

Ya dasal ku ey meweddand hi-gayun emin hu binabbal Apu Dios.

## Ya Tudek Paul nan Pilimon

<sup>1</sup> Huyyan tudek ey nalpun Timothy e agi tayu et hi-gak e hi Paul e neikelabut tep ya nakka pengu-unnudin Jesus Christo. Tudek mi huyyan hi-gam e Pilimon, e nakappinshed mi niya edum min kamengituttuddun meippanggep nan Jesus, <sup>2</sup> hi Appia e agi tayun biin kamengullug et hi Arkippus e edum tayun sindalun Jesus Christo, niyadda edum tayun kamengullug ni kameemmuemmung ni kamenaydayaw nan Apu Dios ditan baley yu.

<sup>3</sup> Pinhed kun meweddand hi-gayu hu binabbal niya linggep ni kamelpun Apu Dios e Ametayu et hi Jesus Christo e Apu tayu.

*Ya impeminhed niya kapengullug Pilimon*

<sup>4</sup> Nakka mansalamat ni ingganah nan Apu Dios hedind daka kapan-iddasali, <sup>5</sup> tep diddingngel ku hu meippanggep ni muka pengullug nan Jesus e Apu tayu niya impeminhed muddan emin ni kamengullug. <sup>6</sup> Ya nakka ibbagad dasal ku ey ya pambalanan ni tayu kapengullug nan Christo ey ya pengewwatan tayun emin ida etan ni panyaggudan tayun kamengullug. <sup>7</sup> Impeamleng muwak ni peteg niya impetuled muwak tep ya nehhammad ni impeminhed mu e agik, niya impeamleng mudda edum tayun tuun Apu Dios.

*Ya nengitugunan Paul nan Pilimon ni pengebbulutan tun Onesimus*

<sup>8</sup> Et humman hu, eggak um-e-gen ni mengibbeggan hi-gam ni nunya. Gullat et dammutu pay ni mandalen daka eyad pinhed kun pehding mu, tep han-agi ita law gapuh ni nekidagyuman tan Christo, tep humman hu kayyaggud ni pehding mu. <sup>9</sup> Nem gapuh ni neminshed kun hi-gam ey eggak pehding humman, nem pambinaggak ni ebuh ni hi-gam. Hakey pay ey nea-amma-ak law niya iyyadya-ak di kallabbuttan tep ya nakka pengu-unnudin Jesus Christo. <sup>10</sup> Ya ibbagak ni hi-gam ey peang-ang mu anhan hu binabbal mun Onesimus e himbut mun bimmesik. Heni u-unggak, tep hi-gak nenuttuddun hi-gatud kallabbuttan et han mangulug nan Jesus. <sup>11</sup> Makulug na-mun wada lawah ni impahding tu lan hi-gam ni nunman, nem yan nunya law ey dammutun umbaddang ni hi-gata. <sup>12</sup> Et humman hu, pambangngad ku law di kad-an mu, anin ni neligat ni hi-gak, tep nemahhig hu impeminhed kun hi-gatu.

<sup>13</sup> Pinhed ku et ni mekihha-ad ni hi-gak et baddangan tuwak ma-lat henid ka dama wadad yan kaumbaddang ni hi-gak, tep iyyadya-ak di kallabbuttan gapuh ni nakka pengituttudduin meippanggep ni impahding Jesus Christo ni panyaggudan ni tuu. <sup>14</sup> Nem ngenamung ka, tep eggak pinhed ni daka pilliten ni umbaddang ni hi-gak hedind eleg mu i-abulut.

<sup>15</sup> Hini-yan daka na-mun Onesimus ni nekemtang ma-lat hedind mambangngad ni hi-gam, ey manha-ad law ni ingganah. <sup>16</sup> Ya law nunya, ey beken ni himbut ni ebuh pengibbillang mun hi-gatu, nem agi ta law ni nakappinshed ta, nema-man hi-gak. Nem nema-man e-etteng peminhed mun hi-gatu, tep beken ni agim ni ebuh, nem baddangan tuwan pambangngadan tud baley mu.

<sup>17</sup> Et humman hu, hedind muwak kaibbilang ni agim ni kamengullug, ey abulut mu hi Onesimus henind pengebbulutan muwak hedind um-ali-ak ditan baley mu. <sup>18</sup> Ey hedind wada impahding tun hi-gam ni lawah, winu wada utang tun hi-gam, man beyyadan ku. <sup>19</sup> Adyah e pilmaan ku eya intudek kun kangkuy, hi-gak e hi Paul hu memeyyad hedind wada utang tun hi-gam. Inamtak e pehding mu hu neipek, tep kaw eleg mu nemnema e henid wada utang mun hi-gak, tep hi-gak hu nenuttuddun hi-gam et wada law hu biyag mun endid pappeg tu? <sup>20</sup> Et human hu, ibbagak anhan ni hi-gam e agik ni kamengullug nan Jesus e ipahding mu huyyan imbagak ma-lat pelinggep mu nemnem ku tep han-agi ita gapuh ni neiegian tan Jesus.

<sup>21</sup> Anin ni nakka pan-ittudek huyya, et nakka medinnel ni ippahding mu ngu dedan huyya niya inamtak e nehuluk anhan law hu pehding mu nem ya nakka ibbaga. <sup>22</sup> Ya hakey pay ni ibbagak ey idaddan mu hu panha-adan ku tep nakka namnamaha e ebbuluten Apu Dios hu dasal yun meippanggep ni hi-gak, et pebukyat tuwak et mambangngaddak di kad-an yu.

*Ya nanggillig ni intudek Paul*

<sup>23</sup> Wadadya hi Epaphras e kadwak ni neikelabut tep ya tuka pengu-unnudin Jesus Christo, henind hi-gak, et kantuy dakeyu kanenemnehan hi-gatu. <sup>24</sup> Wadadda damadya kamekinggunnun hi-gak di ngunun Apu Dios e hi Mark, hi Alistalkus, hi Demas et hi Luke e kanday dakeyu kunu dama kanenemnehan hi-gada.

<sup>25</sup> Ya dasal ku ey meweddan hi-gayun emin hu binabbal Apu Dios.

## Huyya Tudek ni Intudek Daddan Hebrew

<sup>1</sup> Ya lan nunman, ey nambakbaklang ni elaw hu nengipeenamtaan Apu Dios ni ehel tuddan aammed tayun nebayag. Yadda prophets hu nengi-i-hel ni ehel tun hi-gada. <sup>2</sup> Nem yan nunya law, ey ya U-ungnga tu nengipeenamtan ehel tun hi-gatsu. Hi Jesus hu nengipekapyaan Apu Dios ni emin niya hi-gatu pinutuk tun memeltan ni emin. <sup>3</sup> Hi-gatu keang-angan ni kasina-gey Apu Dios e hi Ametu, tep emin hu wadan Apu Dios ey wada daman U-ungnga tu. Hi-gatu mewan hu kamengippaptek ni emin ni lintun Apu Dios niya wada kabaelan tun mengippahding ni nunman tep ya kabaelan ni ehel tu. Yan neneklaan tun liwat tayu, ey immanemut di kabunyan et yumudung di winannan Apu Dios et yadman nengipeta-geyan Apu Dios ni saad tun meihhayned ni hi-gatun man-ap-apu.

*Neta-ta-gey hi Jesus nem yadda anghel*

<sup>4</sup> Et humman hu, neamta e hi Jesus Christo hu neta-ta-gey nem yadda anghel. Yan nanghelan Apu Dios ni U-ungnga tu hi Jesus ey humman keang-angan tun neta-ta-gey hi Jesus nem yadda anghel. <sup>5</sup> Tep eleg ehelen Apu Dios ni hipan anghel hu inhel tun Jesus e kantuy

“U-ungnga dakan hi-gak. E-helen kun nunya e hi-gak hi Amam.” \*

Ey beken ni yadda anghel hu nanghelan tun kantuy

“Hi-gak ali hi Ametu ey hi-gatulli hu U-unggak.”

Nem ya nanghelan tun nunya ey hi Jesus Christo ni ebuh. <sup>6</sup> Et ya pay inhel tun meippanggep ni U-ungnga tu e pengulwan tayun kamengullug, eman ni ngannganih ni pengippeang-angan tuddan tuud puyek ni U-ungnga tu ey kantuy

“Emin ida anghel ku ey mahapul ni hi-gatu daydayawen da.” † <sup>7</sup> Ya inhel Apu Dios ni meippanggep idan anghel ey kantuy “Yadda anghel ey bega-en kuddan ebuh. Ida kamengu-unnud ni pinhed ku niya pambalin kuddan dibdib winu kamantettebbel ni apuy.” ‡

<sup>8</sup> Nem ya inhel Apu Dios ni meippanggep ni U-ungnga tu ey kantuy

“Apu Dios, mannananeng ni ingganah hu nan-ap-apuan mu niya meandeng hu muka pan-ap-apu. <sup>9</sup> Ya kayyaggud ni elaw hu nakappinhed mu, nem anggebe-hel mu hu lawah ni elaw. Et humman hu, hi-gak e Dios ni muka u-unnuda ey pinutuk dakan medaydayaw nem yadda edum mu ma-lat man-am-amleng kan peteg.” §

<sup>10</sup> Ya hakey mewan ni inhel Apu Dios ni U-ungnga tu ey kantuy

“Yan eman ni laputu ey lintum e Apu hu puyek, ya kabunyan niyadda hipan wadadman.

<sup>11</sup> Nem hedin hi-gam, man wada ka ngu dedan ni ingganah. Nem yadda humman ni lintum ey meendiddallin emin ni hakey ni aggew. Heniddan balwasin kamambalin ni layyut. <sup>12</sup> E-kalen muddalli humman ni lintum, et hululan muddan baluh. Nem hedin hi-gam, man eleg kan hekey melullumman niya endi pappeg ni biyag mu.” \*

<sup>13</sup> Endin hekey hu anghel ni tu nanghelan eyan kantuy

“Yudung kad winannan ku † ingganah apputen kudda buhul mu et hi-gam hu pan-ap-apu da.”

Nem ya nanghelan tun nunya ey ebuh hi Jesus Christo e U-ungnga tu.

<sup>14</sup> Tep yadda anghel ey ispirituh ida e lintuddan Apu Dios ni bega-en tun ebuh. Yadda etan kaphellaknibin Apu Dios di liwat da ma-lat mekihha-ad idan hi-gatu ey humman ida tuka pemeggain anghel ni memaddang ni hi-gada.

## 2

*Ya elaw ni kehellakniban tayun nangkeliwatan*

<sup>1</sup> Hi Jesus e Apu tayu hu keta-ta-geyyan. Et humman hu, mahapul ni ihhammad tayun mengu-unnud idan dinggel tayun tugun tun neitenuttuddu, tep entanni ey liwwanen tayu. <sup>2</sup> Yadda tugun Apu Dios ni impeamtaddan anghel tu nan hi Moses ey neipeang-angan e mahapul ni u-unnuden. Tep emin hu tuun eleg mengu-unnud idan nunman ni tugun ey mekastigudda. <sup>3</sup> Et humman hu, hedin eleg tayu hengnguda humman ni kamengippetngan kehellakniban tayu, ey nema-ma hu kastigu tayu nem hi-gada.

\* 1:5 1:5 Ang-ang yu hu Psalms 2:7, Acts 13:33 niya Hebrews 5:5. † 1:6 1:6 Deut. 32:43 ‡ 1:7 1:7 Psalm 104:4

§ 1:9 1:9 [8-9] Psalm 45:6-7 \* 1:12 1:12 [10-12] Psalm 102:25-27 † 1:13 1:13 Ya keibbellinan tu ey wada lebbeng tun man-ap-apud emin.

Hi Jesus Christo e Apu tayu hu nemangulun nengipeamtan meippanggep ni nunman, et yadda etan nanggel ni hi-gatu hu nengipeamtan hi-gatsu e makulug humman. <sup>4</sup> Anin hi Apu Dios et impeang-ang tu e makulug humman ni nengipenahdingan tuddan nambakbaklang ni miracles, niya nengika-pengan tun nambakbaklang ni kabaelan idan kamengullug. Humman ni nambakbaklang ni kabaelan ey nalpud Ispirituh tu et idwat Apu Dios idan tuun pinhed tun pengidwatan.

*Ya etan menellaknib ni hi-gatsun kamengullug*

<sup>5</sup> Ey hakey pay ey yallin penullulan Apu Dios idan emin ni wadan nunya ma-lat wadaen tu hu baluh ni puyek e humman tayu kae-ehhelan nunya, ey beken idallin anghel hu man-ap-apu, nem hi-gatsun tuu. <sup>6</sup> Tep yad ehel Apu Dios ni neitudek ey kantuy

“Apu Dios, kaw hipa ngu anhan ida tuu et mudda kanemnemnema niya mudda kaipapaptek? <sup>7</sup> Lintum idan nebababah ni ekket nem yadda anghel, nem nekemtang ni ebuh. Ey impedaydayaw mudda, <sup>8</sup> niya pinutuk muddan pan-ap-apun emin.” \*

Yan eman ni nemutukan Apu Dios idan tuun man-ap-apu, ey endi hu eleg maila-kam di pan-ap-apuan da. Humman ni neitudek ni pan-ap-apuan ni tuun emin ni wadad puyek ey eleg ni pay maipahding. <sup>9</sup> Nem inamta tayu e um-amnu huuya tep ya neipahding nan Jesus. Tep indawat Apu Dios ni hi-gatu hu kasina-gey tu niya dayaw tun man-ap-apu tep ya nanlelehanan tun neteyyan tu. Neipebah hi Jesus nem yadda anghel ni nekemtang eman ni kaweda tud puyek, ma-lat wada inna-nu tun mengikkettey ni panyaggudan tayun emin gapuh ni binabbal niya hemek Apu Dios.

<sup>10</sup> Hi Apu Dios e nanletun emin eyan wadan nunya ma-lat keidaydayawan tu ey kayyaggud hu impahding tu e in-abulut tu nanlelehanan Jesus et mehelakniban itu. Tep implanuh tu dedan humman ma-lat endi pangkullangan Jesus ni menellaknib ni hi-gatsu, et emin tuun impambalin Apu Dios ni u-ungnga tu ey meilla-kam idad kasina-gey nan Jesus di kabunyan.

<sup>11</sup> Et yan nunya law ey hi-gatsun neliwtan, et hi Jesus e kamemessinsah ni liwat tayu ey hakey hu Ame tayu e hi Apu Dios. Et humman hu, eleg umbaing hi Jesus ni menghel ni agi daitsu. <sup>12</sup> Neiingingeh huuya etan di neitudek ni ehel Apu Dios e kan Jesus ni hi-gatuy

“Peamtak idan aaggik hu meippanggep ni hi-gam e Apu Dios. Ey daydayawen dakad kakeemmuemmungiddan tutu-um.” †

<sup>13</sup> Kantu mewan ey “Hi Apu Dios hu iddinel ku.” Ey kantu mewan ey “Iyyadya-ak di kad-an idan u-ungngan Apu Dios ni indinel tun hi-gak.” ‡

<sup>14</sup> Yadda u-ungngan Apu Dios ey tuuddan ebuh, e ida kamettey. Et humman hu, nambalin hi Jesus ni tuu e henin hi-gada. Netey et metagwan e humman nengapputan tun Satanas e wada kabaelan tun memettey ni hi-gatsun tuu. <sup>15</sup> Netey hi Jesus di krus ma-lat meendi takut tayun katey, e humman heni kamenettenged ni hi-gatsun kewa-wa-wa. <sup>16</sup> Huuya keang-angan tu e hi-gatsun kameibbillang ni helag Abraham hu tuka baddangi e beken ni yadda anghel. <sup>17</sup> Et humman hu, mahapul ni hiniktaman Jesus ni emin hu tayu kapanligligasin agitun tuu, ma-lat wada inna-nu tun mambalin ni mahmek niya kameiddinnel ni Padin Eta-gey ni mengi-ehngeng ni hi-gatsun hinanggan Apu Dios. Inebulut tun manligligat ma-lat teklaen tu liwat tayu et mepesinsahan itu. <sup>18</sup> Em, hineniktaman tun emin hu tayu kapanhelheltapi tep nanhelheltapi niya pinatnaan Satanas, et ya law nunya ey daitsu kabaddangi, hedin patnaan daitsun Satanas ni helen.

### 3

*Eta-ta-gey hi Jesus nem hi Moses*

<sup>1</sup> Et humman hu, hi-gayun kaegiengin pinilin Apu Dios ni pantu-u tun mekihha-ad ni hi-gatud kabunyan, ey ihakkey yu nemnem yun Jesus e pinutuk Apu Dios ni mengi-ehngeng ni hi-gatu niya hi-gatu dama hu Eta-gey ni Padi tayun kamengullug. <sup>2</sup> Inenu-unnud tu hu pinhed Apu Dios e nemutuk ni hi-gatud ngunu tu, henin nengu-unnudan Moses nan hi Apu Dios ni nengipaptekan tuddan helag Israel e tutu-un Apu Dios ni imbilang tun pamilyah tu. <sup>3</sup> Nem hi Jesus hu lebbengtun meiddeyyaw ni peteg nem hi Moses, henin nengapyan baley e e-etteng ni peteg hu ketbalan tu nem ya etan baley ni kinapya tu. <sup>4</sup> Makulug ni emin hu baley ey wada hu nengapyaddan nunman, nem hi Apu Dios hu nengapyan emin. <sup>5</sup> Hi Moses e bega-en ni ebuh e kamekangngu-unnud nan hi Apu Dios

\* 2:8 2:8 [6-8] Psalm 8:4-6 † 2:12 2:12 Psalm 22:22 ‡ 2:13 2:13 Isaiah 8:18

ey impapaptek tudda hu imbilang Apu Dios ni tutu-u tu niya intuttuddu tun hi-gada hu peamtallin Apu Dios ni edum ni aggew. <sup>6</sup> Nem hedin hi Jesus Christo ey beken ni bega-en Apu Dios, tep U-ungnga tu. Nem inenu-unnud tu hu indawat Apu Dios ni ngunu tun mengippaptek idan kameibbilang ni tuu tu. Ey hi-gatsun kamengullug hu kameibbilang ni tuu tu hedin itultuluy tayun mengihammad ni dinel tayun Jesus Christo niya eleg tayu iwwalak hu tayu kanamnamaha eyan ketaggu tayu.

*Ya pan-iyyatuan idan tuun Apu Dios*

<sup>7</sup> Et humman hu, u-unnud yu etan tugun ni impatudek ni Ispirituh Apu Dios e kantuy “Hedin dedngelen yu ehel Apu Dios ni nunya, <sup>8</sup> ey entan tu ngehay hu e-helen tu. Entan tu u-ukkul hu impahding ida la eman ni aammed yu e kinehing da hi Apu Dios eman ni nematnaan dan hi-gatun nanha-adan dad desert. \* <sup>9</sup> Inenang-ang da hu impahpahding tun na-pat ni toon, nem pinenatnaan da binabbal tud lawah ni impahpahding da. <sup>10</sup> Et mukun imbunget tudda humman ni tuun nunman et kantuy ‘Annakkayang ida huyyan tuu! Manghay idan peteg e eleg dan hekey pinhed ni mengu-unnud ni tugun ku.’” <sup>11</sup> Et humman hu, bimmungettak et isapatah ku e kangkuy “Hedin yadda humman ni tuu, ey eleg mabalin ni ida meilla-kam di nakka pan-iyyatui.”

<sup>12</sup> Et humman hu, hi-gayun kaegiegi, helipat-i yu ma-lat eleg yu u-ukkulen ida humman ni mangkanghay ni tutu-un eleg mangulug, tep entanni ey iwwalleng yu dama hi Apu Dios e wadan ingganah. <sup>13</sup> Nemnem yu e anin ni yan nunya et nanengtun kan Apu Dios ey “U-unnud yuwak.” Et mukun mahapul ni man-in-e-hel kayun kewa-wa-wa ma-lat itultuluy yun mengu-unnud ni hi-gatu et endi hakey ni hi-gayun mehe-ul ni mangngenghay. <sup>14</sup> Tep hedin eleg tayu iwwalak hu dinel tayun Jesus Christo eman ni laputan nengulugan tayu, ey meilla-kam itsud panyaggudan ni meidwat ni hi-gatu. <sup>15</sup> Ey entan nisi tu liwwan hu impatudek Apu Dios e kantuy

“Hedin dedngelen yu hu ehel Apu Dios ni nunyan aggew, ey entan tu ngehay hu e-helen tu et eleg yu iu-ukkul idan aammed tayun nunman e nginhay da tugun tu.” †

<sup>16</sup> Hipadda humman ni tutu-un nangngel ni inhel Apu Dios, nem kinehing da? Inamta tayu e huyyadda helag Israel ni inhewang tud namhimbunan dad Egypt et ipenguluddan Moses ni neni-yan ni nunman ni bebley. <sup>17</sup> Ey hipadda hu nengipebubunget nan Apu Dios ni na-pat ni toon? Humman ida hu helag Israel, tep nanliwat ida et kastiguen idan Apu Dios et mangkatey idad desert. ‡ <sup>18</sup> Ey hipadda etan tuun insapatah Apu Dios ni eleg manla-kam ni panyaggudan ni pan-iyyatuan dan impakulug tu? Humman ida etan helag Israel e nginhay da hu ehel Apu Dios. <sup>19</sup> Et humman hu, inewatan tayu law e eleg da la-kamen hu panyaggudan da, tep eleg ida mangulug.

## 4

<sup>1</sup> Humman ni impakulug Apu Dios ni panyaggudan ni pan-iyyatuan ni indaddan tu ey dammutu daman la-kamen tayu. Et humman hu, helipat-i tayu ma-lat endi hakey ni hi-gatsun eleg manla-kam nunman. <sup>2</sup> Tep huyyan panyaggudan ni dingngel tayu ey dingngel ida daman aammed tayun nunman, nem endi silbitun nangngelan da, tep eleg da kulugen. <sup>3</sup> Tep hi-gatsuddan ebuh ni kamengullug hu dammutun meki-iyyatud pan-iyyatuan ni indaddan Apu Dios. Nem hedin yadda etan eleg mengullug, ey hi-gada nanghelan Apu Dios ni kantuy “Bimmungettak et isapatah ku e hedin hi-gada, man eleg ida meilla-kam di nakka pan-iyyatui.”

Ey humman ni pan-iyyatuan ey neidaddan ni hi-gatsun tuu eman ni nengibbunan Apu Dios ni nanletuan tun puyek niyaddan emin eya wadan nunya. <sup>4</sup> Hedin ya meippanggep ni neikepitan aggew, man wada neitudek e kantuy “Nan-iyyatui hi Apu Dios ni kapitan aggew, tep ginibbuh tun emin ngunu tu.” \* <sup>5</sup> Ma-nut neidaddan ni nebayag huyyan pan-iyyatuan, nem neitudek e kantuy “Hedin yadda humman ni tuu, ey eleg mabalin ni ida meilla-kam di nakka pan-iyyatui.” † <sup>6</sup> Tep ma-nut hi-gada hu nemangulun nengipeamtaan Apu Dios ni meippanggep nunyan pan-iyyatuan ni panyaggudan da, nem eleg ida maila-kam tep eleg da kulugen. Nem anin ni hanniman et dammutun meilla-kam itsun kamengullug nan Apu Dios. <sup>7</sup> Makulug huyya, tep nelabah dakek ni toon ni eleg panla-kaman idan aammed tayun indaddan Apu Dios ni pan-iyyatuan da, ey impatudek tun David e kantuy

\* 3:8 3:8 [7-8] Psalm 95:8-9 † 3:15 3:15 Psalm 95:7b-8 ‡ 3:17 3:17 Numbers 14:29 \* 4:4 4:4 Genesis 2:2

† 4:5 4:5 Psalm 95:11.

“Hedin dedngelen yu hu ehel Apu Dios ni nunyan aggew, man entan tu ngehay hu e-helen tu.” ‡

<sup>8</sup> Huyyan pan-iyyatuan ey beken ni yad Kanaan e nengipengulangan Joshua idan nunman ni aammed tayu. Tep gullat ni yadman, ey eleg et ehelen Apu Dios hu hakey mewan ni aggew ni dammutun peki-iyyatuan ni hi-gatu. <sup>9</sup> Et humman hu, hi-gatsun tuun Apu Dios ey nanengtun dammutun la-kamen tayulli humman ni kapan-iyyatuin kamelpun hi-gatu. <sup>10</sup> Tep emin hu tuun meilla-kam di nan-iyyatuan Apu Dios ey meweddan hi-gada hu makulug ni iyyatu, henin nan-iyyatuan tu eman ni nengibbuhan tun ngunu tu. <sup>11</sup> Et humman hu, ipahding tayu kabaelan tayu et abuluten daitsun Apu Dios ni meki-iyyatun hi-gatu ma-lat endi mengippekekwah ni hi-gatsu etan ni iyyatun henin nengipekawahan idan helag Israel, tep ya eleg da pangulugan.

<sup>12</sup> Tep et-eteng ni peteg hu kabaelan ni ehel Apu Dios. Metattaddem nem ya ispadah ni makattadem di nambina-hil. Tep ya ehel tu ey tuka buddihi hu neidalleem ni wadad nemnem tayu niya pinhed tayun pehding ma-lat meamta hu ingkatuu tayu. <sup>13</sup> Endi hakey ni naltun tu ittalwan hi Apu Dios. Hi-gatu hu menuwet ni hi-gatsu, tep tuka ang-angan emin hu tayu kapehpehding niya tayu kanemnemnema.

*Ya etan Eta-gey ni Padi tayun kamengi-ehngeng ni hi-gatsud hinanggan Apu Dios*

<sup>14</sup> Tettengedi tayu hu tayu kapengullug nan Jesus e U-ungngan Apu Dios. Hi-gatu hu Eta-gey ni Padi tayun nambangngad di kabunyan ni kamengi-ehngeng ni hi-gatsud hinanggan Apu Dios. <sup>15</sup> Humman ni Eta-gey ni Padi tayu ey et-eteng hu hemek tun hi-gatsu, tep naka-amta tu hu kakulang ni tayu kapengullug niya kalinekah ni tayu kapanliwwasi, tep pinatnaan tun emin hu elaw ni kakehe-ulin tuu, nem hedin hi-gatu, man eleg manliwat. <sup>16</sup> Et humman hu, kadinel itsun mandasal nan hi Apu Dios di kabunyan e kabbabbal ni peteg. Tep nanna-ud ni hehmeken daitsu niya baddangan daitsud tsimpun ni kahapulan tayu hu baddang.

## 5

<sup>1</sup> Ya eta-gey ni padi ey kamepillid edum tun tuu ma-lat hi-gatu mengi-ehngeng ni hi-gadan Apu Dios. Ey hi-gatu hu mengidwat nan Apu Dios ni kaiddawat idan tuu niyadda daka i-appit ma-lat mepesinsahan hu liwat da. <sup>2</sup> Huyyan padi ey han-anus tudda etan tuun eleg da amta pehding da, niyadda etan wada daka keihlai, tep anin hi-gatu et dammutun metuttullun niya dammutun meihla tep tuu dama. <sup>3</sup> Et mukun hedin i-appit tu hu kameidwat ni daka i-appit nan Apu Dios, ey mahapul ni hi-gatu memengngulun um-idwat ni i-appit tu et han law mabalin ni i-appitan tudda tuu tep neliwtan dama. <sup>4</sup> Endi tuun nealay pinutuk tu annel tun mabalin ni eta-gey ni padin mengi-ehngeng idan tuud hinanggan Apu Dios, tep hi Apu Dios hu memuttuk ni hi-gatu henin nemutukan tun Aaron e nemangulun eta-gey ni padiddan aammed tayun nunman.

<sup>5</sup> Hanniman daman Jesus Christo e beken ni nealay kantuy hi-gatu hu Eta-gey ni Padi, tep hi Apu Dios hu nemutuk ni hi-gatu. Tep kan Apu Dios ni hi-gatuy

“U-ungnga dakan hi-gak. E-helen kun nunya e hi-gak hi Amam.” \*

<sup>6</sup> Kan mewan Apu Dios ni hi-gatu ey

“Pinutuk dakan mampeddin ingganah henin kinapadin Melchisedek.”

<sup>7</sup> Yan kawedan Jesus di puyek, ey nemahhig ni in-anteng tu dasadasal nan Apu Dios. Inlet tu dasal tu niya limmewalewan tuka pandasali, tep amta tun wada kabaelan Apu Dios ni menellaknib ni hi-gatud ketteyyan tu. Inebulut Apu Dios hu dasal tu tep impebahah tu annel tun nengu-unnudan tun Apu Dios. <sup>8</sup> Ma-nut U-ungngan Apu Dios hi Jesus, nem mahapul ni nanlelehhahan tu ligat tun pengippeang-angan tun tuka pengu-unnudin Apu Dios. <sup>9</sup> Naka-u-unnud tu hi Apu Dios, et humman hu nambalin ni hi-gatu hu menellaknib ni hi-gatsun kamengu-unnud ni hi-gatu, ma-lat meidwatan itsun biyag ni endi pappeg tu. <sup>10</sup> Tep hi-gatu hu pinutuk Apu Dios ni Eta-gey ni Padin henin kinapadi lan Melchisedek.

*Ya pemaptek tayun tayu kapengullug nan Jesus*

<sup>11</sup> Wada et pay edum ni pinhed kun ituttuddun hi-gayun meippanggep idan nunya, nem neligat ni ituttuddun hi-gayudda huyya, tep kulang kayu nin mengewwat. <sup>12</sup> Gullat et, tep nebayag kayu law ni ngulug, ey dammutu law ni mantuttuddu kayu ehel Apu Dios. Nem tam ingganah nunya ey mahapul ni ippenidwan ituttuddun hi-gayudda etan nelakah ni meewwatan ni inedaedal yu. Heni kayu gelang ni eleg tu ni han-ekan hu kakennan nehiken, tep nanengtun ya gatas yuka innuma. <sup>13</sup> Ya henin

‡ 4:7 4:7 Psalm 95:7b-8

\* 5:5 5:5 Psalm 2:7, Acts 13:33 niya Hebrews 1:5.



nunyan tuun ya gatas ni ebuh tuka ekmuna ey neikamkampun ebuh hu inewatan tun kameituttuddun elaw Apu Dios. Kulang nin peteg hu tuka pengimmatun ni neiptek winu neihalla. <sup>14</sup> Nem yadda etan kamengewwat niya kamengu-unnud ni nehammad ni kameituttuddun meippanggep nan Apu Dios ey neihammad hu daka pengullug, et amta da hu nambaklangan ni lawah et ya kayyaggud, niya hi-gada neieligan ni dammutun mengngan ni kakennan nehiken.

## 6

<sup>1</sup> Et humman hu, eleg tayu ngu law tuppuga etan inedal tayun laputun nengulugan tayun Christo, nem mahapul ni eddalen tayu dama niya ewwatan tayu hu edum ni kameituttuddun mengihhammad ni tayu kapengullug. Tep eleg mahapul ni tayu pennidwaen ni eddalen ida hu inedal tayun nunman ni pengiwwallengen tayun lawah ni elaw tayu, niya meippanggep ni tayu kapengullug ni hi-gatu, <sup>2</sup> ya keibbellinan ni benyag, ya kapengitta-pewin tepayad ulun kamengullug ni pengiddasalan ni panyaggudan da, ya ketegguan idallin nangketey niya penuwetan Apu Dios ni tuu et mekastiguddan ingganah hu neliwan, tep inamta tayudda law humman. <sup>3</sup> Et humman hu, ya kayyaggud ey yadda law kameituttuddun mengippehammad ni tayu kapengullug hu eddaeddalen tayu. Huyya ippahding tayu hedin i-abulut Apu Dios.

<sup>4</sup> Helipat-i yu, tep ya tuun nantuttuyyun liwat tu et mangulug nan Jesus, nem iggeb-at tun dedkugen hu tuka pengullug, ey eleg mabalin ni an mantuttuyyu mewan. Tep hedin nabnangan nemnem tu niya dinwat tu etan panyaggudan ni nalpad kabunyan, newadan hi-gatu hu Ispirituh Apu Dios ni mengadkadwan hi-gatu, <sup>5</sup> inedal tu kakinayyaggud ni ehel Apu Dios, niya inamta tu kabaelan Jesus Christo ni pan-ap-apuan tullu, <sup>6</sup> nem iggeb-at tun dedkugen ni emin huyya, ey eleg law mabalin ni mantuttuyyu niya eleg law mabalin ni mambanggad ni mengullug mewan. Tep huyyan pehding tu ey heni tu pidwaen ni ippatak di krus hi Jesus e U-ungngan Apu Dios \* et mebabba-ingan mewan di kedakan ni tuu.

<sup>7</sup> Ya tuun hanniman ey mekastigu, nem yadda etan tuun pannananeng dan u-unnuden hi Jesus ey meidwatan idan panyaggudan da. Tep ya kei-elligan tu huyya ey ya etan puyek ni kameuddanin kenayan et kayyaggud kaillameh ni kameitnem diman, ey ippatek Apu Dios humman ni puyek. <sup>8</sup> Nem hedin hebit ni ebuh hu kaumtemel diman ni puyek, man endi silbitu et lelgaben alin Apu Dios ni apuy.

<sup>9</sup> Nem anin ni hanniman hu inhel mi, et kami kamedinnel e beken ni hanniman hu elaw yu, tep inamta mi e kayyaggud hu yuka pehpehding tep nehelakniban kayu. <sup>10</sup> Tep limpiyuh hu kapehding Apu Dios et amta mi e eleg tullu liliwwana hu impahpahding yun kayyaggud ni ya nengipeang-angan yun impeminhed yun hi-gatun nemenaddangan yuddan edum tayun kamengullug ni laputu ingganah nunya. <sup>11</sup> Ya pinhed min peteg ni meippahding ey pannananeng yun emin ni mengihhammad ni yuka pengullug ingganah ni amnuan ni yuka namnama. <sup>12</sup> Huyya pinhed min pehding yu, tep eleg mi pinhed ni kayu um-inglay ni mengiddinnel nan Apu Dios, nem u-ukkulen yudda etan nenawat ni impakulug tu, tep eleg da isiked ni menehhegged ni amnuan tu humman ni impakulug tun panyaggudan da.

### *Ya um-amnun impakulug Apu Dios*

<sup>13</sup> Hi Abraham hu pengiu-unnudan tayu eyan nakka pan-e-hela. Tep yan eman ni wada impakulug Apu Dios ni hi-gatu, ey insapatah tun peamnu tu humman ni inhel tu. Ey gapu tep endi edum ni eta-ta-gey nem hi-gatu, ey neala et isapatah tud ngadan tu <sup>14</sup> et kantun Abraham ey "E-helen kun hi-gam e iddawtan dakan dakel ni panyaggudan mu niya iddawtan dakallin dakel ni peteg ni helag mu." <sup>15</sup> Et an-anusan Abraham ni hinehhegged humman ni inhel Apu Dios ni hi-gatu ingganah immamnu. <sup>16</sup> Hedin wada mansapatah, ey tuka issapatah di eta-ta-gey nem hi-gatu. Ey hedin nantebbalan idan nunman ni neisapatah, humman kesikkedan ni daka panhallai. <sup>17</sup> Hanniman daman Apu Dios e nansapatah e peamnu tu etan impakulug tun pehding tu ma-lat pengamtaan idan menewwat e eleg mehulluli humman ni ninemnem tun pehding tu. <sup>18</sup> Eleg man-ittek hi Apu Dios, et humman hu eleg mabalin ni tu kekyaten hu insapatah tu. Et mukun hi-gatsuddan hinelakniban tu ey et-eteng namnama tayun menehhegged ni amnuan ni inhel tu. <sup>19-20</sup> Huyyan namnama tayu hu mengippekedhel ni nemnem tayu et eleg tayu iwalleng hu tayu kapengullug ni hi-gatu. Tep inamta tayu e yallin edum ni aggew ey

\* 6:6 6:6 Ya pinhed tun e-helen hu "heni tu pidwaen ni ippatak di krus hi Jesus e U-ungngan Apu Dios," ey ya tuun tuka dedkuga hi Jesus ey eleg tu law ibbilang hu neteyyan tu niya tuka kulluga e endi kabaelan Jesus ni memaddang ni hi-gatu et mukun be-ingen tu mewan hi Jesus.

umlaw itsud kad-an tu. Humman ni pekihha-adan tayun Apu Dios di kabunyan ey endi dewadewa, tep immen law diman hi Jesus. Hi-gatu hu heni nengibeghul ni kultinah et humgep di kuwaltuh Apu Dios. Et humman hu, dammutu daman umhegep itsudman. Limmaw ni an mengi-ehngeng ni hi-gatsud hinanggan Apu Dios, tep nambalin ni Eta-gey ni Padin ingganah, henin kinapadin Melchisedek.

## 7

### *Ya kinapadin Melchisedek*

<sup>1</sup> Hedin hi Melchisedek, ey hi-gatu la hu patul di Salem ni nunman niya hi-gatu dama hu padin Apu Dios e Keta-ta-geyyan.

Ya kinapadin Melchisedek ey kameang-ang eyad nan-ungbalan dan Abraham. Tep yan eman ni hakey ni aggew, ey kameangkeibbanggad hi Abraham ni tu nekigubatan, e inapput tudda epat ni patul, ey an dinammun Melchisedek et idasalan tu ma-lat idwatan Apu Dios ni panyaggudan tu. <sup>2</sup> Et idwat daman Abraham nan Melchisedek hu kapulun emin ni piniliw tud tu nekigubatan. Ya keibbellinan ni ngadan ni Melchisedek ey limpiyuh ni patul. Da dama kaingngadnin patul ni kaum-idwat ni linggep, tep linggep hu keibbellinan ni bebley tud Salem. <sup>3</sup> Eleg meamta hu ama niya inan Melchisedek, niya hipan aammed tu. Anin ni ya neiunggaan tu et ya neteyyan tu, et eleg meamta, tep endi an neitudek ni meippanggep idan nunman. Ya kinapadin Melchisedek ey henin kinapadin U-unggan Apu Dios e padin ingganah e endi pappeg tu.

<sup>4</sup> Humman keang-angan tu hu kasina-gey Melchisedek, tep anin hi Abraham e kametbal ni nahlagan tayun Jews, et indawat tun Melchisedek hu kapulun emin ni piniliw tud tu nekigubatan. <sup>5</sup> Yan nunya ey yadda padin helag Levi hu kan ni Tugun ni wada lebbeng dan mengellan kapulun kinedangyan idan edum dan helag Israel, anin ni hakey hu nalpuan da e hi Abraham. <sup>6</sup> Nem hi Melchisedek ey beken ni helag Levi, nem dinwat tu hu kapulun kinedangyan Abraham. Et idasalan tu hi Abraham e hi-gatu hu nengipekulugan Apu Dios ni idawat tu niya pehding tu. <sup>7</sup> Ey inamta tayu e ya tuun kamengibeggan Apu Dios ni panyaggudan ni edum tun tuu ey eta-ta-gey nem ya etan menewwat nunman ni panyaggudan. <sup>8</sup> Hedin yadda etan padin helag Levi ni kamenewwat ni kapulun kalelmuan tuu, man ida kametey. Nem hedin hi Melchisedek, e nengalan kapulun limmun Abraham, man nanengtun mategu, tep endi an nee-ehhel di impatudek Apu Dios ni neteyyan tu. <sup>9</sup> Ma-nu tep makulug ni yadda helag Levi ey daka dewwata kapulun limmun tuu, nem heni dama immidwat hi Levi nan Melchisedek ni nengidwatan Abraham ni kapulun limmu tu. <sup>10</sup> Tep anin ni eleg ni maiunggan nunman hi Levi et heni wadad annel nan Abraham e apu tun eman ni nandammuan dan Melchisedek.

<sup>11</sup> Ma-nut ya nampadian idan helag Levi, ey neipuu di tugun Moses, nem kulang kinapadi da. Et mukun intu-dak Apu Dios hi Christo ni neihullul ni hi-gada. Tep hi Christo ey henin kinapadin Melchisedek hu kinapadi tu. <sup>12</sup> Nem yan nunya ey endi law bilang ni kinapadiddan helag Levi, et humman hu, endi dama law lebbeng ni tugun Moses ni memillin mampeddi. <sup>13-14</sup> Et humman hu, ma-nut endi an ine-ehhel Moses ni wada padin melpud helag Judah, niya eleg tudda idwatan ni lebbeng dan mengippahding ni ngunun padid altar, nem pinutuk Apu Dios hi Apu tayu e hi Jesus Christo e helag nan Judah ni mampeddi.

### *Ya kinapadin Jesus Christo*

<sup>15</sup> Et inamta tayu e na-kal law hu lebbeng dan mampeddi, tep wada law hu hin-appil ni padin henin Melchisedek. <sup>16</sup> Nambalin ni padi tep ya kabaelan ni biyag tun endi pappeg tu e beken ni neipuu di tugun ni kantuy ebuh ida helag Levi ni mampeddi. <sup>17</sup> Makulug huuya, tep impatudek nan Apu Dios hu meippanggep ni hi-gatu e kantuy "Pinutuk dakan mampeddin ingganah henin kinapadin Melchisedek." \*

<sup>18</sup> Et humman hu, eleg law meu-unnud hu Tugun Moses ni meippanggep ni pampedian, tep eleg umgegla niya neendi law silbitu. <sup>19</sup> Tep endi hakey ni tuun kayyaggud di hinanggan Apu Dios tep ya nengu-unnudan tun tugun Moses. Nem kayyaggud et yan nunya, ey wada law hu i-imman ni pengiddinnelan tayun pengebbulutan daitsun Apu Dios, et mukun wada law dinel tayun umhayukup ni menaydayaw niya mandasal ni hi-gatu.

<sup>20-21</sup> Insapatah Apu Dios e padillin ingganah hi Jesus Christo. Endi edum ni padin tu nanghelan nunya. Tep ebuh hi Jesus ni nanghelan tun kantuy

\* 7:17 7:17 Psalm 110:4

"Hi-gak e Ap-apu ey issapatah ku e padi kallin ingganah niya eleg ali mehulluli hu nemnem kun nunyan insapatah ku."

<sup>22</sup> Et humman hu, huuyan insapatah Apu Dios ey hi Jesus hu iddinel tayun amnuan nunyan kekkeddukdul ni nekitbalan Apu Dios ni kehellakniban tayu.

<sup>23</sup> Hedin yadda padin helag Levi, ey dakel ida nanhuluhulu tep hedin netey hakey, man nehululan. Et mukun beken idan padin ingganah. <sup>24</sup> Nem hedin hi Jesus, man eleg mepappeg hu nampadian tu tep mategun ingganah. <sup>25</sup> Et humman hu, hi Jesus hu wadan ingganah hu kabaelan tun menellaknib idan umhayukup nan Apu Dios ni kamengiddinnel nan Jesus ma-lat eleg ida mekastigu, nem wadalli biyag dan endi pappeg tu. Wada kabaelan Jesus ni mengippahding idan nunya, tep mategun ingganah ni mengiehneng ni hi-gadad hinanggan Apu Dios.

<sup>26</sup> Et humman hu, hi Jesus hu Eta-gey ni Padin umbaddang ni hi-gatsud kakulang tayu tep kayyaggud ni peteg, endin hekey hu liwat tu e endi tuka keihlai. Neappil law etan idad nangkeliwat, niya hi-gatu hu impeta-gey Apu Dios di emin et hi-gatu hu keta-tageyyan di kabunyan. <sup>27</sup> Hi Jesus ey beken ni henidda etan ni edum ni padin kamengiehneng idan tuun Apu Dios, tep eleg tu mahapul ni man-appit ni kewa-wa-wan Apu Dios henin daka pehding. Tep hedin hi-gada, man da ni kai-appisi hu liwat da ni han da in-appisi hu liwat ni edum dan tuu. Nem hedin hi Jesus, man pinhakkey nengiappitan tun annel tun nengiketeyan tun liwat ni tuu, et netekla law. Eleg mahapul ni tu ippenidwan man-appit, tep hiyya humman ni pinhakkey ni nan-appitan tu.

<sup>28</sup> Yadda etan eta-gey ni padin nepilin neipuun di tugun Moses ey tuuddan ebuh e ida dama kamanliwaw. Nem ya etan insapatah Apu Dios ni peelli tu, ey impa-beh nem ya hu tugun, et humman neihullul di tugun. Ey humman ni insapatah tu ey ya U-ungnga tu e Eta-gey ni Padin mampeddin ingganah. Tep hedin hi Jesus ey endin hekey tuka pangkullangi, tep kayyaggud ni peteg.

## 8

*Ya etan baluh ni nekitbalan Apu Dios ni panyaggudan tayu*

<sup>1</sup> Ya pinhed min paka-amtaen yu ey yahhuy. Hi Jesus e Eta-gey ni Padi tayun kamengiehneng ni hi-gatsud hinanggan Apu Dios ey yimmudung di winannan Apu Dios e Apapud kabunyan, et humman keang-angan tu hu kasina-gey ni saad tu. <sup>2</sup> Yadman di kadan Apu Dios hu kapampeddiin Jesus. Ey yadman hu kad-an ni makulug ni Tabernacle ni kinapyan Apu tayu, beken ni ya tuu hu nengapya.

<sup>3</sup> Hedin ya ngunun eta-gey ni padi ey hi-gatu hu kamengidwat ni kaiddawat idan tuun Apu Dios niya hi-gatu kamengi-appit ni daka i-appit tep ya liwat da. Et humman hu, mahapul daman wada iddawat Jesus nan Apu Dios, et ya annel tu hu indawat tu. <sup>4</sup> Gullat ni nanengtun wadad puyek hi Jesus, ey beken ni padi ngunu tu, tep dakel ida padid puyek ni kamengidwat ida etan ni kameidwat nan Apu Dios meippuun di Tugun Moses. <sup>5</sup> Ya Tabernacle ni kapangngunnuiddan padi ey nan-ingngeh ang-ang tu etan ni wadad kabunyan. Tep yan eman ni nengilapwan Moses ni nengapyaan tun nunman ni Tabernacle, ey kan Apu Dios ni hi-gatuy "Paka-ang-ang mu et paka-u-unnuden mu etan henin inang-ang mud duntug."

<sup>6</sup> Nem eta-gey ni peteg hu ngunun Jesus Christo nem yadda padid puyek. Tep ya ngunu tun kamengiehneng ni hi-gatsu ey neipuun di baluh niya kakkayyaggud ni nekitbalan Apu Dios idan tuu tu. Humman ni baluh ni nekitbalan tu ey kedukdul nem ya eman nemangulu, tep neipuun di kekkeddukdul ni impakulug tun pehding tu, ey hi Jesus hu menang-ang ma-lat peamnu tu.

<sup>7</sup> Gullat ni endi kulang tu eman nemangulun nekitbalan Apu Dios idan tuu tu, et eleg mahapul hu meikkadwa. <sup>8</sup> Nem inang-ang Apu Dios ey wada kapangkullangiddan tuu tu, et mukun kantun hi-gaday

"Hi-gak e Ap-apu ey yahhuy hu e-helen kun hi-gayun tuuk di Israel niyad Judah: Hakey alin aggew ey wadalli baluh ni pekitbalak ni hi-gayu.

<sup>9</sup> Nem beken ni henin nekitbalan kudda lan aammed da eman ni nengipenguluan kun hi-gadan neni-yanan dan Egypt tep eleg da pannananeng ni u-unnuden hu nekitbalan kun hi-gada, et humman nengiwallengan kun hi-gada.

<sup>10</sup> Heninnuy hu baluh ni pekitbalan kun hi-gada: Ihha-ad kullid puhu da niyad nemnem da hu tugun ku, et humman ali enu-unnuden da. Yallin nunman ni aggew ey hi-gak ali hu Dios da niya hi-gadalli hu tuuk, et ipaptek kudda.

<sup>11</sup> Eleg ali law mahapul ni da tuttudduan edum dan meippanggep ni hi-gak ma-lat amtaen da-ak. Tep emin ali tuu ey amta da-ak ngu dedan, anin ida etan ni tuun eleg meibbillang niyadda etan tuun kamedeyyaw.

<sup>12</sup> Ey anin ni nanliwat ida et hehmeken kuddalli et pesinsahan ku liwat da niya liwwanan kulli hu nambahulan da.” \*

<sup>13</sup> Ya nanghelan Apu Dios ni hi-gatsun wada baluh ni nekitbalan tun u-unnuden tayu ey humman keang-angan tun pinappeg tu etan nemangulun nekitbalan tu. Ey inamta tayu e ya etan nebayag ni endi silbitu law ey anggegannu meendilli.

## 9

*Ya elaw ni kapenaydayaw idan Jews nan Apu Dios ni laputu et ya elaw ni tayu kapenaydayaw nunya*

<sup>1</sup> Hedin ya eman nemangulun nekitbalan Apu Dios ey intugun tu pehding idan tuu tun menaydayaw ni hi-gatu niya wada hu nekapan Tabernacle ni penaydayawan tayun hi-gatu eyad puyek. <sup>2</sup> Humman ni Tabernacle ey wada nekapan dewwan kuwaltuh tu. Ya etan di nemangulun kuwaltuh ey wada hu pattukkan ni kengkeh, ya tebol niya sinapay ni neiappit nan Apu Dios. Ya ngadan nunyan kuwaltuh ey Nesantuh ni Kuwaltuh. <sup>3</sup> Wada hu kultina ni nengedwan nunman ni dewwan kuwaltuh. Ya ngadan ni neikadwan kuwaltuh ey Nekasantuh ni Kuwaltuh. <sup>4</sup> Yadman kad-an etan ni balituk e neiha-adan ni altar ni kapenggihhebin insensoh e mebanglu hamuy tu. Wada damadman etan Kaban ni netakapan ni balituk e humman hu Kaban ni nekitbalan Apu Dios ni neiha-adan etan ni dewwan batun neitudekan idan hampulun Tugun Apu Dios ni dinwat Moses, ya etan hulkud Aaron ni pimmingi niya etan pa-nay ni balituk e neiha-adan ni manna. <sup>5</sup> Yad ta-pew ni hu-keb nunman ni Kaban ey wada dewwan nepaot ni anghel e kei-ang-angan ni kawedan Apu Dios. Nebekyag hu payak da et mahiduman hu hu-keb nunman ni Kaban ni kake-kalin liwat tep yadman hu kapengiwwakgihin padin kuheyaw ni kameiappit nan Apu Dios. Nem beken nin nunyan pengippeamtaan kun hi-gayun emin ni meippanggep ni nunya.

<sup>6</sup> Henin nunya hu elaw nunman ni Tabernacle. Yan nunman la, ey ida kaumhegep hu padin kewa-wa-wa etan di nemangulun kuwaltuh ni Tabernacle et yadman daka pengippahdingin ngunu da. <sup>7</sup> Nem hedin ya etan di neikadwan kuwaltuh ey ebuh hu eta-gey ni padin kaumhegep, nem pinhakkey ni ebuh ni hantoon hu tuka hehgepid man. Hedin umhegep diman ey mahapul ni um-ilaw ni kuheyaw ni animal ni i-appit tun Apu Dios et tu iwakgih di hu-keb etan ni Kaban et wada inna-nun ke-kalan ni liwat tu niya liwat idan edum tun tuu. <sup>8</sup> Ey humman ni kapehding idan tutu-un animal hi Apu Dios niya edum ni kameidwat ni hi-gatu, nem kapyatun eleg luminggep hu nemnem da, tep amta da e nanengtun eleg ma-kal hu liwat da. <sup>10</sup> Tep humman ni daka penaydayaw ey humman hu daka pengu-unnudin Tugun Moses ni meippanggep ni elaw ni kakenna, ya kainnuma niya elaw ni linih ni annel. Huyyadda hu mahapul ni u-unnuden da ingganah eman ni pengippeamtaan Apu Dios ni baluh ni nekitbalan tun elaw ni penaydayaw ni hi-gatu.

<sup>11</sup> Et neipahding huyya eman ni illian Jesus Christo di puyek e nambalin ni hi-gatu hu Eta-gey ni Padi tayun kamengi-ehngeng ni hi-gatsud hinanggan Apu Dios ma-lat dawten tayu hu panyaggudan ni indaddan Apu Dios ni hi-gatsu. Et yan nunya ey immen di kayyaggud ni peteg ni Tabernacle di kabunyan e beken ni kinapyan tuu niya beken eyad puyek nebehwatan tu. <sup>12</sup> Pinhakkey ni ebuh hu hinggepan tud man, ey endi inhegep tun kuheyaw ni gelding winu bakan tu in-appit nan Apu Dios. Tep ya kuheyaw tu hu in-appit tu eman ni neteyyan tu et mehelakniban itsun kamengullug, et wada law hu biyag tayun endi pappeg tu. <sup>13</sup> Hedin ya elaw eman ni nemangulun nekitbalan Apu Dios, man hedin wada tuun wada impahding tun pi-yew, ey eleg mabalin ni da pekiemmung ni mekidaydayaw nan Apu Dios ingganah wakgihan idan padin kuheyaw ni gelding winu baka niya dep-ul ni giniheb dan impah ni baka. Et hedin negibbuh ni impahding ni padi humman, ey han dammutun mambangngad etan nengipahding ni pi-yew ni mekidaydayaw nan Apu Dios. <sup>14</sup> Et hedin henin nunman elaw tun nunman, ey kaw beken ni nema-man me-kal hu liwat tayu et endi tayu law nenemnemen tep ya ineyuhan ni kuheyaw nan Jesus Christo di krus? Humman ni impahding Jesus ey endi kulang tun neiappit nan Apu Dios ni kepossinsahan ni liwat tayun umhulun ni ketteyyan tayu. Impahding tu huyya tep ya baddang ni Ispirituh Apu Dios e endi laputu niya endi pappeg tu. Et yan nunya ey dammutu law ni mansilbi itsun Apu Dios e wadan ingganah.

\* 8:12 8:12 [8-12] Jeremiah 31:31-34

<sup>15</sup> Et humman hu, hi Christo hu kamengi-ehneng ni hi-gatsud hinanggan Apu Dios di baluh ni nekitbalan tu ma-lat emin itsun nambalin ni tuun Apu Dios ey dewwatan tayu etan impakulug tun beltanen tayun mannananeng ni ingganah. Dammutu law ni meippahding huuya, tep ingkatey Jesus hu liwat tayu, anin yadda lawah ni impahpahding tayun eman lan nemangulun nekitbalan Apu Dios ida aammed tayu.

<sup>16</sup> Ya elaw ni kapengipebeltanin Apu Dios ni hi-gatsun panyaggudan tayu ey henin elaw tayun Jews e mahapul ni mettey etan mengippebeltan et han beltanaddan pinhed tun pengidwatan hu hipan pebeltan tu. <sup>17</sup> Tep hedin nanengtun mategu etan tuu, ey eleg mabalin ni tu pebeltan hu tenged tu. <sup>18</sup> Hanniman dama hu nemangulun nekitbalan Apu Dios e mahapul ni wada mekleng et meiappit hu kuheyaw tun Apu Dios et han dammutun dewwatan ni tuu hu panyaggudan tu. <sup>19</sup> Makulug huuya, tep yan eman ni negibbuan ni nengipeamtaan Moses idan tuun emin ni Tugun, ey illa tu kuheyaw ni baka et ya kuheyaw ni gelding ni neikamdug di danum et alen tu etan helek ni hysop ni nabtek ni madlang ni sinulid et ita-mel tud kuheyaw et wakgihan tu hu libluh ni neitudkan ni Tugun niyadda tutu-un wadadman. <sup>20</sup> Yan tuka pampengippahdingin nunman ey kantuy "Huuyan kuheyaw hu mengippeamta e mahapul ni u-unnuden tayu hu nekitbalan Apu Dios ni hi-gatsu." \* <sup>21</sup> Winakgihan tu dama hu Tabernacle et yaddan emin hu wadadman ni kai-usal ni kapenaydayawin Apu Dios. <sup>22</sup> Ya intenuttuddun Moses ni Tugun Apu Dios ni intudek tun nunman ey emin ida etan kamenaydayaw nan Apu Dios niyadda etan kamei-ussal ni kapenaydayawin hi-gatu ey mahapul ni mewakgihan idan kuheyaw et han abulutaddan Apu Dios. Ey hedin nanliwat ida, man mahapul ni wada hu i-appit dan Apu Dios ni animal, tep eleg mabalin ni an me-kal hu liwat da hedin endi da peih-ih ni kuheyaw ni animal.

*Ya na-kalan ni liwat tayu tep ya neteyyan Jesus Christo*

<sup>23</sup> Humman hu elaw ni kaebbulutan Apu Dios ni penaydayaw dan hi-gatun nunman, tep mahapul ni wada iddawat dan animal ni hi-gatu et iwakgih da hu kuheyaw tud Tabernacle niyadda etan di neiha-ad diman. Nem huuyaddan emin ey u-ukkul ni ebuh etan ni makulug ni Tabernacle di kabunyan, et mukun humman ni Tabernacle ey mahapul ni ya kekkeddudukul ni peteg hu mei-appit diman nem ya hu kuheyaw ni animal ni kai-enappit ni padid puyek. <sup>24</sup> Et humman hu, pakkaw immayuh hu kuheyaw nan Christo ni pengidwatan tun annel tun Apu Dios. Ya Tabernacle ni hinggepan tu ey beken ni kinapyan tuu eyad puyek, tep u-ukkul ni ebuh humman. Ya hinggepan tu ey yad kabunyan e humman dedan hu makulug ni Tabernacle et immen di diman ni nunya et hi-gatu kamengi-ehneng ni hi-gatsud hinanggan Apu Dios. <sup>25</sup> Hedin ya etan eta-gey ni padid puyek, man katootoon ey kaum-ilaw ni kuheyaw ni animal ni tuka an i-appit nan Apu Dios etan di Nekassantuh ni Kuwaltuh ma-lat pesinsahan tu hu liwat idan tuu. Nem beken ni henin nunman nan hi Jesus Christo, tep ingkatey tun pinhakkey hu neneklaan tun liwat tayu et ebuh. Eleg law mahapul ni an meippenidwa. <sup>26</sup> Tep gullat ni mahapul ni mampidpidwan mettey ni pengi-appitan tun annel tun Apu Dios, et ku e-eggel ni nanlelehanan tu, neipalpu eman ni naltuan ni puyek ingganah nunya. Nem beken ni henin nunman, tep immali hi Jesus eman ni gintud Apu Dios ni nemappegan tun kabelaan ni liwat et iketey tud krus hu pengkalan tun liwat tayu, ey hiyya humman ni pinhakkey ni nengipahdingan tun nunman.

<sup>27</sup> Emin hu tuu ey nanna-ud dedan ni mettey et mehuwetan ida. <sup>28</sup> Makulug huuya, ey neka-amta tayu dama e ingkatey Jesus Christo hu liwat tayu ma-lat wada inna-nu tun ke-kalan ni liwat idan katuutuu. Ey mambanggad ali mewan, nem beken law ni ya liwat tayu hu tu ellian, nem ma-lat tudda helakniban hu kamengullug ni kamenehged ni ellian tu.

## 10

<sup>1</sup> Ya Tugun Moses ni meippanggep ni pan-appitan hu keang-angan tudda huuyan kakkayyaggud ni mekapkapyallin hakey ni aggew. Nem kulang impeang-ang tu, tep heni allinnew ni ebuh. Et mukun anin ni katootoon ni nan-appit ida tutu-u et nanengtun eleg ida ibbilang Apu Dios ni kayyaggud. <sup>2</sup> Tep gullat ni makulug ni nepesinsahan hu liwat idan tuun hanniman ni daka penaydayaw, ey eleg da et nemnemnema hu liwat da et issiked dan man-appit ni animal nan Apu Dios. <sup>3</sup> Nem ya kakulugan tu ey daka nemnemnema hu liwat da, et mukun katootoon ni nan-appit ida. <sup>4</sup> Tep eleg han-ekal ni kuheyaw ni baka niya gelding hu liwat.

<sup>5</sup> Et humman hu, yan eman ni illian Jesus di puyek ey kanton Apu Dios ey

\* 9:20 9:20 Exodus 24:6-8

"Eleg mu law pinhed ida etan animal niyadda linggeman ni daka i-appit niyadda daka iddawat ni hi-gam, et humman hu, winedam hu annel kun mei-appit ni hi-gam. <sup>6</sup> Eleg ka um-amleng ida etan ni kagihheban kamei-appit ni hi-gam niyadda etan edum ni daka iddawat ma-lat ekalen mu liwat da. <sup>7</sup> Et humman hu, kangkuy 'Apu Dios, ebbuluten ku etan pinhed mun meippahding ni hi-gak ni henin neitudek etan di liblun ni impatudek mun ehel mu.'"

<sup>8</sup> Em, inhel Jesus nan Apu Dios e kantuy "Eleg mu law pinhed ida humman ni daka i-appit ni hi-gam ni linggeman niya eleg mu pinhed etan daka gihheban animal ni i-appit dan hi-gam tep ya liwat da." Huyya nengipesikedan Jesus ni daka i-appit nan Apu Dios, anin ni humman hu intugun tun Moses ni nunman. <sup>9</sup> Induman tu et kantuy "Apu Dios, ebbuluten ku etan pinhed mun meippahding ni hi-gak." Huyya nemappegan tun eman ni nebayag ni elaw ni daka penaydayaw, et hululan tun baluh law ni elaw. Et mukun endi law silbi tun um-ienappit ni animal nan Apu Dios tep hi Jesus law hu inhullul tun mei-appit ni hi-gatu. <sup>10</sup> Et humman ni pinhed Apu Dios ni meippahding nan Jesus hu pengibbillangan daitsu law ni kayyaggud di hinangga tu, tep ingkatey Jesus Christo hu peneklaan tun liwat tayu et endilli tu keippidwaan mewan humman, tep endi tu nangkulangan humman ni impahding tu.

<sup>11</sup> Ya kapehding idan padin nunman ey ida kaman-eh-ehneng ni kewa-wa-wad altar ni man-appit. Nem ya humman ni daka i-enappit ey eleg tu han-ekal hu liwat ni tuu. <sup>12</sup> Nem hi Jesus ey pinhakkey ni ebuh hu nengiappitan tun annel tu eman ni nengiketeyan tun liwat ni emin ni tuu, nem mannananeng hu keihhilbian ni nunman ni impahding tu. Yan nunya ey immen ni yimmudung di winannan Apu Dios ni kei-ang-angan ni kasinagey ni saad tu. <sup>13</sup> Immen law diman e tuka hehhegeda pengapputan Apu Dios emin ni buhul tu ma-lat hi-gatu hu tengngawen dan Ap-apu. <sup>14</sup> Humman ni pinhakkey ni tu nengiappitan ni annel tun Apu Dios hu nengabulutan ida law Apu Dios ni ingganah etan idan tuun na-kal liwat da. Ey hi-gada hu kababbaddangin Apu Dios ma-lat makanggunnud idan hi-gatun kewa-wa-wa. <sup>15</sup> Anin ni ya Ispirituh Apu Dios et tuka ihhudut ida huyya, tep inhel tun nunman hu inhel Apu Dios ni kantuy

<sup>16</sup> "Medetengan ali etan aggew ni gintud kun pengipeamtaan kun baluh ni nekitbalan kuddan tutu-uk. Ihha-ad kullid puhu da niyad nemnem da hu tugun ku, et humman ali enu-unnuden da." \*

<sup>17</sup> Kantu mewan ey "Ey anin ni nanliwat ida et hehmeken kuddalli et pesinsahan ku liwat da niya liwwanen kulli hu nambahulan da." <sup>18</sup> Et hedin tep pinesinsahan Apu Dios hu liwat tayu, ey eleg law mahapul ni itsu um-ienappit nan Apu Dios ni linggeman ni ke-kalan ni liwat tayu.

*Ya pengihhammadan tayun pekiddagyuman tayun Apu Dios*

<sup>19</sup> Et humman hu, hi-gayun kaegiegi, ey dammutu law ni umhayukup itsud kad-an Apu Dios di kabunyan et mandasal itsun hi-gatu, tep immayuh hu kuheyaw nan Jesus ni nengiketeyan tun liwat tayu. <sup>20</sup> Nem mategu law, et hi-gatu mengillaw ni hi-gatsud kad-an Apu Dios. Tep yan eman ni neteyyan tu ey nebi-ki etan kultinah ni nengadwa etan ni dewwan kuwaltuh et endi law hu umhanid dellanen ni umlaw di kad-an Apu Dios et dammutu law ni manna-ud itsun mandasal ni hi-gatu. <sup>21</sup> Hi Jesus law hu Eta-gey ni Padi tayun kamengippaptek ni hi-gatsun tuun Apu Dios. <sup>22</sup> Et humman hu, ya kayyaggud ni pehding tayu ey panduttuk itsud kad-an Apu Dios e eleg itsu mandinwa, nem paka-iddinel tayu hi Jesus e kamengi-ehneng ni hi-gatsu ma-lat abuluten Apu Dios hu dasal tayu. Dammutun pehding tayu huyya, tep heni daitsu winakgihan ni kuheyaw Jesus et eleg tayu law nenemnemen hu lawah ni impahding tayu. Kameang-ang huyya eman ni nebenyagan tayu, e heni na-meh hu annel tayun malinih ni danum. <sup>23</sup> Ey kayyaggud hedin eleg itsu mandinwa, nem tettengedi tayu etan tayu kanamnamahan kantayun wadan hi-gatsu, tep inamta tayu e hi Apu Dios ey kameiddinnel ni mengippeamnu etan ni impakulug tu. <sup>24</sup> Nemnem tayu hu pehding tayun manhimbabaddang ni keihhammadan ni tayu kapengullug, pan-impipinhed itsu niya kayyaggud hu ipahding tayu. <sup>25</sup> Eleg tayu iu-unnud idan edum e inwalleng da hu daka pengullug et isiked da law ni mekiammuammung ni menaydayaw nan Apu Dios. Nem ya pehding tayu ey panhintutugun itsu, nema-man nunya, tep ay kamangkedetengi law hu pambangngadan nan Apu tayu.

<sup>26</sup> Hedin iggeb-at tayun eleg u-unnuda hu neipeamtan hi-gatsu, et tataggan tayun manliwwaliwwat, ey eleg law mansilbin hi-gatsu hu neteyyan Jesus. Tep endi law edum ni dammutun mei-appit ni mengkal ni liwat tayu. <sup>27</sup> Et hedin hanniman, man daitsu kahehhegeda etan di kehuwetan tayu ni ya etan di angettakkut ni kekastiguan

\* 10:16 10:16 Jeremiah 31:33

di kaumhahinyab ni apuy ni pengastigun Apu Dios ida etan ni buhul tu. <sup>28</sup> Anin ya Tugun Moses et kantuy hedini wada kamangngenghay, ey eleg hehmeke, nem pepettey hedini wada dewwa winu tellun mantistigu.

<sup>29</sup> Hedin hanniman, man nema-man mekastigu etan tuun mangngenghay ni Ungngan Apu Dios e hi Jesus. Tep imbilang tun endi hu silbin kuheyaw tun in-appit tun Apu Dios ni kepinsinsahan ni liwat tayu meippuun etan di baluh ni nekitbalan Apu Dios. Ya etan tuun mengippahding ni hanniman ey kinehing tu hu Ispirituh Apu Dios e kababbal ni peteg ni hi-gatsun neliwtan. <sup>30</sup> Nemahhig ali hu kastigu tu, tep inamta tayu e kan Apu Dios ey "Hi-gak hu mengibleh. Hi-gak e Apu yu hu mengastigu etan ni mengippahding ni lawah ni hi-gayu." Kantu pay ey "Hi-gak e Apu hu menuwet idan tuuk." <sup>31</sup> Anggetakut hedini hi Apu Dios e wadan ingganah hu mengastigun hi-gatsu.

<sup>32</sup> Nemnem yu kedi eman neipenahding ni hi-gayun laputan nengulugan yu. Tep yan eman ni nehullulan ni nemnem yu ey dakel hu nanligligatan yu, nem inhikal yu et pannananeng yu hu yuka pengullug. <sup>33</sup> Hin-addum ni dakeyu kapampadngelin edum yun tuud kedaklan ni tuu niya hin-addum ni dakeyu kapanlelehan. Niya hin-addum ni kayu kameillegat di kapanlelehaniddan edum ni kamengullug. <sup>34</sup> Ey neilegat kayun nanlelehanan idan edum yun kamengullug ni neikelabut. Ey anin ni piniliw idan buhul yu hu limmu yu et kayu kaman-am-amleng, tep inamta yu e wadan hi-gayu hu kakkayyaggud nem yadda humman ni limmu yu. Ey humman ni kayyaggud ni wadan hi-gayu ey eleg metellak, nem mannananeng ni ingganah. <sup>35</sup> Et humman hu, etan tu iwalleng hu dinel yun Apu tayu, anin ni hipa mekapkapyaya, tep et-eteng hu gungunahan yu hedini mandinnel kayun kenayun. <sup>36</sup> Mahapul ni an-anasan yun mengihikkal idan kamekapkapyan hi-gayu ma-lat dammutun han-ipahding yu hu pinhed Apu Dios ni pehding yu. Hedin hannya pehding yu, ey dewwatan yullin emin hu impakulug tun iddawat tu. <sup>37</sup> Tep neitudek dedan e kantuy

"Anggegannu law ey um-ali etan tayu kahehhegedan um-ali. Eleg tu gegnada hu ellian tu. <sup>38</sup> Et yaddalli etan tuuk ni neibilang ni kayyaggud ey hi-gada hu mengihikkal ni hipan ligat da tep ya daka pengullug ni hi-gak. Nem hedini wada mengiwwalleng ni tuka pengullug ni hi-gak ey eleg tuwak peamleng."

<sup>39</sup> Tep yadda tutu-un kamengiwwalleng nan Apu Dios ey eleg ida mehellaknibi. Nem hedini ngun hi-gatsu, man pannananeng tayu hu tayu kapengullug ni hi-gatu, et humman hu, mehellakniban itsulli.

## 11

### *Ya elaw ni pengullug*

<sup>1</sup> Ya kapengullug ey humman hu tayu kapengamtain dewwatan tayu etan ida tayu kanamnamaha niya humman hu tayu kapengamtain makulug ni wadadda etan eleg tayu han-ang-ang. <sup>2</sup> Ya kapengullug idan tuun nunman hu nengabulutan Apu Dios e kayyaggud ida.

<sup>3</sup> Ya tayu dama kapengullug hu nengamtan tayu e naltu hu puyek niyaddan emin hu edum ni naltu tep inmandal Apu Dios. Et humman hu, tayu kaewwasi e emin ida eya tayu kaang-ang-anga ey nalpud eleg meang-ang.

### *Yadda tuun kaebbulutan Apu Dios ni kayyaggud tep ya daka pengullug*

<sup>4</sup> Ya kapengullug Abel, hu gaputan wadwada hu in-appit tun Apu Dios nem hi Cain e agi tu. Inebulut Apu Dios humman ni in-appit tu tep ya tuka pengullug, e humman nengibilangan Apu Dios ni hi-gatun kayyaggud. Ey anin ni netey hi Abel, et nanengtun ya tuka pengullug hu kamengituttudun kayyaggud ni elaw ni u-unnuden. \*

<sup>5</sup> Hanniman daman Enok, e eleg matey tep ya tuka pengullug, e inewit Apu Dios di kabunyan, et endi an nenamak ni hi-gatu. Kantud ehel Apu Dios ni impatudek tu ey impeamleng Enok hi Apu Dios et han tu ayagid kabunyan. <sup>6</sup> Hedin endi kapengullug ni tuu ey eleg mabalin ni tu peamleng hi Apu Dios. Tep ya tuun neminhed ni umhayukup di kad-an Apu Dios, ey mahapul ni kullugen tu e wada hi Apu Dios, niya kullugen tu dama e kabaddangan Apu Dios hu tuun kamambeggan baddang ni hi-gatu.

<sup>7</sup> Hi Noah dama hu hakey ni indeddengel tu hu impanwarning Apu Dios ni hi-gatun mekapkapyallin hakey ni aggew tep ya tuka pengullug. Et kumapyan bapor ni nengipahgepan tudan pamilyah tu et eleg ida malsing ni nalbengan ni bebley. Ya tuka pengullug hu nengibilangan Apu Dios ni hi-gatun kayyaggud. Ya nengu-unnudan tun inhel Apu Dios hu keang-angan tu e emin ida tuun nunman ni kawedan Noah ey neliwtan ida, tep endi daka pengullug.

\* 11:4 11:4 Genesis 4:3-10

<sup>8</sup> Hanniman daman nan hi Abraham, e gapuh ni tuka pengullug ey inu-unnud tu hu inhel Apu Dios ni hi-gatu et hi-yanen tu hu bebley tu et man-aldan etan di bebley ni impakulug Apu Dios ni pebeltan tu, anin ni eleg tu amta lawwan tu. <sup>9</sup> Ey ya tuka pengullug hu tu nan-etaetanan di tu nekibebleyan di impakulug Apu Dios ni pampuyyek tu. Tep heni binunal hi Abraham di emin di linawwan tu niya neatepan ni tuldah ni ebuh hu baley tu. Hanniman dama hu impahpahding di Isaac e u-ungnga tu, ni hi Jacob e inap-apu tu. Neila-kam idan nan hi Abraham etan di beltanen dan impakulug Apu Dios ni hi-gada. <sup>10</sup> Tep ya etan bebley ni kahehheggedan Abraham ni pambebleyan da ey nehammad ni peteg hu sinuunan tu, tep hi Apu Dios hu kan nemnem niya nengapyan nunman.

<sup>11</sup> Anin daman hi Sarah e ahwan Abraham et nehammad hu tuka pengullug, tep anin ni nebasi niya nei-inna law, et entanni ey newada hakey ni u-ungnga tu. Nambutsug tep kamedinnel nan Apu Dios e tuka peamnu hu tuka e-helan pehding tu. <sup>12</sup> Anin hi Abraham ey nea-amman peteg et endi law kabaelan tun mantennud, nem entanni ey impantanud nan Apu Dios et henidda bittuwen di kabunyan niya henidda palnah di gilig ni baybay hu kadinakkel ni helag tu e eleg ida mebillang.

<sup>13</sup> Emin ida huyyan tutu-u ey impannaneng da hu daka pengullug ingganah ni neteyyan da. Eleg da dawten hu impakulug Apu Dios ni iddawat tun hi-gada ey netey ida, nem nannaneng hu dinel da e hakey alin aggew et um-amnu humman ni impakulug tu. Daka kulluga e hi-gatsuddan kamengullug ey bawi tayun ebuh eya puyek, tep eleg itsu mena-yun deya. <sup>14</sup> Huyyaddan tuu ey kinulug da e wada etan bebley ni lawwan da e yadman ali law hu panha-adan dan ingganah, et humman hu daka hemmahemmaka. <sup>15</sup> Beken ni ya etan bebley ni hini-yan da hu daka nenemnema, tep gullat et nambanggad idadman. <sup>16</sup> Humman ni panha-adan dallin daka nenemnema ey kakkayyagud nem ya etan bebley ni hini-yan da, tep yad kabunyan hu kad-an tu, ey daka iddinel hi Apu Dios ni nengidaddan ni nunman e panha-adan da. Et humman hu, eleg umbaing hi Apu Dios ni menghel e hi-gatu Dios da, tep indaddanan tuddan pambebleyan da.

<sup>17-19</sup> Ya kapengullug Abraham hu gaputun nengu-unnudan tun inhel Apu Dios ni nematnaan tun hi-gatu. Tep yan nanghelan Apu Dios ni tu i-appit etan binugtung ni u-ungnga tu e hi Isaac ey inu-unnud tu, anin ni impakulug tu lan hi-gatu e hi Isaac hu kehlagan alin dakel ni tuu. Et ilaw tu tu-wangu et tu-et petteyen, tep kamedinnel e wada kabaelan Apu Dios ni meneggan netey. Ey makulug ni heni tu sinegu, tep inhelan tu et eleg law iappit Abraham etan u-ungnga tun hi Isaac.

<sup>20</sup> Heni daman nan hi Isaac e ya tuka pengullug hu nanghelan tuddan dewwan u-ungnga tu e di Jacob nan Esau e yallin edum ni aggew ey iddawat Apu Dios hu panyaggudan da.

<sup>21</sup> Ya kapengullug daman nan hi Jacob hu gaputun yan eman ni naka-a-amma law e ngannganah ni ketteyyan tu, ey inhudngul tu hulkud tud pangal tu et dayawen tu hi Apu Dios et idasalan tudda inap-apu tun u-ungngan Joseph ma-lat idwat nan Apu Dios hu panyaggudan da.

<sup>22</sup> Anin daman hi Joseph et ya tuka pengullug hu gaputun yan eman ni ngannganah law hu ketteyyan tu, ey inhel tu e yallin edum ni aggew ey hi-yanen idan edum tun helag Israel hu Egypt et itugun tun hi-gada e ittabin da hu tu-ngal tu.

<sup>23</sup> Anin idan a-ammed nan Moses et ya daka pengullug hu gaputun eleg da takutan ni menghing ni olden ni patul e pepettey tun emin hu pakeiungngan laki et itattallu da hi Moses ni tellun bulan. Hakey pay ey yan eman ni neiungngaan tu ey inang-ang idan a-ammed tu e indawtan idan Apu Dios ni kayyagud ni peteg ni u-ungnga.

<sup>24</sup> Anin hi Moses eman ni nehikan tu law et ya tuka pengullug hu eleg tu peminhedan ni meibbillang ni u-ungnga etan ni biin u-ungngan patul di Egypt e nengagemid ni hi-gatu. <sup>25</sup> Tep tuka pehebballi hu anin mekilלהan idan tuun Apu Dios nem ya an meiedduddan di kapehpehding idan tuud Egypt ni panliwwatan, tep inamta tu e nekemtang ni ebuh hu pan-amlengan ni kamanliwwat. <sup>26</sup> Tuka pehebballin mepihhul tep ya namnamah tun ellian alin Christo nem ya hu tu pengellaan ni emin ni kinedangyan di Egypt, tep tuka nemnemnema hu gungunahen tullin hakey ni aggew.

<sup>27</sup> Eleg tumekut ni bunget nan Pharaoh e patul et hi-yanen tu hu Egypt tep ya tuka pengullug. Anin ni neligat hu biyag tu et inenu-unnud tu hi Apu Dios, tep heni tuka ang-ang-anga hi Apu Dios anin ni eleg meang-ang. <sup>28</sup> Ey ya tuka pengullug hu himmulun et hi-gatu hu nengilepun Piyestah ni Passover et u-unnuden tu hu inhel Apu Dios e wakgihan dan emin hu pamedingan ni baballey dan kuheyaw ma-lat hedin um-ali etan anghel ni memettey idan emin ni pengulwan ni lakin u-ungngaddan tuud Egypt, man eleg tudda illagat hu pengulwan ni lakin u-ungngaddan Jews.



<sup>29</sup> Ya kapengullug idan Jews ni nunman hu nan-agwatan dad mamegan puyek di gawan Madlang ni Baybay. Ngunnud ida tuud Egypt, nem nan-addum mewan hu danum et mangkaling ida.

<sup>30</sup> Gapuh ni kapengullug idan helag Israel ey nangketu-li hu tuping ni luhud di Jericho, tep inu-unnud da hu inhel Apu Dios e liklikwehen da humman ni bebley ni pitun aggew. <sup>31</sup> Ya kapengullug nan Rahab, e hakey ni biidman ni tuka pebeyad hu annel tud laki, hu gaputun eleg da pameteyan ni hi-gatu. Emin ida hu tuudman ey eleg ida mengu-unnud nan Apu Dios et pateyen idan Jews, nem eleg da pakipetey hi Rahab, tep yan eman ni illian idan dewwan Jews ni an mansi-im idan kebebleyan tu, ey inaygan tuddad baley tu et baddangan tuddan nambangngadan da.

<sup>32</sup> Wadan hiyyadda huyyan pengamtaan yun elaw ni kapengullug. Tep gullat ni tagan ku tenten et kulang hu tsimpuh ni penghelan kun kapengullug idan tuun nunman, henid Gideon, hi Barak, hi Samson, hi Jephthah, hi David, hi Samuel, niyadda la eman prophets. <sup>33</sup> Wadadda edum ni hi-gadan nengenapput di da nekigubatan tep ya daka pengullug. Yadda edum ey kayyaggud hu nan-ap-apuan dad bebley da niya dinwat da hu impakulug Apu Dios ni iddawat tun hi-gada. Yadda edum, ey innang pengngannan idan layon ni hi-gada, nem eleg dadda kanen. <sup>34</sup> Wadadda edum ni innang kegihheban dad kaumhinyab ni apuy, nem neihwang ida. Yadda edum ey innang hu pemeteyan ni buhul dan nampam-ispadah ni hi-gada, nem neihwang ida. Yadda edum, ey nekapuy ida, nem nambalin idan na-let. Nambalin ida edum ni nangketuled ni mekiggubbat et apputen dadda buhul da. <sup>35</sup> Ey wadadda dama bibi-in nunman ni netagwan hu u-ungnga dan netey tep ya daka pengullug.

Wadadda edum ni kamengullug ni dimpap idan edum ni tuu et panlelehan dadda. Yadda etan nampap ni hi-gada ey kanday ibbukyat dadda hedini issiked dan mengullug nan Apu Dios, nem kahing ida et pampateyen dadda. Eleg da isiked ni mengullug tep pinhed dan meteggan idalli et kayyaggud ali biyag da nem ya biyag dad puyek. <sup>36</sup> Yadda edum ni kamengullug ey pinihupihul idan edum dan tuu niya bineibeig dadda. Yadda edum, ey binenangkiling dadda et pan-ikelabut dadda. <sup>37</sup> Yadda edum ey nantengba daddan batu et mangkatey ida. Nambengwah dadda edum ni gelgel niya nantewik dadda edum ni ispadah. Yadda edum ey newetwet ida et ya balwasi da ey katat ni kalneroh winu gelding. Nanlelehanan da niya lawah hu impahpahding idan edum ni tuun hi-gada. <sup>38</sup> Yadda edum ey hinek-il daddad baballey da et ida mandaladalan di desert niyad kedunduntug. Nantalaluddad hungab niyad leyang. Et mukun yadda eleg mengullug e nemahhig kalwah da, ey eleg idan hekey meibbillang ni mekibbebley ni hi-gadan kamengullug.

<sup>39</sup> Huyyaddan tuu ey katettebalan Apu Dios idan kayyaggud tep ya daka pengullug, nem eleg da ni dawten hu impakulug tu, <sup>40</sup> tep wada hu kekkeddukdul ni ninemnem tun pehding ni hi-gatsun emin, e beken ni hi-gadan ebuh. Tep eleg um-amnu hu planuh Apu Dios hedini eleg itsu mei-dum ni hi-gada tep ya dama tayu kapengullug.

## 12

### *Hi Apu Dios hu Ametayun emin ni kamengullug*

<sup>1</sup> Humman hu elaw ni kapengullug idan nunman ni tutu-u. Nem inna-nu daman hi-gatsu? Hipa pehding tayu? Mahapul ni nemnemen tayu e wadadda hu dakel ni tutu-un nunman ni nehammad daka pengullug. Et ya kayyaggud ey ya elaw da hu pengiu-unnudan tayun kamengullug nunya. \* Et humman hu, isiked tayun mengippenahding ni linggeman ni kaumheli-wan hi-gatsun pengu-unnudan tayun Apu tayu. Ey isiked tayudda hu liwat ni heni nemedbed ni hi-gatsu. Niya anin ni hipa mekapkapyu et pannananeng tayu hu tayu kapengullug. <sup>2</sup> Hi Jesus ni ebuh hu kulug tayu niya hi-gatu pandineli tayu, tep hi-gatu neipuunan ni tayu kapengullug niya hi-gatu hu mengippehammad ni tayu kapengullug. Impeang-ang tu hu pehding tayu tep inhikal tu hu ligat tud krus, tep amta tun wadalli pan-am-amlengan tun kegibbuan tu humman. Eleg tu nemnemen hu kebe-ingan tun ketteyyan tud krus et yan nunya ey yimmudung law di winannan Apu Dios e Ap-apud kabunyan.

<sup>3</sup> Ey mahapul ni nemnem tayu hu nengisipelan nan Jesus ni nemahhig ni kapemippi-huliddan neliwatan ni hi-gatu ma-lat eleg yu nemnemnemen e endi silbin yuka pengullug hedini wada ligat yu, tep hedini hanniman hu pannemnem yu, man manlu-lu kayu. <sup>4</sup> Tep

\* **12:1** 12:1 Kan idan edum ey ya keibbellinan tu huyya ey heni daitu hinelikuban idan nunman ni tutu-un nehammad daka pengullug e ihik idan pengi-unnudan tayun elaw da.

anin ni kayu kamanligligat ni mengiwwalleng ni liwat et endi ni hu mengiketekey nunman.  
<sup>5</sup> Kaw liniwwan yu hu tugun Apu Dios ni hi-gayun u-ungnga tun kantuy  
 “Hi-gam e u-unggak, entan tu langlangkuyya hu nakka penuggunin hi-gam niya entan  
 almet mu hedini imbunget daka, <sup>6</sup> tep nak ida katugguna hu nakka ibbilang ni  
 u-unggak ni pinpinhed ku niya nak ida kakastiguan panyaggudan da.” †  
<sup>7</sup> Et humman hu, mahapul ni ihhikal yu hu ligat yu, tep ya kapenuggunin Apu Dios ni hi-  
 gayu hu keang-angan tun dakeyu kaibbilang ni u-ungnga tu. Tep kaw wada u-ungngan  
 eleg tuggunan ametu? <sup>8</sup> Katuggunan Apu Dios idan emin u-ungnga tu. Et hedini eleg  
 dakeyu tugguna, ey beken kayu tep ni makulug ni u-ungnga tu. <sup>9</sup> Yan ekaglang tayu ey  
 daitsu katuggunan ametayud puyek et tayudda kalispituha. Et humman hu, kaw beken  
 ni nema-man mahapul ni ya Ametayud kabunyan e namyuh ni hi-gatsu hu u-unnuden  
 tayu ma-lat makitegu itsun hi-gatun ingganah? <sup>10</sup> Hedini ya ametayud puyek, ey sinugun  
 daitsun amta dan kayyagud ni penuggun dan hi-gatsun ekaglang tayu. Nem hedini  
 hi Ametayud kabunyan, man daitsu katuggunan panyaggudan tayu ma-lat kaila-kaman  
 tayud kakinayyagud tu. <sup>11</sup> Hedini inhelan daitsud tayu kapehpehding ni lawah, ey eleg  
 tayu pinhed et maggeh di nemnem tayu. Nem ya pambalanan tu hu daitsu kapenugguni  
 ey yaggudan ni elaw tayu niya linggepan ni nemnem tayu.

*Ya pengun-unnudan tayun Jesus*

<sup>12</sup> Et humman hu, eleg itu um-almet hedini kimmapiy hu tayu kapengullug tep  
 ya ligat, nem ihammad tayu kuma hu tayu kapengullug nan Jesus. <sup>13</sup> Pannananeng  
 yun mengun-unnud ni kayyagud ni elaw ma-lat hedini wadadda etan kamanlu-lu tep  
 kimmapiy hu daka pengullug et ida kamandinwa, ey mebaddangan ida et amtaan da  
 hu kayyagud ni elaw ni u-unnuden da et meihhammad hu nemnem dan mengullug.

<sup>14</sup> Ipahding yun emin hu kabaelan yu et ya kayyagud hu pekikkillawwan yun edum  
 yun tuu, niya ang-ang yu et ya pinhed Apu tayu hu u-unnuden yu. Tep hedini endi  
 hu kakinayyagud ni tuu, man eleg tullu ang-anga hi Apu tayu. <sup>15</sup> Helipati yu ma-  
 lat endi hakey ni hi-gayun mengissikked ni mengiddinnel ni binabbal Apu Dios. Ey  
 ang-ang yu et endin hi-gayu hu mengipappanggulun mengippahding ni lawah, tep  
 iu-unnud ni edum et umhulun ni panliwatan ni dakel ni kamengullug. <sup>16</sup> Helipati-iyu  
 mewan ma-lat endin hi-gayu hu makilaki winu makibii. Ey entan tu iu-ukkul nan Esau  
 e nginhay tu hi Apu Dios. Tep anin ni hi-gatu hu pengulwan, et eleg tun hekey ibilang  
 hu kelebengan ni pengulwan ni indawat Apu Dios ni hi-gatu, nem nealay inwa-hi tu  
 humman ni kelebengan tun agitun pihakkey ni pengngannan ni ebuh. <sup>17</sup> Ey inamta  
 yu e entanni ey pinhed tun peteg ni iddasalan daman ametun panyaggudan tu, nem  
 eleg law mabalin, tep endi law kelebengan tun menewwat ni panyaggudan tu. In-  
 anteng tu nanginangih, nem eleg law mabalin ni tu bangngaden hu tu nengiwa-hian ni  
 kelebengan tu.

<sup>18</sup> Ya nengamtaan tayun Apu Dios ey beken ni henin nengamtaan idan Jews ni nenawat  
 ni tugun Moses. Tep yan nenawtan dan nunman ni tugun e neihnup ida etan di Duntug  
 e Sinai ey simmakut ida tep kaumhinyab etan duntug niya andeket hu ahuk tu. Ey  
 engeenget niya kamampepewwek. <sup>19</sup> Ey wada dingngel dan tenul ni tangguyup niya  
 dingngel dan imnehel hi Apu Dios et nemahhig takut da. Et mampehemhemmek ida  
 hu tuun nanggel ma-lat isiked tun um-ehel. <sup>20</sup> Tep kantun hi-gaday eleg mabalin ni  
 ida meihnup etan di duntug ni kad-an tu. Ey inhel tun hi-gada e anin ni yadda animal  
 hu umgasin diman et mahapul ni pantengbaen da et matey. <sup>21</sup> Anggetakut ni peteg hu  
 inang-ang da, et mukun kan Moses ey “Nakka manggegeygey ni takut ku!”

<sup>22</sup> Nem beken ni henin nunman hu nengamtaan yun Apu Dios, tep yan nehelakniban  
 yu ey neila-kam kayudda etan ni kamandaydayaw di Duntug e Zion, e humman hu  
 makulug ni Jerusalem di kabunyan e bebley Apu Dios e wadan ingganah. Ya yuka  
 penaydayaw ni hi-gatu ey eleg maiinggeh di nenaydayaw ida etan ni kaumtatakut di  
 Duntug e Sinai. Nem hedini hi-gatsu, man nei-dum itsudda etan di kalibulibun anghel di  
 kabunyan ni kamampan-am-amleng ni kamenaydayaw ni hi-gatu. <sup>23</sup> Em, hi-gatsuddan  
 kamengullug ey et-eteng hu bendisyon tayu tep hi Apu Dios, e manhuwet alin emin idan  
 tutu-u, hu Ametayu law et mei-dum itsun emin idan nambalin ni u-ungnga tun neitudek  
 hu ngadan dad kabunyan. Em, nebulut daman Apu Dios hu tayu kapengullug henin  
 nengabulutan tun kapengullug idan nehelakniban ni nangketey e immamnu law hu  
 pinhed Apu Dios ni pambalanan da. <sup>24</sup> Wada law dama neiegian tayun Jesus e kamengi-  
 ehngeng ni hi-gatsud hinanggan Apu Dios, tep hi-gatu nengipeamnu Apu Dios ni baluh  
 ni nekitbalan tun pengebbulutan tun hi-gatsu. Itu dama kameilla-kam di panyaggudan  
 ni nambalanan ni ineyuhan ni kuheyaw Jesus e humman immatun ni impeminhed tun

† 12:6 12:6 [5-6] Proverbs 3:11-12

hi-gatsu niya immatun ni tuka pemessinsahin liwat tayu. Beken ni henin ineyuhan ni kuheyaw nan Abel e humman hu immatun ni mahapul ni mei-ewwit etan di nematey ni hi-gatu.

<sup>25</sup> Hanniman hu elaw ni baluh ni nekitbalan Apu Dios ni hi-gatsu, et mukun mahapul ni helipati tayu ma-lat u-unnuden tayu tugun tun hi-gatsu. Tep hedin kinastigun Apu Dios ida hu eleg mengu-unnud ni tugun tun intugun Moses ni hi-gada eyad puyek, ey kaw beken ni nema-ma hu kekastiguan tayu hedin eleg tayu u-unnuda etan kaumtugutugun alid kabunyan? <sup>26</sup> Yan nunman ni inhelan Apu Dios di Duntug e Sinai ey nanyegyeg. Nem yan nunya ey inhel tu mewar e kantuy "Peyegyeg kulli mewar hu puyek, anin ya kabunyan." <sup>27</sup> Ya pinhed tun e-helen huyyan kantun peyegyeg tulli mewar, ey emin eya lintu tu ey mebahbah ida et meendidda. Ey emin ida etan eleg mebahbah ey mannananeng idan ingganah.

<sup>28</sup> Et humman hu, pansalamat itsun Apu Dios, tep mekihha-ad itsullid pan-ap-apan tud bebley ni endi tu kebabhahan. Ey mahapul ni daydayawen tayu niya u-unnuden tayu ma-lat umamleng. <sup>29</sup> Tep nemahhig hu kapengastigun Apu Dios idan eleg mengu-unnud ni hi-gatu, tep hi Apu Dios ey heni apuy e kaumgiheb.

## 13

### *Ya pengippeamlengan tayun Apu Dios*

<sup>1</sup> Hi-gayuddan kamengullug nan Jesus Christo, ey pannananeng yun man-impinshed. <sup>2</sup> Hedin wada dimmutuk di baley yu, ey apnga yudda, anin ni eleg yudda amta. Tep wadadda edum ni hanneya impahding da ey ida umkukumna ey anghel ida gayam humman ni mangili da. <sup>3</sup> Ey entan tu liwwan ni baddangan ida etan nangeikelabut. Hemek yudda e heni etan ni neikelabut kayu dama. Niya hedin wadadda kamanlelehan, ey nemnem yudda damad ligat da e heni etan ni kayu kamekillehan ni hi-gada.

<sup>4</sup> Emin kayu ey mahapul ni ikkahahekey yu impeminhed yun ahwa yu. Entan tu iulig hu beken yun ahwa niya entan tu ipahding hu linggeman ni anggeba-ing, tep makulug ni kastigun Apu Dios ida kamengippahding ni nunya.

<sup>5</sup> Beken ni ya pihhuh hu gagamgami yu niya entan tu enguhi hu hipan wadan hi-gayu. Tep kan Apu Dios ey "Eleg dakeyun hekey e-wayaya niya eleg dakeyu hi-yana." <sup>6</sup> Et humman hu, emin itu ey wada dinel tayun Apu Dios et mukun dammutun kantayuy "Hi Apu hu memaddang ni hi-gak. Et humman hu, eggak umtakut. Tep kaw hipa kabaelan ni tuun ebuh ni mengippahding ni lawah ni hi-gak ey hi Apu Dios hu kamengippatek ni hi-gak?"

<sup>7</sup> Nemnem yudda eman nemangulun kamengipappanggulun nengitenuttuddun ehel Apu Dios ni hi-gayu. Nemnem yu hu kayyagud ni nambalinan ni impenahding da eman ni ketaggu da et ya elaw ni neteyyan da, et hi-gada hu pengiu-unnudan yud yuka pengullug nan Jesus Christo, tep hi-gatun ebuh hu kinulug da. <sup>8</sup> Tep hedin hi Jesus Christo, man eleg melumman, tep humman ngu dedan ni nunman, yan nunya niya humman alin ingganah. <sup>9</sup> Et humman hu, ang-ang yu et eleg kayu meid-ingelan idan dakel ni nangeihallan kameituttuddun eleg meiuunnud di neituttuddun hi-gayu. Ya kumaddan pehding tayu ma-lat maihammad hu tayu kapengullug ey idinel tayu hu baddang Apu Dios, et beken ni ya pengu-unnudan ida etan ni kamepi-yew ni kennen, tep endi tu ibbaddang hu pengu-unnudan idan nunman.

<sup>10</sup> Hedin hi-gatsun kamengullug, ey heni wada hu altar tayun kakelpuin et-eteng ni tayu kapanyagudi e humman neteyyan Jesus di krus. Nem yadda etan tuun daka idinel hu kai-appit idan padid Tabernacle ey endi lebbeng dan an mekilla-kam di panyagudun tayu. <sup>11</sup> Inamta tayu e ya kapehding etan ni eta-gey ni padi ey tuka ella hu kuheyaw ni animal ni in-appit tu tep ya liwat ni tuu, et tuka illaw etan di Nekassantuh ni Kuwaltuh. Nem daka gihheba hu annel etan ni animal di ligliggan. <sup>12</sup> Huyya hu neidingpatan ni neipahding nan Jesus, tep inlaw dad ligliggan et han da pateyad krus. Et ya etan immayuh ni kuheyaw tud krus hu neiappit nan Apu Dios ni nangkai ni liwat tayu. <sup>13</sup> Et humman hu, mahapul ni eleg tayu law idinel hu elaw tayun nunman, nem hi Jesus law hu idinel tayun menellakni ni hi-gatsu. Abulut tayu hu keilla-kaman tayud anggeba-ing ni neipahding ni hi-gatud ligliggan. <sup>14</sup> Tep eleg itu mena-yun ni mambebley eyad puyek, tep wada etan tayu kanamnamahan bebley di kabunyan ni panha-adan tayullin ingganah. <sup>15</sup> Et humman hu, daydayaw tayun kenayun hi Apu Dios e nengitudak nan Jesus ma-lat panyagudun tayu. Daydayaw tayun kenayun tep ya et-eteng ni impeminhed tun hi-gatsu niya kasina-gey tu, tep humman ni tayu kapenaydayaw ey heni humman hu tayu kai-appit ni hi-gatu. <sup>16</sup> Ey entan tu liwwan ni mengippahding

ni kayyaggud niya panhinbabaddang kayu, tep huyyaddan kapehding ey heni dama humman kai-appit ni kamengippeamleng nan Apu Dios.

<sup>17</sup> U-unnud yu hu tugun idan kamengipappanggulun hi-gayu niya lispituh yudda, tep daka ipapaptek hu panyaggudan ni yuka pengullug. Ipahding yu huyya tep hakey alin aggew ey mahapul ni e-helen dan Apu Dios hedin impahding da ngunun indinel tun hi-gada. Kayyaggud hedin u-unnuden yudda ma-lat umamleng idad ngunu da, tep hedin eleg yudda u-unnuda, ey umhigaddan mangngunnu et beken ni panyaggudan yu hu pambalanan tu.

<sup>18</sup> Kaegiegi, idasali dakemi tep inamta mi e kayyaggud hu impenahding mi, tep emin hu pinhed min pehding ey yadda etan kametbal ni kapehding. <sup>19</sup> Ey nakka kekdewan hi-gayun idasali yuwak dama ma-lat anggegannuy pambanggad tuwak Apu Dios di kad-an yu.

*Ya dasal etan ni nantudek*

<sup>20</sup> Hi Apu Dios e kakelpuin emin ni linggep hu nenagun Jesus e Ap-apu tayu e kamedeyyaw ni kamengippaptek ni hi-gatsun kamengullug e kamei-ellig ni kalneroh tu. Ya ineyuhan ni kuheyaw tun nengiketeyan tun liwat tayu hu inamnuan ni kamannananeng ni nekitbalan Apu Dios ni panyaggudan tayu. <sup>21</sup> Et mukun ya nakka iddasal ey pinhed kun iddawat tun hi-gayun emin hu kabaelan ni mahapul yu ma-lat wada inna-nu yun mengippahding ni pinhed tun kamengippeamleng ni hi-gatu tep ya baddang nan Jesus Christo. Ey pinhed kun hi-gatu hu medeyyaw ni ingganah. Amen.

*Ya nanggillig ni neitudek*

<sup>22</sup> Kaegiegi, anusi yu anhan ni dedngelan eyadda nakka e-e-hela, yaggud beken ni andukkey huyyan tudek ku. <sup>23</sup> Pinhed kun peamtan hi-gayun neibukyat law hi agi tayun hi Timothy di kallabbutan. Hedin umdateng alidyan dagah, man ikkuyug ku lan elliak ditan.

<sup>24</sup> Ehel yuddan emin ni kamengipappanggulun hi-gayu niyadda etan tuun Apu Dios ditan e midda kanenemnema. Ey kan ida daman agi tayun nalpud Italy ey dakeyu kunu kanenemneman hi-gada.

<sup>25</sup> Pinhed kun meweddan hi-gayun emin hu binabbal nan Apu Dios. Amen.

## Ya Intudek James

<sup>1</sup> Huyyan tudek ey nalpun hi-gak e hi James e bega-en Apu Dios nan hi Jesus Christo e Apu tayu. Nakka pan-ittudek huyyan tudek ni hi-gayun emin ni kamengullug nan Jesus ni neihiliti di kebebbley. Dakeyu kanenemneman emin.

*Ya tayu kapanliligasi hu kamengihhammad ni tayu kapengullug*

<sup>2</sup> Hi-gayuddan agik ni kamengullug, ey hedin yuka panlelehmani hu hipan ligat yu, man pan-am-amleng kayu. <sup>3</sup> Tep inamta tayu, e ya ligat hu kamengihhammad ni tayu kapengullug nan Jesus, et anin ni hipa mekapkapy e mannananeng itsun mengu-unnud ni hi-gatu. <sup>4</sup> Et humman hu, mahapul ni ennsan tayu hipan ligat ma-lat maihammad hu tayu kapengullug nan Jesus et endi pangkullangan ni kakinayyaggud tayu.

<sup>5</sup> Nem hedin wadan hi-gayu hu eleg tu amta hu pehding tun mengu-unnud nan Apu Dios, ey dammutun mandasal ni hi-gatu et baddangan tu. Tep hi Apu Dios ey madewat et man-am-amleng ni umbaddang niya mengidwat ni panyaggudan ni emin ni tuu. <sup>6</sup> Nem hedin mandasal kayu, ey entan pandewadewa, nem kulug yu e iddawat Apu Dios niya pehding tu hu yuka ibbaga. Tep ya etan tuun kamandewadewa ey henin dalluyun di baybay e kamanbinbinangngad e kamei-unnunndi di kalawwin dibdib. <sup>7-8</sup> Ey naka-ihlan peteg hedin ya humman ni tuu ey tuka nemnemnema e iddawat Apu Dios hu tuka ibbaga.

*Ya elaw ni u-unnuden idan newetwet niyadda kedangyan*

<sup>9</sup> Pan-am-amleng kayun newetwet ni kamengullug nan Jesus, tep eta-gey kapengibbillang Apu Dios ni hi-gayu. <sup>10</sup> Ey hi-gayun kedangyan, pan-am-amleng kayun nengipebahahan Apu Dios ni hi-gayu, et yan nunya law ey dakeyu katettebala gapuh ni yuka pengullug. Tep anin ni kedangyan et kamettye, e henin habung ni helek e hedin nakpit, man kame-gah. <sup>11</sup> Ya habung ni helek ey eleg mannananeng ni kayyaggud ni ingganah hu ang-ang tu, tep hedin pimmetang ni na-let ey kamekling ni naplag et lawah law hu ang-ang tu. Henin etan ni kedangyan e ikkatey tu pehding tun mengdum ni kinedangyan tu, nem hakey alin aggew et endi silbitu hu kinedangyang tu, tep eleg mabalin ni tu ittabin di lawwan tu hedin mettey.

*Ya elaw ni kakepatnai niya kakehe-uli*

<sup>12</sup> Ya tuun nanengtun nehammad hu tuka pengullug, anin ni kamanligligat, ey iddawtan Apu Dios ni panyaggudan tu e humman hu biyag ni endi pappeg tu, tep humman impakulug Apu Dios ni iddawat tuudan tuun neminshed ni hi-gatu.

<sup>13</sup> Ey hedin wadan hi-gayu hu mehe-ul ni mengippahding ni lawah, ey entan tu ipenuyun Apu Dios. Tep hi Apu Dios ey eleg tu pinhed hu lawah, et eleg mabalin ni hi-gatu mene-ul ni hi-gayun mengippahding ni lawah. <sup>14</sup> Ya kaumhulun ni kakehe-ulin tuu ey ya neminshed tun mengu-unnud ni lawah ni wadad nemnem tu. <sup>15</sup> Et hedin u-unnuden hu lawah ni wadad nemnem, ey manliwwat ita, et ya pambalanan ni nengipeinaman tun mengippahding ni lawah ey ketteyyan tu et meiddawwin Apu Dios.

<sup>16</sup> Et humman hu, hi-gayuddan agik ni kamengullug, ey helipati yu ma-lat eleg kayu maheul. Tep hi Apu Dios ey eleg tu he-ula tutu-u ma-lat ipahding da hu lawah. <sup>17</sup> Beken, tep emin hu kamelpun Apu Dios di kabunyan ey kayyaggud niya endi kulang tu. Hi-gatu nengapyan aggew, ya bulan niyadda bittuwen. Hin-addum ni nelumman hu ang-ang da, nem hi Apu Dios ey eleg melumman. <sup>18</sup> Ey hi-gatsun kamengullug hu impambalin tun keta-ta-geyyan di emin ni lintu tu, tep imbilang daitsun u-ungnga tu eman ni nengulugan tayun makulug ni kameituttuddu, tep humman dedan hu pinhed tun pehding.

*Ya pengu-unnudan tayun ehel Apu Dios*

<sup>19</sup> Hi-gayuddan agik ni kamengullug, dengal yu eya e-helen ku. Ililingisi tayun mengngel ni kayyaggud, beken ni tayu lellelgemen ni umhapit, niya entan pengimbubunget. <sup>20</sup> Tep endi ibbaddang ni bunget di pengippahdingan ni pinhed Apu Dios. <sup>21</sup> Et humman hu, mahapul ni e-kalen yun emin hu hipan lawah ni wadad nemnem yu niya isiked yun mengippahding idan lawah. Ey mahapul ni mampekumbabah kayu et ya ehel Apu Dios ni kinulug yu hu u-unnuden yu e humman hu menellaknib ni hi-gayu.

<sup>22</sup> Ya ehel Apu Dios ey mahapul ni unnuden yu, beken ni yu deddengngelen ni ebuh. Tep hedin eleg yu u-unnuda, man ya ngu annel yu hu yuka he-ula. <sup>23-24</sup> Tep ya tuun tuka deddedngelan ebuh yu ehel Apu Dios, nem eleg tu u-unnuda ey heni etan ni tuun

nandiggal et paka-ang-angen tu angh tu, et hi-yanen tu etan diggal, ey nekemtang ey liniwwan tu ang-ang tu. <sup>25</sup> Nem ya tuun kameihaha-ad di nemnem tu hu Tugun Apu Dios et tuka pannananeng ni u-unnuden ey panyaggud Apu Dios di hipan pehding tu. Tep ya etan tuun kamengu-unnud nunman ni Tugun ey mebaddangan ma-lat eleg manliwaliwat.

<sup>26</sup> Ya etan tuun kamenghel ni kantuy kamengullug, nem lawah hu tuka e-e-hela, ey nehaul humman ni tuu. Endi silbin tuka pengullug. <sup>27</sup> Ya makulug ni kamengullug nan Apu Dios ey tuka baddangidda nebalun bibi-i niyadda etan nepu-hig ni u-ungngad ligat da niya eleg tu iu-unnud di lawah ni elaw idan eleg mengullug nan Jesus.

## 2

### *Pan-iingeh tayu hu pengibbillang tayun edum tayun tuu*

<sup>1</sup> Hi-gayuddan agik ni kamengullug, lawah hedín tayu ittuppug idan kedangyan hu panlispituh yu et eleg yudda lispituha hu newetwet, tep beken humman ni elaw ni kamengullug nan Jesus Christo e kamedeyyaw. <sup>2-3</sup> Henid yuka keemmuemmungid yuka penaydayawin Apu Dios e hedín kedangyan etan tuun immali e kayyaggud balwasi tu niya nanhubeng, ey ma-nun hi-gatu, tep yu peyuddung di kakkayyaggud ni yuddunggan et diman etan newetwet ni nebi-bi-ki balwasi tu et man-eh-ehng winu yu peyuddung di det-al. <sup>4</sup> Nalpu lawah ni nemnem yu hu yuka pengibbillangin kanyuy kakkayyaggud ida hu kedangyan nem yadda newetwet.

<sup>5</sup> Hi-gayuddan agik ni nakappinshed ku, dengel yu eya e-helen ku. Makulug ni yadda nangkewetwet hu daddakkel ni pinilin Apu Dios ni mengullug ni hi-gatu, et hi-gada hu imbilang tun kedangyan gapuh ni daka pengullug et hi-gadalli anhan law hu mekihha-ad ni hi-gatu, tep huuya impakulug tuddan tuun neminshed ni hi-gatu. <sup>6</sup> Ey kele endi lispituh yuddan nangkewetwet? Kaw beken ni yadda kedangyan hu kamengippeliligat ni hi-gayu e anin ekket et dakeyu iddiklamuh? <sup>7</sup> Kaw beken ni hi-gada kamemihhupihhul nan Apu Jesus Christo, e nalpuan ni ngadan tayun Christiano?

<sup>8</sup> Ya keim-importantehan ni tugun Apu Dios ni neitudek ey kantuy “Ya peminshed yun edum yun tuu ey henin peminshed yun annel yu.” Et kayyaggud hedín humman hu yuka u-unnuda. <sup>9</sup> Nem hedín eleg yu pan-iingneh hu impeminshed yud edum yun tuu, ey manliwat kayu, tep eleg yu u-unnuda humman ni tugun Apu Dios. <sup>10</sup> Tep ya tuun tuka peka-u-unnuda hu Tugun Apu Dios, nem wada hakey ni eleg tu u-unnuda, ey nanliwat damengu, heni etan ni tuun endi tu inu-unnud ni Tugun Apu Dios. <sup>11</sup> Heni mewan etan ni tuun ma-nut eleg tu iulig hu beken tu ahwa, nem pimmatey e neliwtan damengu, tep ma-nut inu-unnud tu hu tugun Apu Dios ni kantuy entan tu iulig hu beken mu ahwa, nem kinehing tu etan hakey ni tugun ni kantuy entan patey.

<sup>12</sup> Hi Apu Dios ey kaumbaddang ma-lat eleg itu manliwaliwat et peamleng tayu. Et humman hu, nemnem yu hu pinhed Apu Dios ni han kayu himmapit winu han yu impahding hu pehding yu, ma-lat emin hu pehding yu ey mei-unnud di pinhed tu, tep hakey alin aggew et huwetan daitun hi-gatud impahpahding tayu. <sup>13</sup> Tep ya tuun eleg tu hehmeke edum tun tuu ey eleg damalli hehmeke Apu Dios ni kehuwetan tu. Nem ya etan tuun tuka hehmeke edum tun tuu ey eleg ali umtakut ni penuwetan Apu Dios.

### *Ya elaw ni kapengullug niya kayyaggud ni kapehding*

<sup>14</sup> Hi-gayuddan agik, hedín wada tuun kantuy kamengullug nan Jesus, nem endi pengi-ang-angan ni nengulugan tu, ey endi silbi tun tuka penghelin nunman, tep beken ni ya penghelan tun ebuh ni tuka pengullug hu pengebbulutan Apu Dios ni hi-gatu. <sup>15</sup> Hedín wada agi yun kamengullug ni kamanheppul ni balwasi niya kennen, <sup>16</sup> kaw kanyun ebuh ey “Anemut ka, ey entan tu pannenemnem huttan ni mahapul mu. Ngenamung hi Apu Dios ni mengidwat.” Beken ni hannaman, tep endi silbin nunman ni kayyaggud ni inel yu, hedín endi yu iddawat ni hi-gatu. <sup>17</sup> Heni daman kapengullug, e anin ni kanyuy kayu kamengullug, nem endi yuka pehding ni pengippeang-angan yun yuka pengullugin Apu Dios, et endi silbin nunman ni kanyuy kayu kamengullug.

<sup>18</sup> Nem wadan penghel ni edum ni tuu mewan ey “Yadda edum ey daka ilillingisi pengullugan dan Apu Dios. Nem yadda edum ey pinhed dan umbaddang ni edum dan tuu.” Nem e-helen kun hi-gayu e kulang hedín ya kapengullug ni ebuh hu wadan hi-gayu, tep inna-nun keamtaan tun kayu kamengullug hedín endi yu ippahding ni keang-angan ni yuka pengullug? Et mukun hedín hi-gak ngu, man nakka baddangidda edum kun tuu ma-lat keang-angan tu e nakka mengullug nan Apu Dios.

<sup>19</sup> Ma-nu tep inamta e humman idan tuu ey daka kulluga e hakey ni ebuh hu Dios, et kayyaggud humman. Nem kulang hedín ebuh humman ni daka kulluga, tep anin idan kameihhuklung ni dimonyoh, et daka kulluga e hakey ni ebuh hu Dios niya inamta da

e wada lebbeng tun mengastigun hi-gada, et humman hu, ida kaumgeygey ni takut da.<sup>20</sup> Hi-gayun endi nemnem tu, kaw eleg yu amta e endi silbin kapengullug hedin eleg ippahding hu pinhed Apu Dios ni pehding? Ey endi silbitu hedin endi kayyaggud ni ippahding ni keang-angan tu.

<sup>21</sup> Kaw eleg yu hannemnem hi Abraham e nahlagan tayu? Hi Abraham ey imbilang Apu Dios ni kayyaggud tep inu-unnud tu inhel Apu Dios ni hi-gatu et i-appit tu- et hi Isaac e u-ungnga tu. <sup>22</sup> Huyyan impahding Abraham hu keang-angan tun ya kayyaggud ni kaippahding hu kakeang-angin kapengullug. Et humman hu, ya nengu-unnudan tun inhel Apu Dios hu nengipehammad ni tuka pengullug. <sup>23</sup> Huyyan impahding Abraham hu inamnuan ni impatudek Apu Dios ni kantuy "Kinulug Abraham hu inhel Apu Dios, et humman nengibilangan Apu Dios ni hi-gatun kayyaggud." \* Humman gaputun kan Apu Dios ey gayyum tu hi Abraham.

<sup>24</sup> Et humman hu, kameewwasi e ya kapengibbillangin Apu Dios ni kayyaggud hu hakey ni tuu ey beken ni ya kapengullug ni ebuh, nem mahapul ni u-unnuden tu dama hu pinhed Apu Dios. †

<sup>25</sup> Hanniman dama hi Rahab e impeang-ang tun wada tuka pengullug di impahding tu. Yan nunman ey tuka pebeyyad hu annel tun laki, nem imbilang Apu Dios ni kayyaggud tep ya impahding tu e intalu tudda etan tuun Apu Dios et itudu tu hu dillan dan binsikan da et eleg ida madpap.

<sup>26</sup> Mukun ya etan tuun kamenghel ni wada tuka pengullug, nem endi kayyaggud ni tuka pehding, ey heni netey e wada annel tu, nem endi yayyah tu.

### 3

#### *Ya kamelpud bungut tayu*

<sup>1</sup> Hi-gayuddan agik, ang-ang yu et beken kumamman ni dakel ni hi-gayu hu mambalin ni mantuttuddun meippanggep nan Apu Dios, tep inamta yu e nemahhig hu penuwet tuddan kamantuttuddu nem yadda kametuttuddui.

<sup>2</sup> Hi-gatsun tuu ey wadan wada tayu kakeihhallai. Nem hedin wada tuun hangkekken-neng tu hu bungut tu et endi meihlan e-helen tu ey dammutu daman hangkekken-neng tun emin hu pehpehding tu. <sup>3</sup> Henin kebayyu e hedin ihha-ad gumek ni kapekemmal di bungut tu, et anin attu pengippelawwan etan ni nantakkay et tuka u-unnuda, tep ya etan gumek ni neiha-ad di bungut tu. <sup>4</sup> Ya pay hu hakey ni kakei-elligin bungut ey ya etan ek-eket ni gumek di gepgep ni bapor e anin et-eteng etan bapor niya anin na-let hu dibdib et dammutun bengngiwen etan ni kamampellinu et palaw tud pinhed tun pengippelawwan. <sup>5</sup> Ya bungut ni tuu ey ek-eket, nem nemahhig kabaelan tu, henin emsi, e dammutun lelgaben tu hakey ni duntug. <sup>6</sup> Makulug ni ya bungut tayu ey heni kaumhihinyab ni apuy ni memahbah ni hi-gatsu, tep kakelpuin dakel ni lawah ni ehel. Ya lawah ni kae-helan bungut ni kaumbahbah ey nalpun Satanas. Et huyya tayu kapanligligasi eyan ketaggu tayu.

<sup>7</sup> Ya tuu ey dammutun eyyumen tu nambakbaklang ni animal, yadda sisit, yadda kaumbuluh niyadda wadad baybay, henin deleg, niyadda edum ni klasih ni animal. <sup>8</sup> Nem endi tuun hankekken-neng tu bungut tu. Ya bungut ey kakelpuin lawah ni kaumbahbah e heni kedet ni kaupatey. <sup>9</sup> Tayu kaussala bungut tayun penaydayaw tayun Ametayu e hi Apu Dios, nem tayu mewan kaussalan menghel ni lawah meippanggep ni edum tayun tuun lintu tun henin hi-gatu. <sup>10</sup> Hi-gayuddan agik, lawah hedin ussalen tayu hu bungut tayun penaydayaw tayun Apu Dios, ey ussalen tayu mewan ni menghel ni lawah meippanggep ni edum tayun tu. Hi-gayuddan agik, etan tu ipahding hu hanniman, tep beken huyyan elaw ni pinhed Apu Dios. <sup>11-12</sup> Et humman hu, ebuh ida etan kayyaggud ni e-helen tayu e beken ida etan lawah ni umbahbah ni edum ni tuu. Henin hebwak, e hedin kayyaggud etan danum ni kaum-utbul diman, man kayyaggud ngu dedan e beken ni hin-addum ni nebangtut. Ey henin fig e eleg umlameh ni olibah, winu ya grapes e eleg umlameh ni fig.

#### *Ya kalinaing ey kamelpun Apu Dios*

<sup>13</sup> Hedin makulug ni nelaing kayu niya nenemneman kayu ey mahapul ni pebahah yu annel yu niya ipahding yu kayyaggud, tep henin nunman hu elaw ni tuun nenemneman. <sup>14</sup> Nem hedin kayu kaman-in-aameh, niya ebuh hu annel yu yuka nenemnema, man entan tu ipahhiyyan kanyuy nenemneman kayu, tep beken ni henin nunman hu elaw ni nenemneman. <sup>15</sup> Beken ni henin nunman hu kaibbilang Apu Dios ni nenemneman, tep ya henin nunman ni elaw ey henin elaw ni eleg mengullug nan Jesus e humman

\* 2:23 2:23 Genesis 15:6 † 2:24 2:24 [21-24] Genesis 22:15-16

ey nalpun dimonyoh. <sup>16</sup> Yadda etan tuun kaman-in-aameh niya ebuh annel dan daka nenemnema ey endi linggeh di nemnem da niya lawah hu pehpehding da.

<sup>17</sup> Nem ya tuun kaibbilang Apu Dios ni nenemneman ey ebuh hu kayyaggud ni wadam nemnem tu, endi lawah. Tuka paka-ippaptek hu pan-aagian, kabbabbal, eleg tu pepillit hu pinhed tu, mahmek, nan-iingneh tuka pengibbilang ni emin ni tuu, eleg man-ittek niya tuka pehding hu panyaggudan ni edum tun tuu. <sup>18</sup> Ya pambalanan ni kapehding ni tuun tuka ilillingisi ma-lat melinggep hu biyag ni edum tun tuu ey ya kayyaggud ni padadagyuman da. \* Ya kei-elligan tu huyya ey kayyaggud hu ineni tu tep kayyaggud hu intanem tun bukel.

## 4

### *Ya pekiddagyuman idan kamengullug nan Apu Dios*

<sup>1</sup> Ya kaumhulun ni yuka panhahallai ey tep angebe-hel yu edum yu, et kayu kamantututut tep ya lawah ni kamelpud nemnem yu. Wada hakkey ni hi-gayu ey ya pinhed tun lawah hu tuka nenemneman ebuh ni ippahding. <sup>2</sup> Ey ya lawah hu yuka gagamgami, ey hedin eleg yu han-ipahding humman, man pinhed yun umpatey. Pinhed yun umpiliw ni kukuwah ni edum yun tuu, nem hedin eleg yu hanpiliw, man kayu kamekidpap. Ey emin hu pinhed yun ellan ey eleg yu han-ala, tep eleg yu ibbagan Apu Dios. <sup>3</sup> Nem anin ni ibbageyun Apu Dios et eleg tu iddawet, tep hedin ellan yu, man lawah hu yuka nenemneman pengi-ussalan yu ni ya pan-an-anlaan yun ebuh pinhed yu.

<sup>4</sup> Lawah kayu, tep eleg yu ipahding hu insapatah yun Apu Dios e kanyuy hi-gatu u-unnuden yu. Kaw eleg yu amta e hedin u-unnuden yu lawah idan elaw ni eleg mengullug, man mambalin kayun buhul Apu Dios? Et humman hu, emin ida tuun pinhed dan iu-unnud di lawah ni elaw ni eleg mengullug ey iggeb-at dan mekibbuhul nan Apu Dios. <sup>5</sup> Kaw kanyu nem endi silbin etan ni ehel Apu Dios ni impatudek tun kantuy "Ya Ispirituh kun wadan hi-gayu ey pinhed tun hi-gak hu pannananeng yun pinheden, beken ni yadda linggeman ni lawah." <sup>6</sup> Hi Apu Dios ey tudda kabaddangi tuun neminhed ni hi-gatu ma-lat beken ni ya lawah hu pehpehding da. Impatudek Apu Dios hu meippanggep nunya e kantuy "Kastiguen Apu Dios hu tuun kamampahhiya, nem kabbabbal ni tuun tuka pebah annel tu." \*

<sup>7</sup> Et humman hu, mahapul ni u-unnud yu hi Apu Dios ma-lat eleg yu ipahding hu lawah. Entan tu u-unnud hu pinhed Satanas hedin tuka ipatpatnan menuttullun ni hi-gayun mengippahding ni lawah, nem kahing yu et uma-allaw kaya. <sup>8</sup> Ihammad yu pekiddagyuman yun Apu Dios et kayyaggud dama pekiddagyuman tun hi-gayu. † Hi-gayuddan kamanliwwaliwwat, ey isiked yudda lawah ni yuka pehpehding. Ey hi-gayuddan endi petek tu hu tuka u-unnuda, heballi hi Apu Dios hu u-unud yu. <sup>9</sup> Lemyung kayu niya pantuttuyyu kayud nanliwatan yu et beken ni ya am-amleng hu pehpehding yu. <sup>10</sup> Pebabah yu annel yud hinanggan Apu Dios ma-lat peta-gey dakeyun hi-gatu niya tettebalen dakeyu.

### *Ya eleg tayu pemihhulin edum tayun tuu*

<sup>11</sup> Hi-gayuddan agik ni kamengullug, entan tu pihul niya entan tu ehel hu lawah meippanggep ni edum yu. Tep hedin pihhulen yu edum yu, man pinihul yu hu Tugun Apu Dios, tep kantuy mahapul ni man-impipinhed itu. Ey hedin pihhulen yu Tugun Apu Dios, humman keang-angan tun eleg kayu mengu-unnud, tep impambalin yun neihalla hu Tugun tu. <sup>12</sup> Hi Apu Dios e nalpuan ni Tugun hu wada kelebangan tun menuwet ni tuu. Hi-gatun ebuh hu wada kabaalan tun menellaknib niya hi-gatun ebuh hu wada lebbeng tun mengastigu. Et humman hu, beken ni hi-gatsu hu menuwet ni edum tayun tuu.

### *Entan tu ippahhiya hu hipan yuka nemnemneman pehding yullin hakey ni aggew*

<sup>13</sup> Dengel yuwak e hi-gayuddan kantuy "Umlaw kamin nunya, winu kabbuhhan di edum ni bebley et manha-ad kamidman ni hantoon et manggatang kami et dumakkel pihhuh mi." <sup>14</sup> Kaw inamta yu hedin hipa mekapkapyallin kabbuhhan winu edum alin aggew? Eleg yu amta. Tep ya biyag tayu ey heni be-haw, e wadan nunya, nem mekemkemtang ey attukaw la. <sup>15</sup> Ya kumaddan hu kayyaggud ey kantayuy "Hi Apu Dios hu ngenamung hedin i-abulut tun ippahding ku diyyay winu ya dimmun." <sup>16</sup> Nem kayu kamampahhiya, tep et-eteng dinel yud annel yu e beken nan Apu Dios. Ey lawah humman ni ippahding yu.

\* 3:18 3:18 Romans 12:18 \* 4:6 4:6 Proverbs 3:34 † 4:8 4:8 Kantud Greek ey "Hayukup kayud kad-an Apu Dios et humeyukup damad kad-an yu."



<sup>17</sup> Et humman hu, ya etan tuun inamta tu kayyaggud, nem eleg tu ippahding, ey nanliwat nan Apu Dios.

## 5

### *Ya meittugun idan kekeddangyan*

<sup>1</sup> Hi-gayudda daman kedangyan, dengel yu eya e-helen ku. Nemnemnem yu e hakey alin aggew et umnanginangih kayullin ligat yu, tep kastiguen dakeyullin Apu Dios gapuh ni liwat yu. <sup>2</sup> Endi silbin kinedangyan yu tep metellak ali. Hanniman idallin balwasi yun dakel, tep medunnut et kennen idallin tubbaybay. <sup>3</sup> Mebahbah ali balitik yu niya pihuh yu, et ya kebabahan da hu pengi-immaturan ni kastigu yu. Kastiguen dakeyullin Apu Dios tep nekuliput kayu niya intaggan yu amung ni kinedangyan yun nunya e kamangkedettengi hu kehuwetan tayun tuu. <sup>4</sup> Inamtan Apu Dios e ya ingkedangyan yu ey yadda etan eleg yu idwat ni tangdan idan impangngunu yud payew yu. Et deh e ida kamampehemhemmek nan Apu Dios e Kabaelan tun emin. Dingngel tu hu daka pampehemhemmeki et nanna-ud ni baddangan tudda.

<sup>5</sup> Ya pan-an-anlaan yu niya nelam-ay ni biyag yun ebuh hu ninemnem yu, nem eleg yu nemnemen etan aggew ni penuwetan dakeyun Apu Dios. Heni kayu bakan tuka i-anteng ekan ni helek ma-lat tumeba, nem eleg tu amta e kamangkedettengi hu aggew ni kepalsian tu. <sup>6</sup> Ya hakey mewan ni impahding yun lawah ni peteg ey anin endi bahul ni tuu et kanyuy nambahul. Ey pintey yudda edum ni tuun endi katteg kabaelan dan mekihhanggan hi-gayu. Et humman hu, nanna-ud ni mekastigu kayu.

### *Ya pangan-anusan ni kamengullug ni ligat*

<sup>7</sup> Et hi-gayuddan kaegiegi, an-anusi yu ligat yu ingganah alin ellian Jesus. Nemnem yudda kamangge-ud e daka an-anusin hehhegeden hu udan ni pangge-udan da niya daka ennsin hehgeden hu ke-tengan ni pagey et han ida man-ani. <sup>8</sup> Henin nunman kuma et dama hu pangan-anusan yun menehheged ni ellian Apu tayu e hi Jesus. Pekedhel yu nemnem yu niya pengu-unnud kayun hi-gatu, tep kamangkedettengi hu aggew ni pambangngadan tud puyek.

<sup>9</sup> Hi-gayuddan kaegiegi, entan pan-intutumbuk yu ma-lat eleg dakeyu kastiguen Apu Dios, tep kamangkedettengi law hu ellian ni menuwet ni hi-gatsu e hi Jesus Christo.

<sup>10</sup> Hi-gayuddan kaegiegi, nemnem yudda la prophets ni intu-dak Apu Dios ni an mengippeamtan pinhed tu e inan-anusan da ligat da. Hi-gada pengiu-unnudi yun mengan-anus ni yuka panliligasi. <sup>11</sup> Yan nunya ey ida law kaman-am-amleng tep inan-anusan dan impalebah hu ligat da. Hanniman dama hi Job, e nemahhig hu ligat tu, nem inan-anusan tu et yan udih tu ey impeang-ang Apu Dios hu et-eteng ni hemek tu et baddangan tu, tep mahmek niya nakappinhed tudda tuu tu.

<sup>12</sup> Ya hakey ni importanteh ni e-helen kun hi-gayun kaegiegi ey entan pansapatah yud kabunyan winu yad puyek niyad linggeman hedin wada issapatah yu. Nealay kanyuy "em," hedin em, winu "eleg," hedin eleg, ma-lat eleg dakeyu kastiguen Apu Dios.

<sup>13</sup> Hedin wadan hi-gayu hu kameliligasi, mahapul ni mandasal nan Apu Dios. Ey hi-gayun kaman-am-amleng, pan-a-appah kayun kenayun ni keiddeyyawan tu.

<sup>14</sup> Hedin wada edum yun kamandedgeh, ey paeyag tudda etan neputuk ni ap-apu yun kamengullug di baley tu ma-lat idasalan da et duyan dan lana hu annel tun pambeggaan dan baddang Apu Dios. <sup>15</sup> Et hedin yan nunman ni daka pandasali ey medinnel idan Apu Dios ni mengkal ni degeh tu, man me-kal. Ey hedin wada nanliwatan tu, ey pessinsahan Apu Dios.

<sup>16</sup> Et humman hu, ehel yu liwat yuddan edum yun kamengullug niya panhindadasal kayu, ma-lat yumaggud kayu. Ey nemnem yu e kayyaggud ni peteg hu pambalinal ni dasal ni tuun kayyaggud hu tuka pehding. <sup>17</sup> Heni lan Elijah e prophet e hi-gatu ey tuu dama, henin hi-gatsu, nem inhammad tun nandasal nan Apu Dios ma-lat eleg umudan ey eleg tu-wangu umudan ni tellu et kagedwah ni toon. <sup>18</sup> Ey entannit nandasal mewan ma-lat umudan ey tu-wangu e immudan et mategu intanem idan tuu.

<sup>19</sup> Hi-gayun kaegiegin kamengullug, hedin wadan hi-gayu mengiwellak ni tuka pengullug nan Apu Dios, nem wada hakey ni hi-gayun menuggun ni hi-gatu ma-lat mambangngad ni mengu-unnud nan Apu Dios, <sup>20</sup> ey binaddangan tu humman ni tuu et eleg meidawwin Apu Dios ni ingganah. Ey gapuh nunman ni impahding tu ey pessinsahan Apu Dios emin hu liwat nunman ni tuu.

## Ya Nemangulun Tudek Peter

<sup>1</sup> Huyyan tudek ey nalpun hi-gak e hi Peter e hakey ni apostle ni pinutuk Jesus Christo. Nakka pan-ittudek huyyan hi-gayun kamengullug nan Jesus ni nehilit di kebebheley di Pontus, yad Galatia, yad Cappadocia, yad Asia et yad Bitinia. <sup>2</sup> Hi-gayu dedan pinilin Apu Dios e Ametayun tuu tu, tep humman ninemnem tu dedangngun laputu. Et pambalin daitsun Ispirituh tun tutu-un mengu-unnud nan Jesus Christo, tep yan neteyyan tu ey pinesinsahan Apu Dios hu liwat tayu.

Pinhed kun meweddand hi-gayun ingganah hu binabbal niya linggep ni kamelpun Apu Dios.

### *Ya kahinammad ni tayu kapengullug*

<sup>3</sup> Daydayaw tayu hi Apu Dios e Aman Jesus Christo e Apu tayu. Tep et-eteng hemek tun hi-gatsun nenaguan tun Jesus Christo eman ni neteyyan tu et wada law hu baluh ni biyag tayu. Et humman hu, et-eteng law namnamah tayun iddawwat alin Apu Dios ni hi-gatsu etan wadad kabunyan ni iddawwat tuddan tuu tu. <sup>4</sup> Humman ni panyaggudan tayun inhahha-ad tud kabunyan ey eleg mebahbah niya endi tu ketellakan. <sup>5</sup> Ey gapuh ni et-eteng ni kabaelan Apu Dios ey ippaptek dakeyun hi-gatu tep ya yuka pengullug nan Jesus et meihwang kayud hipan lawah ingganah medettengan hu amnuan ni kehelakniban tayullin kepapegan ni puyek.

<sup>6</sup> Et humman hu, pan-am-amleng kayu anin ni wada panligligatan yu eyan nekemtang ni ebuh. <sup>7</sup> Humman ni panligligatan yu ey humman kapematnain Apu Dios ni yuka pengullug ma-lat meamta hedind nehammad winu eleg. Anin ni balituk e kamebahbah, et mahapul ni eyyugen ma-lat memahmah. Et nema-man mahapul ni mepatnaan hu tayu kapengullug e wadwada nem ya balituk. Tep hedind makulug ni nehammad yuka pengullug ey metbal kayulli niya keiddeyyawan yullin pambangngadan mewan nan Jesus Christo. <sup>8-9</sup> Anin ni eleg yu ang-angen hi Jesus Christo et kapyatun et-eteng impemihed yu niya dinel yun hi-gatu. Kayu kaum-amleng ni peteg tep ya nehelakniban yun humman nambalinan ni yuka pengullug. Humman ni et-eteng ni amleng tayun kamengullug ey endi tu kei-inggehan.

<sup>10</sup> Huyyan nehelakniban tayu tep ya binabbal Apu Dios ey impeamta tuddan prophets tun nunman. Et ipatna da kabaelan dan an nengadaadal ni meippanggep nunya, anin ni eleg da ni peka-amtaen hu elaw tu. <sup>11</sup> Impatna dan amtaen hedind pigan tu niya inna-nun keippahdingan tu humman ni kehellakniban, tep impeamtan Ispirituh Christo ni wadand hi-gada hu panelehhahan alin Christo et ya keiddeyyawan tulli. <sup>12</sup> Nem impeamtan Apu Dios idand nunman ni prophets e beken ni yan nunman ni kaweda da hu keippahdingan tu humman ni kehellakniban ni tuun in-inhel da. Et ay yan nunyan kaweda tayu hu inamnuan tu. Et huyyan kayyaggud ni peteg ni neipahding ey impeamtadand kamengittentuddun ehel Apu Dios ni hi-gayu. Kabaelan dan mengippeennamtan nunman, tep kabaddangiddand Ispirituh Apu Dios ni intudak tun an memaddang ni hi-gada. Anin idand anghel et ihik idand mengeddand ni elaw tu huyyan kehellakniban.

### *Mahapul ni meiddeyyaw hi Apu Dios di emin ni kapehpending idand kamengullug*

<sup>13</sup> Et humman hu, idaddand yu nemnem yu, et helipat-and yu, niya kekenneng yu annel yu, ey kadinel kayud binabbal ni peang-ang nan Apu Dios ni hi-gayun ellian nan Jesus Christo mewan. <sup>14</sup> U-unnud yu hi Apu Dios, tep kayu law kameibbillang ni u-ungga tu, et beken ida etan ni lawah ni inenu-unnud yun nunman ni eleg yu ni pengamatan nan Jesus ni u-unnud yu. <sup>15</sup> Mahapul ni kakkayyaggud kayu, tep hi Apu Dios e nemutuk ni hi-gayu ey kakkayyaggud ni peteg. <sup>16</sup> Tep neitudek di ehel Apu Dios e kantuy "Mahapul ni kakkayyaggud kayu, tep hi-gak e hi Apu Dios ey kakkayyagguddak ni peteg."

<sup>17</sup> Nemnemnem yu, tep hi Ameyud kabunyan e yuka pandasali ey endi tuka pengippahhigi, tep limpiyuh tuka penuwet ni tuu. Et humman hu, mahapul ni ya kayyaggud hu pehpending tayu eyan ketaggu yu niya mahapul ni umtakut itsun mengippahding ni eleg tu pinhed, tep heni itu nambawind ebuh eyad puyek. <sup>18</sup> Inamta yu hu elaw ni neneklaan Jesus ni kastigu tayu tep ya lawah ni elaw tayun bineltan tayuddand aammed tayu. Beken ni pihhuh winu balituk e kamebahbah hu neteklaan tu humman, <sup>19</sup> tep ya biyag nan Jesus Christo hu nenekla tun liwat tayun ineyuhan ni kuheyaw tud krus. Heni etan ni kalneroh ni endind hekey ganna tun kamei-appit nan Apu Dios ni pengkalan tun bunget tuddand nangkeliwtan hu elaw ni nengiketeyan Jesus ni liwat tayun tuu. <sup>20</sup> Pinutuk Apu Dios hi Jesus ni mengikkettey ni liwat tayu

et han maweda emin eya wadan nunya. Nem ay yan nunya eyan kamangeddetteng hu kepappegan ni puyek ey immalin memaddang ni hi-gatsun neliwtan. <sup>21</sup> Hi Jesus hu gimmapun wada yuka pengullug nan Apu Dios e nenagun hi-gatun neteyyan tu niya nengidwat ni keiddeyyawan tu. Et humman hu, hi Apu Dios ni ebuh hu kullugen tayu niya hi-gatun ebuh hu kakelpuin namnamah tayu.

<sup>22</sup> Yan nunya law ey yimmaggud elaw yu niya et-eteng law hu impeminhed yun edum yu, tep ya yuka pengu-unnudin kayyaggud ni elaw. Et humman hu, mahapul ni emin kayu ey man-impipinhed kayun peteg. <sup>23</sup> Tep heni kayu neipidwan neingunga et huyyan baluh ni biyag yun endi pappeg tu ey nalpud ehel Apu Dios e wada kabaelan tu niya kamannanang ni ingganah. Ey eleg malpu huyyan biyag di a-ammed yun kamettye. <sup>24</sup> Em, makulug huyya, tep neitudek dedan e kantuy

“Emin tuu ey heni helek e kamekpit ni netey. Ey emin hu kakeiddeyyawin tuu ey heni habung ni helek e hedin nakpit, man endi law, tep kame-gah. <sup>25</sup> Nem ya ehel Apu tayu ey mannananang ni ingganah.”

Huyyan inhel Apu tayun meippanggep ni impeminhed tun hi-gatsun tuun neliwtan ey neituttuddun hi-gayun nunman.

## 2

<sup>1</sup> Et humman hu, ya pehding yu tep ay wada law ni hi-gayu hu baluh ni biyag, ey mahapul ni issiked yun mengapkapyan lawah. Entan panlangkak yu, entan tu hingukkuklugin Jesus, entan tu kaemehi edum yu niya entan tu tenumbuk edum yun tuu. <sup>2</sup> Hapul yu hu impatudek Apu Dios ni ehel tu heni kapeneppulin pakeungngan gelang ni tuka innuma ma-lat maihammad hu yuka pengullug nan Jesus e kamenellaknib ni hi-gatsun neliwtan. <sup>3</sup> Hanniman ipahding yu eyan nengamtaan yu law e et-eteng impeminhed Apu Dios ni hi-gatsun tuu.

<sup>4</sup> Ihammad yu hu yuka pengullug nan Apu Jesus Christo tep hi-gatu hu heni pegnad ni batun kakelpuin biyag \* ni binelaw idan tutu-u. Nem hi-gatu hu pinutuk Apu Dios ni mengi-ehneng ni hi-gatsu, tep hi-gatu kametbal ni peteg. <sup>5</sup> Et hi-gatsu daman wada law baluh ni biyag tu, ey iebulut tayu hu annel tayun heni batun meikkapyad tempol Apu Dios. Pinili daitsun padi tun mengippahding ni pinhed tu e humman ida hu kayyaggud ni pehding tayun heniddan mei-appit ni hi-gatun tuka ebbuluta tep hi Jesus Christo. <sup>6</sup> Kameang-ang huyyad neitudek ni ehel Apu Dios ni kantuy

“Wada etan batun nakka pan-ihha-ad di Zion ni kekakkayyaggudan ni meippegnad. † Ya tuun mengiddinnel nunman ey eleg mantuttuyun nandinelan tun hi-gatu.” ‡ <sup>7</sup> Et hummna hu, hi-gatsun kamengullug ey et-eteng kei-silbian tud biyag tayu. Nem yadda etan eleg mangulug ni hi-gatu ey hi-gada neieligan idan tuun kamemellaw ni baley e heni neitudek e kantuy

“Ya etan batun binelaw idan kamengapyan baley ey humman anhan law hu nambalin ni kehahhammadan ni pengibbehwatan ni baley.”

<sup>8</sup> Kan Apu Dios mewan ey

“Huyyan batu hu kehellapdungan ni tuu et man-egah.” §  
Mehellapdung ida tep eleg da kulluga ehel Apu Dios. Et humman hu, mekastigudda, tep humman dedan kan Apu Dios ni meippahding alin hi-gada.

<sup>9</sup> Nem hi-gatsun kamengullug hu pinilin Apu Dios ni pantu-u tu. Heni itu neikahhakey ni bimmebley, tep hakey hu tayu kau-unnudan Apu tayu. Hi-gatsu law heni padi tun tuka panggunnun mengippeamtan kayyaggud ni impahding tun hi-gatsu. Yan nunman ey heni itu wadad engeenget, tep eleg tayu amta hi Apu Dios. Nem yan nunya ey wada itu law di kawwalwal, tep ingkal tu liwat tayu et pambalin daitsun kakkayyaggud et ayan daitsun pantu-u tu, ma-lat ittuttuddu tayu elaw tu niya amtaen ni katuutuu hu inna-nun tayu nehelakniban di kekastiguan tayu. <sup>10</sup> Yan nunman la ni ey beken itu nin tuun Apu Dios niya eleg tayu inamta hu meippanggep ni hemek tun hi-gatsu. Nem yan nunya law ey tuu daitsun hi-gatu niya inebulut tayu law hu hemek tun hi-gatsu. \*

*Ya pehding idan kamengullug di kad-an idan eleg mengullug*

<sup>11</sup> Hi-gayun kaegiegi, ey e-helen kun hi-gayu e beken anhan ni yadda eya lawah ni pinhed ni annel tayu eyad puyek hu gangaman tayu, tep hi-gatsun tuun Apu Dios ey heni itu nambawin ebuh eyad puyek tep yad kad-an Apu Dios hu panha-adan tayullin ingganah. Tep huyyaddan lawah ni pinpinhed ni annel tayu ey humman ida

\* 2:4 2:4 Hedin hi Jesus Christo ey kameingadnin “pegnad ni batun kakelpuin biyag” tep netagwan et mategu law ni ingganah. † 2:6 2:6 Humman ni batun kan Apu Dios ey hi Jesus Christo. ‡ 2:6 2:6 Isaiah 28:16 § 2:8 2:8

Isaiah 8:14 \* 2:10 2:10 Hosea 1:6 niya verse 9 et ya 2:23

kaumpapakkuk ni pengu-unnudan tayun Jesus. <sup>12</sup> Ya kayyaggud hu peang-ang tayuddan eleg mengullug et anin ni kanday lawah kayu ey lektattuy ang-angen da kaya hu kakinyayyaggud yu et mengullug idan Apu Dios et daydayawen dan ellian tun menuwet ni tutu-u.

<sup>13</sup> U-unnud yudda hu ap-apu yun piniliddan tuun mengipappanggulun bebley. Tep anin hi Apu Dios et pinhed tun wada ap-apud bebley ni mengipappanggulu. U-unnud yu hu patul yu, tep hi-gatu hu ulun bebley. <sup>14</sup> Ey u-unnud yudda dama etan pinili tun man-ap-apun mengastiguddan kamambehhul ni kamengapkapyan lawah, nem kamenettebal idan tuun kayyaggud hu daka pehpehding. <sup>15</sup> Tep ya pinhed Apu Dios ey ya kayyaggud hu pehpehding yu ma-lat masiked hu mapeit ni ehel ni tuun daka pakpakdag ehehel. <sup>16</sup> Beken kayun himbut, tep liblih kayu. Nem beken kayun liblih ni mengapkapyan lawah, nem liblih kayun mengippahding ni pinhed Apu Dios, tep bega-en dakeyun hi-gatu. <sup>17</sup> Lispituh tayun emin tuu niya peang-ang tayu hu neminhed tayuddan edum tayun kamengullug. Takut itsun mengippahding ni eleg pinhed Apu Dios niya lispituh tayu hu ap-apun bebley tayu.

*Ya nengisipelan Jesus ni nanlelehanan tu*

<sup>18</sup> Hi-gayuddan bega-en, ey mahapul ni u-unnuden yu niya lispihuen yudda apu yu. Beken ni ebuh ida etan kabbabbal niya mahmek ni apu yu hu u-unnuden yu niya lispihuen yu, nem anin idan mangkabunget ni apu yu. <sup>19</sup> Tep ya tuun tuka issipel hu ligat tu tep ya tuka pengu-unnudin Apu Dios ey kametbal. <sup>20</sup> Nem ya tuun panlelehanan tu kastigu tu gapuh ni bahul tu ey eleg metbal, anin ni issipel tu. Nem ya tuun tuka panlelehanan ligat tud tuka pengipahdingin kayyaggud, nem tuka ennusi, ey hi-gatu tettebalen Apu Dios. <sup>21</sup> Tep ya tayu kapanlelehanan kamengullug ey pinhed Apu Dios ni issipel tayu. Iu-unnud tayun Jesus Christo e nanhelheltap ni panyaggudan tayu. <sup>22</sup> Nem eleg manliwat niya eleg man-itek, nem nanlelehanan tu. <sup>23</sup> Anin ni nampel-itan da et eleg tu humangen ni lawah. Impanhelheltap da, nem eleg tu ipatnan ibbaleh, tep indinel tun emin hu neipahding ni hi-gatu nan Apu Dios e limpiyuh hu tuka panhuwet. <sup>24</sup> Ingkatey tud krus hu neneklaan tun liwat tayu ma-lat beken ni ya lawah hu tayu pehpehding, nem yadda law hu kakkayyaggud ni ebuh. Humman ni nanlelehanan tu niya neteyyan tud krus hu neneklaan tun liwat tayu. <sup>25</sup> Yan nunman lani ey heni kayu netalak ni kalneroh ni hini-yan ni kamampattul. Nem ay yan nunya ey nambangngad kayud kad-an Jesus e kamengippaptek ni tuu tu.

### 3

*Yahhuy ida meittuggun idan laki niya biin nampengahwa*

<sup>1-2</sup> Hi-gayuddan biin nampengahwa ey mahapul ni u-unnuden yun emin hu pinhed ni ahwa yu, tep lebbung tun ya laki hu meunnud. Huyya ipahding yu ma-lat hedin eleg mengullug ni kameituttuddun impahding Jesus ni kehellakniban ni tuu ey dammutun mengullug hedin ang-angen tu e kayyaggud elaw yu. Anin ni eleg yu e-helan ahwa yu hu pengullugan tu, et mengu-unnud dama hedin tuka ang-ang-anga hu kayyaggud ni elaw ni yuka pengu-unnudin Apu Dios. <sup>3</sup> Entan tu pemahhig ni iyenayyaggud hu ang-ang ni annel yud nambakbaklang ni yuka ippenahding ni bewek yu, yad yuka pengihukklubin nangkenginan balwasi yu niya balituk ni gamgam yu. <sup>4</sup> Tep ya kaibbilang Apu Dios ni nebalol ey ya kakinyayyaggud ni nemnem, ya binabbal, niya ingkatuun tuu, tep huyyadda hu heni hubeng ni eleg melumman.

<sup>5</sup> Henin nunman elaw ida eman ni bibi-in kamekangngu-unnud niya kamengiddinnel nan Apu Dios ni nunman. Humman idan bibi-i ey neka-u-unnud da pinhed ni ahwa da, et humman ni impahding da hu kan Apu Dios ni kakinat-agu da. <sup>6</sup> Hanniman dama hi Sarah e imbilang nan Apu Dios ni kat-agu tep ya tuka pengu-unnudin ahwa tun hi Abraham niya imbilang tun apu tu. Et humman hu, meibbilang kayun u-unggan Sarah hedid kayyaggud hu yuka pehding niya endi tekkutan yun pengibbungngetan dakeyun ahwa yu.

<sup>7</sup> Hi-gayudda daman lakin nampengahwa ey mahapul ni ewwatan yu e yadda bii ey kulang elet da, nem anin hi-gada et meidwatan idan biyag ni endi pappeg tun kamelpun Apu Dios. Et humman hu, ya kayyaggud ey kabbabbal kayun hi-gada ma-lat endi an umpapakkuk di dasal yun dewwa hedid mandasal kayu.

*Ya kayyaggud hu pameleh tayun hipan lawah ni pehding ni edum ni tuun hi-gatsu*

<sup>8</sup> Ya edum ni pinhed kun e-helen ni hi-gayun kamengullug nan Jesus, ey pandadagyum kayu, pan-impipinhed kayu, ey pan-inhehmek kayu niya entan pampahhiyya yu. <sup>9</sup> Anin ni wada pehding dan hi-gayun lawah niya pel-itan dakeyue et entan tu ibleh. Ya

kayyaggud ni emin hu peang-ang yu, anin lawah daka pehpehding ni hi-gayu, tep hi-gayu hu pinilin Apu Dios ni mengippeang-ang ni kayyaggud. Et hakey alin aggew ey iddawtan dakeyun Apu Dios ni panyaggudan yu. <sup>10</sup> Tep wada etan impatudek Apu Dios di ehel tun kantuy

“Ya tuun pinhed tun iddawtan Apu Dios ni panyaggudan tu, ey mahapul ni eleg um-ihepihetit ni lawah di edum tun tuu niya eleg um-iteitek. <sup>11</sup> Mahapul ni ebuh hu kayyaggud ni pehpehding tu, et beken ida etan ni lawah, niya mahapul daman ya linggepan tayun tuu hu ililingitan tu. <sup>12</sup> Tep hi Apu Dios ey tuka ipapaptek ida etan tuun kakkayyaggud elaw da niya tuka ebbuluta hu daka ibbagad dasal da.

Nem yadda etan tuun lawah elaw da ey tudda kaibbunget.” \*

<sup>13</sup> Endi tuun tu bellawen ida etan tuun kamengippahding ni panyaggudan, tep kaw wada tuun eleg tu pinhed hu panyaggudan tu? <sup>14</sup> Nem hedin kantu et manhelheltap kayun yuka pengippenahdingin kakkayyaggud, ey pan-am-amleng kayu tep bendisyonan dakeyullin Apu Dios. Entan takut yu niya entan pandanag yu. <sup>15</sup> Hi Jesus Christo hu idinel yu niya nemnemem yu, tep hi-gatu hu Apu tayu et hi-gatu u-unnuden tayu. Pandaddan kayun kenayun ma-lat amta yu penummang yudda etan ni kamengibbegan gaputun yu nengulugan Jesus et ya gaputun yuka penehhegedin ellian tu mewan di puyek. <sup>16</sup> Nem ya elaw ni penummang yu ey mahapul ni nelispituh kayu niya kabbabbal kayu. Peang-ang yu hu kakinayyaggud ni nemnem yud yuka pehpehding ma-lat bumeing ida kaya etan kamemihhul ni hi-gayu tep ya yuka pengu-unnudin kayyaggud ni elaw Jesus.

<sup>17</sup> Tep kudukdul hu an panlelehhanan tep ya kapengippahdingin kayyaggud hedin humman pinhed Apu Dios, nem ya an panlelehhanan tep ya kapengippahdingin lawah. <sup>18</sup> Henin Jesus e endin hekey hu liwat tu, nem himmek daitsun tuun neliwtan et iketey tu hu liwat tayu ma-lat wada inna-nu tun pengebbulutan daitsun Apu Dios. Ey hiyya humman ni pinhakkey ni nengiketeyan tun liwat tayu. Em netey, nem netagwan mewan. <sup>19</sup> Yan eman ni neteyyan tu, ey linnawetud kad-an ida etan ni neikelabut ni linnawaddan nangketey, et tu ehlen ni hi-gada e hi-gatu hu Ap-apun emin. <sup>20</sup> Humman ida etan linnawadda eman ni tuun eleg mangulug Apu Dios eman ni kawedan Noah, nem inan-anusan tudda ingganah ginibbuh tun kinapya etan bapor. Ginibbuh Noah humman ni bapor ey nalbengan ni emin bebley, ey ebuh ida walun tuun netagu, tep himmegep idad bapor. <sup>21</sup> Huyya kei-elligan tu hu elaw ni benyag. Tep ya benyag ey beken ni an pengullah ni lugit di annel, nem humman keang-angan tun impakulug tayu law nan Apu Dios e hi-gatu hu u-unnuden tayu. Tep ya benyag hu pengippeang-angan ni tuun nehelakniban tud liwat tu tep ya tuka pengullug nan hi Jesus Christo, e netey, nem netagwan ma-lat wada inna-nun kehellakniban ni tuud liwat da. <sup>22</sup> Yan nunya ey wada law di kad-an Apu Dios di kabunyan e hi-gatu neihayned nan Apu Dios ni Ap-apu. Hi-gatu hu Ap-apuddan anghel et yaddan emin etan wadad puyek niyad kabunyan ni wada kabaelan tu.

## 4

*Ya tuun kamengullug nan Jesus ey kayyaggud elaw tu*

<sup>1</sup> Hi Jesus Christo ey nanlelehhanan tu eman ni kaweda tu eyad puyek tep ya panyaggudan tayu, nem insisipel tu. Et humman hu, iu-unnud tayun hi-gatu, tep ya tuun tuka ihhikal ligat tu ey han-isiked tun manliwwat. <sup>2</sup> Et humman hu, meippalpun nunya ey ya law pinhed Apu Dios hu pehding tayu et beken ni ya lawah ni pinpinhed tayu hu u-unnuden tayu. <sup>3</sup> Impalebalebah yuddan emin hu lawah ni kapehpehding idan eleg mengullug, henin kapengi-ulligin beken ni ahwa, yadda lawah ni kaamyawin annel, ya nemahhig ni yuka penginnumi ni nebuteng kayu niya yuka penaydayawin beken ni makulug ni dios ey humman angebe-hel Apu Dios. <sup>4</sup> Nem yan nunya, ey ida kametnga hu eleg mengullug, tep eleg kayu law mei-dum ni hi-gadan mengippahding ni lawah ni daka pehpehding et dakeyu kapippihula. <sup>5</sup> Nem entan tu liwwan e yallin hakey ni aggew ey mahapul ni hummangen dalli hu penummalyaan Apu Dios ni hi-gadad emin ni impahpahding da. Tep hi Apu Dios ey nandadaddan ni menuwet ni emin ni tuun mategu niya nangketey. <sup>6</sup> Et mukun anin idan nangketey et neituttuddun hi-gadan ketaggu da eya elaw ni penellakniban Apu Dios ni tuu. Et anin netey hu annel da, tep kamettyey emin hu tuu, nem yallin hakey ni aggew ey mekibi-biyag idallin Apu Dios etan ida tuun nengabulut ni hi-gatu.

<sup>7</sup> Kamangkedtengi law hu kepappegan ni puyek, et humman hu, ipaptek yu et ya kakkayyaggud hu wadad nemnem yu niya kekkenneng yun emin hu yuka pehpehding

\* 3:12 3:12 [10-12] Psalm 34:12-16

ma-lat kayyaggud hu pandasalan yu. <sup>8</sup> Ya anhan memengngulun nemnemen tayu ey ya nehammad ni panhimpipinhedan tayu, et anin ni hipa humman ni nambahulan ni edum tayun hi-gatsu et pessinsahan tayudda. <sup>9</sup> Entan tu ihingal hu edum yun tuun kaumdutuk di baley yu. <sup>10</sup> Emin etan indawat Apu Dios ni hi-gatsun kabaelan tayu ey iusal tayud panyaggudan ni edum tayun tuu ma-lat kakkayyaggud kei-ussalan idan nunman ni nambakbaklang ni kabaelan tayu. <sup>11</sup> Hedin ya mantuttuddun ehel Apu Dios hu indawat tun hakey ni tuu, ey mahapul ni humman u-unnuden tu et ittuttuddu tu hu ehel Apu Dios. Hedin ya umbaddang ni edum ni tuu hu indawat Apu Dios ni hakey ni tuun kabaelan tu, man mahapul ni i-usal tu humman ni umbaddang ni edum tun tuu ma-lat meidaydayaw hi Apu Dios di emin tep hi Jesus Christo. Et hi Jesus Christo hu dayu tun man-ap-apu niya medeyyaw ni ingganah. Amen.

*Ya panlelehanan tayu tep ya tayu kapengu-unnudin Jesus*

<sup>12</sup> Kaegiegi, entan katnga eyan hin-appil ni ligat yun yuka helheltapa, tep humman kapematnain Apu Dios ni tayu kapengullug. <sup>13</sup> Ya kayyaggud ni pehding yu ey amleng kayu, tep ya yuka panligligasin nunyan henin nanligligatan Jesus Christo ni nunman ey pan-am-amlengan yullin keang-angan ni keiddeyyawan Jesus Christo. <sup>14</sup> Anin ni pihhupihhulen dakeyuddan eleg mengullug et amleng kayu kaya tep wada hu Ispirituh Apu Dios ni hi-gayun umbaddang ni hi-gayu, tep hi-gatu kekakkayyaggudan. <sup>15</sup> Lawah hedin ya umpatey, ya monekkew, ya mengippahding ni lawah niya ya mekidimdim-a di edum ni tuu hu umhulun ni yu panliligatan. <sup>16</sup> Nem hedin ya yuka pengun-unnudin Jesus Christo hu umhulun ni panliggatan yu, man entan tu ibeing humman, nem pansalamat kayun Apu Dios tep ya yuka pengi-ehngin Jesus Christo.

<sup>17</sup> Ya panhuwetan Apu Dios ni tuu ey neilepu law, et ya memengngulun mepatnaan ey hi-gatsun tuu tu. Et hedin hanniman e anin ni hi-gatsun kamengullug et mehuwetan, ey kaw beken ni nema-madda hu eleg mengullug e mehuwetan ida et mekastigudda? <sup>18</sup> Makulug ni nemahhig ali pengastigun Apu Dios idan eleg mengullug, tep inhel Apu Dios e kantuy "Hedin neligat ni mehella kniban hu tuun kakkayyaggud, man nema-ma-ma etan tuun kahing ni peteg nan Apu Dios, tep eleg mehella knibi et mekastigu." \*

<sup>19</sup> Et humman hu, hi Apu Dios hu idinel tayu et ipahding tayu hu kayyaggud, anin ni panlelehanan tayu hedin humman pinhed tu, tep hi-gatu namyuh ni hi-gatsu, et eleg mabalin ni daitsu ippayyag.

## 5

*Ya meittuggun idan kamengipappangnguluddan kamengullug nan Jesus*

<sup>1</sup> Hi-gayuddan edum kun kamengipappangnguluddan kamengullug, dengel yu anhan eya pinhed kun ittugun ni hi-gayu, tep hi-gak ey inenang-ang ku hu nanlelehanan Jesus tep hi-gatsu, niya meilla-kammak alid keiddeyyawan tun pambangngadan tu. <sup>2</sup> Ya pinhed ku ey ipaptek yudda anhan etan kamengullug ni indinel Apu Dios ni hi-gayu. Beken ni kayu mepillit tep ngunu yu, nem ipaptek yu ngu dedan ida tep ya impeminhed yun hi-gada. Tep humman hu pinhed Apu Dios ni elaw ni kamengipappangngulu. Ipaptek yu ngunu yu, tep pinhed yu ngu dedan ni umbaddang ni edum yu beken ni gapu tep ya tangdan. <sup>3</sup> Anin ni hi-gayu hu heni peppengngulwan da, ey entan tu peta-gey hu annel yu, nem hi-gayu kumangngu anhan law hu mengippahding ni hipan pehding ni pengiu-unnudan da. <sup>4</sup> Ipahding yudda huyya ma-lat yallin pampeang-angan etan ni keta-ta-geyyan ni kamengippaptek ni tuu ey iddawat tullin hi-gayu hu keiddeyyawan yun ingganah.

*Mahapul ni pebabah tayu annel tayun Apu Dios et yaddad edum tayun tuu*

<sup>5</sup> Hi-gayuddan lalakkin kamampenikken ey mahapul ni u-unnuden yudda peppengngulwan yu. Emin kayun kamengullug ey pebabah yu annel yu ey pan-imbabaddang kayu, tep neituede di ehel Apu Dios e kantuy "Anggebe-hel idan Apu Dios hu tuun kamampahhiyya, nem pekabbaddangan tudda etan tuun daka pebabah annel da."

<sup>6</sup> Et humman hu, pebabah yu annel yun Apu Dios e et-eteng kabaelan tu et ibega yun ngenamung tun pehding tun hi-gayu ma-lat hakey alin aggew et meiddeyyaw kayu. <sup>7</sup> Emin etan yuka kakkaguhi ey ehel yun hi-gatu, et ngenamung tu, tep hi-gatu kamengippaptek ni hi-gatsu.

*Kahing tayu buhul tayu e hi Satanas*

<sup>8</sup> Helipat-i yu niya ipapaptek yu annel yu, tep hi Satanas e buhul tayu ey tuka hellipat-i ma-lat bahbahen daitsu e henin etan ni layon ni kamangngengeyyed ni bunget tu.

\* 4:18 4:18 Proverbs 11:31

<sup>9</sup> Ihammad yu hu yuka pengullug ma-lat wada kabaelan tayun menanggan Satanas, tep inamta yu e anin ida edum tayun kamengullug di kebebbley et da dama kapanligligasi hu kapehding Satanas ni hi-gada.

<sup>10</sup> Hi Apu Dios e makabbaddang di tuu ey pinutuk dakeyun meilla-kam di keid-deyyawan tun endi pappeg tu tep ya nengulugan yun Jesus Christo. Et humman hu, hedin megibbuh ali kaya eya neke mtang ni yuka panligligasi ey peyaggud dakeyun Apu Dios, ey ihhammad tullu hu yuka pengullug niya hi-gatu mengippa-let ni hi-gayu.

<sup>11</sup> Ya kayyaggud ey hi Apu Dios e endi kei-inggehan ni kabaelan tu hu nanengtun daydayawen tayun ingganah. Amen.

*Ya manggillig eyad tudek*

<sup>12</sup> Pinhed kun peamtan hi-gayu e hi Silas, e nakka ibbilang ni nehammad ni kamengunnud ni agi tayu, ey binenaddangan tuwak numan ni nengitudkan ku eyan ansikkey ni tudek kun hi-gayu. Nantudekkak ni hi-gayu tep pinhed kun ihhammad yun mengunnud nan Jesus niya pinhed kun peamtan hi-gayu hu makulug ni elaw ni baddang Apu Dios ni hi-gatsu, et humman hu iddinel tayun kenayun.

<sup>13</sup> Emin ida etan edum tayun kamengullug di bebley di Babilon ni pinilin Apu Dios, henin hi-gayu, ey kanday dakeyu kanenemneman hi-gada. Anin hi Mark e nakka ibbilang ni u-unggak et dakeyu dama kanenemneman hi-gatu. <sup>14</sup> Peang-ang yu hu nan-impipinhedan yun emin hedin nandadammu kayun kamengullug.

Nakka iddasal e ya linggep hu meweddan hi-gayun emin ni kamengullug nan Jesus Christo.

## Huyya Neikadwan Tudek Peter

<sup>1</sup> Nalpu huyyan tudek ni hi-gak e hi Simon Peter e bega-en niya apostle nan hi Jesus Christo. Nakka pan-ittudek huyyan hi-gayun nengulug e henin hi-gami. Nengulug itsu tep ya baddang nan Jesus Christo e Dios tayun nenelaknib ni hi-gatsun neliwtan, tep ya kakinyayaggud tu.

<sup>2</sup> Pinhed kun meweddian hi-gayun ingganah hu binabbal niya linggep tep ya nengamtaan yun Apu Dios ni hi Jesus Christo e Apu tayu.

*Ya elaw ni kamengullug nan Jesus*

<sup>3</sup> Hi Apu Dios ey et-eteng kabaellan tu et tuka iddawat hu hipan mahapul tayun pengu-unnudan tayun kayyaggud ni elaw ni pinhed tun u-unnuden tayu gapuh ni nengamtaan tayun nengayag ni hi-gatsun meilla-kam di kakinyayaggud tu niyad keiddayyawan tu. <sup>4</sup> Et gapuh ni et-eteng ni kabaellan tu ey indawat tun hi-gatsu etan ida kakkayaggud ni impakulug tun iddawat, gapuh idan nunya ey mabalin ni iwalleng tayudda etan lallawah ni impeinghan tuun pehpehding, ma-lat meilla-kam itsud kakinyayaggud tu.

<sup>5-7</sup> Et humman hu, ipahding tayun emin hu kabaellan tayun mengippahding ni kayyaggud ni mei-unnud di tayu kapengullug. Ey mahapul mewan ni menemneman itu, han kekkeneng tayu hu tayu kapehpehding di annel tayu, issipel tayu hu ligat tayu, u-unnuden tayu pinhed Apu Dios, kabbabbal itsud edum tayun tuu niya pinheden tayu edum tayun tuun kamengullug niya eleg. <sup>8</sup> Hedin huyya pehpehding tayu, man endi tayu pangkullangan di nengamtaan tayun Jesus Christo e Apu tayu et endi tayu higgaan ni mengippahding ni pinhed tun pehding tayun tuu. <sup>9</sup> Nem hedin wadan hi-gayu hu eleg tu ippahding ida huyya, ey heni etan ni tuun kulang nemnem tu, tep humman keang-angan tun liniwwan tu hu nangkalan Apu Dios ni liwat tu eman ni nengulugan tu.

<sup>10</sup> Et humman hu, hi-gayun kaegiagi, ipatna yun peang-ang di yuka pehpehding e hi-gayu hu pinilin Apu Dios ni pantu-u tu niya inaygan tun mengu-unnud ni hi-gatu. E-helen kun hi-gayu e hedin ippahding yudda humman, ey makulug ni endi yu pehpehding ni lawah <sup>11</sup> niya et-eteng ali kelebengan yun an mekihha-ad di endi pappeg tun pan-ap-apan Apu tayun hi Jesus Christo e kamenellaknib ni tuun neliwtan.

*Ya nengipeamtaan Peter ni ketteyyan tu*

<sup>12</sup> Et anin inamta yudda huyya niya anin nehammad yuka pengullug ni meippanggep ni makulug ni diddinggel yu, et nakka iggeb-at ni penemnem ni hi-gayun kenayun. <sup>13</sup> Nakka nemnemnema e kayyaggud hedin penemnem kudda huyyan hi-gayu eyan ketagguk. <sup>14</sup> Tep inamtak e kamangkedettengi law hu aggew ni ketteyyan ku tep inhel Apu tayun hi Jesus Christo ni hi-gak. <sup>15</sup> Et huyya hu nakka ippatnan emin hu kabaellan kun pehding ma-lat anin metteyyak ali, ey nemnemnemen yullin kenayun eya nakka ittugutugun ni pehding yu.

*Ya in-inhel ida eman ni prophets et ya inenang-ang Peter ni meippanggep ni keiddeyyawan Christo*

<sup>16</sup> Beken ni a-abbig ni gandat hu in-inhel min nunman ni meippanggep ni et-eteng ni kabaellan niya ellian alin Apu tayun hi Jesus Christo, tep makulug ni inang-ang mi hu nengideyawan Apu Dios ni hi-gatu. <sup>17-18</sup> Wada kamid Jesus etan di duntug ni nunman ni nengipeang-angan nan Ama taya e hi Apu Dios ni tuka pembal niya tuka pengiddeyyaw nan Jesus et dingngel mi hu inhel tu e kantuy "Huyya etan binugtung ni u-ungngak ni nakappinched ku. Hi-gatu hu kamengippeamleng ni hi-gak."

<sup>19</sup> Huyya neamtaan tu e makulug hu inhel idan prophets ni meippanggep nan Jesus. Et humman hu, et-eteng dinel tayun inhel idan prophets niya mahapul ni kullugen tayu, tep humman idan inhel da ey heni dilag ni tuka bebnangi engeenget. Nem yallin ellian Jesus Christo, ey bebnangan tullin peteg hu nemnem tayu tep yan nunman ali ey han-awat tayulli law, tep hi-gatu kakelpuin kapan-ewwat, heni etan ni talaw e kakelpuin benang ni kamangkewa-wa.

<sup>20</sup> Ya hakey ni mahapul ni amtaan yu ey emin hu impeenamtaddan prophets ni hipan mekapkapan edum alin aggew ey beken ni nalpud nemnem da, <sup>21</sup> niya beken ni gapu tep humman pinhed dan peamta, tep ya Ispirituh Apu Dios hu nengipeamtan hi-gada et han da peamtaddan tutu-u.



## 2

*Yadda etan beken ni makulug ni prophets*

<sup>1</sup> Nem anin ni yan nunman et wadadda etan beken ni makulug ni prophets et hanniman ali dama e wadaddalli etan tuun kaumhaul ni mantuttuiddun beken ni makulug ni hi-gayun memahbah ni yuka pengullug. Ituttuuddu dallin hi-gayu hu beken ni makulug ni meippanggep nan Apu Jesus e nenekan liwat tayu, tep daka kehingga, et humman ali umhulun ni angagannu ey mekastiguuda. <sup>2</sup> Wadaddalli dakel ni mengu-unnud ni neiulan daka ittenuttuuddu et pampihhulen dalli eya makulug ni kameituttuiddun meippanggep nan Jesus, et humman ali umhulun ni pengehingga idan edum ni tuun hi-gatu niya elaw tun makulug. <sup>3</sup> Gapuh ni kineagum da ey he-ulan dakeyullid daka ittenuttuiddun linggeman ma-lat pengal-an dan pihhuh yu. Nem ninemnem dedan nan Apu Dios ni nebayag e kastiguen tudda, et humman hu eleg mebeyyag ey medettengan kebabbahan da.

<sup>4</sup> Tep anin idan anghel ni nunman et eleg ida hemeken Apu Dios eman ni nanliwtan da et palaw tuddad impiernoh e nandaul di engeenet et immen edaman e henidda neikubbub e daka hehhegoda hu kehuwetan da. <sup>5</sup> Ey eleg tu mewan hemeken ida etan tutu-un nunman, tep ebuh lawah ni impenahding da et lebengen Apu Dios hu puyek et malsing ida. Hi Noah e kamengittenuddun kayyagud, niyadda etan pitun edum tu hu natdaan ni ebuh ni eleg malsing. <sup>6</sup> Hanniman mewan hu tutu-ud Sodom niyad Gomorrah e eleg ida hemeken Apu Dios, et legaben tu bebley da et magiheh ida. Humman pengippeang-angan tun meippahding idalli etan ni eleg mengu-unnud ni hi-gatu. <sup>7-8</sup> Nem inhewang Apu Dios hi Lot et eleg magiheh, tep kayyagud elaw tu niya angebe-hel tudda hu lawah ni kakapkapyaaadan kebebleyan tun kewa-wa-wa. <sup>\*</sup>

<sup>9</sup> Huyya keang-angan tun kaippatek Apu Dios ida kamengu-unnud ni hi-gatu hedini wada ligat da, nem hedini yadda tutu-un lawah daka pehpending, man huwetan tuddalli et kastiguen tudda, <sup>10</sup> nema-madda etan nangkabgang niyadda etan kamengehging ni hipan kelebengan ni tuun indawat Apu Dios.

Helipat-i yudda etan kamengittenuddun itek ni meippanggep Jesus, tep endin hekey baing da niya manghay ida. Daka peta-gey hu annel da et daka pihhuladda etan eleg meang-ang ni nangketa-gey ni lintun Apu Dios. <sup>11</sup> Yadda anghel ey eta-ta-gey ida nem yadda humman ni kamengittenuddun itek ni meippanggep nan Jesus, nem eleg da ni-ngangu pihhuladda humman ni eleg meang-ang ni lintun Apu Dios, anin ni wada nambahulan dan hi-gatu.

<sup>12</sup> Humman idan kamengittenuddun neiulla ey daka pedhing ni emin hu lawah ni pinhed da, tep endin hekey hu kayyagud ni nemnem da. Daka pekdag pihupihul ni eleg da ewwasi. Henidda tu-wangu ulha e hedini dinweng ni tuu et pintey da, man ebuhe negibbuh biyag tu, tep huyyaddan tuu ey mettey ida, et humman pappeg ni biyag dan ebuh. <sup>13</sup> Emin etan impahpahding dan nanlelehhanan idan edum ni tuu ey meibleh alin hakey ni aggew et panlelehhanan dalli dama. Endin hekey daka ikkapan baing da, tep anin kawwalwal et daka peang-ang-hu linggeman ni angeba-ing ni pinhed ni annel dan pehpending. Hi-gada hu kaumbababab ni kakinayyagud yu, nema-ma hedini wada nei-duman dan hi-gayud kapekikkanni tep daka igaggaya hu elaw ni daka pene-uh-e-ulin edum dan tuu. <sup>14</sup> Hedini wada inang-ang dan bii, ey ebuh lawah ni wadad nemnem da. Ebuh lawah ni daka nenemnem pehpending. Dadda kaantenuttuudda etan kulang nemnem dan mengapkapan lawah niya nelaing idan unkilan ni pihhuh ni edum dan tuu. Huyyadda hu nanghelan Apu Dios ni kantuy kastiguen tudda. <sup>15</sup> Inwalleng da hu kayyagud ni elaw ni kamei-unnud di pinhed Apu Dios et ya hu elaw Balaam e u-unggan Beor hu daka u-unnuda e ebuh hauhaul ni edum ni tuka pehpending ma-lat pampihhulan tudda. <sup>16</sup> Nem hakey ni aggew ey himmapit etan kebayyun Balaam e manghay ni prophet et ibunget tu hi Balaam et bumeing law ni tuka pengippenahdingin lawah.

<sup>17</sup> Huyyaddan tuu ey henidda hebwak ni natduk et endi law silbi da niya henidda kulput ni kaihuyyahuyyaw ni dibdib ni ebuh, tep endin hekey baddang dan hi-gatsu. Nanna-ud ni kastiguen idan Apu Dios et pellow tuddad engeenet. <sup>18</sup> Tep nemahhig daka pampahhiyyain endi puut tu. Daka ittenuttuuddu hu lawah ni pan-an-laan ni annel ma-lat panepang dadda etan ni pakeisiked dan mengippahding ni lawah et itu-man da mewan ni mengippahding idan nunman. <sup>19</sup> Daka ittenuttuuddu e kanday hedini u-unnuden ida, man dammutun han-ipahding hu linggeman ni kakayyagud. Nem itek da humman, tep anin hi-gada et eleg da kaya han-ipahding hu hipan kayyagud. Inamta tayu e hedini imminan law hu lawah ni kakapkapyaan tuu, man humman law

\* 2:7-8 2:7 Genesis 19:1-16

tuka nenemneman kenayun ni ippahding. <sup>20</sup> Ya tuun insiked tun mengippahding ni henin kapehpehding idan eleg mengullug, tep inamta tu law hu meippanggep nan hi Jesus, nem entanni ey nambangngad mewan ni mengippahding idan henin nunman, ey nehalmali hi kastigu tu nem ya kastigu tun eleg tu pengamtaan ni meippanggep nan Jesus. <sup>21</sup> I-imman ew etan eleg da amtaa humman ni elaw ni kakinyayagud nem ya etan da amtaen ni han dalli mewan inwalleng, tep nemahhig kastigu da hedini iwwalak da hu hipan tugun Apu Dios ni hi-gada. <sup>22</sup> Makulug numan etan kandan “Ya ahhu ey tuka bangngadan kenen hu in-utetu. Ya killum ey anin ni e-mehen et mambangngad mewan ni an mantuplak.” †

### 3

#### *Ya pambangngadan Apu Jesus Christo di puyek*

<sup>1</sup> Kaegiegi, huyya meikkadwan tudek kun hi-gayu. Ya intudek kun nunya ey heni la etan ni nemangulun tudek ku e pinhed kun penemnem ni hi-gayu etan ida kayyagud ni tugun, et humman ida nemnemnemen yu. <sup>2</sup> Pinhed ku mewan ni eleg yu liwwana hu impeenamtaddan prophets ni nunman niyadda tugun Apu Jesus Christo, e kaumhelaknib, ni intenuttudduuddan apostles ni hi-gayu. <sup>3</sup> Nem mahapul ni ewwatan yu ni e hedini kamangkedettengi law hu kepapegan ni puyek, man wadaddalli tuun ebuh hu lawah ni pinhed ni annel dan pehpehding da. Ngi-ngi-ngian dakeyullin hi-gada <sup>4</sup> et kandallin hi-gayuy “Attu mewan et kamambangngad hi Jesus Christo ey? Tam neipalpun nunman ingganah nunya e nangketey ida hu aammed tayuddan nangkebayag ey nanengtun humman dedanggu eyadda wadad puyek meippalpu eman ni newad-an ni emin? Huyya keang-angan tun eleg um-ali hi Jesus.”

<sup>5-6</sup> Huyya kae-heladdan nunman ni tutu-u tep daka iggeb-at ni kehgingen e ebuh ehel nan Apu Dios ey lintu tu kabunyan niya puyek. Et wadaen tu hu puyek di gawwan danum et iha-ad tu danum di nanlinikweh eyad puyek. Nem entanni ey limbengan tu hu puyek ni kinapya tu, et humman nebahbahan tu. <sup>7</sup> Ey tep immandal mewan Apu Dios e ya eya puyek et ya kabunyan ni tayu kaang-ang-angan nunya, ey bahbahan tullin apuy ni kedettengan ni aggew ni penuwetan niya pengastiguan tuddan tuun kamengehging ni hi-gatu.

<sup>8-9</sup> Nem entan tu liwwan e aaggik ida e emin hu inhel Apu Dios ni mekapkanya ey meippahding anin ni melebbah pigan toon. Tep hi Apu Dios ey nan-inggeh hu han-aggew et ya hanlibun toon. Ma-nu kedit ingganah nunyay eleg tu peamnu hu inhel tun meippahding, ey tuka hehheggeda hu pantuttuyuan ida-et anhan ni emin ni tuud liwat da, tep eleg tu pinhed ni anin hakey et wada an mekastigu.

<sup>10</sup> Nanna-ud ni um-alilli hi Apu tayun an menuwet ni tuu. Nem eleg tayu amta hedini pigan tu ellian tu, tep henin kaelliin kamenekkew e endi nengamta. Nem ka-immaturan ali kedettengan tu humman ni ellian Jesus tep medngel ali na-let ni bungug ni kabunyan ni ketellakan tu. Emin idalli etan bittuwen et ya aggew niya bulan ey mangkegihheb idan emin. Anin ya puyek niyadda etan wadadman et metellak ida.

#### *Mahapul ni mandaddan itsun an menammun Apu Dios*

<sup>11</sup> Inamta yu law e metellak idallin emin eya kinapyan Apu Dios, et humman hu, mahapul ni ya kakkayyagud hu pehpehding yu niya hi-gatu denaydayaw yu <sup>12</sup> eyan yuka penehheggedin kedettengan ni aggew ni gintud tun keippahdingan tu ddalli huyya. Yadda kayyagud kapkanya yu ma-lat anggegannu ey nedatngan ellian tu. Emin ali hu wadad puyek niyad kabunyan ey mangkegihheb idan emin ni nunman ni aggew. <sup>13</sup> Nem hi-gatsun kamengullug ey itu kamedinnel, tep anin ni megihheb ali kabunyan niya puyek et wada etan impakulug Apu Dios ni hi-gatsun baluh ni kabunyan niya puyek ni panha-adan tayu. Yadman kad-an ni kayyagud ni Apu tayu e hi Jesus niyadda tuun kakkayyagud elaw da.

<sup>14</sup> Et humman hu, hi-gayun kaegiegin kamenehhegged ni pambangngadan nan Jesus, ey ippahding yun emin kabaelan yun mengu-unnud ni pinhed tu, ma-lat hedini um-alilli ey endi mehemmak ni bahul yun umhulun ni kekastiguan yu niya ma-lat kayyagud hu pekiddagyuman yun Apu Dios. <sup>15</sup> Nemnem yu e ya eleg ni alian Jesus ey tep ya binabbal Apu Dios, tep pinhed tun iddawtan ida tuun nangkeliwatan ni wayah dan mantuttuyuan liwat da, et wada inna-nu tun kehellakniban da. Anin hi agi tayun hi Paul et huyya impeamtan Apu Dios ni hi-gatu et huyya impaenamta tun hi-gayud tudek tu. <sup>16</sup> Emin di tudek tu ey huyyadda impeenamta tu. Nem wadadda etan neligat ni meewwatan

† 2:22 2:22 Ya pinhed nunyan e-helen ey yadda tuun eleg mengamtan Apu Dios ey ya lawah hu daydayu tun pehding da, tep anin issiked dan manliwwat et en-entanni mewan ni nanliwat ida.

di edum ni tudek Paul, et yadda etan eleg da han-awat niya kulang daka pengullug ey hin-appil daka pengewwat. Hanniman dama daka pehding hedid binidbid dadda etan edum ni impatudek nan Apu Dios, et humman ali umhulun ni kekastiguan da.

<sup>17</sup>Nem hi-gayun kaegiegi ey inamta yu humman ni elaw idan nunman ni tuun kahing nan Apu Dios. Et humman hu, helipati yu ma-lat eleg dakeyu haulen ni hi-gada, tep entanni ey mehe-ul kayu et dedkugen yu hi Jesus. <sup>18</sup>Ya kayyaggud ey pannananeng yun mengamtan nan Jesus Christo e Apu tayun kaumhelaknib niya kenayun ni adaadal yu hu binabbal tu e humman hu tuka pemaptek ni hi-gatsu.

Endi edum ni kamedeyyaw nem ebuh tu. Et humman hu, daydayaw tayun nunya et ingganah hi Jesus Christo. Amen.

## Ya Nebukul ni Tudek nan John

*Ya etan kamengidwat ni biyag ni endi pappeg tu*

<sup>1</sup> Nakka pan-ittudek huyyan hi-gayu ma-lat amtaen yu hi Jesus Christo e hi-gatu hu Ehel nan Apu Dios niya hi-gatu kamengidwat ni biyag ni endi pappeg tu. Hi Jesus ey wada ngu dedan et han mawedan emin eya wadan nunya. Hi-gami hu anhan ni nenang-ang ni hi-gatu et kinepakempa mi hu annel tu niya diddingngel mi hu ehel tu. <sup>2</sup> Hi-gatu intu-dak Apu Dios ni nengi-lin biyag ni endi pappeg tu. Nangkapyan tuu ey naka-immatunan min peteg niya inenang-ang mi et ay mika e-e-hela hu impahpahding tun nunman. Wadad kad-an Ametun nunman, nem immalidya et ang-angen mi. Hi Jesus ey endi laputu niya endi pappeg tu. <sup>3</sup> Mika peennamtan hi-gayu hi Jesus ma-lat wada inna-nu tun mei-dum kayun hi-gamin mekiddagyum nan hi Apu Dios ni hi Jesus Christo e U-ungnga tu. <sup>4</sup> Mika pan-ittudek huyya ma-lat endilli an pangkullangan ni amleng tayu.

*Ya pekiddagyuman tayun Apu Dios*

<sup>5</sup> Huyya hu dingngel min hi-gatu e kantuy "Hi Apu Dios ey kayyaggud ni peteg, endin hekey lawah ni hi-gatu, tep eleg tu pinhed hu lawah." Et huyya hu pinhed min peamta daman hi-gayu. <sup>6</sup> Et humman hu, hedin kan tayuy itsu kamekiddagyum nan hi Apu Dios, nem ya lawah tayu kapehpehding, man maitek itsu, tep beken etan ni kayyaggud ni pinhed tu hu tayu kapehpehding. <sup>7</sup> Nem hedin ya etan kakkayyaggud ni pinhed Apu Dios hu tayu kapehpehding henin kakinayyaggud tu, man kayyaggud hu pandadagyuman tayun kamengullug et me-kal liwat tayu niya baddangan daitsun Apu Dios ni eleg manliwwat tep ya neteyyan Jesus Christo e U-ungnga tu.

<sup>8</sup> Nem hedin kan tayuy endi liwat tayu, man humman keamtaan tun endi hu makulug ni kakinayyaggud di nemnem tayu, tep itsu kamehe-ul. <sup>9</sup> Hedin e-helen tayu hu liwat tayun Apu Dios, man makulug ni pessinsahan daitsu niya panyaggud tu hu nemnem tayu, tep meandeng tuka pehding niya kameiddinnel. <sup>10</sup> Hedin kantayuy endin hekey hu liwat tayu, man impambalin tayun maitek hi Apu Dios, tep humman keang-angan tun eleg tayu kulugen hu ehel tu.

## 2

*Ya etan kamengi-ehneng ni hi-gatsud kad-an Apu Dios*

<sup>1</sup> Kaegiegi, nakka pan-ittudek huyya ma-lat eleg kayu manliwaliwat. Nem hedin wada manliwwat ni hi-gayu, man ibega yu etan ni kaumbaddang ni hi-gatsu e hi Jesus Christo e kayyaggud ni peteg, tep hi-gatu kamengi-ehneng ni hi-gatsud kad-an Apu Dios, et pesinsahan tu hu liwat yu. <sup>2</sup> Hi Jesus hu nengiketey ni liwat tayu, nem beken ni ebuh hu liwat tayun ingkatey tu, nem anin ni liwat ni emin ni tuud puyek.

<sup>3</sup> Ya keang-angan tun makulug ni itsu kamengullug nan Apu Dios ey ya tayu kapengu-unnudin tugun tu. <sup>4</sup> Ya tuun kantuy kamengullug nan hi Apu Dios, nem eleg tu u-unnuda hu tugun tu, ey maitek niya tuka kehingga hu makulug ni kameituttuddu. <sup>5-6</sup> Nem ya tuun kamengu-unnud ni intugun Apu Dios ey makulug ni et-eteng hu impeminhed tun hi-gatu. Ya keang-angan tun makulug ni wadan hi-gatu hi Apu Dios ey ka-immatun tep tuka u-unnuda elaw Apu Dios henin nengu-unudan Jesus Christo ni hi-gatu eman ni kaweda tud puyek.

*Mahapul ni man-impipin角度 itsu*

<sup>7</sup> Kaegiegi, beken ni hin-appil ni tugun eya nakka pan-e-helan hi-gayu, tep nebayag huyyan tugun ni meippanggep ni pan-impipin角度an tayu. Huyya neitugun ni hi-gayu eman ni laputun nengulungan yun Jesus. <sup>8</sup> Et ay yan eyan tayu kapan-impipin角度edi law ey eleg tayu law pehpehding etan ida lawah ni impenahding tayun nunman. Inu-unnud Jesus huyyan tugun et aye yu law dama kau-unnuda. Huyya keang-angan tu e kamangkeendi hu engeenget, tep kamambebennang law etan makulug ni dilag.

<sup>9</sup> Ya etan tuun kantuy kamengu-unnud nan hi Apu Dios, nem angebe-hel tu edum tun tuu ey nanengtun lawah elaw tu. <sup>10</sup> Ya tuun wada impeminhed tun edum tu ey hi-gatu hu nabnangan, et humman hu eleg tu ippahding hu umhulun ni panliwwatan ni edum tu. <sup>11</sup> Nem ya tuun angebe-hel tu edum tun tuu ey nemahhig kalwah tu, et eleg tu amta pambalanan tu, tep ya lawah ni ebuh hu wadad nemnem tu, et humman kamemahbah ni hi-gatu.

<sup>12</sup> Nakka pan-ittudek huyyan hi-gayun kaungaunga tep ya na-kalan ni liwat yu, tep ya impahding Jesus Christo. <sup>13</sup> Nakka pan-ittudek huyyan hi-gayun a-ammed ida tep ya

nengamtaan yun Jesus e endi laputu niya endi pappeg tu. Nakka pan-ittudek huyyan hi-gayun kamampenikken ni lalakki tep beken law ni lawah hu yuka pehpending.

<sup>14</sup> Em, nakka pan-ittudek dama huyyan hi-gayun kaungaunga tep ya nengamtaan yun Apu Dios e hi Ametayu. Nakka mantuddek ni hi-gayun keammeammed tep ya nengamtaan yun Jesus Christo e sigud ni wada et han maweda emin eya wadan nunya. Nakka mantuddek ni hi-gayun kamampenikken ni lalakki, tep neihammad law yuka pengullug ni ehel Apu Dios et eleg yu peapput hu nemnem yun Satanas hedini sinuttullun dakeyun mengippahding ni lawah.

*Yadda etan eleg tayu gagamgami*

<sup>15</sup> Entan tu gagamgamidida etan lawah ni henin kapehpending idan eleg mengullug nan Jesus. Tep hedini humman gagamgaman yu, man endi hu impeminhed yun Ametayun hi Apu Dios. <sup>16</sup> Tep emin eya lawah ni elaw di puyek ey beken ni hi Apu Dios hu nalpuan tu. Humman idan lawah ni elaw ey ya mengippahhiyyan limmu, ya pengu-unnudan ni lawah ni pinhed ni annel tayu niya pengamgaman ni emin ni hipan lawah ni kaang-ang-anga eyad puyek. <sup>17</sup> Emin ida huyyan wadad puyek niyadda etan lawah ni kaamnawin tuun kaumhulun ni kapannemnem lawah ey metellak idalli. Nem ya etan mengu-unnud ni pinhed Apu Dios ey wadalli biyag tun endi pappeg tu.

*Ya etan buhul alin Jesus*

<sup>18</sup> Kaegiegi, kamangeddettengi law hu kepappegan ni puyek. Diddingngel yu e wadalli etan un-alin buhul Christo. Et yan nunya, ey wadadda law hu dakek ni buhul tu, et huyya pengamtaan tayu e kamangeddettengi law kepappegan ni puyek. <sup>19</sup> Huyyaddan buhul Jesus Christo ey nekiemuemung ida lan nunman ni hi-gatsun kamengullug, nem eleg da u-unnuden hu inu-unnud tayu. Gullat ni makulug ni edum tayudda, et nanengtun hi-gatsun emin, nem hini-yan daitu, et humman keang-angan tun beken ida dedan ni edum tayu.

<sup>20</sup> Nem hi-gayun nengidwatan Jesus ni Ispirituh Apu Dios ey inamta yu hu makulug ni elaw. <sup>21</sup> Nakka pan-ittudek huyyan hi-gayu ma-lat tettengedan yu hu makulug ni elaw ni kamengullug. Beken ni kangkuy eleg yu amta hu makulug, tep inamta tayu e emin hu kamelpun Apu Dios ey beken ni itek.

<sup>22</sup> Hipa tuun kandan maitek? Ya tuun kandan maitek ey humman ida etan tuun kamengehding nan hi Jesus, et kanda beken tun hi Christo ni intu-dak Apu Dios ni mengippaptek ni tuu. Huyyan tuun tuka kehginga hu meippanggep nan Jesus ni hi Apu Dios ey buhul nan Jesus Christo. <sup>23</sup> Tep ya tuun tuka kehginga hi Jesus Christo e U-unggan Apu Dios ey tuka kehginga dama hi Apu Dios e Ametu. Nem ya tuun inebulut tu hi Jesus Christo ey inebulut tu dama hi Apu Dios.

<sup>24</sup> Entan tu iwelak eman neitudun hi-gayun laputun nengullug yun Jesus. Tep hedini tettengedan yu, man mannananeng hu yuka pengullug nan hi Jesus et hi Ametun hi Apu Dios. <sup>25</sup> Et ya etan impakulug nan Jesus ni hi-gatsun iddawat tu ey humman etan biyag ni endi pappeg tu.

<sup>26</sup> Huyyan intudek ku ey humman idalli hu tuun mengippatnan mene-ul ni hi-gayu. <sup>27</sup> Nem hi-gayun nengidwatan Jesus ni Ispirituh Apu Dios ey wadad nemnem yun kenayun, et beken ni pakkadek wada mengituttuddun hi-gayu, tep amta yu hu hipan lawah niya kayyaggud. Tep ya Ispirituh Apu Dios hu kamengittuddun hi-gayu, ey humman ni ittudu tu ey makulug. U-unnud yu hu intuttuddun Ispirituh Apu Dios et pannananeng yu hu yuka pengullug nan Jesus.

<sup>28</sup> Et humman hu, hi-gayun kaegiegi, ey pannananeng yu hu yuka pengullug nan Jesus ma-lat emin itu ey melinggep ali nemnem tayu et eleg itsulli bumeing ni ellian tu.

<sup>29</sup> Inamta tayu e hi Apu Dios ey kayyaggud niya neiptek ni emin hu tuka pehding. Et humman hu, ya tuun kakkayyaggud niya neiptek tuka pehpending ey humman hu u-unggan Apu Dios.

### 3

*Hi-gatsuddan kamengullug hu u-unggan Apu Dios*

<sup>1</sup> Nemnem yu e et-eteng hu impeminhed Apu Dios ni hi-gatsu, et mukun inggadnan daitun u-ungga tu. Et, hi-gatsun kamengullug nan Jesus Christo ey u-ungga daitun Apu Dios. Ya kaumhulun ni eleg han-awat idan eleg mengullug hu elaw tayu ey tep eleg da amta hu elaw Apu Dios ni tayu kakulluga. <sup>2</sup> Kaegiegi, u-ungga daitu law nan Apu Dios, nem eleg tayu peka-amtaen hu pambalinan tayulli, nem inamta tayu e yallin pampeang-angan Jesus ey meki-ingngeh itsullin hi-gatu, tep peka-ang-angen tayulli keiddeyyawan tu. <sup>3</sup> Et emin ida etan kamedinnet e meki-ingngeh idallin Jesus

ey humman ida tuun daka ippatnan u-unnuden hu kakinayyaggud ni elaw tu, tep kakkayyaggud ni peteg hi Jesus.

<sup>4</sup> Liwat hu eleg pengu-unnudin tugun Apu Dios, et mukun ya tuun eleg tu u-unnuda tugun tu ey nanliwat. <sup>5</sup> Nemnem tayu e ya illian Jesus di puyek ey ma-lat ekalen tu hu liwat tayu. Niya inamta tayu e hi Jesus ey endin hekey hu liwat tu. <sup>6</sup> Ya tuun makulug ni kamengullug nan Jesus ey beken ni kenayun ni kamanliwwat. Nem ya tuun kamanliwwaliwwat ey eleg tun hekey amta hi Jesus niya eleg mangulug ni hi-gatu.

<sup>7</sup> Kaegiegi, etan kaheul yu etan ni kan idan edum ni tuun anin manliwwat itsu et nanengtun kakkayyaggud itsu, tep eleg mabalin ni kakkayyaggud hu tuu hedin lawah hu tuka pehpending. Ey ya tuun makulug ni kakkayyaggud ey kayyaggud dama hu tuka pehpending, henin Jesus. <sup>8</sup> Nem ya tuun kamanliwwaliwwat ey humman keang-angan tun ya lawah ni elaw Satanas, e nanliwat eman ni laputu et ingganah nunya, hu wadan hi-gatu. Humman ni lawah ni elaw Satanas hu illian Jesus ma-lat pasiked tu.

<sup>9</sup> Hi-gatsuddan kamengullug nan Jesus ey u-ungnga daitsun Apu Dios, et humman hu, beken ni ya lawah tayu pehpending, tep wadan hi-gatsu elaw nan Apu Dios niya hi Apu Dios ey kakkayyagud ni peteg. Hi Apu Dios hu Ametayu law, et mukun eleg mabalin ni tayu pengpenglaw hu manliwwat. <sup>10</sup> Huyya hu nambaklangan ni u-ungngan Apu Dios niyadda u-ungngan Satanas. Yadda tuun beken ni kayyaggud hu daka pehpending niya eleg da pinhed hu edum da ey humman ida u-ungngan Satanas. Nem yadda etan kaman-impipinhed ey humman ida u-ungngan Apu Dios.

*Ya tayu kapan-impipinhedi hu keang-angan tun nehelakniban itsu*

<sup>11</sup> Et humman hu, ya kayyaggud ey man-impipinhed kayu, tep humman neitudun hi-gayu eman ni laputun nengulugan yun Jesus. <sup>12</sup> Entan tu u-unnud hu elaw Cain e tuun Satanas, tep pintey tu hi agitu. Kaw inamta yu hu gaputun nemateyan nan Cain nan agitu? Pintey tu tep tuka keemmehi kakinayyaggud agitu e hi Abel ey hedin hi-gatu, man lawah hu tuka pehpending. <sup>13</sup> Et humman hu, etan katnga yu hedin angebe-hel dakeyudda etan ni eleg mengullug, tep humman idan tuu ey henidda hi Cain. <sup>14</sup> Nem hedin hi-gatsu, ey ya tayu kapan-impipinhedi hu keang-angan tun nehelakniban itsu et wada law biyag tayun endi pappeg tu. Nem yadda etan tuun endi hu impeminhed dan edum da ey eleg ida mangulug nan Apu Dios, et mannananeng hu liwat da et nanna-ud ni eleg ida mekibi-biyag di kad-an tu. <sup>15</sup> Ya kapetteyan tuu ey humman etan angebe-hel tu, et humman hu hedin angebe-hel ni tuu hu edum tu, ey heni damengu pintey tu. Ey inamta tayu e ya pimmatey ey endi hu biyag tun endi pappeg tu hedin eleg mantuttuyyu.

<sup>16</sup> Ya elaw ni makulug ni impeminhed ey henin impahding nan Jesus, e ingkatey tu hu panyaggudan tayu tep ya impeminhed tun hi-gatsu. Et humman hu, hanniman et dama hu pehding tayu, e anin ikkatey tayu hu panyaggudan idan edum tayun kamengullug. <sup>17</sup> Ya tuun wadwada-an, nem eleg tu hehmekadda edum tun kamanligligat, ey endi hu impeminhed tun Apu Dios. <sup>18</sup> Kaegiegi, ya elaw ni makulug ni impeminhed ey mahapul ni ippahding hu pengippeang-angan ni impeminhed et beken ni yad ehel ni ebu. <sup>19</sup> Hedin hanneya elaw tayu, man huyya keang-angan tun hi-gatsu hu makulug ni tuun Apu Dios, et melinggep itsullid hinangga tu. <sup>20</sup> Et humman hu, hedin tayu kanenemnema e nanliwat itsu, ey idinel tayun Apu Dios tep inamta tun emin. Hi-gatu nengamta hedin nambahul itsu winu eleg. Et mukun itsu kamedinnel e hehmeken daitsun hi-gatu.

*Ya tayu kapengullugin Jesus Christo hu nalpuan ni kelebengan tayun mandasal nan Apu Dios*

<sup>21</sup> Kaegiegi, e-helen kun hi-gayu e hedin melinggep nemnem tayu, man eleg itsu u-egen ni mandasal nan hi Apu Dios. <sup>22</sup> Et emin tayu kaibbagan hi-gatu ey iddawat tu tep tayu kaippahding ni emin etan pinhed tun kamengippeamleng ni hi-gatu. <sup>23</sup> Ya tugun tun pinhed tun u-unnuden tayu ey pangulug itsun U-ungnga tu e hi Jesus Christo niya pan-impipinhedi itsun emin. Anin hi Jesus Christo et huyyadda hu tuka ittugutugun ni hi-gatsu. <sup>24</sup> Emin ida etan tuun kamengu-unnud ni tugun Apu Dios ey mannananeng idan mengiddinnel ni hi-gatu niya ipapaptek tudda daman kenayun. Hi Apu Dios ey impaeli tun hi-gatsu hu Ispirituh tu, et humman pengamtaan tayun wadan hi-gatsu hi Apu Dios.

## 4

*Ya pengamtaan tayu hedin wada Ispirituh Apu Dios di tuun kamantuttuddu winu endi*

<sup>1</sup> Hi-gayun kaegiegi, ey etan tu kulug hu linggeman ni tuun menghel ni wada hu Ispirituh Apu Dios ni hi-gatu. Nem patnai yun ibbag-an hedin makulug ni nalpuan Ispirituh Apu Dios humman ni tuka ittuttuddu winu eleg, tep dakel ida limmaw di

kebebbeley ni an mantuttuddun itek. Kanday prophets ida, nem beken kaya. <sup>2</sup> Ya pengamtaan yu hedin makulug ni nalpun Ispirituh Apu Dios hu daka ituttuddu, ey hedin daka ebbuluta e hedin hi Jesus, man nangkapyan tuu. <sup>3</sup> Nem yadda tuun eleg da ebbulutan hi Jesus ey nangkapyan tuu ey humman keang-angan tun beken ni Ispirituh Apu Dios hu wadan hi-gada, nem ya ispirituh ni buhul Jesus Christo. Diddingngel yun um-alilli etan buhul Christo, nem anin yan nunya et kamekapkapyu hu henin elaw tu.

<sup>4</sup> Nem hi-gayun kaegiegin nengabulut nan Apu Dios ey inebak yudda humman ni tuun mangkaitek ni neihilit di kebebbeley, tep wada hu Ispirituh Apu Dios ni hi-gayu e na-na-let nem ya etan ispirituh ni buhul Apu Dios ni wadan hi-gadan eleg mengullug. <sup>5</sup> Emin ida etan mangkaitek ni kanday prophets ida ey humman ida eleg mengullug nan Jesus, et emin etan daka ittenuttuddu ey ya elaw ni eleg mengullug, et humman hu, ida kameidngeli hu edum ni eleg mengullug. <sup>6</sup> Nem hi-gatsun kamengullug nan Jesus ey tuu daitun Apu Dios, et humman hu, yadda edum ni kamengullug ey daitu kau-unnuda, nem eleg daitu u-unnudaddan eleg mengullug. Huyya pengi-immatun ni kameituttuddun nalpun Ispirituh Apu Dios et ya etan kameituttuddun nalpun buhul Apu Dios ni kamengituttuddun neihla.

#### *Hi Apu Dios hu kakelpuin kapeminhed*

<sup>7</sup> Kaegiegi, ya kayyaggud ey man-impipin角度 itsu, tep hi Apu Dios hu kakelpuin kapeminhed. Emin ida etan amta dan umpin角度 ey humman ida tuun Apu Dios niya inamta da hi Apu Dios. <sup>8</sup> Ya tuun endi impemin角度 tu ey eleg tu amta hi Apu Dios, tep ebuh tun kakelpuin kapeminhed. <sup>9</sup> Ya nengipeang-angan Apu Dios ni impemin角度 tun hi-gatsu ey ya nengitu-dakan tun U-ungnga tud puyek et daitu helakniban ma-lat makitegu itsun hi-gatun ingganah. <sup>10</sup> Heninnuy hu makulug ni impemin角度. Ya keang-angan tu ey beken ni ya tayu nemin角度 Apu Dios, nem ya nemin角度 tun hi-gatsu, et itu-dak tu U-ungnga tun nengiketey ni liwat tayu. <sup>11</sup> Kaegiegi, nakappin角度 daitun Apu Dios, et humman hu, pan-impipin角度 itsu dama. <sup>12</sup> Endi an nenang-ang nan hi Apu Dios, nem hedin man-impipin角度 itsu, man wadan hi-gatsu hi Apu Dios ni kenayun niya um-amnu law ni emin hu pinhed tun pambalanan tayu, tep ya et-eteng ni impemin角度 tun hi-gatsu.

<sup>13</sup> Ya keang-angan tun kamannan角度 hu tayu kapengiddinnelin Apu Dios niya wadan hi-gatsu ey ya nengidwatan tun hi-gatsun Ispirituh tu. <sup>14</sup> Ey inang-ang mi et miika ihhadak hu nengitu-dakan Ametayun hi Apu Dios ni U-ungnga tun an nenelaknib ni hi-gatsun tuu. <sup>15</sup> Et humman hu, ya tuun tuka ebbuluta e U-unggan Apu Dios e hi Jesus ey wada hi Apu Dios ni hi-gatu niya wada daman hi-gatu nan hi Apu Dios. <sup>16</sup> Inamta tayu e et-eteng hu impemin角度 Apu Dios ni hi-gatsu, et humman hu, itsu kamedinnel ni ippaptek daitu.

Hi Apu Dios hu kakelpuin impemin角度, et ya tuun pannan角度 tu hu impemin角度 tun Apu Dios, ey wadan hi-gatu hi Apu Dios niya nehammad hu nekidayuman tun hi-gatu. <sup>17</sup> Hedin nehammad hu impemin角度 tayun Apu Dios, man eleg itsulli umtakut ni kehuwetan tayun hakey ni aggew, tep humman ni tayu kapemin角度 eyad puyek ey henin kapemin角度 Jesus. <sup>18</sup> Ya tuun nehammad hu impemin角度 tun Apu Dios ey eleg tu tekkusi hi Apu Dios. Nem ya tuun kaumtakut tep yalli kehuwetan tu ey kulang impemin角度 tun Apu Dios. Ya katekkusin tuud kehuwetan tulli ey ya kekastiguan tu.

<sup>19</sup> Ya kawedan impemin角度 tayu ey tep hi Apu Dios hu nemangulun nemin角度 ni hi-gatsu. <sup>20</sup> Ya tuun kantuy pinhed tu hi Apu Dios, nem anggebe-hel tu edum tu ey maitek, tep eleg mabalin ni tu pinheden hi Apu Dios e eleg tu ang-angen hedin eleg tu pinheda hu edum tun tuun han-ang-ang tu. <sup>21</sup> Ya intugun Apu Dios ni hi-gatsu ey kantuy "Ya tuun pinhed tu hi Apu Dios ey mahapul daman pinheden tu edum tun tuu."

## 5

#### *Ya etan kamengippaptek ni hi-gatsu e hi Jesus Christo*

<sup>1</sup> Emin tuun makulug ni tuka kulluga e hi Jesus hu pinutuk Apu Dios ni kamengippaptek ni hi-gatsu ey humman ida tuu tu. Ya tuun pinhed tu hi Ametayu e hi Apu Dios ey pinhed tudda dama etan impantuun Apu Dios e humman ida kamengullug. <sup>2</sup> Hedin pinhed tayu hi Apu Dios et tayu kau-unnuda hu tugun tu, man huyya keang-angan tun pinhed tayu etan ida u-ungnga tu e humman ida kamengullug ni hi-gatu. <sup>3</sup> Ka-immatun hedin wada impemin角度 tayun Apu Dios tep tayu kau-unnuda etan inhel ni tugun tun pehding tayu. Humman ni tugun ey beken ni neligat, <sup>4</sup> tep emin itsun kameibbillang ni u-ungnga tu ey wada kabaelan tayun mengiddinnel nan Jesus ni umbaddang ni hi-gatsun eleg manliwwat niya eleg mengippahding ni lawah tep ya tayu kapengullug nan Jesus.

<sup>5</sup> Ya tuun eleg mengippahding ni lawah ni henin kapehpehding idan eleg mengullug ey humman makulug ni tuka kulluga e U-ungngan Apu Dios hi Jesus.

<sup>6-8</sup> Wada hu tellun pengi-ang-angan e hi Jesus Christo ey makulug ni U-ungngan Apu Dios. Ya memengngulu ey ya nampebenyagan tun danum. Ya meikkadwa ey ya kuheyaw tun immayuh eman ni neteyyan tu. Ya meikkatlu ey ya Ispirituh Apu Dios tep makulug ni emin hu tuka e-hela. Nan-uunnud ida huyyan tellun kamengippeamtan makulug ni U-ungngan Apu Dios hi Jesus. <sup>9</sup> Hedin tayu kakulluga hu kae-helan tuu, ey nema-man kullugen tayu hu kapeang-ang nan hi Apu Dios, tep hi Apu Dios ey neta-ta-gey nem ya tuu. Et ya humman ni impeang-ang tu ey humman keang-angan tun makulug ni U-ungnga tu hi Jesus. <sup>10</sup> Emin ida etan kamengullug nan Jesus e U-ungngan Apu Dios ey neka-amta da e makulug hu inhel Apu Dios meippanggep ni hi-gatu. Nem yadda eleg mengullug ni inhel tu ey impambalin dan maitek.

<sup>11</sup> Ya pinhed Apu Dios ey peamta tun hi-gatsu e indawtan daitsun biyag ni endi pappeg tun wadan U-ungnga tu e hi Jesus Christo. <sup>12</sup> Et humman hu, emin hu nengabulut nan Jesus Christo ey wada biyag dan endi pappeg tu. Nem yadda etan eleg mangulug ni hi-gatu ey endi humman ni biyag da.

*Ya nalpuan ni biyag tayun endi pappeg tu*

<sup>13</sup> Intudek ku huyyan hi-gayun kamengullug ni U-ungngan Apu Dios ma-lat amtaen yu e wada hu biyag yun endi pappeg tu. <sup>14</sup> Wada dinel tayu e emin etan ibbaga tayun Apu Dios ey iddawat tu hedin neiinggeh di pinhed tu. <sup>15</sup> Hedin itsu kamedinnel e dedngelen tu hu dasal tayu, ey makulug ni iddawat tu humman ni hipan tayu kaibbaga.

<sup>16-17</sup> Hedin wada ang-angen yun edum yun wada impahding tun lawah ni panliwwatan tu, nem beken ni nehalman ni liwat, ey idasali yu ma-lat baddangan Apu Dios ni eleg mengippahding ni nunman niya ma-lat pesinsahan Apu Dios humman ni liwat tu. Emin hu lawah ni kakapkapyaan tuu ey liwat, nem wada hu nehalman ni liwat niya wada dama hu beken ni nehalman. Beken ni kangkuy yudda iddasalan ni emin hu kamanliwwat, tep endi silbi tun an iddasalan ida etan nehalman liwat dan daka iggeb-at ni kehgingen hi Jesus.

<sup>18</sup> Inamta tayu e yadda tuun nengabulut nan hi Apu Dios et ya U-ungnga tun hi Jesus Christo e kamengipappatek ni hi-gatsu ey beken ni kenkenayun ni ida kamanliwwat et eleg mabalin ni ida mehe-ul di hipan lawah. <sup>19</sup> Inamta tayu mewan e hi-gatsu hu tuun Apu Dios et emin ida etan tuun eleg mengullug ey humman ida tuun Satanas e ap-apuddan lawah. <sup>20</sup> Ey inamta tayu e immali hi Jesus Christo e U-ungngan Apu Dios, et idwat tun hi-gatsu hu tayu kapengewwat ma-lat amtaen tayu hu makulug ni Dios. Ey wada law nehammad ni neiegian tayun Apu Dios tep neibilang itsun agin U-ungnga tu e hi Jesus Christo. Tep hedin hi Jesus, man makulug daman Dios. Ey hi-gatu hu kamengidwat ni biyag ni endi pappeg tu.

<sup>21</sup> Kaegiegi, ang-ang yu et eleg yu daydayawen ida etan beken ni makulug ni dios.



## Ya Neikadwan Tudek nan John

<sup>1</sup> Nalpu huyyan tudek ni hi-gak e hakey ni pinilin Apu Dios ni mantuttuddu. Nakka pan-ittudek huyyan hi-gam e hakey ni biin \* pinilin Apu Dios ni pantu-u tu, niyadda etan u-ungngam. Nehammad impeminhed kun hi-gayu ey beken nak ni ebuh, nem emin ida dama etan nengulug nan Jesus Christo e makulug hu elaw tu. <sup>2</sup> Et-eteng impeminhed kun hi-gayu tep ya tayu kapengullugin ehel Apu Dios, e humman kaumbaddang ni hi-gatsun kenayun.

<sup>3</sup> Pinhed kun meweddand hi-gayu hu binabbal, ya hemek niya linggep ni kamelpun Apu Dios e Ametayu et hi Jesus Christo e U-ungnga tu ma-lat meihammad hu tayu kapengullug niya pan-impipinhed itsu.

*Ya pengu-unnudan tayun elaw Apu Dios*

<sup>4</sup> Nakka man-am-amleng ni peteg ni nengamtaan kun wadadda hu u-ungngam ni kamengu-unnud ni intugun Ametayun hi-gatsun makulug ni elaw. <sup>5-6</sup> Pinhed kun penemnem mewan ni hi-gam eya tugun e mahapul ni man-impipinhed itsu. Tep hedin man-impipinhed itsu, man u-unnuden tayun emin hu tugun Apu Dios, et humman hu u-unnud yu. Huyyan tugun ey beken ni hin-appil, tep huyya neitugun ni hi-gatsu eman ni laputun nengulugan tayun Jesus.

<sup>7</sup> U-unnud tayu huyyan tugun tep ay dakel ida law di kebebbebley hu mangkaheul e eleg da ebbuluta e nangkapyan tuu hi Jesus Christo. Humman idan mangkaheul ey buhul idan Jesus Christo. <sup>8</sup> Ang-ang yu ma-lat wada silbitu hu mi nantenuttudduan ni hi-gayu et dawaten yullin emin etan iddawat Apu Dios.

<sup>9</sup> Emin ida etan kamengehging ni meippanggep nan Jesus ey beken idan tuun Apu Dios. Nem yadda etan tuun kamengu-unnud ni elaw nan Jesus Christo ey humman ida tuun Ametayu e hi Apu Dios nan hi Jesus Christo e U-ungnga tu.

<sup>10</sup> Emin ida hu um-alid baley yun kamantuttuddun beken ni makulug ni meippanggep nan Jesus Christo ey entan tu hangud niya entan tu pahgep. Ey entan tu ehel ni hi-gatu hu "Melinggep ka kaya." <sup>11</sup> Tep hedin apngaen yu hu henin nunman ni tuu, man heni inebulut yu hu tuka ittuttuddun hin-appil et mekilliwwat kayun hi-gatu.

<sup>12</sup> Dakel et pinhed kun ittudek ni hi-gayu, nem ay ngenamung ali ew ni ellian kudtan hu pengung-ungbalan tayu et wadan man-am-amleng itsullin peteg ni emin.

<sup>13</sup> Anin ida eya u-ungngan agim ni biin pinilin Apu Dios et kanday dakeyu kanenemneman hi-gada.

---

\* **1:1** 1:1 Yad ehel ni Greek, endi maptek ni keibbellinan tu eya kantun "bii" di verse 1 et yad verse 13, hedin humman ey bii tu-wangu winu yadda kamengullug. Nem yadda etan kamengullug na-mu hu pinhed tun e-helen.

## Ya Neikatlun Tudek nan John

<sup>1</sup> Agik Geyus, \* nalpu huyyan tudek ni hi-gak e hakey ni kamengipappangnguluddan kamengullug. Et-eteng impeminhed kun hi-gam.

<sup>2</sup> Daka kaiddasadasali ma-lat ya kayyaggud ni emin hu mekapkapyan hi-gam niya ma-lat eleg ka mandegeh et kakkayyaggud hu annel mu henin kakinayyaggud ni muka pengullugin Jesus. <sup>3</sup> Et-eteng amleng kun nengiddattengan ida eyan edum tayun kamengullug ni dimmateng di deya ni kakinayyaggud ni biyag mun muka pengu-unnudin makulug ni kayyaggud ni elaw ni kinulug mun nunman. <sup>4</sup> Tep ya kamengippeamleng ni peteg ni hi-gak ey hedin dingngel ku e emin kayun nakka ibbilang ni u-ungngak ey yuka u-unnuda eya makulug ni neitugun.

### *Ya natbalan Geyus*

<sup>5</sup> Hi-gam e agik, ey kayyaggud hu impahpahding mu, tep et-eteng baddang muddan kamantuttuddun ehel Apu Dios anin ni eleg mudda inghaan. <sup>6</sup> Humman idan edum tayu hu nengiddatteng ni hi-gamin impeminhed mu niya kakinayyaggud mun hi-gada. Inhel da huyyad mika keemmuemmungin kamengullug nan Jesus di deya. Ang-ang mu anhan idela eya edum tayun panda-guhan dattan et baddangan muddad lawwan da ma-lat man-am-amleng hi Apu Dios. <sup>7</sup> Man-am-amleng hi Apu Dios ni pemaddangan mudda tep umlaw idan an mengituttuddun meippanggep nan hi Jesus ey eleg mabalini ni da ellan hu ibbaddang idan eleg mengullug. <sup>8</sup> Et humman hu, mahapul ni hi-gatsun kamengullug hu umbaddang ni heniddan nunyan tuu ma-lat maibilang itsun heni tayu dama kaittenuttuddu hu makulug.

### *Ya lawah ni impahding Diotrepes*

<sup>9</sup> Nantudekkak idan kameemmuemmung ni kamengullug di bebley yun meippanggep nunya, nem kahing hi Diotrepes. Tuwak kala-pahi et pinhed tun hi-gatu meunnud. <sup>10</sup> Nem yallin ellian kudtan ey e-helen kun emin ida etan el-eleg ni tuka pehpehding heni etan ni itek ni tuka e-e-helan meippanggep ni hi-gami. Ya hakey mewan ey eleg tu hengnguhengnguda ida etan edum tayun kamengullug ni kaumhawang di ditan e bebley yu. Ey hedin wada mewan ni hi-gayu hu kamenengngud ni hi-gada, man nemahhig hu bunget tun hi-gada et eleg tudda law peki-emmung etan di yuka pandaydayawi.

### *Ya elaw Demetrio*

<sup>11</sup> Hi-gam e agik Geyus, beken ni ya lawah hu u-unnuden. Ya kayyaggud kumaddan hu u-unnud mu, tep ya tuun kayyaggud hu tuka pehpehding ey kaippaptek nan Apu Dios. Nem ya tuun lawah tuka pehpehding ey eleg tu amta hi Apu Dios. <sup>12</sup> Heni hi Demetrio, e katettebalan emin ni tuu e kanday kayyaggud, tep ka-ang-ang hu tuka pengu-unnudin neitudun makulug. Anin hi-gak et nakka ebbuluta e kayyaggud numan niya anin ni hi-gam et amta yum e makulug huyyan inhel ku.

<sup>13</sup> Dakel et hu pinhed kun ittudek ni hi-gam, <sup>14</sup> nem ngenamung ali ew ni ellian kudtan ni pan-ung-ungbalan ta.

<sup>15</sup> Nakka iddasal e ya linggep hu meweddan hi-gam. Emin ida eya edum tayudya ey kanday daka kanenemneman hi-gada. Ehel mudda dama etan ni edum tayudtan, e nak ida dama kanenemnema.

\* 1:1 1:1 Acts 19:29, et ya Romans 16:23 niya 1 Corinthians 1:14

## Ya Intudek Jude

<sup>1</sup> Huyyan tudek ey nalpun hi-gak e hi Jude e bega-en nan Jesus Christo. Agi tuwak nan James. Nakka pan-ittudek huyyan hi-gayuddan tuun nakappinshed Ama tayun Apu Dios ni inaygan tun pantu-u tu niya kaipapaptek nan Jesus Christo.

<sup>2</sup> Ya nakka iddasal ey meweddand hi-gayun ingganah hu hemek Apu Dios, ya impeminhed tu, niya linggep ni kamelpun hi-gatu.

*Ya etan ida neihlan daka ittenuttuddu*

<sup>3</sup> Kaegiegi, mantuddekkak et ni hi-gayun meippanggep ni kapenellaknibin Apu Dios ni hi-gatu. Nem ay ninemnem kun mahapul ni mantuddekkak ma-lat ehelen kun hi-gayu e ya kayyaggud ey pambabaddang kayun mengi-ehnung ni tayu kapengullug nan Apu Dios. Tep wadadda edum ni tuun ya pinhed da ey iwwalleng tayu hu tayu kapengullug. Nem entan kaya tu kulug humman idan tuu. Tep ya etan kinulug tayu dedan nunman ni indinel Apu Dios idan tuu tu ey eleg mabalin ni an mehullulan. <sup>4</sup> Intudek ku huyya tep humman idan edum ni tuu ey eleg da deyyawa hi Apu Dios, nem eleg mi amta e eleg ida mengullug nan Jesus ni nunman ni nengabulutan midda. Daka hehwia hu binabbal Apu Dios idan neliwtan, tep intudu da hu neihla e kanday anin pehding da hu hipan pinhed ni annel da, yaggud eleg umbunget hi Apu Dios, tep et-eteng impeminhed tun hi-gatsun neliwtan. Ya hakey mewan ey eleg da ebbuluta e hi Jesus Christo e Apu tayun ebuh hu meunnud, e endi edum. Nem humman idan tuu ey wada dedan neitudek eman ni nebayag ni inhel Apu Dios ni kastiguddan henin nunman ni tuu.

<sup>5</sup> Inamtak e neka-amta yu eya impahding Apu Dios, nem anin, penemnem ku mewan ni hi-gayu e yadda helag Israel ey neihwang idad daka panligligasid Egypt tep impakal idan Apu Dios diman. Nem entanni ey kinastigu tudda etan eleg mangulug ni hi-gatu et matey ida. <sup>6</sup> Hanniman ida dama eman edum ni anghel e kakkayyaggud idan nunman, nem nanliwat ida tep eleg da ipahding hu ngunu da dedan ni indinel Apu Dios ni hi-gada et dekugen da nanha-adan da, mukun impalaw tuddad engeenget et naneng tuddadman ingganah alin kehuwetan da et mekastigudda. <sup>7</sup> Ey entan tu liwwan hu neipahding di Sodom niyad Gomorrah, niyadda etan kebebbeley di nanlinikweh diman e kinastiguddan Apu Dios tep nabngang ida katuutuud man, et legaben tu humman idan bebley. Huyya kastigu da tep nemahhig liwat dan henin nanliwtan idan anghel, tep imminam ni hi-gada hu lellelgemen hu uliulig ni tuu e eleg da u-unnuda hu tugun Apu Dios ni pan-ahwaan e pakkaw ya laki niya bii hu man-ahwa. Nem ay yadda lakidman ey ya edum dan laki daka adduma henin pan-ahwa da. \* Huyyan nanlegaban nan Apu Dios ni bebley di Sodom niyad Gomorrah hu kei-ingngehan ni kastiguddan tuun manliwwat.

<sup>8</sup> Hanniman ida dama etan tuun kangkun kamengittenuttuddun neihla et eleg da kekkenenga annel da, tep am-amleng dan ipahpahding hu lawah ni pinpinhed ni annel da. Daka kehinga hi Apu Dios e Apu tayu niya daka pippihuladda anghel. <sup>9</sup> Nem hi Michael e eta-gey ni anghel ey eleg tu pihulen hi Satanas eman ni nanhubegan da hedid hipa mengellan annel Moses eman ni neteyyan tu, tep kantun ebuh ey "Ngenamung hi Apu Dios ni mengibbunget ni hi-gam."

<sup>10</sup> Nem huyyaddan tuu ey lawah daka e-helan etan ni eleg da ewwasi. Henidda animal e eleg da nemnema hu daka pehpending, et humman kamemahbah ni hi-gada. <sup>11</sup> Angehemmek ida tep daka u-unnuda elaw nan Cain ni nunman e pintey tu agitu. Henidda la hi Balaam, tep daka u-unnuda elaw ni beken ni makulug tep ya pihuh hu daka gagamgami. Henidda la mewan nan Korah e kinehing tu hi Moses et kastiguen nan Apu Dios. Et mukun kastiguen idalli daman Apu Dios.

<sup>12</sup> Huyyaddan tuun kamengituttuddun beken ni makulug ey endi baing da. Ida kaumbabahbah di yuka keemmuemmungin yuka pengngannin penginnemneman yun neteyyan Jesus et ya netagwan tu. Ebuh annel dan daka nemnemnema. Ida kamelaglagabin mengngan ey daka pan-ituuk meinnun et ida kameendii edum. Henidda kulput ni endi udan e kameihuyahuyyaw di dibdib ni ebuh. Henidda etan ni keyew ni eleg umlameh ni ahilammehahan da tep nelaug et mabwag. <sup>13</sup> Henidda mewan etta-teng ni dalluyun di baybay e kakelpuin nelugit ni lewag ey daka ippahding hu lawah et be-ingen da edum dan tuu. Henidda kebibbittuwen ni kame-me-gah. Huyyaddan tuu ey umlaw idad engeenget ni indaddan Apu Dios ni panha-adan dan ingganah.

\* 1:7 1:7 Ang-ang yu hu Romans 1:24-27.

<sup>14</sup> Hi Enok e meikkeppitun helag nan Adam hu nanghel e wadaddalli hanneyan tuu. Kantuy "Um-ali Apu tayu et ikkuyug tudda hantapug ni anghel ni kakkayyaggud ni peteg <sup>15</sup> et huwetan tu emin tuud puyek. Et emin hu eleg mengu-unnud nan Apu Dios ey mekastigudda, tep ya lawah ni impenahding da niya tep ya lawah ni in-inhel dan hi-gatu."

<sup>16</sup> Huyyaddan tuu ey daka ingngudungudu hi Apu Dios niya ida kamanlillih ni gahat da. Ya lawah hu pinhed da, et humman daka u-unnuda. Nemahhig daka pampahhiya e kanday kayyaggud ida. Kayyaggud daka e-helan edum dan tuu, nem ebuh hedin wada pinhed dan ellan.

*Ya tugun Jude idan kamengullug*

<sup>17</sup> Nem hi-gayuddan kaegiegi, ey nemnemnem yu hu inhel idan apostles nan Apu tayun hi Jesus Christo <sup>18</sup> e kanday "Wadaddalli tuun ngi-ngi-ngian da hu elaw Apu Dios et yadda tuun mengu-unnud ni elaw tu et han dumteng hu kepappegan ni puyek. Huyyaddan tuu ey ya lawah pinhed dan u-unnuden." <sup>19</sup> Ey huyyaddan tutu-u hu kaumhulun ni kebabbahan ni kapandadagyumiddan kamengullug ey ebuh lawah ni daka nenemnema niya endi hu Ispirituh Apu Dios ni hi-gada.

<sup>20</sup> Nem hi-gayun kaegiegi ey ya kumaddan keihhammadan ni yuka pengullug nan Jesus hu gagamgami yu. Ey yad pandasalan yu, ey idinel yun Ispirituh Apu Dios. <sup>21</sup> Pannananeng yun mandinnel di impeminhed Apu Dios eyan tayu kapenehhegedin pengidwatan Apu tayu hi Jesus Christo ni biyag tayun endi pappeg tu tep ya hemek tun hi-gatsu. <sup>22</sup> Hemek yudda hu kamandinwa et baddangan yuddan mengihhammad ni daka pengullug nan Apu Dios. <sup>23</sup> Baddangi yudda dama etan edum ni neliwtan ma-lat eleg dalli panlelehhanaan di apuy. Wadadda mewan hu edum ni kahing idan peteg, tep imminam ni hi-gada hu lawah. Et humman hu, helipat-i yu tep entanni ey medinni kayu kumedek ni manliwwat.

*Ya lebbeng tun penaydayawan Apu Dios*

<sup>24</sup> Medeyyaw hi Apu Dios e kabaelan tun mengippaptek ni hi-gatsu ma-lat eleg tayu iwelak hu tayu kapengullug ma-lat edum alin aggew ey ewwiten daitsu et man-amamleng itsun peteg di hinanggab tu tep endilli law ni hekey hu liwat tayu. <sup>25</sup> Endi edum ni henin hi-gatu, ebuh tun Dios e kamenellaknib ni hi-gatsu. Et ya pinhed ku ey immatunan alin emin ni tuu e hi Apu Dios hu kamedeyyaw, keta-ta-geyyan, kamenettengged ni emin, niya et-eteng kabaelan tun nunman, yan nunya niyallin ingganah, tep ya impahding nan Apu tayu e hi Jesus Christo. Amen.

## Ya Neitudkan ni Impeamtan Jesus

<sup>1</sup> Huyyan libluh hu neitudekan ni mekapkapyallin edum ni aggew ni impeamtan Apu Dios nan hi Jesus ma-lat peamta tu damaddan kamengullug. Hi-gak e hi John e bega-en nan Jesus ey inamtak ni emin huuya tep intu-dak tu hu hakey ni anghel et peamta tun emin ni hi-gak. <sup>2</sup> Et yadda huuyan emin ni intudek ku ey humman ida inang-ang ku niya dingngel kun nalpun Apu Dios ni impeamtan Jesus ni hi-gak.

*Ya inhel daddan kamengullug di pitun simbaan*

<sup>3</sup> Ya tuun memidbid niya mengullug idan nunyan neitudek eyad libluh ey iddawtan Apu Dios ni panyaggudan tu tep kamangkedettengi law hu keippahdingan tudda huuya. <sup>4</sup> Huyyan tudek kun hi-gayun kaegiegin kameemmuemmung etan idad pitun simbaan di probinsiya di Asia ey hi-gak e hi agi yun hi John hu nalpuan tu.

Ya pinhed ku ey meweddin hi-gayu hu binabbal niya linggep ni kamelpun Apu Dios, e wada dedan nunman, yan nunya, niya wadan ingganah. Ey pinhed kun hanniman dama pehding ni Ispirituh tun pitu kabaelan tun wadad hinanggan Apu Dios di yinudungan tun tuka pan-ap-apui. <sup>5</sup> Pinhed kun hanniman dama hu pehding Jesus Christo e kameiddinnel ni mengippeennamtan pinhed Apu Dios ni meippahding. Hi-gatu nemangulun netagwan di nangketey niya hi-gatu dama hu ap-apun emin ni ap-apud puyek.

Nakappinhed daitsun hi-gatu et teklaen tu liwat tayun neteyyan tud krus. <sup>6</sup> Pinili daitsun mekilla-kam di nan-ap-apuan tu niya impambalin daitsun heni padin mengippahding ni pinhed Apu Dios e hi Ametu. Kayyaggud hedini hi-gatu man-ap-apun daydayawen tayun kenayun. Amen.

<sup>7</sup> Nemnem yu tep makulug eya e-helen kun hi-gayu. Um-alilli mewan e wadalli kulput di nanlinikweh di kad-an tu. Ang-angen alin emin ni tuu, anin ida etan ni nematey ni hi-gatu. Emin idalli hu eleg mangulug ni hi-gatu ey mannannangngih ida niya umtatakut idan hi-gatu. Makulug ni meippahding alin emin huuya. Amen.

*Ya i-innep nan John ni impeang-ang ni Ispirituh Apu Dios ni ippahding nan Jesus*

<sup>8</sup> Hi Apu Dios e Han-iphahding tun emin ey kantuy "Hi-gak ey wada-ak dedan ni nunman, yan nunya, niya wada-ak ni ingganah. Hi-gak ey wada-ak dedan ni laputu niya wada-ak alin pappeg tu."

<sup>9</sup> Hi-gak e hi agi yun hi John e meilla-kam alid pan-ap-apuan Apu Dios ey nak dama kaisissipel hu nakka panlelehanin ligat tayu tep ya tayu kapengullug nan Jesus. Inali da-ak eyad bebley di Patmos ni neigawwad baybay tep huuya kastiguk ni nakka pengittenuttuudin impeamtan Jesus ni hi-gak. <sup>10</sup> Yan eman ni hakey ni Linggu, ey wada impeang-ang ni Ispirituh Apu Dios ni hi-gak. Entanni ey wada dingngel kun na-let ni ehel di dingkuggan ku e heni tenul ni tangguyup. <sup>11</sup> Kantuy "Itudek mun emin hu ang-angen mu et palaw muddan kamengullug di pitun simbaan ni nei-peng di Asia, e yad Ephesus, yad Smyrna, yad Pergamum, yad Thyatira, yad Sardis, yad Philadelphia, et yad Laodicea."

<sup>12</sup> Nanligguhak et ang-angen ku etan kaman-e-ehhel ni hi-gak ey inang-ang ku pitun balituk ni kapengippettukin kengkeh. <sup>13</sup> Ey yad gawwaddan nunman ni kapengippettukin kengkeh ey wada immehneng ni tuun andukkey balwasi tu niya wada tun balituk ni neiewakeh di pagew tu. <sup>14</sup> Ya ulu tu niya bewek tu ey makablah niya heni tebal ni apuy hu matetu. <sup>15</sup> Ya heli tu ey heni kamammusi-lak ni nemahmah ni giniling. Ya ehel tu ey heni na-let ni bungug ni kamampey-uk ni danum. <sup>16</sup> Wada singnged ni wannan ni ngamay tun pitun bituwen. Ey wada dimmewdew di bungut tun makattadem ni nambina-hil tadem tun ispadah. Ya heyaw ni anghat tu ey heni petang ni nandattekan ni aggew.

<sup>17</sup> Yan nenang-angan kun hi-gatu, ey netukkaddak di kad-an ni heli tu ey heni-ak netey. Ingkapetun hi-gak hu wannan ni ngamay tu et kantuy "Entan takut mu. Hi-gak ey wada-ak dedan ni laputu niya wada-ak alin pappeg tu. <sup>18</sup> Hi-gak etan mategun ingganah. Neteyyak la, nem ang-ang mu kedi e mategu-ak law ni ingganah. Hi-gak nangnged ni alladdud kalawwin kamettey tep hi-gak nangnged ni biyag ni tuu niya wada kelebengan kun mengippellaw ni linnawan tuud lawwan tu hedini netey. <sup>19</sup> Itudek mun emin hu inang-ang mun nunya et ya ang-angen alin mekapkapy. <sup>20</sup> Yadda etan pitun

heni bittuwen ni inang-ang mud wannan ku ey humman ida etan pitun anghel \* ni neng-peng di pitun simbaan. Yadda etan pitun kapengippettukin kengkeh ey humman ida kamengullug etan di pitun simbaan.”

## 2

### *Ya meittuggun idan kamengullug di Ephesus*

<sup>1</sup> Kantu mewan ey “Ya ittudek mu etan ni anghel idan kamengullug di Ephesus ey kammuy: Kan etan ni kamenettengged ni pitun bittuwen di wannan ni ngamay tun kamandalladallan etan di gawaddan pitun balituk ni kapengippettukin kengkeh ey <sup>2</sup> ‘Inamtak hu yuka pehpehding. Inamtak hu hinlu yu niya ya yuka pengissippelin ligat ni ngunu yun mansilbin hi-gak. Ey inamtak e eleg yu u-unnuden ida etan mangkaitek ni tuun kaday apostles ida, nem beken ida kaya, tep pinatnaan yudda et inamta yu law e lawah ida niya maitek ida. <sup>3</sup> Inamtak e nanlelehhanan yu ligat yud ngunu yu gapuh ni hi-gak, nem insisipel yu et eleg yuwak iwalleng. <sup>4</sup> Nem ya eggak pinhed ni hi-gayu ey beken law ni heni eman ni laputun nengulugan yu hu nemihed yun hi-gak niya eleg kayu law man-impipihed. <sup>5</sup> Kele ma-nun nunman tep kayyaggud elaw yu? Nemnem yu tep et-eteng humman ni liwat yu. Pantuttuyyu kayu et ya kayyaggud ni elaw yun nunman hu pannananeng yun pehpehding. Tep hedini eleg yuwak u-unnuda, man umali-ali ali et nak e-kalen etan kapengippettukin kengkeh yu. <sup>6</sup> Nem anin ni humman kangku et nanengtun wada dinel kun hi-gayu tep ya eleg yu peminhedan etan ni lawah ni kapehpehding idan Nicolaitan e anin hi-gak et eggak dama pinhed. <sup>7</sup> Kaegiegi, dengel yu et u-unnuden yu hu kapan-e-helan Ispirituh Apu Dios ni hi-gayun kamengullug e kantuy: Ya tuun eleg tu iwalleng hu tuka pengullug, anin ni hipa mekapkapan hi-gatu ey hi-gatu mengeddani nengapput et hi-gatu pengidwatan kun kelebbengan ni mengngan ni lameh ni keyew ni kakelpuin biyag ni endi pappeg tud kad-an Apu Dios.’”

### *Ya meittuggun idan kamengullug di Smyrna*

<sup>8</sup> Kantu mewan ni hi-gak ey “Pantudek kan etan ni anghel idan kamengullug di Smyrna et ittudek mu e kammuy: Huyya hu inhel etan ni wada dedan ni laputu niya wadallin pappeg tu. Netey, nem simmagu, et yan nunya ey kantun hi-gayuy <sup>9</sup> ‘Inamtak e nemahhig ligat yu niya newetwet kayu, nem ya kakulugan tu ey kedangyan kayu tep et-eteng baddang Apu Dios ni hi-gayu. Ey inamtak hu lawah ni kae-ehheladdan etan ni tuun Satanas e ida kamampahhiyyan kaday Jews ida, nem beken ida kaya tep lawah elaw da. <sup>10</sup> Entan ali takut yu hedini umdateng etan panligatan yu, tep e-helen kun hi-gayu e panligat dakeyuddallin tuuddan Satanas et peikkellabut dakeyulli, nem humman kepatnaan ni yuka pengullug. Anin ni umhulun ni ketteyyan yu humman idallin ligat et entan takut yu et eleg yu isiked hu yuka pengullug ni hi-gak, yaggud nekemtang alin ebuh e heni nekapulun aggew, tep iddawtan dakeyullin hi-gak ni biyag ni endi pappeg tud kad-an Apu Dios.

<sup>11</sup> Kaegiegi, dengel yu et u-unnuden yu hu kae-helan Ispirituh Apu Dios ni hi-gayun kamengullug e kantuy: Ya tuun han-ihikal tullin emin hu ligat tu ey eleg han-apput nan Satanas, et humman hu eleg umlaw di impierno e humman hu meikkadwan ketteyyan.’”

### *Ya meittuggun idan kamengullug di Pergamum*

<sup>12</sup> Kantu pay ni hi-gak ey “Pantudek ka etan ni anghel idan kamengullug di Pergamum et ehelem e kammuy: Hi-gak etan wada matedem ni nambina-hil tadem tun ispadah di bungut tu. <sup>13</sup> Inamtak e yad kad-an yu ey lawah idan peteg hu daki ni tuudtan tep hi Satanas hu daka u-unnuda. Nem inamtak e nehammad hu yuka pengullug tep anin ni pintey da hi Antipas e hakey ni kameiddinnel ni kamengituttuddun meippanggep ni hi-gak et eleg kayu tumekut et eleg yu iwalleng hu yuka pengullug. Kayu kamelilligasidtan tep huttan ni bebley ey heni yadnan namebleyan nan Satanas. <sup>14</sup> Nem ya eggak pinhed ey wadadda etan edum yun daka u-unnuda hu intenuttuddun Balaam nan hi Balak et panliwat tudda tuud Israel. Intenuttuddu tu hu pehding Balak ni mengewwis idan tuun mengi-ullig ni beken da ahwa niya mengngan idan daka i-appit ni beken ni makulug ni Dios, et humman daka panliwwasi. <sup>15</sup> Wadadda dama edum yun kamengu-unnud

\* **1:20** 1:20 Endi maptek hedini hipadda humman ni pitun anghel. Kan ni edum ey makulug idan anghel. Ya edum ey kaday humman ida hu kamengipappangngulun kamengullug di diman ni pitun simbaan. Yadda dama edum ey kaday humman ida daka beggaan mengillaw idan nunyan tudek. \* **2:5** 2:5 Ya pinhed nan Jesus Christo ni e-helen ni nanghelan tun e-kalen tu hu kapengippettukin kengkeh idan kamengullug di hakey ni simbaan ey humman hu keang-angan tun eleg da law han-u-unnud hu tugun tu.

ni lawah ni kaituttudduiddan Nicolaitan. <sup>16</sup> Isiked yun manliwwat tep hedin eleg yu issiked ey um-ali-ak et dakeyu kastiguen niya nak pampetteyen eyan ispadah ni wadad bungut kudda humman ni kamengu-unnud ni daka ituttuddu. <sup>17</sup> Kaegiegi, dengel yu et u-unnuden yu hu kae-helan Ispirituh Apu Dios ni hi-gayun kamengullug e kantuy: Ya tuun eleg tu peapput yu nemnem tud lawah ey iddawtan kun heni kennen e manna ni eleg meamta niya iddawtan kun hi-gatu etan mablak ni batun wada neitudek ni baluh ni ngadan, e endi edum ni nengamta nem ebuh etan mengella.”

*Ya meittuggun idan kamengullug di Tiatira*

<sup>18</sup> Kantu mewan ni hi-gak ey “Pantudek ka etan ni anghel idan kamengullug di Tiatira et ehelen mun hi-gada e kammuy Ya inhel ni U-ungngan Apu Dios e heni kamantettebbel ni apuy hu matetu niya heni kamammussi-lak ni giniling hu heli tu ey kantuy <sup>19</sup> Hi-gayun kamengullug di Tiatira, inamtak hu yuka pehpending, ya impeminhed yu, ya yuka pengullug ni hi-gak, niya yuka pengihikkalin ligat di ngunu yu gapuh ni hi-gak. Ey inamtak e nema-man kayyaggud elaw yun nunya nem ya eman ni laputu. <sup>20</sup> Nem ya eggak pinhed ni hi-gayu ey wada etan hakey ni hi-gayun hi Jesebel ngadan tun kantuy hi-gatu hakey ni pengissikkedan tun nunman ni tuka pehpending, nem eleg tu pinhed ni issiked. <sup>22</sup> Et humman hu, ya pehding ku ey iddawtan kun degeh ni helheltapen tu, anin ida etan ni kamengu-unnud ni tuka ituttuddu, hedin eleg ida mantuttuyyun liwat dan impahpahding da. <sup>23</sup> Emin ida etan kamengu-unnud ni kaitenuttuddu niya kapehpending nan Jesebel ey pepettey kudda et amtaen idallin emin ni kamengullug e hi-gak ey amtak hu wadad nemnem ni tuu niya amtak pinhed dan pehpending. Wadalli dama iddawtan kun hi-gayun emin, nem ngenamung hedin hipa yuka pehpending eyad puyek. <sup>24</sup> Hi-gayuddan edum ni tuud Tiatira ni eleg mengu-unnud nan Jesebel ey endi nak iddawtan ni hi-gayun panliggatan yu, tep egyu adalen hu edum ni neitun impeamtan Satanas. <sup>25</sup> Nem mahapul ni pannananeng yu hu yuka pengullug ingganah alin ellian ku mewan.

<sup>26</sup> Ya etan eleg mengu-unnud ni lawah et ya pinhed ku hu tuka pannananeng ni pehding ey iddawtan kulli kelebengan tun man-ap-apud kebebbebley. <sup>27</sup> Hi-gatulli meunnud di emin niya endi an mengapput ni hi-gatu. Nelakah ali pampengapputan tuddan lawah ni tuu e heniddalli etan ni bewed e nelakah ni pehiken. † Humman ni kelebengan ni iddawtan kullin hi-gatu ey heni kelebengan kun indawat Apu Dios ni hi-gak. <sup>28</sup> Iddawat kun hi-gatu hu talaw. <sup>29</sup> Kaegiegi, dengel yu et u-unnuden yu hu kapan-e-helan Ispirituh Apu Dios ni hi-gayun kamengullug.”

### 3

*Ya meittuggun idan kamengullug di Sardis*

<sup>1</sup> Kantu mewan ni hi-gak ey “Pantudek ka etan ni anghel idan kamengullug di Sardis et ehelen mun hi-gada e kammuy: Kan etan ni pitu kabaalan tun Ispirituh Apu Dios niya nangged ni pitun bittuwen ey ‘Inamtak hu yuka pehpending. Kan idan tuu ey mategu kayu, nem ya kakulugan tu e heni kayu netey, tep eleg maihammad hu yuka pengullug. <sup>2</sup> Pepuhdani yu et ihammud yu hu yuka pengullug nan Apu Dios, tep ekket law ni peteg hu natdaan ni yuka pengullug. Eleg ni hekey pinhed Apu Dios hu elaw yu. <sup>3</sup> Nemnem yudda eman diddinggel yun neitenuttuddun hi-gayu et u-unnuden yu niya pantuttuyyu kayun liwat yu. Tep hedin eleg kayu mantuttuyyu, man um-ali-ak et kastiguen dakeyu. Nem eleg yulli amta hedin pigan tu ellian kud kad-an yu, tep heni-ak ali matekew ni um-ali e eleg tu peam-amta ni inhawang tu.

<sup>4</sup> Nem wadadda hahhakkey ni hi-gayun iSardis ni eleg manliwat. Mekillaw kayullin hi-gak niya mambalwasi kayullin mablak, tep impapaktek yu hu yuka pengullug et eleg yu iwalleng e heni yu ingkakaguh balwasi yu et eleg malugit. <sup>5</sup> Yaddalli etan tuun pannananeng da hu daka pengullug, anin ni hipa mekapkapan hi-gada ey hi-gadalli hu heni nengapput niya mambalwasi idalli daman mablak niya eleg mabalin ni an me-kal hu ngadan da etan di neitudkan ni ngadan idan tuun wada biyag dan endi pappeg tu. Tep peamtak di hinanggan Apu Dios niyadda anghel e humman ida tuuk. <sup>6</sup> Dengel yun kaegiegi et u-unnuden yu eya kapan-e-helan Ispirituh Apu Dios ni hi-gayun kamengullug.”

† 2:27 2:27 Psalm 2:9

*Ya meittuggun idan kamengullug di Philadelphia*

<sup>7</sup> Kantu pay ni hi-gak ey "Pantudek ka etan ni anghel idan kamengullug di Philadelphia et ehelen mu e kammuy: Huyya inhel etan ni kayyaggud ni peteg niya makulug ni Dios, niya nangged etan ni alladdu lan David et hedin in-alladdu tu etan habyen ni dellanen, man endi tuun han-ibeghul tu. Ey hedin mewan imbeghul tu, man endi tuun han-ilekbi tu. <sup>8</sup> Kantuy 'Inamtak hu yuka pehpending. Ey inamtak e kulang kabaelan yu, nem inenu-unnud yu hu nakka ittenuttuddu ey nanengtun nunyan hi-gak hu yuka kulluga. Et humman hu, imbeghul ku etan dellanen yun habyen ni endi tuun han-ilekbi tu. <sup>9</sup> Dengel yu eya e-helen kun hi-gayu: yaddalli etan tuun Satanas ni mangkaitek e ida kapehiyyahiyyan kandy Jews ida, nem beken kaya, ey pandukkun kuddallid hinangga yu et amtaen da e hi-gayu nakappinhed ku.

<sup>10</sup> Inu-unnud yu hu tugun ku et ihikal yu ligat yu, et mukun eleg dakeyulli pekihel-heltap di ligat ni peellik ni pematnaan kun emin ni tuu eyad puyek. <sup>11</sup> Kamangkedettengi law hu keibbangnadan ku. Et humman hu, tettengedi yu hu yuka pengullug ni hi-gak ma-lat endilli mene-ul ni hi-gayu. Tep hedin mehe-ul kayu, man eleg kayulli meidwasin panyaggudan yun iddawat Apu Dios. <sup>12</sup> Ya tuun eleg tu peapput hu nemnem tud lawah ey hi-gatulli hu mengapput niya ihha-ad kun mannananeng ni heni tukud ni Tempol Apu Dios et manha-ad diman ni ingganah. Hi-gatulli heni keittuddekan ni ngadan nan Apu Dios e Dios ku, et mambebley ali etan di baluh ni bebley di Jerusalem e melpun Apu Dios di kabunyan niya hi-gatulli keittuddekan ni baluh ni ngadan ku. <sup>13</sup> Kaegiegi, dengel yu et u-unnuden yu eya kapan-e-helan Ispirituh Apu Dios ni hi-gayun kamengullug.' "

*Ya meittuggun idan kamengullug di Laodicea*

<sup>14</sup> Kantu pay ni hi-gak ey "Pantudek ka etan ni anghel idan kamengullug di Laodicea et kammuy: Ya etan Amen hu ngadan tu e makulug ni emin tuka e-hela niya kayyaggud ni emin tuka pehpending ey hi-gatu umhulun ni nanletuan nan Apu Dios ni emin eyan wadan nunya ey kantun hi-gayuy <sup>15-16</sup> 'Inamtak ni emin hu yuka pehpending. Heni kayun danum ni kulang atung tu niya kulang tengnin tu, tep eleg yuwak peka-u-unnuda. Et humman hu, ibbu-yak dakeyu tep iwwalak dakeyun hi-gak hedin eleg kayu mantuttuyyun yuka pehpending. Heballi ni-ngangu hu maetung kayu winu metengnin kayu. <sup>17</sup> Kanyuy kedangyan kayu tep dakel limmu yu niya wadan emin hu mahapul yu, nem eleg yu anta e newetwet kayu niya anggehemmek kayu. Heni kayu nekulap niya heni kayu eleg mambalwasi, tep endin hi-gayu etan kamelpun hi-gak ni kaikkedangyan ni tuu. <sup>18</sup> Et huyya hu, nakka ittugun ni hi-gayun heballi hi-gak hu pambag-i yun ibbalwasi yun mablaha ma-lat eleg kayu mambebbellad tep angeba-ing. Hi-gak pambag-i yun agah ni mateyu ma-lat han-ang-ang yu niya hi-gak pambag-i yun balituk ni ikkedangyan yu. <sup>19</sup> Emin ida etan nakappinhed ku ey nak ida kaibbunget niya nak ida katagguna. Et humman hu, pinhed kun mantuttuyyu kayun liwat yu et dengelen yu tugun ku.

<sup>20</sup> Dengel yu eya nakka pan-e-hela, tep wada-ak di kad-an yu et heni-ak etan ni tuun tuka an kennugkuga habyen, et ya tuun dedngelen tu ehel ku et ibbeghulan tuwak ey umhegeppak ni an mekikkan ni hi-gatu. <sup>21</sup> Yaddalli etan tuun pannananeng dan ebuh hu kayyaggud ni pehpending da ey iddawat kun hi-gada hu kelebangan dan mekiyyuddung di nengipeyudungan tuwak nan Apu Dios ni man-ap-apu, tep inapput ku dama hi Satanas tep ebuh kayyaggud ni inenu-unnud ku. <sup>22</sup> Kaegiegi, dengel yu et u-unnuden yu eya kapan-e-helan Ispirituh Apu Dios ni hi-gayun kamengullug.' "

## 4

*Ya kedeyawan Apu Dios di kabunyan*

<sup>1</sup> Negibbuh huyya et nak i-ang-ang ey heni neibeghul hu habyen ni kabunyan. Ey dingngel ku hu ehel etan ni imhel ni hi-gak ni laputan heni tenul ni tangguyup e kantuy "Ikay deya et peang-ang kun hi-gam hu mekapkapyalli." <sup>2</sup> Nekekemtang ey impeang-ang ni Ispirituh Apu Dios ni hi-gak hu yuddungngan ni ap-apud kabunyan e wada yimmudung. <sup>3</sup> Ya ang-ang ni angah tu ey kamammussiil e heni etan ni batun jasper niya carnelian. Ey wada sibbunglun ni heni batun emerald e linikweh tu etan yuddungngan. <sup>4</sup> Wadad nanlinikweh etan ni yuddungngan hu dewampulut epat mewan ni yuddungngan niya wadada yimmudung ni aap-apun nampambalwasin mangkablaha niya nampampenget idan balituk. <sup>5</sup> Entanni ey wadalli nalpu etan di yuddungngan ni ap-apud kabunyan ni kedyam, ya na-let ni bungug niya na-let ni kidul. Wada mewan pitun dilag ni kamantettebbel di hinanggan yuddungngan ni ap-apu e humman ida immatun ni Ispirituh Apu Dios e wada pitun kabaelan tu. <sup>6</sup> Wada damad hinangga etan



ni yuddungnan hu diggal ni henin baybay hu lakkeb tu niya heni crystal e kamaka-ang-ang ni peteg.

Ey wadadda epat ni mategun kaman-eh-ehneng di nanlinikweh etan ni yuddungnan e nemataan di nambinbina-hil hu annel da. <sup>7</sup> Ya etan nemangulu, ey heni layon hu ang-ang tu, ya etan neikadwa, ey heni lakkitun baka, ya etan neikatlu, ey heni angh ni tuu angh tu, et ya etan neika-pat ey heni tulduh ni kamantattayab. <sup>8</sup> Wada han-emen ni payak dan nemataan di nambina-hil. Daka i-anteng a-appeh anin hileng niyan kawwalwal. Kandad a-appeh da ey

“Kayyaggud ni peteg, kayyaggud ni peteg, kayyaggud ni peteg ni Ap-apu e Dios ni Han-ipahding tun emin. Wada ngu dedan ni nunman et yan nunya ey wadan ingganah.”

<sup>9</sup> Daka i-ena-appeh hu daka penaydayaw niya daka pansalamat etan ni yimmudung di yuddungnan ni ap-apu e wadan kenayun. <sup>10</sup> Ey hedid idan kaman-a-appeh, man ida kamandukkun etan dewampulut epat ni aap-apu di hinangga etan ni yimmudung ma-lat daydayawen da. Ey daka ihha-ad hu balituk ni penget dad hinangga tu niya ida kaman-a-appeh e kanday

<sup>11</sup> “Apu e Dios mi, deyyawen daka kumaddan, tep ya kasina-gey mu niya et-eteng ni kabaelan mu, tep hi-gam nanletun emin. Em, lintum idan emin eyan wadan nunya tep humman pinhed mu.”

## 5

*Ya etan neludun ni papil niya etan Impah ni Kalneroh*

<sup>1</sup> Entanni ey wada inang-ang kun neludun ni papil di wannan ni ngamay etan ni yimmudung di yuddungnan ni ap-apu. Netudkan di nambina-hil niya pitu impamket da. <sup>2</sup> Ey inang-ang ku hu makewiging ni anghel e inlet tu ehel tu e kantuy “Hipa wada kelebengan tun mengkal eyan impamket da ma-lat ukyaden tu eya neludun ni papil?”

<sup>3</sup> Nem endi hakey di kabunyan, yad puyek niyad nandaul ni dammutun an memekyag etan ni neludun ni papil ma-lat bidbiden tu. <sup>4</sup> Et mannannangngihhak tep endi anin hakey ni lebbeng tun memekyag nunman ni neludun ni papil ma-lat bidbiden tu. <sup>5</sup> Nem kan etan ni hakey ni ap-apun hi-gak ey “Isiked mun umnangih. Dammutun kabaelan etan ni kameingngadnin Layon ni nalpud helag nan Judah e helag nan David. Tep inapput tun emin hu lawah, et dammutun han-ekal tu etan pitun impamket da etan ni papil ma-lat ukyaden tu.”

<sup>6</sup> Entanni ey inang-ang ku etan kameingngadnin Impah ni Kalneroh di kad-an etan ni yuddungnan ni ap-apu e immehneng di nanggawwaan ida etan ni epat ni mategu niyadda etan aap-apu. Inang-ang ku hu liput tun nemateyan dan nunman. Pitu haduk tu niya pitu matetu e humman ida immatun ni Ispirituh Apu Dios e wada pitun kabaelan tun neitu-dak eyad puyek. <sup>7</sup> Limmaw humman ni Impah ni Kalneroh et tu al-en etan papil ni neludun di wannan etan ni yimmudung di yuddungnan ni ap-apu. <sup>8</sup> Yan nengal-an tun nunman ni neludun ni papil ey nandukkun ida etan epat ni mategu niyadda etan dewampulut epat ni aap-apu di hinangga tu et daydayawen da. Wada singnged dan gitalah da niya mahukung ni duyun balituk e napnun insensoh e humman hu neiha-adan ni dasal idan tuun Apu Dios.

<sup>9</sup> Et ia-appeh da eya baluh ni a-appeh e kanday

“Hi-gam hu wada kelebengan tun mengella etan ni neludun ni papil ma-lat ekalen mu hu peket tu tep ya nemateyan daka hu neneklaan mun liwat idan tutu-ud kebbebley e nambakbaklang hu nahlagan da, ya ehel da niya neitu-wan da et nambalin ida law ni tuun Apu Dios.

<sup>10</sup> Impambalin idan Apu Dios ni padin mengippahding ni pinhed tu et hi-gada mampan-ap-apullid kebbebley di puyek.”

<sup>11</sup> Entanni mewan et man-ang-anggak ey wada dingngel kun ehel idan dakel ni anghel e eleg ida mebillang. Immehneng idad nanlinikweh di kad-an etan ni yimmudung di yuddungnan ni Ap-apu niyad kad-an etan idan dewampulut epat ni aap-apu niyadda etan epat ni mategun kaman-eh-ehneng. <sup>12</sup> Daka pan-cleta a-appeh da e kanday

“Wada kelebengan etan ni kameingngadnin Impah ni Kalneroh ni pintey dan menewwat ni et-eteng ni kabaelan, ya kinedangyan, niya laing. Ey lebbeng tu dedan ni melispituh, medeyyaw niya metbal.”

<sup>13</sup> Ey dingngel ku a-appeh idan emin ni wadad kabunyan, yad puyek, yad nandaul niyad baybay e kanday

“Ya etan yimmudung di yuddungngan ni Ap-apu niya etan Impah ni Kalneroh hu lebbeng tu dedan ni metbal, melispituh, medeyyaw niya wada et-eteng ni kabaelan dan ingganah.”

<sup>14</sup> Hinumang ida etan ni epat ni mategu et kanday “Amen.” Et mandukun ida aap-apu et daydayawen da hi Apu Dios niya etan kameingngadnin Impah ni Kalneroh.

## 6

*Ya na-kalan etan ni neipket etan di neludun ni papil*

<sup>1</sup> Entanni ey inang-ang ku etan Impah ni Kalneroh e ingkal tu etan nemangulun impamket da etan ni neludun ni papil ey dingngel ku ehel etan ni hakey ni mategu e heni kidul tep na-let ehel tu e kantuy “Ikay.” <sup>2</sup> Nak i-ang-ang ey wada mablah ni kebayyu. Wada singnged etan ni nantakkay ni pana niya wada indawat dan hi-gatun balituk ni kinapya dan penget. Limmaw ni an mekiggubbat ey heni sindalun kamengapput ni ingganah.

<sup>3</sup> Ingkal etan ni Impah ni Kalneroh hu neikadwan impamket da ey dingngel ku etan neikadwan mategu e kantuy “Ikay.” <sup>4</sup> Entanni ey wada mewan immalin hakey ni madlang ni kebayyu. Ya etan nantakkay ey wada kelebengan tun mengi-lin gubat di puyek ma-lat mampapatey ida tuu. Wada indawat dan hi-gatun andukkey ni ispadah.

<sup>5</sup> Ingkal mewan etan ni kameingngadnin Impah ni Kalneroh hu neikatun impamket da ey dingngel ku etan neikatun mategu e kantuy “Ikay.” Nak i-ang-ang ey wada hu andeket ni kebayyu. Wada singnged etan ni nantakkay ni killohan. <sup>6</sup> Ey wada dingngel kun immehel di kad-an ida etan ni epat ni mategu e kantuy “kagedwah ni talub ni wheat winu hantalub et kagedwah ni barley hu tangdan ni han-aggew. Ey entan tu peta-gey hu bayad ni mansikan olibah niya kameinum.”

<sup>7</sup> Ingkal mewan etan ni kameingngadnin Impah ni Kalneroh etan neika-pat ni impamket da ey dingngel ku ehel etan ni neika-pat ni mategu e kantuy “Ikay.” <sup>8</sup> Nak i-ang-ang ey wada hu nandep-ul ni kebayyu. Ya ngadan etan ni nantakkay ey hi Patey ey kameitu-tu-nud hi Hades e kalawiddan netey. Wada kelebengan ida etan ni dewwan memettey ni kagedwah ni gadwan tutu-u eyad puyek. Hi-gada kamengippeellin gubat, ya bisil, ya degeh niyadda angetakkut ni animal di puyek.

<sup>9</sup> Ingkal etan ni Impah ni Kalneroh etan neikeliman impamket da ey inang-ang kudaul ni altar hu linnawaddan tuun pinetepetey da tep ya nengitenuttudduan dan ehel Apu Dios niya tep impannananeng da hu daka pengullug nan Jesus, et humman da intenuttuddu. <sup>10</sup> Intekuk ida etan ni linnawa e kanday “Apu e Han-ipahding tun emin, kayyaggun kan peteg niya hi-gam hu makulug ni Dios. Pigan tu panhuwetan mun tuu et kastiguan mudda etan nematey ni hi-gami?” <sup>11</sup> Inang-ang ku ey indawtan daddan mangkablal ni balwasi humman idan linnawa. Ey wada nanghel ni hi-gadan man-iyatudda ni pay ingganah ni medettengan etan bilang ni edum dan bega-en Jesus ni meippepetey tep ya daka pengullug e heni neipahding ni hi-gada.

<sup>12</sup> Entanni ey inang-ang ku e ingkal etan ni Impah ni Kalneroh etan neika-nem ni impamket da etan di papil ey pinhakkeyey nanyegyeg ni na-let. Nak i-ang-ang di aggew ey nambalin ni andeket e heni andeket ni luput. Ey nambalin etan netullikeng ni bulan ni madlang e heni kuheyaw. <sup>13</sup> Nangka-gah ida bittuwen di puyek e heni naplagnan ni lameh ni keyew hedun pimmewek. <sup>14</sup> Neendi hu kabunyan tep heni papil ni neludun. Emin ida etan duntug ey nangkaglid ida, anin ida etan ni puyek ni nangkeigawwad baybay. <sup>15</sup> Emin ida tuud puyek, anin ida etan ni ap-apu, yadda etata-gey saad da, yadda ap-apun sindalu, yadda kedangan niyadda et-eteng kabaelan dan tutu-u, yadda himbut niyadda beken ni himbut ey nampantaludda leyang niyad hungab di kedunduntug. <sup>16</sup> Et ehelen daddan duduntug niyadda batu e kanday “De-hili dakemi ma-lat eleg dakemi ang-ang-angen etan ni yimmudung di yuddungngan ni ap-apu et ya etan Impah ni Kalneroh tep nemahhig bunget dan hi-gami” <sup>17</sup> et nedatngan law hu aggew ni pengastiguan tun hi-gami. Ey nanna-ud ni endin hi-gami hu eleg mekastigu.”

## 7

*Yadda ida etan tuun helag Israel ni wada malkan Apu Dios ni hi-gada*

<sup>1</sup> Negibbu huuya et nak i-ang-ang ey wadadda epat ni anghel ni nei-peng di nandemademang di gilig ni puyek. Impasiked da dibdib di puyek niyad baybay. Anin idan keyew et endin hekey kamanggiggiwwed. <sup>2</sup> Nan-ang-anggak mewan ey wada hakey ni anghel ni nalpud petek ni kasimmilin aggew e wada singnged tun malkan Apu Dios e wadan ingganah. Et eleyen tun umhel ida etan ni epat ni anghel ni nengidwatan Apu Dios ni kabaelan dan memahbah ni puyek niya baybay et <sup>3</sup> kantuy “Entan ni tu

babbah hu puyek niya kabunyan niyadda keyew ingganah malakaan tayuddan emin hu tuktuk idan bega-en Apu Dios.”<sup>4</sup> Ey dingngel ku e ya bilang idan nunman ni nemalkaan hu tuktuk da ey hanggatut et na-pat et epat ni libu e nalpuddad hampulut dewwan helag nan Israel.<sup>5</sup> Hampupulu et dewwan libu hu tuun nemalkaan ni nalpud helag Judah, hi Ruben, hi Gad,<sup>6</sup> hi Asher, hi Naptali, hi Manasseh,<sup>7</sup> hi Simeon, hi Levi, hi Issakar<sup>8</sup> hi Sebulun, hi Joseph et hi Benjamin.

*Ya dakel idan neamuamung ni tuu*

<sup>9</sup> Nan-ang-angngak mewan ey wadadda neamung ni hantapug ni tuun eleg mebillang. Immehneng idad hinangga etan ni yimmudung di yuddunggan ni ap-apu et ya etan Impah ni Kalneroh. Nalpuddad nambakbaklang ni bebley ey nambakbaklang ni emin hu nahlangan da, ya ehel da et ya neitu-wan da. Nampambalwasiddan mangkablah ey wada singnged dan bulung ni palmah.<sup>10</sup> Daka e-e-leta ehel da e kanday “Hi Apu Dios e yimmudung di kayuddungin ap-apu et ya etan kameingngadnin Impah ni Kalneroh hu kaumhelaknib.”<sup>11</sup> Yadda etan anghel ni kaman-eh-ehng di nanlinikweh di kad-an etan ni yimmudung di kayuddungin ap-apu et yadda etan epat ni mategu niyadda etan aap-apu ey nandukkun idad hinanggan Apu Dios ni menaydayaw ni hi-gatu.<sup>12</sup> Kanday “Amen! Hi Apu Dios hu metbal, melispituh niya medeyyaw ni ingganah. Ey hi-gatu pansalamatan emin ni tuu tep ya kalinaing tu, ya kabaelan tu niya kasina-gey tu. Amen.”

<sup>13</sup> Kan etan ni hakey ni ap-apun hi-gak ey “Hipadda eman nampambalwasin mablaha? Attu nangkalpuan da?”<sup>14</sup> Ey kangkuy “Apu, hi-gam nengamtan hi-gada, eggak ida ngu amta.” Et kantun hi-gak ey “Huyyadda etan tuun nehelakniban eman ni nemahhig hu nepalpaligatan ni tuu. Mangkablah hu balwasi da tep imbalbal dad kuheyaw etan ni Impah ni Kalneroh.”<sup>15</sup> Et mukun wadaddad kad-an ni kayuddungin Apu Dios et ida kamansilbin hi-gatud Tempol tun kewa-wa-wa niyan kahilehileng. Ya etan yimmudung di kayuddungin ap-apu hu mengippaptek ni hi-gada tep wadad kad-an da,<sup>16</sup> et endilli da keuppaan, endi da ke-wewan, endi da keptangan niya endi da keettungan.<sup>17</sup> Tep humman ni Impah ni Kalneroh hu heni kamampattul ni hi-gada et ippangulu tuddad hebwak ni kainnumin danun ni kakelpuin biyag. Endilli law umhulun ni da nengngihan di kad-an Apu Dios.”

## 8

*Ya na-kalan etan ni neikepitun neipket etan di neludun ni papil*

<sup>1</sup> Ingkal etan ni Impah ni Kalneroh etan meikkeppitun impamket da etan ni neludun ni papil ey pinhakkeyey immi-ineng ni emin hu wadad kabunyan ni kagedwah ni olas.

<sup>2</sup> Entanni ey inang-ang kudda pitun anghel ni immehneng di hinangngab Apu Dios e wada hanhakkey dan tangguyup ni neidwat ni hi-gada.

<sup>3</sup> Nan-ang-angngak mewan ey immali hakey ni anghel et umehng di kad-an etan ni altar. Singnged tu hu balituk ni pengiggihheban ni insensoh. Indawtan dan dakel ni insensoh et tu giheben etan di altar ni mei-dum di dasal idan tuun Apu Dios. Ya etan altar ey wadad hinangga etan ni yinudungan ni ap-apu.<sup>4</sup> Ya ahuk etan ni insensoh ni singnged etan ni anghel ey limnaw di kad-an Apu Dios e nei-dum di dasal idan tutu-u tu.

*Yadda etan anghel ni wada tangguyup dan nengi-lin ligat ni tuud puyek*

<sup>5</sup> Entanni ey inla etan ni anghel hu pengiggihheban ni insensoh et ha-adan tun apuy ni nalpud altar et bekahen tud puyek ey kamangkikidul niya kamangkekedyam niya nanyegyeg ni na-let.

<sup>6</sup> Entanni mewan ey nandaddan ida etan pitun anghel ni mengippatnul ni tangguyup da.

<sup>7</sup> Impatnul etan ni nemangulun anghel hu tangguyup tu ey angka-gah di puyek hu dallallu niya apuy e na-duman ni kuheyaw. Ey ya ingkatlun puyek ey negihebe et makigihebe hu ingkatlun emin ni keyew niya helek.

<sup>8</sup> Impatnul etan ni neikadwan anghel hu tangguyup tu ey wada etan heni et-eteng ni duntug ni kamantettebbel ni neibkah di baybay. Ey nambalin hu ingkatlun baybay ni kuheyaw<sup>9</sup> et matey hu ingkatlun emin ni hipan mategun wadadman. Anin idan bapor et ingkatlu hu nangebabbah.

<sup>10</sup> Impatnul etan ni neikatlun anghel hu tangguyup tu ey wada et-eteng ni bittuwen ni kamantettebbel ni na-gah alid kabunyan et ma-gahan hu ingkatlun emin ni wangwang

\* 7:14 7:14 Ya pinhed tun e-helen huyya ey na-kal law hu liwat da, tep ingkatey etan ni Impah ni Kalneroh.

niyaddad etan di kautbulin danum. <sup>11</sup> Ya ngadan etan ni bittuwen ey “Kel-it” tep ya ingkatlun danum idad etan di na-gahan tu ey kamangkal-it. Et dakel ida nangketey ni tuun imminum ni danum diman.

<sup>12</sup> Impatnul etan ni neika-pat ni anghel hu tangguyup tu ey neendi hu ingkatlun benang ni aggew, ya bulan niyadda bittuwen. Et engeenget ni ingkatlun aggew niya labbi.

<sup>13</sup> Entanni et mantengngawwak di kabunyan ey wada kamantattayab ni hakey ni tulduh. Kaumtekutekuk e kantuy “Anggehemmek idallin peteg hu tutu-ud puyek tep ya mekapkapyan hi-gada hedind petnul idallin etan ni tellun anghel hu tangguyup da.”

## 9

<sup>1</sup> Impatnul etan ni meikkelliman anghel hu tangguyup tu ey wada inang-ang kun bittuwen ni na-gah alid kabunyan. Humman ni bittuwen hu nengidwatan dan alladdun etan ni neku-kuan ni endi pappeg ni kadinallim tu. <sup>2</sup> Inalladdu tu et tukwaban tu ey neukat ali hu nemahhig ni ahuk e heni nalpud et-eteng ni apuy ey nan-enget tep hinenian ni ahuk hu petang. <sup>3</sup> Entanni ey wadadda dudun ni nalpu etan di ahuk e neidwatan idan kabaelan dan umteled e heni lulluwat. <sup>4</sup> Ya neitugun ni hi-gada ey eleg da bahbahadda neitnem et yadda helek niya keyew, nem ebuh ida hu tuun endi malkan Apu Dios di tuktuk dan da pantetleden. <sup>5</sup> Ma-nut endi kabaelan dan memettey idan tuu, nem panlelehanan da teled dan liman bulan. Ya degeh ni daka kellata ey heni degeh ni kakellatan lulluwat. <sup>6</sup> Yallin nunman e liman bulan ey umhamahamak idalli etan tuun ketteyyan da. Pinhed dallin mettey tep panlelehanan da, nem eleg idalli ni mettey ni nunman.

<sup>7</sup> Ya ang-ang idan nunman ni dudun ey henidda kebayyun neidaddan ni mekiggubbat. Wada impenget dan heni balituk ey heni angah ni tuu hu angah da. <sup>8</sup> Heni bewek ni bii hu bewek da ey heni ngipen ni layon hu ngipen da. <sup>9</sup> Ya pagew da ey neharian ni heni happyyaw ni gumeke. Ya bungug ni payak da ey heni kududdan dakel ni kebayyun nampangguyud ni kalesah ni kamampemsiik ni an mekiggubbat. <sup>10</sup> Wada ikul da ey wada teled ni ikul da e heniddan lulluwat. Humman hu ussalen dan mampehelheltap ni tutu-un liman bulan. <sup>11</sup> Wada apu da e humman etan anghel ni kamampaptek etan ni neku-kuan ni endi pappeg ni kadinallim tu. Ya ngadan tud ehel ni Hebrew ey hi Abaddon, yad ehel ni Greek ey hi Apolyon e ya keibbellinan tu ey “Kaumbabahbah.” <sup>12</sup> Hedind megibbuh huyyan nemengngulun ligat ni angetakkut ey wada pay dewwan meittu-nud.

<sup>13</sup> Impatnul etan ni meikka-nem ni anghel hu tangguyup tu ey wada dingngel kun ehel ni nalpu etan di epat ni dugu etan ni balituk ni altar di kad-an Apu Dios. <sup>14</sup> Kantu etan ni meikka-nem ni anghel ey “Pebukyat mudda etan neikelabut ni epat ni anghel di et-eteng ni Wangwang e Euphrates.” <sup>15</sup> Humman idan neikelabut ni anghel hu neidaddan ni meibbukyat ni kedettengan ni gintud Apu Dios et da pampettey hu ingkatlun tuud puyek. <sup>16</sup> Inhel dan hi-gak hu bilang idan tuun nangkebayyun an mampemettey idan tuud puyek ey kalibulibu bilang da.

<sup>17</sup> Inang-ang kudda etan kebayyu et yadda nampantakkay di i-innep ku ey wada heni happyyaw ni neihenid pagew dan madlang ida edum e henidda apuy niya heni ang-ang ni batu sapphire ida edum. Malulaw ida edum e heni ang-ang ni sulfur. Ya uluddan kebayyu ey henidda ulun layon. Wada kameukkat di bungut dan apuy, ya ahuk, et ya sulfur. <sup>18</sup> Huyyaddan kameukkat di bungut da hu nampematey ni ingkatlun tuud puyek. <sup>19</sup> Humman ni kabaelan dan umpatey ey wadad bungut da niyad ikul da. Ya ikul da ey heni uleg ni wada ulu tu, et humman hu daka lippusi tuu.

<sup>20</sup> Nem yadda etan natdaan ni eleg matey ni tuu ey eleg da isiked hu lawah ni daka pehpending. Eleg da issiked ni menaydayaw idan dimonyoh niyadda etan kinapyaddan tuun u-ukkul ni dios dan balituk, silber, giniling, batu niya keyew ni eleg um-ang-ang, eleg um-ehel, eleg umdengel niya eleg umdalan. <sup>21</sup> Eleg ida mantuttuyun pinetepeteyan da, yadda nengipahdingan dan ayak da, ya nengiuiligan dan beken da ahwa niya nenaketakewan da.

## 10

*Ya etan anghel niya etan ekkeket ni neludun ni papil*

<sup>1</sup> Entanni ey wada mewan hakey ni inang-ang kun makewiging ni anghel ni nalpud kabunyan. Heni nambalwasin kulput ey heni wada impenget tun sibbunglun. Ya angah tu ey heni aggew. Ya heli tu ey heni tukud ni kamantettebbel. <sup>2</sup> Wada singnged tun nebiiklag ni papil. Inggasin tu hakey ni heli tud puyek ey inggasin tu hakey di baybay.

<sup>3</sup> Inlet tu ehel tu ey heni elug ni layon. Negibbuh ni immehel ey hinumang ni kidul ni nangkappitu. <sup>4</sup> Nak et la ittudek hu inhel tu ey dingngel ku ehel ni nalpud kabunyan e kantuy “Entan tu peamta hu in-inhel ni kidul ni nangkappituan tun kinidulan tu niya entan tu itudek.”

<sup>5</sup> Ey ya etan makewiging ni anghel ni inang-ang kun kaman-eh-ehngeng ni inggasin tu hakey ni heli tud baybay et ya hakey ni heli tud puyek ey inta-gey tu ngamay tud kabunyan <sup>6</sup> et mansapatah nan Apu Dios e wadan ingganah e nanletun puyek, ya kabunyan, ya baybay niyaddan emin hu wadadman, et kantuy “Nekemtang law ni ebuh. <sup>7</sup> Hedin umtetnul ali etan tangguyup ni neikepitun anghel, man meippahding law etan impeamtan Apu Dios ida la eman ni bega-en tun prophets.”

<sup>8</sup> Immehel ali mewan etan wadad kabunyan ni dingngel ku la ehel tu e kantuy “Lakkay et mu alen etan papil ni singnged etan ni anghel ni inggasin tu hakey ni heli tud baybay et ya hakey ni heli tud puyek.”

<sup>9</sup> Limmawwak et nak ibegan ellan ku etan papil ni singnged tu ey kantun hi-gak ey “Alam et kanen mu. Malumi-ih di bungut mu e heni putsukan, nem umdegeh ali egeh mu tep umpait di egeh mu hedin ekmunen mu.” <sup>10</sup> Illak et kanen ku ey heni putsukan di bungut ku, nem inekmun ku ey mapeit di egeh ku. <sup>11</sup> Ey kantu mewan ey “Mahapul ni mu peennamta eya inhel Apu Dios ni meippanggep idan ap-apu et yadda etan tuun nangkalpud nambakbaklang ni bebley ni nambakbaklang neitu-wan da niya ehel da.”

## 11

<sup>1</sup> Indawat dan hi-gak hu tepeng ni heni katlubbung et kanday “Lakkay et mu tepengen hu Tempol et ya etan altar di bawang tu ey bilang mudda etan tuun kamenaydayaw nan Apu Dios ni wadadman. <sup>2</sup> Entan tu tepeng etan dallin ni Tempol, tep humman hu neidwat idan tutu-un eleg mengullug nan Apu Dios. Humman idallin tuu ey iggasigasin dalli hu Jerusalem ni na-pat et dewwan bulan e endi lispituh dan nunman ni bebley ni pinilin Apu Dios, tep ippahding dallidman hu hipan lawah ni pinpinhed da.

*Yadda etan dewwan tuun menghel ni tugun Apu Dios*

<sup>3</sup> Ittu-dak kuddalli etan dewwan tuun nambalwasin langgusih et peamta da hu e-helek ni hi-gadan meippahding alin nunman ni hanlibu et dewanggatut et na-nem ni aggew.”

<sup>4</sup> Yadda humman ni dewwan tuu ey heniddalli etan ni dewwan keyew ni olibah niyadda etan dewwan kapengippettukin kengkeh ni wadad hinanggan Apu Dios e Apapun emin di puyek. <sup>5</sup> Hedin wada mengippatnan mengippahding ni hi-gadan lawah, man wada meukkat ni apuy di bungut da, et humman pemettey dan buhul da. Et humman hu, emin ida etan mengippatnan mengippeliggat ni hi-gada ey mettey ida. <sup>6</sup> Eleg ali um-udan ni da pengi-i-helan etan ni impeamtan Apu Dios ni hi-gada, tep wada kabaelan dan mengippesikked ni udan niya kabaelan da daman pambalin ni kuheyaw hu danum. Ey dammutun peelli da hu hipan ligat di puyek hedin pinhed da.

<sup>7</sup> Hedin megibbuh ni peamta da hu impeamtan Apu Dios, ey meukkat ali law hu heni animal ni anggetakkut di neku-kuan ni endi pappeg tu hu kadinallan tu, et an makipetey ni hi-gada ingganah petteyen tudda humman ni dewwa. <sup>8</sup> Et meippullay ali annel dad gawan keltad etan di nandingngel ni bebley ni neipetakan lan Apu dad krus. Humman ni bebley ey kameingnadin Sodom niya Egypt. <sup>9</sup> Emin ali hu tutu-un nambakbaklang bebley da niya nahlagan da, ya ehel da niya neitu-wan da, ey pan-in-aang-angan da hu annel idan nunman ni netey ni tellun aggew et kagedwah. Ey i-e-leg dallin ida meikkullung humman idan dewwan netey. <sup>10</sup> Emin idalli tuud puyek ey man-am-amleng idan neteyyan idan nunman ni dewwan tuu. Mampiyestah idalli niya man-indadawat idallin hipan wadan hi-gada. Mampanggayaddallin emin hu tuu tep netey ida humman ni dewwan nengi-lin nemahhig ni ligat di puyek. <sup>11</sup> Nem hedin melebbah tellun aggew et kagedwah, man tegguan idallin Apu Dios. Um-ehngeng idalli et emin ida etan tuun menang-ang ni hi-gada ey umtakut idan peteg. <sup>12</sup> Wadalli dedngelen idan nunman ni dewwan netagan ni ehel di kabunyan e kantuy “Ikeyuy deya.” Ey ang-ang-angen idallin buhul da e pinhakkeyey wadaddad kulput e immeladdad kabunyan. <sup>13</sup> Yallin nunman ni olas ey manyegyeg ni na-let et mebahbah hu pangil ni bebley et matey hu pitun libun tuu. Et umtatakut idalli edum ni tuu et daydayawen dalli law hi Apu Dios di kabunyan tep ya kabaelan tu. <sup>14</sup> Huyya kegibbuhan ni meikkadwan anggetakkut ni ligat. Nem mekemkemtang et meittu-nud mewan hu meikkatlung anggetakkut ni ligat.

*Ya nengipatnulan etan ni meikkeppitun anghel ni tangguyup tu*

<sup>15</sup> Impatnulan etan ni meikkeppitun anghel hu tangguyup tu ey wadadda ka-hel ni na-let di kabunyan e kanday “Yalli law man-ap-apun emin eyad puyek ey hi Apu Dios nan hi Christo e pinutuk tun mengippaptek ni tuu e hi-gatulli man-ap-apun ingganah.” <sup>16</sup> Ey

yadda etan dewampungul epat ni aap-apun kaumyuyudung di yuddungnan idan ap-apud hinanggan Apu Dios ey limmukbub idan menaydayaw ni hi-gatu <sup>17</sup> et kanday

“Apu Dios e Han-ipahding tun emin, wada ka dedan nunman ey wada kan ingganah. Kami kamansalamat tep impeang-ang mu kabaelan mu et ilepum ni man-apapud puyek. <sup>18</sup> Ida kaumbubunget hu eleg mengullug tep yan nunya nedatngan ni pengippeang-angan mun bunget mu et ya kehuwetan idan nangketey. Ey nedatngan law hu pengidwatan mun kayyaggud ni iddawat muddan bega-en mu, yadda prophets niyaddan emin hu tuum ni kamenaydayaw ni hi-gam, anin yadda nangkebabah niyadda nangketa-gey saad da. Ey nedatngan law hu kekastiguan idan tuun nengipenahding ni lawah di puyek.”

<sup>19</sup> Entanni ey neibeghul hu Tempol Apu Dios di kabunyan et kameang-ang etan Kaban ni neiha-adan ni neitudkan ni nekitbalan tu. Ey kamangkekedyam niya kamangkikidul. Ey wada kamabungngug niya kamanyeyegyeg ey nemahhig hu udan e kamandallallu.

## 12

### *Ya etan Bii et ya etan Dragon*

<sup>1</sup> Entanni ey wada nampeang-ang di kabunyan ni kamengippetnga. Ya ang-ang tu ey biin heni imbalwasi tu aggew tep kaumhili. Heni wadad daul ni heli tu hu bulan niya heni impenget tu hu hampulut dewwan bittuwen. <sup>2</sup> Nambutsug ey nedatngan panungnga tu et kaumpalalapak ni degeh tu.

<sup>3</sup> Entanni ey inang-ang kud kabunyan hu hakey mewan ni kamengippetnga. Ya ang-ang tu ey heni et-eteng ni dragon. Madlang niya wada pitun ulu tun napngetan ni balituk, ey hampulu ha-duk tu. <sup>4</sup> Ginuyud ni ikul tu hu ingkatlun bittuwen di kabunyan et egahan tuddad puyek. Kaum-eehngeng di kad-an etan ni biin man-ungnga, tep pinhed tun kennen etan gelang hedini mekkat.

<sup>5</sup> Nan-ungnga etan bii ey laki, e hi-gatulli ap-apun emin ni bebley niya endilli mengapput ni hi-gatu, niya pakkaw ni ya pinhed tu meunnud. Pinhakkeyey impalaw Apu Dios etan u-ungngad kabunyan di kad-an tu et eleg kanen etan ni dragon. <sup>6</sup> Hedini ya etan bii, man bimmesik di endi nambebley e humman hu indaddan Apu Dios ni tu panha-adan ni keippaptekan tun hanlibut dewwan gatut et na-nem ni aggew.

<sup>7</sup> Entanni ey wada gubat di kabunyan et gubaten Michael niyadda edum tun anghel etan dragon niyadda anghel tu. <sup>8</sup> Ey inapput di Michael etan dragon niyadda anghel tu et degyunen daddad kabunyan <sup>9</sup> et egahan daddad puyek. Humman ni dragon etan la uleg nunman, e hi-gatu etan dimonyoh e hi Satanase kaumhauhaul ni tuud puyek.

<sup>10</sup> Entanni ey wada dingngel kun na-let ni ehel di kabunyan e kantuy “Nedatngan law hu penellakniban nan Apu Dios ni hi-gatsu. Impeang-ang tu hu et-eteng ni kabaelan tun man-ap-apu. Ey impeang-ang daman Christo e intu-dak tun mengippaptek ni tuu hu kelebngan tu. Tep neapput law hi Satanase kenayun ni dakel tuka pebehul idan edum tayun kamengullug di hinangngab Apu Dios. <sup>11</sup> Nengapput ida agi tayu tep ya ineyuhan ni kuheway etan ni Impah ni Kalneroh ni neteyyan ni niya tep ya nengipeenamtaan dan ehel Apu Dios, anin ni humman umhulun ni ketteyyan da. <sup>12</sup> Et mukun pan-am-amleng kayun wadad kabunyan. Nem hi-gayun wadad puyek ey angehemmek kayu, tep wada law hi Satanase di kad-an yu e nemahhig bunget tu, tep inamta tu e anggegannu law ey mepappeg hu pengippahdingan tun pinhed tu.”

<sup>13</sup> Yan nengamtaan etan ni dragon e hi Satanase na-gah di puyek, ey tu nanhamak etan biin nengiuungnga etan ni laki. <sup>14</sup> Nem neidwatan etan biin payak ni et-eteng ni tulduh ma-lat wada inna-nu tun umtayab di puyek ni endi nambebley et meipaptek diman ni tellun toon et kagedwah et endi inna-nu etan ni dragon ni menemmak ni hi-gatu. <sup>15</sup> Entanni ey pinatnaan etan ni dragon ni lelsingen etan biin danum ni kamelpud bunget tu, <sup>16</sup> nem binaddangan ni puyek etan bii, tep nantekang et kamenaggah etan dakel ni danum. <sup>17</sup> Nemahhig bunget etan ni dragon etan ni bii et lumaw, e tudda gubaten ida helag etan ni bii e humman ida etan kamengu-unnud ni tugun Apu Dios niya intuttuddun Jesus. <sup>18</sup> Entanni ey limmaw etan dragon di gilig ni baybay.

## 13

### *Yadda etan dewwan heni animal ni anggetakkut*

<sup>1</sup> Entanni mewan ey inang-ang ku hu heni anggetakkut ni animal ni nalpud baybay. Hampulu ha-duk tu niya pitu ulu tu, ey nangkapngetan ni emin hu ha-duk tu. Ey nangketudkan hu ulu tun lawah e humman keang-angan tu e tuka ngenghaya hi Apu Dios. <sup>2</sup> Heni leopard hu ang-ang tu. Ya heli tu ey heni helin bear. Ya bungut tu ey heni

bungut ni layon. Indawat etan ni dragon hu kelebengan tu, ya kabaelan tu niya saad tun man-ap-apu.

<sup>3</sup> Ya hakey ni ulu etan ni heni animal ni angetakkut ey nemahhig liput tu, nem entanni ey napwahan. Et emin ida tuud puyek ey hi-gatu daka u-unnuda, tep natngaddan nunman ni neipahding. <sup>4</sup> Ey daka daydayawa etan dragon, tep indawat tu kelebengan tu etan ni heni animal ni angetakkut. Anin ya etan animal et daka daydayawa. Kandan daka penaydayaw ey “Endi edum ni henin eyan heni animal ni angetakkut. Endi hakey ni kabaelan tun mekihhanggan hi-gatu.”

<sup>5</sup> Manghay humman ni heni animal ni angetakkut et lawah tuka e-ehhelan nan Apu Dios, nem wada kelebengan tun man-ap-apun na-pat et dewwan bulan. <sup>6</sup> Lawah ni peteg tuka e-ehhelan nan Apu Dios niyadda wadad kad-an tu niya anin ya kabunyan e kapanha-adin Apu Dios et tuka pampihula. <sup>7</sup> Neidwatan ni kelebengan tun mengubbat idan tuun Apu Dios ey dammutun apputen tudda niya wada kelebengan tun man-ap-apun emin ni tuud kebebbley ni nambakbaklang hu nahlagan da, ya ehel da niya neitu-wan da. <sup>8</sup> Emin ida tuud puyek ey daydayawen dalli huuyan heni animal ni angetakkut. Ebu idalli etan neituede hu ngadan dad libluh ni kakeittuddekiddan tuun wada biyag dan endi pappeg tu hu eleg menaydayaw ni hi-gatu. Ya etan libluh ey neituede et han maweda emin eya wadan nunya. Ya kanlibluh nunman ey ya etan kameingnagnin Impah ni Kalneroh e pintey dan nunman.

<sup>9</sup> Hi-gayun wada tangila tu, ey dengel yu eya e-helen kun hi-gayu. <sup>10</sup> Tep yadda etan tuun gahat dan medpap ni meikkullabut ey makulug ni meikkullabut ida. Yadda etan tuun gahat dan ya ispadah mengellan hi-gada ey makulug ni ya ispadah memettey ni hi-gada. Et humman hu, hi-gatsuddan tuun Apu Dios ey pannananeng tayu hu tayu kapengullug ma-lat han-ihikal tayulli ligat tayu.

<sup>11</sup> Entanni ey wada mewan hakey ni inang-ang kun heni animal ni angetakkut ni neukat alid dallem ni puyek. Dewwa ha-duk tu e heniddan ha-duk ni impah ni kalneroh. Ya ehel tu ey heni ehel etan ni dragon. <sup>12</sup> Henin kelebengan etan ni nemangulun heni animal ni angetakkut hu kelebengan tu. Tuka pillita tuun menaydayaw etan ni heni animal ni angetakkut ni wada napwahan ni neliputan di ulu tu. <sup>13</sup> Huyyan neikadwan heni animal ni angetakkut ey han-ipahding tu hu kaketngain tuu. Dammutun tuka peellid puyek hu apuy ni kamelpud kabunyan et panhin-aangangan ni tuu. <sup>14</sup> Impahding tudda miracles ma-lat maidaydayaw etan nemangulun heni animal ni angetakkut ni napwahan hu nemahhig ni liput di ulu tu. Et humman idan miracles hu tuka pene-ul ni tuu. Et ehelen tuddan tutu-u e umkapyaddan u-ukkul nunman ni heni animal ma-lat daydayawen dan dios da. <sup>15</sup> Humman ni neikadwan heni animal ni angetakkut ey wada kabaelan tun mengidwat ni yayyah etan ni kapyaan dan u-ukkul etan ni nemangulun animal et dammutun umhapit niya dammutun petteyen tudda hu eleg menaydayaw ni hi-gatu.

<sup>16</sup> Ey pepillit tullin memalkaan hu ngamay winu tuktuk ni emin ni tuu, anin ni kedangyan niya newetwet, yadda etan wada saad da niyadda endi saad da, yadda himbut niyadda beken ni himbut. <sup>17</sup> Ey endi hakey ni dammutun manggettang niya umgatang hedini endi malkan ngadan etan ni heni animal ni angetakkut niya bilang tun neituede di tuktuk winu yad ngamay etan ni tuu. <sup>18</sup> Huyyan ngadan niya bilang etan ni animal ni angetakkut ey mahapul hu baddang nan Apu Dios et han dammutun ewwatan ni tuu hu keibbellinan da. Ya humman ni bilang e enem ni gatut et na-nem et enem ey humman hu bilang ni tuu.

## 14

### *Ya a-appeh ida etan ni tuun nehelakniban*

<sup>1</sup> Entanni ey inang-ang ku etan Impah ni Kalneroh ni kaman-eh-ehneng di Duntug e Zion niyadda etan hanggatut et na-pat et epat ni libun nangkemalkaan hu tuktuk dan ngadan tu niya ngadan nan Ametu. <sup>2</sup> Entanni mewan ey wada dingngel kun ehel ni nalpud kabunyan ni heni na-let ni bungug ni kamampey-uk ni danum niya heni na-let ni kidul. Humman ni dingngel ku ey heni tenul idan dakel ni nelaing ni manggitalah.

<sup>3</sup> Humman idan hanggatut et na-pat et epat ni libun tuun nehelakniban eyad puyek ey daka i-ena-appeh hu baluh ni a-appeh e hi-gadan ebu hu nengamta. Immehneng idad hinanggan yinudungan Apu Dios, yadda etan epat ni mategu niyadda etan dewampulut epat ni aap-apu. <sup>4</sup> Tep huyyadda ey endi da nansiwsiwani ni bii, nem kayyaggud hu impahpahding da. Ida kamei-unnuunnud etan ni Impah ni Kalneroh, anin ni attu lawwan tu. Huyyadda hu tuun nehelakniban ni neiapit nan Apu Dios niya etan Impah ni Kalneroh. <sup>5</sup> Endi da nanlangkakan niya endi hu hipan da nambahulan.

*Yadda etan tellun anghel*

<sup>6</sup> Entanni ey wada mewan inang-ang kun anghel ni kamantayyatayyab di kabunyan e tuka an peennamta etan kamannananeng ni kameituttuddun meippanggep nan Apu Dios idan katuutuud kebbebley ni nambakbaklang nahlagan da, ya ehel da niya neituan wa. <sup>7</sup> Inlet tu ehel tu et kantuy “Kulug yu hi Apu Dios. Daydayaw yu tep nedatngan law hu panhuwetan tun tuud puyek. Em, daydayaw yu hi Apu Dios e nanletun emin eyan puyek, ya kabunyan, ya baybay niyaddan emin kautbulin danum.”

<sup>8</sup> Neitu-nud ni immali etan neikadwan anghel ey kantuy “Nebahbah! Nebahbah law hu Babilon \* e nandingngel ni bebley! Yadda tuudman ey lawah idan peteg niya dinini dadda tuud kebbebley di puyek ni mengippahding ni lawah, ma-lat eleg da daydayawa hi Apu Dios.”

<sup>9</sup> Neitu-nud ali dama etan neikatlun anghel ey inlet tu ehel tu e kantuy “Emin ida etan kamenaydayaw etan ni heni animal ni angetakktu niya etan u-ukkul tun kinapya da niya inebulut da malka tud tuktud da winu ngamay da <sup>10</sup> ey helheltapen dalli hu nemahhig ni pengastigun Apu Dios ni hi-gada. Nemahhig ali hu kastigu da tep ya bunget tun impahding da. Ang-angen alin etan ni Impah ni Kalneroh niyadda anghel humman idan tuun penelheltapan dan atung ni apuy niya sulfur ni kastigu da. <sup>11</sup> Kewa-wa-wa niya kahilehileng ey endilli da ke-kalan etan di apuy, tep humman kastigu dan daka penaydayawin nunman ni animal ni angetakktu niya etan u-ukkul tu. Humman ida tuu ey nemalkaan ni ngadan tu. Panlelehhanan dallin ingganah hu apuy ni kapellow di nengin-ahpat hu ahuk tu.”

<sup>12</sup> Hi-gayuddan tuun Apu Dios ni kamengu-unnud ni tugun tu niya impannaneng da hu daka pengullug nan Jesus ey mahapul ni eddalen yun mengissippel ni ligat yu.

*Ya panhuwetan Apu Dios ni tuud puyek*

<sup>13</sup> Entanni ey wada dingngel kud kabunyan ni kantuy “Itudek mu e meippalpun nunya ey emin idalli hu tuun manligligat tep ya daka pengu-unnudin Apu Dios ey man-am-amleng idallin ingganah, anin ni netey ida.” Immehel etan Ispirituh Apu Dios ey kantuy “Makulug ni man-am-amleng idalli law ni man-iyayatun ingganah, tep humman pambalanan ni ngunu dan kayyagud.”

<sup>14</sup> In-ang-ang ku mewan ey wada mablah ni kulput e wada kamanyuyyuddung ni heni tuun nampenget ni balituk niya wada singnged tun makattadem ni gapas. <sup>15</sup> Entanni ey immehep ali etan hakey ni anghel di Tempol et eleten tu ehel tu e kantun etan ni kamanyuyyuddung di kulput ey “Alam eya gapas et mu panggapasen neitnem, tep nedatngan law ahianid puyek.” <sup>16</sup> Et lumaw etan yimmudung di kulput et tu anien hu nedatngan ni meennid puyek.

<sup>17</sup> In-ang-ang ku mewan ey wada hu anghel ni nalpu etan di Tempol di kabunyan ey wada dama makattadem ni gapas tu. <sup>18</sup> Entanni ey immehep ali mewan etan hakey ni anghel di kad-an ni altar di bawang ni Tempol. Humman ni anghel ey higuat kamampaptek ni apuy. Intekuk tu etan ni kadwa tun anghel ni wada singnged tun matemed ni gapas e kantuy “Lakkay et mu pampugahan hu lameh idan grapes ni nangeitnem di puyek tep nangkelluum ida.” <sup>19-20</sup> Limmaw etan anghel et tu pampugahan ida etan grapes et iduyag tuddad keppallan et pangkepaleh tudda. Entanni ey heni kuheway hu danum tun kamangkaukat di keppallan et malbeng hu telunggatut et dewwan pulun kilometroh hu kadinukkey tu niya liman piyeh hu kadinallum tu.

**15***Ya etan anghel niya etan manggillig ni ligat*

<sup>1</sup> Entanni ey wada mewan inang-ang kud kabunyan ni kaketngain tuu. Wadadda pitun anghel ni wada hu pitun nambakbaklang ni ligat ni iddawat daddan tutu-u. Huyya manggillig ni ligat ni pengippeang-angan Apu Dios ni bunget tu.

<sup>2</sup> Entanni ey inang-ang ku baybay e heni diggal ey kamantetebbel. Ey inang-ang kudda etan eleg mengu-unnud etan ni heni animal ni angetakktu niya etan u-ukkul tu e eleg mangebulut ni memalkaan etan ni bilang ni mengi-ehheng ni ngadan tu. Ida kaman-ehheng di gilig etan ni baybay e heni diggal, e na-peng idan gitalah ni indawat Apu Dios et ida kaman-a-appeh. <sup>3</sup> Daka pan-ia-appeh hu a-appeh nan Moses e bega-en lan Apu Dios niya humman dama a-appeh ni meippanggep etan ni Impah ni Kalneroh. Kanda a-appeh da ey

\* **14:8** 14:8 Hedin ya Babilon ey tu-wangun bebley di Iraq ni nunman. Nem ya hakey ni neieligan tu ey emin hu tuun eleg mengu-unnud nan Apu Dios, e daka kehingan emin hu elaw tu.



"Kaketngain emin eya dakel ni muka pehpending, Apu Dios e Han-ipahding tun emin. Meandeng niya makulug ni emin hu elaw mu. Hi-gam dedan hu Ap-apun emin ni tuu niya hi-gam ali hu Ap-apun ingganah. <sup>4</sup> Emin hu tuu ey kullugen daka e Ap-apu mi niya daydayawen daka, tep hi-gam ni ebuh hu kayyaggud ni peteg. Emin hu katuutuud kebbebley ey um-aliddan an menaydayaw ni hi-gam, tep inenang-ang ni emin ni tuu ida etan kayyaggud ni muka pehpending." \*

<sup>5</sup> Negibbuh huyya, ey inang-ang ku hu Tempol ni kapanha-adin Apu Dios di kabunyan e neibeghul. <sup>6</sup> Ey inang-ang kun immehep ida etan pitun anghel ni nangged ni pitun nambakbaklang ni ligat ni peelli da. Nampambalwasiddan mangkablah ey wada balituk ni neiewakeh di pagew da. <sup>7</sup> Ya hakey etan idan epat ni mategu ey indawat tudan nunman ni pitun anghel hu hanhakkey dan balituk ni duyun napnu nemahhig ni bunget Apu Dios e wadan ingganah. <sup>8</sup> Ey napnu etan Tempol ni ahuk e humman hu immatun ni kasina-gey niya kabaelan Apu Dios. Eleg mabalin ni wada an umhegep diman ingganah megibbuh etan pitun nambakbaklang ni ligat ni iddawat idan etan ni pitun anghel.

## 16

*Ya panhuwetan Apu Dios niya pengastiguan tudda etan ni kamengehnging ni tugun tu*

<sup>1</sup> Entanni ey wada dingngel kun na-let ni ehel ni nalpu etan di Tempol e kantudda etan ni pitun anghel ey "Lakkayyuy et yu iduyag di puyek hu bunget Apu Dios ni neiha-ad etan idad pitun duyu."

<sup>2</sup> Et lumaw etan nemangulun anghel et tu iduyag hu duyu tud puyek ey nangkebebla annel idan emin etan ni nemalkaan tuktuk dan ngadan etan ni heni animal ni angetakkut niyadda etan kamenaydayaw ni u-ukkul tun kinapya da.

<sup>3</sup> Limmaw etan neikadwa et tu iduyag hu duyu tud baybay ey nambalin hu danum ni heni kuheyaw ni netey et mangkatey idan emin hu kaman-ayyam diman.

<sup>4</sup> Induyag etan ni neikatlun anghel hu duyu tud wangwang niyaddad kautbulin danum ey nambalin ni kuheyaw hu danum. <sup>5</sup> Dingngel ku ehel etan ni anghel ni kamampaptek ni danum e kantuy "Apu Dios, neiptek niya limpiyuh huyyan pengastigum. Hi-gam ni ebuh hu kayyaggud ni peteg. Hi-gam hu endi laputu ey endi pappeg tu. <sup>6</sup> Kayyaggud humman ni impahding mu tep pinetey dadda tuum niyadda prophets mu. Huyya nambalanan ni impahpading da ma-lat ya dama kuheyaw hu innumen da." <sup>7</sup> Wada dingngel kun ehel ni nalpud altar di bawang ni Tempol e kantuy "Apu Dios e Han-ipahding tun emin, makulug numan ni limpiyuh niya neiptek humman ni impengastigum ni hi-gada."

<sup>8</sup> Induyag etan ni neika-pat ni anghel hu duyu tud aggew ey nemahhig ni megihheb ida tuun petang. <sup>9</sup> Ida kamangkaetungi tutu-un petang et daka pan-iidusi hi Apu Dios e nengipealin nunman idan ligat. Eleg ida mantuttuyyun liwat da niya eleg da daydayawa hi Apu Dios.

<sup>10</sup> Induyag etan ni neikeliman anghel hu duyu tud kad-an ni kayuddungi etan ni heni animal ni angetakkut ey nan-enget emin di nan-ap-apuan tu. Ey kapangkalatan tutu-udman hu dila da tep nemahhig daka panlelehhani. <sup>11</sup> Daka pan-iidusi hi Apu Dios di kabunyan tep ya makaggeh niya nangkebeblad annel da. Nem eleg da pinhed ni issiked hu lawah ni daka pehpending.

<sup>12</sup> Induyag dama etan ni neika-nem hu duyu tud et-eteng ni Wangwang e Euphrates ey nema-ganan et man-agwat ida ap-apu niyadda sindalu dan kamelpud kasimmilin aggew.

<sup>13</sup> Entanni ey inang-ang ku e wada neukat ni tellun lawah ni ispirituh e nalpu hakey di bungut etan ni dragon, ya hakey di bungut etan ni heni animal ni angetakkut niya nalpud bungut etan ni beken ni makulug ni prophet etan hakey. Ya ang-ang da ey henidda tukak. <sup>14</sup> Huyyaddan tellun ispirituh ey ispirituh idan dimonyoh ni kamengippeennang-ang ni kaketngain tuu. Dadda kaandinnidinnia hu ap-apud kebbebley di puyek e kandy mambabaddang ida et makigubat idallin Apu Dios. Humman alin aggew ni pegiggubatan da ey gintud Apu Dios e Han-ipahding tun emin.

<sup>15</sup> Nem kan Apu Dios ey "Helipat-i yu tep eleg meamta ellian ku e henin kapehding ni matekew e kamengintutugaw ni hileng. Yadda etan tuun ippaptek da annel dan elliak et eleg ida mengakpayan lawah ey endilli da kebe-ingan, nem man-am-amleng idalli."

<sup>16</sup> Entanni ey inemung idan lawah ni ispirituh hu ap-apud kebbebley etan di bebley ni Armageddon hu ngadan tud Hebrew.

<sup>17</sup> Induyag etan ni neikepitun anghel etan neiha-ad di duyu tud kabunyan ey wada dingngel kun ehel ni na-let ni nalpu etan di yuddunggan ni ap-apud Tempol e kantuy

\* 15:4 15:4 Psalms 86:9 Isaiah 66:23

“Negibbuh law!”<sup>18</sup> Nekemkemtang ey kamangkekedyam niya kamangkikidul ey wada kamabunggug ni na-let. Ey nanyegyeg ni naka-let e endi hu heni nunyan nemahhig ni yegyeg neipalpun laputun newad-an ni tuud puyek ingganah nunya.<sup>19</sup> Nantelu-an ni nebahbah etan nandingngel ni bebley di Babilon, anin idan edum ni etta-teng ni bebley. Ninemnem Apu Dios hu lawah ni impahpahding idan tuud Babilon, et humman binungtan tu et kastiguen tudda.<sup>20</sup> Attukaw ida etan puyek di gawwan baybay niya endi duntug ni kameang-ang.<sup>21</sup> Ida kamangkede-hili tuun dallallun heni batun mangkebel-at ni nalpud kabunyan et kapan-iidusin tuu hi Apu Dios tep ya humman ni nemahhig ni ligat ni impaeli tu.

## 17

### *Ya neieligan etan biin tuka iggatang annel tun laki*

<sup>1</sup> Immali etan hakey ida etan ni pitun anghel ni wada singnged dan duyu et kantun higak ey “Ikay et peang-ang ku hu pengastigun Apu Dios etan ni biin tuka iggatang annel tu. Ya tuka kei-elligi huyyan bii ey ya etan nandingngel ni bebley di kad-an etan ni dakel ni wangwang.<sup>2</sup> Emin ida hu ap-apud kebebbbley ey in-ulig da humman ni bii. Ey emin ida tutu-ud kebebbbley e nebuteng idan impainum tu.”<sup>3</sup> Pinhakkey mewan ey newada hu Ispirituh Apu Dios ni hi-gak et ilaw tuwak di desert. Ey wada inang-ang kun hakey ni biin nantakkay di madlang ni heni animal ni anggetakkut hu ang-ang tu. Pitu ulu tu niya hampulu ha-duk tu niya nangketudkan ida annel tun lawah ni ehel ni keang-angan tun tuka la-pahi hi Apu Dios.<sup>4</sup> Nambalwasi etan biin madlang niya nan-usal ni dakel ni balituk niyadda nangkinginan batu niya pearl. Wada singnged tun balituk ni basuh e neiha-adan idan lawah ni tuka pephehding niyadda lawah ni impahpahding idan tutu-un hineul tu.<sup>5</sup> Wada neitudek di tuktuk tun neligat ni meamta hu keibbellinan tu e kantuy “Ya nandingngel ni bebley di Babilon hu nengipappangngulun emin ni bibi-in daka iggatang annel da niya hi-gatu nengiu-unnadan idan katuutuun mengippahding ni lawah.”<sup>6</sup> Inang-ang ku etan bii ey nebuteng ni kuheyaw ida etan ni tuun Apu Dios ni pinetepetey da tep ya daka pengullug nan Jesus.

Yan nenang-angan kun hi-gatu ey natnga-ak ni peteg et<sup>7</sup> kan etan ni anghel ni hi-gak ey “Entan katngam tep e-helen kun hi-gam hu keibbellinan tudda humman ni inang-ang mun bii niya etan animal ni nantakkayan tun pitu ulu tu niya hampulu ha-duk tu.<sup>8</sup> Humman ni heni animal ni inang-ang mun mategun nunman ey netey law nunya, nem eleg mebeyyag ey meukkat ali law etan di neku-kuan ni endi pappeg tu hu kadinallam tu et lumaw di kekastiguan tun ingganah. Et metngaddallin peteg hu tutu-ud puyek ni penang-angan da mewan ni nunman e anggetakkut ni animal. Humman ida etan eleg maitudek ngadan da etan di libluh ni neitudekan ni wada biyag dan endi pappeg tu e neitudek dedangngu et han maweda emin eya wadan nunya.

<sup>9</sup> Ya keibbellinan tu huyya ey dammutun amtaen ni nenemneman. Ya etan pitun ulun nunman ni animal ey humman ida etan pitun duntug ni bebley ni kapan-ap-apui etan ni bii.<sup>10</sup> Ya hakey mewan ni keibbellinan tu ey humman ida etan pitun ap-apu. Nem neapput ida lima et ya etan meikka-nem hu ap-apun nunya. Meihhullul ali dama etan meikkeppitu, nem nekemtang alin ebuh hu pan-ap-apuan tu.<sup>11</sup> Ya etan heni animal ni wadan nunman, nem endi law nunya ey hi-gatulli meikkewwalun man-ap-apu. Nan-ap-apu lan nunman, tep hi-gatu hu hakey ida etan ni pitun ap-apu, nem anin hi-gatu et umlaw di kalawwin kamekastigu.<sup>12</sup> Yadda etan hampulun ha-duk ey humman ida hampulun ap-apu, nem eleg ida ni man-ap-apu. Meki-ap-apuddallin nekemtang etan ni heni animal.<sup>13</sup> Huyyaddan hampulun man-ap-apu ey nan-iingeh hu wadad nemnem da e iddawat dalli kabaelan da niya kelebngan da etan heni animal.<sup>14</sup> Dalli gubbatan etan Impah ni Kalneroh, nem apputen tuddalli, tep hi-gatu hu Ap-apun emin ni ap-apu niya hi-gatu Patul idan emin ni patul. Emin ida tuun kameikukkuyyug ni hi-gatu ey humman ida nepili niya kameiddinnel ni impantuu tu.”

<sup>15</sup> Kan mewan etan ni anghel ni hi-gak ey “Ya etan ida wangwang ni inang-ang mun kapanyuyuddungi etan ni biin tuka pebeyyad annel tu ey humman kakeiddingpatiddan dakel ni tuun nambakbaklang bebley da, ya nahlagan da niya ehel da.<sup>16</sup> Ya etan hampulun ha-duk niya etan heni animal ni anggetakkut ey humman idalli tuun man-ap-apun anggebe-hel dalli etan bii et ellan dan emin hu wadan hi-gatu niya bebladan da. Petteyen dalli et kanen da laman tu et giheben da genit tu.<sup>17</sup> Ippahding dalli huyya tep impandadagyun Apu Dios nemnem dan mengippahding ni pinhed tu et emin ida ey iddawat da kelebngan da niya kabaelan da etan heni animal et hi-gatu man-ap-apu ingganah um-amnun emin hu inhel Apu Dios.<sup>18</sup> Ya etan biin inang-ang mu ey

humman neidingpatan etan ni nandingngel ni bebley ni ap-apun emin idan aap-apud kebebbbley.”

## 18

### *Ya neapputan ni bebley di Babilon*

<sup>1</sup> Negibbuh huuya, ey inang-ang ku mewan hu hakey ni anghel ni nalpud kabunyan. Et-eteng kelebengan tu niya binnangan tu hu puyek. <sup>2</sup> Simmekuk ni na-let ey kantuy “Nebahbah! Nebahbah hu bebley di Babilon. Nambalyan law ni dimonyoh niyaddan emin hu nambakbaklang ni lawah ni ispirituh. Emin ida etan sisit ni kamengngan ni beken ni malinih ey wadadman. <sup>3</sup> Huuya kastigu da tep impambalin dadda katuuuu niyadda ap-apud kebebbbley ni nangkabngang. Emin ida etan kamampambiyahéh niyadda kamampantendad kebebbbley ey ingkedangyan da humman ni kapambebn-gangiddan tutu-udman.”

<sup>4</sup> Entanni ey wada dingngel kun ehel ni nalpud kabunyan e kantuy “A-allaw kayun tuuk. Hi-yan yu humman ni bebley. Entan pakiliwat yud liwat dadman et eleg kayulli mailegat ni kekastiguan da. <sup>5</sup> Tep gullat ni pantu-tu-nip liwat ni tuudman et dinteng tu law hu kabunyan. Ey eleg liwwanan Apu Dios ida humman ni lawah ni kamekapkapyad man e bebley. <sup>6</sup> Mekastigudda tep ya lawah ni impenahding da ey mahapul ni mandubli hu kastigu da. Em, mandubli hu kastigu da tep impanliwat dadda edum ni tuu. <sup>7</sup> Meidwat ni emin hu ligat ni panlelehhanaan da tep daka igaggaya hu kinedangyan dan peteg. Kanday wadan emin hu mahapul da niya kanday endilli da keliggatan. Ida kamampahhiya e kanday ‘Beken nak ngun nebalu. Et humman hu, eggak alin hekey hiktami ligat niya lemyung, tep ahwa da-ak ni patul.’ <sup>8</sup> Et humman hu, hakey alin aggew et man-iindah ni umdateng hu ligat da. Tep mebisil idalli, wadalli lelemyungan da niya wadalli mettey ni hi-gada. Megihheb ali humman ni bebley tep hi Apu Dios e kamanhuwet ni emin ni tuu ey han-ipahding tun emin.”

<sup>9</sup> Yadda etan ap-apun nengipenahding ni lawah ni henin impenahding idan tuudman ey umnanginangih idalli niya umlelemyung idallin kegihheban nunman ni bebley. <sup>10</sup> Eleg idalli meihehhennup tep ya takut dan kekastiguan da et kandalliy “Ahhaahhah humman ni bebley di Babilon! Aeyulah humman ni nandingngel ni bebley. Nekemtang ni ebuh ey attukaw la humman ni bebley!”

<sup>11</sup> Anin idalli etan ni kamampantenda et umnanginangih idalli niya umlelemyung idalli tep endi law kaumgatang. <sup>12</sup> Endilli law ni hekey umgatang ni daka iggatang idan balituk, yadda silber, yadda etan nangkenginan batu, yadda pearl, yadda luput ni nengina, yadda keyew, yadda gumeke, yadda giniling, yadda marble, <sup>13</sup> yadda insensoh, yadda mira, yadda lana, yadda kameinum, yadda kennen niyadda nangkenginan kaikkamdug di kennen, yadda newang, baka, kalneroh, kebayyu, kalesah, niyadda himbut, niyaddan emin hu kameiggettang ni wadadman. <sup>14</sup> Kan idallin kamampanggettang ey “Emin hu kayyagud ni pinhed ni tuun ellan ni wadad man ni bebley ey attukaw lan emin. Emin kinedangyan niya dayaw eyan bebley ey endi law.”

<sup>15</sup> Eleg idalli meihehhennup ida humman ni kimmedangyan ni kamanggettang etan di bebley, tep ida kaumtakut ni menang-ang-ang ni ligat idan tuudman. Umnanginangih idalli niya umlelemyung ida <sup>16</sup> et kandalliy “Ahhaahhah humman ni bebley di Babilon! Wada lan emin diman hu nangkenginan balwasi, yadda balituk, yadda nangkenginan batu, niyadda pearl. <sup>17</sup> Nem ay pinhakkeyey attukaw idan emin humman ni kinedangyan da!”

Emin ida etan kamampangngunnud bapor di baybay niyadda etan wada kalga dad bapor ey eleg idalli meihehhennup. <sup>18</sup> Tagan dalli nangih ni penang-angan dan ahuk etan ni bebley ni tuka pangkelgabi. Kandalliy “Endi edum ni bebley ni henin nunya!” <sup>19</sup> Pandep-ulan dalli ulu dan tutuyyu da, umlelemyung idalli niya umnanginangih ida. Kandalliy “Ahhaahhah! Endi silbitu law humman ni nandingngel ni bebley. Humman ni bebley hu kinedangyan ida etan ni wada bapor da, nem ay pinhakkeyey attukaw lan emin humman ni kinedangyan dadman.” Humman ali e-e-helen da.

<sup>20</sup> Nem hi-gayuddan emin ni wadad kabunyan, hi-gayuddan apostles, prophets niya hi-gayuddan tuun Apu Dios, ey pan-am-amleng kayun nebahbahan tu humman ni bebley. Tep kinastigu law nan Apu Dios ida tuudman tep ya lawah ni impahpahding dan hi-gayu.

<sup>21</sup> Entanni mewan ey wada hu makewiging ni anghel ni immalan etteteng ni batu et itengba tud baybay, ey kantuy “Henin nunyalli hu kebahbahan ni bebley di Babilon et endilli law tu keang-angan. <sup>22</sup> Yadda etan nangkelaing ni man-a-appéh niyadda etan nangkelaing ni manggitalah, yadda etan amta tu mantullaling niyadda etan

amta dan mantangguyup ey endilli da kedngelan mewan etan di bebley. Ey endilli law mangnungunnudman niya endilli medngel ni mambeyyudman e bebley. <sup>23</sup> Endilli law an meang-ang mewan ni dilag diman niya endilli law an medngel ni mengahwadman. Humman kastigu da, tep yadda etan kamanggettang ni nalpudman e bebley ey ida kametbal, nem hineuheul dadda tuud kebebbebley. <sup>24</sup> Binahbah Apu Dios humman ni bebley di Babilon, tep hi-gada nematey ni emin ida tuun Apu Dios niyadda prophets, anin ida etan edum ni nangketey di puyek.”

## 19

<sup>1</sup> Negibbuh huyya ey wada dingngel kun heni ngalan dakel ni tuud kabunyan e kanday “Daydayaw tayu hi Apu Dios! Hi-gatu hu kamedeyyaw, tep ya kabaelan tu niya hi-gatu kaumhelaknib. <sup>2</sup> Dayaw tayu hi Apu Dios, tep makulug niya meandeng hu tuka penuwet. Binahbah tu humman ni bebley tep yadda tuudman hu himmulun ni nangkabngangan idan katutuud kebebbebley. Em, kinastigun Apu Dios ida bimbley diman tep pinetepetey dadda bega-en tu.” <sup>3</sup> Intekuk da mewan e kanday “Daydayaw tayu hi Apu Dios, tep kaumlaw ni ingganah di ahpat hu ahuk ni kamelpudman ni bebley ni tuka pangkelgabi.”

<sup>4</sup> Entanni ey nandukkun ida etan epat ni mategu niyadda etan dewampulut epat ni aap-apu et daydayawen da hi Apu Dios e yimmudung di kayuddungin Ap-apu et kanday “Daydayaw tayu hi Apu Dios! Amen.”

<sup>5</sup> Entanni mewan ey wadalli immehel di kad-an ni yuddungnan ni ap-apu e kantuy “Hi-gayuddan emin ni bega-en nan Apu Dios, emin kayun kamengullug ni hi-gatu, newetwet niya kedangyan, ey daydayaw tayu hi Apu Dios.”

*Ya pekihhemulan tayud kasal etan ni Impah ni Kalneroh*

<sup>6</sup> Wada mewan dingngel kun ehel idan dakel ni tuu e heni na-let ni bungug ni kamampey-uk ni danum niya heni bungug ni na-let ni kidul e kanday “Daydayaw tayu hi Apu Dios. Tep hi Apu tayu e Han-ipahding tun emin ey hi-gatu Ap-apun emin.

<sup>7</sup> Pan-am-amleng itsu niya panggagaya itsun emin, tep nedatngan hu pangkasalan etan ni Impah ni Kalneroh. Nandaddan etan ahwaen tu. <sup>8</sup> Neidwatan ni nekangngina niya makablah e kaumhilin ibbalwasi tu.” (Ya neieligan tu etan balwasin makablah ni nekangngina ey humman ida hu kayyaggud ni impahding idan tuun Apu Dios.)

<sup>9</sup> Entanni ey kan etan ni anghel ni hi-gak ey “Itudek mu e kammuy: Man-am-amleng ida etan tuun neaygan ni mekihemmul di kasal etan ni Impah ni Kalneroh.” Niya kantuy “Huyyaddan inhel Apu Dios ey makulug.”

<sup>10</sup> Nandukkunnak di hinangga tun menaydayaw ni hi-gatu, nem kantuy “Entan tuwak dayaw. Hi Apu Dios hu dayaw mu. Tep bega-en nak daman ebuh e henin hi-gam niyadda agim ni kamengu-unnud ni makulug ni impeamtan Jesus. Ya tayu kapengippeennamtain meippanggep nan Jesus Christo hu nengamtaan tayuddan mekapkapyallin hakey ni aggew.”

*Ya etan nantakkay di mablah ni kebayyu*

<sup>11</sup> Entanni ey in-ang-ang kud kabunyan ey heni neibeghul ey wada inang-ang kun mablah ni kebayyu. Ya etan nantakkay ey humman etan kameingnadin Makulug niya Kameiddinnel di tuka pehpending. Meandeng hu tuka penuwet ni tuu niya kaumlaw ni an mekiggubbat. <sup>12</sup> Heni tebel ni apuy hu matetu niya dakel hu impengt tu, e humman immatun e ap-apu. Neituede ngadan tud penget tu, nem endi nengamta, ebuh tu. <sup>13</sup> Nekukkuheyaw hu balwasi tu. Ya daka panggeddan ni hi-gatu ey “Ehel nan Apu Dios.” <sup>14</sup> Yadda etan sindalud kabunyan ni nampantakkay di kebayyun mangkablah ey ida kameikukkuyyug ni hi-gatu. Nampambalwasiddan mangkablah ni malinih. <sup>15</sup> Wada matadem ni ispadah di bungut tun humman pengapput tuddallin buhul tud kebebbebley, et endilli an mengapput ni hi-gatu. Apputen tuddalli et hi-gatulli pan-apu da niya kastiguen tuddalli tep nemahhig hu bunget Apu Dios e Han-ipahding tun emin. <sup>16</sup> Wada neituede di balwasi tu niyad heli tun kantuy “Patul ni emin ni patul niya Ap-apun emin ni ap-apu.”

<sup>17</sup> Entanni ey wada inang-ang kun anghel di gawan aggew. Simmekuk et kantuddan sisit ni kamantayyattayab di gawan kabunyan ey “Kaemung kayun emin ni sisit tep piyestah nan Apu Dios. <sup>18</sup> Ali kayu et pangkanen yu hu annel idan buhul Apu Dios ni ap-apuddan tuu, yadda ap-apuddan sindalu, yadda etan tuun nangketa-gey saad da, yadda etan kebayyu, anin idan nantakkay, yadda etan himbut niyadda beken ni himbut, yadda etan eta-gey niyadda nangkebabah ni tuu.”

<sup>19</sup> Ey inang-ang ku etan heni animal ni angetakkut niyadda ap-apud kebebbebley e neamung idan an mekiggubbat etan ni nantakkay di kebayyu niyadda sindalu tun

nalpud kabunyan. <sup>20</sup> Nanggugubat ida ey nengapput etan nantakkay di kebayyu niyadda sindalu tu. Bineludda etan heni animal ni anggetakkut niya etan beken ni makulug ni prophet et pambekahen daddad apuy e wada sulfur tu. Ya etan beken ni makulug ni prophet hu nenauhaul idan dakel ni tuu tep ya tuka peennang-ang ni kaketngain tuud hinangngab etan heni animal ni anggetakkut. Yadda etan tuun nangkehaul ey inebulut dan pemalkaddan malka etan heni animal ni anggetakkut et daka daydayawa etan u-ukkul tun kinapya da. <sup>21</sup> Humman idan kamenaydayaw etan ni heni animal ni anggetakkut ey nampalang etan ni nantakkay di kebayyun ispadah tun wadad bungut tu et mangkatey ida et ipeppheh idan sisit hu annel da.

## 20

### *Ya nebaludan Satanas ni hanlibun toon*

<sup>1</sup> Inang-ang ku mewan hu hakey ni anghel ni nelehbeng alid kabunyan e singnged tu et-eteng ni takilala et ya alladdu etan ni bitun endi pappeg tu hu kadinallam tu. <sup>2</sup> Dimpap tu etan dragon e humman hu uleg lan nunman e hi Satanas e hi-gatu hu Dimonyoh et ibelut tun hanlibun toon. <sup>3</sup> Bingkah tu etan di bitu et ilekbi tu et ialladdu tu ma-lat eleg an humeuheul ni tuud puyek. Pakkaw melebbah hanlibun toon et han-ali mewan maibukyay ni nekemtang.

<sup>4</sup> Entanni ey inang-ang kudda hu yuddungngan ni ap-apud kabunyan ni wada kelebngan dan manhuwet. Ey inang-ang ku linnawadda etan ni tutu-un nangkeputul ulu da tep ya da nengipeenamtaan ni ehel Apu Dios niyadda makulug ni impeamtan Jesus. Niya tep eleg da daydayawen etan heni animal ni anggetakkut niya etan u-ukkul tun kinapya da, ey endi neimalkad tuktuk da winu ngamay dan malka tu. Netagwan ida et makiap-apu idan Jesus ni hanlibun toon. <sup>5</sup> Yadda etan nekiap-apun Jesus ey hi-gada nemangulun netagwan, tep yadda etan edum ni nangketey ey eleg ida metagwan ingganah nelabah hu hanlibun toon.

### *Ya keapputan Satanas*

<sup>6</sup> Humman idan nemangulun netagwan ey man-am-amleng ida tep endi kabaelan ni meikkadwan katey ni hi-gada. Hi-gada law padid Apu Dios nan hi Christo niya meki-ap-appedan Jesus ni hanlibun toon.

<sup>7-8</sup> Meibbukyat hi Satanas hedid melebbah hu hanlibun toon, et tu taggan haul ni katuutuud kebebbley e humman idan bebley hu mengeddanan ni Gog niya Magog, tep lawah hu elaw da. Tuddalli pan-emmungen hu tutu-udman et ida makigubat. Eleg idalli mebillang, tep heniddan kadinakkel ni palnah di gilig ni baybay. <sup>9</sup> Nalpuddad kebebbley et likwehen da etan nakappinshed Apu Dios ni bebley ni nanha-adan idan tuu tu, ma-lat gubaten dadda, nem immali hu apuy di kabunyan et pateyen tudda.

<sup>10</sup> Ya etan dimonyoh e hi Satanas ni nenaui ni hi-gada ey neibkah di apuy ni wada sulfur. Yadman dama kad-an etan ni heni animal ni anggetakkut niya etan beken ni makulug ni prophet et panlelehanan dallidman ni ingganah.

### *Ya panhuwetan Apu Dios ni tuu*

<sup>11</sup> Entanni ey wada inang-ang kun et-eteng ni mablai ni yuddungngan ey wada yimmudung diman. Ey endi maptek ey attukaw la hu puyek niya kabunyan, tep endidda law di kad-an tu. <sup>12</sup> Pinhakkeyey inang-ang kudda etan nangketey lan tuun eta-gey niya nebah hu saad da, kametbal niya eleg, ni kamampan-eh-ehneng di kad-an etan ni yuddungngan ni Ap-apu. Ey inang-ang kudda libluh ni nangkebilag. Ya etan hakey ni libluh hu neitudkan ni ngadan idan tuun meidwatan ni biyag dan endi pappeg tu. Yadda libluh ni nangkeitudkan ni impahpahding ni tuud puyek ey humman ida keangangan ni kehuwetan idan nangketey. <sup>13</sup> Nangkeukat idallin emin hu nangketey ni wadad baybay niyad kalawwin netey e dungay et mehuwetan idad hipan impahpahding da. <sup>14</sup> Et humman ni nambalyan ni patey niya kalawwin netey di dungay ey neibbeng idad apuy e heni lebeng hu kalinakkeh tu, ey humman hu meikkadwan keteyyan. <sup>15</sup> Emin ida etan endi ngadan tud Libluh ni neitudkan idan tuun wada biyag dan endi pappeg tu ey neibbeng ida damad apuy.

## 21

### *Ya baluh ni kabunyan niya baluh ni puyek*

<sup>1</sup> Entanni ey inang-ang ku hu baluh ni kabunyan et ya baluh ni puyek. Neendidda etan nemangulun kabunyan, ya nemangulun puyek niya baybay. <sup>2</sup> Inang-ang kun nalpullid kabunyan hu kakkayyaggud ni bebley nan Apu Dios e humman hu baluh ni Jerusalem. Neka-iyayyaggud nan Apu Dios humman ni bebley et heni law biin nambalwasin

mangkasal. \* <sup>3</sup> Ey wada dingngel kun na-let ni ehel ni nalpu etan di yuddungngan ni Ap-apu e kantuy "Kamekihha-ad law hi Apu Dios idan tuu. Mekibbebley ni hi-gada et pantuu tudda et hi-gatu hu Dios da. <sup>4</sup> E-kalen tu law ni emin hu ligat ni tuu tu et eleg ida law mettey, endi law da lemyungan, endi da nengngihan niya endi da pandedgehan diman. Tep nehullulan law ni emin hu wadan nunman ni laputu."

<sup>5</sup> Kan etan ni yummudng ey "Yan nunya ey impebaluh kun emin." Kantun hi-gak ey "Itudek mu huyya, tep makulug niya kameiddinnel hu nakka e-hela." <sup>6</sup> Kantu mewan ey "Negibbuh law. Hi-gak ey wada-ak dedan ni laputu niya wada-ak alin pappeg tu. Ya tuun na-wew ey iddawtan kun kelebengan tun um-inum ni danum ni endi bayad tun kaum-idwat ni biyag ni endi pappeg tu. <sup>7</sup> Emin ida etan mengu-unnud ni intugun ku ey hi-gak hu Dios da niya hi-gada u-ungngak. <sup>8</sup> Nem yadda etan eleg mengu-unnud lan hi-gak tep ya takut da niyadda etan nengiwalleng ni daka pengullug ni hi-gak, yadda lawah daka pehpending, yadda mangkapetey, yadda nengiuig ni beken da ahwa, yadda maeyak, yadda etan daka deyyawa beken ni makulug ni Dios niyadda mangkaitek ey yad apuy hu lawwan da, e humman meikkadwan ketteyyan."

### *Ya etan baluh ni Jerusalem*

<sup>9</sup> Immali hakey ida etan ni anghel ni nangnged etan ni duyun neiha-adan ni ligat et kantun hi-gak ey "Ikay et nak itudun hi-gam hu ahwaen etan ni Impah ni Kalneroh." <sup>10</sup> Pinhakkey mewan ey inlaw da-ak etan ni anghel di tuktu ni eta-gey ni dunget et itudu tun hi-gak hu Jerusalem e bebley tun kamangkelpullid kabunyan. <sup>11</sup> Kamammussilak ni dayaw nan Apu Dios humman ni bebley e heni jasper e nenginan batu niya heni crystal. <sup>12</sup> Nangehammad niya nangkeita-gey hu tuping tu humman ni bebley. Hampulu et dewwa hu eheb tu. Nei-peng ida hanhakkey ni anghel ni mangguwalya etan di hampulut dewwan eheb. Neitudek hu ngadan ida etan ni hampulut dewwan helag nan Israel etan idad eheb. <sup>13</sup> Hantetlu hu eheb di nambinbina-hil di diman ni bebley di Jerusalem. Tellud appit ni kasimmilin aggew, hantetlud north, yad south niyad kakelinnugin aggew. <sup>14</sup> Ya tuping ni luhud nunman ni bebley ey neibehwat di hampulu et dewwan batun neitudekan ni ngadan ida etan ni hampulut dewwan apostles etan ni Impah ni Kalneroh.

<sup>15</sup> Ya etan anghel ni nekiungbal ni hi-gak ey wada singnged tun balitik ni tepeng ni pempeng tu etan ni bebley, yadda eheb tu niyadda tuping tu. <sup>16</sup> Ya etan bebley ey kuwaddadah e nan-inggeh kalinakkeb tu niya kadinukkey tu. Simpeng etan ni anghel ey dewwan libu et epat ni gatut ni kilometroh hu kadinukkey tu, ya kasina-gey tu niya kalinakkeb tu. <sup>17</sup> Simpeng tu dama etan tuping ey dewanggatut et hampulut enem ni piyeh. Ya elaw ni impampeng etan ni anghel ey henin kapempeng ni tuu.

<sup>18</sup> Ya neituping etan di bebley ey humman etan nenginan batu e jasper. Ey ya etan bebley ey balitik hu nangkeikapya e kaumhili e heni diggal. <sup>19</sup> Ya pegrad ni tuping ey nangkamkamdug ni nangkenginan batu e nantutu-nud ni neipegrad. Ya nemangulun neikapya ey ya jasper, et han meikapya sapphire, ya agate, ya emerald, <sup>20</sup> ya onyx, ya carnelian, ya chrysolite, ya beryl, ya topaz, ya chalcedony, ya turquoise, et han manggillig hu amethyst.

<sup>21</sup> Ya etan hampulut dewwan eheb ey hampulut dewwan pearl hu neikapya. Hanhakkey ni pearl hu neikapyad hakey ni eheb. Ya etan et-eteng ni keltad diman ey balitik ni nemahmah hu neikapya e heni diggal.

<sup>22</sup> Endi tempol diman tep eleg mahapul tep wada hi Apu Dios e Han-ipahding tun emin et ya etan Impah ni Kalneroh. <sup>23</sup> Eleg mahapul hu aggew niya bulan diman tep kadillagiddan dayaw di Apu Dios et ya etan Impah ni Kalneroh. <sup>24</sup> Ya benang nunman ni bebley hu menillag ni dellanen idan kebebbebley. Emin idalli ap-apud kebebbebley ni um-alin mandeyyaw ey peamta da e nalpun Apu Dios ni emin hu dayaw da niya kinedangyan da. <sup>25</sup> Meibebehul ida hu eheb diman, tep kawwalwal ni kenayun. <sup>26</sup> Emin hu dayaw niya kinedangyan idan kebebbebley niyadda tuud puyek ey i-ali dadman e bebley. <sup>27</sup> Nem endilli an umhegep diman ida etan ni tuun lawah daka pehpending, yadda etan mangkaitek, yadda nangkabngang, niyadda etan tuun kamengippebaabaing daka pehpending. Yadda dammutun ebuh ni umhegep diman ey ebuh ida etan neitudek ngadan dad libluh etan ni Impah ni Kalneroh e humman hu libluh ni neitudkan ni wada biyag dan endi pappeg tu.

## 22

### *Ya ellian nan Jesus*

\* 21:2 21:2 Ang-ang yu Revelation 21:9 niya 22:17

<sup>1</sup> Impeang-ang mewan etan ni anghel etan wangwang ni kakelpuin danum ni kaum-idwat ni biyag ni endi pappeg tu e ya ang-ang tu ey heni crystal tep makalli-neng. Humman ni wangwang ey nalpud kad-an Apu Dios niya etan Impah ni Kalneroh et <sup>2</sup> mandalan di gawwa etan ni et-eteng ni keltad ni bebley. Wada etan keyew ni kamengidwat ni biyag di nambina-hil ni wangwang e kaumlameh ni pinhakkey ni hambulan. Kamampinhampulut dewwan umlameh ni hantoon. Kai-agah idan katuutuud kebebbebley hu bulung nunman ni keyew. <sup>3</sup> Emin ida etan lawah ni eleg pinhed Apu Dios ey endidman ni bebley, tep yadman hu nan-ap-apuan tu et ya etan Impah ni Kalneroh, et emin idalli etan bega-en tu ey hi-gatu daydayawen da. <sup>4</sup> Ang-angen dalli hu angah tu ey emin ali tuktuk da ey memalkaan ni ngadan tu. <sup>5</sup> Endilli law tu kehillengan diman et eleg ali law mahapul hu dilag niya petang, tep hi Apu Dios law tu dilag diman. Ey man-ap-apuddallin ingganah hu tutu-u tu.

<sup>6</sup> Entanni ey kan etan ni anghel ni hi-gak ey "Huuyan na-na-hel ey makulug niya kameiddinell. Hi Apu Dios e Apu tayu hu nengipa-hel idan prophets tu niya hi-gatu nengitu-dak etan ni anghel ni an menghel ni mekapkapyallin meba-ba-ba." <sup>7</sup> Immehel hi Jesus et kantuy "Dengel yu eya e-helen ku tep anggegannu law et um-ali-ak. Emin ida etan kamengullug ni neitudek eyad libluh ey man-am-amleng idalli."

*Ya nanggillig ni inhel nan John*

<sup>8</sup> Hi-gak e hi John hu nangngel niya nenang-ang ni emin nunya. Yan nenang-angan ku niyan nangngelan kun emin ni nunya ey nandukkunnak di hinangga etan ni anghel ni nengipeamtaddan nunyan hi-gak. <sup>9</sup> Nem kantuy "Entan tuwak dayaw tep nan-ingngel ita e bega-en nan Apu Dios henidda etan ni agi tayuddan prophets niyaddan emin etan kamengullug ni ehel tun neitudek eyad libluh. Hi Apu Dios hu daydayaw mu."

<sup>10</sup> Et kantu mewan ey "Entan tu itlu eya na-na-hel ni intudek mu, tep anggegannu law keippahdingan tun emin huuya. <sup>11</sup> Yaddalli etan lawah daka pehphehding ey humman ali pehphehding dan ingganah. Yaddalli kayyaggud daka pehphehding ey humman ali pehphehding dan ingganah."

<sup>12</sup> Immehel hi Jesus et kantuy "Ang-ang yu tep anggegannu law ey um-ali-ak. I-alik hu panyaggudan yu niya kekastiguan yu meippuun di impahpahding yud puyek. <sup>13</sup> Hi-gak hu wada dedan ni laputu niya wadallin kepappegan ni emin. Wada-ak dedan ni nunman, yan nunya niya wada-ak ni ingganah."

<sup>14</sup> Man-am-amleng idalli etan kamengippenahding ni kayyaggud, tep lebbeng tun meidwatan idallin biyag ni endi pappeg tu niya wada lebbeng dan mengidlan etan di eheb ni bebley. <sup>15</sup> Nem yadda etan tuun mangkaheul, yadda maeyak, yadda kamengiu-llig ni beken da ahwa, yadda mapetey, yadda etan daka daydayawa hu beken ni makulug ni dios, yadda mangkaitek niyadda etan kamengippenahding ni linggeman ni lawah ey eleg ida mekihha-ad etan di bebley.

<sup>16</sup> "Hi-gak e hi Jesus hu nengitu-dak etan ni anghel ma-lat tu ehelen ni hi-gayud kesimsimbaan yun emin eya impeamtak. Hi-gak hu hakey ni helag David. Niya hi-gak etan madilag ni talaw ni kamangkewa-wa."

<sup>17</sup> Kan etan ni Ispirituh Apu Dios niya etan ahwaen \* ni Impah ni Kalneroh ey "Ikeyuy." Emin ida etan mengngel nunya ey mahapul daman kanday "Ikeyuy." Em, emin ida etan nangka-wew ey ali kayu. Abulut yu eya endi bayad tun danum ni kaum-idwat ni biyag ni endi pappeg tu.

<sup>18</sup> Hi-gak e hi John hu nengitudek ni emin nunya. Ey e-helen kun hi-gayu e ya tuun e-duman tu huuyan neitudek eyad libluh ey e-duman daman Apu Dios hu ligat tun henin ligat ni na-na-hel eyad libluh. <sup>19</sup> Ey hedin kullangan ni hakey ni tuu eya neitudek di libluh, man eleg iddawat Apu Dios hu patal tu etan di keyew ni kaum-idwat ni biyag ni endi pappeg tu niya tawid tu etan di bebley ni na-hel eyad libluh.

<sup>20</sup> Hi Jesus hu nengipeang-ang ni makulug emin eya wadad libluh et kantuy "Anggegannu law ey um-ali-ak." Et kangkuy "Kayyaggud hedin um-ali ka. Ali ka law e Apu Jesus."

<sup>21</sup> Pinhed kun meweddand hi-gayun emin hu binabbal ni kamelpun Jesus e Apu tayu. Amen.

\* 22:17 22:17 Revelation 21:2 niya verse 9